


Nhanderüete ayvu
iky'a e'ỹ va'e



New Testament in Guaraní, Mbyá

Nhanderuete ayvu iky'a e'ỹ va'e

New Testament in Guaraní, Mbyá

copyright © 2004 Wycliffe Bible Translators, Inc.

Language: Mbyá Guaraní (Guaraní, Mbyá)

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 853110565X

The New Testament

in Guaraní, Mbyá

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 29 Jan 2022 from source files dated 29 Jan 2022

3309fa3b-7590-5ae9-b829-5df4ddfbf957

Contents

Gênesis	1
Êxodo	53
Levítico	95
Números	124
Deuteronômio	168
Josué	205
Juízes	229
Rute	255
1 Samuel	259
2 Samuel	293
1 Reis	322
2 Reis	354
1 Crônicas	387
2 Crônicas	416
Esdras	450
Neemias	460
Ester	475
Jó	483
Salmos	521
Provérbios	625
Eclesiastes	657
Cântico	665
Isaías	672
Jeremias	723
Lamentações	776
Ezequiel	785
Daniel	833
Oséias	849
Joel	857
Amós	860
Obadias	867
Jonas	869
Miquéias	872
Naum	877
Habacuque	880
Sofonias	883
Ageu	886
Zacarias	888
Malaquias	898

Mateus	901
Marcos	938
Lucas	962
João	1001
Atos	1032
Romanos	1067
1 Coríntios	1083
2 Coríntios	1098
Gálatas	1108
Eféios	1114
Filipenses	1120
Colossenses	1124
1 Tessalonicenses	1128
2 Tessalonicenses	1132
1 Timóteo	1134
2 Timóteo	1139
Tito	1143
Filemom	1145
Hebreus	1146
Tiago	1158
1 Pedro	1162
2 Pedro	1167
1 João	1170
2 João	1174
3 João	1175
Judas	1176
Apocalipse	1178

Gênesis jypy'i kuaxia Moisés ombopara va'ekue Gênesis jypy'i kuaxia Moisés ombopara va'ekue

Tery Gênesis ma “Mba'emo ypy” he'ia, “Jypy'i ma Nhanderueete ojapo raka'e yva ha'e yvy”, he'ia rami (1.1). Kova'e kuaxia para re ma omombe'u marã rami pa opa mba'e ijypy'iague: kuaray, jaxy, jaxy-tata, yvy, py'ê, avakue, kunhague, mymba, mba'emo rogue, tekoarã guive.

Ha'e nunga ha'e javi Nhanderueete ojapo jave ha'eve va'e meme raka'e. Ava ovy'a oikovy yvotyty rupi oikoa py, gua'yxy reve. Ha'e gui ma ha'e kuery nonhe'ê rendui ramo Nhanderueete omoxê, ha'e omano aguã re ijayvu. Ha'e ramia py oiko ypy raka'e teko vai ha'e manoa. Ha'e rami rire nhande kuery jajevy ha'e nhamano aguã rami meme nhandekuai.

Avakue hetave tema ha'e heko vaive oje'oivy. Ha'e ramo Nhanderueete yy ombou vy ojukapa raka'e. Noé anho Nhanderueete pe ete oiko ramo ogueraa jepe kanoã guaxu py, hoo pygua kuery reve.

Ha'e va'e rire Nhanderueete pete'i regua oiporavo ha'e kuery pe ojekuaa uka aguã. Ha'e kuery ru ma Abraão raka'e, ha'e gui ta'y Isaque, ha'e gui Isaque ra'y Jacó ju oiporavo. Ha'e va'e kuery pete'i-te'i pe Nhanderueete ogueroayvu porã vy ijayvu yvy hekoague hamymino kuery pe ju ome'ê aguã re.

Jacó pe ma amboae heryrã ju ome'ê: ha'e va'e ma Israel. Jacó ma doze gua'y kuery oguereko. Ha'e kuery gui doze regua ikuai raka'e Israel kuery. Jacó ra'y kuery va'e regua pete'i ma José. Ha'e va'e re tyke'y kuery nda'ija'e'i vy ovende raka'e Egitó yvy katy oguata va'e kuery pe. Ha'e gui ma karuai oiko ramo Jacó ra'y kuery ha'e javi oo Egitó yvy re, tembi'u ojogua aguã. Ha'e py ma opyta raka'e.

Kova'e kuaxia para ha'e javi rupi Nhanderueete oexa uka nhamemboaxya. Adão ha'e Eva ojevavy rire te'i Nhanderueete omboaxy vy omonhemonde. “Noé ma Senhor renonde oupity omboaxya”, he'i (6.8). Ha'e José voi guyk'e'y kuery pe aipoe'i: “Peê kuery ma anhetê xevy pejapo vaixe pekuapy karamboae. Ha'e rã Nhanderueete ma ha'e nunga ogueroava nhomoingo porã aguã rami. Mba'eta heta ete rekove reraa jepearã xemoingo, aỹ pexa pekuapy rami”, he'i (50.20). Nhanderueete ma nhamemboaxya ha'e nhandereraa jepea oiko.

Yva, yvy ha'e opa mba'e ikuai va'e omoingoague

¹ Jypy'i ma Nhanderueete ojapo raka'e yva ha'e yvy.

² Yvy ma nda'itui porã teri, ne'i mba'eve jipoi. Ijaxuru vaikue va'e áry ma pytũ anho rei oiny. Ha'e gui Nhanderueete Nhe'ê oiko avi yy áry.

³ Ha'e gui Nhanderueete aipoe'i:

— Toiko hexakãa — he'i. Ha'e ramo hexakãa oiko.*

⁴ Hexakãa Nhanderueete oexa rã ha'eve va'e. Ha'e vy omboja'o hexakãa ha'e pytũ.

⁵ Hexakãa ma Nhanderueete oenoĩ “Ára”. Ha'e rã pytũ reia pe ma “Pytũ” he'i. Oiko ka'aru ha'e aje'ive. Ha'e va'e ára ma ijypya.*

⁶ Ha'e gui Nhanderueete aipoe'i ju:

— Yy oĩ va'e mbyte rupi toĩ yva, yy omboja'o aguã mokoĩ henda rupi — he'i.

⁷ Ha'e rami vy Nhanderueete yva ojapo vy yy yvate oĩ va'e omboja'o iguy rupi oĩ va'e gui. Ha'e rã ha'e rami ojeapo.

⁸ Ha'e va'e ma Nhanderueete oenoĩ “Yva”. Oiko ka'aru ha'e aje'ive. Ha'e va'e ma mokoĩ araa.

⁹ Ha'e gui Nhanderueete aipoe'i avi:

— Yy yva guýry oĩ va'e tono'õ pete'i henda py, ha'e tojekuaa ipiru reia — he'i. Ha'e rã ha'e rami ojeapo.

¹⁰ Ipiru reia ma Nhanderueete oenoĩ “Yvy”, ha'e rã yy ono'õ va'e pe ma “Ye'ê” he'i. Nhanderueete ha'e nunga oexa rã ha'eve va'e.

¹¹ Ha'e gui aipoe'i:

— Toiko nhuũ yvy gui. Toiko jai rogue ha'yĩ va'e ha'e yvyra hi'a va'e. Tai'a ha'yĩ va'e joo ramigua e'y'e'y yvy áry — he'i. Ha'e ramo ha'e rami oiko.

¹² Yvy gui oiko nhuũ, jai rogue ha'yĩ va'e joo ramigua e'y'e'y ha'e yvyra hi'a va'e. Ha'e va'e re oĩ joo rami e'y'e'y ha'yĩ va'e. Ha'e nunga Nhanderueete oexa rã ha'eve va'e.

¹³ Oiko ka'aru ha'e aje'ive. Ha'e va'e ma mboapy araa.

¹⁴ Ha'e gui Nhanderueete aipoe'i avi:

— Toĩ hendy va'e yva re, oikuaa uka aguã ára ha'e pytũ, ha'e va'e re oikuaa aguã mba'emo oa'angaa, ára ha'e ma'etã.

¹⁵ Yva re hendy va'e toĩ yvy moexakãarã — he'i. Ha'e ramo ha'e rami oiko.

¹⁶ Nhanderueete ojapo mokoĩ hendy guaxu va'e: tuvixave va'e ma ara py ojekuaa va'erã, ha'e rã kyríve va'e ma pyávy ojekuaa va'erã. Jaxy-tata avi ojapo.

¹⁷ Ha'e vy yva re omoĩ yvy moexakãarã,

¹⁸ ara py ha'e pyávy ojekuaa ha'e omboja'o aguã hexakã aguã ha'e pytũ. Ha'e nunga Nhanderueete oexa rã ha'eve va'e.

¹⁹ Oiko ka'aru ha'e aje'ive. Ha'e va'e ma irundy araa.

* 1:3 2 Coríntios 4.6 * 1:5 Ha'e kuery pe rã ára nhavõ ka'aru ranhe oiko, ha'e gui aje'ive.

²⁰ Ha'e gui Nhanderuete aipoe'i avi:

— Toiko ke opa marãgua temimoingo yy rupi omyĩ va'e, ha'e rã yvy áry rupi ma toveve guyra yva rupi — he'i.

²¹ Ha'e rami vy Nhanderuete omoingo yy rupigua tuvixakueve ha'e opa marãgua otyryry va'e. Ha'e nunga heta ikuai yy rupi, peteĩ-teĩ regua. Omoingo avi guyra peteĩ-teĩ regua. Ha'e nunga Nhanderuete oexa rã ha'eve va'e.

²² Ha'e rami vy ogueroayvu porã vy aipoe'i:

— Pendera'y reta ke, pendereta ke. Ha'e rami vy pemonyẽ ye'ẽ, ha'e rã yvy re ma taeta guyra — he'i.

²³ Oiko ka'aru ha'e aje'ive. Ha'e va'e ma peteĩ nhiruĩ araa.

²⁴ Ha'e gui Nhanderuete aipoe'i avi:

— Toiko ke yvy re opa marãgua temimoingo joo ramigua e'ỹ-e'ỹ. Toiko mymba oka re ikuai va'erã, otyryry va'e ha'e ka'aguy regua joo ramigua e'ỹ-e'ỹ — he'i. Ha'e ramo ha'e rami oiko.

²⁵ Nhanderuete omoingo vixo ka'aguy regua joo ramigua e'ỹ-e'ỹ, mymba oka regua joo ramigua e'ỹ-e'ỹ, ha'e yvy rupi otyryry va'e ha'e javi joo ramigua e'ỹ-e'ỹ. Ha'e nunga Nhanderuete oexa rã ha'eve va'e.

²⁶ Ha'e gui Nhanderuete aipoe'i avi:

— Nhamoingo ava va'e nhande ete ramigua, nhande rami ete oiko va'erã. Topena pira ye'ẽ rupigua re, guyra oveve va'e re, mymba oka regua re, yvy ha'e javi re ha'e yvy rupi otyryry va'e ha'e javi re — he'i.

²⁷ Ha'e rami vy Nhanderuete omoingo ava ojee ramigua. Nhanderuete rami oiko va'erã ae omoingo. Ava ha'e kunha va'e omoingo.*

²⁸ Ha'e vy Nhanderuete ogueroayvu porã. Ha'e vy aipoe'i:

— Pendera'y reta ke, pendereta ke, pemonyẽ yvy, ha'e pendepo'aka yvy re. Pepena ke pira ye'ẽ rupi ikuai va'e re, guyra oveve va'e ha'e yvy áry otyryry va'e ha'e javi re — he'i.

²⁹ Aipoe'ive ju:

— Ma'ẽ, pëvy ame'ẽ jai rogue ha'yĩ va'e yvy re ikuai va'e ha'e yvyra'a ha'yĩ va'e ha'e javi. Ha'e nunga ma pe'u va'erã oiko.

³⁰ Ha'e rã yvy re vixo ikuai va'e pe, guyra oveve va'e, yvy rupi otyryry va'e ha'e ipytuẽ va'e ha'e javi pe ma jai rogue pyau' rã ikuai ho'u va'erã — he'i. Ha'e ramo ha'e rami ae oiko.

³¹ Nhanderuete opa mba'e omoingo va'ekue oexa rã ha'eve ete va'e. Oiko ka'aru ha'e aje'ive. Ha'e va'e ma mboapy meme araa.

2

¹ Ha'e rami py ojapopa yva ha'e yvy ha'e opa mba'e ikuai va'e.

² Ha'e gui ma Nhanderuete ojapopa ma vy sete-a ára py opytu'u opa mba'e ojapoa gui.*

³ Sete-a ára Nhanderuete ogueroayvu porã iky'a e'ỹ va'e opyta aguã rami, ha'e va'e ára opa mba'e ojapoa gui opytu'u vy.

Ava ojapo ypy'iague

⁴ Po rami ma yva ha'e yvy oiko ypy'i jave guare, SENHOR Nhanderuete omoingo rã.

⁵ Ha'e va'e jave ma mba'eve onhotỹ mbyre jipoi teri yvy re, ha'e peteĩve hogue va'e yvy re ikuai va'e naenhoĩ teri, mba'eta yvy áry SENHOR Nhanderuete nombo'okyí teri, ha'e ndoikoi teri avakue yvy re oma'etỹ va'erã.

⁶ Yvy gui yvyxĩ rive opu'ã ovy vy omoakỹ yvy jave re.

⁷ Ha'e ramo SENHOR Nhanderuete ojapo ava yvy ku'i gui, ha'e inhapyĩgua py oipeju ipytuẽ reve oiko aguã.

Ha'e ramo ava hekove va'e oiko.*

⁸ Ha'e gui Éden yvy re SENHOR Nhanderuete onhotỹ peteĩ vyvra ty, kuaray oua katy. Ha'e py ae omoĩ ava omoingo va'ekue.

⁹ Yvy gui SENHOR Nhanderuete omoenhoĩ opa marãgua vyvra jaexa rã iporã va'e ha'e hi'a ja'u aguã ha'eve va'e. Vyvra ty mbyte py omoĩ avi vyvra tekove me'ëa, ha'e vyvra mba'emo porã ha'e mba'emo vai kuaa ukaarã avi omoĩ.

¹⁰ Éden yvy gui ma peteĩ yakã oẽ vyvra ty moakýarã. Ha'e va'e gui oja'o vy irundy henda rupi oxyry.

¹¹ Yakã jypygua ma Pisom hery va'e. Ha'e va'e ma Havilá yvy ouro oĩa rupi ojere-jere ovy va'e.

¹² Ha'e va'e yvy re ouro oĩ va'e ma iporã. Ita bdélio ha'e ðnix voi oiko ha'e py.*

¹³ Yakã mokoĩa ma Giom hery va'e. Ha'e va'e ma Cuxe yvy ha'e javi rupi ojere-jere ovy va'e.

¹⁴ Yakã mboapy ma Tigre hery va'e. Ha'e va'e ma Assíria yvy rovai rupi oxyry ovy kuaray oua katy rupi. Ha'e gui irundy ma Eufrates hery va'e.

¹⁵ Ha'e gui SENHOR Nhanderuete ava va'e ogueraa vy Éden regua vyvra ty omoĩ omoatyrõ ha'e opena aguã.

¹⁶ Ha'e rami vy ixupe SENHOR Nhanderuete aipoe'i:

— Vyvra ty py vyvra hi'ái va'e ha'e javi'a ha'eve 'rã re'u aguã.

¹⁷ Ha'e rã vyvra mba'emo porã ha'e mba'emo vai kuaa ukaa 'a ma re'u va'erã e'ỹ, mba'eta ha'e va'e re'ua ára anhetẽ remano 'rã.

Kunha omoingoague

* 1:27 Mateus 19.4, Marcos 10.6 * 2:2 Hebreus 4.4 * 2:7 1 Coríntios 15.45 * 2:12 Bdélio ma mba'emo iju porã va'e, ha'e rã ðnix ma ita pytä'i va'e. Ovare va'e meme.

- 18 Ha'e gui SENHOR Nhanderuete aipoe'ive ju:
 — Nda'evei ava va'e ha'e ae'i oiko aguã. Amoingo 'rã ipytyvõarã, hexeve guarã ae — he'i.
- 19 Ha'e rami vy SENHOR Nhanderuete ma mymba vvy regua ha'e guyra yvate rupi oveve va'e omoingo va'ekue ha'e javi oguerupa ava va'e oia py, marã rami pa omboerya oikuaa aguã. Temimoingo ikuai va'e petei-tei ava va'e omboeryague rami ae hery.
- 20 Ha'e rami py ava omboery mymba kuery ha'e javi, guyra oveve va'e ha'e vixo ka'aguy regua voi. Ha'e rami tei ava pe jipoi hexevegua ae ipytyvõarã.
- 21 Ha'e ramo SENHOR Nhanderuete ojapo ava va'e hopeyi vaipa aguã rami. Ha'e ramo oke ete. Ha'e ramo ixugui petei inharukã SENHOR omboi vy ho'o py ju omboty omboiague.
- 22 Ava arukã SENHOR Nhanderuete omboi va'ekue gui omboete petei kunha. Ha'e vvy ogueru ava pe.
- 23 Ha'e ramo ava va'e oexa vvy aipoe'i:
 — Kova'e ma xekãgue gui ae ikãgue va'e, ha'e xero'o gui ho'o va'e. Kova'e pe “Kunha” 'ea 'rã, ava va'e gui omboia rire — he'i.[†]
- 24 Ha'e rami rire avakue oexa 'rã nguu ha'e oxy, gua'yxy reve joguereko aguã, moko'i gui petei'i to'o oiko aguã.*
- 25 Ha'e rami jave ma ava va'e ha'e ta'yxy ipire rei va'eri noxi raka'e.

3

Ava ha'e kunha ojejavyague

- 1 Ha'e gui mboi avi oiko raka'e. Ha'e va'e ma vixo ka'aguy rupigua SENHOR Nhanderuete omoingo va'ekue ha'e javi gui nhombotavy kuaave va'e. Ha'e rami vvy aipoe'i kunha va'e pe:
 — Po rami teve Nhanderuete aipoe'i ra'e: “Pe'u eme ha'e javive vvyra ty py ikuai va'e'a” he'i va'ekue?
- 2 Kunha va'e ombovai:
 — Yvyra ty py ikuai va'e'a ma ha'eve ro'u aguã.
- 3 Ha'e rã vvyra ty mbyte py petei vvyra hi'ai va'e'a pe ma Nhanderuete “Pe'u eme, nei pepoko eme, pemanu e'y aguã”, he'i va'ekue orevy.
- 4 Ha'e gui mboi aipoe'i kunha va'e pe:
 — Anhetê napemanoi 'rã,
- 5 mba'eta Nhanderuete oikuaa ha'e va'e'a pe'ua ára penderexa ojepe'a 'rãa, ha'e Nhanderuete rami ete 'rã peikuaa mba'emo porã ha'e mba'emo vai — he'i.
- 6 Kunha va'e oikuaa rã vvyra'a ho'u aguã ha'eve. Vvyra'a oexa rã iporã, ha'e oikuaa avi imo'aranduarã oikoa. Ha'e rami vvy hi'a omondó vy ho'u. Ome pe avi ome'ê rã ha'e voi ho'u.
- 7 Ha'e ramo mokoïve rexa ojepe'a rã oikuaa ipire reia. Ha'e rami vvy figo'y rogue ojou vvy ombovvy guambeorã.
- 8 Ha'e gui ka'aru jave vvyra ty rupi SENHOR Nhanderuete oiko rã ava va'e ha'e ta'yxy oendu. Ha'e rami vvy SENHOR renonde gui onhemi vvyra ty mbyte.
- 9 Ha'e gui SENHOR oenoï ava va'e. Ha'e vvy oporandu:
 — Mamo tu rei?
- 10 Ombovai:
 — Aendu ndeayvu vvyra ty py reiko rã. Ha'e rami vvy ndevy akyje vy anhemi, mba'eta xepire rei — he'i.
- 11 Nhanderuete oporandu:
 — Mava'e tu oikuaa uka ndepire reia? Re'u teve vvyra'a “He'u eme ke” ha'eague?
- 12 Ava va'e ombovai:
 — Kunha xera'yxyrã reme'ê va'ekue rima vvyra'a ome'ê xevy. Ha'e ramo mae ma xee ha'u — he'i.
- 13 Ha'e gui kunha va'e pe ju SENHOR aipoe'i:
 — Mba'e re tu ha'e rami rejapo?
 Kunha va'e ombovai:
 — Mboi xembotavy ramo rima xee ha'u — he'i.
- 14 Ha'e gui SENHOR Nhanderuete aipoe'i mboi pe:
 — Guï rami rejapo rire mymba oka regua ikuai va'e ha'e vixo ka'aguy regua ha'e javive gui ayvu vai pyve 'rã reiko. Ha'e rami vvy retyryry 'rã reikovy nderye re, ha'e reikovea pukukue re vvy ku'i rive 'rã rere.
- 15 Ajapo 'rã ndee ha'e kunha va'e reve joe napendea'ei aguã rami, ha'e gui neramymino kuery ha'e hemiarirõ kuery reve ju. Ha'e va'e omou'ü 'rã neakã, ha'e rã ndee ma reixu'u 'rã ipyta py — he'i.
- 16 Kunha va'e pe ju aipoe'i:
 — Xee ajapo 'rã nememby ryru'i vy rejexavai ete aguã rami. Ha'e ramo haxy 'rã rendu nememby reikuavã'i vy. Renhomoiruxe 'rã neme reve. Ha'e rã ha'e ma ipo'aka 'rã ndere — he'i.
- 17 Ha'e gui Adão pe aipoe'i:
 — Ndee ma ndera'yxy renhe'ê rendu vy vvyra'a “He'u eme” ha'eague va'e re'u rire ndekáuxa ae 'rã vvy ayvu vaipy itui. Remba'eapo poyi vy 'rãe rejou vvy gui re'u va'erã, reikovea pukukue re.
- 18 Vvy gui henhoi 'rã juu'y ha'e juu vaikue. Nerembi'urã oiko 'rã vvy gui ae.

† 2:23 Ha'e kuery ayvu py tery “Kunha” ma “Ava guigua” nhaendu rã joo ramigua rai'i.

* 2:24 Mateus 19.5, Marcos 10.7, 1 Coríntios 6.16,

¹⁹ Ndery'iaigae re 'rã re'u reikovy mbojape, vvy ju rejeapo peve, vvy gui ae rojapo rire. Mba'eta vvy ku'i regua reiko vy vvy ku'i ju 'rã rejeapo — he'i.

²⁰ Ava va'e gua'yxy omboery Eva, oikove va'e ha'e javive xy oiko ramo.*

²¹ Adão ha'e ta'yxy aorã ma SENHOR ojapo mymba pire gui. Ha'e rami vy omonhemonde.

²² Ha'e gui SENHOR Nhanderuete aipoe'i:

— Aỹ gui ma nhande rami avakue ikuai, mba'eta oikuaa mba'emo porã ha'e mba'emo vai. Ha'e gui nda'evei vvyra tekove me'ëa 'a voi ha'e kuery omondo aguã, mba'eta ho'u vy oiko riae 'rã — he'i.

²³ Ha'e rami vy SENHOR omoxê Éden regua vvyra ty gui, vvy gui omoingo rire vvy re ae ju oma'etỹ oikovy aguã.

²⁴ Ava omoxê ma vy anjo kuery ipepo va'e omoĩ imbokuapy vvyra ty regua kuaray oua katy. Oeja avi peteĩ kyxe guaxu hendy va'e ojere-jere va'erã, vvyra tekove me'ëa hi'aia katy tape oo va'e jokoarã.

4

Abel ha'e Caim rekokué oĩa

¹ Ha'e gui ava va'e jogueroke gua'yxy Eva reve. Ha'e ramo oguereko kyrĩ va'e, oikuavã Caim. Ha'e vy aipoe'i:

— SENHOR xepytyvõ ramo ava'i aikuavã — he'i.

² Ha'e rire teĩgue ju oikuavã tyvy Abel. Abel ma vexa'i re openaa rupi oiko. Ha'e rã Caim ma oma'etỹ va'e.

³ Peteĩ ára Caim ogueru mba'emo onhotỹ va'ekue'a SENHOR pe ome'ë va'erã.

⁴ Ha'e rã Abel ma guymba kuery regua jypy'i oiko va'ekue ogueru, ikyrave va'e anho. Ha'e ramo SENHOR ojou porã Abel ha'e mba'emo ome'ë va'e.

⁵ Ha'e rã Caim ome'ë va'e ma SENHOR ndojou porãi. Ha'e ramo Caim ivai vaipa vy hova mboaeapa.

⁶ Ha'e ramo ixupe SENHOR aipoe'i:

— Mba'e re tu ndevai? Mba'e re tu nderova mboae rei ri?

⁷ Ha'evea rami reiko ramo anhetê e'ỹ 'rã ri ty'y roguerovy'a? Ha'e rami teĩ ha'eve'ỹa rami reiko ramo rejajavy aguã nerarõ okê py. Opa marã ndererekoxe ramo hexe ndepo'aka 'rãgue.

Jojuka ypy'iaque

⁸ Ha'e gui Caim aipoe'i guyvy Abel pe:

— Jaa na mba'ety py — he'i. Ha'e gui mba'ety rupi ikuai jave guyyvy Abel re Caim opu'ã vy ojuka.

⁹ Ha'e ramo SENHOR aipoe'i Caim pe:

— Mamo tu nderyvy Abel oĩ?

Caim ombovai:

— Xee ndaikuaai. Xee ri ty'y xeryvy re opena va'e aiko? — he'i.

¹⁰ Ha'e ramo Nhanderuete aipoe'i:

— Mba'e tu rejapo? Nderyyvy ruguy xevy ojavukai vvy gui.

¹¹ Ha'e rami rire aỹ ayvu vaipy 'rã reiko vvy re, mba'eta nderyvy ruguy ndepo py remoë va'ekue vvy ojuru oipe'a vy omokõ rire.

¹² Ha'e nunga rupi vvy re rema'etỹ teĩ ixugui iporã va'e ndoikoi 'rã ndevy. Rejava-java ha'e reguata rei 'rã vvy re — he'i.

¹³ Ha'e ramo Caim aipoe'i SENHOR pe:

— Ha'e rami ete xembopaga ramo ndaropo'aka reguai.

¹⁴ Mba'eta aỹ xemoxê ta xeryvy gui. Ha'e ramo ajepe'a 'rã nerenonde gui anhemí aguã. Ajava, aguata rei tema 'rã aikovy vvy re. Ha'e xereroavaexĩ va'e rei tema 'rã xejuka.

¹⁵ SENHOR ombovai:

— Ha'e rami avi Caim, ndejuakaare ma sete-kue 'rã opaga — he'i. Ha'e rami vy Caim re SENHOR omoĩ ikuaa ukaarã, ojou va'e kuery ojuka e'ỹ aguã.

¹⁶ Ha'e ramo SENHOR renonda gui Caim ojepe'a vy Node vvy re ju oiko, Éden regua kuaray oua katy.

Caim ramymino kuery rery oĩa

¹⁷ Ha'e gui Caim gua'yxy reve jogueroke ramo oguereko kyrĩ va'e, ha'e vy oikuavã'i Enoque. Ha'e gui Caim peteĩ tetã ojapo vy gua'y Enoque rery rupi omboery.

¹⁸ Enoque ra'y ma Irade oiko. Irade ra'y ma Meujael, Meujael ra'y ma Metusael, Metusael ra'y ma Lameque.

¹⁹ Lameque ma mokoĩ kunha ojou gua'yxyrã: peteĩ ma Ada hery va'e, ha'e rã amboae ma Zilá.

²⁰ Ada oikuavã'i Jabal. Ha'e va'e ramymino kuery ma oo'i rupi ikuai ha'e mymba re opena va'e kuery ae.

²¹ Tyvy rery ma Jubal. Ha'e va'e ramymino kuery ma mba'epu ixã reta va'e mbopua ha'e mimby monhe'ëa kuery ae.

²² Ha'e gui Zilá ju oikuavã'i Tubalcaim. Ha'e va'e ma opa marãgua tembiporu haĩmbe va'e apoa oiko, overa va'e ha'e ferro guigua. Tubalcaim reindy ma Naamá.

²³ Ha'e gui Lameque aipoe'i gua'yxy kuery pe:

— Ada ha'e Zilá, pendu ke xeyvuu rã. Peẽ Lameque ra'yxy kuery, pejapyxaka ke xeyvua re. Xee ma ajuka peteĩ ava xere ojeai rire, ha'e peteĩ kunumi va'e ajuka avi xere opyrõ ramo rive.

* 3:20 Tery Eva ma "Hekove va'e" 'ea. Ha'e rã tery Adão ma "Ava" 'ea.

²⁴ Caim ojukaa vy sete-kue 'rã opaga. Ha'e rã xee Lameque ma amongue xejukaa vy setenta vezes sete-kue 'rã opaga — he'i.

²⁵ Ha'e gui pete'igue ju Adão gua'yxy reve jogueroke ramo pete'i ava'i ju ikuavã. Ha'e va'e ma omboery Sete, mba'eta aipoe'i:

— Nhanderuete amboae ava'i ju ome'ê xevy, xepi'a Abel tyke'y Caim ojuka va'ekue rekovia — he'i.*

²⁶ Ha'e gui pete'i oiko avi Sete ra'y. Ha'e va'e ma omboery Enos. Ha'e va'e guive ma SENHOR rery rupi ha'e kuery ojapukai pyy raka'e.

5

1 Crônicas 1.1-4

¹ Kova'e kuaxia ma Adão ramymino kuery rekokie oĩa. Nhanderuete avakue omoingo vy ojee rami ae ojapo.

² Ha'e rami vy omoingo ava va'e, ha'e gui kunha ju. Ogueroayvu porã, ha'e mokoive pe “Avakue” he'i, omoingoa ára guive.*

³ Adão ma cento e trinta ma'etỹ re oiko. Ha'e gui ta'y oiko nguu ramigua ete, nguu rami ete ojekuaa. Ha'e va'e ma omboery Sete.

⁴ Sete oiko rire tuu Adão ma oitocentos ma'etỹ re ju oiko. Ha'e gui oikove ju ta'y ha'e taju kuery.

⁵ Adão ha'e javi vy novecientos e trinta ma'etỹ re oiko. Ha'e rire omano.

⁶ Ha'e gui ta'y Sete ma cento e cinco ma'etỹ re oikoa py oiko ta'y Enos.

⁷ Enos oiko rire tuu Sete ma oitocentos e sete ma'etỹ re ju oiko. Oikove ju ta'y ha'e taju kuery.

⁸ Sete ha'e javi vy novecientos e doze ma'etỹ oiko. Ha'e rire omano.

⁹ Enos ma noventa ma'etỹ re oikoa py oiko ta'y Cainã.

¹⁰ Cainã oiko rire tuu Enos ma oitocentos e quinze ma'etỹ re ju oiko. Oikove ju ta'y ha'e taju kuery.

¹¹ Enos ha'e javi vy novecientos e cinco ma'etỹ re oiko. Ha'e rire omano.

¹² Cainã ma setenta ma'etỹ re oikoa py oiko ta'y Maalalel.

¹³ Maalalel oiko rire ma tuu Cainã ma oitocentos e quarenta ma'etỹ re ju oiko. Oikove ju ta'y ha'e taju kuery.

¹⁴ Cainã ha'e javi vy novecientos ma'etỹ re oiko. Ha'e rire omano.

¹⁵ Maalalel ma sessenta e cinco ma'etỹ re oikoa py oiko ta'y Jerede.

¹⁶ Jerede oiko rire tuu Maalalel ma oitocentos e trinta ma'etỹ re ju oiko. Oikove ta'y ha'e taju kuery.

¹⁷ Maalalel ha'e javi vy oitocentos e noventa e cinco ma'etỹ re oiko. Ha'e rire omano.

¹⁸ Jerede ma cento e sessenta e dois ma'etỹ re oikoa py oiko ta'y Enoque.

¹⁹ Enoque oiko rire tuu Jerede ma oitocentos ma'etỹ re ju oiko. Oikove ta'y ha'e taju kuery.

²⁰ Jerede ha'e javi vy novecientos e sessenta e dois ma'etỹ re oiko. Ha'e rire omano.

²¹ Enoque ma sessenta e cinco ma'etỹ re oikoa py oiko ta'y Metusalém.

²² Enoque ma Nhanderuete reve oiko. Ta'y Metusalém oiko rire tuu trezentos ma'etỹ re oiko. Oikove ju ta'y ha'e taju kuery.

²³ Enoque ha'e javi vy trezentos e sessenta e cinco ma'etỹ oiko.

²⁴ Enoque ma Nhanderuete reve oiko ramo ndoexaavei, Nhanderuete ojeupe ae ogueraa ramo.

²⁵ Metusalém ma cento e oitenta e sete ma'etỹ re oikoa py oiko ta'y Lameque.

²⁶ Lameque oiko rire tuu Metusalém ma setecentos e oitenta e dois ma'etỹ re ju oiko. Oikove ju ta'y ha'e taju kuery.

²⁷ Metusalém ha'e javi vy novecientos e sessenta e nove ma'etỹ re oiko. Ha'e rire omano.

²⁸ Lameque ma cento e oitenta e dois ma'etỹ re oikoa py oiko pete'i ta'y.

²⁹ Ha'e va'e ma Noé omboery vy aipoe'i:

— Kova'e ma nhanemombytu'u 'rã ko vvy Nhanderuete ijayvu vaiague re nhandekuai vy nhandepo py nhamba'eapo poyia gui — he'i.

³⁰ Noé oiko rire tuu Lameque ma quinhentos e noventa e cinco ma'etỹ re ju oiko. Oikove ju ta'y ha'e taju kuery.

³¹ Lameque ha'e javi vy setecentos e setenta e sete ma'etỹ re oiko. Ha'e rire omano.

³² Noé ma quinhentos ma'etỹ re oiko rire mboapy oiko ta'y kuery: Sem, Cam ha'e Jafé.

6

Avakue opa marã rei ikuaiague

¹ Hetave ovy avakue vvy re, ha'e taju kuery ikuai.

² Nhanderuete ra'y kuery ava rajy kuery oexa rã iporãgue. Ha'e ramo gua'yxyrã ojopy oipota va'e rei.

³ Ha'e ramo SENHOR aipoe'i:

— Xenhe'ê noĩ riaei 'rã avakue re, to'o rive ikuai rã. Ha'e rami vy ha'e kuery ma cento e vinte ma'etỹ peve'i 'rã ikuai — he'i.

⁴ Ha'e jave ma ikuai gigante vvy re. Ha'e Nhanderuete ra'y kuery avakue rajy kuery re omenda rire ta'y kuery ojerovia rei va'e ikuai. Ha'e va'e avakue ma ipy'a guaxukue ha'e omboetepy meme raka'e.

⁵ SENHOR oexa rã avakue vvy re ikuai va'e heko vaive tema oje'oivy. Ha'e kuery py'a re oĩ opa marã ikuai aguã anho.

* 4:25 Tery Sete ma “Ome'ê mbyre” 'ea reve nhaendu rã joo ramigua. * 5:2 Mateus 19.4, Marcos 10.6

⁶ Ha'e ramo SENHOR ndoguerovy'avei avakue vvy re omoingoague. Opy'a re oendu nda'eveia.

⁷ Ha'e rami vvy aipoe'i:

— Avakue amoingo va'ekue amokanhymba 'rã vvy gui. Avakue, vixo, vvy rupi otyryry va'e ha'e guyra oveve va'e ha'e javi 'rã amomba. Ndarovy'avei amoingoague — he'i.

⁸ Ha'e rã Noé ma SENHOR renonde oupity omboaxya.

⁹ Po rami ma Noé rekokue: Noé ma ava heko porã va'e, ha'e javegua kuery mbyte anhetê rupi anho oiko Nhanderuete reve.

¹⁰ Ta'y kuery ma mboapy oiko raka'e: Sem, Cam ha'e Jafé.

Yy ovu aguã Nhanderuete omombe'u ma voiaque

¹¹ Nhanderuete renonde vvy regua kuery opa marã rei ikuai joupe ojapo vaia rupi anho.

¹² Vvy Nhanderuete oexa rã vvy regua kuery opa marã rei ikuai. Petei-tei reko ivaiapa ma vvy re.

¹³ Ha'e ramo Nhanderuete aipoe'i Noé pe:

— Xee anhembopy'a vvy regua kuery ha'e javi amomba aguã, avakue heko vai va'e anho ikuai ramo vvy re. Amokanhymba 'rã, vvy reve.

¹⁴ Ha'e ramo ejapo petei kanoã guaxu vvyrape cipreste guigua va'e gui. Ha'e va'e py rejapo 'rã opy ja'o-ja'o'i. Ipa'ũ-pa'ũ rembotypa 'rã opy katy ha'e oka katy, oja va'e reikyty vvy.

¹⁵ Po rami 'rã rejapo: cento e cinqüenta metros remoĩ 'rã ipuku-a, ha'e rã ipya ma vinte e cinco metros, ha'e yvatea ma quince.

¹⁶ Jovaive rupi rebokua 'rã meio metro yvatea rami. Kanoã rokêrã ma ijyke re 'rã rejapo. Pyrõarã ma renhono 'rã mboapy: petei iguy rupi, petei hi'áry, ha'e rã amboae ma yvateve rupi.

¹⁷ Mba'eta ambou 'rã yy vvy ha'e javi ao'iarã, amomba aguã opa mba'e ipytuê va'e yva guýry ikuai va'e. Vvy re ikuai va'e ha'e javi 'rã okanhymba.

¹⁸ Ha'e rã ndereve ma ajapo 'rã xereve guarã. Ha'e rami rã peikepa 'rã kanoã py, ndee, ndera'y kuery, ndera'yxy ha'e ndera'y ra'yxy kuery reve.

¹⁹ Kanoã py remoinge avi 'rã mymba temimoingo kuery ikuai va'e. Petei-tei regua gui mokoĩ 'rã remoinge, ava ha'e kunha okuave reve rereko aguã ndereve.

²⁰ Guyra kuery, vaka, vvy rupi otyryry va'e, ha'e nunga ha'e javi petei-tei regua gui mokoĩ 'rã reru ndea py, okuave reve rereko aguã.

²¹ Ndea py emoĩ porã avi ke opa marãgua tembi'u. Emboaty ndea py ndee re'u va'erã, ha'e kuery pe voi — he'i.

²² Ha'e rami Noé ojapo. Nhanderuete ojapo uka va'ekue ojaopapa.

7

Ngoo pygua kuery reve Noé kanoã py oikeague

¹ Ha'e gui SENHOR aipoe'i Noé pe:

— Eike ke kanoã py, ndee ha'e ndero pygua kuery ha'e javive, mba'eta aikuaa xerenonde heko porã va'e reikoa aýgua kuery mbyte.

² Ha'e javi regua mymba pe'u aguã ha'eve va'e ma sete irũ va'e 'rã reraa ava ha'e kunha. Ha'e rã mymba ha'eve'y va'e ma petei'i irũ va'e eraa ava ha'e kunha.*

³ Guyra oveve va'e voi sete irũ va'e 'rã reraa ava ha'e kunha, petei-tei regua okuave aguã vvy re.

⁴ Mba'eta sete araa py ambo'oky 'rã vvy re, quarenta ára ha'e quarenta pytũ peve. Vvy gui amokanhymba 'rã amoingo va'ekue ha'e javi — he'i.

⁵ Ha'e ramo Noé ojapo SENHOR ojapo uka va'ekue ha'e javi.

⁶ Noé ma seiscentos ma'etý oguereko, yy ovu vvy vvy ojao'i jave.

⁷ Oky ramo yy ovu va'e gui Noé oike raka'e kanoã py. Hexeve oike avi ta'y kuery, ta'yxy ha'e ta'y ra'yxy kuery.

⁸ Oike avi mymba ha'eve va'e ha'e ha'eve'y va'e, guyra ha'e vvy rupi otyryry va'e ha'e javi.

⁹ Ha'e kuery ma Noé-a py oikepa kanoã py. Mokõ-mokoĩ oike ava ha'e kunha, Noé pe Nhanderuete ojapo ukaague rami.

¹⁰ Ha'e gui sete ára rire yy ovu ouvy vvy áry.

¹¹ Seiscentos ma'etý Noé oguereko jave, mokoĩ jaxya ha'e dezessete araa py ma yy vvy gyy gui ovu yy omondoropa ygua ha'e javi, ombokua ja'ea, ha'e yva voi ojepe'apa.

¹² Ha'e rami vvy oky vaipa vvy re quarenta ára ha'e quarenta pytũ re.

¹³ Ha'e va'e árave Noé oike raka'e kanoã py. Oike avi ta'y kuery Sem, Cam ha'e Jafé, ta'yxy ha'e ta'y ra'yxy kuery reve.

¹⁴ Ha'e kuery ha'e mymba petei-tei regua, vaka, vvy rupi otyryry va'e, guyra, guyra'i ha'e ipepo va'e ha'e javi,

¹⁵ ho'o va'e ipytuê va'e ha'e javi gui mokõ-mokoĩ oike Noé reve kanoã py.

¹⁶ Temimoingo ha'e javi regua gui oike ava ha'e kunha, Nhanderuete Noé pe ojapo ukaague rami. Ha'e rã ha'e oike rire ma SENHOR omboty okê.

* 7:2 Ha'e kuery ma amongue mymba pe "Ha'eve'y va'e" he'i 'rã, ha'e rã amboae pe ma "Iky'a e'y va'e" he'i 'rã. Ha'e nunga Levítico 11 py omombe'u porãve.

Yy ovu jave guare

- ¹⁷ Yvy áry ma quarenta ára re yy ou. Ovuve ovy vy oguerovu heravy kanoã vvy áry gui.
¹⁸ Yy ouve vy typyve ovy vvy áry. Ha'e rã kanoã ma ovu oupy yy áry.
¹⁹ Yvy áry yy ou vy ojao'ipa. Yvyty yvatekueve va'e yva guýry ikuai va'e ha'e javi ojao'i.
²⁰ Yvyty ikuai va'e yy ojao'i vy sete metros raxa peve typy hi'áry.
²¹ Temimoingo vvy re ikuai va'e omanomba: guyra, mymba oka regua ha'e ka'aguy regua, vvy re omyĩ va'e ha'e avakue ha'e javi.
²² Opa marãgua ipytuẽ va'e, vvy pirua rupi ikuai va'ekue omanomba.
²³ Ha'e rami py temimoingo kuery vvy re ikuai va'ekue opa, avakue, mymba, otyryry va'e, guyra oveve va'e, ha'e javive okanhymba vvy gui. Noé anho oikove, ha'e hexeve kanoã py ikuai va'e guive.
²⁴ Cento e cinqüenta ára re yy itui vvy áry.

8

Yy ovu va'ekue typave ovyague

- ¹ Ha'e gui ma Nhanderuete ima'endu'a Noé re, ha'e kanoã py mymba ka'aguy regua ha'e oka regua hexeve ikuai va'e ha'e javi re. Ha'e rami vy Nhanderuete ojapo vvy áry rupi vvyty oipeju aguã rami. Ha'e ramo yy tpa ovy.
² Onhembotypa ju ygua vvy guy gui yy omondoro va'ekue, ha'e yva voi ndojepe'avei ramo oky vaipa va'ekue opytu'u.
³ Yy ma oxyry ovy vvy áry gui. Typave ovy cento e cinqüenta araa peve.
⁴ Ha'e gui sete jaxya ha'e dezessete araa py ma kanoã opyta Ararate vvyty áry.
⁵ Ha'e va'e rire dez jaxya peve ju yy typave ovy. Ha'e va'e jaxy jypy'ia ára ojekuaa vvy vvyty apyte.

Noé xapirẽ ha'e apykaxu opoiague

- ⁶ Ha'e gui quarenta araa py ma Noé oiipe'a okẽ'i kanoã re ojapo va'ekue.
⁷ Ha'e rami vy opoi peteĩ xapirẽ. Ha'e va'e oẽ vvy oo ha'e ojevvy jepi, vvy áry gui yy ipiru peve.
⁸ Ha'e rire peteĩ apykaxu ju opoi, vvy áry gui pa yy tpa maa oikuaaxe vy.
⁹ Va'eri apykaxu oguapy aguã ndojoui vvy ojevvy ju ha'e oĩa py kanoã py, vvy yy ojao'i teri ramo. Ha'e ramo Noé okuave'ẽ rã oguapy ramo omoinge ju kanoã py.
¹⁰ Sete ára ju oarõ rire opoi ju apykaxu kanoã gui.
¹¹ Ha'e rire ka'aru jave ojevvy ju ha'e oĩa py. Ojuru py ogueru oliveira rogue ipyau va'e. Ha'e ramo Noé oikuaa vvy áry gui yy tpa maa.
¹² Ha'e gui sete ára ju oarõ rire teĩgue ju opoi apykaxu. Ha'e ramo ndojevvyvei ha'e py.

Kanoã gui Noé kuery oẽmba jevyague

- ¹³ Ha'e gui seiscentos e um ma'etỹa, ijypya jaxy ha'e ijypya ára ma yy tpa vvy áry gui. Ha'e ramo Noé oiipe'a kanoã ao'ia. Oma'ẽ vy oexa vvy ipiru maa.
¹⁴ Ha'e gui mokoĩ jaxya, vinte e sete araa py ma vvy ipiru ete ma.
¹⁵ Ha'e ramo Nhanderuete aipoe'i Noé pe:
¹⁶ — Peẽmba ju ke kanoã gui, ndera'yxy, ndera'y kuery ha'e ndera'y ra'yxy kuery reve.
¹⁷ Emoẽmba avi mymba kuery ndereve ikuai va'e, temimoingo ha'e javi, guyra, vaka ha'e opa marãgua vvy rupi otyryry va'e, ha'e kuery vvy re ikuai jevvy vvy ta'y ha'e heta aguã — he'i.
¹⁸ Ha'e ramo Noé oẽ gua'y kuery, gua'yxy ha'e gua'y ra'yxy kuery reve.
¹⁹ Omoẽmba avi mymba kuery kanoã gui, vvy rupi otyryry va'e ha'e javi, guyra ha'e vvy áry omyĩ va'e peteĩ-teĩ regua.

Noé altar ojapague

- ²⁰ Ha'e gui Noé ojapo peteĩ altar SENHOR pegua. * Ha'e rami vy mymba ha'e guyra'i ha'eve va'e regua ojopy vy ojuka. Oapy vy ome'ẽ altar áry.
²¹ Ha'e rã ipixe porã SENHOR oetũ vy aipoe'i ojeupe:
 — Aỹ gui ma avakue káuxa xee ndaxeayvu vaivei 'rã vvy re, kyrĩ guive heko vai aguã anho ipy'a va'eri. Neĩ namombavei ma 'rã temimoingo kuery amombaague rami.
²² Yvy ituia ja ndoiko e'ỹi 'rã mba'emo onhotỹa aguã neĩ omono'õa aguã, yro'ya neĩ haku-a, ára neĩ pytũ ndoiko e'ỹi 'rã guive.

9

Noé kuery reve Nhanderuete guexeve guarã ojapague

- ¹ Ha'e gui Nhanderuete ogueroayvu porã Noé ha'e ta'y kuery. Ha'e vy aipoe'i:
 — Pendera'y ke, pendereta ha'e pemonyẽ vvy.
² Mymba vvy re ikuai va'e ha'e guyra oveve va'e ha'e javi 'rã okyke pendegui. Pendepo py amboaxa 'rã vvy áry omyĩ va'e ha'e pira ye'ẽ rupigua ha'e javi.
³ Opa marãgua oikove va'e vvy re oo va'e ha'e javi 'rã ha'eve pe'u va'erã. Pẽvy jai rogue pyau ame'ẽague rami avi aỹ ma ame'ẽmba.
⁴ Ha'e rã xo'o huguy oĩ teri va'e ma nda'evei pe'u aguã, tuguy re tekove oĩ ramo.

* 8:20 Altar ma SENHOR pe ome'ẽmby oapya aguã.

⁵ Anhetê pende kuery ruguy omoëague re voi anhombopaga 'rã. Mymba ikuai va'e gui voi amboekovia 'rã, avakue po gui amboekoviaa rami avi. Mba'eta amongue oirũ rekove oipe'a rire ipo gui amboekovia kuerei 'rã.

⁶ Amongue oirũ ruguy omoê rire avakue ju omoê 'rã huguy, Nhanderuete ojee rami ae avakue omoingo rire.

⁷ Ha'e rã peê ma penda'y reta, pendereta ha'e pemonyê yvy, pendereta yvy re — he'i.

⁸ Noé ha'e ta'y kuery pe Nhanderuete aipoe'i avi:

⁹ — Aỹ ma peê kuery reve ajapo ta xereve guarã, peneramymino kuery

¹⁰ ha'e temimoingo kuery pendereve ikuai va'e ha'e javi reve: guyrã'i, mymba oka regua ha'e ka'aguy regua kanoã gui oê va'ekue, opa marãgua mymba yvy re ikuai va'e reve guive.

¹¹ Po rami pendereve ajapo xereve guarã: Temimoingo kuery namombavei ma 'rã yv gui, yv ndouvei 'rã yvy mombaara.

¹² Nhanderuete aipoe'ive ju:

— Pova'e ma aeja xereve guarã ajapo va'e kuaa ukaarã, peê kuery ha'e temimoingo kuery pendereve ikuai va'e ha'e javi reve, ha'e araka'e rã peve ikuai va'erã va'e peguarã voi:

¹³ Arai re aexa uka 'rã xerapa, yvy re ikuai va'e reve xereve guarã ajapo va'ekue kuaa ukaarã.*

¹⁴ Yvy áry arai aru nhavõ, ha'e arai re karugua ojekuaa ramo

¹⁵ xema'endu'a 'rã xereve guarã ajapo va'ekue re, peê ha'e temimoingo ikuai va'e ha'e javi reve. Ha'e rami yv yv nambouvei 'rã okuave va'e mombaara.

¹⁶ Karugua ojekuaa 'rã arai re. Ha'e ramo xee aexa vy xema'endu'a 'rã xereve guarã xee Penderuete raka'e rã peve guarã ajapo va'ekue re, temimoingo yvy re ikuai va'e ha'e javi reve.

¹⁷ Nhanderuete aipoe'i Noé pe:

— Ha'e va'e ma xereve guarã ajapo va'ekue kuaa ukaarã temimoingo kuery yvy re ikuai va'e reve — he'i.

¹⁸ Noé ra'y kuery kanoã gui oê va'ekue ma Sem, Cam ha'e Jafé. Cam ra'y ma Canaã.

¹⁹ Ha'e va'e kuery ma Noé ra'y mboapy ikuai raka'e. Ha'e kuery gui ae yvy jave re omonyê.

Noé jogueroayvu porã ha'e ijayvu vaiague

²⁰ Noé ma oma'etỹa rupi oiko. Ha'e rami vy onhotỹ uva.

²¹ Ha'e gui vinho oy'u vy oka'u, ha'e ipire rei oiny oo'i py.

²² Canaã ru Cam ma nguu ipire reia oexa vy omombe'u mokoĩ guyke'y kuery oka py ikuai va'e pe.

²³ Ha'e ramo guyke'y Sem ha'e Jafé ma peteĩ capa ojopy vy omoĩ oaxi'y re. Ha'e rami vy okupe re oguata ovy vy ojao'i nguu pire reia oexa e'ỹ re, amboae katy rive oma'ê reve.

²⁴ Ha'e gui Noé oka'uague gui ovy vy oikuaa gua'y kyrĩve va'e hexe ojapague.

²⁵ Ha'e vy aipoe'i:

— Tove Canaã toiko ayvu vaipy. Guyke'y kuery rembiguai yvyĩve va'e rami toiko — he'i.

²⁶ Aipoe'ive ju:

— SENHOR Sem Ruete va'e ma ayvu porãmbu toiko. Ha'e rã Canaã ma Sem rembiguai toiko.

²⁷ Ha'e Jafé ma tove Nhanderuete tomboyvate. Guyke'y Sem irũ toiko hoo py. Ha'e rã Canaã ma hembiguai toiko — he'i.

²⁸ Yv ovuague oaxa rire Noé ma trezentos e cinqüenta ma'etỹ re ju oiko.

²⁹ Noé ha'e javi vy novecientos e cinqüenta ma'etỹ oiko. Ha'e rire omano.

10

1 Crônicas 1:5-23

¹ Po rami ma Noé ra'y kuery ramymino kuery rery. Ta'y kuery ma Sem, Cam ha'e Jafé. Ha'e kuery ma yv ovu rire ta'y okuapy.

² Jafé ra'y kuery ma Gômer, Magogue, Madai, Javã, Tubal, Meseque ha'e Tiras.

³ Gômer ra'y kuery ma Asquenaz, Rifate ha'e Togarma.

⁴ Javã ra'y kuery ma Elisã, Tãrsis, Quitim ha'e Dodanim.

⁵ Ha'e va'e kuery oja'o vy oo ye'ê rembe re ikuai amboae reguarã. Peteĩ-teĩ regua oayvu ae py ijayvu, joegua-egua joa py ikuai.

⁶ Ha'e gui Cam ra'y kuery ma Cuxe, Mizraim, Pute ha'e Canaã.

⁷ Cuxe ra'y kuery ma Sebã, Havilã, Sabtã, Raamá ha'e Sabteca. Ha'e Raamá ra'y kuery ma Sabã ha'e Dedã.

⁸ Cuxe ra'y ma Ninrode. Ha'e va'e ma ipo'akapa ppy raka'e yvy re.

⁹ Imba'ejukaa ipy'a guaxu va'e oiko SENHOR renonde. Ha'e ixupe "Ninrode SENHOR renonde imba'ejukaa rami avi oiko va'e", 'ea.

¹⁰ Jypy'i ipo'aka raka'e ma Babel tetã re, ha'e gui Ereque, Acade ha'e Calné re ju, Sinar yvy re ae.

¹¹ Ha'e va'e yvy gui ha'e ojepe'a Assiria re ju oiko aguã. Ha'e vy ojapo Nínive, Reobote-Ir ha'e Calã tetã.

¹² Nínive ha'e Calã mbyte ma ojapo avi Resém tetã guaxu.

¹³ Mizraim ra'y ma Ludim, Anamim, Leabim, Naftuim,

¹⁴ Patrusim ha'e Casluim (ha'e va'e gui ma filisteu kuery ikuai), ha'e gui Caftorim.

¹⁵ Canaã ra'y ma Sidom jypygua. Ha'e va'e gui ma Hete ju.

¹⁶ Hamymino kuery ma jebuseu kuery, amorreu, girgaseu,

¹⁷ heveu, arqueu, sineu,

* 9:13 "Xerapa" he'ia ma arai re Nhanderuete karugua oexa uka va'e.

- ¹⁸ arvadeu, zemareu ha'e hamateu kuery ikuai. Canaã ramymino kuery ma opa rupi oaĩmba raka'e.
¹⁹ Canaã ramymino kuery vvy omboja' oague ma Sidom guive oo Gerar katy, Gaza peve, ha'e gui oo Sodoma, Gomorra, Admá ha'e Zeboim katy, Lasa peve.
²⁰ Ha'e va'e kuery ma Cam ramymino kuery. Peteĩ-teĩ regua oayvu ae py ijayvu, joegua-egua joa py ikuai.
²¹ Ha'e gui Jafé ryke'y Sem ma ta'y avi. Hamymino kuery ma Héber ra'y kuery ha'e javi ikuai.
²² Sem ra'y kuery ma Elão, Assur, Arfaxade, Lude ha'e Arã.
²³ Arã ra'y kuery ma Uz, Hul, Geter ha'e Más.
²⁴ Arfaxade ra'y ma Salá, Salá ra'y ma Héber.
²⁵ Héber ra'y ma mokoĩ oiko. Peteĩ ma Pelegue hery va'e, mba'eta ha'e va'e oiko jave vvy omboja'oa.*
 Ha'e rã tyvy ma Joctã.
²⁶ Joctã ra'y kuery ma Almodá, Salefe, Hazar-Mavé, Jerá,
²⁷ Hadorão, Uzal, Dicla,
²⁸ Obal, Abimael, Sabá,
²⁹ Ofir, Havilá ha'e Jobabe ikuai. Ha'e va'e kuery ha'e javi ma Joctã ra'y kuery.
³⁰ Ha'e kuery vvy omboja' oague ma Messa guive oo, kuaray oua katy Sefar vvyty oĩ va'e peve.
³¹ Ha'e va'e kuery ma Sem ra'y kuery. Peteĩ-teĩ regua oayvu ae py ijayvu, joegua-egua joa py ikuai.
³² Ha'e va'e kuery ae Noé ramymino kuery. Peteĩ-teĩ regua oayvu ae py ijayvu, joegua-egua joa py ikuai.
 Ha'e kuery ma yy ovu rire oja' opa vvy jave re.

11

Babel py torre ojapoa okuapyague

- ¹ Ha'e jave py ma vvy jave re peteĩ'i ayvu oiko ramo peteĩ'i rami anho ijayvu okuapy.
² Ha'e kuery kuaray oua katy gui oje'oi vy ojou peteĩ vvy joa porã reia Sinar vvy re. Ha'e py ju ikuai.
³ Ha'e vy aipoe'i joupe-ue:
 — Peju ke, jajapo vvy jykuerã, japy porã — he'i. Ha'e jave py vvy jykue oiporu ita 'rãgue py. Oja va'e voi oiporu omboja agua.
⁴ Aipoe'i okuapy:
 — Peju ke, jajapo peteĩ tetã nhandevy, ha'e torre yva re peve yvate va'erã. Ha'e rami vy nhandere ima'endu'a porãa 'rã, ha'e vvy jave re nhaneã e'ỹ agua — he'i okuapy.
⁵ Ha'e rami rã SENHOR oaguejy oexa agua tetã ha'e torre avakue ra'y kuery ojapo va'e.
⁶ Ha'e vy SENHOR aipoe'i:
 — Aỹ peve peteĩ regua anho ikuai, ha'e peteĩ rami meme ijayvu va'e. Ha'e nunga ma jypy'i rei teri. Aỹ gui ma ha'e kuery ndojapo kuaa e'ỹi 'rã ojapoxe va'e rei.
⁷ Peju ke, jaguejy, jajapo joo rami e'ỹ-e'ỹ ijayvu agua rami, peteĩ-teĩ joayvu oendu kuaa ve'ỹ agua — he'i.
⁸ Ha'e rami vy SENHOR omoaĩmba vvy jave re. Ha'e ramo opytu'u tetã ojapo okuapy gui.
⁹ Ha'e nunga rupi ha'e va'e henda omboerya Babel, ha'e py joayvu oendu kuaa e'ỹ agua rami SENHOR ojapo rire, vvy jave re omoaĩmba vvy.*
¹ Crônicas 1.24-27
¹⁰ Po rami ma Sem ramymino kuery rery. Ha'e ma cem ma'etỹ oguerekoa py ta'y ypy'i Arfaxade oiko, yy ovu rire mokoĩ ma'etỹa py.
¹¹ Ha'e Arfaxade oiko rire tuu Sem ma quinhentos ma'etỹ re ju oiko. Ta'y ha'e tajy ju.
¹² Arfaxade ma trinta e cinco ma'etỹ oikoa py oiko ta'y Salá.
¹³ Ha'e Salá oiko rire tuu Arfaxade ma quatrocentos e três ma'etỹ re ju oiko. Ta'y ha'e tajy ju.
¹⁴ Salá ma trinta ma'etỹ oikoa py oiko ta'y Héber.
¹⁵ Ha'e Héber oiko rire tuu Salá ma quatrocentos e três ma'etỹ re ju oiko. Ta'y ha'e tajy ju.
¹⁶ Héber ma trinta e quatro ma'etỹ oikoa py oiko ta'y Pelegue.
¹⁷ Ha'e Pelegue oiko rire tuu Héber ma quatrocentos e trinta ma'etỹ re ju oiko. Ta'y ha'e tajy ju.
¹⁸ Pelegue ma trinta ma'etỹ oikoa py ta'y Reú oiko.
¹⁹ Ha'e Reú oiko rire tuu Pelegue ma duzentos e nove ma'etỹ re ju oiko. Ta'y ha'e tajy ju.
²⁰ Reú ma trinta e dois ma'etỹ oikoa py oiko ta'y Serugue.
²¹ Ha'e Serugue oiko rire tuu Reú ma duzentos e sete ma'etỹ re ju oiko. Ta'y ha'e tajy ju.
²² Serugue ma trinta ma'etỹ oikoa py oiko ta'y Naor.
²³ Ha'e Naor oiko rire tuu Serugue ma duzentos ma'etỹ re ju oiko. Ta'y ha'e tajy ju.
²⁴ Naor ma vinte e nove ma'etỹ oikoa py oiko ta'y Terá.
²⁵ Ha'e Terá oiko rire tuu Naor ma cento e dezenove ma'etỹ re ju oiko. Ta'y ha'e tajy ju.
²⁶ Terá ma setenta ma'etỹ oiko rire oiko ta'y kuery Abrão, Naor ha'e Harã.
²⁷ Po rami ma Terá ramymino kuery rery. Terá ra'y kuery ma Abrão, Naor ha'e Harã. Harã ra'y ma Ló.
²⁸ Harã ma vvy oikoague py ae omano, Ur caldeu kuery rekoa py. Ha'e va'e jave py tuu Terá oikove teri.
²⁹ Abrão ha'e Naor ojou gua'yxyrã. Abrão ra'yxy ma Sarai hery va'e, ha'e rã Naor ra'yxy ma Milca, Harã rajy ae. Harã ra'y kuery ma Milca ha'e Iscã.
³⁰ Ha'e rã Sarai ma imemby va'erã e'ỹ ae oiko.

* 10:25 Tery Pelegue ma "Oja'oa" 'ea reve joo ramigua.

* 11:9 Tery Babel ma "Joo rami e'ỹ-e'ỹ oikuaa okuapy" 'ea.

³¹ Ha'e gui Terá ogueraa gua'y Abrão, gua'y Harã ra'y Ló, ha'e gua'y Abrão ra'yxy Sarai. Ha'e vy caldeu kuery rekoa Ur gui jogueraa, Canaã yvy re ovaê aguã. Ha'e rami teĩ Harã tekoa peve'i oje'oi. Ha'e vy opyta okuapy ha'e py.

³² Ha'e gui Terá ma duzentos e cinco ma'etỹ oikoa py omano Harã tekoa py.

12

Nhanderueté Abrão oenoĩ vy ogueroayvu porãague

¹ Ha'e gui SENHOR aipoe'i Abrão pe:

— Exê ke ndeyvy gui, nderu ro ha'e neretarã kuery ikuaiã gui, ha'e tereo yvy aexa uka va'erã katy.*

² Mba'eta ndegui amoingo 'rã peteĩ regua heta va'e. Romoingo porã 'rã, ha'e amboete uka 'rã nderery. Ndere vy amboae regua kuery amoingo porã avi 'rã.

³ Amoingo porã avi 'rã nemoingo porã va'e kuery, ha'e rã ndere ijayvu vai va'e kuery re ma xeyvu vai 'rã. Ndere vy yvy regua ha'e javi ikuai porã 'rã — he'i.*

⁴ Ha'e rami SENHOR ijayvuague rami vy Abrão oo. Ló voi oo hupive. Setenta e cinco ma'etỹ Abrão oguereko reve ojepe'a Harã tekoa gui.

⁵ Abrão ngupive ogueraa va'e ma gua'yxy Sarai, guyvy ra'y Ló ha'e mba'emo oguereko va'e ha'e javi. Ogueraa avi guembiguai kuery Harã tekoa py oiko jave ojou va'ekue. Ha'e rami vy Canaã yvy katy ju jogueraa. Ha'e vy ovaẽmba ha'e py.

⁶ Ha'e va'e yvy Abrão oaxa ovy Siquém tetã peve, Moré py yvyra carvalho hi'ãi va'e peve. Ha'e jave ma cananeu kuery ikuai yvy re.

⁷ Ha'e ramo Abrão pe SENHOR ojexa uka. Ha'e vy aipoe'i:

— Kova'e yvy ame'ê 'rã neramymino kuery pe — he'i. Ha'e ramo Abrão ojapo peteĩ altar SENHOR pe, ixupe ojexa uka rire.

⁸ Ha'e va'e gui oaxa ovy yvyty Betel regua kuaray oua katy oĩ va'e peve. Ha'e py ma oupi oo'i, Betel tetã regua kuaray oikoa katy opyta, ha'e Ai regua kuaray oua katy. Ha'e py voi ojapo peteĩ altar SENHOR pe, ha'e ojapukai SENHOR rery rupi.

⁹ Abrão oo ju ha'e gui, Neguebe katy tema oo oiny.*

Egito yvy re Abrão oiko jave guare

¹⁰ Ha'e gui ha'e va'e yvy re oiko karuai. Ha'e ramo Abrão oo vy Egito yvy re ju oiko, ijyvy re ae karuai ete ramo.

¹¹ Ha'e gui Egito yvy re ovaẽ rai'i maa py Abrão aipoe'i gua'yxy Sarai pe:

— Xee aikuaa porã ndee kunha porã ereikoa.

¹² Ha'e ramo Egito pygua kuery nderexa vy aipoe'i 'rã: “Peva'e kunha ma ta'yxy oiko”, he'i vy xejuka 'rã. Ndee anho'i nemoingove 'rã.

¹³ Ha'e nunga rupi aipo're xereindy reikoa rami, ndere vy ha'e kuery xemboete vy xee voi xemoingove aguã — he'i.

¹⁴ Egito yvy re Abrão ovaẽ ramo ha'e pygua kuery ta'yxy oexa rã iporã ete.

¹⁵ Faraó rembiguai kuery yvatekueve va'e oexa vy omombe'u Faraó pe. Ha'e ramo Faraó ogueru ruka kunha va'e ngoo py.

¹⁶ Faraó ma kunha va'e re vy opena porã Abrão re. Ha'e ramo ojou-jouve guymbarã: vexa'i, vaka, mburika'i, ha'e gui guembiguai avakue ha'e kunhague, kavaju ha'e camelo.

¹⁷ Ha'e rami teĩ SENHOR omoingo axy Faraó ha'e hoo pygua kuery ha'e javi. Mba'emo vai ete omoingo Abrão ra'yxy Sarai káuxa.

¹⁸ Ha'e ramo Faraó oenoĩ uka Abrão. Ha'e vy aipoe'i:

— Mba'e tu rejapo xere? Mba'e re tu ndera'yxy oikoa neremombe'u porã ri,

¹⁹ ha'e “Xereindy” 're rive? Ha'e rami rã ajopy karamboae xera'yxyrã. Aỹ ma ndera'yxy ae ri rã eraa ju, ha'e tapeo — he'i.

²⁰ Ha'e rami vy Faraó guembiguai kuery pe opena uka Abrão re. Ha'e ramo oarõ heravy, ta'yxy ha'e opa mba'e oguereko va'e guive.

13

Abrão ha'e Ló joegui oja'oague

¹ Ha'e gui Egito gui Abrão oẽ vy Neguebe katy ju oo. Gua'yxy ogueraa opa mba'e oguereko va'e reve. Ló avi oo hupive.

² Abrão ma oguerekopa va'e. Oguereko vaka, prata ha'e ouro.

³ Ha'e gui Neguebe gui Betel katy ju oo, oo'i oupi ypy'iague py, Betel ha'e Ai mbyte py ae,

⁴ altar SENHOR peguarã ojapoague peve. Ha'e py ae ju Abrão ojapukai SENHOR rery rupi.

⁵ Abrão rupive Ló oo vy ogueraa reta vexa'i, vaka ha'e oo'i.

⁶ Ha'e nunga rupi ha'e va'e yvy re nda'evevei joa py mokoĩve ikuai aguã, oguerekopa va'e meme ramo. Nda'evei ae joa py ikuai aguã.

* 12:1 Atos 7.3 * 12:3 Gálatas 3.8 * 12:9 Neguebe ma Judéia regua yvy piru reia kuaray puku-a katy oĩ va'e.

⁷ Ha'e gui Abrão rymba re opena va'e kuery joguero'a rei Ló rymba re opena va'e kuery reve. Ha'e va'e jave py cananeu ha'e ferezeu kuery avi ikuai ha'e va'e vvy re.

⁸ Ha'e ramo Abrão aipoe'i Ló pe:

— Nda'evei nhande jajoguero'a rei aguã, neí xerembigui kuery nerembigui kuery reve joguero'a aguã nda'evei, joegua meme nhandekuai vy.

⁹ Ma'ê, nerenonde itui vvy ha'e javi. Ajerure xea gui rejepe'a aguã. Xapy'a rei jaiporu kuaa e'ÿa katy ri reo ramo xee ma jaiporu kuaa katy 'rã aa. Ha'e rã jaiporu kuaa katy ri reo ramo xee ma jaiporu kuaa e'ÿa katy 'rã aa — he'i.

¹⁰ Ha'e ramo Ló oma'ê vy oexa vvy joja porã reia Jordão yakã vvy'ry itui va'e, Zoar tekoa katy'i. Ha'e va'e vvy ma Sodoma ha'e Gomorra SENHOR omomba e'ÿ mbove yy porã oïa, vyotyty SENHOR omoingo va'ekue rami ae iporã, Egitto vvy rami avi.

¹¹ Ha'e ramo Ló ma ojeupe guarã oiporavo Jordão vvy'ry vvy joja porã reia itui va'e ha'e javi. Ha'e rami vy ha'e katy oo, kuaray oua katy. Ha'e rami py mokoïve oja'o joe gui.

¹² Abrão ma Canaã vvy re ae opyta. Ha'e rã Ló ma oo vvy joja porã reia re tetã ikuai va'e rupi oiko. Ha'e rami vy oo'i oguero va heravy Sodoma tetã peve.

¹³ Ha'e rã Sodoma pygua avakue ma heko vai va'e, SENHOR renonde ojevavy e te va'e ikuai.

Abrão pe Canaã vvy ome'ê aguã re SENHOR ijavyague

¹⁴ Ha'e gui Ló ojepe'a ma rire SENHOR aipoe'i Abrão pe:

— Ema'ê reia guive kuaray ipuku'a'ia katy, kuaray ipuku-a katy, oua katy ha'e oïkea katy.

¹⁵ Mba'eta vvy rexa va'e ha'e javi 'rã ame'êmba ndevy, ha'e neramymino kuery pe voi, araka'e rã peve guarã.*

¹⁶ Amboeta 'rã neramymino kuery vvy ku'i hetaa rami. Amongue vvy ku'i oipapa kuaa va'e rire mae oipapa kuaa avi 'rãgue neramymino kuery.

¹⁷ Epu'ã ke, tereo ha'e eikuua pota kova'e vvy ipuku-a ha'e ipya rami, mba'eta ame'êmba 'rã ndevy — he'i.

¹⁸ Ha'e ramo Abrão ngoo'i oguero va heravy vy oiko carvalho vvyra ty Manre py oï va'e rexei'í ju oiko, Hebrom tetã katy'i. Ha'e py ma teigue ju ojapo altar SENHOR pe.

14

Irundy huvixa kuery pete'i nhiru'i re opu'ã okuapyague

¹ Ha'e jave py ma Sinar tetã pygua huvixa Anrafel, Elasar pygua huvixa Arioque, Elão pygua huvixa Quedorlaomer ha'e Goim pygua huvixa Tidal ve,

² ha'e kuery ma opu'ã okuapy Sodoma pygua huvixa Bera rovai, Gomorra pygua huvixa Birsá, Admá pygua huvixa Sinabe, Zeboim pygua huvixa Semeber ha'e Belá Zoar hery avi va'e pygua huvixa rovai.

³ Ha'e ramo ha'e va'e kuery ma Sidim regua vvyugua py ono'õmba okuapy, yupa he'ê ro va'e katy'i.

⁴ Ha'e kuery ma doze ma'etÿ re ma huvixa Quedorlaomer escravo ikuai rire treze ma'etÿ maa py nonhe'ê renduxevei.

⁵ Ha'e gui catorze ma'etÿa py Quedorlaomer ou, guexevagua huvixa kuery reve. Ha'e rami vy oitypa refaim kuery Asterote-Carnaim tetã py, ha'e gui zuzim kuery Hã py, emim kuery Savé-Quiriataim py,

⁶ ha'e horeu kuery ju oity Seir vvyty re, El-Parã regua tekoa e'ÿa katy'i oï va'e peve.

⁷ Ha'e gui ma En-Mispate py ju ovaê (ha'e va'e ma Cades), ha'e rami vy oitypa amalequita ha'e amorreu kuery Hazazom-Tamar py ikuai va'ekue.

⁸ Ha'e ramo hovai opu'ã joguervy Sodoma pygua huvixa, Gomorra pygua huvixa, Admá pygua huvixa, Zeboim pygua huvixa ha'e Belá Zoar va'e pygua huvixa. Ha'e kuery jogueraa Sidim regua vvyugua py huvixa kuery mboae rovai opu'ã aguã,

⁹ Elão pygua huvixa Quedorlaomer, Goim pygua huvixa Tidal, Sinar pygua huvixa Anrafel ha'e Elasar pygua huvixa Arioque rovai. Ha'e rami py irundy huvixa kuery opu'ã okuapy pete'i nhiru'i huvixa kuery rovai.

¹⁰ Ha'e gui Sidim regua vvyugua py ma heta oï vvykua oja va'e oïa. Ha'e va'e rupi Sodoma ha'e Gomorra pygua huvixa kuery oja vy amongue ho'a vvykua py, ha'e rã amboae kuery ma vvyty katy ojava.

¹¹ Ha'e rã hovaiqua kuery ma oipe'apa Sodoma ha'e Gomorra pygua kuery mba'e rei-rei. Tembi'u voi ogueraapa vy oje'oipa ju.

Ló kuery ojopypa heravyague

¹² Ha'e kuery ogueraa avi Abrão ryvy ra'y Ló, Sodoma tetã py oikoague gui. Hymba kuery voi ogueraapa.

¹³ Ha'e ramo pete'i oo jepe va'ekue ou vy omombe'u Abrão hebrev va'e pe, Manre regua carvalho ty katy'i oikoa py. Manre ma amorreu oiko raka'e, Escol ha'e Aner ruvy. Ha'e va'e kuery ma Abrão reve nhomoirũ va'e ikuai.

¹⁴ Ha'e ramo Abrão ma tyvy ra'y ogueraa ague oendu vy omono'õmba guembigui kuery hoo py itui'i va'ekue, opu'ã kuaa va'e zerezento e dezoito ikuai va'e. Ha'e rami vy amboae kuery rakykue oje'oi Dã peve.

¹⁵ Ha'e rami vy hembigui kuery oja'o vy pyávy opu'ã okuapy amboae kuery rovai. Oitypa vy omonha Damasco yke ijaxua katy Hobá tetã oï va'e peve.

¹⁶ Ha'e rami vy oguerupa ju imba'e rei-rei. Oguero avi guetarã Ló, imba'e rei-rei, kunhague ha'e hetarã kuery ha'e javive.

*

¹⁷ Ha'e gui Abrão ma huvixa Quedorlaomer ha'e hexevegua huvixa kuery oitypaague gui ojevy ramo oĩa py Sodoma pygua huvixa ou ovaexĩ aguã Savé regua yvyugua, “Huvixa yvyugua” 'epy va'e py.

Melquisedeque Abrão ogueroayvu porãague

¹⁸ Ha'e gui oĩa py Salém pygua huvixa Melquisedeque ogueru mbojape ha'e vinho. Ha'e va'e ma sacerdote oiko Nhanderuete yvate ete va'e pegua.

¹⁹ Ha'e gui ogueroayvu porã Abrão. Ha'e vy aipoe'i:

— Abrão, tove Nhanderuete yvate ete va'e, yva ha'e vvy rerekoa tanemoingo porã.

²⁰ Ha'e ta'ima'endu'a porã Nhanderuete yvate ete va'e re, ndepo py nderovaigua kuery omboaxapa rire — he'i. Ha'e rami rã ixupe Abrão ome'ẽ dízimo ogueru va'ekue ha'e javi gui.*

²¹ Ha'e gui Sodoma pygua huvixa ju aipoe'i Abrão pe:

— Xevy pe eraa uka ju xeretã pygua kuery, ha'e rã nhomba'e rei-rei reru va'ekue ma ndevy guarã toĩ — he'i.

²² Ha'e rã Abrão ombovai:

— Aupi xepo SENHOR Nhanderuete yvate ete va'e, yva ha'e vvy rerekoa pe.

²³ Ha'e rami vy aura mba'eve ajopy e'ỹ aguã nembra'e rei-rei gui, neĩ peteĩ nhimbo, neĩ xapatu xã, “Xee ame'ẽ ramo Abrão oguerekopa”, 're e'ỹ aguã.

²⁴ Mba'eve xee ndaipotai xejeupe guarã, mba'emo kunumigue ho'u va'ekue e'ỹ vy, ha'e xerupive oje'oi va'ekue Aner, Escol ha'e Manre pe reme'ẽ va'erã va'e anho. Tove ha'e kuery tojopy ojeupe guarã — he'i.

15

Nhanderuete Abrão ta'y aguã re ijayvuague

¹ Ha'e va'e rire SENHOR Abrão pe ojexa uka vy aipoe'i ixupe:

— Abrão, ekyje eme. Xee ma mba'emo vai jokoa aiko ndevy, ha'e ndevy guarã va'ekue heta 'rã ame'ẽ.

² Abrão ombovai:

— SENHOR Xeruete, mba'e tu ha'vy reme'ẽ 'rã, xera'y e'ỹ re ae aiko rã? Ha'e xero py mba'emo areko va'e aeja rã ojopy va'erã ma Damasco guigua Eliézer anho.

³ Aipoe'ive ju: — Xera'yrã nereme'ẽi rire mba'emo areko va'e xero py tembiguaĩ itui'i va'ekue pe guarã rive ojopyta.

⁴ Ha'e ramo SENHOR ombovai vy aipoe'i:

— Ha'e va'e ma nembra'e jopyarã e'ỹ oiko. Ha'e rã ndegui oiko va'erã va'e ae ma 'rã ojopy — he'i.

⁵ Ha'e vy ogueraa oka py. Ha'e vy aipoe'i:

— Ema'ẽ yva re, ha'e eipapa jaxy-tata ikuai va'e, reipapa aguã ha'eve ramo.*

Aipoe'i avi: — Guĩ rami 'rã heta neramymino kuery — he'i.

⁶ Ha'e ramo Abrão SENHOR re ojerovia ramo ixupe “Heko porã va'e” he'i.*

⁷ Ha'e gui SENHOR aipoe'ive ju:

— Xee ma SENHOR Ur caldeu kuery retã gui roipe'a va'ekue, kova'e vvy nderekoarã ame'ẽ aguã — he'i.

⁸ Abrão oporandu ixupe:

— SENHOR Xeruete, mba'exa tu aikuaa 'rã anhetẽ kova'e vvy ajopy 'rãa?

⁹ Ombovai:

— Eru xevy ha'vy peteĩ vaka kunha'i, peteĩ kavara ha'e peteĩ vexa'i ra'y, mboapy ma'etỹ oguereko va'e meme. Eru avi peteĩ pyku'i'i ha'e peteĩ apyaxu'i — he'i.

¹⁰ Ha'e ramo Abrão mymba ha'e javi ogueru vy oipe'ãmba mbyte rupi. Onhono porã'i ipêgue, peteĩ-teĩ joexe-exei'i. Ha'e rã guyra'i ma noĩpe'ãi.

¹¹ Xapirẽ kuery mba'emo re'õgue áry oguejy ramo Abrão omondyi.

Abrão reve Nhanderuete ngupive guarã ojapoague

¹² Ka'aru rai'i ma jave Abrão hopeyi vaipa, ha'e oendu avi okyje vaipaa, pytũ vai ete ramo.

¹³ Ha'e ramo SENHOR aipoe'i ixupe:

— Reikuaa pota pova'e re, mba'eta neramymino kuery joyvy rupi oguata rei 'rã. Escravo ikuai aguã rami ojopya 'rã. Ha'e gui ombojexavaia 'rã quatrocentos ma'etỹ re.

¹⁴ Ha'e rami teĩ herekoa kuery ma xee ju amoingo axy 'rã. Ha'e va'e rire ojepe'apa 'rã ha'e gui, imba'e rei-reipa reve.*

¹⁵ Ha'e rã ndee ma reo porã 'rã neramoĩ kuerya py. Ha'e ramo nenhono porãa 'rã ndetuja'i ete jave.

¹⁶ Ha'e gui neramymino kuery irundykuea mae ma ikuai va'e ojevy 'rã apy, mba'eta ndopai teri apygua amorreu kuery heko vai aguã — he'i.

¹⁷ Kuaray oike ma ramo pytũ vaipa ete. Ha'e gui ojekuaa peteĩ tapyĩ ryrũ hataxĩ opu'ã oinya va'e, ha'e peteĩ takua ryxa rendy mymba pêgue ikuai va'e mbyte rupi oaxa oiny va'e.

¹⁸ Ha'e va'e árave Abrão reve SENHOR ojapo ngupive guarã. Ha'e vy aipoe'i:

— Ha'e gui neramymino kuery pe ae 'rã ame'ẽ kova'e vvy, Egito yakã guive Eufrates yakã guaxu peve,

¹⁹ queneu kuery ikuai, quenezu, cadmoneu,

²⁰ heteu, ferezeu, refaim,

21 amorreu, cananeu, gîrgaseu ha'e jebuseu kuery ikuaia guive.

16

Sarai ha'e Agar rekokue oia

¹ Abrão ra'yxy Sarai ma imemby va'e'y. Ha'e rami avi ogueroko peteĩ guembiguaí Egito guigua Agar hery va'e.

² Ha'e gui Sarai aipoe'i Abrão pe:

— Xee ma Nhanderuetee xeapo kyrí va'e areko e'y aguã rami. Emenda ke xerembiguaí re, ha'e va'e rupi xepi'arã rami ndera'y aguã — he'i. Ha'e ramo Abrão onhe'ẽ rendu Sarai.

³ Ha'e rami vy ome Abrão-a py Sarai ogueraa guembiguaí Egito guigua Agar, ome'ẽ ta'yxy jevyrã. Ha'e va'e jave ma dez ma'etý re ma ikuai Canaã vvy re.

⁴ Ha'e gui Agar reve Abrão jogueroko ramo ogueroko kyrí va'e. Kyrí va'e ogueroko maa oexa vy nda'ija'evei ma opatõ ra'yxy re.

⁵ Ha'e ramo Sarai aipoe'i Abrão pe:

— Ndeee ae toopa xemoximba reiague. Xee ma xerembiguaí rereko aguã ame'ẽ rire kyrí va'e ogueroko maa oexa vy nda'ija'evei xere. Tove SENHOR toikuaa pota xere rejapo va'ekue re.

⁶ Gua'yxy pe Abrão ombovai:

— Nerembiguaí ma ndepo py oiko. Ereko ndee ae rerekoxea rami — he'i. Ha'e ramo Sarai guembiguaí ogueroko axy ramo ojava ixugui.

⁷ Ha'e gui SENHOR-a guigua anjo ojou tekoa e'ya py peteĩ yvu rexei, Sur vvy katy tape oo va'e py.

⁸ Ha'e vy aipoe'i ixupe:

— Ndeee Sarai rembiguai Agar, magui tu reju? Marã katy tu reo?

Ombovai:

— Xererekoa Sarai gui rima ajava — he'i.

⁹ Ha'e ramo anjo SENHOR-a guigua aipoe'i ixupe:

— Ejevvy ju ndererekoa py, ha'e enhemoyvvt'i ipo py.

¹⁰ Anjo aipoe'ive ju:

— Xee amboeta ete 'rã neremiarirõ kuery, avave rei oipapa kuaa aguã rami e'y.

¹¹ Anjo aipoe'ive ju:

— Rereko 'rã kyrí va'e, ava'i 'rã reikuavã. Remboery 'rã Ismael, rejexavaia gui SENHOR ndereraa jepe rire.*

¹² Ha'e va'e ma avakue oikuaa rã mburika ka'aguy regua rami 'rã oiko, mba'eta opu'ã 'rã pavẽ re, ha'e rã hexe ma pavẽ 'rã opu'ã avi. Oiko 'rã guyvy kuery rovaigua — he'i.

¹³ Ha'e ramo Agar ma SENHOR hexeve ijayvu rire ojapukai hery rupi. Ha'e vy aipoe'i:

— Ndeee ma Xeruetee rexa va'e — he'i. Mba'eta aipoe'i: “Xee ri ty'y apy ha'eve xerexaa aexa aguã?” he'i vy.

¹⁴ Ha'e nunga rupi ha'e va'e ygua hery Beer-Laai-Roi. Cades ha'e Berede mbyte re opyta.†

Ismael itui'iaque

¹⁵ Ha'e gui Agar ogueroko'i Abrão ra'y. Ha'e rã Abrão Agar re ta'yague omboery Ismael.

¹⁶ Oitenta e seis ma'etý re ma Abrão oiko jave Agar ta'y Ismael re.

17

Nhanderuetee Abrão rery oguerovaague

¹ Abrão noventa e nove ma'etý oguereko'a py SENHOR ojexa uka ixupe. Ha'e vy aipoe'i:

— Xee ma Nderuetee xepo'akapa va'e. Eiko ke xerenonde opa mba'e py ndereko porãa rupi.

² Ha'e ramo ndereve ajapo 'rã xerupive guarã, ha'e rami vy amboeta 'rã neramymino kuery — he'i.

³ Ha'e ramo Abrão guenapy'ã re oĩ, ngova vvy re omovaẽ. Nhanderuetee aipoe'i ixupe:

⁴ — Xerupive guarã ndereve ajapo rire ndee reiko 'rã mbovy e'y regua ikuai va'e ru.

⁵ Ha'e nunga rupi Abrão ve'y ma 'rã nderery, ha'e rã Abraão, mbovy e'y regua rurã romoingo rire.*

⁶ Xee romboeta ete 'rã neramymino kuery. Ndegui 'rã amoingo joegua e'y-e'y, huvixa kuery guive.

⁷ Xerupive guarã ndereve jypy'i ajapo va'ekue ma aikuaa uka 'rã neramymino kuery pe ha'e kuery ikuai jevy-jevy rã guarã, raka'eve rã. Ha'e rami vy Nderuetee aiko aguã, ha'e gui neramymino kuery Ruete guive.

⁸ Ndeevy ha'e neramymino kuery pe ame'ẽ 'rã vvy reguata reikovyague. Ha'e kuery pegua itui Canaã vvy ha'e javi, raka'e rã guarã. Ha'e xee aiko 'rã ha'e kuery Ruete.

Opire omboi uka aguã oejaa ague

⁹ Nhanderuetee aipoe'ive ju Abraão pe:

— Ndeee ha'e neramymino kuery pendekuai 'rã xereve guarã ajapo va'e rupi, ha'e kuery ikuaia nhavõ ha'e rami ae ta'ikuai.

¹⁰ Po rami ma xereve guarã ajapo, ha'e va'e rupi peẽ ha'e neramymino kuery pendekuai aguã: Pemboi 'rã avakue'i penembyte oiko va'e ha'e javi pire.

* 16:11 Tery Ismael ma “Nhanderuetee oendu va'e” ea. † 16:14 Tery Beer-Laai-Roi ma “Hekove va'e xerexaaty ygua” ea. * 17:5 Tery Abraão ma “Heta regua ru” ea (Romanos 4.17).

¹¹ Pendero'o pire ae 'rã pemboi. Ha'e nunga ma xereve guarã ajapo va'e rupi pendekuaia kuaa ukaarã oĩ.

¹² Penembyte oiko va'e oito ára oguerekoa py pemboi 'rã ipire: avakue pende kuery regua ha'e penerembiguai ra'y kuery pendo py oiko va'ekue, yvy mboae guigua pejogua va'ekue guive, penderegua ae e'ỹ teĩ.

¹³ Pemboi 'rã pendero py itui'i va'ekue ha'e pendereráta re pejogua va'ekue pire. Ha'e rami py xereve guarã ajapo va'ekue kuaa ukaarã oĩ 'rã pendero'o re, raka'e rã peve guarã.

¹⁴ Ha'e rã ngo'o pire omboi uka e'ỹ va'e ma oipe'aa 'rã pende kuery mbyte gui, xereve guarã ajapo va'ekue rupi e'ỹ oiko ramo.

Sarai rery ju Nhanderuete ogueroavaague

¹⁵ Nhanderuete aipoe'i Abraão pe:

— Ndera'yxy Sarai pe ma “Sarai” 'ereve eme, ha'e rã “Sara” ju 'rã renoi.†

¹⁶ Mba'eta amoiingo porã vy ajapo 'rã ndera'yra oguereko aguã rami. Anhetê amoiingo porã ramo ixugui joegua e'ỹ-e'ỹ 'rã ikuai, huvixa kuery guive — he'i.

¹⁷ Ha'e ramo Abraão guenapy'ã re oĩ vy yvy re ngova omovaẽ. Ha'e vy hory vy aipoe'i ojeupe:

— Ava cem ma'etỹ ma oguereko va'e nda'u ta'y 'rã ri? Ha'vy Sara nda'u imemby nho 'rã, noventa ma'etỹ ma oguereko va'eri? — he'i ojeupe.

¹⁸ Ha'e gui Nhanderuete pe ju Abraão aipoe'i:

— Ismael ae oiko 'rãgue nerenonde rupi — he'i.

¹⁹ Nhanderuete ombovai:

— Ndera'yxy Sara ae 'rã oguereko ndera'y. Ha'e va'e remboery 'rã Isaque. Ixupe ae 'rã amoi atã xereve guarã ajapo va'ekue, hamymino kuery raka'eve rã ikuai va'erã va'e peguarã.

²⁰ Ha'e rami avi aendu avi Ismael re ndeayvu rã. Amoiingo porã avi 'rã, ha'e ajapo 'rã ta'y reta aguã rami. Ta'y kuery ma doze huvixa 'rã ikuai. Ixugui amoiingo 'rã peteĩ regua heta ete ikuai va'e.

²¹ Ha'e rã xereve guarã ajapo va'ekue ma Isaque pe ae ju 'rã amoi atã. Ha'e va'e ma peteĩ ma'etỹa py kova'e ára ojeupity ju jave Sara oguereko 'rã ndera'yra — he'i.

²² Ha'e gui Abraão reve Nhanderuete ijayvupa ma vy ojeupi ovy ha'e gui.

Opire omboi ukapaa okuapyague

²³ Ha'e va'e árave Abraão ogueru ruka gua'y Ismael, guembiguai kuery ha'e pygua ae ha'e peráta re ojogua va'ekue ha'e javi. Avakue hoo py ikuai va'e ha'e javive omboatypa vy omboi peteĩ-teĩ pire, Nhanderuete aipoe'iguae rami vy.

²⁴ Abraão noventa e nove ma'etỹ oguereko reve opire omboi uka raka'e.

²⁵ Ta'y Ismael ma treze ma'etỹ oguereko jave omboi ipire.

²⁶ Peteĩ ára pyve Abraão ta'y Ismael reve omboi uka okuapy opire.

²⁷ Avakue hoo py ikuai va'e ma guive rã opire omboi ukapa, tembiguai kuery ha'e pygua ae, ha'e yvy mboae gui peráta re ojogua pyre guive.

18

Abraão pe SENHOR ha'e mokoĩ anjo ojexa ukaague

¹ Ha'e gui Manre py Abraão pe SENHOR ojexa uka ju vyvra carvalho ty oĩ va'e rexe'i, hakuve ma jave ngoo'i rokẽ py uguapy oiny jave.

² Abraão oma'ẽ vy oexa mboapy avakue henonde hi'aĩ ra'e ramo. Oexa vy ngoo'i rokẽ gui onha ovy ovaexĩ aguã.* Guenapy'ã re oĩ, ngova yvy re omovaẽ rei reve.

³ Ha'e vy aipoe'i:

— Xe-Senhor, rejou porã ri ramo ajerure reaxa rive e'ỹ aguã xee nerembiguaia gui.

⁴ Taru ruka yy pendepy pejoi aguã.† Pepytu'u ranhe kova'e vyvra guy py.

⁵ Aru ruka 'rã mbojape'i. Pe'u ke, penembaraeteve, ore kuery penembiguaia py pevaẽ ma vy. Ha'e gui mae ma ha'eve peove aguã — he'i.

Ha'e kuery ombovai vy

— Ejapo ha'vy ndeayvuague — he'i okuapy.

⁶ Ha'e ramo Abraão ojapya ovy oo'i Sara oĩa py. Ha'e vy aipoe'i:

— Emoakỹ pojava na mboapy ryruru trigo iporãve va'e mbojaperã, ha'e exy ju tanhimbu py — he'i.

⁷ Ha'e gui Abraão ma mymba kora katy ju onha ovy. Peteĩ vaka ra'y ikyra porã va'e ojopy vy ome'ẽ omongakua va'ekue pe oguereko katu pojava aguã.

⁸ Ogueru avi kamby kekue ha'e oke e'ỹ va'e, ha'e gui vaka ro'o oexy uka va'ekue. Ha'e rami vy ipoua kuery renonde omoĩmba. Oarõ ho'amy ha'e kuerya py vyvra guy py okaru okuapy ramo.

⁹ Ha'e ramo ha'e kuery oporandu ixupe:

— Ndera'yxy Sara mamo tu oĩ?

Ombovai:

— Opy ri hiny — he'i.

† 17:15 Tery Sara ma “Huvixave rajy” 'ea. * 18:2 Mboapy avakue ovaẽ va'e regua mokoĩ ma anjo ikuai (19.1), ha'e rã amboae ma SENHOR ae, ha'e'ỹ vy anjo ikuaa ukua (versículos 1, 17, 20, 22). † 18:4 Ha'e kuery reko rami vy oo py ipoua kuery ovaẽ ramo hoo va'e omovaẽ vy ogueru ruka 'rã ry ovy ojoi aguã, tape rupi yvy ku'i rupi oo rure (19.2, 24.32, 43.24, Juízes 19.21, Lucas 7.44, João 13.1-14).

- 10 Ha'e kuery regua peteĩ va'e aipoe'i:
 — Aỹ ma peteĩ ma'etỹa py ma aju ete ju 'rã ndea py. Ha'e ramo ndera'yxy Sara oguereko 'rã ava'i — he'i.
 Ha'e rami jave Sara oendu oo'i rokẽ py ha'e kuery rakykue katy.
- 11 Abraão ha'e Sara ma tujakue'i ete ma ikuai. Sara voi ndoikovei ma gueko re.
- 12 Ha'e gui Sara ha'e nunga oendu vy hory oiny opy'a py. Ha'e vy aipoe'i ojeupe ae:
 — Xeguaiguĩ'i ete ma, ha'e xeme voi tuja'i ma va'eri, ha'e rami teĩ nhi'ã avy'a nho 'rã ri? — he'i.
- 13 SENHOR aipoe'i Abraão pe:
 — Mba'e re tu Sara hory rei reve ri aipoe'i: “Anhetẽ ete ri nda'u areko'i teri 'rã kyrĩ va'e, xeguaiguĩ'i ma rire?” he'i?
- 14 Nhanderuete pe nda'u oiko 'rã ri mba'emo haxy ete va'e ojapo aguã? Peteĩ ma'etỹa py kova'e ára ojeupity jevy jave 'rãe aju ndea py, ha'e Sara oguereko 'rã kyrĩ va'e — he'i.*
- 15 Ha'e rami rã Sara okyje vy onhenhomi. Ha'e vy aipoe'i:
 — Ndaxeroryi rima ainy.
 Ha'e rã ha'e va'e ma ombovai:
 — Any, anhetẽ nderory kuri — he'i.
- Sodoma ha'e Gomorra omomba aguã re Nhanderuete ijayvuague*
- 16 Ha'e gui avakue opu'ãmba vy oo ha'e gui, Sodoma tetã katy oma'ẽ aguã. Abraão voi oo ranhe ha'e kuery rupive tape oexa uka aguã.
- 17 SENHOR aipoe'i ojeupe ae:
 — Ndaikuaa ukai 'rã ri nda'u Abraão pe mba'e pa ajapo taa?
- 18 Mba'eta Abraão gui ma oiko 'rã peteĩ regua heta ha'e imbaraete va'e. Ha'e hexe vy yvy jave regua ha'e javi 'rã amoingo porã.*
- 19 Mba'eta xee aiporavo ha'e ombo'e aguã gua'y kuery ha'e guamymino kuery araka'eve rã guarã xee aipotaa rami ikuai aguã re, teko porã ha'e ha'eve ramigua anho ojapo aguã. Ha'e nunga rupi Abraão pe xee SENHOR ajapo 'rã hekorã re xeayvuague — he'i.
- 20 SENHOR aipoe'ive ju:
 — Sodoma ha'e Gomorra pygua kuery reko re opa marã ayvua rã aendu. Ha'e kuery ojevavypave tema oje'oiivy.
- 21 Ha'e nunga rupi avaẽ 'rã aexa aguã anhetẽ pa aendua rami ha'e kuery ikuai. Ha'e rami e'ỹ rã aikuaa avi 'rã.
- Nhanderuete pe Abraão ojerureague*
- 22 Ha'e gui ha'e va'e avakue oje'oi Sodoma tetã katy. Ha'e rã Abraão ma SENHOR renonde teri oĩ.
- 23 Ha'e rami vy hexe onhemboja vy aipoe'i:
 — Heko vai va'e remombaa py remomba avi 'rã teve heko porã va'e?
- 24 Xapy'a rei tetã py cinqüenta heko porã va'e ikuai teĩ nda'u remomba nho 'rã tetã? Cinqüenta heko porã va'e remboaxya nda'u nerendui 'rã tetã remomba e'ỹ aguã?
- 25 Ejapo eme ha'e rami, heko vai va'e rejukaa py ejukapa avi eme heko porã va'e, heko vai va'e opaa rami ae avi heko porã va'e opa e'ỹ aguã. Tove ha'e ramigua toiko eme. Ndee yvy jave re ikuai va'e rerekoa reiko va'e ha'eve e'ỹa rami teve 'rã rejoguereko? — he'i.
- 26 Ha'e ramo SENHOR ombovai:
 — Ha'e gui Sodoma py cinqüenta heko porã va'e ajou ri vy ha'e kuery re vy amboaxy 'rã tetã ha'e javi — he'i.
- 27 Ha'e gui Abraão aipoe'ive ju:
 — Taxepy'a guaxu xeayvuve aguã Xeruete reve, yvy ku'i, tanhimbu guigua aiko va'eri.
- 28 Xapy'a rei heko porã va'e cinqüenta aguã peteĩ nhirũ'i ri oata ramo remomba nho 'rã teve tetã? Ombovai:
 — Quarenta e cinco ri ha'e py ajou vy namombai 'rã tetã — he'i.
- 29 Abraão aipoe'ive ju:
 — Ha'e gui xapy'a rei quarenta ri ikuai ramo ha'vy? Ombovai:
 — Quarenta ikuai va'e re vy namombai 'rã — he'i.
- 30 Oporanduve ju:
 — Ejou vai eme ke SENHOR, xeayvuve ju taa. Ha'vy trinta ikuai ramo ha'e py? SENHOR ombovai:
 — Trinta heko porã va'e ha'e py ajou vy namombai 'rã — he'i.
- 31 Abraão ijayvuve tema:
 — SENHOR reve xeayvuve ta. Ha'vy vinte ete'i ri ikuai ramo ha'e py? SENHOR ombovai:
 — Namombai 'rã vinte ikuai va'e re vy — he'i.
- 32 Abraão aipoe'ive ju:
 — Ejou vai eme ke SENHOR, teĩgue ju xeayvu taa. Ha'vy dez heko porã va'e ikuai ramo?

SENHOR ombovai:

— Dez-'i ikuai va'e re vy namombai 'rã — he'i.

³³ Abraão ijayvupa ma ramo SENHOR ojepe'a ovy. Ha'e rã Abraão ma ngoo katy ju ojevy.

19

Ló mokoï anjo omovaëague

¹ Pytũ'i ovy jave mokoï anjo ovaë Sodoma py. Ha'e jave py Ló oguapy oiny tetã py oikoa py. Anjo kuery ou rã oexa vy opu'ã ovy ovaexĩ aguã. Ovaexĩ vy guenapy'ã re oĩ, vvy re ngova omovaë oiny.

² Ha'e vy aipoe'i:

— Aỹ ma xeruvixa kuery, pevaë ke xee penerembigui ro py pendepy pejoi ha'e peke aguã. Ko'ẽ rã aje'ive'i ma'e ma peguatave ju 'rã.

Ha'e kuery ombovai:

— Ha'e rami avi tetã mbyte py rive roke teĩ ha'eve — he'i.

³ Ló onhea'ã ete ramo mae ma jogueraa hoo py oke aguã. Ha'e ramo omongaru, mbojape ombovu e'ỹ re oexy uka vy. Ha'e ramo ha'e kuery okaru.

⁴ Onhenomba e'ỹ re Sodoma tetã pygua avakue jogueru vy ombojere okuapy oo. Kunumigue ha'e tujakue ou okuapy opa rupi gui.

⁵ Ha'e rami vy Ló pe ojavukai vy aipoe'i okuapy:

— Mamo tu ikuai avakue pytũ'i jave ndero py ovaë va'ekue? Eru oka katy rojavuky rei aguã — he'i okuapy.

⁶ Ha'e ramo Ló anho oẽ ha'e kuerya py, ha'e omboty okẽ.

⁷ Ha'e vy aipoe'i:

— Xeretarã kuery, ajerure pejapo vai e'ỹ aguã.

⁸ Ma'ẽ, mokoï xerajy kunhataigue areko xero py. Ha'e va'e kuery ma aru ta perekoxea rami pereko aguã. Ha'e rã ha'e va'e avakue pe ma pejapo vai eme, xero py amovaë rire.

⁹ Ha'e rã ha'e kuery aipoe'i:

— Ejepe'a ke upe gui!

Ha'e gui joupe-upe ju ijayvu:

— Amboae yvy guigua nhanderekoa py ou va'ekue ri okuua potaxe nhandere. Ha'e nunga rupi hexe tema ngoo py omovaë va'ekue gui jajapo vaive 'rã — he'i okuapy. Ha'e vy Ló omboty rei jogueruvy, ha'e omboixe okẽ.

¹⁰ Ha'e ramo ngopy avakue ikuai gui okuave'ẽ vy ojopy Ló, omoinge ju ovy. Ha'e rami vy omboty ju okẽ.

¹¹ Ha'e gui oexa mboguepa oka py ikuai va'e, kyrigüeve ha'e tujaküeve. Ha'e ramo okẽ rekaa rupi rive ikuai ikane'õmba peve.

¹² Ha'e gui mokoï ava aipoe'i Ló pe:

— Apy rerekove pa ndero pygua kuery? Nderajy me kuery, ndera'y kuery, nderajy kuery pa ikuai? Mba'eta rereko va'e ma guive rã eraapa ke tetã gui.

¹³ Mba'eta ore romomba ta kova'e tetã. Apygua kuery reko vaia omombe'ua rã SENHOR renonde peve onhendu. Ha'e ramo SENHOR orembou romomba aguã — he'i.

¹⁴ Ha'e ramo Ló oo vy guajy me kuery pe omombe'u. Ha'e vy aipoe'i:

— Pepu'ã ke, pejepe'a apy gui. SENHOR omomba ta kova'e tetã — he'i teĩ tajy me kuery “Horyai vy po” he'i okuapy.

¹⁵ Ko'ẽmba ramove anjo kuery peteigue ju ijayvu Ló pe. Ha'e vy aipoe'i:

— Epu'ã ke, erojava heravy ndera'yxy ha'e nderajy mokoïve rereko va'e, tetã okanhy rã pekanhy e'ỹ aguã — he'i.

¹⁶ Ha'e rami teĩ heko mbegue ramo avakue ojopy ipo re ogueraa, ta'yxy ha'e tajy kuery mokoïve reve. SENHOR omboaxy ramo ogueraa tetã roka peve.

¹⁷ Mombyry'i ma ogueraa maa py anjo kuery va'e regua aipoe'i ixupe:

— Penhave tema, tapeo jepe. Pema'ẽ eme penderakykue re, ha'e vvy joja porã reia rupi peaxapa e'ỹ teria ja pepyta eme. Yvy'ã re tapeo pekanhy e'ỹ aguã — he'i.

¹⁸ Ha'e rã Ló ombovai vy aipoe'i:

— Ha'e rami ma nda'evei xeruvixa.

¹⁹ Ndee ma xemboaxy vy xepytyvõ ete kuri xereraa jepe vy. Ha'e rami avi nda'evei vvy'ã re aa aguã. Akyje aa reve mba'emo vai xerupity ramo aiko vai gui.

²⁰ Pe'i py oĩ tekoa mboae. Ha'e va'e katy taa, mba'eta ndatuvixai. Tove ha'e katy taa, kyrĩ'i ete ramo. Ha'e py ma xerekove reve 'rã aiko — he'i.

²¹ Ha'e rami rã ha'e kuery ombovai:

— Ha'eve ri. Ore noromombai 'rã tekoa ndeayvuague.

²² Tereo pojava ha'e py reiko aguã. Mba'eve rei ndajapoi 'rã ha'e py revaë e'ya ja — he'i. Ha'e rami rire ha'e va'e tetã omboerya Zoar.*

Sodoma ha'e Gomorra omombaa ague

²³ Kuaray yvate'i ma ovy jave Ló ovaë Zoar tekoa py.

²⁴ Ha'e rã Sodoma ha'e Gomorra áry ma SENHOR ombou enxofre ha'e tata, ixuguigua ae ho'a yva gui.

* 19:22 Tery Zoar ma “Kyrĩ'i va'e”'ea.

²⁵ Ha'e rami vy omomba ete tetã, ha'e ha'e katy'i yvy joja porã reia ha'e javi. Tetã py ikuai va'ekue omomba, mba'emo yvy re henhoi va'e ha'e javi reve.

²⁶ Ha'e gui Ló ra'yxy ma guakykue re oma'ẽ vy juky guigua opyta ho'amy.

²⁷ Ha'e gui Abraão ma ko'ẽ e'y re opu'ã vy oo SENHOR renonde oiague py.

²⁸ Sodoma ha'e Gomorra tetã katy oma'ẽ ho'amy. Ha'e vy oexa rã vvy joja porã reia ha'e javi gui hataxi opu'ã ovy, tata rupa gui hataxi opu'ãa rami.

²⁹ Yvy joja porã reia re tetã ikuai va'ekue Nhanderuete omomba teĩ Abraão re ima'endu'a vy ogueraa jepe ta'y kyrĩ Ló hetã omomba ta va'e mbyte gui.

Moabita ha'e amonita kuery ypy rekoue oia

³⁰ Ha'e gui Zoar tekoa py Ló oikoxe teĩ okyje vy ojepe'a ju ha'e gui, guajy mokoive reve. Yvy'ã re ju oo, ha'e petei itakua oi va'e py ikuai guajy kuery reve.

³¹ Ha'e gui tajy guaiguive va'e aipoe'i kyrive va'e pe:

— Nhanderu ma tujã'i ma, ha'e jipoi avakue kova'e yvy re nhanemerã ikuai va'e, nhanderekorã va'ekue rami vy nhamenda aguã.

³² Jaa, nhamboy'u vinho py. Ha'e gui nhanheno hexeve, nhanderu gui ae nhanememby aguã ta'yrã — he'i.

³³ Ha'e rami vy ha'e va'e pyávy nguu pe ome'ẽ vinho oy'u aguã. Ha'e gui guaiguive va'e ovaẽ vy nguu reve onheno oikuaa e'y re. Tajy onheno rã noendui, neĩ opu'ã jevy ramo voi noendui.

³⁴ Ha'e gui ko'ẽgue guaiguive va'e aipoe'i kyrive va'e pe:

— Kuee pyávy xee anheno va'ekue xeru reve. Ha'e gui kova'e pyávy ha'ekue rami ju jajapo vinho oy'u aguã. Ha'e gui ndee ju evaẽ enheno hexeve, ixugui nhanememby aguã ta'yrã — he'i.

³⁵ Ha'e va'e pyávy ha'ekue rami ae ju nguu pe vinho ome'ẽ oy'u aguã. Ha'e gui tajy kyrive va'e ju ovaẽ vy onheno nguu reve oikuaa e'y re. Onheno rã tuu noendui, neĩ opu'ã ramo voi ndoikuaa.

³⁶ Ha'e rami py Ló rajy kuery mokoive nguu gui ae imemby.

³⁷ Guaiguive va'e ma petei ava'i oikuavã vy omboery Moabe. Ha'e va'e ramymino kuery ma Moabe pygua kuery aỹ peve ikuai va'e.

³⁸ Ha'e gui kyrive va'e voi petei ava'i oikuavã avi vy omboery Ben-Ami. Ha'e va'e ramymino kuery ma Amom pygua kuery aỹ peve ikuai va'e.

20

Gerar py Abraão ha'e Sara ikuai jave guare

¹ Abraão guekoa gui oẽ vy Neguebe vvy katy ju oo. Ha'e py ju oiko Cades ha'e Sur mbyte re, Gerar py ae.

² Gua'yxy Sara pe “Xereindy” he'i ramo Gerar pygua huvixa Abimeleque ogueru ruka.

³ Pyávy Abimeleque oexa ra'u rã Nhanderuete ojexa uka. Ha'e vy aipoe'i ixupe:

— Kunha va'e reipe'a ramo rombopaga 'rã remano peve, omenda va'e ramo — he'i.

⁴ Ha'e jave kunha va'e reve Abimeleque ndajoguereko'i teri. Ha'e rami vy aipoe'i:

— SENHOR, rejuka ta va'e ty'y heko porã va'e?

⁵ Mba'eta ime ae “Xereindy” he'i, ha'e kunha va'e voi ixupe “Xekyvy” he'i. Ha'e nunga rupi rima xee potae vy e'y ajapo, ajapo vaixe vy e'y — he'i.

⁶ Nhanderuete ombovai oexa ra'u rã:

— Aikuaa porã potae vy e'y rejapogue. Ha'e nunga rupi ae xee rojoko xerovai rejajavy e'y aguã, ha'e kunha va'e reve rejoguereko e'y aguã.

⁷ Aỹ ma eraa ju imea py, mba'eta profeta oiko. Ha'e ma ndere ojerure ramo reikove 'rã. Ha'e rami avi ime pe kunha va'e ndereraa ju ri vy reikuaa anhetẽ ete remano 'rãa, nerembiguai kuery ha'e javi reve — he'i.

⁸ Ko'ẽ rai'i jave Abimeleque opu'ã vy oenoĩmba guembiguai kuery, ha'e vy omombe'upa. Ha'e ramo avakue oendu vy onhemondyipa okuapy.

⁹ Ha'e gui Abimeleque oenoĩ uka Abraão. Ha'e vy aipoe'i ixupe:

— Mba'e tu rejapo orere? Mba'e nunga py tu ajejavy ndevy? Mba'eta ha'e rami ete ndee xererojajavy ha'e xerembiguai kuery guive. Nda'evei va'e rejapo va'ekue xere.

¹⁰ Mba'exa tu renhembopy'a ha'e nunga rejapo aguã? — he'i Abraão pe.

¹¹ Abraão ombovai:

— Mba'eta xee ma xejeupe ae aipoa'e: “Kova'e tekoa pygua kuery ma Nhanderuete renonde ojererokyjea rupi e'y ikuai vy xejuka 'rã xera'yxy káuxa”, ha'e va'ekue.

¹² Ha'e rami avi anhetẽ ae xereindy oiko, xeru rajy oiko vy, va'eri ha'i memby e'y ta'vy oiko. Ha'e rami vy rima hexe amenda karamboae.

¹³ Ha'e nunga rupi aguata-guata aguã xeru ro gui Nhanderuete xemondouka jave aipoa'e va'ekue xera'yxy pe: “Po rami 'rã ndee xepytyvõ nhavaẽa nhavõ rupi, Xevy 'Xekyvy' 're 'rã”, ha'e va'ekue ixupe.

¹⁴ Ha'e rami rã ixupe Abimeleque ogueru ruka vexe'i, vaka, ha'e tembiguai kuery avakue ha'e kunhague, omboaxapa Abraão pe. Ta'yxy Sara avi omboaxa ju ime pe.

¹⁵ Ha'e vy Abimeleque aipoe'i:

— Xevy ha'e javi ma nerenonde itui. Eĩ tema reĩxea py rei — he'i.

¹⁶ Ha'e gui Sara pe ju aipoe'i:

— Ma'ẽ, ndekyvy pe ame'ẽ ta mil hatã'i va'e prata guigua, ndere oiko va'ekue ha'e javi rekovia. Ha'e ramo pavẽ oikuaa 'rã ndereko porã va'ea — he'i.

¹⁷ Ha'e gui Abraão ojerure ramo Nhanderuete omonguera Abimeleque, ta'yxy ha'e hembiguai kuery, ta'y jevy aguã rami.

¹⁸ Mba'eta Abraão ra'yxy Sara káuxa SENHOR ojapo rire kunhague Abimeleque ro py ikuai va'e ha'e javi imemby ve'ÿ aguã rami.

21

Isaque itui'iaque

¹ SENHOR ijayvuague rami vy Sara pe ojekuaa uka vy ojapo ijayvuague.

² Ha'e ramo Sara oguereko'i, ha'e vy oikuavã peteĩ ava'i. Nhanderuete oa'angaague ára py ae Abraão tuja'i ma va'eri ta'y, SENHOR ijayvuague rami vy.

³ Sara pi'a'i itui'i va'ekue Abraão omboery Isaque.

⁴ Ta'y Isaque oito ára oguereko py Abraão omboi ipire, Nhanderuete ojapo ukaague rami vy ae.

⁵ Abraão cem ma'etÿ ma oguereko ta'y Isaque oiko jave.

⁶ Ha'e gui Sara aipoe'i:

— Aÿ ma Nhanderuete xeapo xerory ju aguã rami. Ha'e ramo pavẽ ha'e nunga oendu vy hory avi 'rã xererovy'a vy.

⁷ Avave rei noexa'ãi va'ekue xee Sara amokambu'i aguã re xepi'a'i Abraão ra'y, tuja'i vaipa ma va'eri ta'vy — he'i.

Tekoa e'ÿa rupi Agar oguata jave guare

⁸ Ava'i Isaque tuvixa ovy vy nokambuvei. Ha'e ramo nokambuveia ára Abraão ojapo peteĩ ngaru tuvixa va'e.

⁹ Ha'e va'e javegua py oĩ avi Egito guigua Agar pi'a, Abraão ra'y mboae va'e. Ha'e va'e ma ojoi rei Isaque. Ha'e nunga Sara oexa vy

¹⁰ aipoe'i Abraão pe:

— Emondouka na peva'e tembiguai ipi'a reve. Nda'evei ipi'a mba'emo reja va'e ojopy avi aguã xepi'a Isaque reve — he'i.*

¹¹ Ha'e nunga Abraão oendu vy nda'evei gua'y jypygua re.

¹² Ha'e rami teĩ Nhanderuete aipoe'i Abraão pe:

— Ndeporiau eme ndera'y ha'e ixy nerembiguai re oiko va'e re. Endu ke ndera'yxy Sara ijayvua ha'e javi, mba'eta Isaque ramymino kuery pe ae 'rã “Abraão ramymino kuery” 'ea.*

¹³ Ha'e gui nerembiguai pi'a ramymino kuery voi amboeta 'rã, ndera'y oiko avi ramo — he'i.

¹⁴ Ha'e ramo ko'ẽ e'ÿ mbove Abraão opu'ã vy Agar pe ome'ẽ mbojape ha'e peteĩ hyru yy. Ikupe re omõi. Ixupe omboaxa avi ipi'a'i. Ha'e rami vy omondouka. Ha'e ramo kunha va'e oo vy uguata rei oikovy Berseba katy tekoa e'ÿa oĩ va'e rupi.

¹⁵ Ha'e gui yy hyru py opa ma ramo opi'a omonheno vyvra'i hi'a'i va'e guy py.

¹⁶ Ha'e vy ojepe'a vy oo ava'i ituia gui mombyry'i, hu'y nhamombo ramo oguerovya rami peve, “Ava'i omano rã aexa aguã nda'evei” he'i vy. Ha'e rami vy ha'e py oguapy vy haxẽ reve ojave'o.

¹⁷ Ha'e gui Nhanderuete ma ava'i va'e haxẽ rã oendu. Ha'e rami vy yva gui Nhanderuetea guigua anjo oenoĩ Agar. Ha'e vy aipoe'i:

— Agar, mba'e tu rereko? Ekyje eme, mba'eta Nhanderuete oendu ava'i ituia py haxã.

¹⁸ Epu'ã ke, emopu'ã imo'amy ava'i ndepo py rejopy reve, mba'eta amboeta ete 'rã hamymino kuery — he'i.

¹⁹ Ha'e gui Nhanderuete kunha va'e rexa oi'pe'a ramo oexa peteĩ ygua. Ha'e py oo vy omonyẽ ju yryru, ha'e opi'a'i pe ome'ẽ oy'u aguã.

²⁰ Ava'i va'e tuja ovy rã Nhanderuete oiko hexeve. Tekoa e'ÿa rupi oiko guyrapa ha'e hu'y revegua.

²¹ Parã yvy regua tekoa e'ÿa rupi oiko. Ha'e gui ta'yxyrã ixy ojou peteĩ kunha Egito pygua.

Abimeleque reve Abraão peteĩ rami ikuai aguã ojapoague

²² Ha'e jave ma Abimeleque ha'e ojeupegua xondaro ruvixa Ficol reve aipoe'i Abraão pe:

— Opa mba'e rejapoa py Nhanderuete oiko ndereve.

²³ Ha'e nunga rupi aÿve eura xevy Nhanderuete rery rupi, xevy ndeapu e'ÿ aguã, xera'y pe, neĩ xeramymino pe. Ndevy ajapo porãague rami xevy ju rejapo porã aguã, ha'e xevy re reikoague re voi — he'i.

²⁴ Abraão ombovai vy

— Aura 'rã — he'i.

²⁵ Ha'e rami teĩ Abimeleque pe Abraão ijayvu ete, hembiguai kuery peteĩ ygua oi'pe'a nhea'ã okuapyague re.

²⁶ Ha'e ramo Abimeleque ombovai:

— Xee ndaikuaa'i mava'e pa ha'e ramigua ojapo. Avave rei ndoikuaa ukaai teri xevy, neĩ ruxã'i ma voi naendui kova'e ára e'ÿ vy — he'i.

²⁷ Ha'e ramo Abimeleque reve Abraão ojapo peteĩ rami ikuai aguã. Ha'e rami vy vexa'i ha'e vaka ogueru vy ome'ẽ Abimeleque pe.

²⁸ Sete vexa'i kunha Abraão oiporavo vy mymba kuerya gui ha'e kuery ae'i ikuai aguã py omõi.

²⁹ Ha'e ramo Abimeleque oporandu Abraão pe:

* 21:10 Gálatas 4.30 * 21:12 Romanos 9.7, Hebreus 11.18

— Mba'erã tu sete vexa'i ri reipe'a?

³⁰ Abraão ombovai:

— Xepo gui rejopy 'rã pee py sete vexa'i ikuai va'e, xee ae kova'e ygua ajo'o ukaague kuaa ukaarã — he'i.

³¹ Ha'e rami rire ha'e va'e henda hery Berseba, ha'e py oura okuapy rire.*

³² Ha'e rami vy peteĩ rami ikuai aguã re jogueroayvu Berseba py. Ha'e rire Abimeleque ha'e xondaro ruvixa Ficol opu'ã vy ojevypa ju filisteu kuery vvy katy.

³³ Berseba py Abraão onhoty tamargueira. Ha'e py ojapukai guive SENHOR Nhanderuede imarã e'y va'e rery rupi.

³⁴ Filisteu kuery vvy re Abraão oiko are.

22

Nhanderuede Abraão oeko a'ãague

¹ Ha'e va'e rire Nhanderuede oeko a'ã Abraão. Ha'e vy

— Abraão — he'i ixupe.

Ombovai:

— Apy ma aĩ.

² Nhanderuede aipoe'i:

— Ejopy ndera'y peteĩ'i Isaque reayvu ete va'e, ha'e eraa Moriã vvy re. Ha'e py reme'ẽ 'rã xeivy reapy vvy, peteĩ vvyty xee aexa uka va'erã áry — he'i.

³ Ha'e gui ko'ẽ e'y mbove Abraão opu'ã. Guymba mburika oguereko katupa ma vy ogueraa mokoĩ guembiguaĩ, gua'y Isaque guive. Yxakã omboa'y uka omoendy aguã. Ha'e gui oo Nhanderuede aipoe'iague katy.

⁴ Mboapy ára ma ooa py Abraão oma'ẽ vy oexa ooxea mombyry gui.

⁵ Ha'e vy aipoe'i guembiguaĩ kuery pe:

— Peẽ kuery orerarõ 'rã apy mburika'i reve. Ha'e rã xee ma kunumi va'e reve 'rã roo kii rami. Nhanderuede romboetepa ma vy rojevny ju 'rã peẽa py — he'i.

⁶ Ha'e vy yxakã omoendy va'erã Abraão ojopy vy ombovoyi gua'y Isaque. Ha'e rã ta'y ma opo py ogueraa tata ha'e kyxe. Ha'e rami vy jogueraa.

⁷ Ooa rupi Isaque aipoe'i nguu Abraão pe:

— Xeru.

Ombovai:

— Apy ma aĩ xera'y.

Isaque oporandu:

— Apy ma tata, yxakã guive oĩ. Mamo tu oĩ vexa'i jajuka ha'e japy va'erã?

⁸ Ombovai:

— Xera'y, Nhanderuede ae 'rã ojou uka vexa'i japy va'erã — he'i. Ha'e gui oove tema joupive.

⁹ Ha'e gui ovaẽ ma Nhanderuede ijayvuague py. Ha'e py ma Abraão ojapo peteĩ altar SENHOR pe. Ha'e va'e áry omoĩ yxakã. Ha'e gui ojokua gua'y Isaque, ha'e altar áry omonheno yxakã oĩ va'e áry.

¹⁰ Opo omondouka vy ojopy kyxe gua'y ojuka aguã.

¹¹ Ha'e ramo anjo SENHOR-a guigua ijayvu nhendu yva gui. Ha'e vy aipoe'i:

— Abraão! Abraão!

ombovai vy

— Apy ma aĩ — he'i.

¹² Ha'e ramo aipoe'i:

— Eupi eme ndepo kunumi va'e rejuka aguã, mba'eve ejapo eme hexe. Mba'eta aỹ ma aikuaa Nhanderuede rononde rejererokyjea rupi reiko va'ea, ndera'y peteĩ'i va'e xeivy nereme'ẽxe e'y'i rire — he'i.

¹³ Abraão guakykue katy oma'ẽ vy oexa peteĩ vexa'i guakua re ojevura oiny va'e jai rogue hi'aĩ va'e re. Ha'e rami vy vexa'i ojopy vy oapy gua'y rekovia.

¹⁴ Ha'e va'e henda Abraão omboery “ SENHOR ojou uka 'rã”. Ha'e rami rire aỹ peve “ SENHOR pegua vvyty re ojou uka 'rã”, 'ea.

¹⁵ Ha'e gui mokoigüea ma anjo SENHOR-a guigua ijayvu Abraão pe yva gui.

¹⁶ Ha'e vy SENHOR aipoe'i:

— Xerery rupi ae aura: Nami rejapo, ndera'y peteĩ va'e xeivy nereme'ẽxe e'y'i rire ma

¹⁷ xee romoingo porã 'rã. Anhetẽ amboeta 'rã neramymino kuery jaxy-tata yva re ikuai va'e rami, ha'e ita ku'i ye'ẽ yvýry ikuai va'e hetaa rami. Neramymino kuery ipo'aka 'rã ngovaigua kuery retã re.*

¹⁸ Ha'e kuery re vy vvy regua kuery ha'e javi 'rã amoingo porã, xeayvua rejapo rire — he'i.*

¹⁹ Ha'e ramo Abraão ojovy ju guembiguaĩ kuerya py. Oo joupive guekoa Berseba katy. Ha'e py ju hekoa.

Naor ramymino kuery rery oĩa

²⁰ Ha'e va'e rire Abraão oendu “Milca voi oikuavã ma kyrigüe, nderyvy Naor ra'y” 'ea rã

²¹ Po rami hery oĩ: tujave va'e ma Uz, tyvy Buz, Arã rurã Quemuel,

²² ha'e gui Quésede, Hazo, Pildas, Jidlafe ha'e Betuel.

* 21:31 Tery Berseba ma “Ygua ouraague” 'ea.

* 22:17 Hebreus 6.14

* 22:18 Atos 3.25

²³ Betuel rajy ma Rebeca. Ha'e va'e kuery irundy meme ma Milca memby kuery ikuai, Abraão ryvy Naor ramymino kuery.

²⁴ Naor ra'yxy jevy ma Reumá hery va'e. Ha'e voi oguereko kyrígue: Teba, Gaã, Taás ha'e Maaca.

23

Sara omanoague

¹ Ha'e gui Sara ma cento e vinte e sete ma'etÿ re oikoa py

² omano Quiriatae–Arba tetã Hebrom 'epy va'e py, Canaã yvy re ae. Ha'e ramo Abraão ou vy ojae'o ipy'a vai vy.

³ Ha'e va'e rire Abraão opu'ã ju omano va'ekue ituia gui. Ha'e vy ijayvu Hete ra'y kuery ikuai va'e pe:

⁴ — Xee ma yvy mboae guigua aiko pendeyvy re. Peme'ë xe'vy ha'vy omano va'ekue ruparã pendeyvy re, xera'yxy retekue anhono porã aguã — he'i.

⁵ Hete ra'y kuery ombovai vy Abraão pe aipoe'i:

⁶ — Xeruvixa, endu ke oreayvu. Ndee ma orembyte reiko Nhanderuete huvixarã omoï va'ekue rami. Yvyra rupa iporãve va'e py tema enhono porã ndera'yxy retekue. Ore kuery regua mava'eve norome'ë e'ÿi 'rã yvyra ruparã va'e, omano va'ekue renhono porã aguã — he'i.

⁷ Ha'e ramo Abraão opu'ã vy guenapy'ã re oï ha'e va'e tekoa pygua kuery ha'e Hete ra'y kuery renonde.

⁸ Ha'e vy aipoe'i ha'e kuery pe:

— Xapy'a rei omano va'ekue anhono porã aguã pejou porã ri vy pejapyxaka. Xerekovia pejerure Zoar ra'y Efrom pe,

⁹ xe'vy ome'ë aguã Macpela re itakua oï va'e, mba'eta ijyvy apy re oï. Hepya rami porã tovende xe'vy, pendeyvy mbyte re anhono porã aguã — he'i.

¹⁰ Ha'e gui heteu regua Efrom ou vy oguapy oiny Hete ra'y kuery mbyte. Tetã kora rokë rupi oïke va'e ha'e javi oendua py ijayvu, ha'e vy aipoe'i Abraão pe:

¹¹ — Any teve xeruvixa, endu ke. Xe'vy ame'ëmba rive 'rã ndevy, itakua oï va'e guive. Xeretarã ra'y kuery pavë renonde ame'ë ndevy. Enhono porã tema omano va'ekue — he'i.

¹² Ha'e ramo Abraão guenapy'ã re oï tekoa pygua kuery renonde.

¹³ Tekoa pygua kuery oendua py ijayvu ju Efrom pe:

— Ha'e rami teï rejou porã ri ramo ajerure rejapyxaka aguã re. Ndeyvy repy 'rã xee ame'ë. Ejopy ke xepo gui. Ha'e ramo 'rãe xera'yxy retekue anhono porã ha'e py — he'i.

¹⁴ Ha'e ramo Efrom ombovai:

¹⁵ — Xeruvixa, endu ha'vy. Peteï yvy quatrocentos hatã'i va'e prata guigua ovare va'e, mba'e tu ha'e nunga xe'vy ha'e ndevy? Enhono porã katu ha'e py ndera'yxy retekue — he'i.

¹⁶ Ha'e rami Efrom ijayvu rã Abraão oendu vy oa'ã prata ha'e ome'ë ixupe. Hete ra'y kuery oexaa py ome'ë, ijayvuague rami vy quatrocentos hatã'i va'e prata guigua, mba'emo vendea oiporuve va'e regua.

¹⁷ Ha'e rami Efrom yvy Macpela re oï va'e Manre katy'i, yvy, itakua ha'e yvyra ikuai va'e ha'e javi

¹⁸ ovendepa Abraão pe, Hete ra'y kuery ha'e tetã kora rokë py ikuai va'e ha'e javive oendua py.

¹⁹ Ha'e rire Abraão onhono porã gua'yxy Sara retekue itakua py, Macpela yvy re Manre katy'i. Ha'e va'e tekoa ma Hebrom, Canaã yvy re oï.

²⁰ Ha'e rami py Hete ra'y kuery Abraão pe ovende raka'e yvy ha'e itakua oï va'e, ta'yxy omano va'ekue ruparã.

24

Guembiguai pe Abraão Isaque ra'yxyrã ojou ukaague

¹ Ha'e rire Abraão tuja'i ete ma, heta ma'etÿ ma oguereko, ha'e opa mba'e py SENHOR omoingo porã.

² Ha'e ramo Abraão ijayvu guembiguai hoo py ikuai va'e gui inhymave va'e, opa mba'e oguereko va'e re opena va'ety pe. Ha'e vy ixupe aipoe'i:

— Emoï ndepo xe'u gu'y rupi,

³ ha'e eura SENHOR Nhanderuete yva ha'e yvy ha'e javi re ipo'aka va'e rery rupi, xera'y ra'yxyrã rejou aguã teï Canaã yvy apy aikoa py ikuai va'e rajy kuery regua e'ÿ guive.*

⁴ Ha'e rã xeretarã kuerya py ae 'rã reo, ha'e va'e regua rejou aguã xera'y Isaque ra'yxyrã — he'i.

⁵ Ha'e ramo hembiguai aipoe'i:

— Xapy'a rei ma kunha va'e ndouxei 'rã xerupive kova'e yvy re. Ha'e rami rã ndera'y teve 'rã araa yvy rejuague katy?

⁶ Abraão ombovai:

— Nda'evei! Ejapo eme xera'y ha'e katy ojevvy aguã rami.

⁷ Mba'eta SENHOR Nhanderuete yva pygua xepe'a karamboae xeru ro ha'e yvy xetuiaque gui, ha'e xe'vy oura reve “Kova'e yvy ame'ë 'rã neramymino kuery peguarã”, he'i va'ekue. Ha'e rami vy nerenonde omondouka 'rã guembiguai anjo. Ha'e ramo ha'e va'e yvy gui 'rã reru xera'y ra'yxyrã.*

⁸ Ha'e gui xapy'a rei kunha va'e nderupive ndouxei ramo toaxa rive reuraague. Ha'e rami teï eraa eme xera'y ha'e katy — he'i.

* 24:3 Ha'e va'e jave ma ha'e kuery ouraa ovareve aguã opo omoï 'rã jo'u gu'y rupi oura vy. * 24:7 Gálatas 3.16

⁹ Ha'e ramo opatô Abraão 'u guy rupi hembiguai opo omoï reve oura ijayvuague rami ojapo aguã re.

¹⁰ Ha'e rami vy dez camelo hembiguai ogueraa opatô rymba, ha'e mba'emo porã ipatô ogueraa uka va'ekue ha'e javi. Mesopotâmia katy ojepe'a ovy, Naor kuery retã katy ae.

¹¹ Hetã py ovaê rai'ia py peteï ygua oï va'e yvÿry ovaê. Ha'e py omombytu'u ranhe mymba camelo henapy'ã re. Ka'aru jave kunhataïgue yy re ouaty hora omombytu'u imbokuapy.

¹² Ha'e vy aipoe'i opy'a py:

— SENHOR, xepatô Abraão Ruete reiko va'e, ajerure ndevy xepytyvô aguã, ha'e xepatô Abraão voi remboaxy aguã.

¹³ Mba'eta xee ma apy aï ygua rexei'i, kunhague kova'e tetã pygua rajy kuery yy re ouaty py.

¹⁴ Ha'e nunga rupi tove kunhataï xevy aipoe'ea va'e: “Emboguejy yryru ay'u aguã”, ha'e ramo “Ey'u, ha'e nerymba camelo kuery avi 'rã amboy'u”, he'i va'e ae toiko nerembiguai Isaque ra'yxyrã reiporavo va'ekue. Ha'e ramo 'rãe aikuaa xepatô remboaxy maa — he'i.

Rebeca reve Isaque nhovaexiague

¹⁵ Ha'e rami teri ijayvu ho'amy jave tetã gui oê ovy Rebeca, Betuel rajy va'e. Tuu ma Abraão ryke'y Naor ra'y, ha'e Milca pi'a. Peteï yryru ogueru oiny oaxi'y áry.

¹⁶ Ha'e va'e kunhataï ma iporã vaipa, ava reve joguereko va'e'y teri. Ha'e gui ygua py oo vy o'yryru omonyê ma vy ou ju.

¹⁷ Ha'e va'e jave py tembiguai oo vy ovaexi. Ha'e vy aipoe'i:

— Eme'ê yy nde'yryru gui ay'u aguã.

¹⁸ Kunha va'e ombovai:

— Ey'u katu xeruvixa — he'i. Ha'e rami vy yryru omboguejy pojava vy ojopy reve ombojero'a omboy'u aguã.

¹⁹ Omboy'upa ma vy aipoe'i:

— Anoêve ta nerymba camelo kuery pe ju ha'e javive oy'u peve — he'i.

²⁰ Ha'e rami vy ojapura reve onhoê mymba oy'uaty py, ha'e onha ju ovy ygua katy ojarave aguã. Ogueruve ju vy camelo kuery ha'e javive omboy'u.

²¹ Ava va'e ijayvu e'y re oma'ê oiny oikuaa porãxe vy SENHOR anhetê pa ha'e oguataa py oipytyvôa, tyrã anya.

²² Camelo kuery ha'e javive oy'u ma ramo ava va'e oguenoê peteï ojere'i va'e ouro guigua hatã'i va'e rami rai ipoyi va'e, ha'e mokoï poapy regua ouro guigua dez hatã'i va'e rami ipoyi va'e.

²³ Ha'e vy oporandu kunha va'e pe:

— Xee ajerure remombe'u aguã: Mava'e rajy tu ndee? Ha'eve 'rã nda'u nderu ropy ake aguã, ha'e xerupive ou va'ekue guive?

²⁴ Ombovai:

— Xee ma Betuel rajy. Xeru ma Naor ra'yxy Milca pi'a.

²⁵ Ha'e gui roguereko reta mba'emo pire ha'e nhuũ. Peke aguã voi ha'eve — he'i.

²⁶ Ha'e rami rã ava va'e guenapy'ã re oï vy ombojerovia SENHOR.

²⁷ Ha'e vy aipoe'i:

— Ta'ima'endu'a porãmby toiko SENHOR, xepatô Abraão “Xeruete” he'ia, mba'eta nomboaxy e'yï xepatô, neï anhetê rupi ndoguereko e'yï. Xeraperã re SENHOR xembo'e ra'e xepatô retarã kuery ro py ae avaê aguã — he'i.

²⁸ Ha'e rami rã kunhataï va'e onha ovy, ha'e oxy kuery ro py omombe'upa.

²⁹ Rebeca oguereko peteï okyvy Labão hery va'e. Ha'e va'e onha ovy tembiguai ygua rexei hi'aï va'e ovaexi aguã.

³⁰ Ojere'i va'e ha'e poapy regua gueindy poapy re oexa vy, ha'e heindy “Po rami ava va'e ijayvu xevy” he'i. Ha'e ramo Labão oendu vy oo ovaexi camelo reve, ygua yvy'iry hi'aïa py.

³¹ Ha'e vy aipoe'i ixupe:

— SENHOR nemoingo porã va'e, evaê ke. Mba'e re tu re'ã apy oka py? Xeropy rupi areko katupa ma, nerymba camelo ikuai aguã guive — he'i.

³² Ha'e rami vy omovaê. Camelo kuery áry gui mba'emo omboguejy va'ome'ê mba'emo pire ha'e nhuũ. Yy guive ogueru ruka ava va'e py ojoi aguã, avakue hupive ou va'ekue pe voi.

³³ Tembi'u guive ogueru.

Ha'e ramo ava va'e aipoe'i:

— Xee ndakaru reguai amombe'upa e'y re mba'erã pa ajua.

Labão ombovai:

— Emombe'u ma'vy — he'i.

³⁴ Ha'e ramo aipoe'i:

— Xee ma Abraão rembiguai aiko.

³⁵ SENHOR omoingo porã ete xepatô. Ha'e ramo oguerekopa: vexa'i, vaka, prata, ouro, guembiguai avakue ha'e kunhague, guymba camelo ha'e mburika'i.

³⁶ Sara xepatô ra'yxy kakuaa vaipa oikoa py oikuavã opi'a. Ha'e va'e pe ma tuu ome'êmba oguereko va'e ha'e javi.

³⁷ Ha'e gui xepatô xeapo karamboae aura aguã rami. Ha'e vy aipoe'i: “Xera'y ra'yxyrã rejou vy nda'evei kunhague Canaã yvy xee aikoa va'e regua rejou aguã.

³⁸ Ha'e rami 'râgue py xeru ro py 'râ reo, xeretarâ kuerya py ae. Ha'e gui 'râ reru xera'y ra'yxyrâ", he'i va'ekue xe'vy.

³⁹ Ha'e ramo xepatô pe "Xapy'a rei ma kunha va'e ndouxei 'râ xerupive", ha'e.

⁴⁰ ramo ombovai: " SENHOR hexeve aikoa va'e ombou 'râ guembiguai anjo nepytyvôarâ, xeretarâ kuery ha'e xeru ro py ae rejou aguâ xera'y ra'yxyrâ.

⁴¹ Ha'e rami avi xeretarâ kuerya py reo ramo kunha va'e ha'e kuery nombou ukaxei ramo ma toaxa rive reuraague", he'i va'ekue xe'vy.

⁴² Ha'e gui ange ygua py avâe vy aipoa'e xejeupe: "Xepatô Abraão SENHOR 'Xeruete' he'ia va'e, xapy'a rei aguataa rupi xepytyvô ramo ma,

⁴³ apy ma aï aÿ ygua vyv'y'iry. Tove kunhataï yy re ou va'e pe aipoa'e ramo 'Eme'ê na yy ruxá'ï tay'u nde'yryru gui', ha'e rã

⁴⁴ xe'vy 'Ey'u, ha'e nerymba camelo kuery pe voi ajara 'rã', he'i va'e, ha'e va'e ae toiko xepatô ra'y ra'yxyrâ SENHOR oiporavo va'ekue", ha'e va'ekue.

⁴⁵ Ha'e nunga re teri xepy'a ain'y jave oê ouvy Rebeca. Yryru oaxi'y áry ogueru va'e reve ygua py oo vy ojara yy. Ha'e gui xee aipoa'e: "Ajerure ndevy eme'ê na ay'u aguâ", ha'e

⁴⁶ ramo ome'ê pojava. Ha'e vy oaxi'y áry gui yryru omboguejy vy aipoe'i: "Ey'u, ha'e nerymba camelo kuery pe voi ame'ê 'rã oy'u aguâ", he'i. Ha'e ramo ay'u, xerymba camelo kuery voi omboy'u.

⁴⁷ Ha'e gui ixupe aporandu: "Mava'e rajy tu ndee?" Ha'e ombovai: "Betuel rajy aiko. Xeru ma Naor ra'y, Milca pi'a va'e", he'i. Ha'e ramo ixí re amoí ojere'i va'e, ha'e rã ipoapy re ma poapy regua amoí.[†]

⁴⁸ Ha'e vy xerenapy'ã re aï vy ambojerovia SENHOR. Xema'endu'a porã SENHOR xepatô Abraão "Xeruete" he'ia va'e re, mba'eta tape ha'evea rupi xerereko rire, xepatô retarã rajy ae ajou aguâ rami ta'y ra'yxyrâ.

⁴⁹ Ha'e gui aÿ ma xapy'a rei xepatô pe iporã va'e ha'e anhetê rupigua ri pejapoxe vy pemombe'u xe'vy. Ha'e rami e'y ramo pemombe'u porã avi xe'vy, xee aikuaa aguâ jaiporu kuaa regua katy aa aguâ, e'y vy jaiporu kuaa e'yã katy — he'i.

⁵⁰ Ha'e ramo Labão ha'e Betuel ombovai:

— Ha'e nunga ma SENHOR gui ae oiko ra'e. Ore ma mba'eve rei oreayvurã ndoroikuaai, anhetê va'e remombe'u ramo.

⁵¹ Upe hiny Rebeca nerenonde. Eraa, tapeo. Toiko nepatô ra'y ra'yxyrâ, SENHOR ijayvuague rami vy — he'i.

Rebeca re Isaque omendaague

⁵² Ha'e rami ombovai rã Abraão rembiguai oendu vy guenapy'ã re oï SENHOR renonde.

⁵³ Ha'e oguenoê mba'emo porã: ouro, prata guigua ha'e tupyja. Rebeca pe ome'êmba. Ikyvy pe, ix'y pe avi ome'ê mba'emo porã.

⁵⁴ Ha'e rire mae okaru ha'e oy'u okuapy, avakue hupive ou va'ekue reve. Pytũ oaxa okuapy.

Ko'ê rai ramove tembiguai opu'ã vy aipoe'i:

— Xemondouka ju xepatôa katy.

⁵⁵ Ha'e rã ikyvy ha'e ix'y aipoe'i:

— Tove, kunha va'e topytave'i ranhe dez ára ri jepe. Ha'e gui mae ma 'rã oo — he'i.

⁵⁶ Ha'e ramo aipoe'i:

— Nda'evei ha'e rami aguâ, aguataa rupi SENHOR xepytyvô rire. Xemondouka ju xepatôa katy.

⁵⁷ Aipoe'i okuapy:

— Nhaenoï ha'vy kunhataï va'e, ixugui ae nhaendu aguâ — he'i.

⁵⁸ Ha'e rami vy gueindy Rebeca oenoï okuapy vy oporandu ixupe:

— Reoxe pa kova'e ava reve?

Ha'e ramo

— Aa 'rã — he'i.

⁵⁹ Ha'e ramo omondouka gueindy Rebeca hembiguai reve, Abraão rembiguai ha'e avakue hupive ou va'ekue reve oo aguâ.

⁶⁰ Ogueroayvu porã imondovy Rebeca. Ha'e vy aipoe'i:

— Ndee ma oreireindy. Tanememby reta ete. Tove neremiarirô kuery ta'ipo'aka ngovaigua kuery retã re — he'i.

⁶¹ Ha'e ramo Rebeca opu'ã guembiguai kunhataïgue reve. Camelo áry oïmba vy oje'oi ava va'e rakykue. Ha'e rami py Abraão rembiguai ogueraa Rebeca.

⁶² Ha'e va'e jave Isaque ou oiny Beer-Laai-Roi katy gui, Neguebe yvy re ju oiko aguâ.

⁶³ Ka'aru'i jave oo ovyvy rupi oikuaa pota aguâ. Ha'e gui oma'ê vy oexa camelo árygua kuery ou oiny rã.

⁶⁴ Rebeca voi oma'ê vy oexa Isaque. Ha'e rami vy camelo áry gui ogejy vy

⁶⁵ oporandu Abraão rembiguai pe:

— Mava'e ava tu ou oiny yvy rupi nhandea katy?

— Xepatô rima ou — he'i ombovai vy. Ha'e ramo tova mo'ãa oguenoê vy omo'ã ngova.[‡]

⁶⁶ Isaque pe tembiguai omombe'u mba'emo ojapo va'ekue ha'e javi.

[†] 24:47 Ha'e va'e jave py kunhague omombu uka 'rã oxí, aÿgua onambi omombu ukaa rami avi, ijegua va'e omoï aguâ.

[‡] 24:65 Rebeca ma ngova ojao'i omerã Isaque omboete vy, ha'e kuery reko rami vy.

67 Ha'e ramo Isaque ma oxy Sara rogue py ogueraa Rebeca. Hexe omenda ramo ta'yxy oiko. Isaque oayvu ete. Ha'e rami vy mae ipy'a porã ju ixy omanoague gui.

25

1 Crônicas 1.32,33

1 Abraão omenda ju kunha mboae Quetura hery va'e re.

2 Ha'e va'e ma oikuavã Zinrã, Jocsã, Medã, Midiã, Isbaque ha'e Suã.

3 Jocsã ra'y kuery ma Sabã ha'e Dedã. Dedã ra'y kuery ma Assurim, Letusim ha'e Leumim.

4 Midiã ra'y kuery ma Efã, Efer, Enoque, Abida ha'e Elda. Ha'e va'e kuery ha'e javi Quetura pi'a kuery.

5 Ha'e rã Isaque pe ae ma Abraão ome'ẽ oguereko va'e ha'e javi.

6 Gua'yxy jevy pi'a kuery pe ma mba'emo ome'ẽ avi va'eri oikove teri reve omondoukapa gua'y Isaque-a gui mombvry. Amboae vvy katy omondouka kuaray oua katy.

Abraão omanoague

7 Abraão ma cento e setenta e cinco ma'etỹ re oiko.

8 Ha'e gui Abraão ipytuẽ atã vy omano kakuaa ete reve. Ha'e ramo heraa tamoĩ kuerya py.

9 Ha'e ramo ta'y Isaque ha'e Ismael onhono porã Macpela py itakua oĩ va'e py. Ha'e va'e vvy ma Manre katy'i oĩ, heteu regua Zoar ra'y Efram mba'e va'ekue.

10 Ha'e va'e vvy ma Hete ra'y kuery gui Abraão ojogua va'ekue. Ha'e py ae onhono porã Abraão, ta'yxy Sara vvyry.

11 Abraão omano rire ta'y Isaque ju Nhanderueete omoingo porã. Isaque ma Beer-Laai-Roi katy'i oiko.

1 Crônicas 1.28-31

12 Po rami Ismael ramymino kuery rery. Ha'e ma Abraão ra'y, Sara rembiguai Agar Egito guigua pi'a.

13 Po rami ma Ismael ra'y kuery rery, jypy'i itui'i va'ekue guive. Ismael ra'y ppy ma Nebaiote, ha'e gui Qedar, Adbeel, Mibsão,

14 Misma, Dumã, Massã,

15 Hadade, Tema, Jetur, Nafis ha'e Quedemã.

16 Ha'e va'e kuery ma Ismael ra'y kuery. Ha'e kuery rery ma hetã ha'e hekoa rery joo ramigua. Doze huvixa ikuai guetarã kuery re opena va'e.

17 Ismael ma cento e trinta e sete ma'etỹ re oiko. Ha'e vy omano. Ha'e rã heraa tamoĩ kuerya py.

18 Ta'y kuery ma Havilã vvy guive Sur peve ikuai, Egito katy'i, Assíria katy jaa vy jaaxa va'e. Guetarã kuery gui mombvry ikuai.

Isaque ra'y kuery itui'iaque

19 Po rami ma Abraão ra'y Isaque ra'y kuery. Abraão ra'y ma Isaque.

20 Isaque quarenta ma'etỹ oguerekoa py omenda Rebeca re. Ha'e va'e ma arameu regua Betuel Padã-Arã pygua rajy, arameu regua Labão reindy.

21 Ha'e gui Isaque ra'yxy imemby va'erã e'y oiko ramo ojerure SENHOR pe. Ha'e rã ojerurea SENHOR oendu ramo ta'yxy Rebeca oguereko'i kyrĩ va'e.

22 Hyru'i py kyrĩgue joe opu'ã okuapy. Ha'e ramo Rebeca aipoe'i:

— Ha'e rami ri ramo mba'erã tu xee aiko? — he'i. Ha'e rami vy oporandu SENHOR pe.

23 SENHOR ombovai:

— Mokoĩ regua rima nderye py oĩ, itui'i guive mokoĩ regua 'rã oiko joo rami e'y ikuai va'e. Peteĩ regua ma amboae gui ipõ'akave 'rã, ha'e tujave va'e oiko 'rã kyrĩve va'e rembiguai — he'i.*

24 Ha'e gui kyrĩ va'e oikuavã aguã ára ovaẽ ramo mokoĩ oĩ ra'e hyru'i py.

25 Jypygua ma pytã rei, haguepa rei va'e oiko. Ha'e nunga rupi omboery Esaú.*

26 Ha'e rire'i ma tyvy ju oiko guyke'y Esaú pyta re ojopy reve. Ha'e nunga rupi omboery Jacó.† Isaque sessenta ma'etỹ oguerekoa py ta'yxy Rebeca oikuavã'i.

Esaú jypygua peguarã va'e ovendeague

27 Ha'e gui avakue'i tujapave ma oje'oiyv. Esaú ma imba'ejuka rupi oiko ka'aguy re. Ha'e rã Jacó ma oiko rive, oo'i py oĩ va'e.

28 Isaque oayvu vaipa Esaú, xo'o ojuka va'ekue ho'uxe vai vy. Ha'e rã Rebeca ma Jacó oayvuve.

29 Ha'e gui Jacó mba'emo'i ombojy oiny jave Esaú ou oiny ka'aguy gui inhembayai vaipa reve.

30 Ha'e vy aipoe'i:

— Eme'ẽ xevy upe pytã rei va'e rembojy va'ekue kyrĩ'i ha'u aguã, xenhembyayi vaipa ma — he'i. Ha'e nunga rupi omboerya Edom.‡

31 Ha'e ramo Jacó aipoe'i:

— Evende ranhe xevy jypygua peguarã rejopy va'erã va'e.§

32 Tyke'y ombovai:

— Xee ma amano ta ma. Mba'erã tu ovare xevy jypygua peguarã va'e? — he'i.

* 25:23 Romanos 9.12 † 25:26 Tery Jacó ma "Jopyta jopya" 'ea, nhombotavya jaikuaa aguã.

‡ 25:30 Tery Edom ma "Pytã va'e" 'ea. § 25:31 Ha'e kuery reko rami vy tuu omano vy gua'y tujave va'e pe oeja retave 'rã iporãve va'e anho, ha'e rã kyrĩve va'e pe ma mboapy'ive 'rã oeja.

³³ Ha'e ramo Jacó

— Eura ranhe xevy — he'i ramo oura.

³⁴ Ha'e gui Esaú pe Jacó ome'ê mbojape ha'e lentilha mimoĩ. Ha'e rã ho'upa ma vy opu'ã ovy. Ha'e rami py Esaú nombovarei jypygua pegua ojopy aguã va'ekue.

26

Filisteu kuery yvy re Isaque oiko jave guare

¹ Ha'e gui oiko ju karuai yvy re, jypy'i Abraão oiko teri jave karuai oiko va'ekue ramigua. Ha'e nunga rupi Isaque oo Gerar katy, filisteu kuery ruvixa Abimeleque-a py.

² Ha'e gui ixupe SENHOR ojexa uka vy aipoe'i:

— Egeuejy eme Egito katy. Epyta yvy xee aexa uka va'e py.

³ Ha'e py ae eiko. Ha'e rã xee aiko 'rã ndereve, romoingo porã 'rã guive. Mba'eta ndevy ha'e ndera'y kuery pe ju 'rã ame'ê kova'e yvy ha'e javi. Ajapopa 'rã nderu Abraão pe auraague.

⁴ Ha'e rami vy neramymino kuery amboeta 'rã jaxy-tata yva re ikuai va'e hetaa rami. Ha'e kuery pe ju teĩ ame'ê kova'e yvy ha'e javi. Neramymino kuery re vy amoingo porã 'rã ha'e javi regua yvy re ikuai va'e,

⁵ Abraão xenhe'ê rendu rire. Ha'e ma ojapopa ajapo uka va'e, aipota va'e, lei hekorã aeja va'ekue ha'e javi — he'i.*

⁶ Ha'e ramo Isaque ma Gerar py ae opyta.

⁷ Ha'e va'e tekoa pygua kuery ta'yxy re oporandu rã “Xereindy” he'i 'rã, “Xera'yxy” he'i aguã okyje vy. Ojeupe ae “Avakue tekoa pygua xejuka e'ỹ aguã Rebeca oayvu vy” he'i, ta'yxy iporã vaipa ramo.

⁸ Are ma ha'e py Isaque oiko py filisteu kuery ruvixa Abimeleque oma'ê peteĩ okê'i rupi. Ha'e vy oexa Isaque gua'yxy Rebeca reve joayvu ramo.

⁹ Ha'e gui Abimeleque oenoĩ uka Isaque. Ha'e vy aipoe'i:

— Anhetê ae kunha va'e ndera'yxy ra'e! Mba'e re tu ixupe “Xereindy” 're?

Isaque ombovai:

— Mba'eta “Ikáuxa xejukaa e'ỹ aguã”, ha'e vy — he'i.

¹⁰ Abimeleque aipoe'i:

— Mba'e re tu ha'e rami rejapo orere? Ndayxy 'rãgue amongue apygua ndera'yxy reve ojejavu aguã. Ha'e rami va'e rire ndee orembojeyavy vaipa ete 'rãgue — he'i.

¹¹ Ha'e gui guetarã kuery ha'e javive pe ju Abimeleque ijayvu:

— Amongue kova'e ava re ojapo vai va'e, ha'e e'ỹ vy ta'yxy re opena va'e ma anhetê omano 'rã — he'i.

¹² Ha'e rire ha'e va'e yvy re Isaque oma'etỹ. Ha'e va'e ma'etỹ re ae peteĩ-teĩ gui omono'õ cem, SENHOR omoingo porã ramo.

¹³ Ha'e rami vy oguerekopave tema ovy, oiko porã, oguerekopa ete peve.

¹⁴ Oguereko vxa'ĩ, vaka, oguereko reta guembiguai. Ha'e ramo filisteu kuery nda'evei rei ikuai hexe.

¹⁵ Ha'e rami vy ombotpya ygua tuu Abraão oikove teri rã hembiguai kuery ojo'o va'ekue, yvy omonyẽmba rive.

¹⁶ Abimeleque voi aipoe'i Isaque pe:

— Ejepe'a orerekoa gui, ore kuery gui ndepo'akapave ma guive ramo — he'i.

¹⁷ Ha'e rami rã Isaque oo ha'e gui, Gerar yvy'ã guy py ju oiko aguã. Ha'e py ae hekoa.

¹⁸ Ha'e py peteigue ju Isaque ojo'o uka yguarã Abraão oikove teri rã ojo'o pyre, Abraão omano rire filisteu kuery ombotpya va'ekue. Ygua peteĩ-teĩ omboery tuu omboeryague rupi ae.

¹⁹ Isaque rembiguai kuery avi yvy'ã guy py ojo'o vy ojou yvu porã oĩa.

²⁰ Ha'e rã Gerar pygua vxa'i re opena va'e kuery joguero'a okuapy Isaque rymba kuery re opena va'e reve, “Kova'e yy ma oremba'e” he'i vy. Ha'e ramo ha'e va'e ygua Isaque omboery Esequé, hexeve joguero'a ramo.*

²¹ Ha'e gui amboae ygua ju ojo'o. Ha'e va'ekue re voi joguero'a okuapy. Ha'e nunga rupi ha'e va'e omboery Sitna.†

²² Ha'e gui oove vy amboae ju ojo'o yguarã. Ha'e va'e re ma ndajoguero'avei vy omboery Reobote,‡ “Aỹ SENHOR nhanderekoarã ome'ê ma ramo nhandekuai porã 'rã kova'e yvy re” he'i vy.

²³ Ha'e gui Berseba katy ju oo.

²⁴ Ha'e va'e pyávy SENHOR ojexa uka ixupe. Ha'e vy aipoe'i:

— Xee ma nderu Abraão Ruete. Ekyje eme, mba'eta ndereve voi xee aiko. Romoingo porã 'rã, ha'e neramymino kuery amboeta 'rã xerembiguai Abraão re vy — he'i.

²⁵ Ha'e ramo ha'e py ojapo peteĩ altar SENHOR pe, ha'e ojapukai hery rupi. Ha'e gui oupi oĩ aguã ha'e py ae hekoa vy. Hembiguai kuery ojo'o ju yguarã ha'e py.

Abimeleque reve Isaque peteĩ rami ikuai aguã ojapoague

²⁶ Ha'e rire Gerar gui oo Abimeleque, irũ Ausate ha'e xondaro ruvixa Ficol reve.

²⁷ Ovaẽmba ramo Isaque aipoe'i ha'e kuery pe:

— Mba'erã tu peju xea py? Xere napendea'ei rei vy penembyte gui xepe'a va'ekue ri.

²⁸ Ha'e kuery ombovai:

* 26:5 Atos 3:25 † 26:20 Tery Esequé ma “Joguero'aa” 'ea. ‡ 26:21 Tery Sitna ma “Ija'e e'ỹa” 'ea. § 26:22 Tery Reobote ma “Heta ikuai aguã” 'ea.

— Roexa porã SENHOR anhetê ndereve oikoa. Ha'e rami vy aiporo'e: “Aÿ ke jaura ore kuery ndereve, jajapo petei rami nhandekuai aguã.”

²⁹Eura ke orevy rejapo vai e'ÿ aguã, ore petei henda py ndere ndorojapo vaia rami avi. Ha'evea rami anho rojapo ndere, romondouka porã guive karamboae. Ndee ma SENHOR omingo porã va'e reiko — he'i.

³⁰Ha'e ramo Isaque ojapo ngaru ha'e kuery pe. Okaru ha'e oy'u okuapy.

³¹Ko'ê rai opu'ã vy oura okuapy joupe-upe. Ha'e gui Isaque omoundoukapa rã ha'e kuery oje'oi porã.

³²Ha'e va'e árave Isaque rembiguai kuery ou vy ixupe omombe'u ygua ojo'o va'ekue. Ha'e vy aipoe'i: — Rojow ma yy — he'i okuapy.

³³Ha'e va'e ygua ma omboery Seba. Ha'e rami rire ha'e va'e tetã rery aÿ reve Berseba.

³⁴Ha'e gui Esaú quarenta ma'et'ÿ oguerekoa py gua'yxyrã ojow moko'i: hetew regua Beerri rajy Judite ha'e hetew regua Elom rajy Basemate.

³⁵Ha'e kuery mokoïve re Isaque ha'e Rebeca nda'evei ete ikuai.

27

Isaque gua'y kuery Jacó ha'e Esaú ogueroayvu porãague

¹Isaque tujai'í vy ndoexa kuaavei, noma'ê atãvei ma vy. Gua'y tujave va'e Esaú oenoï vy aipoe'i:

— Xera'y.

Ombovai:

— Apy ma aï — he'i.

²Tuu aipoe'i ixupe:

— Xetuja'i ma, amano aguã ára ovaê ovuy teï ndaikuaai araka'e paa.

³Aÿ eraa nerembiporu hu'y ryrur ha'e nderapa, tereo ka'aguy re, ha'e ejuka xo'o xevy.

⁴Ejapo tembi'u hee va'e xee ha'uxea ramigua, eru ha'u aguã. Mba'eta amano e'ÿ mbove xee rogueroayvu porã 'rã — he'i.

⁵Ha'e ramo Rebeca oendu gua'y Esaú reve Isaque ijayvu rã. Ha'e ramo Esaú ka'aguy re xo'o ojuka aguã oo ma ramo

⁶Rebeca aipoe'i opi'a Jacó pe:

— Aendu kuri nderyke'y Esaú reve nderu ijayvu vy

⁷“Eru xo'o, ha'e ejapo tembi'u hee va'e ha'u aguã, amano e'ÿ mbove SENHOR renonde rogueroayvu porã aguã”, he'i rã.

⁸Aÿ ma xepi'a, endu xeayvu, ejapo ajapo uka va'e.

⁹Tereo mymba kora py, eru mokoï kavara'i iporã va'e. Ha'e va'e gui ma xee ajapo 'rã tembi'u hee va'e nderu pe, ha'e ho'uxea ramigua ae.

¹⁰Ha'e gui reraa 'rã nderu pe ho'u aguã, omano e'ÿ mbove ndee ae ndereroayvu porã aguã — he'i.

¹¹Jacó aipoe'i oxy Rebeca pe:

— Ha'e rami avi ke'y Esaú ma haguepa rei va'e, ha'e rã xee ma ha'e ramigua e'ÿ.

¹²Xapy'a rei xeru opokopa 'rã xere, oikuaa pota vy. Ha'e rami vy oikuaa 'rã ambotavyxea, ha'e ijayvu vai 'rã xere, xereroayvu porã 'rãgue py — he'i.

¹³Ha'e rã ixu ombovai:

— Xepi'a, tove xere ae toï ijayvu vaia. Ndee ma ejapo xeayvua. Tereo, ha'e eru — he'i.

¹⁴Ha'e ramo oo. Mymba ojuka vy ogueru oxy pe. Ha'e rã ojapo tembi'u hee va'e, tuu ho'uxea ramigua.

¹⁵Ha'e gui Rebeca ogueru opi'a tujave va'e Esaú mba'e ao iporãve va'e, ngoo py oguereko va'e. Ha'e va'e py ma opi'a kyrive va'e Jacó ju omonhemonde.

¹⁶Kavara rague py onhovã ipo ha'e ijaju'y ndagueia rupi.

¹⁷Ha'e vy opi'a Jacó pe ome'ê tembi'u hee va'e ha'e mbojape ojapo va'ekue.

¹⁸Ha'e gui nguua py Jacó oo. Ha'e vy aipoe'i:

— Xeru.

Ombovai:

— Apy ma aï. Mava'e tu ndee, xera'y?

¹⁹Jacó ombovai:

— Xee ma Esaú, ndera'y tujave va'e. Ajapo ma rejapo uka va'ekue. Evy ke, eguapy, he'u ajuka va'ekue, xereroayvu porã aguã — he'i.

²⁰Ha'e ramo Isaque aipoe'i gua'y pe:

— Xera'y, mba'exa vy tu rejow voi'i ete ri rejuka va'erã?

Ombovai:

— Mba'eta SENHOR nderuete ombou xerenonderã — he'i.

²¹Ha'e ramo Isaque aipoe'i Jacó pe:

— Enhemboja ha'vy xea py. Tapoko ndere xera'y, Esaú ete pa reikoa tyrã anya aikuaa aguã — he'i.

²²Ha'e ramo nguui Isaque-a katy'i Jacó onhembojave. Ha'e ramo hexe opokopa vy aipoe'i:

— Ndeayvua ma Jacó rami ndeayvu, ha'e rã ndepo ma Esaú rami ae ndepo — he'i.

²³Ndoikuaai, ipo haguepa rei ramo tyke'y Esaú po rami. Ha'e rami vy ogueroayvu porã.

²⁴Ha'e vy aipoe'i ixupe:

— Ndee ma xera'y Esaú ae pa?

Ombovai:

— Tá, ha'e ae xee — he'i.

²⁵ Ha'e ramo aipoe'i:

— Xera'y, eru ha'vy xea py rejuka va'ekue ha'u aguã, rogueroayvu porã aguã — he'i. Ha'e gui xo'o ogueru ramo ho'u. Vinho avi ogueru ramo oy'u.

²⁶ Tuu Isaque aipoe'i:

— Xera'y, evaêve'i ju ke, xerayvu — he'i.

²⁷ Ha'e rã onhemboja vy oyavvu. Ha'e ramo tuu oetũ ijao reakuã. Ha'e vy ogueroayvu porã vy aipoe'i:

— Xera'y, reakuã ma mba'ety SENHOR omoingo porã va'e reakuã.

²⁸ Nhanderuete tome'ê ndevy yxapy yva gui, tomoingo porã ndevvy re henhoĩ va'e. Tome'ê vaipa trigo ha'e uva pyau.

²⁹ Tove amboae regua nerembiguai ta'ikuai, tanemboete. Tove nderyvy kuery re tandepo'aka, ndexy pi'a kuery guenapy'ã re toĩ nerenonde. Tove ndere ijayvu vai va'e toiko ayvu vaipy, ha'e rã ndereroayvu porã va'e ma ayvu porãmbu toiko — he'i.

³⁰ Gua'y Jacó Isaque ogueroayvu porãmba ma ramo nguua gui oê ovv ramove tyke'y Esaú ovaê okaxa vy ooague gui.

³¹ Ha'e avi tembi'u hee va'e ojapo va'ekue ogueru nguua py. Ha'e vy aipoe'i ixupe:

— Evy ke xeru, he'u ndera'y ojuka va'ekue, xereroayvu porã aguã — he'i.

³² Tuu Isaque oporandu:

— Mava'e tu ndee?

Ombovai:

— Xee ma ndera'y tujave va'e Esaú — he'i.

³³ Ha'e ramo Isaque oryryipa reve aipoe'i:

— Mava'e tu ha'vy xo'o ojuka va'ekue ogueru ra'e? Ndee reju e'ÿ mbove xee ha'upa ma, ha'e aroyvvy porã guive. Ha'e rami rire ayvu porãmbu ae 'rã oiko — he'i.

³⁴ Ha'e rami tuu ijayvu rã Esaú oendu vy nda'evei vaipa. Ha'e vy aipoe'i nguu pe:

— Xeru, xee voi ta'vy xereroayvu porã 'rãgue.

³⁵ Tuu ombovai:

— Ndervyvy xembotavy reve ou vy ojereroayvu porã uka kuri nderekovia — he'i.

³⁶ Ha'e ramo Esaú aipoe'i:

— Ha'evea rami e'ÿ ri ty'y ha'e hery Jacó? * Mba'eta mokoïgue ma xembotavy. Xegui jypygua peguarã ajopy 'rã va'ekue oipe'a rire aÿ ma xerekovia ju ojereroayvu porã uka. Ndererekovei teve neĩ peteĩ henda py ri jepe xereroayvu porã aguã?

³⁷ Ha'e ramo tuu Isaque ombovai Esaú pe:

— Xee amoĩ ae ma ndere ipo'aka va'erã. Tyvy kuery hembiguai ikuai aguã rami ajapo. Trigo ha'e uva pyau ojoupa aguã rami xeyvvy. Ha'e gui ndee xera'y, mba'e tu aÿ ajapo ta ndevy? — he'i.

³⁸ Esaú aipoe'i nguu pe:

— Xeru, neĩ peteĩ henda py xereroayvu porã aguã voi teve ndererekoi? Xereroayvu porã avi nho ke — he'i. Ha'e gui Esaú ijayvu atã vy ojae'o.

³⁹ Tuu Isaque ombovai:

— Ndee ma yvy porã gui momyrya py 'rã reiko, yxapy yvate gui ho'a e'ÿa rupi.

⁴⁰ Kyxe re rejeroivia rupi 'rã reiko nderyvy rembiguai. Ha'e rami teĩ repu'ã vy reo jepe 'rã ndere ipo'akaa gui — he'i.

⁴¹ Ha'e rire gua'y Jacó tuu ogueroayvu porã rire Esaú ivai guyvvy pe. Ha'e vy aipoe'i ojeupe: “Xeru omano aguã ovaê rai'i ma. Ha'e va'e rire ma ajuka 'rã xeryvy Jacó”, he'i.

⁴² Rebeca oendu ha'e rami ipi'a tujave va'e Esaú ijayvuague omombe'ua rã. Ha'e rami vy oenoĩ uka opi'a kyrĩve va'e Jacó. Aipoe'i ixupe:

— Ma'ê, nderyke'y Esaú ndejukaxe ipy'a porã aguã.

⁴³ Ha'e gui aÿ ma xepi'a, endu xeayvua. Tereo xekyvvy Labão ro katy Harã py.

⁴⁴ Hexeve eiko are nderyke'y ivaiague oaxa peve,

⁴⁵ nderyke'y re rejapoague re hexarai vy nda'ivaivei peve. Ha'e gui ma amondouka 'rã ndereruarã. Mba'e re tu peteĩ árave amokanhy ta xepi'a kuery mokoïve? — he'i.

⁴⁶ Ha'e gui ome Isaque pe ju Rebeca aipoe'i:

— Xee ma ndavy'ai Hete rajy kuery kova'e yvy re ikuai va'e re. Xapy'a rei Jacó ju ha'e kuery va'e regua gua'yxyrã ojou ramo mba'erã tu aikove ta? — he'i.

28

Jacó ojavaague

¹ Ha'e ramo Isaque oenoĩ Jacó. Ogueroayvu porã reve omondouka. Ha'e vy aipoe'i:

— Nda'evei ndera'yxyrã rejou aguã apy Canaã yvy re ikuai va'e rajy kuery regua.

² Ha'e rami 'rãgue py epu'ã, tereo Padã-Arã katy, ndexy ru Betuel ro katy. Ha'e py ae 'rã ndera'yxyrã rejou ndexy kyvy Labão rajy kuery regua.

* 27:36 Tery Jacó ma “Nhombotavya” 'ea (25.26).

³ Tove Nhanderuete ipo'akapa va'e tanemoingo porã, toamboeta neramymino kuery, heta regua pendekuai aguã.

⁴ Tove ndere ju toiko Abraão ogueroayvu porãague, ha'e gui neramymino kuery re ju, vvy reikoa Nhanderuete Abraão pe ome'ê va'ekue re ndee ju nderekoa aguã — he'i.

⁵ Ha'e rami vvy Isaque omondouka Jacó Padã-Arã katy Betuel ra'y Labão ro katy. Ha'e va'e ma Arã pygua oiko, Jacó ha'e Esaú xy Rebeca kyvy.

⁶ Ha'e gui Esaú oexa gua'y Jacó Isaque ogueroayvu porã reve Padã-Arã katy omondouka rã gua'yxyrã ha'e gui ojou aguã. Mba'eta ixupe “Nda'evei Canaã vvy re ikuai va'e rajy kuery regua rejou aguã ndera'yxyrã” he'i imondovy va'ekue.

⁷ Ha'e vvy Esaú oexa avi Jacó nguu ha'e oxy ayvu oendu vvy Padã-Arã katy oo rã.

⁸ Oikuaa avi tuu Isaque kunhague Canaã vvy pygua ndojou porãia.

⁹ Ha'e rami vvy Abraão ra'y Ismael rekoa py Esaú oo vvy gua'yxyrã kuery ojou va'ekue gui ojouve ju Ismael rajy Maalate, Nebaiote reindy.

Jacó pe tape pyrô-pyrôa'i oexa ukaa ague

¹⁰ Ha'e gui Jacó ma Berseba gui ojepe'a vy oo oiny Harã katy.

¹¹ Peteĩ henda py ovaëa py oaxa pytũ, kuaray oike ma ramo. Peteĩ ita ha'e py itui va'e ojou vvy omoĩ oakã ngytarã. Ha'e vvy onheno oupy vvy oke.

¹² Oexa ra'u vvy oexa peteĩ tape pyrô-pyrôa'i vvy gui yva peve oo va'e. Ha'e va'e rupi anjo kuery Nhanderuetea guígua ojeupi ha'e oguejy okuapy.

¹³ Ha'e va'e gui mombyry e'ÿ hi'aĩ SENHOR. Ha'e vvy aipoe'i ixupe:

— Xee ma SENHOR neramoĩ Abraão ha'e Isaque Ruete. Vvy aÿ renheno rejupya ma ame'ê 'rã ndevy ha'e neramymino kuery pe.

¹⁴ Neramymino kuery ma vvy ku'i rami 'rã heta. Kuaray oikea katy guive 'rã hekoa kuaray oua katy peve, ha'e ijapu'a'ia katy guive ipuku-a katy peve. Ndere ha'e neramymino kuery re vvy amoingo porã 'rã ha'e javi regua vvy re ikuai va'e.

¹⁵ Xee ma aiko ndereve, ndere apena 'rã mamõ rã reikoa rupi. Rojapo 'rã kova'e vvy re rejevy ju aguã rami. Noroipytyvõ e'ÿi 'rã, xeayvuague ajapopa peve — he'i.

¹⁶ Ha'e gui Jacó okeague gui omyĩ vvy aipoe'i:

— Anhetê SENHOR oĩ ra'e apy. Xee ma ndaikuaai.

¹⁷ Nda'evei rima ra'e apy! Apy ma Nhanderuete ro, yva rokê ael — he'i ojererokyje reve.

Betel py Jacó ita omopu'ãague

¹⁸ Ko'ê raĩ ramove Jacó opu'ã vvy ojopy ita oakã ngytarã omoĩ va'ekue, ha'e omopu'ã ijytarã rami. Hi'áry onhoë azeite.

¹⁹ Ha'e va'e katy'i tetã oĩ va'e yma Luz hery va'ekue ma Betel ju omboery.*

²⁰ Ha'e gui Jacó onhemboayvu vvy aipoe'i:

— Xapy'a rei xereve Nhanderuete oiko vvy xere opena ramo, xapy'a rei mbojape ha'e ao anhemonde aguã xeve omé'ê ramo

²¹ xeru ro katy ju ajevvy porã aguã rami, ha'e ramo SENHOR ae 'rã Xeruete.

²² Ha'e gui kova'e ita ijytarã rami amopu'ã va'ekue ma oĩ 'rã Nhanderuete rorã. Ha'e gui mba'emo rejou uka va'e nhavõ gui xee ame'ê kuerei 'rã dízimo ndevy — he'i.

29

Raquel reve Jacó nhovaexiague

¹ Jacó oguatave vvy ovaë kuaray oua katy ikuai va'e kuery vvy re.

² Oma'ê vvy oexa peteĩ ygua ojo'o pyre oĩ va'e. Oexa avi ijyvyry mboapy henda py vexa'i ijaty va'e. Onhenomba rei okuapy, mba'eta ha'e va'e ygua gui ae 'rã opena va'e kuery ome'ê guymba kuery oy'u aguã. Ygua juru áry oĩ ita tuvixa va'e imbotyarã.

³ Ha'e py mymba kuery ijatypa jave opena va'e kuery oi-pe'a 'rã ita ygua juru gui. Ha'e vvy vexa'i kuery omboy'upa ma vvy omoĩ ju 'rã oĩaty py.

⁴ Jacó oporandu ha'e kuery pe:

— Xeryvy kuery, mamogua tu peë kuery?

Ombovai:

— Ore ma Harã pygua — he'i okuapy.

⁵ Jacó oporandu ha'e kuery pe:

— Peikuaa pa Naor ra'y Labão?

Ombovai vvy

— Roikuaa ri — he'i.

⁶ Jacó oporanduve ju:

— Ha'e oiko porã pa?

— Tá, oiko porã. Pee hymba kuery vexa'i reve ou oiny va'e ma tajy Raquel ae — he'i okuapy.

⁷ Ha'e ramo aipoe'i ha'e kuery pe:

* 28:19 Tery Luz ma português pygua ayvu “Luz” e'ÿ raka'e, ha'e kuery ayvu py “Amêndoa'y” 'ea. Ha'e rã tery Betel ma “Nhanderuete ro” 'ea.

— Ndaka'arui teri, novaëi teri mymba kuery vexa'i pemboty aguã. Pemboy'u vexa'i kuery, ha'e peraa pemongaruve — he'i.

⁸ Ha'e kuery ombovai:

— Ore kuery pe nda'evei, mymba kuery ijatypa e'ÿa ja. Ha'e ramo 'rãe roipe'a ita ygua juru gui romboy'u aguã — he'i okuapy.

⁹ Ha'e kuery reve ijayvu teri reve ovaë ouvy Raquel nguun rymba kuery reve, mba'eta vexa'i re openaa rupi oiko.

¹⁰ Ha'e gui oxy kyvy Labão rajy Raquel hymba vexa'i kuery reve ou oiny rã Jacó oexa vy oo oipe'a ita ygua juru gui. Ha'e rami vy omboy'u oxy kyvy Labão rymba vexa'i kuery.

¹¹ Ha'e nunga Jacó ojapopa vy Raquel oayvu vy ojae'o.

¹² Ha'e vy Raquel pe Jacó omombe'u tuu retarã ra'y ha'e Rebeca pi'a oikoa. Ha'e ramo kunha va'e onha ovy nguun pe omombe'u aguã.

¹³ Heindy pi'a Jacó ovaëague Labão oendu vy onha reve oo ovaexi. Oikuavã, oayvu, ha'e ngoo py ogueraa. Ha'e ramo Labão pe Jacó omombe'upa oguataa rupi oiko va'ekue.

¹⁴ Labão aipoe'i ixupe:

— Anhetê ndee xekãgue ha'e xero'o regua reiko — he'i. Ha'e ramo Jacó pete'i jaxy re oiko hexeve.

¹⁵ Ha'e rire Labão aipoe'i Jacó pe:

— Ndee xeretarã reiko va'eri ha'evea rami teve remba'eapo rive xevy? Emombe'u ke mba'e re 'rã tu remba'eapo — he'i.

¹⁶ Labão oguereko mokoï guajy: guaiguive va'e ma Lia, ha'e rã kyrive va'e ma Raquel.

¹⁷ Lia ma oexa porã va'e'ÿ, ha'e rã Raquel ma opa mba'e py iporã, hova rupi voi.

¹⁸ Jacó oayvu Raquel. Ha'e vy aipoe'i Labão pe:

— Sete ma'etÿ re amba'eapo 'rã ndevy, nderajy kyrive va'e Raquel re.

¹⁹ Labão ombovai:

— Amboae ra'yxyrã ame'ë 'rãgue py ha'eveve ndevy ae ame'ë aguã. Eiko ha'vy xea py — he'i.

²⁰ Ha'e rami vy sete ma'etÿ re Jacó omba'eapo Raquel re. Ixupe rã sete ma'etÿ oaxapa voi, mboapy ára ete'i merami, oayvu ete ramo.

Lia ha'e Raquel re omendaague

²¹ Ha'e gui Jacó aipoe'i Labão pe:

— Eme'ë ma'vy xera'yxyrã. Ovaë ma nha'angaague, hexe amenda aguã — he'i.

²² Ha'e ramo Labão omboatypa avakue ha'e py ikuai va'e ngaru ojapoa py.

²³ Pyávy ma ogueru guajy Lia, Jacó pe ome'ë. Ha'e ramo jogueroke.

²⁴ (Guajy Lia rembiguairã Labão ome'ë guembiguai kunha Zilpa.)

²⁵ Ko'ëgue Lia ri ty ra'e oikuaa vy Jacó aipoe'i Labão pe:

— Mba'e re tu ha'e rami xeapo ra'e? Nderajy Raquel re e'ÿ ri ty'y amba'eapo raka'e? Mba'e re tu xembotavy ri?

²⁶ Labão ombovai:

— Nda'evei ha'e rami rojapo aguã orerekoa py. Nda'evei guaiguive va'e gui kyrive va'e ranhe omenda aguã.

²⁷ Kova'e semana opa rire ma ame'ë 'rã Raquel avi, sete ma'etÿ re ju xevy remba'eapo aguã re — he'i.

²⁸ Jacó ojou porã vy pete'i semana oiko Lia reve. Ha'e ramo mae ma guajy Raquel avi Labão ome'ë ta'yxyrã.

²⁹ (Guajy Raquel rembiguairã Labão ome'ë avi guembiguai kunha Bila.)

³⁰ Ha'e gui Jacó joguereko Raquel reve. Lia gui oayvuve Raquel. Ha'e gui sete ma'etÿ re ju omba'eapo Labão pe.

Jacó ra'y kuery itui'iaque

³¹ Lia ndoayvuivea SENHOR oexa vy ojapo imemby aguã rami. Ha'e rã Raquel ma imemby va'erã e'ÿ oiko.

³² Ha'e ramo Lia kyrí va'e oguereko vy oikuavã ava'i. Ha'e va'e omboery Rúben. Ha'e vy aipoe'i:

— Xeporiau rã SENHOR oexa vy xepytyvõ. Ha'e ramo aÿ xeme xerayvu 'rã — he'i.*

³³ Teïgue ju kyrí va'e oguereko vy oikuavã ava'i. Ha'e vy aipoe'i:

— Ajexavai aikovya SENHOR oikuaa vy kova'e ju ome'ë xevy — he'i vy omboery Simeão.†

³⁴ Peteïgue ju Lia kyrí va'e oguereko vy oikuavã ava'i. Ha'e vy aipoe'i:

— Aÿ kova'e gui ma xeme xereve onhemoirüve 'rã, mboapy ta'y areko ramo — he'i. Ha'e vy omboery Levi.‡

³⁵ Peteïgue ju oguereko kyrí va'e, ava'i. Ha'e vy aipoe'i:

— Aÿ ma arovy'a SENHOR — he'i. Ha'e vy omboery Judá.§ Ha'e gui ndoguerekovei ranhe kyrí va'e.

30

¹ Ha'e gui Raquel Jacó ra'y ndoguerekoia oikuaa vy hakate'ÿ guyke re. Ha'e vy aipoe'i Jacó pe:

— Xemomemby ma ta'vy. Ha'e rami e'ÿ ramo amano 'rã — he'i.

² Ha'e ramo Jacó ivai Raquel pe. Ha'e vy aipoe'i:

* 29:32 Tery Rúben ma "Ma'ë, ipi'a oiko" 'ea. † 29:33 Tery Simeão ma "Oikuaa porãmby" 'ea. ‡ 29:34 Tery Levi ma "Irü" 'ea.

§ 29:35 Tery Judá ma "Herovy'aa" 'ea.

— Xee ri ty'y Nhanderuete? Ha'e ae nememby e'y aguã rami ojapo — he'i.

³ Kunha va'e ombovai:

— Apy ma oĩ xerembiguai Bila. Xerekovia hexeve ju pejogueroko kyrĩ va'e ogueroko aguã, imemby ramo xememby rami oiko aguã — he'i.

⁴ Ha'e vy ixupe ome'ẽ guembiguai Bila ta'yxy jevyrã. Ha'e ramo Jacó jogueroko.

⁵ Ha'e rami vy Bila ogueroko Jacó ra'y.

⁶ Ha'e ramo Raquel aipoe'i:

— Nhanderuete xere oikuaa pota vy oendu xeayvua. Ha'e rami vy ome'ẽ xepi'arã — he'i. Ha'e nunga rupi omboery Dã.*

⁷ Ha'e gui Raquel rembiguai Bila teĩgue ju ogueroko kyrĩ va'e Jacó ra'y.

⁸ Ha'e rã Raquel aipoe'i:

— Xeryke reve ropu'ã vaipaa gui xepo'aka ma hexe — he'i vy omboery Naftali.†

⁹ Ha'e gui Lia ma kyrĩ va'e ndoguerokoveia oikuaa vy ogueru guembiguai Zilpa, ha'e Jacó pe ome'ẽ ta'yxy jevy mboærã.

¹⁰ Ha'e gui Lia rembiguai Zilpa ogueroko'i ma Jacó ra'y.

¹¹ Ha'e ramo Lia aipoe'i:

— Iporã ete va'e oiko xevy — he'i vy omboery Gade.‡

¹² Ha'e va'e rire Lia rembiguai Zilpa teĩgue ju ogueroko Jacó ra'y.

¹³ Ha'e ramo Lia aipoe'i:

— Aỹ ma avy'a, xepi'a kuery voi xererovy'a ete 'rã — he'i vy omboery Aser.§

¹⁴ Ha'e gui Rúben ma trigo omono'õa py ojou mandrágora rembypy mba'ety py.* Oxy Lia pe ogueru. Ha'e ramo Raquel aipoe'i Lia pe:

— Eme'ẽ xevy mandrágora rembypy ndepi'a ojou va'ekue gui.

¹⁵ Lia oporandu:

— Reraa ma xeme xegui. Aỹ mandrágora rembypy xepi'a ojou va'ekue ju ta reraa?

Ha'e ramo Raquel ombovai:

— Ha'e rami rã ma aỹ pyávy tove Jacó ndereve toke mandrágora rembypy ndepi'a ojou va'ekue rekovia — he'i.

¹⁶ Ka'aru'i Jacó mba'ety gui ou ramo Lia oo ovaexĩ. Ha'e vy aipoe'i:

— Aỹ xereve ju 'rã reke, romboekovia kuri mandrágora rembypy xepi'a ojou va'ekue re — he'i ramo ha'e va'e pytũ oke hexeve.

¹⁷ Lia ojerurea Nhanderuete oendu ramo peteĩ nhiruĩa ma ogueroko Jacó ra'y.

¹⁸ Ha'e ramo Lia aipoe'i:

— Nhanderuete ome'ẽ xevy mba'emo porã, xeme pe xerembiguai ame'ẽ rire — he'i vy omboery Issacar.†

¹⁹ Lia peteĩgue ju ogueroko kyrĩ va'e. Mboapy memea ma ogueroko Jacó ra'y.

²⁰ Ha'e rami vy Lia aipoe'i:

— Nhanderuete mba'emo iporã ete va'e ome'ẽ xevy. Aỹ xereve anho 'rã xeme opyta, mboapy meme ta'y areko ramo — he'i vy omboery Zebulom.‡

²¹ Ha'e rire kunha'i ju ogueroko. Ha'e va'e ma omboery Dinã.

²² Ha'e gui Raquel re ju Nhanderuete oikuaa pota vy ojerurea oendu avi. Ha'e vy ojapo imemby aguã rami.

²³ Ogueroko kyrĩ'i va'e, ava'i. Ha'e vy aipoe'i:

— Aỹ ma Nhanderuete axĩmba rei aguã rami ve'y xeapo — he'i.

²⁴ Ha'e vy omboery José. Aipoe'i:

— Tove Nhanderuete amboae ju tome'ẽ xepi'arã — he'i vy.§

²⁵ Ha'e gui Raquel José ogueroko'i rire Jacó aipoe'i Labão pe:

— Aỹ ma xemondouka ju xevvy re ae xerekoa oĩ va'e katy.

²⁶ Eme'ẽ ta'vy xera'yxy kuery ha'e xera'y kuery, ha'e kuery re amba'eapo vaipa ete rire. Ha'e ramo aa 'rã. Ndee voi reikuaa mbovy ma'etỹ re ha'e marã rami pa ndevy amba'eapogue.

Jacó omba'epove ju aguã re Labão ijayvuague

²⁷ Ha'e ramo Labão aipoe'i:

— Aỹ xemboaxya rendu vy ke epytave xereve. Aikuaa ma ndere vy Nhanderuete xemoingo porã.

²⁸ Emombe'u ke mba'e nunga re pa remba'eapo aguã xevy. Ha'e ramo xee apaga 'rã — he'i.

²⁹ Jacó aipoe'i:

— Ndee reikuaa marã rami pa ndevy amba'eapogue, nerymba kuery re apena porãague voi.

³⁰ Xee aju e'y mbove mboapy'i rereko va'ekue. Aỹ ma heta ete ma rereko. Ndevy amba'eapo ramo Nhanderuete nemoingo porã. Ha'e gui aỹ araka'e tu ha'vy amba'eapo ta xee ae mba'erã re? — he'i.

³¹ Ha'e ramo Labão oporandu:

* 30:6 Tery Dã ma "Joguerekoa" 'ea. † 30:8 Tery Naftali ma "Joe apu'ãa" 'ea. ‡ 30:11 Tery Gade ma "Iporã va'e oikoa" 'ea. § 30:13 Tery Aser ma "Ovy'a va'e" 'ea. * 30:14 Mandrágora ma jai rogue. Ha'e kuery pe rã moã imemby aguã regua. † 30:18 Tery Issacar ma "Mba'eapoa repy" 'ea. ‡ 30:20 Tery Zebulom ma "Tekoa" 'ea. § 30:24 Tery José ma "Tome'ëve ju" 'ea.

— Mba'e tu ha'vy reipota ame'ê?

Jacó aipoe'i:

— Mba'eve eme'ê eme. Nerymba kuery re apena, arôve jevy 'rã aikovy, po rami ri xere rejapo ramo.

³² Kova'e árave aaxa 'rã nerymba kuery ha'e javi ikuai rupi. Vexa'i kuery mbyte gui aipe'apa 'rã ipara'i va'e, ipara va'e ha'e huü va'e ha'e javi. Ha'e gui kavara kuery mbyte gui aipe'a 'rã ipara va'e ha'e ipara'i va'e. Ha'e va'e nunga rive topyta amba'epoague repy.

³³ Po rami 'rã reikuaa ha'evea rami pa aiko tyrã pa anya. Reju xapy'a vy rexaxe ramo angana va'ekue ha'e javi 'rã ojekuaa nerenonde. Xapy'a rei kavara kuery ipara'i va'e'ÿ, ipara e'ÿ va'e, e'ÿ vy vexa'i kuery huü e'ÿ va'e xereve rejou ri vy reikuaa 'rã xemondaague — he'i.

³⁴ Ha'e ramo Labão aipoe'i:

— Tá, ha'eve. Ndeayvuague rami ae tema eiko — he'i.

³⁵ Ha'e va'e árave guymba kavara ava Labão oguereko va'e gui omboja'opa ipara puku va'e ha'e ipara va'e ha'e javi. Kavara kunha ikuai va'e mbyte gui oipe'a ipara'i va'e ha'e ipara va'e, ha'e javive ipara xii va'e. Vexa'i ikuai va'e mbyte gui oipe'a huü va'e. Omboaxapa gua'y kuery pe.

³⁶ Mboapy araa py nhavaê aguã va'e py ogueraa Jacó-a gui. Ha'e rã Jacó ma Labão rymba mboae re opena oikovy.

Jacó oguerekopave ovyague

³⁷ Ha'e gui Jacó ojou yvyra rakã ipyau va'e álamu, aveleira ha'e plátano guigua. Ha'e vy oipiro vy ombopara puku-puku, yvyra xii va'e ojekuaa aguã rami.

³⁸ Ha'e vy yvyra rakã oipiro va'ekue omoí mymba renonde yy rape py, mymba oy'uaty py ae. Ha'e rami vy yy oy'u aguã ou vy ipuru'apa.

³⁹ Mymba kuery guenonde re yvyra oí jave ipuru'apa. Ha'e rami vy vexa'i kuery oguereko ipara puku va'e, ipara'i va'e ha'e ipara va'e.

⁴⁰ Ha'e gui Jacó omboja'o vexa'i. Labão rymba kuery ipara puku ha'e huü va'e ikuai katy ombojere mymba mboae. Guymba kuery ae omombyta mombyry'i, nomboje'ai Labão rymba kuery re.

⁴¹ Ha'e gui vexa'i tuvixakueve ta'yxe nhavó mymba kuery renonde Jacó omoí kuerei yvyra, yy rape vy'ÿry mymba kuery oexa aguã py, yvyra oexa reve ta'y aguã.

⁴² Ha'e rã vexa'i kuery ikangykue ta'yxe ramo ma nomoí yvyra. Ha'e rami vy ikangykue Labão pe opytapa, ha'e rã imbaraetekue ma Jacó pe opytapa.

⁴³ Ha'e rami vy Jacó oguerekopave tema: mymba vexa'i, guembiguai kuery avakue ha'e kunhague, camelo, mburika guive.

31

Nguu kuery yvy katy Jacó ojevvyague

¹ Ha'e gui Jacó oendu Labão ra'y kuery ijayvu vy “Jacó tu oipe'apa rima nhanderu mba'e. Nhanderu mba'e gui omba'erã ha'e javi ojou” he'i okuapy rã.

² Jacó oexa Labão voi ndoguero'avei rã ha'ekue rami e'ÿ.

³ SENHOR aipoe'i Jacó pe:

— Tereo ju nderu kuery yvy katy, neretarã kuerya katy ae. Xee aiko 'rã ndereve — he'i.

⁴ Ha'e ramo Jacó oenoí uka Raquel ha'e Lia nhuüny rupi guymba kuery reve oikoa py.

⁵ Ha'e vy aipoe'i ha'e kuery pe:

— Xee aikuaa penderu ha'ekue rami e'ÿ ndaxerero'aveia. Ha'e rami teí xeru Ruete xereve oiko.

⁶ Peê kuery ae voi peikuaa anhea'ã rupi penderu pe amba'epoague.

⁷ Ha'e rami teí penderu xembotavypa herekovy. Dez-kue ma opaga 'rã va'ekue oguero'ava. Ha'e rã Nhanderuete ma mba'eve py ndojapo vai ukai xere.

⁸ Xapy'a rei xevy “Vexa'i ipara'i va'e remba'epoague repy topyta” he'i ramo hymba kuery ipara'i va'e anho 'rã ta'y'i. Ha'e rã xapy'a rei “ipara puku va'e remba'epoague repy topyta” he'i ramo hymba kuery ipara puku va'e anho ta'y'i.

⁹ Ha'e rami vy Nhanderuete nderu rymba kuery oipe'a vy xevy ju omboaxa.

¹⁰ Ha'e gui mymba kuery ipuru'a'ipa jave ama'ê vy aexa ra'u kavara ava ojeupi va'e ipara puku, ipara'i ha'e ipara va'e meme ikuai.

¹¹ Ha'e anjo Nhanderuetea guigua aexa ra'u rã “Jacó” he'i ramo ambovai: “Apy ma ai.”

¹² Aipoe'i xevy: “Ema'ê, ha'e exa kavara ava ojeupi va'e ipara puku, ipara'i ha'e ipara va'e meme ikuai, mba'eta aexapa Labão ndere ojapo vaia.

¹³ Xee ma Nderuete Betel py ajexa uka va'ekue. Ha'e py ma ita remopu'ã va'ekue áry azeite renhoê reve renhemboayvu xevy. Epu'ã ke aÿ, kova'e yvy gui tereo ju neretarã kuerya katy” he'i va'ekue xevy — he'i.

¹⁴ Ha'e ramo Raquel ha'e Lia ombovai vy aipoe'i ixupe:

— Anhetê ete ri oreru ro py noívei oreyv ome'ê va'erã.

¹⁵ Ndorerererei ri ty'y amboae yvy guigua oguerekoa rami? Mba'eta orevende, omomba oreyv guarã va'ekue.

¹⁶ Mba'eta oreru gui Nhanderuete opa mba'e oipe'apa va'ekue ma nhandera'e meme, ha'e nhandera'y kuery mba'e. Aÿ ejapo tema Nhanderuete ndevy aipoe'iague — he'i.

¹⁷ Ha'e ramo Jacó opu'ã. Gua'y kuery ha'e gua'yxy kuery camelo áry omoí vy

¹⁸ ogueraapa guymba kuery ha'e oguereko va'e ha'e javi. Hymba kuery Padã-Arã py oiko jave ojou va'ekue omboatypa, nguu Isaque-a py Canaã yvy re oo aguã.

¹⁹ Labão guymba rague ojaya aguã oo jave Raquel imonda mba'emo ra'angaa nguu ro py oĩ va'ekue re.

²⁰ Ha'e rami vy Jacó ju ombotavy Arã pygua Labão. Nomombe'ui ojava aguã.

²¹ Ojava ovy opa mba'e oguereko va'e reve. Opu'ã vy oaxa ovy yakã Eufrates, Gileade yvyty katy oo vy.

Jacó rakykue Labão ooague

²² Mboapy araa py mae ma Labão pe omombe'ua Jacó ojavaague.

²³ Ha'e ramo guyyvy kuery ngupive ogueraa vy oje'oi hakykue. Sete ára re oguata. Ha'e vy Gileade yvyty re ovaëa py oupity.

²⁴ Pyávy oexa ra'u rã Nhanderuete ou Arã pygua Labão-a py. Ha'e vy aipoe'i:

— Eiko kuaa ke, Jacó pe ndeayvu eme iporã va'e rupi, neĩ iporã e'y va'e rupi voi — he'i.

²⁵ Ha'e gui Labão oupity ma Jacó ha'e va'e yvyty re Jacó oo'i oupiague py. Labão voi oupi oo'i Gileade yvyty re guyyvy kuery reve.

²⁶ Ha'e vy Labão aipoe'i Jacó pe:

— Mba'e tu xere rejapo xembotavy vy? Xerajy kuery reraa ra'e, escravo-rã kyxe py ogueraa va'e rami rive.

²⁷ Mba'e re tu rejava nhemi ri xembotavy aguã? Mba'eve neremombe'ui xevy romondouka porã'i aguã, mboraei rupi, pandeiro ha'e mba'epu ixã reta va'e rupi.

²⁸ Mba'e re tu nderejapoi xeramymino kuery ha'e xerajy kuery ayvupa'i aguã rami? Ha'eve e'ya rami reiko.

²⁹ Ha'e rami avi xee xepo'aka ndere ajapo vai aguã, va'eri kuee pyávy nderu Ruete ijayvu xevy. Ha'e vy aipoe'i: “Eiko kuaa ke Jacó pe ndeayvu vai e'y aguã, neĩ ndeayvu porã e'y aguã”, he'i va'ekue xevy.

³⁰ Aỹ ma nderu ro re nderevy'vei vy reo xea gui. Ha'e rami vy mba'e re tu ha'vy nemonda ri xeruede ra'angaa areko va'ekue re? — he'i.

³¹ Ha'e ramo Jacó ombovai:

— Akyje vy ndaikuaa ukai ndevy. Aipoa'e xejeupe: “Xapy'a rei rã guajy kuery oipe'a nhea'ã 'rã xegui”, ha'e va'ekue.

³² Ha'e gui nderuete ra'angaa reruare rejou ramo toikove eme. Nhaneretarã kuery oexaa py eikuaa porã pota xemba'e oĩ va'e rupi nemba'e rejouxé vy. Eraapa ju nemba'e — he'i. Mba'eta Jacó ma ndoikuai ra'e Raquel imondaague.

³³ Ha'e gui Labão oike Jacó ro Lia ha'e hembiguai kuery kunhague ikuai py. Opoynyvypa teĩ ndojou. Lia oĩa gui oẽ vy Raquel oĩa py ju oike.

³⁴ Tuuete ra'angaa ma Raquel onhomi ra'e camelo kupe árygua guýry. Ha'e va'e áry ju oguapy oiny. Labão opy ha'e javi rupi opovyvypa teĩ ndojou.

³⁵ Ha'e ramo Raquel aipoe'i nguu pe:

— Xeruvixa, ndevai eme ke. Nda'evei apu'ã aguã nerenonde, kunhague reko gui xemba'eaxy vy — he'i. Ha'e ramo oeka teĩ ndojou nguete ra'angaa ngoo py oguereko va'ekue.

³⁶ Ha'e rami rã Jacó ivai vy ijayvu Labão pe. Ha'e vy aipoe'i:

— Mba'e nunga py tu ha'vy noronhe'ẽ rendui raka'e? Mba'e py ha'vy ajevavy vaipa raka'e ndevy, xerakykue reju aguã?

³⁷ Xemba'e rei-rei rupi repovyvypa reia rupi mba'e tu ha'vy rejou ndero gui guare? Eru apy xeretarã kuery nderyyvy kuery renonde, ha'e kuery oikuaa pota aguã nhanderekokue re.

³⁸ Vinte ma'etỹ re ndea py aiko jave ma nerymba vexa'i, kavara na'imemby porã e'yi, neĩ ndakarui guive nerymba vexa'i re.

³⁹ Neĩ peteĩgue ndarui ndevy vixoo omondoro va'ekue. Ha'e nunga oiko rã xee ae amboekovia. Ha'e rã ara py e'y vy pyávy mba'emo nerymba kuery ogueraa ramo ndee remboekovia kuerei xepo gui.

⁴⁰ Ara py aiko axy kuaray aku gui, ha'e pyávy yro'y gui ju ajexavai aikovy va'ekue, ndake kuaavei guive.

⁴¹ Vinte ma'etỹ re aiko va'ekue ndero py. Catorze ma'etỹ re ndevy amba'eapo nderajy kuery mokoĩve re, ha'e gui seis ma'etỹ re ju nerymba kuery re apena aikovy va'ekue. Ha'e jave dez-kue ha'ekue-'ekue e'y rami rerova xevy repaga 'rã va'ekue.

⁴² Anhetẽ Xeru Ruete, Abraão Ruete, Isaque Ojererokyjea va'e ae xereve ndoikoi va'e rire ma ndee xemondouka rive 'rãgue. Ha'e rami teĩ Nhanderuete xere opena amba'eapoa py ajexavai rã. Ha'e nunga rupi ae kuee pyávy ijayvu raka'e ndevy — he'i.

Jacó reve Labão peteĩ rami ikuai aguã ojapoague

⁴³ Ha'e ramo Labão aipoe'i Jacó pe:

— Kova'e kunhague ma xerajy kuery ikuai, kova'e avakue'i ma xeramymino kuery, kova'e mymba kuery ma xerymba meme ikuai. Opa mba'e jaexa va'e xemba'e meme. Mba'e tu ha'vy ajapo ta aỹ xerajy kuery pe ha'e ipi'a kuery oikuavã va'ekue pe?

⁴⁴ Aỹ ma eju, xereve jajapo peteĩ rami ju nhandekuai aguã, nhande mokoĩve nhanema'endu'a riaa aguã rami — he'i.

⁴⁵ Ha'e ramo Jacó peteĩ ita ojopy vy omopu'ã ijytarã rami.

⁴⁶ Ha'e vy aipoe'i guyyvy kuery pe:

— Pemono'õ ke ita — he'i. Ha'e ramo ita ogueru vy omboaty. Ita omboaty va'ekue yvýry okaru okuapy.

⁴⁷ Ha'e va'e ma Labão omboery Jegar-Saaduta. Ha'e rã Jacó ma omboery Galeede.

⁴⁸ Ha'e ramo Labão aipoe'i:

— Kova'e itaaty ma aÿ guive topyta nhande mokoïve moma'endu'aarã — he'i. Ha'e nunga rupi ae omboerya Galeede.*

⁴⁹ Omboery avi Mispa, mba'eta aipoe'i:

— Tove Nhanderuete topena xere ha'e ndere joe gui mombyry jaikoa ja. Toikuaa pota nhandeayvuague jajapo aguã re.†

⁵⁰ Ha'e gui xapy'a rei xerajy kuery reayvu ve'y vy amboae kunha re ju remenda ramo avave rei oikuaa e'y teĩ tove Nhanderuete toikuaa pota ha'e nunga re, mokoïve nhanderexa vy.

⁵¹ Labão aipoe'ive ju Jacó pe:

— Apy nhande mokoï mbyte oĩ itaaty ha'e ita amopu'ã va'ekue.

⁵² Tove kova'e itaaty ha'e ita topyta nhanemoma'endu'aarã, kyvõ katy gui itaaty rovai katy aaxa e'y aguã, neĩ ndee ma voi nda'evei itaaty neĩ ita reaxa aguã kyvõ katy.

⁵³ Tove nhaneramoĩ kuery Abraão ha'e Naor Ruete toikuaa pota nhandere — he'i. Ha'e ramo Jacó oura nguua Isaque Ojererokyjea va'e rery rupi.

⁵⁴ Ha'e va'e yvyty re Jacó ojuka peteĩ mymba Nhanderuete pe, ha'e guetarã kuery oenoimba mbojape ho'u aguã. Ho'upa vy ha'e va'e pyávy ju yvyty re oke.

⁵⁵ Ko'ẽ e'y mbove'i Labão opu'ã vy oayvupa guamymino kuery ha'e guajy kuery. Peteĩ-teĩ ogueroayvu porã. Ha'e vy mae ma ojepe'a vy oo ju ngoo katy.

32

¹ Jacó voi oguatave ju. Ha'e ramo Nhanderuetea guigua anjo kuery jogueru ovaexĩ aguã.

² Ha'e kuery ou rã Jacó oexa vy aipoe'i:

— Apy rima Nhanderuetea guigua ikuiaia — he'i vy omboery Maanaim.*

Esau reve Jacó peteĩ rami ju ikuai aguã ojapoague

³ Ha'e gui Jacó guenonde re omondouka guyke'y Esaú pe oayvu momb'e'uarã kuery, EDOM regua Seir yvy katy oĩ ramo.

⁴ Ha'e vy aipoe'i imondovy ha'e kuery pe:

— Po rami pendeayvu 'rã xeruvixa Esaú pe: “Nerembiguai Jacó aipoe'i uka: ‘Aguataa rupi Labão ro py ranhe aiko va'ekue aÿ peve.

⁵ Areko vaka, mburika, vexa'i, ha'e gui xerembiguai avakue ha'e kunhague. Xeruvixa, ndea py amondouka xeyavu momb'e'uarã nerenonde xemboaxy uka aguã' he'i uka”, peje 'rã ixupe.

⁶ Ha'e gui tenonde re omondouka va'ekue ou jevy vy aipoe'i Jacó pe:

— Roo nderyke'y Esaú-a py peve. Ha'e voi ou nerovaexĩ aguã quatrocentos avakue reve — he'i okuapy.

⁷ Ha'e rami ijayvu rã Jacó oendu vy okyje vaipa, onhemondy guive. Ha'e vy omboja'o ngupive ikuai va'e ha'e javi: vexa'i, vaka ha'e camelo kuery. Mokoï henda-enda py omboaty.

⁸ Mba'eta ijayvu vy “Xapy'a rei Esaú ou vy peteĩ pygua ojukapa teĩ amboae pygua oo jepe 'rã”, he'i.

⁹ Ha'e gui Nhanderuete pe Jacó ojerure vy aipoe'i:

— SENHOR xeramoi Abraão ha'e xeru Isaque Ruete, xe'vy aipo're va'ekue: “Tereo ju ndevy re neretarã kuerya katy. Ha'e py ma ndere apena porã 'rã”, 're va'ekue.

¹⁰ Xee nerembiguai ma xe'yvy'i ete ndee xemboaxy vy ndeayvuague rami xerereko porã aguã. Mba'eta xepopoka reve anho aaxa karamboae kova'e Jordão yakã. Aÿ ma mokoï henda py ju oreaty.

¹¹ Xereraa jepe ke ke'y Esaú po py aiko vai e'y aguã. Mba'eta akyje apy ou vy xejuka gui, ha'e xera'yxy ha'e xera'y kuery ojukapa gui.

¹² Xe'vy aipo're va'ekue: “Xee apena 'rã ndere. Amboeta 'rã neramymino kuery ita ku'i heta aguã, heta ete ramo avave rei ndoipapa kuaai aguã rami”, 're va'ekue — he'i.

¹³ Ha'e va'e pyávy Jacó opyta ha'e py. Mba'emo ogueraa va'e gui oguereko katu guyke'y Esaú pe ome'ẽ va'erã:

¹⁴ duzentos kavara, vinte kavara ava, duzentos vexa'i, vinte vexa'i ava,

¹⁵ trinta camelo ikamby va'e ta'y'i reve, quarenta vaka, dez vaka ava, vinte mburika ha'e dez ta'y'i.

¹⁶ Ha'e va'e nunga ogueraa ukapa guembiguai kuery pe, peteĩ-teĩ henda py omoi. Guembiguai kuery pe aipoe'i imondovy:

— Tapeo xerenonderã, pemondy pokã mymba kuery peteĩ-teĩ regua amboae regua gui mombyry'i oo aguã — he'i.

¹⁷ Jy'py oo va'e pe aipoe'i:

— Ke'y Esaú rovaexĩ rã oporandu 'rã ndevy: “Mava'e tu nembou? Marã katy tu reo? Mava'e rymba tu nerenonde ikuai?” he'i ramo

¹⁸ rembovai 'rã: “Nerembiguai Jacó rymba rima aru. Nguvixa Esaú peguarã ombou uka. Ha'e gui ha'e voi ou oiny orerakykue”, peje 'rã — he'i.

¹⁹ Mokoïa oo va'e pe ha'ekue rami ju aipoe'i uka, mboapya oo va'e pe voi. Mymba kuery mondyarã ha'e javi pe aipoe'i:

— Po rami meme 'rã pendeayvu Esaú peovaexĩ vy.

* 31:48 Tery Galeede ma “Itaaty nhanema'endu'a aguã” 'ea. † 31:49 Tery Mispa ma “Torre oikuaa pota va'ety oĩa” 'ea. * 32:2 Tery Maanaim ma “Mokoï regua ikuiaia” 'ea.

²⁰ Aipopeje 'rã: “Nerembiguai Jacó ou oiny orerakykue”, peje — he'i uka imondovy. Mba'eta ojeupe aipoe'i: “Mba'emo ame'ê uka vy ambopy'a porã 'rã аваexĩ e'y mbove. Ha'e gui ma xee aexa 'rã. Ha'e rami rã xapy'a rei xejou porã 'rã”, he'i.

²¹ Ha'e rami vy guenonde ranhe omondouka ome'ê uka va'erã. Ha'e rã ha'e ma ha'e va'e pytũ re opyta ranhe okeague py.

Nhanderuetea guigua ava reve Jacó joguero'aague

²² Ha'e va'e pyavyve Jacó opu'ã vy omboaty mokoïve gua'yxy, mokoïve guembiguai kunha ha'e gua'y kuery onze-ve ikuai va'e. Ha'e vy ogueraapa Jaboque yakã oaxaaty peve.

²³ Ha'e kuery ranhe omboaxa yakã rovai re. Oguereko va'e ha'e javi omboaxapa.

²⁴ Jacó ha'e ae'i opyta ha'e py. Ha'e ramo peteĩ ava ojekuaa vy hexeve joguero'a ko'ê peve.

²⁵ Ava va'e ma Jacó re nda'ipo'akaia oexa vy opoko hi'u guýry. Ha'e rami vy omboi Jacó 'u ojepotaa, joguero'a vy.

²⁶ Ha'e vy aipoe'i:

— Xepoi katu, taa, mba'eta ko'ê ta ma.

Jacó ombovai:

— Noromondoukai 'rã xereroayvu porã e'yã ja — he'i.

²⁷ Ha'e ramo oporandu:

— Mba'exa tu ha'vy nderery?

— Jacó — he'i.

²⁸ Ha'e rã aipoe'i:

— Aỹ ma Jacó ve'y 'rã nderery, ha'e rã Israel. Mba'eta huvixa rami Nhanderuetea ha'e avakue reve renhea'ã ndepo'aka peve — he'i.[†]

²⁹ Ha'e gui Jacó aipoe'i:

— Ajerure nderery remombe'u aguã.

Ombovai:

— Mba'e re tu xerery re reporandu? — he'i. Ha'e vy ogueroayvu porã ha'e py.

³⁰ Ha'e va'e henda Jacó omboery Peniel, “Apy ma xerexa py ae Nhanderuetea aexa teĩ xerekove ndoipe'ai”, he'i vy.[‡]

³¹ Kuaray oẽ jave oaxa Peniel rupi, okara-karau ovy hi'u oi rire.

³² Ha'e rami rire aỹ reve Israel kuery ndo'ui 'rã xo'o rajykue hi'u áry rupi ijapu'a oiny va'e, ava va'e Jacó retyma rajy omboapu'apa rire.

33

Esau reve Jacó nhovaexiague

¹ Jacó oma'ê vy oexa Esau ou oiny rã quatrocentos avakue reve. Ha'e rami vy gua'y kuery omboja'o vy opena uka Lia, Raquel ha'e mokoïve guembiguai kunha pe.

² Tenonde omondouka mokoïve guembiguai kunha, ipi'a kuery reve. Ha'e kuery rakykue omondouka Lia imemby kuery reve. Takykue ete omondouka Raquel ipi'a José reve.

³ Ha'e va'e kuery gui ha'e ranhe oo vy sete-kue guenapy'ã re oĩ ovy guyke'ya py ovaẽ peve.

⁴ Ha'e ramo Esau onha ouvy ovaexĩ aguã. Oikuavã, oayvupa. Ojae'o vaipa mokoïve.

⁵ Ha'e gui Esau oma'ê vy oexa kunhague ha'e kyrĩgue ou oiny rã. Ha'e vy aipoe'i:

— Mava'e kuery tu ndereve ikuai?

Jacó ombovai:

— Peva'e kuery ma kyrĩgue xee nerembiguai pe Nhanderuetea ome'ê va'ekue — he'i.

⁶ Ha'e gui mokoï hembiguai kunha ovaẽ ouvy opi'a kuery reve, ha'e guenapy'ã re oĩmba.

⁷ Ha'e gui Lia omemby kuery reve ju ovaẽ vy ha'e kuery voi guenapy'ã re oĩ. Ha'e gui ma Raquel opi'a José reve ovaẽ ouvy vy oĩ guenapy'ã re.

⁸ Ha'e ramo Esau oporandu:

— Mba'erã tu guĩ rami ete nerymba kuery xereroavaexĩ ra'e?

Jacó ombovai:

— Xeruvixa, anhemboaxy uka vy rima aru ruka kuri ndevy — he'i.

⁹ Ha'e ramo Esau aipoe'i:

— Xee ma areko vaipa ma mba'emo. Ndepo py ae ri topyta rereko va'e.

¹⁰ Ha'e rã Jacó ombovai:

— Ejopy katu. Xapy'a rei xejou porã ri rã ajerure ame'ê rive'i va'e rejopy aguã re. Mba'eta xevy rã nderova Nhanderuetea rova rami ete, xererovy'aa rupi xemovaẽ ramo.

¹¹ Ha'e nunga rupi ajerure mba'emo'i aru ruka va'ekue rejopy aguã re, xevy Nhanderuetea ome'ê porãmba rire. Arekopa opa mba'e — he'i. Ha'e rami vy onhea'ã ojopy aguã.

¹² Esau aipoe'i:

— Jaje'oi ha'vy. Xee ma aa ta tenonde.

¹³ Ha'e ramo Jacó aipoe'i:

[†] 32:28 Tery Israel ma "Nhanderuetea reve joguero'a va'e" 'ea. [‡] 32:30 Tery Sucote ma "Mymba ro" 'ea.

— Xeruvixa, ndee reikuaa xera'y kuery kyrîgue teri ikuai. Xereve areko avi vexe'i ha'e vaka ikamby va'e. Xapy'a rei petei ára re xerymba kuery romondy atã heravy ramo amanomba 'rà ha'e javi.

¹⁴ Ha'e nunga rupi xeruvixa, tereo tema ndee ranhe xee nerembuguai renonde. Ha'e rà xee ma mbegue'i 'rà aa nderakykue, vaka romondy va'e ha'e kyrîgue ooa'i rami, Seir py ndee xeruvixaa py avaê peve — he'i.

¹⁵ Esaú ombovai:

— Ha'e rami rà ndereve taeja xereve ikuai va'e regua.

Ha'e rà Jacó aipoe'i:

— Mba'erã tu ha'e kuery opyta ta? Xeruvixa, ha'eve ae ma aexa xemboaxya — he'i.

¹⁶ Ha'e rami rà ha'e va'e árave Esaú oo ju Seir py ouague katy.

¹⁷ Ha'e rà Jacó ma Sucote katy oo. Ha'e py ma ngoorã ojapo, vaka korarã ojao'i guive. Ha'e nunga rupi ae ha'e va'e henda omboery Sucote.

Siquém py Jacó ovaëague

¹⁸ Padã-Arã gui Jacó ojevvy vy hexa'i reve ovaê Siquém tetã py, Canaã yvy re oĩ va'e py. Tetã yvÿry oupi oo'i.

¹⁹ Yvy oo'i oupia va'e ma cem hatã'i va'e re ojogua Siquém ru Hamor ra'y kuery gui.

²⁰ Ha'e py ma ojapo petei altar. Ha'e va'e ma omboery Nhanderuete Israel Ruete pegua.

34

Siquém pygua kuerya py Diná oo jave guare

¹ Ha'e gui Lia memby Diná, Jacó rajy va'e ojepe'a ovy yvy re ikuai va'e rajy kuery rexa vy.

² Ha'e jave ha'e va'e pygua huvixa ma Hamor ra'y Siquém. Ha'e va'e ma Jacó rajy Diná oexa vy ojopy vy ojavyky, ogueroko rive.

³ Ovy'a ete kunhataĩ re, oayvu vy. Ijayvu porã'i guive ixupe.

⁴ Ha'e gui Siquém aipoe'i nguu Hamor pe:

— Eru ruka ke ha'e va'e kunhataĩ xera'yxyrã — he'i.

⁵ Ha'e ramo Jacó oendu tajy Diná ogueroko riveague. Ha'e rami teĩ okyrirĩ ranhe, ta'y kuery vaka re openaa rupi ikuai gui ojevypa e'ya ja.

⁶ Ha'e va'e jave ou Siquém ru Hamor Jacó reve ijayvu aguã.

⁷ Ha'e gui Jacó ra'y kuery oupa nhuũndy gui. Oendu okuapy geindy re oikoague. Ha'e rami vy nda'evaipe, ipoxypa okuapy, Israel kuery re Siquém ha'eve e'ya ramigua ojapo rire. Jacó rajy ogueroko rive, ha'eve'ỹ va'e ete ojapo.

⁸ Ha'e gui ma ha'e kuery reve Hamor ijayvu. Ha'e vy aipoe'i:

— Xera'y Siquém ndovy'ai ete oikovy nderajy re. Ajerure peme'ẽ aguã ta'yxyrã.

⁹ Ha'e rami vy peiko 'rà oreretarã kueryrã. Orevy pe peme'ẽ 'rà pendajy kuery, ha'e orerajy kuery ju peraa 'rà pendera'y kuery ra'yxyrã.

¹⁰ Ha'e rami vy pendekuai ore kuery reve. Orevvy ma pendeyvyrã itui. Apy ae pendekuai, mba'emo pejogua peikovy penemba'erã pejou vy — he'i.

¹¹ Siquém voi aipoe'i Diná ru ha'e ikyvy kuery pe:

— Ejapo ke ajerurea. Ha'e rà xee ame'ẽ 'rà peipota va'e rei.

¹² Mba'emo re pejerure reta teĩ ame'ẽmba 'rà. Ha'e rami avi peme'ẽ kunhataĩ va'e xera'yxyrã — he'i.

¹³ Ha'e ramo Siquém ha'e tuu Hamor pe Jacó ra'y kuery ombovai vy ombotavya rupi ijayvu, heindy Diná Siquém ogueroko rive rire. Ha'e vy aipoe'i okuapy:

¹⁴ — Ha'e rami aguã nda'evai, orereindy rome'ẽ aguã ava opire omboi uka e'ỹ va'e ra'yxyrã. Orereko rami vy ha'e nunga nda'evai.

¹⁵ Peteĩ mba'e pejapo ramo ha'eve 'rà orevy, peẽ kuery avakue ha'e javive ore rami avi pendepire pemboi uka ramo.

¹⁶ Ha'e ramo 'ràe romomenda orereindy kuery, ha'e pendajy kuery re ore romenda, peẽ kuery reve orekuai, ha'e peẽ kuery reve petei regua nhandekuai.

¹⁷ Ha'e rà norenh'e'ẽ rendui, pendepire napemboi ukai ramo rogueraa ju 'rà orereindy — he'i.

¹⁸ Ha'e rami avi petei mba'e jajapo ramo ha'e va'e avakue pe ha'eve 'rà nhandereve petei'i regua ikuai aguã,

¹⁹ Ha'e rami vy kunumi va'e ndarei ha'e rami ojapo aguã, Jacó rajy oayvu vy. Ha'e va'e ma nguu ro pygua kuery ha'e javi gui omboeteave va'e oiko.

²⁰ Ha'e gui gua'y Siquém reve Hamor tetã kora rokẽ py oo vy ijayvu avakue ha'e py ikuai va'e pe. Ha'e vy aipoe'i:

²¹ — Ha'e va'e avakue ma ndojapo vai 'rà nhandere. Ha'e ramo tove ta'ikuai, tojogua mba'emo. Nhandeyvy ma tuvixa, ha'eve nhande ha'e javi nhandekuai aguã. Ha'e kuery rajy kuery jajopy 'rà nhandera'yxyrã, ha'e nhanderajy kuery nhamomenda 'rà ha'e kuery re.

²² Ha'e rami avi petei mba'e jajapo ramo ha'e va'e avakue pe ha'eve 'rà nhandereve petei'i regua ikuai aguã, avakue apy nhandekuai va'e ha'e javive nhandepire nhamboi uka ramo, ha'e kuery ojapoa rami avi.

²³ Ha'e rire ha'e kuery rymba vaka, mba'emo ogueroko va'e-va'e ha'e javi ha'e hymba kuery ha'e javi 'rà teve nhanemba'erã opyta. Ha'e kuery petei'i re ojerurea jajapo, nhande kuery reve ikuai aguã — he'i.

²⁴ Ha'e ramo tetã kora rokẽ py ikuai va'e ha'e javi onhe'ẽ rendu okuapy Hamor ha'e ta'y Siquém. Ha'e rami vy avakue opire omboi ukapa hokẽ py ikuai va'ekue ha'e javive.

Simeão ha'e Levi Siquém ro pygua avakue ojukapaague

²⁵ Mboapy araa py avakue haxya oendu vaipa jave Jacó ra'y mokoí Simeão ha'e Levi Diná kyvy kuery ikuai va'e ogueraa okyxe. Tetã py oike ha'e pygua kuery oexa'ã e'ÿa py. Ipoxy reve ojukapa avakue ha'e py ikuai va'ekue ha'e javi.

²⁶ Kyxe py ojuka avi Hamor ha'e ta'y Siquém. Siquém ro gui gueindy Diná oipe'a vy oje'oipa ju.

²⁷ Ha'e gui Jacó ra'y kuery mboae ou vy ojukapaague oexa vy ogueraapa mba'emo tetã py ojou va'e ha'e javi, heindy ha'e pygua oguereko rive rire.

²⁸ Hymba vexa'i, vaka, mburika oipe'apa tetã gui, ha'e hovai re mba'emo ikuai va'ekue ha'e javi,

²⁹ imba'e rei-rei ha'e javi oipe'apa. Ta'y kuery ha'e ta'yxy kuery oipokuapa heravy ngoo katy.

³⁰ Ha'e ramo Jacó aipoe'i Simeão ha'e Levi pe:

— Ha'e rami peiko vy xemoi vai. Pejapo ko'i rupi ikuai va'e xejou vai aguã rami, cananeu ha'e ferezou kuery. Nhandereeta e'ÿ'i ramo xere opu'ã vy xejuka 'rã, xero pygua kuery ha'e javi reve.

³¹ Ha'e kuery ombovai:

— Ha'e rami avi ha'eve 'rã ri nda'u ha'e kuery oreindy itavy rei va'e rami oguereko rã? — he'i okuapy.

35

Betel py Jacó altar ojapoaague

¹ Ha'e gui Nhanderueete aipoe'i Jacó pe:

— Epu'ã ke, tereo ju Betel katy. Ha'e py eiko, ejapo peteí altar Nderuete nderyke'y Esaú gui rejava jave ojexa uka va'ekue pe — he'i.

² Ha'e ramo Jacó ijayvu ngoo pygua kuery ha'e hexevegua kuery ha'e javi pe. Ha'e vy aipoe'i:

— Pemombo ke mba'emo ra'angaa amboae kuery guigua penembyte pereko va'e. Pejeky'a'ou ukapa. Pendeao voi pemboekoviapa.

³ Nhapu'ã ke, jaje'oi Betel katy. Ha'e py ma ajapo 'rã peteí altar Nhanderueete ajexavai rei rã xerepy va'ekue pe, aguata aikovya rupi xereve oiko rire — he'i.

⁴ Ha'e ramo Jacó po py omboaxapa mba'emo ra'angaa amboae kuery guigua oguereko va'ekue ha'e javi. Namixã oguereko va'ekue voi omboaxapa. Ha'e ramo Jacó ojatypa yvyra carvalho Siquém katy'i hi'aí va'e guy py.

⁵ Ha'e gui ma oje'oi. Nhanderueete ojapo ha'e katy rai-rai'i tetã oí va'e pygua kuery okyjea oendu aguã rami. Ha'e ramo avave rei ndoje'oiái Jacó ra'y kuery rakykue.

⁶ Ha'e rami vy Jacó hexeve ikuai va'e ha'e javive reve ovaẽmba Luz tetã Betel 'epy va'e py, Canaã vvy re oí va'e py.

⁷ Ha'e py ma Jacó ojapo altar. Ha'e va'e henda omboery El-Betel, ha'e py guyke'y gui ojava ovy jave Nhanderueete ojexa uka rire.*

⁸ Ha'e py omano Rebeca mongakuaare Débora. Ha'e ramo onhono porã Betel guy katy carvalho hi'aí va'e guy py. Ha'e va'e yvyra omboery Alom-Bacute.†

⁹ Ha'e gui Padã-Arã gui Jacó ou ma ramo Nhanderueete teĩgue ju ojexa uka ixupe. Ha'e rami vy ogueroayvu porã.

¹⁰ Ha'e vy aipoe'i:

— Nderery ma Jacó. Aÿ guive ma Jacó ve'ÿ ma, ha'e rã Israel 'rã nderery — he'i. Ha'e rami vy omboery Israel.

¹¹ Aipoe'ive ju:

— Xee ma Penderuete ipo'akapa va'e aiko. Ndera'y reta ke. Ndegui oiko 'rã peteí regua, ha'e gui heta regua ju 'rã, huvixa kuery voi.

¹² Ndevy ju ame'ẽ 'rã vvy Abraão ha'e Isaque pe ame'ẽ va'ekue. Ha'e gui ndee ndereikovei ma rire neramymino kuery pe ju 'rã ame'ẽ — he'i.

¹³ Ixugui Nhanderueete ojepe'a vy ijayvu oinyague gui ojeupi ju.

¹⁴ Ha'e ramo Jacó reve Nhanderueete ijayvu oinyague py ixupe omopu'ã peteí ita ijytarã rami. Hi'áry onhoẽ guive mba'emo, azeite avi.

¹⁵ Henda hexeve Nhanderueete ijayvuague ma Jacó omboery Betel.

Benjamim itui'i ramo Raquel omanoague

¹⁶ Betel gui oje'oive ju. Efrata py ovaẽ rai'ia py Raquel oikuavã opi'a. Haxy vaipa ete reve oikuavã.

¹⁷ Imemy raxy ramo hexe opena va'e aipoe'i:

— Enhemondyi eme. Kova'e voi ma reikuavã nho 'rã — he'i.

¹⁸ Ha'e gui omano rã inhe'ẽ ojepe'a ovy jave omboery Benoni. Ha'e rã tuu ma omboery Benjamim.‡

¹⁹ Ha'e gui Raquel omano ramo onhono porã Efrata katy tape oo va'e yvÿry. Ha'e va'e ma Belém.

²⁰ Raquel rupa áry Jacó omopu'ã peteí ita ijytarã. Ha'e va'e ma aÿ reve hi'aí.

²¹ Ha'e gui Israel ojepe'a ju vy oorã ojapo Éder py torre oí va'e rovai re.

* 35:7 Tery El-Betel ma "Betel py Nhanderueete ojekuua ague" 'ea. † 35:8 Tery Alom-Bacute ma "Carvalho ojave opaague" 'ea. ‡ 35:18 Tery Benoni ma "Xepi'a xeraxya guigua" 'ea. Ha'e rã Benjamim ma "Xera'y xepo aiporu kuaa regua oí va'e" 'ea.

²² Ha'e va'e yvy re Israel oiko jave py ta'y Rúben oo vy onheno nguu ra'yxy jevy Bila reve. Ha'e ramo Israel oikuaa. Ha'e javi vy doze ikuai raka'e Jacó ra'y kuery.

1 Crônicas 2.1,2

²³ Lia pi'a kuery ma Jacó ra'y jypy guare Rúben, ha'e gui Simeão, Levi, Judá, Issacar ha'e Zebulom.

²⁴ Raquel pi'a ma José ha'e Benjamim.

²⁵ Raquel rembiguai Bila pi'a ma Dã ha'e Naftali.

²⁶ Lia rembiguai Zilpa pi'a ma Gade ha'e Aser. Ha'e va'e kuery Jacó ra'y Padã-Arã py itui'i va'ekue.

²⁷ Ha'e gui nguu Isaque-a py ju Jacó ou Manre Quiriate-Arba re oĩ jave py. Ha'e va'e ma Hebrom, Abraão ha'e Isaque ikuaiaque.

²⁸ Isaque cento e oitenta ma'etỹ re oiko.

²⁹ Ha'e gui Isaque ipytuẽ atã vy omano tuja'i vaipa ma vy. Ha'e ramo heraa guamoĩ kuerya py. Ha'e ramo ta'y kuery Esaú ha'e Jacó ae onhono porã.

36

1 Crônicas 1.35-37

¹ Po rami ma Esaú ramymino kuery rery. Hery mboae ma Edom.

² Esaú gua'yxyrã ojou Canaã py ikuai va'e rajy kuery regua: heteu regua Elom rajy Ada, heveu regua Zibeão ra'y Aná rajy Oolibama,

³ ha'e Ismael rajy Nebaiote reindy Basemate.

⁴ Esaú gui Ada oguereko Elifaz, ha'e Basemate oguereko Reuel.

⁵ Oolibama oguereko Jeús, Jalão ha'e Coré. Ha'e va'e kuery ma Esaú ra'y kuery Canaã yvy re itui'i va'ekue.

⁶ Esaú ogueraapa gua'yxy kuery, gua'y kuery, guajy kuery, ngoo py oguereko va'e kuery ha'e javi, guymba kuery, vaka ha'e mba'emo Canaã yvy re oĩ jave ojou va'ekue ha'e javi. Amboae yvy re ju ogueraapa guyyvy Jacó gui oja'o vy,

⁷ mba'eta ha'e kuery oguerekopa vy nda'vevei joa py ikuaive aguã. Yvy ikuaia re ma noĩvei hymba kuery omongaru aguã, heta ete ramo.

⁸ Ha'e rami vy Esaú Edom avi hery va'e oo vy Seir yvyty re oiko.

⁹ Pova'e ma Esaú ramymino kuery, edomita kuery Seir yvyty re ikuai.

¹⁰ Po rami ma Esaú ra'y kuery rery: Esaú ra'yxy Ada pi'a Elifaz, ha'e Esaú ra'yxy Basemate pi'a Reuel.

¹¹ Elifaz ra'y kuery ma Temã, Omar, Zefô, Gaetã ha'e Quenaz.

¹² Esaú ra'y Elifaz ma gua'yxy jevy oguereko, Timna hery va'e. Ha'e va'e ma Elifaz gui oguereko Amaleque. Ha'e va'e kuery ma Esaú ra'yxy Ada remiarirô.

¹³ Ha'e gui Reuel ra'y kuery ma Naate, Zerá, Samá ha'e Mizá. Ha'e va'e kuery ma Esaú ra'yxy Basemate remiarirô.

¹⁴ Ha'e rã Esaú ra'yxy jevy Oolibama ma Aná rajy, Zibeão ramymino oiko. Esaú gui oguereko Jeús, Jalão ha'e Coré.

¹⁵ Pova'e kuery ma Esaú ra'y kuery huvixa ikuai va'e: Esaú ra'y jypy'igua Elifaz ra'y kuery ma huvixa Temã, Omar, Zefô, Quenaz,

¹⁶ Coré, Gaetã ha'e huvixa Amaleque. Ha'e va'e Elifaz ra'y kuery huvixa meme ikuai, Edom yvy re oiko va'ekue. Ada remiarirô ikuai.

¹⁷ Ha'e rã Esaú ra'y Reuel ra'y kuery ma huvixa Naate, Zerá, Samá ha'e Mizá. Ha'e va'e Reuel ra'y kuery ma huvixa meme ikuai Edom yvy re. Esaú ra'yxy Basemate remiarirô ikuai.

¹⁸ Ha'e rã Esaú ra'yxy Oolibama pi'a kuery ma huvixa Jeús, Jalão ha'e Coré. Ha'e va'e huvixa kuery ma Esaú ra'yxy Oolibama Aná rajy memby ikuai.

¹⁹ Ha'e kuery, huvixa kuery guive Esaú ramymino meme ikuai. Ha'e ma Edom.

1 Crônicas 1.38-42

²⁰ Pova'e kuery ma horeu regua Seir ra'y kuery ha'e va'e yvy re ikuai va'e: Lotã, Sobal, Zibeão, Aná,

²¹ Disom, Eser ha'e Disã. Ha'e va'e kuery ma horeu kuery ruvixa, horeu regua Seir ra'y meme ikuai Edom yvy re.

²² Lotã ra'y kuery ma Hori ha'e Homã. Lotã reindy ma Timna.

²³ Sobal ra'y kuery ma Alvã, Manaate, Ebal, Sefô ha'e Onã.

²⁴ Zibeão ra'y kuery ma Aiã ha'e Anã. Anã ma tekoa e'ỹa py yvu haku va'e ojou raka'e, nguu Zibeão rymba kuery mburika re opena oikovya py.

²⁵ Anã ra'y kuery ma Disom ha'e tajy Oolibama.

²⁶ Disã ra'y kuery ma Hendã, Esbã, Itrã ha'e Querã.

²⁷ Eser ra'y kuery ma Bilã, Zaavã ha'e Acã.

²⁸ Disã ra'y kuery ma Uz ha'e Arã.

²⁹ Horeu kuery ruvixa ikuai va'e ma huvixa Lotã, Sobal, Zibeão, Anã,

³⁰ Disom, Eser ha'e Disã. Ha'e va'e kuery ma horeu kuery ruvixa ikuai, Seir yvy re hekoa va'e meme.

1 Crônicas 1.43-54

³¹ Pova'e kuery ma Edom yvy re huvixa kuery ikuai, Israel kuery ruvixave oĩ e'ỹ mbove.

³² Beor ra'y Belã oĩ Edom pygua ruvixa. Tetã opena oikovya ma Dinabã.

³³ Belã omano ramo hekovia oĩ Bozra pygua Zerã ra'y Jobabe.

³⁴ Jobabe omano ramo hekovia oĩ temanita yvy guigua Husão.

³⁵ Husão ju omano ramo hekovia oĩ Bedade ra'y Hadade. Ha'e va'e ma Moabe yvy re Midiã pygua kuery ojuka va'ekue. Tetã opena oikovyva ma Avite.

³⁶ Hadade omano ramo hekovia oĩ Masreca pygua Samlá.

³⁷ Samlá omano ramo hekovia oĩ Saul, Reobote tetã Eufrates yakã yvy'iry oĩ va'e guigua.

³⁸ Saul omano ramo hekovia oĩ Acbor ra'y Baal-Hanã.

³⁹ Acbor ra'y Baal-Hanã omano ramo hekovia oĩ Hadar. Tetã opena oikovyva ma Pau. Ta'yxy ma Meetabel oiko, Matrede rajy, Me-Zaabe ramymino.

⁴⁰ Po rami ma Esaú ramymino huvixa ikuai va'e. Ha'e kuery rery, hetarã kuery rery ha'e hekoa rery ma joo ramigua: huvixa Timna, Alva, Jetete,

⁴¹ Oolibama, Elá, Pinom,

⁴² Quenaz, Temã, Mibzar,

⁴³ Magdiel ha'e Irã. Ha'e va'e kuery ma Edom pygua ruxiva ikuai. Ha'e kuery rery ma ijyvy hekoa rery joo ramigua ae. Ha'e va'e kuery ma Edom kuery ru Esaú ramymino ikuai.

37

Tyke'y kuery guyyvy José ovendeague

¹ Jacó ma yvy tuu uguata oikovyague rupi ae ju oiko, Canaã yvy re.

² Po rami ma Jacó kuery rekokue. Ta'y José dezessete ma'etỹ oguereko jave vexe'i re opena oikovy guyke'y kuery reve. Kunumi teri jave tuu rembiguai pi'a kuery reve oiko, Bila ha'e Zilpa pi'a kuery reve. Ha'e kuery reko omombe'u riae nguu pe.

³ Tuu Israel ma gua'y kuery ha'e javi gui oayvuve José, tuja'i ma vy ta'y rire. Ha'e rami vy ikamixa pukurã ojapo, ijyva puku va'e.

⁴ Ha'e gui tyke'y kuery ma ha'e kuery gui tuu José oayvuvea oexa vy nda'ija'evei hexe. Hexeve ijayvu porã aguã voi nda'evevei.

⁵ Ha'e gui José oexa ra'u peteĩ mba'e, ha'e guyke'y kuery pe omombe'u. Ha'e ramo ipoxypave ju,

⁶ mba'eta ha'e kuery pe aipoe'i rire:

— Ajerure pëvy, pendu ke amombe'u rã aexa ra'u va'ekue.

⁷ Mba'ety py merami nhandekuai mba'emoaju jokuaa rupi. Ha'e va'e mbyte py xee ajokua va'ekue opu'ã ho'amy. Ha'e rã peẽ pejokua va'ekue ma ombojere vy xemba'e renonde re ojero'a okuapy — he'i.

⁸ Ha'e ramo tyke'y kuery aipoe'i:

— Ha'e rami vy ndee ri ty'y oreruvixarã reiko? Ndee ri ty'y orere ndepo'aka ta? — he'i okuapy. Ha'e rami ipoxypave okuapy oexa ra'u va'ekue omombe'u ramo, ijayvua ojou vai vy.

⁹ Ha'e gui amboae ju José oexa ra'u. Guyke'y kuery pe omombe'u vy aipoe'i:

— Aexa ra'u avi peteĩ mba'e. Ha'e vy aexa kuaray, jaxy ha'e jaxy-tata onze ikuai va'e. Ha'e kuery xerenonde re merami ikuai vy ngova yvy re omovaẽmba okuapy — he'i.

¹⁰ Nguu ha'e guyke'y kuery pe omombe'u ramo tuu ixupe ijayvu ete. Ha'e vy aipoe'i:

— Mba'erã tu ha'e nunga rexa ra'u? Ha'e rami vy ore kuery — xee, ndexy, nderyke'y kuery — yvy re orerova romovaẽmba 'rã ri ty'y nerenonde re roĩ vy? — he'i.

¹¹ Tyke'y kuery ma ndoayvuvei okuapy. Ha'e rã tuu ma ha'e nungakue omoĩ porã opy'a re.

¹² Ha'e gui tyke'y kuery oo nguu rymba kuery vexe'i re opena aguã Siquém katy.

¹³ Ha'e ramo Israel aipoe'i José pe:

— Xerymba kuery re nderyke'y kuery opena okuapy Siquém py. Romondouka 'rã ha'e kuerya py.

José ombovai:

— Apy ma aĩ.

¹⁴ Israel aipoe'i:

— Tereo aỹ. Exa marã rami pa nderyke'y kuery ikuai, ha'e xerymba kuery mba'exa pa ikuai guive exa pota. Ha'e gui eju xevy remombe'u aguã — he'i. Ha'e rami vy Hebrom yvy'ã guy gui omondouka Siquém katy.

¹⁵ Opa rupi rei José oiko rã peteĩ ava ovaexĩ. Ha'e vy oporandu:

— Mba'e tu reka reikovy?

¹⁶ Ombovai:

— Ke'y kuery rima aeka aikovy. Emombe'u ke mamo pa mymba kuery oguereko okuapy — he'i.

¹⁷ Ha'e rã ava va'e aipoe'i:

— Apy gui oje'oipa ju ma. Mba'eta aendu aipoe'i rã: "Jaje'oi apy gui Dotã katy ju" he'i okuapy ramo. — Ha'e ramo José oo guyke'y kuery rakykue. Ha'e vy Dotã py ojou.

¹⁸ Mombyry rupi ou reve ha'e kuery oexa vy ovaẽ e'ỹ mbove jogueroayvu okuapy ojuka aguã re.

¹⁹ Joupe-upe aipoe'i:

— Pee ma ou oiny oexa ra'u kuaa va'e!

²⁰ Peju ke aỹ, jajuka. Nhamombo yvykua py, ha'e nhamombe'u 'rã rixo ka'aguy regua ho'uague rami. Ha'e rami vy jaexa 'rã mba'e pa oexa ra'uague gui oiko ra'ea — he'i okuapy.

²¹ Ha'e rami ijayvu rã tyke'y Rúben oendu vy ogueraa jepe ha'e kuery po gui. Ha'e vy aipoe'i:

— Nda'evei jajuka aguã.

²² Nda'evei nhamoẽ aguã huguy. Yvykua tekoa e'ỹa py oĩ va'e py pemombo teĩ hexe pemoĩ eme pendepo — he'i. Ha'e rami ijayvu ha'e kuery po gui ogueraa jepexe vy tuua py ju omondouka aguã.

²³ Ha'e gui José guyke'y kuerya py ovaẽ ramove ojopy, omboi ikamixa puku ijyva puku va'e onhemonde oikovyva.

²⁴ Ojopy vy omombo vvykua yy oĩ e'ỹ va'e py.

²⁵ Ha'e gui uguapy okuapy okaru aguã. Oma'ẽ vy oexa Ismael regua kuery Gileade gui ou okuapy va'e. Guymba camelo áry ogueru heakuã porã va'e, balsamo ha'e mirra. Egito vvy katy ogueraa henoiny.

²⁶ Ha'e gui Judá aipoe'i guyyv kuery pe:

— Mba'e tu jajou 'rã nhanderyvy jajukaague re, ha'e huguy nhamoẽague nhandhomia re?

²⁷ Peju, nhavende Ismael regua kuery pe, hexe nhandepo nhamo'ẽ e'ỹ aguã, mba'eta nhanderyvy nhandero'o ae oiko — he'i. Ha'e ramo tyvy kuery ojou porã.

²⁸ Mba'emo vendea Midiã pygua kuery oaxa oje'oivy ramo José ryke'y kuery ojopy vy oguenoẽ vvykua gui. Ismael regua kuery pe ovende vinte hatã'i va'e prata guigua re. Ha'e rã ha'e kuery ma Egito vvy katy ogueraa José.

²⁹ Ha'e gui Rúben vvykua py oma'ẽ aguã ou ju ramo José noĩvei ma ha'e py. Ha'e ramo oao omondoro.*

³⁰ Oo ju guyke'y kuerya py. Aipoe'i:

— Kunumi va'e noĩvei pe py. Ha'e rami rire xee marã katy 'rã tu aa? — he'i.

³¹ Ha'e ramo José kamixa puku ojopy vy kavara ojuka vy ombovypa huguy.

³² Ha'e vy kamixa puku ijyva puku va'e omoudouka, nguua py ogueraa uka. Ha'e vy aipoe'i uka okuapy:

— Kova'e rojou. Exa pota ndera'y mba'e pa tyrã pa ha'e'ya — he'i uka.

³³ Ha'e gui tuu kamixa puku oexa kuua vy aipoe'i:

— Xera'y mba'e rima. Vixo ka'aguy regua rima ho'u ra'e. Anhetẽ José omondoropa 'rã ra'e — he'i.

³⁴ Ha'e rami vy Jacó oao omondoropa vy ajukue voxa guigua py ju onhemonde. Mbovy ára re rei e'ỹ ipy'a vai oikovy gua'y re.

³⁵ Ha'e ramo ta'y ha'e taju kuery ha'e javive joguerupa ombopy'a porã aguã. Ha'e rã ha'e ma nonhembopy'a porã ukai. Ha'e vy aipoe'i:

— Ajae'o reve 'rã xenhe'ẽ oo xera'y oĩa py — he'i. Ha'e rami vy tuu ojae'o vaipa.

³⁶ Ha'e va'e jave Midiã regua kuery ma Egito vvy py ju ovende José, Faraó rembiguai xondaro ruvixa Potifar hery va'e pe.

38

Judá ha'e ta'y ra'yxykue Tamar rekoke oĩa

¹ Ha'e va'e jave py Judá guyyv kuerya gui ojepe'a vy oiko pete'i Adulão pygua, Hira hery va'e ro py.

² Ha'e py Judá oexa pete'i kunha Canaã pygua Sua rajy. Gua'yxyrã ogueru vy oguereko.

³ Ha'e gui oguereko'i kyrĩ va'e, ava'i. Tuu omboery Er.

⁴ Oguerekove ju amboae kyrĩ va'e. Ha'e va'e ma ixy omboery Onã.

⁵ Peteiguy ju oguereko ramo amboae ava'i itui'i. Ha'e va'e rery ma Selá. Quezibe tekoa py oikoa py oikuavã'i.

⁶ Ha'e gui Judá ojou gua'y jypy guare Er ra'yxyrã, Tamar hery va'e.

⁷ Ha'e rã Judá ra'y tujave va'e ma teko vai rupi anho oiko Nhanderuete renonde. Ha'e ramo SENHOR oipe'a hekove.

⁸ Ha'e ramo gua'y Onã pe ju Judá aipoe'i:

— Ereko nderyke'y ra'yxykue. Nhanderekorã va'ekue rami vy ereko, nderyke'y ra'y'rã rami pereko aguã — he'i.*

⁹ Ha'e rami teĩ Onã oikuaa ta'y oiko va'erã va'e ta'y ae e'ỹ oiko 'rãa. Ha'e rami vy guyke'y ra'yxykue reve onheno nhavõ ojapo vvy py ho'apa aguã rami, tyke'y ra'y'rã rami oiko e'ỹ aguã.

¹⁰ Ha'e rami ojapo ramo SENHOR ndojou porã. Ha'e rami vy ha'e va'e rekove voi oipe'a avi.

¹¹ Ha'e ramo Judá aipoe'i gua'y ra'yxykue Tamar pe:

— Eiko imeve'ỹ va'e ranhe nderu ro py, xera'y Selá tuja peve — he'i. Mba'eta ojeupe aipoe'i: “Kova'e xera'y voi guyke'y kuery rami omano e'ỹ aguã”, he'i vy. Ha'e ramo Tamar oo vy nguu ro py ju oiko.

¹² Yma ma rire Judá ra'yxy Sua rajy va'e omano. Ha'e va'e gui Judá ipy'a porã ju vy oo guymba kuery vexa'i rague ojaya aguã Timna py, oirũ Hira Adulão pygua reve.

¹³ Ha'e Tamar pe aipo'ea:

— Neme rukue rako oo oiny Timna katy, guymba vexa'i rague ojaya aguã — he'i.

¹⁴ Ha'e ramo oao imeve'ỹ va'e regua onhemondea omboekovia, ngova guive omo'ã ojexa kuua uka e'ỹ aguã. Oguapy oiny Enaim rokẽ rexei Timna katy tape oo va'e py, mba'eta oikuaa Selá tuja ma va'eri ta'yxyrã nome'ẽi teria.

¹⁵ Ha'e gui Judá oexa vy “Itavy rei va'e po” he'i, ngova omo'ã ramo.

¹⁶ Ha'e rami vy hexe onhemboja ovy vy aipoe'i:

— Eju, jaa nhandheno — he'i, gua'y ra'yxykue oexa kuua e'ỹ vy.

Kunha va'e oporandu:

— Mba'e tu ha'vy reme'ẽ ta nhandheno aguã re?

* 37:29 Ha'e kuery omondoro 'rã oao ndovy'aia oexa uka vy. * 38:8 Ha'e kuery reko rami vy amongue ta'y e'ỹ re omano ramo tyvy ju oiko 'rã imeve'ỹ va'e re omenda aguã rami, tyvy ra'y oiko aguã omano va'ekue ra'y rami (Deuteronomio 25.5-6). Ha'e nunga re saduceu kuery oporandu okuapy Jesus pe (Mateus 22.23-33; Marcos 12.18-27; Lucas 20.27-40).

- ¹⁷ Ha'e ombovai:
— Ndea py aru ruka 'rã peteĩ kavara xerymba kuery ikuaia gui — he'i.
Ha'e rã kunha va'e aipoe'i:
— Kavara reru ruka e'ÿa ja eja ranhe xevy mba'emo areko va'erã — he'i.
- ¹⁸ Judá oporandu:
— Mba'e nunga ha'vy reipotã aea?
Kunha va'e ombovai:
— Nemba'e carimbo ixã reve, ha'e ndepopoka ndepo py rereko va'e — he'i. Ome'ẽmba vy onhenho kunha va'e reve. Ha'e gui kunha va'e oguereko'i ta'y.
- ¹⁹ Ha'e vy opu'ã ovy vy omboi ngova mo'ãa. Omoĩ ju ao imeve'ÿ va'e regua omboi va'ekue.
²⁰ Ha'e va'e rire oĩague py Judá ogueraa uka kavara oirũ Adulão pygua pe, kunha va'e gui ogueru ju aguã ipo py oea va'ekue. Oo teĩ ndojou kunha va'e.
- ²¹ Ha'e vy oporandu ha'e pygua avakue pe. Ha'e vy aipoe'i:
— Mamo tu oĩ kunha itavy rei va'e Enaim rexei'i tape oo va'e py oĩ va'ekue?
Ha'e kuery ombovai:
— Apy tu ndoikoĩ ri jepi itavy rei va'e — he'i.
²² Ha'e gui Judá oĩa py ju irũ ojevuy vy aipoe'i:
— Xee ndajou kunha va'e. Ha'e rami avi avakue ha'e pygua “Apy tu ndoikoĩ ri jepi itavy rei va'e”, he'i okuapy xevy.
- ²³ Judá ombovai:
— Tove ipo py ae topyta aea va'ekue, nhandejojaja rei e'ÿ aguã. Ixupe guarã kavara araa uka teĩ nderejou — he'i.
- ²⁴ Ha'e gui mboapy jaxy rai'i jave Judá pe aipo'ea:
— Ndera'y ra'yxykue Tamar tu itavy rei ra'e, oguereko ma kyrĩ va'e — 'ea.
Ha'e ramo Judá aipoe'i:
— Penoẽ na oka py peapypa aguã.
- ²⁵ Oguenoẽ heruvy ramo aipoe'i uka ome rukue pe:
— Kova'e ja gui ae areko kyrĩ va'e. Peikuaa pota ke mava'e mba'e pa kova'e carimbo ixã revegua ha'e kova'e popoka — he'i.
- ²⁶ Ha'e ramo Judá oexa kuaa vy aipoe'i:
— Ha'e ma xegui heko porãve va'e oiko, imerã xera'y Selá name'ẽi rire — he'i. Ha'e va'e rire nonhenovei hexeve.
- ²⁷ Kyrĩ va'e oikuavã aguã ára ovaẽ ramo mokoĩ'i oguereko hyru py.
- ²⁸ Itui'i jave peteĩ omoĩ opo oka katy. Ixy re opena va'e ojopy vy ipo rupi ojokua nhimbo pytã va'e py. Ha'e vy aipoe'i:
— Kova'e ma ha'e ranhe omoẽ opo.
- ²⁹ Ha'e rami teĩ ha'e va'e opo omoinge ju ramo amboae ju itui. Ha'e rã aipoe'i:
— Mba'exa tu remopa'ũ rejuvy? — he'i vy omboery Perez.†
- ³⁰ Ha'e gui ma tyvy ju itui ipo rupi ojokuaa va'ekue reve. Ha'e vy omboery Zera.

39

Potifar ro py José oikoague

- ¹ Ha'e gui Ismael regua kuery Egito katy José ogueraa okuapy rire ha'e kuery gui Faraó rembiguai xondaro ruvixa Potifar hery va'e ju ojogua.
- ² José reve SENHOR oiko ramo oiko porã Egito pygua ro py.
- ³ Potifar voi oexa hexeve SENHOR oikoa, ha'e mba'emo ojapoa ha'e javi py SENHOR omoingo porãa.
- ⁴ Ha'e rami vy ojou porã José. Omoĩ ngoo py ikuai va'e ha'e javi re opena aguã. Opa mba'e oguereko va'e omboaxapa ipo py.
- ⁵ Ngoo ha'e opa mba'e oguereko va'e re opena kuaa ára guive José re vy SENHOR omoingo porã Egito pygua ro. Opa mba'e oguereko va'e, hoo pygua, mba'ety rupi voi SENHOR omoingo porã.
- ⁶ Ha'e ramo Potifar opa mba'e José po py omboaxapa, mba'emo re opena va'erã omoĩ vy mba'eve re ndoikuaa potavei mbojape ho'u va'erã e'ÿ vy. José ma imbarae, iporã guive.
- ⁷ Ha'e va'e rire ipatõ ra'yxy openaxe oikovy José re. Ha'e vy aipoe'i:
— Enheno xereve.
- ⁸ Ha'e ramo ndoipotai vy aipoe'i opatõ ra'yxy pe:
— Xepatõ ma ndoikuaa potai mba'emo hoo py oĩ va'e re, xepo py omboaxapa oguereko va'e ha'e javi.
- ⁹ Ha'e voi xegui ndayvatevei kova'e oo py. Mba'eve nomboaxa e'ÿi apena aguã, ndere e'ÿ vy, ta'yxy ae reiko ramo. Mba'e re tu ha'e rami ete teko vai ajapo ta, Nhanderuetẽ pe ajevuy vy? — he'i.
- ¹⁰ Ko'ẽ nhavõ kunha va'e ijayvu oikovy José pe. Ha'e rã ndojapyxakai hexeve onhenho aguã, neĩ hexeve oĩ aguã ndojou porã guive.
- ¹¹ Ha'e gui peteĩ ára oo py José ou mba'emo re oikuaa pota aguã. Tembiguaĩ oo pygua kuery neĩ peteĩve noĩ.

† 38:29 Tery Perez ma “Omopa'ũ va'e” 'ea.

- ¹² Ha'e ramo kunha va'e ijao re ojopy vy aipoe'i:
— Enhenoxe xereve — he'i ju. Ha'e ramo kunha va'e po py oao oea ovy, onha ovy oka katy.
- ¹³ Oka katy onha vy oao ipo py oea ovy kunha va'e oexa vy
- ¹⁴ oenoi tembiguai avakue oo pygua kuery. Ha'e vy aipoe'i ha'e kuery pe:
— Pexa ma, kova'e hebreu xeme ogueru va'ekue nhanembojaru rei aguã ou. Xea py ou kuri xereve onhenoxe vy. Ha'e rã xee ajapukai ratã.
- ¹⁵ Ajapukai ratã ramo oendu vy onha ovy oka katy, oao oea ovy — he'i.
- ¹⁶ Kunha va'e ijao omoi porã ovyry, ime ngoo py ou ju peve.
- ¹⁷ Ha'e gui ome pe ju omombe'u jypy omombe'uague rami ae. Ha'e vy aipoe'i:
— Xea py ou kuri hebreu nerembiguairã reru va'ekue, xembojaruxe vy.
- ¹⁸ Ha'e gui ajapukai atã ramo oka katy onha vy xevyry oea ovy oao — he'i.
- ¹⁹ Ipatõ ra'yxy ixupe “Ha'e rami nerembiguai ojapo kuri xere” he'i rã oendu vy ipoxy vaipa.
- ²⁰ Ha'e vy ojopy José. Ombo'a uka nhuã huvixa ombo'a uka va'ekue ikuai py. Ha'e rami rã José nhuã py oi.
²¹ Ha'e rami tei José reve SENHOR oiko vy opena porã hexe. Ojapo nhuã re opena va'e ojou porã aguã rami.
- ²² Ha'e ramo José pe ju opena uka nhuã py ikuai va'e ha'e javive re. Mba'emo ojapoa va'e ha'e javi re opena ha'e py.
- ²³ Nhuã re opena va'e mba'eve ndojapoi, José pe anho mba'emo ojapo uka vy. Hexeve SENHOR oiko, ha'e mba'emo ojapoa ha'e javi py SENHOR omoingo porã.

40

José nhuã py oi jave mokoï oexa ra'u va'ekue omombe'uague

- ¹ Ha'e va'e rire Egito pygua huvixa rembiguai kuery, ixupegua karo re opena va'ety ha'e mbojape apoa, mokoïve ojejavy opatõ pe.
- ² Ha'e ramo guembiguai mokoïve pe Faraó ivai, karo re opena va'e ruvixa pe, mbojape apoa ruvixa pe guive.
- ³ Ha'e rami vy ombo'a uka xondaro ruvixa ro py, José nhuã py oia py ae.
- ⁴ Mokoïve re xondaro ruvixa opena uka José pe. Ha'e rami py opyta are okuapy nhuã py.
- ⁵ Petei pyavyve ha'e kuery mokoïve oexa ra'u, karo re opena va'ekue ha'e mbojape apoare Egito pygua huvixa rembiguai nhuã py ikuai va'e. Ha'e rami vy petei-tei oikuaxe oexa ra'uague mba'erã paa.
- ⁶ Ko'ë aje'ive reve ha'e kuery py José ou vy oexa rã iporiau rei okuapy.
- ⁷ Ha'e ramo oporandu Faraó rembiguai hexeve nhuã py ikuai va'e pe. Ha'e vy aipoe'i:
— Mba'e re tu aỹ pendoriau rei pekuapy?
- ⁸ Ha'e kuery ombovai:
— Roexa ra'u kuri petei mba'e, ha'e avave rei jipoi mba'erã paa kuaa ukaarã — he'i.
Ha'e ramo José aipoe'i:
— Nhanderuete e'ỹ ri ty'y ha'e nunga kuaa ukaarã oiko? Pemombe'u ha'vy xevy pexa ra'u va'ekue.

Karo re opena va'e oexa ra'u va'ekue omombe'uague

- ⁹ Ha'e ramo karo re opena va'ekue José pe omombe'u oexa ra'u va'ekue. Ha'e vy aipoe'i:
— Xee aexa ra'u rã petei uva rembypy hi'ai xerenonde.
- ¹⁰ Uva rembypy re oi mboapy hakã. Hoky, ipotypa, hi'a ijajupa guive.
- ¹¹ Faraó pegua karo xepo py merami areko. Uva'a ajopy vy aumbiri merami karo py. Ha'e vy Faraó po py merami amoi — he'i.
- ¹² Ha'e ramo José aipoe'i ixupe:
— Po rami guarã rima ra'e: Mboapy uva rakã ma mboapy ára.
- ¹³ Ha'e gui mboapy araa py ma Faraó nemoi ju 'rã reikoaty rami reiko aguã, nerembiaporã va'ekue rejapo ju 'rã ipo py karo remoi aguã, yma ixupegua karo re repenaaty rami ae ju.
- ¹⁴ Ha'e rami avi reiko porã ma vy nema'endu'a ke xere. Ajerure xepytyvõ aguã, Faraó oendua py ke nema'endu'a xere, kova'e oo gui aẽ aguã,
- ¹⁵ mba'eta xee ma anhetẽ xererua rive va'ekue hebreu kuery yvy gui. Ha'e gui apy voi mba'eve ndajapoi nhuã py xembotyva aguã — he'i.

Mbojape apoa oexa ra'u va'ekue omombe'uague

- ¹⁶ Ha'e gui mbojape apoa ruvixa ju José mba'emo omombe'u porã oexa vy aipoe'i ixupe:
— Xee voi aexa ra'u kuri. Ha'e gui mboapy ajaka'i mbojape oia xeaã áry merami araa henoiny.
- ¹⁷ Ajaka'i hi'áryve oi va'e py ma opa marãgua Faraó ho'uxe vai va'e oi mbojape apoa rembiapo. Ha'e rã guyra ma ho'u okuapy xeaã áry ajaka'i araa va'e gui — he'i.
- ¹⁸ Ha'e ramo José aipoe'i ixupe:
— Po rami guarã rima ra'e: Mboapy ajaka'i ma mboapy ára.
- ¹⁹ Ha'e gui mboapy araa py ma Faraó oi'pe'a uka 'rã neakã, ha'e ndereupi 'rã yvyra re. Ha'e rã guyra ho'u 'rã ndero'okue — he'i.
- ²⁰ Ha'e gui mboapy araa py ma ovaẽ Faraó ituiague ára. Ha'e va'e ára py ngaru ojapo guembiguai kuery ha'e javi pe. Ha'e kuery oexa py omoi ju karo re opena va'e ruvixa, ha'e rã mbojape apoa ruvixa re ma ijayvu omano aguã re.
- ²¹ Karo re opena va'e ruvixa ma omoi oikoaty rami ju oiko aguã rami, Faraó po py karo omoi aguã.

²² Ha'e rã mbojape apoa ruvixa ma ojryvipy uka, José omombe'u voiaque rami.

²³ Ha'e rami teĩ karo re opena va'e ruvixa na'ima'endu'avei José re, hexarai rive.

41

Faraó oexa ra'u va'ekue ju José omombe'uague

¹ Mokoĩ ma'et'ya py Faraó ju oexa ra'u. Nilo yakã yv'ry merami opu'ã ho'amý.

² Oexa ra'u sete vaka ikyra va'e, iporãgue va'e yy gui oẽ vy nhuũ rogue ho'u okupy ramo.

³ Ha'e va'e rire sete vaka ivaikue, inhangaikue va'e ju yy gui oẽ ovuy ikyrakue rakykue. Oẽ ypy va'ekue reve opyta okuapy yy rembe re.

⁴ Ha'e gui vaka ivaikue rei, inhangaikue va'e omokõmba merami vaka ikyrave va'e. Ha'e ramove Faraó omyĩ.

⁵ Ha'e gui oke vyve oexa ra'u ju. Ha'e vy oexa peteĩ rembypy re sete hary iporã va'e oĩ rã.

⁶ Ha'e va'e rire sete hary ju oĩ ivaikue'i, yvytu haku va'e omombirupa rei'i va'ekue ramigua.

⁷ Ha'e gui sete hary ivaikue'i va'e omokõmba hary porãgue oĩ va'ekue. Ha'e gui Faraó omyĩ. Ha'e nunga oexa ra'u.

⁸ Ko'ẽ aje'ive ha'e nunga re anho Faraó ipy'a oiny vy oenoĩ ukapa imba'ekuaa va'e ha'e guembiguai hi'arandu va'e Egito py ikuai va'e ha'e javi. Ha'e kuery pe omombe'upa oexa ra'u va'ekue. Ha'e rami teĩ peteĩve jipoi ixupe mba'erã paa omombe'u kuaa va'erã.

⁹ Ha'e rami rã karo re opena va'e ruvixa aipoe'i Faraó pe:

— Aỹ ma xema'endu'a peteĩ ajejavyague re.

¹⁰ Nerebiguai kuery pe ndevai vaipa vy xemboty uka karamboae nhuã py xondaro ruvixa ro py, mbojape apoa ruvixa reve.

¹¹ Peteĩ pyávy peteĩ-teĩ roexa ra'u joo rami e'ỹ-e'ỹ.

¹² Ore roĩa py oiko avi peteĩ kunumi hebreu va'e xondaro ruvixa rembiguai oiko va'ekue. Ore roexa ra'u va'ekue romombe'u ramo oikuaa uka mba'erã pa roexa ra'uague. Peteĩ-teĩ pe roexa ra'u va'ekue ha'evea rami omombe'u orevy.

¹³ Ha'e gui roexa ra'u va'ekue omombe'uague rami meme oiko. Xee ma aikoaaty rami ju xemoĩ. Ha'e rã amboae ma rejryvipy uka — he'i.

¹⁴ Ha'e ramo Faraó ma José oenoĩ uka ramo nhuã gui oguenoẽa pojava. Ha'e ramo guendyva ojapo, ha'e oao omboekovia ma vy oo Faraó pe ojexa uka aguã.

¹⁵ Ixupe Faraó aipoe'i:

— Xee aexa ra'u va'ekue avave rei ndoikuaai mba'erã pa aexa ra'ua. Ha'e rã ndevy ma aipo'ea reikuaa va'ea oexa ra'u pyre mba'erã paa.

¹⁶ José ombovai vy aipoe'i:

— Xee e'ỹ rima aikuaa, Nhanderuete ae 'rã oikuaa uka ndee Faraó pe opena porã vy — he'i.

¹⁷ Ha'e ramo Faraó omombe'u José pe:

— Aexa ra'u vy yakã Nilo rembe re merami xe'aĩ.

¹⁸ Ha'e aexa sete vaka ikyra va'e, iporã va'e yy gui oẽ rã. Okaru okuapy ranhe nhuũ rogue re.

¹⁹ Ha'e rire vaka kuery mboae ju oẽ ovuy ikangykue, ivaikue ha'e inhangaikue. Ha'e ramigua xee aexa va'e'ỹ teri Egito yvy ha'e javi re.

²⁰ Ha'e gui vaka inhangaikue, ivaikue va'e ho'upa ikyra va'e oẽ ypy va'ekue.

²¹ Omokõmba rire teĩ aexa rã nhomokõ va'ekue rami e'ỹ, ivaikue rei ae okuapy jypy guare rami ae. Ha'e gui amyĩ.

²² Ha'e gui ma aexa ra'u ju peteĩ rembypy re sete hary iporãgue oĩ va'e.

²³ Ha'e va'e rire oẽ ju sete hary vaikue'i, yvytu haku va'e gui ipirupa rei va'e.

²⁴ Ha'e gui sete hary vaikue'i va'e omokõmba sete hary porãgue ikuai va'ekue. Ha'e nunga imba'ekuaa va'e kuery pe amombe'u rã neĩ peteĩve nomombe'u kuaai mba'erã paa — he'i.

²⁵ Ha'e ramo José ombovai:

— Ndee Faraó, peteĩ rami guarã ae rexa ra'u ra'e. Nhanderuete mba'emo omoingo va'erã rima oikuaa uka ndevy.

²⁶ Sete vaka iporã va'e rexa va'e ma sete ma'et'ỹ. Ha'e sete hary iporã va'e voi sete ma'et'ỹ. Rexe ra'u va'ekue ma peteĩ'i rami guarã.

²⁷ Sete vaka ivaikue rei, inhangaikue va'e takykue oẽ va'e ma sete ma'et'ỹ avi, ha'e sete hary ivaikue rei va'e yvytu haku va'e omombirupa va'ekue ma sete ma'et'ỹ re karuai oiko va'erã.

²⁸ Pova'e ayvu Faraó pe aipoa'e va'e py ma Nhanderuete ndevy oikuaa uka mba'emo ombou va'erã.

²⁹ Mba'eta sete ma'et'ỹ re opa mba'e oiko porã 'rã Egito yvy ha'e javi re.

³⁰ Ha'e va'e rire ma sete ma'et'ỹ re ju 'rã oiko karuai. Ha'e va'e gui opa mba'e oiko porãague re na'ima'endu'aavei 'rã Egito yvy re, mba'eta karuai omomba 'rã yvy ha'e javi.

³¹ Yvy re oiko porãague re ma na'ima'endu'aavei 'rã karuai ha'e va'e rire oiko ramo. Ha'e nunga nda'evei eite 'rã.

³² Mokoĩgue ma Faraó pe Nhanderuete oexa ra'u uka, mba'eta ombou 'rãe, ombou voi 'rã guive.

³³ Aỹ ma Faraó, rejou 'rãgue peteĩ ave oiko kuaa va'e, hi'arandu va'e Egito yvy re opena aguã remoĩ va'erã.

³⁴ Faraó, ejapo ke po rami. Emoĩ yvy re opena va'erã kuery, Egito yvy rupi sete ma'et'ỹ re peteĩ nhiruĩ henda py ijaju va'e oiko nhavõ gui peteĩ-teĩ ojopy va'erã.

³⁵ Opena va'e kuery tomono'õ mba'emo'a, ma'etÿa oiko porã va'e ára. Tomboaty reta mba'emo ra'yí Faraó po py tetã pygua kuery peguarã. Tomoí porãmba.

³⁶ Ha'e rami vy 'rãe pereko tembi'u karuai sete ma'etÿ re Egitto yvy re oiko jave guarã, karuai gui yvy re ikuai va'e opa e'y agua — he'i.

Egitto yvy re José opena oikovyague

³⁷ Ha'e va'e ayvu Faraó ojou porã. Hembiguai kuery voi ojou porã.

³⁸ Ha'e rami vy Faraó aipoe'i guembiguai kuery pe:

— Jajou 'rã ri nda'u ava kova'e rami hexe Nhanderuete Nhe'ë oí va'e? — he'i.

³⁹ Ha'e rire José pe ju Faraó aipoe'i:

— Ha'e gui ha'e nunga ha'e javi Nhanderuete oikuaa ukapa ndevy. Avave rei ndoikoi ndee ramigua oiko kuaa ha'e hi'arandu va'e.

⁴⁰ Ha'e rami rã ndee ae 'rã rei xero re opena va'e. Ndee meme 'rã ndepo'aka xeivygua kuery re. Xee anho 'rã ndegui yvateve va'e aiko — he'i.

⁴¹ Faraó aipoe'ive ju José pe:

— Ma'ë, Egitto yvy ha'e javi re repena aguã romoí — he'i.

⁴² Ha'e rami vy Faraó oikuã regua hery oía va'e omboi vy José kuã re ju omoí. Ao ajukue iporãve va'e guigua py omonhemonde vy mbo'y ouro guigua omoí ijaju'y re.

⁴³ Karóxa mokoia va'e py oí aguã rami ojapo, ha'e henonde “Penenapy'ã re ke peí” he'i uka heravy. Ha'e rami py ombopo'aka Egitto yvy re ikuai va'e ha'e javi re.

⁴⁴ Faraó aipoe'ive ju José pe:

— Xee ma Faraó. Ha'e rami avi ndeayvu e'y re avave rei ndoupi 'rã opo neí opy Egitto yvy ha'e javi re — he'i.

⁴⁵ Faraó omboery José Zafenate-Panéia. Ta'yxyrã ome'ë Asenate, Om pegua sacerdote Potífera hery va'e rajy. Ha'e va'e rire José oguata oikovy Egitto yvy ha'e javi rupi.

⁴⁶ José trinta ma'etÿ oguereko Egitto pygua huvixa Faraó renonde ojexa uka jave. Ha'e va'e gui Egitto yvy jave re oguataa rupi oiko.

⁴⁷ Sete ma'etÿ re yvy py onhotÿ mbyre ha'e javi oiko porã.

⁴⁸ Ha'e va'e sete ma'etÿ re José omono'õ ukapa tembi'urã Egitto yvy re oiko va'e. Omoí porã tetã ikuai va'e py. Petei-tei tetã pyve omoí porã ha'e va'e katy'i rupi tembi'urã oiko va'ekue.

⁴⁹ Ha'e rami vy José omono'õ reta mba'emo ra'yí, ita ku'i ye'ë rembe rupi ikuai va'e hetaa rami. Ndoipapa kuaavei ma, heta vaipa ete rã.

⁵⁰ Ha'e gui karuai oiko e'y mbove oiko mokoí kyrí va'e José ra'y, Om pegua sacerdote Potífera rajy Asenate pi'a.

⁵¹ Tujave va'e ma José omboery Manassés, mba'eta “Nhanderuete xemboexarai amba'eapo atãague, ha'e xeru ro py aiko jave guare ha'e javi re”, he'i vy.*

⁵² Ha'e rã gua'y mboae ma omboery Efraim, “Yvy ajexavai aikovyague py teí Nhanderuete xeapo xera'y reta aguã rami”, he'i vy.†

⁵³ Sete ma'etÿ Egitto yvy re opa mba'e oiko porãa opa.

⁵⁴ Ha'e va'e rire oiko sete ma'etÿ re karuai, José aipoe'iague rami vy. Yvy jave re ete oiko karuai. Ha'e rã Egitto yvy ha'e javi re ma oí tembi'u.

⁵⁵ Egitto yvy jave re karuai oiko ramo Egitto pygua kuery Faraó pe ojapukai tembi'u re. Ha'e ramo ojeuepegua kuery pe Faraó

— Tapeo José-a py. Ha'e ojapo uka va'e tema pejapo — he'i.

⁵⁶ Yvy jave re karuai oiko ramo José oipe'a uka tembi'u omoí porãaty ha'e javi Egitto pygua kuery pe ovende aguã, Egitto re voi karuai oiko ramo.

⁵⁷ Yvy jave re karuai ramo Egitto katy oua, José gui tembi'u ojogua aguã.

42

Egitto py José ryke'y kuery ju ou okuapyague

¹ Egitto yvy re tembi'u oía Jacó oikuaa vy aipoe'i gua'y kuery pe:

— Mba'e re tu joe-joe rive ri pema'ë pekuapy?

² Xee aendu “Egitto yvy re mba'emo ra'yí oí” 'ea rã. Tapeo ha'vy ha'e gui pejogua jaikove aguã, nhamanomba e'y aguã — he'i.

³ Ha'e ramo José ryke'y kuery dez-ve ikuai va'e oje'oi Egitto gui mba'emo ra'yí ojogua aguã.

⁴ Ha'e rã José ryvy Benjamim ma Jacó nomondoukai tyke'y kuery reve, ojeupe “Xapy'a rei mba'emo oiko gui”, he'i vy.

⁵ Ha'e rami vy amboae regua kuery reve Israel ra'y kuery oje'oi mba'emo ojogua vy, Canaã yvy re voi karuai oiko ramo.

⁶ José ma Egitto yvy re opena va'e oí. Ha'e ae yvy jave gui ou va'e pe mba'emo ovende oiny. Ha'e rami rã tyke'y kuery ou vy guenapy'ã re oí henonde, yvy re ngova omovaẽmba reve.

* 41:51 Tery Manassés ma “Nhomboexaraia” 'ea. † 41:52 Tery Efraim ma “Ta'y reta va'e” 'ea.

- 7 José ma guyke'y kuery oexa kuaa. Ha'e rami teĩ ha'e kuery pe ndojekuaa ukai. Ha'e kuery pe ijayvu atã guive. Ha'e vy aipoe'i:
 — Magui tu peju?
 Ha'e kuery ombovai:
 — Canaã yvy gui roju tembi'u rojogua aguã — he'i okuapy.
- 8 José oexa kuaa guyke'y kuery, ha'e rã ha'e kuery ma ndoexa kuaai.
 9 José ima'endu'a ha'e kuery rekorã oexa ra'u va'ekue re. Ha'e vy aipoe'i:
 — Peẽ kuery ma nhemi rupi oikuaa pota va'e pendekuai. Oreyvy re peju mamo pa roarõ e'ÿa peikuaaxe vy rive.
 10 Ha'e kuery ombovai:
 — Any, oreruvixa. Ore nerembuguai kuery tembi'u rojogua aguã rima roju.
- 11 Ore kuery ha'e javive peteĩ'i ava ra'y orekuai. Heko porã va'e guive orekuai, mba'emo re oikuaa pota va'e e'ÿ — he'i okuapy.
 12 Ha'e rã ha'e aipoe'i:
 — Any teve. Yvy roarõ e'ÿa re peikuaaxe vy rima peju.
 13 Ha'e kuery ombovai:
 — Ore kuery nerembuguai orekuai va'e ma doze joegua orekuai, peteĩ ava Canaã yvy re oiko va'e ra'y kuery. Kyrĩve va'e ma oreru ro py opyta. Ha'e rã amboae ma ndoikovei ma — he'i okuapy.
 14 Ha'e gui José aipoe'i ha'e kuery pe:
 — Xee pëvy aipoa'league rami ae oreyvy re peikuaa pota va'e ete pendekuai.
- 15 Ha'e rami vy 'rãe aikuaa. Anhetẽ ete Faraó rekove rupi aura vy aipoa'e: Apy gui ndapeoi 'rã penderivyv kyrĩve va'e ou e'ÿa ja.
 16 Peẽ kuery regua peteĩ xee amondouka 'rã penderivyv reruarã. Ha'e rã peẽ kuery ma romboty 'rã aikuaa aguã anhetẽ pa pendeayvua. Ha'e rami e'ÿ rã Faraó rekove rupi aura vy aipoa'e: Oreyvy re peikuaa pota vy ae peju — he'i.
 17 Ha'e vy mboapy ára re ombo'a imbokuapy nhuã py.
 18 Mboapy araa py José aipoe'i:
 — Po rami pejapo vy 'rãe peikove, mba'eta xee voi Nhanderuede renonde ajereroxyjea rupi aiko va'e.
- 19 Peẽ kuery heko porã'i va'e ri pendekuai vy peẽ kuery va'e regua peteĩ'i pepyta 'rã apy nhuã py. Ha'e rã amboae kuery ma tapeo mba'emo ra'y'i peraa pendo pygua kuery ho'u va'erã.
 20 Ha'e gui penderivyv kyrĩve va'e ta'vy peru xea py. Ha'e ramo 'rãe aikuaa porã pendeayvu anhetẽa. Ha'e rami e'ÿ vy pemanomba 'rã — he'i.
 Ha'e rami rã ha'e kuery oiko katu ha'e rami ojapo aguã.
- 21 Joupe-upe aipoe'i:
 — Aÿ ma japaga 'rã nhanderyvy re jajapo vaiague re. Anhetẽ ojexavai reve nhandevy ojapukai ramo nanhamboaxyi karamboae. Ha'e nungakue re ae jaiko axy aÿ — he'i okuapy.
 22 Ha'e ramo Rúben ombovai:
 — Xee aipo nda'ei ri ty'y raka'e: “Nda'evei kunumi va'e re jajapo vai aguã” nda'ei? Teĩ peẽ kuery maxenhe'ẽ rendui. Aÿ ha'e nungakue re japagapa jakuapy huguy nhamoẽ uka rire — he'i.
- 23 Ha'e kuery ha'e rami ijayvu vy ndoikuaai José oendu kuaa, mba'eta ha'e kuery reve ijayvu mba'e he'ia paa omombe'u va'e rupi.
 24 Ha'e kuerya gui José ojepe'a ranhe. Ha'e vy ojae'o. Ha'e gui ou ju vy ha'e kuery reve ijayvu. Guyke'y Simeão ha'e kuery mbyte gui oipe'a vy ojokua uka ha'e kuery oexaa py.
- Egito gui José ryke'y kuery ojevuyague*
- 25 Ha'e kuery voxa mba'emo ra'y'i José omonyẽ uka vy peteĩ-teĩ voxa py omoĩ uka ju iperáta, tembi'u tapeo rupi ho'u va'erã guive. Ha'e ramo ijayvuague rami ojapoa.
 26 Ha'e ramo guymba mburika'i áry mba'emo ra'y'i ojogua va'ekue oupi vy oje'oipa ha'e gui.
 27 Oke aguã py opytaa py peteĩ ovoxá oipe'a mburika'i ho'u va'erã oguenoẽ aguã. Ha'e vy operáta ojou ju voxa py oĩ ramo.
 28 Ha'e vy guyvy kuery pe aipoe'i:
 — Kore ome'ẽa ju rima xeperáta. Ha'ekue ete'i nda oĩ xevoxa py — he'i.
 Ha'e rami vy onhemondyi okuapy okyje vy. Joe-joe oma'ẽ reve joupe-upe aipoe'i:
 — Mba'e re nda'u ha'e rami ete ri Nhanderuede ojapo nhandere? — he'i okuapy.
 29 Ha'e gui Canaã yvy re nguu Jacó-a py ovaẽ vy ixupe omombe'upa oiko va'ekue-'ekue. Ha'e vy aipoe'i:
 30 — Ava ha'e va'e yvy pygua ruvixa oĩ va'e oreyvy ijayvu atã, ijyvy re oikuaa pota va'e rami orereroko.
- 31 Ha'e rã ore kuery aiporo'e: “Ore ma heko porã va'e orekuai, roikuaa pota va'e'ÿ.
 32 Doze joegua orekuai, peteĩ'i oiko oreru. Peteĩ oreryvy ma jipovei, ha'e rã kyrĩve va'e ma oreru ro py oĩ Canaã yvy re”, ore.
 33 Ha'e gui ava yvy regua ruvixa aipoe'i oreyvy: “Po rami 'rã aikuaa peẽ kuery heko porã va'e pa peikoa. Apy peja 'rã peteĩ penderegua va'e. Ha'e rã amboae kuery ma pendo pygua kuery rembi'urã peraa vy tapeo.
 34 Ha'e gui xea py ju peru penderivyv kyrĩve va'e. Ha'e ramo 'rã aikuaa avakue heko porã va'ea, oikuaa pota va'e'ÿ peikoa. Ha'e gui ma pendepo py ju amboaxa 'rã penderivyv, ha'e kova'e yvy re pejogua aguã mba'emo”, he'i va'ekue oreyvy.

³⁵ Ha'e kuery ogueru va'ekue voxa gui onhoë vy petei-tei oexa operáta voxa py ogueru jevyague. Voko'i peráta ryrú oexa petei-tei. Ha'e rami vy onhemondyipa okuapy, tuu voi.

³⁶ Ha'e gui tuu Jacó aipoe'i:

— Aÿ nda'evei teve xevy. José ma ndokovei ma, Simeão voi noĩ apy. Aÿ ma Benjamim ju peraxe. Ha'e nunga ha'e javi oiko xevy.

³⁷ Ha'e gui Rúben aipoe'i nguu pe:

— Xapy'a rei xeryvy ndaru jevyi ri ramo ejuka xera'y mokoïve'i hekovia. Xevy repena uka ramo ma xee aru ju 'rã.

³⁸ Ha'e rã tuu ombovai:

— Nda'evei xera'y penderupive oo aguã. Tyke'y omano ma. Ha'e anho'i oikove. Xapy'a rei ooa rupi mba'emo ixupe oiko ramo ma xeporiaua gui rive amano aguã rami 'rã pejapo — he'i.

43

Egito yvy katy ju José ryke'y kuery oo aguã re onhembopy'a okuapyague

¹ Ha'e ramia jave re karuai nda'evei ete yvy re.

² Ha'e gui ha'e kuery tembi'u Egito gui ojogua va'ekue opa ramo tuu aipoe'i:

— Tapeo, pejoguave ju tembi'u nhandevy.

³ Ha'e ramo Judá ombovai:

— Ha'e rami avi ava va'e orevy ijayvu atã reve aipoe'i va'ekue: “Xerova ndapexa jevyi 'rã penderivyvy penderupive ou e'ÿ rã”, he'i va'ekue.

⁴ Ha'e nunga rupi oreryvy orerupive remondouka ramo ma roo ju 'rã tembi'u rojogua aguã.

⁵ Ha'e rã neremondoukai ramo ndorooi 'rã, ava va'e “Xerova ndapexai 'rã penderivyvy penderupive ou e'ÿ rã”, he'i rire.

⁶ Ha'e ramo tuu Israel aipoe'i:

— Mba'e re tu xemoi vai rei pekuapy penderivyvy mboae arekovea peikuaa uka vy?

⁷ Ha'e kuery ombovai:

— Ha'e va'e ava oporandu karamboae orere, ha'e oreretarã kuery re guive. Ha'e vy aipoe'i: “Oikove teri pa penderu? Perekove pa penderivyvy?” he'i orevy. Ha'e rã oporandua ha'e javi'i rombovai. Ndoroiukuai mba'erã pa oikuaaxea vy “Peru ke penderivyvy”, he'i orevy.

⁸ Ha'e gui Judá aipoe'i nguu Israel pe:

— Xerupive ha'vy emondouka kunumi va'e. Ha'e ramo ropu'ã vy roo 'rã jaikovepa aguã. Ha'e rami e'ÿ ramo ndajaikovei 'rã, ore kuery, ndee, neĩ orera'y kuery.

⁹ Xee ae 'rã apena hexe, ha'e rire xepo gui ae ju rejou aguã. Ha'e gui xee ndea py ndaru jevyi ri ramo xee ae ajevy va'e aiko 'rã ndevy, aikovea pukukue re.

¹⁰ Ha'e rã nanhamboarei va'e rire ma mokoïguea ma rojey 'rãgue — he'i.

¹¹ Tuu Israel ombovai:

— Ha'e rami rã ma po rami pejapo: Pejopy mba'emo iporãve va'e kova'e yvy gui, pendevoxa py peraa ava va'e pe peme'ë va'erã: bálsamo, ei kyri'i, heakuã porã va'e, mirra, terebinto ha'e amêndoas.

¹² Peráta guive peraave pendepo py. Pendevoxa py peráta peru va'ekue voi peraa ju pendepo py, mokoïguea repy. Xapy'a rei ojavy ri nhi'ã ra'e.

¹³ Ha'e gui penderivyvy avi peraa. Pepu'ã, ha'e tapeo ju ava va'ea katy.

¹⁴ Tove Nhanderuete ipo'akapa va'e tapenemboaxy uka huvixa renonde peĩ ramo, penderyke'y mboae pendupive ou ju aguã, Benjamim guive. Ha'e gui xee, xera'y kuery okanhy ramo ma ta'y e'ÿ va'e 'rã apyta — he'i.

José guyke'y kuery omovaẽmbaague

¹⁵ Ha'e gui avakue ogueraa mba'emo ome'ë va'erã, peráta guive ogueraa mokoïguea repy. Guyvy Benjamim voi ogueraa. Opu'ã vy oje'oi Egito katy. Ha'e rami vy ojexa uka ju José pe.

¹⁶ Benjamim ha'e kuery reve oĩ rã José oexa vy aipoe'i hoo re opena va'e pe:

— Eraa kova'e avakue ha'e javi xero py. Ejuka vaka ra'y, ereko katupa. Kova'e kuery ma kuaray mbyete jave okaru 'rã xereve — he'i.

¹⁷ Ha'e ramo ojapopa José ijayvuague. Ha'e rami vy ogueraa avakue José ro py.

¹⁸ José ro py ogueraa rã okyjepa okuapy. Ha'e vy aipoe'i:

— Peráta káuxa rima aÿ nhandereru, kueve nhandevoxa py peráta oĩ rire. Aÿ ma nhanemondaague rami 'rã omombe'u, nhandere opu'ã vy escravo nhanemoingo aguã, nhanerymba kuery mburika'i ojopy aguã guive — he'i.

¹⁹ Ha'e vy José ro re opena va'e re ha'e kuery onhemboja vy hexeve ijayvu okuapy okẽ py.

²⁰ Ha'e vy aipoe'i:

— Kore xeruvixa, tembi'u rojogua aguã jypy roju karamboae.

²¹ Rojevya rupi roke aguã py rovaë vy orevoxa roipe'a ramo ha'e py oreperáta oĩ ra'e. Ha'e va'ekue aÿ rogueru ju.

²² Ha'e gui rogueruve ju peráta tembi'u rojogua aguã. Ndoroiukuai guive mava'e pa oreperáta orevoxa py omoĩ jevyague — he'i okuapy.

²³ Ha'e ramo ava va'e ombovai:

— Pendeputy'a guaxu ke, pekyje eme. Penderuete, peẽ kuery ru Ruete ae omoĩ uka ju peráta pendevoxa py. Penderperáta xee ae ajopypa karamboae — he'i. Ha'e gui ha'e kuerya py ogueru ju Simeão.

²⁴ Ha'e gui José ro py ogueroike vy yy ogueru opy ojoj aguã. Hymba kuery mburika'i guive omongaru.

²⁵ Ha'e rá ha'e kuery ma José pe ome'ẽ va'erã oguereko katu kuaray mbyte jave ou rá guarã, mba'eta oendu ha'e py okaru vy ou'ráa.

²⁶ José ou ramo ha'e kuery ogueroike heruvy ixupe ome'ẽ va'erã. Henonde re guenapy'ã re oĩ okuapy, yvy re ngova omovaẽ reve.

²⁷ Ha'e ramo ha'e kuery pe oporandu mba'exa pa ikuaia re. Ha'e vy aipoe'i:

— Ha'vy penderu tujá'i pemombe'u va'ekue oiko porã pa? Oikove teri pa?

²⁸ Ha'e kuery ombovai:

— Oiko porã ri oreru nerembuguai, oikove teri — he'i okuapy. Oakã omboguejyppa reve guenapy'ã re oĩ.

²⁹ Ha'e ramo José oma'ẽ vy oexa guyyvy Benjamim ixu pi'a. Ha'e vy aipoe'i:

— Upe va'e ma nhi'ã penderyyvy kyríve va'e pemombe'u va'ekue? Nhanderuete topena porã ndere, xera'y — he'i ixupe.

³⁰ José oeka pojava ojae'o aguã, opy'a re guyyvy oayvua anho oendu vy. Ha'e vy opy mboae oike vy ojae'o.

³¹ Ojeovaei rire oẽ ju ovvy. Ojejoko vy aipoe'i guembuguai pe:

— Pejara ke tembi'u — he'i.

³² Ha'e ramo ixupe omoĩ ae'i, ha'e kuery pe omoĩ ae'i avi, ha'e Egito pygua kuery ha'e kuery reve okaru va'e pe omoĩ ae'i avi, mba'eta Egito pygua kuery pe nda'evei hebreu kuery reve okaru aguã, Egito kuery rekorã va'ekue rami vy.

³³ Ha'e rami vy guenonde omboguapy uka guyke'y kuery ha'e javi. Tujave va'e omboguapy tujave va'e oĩ aguã py porã, peteĩ-teĩ ha'e rami aguã rami omboguapy, kyríve va'e voi kyríve va'e oĩ aguã py. Ha'e rami rá joe-joe oma'ẽ reve onhemondyipa okuapy.

³⁴ Ha'e gui peteĩ-teĩ ho'u va'erã ojara uka tembi'u guenonde re oĩ va'e gui. Ha'e rá Benjamim pe ma hetave ojara uka, amboae kuery pe ojara uka va'e gui peteĩ nhiruĩkue hetave. Ha'e ramo ha'e kuery okaru ha'e oy'u porã okuapy hexeve.

44

José guyke'y kuery ou jevy aguã rami ojapoague

¹ Ha'e gui José aipoe'i ngoo re opena va'e pe:

— Emonyẽmba ke avakue voxa ipo'akaa rami peve, ha'e emoĩ ju peteĩ-teĩ peráta ivoxa py.

² Ha'e gui kyríve va'e voxa py ma pemoĩ xekaro prata guigua voi, iperáta mba'emo ra'yí repykie reve — he'i. Ha'e rá José aipoe'iague rami ojapo.

³ Ko'ẽmba ramove avakue oje'oipa ju guymba kuery reve.

⁴ Tetã gui mombyry e'y'i teri oo jave José aipoe'i ngoo re opena va'e pe:

— Epu'ã, tereo avakue oo va'ekue rakykue. Reupity vy ke aipo're: “Mba'e re tu penderayvu ete va'e pe pejapo vai?”

⁵ Upe va'e karo e'y'i ri ty'y xeruvixa oy'uaty ha'e imba'ekuaa rupi oiporu va'ety? Ha'e ramia py pejapo vai rima”, 're.

⁶ Ha'e ramo hembigui ha'e kuery oupity vy ha'ekue rami ae ijayvu.

⁷ Ha'e ramo ha'e kuery ombovai:

— Oreruvixa, mba'e re tu ha'e rami ete ri ndeayvu? Ha'e ramigua ete ore nerembuguai kuery ndorojapoi.

⁸ Peráta orevoxa py rojou va'ekue ma Canaã yvy gui rogueru ju ndevy. Mba'erã tu ha'vy nderuvixa ro gui prata, ouro re oremonda ta?

⁹ Karo rejou ri ramo heruare tomano, ha'e rá ore kuery ma toreuai ndevygua escravo, oreruvixa — he'i okuapy.

¹⁰ Ha'e ramo ombovai:

— Pendeayvuague rami ae teĩ karo reruare anho 'rá oiko xevygua escravo. Ha'e rá peẽ kuery re ma pendereko vaia noĩ — he'i.

¹¹ Ha'e gui ha'e kuery ojapura voxa omboguejyppa aguã yvy py. Peteĩ-teĩ oipe'a ovoxa.

¹² Ha'e ramo huvixa rembuguai oikuaa pota peteĩ-teĩ voxa py oĩ va'e re. Tujave va'ea gui ranhe omboypy vy kyríve va'ea py omomba. Ha'e vy karo ojou Benjamim voxa py.

¹³ Ha'e ramo ha'e kuery oao omondoropa. Peteĩ-teĩ guymba áry ju ovoxa oupipa vy ojevypa tetã katy.

Judá onhemombe'u porãague

¹⁴ Ha'e gui Judá guyyvy kuery reve ovaẽmba ju José ro py, ha'e py teri oĩ ramo. Guenapy'ã re ju oĩmba henonde.

¹⁵ Ha'e ramo José aipoe'i:

— Mba'e re tu ha'e ramigua pejapo xere? Ndapeikuaai va'e ty'y ava xee rami ipo'aka va'e imba'ekuaa va'e memea?

¹⁶ Ha'e ramo Judá ombovai:

— Xeruvixa, mba'eta tu ha'vy rombovai ta ndevy? Mba'exa tu ha'vy oreayvu ta? Mba'exa tu ronhemombe'u ta? Nhanderuete oikuaa ore nerembuguai kuery rojejavyguae. Aỹ ma xeruvixa, ore kuery ha'e javive 'rá ndevygua escravo orekuai, karo reraare anho e'y — he'i.

¹⁷ Ha'e ramo José aipoe'i:

— Nda'evei ha'e rami ajapo aguã. Ava xekaro reraare anho 'rã oiko escravo. Ha'e rã peẽ kuery ma tapeo porã penderua katy — he'i.

¹⁸ Ha'e ramo Judá onhembojave hexe. Ha'e vy aipoe'i:

— Xeruvixa, ejapyxaka ranhe xea'yvua re. Ejapyxaka pete'i re xee nerembiguai xea'yvu aguã. Xeruvixa, ndevai eme xee nerembiguai pe, mba'eta ndee ma Faraó rami avi ndepo'akapa va'e.

¹⁹ Xeruvixa, ore nerembiguai kuery pe reporandu karamboae vy aipo're: "Pereko pa penderu, e'ỹ vy penderivyv?" 're va'ekue.

²⁰ Ha'e gui ndee oreruvixa pe rombovai: "Roguereko oreru tuja'i, ha'e ta'y avi oiko oreru tuja'i ma vy ta'yague. Ha'e va'e ma kyrive va'e oiko. Tyke'y ae'i va'ekue omano rire ha'e anho'i ma oiko ixy pi'a. Tuu oayvuye va'e oiko", ro'e va'ekue.

²¹ Ha'e gui ndee aipo're avi va'ekue ore nerembiguai kuery pe: "Peru ha'vy apy aexa aguã."

²² Ha'e ramo ndee oreruvixa pe rombovai: "Kunumi va'e nda'evei nguu tuja'i oexa aguã. Oexa ramo omano 'rã", ro'e va'ekue.

²³ Ha'e gui ndee aipo're ju orevy: "Penderivyv kyrive va'e penderupive ndoui ramo ndapexavei 'rã xerova", 're va'ekue.

²⁴ Ha'e gui roo ju nerembiguai orerua py. Romombe'upa ndee xeruvixa ndea'yvuaque.

²⁵ Oreru aipoe'i: "Tapeo, pejoguave'i ju tembi'u ja'u va'erã", he'i va'ekue.

²⁶ Ha'e rã ore rombovai: "Nda'evei roo aguã. Oreryvy kyrive va'e orerupive oo ramo 'rãe ha'eve. Nda'evei 'rã ava va'e rova roexa ju aguã oreryvy reve'ỹ", ro'e ixupe.

²⁷ Ha'e gui nerembiguai oreru aipoe'i: "Peẽ kuery peikuaa xera'lyxu oikuavã karamboae moko'i xera'y.

²⁸ Pete'i ma xea gui okanhy ramo aipoa'e: "Xee aikuaa rã ta'vy omboa'ypaa rã nda'u", ha'e va'ekue. Aỹ peve xee ndaexavei.

²⁹ Aỹ kova'e ju xea gui peipe'axe, ha'e ixupe mba'emo oiko ramo pejapo 'rã xeporiau gui amano aguã rami", he'i va'ekue oreru.

³⁰ Ha'e rami rire aỹ ma xapy'a rei xee nerembiguai xerua py ajevy teĩ kunumi va'e orerupive ndooi ramo ma oreru omano rive 'rã, mba'eta kunumi va'e reve vy ae oikove'i teri.

³¹ Orereve kunumi va'e noĩ rã oreru oexa vy omano 'rã. Ha'e rami vy rojapo 'rã nerembiguai oreru iporiau gui rive omano aguã rami.

³² Mba'eta xee nerembiguai aiko kunumi va'e re apena aguã rami. Ha'e rami vy xeru pe aipoa'e: "Xeru, xapy'a rei xee ndaru jevyi ramo ndevy pe aiko 'rã ajevavy va'e aikovea pukukue re", ha'e va'ekue.

³³ Ha'e nunga rupi aỹ xeruvixa, xee ae tapyta nerembiguairã kunumi va'e rekovia, ha'e rã kunumi va'e ma too ju ke'y kuery reve.

³⁴ Mba'exa tu xerua py aa ju ta kunumi va'e reve'ỹ? Mba'eta xee ma ndaexaxei xeru tuja'i pe mba'emo vai oiko rã — he'i.

45

Guyke'y kuery pe José ojekuaa ukaague

¹ Ha'e gui José ma ha'e javi oexaa py nonhemombe'u e'ỹ reguavei. Ha'e vy ojavukai:

— Toẽmba xea gui — he'i. Ha'e ramo avave rei hexeve ndopytai, guyke'y kuery pe José ojekuaa uka aguã.

² Ha'e gui José ojae'o atã, Egito pygua kuery oendu aguã rami, Faraó ro pygua kuery guive.

³ Ha'e rami vy José aipoe'i guyke'y kuery pe:

— Xee ma José aiko. Ha'vy oikove teri pa xeru? — he'i. Ha'e ramo tyke'y kuery nombvai kuaavei, henonde py okyjepa vy.

⁴ José pete'igue ju aipoe'i guyke'y kuery pe:

— Aỹ ma penhembojapa xere — he'i ramo hexe ovaẽmba ouvya. Ha'e vy aipoe'ive ju: — Xee ma José Egito vvy katy xevende imbouv va'ekue.

⁵ Aỹ ma nda'evei penderoriaupa rei aguã kyvõ katy xevendeague re, neĩ pendejeupe pendevei aguã voi nda'evei. Mba'eta ajogueraa jepe aguã ae Nhanderuete xembou raka'e penerenonde.

⁶ Mba'eta mokoĩ ma'etỹ re ma karuai oiko kova'e vvy re. Aỹ oata pete'i nhirui ma'etỹ teri mba'eve rei nonhotỹai neĩ nomono'õai aguã.

⁷ Nhanderuete xembou penerenonde nhande kuery opa e'ỹ aguã ko vvy gui, heta araa jepe vy.

⁸ Mba'eta peẽ kuery e'ỹ xembou karamboae apy. Nhanderuete ae xembou vy Faraó ru rami xemoĩ, hoo py ikuai va'e ha'e javive rivuxarã, Egito vvy ha'e javi re apena aguã.

⁹ Tapeo povaja ha'vy xerua py, aipopeje: "Ndera'y José aipoe'i uka: 'Nhanderuete xemoĩ Egito vvy ha'e javi regua rivuxarã. Eju voi xea py are e'ỹ re.

¹⁰ Gósen vvy re ha'eve 'rã xea katy'i reiko aguã, ndera'y kuery, neramymino kuery, nerymba vexa'i, vaka kuery, ha'e mba'emo rereko va'e ha'e javi reve.

¹¹ Ha'e py ma apena 'rã ndere, mba'eta pete'i nhirui ma'etỹ teri oata karuai opa aguã. Ha'e rami iporiaukue va'e reiko e'ỹ aguã, ndero py ikuai va'e, neĩ rereko va'e ha'e javi opa e'ỹ aguã, he'i uka José", peje.

¹² Aỹ ma peẽ kuery xeryvy Benjamim reve pexa pekuapy xee ae penderive xea'yvu aikovya.

¹³ Xeru pe pemombe'u Egito vvy re mba'emo porã arekopa va'e ha'e pexa va'e ha'e javi. Tapeo pojava, apy ju peru xeru — he'i.

¹⁴ Ha'e gui guyvvy Benjamim oia py José oo vy ijaju'y rupi oikuavã reve ojae'o. Benjamim voi ojae'o guyke'y ajaju'y rupi oikuavã vy.

¹⁵ Ha'e gui guyke'y kuery ha'e javive ju oayvupa ojae'o reve. Ha'e ramo tyke'y kuery ijayvu hexeve.

José ryke'y kuery ou okuapy rã Faraó oenduague

¹⁶ Ha'e gui Faraó ro py voi onhendu aipo'ea rã:

— José ryke'y kuery ri ty ou ra'e — 'ea rã. Faraó oendu vy ojou porã, hembiguai kuery guive.

¹⁷ Ha'e rami vy Faraó aipoe'i José pe:

— Aipo're nderyke'y kuery pe: “Pova'e nunga pejapo: Penerymba kuery pembovoyi ju heravy Canaã vvy katy.

¹⁸ Ha'e gui peru penderu ha'e pendera'y kuery xea py. Xee ame'ẽ 'rã vvy iporãvea Egito re oĩ va'e pendekuai aguã. Ha'e py pekaru 'rã pekuapy iporãve va'e re anho”, 're.

¹⁹ Emombe'u avi ha'e kuery pe: “Pova'e nunga pejapo: Egito vvy gui peraa karóxa pendera'y kuery ha'e pendera'yxy kuery peru aguã. Peru avi penderu, pejupa.

²⁰ Ha'e pepexã rei eme mba'emo pereko va'e perupa aguã re, mba'eta Egito vvy ha'e javi re iporãguevea ikuai va'e opytapa rã pendeivy”, 're — he'i.

²¹ Ha'e gui Israel ra'y kuery ha'e rami ojapo. Faraó aipoe'iague rami vy ha'e kuery pe José ome'ẽ karóxa, tembi'u guive tape rupi ho'u va'erã.

²² Peteĩ-teĩ pe ome'ẽ ao iporãve va'e. Ha'e rã Benjamim pe ma ome'ëve, trezentos hatã'i va'e prata guigua ha'e peteĩ nhiruĩ ao iporãve va'e.

²³ Nguu pe ma ha'e rami avi ogueraa uka dez mburika'i opa mba'e porã Egito guigua re ovoyi va'e, ha'e dez mburika'i mba'emo ra'yĩ ha'e mbojape re ovoyi va'e. Tembi'u tuu oua rupi ho'u va'erã voi ome'ẽ.

²⁴ Ha'e rami vy omondoukapa guyke'y kuery. Aipoe'i:

— Joe-joe pepu'ã eme tape peoa rupi — he'i imondovy.

²⁵ Ha'e rami rã Egito vvy gui oje'oi vy ovaẽmba ju Canaã vvy re nguu Jacó-a py.

²⁶ Nguu pe aipoe'i okuapy:

— José oikove teri. Ha'e ma Egito vvy jave re opena va'e oiko — he'i okuapy. Ha'e ramigua oendu vy nda'ipy'a tytyveia ramigua oendu, ndogueroviai vy.

²⁷ José ijayvuague omombe'upa rã tuu Jacó oendu vy, ha'e karóxa heruarã José omondouka va'ekue oexa vy mae ma oendu ju ipy'a guaxua.

²⁸ Ha'e rami vy Israel aipoe'i:

— Ha'eve ma. Xera'y José anhetẽ oikove teri ra'e. Xee aa ta amano e'y mbove aexa ju aguã — he'i.

46

Egito vvy katy Jacó ro pygua kuery oje'oiague

¹ Ha'e gui Israel opa mba'e ogueroko va'e reve oo vy Berseba py ranhe ovaẽ. Ha'e py ma mba'emo ome'ẽ nguu Isaque Ruete pe ombojerovia vy.

² Pyávý Israel pe Nhanderuete ojexa uka vy aipoe'i:

— Jacó! Jacó!

Ombovai:

— Apy ma aĩ — he'i.

³ Ha'e ramo aipoe'i:

— Xee ma Nderuete, nderu Ruete aiko. Ekyje eme Egito vvy re reo aguã, mba'eta ha'e py ndegui amingo 'rã peteĩ regua heta va'e.

⁴ Xee aa 'rã ndereve Egito katy. Araka'eve rã ajapo 'rã ha'e gui pejevy ju aguã rami. Remano ramo José ae 'rã omboty nderexa — he'i.

⁵ Ha'e gui Berseba gui Jacó oguatave ovy. Israel ra'y kuery ogueraa nguu Jacó, gua'y kuery ha'e gua'yxy kuery Faraó karóxa heraarã ombou va'ekue py.

⁶ Ogueraaapa guymba kuery vaka ha'e Canaã vvy re oiko jave ojou va'ekue ha'e javi. Oopa Egito katy, Jacó, hamymino kuery guive.

⁷ Gua'y kuery, gua'y ra'y kuery, guajy kuery, gua'y rajy kuery, ha'e kuery ha'e javi ogueraapa Egito katy.

⁸ Po rami ma Israel ra'y kuery nguu Jacó reve Egito katy oo va'ekue rery: Rúben ma Jacó ra'y tujave va'e.

⁹ Rúben ra'y kuery ma Enoque, Palu, Hezrom ha'e Carmi.

¹⁰ Simeão ra'y kuery ma Jemuel, Jamim, Oade, Jaquim, Zoar ha'e Canaã pygua pi'a Saul.

¹¹ Levi ra'y kuery ma Gérson, Coate ha'e Merari.

¹² Judá ra'y kuery ma Er, Onã, Selá, Perez ha'e Zera. Ha'e rã Er ha'e Onã ma Canaã vvy re ae amano. Perez ra'y kuery ma Hezrom ha'e Hamul.

¹³ Issacar ra'y kuery ma Tola, Puva, Jó ha'e Sinrom.

¹⁴ Zebulom ra'y kuery ma Serede, Elom ha'e Jaleel.

¹⁵ Ha'e va'e kuery ma Jacó ramymino ikuai, Lia pi'a meme, Padã-Arã py oiko va'ekue. Tajy Diná voi ha'e pygua. Ha'e va'e ta'y kuery, tajy kuery ha'e javi vy ma trinta e três ikuai.

¹⁶ Ha'e gui Gade ra'y kuery ma Zifiom, Hagi, Suni, Esbom, Eri, Arodi ha'e Areli.

¹⁷ Aser ra'y kuery ma Imna, Isvã, Isvi, Berias ha'e heindy Sera. Berias ra'y kuery ma Héber ha'e Malquiel.

¹⁸ Ha'e va'e kuery ma Zilpa pi'a meme, Jacó ra'y ha'e rajy kuery. Zilpa ma Labão guajy Lia rembiguirã ome'ë va'ekue. Ha'e kuery ha'e javi vy ma dezesseis ikuai.

¹⁹ Ha'e gui Jacó ra'yxy Raquel pi'a ma José ha'e Benjamim.

²⁰ José ra'y kuery Egito py oiko va'ekue ma Manassés ha'e Efraim. Ha'e kuery ma Asenate pi'a ikuai. Ixy ma Om pegua sacerdote Potifera rajy.

²¹ Benjamim ra'y kuery ma Bela, Bequer, Asbel, Gera, Naamã, Ei, Rôs, Mupim, Hupim ha'e Arde.

²² Ha'e va'e kuery ma Jacó ra'y kuery, Raquel pi'a meme. Ha'e javi vy catorze ikuai.

²³ Ha'e gui Dã ra'y ma Husim.

²⁴ Naftali ra'y kuery ma Jazeel, Guni, Jezer ha'e Silém.

²⁵ Ha'e va'e kuery ma Jacó ra'y kuery, Bila pi'a meme. Ha'e va'e ma Labão guajy Raquel rembiguirã ome'ë va'ekue. Ha'e javi vy sete ikuai.

²⁶ Ha'e rami py Jacó reve Egito katy oo va'ekue ma sessenta e seis ikuai, ta'y ra'yxy kuery jaipapa e'y re.

²⁷ José ra'y kuery Egito py oiko va'ekue ma moko'i ikuai. Jacó ro pygua kuery Egito py oo va'ekue ha'e javi vy setenta ikuai raka'e.

Nguu reve José nhovaexiague

²⁸ Jacó guenonde re omondouka Judá José-a py, Gósen katy tape oo va'e oikuaa aguã. Ha'e rami vy Gósen yvy re ovaëmba.

²⁹ Ha'e gui José ma karóxa oguereko katu vy oo ovaexĩ nguú Israel Gósen re. Ixupe ojexa uka vy ijaju'y rupi oikuaavã are'i ojae'o reve.

³⁰ Ha'e ramo Israel aipoe'i gua'y José pe:

— Aỹ ma amano teĩ ha'eve ma, reikove reve roexa rire — he'i.

³¹ Ha'e gui José aipoe'i gukye'y kuery ha'e nguú ro pygua kuery ha'e javi pe:

— Xee aa ju ta ranhe. Faraó pe aipoa'e 'rã: “Ke'y kuery ha'e xeru ro pygua kuery ha'e javi Canaã yvy re ikuaiia gui oupa ma xea py.

³² Ha'e va'e avakue ma vexa'i ha'e vaka re openaa rupi ikuai. Oguerupa guymba kuery vexa'i ha'e vaka, mba'emo oguereko va'e ha'e javi reve”, ha'e 'rã.

³³ Ha'e gui Faraó penerenoĩ uka vy oporandu 'rã: “Mba'exa tu peë kuery pemba'eapo va'e?” he'i ramo ma

³⁴ aipopeje 'rã: “Ore nerembiguai kuery ma mymba kuery re ropenaa rupi orekuai, orekunumi guive aỹ peve, oreramoi kuery ikuaiague rami ae”, peje. Ha'e rami rã ijayvu 'rã Gósen yvy re pendekuai aguã. Mba'eta Egito pygua kuery pe rã guymba re opena va'e omboetepy e'y meme ikuai — he'i.

47

Faraó-a py José nguú Israel ogueruague

¹ Ha'e gui José ou vy aipoe'i Faraó pe:

— Xeru ha'e ke'y kuery oupa ma Canaã yvy gui. Guymba kuery vexa'i ha'e vaka, ha'e mba'emo oguereko va'e ha'e javi reve ovaë okuapy Gósen yvy re — he'i.

² Ha'e vy teĩ nhiruĩ gukye'y kuery ogueru avi, oexa uka Faraó pe.

³ Ha'e ramo José ryke'y kuery pe Faraó oporandu:

— Mba'exa tu peë kuery pemba'eapo va'e?

Ha'e kuery ombovai:

— Nerembiguai kuery vexa'i re ropenaa rupi orekuai, oreramoi kuery ikuaiague rami ae.

⁴ Kova'e yvy re orekuai aguã ri roju, mba'eta Canaã yvy re ma nhuũ porã jipoi ore nerembiguai kuery rymba kuery pe, karuai nda'evei ete ramo. Ha'e nunga rupi aỹ rojerure Gósen yvy re orekuai aguã re — he'i okuapy Faraó pe.

⁵ Ha'e ramo Faraó aipoe'i José pe:

— Nderu ha'e nderyke'y kuery ndea py oupa ma ramo

⁶ Egito yvy ndevy guarã ae itui. Iporãvea py ejapo nderu ha'e nderyke'y kuery ta'ikuai. Gósen yvy re ae ri ta'ikuai. Ha'e gui xapy'a rei rã nderyke'y kuery regua opena kuaa ete va'e ikuai ramo emoĩ xerymba kuery re ae opena va'erã — he'i.

⁷ Ha'e gui nguú Jacó ju José ogueru vy oexa uka Faraó pe. Ha'e ramo Jacó ogueruavyu porã Faraó.

⁸ Faraó oporandu Jacó pe:

— Mbovy ma'etỹ ma tu rereko?

⁹ Jacó ombovai:

— Xee aikoa ha'e javi vy ma cento e trinta ma'etỹ. Mboapy'i ete aiko axya. Xee ma ndaupityi teri xeramoi kuery oikoague ma'etỹ peve — he'i.

¹⁰ Ha'e rami vy Jacó Faraó ogueruavyu porã rire oo ju oĩa gui.

¹¹ Ha'e gui José omboekoa nguú ha'e gukye'y kuery. Ramessés yvy re Egito yvy iporãvea py ome'ë ikuai aguã, Faraó aipoe'iague rami vy.

¹² Nguú, gukye'y kuery ha'e nguú ro pygua kuery ha'e javi pe José ombou jepi tembi'u, peteĩ-teĩ gua'y kuery mbovy pa oguerekoa rami.

José Egito yvy ha'e javi ojoguuaague

¹³ Karuai nda'evei ete ramo yvy jave re jipoi tembi'u. Ha'e nunga rupi Egito ha'e Canaã yvy re ikuai va'e iporiauve oje'oivy karuai gui.

¹⁴ Ha'e vy Egito ha'e Canaã pygua kuery José gui mba'emo ra'yí ojogua vy ipo py anho omboaxa peráta. Ha'e ramo Faraó ro py ju oguerupa.

¹⁵ Ha'e gui Egito ha'e Canaã yvy re peráta jipovei ramo Egito pygua kuery ha'e javi jogueru vy ojexa uka José renonde. Ha'e vy aipoe'i okuapy:

— Eme'ê orerembi'urá. Mba'erá tu romanomba ta rexa py? Oreperáta opa ma — he'i okuapy.

¹⁶ José ombovai:

— Pendeperáta opa ma ramo penerymba kuery ju peru. Penerymba kuery rekovia 'rã ame'ê tembi'u — he'i.

¹⁷ Ha'e ramo José-a py ogueru guymba kuery. Ha'e rã hemb'i'urá José ome'ê kavaju, vexa'i, vaka ha'e mburika'i rekovia. Ha'e rami vy ha'e va'e ma'etỹ re ma mymba kuery rekovia re omongaru.

¹⁸ Ha'e va'e ma'etỹ opa rire ma'etỹa mboae ovaẽ ramo José-a py oupa ju. Ha'e vy aipoe'i:

— Oreruvixa, nda'evei rombotavya rupi oreayvu aguã ndevy. Oreperáta opa ma, orerymba kuery voi rerekopa ma. Mba'eve'i ndoroguerokovei ma ndevy peguarã, orerete ae ha'e oreyyv e'ỹ vy.

¹⁹ Mba'erá tu ore kuery romano ta rexa py, oreyyv opyta rive aguã? Orejogua ke, oreyyv avi ejogua tembi'u rekovia. Ha'e rami rã ore kuery roiko 'rã escravo Faraó pegua, oreyyv voi imba'erá topyta. Eme'ê orevy mba'emo ra'yígue roikove aguã, romano e'ỹ aguã, yvy voi opyta rive e'ỹ aguã — he'i okuapy.

²⁰ Ha'e rami rã Egito yvy ha'e javi José ojogua Faraó pe. Egito pygua kuery peteĩ-teĩ ovyv ovende, ha'e py karuai nda'evei ete ramo. Ha'e rami vy yvy ha'e javi Faraó mba'e opyta.

²¹ Ha'e pygua kuery voi ojeupegua escravo omoingo, Egito yvy ha'e javi rupi ikuai va'e.

²² Sacerdote kuery hyvy anho ndojoguai, mba'eta ha'e va'e kuery pe Faraó mba'emo ome'ê jepi ramo. Faraó po gui ojopy va'ekue re ae okaru okuapy. Ha'e rami vy ha'e kuery novendei ovyv.

²³ Ha'e gui José aipoe'i heta va'e kuery pe:

— Aỹ ma peẽ kuery rojogua ma, pendevvy voi ajogua Faraó mba'erá. Apy ma mba'emo ra'yígue oĩ. Peraa, penhotỹ yvy re.

²⁴ Mba'emo'a pemono'õ vy ma peteĩ nhiruĩ ikuai va'e nhavõ gui peteĩ-teĩ peme'ê 'rã Faraó pe. Ha'e rã hemb'yrekue ma pendevy peguarã topyta. Pendevyguia ma yvy re penhotỹ ju aguã, pekaru aguã pendera'y kuery ha'e pendero py ikuai va'e ha'e javi reve — he'i.

²⁵ Ha'e ramo ha'e kuery ombovai:

— Ndee ma roikove aguã rami oreapo. Oreruvixa, ndee oreomboaxa rupi orerereko. Ha'e ramo Faraó pegua escravo orekuai teĩ ha'eve — he'i okuapy.

²⁶ Ha'e rami aguã Egito yvy re José ojapoague ma lei aỹ peve guarã oĩ: Mba'emo aju peteĩ nhiruĩ ikuai nhavõ gui ma peteĩ-teĩ ome'êa 'rã Faraó pe. Sacerdote kuery yvy anho Faraó mba'e'ỹ itui.

²⁷ Ha'e rami vy Israel Egito yvy re oiko, Gósen re ae. Ha'e py ha'e kuery ikuai aguã ojou vy heta-etave oje'oivy, heta ete ikuai.

²⁸ Jacó ma dezessete ma'etỹ re oiko Egito yvy re. Jacó oikoa ma'etỹ ha'e javi vy cento e quarenta e sete ma'etỹ.

²⁹ Ha'e gui Israel omano rai'i ma vy oenoĩ gua'y José. Ha'e vy aipoe'i:

— Aỹ ma ndee xemboaxy ramo ajerure xe'u guýry ndepo remoĩ reve reura aguã, xevy rejapo porã aguã anhetẽ rupi. Ajerure Egito yvy re e'ỹ xenhono porã aguã,

³⁰ ha'e rã xeru kuery ikuaiague py anho. Ha'e rami vy Egito yvy gui xeretekue reraa 'rã xeru kuery onhono porãague py, ha'e py ae xenhono porã aguã — he'i.

José ombovai:

— Xee ajapo 'rã ndeayvuague rami — he'i.

³¹ Ha'e gui Jacó

— Eura ha'vy xevy — he'i. Ha'e ramo oura. Ha'e rami rã Israel ojero'a, ngupa akã re ojeko.*

48

Jacó imba'eaxy oupya py José gua'y kuery ogueruague

¹ Ha'e va'e rire José pe aipo'ea:

— Nderu tu imba'eaxy vaipa rima oupy — 'ea. Ha'e ramo ogueraa ha'e py mokoive gua'y Manassés ha'e Efraim.

² Jacó pe omombe'ua:

— Ndera'y José rako ou oiny ndea py — 'ea. Ha'e ramo Israel onhemomburu ngupa py oguapy ranhe aguã.

³ Ha'e gui Jacó aipoe'i José pe:

— Nhanderueté Ipo'akapa va'e xevy ojexa uka karamboae Canaã yvy re Luz tetã py aiko jave, ha'e rami vy xereroayvu porã.

⁴ Ha'e vy aipoe'i: “Xee rojapo 'rã ndera'y reta aguã rami. Neramymino kuery ajapo 'rã heta regua ikuai aguã rami. Ha'e kuery pe ame'ê 'rã kova'e yvy araka'e rã peve guarã”, he'i va'ekue xevy.

⁵ Ha'e rã ndera'y mokoĩ Egito yvy re aju e'ỹ mbove oiko va'ekue ma, ha'e kuery ma aỹ guive xera'y ae'i rami ikuai. Efraim ha'e Manassés ma xera'y ae'i rami ma ikuai, Rúben ha'e Simeão rami avi.*

* 47:31 Ha'e rami Jacó ojapo ombojerovia vy (Hebreus 11.21).

* 48:5 José ra'y kuery mokoĩ ikuai va'e ma Jacó omano ta vy ogueroyvu porã, gua'y kuery ae'i pe rami avi.

⁶ Ha'e rā ha'e kuery rire ju ndera'y ikuai va'erā va'e ma ndera'y ae 'rā ikuai, ha'e guyke'y kuery vvy re 'rā ha'e kuery hekoa.

⁷ Mba'eta xee Padā gui aju jave Raquel omano karamboae Canaā vvy re, tape Efrata katy oo va'e katy'i. Xeporiau reve anhono porā karamboae tape Efrata Belém 'epy va'e katy oo va'e vvyry — he'i.

⁸ Ha'e gui Israel ma José ra'y kuery oexa vvy aipoe'i:

— Mava'e kuery tu upe va'e?

⁹ José aipoe'i nguu pe:

— Xera'y kuery rima ikuai, apy ae Nhanderuete xevy ome'ē va'ekue — he'i.

Ha'e ramo aipoe'i:

— Eronhembojave'i ha'vy xea py, aroayvu porā aguā — he'i.

¹⁰ Israel tuja'i ete vvy hexa voi pytūmba ma, ndoexa porāvei ma. Ha'e nunga rupi José ogueronhemboja heruvy ha'e oia py. Ha'e ramo oayvupa, oikuavāmba.

Gua'y José ha'e ta'y kuery Jacó ogueroayvu porāague

¹¹ Ha'e ramo Israel aipoe'i José pe:

— Xee ma naexa'āi peteigie ju roexa aguā. Ha'e rami tei Nhanderuete ojapo ndera'y kuery avi aexa aguā rami — he'i.

¹² Ha'e gui José gua'y kuery oipe'a nguu renapy'ā re ikuaiia gui. Nguu renonde oī guenapy'ā re, ngova omovaē vvy re.

¹³ Ha'e va'e rire José ogueru ju gua'y kuery. Efraim ma oiporu kuaa re omopu'ā imo'amy, tuu Israel oiporu kuaa e'ya re oī aguā, ha'e rā Manassés ma oiporu kuaa e'ya re omopu'ā, Israel oiporu kuaa re. Ha'e rami vvy mokoive ogueronhemboja heruvy hexe.

¹⁴ Ha'e rami tei Israel opo ombojoaxa imondovy vvy oiporu kuaa regua omoī Efraim kyrīve va'e apyte re, ha'e rā oiporu kuaa e'ya ma Manassés apyte re omoī, tujave va'eri.

¹⁵ Ha'e rami vvy José ra'y kuery ogueroayvu porā vvy aipoe'i:

— Xeramoi Abraão oiko va'ekue Nhanderuete renonde, xeru Isaque guive. Ha'e gui xere ju opena oikovy xekyrī guive aỹ peve.

¹⁶ Ixugugua anjo opa mba'e vai gui xereraa jepe va'e tomoingo porā kova'e avakue'i. Tove xerery rupi meme ta'ikuai, xeru kuery Abraão ha'e Isaque rery rupi guive. Ta'y kuery taetave oje'oivv vvy re — he'i.

¹⁷ Ha'e gui tuu opo oiporu kuaa regua Efraim apyte re omoī rā José oexa vvy ndojou porāi. Ha'e rami vvy nguu po re ojopy, Efraim apyte gui ogueroava aguā Manassés apyte re.

¹⁸ Ha'e vvy José aipoe'i nguu pe:

— Evoko rami e'ỹ xeru, mba'eta kova'e ae ma tujave va'e oiko. Inhakā re ae 'rāgue remoi reiporu kuaa regua — he'i.

¹⁹ Ha'e rami tei tuu opo ndoguerova ukai. Ha'e vvy aipoe'i:

— Xera'y, xee aikuaa ae ma, aikuaa. Ha'e rami avi ixugui avi 'rā oiko petei regua, yvate va'e 'rā oiko. Ha'e rā tyvy ma ixugui yvateve 'rā. Hamymino kuery ma heta regua 'rā ikuai — he'i.

²⁰ Ha'e rami py ha'e va'e ára ogueroayvu porā. Ha'e vvy aipoe'i:

— Peē kuery rery rupi Israel kuery jogueroayvu porā 'rā. Ha'e vvy “Tove Nhanderuete tanemoingo porā Efraim ha'e Manassés rami”, he'i 'rā okuapy. — Ha'e rami ijayvu vvy Manassés rery gui Efraim rery re ranhe ijayvu.

²¹ Ha'e rire Israel aipoe'i José pe:

— Aỹ xee amano 'rā. Ha'e rami tei Nhanderuete oiko 'rā ndereve, ojapo 'rā vvy neramoi kuery ikuaiague py peo ju aguā rami.

²² Ndevy pe aea petei mba'e, ha'e ramigua nderyke'y kuery pe aea va'erā e'ỹ. Ndevy aea vvy'ā amorreu kuery gui xekyxe ha'e xerapa py aipe'a va'ekue.

49

Jacó gua'y kuery rekorā omombe'u ma voiague

¹ Ha'e rire Jacó oenoī gua'y kuery ha'e javi. Ha'e vvy aipoe'i:

— Peno'ōmba ke. Xee amombe'u 'rā penderekorā, raka'e rā guarā.

² Jacó ra'y kuery, peno'ōmba pendu aguā. Pejapyxaka penderu Israel ijayvu rā.

³ — Rúben, ndee ma xera'y tujave va'e, xembaraetea kuaa ukua. Jypy'i xegui reiko va'ekue, pavē gui yvateve ha'e ipo'akave va'e reiko.

⁴ Ha'e rami avi yai opu'ā-pu'āa rami avi rejekoko kuaa e'ỹ vvy pavē gui e'ỹ 'rā ndeyvateve. Mba'eta nderu rupa py rejeupi vvy retekoavy rire. Xerupa py rejeupi va'ekue.*

⁵ — Ha'e gui Simeão, Leví reve ma joegua pendekuai. Pendekyxe perojerovia peikovy joe.

⁶ Ha'e rami avi peē kuery penhembopy'aa py xee ma nanhembopy'ai, peē penhemboatya re xenhe'ē nonhembojai. Mba'eta pendepoxy vvy pejojuka raka'e, pejerovia vvy vaka oguata vaikue aguā rami pejapo.

⁷ Pendevaia ma ayvu vaipy topyta, pendevaia vaipa rā. Pendepoxy vvy pejapo vai etc. Ha'e ramo xee romboja'o 'rā Jacó kuery ra'y ikuaiia rupi, Israel ra'y ikuaiia rupi romoaimba 'rā.

⁸ — Judá, nderyvy kuery tandererovy'a. Ndepo py rejopy 'rā nderovaigua kuery aju'y re. Nderu ra'y kuery voi guenapy'ā re oī 'rā nerenonde.

* 49:4 Gênesis 35:22

- ⁹ Judá, ndee ma xivi ra'y rami ndepy'a guaxu va'e. Xera'y, guembia omondoroa gui opu'ã ju va'e rami reiko. Xivi ha'e xivi kunha minha onheno oupya gui mava'e nda'u omomyi ta?
- ¹⁰ Judá regua po gui ndoipe'aai 'rã huvixa po pygua opy mbyte ojopy heno'amy va'e, ija Siló 'epy va'e ou e'ya ja. Ha'e va'e ma pavê regua 'rã onhe'ê rendu okuapy.
- ¹¹ Guymba mburika omoxã 'rã uva rembypy re, hymba ra'y uva rembypy iporãve va'e re 'rã omoxã. Oao ojoi 'rã uva rykue py, o-capa ma tuguy rami uva'a guigua py ojoi 'rã.
- ¹² Hexa ma pytä 'rã vinho gui, haï ma xiï va'e opyta 'rã kamby oy'u gui.
- ¹³ — Ha'e gui Zebulom ma ye'ê yvýry 'rã oiko, kanoã ojaaty katy. Sidom peve 'rã oo hekoo.
- ¹⁴ — Issacar ma mburika i ikãgue mbaraete va'e, vexa'iaty ikuai va'e mbyte rupi onheno oupy va'e rami.
- ¹⁵ Ha'e oikuaa rã opytu'u aguã ha'eve, ijyvy iporã rã. Ha'e rami vy ojero'a 'rã onhembovoyi uka vy. Ogueropo'akaa rã oiko 'rã nhoembiguai.
- ¹⁶ — Ha'e gui Dã ma oikuaa pota 'rã guetarã kuery re, Israel regua mboae ojapoa rami.
- ¹⁷ Dã ma mboi tape yvýry itui va'e rami avi 'rã oiko. Mboi minha itui 'rã tape yvýry kavaju pyta py oixu'u aguã, kavaju árygua hakyguê katy ho'a aguã rami ojapo.
- ¹⁸ — SENHOR, xee ma roarõ aikovy xereraa jepe aguã!
- ¹⁹ — Ha'e gui Gade re ma jujukaa kuery heta opu'ã okuapy teï omonhamba 'rã imondovy.
- ²⁰ — Aser ma ojou reta 'rã tembi'u porã, huvixave pegua voi.
- ²¹ — Naftali ma guaxu opoi pyre rami oiko, ijayvu porã kuaa 'rã guive.
- ²² — José ma vyvra rakã hi'a porã riae va'e rami 'rã oiko, yakã yvýry oi va'e rami, kora áry rupi hakã ojeupi ovy va'e rami.
- ²³ Hapa va'e kuery omoï vai 'rã. Hexe hu'y omombo vy omoingo axy 'rã.
- ²⁴ Ha'e rami teï nderapa rejopy atã riae 'rã, ndejyva voi imbarate 'rã, Jacó repyare Ipo'akapa va'e nepytyvõ ramo. Ha'e va'e ma Israel kuery re opena va'e, Israel kuery pegua ita imbarate va'e.
- ²⁵ Nderu Ruete nepytyvõ 'rã. Ipo'akapa va'e nemoingo porã 'rã. Yva guigua ha'e yvy guyrygua py nemoingo porã 'rã. Omoingo porã avi 'rã xy kuery kã ha'e kyri'i va'e ryrü ndera'y reta aguã rami.
- ²⁶ Xeru kuery xereroayvu porãgue gui xee nderu rogueroayvu porãve, vyvty araka'e rã guarã apyte áryve. Ha'e nunga ha'e javi toï José akã re, guyke'y kuery gui yvateve va'e rã.
- ²⁷ — Ha'e gui Benjamim ma guary nhomondoropa va'e rami ipo'aka riae va'e. Ha'e nunga ma aje'ive reve ho'u 'rã oiny guembia, ha'e ka'arukue voi omboja'o 'rã ojopy va'ekue — he'i.
- ²⁸ Ha'e va'e kuery ma Israel regua doze ikuai va'e ru. Ha'e rami ae tuu ogueroayvu porã. Petei-teï ogueroayvu porã petei-teï renonderã oia rami vy.
- ²⁹ Ha'e rire ha'e kuery pe aipoe'i:
- Xenhe'ê heraa 'rã xeramoi kuerya py. Ha'e ramo xenhono porã xeru kuery yvýry itakua heteu regua Efrom yvy re oi va'e py.
- ³⁰ Macpela regua yvy Manre katy'i oi Canaã yvy re, Efrom gui Abraão ojogua va'ekue jouparã.
- ³¹ Ha'e py ma Abraão onhono porã raka'e gua'yxy Sara. Ha'e py ju Isaque onhono porã Rebeca. Ha'e py avi xee anhono porã karamboae Lia.
- ³² Ha'e va'e yvy ha'e itakua oi va'e ma Hete ra'y kuery gui ojogua pyre — he'i.
- ³³ Opa ma Jacó gua'y kuery omongetapa vy opy omboapu'a heravy ngupa py, ha'e omano. Ha'e rami vy inhe'ê heraa tamoi kuerya py.

50

Jacó re ipy'a vai reve onhono porãague

- ¹ Ha'e ramo José nguu rova oikuavã vy ojae'o reve oayvupa.
- ² Guembiguai poropoanoa ikuai va'e pe José ijayvu tuu retekue omoeakuãmba aguã re. Ha'e ramo poropoanoa kuery omoeakuãmba Israel retekue.*
- ³ Gueko rami vy quarenta ára re omba'eapo omoeakuãmba peve. Ha'e Egito pygua kuery ma setenta ára re ojae'o okuapy.
- ⁴ Ojae'oa opa ma rire José aipoe'i Faraó ro pygua kuery pe:
- Peê kuery xemboaxy ramo ajerure Faraó apyxa py pendeayvu aguã re. Aipoa'e uka:
- ⁵ “Xeru rãgue'i xeapo karamboae aura aguã rami. Ha'e vy aipoe'i: ‘Xee amano ta ma. Ha'e gui xenhono porã Canaã yvy re xeruparã xee ae areko katu va'ekue py’, he'i va'ekue. Aÿ ma aaxe xeru retekue anhono porã aguã. Ha'e gui aju ju ‘rã”, peje Faraó pe — he'i.
- ⁶ Ha'e ramo Faraó ombovai:
- Tereo katu, enhono porã nderu, ndevy oura ukaague rami ae — he'i.
- ⁷ Ha'e ramo José ojepe'a ovy nguu onhono porã aguã. Hupive oje'oi avi Faraó rembiguai kuery, hoo pygua yvatekueve va'e ha'e Egito yvy re yvatekueve ha'e javi.
- ⁸ Oje'oi avi José ro pygua kuery, tyke'y kuery ha'e nguu ro pygua kuery ha'e javi. Gósen yvy re opyta va'e ma kyrigüe'i anho, hymba kuery vexa'i, vaka guive.
- ⁹ Hupive oje'oi avi karóxa ha'e kavaju árygua. Heta ete oje'oi.
- ¹⁰ Ha'e gui mba'emo moa'yiaty Atade py oi va'e py ova'ẽmba vy opyta ranhe Jordão rovai re. Ha'e py ma petteigüe ju ojae'o vaipa okuapy. Sete ára re José ojae'o nguu re.

* 50:2 Egito pygua kuery gueko rami vy omoeakuã 'rã te'õgue, are teï hu'ũmba e'y aguã.

¹¹ Canaã vvy regua ha'e py ikuai va'e oexa okuapy ha'e rami ete ojae'o okuapy rã, Atade py mba'emo moa'yiaty oĩ va'e py. Ha'e vvy aipoe'i:

— Egito pygua kuery ojae'o vaipa ete — he'i okuapy. Ha'e rami vvy omboery Abel-Mizraim. Jordão rovai re oi.†

¹² Ha'e gui ta'y kuery ojapo tuu ijayvuague rami.

¹³ Ha'e rami vvy Canaã vvy katy ogueraa vvy onhono porã Macpela vvy re itakua oĩ va'e py. Ha'e va'e vvy ma heteu regua Efrom gui Abraão jouparã ojogua va'ekue, Manre katy'i.

¹⁴ Ha'e rire José ojevvy ju Egito katy guyke'y kuery reve, ha'e tuu onhono porã aguã hupive oje'oi va'ekue ha'e javi.

Guyke'y kuery reve José ijayvu porã'iaque

¹⁵ José ryke'y kuery ma tuu omano ma rire aipoe'i okuapy:

— Aỹ ma xapy'a rei José ojevvy vvy nhanembopaga ma 'rã ixupe jajapo vaiague re — he'i okuapy.

¹⁶ Ha'e rami vvy José pe aipoe'i uka okuapy:

— Nhanderu rãgue'i omano e'y mbove aipoe'i:

¹⁷ “Aipopeje 'rã José pe: ‘Eperdoa ke nderyke'y kuery ojevvyague ndevy otekoavy vaipa rire teĩ’, he'i. Ha'e rami rire ma aỹ rojerure reperdoa aguã re ore kuery nderu Ruete rembiguai va'e rojevvyague”, peje. — Ha'e rami ha'e kuery ijayvua José oendu vvy ojae'o.

¹⁸ Ha'e gui tyke'y kuery ou vvy henonde re guenapy'ã re oĩmba reve aipoe'i okuapy:

— Apy ma roĩ nerembiguai kueryrã.

¹⁹ José ombovai:

— Pekiye eme. Xee ma nhi'ã Nhanderuete rami aĩ?

²⁰ Peẽ kuery ma anhetẽ xeivy pejapo vaixe pekuapy karamboae. Ha'e rã Nhanderuete ma ha'e nunga oguerova nhomoingo porã aguã rami. Mba'eta heta ete rekove reraa jepearã xemoingo, aỹ pexa pekuapya rami.

²¹ Ha'e nunga rupi pekiye eme. Xee apena 'rã pendere ha'e pendera'y kuery re — he'i. Ha'e rami vvy ombopy'a guaxua rupi ijayvu porã'i ha'e kuery reve.

José omanoague

²² Egito vvy re José oiko, nguu ro pygua kuery guive. Cento e dez ma'etỹ re oiko.

²³ José oexa Efraim ra'y kuery, ta'y ra'y kuery guive. Oexa avi Manassés ra'y Maquir ra'y kuery, guenapy'ã áry omboguapy imbokuapy.

²⁴ Ha'e gui José aipoe'i guyke'y kuery pe:

— Xee ma amano ta ma. Ha'e rire Nhanderuete pendevy ojekuaa uka vvy penemondouka ju 'rã kova'e vvy gui, vvy mboae Abraão ha'e Jacó pe ome'ẽ aguã re ouraague katy — he'i.

²⁵ José ojapo Israel ra'y kuery oura aguã rami. Ha'e vvy aipoe'i:

— Anhetẽ Nhanderuete ojekuaa uka 'rã pendevy, ha'e ramo xekãgue peraa 'rã apy gui — he'i.

²⁶ Ha'e gui José omano cento e dez ma'etỹ oguerekoa py. Ha'e ramo hetekue omoeakuãmbaa vvy Egito vvy re ae onhono porãa peteĩ hyru py.

† 50:11 Tery Abel-Mizraim ma “Egito pygua kuery ojae'oa”'ea.

Êxodo mokoña kuaxia Moisés ombopara va'ekue

Êxodo mokoña kuaxia Moisés ombopara va'ekue

Tery Êxodo ma “Oêmbaa” he'ia. Ha'e rami vy kova'e kuaxia para re omombe'ua Egito vvy re Israel kuery escravo ikuaiã gui oêmbaague.

Jypy Nhanderuete oenoĩ Moisés Egito vvy re oo vy ixupegua kuery oguenoẽ aguã. Ha'e rã Moisés ma ndooxei ranhe. Ha'e rami vy oporandu: “Mava'e tu xee aiko Faraó-a py aa aguã, ha'e Egito vvy gui Israel kuery anoẽ aguã?” Nhanderuete ombovai: “Xee aiko 'rã ndereve”, he'i (3.11-12a). Ha'e gui ma Moisés oporanduve ju Nhanderuete rery marã rami paa re. “Nhanderuete ombovai Moisés pe: ‘Xee ma xee ae. Po rami ndeayvu 'rã Israel kuery pe: “Xee ae” he'i va'e xembou peẽ kuerya py’”, he'i (3.14). Mba'eta Nhanderuete ma pete'i anho, amboae ndoikoi.

Ha'e gui ma Egito vvy re Moisés oo vy huvixa Faraó renonde py dez regua ojapo nhomondyipaará. Ha'e va'e rire mae ma Faraó omoudouka Israel kuery ovyvy gui. Ha'e rami teĩ nda'evei nho vy oakykue monha oxondaro kuery reve. Ha'e ramo ye'ẽ mbyte py Nhanderuete ojukapa. Ha'e rã ojeupegua kuery pe ma ye'ẽ omboja'o vy yy opu'ã va'e mbyte rupi omoudouka vvy piru reia rupi.

Ha'e gui ma tekoa e'ÿã rupi ogueraa Sinai vvytyt peve. Ha'e py ma Moisés po py omboaxa ojeuguiga lei ha'e kuery rekorã. Omombe'u avi ombojerovia atyrã ojapo aguã. Nhanderuete opa mba'e py ha'e kuery re opena porã, yva gui hembu'urã manã 'epy va'e ombou guive teĩ ha'e kuery ndojeroviai ha'e nonhe'ẽ rendui jepi raka'e.

Jacó ramymino kuery Egito re ikuai va'ekue rery oía

¹ Po rami ma Israel ra'y kuery rery, Jacó reve Egito re oo va'ekue. Peteĩ-teĩ ogueraa ngoo pygua kuery.

² Rúben, Simeão, Levi ha'e Judá,

³ Issacar, Zebulom ha'e Benjamim,

⁴ Dã ha'e Naftali, Gade ha'e Aser.

⁵ Jacó guigua kuery ha'e javi ma setenta ikuai. Ha'e rã José ma Egito re oiko ae ma.

⁶ Ha'e gui José omano ha'e tyke'y kuery ha'e javi, ha'e javega kuery ha'e javive.

⁷ Israel kuery ikuai porã vy heta-etave ha'e imbaraeteve tema ovy. Ha'e rami vy ha'e kuery vvy omonyẽ.

⁸ Ha'e gui Egito pygua huvixa mboae ju oĩ José oikuaa e'ÿ va'e.*

⁹ Ha'e va'e ma aipoe'i guembiguai kuery pe:

— Aÿ ma Israel kuery heta vaipa ma, nhandegui ipo'akave guive.

¹⁰ Ma'ẽ, jaikuaa rami jajapo ha'e kuery re heta-etave e'ÿ aguã, xapy'a rei nhandere opu'ãa ramo nhanderoavagua kuery re ha'e kuery onhemoirũ e'ÿ aguã, ha'e nhandere opu'ã vy nhandevvy gui oje'oiipa rive e'ÿ aguã.

¹¹ Ha'e rami vy omoĩ Israel kuery momba'epoará oguereko axy rei aguã ombovovia rupi. Ha'e ramo Faraó pe Israel kuery ojapo tetã mba'emo ra'yigüe omoĩ porã atyrã, Pitom ha'e Ramessés hery va'e.

¹² Ha'e rami teĩ oguereko axy reia ramive ma heta-etave tema ovy. Ha'e ramo nda'evei rei ikuai Israel kuery gui.

¹³ Ha'e rami vy Egito pygua kuery oguereko axy reive okuapy Israel kuery omomba'epoia py.

¹⁴ Ojavyky rei okuapy omomba'epoia poyi vy, yapo omou'ũa py, tijolo ojapoa py ha'e mba'ety rupi omba'epoia py. Omba'epoia ha'e javi rupi omoingo axy.

Faraó ijayvuague rami e'ÿ kyrĩ'i va'e rexaã kuery ikuaiague

¹⁵ Ha'e gui Egito pygua huvixa ijayvu hebreu regua kyrĩ'i va'e rexaã kuery pe. Ha'e va'e kuery regua peteĩ ma Sifrá, ha'e rã amboae ma Puá hery va'e.

¹⁶ Ha'e vy aipoe'i ha'e kuery pe:

— Hebreu regua memby pexa vy ke peikuaa pota. Xapy'a rei ava'i ri ramo ma pejuka 'rã. Ha'e rã kunhague'i ri ramo ma tove ta'ikuai.

¹⁷ Ha'e rã kyrĩ'i va'e rexaã kuery ma Nhanderuete renonde ojererokyjea rupi ikuai vy Egito pygua huvixa ijayvuague rami e'ÿ ojapo. Ha'e rami vy ndojukai avakue'i itui'i rã.

¹⁸ Ha'e ramo Egito pygua huvixa oenoĩ uka kyrĩ'i va'e rexaã kuery. Ha'e vy aipoe'i ha'e kuery pe:

— Mba'e re tu ha'e rami pejapo? Ndapejukai ri avakue'i.

¹⁹ Ha'e ramo kyrĩ'i va'e rexaã kuery aipoe'i Faraó pe:

— Mba'eta hebreu regua kunhague ma Egito regua rami e'ÿ ikyre'ÿ va'e vy kyrĩ'i va'e rexaã kuery ovaẽ e'ÿ mbove ma voi 'rã oikuavã — he'i okuapy.

²⁰ Ha'e rami rã Nhanderuete opena porã kyrĩ'i va'e rexaã kuery re, ha'e Israel kuery heta-etave ete tema ovy, imbaraete guive.

²¹ Ha'e kyrĩ'i va'e rexaã kuery Nhanderuete renonde ojererokyjea rupi vy ojapo ha'e kuery voi imemby aguã rami.

²² Ha'e ramo Faraó ijayvu guembiguai kuery pe. Ha'e vy aipoe'i:

— Hebreu regua avakue'i itui nhavõ pemombo 'rã Nilo yakã py. Ha'e rã kunhague'i ma ndapejukai 'rã.

*

2

Moisés itui'i ha'e okakuaague

- ¹ Ha'e gui peteī ava Levi regua oo vy omenda peteī Levi regua rajy re.
² Ha'e ramo kunha va'e ma kyrī va'e oguereko vy oikuavā peteī ava'i. Ha'e vy oexa rā iporā'i ramo onhomi mboapy jaxy re.
³ Onhomi aguā nda'evevei ramo ma ojou peteī ajaka jai rogue guigua, ha'e ombotupa betume ha'e oja va'e py. Ha'e gui opi'a'i omboyru vy yakā py omoī hembe katy'i jai rogue ikuai rupi.
⁴ Ha'e rā heindy ma mombry gui oma'ē oikovy mba'e pa oikoa oexaxe vy.
⁵ Ha'e gui Faraó rajy ou yakā py ojau aguā. Hembiguai kunhataīgue yakā vvyry ikuai. Ha'e gui ajaka jai rogue mbyte ovu rā oexa vy omondouka guembiguai ojopy aguā.
⁶ Oipe'a vy oexa kyrī va'e itui rā. Ha'e va'e ojae'o ramo omboaxy. Ha'e vy aipoe'i:
 — Kova'e ma hebreu regua ra'y ra'e.
⁷ Ha'e ramo heindy ou vy aipoe'i Faraó rajy pe:
 — Reipota pa aa peteī hebreu regua aenoī omokambu ha'e omongakuaa aguā ndevy?
⁸ Faraó rajy ombovai:
 — Tereo ha'vy — he'i. Ha'e ramo kunhataī oo vy oenoī kyrī va'e xy.
⁹ Ixupe Faraó rajy aipoe'i:
 — Tereo, eraa kova'e ava'i, emongakuaa xevy. Ha'e rā xee apaga 'rā repenaa re — he'i. Ha'e ramo ixu ogueraa vy omongakuaa.
¹⁰ Ha'e gui ava'i tujave ma ramo ogueraa Faraó rajya py. Ha'e va'e ju oguereko opi'a ete'i rami. Ha'e rami vy omboery Moisés, “Yy gui anoē va'ekue” he'i vy.*

Egito pygua Moisés ojuka vy Midiā katy onhaague

- ¹¹ Ha'e gui Moisés tuja ma vy oo guetarā kuery ikuai py. Ha'e vy oexa rā omomba'eapoa poyi vai ete. Oexa avi peteī Egito pygua oinupā rā hebreu regua.
¹² Ha'e gui jovaive-ive re oma'ē vy avave rei ndoexai vy ojuka Egito pygua, ha'e vy hetekue ojaty ita ku'i rea py.
¹³ Ko'ēgue ju oo vy oexa mokoī hebreu regua joguero'a rā. Ha'e rami vy joapo vai va'e pe aipoe'i:
 — Mba'e re tu reinupā neretarā?
¹⁴ Ha'e va'e ombovai:
 — Mava'e tu nemoī oreruvixarā orere reikuaa pota aguā? Egito pygua rejukaague rami jevy teve xejukaxe ri?

Ha'e nunga Moisés oendu vy okyje, “Anhetē teve ha'e va'e oikuaa” he'i vy.*

- ¹⁵ Ha'e nunga Faraó voi omombe'ua rā oendu vy ojukaxe Moisés. Ha'e rami teī Faraó gui Moisés ojava vy oo Midiā vvy re oiko.

Ha'e py ma oguapy oiny peteī ygua vvyry.

- ¹⁶ Sacerdote Midiā pygua ma sete oguajy oguereko. Ha'e va'e kuery ma ygua py ou yy ojara aguā. Ha'e rami vy mba'emo oy'uaty oī va'e py omonyē imoiny nguu rymba kuery vexe'i omboy'u aguā.

- ¹⁷ Ha'e jave jogueru avi vexe'i re opena va'e kuery mboae, ha'e omonhamba kunhague ha'e gui. Ha'e rā Moisés ma opu'ā vy oepy kunhague, ha'e omboy'upa hymba kuery guive.

¹⁸ Ha'e gui kunhague ma nguu Reuel-a py ojevypa. Ha'e ramo tuu oporandu:

— Mba'e re tu kova'e ára peju voive ri?†

¹⁹ Kunhague ombovai:

- Peteī Egito pygua orereraa jepe vexe'i re opena va'e kuery po gui. Ha'e gui yy ju ojara orevy, ha'e nymba kuery pe voi ome'ē oy'u aguā — he'i.

²⁰ Ha'e ramo aipoe'i ha'e kuery pe:

— Mamo ha'vy hiny ava va'e? Mba'e re tu peja ra'e ha'e py? Penōi na, tou to'u mbojape — he'i.

²¹ Ha'e ramo Moisés ovy'a ha'e va'e ava reve opyta vy. Ha'e ramo Moisés ra'yxyrā ome'ē guajy Zípora.

- ²² Ha'e gui ta'yxy oikuavā peteī ava'i. Ha'e ramo omboery Gérson, “Yvy mboae re aiko va'e” he'i vy.‡

Egito pygua huvixa omano rā guare

- ²³ Yma ete ma rire omano Egito pygua huvixa. Ha'e jave Israel kuery ipoae riae okuapy escravo ikuai vy. Ha'e vy ojapukai okuapy. Ha'e ramo ha'e kuery ojapukaia ma Nhanderuetea peve onhendu.

²⁴ Ipoaēa Nhanderuete oendu vy ima'endu'a Abraão, Isaque ha'e Jacó reve ngupive guarā ojapo va'ekue re.

- ²⁵ Ha'e rami vy Israel kuery Nhanderuete oexa vy oikuaa pota ikuai axya re.

3

Moisés reve Nhanderuete vvyra rogue hendy va'e mbyte gui ijayvuague

* 2:10 Tery Moisés ma “Oguenoē mbyre” tea reve nhaendu rā joo ramigua. * 2:14 Atos 7.27-28,35 † 2:18 Reuel ma Midiā pygua sacerdote (versículo 16). Hery mboae ma Jetro (Êxodo 3.1). ‡ 2:22 Tery Gérson ma “Yvy mboae regua” 'ea reve nhaendu rā joo ramigua.

¹ Ha'e gui Moisés opena oikovy guaty Jetro Midiã pygua sacerdote va'e rymba kuery vexa'i re. Ha'e rami vy vexa'i kuery ogueraa kuaray oikoa katy tekoa e'ÿa va'e py, ha'e Nhanderuete pegua vyvty re ovaë, Horebe 'epy va'e py.*

² Ha'e gui ixupe ojexa uka peteĩ anjo SENHOR-a guigua peteĩ vyvra rogue hendy va'e mbyte. Moisés oma'ê rã vyvra rogue re tata hendy oiny va'erĩ ndokai.

³ Ha'e ramo aipoe'i ojeupe ae:

— Aa ta peva'e katy, aexa aguã ha'e rami ete iporã va'e. Mba'eta re tu vyvra rogue ndokai?

⁴ Ha'e katy oexa aguã oo rã SENHOR oexa vy oenoĩ tata vyvra rogue hendy va'e mbyte gui. Ha'e vy aipoe'i:

— Moisés, Moisés!

Ombovai:

— Apy ma aĩ.

⁵ Ha'e ramo aipoe'i ju:

— Ejuve eme kyvõ katy. Emboi ndepy regua, mba'eta vvy repyrõ re'amya ma iky'a e'ÿ va'e.*

⁶ Xee ma nderu Ruete, Abraão, Isaque ha'e Jacó Ruete — he'i.

Ha'e ramo Moisés ma Nhanderuete re oma'ê aguã okyje vy omo'ã ngova.*

⁷ Ha'e gui SENHOR aipoe'ive ju:

— Xee aexa ete xeivygua kuery Egitu re ikuai vy ojexavaia. Aendu ma ha'e kuery ojapukaia imomba'epoa kuery gui. Xee aikuaa ojexavaia.

⁸ Ha'e nunga rupi aguejy araa jepe aguã Egitu pygua kuery po gui, ha'e ajapo aguã ha'e va'e vvy gui vvy iporã mba'emo oata e'ÿa py oje'oi aguã rami. Ha'e va'e vvy ma kamby ha'e ei oata e'ÿa, ha'e cananeu kuery rekoa, heteu, amorreu, ferezeu, heveu ha'e jebuseu kuery rekoa.*

⁹ Mba'eta Israel kuery ojapukaia ma xea peve onhendu, aexa avi Egitu pygua kuery opa marã rei ombojexavaia.

¹⁰ Eju ha'vy, aÿ xee romondouka 'rã Faraó-a py, Egitu vvy gui xeivygua Israel kuery reipe'a aguã — he'i.

¹¹ Ha'e rami rã Moisés aipoe'i Nhanderuete pe:

— Mava'e tu xee aiko Faraó-a py aa aguã, ha'e Egitu vvy gui Israel kuery anoë aguã?

¹² Nhanderuete ombovai:

— Xee aiko 'rã ndereve. Po rami 'rã reikuaa xee romondoukaague: Egitu gui xeivygua kuery renoëmba ma rire kova'e vyvty re ae ju xee Penderuete xemboete 'rã pekuapy.

¹³ Moisés aipoe'i Nhanderuete pe:

— Ha'e gui Israel kuery ikuai py avaë vy ha'e kuery pe “Penderu kuery Ruete xembou peë kuerya py” ha'e ramo ma ha'e kuery oporandu 'rã xeivy: “Mba'eta tu hery?” he'i 'rã okuapy. Ha'e rami rã marã rami tu aipoa'e 'rã ha'e kuery pe?

¹⁴ Nhanderuete ombovai Moisés pe:

— Xee ma xee ae. Po rami ndeayvu 'rã Israel kuery pe: “Xee ae” he'i va'e xembou peë kuerya py.

¹⁵ Po rami 'rã ndeayvu Israel kuery pe: “ SENHOR peneramoĩ kuery Abraão, Isaque ha'e Jacó Ruete va'e rima xembou karamboae pendea py.[†] Po rami ae ma xerery opa va'erã e'ÿ. Ha'e va'e rupi ae 'rã xere penema'endu'a aÿ ha'e araka'e rã peve”, 're.

¹⁶ Tereo ha'vy, emono'omba Israel mongetaaty kuery. Aipo're ha'e kuery pe: “ SENHOR peneramoĩ kuery Abraão, Isaque ha'e Jacó Ruete ojexa uka karamboae xeivy. Ha'e va'e aipoe'i: ‘Anhetë xee aikuaa pota ma pendere, aexa guive Egitu vvy re penemoingo axya.

¹⁷ Ha'e nunga rupi xee aipoa'e: “Ajapo 'rã Egitu vvy re pendekuai axy reia gui peo jepe aguã cananeu kuery vvy re, heteu, amorreu, ferezeu, heveu ha'e jebuseu kuery vvy re, vvy kamby ha'e ei oata e'ÿa py”, he'i”, 're 'rã ha'e kuery pe.

¹⁸ — Ha'e ramo ha'e kuery oendu 'rã ndeayvua, ha'e gui Israel mongetaaty kuery reve peo 'rã Egitu pygua huvixaa py. Ha'e vy aipopeje 'rã ixupe: “ SENHOR hebreu kuery Ruete ojekuaa uka orevy. Aÿ ma tove mboapy ára re toroo tekoa e'ÿa oĩ va'e katy, SENHOR Oeruetu pe mba'emo rome'ê aguã”, peje 'rã.

¹⁹ Ha'e rami teĩ xee aikuaa Egitu pygua huvixa napenemondoukai 'rãa, xepo'akaa aexa uka e'ÿ rã.

²⁰ Ha'e nunga rupi xepo aupi vy ajapo vai 'rã Egitu vvy re. Ha'e kuery mbyte ambou 'rã opa marãgua nhomondyipaarã. Ha'e va'e rire mae ma penemondouka 'rã.

²¹ Mba'eta xee ajapo 'rã Egitu pygua kuery penepytyvõxe aguã rami. Ha'e ramo penembouka rã ndapeo rivei 'rã, pendepo py mba'eve peraa e'ÿ re.

²² Ha'e rami 'rãgue py peë kuery regua peteĩ-teĩ kunha ojerure 'rã ha'e katy'i ikuai va'e, ha'e hoo py ovaë va'e-va'e pe prata ha'e ouro guigua iporã va'e re, ao re guive. Ha'e nunga pejopy vy pendera'y ha'e penderajy kuery re voi pemoĩ 'rã. Ha'e rami vy peraapa 'rã Egitu pygua kuery mba'emo oguereko va'ekue.

4

Moisés mba'emo ajapo aguã re Nhanderuete ombo'eague

¹ Ha'e gui Moisés ombovai:

* 3:1 Horebe vyvty rery mboae ma Sinai. * 3:5 Atos 7.33 * 3:6 Mateus 22.32, Marcos 12.26, Lucas 20.37, Atos 7.32 * 3:8 Atos 7.34

† 3:15 Tery SENHOR ma “Aikove va'e” ea.

— Ha'e rami avi xeretarā kuery ndogueroviai 'rā xeayvua, neĩ noendui 'rā guive. Ha'e rami vy “ SENHOR ma ndojexa ukai ndevy”, he'i 'rā xevy.

² SENHOR oporandu ixupe:

— Mba'e tu ndepo py rereko va'e?

Ombovai vy

— Xepopoka rima areko — he'i.

³ Ha'e rā aipoe'i ixupe:

— Emombo ha'vy vyv py.

Ha'e ramo vyv py omombo rā ojeapo mboi. Ha'e va'e gui Moisés onha.

⁴ Ha'e gui SENHOR aipoe'i ju Moisés pe:

— Eju, ekuave'ẽ ha'e ejopy huguai re.

Ha'e ramo okuave'ẽ vy huguai re ojopy rā popoka rive ju ojeapo.

⁵ SENHOR aipoe'i:

— Ha'e nunga ma ha'e kuery oexa vy oguerovia aguã ndevy SENHOR ojexa ukaague, peneramoĩ kuery Abraão, Isaque ha'e Jacó Ruete.

⁶ Ha'e gui emoĩ ndepo ndepexo re — he'i. Ha'e rami opexo re opo omoĩ vy oipe'a jevy rā ipo re oĩ lepra, yro'y rami xii va'e.

⁷ SENHOR aipoe'ive ju:

— Emoĩ ju ndepo ndepexo re — he'i ramo teĩgue ju opexo re opo omoĩ vy oipe'a jevy rā ho'o iporāa rami ae ju ojekuaa.

⁸ SENHOR aipoe'i:

— Jypygua hexa pyrã rejapo rā ha'e kuery nandereroviaai neĩ ndoikuaa potai teĩ xapy'a rei mokoĩa rejapo ramo ojerovia 'rā.

⁹ Ha'e rami avi ha'e va'e mokoĩ hexa pyrã rejapo rā ha'e kuery ndogueroviai, neĩ ndeayvua noendu potai ramo ma yy rejara 'rā yakã gui, ha'e renhoẽ 'rā vyv piru reia py. Ha'e rā yy yakã gui rejara va'ekue ojeapo 'rā tuguy vyv áry.

¹⁰ Moisés ombovai SENHOR:

— Ai SENHOR! Xee ma xeayvu kuaa va'e'ỹ, nerembiguaĩ reve ndeayvu rire neĩ ndeayvu e'ỹ mbove. Mba'eta xejuru ha'e xeapekũ ipoyi vaipa xeayvu porã aguã.

¹¹ SENHOR aipoe'i ixupe:

— Mava'e tu ojapo avakue juru? Mava'e tu ojapo ijayvu e'ỹ va'e ha'e oendu e'ỹ va'e, ha'e oexa va'e ha'e oexa e'ỹ va'e? Xee SENHOR e'ỹ teve ajapo?

¹² Ha'e gui aỹ tereo. Xee ma ndejuru reve aiko vy rombo'e 'rā ndeayvu aguã.

¹³ Ha'e ramo aipoe'i:

— Ai SENHOR! Emondouka remondouka va'e rei, xee e'ỹ.

¹⁴ Ha'e ramo SENHOR ivai Moisés pe. Ha'e vy aipoe'i:

— Levita regua Arão nderyke'y e'ỹ ri ty'y? Xee aikuaa ha'e va'e ijayvu kuaa ete va'ea. Ha'e gui ha'e ou ma oiny nerovaexĩ vy. Nderexa vy ovy'a 'rā opy'a py.

¹⁵ Ha'e gui ndee hexeve ndeayvu vy remombe'u 'rā ijayvu aguã. Ha'e gui xee aiko 'rā ndejuru ha'e ijuru reve, ha'e rombo'e 'rā mba'emo pejapo aguã re.

¹⁶ Nderekovia nderyke'y 'rā ijayvu penetarã kuery pe. Ha'e ma ndejuru rekovia 'rā ijayvu, ha'e rā ndee ma ixupe aipo'ere uka 'rā xee Penderuete rami.

¹⁷ Ha'e rami ejopy kova'e popoka ndepo py, ha'e va'e py hexa pyrã rejapo aguã — he'i.

Egito vyv katy Moisés ojevyaague

¹⁸ Ha'e gui Moisés ojevy vy guaty Jetro-a py ranhe ovaẽ. Aipoe'i guaty pe:

— Tove taa xeretarã kuery Egito vyv re ikuaia py ju ajevy aguã, okuave teri paa aexa aguã.

Ha'e rã Jetro ma

— Tereo porã ke — he'i Moisés pe.

¹⁹ Ha'e gui Midiã vyv re teri Moisés oiko reve SENHOR aipoe'i ixupe:

— Tereo, ejevy ju Egito katy, mba'eta ndejukaxe va'ekue omanomba ma — he'i.

²⁰ Ha'e ramo Moisés ma gua'yxy ha'e gua'y kuery ogueraa vy omoĩ mburika áry. Ha'e rami vy Egito vyv katy ojevy. Opo py ma Moisés ogueraa Nhanderuete pegua popoka.

²¹ SENHOR aipoe'i ju Moisés pe:

— Egito vyv re revaẽ vy ke Faraó renonde ejapopa hexa pyrã ndepo py amboaxa va'ekue ha'e javi. Ha'e rami avi xee ajapo 'rā inhakã ratã aguã rami, neretarã kuery omondouka e'ỹ aguã.

²² Faraó pe aipo're 'rã: “Po rami SENHOR ijayvu: 'Israel kuery ma xera'y jypygua rami.

²³ Ha'e nunga rupi aipoa'e ndevy xera'y remondouka aguã xeve oiko aguã. Ha'e rã neremondoukaxeĩ ramo xee ajuka 'rã ndera'y jypyguare rereko va'e', he'i uka ndevy”, 're 'rã ixupe.

²⁴ Ha'e gui tape rupi Moisés oguataa rupi opytu'ua py SENHOR ovaexĩ. Ha'e vy ojukaxe.*

²⁵ Ha'e ramo ta'yxy Zípora ma peteĩ ita haimbe va'e oguenoẽ vy omboi opi'a pire, ha'e Moisés py vy'iry omombo. Ha'e vy aipoe'i ixupe:

* 4:24 Nhanderuete ojukaxe mba'eta Moisés nombi teri gua'y pire, ijayvuaque rami e'ỹ (Gênesis 17.9-14).

— Ndee xeme ma xevy rã jouguy moëa — he'i.

²⁶ Ha'e rami rã SENHOR oēja Moisés oikove aguã rami. Opi'a pire omboia káua ae ixupe ta'yxy “Xeme jouguy moëa”, he'i.

²⁷ Ha'e gui tyke'y Arão pe voi SENHOR aipoe'i:

— Tereo tekoa e'ÿa py eovaexĩ nderyvy Moisés — he'i. Ha'e ramo ha'e va'e ojepe'a ovy. Nhanderue te pegua vytyy oĩ va'e py guvyv ovaexĩ vy oayvupa.

²⁸ Ha'e ramo guyke'y Arão pe Moisés omombe'u SENHOR hexeve ijayvu vy omondoukaague, ha'e hexa pyrã ojapo ukaague ha'e javi.

²⁹ Ha'e gui Moisés jogueraa Arão reve. Ha'e vy omboatypa Israel kuery mongetaaty kuery.

³⁰ Heta va'e kuery pe Arão omombe'u Moisés pe SENHOR aipoe'i ukaague ha'e javi, ha'e kuery oexaa py ojapo avi hexa pyrã.

³¹ Ha'e rami rã ha'e kuery oguerovia. Mba'eta SENHOR oikuaa pota vy Israel kuery ikuai axya oexa ma. Ha'e nunga ha'e kuery pe omombe'u rã oendu vy oĩmba guenapy'ã re, ha'e ombojerovia.

5

Faraó pe Moisés ha'e Arão ijayvuague

¹ Ha'e gui Faraó-a py Moisés Arão reve jogueraa vy aipoe'i ixupe:

— Po rami SENHOR Israel kuery ruete ijayvu: “Emondouka na xevelygua kuery, xemboete vy ngaru ojapo aguã tekoa e'ÿa py”, he'i.

² Ha'e rã Faraó aipoe'i:

— Mava'e tu SENHOR oiko, ijayvua xee aendu vy Israel kuery amondouka aguã? Xee ndaikuaai teve “SENHOR” pejea, neĩ namondoukai 'rã Israel kuery — he'i.

³ Ha'e ramo ha'e kuery aipoe'ive ju:

— Hebreu kuery ruete ma ou orepu. Ha'e nunga rupi oremondouka na mboapy ára re tekoa e'ÿa py roo aguã, SENHOR orerue te mba'emo rome'ë aguã, ore re ha'e ombou e'ÿ aguã mba'eaxy, e'ÿ vy kyxe revegua.

⁴ Ha'e ramo ha'e kuery pe Egito pygua huvixa aipoe'i:

— Moisés ha'e Arão, mba'e nunga rupi? Mba'e re tu pemombytu'uxe ri penetarã kuery omba'eapoa gui? Tapeo na peẽ kuery pemba'eapo aguã katy.

⁵ Faraó aipoe'i avi:

— Penetarã kuery heta ma ikuai oreyvy re. Ha'e rã peẽ ma pemombytu'uxe omba'eapoa gui.

Faraó Israel kuery ombojexavai reiaque

⁶ Ha'e va'e árave Faraó ijayvu guembiguaĩ huvixa kuery ha'e omba'eapoa re opena va'e kuery pe. Ha'e vy aipoe'i:

⁷ — Aÿ gui ma Israel kuery pe napeme'ëvei ma 'rã mba'emo 'ygue jypy guare rami, vy jykueraõ ojapo aguã. Ha'e kuery ae too ha'e kuery ae tojou mba'emo 'ygue.

⁸ Ha'e rami avi ha'e kuery pe pejapo uka 'rã vy jykueraõ jypy'i guive ojapoaty rami ae. Mbovyve'i tojapo eme. Mba'eta ha'e kuery ma inhate'ÿ okuapy. Ha'e rami vy ae “Jaje'oi, mba'emo nhame'ë Nhanderue te pe”, he'i.

⁹ Ha'e nunga rupi pembopoyive tema ha'e va'e avakue rembiaporã, ha'e va'e rupi anho ikuai aguã, ijapu va'e ayvu ojapyxaka e'ÿ aguã — he'i.

¹⁰ Ha'e ramo hembiguaĩ huvixa kuery ha'e omba'eapoa re opena va'e kuery oje'oi vy ijayvu Israel kuery pe:

— Faraó aipoe'i: “Pende vy name'ëvei ma 'rã mba'emo 'ygue.

¹¹ Tapeo, peẽ ae pejou mba'emo 'ygue pejoua py rei. Mba'eta mba'eve py ndapejapoi 'rã penerembiapo mbovyve'i”, he'i uka pëvy — he'i.

¹² Ha'e ramo Egito vy ha'e javi rupi Israel kuery oaimba oje'oi vy mba'emo 'ygue 'rãgue py hemybrekue ri jepe omono'õ aguã.

¹³ Huvixa kuery ombojexavai rei herekovy. Ha'e vy aipoe'i:

— Pejapopa ke penembiapo peteĩ-teĩ ára pyguarã pejopy va'ekue mba'emo 'ygue ikuai jave guare rami — he'i.

¹⁴ Ha'e rami vy oinupã Israel kuery omba'eapoa re opena va'e kuery Faraó rembiguai huvixa kuery omoĩ va'ekue. Ha'e vy ha'e kuery pe aipoe'i okuapy:

— Mba'e re tu napemombai kuee, neĩ ange penembiaporã pejopy va'ekue, kueve guare rami vy jykueraõ pejapopa aguã?

Moisés ha'e Arão pe Israel kuery ivai okuapyague

¹⁵ Ha'e ramo Israel kuery omba'eapoa re opena va'e kuery oje'oi Faraó-a py. Ixupe ijayvu vy aipoe'i:

— Mba'e re tu ha'e rami orerereko nerembiguaĩ orekuai va'eri?

¹⁶ Mba'emo 'ygue ma nome'ëvei ore kuery nerembiguaĩ orekuai va'e pe, ha'e rami teĩ “Pejapo ke vy jykueraõ”, 're uka orevy. Ore ma orenupãmbaa rami teĩ pende kuery ae pejajavy.

¹⁷ Ha'e rami teĩ Faraó ombovai:

— Peneate'ÿ, peneate'ÿ. Ha'e rami vy ae “Jaje'oi, mba'emo nhame'ë SENHOR pe”, peje jepi.

¹⁸ Ha'e gui aÿ tapeo pemba'eapo. Ha'e rã mba'emo 'ygue ma nome'ëai 'rã pende vy. Ha'e rami teĩ pejapo retaaty rami ae 'rã pejapo vy jykueraõ.

¹⁹ Ha'e ramo Israel kuery omba'epoa re opena va'e kuery ojexavai rei okuapy, ha'e kuery pe aipo'ea rã: "Mba'eve py mbovyve'i pejapo eme vvy jykuera, petei-tei ára py pejapo aguã va'ekue."

²⁰ Ha'e gui Faraó renonde gui ha'e kuery oje'oi vvy oexa Moisés ha'e Arão ha'e kuery rarõa py ikuai rã.

²¹ Ha'e vvy ha'e kuery pe aipoe'i:

— Tove pendere SENHOR toexa pota, toikuaa pota pendere, mba'eta peẽ pejapo Faraó orere nda'ija'ei aguã rami, ha'e hembigua kuery renonde. Ha'e kuery po py reme'ẽ kyxe orejuka aguã — he'i okuapy.

²² Ha'e ramo Moisés SENHOR pe ojapukai. Ha'e vvy aipoe'i:

— SENHOR, mba'e re tu rembojexavai uka kova'e kuery? Mba'e re tu xee xembou?

²³ Mba'eta Faraó-a py nderery rupi xeayvu aguã ajexa ukaa ára guive ma ojavvyky rei kova'e kuery. Ha'e rã ndee ma peteive py ndereraa jepeti teri ndevygu kuery.

6

¹ Ha'e ramo SENHOR aipoe'i Moisés pe:

— Aỹ ma rexa 'rã mba'emo Faraó re ajapo va'e, mba'eta xepo'akaa aexa uka ramo 'rãe penemondouka, xepo'akaa aexa uka ramo 'rãe penerenoẽ ukapa oyvy gui.

Israel kuery ogueraa jepe aguã re Nhanderuete ijayvuague

² Ha'e gui Nhanderuete ijayvuve ju Moisés pe. Ha'e vvy aipoe'i ixupe:

— Xee ma SENHOR.

³ Abraão, Isaque ha'e Jacó pe ajexa uka vvy Penderuete ipo'akapa va'ea rami ajekuaa uka raka'e. Ha'e rã xerery SENHOR rupi ma ha'e kuery pe ndajekuaa ukai.

⁴ Ha'e kuery reve ajapo avi xereve guarã, ha'e va'e rupi Canaã vvy ame'ẽ aguã hekoarã, ha'e va'e vvy re oguata rei va'e rami ikuaiague ae.

⁵ Aendu avi Egito pygua kuery Israel kuery escravo omoingo rã ipoã okuapy. Ha'e rami vvy xema'endu'a xereve guarã ajapo va'ekue re.

⁶ Ha'e nunga rupi aipo're Israel kuery pe: "Xee ma SENHOR. Ha'e rami vvy roguenoẽ 'rã Egito pygua penembovyia guy gui. Roipe'a 'rã pemba'epo vaipaa gui, ha'e rogueraa jepe 'rã xepo aupi vvy nhombopagaarã tuvixa va'e ambou reve.

⁷ Xee rogueraa 'rã xeve guarã, ha'e aiko 'rã Penderuete. Ha'e ramo peikuaa 'rã xee SENHOR ae Penderuete aikoa, Egito pygua penembovyia guy gui roguenoẽ va'e.

⁸ Ha'e rami vvy rogueraa 'rã vvy Abraão pe ame'ẽ aguã auraague, Isaque ha'e Jacó pe guive. Pendevy ju ame'ẽ 'rã penderekoarã. Xee ma SENHOR", 're 'rã xerery rupi.

⁹ Ha'ekue rami ae Moisés ijayvu Israel kuery pe. Ha'e rami tei ha'e kuery ndoikuaa potai Moisés re, escravo poyi ikuaiague onhe'ẽ py ikuera vvy.

¹⁰ Ha'e gui teigüe ju SENHOR ijayvu Moisés pe. Ha'e vvy aipoe'i:

¹¹ — Tereo Egito pygua huvixa Faraó-a py. Aipo're ixupe: "Tove na too Israel kuery ndevvy gui", 're.

¹² Ha'e rã Moisés ombovai vvy aipoe'i SENHOR pe:

— Neĩ endu ke, Israel kuery ma noendui. Mba'exa'vvy tu Faraó oendu ta xeayvu? Ndaxeayvu porã kuaai — he'i.

¹³ Ha'e rami tei Moisés ha'e Arão pe SENHOR ojapo uka ae Israel kuery peguarã, ha'e Egito pygua huvixa Faraó peguarã guive, Egito vvy gui Israel kuery oguenoẽ aguã.

Moisés ha'e Arão ramymino kuery rery oĩa

¹⁴ Po rami ma heta va'e kuery re opena va'e kuery rery. Israel ra'y jypyguia Rúben ra'y kuery ma Enoque, Palu, Hezrom ha'e Carmi. Ha'e va'e kuery ma Rúben ra'y kuery.

¹⁵ Ha'e Simeão ra'y kuery ma Jemuel, Jamim, Oade, Jaquim, Zoar ha'e Canaã pygua pi'a Saul. Ha'e va'e kuery ma Simeão ra'y kuery.

¹⁶ Po rami ma Levi ra'y kuery rery hamymino kuery reve: Gérson, Coate ha'e Merari. Levi ma cento e trinta e sete ma'etỹ re oiko.

¹⁷ Gérson ra'y kuery ma Libni ha'e Simeĩ, ta'y kuery rery oĩa rami.

¹⁸ Coate ra'y kuery ma Anrão, Isar, Hebrom ha'e Uziel. Ha'e gui Coate ma cento e trinta e três ma'etỹ re oiko.

¹⁹ Merari ra'y kuery ma Mali ha'e Musi. Ha'e rami ma Levi ra'y kuery rery hamymino kuery reve.

²⁰ Ha'e gui Anrão ma gua'lyxyrã ojou ojaixe Joquebede. Ha'e ramo oikuavã Arão ha'e Moisés. Anrão ma cento e trinta e sete ma'etỹ re oiko.

²¹ Isar ra'y kuery ma Corá, Nefegue ha'e Zicri.

²² Uziel ra'y kuery ma Misael, Elzafã ha'e Sitri.

²³ Arão ma gua'lyxyrã ojou Aminadabe rajy Eliseba, Naassom reindy va'e. Ha'e ramo oikuavã'i Nadabe, Abiú, Eleazar ha'e Itamar.

²⁴ Corá ra'y kuery ma Assir, Elcana ha'e Abiasafe. Ha'e va'e ma Corá ra'y kuery.

²⁵ Ha'e gui Arão ra'y Eleazar ma gua'lyxyrã ojou Putiel rajy kuery va'e regua. Ha'e ramo oikuavã'i Finéias. Ha'e va'e kuery ma hoo va'e yvatekueve va'e ikuai gua'y kuery reve.

²⁶ Ha'e gui Arão ha'e Moisés pe ae SENHOR aipoe'i: "Penoẽ ke Israel kuery Egito vvy gui xondaro ikuai va'e rami" he'i va'ekue.

²⁷ Ha'e va'e kuery ma Egito pygua huvixa Faraó pe ijayvu va'ekue Egito gui Israel kuery oguenoë aguã. Moisés ha'e Arão hery va'e.

Faraó pe Moisés ijayvu jevyague

²⁸ Ha'e va'e jave ae SENHOR ijayvu Moisés pe Egito yvy re oiko rã.

²⁹ Ha'e vy aipoe'i ixupe:

— Xee ma SENHOR. Aipo're Egito pygua huvixa Faraó pe ndevy xeayvuague ha'e javi rupi — he'i.

³⁰ Ha'e ramo Moisés ombovai SENHOR renonde:

— Xee ma ndaxeayvu porã kuaai. Mba'exa tu Faraó xenhe'ẽ rendu ta?

7

¹ Ha'e ramo SENHOR aipoe'i Moisés pe:

— Ma'ẽ, ndee romoi tuete rami Faraó áry. Ha'e rã nderyke'y Arão oiko 'rã ndeayvu momb'e'uarã.

² Mba'eta nderyke'y Arão pe remboaxa 'rã ndevy aipoa'e uka va'e ha'e javi. Ha'e gui ha'e va'e ju 'rã ijayvu Faraó pe, ovyv gui Israel kuery omoundouka aguã.

³ Ha'e rami avi xee ma ajapo 'rã Faraó inhakã ratã aguã rami. Ha'e Egito yvy re ajapo 'rã heta hexa pyrã ha'e xeguigua iporã va'e.

⁴ Ha'e rami teĩ Faraó ndojapyxakai 'rã pendeayvu re. Ha'e nunga rupi xee amoi 'rã xepo Egito áry. Ha'e rami vy ajapo 'rã Egito yvy gui oẽmba aguã rami xexondaro kuery xevygua kuery ikuai va'e, Israel kuery, nhombopagaarã tuvixa va'e aikuaa uka reve.

⁵ Ha'e ramo Egito pygua kuery oikuaa 'rã xee SENHOR aikoa, Egito áry xepo amoi jave ha'e kuery mbyte gui Israel kuery anoẽmba vy.

⁶ Ha'e gui Moisés ha'e Arão ojapo ha'e rami. Ha'e kuery pe SENHOR ijayvuague rami ae ojapo okuapy.

⁷ Moisés ma oitenta ma'etỹ oguereko, ha'e rã Arão ma oitenta e três ma'etỹ oguereko Faraó pe ijayvu jave py.

⁸ Ha'e gui SENHOR aipoe'i Moisés ha'e Arão pe:

⁹ — Ha'e gui pëvy Faraó “Pejapo ha'vy hexa pyrã, ha'e ramo ajerovia 'rã pendere”, he'i rã ke aipo're Arão pe: “Ejopy ndepopoka, ha'e emombo Faraó renonde.” Ha'e ramo ojeapo 'rã mboi.

¹⁰ Ha'e ramo Moisés ovaẽ Faraó-a py Arão reve. Ha'e vy ojapo SENHOR ha'e kuery pe ojapo uka va'ekue. Arão omombo opopoka Faraó ha'e hembiguai kuery renonde. Ha'e ojeapo mboi.

¹¹ Ha'e ramo Faraó ogueruruka hi'arandu va'e ha'e imba'evyky va'e kuery. Ha'e ramo Egito pygua hi'arandu va'e kuery ma ha'ekue rami ae ojapo nhemi rupi hi'arandua py.

¹² Ha'e ramo ha'e kuery voi opopoka peteĩ-teĩ omombo ramo ojeapo mboi. Teĩ Arão popoka ho'upa ha'e kuery popoka.

¹³ Ha'e rami teĩ Faraó inhakã ratã vy noendu potai SENHOR ijayvuague re.

Jypygua nhombopagaarã yy tuguy omoingoaque

¹⁴ SENHOR aipoe'i Moisés pe:

— Faraó ma inhakã ratã vy nomondoukaxeĩ neretarã kuery.

¹⁵ Tere ju Faraó-a py ko'ẽmba'i ramove. Ha'e ma oo 'rã yy katy. Rearõ 'rã yakã yvỹry. Ndepo py rereko 'rã ndepopoka mboi ojeapo va'ekue.

¹⁶ Ha'e aipo're ixupe: “ SENHOR hebreu kuery ruete xembou ndea py aipoa'e aguã: ‘Emondouka xevelygua kuery tekoa e'ya py ikuai aguã xevy. Ha'e rami teĩ aỹ peve nerendu potai’, ha'e aguã.

¹⁷ Ha'e gui SENHOR aipoe'i ukave ju: ‘Pova'e nunga rupi 'rã reikuaa xee SENHOR aikoa. Kova'e popoka xepo py areko va'e py ainupã 'rã yy yakã rupi oi va'e. Ha'e ramo oiko 'rã tuguy.

¹⁸ Pira yakã rupi ikuai va'e omanomba 'rã. Yakã heakuã vaikue 'rã, ha'e Egito pygua kuery ojeguaru 'rã yakã gui oy'u aguã’, he'i uka.”

¹⁹ SENHOR aipoe'ive ju Moisés pe:

— Aipo're Arão pe: “Ejopy ndepopoka, ha'e eupi ndepo yy Egito rupi ikuai va'e áry, yakã, yy rape, yupa ikuai va'e ha'e yy omboty pyre ha'e javi áry, tuguy oiko aguã. Toiko tuguy Egito yvy jave re, yryru yvyra guigua ha'e ita guigua py”, 're 'rã ixupe — he'i.

²⁰ Ha'e ramo Moisés ha'e Arão ojapo SENHOR ijayvuague. Ha'e rami vy Arão opopoka oupi vy oinupã yy yakã rupi oi va'e, Faraó ha'e hembiguai kuery oexaa py. Ha'e ramo yy yakã rupi oi va'e ha'e javi tuguy oiko.

²¹ Pira yakã rupi ikuai va'e omanomba. Yakã heakuã vaikue. Ha'e Egito yvy re ikuai va'e nda'evevei yakã gui oy'u aguã. Egito yvy jave re tuguy oiko.

²² Ha'e gui Egito pygua imba'ekuaa va'e kuery voi ha'ekue ramigua ju ojapo okuapy nhemi rupi hi'arandua py. Ha'e nunga rupi Faraó inhakã ratã vy noendu potai, SENHOR ijayvuague rami vy.

²³ Faraó ojere vy ngoo katy ju oo. Neĩ ha'e nunga re voi ndoikuaa potai opy'a py.

²⁴ Ha'e gui Egito pygua kuery ha'e javi ojo'o okuapy yakã yvỹry, ojou aguã yy oy'u aguã. Mba'eta yy yakã guigua nda'evei oy'u aguã.

²⁵ Ha'e gui SENHOR yakã oinupã uka rire sete ára oaxa.

8

Mokoia nhombopagaarã ju'i ombouague

¹ Ha'e va'e rire SENHOR aipoe'i Moisés pe:

— Tereo ju Faraó-a py, ha'e aipo're ixupe: "Po rami SENHOR ijayvu: 'Tove too xeivygua kuery, xevy ikuai aguã.

² Xapy'a rei neremondoukai ramo ma rombopaga 'rã ju'i ndevvy ha'e javi rupi ambou vy.

³ Yakã gui oiko 'rã ju'i. Mbovy e'y 'rã oê, oiko 'rã ndero py, opy ja'o'i rekeaty py, nderupa áry, nerembigui kuery ro rupi, ndevvygua kuery re, ha'e mbojape pembojaty rupi, mbojaperã pemoapomoaty rupi.

⁴ Ju'i ojeupi 'rã ndere, nerembigui kuery ha'e ndevvygua kuery ha'e javive re', 're 'rã ixupe."

⁵ SENHOR aipoe'ive ju Moisés pe:

— Aipo're ke Arão pe: "Eupi ndepo ndepopoka reve yakã áry, yy rape ha'e yupa ikuai va'e áry, ju'i rejapo Egito vvy re oê aguã rami", 're.

⁶ Ha'e ramo Arão opo oupi yy Egito vvy re ikuai va'e áry. Ha'e rã ju'i oê vy Egito vvy ha'e javi rupi ojao'i.

⁷ Ha'e ramo imba'ekuaa va'e kuery ha'ekue ramigua ju ojapo nhemi rupi hi'arandua py. Ha'e vy ojapo Egito vvy re ju'i oê aguã rami.

⁸ Ha'e gui Faraó oenoī Moisés ha'e Arão. Ha'e vy aipoe'i ha'e kuery pe:

— Pejerure SENHOR pe oipe'a aguã ju'i xea gui ha'e xeivygua kuerya gui. Ha'e ramo ma pende kuery romondouka 'rã SENHOR pe mba'emo peme'ê aguã.

⁹ Ha'e ramo Moisés aipoe'i Faraó pe:

— Aipo're ke xevy araka'e pa reipota ajerure ndere, nerembigui kuery ha'e ndevvygua kuery re, ju'i oipe'aa aguã ndea gui ha'e ndero pygua kuerya gui, yakã py anho ju opyta aguã.

¹⁰ — Ko'ê rã — he'i.

Moisés aipoe'i:

— Toiko ndeayvua rami, reikuaa aguã peteīve jipoia SENHOR Oreruete ramigua.

¹¹ Ndea gui ojepe'apa 'rã ju'i, ndero pygua kuery, nerembigui kuery ha'e ndevvygua kuerya gui. Yakã py anho ju 'rã ikuai — he'i.

¹² Ha'e ramo Moisés ha'e Arão jogueraa Faraó-a gui. SENHOR pe Moisés ojapukai ju'i káuxa, Faraó reve jogueroayvuague rami vy.

¹³ Ha'e ramo SENHOR ojapo Moisés ijayvuague rami. Ju'i omanomba oo rupi, oka rupi ha'e mba'ety rupi ikuaiague py.

¹⁴ Ijaty reta-eta. Ha'e ramo vvy jave re heakuã vaikue.

¹⁵ Ha'e gui Faraó ma oo jepea oexa vy inhakã ratãve ju. Ha'e vy noenduxevei, SENHOR ijayvuague rami vy.

Mboapy nhombopagaarã ky ombouague

¹⁶ Ha'e gui SENHOR aipoe'i Moisés pe:

— Aipo're Arão pe: "Eupi ndepopoka, ha'e einupã vvy ku'i re, ky oiko aguã Egito vvy jave re", 're.

¹⁷ Ha'e rami ojapo. Arão opo opopoka reve oupi vy oinupã vvy ku'i. Ha'e ramo oiko reta ky avakue re ha'e mymba kuery re. Vvy ku'i ha'e javi gui ky oiko Egito vvy jave re.

¹⁸ Ha'e ramo imba'ekuaa va'e kuery ma ha'ekue ramigua ae avi o'arandua rupi ojapo nhemixe ky omoingo aguã, va'eri ndojapo kuaai. Ky anho ikuai avakue re ha'e mymba kuery re.

¹⁹ Ha'e ramo imba'ekuaa va'e kuery aipoe'i Faraó pe:

— Kova'e ma Nhanderuete kuã ojapo va'e — he'i teī Faraó inhakã ratã. SENHOR ijayvuague rami vy noendui ae.

Irundy nhombopagaarã mberu ombouague

²⁰ Ha'e gui SENHOR aipoe'i Moisés pe:

— Epu'ã ke ko'ê rã aje'ive'i reve, ha'e ejexa uka ju Faraó pe. Ha'e va'e oo 'rã oiny yy katy. Ha'e rã ixupe aipo're: "Po rami ijayvu SENHOR: 'Tove too xeivygua kuery, xevy ikuai aguã.

²¹ Ha'e gui xeivygua kuery neremondoukai ri ramo ma'ê, xee ambou 'rã mberu nde'áry, nerembigui kuery, ndevvygua kuery ha'e ndero pygua kuery áry. Ha'e Egito pygua kuery ro rupi omonyẽmba 'rã mberu, vvy ha'e kuery ikuai voi.

²² Ha'e rã Gósen vvy re xeivygua kuery ikuai rupi ma amboa rami 'rã ajapo. Xeivygua kuery ikuai re mberu ndoikoī 'rã, reikuaa aguã pendeivy mbyte re voi xee SENHOR aika.

²³ Ha'e rã ndevvygua kuery ma xeivygua kuery arekoa rami e'y 'rã areko. Ko'ê rã oiko 'rã ha'e nunga hexa pyrã, he'i uka ndevvy", 're.

²⁴ Ha'e rami ae SENHOR ojapo. Ha'e ramo Faraó ro re ou mbovy e'y mberu, hembigui kuery ro re ha'e Egito vvy ha'e javi áry. Ha'e ramo vvy na'iporãve mberu gui.

²⁵ Ha'e ramo Faraó oenoī Moisés ha'e Arão. Ha'e vy aipoe'i:

— Tapeo, Penderuete pe mba'emo peme'ê teī kova'e vvy re anho ta'vy.

²⁶ Moisés ombovai:

— Ha'e rami rojapo aguã nda'vei, mba'eta SENHOR Oreruete pe rome'ê 'rã mba'emo Egito pygua kuery ojou porã va'e'y. Ma'ê, xapy'a rei ha'e kuery oexaa rupi ha'e nunga rome'ê ramo ha'e kuery oreapipa 'rã ita py.

²⁷ Ha'e rami 'rãgue py mboapy ára re 'rã roo tekoa e'ya py, ha'e py mae SENHOR Oreruete pe mba'emo rome'ê aguã, orevy aipoe'ia rami vy — he'i.

²⁸ Ha'e ramo Faraó aipoe'i:

— Ha'eve 'rã tekoa e'ya py teī peo aguã mba'emo peme'ê aguã. Ha'e rami avi mombyry ete e'y 'rã peo. Ha'e xere voi ke penhembo'e.

²⁹ Moisés ombovai:

— Ma'ê, aÿ ma xee nerenonde gui aa vy anhembo'e 'rã SENHOR pe. Ha'e gui ko'ê rã kova'e mberu ojepe'apa 'rã ndee Faraó-a gui, nerembiguai kuery ha'e ndevyguia kuery ha'e javia gui. Ha'e rami avi Faraó, xembotavyve eme, xeretarã kuery SENHOR pe mba'emo ome'ê aguã neremondoukaia py — he'i.

³⁰ Ha'e ramo Faraó renonde gui Moisés oo vy onhembo'e SENHOR pe.

³¹ Ha'e ramo SENHOR ojapo Moisés ijayvuague rami. Ha'e ramo mberu ojepe'apa Faraó-a gui, hembiguai kuery ha'e ixupegua kuery ha'e javia gui. Pete'i voi ndopytai mberu.

³² Ha'e rami te'i Faraó inhakã ratã ju. Ha'e vy nomondoukai ha'e kuery.

9

Pete'i nhiruã nhombopagaarã mymba re mba'eaxy ombouague

¹ Ha'e gui SENHOR aipoe'i Moisés pe:

— Ejexa uka ju Faraó pe, ha'e aipo're ixupe: “Po rami SENHOR hebreu kuery ruete va'e ijayvu: ‘Tove too xeveygua kuery, xevy ikuai aguã.

² Mba'eta xapy'a rei neremondoukai ha'e remombyta nhea'ã ramo

³ SENHOR opo omoi 'rã nerymba kuery nhuũndy rupi ikuai va'e áry, kavaju kuery, mburika, camelo kuery, vaka ha'e vexa'i kuery áry, mba'eaxy vaikue ombou vy.

⁴ Ha'e rã Israel kuery rymba kuery re ma SENHOR amboae rami 'rã ojapo Egito pygua kuery rymba re ojapo 'rãgue py, Israel kuery rymba ne'i pete'ive omano e'y aguã, he'i uka ndevy.

⁵ Mba'eta SENHOR oa'anga ma ha'e nunga oiko aguã ára. Ko'ê rã ha'e nunga SENHOR omoingo 'rã yvy re”, 're 'rã ixupe — he'i.

⁶ Ha'e gui ko'ê jevy SENHOR ha'e nunga ombou ramo Egito pygua kuery rymba ha'e javi omano. Ha'e rã Israel kuery rymba ma nomanoi ne'i pete'i.

⁷ Ha'e gui Faraó omondouka oma'ê aguã, ha'e rã Israel kuery rymba nomanoi ne'i pete'i. Ha'e rami te'i Faraó inhakã ratã vy nomondoukai ha'e kuery.

Seis-a nhombopagaarã ai vaikue ombouague

⁸ Ha'e ramo SENHOR aipoe'i Moisés ha'e Arão pe:

— Tata rupa gui pejopy pendepo renyê tanhimbu. Ha'e ramo Faraó renonde Moisés omombo 'rã yvate katy.

⁹ Ha'e va'e gui oiko 'rã iku'i va'e Egito yvy ha'e javi áry. Ha'e ramo Egito yvy jave rupi oiko 'rã irurupa, opu 'rã ai vaikue avakue re ha'e mymba kuery re — he'i.

¹⁰ Ha'e ramo ha'e kuery oo vy tata rupa gui ojopy tanhimbu, ha'e vy oo Faraó-a py. Moisés omombo yvate katy. Ha'e ramo ha'e va'e gui oiko irurupa va'e ha'e ai vaikue avakue re ha'e mymba kuery re.

¹¹ Ha'e nunga rupi Moisés renonde gui imba'ekuaa va'e kuery ojepe'apa ai vaikue gui. Mba'eta imba'ekuaa va'e kuery re voi ai vaikue oiko, ha'e Egito pygua kuery ha'e javi re.

¹² Ha'e rami te'i SENHOR ojapo Faraó inhakã ratã aguã rami. Ha'e ramo noendui, Moisés pe SENHOR ijayvuague rami vy.

Sete-a nhombopagaarã amandau ombouague

¹³ Ha'e gui SENHOR aipoe'i Moisés pe:

— Epu'ã ke ko'ê rã aje'ive. Ejexa uka Faraó pe, ha'e aipo're ixupe: “Po rami SENHOR hebreu kuery ruete ijayvu: ‘Tove too xeveygua kuery, xevy ikuai aguã.

¹⁴ Mba'eta aÿ ma ndere ete amo'i 'rã nhombopagaarã ha'e javi, nerembiguai kuery ha'e ndevyguia kuery áry, peikuaa aguã avave rei xee ramigua jipoia yvy jave re.

¹⁵ Mba'eta ha'e rami ajapoxe va'e rire rojuka aguã xepo amo'i ma 'rãgue, ndee ha'e ndevyguia kuery áry mba'eaxy ambou vy. Roipe'apa ma 'rãgue yvy gui.

¹⁶ Ha'e rami te'i ha'e rami ndajapoi, ndevy aexa uka aguã xepo'akaa, ha'e xerery rupi xereko omombe'ua aguã yvy jave re.*

¹⁷ Ha'e rã ndee repu'ã rei teri va'e ty'y xeveygua kuery rovai, remondouka e'y aguã?

¹⁸ Ma'ê, ko'ê rã kova'e hora ojeupity ju jave ajapo 'rã amandau ho'a vaipa aguã rami, Egito yvy re oiko e'y teri va'e ramigua ijypya ára gui aÿ peve.

¹⁹ Ha'e gui aÿ ma emoinge ukapa nerymba vaka, avakue ha'e mymba nhuũndy rupi ikuai va'e. Mba'eta opy ndoikvei vy ha'e kuery re amandau ho'a rã omanomba 'rã, he'i uka ndevy”, 're.

²⁰ Ha'e ramo Faraó rembiguai kuery va'e regua amongue ma SENHOR ayvu oendu vy ojeayvu. Ha'e rami vy ojapo guembiguai kuery ha'e guymba vaka kuery oupa aguã rami ngoo rupi.

²¹ Ha'e rã SENHOR ayvu re ndoikuaa potai va'e ma oeja guembiguai kuery ha'e vaka kuery nhuũndy re ae.

²² Ha'e gui SENHOR aipoe'i Moisés pe:

— Eupi ndepo yvate katy. Ha'e rã ho'a 'rã amandau Egito yvy jave re, avakue áry, mymba ha'e Egito yvy jave re mba'ety rupi onhot'y mbyre ikuai va'e áry.

²³ Ha'e ramo Moisés yvate katy opopoka oupi ramo SENHOR ombou yapu hatã va'e ha'e amandau, tata voi ho'a yvy re. Ha'e rami vy SENHOR ojapo amandau Egito yvy re ho'a aguã.

²⁴ Ha'e rami ete amandau ha'e tata amandau re irũ va'e ho'a nda'evei ete va'e. Ha'e ramigua oiko va'e'y teri Egito yvy re, Egito pygua ikuai ypya ára guive.

* 9:16 Romanos 9.17

²⁵ Ha'e gui Egito vvy jave re amandau ojuka opa mba'e oka rupi ikuai va'e, avakue ha'e mymba kuery. Amandau ojavyky avi mba'ety rupi onhoty mbyre ha'e javi, omopemba avi vvyra nhuundy rupi ikuai va'e.

²⁶ Ha'e rã Gósen vvy re Israel kuery ikuai py anho ndo'ai amandau.

²⁷ Ha'e ramo Faraó oenoí uka Moisés ha'e Arão. Ha'e vy aipoe'i ha'e kuery pe:

— Aỹ ma ajevavy. SENHOR ma heko porã va'e, ha'e rã xee ha'e xeivygua kuery ma rojevavy va'e.

²⁸ Ejpakui ke ha'vy SENHOR pe, mba'eta ha'eve ma kova'e yapu atã va'e ha'e amandau. Xee romondouka 'rã, ndapepytavei ma 'rã apy.

²⁹ Ha'e ramo Moisés ombovai:

— Xee ma tetã gui aẽ vy xepo aupi 'rã SENHOR pe. Ha'e ramo yapu va'e oaxa 'rã, ndo'avei 'rã amandau, peikuaa aguã ko vvy SENHOR mba'ea.

³⁰ Ha'e rami avi xee aikuaa ndee ha'e nerembiguai kuery SENHOR Oreruete renonde pejererokyje aguã nõ teria.

³¹ (Ha'e jave py linho ha'e cevada ikuai va'e ojavykypa, mba'eta cevada ma hary ma, ha'e rã linho ma ipoty.

³² Ha'e rã trigo ha'e centeio ma ndojavykyi, naenhoi teri ramo.)

³³ Ha'e gui Faraó renonde gui Moisés oo ju vy oẽ tetã gui. SENHOR pe opo oupi ramo yapu atã va'e ha'e amandau oaxapa, neĩ nda'okyvei vvy re.

³⁴ Ha'e rami teĩ amandau ha'e yapu atã va'e oaxapa rã Faraó oexa vy ojevavyve ju, mba'eta guembiguai kuery reve inhakã ratã va'e meme.

³⁵ Ha'e rami vy Faraó inhakã ratã vy nomondoukai Israel kuery, Moisés pe SENHOR ijavyvague rami vy.

10

Oito-a nhombopagaarã tuku ombouague

¹ Ha'e gui SENHOR aipoe'i Moisés pe:

— Tereo Faraó-a py, mba'eta amoakã ratã, hembiguai kuery guive, ha'e kuery mbyte ajapo aguã kova'e nunga hexa pyrã,

² ha'e ndera'y kuery pe, ndera'y ra'y kuery pe remombe'u aguã Egito pygua kuery ajavyky reiague, ha'e ha'e kuery mbyte mbovykue rei e'ỹ nhomondyipaarã ambouague, ha'e kuery oikuaa aguã xee ae SENHOR aikoa — he'i.

³ Ha'e ramo Moisés ha'e Arão oo vy ojexa uka Faraó renonde. Ha'e vy aipoe'i ixupe:

— Po rami SENHOR hebreu kuery ruete ijavyvu: “Raka'e peve tu nerenhemo'vyvĩ'i 'rã xerenonde? Tove too xeivygua kuery, xeivy ikuai aguã.

⁴ Ha'e rami teĩ xeivygua kuery neremondoukaxei aguã ramo ma'ẽ, ko'ẽ rã ambou 'rã tuku ndevvy re.

⁵ Ha'e ramo ojao'ipa 'rã vvy. Ha'e va'e gui neĩ petei henda py ma ndojekuaavei 'rã. Ha'e kuery ho'upa 'rã amandau ndojavykypai va'ekue, ho'upa avi 'rã vvyra pendevvy re henhoi va'ekue.

⁶ Ndero rupi voi omonyẽmba 'rã, nerembiguai kuery ha'e Egito pygua kuery ha'e javi ro. Nderu kuery oexa e'ỹ teri va'e nunga, neĩ neramoĩ kuery voi, vvy re ikuaiã ára guive kova'e ára peve”, he'i uka ndevvy — he'i. Ha'e gui Moisés ojere vy ojepe'a ju ovy Faraó renonde gui.

⁷ Ha'e ramo Faraó rembiguai kuery aipoe'i ixupe:

— Raka'e peve tu kova'e aha nhandejopy 'rã herekovy? Emondouka na ha'e kuery, SENHOR nguete pe ikuai aguã. Nderikuai teri ri ty'y Egito ivaipa maa? — he'i okuapy.

⁸ Ha'e gui Faraó renonde ogueru ju Moisés ha'e Arão. Ha'e ramo ha'e aipoe'i ha'e kuery pe:

— Tapeo, peiko SENHOR penderuete pe. Ha'e gui mava'e kuery tu oo va'erã pendereve?

⁹ Moisés ombovai:

— Ore revegua oo 'rã kunumigue, tujakue'i, orera'y kuery, orerajy kuery, orerymba kuery ha'e vaka kuery ha'e javi. Mba'eta rojapo 'rãe ngaru SENHOR pegua — he'i.

¹⁰ Ha'e ramo Faraó aipoe'i ha'e kuery pe:

— Toiko SENHOR pendereve, peẽ ha'e kyrĩgue reve, xapy'a rei romondouka ri ramo. Ha'e rami avi peikuaa pota, mba'eta ha'eve'ỹa rami pejapoxe.

¹¹ Ha'e rami nda'evei 'rã. Tapeo peẽ avakue anho SENHOR pe pendekuai aguã rejerurea rami — he'i. Ha'e rami vy Faraó guenonde gui oipe'a uka.

¹² Ha'e gui SENHOR aipoe'i Moisés pe:

— Eupi ndepo Egito vvy áry, tuku ou vy ho'upa aguã jai rogue vvy re ikuai va'e, amandau ndojavykypai va'ekue ha'e javi — he'i.

¹³ Ha'e gui Egito vvy áry Moisés opopoka oupi ramo SENHOR kuaray oua katy gui ombou vvytu. Ha'e va'e ára pukukue re ha'e pyty mbukukue re oipeju. Ha'e gui ko'ẽ jave ma vvytu rupi ou tuku.

¹⁴ Ha'e rami vy tuku ou Egito vvy jave áry, vvy jave re oguejy. Heta ete vy ha'e va'e e'ỹ mbove ndoikoi teri ha'e va'e nunga tuku, neĩ ha'e va'e rire ndouvei ma 'rã ha'e va'e ramigua.

¹⁵ Mba'eta ojao'ipa vvy ha'e javi, vvy huũ rei aguã rami opyta. Ho'upa jai rogue vvy re ikuai va'e ha'e vvyra'a ha'e javi, amandau ndojavykypai va'ekue. Egito vvy ha'e javi rupi mba'eve jipovei ipyau va'e vvyra re, neĩ jai rogue mba'ety rupi ikuai va'e.

¹⁶ Ha'e rami rã Faraó oenoĩ pojava Moisés ha'e Arão. Ha'e vy aipoe'i ha'e kuery pe:

— Ajevavy SENHOR penderuete rovai ha'e peẽ kuery rovai.

¹⁷ Ha'e gui aỹ ma ajerure pëvy xeperdoa ju aguã ajevavya aỹgua voi. Ha'e pejerure SENHOR penderuete pe xegui oipe'a aguã kova'e manoa — he'i.

¹⁸ Ha'e ramo Faraó renonde gui Moisés oo ju vy ojapukai SENHOR pe.

¹⁹ Ha'e ramo SENHOR ojapo vytytu kuaray oikea katy gui ju oipeju atã agua rami. Ha'e va'e ma tuku oguerovepe vy oitypa Ye'e Pytã va'e py. Neĩ peteĩ tuku ndopytai Egito vyvave re.

²⁰ Ha'e rami teĩ SENHOR Faraó omoakã ratã ramo nomondoukai Israel kuery.

Nove-a nhombopagaarã pytũ ombouague

²¹ Ha'e gui SENHOR aipoe'i Moisés pe:

— Eupi ndepo vyate katy, Egito vyvave pytũ ou agua, pytũ vaikue japokoa va'e regua — he'i.

²² Ha'e ramo Moisés vyate katy opo oupi ramo oiko pytũ ana Egito vyvave re mboapy ára re.

²³ Ha'e nunga rupi peteĩve ndajoexai, peteĩve oĩa gui nupu'ãi mboapy ára re. Ha'e rã Israel kuery ro rupi ma hexakã.

²⁴ Ha'e ramo Faraó oenoĩ Moisés. Ha'e vy aipoe'i ixupe:

— Tapeo, peiko SENHOR pe. Topyta penerymba vexa'i ha'e penerymba vaka anho. Pendera'y kuery kyrĩgue ma too avi pendupive.

²⁵ Moisés ombovai:

— Ha'e rami ri ramo ndee ae 'rã reme'ẽ orepo py mba'emo rojuka ha'e roapy vy SENHOR Oreruete pe rome'ẽ va'erã.

²⁶ Any, orerymba vexa'i kuery avi 'rã oo orerupive. Neĩ peteĩve pyapẽ ndopytai 'rã, mba'eta ha'e va'e regua gui roiporavo 'rã SENHOR Oreruete pe rome'ẽ agua. Ndooroikuai mba'e nunga pa SENHOR pe rome'ẽ va'erã, ha'e py rovaẽ e'ỹa ja — he'i.

²⁷ Ha'e gui Faraó inhakã ratã agua rami SENHOR ojapo ramo nomondoukaxei.

²⁸ Ha'e rami vy Faraó aipoe'i Moisés pe:

— Ejepe'a ke xea gui, ha'e eiko kuaa xerova rexa ve'y agua. Mba'eta xerova rexa jevya ára ma remano 'rã.

²⁹ Moisés ombovai:

— Ha'evea rami ndeayvu. Xee ndaexa jevyvei ma 'rã nderova — he'i.

11

Dez-a nhombopagaarã Nhanderuete ombou agua re ijayvuague

¹ Ha'e gui SENHOR aipoe'i Moisés pe:

— Peteĩgue ju 'rã ambou nhomoingo axyarã Faraó ha'e Egito vyvave ha'e javi áry. Ha'e ramo mae penemondouka 'rã apy gui. Penemondoukaa ára ma anhetẽ penemoxẽmba ete 'rã.

² Aỹ ma ndeayvu neretarã kuery oendua py, avakue ha'e javi ngoo katy'i rupi ikuai va'e pe mba'emo re ojerure agua re, kunhague voi tojerure kunhague ngoo katy'i rupi ikuai va'e pe. Prata ha'e ouro guigua re tojerure — he'i.

³ Ha'e ramo SENHOR ojapo Egito pygua kuery ixupegua kuery omboaxy agua rami. Moisés voi oikuaapy oiko Egito vyvave re, Faraó rembiguai kuery ha'e ixupegua kuery omboetepa.

⁴ Ha'e gui Moisés aipoe'i Faraó pe:

— Po rami SENHOR ijayvu: “Pytũ mbyte jave xee aaxa 'rã Egito vyvave mbyte rupi.

⁵ Ha'e ramo omano 'rã jypygua Egito vyvave re ikuai va'e ha'e javive, Faraó guenda openaaty py oguapy va'e ra'y jypygua, hembiguai kunha mba'emo mongu'ia pygua pi'a jypygua voi, ha'e mymba ikuai va'e ra'y'i ypya ha'e javi.

⁶ Ha'e ramo Egito vyvave re onhendu 'rã haxẽ va'e. Ha'e nunga oiko va'e'y teri, ha'e ndoikovei ma 'rã guive.

⁷ Ha'e rã Israel kuery re ma ndoikoi 'rã, avakue, neĩ mymba kuery re. Ha'e kuery re ma neĩ peteĩ jagua voi nonhe'ei 'rã, peikuaa agua SENHOR amboae rami oguerokoa Israel kuery, Egito pygua kuery rami e'y", he'i uka ndevy.

⁸ Ha'e ramo nerembiguai kuery apy ikuai va'e xea py jogueruvy vy xerenonde ojero'a reve aipoe'i 'rã: “Tereo ndee ha'e neretarã kuery ndereve ikuai va'e ha'e javive”, he'i 'rã xevy. Ha'e va'e rire mae ma 'rã aa — he'i Faraó pe. Ha'e rami vy Moisés ipoxy vaipa reve ojepe'a Faraó renonde gui.

⁹ Ha'e gui SENHOR aipoe'i Moisés pe:

— Faraó ma noendui 'rã pendeayvu, xeguigua nhomondyipaarã ojekuaave agua Egito vyvave re — he'i.

¹⁰ Ha'e nunga nhomondyipaarã ha'e javi Moisés ha'e Arão ojapo Faraó renonde teĩ SENHOR omoakã ratã ramo Israel kuery nomondoukai ovyvave gui.

12

Páscoa judeu kuery rekorã oejaa ague

¹ SENHOR aipoe'i Moisés ha'e Arão pe Egito vyvave re teri ikuai jave:

² — Kova'e jaxy ma pendeivy jaxy jypygua 'rã, ma'etã ijypya regua.

³ Pendeayvu Israel kuery ijaty va'e pe. Ha'e vy aipopeje: “Kova'e jaxy dez araa py ma peteĩ-teĩ peru 'rã peteĩ vexa'i ra'y, peteĩ-teĩ hoo va'e ogueru 'rã peteĩ vexa'i ra'y ngoo peguarã.

⁴ Ha'e gui xapy'a rei hoo pygua kuery mbovy'i vy vexa'i ra'y ndo'upa'i 'rã ri ramo ma toenoĩ ojea katy'ive rupi ikuai va'e, mbovy pa ikuai rami. Oikuaa pota 'rã mbovy pe pa ha'eve vexa'i ra'y ho'upa agua.

⁵ Vexa'i ava ma ivaikue rei e'y va'e peteĩ ma'etã ogueroko va'e ha'eve. Vexa'i ra'y e'y vy kavara'i ha'eve avi peru agua.

6 Ha'e va'e jaxy pemboty 'rã catorze ára peve. Ha'e vy Israel kuery ha'e javive 'rã ojuka ka'arukue.

7 Huguykue ma peraa vy peikyty 'rã okê yta jovaive ha'e hi'árygua rupi, pendero pe'ua va'e rokê re ae.

8 Ha'e va'e pytũve 'rã pe'u ho'okue tata py oexy pyre. Mbojape imbovua revegua e'ỹ ha'e jai rogue iro va'e reve 'rã pe'u.

9 Ho'okue ipyrygua ma ndape'ui 'rã, neĩ yy py ombojy pyre, ha'e rã tata py oexy pyre anho: inhakãgue, hetymague ha'e ha'ykue-lykue.

10 Ha'e va'e gui mba'eve rei ndapejai 'rã ko'ê peve guarã. Ko'ê peve opyta va'e ma peapypa 'rã tata py.

11 Po rami 'rã pe'u. Pendeku'a kuua reve 'rã pe'u, pendepy regua reve, ha'e pendepo py pendepopoka pereko reve. Pe'u pojava ke. Ha'e va'e ma SENHOR pegua Páscoa.*

12 Mba'eta ha'e va'e pytũ xee Egito yvy rupi aaxa vy ajuka 'rã ta'y jypygua ikuai va'e ha'e javi, avakue ha'e mymba guigua voi. Ambopaga 'rã Egito pygua ruete ikuai va'e ha'e javi. Xee ma SENHOR.

13 Huguykue ma oikuaa uka 'rã oo pendekuaia. Mba'eta huguy aexa vy ma aaxa rive 'rã peia rupi. Ha'e rami rã peẽ kuery mbyte ma ndoiko 'rã mba'eaxy nhomombaarã. Ha'e va'e py ma Egito yvy re anho 'rã ajojuka.

14 "Ha'e va'e ára ma penema'endu'a aguã. Ngaru iky'a e'ỹ va'e pejapo 'rã SENHOR pe. Peneramymino kuery avi 'rã ojapo araka'e rã peve guarã, pendekorã aeja rire.

15 Sete ára re pe'u 'rã mbojape imbovua revegua e'ỹ. Ijypya ára guive peipe'apa 'rã mbojape mbovua penderopy oĩ va'ekue, mba'eta ijypya ára guive sete-a ára peve imbovua revegua ho'u va'e rei oipe'aa 'rã Israel kuerya gui.

16 Ijypya ára py ma pẽvy oiko 'rã nhemboaty iky'a e'ỹ va'e. Sete araa py teĩgue ju pejapo 'rã nhemboaty iky'a e'ỹ va'e. Ha'e jave py ma neĩ peteĩve tembiapo ndojapoai 'rã, pe'u va'erã pejapoa e'ỹ vy. Ha'e va'e anho ha'eve pejapo aguã.

17 Ha'e rami vy pejapo 'rã ngaru mbojape imbovua revegua e'ỹ pe'u va'erã, mba'eta ha'e va'e ára ae xee roguenoẽ Egito yvy gui. Ha'e nunga rupi peneramymino kuery ikuai peve 'rã penema'endu'a ha'e va'e ára re, araka'e rã peve guarã aeja rire.

18 Jypygua jaxy catorze araa ka'aru guive 'rã pe'u mbojape imbovua revegua e'ỹ, ha'e va'e jaxy vinte e um araa ka'aru peve.

19 Ha'e va'e sete ára ma toĩ eme mbojape mbovua pendero rupi. Mba'eta mbojape imbovua revegua ho'u va'e oipe'aa 'rã Israel kuery mbyte gui, mombyry guigua e'ỹ vy pendevvy pygua ae teĩ.

20 Mba'eve imbovua revegua pe'u eme. Pendero ha'e javi rupi 'rã pe'u mbojape imbovua revegua e'ỹ anho", peje ha'e kuery pe — he'i.

21 Ha'e rami rã Moisés oenoĩmba Israel kuery mongetaaty kuery. Ha'e vy aipoe'i ha'e kuery pe:

— Peẽ kuery peteĩ-teĩ peiporavo 'rã vexe'i ra'y pendero peguarã, ha'e pejuka 'rã Páscoa ára pyguarã.

22 Hissopo rakãgue peru vy pemoakỹ huguykue hy'a jere py oĩ va'e py, ha'e hy'a jere py huguykue oĩ va'e peikyty 'rã penerokê yta re, ha'e hi'árygua rupi. Ko'ẽmba peve peteĩve napeĩ 'rã penerokê gui.

23 Mba'eta SENHOR oaxa 'rã ovy Egito pygua kuery ojuka aguã. Ha'e rã okê árygua ha'e ijyta jovaive re huguy oĩa SENHOR oexa vy ma oaxa rive 'rã ha'e va'e oo rupi, pendero py nomoingei 'rã nhomombaarã pendejuka aguã.

24 Ha'e nunga rupi peẽ ha'e pendera'y kuery penderexarai eme pendekorã araka'e rã peve aeja va'ekue re.

25 Ha'e gui yvy SENHOR ijayvuague py penderekoa ma vy voi pendekuai 'rã pendekorã aeja va'ekue rami.

26 Ha'e pendera'y kuery pẽvy oporandu ramo: "Mba'eta tu nhandereko ha'e rami?" he'i ramo

27 aipopeje 'rã: " SENHOR pegua Páscoa pyguarã jajuka va'e, mba'eta Egito yvy re Israel kuery ro áry rupi oaxa vy Egito pygua kuery ojuka, ha'e rã nhandero py ikuai va'e ma ogueraa jepe", peje 'rã pendera'y kuery pe — he'i.

Ha'e ramo heta va'e kuery ojero'apa vy ombojerovia okuapy.

28 Ha'e gui Israel kuery oje'oi vy ojapo ha'e rami. Moisés ha'e Arão pe SENHOR aipoe'iague rami ae ikuai.

Dez-a nhombopagaarã ta'y kuery jypygua ojupapaa ague

29 Ha'e gui pytũ mbyte jave SENHOR ojuka Egito yvy re ta'y jypygua ikuai va'e ha'e javi. Ojuka Faraó guenda openaaty py ogyapy va'ety ra'y jypygua, nhuũ py ombo'a pyre ra'y kuery ha'e mymba ra'y jypygua ikuai va'e ha'e javi.

30 Ha'e ramo Faraó opu'ã pyavyve, hembiguai kuery ha'e Egito pygua kuery ha'e javive guive. Mba'eta haxê va'e onhendu Egito yvy re, mba'eta oo omanoa e'ỹa jipoi.

31 Ha'e ramo ha'e va'e pytũve Faraó oenoĩ Moisés ha'e Arão. Ha'e vy aipoe'i ha'e kuery pe:

— Pepu'ã ke, tapeo xevygya kuery mbyte gui, peẽ ha'e Israel kuery ha'e javive guive. Tapeo, SENHOR pe pendekuai, aipo pejeague rami vy.

32 Penderupive peraa avi penerymba kuery vexe'i ha'e vaka, aipo pejeague rami. Tapeopa, ha'e xee voi ke xereroayvu porã — he'i.

33 Mba'eta Egito pygua kuery omondouka pojava, ovy gui omoẽmba aguã ojapura vy, "Ha'e javive nhamanomba 'rã" he'i vy.

34 Ha'e ramo ha'e kuery ojopy mbojaperã omoakỹ va'ekue, imbovua revegua e'ỹ. Omoapomoaty ma oao py onhovã vy ojaxe'i heravy.

35 Ha'e rami vy Israel kuery ojapo okuapy Moisés ijayvuague rami. Ha'e vy Egito pygua kuery pe ojerure okuapy prata ha'e ouro guigua ha'e ao re.

* 12:11 Tery Páscoa ma "Oaxa ovy rivea" 'ea (versículo 23).

³⁶ SENHOR ojapo Egito pygua kuery omboaxy aguã rami ixupegua kuery. Ha'e va'e kuery pe ojerurea ome'êmba. Ha'e ramo oipe'apa Egito pygua kuery oguereko va'ekue.

Egito vvy gui Israel kuery oêmbaague

³⁷ Ha'e rami vy Israel kuery ma Ramessés tetã gui oje'oi Sucote katy. Seiscentos mil vvy rupigua avakue ikuai, kunhague ha'e kyrîgue oipapa e'ÿ rã.

³⁸ Ha'e kuery reve oje'oi avi amboae kuery joegua e'ÿ-e'ÿ, ha'e gui mbovy e'ÿ mymba kuery vexa'i ha'e vaka.
³⁹ Ombojy okuapy mbojape imbovua revegua e'ÿ Egito gui omoapomo heravy va'ekue. Imbovua revegua e'ÿ teri ombojy, mba'eta Egito gui omoêmbaa ramo ojavura vy nda'ëvei ho'u va'erã ojavopa aguã.

⁴⁰ Israel kuery ma quatrocentos e trinta ma'etÿ re ikuai Egito vvy re.

⁴¹ Ha'e gui quatrocentos e trinta ma'etÿ opa jave, ha'e va'e ára ae SENHOR pegua xondaro rami ikuai va'e ha'e javi oje'oi Egito gui.

⁴² Ha'e va'e pytũ ma SENHOR re ima'endu'aa aguã, mba'eta ha'e va'e jave oguenoêmba Egito vvy gui. Ha'e va'e pytũ ma SENHOR pegua ramo Israel kuery ha'e javive 'rã ima'endu'a, araka'e rã ikuai va'e voi.

⁴³ Ha'e gui SENHOR aipoe'ive ju Moisés ha'e Arão pe:

— Po rami ma Páscoa ára py pejapo va'erã. Amboae regua neĩ peteive ndo'ui 'rã ha'e va'e regua.

⁴⁴ Ha'e rã tembiguai kuery peráta re ojogua pyre ha'e javi 'rã ho'u, opire omboi uka rire.

⁴⁵ Ha'e rã amboae regua ha'e peráta re omba'eapo va'erã pejou va'ekue ma ndo'ui 'rã ha'e va'e regua.

⁴⁶ Peteĩ-teĩ vexa'i ra'y ma peteĩ'i oo py 'rã pe'u. Ho'okue peraa eme oka katy, neĩ pemopê eme ikãgue.*

⁴⁷ Israel kuery ha'e javive tojapo ha'e rami.

⁴⁸ Ha'e rã xapy'a rei pendero py amboae vvy regua ovaê vy SENHOR pegua Páscoa ho'uxe avi ramo ma avakue ha'e javi pire tomboi ranhe. Ha'e gui mae ma 'rã ha'eve onhemboja ha'e ho'u aguã. Ha'e rami rire ha'e pyguae rami 'rã oiko. Ha'e rã opire omboi uka e'ÿ va'e ma neĩ peteive ndo'ui 'rã.

⁴⁹ Ha'e rami ae toiko pendeyvy pygua ae, ha'e amboae vvy regua penembyte rupi ikuai va'e pe.

⁵⁰ Ha'e rami ikuai Israel kuery ha'e javive. Moisés ha'e Arão pe SENHOR ojapo ukaague rami ae ikuai.

⁵¹ Ha'e va'e árave SENHOR oguenoê Israel kuery Egito vvy gui, peteĩ-teĩ regua ooa rami.

13

Jypygua itui'i va'ekue SENHOR pegua ikuai aguã re ijavyuague

¹ Ha'e gui SENHOR aipoe'i Moisés pe:

² — Xevy guarã remboaxa 'rã Israel kuery oxy gui jypygua itui'i va'e ha'e javi. Avakue e'ÿ vy mymba guigua teĩ xemba'e meme — he'i.*

³ Ha'e ramo Moisés aipoe'i guetarã kuery pe:

— Penema'endu'a ke kova'e ára Egito vvy gui peopaague re, escravo rami pamba'eapo poyiague gui. Mba'eta SENHOR opo'akaa rupi penerenoê ha'e gui. Ha'e nunga rupi pe'u eme mbojape imbovua revegua.

⁴ Kova'e ára jaxy abibe 'epy va'e py ae peje'oi.

⁵ Ha'e gui SENHOR pendereraa 'rã vvy mboae re, cananeu kuery, heteu, amorreu, heveu ha'e jebuseu kuery vvy penderekoarã ome'ê aguã re peneramoĩ kuery pe oura reve ijavyuague, vvy kamy ha'e ei oata e'ÿa. Ha'e va'e vvy re SENHOR pendereraa ma ramo kova'e jaxy ojeupity nhavô penema'endu'a ha'e rami penderekorã oaja va'ekue rami pendekuai aguã.

⁶ Ha'e rami vy sete ára re pe'u 'rã mbojape imbovua revegua e'ÿ. Ha'e gui sete araa py ma oiko 'rã nhemboatyiky'a e'ÿ va'e SENHOR pegua.

⁷ Sete ára re pe'u 'rã mbojape imbovua revegua e'ÿ. Mbojape mbovua toĩ eme pendereve, neĩ pendeyvy ha'e javi rupi.

⁸ Ha'e va'e árave ndera'y kuery pe remombe'u vy “Ha'e rami nhandekuai mba'eta SENHOR mba'emo porã ojapo xevy Egito gui orenoê vy”, peje 'rã.

⁹ Ha'e rami nhandekuaia opyta 'rã ikuaa ukaarã ndepo re ha'e nderova re oĩ va'e rami, nema'endu'a aguã SENHOR guigua lei rupi ndeayvu aguã, mba'eta Egito vvy gui SENHOR opo'akaa rupi nerenoê rire.

¹⁰ Ha'e nunga rupi ma'etÿa nhavô, hi'ára py porã pendekuai 'rã ha'e va'e avvu rami.

¹¹ — Ha'e gui SENHOR ndevy ha'e neramoĩ kuery pe ouraague rami vy penemoinge 'rã cananeu kuery vvy re. Pendekoarã ome'ê ma ramo

¹² SENHOR peguarã remboaxa 'rã oxy gui jypygua itui'i va'ekue ha'e javi, mymba kuery guive. Jypygua ava oiko va'e ma guive rã SENHOR peguarã meme.

¹³ Ha'e rã mburika'i ra'y jypygua rekovia reme'ê 'rã vexa'i ra'y py. Remboekovia e'ÿ ri ramo remopê 'rã jjatua rupi. Ha'e rã avakue regua ndera'y kuery jypygua ikuai va'e ma remboekovia va'erã meme.

¹⁴ Ha'e gui ko'ê rã ndera'y kuery oporandu rã “Mba'e re tu ha'e rami nhandekuai?” he'i ramo ixupe aipo're 'rã: “ SENHOR opo'akaa rupi orenoê raka'e escravo orekuia gui.

¹⁵ Mba'eta Faraó inhakã ratã vy noremondokavei ramo SENHOR ojuka Egito vvy re jypy'i guare ha'e javi, avakue ha'e mymba guigua voi. Ha'e rami rire SENHOR pe xee amboaxa oxy gui jypygua itui'i va'e ava ma guive rã, ha'e rã xera'y kuery jypygua ha'e javi ma amboekovia 'rã.

¹⁶ Ha'e rami nhandekuaia opyta 'rã ndepo re ha'e nderova re ikuaa ukaarã oĩ va'e rami, mba'eta SENHOR opo'akaa rupi orenoê raka'e Egito vvy gui”, re 'rã ndera'y kuery pe.

* 12:46 João 19:36 * 13:2 Lucas 2:23

Tape rupi Nhanderuete ojeupegua kuery oguerekoague

¹⁷ Israel kuery Faraó omondouka ma javé filisteu kuery yvy rupi tape oo va'e rupi e'ÿ Nhanderuete ogueraa namombyryive teí, mba'eta aipoe'i vy: “Xevyguá kuery joe opu'ã va'e oexa vy oendu 'rã okyjea, ha'e Egito yvy katy ju ojevxye 'rã”, he'i vy.

¹⁸ Ha'e rami 'rãgue py ojeupegua kuery Nhanderuete ojapo ojere jogueravy aguã rami ye'ë pytã katy'i rupi tape tekoa e'ÿa rupi oo va'e rupi. Ha'e ramo Israel kuery xondaro rami guembiporupa reve oje'oi Egito gui.

¹⁹ Moisés ogueraa avi José kãgue, mba'eta ha'e rami Israel ra'y kuery ojapo aguã re oura rire. Ha'e vy aipoe'i: “Anhetë Nhanderuete ojekuaa 'rã pendevy. Ha'e ramo apy gui ke peraa xekãgue”, he'iaque rami ae ogueraa.

²⁰ Ha'e gui ha'e kuery Sucote gui oje'oi vy Etã py ju ikuai, tekoa e'ÿa re ovaëa'i py.

²¹ SENHOR oo oiny ha'e kuery renonde. Ára pukukue re peteí arai opu'ã va'e rupi oo, tape rupi ogueraa aguã. Ha'e rã pyávy ma tata opu'ã va'e rupi oo oexape aguã, ara py ha'e pyávy ha'e kuery oguata aguã.

²² Ara py arai opu'ã va'e ndojepe'ai ha'e kuery áry gui, ha'e pyávy ma tata opu'ã va'e voi ndojepe'ai.

14

Israel kuery rakykue Egito pygua kuery ouague

¹ Ha'e gui SENHOR aipoe'i Moisés pe:

² — Ndeayvu na Israel kuery pe guakykue katy ju oo vy Pi-Hairote rexei opyta aguã, Migdol ha'e ye'ë mbyte, Baal-Zefom renonde katy. Ha'e va'e renonde py pepyta 'rã ye'ë yvýry.

³ Ha'e ramo Faraó ojeupe ae “Israel kuery nda'ikuai kuaavei vy po okanhymba ma nhi'ã tekoa e'ÿa re” he'i 'rã.

⁴ Ha'e rami vy amoakã ratã 'rã Faraó penderakykue oo aguã. Ha'e ramo pexa 'rã Faraó ha'e ixondaro kuery ha'e javi re xepo'aka rã. Egito pygua kuery voi oikuaa 'rã xee SENHOR aikoa — he'i. Ha'e ramo ha'e kuery ojapo ha'e rami.

⁵ Ha'e gui Egito pygua huvixa pe omombe'ua Israel kuery ojavapa maa. Ha'e ramo Faraó ha'e hembiguai kuery amboe rami ju onhembopy'a ha'e kuery rovai. Ha'e vy aipoe'i okuapy:

— Mba'exa tu jajapo ra'e Israel kuery nhanerembiguai kuery ikuai ve'ÿ aguã rami? — he'i okuapy.

⁶ Ha'e gui Faraó okaróxa oguereko katu ma vy ogueraa oxondaro kuery.

⁷ Ha'e rami vy ogueraa seiscentos mba'eyru oiporavo va'ekue ha'e karóxa Egito re ikuai va'e ha'e javi, huvixa oí reve meme.

⁸ Mba'eta SENHOR omoakã ratã Egito pygua huvixa Faraó Israel kuery rakykue oo aguã. Ha'e rã Israel kuery ma ipy'a guaxu reve oje'oi.

⁹ Ha'e kuery rakykue Egito pygua kuery oje'oi. Kavaju ha'e javi, Faraó mba'e karóxa, kavaju árygua kuery ha'e ixondaro kuery reve oo vy oupity ye'ë yvýry hekoa okuapya py, Pi-Hairote katy'i, Baal-Zefom renonde katy.

¹⁰ Ha'e gui Faraó kuery ovaë rai'i rã Israel kuery oma'ë. Ha'e vy oexa Egito pygua kuery ha'e kuery rakykue ou oiny rã. Ha'e rami vy Israel kuery okyje ete okuapy, ha'e vy ojapukai okuapy SENHOR pe.

¹¹ Aipoe'i okuapy Moisés pe:

— Egito yvy re orenhono porã aguã jipoi ramo teve ha'e gui orenoë kova'e tekoa e'ÿa py romanomba aguã? Mba'e re tu nami oreapo, Egito gui roëmba aguã rami orerereko?

¹² Po rami e'ÿ ri ty'y ndevy oreayvu raka'e Egito yvy re teri nhandekuai reve: “Orereja ke Egito pygua kuery pe orekuai aguã” ro'e va'ekue. Mba'eta orevy pe ha'eveve va'e rire Egito pygua kuery pe orekuai aguã tekoa e'ÿa py romanomba 'rãgue py — he'i okuapy.

¹³ Ha'e ramo Moisés ombovai heta va'e kuery pe:

— Pkyje eme, pkyriri ha'e pexa 'rã pendereraa jepearã SENHOR kova'e ára omingo ta va'e, mba'eta Egito pygua kuery aÿ pexa va'e ma ndapexa jevyvei ma 'rã.

¹⁴ SENHOR ae 'rã opu'ã penderepy aguã, ha'e rã peë ma pkyriri 'rã — he'i.

Ye'ë mbyte rupi oopaague

¹⁵ Ha'e gui SENHOR aipoe'i Moisés pe:

— Mba'e re tu rejapukai xevy? Aipo're Israel kuery toguata oje'oi.

¹⁶ Ha'e rã ndee ma eupi ndepopoka, ekuave'ë ye'ë áry, ha'e emboja'o, ye'ë mbyte rupi Israel kuery oaxa aguã ipiru reia rupi.

¹⁷ Ma'ë, Egito pygua kuery xee amoakã ratã vy ajapo 'rã penderakykue oo vy ha'e va'e rupi oike avi aguã rami. Xemboete pavë 'rã Faraó re xepo'aka ramo, ha'e ixondaro kuery ha'e javi re, ikaróxa ha'e kavaju árygua kuery re guive.

¹⁸ Ha'e ramo Egito pygua kuery oikuaa pavë 'rã xee SENHOR aikoa. Faraó re vy xemboetea 'rã, karóxa ha'e kavaju árygua kuery re vy guive — he'i.

¹⁹ Ha'e gui Nhanderuetea guigua anjo ma Israel kuery xondaro kuery renonde oo oiny va'ekue ojepe'a vy ha'e kuery rakykue katy ju oaxa. Arai opu'ã va'e voi ojepe'a ha'e kuery renonde katy gui, ha'e vy hakykue katy ju opyta.

²⁰ Ha'e rami vy opyta Egito pygua kuery ikuai ha'e Israel kuery ikuai mbyte. Arai ma Egito pygua kuery pe pytã, ha'e rã Israel kuery pe ma hexakã. Ha'e rami py pytã mbukukue re nda'evéi Egito pygua kuery onhemboja aguã Israel kuery re.

²¹ Ha'e gui Moisés okuave'ê ye'ê áry. Ha'e ramo ha'e va'e pytũ mbukukue re SENHOR ojapo yvytu kuaray oua katy gui oipeju aguã rami, ye'ê ojepe'a aguã. Yy oja'oague rupi yvy piru rei opyta.

²² Ha'e ramo Israel kuery oike ye'ê mbyte yvy ipiru reia rupi. Yy ma kora rami oĩ ha'e kuery yvýry, oiporu kuaa re ha'e oiporu kuaa e'ÿa re.

²³ Ha'e gui Egito pygua kuery ma ha'e kuery rakykue oje'oi vy oike avi jogueravy, Faraó rymba kuery kavaju ha'e javive, karóxa ha'e kavaju árygua kuery guive. Ha'e rami vy ye'ê mbyte peve oo.

²⁴ Ha'e gui ko'ê rai jave SENHOR tata ha'e arai opu'ã va'e mbyte oĩa gui oexa Egito pygua kuery oje'oi rã. Ha'e rami vy omondypa.

²⁵ Ha'e vy ha'e kuery karóxa ruéra ombopija vy ojapo ndoo porãvei aguã rami. Ha'e ramo Egito pygua kuery aipoe'i:

— Jajavapa ke Israel kuery renonde gui, mba'eta SENHOR opu'ã ore kuery rovai ha'e kuery repy vy.

Egito pygua kuery yy py omanombaague

²⁶ SENHOR aipoe'i Moisés pe:

— Ekuava'ê ju ye'ê áry, Egito pygua kuery áry yy ojevý aguã, ikaróxa ha'e kavaju árygua kuery áry — he'i.

²⁷ Ha'e ramo ye'ê áry Moisés okuave'ê. Ko'êmba ma jave ye'ê oxyry atã ju ouvý. Egito pygua kuery ojavapa ta ovy ramo yy ovaexi. Ha'e rami ye'ê mbyte py SENHOR oitypa Egito pygua kuery.

²⁸ Yy ojevypa vy ojao'ipa karóxa, kavaju kuery ha'e Faraó xondaro kuery ha'e javi ye'ê mbyte rupi hakykue oje'oi ta va'ekue. Ha'e kuery regua neĩ peteive ndopytai.

²⁹ Ha'e rã Israel kuery ma ye'ê mbyte ipiru reia rupi uguata. Ha'e kuery pe ma yy kora rami oĩ, oiporu kuaa re ha'e oiporu kuaa e'ÿa re.

³⁰ Ha'e va'e ára SENHOR ogueraa jepe Israel kuery Egito pygua kuery gui. Ha'e gui Israel kuery oexa okuapy Egito pygua kuery ye'ê rembe re omanomba va'ekue.

³¹ Ha'e rami vy Israel kuery oexa SENHOR ipo'aka etea Egito pygua kuery re opu'ã rã. Ha'e ramo ha'e kuery oendu SENHOR renonde ojererokýjea. Hexe ojerovia ete okuapy, hembiguai Moisés re guive.

15

Moisés oporaeiague

¹ Ha'e ramo Moisés ha'e Israel kuery omonhendu okuapy pova'e mboraei SENHOR pe. Ha'e vy aipoe'i:

— Aporaei 'rã SENHOR pe, mba'eta yvate ete vy ipo'aka.

Ye'ê mbyte py oitypa kavaju ha'e hi'árygua kuery.

² SENHOR ma xembaraetea ha'e aporaeia.

Ha'e ma xereraa jepea oiko.

Ha'e va'e ma xerueete, ha'e nunga rupi amboete 'rã.

Xeru Ruete voi oiko ramo amboyvate 'rã.

³ SENHOR ma joe opu'ã va'e.

SENHOR ma hery.

⁴ Ye'ê mbyte py oitypa Faraó mba'e karóxa ha'e xondaro kuery.

Huvixa kuery voi oy'upa Ye'ê Pytã va'e py.

⁵ Yai ou oiny va'e ojao'ipa.

Ha'e ramo ita rami oikepa yy guy ete peve.

⁶ SENHOR, ndepo reiporu kuaa regua ipo'aka vy iporã ete.

SENHOR, ndepo reiporu kuaa regua omboa'ypa nderovaigua kuery.

⁷ Ndeyvate ete va'e vy reitypa nderovai opu'ã va'e kuery.

Ndepoxya rembou rã omokanhymba mba'emo ra'ykue rami.

⁸ Neapyigua gui nepytuê va'e py rive remboaty yy.

Oxyrya gui opytapa, ijaty oupy.

Yai ikuai va'e hatãmba ye'ê guýry.

⁹ Orerovaigua aipoe'i: "Aa 'rã ha'e kuery rakykue aupity peve.

Amboja'o 'rã ha'e kuery mba'e rei-rei va'ekue,

xenhe'ê py arovy'a 'rã ha'e nunga ajopypa vy.

Aeky 'rã kekxye, xepo py amokanhymba 'rã", he'i va'ekue.

¹⁰ Ha'e rã ndeguigua yvytu py reipeju ramo ye'ê ojao'ipa.

Ha'e kuery oikepa yy omyĩ atãa py chumbo oikea rami.

¹¹ — SENHOR, tuuete ikuai va'e regua mava'e 'rã tu ndee ramigua oiko?

Mava'e tu oiko ndee ramigua? Ndeky'a e'ÿ va'e rã ndererovy'aa.

Nhomondypaarã iporã va'e rejapo vy okyjepy reiko.

¹² Reiporu kuaa regua reupi ramo

yvy omokõmba.

¹³ Rejoayvua rupi rereko ndevyguia kuery reraa jepe va'ekue.

Ndepo'akaa rupi reraa nderekoa iky'a e'ÿ va'e py.

¹⁴ Yvy regua kuery oendu vy oryrypa okuapy,

tekoaxy poyi ipo'aka Filístia pygua kuery re.

¹⁵ Ma'ê, Edom py yvatekueve ikuai va'e ma oxĩmba.

Moabe pygua ipo'aka va'e kuery voi oendu okuapy okyjea.
Canaã pygua kuery ikangypa.

¹⁶ Ha'e kuery áry ho'a imondyiarã ha'e imongyjarã.
Ndejjyva ipo'aka ete va'e gui vy okyrimba 'rã ita rami,
ndevelygua kuery oaxa peve, SENHOR,
rejogua va'ekue oaxapa peve.

¹⁷ Ha'e va'e kuery ma ndevyguu vvyty re reraa vy renhoty 'rã ha'e py nembra'etyrã,
SENHOR, tekoa rei atyrã rereko katu va'ekue py,
henda icy'a e'y va'e py, ndepo py renhono va'ekue py.

¹⁸ SENHOR ipo'aka 'rã araka'e rã peve — he'i.

¹⁹ Mba'eta Faraó rymba kuery kavaju, ikaróxa ha'e kavaju árygua kuery ye'ë mbyte py oikapa ramo ha'e kuery áry SENHOR ombou ju yy. Ha'e rã Israel kuery ma vvy rupi oaxa oje'oi vy ye'ë mbyte ipiru reia rupi.

Miriã kunhague mboae reve oporaei okuapyague

²⁰ Arão reindy Miriã ma profeta kunha oiko. Ha'e rami vy pandeiro ojopy rã hakykue kunhague ha'e javive oje'oi pandeiro reve ha'e ojerokya rupi.

²¹ Ha'e ramo ha'e kuery pe Miriã ombovai:

— Peporaei SENHOR pe, mba'eta iporã ete ipo'akaa py.

Mba'eta ye'ë py oitypa kavaju ha'e hi'árygua kuery.

Yy iro va'e iro e'y va'e ju opytaague

²² Ye'ë Pytã va'e gui ma Moisés ogueraa Israel kuery tekoa e'ya Sur katy. Tekoa e'ya rupi mboapy ára re oguata oje'oi vy oju e'y re.

²³ Ha'e gui mae ma Mara py ovaë. Ha'e rami tei Mara py yy oi va'e ma nda'evei oy'u aguã, iro ramo. Ha'e ramo ae omboery Mara.*

²⁴ Ha'e rami rã Moisés re heta va'e kuery ijayvu rei vy aipoe'i:

— Mba'e tu jay'u 'rã? — he'i okuapy.

²⁵ Ha'e ramo Moisés ojakukai SENHOR pe. Ha'e rã ixupe SENHOR oexa uka petei vvyra. Ha'e va'e ma Moisés yy py omombo ramo yy nda'irovei. Ha'e py SENHOR oexa petei ayvu ha'e kuery rekorã. Ha'e rami vy ha'e kuery oeko a'ã ha'e py.

²⁶ Ha'e vy aipoe'i:

— Xapy'a rei SENHOR Penderuete ayvu pendu riae, henonde ha'evea ramigua anho pejapo, ojapo uka va'e pendu, ha'e ijayvuague ha'e javi rupi pendekuai ramo ma ne'i peteive mba'eaxy ndou 'rã pendere, Egito pygua kuery re ambou va'ekue regua. Mba'eta xee ma SENHOR romonguera va'e — he'i.

²⁷ Ha'e gui ha'e kuery ma Elim py ju ovaë, doze yvu ha'e setenta pindo ikuaia py. Ha'e py opyta okuapy yy ikuai va'e vvyry.

16

Nhanderuete maná ombouague

¹ Elim tekoa gui Israel kuery ha'e javi oje'oi Sim tekoa e'ya katy, Elim ha'e Sinai mbyte oi va'e. Egito vvy gui oëmba rire mokoï jaxya quinze araa py ovaë.

² Ha'e gui tekoa e'ya py Israel kuery ha'e javive ijayvu mbegue rei okuapy Moisés ha'e Arão re.

³ Ha'e vy aipoe'i okuapy:

— SENHOR po py romanomba va'e rire Egito vvy re, oja xo'o mimoï oia vvyry roguapy rokuapy jave, ha'e orerevyatãmba peve mbojape ro'u rokuapy jave. Mba'eta ndee ma kova'e tekoa e'ya py orereru orejuka aguã karuai py, ore kuery ha'e javive — he'i.

⁴ Ha'e ramo SENHOR aipoe'i Moisés pe:

— Ma'ë, ajapo 'rã yva gui penembi'urã ho'a aguã rami. Ha'e ramo ko'ë nhavõ heta va'e kuery oë vy omono'õ 'rã petei-tei ára guarã ete'i, xee aexa aguã xeguigua lei rupi pa ikuai tyrã pa anya.*

⁵ Ha'e gui mboapy meme araa py ma mokoï ára peguarã 'rã pemono'õ. Ha'e va'e pemono'õ vy pemoï 'rã penerembi'urã — he'i.

⁶ Ha'e ramo Moisés ha'e Arão aipoe'i Israel kuery ha'e javi pe:

— Kuri ka'arukue peikuaa 'rã SENHOR ae Egito vvy gui penerenoëmbaague.

⁷ Ha'e rã ko'ë aje'ive'i ma pexa 'rã SENHOR rexakã oexa uka rã, mba'eta oendu pendeayvu rei rã. Ha'e gui marã ramigua tu ore roiko orere peë kuery pendeayvu rei aguã?

⁸ Mba'eta ka'arukue SENHOR ombou 'rã xo'o pe'u va'erã, ha'e aje'ivekue ma mbojape ju ombou penererevyatã aguã. Ha'e rami avi SENHOR oendu pejou reia, mba'eta hexe ae pendeayvu rei. Ha'e rã ore ma mava'e tu roiko? Ore rovai e'y pendeayvu, ha'e rã SENHOR rovai — he'i Moisés.

⁹ Ha'e gui Moisés aipoe'i Arão pe:

— Aipo're Israel kuery ha'e javi pe: “Peno'õmba ke SENHOR renonde, mba'eta ha'e oendu pendeayvu rei rã”, 're 'rã ha'e kuery pe — he'i.

¹⁰ Ha'e ramo Israel kuery ha'e javi pe Arão ijayvu jave tekoa e'ya katy oma'ë vy oexa okuapy SENHOR rexakã arai re.

* 15:23 Tery Mara ma “Iro” ea. * 16:4 João 6.31

Nhanderuete guyra codornizes ha'e maná ombouague

¹¹ Ha'e gui SENHOR aipoe'i Moisés pe:

¹² — Aendu Israel kuery ijavyu reia. Ha'e ramo aipo're ha'e kuery pe: “Kuri ka'aru pytū e'ỹ mbove pe'u 'rã xo'o. Ha'e rã aje'ive'i ju ma pe'u 'rã mbojape. Ha'e rami vy peikuaa 'rã xee SENHOR Penderuete aika”, 're 'rã ha'e kuery pe — he'i.

¹³ Ha'e gui ka'arukue oveve ovvy guyra codornizes, ha'e vy ojao'ipa tekoa ha'e javi rupi. Ha'e gui aje'ive'i ma yxapy oĩ tekoa yv'ýry.

¹⁴ Yxapy ho'a va'ekue ipirupa jave yvy re opyta mba'emo xiĩ rei va'e pira pekue ramigua, yro'y rami ipererĩ va'e.

¹⁵ Ha'e nunga Israel kuery oexa vy joupe-upe aipoe'i okuapy:

— Mba'e nunga tu peva'e? Mba'eta ndoikuaai mba'e paa.

Ha'e ramo Moisés ombovai:

— Peva'e ma mbojape pe'u va'erã SENHOR ombou va'ekue.

¹⁶ Mba'eta SENHOR aipoe'i uka pëvy: “Peva'e nunga peteĩ-teĩ pemono'õ 'rã pe'u va'erã, peteĩ-teĩ peguarã peteĩ ryrū tynyẽ oĩ, mbovy pa pendekuaia rami. Peteĩ-teĩ omono'õ 'rã ngoo py ikuai va'e peguarã”, he'i uka va'ekue.

¹⁷ Ha'e rami ae Israel kuery ojapo. Ha'e vy amongue omono'õve, ha'e rã amboae kuery ma nomono'õive'i.

¹⁸ Ha'e rami teĩ hyru py oa'ã rã naemyrei omono'õ reta va'ekue pe, neĩ ndoatai mbovy'i omono'õ va'ekue pe. Mba'eta peteĩ-teĩ ho'u aguã ha'evea rami omono'õ.*

¹⁹ Ha'e gui Moisés aipoe'i ha'e kuery pe:

— Avave rei tomoĩ porã eme ko'ẽ rã guarã — he'i.

²⁰ Ha'e rami teĩ ha'e kuery noendu potai Moisés ayvu re. Ha'e vy amongue maná omono'õ vy omoĩ porã ko'ẽ rã guarã. Ha'e rã haxopa, heakuã vaikue guive. Ha'e ramo Moisés ivai ha'e kuery pe.

²¹ Ha'e nunga rupi aje'ive'i nhavõ omono'õ peteĩ-teĩ ho'u va'erã ete'i, mba'eta kuaray aku rã hykupa.

Israel kuery maná omono'õ okuapyague

²² Ha'e gui seis araa py ma tembi'u omono'õ okuapy mokoĩ ára guarã, peteĩ-teĩ pe mokoĩ ryrū omono'õ. Ha'e rã yvatekueve ou vy omombe'u okuapy Moisés pe.

²³ Ha'e ramo Moisés ombovai:

— Ha'e rami aguã ae ma SENHOR aipoe'i: “Ko'ẽ ramo ma pepytu'u 'rã, SENHOR pegua ára sábado icy'a e'ỹ va'e ramo. Ha'e gui aỹ ma mba'emo oexyaty py pexyxe va'e ma pexy 'rã, ha'e yy py pembojyxe va'e ma pembojy 'rã. Ha'e rami avi ndape'upai va'ekue ha'e javi 'rã peipe'a ko'ẽ rã guarã”, he'i va'ekue.

²⁴ Ha'e ramo Moisés aipoe'iague rami ha'e kuery omoĩ porã ko'ẽ jevy peve. Ha'e va'e ma naeakuã vaikuei, ndaxoi guive.

²⁵ Ha'e ramo Moisés aipoe'i:

— Pe'u ke kova'e ára, mba'eta kova'e ára ma sábado SENHOR pegua. Kova'e ára ma ndapejoui 'rã nhuũndy rupi.

²⁶ Seis ára re 'rã pemono'õ. Ha'e rã sete araa ma sábado. Ha'e va'e ára py ma jipoi 'rã — he'i.

²⁷ Ha'e gui sete araa py heta va'e kuery regua amongue oje'oi omono'õ aguã, teĩ ndojoui.

²⁸ Ha'e ramo SENHOR aipoe'i Moisés pe:

— Raka'e peve tu ndapejoui 'rã ajapo uka va'e ha'e xeguigua lei?

²⁹ Peikuaa pota SENHOR pepytu'u aguã sábado ára oejaague re. Ha'e nunga rupi seis araa py ome'e penembi'u mokoĩ ára peguarã. Sete araa py ma peteĩ-teĩ topyta oĩa py ae, avave rei too eme oĩa gui — he'i.

³⁰ Ha'e rami rã sete araa py heta va'e kuery opytu'u okuapy.

³¹ Ha'e nunga pe Israel kuery “Maná” he'i. Kuratõ ra'yĩ rami xiĩ, ha'e ei guigua rami hee va'e.

³² Ha'e gui Moisés aipoe'i:

— Po rami SENHOR ojapo uka va'e: “Ha'e va'e regua pemonyẽ 'rã peteĩ hyru, ha'e pemoĩ porã 'rã peneramymino kuery peguarã, ha'e kuery avi oexa aguã tembi'u tekoa e'ỹa rupi penemongaruague, Egito gui roguenoẽ jave”, he'i.

³³ Ha'e gui Arão pe ju Moisés aipoe'i:

— Ejopy peteĩ hyru, ha'e emonyẽ maná. Ha'e va'e ma emoĩ porã SENHOR renonde, peneramymino kuery peguarã — he'i.

³⁴ Ha'e ramo Moisés pe SENHOR ijavyuague rami vy Arão ma Nhanderuete ayvu oĩaty renonde omoĩ porã hyru.

³⁵ Ha'e rã Israel kuery ma quarenta ma'et'ý re okaru okuapy maná re, yvy hekoa aguã py oike peve. Canaã yvy re ovaẽ peve okaru okuapy maná re.

³⁶ Ha'e gui dez ryrū renyẽ ma peteĩ ajaka.

Refidim py ita gui yy oëague

¹ Ha'e gui Sim tekoa e'ỹa gui Israel kuery oje'oipa vy opyta-pyta oje'oivy SENHOR aipoe'iague rami vy. Ha'e rami vy Refidim py ju opyta okuapy. Ha'e py ma yy jipoi ha'e kuery oy'u aguã.

² Ha'e ramo heta va'e kuery ijayvu ete okuapy Moisés re. Ha'e vy aipoe'i:

— Eme'ê yy roy'u aguã.

Moisés ombovai:

— Mba'e re tu pendeayvu ete xere? Mba'e re tu peko a'ã SENHOR? — he'i.

³ Heta va'e kuery ha'e py ijey'uveipa vy Moisés re ijayvu rei vy aipoe'i:

— Mba'e re tu oreapo Egito yvy gui roju aguã rami, yuvei py orejukapa aguã, orera'y kuery ha'e orerymba kuery reve? — he'i okuapy.

⁴ Ha'e ramo Moisés ojapukai SENHOR pe:

— Mba'e tu ajapo 'rã kova'e kuery re? Ita py xeapipa ta ma okuapy.

⁵ SENHOR ombovai:

— Eaxa heta va'e kuery renonde, ha'e nderupive eraa Israel kuery mongetaaty kuery regua. Ndepo py eraa ndepopoka yakã reinupãague va'e. Tereo.

⁶ Ha'e gui nerenonde xee a'ĩ 'rã peteĩ itaova Horebe py oĩ va'e áry. Einupã ha'e va'e itaova, ha'e rã ixugui oẽ 'rã yy. Ha'e ramo heta va'e kuery oy'u 'rã — he'i. Ha'e rami Moisés ojapo Israel kuery mongetaa kuery renonde.

⁷ Ha'e va'e tekoa ma omboery Massá ha'e Meribá,* SENHOR oeko a'ãa rupi Israel kuery ijayvu ete rire, “Nhanembyte SENHOR oĩ teve tyrã pa any?” he'i okuapy vy.

Israel kuery re Amaleque kuery opu'ãague

⁸ Ha'e gui Refidim py Israel kuery ikuai jave Amaleque kuery ou vy opu'ã okuapy ha'e kuery rovai.

⁹ Ha'e ramo Moisés ijayvu Josué pe:

— Eiporavo avakue ha'e tereo, pepu'ã Amaleque kuery rovai. Ha'e rã xee ma ko'ê rã aẽ 'rã vvyty apyte áry, Nhanderuete pegua popoka xepo py areko reve — he'i.

¹⁰ Ha'e ramo Josué ojapo Moisés ijayvuague rami. Ha'e rami vy opu'ã okuapy Amaleque kuery re. Ha'e rã Moisés, Arão ha'e Hur ma vvyty apyte áry oẽ.

¹¹ Moisés opo oupi jave Israel kuery ipo'aka 'rã. Ha'e rã opo omboguejy jave ma Amaleque kuery ju 'rã ipo'aka.

¹² Ha'e gui Moisés po ma ipoyi. Ha'e ramo peteĩ ita ha'e kuery ogueru vy omoĩ okuapy ha'e py. Ha'e ramo Moisés oguapy hi'áry. Arão ha'e Hur ma ipo omoĩ atã herekovy jovaive-ive re. Ha'e rami py ipo oĩ atã kuaray oike peve.

¹³ Ha'e rami rã Josué kuery kyxe guaxu py oitypa Amaleque kuery.

¹⁴ Ha'e ramo SENHOR aipoe'i Moisés pe:

— Embopara peteĩ kuaxia re ha'e nungakue re penema'endu'a aguã, ha'e eroayvu ju Josué pe. Mba'eta xee amomba ete 'rã Amaleque kuery, yva guýry rupi ha'e kuery re ima'endu'aa ve'ỹ aguã — he'i.

¹⁵ Ha'e gui Moisés ojapo peteĩ altar. Ha'e va'e ma omboery “ SENHOR ma xe-bandeira”.†

¹⁶ Ha'e vy aipoe'i:

— Mba'eta SENHOR ouraague rami vy Amaleque kuery re opu'ã 'rã araka'e rã peve.

18

Moisés ratyu ta'yxy ha'e ta'y kuery ogueruague

¹ Ha'e gui Moisés ratyu Jetro sacerdote Midiã pygua va'e oendu Moisés pe ha'e Israel kuery pe SENHOR ojapo va'ekue ha'e javi, ha'e marã rami vy pa Egito yvy gui ha'e kuery ogueru raka'eague.

² Ha'e rami vy Moisés ratyu Jetro ogueru ju ta'yxy Zípora omondoukaague gui.

³ Mokoĩ ta'y kuery reve ogueru. Ha'e va'e kuery regua peteĩ ma omboery Gêrson, Moisés “Amboae yvy rupi aguata rei aikovy va'ekue” he'i vy.

⁴ Ha'e rã amboae ma omboery Eliézer, “Xeru ruete xepytyvõ vy xereraa jepe Faraó kyxe guaxu gui” he'i vy.*

⁵ Ha'e rami py Moisés tekoa e'ỹa py hekoa oikovya py hatyu Jetro ogueru ta'y kuery ha'e ta'yxy, Nhanderuete pegua vvyty katy'i.

⁶ Ha'e vy hatyu aipoe'i uka Moisés pe:

— Xee nderaty Jetro aju ndea py, ndera'yxy ha'e ndera'y kuery mokoĩ reve — he'i uka

⁷ ramo Moisés oo ovaexĩ vy. Ojero'a vy oayvupa. Ha'e gui peteĩ-teĩ amboae oiko porã re oporandu vy jogueroike opy.

⁸ Guaty pe Moisés omombe'u SENHOR Israel kuery oayvu vy ojapo va'ekue ha'e javi Faraó ha'e Egito pygua kuery ha'e javi re, ha'e Egito yvy re opa marãgua tembiapo ojapo va'ekue, ha'e marã rami vy pa SENHOR ogueraa jepepaague.

⁹ Ha'e ramo Jetro oguerovy'a opa mba'e py Israel kuery pe SENHOR ojapo porãague, Egito pygua kuery po gui ogueraa jepe vy.

¹⁰ Ha'e vy aipoe'i:

— Ta'ima'endu'a porã SENHOR Faraó ha'e Egito pygua kuery ha'e javi po gui pendereraa jepe va'ekue re.

¹¹ Aỹ ma aikuaa ma tuuete ramigua ikuai va'e ha'e javi gui SENHOR ipo'akapave va'ea, mba'eta Egito pygua kuery po gui neretarã kuery ogueraa jepe, ha'e kuery oguereko axy ramo — he'i.

* 17:7 Tery Massá ma “Moangekoa” 'ea, ha'e gui Meribá ma “Ayvua ete-ete” 'ea. † 17:15 Bandeira ma joe opu'ãa py huvixa omopu'ã rã hupivegua kuery ha'e py oupa aguã. * 18:4 Tery Eliézer ma “Nhanderuete xepytyvõa” 'ea nhaendu rã joo ramigua.

¹² Ha'e ramo Moisés ratyu Jetro ogueru Nhanderuete pe oapy vy ome'ẽ va'erã. Ha'e ramo ou Arão ha'e Israel mongetaaty kuery ha'e javi, Moisés ratyu reve okaru aguã Nhanderuete renonde.

Deuteronomio 1.9-18

¹³ Ko'ẽ jevy Moisés oguapy oiny heta va'e kuery re oikuaa pota aguã. Ko'ẽmba ramove kuaray oikea peve heta va'e kuery opu'ã okuapy henonde.

¹⁴ Ha'e gui Moisés heta va'e kuery ogueroko rã hatyu oexa vy aipoe'i:

— Mba'exa tu guí rami rereko heta va'e kuery? Mba'e re tu ndee anho repenaa py reguapy reiny ko'ẽmba'i ramove kuaray oikea peve, ha'e rã heta va'e kuery ma opu'ã okuapy nerenonde?

¹⁵ Moisés ombovai guaty pe:

— Ha'e rami mba'eta xea py heta va'e kuery ou 'rã oporandu uka vy Nhanderuete pe.

¹⁶ Ha'e gui amongue va'e ijayvu aguã ogueroko vy ma ou 'rã xea py, xee aikuaa pota aguã peteĩ-teĩ reko re, ha'e heta va'e kuery ambo'e porã aguã Nhanderuete ojapo uka va'ekue ha'e lei re — he'i.

¹⁷ Ha'e ramo Moisés ratyu aipoe'i iuxpe:

— Nda'evei ha'e rami rejapo aguã.

¹⁸ Mba'eta nekangy 'rã, heta va'e kuery ndereve ikuai va'e voi. Guí ramigua ma ipoyi vaipa ndevy. Ndee ae'i ndereropo'aka kuaai 'rã.

¹⁹ Ha'e gui endu ke xeayvu. Xee romongeta 'rã, ha'e Nhanderuete toiko ndereve. Eĩ tema heta va'e kuery rekovia Nhanderuete renonde. Nhanderuete pe emombe'u ha'e kuery mba'emo ogueroko va'e.

²⁰ Embo'e hekorã va'ekue ha'e lei re. Ha'e embo'e ha'e kuery mava'e tape rupi pa oo aguã, ha'e mba'emo ojapo aguã re.

²¹ Ha'e gui ejou avi heta va'e kuery regua avakue hi'arandu va'e, avakue Nhanderuete renonde ojerokyjea rupi ikuai va'e, oipotapa reia re nda'eveve'e'yí va'e. Ha'e va'e nunga emoĩ mil ikuai nhavõ va'e ruvixarã, cem, cingüenta ha'e dez ikuai nhavõ va'e ruvixarã.

²² Ha'e kuery toikuaa pota jepi heta va'e kuery re. Ha'e rã haxy ete va'e ha'e javi ma ndevy pe ae 'rã ogueru. Mba'emo ndaxyi va'e re ma ha'e kuery ae toikuaa pota. Ha'e rami rã ha'eveve 'rã ndevy. Ndereve amboae kuery togueraa avi voyi.

²³ Xapy'a rei ha'e rami rejapo, ha'e Nhanderuete ha'e rami aguã ojapo uka ramo ma reropo'aka 'rã, ha'e heta va'e kuery ha'e javi 'rã ngoo katy ojevy avi ovy'a reve — he'i hatyu.

²⁴ Ha'e rami rã Moisés onhe'ẽ rendu guaty. Ojapopa ijayvuague ha'e javi.

²⁵ Ha'e rami vy Moisés oiporavo avakue hi'arandu va'e Israel kuery regua ha'e javi gui. Ha'e va'e kuery ma omoĩ imbokuapy heta va'e kuery re opena va'erã: mil ikuai nhavõ va'e ruvixarã, cem, cingüenta ha'e dez ruvixarã.

²⁶ Ha'e ramo ha'e kuery ju oikuaa pota okuapy heta va'e kuery re. Haxy ete va'e ma Moisés-a py 'rã ogueru. Ha'e rã ndaxyi va'e re ma ha'e kuery ae 'rã oikuaa pota.

²⁷ Ha'e ramo Moisés oxarura imondovy guaty. Ha'e ramo ojevy ju ovyv katy.

19

Sinai vyvty áry Moisés reve SENHOR ijayvuague

¹ Egito yvy gui Israel kuery oẽmba rire mboapy jaxya ha'e ijypy'ia ára py ovaẽ okuapy Sinai vyvty yvýry tekoa e'ÿa oĩ va'e py.*

² Refidim gui oje'oi vy Sinai regua tekoa e'ÿa py ju ou. Ha'e va'e py ae Israel kuery opyta okuapy vyvty rexei.

³ Ha'e gui Moisés oẽ vyvty re Nhanderuete reve ijayvu aguã katy. Ha'e ramo vyvty áry gui SENHOR oenoĩ vy aipoe'i iuxpe:

— Po rami 'rã ndeayvu Jacó ramymino kuery pe, remombe'u 'rã Israel kuery ha'e javi pe:

⁴ “Pexa ma karamboae Egito pygua kuery re ajapo va'e, taguato pepo áry rami rogueraa ague ha'e gui, ha'e apy xea py ju rogueraague.

⁵ Ha'e gui aÿ ma pendu kuaa pota 'rã xeayvu, pendekuai 'rã xereve guarã ajapo va'ekue rami. Ha'e rami vy xevygua ae 'rã pendekuai, ha'e javi regua mbyte teĩ, mba'eta yvy ha'e javi ma xemba'e.

⁶ Peẽ kuery pendekuai 'rã apenaa ha'e xevygua sacerdote kuery, peteĩ regua iky'a e'ÿ va'e”, 're 'rã Israel kuery pe — he'i.

⁷ Ha'e ramo Moisés ou vy oenoĩ nhomongeta va'ety kuery. Ha'e kuery oendua py omombe'upa ayvu SENHOR omombe'u uka va'ekue ha'e javi.

⁸ Ha'e ramo heta va'e kuery peteĩ rami ombovai:

— SENHOR ijayvua ha'e javi 'rã rojapo — he'i okuapy. Ha'e rami heta va'e kuery ijayvuague Moisés omombe'u ju SENHOR pe.

⁹ Ha'e gui SENHOR aipoe'i Moisés pe:

— Ma'ẽ, ndea pyaju 'rã peteĩ arai pytũ va'e rupi, ndereve xeayvu rã heta va'e kuery oendu avi aguã, ndere ojerovia riaa okuapy aguã — he'i. Mba'eta SENHOR pe Moisés omombe'u ma va'ekue heta va'e kuery ijayvuague.

¹⁰ SENHOR aipoe'i avi Moisés pe:

— Tereo ju heta va'e kuerya py. Eiky'a'o ukapa kova'e ára ha'e ko'ẽ rã. Ha'e kuery tojoi oao,

* 19:1 Sinai vyvty ma yvateve va'e. Ha'e rã ijyvyrygua ma ijoja rei tekoa e'ÿa.

¹¹ ha'e toiko katupa mboapy araa pyguarã. Mba'eta mboapy araa py heta va'e kuery ha'e javi oexaa py xee SENHOR aguejy 'rã Sinai vyvty áry peve.

¹² Ha'e gui vyvty yvýry rupi rea'anga 'rã imoiny heta va'e kuery rejoko vy. Ha'e vy aipo're 'rã: "Peiko kuaa pota vyvty re peë e'ÿ aguã, neĩ pepoko eme ijyvýry rupi aa'angaague re. Mba'eta vyvty re opoko va'e rei omano 'rã.

¹³ Ha'e nunga re avave ndopokoai 'rã. Ha'e rami 'rãgue py ojapipaa 'rã ita py, e'ÿ vy onhyvõa 'rã. Avakue, e'ÿ vy mymba teĩ ae ma ndoikovevei 'rã. Mimby guaxu onhe'ë mbuku nhendu jave mae ma ha'eve vyvty re peë aguã", 're 'rã ha'e kuery pe.*

¹⁴ Ha'e gui Moisés vyvty áry gui heta va'e kuerya py ju oguejy ma vy oiky'a'o ukapa. Ha'e ramo ojoi okuapy oao.

¹⁵ Moisés aipoe'i heta va'e kuery pe:

— Peiko katu ke mboapy araa pyguarã, ha'e rami vy penhemboja eme kunhague re — he'i.

¹⁶ Ha'e gui mboapy araa ko'ëmba ramove ma oiko onhemboxi ha'e overa va'e, ha'e petei arai pytũ ete va'e vyvty áry ojekuaa. Peteĩ mimby guaxu onhe'ë ratã ete, tekoa py ikuai va'e oryryipa aguã rami.

¹⁷ Ha'e ramo Moisés ogueraa heta va'e kuery ikuaiã gui mombyry'i Nhanderueete ovaexi aguã. Ha'e ramo vyvty yvýry ju ikuai.

¹⁸ Sinai vyvty ha'e javi rupi hataxi oiny, hi'áry peve SENHOR oguejy ramo tata rupi. Hataxi opu'ã vy tatakua gui hataxi opu'ã va'e rami, ha'e vyvty ha'e javi oryryi atã.

¹⁹ Ha'e gui mimby guaxu onhe'ë atã-atãve tema. Moisés ijayvu rã Nhanderueete ombovai yapu atãa py.

²⁰ Ha'e gui Sinai vyvty apyte áry SENHOR oguejy vy oenoĩ Moisés vyvty apyte áry ou aguã. Ha'e ramo Moisés oë ovy.

²¹ SENHOR aipoe'i Moisés pe:

— Eguejy ju, heta va'e kuery pe ndeayvu touve eme vyvty yvýry rupi rea'angaague kyvõ rami xee SENHOR a katy xerexa aguã, ha'e kuery regua heta omano e'ÿ aguã.

²² Sacerdote kuery xee SENHOR re onhemboja va'e voi tojeky'a'o, xee SENHOR ajuka e'ÿ aguã — he'i.

²³ Ha'e ramo Moisés ombovai:

— Heta va'e kuery nda'evei ae Sinai vyvty re oë aguã, mba'eta orevy ndeayvu vy aipo're: "Ea'anga vyvty yvýry rupi, xevy guarã ae remboaxa vy", 're va'ekue orevy.

²⁴ SENHOR aipoe'i ixupe:

— Tereo, eguejy ju. Ha'e rire ma peë ju pejoguervy Arão reve. Ha'e rã sacerdote kuery ha'e heta va'e kuery ma touve eme rea'angaague kyvõ rami xee SENHOR aĩa py oë aguã, ajuka e'ÿ aguã.

²⁵ Ha'e ramo heta va'e kuerya py ju Moisés oguejy vy omombe'u ha'e kuery pe ha'e nunga ha'e javi.

20

Deuteronomio 5.1-21

¹ Ha'e gui po rami Nhanderueete ijayvu. Ha'e vy aipoe'i:

² — Xee ma SENHOR Nderuete Egito yvy re escravo pendekuai vy pempa'eapo poyiague gui pendepe'a va'ekue.

³ — Ndererekoi 'rã nderuete mboae xerenonde.

⁴ — Nderejapoi 'rã mba'emo ra'angaa nderueterã, yva re ikuai va'e ra'angaa, yva guýry yvy re ikuai va'e ramigua, neĩ yvy guy rupi yy oĩ va'e rupi ikuai va'e ra'angaa voi.

⁵ Ha'e nunga neremboetei 'rã, neĩ nerembojeroviai 'rã, mba'eta xee ae ma SENHOR Nderuete aiko, aipota xere anho pejerovia, mba'eta aju vy amboapaga 'rã xere nda'ija'ei va'e reko vaiague re, tuu kuery, ta'y kuery, hamymino ha'e hamymino jevy kuery ikuaiã peve.

⁶ Ha'e rã amongue xerayvu vy ajapo ukaague rami ikuai va'e ma amboaxy 'rã mil-kue hamymino kuery ikuai peve.

⁷ — Ndeayvu rive eme SENHOR Nderuete rery rupi, mba'eta SENHOR nomboeko porã 'rã hery rupi ijayvu rive va'ekue.

⁸ — Nema'endu'a ke sábado ára py icky'a e'ÿ va'erã remboete aguã.*

⁹ Mboapy meme ára re 'rã remba'eapo, ha'e rejapopa 'rã rejapo va'erã va'ekue ha'e javi.

¹⁰ Ha'e rã sete-a ára ma sábado SENHOR Nderuete pegua ára. Neremba'eapoi 'rã mba'eve py, ndera'y, nderajy, nerembiguai avakue ha'e kunhague, nerymba kuery, neĩ mombyrygua kuery ndero py removaë va'ekue voi.

¹¹ Mba'eta mboapy meme ára re SENHOR ojapo raka'e yva ha'e yvy, ye'ë ha'e opa mba'e hexe ikuai va'e. Ha'e gui sete araa py ma opytu'u. Ha'e nunga rupi sábado ára SENHOR ogueroayvu porã vy oēja icky'a e'ÿ va'erã.*

¹² — Remboete 'rã nderu ha'e ndexy, reikove puku aguã yvy ndeyvyrã SENHOR Nderuete ome'ë va'ekue re.*

¹³ — Ejojuka eme.*

¹⁴ — Ndetavy eme.*

¹⁵ — Nemonda eme.*

¹⁶ — Ndeayvu rive eme neirũ re.

* 19:13 Hebreus 12.20 * 20:8 Sábado ma "Pytu'ua ára" ea. * 20:11 Atos 4.24, 14.15 * 20:12 Mateus 15.4, Marcos 7.10, Efésios 6.2-3 * 20:13 Mateus 5.21, Romanos 13.9, Tiago 2.11 * 20:14 Mateus 5.27, Romanos 13.9, Tiago 2.11 * 20:15 Romanos 13.9

¹⁷ — Emoaruã eme neirũ ro. Emoaruã eme neirũ ra'yxy, hembiguai ava neĩ kunha, hymba vaka neĩ mburika'i, neĩ neirũ mba'e rei-rei oguereko va'e.*

Deuteronomio 5.22-33

¹⁸ Israel kuery ha'e javi oendu okuapy yapu ha'e mimby guaxu pu, ha'e oexa overa va'e ha'e yvyty gui hataxi va'e. Ha'e nunga ha'e kuery oexa vy oryryipa ha'e mombyry'i opyta.

¹⁹ Ha'e vy aipoe'i okuapy Moisés pe:

— Ndee ae ke ndeayvu orevy, ha'e ramo ore kuery roendu 'rã. Ha'e rã Nhanderuete ma ta'ijayvu eme orevy, romanomba e'ỹ aguã.

²⁰ Moisés ombovai heta va'e kuery pe:

— Pkyje eme ke. Nhanderuete ma pendeko a'ã aguã ou kuri, henonde pendu riae aguã pejererokyje aguã, pejejavy e'ỹ aguã — he'i.

²¹ Ha'e ramo ha'e kuery opu'ãmba okuapy mombyry'i. Ha'e rã Moisés ma Nhanderuete oĩa katy onhemboja ovy arai pytũ reia py.

Altar re ijayvuague

²² Ha'e ramo Nhanderuete aipoe'i Moisés pe:

— Po rami 'rã ndeayvu Israel kuery pe: “Peẽ kuery pexa ma yva gui pendereve xeayvu rã.

²³ Pejapo eme tuete ramigua prata e'ỹ vy ouro gui xereve pemboete avi va'erã.

²⁴ Ha'e rami 'rãgue py peteĩ altar yvy guigua rive 'rã pejapo xemboete aguã. Ha'e va'e áry ma mba'emo peapy vy peme'ẽ 'rã, ha'e peteĩ rami nhandekuaia regua, penerymba vexa'i ha'e vaka ava. Mamo rã xerery re penema'endu'a aguã ajapogague rupi aju 'rã ha'e py pendea py romoingo porã aguã.

²⁵ Ita gui ri xevy guarã altar pejapo vy ita omoatyrõmba pyre gui e'ỹ 'rã pejapo, mba'eta tembiporu py pemoatyrõ vy pemongy'a 'rã.

²⁶ Xevyguia altar re pejeupi eme tape pyrõ-pyrõ'a'i rupi, pendepire reia ojekuaa e'ỹ aguã”, 're 'rã ha'e kuery pe.

21

Deuteronomio 15.12-18

¹ — Po rami 'rã remombe'u heta va'e kuery rekorã.

² Xapy'a rei peteĩ hebreu regua escravo-rã pejogua ramo mboapy meme ma'etỹ peve ete'i 'rã omba'eapo pëvy. Ha'e rã sete ma'etỹa py ma pepoi rive 'rã, hepy re'ỹ.

³ Omenda e'ỹ re ri peru rire ha'e ae'i 'rã oo. Ava omenda va'e ri vy ogueraa 'rã ta'yxy.

⁴ Xapy'a rei ipatõ ta'yxyrã ome'ẽ ramo imemby e'ỹ vy ipi'a, ha'e ramo ma kunha ha'e imemby kuery ipatõ pe meme 'rã opyta, ha'e ime ma ha'e ae'i 'rã oo.

⁵ Ha'e rami avi escravo onhemombe'u porã vy “Xee ma ayvu rima xepatõ, xera'yxy ha'e xera'y kuery. Ha'e rami vy ndajepe'axe'i apy gui”, he'i ramo

⁶ ipatõ ogueraa 'rã huvixa kuerya py, ojapo 'rã okẽ py ovaẽ aguã rami, e'ỹ vy okẽ yta peve, ha'e ramo inambi ipatõ omombu 'rã mba'emo mombua py. Ha'e rami rire ixupegua escravo riae 'rã oiko.

⁷ — Xapy'a rei peteĩ ava escravo-rã guajy ovende ramo kunha va'e ndojepe'ai 'rã escravo kuery ojepe'aa rami.

⁸ Xapy'a rei ipatõ gua'yxyrã ojogua teĩ kunha va'e nombovy'ai ramo ovende ju 'rã. Ha'e rami avi nda'evei amboae yvy pygua pe ovende aguã, mba'eta ha'e rami aguã ixupe anhetẽ rupi e'ỹ 'rã oikoa.

⁹ Ha'e rã gua'y re ri omomenda vy guajy rami ae 'rã oguereko.

¹⁰ Ha'e gui xapy'a rei gua'y ra'yxyrã kunha mboae ju ojou vy ta'yxy jypygua pe ome'ẽ tema 'rã tembi'u, ijaorã ha'e ta'yxy rami joguereko aguã.

¹¹ Ha'e nunga mboapyve mba'e ixupe nome'ẽi ri vy opoi rive 'rã hepy re'ỹ.

Joguero'a va'e re ijayvuague

¹² — Amongue jojuka ramo ha'e voi pejuka 'rã.

¹³ Ha'e rã potae vy e'ỹ ojuka, ha'e rã ipo py Nhanderuete ombou rire ma pemondouka 'rã onhemi aguã henda pëvy aikuaa uka va'erã va'e py.

¹⁴ Ha'e rami avi guetarã ojukaxe vy ete hexe oma'ẽ mbegue reve opu'ã, hi'ã gui ojuka ramo ma xevyguia altar yvýry oĩa gui teĩ penoẽ 'rã pejuka aguã.

¹⁵ Nguu e'ỹ vy oxy ojuka va'ekue ma pejuka 'rã.

¹⁶ Ha'e amongue ojopy nhea'ã rei vy ovende, ha'e rami e'ỹ vy ipo py ojoua ramo ma pejuka avi 'rã.

¹⁷ Nguu e'ỹ vy oxy re ijayvu vai va'ekue avi 'rã pejuka.*

¹⁸ — Xapy'a rei mokoĩ joguero'aa py guetarã ombouguypa 'rã ita py, ha'e e'ỹ opo py. Ha'e gui hetarã omano e'ỹ vy jepe ngupa py itui 'rã.

¹⁹ Ha'e gui opu'ã vy oka rupi ju oiko 'rã opopoka reve teĩ. Ha'e rami rã napembopagai 'rã nhoungaare. Ha'e rami avi nhoungaare omboekovia 'rã ára omboaxa riveague re, ha'e omopena uka 'rã okuera porã peve.

²⁰ — Xapy'a rei amongue guembiguai ava e'ỹ vy kunha yvyra py oinupã ramo omano 'rã ipo py. Ha'e rami rã pembopaga 'rã.

* 20:17 Romanos 7.7, 13.9 * 21:17 Mateus 15.4, Marcos 7.10

²¹ Ha'e rami avi xapy'a rei peteí ára, mokoí ára ri hembiguaí nomanói ramo napembopagai 'rá ipatō, mba'eta ipatō peráta rami ombovare va'e.

²² — Ha'e gui xapy'a rei avakue joguero'aa py peteí ounga 'rá kunha ipuru'a va'e. Ha'e gui omemby'i oity teí ixy re mba'eve rei ndoikoi ramo ma oungaare omboekovia 'rá kunha va'e me oipotaa rami, huvixa kuery ijayvua rami ete.

²³ Ha'e rami avi kunha va'e nda'evei ramo pejuka avi 'rá ijukaare,

²⁴ joexa omombuague re pemombu avi 'rá hexa, nhoaí omopëague re pemopë avi 'rá haí, jopo ojayaague re pejaya avi 'rá ipo, jopy ojayaague re pejaya avi 'rá ipy,*

²⁵ joapyague re peapy avi 'rá, nhoungaague re peunga avi 'rá, ha'e nhokyxíague re peikyxí avi 'rá.

²⁶ — Xapy'a rei amongue guembiguaí ava e'ý vy kunha oexa mbogue ramo ndoexavei 'rá. Ha'e rami rá opoi rive 'rá hexa ombogueague rekovia.

²⁷ Ha'e guembiguaí ava e'ý vy kunha raí ojavykya rupi omboi ramo opoi rive 'rá haí omboiague rekovia.

²⁸ — Ha'e gui xapy'a rei amongue rymba vaka ma ava e'ý vy kunha oikutu rire omano 'rá. Ha'e rami rá vaka pejapipa 'rá ita py, ha'e neí ho'okue ma voi ndape'ui 'rá. Ha'e rá vaka ja ma napembopagai 'rá.

²⁹ Ha'e rami avi xapy'a rei vaka yma ma voi jokutu va'ety, ha'e ija oikuaa va'eri nombotyí ramo peteí ava e'ý vy kunha mba'e ojuka 'rá. Ha'e rami rá vaka pejapipa 'rá ita py, ha'e ija voi pejuka avi 'rá.

³⁰ Ha'e rami teí ija pe omboekovia re ojerurea ramo ojerurea rami ome'ë 'rá guekove rekovia.

³¹ Xapy'a rei peteí ava'i e'ý vy kunha'i vaka oikutu vy ojuka ramo ha'ekue rami ae 'rá pempopaga ija.

³² Ha'e rá escravo ava e'ý vy kunha mba'e vaka oikutu ramo ija opaga 'rá ipatō pe trinta hatá'i va'e prata guígua, ha'e rá vaka ma pejapipa 'rá ita py.

³³ — Amongue yvykua omboty e'ý re oeja, xapy'a rei vvy ojo'o va'ekue ri ikua nombotyí ramo ha'e py ho'a 'rá vaka, e'ý vy mburika.

³⁴ Ha'e rami rá vvy jo'oare omboekovia 'rá ija pe peráta ome'ë vy. Ha'e gui mymba omano va'ekue ma imba'e ae 'rá opyta.

³⁵ — Xapy'a rei amongue rymba vaka ma amboae rymba vaka oikutu ramo omano 'rá. Ha'e rami rá ija kuery ovende 'rá vaka oikove va'e, ha'e hepykue omboja'o 'rá joo'i rami. Ha'e mymba omano va'ekue avi 'rá omboja'o.

³⁶ Ha'e rami avi ha'e va'e vaka jokutu va'etya oikuaa pavë va'eri ija nombotyí ramo guymba vaka ome'ë 'rá amboae vaka rekovia, ha'e rá omano va'ekue ma imba'e ae 'rá opyta.

22

Nhomba'e rei-rei re ijayvuaque

¹ — Xapy'a rei amongue vaka e'ý vy vexa'i re imonda vy ovende 'rá ojuka e'ý vy. Ha'e ramo peteí-teí vaka imondaague rekovia ome'ë 'rá peteí nhiru'i vaka, ha'e peteí-teí vexa'i imondaague rekovia ome'ë 'rá irundy vexa'i.

² Ha'e xapy'a rei imonda va'e peteí oo py oipe'a rá ojoua vy oikutu rá omano 'rá. Ha'e ramo huguy moëare ojevavy va'e'ý 'rá opyta.

³ Ha'e rá xapy'a rei kuaray ouve teri reve ri ha'e nunga oiko ramo huguy moëare ojevavy va'e 'rá opyta.

— Imonda va'e oiko va'e rei omboekovia 'rá imondaague. Xapy'a rei ome'ë aguã ndojouí ramo pevende 'rá escravo-rá imondaague rekovia.

⁴ Xapy'a rei mymba vaka, mburika e'ý vy vexa'i mba'e re imonda rire ipo py imondaague oikove reve teri ojoua 'rá. Ha'e rami rá imondaague rekovia mokoí kuerei 'rá ome'ë.

⁵ — Xapy'a rei amongue guymba nhomba'ety py, e'ý vy jo'uvaty py omongaru 'rá, ha'e rami e'ý vy opoi rive 'rá nhomba'ety rupi okaru oikovy. Ha'e rami rá ija omba'ety gui ae 'rá omboekovia iporãgueve va'e ome'ë vy, ha'e e'ý vy o'uvaty gui.

⁶ Xapy'a rei tata ojopy xapy'a vy juuty okai vy oapy avi 'rá mba'emoaju oí va'e, e'ý vy oipo'o pyre, ha'e rami e'ý vy mba'ety ha'e javi okai 'rá. Ha'e rami rá tata moendyare omboekovia 'rá okaiaque re.

⁷ — Xapy'a rei amongue guetarã pe peráta e'ý vy mba'emo ome'ë 'rá omoí porã aguã, ha'e gui ha'e nunga re imonnda 'rá ijopyare gui, ha'e imonda va'ekue ojoua 'rá. Ha'e rami rá imondaague re ma mokoíguea repy 'rá omboekovia.

⁸ Ha'e xapy'a rei imonda va'ekue ndojouai ramo hoo va'e ae 'rá peraa huvixa kuerya py, ha'e kuerya oikuaa pota aguã guetarã mba'e rei-rei re na'imondai pa ra'ea re.

⁹ Xapy'a rei amongue jokore 'rá mymba vaka re, mburika, vexa'i mba'e, ao, e'ý vy mba'emo omokanhy mbyre re. Ha'e rami vvy amboae “Xemba'e rima” he'i ramo mokoíve 'rá peraa huvixa kuerya py. Ha'e ramo huvixa peteí ombopaga ramo guetarã pe mokoíguea repy 'rá omboekovia.

¹⁰ Xapy'a rei amongue guetarã pe opena uka 'rá guymba mburika, vaka, e'ý vy vexa'i re, ha'e e'ý vy amboae nunga mymba re, ha'e gui hymba omano 'rá, ha'e e'ý vy ojevuka 'rá, e'ý vy oë ramo avave rei ndoexaavei 'rá.

¹¹ Ha'e rami rá guetarã pe oura 'rá Nhanderuete rery rupi. Ha'e vy “Xee tu ndajopyi nerymba”, he'i 'rá. Ha'e ramo ija ojou porã 'rá, ha'e amboae ma nomboekoviai 'rá.

¹² Ha'e rami avi anhetë imondaague oikuaa ramo ma omboekovia 'rá ija pe.

¹³ Xapy'a rei ojapypaa ramo ogueru 'rá oexa pavë aguã. Ha'e rami rá nomboekoviai 'rá ojapypaaque re.

¹⁴ Ha'e amongue guetarã pe hymba re ojerure vy ogueraa, ha'e ija noña py mymba okarau, e'ÿ vy omano 'rã. Ha'e rami rã heraaere omboekovia 'rã.

¹⁵ Ha'e rã ija ha'e py ri oĩ rire heraaere nombokoviai 'rã. Xapy'a rei hepy re oiporu rire oiporukaague repy ae 'rã ome'ê hekovia.

Jomeme ha'e Nhanderue te marã rami pa ikuai aguã oejaague

¹⁶ — Kunhataĩ'i omenda aguã nda'evei teri va'e amongue ombotavy vy onhenho 'rã hexeve. Ha'e rami vy hexe omboekovia 'rã, ha'e omenda 'rã.

¹⁷ Ha'e rami avi tuu nomomendaxei ramo ixupe peráta py omboekovia 'rã kunhataĩgue re opagaa rami.*

¹⁸ Imba'evyky va'e rei napemoingovei 'rã.

¹⁹ Mymba reve itavy va'ekue pejuka 'rã.

²⁰ Amongue tuuete mboae pe, Nhanderue pe'ÿ mba'emo ome'ê ramo pejuka avi 'rã.

²¹ Pemoingo axy eme amboae regua, pereko axy eme, mba'eta peẽ voi Egito vvy re amboae regua peiko rire.

²² Pejavyky eme neĩ peteive imeve'ÿ va'e, e'ÿ vy tyre'ÿ.

²³ Mba'eta mba'emo py rei pemoingo axy ramo ha'e kuery xevy ojavukai ramo aendu 'rã ojavukaia.

²⁴ Ha'e rami vy xepoxy vy rojuka uka 'rã kyxe guaxu py. Ha'e ramo pendera'yxykue ju 'rã oiko imeve'ÿ va'e, ha'e pendera'y kuery voi tyre'ÿ 'rã ikuai.

²⁵ Xapy'a rei xevelygua iporiaukue'i ndea katy'i oiko va'e pe peráta reiporuka ma vy emboekovia retave eme, peráta oiporuka va'ety kuery rami e'ÿ.

²⁶ Xapy'a rei neretarã gui ao puku reipe'a vy nembra'emo ogueraa va'e rekovia, ha'e rami vy ixupe reme'ê ju 'rã kuaray oiko e'ÿ mbove.

²⁷ Mba'eta ha'e va'e py ae 'rã onhemonde, onheovã'i 'rã ipire ao'ia. Ajukue py onheovã e'ÿ re mba'eta tu oke 'rã? Ha'e va'e xevy ojavukai ramo aendu 'rã, mba'eta xee anhomboaxy kuaa va'e.

²⁸ Ndeayvu vai eme Nhanderue rovai, neĩ penderuvixa kuery re voi.*

²⁹ Xevy reme'ê va'erã eru voi nembra'ety gui ha'e nde'uvaty gui iporãgueve. Ndera'y kuery jypygua voi remboaxa 'rã xevy.

³⁰ Ha'e rami ae avi 'rã rejapo 'rã nerymba vaka ha'e vexa'i re. Sete ára re ranhe oxy rupi toiko. Ha'e gui oito araa py ma reme'ê 'rã xevy.

³¹ Xevelygua iky'a e'ÿ va'e 'rã pendekuai. Ha'e rami vy pe'u eme jai rupi ivaipa rei va'e ro'okue. Jagua kuery pe rive 'rã pemombo.

23

Ijapu ha'e joe ijayvu rei va'e re ijayvuague

¹ — Nda'evei nembra'emombe'u rive aguã, nda'evei joekokue ramigua remombe'u vy heko vai va'e reve renhomoirũ aguã.

² Nda'evei heta va'e kuery rupive peo aguã mba'emo vai pejapo aguã katy. Ha'e pavẽ ijayvu rei okuapya py voi nda'evei renhomoirũ aguã anhetẽ rupi e'ÿ ndeayvu vy.

³ Iporiaukue re reikuaa potaa py ma nda'evei reayvuve rive aguã.

⁴ Xapy'a rei nderovaigua rymba vaka e'ÿ vy mburika ixã e'ÿ re rejou vy reraa ju 'rã ixupe.

⁵ Ndere ija'e e'ÿ va'e rymba mburika ovoyi reve onhenho oupy rã rexa vy ema'ẽ rive eme, eipytyvõ ivoyi oupi aguã.

Deuterônômio 16.18-20

⁶ — Neretarã iporiaukue'i huvixa kuery pe ojexa uka rã nda'evei ha'eve'ÿa rami rereko aguã.

⁷ Nda'evei reiporu aguã ayvu rive rei. Nda'evei rejuka uka aguã ojevavy e'ÿ va'e ha'e heko porã va'e, mba'eta xee namboeko porã 'rã joapo vai rei va'e.

⁸ Nda'evei ome'ẽmby rejopy aguã ha'eve'ÿa rami rejoguereko aguã, mba'eta ome'ê mbyre oexa mbogue 'rã hi'arandu va'e, ojapo 'rã heko porã va'ekue voi anhetẽ rupi e'ÿ ijayvu aguã rami.

⁹ Nda'evei amboae regua rejavyky aguã, mba'eta peikuaa ae ma amboae regua py'a re oĩ va'e, Egito vvy re amboae regua peiko rire.

Levítico 25.1-7

¹⁰ — Mboapy meme ma'etỹ peve 'rã rema'etỹ ndeayvu re, ha'e ndejeupe guarã remono'õ 'rã mba'emo aju.

¹¹ Ha'e rã sete ma'etỹa re ma vvy reja 'rã opytu'u aguã, topyta rema'etỹ e'ÿ re. Ha'e ramo heta va'e kuery regua iporiaukue'i ojou aguã ho'u va'erã, ha'e ka'aguy rupigua voi ho'u aguã hemyrekue. Ha'e rami ae 'rã rejapo nde'uvaty ha'e nde-oliveira-ty re.

Levítico 23.3

¹² — Mboapy meme ára peve 'rã remba'eapo. Ha'e rã sete araa py ma repytu'u 'rã, nerymba vaka ha'e mburika voi opytu'u aguã, ha'e gui nerembigui pi'a kuery ha'e amboae regua voi opytu'u avi aguã.

¹³ Penekyre'ÿ xeayvua ha'e javi rupi pendekuai aguã. Ha'e rami vy penema'endu'a eme tuuete ramigua rive rery re, ha'e nunga rery rupi pendeayvu eme.

Êxodo 34.18-26; Levítico 23.4-21,33-44; Deuterônômio 16.1-17

¹⁴ — Ma'etỹa nhavõ mboapykue 'rã pejapo ngaru xevy.

* 22:17 Ha'e jave py ava omendaxe vy kunhataĩ ru kuery pe ome'ê 'rã mba'emo iporã va'e (Gênesis 24.53). * 22:28 Atos 23.5

¹⁵ Ha'e rami vy pejapo 'rã ngaru mbojape imbovua revegua e'ÿ. Sete ára re pe'u 'rã mbojape imbovua revegua e'ÿ aipoa'eague rami vy, jaxy abibe re oa'angaague py ae, mba'eta ha'e va'e jave py Egitu yvy gui peẽmba raka'e. Xerenonde avave rei tou rive eme mba'emo ogueru e'ÿ re.

¹⁶ Ha'e gui pejapo avi 'rã ngaru mba'emo ra'yĩgue pemono'õa regua, penemba'ety rupi mba'emo ra'yĩgue pemoaĩague gui jypy'igua pemono'õ jave. Ha'e gui ma'etÿa opaa py pejapo avi 'rã ngaru mba'emo'a peipo'õa regua, penemba'ety rupi renhotÿ va'ekue gui pemono'õmba ma rire.

¹⁷ Ma'etÿa nhavõ mboapykue 'rã avakue ha'e javi ojexa uka okuapy SENHOR Penderuete renonde.

¹⁸ Nda'evei mbojape imbovua regua xevy peme'ẽ avi aguã mymba pejuka va'ekue ruguykue reve. Xevygua ngarua py nda'evei avi inhandykue pereko aguã pytũ mbukukue re ko'ẽmba peve.

¹⁹ Penemba'ety rupi jypy'i oiko va'ekue regua iporãgueve peru 'rã SENHOR Penderuete pegua oo py. Ha'e nda'evei kavara'i pembojy aguã ixy ae kamby reve.

Ijyvyrã Nhanderuete ome'ẽ aguã re ijayvuague

²⁰ — Penerenonde re amondouka 'rã peteĩ anjo pendere opena aguã tape rupi, ha'e pendereraa aguã pendeyvyrã areko va'e py.

²¹ Ha'e va'e renonde re ma peiko kuua, ha'e pendu ijayvua. Pepu'ã eme hexe, mba'eta ha'e nombogueti 'rã pendeko vaiague, hexe xerery oĩ ramo.

²² Ha'e rami 'rãgue py opa mba'e py penhe'ẽ rendu, ha'e xeayvuague ha'e javi rejapopa ramo xee aiko 'rã penderovaigua kuery rovaigua, ha'e penemoingo axy reixe va'e moingo axya.

²³ Mba'eta xeguigua anjo penerenonde oo vy pendereraa 'rã amorreu, heteu, ferezeu, cananeu, heveu ha'e jebuseu kuery yvy peve. Ha'e gui ha'e va'e kuery xee amomba 'rã.

²⁴ Ha'e gui nda'evei ha'e kuery ruete pembojerovia nei pemboete aguã, nda'evei ha'e kuery ikuai rami peẽ kuery pendekuai aguã. Ha'e rami 'rãgue py pemomba ete 'rã, ha'e pemboa'ypa 'rã ita omopu'ã va'ekue ha'e javi.

²⁵ SENHOR Penderuete pe ete 'rã pendekuai. Ha'e ramo ha'e omoingo porã 'rã mbojape pe'u va'e ha'e yy pey'u va'e. Penembyte gui oipe'apa 'rã mba'eaxy.

²⁶ Ha'e ramo pendeyvy re ndoiko'i 'rã kunha omemby'i oity va'e, nei imemby va'erã e'ÿ. Xee romoingo pukuve 'rã.

²⁷ Ha'e penerenonde rupi amondouka 'rã xegui okyjepa aguã, mamõ rã peoa ha'e javi rupi onhemondyipa aguã. Ajapo 'rã penderovaigua kuery ha'e javi guakykue katy onha aguã rami.

²⁸ Penerenonde amondouka avi 'rã kavy nerenonde gui oipe'a heravy va'erã: heveu kuery, cananeu ha'e heteu kuery.

²⁹ Ha'e rami avi peteĩ'i ma'etÿ re'ÿ 'rã aipe'a, ijyvy va'ekue opyta rei e'ÿ aguã, ha'e penderovai ka'aguy rupigua heta-etave e'ÿ aguã.

³⁰ Ha'e rami 'rãgue py mbegueti'i py aipe'a 'rã heravy penerenonde gui, pendereta ha'e pendeyvyrã va'ekue ha'e javi rupi pendekoa peve.

³¹ Ha'e gui pendeyvyrã aa'anga 'rã Ye'ẽ Pytã guive filisteu kuery ikuai rupi ye'ẽ oĩ va'e peve, ha'e tekõa e'ÿa guive Eufrates yakã peve. Mba'eta pendepo py amboaxa 'rã ha'e va'e yvy re ikuai va'e ha'e javi, penerenonde gui peipe'apa aguã.

³² Ha'e kuery reve pejapo eme peteĩ rami pendekuai aguã, nei ha'e kuery ruete ramigua kuery pe pendekuai eme guive.

³³ Ha'e va'e kuery ma nda'evei ikuai aguã pendeyvy re, xerovai rupi penderojevavy e'ÿ aguã. Tuuete kuery pe pendekuai ramo nhuã py rami 'rã penembo'a.

24

Israel kuery reve Nhanderuete guexeve guarã ojapoague

¹ Ha'e gui Nhanderuete aipoe'i Moisés pe:

— Eẽ eovy xee SENHOR aia py, Arão reve, ha'e gui Nadabe, Abiũ ha'e setenta Israel regua nhomongeta va'ety kuery reve. Momybyrã gui teri pejua py pembojerovia 'rã.

² Ndee Moisés anho 'rã renhemboja xee SENHOR re. Ha'e rã amboae kuery ma nonhembojai 'rã, heta va'e kuery ma voi nda'evei oẽ aguã ha'e kuery reve — he'i.

³ Ha'e gui Moisés oo ju vy heta va'e kuery pe omombe'u Nhanderuete ijayvuague, ha'e ayvu oja va'ekue ha'e javi.

Ha'e ramo heta va'e kuery peteĩ rami meme ombovai okuapy. Ha'e vy aipoe'i:

— SENHOR ijayvuague va'e ma guive rã rojapopa 'rã — he'i.

⁴ Moisés omboparapa SENHOR ayvu ha'e javi'i. Ha'e gui ko'ẽ aje'ive'i reve opu'ã vy peteĩ altar ojapo vyty yvy'iry. Doze ita omopu'ã avi, Israel kuery regua doze ikuai rami.

⁵ Ha'e omondouka amongue Israel kuery regua kunumigüe. Ha'e va'e kuery ma mba'emo oapy vy ome'ẽ SENHOR pe, ha'e vaka ra'y ojuka hexeve peteĩ rami ikuai regua.

⁶ Huguy mbyte rupigua Moisés ojopy vy omoĩ peteĩ hy'a py, ha'e rã hembyrekue ma omboayvipa altar áry rupi.

⁷ Ha'e gui kuaxia guexeve guarã ojapo pyre oĩa ogueru vy ogueroayvu heta va'e kuery oendua py. Ha'e ramo ha'e kuery aipoe'i:

— SENHOR ijayvuague ha'e javi 'rã rojapo, ronhe'ẽ rendu vy — he'i.

⁸ Ha'e gui huguy omboyrú va'ekue Moisés ogueraa vy heta va'e kuery áry rupi ju omboayví. Ha'e vy aipoe'i:

— Kova'e tuguy ma SENHOR guexeve guarã pendereve ojapo aguã, ijayvuague ha'e javi rami vy — he'i.*

⁹ Ha'e gui oê jogueravy Moisés ha'e Arão, Nadabe, Abiú ha'e setenta-ve Israel regua nhomongeta va'ety kuery.

¹⁰ Ha'e kuery oexa Israel kuery Ruete. Ipy guýry ma peteĩ pyrõa oĩ ita safira ramigua, yva rami hexakã va'e.

¹¹ Israel regua Nhanderuete oĩporavo va'ekue oexa teĩ ha'e kuery re opo nomoĩ. Ha'e rami 'rãgue py okaru ha'e oy'u okuapy henonde.

Peteĩgue ju nhomongeta va'ety kuery reve Moisés vyvty re oêague

¹² Ha'e gui SENHOR aipoe'i Moisés pe:

— Eê ke vyvty re xea py, ha'e epyta ranhe ha'e py. Ndevy ame'ê 'rã itape ambopara va'ekue pendekorã ha'e ajapo uka va'e oĩa, ha'e kuery ju rembo'e aguã — he'i.

¹³ Ha'e ramo guembiguai Josué reve Moisés opu'ã vy oê ovy Nhanderuete pegua vyvty re.

¹⁴ Nhomongeta va'ety kuery pe aipoe'i:

— Orerarõ ke apy pendea py rojevty peve. Arão ha'e Hur ma opyta 'rã pendereve. Xapy'a rei amongue mba'emo oguereko ri vy ha'e kuerya py too — he'i.

¹⁵ Ha'e gui Moisés oê ramo arai ojao'ipa vyvty.

¹⁶ Sinai vyvty áry ojekuaa oiny Nhanderuete rexakã. Seis ára re arai ojao'i. Ha'e gui sete araa py ma SENHOR oenoĩ Moisés arai mbyte gui.

¹⁷ SENHOR rexakã ma tata rami nhomomba va'e ojekuaa vyvty apyte áry Israel kuery oexa rã.

¹⁸ Arai mbyte rupi Moisés oike vy oê ovy vyvty re. Ha'e py ma opyta quarenta ára ha'e quarenta pytũ re.

25

Êxodo 35.4-9

¹ Ha'e gui SENHOR aipoe'i Moisés pe:

² — Ndeayvu ke Israel kuery pe ogueru aguã xevy ome'ê va'erã. Avakue ipy'a re ha'e rami aguã oĩa va'e, ha'e kuery po gui pejopy 'rã xevy ome'ê va'e.

³ Pova'e ma xevyguia ha'e kuery po gui pejopy va'erã: ouro, prata ha'e overa va'e,

⁴ ajukue hovy va'e, púrpura, pytã va'e, ajukue iporãve va'e ha'e kavara rague,

⁵ vexa'i pirekue omopytã mbyre, ipirekue iporãve va'e, yvyra acácia,

⁶ azeite tataendy rykuerã, azeite SENHOR pe nhomboaxaa aguã regua irurã ha'e heakuã porã va'e oapy pyrã,

⁷ ita ônix ha'e ita sacerdote pegua manto ha'e ipexo regua jeguarã.

⁸ Xevy pe pejapo 'rã peteĩ hendaiky'a e'y va'erã, heta va'e kuery mbyte xee aiko aguã.

⁹ Ombojerovia atyrã rejapo 'rã ha'angaa ndevy aexa uka va'e ha'e javi rami, ha'e opy oĩ 'rã ha'e va'e rami rejapo va'erã ha'e javi.

Êxodo 37.1-5

¹⁰ — Yvyra acácia gui rejapo 'rã xeayvu ryrurã. Ipuku-a ma peteĩ metro raxa'i, ipya ma meio metro raxa'i, yvatea ma meio metro raxa'i avi.

¹¹ Renhovã 'rã ouro ete'i py. Hyepy rupi ha'e hi'áry rupi voi renhovã 'rã. Ha'e ijyvyry rupi ma rembojeguia 'rã ouro guigua py.

¹² Rejapo avi 'rã irundy inhapyĩ va'e ouro gui. Ha'e va'e ma remoĩ 'rã hyru apy irundyve re. Mokoĩ inhapyĩ va'e remoĩ 'rã kyvõ katygua re, ha'e mokoĩ avi 'rã remoĩ hovai re.

¹³ Rejapo avi 'rã yvyra po'i'i acácia gui, ha'e renhovã 'rã ouro py.

¹⁴ Yvyra po'i'i ma remboaxa 'rã hyru jovaive re inhapyĩ va'e oĩ va'e rupi, ha'e va'e re hyru peraa aguã.

¹⁵ Yvyra po'i'i opyta 'rã hyru jovaive re inhapyĩ va'e oĩ va'e rupi. Ndapeipe'ai 'rã ha'e gui.

¹⁶ Hyru py remoĩ 'rã xeayvu ndevy aikuaa uka va'erã va'e.

Êxodo 37.6-9

¹⁷ — Imbotya teko vai ombogue atyrã rejapo avi 'rã ouro ete'i gui. Ipuku-a ma peteĩ metro raxa'i 'rã, ha'e ipya ma meio metro raxa'i.

¹⁸ Ouro gui avi 'rã rejapo mokoĩ anjo ipepo va'e ra'angaa. Ouro omoatyrõ mbyre gui 'rã rejapo, hyru mbotya apy jovaive re hi'ái va'erã.

¹⁹ Peteĩ anjo ra'angaa remopu'ã 'rã peteĩ apy re, ha'e amboae ma hovai re. Peteĩ regua gui meme 'rã rejapo imbotya ha'e anjo ra'angaa ijapy jovaive re hi'ái va'erã.

²⁰ Anjo ra'angaa opepo oupi 'rã yvate katy, ipepo omo'ã 'rã hyru mbotya. Joa katy 'rã oma'ê, imbotya teko vai ombogueaty katy ae.

²¹ Hyru áry remoĩ 'rã imbotya. Ha'e rã hyepy py ma remoĩ 'rã xeayvu ndevy amboaxa va'erã va'e.

²² Ha'e pyaju 'rã ndea py, imbotya teko vai ombogueaty áry, mokoĩve anjo ipepo va'e ra'angaa xeayvu ryruru mbotya áry hi'ái va'e mbyte. Ndereve xeayvu 'rã ajapo uka va'e, ha'e Israel kuery rekorã amombe'u va'e ha'e javi re.

Êxodo 37.10-16

²³ — Rejapo avi 'rã peteĩ mesa yvyra acácia gui. Ipuku-a ma peteĩ metro va'erã, ipua ma meio metro, ha'e yvatea ma meio metro raxa'i.

* 24:8 Mateus 26.28, Marcos 14.24, Lucas 22.20, Hebreus 9.20

²⁴ Mesa ma renhovã 'rã ouro ete'i py. Ijyvýry rupi ma rembojegua 'rã ouro guigua py.

²⁵ Ijyvýry rupi ma rejapo 'rã hembẽ 'yrã. Ipo guaxua ma irundy kuã va'erã, ha'e hembẽ 'y rupi rembojegua 'rã ouro guigua py.

²⁶ Irundy inhapyĩ va'e rejapo 'rã ouro gui. Ha'e va'e ma remoĩ 'rã ijapy irundyve re, hetyma irundyve oĩa py.

²⁷ Rembojeguaague katy'i 'rã oĩ inhapyĩ va'e vyvra po'i'i oĩ aguã, ha'e va'e re peraa aguã mesa.

²⁸ Ha'e va'e vyvra po'i'i ma rejapo 'rã vyvra acácia gui, ha'e ouro py renhovã 'rã, ha'e va'e re peraa aguã mesa.

²⁹ Hi'áry guarã rejapo avi 'rã hy'arã, hekuã porã va'e oapy atyrã, hy'a kuarã ha'e hy'a rugua'i mba'emo ome'ẽmby peraa aguã. Ha'e va'e ma ouro ete'i gui meme 'rã rejapo.

³⁰ Mesa áry remoĩ 'rã mbojape iky'a e'ỹ va'e xerenonde oĩ riae va'erã.

Êxodo 37.17-24

³¹ — Rejapo avi 'rã peteĩ tataendy 'yrã ouro guigua. Ouro omoatyrõ mbyre gui 'rã rejapo. Hapytarã, hakarã, tykue ryrurã, ijapu'a va'erã, ha'e ipotyã voi peteĩ'i gui meme 'rã rejapo.

³² Ijyke gui ma oẽ 'rã mboapy meme hakã. Mboapy rakã oẽ oiny 'rã peteĩ yke gui, ha'e hovai gui ju mboapy rakã avi 'rã oẽ.

³³ Peteĩ-teĩ hakã re oĩ 'rã mboapy amẽndoa ra'angaa tykue ryrurã, peteĩ ijapu'a va'e ha'e peteĩ ipoty. Ha'e gui hakã mboae re ha'ekue rami ae avi 'rã oĩ mboapy amẽndoa ra'angaa tykue ryrurã, peteĩ ijapu'a va'e ha'e peteĩ ipoty. Ha'e rami 'rã mboapy meme hakã tataendy 'y gui oẽ oiny va'e.

³⁴ Hi'y re ete ma oĩ 'rã irundy amẽndoa ra'angaa ijapu'a va'e tykue ryrurã, ipoty reve.

³⁵ Peteĩ ijapu'a va'e oĩ 'rã mokoĩ rakã ixugui oẽ oiny va'e renderã, ha'e amboae ijapu'a va'e ha'ekue rami ae oĩ 'rã mokoĩ rakã ixugui oẽ oiny va'e renderã. Oive ju 'rã peteĩ ijapu'a va'e mokoĩ rakã ixugui oẽ oiny va'e renderã. Ha'e rami rejapo 'rã mboapy meme hakã mokoĩ-mokoĩ tataendy 'y gui oẽ oiny va'e.

³⁶ Ijapu'a va'e ha'e hakã ma peteĩ'i guigua meme. Ha'e javive peteĩ'i guigua meme 'rã rejapo ouro ete'i omoatyrõ mbyre gui.

³⁷ Rejapo avi 'rã sete tataendy. Ha'e va'e ma hendy 'rã omoexakã aguã henonde.

³⁸ Tata moendya ha'e imbogua ma ouro ete'i guigua meme.

³⁹ Peteĩ poyikue ouro ete gui 'rã rejapo tataendy 'yrã ha'e hyru ha'e javi.

⁴⁰ Eikuaa pota ke vyvty apyte re reĩ jave ha'angaa aexa uka va'ekue rami ete rejapopa aguã re.*

26

Êxodo 36.8-18

¹ — Ha'e gui rejapo 'rã ombojerovia atyrã. Imbotyarã ma oĩ 'rã dez cortina ajukue iporãve va'e oipoka pyre gui, ha'e hovya va'e, púrpura ha'e pytã va'e gui. Rembojegua 'rã anjo ipepo va'e ra'angaa py. Ojapo kuaa va'e ojapo 'rã.

² Peteĩ-teĩ cortina puku-a ma catorze metros va'erã, ha'e ipya ma mokoĩ. Cortina ikuai va'e joo rami meme 'rã.

³ Peteĩ nhiruĩ cortina oje'a 'rã joe, ha'e hovai re voi peteĩ nhiruĩ oĩ va'e oje'a-je'a 'rã joe.

⁴ Hovy va'e gui rejapo 'rã jokuaa cortina jypygua apy re oĩ va'e rembe re. Ha'e rami ae avi rejapo 'rã mokoĩa aty apy re cortina oĩ va'e rembe re.

⁵ Peteĩ-teĩ cortina re cinqüenta jokuaa 'rã rejapo, ha'e amboae cinqüenta jokuaa rejapo 'rã mokoĩ aty apy re cortina oĩ va'e re. Peteĩ-teĩ ojokuaa ma oĩ 'rã hovaigua renonde katy.

⁶ Ha'e rejapo avi 'rã cinqüenta ijopyarã ouro guigua. Ha'e va'e py peteĩ-teĩ cortina rejopy 'rã amboae re. Ha'e rami py ombojeroviaaty peteĩ'i ae 'rã opyta.

⁷ — Ha'e kavara rague gui rejapo avi 'rã cortina mboae ombojeroviaaty ao'i jevya mbotyarã. Onze cortina rejapo 'rã ha'e ramigua.

⁸ Ha'e va'e cortina peteĩ-teĩ puku-a ma quinze metros 'rã, ha'e ipya ma mokoĩ. Onze-ve cortina ikuai va'e joo rami meme 'rã ipuku-a ha'e ipya.

⁹ Ha'e va'e cortina ma peteĩ nhiruĩ rejokua 'rã joe, ha'e gui mboapy meme mboae voi rejokua 'rã ha'e rami. Cortina mboapy memea va'e ogueroja 'rã ijao'ia oĩ va'e renonde.

¹⁰ Ha'e jypygua aty apy re cortina oĩ va'e rembe re ma cinqüenta jokuaa rejapo 'rã, ha'e mokoĩa aty apy re cortina oĩ va'e rembe re ma cinqüenta jokuaa ju 'rã rejapo.

¹¹ Rejapo avi 'rã cinqüenta ijopyarã overa va'e guigua. Ha'e gui ijopya ikuai va'e remoĩ 'rã cortina jokuaa re. Ha'e va'e py rejokua 'rã reovy ijao'i arã, peteĩ'i ae opyta aguã.

¹² Ha'e gui ijao'ia re cortina hembyrekue ma remoĩ 'rã ombojeroviaaty kupe katy, cortina mbyte rupi hembyre va'e ae.

¹³ Ha'e rami py ombojeroviaaty re cortina oĩ va'e pukukue rami hembyre vy ma kyvõ rupi meio metro, hovai rupi meio metro avi. Ha'e va'e ma jovaive re remoĩ 'rã ijao'i arã.

Mymba pirekue ha'e vyvrape ogueru rukaague

¹⁴ — Ha'e gui vexa'i pirekue omopytã mbyre gui rejapo 'rã ijao'ia áry guarã. Ha'e va'e áry guarã ju remoĩ 'rã ipirekue iporãve va'e.

¹⁵ — Ombojeroviaaty ytarã ma rejapo avi 'rã vyvrape acácia gui. Ha'e nunga ma rejapo 'rã imo'amy.

* 25:40 Hebreus 8.5

- 16 Peteĩ-teĩ vyvrape puku-a ma irundy metros raxa'i 'rã, ha'e ipya ma meio metro raxa'i.
 17 Peteĩ-teĩ vyvrape re oĩ 'rã mokoĩ omoĩ aguã joa katy oo va'e, joo'i rami nhovaexĩ aguã rami. Ha'e rami rejapo 'rã vyvrape ombojeroviaaty ytarã ha'e javi.
 18 Ha'e ombojeroviaaty ytarã ma vinte vyvrape rejapo 'rã kuaray puku-a katy guarã.
 19 Ha'e gui vinte-ve vyvrape guýry guarã ma rejapo 'rã quarenta omopyrõ aguã prata guigua. Mokoĩ omopyrõ aguã ma peteĩ vyvrape guýry guarã rejapo mokoĩve rendarã, ha'e mokoĩ omopyrõ aguã amboae vyvrape guýry guarã, mokoĩve rendarã.
 20 Ha'e gui ombojeroviaaty rovai re ma rejapo avi 'rã vinte vyvrape, kuaray ijapu'a'ia katygua reguarã.
 21 Rejapo avi 'rã quarenta omopyrõ aguã prata guigua. Peteĩ vyvrape guýry mokoĩ omopyrõ aguã, ha'e amboae vyvrape guýry mokoĩ avi.
 22 Ha'e gui kuaray oikea katy ombojeroviaaty kupe reguarã ma rejapo 'rã mboapy meme vyvrape.
 23 Ha'e ombojeroviaaty kupe katy guarã ma rejapo avi 'rã mokoĩ vyvrape ijapy katy guarã.
 24 Ha'e va'e ma iguýry rupi oja'o, ha'e rã yvate rupi ma peteĩ inhapyĩ va'e rupi joyvy 'rã oĩ. Ha'e rami rejapo 'rã mokoĩ vyvrape re. Mokoĩve apy peteĩ-teĩ re 'rã mokoĩ oĩ.
 25 Ha'e rami oĩ 'rã oito vyvrape omopyrõ aguã prata guigua reve, dezesseis omopyrõ aguã. Peteĩ vyvrape guýry oĩ va'e mokoĩ omopyrõ aguã, ha'e amboae vyvrape guýry mokoĩ ju.
 26 — Yvyra mbyte rupi oaxa ovy va'erã ma rejapo avi 'rã acácia gui, ombojeroviaaty yke re oĩ 'rã peteĩ nhiruĩ vyvrape.
 27 Ha'e gui ombojeroviaaty rovai re vyvrape oĩ va'e rupi guarã ma peteĩ nhiruĩ, ha'e oo kupe kuaray oikea katy vyvrape oĩ va'e rupi guarã peteĩ nhiruĩ avi 'rã oĩ.
 28 Yvyra oaxa ovy va'e oaxa 'rã vyvrape mbyte rupi, peteĩ apy gui amboae apy peve.
 29 Vyvrape renhovã 'rã ouro py, ha'e ouro gui ae ju 'rã rejapo inhapyĩ va'e, ha'e va'e rupi mbyte vyvra oaxa ovy va'e oaxa aguã. Yvyra oaxa oiny va'e voi ouro py ae avi 'rã renhovã.
 30 Ha'e gui rejapo 'rã ombojerovia atyrã vyvty re ndevy aexa uka va'ekue rami ae.

Êxodo 36.35-38

- 31 — Ha'e gui rejapo 'rã peteĩ ajukue okẽ regua hovy va'e gui, púrpura, pytä va'e, ha'e iporãve va'e oipoka pyre gui. Rembojegua 'rã anjo ipepo va'e ra'angaa py. Ojapo kuaa va'e ojapo 'rã.
 32 Ha'e va'e reipyo 'rã irundy yta vyvra acácia guigua ouro py onhovã mbyre. Ha'e va'e jopyarã rejapo 'rã ouro gui, ha'e irundy prata guigua omopyrõ aguã.
 33 Ajukue okẽra reupi 'rã ijopya guýry. Ha'e gui xeayvu ryru ju reraa 'rã ha'e katy, ajukue okẽ regua rovai opyta aguã. Ha'e rami py ajukue oĩ 'rã omboja'o aguã henda iky'a e'ý va'e ha'e henda iky'a e'ý ete va'e.
 34 — Henda iky'a e'ý ete va'e py xeayvu ryru oĩ va'e mbotyarã ma remoĩ 'rã teko vai ombogueaty.*
 35 Ha'e rã mesa ma cortina okẽ regua kyvõ rami 'rã remoĩ. Tataendy 'y ma remoĩ 'rã mesa renonde ombojeroviaaty yke kuaray puku-a katy. Ha'e rã mesa ma remoĩ 'rã kuaray ijapu'a'ia katy.
 36 — Oo rokẽra ma rejapo 'rã peteĩ ajukue hovy va'e gui, púrpura, pytä va'e, ha'e ajukue iporãve va'e oipoka pyre gui, ombojegua kuaa va'e rembiapo.
 37 Ha'e va'e ajukue ytarã ma rejapo 'rã peteĩ nhiruĩ vyvra acácia guigua. Renhovãmba 'rã ouro py. Ijopyarã voi ouro guigua 'rã oĩ. Ha'e va'e rendarã ma overa va'e remboyku 'rã peteĩ nhiruĩ.

27

Êxodo 38.1-7

- 1 — Ha'e gui altar-rã ma vyvra acácia gui 'rã rejapo. Ipuku-a ma mokoĩ metros raxa'i, ipya ma ha'e rami ae ju, altar ijapy irundy va'e opyta aguã. Ha'e rã yvatea ma peteĩ metro raxa'i 'rã.
 2 Ijapy irundyve re ma rejapo 'rã irundy rakua. Ha'e va'e ma altar reve peteĩ'i gui ae 'rã rejapo. Ha'e renhovãmba 'rã overa va'e py.
 3 Ha'e rejapo avi 'rã tanhambu ryrurã, ha'e pá iky'a'o arã, hy'arã, ikuxa rakua ha'e tapyĩ ryrurã. Hyrurã ha'e javive overa va'e gui meme 'rã rejapo.
 4 — Hi'árygua ipokã rei va'erã ma rejapo 'rã overa va'e gui, kya xã ramigua. Irundyve apy reguarã ma rejapo 'rã irundy inhapyĩ va'e overa'li va'e gui.
 5 Ha'e va'e remoĩ 'rã altar ryepy py yvy katy, altar mbyte peve ixã ovaẽ aguã rami.
 6 Altar peguarã rejapo avi 'rã vyvra po'li. Ha'e va'e vyvra po'li ma acácia gui 'rã rejapo, ha'e overa va'e py ju 'rã renhovã.
 7 Yvyra po'li ma oĩ 'rã inhapyĩ va'e jovaive altar re oĩ va'e re, peraa aguã.
 8 Inhavyĩ va'e rejapo 'rã vyvrape gui. Yvyty áry ndevy aexaague rami ae 'rã rejapo.

Êxodo 38.9-20

- 9 — Rejapo avi 'rã ombojeroviaaty rokarã. Kuaray puku-a katy oka rupi oĩ 'rã cortina ajukue iporãve va'e oipoka pyre gui. Jova-jovai re ipuku-a ma quarenta e cinco metros 'rã.
 10 Ha'e va'e rupi oĩ 'rã vinte ijyta ha'e vinte omopyrõ aguã overa va'e guigua meme. Ha'e va'e ijyta re ity'ãi, ha'e hi'áry ıkarẽ va'e oĩ va'e ma prata guigua meme 'rã.
 11 Ha'e rami avi kuaray ijapu'a'ia katygua voi cortina puku-a quarenta e cinco metros avi 'rã. Ha'e vinte ijyta, ha'e vinte omopyrõ aguã oĩ va'e voi overa va'e guigua meme 'rã. Ha'e rã ijyta re ity'ãi, ha'e hi'áry ıkarẽ va'e oĩ va'e ma prata guigua meme 'rã.

* 26:34 Êxodo 25.21

¹² Ha'e kuaray oikea katy ma oka pukukue rupi oĩ 'rã cortina vinte e dois metros oĩ va'e. Ijyta oĩ 'rã dez, ha'e omopyrõ aguã dez avi.

¹³ Ha'e rami ae avi oka kuaray oëa katygua voi ipya vinte e dois metros 'rã.

¹⁴ Ha'e okẽ yke re cortina oĩ va'e ma sete metros 'rã. Ijyta ma mboapy 'rã oĩ, ha'e omopyrõ aguã voi mboapy 'rã.

¹⁵ Okẽ rovaigua re voi oĩ 'rã cortina sete metros va'e. Ijyta ma mboapy 'rã oĩ, ha'e omopyrõ aguã voi mboapy avi 'rã.

¹⁶ Ha'e oka rokẽrã ajukue oĩ va'e ma nove metros ipya 'rã. Ha'e va'e ma hovy va'e guigua, púrpura, pytã va'e ha'e ajukue iporãve va'e oipoka pyre guigua, ajukue ombojegua kuaa va'e rembiapo. Ijyta irundy 'rã, ha'e omopyrõ aguã voi irundy.

¹⁷ Ha'e javive ijyta oka rupi hi'aĩ va'e ma guive rã oguereko 'rã hi'áry rupi prata guigua. Ity'aĩ voi prata guigua, ha'e rã omopyrõ aguã ma overa va'e guigua 'rã.

¹⁸ Oka puku-a ma quarenta e cinco metros, ha'e ipya ma jova-jovai re cinqüenta metros. Yvatea ma dois metros raxa'l 'rã. Cortina oĩ va'e ma ajukue iporãve va'e oipoka pyre gui, ha'e omopyrõ aguã ma overa va'e guigua meme 'rã.

¹⁹ Ha'e javi tembiporu ombojeroviaaty py oiporu pyrã, ombota pyrã, ha'e oka rupi ombota pyrã voi overa va'e guigua meme 'rã.

Levítico 24.1-4

²⁰ — Aipo're 'rã Israel kuery pe togueru tataendyrã azeite oliveira gui anho ombota pyre, tata hendy riaie oiny aguã.

²¹ Ha'e gui oguy nhemboaty oĩaty py, xeavyu ryrü renonde ajukue okẽ regua oĩ va'e kyvõ rami, ha'e py ma Arão ha'e ta'y kuery opena riaie 'rã, ka'aru'i guive ko'ẽ aje'ive peve, SENHOR renonde. Ha'e rami ma Israel kuery rekorã opa e'ỹ va'erã, araka'e rã peve guarã.

28

Éxodo 39.1-31

¹ — Tou ndea py nderyke'y Arão ha'e ta'y kuery, Israel kuery gui aiporavo ha'e kuery ae sacerdote ikuai aguã, Arão, ha'e gui ta'y kuery Nadabe, Abiú, Eleazar ha'e Itamar.

² Nderýke'y Arão pe rejapo 'rã ao iky'a e'ỹ va'erã, omboetea aguã ha'e iporã aguã rami.

Sacerdote kuery aorã ojapo ukaague

³ — Ndeayvu avi 'rã avakue mba'emo ojapo kuaa va'e ha'e hexe nhe'ẽ imo'aranduarã amoia va'e ha'e javive pe, ha'e kuery ojapo aguã Arão aorã. Ha'e rami rã xevy guarã remboaxa 'rã, xevygua sacerdote oiko aguã.

⁴ Po rami 'rã rejapo ijaorã: pexo regua, manto sacerdote pegua, kamixa puku árygua, kamixa puku ombojegua pyre, ngora oimama mbyre ha'e ku'akuaa. Ao iky'a e'ỹ va'erã rejapo 'rã nderyke'y Arão ha'e ta'y kuery pe, xevygua sacerdote ikuai aguã.

⁵ — Peru 'rã ouro, hovy va'e, púrpura, pytã va'e ha'e ajukue iporãve va'e,

⁶ pejapo aguã manto sacerdote peguarã ouro gui, hovy va'e, púrpura, pytã va'e ha'e ajukue iporãve va'e oipoka pyre gui, ojapo porã mbyre meme.

⁷ Ha'e va'e re oĩ 'rã mokoĩ axi'y árygua. Mokoĩve apy re 'rã oĩ, peteĩ'i opyta aguã.

⁸ — Iku'akuaa voi iporã aguã rami 'rã rejapo, sacerdote pegua manto áry oĩ va'erã, joo rami guarã. Mba'eta joo rami ae 'rã rejapo ouro gui, hovy va'e, púrpura, pytã va'e ha'e ajukue iporãve va'e oipoka pyre gui.

⁹ Rejou 'rã mokoĩ ita õnix regua. Ha'e va'e re rembopara 'rã Israel kuery rery.

¹⁰ Peteĩ ita re rembopara 'rã mboapy meme tery, ha'e amboae ita re amboae mboapy meme ju 'rã rembopara ha'e kuery itui'iague rami.

¹¹ Ita re omba'eapo va'e ombopara 'rã, kuã reguarã omboparaa rami avi. Ha'e va'e mokoĩ ita re rembopara 'rã Israel ra'y kuery rery ha'e javi. Ijvyry rupi remboja 'rã ouro py.

¹² Mokoĩve ita remoĩ 'rã manto sacerdote pegua axi'y áry, ita Israel kuery re imoma'endu'a arã. Ha'e kuery rery ma Arão oaxi'y áry ogueraa 'rã SENHOR renonde ima'endu'a aguã.

¹³ Ouro gui rejapo 'rã ita rendarã,

¹⁴ ha'e remoxã 'rã mokoĩ corrente'i ouro ete'i gui. Ixã oipokaa rami 'rã reipoka. Ha'e va'e corrente'i oipoka pyre ma remboja 'rã ita renda re.

¹⁵ — Rejapo avi 'rã pexo regua oikuaa pota aguã va'erã iporã aguã rami, manto sacerdote peguarã rejapoague rami. Ouro gui, ha'e hovy va'e, púrpura, pytã va'e ha'e ajukue iporãve va'e oipoka pyre gui 'rã rejapo.

¹⁶ Irundya jovaive re, ha'e mokoĩ rejapo 'rã. Ipuku-a ma peteĩ po pukukue, ha'e ipya voi peteĩ po pukukue avi 'rã.

¹⁷ Ha'e va'e re ma remoĩ 'rã ita hendarã reve, ita irundy ryxy oĩ reve: jypy'igua ma sárdio, topázio ha'e carbúnculo. Ha'e va'e ma jypy'igua ryxy.

¹⁸ Mokoĩ ryxya ma esmeralda, safira ha'e diamante.

¹⁹ Mboapy ryxya ma jacinto, ágata ha'e ametista.

²⁰ Ha'e gui irundy ryxya ma berilo, õnix ha'e jaspe. Henda ouro guigua oĩ 'rã imbojeguaarã.

²¹ Ha'e va'e ita oĩ 'rã Israel ra'y kuery rery oĩ aguã, hery doze va'e rami avi. Kuã reguarã rami 'rã rembopara, peteĩ-teĩ ita re hery oĩ aguã, doze regua ikuai rami.

²² Pexo regua peguarā rejapo 'rā peteī corrente ixā rami, ouro guigua oipopē mbyre.

²³ Ha'e pexo regua peguarā rejapo 'rā mokoī inhapyī va'e ouro guigua. Ha'e mokoī inhapyī va'e remboja 'rā pexo regua apy re.

²⁴ Ha'e gui mokoīve corrente'i ouro guigua remboaxa 'rā mokoī inhapyī va'e pexo regua apy re remoī va'ekue rupi.

²⁵ Mokoīve corrente'i apy remboja 'rā mokoīve ita renda re, ha'e remoī 'rā manto sacerdote pegua axi'y árygua renonde katy.

²⁶ Rejapo avi 'rā mokoī inhapyī va'e ouro gui, ha'e remboja 'rā pexo regua apy mokoīve re, iguýry oī va'e rembe re, manto sacerdote pegua reve.

²⁷ Ha'e mokoī ju 'rā rejapo inhapyī va'e ouro gui. Ha'e va'e ma remoī 'rā mokoīve manto sacerdote pegua axi'y árygua re, henonde yvyīve'i, ijoapya oī va'e katy'i, iku'akuaa manto sacerdote pegua reve joo rami ojapo porā mbyre áry.

²⁸ Ha'e gui pexo regua re inhapyī va'e oī va'e ma rejokua 'rā inhapyī va'e manto sacerdote pegua re oī va'e hi'áry, peteī xā hovy va'e py oī aguā manto sacerdote pegua ku'akuaa reve joo rami oī aguā. Pexo regua ndoja'oi 'rā manto sacerdote pegua gui.

²⁹ Ha'e rami vy Israel kuery rery Arão ogueraa 'rā pexo regua oikuaa pota aguā va'e, okuraxō áry, henda iky'a e'ý va'e py oike ma vy, SENHOR renonde ima'endu'a riae aguā.

³⁰ — Ha'e gui pexo regua oikuaa pota aguā va'e re remoī avi 'rā Urim ha'e Tumim,* Arão kuraxō áry oī aguā SENHOR renonde oike ramo. Ha'e rami vy Arão okuraxō áry ogueraa 'rā Israel kuery re oikuaa pota aguā, SENHOR renonde oike nhavō.

³¹ — Ha'e sacerdote pegua manto reve guarā ma rejapo avi 'rā kamixa puku áry guarā hovy va'e gui anho. ³² Mbyte py ma oī 'rā ijaju'y kuarā. Ha'e va'e hembe 'y rupi remoana 'rā tupyja ipererī'i va'e rami, oxoro e'ý aguā.

³³ Ha'e gui kamixa puku árygua rembe ha'e javi rupi rembojega 'rā yvyra'a ra'angaa hovy va'e, púrpura ha'e pytā va'e gui ojapo pyre py. Mbyte rupi remoī avi 'rā opará'i va'erā ouro guigua.

³⁴ Kamixa puku árygua rembe ha'e javi rupi oī 'rā peteī opará'i va'e ouro guigua, ha'e peteī yvyra'a ra'angaa, ha'e gui amboae opará'i va'e ouro guigua, ha'e amboae ju yvyra'a.

³⁵ Ha'e va'e kamixa puku árygua py Arão onhemonde 'rā omba'eapo jave guarā, opará'i va'e onhendu aguā henda iky'a e'ý va'e py oike nhavō SENHOR renonde, ha'e oē ouvy rā guive, omano e'ý aguā.

³⁶ — Rejapo avi 'rā ipe va'e ouro ete'i guigua. Ha'e va'e ma rembopara 'rā "Iky'a e'ý va'e SENHOR peguarā" he'ia py, kuā reguarā omboparaa rami avi.

³⁷ Ha'e va'e re rejokua 'rā peteī ixā hovy va'e reve akā regua oīa rami avi, akā regua renonde ete py oī aguā.

³⁸ Ha'e va'e oī 'rā Arão rova áry, Israel kuery mba'emo iky'a e'ý va'e ome'ē va'ekue ogueraa vy ojeky'a'o uka aguā, hexe oī e'ý aguā jejavya. Ha'e nunga rupi oī riae 'rā Arão rova áry, ome'ē mbyre ombovy'a aguā SENHOR.

³⁹ — Rejapo 'rā kamixa puku ajukue iporāve va'e gui. Akā regua voi rejapo 'rā ajukue iporāve va'e gui, ha'e rā ku'akuaa ma ajukue ombopara va'e ojapoa rami 'rā rejapo.

⁴⁰ — Arão ra'y kuery pe rejapo 'rā kamixa puku, ku'akuaa ha'e akā regua, omboetea ha'e iporā aguā.

⁴¹ Ha'e va'e py ae 'rā remonhemonde nderyke'y Arão ha'e ta'y kuery. Hexe azeite remoī reve remboaxa 'rā xevygua sacerdote iky'a e'ý va'erā.

⁴² Rejapo avi 'rā ha'e kuery kaxōrā ijapu'a'i va'e ajukue iporāve va'e guigua ojao'i aguā ipire reia. Iku'a guive hi'u peve 'rā oī.

⁴³ Ha'e va'e ma Arão ha'e ta'y kuery omoī 'rā oguy nhemboaty oīaty py oike nhavō guarā, altar oīa py ovaē vy henda iky'a e'ý va'e py omba'eapo aguā, ha'e kuery re jejavya oī e'ý aguā omano e'ý aguā. Ha'e rami aguā aeja hekorā opa e'ý va'e, ha'e hamymino kuery ikuaije jevy va'e rekorā.

29

Levítico 8.1-36

¹ — Po rami 'rā rejapo xevygua sacerdote-rā remboaxa aguā. Reru 'rā peteī vaka ra'y ha'e mokoī vexe'i ivaikue rei e'ý va'e,

² ha'e gui mbojape ha'e mbojape'i imbovua revegua e'ý azeite reve omoapomo mbyre, ha'e gui mbojape'i imbovua revegua e'ý azeite reve omoaký mbyre. Trigo ku'ikue iporāve va'e gui 'rā rejapo.

³ Ha'e va'e ma peteī ajaka py 'rā remboyru reru aguā. Reru avi 'rā vaka ra'y ha'e mokoī vexe'i.

⁴ Ha'e gui rejapo 'rā Arão ha'e ta'y kuery oguy nhemboaty oīaty rokē py ovaē aguā rami. Jypy rejoi 'rā yy py.

⁵ Ha'e rire ijaorā reru vy remonhemonde 'rā Arão kamixa puku py, hi'árygua, sacerdote pegua manto ha'e pexo regua py. Ha'e gui reku'a jokua 'rā ku'axā manto reguarā ojapo porā mbyre py.

⁶ Inhakā áry ma remoī 'rā akā regua, ha'e akā regua áry ju 'rā remoī coroa iky'a e'ý va'e.

⁷ Ha'e gui azeite SENHOR pe nhomboaxaa aguā regua reru vy renhoē 'rā inhakā áry. Ha'e rami vy 'rā remoī.

⁸ Ha'e va'e rire Arão ra'y kuery ju 'rā remonhemboja. Ha'e kuery re ma remoī 'rā kamixa puku.

⁹ Arão ha'e ta'y kuery re ku'akuaa ha'e akā reguarā reimama 'rā imoiny, sacerdote ikuai aguā guekorā opa e'ý va'e rupi. Ha'e rami py remboaxa 'rā Arão ha'e ta'y kuery xevy pegua sacerdote-rā.

* 28:30 Urim ha'e Tumim ma sacerdote kuery mba'ekuaa-a oguereko va'ekue (Números 27.21).

¹⁰ — Ha'e oguy nhemboaty oĩaty renonde peru 'rã vaka ra'y. Mymba akã re Arão ha'e ta'y kuery omoĩ 'rã opo.

¹¹ Rejyryvi kyxĩ 'rã SENHOR renonde, oguy nhemboaty oĩaty rokẽ py ae.

¹² Ha'e gui vaka ra'y ruguy rejopy vy nekuã py reikyty 'rã altar rakua ikuai va'e re. Ha'e rã huguy rembyrekue ma renhoẽ 'rã altar vyppy rupi.

¹³ Ha'e gui reipe'apa 'rã ikyra hyepy rupi ojao'i imoiny va'ekue, ipy'akue, mokoĩve ipyky raxĩ ha'e ikyra hexe oĩ va'ekue. Ha'e nunga reappya 'rã altar áry.

¹⁴ Ha'e rã vaka ra'y ro'okue, ipire ha'e hye po'ikue ma pendekoa gui mombyry'i 'rã reapy. Ha'e va'e ma jejavya regua ome'ẽmby.

¹⁵ — Ha'e rire ma peru 'rã peteĩ vexe'i. Ha'e ramo inhakã re Arão ha'e ta'y kuery omoĩ 'rã opo.

¹⁶ Vexa'i rejyryvi kyxĩ 'rã, ha'e huguy remboyru vy renhoẽ 'rã altar vyvry jovaive rupi.

¹⁷ Vexa'i reipe'ã vy remboa'y-a'y 'rã. Hyepy ha'e hetymague rejoipa vy remoĩ 'rã ipẽgue ha'e inhakãgue áry.

¹⁸ Ha'e rami meme 'rã vexa'i reapy altar áry. SENHOR pe reapy reve reme'ẽ 'rã, heakuã porã rã ojou porã aguã, SENHOR pe oapy vy ome'ẽ mbyrã.

¹⁹ — Ha'e gui amboae vexa'i rejopy ramo inhakã áry Arão ha'e ta'y kuery omoĩ 'rã opo.

²⁰ Rejyryvi kyxĩ 'rã vexa'i. Ha'e gui huguykue rejopy vy reikyty 'rã Arão ha'e ta'y kuery nambi oiporu kuaa regua apy re, ha'ekue rami ae avi ikuã guaxu ha'e ipyxã guaxu oiporu kuaa regua re. Huguy rembyrekue ma renhoẽmba 'rã altar vyvry jovaive rupi.

²¹ Rejopy 'rã huguy altar áry oĩ va'e ha'e azeite SENHOR pe nhomboaxaa aguã regua, ha'e remboavy'pa 'rã Arão ha'e ijao re, ta'y kuery re ha'e ta'y kuery hexeve ikuai va'e ao re. Ha'e reiky'a'o uka aguã ijao reve, ha'e ta'y kuery hexeve ikuai va'e voi ha'e kuery ao reve.

²² — Ha'e gui reipe'a 'rã vexa'i kyrakue ha'e huguai kyrakue, ikyra hyepy rupi ojao'i imoiny va'ekue avi, ipy'akue, mokoĩve ipyky raxigüe, ikyra hexe oĩ va'e ha'e hi'ugue oiporu kuaa regua, mba'eta vexa'i py reiky'a'o uka aguã,

²³ peteĩ mbojape imbovua revegua e'y, ha'e mbojape'i azeite revegua ha'e mbojape'i kyrĩve'i va'e SENHOR renonde oĩ va'e gui.

²⁴ Ha'e nunga ha'e javi reme'ẽ 'rã Arão ha'e ta'y kuery po py. Oupi reve ombovava 'rã SENHOR renonde ome'ẽ mbyrã.

²⁵ Ha'e gui ipo gui rejopy ju vy reapy 'rã altar áry. SENHOR pe 'rã reme'ẽ. Heakuã porã rã ojou porã aguã, SENHOR pe oapy vy ome'ẽ mbyrã.

²⁶ — Ha'e gui rejopy 'rã vexa'i reiky'a'o uka va'erã poxi'akue. Ha'e va'e ma Arão ojeko'y'a'o uka aguã. Oupi reve ombovava 'rã SENHOR renonde ome'ẽ mbyrã. Ha'e nunga ma ndevy guarã.

²⁷ Reiky'a'o va'ekue reupi vy rembovava reve reme'ẽ 'rã, ipoxi'akue ha'e hetyma rovaikue'i rembovava reve reme'ẽ va'ekue 'u ro'okue. Ha'e va'e ma vexa'i reiky'a'o uka rã guarã gui reipe'a 'rã Arão ha'e ta'y kuery peguarã.

²⁸ Ha'e va'e ma Israel kuery ome'ẽ riae 'rã Arão ha'e ta'y kuery pe, sacerdote peguarã ramo. Ha'e nunga Israel kuery ome'ẽ 'rã SENHOR pe peteĩ rami ikuai reguarã.

²⁹ — Ha'e ao iky'a e'y va'e Arão oiporu va'ekue ma ta'y kuery pe ju 'rã peme'ẽ 'rã ndoikovoi rire, ha'e kuery ju oiporu aguã ha'e kuery re azeite omoĩa reve SENHOR pegua sacerdote-rã omboaxaa rã.

³⁰ Ta'y hekovia sacerdote-rã oiko aguã ma sete ára re 'rã onhemonde ha'e va'e py, oguy nhemboaty oĩaty py oike vy henda iky'a e'y va'e py omba'eapo aguã.

³¹ — Rejopy 'rã vexa'i SENHOR pe nhomboaxaa aguã regua, ha'e vy ho'okue rembojy 'rã henda iky'a e'y va'e py.

³² Ha'e va'e ro'okue ma Arão ha'e ta'y kuery ho'u 'rã okuapy, ha'e oguy nhemboaty oĩaty rokẽ py ajaka py mbojape remboyru va'ekue oĩ va'e gui.

³³ Ha'e kuery ho'u 'rã tembi'u teko vai ojao'i ukaa aguã regua, sacerdote-rã oiky'a'o uka ha'e omboaxaa aguã. Ha'e va'e tembi'u ma iky'a e'y va'e ramo amboae regua ndo'ui 'rã.

³⁴ Xapy'a rei ko'ẽgue peve ri hembyre xo'o e'y vy mbojape nhomboaxaa aguã regua, reappya 'rã tata py. Nda'evei pe'u aguã, iky'a e'y va'e ramo.

³⁵ — Ha'e rami rejapo 'rã Arão ha'e ta'y kuery pe. Ajapo ukaague rami meme 'rã rejapo. Sete ára re 'rã remboaxa sacerdote-rã.

³⁶ Ko'ẽ nhavõ rereko katu 'rã peteĩ vaka ra'y jejavya regua ome'ẽ mbyrã, imbogue arã. Ha'e va'e py reiky'a'o uka 'rã altar, ha'e va'e rire jejavya regua ome'ẽmby py teko vai rejao'i uka aguã. Hexe azeite remoĩ 'rã SENHOR peguarã remboaxa aguã.

³⁷ Sete ára re 'rã reiky'a'o uka altar, remboaxa vy. Ha'e rami rire altar iky'a e'y ete va'erã, ha'e hexe ovy va'e ma guive rã iky'a e'y va'e avi 'rã opyta.

Números 28.1-8

³⁸ — Pova'e ma reme'ẽ riae 'rã altar áry: ko'ẽ nhavõ mokoĩ vexa'i ra'y peteĩ ma'etỹ oguereko va'e.

³⁹ Peteĩ vexa'i ra'y reme'ẽ 'rã aje'ivekue, ha'e rã amboae ma kuaray oike jave.

⁴⁰ Peteĩ vexa'i ra'y reve reme'ẽ avi 'rã peteĩ ryru trigo ku'ikue iporãve va'e peteĩ litro azeite ombota pyre reve omoapomo mbyre, ha'e renhoẽ 'rã peteĩ litro vinho.*

* 29:40 Apy "peteĩ ryru" 'ea py ma mokoĩ litro va'e jaikuaa aguã, trigo ri "rã peteĩ quilo va'e.

- 41 Ha'e gui amboae vexa'i ra'y ma kuaray oike jave rejuka 'rã aje'ive guare rami tembi'u reme'ê aguã mba'emo renhoê reve. Ha'e nunga ma heakuã iporã rã SENHOR ojou porã aguã, ixupe oapy vy ome'êmbu.
- 42 Ha'e rami ae araka'e rã peve peneramymino kuery mba'emo oapy vy ome'ê 'rã, oguy nhemboaty oiaty rokê py xee SENHOR renonde. Ha'e py ae xee arovaexi 'rã, ndereve xeayvu aguã ha'e py.
- 43 Ha'e py aeaju 'rã Israel kuerya py, xerexakãa py aiky'a'o aguã.
- 44 Ha'e rami vy aiky'a'o 'rã oguy nhemboaty oiaty ha'e altar, ha'e gui Arão ha'e ta'y kuery guive, xevygua sacerdote ikuai aguã.
- 45 Xee aiko 'rã Israel kuery mbyte rupi, Tuuete aiko 'rã.
- 46 Ha'e rami rire ha'e kuery oikuaapa 'rã xee ae SENHOR Tuuete aikoa, Egito vyv gui araa jepe va'ekue, ha'e kuery mbyte rupi aiko aguã. Xee ma SENHOR ha'e kuery Ruete.

30

Êxodo 37:25-28

- 1 — Ha'e gui rejapo avi 'rã petei altar heakuã porã va'e peapy atyrã. Yvyra acácia gui 'rã rejapo.
- 2 Ipuku-a ma meio metro va'erã, ha'e ipya ma ha'e rami ae avi 'rã, ijapy irundy va'e. Ha'e rã yvatea ma mokoï metro 'rã. Hexe hakua ikuai va'e ma hexeve petei'rami 'rã rejapo.
- 3 Ouro ete'i py renhovã 'rã yvatevea rupi, imbopyarã jovaive re ha'e hakua ikuai va'e. Ijyvry rupi rembojega 'rã ouro guigua py.
- 4 Ha'e gui rembojegaague yvyve'i rejapo avi 'rã mokoï inhapyi va'e ouro guigua. Jovaive re 'rã remoi. Ha'e va'e rupi remboaxa 'rã yvyra po'i'i altar peraa aguã.
- 5 Yvyra po'i'i ma rejapo 'rã acácia gui, ha'e renhovã 'rã ouro py.
- 6 Altar ma remoi 'rã xeayvu ryruru renonde ajukue okê regua oi va'e kyvõ rami, teko vai ombogueaty xeayvu ryruru oi va'e rexei. Ha'e py ndereve ai jepi 'rã.
- 7 Ha'e va'e altar áry ma Arão oapy 'rã heakuã porã va'e, ko'ê tataendy omoatyrõ nhavõ.
- 8 Ha'e gui pytũ'i jave tataendy omoendy vy ha'ekue rami ae ju 'rã oapy. Ha'e rami py heakuã porã va'e oi riaa 'rã SENHOR renonde, peneramymino jevy-jevy jave guarã.
- 9 Ha'e va'e áry ma nda'evei reapy aguã amboae ramigua heakuã porã va'e, nei amboae regua ome'êmbu nda'evei hi'áry reapy reve reme'ê aguã, nei mba'emo ra'yigue voi. Nda'evei avi mba'emo hi'áry renhoê reve reme'ê aguã.
- 10 Ma'etãa nhavõ petei'gue'i altar áry hakua ikuai va'e re Arão ojao'i uka 'rã pejevavyague mymba ojuka va'ekue ruguy py. Ma'etãa nhavõ petei'gue'i ojao'i uka 'rã hi'áry. Ha'e va'e ma SENHOR pegua iky'a e'y ete va'e, peneramymino jevy-jevy peguarã.

Guekovia perãta ome'ê aguã re ijayvuague

- 11 Ha'e gui SENHOR aipoe'ive ju Moisés pe:
- 12 — Ha'e gui Israel kuery reipapa ramo ma petei-tei SENHOR pe ome'ê 'rã guekovea repyrã oipapaa jave. Ha'e kuery mbyte imoingo axyarã oiko e'y aguã, reipapa ma rire.
- 13 Reipapa va'e ma guive rã ome'ê 'rã po rami: hatã'i va'e seis grama va'e, henda iky'a e'y va'e py oiporupy ipoyi va'e rami (ha'e va'e regua ma doze gramas ipoyia). Seis grama va'e ae 'rã ome'ê SENHOR pe.
- 14 Vinte ma'etã va'e guive tujakue peve ojepapa uka vy SENHOR pe ome'ê 'rã ha'e va'e regua ae.
- 15 Oguerekopa va'e ma ome'ê aguã va'ekue gui nome'evei 'rã, nei iporiaukue'i voi mbovyve'i nome'ei 'rã SENHOR pe, pendereko vaiague pejao'i uka aguã.
- 16 Pejopy 'rã perãta pejao'i uka aguã repy Israel kuery gui, ha'e peme'ê 'rã oguy nhemboaty oiaty rupi omba'eapo va'e pe. Ha'e va'e ma pejapo 'rã SENHOR renonde Israel kuery re ima'endu'aa aguã, pendereko vaiague pejao'i uka vy.

Êxodo 38.8

- 17 Ha'e gui SENHOR aipoe'ive ju Moisés pe:
- 18 — Overa va'e gui rejapo 'rã petei yy mbopyarã, mba'emo pejoï aguã. Hendarã voi ejapo overa va'e gui avi. Ha'e va'e ma remoi 'rã oguy nhemboaty oiaty ha'e altar oi va'e mbyte py. Ha'e va'e py remoi 'rã yy.
- 19 Ha'e va'e py ma Arão ha'e ta'y kuery ojoi 'rã opo ha'e opy.
- 20 Oguy nhemboaty oiaty py ha'e kuery oike vy yy py ojepoei, ha'e opy ojoi 'rã omano e'y aguã, ha'e altar oia py ovaê vy mba'emo omoï aguã, ha'e SENHOR pe omoendy aguã mba'emo oapy vy omboaxa va'erã.
- 21 Opo ha'e opy ha'e kuery ojoi 'rã omano e'y aguã. Ha'e rami aguã oi 'rã hekorã opa e'y va'e, ha'e kuery ha'e hamymino kuery ikuai jevy va'e peguarã.

Êxodo 37.29

- 22 Ha'e gui SENHOR aipoe'ive ju Moisés pe:
- 23 — Ha'e gui heakuã porãve va'e regua reru 'rã mirra rykue mboapy meme quilos poyikue, cinamomo heakuã porã va'e ma mbyte rupi 'rã mboapy quilos va'e, ha'e gui cálamu heakuã porã va'e ma mboapy quilos va'e avi 'rã,
- 24 ha'e cássia ma mboapy meme quilos va'e henda iky'a e'y va'e py poyi oiporu va'ety rami ipoyi va'e, ha'e gui azeite oliveira guigua ma petei galãu va'e.
- 25 Ha'e nunga gui ma rejapo 'rã azeite iky'a e'y va'e SENHOR pe nhomboaxa aguã regua, heakuã porã va'e apoa rembiapo. Ha'e va'e nunga ma azeite iky'a e'y va'e SENHOR pe nhomboaxa aguã regua.
- 26 Ha'e va'e ma oguy nhemboaty oiaty re 'rã remoi remboaxy vy, ha'e gui xeayvu aeja va'ekue ryruru re,
- 27 mesa hembiporu ha'e javi reve, tataendy 'y hembiporu ha'e javi reve, altar heakuã porã va'e oapyaty,

²⁸ altar mba'emo oapyaty hembiporu ha'e javi reve, ha'e hy'a re remoī avi 'rā, henda re guive.

²⁹ Ha'e nunga ha'e javi ma SENHOR peguarā remboaxa 'rā ha'e rami, iky'a e'y'ete va'e opyta aguā. Opa mba'e hexe ovy va'e avi 'rā iky'a e'y' va'e opyta.

³⁰ Azeite ma Arão ha'e ta'y kuery re avi 'rā remoī, xeivygua sacerdote-rā remboaxa vy.

³¹ Ha'e aipo're 'rā Israel kuery pe: “Kova'e ma azeite iky'a e'y' va'e xee SENHOR pe nhomboaxaa aguā regua, pende kuery ha'e araka'e rā peve ikuai va'e peguarā.

³² Nda'evei ava sacerdote e'y' va'e re pemoī aguā, neī ha'e ramigua nda'evei pejapo aguā ha'e va'e guigua gui ju. Iky'a e'y' va'e vy iky'a e'y' ae 'rā pendeivy kuery pavē pe.

³³ Ha'e va'e azeite ramigua rive amongue ojapo, ha'e e'y' vy amboae regua re omoī va'ekue ma oipe'aa 'rā heta va'e kuerya gui”, 're 'rā ha'e kuery pe.

Heakuā porā va'e iky'a e'y' va'erā ojapo ukaague

³⁴ SENHOR aipoe'ive ju Moisés pe:

— Ejopy joo ramigua e'y'-e'y' heakuā porā va'e irūrā estoraque, ônica ha'e gálbano. Ha'e va'e ma remboje'a 'rā heakuā porā va'e re, peteī-teī guigua peteī rami meme 'rā ipoyi va'e.

³⁵ Ha'e va'e gui rejapo 'rā heakuā porā va'e, ha'e nunga apoa rembiapo rami. Remoīrū 'rā juky reve, ha'e gui irūrā e'y' va'e ha'e iky'a e'y' opyta aguā.

³⁶ Ha'e va'e regua amongue ma remongu'i vy remoī 'rā oguy nhemboaty oīaty py xeayvu ryrū oī va'e rexei. Ha'e va'e ma peē kuery pavē pe iky'a e'y' va'erā ete.

³⁷ Ha'e va'e heakuā porā va'e pejapo va'e rami ju nda'evei pendejeupe guarā pejapo aguā. Iky'a e'y' va'e ma SENHOR pegua ae 'rā.

³⁸ Amongue ha'e ramigua gueakuārā rive ojapo va'e ma oipe'aa 'rā heta va'e kuery mbyte gui.

31

Éxodo 35.30-36.1

¹ Ha'e gui SENHOR aipoe'ive Moisés pe:

² — Aenoī hery rupi Judā regua Uri ra'y Bezalel, Hur ramymino.

³ Ha'e va'e re ma xenhe'ē amoī amo'arandu ha'e mba'emo aikuaa uka vy, tembiapo ha'e javi ojapo kuaa aguā rami,

⁴ o'arandu rupi mba'emo ra'angaa ojapo aguā ouro, prata ha'e overa va'e gui,

⁵ ha'e ita jeguarā ombopo porā aguā, vyvra gui guive mba'emo ojapo aguā, ha'e tembiapo porā ha'e javi rupi omba'eapo aguā.

⁶ Ha'e va'e irūrā ma amoī Dā regua Aisamaque ra'y Aoliabe. Ha'e avakue mba'emo ojapo kuaa va'e ha'e javi pe amo'arandu ajapo uka va'e ha'e javi ojapo kuaa aguā:

⁷ oguy nhemboaty atyrā, ha'e xeayvu ryrurā, ha'e imbotya teko vai ombogue atyrā, ha'e oguy rupi tembiporu oī va'erā ha'e javi:

⁸ mesa hembiporu ha'e javi reve, tataendy 'y ouro ete'i guigua hembiporu ha'e javi reve, altar heakuā porā va'e oapy atyrā,

⁹ altar mba'emo oapy atyrā hembiporu ha'e javi reve, hy'a guaxu henda reve,

¹⁰ ao ipereri'i va'e oipoka pyre, ao iky'a e'y' va'e sacerdote Arão ha'e ta'y kuery peguarā sacerdote ikuai aguā,

¹¹ azeite SENHOR pe nhomboaxaa aguā regua, ha'e heakuā porā va'e henda iky'a e'y' va'e pyguarā. Ha'e kuery ma xee ajapo ukaague rami meme 'rā ojapo.

Sábado ára ha'e itape ayvu oīa re ijayvuague

¹² Ha'e gui SENHOR aipoe'ive ju Moisés pe:

¹³ — Israel kuery pe ndeayvu vy aipo'ere 'rā: “Pendekuai 'rā xeivygua sábado ára pyguarā aeja va'ekue rupi. Mba'eta xee ha'e peē kuery reve guarā aeja peikuaa aguā, peneramymino kuery araka'e rā ikuai va'erā pe guive, xee ae SENHOR pendeky'a'oa aikoa peikuaa aguā.

¹⁴ Ha'e nunga rupi ae pendekuai 'rā sábado ára pyguarā aeja va'ekue rupi, mba'eta iky'a e'y' va'e pēvy. Ha'e rā ha'e va'e ára py onhemongy'a va'e ma omano 'rā. Ha'e va'e ára mba'emo ojapo nho va'e oipe'aa 'rā heta va'e kuery mbyte gui.

¹⁵ Seis ára re 'rā pemba'eapo. Ha'e rā sete araa ma sábado SENHOR pegua iky'a e'y' va'e pepytu'u aguā. Sábado ára py mba'emo ojapo va'e omano 'rā.

¹⁶ Ha'e nunga rupi Israel kuery sábado ára py ikuai 'rā ha'e rami, xereve guarā ajapo va'ekue opa e'y' va'e re ima'endu'a reve araka'e rā peve.

¹⁷ Ha'e nunga xee ha'e Israel kuery reve guarā aeja araka'e rā peve guarā ha'e kuery oikuaa aguā. Mba'eta seis ára re xee SENHOR ajapo raka'e yva ha'e yvy. Ha'e gui sete araa py ma apytu'u mba'eve ndajapovei vy”, 're 'rā ha'e kuery pe — he'i.

¹⁸ Ha'e gui Moisés reve SENHOR Sinai vytyt'áry ijayvupa ma rire ixupe ome'ē mokoī itape ijayvu oīa. Ha'e va'e itape ma Nhanderuetete ha'e ae okuā py ompopara va'ekue.

32

Deuteronomio 9.6-21

¹ Ha'e gui vytyt'áry Moisés ndoui ete maa heta va'e kuery oexa vy oupa okuapy Arão-a py. Ha'e vy aipoe'i ixupe:

— Epu'ã ke, ejapo tuuete ramigua nhanerenonde oo va'erã. Ha'e gui Moisés Egito vvy gui nhanerenõẽ va'ekue ri ndajaukaui mba'e pa hexe oiko raka'eague. *

² Arão ombovai:

— Pemboipa ha'vy namixã ouro guigua pendera'yxy nambi gui, pendera'y kuery ha'e penderajy kuery gui. Ha'e vvy peru ju — he'i.

³ Ha'e ramo heta va'e kuery ha'e javi onambi gui namixã omboipa vvy ogueru Arão-a py.

⁴ Ha'e kuery po gui ouro ojopy vvy omoaty'rõ tembiporu py. Tata py omboy rire ojapo peteĩ vaka ra'y. Ha'e ramo ha'e kuery aipoe'i okuapy:

— Israel kuery, kova'e ae ma penderuete Egito vvy gui penerenoẽ va'ekue — he'i okuapy.

⁵ Ha'e nunga Arão oexa vvy ta'angaa renonde ojapo peteĩ altar. Ha'e vvy ijavyu atã reve aipoe'i:

— Ko'ẽ ramo ma oiko 'rã ngaru SENHOR pegua — he'i.

⁶ Ko'ẽ jevy iko'ẽmba okuapy vvy ha'e nunga pe mba'emo oapy vvy ome'ẽ okuapy, peteĩ rami ikuai regua avi. Ha'e vvy oguapy okuapy okaru ha'e oy'u aguã, ha'e gui opu'ã ma okuapy ovy'a aguã.*

⁷ Ha'e ramo SENHOR aipoe'i Moisés pe:

— Tereo, eguejy ju, mba'eta neretarã kuery Egito gui renoẽ va'ekue ojevavya ju ma.

⁸ Ha'e kuery ojepe'a pojava tape xee aeja va'ekue gui. Ojeupe guarã ojapo uka okuapy vaka ra'y tata py. Ha'e va'e anho omboete vvy ixupe mba'emo ome'ẽ okuapy. Ha'e vvy aipoe'i: "Israel kuery, kova'e ae ma penderuete Egito vvy gui penerenoẽ va'ekue", he'i va'ekue.

⁹ SENHOR aipoe'ive ju Moisés pe:

— Ha'e kuery aexa rã inhakã ratã okuapy.

¹⁰ Aỹ ma xereja, xepoxya rupi tareko amokanhymba peve, ha'e gui ndegui ju ajapo 'rã peteĩ regua heta ikuai aguã rami.

Êxodo 32.30-35; Deuteronomio 9.25-29

¹¹ Ha'e ramo Moisés ojerure SENHOR nguete pe. Ha'e vvy aipoe'i:

— Mba'e re tu ndepoxy ri ndevyguia kuery opa mba'e re ndepo'akaa rupi Egito vvy gui rerupa va'ekue rovai?

¹² Mba'exa tu ha'eve 'rã Egito pygua kuery ijavyu vvy "Apy gui ma tuuete ogueraapa vvyty re ojupaka aguã, ha'e vvy áry gui omokanhymba aguã", he'i okuapy aguã? Ndepoxya rupi e'ỹ ke eiko, ejapo vai eme ndevyguia kuery rovai.

¹³ Nema'endu'a ke Abraão, Isaque ha'e Israel re. Ha'e kuery nerembiguai ikuai va'e pe ndee ae rery rupi reura vvy "Amboeta 'rã neramymino kuery jaxy-tata hetaa rami. Ha'e gui kova'e vvy ha'e javi xeyvuuague ame'ẽ 'rã neramymino kuery rekoarã araka'e rã peve", re va'ekue — he'i.

¹⁴ Ha'e rami rã ojeupegua kuery pe SENHOR ndojapoi ojapo vai aguã re ijavyuague.

¹⁵ Ha'e gui Moisés vvyty gui ojey vvy opo py ogueroguejy mokoĩ itape Nhanderuete avvu oĩa. Ha'e va'e itape ma jovaive re ipara oiny va'e.

¹⁶ Itape ma Nhanderuete rembiapo, iparaa oĩ va'e ma Nhanderuete ae ombopara va'ekue itape re.

¹⁷ Ha'e gui Josué ma heta va'e kuery ojapukaia oendu vvy aipoe'i Moisés pe:

— Joe opu'ãmbaa py hevovo rei nhendu okuapy ha'e kuery ikuai py.

¹⁸ Moisés ombovai:

— Joe ipo'aka va'ekue onhendua e'ỹ, neĩ oity pyre onhendu e'ỹ guive. Oporaei va'e rima aendu — he'i.

¹⁹ Heta va'e kuery ikuai py ovaẽ rai'ĩ vvy oexa vaka ra'y ra'angaa hi'ãi rã, ha'e ojeroky va'e. Ha'e rami vvy ipoxya oendu vvy itape omombo vvy ombo'ypa vvyty vvy'iry.

²⁰ Ha'e gui vaka ra'y ojapo pyre ojopy vvy oapypa tata py. Omongu'i porã'i vvy omoaĩ py áry rupi. Ha'e rami vvy Israel kuery pe ome'ẽ oy'u aguã.

²¹ Moisés oporandu Arão pe:

— Mba'e tu ha'e kuery ojapo ndere ha'e rami ete ojevavya aguã rami rejapo aguã?

²² Arão ombovai:

— Xeruvixa, ndevai eme xevy. Reikuaa ma ha'e kuery py'a re teko vai anho oĩa.

²³ Mba'eta xevy aipoe'i okuapy: "Ejapo tuuete orey orerenonde oo va'erã. Ha'e rami avi ava Moisés Egito vvy gui nhanerenõẽ va'ekue ri nhande ndajaukaui mba'e pa hexe oiko raka'ea", he'i okuapy va'ekue.

²⁴ Ha'e ramo aipoa'e ha'e kuery pe: "Ouro pereo va'e ke peipe'a ha'e peme'ẽ xevy", re. Ha'e gui ma tata py xee amombo ramo rive kova'e vaka ra'y ra'angaa oiko — he'i.

Tuuete ramigua mboetea kuery Moisés ojuka ukapaague

²⁵ Ha'e ramo Moisés oexa rã heta va'e kuery ndojejokoi okuapy, ha'e kuery ae oakã gui ikuai aguã rami Arão oja rire oximba aguã rami, ngovaigua kuery mbyte ae teĩ.

²⁶ Ha'e rami vvy Moisés opu'ã ho'amy ha'e kuery ikuai py oikea py. Ha'e vvy aipoe'i:

— SENHOR-a katyguia peiko va'e ke peju xea py — he'i. Ha'e gui oĩa py ono'õmba jogueruvy Levi ramymino kuery ha'e javi.

²⁷ Ha'e va'e kuery pe aipoe'i:

— Po rami ma SENHOR Israel kuery ruete aipoe'i: "Peteĩ-teĩ pemoĩ ke pendekyxe pendeku'a re. Peaxa-axa 'rã heta va'e kuery ikuai ha'e hokẽ ha'e javi rupi. Peteĩ-teĩ pejuka 'rã penderivy, peneirũ ha'e pendea katy'igua", he'i.

²⁸ Ha'e ramo Moisés ojapo ukaague rami Levi ramymino kuery ikuai. Ha'e va'e ára rānda'u três mil avakue ho'a heta va'e kuery regua,

²⁹ Moisés aipoe'i rire: “Kova'e ára ma SENHOR pe anho 'rā pendekuai, peteĩ-teĩ pendera'y kuery e'ỹ vy penderregua kuery rovai peiko teĩ, kova'e ára guive penemoingo porã ju aguã”, he'i rire.

Éxodo 32.11-14; Deuteronomio 9.25-29

³⁰ Ko'ê jevy Moisés aipoe'i heta va'e kuery pe:

— Peẽ kuery ma pejevavy vaipa. Ha'e rami teĩ aỹ ma aa ju ta SENHOR-a py, pejevavyague ambogue ukapa aguã — he'i.

³¹ Ha'e gui Moisés SENHOR-a py ju oo. Ha'e vy aipoe'i:

— Ma'ê, kova'e kuery ojevavy vaipa okuapy nguueterã ouro guigua ojapoa py.

³² Aỹ ma ajerure ojevavyague rembogue aguã re. Ha'e rami e'ỹ vy embogue xerery kuaxia rembopara va'ekue gui — he'i.

³³ Ha'e ramo SENHOR aipoe'i Moisés pe:

— Xerovai ojevavy va'ekue anho 'rā ambogue xekuaxia gui.

³⁴ Ha'e rā tereo aỹ, eraapa ha'e kuery xeayvuague katy. Xevyguã anjo oo 'rā nerenonde. Ha'e rami avi xee ajekuaa ára ambopagapa 'rāe xevy ojevavy va'ekue — he'i.

³⁵ Ha'e rami vy SENHOR omoingo axy, Arão pe ha'e kuery vaka ra'y ra'angaa ojapo uka rire.

33

Ha'e kuery renonde Nhanderuede guigua anjo omondouka aguã re ijayvuague

¹ Ha'e gui SENHOR aipoe'i ju Moisés pe:

— Tapeo apy gui ndee ha'e Egito yvy gui reipe'apa va'ekue ha'e javi reve. Peguata 'rā yvy Abraão pe, Isaque ha'e Jacó pe ame'ê aguã re aura reveague katy, “Neramymino kuery pe 'rā ame'ê”, ha'eague rami vy.

² Ha'e rami vy peteĩ anjo nerenonde amondouka vy aipe'apa 'rā cananeu kuery, amorreu, heteu, ferezeu, heveu ha'e jebuseu kuery.

³ Tapeo yvy kamby ha'e ei oata e'ỹa katy. Ha'e rami avi peneakã ratã ete ramo xee ma ndaai 'rā peẽ kuery reve, tape rupi apomomba e'ỹ aguã — he'i.

⁴ Ha'e rami ijayvu rā heta va'e kuery oendu vy ojae'opa okuapy, ojee jegua omoĩ va'ekue omboipa guive,

⁵ mba'eta Moisés pe SENHOR aipoe'i rire:

— Aipo'ere ke Israel kuery pe: “Peẽ kuery peneakã ratã ete va'e. Xapy'a'i penembyte aa teĩ ma apomokanhymba 'rā. Ha'e nunga rupi pendejegui pemboipa jegua pemoĩ va'ekue. Ha'e ramo 'rāe aikuaa mba'pe pa ajapo aguã”, 're 'rā ha'e kuery pe — he'i va'ekue.

⁶ Ha'e rami rā Israel kuery omboipa jegua oiporu va'ekue ha'e javi, Horebe yvyty re ovaẽa ára guive nomoĩvei.

⁷ Moisés ma ha'e ae'i oĩ aguã oo'i ogueraa 'rā heta va'e kuery ikuaiã gui mombyry'i. Ha'e pyju 'rā omopu'ã. Ha'e va'e pe “Oguy nhemboaty oĩaty” 'ea 'rā. SENHOR re ojerovia va'e ha'e javi 'rā oje'oi oguy nhemboaty oĩaty katy. Heta va'e kuery ikuaiã gui mombyry'i oĩ.

⁸ Oo'i oĩa katy Moisés oẽ ovy ramo heta va'e kuery peteĩ-teĩ opu'amba 'rā okuapy ngoo rokẽ py, hakykue katy gui oma'ê 'rā okuapy oo py oike peve.

⁹ Moisés opy oĩ ramove arai opu'ã va'e oguejy 'rā hi'áry, oo rokẽ py ju 'rā opyta oiny. Ha'e rami vy SENHOR ijayvu 'rā Moisés reve.

¹⁰ Pavẽ rei oexa okuapy arai opu'ã va'e okẽ py opyta rā. Ha'e rami vy ae peteĩ-teĩ ngoo rokẽ py opu'amba 'rā okuapy SENHOR omboete vy.

¹¹ Moisés reve SENHOR ijayvu 'rā oiny jova re oma'ê reve oirũ reve ijayvu va'e rami. Ha'e gui ma Moisés ojevvy ju 'rā heta va'e kuery ikuaiã py. Ha'e rā hembiguai kunumi Num ra'y Josué va'e ma oo'i gui ndojepe'ai oikovy.

Ha'e kuery reve Nhanderuede oiko aguã re Moisés ojerureague

¹² Ha'e gui Moisés aipoe'i SENHOR pe:

— Ndee ma “Eraa kova'e kuery”, 're teĩ xerery neremombe'ui guive mava'e ete'i pa xerupive remondouka 'rāa. Xevy aipo're: “Nderery rupi xee roikuaa, ha'e xerembixea rupi avi romboaxy”, 're va'ekue xevy.

¹³ Ha'e nunga rupi aỹ xemboaxya rendu ramo ajerure ndereko reikuaa uka aguã xevy, ha'e rami xee voi roikuaa porã aguã, ha'e ndee xemboaxya rupi ete aiko aguã. Ha'e nema'endu'a avi kova'e kuery ndevyguã ae ikuaiã re — he'i.

¹⁴ Ombovai:

— Xee ae ma aa 'rā ndereve, ha'e ame'ê 'rā nekane'õgua aguã — he'i.

¹⁵ Ha'e ramo Moisés aipoe'i:

— Xerupive ndereo reguai vy oremondouka eme apy gui.

¹⁶ Ha'e rami e'ỹ ramo mba'exa vy tu oikuaa ta nerembixea rupi xee ha'e ndevyguã kuery oremboaxya? Mba'eta orereve reiko ramo 'rāe yvy regua kuery reko rami e'ỹ orekuai.

Nhanderuede guexakãa oexa uka aguã re Moisés ojerureague

¹⁷ SENHOR aipoe'i Moisés pe:

— Xee ajapo avi 'rā ndeayvuague rami, mba'eta xee romboaxy, nderery rupi roikuaa guive.

¹⁸ Moisés ojerure:

— Ajerure nerexakãa rexa uka aguã xevy.

¹⁹ Ombovai ju:

— Ajapo 'rã nerenonde xeporayvua ha'e javi oaxa aguã rami, ha'e ndevy amombe'u porãve 'rã xerery SENHOR. Mba'eta amboaxy 'rã xee amboaxyxe va'e, xemboaxya rami areko 'rã ha'e rami arekoxe va'e.*

²⁰ Ha'e rã xerova ma nda'evei rexa aguã, mba'eta xerova oaxa va'e ndoikovei 'rã.

²¹ SENHOR aipoe'ive ju:

— Apy xeyvy'iry oĩ peteĩ itaova, ha'e va'e áry ndee reĩ aguã.

²² Ha'e gui xepo'akaa oaxa ramo ma xee romoĩ 'rã ita pa'ũ oĩ va'e py, ha'e xepo py rojao'i 'rã xee aaxa peve.

²³ Ha'e gui xepo aipe'a ramo xerexa 'rã, teĩ xekupe katy gui rive. Ha'e rã xerova ma nderexai 'rã.

34

Deuteronomio 10.1-5

¹ Ha'e gui SENHOR aipoe'i Moisés pe:

— Mokoĩ ju ke embopo itaperã jypy'i guare rami. Ha'e va'e re ma xee ambopara uka 'rã ayvu ha'ekue ae itape rembovopa va'e re oĩ va'ekue.

² Eiko katu ha'vy ko'ê rã guarã, aje'ivekue Sinai yvyty re reẽ ju aguã. Ha'e py ma rejexa uka jevy 'rã xevy, yvyty apyte áry ae.

³ Ha'e rami avi avave rei toẽ eme ndereve, neĩ toiko eme yvyty ha'e javi re. Ijyvyry rupi vexa'i, neĩ vaka ma voi nda'evei omongaru aguã — he'i.

⁴ Ha'e rami rã Moisés ombopo mokoĩ ita, jypy'i guare rami. Ha'e gui ko'ê rai ma jave opu'ã vy oẽ ju ovy Sinai yvyty re, SENHOR ijayvuague rami vy. Opo py ogueraa mokoĩ itaperã omoatyry va'ekue.

⁵ Ha'e gui SENHOR arai rupi oguejy vy hexeve hi'ai ha'e py. Ha'e rami vy guery SENHOR omombe'u porãve reve

⁶ oaxa ovy henonde re. Ha'e vy ijayvu:

— SENHOR, SENHOR Penderuete aiko va'e ma nhomboaxy va'e, poroayvu va'e, ipoxy voi e'y va'e, opa mba'e py iporayvupa va'e ha'e ojeroviapy aiko.

⁷ Mil-kue peneramymino ikuai peve areko 'rã xeporayvua rupi. Ambogue 'rã guive ha'e kuery reko vaia, ha'evei'ya rami ikuai ha'e ojejavya ha'e javi. Ha'e rami avi heko vai va'e ma nambopaga e'y'i 'rã. Ha'e rami vy tuu kuery reko vaiague regua ma ta'y kuery ha'e hamymino kuery re ju 'rã ambou, mboapya ha'e irundyia ikuai peve — he'i.

⁸ Ha'e rami SENHOR ijayvu ramove Moisés yvy py guenapy'ã re oĩ vy omboete.

⁹ Ha'e vy aipoe'i:

— SENHOR, xapy'a rei aỹ nerembiexa rupi xemboaxy ri vy eiko ha'vy ore kuery mbyte rupi. Ore kuery oreakã ratã ete va'eri emboguepa ke orereko vaiaty ha'e rofejavyague. Ha'e orereraa ndejeupe guarã.

Deuteronomio 7.1-5

¹⁰ Ha'e ramo aipoe'i:

— Xee ma heta va'e kuery reve xereve guarã ajapo vy ha'e kuery ha'e javi renonde 'rã ajapo mba'emo iporã ete va'e. Ha'e nunga iporã ete va'e ma neĩ peteĩ henda py, neĩ peteĩ regua renonde ma voi ndojapoi teri. Peva'e kuery mbyte reikoa va'e, ha'e kuery ha'e javi toexa xee SENHOR ajapo va'e, mba'eta mba'emo vaipa ete 'rã ajapo rombovai vy.

¹¹ Penderexarai eme ange xayvuague re. Mba'eta penerenonde gui amoxẽmba 'rã amorreu, cananeu, heteu, ferezeu, heveu ha'e jebuseu kuery.

¹² Ha'e peoa yvy re hekoa va'e kuery reve nda'evei pejapo aguã peteĩ rami pendekuai aguã, ha'e nungakue pendere oiko e'y aguã nhuã rami.

¹³ Ha'e rami 'rãgue py peitypa 'rã ha'e kuery altar ojapo va'ekue, pemopẽmba 'rã ita omopu'ã va'ekue, peake'o 'rã mba'emo ra'angaa ha'e kuery omopu'ã va'ekue.

¹⁴ Napemboetei 'rã amboae tuuete ramigua, mba'eta xee SENHOR pe "Oikuaa pota porã kuua va'e" 'ea. Xee aipota xere anho pejerovia.

¹⁵ Ha'e nunga rupi ha'e va'e yvy regua kuery reve pejapo eme peteĩ rami pendekuai aguã. Mba'eta ha'e kuery nguete kuery mboetea rupi mba'emo ome'ẽ, ha'e guymba ojukaa py penerenoĩ 'rã ha'e kuery reve pe'u aguã ojuka va'ekue ro'okue gui.

¹⁶ Ha'e py peo ri vy ha'e kuery rajy kuery pejopy 'rã pendera'y kuery ra'yxyrã. Ha'e gui tajy kuery nguete pe ju omboete vy ojapo 'rã pendera'y kuery voi ha'e kuery ruete omboete aguã rami.

¹⁷ Pejapo eme penderueterã mba'emo ryku gui rive.

Êxodo 23.14-19; Levítico 23.4-21,33-44; Deuteronomio 16.1-17

¹⁸ — Ha'e gui pejapo 'rã ngaru mbojape imbovua revegua e'y regua. Sete ára re 'rã pe'u mbojape imbovua revegua e'y xayvuague rami vy, jaxy abibe 'epy va'e reguarã aa'angaague rami, mba'eta abibe jaxy py ae Egito yvy gui peẽmba rive.

¹⁹ Jypygua itui'i va'ekue ma xemba'e meme. Penerymba kuery vaka ava, jypygua oiko va'ekue ma guive rã, ha'e vexa'i guigua voi.

²⁰ Ha'e gui mburika jypygua oiko va'ekue ma pendejeupe guarã pemboekovia 'rã vexa'i ra'y'i pejuka vy. Ha'e rã pendejeupe guarã napemboekoviaxe ri vy pemopẽ 'rã ijaju'y. Ha'e rami ae pendejeupe pemboekovia avi 'rã pendera'y kuery jypy'i itui va'ekue.

*

— Avave rei xerenonde ndoui 'rā mba'emo ome'ê va'erā reve'ȳ.

²¹ — Seis ára re pamba'eapo 'rā. Ha'e rā sete araa py ma pepytu'u 'rā penemba'eaty rupi pamba'eapoa gui, ha'e mba'emo pemono'ōa gui.

²² — Trigo pemono'ō ppy'ia ára py pejapo 'rā ngaru sete semana-a pygua, ha'e gui ma'et'ya opa nhavō ju mba'emo pemono'ōa ngaru pejapo.

²³ Ha'e rami py ma'et'ya nhavō mboapykue kuerei 'rā peê kuery va'e regua avakue ha'e javi pejexa uka SENHOR Israel kuery ruete renonde.

²⁴ Mba'eta penerenonde gui aipe'a 'rā amboae regua kuery, pendekuai aguã ambopyve vy. Ha'e rami rire ma'et'ya nhavō mboapykue SENHOR renonde pejexa uka aguã peo teĩ jipoi 'rā pendeyvy pe'aa'.

²⁵ — Ha'e gui xevy mymba ruguy peme'ê reve nda'evei mbojape imbovua revegua avi peme'ê aguã. Ha'e Páscoa ára ngaru py xevy mymba peme'ê rire nda'evei pyávy ndape'upai va'ekue opyta aguã ko'ê rā peve guarã.

²⁶ Nemba'ety gui jypy'i pemono'ō va'ekue regua iporãgueve ma peru 'rā SENHOR Penderuete pegua oo py. — Nda'evei kavara'i remomimoĩ aguã ixy kamby py ae — he'i.

²⁷ SENHOR aipoe'ive ju Moisés pe:

— Embopara ha'e va'e ayvu, mba'eta ha'e rami ae ndereve ha'e Israel kuery ha'e javi reve ajapo xereve guarã — he'i.

²⁸ Ha'e py ma SENHOR reve Moisés oĩ quarenta ára ha'e quarenta pytũ re. Ha'e jave ma ndo'ui mbojape, neĩ yu ma voi ndoy'ui Ha'e py itape re ombopara ayvu guexeve guarã ojapo va'ekue regua, dez ayvu ombopara.

Moisés rova hexakãmbaa oexapa okuapyague

²⁹ Ha'e gui Sinai vyvty gui Moisés oguejy vy opo py ogueraa mokoĩ itape Nhanderuete ayvu oĩa. Hexeve Nhanderuete ijayvu rire hova hexakãmbaa teĩ ndoikuai ranhe vyvty gui oguejy ouvya ja.

³⁰ Ha'e gui Moisés re Arão ha'e Israel kuery ha'e javive oma'ê rā hova hexakãmba. Ha'e ramo ha'e kuery okyje hexe onhemboja aguã.

³¹ Ha'e rami rā Moisés oenoĩmba. Ha'e ramo mae Arão ha'e yvatekueve onhemboja hexe, ha'e ha'e kuery reve Moisés ijayvu.

³² Ha'e gui ma oupa avi okuapy Israel kuery ha'e javi. Ha'e ramo ha'e va'e kuery pe Moisés omboaxapa Sinai vyvty re SENHOR ojapo ukaague.

³³ Ha'e kuery pe Moisés ijayvupa ma vy ngova re omoĩ imo'ãarã.*

³⁴ Ha'e gui SENHOR renonde ju Moisés ijayvu aguã oo vy ngova mo'ãa oipe'a kuerei 'rā, oê ouvvy e'ya ja. Ha'e gui oê vy Israel kuery pe ju 'rā omombe'u ojapo uka pyre ha'e javi.

³⁵ Ha'e ramo ma Israel kuery Moisés rova oexa rā hexakã. Ha'e va'e rire Moisés omo'ã ju 'rā ngova, peteĩgue ju SENHOR reve ijayvu aguã py oike e'ya ja.

35

Sábado ára re ijayvuague

¹ Ha'e gui Moisés Israel kuery ha'e javive omboaty vy aipoe'i:

— Pova'e ayvu ma SENHOR ojapo uka jajapopa ete aguã.

² Nhamba'eapo 'rā seis ára re, ha'e rā sete araa py ma ára iky'a e'ȳ va'e, SENHOR pegua sábado ixupe anho japytu'u aguã. Ha'e va'e ára omba'eapo va'e ma omano 'rā.

³ Sábado ára nda'evei neĩ peteive ma pejatapy aguã pendero rupi ae'i voi.

Éxodo 25.1-9

⁴ Moisés aipoe'ive ju Israel kuery ha'e javive pe:

— Po rami SENHOR ijayvu vy aipoe'i:

⁵ “Mba'emo pereko va'e-va'e gui peipe'a 'rā SENHOR pe peme'ê va'erã. Peteĩ-teĩ pendepy'a re oĩa rami, peme'êxea rami peru 'rā SENHOR pe peme'ê va'erã: ouro, e'ȳ vy prata, overa va'e,

⁶ hovy va'e, púrpura, pytã va'e, ajukue iporãve va'e, kavara rague,

⁷ vexa'i pirekue, mba'emo mopytãarã, yy rupigua pirekue, yvyra acácia,

⁸ azeite omboverapa aguã, azeite SENHOR pe nhomboaxaa aguã regua irũrã, heakuã porã va'e oapy pyrã,

⁹ ita ônix, manto sacerdote pegua re ha'e ipexo regua re ita oĩ va'erã”, he'i.

Éxodo 39.32-43

¹⁰ “Peê kuery va'e regua toupã avakue mba'emo ojapo kuaa va'e ha'e javi, tojapopa SENHOR ojapo uka va'ekue.

¹¹ Tojapo ombojerovia atyrã, ijao'iarã ha'e hi'ary guarã reve, ty'aĩ ikuai va'erã, yvyrape avi, yvyra hi'ary rupi guarã, ijytarã hendarã reve,

¹² ha'e ayvu ryrurã ijyke rupi yvyra po'i'i oĩ va'e reve, teko vai ombogue atyrã ha'e cortina okê pyguarã avi, ¹³ mesa ijyke rupi yvyra po'i'i ha'e hambiporurã ha'e javi oĩ va'e reve, ha'e mbojape SENHOR renonde omoĩ mbyrã,

¹⁴ tataandy 'yrã hambiporu reve, tataendyrã, azeite tataandy rykuerã,

¹⁵ altar heakuã porã va'e oapy atyrã, ijyke regua yvyra po'i'i reve, azeite SENHOR pe nhomboaxaa aguã regua, heakuã porã va'e oapy pyrã, ha'e ajukue ombojeroviaaty rokê reguarã,

* 34:33 2 Coríntios 3.7-16

¹⁶ altar mba'emo oapy atyrã, hi'áry guarã ipokã rei va'e overa va'e guigua, iyjeke regua yvyra po'i'i, hembiporu ha'e javi'i, mba'emo ojoi atyrã hendarã reve,
¹⁷ ajukue okê regua oka rupi guarã, ijytarã henda reve, cortina oka rokê pyguarã,
¹⁸ ombota pyrã ombojeroviaaty omoĩ atã aguã, ombota pyrã oka kora omoĩ atã aguã, ixãrã,
¹⁹ henda iky'a e'ÿ va'e rupi omba'eapo va'e kuery aorã, ha'e sacerdote Arão ha'e ta'y kuery ao iky'a e'ÿ va'erã, ha'e kuery sacerdote ikuaiã rupi omba'eapo vy oiporu aguã", he'i.

Ogueruxea rupi mba'emo ogueru okuapyague

²⁰ Ha'e gui Israel kuery ha'e javive Moisés renonde gui oo ju ramo
²¹ oĩa py ou avakue opy'a ha'e onhe'ê py mba'emo ome'êxea oendu va'e ha'e javi. Ha'e va'e kuery ma SENHOR pe ome'ê va'erã ogueru oguy nhemboaty atyrã ojapoa aguã, opy rupi mba'emo ojapo va'e kuery oiporu va'erã, ha'e ao iky'a e'ÿ va'erã avi.
²² Avakue ha'e kunhague avi ou, ikyre'ÿ va'e meme. Ogueru jegua, mba'emo ojee omoĩ va'ekue, kuã regua, poapy regua, ha'e opa mba'e porã ouro guigua. Avakue ha'e javive ogueru SENHOR pe ouro guigua ome'ê va'erã.
²³ Hovy va'e ogueroko va'e ha'e javi ogueru, ha'e gui púrpura, pytã va'e, ajukue iporãve va'e, kavara rague, vexa'i pirekue omopytã mbyre, ha'e yy rupi ikuai va'e pirekue guive ogueru.
²⁴ Amongue ma ojapo mba'emo SENHOR pe ome'ê va'erã, prata guigua e'ÿ vy overa va'e guigua. Ha'e va'e ma oguerupa. Ha'e yvyra acácia ojou va'ekue ogueru okuapy opa marãgua ojapo pyrã.
²⁵ Ha'e kunhague mba'emo ojapo kuaa va'e voi mba'emo ogueru okuapy ha'e kuery ae opo py ojapo va'ekue, hovy va'e, púrpura, pytã va'e ha'e ajukue iporãve va'e.
²⁶ Kunhague opy'a re mba'emo ojapoxea oĩ va'e ha'e javi ma kavara rague gui oipoka.
²⁷ Huvixa kuery ma ita ônix ha'e ita sacerdote pegua manto ha'e ipexo regua ombojegua pyrã ogueru,
²⁸ ha'e mba'emo heakuã porã va'e, azeite tataendy rykuerã, azeite SENHOR pe nhomboaxaa aguã regua, ha'e heakuã porã va'e oapy pyrã.
²⁹ Ha'e rami py Israel kuery ogueruxea rupi ogueru SENHOR pe ome'ê va'erã. Avakue ha'e kunhague opy'a re ome'êxea oendu va'e ogueru okuapy ome'ê va'erã, Moisés pe SENHOR ojapo uka va'ekue ha'e javi.

Êxodo 31.1-11

³⁰ Ha'e gui Moisés aipoe'i Israel kuery pe:
 — Pendu ke, SENHOR oenoĩ hery rupi Judã regua Uri ra'y Bezalel, Hur ramymino.
³¹ Ha'e rami vy Nhanderue Onhe'ê omonyê imbaraeterã, hi'arandurã ha'e oikuaapa aguã, opa mba'e ojapo kuaa aguã rami,
³² ha'e mba'emo ra'angaa ojapo va'ekue rami ojapo aguã ouro, prata ha'e overa va'e gui,
³³ ha'e ita omoĩ 'rã omoatyrõ aguã, yvyra gui mba'emo ojapo aguã, ha'e opa mba'e porã ojapo kuaa aguã.
³⁴ Ipy'a re omoĩ 'rã amboae kuery avi ombo'e aguã, Dã regua Aisamaque ra'y Aoliabe guive.
³⁵ Ha'e kuery re omoĩ hi'arandurã mba'emo ojapo kuaa ete aguã rami, haxyve va'e guive, ha'e hovy va'e py ajukue ombopara kuaa aguã, púrpura py, pytã va'e py ha'e ajukue iporãve va'e py, ha'e oipokaa rupi omba'eapo aguã. Ha'e rami py opa marã ojapo kuaa, mba'emo ra'angaa ojapo va'ekue rami ae.

36

¹ Ha'e rami py Bezalel ha'e Aoliabe omba'eapo, avakue mba'emo ojapo kuaa va'e ha'e javi reve. Ha'e kuery pe SENHOR oikuaa uka ha'e omo'arandu henda iky'a e'ÿ va'e pyguarã ha'e javi ojapo kuaa aguã, SENHOR ojapo ukaague rami meme.

Mba'emo apoarã kuery po py heta va'e kuery ome'ê va'ekue Moisés omboaxapaague

² Ha'e gui Moisés oenoĩ Bezalel ha'e Aoliabe, ha'e avakue mba'emo ojapo kuaa va'e ha'e javi. Ha'e va'e kuery SENHOR omo'arandu vy ipy'a re omoĩ ovaê ha'e mba'emo ojapoxea.
³ Ha'e va'e kuery pe ae Moisés omboaxa Israel kuery ogueru ha'e ome'ê va'ekue, henda iky'a e'ÿ va'e pyguarã ojapo aguã. Ko'ê nhavõ Moisés-a py ha'e kuery ogueruve 'rã ome'êxea rupi ome'ê va'e.
⁴ Ha'e ramo avakue hi'arandu va'e ma henda iky'a e'ÿ va'e pyguarã mba'emo ojapo 'rã va'ekue oeja ranhe vy oupa.
⁵ Ha'e vy aipoe'i okuapy Moisés pe:
 — Heta va'e kuery tu ogueruve rima SENHOR ojapo ukaague rami rojapo 'rã va'ekue áryve — he'i.
⁶ Ha'e ramo Moisés ijayvu heta va'e kuery ikuaiã ha'e javi rupi omombe'ua aguã. Ha'e vy aipoe'i uka:
 — Avakue ha'e kunhague ma voi henda iky'a e'ÿ va'e pyguarã ome'ê va'erã ojapo ve'ÿ tei ha'eve — he'i uka. Ha'e rami vy heta va'e kuery pe ijayvu mba'emo ndogueruvei aguã,
⁷ mba'eta mba'emo ha'everã ma oĩ mba'emo ojapopaa aguã, hetave guive oĩ.

Êxodo 26.1-13

⁸ Ha'e rami rã omba'eapo va'e regua avakue mba'emo ojapo kuaa ete va'e ojapo okuapy ombojerovia atyrã. Ha'e rami vy dez cortina ojapo ajukue iporãve va'e oipoka pyre guigua, ha'e hovy va'e, púrpura ha'e pytã va'e gui. Anjo ipepo va'e ra'angaa py ombojegua. Opa mba'e ojapo porã ete.
⁹ Peteĩ-teĩ cortina ma doze metros raxa'i 'rã ipuku-a, ha'e rã ipya ma mokoĩ. Cortina ikuai va'e ma joo rami meme ipuku-a ha'e ipya.
¹⁰ Peteĩ nhiruĩ cortina ma amboae ae re oje'a, ha'e hovai re peteĩ nhiruĩ ikuai va'e voi ha'e rami avi amboae ae re oje'a.

¹¹ Cortina ojokua ypy va'ekue apy re ma jokuarã ojapo hovy va'e gui. Ha'ekue rami ae ju ojapo cortina ojokua va'ekue mboae apy re.

¹² Cinqüenta jokuua ojapo peteĩ-teĩ cortina re, ha'e cinqüenta ju cortina mboae ikuai va'e japy re. Jokuua ikuai va'e ma peteĩ-teĩ joexe-exeĩ'i aguã oĩ.

¹³ Ojapo avi cinqüenta ojopy aguã ouro guigua. Ha'e va'e py ma cortina ikuai va'e amboae ae re ombojepo'oi aguã, ombojeroviaaty peteĩ'i opyta aguã.

¹⁴ Kavara pire gui ojapo avi cortina ombojeroviaaty áry rupi guarã, onze cortina.

¹⁵ Ha'e va'e regua peteĩ-teĩ cortina puku-a ma treze metros raxa'i, ha'e rã ipya ma mokoĩ. Onze-ve cortina ma joo rami meme ipuku-a ha'e ipya.

¹⁶ Peteĩ nhiruĩ cortina ma joe ojokua, ha'ekue rami ae ju mboapy meme hembrye va'ekue re.

¹⁷ Ha'e gui cinqüenta jokuua ojapo cortina ojokua ypy va'ekue apy rembe re.

¹⁸ Overa va'e guigua ojapo avi cinqüenta ojopy aguã oo ao'ia ojokua aguã, ha'e javive peteĩ'i opyta aguã.

¹⁹ Oo áry guarã ma ojapo vexe'i pirekue omopytã mbyre gui, ha'e rã amboae pirekue ma inhana e'y va'e.

Êxodo 26.14-30

²⁰ Ombojeroviaaty mbotyarã ojapo avi vyvrape acácia gui, omopu'ã imo'amy aguã.

²¹ Peteĩ-teĩ vyvrape ma quatro metros raxa'i ipuku-a, ha'e rã ipya ma meio metro raxa'i.

²² Peteĩ-teĩ vyvrape re oĩ mokoĩ omoĩ aguã joa katy oo va'e. Ha'e rami ojapo vyvrape ombojeroviaaty mbotyarã ha'e javi.

²³ Vyvrape ombojeroviaaty mbotyarã ma vinte ojapo kuaray puku-a katy guarã.

²⁴ Ha'e gui vinte-ve vyvrape rendarã prata guigua ojapo avi quarenta iguýry rupi omoĩa aguã. Peteĩ ipe va'e guýry hendarã mokoĩ oĩ, ha'e amboae ipe va'e guýry voi oĩ 'rã mokoĩ hendarã.

²⁵ Ha'e gui ombojeroviaaty rovai katy guarã ma vinte vyvrape ju ojapo kuaray apu'a'ia katy guarã.

²⁶ Hendarã ma quarenta oĩ prata guigua meme: peteĩ-teĩ vyvrape guýry ma mokoĩ oĩ hendarã, amboae guýry mokoĩ avi oĩ, ha'e ramive tema.

²⁷ Ombojeroviaaty yke kuaray oieka katy guarã ma mboapy meme vyvrape ju omopu'ã.

²⁸ Ha'e gui ombojeroviaaty apy katy guarã ma mokoĩ vyvrape ju omopu'ã jovaive reguarã.

²⁹ Ha'e va'e ma iguy rupi ndoje'ai. Ha'e rã hi'áry ma joe oje'a 'rã inhapyĩ va'e oĩ ypy va'e re. Ha'e rami omoĩ mokoĩ vyvrape ijapy katy guarã oĩ va'e.

³⁰ Ha'e rami oĩ oito-ve vyvrape henda prata guigua reve. Ha'e javi ma dezesseis oĩ hendarã: peteĩ-teĩ vyvrape guýry ma mokoĩ 'rã oĩ hendarã, ha'e amboae guýry ma mokoĩ ju 'rã oĩ.

³¹ Imbotya mbyte rupi guarã ma vyvra po'i'i ojapo acácia gui: peteĩ nhiruĩ ma vyvrape ombojeroviaaty yke rupi guarã ojapo,

³² ha'e gui peteĩ nhiruĩ ju ma vyvrape hovai re oĩ va'e peguarã, ha'e gui peteĩ nhiruĩ ju ombojeroviaaty kupe katy rupi vyvrape oĩ va'e peguarã, kuaray oua katy.

³³ Vyvra po'i'i ma vyvrape omopu'ã va'ekue mbyte rupi omboaxa amboae apy peve.

³⁴ Vyvrape ikuai va'e ma ouro py onhovã, ha'e omoĩ avi inhapyĩ va'e ouro guigua. Ha'e va'e rupi ae omboaxa imoiny vyvra po'i'i. Vyvra po'i'i voi ouro py avi onhovã.

Êxodo 26.31-37

³⁵ Okêrã ma ojapo avi ajukue hovy va'e gui, púrpura, pytã va'e ha'e ajukue iporãve va'e oipoka pyre gui. Ombojega avi anjo ipepo va'e ra'angaa py, hembiaipo kuaa va'e ojapo va'ekue.

³⁶ Vyvra acácia gui ojapo avi irundy ijtara, ha'e ouro py ju onhovã. Ijopyarã ma ouro guigua avi, ha'e hendarã irundy ikuai, prata guigua meme.

³⁷ Ojapo avi oo'i rokẽ mbotyarã hovy va'e gui, púrpura, pytã va'e, ha'e ajukue iporãve va'e oipoka pyre gui, ombopara kuaa va'e ojapo.

³⁸ Cortina ytarã ma peteĩ nhiruĩ ojapo, ojopy aguã reve. Ijapy yvate katygua, ha'e hembre 'y ma ouro py meme onhovã. Ha'e rã hendarã peteĩ nhiruĩ ikuai va'e ma overa va'e guigua.

37

Êxodo 25.10-15

¹ Ayvu ryrurã ma Bezalel ojapo vyvra acácia gui. Ipuku-a ma peteĩ metro raxa'i, ha'e rã ipya ha'e yvate ma meio metro raxa'i meme.

² Ouro ete'i py onhovã ipypy rupi ha'e hi'áry rupi. Ijvyýry rupi ma ouro guigua py ju ombojega.

³ Irundy inhapyĩ va'e ma ouro gui ojapo. Ha'e va'e ma hyru apy omoĩ irundyve re: mokoĩ inhapyĩ va'e omoĩ kyvõ katy, ha'e mokoĩ ju ma hovai re.

⁴ Vyvra acácia gui ojapo avi vyvra po'i'i, ha'e ouro py ju onhovã.

⁵ Vyvra po'i'i ma hyru jovaive re omboaxa inhapyĩ va'e oĩ va'e rupi, hyru ogueraa aguã.

Êxodo 25.17-22

⁶ Imbotyarã ma ouro ete'i gui ojapo avi teko vai ombogue atyrã. Ipuku-a ma peteĩ metro raxa'i, ha'e rã ipya ma meio metro raxa'i.

⁷ Ouro gui ojapo avi mokoĩ anjo ipepo va'e ra'angaa. Ouro ombope pyre gui ojapo, ha'e teko vai ombogueaty apy jovaive re omoĩ.

⁸ Peteĩ anjo ra'angaa ma peteĩ apy re omoĩ, ha'e rã amboae ma hovai re. Ha'e peteĩ'i regua gui ae ojapo teko vai ombogue atyrã ha'e anjo ipepo va'e jovaive re oĩ va'erã.

⁹ Anjo ra'angaa ma opepo py ojao'i teko vai ombogueaty. Peteĩ-teĩ joa katy hova, ha'e teko vai ombogueaty re oma'ê.

Êxodo 25.23-30

¹⁰ Mesa ma vyvra acácia gui avi ojapo. Ipuku-a ma peteĩ metro, ipya ma meio metro, ha'e rã yvatea ma meio metro raxa'i.

¹¹ Ouro ete'i py onhovã, ha'e ijyvyry rupi ombojegua.

¹² Ijyvyry rupi ojapo avi hembé 'yrã irundy kuã ipya va'e, ha'e hembé 'y rupi ju ombojegua.

¹³ Ijapy irundyve re omoĩ irundy inhapyĩ va'e. Ouro omboyku vy ojapo, ha'e omoĩ irundyve hetyma oĩa re.

¹⁴ Inhapyĩ va'e ma hembé 'y katy'i omoĩ vyvra po'i'i oaxa aguã, mesa ogueraa aguã.

¹⁵ Yvyra po'i'i ma acácia guigua, ha'e ouro py ju onhovã, mesa ogueraa aguã.

¹⁶ Mesa áry tembiporu oĩ va'erã ma ouro ete'i gui ojapo: hy'a, heakuã porã va'e ryrurã, hy'a kua, ha'e tigela mba'emo rykue ome'ëmby ryrurã.

Êxodo 25.31-39

¹⁷ Tataendy 'yrã ma ouro ete'i omoatyrõ mbyre gui ojapo. Hapytarã, hakãrã, tykue ryrurã, ijapu'a va'e ha'e ipoty ikuai va'erã ha'e javi ma peteĩ'i gui meme ojapo.

¹⁸ Ijyke gui ma mboapy meme hakã oẽ oiny. Peteĩ yke gui oẽ 'rã mboapy, ha'e hovai gui ma mboapy avi oẽ.

¹⁹ Peteĩ-teĩ rakã re ma mboapy tykue ryrurã oĩ amêndoa ramigua, ha'e gui peteĩ ijapu'a va'e ha'e peteĩ yvoty. Amboae hakã gui ma ha'ekue rami ae ju mboapy tykue ryrurã amêndoa ramigua oẽ, peteĩ ijapu'a va'e ha'e peteĩ yvoty. Ha'e rami ae ikuai mboapy meme hakã tataendy 'y gui oẽ oiny va'e.

²⁰ Tataendy 'y ete re ma irundy tykue ryrurã oĩ amêndoa ramigua, ijapu'a va'e ha'e ipoty reve.

²¹ Mokoĩ rakã ixugui oẽ oiny va'e nhavõ re oĩ 'rã peteĩ ijapu'a va'e hendarã. Amboae mokoĩ rakã ixugui oẽ oiny va'e re ma ijapu'a va'e mboae ju oĩ hendarã. Ha'e rami ae tema ojapo mboapy meme hakã tataendy 'y gui oẽ oiny va'e.

²² Ijapu'a va'e ha'e hakã hexe oĩ va'e ma peteĩ'i gui ae ojapo. Ha'e javi ma peteĩ'i guigua meme, ouro ete'i omoatyrõ mbyre gui ojapo.

²³ Ojapo avi sete tataendy. Tata moendya ha'e imbogua ma ouro guigua meme.

²⁴ Peteĩ poiykue ouro ete gui oĩporu tataendy 'yrã ha'e hembiporu ha'e javi reve ojapo aguã.

Êxodo 30.1-10

²⁵ Altar heakuã porã va'e oapy atyrã ma vyvra acácia gui ojapo. Ipuku-a ha'e ha'e ipya ma meio metro meme, ipuku-a oĩ va'e'ỹ ramo. Ha'e rã yvatea ma peteĩ metro rai'i. Hexeve hakua ikuai va'e voi peteĩ'i gui ae avi.

²⁶ Ouro ete'i gui onhovã hi'áry ha'e ijyvyry rupi, hakua ikuai va'e guive. Ijyvyry rupi ma ouro guigua py ombojegua.

²⁷ Ombojeguaague guýry rupi ojapo avi mokoĩ inhapyĩ va'e ouro guigua. Jovaive re ojapo. Ha'e va'e rupi ma omboaxa vyvra po'i'i altar ogueraa aguã.

²⁸ Acácia gui vyvra po'i'i ojapo ma vy ouro py onhovãmba.

Êxodo 30.22-38

²⁹ Ojapo avi azeite icky'a e'ỹ va'e SENHOR pe nhomboaxa aguã regua. Heakuã porã va'e oapy atyrã avi ojapo, heakuã porã va'e apoa ojapo va'ekue.

38

Êxodo 27.1-8

¹ Altar mba'emo oapy atyrã ojapo avi vyvra acácia gui. Ipuku-a ma mokoĩ metros raxa'i, ha'e ipya ha'e rami ae ju, ipuku-a oĩ va'e'ỹ ramo. Ha'e rã yvatea ma peteĩ metro raxa'i.

² Ijapy irundyve va'e re ma omoĩ irundy hakuarã. Ha'e va'e ma altar reve peteĩ'i gui meme ojapo. Overa va'e py ju onhovãmba.

³ Tembiporu altar rupi oĩporua va'erã ma ojapo avi opa marãgua: tanhimbu ryrurã, pá icky'a'oarã, hy'arã, ikuxa rakua ha'e tapyĩ ryrurã. Ha'e va'e ha'e javi ma overa va'e gui meme ojapo.

⁴ Altar reguarã ma ojapo peteĩ ipokã rei va'e overa va'e gui kya xã ramigua. Ha'e va'e ma altar rye py rupi oĩ altar mbyte rupi peve ovaẽ.

⁵ Ipokã rei va'e overa va'e guigua apy irundyve reguarã ma ojapo irundy inhapyĩ va'e. Ha'e va'e rupi ma omboaxa 'rã vyvra po'i.

⁶ Vyvra po'i ma acácia gui ojapo, ha'e overa va'e py ju onhovã.

⁷ Ha'e va'e ma inhapyĩ va'e rupi omboaxa altar jovaive re, ogueraa aguã. Inhyvyĩ va'erã ma vyvrape gui ojapo.

Êxodo 30.17-21

⁸ Overa va'e gui ojapo yy mbotyarã, mba'emo ojoia aguã. Hendarã voi ojapo overa va'e gui avi. Oguy nhemboaty oĩaty rokẽ py kunhague omba'eapo okuapy va'e epéko ome'ẽ va'ekue gui ojapo.

Êxodo 27.9-19

⁹ Okarã ma ojapo avi oo regua kuaray ipuku-a katy. Cortina oka korarã oĩ va'e ma ajukue iporãve va'e oĩpoka pyre gui ojapo. Ipuku-a ma quarenta e cinco metros.

¹⁰ Ijytarã ma vinte ojapo, ha'e hendarã ma overa va'e guigua meme. Ha'e rã ijyta re ty'ái oĩ va'e, ha'e hi'áry rupigua ma prata guigua.

¹¹ Ha'e rami ae avi kuaray ijapu'a'ia katy voi oĩ cortina quarenta e cinco metros ipuku-a va'e. Ijytarã ma vinte ojapo, ha'e vinte avi ojapo hendarã, overa va'e guigua meme. Ijyta re ty'aĩ ha'e hi'áry rupigua oĩ va'e voi prata guigua.

¹² Ha'e rã kuaray oikea katy cortina oĩ va'e ma vinte e dois metros ipuku-a va'e. Ijytarã ma dez ojapo, ha'e ijyta renderã ma dez avi. Ijyta re ty'aĩ ha'e hi'áry rupigua oĩ va'e ma prata guigua meme.

¹³ Kuaray oua katy cortina oĩ va'e ma vinte e dois metros ipuku-a va'e.

¹⁴ Ha'e rã oikea rexei cortina oĩ va'e ma sete metros ipuku-a. Ijyta ma mboapy, ha'e henda voi mboapy.

¹⁵ Oka py oikea rovai katy ma cortina puku-a sete metros, oikea rovaive katy joo rami ipuku-a. Ijyta ma mboapy, ha'e henda voi mboapy avi.

¹⁶ Oka vyvry rupi cortina oĩ va'e ha'e javi ma ajukue iporãve va'e oipoka pyre gui ojapo.

¹⁷ Ijyta renderã oĩ va'e ma overa va'e guigua meme. Ha'e rã ijyta re ty'aĩ ha'e hi'áry rupigua oĩ va'e ma prata guigua.

¹⁸ Ajukue oka rokẽ regua ma ajukue ombopara va'e rembiapo. Hovy va'e gui, púrpura, pytä va'e ha'e ajukue iporãve va'e oipoka pyre gui ojapo. Ipuku-a ma nove metros. Yvatea ha'e ipya ma dois metros raxa'i meme, oka rupi cortina ikuai va'e re oa'ãague rami vy.

¹⁹ Ijyta irundy va'e ha'e ijyta renda irundy va'e ma overa va'e gui meme ojapo. Ha'e rã hexegua ty'aĩ ma prata guigua. Ijapy yvategua, ha'e hi'áry ha'e javi prata guigua.

²⁰ Ha'e rã ombota pyrä ombojeroviaaty omoĩ atã aguã, ha'e oka vyvry rupi oĩ va'e regua ma guive rã overa va'e guigua meme.

Mba'emo ombojeroviaaty regua oipapa ha'e oa'ãague

²¹ Pova'e nunga oĩ ombojeroviaaty Nhanderuete ayvu oĩa ropy. Moisés aipoe'iague rami vy sacerdote Arão ra'y Itamar oipapa, levita kuery ha'e py omba'eapo aguã.

²² Judá regua Uri ra'y Bezalel, Hur ramymino va'e ojapopa Moisés pe SENHOR ojapo uka va'ekue ha'e javi.

²³ Hexeve ma Dã regua Aisamaque ra'y Aoliabe omba'eapo. Ha'e va'e ma mba'emo re opena va'e, mba'emo ra'angaa ombopara kuaa, ha'e ajukue ombopara va'e hovy va'e py, púrpura, pytä va'e ha'e ajukue iporãve va'e py.

²⁴ Henda iky'a e'y va'e pyguarã ouro mba'emo ojapoa rupi oiporu va'ekue, ouro ome'ẽ mbyre oa'ãa rã mil quilos rãnda'u, henda iky'a e'y va'e py oiporua va'e rami ae.

²⁵ Ha'e rã prata guery ombopara uka va'e kuery ome'ẽ va'ekue ha'e javi ma três mil quilos, henda iky'a e'y va'e py oiporua va'e rami.

²⁶ Guery ombopara uka va'e vinte ma'etỹ va'e guive tujakue peve peteĩ-teĩ ome'ẽ peteĩ hatã'i va'e seis grama va'e, henda iky'a e'y va'e py oiporua va'e rami. Ome'ẽ va'ekue ha'e javi ma seiscentos e três mil, quinhentos e cinqüenta.

²⁷ Prata ma três mil e quinhentos quilos oiporu mba'emo iky'a e'y va'e py oĩ va'e renderã ojapo aguã, ha'e imbotya renderã guive. Cem ojapo hendarã, peteĩ-teĩ re ma trinta e cinco quilos prata oiporu.

²⁸ Ijyta re mba'emo ojopy aguã ojapo vy oiporu vinte quilos raxa'i, ha'e gui ijapy yvategua onhovã, ha'e hi'áry rupigua ojapo aguã.

²⁹ Ha'e gui overa va'e ha'e kuery ome'ẽ va'ekue oa'ãa rã dois mil e quinhentos quilos.

³⁰ Ha'e va'e gui ma ojapo oguy nhemboaty oĩaty rokẽ yta renderã, altar overa va'e guigua, ipokã rei va'e overa va'e guigua, ha'e altar py oiporu va'erã ha'e javi.

³¹ Overa va'e gui ojapo avi oka vyvry rupi kora oĩ va'e renderã, oka rokẽ yta renderã, ombota pyrä ombojeroviaaty moĩ atãarã ha'e javi, ha'e oka vyvry rupi guarã ombota pyrä va'e ha'e javi.

39

Éxodo 28.1-43

¹ Hovy va'e, púrpura ha'e pytä va'e gui ojapo avi ao iporãve va'e. Ha'e va'e ma henda iky'a e'y va'e rupi omba'eapo va'e onhemonde va'erã. Ojapo ao iky'a e'y va'e Arão peguarã, Moisés pe SENHOR ojapo ukaague rami vy.

² Manto sacerdote peguarã ma ojapo ouro gui, hovy va'e, púrpura, pytä va'e ha'e ajukue iporãve va'e oipoka pyre gui.

³ Ouro ombope porã'i vy ojapo ipererĩ'i va'e, ha'e ojaya po'i'i, oikutu aguã hovy va'e reve, púrpura, pytä va'e ha'e ajukue iporãve va'e reve, ajukue ombopara va'e rembiapo.

⁴ Ojapo avi mokoĩ axi'y áry guarã, manto apy mokoĩve ojopy aguã, ha'e rami joe oje'a oiny.

⁵ Iku'akuarã voi ojapo porã, ha'e omoĩ manto sacerdote pegua áry rupi. Ha'e va'e ma manto reve joo rami ae ojapo ouro gui, hovy va'e, púrpura, pytä va'e ha'e ajukue iporãve va'e oipoka pyre gui, Moisés pe SENHOR aipoe'iague rami vy.

⁶ Ita õnix omoatyry vy omoĩ hendarã ouro guigua re. Ha'e va'e re ma ombopara Israel kuery rery, kuã reguarã omboparaa rami avi.

⁷ Ha'e va'e ita mokoĩve ma manto sacerdote pegua axi'y árygua re omoĩ, Israel kuery re ima'endu'aa aguã, Moisés pe SENHOR aipoe'iague rami vy.

⁸ Pexo regua ma manto sacerdote pegua rami avi ojapo porã etc. Ouro gui ojapo, ha'e hovy va'e, púrpura, pytä va'e ha'e ajukue iporãve va'e oipoka pyre gui.

⁹ Pexo regua ma ijapy irundy va'e, mokoĩ va'e ojapo. Ipuku-a ha'e ipya ma joo rami peteĩ po pukukue.

¹⁰ Ha'e va'e re ma omoĩ ita peteĩ-teĩ renderã ojapo pyre reve. Ita ma irundy ryxy omoĩ. Jypy'igua ma sárdio, topázio ha'e carbúnculo.

¹¹ Mokoĩ ryxya ma esmeralda, safira ha'e diamante.

¹² Mboapy ryxya ma jacinto, ágata ha'e ametista.

¹³ Irundy ryxya ma berilo, ônix ha'e jaspe. Peteĩ-teĩ renderã ojapo pyre ma ouro guigua meme.

¹⁴ Ha'e javi vy doze ita oĩ, Israel ra'y kuery rery doze ikuai va'e rami avi. Kuã regua rami ombopara pyre. Peteĩ-teĩ re oĩ peteĩ rery, doze regua rery ikuai va'e rami vy.

¹⁵ Pexo regua omoxã corrente'i oipopẽ mbyre py, ouro ete'i guigua.

¹⁶ Ixã renderã ma mokoĩ ojapo pexo regua re, mokoĩ inhapyĩ va'e voi, ouro guigua meme. Mokoĩve inhapyĩ va'e ma pexo regua apy re omoĩ.

¹⁷ Pexo regua apy re mokoĩve inhapyĩ va'e oĩ va'e rupi omoĩ mokoĩve corrente oipopẽ mbyre ouro guigua.

¹⁸ Mokoĩve corrente oipopẽ mbyre apy mboae ma omovaẽ mokoĩve hendarã ojapo pyre re. Ha'e va'e ju omoĩ manto sacerdote pegua axi'y árygua re, henonde katy.

¹⁹ Ojapove ju mokoĩ inhapyĩ va'e ouro guigua. Ha'e va'e ma omoĩ mokoĩve pexo regua apy re, hembe oĩ ypyve va'e re omoĩ manto sacerdote pegua rexei.

²⁰ Ojapove ju mokoĩ inhapyĩ va'e ouro guigua, ha'e omoĩ mokoĩve manto sacerdote pegua axi'y árygua re, iguýry, manto sacerdote pegua renonde re, ombojaague oĩ va'e yvy'iry, ku'akuaa ojapo porã mbyre áry rupi.

²¹ Ha'e gui pexo regua re inhapyĩ va'e oĩ va'e ma ojokua inhapyĩ va'e manto sacerdote pegua re oĩ va'e re, hi'áry rupi. Peteĩ xã hovy va'e py ojokua, manto sacerdote pegua ku'akuaa ojapo porã mbyre áry rupi opyta aguã. Ha'e rami vy pexo regua oja'o e'y aguã manto gui, Moisés pe SENHOR aipoe'iague rami vy.

²² Manto sacerdote pegua reve guarã ojapo avi kamixa puku árygua oipopẽ mbyre gui, hovy va'e guigua.

²³ Ha'e va'e mbyte py oĩ ijaju'y kuarã. Ijyvyry rupi omoana, oxoro e'y aguã.

²⁴ Kamixa puku árygua rembe ha'e javi ombojegua yvyra'a ra'angaa py. Hovy va'e, pytã va'e ha'e ajukue iporãve va'e oipoka pyre gui ojapo.

²⁵ Oparã'i va'e voi ojapo ouro ete'i gui. Ha'e va'e ma omoĩ yvyra'a ra'angaa ikuai va'e mbyte rupi, hembe ha'e javi rupi.

²⁶ Peteĩ oparã'i va'e, ha'e gui peteĩ yvyra'a ra'angaa, ha'e gui amboae oparã'i va'e, ha'e amboae yvyra'a, ha'e rami ae tema kamixa puku árygua rembe ha'e javi rupi oĩ aguã. Ha'e va'e py onhemonde 'rã mba'emo ojapo oikovya rupi, Moisés pe SENHOR aipoe'iague rami vy.

²⁷ Kamixa pukurã ma ajukue iporãve va'e gui ojapo, Arão ha'e ta'y kuery peguarã.

²⁸ Akã reguarã ma ajukue iporãve va'e gui avi ojapo, ha'e akã jokuaa ajukue iporãve va'e gui, ha'e gui kaxõ ajukue iporãve va'e oipoka pyre gui ojapo.

²⁹ Ha'e rã ku'akuaa ma ajukue iporãve va'e oipoka pyre gui ojapo, hovy va'e, púrpura ha'e pytã va'e gui. Ajukue ombopara va'e rembiapo, Moisés pe SENHOR aipoe'iague rami vy.

³⁰ Akã jokua iky'a e'y va'e reguarã ma ojapo avi ipererĩ'i va'e. Ouro ete'i gui ojapo. Ha'e va'e re ma ombopara " SENHOR pegua iky'a e'y va'e" he'ia va'e, kuã reguarã omboparaa rami avi.

³¹ Ha'e gui akã regua áry ipererĩ'i va'e ojokua aguã ma peteĩ ixã hovy va'e py oiporu, Moisés pe SENHOR aipoe'iague rami vy.

Éxodo 35:10-19

³² Ha'e rami vy ojapopa ombojeroviaaty py mba'emo oĩ va'erã, oguy nhemboaty oĩaty reguarã. Israel kuery ojapopa, Moisés pe SENHOR ojapo ukaague rami vy.

³³ Ha'e gui Moisés-a py ogueru avi ombojeroviaaty, ijao'iarã, opy guarã ha'e javive, ojopy aguã, yvyrape, hi'áry rupi guarã, ijyitarã, hendarã,

³⁴ ijao'iarã vexa'i rague omopytã mbyre guigua, hi'áry guarã pirekue inhana e'y va'e guigua, ajukue okẽ reguarã,

³⁵ Nhanderuete ayvu ryru yvyra po'i'i reve, imbotya teko vai ombogue atyrã,

³⁶ mesa opa marãgua hembiporu reve, mbojape SENHOR renonde omoĩ mbyrã,

³⁷ tataendy 'yrã ouro ete'i gui ojapo va'ekue hataendy reve, ha'e tataendy hendarã py porã oĩ hembiporu ha'e javi reve, azeite tataendy rykuera,

³⁸ altar ouro guigua avi, azeite SENHOR pe nhomboaxaa aguã regua, heakuã porã va'e oapy pyrã, ajukue oo rokẽrã,

³⁹ altar overa va'e guigua, ipokã rei va'e overa va'e guigua hembiporu ha'e javi reve, ha'e hy'a guaxu henda reve,

⁴⁰ cortina oka korarã, ijyta hendarã ojapo pyre reve, ajukue oka rokẽrã, ixarã, ombota pyrã va'e, ombojeroviaaty re oiporu va'erã va'e ha'e javi, oguy nhemboaty oĩaty rupi guarã,

⁴¹ ao iporãve va'e henda iky'a e'y va'e py omba'eapo va'e kuery oiporu va'erã, ao iky'a e'y va'e sacerdote Arão peguarã, ha'e ta'y kuery aorã sacerdote ikuai aguã.

⁴² Moisés pe SENHOR aipoe'iague rami vy Israel kuery ojapopa ma.

⁴³ Ha'e ramo Moisés mba'emo ojapo pyre oexa rã SENHOR ojapo ukaague rami meme ojapopa ra'e. Ha'e rami ojapopa ma ramo Moisés ogueroa yvu porã.

² — Jaxy jypy'ia re ijypy'ia ára ma remopu'ã 'rã imo'amy oguy pembojerovia vy penhemboaty aguã.

³ Ha'e va'e py ma remoi' rã xeayvu ryrú, ha'e remboty 'rã ajukue okê reguarã reipyo vy.

⁴ Remoinge 'rã mesa, ha'e hi'áry mba'emo remoi' rã oĩ aguã py porã. Opy remopu'ã avi 'rã imo'amy tataendy 'y, ha'e remoendy 'rã hataendy.

⁵ Ha'e gui altar ouro guigua heakuã porã va'e oapy atyrã ma xeayvu ryrú renonde 'rã remoi'. Ha'e gui mae ma remoi' rã ajukue ombojeroviaaty rokêrã.

⁶ Ha'e gui altar mba'emo oapy atyrã remoi' rã oguy ombojeroviaaty ha'e nhemboaty oĩaty rokê rexei'i.

⁷ Ha'e gui hy'a guaxu ju 'rã remoi' oguy nhemboaty oĩaty ha'e altar mbyte py. Ha'e rami vy remonyẽ 'rã imoiny yy.

⁸ Ijyvíry ma remopu'ã 'rã imo'amy oka korarã, ha'e remoi' rã ajukue oka rokêrã.

⁹ — Ha'e gui azeite xee SENHOR pe nhomboaxaa aguã regua reru vy remoi' rã ombojeroviaaty ha'e hexegua ikuai va'e ha'e javi re. Ha'e rami py remboaxapa 'rã xevy guarã, hexegua ha'e javi reve. Ha'e ramo opyta 'rã iky'a e'ỹ va'e.

¹⁰ Altar mba'emo oapyaty re avi 'rã azeite remoi', hembiporu ha'e javi reve, altar xee SENHOR peguarã remboaxa vy. Ha'e ramo altar opyta 'rã iky'a e'ỹ ete va'e.

¹¹ Azeite remoi' rã hy'a guaxu re, henda reve, xevy guarã remboaxa vy.

¹² Ha'e gui rejapo 'rã Arão ha'e ta'y kuery oguy nhemboaty oĩaty rokê re onhembojapa aguã rami. Ha'e py ma rejoi 'rã yy py.

¹³ Arão remonhemonde 'rã ao iky'a e'ỹ va'e py, ha'e hexe remoi' rã azeite, xevygua sacerdote-rã remboaxa vy.

¹⁴ Ha'e gui ta'y kuery ju 'rã remonhemboja, ha'e kuery re avi remoi' aguã kamixa puku.

¹⁵ Ha'e kuery re ju remoi' rã azeite tuu re remoiague rami, ha'e kuery voi xevygua sacerdote ikuai aguã. Ha'e kuery re azeite remoi' rã hamymino kuery voi araka'e rã peve ha'eve 'rã sacerdote ikuai aguã — he'i.

Ombojerovia atyrã omopu'ã imo'amyague

¹⁶ Ha'e ramo Moisés ojapopa SENHOR ojapo ukaague rami meme. Ha'ekue rami ae ojapo.

¹⁷ Mokoĩ ma'e'týa py, jaxy ijypy'i ouvya py, jypy'ia ára py ma omopu'ãa imo'amy ombojerovia atyrã.

¹⁸ Ombojerovia atyrã Moisés omo'ã aguã omoĩ hendarã, omopu'ã imo'amy vyvrape, petei-tei re omoĩ hi'áry rupigua, ha'e gui omopu'ã imo'amy ijytarã.

¹⁹ Ha'e gui ombojeroviaaty áry rupi oipyo ijao'iarã, ha'e hi'áry rupi guarã avi omoĩ, Moisés pe SENHOR ojapo ukaague rami.

²⁰ Ha'e vy itape Nhanderuete ayvu oĩa ogueru vy omoĩ hyrurã ojapo pyre py. Hyru yke re omoĩ avi vyvra po'i'i. Hyru áry ma teko vai mbogue atyrã omoĩ.

²¹ Ha'e gui ayvu ryrú ma ombojeroviaaty py ogueroike vy okêrã oipyo ajukue. Ha'e rami vy omboty ayvu ryrú, Moisés pe SENHOR ojapo ukaague rami vy.

²² Ha'e gui mesa ju omoĩ oguy nhemboaty oĩaty py, ombojeroviaaty regua kuaray puku-a katy, ajukue okê regua kyvõ rupi, oka katy.

²³ Ha'e va'e áry hendarã py porã omoĩ mbojape iky'a e'ỹ va'e SENHOR renonde oĩ aguã, Moisés pe SENHOR ojapo ukaague rami.

²⁴ Tataendy 'y avi omoĩ oguy nhemboaty oĩaty py, mesa renonde, ombojeroviaaty regua kuaray oua katy.

²⁵ Ha'e rami vy SENHOR renonde omoatyrõ tataendy, Moisés pe SENHOR ojapo ukaague rami vy.

²⁶ Altar ouro guigua ma oguy nhemboaty oĩaty py avi omoĩ, ajukue okê regua rexei.

²⁷ Hi'áry ma heakuã porã va'e omoendy, Moisés pe SENHOR ojapo ukaague rami vy.

²⁸ Ha'e gui ombojeroviaaty rokêrã ju ajukue oipyo imoiny.

²⁹ Ha'e gui altar mba'emo oapyaty ma oguy ombojeroviaaty py omoĩ, ha'e nhemboaty oĩaty rokê py ae. Ha'e rami vy hi'áry mba'emo oapy vy ome'ẽ, mba'emo ra'yĩgue guive, Moisés pe SENHOR ojapo ukaague rami vy.

³⁰ Ha'e gui hy'a guaxu ju omoĩ oguy nhemboaty oĩaty ha'e altar mbyte. Ha'e va'e omonyẽ yy ojejoia aguã.

³¹ Ha'e va'e py ma Moisés, Arão ha'e ta'y kuery ojepoei ha'e ojepeyi 'rã

³² oguy nhemboaty oĩaty py oike ta vy, ha'e altar re onhemboja vy, Moisés pe SENHOR ojapo ukaague rami vy.

³³ Ombojeroviaaty ha'e altar vyvíry rupi omopu'ã avi imo'amy oka korarã. Kora rokêrã ma ajukue oipyo. Ha'e rami py Moisés ojapo 'rã va'e ojapopa.

Números 9.15-23

³⁴ Ha'e gui oguy nhemboaty oĩaty rupi arai ojao'ipa. Ha'e ramo ombojeroviaaty ropy rupi tynyẽmba SENHOR rexakãa.

³⁵ Moisés eteve voi ndoike reguai ranhe oguy nhemboaty oĩaty py, hi'áry rupi arai opyta, ha'e ombojeroviaaty SENHOR rexakãa tynyẽ teria ja.

³⁶ Ombojeroviaaty áry gui arai opu'ã ma rire mae ma Israel kuery oguatave ju ikuaiague gui. Ha'e rami oiko kuerei 'rã ha'e kuery oguataa ha'e javi rupi.

³⁷ Ha'e rã arai opu'ã e'ýa ja ma ha'e kuery ndoguatai 'rã, opu'ãa ára anho.

³⁸ Ara py ma SENHOR guigua arai ojekuaa 'rã ombojeroviaaty áry. Ha'e rã pyávý ma hi'áry ojekuaa 'rã tata, Israel kuery ha'e javi oexaa py, ha'e kuery oguataa ha'e javi rupi.

Levítico mboapya kuaxia Moisés ombopara va'ekue Levítico mboapya kuaxia Moisés ombopara va'ekue

Tery Levítico ma “Levita kuery pegua” he'ia. Mba'eta Nhanderuete oenoĩ Levi ramymino kuery ombojeroviaaty rupi omba'eapo aguã. Amongue ma sacerdote-rã omoĩ Nhanderuete pe mymba ojuka vy oapy reve omboaxa aguã, ha'e e'ÿ vy amboae nunga: nhandy, mba'emo aju. Moisés ryke'y Arão ma jypygua sacerdote oiko raka'e. Ha'e rã levita kuery mboae ma sacerdote pytyvõarã ikuai ombojeroviaaty rupi.

Sacerdote kuery ha'e levita kuery ha'e javi ma Nhanderuete renonde iky'a e'ÿ va'erã omoĩa raka'e. Aipoe'i: “Xee Senhor ae Egito yvy gui penenoẽmba va'ekue, Penderuete aiko aguã. Ha'e nunga rupi iky'a e'ÿ va'e 'rã peiko, mba'eta xee ma iky'a e'ÿ va'e” (11.45). Ha'e rami avi Israel kuery pavẽ pe ju aipoe'i: “Iky'a e'ÿ va'e 'rã peiko xevy guarã, mba'eta xee Senhor iky'a e'ÿ va'e aiko ramo, ha'e yvy regua kuery mbyte gui roipe'a xevy guarã ae pendekuai aguã”, he'i (20.26). Ha'e va'e ayvu ma Nhanderuete pe jaiko va'e ha'e javi peguarã.

Mbovykue rei e'ÿ Nhanderuete ojapo uka vy aipoe'i: “Xee ma Senhor”: “Pendekuai 'rã xeyavua aeja va'ekue ha'e javi rupi, pejapopa 'rã ajapo uka va'ekue. Xee ma Senhor”, he'i (19.37). Ha'e va'e ayvu ma jajererokyje aguã oĩ, mba'eta iky'a e'ÿ ha'e Ipo'akapa va'e pegua jaiko.

Oapy vy ome'ẽmby regua

¹ SENHOR oguy nhemboaty oĩaty gui oenoĩ Moisés. Ha'e vy aipoe'i ixupe:

² — Aipo're Israel kuery pe: SENHOR pe mba'emo peme'ẽ va'erã peruxe vy penerymba vaka e'ÿ vy vexa'i 'rã peru.

³ — Xapy'a rei peapy vy peme'ẽxe vy mymba ava ivaikue rei e'ÿ va'e 'rã peru.* Ogyu nhemboaty oĩaty rokẽ peve 'rã peru, SENHOR renonde pendejou porã aguã.

⁴ Ime'ẽa ma mymba ome'ẽ va'erã akã áry opo omoĩ 'rã, hekovia SENHOR ojopy vy ojevavya ojao'i aguã.

⁵ Ha'e rire ma vaka ra'y ojuka 'rã SENHOR renonde. Ha'e gui huguykue ma Arão ra'y kuery sacerdote ikuai va'e oexa uka vy omboayvipa 'rã altar oguy nhemboaty oĩaty rokẽ rexe'i oĩ va'e yv'yry rupi.

⁶ Ha'e gui oapy vy ogueru pyre oipiropa vy omboa'ypa 'rã.

⁷ Sacerdote Arão ra'y kuery omoendy 'rã tata altar áry, ha'e tata py omoĩve ju 'rã xakã.

⁸ Ha'e gui xakã altar áry tata reve oĩ va'e py ma Arão ra'y kuery sacerdote ikuai va'e omoĩ avi 'rã mymba omboa'y va'ekue, inhakãgue, ikyrakue voi.

⁹ Ha'e rã hyekue ha'e hetymague ma sacerdote kuery ojoi 'rã yy py. Ha'e gui mae 'rã oapy altar áry. Ha'e nunga ma oapy vy ome'ẽmby, heakuã porã rã SENHOR ojou porã aguã.

¹⁰ — Xapy'a rei mymba reapy vy reme'ẽ va'erã ma kyrĩve va'e, vexa'i e'ÿ vy kavara ri reru vy ma ava meme 'rã reru ivaikue rei e'ÿ va'e.

¹¹ Ha'e va'e ma SENHOR renonde ojukaa 'rã altar yv'yry kuaray ijapu'a'ia katy. Huguykue ma Arão ra'y kuery sacerdote ikuai va'e omboayvipa 'rã altar yv'yry ha'e javi rupi.

¹² Ha'e gui omboa'ypa 'rã, inhakãgue, ikyrakue voi. Ha'e vy sacerdote omoĩ porã'i 'rã xakã altar áry tata oĩ va'e py.

¹³ Ha'e rã hyekue ha'e hetymague ma ojoi 'rã yy py. Ha'e nungakue ha'e javi sacerdote ogueru vy oapypa 'rã altar áry. Ha'e nunga voi ma oapy vy ome'ẽmby, heakuã porã rã SENHOR ojou porã aguã.

¹⁴ — Ha'e gui xapy'a rei SENHOR pe reapy vy reme'ẽ va'erã guyra ri vy ma reru 'rã pyku'i'i e'ÿ vy apyaxu xii.

¹⁵ Ha'e gui altar oĩa py sacerdote ogueru vy opoapẽ py omo'ẽ 'rã ijaju'y kãgue, ipire omondo e'ÿ re. Ha'e vy oapy 'rã altar áry. Ha'e rã huguykue ma omboxyry 'rã altar yv'yry rupi.

¹⁶ Ha'e rã hi'ai Hague reve omboi vy omombo 'rã altar kuaray oua katy tanchimbu oĩa py.

¹⁷ Ha'e vy ipepo guive omondoro 'rã omboa'y e'ÿ re. Ha'e vy sacerdote oapypa 'rã altar áry, xakã tata py itui va'e áry. Ha'e nunga voi oapy vy ome'ẽmby, heakuã porã rã SENHOR ojou porã aguã.

2

Mba'emo aju guigua ome'ẽmby regua

¹ — Ha'e gui xapy'a rei amongue va'e rei SENHOR pe mba'emo aju guigua ome'ẽ vy ma ogueru 'rã trigo ku'ikue iporãve va'e.* Hi'áry ma omoĩ 'rã azeite, ha'e gui hexeve heakuã porã va'e ju 'rã ogueru.

² Ha'e nunga ogueraa 'rã Arão ra'y kuery sacerdote ikuai va'e pe. Ha'e kuery ojopy 'rã teĩ po trigo ku'ikue, azeite ha'e heakuã porã va'e ha'e javi reve. Ha'e va'e ma oapy 'rã altar áry ome'ẽmby ha'e javi rekovia. Ha'e va'e ma oapy vy ome'ẽmby, heakuã porã rã SENHOR ojou porã aguã.

³ Ha'e rã mba'emo aju guigua ome'ẽ mbyre ndoapyi va'ekue ma Arão ha'e ta'y kuery peguarã opyta. Ha'e nunga ma SENHOR pe oapy pyre regua iky'a e'ÿ ete va'e.

* 1:3 Judeu kuery mba'emo oapy reve ome'ẽ 'rã Nhanderuete omboete aguã, ha'e'ÿ vy ojevavyague ombogue uka aguã, e'ÿ vy Nhanderuete pe ete oikoa oikuaa uka aguã. * 2:1 Mba'emo aju guigua ma ha'e kuery ome'ẽ 'rã Nhanderuete omboete ha'e oguerovy'a aguã.

4 — Ha'e gui xapy'a rei reru 'rā mba'emoaju guigua tatakua py ombojy pyre reme'ē va'erā. Ha'eve mbojape imbovua revegua e'ŷ, trigo ku'ikue iporāve va'e azeite reve omoapomo mbyre, ha'e mbojape ipereri'i va'e imbovua revegua e'ŷ azeite py oikytypa pyre.

5 Xapy'a rei mba'emoaju oexyaty py oexy pyre ri reru vy ma trigo ku'ikue gui imbovua revegua e'ŷ azeite reve omoapomo mbyre 'rā ha'eve.

6 Remboa'y-a'ypa 'rā. Ha'e gui hi'áry renhoē 'rā azeite. Ha'e nunga ma mba'emoaju guigua ome'ēmy.

7 — Ha'e gui xapy'a rei mba'emoaju guigua reme'ē va'erā pairā py ri rembojy vy ma trigo ku'ikue iporāve va'e gui 'rā rejapo azeite reve.

8 Ha'e nunga mba'emoaju guigua reme'ē va'erā rejapo ri vy reru 'rā SENHOR pe. Sacerdote-a py 'rā reraa, ha'e va'e ju altar py ogueraa aguā.

9 Ha'e gui mba'emoaju guigua reme'ē va'e gui ma sacerdote oipe'a 'rā altar áry oapy va'erā ha'e javi rekovia. Ha'e nunga ma oapy vy ome'ēmy, heakuā porā rā SENHOR ojou porā aguā.

10 Ha'e gui mba'emoaju guigua ome'ē mbyre ndoapyi va'ekue ma Arão ha'e ta'y kuery pegua. Ha'e nunga ma SENHOR pe oapy pyre regua iky'a e'ŷ ete va'e.

11 — Ha'e rami avi mba'emoaju guigua SENHOR pe peme'ē va'erā ma ndapejapoi 'rā imbovua revegua. Mba'eta teive regua imbovua revegua nda'evei SENHOR pe peapy vy peme'ē va'erā, nei ei revegua voi nda'evei.

12 Ha'e va'e regua gui ma peru 'rā SENHOR pe jypy'igua peme'ē va'erā, tei altar áry ma nomoia'i 'rā heakuā porā aguā rami.

13 Mba'emoaju guigua reme'ē va'e ha'e javi 'rā remoe'ē juky py. Ha'e nunga reme'ē nhavō neremoe'ē e'ŷi 'rā juky, mba'eta Nderuete guexeve guarā ojapo va'ekue kuaa ukaarā. Reme'ē va'e ha'e javi re 'rā remoi' juky.

14 — SENHOR pe reru avi 'rā mba'emoaju jypy'i oiko va'ekue regua iporāgueve reme'ē va'erā. Ha'eve 'rā mba'emoary pyau guigua reme'ē aguā, tata py rexy va'ekue, ha'yīngy hary pyau va'e gui reumbiri va'ekue.

15 Ha'e va'e áry renhoē 'rā azeite, ha'e hexeve reru 'rā heakuā porā va'e. Ha'e nunga ma mba'emoaju guigua ome'ēmy.

16 Mba'emoary yīngy oumbiri pyre gui sacerdote oipe'a 'rā ome'ēmy ha'e javi rekovia oapy va'erā, azeite ha'e heakuā porā va'e ha'e javi reve. Ha'e nunga ma SENHOR pe oapy vy ome'ēmy.

3

Petei rami ikuaiia regua ome'ēmy regua

1 — Ha'e gui amongue SENHOR renonde ogueru 'rā petei rami ikuaiia regua ome'ē va'erā.* Ha'e rami vy ha'eve 'rā guymba ava e'ŷ vy kunha ivaikue rei e'ŷ va'e.

2 Mymba ome'ē va'e akā áry opo omoi vy ojuka 'rā oguy nhemboaty oiaty rokē katy'i. Huguykue ma Arão ra'y kuery sacerdote ikuai va'e omboayvi 'rā altar vy'ry ha'e javi rupi.

3 Petei rami ikuaiia regua ome'ē va'e gui ma oipe'a 'rā mba'emo SENHOR pe oapy vy ome'ē va'erā: ikyra hyekue áry ha'e hyekue re oī va'ekue ha'e javi,

4 ha'e gui ipykyraxī mokoīve, hi'áry ikyra ojao'i va'ekue, ikupe áry guare, ha'e ipy'akue re ikyra oī va'ekue voi ipykyraxī reve omboipa 'rā.

5 Ha'e nunga ha'e javi Arão ra'y kuery oapy 'rā altar áry, mba'emo oapy vy ome'ēmy, xakā áry ae 'rā oapy. Ha'e va'e ma oapy vy ome'ēmy, heakuā porā rā SENHOR ojou porā aguā.

6 — Ha'e gui petei rami ikuaiia reguarā SENHOR pe mba'emo ome'ē aguā ma ha'eve mymba kyri'ive va'e ava e'ŷ vy kunha, ivaikue rei e'ŷ va'e anho.

7 Vexa'i ri ome'ē va'erā ogueru vy ma SENHOR renonde py ae 'rā ome'ē.

8 Ha'e vy ome'ē va'e akā áry opo omoi vy ojuka 'rā oguy nhemboaty oiaty roka py. Huguykue ma Arão ra'y kuery omboayvi 'rā altar vy'ry rupi.

9 Petei rami ikuaiia regua ome'ē va'e gui ma oipe'a 'rā ikyrakue SENHOR pe oapy aguā: huguaukie ipxyo kágue katy'i omboi pyre ha'e javi, ha'e ikyra hyekue áry ha'e hyekue re oī va'ekue ha'e javi.

10 Ipykyraxī mokoīve omboi avi 'rā, mokoīve áry ikyra oī va'e, ikupe regua, ha'e gui ipy'akue re ha'e ipykyraxī re oī va'ekue ha'e javi 'rā omboi.

11 Ha'e va'e ha'e javi sacerdote oapypa 'rā altar áry, SENHOR pe tembi'u oapy vy ome'ēmy.

12 — Kavara ri ome'ē va'erā vy ma SENHOR renonde py 'rā ogueru.

13 Ha'e vy inhakā áry opo omoi vy ojuka 'rā oguy nhemboaty oiaty roka py. Huguykue ma Arão ra'y kuery omboayvi 'rā altar vy'ry ha'e javi rupi.

14 Ha'e va'e regua ome'ē va'e gui oipe'a 'rā SENHOR pe oapy vy ome'ē va'erā: ikyra hyekue áry ha'e hyekue re oī va'ekue ha'e javi,

15 ipykyraxī mokoīve, mokoīve áry ikyra oī va'ekue, ikupe regua, ha'e ipy'akue regua oī va'ekue ipykyraxī reve omboipa 'rā.

16 Ha'e nunga ha'e javi sacerdote oapypa 'rā altar áry, tembi'u oapy vy ome'ēmy, heakuā porā rā SENHOR ojou porā aguā. Ikyrakue ha'e javi ma SENHOR pegua ae.

17 Po rami ma pendekorā oēja pyre raka'e 'rā peve guarā, pendekuaia jave re, ha'e mamō rā pendekuaia py: ndape'ui 'rā ikyrakue nei huguykue — he'i.

* 3:1 Petei rami ikuaiia regua ha'e kuery ome'ē 'rā Nhanderuete omboete ha'e hexeve petei rami ikuaiia oikuaa uka aguā.

4

Sacerdote kuery potae vy e'ÿ ojevavy vy mba'emo ome'ê aguã regua

¹ Ha'e gui SENHOR aipoe'ive ju Moisés pe:

² — Ndeavyvu ke Israel kuery pe. Ha'e vy aipo're 'rã: Xapy'a rei amongue potae vy e'ÿ ojevavy 'rã SENHOR ojapo uka va'ekue rovai, xapy'a rei ha'e nunga rovai py ojapo 'rã ojapo e'ÿ va'erã va'ekue.

³ Xapy'a rei sacerdote-rã omoï mbyre eteve voi ojevavy 'rã heta va'e kuery opaga aguã rami avi omoingo vy. Ha'e rami vy ojevavyague re SENHOR pe ome'ê 'rã petei vaka ra'y ivaikue rei e'ÿ va'e.*

⁴ Jejavya renonde py vaka ra'y ogueru 'rã oguy nhemboaty oïaty rokê py. Vaka ra'y akã áry opo omoï vy ojuka 'rã SENHOR renonde.

⁵ Huguykue regua ma sacerdote-rã omoï mbyre ogueraa 'rã oguy nhemboaty oïaty py.

⁶ Huguykue py okuã omoakÿ vy sete-kue 'rã omboavy SENHOR renonde py, hendaiky'a e'ÿ va'e py ajukue okê regua oï va'e rexei.

⁷ Sacerdote huguy omoï avi 'rã altar hekuã porã va'e oapyaty va'e rakua ikuai va'e apy re, SENHOR renonde py. Ha'e va'e altar ma oguy nhemboaty oïaty py oï. Ha'e gui huguy rembyrekue ma altar mba'emo oapyaty va'e guýry onhoê 'rã, nhemboaty oïaty rokê py oï va'e py.

⁸ Jejavya ojao'i ukua aguã regua vaka ra'y ome'ëmby gui omboipa 'rã ikyrakue oï va'e ha'e javi: ikyra hyekue áry, hyekue re oï va'ekue ha'e javi,

⁹ ipykyraxi mokoive, mokoive re ikyra oï va'ekue, ikupe regua, ha'e ipy'akue regua oï va'ekue ipykyraxi reve omboipa avi 'rã,

¹⁰ petei rami ikuai regua vaka ra'y ome'ëmby gui omboia rami avi. Ha'e vy sacerdote oapypa 'rã altar mba'emo oapyaty va'e áry.

¹¹ Ha'e rã vaka ra'y pirekue, ho'okue ha'e javi, inhakãgue, ipykue, hyekue, ha'e hepoxikue,

¹² vaka ra'y retekue ha'e javi ma ogueraa 'rã teta ikuaia gui mombyry'i petei hendaiky'a e'ÿa py. Tambahukue omomboaty py 'rã oapypa tata py, xakã áry.

Números 15.22-26

¹³ — Xapy'a rei Israel kuery ha'e javi potae vy e'ÿ ojevavy tei ha'e nungakue avave rei ndoikuai ranhe, xapy'a rei ojapo e'ÿ va'erã va'ekue py ojevavy okuapy 'rã SENHOR ojapo uka va'ekue rovai.

¹⁴ Ha'e gui ha'e kuery ojevavyague oikuaa ri ramo pavê ogueru 'rã vaka ra'y ojevavyague re ome'ê va'erã. Ha'e vy oexa uka 'rã okuapy oguy nhemboaty oïaty roka py.

¹⁵ Vaka ra'y akã áry ha'e kuery mongetaaty kuery omoï 'rã opo SENHOR renonde. Ha'e rire vaka ra'y ojukaa 'rã SENHOR renonde.

¹⁶ Vaka ra'y ruguykue regua sacerdote-rã omoï mbyre ojopy vy ogueraa 'rã oguy nhemboaty oïaty py.

¹⁷ Ha'e vy huguykue py okuã omoakÿ vy sete-kue 'rã omboavy SENHOR renonde py, cortina okê regua rexei.

¹⁸ Huguykue omoï avi 'rã altar oï va'e rakua apy re, SENHOR renonde oguy nhemboaty oïaty py. Ha'e rã huguy rembyrekue ha'e javi ma onhoê 'rã altar mba'emo oapyaty va'e nhemboaty oïaty rokê py oï va'e guýry.

¹⁹ Vaka ra'y gui ikyrakue omboipa vy oapypa 'rã altar áry.

²⁰ Ha'e va'e vaka ra'y re ojapo 'rã jejavya regua vaka ra'y ome'ëmby re ojapoa rami avi. Ha'e rami ae 'rã ojapo, ha'e kuery ojevavyague sacerdote ojao'i uka vy. Ha'e rami rã ha'e kuery operdoaa 'rã.

²¹ Ha'e va'e rire vaka ra'y retekue oipe'aa 'rã heravy teta ikuaia gui mombyry'i. Ha'e vy oapypa 'rã jypy vaka ra'y oapypague rami avi. Ha'e va'e ma heta va'e kuery ojevavyague regua ome'ëmby.

Yvatekueve potae vy e'ÿ ojevavy vy mba'emo ome'ê aguã regua

²² — Ha'e gui huvixa kuery va'e regua potae vy e'ÿ ojevavy 'rã SENHOR ojapo uka va'ekue regua e'ÿ ojapoa py. Ha'e vy ha'e nunga py opaga aguã rami 'rã oiko,

²³ ha'e gui ojevavyague ixupe oikuaa ukuaa ramo ogueru 'rã kavara ivaikue rei e'ÿ va'e ome'ê va'erã.

²⁴ Kavara akã áry opo omoï vy SENHOR renonde ojuka 'rã oapy pyrã ojukaaty py. Ha'e nunga ma jejavya regua ome'ëmby.

²⁵ Ha'e gui jejavya regua ome'ê mbyre ruguy py sacerdote okuã re omoakÿ vy ombovy 'rã altar mba'emo oapyaty va'e rakua ikuai va'e apy re. Ha'e rã huguy rembyrekue ma onhoëmba 'rã altar mba'emo oapyaty va'e vyýry rupi.

²⁶ Ome'ê mbyre kyrakue ma oapypa 'rã altar áry, petei rami ikuai regua ome'ëmby kyrakue oapypa rami avi. Ha'e rami py sacerdote ojao'i uka 'rã huvixa ojevavyague. Ha'e ramo operdoaa 'rã.

Mava'e rã rei potae vy e'ÿ ojevavy vy mba'emo ome'ê aguã regua

²⁷ — Ha'e gui xapy'a rei mava'e rã rei pendevvy re oiko va'e regua ojevavy 'rã potae vy e'ÿ, SENHOR ojapo uka e'ÿ va'ekue ojapoa py. Ha'e rami vy opaga aguã rami va'e 'rã oiko.

²⁸ Ha'e gui ojevavyague ixupe oikuaa ukuaa ramo ogueru 'rã kavara ivaikue rei e'ÿ va'e ome'ê va'erã, ojevavyague regua.

²⁹ Ojevavyague regua ome'ê va'e akã áry opo omoï vy ojuka 'rã oapy pyrã ojukaaty py ae.

³⁰ Ome'ëmby ruguy py sacerdote okuã omoakÿ vy ombovy 'rã altar mba'emo oapyaty va'e rakua apy re. Ha'e rã huguy rembyrekue ma onhoëmba 'rã altar vyýry rupi.

* 4:3 Jejavya regua ome'ëmby ma ha'e kuery ome'ê ojevavyague ombogue uka aguã. Ha'e nunga ome'ê reve ojevavyague omombe'upa Nhanderuetue oiky'a'o ju aguã.

³¹ Ikyrakue ma omboipa 'rā petei rami ikuaiia regua re ome'ēmy rami avi. Sacerdote oapy 'rā altar áry, heakuā porā rā SENHOR ojou porā aguā.† Ha'e rami sacerdote ojao'i uka 'rā ojejavayague, ha'e ramo operdoaa 'rā.

³² — Ha'e rami tei xapy'a rei vexa'i ri ojejavayague regua ome'ē vy ma kunha ivaikue rei e'y va'e 'rā ogueru.

³³ Ha'e rami vy ojejavayague regua ome'ēmy akā áry opo omo'i vy ojuka 'rā ojejavayague re, mba'emo ome'ēmy oapyaty py ae.

³⁴ Ojejavayague regua ome'ēmy ruguykue py sacerdote okuā omoak'y vy ombovy 'rā altar mba'emo oapyaty va'e rakua apy re. Ha'e rā huguy rembyrekue ma onhoēmba 'rā altar yv'yry rupi.

³⁵ Ha'e rā ikyrakue ma omboipa 'rā, petei rami ikuaiia regua ome'ēmy re ojapoa rami avi. Ha'e vy sacerdote oapy 'rā altar áry, SENHOR pe mba'emo oapy va'e áry. Ha'e rami sacerdote ojao'i uka 'rā ojejavayague. Ha'e ramo operdoaa 'rā.

5

Amongue va'e rei oikuaa e'y re ojevavy vy mba'emo ome'ē aguā regua

¹ — Xapy'a rei amongue ojevavy 'rā po rami: Mba'emo oiko rā oexa e'y vy oendu tei huvixa omboayvua py voi nomombe'uxe'i 'rā. Mba'emo oikuaa va'eri nomombe'ui vy hexe ae 'rā o'i ojejavayague re opaga aguā.

² Xapy'a rei amongue ojopy 'rā mba'emo ha'eve'y va'e re, vixo ha'eve'y va'e re'ogue re mba'e, mymba ha'eve'y va'e re'ogue, e'y vy yvy rupi onhembotyryry va'e ha'eve'y va'e re'ogue re. Ha'e nunga avave rei ndoexaai tei ha'e ae ju ha'eve'y va'e ojeapo vy ha'e ae oiko 'rā opaga aguā rami.

³ Ha'e rami e'y vy xapy'a rei ojopy 'rā ava guigua ha'eve'y va'e re, ha'e nunga o'i va'e re rei onhemongy'a 'rā. Potae vy e'y opoko tei oikuaa nho vy opaga aguā rami 'rā oiko.

⁴ Ha'e rami e'y vy amongue ijayvu vy oura rive 'rā ojapo vai aguā re, e'y vy ojapo porā aguā re tei, ha'e rami rei oura rivea rupi ijayvu 'rā oikuaa pota vy e'y, tei oikuaa nho vy ha'e nunga káuxa oiko 'rā opaga aguā rami.

⁵ Ha'e ramigua py ri opaga aguā rami oiko rire omombe'upa 'rā mba'e py ete'i pa ojevavya,

⁶ ha'e ome'ē 'rā ojevavyague regua. Ha'e rami vy SENHOR pe ogueru 'rā mymba kyrive va'e, vexa'i kunha, e'y vy kavara kunha, ojevavyague regua ome'ē va'erā. Ha'e ramo sacerdote ojao'i uka 'rā ojevavyague.

⁷ Ha'e gui vexa'i kunha ndojou'i ri vy SENHOR pe ogueru 'rā moko'i apyaxu e'y vy moko'i jeruxi, opaga aguā rami oikoague re ome'ē va'erā. Petei ma ojevavyague regua 'rā ome'ē, ha'e rā amboae ma oapy vy ome'ēmy.

⁸ Sacerdote pe mokoive ome'ē rā jejavaya regua ranhe 'rā ojuka. Ha'e rami vy opoapē py omopē 'rā ijaju'y kágue, ipire omondo e'y re.

⁹ Ha'e gui jejavaya regua ome'ēmy ruguykue gui ma ogueraa vy omboayvipa 'rā altar yke rupi. Ha'e rā huguy rembyrekue ma altar gu'yry rupi onhoēmba 'rā. Ha'e va'e ma jejavaya regua ome'ēmy.

¹⁰ Ha'e gui amboae guyra ma oapy 'rā ipara oia rami vy. Ha'e rami sacerdote ojao'i uka 'rā ojevavyague. Ha'e rā operdoaa 'rā.

¹¹ Xapy'a rei moko'i apyaxu e'y vy moko'i jeruxi ogueru aguā ndojou'i ri vy, ojevavya regua ome'ē va'erā togueru petei rryru trigo ku'ikue iporāve va'e.* Ha'e va'e áry tomo'i eme guive azeite, nei heakuā porā va'e, jejavaya regua ome'ēmy ramo.

¹² Sacerdote pe ha'e va'e ome'ē ramo ojara 'rā petei po renyē ha'e javi rekovia. Ha'e va'ekue ma SENHOR pe oapy 'rā altar áry, oapy vy ome'ēmy o'i va'e áry ju. Ha'e va'e ma jejavaya regua.

¹³ Ha'e rami sacerdote ojao'i uka 'rā mba'emo py rei tema ojevavyague. Ha'e ramo operdoaa 'rā. Ha'e rā ndoapyi va'ekue ma sacerdote kuery pegua, mba'emoaju guigua ome'ē mbyre re ojapoa rami.

SENHOR pegua nomboteiague re ome'ē aguā regua

¹⁴ SENHOR aipoe'ive ju Moisés pe:

¹⁵ — Ha'e gui xapy'a rei amongue ojapo 'rā ojapo e'y va'erā va'ekue, ha'e potae vy e'y ojevavy 'rā mba'emo SENHOR pegua iky'a e'y va'e o'i va'e py. Ha'e rami vy guymba kuery ikuai va'e gui ogueraa 'rā SENHOR pe petei vexa'i ivaikue rei e'y va'e ome'ē va'erā. Ha'e va'e repy re reikuaa 'rā hatā'i va'e prata guigua mbovy paa, henda iky'a e'y va'e py oiporua va'e rami, mba'emo omboekovia aguā regua ome'ēmy.

¹⁶ Ha'e rami py oguerupa ju 'rā SENHOR pe ndoguerupai va'ekue. Hi'áry omo'i retave ju 'rā, petei nhirui ikuai nhavō áry petei-tei ju 'rā ome'ēve. Sacerdote pe ae 'rā ome'ē. Ha'e ramo sacerdote ojao'i uka 'rā ojevavyague, mba'emo omboekovia aguā regua vexa'i ome'ē va'ekue py ae. Ha'e ramo operdoaa 'rā.

Potae vy e'y ojevavyague re mba'emo ome'ē aguā regua

¹⁷ — Xapy'a rei amongue ojevavy 'rā SENHOR ojapo uka va'ekue rupi e'y. Potae vy e'y ojapo tei oiko 'rā opaga aguā rami, ha'e vy hexe ae 'rā o'i ojevavyague re opaga aguā.

† 4:31 Mboapy regua ome'ēmy pe anho “Heakuā porā rā SENHOR ojou porā aguā” ea va'e. Ha'e va'e ma oapy vy ome'ēmy (capítulo 1), mba'emoaju guigua ome'ēmy (capítulo 2), ha'e petei rami ikuaiia regua ome'ēmy (capítulo 3). Ha'e va'e mboapy regua ome'ēmy ma ome'ēxea'i py 'rā ome'ē, Nhanderuetete ombotea rupi. Ha'e rā amboae regua ome'ēmy pe ma “Heakuā porā rā SENHOR ojou porā aguā” nde'i, mba'eta ojevavyague re ome'ē, Nhanderuetete ombogue aguā. Ha'e va'e ma jejavaya regua ome'ēmy (4.1–5.7). Ha'e rami avi jejavaya regua ome'ēmy gui voi ikyrakue oapy rā ha'e nunga pe “Heakuā porā rā SENHOR ojou porā aguā” he'i avi 'rā, mba'eta petei rami ikuaiia regua ome'ēmy rami oapy (4.31). * 5:11 Apy “petei rryru” he'ia ma moko'i litro va'e re ijayvu vy, ha'e rā trigo ri rā petei quilo va'e (Lucas 2.24).

¹⁸ Ha'e rami vy guymba kuery gui ogueraa 'rã sacerdote pe petei vexa'i ivaikue rei e'y va'e. Hepy reikuaa rami ome'ë 'rã ojevavyague omboekovia aguã. Ha'e ramo ha'e va'e py sacerdote ojao'i uka 'rã potae vy e'y ojevavyague. Ha'e ramo operdoaa 'rã.

¹⁹ Ha'e va'e ma mba'emo omboekovia aguã regua ome'ëmby, SENHOR pe opaga aguã rami oiko rire.

6

Amongue oikuaa tei ojevavya nho vy mba'emo ome'ë aguã regua

¹ SENHOR ijayvuve Moisés pe. Ha'e vy aipoe'i:

² — Xapy'a rei amongue ojevavy 'rã, ojapo vai 'rã SENHOR rovai. Xapy'a rei oirü pe nome'ë jevyxei 'rã mba'emo oia py omoï porã uka va'ekue, e'y vy mba'emo repyrã ome'ë va'ekue, mba'emo re imondaague mba'e, oirü okoreague,

³ omokanhy mbyre ojou tei ha'e nunga pe “Ndajoui” he'i 'rã oura rive vy, e'y vy amboae ramigua py avakue ojevavy jepiaty rami.

⁴ Ha'e rami ojevavyague oikuaa pavë ramo ome'ë jevy nho 'rã imondaague rekovia, e'y vy okoreague rekovia, hexeve omoï porã va'ekue, mba'emo omokanhy mbyre ojou va'ekue,

⁵ e'y vy ha'e nunga ha'e javi re oura riveague. Omboekoviapa ju 'rã ha'ekue'i rami. Ha'e va'e áry omoïve'i ju 'rã, petei nhirü ikuai nhavö áry petei-tei ju 'rã ome'ëve. Ija kuery pe ae 'rã ome'ë, ojevavyague re omboekovia aguã regua ome'ëa árave.

⁶ Omboekovia aguã regua ome'ë va'erã ma SENHOR pe ogueru 'rã guymba kuery gui vexa'i ivaikue rei e'y va'e, mbovy repy reikuaa rami omboekovia aguã regua ome'ë va'erã. Sacerdote pe ae 'rã ogueru.

⁷ Ha'e ramo ojevavyague sacerdote ojao'i uka 'rã SENHOR renonde. Ha'e ramo operdoaa 'rã ojevavya py opaga aguã rami oikoague.

Mba'emo oapya vy ome'ëmby regua lei oia

⁸ SENHOR aipoe'ive Moisés pe:

⁹ — Ejapo uka na Arão ha'e ta'y kuery pe. Ha'e vy aipo're: Po rami 'rã mba'emo peme'ë peapy vy. Oapy vy ome'ë mbyre ma altar áry 'rã opyta pytü mbukukue ko'ë peve, tata altar áry hendy riae reve.

¹⁰ Ha'e gui ma sacerdote onhemonde 'rã ao puku ajukue iporãve va'e guigua py, ha'e kaxö ajukue iporãve va'e guigua py opire reia áry. Ha'e rami vy altar áry tata ome'ë mbyre oapypa ma rire tanhimbu oguerova 'rã ha'e gui, altar vyvry ju ranhe 'rã omoï.

¹¹ Ha'e gui oao omboekoviapa vy amboae ju 'rã omoï. Ha'e vy tanhimbu ogueraa 'rã teta ikuaiia gui mombyry'i, petei henda iky'a e'ya py.

¹² Altar áry tata hendy riae 'rã oiny. Pembogue eme. Ko'ë nhavö hi'áry sacerdote omoïve 'rã xakã, ha'e gui ha'e va'e áry ju 'rã omoï oapy vy ome'ëmby, ha'e gui ha'e va'e áry ju 'rã oapy mba'emo kyrakue petei rami ikuaiia regua, ome'ë mbyre guigua.

¹³ Altar áry tata hendy riae 'rã oiny. Pembogue eme.

Mba'emoaju guigua ome'ëmby regua lei oia

¹⁴ — Po rami 'rã peme'ë mba'emoaju guigua. SENHOR renonde altar oï va'e py 'rã Arão ra'y kuery ome'ë.

¹⁵ Ha'e kuery regua petei ma mba'emoaju guigua ome'ëmby gui ojopy 'rã petei po renyë trigo ku'ikue iporãve va'e azeite reve. Ojopy avi 'rã heakuã porã va'e ome'ëmby revegua ha'e javi. Ha'e va'e ma altar áry omoendy 'rã ome'ëmby ha'e javi rekovia, heakuã porã rã SENHOR ojou porã aguã.

¹⁶ Ha'e rã hembyrekue ma Arão ha'e ta'y kuery ho'u 'rã. Imbovua reve'y 'rã ho'u henda iky'a e'ya py. Oguy nhemboaty oiaty roka rupi 'rã ho'u okuapy.

¹⁷ Ha'e rami avi ndoxyi 'rã imbovua reve. Ha'e kuery peguarã ae xee aeja xeivygua oapy vy ome'ëmby regua. Ha'e nunga ma iky'a e'y ete va'e, jejavya regua ha'e mba'emo omboekovia aguã regua ome'ëmby rami avi.

¹⁸ Arão ra'y kuery va'e regua ha'e javi 'rã ho'u ha'e va'e gui. Ha'e rami aguã pendekorã aeja va'ekue raka'e rã peve, pendekuaia pukukue reguarã, SENHOR pe oapy vy ome'ëmby regua. Ha'e va'e re ovv va'e rei tema iky'a e'y va'e avi 'rã opyta.

Sacerdote kueryã omoiajave mba'emo ome'ë aguã regua

¹⁹ Ha'e gui SENHOR aipoe'ive Moisés pe:

²⁰ — Pova'e nunga ma Arão ha'e ta'y kuery ome'ë 'rã SENHOR pe sacerdote-rã omoia ára py. Petei rryru trigo ku'ikue iporãve va'e ome'ë riae jepi 'rã mba'emoaju guigua ome'ë mbyrã. Mbyte peve ma aje'ivekue 'rã ome'ë, ha'e rã hembyrekue ma ka'arukue 'rã.

²¹ Ha'e va'e ma ombojy 'rã ooxyaty py azeite reve, omona porã 'rã guive ogueru aguã. Pëgue-pëgue'i mbixy ma ogueru 'rã mba'emoaju guigua ome'ë aguã, heakuã porã rã SENHOR ojou porã aguã.

²² Ha'e gui Arão ra'y kuery va'e regua hekovia sacerdote-rã omoï mbyre ma ha'ekue rami ae 'rã ojapo. Raka'e rã peve guarã ojapo uka pyre rami vy oapy 'rã SENHOR peguarã ae.

²³ Ha'e rami 'rã mba'emoaju guigua ome'ëmby peapypa, ndape'ui 'rã.

Jejavya regua ome'ëmby regua lei oia

²⁴ SENHOR aipoe'ive Moisés pe:

²⁵ — Aipo're Arão ha'e ta'y kuery pe: Po rami 'rã peme'ë jejavya regua. Mba'emo oapy vy ome'ëmby ojukaaty py ae 'rã jepuka jejavya regua, SENHOR renonde. Ha'e va'e ma iky'a e'y ete va'e.

²⁶ Jejavya regua mboaxaare sacerdote ae 'rã ho'u. Henda iky'a e'ÿa py 'rã ho'u, oguy nhemboaty oiaty roka py.

²⁷ Ome'ê mbyre ro'okue re ovy va'e ha'e javi tema iky'a e'ÿ va'e avi 'rã opyta. Ha'e gui oao re ri huguy omboayvi xapy'a vy ma omboayviague ojoi 'rã henda iky'a e'ÿa py.

²⁸ Yapo guigua py ri ombojy rire ma ombovo 'rã hyrukue. Ha'e rã overa va'e guigua py ri ombojy rire ma oipyeipa porã, ha'e ojoi 'rã yy py.

²⁹ Ha'e va'e ma sacerdote regua ha'e javi 'rã ho'u. Iky'a e'ÿ ete va'e.

³⁰ Ha'e rã jejavya regua ome'ê mbyre ro'okue ma ndape'ui 'rã teive, oguy nhemboaty oiaty py huguykue peru rire, henda iky'a e'ÿ va'e py jejavya ojao'i ukaa aguã. Ha'e nunga ma tata py 'rã peapypa.

7

Mba'emo omboekovia aguã regua ome'ê mby regua lei oia

¹ — Po rami 'rã peme'ê mba'emo omboekovia aguã regua. Ha'e va'e ma iky'a e'ÿ ete va'e.

² Mba'emo omboekovia aguã regua ome'ê mby mba oapy vy ome'ê mby ojukaaty py ae avi 'rã pejuka. Ha'e gui huguykue ma omboayvia 'rã altar áry ha'e javi rupi.

³ Ikyrakue ma omboaxapa 'rã, huguaikue ha'e hye áry ikyra oĩ va'ekue voi,

⁴ ha'e gui ipykyraxigüe mokoïve, hexe ikyra oĩ va'ekue ikupe reguare, ha'e ipy'akue regua ipykyraxigüe reve omboipa 'rã.

⁵ Altar áry 'rã sacerdote oapy, SENHOR pe oapy vy ome'ê mbyrã. Ha'e va'e ma mba'emo omboekovia aguã regua ome'ê mby.

⁶ Sacerdote regua ha'e javi 'rã ho'u henda iky'a e'ÿ va'e py. Iky'a e'ÿ ete va'e.

⁷ Jejavya regua peme'êa rami ae avi 'rã peme'ê mba'emo omboekovia aguã regua. Mokoïve regua lei ma pete'ĩ. Ha'e va'e py sacerdote ojao'i uka 'rã jejavya, rire ixupegua ae 'rã opyta ndoapyy va'ekue.

⁸ Amongue rekovia sacerdote oapy vy ome'ê rire ipirekue opyta 'rã ixupegua ae.

⁹ Omboxyryryaty py, e'ÿ vy oexyaty áry ombojy pyre ma sacerdote peguarã meme 'rã opyta, tatakua py mba'emo aju guigua oexy pyre rami avi.

¹⁰ Mba'eta mba'emo aju guigua ome'ê mbyre, azeite reve omoapomo mybre e'ÿ vy ipiru va'e teĩ ma Arão ra'y kuery pegua meme.

Peteĩ rami ikuaiia regua ome'ê mby regua lei oia

¹¹ — Po rami 'rã peme'ê peteĩ rami ikuaiia regua. Amongue va'e rei ha'eve SENHOR pe ome'ê aguã.

¹² SENHOR oguerovy'aa rupi ri ome'ê vy oguerovy'aa rupi ome'ê va'e reve ogueru avi 'rã mbojape imbovua revegua e'ÿ azeite py omoapomo mbyre, ha'e mbojape ipereri'ĩ va'e imbovua revegua e'ÿ azeite py oikyty pyre, ha'e mbojape trigo ku'ikue iporãve va'e guigua azeite reve omoapomo porã mbyre.

¹³ Ha'e va'e mbojape reve ogueru avi 'rã mbojape imbovua revegua ome'ê va'erã, peteĩ rami ikuaiia regua reve oguerovy'aa rupi ome'ê mbyrã.

¹⁴ Mba'emo ome'ê mby ha'e javi regua gui ogueru avi 'rã peteĩ mbojape SENHOR pe ome'ê va'erã. Ha'e va'e ma peteĩ rami ikuaiia regua ome'ê mby ruguykue sacerdote omboayvi rire ixupe guarã ae 'rã opyta.

¹⁵ Peteĩ rami ikuaiia reguare ome'êa árave 'rã ho'upa oguerovy'aa rupi ome'ê mby ro'okue. Mba'eve ndoejai 'rã ko'ê rã guarã.

¹⁶ — Ha'e gui xapy'a rei amongue onhemboayvua rupi ri mba'emo ome'ê, e'ÿ vy ha'e ae'i onhenhandua rami ome'ê teĩ ome'êa árave ae 'rã ho'ua. Xapy'a rei mba'emo hembyre ramo ko'êgue ha'eve teri ho'ua aguã.

¹⁷ Ha'e rã mboapy ára peve ri ome'ê mbyre ro'okue hembyre ramo ma oapypaa 'rã tata py.

¹⁸ Mba'eta xo'o peteĩ rami ikuaiia regua ome'ê mbyre ma mboapy ára peve ri ho'ua ramo heruare ndojou porãai 'rã, ome'ê va'ekue voi ndovarei 'rã. Ha'e nunga ma ha'eve'ÿ va'e. Hi'uaire re ae 'rã oimba ojevavyague re opaga aguã.

¹⁹ — Ha'e gui mba'emo ha'eve'ÿ va'e re xo'o ovy ramo ma ndo'uai 'rã. Tata py 'rã oapypaa. Ha'e rã xo'o ome'ê mbyre regua ma amongue ojeky'a'o ukapa va'ekue rei 'rã ha'eve ho'u aguã.

²⁰ Ha'e rami avi amongue ojeky'a'o uka va'ekue'ÿ ri, peteĩ rami ikuaiia regua SENHOR pe ome'ê mbyre xo'o ho'u ramo, oipe'aa 'rã heta va'e kuery mbyte gui.

²¹ Ha'e rami avi xapy'a rei amongue opoko 'rã mba'emo ha'eve'ÿ va'e re, avakue guigua ha'eve'ÿ va'e, e'ÿ vy mymba ha'eve'ÿ va'e, e'ÿ vy onhembotyryry va'e ha'eve'ÿ va'e guigua re. Ha'e gui ha'e va'e peteĩ rami ikuaiia regua SENHOR pe ome'ê mbyre xo'o gui ho'u ramo oipe'aa 'rã heta va'e kuery mbyte gui.

Ikyrakue ha'e huguykue Nhanderuete ndo'u ukaiguage

²² SENHOR aipoe'ive ju Moisés pe:

²³ — Ndeayvu 'rã Israel kuery pe. Ha'e vy aipo're: Pe'u eme vaka kyra, neĩ vexa'ĩ ha'e kavara kyra voi.

²⁴ Ha'e gui mymba omano rive va'ekue, ha'e inharõ va'e rembia kyrakue ha'eve 'rã amboae rami peiporu aguã, ha'e rã pe'u aguã ma nda'evei.

²⁵ Mba'eta SENHOR pe oapy vy ogueru pyre kyrakue ho'u va'e rei ma oipe'aa 'rã heta va'e kuery mbyte gui.

²⁶ Ndape'ui 'rã huguy mamã rã peĩa py, neĩ guyra neĩ vaka guigua.

²⁷ Huguy ho'u va'e rei tema oipe'aa 'rã heta va'e kuery mbyte gui.

Sacerdote kuery pegua re ijayvua

²⁸ SENHOR aipoe'ive ju Moisés pe:

²⁹ — Ndeayvu ke Israel kuery pe. Ha'e vy aipo're: Peteĩ rami ikuaia regua amongue ome'ẽ vy ogueru 'rã SENHOR pe. Ha'e gui peteĩ rami ikuaia regua ome'ẽmby gui
³⁰ opo py ae 'rã oi'pe'a heruvy SENHOR pe oapy vy ome'ẽ va'erã. Ipexo kyrakue ma ogueru 'rã ipexokue reve. Ha'e va'e SENHOR renonde oupi vy ombovava reve 'rã ome'ẽ.
³¹ Ikyrakue ma sacerdote oapy 'rã altar áry, ha'e rã ipexokue ma Arão ha'e ta'y kuery peguarã opyta.
³² Hi'ugue oiporu kuaa regua voi ome'ẽ 'rã sacerdote pe, peteĩ rami ikuaia regua ome'ẽ va'e gui oi'pe'a va'ekue.
³³ Mba'eta Arão ra'y kuery va'e regua peteĩ rami ikuaia regua ome'ẽmby ruguykue mboayviare ha'e ikyrakue rapyare, ha'e va'e ae 'rã ogueraa hi'ugue oiporu kuaa regua ojeupe guarã.
³⁴ Mba'eta xejeupe guarã ae aipe'a uka peteĩ rami ikuaia regua mymba pexokue ha'e hi'ugue Israel kuery ome'ẽ va'ekue gui, ha'e sacerdote Arão ha'e ta'y kuery pe ju amboaxa. Raka'e rã peve guarã ha'eve 'rã Israel kuery gui ojopy agüã.
³⁵ Ha'e nunga ae ma opyta Arão ha'e ta'y kuery peguarã, mba'emo SENHOR pe oapy vy ome'ẽ mbyre regua, SENHOR pegua sacerdote-rã omoia ára guive ha'e kuery peguarã aeja.
³⁶ Ha'e kuery omoia ára py ha'e nunga ae xee SENHOR xeayvu Israel kuery ome'ẽ agüã ha'e kuery pe, hamymino kuery rekorã avi aeja raka'e rã peve guarã — he'i.
³⁷ Ha'e rami ae 'rã peme'ẽ mba'emo oapy vy ome'ẽmby, mba'emo aju guigua, jevavya regua, mba'emo omboekovia agüã regua, ojeky'a'o agüã regua ha'e peteĩ rami ikuaia regua.
³⁸ Moisés pe SENHOR ae ojapo uka va'ekue Sinai vvyty re. Ojapo ukaa ára guive Israel kuery mba'emo ogueru agüã SENHOR pe Sinai regua tekoa e'ya py.

8

Êxodo 29.1-37

¹ SENHOR aipoe'ive ju Moisés pe:
² — Eraa Arão ha'e ta'y kuery ijao puku reve, ha'e azeite SENHOR pe nhomboaxaa agüã regua avi, ha'e gui peteĩ vaka ra'y jevavya re reme'ẽ va'erã, ha'e mokoĩ vexa'i, ha'e gui ajaka mbojape imbovua revegua e'y va'e oia.
³ Ogyu nhemboaty oĩaty rokẽ py emboaty uka heta va'e kuery ha'e javi — he'i.
⁴ Ha'e ramo Moisés ojapo SENHOR ojapo ukaague rami. Ha'e ramo heta va'e kuery ma ogyu nhemboaty oĩaty rokẽ py onhemboatypa okuapy.
⁵ Moisés aipoe'i ijaty va'e kuery pe:
 — Namigua ma SENHOR ojapo uka va'ekue nhandevy — he'i vyve
⁶ Arão ha'e ta'y kuery ogueru vy ombojau yy py.
⁷ Omonhemonde Arão kamixa puku py, ha'e ku'akuaa ju omoĩ. Omoĩ ao puku sacerdote pegua. Hexe omoĩ avi hi'árygua, ha'e manto sacerdote pegua ae omoĩ vy oku'akuaa avi manto regua py ae, ita oĩmbaa va'e py. Ha'e vy omoatyrõmba porã'i hexe.
⁸ Ha'e gui ma omoĩ avi pexo regua, ha'e pexo regua re ma Urim ha'e Tumim ju omoĩ.*
⁹ Inhakã re oimama imoiny ingorarã, ha'e ingora re renonde katy omoĩ avi ouro guigua ipererĩ va'e hakã regua iky'a e'y va'erã, Moisés pe SENHOR ojapo ukaague rami vy.
¹⁰ Ha'e rami rã azeite SENHOR pe nhomboaxaa agüã regua Moisés ogueru vy omoĩ ombojeroviaaty re, ha'e mba'emo ikuai va'e ha'e javi re, iky'a e'y va'erã omboaxa vy.
¹¹ Altar áry rupi ma sete-kue azeite omboayvi. Omboayvi altar re hembiporu ikuai va'e rupi, hy'a guaxu ha'e henda rupi guive, iky'a e'y va'erã omboaxa vy.
¹² Ha'e va'e rire Arão akã áry ju azeite SENHOR pe nhomboaxaa agüã regua onhoẽ, iky'a e'y va'erã omboaxa vy.
¹³ Ha'e gui Moisés omonhemboja avi Arão ra'y kuery. Ha'e vy kamixa puku py omonhemonde vy ha'e kuery oiku'akuaa avi ku'akuaa py. Akã reguarã oimama avi imoiny, SENHOR ijavyvague rami vy.
¹⁴ Vaka ra'y ogueru ruka avi jevavya regua ome'ẽ va'erã. Vaka ra'y akã áry Arão ha'e ta'y kuery opo omoĩ jevavya regua ome'ẽ va'erã.
¹⁵ Ha'e rã Moisés ojuka vy ojopy huguykue, ha'e vy okuã py oikyty altar rakua ikuai va'e re. Ha'e rami vy oiky'a'o altar. Huguy rembyrekue ma altar vvyry onhoẽmba. Ha'e rami vy omboaxa iky'a e'y va'erã, hi'áry ojevavyague ojao'i uka agüã.
¹⁶ Ha'e gui ma hyekue áry ha'e ipy'akue re ikyra oĩ va'ekue ogueru ipykyraxĩgue mokoĩve ikyrakue reve. Ha'e vy Moisés oapypa altar áry.
¹⁷ Ha'e rã vaka ra'y regua altar áry ndoapyy va'ekue ma ha'e kuery rekoa gui mombyry'i oapy, ipirekue, xo'o ha'e hepoxi ha'e javi reve, Moisés pe SENHOR ojapo ukaague rami vy.
¹⁸ Ha'e va'e rire vexa'i oapy vy ome'ẽ va'erã ju ogueru ruka. Vexa'i akã áry ma Arão ha'e ta'y kuery opo omoĩ.
¹⁹ Moisés ojuka vy huguykue omboayvipa altar áry ha'e javi rupi.
²⁰ Omboaypa vexa'i. Inhakãgue ma Moisés oapy, ipẽgue ha'e ikyrakue reve.
²¹ Hyekue, hetymague ma ojoipa ranhe yy py. Ha'e gui vexa'i ha'e javi Moisés oapy altar áry, heakuã porã rã SENHOR ojou porã agüã. Ixupegua oapy vy ome'ẽmby opyta, Moisés pe SENHOR ojapo ukaague rami vy.

* 8:8 Urim ha'e Tumim ma sacerdote kuery mba'ekuaa-a ogueroko va'ekue (Números 27.21).

²² Ha'e gui amboae vexa'i ju ogueru ruka sacerdote-rã mboaxaarã. Vexa'i akã áry Arão ha'e ta'y kuery omoí opo.

²³ Moisés ojuka vy huguykue gui ojara vy ombovy Arão nambi, ikuã guaxu ha'e ipyxã guaxu oiporu kuaa regua re meme.

²⁴ Ha'e gui Arão ra'y kuery avi omovaë. Huguy gui ae ombovy ha'e kuery nambi, ikuã guaxu ha'e ipyxã guaxu oiporu kuaa regua re. Ha'e rã huguy rembyrekue ma altar áry ha'e javi rupi Moisés omboayvi.

²⁵ Ogueru ikyrakue, huguaukue, ikyra hyekue áry ha'e ipy'akue re oí va'ekue, ipykyraxígue mokoíve ikyrakue reve, ha'e gui hi'ugue oiporu kuaa regua.

²⁶ Ha'e gui ajaka mbojape imbovua revegua e'ý va'e oía SENHOR renonde oí va'e gui ma ojopy peteí mbojape imbovua revegua e'ý, peteí mbojape azeite revegua, ha'e gui peteí mbojape ipereri'í va'e. Ha'e va'e ma omoí ikyrakue ha'e hi'ugue oiporu kuaa regua áry.

²⁷ Ha'e nunga ha'e javi omoí Arão ha'e ta'y kuery po py. Ha'e vy oupi reve ombovava SENHOR renonde, ome'ë mbyrã.

²⁸ Ha'e va'e rire ha'e kuery po gui Moisés oipe'a ju vy oapy altar áry, mba'emo oapy inony va'e áry. Ha'e nunga ma ha'e kuery iky'a e'ý va'erã omboaxa vy ome'ë, heakuã porã rã SENHOR ojou porã aguã, SENHOR pe ae oapy vy ome'ë.

²⁹ Ipexokue ma Moisés ojopy vy oupi reve ombovava SENHOR renonde, ome'ë mbyrã. Ha'e va'e vexa'i nhomboaxaa aguã regua ome'ëmby pexokue ma Moisés pegua ae, SENHOR ijayvuague rami vy.

³⁰ Ha'e gui Moisés ojopy avi azeite SENHOR pe nhomboaxaa aguã regua, ha'e altar áry huguykue oí va'ekue. Ha'e va'e omboayvi Arão ha'e ijao re, ha'e gui ta'y kuery ha'e ijao re guive. Ha'e rami vy iky'a e'ý va'erã omboaxa Arão ha'e ta'y kuery, ijao reve.

³¹ Ha'e gui ma Arão ha'e ta'y kuery pe Moisés aipoe'i:

— Pembojy ke xo'o oguy nhemboaty oíaty rokë rexei. Ha'e pyve 'rã pe'u ajaka nhomboaxaa aguã regua py mbojape oí va'e reve, xee ajapo ukaague rami vy, “Arão ha'e ta'y kuery ho'u 'rã”, ha'e rire.

³² Ha'e gui xo'o ha'e mbojape ndape'upai va'ekue ma peapypa 'rã.

³³ Sete ára peve pejepe'a eme oguy nhemboaty oíaty rokë gui, iky'a e'ý va'erã penemboaxa aguã ára ojeupitypa e'ý ja. Mba'eta sete ára peve 'rã SENHOR ojeupe guarã penemboaxa.

³⁴ Kova'e ára py jajapo va'ekue ma SENHOR ojapo uka va'ekue meme, pejejavyague ojao'ipa aguã.

³⁵ Ha'e nunga rupi sete ára peve 'rã pepyta oguy nhemboaty oíaty rokë py ara py ha'e pyávy. Pejapopa 'rã SENHOR ojapo uka va'ekue, pemano e'ý aguã, ha'e rami xevy ojapo uka rire — he'i.

³⁶ Ha'e ramo Arão ha'e ta'y kuery ojapopa Moisés rupi SENHOR ojapo uka va'ekue ha'e javi.

9

Arão ojeuegua ha'e heta va'e kuery regua ome'ëague

¹ Oito araa py ma Moisés oenoí Arão ta'y kuery reve, ha'e Israel mongetaaty kuery guive.

² Ha'e vy aipoe'i Arão pe:

— Eraa peteí vaka ra'y rejajavya regua reme'ë va'erã, ha'e peteí vexa'i reapy vy reme'ë va'erã. Mokoíve ma ivaikue rei e'ý va'e 'rã. Ha'e vy eru SENHOR renonde.

³ Ha'e gui aipo're 'rã Israel kuery pe: “Peru peteí kavara pejejavyague re peme'ë va'erã, ha'e gui peteí vaka ra'y ha'e peteí vexa'i ra'y, mokoíve peteí ma'etý va'e ha'e ivaikue rei e'ý va'e meme, peapy vy peme'ë va'erã.

⁴ Peru avi peteí vaka ha'e peteí vexa'i peteí rami ikuaiia regua peme'ë va'erã, SENHOR renonde pejuka aguã, ha'e gui mba'emo aju guigua azeite reve omona mbyre peme'ë va'erã, mba'eta kova'e ára SENHOR ojexa uka 'rã pëvy”, 're 'rã ha'e kuery pe — he'i.

⁵ Ha'e ramo Moisés ijayvuague rami vy ha'e kuery oguerupa okuapy oguy nhemboaty oíaty rexei. Ha'e vy heta va'e kuery ha'e javi oupa vy ojexa uka okuapy SENHOR renonde.

⁶ Moisés aipoe'i:

— Kova'e SENHOR ojapo uka va'ekue ma pejapo 'rã. Ha'e ramo SENHOR rexakãa ojexa uka 'rã pëvy.

⁷ Arão pe ju Moisés aipoe'i:

— Enhemboja ke altar oía py, ha'e eme'ë rejajavyague re reapy vy reme'ë aguã va'e. Ha'e vy ejao'i uka ndee ae rejajavyague, ha'e gui heta va'e kuery pe avi. Ha'e va'e rire eme'ë heta va'e ome'ë uka va'ekue ha'e kuery ojejavyague rejao'i uka aguã, SENHOR ijayvuague rami vy — he'i.

⁸ Ha'e ramo altar oía py Arão onhemboja vy ha'e ae ojejavyague regua ranhe ojuka vaka ra'y.

⁹ Arão pe ta'y kuery huguykue ogueru ramo huguykue re okuã ombovy vy oikyty altar rakua ikuai va'e re. Huguy rembyrekue ma onhoëmba altar yvýry.

¹⁰ Ha'e gui ojejavyague regua ome'ëmby kyrakue, ipykyraxígue ha'e ipy'akue regua oí va'ekue ha'e javi ma oapypa altar áry, SENHOR Moisés pe ojapo ukaague rami vy.

¹¹ Ha'e rã ho'o ha'e ipirekue ma tekoa gui mombyry'ia py oapy.

¹² Ha'e va'e rire mymba oapy vy ome'ë va'erã ju ojuka. Arão pe ta'y kuery huguykue ogueru rã ha'e omboayvi altar yvýry ha'e javi rupi.

¹³ Ixupe ogueru avi mymba oapy vy ome'ë va'erã omboaypa va'ekue, inhakãgue reve. Ha'e rã oapypa altar áry.

¹⁴ Ha'e gui hyekue ha'e hetymague ojoipa vy oapy altar py oapy inony va'e áry.

¹⁵ Ha'e va'e rire ogueru ruka heta va'e kuery ome'ẽ uka va'ekue. Kavara heta va'e ojevavyague regua ome'ẽmby ranhe ojopy vy ojuka, ha'e ogueroko katu ojevavyague regua ome'ẽ aguã, jypy ojapoague rami vy.

¹⁶ Ogueru ruka avi oapy vy ome'ẽ va'erã. Ha'e vy ome'ẽ ojapoaty rami vy.

¹⁷ Ha'e gui ogueru ruka avi mba'emo aju guigua ome'ẽ va'erã. Ha'e va'e regua petei po renyẽ ojopy vy oapy altar áry, aje'ive reve mba'emo oapy va'ekue áryve.

¹⁸ Ha'e va'e rire ojuka vaka ha'e vexe'i petei rami ikuai reguarã heta va'e kuery rekovia. Huguykue Arão ra'y kuery ixupe omboaxa rã omboayvipa altar yvýry ha'e javi rupi.

¹⁹ Ojopy avi vaka ha'e vexe'i kyrakue, huguaukie, hyekue regua oĩ va'ekue, ipykyraxĩgue ha'e ipy'akue regua oĩ va'ekue.

²⁰ Ipexokue áry ikyrakue omoĩmba vy oapypa altar áry.

²¹ Ha'e rã ipexo ha'e hi'ugue oiporu kuaa regua ma Arão omboaxa SENHOR renonde oupi vy ombovava reve, Moisés ojapo ukaague rami vy.

²² Ha'e va'e rire heta va'e kuery ikuai katu Arão opo oupi vy ogueroayvu porãmba. Ha'e gui mae oguejy, ojevavyague regua ome'ẽmba ma rire, oapy vy ome'ẽmby ha'e petei rami ikuai aguã regua guive.

²³ Moisés ha'e Arão oike jogueravy oguy nhemboaty oĩaty py. Ha'e gui oẽ ju vy teĩgue ju ogueroayvu porãmba heta va'e kuery. Ha'e ramo SENHOR rexakãmbaa ojekuaa ha'e kuery pavẽ pe.

²⁴ Oma'ẽ rã SENHOR-a guigua tata oguejy vy oapypa mymba ome'ẽmby altar áry oĩ va'e ha'e javi, ikyrakue guive. Ha'e nunga ha'e kuery oexa vy ogueroavy'a reve omboete okuapy. Guenapy'ã re oĩmba, ngova yvy re omovaẽ reve.

10

SENHOR renonde Nadabe ha'e Abiú oiko vaiague

¹ Ha'e gui Arão ra'y kuery Nadabe ha'e Abiú ma ha'e kuery voi ogueraa omba'e hy'a'i heakuã porã va'e oapypaty, ha'e va'e re omoĩ tata ha'e heakuã porã va'e. Ha'e rami vy ha'eve e'ỹa ramigua tata ogueroike SENHOR renonde, ha'e kuery pe ojapo uka va'ekue'y tei.

² Ha'e ramo SENHOR-a gui tata ho'a xapy'a vy oapypa. Ha'e rã oiko vai SENHOR renonde.

³ Ha'e gui Moisés aipoe'i Arão pe:

— Po rami SENHOR ijayvuague ae: “Xere onhemboja va'e pe aexa uka 'rã xeky'a e'ỹ va'ea, ha'e heta va'e kuery renonde ojekuaa 'rã xepo'akaa”, he'i. Ha'e ramo Arão okyrii.

⁴ Ha'e gui Moisés oenoĩ Arão tuty Uziel ra'y kuery Misael ha'e Elzafã. Ha'e kuery pe aipoe'i:

— Peju, peipe'a penderivy retiekue henda iky'a e'ỹ va'e renonde gui, peraa tekoa gui mombyry'ia py — he'i.

⁵ Ha'e ramo ha'e kuery ou vy ikamixa puku py ae onhovã heravy tekoa gui mombyry'ia py, Moisés aipoe'iague rami vy.

⁶ Moisés aipoe'i Arão pe, ha'e ta'y kuery Eleazar ha'e Itamar pe voi:

— Pejeai eme pende'a re, neĩ pemondoro eme pendeao, pemano e'ỹ aguã, ha'e nhande kuery pavẽ áry ou e'ỹ aguã imbopagaarã nda'evei ete va'e. Ha'e rã nderegua kuery Israel ro pygua kuery ikuai va'e ma tojae'o pavẽ SENHOR-a gui tata ho'aague re.

⁷ Peẽ eme guive oguy nhemboaty oĩaty rokẽ gui, pemano e'ỹ aguã, pendere omoĩa rire azeite SENHOR pe nhomboaxaa aguã regua — he'i.

Ha'e ramo ha'e kuery ojapo okuapy Moisés aipoe'iague rami.

Sacerdote kuery mba'emo ojapo aguã, ha'e kuery pegua re ijayvua

⁸ SENHOR voi ijayvu Arão pe. Ha'e vy aipoe'i:

⁹ — Ndee ha'e ndera'y kuery oguy nhemboaty oĩaty py peike ta jave ndapey'ui 'rã vinho neĩ iro va'e, peiko vai e'ỹ aguã. Ha'e rami aguã ma peẽ kuery rekorã aeja va'e raka'e peve guarã, ha'e peneramymino kuery ikuai va'erã-'erã pe guive guarã,

¹⁰ peẽ kuery peikuaa aguã mba'emo iky'a e'ỹ va'erã omboaxa pyre ha'e omboaxa pyre'y reve joo rami e'ỹa, ha'eve va'e ma ha'eve'y va'e reve joo rami e'ỹ guive,

¹¹ Israel kuery pembo'e kuaa aguã Moisés pe SENHOR omombe'u uka va'ekue rupi ikuai aguã rami.

¹² Ha'e gui Moisés aipoe'i Arão ha'e ta'y okuave'i va'ekue Eleazar ha'e Itamar pe:

— Pejopy mba'emo aju guigua SENHOR pe ome'ẽa teĩ ndoapyi va'ekue, ha'e pe'u imbovua e'ỹ re altar yvy'iry ae, iky'a e'ỹ va'e ramo.

¹³ Pe'u 'rã henda iky'a e'ỹ va'e py, mba'eta pẽvygua ha'e pendera'y kuery pegua ae, mba'emo SENHOR pe oapy vy ome'ẽ mbyre guigua. Ha'e rami ae xevy ojapo uka va'ekue.

¹⁴ Ha'e gui ipexokue ha'e hi'ugue peupi vy pembovava reve pemboaxa va'ekue voi pe'u 'rã petei henda iky'a e'ỹa py, ndera'y kuery ha'e nderajy kuery reve. Mba'eta ha'e nunga ma ndevy guarã ae ome'ẽ mbyre, ha'e ndera'y kuery peguarã, Israel kuery petei rami ikuai regua ome'ẽ va'ekue guigua.

¹⁵ Hi'ugue ha'e ipexokue peupi vy pembovava reve pemboaxa va'ekue ma peru 'rã mymba peapy va'ekue kyrakue reve. Ha'e nunga ha'e javi peupi vy pembovava 'rã SENHOR renonde. Ha'e rami aguã ma penderekorã aeja va'e raka'e peve guarã, ha'e peneramymino kuery peguarã, SENHOR he'iague rami vy — he'i.

¹⁶ Moisés oikuaa pota ete kavara jejavya regua ome'ẽ mbyre guigua teĩ oapypaa ma ra'e. Ha'e vy ijayvu atã Arão ra'y kuery okuave'i va'e Eleazar ha'e Itamar pe. Ha'e vy aipoe'i:

17 — Mba'e re tu ndape'ui ri jejavya regua ome'ẽ mbyre guigua henda iky'a e'ỹa py? Mba'eta ha'e nunga ma iky'a e'ỹ ete va'e. Pendevy SENHOR ome'ẽ heta va'e kuery ojevavyague peraa aguã SENHOR renonde peja'o'i uka vy.

18 Ne'exa, ha'e va'e mymba ome'ẽ mbyre ruguykue henda iky'a e'ỹ va'e py ndogueruai ramo ma xo'o pe'upa 'rãgue ra'e henda iky'a e'ỹ va'e py, xee ajapo ukaague rami vy — he'!

19 Arão ombovai Moisés pe:

— Ma'ẽ, ange jejavya regua xee ha'u va'e rire SENHOR ojou porã 'rãgue ri nda'u? Mba'eta ange xera'y kuery omboaxa heta va'e kuery ojevavyague regua SENHOR renonde, oapy vy ome'ẽ mbyre voi, va'eri ha'e rami ete xere oiko — he'!

20 Ha'e nunga Moisés oendu vy nda'ivaivei.

11

Deuteronomio 14.3-20

1 SENHOR ijavyu Moisés ha'e Arão pe. Ha'e vy aipoe'i:

2 — Aipopeje Israel kuery pe: Yvy re mymba ipy irundy va'e ikuai va'e gui ma pova'e anho 'rã pe'u:

3 Ipyapê mbyte rupi ja'o va'e ha'e oixu'u jevy va'e ha'e javi ma ha'eva 'rã mymba ikuai va'e gui pe'u aguã.

4 Ha'e rã pova'e nunga ma ndape'ui 'rã: oixu'u jevy va'e rive, ha'e e'ỹ vy ipyapê ja'o va'e'ỹ rive. Camelo ma oixu'u jevy va'eri ipyapê ja'o va'e'ỹ. Ha'e nunga ma ha'eva'e'ỹ va'e pendevy.

5 Arganz ma oixu'u jevy avi va'eri ipyapê ja'o va'e'ỹ. Ha'e nunga ma pendevy ha'eva'e'ỹ va'e.

6 Tapixi ma oixu'u jevy va'eri ipyapê ja'o va'e'ỹ. Ha'e nunga pendevy ha'eva'e'ỹ va'e.

7 Poryko ma ipyapê ja'o va'eri oixu'u jevy va'e'ỹ. Ha'e va'e ma pendevy ha'eva'e'ỹ va'e.

8 Ha'e nunga ro'okue ma ndape'ui 'rã, ne'i he'õgue re ma voi ndapepokoi 'rã, pendevy ha'eva'e'ỹ va'e ramo.

9 — Ha'e gui yy rupi ikuai va'e regua ma pova'e pe'u 'rã: ye'ẽ ha'e yakã rupi ipepo ha'e ipekue va'e ma pe'u 'rã.

10 Ha'e rã ipepo e'ỹ va'e, e'ỹ vy ipekue e'ỹ va'e ma nda'evei: ye'ẽ rupi, yakã, yy rupi onhemboaty okuapy, yy rupi temimoingo ikuai va'e tema nda'evei, ha'eva'e'ỹ va'e pendevy.

11 Pendevy ha'eva'e'ỹ va'e ramo ma ho'okue ndape'ui 'rã, he'õgue voi ha'eva'e'ỹ va'e.

12 Yy rupigua ipepo e'ỹ va'e, e'ỹ vy ipekue e'ỹ va'e ma pendevy ha'eva'e'ỹ va'e meme.

13 — Guyra oveve va'e regua ha'eva'e'ỹ va'e ma pova'e regua ro'o ndape'ui 'rã, ojeguarupy ramo: taguato xii, xapirê ha'e taguato ye'ẽ rupigua gui;

14 milhano, falção ha'e hexegua va'e ma guive rã;

15 xapirê regua ha'e javi, ha'e hexegua va'e ma guive rã;

16 avestruz, urukure'a, gaiyota, taguato, ha'e hexegua va'e ma guive rã;

17 mocho, xapirê ye'ẽ rupigua, íbis,

18 aka'ẽ, pelicano, abutre,

19 cegonha, garça ha'e hexegua va'e ma guive rã, poupa ha'e mbopi.

20 — Ha'e gui omy'i va'e oveve'i ha'e ipy irundy'i va'e regua ma guive rã ha'eva'e'ỹ va'e pendevy.

21 Ha'e rã omy'i ha'e oveve'i va'e, opy irundy re oguata va'e regua yvy áry rupi opo aguã hetyma mbukue va'e ma pe'u 'rã.

22 Ha'e va'e regua pe'u va'erã ma pova'e: locusta ha'e hexegua va'e ma guive rã, tuku-karu ha'e hexegua va'e ma guive rã, kyju ha'e hexegua va'e ma guive rã, ha'e tuku hexegua va'e ma guive rã.

23 Ha'e gui amboae oveve'i va'e ha'e omy'i va'e opy irundy re oguata va'e ma ha'eva'e'ỹ va'erã meme pendevy.

24 — Pova'e nunga re'õgue ma penemongy'aarã ramo amongue va'e rei hexe opoko va'ekue ma ha'eva'e'ỹ va'e 'rã oiko ka'aru peve.

25 He'õgue reraare ma ojoi 'rã oao, ha'e rami te'i ha'eva'e'ỹ va'e 'rã oiko ka'aru peve.

26 Mymba ipyapê ja'o va'eri mbyte rupi e'ỹ oja'o va'e, ha'e oixu'u jevy va'e'ỹ ma pendevy ha'eva'e'ỹ va'e meme. Ha'e nunga re opoko va'e rei ma ha'eva'e'ỹ va'e avi 'rã oiko.

27 Mymba ipy irundy va'eri opy mbyte re oguata va'e ma pendevy ha'eva'e'ỹ va'e meme. He'õgue re opoko va'e ma guive rã ha'eva'e'ỹ va'e 'rã oiko ka'aru peve.

28 He'õgue reraare voi ojoi 'rã oao, ha'e ha'eva'e'ỹ va'e oiko 'rã ka'aru peve. Ha'e nunga ha'e javi ma ha'eva'e'ỹ va'e pendevy.

29 — Ha'e gui yvy jave re temimoingo ikuai va'e va'e regua ma pova'e nunga ha'eva'e'ỹ va'e 'rã: doninha, anguja, teju ha'e hexegua va'e ma guive rã,

30 ha'e geco, jakare yvy re ikuai va'e, tejuro, teju ye'ẽ yv'rygua ha'e camaleão.

31 Ha'e gui temimoingo ikuai va'e ha'e javi gui ma ha'e nunga pendevy ha'eva'e'ỹ va'e meme 'rã. He'õgue re opoko va'ekue ma oiko 'rã ha'eva'e'ỹ va'e ka'aru peve.

32 Ha'e mba'emo áry ha'e nunga re'õgue ho'a ramo voi ha'eva'e'ỹ va'e 'rã, mba'emo rryru yvyra guigua mba'e, ao, ipire, voxa, e'ỹ vy tembiporu mba'emo jajapoa va'e rei, ha'e nunga nhamoi 'rã yy py, ka'aru peve 'rã opyta ha'eva'e'ỹ va'e. Ha'e ramo ma ha'eva'e'ỹ ju 'rã opyta.

33 Ha'e gui mba'emo rryru nha'e'ũ guigua py ri ha'e nunga ho'a ramo ma ha'e py omboyru pyre ha'e javi ha'eva'e'ỹ va'e 'rã opyta. Hyru voi pembovo 'rã.

34 Ha'e va'e py tembiporu yy reve oji va'ekue ma ha'eva'e'ỹ va'e meme 'rã opyta. Hykue va'e jay'u va'erã omboyru pyre ma ha'eva'e'ỹ va'e meme avi 'rã.

³⁵ Ha'e mba'emo áry rei he'õgue ho'a ramo opyta 'rã ha'eve'y va'e: tatakua, e'y vy tata rupa yapo guigua áry ho'a ramo pembovopa 'rã, ha'eve'y va'e ma opyta ramo, ha'e nunga rupi ha'eve'y va'ea peikuaa aguã.

³⁶ Ha'e rã yvu, e'y vy yy omboty pyre py ri ho'a ramo ma ha'eve va'e 'rã opyta. Ha'e rã yy py omano va'ekue re opoko va'ekue ma ha'eve'y va'e 'rã opyta.

³⁷ Xapy'a rei mba'emo ra'yigue onhoty mbyrã va'e áry ri he'õgue ho'a ramo ma opyta 'rã ha'eve va'e.

³⁸ Ha'e rã xapy'a rei amongue ha'yigue yy py omoaký va'ekue áry mba'emo re'õgue ho'a ramo ma ha'eve'y va'e 'rã opyta pendeivy.

³⁹ — Xapy'a rei mymba pe'u aguã ha'eve va'e omano ramo he'õgue re amongue opoko ri vy opyta 'rã ha'eve'y va'e ka'aru peve.

⁴⁰ He'õgue regua ho'u va'ekue ma ojoi 'rã oao, ha'e ka'aru peve 'rã oiko ha'eve'y va'e. He'õgue reraare voi ojoi 'rã oao, ha'e oiko 'rã ha'eve'y va'e ka'aru peve.

⁴¹ — Opa marãgua temimoingo yvy rupi omyí okuapy va'e ma pe'u aguã ha'eve'y va'e meme. Ha'e nunga ma pe'u va'erã e'y.

⁴² Opa marãgua temimoingo yvy rupi omyí okuapy va'e guye re uguata va'e, opy irundy re uguata va'e, e'y vy ipy reta va'e ma nda'evei 'rã pe'u aguã, ha'eve'y va'e ramo.

⁴³ Ha'eve'y va'e penhemoingo eme ha'e va'e regua temimoingo yvy rupi omyí okuapy va'e pe'ua py, penhemongy'a eme ha'e va'e regua gui, ha'eve'y va'e peiko e'y aguã.

⁴⁴ Xee ma SENHOR Penderuete. Ha'e nunga rupi peë voi pejky'a'o iky'a e'y va'e peiko aguã, mba'eta xee ma iky'a e'y va'e. Penhemongy'a eme temimoingo kuery yvy rupi onhembotyryry va'e gui.

⁴⁵ Xee SENHOR ae Egito yvy gui penenoẽmba va'ekue, Penderuete aiko aguã. Ha'e nunga rupi iky'a e'y va'e 'rã peiko, mba'eta xee ma iky'a e'y va'e.*

⁴⁶ — Ha'e va'e lei ma mymba kuery, guyra oveve va'e, yy rupi omyí va'e, ha'e temimoingo yvy re ikuai va'e ha'e javi regua,

⁴⁷ peikuaa aguã ha'eve va'e ha'e ha'eve'y va'e reve joo rami e'yã, ha'e mymba pe'u aguã ha'eve va'e ha'e ha'eve'y va'e voi.

12

Kunhague oikuavã'i rire ojeky'a'o jevy aguã regua

¹ SENHOR aipoe'ive ju Moisés pe:

² — Ndeayvu 'rã Israel kuery pe: Xapy'a rei peteí kunha kyri va'e oguereko vy ava'i ri oikuavã'i ma vy sete ára re 'rã oí ha'eve'y va'e, gueko re oiko va'e rami ae avi.

³ Oito araa py ma ava'i pire omboi uka 'rã.

⁴ Ha'e gui kunha va'e ma trinta e trêš ára peve 'rã oíve nguguy gui ojeky'a'o aguã. Ojeky'a'opaa ára ojeupity e'yã ja teíve ma voi ndopokoi 'rã iky'a e'y va'e re, neí ndoikei 'rã henda iky'a e'y va'e py.

⁵ Ha'e rã kunha'i ri oikuavã'i vy ma mokoí semana 'rã ha'eve'y va'e oí, gueko re oiko va'e rami avi. Ha'e va'e rire sessenta e seis ára re oí 'rã nguguy gui ojeky'a'opa peve.

⁶ — Ha'e gui imemby'i e'y vy ipi'a'i oikoague gui ojeky'a'opa aguã ára ojeupity ma ramo sacerdote pe ogueraa 'rã peteí vexe'i ra'y peteí ma'ety'i va'e oapy vy ome'ë va'erã, ha'e gui peteí apyaxu e'y vy peteí jeruxi'i jejavya regua ome'ë va'erã, oguy nhemboaty oíaty rokë py.

⁷ Ha'e ramo sacerdote ojuka 'rã SENHOR renonde kunha va'e ha'eve e'yague ojao'i uka vy. Ha'e ramo ojeky'a'opa ju 'rã nguguy gui. Ha'e rami aguã ma omemby'i e'y vy opi'a'i oikuavã'i va'e rekorã ojea pyre.

⁸ Ha'e rami teí xapy'a rei vexe'i ra'y ome'ë va'erã ndojou ri vy ogueraa 'rã mokoí jeruxi e'y vy mokoí apyaxu'i. Ha'e va'e regua peteí ma oapy vy ome'ë 'rã, ha'e rã amboae ma jejavya regua. Ha'e va'e py sacerdote ojao'i uka 'rã kunha va'e ha'eve e'yague, ha'e ramo ha'eve va'e ju 'rã oiko.*

13

Lepra regua lei oia

¹ SENHOR aipoe'í Moisés ha'e Arão pe:

² — Xapy'a rei amongue pire re oí 'rã irurupaa e'y vy ipeupa rei, e'y vy iovea overa rei va'e. Ha'e nunga lepra rivyvyi ramo peraa 'rã sacerdote Arão-a py, e'y vy ta'y sacerdote oiko va'ea py.

³ Ha'e ramo sacerdote oexa pota 'rã jiaia ipire re oí va'e. Xapy'a rei jiaia rupi ipire rague xií rei, ha'e jiaia ho'o peve oíke ma ramo ma oikuaa 'rã lepra guigua ete ai vaikue. Sacerdote oexa potapa ma vy iuxpe "Ha'eve'y va'e" he'i 'rã.

⁴ Xapy'a rei iovea overa rei va'e ha'e xií rei va'eri ho'o peve ijai ndoikei, ha'e ipire rague voi naxií ramo sacerdote omboty 'rã ijai va'e ha'e ae'i sete ára peve.

⁵ Sete araa py ma sacerdote oexa pota ju 'rã. Oexa rã ijai vaikue opyta, ha'e ipire áry rupi nda'ipy-ipyve ovyi ri ramo sete ára peve ae ju 'rã sacerdote omboty.

⁶ Ha'e gui sete araa py sacerdote oexa pota jevy 'rã. Xapy'a rei lepra ndovera reivei, ha'e nda'ipyve ovyi ramo ma iuxpe sacerdote "Ha'eve va'e" he'i 'rã. Ha'e va'e regua ai ma tykue rei va'ekue ae. Ava oao ojoi vy ha'eve va'e ju 'rã oiko.

⁷ Ha'e rami teí ojeky'a'o uka aguã sacerdote pe ojexa uka ma rire ipire rupi ijai tykue reia ipyve ju ovy ri ramo teigue ju 'rã ojexa uka sacerdote pe.

8 Ha'e va'e oikuaa pota rā ipire rupi ijai tykue reia ipyve ra'e ri ramo ixupe “Ha'eve'y va'e” he'i 'rā, lepra ete oī ramo.

9 — Xapy'a rei amongue re lepra ojekuaa ri ramo peraa 'rā sacerdote-a py.

10 Sacerdote oikuaa pota rā ipire rurua rupi xiī rei va'e ojekuaa, ipire rague xiimba ha'e ho'okue ojekuaa rei ri ramo

11 ipire re lepra ae oī. Ha'e nunga rupi sacerdote ixupe “Ha'eve'y va'e” he'i 'rā. Nomboty 'rā, ha'eve'y va'e ae oiko ramo.

12 Xapy'a rei lepra ipy-ipyve ri hete pire ha'e javi rupi, ha'e sacerdote oexa rā inhakā guive ipy peve oja'o'ipa ri ijai ramo

13 oikuaa pota porā 'rā. Xapy'a rei lepra ho'o ha'e javi rupi oja'o'ipa ramo iove va'e pe “Ha'eve va'e” he'i 'rā. Lepra oīague xiimba ramo ha'eva va'e ju oiko.

14 Ha'e rami teī ho'okue ojekuaa jevya ára py ma ha'eve'y va'e ju 'rā oiko.

15 Ho'okue ojekuaa reia py sacerdote oexa vy “Ha'eve'y va'e” he'i 'rā. Ho'okue ojekuaa va'e ma ha'eve'y va'e. Ha'e nunga ma lepra ae.

16 Xapy'a rei ho'okue ojekuaa rei va'ekue xiimba jevy ramo ou 'rā sacerdote-a py.

17 Ha'e ramo oexa pota 'rā. Xapy'a rei lepra ojekuaa va'ekue xiimba jevy ramo ijai vaikueague pe sacerdote “Ha'eva va'e” he'i 'rā. Ha'e ramo ha'eva va'e 'rā oiko.

18 — Ha'e gui xapy'a rei ho'okue ha'e ipire py ipeupa reiague onhemboty, a

19 ha'e ipeupa reia 'rāgue py irurupa rei vy iovea xiimba rei, e'y vy overa reia rupi pytāmba rei avi ramo ojexa uka 'rā sacerdote pe.

20 Ha'e ramo sacerdote oikuaa pota 'rā. Xapy'a rei ipire guýry ete oike, ha'e ipire rague'i xiimba ri ramo sacerdote “Ha'eve'y va'e” he'i 'rā. Ha'e va'e ma lepra ae, ipeupa reiague gui ju ojekuaa.

21 Ha'e rami teī sacerdote oexa pota rā ipire rague'i naxiivei, ipire guýry e'y, ha'e ndoveravei ramo sacerdote sete ára peve 'rā omboty ha'e ae'i.

22 Xapy'a rei ipire rupi ipy-ipyve ri ramo ma ixupe sacerdote “Ha'eve'y va'e” he'i 'rā, lepra ae ramo.

23 Ha'e rami avi iovea overa reia nda'ipyve ovyi ri ramo ma ipeupa reia rendakue ae 'rā ipere. Ha'e ramo ixupe sacerdote “Ha'eva va'e” he'i 'rā.

24 — Xapy'a rei ipire re tata okaia py ho'okue perea overa rei ri, xapy'a rei xiimba ha'e pytā rei reve, e'y vy xiimba rive ramo

25 sacerdote oexa pota 'rā. Xapy'a rei ipere overa reia rague xiimba, ha'e ipire guýryve ri oī ramo lepra ae okaiaague mbyte gui ojekuaa. Ixupe sacerdote “Ha'eve'y va'e” he'i 'rā, lepra ae ramo.

26 Ha'e rami teī sacerdote oexa pota rā ipere overa reia rague naxiī ri, neī ipire guýry voi ndoikei, ha'e ndoveravei ri ramo sacerdote omboty 'rā sete ára peve ha'e ae'i.

27 Ha'e gui sete araa py ma sacerdote oexa pota jevy 'rā. Xapy'a rei ijai ipire rupi ipyve ri ovy ramo sacerdote “Ha'eve'y va'e” he'i 'rā, lepra ae ramo.

28 Ha'e rami avi xapy'a rei ipere overa reia oīague py opyta, nda'ipyve ovyi, ha'e ndovera reivei ramo okaiaague pere ae 'rā ojekuaa. Ha'e ramo sacerdote “Ha'eva va'e” he'i 'rā, okaiaague pere rive ramo.

29 — Xapy'a rei ava e'y vy kunha inhakā re e'y vy hembeta re ijai ramo

30 sacerdote oexa pota 'rā ai. Xapy'a rei ipire guýry ri ijai oike, ha'e hague'i ijupa rei va'e ojekuaa ramo ma sacerdote “Ha'eve'y va'e” he'i 'rā. Ha'e nunga lepra ma tinha 'epy va'e, inhakā re e'y vy hembeta re ojekuaa.

31 Ha'e rami teī ai tinha sacerdote oikuaa pota vy oexa rā ijai ipire guýry vaipa e'y, ha'e hague huū va'e noī ri ramo sacerdote sete ára peve 'rā omboty tinha revegua ha'e ae'i.

32 Sete araa py ma sacerdote oexa pota ju 'rā ai. Xapy'a rei tinha nda'ipyve ovyi, hague'i iju va'e noī, ha'e tinha ai oexa rā ipire guýry e'y ri ijai ramo ma

33 ava onhopā 'rā. Ha'e rā ai tinha oīa rupi ma nonhopāi. Ha'e gui sacerdote omboty ju 'rā sete ára peve ai tinha revegua.

34 Sete araa py ma sacerdote oexa pota jevy 'rā ai tinha revegua. Xapy'a rei ipire rupi nda'ipyve ovyi, ha'e ipire guýry e'y ri ijai ramo ixupe sacerdote “Ha'eva va'e” he'i 'rā. Oao ojoj ma vy ha'eva va'e ju 'rā oiko.

35 Ha'e rami avi xapy'a rei ojegy'a'o uka rire ipire rupi ai tinha ipyve pyve ri ramo

36 sacerdote oexa pota ju 'rā. Ipire rupi tinha ipyve pyve ri ramo sacerdote hague'i ijupa va'e oeka e'y teī ha'eve'y va'e ae oiko.

37 Ha'e rami avi ha'e oexa rā ai tinha va'e opyta, ha'e hague'i huū va'e ipukuve ri ramo ai tinha okuera ma. Ha'eva va'e ramo ixupe sacerdote “Ha'eva va'e” he'i 'rā.

38 — Ha'e gui ava e'y vy kunha ipire rupi iperea overa rei va'e oī ramo

39 sacerdote oexa pota 'rā. Xapy'a rei ipire rupi ipereague xiimba rei va'eri ndovera reivei va'e ramo ma iove xiī ojekuaa ipire rupi. Ha'e va'e ma ha'eva va'e.

40 — Xapy'a rei ava akā gui hi'a okuipa vy ipire rei teī ha'eva va'e oiko.

41 Xapy'a rei hova katy gui ri hi'a kui vy hova katy ipire rei teī ha'eva va'e oiko.

42 Ha'e rami avi xapy'a rei ijapyte rupi e'y vy hova katy hi'a kuipaague py ojekuaa ri ai xiī rei va'e pytā reve vy ma lepra ojekuaa, ijapyte rupi e'y vy hova katy hi'a kuipaague py.

43 Ha'e gui sacerdote oikuaa pota vy oexa rā irurua ijapyte re e'y vy hova katy hi'a kuipaague py xiī rei pytā reve ri ramo lepra ipire re ojekuaa rami,

44 ha'e ramo ma lepra revegua ae, ha'eve'y va'e oiko. Ixupe sacerdote “Ha'eve'y va'e” he'i 'rā, inhakā re ijai oī ramo.

⁴⁵ — Ha'e gui lepra revegua ma oao xorokue py onhemonde 'rã, o'a voi nomoatyrõi 'rã. Ojejuru mo'ã reve ojapukai vy "Ha'eve'y va'e, ha'eve'y va'e aiko!" he'i 'rã.

⁴⁶ Hexe ai oia ja ha'eve'y va'e oiko 'rã. Ha'eve'y va'e vy ha'e ae'i 'rã oiko. Heta va'e kuery gui mombyry 'rã onhemboekoa.

⁴⁷ — Xapy'a rei amongue ao re ojekuaa 'rã hove rei va'e, ao vexa'i rague guigua, e'y vy ajukue iporãve va'e guigua re.

⁴⁸ Ipuku-a rupigua mba'e, e'y vy ipya rupigua re ojekuaa 'rã ajukue iporãve va'e guigua e'y vy vexa'i rague guigua re, mba'emo pire re, e'y vy pire guigua ojapo pyre re mba'e.

⁴⁹ Ha'e nunga re hove va'e hovy, e'y vy pytã va'e ri oi ramo, ao re mba'e, e'y vy mba'emo pire re, ipuku-a rupi e'y vy ipya rupigua re, ha'e pire gui mba'emo ojapo pyre re tei hove rei va'e ojekuaa rã oexa uka 'rã sacerdote pe.

⁵⁰ Sacerdote oexa pota vy hove rei va'e oia omõ porã 'rã sete ára peve.

⁵¹ Ha'e gui sete araa py ma oexa pota jevy 'rã. Xapy'a rei ijao re ipyve ovy ri ramo, ipuku-a rupi e'y vy ipya rupi tei, ipire re e'y vy mba'emo hembiape re mba'e, ha'e ramo lepra ovy va'e ae 'rã oi. Ha'e va'e ma ha'eve'y va'e ae.

⁵² Ha'e ramo oapypaa 'rã ajukue, ipuku-a rupi e'y vy ipya rupigua re lepra ojekuaa tei, vexa'i rague guigua e'y vy ajukue iporãve va'e guigua tei, mba'emo pire gui ojapo pyre re tei lepra ojua rã lepra ae ovy va'e ae. Ha'e nunga ha'e javi oapypaa 'rã.

⁵³ — Ha'e rami avi xapy'a rei sacerdote oexa pota rã hove rei va'e nda'ipyve ovyi ri ijao re, ne'i ipuku-a rupi ne'i ipya rupi, ne'i mba'emo pire gui ojapo pyre re voi ramo

⁵⁴ sacerdote ojoi uka 'rã hove va'e oïague, ha'e sete ára peve ju omõ porã 'rã ha'e ae'i.

⁵⁵ Ha'e gui ajukue hove rei va'e ojekuaa ague ojia rire sacerdote oexa pota rã ha'ekue'i ae opyta ramo, nda'ipyve ovyi tei ha'eve'y va'e ae 'rã oiko. Oapypaa 'rã tata py. Ha'e nunga ma lepra okaru va'e, hi'áry rupi e'y vy igyu rupi ojekuaa tei.

⁵⁶ — Ha'e rami avi sacerdote oikuaa pota vy xapy'a rei oexa 'rã ojia rire oje'o ramo omondoro 'rã ajukue gui, e'y vy ipirekue guigua gui, ipuku-a rupi e'y vy ipya rupi ojekuaa tei.

⁵⁷ Ajukue re hove rei ovy va'e ojekuaa teri ramo, ipuku-a rupi e'y vy ipya rupi tei, mba'emo pire gui ojapo pyre re tei lepra ipy-ipyve va'erã ae. Oapypaa 'rã tata py lepra ovyague.

⁵⁸ Ha'e rami tei xapy'a rei ao re hove rei va'e oia va'e, ipuku-a rupi e'y vy ipya rupi tei, e'y vy mba'emo pire guigua tei ojia rã hove rei va'e nde'jekuaavei ri ramo teigue ju 'rã ojia. Ha'e vy ma ha'eve va'e ju 'rã oiko.

⁵⁹ Ha'e va'e lei ma vexa'i rague guigua re hove rei va'e ojekuaa va'e regua, e'y vy ajukue iporãve va'e guigua re, ipuku-a rupi e'y vy ipya rupi ojekuaa, e'y vy ipire gui ojapo pyre re ojekuaa rire, ha'e nunga pe "Ha'eve va'e" e'y vy "Ha'eve'y va'e" he'i kuaa aguã.

14

Lepra gui okuera va'ekue regua lei oia

¹ SENHOR aipoe'i Moisés pe:

² — Pova'e ojapo ukapy ma lepra gui okuera va'ekue ojeky'a'oa ára guarã. Ha'e rami rã peraa 'rã sacerdote-a py.

³ Ha'e ramo tekoa gui mombyry'i oipe'a vy oexa pota 'rã. Xapy'a rei lepra ogueroko va'ekue gui okuera ma ramo

⁴ sacerdote oiky'a'oa aguã ogueru ruka 'rã mokoï guyra oikove reve ha'e ha'eve va'e, ha'e gui petei vyvra yary, havijukue pytã va'e ha'e hissopo rogue.

⁵ Petei guyra ma sacerdote ojuka uka 'rã hyru nhae'ũ guigua py yy xyry omboyru va'ekue áry.

⁶ — Ha'e gui mokoïa guyra ju ogueru 'rã oikove reve, ha'e gui vyvra yary, havijukue pytã va'e, ha'e hissopo rogue. Ha'e vy omoakymba 'rã guyra yy xyry áry ojuka va'ekue ruguykue py.

⁷ Lepra gui ojeky'a'oa uka va'e áry rupi ma omboavyi 'rã sete-kue. Ha'e vy ixupe "Ha'eve va'e" he'i 'rã, ha'e gui guyra oikove va'e opoi ju 'rã tekoa e'yã áry rupi oveve ovy aguã.

⁸ Ha'e gui ojeky'a'oa uka va'e ojoi 'rã oao, onhopimba 'rã opire rague ha'e javi, ha'e oiau 'rã yy py. Ha'e vy ma ha'eve va'e ju 'rã oiko. Ha'e va'e rire oo ju 'rã tekoa py, tei ngoo py tema ndoikei ranhe 'rã sete ára peve.

⁹ Sete araa py ma o'a onhopimba 'rã oakã gui, guendyva, ha'e guexa pykã rague guive. Opire rague ha'e javi 'rã onhopimba. Ha'e vy oao ojoi 'rã, oiau 'rã guive. Ha'e vy ma ha'eve va'e ju 'rã oiko.

¹⁰ — Oito araa py ma ogueru 'rã mokoï vexa'i ivaikue rei e'y va'e, petei vexa'i kunha ivaikue rei e'y va'e petei ma'et'y'i va'e, ha'e mboapy ryruru trigo ku'ikue iporãve va'e mba'emoaju guigua ome'ẽ mbyrã, azeite reve omonamba pyre, ha'e gui petei ryruru azeite ju.

¹¹ Ha'e gui sacerdote joky'a'oa ukua rupi oiko va'e ma SENHOR renonde oexa uka 'rã ava ojeky'a'oa uka aguã oo va'e mba'emo ogueru va'ekue ha'e javi reve, oguy nhemboaty oiaty rokẽ py.

¹² Petei vexa'i va'e regua ogueru vy ojuka 'rã mba'emo omboekovia aguã regua ome'ẽ va'erã, azeite ryruru reve. Ha'e nunga oupi reve ombovava 'rã SENHOR renonde ome'ẽ vy.

¹³ Ha'e gui vexa'i mboae ju 'rã ojuka. Jejavya regua ha'e oapy vy ome'ẽmby ojukaaty py ae ojuka, henda iky'a e'y va'e py. Mba'eta mba'emo omboekovia aguã regua ome'ẽmby ha'e jejavya regua ma sacerdote pe meme opyta, iky'a e'y ete va'e.

¹⁴ Omboekovia aguã ome'ẽmby ruguykue regua sacerdote ojopy vy omboyru 'rã ojeky'a'oa uka va'e nambi, ikuã guaxu ha'e ipyxã guaxu oiporu kuaa regua re meme.

¹⁵ Azeite ju ojopy vy hyru gui onhoë 'rã opo ijaxua regua mbyte py.

¹⁶ Opo ijaxua re azeite oi va'e py omoakÿ 'rã okuã oiporu kuaa regua. Ha'e vy okuã py ju omboavyipa 'rã sete-kue SENHOR renonde.

¹⁷ Azeite rembyrekue opo py oi teri va'e regua ma sacerdoti ombovy 'rã ojeki'a'o uka va'e nambi, ikuã guaxu ha'e ipyxã guaxu oiporu kuaa regua re meme, mba'emo omboekovia aguã regua ome'ë mbyrã ojuka uka va'ekue ruguy áry.

¹⁸ Ha'e rã azeite rembyrekue opo py oi va'e ma sacerdoti onhoë 'rã ojeki'a'o uka va'e apyte re. Ha'e rami vy SENHOR renonde sacerdoti ojao'i uka 'rã ha'eve e'ÿague.

¹⁹ — Ha'e gui ma jejavya regua sacerdoti ome'ë vy ojao'i uka 'rã ojeki'a'o uka va'e ha'eve e'ÿague. Ha'e va'e rire ma ojuka 'rã oapy vy ome'ëmby.

²⁰ Ha'e nunga ome'ë 'rã altar áry mba'emoaju guigua reve. Ha'e rami py sacerdoti ojao'i uka 'rã ava ha'eve e'ÿague. Ha'e ramo ha'eve va'e ju 'rã oiko.

²¹ Xapy'a rei iporiaukue'i vy ha'e nunga ha'e javi ndojou ri vy ogueru 'rã petei vexa'i mba'emo omboekovia vy ome'ë aguã oupi vy ombovava reve, ha'eve e'ÿague ojao'i uka aguã. Ogueru avi 'rã petei ryru trigo iporãve va'e azeite reve omoma mbyre mba'emoaju guigua ome'ë aguã, ha'e petei ryru azeite,

²² ha'e gui mokoï jeruxi e'ÿ vy mokoï apyaxu ojoua'i rami. Ha'e va'e regua petei ma jejavya regua ome'ë va'erã, ha'e rã amboae ma oapy vy ome'ë va'erã.

²³ Ha'e gui irundy meme ára ma ojeki'a'o ukaa py sacerdoti pe ogueru 'rã ha'e nunga ha'e javi, oguy nhemboaty oĩaty va'e rokë py, SENHOR renonde.

²⁴ Sacerdoti ma vexa'i mba'emo omboekovia aguã regua ome'ëmby ha'e azeite ryru ojopy vy oupi 'rã SENHOR renonde ombovava reve ome'ë mbyrã.

²⁵ Ha'e gui ma sacerdoti ojuka 'rã vexa'i mba'emo omboekovia aguã regua ome'ëmby. Ha'e vy mba'emo omboekovia aguã vexa'i ojuka va'ekue ruguy ojopy vy ombovy 'rã ojeki'a'o uka va'e nambi, ikuã guaxu ha'e ipyxã guaxu oiporu kuaa regua re meme.

²⁶ Azeite onhoë 'rã opo ijaxua regua mbyte re.

²⁷ Ha'e vy opo ijaxua regua re azeite oi va'e py okuã oiporu kuaa regua omoakÿ vy omboavyi 'rã sete-kue SENHOR renonde.

²⁸ Ha'e vy azeite opo py oi va'e regua ombovy 'rã ojeki'a'o uka va'e nambi apy, ikuã guaxu ha'e ipyxã guaxu oiporu kuaa regua re meme, mba'emo omboekovia aguã regua ojuka pyre ruguy oikyty va'ekue áry.

²⁹ Ha'e gui sacerdoti po py azeite mbyre oi va'e ma onhoë 'rã ojeki'a'o uka va'e apyte re, SENHOR renonde ha'eve e'ÿague ojao'i uka aguã.

³⁰ Ome'ë 'rã petei jeruxi e'ÿ vy petei apyaxu ha'e ojoua'i rami.

³¹ Ha'e va'e regua petei ma jejavya regua ome'ë 'rã, ha'e rã amboae ma mba'emoaju guigua oapy vy ome'ëmby reve guarã. Ha'e rami py SENHOR renonde sacerdoti ojao'i uka 'rã ojeki'a'o uka va'e ha'eve e'ÿague.

³² Ha'e va'e lei ma lepra ogueroko va'e gui ojeki'a'o uka va'e rekorã, iporiaukue'i vy ome'ë aguã ndojou rimo.

Lepra oo re ojekuaa va'e regua lei oĩa

³³ SENHOR aipoe'ive ju Moisés ha'e Arão pe:

³⁴ — Canaã vvy pendekoarã pendevy ame'ë va'ekue py pevaë ma rire amongue oo re xee amoï 'rã hu'ũmba rei va'e.

³⁵ Ha'e ramo hoo va'e sacerdoti pe omombe'u vy "Mba'emo vaikue ko xero re oi", he'i 'rã.

³⁶ Ha'e ramo sacerdoti oguenoë ukapa 'rã opy gui, hu'ũ rei va'e oexa pota e'ÿ mbove, oo py ikuai va'e ha'e javi omongy'apa e'ÿ aguã. Ha'e rire mae ma sacerdoti oo 'rã oo re oikuaa pota aguã.

³⁷ Oexa pota 'rã hu'ũ rei va'e. Xapy'a rei oo mbotya re iovea hovy rei va'e e'ÿ vy pytã reia ri ojekuaa oo mbotya gu'ÿryve oike ramo ma

³⁸ opy gui sacerdoti oë vy omboty uka 'rã sete ára peve.

³⁹ Sete araa py sacerdoti ou ju 'rã oexa pota vy. Xapy'a rei oo mbotya re ipyve ri hu'ũ rei va'e ojekuaa ramo ma

⁴⁰ oo mbotya gui omboi uka 'rã ita hu'ũ rei va'e oĩa, ha'e vy omombo uka 'rã tetã gui mombyry'i petei henda mba'emo ha'eve'ÿ va'e omomboaty py.

⁴¹ Ha'e gui onhopi ukapa 'rã opy rupi mbotya ikuai va'e ha'e javi rupi. Onhopi va'ekue ku'ikue ma omombo 'rã tetã gui mombyry'i petei henda mba'emo ha'eve'ÿ va'e omomboaty py.

⁴² Ha'e va'e rire ma ita mboae ojopy vy omoĩa 'rã omboi ppyague py. Omoapomo pyau va'ekue ojopy vy omboja 'rã oo re.

⁴³ — Xapy'a rei ita omboia vy oo mbotya onhopimba rire omboja jevy tei oo re hu'ũ rei va'e ojekuaa jevy ri ramo

⁴⁴ sacerdoti oike ju 'rã oexa pota. Xapy'a rei oo re hu'ũ rei va'e tuvixa-vixave ri vy ma hu'ũ rei ovy va'e ae 'rã oi. Ha'eve'ÿ va'e ae 'rã opyta.

⁴⁵ Ha'e rami rã oitypa 'rã oo, ita ha'e yvyra omboipa 'rã, oo mbotya omboja va'ekue voi. Ha'e nunga ogueraapaa 'rã tetã gui mombyry, petei henda mba'emo ha'eve'ÿ va'e omomboaty py.

⁴⁶ Oo omboty aguã jave py amongue oike vy ha'eve'ÿ va'e avi 'rã oiko ka'aru peve.

⁴⁷ Opy oke e'ÿ vy okaru va'ekue ma ojoi 'rã oao.

- 48 — Ha'e rami avi oo omboja pyaupya rire ha'e py sacerdote oike jevy vy oexa pota rã oo re hu'ũ rei va'e ndatuvixave ovyi ri ramo ixupe sacerdote "Ha'eve va'e" he'i 'rã, hu'ũ rei va'e okanhy ma rire.
- 49 Ha'e gui oo oiky'a'o aguã ma ojopy 'rã mokoĩ guyra, yvyra yary, havijukue pytä va'e ha'e hissopo rogue.
- 50 Peteĩ guyra ojuka 'rã hyru nhae'ũ guigua py yy xyry omboyru va'ekue áry.
- 51 Ojopy 'rã yvyra yary, hissopo rogue, havijukue pytä va'e ha'e guyra oikove va'e. Ha'e vy guyra ojuka va'ekue ruguy py omoaký 'rã yy oxyry va'e reve. Sete-kue 'rã omboayvi oo re.
- 52 Ha'e rami py oo oiky'a'o 'rã guyra ruguykue, yy oxyry va'e, guyra oikove va'e, yvyra yary, hissopo rogue ha'e havijukue pytä va'e py guive.
- 53 Guyra oikove va'e ma tetã gui opoi 'rã mombyry tekoa e'ÿa áry rupi oveve ovy aguã. Ha'e rami vy oo ha'eve e'ÿague oiky'a'o uka ma ramo ha'eve va'e ju 'rã opyta.
- 54 — Ha'e va'e lei ma opa marãgua lepra ha'e mba'eaxy tinha oguereko va'e regua,
- 55 ao re hu'ũ rei va'e oĩ va'e, ha'e oo re,
- 56 irurupa va'e re, ipeu ha'e iperea overa rei va'e re,
- 57 penhombo'e aguã ha'eve va'e ha'e ha'eve'ÿ va'e oikoa re. Ha'e va'e ma lei lepra regua.

15

Ava ha'e kunha re ha'eve'ÿa oĩ va'e re ijayvua

¹ SENHOR aipoe'ive Moisés ha'e Arão pe:

- ² — Pendeayvu Israel kuery pe, ha'e vy aipopeje: Ava ma guive rã hete guigua ndopytai ramo ha'eve'ÿ va'e 'rã oiko ndopytaia káuxa.
- ³ Po rami 'rã ha'eve'ÿ va'e oikoa oikuaa aguã regua, hete guigua ndopytaia káuxa. Xapy'a rei hete gui ndopytai, e'ÿ vy opytu'u-tu'u teĩ ha'eve'ÿ va'e ae 'rã oiko.
- ⁴ Tupa ha'e onhenoa py rei tema ha'eve'ÿ va'e 'rã opyta, ndopytaia káuxa. Ha'e mba'emo áry ha'e oĩague py rei ha'eve'ÿ va'e avi 'rã opyta.
- ⁵ Hupa re ovy va'e rei tema ojoi 'rã oao, ha'e ojau 'rã yy py. Ha'e vy ka'aru peve ha'eve'ÿ va'e 'rã oiko.
- ⁶ Ha'e gui hete guigua opyta e'ÿ va'e oguapyague py ri oguapy va'e tema ojoi 'rã oao, ha'e ojau 'rã yy py. Ha'e vy ha'eve'ÿ va'e 'rã oiko ka'aru peve.
- ⁷ Hete guigua opyta e'ÿ va'e re ovy va'e tema ojoi 'rã oao, ojau 'rã guive yy py, ha'e oiko 'rã ha'eve'ÿ va'e ka'aru peve.
- ⁸ Xapy'a rei amongue ha'eve va'e re ava hete guigua opyta e'ÿ va'e onyvõ ramo ha'e va'e voi ojoi 'rã oao, ha'e ojau 'rã yy py, ha'e vy ka'aru peve oiko 'rã ha'eve'ÿ va'e.
- ⁹ Kavaju kupe árygua hete guigua opyta e'ÿ va'e oĩague voi opyta 'rã ha'eve'ÿ va'e.
- ¹⁰ Mba'emo iguýry oĩ va'e re opoko va'e rei tema oiko 'rã ha'eve'ÿ va'e ka'aru peve. Ha'e rã ha'e nunga reraare voi ojoi 'rã oao, ha'e ojau 'rã yy py, ha'e vy oiko 'rã ha'eve'ÿ va'e ka'aru peve.
- ¹¹ Ha'eve re hete guigua opyta e'ÿ va'e ojepoei e'ÿ re opokoa va'ekue ma ojoi 'rã oao, ha'e ojau 'rã yy py, ha'e vy oiko 'rã ha'eve'ÿ va'e ka'aru peve.
- ¹² Hyru yapo guigua re hete guigua opyta e'ÿ va'e opokoague ma ombovoa 'rã. Ha'e rã hyru yvyra guigua ri ramo ma ojoipa 'rã yy py.
- ¹³ — Ha'e gui hete guigua opyta e'ÿ va'e okuera ju ma vy oipapa 'rã sete ára peve ojeky'a'o uka aguã. Ha'e gui ojoi 'rã oao ha'e ojaupa 'rã guete ha'e javi rupi yy xyry py. Ha'e vy ma ha'eve va'e ju 'rã oiko.
- ¹⁴ Irundy meme araa py ma ogueraa 'rã mokoĩ jeruxi e'ÿ vy mokoĩ apykaxu. Ha'e vy ojexa uka 'rã SENHOR renonde py, oguy nhemboaty oĩaty rokẽ py. Ha'e vy sacerdote pe ome'ẽ 'rã mokoĩ guyra,
- ¹⁵ ha'e va'e omboaxa aguã. Jypygua ma ome'ẽ 'rã jejavya regua, ha'e 'rã amboae ma oapy vy ome'ẽmby. Ha'e rami SENHOR renonde sacerdote ojao'i uka 'rã hete guigua opyta e'ÿ va'e ha'eve e'ÿague.
- ¹⁶ — Ha'e gui ava xapy'a rei ijay ndopytai rei rive vy ma ojau 'rã yy py guete ha'e javi rupi, ha'e vy oiko 'rã ha'eve'ÿ va'e ka'aru peve.
- ¹⁷ Ijao e'ÿ vy ipire re ijay ovyague oĩ ramo ojoipa 'rã yy py, ha'e vy opyta 'rã ha'eve'ÿ va'e ka'aru peve.
- ¹⁸ Xapy'a rei peteĩ ava kunha reve joguerekoa py ojapo ri vy mokoive 'rã ojau yy py, ha'e vy ha'eve'ÿ va'e 'rã ikuai ka'aru peve.
- ¹⁹ — Kunha va'e gueko re oiko ramo heko ae ri oiko ramo sete ára peve 'rã oiko gueko re. Hexe ovy va'e rei ha'eve'ÿ va'e 'rã oiko ka'aru peve.
- ²⁰ Gueko re oikoa pukukue re oke oupyague ha'e oguapyague rei tema ha'eve'ÿ va'e 'rã opyta.
- ²¹ Hupa re ovy va'e rei tema ojoi 'rã oao, ha'e ojau 'rã yy py. Ha'e vy oiko 'rã ha'eve'ÿ va'e ka'aru peve.
- ²² Mba'emo áry oĩague re opoko va'ekue voi ojoi 'rã oao, ha'e ojau 'rã. Ha'e vy oiko 'rã ha'eve'ÿ va'e ka'aru peve.
- ²³ Hupa e'ÿ vy oguapyague áry mba'emo itui va'e re opoko va'ekue ma oiko 'rã ha'eve'ÿ va'e ka'aru peve.
- ²⁴ Xapy'a rei gueko re oiko va'e reve ava joguereko vy ma ha'eve'ÿ va'e 'rã oiko sete ára peve. Tupa onhenoaague voi opyta 'rã ha'eve'ÿ va'e.
- ²⁵ — Ha'e gui kunha ma heko ojekuaa vaipa ete mbovy ára rei e'ÿ, ha'e ramiaty py e'ÿ va'eri, ha'e'ÿ vy gueko re oikoaty gui oxave ri vy ko'ẽ nhavõ gueko re oikoa ja oiko 'rã ha'eve'ÿ va'e, gueko re ae oikoa rami.
- ²⁶ Gueko re oiko va'e tupa okea va'e ma ha'eve'ÿ va'e 'rã opyta gueko re ae oikoaty rami ae. Mba'emo áry oĩague va'e tema opyta avi 'rã ha'eve'ÿ va'e, gueko re oikoaty rami ae.
- ²⁷ Ha'e va'e re ovy va'ekue ma oiko 'rã ha'eve'ÿ va'e. Ha'e rami vy ojoi 'rã oao, ha'e ojau 'rã yy py. Ha'e vy oiko 'rã ha'eve'ÿ va'e ka'aru peve.

²⁸ Ha'e rami avi heko opyta ri ramo oipapa 'rā sete ára peve ju, ha'e gui ma ha'eve va'e ju 'rā oiko.

²⁹ Oito araa py ma ojopy 'rā mokoī jeruxi e'ŷ vy mokoī apykaxu, ha'e vy ogueru 'rā sacerdote pe oguy nhemboaty oīaty rokē py.

³⁰ Peteī ma sacerdote omboaxa 'rā jejavya re, ha'e rā amboae ma oapy vy ome'ēmbu. Ha'e va'e rupi SENHOR renonde sacerdote ojao'i uka 'rā gueko re oiko va'e ha'eve e'ŷague.

³¹ — Ha'e rami Israel kuery gui peipe'a ukapa 'rā ha'eve e'ŷague, ha'e va'e gui oiko vai e'ŷ aguā xembojeroviaaty ha'e kuery mbyte oī va'e omongy'aague re.

³² — Ha'e va'e lei ma hete guigua ndopytaia, ha'e ijay ndopytai rei rivea re ha'eve'ŷ va'e oiko va'e regua,

³³ ha'e kunha gueko re oikoa py oiko axy va'e regua, ava e'ŷ vy kunha teī hete guigua opyta e'ŷ va'e, ha'e gui ava reve gueko re oiko va'e joguereko va'e regua guive.

16

Jejavya ojao'i ukaa ára regua

¹ SENHOR ijavyu Moisés pe, mokoī Arão ra'y kuery SENHOR renonde py onhemboja vy oiko vai rire.

² Ha'e vy SENHOR aipoe'i Moisés pe:

— Aipo're nderyke'y Arão pe, toike riae eme henda icky'a e'ŷ va'e py ajukue okē regua rovai, xeyvuu ryru áry imbotya teko vai ambogueaty oī va'e renonde, omano xapy'a e'ŷ aguā, mba'eta xee ae imbotya áry ajexa uka 'rā arai rupi.

³ Pova'e nunga reve anho 'rā Arão oike henda icky'a e'ŷ va'e py: peteī vaka ra'y jejavya re ome'ē va'erā, ha'e vexe'i oapy vy ome'ēmbu.

⁴ Onhemonde 'rā kamixa puku ajukue iporāve va'e guigua icky'a e'ŷ va'e py, ha'e kaxō voi ajukue iporāve va'e guigua 'rā oiporu opire ao'iarā, oku'a rupi ojokua 'rā ajukue iporāve va'e guigua avi, ha'e vy ngorarā ajukue iporāve va'e guigua oimama mbyre py. Ha'e va'e ao ma icky'a e'ŷ va'e meme. Yy py ojaupa ma vy onhemonde 'rā.

⁵ Israel kuery po gui ojopy 'rā mokoī kavara ojejavayague re ome'ē va'erā, ha'e gui peteī vexe'i oapy vy ome'ē va'erā.

⁶ — Vaka ra'y jejavya regua ome'ē va'erā Arão ogueru vy ha'e ae ojejavayague ranhe 'rā ojao'i uka, ha'e gui ngoo pygua kuery ojejavayague ju.

⁷ Mokoīve kavara ojopy vy ogueru 'rā imo'amy SENHOR renonde oguy nhemboaty oīaty rokē py.

⁸ Mokoīve kavara re oexa 'rā xortea. Peteī ma SENHOR peguarā opyta, ha'e rā amboae kavara ma omoudouka pyrā.

⁹ Kavara SENHOR peguarā opyta va'ekue ma Arão omovaē vy ojuka 'rā jejavya regua ome'ē va'erā.

¹⁰ Ha'e rā kavara omoudouka pyrā ma oikove reve 'rā oexa uka SENHOR renonde, ha'e va'e rupi jejavya ojao'i uka aguā, ha'e gui tekoa e'ŷa katy omoudoukaa aguā.

Sacerdote yvateve va'e ha'e ae ojejavayague re ome'ēa regua

¹¹ — Ha'e gui Arão ogueru 'rā vaka ra'y ha'e ae ojejavayague ranhe ojao'i uka aguā, ha'e gui ngoo pygua kuery ojejavayague ju. Ha'e vy ojuka 'rā ojejavayague reguarā.

¹² SENHOR renonde altar oī va'e áry gui oguenōē 'rā tapyī heakuā porā va'e oapyaty renyē, ha'e gui mokoī po renyē heakuā porā va'e omongu'i porā mbyre. Ha'e va'e ogueroike 'rā ajukue okē regua rovai.

¹³ Xee SENHOR renonde omoī 'rā heakuā porā va'e tata py, hataxígue ojao'i aguā xeyvuu ryru mbotya teko vai ambogueaty áry rupi, omano xapy'a e'ŷ aguā.

¹⁴ Ha'e gui vaka ra'y ruguykue ojopy vy okuā py omboayvipa 'rā ayvu ryru mbotya áry rupi. Ha'e gui hyru mbotya renonde rupi ju sete-kue 'rā omboayvi huguykue okuā py.

Heta va'e kuery ojejavayague re ome'ēa regua

¹⁵ — Ha'e va'e rire ma ojuka 'rā kavara heta va'e kuery ojejavayague re ome'ē aguā. Huguykue ma ogueroike 'rā ajukue okē regua rovai. Huguykue py ojapo 'rā vaka ra'y ruguykue py ojapogue rami ae. Omboayvi 'rā ayvu ryru mbotya teko vai ambogueaty áry rupi, ha'e henonde rupi.

¹⁶ Ha'e rami py ojao'i uka 'rā Israel kuery henda icky'a e'ŷ va'e omongy'aague, ha'e kuery ojejavaya ha'e heko vaia ha'e javi káuxa. Ha'e rami ae avi oiky'a'o uka 'rā oguy nhemboaty oīaty ha'e kuery mbyte oī va'e omongy'apaague gui.

¹⁷ Peteīve ava ndopytai 'rā oguy nhemboaty oīaty py henda icky'a e'ŷ va'e py sacerdote oike jave jejavya ojao'i uka aguā, ha'e ae ojejavayague ranhe ojao'i uka ma vy oē e'ŷa ja, ha'e gui ngoo pygua kuery ha'e Israel kuery ha'e javi ojejavayague ju.

¹⁸ Ha'e gui oē vy SENHOR renonde altar oīa py oo vy oiky'a'o uka avi 'rā omongy'aague oī va'e gui. Ha'e rami vy vaka ra'y ha'e kavara ruguykue ojopy vy ombovy 'rā altar rakua ikuai va'e yvryrupi.

¹⁹ Okuā py sete-kue 'rā huguykue omboayvi 'rā altar áry. Ha'e rami py oiky'a'o uka 'rā Israel kuery omongy'aague gui.

²⁰ — Ha'e gui ma henda icky'a e'ŷ va'e, oguy nhemboaty oīaty ha'e altar oiky'a'o ukapa ma rire ogueru ruka 'rā kavara oikove va'e.

²¹ Arão opo jovaive omoī 'rā kavara oikove va'e akā áry. Hi'áry omombe'u 'rā Israel kuery reko vaia, nonhe'ē rendui ha'e ojejavayague ha'e javi. Kavara akā áry ha'e nunga omoimba ma vy ogueraa uka 'rā peteī ava po rupi, ha'e rami aguā omoī mbyre pe.

²² Ha'e rami ha'e kuery reko vaia kavara ojee ae ogueraapa 'rã peteĩ vvy avave rei noĩa py. Tekoa e'ỹa py 'rã ava opoi kavara.

²³ — Ha'e va'e rire Arão oike jevy 'rã oguy nhemboaty oĩaty py. Ha'e vvy omboipa 'rã ao ajukue iporãve va'e guigua henda iky'a e'ỹ va'e py oike aguã omoĩ va'ekue. Ha'e py ae 'rã oejapa.

²⁴ Ojau 'rã yy py peteĩ henda iky'a e'ỹa py, ha'e vvy onhemonde 'rã oao ae'i py. Ha'e vvy oẽ ju vvy oapy vvy ome'ẽ 'rã ha'e ae ojevavyague, ha'e heta va'e kuery ojevavyague guive. Ha'e rami vvy ojao'i uka 'rã.

²⁵ Ome'ẽ mbyrã ojuka va'ekue kyrakue ma ojevavyague re oapypa avi 'rã altar áry.

²⁶ Ha'e gui kavara reraa-are ma ojoi 'rã oao ha'e ojaupa 'rã yy py. Ha'e gui ma ovaẽ ju 'rã tekoa py.

²⁷ Ha'e rã vaka ra'y ha'e kavara ojevavyague regua ome'ẽ va'ekue ma huguykue henda iky'a e'ỹ va'e py jejavya ojao'i uka aguã oguerokie rire hetekue peraa ju 'rã tekoa gui mombyry'i. Ipirekue, ho'okue ha'e hepoxikue ha'e javi 'rã oapypa.

²⁸ Ha'e va'e rapyare ma ojoi 'rã oao, ha'e ojau 'rã yy py. Ha'e gui ma ovaẽ ju 'rã tekoa py.

Jejavya ojao'ia ára ma'et'ya nhavõ ojeupity aguã regua

²⁹ — Pova'e nunga ma penderekorã oja pyre raka'e rã peve guarã. Ha'e gui sete jaxya va'e dez araa py ma pejexavai 'rã penenhe'ẽ py, ndapejapoi 'rã mba'eva, neĩ ha'e py aegua, neĩ amboae regua penembyte rupi ikuai va'e.*

³⁰ Mba'eta ha'e va'e ára ma ojao'ia 'rã pejevavyague, pendeky'a'o aguã. Ha'e ramo xee SENHOR renonde pejeky'a'opa 'rã pejevavyague ha'e javi gui.

³¹ Ha'e va'e sábado ára ma xevy pe ete 'rã pepytu'u ha'e pejexavai aguã penenhe'ẽ py. Ha'e va'e ma penderekorã oja pyre raka'e rã peve guarã.

³² Ha'e gui nguú rekovia sacerdote-rã omboaxaa vvy hexe azeite omoĩ mbyre ae 'rã ojao'i uka pejevavyague, ao ajukue iporãve va'e guigua iky'a e'ỹ va'e py onhemonde reve.

³³ Ha'e rami vvy ojao'i uka 'rã henda iky'a e'ỹ va'e, oguy nhemboaty oĩaty ha'e altar re ha'eve'ỹa oĩ va'ekue. Ojao'i uka avi 'rã sacerdote kuery ha'e heta va'e kuery ha'e javi re oĩ va'ekue.

³⁴ Ha'e va'e ma penderekorã raka'e rã peve guarã oja pyre, ma'et'ya nhavõ Israel kuery ojevavyague ojao'ia aguã — he'i.

Ha'e ramo Arão ojapopa Moisés pe SENHOR omombe'u ukaague rami.

17

Mymba ojuka aguã regua lei oĩa

¹ SENHOR aipoe'i Moisés pe:

² — Ndeayvu ke Arão, ta'y kuery ha'e Israel kuery ha'e javi pe. Ha'e vvy aipo're: Po rami SENHOR ojapo uka vvy aipoe'i va'ekue:

³ Israel kuery regua ma guive rã xevy peguarã teĩ vaka ra'y e'ỹ vvy vexa'i, ha'e'ỹ vvy kavara mba'e ojuka amboae tekoa py, e'ỹ vvy tekoa gui mombyry'i,

⁴ oguy nhemboaty oĩaty rokẽ py ogueru 'rãgue py xee SENHOR pe ome'ẽ aguã, ha'e va'e ava pe “Jojukaa” 'ea 'rã. Huguy omoẽ rire ha'e va'e ava oi'pe'aa 'rã heta va'e kuery mbyte gui.

⁵ Mba'eta Israel kuery ma mymba tekoa rovaĩ rupi ojuka 'rãgue py ogueru 'rã SENHOR pe oexa uka aguã, oguy nhemboaty oĩaty rokẽ py ae. Ha'e rami rã sacerdote ome'ẽ 'rã SENHOR pe peteĩ rami ikuai reguarã.

⁶ Huguykue sacerdote omboavyipa 'rã oguy nhemboaty oĩaty rokẽ rexerẽ SENHOR pegua altar oĩ va'e áry. Ha'e rã ikyrakue ma oapypa 'rã, heakuã porã rã SENHOR ojou porã aguã.

⁷ Anha kuery pe rive nda'evevei ome'ẽ aguã mymba, mba'eta ha'e nunga pe rive onhembotavy uka okuapy. Ha'e va'e ma penderekorã oja pyre raka'eva rã ikuai va'e peguarã.

⁸ — Ha'e nunga rupi aipo're ha'e kuery pe: Ava ma guive rã Israel kuery va'e regua e'ỹ vvy amboae regua penembyte ikuai va'e teĩ mba'emo oapy, e'ỹ vvy mymba ome'ẽ aguã ojuka aguã

⁹ oguy nhemboaty oĩaty rokẽ py e'ỹ ogueru ramo SENHOR pe ome'ẽ aguã, ha'e va'e ma oi'pe'aa 'rã heta va'e kuery mbyte gui.

Mymba ruguykue ho'u e'ỹ aguã re ijayvua

¹⁰ — Ava ma guive rã Israel kuery regua e'ỹ vvy amboae guigua penembyte rupi ikuai va'e teĩ huguykue ho'u ramo ma hovai apu'ã vvy aipe'a 'rã heta va'e kuery mbyte gui.

¹¹ Mba'eta temimoingo rekovea ma huguy re ae oĩ. Huguy ma ame'ẽ uka va'e altar áry pendereko vaiaty pejao'i uka aguã. Mba'eta huguy re vvy ae 'rã ajao'i, tekove rekovia.

¹² Ha'e nunga rupi aipo'a'e ae ma Israel kuery pe: “Peẽ kuery va'e regua neĩ peteĩve to'u eme huguykue, neĩ amboae regua penembyte ikuai va'e voi to'u eme”, ha'e va'ekue.

¹³ Ava ma guive rã Israel kuery va'e regua, e'ỹ vvy amboae regua penembyte rupi ikuai va'e teĩ, mymba e'ỹ vvy guyra ojuka vvy huguy omoẽmba rive 'rã, ha'e vvy ku'i py ju 'rã ojao'i.

¹⁴ — Mba'eta temimoingo ha'e javi rekovea ma huguy re ae oĩ. Ha'e nunga rupi ae aipo'a'e va'ekue Israel kuery pe: “Xo'o ma guive rã pe'u eme huguykue, mba'eta temimoingo ha'e javi rekovea ma huguy re ae oĩ. Ho'u va'e rei tema oi'pe'aa 'rã”, ha'e va'ekue.

* 16:29 Onhe'ẽ py ojexavai ojevavyague re, ha'e okaru e'ỹ re ikuai.

¹⁵ Ha'e py aegua, e'ÿ vy amboae regua teĩ, mymba omano rive va'ekue e'ÿ vy omboa'ypa pyre ri ho'u rire ojoi 'rã oao, ha'e ojau 'rã yy py. Ha'e vy ha'ëve'ÿ va'e 'rã oiko ka'aru peve. Ha'e va'e rire ma ha'ëve va'e ju 'rã oiko.

¹⁶ Ha'e rami teĩ oao ndojoi neĩ yy py ndojau ri ramo hexe ae 'rã oĩ ojevavyague re opaga aguã.

18

Amboae reve itavy rei va'e re ijayvua

¹ SENHOR aipoe'ive Moisés pe:

² — Ndeayvu Israel kuery pe. Ha'e vy aipo're: Xee ma SENHOR Penderuete.

³ Pendekuai eme Egito yvy pendekuaiaque pygua kuery reko rami, neĩ Canaã yvy katy xee rogueraa henoinya pygua kuery reko rami ma voi. Ha'e kuery reko rami pendekuai eme.

⁴ Xee aipotaa rami ae 'rã pendekuai, xeayvu aeja va'ekue pejapo, ha'e va'e rupi anho peiko aguã. Xee ma SENHOR Penderuete.

⁵ Ha'e nunga rupi xeayvua ha'e ajapo uka va'ekue rupi ae 'rã pendekuai. Mba'eta ha'e va'e ayvu amongue ojapopa ri vy oikove 'rã hexe vy. Xee ma SENHOR.*

⁶ — Ava ma guive rã nda'evei guetarã kunha reve ae ojevavy aguã. Xee ma SENHOR.

⁷ Ejevavy eme nderu pe, ndexy reve pejevavya rupi. Ha'e ma ndexy ae. Ejevavy eme hexeve.

⁸ Ejevavy eme ndexy anga reve, nderu pe voi rejevavy e'ÿ aguã.

⁹ Ejevavy eme nereindy reve. Xapy'a rei nderu rajy e'ÿ vy ndexy memby, pendero py aegua e'ÿ vy pendero gui mombyry guigua teĩ ejevavy eme hexeve.

¹⁰ Ejevavy eme ndera'y rajy e'ÿ vy nderajy memby reve, ndero'o pe ae rejevavy e'ÿ aguã.

¹¹ Ejevavy eme nderu ra'yxy memby, nderu gui oiko va'ekue reve, nereindy ae oiko ramo.

¹² Ejevavy eme nderu reindy reve, nderu retarã ae oiko ramo.

¹³ Ejevavy eme ndexy kypy'y reve, ndexy retarã ae oiko ramo.

¹⁴ Ejevavy eme nderu ryvy pe ta'yxy reve rejevavya rupi, ndexy'y ae oiko ramo.

¹⁵ Ejevavy eme ndera'y ra'yxy reve, ndera'y ra'yxy ae oiko ramo. Ejevavy eme hexeve.

¹⁶ Ejevavy eme nderyke'y e'ÿ vy nderyvy ra'yxy reve, nderyke'y e'ÿ vy nderyvy pe rejevavy e'ÿ aguã.

¹⁷ Ejevavy eme peteĩ kunha ha'e imemby reve avi. Ha'e ejopy eme ndera'y rajy neĩ nderajy memby hexeve rejevavy aguã. Ha'e kuery ma neretarã kuery ae ramo ma ha'ëve'ÿ ete 'rã.

¹⁸ Ndera'yxy ae rereko reve eraa eme amboae kunha ndera'yxy jevyrã, joe nda'ija'ei e'ÿ aguã. Ndera'yxy ae oikovea ja nda'evei amboae re rejevavy aguã.

Ojegarupy rupi anho joguereko va'e re ijayvua

¹⁹ — Enhemboja eme kunha gueko re oikoa ja, hexeve renheno aguã.

²⁰ Enheno eme neirũ ra'yxy reve, hexeve vy renhemongy'a e'ÿ aguã.

²¹ Ndeguigua kuery peteĩve ma emboaxa eme Moloque pe rive, remongy'a rei e'ÿ aguã Nderuete rery. Xee ma SENHOR.*

²² Enheno eme ava reve kunha reve rami. Ha'e nunga ma ojegarupy ete.

²³ Neĩ mymba reve voi nerenhenoi 'rã, hexeve vy renhemongy'a e'ÿ aguã. Kunhague ma voi nda'evei mymba re onhemboja vy hexeve ojevavy aguã. Ha'e nunga ma ha'ëve'ÿ ete.

²⁴ — Neĩ peteĩve ha'e va'e regua py enhemongy'a eme, mba'eta ha'e nunga ha'e javi py amboae regua kuery onhemongy'a okuapya re aipe'apa 'rã penerenonde gui.

²⁵ Ha'e rami vy ha'e kuery oyvy ae omongy'apa. Ha'e ramo aju vy ha'e va'e yvy re aikuaa pota vy yvy gui amondyipa 'rã ha'e py ikuai va'e.

²⁶ Ha'e rã peẽ kuery ma pejapo 'rã ajapo uka va'e ha'e xeayvu aeja va'ekue ha'e javi. Neĩ peteĩve ojegarupy amboae kuery ikuai regua pejapo eme, peẽ ha'e py aegua kuery, neĩ amboae regua penembyte rupi ikuai va'e voi.

²⁷ Mba'eta ha'e va'e regua ojegarupy ha'e javi ma peẽ kuery peju e'ÿ mbove ha'e va'e yvy re ikuai va'e ojapo raka'e. Ha'e rami vy oyvy omongy'apa.

²⁸ Peẽ ma pendekuai eme pendeivy pemongy'aa rupi, peẽ kuery voi pendepe'apaa e'ÿ aguã ha'e gui, peju e'ÿ mbove ha'e py ikuai va'e oipe'apague rami ae avi.

²⁹ Ha'e va'e regua ojegarupy rupi ikuai va'e, ha'e nunga apoare rei tema oipe'apaa 'rã heta va'e kuery mbyte gui.

³⁰ Ha'e nunga rupi xereve guarã aeja va'ekue rupi anho 'rã pendekuai. Pejapo eme neĩ peteĩve ojegarupy peju e'ÿ mbove ikuai va'e ojapo va'ekue, penhemongy'a e'ÿ aguã. Xee ma SENHOR Penderuete.

19

Lei regua omombe'u porãve jevyague

¹ Ha'e gui SENHOR aipoe'i Moisés pe:

² — Ndeayvu Israel kuery pavẽ pe. Ha'e vy aipo're: Peiko iky'a e'ÿ va'e, mba'eta xee SENHOR Penderuete ma iky'a e'ÿ va'e aiko.

* 18:5 Romanos 10.5, Gálatas 3.12 * 18:21 Tuuete ra'angaa Moloque ma amboae regua kuery ombojerovia vy ixupe gua'y kuery ae 'rã omboaxa tata rupi ojuka aguã (20.1-5; 2 Reis 23.10; Jeremias 7.31, 32.35).

³ Peteĩ-teĩ pemboete 'rã pendexy ha'e penderu, ha'e pemboete avi 'rã xeivygua sábado ára. Xee ma SENHOR Penderuete.

⁴ Peiko eme mba'emo ra'angaa pe, neĩ pejapo eme penderuete ra'angaarã mba'emo ryku gui. Xee ae ma SENHOR Penderuete.

⁵ — Ha'e gui xee SENHOR reve peteĩ rami nhandekuaia regua peme'ẽ vy ma pendejou porã aguã rami 'rã peme'ẽ.

⁶ Peme'ẽa árave 'rã pe'u, ha'e ko'ẽgue jevy. Ha'e rã mboapy araa py ma peapypa 'rã ndape'upai va'ekue.

⁷ Mboapy araa py ri ho'u va'e ma ojeguarupy ae 'rã opyta, ha'e ome'ẽ mbyre voi ndajou porã 'rã.

⁸ Ha'e nunga ho'u va'e rei tema hexe ae 'rã oĩ ojevavyague re opaga aguã, xee SENHOR pegua icy'a e'ỹ va'e nombovarei rire. Ha'e nunga rupi oipe'aa 'rã heta va'e kuery mbyte gui.

⁹ — Ha'e gui ndevy re renhotỹ va'ekue remono'õ vy nembra'ety rembe rupi neremono'õ katui'i 'rã, neĩ hary reity rive va'ekue voi neremono'õi 'rã nembra'ety gui.

¹⁰ Neremono'õ jevyi 'rã nde'uvaty rupi, neĩ nderejopyi 'rã uva'a reity rive va'ekue. Ha'e nunga ha'e javi reja 'rã iporiaukue'i ha'e amboae regua kuery pe. Xee ma SENHOR Penderuete.

¹¹ — Nemonda eme, ndeapu eme, neĩ embotavy eme neirũ kuery.

¹² Eura rive eme xerery rupi, Penderuete rery nerembovare e'ỹi aguã. Xee ma SENHOR.

¹³ — Emoingo axy rei eme neirũ kuery, ha'e kuery gui nemonda eme guive. Omba'epao va'e kuery peguarã ndepo py topyta eme ko'ẽ peve.

¹⁴ — Ndeayvu vai eme ijapxya e'ỹ va'e re, neĩ hexa pyxo e'ỹ va'e renonde emoĩ eme onhepyxanga aguã. Ha'e rami 'rãgue py Penderuete renonde rejereerokyjea rupi eiko. Xee ma SENHOR.

¹⁵ — Mba'emo re reikuaa potaa py ejoguereko eme ha'eve e'ỹa rami. Ema'ẽve eme iporiaukue'i re, eayvuve rei eme guive oguerokopa rei va'e kuery. Ha'evea rami meme 'rã reikuaa pota neirũ kuery reko re.

¹⁶ — Enhomoangeko rei eme heta va'e kuery mbyte rupi. Eiko eme neirũ kuery rekove reipe'a ukua rupi. Xee ma SENHOR.

¹⁷ — Ndea'e e'ỹ eme nderyke'y e'ỹ vy nderyvy kuery re ndepy'a py. Ha'e rami avi ndeayvu ete 'rã neirũ pe, ha'e ramia py rive ndee voi rejajavy e'ỹ aguã.

¹⁸ — Ejepy eme joe, neĩ ndejee emoĩ eme neirũ kuery va'e regua pe ndevaia. Ha'e rami 'rãgue py reayvu 'rã neirũ ndee ae rejeayvua rami. Xee ma SENHOR.*

¹⁹ — Reiko 'rã xeayvua aeja va'ekue rupi anho. Eja eme nerymba kuery joegua e'ỹ-e'ỹ re ta'y aguã. Nembra'ety py enhotỹ eme mba'emo ra'yĩ mokoĩ regua. Enhemonde eme guive ao joegua e'ỹ-e'ỹ guigua py.

²⁰ — Amongue onhenho 'rã escrava kunha amboae ava re omenda aguã rami oiko va'e reve, teĩ imerã mba'eve ndopagai teri escrava oikoa gui opoi aguã. Ha'e ramo mokoĩve ombopia 'rã. Ha'e rami avi ndojukaai 'rã, mba'eta escrava oikoa gui ndopoi teri ramo.

²¹ Ha'e ramia py ava va'e ojevavyague omboekovia aguã ogueru peteĩ vexa'i xee SENHOR pe oguy nhemboaty oĩaty rokẽ py.

²² Ha'e ramo mba'emo omboekovia aguã regua vexa'i ome'ẽ va'e py ma sacerdote ojao'i uka 'rã ojevavyague SENHOR renonde. Ha'e ramo ojevavyague operdoa 'rã.

²³ — Ha'e gui pendejvyrã va'ekue re pendekoa ma vy opa marãgua vyvra hi'a va'e penhotỹ ramo nda'evei ranhe 'rã hi'a pe'u aguã. Mboapy ma'etỹ peve nda'evei 'rã, ndape'ui 'rãe.

²⁴ Ha'e gui irundy ma'etỹa re ma hi'a ha'e javi peikuaa 'rã icy'a e'ỹ va'ea, ha'e SENHOR pe peme'ẽmba 'rã perovy'aa rupi anho.

²⁵ Peteĩ nhiruĩ ma'etỹa py mae ma 'rã pe'u hi'a, ha'e rami py hi'ave aguã. Xee ma SENHOR Penderuete.

²⁶ — Ndape'ui 'rã xo'o huguykue reve. Penemba'ekuaa eme, penemba'evyky rei eme guive.

²⁷ — Pejaya eme pende'a ijapu'a'i aguã rami, neĩ pejaya eme penderdyva apy rupi.*

²⁸ Omania rã penhekyxĩmba rei eme pendero'o rupi, penhembojeguapa rei eme guive. Xee ae ma SENHOR.

²⁹ — Pembojegyvy eme penderjy kuery itavy rei va'e ikuai aguã, pendejvy ha'e javi rupi penhembotavy vy teko vai rupi anho pendekuai e'ỹ aguã.

³⁰ Pemboete 'rã xeivygua sábado ára, ha'e xeivygua henda icy'a e'ỹ va'e. Xee ma SENHOR.

³¹ — Peo eme omanogue mboayvua kuery re, neĩ imba'ekuaa va'e kuery re. Peka eme, ha'e kuery reve vy penhemongy'a e'ỹ aguã. Xee ma SENHOR Penderuete.

³² — Pepu'ã pe'amy hi'a xiĩmba'i va'e renonde py, pemboete 'rã tujakueve ikuai va'e. Penderuete renonde avi peiko pejerokyjea rupi. Xee ma SENHOR.

³³ — Amboae regua pendejvy re ikuai va'e pemoingo axy rei eme.

³⁴ Amboae regua penembyte ikuai va'e pereko 'rã pãa py aegua perekoa rami. Pemboaxy 'rã peẽ ae penhemboaxya rami, mba'eta Egitto vvy re amboae regua peẽ voi peiko rire. Xee ma SENHOR Penderuete.

Deuteronomio 25.13-16

³⁵ — Pejokore eme joeko re peikuaa potaa py, neĩ vyvra'i py mba'emo pea'ã vy, mba'emo pepejaa py, neĩ hyru py mba'emo pea'ãa py.

³⁶ Mba'emo opejaa, ipoyia, ajaka ha'e galão ma ha'evea'i ramigua meme 'rã peiporu. Xee ma SENHOR Penderuete Egitto vvy gui penerenoẽmbaare.

* 19:18 Mateus 5.43, 19.19, 22.39; Marcos 12.31; Lucas 10.27; Romanos 13.9; Gálatas 5.14; Tiago 2.8 * 19:27 Ha'e jave py amboae regua kuery ma omania rã ipy'a vai vy ojaya 'rã o'a ijapu'a'i aguã rami, ha'e opa marã 'rã onhekyxĩmba rei (21.5; Deuteronomio 14.1-2).

³⁷ Pendekuai 'rã xeayvua aeja va'ekue ha'e javi rupi, pejapopa 'rã ajapo uka va'ekue. Xee ma SENHOR.

20

Nhomoingo axyague repy re ijavyua

¹ SENHOR aipoe'ive ju Moisés pe:

² — Aipo're avi 'rã Israel kuery pe: Ava ma guive rã Israel kuery e'y vy amboa regua peẽ kuery mbyte rupi ikuai va'e Moloque pe gua'y kuery omboaxa ramo pejuka 'rã. Pendevvy re pendekuai va'e ae 'rã pejapipa ita py.*

³ Ha'e va'e rovai xee voi apu'ã vy aipe'a 'rã heta va'e kuery mbyte gui, mba'eta Moloque pe gua'y kuery ae omboaxa vy omongy'a xeivyua henda iky'a e'y va'e, ha'e nombovarei xerery iky'a e'y va'e.

⁴ Xapy'a rei pendevvy re pendekuai va'e penderexa pemboty 'rã pexa e'y aguã amongue gua'y kuery Moloque pe omboaxa rã, ha'e rami vy ndapejukai 'rã.

⁵ Ha'e ramo ma xee ae 'rã apu'ã ha'e va'e ava ha'e hoo pygua kuery ha'e javi rovai. Aipe'apa 'rã heta va'e kuery mbyte gui, hexeve Moloque pe onhembotavy uka va'ekue ha'e javi guive.

⁶ — Ha'e gui amongue oo 'rã omanogue mboayvua kuery pe oporandu aguã, ha'e rami e'y vy imba'evyky va'e kuerya py oo 'rã ha'e kuery reve vy onhembotavy uka aguã. Ha'e ramo ha'e va'e rovai xee ae apu'ã vy aipe'a 'rã heta va'e kuery mbyte gui.

⁷ Ha'e nunga rupi pejuky'a'o uka ke iky'a e'y va'e peiko aguã, mba'eta xee ma SENHOR Penderuete.

⁸ Peiko ete 'rã xeayvua aeja va'ekue rupi, pejapopa ete. Xee ma SENHOR xeivyua iky'a e'y va'erã penemoingo va'e.

⁹ Mava'e rã rei ava nguu e'y vy oxy re ijavyvui vai ramo pejuka 'rã. Nguu e'y vy oxy re ijavyvui vai rire hexe ae 'rã oi huguy pemoëague re opaga aguã.*

¹⁰ — Oirũ ra'yxy reve ava itavy ramo pejuka 'rã, kunha itavy va'ekue voi.

¹¹ Nguu ra'yxy reve ava onhenho vy ojevavy nguu pe ae. Ha'e rã mokoïve 'rã pejuka. Ha'e kuery re ae 'rã oi huguy pemoëague re opaga aguã.

¹² Gua'y ra'yxy reve ava onhenho ramo pejuka 'rã mokoïve, nda'evaipe va'e ojapo rire. Ha'e kuery re ae 'rã oi huguy pemoëague re opaga aguã.

¹³ Ha'e gui ava meme ri kunha rami joguereko va'e ma mokoïve ojapo okuapy ojevuarupy. Pejuka 'rã. Ha'e kuery re ae 'rã oi huguy pemoëague re opaga aguã.

¹⁴ Xapy'a rei petei'ava joguereko 'rã petei'kunha ha'e ixy reve. Ha'e ramo ha'e've'y va'e ae. Peapypa 'rã ava ha'e kunhague, penembyte ha'e rami ete teko vai ojapoa ve'y aguã.

¹⁵ Mymba reve ri ava itavy ramo pejuka 'rã, pejuka avi 'rã mymba.

¹⁶ Kunha ri mymba re onhemboja vy hexeve ojevavy ramo pejuka 'rã kunha va'e ha'e mymba avi. Ha'e kuery re ae 'rã oi huguy pemoëague re opaga aguã.

¹⁷ — Xapy'a rei petei'ava ogueraa 'rã gueindy nguu rajy va'e, ha'e e'y vy oxy memby, hexeve ojevavy aguã. Ha'e ramo ma ha'e've'y va'e ae. Ha'e kuery oi'pe'apaa 'rã heta va'e kuery mbyte gui. Gueindy reve ae ojevavy rire hexe ae 'rã oi ojevavyague re opaga aguã.

¹⁸ Xapy'a rei petei'kunha gueko re oiko va'eri'ava oguereko vy ojevavy 'rã. Heko regua oexa, ha'e kunha va'e voi gueko regua oexa uka rire mokoïve oi'pe'aa 'rã heta va'e kuery mbyte gui.

¹⁹ Ha'e rami ae avi ejevavy eme ndexy kypy'y e'y vy nderyke reve, nei'nderu reindy reve voi. Neretarã ae'i reve rejevavy rire ndere ae 'rã oi rejevavyague re opaga aguã.

²⁰ Oxy'y reve ava onhenho vy otuty pe voi ojevavy. Hexe ae 'rã oi ojevavyague re opaga aguã. Ha'e rami vy omano 'rã ta'y ve'y re.

²¹ Guyvy e'y vy guyke'y ra'yxy reve ri'ava joguereko vy ha'e've'y va'e ae oiko, guyke'y e'y vy guyvy pe ojevavy rire ta'y ve'y re 'rã oiko.

²² — Ha'e nunga rupi peiko 'rã xeayvua aeja va'ekue ha'e javi rupi, pejapopa ajapo uka va'ekue, yvy pendekuai aguã py rogueraa ague gui pendep'apaa e'y aguã.

²³ Pendekuai eme penerenonde gui aipe'a va'ekue regua ikuai rami, mba'eta ha'e nunga ha'e javi ha'e kuery ojapo va'e. Ha'e nunga rupi ae xee ajou vai.

²⁴ Ha'e rã peẽ kuery pe ma aipoa'e ae ma: Ha'e va'e yvy re ae 'rã pendekoa, pendekoarã ae ame'ẽ, yvy kamby ha'e ei oata e'yã. Xee ma SENHOR Penderuete yvy regua kuery mbyte gui pendep'aare.

²⁵ Ha'e nunga rupi a'y peikuaa 'rã mymba ha'e guyra ha'e've va'e ha'e ha'e've'y va'e reve joo ramigua e'yã. Penhemoingo eme ojevuarupy mymba re rive, guyra, e'y vy yvy áry rupi onhembotyryry ovy va'e re rive, mba'eta ha'e rami ikuai va'e pendegui aipe'a rire ha'e've'y va'e memea peikuaa aguã.

²⁶ Iky'a e'y va'e 'rã peiko xevy guarã, mba'eta xee SENHOR iky'a e'y va'e aiko ramo, ha'e yvy regua kuery mbyte gui roipe'a xevy guarã ae pendekuai aguã.

²⁷ — Ha'e gui ava e'y vy kunha tei'omanogue mboayvua, ha'e'y vy imba'evyky rupi oiko va'e pejuka 'rã. Pejapipa 'rã ita py. Ha'e kuery re ae 'rã oi huguy pemoëague re opaga aguã.

21

Sacerdote kuery regua lei oia

¹ SENHOR aipoe'i Moisés pe:

* 20:2 Levítico 18.21 * 20:9 Mateus 15.4, Marcos 7.10

— Ndeayvu Arão ra'y kuery sacerdote ikuai va'e pe. Ha'e vy aipo're: Sacerdote kuery ma nda'evei onhemongy'a aguã heta va'e kuery ikuai omano va'ekue re opokoa py,

² hetarã ae'i re e'ÿ ramo, ixy, tuu, ta'y, tajy, tyvy e'ÿ vy tyke'y ae'i,

³ ha'e heindy ae'i voi kunhata'i omenda e'ÿ teri va'e retiekue re opoko vy onhemongy'a teĩ ha'eve avi.

⁴ Heta va'e kuery renondegua sacerdote kuery ikuai va'e vy nda'evei onhemongy'a rive aguã, ha'eve'ÿ va'e oiko e'ÿ aguã.

⁵ Sacerdote kuery ma oakã nombopire rei 'rã, guendyva voi ndojayai 'rã, nonhekyximba rei 'rã guive guete rupi.

⁶ Ha'e kuery ma Nguete pegua iky'a e'ÿ va'e 'rã ikuai, Nguete rery nombovareai aguã rami e'ÿ, mba'eta SENHOR pe ae mba'emo oapy vy omboaxa, tembi'u SENHOR pegua guive. Ha'e vy iky'a e'ÿ va'e 'rã ikuai.

⁷ Ha'e kuery ma gua'yxyrã ndojou 'rã kunha itavy rei va'e, e'ÿ vy omboetepy e'ÿ. Ndojou 'rã ime omoxê va'ekue, mba'eta sacerdote ma iky'a e'ÿ va'e, Nguete pe ete oiko va'e.

⁸ Ha'e nunga rupi remboaxa 'rã xe'vy guarã, Nguete pegua tembi'u me'ëa ikuai ramo. Ha'e kuery ikuai 'rã iky'a e'ÿ va'e, mba'eta xee SENHOR pendeky'a'oa aiko va'e ma iky'a e'ÿ va'e aiko.

⁹ Peteĩ sacerdote rajy onhembotavy reia py omboetepy e'ÿ onhemoingoa ma nguu voi nomboete ukai vy. Ha'e ramo oapypaa 'rã.

¹⁰ — Ha'e gui sacerdote yvateve va'e ma tyvy kuery mbyte gui oiporavo vy inhakã re onhoëa azeite SENHOR pe omboaxa aguã regua, ha'e ao iky'a e'ÿ va'e py onhemonde aguã oiky'a'oa ramo ma nomoatyrô e'ÿi 'rã o'a, neĩ nomondoroĩ 'rã oao.

¹¹ Neĩ nonhembojai 'rã teĩve tetekue re, neĩ tuu e'ÿ vy ixy ae omano teĩ ha'e nonhemongy'ai 'rã hetekue re.

¹² Ha'e ma noëi 'rã henda iky'a e'ÿ va'e gui, nombovare e'ÿi 'rã Nguete pegua henda iky'a e'ÿ va'e, hexe azeite Tuete pe nhomboaxa aguã regua omoia rive. Xee ma SENHOR.

¹³ Gua'yxyrã ma kunhata'i omenda e'ÿ teri va'e anho 'rã ojou.

¹⁴ Gua'yxyrã ndojou 'rã imeve'ÿ va'e, neĩ opoi pyre, omboetepy e'ÿ neĩ itavy rei va'e, ha'e rami 'rãgue py kunhata'i omenda e'ÿ teri va'e ha'e kuery va'e regua ae 'rã ojou gua'yxyrã,

¹⁵ ha'e rami vy amboae kuery mbyte gua'y kuery nombovare e'ÿi aguã, mba'eta xee SENHOR ae aiko xe'vygua iky'a e'ÿ va'erã amoingo va'e — he'i.

¹⁶ SENHOR aipoe'ive ju Moisés pe:

¹⁷ — Ndeayvu 'rã Arão pe. Ha'e vy aipo're: Neramymino kuery, aÿ guive ikuai va'erã voi, ha'e kuery va'e regua re ivaikue reia oia va'e nonhembojai 'rã SENHOR Nguete peguarã tembi'u omboaxa aguã.

¹⁸ Peteĩve ava hexe ivaikue reia oia va'e nonhembojai 'rã: ava hexa pyxo e'ÿ va'e, e'ÿ vy ipy xogue va'e, hova pëgue'i va'e, e'ÿ vy hete vaikue'i va'e,

¹⁹ ipy e'ÿ vy ipo opê va'ekue,

²⁰ ojero'a rei'i va'e, kyrĩ'i rei va'e, e'ÿ vy hexa ra'yĩ huña xĩ'i va'e, hemomba va'e, ipire ijaipa rei va'e, ha'e'ÿ vy ha'yĩ opu va'ekue.

²¹ Peteĩve ava sacerdote Arão ramymino va'e regua teĩ hexe ivaikue reia oĩ ramo nonhembojai 'rã SENHOR pe mba'emo oapy vy omboaxa aguã. Hexe ivaikue reia oĩ ramo nonhembojai 'rã Nguete pegua tembi'u omboaxa aguã.

²² Ha'e rami avi ha'e va'e regua ma Nguete pegua tembi'u ho'u teĩ ha'eve, tembi'u iky'a e'ÿ va'e, iky'a e'ÿ ete va'e teĩ.

²³ Ha'e rami teĩ hexe ivaikue reia oĩ ramo ndoikei 'rã ajukue okê regua katy'i peve, neĩ novaëi 'rã altar oia peve, xe'vygua henda iky'a e'ÿ va'e nombovare e'ÿi aguã, mba'eta xee ma SENHOR xe'vygua iky'a e'ÿ va'erã amoingo va'e — he'i.

²⁴ Ha'e rami Moisés ijayvu Arão, ta'y kuery ha'e Israel kuery ha'e javi pe.

22

Tembi'u ha'eve va'e regua lei oia

¹ SENHOR aipoe'i Moisés pe:

² — Aipo're Arão ha'e ta'y kuery pe mba'emo iky'a e'ÿ va'e Israel kuery xe'vy ome'ë va'ekue re topena rive eme, xerery iky'a e'ÿ va'e nombovare e'ÿi aguã. Xee ma SENHOR.

³ — Aipo're avi ha'e kuery pe: Peê kuery ha'e peneramymino kuery ikuai va'e regua teĩ hexe ha'eve'ÿa oĩ teri reve mba'emo iky'a e'ÿ va'e xee SENHOR pe Israel kuery ome'ë va'ekue re onhemboja ramo oipe'aa 'rã xerenonde gui. Xee ma SENHOR.

⁴ Arão ramymino kuery regua teĩ lepra oguereko, e'ÿ vy hete guigua opyta e'ÿ va'e ndo'ui 'rã tembi'u iky'a e'ÿ va'e, ojeky'a'opa e'ÿja ja. Ha'e rami ae avi mba'emo ha'eve'ÿ va'e re opoko va'e avi, tetekue re ovy va'ekue, e'ÿ vy ijay opyta e'ÿ xapy'a va'e,

⁵ ha'e'ÿ vy onhembotyryry va'e re opoko vy ha'eve'ÿ va'e oiko va'ekue, e'ÿ vy ava ndojeky'a'ou ukai teri va'e re, mba'emo re rei tema ovy vy ha'eve'ÿ va'e 'rã oiko.

⁶ Ha'e nunga re opoko va'ekue rei tema oiko avi 'rã ha'eve'ÿ va'e ka'aru peve. Ha'e rami vy tembi'u iky'a e'ÿ va'e ho'u aguã nda'evei, yy py ojaua ranhe e'ÿja ja.

⁷ Ha'e gui kuaray oike ma jave ha'eve va'e ju 'rã oiko. Ha'e vy 'rãe ho'u tembi'u iky'a e'ÿ va'e, ixupe guarã va'ekue ae ramo.

⁸ Sacerdote kuery ndo'ui avi 'rã mymba omano rive va'ekue e'ÿ vy omboaxa pyre, ha'e nunga py onhemongy'a e'ÿ aguã. Xee ma SENHOR.

⁹ Ha'e kuery ma xereve guarã aea va'ekue rupi 'rã ikuai, ha'e kuery omano e'ÿ aguã ojejavya re opaga aguã oĩ va'e káuxa, ha'e kuery ae onhemongy'a rire. Xee ma SENHOR iky'a e'ÿ va'erã amoiingo va'e.

¹⁰ — Ha'e rã amboae regua peteĩve ndo'ui 'rã tembi'u iky'a e'ÿ va'e. Sacerdote kuerya py oke vy ou va'e, neĩ ixupe omba'eapo va'e kuery ma voi ndo'ui 'rã.

¹¹ Ha'e rami avi xapy'a rei sacerdote operáta re ae 'rã ojogua escravo-rã. Ha'e va'e regua ma ha'eve 'rã ha'e nunga gui ho'u aguã. Hopy ae oiko'i va'ekue voi hexeve okaru avi 'rã hembí'u re.

¹² Ha'e rami teĩ sacerdote raji amboae regua re ri omenda vy ndokaruvei 'rã iky'a e'ÿ va'e ome'ẽ mbyre re.

¹³ Ha'e rami avi xapy'a rei sacerdote raji imeve'y' va'e oiko, ha'e e'ÿ vy opoi pyre, ha'e imemby e'ÿ teri vy ngu ro py ju ojevuy 'rã kunhataĩ jave oikoague py. Ha'e vy ma ha'eve 'rã ngu rembi'u re ju okaru aguã. Ha'e rã amboae regua ma peteĩve nda'evei ha'e nunga re okaru aguã.

¹⁴ Xapy'a rei amogue oikuaa pota e'ÿ re mba'emo iky'a e'ÿ va'e ho'u 'rã. Ha'e rami ri vy ma ha'ekue regua áryve ome'ëve ju 'rã sacerdote pe, peteĩ nhiruí ikuai nhavõ áry peteĩ-teĩ ju 'rã ome'ëve iky'a e'ÿ va'ekue repy.

¹⁵ Sacerdote kuery nda'evei nombovarei aguã mba'emo iky'a e'ÿ va'e SENHOR pe Israel kuery ome'ẽ va'e,

¹⁶ mba'eta ha'e rami ri vy ojapo 'rã hexe ae ojejavyague re opaga aguã oĩ aguã rami, mba'emo iky'a e'ÿ va'e ho'uague káuxa, mba'eta xee ma SENHOR iky'a e'ÿ va'erã amoiingo va'e.

Mymba ivaikue rei e'ÿ va'e anho ome'ẽ aguã re ijayvua

¹⁷ SENHOR aipoe'ive ju Moisés pe:

¹⁸ — Ndeayvu Arão ha'e ta'y kuery pe, ha'e Israel kuery ha'e javi pe. Ha'e vy aipo're: Xapy'a rei Israel kuery va'e regua, ha'e'y vy amboae regua Israel kuery mbyte rupi ikuai va'e ogueru 'rã mba'emo ome'ẽ va'erã, onhemboayvuague ojapopaa regua mba'e, e'ÿ vy onhenhandua'i rami ome'ẽ va'e. Ha'e nunga SENHOR pe oapy vy ome'ẽ va'erã ogueru ramo

¹⁹ xee ajopy 'rã mymba ava ivaikue rei e'ÿ va'e anho, vaka ra'y, vexa'i e'ÿ vy kavara.

²⁰ Ha'e rã mymba ivaikue rei va'e ma napeme'ei 'rã, mba'eta ha'e nunga ma xee ndajopyi 'rã pendepo gui.

²¹ Ha'e gui xapy'a rei xee SENHOR pe amogue ome'ẽ 'rã peteĩ rami ikuai regua, onhemboayvuague ojapopaa regua, e'ÿ vy onhenhandua'i rami ome'ẽ teĩ, vaka ra'y, e'ÿ vy guymba kuery mboae guigua. Ha'e ramo mymba ajopy aguã ma ivaikue rei e'ÿ va'e. Ha'e va'e re neĩ peteĩ henda py ivaikue reia oĩ aguã nda'evei.

²² Ha'e rã oexa e'ÿ va'e, ikarẽgue'i, e'ÿ vy hova pẽgue'i va'e, ijai vaikue va'e, hemomba va'e, e'ÿ vy ipire rupi iove rei va'e, ha'e nunga ma nda'evei xee SENHOR pe peme'ẽ aguã, neĩ altar áry ma voi napemõ 'rã xee SENHOR pe peapy aguã.

²³ Ha'e rami avi vaka ra'y e'ÿ vy vexa'i hete vaikue'i va'e ha'eve 'rã penhenhandua'i rami peme'ẽ aguã, ha'e rã penhemboayvuague pejapopaa reguarã ma ndajopyi 'rã.

²⁴ SENHOR pe napeme'ei 'rã mymba ha'y raxy va'e, omou'ũ mbyre, oa'yjio pyre, ha'e'y vy ojaya pyre. Ha'e nunga pejapo eme yvy pendekuaia re.

²⁵ Neĩ amboae regua kuery po gui pejopy eme avi ha'e nunga mymba Penderuete pegua tembi'u peme'ẽ aguã, mba'eta ivaikuea oĩa káuxa nda'evevei ae ma. Ha'e nunga ma ndajopyi 'rã pendepo gui.

²⁶ SENHOR aipoe'ive ju Moisés pe:

²⁷ — Vaka ra'y, e'ÿ vy vexa'i oiko'i rire ma sete ára peve 'rã oiko ixya py. Oito ára guive mae ha'eve xee SENHOR pe peapy vy peme'ẽ aguã. Ha'e ramo ma xee ajopy 'rã.

²⁸ Vaka, e'ÿ vy vexa'i teĩ peteĩ'i ára pyve pejúka eme mokoive imemby reve.

²⁹ SENHOR perovy'aa rupi mba'emo peme'ẽ vy ma pendejou porã aguã rami peme'ẽ.

³⁰ Ha'e va'e árove pe'upa 'rã. Mba'eve pemoembyre eme ko'ẽ jeyv guarã. Xee ma SENHOR.

³¹ Ha'e nunga rupi peiko 'rã ajapo uka va'ekue rupi, pejapopa 'rã. Xee ma SENHOR.

³² Pembrovare e'ÿ eme xerery iky'a e'ÿ va'e, mba'eta Israel kuery mbyte aikuaa uka 'rã iky'a e'ÿ va'e aikoa. Xee ma SENHOR iky'a e'ÿ va'erã penemoingo va'e.

³³ Egito yvy gui roguerupa va'ekue Penderuete aiko aguã. Xee ma SENHOR.

23

SENHOR pegua ngaru ikuai va'e re ijayvua

¹ SENHOR aipoe'i Moisés pe:

² — Ndeayvu 'rã Israel kuery pe. Ha'e vy aipo're: Ngaru SENHOR peguarã oa'angaa pyre ma peikuaa uka 'rã iky'a e'ÿ va'e memea penhemboaty aguã. Pova'e ma xeivygua ngaru ikuai va'e.

Êxodo 23.12

³ — Seis ára re pemba'eapo 'rã. Ha'e rã sete araa ma sábado, xeivygua pepytu'u ha'e penhemboaty aguã ára iky'a e'ÿ va'e. Mba'eve py napemba'eapoi 'rã, mba'eta sábado SENHOR pegua ára, mamõ rã peikoa rupi rei.

Êxodo 23.14,15; 34.18; Deuteronomio 16.1-8

⁴ — Pova'e ma ngaru SENHOR oa'anga va'ekue meme, ára iky'a e'ÿ va'e penhemboaty aguã. Peikuaa uka 'rã oa'angaague ára ojeupity nhavõ.

⁵ Jypy'igua jaxy re, catorze araa py, ka'aru'i ma jave ojeupity 'rã SENHOR pegua Páscoa ára.

⁶ Ha'e va'e jaxy re ae quinze araa py oiko 'rã SENHOR pegua ngaru mbojape imbovua revegua e'ÿ va'e regua. Sete ára peve 'rã pe'u mbojape imbovua revegua e'ÿ.

⁷ Jypy'ia ára ma pejapo 'rã nhemboaty iky'a e'ÿ va'e. Ha'e vy pemba'eapo eme mba'eve py.

⁸ Sete ára re peme'ê 'rã mba'emo SENHOR pe peapy vy. Ha'e gui sete araa py ma oiko 'rã nhemboaty iky'a e'ÿ va'e. Pamba'eapo eme mba'eve py.

Êxodo 23.16; 34.22,26

⁹ SENHOR aipoe'ive Moisés pe:

¹⁰ — Ndeayvu Israel kuery pe. Ha'e vy aipo're: Yvy ame'ê va'ekue re pevaê ma vy pemono'ô 'rã mba'emo penhotÿ va'ekue. Mba'emo aju pemono'ô va'e gui ma sacerdote pe peru 'rã jypy'i pejokua va'ekue regua iporãgueve peme'ê va'erã.

¹¹ Ha'e va'e jokuaa sacerdote oupi reve ombovava 'rã SENHOR renonde, pendejou porã aguã.

¹² Sábado ára rire'i 'rã sacerdote oupi reve ombovava. Mba'emo aju ojokua pyre oupia ára ae 'rã peme'ê avi peteï vexa'i ivaikue rei e'ÿ va'e, peteï ma'etÿ'ÿ oguereko va'e, SENHOR pe peapy vy peme'ê aguã.

¹³ Ha'e gui mba'emo aju guigua peme'ê va'erã mokoï rryru trigo iporãve va'e azeite reve omona mbyre. Ha'e va'e ma peapy vy peme'ê 'rã, heakuã porã rã SENHOR ojou porã aguã. Peru avi 'rã peteï rryru vinho ixupe penhoê va'erã.

¹⁴ Ndape'ui 'rã mbojape, trigo maimbe, neï mba'emo ra'yíngy, Penderuete pe peme'ê va'erã peru e'ÿa ja. Ha'e rami aguã ma raka'e rã peve aeja va'ekue penderekorã, pendekuaia rupi ha'e javi guarã ae.

Deuteronomio 16.9-12

¹⁵ — Ha'e gui peipapa 'rã ára, sábado ára rire'i jokuaa oupi reve ombovava pyrã perua ára guive peipapa 'rã sete semana ha'e javi re.

¹⁶ Ha'e gui sete-a sábado rire'i ára guive ma cinqüenta ára jevy 'rã peipapa. Ha'e gui ma peru ju 'rã SENHOR pe mba'emo aju guigua peme'ê va'erã.

¹⁷ Pendekoa gui peru 'rã mokoï mbojape oupi reve ombovava pyrã. Mokoï rryru trigo gui 'rã pejapo. Imbovua reve 'rã pembojy. Ha'e va'e ma jypy'igua SENHOR pe peme'ê va'erã.

¹⁸ Ha'e gui mbojape reve peme'ê avi 'rã sete vexa'i ra'y ivaikue rei e'ÿ va'e, peteï ma'etÿ'i va'e meme, ha'e peteï vaka ra'y, ha'e gui mokoï vexa'i. Ha'e nunga peapy uka vy peme'ê 'rã SENHOR pe, peteï rami pendekuaia regua ha'e vinho penhoê va'e reve. Peapy uka vy 'rã peme'ê, heakuã porã rã SENHOR ojou porã aguã.

¹⁹ Ha'e gui peteï kavara peme'ê avi 'rã pejevayague re, ha'e mokoï vexa'i peteï ma'etÿ'ÿ va'e ju 'rã peme'ê peteï rami pendekuaia reguarã.

²⁰ — Ha'e nunga ma sacerdote oupi reve ombovava 'rã, trigo jypygyua gui mbojape pejapo va'ekue reve. Ha'e nunga SENHOR renonde oupi reve ombovava pyrã peme'ê, mokoï vexa'i ra'y reve. Ha'e nunga ma SENHOR pegua iky'a e'ÿ va'e, sacerdote kuery ho'u va'erã.

²¹ Ha'e va'e árave oikuaa uka 'rã nhemboaty aguã ára iky'a e'ÿ va'erã. Pamba'eapo eme mba'eve py. Ha'e va'e ma ojapo uka pyre raka'e rã peve guarã, pendekuaia ha'e javi rupi, ha'e peneramymino kuery ikuai va'e peguarã avi.

²² — Ha'e gui pendeyvy re penemba'ety rupi pemono'ô vy ndapeo jevyi 'rã penemba'ety rembe rupi gui peruve aguã, neï hary peity rive va'ekue pemono'ô eme. Tove iporiaukue'i ha'e amboae regua kuery peguarã. Xee ma SENHOR Penderuete — he'i.

²³ SENHOR aipoe'ive ju Moisés pe:

²⁴ — Ndeayvu Israel kuery pe. Ha'e vy aipo're: Sete jaxya re ijypy'ia ára py ma oiko 'rã xevy pepytu'u ha'e penema'endu'a aguã ára. Mimby guaxu pemonhe'ê 'rã penhemboaty aguã, ára iky'a e'ÿ va'e ramo.

²⁵ Mba'eve py pamba'eapo eme. Ha'e rami 'rãgue py SENHOR pe 'rã peru peapy vy peme'ê va'erã.

Jejavya ojao'ia aguã ára re ijayvua

²⁶ SENHOR aipoe'ive Moisés pe:

²⁷ — Ha'e gui ha'e va'e sete jaxya va'e re, dez araa py ma ojeupity 'rã jejavya ojao'ia aguã ára. Oiko 'rã nhemboaty iky'a e'ÿ va'e, penenhe'ê py pejexavaia rupi pendekuai aguã. Ha'e rami vy SENHOR pe peru 'rã peapy vy peme'ê va'erã.

²⁸ Ha'e va'e ára ma mba'eve py napemba'epoi 'rã, pejevayague ojao'ia aguã ára, SENHOR Penderuete renonde pejevayague pejao'i uka aguã ae.

²⁹ Ha'e va'e ára onhe'ê py ojexavaia rupi e'ÿ ikuai va'e oipe'aa 'rã heta va'e kuery mbyte gui.

³⁰ Ha'e va'e ára mba'emo py omba'eapo va'e ma xee ae amokanhÿ 'rã heta va'e kuery mbyte gui.

³¹ Mba'eve py napemba'epoi 'rã. Ha'e va'e ma ojapo uka pyre raka'e rã peve guarã peneramymino ikuai va'e peguarã, pendekuaia ha'e javi rupi.

³² Sábado ára rami oiko 'rã xevy pe pepytu'u aguã ára, penenhe'ê py pejexavaia rupi peiko aguã. Ha'e va'e jaxy re nove araa py ka'arukue guive, ha'e ko'ê jevy ka'aru peve ma pepytu'u 'rã sábado ára pemboetea rami.

Ngaru oikoa ára oguy'i py ikuai aguã re ijayvua

³³ SENHOR aipoe'ive ju Moisés pe:

³⁴ — Ndeayvu Israel kuery pe, ha'e vy aipo're: Sete jaxya va'e re quinze araa py ma oiko 'rã SENHOR pegua ngaru oguy'i py peï aguã regua. Sete ára re 'rã oiko.

³⁵ Jypy'ia ára ma oiko 'rã nhemboaty iky'a e'ÿ va'e. Ha'e rami vy mba'eve py napemba'epoi 'rã.

³⁶ Sete ára re 'rã SENHOR pe peme'ê mba'emo peapy vy. Oito araa py ju 'rã oiko nhemboaty iky'a e'ÿ va'e, SENHOR pe peme'ê aguã mba'emo peapy vy. Ixupe penhemboaty aguã ára ramo mba'eve py napemba'epoi 'rã.

³⁷ — Ha'e va'e ha'e javi ma SENHOR pegua ngaru oiko aguã ára oa'anga pyre. Ojeupity nhavõ peikuaa uka 'rã nhemboaty iky'a e'y'ã va'erã, SENHOR pe peme'ẽ aguã mba'emo peapy vy, tata py oapya va'erã, mba'emo aju guigua, mymba ojukaa va'erã, ha'e mba'emo rykue onhoëa va'erã, peteĩ-teĩ regua ma hi'ãra py porã 'rã peme'ẽ.

³⁸ Oiko avi 'rã SENHOR pegua sábado ára, ha'e mba'emo peme'ẽ aguã ára, ha'e penhemboayvuague peajopaa regua, ha'e SENHOR pe mba'emo penhenhandua'i rami peme'ẽ aguã ha'e javi.

³⁹ — Ha'e gui sete jaxya re quinze ára py ma pendeyvy re penhoty'ã va'ekue'a pemono'õmba ma vy sete ára re pejapo 'rã ngaru SENHOR pe. Jypy'ia ára, ha'e gui oito araa py ju 'rã oiko xevy pepytu'u aguã.

⁴⁰ Jypy'ia ára py ma peru 'rã yvyra'a iporãgueve va'e, pindo rogue, yvyra rogue porãgue, ha'e salgueiro yy rembe rupi hi'ã va'e rogue guive. Ha'e rami vy sete ára re pevy'a 'rã SENHOR Penderuete renonde.

⁴¹ Ha'e rami vy pejapo 'rã ngaru SENHOR pegua, sete ára re ma'et'ya nhavõ. Ha'e va'e ma ojapo uka pyre raka'e rã peve guarã, peneramymino kuery ikuai va'e peguarã. Sete jaxya py ae 'rã pejapo.

⁴² Sete ára peve 'rã peĩ oguy'i yvyra rogue gui pejapo va'ekue guýry. Israel kuery regua ha'e javi toĩ oguy'i py,

⁴³ peneramymino kuery oikuaa aguã, mba'eta Egito yvy gui Israel kuery xee anoëmba jave ajapo karamboae oguy'i guýry ikuai aguã rami. Xee ma SENHOR Penderuete — he'i.

⁴⁴ Ha'e rami Israel kuery pe Moisés omombe'u porãve ngaru SENHOR pegua oa'angaague ára.

24

Êxodo 27.20,21

¹ Ha'e gui SENHOR aipoe'i Moisés pe:

² — Ndeayvu Israel kuery pe ogueru aguã azeite ete'i oliveira onhami mbyre guigua tataendy reguarã, ha'e rami vy hexakã riae oiny aguã ogue e'y'ã re.

³ Ha'e va'e re ma Arão opena porã 'rã oikovy oguy'ã nhemboaty oiaty py SENHOR ayvu oiaty renonde, ajukue okẽ regua kyvõ rupi, ka'aru guive ko'ẽgue peve. Ha'e va'e ma raka'e rã peve guarã ojapo uka pyre peneramymino kuery ikuai va'e peguarã.

⁴ SENHOR renonde tataendy 'y ouro ete'i gui ojapo pyre áry ikuai 'rã hendy va'e. Ha'e va'e re ha'e opena riae 'rã oikovy.

SENHOR pegua mesa áry mbojape oĩ va'e re ijayvua

⁵ — Ha'e gui trigo iporãve va'e rejou vy rejapo 'rã doze mbojape. Peteĩ-teĩ ma mokoĩ ryru gui 'rã rejapo.*

⁶ Ha'e gui mesa ouro guigua va'e áry remoĩ 'rã mokoĩ ryxy rupi. Peteĩ-teĩ ryxy rupi ma mboapy meme 'rã remoĩ SENHOR renonde.

⁷ Peteĩ-teĩ ryxy áry rupi ma remoĩ 'rã heakuã porã va'e. Ha'e va'e ma mbojape ha'e javi rekovia oapy vy ome'ëa 'rã SENHOR pe.

⁸ Sábado nhavõ Arão omoatyrõ porã'i 'rã SENHOR renonde. Ojapo riae 'rã Israel kuery re vy, raka'e rã peve xereve guarã aja va'ekue rami vy.

⁹ Ha'e va'e mbojape ma Arão ha'e ta'y kuery peguarã, henda iky'a e'y'ã va'e py ae ho'u okuapy aguã, mba'eta iky'a e'y'ã ete va'e ha'e kuery pe, SENHOR pe mba'emo oapy vy ome'ẽ mbyre revegua, raka'e rã peve guarã ajapo ukaague rami vy.

SENHOR re ijayvu vai va'e opaga aguã re ijayvua

¹⁰ Ha'e gui Israel kuery mbyte peteĩ oiko Israel regua pi'a, Egito pygua ra'y. Ha'e va'e ava Israel regua pi'a va'e ma Israel regua ae reve joe opu'ã ha'e kuery rekoa py.

¹¹ Israel regua pi'a va'e ma ojejavu vy ijayvu vai SENHOR rery re. Ha'e ramo Moisés oĩa py oguerua. Ixy ma Dã regua Dibri rajy Selomite.

¹² Ha'e rã ava va'e nhuã py omboty hekorã SENHOR oikuaa uka e'y'ã ja.

¹³ Ha'e rami rã SENHOR aipoe'i Moisés pe:

¹⁴ — Peipe'a ijayvu vai va'ekue pendekoa gui mombyry'i. Ha'e ramo inhakã áry henduare kuery ha'e javi tomoĩ opo. Ha'e gui heta va'e kuery ha'e javi 'rã ojapipa ita py.

¹⁵ — Aipo're Israel kuery pe: Mava'e rã rei Nguete re ijayvu vai va'e ma hexe ae 'rã oĩ ojejavuague re opaga aguã.

¹⁶ SENHOR rery re ijayvu vai va'ekue ma pejuka 'rã. Peẽ kuery ha'e javi 'rã pejapi ita py. Amboae regua kuery, e'y'ã vy Israel regua ae teĩ SENHOR rery re ijayvu vai ramo ojukaa 'rã.

¹⁷ Jojuka va'e rei tema ojukaa avi 'rã.

¹⁸ Ha'e rã mymba jukaare ma amboae ju 'rã ome'ẽ hekovia, ha'ekue ramigua ete'i.

¹⁹ Amongue va'e rei joupe ojapo vai ri ramo joe ojapogae re pejapo avi 'rã hexe:

²⁰ nhomopëague re pemopẽ avi 'rã, joexa omombuague re pemombu avi 'rã hexa, nhoaĩ omopëague re pemopẽ avi 'rã haĩ. Nhomoiingo axyague re pejapo avi 'rã hexe.*

²¹ Mymba jukaare ma amboae ju 'rã ome'ẽ hekovia. Ha'e rã ava ri ojuka ramo ma ojukaa avi 'rã.

²² Lei peteĩ'i rami ae 'rã peiporu, amboae regua kuery ha'e Israel kuery va'e regua pe teĩ. Mba'eta xee ma SENHOR Penderuete — he'i.

* 24:5 Mbojape peteĩ-teĩ ma dois quilos trigo gui 'rã ojapo. * 24:20 Mateus 5.38

²³ Ha'e ramo Israel kuery pe Moisés aipoe'i ijayvu vai va'ekue tekoa gui mombyry'i oipe'a vy ita py ojapipa aguã. Ha'e ramo Israel kuery ojapo okuapy Moisés pe SENHOR ojapo ukaague rami.

25

Êxodo 23.10,11

¹ SENHOR aipoe'i Moisés pe Sinai vvyty re oĩ teri jave:

² — Ndeayvu Israel kuery pe, ha'e vy aipo're: Pendeyvyrã ame'ẽ va'ekue py pevaẽ ma ramo vvy ae opyta rive jepi 'rã oupy SENHOR pe sãbado ára py rami.

³ Mboapy meme ma'etỹ re penhotỹ 'rã penemba'ety rupi, mboapy meme ma'etỹ re avi 'rã pende'uva ty rupi pemoatyrõ hakã, ha'e vy pemono'õ 'rã hi'a.

⁴ Ha'e rã sete ma'etỹ re ma oiko 'rã sãbado ára py rami vvy opytu'u aguã, SENHOR pe ae 'rã opyta rive sãbado ára py rami. Ha'e vy napema'etỹi 'rã penemba'ety rupi, neĩ pende'uva ty rupi hakã napemoatyrõ 'rã guive.

⁵ Penemba'ety rupi henhoĩ rive va'ekue'a voi napemono'õi 'rã, neĩ uva rakã pemoatyrõ e'ÿague rupi voi ndapeipo'oi 'rã. Ha'e va'e ma'etỹ re ma vvy opyta rive 'rã xevy.

⁶ Ha'e rami avi vvy opyta rivea ja hi'a rive va'ekue ma ha'eve 'rã pe'u aguã, peẽ, penembiguai kuery avakue ha'e kunhague, pẽvy omba'eapo va'e ha'e amboae regua pendereve ikuai va'e guive.

⁷ Penerymba kuery ha'e mymba kuery pendeyvy re ikuai va'e voi okaru avi 'rã mba'etygue ha'e javi rupi.

Ma'etỹ jubileu 'epy va'e re ijayvu

⁸ — Ha'e gui peipapa 'rã ma'etỹa oaxa va'e, sete ma'etỹa sete-kue peve 'rã peipapa. Ha'e rami vy sete ma'etỹa sete-kue peipapa va'e ha'e javi vy quarenta e nove ma'etỹa 'rã peipapa.

⁹ Ha'e gui sete jaxya va'e re, dez araa py ma pemonhe'ẽ atã 'rã mimby guaxu. Jevajva ojao'ia ára py ae 'rã pemonhe'ẽ pendeyvy ha'e javi rupi onhendu aguã rami.

¹⁰ Ha'e vy cinqüenta ma'etỹ ma peikuaa uka 'rã ma'etỹ iky'a e'ÿ va'ea, vvy jave rupi ikuai va'e pe peikuaa uka avi 'rã opa mba'e pepoi rivepa aguã. Ha'e va'e ma'etỹ ma jubileu pendeyv peguarã aeja va'e. Ha'e rami vy peteĩ-teĩ pejevypa 'rã peovy pendeyvy ae katy, ha'e peneretarã kuerya katy ae.

¹¹ Cinqüenta ma'etỹ ojeupity nhavõ oiko 'rã jubileu ma'etỹ pendevy pegua. Ha'e vy napema'etỹi 'rã, neĩ napemono'õi 'rã henhoĩ rive va'ekue gui, neĩ uva rakã pemoatyrõ e'ÿague rupi voi ndapeipo'oi 'rã.

¹² Mba'eta jubileu ma'etỹ oiko, iky'a e'ÿ va'e pendevy. Ha'e vy penemba'ety rupi hi'a rive va'ekue 'rã pe'u.

¹³ — Jubileu ma'etỹ re ma peteĩ-teĩ pejevuy 'rã penderekoa katy ae.

¹⁴ Xapy'a rei neirũ pe mba'emo revende, ha'e e'ÿ vy neirũ gui mba'emo rejogua ri vy ekore eme nderyke'y, e'ÿ vy nderyvy.

¹⁵ Mba'eta jubileu ma'etỹ oiko guive mbovy ma'etỹ oaxa va'ekue reipapaa rami vy 'rã neirũ gui vvy rejogua va'e repyrã peikuaa. Mba'eta ovy ndevy ha'e ovende jave jubileu ma'etỹ ojeupity jevy aguã remono'õ aguã mbovy ma'etỹ oata teria rami vy peikuaa 'rã hepyrã.

¹⁶ Heta ma'etỹ re guarã ri vy hepyve 'rã, ha'e rã mbovy'i ma'etỹ re guarã ri vy ma ndaepyive 'rã, mba'eta ndevy ha'e omboepy 'rã mbovykue pa remono'õ aguã rami.

¹⁷ Ha'e nunga rupi pekore eme peneirũ kuery. Ha'e rami 'rãgue py peteĩ-teĩ Penderuete renonde pejererokyjea rupi pendekuai, mba'eta xee ma SENHOR Penderuete.

¹⁸ — Pendekuai xee ajapo uka va'ekue rupi, xee aipotaa rami pejapopa aguã. Ha'e rami vy 'rã pendekuai porã pendeyvy re.

¹⁹ Ha'e rami vy vvy re mba'emo hi'a porã 'rã, pe'uxea rami 'rã pe'u, pendekuai porã 'rã guive.

²⁰ Xapy'a rei aipopeje 'rã: "Mba'e tu ja'u 'rã sete ma'etỹa re, nanhama'etỹi neĩ nhanemba'ety gui nhamono'õ e'ÿ re?" peje 'rã xevy.

²¹ Ha'e ramo ma mboapy meme ma'etỹa re ajou uka retave 'rã pendevy, mboapy ma'etỹ peve mba'emo hi'a aguã rami.

²² Ha'e gui oito ma'etỹa re mae ma pema'etỹ jevy vy pe'u 'rã pemono'õ ypy va'ekue rive, nove ma'etỹa peve. Penhotỹ jevy va'ekue hi'a e'ÿa ja pe'u 'rã inhymague gui.

²³ Ha'e gui pendeyvy napevendei 'rã raka'e rã peve guarã, mba'eta vvy ma xemba'e ae, ha'e rã peẽ kuery ma xevy rã kovae vvy regua e'ÿ, amboae guigua vvy rupi oguata va'e rami rive.

²⁴ Ha'e nunga rupi vvy pendekuai ha'e javi rupi vvy ja pe ae ju 'rã pejogua uka.

²⁵ — Xapy'a rei penderyvy e'ÿ vy penderyke'y iporiaukue'i vy ovyv ovende ramo peteĩ hetarã ou 'rã hepyrã, ha'e vy ojogua jevy 'rã vvy tyvy e'ÿ vy tyke'y ovende va'ekue.

²⁶ Xapy'a rei amongue ndoguerekoĩ guetarã ovyv jogua jevyarã teĩ ha'e ae 'rã ojou hepyrã ojogua jevy aguã.

²⁷ Ha'e rami vy ha'e oipapa 'rã mbovy ma'etỹ re pa ojapo ma ovendeague, ha'e gui jubileu ma'etỹ ojeupity aguã oata teria rami vy ome'ẽ 'rã ovyv joguaare pe, ha'e gui ovyv katy ae 'rã ojevuy ju.

²⁸ Ha'e rami avi vvy repyrã ndojouĩ ramo vvy ovende va'ekue opyta 'rã ijoguaare po py ae, jubileu ma'etỹ ojeupity jevy e'ÿa ja. Ha'e gui jubileu ojeupity jevy ramo ipo gui ojopy ju 'rã ovyvyrã.

²⁹ — Ha'e gui xapy'a rei teĩ ikorapa va'e py amongue ngoo oguereko va'e ovende teĩ ovendeague ára guive peteĩ ma'etỹ ndoaxai teria ja ha'eve ojogua jevy aguã. Peteĩ ma'etỹ oaxa e'ÿa ja ha'eve ju 'rã ojogua aguã.

³⁰ Ha'e rami avi ojogua jevy e'ÿ re peteĩ ma'etỹ oaxa ma rire oo tetã ikorapa va'e py oĩ va'e opyta ae 'rã ijoguaare po py, ha'e oiko rire hamymino kuery po py ju, raka'e rã guarã. Jubileu ma'etỹ ojeupity teĩ ijoguaare nome'ëvei 'rã ivendeare pe.

³¹ Ha'e rā oo tekoa'i ikora e'ŷ va'e py oī va'e ma vvy hovai rupi oī va'e rami 'rā omboepya. Ha'e nunga ma ha'eve riae 'rā ojogua jevy aguā, ha'e vvy jubileu ma'etŷ ojeupity jave py ijoguaare ome'ē ju 'rā ivendeare pe.

³² Ha'e rā levita kuery retā rupi ma ngoo ovende rire teī raka'e rā peve guarā ha'eve ojogua ju aguā.

³³ Xapy'a rei levita ngoo guetā py ovende va'ekue ndojogua jevyi teī ijoguaare ome'ē nho 'rā jubileu ma'etŷ ojeupity jevy ramo. Mba'eta levita kuery retā py hoo ikuai va'e ma imba'e ae 'rā oī Israel kuery mbyte rupi.

³⁴ Ha'e rā ha'e kuery retā vyŷry vvy itui va'e ma novendei 'rā, mba'eta imba'e ae 'rā itui raka'e rā peve guarā.

Deuteronomio 15.7-11

³⁵ — Xapy'a rei nderyvy e'ŷ vy nderyke'y iporiau vy ikangypa ramo pemongaru 'rā. Amboae regua pendeivy rupi ikuai va'e reipityvōa rami rereko avi 'rā ndereve.

³⁶ Ixupe perāta reiporukaa áryve emboekovia uka retave eme. Ha'e rami 'rāgue py Nderuete renonde rejerekyjea rupi eiko, ndereve nderyvy kuery, nderyke'y kuery ikuai porā aguā rami.

³⁷ Ha'e kuery pe perāta ndereiporukai 'rā remboekovia uka retave aguā rive, neī tembi'u voi nerevendei 'rā ha'e kuery pe hepyve re.

³⁸ Xee ma SENHOR Penderuete. Egito vvy gui roguerupa Canaā vvy ame'ē, ha'e Penderuete aiko aguā.

Escravo kuery regua lei oīa

³⁹ — Ha'e gui nderyvy e'ŷ vy nderyke'y ndereve oikoa py iporiau vy nerembiguairā onhevende teī ereko eme escravo rami.

⁴⁰ Ndea py oiko 'rā omba'eapo va'e e'ŷ vvy amboae regua rami. Jubileu ma'etŷ ojeupity jevy peve'i 'rā omba'eapo ndevy.

⁴¹ Ha'e gui ma ndero gui ojepe'a vvy gua'y kuery reve oje'oipa jevy 'rā nguu kuery rekoague katy.

⁴² Mba'eta peē kuery ma Egito vvy gui xevygua escravo rami ae arupa va'ekue. Ha'e nunga rupi napenevendeai ju 'rā amboae pegua escravo-rā.

⁴³ Ha'e nunga rupi ejoguereko poyi eme. Ha'e rami 'rāgue py Nderuete renonde eiko rejerekyjea rupi.

⁴⁴ Xapy'a rei ndevyguā escravo-rā ava e'ŷ vvy kunha ma pendeivy vyŷry rupigua anho 'rā pejogua. Ha'e gui ae 'rā pejou escravo-rā.

⁴⁵ Ha'eve avi mombyry guigua penembyte ikuai va'e ra'y kuery pejogua aguā, pendeivy re ta'y kuery oguereko va'e guive. Ha'e kuery anho ha'eve escravo pereko aguā.

⁴⁶ Ha'e va'e kuery ma peja 'rā pendera'y kuery peguarā, pendera'y kuery ju oguereko aguā. Pendera'y kuery pe omba'eapo 'rā raka'e rā peve. Ha'e rā pendeivyvy kuery, nderyke'y kuery Israel kuery ae ikuai ramo pereko poyi rei eme, peteī-teī penhembouvixave eme joe gui.

⁴⁷ — Ha'e gui xapy'a rei amboae regua pendea rupi ikuai va'e oguerekopa 'rā mba'emo, ha'e penderyke'y e'ŷ vvy penderivy iporiau vy onhevende 'rā amboae regua penembyte oiko va'e pegua escravo-rā, ha'e rami e'ŷ vvy ta'y kuery pe.

⁴⁸ Ha'e va'e regua onhevende ma teī ha'eve nho 'rā ojoguaa ju aguā. Tyvy kuery, tyke'y kuery va'e regua ha'eve 'rā ojogua ju aguā.

⁴⁹ Ituty kuery, tyvy kuery voi ha'eve 'rā ojogua aguā, e'ŷ vvy hetarā va'e rei ojogua 'rā. Ha'e e'ŷ ramo ma ha'e ae mba'emo ojoupa ri vy ojejogua 'rā.

⁵⁰ Ha'e gui ma ijoguaare reve oikuaa pota 'rā mbovy repy re pa onhevendeague ma'etŷ guive jubileu ma'etŷ ojeupity jevy peve. Ha'e va'e ma'etŷa mbovy paa rami vvy oikuaa 'rā hepyrā, omba'eapo va'e pe pemboekoviaa rami vy.

⁵¹ Xapy'a rei jubileu ojeupity peve ma'etŷa oata reta teri ramo ma ojejogua ju aguā ome'ē reta 'rā.

⁵² Ha'e rami avi jubileu ojeupity peve ma'etŷa ndoata retai ri ramo ma hexeve oikuaa pota vvy ojejogua ju aguā nome'ē retavei 'rā.

⁵³ Ha'e rami vvy ma'etŷ nhavō ixupe omba'eapo 'rā omba'eapo va'e rami ae. Ha'e rami avi reikuaa pota 'rā ija oguereko poyi e'ŷ aguā.

⁵⁴ Xapy'a rei avave rei ndojoguaa jevyi ri ramo jubileu ma'etŷ py ae 'rā oo jepe, ta'y kuery voi oje'oi 'rā hexeve.

⁵⁵ Mba'eta Israel kuery ma xevygua escravo rami ae ikuai. Xevyguā kuery areko va'e ma ha'e kuery ae, Egito vvy gui aipe'apa va'ekue. Xee ma SENHOR Penderuete.

26

Nguete ra'angaa omboete e'ŷ aguā re ijayvua

¹ — Ndapejapoi 'rā penderuete ra'angaarā rive, neī napemopu'āi 'rā mba'emo ra'angaa neī ita. Nda'evei avi pendeivy re ita oī va'e gui ta'angaarā pejapo aguā, ha'e nunga pe pejero'a e'ŷ aguā. Mba'eta xee ae ma SENHOR Penderuete.

² Pemboete 'rā xevyguā sábadō ára, pemboete avi 'rā xevyguā henda iky'a e'ŷ va'e. Xee ma SENHOR.

Deuteronomio 7.12-24; 28.1-14

³ — Xapy'a rei xeayvua rupi pendekuai, ha'e ajapo uka va'e ha'e javi pejapo ramo

⁴ pendeivy xee ambou 'rā oky hi'ára py porā. Ha'e rā vvy gui oiko 'rā mba'emo'a, ha'e vyvra pendeivy rupi ikuai va'e voi hi'a 'rā.

⁵ Ha'e rami rā mba'emo ra'yigüe pejyky 'rā uva peipo'oa ára peve, ha'e uva peipo'o 'rā mba'emo ra'yī pemono'ō jevya ára peve. Pejou 'rā tembi'u oata aguā rami e'ŷ, ha'e pendekuai porā 'rā pendeivy re.

⁶ Ajapo 'rā pendeyvy re pendekuai porā aguā rami. Penheno rā nda'ipoi 'rā penemondyiarā. Pendeyvy gui amomba 'rā mymba penemoangeko reiarā ikuai va'ekue, ha'e pendeyvy rupi ndoaxavei ma 'rā kyxe revegua.

⁷ Peakykue monhamba 'rā penderovaigua kuery. Penerenonde ha'e kuery ho'apa 'rā pendekyxe gui.

⁸ Peē kuery va'e regua pete'i nhirui'i te'i pemomba 'rā cem, ha'e peē kuery va'e regua cem pemomba 'rā dez mil. Ha'e rā penerenonde penderovaigua kuery ho'apa 'rā pendekyxe gui.

⁹ Pendere ama'ē vy ajapo 'rā pendera'y reta aguā rami, romboetave 'rā. Ha'e vy xereve guarā aeja va'ekue amoī atāve 'rā.

¹⁰ Pe'u tema 'rā pemono'ō va'ekue ymague gui, ha'e inhymague penoēmba vy 'rāe pejuo mba'emo ra'yīgue pyau pemoī porā aguā.

¹¹ Penembyte amoī 'rā xembojerovia atyrā, ha'e gui xenhe'ē py ndoroipota e'yvei ma 'rā.

¹² Penembyte rupi aiko vy Penderuete ae 'rā aiko, ha'e rā peē kuery ma xevyguia kuery pendekuai 'rā.*

¹³ Xee ma SENHOR Penderuete. Egito yvy gui roguerupa va'ekue ha'e kuery pegua escravo pendekuai ve'y'āguā. Hi'y pendeaju'y rupi omoī va'ekue amopē vy ajapo pende'yvi porā reve peiko aguā rami.

Deuteronomio 28.15-68

¹⁴ — Ha'e rami te'i xapy'a rei naxenhe'ē rendui, ha'e ajapo uka va'e ha'e javi ndapejapoi ramo,

¹⁵ xeayvuague pemboykepa rive ri ramo, ha'e pendepy'a re aipotaa ha'e javi napendu potai ajapo uka va'e ndapejapoxei vy, ha'e xereve guarā aeja va'ekue rupi e'y'ā pendekuai ramo,

¹⁶ ha'e ramo xee amomba 'rā pova'e nunga: Pende'ary ambou 'rā penemongyjarā, mba'eaxy ha'e pire raku vaikue. Ha'e nunga ojapo 'rā penderexa hendy reia oguepa aguā rami, ha'e pendekovea opa ovy aguā rami. Mba'emo ra'yī penhot'y rive 'rā, mba'eta penderovaigua kuery ovy ho'upa 'rā.

¹⁷ Penderovaigua xee voi aiko ramo penderovaigua kuery pendejuka 'rā. Pendere ija'e e'y'ā va'e kuery onhembouvixa rei 'rā pende'ary, ha'e mava'eve penemonhaa e'y'ā te'i penhamba rive 'rā.

¹⁸ Xeayvuague napendu potai teri ri ramo pejevavyague re rombojexavaive ju 'rā sete-kue peve.

¹⁹ Ha'e rami vy amomba 'rā nembaraetea penhembovyate rei ve'y'āguā. Ha'e vy yva pende'ary rupi oī va'e amboty 'rā ferro guigua rami, pendeyvy overa va'e rami hatāmba aguā.

²⁰ Rive ete 'rā penhea'ā pemba'eapoa rupi. Mba'eta pendeyvy gui ndoikovei ma 'rā pemono'ō va'erā, yvyra yvy re ikuai va'e voi ndai'avei 'rā.

²¹ — Xapy'a rei xerovai tema pendekuai, ha'e xeayvua napendu potai ae ramo pende'ary ambouve 'rā penemoingo axyarā sete-kue peve ju, pejevavyve temaa re.

²² Ha'e rami vy penembyte ambou 'rā ka'aguy rupigua inharō va'e. Ha'e va'e kuery omomba 'rā pendera'y kuery ha'e penerymba kuery, ojapo 'rā mbovy'i ete pekuave aguā rami, tape peguataaty rupi avave rei ndoaxaavei peve.

²³ — Ha'e ramigua oiko te'i ndapeikuaa potai vy xeayvu napendu potai xevy pe ju pendekuai aguā, ha'e xerovai tema peiko ramo ma

²⁴ xee voi aiko 'rā penderovai. Ha'e rami vy pejevavyvea re xee ae rojukapa 'rā sete-kue teri pendekuai axy aguā.

²⁵ Pende'ary ambou 'rā kyxe revegua penemombaarā, xereve guarā aeja va'ekue rovai pendekuai ramo. Ha'e ramo peneretā rupi pendeatypa te'i penembyte ambou 'rā mba'eaxy vaikue, ha'e romboaxa 'rā penderovaigua kuery po py.

²⁶ Pe'u 'rā va'ekue aipe'a ramo dez kunhague pete'i tatakua pyve 'rā ombojy mbojape, ha'e gui opejapa va'ekue anho 'rā omboja'o-ja'o pendey. Pe'u te'i napenhandui 'rā.

²⁷ — Ha'e rami ete oiko te'i napendu potai vy xerovai ae tema peiko ramo

²⁸ xee voi xepoxya aendu vy aiko 'rā penderovai. Ha'e rami vy pejevavyvea re rombojexavaive 'rā sete-kue peve ju.

²⁹ Ha'e ramo pe'u 'rā pendera'y ha'e penderajy kuery ro'okue ae.

³⁰ Aity ukapa 'rā pembojerovia atyrā yvy'ā rupi pejapo va'ekue, ambovaipa 'rā kuaray ra'angaa pejapo va'ekue, ha'e peneretā ogue amombo 'rā penderuete ramigua ivaipa va'ekue ary. Ha'e vy xepy'a py aendu 'rā noromboaxyveia anho.

³¹ Ambovaipa 'rā peneretā ikuai va'e tekoa e'ya opyta aguā rami, amomba 'rā pembojeroviaaty, naetūvei ma 'rā heakuā porā va'e ajou porā aguā peapy te'i.

³² Ambotyguepa avi 'rā pendeyvy. Ha'e nunga gui penderovaigua kuery onhemondyipa 'rā onhemboekoa okuapy vy.

³³ Romoaimba 'rā yvy regua kuery mbyte rupi, ha'e aekyi uka 'rā kyxe penderakykue rupi. Pendeyvy va'ekue itygue 'rā, ha'e peneretā va'ekue ma tekoague meme 'rā opyta.

³⁴ — Ha'e ramo 'rāe pendeyvy opytu'upa sábadō ára py rami, jipoaveia ja. Ha'e rā peē kuery ma penderovaigua kuery yvy re rive 'rā pendekuai. Ha'e va'e jave ma pendeyvy ikane'ōgua 'rā, sábadō ára py opytu'upaa rami.

³⁵ Jipoaveia ja pendeyvy ikane'ōgua 'rā, mba'eta yvy re pendekuai jave pendeyvy ndopytu'ui rive sábadō ára py rami.

³⁶ Ha'e gui pekuave va'e kuraxō re amoī 'rā mby'a guaxu ve'y'ā penderovaigua kuery yvy re pendekuaia py. Ha'e rami vy penhamba 'rā mba'emo rogue pirukue ovava nhendu'i va'e gui rive. Kyxe revegua ou va'e gui rami 'rā penhamba, pe'apa rive 'rā guive mava'eve penemonha ramo e'y'ā.

* 26:12 2 Corintios 6.16

³⁷ Pe'apa 'rā jo'a-jo'a kyxe gui ho'a va'e rami, mava'eve penemonha ramo e'ÿ. Napepu'ā kuaavei 'rā penderovaigua kuery renonde.

³⁸ Pemanomba 'rā yvy regua kuery mbyte, ha'e penderovaigua kuery yvy re peneru'ũmba 'rā.

³⁹ Pende kuery va'e regua okuave'i va'ekue okanhymba 'rā oje'oivy penderovaigua kuery yvy re, peẽ ha'e peneramoĩ kuery reko vaiague káuxa pekanhymba 'rā ha'e kuery rami avi.

⁴⁰ — Ha'e rami avi xapy'a rei ha'e kuery ojejavyague omombe'upa 'rā, ha'e tamoĩ kuery xerovai ikuaia rupi ojejavyague. Mba'eta tamoĩ kuery voi xerovai ikuaia onhemombe'upa raka'e,

⁴¹ ha'e kuery rovai xee aiko vy hovaigua kuery yvy re amboaxapa rire. Ha'e gui xapy'a rei pende kuery regua voi inhakā ratā va'e teĩ onhemo'yvy'i vy ojejavyague repy pe "Ha'evea ramigua" he'i ramo,

⁴² ha'e ramo xee xema'endu'a ju 'rā xereve guarā Jacó reve ajapo va'ekue, Isaque ha'e Abraão reve ma voi ajapo va'ekue re. Ha'e kuery yvy re avi xema'endu'a 'rā.

⁴³ Ha'e rami avi ijyvy jipoaveia ha'e kuery ojeja va'ekue opytu'u 'rā sábadu ára py rami. Ha'e rami jave ha'e kuery ojejavyague re amboaxapa pe "Ha'evea ramigua" he'i 'rā, xee aipota va'e ha'e kuery nombovarei, ha'e ajapo uka va'ekue ojou va'i rire.

⁴⁴ Ha'e rami rā hovaigua kuery yvy re ha'e kuery ikuai jave ndaxerexarai 'rā ha'e kuery gui, naenduvei 'rā guive ha'e kuery ndaipotavei vy amomba aguā, neĩ xereve guarā ha'e kuery reve ajapo va'ekue ambovaipa aguā, mba'eta xee ma SENHOR ha'e kuery Ruete.

⁴⁵ Ha'e rami 'rāgue py ha'e kuery amboaxy vy xema'endu'a ma voi 'rā tamoĩ kuery pe xereve guarā ajapo va'ekue re, mba'eta Egito yvy gui aipe'a va'ekue yvy regua kuery oexaa py, ha'e kuery Ruete aiko aguā. Xee ma SENHOR — he'i.

⁴⁶ Ha'e va'e ae SENHOR ojapo uka, oipota va'e ha'e lei Israel kuery pe ojeja va'ekue hexeve ikuai aguā. Sinai vvyty áry ome'ẽ va'ekue Moisés po rupi.

27

Mba'emo ome'ẽa aguā re, ha'e hepyrā oikuaa aguā re ijayvua

¹ SENHOR aipoe'ive Moisés pe:

² — Ndeayvu Israel kuery pe, ha'e vy aipo're: Amongue onhemboayvu 'rā xeve guarā nhomboaxa aguā re. Ha'e rami rire omboaxa pyre SENHOR pegua ae 'rā oiko, teĩ ha'eve avi nhomboaxa ete 'rāgue py omboekovia aguā hepyrā reikuaa va'e re.*

³ Peteĩ ava vinte ma'etÿ va'e guive sessenta ma'etÿ va'e peve ri ramo ma hepyrā reikuaa 'rā cinquenta hatā'i va'e prata guigua, henda iky'a e'ÿ va'e py oiporua va'e rami.

⁴ Ha'e rā kunha ri ramo ma trinta hatā'i va'e reikuaa 'rā hepyrā.

⁵ Ha'e rā amongue cinco ma'etÿ'i va'e guive vinte ma'etÿ va'e peve, ava ri ramo hepyrā reikuaa 'rā vinte hatā'i va'e, ha'e rā kunha repyrā ramo dez 'rā reikuaa.

⁶ Ha'e rā peteĩ jaxy'i va'e guive cinco ma'etÿ va'e peve, ava ri ramo hepyrā reikuaa 'rā cinco hatā'i va'e prata guigua, ha'e rā kunha repyrā ma três ete'i 'rā.

⁷ Ha'e rā avakue sessenta ma'etÿ va'e guive tujakueve peve ramo ma quinze hatā'i va'e reikuaa 'rā hepyrā. Ha'e rā kunha ma dez 'rā hepyrā.

⁸ Ha'e rami teĩ xapy'a rei nhomboaxa aguā re onhemboayvu va'e iporiaukue'i vy ndojou'i 'rā joepyrā reikuaa va'ekue. Ha'e rami vy ojexa uka 'rā sacerdote pe, ha'e va'e ju joepyrā oikuaa aguā. Ha'e ramo hepyrā sacerdote oikuaa 'rā ojoua'i rami vy.

⁹ — Xapy'a rei penhemboayvu 'rā mymba SENHOR pe pemboaxa aguā re. Peme'ẽ va'ekue ma SENHOR pe iky'a e'ÿ va'e meme.

¹⁰ Ha'e nungakue ndaperovai 'rā, neĩ iporā va'e napemboekovia'i 'rā ivaikue va'e re, neĩ ivaikue va'e iporā va'e re. Xapy'a rei peteĩ mymba amboae re pemboekovia ramo mokoive 'rā opyta iky'a e'ÿ va'e.

¹¹ Xapy'a rei mymba ha'eve'ÿ va'e SENHOR pe ome'ẽ mbyrā va'ekue'ÿ regua ri peru vy pexa uka 'rā sacerdote pe.

¹² Sacerdote ae oikuaa 'rā iporā pa, tyrā ivaikue rei va'ea. Sacerdote oikuaa rami ae 'rā hepy.

¹³ Ha'e gui xapy'a rei pendejeupe guarā ju pejoguaxe vy hepyrā oikuaa pyre áryve 'rā peme'ëve, peteĩ nhiruĩ repy oikuaa nhavõ áry peteĩ-teĩ ju 'rā peme'ëve.

¹⁴ — Ha'e gui amongue ngoo SENHOR pe omboaxa aguā re onhemboayvu 'rā iky'a e'ÿ va'erā. Ha'e ramo sacerdote oexa pota 'rā iporā paa, tyrā ivaikue rei va'ea. Sacerdote oikuaa rami ae 'rā hepy.

¹⁵ Ha'e rā SENHOR pe ngoo omboaxa va'ekue omboekovia jevyxe ri vy hepyrā oikuaa pyre áryve 'rā ome'ëve, peteĩ nhiruĩ repy oikuaa nhavõ áry peteĩ-teĩ ju 'rā ome'ëve. Ha'e ramo mae ma imba'e ju 'rā opyta.

Oyvy ome'ẽ aguā re oura rire ojogua jevy va'e regua

¹⁶ — Xapy'a rei amongue pe peteĩ mba'ety oejaa 'rā imba'erā, ha'e ramo onhemboayvu 'rā SENHOR peguarā ju omboaxa aguā re. Ha'e gui hepyrā reikuaa 'rā mba'emo ra'yigue ha'e va'e rupi onhotÿ aguā ha'eve va'e. Cevada ra'yigue mba'e peteĩ ryrū renyẽ repyrā ma cinquenta hatā'i va'e prata guigua 'rā reikuaa.

¹⁷ Xapy'a rei jubileu ma'etÿ py ri omba'ety omboaxa aguā re onhemboayvu ramo hepyrā ha'e javi porā'i 'rā reikuaa.

* 27:2 Samuel xy Ana onhemboayvu ipi'a oiko'i rire SENHOR peguarā omboaxa aguā re (1 Samuel 1.9-11). Ha'e gui apy aipoe'i ha'eve avi amongue nhomboaxa ete 'rāgue py perāta re omboekovia aguā.

¹⁸ Ha'e rami avi jubileu ma'etÿ oiko rire ri omba'ety omboaxa ramo sacerdote hepyrã oikuaa 'rã jubileu ojeupity jevy peve mbovy ma'etÿ pa oataa rami vy. Ha'e va'e rami vy hepyrã reikuaa vy neremboetaive 'rã.

¹⁹ Xapy'a rei omba'ety ome'ë rire ojogua jevyxe ri vy peráta ome'ëve 'rã hepyrã reikuaa va'ekue áryve, peteĩ nhiruĩ repy oikuaa nhavõ áry peteĩ-teĩ ju 'rã ome'ëve. Ha'e vy mae imba'e ju 'rã itui.

²⁰ Xapy'a rei omba'etykue ndojogua jevyxei, neĩ amboae ava pe novendexe rire ma nda'evei 'rã omboekovia ju aguã.

²¹ Ha'e rami avi jubileu ma'etÿ py ri ha'e va'e mba'ety omboekoviaa ramo SENHOR pegua iky'a e'ÿ va'e 'rã itui, mba'ety ixupe omboaxa pyre rami ae. Sacerdote peguarã 'rã itui.

²² — Xapy'a rei amongue omba'etyrã ojogua va'ekue omboaxa 'rã SENHOR peguarã, imba'erã oeja pyre regua e'ÿ.

²³ Ha'e ramo hepyrã sacerdote oikuaa 'rã jubileu ma'etÿ ojeupity peve oataa rami vy. Ha'e va'e árave hepyrã oikuaa va'ekue ome'ë 'rã SENHOR pe iky'a e'ÿ va'e opyta aguã.

²⁴ Ha'e gui jubileu ojeupity jevy jave ha'e va'e mba'ety ivendeare mba'erã ju 'rã itui, imba'erã ae oeja rire.

²⁵ Peteĩ-teĩ mba'e repyrã reikuaa 'rã hatã'i va'e henda iky'a e'ÿ va'e py oiporia va'e rami. Peteĩ-teĩ hatã'i va'e ma doze gramas va'e.

²⁶ — Ha'e rã jypy'igua mymba ra'y oiko va'e SENHOR peguarã ae ma oiko ramo nda'evei avave rei omboaxa jevy aguã. Jypy'igua vaka ra'y, e'ÿ vy mymba kyrĩ-kyrĩ'i va'e oiko teĩ SENHOR pegua ae meme.

²⁷ Ha'e rami avi mymba ha'eve'ÿ va'e regua ramo ma ha'eve 'rã omboekovia ju aguã, hepyrã reikuaa va'ekue rami vy, ha'e hi'áryve ome'ëve avi 'rã, peteĩ nhiruĩ repy reikuaa nhavõ áry peteĩ-teĩ ju 'rã ome'ëve. Xapy'a rei nomboekovia jevy ri ramo ovendea 'rã hepyrã reikuaa va'ekue re.

Mba'emo iky'a e'ÿ va'e ae omboekovia jevy e'ÿ aguã re ijayvua

²⁸ — Ha'e rami avi SENHOR pe amongue omboaxa 'rã mba'emo oguereko va'e raka'e rã peve guarã, ava mba'e, e'ÿ vy mymba, ha'e'ÿ vy imba'etyrã oeja pyre teĩ. Ha'e nunga ma nda'evei pevende, neĩ pemboekovia ju aguã. Ha'e nunga ha'e javi SENHOR pe pemboaxa ae ma rire iky'a e'ÿ ete va'e opyta.

²⁹ Avakue va'e regua teĩ SENHOR peguarã omboaxaa ae ma rire nda'evei omboekovia ju aguã. Ojukaa 'rãe.

Dízimo re ijayvua

³⁰ — Ha'e gui dízimo voi yvy gui mba'emo'a oiko va'ekue regua, mba'ety gui mba'emo ra'yĩ va'e regua, e'ÿ vy yvyra'a teĩ SENHOR mba'e meme, SENHOR pegua iky'a e'ÿ va'e.

³¹ Xapy'a rei amongue dízimo ome'ë va'ekue regua ri omboekoviaxe vy ome'ëve 'rã hepyrã va'ekue áryve, peteĩ nhiruĩ repy ovare nhavõ áry peteĩ-teĩ ju 'rã ome'ëve.

³² Ha'e rã dízimo vaka ra'y regua, mymba kyrĩgueve'i, ha'e mymba re opena va'e kuery oipapa vy yvyra guy rupi omboaxa va'e ha'e javi regua dízimo ome'ë ma rire ma SENHOR pegua iky'a e'ÿ va'e ae opyta.

³³ Ija ndoikuaa potai 'rã iporã va'e pa, e'ÿ vy iporã e'ÿ va'e re, neĩ nda'evei omboekovia aguã. Omboekovia ri ramo mokoive 'rã opyta iky'a e'ÿ va'e. Nda'evei avi 'rã ojeupe guarã ju ojogua aguã — he'i.

³⁴ Kova'e ayvu ha'e javi Moisés pe SENHOR oeja va'ekue Israel kuery peguarã, Sinai yvyty áry.

Números irundya kuaxia Moisés ombopara va'ekue

Números irundya kuaxia Moisés ombopara va'ekue

Kova'e kuaxia ma Números 'epy va'e, mba'eta omombe'u mokoïgue Moisés heta va'e kuery oipapaague. Jypy ma Egito vvy gui Israel kuery oëmba rire Sinai vvyty py ikuai jave py oipapa (capítulo 1). Ha'e gui amboae ma quarenta ma'etÿ rire Canaã vvy re oopa ta jave py ju oipapa (capítulo 26). Ha'e gui kova'e kuaxia para re oï quarenta ma'etÿ re Israel kuery tekoa e'ÿa rupi ikuai jave guare.

Ha'e va'e jave ma Israel kuery nonhe'ë rendui jepi okuapy Nhanderuete, neï hemimbo'e Moisés voi. Amongue py na'ikyre'ÿvei, okyje rei ha'e ijavyvui rei okuapy Moisés ha'e Nhanderuete rovai. Ha'e rami teï Nhanderuete omboaxya rupi opena porã, ojejavvyague operdoa kuerei guive. Moisés ma imbarae oikovy va'eri ha'e voi peteïgue nonhe'ë rendu porã, mba'eta Meribá tekoa py ivai vvy nomboetei Nhanderuete heta va'e kuery oendua py. “Ha'e ramo Senhor aipoe'i Moisés ha'e Arão pe: 'Peë kuery ndapejeroviai va'ekue xere, mba'eta Israel kuery oendua py ndapexa ukai xeky'a e'ÿ va'ea. Ha'e nunga rupi peë ma naperovaëvei ma 'rã kova'e kuery ijyvrã ame'ëague py', he'ï” (20.12).

Ha'e gui ma Israel kuery rovaigua kuery ogueru peteï ava Balão ha'e kuery re ijavyvui vai aguã. Ha'e rami teï Nhanderuete ojoko vvy ojeupegua kuery rovai nomombe'u ukai ayvu vai. Ha'e rami 'rãgue py Balão aipoe'i: “Jacó kuery rovai rupi mba'evyky'a nda'eve ranhei 'rã, Israel kuery rovai mba'ekuaa ndovarei 'rã”, he'ï (23.23a). Ha'e rami py Nhanderuete oepy kuerei 'rã ojeupegua kuery.

Moisés pe Israel kuery rery rupi Nhanderuete oipapa ukapaague

¹ Egito vvy gui Israel kuery oje'oi pa rire mokoï ma'etÿa re, mokoï jaxya, jypy araa py ma SENHOR ijavyvui Moisés pe, Sinai vvyty katy'i tekoa e'ÿa oï va'e py. Ogyu nhemboaty oï va'e py aipoe'i:

² — Pemboparapa ke Israel kuery rery ha'e javi, peteï-teï ta'y va'e, ha'e tamoi kuery ro pygua ikuai rami vvy. Avakue ha'e javi 'rã peipapa peteï-teï rery rupi.

³ Vinte ma'etÿ oguereko va'e guive 'rã peipapa tujakue peve, Israel regua joe opu'ã aguã ikuai kuaa va'e meme, ha'e va'e kuery ae ndee ha'e Arão reve peipapa 'rã xondaro kueryrã peteï-teï regua gui.

⁴ Peteï-teï regua ikuai va'e gui oiko avi 'rã peteï ava penepytyvõarã, nguu ro pygua kuery ruvixa ae.

⁵ Po rami ma avakue penepytyvõa rery: Rúben ramymino kuery ruvixa ma Sedeur ra'y Elizur;

⁶ Simeão ramymino kuery ruvixa ma Zurisadai ra'y Selumiel;

⁷ Judá ramymino kuery ruvixa ma Aminadabe ra'y Naassom;

⁸ Issacar ramymino kuery ruvixa ma Zuar ra'y Natanael;

⁹ Zebulom ramymino kuery ruvixa ma Helom ra'y Eliabe;

¹⁰ Ha'e gui José ra'y kuery ramymino kuery, Efraim ramymino kuery ruvixa ma Amiúde ra'y Elisama, ha'e rã Manassés ramymino kuery ruvixa ma Pedazur ra'y Gamaliel;

¹¹ Benjamim ramymino kuery ruvixa ma Gideoni ra'y Abidã;

¹² Dã ramymino kuery ruvixa ma Amisadai ra'y Aiezer;

¹³ Aser ramymino kuery ruvixa ma Ocrã ra'y Pagiel;

¹⁴ Gade ramymino kuery ruvixa ma Deuel ra'y Eliasafe;

¹⁵ Naftali ramymino kuery ruvixa ma Enã ra'y Aira.

¹⁶ Ha'e va'e kuery ma heta va'e kuery mbyte gui oiporavo pyre, tamoi kuery ramymino kuery yvateve va'e, Israel kuery mbovy rei e'ÿ ikuai va'e ruvixarã.

¹⁷ Ha'e ramo ha'e va'e avakue hery rupi oiporavo ramo Moisés ha'e Arão oguerua.

¹⁸ Ha'e vvy mokoï jaxya jypy'ia ára py heta va'e kuery omboaty pa ramo ha'e kuery omombe'u porãve okuapy peteï-teï regua ramoi kuery rery, tuu ha'e ta'y kuery. Hery rupi oipapa vinte ma'etÿ oguereko va'e guive tujakue peve.

¹⁹ Moisés pe SENHOR ojapo ukaague rami vvy oipapapa Sinai vvyty katy'i tekoa e'ÿa oï va'e py.*

²⁰ Israel ra'y jypykue Rúben ramymino kuery, peteï-teï hoo pygua kuery ikuai rami, tuu ha'e ta'y kuery, hery rupi meme oipapa. Peteï-teï ava vinte ma'etÿ oguereko va'e guive tujakue peve oipapa joe opu'ã kuaa va'e meme.

²¹ Ha'e vvy Rúben ramymino kuery oipapa rã quarenta e seis mil e quinhentos ha'e javi vvy.

²² Ha'e gui Simeão ramymino kuery ju, peteï-teï hoo pygua kuery ikuai rami, tuu ha'e ta'y kuery, hery rupi meme oipapa. Peteï-teï ava vinte ma'etÿ oguereko va'e guive tujakue peve oipapa joe opu'ã kuaa va'e meme.

²³ Ha'e vvy Simeão ramymino kuery oipapa rã cinqüenta e nove mil e trezentos ha'e javi vvy.

²⁴ Ha'e gui Gade ramymino kuery ju, peteï-teï hoo pygua kuery ikuai rami, tuu ha'e ta'y kuery, hery rupi meme oipapa. Peteï-teï ava vinte ma'etÿ oguereko va'e guive tujakue peve oipapa joe opu'ã kuaa va'e meme.

²⁵ Ha'e vvy Gade ramymino kuery oipapa rã quarenta e cinco mil seiscentos e cinqüenta ha'e javi vvy.

²⁶ Ha'e gui Judá ramymino kuery ju, peteï-teï hoo pygua kuery ikuai rami, tuu ha'e ta'y kuery, hery rupi meme oipapa. Peteï-teï ava vinte ma'etÿ oguereko va'e guive tujakue peve oipapa joe opu'ã kuaa va'e meme.

* 1:19 Sinai vvyty áry SENHOR lei oea raka'e (Êxodo 19.1-6).

²⁷ Ha'e vy Judá ramymino kuery oipapa rã setenta e quatro mil e seiscentos ha'e javi vy.

²⁸ Ha'e gui Issacar ramymino kuery ju, peteĩ-teĩ hoo pygua kuery ikuaiami, tuu ha'e ta'y kuery, hery rupi meme oipapa. Peteĩ-teĩ ava vinte ma'etỹ oguereko va'e guive tujakue peve oipapa joe opu'ã kuaa va'e meme.

²⁹ Ha'e vy Issacar ramymino kuery oipapa rã cingüenta e quatro mil e quatrocentos ha'e javi vy.

³⁰ Ha'e gui Zebulom ramymino kuery ju, peteĩ-teĩ hoo pygua kuery ikuaiami, tuu ha'e ta'y kuery, hery rupi meme oipapa. Peteĩ-teĩ ava vinte ma'etỹ oguereko va'e guive tujakue peve oipapa joe opu'ã kuaa va'e meme.

³¹ Ha'e vy Zebulom ramymino kuery oipapa rã cingüenta e sete mil e quatrocentos ha'e javi vy.

³² Ha'e gui José ra'y kuery ju, Efraim ramymino kuery ranhe, peteĩ-teĩ hoo pygua kuery ikuaiami, tuu ha'e ta'y kuery, hery rupi meme oipapa. Peteĩ-teĩ ava vinte ma'etỹ oguereko va'e guive tujakue peve oipapa joe opu'ã kuaa va'e meme.

³³ Ha'e vy Efraim ramymino kuery oipapa rã quarenta mil e quinhentos ha'e javi vy.

³⁴ Manassés ramymino kuery ju, peteĩ-teĩ hoo pygua kuery ikuaiami, tuu ha'e ta'y kuery, hery rupi meme oipapa. Peteĩ-teĩ ava vinte ma'etỹ oguereko va'e guive tujakue peve oipapa joe opu'ã kuaa va'e meme.

³⁵ Ha'e vy Manassés ramymino kuery oipapa rã trinta e dois mil e duzentos ha'e javi vy.

³⁶ Ha'e gui Benjamim ramymino kuery ju, peteĩ-teĩ hoo pygua kuery ikuaiami, tuu ha'e ta'y kuery, hery rupi meme oipapa. Peteĩ-teĩ ava vinte ma'etỹ oguereko va'e guive tujakue peve oipapa joe opu'ã kuaa va'e meme.

³⁷ Ha'e vy Benjamim ramymino kuery oipapa rã trinta e cinco mil e quatrocentos ha'e javi vy.

³⁸ Ha'e gui Dã ramymino kuery ju, peteĩ-teĩ hoo pygua kuery ikuaiami, tuu ha'e ta'y kuery, hery rupi meme oipapa. Peteĩ-teĩ ava vinte ma'etỹ oguereko va'e guive tujakue peve oipapa joe opu'ã kuaa va'e meme.

³⁹ Ha'e vy Dã ramymino kuery oipapa rã sessenta e dois mil e setecientos ha'e javi vy.

⁴⁰ Ha'e gui Aser ramymino kuery ju, peteĩ-teĩ hoo pygua kuery ikuaiami, tuu ha'e ta'y kuery, hery rupi meme oipapa. Peteĩ-teĩ ava vinte ma'etỹ oguereko va'e guive tujakue peve oipapa joe opu'ã kuaa va'e meme.

⁴¹ Ha'e vy Aser ramymino kuery oipapa rã quarenta e um mil e quinhentos ha'e javi vy.

⁴² Ha'e gui Naftali ramymino kuery ju, peteĩ-teĩ hoo pygua kuery ikuaiami, tuu ha'e ta'y kuery, hery rupi meme oipapa. Peteĩ-teĩ ava vinte ma'etỹ oguereko va'e guive tujakue peve oipapa joe opu'ã kuaa va'e meme.

⁴³ Ha'e vy Naftali ramymino kuery oipapa rã cingüenta e três mil e quatrocentos ha'e javi vy.

⁴⁴ Ha'e va'e kuery ma Moisés ha'e Arão oipapa va'ekue. Israel kuery yvatekueve ikuai va'e ma doze avakue, peteĩ-teĩ tamoi kuery ro pygua kuery ruvixa oiko.

⁴⁵ Ha'e rami vy Israel kuery ha'e javi oipapaa peteĩ-teĩ hoo pygua kuery ikuaiami. Peteĩ-teĩ ava vinte ma'etỹ oguereko va'e guive tujakue peve oipapa joe opu'ã kuaa va'e meme.

⁴⁶ Oipapa pyre ha'e javi vy ma seiscentos e três mil quinhentos e cingüenta.

Levita kuery regua ndoipapaaiaque

⁴⁷ Ha'e rã levita kuery regua ma ndoipapaa tuu kuery regua ikuaiami, amboae kuery oipapaa rami e'ỹ,

⁴⁸ mba'eta Moisés pe SENHOR ijayvu ma voi vy aipoe'i va'ekue:

⁴⁹ "Levita kuery regua anho 'rã nderepapai, ha'e kuery rery ma voi neremboparai 'rã Israel kuery rery mboae ikuai py.

⁵⁰ Ha'e rami 'rãgue py levita kuery ma remoi 'rã ombojeroviaaty xayvu oĩa va'e re opena va'erã, tembiporu ikuai va'e ha'e hexegua ha'e javi re. Ha'e kuery ikuai 'rã ombojeroviaaty oguerova heravy aguã rami, hexegua tembiporu ha'e javi reve. Ombojeroviaaty ropy rupi ae 'rã ha'e kuery opena okuapy, ha'e ijyvyry rupi 'rã ikuai.

⁵¹ Ha'e gui ombojeroviaaty oguerova ta jave ma levita kuery ombovaipa 'rã. Ha'e gui tekoa mbyte py ju omopu'ã aguã ma levita kuery ae ju 'rã omoatyrõ. Ha'e rã amboae regua hexe onhemboja vy omano 'rã.

⁵² Ha'e gui Israel kuery ma peteĩ-teĩ ngorã ojapo 'rã guekoa py ae, peteĩ-teĩ regua joa py ae 'rã ikuai, ojeupegua bandeira vyryrupi.

⁵³ Ha'e rã levita kuery ma ngorã ojapo 'rã okuapy ombojeroviaaty xayvu oĩa va'e vyryrupi ae, Israel kuery áry ou e'ỹ aguã imbopagaarã. Ha'e rami vy levita kuery ae 'rã opena okuapy ombojeroviaaty xayvu oĩa va'e re", he'i va'ekue.

⁵⁴ Ha'e ramo Israel kuery ojapo ha'e rami. Moisés pe SENHOR ojapo ukaague ha'e javi rupi ikuai.

2

Tekoa rupi peteĩ-teĩ regua ikuai aguã re ijayvuague

¹ SENHOR aipoe'i Moisés ha'e Arão pe:

² — Israel kuery ikuai 'rã peteĩ-teĩ regua bandeira 'y vyryrupi ae. Peteĩ-teĩ regua bandeira re ma tamoi kuery kuaa ukaarã oĩ. Ogy nhemboaty oiaty oĩ va'e vyryrupi 'rã hekoa, ha'e va'e katy peteĩ-teĩ regua oma'e' okuapy aguã rami.

³ Kuaray oua katy ikuai 'rã Judá regua kuery ojeupegua bandeira 'y vyryrupi, peteĩ-teĩ regua joa py ae. Judá ra'y kuery ruvixarã oĩ 'rã Aminadabe ra'y Naassom.

⁴ Ha'e kuery va'e regua xondaro kuery oipapaa rã setenta e quatro mil seiscentos ha'e javi vy.

- 5 Ha'e kuery yvýry ikuai 'rã Issacar regua kuery. Ha'e va'e kuery ruvixarã oĩ 'rã Zuar ra'y Natanael.
- 6 Ha'e kuery va'e regua xondaro kuery oipapaa rã cinqüenta e quatro mil e quatrocentos ha'e javi vy.
- 7 Ha'e gui Zebulom regua kuery jevy 'rã ikuai. Ha'e va'e kuery ruvixarã oĩ 'rã Helom ra'y Eliabe.
- 8 Ha'e kuery va'e regua xondaro kuery oipapaa rã cinqüenta e sete mil e quatrocentos ha'e javi vy.
- 9 Judá regua kuery rekoa py oipapaa rã cento e oitenta e seis mil e quatrocentos ha'e javi vy, amboae regua irũ kuery reve. Ha'e kuery ma tenondegua 'rã oje'oi.
- 10 Ha'e gui kuaray puku-a katy 'rã ikuai Rúben regua kuery ojeuepegua bandeira 'y yvýry, peteĩ-teĩ regua joa py ae. Rúben ra'y kuery ruvixarã oĩ 'rã Sedeut ra'y Elizur.
- 11 Ha'e kuery va'e regua xondaro kuery oipapaa rã quarenta e seis mil e quinhentos ha'e javi vy.
- 12 Ha'e kuery yvýry ma ikuai 'rã Simeão regua kuery. Ha'e va'e kuery ruvixarã oĩ 'rã Zurisadai ra'y Selumiel.
- 13 Ha'e kuery va'e regua xondaro kuery oipapaa rã cinqüenta e nove mil e trezentos ha'e javi vy.
- 14 Ha'e gui ma Gade regua kuery jevy 'rã ikuai. Ha'e va'e kuery ruvixarã oĩ 'rã Deuel ra'y Eliasafe.
- 15 Ha'e kuery va'e regua xondaro kuery oipapaa rã quarenta e cinco mil seiscientos e cinqüenta ha'e javi vy.
- 16 Rúben regua kuery rekoa py oipapaa rã cento e cinqüenta e um mil quatrocentos e cinqüenta ha'e javi vy, amboae regua irũ kuery reve. Ha'e kuery ma tenondegua rakykue 'rã oje'oi.
- 17 Ha'e gui mae ma oguerovaa 'rã heravy oguy nhemboaty oĩaty. Levita kuery ikuai va'e amboae kuery mbyte py 'rã oje'oi. Ha'e kuery ikuai rami ae 'rã oje'oi oguataa rupi. Peteĩ-teĩ regua oje'oi 'rã ikuai aguã py ae, ojeuepegua bandeira rakykue.
- 18 Ha'e gui kuaray oíkea katy ikuai 'rã Efraim regua kuery ojeuepegua bandeira 'y yvýry, peteĩ-teĩ regua joa py ae. Efraim ra'y kuery ruvixarã oĩ 'rã Amiúde ra'y Elisama.
- 19 Ha'e kuery va'e regua xondaro kuery oipapaa rã quarenta mil e quinhentos ha'e javi vy.
- 20 Ha'e va'e kuery yvýry ikuai 'rã Manassés regua kuery. Ha'e va'e kuery ruvixarã oĩ 'rã Pedazur ra'y Gamaliel.
- 21 Ha'e kuery va'e regua xondaro kuery oipapaa rã trinta e dois mil e duzentos ha'e javi vy.
- 22 Ha'e gui ma Benjamim regua kuery jevy 'rã ikuai. Ha'e va'e kuery ruvixarã oĩ 'rã Gideon ra'y Abidã.
- 23 Ha'e kuery va'e regua xondaro kuery oipapaa rã trinta e cinco mil e quatrocentos ha'e javi vy.
- 24 Efraim regua kuery rekoa py oipapaa rã cento e oito mil e cem ha'e javi vy, amboae regua irũ kuery reve. Ha'e kuery ma mboapya py 'rã oje'oi.
- 25 Ha'e gui kuaray apu'aa katy ikuai 'rã Dã regua kuery ojeuepegua bandeira 'y yvýry, peteĩ-teĩ regua joa py ae. Dã ra'y kuery ruvixarã oĩ 'rã Amisadai ra'y Aiezer.
- 26 Ha'e kuery va'e regua xondaro kuery oipapaa rã sessenta e dois mil e setecentos ha'e javi vy.
- 27 Ha'e va'e kuery yvýry ikuai 'rã Aser regua kuery. Ha'e va'e kuery ruvixarã oĩ 'rã Ocrã ra'y Pagiel.
- 28 Ha'e kuery va'e regua xondaro kuery oipapaa rã quarenta e um mil e quinhentos ha'e javi vy.
- 29 Ha'e gui ma Naftali regua kuery jevy 'rã ikuai. Ha'e va'e kuery ruvixarã oĩ 'rã Enã ra'y Aira.
- 30 Ha'e kuery va'e regua xondaro kuery oipapaa rã cinqüenta e três mil e quatrocentos ha'e javi vy.
- 31 Dã regua kuery rekoa py oipapaa rã cento e cinqüenta e sete mil e seiscentos ha'e javi vy, amboae regua irũ kuery reve. Ha'e kuery ma opa vygua 'rã oje'oi, peteĩ-teĩ regua ojeuepegua bandeira rakykue.
- 32 Ha'e va'e kuery ma Israel kuery regua oipapa pyre, tamoi kuery ikuai va'e-va'e rupi. Oipapa pyre ha'e javi vy ma seiscentos e três mil quinhentos e cinqüenta, peteĩ-teĩ regua joa py ikuai rami.
- 33 Ha'e rã levita kuery ma ndoipapaa Israel kuery oipapaa py, Moisés pe SENHOR ijayvuague rami vy.
- 34 Ha'e rami ae Israel kuery ikuai. Moisés pe SENHOR ijayvuague rami ae ikuai ojeuepegua bandeira 'y yvýry rupi. Ha'e rami ae avi oguata oje'oi, peteĩ-teĩ regua nguu ro pygua kuery reve.

3

Levita kuery mbovy pa ikuai, ha'e hembiaoporã re ijayvuague

1 Ha'e gui pova'e kuery ma Arão ha'e Moisés ra'y kuery ikuai, Sinai vytyt ary Moisés pe SENHOR ijayvu jave guare.

2 Po rami ae Arão ra'y kuery rery: ta'y jypykue ma Nadabe, ha'e gui ma Abiú, Eleazar ha'e Itamar.

3 Po rami Arão ra'y kuery rery, sacerdote-rã omoĩ mbyre meme ikuai, sacerdote-rã omboaxaa riere.

4 Ha'e rami teĩ Nadabe ha'e Abiú omano raka'e SENHOR renonde py, Sinai regua tekoa e'ya py SENHOR renonde tata ha'eve'ya ramigua ogueroi ke ramo. Ta'y e'y re omano raka'e. Ha'e rã tyvy kuery Eleazar ha'e Itamar ju sacerdote ikuai nguu Arão renonde.

5 SENHOR aipoe'i Moisés pe:

6 — Emonhemboja ke Levi regua kuery sacerdote Arão renonde py ipytyvõarã.

7 Ha'e kuery tojapo mba'emo ixupe, ha'e heta va'e kuery oguy nhemboaty oĩaty renonde rupi ikuai va'e ha'e javi re vy, ombojeroviaaty ropy rupi omba'eapoa py.

8 Ha'e kuery opena 'rã tembiporu oguy nhemboaty oĩaty pygua ha'e javi re. Ha'e vy 'rãe ojapopa ojapo 'rã va'ekue Israel kuery re vy, ombojeroviaaty rupi omba'eapoa py.

9 Ha'e nunga rupi levita kuery remboaxa 'rã Arão ha'e ta'y kuery peguarã. Israel kuery regua ixupe remboaxa va'erã ha'e kuery anho.

10 Ha'e rã Arão ha'e ta'y kuery pe ndeayvu 'rã sacerdote rami anho omba'eapo aguã re. Ha'e rã amboae regua ri onhemboja vy ma omano 'rã — he'i.

11 SENHOR aipoe'i Moisés pe:

12 — Ma'ë, levita kuery ma xee aipe'a va'ekue Israel kuery mbyte gui. Israel kuery jypy'i oiko'i va'e nhavõ rekovia ma levita kuery aiporavo xejeupe guarã. Ha'e rami rire levita kuery xevygua meme 'rã ikuai.

13 Mba'eta jypy'i oiko va'e nhavõ ma xevygua ae. Egito vvy py jypy'i oiko va'ekue ajukapa ára guive ma Israel kuery va'e regua jypykue'i amboaxapa xejeupe guarã, avakue ha'e mymba kuery voi. Xevy guarã meme ikuai. Xee ma SENHOR — he'i.

14 Ha'e gui Sinai regua tekoa e'ya py SENHOR ijayvu Moisés pe. Ha'e vvy aipoe'i:

15 — Reipapa 'rã Levi ramymino kuery peteĩ-teĩ tamymino kuery rery rupi, tuu ha'e ta'y kuery reve. Avakue ha'e javi 'rã reipapa, peteĩ jaxy oguereko va'e guive tujapave peve — he'i.

16 Ha'e ramo SENHOR ijayvuague rami vvy Moisés oipapa levita kuery, ixupe oipapa ukaague rami ae.

17 Po rami ma Levi ra'y kuery rery: Gérson, Coate ha'e Merari.

18 Ha'e gui pova'e ma Gérson ra'y kuery rery, peteĩ-teĩ ta'y kuery reve: Libni ha'e Simei.

19 Ha'e gui Coate ra'y kuery, ta'y kuery reve ma Anrão, Izar, Hebrom ha'e Uziel.

20 Ha'e gui Merari ra'y kuery, ta'y kuery reve ma Mali ha'e Musi. Ha'e va'e kuery ae Levi ramymino kuery, guamoĩ kuery rery rupi.

21 Gérson ramymino kuery ma Libni ha'e Simei ra'y kuery, Gérson re tamoĩ va'e meme.

22 Ha'e kuery regua avakue peteĩ jaxy oguereko va'e guive tujapave peve ma hery rupi oipapaa rã sete mil e quinhentos ha'e javi vy.

23 Ha'e gui Gérson ramymino kuery ma ombojeroviaaty kupe rupi 'rã ngoorã ojapo, kuaray oikea katy.

24 Gérson ramymino kuery ruvixarã ma Lael ra'y Eliasafe ikuai 'rã.

25 Gérson ramymino kuery opena 'rã okuapy oguy nhemboaty oĩaty re, ombojeroviaaty, oo ha'e ijao'ia re, ha'e oguy nhemboaty oĩaty rokërã ajukue oĩ va'e re,

26 ajukue oka ombojeroviaaty ha'e altar vvyry rupi ikuai va'e re, oka rokërã ajukue oĩ va'e re, ha'e gui ixã ikuai va'e re. Ha'e nunga ha'e javi rupi omba'eapo agua rami ikuai.

27 Ha'e gui Coate ramymino kuery ma Anrão, Izar, Hebrom ha'e Uziel ra'y kuery. Ha'e va'e kuery ma Coate re tamoĩ va'e meme.

28 Ha'e kuery regua avakue peteĩ jaxy oguereko va'e guive tujapave peve ma oipapaa rã oito mil e seiscientos ha'e javi vy. Ha'e kuery ma henda iky'a e'ỹ va'e re opena agua rami ikuai.

29 Ha'e gui Coate ramymino kuery ma ombojeroviaaty yke katy rupi 'rã ngoorã ojapo, kuaray puku-a katy.

30 Coate ramymino kuery ruvixarã oĩ 'rã Uziel ra'y Elisafã.

31 Ha'e kuery ma xeavyu ryrur re opena agua rami ikuai, mesa oĩ va'e, tataendy 'y, altar ha'e javi re, tembiporu henda iky'a e'ỹ va'e rupi oiporu va'ety ha'e ajukue okërã oĩ va'e re. Ha'e nunga ha'e javi re opena agua rami ikuai.

32 Levi ramymino kuery ruvixa yvateve va'e ma sacerdote Arão ra'y Eleazar. Ha'e va'e ma opena 'rã henda iky'a e'ỹ va'e ropy rupi omba'eapo va'e kuery re.

33 Ha'e gui Merari ramymino kuery ma Mali ha'e Musi ra'y kuery. Ha'e va'e kuery ae Merari re tamoĩ va'e meme.

34 Ha'e kuery regua avakue peteĩ jaxy oguereko va'e guive tujapave peve ma oipapaa rã seis mil e duzentos ha'e javi vy.

35 Ha'e gui Merari ramymino kuery ruvixarã oĩ 'rã Abiael ra'y Zuriel. Ha'e kuery ma ombojeroviaaty yke katy rupi 'rã ngoorã ojapo, kuaray apu'a'ia katy.

36 Merari ra'y kuery omoague rami vvy opena 'rã okuapy vvyra pe ombojeroviaaty regua ikuai va'e re, ha'e gui ijyta'i, ijyta, ijyta vvyry ha'e tembiporu ikuai va'e re. Ha'e va'e ha'e javi re opena agua rami ikuai,

37 ha'e gui ijyvryr oka rupi ijyta ikuai va'e re, ijyta vvyry, vvyra rakua, ha'e ixã ikuai va'e ha'e javi re.

38 Ha'e gui ombojeroviaaty renonde kuaray oua katy Moisés ha'e Arão ojapo 'rã ngoorã gua'y kuery reve, oguy nhemboaty oĩaty renonde kuaray oua katy ae. Ha'e va'e kuery ma henda iky'a e'ỹ va'e ropy rupi 'rã omba'eapo, omoague rami vvy. Omba'eapo 'rã Israel kuery re oma'ë vy. Ha'e rã amboae regua ri onhemboja vvy omano 'rã.

39 Ha'e gui levita kuery regua avakue peteĩ jaxy oguereko va'e guive tujapave peve ma oipapaa rã vinte e dois mil ha'e javi vy. SENHOR ojapo ukaague rami vvy Moisés ha'e Arão oipapa, ta'y kuery ha'e javi reve.

Jypy oiko'i va'ekue rekovia ome'ë mbyrã re ijayvuague

40 SENHOR aipoe'i Moisés pe:

— Eipapa ta'y jypykue'i avakue Israel kuery regua. Peteĩ-teĩ hery rupi 'rã reipapa peteĩ jaxy oguereko va'e guive tujapave peve.

41 Ha'e rami avi Israel kuery jypykue'i va'e rekovia xejeupe guarã amboaxa ma levita kuery. Xee ma SENHOR. Ha'e rami ae avi levita kuery rymba kuery xejeupe guarã amboaxa 'rã Israel kuery rymba kuery jypykue'i va'ekue rekovia — he'i.

42 Ha'e ramo SENHOR ojapo ukaague rami vvy Moisés oipapa jypykue'i Israel kuery regua ha'e javi.

43 Ha'e kuery regua avakue jypykue'i va'e peteĩ jaxy oguereko va'e guive tujapave peve ma hery rupi oipapaa rã vinte e dois mil duzentos e setenta e três ha'e javi vy.

44 Ha'e gui SENHOR aipoe'i Moisés pe:

45 — Israel kuery regua ta'y jypykue'i rekovia emboaxa ke levita kuery xevy guarã, ha'e Israel kuery rymba kuery rekovia emboaxa avi levita kuery rymba ikuai va'e. Mba'eta levita kuery ma xevy guarã meme ikuai. Xee ma SENHOR.

⁴⁶ Ha'e gui ikuai avi duzentos e setenta e três jypykue Israel kuery regua, levita kuery gui hetave va'e. Ha'e va'e kuery remboekovia aguã ma

⁴⁷ peteĩ-teĩ repyrã rejopy 'rã cinco hatã'i va'e. Henda iky'a e'ý va'e py hatã'i va'e oiporua va'e regua ae 'rã reiporu, doze gramas va'e meme.

⁴⁸ Ha'e va'e peráta reme'ê 'rã Arão ha'e ta'y kuery pe, hetave va'e kuery repyrã — he'i.

⁴⁹ Ha'e va'e peráta ma Moisés ojopy levita kuery gui Israel kuery jypykue'i hetave ikuai va'e repyrã.

⁵⁰ Israel kuery jypykue'i gui ae ojopy, mil trezentos e sessenta e cinco hatã'i va'e ha'e javi vy, henda iky'a e'ý va'e py oiporua va'e rami.

⁵¹ Ha'e va'e peráta SENHOR ome'ê ukaague rami vy Moisés ome'ê ha'e kuery repyrã. Arão ha'e ta'y kuery pe ome'êmba, Moisés pe SENHOR ojapo ukaague rami vy.

4

Coate ramymino kuery rembiaporã re ijayvuague

¹ Ha'e gui SENHOR aipoe'i Moisés ha'e Arão pe:

² — Pemboparapa ke Levi ra'y Coate ramymino kuery rery, ta'y kuery ha'e tuu ro rupigua kuery ikuai va'e reve.

³ Trinta ma'etý va'e guive cinqüenta ma'etý oguereko va'e peve ha'e va'e kuery omba'eapo aguã rami ikuai 'rã, onhemboaty aty ropy rupi mba'emo ojapo aguã.

⁴ Po rami ae 'rã Coate ra'y kuery omba'eapo oguy nhemboaty oíaty rupi, mba'emo iky'a e'ý ete va'e re opena vy.

⁵ Ha'e gui heta va'e kuery ikuai va'e ova ta ma ramo Arão gua'y kuery reve ou vy omboi 'rã ajukue okê regua xeayvu rryru oĩa mbotyarã omoĩ mbyre, ha'e vy ha'e va'e py onhovã 'rã hyru.

⁶ Ha'e va'e áry rupi ma omoĩ 'rã mba'emo pirekue iporãve va'e, ha'e gui hi'áry jevy rupi omoĩ 'rã peteĩ ajukue hovypa rei va'e. Ha'e gui mae ma jovaive rupi 'rã omoĩ vyvra po'i oupi heravy aguã.

⁷ Ha'e rami ae avi mesa mbopape xerenonde omoĩ mbyre ikuaiaty áry voi omoĩ 'rã peteĩ ajukue hovypa va'e. Ha'e va'e áry ju omoĩ 'rã hy'a, heakuã porã va'e ryrurã, karo, ha'e gui mba'emo rryru kyr'i va'e. Hi'áry ikuai tema avi 'rã mbopape xerenonde ikuai riae va'erã.

⁸ Ha'e nunga ha'e javi áry omoĩ 'rã ajukue pytã porãve va'e, ha'e ojao'i 'rã mba'emo pirekue iporãve va'e py. Ha'e gui ma jovaive rupi omoĩ avi 'rã vyvra po'i.

⁹ Ha'e gui ma ajukue hovypa va'e oupi vy ojao'i 'rã imoiny tataendy 'y hi'ai va'e, tataendy ikuai va'e, tapyĩ pejua, imbogua, ha'e gui tykuerã azeite rryru ikuai va'e ha'e javi.

¹⁰ Tataendy 'y, ha'e hexegua tembiporu ikuai va'e ha'e javi ojao'ipa 'rã mba'emo pirekue iporãve va'e py. Ha'e gui ma omoimba 'rã vyvra po'i áry rupi.

¹¹ Ha'e gui ma altar ouro guigua áry rupi omoĩ 'rã peteĩ ajukue hovypa va'e, ha'e ojao'i 'rã mba'emo pirekue iporãve va'e py. Ha'e gui ma vyvra po'i jevy 'rã omoĩ jovaive rupi.

¹² Ha'e gui ma oguerupa 'rã tembiporu henda iky'a e'ý va'e ruy oiporua va'e ha'e javi. Ha'e nunga voi onhovã 'rã ajukue hovypa va'e py, ha'e ojao'i avi 'rã mba'emo pirekue iporãve va'e py. Ha'e gui omoimba 'rã vyvra po'i áry rupi.

¹³ Ha'e gui altar jepy gui oipe'a 'rã tanhimbu oĩ va'e, ha'e hi'áry ma omoĩ 'rã peteĩ ajukue pytã va'e.

¹⁴ Ha'e va'e áry jevy omoimba 'rã altar rupi tembiporu oiporupy ha'e javi: tapyĩ rryru, kuxa rakua va'e, kuxa guaxu ha'e hy'a guaxu ikuai va'e, ha'e altar rupi tembiporu oiporupy ha'e javi. Ha'e gui hi'áry rupi ma omoĩ 'rã mba'emo pirekue iporãve va'e. Ha'e gui ma jovaive rupi omoĩ 'rã vyvra po'i.

¹⁵ — Ha'e gui tekoa gui oje'oipa ta ramo Arão ha'e ta'y kuery henda iky'a e'ý va'e ha'e hexegua mba'emo ikuai va'e ojao'ipa ma rire Coate ra'y kuery ju 'rã ou ogueraapa aguã. Ha'e rã mba'emo iky'a e'ý va'e re ma ha'e kuery ndopokoi 'rã, omano e'ý aguã. Mba'emo oguy nhemboaty oíaty regua anho 'rã ha'eve Coate ra'y kuery ogueraa aguã.

¹⁶ Ha'e gui sacerdote Arão ra'y Eleazar ma tataendy rykuerã azeite oĩ va'e re opena 'rã, ha'e gui heakuã porã va'e re, mba'emoaju guigua ome'ê jepi aguã, azeite SENHOR pe nhomboaxaa aguã regua re. Ha'e rami ae 'rã opena ombojeroviaaty re, ha'e gui ha'e py ikuai va'e ha'e javi re, henda iky'a e'ý va'e ropy rupi mba'emo ikuai va'e re guive — he'i.

¹⁷ Ha'e ramo SENHOR aipoe'i Moisés ha'e Arão pe:

¹⁸ — Peja eme Coate ramymino kuery ojapo aguã, levita kuery mbyte gui okanhymba aguã rami.

¹⁹ Pova'e ae 'rã pejapo ha'e kuery okuave aguã, mba'eta mba'emo iky'a e'ý ete va'e ikuai katy onhemboja vy ha'e kuery omanomba 'rã. Arão ha'e ta'y kuery anho 'rã ha'e py oíke, peteĩ-teĩ rembiaporã ome'ê aguã.

²⁰ Ha'e rã Coate kuery ma neĩ xapy'a'i voi nda'evei oíke aguã ha'e py mba'emo iky'a e'ý va'e oexa aguã, ha'e kuery omano e'ý aguã.

Gérson ramymino kuery rembiaporã re ijayvuague

²¹ Ha'e gui SENHOR aipoe'ive ju Moisés pe:

²² — Aý ma pemboparapa ke Gérson ramymino kuery rery, ta'y kuery ha'e tuu ro rupigua kuery ikuai va'e reve.

²³ Trinta ma'etý va'e guive cinqüenta ma'etý oguereko va'e peve ha'e va'e kuery omba'eapo aguã rami ikuai 'rã, oguy nhemboaty oíaty roka rupi opena aguã.

²⁴ Gérson ramymino kuery rembiaporã ma mba'emo re opena ha'e ogueraa aguã.

²⁵ Oguerovapa 'rã ajukue ombojeroviaaty ha'e oguy nhemboaty oĩaty mbotyará oipyo pyre, ha'e gui ijao'ia, hi'áry rupi mba'emo pirekue iporãve va'e py onhovã mbyre, okê reguarã ajukue omoĩ mbyre,

²⁶ ombojeroviaaty, altar vyvry rupi ajukue oka mbotyará oupi pyre, oka rokêrã ajukue omoĩ mbyre, ixã-ixã ha'e tembiporu ikuai va'e. Ha'e nunga ha'e javi re openaa rupi 'rã ha'e kuery omba'eapo.

²⁷ Gérson ramymino kuery mba'emo ogueraa e'y vy ojapo aguã ha'e javi ma Arão ha'e ta'y kuery ojapo ukaa rami 'rã ojapo. Arão kuery ae 'rã oguerova uka mba'emo.

²⁸ Ha'e rami ae Gérson ra'y kuery omba'eapo 'rã oguy nhemboaty oĩaty rupi. Sacerdote Arão ra'y Itamar ijayvua rami anho 'rã omba'eapo okuapy.

Merari ramymino kuery rembiaporã re ijayvuague

²⁹ — Ha'e gui Merari ramymino kuery reipapa avi 'rã ta'y kuery ha'e tuu ro rupigua kuery ikuai va'e reve.

³⁰ Trinta ma'etỹ va'e guive cinqüenta ma'etỹ ogueroko va'e peve ha'e va'e kuery omba'eapo aguã rami 'rã ikuai, oguy nhemboaty oĩaty rupi omba'eapo aguã.

³¹ Pova'e nunga ha'e kuery oguerova 'rã oguy nhemboaty oĩaty rupi omba'eapo vy: vyvra pe ombojeroviaaty mbotyará omoĩ mbyre, yvate rupi ikuai va'e, ijytarã omopu'ã mbyre, ijyta vyvpy ikuai va'e,

³² oka vyvry rupi ijytarã omopu'ã mbyre, ijyta vyvpy, vyvra rakua, ixã-ixã, tembiporu ha'e opa mba'e ha'e rupi oiporupy ha'e javi. Mba'emo ha'e kuery oguerova va'erã rery remombe'upa 'rã.

³³ Ha'e rami ae 'rã Merari ramymino kuery omba'eapo oguy nhemboaty oĩaty rupi, sacerdote Arão ra'y Itamar ijayvua rami anho.

Coate ra'y kuery oipapaa ague

³⁴ Ha'e gui Moisés ha'e Arão heta va'e kuery yvatekueve reve oipapapa Coate ra'y kuery, ta'y kuery ha'e tuu ro rupigua kuery ikuai va'e reve.

³⁵ Trinta ma'etỹ va'e guive cinqüenta ma'etỹ ogueroko va'e peve oipapa hembiaaporã ome'ẽ aguã, oguy nhemboaty oĩaty rupi mba'emo ojapo aguã.

³⁶ Ha'e va'e kuery oipapa rã dois mil setecentos e cinqüenta ha'e javi vy, tuu ro rupigua kuery ikuai rami.

³⁷ Ha'e kuery ae Coate ramymino kuery oipapa pyre, oguy nhemboaty oĩaty rupi omba'eapo va'erã meme. Moisés ha'e Arão ae oipapa, Moisés pe SENHOR ojapo ukaague rami vy.

Gérson ramymino kuery oipapaa ague

³⁸ Ha'e gui Gérson ramymino kuery ju oipapa avi, ta'y kuery ha'e tuu ro rupigua kuery ikuai va'e reve,

³⁹ trinta ma'etỹ va'e guive cinqüenta ma'etỹ ogueroko va'e peve hembiaaporã ome'ẽ aguã, oguy nhemboaty oĩaty rupi mba'emo ojapo aguã.

⁴⁰ Ha'e va'e kuery oipapa rã dois mil seiscentos e trinta ha'e javi vy, tuu ro rupigua kuery ikuai rami.

⁴¹ Ha'e kuery ae Gérson ramymino kuery oipapa pyre, oguy nhemboaty oĩaty rupi omba'eapo va'erã meme. Moisés ha'e Arão ae oipapa, Moisés pe SENHOR ojapo ukaague rami vy.

Merari ramymino kuery oipapaa ague

⁴² Ha'e gui Merari ramymino kuery ju oipapa avi, ta'y kuery ha'e tuu ro rupigua kuery ikuai va'e reve,

⁴³ trinta ma'etỹ va'e guive cinqüenta ma'etỹ ogueroko va'e peve hembiaaporã ome'ẽ aguã, oguy nhemboaty oĩaty rupi mba'emo ojapo aguã.

⁴⁴ Ha'e va'e kuery oipapa rã três mil e duzentos ha'e javi vy, tuu ro rupigua kuery ikuai rami.

⁴⁵ Ha'e kuery ae Merari ramymino kuery oipapa pyre. Moisés ha'e Arão ae oipapa, Moisés pe SENHOR ojapo ukaague rami vy.

Levita regua kuery anho'i mbovy pa ikuai re ijayvuague

⁴⁶ Ha'e rami py Moisés ha'e Arão Israel kuery yvatekueve reve oipapa levita regua kuery, ta'y kuery ha'e tuu ro rupigua kuery ikuai va'e reve,

⁴⁷ trinta ma'etỹ va'e guive cinqüenta ma'etỹ ogueroko va'e peve, hembiaaporã ome'ẽ aguã, oguy nhemboaty oĩaty rupi mba'emo ojapo aguã.

⁴⁸ Ha'e va'e kuery oipapa rã oito mil quinhentos e oitenta ha'e javi vy.

⁴⁹ Moisés pe SENHOR ojapo ukaague rami vy peteĩ-teĩ omoĩ guembiaaporã rupi omba'eapo aguã. Ha'e rami aguã ae ha'e kuery oipapa, Moisés pe SENHOR ojapo ukaague rami vy.

5

Tekoa gui mombyry'i lepra revegua ha'e ha'eve'y va'e oipe'apaa aguã re ijayvuague

¹ Ha'e gui SENHOR aipoe'i Moisés pe:

² — Aipo're Israel kuery pe tekoa mbyte gui mombyry'i oipe'apa aguã lepra revegua, ipeupa rei va'e, ha'e omanogue re opokoa py ha'eve'y va'e ikuai va'ekue ha'e javi.

³ Avakue ha'e kunhague voi peipe'a 'rã tekoa gui mombyry'i, penderekoa omongy'apa e'y aguã, mba'eta mbyte rupi xee aiko — he'i.

⁴ Ha'e ramo Israel kuery ha'e rami ae ojapo okuapy. Ha'e vy guekoa mbyte gui oipe'apa ha'e ramigua kuery. Moisés pe SENHOR ojapo ukaague rami vy Israel kuery ojapo okuapy.

Lei mba'emo rekovia ome'ẽa regua oĩa

⁵ Ha'e gui SENHOR aipoe'ive ju Moisés pe:

⁶ — Aipo're Israel kuery pe: Xapy'a rei ava e'y vy kunha mba'e ojevavy 'rã pavê ojevavya py, ha'e vy otekoavy 'rã SENHOR pe. Ha'e rami vy ha'e va'e ojevavy va'e oiko.

⁷ Ha'e gui ma omombe'u 'rã ojevavyague, ha'e ojevavyague re mba'emo ome'ê 'rã otekoavyague rekovia. Ome'êve 'rã guive, petei nhiruĩ repy ovare nhavô áry petei-teĩ ju 'rã ome'êve. Ha'e nunga ha'e javi ome'ê 'rã ojapo vaia va'ekue pe ae.

⁸ Ha'e gui xapy'a rei ha'e va'e omano, ha'e hetarã ete'i nda'ipoi ramo otekoavyague rekovia ome'êa rã ojopy va'erã, ha'e ramo SENHOR pe ae 'rã ome'ê opaga aguã va'ekue. Sacerdote pe togueru petei vexa'i reve, ha'e va'e py ojevavyague ojao'i uka aguã.

⁹ Mba'emo sacerdote pe Israel kuery ogueru va'ekue ha'e javi ma sacerdote pegua ae opyta iky'a e'y va'e.

¹⁰ Petei-teĩ gui mba'emo iky'a e'y va'e ojopy va'ekue ma imba'e ae. Sacerdote pe ogueru pyre ma ixupe ae 'rã opyta.

Kunha otavypaague re oikuaa pota aguã re ijayvuague

¹¹ SENHOR aipoe'ive ju Moisés pe:

¹² — Ndeayvu ke Israel kuery pe, ha'e vy aipo're: Xapy'a rei amongue ra'yxy ome gui ojepe'a vy oiko 'rã ome okorea rupi.

¹³ Ava mboae reve itavy rei teĩ onhenhomi ramo ime ndoexai 'rã, ha'eve'ya rami oiko teĩ avave rei ndoexaai, neĩ itavy jave voi.

¹⁴ Ha'e gui xapy'a rei ime opy'a re oendu hakãte'y reia, gua'yxy re hakãte'y 'rã kunha va'e itavy rire, ha'e'y vy nda'itavyi teĩ hexe hakãte'y vy ma

¹⁵ ava va'e ogueru 'rã gua'yxy sacerdote-a py. Ogueru avi 'rã mba'emo gua'yxy ojevavya regua ome'ê va'erã. Petei ryru cevada ku'ikue ome'ê 'rã ha'e va'e re azeite omo' e'y re, neĩ heakuã porã va'e ma voi nomoi 'rã hi'áry, mba'eta hakãte'y reia regua mba'emo aju guigua ome'êmby. Ha'e va'e ma mba'emokue re nhomoma'endu'a aguã regua ome'ê, teko vai kuaa ukaarã.

¹⁶ — Ha'e ramo sacerdote kunha va'e omonhemboja vy ogueru 'rã imo'amy SENHOR renonde py.

¹⁷ Ha'e vy sacerdote karo nhae'ũ guigua yy ky'a e'y oĩa va'e oupi vy ojopy avi 'rã yvy ku'ikue ombojeroviaaty ropy rupi ikuai va'e regua. Ha'e va'e ma omoi 'rã yy py.

¹⁸ Ha'e vy SENHOR renonde py kunha va'e oexa uka vy omboguejyppa 'rã hi'a. Ha'e vy ipo py omoi 'rã mba'emo aju guigua imoma'endu'aarã ome'ê mbyre, takãte'y regua. Ha'e rã yy iro va'e nhomoingo axyarã ma sacerdote po py ranhe 'rã opyta.

¹⁹ Ha'e gui kunha va'e pe sacerdote oura uka vy aipoe'i 'rã ixupe: “Xapy'a rei ndereve avave rei nonhenoai, ha'e neme oipotaa rami e'y vy ixugui nderejepe'ai ri vy ha'eve'y va'e rejapo aguã, ha'e rami vy kova'e yy iro va'e ayvu vaipy nhomoingoarã gui rey'u teĩ mba'eve ndoiko'i 'rã, reo jepe 'rã.

²⁰ Ha'e rami teĩ xapy'a rei neme openaa gui rejepe'a vy ha'eve'ya rami reiko, ha'e ava neme e'y ri ndereve onheno ramo ma —”

²¹ (ha'e rami vy sacerdote oura uka 'rã kunha va'e pe oiko axy aguã rupi, ha'e vy ixupe aipoe'ive 'rã): “— Ha'e rami ri ramo tove SENHOR tanemoingo ayvu vaipy ha'e ojou vaipy heta va'e kuery mbyte. Tove SENHOR tandeapo nde'u ivaipa ha'e nderyepy rupi irurupa ovy aguã rami.

²² Ha'e rami vy kova'e yy ayvu vaipy nhomoingoarã nderyepy rupi oike ramo ta'irurupa, ha'e ta'ivaipa nde'u”, he'i 'rã. Ha'e ramo kunha va'e “Ha'eve va'e, ha'eve va'e!” he'i 'rã.

²³ — Ha'e gui ha'e va'e ayvu vai sacerdote omboparapa 'rã petei kuaxia re, ha'e gui ipara omboje'opa ju 'rã yy iro va'e irürã.

²⁴ Ha'e vy kunha va'e pe oy'u uka 'rã yy iro va'e ayvu vaipy nhomoingoarã. Ha'e va'e oy'u ramove ma hexe oĩ 'rã imoingo axyarã.

²⁵ Ha'e gui kunha va'e po gui sacerdote ju ojopy 'rã mba'emo aju guigua takãte'y regua ome'ê mbyre, ha'e SENHOR renonde oupi vy ombovava 'rã. Ha'e gui ma altar hi'aia py ju 'rã ogueraa.

²⁶ Ha'e gui mba'emo aju guigua nhomoma'endu'aarã ome'ê mbyre petei po ojopy vy oapy 'rã altar áry. Ha'e va'e rire yy ome'ê 'rã kunha va'e pe oy'u aguã.

²⁷ Ha'e gui ma ixupe yy oy'u uka ramo, xapy'a rei kunha va'e ojevavy ri vy ha'eve'ya rami ome okorea rupi oiko rire ma yy ayvu vaipy nhomoingoarã hexe oike vy omoingo axy 'rã. Ha'e ramo hyepy rupi irurupa 'rã, ha'e hi'u ivaipa 'rã. Ha'e ramo kunha va'e heta va'e kuery mbyte rupi oiko 'rã ayvu vaipy.

²⁸ Ha'e rami teĩ xapy'a rei kunha va'e mba'eve py ndojejavyi, ha'e hexe ha'eve'y va'e noĩ ramo oo jepe 'rã, ha'eve ju 'rã kyri va'e oguereko'i aguã.

²⁹ — Ha'e va'e lei ma takãte'ya regua, kunhague ome kuery openaa gui ojepe'a vy ha'eve'ya rami oiko ramo guarã,

³⁰ ha'e rami e'y vy ava opy'a re hakãte'ya oendu ramo guarã. Ha'e rami vy gua'yxy ogueraa vy SENHOR renonde py oexa uka 'rã, ha'e hexe sacerdote ojapopa 'rã lei oĩ va'e ha'e javi rami vy.

³¹ Ha'e gui ava va'e re ma teko vai noĩ, ha'e rã kunha va'e ojevavy rire hexe oĩ 'rã ojevavyague re opaga aguã.

6

Lei nazireu rami oiko aguã regua oĩa

¹ SENHOR aipoe'ive ju Moisés pe:

2 — Ndeayvu ke Israel kuery pe, ha'e vy aipo're: Peteĩ ava e'ỹ vy kunha teĩ ae ma onhemboayvu 'rã anhetẽ rupi nazireu rami oiko aguã re, SENHOR pe anho oiko aguã.*

3 Ha'e rami vy ha'e va'e ndoy'uvei ma 'rã vinho ha'e iro va'e regua. Neĩ ndoy'uvei 'rã vinagre vinho guigua, iro va'e guigua, uva rykue, ndo'ui 'rã uva oipo'o ramo'i pyre, neĩ ipirukue ma voi.

4 Nazireu rami oiko teri reve ndoy'uvei 'rã mba'emo uva'a gui ojapo pyre, ha'yĩgue neĩ ipirekue gui ma voi.

5 Nazireu rami oiko aguã re onhemboayvuague rami oiko teri reve ma oakã rague ndojaya ukai 'rã mba'emo haimbe va'e py ma voi. SENHOR pe anho oiko aguã ára ojeupitypa e'ỹa ja ma oiko 'rã iky'a e'ỹ va'e. Ha'e vy onhembo'a vuku 'rã.

6 — SENHOR pe onhemboaxa aguã pukukue re ma nonhembojavei 'rã te'õgue ituia katy ma voi.

7 Xapy'a rei tuu ae omano teĩ, e'ỹ vy ixy teĩ ae ma, e'ỹ vy tyvy, tyke'y, e'ỹ vy heindy omano teĩ ikáuxa rive nda'evei ha'eve'e'ỹ va'e oiko aguã. Mba'eta inhakã re oĩ 'rã Nguete pe anho oiko aguã kuaa ukaarã.

8 Nazireu rami oikoa pukukue re ma SENHOR pe iky'a e'ỹ va'ea 'rã oexa uka.

9 — Ha'e gui ha'e oĩa py amongue omano xapy'a ramo nazireu rami onhemboaxaague gui ha'eve'e'ỹ va'e ju 'rã oiko, hi'a guive. Ha'e ramo ma sete araa py ojaya ukapa ju 'rã o'a, ojeky'a'o ukaa ára py ae.

10 Ha'e gui oĩto araa py ma sacerdote pe ogueraa 'rã mokoĩ pyku'i'i e'ỹ vy mokoĩ apyaxu'i, oguy nhemboaty oĩaty rokẽ peve.

11 Ha'e va'e regua peteĩ ma sacerdote omboaxa 'rã jejavya regua, ha'e rã amboae ma oapypa vy omboaxa 'rã. Ha'e rami vy ojao'i uka 'rã omanogue káuxa ojevavyague. Ha'e va'e árave omboaxa jevy 'rã o'a.

12 Ha'e gui onhemboaxa ju 'rã SENHOR pe nazireu rami oiko aguã, ha'e vy mba'emo omboekovia aguã regua ome'ẽ va'erã ogueraa 'rã peteĩ vexa'i peteĩ ma'etỹ oguereko va'e. Ha'e gui nazireu rami oikoa oaxa va'ekue ma ndovarevei 'rã, ivaipa rive ramo.

13 — Po rami ma nazireu pega lei. Nazireu rami oiko aguã ára ojeupitypa ma ramo oguerua 'rã oguy nhemboaty oĩaty rokẽ peve.

14 Ha'e ramo SENHOR pe ha'e ogueru 'rã vexa'i peteĩ ma'etỹ va'e ivaikue rei e'ỹ va'e, oapy vy ome'ẽ mbyrã. Ha'e gui jejavya regua ome'ẽ avi 'rã vexa'i kunha peteĩ ma'etỹ oguereko va'e, ivaikue rei e'ỹ va'e. Ha'e gui peteĩ rami ikuaia regua ome'ẽ 'rã peteĩ vexa'ava ivaikue rei e'ỹ va'e.

15 Ome'ẽ avi 'rã peteĩ varai mbojape imbovua revegua e'ỹ, mbojape trigo iporãve va'e guigua azeite reve omoapomo mbyre, ha'e gui mbojape iperiri'i va'e azeite revegua. Mba'emo aju guigua voi ome'ẽ 'rã, mba'emo rykue guive.

16 Ha'e nunga SENHOR renonde py sacerdote ogueru vy oexa uka 'rã jejavya regua ome'ẽmby ha'e oapypa revegua.

17 Vexa'i ma SENHOR pe ome'ẽ 'rã peteĩ rami ikuaia regua, varai py mbojape imbovua revegua e'ỹ reve. Sacerdote ome'ẽ avi 'rã mba'emo aju guigua ogueru pyre, mba'emo rykue guive.

18 Ha'e gui nazireu rami oiko va'e ma oguy nhemboaty oĩaty rokẽ py hi'aia py onhopĩ ukapa 'rã oakã rague nazireu rami oikoague kuaa ukaa. Ha'e va'e ma ogueraa vy omoĩ 'rã tata áry, peteĩ rami ikuaia regua ome'ẽmby oĩ va'e vyvry.

19 Ha'e va'e rire ma sacerdote ogueru 'rã vexa'i axi'y ro'okue mimoĩ, peteĩ mbojape imbovua revegua e'ỹ hyru gui, ha'e gui peteĩ mbojape periri'i imbovua revegua e'ỹ. Ha'e nunga ma omoĩmba 'rã nazireu va'e po py, nazireu rami oiko aguã oakã onhopimba ma rire.

20 Ha'e nunga sacerdote oupi 'rã SENHOR renonde py, oupi vy ombovava reve ome'ẽ mbyrã. Ha'e nunga ma iky'a e'ỹ va'e opyta sacerdote peguarã, mymba oupi vy ombovava reve ome'ẽmby pexokue ha'e hi'ugue ha'e rami ae avi. Ha'e va'e rire ma ha'eve ju 'rã nazireu va'ekue vinho oy'u aguã.

21 — Ha'e va'e lei ma nazireu rami oiko aguã re onhemboayvu va'ekue pegua. SENHOR pe mba'emo ome'ẽ 'rã nazireu ome'ẽ aguã va'e ae, mba'emo oguereko va'e rami ome'ẽ va'e áryve. Onhemboayvuague rami ae 'rã oiko, lei nazireu rami oiko aguã regua oĩa rami ae.

Sacerdote jogueroayvu porã aguã regua

22 SENHOR aipoe'i Moisés pe:

23 — Ndeayvu ke Arão ha'e ta'y kuery pe, ha'e vy aipo're: Po rami 'rã peroayvu porã Israel kuery. Ha'e vy aipopeje 'rã:

24 “ SENHOR tanemoingo porã
ha'e topena porã ndere.

25 SENHOR rova taexakã nde'áry rupi,
tanemboaxy guive.

26 SENHOR toma'ẽ riae ndere,
ha'e tome'ẽ revy'a aguã.”

27 Po rami 'rã peroayvu xerery Israel kuery áry rupi. Ha'e ramo xee amoingo porã 'rã — he'i.

7

Altar SENHOR pega iky'a e'ỹ va'erã omboaxaa py vatekueve mba'emo ome'ẽ okuapyague

* 6:2 Nazireu ma Nhanderuete pe anho'i oiko aguã rami onhemboayvu va'ekue. Peteĩ semana e'ỹ vy peteĩ jaxy, e'ỹ vy cinco ma'etỹ peve guarã oiko 'rã ijavyague rami ae. Ha'e va'e rire ma nazireu ve'ỹ 'rã oiko, Nhanderuete pe oiko riae teĩ amboae nunga re opena reve.

¹ Ha'e gui Moisés ombojerovia atyrā ojaopaa ára py azeite omoí reve omboaxa SENHOR pega iky'a e'ÿ va'erã, tembiporu ikuai va'e guive, altar ha'e hexegua tembiporu ikuai va'e ha'e javi reve.

² Ha'e ramo Israel kuery yvatekueve guetarã kuery rerekoa ikuai va'e, peteĩ-teĩ regua ruvixa kuery guetarã kuery papaare ma mba'emo ome'ẽmba okuapy.

³ Ha'e vy SENHOR renonde py ogueru okuapy ome'ẽ va'erã mboapy meme karóxa hoopa va'e ha'e doze toro. Yvatekueve mokoĩ-mokoĩ ome'ẽ peteĩ karóxa, ha'e rã peteĩ-teĩ ma ome'ẽ toro. Oguerupa okuapy ombojeroviaaty rexei.

⁴ Ha'e gui SENHOR aipoe'i Moisés pe:

⁵ — Ejopypa ke ha'e nunga ha'e kuery po gui, mba'eta oguy nhemboaty oĩaty rupi omba'eapo va'e kuery oiporu va'erã. Levita kuery pe ju 'rã remboaxapa, peteĩ-teĩ guembiaporã oguerekoa rami — he'i.

⁶ Ha'e ramo Moisés karóxa ha'e toro ojopypa vy omboaxapa levita kuery pe.

⁷ Ha'e rami vy Gérson ramymino kuery pe ranhe omboaxa mokoĩ karóxa ha'e irundy toro, ha'e kuery guembiaporã oguerekoa rami.

⁸ Ha'e gui Merari ramymino kuery pe ma irundy karóxa ha'e oito toro omboaxa, ha'e kuery guembiaporã oguerekoa rami. Ha'e kuery ma sacerdote Arão ra'y Itamar po py meme omba'eapo.

⁹ Ha'e rã Coate ramymino kuery pe ma nome'ẽi mba'eve, mba'eta ha'e va'e kuery henda iky'a e'ÿ va'e rupi omba'eapo va'e vy ojaxe 'rã mba'emo.

¹⁰ Ha'e gui altar re azeite omoí reve SENHOR peguarã omboaxa aguã yvatekueve ogueru okuapy mba'emo altar áry ome'ẽ va'erã. Altar rexei peteĩ-teĩ ogueru okuapy ome'ẽ va'e.

¹¹ Mba'eta SENHOR aipoe'i Moisés pe:

— Altar xevygua iky'a e'ÿ va'erã pemboaxa aguã ma huvixa kuery peteĩ-teĩ ogueru 'rã ome'ẽ va'erã, ára rexei ae 'rã oguerupa — he'iague rami vy.

¹² Ha'e ramo jypy'ia ára py mba'emo ome'ẽ va'erã ogueru va'ekue ma Aminadabe ra'y Naassom, Judá ramymino kuery ruvixa.

¹³ Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ÿ va'e py oiporupy ramigua ae. Ha'e va'e mokoĩve ma trigo iporãve va'e py omonyẽ reve ogueru, azeite reve omoapomo mbyre, mba'emo aju guigua ome'ẽ va'erã;

¹⁴ ha'e gui peteĩ hyru ouro guigua cento e vinte gramas ipoyi va'e, heakua porã va'e tynyẽ reve;

¹⁵ ha'e peteĩ toro ra'y, peteĩ vexa ava ha'e peteĩ vexa'í ra'y peteĩ ma'et'ÿ va'e, oapy vy ome'ẽ va'erã meme;

¹⁶ ha'e gui peteĩ kavara jejavya regua ome'ẽ va'erã;

¹⁷ ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'í ra'y peteĩ ma'et'ÿ va'e meme. Ha'e va'e ha'e javi ma Aminadabe ra'y Naassom ome'ẽ va'ekue.

¹⁸ Ha'e gui mokoĩ araa py mba'emo ome'ẽ va'erã ogueru va'ekue ma Zuar ra'y Natanael, Issacar ramymino kuery ruvixa.

¹⁹ Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ÿ va'e py oiporupy ramigua ae. Ha'e va'e mokoĩve ma trigo iporãve va'e py omonyẽ reve ogueru, azeite reve omoapomo mbyre, mba'emo aju guigua ome'ẽ va'erã;

²⁰ ha'e gui peteĩ hyru ouro guigua cento e vinte gramas ipoyi va'e, heakua porã va'e tynyẽ reve;

²¹ ha'e peteĩ toro ra'y, peteĩ vexa ava ha'e peteĩ vexa'í ra'y peteĩ ma'et'ÿ va'e, oapy vy ome'ẽ va'erã meme;

²² ha'e gui peteĩ kavara jejavya regua ome'ẽ va'erã;

²³ ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'í ra'y peteĩ ma'et'ÿ va'e meme. Ha'e va'e ha'e javi ma Zuar ra'y Natanael ome'ẽ va'ekue.

²⁴ Ha'e gui mboapy araa py ma ou Helom ra'y Eliabe, Zebulom ramymino kuery ruvixa.

²⁵ Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ÿ va'e py oiporupy ramigua ae. Ha'e va'e mokoĩve ma trigo iporãve va'e py omonyẽ reve ogueru, azeite reve omoapomo mbyre, mba'emo aju guigua ome'ẽ va'erã;

²⁶ ha'e gui peteĩ hyru ouro guigua cento e vinte gramas ipoyi va'e, heakua porã va'e tynyẽ reve;

²⁷ ha'e peteĩ toro ra'y, peteĩ vexa ava ha'e peteĩ vexa'í ra'y peteĩ ma'et'ÿ va'e, oapy vy ome'ẽ va'erã meme;

²⁸ ha'e gui peteĩ kavara jejavya regua ome'ẽ va'erã;

²⁹ ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'í ra'y peteĩ ma'et'ÿ va'e meme. Ha'e va'e ha'e javi ma Helom ra'y Eliabe ome'ẽ va'ekue.

³⁰ Ha'e gui irundy araa py ma ou Sedeut ra'y Elizur, Rúben ramymino kuery ruvixa.

³¹ Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ÿ va'e py oiporupy ramigua ae. Ha'e va'e mokoĩve ma trigo iporãve va'e py omonyẽ reve ogueru, azeite reve omoapomo mbyre, mba'emo aju guigua ome'ẽ va'erã;

³² ha'e gui peteĩ hyru ouro guigua cento e vinte gramas ipoyi va'e, heakua porã va'e tynyẽ reve;

³³ ha'e peteĩ toro ra'y, peteĩ vexa ava ha'e peteĩ vexa'í ra'y peteĩ ma'et'ÿ va'e, oapy vy ome'ẽ va'erã meme;

³⁴ ha'e gui peteī kavara jejavya regua ome'ē va'erā;

³⁵ ha'e gui peteī rami ikuai aguā regua ome'ē va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etȳ va'e meme. Ha'e va'e ha'e javi ma Sedeur ra'y Elizur ome'ē va'ekue.

³⁶ Peteī nhiruī araa py ma ou Zurisadai ra'y Selumiel, Simeão ramymino kuery ruvixa.

³⁷ Ha'e va'e ma ome'ē peteī hy'a prata guigua mil e quinhentos gramas ipoyi va'e, ha'e gui peteī hy'a guaxu prata guigua oitocentos gramas ipoyi va'e, hendaiky'a e'ȳ va'e py oiporupy ramigua ae. Ha'e va'e mokoīve ma trigo iporāve va'e py omonyē reve ogueru, azeite reve omoapomo mbyre, mba'emo aju guigua ome'ē va'erā;

³⁸ ha'e gui peteī hyru ouro guigua cento e vinte gramas ipoyi va'e, heakūa porā va'e tynyē reve;

³⁹ ha'e peteī toro ra'y, peteī vexa ava ha'e peteī vexa'i ra'y peteī ma'etȳ va'e, oapy vy ome'ē va'erā meme;

⁴⁰ ha'e gui peteī kavara jejavya regua ome'ē va'erā;

⁴¹ ha'e gui peteī rami ikuai aguā regua ome'ē va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etȳ va'e meme. Ha'e va'e ha'e javi ma Zurisadai ra'y Selumiel ome'ē va'ekue.

⁴² Ha'e gui mboapy meme araa py ma ou Deuel ra'y Eliasafe, Gade ramymino kuery ruvixa.

⁴³ Ha'e va'e ma ome'ē peteī hy'a prata guigua mil e quinhentos gramas ipoyi va'e, ha'e gui peteī hy'a guaxu prata guigua oitocentos gramas ipoyi va'e, hendaiky'a e'ȳ va'e py oiporupy ramigua ae. Ha'e va'e mokoīve ma trigo iporāve va'e py omonyē reve ogueru, azeite reve omoapomo mbyre, mba'emo aju guigua ome'ē va'erā;

⁴⁴ ha'e gui peteī hyru ouro guigua cento e vinte gramas ipoyi va'e, heakūa porā va'e tynyē reve;

⁴⁵ ha'e peteī toro ra'y, peteī vexa ava ha'e peteī vexa'i ra'y peteī ma'etȳ va'e, oapy vy ome'ē va'erā meme;

⁴⁶ ha'e gui peteī kavara jejavya regua ome'ē va'erā;

⁴⁷ ha'e gui peteī rami ikuai aguā regua ome'ē va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etȳ va'e meme. Ha'e va'e ha'e javi ma Deuel ra'y Eliasafe ome'ē va'ekue.

⁴⁸ Ha'e gui sete araa py ma ou Amiúde ra'y Elisama, Efraim ramymino kuery ruvixa.

⁴⁹ Ha'e va'e ma ome'ē peteī hy'a prata guigua mil e quinhentos gramas ipoyi va'e, ha'e gui peteī hy'a guaxu prata guigua oitocentos gramas ipoyi va'e, hendaiky'a e'ȳ va'e py oiporupy ramigua ae. Ha'e va'e mokoīve ma trigo iporāve va'e py omonyē reve ogueru, azeite reve omoapomo mbyre, mba'emo aju guigua ome'ē va'erā;

⁵⁰ ha'e gui peteī hyru ouro guigua cento e vinte gramas ipoyi va'e, heakūa porā va'e tynyē reve;

⁵¹ ha'e peteī toro ra'y, peteī vexa ava ha'e peteī vexa'i ra'y peteī ma'etȳ va'e, oapy vy ome'ē va'erā meme;

⁵² ha'e gui peteī kavara jejavya regua ome'ē va'erā;

⁵³ ha'e gui peteī rami ikuai aguā regua ome'ē va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etȳ va'e meme. Ha'e va'e ha'e javi ma Amiúde ra'y Elisama ome'ē va'ekue.

⁵⁴ Oito araa py ma ou Pedazur ra'y Gamaliel, Manassés ramymino kuery ruvixa.

⁵⁵ Ha'e va'e ma ome'ē peteī hy'a prata guigua mil e quinhentos gramas ipoyi va'e, ha'e gui peteī hy'a guaxu prata guigua oitocentos gramas ipoyi va'e, hendaiky'a e'ȳ va'e py oiporupy ramigua ae. Ha'e va'e mokoīve ma trigo iporāve va'e py omonyē reve ogueru, azeite reve omoapomo mbyre, mba'emo aju guigua ome'ē va'erā;

⁵⁶ ha'e gui peteī hyru ouro guigua cento e vinte gramas ipoyi va'e, heakūa porā va'e tynyē reve;

⁵⁷ ha'e peteī toro ra'y, peteī vexa ava ha'e peteī vexa'i ra'y peteī ma'etȳ va'e, oapy vy ome'ē va'erā meme;

⁵⁸ ha'e gui peteī kavara jejavya regua ome'ē va'erā;

⁵⁹ ha'e gui peteī rami ikuai aguā regua ome'ē va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etȳ va'e meme. Ha'e va'e ha'e javi ma Pedazur ra'y Gamaliel ome'ē va'ekue.

⁶⁰ Ha'e gui nove araa py ma ou Gideoni ra'y Abidā, Benjamim ramymino kuery ruvixa.

⁶¹ Ha'e va'e ma ome'ē peteī hy'a prata guigua mil e quinhentos gramas ipoyi va'e, ha'e gui peteī hy'a guaxu prata guigua oitocentos gramas ipoyi va'e, hendaiky'a e'ȳ va'e py oiporupy ramigua ae. Ha'e va'e mokoīve ma trigo iporāve va'e py omonyē reve ogueru, azeite reve omoapomo mbyre, mba'emo aju guigua ome'ē va'erā;

⁶² ha'e gui peteī hyru ouro guigua cento e vinte gramas ipoyi va'e, heakūa porā va'e tynyē reve;

⁶³ ha'e peteī toro ra'y, peteī vexa ava ha'e peteī vexa'i ra'y peteī ma'etȳ va'e, oapy vy ome'ē va'erā meme;

⁶⁴ ha'e gui peteī kavara jejavya regua ome'ē va'erā;

⁶⁵ ha'e gui peteī rami ikuai aguā regua ome'ē va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etȳ va'e meme. Ha'e va'e ha'e javi ma Gideoni ra'y Abidā ome'ē va'ekue.

⁶⁶ Ha'e gui dez araa py ma ou Amisadai ra'y Aiezer, Dā ramymino kuery ruvixa.

⁶⁷ Ha'e va'e ma ome'ē peteī hy'a prata guigua mil e quinhentos gramas ipoyi va'e, ha'e gui peteī hy'a guaxu prata guigua oitocentos gramas ipoyi va'e, hendaiky'a e'ȳ va'e py oiporupy ramigua ae. Ha'e va'e mokoīve ma trigo iporāve va'e py omonyē reve ogueru, azeite reve omoapomo mbyre, mba'emo aju guigua ome'ē va'erā;

⁶⁸ ha'e gui peteī hyru ouro guigua cento e vinte gramas ipoyi va'e, heakūa porā va'e tynyē reve;

⁶⁹ ha'e peteī toro ra'y, peteī vexa ava ha'e peteī vexa'i ra'y peteī ma'etŷ va'e, oapy vy ome'ē va'erā meme;

⁷⁰ ha'e gui peteī kavara jejavya regua ome'ē va'erā;

⁷¹ ha'e gui peteī rami ikuai aguā regua ome'ē va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etŷ va'e meme. Ha'e va'e ha'e javi ma Amisadai ra'y Aiezer ome'ē va'ekue.

⁷² Ha'e gui onze araa py ma ou Ocrā ra'y Pagiē, Aser ramymino kuery ruvixa.

⁷³ Ha'e va'e ma ome'ē peteī hy'a prata guigua mil e quinhentos gramas ipoyi va'e, ha'e gui peteī hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoīve ma trigo iporāve va'e py omonyē reve ogueru, azeite reve omoapomo mbyre, mba'emo aju guigua ome'ē va'erā;

⁷⁴ ha'e gui peteī hyru ouro guigua cento e vinte gramas ipoyi va'e, heakūa porā va'e tynyē reve;

⁷⁵ ha'e peteī toro ra'y, peteī vexa ava ha'e peteī vexa'i ra'y peteī ma'etŷ va'e, oapy vy ome'ē va'erā meme;

⁷⁶ ha'e gui peteī kavara jejavya regua ome'ē va'erā;

⁷⁷ ha'e gui peteī rami ikuai aguā regua ome'ē va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etŷ va'e meme. Ha'e va'e ha'e javi ma Ocrā ra'y Pagiē ome'ē va'ekue.

⁷⁸ Ha'e gui doze araa py ma ou Enā ra'y Aira, Naftali ramymino kuery ruvixa.

⁷⁹ Ha'e va'e ma ome'ē peteī hy'a prata guigua mil e quinhentos gramas ipoyi va'e, ha'e gui peteī hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoīve ma trigo iporāve va'e py omonyē reve ogueru, azeite reve omoapomo mbyre, mba'emo aju guigua ome'ē va'erā;

⁸⁰ ha'e gui peteī hyru ouro guigua cento e vinte gramas ipoyi va'e, heakūa porā va'e tynyē reve;

⁸¹ ha'e peteī toro ra'y, peteī vexa ava ha'e peteī vexa'i ra'y peteī ma'etŷ va'e, oapy vy ome'ē va'erā meme;

⁸² ha'e gui peteī kavara jejavya regua ome'ē va'erā;

⁸³ ha'e gui peteī rami ikuai aguā regua ome'ē va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etŷ va'e meme. Ha'e va'e ha'e javi ma Enā ra'y Aira ome'ē va'ekue.

⁸⁴ Po rami ma Israel kuery yvatekueve ome'ē va'ekue altar áry azeite omoī reve SENHOR peguarā omboaxa aguā: doze hy'a prata guigua, doze hy'a guaxu prata guigua ha'e doze avi hyru ouro guigua.

⁸⁵ Peteī-teī hy'a prata guigua va'e ma mil e quinhentos gramas ipoyi va'e meme, ha'e gui peteī-teī hy'a guaxu ma setenta ipoyi va'e. Ha'e va'e tembiporu re prata oī va'e ha'e javi vy ma vinte e oito quilos e oitocentos gramas, henda iky'a e'ŷ va'e py oiporupy rami ae.

⁸⁶ Ha'e gui doze hyru ouro guigua heakūa porā va'e tynyē reve ma cento e vinte gramas ipoyi va'e meme, henda iky'a e'ŷ va'e py oiporupy ramigua ae. Ha'e nunga ha'e javi re ouro oī va'e ma um quilo e quatrocentos e quarenta gramas.

⁸⁷ Ha'e gui mymba kuery oapy vy ome'ē mbyre ma doze toro ra'y, doze vexa ava, doze avi vexa'i ra'y peteī ma'etŷ va'e, mba'emo aju guigua ome'ē mbyre reve, ha'e doze kavara ava avi ome'ē jejavya regua.

⁸⁸ Ha'e gui peteī rami ikuai aguā regua mymba ome'ē mbyre ha'e javi vy ma vinte e quatro toro ra'y, sessenta vexa ava, sessenta kavara ha'e sessenta avi vexa'i ra'y peteī ma'etŷ va'e meme. Ha'e va'e ma ome'ē okuapy altar áry azeite omoī vy SENHOR peguarā omboaxa aguā.

⁸⁹ Ha'e gui SENHOR reve Moisés ijavyu aguā oguy nhemboaty oīaty py oike nhavō oendu kuerei 'rā ixupe ijavyu va'e ayvu ryrū mbotyā teko vai ombogueaty áry gui. SENHOR ayvu ryrū áry mokoī anjo ipepo va'e ra'angaa hi'ái va'e mbyte gui onhendu.* Ha'e rami ae 'rā ijavyu ixupe.

8

Henda iky'a e'ŷ va'e py sete tataendy renda ikuai va'e re ijavyuague

¹ SENHOR aipoe'i Moisés pe:

² — Ndeayvu ke Arão pe, ha'e vy aipo're: Sete tataendy hendarā py remoī vy reja 'rā imoiny hi'y kyvō katy hexakā aguā rami — he'i.

³ Ha'e ramo ha'ekue rami ae Arão ojapo. Ha'e rami vy tataendy omoī hi'y kyvō katy meme hexakā aguā rami, Moisés pe SENHOR aipoe'igague rami vy.

⁴ Tataendy 'y ma ouro ombota pyre gui ojapoa va'ekue, hi'yvypy guive yvate katy ipoty ikuai peve. Moisés pe SENHOR ta'angaa oexa ukaague rami ae ju ojapo tataendy 'yrā.

SENHOR pegua iky'a e'ŷ va'erā levita kuery omboaxaa ague

⁵ Ha'e gui SENHOR aipoe'ive ju Moisés pe:

⁶ — Aŷ ma emono'ōmba levita kuery Israel kuery mbyte gui, ha'e eiky'a'opa xevy guarā.

⁷ Po rami 'rā rejapo iky'a e'ŷ va'e ikuai aguā: Ha'e kuery áry emboayvi yy jejavya ojao'ia aguā regua. Ha'e gui hete ha'e javi rupi renhopī uka 'rā kyxe py, ha'e rejoi ukapa 'rā ijao. Ha'e rami vy 'rā ha'e kuery iky'a e'ŷ va'e ikuai.

⁸ Ha'e gui ha'e kuery ogueru 'rā peteī toro ra'y mba'emo aju guigua reve ome'ē va'erā, trigo iporāve va'e ha'e azeite reve omoapomo mbyre. Ha'e rā ndee ma amboae toro ra'y ju 'rā reru jejavya regua reme'ē va'erā.

* 7:89 Anjo ipepo va'e ra'angaa ma ayvu ryrū mbotyā áry guarā omoī mbyre (Êxodo 25.18-20).

⁹ Ha'e gui rejapo 'rã oguy nhemboaty oĩaty rexei levita kuery onhembojapa aguã rami. Remboaty avi 'rã Israel kuery ha'e javi.

¹⁰ Ha'e gui ma SENHOR renonde py levita kuery removaẽmba ramo ha'e kuery áry katy Israel kuery omoĩmba 'rã opo.

¹¹ Ha'e gui SENHOR pe Arão oexa uka 'rã levita kuery mba'emo oupi reve Israel kuery ome'ẽ va'e rami. Ha'e rami rã 'rã SENHOR pe omba'eapo aguã rami ikuai.

¹² Ha'e gui levita kuery ju opo omoĩ 'rã okuapy toro ra'y ikuai va'e akã áry. Ha'e va'e regua peteĩ ma rejuka 'rã jejavya regua ome'ẽ mbyrã, ha'e rã amboae ma SENHOR pe oapy vy ome'ẽ mbyrã, levita kuery ojevavyague rejao'i uka aguã.

¹³ Ha'e vy Arão ha'e ta'y kuery renonde py levita kuery removaẽ imo'amy vy rexa uka 'rã SENHOR pe oupi reve ome'ẽmby rami.

¹⁴ — Reipe'a 'rã levita kuery Israel kuery mbyte gui. Levita kuery ma xevy pegua ae 'rã ikuai.

¹⁵ Ha'e va'e rire mae ma levita kuery oike 'rã oguy nhemboaty oĩaty rupi omba'eapo aguã. Ndee remboaxa 'rã iky'a e'ỹ va'erã, ha'e xevy rexa uka 'rã oupi reve ome'ẽmby rami.

¹⁶ Mba'eta ha'e kuery ae Israel kuery va'e regua ikuai va'erã xevy pegua. Israel kuery regua jypykue ta'y ikuai va'ekue ha'e javi rekovia ma xejeupe guarã meme aipe'a.

¹⁷ Mba'eta xevygua meme ikuai Israel kuery regua jypykue ikuai va'ekue, avakue ha'e'ỹ vy mymba kuery regua teĩ. Egito yvy re ta'y ypy'iague ajukapa ára guive ha'e kuery aipe'a xejeupegua iky'a e'ỹ va'erã.

¹⁸ Ha'e nunga rupi xejeupe guarã levita kuery aipe'a Israel kuery jypykue ikuai va'e rekovia.

¹⁹ Ha'e gui ma Arão ha'e ta'y kuery po py ju amboaxa levita kuery, Israel kuery mbyte gui. Amboaxapa oguy nhemboaty oĩaty rupi omba'eapo okuapy aguã Israel kuery re ama'ẽ vy, ha'e kuery ojevavyague ojao'i uka aguã, ha'e rami vy Israel kuery mbyte rupi oiko e'ỹ aguã imoingo axyarã, mba'eta henda iky'a e'ỹ va'e py Israel kuery oike va'e rire oiko 'rãgue ae — he'i.

²⁰ Ha'e ramo Moisés, Arão ha'e Israel kuery ha'e javi ma ha'e rami ae ojapo okuapy levita kuery re. Moisés pe SENHOR ijayvuague ha'e javi rami Israel kuery ojapo okuapy levita kuery omboaxa vy.

²¹ Ha'e rami vy levita kuery iky'a e'ỹ va'e ikuai aguã ojoj okuapy oao. Ha'e gui Arão oexa ukapa SENHOR renonde py oupi reve ome'ẽmby rami. Ojao'i uka guive ha'e kuery ojevavyague, iky'a e'ỹ va'e ikuai aguã.

²² Ha'e va'e rire levita kuery ovaẽmba okuapy oguy nhemboaty oĩaty rupi omba'eapo aguã, Arão ha'e ta'y kuery renonde rupi. Levita kuery rekorã re Moisés pe SENHOR ijayvuague rami vy ae ojapo ha'e kuery re.

²³ Ha'e gui SENHOR aipoe'ive ju Moisés pe:

²⁴ — Pova'e lei ma levita kuery regua: Vinte e cinco ma'et'ỹ va'e guive tujakue peve 'rã ikuai oguy nhemboaty oĩaty rupi omba'eapo aguã.

²⁵ Ha'e rã cinqüenta ma'et'ỹ va'e ma ha'e va'e rupi nda'ikuavei 'rã, ha'ekue rami nomba'eapovei 'rã.

²⁶ Ha'e rami 'rãgue py joegua kuery pytyvõa rupi 'rã ikuai oguy nhemboaty oĩaty rupi omba'eapoa py, teĩ ha'e kuery ae nomba'eapovei 'rã. Ha'e rami ae 'rã remoĩ levita kuery guembiaporã oĩ va'e ojapo aguã.

9

Páscoa ára pygua ngaru ojapo aguã re ijayvuague

¹ SENHOR ijayvu Moisés pe Sinai regua tekoa e'ỹa rupi oiko teri reve. Egito yvy gui oje'oipa rire mokoĩ ma'et'ỹa ha'e jypy'ia jaxy re ijayvu vy aipoe'i:

² — Israel kuery tojapo okuapy ngaru Páscoa regua hi'ára py porã.

³ Kova'e jaxy re catorze araa py, ka'aru ma ovy pa ma pejapo 'rã ngaru hi'ára py. Lei ha'e ojapo uka pyre ha'e javi rami vy 'rã pejapo ngaru — he'i.

⁴ Ha'e ramo Moisés aipoe'i Israel kuery pe ngaru ojapo aguã Páscoa ára py.

⁵ Ha'e rami vy ngaru ojapo okuapy, peteĩ jaxya re, catorze araa py ae. Ka'aru ma ovy jave ojapo Sinai regua tekoa e'ỹa py. Moisés pe SENHOR ojapo ukaague rami vy Israel kuery ojapopa okuapy.

⁶ Ha'e va'e ára ma amongue ikuai avi ha'e've'ỹ va'e peteĩ omanogue re opokoague káuxa. Ha'e nunga rupi nda'evei ngaru oĩa py ikuai aguã. Ha'e rami vy Moisés ha'e Arão renonde py ha'e kuery ovaẽ vy

⁷ aipoe'i okuapy:

— Ore ma ha'e've'ỹ va'e roiko peteĩ ava omano va'ekue re ropoko rire. Nda'evei 'rã ri nda'u SENHOR pe ore voi mba'emo rome'ẽ aguã Israel kuery reve Páscoa ára py?

⁸ Moisés ombovai:

— Pearõ ranhe, ha'e xee ajapyxaka 'rã ainy mba'exa pa peẽ kuery re SENHOR ojapo uka rã aendu aguã — he'i.

⁹ Ha'e gui ma SENHOR aipoe'i Moisés pe:

¹⁰ — Ndeayvu ke Israel kuery pe, ha'e vy aipo're: Xapy'a rei amongue pende kuery va'e regua, e'ỹ vy raka'eve rã peneramimino kuery ikuai va'erã regua ikuai 'rã ha'e've'ỹ va'e omano va'ekue káuxa. Ha'e rami e'ỹ vy penderekoa gui mombryrã oguata teĩ ha'e've nho 'rã Páscoa regua ngaru ojapo aguã SENHOR pe.

¹¹ Ha'e rami vy ha'e kuery mokoĩ jaxy py 'rã ngaru ojapo, catorze araa va'e ka'aru ma jave. Ho'u 'rã okuapy mbojape imbovua revegua e'ỹ, jai rogue iro va'e reve.*

¹² Pemoembyre eme nei kyr'i ma voi ko'ẽ rã guarã, pemopẽ eme guive ikãgue'i. Páscoa pygua ngaru regua re ipara oĩa rami 'rã pejapo.

* 9:11 Ha'e kuery pe ma Nhanderuete ngaru ojapo uka amboae jaxy py, hi'ára pyguarã ndoiko katui rire.

¹³ Ha'e rami avi xapy'a rei pete'i ava ngarua pyguarā ha'eve va'e oiko, ha'e tape rupi ndoguatai va'eri Páscoa ára ngaru py ndooi ri ramo ha'e va'e oipe'aa 'rā heta va'e kuery mbyte gui, mba'eta ha'e va'e ára py mba'eva ndoguerui SENHOR pe ome'ē va'erā. Ha'e va'e ava re oī ae 'rā ojejavyague re opaga aguā.

¹⁴ Ha'e gui penembyte amboae regua ikuai va'e Páscoa ára SENHOR pegua ngarua py ikuai avi ri vy lei ipara oīa rami vy ae 'rā ikuai. Pete'i lei oī pende'vy ha'e amboae kuery pe joo rami.

Éxodo 40.34-38

¹⁵ Ha'e gui ombojerovia atyrā ojapooa ára py arai ou va'e ojao'ipa. Ha'e va'e oo ma SENHOR avyu oīaty ae. Ha'e rā ka'aru guive ko'ēmba peve ma tata rami ju 'rā ojekuaa ombojeroviaaty áry rupi.

¹⁶ Ha'e rami ae tema oiko. Arai ojao'i kuerei 'rā, ha'e rā pyávy ma tata rami ju 'rā ojekuaa.

¹⁷ Oo áry gui arai ojeupi ovy nhavō Israel kuery oguata 'rā oje'oivy. Ha'e gui arai opyta oinya py ae ju 'rā Israel kuery opyta avi okuapy.

¹⁸ SENHOR oikuaa ukaa rami vy Israel kuery oje'oi 'rā, ha'e gui SENHOR oikuaa ukaa rami vy ae ju 'rā opyta okuapy. Ombojeroviaaty áry rupi arai opyta oinya ja ma ikuai tema 'rā ha'e py.

¹⁹ Heta ára re ri ombojeroviaaty áry rupi arai opyta te'i Israel kuery SENHOR ojapo ukaa rami ikuai vy ndooi 'rā okuapy.

²⁰ Amongue py are'ỹ'i re arai opyta 'rā oiny ombojeroviaaty áry rupi. Ha'e ramo SENHOR oikuaa ukaa rami vy ikuai tema 'rā ha'e py, ha'e gui SENHOR oikuaa ukaa rami vy jevy 'rā oguata oje'oi'vy.

²¹ Amongue py ma ka'aru'i ramove ko'ēmba peve'i 'rā arai opyta oiny. Ha'e gui ko'ē rā arai ojeupi ovy ramo ma ha'e kuery oguata 'rā oje'oivy. Ara py e'ỹ vy pyávy te'i arai ojeupi ramo oguata 'rā oje'oivy.

²² Xapy'a rei ombojeroviaaty áry rupi arai oī tema 'rā mokoī ára re, e'ỹ vy pete'ijaxy re mba'e, e'ỹ vy areve mba'e te'i hi'áry rupi arai oī teria ja Israel kuery ikuai tema 'rā ha'e py, ndoguatai. Ojeupi ovy ramo mae ma oguata ju 'rā oje'oivy.

²³ Ha'e rami py SENHOR oikuaa ukaa rami vy opyta 'rā, ha'e gui SENHOR oikuaa ukaa rami vy ae ju 'rā oguata oje'oivy. SENHOR pe ojapo okuapy ojapo 'rā va'ekue, Moisés rupi SENHOR ojapo ukaa rami vy.

10

Mokoī mimby guaxu prata guigua re ijayvuague

¹ Ha'e gui SENHOR aipoe'ive ju Moisés pe:

² — Ejapo uka mokoī mimby guaxu prata guigua. Pembota-mbota vy 'rā pejapo. Ha'e va'e pemonhe'ē 'rā heta va'e kuery pemboaty aguā, ha'e ikuai gui oguata oje'oivy aguā guive.

³ Pemonhe'ē ramo heta va'e kuery onhemboatypa 'rā okuapy ndea py, ogyu nhemboaty oīaty rokē rexe'i rupi ae.

⁴ Pete'i mimby guaxu pemonhe'ē ramo ndea py onhemboja 'rā yvatekueve anho, Israel kuery mbovy rei e'ỹ regua ruvixa ikuai va'e ae.

⁵ Ha'e gui mokoīve ri pemonhe'ē ramo ma oje'oi 'rā kuaray oua katy ikuai va'ekue ranhe.

⁶ Pemonhe'ē jevy ramo oje'oi 'rā kuaray puku-a katy ikuai va'ekue. Pemonhe'ē va'e ha'e kuery oendu vy oikuaa 'rā oje'oi aguā.

⁷ Ha'e rā ha'e kuery pemboaty jevy aguā ma pemonhe'ē avi 'rā te'i hatā e'ỹ ta'vy.

⁸ Arão ramymino kuery sacerdote ikuai va'e ae 'rā omnonhe'ē mimby guaxu. Pende kuery rekorā aeja raka'e rā peve guarā.

⁹ Ha'e gui pende'vy re ae pendekuai jave penderovaigua kuery reve pepu'ā aguā katy peje'oi ramo pememoi vai okuapy ramo pemonhe'ē avi 'rā mimby guaxu. Ha'e ramo xee SENHOR Penderuete aīa py peē kuery re ama'ē ramo peo jepe 'rā penderovaigua kuery gui.

¹⁰ Ha'e rami ae avi pevy'a aguā ára py, xe'vy ngaru pejapoa py mba'e, ha'e jaxy jypy'ia py guive pemonhe'ē avi 'rā mimby guaxu. Ha'e va'e jave py mba'emo peapya vy peme'ē, ha'e pete'i rami pendekuaia regua peme'ē va'e áry rupi pemonhe'ē ramo xee Penderuete aīa py ama'ē 'rā pendere. Xee ma SENHOR Penderuete aiko.

Sinai gui Israel kuery oje'oipaague

¹¹ Ha'e gui ma mokoī ma'et'ya py, mokoī jaxya re vinte ára ma jave arai ojeupi ovy ogyu nhemboaty oīaty áry rupi oīague gui.

¹² Ha'e ramo Israel kuery Sinai regua tekoa e'ya py ikuai gui oguata oje'oivy. Oguata-guata oje'oivy Parā regua tekoa e'ya py ju arai opyta peve.

¹³ Ha'e rami vy oguata ypy'i oje'oivy, SENHOR Moisés pe ojapo ukaa rami vy.

¹⁴ Jypy'rā ete ma Judá ramymino kuery pegua bandeira reraa ranhe oje'oi ngupivegua kuery reve. Ha'e va'e regua xondaro kuery ruvixa ma Aminadabe ra'y Naassom.

¹⁵ Ha'e gui Issacar ramymino kuery regua xondaro kuery ruvixa ma Zuar ra'y Natanael.

¹⁶ Zebulom ramymino kuery xondaro kuery regua ruvixa ma Helom ra'y Eliabe.

¹⁷ Ha'e gui ma ombovaipa okuapy ombojeroviaaty, ha'e Gérson ha'e Merari ramymino kuery oje'oi vy ogueraapa henoiny.

¹⁸ Ha'e va'e rire ma Rúben kuery pegua bandeira reraa ju oje'oi ngupivegua kuery reve. Ha'e kuery va'e regua xondaro kuery ruvixa ma Sedoru ra'y Elizur.

¹⁹ Ha'e gui Simeão ramymino kuery regua xondaro kuery ruvixa ma Zurisadai ra'y Selumiel.

²⁰ Gade ramymino kuery regua xondaro kuery ruvixa ma Deuel ra'y Eliasafe.

²¹ Ha'e gui ma oje'oipa ju Coate regua kuery mba'emo iky'a e'y va'e ogueraa reve. Ha'e gui ha'e kuery ovaë e'y mbove ma voi omopu'ãmbaa ju 'rã imoiny ombojeroviaaty.

²² Ha'e va'e rire ma Efraim ramymino kuery pegua bandeira reraa ju oje'oi ngupivegua kuery reve. Ha'e kuery regua xondaro kuery ruvixa ma Amiúde ra'y Elisama.

²³ Ha'e gui Manassés ramymino kuery regua xondaro kuery ruvixa ma Pedazur ra'y Gamaliel.

²⁴ Benjamim ramymino kuery regua xondaro kuery ruvixa ma Gideoni ra'y Abidã.

²⁵ Ha'e gui ma Dã ramymino kuery pegua bandeira reraa ju oje'oi ngupivegua kuery reve. Ha'e va'e kuery ma heta va'e kuery ha'e javi rakykue oje'oi oarõa rupi. Ha'e kuery va'e regua xondaro kuery ruvixa ma Amisadai ra'y Aiezer.

²⁶ Ha'e gui Aser ramymino kuery regua xondaro kuery ruvixa ma Ocrã ra'y Pagiel.

²⁷ Naftali ramymino kuery regua xondaro kuery ruvixa ma Enã ra'y Aira.

²⁸ Ha'e rami ae oguata oje'oivy Israel kuery meme, oxondaro kuery reve.

Hobabe pe ha'e kuery reve oo aguã re Moisés ojerureague

²⁹ Ha'e gui Moisés ijayvu Hobabe pe. Ha'e va'e ma hatyu Midã pygua Reuel ra'y. Ha'e vy aipoe'i:

— Roguata roje'oivy petei henda orevy SENHOR “Ame'ë 'rã pëvy” he'iaque katy. Eju orerupive, ha'e ramo rojapo porã 'rã ndevy. Mba'eta Israel kuery pe mba'emo porã ome'ë aguã re SENHOR ijayvu.

³⁰ Ha'e ombovai:

— Xee ma ndaa reguai. Xevy xeretarã kuery rekoa py ae 'rã aa — he'i.

³¹ Ha'e gui ixupe Moisés aipoe'ive ju:

— Ne'exa, orereja eme ke, mba'eta ndee ma reikuaa tekoa e'ya rupi orekuai ranhe 'rãa. Ha'e gui ndee ma orererekoarã 'rã reiko.

³² Xapy'a rei ore kuery reve reo ri ramo ndevy pe rojapo porã 'rã SENHOR ore kuery pe ojapoa rami ae — he'i.*

³³ Ha'e gui ma oje'oipa ma SENHOR pegua vyty katy'i ikuaiague gui. Mboapy araa re oguata oje'oivy. Ha'e kuery renonde rupi SENHOR guexeve guarã ojapo va'ekue ryrureraa kuery oguata oje'oivy mboapy ára re, ha'e kuery opyty'u aguã ojou aguã.

³⁴ Ha'e gui ára py arai SENHOR ombou va'ekue oo tema ha'e kuery áry rupi, ikuaiague gui oje'oi jave voi.

³⁵ Ha'e gui Nhanderuete avyu ryruroupa heravy nhavõ Moisés aipoe'i 'rã:

— SENHOR, epu'ã ke nderovaigua kuery remoaimba aguã. Tove nerenonde gui tonhamba ndere nda'ija'ei va'e.

³⁶ Ha'e gui opyta ju nhavõ aipoe'i 'rã:

— SENHOR, ejevju ke mbovy rei e'y Israel kuery ikuaiague py.

11

Israel kuery ijayvu ete okuapyague

¹ Ha'e gui ma SENHOR oendua py tei ha'e kuery ijayvu ete okuapy mba'emo oiko va'e re. SENHOR oendu ramo ipoxya hendy. Ha'e rami vy ha'e kuery mbyte tata SENHOR guigua ou vy omomba hekoo apy rupi ikuai va'e.

² Ha'e ramo Moisés pe ha'e kuery ojerure okuapy ramo SENHOR pe ha'e ju onhembo'e. Ha'e ramo tata oguepa.

³ Ha'e nunga rupi ha'e va'e tekoa ma oenoí Taberã, ha'e kuery mbyte tata SENHOR guigua hendy ma rire.*

⁴ Ha'e gui ha'e kuery mbyte opa marã ikuai va'e oendu okuapy Egito pygua kuery rembi'u regua ho'uxe reia. Ha'e ramo Israel kuery voi ojae'opa reve aipoe'i okuapy:

— Mava'e 'rã tu ome'ë xo'o ja'u va'erã?

⁵ Aỹ ma nhanema'endu'a jakuapy Egito yvy re pira ja'u rive jakuapyague re, ha'e pepino, melão, alho ka'aguy regua, cebola ha'e alho re guive.

⁶ Ha'e rami tei aỹ ma nhanenhe'e voi ipirupa ma 'rã, mba'eta amboae ramigua ma voi ndajajouvei, kova'e manã e'y vy — he'i okuapy.

⁷ Manã ma coentro ra'yigüe ramigua, jaexa rã yvyra axy ramigua rei.

⁸ Heta va'e kuery opa rupi oeka oje'oivy vy omono'õ vy omongu'i 'rã mba'emo mongu'ia py, ha'e'y vy angu'a py ojoxo 'rã. Ha'e rami vy omomimoí 'rã oja py, e'y vy iku'ikue gui ojapo 'rã mbojape. Ja'u rã mbojape azeite reve ojapo pyre rami hee va'e.

⁹ Pyávy ha'e kuery rekoa rupi yxapy ho'a reve manã ho'a avi 'rã oiny ha'e rupi.

Moisés ojapo 'rã va'ekue ipoyi etea rupi ijayvuague

¹⁰ Heta va'e kuery ojae'o rã Moisés oendu, mba'eta petei-tei gua'y kuery reve ngoo rokẽ py ojae'o okuapy. Ha'e ramo SENHOR poxya hendy. Moisés voi oexa vy ndojou porã.

¹¹ Ha'e ramo Moisés aipoe'i SENHOR pe:

— Mba'e re tu mba'emo vai rejapo xee nerembiguai re? Mba'e re tu ndaxejou porãvei nerenonde py? Mba'eta xemoi kova'e kuery ha'e javi re apena aguã rami.

* 10:32 Moisés ngupive ogueraaxe ngovaja Hobabe. Ha'e va'e ma ndooxei ranhe tei oo nho (Juizes 1.16).
 'ea reve nhaendu rã joo ramigua.

* 11:3 Tery Taberã ma “Okaiã”

¹² Xee ae ri ty'y kova'e kuery moingoare aiko? Xee ae ri ty'y areko'i va'ekue xe'vy aipo're aguã: "Eraapa nde'jyva áry okambu'i va'e rami, yvy aura reve neramo'i kuery pe ame'ê aguã re xe'vyvague peve", 're aguã?

¹³ Magui 'rã tu xee ajou xo'o ha'e kuery ha'e javi peguarã? Mba'eta xerenonde py ojae'o reve aipoe'i okuapy: "Eme'ê na xo'o ro'u va'erã."

¹⁴ Ha'e gui xee ae'i ma voi ndaropo'akai 'rã kova'e kuery ha'e javi, xe'vy ipoyi vaipa ramo.

¹⁵ Namí ae ta ri xerereko vy ma xejuka vyvo'i, ajerure. Xemoaxy ri vy xemoingo eme ajexavai aguã rive.

Moisés pytyvõarã setenta avakue Nhanderuete oiporavo ukaague

¹⁶ SENHOR aipoe'i Moisés pe:

— Emboaty ha'vy setenta avakue Israel kuery mongetaaty va'e regua rexa va'ety, nhomongetaa rupi ha'e heta va'e kuery re openaa rupi ae ikuai va'ety. Ha'e va'e kuery remonhembojapa 'rã oguy nhemboaty oïaty rexei, ha'e py ikuai aguã nerenonde.

¹⁷ Ha'e py ma xee aguejy vy xe'vyvu 'rã ndereve. Ha'e Xenhe'ê ndere oï va'e ambove vy ha'e kuery re voi amoï 'rã. Ha'e vy ndereve ha'e kuery ikuai avi 'rã heta va'e kuery re openaa rupi, ndee anho'i e'ÿ repena aguã.

¹⁸ Ha'e vy aipo're 'rã heta va'e kuery pe: "Pejeki'a'o uka ju ko'ê rã guarã, pe'u aguã xo'o. Mba'eta peê kuery pejae'o reve 'Mava'e tu ome'ê ta xo'o ja'u va'erã? Egito yvy re ma jaiko porã va'ekue', peje ramo SENHOR oendu. Ha'e rami vy pende'vy SENHOR ome'ê 'rã xo'o, ha'e pe'upa 'rã.

¹⁹ Peteï ára'i re rive'ÿ 'rã pe'u, neï mokoï ára'i 'rã e'ÿ, neï peteï nhiruï neï dez, neï vinte ára re'i e'ÿ guive.

²⁰ Ha'e rami 'rãgue py peteï jaxy pukukue re 'rã pe'u, peneapyígua gui oëmba rã pejeguarupa peve. Mba'eta SENHOR penembyte oiko va'e ndapeipotavei, ha'e henonde py pejae'o reve 'Mba'e re tu Egito gui jajupa raka'e?' peje va'ekue", 're 'rã ha'e kuery pe — he'i.

²¹ Ha'e ramo Moisés ombovai:

— Xee ma seiscientos mil avakue opu'ã okuapy va'e mbyte py aiko. Ha'e ramo mba'exa tu aipo're xe'vy: "Eme'ê ha'e kuery pe xo'o, peteï jaxy pukukue re ho'u okuapy aguã" 're?

²² Mymba kuery vexa'i ha'e vaka ty'y ojukapaa 'rã ha'e kuery ha'e javi ho'u va'erã? Tyrã pa ye'ê rupi pira ikuai va'e ha'e javi 'rã omono'õmbaa ha'e kuery ho'u va'erã? — he'i.

²³ Ha'e ramo Moisés pe SENHOR ombovai:

— Xee SENHOR jyva nda'u ijapu'a'i ri? Aÿ'i ma voi rexa 'rã xe'vyvague oiko rã tyrã pa anya! — he'i.

²⁴ Ha'e gui Moisés oë vy heta va'e kuery pe SENHOR omombe'upa SENHOR ijavyvague. Ha'e vy ha'e kuery mongetaaty setenta avakue ikuai va'e omboaty imbokuapy oo yvÿry rupi.

²⁵ Ha'e ramo SENHOR oguejy arai rupi. Ha'e vy ijavyvu ixupe. Ha'e vy Nhe'ê hexe oï va'e ombove vy omoi avi setenta nhomongetaaty ikuai va'e re. Ha'e va'e kuery re Nhe'ê oï avi ramo omombe'u okuapy ixuguigua, teï ha'e va'e rire ma nda'ijavyvuvei ha'e rami.

²⁶ Ha'e gui ma mokoï avakue opyta tekoa py. Peteï ma Eldade hery va'e, ha'e rã amboae ma Medade. Ha'e kuery re voi Nhe'ê oï, mba'eta ha'e kuery voi nhomongetaaty kuery regua teï oo katy ndooi va'ekue. Ha'e rami vy ha'e kuery voi ayvu omombe'u okuapy tekoa mbyte ikuai va'e py.

²⁷ Ha'e ramo peteï kunumi onha ovy vy omombe'upa Moisés pe. Ha'e vy aipoe'i:

— Eldade ha'e Medade voi ri tu ayvu omombe'u okuapy — he'i.

²⁸ Ha'e ramo Num ra'y Josué, Moisés pytyvõarã oiporavo va'ekue va'e ombovai vy aipoe'i:

— Xeruvixa Moisés, emokyrirĩ na.

²⁹ Ha'e rã Moisés aipoe'i ixupe:

— Ndee ta'vy nerakäte'ÿ teve xere? SENHOR pegua kuery profeta meme ikuai 'rãgue, ha'e kuery ha'e javi re SENHOR Onhe'ê omoi aguã! — he'i.

³⁰ Ha'e va'e rire Moisés ma tekoa katy ju oje'oi Israel kuery mongetaaty kuery reve.

Guyra codornizes Nhanderuete ombouague

³¹ Ha'e gui SENHOR-a gui peteï vytytu oipeju ovy vy ye'ê áry gui ogueru guyra codornizes. Ha'e vy tekoa áry ha'e javi rupi omoaimba heravy peteï ára jaguataa rami rai'i peve. Ijvyvÿry rupi opyta peteï metro peve yvy py.

³² Ha'e ramo ha'e va'e árave heta va'e kuery oje'oipa, pyávy ha'e ko'ëgue voi, ha'e vy ojopy oje'oivy guyra ikuai va'e. Amongue mboapy'ive ojopy va'ekue ri cem voxa renyê ogueru. Ha'e vy tekoa ha'e javi rupi omboaty imoiny ojeupe guarã ae.

³³ Ha'e rami teï ijuru py xo'o oime rei reve, oixu'u jepe e'ÿ re voi ha'e kuery rovai SENHOR poxya hendy vy ojukapa mba'emo vai py.

³⁴ Ha'e nunga rupi ha'e va'e tekoa ma oenoïa Quibrote-Hataavá, ha'e py Egito regua tembi'u re nda'eveive va'ekue ojatypaa rire.†

³⁵ Ha'e gui Quibrote-Hataavá gui ma ha'e kuery oje'oive Hazerote katy, ha'e vy opyta ju ha'e py.

12

Moisés rovai rupi Miriã ha'e Arão ijavyvague

¹ Ha'e gui Moisés ogueraa peteï kunha Cuxe pygua gua'yxyrã. Ha'e ramo Miriã ha'e Arão ijavyvu okuapy Moisés rovai, Cuxe pygua gua'yxyrã ogueraa va'ekue káuxa.

† 11:34 Tery Quibrote-Hataavá ma "Tembi'u re nda'eveive va'ekue ojatyaague" 'ea.

² Ha'e vy aipoe'i okuapy:

— Xapy'a rei nda'u Moisés rupi anho ri SENHOR ijayvu? Nhande rupi voi nda'u nda'ijayvui avi 'rã? — he'i ramo SENHOR oendu.

³ Moisés ma ava onhemo'vyvĩ'i va'e, ko vvy re avakue ikuai va'e gui voi vvyĩ'ive va'e oiko.

⁴ Are'ỹ'i re SENHOR aipoe'i Moisés pe, Arão ha'e Miriã pe voi:

— Peẽ kuery mboapy ma peẽ 'rã oguy nhemboaty oiaty oi va'e gui — he'i. Ha'e ramo oẽmba mboapyve.

⁵ Arai rupi SENHOR oguejy ovy vy oo rokẽ py opyta ho'amy. Ha'e vy oenoĩ Arão ha'e Miriã. Ha'e ramo ha'e kuery ojexa uka.

⁶ Ha'e ramo aipoe'i ha'e kuery pe:

— Pendu ke aỹ xee xeayvu ramo. Penembyte profeta oiko ramo ma ixupe xee SENHOR ajekuaa uka 'rã mba'emo aexa ukaa py, ha'e'ỹ vy oexa ra'ua py 'rã xeayvu hexeve.

⁷ Ha'e rã xerembigui Moisés reve ma nami e'ỹ ju aiko, mba'eta ha'e ma ojeroviapy ete oiko xero pygua kuery ha'e javi re openaa rupi.*

⁸ Hexeve ma xeayvu 'rã xejuru rupi ae, oikuaa porã aguã rami, ayvu haxy rei va'e rupi e'ỹ. Ixupe xee SENHOR ajekuaa rã xerexa guive. Mba'exa ha'vy tu ndapekyjei ri xerembigui Moisés rovai rupi pendeayvu aguã? — he'i.

⁹ Ha'e rami vy ha'e kuery rovai SENHOR poxya hendy. Ha'e rire ojepe'a.

¹⁰ Arai voi ojepe'a ovy oo áry gui. Ha'e ramove Miriã oikuaa rã hexe oi ma lepra, yro'y apĩ rami xiĩ rei va'e. Miriã re Arão oma'ẽ ramo lepra revegua ma hi'ái.

¹¹ Arão aipoe'i Moisés pe:

— Ake'e xeruvixa! Ndevy ajerure: Orere emoĩ eme orereko vaia, mba'eta ore'arandua rupi e'ỹ rojapo ha'e nunga, rojejavy ete ange.

¹² Nhanereĩndy topyta eme kyri'i va'e oity pyre rami, mbyte rupi ho'okue ho'apa va'e rami — he'i.

¹³ Ha'e ramo SENHOR pe Moisés ojakukai vy aipoe'i:

— Xerueté, ajerure remonguera ju aguã.

¹⁴ SENHOR ombovai Moisés pe:

— Xapy'a rei hova re tuu onyvõ va'e rire nda'u sete araa peve ndopytai 'rãgue oxĩmbaa py? Ha'e voi topyta ranhe sete ára tekoa gui mombyry'i. Ha'e va'e rire ma ha'eve peru ju aguã — he'i.

¹⁵ Ha'e rami rã Miriã sete ára peve omondouka ranhe tekoa gui mombyry'i. Oguerua e'ỹa ja heta va'e kuery ndoguatai tekoa gui.

¹⁶ Ha'e va'e rire mae ha'e kuery oje'oi ju Hazerote gui, ha'e Parã regua tekoa e'ỹa py ju ikuai.

13

Deuteronomio 1.19-25

¹ SENHOR aipoe'i Moisés pe:

² — Emondouka ke avakue Canaã vvy re oexa pota va'erã, mba'eta ame'ẽ 'rã Israel kuery vvyvã. Peneramoĩ kuery peteĩ-teĩ regua gui remondouka 'rã peteĩ ava, huvixa oiko va'e ae — he'i.

³ Ha'e ramo Moisés omondouka Parã regua tekoa e'ỹa py ikuai guie ae, SENHOR aipoe'iague rami vy. Ha'e va'e avakue ma Israel kuery ruvixa ikuai va'e meme.

⁴ Po rami ma ha'e va'e kuery rery: Rúben kuery regua ma Zacur ra'y Samua;

⁵ Simeão kuery regua ma Hori ra'y Safate;

⁶ Judá kuery regua ma Jefoné ra'y Calebe;

⁷ Issacar kuery regua ma José ra'y Jigeal;

⁸ Efraim kuery regua ma Num ra'y Oséias;

⁹ Benjamim kuery regua ma Rafu ra'y Palti;

¹⁰ Zebulom kuery regua ma Sodi ra'y Gadiel;

¹¹ José kuery regua, ha'e Manassés kuery regua ae ma Susi ra'y Gadi;

¹² Dã kuery regua ma Gemali ra'y Amiel;

¹³ Aser kuery regua ma Micael ra'y Setur;

¹⁴ Naftali kuery regua ma Vofsi ra'y Nabi;

¹⁵ Gade kuery regua ma Maqui ra'y Geuel.

¹⁶ Ha'e va'e avakue ma Moisés omoĩ vvy re oexa pota va'erã omondouka aguã. Ha'e gui Num ra'y Oséias rery Moisés oguerova vvy Josué ju omboery.

¹⁷ Ha'e gui Canaã vvy katy Moisés omondouka oexa pota aguã. Ha'e vy aipoe'i ha'e kuery pe:

— Peẽ Neguebe katy, ha'e vvyty ikuai va'e rupi ju 'rã peo.

¹⁸ Pexa 'rã vvy peikuaa aguã mba'exa pa ra'e, ha'e hexegua kuery re guive peikuaa pota, imbaraetekue tyrã pa ikangykue, ndaetai tyrã pa heta.

¹⁹ Ha'e peikuaa pota 'rã mba'exa pa vvy ha'e kuery ikuai re, iporã tyrã pa na'iporã, ha'e mba'exa pa tetã ikuai voi ra'e, tekoa rive tyrã pa tetã ikorapa va'e.

²⁰ Pexa avi mba'exa pa ra'e vvy itui, iporã tyrã pa na'iporã, ha'e gui ka'aguy tyrã pa any. Penekyre'ỹ tema, ha'e peru mba'emo aju ha'e va'e vvy guigua — he'i. Ha'e va'e jave ma uva ijaju ypya ára ae.

²¹ Ha'e rami rã ha'e kuery oje'oi vy ha'e va'e vvy rupi oexa pota oje'oivy, Zim regua tekoa e'ỹa guive Reobe peve Hamate py ovaẽa'i py.

*

²² Neguebe rupi oje'oi vy ou okuapy Hebrom peve. Ha'e py ma ikuai Enaque ra'y kuery Aimã, Sesai ha'e Talmã. (Hebrom tetã ojapoa ma sete ma'e'ty teri Egito vvy re Zoã tetã ojapoa e'ÿ mbove ma voi.)

²³ Ha'e rire ma Escol vvyugua peve ju ou. Ha'e py ma ojaya okuapy peteĩ xã uva hi'y reve. Ha'e va'ekue ma mokoĩ avakue ogueru peteĩ vvyra po'i re ombo'y vy. Romã'a ha'e figo'a avi ogueru.

²⁴ Ha'e va'e vvyugua pe ma "Escol" oenoĩ, ha'e py Israel kuery uva'a ojaya rire.*

Deuteronomio 1.26-33

²⁵ Ha'e gui vvy oexa vy oje'oiague gui quarenta ára opaa py ojevypa ju.

²⁶ Oguata jogueruvy vy ovaẽmba ju Moisés ha'e Arão-a py, ha'e Israel kuery ha'e javi onhemboaty okuapy py Parã regua tekoa e'ÿa re, Cades py ae. Ha'e kuery pe omombe'upa okuapy oexa va'ekue, heta va'e kuery ha'e javi pe voi. Oexa uka avi mba'emo aju ha'e va'e vvy gui ogueru va'ekue.

²⁷ Ha'e vy Moisés pe omombe'u vy aipoe'i okuapy:

— Roje'oi vvy oremondoukaague va'e peve. Ha'e gui anhetẽ ete ha'e py kamby ha'e ei ndoatai. Kova'e ma mba'emo'a ha'e pyguare.

²⁸ Ha'e rami avi avakue ha'e va'e vvy re ikuai va'e ma imbaraetekue ae. Hetã voi tuvixa ete va'e ikuai, ikorapa va'e meme guive. Ha'e py roexa avi Enaque ramymino kuery.†

²⁹ Amalequita kuery ma Neguebe re ikuai. Ha'e rã vvyty rupi ma heteu, jebuseu ha'e amorreu kuery ikuai. Ye'ẽ katy'i rupi ma cananeu kuery ikuai, Jordão yakã vvyty rupi guive — he'i okuapy.

³⁰ Ha'e gui Calebe ju nhomokyrirĩmba heta va'e kuery Moisés renonde py ikuai va'e. Ha'e rami vy aipoe'i: — Ma'ẽ, jaje'oi jajopy aguã ha'e va'e vvy, mba'eta nhandepo'aka 'rã ha'e kuery re — he'i.

³¹ Ha'e rami teĩ avakue mboae hexeve oje'oi va'ekue aipoe'i okuapy:

— Nda'evei teve ha'e va'e kuery rovai jaje'oi aguã, nhande kuery gui ipo'akapave va'e ramo — he'i okuapy.

³² Ha'e rami vy Israel kuery oendupaa py ha'e kuery ijayvu rei okuapy vvy oexa va'ekue re. Ha'e vy aipoe'i:

— Vvy mbyte rupi roexa pta aguã roxaague va'e ma hekoa va'e kuery mombaarã itui. Ha'e py roexa va'ekue ma ava ja'eakue meme,

³³ gigante kuery avi roexa karamboae. Ha'e vy rojoexa ramo tuku'i rami rive orekuai, ha'e kuery pe voi ha'e rami ae avi orerexa rã — he'i okuapy. Enaque ramymino kuery ma gigante guigua meme ikuai raka'e.

14

Heta va'e kuery ovvyrã katy ndooxeiaque

¹ Ha'e gui heta va'e kuery opu'ãmba vy ojapukai atã rei okuapy. Ha'e va'e pyávy ha'e kuery ojae'opa okuapy.

² Ha'e vy Israel kuery ha'e javi ijayvu rei okuapy Moisés ha'e Arão re. Ha'e vy aipoe'i:

— Ha'eveve 'rãgue Egito vvy re, e'ÿ vy kova'e tekoa e'ÿa py ma voi nhamanomba va'e rire!

³ Mba'erã tu SENHOR nhandererupa kova'e vvy re? Kyxe py nhamanomba aguã pa, ha'e nhandera'yxy kuery ha'e nhandera'y kuel'iry escravo-rã ogueraapaa aguã teve? Nda'evei nda'u Egito vvy katy ae ju jajevypa aguã? — he'i.

⁴ Joupe-upe aipoe'i okuapy:

— Jajou peteĩ nhanderuvixarã, Egito vvy katy jajevypa aguã — he'i okuapy.

⁵ Ha'e rami rã Israel kuery oexaa py Moisés ha'e Arão guenapy'ã re oĩ ngova vvy re omovaẽ reve.

⁶ Ha'e rami ae avi vvy rexaare kuery va'e regua Num ra'y Josué ha'e Jefoné ra'y Calebe omondoro okuapy oao.

⁷ Ha'e vy Israel kuery ha'e javive pe ijayvu vy aipoe'i:

— Vvy mbyte rupi roxaague va'e rima iporã ete.

⁸ SENHOR nhandejou porã ri vy ojapo 'rã ha'e va'e vvy re nhavaẽ aguã rami, nhandevy ju omboaxa aguã. Ha'e va'e vvy ma kamby ha'e ei oata e'ÿa.

⁹ Ha'e nunga rupi pepu'ã rei eme SENHOR re, pekyje eme guive ha'e pygua avakue gui, mba'eta mbjape ja'ua rami nhamomba avi 'rã ha'e kuery. Ha'e kuery reve noĩve ma hepyarã va'ekue. Ha'e rã nhande kuery re ma SENHOR ae 'rã oiko. Pekiye eme ha'e kuery gui — he'i.

¹⁰ Ha'e rami teĩ heta va'e kuery ha'e javi jogueroayvu okuapy ita py ojapipa aguã re. Ha'e rami teĩ ha'e kuery pe SENHOR rexakã ojekuaa xapy'a oguy nhemboaty oiaty rupi.

¹¹ Ha'e rami vy SENHOR aipoe'i Moisés pe:

— Raka'e peve nda'u kova'e kuery xereko a'ã 'rã okuapy? Raka'e peve nda'u ndojeroviai 'rã xere, ha'e kuery mbyte rupi opa marãgua hexa pyrã amoingo va'eri?

¹² Ha'e nunga rupi ambou 'rã mba'eaxy vaikue ijukapaarã, name'ëvei ma 'rã ijvyvyrã va'ekue. Ha'e gui ndegui ju amoingo 'rã peteĩ regua kova'e kuery gui hetave ha'e imbaraetekueve va'e — he'i.

Heta va'e kuery re Moisés ojerureague

¹³ Ha'e ramo Moisés ombovai SENHOR pe:

— Egito pygua kuery mbyte gui ndepo'akapaa rupi kova'e kuery reipe'apa rire teĩ remomba ramo Egito pygua kuery oendupa 'rã.

¹⁴ Ha'e rami vy ha'e kuery omombe'u uka 'rã kova'e vvy re ikuai va'e pe. Ha'e gui SENHOR, kova'e vvy pygua kuery oendu ae ma ndevyguia kuery mbyte rupi reikoa, ha'e ha'e kuery rexa py ae rejexa ukaa. Ha'e kuery

* 13:24 Tery Escol ma "Uva'a" ea. † 13:28 Enaque ra'y kuery ma gigante ikuai raka'e (versículo 33).

áry rupi ndeiguigua arai oĩ, ha'e ha'e kuery renonde rupi arai opu'ã va'e py 'rã reo ara py, ha'e rã pyávy ma tata opu'ã va'e py 'rã reo.

¹⁵ Ha'e gui xapy'a rei ndevyguia kuery rejukapa vyvoi ramo amboae regua kuery nemombe'ua rã oendu va'ekue aipoe'i 'rã okuapy:

¹⁶ “Yvy re SENHOR ndogueraa kuaai ri nda'u ojeupegua kuery, oura reve ha'e kuery pe ome'ẽ aguã re ijavyu va'ekue ri, ha'e nunga rupi ae ojukapa tekoa e'ỹa py”, he'i 'rã okuapy.

¹⁷ Ha'e nunga rupi aỹ SENHOR, ajerure ndepo'akapa va'ea rexa uka aguã, ndeayvuague rami vy. Mba'eta aipo're va'ekue:

¹⁸ “Xee SENHOR ma xeporayvu va'e ha'e opa mba'e py anhomboaxy va'e, ambogue 'rã teko vai ha'e jejavya. Ha'e rami avi ojevavy va'ekue nambopaga e'yi 'rã. Ha'e rami 'rãgue py tuu kuery reko vaiague re ambou 'rã ta'y kuery voi ojexavai aguã, mboapya ha'e irundya ikuai peve”, 're va'ekue.

¹⁹ Ha'e nunga rupi opa mba'e py renhomboaxy va'e vy embogue ke kova'e kuery reko vaia, heko vaia Egito vvy gui oje'oi pa guive apy ovaẽmba peve rembogue jepiaty rami.

Deuteronomio 1.34-40

²⁰ Ha'e ramo SENHOR aipoe'i:

— Ndeayvua rami xee ambogue ma ha'e kuery reko vaia.

²¹ Ha'e rami avi anhetẽ ete xee SENHOR xee ae rekove rupi, ha'e xerexakãa vvy jave rupi ojekuaa va'erã va'e rupi aura vy aipoa'e:

²² avakue xerexakãa ha'e hexa pyrã Egito vvy re ha'e tekoa e'ỹa rupi ajapo rã oexa va'ekue, ha'e gui dez-kue ma xereko a'ãa rupi naxenhe'ẽ rendui va'ekue,

²³ ha'e va'e regua nei peteive ma ndoexai 'rã vvy peneramoi kuery pe ame'ẽ aguã re aura reve xeayvuague va'e. Tá, ndaxepotavei va'e kuery nei pete'i ma voi ndoexai 'rã.

²⁴ Ha'e rã xerembiguai Calebe re ma amboae regua nhe'ẽ oĩ. Ha'e va'e ma xereve ete oiko riae ramo xee ajapo 'rã vvy oexa potaague re ae hekoa aguã rami. Hamymino kuery avi 'rã ikuai ha'e py.

²⁵ Ne'exa, amalequita ha'e cananeu kuery ma vvy'ã guy katy ikuai. Pejepekuavo ha'vy amboae katy. Ko'ẽ rã tapeo tekoa e'ỹa katy ju, ye'ẽ pytã vvyry tape oo va'e rupi ae — he'i.

²⁶ Ha'e rire Moisés ha'e Arão pe ju SENHOR aipoe'i:

²⁷ — Raka'e peve 'rã tu aropo'aka kova'e kuery xerovai rupi ijavyu okuapy va'e? Xee aendupa ainy Israel kuery xere ijavyu rei okuapy ramo.

²⁸ Aipo're ha'e kuery pe: SENHOR aipoe'i: Xee ae rekove rupi aura vy aipoa'e: Xeapyxa py pendeayvuague ae ju 'rã ambou pendere.

²⁹ Mba'eta kova'e tekoa e'ỹa py ae 'rã pemanomba, peẽ kuery va'e regua penderery omoia jave vinte ma'etỹ va'e ha'e pendetujakueve va'e guive, joupe-upe xerovai pendeayvu va'ekue ha'e javi.

³⁰ Ndapeupityi 'rã vvy pendekoarã ame'ẽ aguã re aura reve xeayvuague va'e py, Jefoné ra'y Calebe ha'e Num ra'y Josué va'e e'ỹ vvy.

³¹ Ha'e rã pendera'y kuery pe “Escravo-rã ogueraapaa 'rã” peje va'ekue ri ha'e kuery ma ajapo 'rã ha'e py ovaẽmba aguã rami. Ha'e kuery ma oexa 'rã vvy peẽ ndapeipotai va'ekue.

³² Ha'e rã peẽ kuery ma kova'e tekoa e'ỹa py 'rã pemanomba.

³³ Kova'e tekoa e'ỹa rupi ma quarenta ma'etỹ re pendera'y kuery ikuai 'rã guymba kuery re openaa rupi. Pejejavya kãuxa ae 'rã ha'e kuery ojexavai, kova'e tekoa e'ỹa py xapirẽ penderetekue ho'upa peve.

³⁴ Mba'eta quarenta ára re vvy re pexa pota peje'oi vvy rire quarenta ma'etỹ re ju 'rã pejexavai pejevavyague re, pete'i-teĩ ára rekovia pete'i ma'etỹ 'rã oaxa. Ha'e rami vy pendupa 'rã xee rojou vaia regua.

³⁵ Xee SENHOR ha'e rami xeayvu rire ha'e rami ae ju 'rã ajapo kova'e kuery heko vai va'e xere opu'ã va'ekue re. Kova'e tekoa e'ỹa py ae 'rã okanhy ovy, opa peve — he'i.

³⁶ Ha'e gui avakue vvy rexaarã Moisés omondouka va'ekue ojevvy vvy ha'e va'e vvy re ijavyu rei vy ojapo heta va'e kuery ha'e javi vvy re ijavyu rei avi okuapy aguã rami.

³⁷ Ha'e va'e avakue vvy re ijavyu rei va'ekue ma SENHOR renonde py omanomba raka'e mba'eaxy vaikue gui.

³⁸ Ha'e rã Num ra'y Josué ha'e Jefoné ra'y Calebe ma avakue vvy rexaarã oje'oi va'ekue va'e regua avi teĩ okuave.

Deuteronomio 1.41-46

³⁹ Ha'e nunga Moisés omombe'u Israel kuery ha'e javive pe. Ha'e ramo ha'e kuery iporiau vaipa ete okuapy.

⁴⁰ Ko'ẽ rai ramove ovypa vy oẽmba jogueruvy vvyty apyte katy. Ha'e vvy aipoe'i okuapy:

— Apy ma orekuai, anhetẽ ae rojevavya rire teĩ roo nho 'rã vvy nhandevy SENHOR ome'ẽ 'rã va'ekue re — he'i okuapy.

⁴¹ Moisés ombovai:

— Mba'e re ha'vy SENHOR ojapo ukaa rami e'ỹ pendekuai? Pendeayvua rami pendekuai aguã ma nda'eva porã.

⁴² Tapeo eme ta'vy penderovaigua kuery renonde py pemanomba e'ỹ aguã, mba'eta SENHOR noĩvei ma 'rã peẽ kuery mbyte.

⁴³ Ma'ẽ, penerenonde rupi amalequita ha'e cananeu kuery ikuai. Pe'apa 'rã pekuapy ikyxé gui. Mba'eta SENHOR gui pejepe'a ma rire noĩvei 'rã peẽ kuery reve — he'i.

⁴⁴ Ha'e ramive ma ha'e kuery onhea'a tema okuapy vvyty rupi oje'oi aguã. Ha'e rami teĩ SENHOR guexeve guarã ojapo va'ekue ryru ndogueraai ha'e kuery rekoa mbyte oĩa gui, neĩ Moisés voi ndooi.

⁴⁵ Ha'e ramo amalequita ha'e cananeu kuery vvyty rupi ikuai va'e oguejy vy ojukapa, Horma peve oitypa.

15

Lei mba'emo ome'ẽmby regua oĩa

¹ SENHOR aipoe'i Moisés pe:

² — Ndeayvu ke Israel kuery pe, ha'e vy aipo're: Yvy pendekoarã xee ame'ẽ va'erã re pevaẽ jave ma

³ mba'emo peapy vy peme'ẽ 'rã SENHOR pe, mymba mba'e pejuka vy penhemoavyvague pejapopa regua, e'ỹ vy mba'emo penhenhandua'i rami peme'ẽ va'e, e'ỹ vy ngaru hi'ára py pejapoa py SENHOR pe peapy 'rã heakuã porã va'e, vaka, vexa'i pejuka vy peme'ẽ va'e reve.

⁴ Ha'e gui SENHOR pe mba'emo ome'ẽ va'erã ogueru va'e ma ogueru avi 'rã peteĩ ryru trigo iporãve va'e, peteĩ ryru raxa'i azeite reve omoirũ va'ekue.

⁵ Ha'e peteĩ-teĩ vexa'i peme'ẽ va'e reve guarã peru avi 'rã peteĩ ryru vinho penhoẽ reve peme'ẽ va'erã, mba'emo peapy vy peme'ẽ va'e ha'e mymba pejuka uka va'e áry.

⁶ Peteĩ-teĩ vexa'i peme'ẽ va'e reve guarã peru avi 'rã mba'emo aju guigua peme'ẽ va'erã. Mokoĩ ryru trigo iporãve va'e peru, peteĩ ryru raxa'i azeite reve omoirũ mbyre.

⁷ Vinho peteĩ ryru raxa'i 'rã peme'ẽ SENHOR pe penhoẽ reve, peapy vy peme'ẽ ramo heakuã porã aguã.

⁸ Ha'e gui toro ra'y peapy e'ỹ vy pejuka aguã pereko katu 'rã penhemoavyvague pejapopaa reguarã, ha'e'ỹ vy perovy'a aguã regua SENHOR pe aje'ũ va'erã.

⁹ Toro ra'y reve peru avi 'rã mba'emo aju guigua peme'ẽ va'erã. Mboapy ryru trigo iporãve va'e 'rã peru, mokoĩ ryru rai'i azeite reve omoirũ mbyre.

¹⁰ Vinho penhoẽ reve peme'ẽ 'rã mokoĩ ryru rai'i, SENHOR pe mba'emo peapy vy peme'ẽ ramo heakuã porã aguã.

¹¹ Ha'e rami ae pejapo 'rã toro ra'y peme'ẽ va'e reve guarã, vexa'ava, vexa'i ra'y ha'e kavara ava reve guarã guive.

¹² Peteĩ-teĩ peme'ẽ va'e reve guarã 'rã peru, mbovy pa peme'ẽa rami vy.

¹³ Ha'e py aegua kuery ojapo 'rã ha'e rami, mba'emo oapy vy SENHOR pe ome'ẽ ramo heakuã porã aguã.

¹⁴ Ha'e penembyte rupi ikuai avi 'rã amboae regua, peneramymino kuery ikuai-ive jave. Ha'e va'e regua ogueru avi 'rã mba'emo oapy vy SENHOR pe ome'ẽ va'erã, heakuã porã aguã. Peẽ kuery pejapoa rami ae avi 'rã ha'e kuery voi ojapo.

¹⁵ Peẽ kuery ha'e javi rekorã ma peteĩ'i aeja, pëvy ha'e amboae regua penembyte rupi ikuai va'e pe voi. Ha'e va'e ma raka'e rã peve guarã oĩ peneramymino kuery rekorã avi ikuai jave guarã. Peẽ kuery pendekuaia rami ae avi 'rã amboae regua kuery ikuai xee SENHOR renonde.

¹⁶ Peteĩ'i lei oĩ 'rã pendekorã, peẽ kuery pe ha'e amboae regua penembyte rupi ikuai va'e pe voi — he'i.

¹⁷ SENHOR aipoe'ive ju Moisés pe:

¹⁸ — Ndeayvu ke Israel kuery pe, ha'e vy aipo're: Yvy xee rogueraa ague py pevaẽ jave

¹⁹ vvy re mba'emo aju oiko va'ekue pe'u ta nhavõ SENHOR pe ranhe 'rã peme'ẽ mba'emo.

²⁰ Jypygua mba'emo pemongu'i va'ekue iporãve va'e gui pejapo 'rã mbojape. Ha'e va'e ma peru peme'ẽ va'erã. Mba'emo pemoa'ỹ va'ekue rami 'rã peme'ẽ.

²¹ Jypygua mba'emo pemongu'i va'ekue iporãve va'e guigua SENHOR peguarã ranhe 'rã peme'ẽ, peneramymino kuery ikuai-ive jave voi.

Levítico 4.13-21

²² — Ha'e gui amongue py pejavy 'rã Moisés rupi SENHOR ojapo uka va'ekue ndapejapoa py.

²³ Mba'eta Moisés rupi meme SENHOR ojapo uka raka'e pëvy, ojapo uka ypya ára guive aỹ peve, ha'e peneramymino kuery ikuai-ive jave guarã guive.

²⁴ Ha'e gui xapy'a rei potae vy e'ỹ pejapo 'rã ha'eve'ỹa rami, ha'e neĩ heta va'e kuery voi ndoikuaai okuapy. Ha'e rami vy ha'e kuery ha'e javi ome'ẽ 'rã peteĩ toro ra'y, oapya ramo SENHOR pe heakuã porã aguã. Mba'emo aju guigua reve 'rã ogueru, ha'e mba'emo rykue onhoẽ aguã ome'ẽ va'erã reve, pendekorã oea pyre rami vy ae. Peteĩ kavara ogueru avi 'rã jejavya regua ome'ẽ va'erã.

²⁵ Ha'e gui sacerdote ojao'i uka 'rã Israel kuery ojejavy okuapyague. Ha'e ramo ha'e kuery operdoaa 'rã, potae vy e'ỹ ojavy rire. Ha'e kuery ojejavyague re ogueru 'rã mba'emo oapy vy SENHOR pe ome'ẽ va'erã. SENHOR renonde py ogueru avi 'rã ojejavyague regua ome'ẽ va'erã.

²⁶ Ha'e ramo operdoaa 'rã Israel kuery ha'e javi, ha'e kuery mbyte rupi amboae regua ikuai va'e voi, ha'e javive otekoavy rire.

²⁷ — Amongue potae vy e'ỹ ojejavy rire ogueru 'rã peteĩ kavara kunha peteĩ ma'etỹ va'e, ojejavyague regua ome'ẽ va'erã.

²⁸ Ha'e ramo sacerdote ojao'i uka 'rã ojejavyague, SENHOR renonde potae vy e'ỹ ojejavy rire. Ha'e nungakue ojao'i uka ramo operdoaa 'rã.

²⁹ Israel kuery ae, ha'e'ỹ vy ha'e kuery mbyte amboae regua ikuai va'e teĩ peteĩ'i anho 'rã oĩ lei potae vy e'ỹ ojejavy va'ekue pe.

³⁰ Ha'e rã otekoavy potae va'e, ha'e pygua kuery ae, e'ỹ vy amboae regua teĩ SENHOR mboetea rupi e'ỹ rei oiko ramo oipe'aa 'rã heta va'e kuery mbyte gui,

³¹ SENHOR ayvu noendu potai rire, ha'e ndojapoxei ete ha'e ojapo uka va'ekue. Ha'e va'e oipe'aa 'rãe, ha'e hexe ae 'rã oĩ ojejavayague opaga aguã.

Sábado regua lei rupi e'ỹ oiko va'ekue ombopagaague

³² Tekoa e'ỹa py Israel kuery ikuai teri reve oikuaa okuapy peteĩ ava sábado py va'eri xakã omono'õ oikovy rã.

³³ Ha'e rami vy xakã mono'õare ojou va'ekue ogueru okuapy Moisés ha'e Arão-a py, heta va'e kuery ha'e javi renonde py.

³⁴ Oeja ranhe openaa imoiny aguã, mba'eta ndoikuuai rei teri mba'exa pa hexe ojapo aguã.

³⁵ Ha'e ramo SENHOR aipoe'i Moisés pe:

— Ha'e va'e ava ma omano aguã rami oiko. Pavẽ 'rã ojapi ita py, tekoa gui mombyry'ia py — he'i.

³⁶ Ha'e ramo ha'e kuery ha'e javi ma tekoa gui mombyry'ia py ogueraa vy ojapipa okuapy ita py. Ha'e ramo omano, Moisés pe SENHOR ojapo ukaague rami vy.

Deuterônimo 22.12

³⁷ SENHOR aipoe'i Moisés pe:

³⁸ — Ndeayvu ke Israel kuery pe. Ha'e vy aipo're: Pembopotypa 'rã pendea apy rupi, peneramymino kuery ikuai-ive jave guarã. Ao apy re peteĩ-teĩ poty 'rã pejokua ixã hovy va'e py.

³⁹ Ha'e nunga pexa nhavõ penema'endu'a 'rã SENHOR ojapo uka va'ekue ha'e javi re, pejapo ete aguã. Nda'vei pendepý'a re peipotaa oĩ va'e rami rive pendekuai aguã, neĩ mba'emo pexa vy peipota rei aguã guive, mba'eta ha'e nunga rupi pendetavy vy pendetavy rei ae ma.

⁴⁰ Ha'e rami 'rãgue py penema'endu'a ajapo uka va'ekue ha'e javi re, pejapo ete aguã. Ha'e vy 'rãe Penderuete renonde peiko iky'a e'ỹ va'e.

⁴¹ Xee ae ma SENHOR Penderuete, Egito yvy gui pendererupaare, Penderuete aiko aguã. Xee ae SENHOR Penderuete.

16

Coré, Datã ha'e Abirão SENHOR rovai opu'ãxe okuapyague

¹ Peteĩ levita regua oiko Coate ramymino Isar ra'y Coré hery va'e.* Ha'e va'e ma ngupive ogueraa Rúben kuery regua, Eliabe ra'y kuery Datã ha'e Abirão, ha'e gui Pelete ra'y Om.

² Ha'e ramo ha'e va'e kuery ma Moisés renonde py opu'ã okuapy duzentos e cinqüenta Israel kuery regua avakue reve, huvixarã heta va'e kuery oiporavo va'ekue, avakue omboetepy ikuai va'e meme.

³ Ha'e kuery onhemboaty okuapy Moisés ha'e Arão rovai opu'ãxe vy. Ha'e vy aipoe'i okuapy ha'e kuery pe:
— Aỹ ha'eve ma! Mba'eta heta va'e javive iky'a e'ỹ va'e ikuai, nhande kuery va'e regua peteĩ-teĩ ma iky'a e'ỹ va'e jaiko, nhande kuery mbyte SENHOR oiko ramo. Mba'e re tu ha'vy penhemboyvatevi ri SENHOR pegua orekuai va'e gui? — he'i okuapy.

⁴ Ha'e nunga Moisés oendu vy guenapy'ã re oĩ, ngova yvy re omovaẽ peve.

⁵ Ha'e rami vy ijayvu Coré ha'e hexevagua kuery ha'e javi pe. Ha'e vy aipoe'i:

— Ko'ẽ rã aje'ive ma SENHOR oikuaa uka 'rã mava'e ete pa ixupegua ra'ea, ha'e mava'e pa iky'a e'ỹ va'e ojee omonhemboja va'erã. Mba'eta ha'e oiporavo va'ekue anho 'rã omonhemboja.*

⁶ Coré ha'e nderevegua kuery ha'e javi, po rami 'rã pejapo. Peru ke hy'a'i heakuã porã va'e oapyaty,[†]

⁷ ha'e gui ko'ẽ rã pemboja 'rã tata. Hi'áry pemoĩ avi 'rã heakuã porã va'e SENHOR renonde py. Ha'e gui SENHOR oiporavo va'e ae ma 'rã iky'a e'ỹ va'e. Peẽ levita kuery pendekuai va'e, ha'eve ma aỹ pendeayvu — he'i.

⁸ Aipoe'ive ju Coré kuery pe:

— Aỹ ma Levi ramymino kuery, penduve tema.

⁹ Peẽ kuery pe rã nda'u mba'e'ỹ'i ri Israel kuery Ruete ha'e kuery mbyte gui pendeporavo hexe penhemboja aguã, ha'e SENHOR ombojeroviaaty rupi ixupe pemba'eapo aguã heta va'e kuery re vy?

¹⁰ Mba'eta Coré, ha'e ma nemonhemboja ojee, ha'e nderevegua Levi ramymino kuery voi. Mba'e re tu sacerdote ete avi peikoxe ri?

¹¹ Ha'e nunga rupi ndee ha'e nderevegua ikuai va'e ma SENHOR rovaigua meme pendekuai. Ha'e gui Arão ma mba'exagua tu oiko, hovai re pendeayvu rei pekuapy aguã? — he'i.

¹² Ha'e gui Moisés oenof uka Eliabe ra'y kuery Datã ha'e Abirão. Ha'e rami teĩ ha'e kuery ma aipoe'i uka:
— Ore kuery ma ndorooi 'rãe.

¹³ Ndee ma orepe'a va'ekue yvy kamby ha'e ei oata e'ỹa gui, kova'e tekoa e'ỹa py ju romanomba aguã, ha'e gui aỹ renhemof ukaxe oreruvixarã orere ndepo'aka aguã.

¹⁴ Mba'eta ndee ndorereraai teri yvy kamby ha'e ei oata e'ỹa py, neĩ orevy nereme'ẽi guive mba'ety ha'e vinho ty. Remombo ta ri ty'y yvy ku'ikue kova'e avakue rexa py? Ha'e nunga rupi ore kuery ma ndorooi 'rã — he'i uka.

¹⁵ Ha'e ramo Moisés ivai vaipa reve aipoe'i SENHOR pe:

— Ha'e kuery ndevy mba'emo ome'ẽ teĩ ema'ẽ rive ome'ẽ va'e re. Mba'eta xee ma ha'e kuery gui neĩ peteĩ mburika ma voi ndaraai, neĩ peteĩ henda py ma voi ndajapo vai ha'e kuery pe — he'i.

* 16:1 Amongue Biblia py hery Coré 'rãgue py Corá oĩ. Mokoive tery ojeportu. * 16:5 2 Timóteo 2.19 † 16:6 Ha'e kuery ma sacerdote e'ỹ ikuai ramo nda'vei heakuã porã va'e oapy aguã, sacerdote kuery pe anho ha'eve (Êxodo 30.34-38).

¹⁶ Moisés aipoe'ive ju Coré pe:

— Ndee ha'e nderevegua kuery ma ko'ë rã peĩmba 'rã SENHOR renonde py. Arão voi oĩ 'rã.

¹⁷ Peteĩ-teĩ peru 'rã penemba'e hy'a'i heakuã porã va'e oapyaty, pemoĩ avi 'rã heakuã porã va'e. Peteĩ-teĩ peru 'rã SENHOR renonde py, duzentos e cingüenta hy'a'i ha'e javi py 'rã peru. Ndee ha'e Arão peru 'rã penemba'e ae — he'i.

¹⁸ Ha'e ramo ha'e kuery peteĩ-teĩ ogueru okuapy heakuã porã va'e oapyaty. Tata omboja, ha'e hi'áry omoĩ heakuã porã va'e. Moisés ha'e Arão reve ikuai oguy nhemboaty oĩaty rokẽ rexei.

¹⁹ Moisés ha'e Arão rovai Coré omboatypa heta va'e kuery oguy nhemboaty oĩaty rokẽ py. Ha'e ramo SENHOR rexakãa ojekuaa xapy'a ijaty va'e ha'e javi pe.

Opu'ã rei va'ekue ombopagaague

²⁰ Ha'e gui SENHOR aipoe'i Moisés ha'e Arão pe:

²¹ — Pejepe'a ke upe va'e kuery mbyte gui, mba'eta are'ỹ'i re amomba vyvoi 'rã — he'i.

²² Ha'e rami teĩ ha'e kuery mokoĩve ma ngova vvy re omovaẽ reve aipoe'i:

— Oerujete temimoingo ha'e javi moingoare ha'e herekoa reiko va'e, xapy'a rei rã peteĩ'i ava ri ojejavy ramo kova'e kuery ha'e javi rovai 'rã teve ndepoxy?

²³ SENHOR ombovai Moisés pe:

²⁴ — Aipo're ha'vy upe py ikuai va'e ha'e javi pe: “Pejepe'a ke Coré, Datã ha'e Abirão ikuai gui”, 're.

²⁵ Ha'e ramo Moisés opu'ã ju vy oo Datã ha'e Abirão ikuai py. Hakykue oje'oiipa avi Israel kuery mongetaaty kuery.

²⁶ Ha'e vy aipoe'i ha'e py ijaty va'e pe:

— Ajerure, pejepe'apa na upe va'e avakue heko vai va'e rekoa gui mombyry'i. Pepoko eme guive ha'e kuery mba'e rei-rei re, ha'e kuery ojejavva py peẽ voi penemombaa e'ỹ aguã — he'i.

²⁷ Ha'e ramo ojepe'apa oje'oiyv Coré, Datã ha'e Abirão ikuai gui. Datã ha'e Abirão ma oẽ vy ngoo rokẽ py oguapy, gua'yxy kuery reve, gua'y kuery, guajy kuery ha'e kyrĩgue'i ha'e javi reve.

²⁸ Ha'e gui Moisés aipoe'i:

— Mba'emo oiko ta va'e rupi peikuaa 'rã SENHOR ae xembouague ixupegua ha'e javi ajapo aguã, ha'e xejegui e'ỹ ae meme ajapoa peikuaa aguã.

²⁹ Aỹ ma peva'e avakue amboae avakue omanoa rami ri omano ramo, xapy'a rei avakue mboae ojexavaia rami rive ha'e kuery ojexavaia ramo ma SENHOR remimbou e'ỹ xee aiko.

³⁰ Ha'e rami avi xapy'a rei SENHOR mba'emo ndajaxai teri va'e ojapo ramo vvy ojepe'a rã kova'e avakue ho'apa aguã omba'e rei-rei reve, ha'e vvykua vaikue py ha'e kuery oikove reve oguejy ramo peikuaa 'rã SENHOR mboetea rupi ve'ỹ ikuai va'e memea — he'i.

³¹ Ijavyvupa'i ramove vvy ha'e kuery ikuai guy rupi ojepe'a ovy.

³² Ojepe'a ramo ha'e kuery ho'apa hoo ha'e javi reve, Coré revegua avakue ikuai va'ekue voi, imba'e rei-rei ha'e javi reve.

³³ Vvykua vaikue py ho'apa oguereko va'ekue ha'e javi reve. Ha'e gui vvy ojao'ipa jevy ramo heta va'e kuery mbyte gui okanhymba.

³⁴ Ha'e ramo Israel kuery ha'e kuerya katy'i rupi ikuai va'ekue onhamba oje'oiyv haxẽmba rã oendu vy, “Tove vvy tanhanemomba heravy eme avi” he'i vy.

³⁵ SENHOR-a gui tata oẽ ovy vy ojukapa duzentos e cingüenta avakue heakuã porã va'e rryru revegua.

³⁶ Ha'e gui SENHOR aipoe'i Moisés pe:

³⁷ — Aipo're sacerdote Arão ra'y Eleazar pe heakuã porã va'e oapyaty ikuai va'e oi'pe'apa aguã tata hendy va'e mbyte gui, tomoaĩmba tata oĩ va'e mombyrya rupi, mba'eta hyru ma iky'a e'ỹ va'e meme.

³⁸ Ha'e gui ojejavvy okuapy va'e mba'ekue heakuã porã va'e oapyaty peipe'a va'ekue ma pemopererĩ'i 'rã altar penhovã aguã, SENHOR renonde py oguerupa okuapy rire. Ha'e nunga iky'a e'ỹ va'e ikuai ramo opyta 'rã Israel kuery oikuaa aguã — he'i.

³⁹ Ha'e ramo sacerdote Eleazar oi'pe'a heakuã porã va'e oapyaty overa va'e guigua okaipa va'ekue po gui, ha'e vy omopererĩ'i altar onhovã aguã,

⁴⁰ Israel kuery ha'e nungakue re ima'endu'a okuapy aguã. Mba'eta amboae regua rei Arão guigua e'ỹ va'e nda'evei SENHOR renonde py onhemboja aguã heakuã porã va'e oapy aguã, Coré ha'e hexevegua kuery re oiko va'ekue ramigua oiko ju e'ỹ aguã, Moisés rupi SENHOR ijavyvuaque rami vy.

Opa marã ju ikuai va'ekue ombopagaague

⁴¹ Ko'ẽ jevy ma Israel kuery ha'e javi ijavyvuy rei okuapy Moisés ha'e Arão rovai. Ha'e vy aipoe'i:

— Peẽ kuery tu pejuka ma SENHOR pegua kuery — he'i.

⁴² Moisés ha'e Arão rovai re ha'e kuery onhemboatypa vy oguy nhemboaty oĩaty oia katy oje'oi ramove arai ou vy ojao'ipa, ha'e SENHOR rexakãa ojekuaa xapy'a.

⁴³ Moisés ha'e Arão jogueru avi onhemboaty aty renonde py.

⁴⁴ Ha'e gui Moisés pe SENHOR ijavyvuy vy aipoe'i:

⁴⁵ — Pejepe'a ke upe va'e kuery ikuai gui, amomba vyvoi aguã — he'i ramo mokoĩve guenapy'ã re ikuai ngova vvy re omovaẽ peve.

⁴⁶ Ha'e ramo Moisés aipoe'i Arão pe:

— Eraa ke nembra'e heakuā porā va'e oapyaty, ha'e emboja tata altar áry gui rejopy va'e. Hi'áry rupi emoī avi heakuā porā va'e. Ha'e gui tereo pojava heta va'e kuery ikuai rupi ha'e kuery ojevavya rejao'i uka aguā, mba'eta imbopagaarā tuvixa ete va'e ou SENHOR renonde gui. Omboypy ma mba'eaxy vaikue — he'i.

⁴⁷ Arão ma Moisés ijayvuague rami vy heakuā porā va'e rryru ogueraa vy onha ovy tekoa mbyte rupi, ha'e kuery mbyte rupi mba'eaxy vaikue ou ma ramo. Tata áry rupi heakuā porā va'e omoī vy ojao'i uka ovy ha'e kuery ojevavya.

⁴⁸ Ha'e rami py omanogue ha'e okuave va'e mbyte oiko. Ha'e rami rā mba'eaxy vaikue opa vyvoi.

⁴⁹ Mba'eaxy gui omano va'ekue ma catorze mil e seiscentos ha'e javi vy, Coré káuxa omano va'ekue reve'y vy.

⁵⁰ Ha'e gui mba'eaxy vaikue opytu'u rire oguy nhemboaty oīaty rokē py ju Arão ou Moisés oīa py.

17

Arão popoka ipotypaague

¹ SENHOR aipoe'i Moisés pe:

² — Ndeayvu ke Israel kuery pe. Ha'e kuery gui rejopy 'rā popoka. Doze popoka rejopy 'rā, peteī-teī tamoi ro pygua kuery va'e regua yvatekueve gui. Peteī-teī rery rembopara 'rā imba'e popoka re ae.

³ Ha'e rā Levi kuery va'e regua popoka re ma rembopara 'rā Arão rery, mba'eta peteī-teī oo pygua kuery ruvixa ogueroko 'rā popoka.

⁴ Ha'e va'e ma remoimba 'rā oguy nhemboaty oīaty py, xeayvu rryru oī va'e renonde. Ha'e py xee ae 'rā rovaexī.

⁵ Ha'e gui ava xee aiporavo va'e popoka ma ipotypa 'rā. Ha'e rami vy xerenonde gui amombytu'upa 'rā Israel kuery penderovai rupi ijayvu rei okuapya — he'i.

⁶ Ha'e rami Israel kuery pe Moisés ijayvu ramo doze yvatekueve ikuai va'e ome'ē okuapy opopoka. Peteī-teī ixupe ome'ē guamoī ro pygua kuery pegua ae, doze popoka ha'e javi vy. Ha'e kuery popoka mbyte py oī avi Arão popoka.

⁷ Ha'e kuery popoka ma Moisés ogueroikepa SENHOR renonde py, opy ijayvua oīaty py ae.

⁸ Ko'ē jevy oguy Nhanderuetē ayvu oīaty ropy Moisés oīke ramo Arão popoka Levi ro pygua kuery pegua henhoīmba ra'e. Hi'y tuvixaa rupi ipotypa ma, ha'e vy hi'apa guive.

⁹ Ha'e ramo popoka ha'e javi ma SENHOR renonde gui Moisés ogueraapa ju Israel kuery ikuai py. Ha'e ramo ha'e kuery oexa vy peteī-teī ojopy okuapy opopoka ae.

¹⁰ SENHOR aipoe'i Moisés pe:

— Eraa ju ke imoiny Arão popoka xeayvu oīaty renonde py, ha'e py ae oī porā aguā Israel kuery opu'ā rei va'e oikuaa okuapy aguā. Ha'e rami vy 'rāe remokyrirī xerovai rupi ijayvu rei okuapy va'e, omanomba e'y aguā — he'i.

¹¹ Ha'e ramo Moisés ojapo ha'e rami. SENHOR ojapo ukaa rami vy ae ojapo.

¹² Ha'e gui Moisés pe Israel kuery ijayvu jevy vy aipoe'i okuapy:

— Aỹ ma romanomba ta ma! Rokanhymba 'rā, rokanhymba 'rāe ha'e javive!

¹³ Mba'eta SENHOR ombojeroviaty katy onhemboja va'e rei ma omano 'rā. Xapy'a rei nda'u ore kuery ha'e javive 'rā ri romanomba? — he'i okuapy.

18

Sacerdote kuery mba'emo ojapo ha'e ojopy va'erā re ijayvuague

¹ Ha'e gui SENHOR aipoe'i Arão pe:

— Ndee, ndera'y kuery ha'e neramoī Levi ramymino kuery ha'e javi re oī 'rā henda iky'a e'y va'e rupi pemba'eapoa py pejevavy ri vy pepaga aguā. Ha'e rā ndee ha'e ndera'y kuery re anho 'rā oī sacerdote rami pemba'eapoa py pejevavy vy pepaga aguā.

² Ha'e gui oo xeayvu oīaty renonde rupi ndee ha'e ndera'y kuery pemba'eapo pekuapy jave ma peru avi 'rā peneretarā kuery peneramoī Levi ramymino ikuai va'e, pendea py meme ha'e kuery ou vy penepytyvō okuapy aguā.

³ Ha'e kuery ma ndereve oo rupi omba'eapo vy ojapo 'rā okuapy ojapo 'rā va'ekue. Ha'e rami teī ha'e kuery nonhembojai 'rāe henda iky'a e'y va'e py mba'emo ikuai va'e re, neī altar re, omanomba e'y aguā, peē kuery voi.

⁴ Ndea py ha'e kuery onhemboaty 'rā okuapy ojapopa aguā oguy nhemboaty oīaty rupi ojapo 'rā va'e ha'e javi. Ha'e rā amboae regua ma nda'evei pēa py onhemboja aguā.

⁵ Peē kuery anho 'rā pemba'eapo henda iky'a e'y va'e py, altar rupi voi, Israel kuery mbopagaarā oiko jevy e'y aguā.

⁶ Peneretarā kuery levita ikuai va'e ma xee aiporavo Israel kuery mbyte gui, ha'e penepytyvōarā ju amboaxa oguy nhemboaty oīaty rupi SENHOR pe omba'eapo okuapy aguā.

⁷ Ha'e rā altar rupi, ha'e ajukue okē regua oī va'e ropy rupi ma ndee ha'e ndera'y kuery reve ae 'rā pepena sacerdotē rembiaporā oī va'e ha'e javi re. Ha'e va'e ma penembiaporā ae. Peē kuery pe ame'ē sacerdote rami pemba'eapo aguā. Ha'e rā amboae regua onhemboja ri vy ma omano 'rā — he'i.

⁸ SENHOR aipoe'ive ju Arão pe:

— Ndevy peguarã xee amboaxa xeve ome'ẽ mbyre-mbyre gui mba'emo oipe'aa va'e, Israel kuery mba'emo iky'a e'y va'erã ogueru va'e guigua. Ndevy ha'e ndera'y kuery pe raka'e rã peve guarã amboaxa peẽ kuery peguarã ae.

⁹ Pova'e ae rã pejopy mba'emo iky'a e'y ete va'e gui, tata py omoia e'y va'ekue regua. Xeve ome'ẽ va'erã ha'e kuery ogueru va'e ha'e javi gui mba'emo opyta rã ndevy ha'e ndera'y kuery pe iky'a e'y ete va'erã, mba'emoaju guigua mba'e, jejavya regua, ha'e mba'emo omboekovia aguã regua xeve ogueru va'e ha'e javi gui.

¹⁰ Ha'e nunga pe'u rã pekuapy henda iky'a e'y etea py ae. Peẽ kuery va'e regua avakue ma guive rã pe'u rã. Pendevy ma iky'a e'y va'e opyta.

¹¹ Pova'e nunga voi opyta rã ndevy guarã: mba'emo Israel kuery oupi vy ombovava reve ome'ẽ va'ekue ha'e javi gui oipe'a pyre, ha'e nunga voi amboaxa ndevy, ndera'y kuery ha'e nderajy kuery pe guive, raka'e rã peve guarã. Ndero pygua kuery ngarua pyguarã ha'eve va'e ri ikuai vy ha'e javi rã ha'eve ho'u aguã.

¹² Azeite, vinho ha'e mba'emo ra'yigue oiko jypy'i va'ekue regua iporãgueve SENHOR pe ha'e kuery ome'ẽ va'ekue ma ndevy peguarã memo amboaxapa.

¹³ Yvy re onhoty mbyre ha'e javi regua jypy'i hi'a va'e xee SENHOR pe ha'e kuery ogueru va'e ma namba'e meme rã. Ndero pygua kuery ngarua pyguarã ha'eve va'e ri ikuai vy ha'e javi rã ho'u.

¹⁴ SENHOR peguarã Israel kuery omboaxa va'ekue ha'e javi ma ndevyguua meme opyta.

¹⁵ Ha'e javya temimoing jypy'igua oiko va'ekue xee SENHOR pe ha'e kuery ogueru va'e, avakue e'y vy mymba kuery teĩ ndevy guarã meme rã opyta. Ha'e rami avi avakue jypykue oiko va'ekue ma remboekovia uka rã, mymba kuery ha'eve'y va'e regua jypy guare remboekovia uka avi rã.

¹⁶ Peteĩ jaxy'i va'e meme rã remboekovia uka. Hekovia repyrã reikuaa rami vy ae rã ome'ẽ, cinco hatã'i va'e re, henda iky'a e'y va'e py oiporupy regua doze grama va'e rami ae.

¹⁷ Ha'e rã vaka, vexa'i, kavara ra'y kuery jypy'igua va'e ma nomboekovia'i rã, iky'a e'y va'e ramo. Huguykue ma pemboayvipa rã altar áry rupi, ha'e rã ikyrakue ma oapy vy ome'ẽa rã SENHOR pe heakuã porã aguã.

¹⁸ Ha'e rã ho'okue ma pendevyguua rãe, ipexo oupi vy ombovava reve ome'ẽ mbyre ro'okue, ha'e hi'u oiporu kuua regua ro'okue ma ha'e rami ae avi.

¹⁹ Xee SENHOR peguarã iky'a e'y va'e Israel kuery ome'ẽ va'ekue ha'e javi amboaxa ndevy, ndera'y ha'e nderajy kuery ikuai va'e pe guive, raka'e rã peve guarã. Xee SENHOR renonde py oĩ riae rã xereve guarã ajapo va'ekue juky regua, ndee ha'e neramymino kuery peguarã.*

²⁰ Ha'e gui SENHOR aipoe'i avi Arão pe:

— Ndee ma ndevyvrã nderejopyi rã neĩ ruxã'i voi, heta va'e kuery yvy mbyte neĩ peteĩ henda py voi noĩ rã ndevyvrã. Mba'eta xee ae ma aiko ndevyguua rereko va'erã Israel kuery mbyte — he'i.

Dízimo ha'e levita kuery re ijavyvuaque

²¹ — Levi ramymino kuery pe ma xee amboaxa dízimo ome'ẽmby ha'e javi. Ha'e kuery peguarã ae opyta oguy nhemboaty oĩaty rupi omba'eapoague repyrã.

²² Ha'e rã Israel kuery ma novaẽi rã oguy nhemboaty oĩaty py, ha'e kuery ojejavayague re opaga aguã oĩ ramo omanomba e'y aguã.

²³ Levita kuery ae rã omba'eapo oguy nhemboaty oĩaty rupi, ha'e kuery re ae rã oĩ ojevay vy opaga aguã. Ha'e va'e lei ma raka'e rã peve oĩ hekorã, hamymino jevy kuery peguarã. Ha'e rã ovyvrã ma neĩ ruxã'i ma voi ndojopyi rã Israel kuery mbyte py.

²⁴ Mba'eta Israel kuery dízimo SENHOR pe ome'ẽ okuapy va'e ma amboaxapa levita kuery peguarã. Ha'e kuery pe ma "Israel kuery mbyte rupi pendevyvrã neĩ ruxã'i ma voi ndapejopyi rã", ha'e rire.

²⁵ Ha'e gui Moisés pe ju SENHOR aipoe'i:

²⁶ — Ndeayvu rã levita kuery pe, ha'e vy aipo're: Israel kuery dízimo ome'ẽ va'ekue pendevy guarã amboaxa va'e pejopy vy pemboja'o ju rã SENHOR pe. Dízimo ome'ẽ mbyre regua gui dízimo ju rã peme'ẽ xeve.

²⁷ Ha'e nunga peme'ẽ va'e ma mba'emo pemoa'yĩ va'ekue gui, e'y vy vinho onhamiaty gui jypy'igua peme'ẽ rãgue py.

²⁸ Ha'e rami vy SENHOR pe ju rã peme'ẽ dízimo Israel kuery po gui pejopy va'ekue ha'e javi guigua. Ha'e nunga gui SENHOR pe peme'ẽ va'e ma sacerdote Arão ae oiporu va'erã.

²⁹ Ome'ẽ mbyre pejopy va'e ha'e javi gui peme'ẽ rã SENHOR pegua meme. Ha'e nunga iporãgueve ae rã peme'ẽ iky'a e'y va'erã.

³⁰ — Aipo'reve ju rã levita kuery pe: Dízimo ome'ẽ mbyre regua iporãgueve peme'ẽ ma rire hembyrekue ma pendevy guarã ae opyta, mba'emo pemoa'yĩ va'ekue gui, e'y vy vinho onhamiaty gui dízimo me'ẽare pe hembyrekue opytara rami avi.

³¹ Ha'e nunga pe'ua py rei pe'u teĩ ha'eve, peẽ kuery ha'e pendero pygua kuery guive, oguy nhemboaty oĩaty rupi pemba'eapoague repy ae ramo.

³² Ha'e va'e mbyte gui iporãve va'e peme'ẽ aguã peiporavo ramo pendere noĩ rã pejevavya. Ha'e rami vy rãe mba'emo Israel kuery iky'a e'y va'erã ome'ẽ va'ekue ndopyta jevyi ha'eve'y va'e, pemanomba e'y aguã.

* 18:19 Mba'emo ome'ẽ rã juky py omoe'ẽ reve (Levítico 2.13).

¹ Ha'e gui SENHOR aipoe'ive ju Moisés ha'e Arão pe:

² — Pova'e lei rupi SENHOR ojapo uka vy aipoe'i: Aipopeje Israel kuery pe peña py togueru peteĩ vaka kunha'i pytã va'e, iporã rei va'e, ivaikue rei e'ỹ va'e, neĩ peteĩgue ma voi canga py omomba'epo e'ỹ teri va'e.

³ Ha'e va'e ma pemboaxa ju 'rã sacerdote Eleazar pe. Ha'e va'e ju ogueraa 'rã tekoa gui mombry'ia py, ha'e vy ojukaa 'rã henonde py.

⁴ Ha'e vy huguykue re sacerdote Eleazar okuã ombovy vy omboayvipa 'rã oguy nhemboaty oĩaty renonde katy. Sete-kue 'rã omboayvi.

⁵ Ha'e oexaa py oapypaa 'rã vaka kunha'i ha'e javi: ipire, ho'okue, huguy ha'e hepoxikue voi. Ha'e javi 'rã oapypa.

⁶ Sacerdote ogueru 'rã peteĩ vyvra yary va'e, hissopo rogue ha'e havijukue pytã va'e, ha'e vy omoĩmba 'rã tata mbyte vaka kunha'i okaia py.

⁷ Ha'e gui ma sacerdote ojoi 'rã oao, ojau 'rã guive yy py. Ha'e rire mae 'rã ojevuy ju tekoa py, teĩ ha'eve'ỹ va'e oiko 'rã ka'aru peve.

⁸ Hapyare voi ojoi 'rã oao ha'e ojau yy py. Ha'e voi oiko 'rã ha'eve'ỹ va'e ka'aru peve.

⁹ Ha'e gui peteĩ ava ha'eve va'e ma tanhimbu vaka kunha'i rugue omboaty ju vy omoĩ porã 'rã tekoa gui mombry'ia py, peteĩ henda iky'a e'ỹ va'e ojapo pyre py. Israel kuery ha'e javi peguarã omoĩ porã 'rã, yy joky'a'oa irtũrã, jejavya gui joky'a'oa aguã.

¹⁰ Ha'e gui vaka kunha'i rugue mono'õare voi ojoi 'rã oao, ha'e ha'eve'ỹ va'e oiko 'rã ka'aru peve. Ha'e va'e ojapo uka pyre ma raka'e rã peve guarã Israel kuery pe, ha'e amboae regua ha'e kuery mbyte rupi ikuai va'e pe guive.

¹¹ — Amongue omanogue re, ava retekue re ri opoko ramo ma ha'eve'ỹ va'e oiko 'rã sete ára peve.

¹² Ha'e gui mboapy araa py, ha'e sete araa py ju ojeky'a'o uka 'rã ha'e va'e yy py, ha'eve va'e ju oiko aguã. Va'eri mboapy araa py, e'ỹ vy sete araa py ndojeky'a'o ukai ri vy ma ha'eve'ỹ va'e ae 'rã oiko.

¹³ Xapy'a rei omanogue re, ava retekue re opoko va'ekue ndojeky'a'o ukai vy ma omongy'apa avi 'rã SENHOR mbojeroviaaty. Ha'e va'e ma oipe'aa 'rã Israel kuery mbyte gui, mba'eta hi'áry rupi yy joky'a'oa nomboayviai rire ha'eve'ỹ va'e ae 'rã oiko. Hexe oĩ teri ha'eve'ỹa.

¹⁴ — Pova'e lei ma amongue ava peteĩ oo py ri omano rã guarã. Ha'e va'e opy oike va'e, ha'e opy ikuai va'ekue ha'e javi 'rã ha'eve'ỹ va'e ikuai sete ára peve.

¹⁵ Mba'emo ryru ojepe'a va'e, imbotya ojokua e'ỹ va'e ma ha'eve'ỹ va'e oiko avi 'rã.

¹⁶ Ha'e javive rei mba'ety rupi ooa rupi amongue kyxe py ojuka pyre re opoko va'ekue ma oiko 'rã ha'eve'ỹ va'e sete ára peve, ha'e'ỹ vy amboae rami omano va'ekue re, amongue ava kãgue re, e'ỹ vy te'õgue rupa re mba'e.

¹⁷ Ha'eve'ỹ va'e oiky'a'oa aguã ma pejopy 'rã vaka kunha'i oapy va'ekue rugue jejavya gui joky'a'oa va'e regua, ha'e gui hugue áry penhoẽ 'rã yy oxyry va'e, peteĩ hyru py.

¹⁸ Peteĩ ava ha'eve va'e ma peteĩ hissopo rogue ogueraa vy omoakỹ 'rã ha'e va'e yy py. Ha'e va'e py omboayvipa 'rã ha'e va'e oo áry rupi ha'e tembiporu ikuai va'e, ha'e py ikuai va'ekue áry rupi, ha'e gui ojuka pyre, e'ỹ vy omano va'ekue kãgue re opoko va'ekue, hupa áry rupi guive.

¹⁹ Ha'eve'ỹ va'e áry rupi amongue ha'eve va'e omboayvi 'rã mboapy araa py, ha'e sete araa py ju. Sete araa py ma oiky'a'oa 'rã. Ha'eve'ỹ va'ekue ojoi 'rã oao, ha'e ojau 'rã yy py. Ka'aru jave ha'eve va'e ju 'rã oiko.

²⁰ — Ha'e rami teĩ xapy'a rei amongue ha'eve'ỹ va'e ndojeky'a'o ukai ramo oipe'aa 'rã heta va'e kuery mbyte gui, SENHOR pegua henda iky'a e'ỹ va'e omongy'apa rire. Hi'áry rupi yy joky'a'oa nomboayviai rire ha'eve'ỹ va'e ae 'rã oiko.

²¹ Ha'e rami aguã ma raka'e rã peve guarã oĩ ha'e kuery ojapo aguã. Yy joky'a'oa mboayviare voi ojoi 'rã oao. Yy joky'a'oa re opoko va'e rei ma oiko 'rã ha'eve'ỹ va'e ka'aru peve.

²² Opa marãgua re ha'eve'ỹ va'e opokoa va'e rei oiko 'rã ha'eve'ỹ va'e. Hexe opoko va'e voi oiko 'rã ha'eve'ỹ va'e ka'aru peve.

20

Miriã omanoague

¹ Ha'e gui Israel kuery ha'e javi ovaẽ okuapy Zim regua tekoa e'ỹa py. Jypy'igua jaxy py ma Cades py oypatpa okuapy. Ha'e py ma Miriã omano, ha'e pyve ju onhono porãa.

Meribá py itaova oĩ va'e Moisés ombovoague

² Ha'e gui yy nda'ipoi ha'e kuery oy'u aguã. Ha'e ramo onhemboaty okuapy Moisés ha'e Arão rovai.

³ Moisés pe ijayvu atã vy aipoe'i okuapy:

— Ne'exa, oreryvy kuery SENHOR renonde py omanomba jave ore voi romano va'e rire ha'eveve 'rãgue!

⁴ Mba'e re tu SENHOR pegua orekuai va'e orererupa raka'e tekoa e'ỹa py, romanomba aguã rive, ore kuery ha'e orerymba kuery guive?

⁵ Mba'e re tu Egitto yvy gui orererupa ri kova'e tekoa vaikue py oremovaẽ aguã, neĩ mba'emo ra'yĩgue noĩa py, neĩ figo'a ma voi, vinho, romã'a, neĩ yy jay'vu va'erã voi nda'ipoia py? — he'i okuapy.

⁶ Ha'e ramo heta va'e kuery onhemboaty okuapy va'e renonde gui Moisés ha'e Arão oje'oi vy ovaẽ nhemboaty oĩaty rokẽ py. Ha'e vy guenapy'ã re oĩ ngova yvy re omovaẽ peve. Ha'e ramove SENHOR rexakãa ojekuaa xapy'a ha'e kuery pe.

⁷ SENHOR aipoe'i Moisés pe:

⁸ — Aÿ eru popoka, ha'e emboatypa ju heta va'e kuery, ndee ha'e nderyke'y Arão voi. Ha'e vy ha'e kuery oexapaa py ndeayvu 'rã itaova oï va'e pe, ha'e ramo ixugui onheê 'rã yy. Ita gui yy onheê aguã rami pejapo vy peme'ê 'rã heta va'e kuery pe oy'u okuapy aguã, hymba kuery pe guive — he'i.

⁹ Ha'e ramo popoka SENHOR renonde py oï va'ekue Moisés oguenoê, SENHOR aipoe'igague rami vy.

¹⁰ Ha'e gui Moisés ha'e Arão omboatypa heta va'e kuery itaova oï va'e rexei. Ha'e vy aipoe'i ha'e kuery pe:

— Pendu ke aÿ, pepu'ã rei va'e kuery. Xapy'a rei nda'u rojapo 'rã kova'e itaova oï va'e gui yy onheê aguã rami, peê kuery pey'u aguã? — he'i vy

¹¹ Moisés opo py popoka oguereko va'e oupi vy itaova re oinupã mokoïgue. Ha'e ramo onheê vaipa ete yy. Heta va'e kuery oy'u okuapy, hymba kuery guive.

¹² Ha'e ramo SENHOR aipoe'i Moisés ha'e Arão pe:

— Peê kuery ndapejeroviai va'ekue xere, mba'eta Israel kuery oendua py ndapexa ukai xeky'a e'ÿ va'ea. Ha'e nunga rupi peê ma naperovaêvei ma 'rã kova'e kuery ijyvyrã ame'ëague py — he'i.

¹³ Ha'e va'e yy ma Meribá pygua. Ha'e py ma Israel kuery SENHOR rovai rupi ijayvu atã okuapy ramo ha'e kuery mbyte py SENHOR oexa uka iky'a e'ÿ va'ea.*

Edom vvy rupi ha'e kuery oaxa oje'oivvy aguã re Moisés ojerure uka teïague

¹⁴ Cades gui Moisés omondouka guembiguai kuery Edom pygua huvixaa py, ixupe aipoe'i aguã: “Po rami ijayvu nderyvy Israel kuery: Reikuaa porã ma ore kuery opa mba'e py orekuai axyague.

¹⁵ Mba'eta oreramoï kuery Egito vvy katy oguejypa raka'e. Ha'e gui ore kuery ju Egito py are vaipa orekuai. Ha'e rã Egito pygua kuery oreomoingo axy, ore kuery ha'e oreru kuery voi.

¹⁶ SENHOR pe rojapukai ramo oreayvua oendu vy ojeuguia anjo omondouka Egito gui orepe'apaarã. Ha'e gui aÿ ma Cades py orekuai, tetã ndeyvy rexei'i oï va'e py.

¹⁷ Eja ndeyvy rupi roaxa aguã. Ndoroxai 'rã penemba'ety rupi, nei uvaty rupi. Ndoroy'ui avi 'rã ygua ikuai va'e gui. Tape iporãve va'e rupi anho 'rã roguata, ndoropiai 'rã jaiporu kuaa katy, nei jaiporu kuaa e'ÿa katy ma voi, ndeyvy rupi roaxapa peve”, he'i uka.

¹⁸ Ha'e ramo Edom pygua aipoe'i uka ixupe:

— Peaxa eme ta'vy xeyvy rupi, rovaexi vy aa e'ÿ aguã kyxe reve — he'i.

¹⁹ Ha'e gui Israel kuery aipoe'i ju okuapy ixupe:

— Tape jeporuve va'e rupi anho 'rã roje'oi. Xapy'a rei xee ha'e'ÿ vy xerymba kuery nemba'e yy roy'u ri vy apagapa 'rã hepya rami tema. Amboae nunga ma ndaipotai, vvy rupi roaxa aguã e'ÿ vy.

²⁰ Ombovai:

— Peaxa eme ta'vy — he'i vy Edom kuery oupa nhoguenoiny heta avakue reve ovaexi aguã, opo'akaa oexa uka reve.

²¹ Ha'e rami vy Edom kuery ndoejai Israel kuery ijyvy rupi oaxa aguã. Ha'e ramo Israel kuery ojepekuavo oje'oivvy ha'e va'e gui.

Números 33.38,39

²² Cades gui Israel kuery ha'e javi ikuai va'ekue oje'oi vy oguata oje'oivvy Hor vvyty katy.

²³ Hor vvyty re Edom vvy opa'ia py ma SENHOR aipoe'i Moisés ha'e Arão pe:

²⁴ — Arão nhe'ê ma heraa 'rã tamoi kuerya py, novaêi 'rã Israel kuery vvyrã ame'ê va'e py, Meribá py yy onheê jave naxenhe'ê rendu potai rire.

²⁵ Eraa ha'vy Arão ha'e ta'y Eleazar, ha'e enoê Hor vvyty apyte peve.

²⁶ Ha'e rire ma emboi Arão ao, ha'e gui ijaokue py ta'y Eleazar ju emonhemonde, mba'eta Arão ma oipe'aa 'rã tuu kuery ooague katy, ha'e py ae 'rã omano — he'i.

²⁷ Moisés ojapo SENHOR ojapo kuaa rami vy. Jogueraa nhoguenoiny Hor vvyty katy heta va'e kuery ha'e javi oexaa gui.

²⁸ Arão ao Moisés omboi vy ta'y Eleazar ju emonhemonde ijaokue py. Ha'e py Arão omano vvyty apyte py ae. Ha'e rã Moisés ha'e Eleazar ma oguejy ju jogueruvy ha'e gui.

²⁹ Ha'e ramo heta va'e kuery Arão omanoague oikuaa ma vy ha'e kuery ha'e javi ojae'o hexe. Trinta ára re ojae'o okuapy.

21

Arade pygua huvixa oity okuapyague

¹ Ha'e gui ma cananeu regua Arade pygua huvixa Neguebe py oikoa py oendu omombe'ua rã Israel kuery tape rupi ou okuapy Atarim katy. Ha'e rami vy Israel kuery re opu'ã vy amongue ogueraa escravo-rã.

² Ha'e ramo Israel kuery SENHOR renonde onhemboayvu vy aipoe'i okuapy:

— Orepo py ri ha'e va'e kuery remboaxapa ramo romomba'ete 'rã ha'e kuery retã ikuai va'e — he'i.

³ Israel kuery ijayvua SENHOR oendu vy ipo py omboaxapa cananeu kuery. Ha'e ramo Israel kuery omomba ete, hetã ikuai va'e guive. Ha'e va'e tekoa ma oenoï okuapy Horma.*

Mboi ra'angaa overa va'e guigua re ijayvuague

* 20:13 Tery Meribá ma “Ayvua ete-ete”'ea (Êxodo 17.7). * 21:3 Tery Horma ma “Ombovaipaague”'ea.

⁴ Ha'e gui Hor vvyty gui oje'oi'pa okuapy. Ye'ë Pytã va'e vvyry tape oo va'e rupi oje'oi, Edom vvy rovai rupi oaxa aguã. Ha'e rami teĩ Israel kuery oguataa rupi nda'evei ete ju okuapy.

⁵ Ha'e vy ijayvu okuapy Nhandueruete ha'e Moisés rovai rupi. Ha'e vy aipoe'i:

— Mba'erã tu Egipto vvy gui orererupa ri, kova'e tekoa e'ya py romanomba aguã ty'y, mbojape neĩ yy ma voi nda'ipoia py? Mba'eta orenhe'ë py voi orekane'õmba ma kova'e nunga mbojape ovare e'ỹ va'e anho ro'vu — he'i.

⁶ Ha'e ramo ha'e kuery mbyte rupi SENHOR ombou mboi inharõve va'e, ixu'upaarã. Ha'e ramo heta omano Israel kuery va'e regua.

⁷ Moisés-a py ha'e kuery oupa vy aipoe'i okuapy:

— Rojejavyva ra'e, mba'eta SENHOR rovai ha'e nderovai rupi oreayvu. Ejerure ha'vy SENHOR pe ore kuerya gui oipe'apa aguã mboi — he'i ramo Moisés ojerure ha'e kuery re.

⁸ Ha'e gui SENHOR aipoe'i Moisés pe:

— Ejapo ke peteĩ mboi inharõve va'e ra'angaa, ha'e eupi imoiny vvyra po'i apy re. Ha'e gui ha'e javive oixu'u va'ekue ha'e nunga re oma'ë vy oikove 'rã — he'i.

⁹ Ha'e ramo Moisés ojapo peteĩ mboi ra'angaa overa va'e gui, ha'e vy oupi imoiny peteĩ vvyra po'i apy re. Ha'e gui amongue mboi oixu'u ramo overa va'e guigua re oma'ë va'e okuera kuerei.*

Israel kuery oguata oje'oi'vyague

¹⁰ Ha'e gui Israel kuery oje'oi'pa vy Obote py ju ikuai.

¹¹ Ha'e gui Obote gui oje'oi vy Ijé-Abarim py ju opyta okuapy, tekoa e'ya Moabe rexi oĩ va'e py, kuaray oua katy.

¹² Ha'e gui oje'oi vy Zerede vvy'ã guy py ju opyta.

¹³ Oje'oi jevy vy Arnom yakã rovai ju opyta okuapy, tekoa e'ya amorreu kuery rekoa peve oo va'e py. Mba'eta Arnom yakã ma Moabe vvy apy'i rupi oĩ, Moabe ha'e amorreu kuery rekoa mbyte py.

¹⁴ Ha'e nunga rupi ae SENHOR joe opu'ãa regua oia kuaxia re ipara oiny:

“Vaebe tekoa Sufa re oĩ va'e,

ha'e Arnom yakã vvyry vvy'ã guy ikuai va'e rupi,

¹⁵ ha'e gui vvyugua gui jaguejya rupi

jaguejyve 'rã Ar tekoa katy,

Moabe tekoa apy'ia py nhavaẽa peve.”

¹⁶ Ha'e gui ma Beer katy ju oguata oje'oi'vy. Ha'e va'e ygua ma Moisés pe SENHOR aipoe'iague: “Emboatypa heta va'e kuery, ha'e ramo ame'ë 'rã yy”, he'iague va'e.

¹⁷ Ha'e ramo pova'e mboraie rupi Israel kuery oporai okuapy:

— Tovu yy! Perovy'a ke mboraie rupi!

¹⁸ Yguarã huvixa kuery ojo'o va'ekue,

heta va'e kuery regua yvatekueve ojo'o va'ekue

vvyra py rive, popoka oguereko va'e py ae — he'i okuapy.

Ha'e gui ma tekoa e'ya gui Matana katy ju oguata oje'oi'vy.

¹⁹ Matana gui ma Naaliel katy ju oje'oi, ha'e Naaliel gui ma Bamote katy,

²⁰ ha'e Bamote gui ma vvy'ã guy Moabe vvy oĩ va'e katy ju oje'oi, Pisca vvyty áry peve. Ha'e va'e apyte gui nhama'ë 'rã tekoa e'ya katy.

Deuteronomio 2.26-37

²¹ Ha'e gui ma Seom amorreu kuery ruvixaa py Israel kuery omoudouka ayvu reraarã. Ha'e vy aipoe'i:

²² — Oremboaxa uka ke ndeyvy rupi. Ndoropiai 'rã mba'ety ikuai va'e rupi, neĩ uvaty rupi. Ygua gui voi ndoroy'ui 'rã. Roguata 'rã roje'oi'vy tape iporãve rupi anho, ndeyvy rupi roaxapa peve — he'i uka.

²³ Ha'e rami teĩ Seom nomboaxa ukai Israel kuery oyvy rupi. Ha'e rami 'rãgue py ojeupegua kuery omboatypa vy oje'oi Israel kuery ovaexĩ aguã tekoa e'ya py. Jasa py ovaẽa py opu'ã okuapy Israel kuery rovai.

²⁴ Teĩ Israel kuery ma kyxe py ojuka reta vy ipo'aka ijyvy re, Arnom yakã guive Jaboque peve, Amom ramymino kuery rekoa peve. Ha'e va'e tekoa apy'i rupi ikorapa va'e.

²⁵ Ha'e rami vy Israel kuery ojopypa amorreu kuery retã ikuai va'ekue, ha'e va'e py ju ikuai, Hesbom py ha'e ijyvyry tekoa'i ikuai va'e ha'e javi rupi.

²⁶ Mba'eta Hesbom tetã ma amorreu kuery ruvixa Seom openaaty ae. Ha'e va'e ma Moabe pygua ruvixa yma guare re opu'ã vy ijyvy ojopypa va'ekue Arnom yakã peve,

²⁷ ijayvu kuaa va'e kuery aipoe'ia rami:

“Peju ke Hesbom tetã py! Pejapo ju,

pemoatyryõmba ju Seom opena atyrã.

²⁸ Mba'eta Hesbom gui tata oẽ,

tataendy nhomombaarã oẽ Seom pegua tetã gui,

ha'e vy omomba Moabe kuery rekoa Ar,

ha'e Arnom vvyry vvy'ã re yvatekueve ikuai va'ekue ha'e javive.

²⁹ Moabe kuery, nda'evei ete 'rã pëvy!

Quemos pe pendekuai va'e, okanhygue ma peiko.

*

Mba'eta ojapo pendera'y kuery onhamba aguã rami,
ha'e penderajy kuery escravo-rã ogueraapa aguã rami,
amorreu kuery ruvixa Seom peguarã ae.

³⁰ Ore kuery ma roitypa ma.

Okanhymba ete Hesbom guive Dibom peve.
Rombovaipa ma Nofa peve,
tata py roapyapa Medeba peve.”

Deuteronomio 3.1-11

³¹ Ha'e rami vy amorreu kuery yvy re ju Israel kuery hekoa.

³² Ha'e va'e rire Jazer tetã re ju Moisés oexa pota uka ma ramo Israel kuery ipo'aka hekoa ijyvyry ikuai va'e ha'e javi reve, amorreu kuery ha'e py ikuai va'ekue oipe'apa vy.

³³ Ha'e gui ojevypa ju vy oje'oi Basã tetã katy tape oo va'e rupi. Ha'e ramo Basã pygua huvixa Ogue va'e ou ha'e kuery rovai, ojeuegua kuery ha'e javi reve. Ha'e vy joe opu'ã okuapy Edrei py.

³⁴ Ha'e gui SENHOR aipoe'i Moisés pe:

— Ekyje eme ha'e kuery gui, mba'eta xee amboaxa ma ndepo py, huvixa ha'e ixupegua kuery ha'e javi, ijyvy voi. Ha'e kuery re pejapo 'rã amorreu kuery ruvixa Seom Hesbom pygua re pejapoague rami ae — he'i.

³⁵ Ha'e ramo ojuka reta okuapy, huvixa, ta'y kuery ha'e ixupegua kuery ha'e javi. Ha'e kuery va'e regua nei pete'i ma voi ndoo jepei. Ijyvy re ipo'aka avi omba'erã.

22

Balaão-a py ayvu reraa kuery Balaque omondoukaague

¹ Israel kuery ha'e gui oje'oi pa vy opyta ju okuapy Moabe vvy rupi Jordão rovaigua re, Jericó tetã rexei.

² Ha'e gui ma Zipor ra'y Balaque oexapa va'ekue Israel kuery amorreu kuery re ojapoague.*

³ Ha'e rami vy ha'e kuery gui Moabe kuery okyje vaipa okuapy, heta raxa ramo. Nda'evei ete ikuai Israel kuery ou rã oexa vy.

⁴ Ha'e va'e jave ma Moabe pygua huvixa ma Zipor ra'y Balaque ae.

Ha'e rami vy Moabe pygua huvixa aipoe'i Midiã pygua kuery yvatekueve pe:

— Aỹ ma petei regua Egipto yvy gui ou vy ojao'ipa ma okuapy yvy ha'e javi. Ha'e kuery ma xerekoa renonde katy ae ju ikuai.

⁵ Ha'e rami vy guembiguai kuery omondouka Beor ra'y Balaão oenoí aguã. Ha'e va'e ma Eufates yakã yvyry oiko Petor py, hetarã kuery ikuai py ae. Ha'e va'e pe aipoe'i uka:

— Aỹ ma petei regua Egipto yvy gui ou vy ojao'ipa ma okuapy yvy ha'e javi. Ha'e kuery ma xerekoa renonde katy ae ju ikuai.

⁶ Ha'e gui aỹ ajerure ndevy: Eju na ha'e kuery re ndeayvu vai aguã, xegui ipo'akapave ramo. Xapy'a rei rã ha'e kuery va'e regua ajuka vy aipe'apa 'rã xeyvy gui, mba'eta xee aikuaa reroayvu porã va'ekue rei ayvu porãmy ae 'rã ikuai, ha'e amongue re ndeayvu vai rire ma ayvu vaipy 'rã oiko — he'i uka.

⁷ Ha'e ramo Moabe ha'e Midiã pygua yvatekueve oje'oi. Ngupive ogueraa avi ijayvu vaia omboekovia aguã. Balaão-a py ovaẽmba ma vy ixupe omombe'u okuapy Balaque ijayvuague ha'e javi.

⁸ Ha'e ramo Balaão aipoe'i ha'e kuery pe:

— Pepyta ke apy kova'e pyávuy, ha'e gui aikuaa uka 'rã ambovaia, SENHOR ijayvua rami vy ae — he'i ramo Balaão ro py Moabe pygua yvatekueve opyta okuapy.

⁹ Ha'e gui Balaão-a py Nhanderueete ojekuaa vy aipoe'i:

— Marã ramigua tu kova'e avakue ndero py ikuai va'e?

¹⁰ Balaão ombovai Nhanderueete pe:

— Ha'e kuery ma Zipor ra'y Balaque Moabe pygua huvixa va'e ombou va'ekue xereve ijayvu aguã. Ha'e vy aipoe'i xevy:

¹¹ “Egipto yvy gui ou va'ekue regua ojao'ipa ma okuapy yvy ha'e javi. Aỹ ma eju na ha'e kuery re ndeayvu vai aguã. Xapy'a rei ha'e kuery re xepo'aka nho 'rã xeyvy gui aipe'apa aguã rami”, he'i va'ekue xevy.

¹² Ha'e ramo Nhanderueete aipoe'i Balaão pe:

— Tereo eme ha'e kuery reve, ndeayvu vai eme guive heta va'e kuery re. Mba'eta ha'e kuery ma ijayvu porãmy ae ikuai — he'i.

¹³ Ha'e gui ko'ẽgue Balaão opu'ã vy aipoe'i Balaque pegua yvatekueve pe:

— Tapeo ju pendevvy katy, mba'eta SENHOR naxemondoukai penderupive — he'i.

¹⁴ Ha'e ramo Moabe pygua yvatekueve opu'ã vy oje'oi ju Balaque-a py. Ha'e vy aipoe'i okuapy:

— Balaão rima ndouxéi orereve — he'i okuapy.

¹⁵ Ha'e gui yvatekueve mboae ju Balaque omondouka, jypygua kuery gui hetave ha'e omboetepevy va'e.

¹⁶ Ha'e va'e kuery ma Balaão-a py ovaẽ vy aipoe'i okuapy:

— Po rami ma Zipor ra'y Balaque ijayvu: “Ajerure ndevy: Emboare eme xea py reju aguã,

¹⁷ mba'eta anhetẽ ete rojapo 'rã omboetepy. Ndeayvua ha'e javi tema 'rã ajapo. Ha'e gui ajerure ndevy: Eju ke, ndeayvu vai kova'e kuery re”, he'i uka va'ekue ndevy.

¹⁸ Ha'e ramo Balaque pegua yvatekueve pe Balaão ombovai:

* 22:2 Balaque ma Moabe pygua huvixave.

— Xevy pe Balaque ngoo prata ha'e ouro tynyê reve ome'êmba teĩ xee mba'eve ndajapoi 'rã SENHOR Xeruetete ojapo uka va'e e'ÿ vy, mba'emo kyri'i va'e e'ÿ vy tuvixa va'e teĩ.

¹⁹ Ha'e rami avi aÿ ajerure kova'e pyávy peê kuery pepyta aguã apy, aikuaa aguã xapy'a rei xevy SENHOR omombe'uve rã — he'i.

²⁰ Pyávy Balaão-a py SENHOR ojekuaa vy aipoe'i ixupe:

— Ha'e va'e avakue ndereraxxe vy ou ramo epu'ã, tereo ha'e kuery reve. Ha'e rami teĩ rejapo 'rã xeyvua anho.†

SENHOR-a guigua anjo ha'e Balaão rymba mburika'i ojoko-jokoague

²¹ Ko'êmba jave Balaão opu'ã vy ombokupe áryguapa guymba mburika'i, ha'e vy oo Moabe pygua yvatekueve reve.

²² Ha'e oo ramo Nhanderuetete poxya hendy. Ha'e rami vy SENHOR-a guigua anjo opyta tape henonde oo aguã py ojoko aguã. Ha'e rami jave Balaão oguata ovy mburika'i áry. Hexeve oo avi mokoĩ hembiguaĩ.

²³ Ha'e gui henda mburika'i oexa SENHOR-a guigua anjo tape py opyta ho'amy rã, opo py okyxe hyru gui oekyi va'ekue oguereko reve. Ha'e ramo mburika'i ma tape gui ojepekuavo ovy vy mba'ety rupi ju oo oiny. Ha'e ramo Balaão oinupã mburika'i tape rupi ae ju ojevuy aguã.

²⁴ Ha'e gui ma SENHOR-a guigua anjo ma peteĩ henda uvaty mbyte rupi hi'ái, kora jovaive rupi oĩ va'e py.

²⁵ Mburika'i ma SENHOR-a guigua anjo hi'ái rã oexa vy kora re ojekyty vy oumbiri heravy Balaão retyma. Ha'e ramo Balaão ojeaive ju.

²⁶ Ha'e gui henonde katy SENHOR-a guigua anjo oove vy peteĩ henda ipo'i'ivea py ju hi'ái, ojepekuavo aguã ha'eve'ÿa py oiporu kuaa katy, neĩ oiporu kuaa e'ÿa katy ma voi.

²⁷ Ha'e gui mburika'i ma SENHOR-a guigua anjo hi'ái rã oexa vy ho'a oupy Balaão guy rupi. Ha'e ramo Balaão ivai ete vy oinupãmba mburika'i jvyra py.

²⁸ Ha'e ramo SENHOR ojapo mburika'i ijayvu aguã rami. Ha'e vy aipoe'i Balaão pe:

— Mba'e tu xee ajapo ndeivy, mboapykue ma xenupãmba aguã?

²⁹ Balaão ombovai mburika'i pe:

— Mba'eta xevyky rei. Xepo py kyxe areko va'e rire aÿ'i ma voi rojuka 'rãgue — he'i.

³⁰ Ha'e ramo mburika'i ijayvu Balaão pe:

— Xapy'a rei nda'u xee nerymba mburika'i e'ÿ ri aiko, xe'áry e'ÿ nda'u reĩ, reikoa pukukue re aÿ peve? Xapy'a rei nda'u nami ae pa ndevy ajapo jepi?

Ombovai vy

— Any ri — he'i.

³¹ Ha'e gui Balaão rexa SENHOR oiipe'a ramo oexa SENHOR-a guigua anjo tape py hi'ái rã, kyxe hyru gui oekyi va'ekue opo py oguereko reve. Ha'e ramo oakã omboguejy vy ngova omovaê jvy re.

³² SENHOR-a guigua anjo aipoe'i ixupe:

— Mba'e re tu mboapykue ma xenupãmba mburika'i? Ne'exa, xee ma nderovai guarã aju, mba'eta xerenonde rupi ha'eve'ÿa rami reiko.

³³ Mburika'i ma xerexa vy ae mboapykue ma ojepekuavo xegui. Anhetê ete ha'e rami e'ÿ va'e rire xee rojuka ma 'rãgue, ha'e rã nerymba ma aeja 'rãgue oikove reve — he'i.

³⁴ SENHOR-a guigua anjo pe Balaão ombovai:

— Ajevavy, mba'eta ndaikuuai kova'e tape py xejokoarã ne'aia. Ha'e rã xapy'a rei rã ha'eve'ÿ va'e ri reikuaa ramo ma ajevuy ju 'rã.

³⁵ SENHOR-a guigua anjo ombovai:

— Tereo tema peva'e avakue reve. Ha'e rami teĩ xeyvua rami anho 'rã ndeayvu — he'i ramo Balaão oo ju oiny Balaque pegua yvatekueve reve.

³⁶ Ha'e gui Balaão ovaê ta maa Balaque oendu vy oê ovaexĩ aguã peteĩ tetã Moabe regua Arnom yakã ovaêa peve, ovyvy apy peve ete.

³⁷ Ha'e rami vy Balaque oporandu Balaão pe:

— Xee namondoukai ri ty'y xerembiguaĩ kuery nerenoĩ aguã? Mba'e re tu ndereju voi ri xea py? Xee nda'u nanemboete kuaai ri?

³⁸ Balaão ombovai Balaque pe:

— Apy ma xee aĩ nerenonde py. Xapy'a rei nda'u xee ju aÿ ha'eve 'rã xeyvu aguã mba'emo re rei? Ha'e rami 'rãgue py ayvu Nhanderuetete xevy omombe'u uka va'e rupi anho 'rã xeyvu — he'i.

³⁹ Ha'e gui Balaque reve Balaão oo vy ovaê okuapy Quiriate-Huzote py.

⁴⁰ Ha'e ramo Balaque ma vaka ha'e vexa'i ojuka uka vy ho'okue omondouka Balaão pe ha'e hexeve yvatekueve ikuai va'e pe.

⁴¹ Ko'êgue Balaque Balaão ogueraa vy oguenoê heravy Bamote-Baal apyte peve. Ha'e va'e gui ma Balaão oexa Israel kuery regua ha'e'i pyve ikuai.

Balaão jypy'i Israel kuery ogueroayvu porãague

¹ Ha'e ramo Balaão aipoe'i Balaque pe:

† 22:20 Nhanderuetete nomondoukaxei teĩ omondouka nho, mba'eta oikuaa vy Balaão ooxe etea (versículo 12). Ha'e gui Balaão ma oikuaa ma voi Nhanderuetete nomondoukaxeia, teĩ oo nho Nhanderuetete oipotaa rami e'ÿ.

— Ejapo na sete altar xevy, ha'e vy ejuka sete toro ra'y ha'e sete vexa'i — he'i ramo

² Balaque ojapo Balaão ijayvuague. Petei-teĩ altar áry Balaque ha'e Balaão oapy peteĩ toro ra'y ha'e peteĩ vexa'i.

³ Ha'e gui Balaão aipoe'ive ju Balaque pe:

— Ndee ma epyta apy altar áry reapy va'ekue yvýry, ha'e rã xee ma aa 'rã mombury'i. Xapy'a rei SENHOR xereroaxeĩ vy ou ramo maaju vy ndevy amombe'upa 'rã oexa uka va'e rei — he'i vy oẽ ovy peteĩ yvyty áry.

⁴ Ha'e gui Balaão reve Nhanderuete nhovaexĩ ouvy ramo aipoe'i ixupe:

— Xee ma sete altar ma ajapo ndevy, ha'e gui peteĩ-teĩ áry apy ma peteĩ toro ra'y ha'e peteĩ vexa'i — he'i.

⁵ Ha'e ramo SENHOR ome'ẽ ayvu Balaão omombe'u va'erã. Ha'e vy aipoe'i:

— Tereo ju Balaque-a py. Ha'e vy xeayvua rami ae 'rã ndeayvu — he'i.

⁶ Ha'e katy ju Balaão oo vy altar ikuai py ovaẽ rã altar yvýry teri Balaque hi'aĩ, Moabe pygua yvatekueve ha'e javi reve.

⁷ Ha'e ramo ayvu omombe'u vy aipoe'i:

— Balaque ma xereru ruka Arã gui,

Moabe pygua huvixa xerenoĩ kuaray ou katy yvyty oĩ va'e gui.

“Eju na, Jacó ramymino kuery re ndeayvu vai aguã,

eju ndeayvu rei Israel kuery re”, he'i uka.

⁸ Ha'e rami avi mba'exa tu xeayvu vai ta Nhanderuete nda'ijayvu vaia kuery re?

Mba'exa tu xeayvu rei ta SENHOR nda'ijayvu reia kuery re?

⁹ Mba'eta xee ma yvyty áry gui aexa Israel kuery,

yvy'ã xe'aĩa gui ama'ẽ ha'amy ha'e kuery re.

Ha'e vy xee aexa rã ha'e kuery ae'i ikuai va'e regua,

ha'e kuery pe “Yvy regua” nda'eai 'rã.

¹⁰ Mava'e ha'vy oipapa kuaa ta Jacó ramymino kuery yvy ku'i rami heta va'e,

mava'e oipapa kuaa ta Israel kuery heta va'e apy re'i voi?

Xee ma tamano heko porã va'e kuery rami,

ha'e kuery opaa rami avi tapa — he'i.

¹¹ Ha'e ramo Balaque aipoe'i Balaão pe:

— Mba'e tu rejapo xere? Xee ma roenoĩ xerovaigua kuery re ndeayvu vai aguã, va'eri ndee ma roerayvu porã.

¹² Ha'e rã ombovai:

— Xapy'a rei nda'u ayvu SENHOR omombe'u uka va'ekue rupi e'y 'rã ri xeayvu? — he'i.

Balaão mokoigua Israel kuery ogueroayvu porãague

¹³ Ha'e ramo Balaque aipoe'i ixupe:

— Xee ajerure ndevy: Eju, amboae katy ju jaa xerupive, ha'e kuery rexa aguã py. Ha'e'i rupive ikuai va'e anho 'rã rexa, ha'e javi e'y. Ha'e vy ndeayvu vai 'rã ha'e gui — he'i vy

¹⁴ Zofim regua nhuũndy rupi ju ogueraa, Písga yvyty apyte áry. Ha'e py ma sete altar ju ojapo, ha'e peteĩ-teĩ áry oapy peteĩ toro ra'y ha'e peteĩ vexa'i.

¹⁵ Ha'e ramo Balaão aipoe'i Balaque pe:

— Epyta ke apy altar áry reapy va'ekue yvýry, ha'e rã xee ma aa ta pe'i py SENHOR reve aikuaa pota aguã — he'i.

¹⁶ Balaão-a py SENHOR ojekuaa ju vy ixupe ome'ẽ ayvu omombe'u va'erã. Ha'e vy aipoe'i:

— Tereo ju Balaque-a py. Xeayvua rami 'rã ndeayvu.

¹⁷ Ha'e gui Balaque oĩa py ojevy rã ho'ame teri altar yvýry. Hexeve ikuai avi Moabe pygua yvatekueve.

Ha'e vy oporandu:

— Mba'e he'i SENHOR?

¹⁸ Ha'e ramo Balaão ayvu omombe'u vy aipoe'i:

— Epu'ã ke Balaque, rendu aguã.

Ndee Zipor ra'y, ejapyxaka xeayvu re.

¹⁹ Nhanderuete ma ava e'y oiko ijapu aguã,

ava ra'y e'y guive oiko nda'evei nho ju aguã.

Xapy'a rei nda'u ha'e nome'ei 'rã ri ome'ẽ 'rã va'ekue?

Ha'e ijayvu rire ndojapo 'rã ri nda'u ha'e rami he'iague?

²⁰ Ma'ẽ, ha'e ijayvu ha'e kuery aroyvu porã aguã re.

Ha'e gui ha'e ogueroayvu porãague ma xee nda'evei amboaxa rive aguã.

²¹ Mba'eta Jacó kuery re ha'e ndoexai mba'emo vai,

nonhembopy'ai guive Israel kuery omoingo axy aguã.

Ha'e kuery reve SENHOR tuete oiko,

ha'e kuery mbyte gui onhendu nguvixave oguerovy'a okuapya regua.

²² Egito yvy gui Nhanderuete ogueraapa raka'e,

ha'e kuery ma toro ka'aguy regua rami 'rã imbaraete.

²³ Mba'eta Jacó kuery rovai rupi mba'evykya nda'eve ranhei 'rã,

Israel kuery rovai mba'ekuaa ndovarei 'rã.

Aỹ ma Jacó ha'e Israel kuery re aipo'ea 'rã:

- “Mba'emo iporã ete va'e ha'e kuery pe Nhanderuete ojapo!”
- ²⁴ Ma'ê, ha'e kuery opu'ã 'rã guary kunha rami,
guary rami ete 'rã opu'ã.
Mba'eta nonhenoi 'rã guembia ho'upa e'ÿa ja,
ojuka va'ekue ruguy voi oy'u va'e — he'i.
- ²⁵ Ha'e ramo Balaque aipoe'i Balaão pe:
— Ndeayvu vai eme ha'e kuery re, neĩ eroayvu porã eme guive.
- ²⁶ Ha'e rã Balaão ombovai vy aipoe'i Balaque pe:
— Aipo nda'ei ri ty'y: “ SENHOR ijayvua ha'e javi ma xee ajapo 'rãe”, nda'ei ae ty'y ndevy?
- ²⁷ Ha'e rami rã Balaque aipoe'ive ju Balaão pe:
— Neĩ ke eju, amboae katy jevy ta rogueraa. Xapy'a rei ma ha'e py Nhanderuete ojapo porã 'rã ndeayvu vai aguã — he'i.
- ²⁸ Ha'e rami vy Peor vyvity apyte peve ju Balaque ogueraa Balaão. Ha'e va'e gui ma tekoe e'ÿa ha'e javi ojekuaa 'rã.
- ²⁹ Ha'e gui Balaão aipoe'i Balaque pe:
— Apy voi ke ejapo xevy sete altar, ha'e eapy ju sete toro ra'y ha'e sete vexa'i — he'i.
- ³⁰ Balaão ijayvuague rami vy Balaque ojapo vy peteĩ-teĩ altar áry oapy peteĩ toro ra'y ha'e peteĩ vexa'i.

24

Balaão mboapykuea Israel kuery ogueroayvu porãague

- ¹ Ha'e gui Balaão oikuaa ae ma SENHOR Israel kuery ogueroayvu porãxea. Ha'e rami vy ha'ekue rami e'ÿ ndooi ranhe imba'ekuaa aguã. Ha'e rami 'rãgue py tekoe e'ÿa katy oma'ê ho'amý.
- ² Balaão oma'ê vy oexa Israel kuery peteĩ-teĩ regua ikuai va'e. Ha'e gui hexe ou Nhanderuete-a guigua Nhe'ê.
- ³ Ijayvu vy aipoe'i:
— Po rami ma Beor ra'y Balaão ijayvu,
ava mba'emo oexa porã va'e ayvu,
- ⁴ Nhanderuete hayvu oendu va'e ayvu ae.
Mba'eta Ipo'akapa va'e oexa uka va'e aexa vy xerenapy'ã re aĩ reve ama'ê porã va'e.
- ⁵ Jacó kuery, oo pendekuaia va'e ma iporã va'e memel!
Israel kuery, penderekoa ma iporã etel!
- ⁶ Yvy'ãmbe reia rupi ojekuaa,
yvoty ty yakã yvýry onhotÿ mbyre rami,
yvya sândalo rembypy SENHOR onhotÿ va'ekue rami,
yary yy yvýry rupi hi'aĩ va'e rami.
- ⁷ Ha'e kuery yryru py ndoatai 'rã yy,
mba'emo ra'yĩ onhotÿa rupi voi inhakÿ porã riae 'rã.
Ha'e kuery ruxixave ma Agague gui 'rã yvateve,
ipo'akaa voi omboetevepy.
- ⁸ Israel kuery Egitó yvy gui Nhanderuete ogueru va'ekue ma toro ka'aguy regua rami imbarae va'e.
Ha'e vy omomba 'rã ngovaigua kuery yvy regua.
Ompêmba 'rã ikãgue.
Ngu'y py onhyvõmba 'rã.
- ⁹ Ha'e kuery oguapy vy onhenoi 'rã guary rami,
ha'e guary kunha rami. Mava'e 'rã tu omomyĩ?
Ovy'a ete 'rã ha'e kuery reroayvu porãare,
ha'e rã ha'e kuery re ijayvu vai va'ekue ma ayvu vaipy ikuai — he'i.
- ¹⁰ Ha'e ramo Balaão pe Balaque ipoxy raxa. Ha'e vy aipoe'i Balaão pe:
— Xee ma xerovaigua kuery pe ndeayvu vai aguã roenoĩ teĩ mboapykue ma reroayvu porã.
- ¹¹ Ha'e nunga rupi aÿ ma tereo ju ndero katy. Xee ma “Ndevy ame'ê 'rã mba'emo porã” ha'e va'ekue ri aÿ SENHOR ojapo ma mba'eve rejopy e'ÿ aguã rami — he'i.
- ¹² Ha'e ramo Balaão ju aipoe'i Balaque pe:
— Ha'e rami avi nerembiguai kuery xea py remondouka va'ekue pe xee aipo nda'ei ty'y:
- ¹³ “Xapy'a rei Balaque ngoo ouro ha'e prata tynyê reve xevy ome'ê teĩ xee ma mba'eve ndajapoi 'rã SENHOR ojapo uka va'e e'ÿ vy, aroayvu porã aguã, e'ÿ vy xeayvu vai aguã teĩ. SENHOR ijayvuague rupi ae 'rã xee xeayvu”, nda'ei ae ri ty'y?
- ¹⁴ Ha'e gui aÿ xee aa ju ta xeretarã kuery rekoa katy. Ha'e rami teĩ enhemboja ranhe, ndevy amombe'u ta raka'eve rã ndevygu kuery re kova'e kuery ojapo 'rãa — he'i.

Jaxy-tata Jacó guigua re Balaão ijayvu ma voiague

- ¹⁵ Ha'e vy Balaão ayvu omombe'u vy aipoe'i:
— Po rami ma Beor ra'y Balaão ijayvu,
ava mba'emo oexa porã va'e ayvu,

- ¹⁶ Nhanderuete hayvu oendu va'e ayvu ae.
Mba'eta Yvateve ete va'e oikuaa uka va'e aikuaa va'e,
Ipo'akapa va'e oexa uka va'e aexa va'e,
ha'e xerenapy'ã re aĩ reve ama'ẽ porã va'e.
- ¹⁷ Ha'e gui peteĩ aexa teĩ aỹ'i oiko va'erã e'ỹ guive,
aexa teĩ ovaẽ rai'i va'erã e'ỹ.
Mba'eta peteĩ jaxy-tata oiko 'rã Jacó ramymino,
Israel kuery mbyte gui peteĩ ou 'rã po pygua revegua,
Moabe kuery akã rupi omopẽmba va'erã,
ha'e Sete ramymino kuery mombaarã.
- ¹⁸ Mba'eta Edom yvy re ipo'aka 'rã,
ngovaigua kuery Seir yvy re voi ipo'aka 'rã.
Ha'e rã Israel kuery ma imbaraetea rupi 'rã ikuai.
- ¹⁹ Mba'eta Jacó kuery mbyte gui oiko 'rã joe ipo'aka va'erã.
Ha'e va'e omomba 'rã peneretã rupi pekuave va'ekue-'ekue — he'i.
- ²⁰ Ha'e gui Balaão amalequita kuery ju oexa vy ayvu omombe'uve. Ha'e vy aipoe'i:
— Amalequita kuery ma yvy regua kuery gui penderetave va'eri
opaa py ma penemokanhymbaa 'rã — he'i.
- ²¹ Oexa avi Queneu kuery. Ha'e vy ayvu omombe'u vy aipoe'i:
— Penderekoa ma oĩ porã ranhe,
nderaityrã itaova re rejapo va'ekue ri,
- ²² teĩ peẽ Queneu kuery penemombaa 'rã.
Raka'e peve 'rã tu? Assur pygua kuery pendereraapa 'rã escravo-rã — he'i.
- ²³ Ayvu omombe'u teri vy aipoe'i:
— Haxy ete 'rã! Mava'e tu oikove 'rã
Nhanderuete ha'e nunga omoingo jave?
- ²⁴ Mba'eta Quitim yvy gui kanoã guaxu py avakue ou vy
Assur ha'e Héber rupi voi nhombojexavai 'rã.
Ha'e rami teĩ ha'e kuery ae jevy 'rã omanomba — he'i.
- ²⁵ Ha'e rire Balaão opu'ã vy ojepe'a ovy, ovyvy katy ju ojevy. Balaque voi oo ju ouague rupi.

25

Peor pygua kuery ruete ramigua Baal ombojerovia okuapya py Finéias omombaague

- ¹ Israel kuery Sitim py ikuai jave ha'e kuery omboypy Moabe pygua kunhague reve itavy rei okuapy aguã.
- ² Ha'e va'e kunhague oenoimba nguete ra'angaa kuery pe rive mba'emo ome'ea py. Ha'e ramo Israel kuery amboae kuery reve okaru okuapy aguã oo vy kunhague ruete ra'angaa kuery renonde py rive 'rã guenapy'ã re ikuai.
- ³ Peor pygua kuery ruete ramigua Baal re Israel kuery voi oje'oi ramo SENHOR poxya hendy ha'e kuery rovai.
- ⁴ Ha'e rami vy SENHOR aipoe'i Moisés pe:
— Ejopypa ke heta va'e kuery ruvixa ikuai va'e, ha'e vy SENHOR renonde ejyryvipypa imo'amy oka py,
Israel kuerya gui xepoxya ojepe'a aguã — he'i.
- ⁵ Ha'e ramo Moisés aipoe'i Israel kuery mongetaa kuery pe:
— Peteĩ-teĩ pejuka 'rã penderegua avakue Peor pygua ruete Baal re oje'oi va'ekue — he'i.
- ⁶ Ha'e rami teĩ peteĩ ava Israel kuery va'e regua oo vy heta va'e kuery ikuai py ogueru peteĩ kunha Midiã pygua. Moisés oexaa py eteve ogueru, ha'e Israel kuery ha'e javi oexa pavã py, ha'e kuery oguy nhemboaty oĩaty renonde py ojae'opa teri okuapy jave.
- ⁷ Kunha va'e ogueru rã sacerdote Finéias oexa. Ha'e va'e ma Eleazar ra'y, Arão ramymino ae. Ha'e rami vy heta va'e kuery mbyte gui ha'e opu'ã vy peteĩ hu'y ojopy reve
- ⁸ oo oiny ava Israel regua rakykue, ngopy oikoe ovyague peve. Ha'e py ae onhyvõ mokoive hyepy rupi, ava Israel regua ha'e kunha va'e voi. Ha'e ramo opytu'u mba'emo vai Israel kuery mbyte rupi oiko va'ekue.
- ⁹ Mba'emo vai gui omano va'ekue ma vinte e quatro mil ha'e javi vy.
- ¹⁰ Ha'e gui SENHOR aipoe'i Moisés pe:
¹¹ — Eleazar ra'y Finéias, sacerdote Arão ramymino va'e rima ojapo Israel kuery áry gui xepoxya opytu'u aguã rami. Mba'eta xere vy ae oendu nda'evei etea ha'e kuery mbyte rupi. Ha'e rami vy ojapo Israel kuery amomba e'ỹ aguã rami, nda'evei etea aendu teĩ.
- ¹² Ha'e nunga rupi aipo're 'rã: "Aỹ ma ndereve ajapo 'rã xereve peteĩ rami romoingo aguã" 're,
- ¹³ mba'eta hexeve, ha'e gui ha'e ndoikovei rire hamymino kuery jevy ikuai va'e reve ajapo 'rã sacerdote ikuai aguã. Xee nguete re ima'endu'a vy ae oendu openaxea, ha'e rami vy ojao'i uka Israel kuery ojevavyague — he'i.
- ¹⁴ Midiã pygua kunha reve Israel regua ojuka pyre ma Salu ra'y Zimri. Tuu ma Simeão regua kuery ruvixa.
- ¹⁵ Ha'e rã Midiã pygua kunha ojuka pyre ma Zur rajy Cosbi. Tuu ma Midiã pygua huvixa oiko.
- ¹⁶ Ha'e gui SENHOR aipoe'ive ju Moisés pe:
¹⁷ — Pemoingo axy 'rã Midiã pygua kuery pejukapa peve,

18 mba'eta ha'e kuery voi penemoingo axy va'ekue Peor py nguete ramigua pembojerovia aguã rami penembotavypaa py, ha'e gui gueindy Midíã pygua huvixa rajy Cosbi káuxa voi. Ha'e va'e ma ojukaa Peor py mba'emo vai oiko jave.

26

Israel kuery oipapaa jevyague

¹ Mba'emo vai oaxapa ma rire SENHOR ijayvu Moisés pe, ha'e sacerdote Arão ra'y Eleazar pe. Ha'e vy aipoe'i:

² — Pemboparapa ke Israel kuery ha'e javi rery, vinte ma'etý va'e guive tujakue peve, peteĩ-teĩ tamof kuery ro pygua ikuaia rami vy. Israel kuery va'e regua pemboparapa 'rã joe opu'ã kuaa va'e ha'e javi — he'i.

³ Ha'e ramo Moisés ha'e sacerdote Eleazar ijayvu Israel kuery yvatekueve pe. Moabe yvy ka'aguy e'ya py, Jordão yakã vyry Jericó tetã rexei ikuaia py ijayvu vy aipoe'i:

⁴ — Peipapa 'rã avakue vinte ma'etý va'e guive tujakue peve, Moisés pe SENHOR ojapo ukaague rami vy, ha'e Israel kuery Egito gui oje'oi va'ekue ha'e javi pe — he'i.

⁵ Ha'e gui Rúben ma Israel ra'y jypykue va'e. Rúben ramymino kuery Enoque guigua ma enoquita, Palu ramymino kuery ma paluíta,

⁶ Hezrom ramymino kuery ma hezronita, Carmi ramymino kuery ma carmita.

⁷ Ha'e va'e kuery ma Rúben ramymino meme. Ha'e kuery va'e regua oipapaa rã quarenta e três mil e setecentos e trinta ha'e javi vy.

⁸ Palu ra'y ma Eliabe.

⁹ Eliabe ra'y kuery ma Nemuel, Datã ha'e Abirão. Ha'e gui Datã ha'e Abirão ma heta va'e kuery oiporavo va'ekue ri opu'ã okuapy Moisés ha'e Arão rovai Coré pegua kuery reve, SENHOR rovai ae opu'ãa py.

¹⁰ Ha'e va'e jave py yvy ojepe'a ramo Coré pegua kuery ho'apa raka'e. Ha'e vy omanomba. Tata py ju duzentos e cinqüenta avakue omano raka'e. Ha'e nungakue ma nhanheangu aguã oiko raka'e.

¹¹ Ha'e rami teĩ Coré ra'y kuery ma nomanombai.

¹² Ha'e gui Simeão ramymino kuery peteĩ-teĩ regua ikuai va'e ma po rami hery: Nemuel ramymino kuery ma nemuelita, Jamim ramymino kuery ma jaminita, Jaquim ramymino kuery ma jaquinita,

¹³ Zerá ramymino kuery ma zeraíta, Saul ramymino kuery ma saulita.

¹⁴ Ha'e va'e kuery ma Simeão ramymino meme, vinte e dois mil e duzentos ha'e javi vy ikuai.

¹⁵ Ha'e gui Gade ramymino kuery ju. Zefom ramymino kuery ma zefonita, Hagi ramymino kuery ma hagita, Suni ramymino kuery ma sunita,

¹⁶ Ozni ramymino kuery ma oznita, Eri ramymino kuery ma erita,

¹⁷ Arodi ramymino kuery ma arodita, Areli ramymino kuery ma arelita.

¹⁸ Ha'e va'e kuery ma Gade ramymino kuery meme. Ha'e kuery va'e regua oipapaa rã quarenta mil e quinhentos ha'e javi vy.

¹⁹ Ha'e gui Judá ramymino kuery ma Er ha'e Onã. Ha'e va'e kuery ma Canaã yvy re omano va'ekue.

²⁰ Ha'e rami vy Judá ramymino kuery peteĩ-teĩ regua ikuai va'e ma po rami hery: Selá ramymino kuery ma selaíta, Perez ramymino kuery ma perezita, Zera ramymino kuery ma zeraíta,

²¹ Perez ra'y Hezrom ramymino kuery ma hezronita, ha'e rã Hamul ramymino kuery ma hamulita.

²² Ha'e va'e kuery ma Judá ramymino kuery meme. Ha'e kuery va'e regua oipapaa rã setenta e seis mil e quinhentos ha'e javi vy.

²³ Ha'e gui Issacar ra'y kuery ju peteĩ-teĩ regua ikuai va'e ma po rami hery: Tola ramymino kuery ma tolaíta, Puva ramymino kuery ma puvita,

²⁴ Jasube ramymino kuery ma jasubita, Sinrom ramymino kuery ma sinronita.

²⁵ Ha'e va'e kuery ma Issacar ramymino kuery meme. Ha'e va'e kuery oipapaa rã sessenta e quatro mil e trezentos ha'e javi vy.

²⁶ Ha'e gui Zebulom ra'y kuery ju peteĩ-teĩ regua ikuai va'e ma po rami hery: Serede ramymino kuery ma seredita, Elom ramymino kuery ma elonita, Jaleel ramymino kuery ma jaleelita.

²⁷ Ha'e va'e kuery ma Zebulom ramymino kuery meme. Ha'e kuery va'e regua oipapaa rã sessenta mil e quinhentos ha'e javi vy.

²⁸ Ha'e gui José ra'y kuery ju peteĩ-teĩ regua ma Manassés ha'e Efraim.

²⁹ Manassés ramymino kuery Maquir guigua ma maquirita, Maquir ra'y ma Gileade, ha'e Gileade ramymino kuery ma gileadita.

³⁰ Ha'e gui Gileade ramymino kuery Jezer ramymino kuery ma jezerita, Heleque ramymino kuery ma helequita,

³¹ Asriel ramymino kuery ma asrielita, Siquém ramymino kuery ma siquemita,

³² Semida ramymino kuery ma semidaíta, Hefer ramymino kuery ma heferita.

³³ Hefer ra'y Zelofeade ma ta'y e'y va'e, taji kuery anho ikuai. Zelofeade rajy kuery ma Macla, Noa, Hogla, Milca e Tirza.

³⁴ Ha'e va'e kuery ma Manassés ramymino kuery. Ha'e kuery va'e regua oipapaa rã cinqüenta e dois mil e setecentos ha'e javi vy.

³⁵ Ha'e gui Efraim ra'y kuery peteĩ-teĩ ikuai va'e ma po rami hery: Sutela ramymino kuery ma sutelaíta, Bequer ramymino kuery ma bequerita, Taã ramymino kuery ma taanita.

³⁶ Ha'e gui Sutela ra'y Erã va'e ramymino kuery ma eranita ae.

³⁷ Ha'e va'e kuery ma Efraim ramymino kuery meme. Ha'e kuery va'e regua oipapaa rã trinta e dois mil e quinhentos ha'e javi vy. Ha'e va'e kuery ma José ramymino kuery meme, peteĩ-teĩ regua ikuaiami rami.

³⁸ Ha'e gui Benjamim ramymino kuery peteĩ-teĩ regua ikuai va'e ma po rami hery: Bela ramymino kuery ma belaíta, Asbel ramymino kuery ma asbelita, Airão ramymino kuery ma airamita,

³⁹ Sufã ramymino kuery ma sufamita, Hufã ramymino kuery ma hufamita.

⁴⁰ Bela ra'y kuery ma Arde ha'e Naamã. Arde ramymino kuery ma ardita, Naamã ramymino kuery ma naamanita.

⁴¹ Ha'e va'e kuery ma Benjamim ramymino kuery meme. Ha'e kuery va'e regua oipapaa rã quarenta e cinco mil e seiscientos ha'e javi vy.

⁴² Ha'e gui Dã ramymino kuery peteĩ-teĩ regua ikuai va'e ma po rami hery: Suão ramymino kuery ma suamita. Ha'e va'e kuery ma Dã ramymino kuery kuery, peteĩ-teĩ regua ikuaiami rami.

⁴³ Ha'e gui suamita kuery va'e regua ma oipapaa rã sessenta e quatro mil e quatrocentos ha'e javi vy.

⁴⁴ Ha'e gui Aser ra'y kuery ju peteĩ-teĩ regua ikuai va'e ma po rami hery. Imna ramymino kuery ma imnaíta, Isvi ramymino kuery ma isvita, Berias ramymino kuery ma beriaíta.

⁴⁵ Berias ra'y Héber ramymino kuery ma heberita, ha'e rã Malquiel ramymino kuery ma malquielita.

⁴⁶ Ha'e gui Aser rajy rery ma Sera.

⁴⁷ Ha'e va'e kuery ma Aser ramymino kuery meme. Ha'e kuery va'e regua oipapaa rã cinqüenta e três mil e quatrocentos ha'e javi vy.

⁴⁸ Ha'e gui Naftali ra'y kuery peteĩ-teĩ regua ikuai va'e ma po rami: Jazeel ramymino kuery ma jazeelita, Guni ramymino kuery ma gunita,

⁴⁹ Jezer ramymino kuery ma jezerita, Silém ramymino kuery ma silemita.

⁵⁰ Ha'e va'e kuery ma Naftali ramymino kuery meme. Ha'e kuery va'e regua oipapaa rã quarenta e cinco mil e quatrocentos ha'e javi vy.

⁵¹ Ha'e va'e kuery ma Israel kuery va'e regua oipapaa rã seiscentos e um mil setecentos e trinta ha'e javi vy.

Ha'e kuery yvyrã omboja'o-ja'o aguã re ijayvua

⁵² SENHOR aipoe'i Moisés pe:

⁵³ — Ha'e kuery pe ma remboja'o 'rã yvy imba'erã, peipapa rã peteĩ-teĩ regua mbovy pa ikuaiami rami vy.

⁵⁴ Ha'e gui hetave va'e regua pe ma yvy tuvixave 'rã pemboaxa. Ha'e rã mboapy'ive va'e regua pe ma ruxãve'i 'rã remboaxa. Peteĩ-teĩ regua mbovy pa ikuaiami rami vy 'rã remboaxa ijyvyrã.

⁵⁵ Yvy pemboja'o 'rã xorte pexa vy. Tamoi kuery regua rery pexaa rami vy ha'e kuery ojopy 'rã ovyvrã.

⁵⁶ Xorte pexa vy 'rãe pemboja'opa peteĩ-teĩ regua pe, hetave va'e pe, ha'e mboapy'ive va'e pe voi.

Levita kuery ju oipapaa ague

⁵⁷ Pova'e kuery ma levita kuery va'e regua oipapa pyre, peteĩ-teĩ regua ikuaiami rami: Géron ramymino kuery ma gersonita, Coate ramymino kuery ma coatita, Merari ramymino kuery ma merarita.

⁵⁸ Pova'e kuery voi ma Levi ramymino kuery ikuai: libnita, hebronita, malita, musita ha'e coreíta kuery regua. Coate ra'y ma Anrã.

⁵⁹ Anrã ra'yxy ma Levi ramymino Joquebede, Egito yvy re ae oiko va'ekue. Ha'e va'e ma oguereko'i Anrã ra'y kuery Arão ha'e Moisés, ha'e gui ha'e kuery reindy Miriã.

⁶⁰ Arão ra'y kuery ma Nadabe, Abiú, Eleazar ha'e Itamar.

⁶¹ Nadabe ha'e Abiú ma omano va'ekue, tata ha'eve'ya ramigua SENHOR renonde py ogueruague re.

⁶² Ha'e va'e kuery regua oipapaa rã vinte e três mil, avakue peteĩ jaxy va'e guive tujakue peve. Ha'e va'e kuery ma Israel kuery mboae reve ndoipapaai, mba'eta ha'e kuery pe ma nome'ëai ijyvyrã amboae kuery reve.

⁶³ Ha'e va'e kuery ha'e javi ma Moisés ha'e sacerdote Eleazar oipapa va'ekue. Moabe yvy ka'aguy e'ya py oipapa Israel kuery, Jordão yakã yv'yry, Jericó tetã rexei ikuai jave.

⁶⁴ Ha'e va'e kuery regua peteĩve ma voi jipovei Moisés ha'e sacerdote Arão oipapa py va'ekue, Sinai regua tekoa e'ya py Israel kuery ikuai jave,

⁶⁵ SENHOR "Ha'e kuery omanomba 'rã tekoa e'ya py" he'i rire. Ha'e rami rire peteĩve ma voi ndoikevi, Jefoné ra'y Calebe e'y vy, ha'e gui Num ra'y Josué guive.

27

Zelofeade rajy kuery ovyvrã ojopy aguã re ijayvua

¹ Ha'e gui ou okuapy Zelofeade rajy kuery. Zelofeade ma Hefer ra'y, Hefer ma Gileade ra'y, Gileade ma Maquir ra'y, Maquir ma Manassés ra'y, Manassés ma José ra'y. Po rami ma tajy kuery rery: Macla, Noa, Hogla, Milca ha'e Tirza.

² Ha'e gui ha'e va'e kuery ma Moisés renonde py ojexa uka okuapy, sacerdote Eleazar, huvixa kuery ha'e heta va'e kuery renonde py, oguy nhemboaty oiáty rokẽ py onhemboaty py. Ha'e vy aipoe'i okuapy:

³ — Ore kuery ru ma omano karamboae tekoa e'ya py teĩ SENHOR rovai Coré pegua kuery opu'ã okuapy va'e revegua e'y. Ha'e ae ojeyavyague re omano raka'e. Ta'y e'y re guive omano.

⁴ Mba'e re tu ha'vy oreru rery pembogue ta ri hetarã kuery mbyte gui, ta'y kuery nda'ipoia káuxa rive? Eme'ë avi na oreyvyrã, oreru ryvy kuery oguerekoa rami avi — he'i okuapy.

⁵ Ha'e va'e kunhague ojerurea Moisés omboaxa SENHOR renonde py.

⁶ Ha'e ramo SENHOR aipoe'i Moisés pe:

⁷ — Zelofeade rajy kuery ma ha'evea rupi meme ojerure. Ha'e nunga rupi ha'e kuery pe voi peme'ê 'rã ijyvyrã, tuu ryvy kuery pe rami avi. Tajy kuery pe 'rã peme'ê tuu vvykue.

⁸ Ndeayvu 'rã Israel kuery pe. Ha'e vy aipo're: “Amongue ta'y e'y' re omano ri ramo imba'ekue peme'ê 'rã tajy pe ae.

⁹ Ha'e rã tajy ndoikoi ramo imba'ekue peme'ê 'rã tyvykue pe.

¹⁰ Ha'e rã tyvy kuery ndoikoi ri ramo imba'ekue peme'ê 'rã tuu ryvy kuery pe.

¹¹ Ha'e rã guvyvy kuery ndoguerekali ri ramo imba'ekue peme'ê 'rã penetarã kuery ae'ive pe imba'erã”, 're 'rã — he'i.

Ha'e va'e ma Israel kuery rekorã SENHOR oeja va'ekue, Moisés pe ojapo ukaague rami vy.

Deuteronomio 3.23-29

¹² Ha'e va'e rire SENHOR aipoe'i Moisés pe:

— Eê ke kova'e vvyty Abarim apyte peve, vvy Israel kuery pe ame'ê va'e rexa aguã.

¹³ Ha'e va'e rexa ma rire nenhe'ê ju 'rã heraa neramoï kuerya py, nderyke'y Arão nhe'ê heraa ague rami avi.

¹⁴ Mba'eta Zim regua tekoa e'yã py heta va'e kuery opu'ãmba rei jave peê voi naxenhe'ê rendui va'ekue, ha'e vy ha'e kuery oexaa py ndapexa ukai xeky'a e'y' va'ea, yy peme'êa py — he'i. Ha'e va'e yy ma Meribã pygua, Cades katy'i, Zim regua tekoa e'yã py.

¹⁵ Ha'e ramo Moisés aipoe'i SENHOR pe:

¹⁶ — Ndee SENHOR pavê rekoerã me'êa, ha'e pavê rekove re repena va'e, emoï peteï ava kova'e kuery re opena va'erã,

¹⁷ ha'e kuery renonde rupi ojepe'a ha'e ojevy va'erã, ha'e ha'e kuery oje'oi ha'e ojevya rupi oguereko va'erã, SENHOR pegua kuery vexa'i ija e'y' va'e rami rive ikuai e'y' aguã — he'i.

Moisés rekovia Josué ju omoïague

¹⁸ SENHOR aipoe'i Moisés pe:

— Eraa ha'vy Num ra'y Josué, ha'e emoï ndepo hexe, mba'eta ha'e va'e re ma Nhe'ê oï.

¹⁹ Rexa uka 'rã sacerdote Eleazar ha'e heta va'e kuery ha'e javi renonde py. Ha'e kuery oexaa py eme'ê ojapo va'erã.

²⁰ Ixupe ju 'rã remboaxa ndepo'akaa regua, Israel kuery ha'e javi onhe'ê rendu aguã.

²¹ Ha'e jevy 'rã ojexa uka sacerdote Eleazar pe, SENHOR renonde py oikuaa pota aguã Urim oexaa rupi. Mba'eta sacerdote ijayvua rami meme 'rã ha'e kuery oje'oi ha'e ojevvy okuapy, Josué ha'e Israel kuery ha'e javi — he'i.

²² Ha'e ramo Moisés ojapo SENHOR ojapo ukaa rami. Ha'e vy Josué ogueraa vy oexa uka sacerdote Eleazar pe heta va'e kuery pavê oexaa py.

²³ Hexe opo omoï vy ome'ê ojapo va'erã, Moisés pe SENHOR ijayvuague rami vy.

28

Êxodo 29.38-42

¹ Ha'e gui SENHOR aipoe'ive ju Moisés pe:

² — Ndeayvu ke Israel kuery pe. Ha'e vy aipo're: Pepena 'rã mba'emo xevy peme'ê aguã, peme'ê aguã ára py porã, mba'emo aju guigua mba'e, mba'emo peapy va'erã, heakuã porã va'e guive.

³ Pova'e ae 'rã ko'ê nhavõ SENHOR pe peapy vy peme'ê va'erã: mokoï vexa'i ra'y peteï ma'etý va'e, ivaikue rei e'y' va'e. Ha'e va'e ma peapy vy peme'ê jepi 'rã.

⁴ Peteï vexa'i ra'y ma peme'ê 'rã aje'ive'i reve, ha'e rã amboae ma ka'aru'i jave guarã.

⁵ Peteï ryru trigo iporãve va'e avi 'rã peru mba'emo aju guigua ome'ê mbyrã, peteï ryru azeite onhami mbyre reve pemoirũ vy pemoapomo va'ekue reve.

⁶ Ha'e va'e ma peapy vy peme'ê jepi 'rã Sinai vvyty py oejaague rami vy, heakuã porã rã SENHOR ojou porã aguã.

⁷ Peteï-teï vexa'i ra'y reve penhoê avi 'rã peteï ryru iro va'e. Henda iky'a e'y' va'e py 'rã peme'ê SENHOR pe.

⁸ Ha'e rã amboae vexa'i ra'y ma ka'aru'i jave 'rã peme'ê. Aje'ive'i reve guarã peme'êa rami ae avi 'rã peme'ê ju mba'emo aju guigua, iro va'e penhoê reve. Peapy vy 'rã peme'ê, heakuã porã rã SENHOR ojou porã aguã.

⁹ — Ha'e rã sábado ára py ma peme'ê 'rã mokoï vexa'i ra'y peteï ma'etý va'e, ivaikue rei e'y' va'e, ha'e gui mokoï ryru trigo iporãve va'e azeite reve omoapomo mbyre. Mba'emo aju guigua peme'ê 'rã iro va'e penhoê reve.

¹⁰ Ha'e va'e ma sábado nhavõ peapy vy peme'ê va'erã, ko'ê nhavõ mba'emo peme'ê ha'e penhoê va'e áryve.

¹¹ — Ha'e gui jaxy nhavõ ijypy'ia ára py ma SENHOR pe peapy vy peme'ê 'rã mokoï toro ra'y, peteï vexa'i ha'e sete vexa'i ra'y peteï ma'etý va'e, ivaikue rei e'y' va'e.

¹² Toro ra'y reve peme'ê avi 'rã mba'emo aju guigua mboapy ryru trigo iporãve va'e azeite reve omoapomo mbyre. Ha'e rã vexa'i reve ma mba'emo aju guigua peme'ê 'rã mokoï ryru trigo iporãve va'e azeite reve omoapomo mbyre.

¹³ Vexa'i ra'y reve ma mba'emo aju guigua peme'ê 'rã peteï ryru trigo iporãve va'e azeite reve omoapomo mbyre. Ha'e va'e ma peapy vy peme'ê 'rã, heakuã porã rã SENHOR ojou porã aguã.

¹⁴ Toro ra'y reve penhoê 'rã mokoï ryru vinho, ha'e rã vexa'i reve ma peteï ryru raxa'i 'rã penhoê, ha'e gui vexa'i ra'y reve ma peteï ryru ete'i 'rã penhoê. Ha'e va'e ma jaxy pyaua ára ojeupity nhavõ peme'ê 'rã peapy vy, ma'etý mbukukue re.

¹⁵ Ko'ê nhavô peru avi 'rã peteĩ kavara ava jejavya regua SENHOR pe peapy vy peme'ê va'erã, mba'emo penhoê va'e reve.

¹⁶ — Ha'e gui jaxy jypy'igua re catorze araa py ma oiko 'rã SENHOR pegua ngaru Páscoa regua.

¹⁷ Ha'e va'e jaxy re quinze araa py ma pejapo 'rã ngaru. Sete ára re 'rã mbojape pe'u pekuapy imbovia revegua e'y.

¹⁸ Ijypya ára oiko 'rã nhemboaty iky'a e'y va'e. Neĩ peteĩve ma napemba'epoi 'rã.

¹⁹ SENHOR pe peapy vy peme'ê 'rã mokoĩ toro ra'y, peteĩ vexa'i ha'e sete vexa'i ra'y peteĩ ma'etỹ va'e, ivaikue rei e'y va'e meme.

²⁰ Mba'emo aju guigua peme'ê 'rã azeite reve omoapomo mbyre. Toro ra'y reve peme'ê 'rã mboapy ryrú trigo iporãve va'e gui pejapo va'ekue, ha'e rã vexa'i ava reve ma mokoĩ ryrú gui,

²¹ ha'e gui sete vexa'i ra'y ikuai va'e regua peteĩ-teĩ reve 'rã peme'ê peteĩ ryrú gui pejapo va'ekue.

²² Peme'ê avi 'rã peteĩ kavara ava jejavya regua, pejejavyague pejao'i uka agua.

²³ Ha'e nunga ha'e javi 'rã peme'ê, aje'ive'i reve mba'emo peapy vy peme'ê va'ety reve.

²⁴ Ha'e rami vy sete ára re, ko'ê nhavô peme'ê 'rã mba'emo aju guigua peapy vy, heakuã porã rã SENHOR ojou porã agua. Ko'ê nhavô mba'emo peapy vy peme'ê va'e reve ha'e va'e peme'ê avi 'rã, mba'emo penhoê reve.

²⁵ Ha'e gui sete araa py ju 'rã pejapo nhemboaty iky'a e'y va'e. Neĩ peteĩve ma napemba'epoi 'rã.

²⁶ — Ha'e gui mba'emo aju jypy'igua ára py ju 'rã pejapo nhemboaty iky'a e'y va'e, mba'emo aju pyau guigua SENHOR pe peru agua, ngaru semana regua ojeupity jave. Neĩ peteĩve ma napemba'epoi 'rã.

²⁷ Ha'e va'e jave py pova'e 'rã peapy vy peme'ê heakuã porã rã SENHOR ojou porã agua: mokoĩ toro ra'y, peteĩ vexa'i ava ha'e sete vexa'i ra'y peteĩ ma'etỹ va'e meme.

²⁸ Mba'emo aju guigua peme'ê avi 'rã azeite reve omoapomo mbyre. Toro ra'y reve guarã pejapo 'rã mboapy ryrú trigo iporãve va'e gui, ha'e rã vexa'i ava reve guarã ma mokoĩ ryrú gui.

²⁹ Sete vexa'i ra'y va'e regua peteĩ-teĩ reve guarã ma pejapo avi 'rã peteĩ ryrú gui.

³⁰ Peteĩ kavara ava peme'ê avi 'rã pejejavyague pejao'i uka agua.

³¹ Ha'e nunga ha'e javi 'rã peme'ê, ko'ê nhavô mba'emo peapy vy peme'ê va'e reve, mba'emo aju guigua ha'e mba'emo penhoê va'e reve. Ivaikue rei e'y va'e meme 'rã peru.

29

SENHOR pegua ngaru mboae oiko jave py mba'emo ome'ê va'erã re ijayvuague

¹ — Ha'e gui sete jaxya re, jypy'igua ára py ma pejapo 'rã nhemboaty iky'a e'y va'e. Neĩ peteĩve ma napemba'epoi 'rã. Pëvy oiko 'rã mimby guaxu pemonhe'ê agua ára.

² Ha'e va'e jave py pova'e nunga peme'ê 'rã peapy vy, heakuã porã rã SENHOR ojou porã agua: peteĩ toro ra'y, peteĩ vexa'ava ha'e sete vexa'i ra'y peteĩ ma'etỹ va'e, ivaikue rei e'y va'e meme.

³ Mba'emo aju guigua peme'ê avi 'rã azeite reve omoapomo mbyre. Toro ra'y reve guarã ma mboapy ryrú trigo iporãve va'e gui 'rã pejapo, ha'e rã vexa'ava reve guarã ma mokoĩ ryrú gui 'rã.

⁴ Ha'e gui sete vexa'i ra'y peteĩ-teĩ reve guarã ma peteĩ ryrú gui 'rã pejapo.

⁵ Peteĩ kavara peme'ê avi 'rã jejavya regua, pejejavyague pejao'i uka agua.

⁶ Ha'e va'e jaxy re mba'emo peapy vy peme'ê va'e reve 'rã peme'ê, mba'emo aju guigua reve, ko'ê nhavô mba'emo peapy vy mba'emo aju guigua ha'e penhoê va'e regua reve. Ombopara pyre oĩa rami vy peme'ê 'rã heakuã porã rã SENHOR ojou porã agua.

⁷ — Ha'e gui sete jaxya re dez araa py ma pejapo ju 'rã nhemboaty iky'a e'y va'e. Penenhe'ê py pejexavaia rupi 'rã pendekua. Neĩ peteĩve ma napemba'epoi 'rã.

⁸ Pova'e ma peapy vy peme'ê 'rã heakuã porã rã SENHOR ojou porã agua: peteĩ toro ra'y, peteĩ vexa'ava, ha'e gui sete vexa'i ra'y peteĩ ma'etỹ va'e, ivaikue rei e'y va'e meme.

⁹ Mba'emo aju guigua peme'ê 'rã azeite reve omoapomo mbyre: toro ra'y reve guarã ma mboapy ryrú trigo iporãve va'e gui pejapo 'rã, ha'e gui vexa'i ava reve guarã ma mokoĩ ryrú gui 'rã.

¹⁰ Ha'e rã sete vexa'i ra'y ikuai va'e regua peteĩ-teĩ reve guarã ma peteĩ'i ryrú gui 'rã pejapo.

¹¹ Peme'ê avi 'rã peteĩ kavara ava jejavya regua. Ha'e va'e peme'ê avi 'rã jejavya regua ko'ê nhavô peme'ê va'e reve, ha'e mba'emo peapy va'e, mba'emo aju guigua ha'e mba'emo penhoê jepi va'e reve.

¹² — Sete jaxya re quinze araa py ma teĩgue ju 'rã oiko nhemboaty iky'a e'y va'e. Neĩ peteĩve ma napemba'epoi 'rã. Sete ára re 'rã pejapo ngaru SENHOR pe.

¹³ Pova'e ma peapy vy peme'ê 'rã heakuã porã rã SENHOR ojou porã agua: mboapy toro ra'y, mokoĩ vexa'ava, ha'e gui catorze vexa'i ra'y peteĩ ma'etỹ va'e, ivaikue rei e'y va'e meme.

¹⁴ Mba'emo aju guigua peme'ê 'rã azeite reve omoapomo mbyre: mboapy toro ra'y peteĩ-teĩ reve guarã ma mboapy ryrú trigo iporãve va'e gui pejapo 'rã, ha'e gui mokoĩ vexa'i ra'y peteĩ-teĩ reve guarã ma mokoĩ ryrú gui 'rã pejapo.

¹⁵ Ha'e rã catorze vexa'i ra'y peteĩ-teĩ reve guarã ma peteĩ'i ryrú gui 'rã pejapo.

¹⁶ Peteĩ kavara peme'ê avi 'rã jejavya regua, ko'ê nhavô mba'emo peapy va'e reve, mba'emo aju guigua ha'e mba'emo penhoê va'e reve.

¹⁷ — Ha'e gui mokoĩ araa py ma peme'ê 'rã doze toro ra'y, mokoĩ vexa'i ava ha'e catorze vexa'i ra'y peteĩ ma'etỹ va'e, ivaikue rei e'y va'e meme.

¹⁸Toro ra'y, vexa'i ava ha'e vexa'i ra'y kuery reve guarã ma peme'ê avi 'rã mba'emo aju guigua ha'e mba'emo penhoê va'e. Petei-teĩ mymba regua mbovy pa ikuaiã rami vy peme'ê 'rã hexeve guarã, ayvu oēja pyre rami vy.

¹⁹Petei kavara peme'ê avi 'rã jejavya regua, ko'ê nhavõ mba'emo peapy va'e reve, mba'emo aju guigua ha'e mba'emo penhoê va'e reve.

²⁰— Ha'e gui mboapy araa py ma peme'ê 'rã onze toro ra'y, mokoĩ vexa'i ava ha'e catorze vexa'i ra'y petei ma'etỹ va'e, ivaikue rei e'ỹ va'e meme.

²¹Toro ra'y, vexa'i ava ha'e vexa'i ra'y kuery reve guarã ma peme'ê avi 'rã mba'emo aju guigua ha'e mba'emo penhoê va'e. Petei-teĩ mymba regua mbovy pa ikuaiã rami vy peme'ê 'rã hexeve guarã, ayvu oēja pyre rami vy.

²²Petei kavara peme'ê avi 'rã jejavya regua, ko'ê nhavõ mba'emo peapy va'e reve, mba'emo aju guigua ha'e mba'emo penhoê va'e reve.

²³— Ha'e gui irundy araa py ma peme'ê 'rã dez toro ra'y, mokoĩ vexa'i ava ha'e catorze vexa'i ra'y petei ma'etỹ va'e, ivaikue rei e'ỹ va'e meme.

²⁴Toro ra'y, vexa'i ava ha'e vexa'i ra'y kuery reve guarã ma peme'ê avi 'rã mba'emo aju guigua ha'e mba'emo penhoê va'e. Petei-teĩ mymba regua mbovy pa ikuaiã rami vy peme'ê 'rã hexeve guarã, ayvu oēja pyre rami vy.

²⁵Petei kavara peme'ê avi 'rã jejavya regua, ko'ê nhavõ mba'emo peapy va'e reve, mba'emo aju guigua ha'e mba'emo penhoê va'e reve.

²⁶— Ha'e gui petei nhiruĩ araa py ma peme'ê 'rã nove toro ra'y, mokoĩ vexa'i ava ha'e catorze vexa'i ra'y petei ma'etỹ va'e, ivaikue rei e'ỹ va'e meme.

²⁷Toro ra'y, vexa'i ava ha'e vexa'i ra'y kuery reve guarã ma peme'ê avi 'rã mba'emo aju guigua ha'e mba'emo penhoê va'e. Petei-teĩ mymba regua mbovy pa ikuaiã rami vy peme'ê 'rã hexeve guarã, ayvu oēja pyre rami vy.

²⁸Petei kavara peme'ê avi 'rã jejavya regua, ko'ê nhavõ mba'emo peapy va'e reve, mba'emo aju guigua ha'e mba'emo penhoê va'e reve.

²⁹— Ha'e gui mboapy meme araa py ma peme'ê 'rã oito toro ra'y, mokoĩ vexa'i ava ha'e catorze vexa'i ra'y petei ma'etỹ va'e, ivaikue rei e'ỹ va'e meme.

³⁰Toro ra'y, vexa'i ava ha'e vexa'i ra'y kuery reve guarã ma peme'ê avi 'rã mba'emo aju guigua ha'e mba'emo penhoê va'e. Petei-teĩ mymba regua mbovy pa ikuaiã rami vy peme'ê 'rã hexeve guarã, ayvu oēja pyre rami vy.

³¹Petei kavara peme'ê avi 'rã jejavya regua, ko'ê nhavõ mba'emo peapy va'e reve, mba'emo aju guigua ha'e mba'emo penhoê va'e reve.

³²— Ha'e gui sete araa py ma peme'ê 'rã sete toro ra'y, mokoĩ vexa'i ava ha'e catorze vexa'i ra'y petei ma'etỹ va'e, ivaikue rei e'ỹ va'e meme.

³³Toro ra'y, vexa'i ava ha'e vexa'i ra'y kuery reve guarã ma peme'ê avi 'rã mba'emo aju guigua ha'e mba'emo penhoê va'e. Petei-teĩ mymba regua mbovy pa ikuaiã rami vy peme'ê 'rã hexeve guarã, ayvu oēja pyre rami vy.

³⁴Petei kavara peme'ê avi 'rã jejavya regua, ko'ê nhavõ mba'emo peapy va'e reve, mba'emo aju guigua ha'e mba'emo penhoê va'e reve.

³⁵— Ha'e gui oito araa py ma pejapo 'rã nhemboaty iky'a e'ỹ va'e. Neĩ peteive ma napemba'eapoi 'rã.

³⁶Ha'e rami vy peapy vy peme'ê 'rã petei toro ra'y, petei vexa'ava ha'e sete vexa'i ra'y petei ma'etỹ va'e, ivaikue rei e'ỹ va'e meme, heakuã porã rã SENHOR ojou porã aguã.

³⁷Toro ra'y reve guarã, vexa'i ava ha'e vexa'i ra'y kuery reve guarã ma peme'ê avi 'rã mba'emo aju guigua ha'e mba'emo penhoê va'e. Petei-teĩ mymba regua mbovy pa ikuaiã rami vy peme'ê 'rã hexeve guarã, ayvu oēja pyre rami vy.

³⁸Petei kavara peme'ê avi 'rã jejavya regua, ko'ê nhavõ mba'emo peapy va'e reve, mba'emo aju guigua ha'e mba'emo penhoê va'e reve.

³⁹— Ha'e va'e ha'e javi ma SENHOR pe peme'ê 'rã petei-teĩ ngaru ojeupity nhavõ oapy vy ome'ê mbyrã, mba'emo aju guiguã, mba'emo onhoê mbyrã, ha'e petei rami ikuai aguã reguarã. Ha'e va'e peme'ê avi 'rã SENHOR renonde penhemboayvua rami, e'ỹ vy penhenhandua'i rami mba'emo peme'ê va'e reve — he'i.

⁴⁰Ha'e rami Moisés ijayvu Israel kuery pe, ixupe SENHOR ojapo ukaague ha'e javi rami vy.

30

Deuteronomio 23.21-23

¹Ha'e gui Moisés ijayvu Israel kuery petei-teĩ regua yvatekueve ikuai va'e pe. Ha'e vy aipoe'i:

— Pova'e ayvu ma SENHOR ojapo uka va'ekue:

²Xapy'a rei petei ava onhemboayvu 'rã SENHOR pe mba'emo ojapo aguã re, ha'e'ỹ vy mba'emo ojapo e'ỹ re oiko aguã re. Ha'e rami ri vy ndojapo e'ỹi 'rã ijayvuague. Onhemboayvuague ha'e javi 'rã ojapo.

³Ha'e rami avi xapy'a rei petei kunha onhemboayvu 'rã SENHOR pe mba'emo ojapo aguã re, ha'e'ỹ vy mba'emo ojapo e'ỹ re oiko aguã re, kunhataĩ vy nguu ro py teri oiko va'e.

⁴Ha'e gui xapy'a rei tuu ma guajy onhemboayvuague oikuaa va'eri mba'eve nde'i 'rã ixupe. Ha'e ramo ma onhemboayvuague ha'e javi 'rã ovare. Tajy ojapopa 'rãe mba'emo ojapo e'ỹ re oiko aguã re onhemboayvuague.

⁵ Ha'e rã xapy'a rei tuu ha'e va'e nunga oikuaa vyve ojoko ramo ma taju onhemboayvuague nei petei henda py voi ndovarei 'rã, mba'emo ojapo e'ÿ re oiko aguã re ijayvuague rupi oiko e'ÿ tei ha'ëve 'rã. SENHOR operdoa 'rã, onhemboayvuague tuu ojoko rire.

⁶ — Ha'e rami avi xapy'a rei kunha va'e onhemboayvuague, ha'e'ÿ vy opëxa porã e'ÿ re mba'emo ojapo aguã re ijayvuague ovare teri reve omenda 'rã,

⁷ ha'e xapy'a rei ime ha'e nunga oendu tei mba'ëve nde'i ramo kunha va'e onhemboayvuague ovare tema 'rã. Ojapo 'rãe mba'emo ojapo e'ÿ re oiko aguã re ijayvuague.

⁸ Ha'e rami tei xapy'a rei ime oendu vyve ojoko 'rã kunha va'e onhemboayvuague, e'ÿ vy opëxa porã e'ÿ re ijayvuague ojapo aguã gui. Ijayvuague ime ombovaipa rire SENHOR operdoa 'rã.

⁹ Ha'e gui imeve'ÿ va'e, e'ÿ vy kunha oea pyre onhemboayvuague ma ovare va'erã meme.

¹⁰ — Xapy'a rei kunha va'e ome ro py oiko reve onhemboayvu 'rã, ha'e'ÿ vy oura reve ijayvu 'rã mba'emo ojapo e'ÿ re oiko aguã re.

¹¹ Ha'e nunga ime oikuaa vy “Ha'ëve” nde'i, nei “Nda'ëvei” nde'i ri ramo kunha va'e onhemboayvuague ovare 'rã. Ojapopa 'rãe mba'emo ojapo aguã re ijayvuague.

¹² Ha'e rã xapy'a rei ime ha'e nunga oikuaa vyve ombovaipa 'rã. Ha'e rami rã kunha va'e mba'emo ojapo aguã re, ha'e'ÿ vy mba'emo ojapo e'ÿ re oiko aguã onhemboayvu rire tei ndovarei 'rã. Ime ombovaipa rire SENHOR operdoa 'rã.

¹³ Kunha va'e onhe'ë py ojexavaia rupi oiko aguã re ijayvu, e'ÿ vy oura ramo ime oendu vy xapy'a rei “Ha'ëve” he'i 'rã, e'ÿ vy “Nda'ëvei” he'i 'rã ombovaipa vy.

¹⁴ Ha'e rami avi xapy'a rei ime ma ko'ë nhavõ mba'ëve nde'i ramo kunha va'e mba'emo ojapo aguã re onhemboayvuague ovarepa 'rã, ime oikuaa vyve mba'ëve nde'i rire.

¹⁵ Ha'e gui xapy'a rei ime ha'e nunga oendua ára rire ri ombovaipa ramo hexe ae 'rã oi kunha va'e káuxa opaga aguã — he'i.

¹⁶ Ha'e va'e ma Moisés pe SENHOR omboaxa va'ekue ojapoa aguã, ime ha'e gua'yxy reve joguereko kuaa aguã regua, ha'e gui tuu ha'e taju kunhatai vy nguuro py teri oiko va'e pegua.

31

Midiã pygua kuery re ipo'akaague

¹ SENHOR aipoe'i Moisés pe:

² — Embopaga Midiã pygua kuery Israel kuery re ojapogue re. Ha'e rire ma nenhe'ë heraa 'rã neramoí kuerya py — he'i.*

³ Ha'e ramo Moisés ijayvu heta va'e kuery pe. Ha'e vy aipoe'i:

— Peë kuery va'e regua pereko katu ke tembiporu joe pepu'ã aguã. Ha'e gui tapeo Midiã pygua kuery rovai pepu'ã aguã, SENHOR ombopaga ukua rami pejapo aguã.

⁴ Israel kuery petei-tei regua joe opu'ã aguã py pemondouka 'rã mil avakue — he'i.

⁵ Ha'e ramo Israel kuery mbovy e'ÿ ikuai va'e petei-tei regua gui omoudouka mil. Joe opu'ã aguã katu doze mil ha'e javi vy omoudouka tembiporu revegua meme.

⁶ Moisés ae omoudouka joe opu'ã aguã katu, petei-tei regua mil oje'oi aguã. Oo avi sacerdote Eleazar ra'y Finéias. Ha'e va'e ma ogueraa mimby guaxu iky'a e'ÿ va'e omonhe'ë aguã.

⁷ Ha'e gui Midiã pygua kuery reve opu'ã okuapy, Moisés pe SENHOR ojapo ukaague rami vy.

⁸ Ha'e vy ojukapa okuapy avakue ikuai va'ekue ha'e javi. Jypyve omano va'ekue regua anho e'ÿ, ojuka avi Midiã pygua huvixa kuery: Evi, Requém, Zur, Hur ha'e Reba, petei nhiruí Midiã pygua kuery ruvixa ikuai va'ekue. Kyxe py ojuka avi okuapy Beor ra'y Balaão.

⁹ Ha'e rã Midiã pygua kunhague ha'e kyriague ma Israel kuery ogueraapa okuapy guembiguairã. Ogueraapa avi vaka kuery ha'e hymba kuery ikuai va'ekue, ha'e oguereko va'ekue-'ekue ha'e javi.

¹⁰ Oapypa avi tetã ha'e kuery ikuaiague, ha'e gui hekoa mboae ikuai va'ekue voi.

¹¹ Ha'e rami py ogueraapa ojopy va'ekue-'ekue, omba'erã ojou va'ekue ha'e javi, ha'e kuery va'e regua ha'e hymba kuery guive.

¹² Ha'e nunga oguerupa okuapy Moisés pe, sacerdote Eleazar ha'e Israel kuery ha'e javi ikuai va'e pe. Guembiguairã ogueraa va'ekue, mba'emo ojou va'ekue ha'e imba'e rei-rei va'ekue ha'e javi ogueraa guetkoa py, Moabe yvy ka'aguy e'ÿa py, Jordão yakã yv'ýry, Jericó tetã rexei.

Guembiguairã oguerupa pyre re ijayvuague

¹³ Ha'e gui Moisés, sacerdote Eleazar ha'e heta va'e kuery regua yvatekueve ha'e javi ma tekoa gui oëmba okuapy mombyry'i omovaë jevy aguã.

¹⁴ Ha'e rami tei Moisés ivai xondaro ruvixa kuery pe, mil ha'e cem xondaro capitão kuery joe opu'ãague gui ou va'ekue pe.

¹⁵ Ha'e vy Moisés aipoe'i ha'e kuery pe:

— Peja ri ty'y kunhague ha'e javi okuave aguã?

¹⁶ Mba'eta ha'e kuery ae Balaão omongetaa rami vy ojapo va'ekue Israel kuery SENHOR rovai rupi ikuai aguã rami, Peor py ae. Ha'e nunga rupi mba'emo vai oiko raka'e SENHOR pegua kuery mbyte rupi.

* 31:2 Midiã pygua kuery ojapo va'ekue ma ombotavypa rei Israel kuery, tuuete ramigua rive ombojerovia aguã rami (25.16-18).

¹⁷ Ha'e nunga rupi aỹ kyrĩgue'i regua pejukapa 'rã avakue'i ikuai va'e. Pejukapa avi 'rã kunhague avakue reve nhogueronheno va'ekue.

¹⁸ Ha'e rã kunhague'i ha'e kunhataĩgue'i avakue reve nhogueronheno e'ỹ teri va'e ma peja 'rã okuave aguã pendejeupe guarã.

Xondaro kuery ha'e mba'emo ogueru va'ekue oiky'a'opaa jevyague

¹⁹ — Sete ára re ranhe 'rã pendekuai tekoa gui mombyry'ia py. Mava'e rã rei peẽ kuery pejojuka, ha'e'ỹ vy omanogue re pepoko va'ekue ma pejesty'a'o uka 'rã mboapy araa py, ha'e gui sete araa py ju, penembiguairã peru va'ekue voi.

²⁰ Peiky'a'o uka avi 'rã ao pereko va'e, mba'emo mymba rague gui ojapo pyre, kavara rague gui ha'e yvyra gui ojapo pyre ha'e javi — he'i.

²¹ Ha'e gui sacerdote Eleazar aipoe'i avi xondaro kuery joe opu'ã aguã katy oje'oi va'ekue pe:

— Po rami ma lei Moisés rupi SENHOR ojapo uka va'ekue.

²² Mba'emo ouro guigua, prata, overa va'e, ferro, estanho ha'e chumbo guigua,

²³ opa mba'e tata py oĩ aguã ha'eve va'e ma pemboaxa 'rã tata rupi ha'eve va'e opyta aguã. Peiky'a'o avi 'rã yy joky'a'oa py. Ha'e rã mba'emo tata py oĩ aguã nda'eve va'e ma yy py rive 'rã peiky'a'o.

²⁴ Ha'e gui sete araa py pejoipa 'rã pendeao, ha'eve va'e ju peiko aguã. Ha'e gui mae ma peike ju 'rã tekoa py.

Mba'emo ogueru pyre omboja'opa aguã re ijayvuague

²⁵ Ha'e gui SENHOR aipoe'ive ju Moisés pe:

²⁶ — Reipapa 'rã nhomba'ekue ogueru pyre, ha'e kuery va'e regua ha'e mymba kuery voi. Ndee ha'e sacerdote Eleazar peipapa 'rã, ha'e heta va'e kuery regua tamoĩ kuery ro pygua yvatekueve ikuai va'e guive.

²⁷ Pemboja'o 'rã mokoĩ henda katy joo rami meme. Peteĩ henda py ma xondaro kuery joe opu'ã aguã oje'oi va'ekue peguarã, ha'e rã amboae henda py ma heta va'e kuery ha'e javi peguarã.

²⁸ Ha'e gui SENHOR peguarã peipe'a avi 'rã xondaro kuery joe opu'ã aguã oje'oi va'ekue guigua. Quinhentos ikuai va'e nhavõ joo peteĩ 'rã peipe'a, ha'e kuery va'e regua, toro, mburika'i ha'e vexa'i kuery ikuai va'e gui.

²⁹ Xondaro kuery peguarã omboja'o pyre mbyte gui reipe'a va'ekue ma sacerdote Eleazar po py 'rã reme'ẽ, SENHOR pe ju omboaxa va'erã.

³⁰ Ha'e rã Israel kuery peguarã omboja'o pyre mbyte gui ma reipe'a 'rã cinqüenta ikuai va'e nhavõ gui peteĩ, ha'e kuery va'e regua gui, toro, mburika'i, vexa'i ha'e mymba kuery ha'e javi gui. Ha'e nunga remboaxapa 'rã levita kuery po py, SENHOR pembojerovia aty rupi omba'eapo va'e peguarã — he'i.

³¹ Ha'e gui Moisés ha'e sacerdote Eleazar ojapopa SENHOR Moisés pe ojapo ukaague.

³² Xondaro kuery mba'emo ogueru va'ekue ha'e javi vy ma seiscentos e setenta e cinco mil vexa'i,

³³ setenta e dois mil toro,

³⁴ sessenta e um mil mburika'i,

³⁵ ha'e gui trinta e dois mil kunhague neĩ peteĩgue ma avakue reve nhogueronheno e'ỹ teri va'e.

³⁶ Ha'e gui joe opu'ã aguã katy oje'oi va'ekue peguarã omboja'o pyre ma trezentos e trinta e sete mil e quinhentos vexa'i ikuai.

³⁷ Vexa'i kuery SENHOR peguarã omboaxa va'ekue ma seiscentos e setenta e cinco ha'e javi vy.

³⁸ Toro ma trinta e seis mil. Ha'e va'e regua SENHOR peguarã omboaxa va'ekue ma setenta e dois.

³⁹ Mburika'i kuery ma trinta mil e quinhentos. Ha'e va'e regua SENHOR peguarã ome'ẽ va'ekue ma sessenta e um.

⁴⁰ Ha'e rã ha'e kuery va'e regua ma dezesseis mil. Ha'e va'e regua SENHOR peguarã omboaxa va'ekue ma trinta e dois.

⁴¹ Ha'e ramo sacerdote Eleazar po py ju Moisés omboaxa SENHOR peguarã ome'ẽ mbyre, Moisés pe ojapo ukaague rami vy.

⁴² Heta va'e kuery peguarã ju Moisés omboja'o joe opu'ã aguã katy oje'oi va'ekue ogueru va'ekue gui.

⁴³ Heta va'e kuery peguarã omboja'o va'ekue ma trezentos e trinta e sete mil e quinhentos vexa'i,

⁴⁴ trinta e seis mil toro,

⁴⁵ trinta mil e quinhentos mburika'i,

⁴⁶ ha'e gui ha'e kuery va'e regua ma dezesseis mil.

⁴⁷ Ha'e gui Israel kuery peguarã omboja'o pyre mbyte gui ma cinqüenta ikuai va'e nhavõ gui Moisés oipe'a peteĩ, ha'e kuery va'e regua ha'e mymba kuery guive. Ha'e vy omboaxapa levita kuery SENHOR ombojeroviaaty rupi omba'eapo va'e po py, Moisés pe SENHOR ojapo ukaague rami vy.

Xondaro ruvixa kuery mba'emo onhenhandua'i rami ome'ẽ okuapyague

⁴⁸ Ha'e gui Moisés-a py ovaẽmba okuapy xondaro kuery mbovy e'ỹ ikuai va'e ruvixa kuery, mil ha'e cem ikuai va'e capitão kuery voi.

⁴⁹ Ha'e vy ha'e kuery aipoe'i okuapy iuxpe:

— Ore nerembuguai kuery ma roipapapa avakue joe opu'ãa pygua ore kuery ropenaa va'e. Ha'e rã ha'e kuery va'e regua neĩ peteĩve ma ndoatai, ore kuery va'e regua ha'e rami ae avi.

⁵⁰ Ha'e nunga rupi rogueru ma SENHOR pe rome'ẽ va'erã, peteĩ-teĩ rogueru rojou va'ekue regua gui, mba'emo ouro guigua, jyva regua, poapy regua, kuã regua, namixã ha'e mbo'y. SENHOR renonde py rogueru rojejavague rojao'i uka aguã — he'i okuapy.

⁵¹ Ha'e ramo ha'e kuery gui Moisés ha'e sacerdote Eleazar ojopypa ouro guigua, mba'eta jegua ojapo porã mbyre meme ramo.

⁵² SENHOR pe ouro guigua mil ha'e cem rerekoa capitão kuery ogueru va'ekue poyikue ma cento e oitenta quilos raxa ha'e javi vy.

⁵³ Mba'eta joe opu'ãa pygua kuery omba'erã mba'emo ojopy va'ekue meme.

⁵⁴ ouro guigua mil ha'e cem rerekoa capitão kuery gui Moisés ha'e sacerdote Eleazar ojopy vy onhemboaty aty ropy ju ogueru imoiny, SENHOR renonde py Israel kuery ima'endu'a riaa aguã.

32

Ha'e kuery va'e regua amongue Jordão rovai re opytaxe okuapyague

¹ Rúben ha'e Gade ramymino kuery ma heta ete oguereko guymba kuery. Ha'e kuery ma Jazer ha'e Gileade vvy oexa rá mymba kuery ikuai aguã ha'eve.

² Ha'e rami vy Gade ha'e Rúben ramymino kuery ou okuapy Moisés pe ojerure aguã, sacerdote Eleazar ha'e heta va'e kuery yvatekueve reve. Ha'e vy aipoe'i okuapy:

³ — Ha'e gui vvy Atarote, Dibom, Jazer, Ninra, Hesbom, Eleale, Sebã, Nebo ha'e Beom,

⁴ ha'e va'e vvy pygua kuery Israel kuery renonde gui SENHOR oipe'apa ma va'ekue meme. Ha'e va'e vvy ma ha'eve mymba kuery ikuai aguã. Ha'e gui ore nerembigui kuery ma orerymba va'e meme.

⁵ Xapy'a rei rá ndee rejou porã ri vy eme'ẽ ha'e va'e vvy ore nerembigui kuery pe oreyvyrã. Oremboaxa eme Jordão yakã rovai katy — he'i okuapy.

⁶ Ha'e rami teĩ Gade ha'e Rúben ramymino kuery pe Moisés aipoe'i:

— Amboae regua kuery anho 'rã ty'y joe opu'ã aguã katy oje'oi, ha'e rá peẽ kuery ma apy ae 'rã pepytapa?

⁷ Mba'e re tu pejapo Israel kuery nda'ipy'a guaxuvei aguã rami, vvy SENHOR ha'e kuery pe ome'ẽ va'e py oove e'y aguã?

⁸ Mba'eta ha'e rami ae avi penderu kuery ojapo raka'e, Cades-Barnéia gui amondouka jave py kova'e vvy oexa pota aguã.

⁹ Ha'e va'e kuery ma Escol vvy'ã guy katy peve ovaẽa py vvy oexapa ma vy ojapo okuapy Israel kuery nda'ipy'a guaxuvei aguã rami, vvy SENHOR ome'ẽ va'e oupity e'y aguã.

¹⁰ Ha'e va'e árave SENHOR poxya hendy vy oura reve aipoe'i va'ekue oreyvy:

¹¹ “Anhetẽ ete avakue vinte ma'etỹ va'e guive tujakue peve Egito gui oje'oi va'ekue ri peteĩve ma ndoexai 'rã vvy Abraão pe, Isaque ha'e Jacó pe aura reve ame'ẽ aguã re xeavyvague, xenhe'ẽ rendua gui ojepe'apa rire.

¹² Oexa va'erã ma quenezu Jefoné ra'y Calebe anho, ha'e Num ra'y Josué avi, mba'eta ha'e kuery ma SENHOR nhe'ẽ rendua gui ndojepe'ai rire”, he'i va'ekue.

¹³ Ha'e rami vy SENHOR poxya Israel rovai rupi hendy vy quarenta ma'etỹ re ojapo ha'e kuery tekoa e'ya rupi oguata rei aguã rami, SENHOR rovai opu'ã okuapy va'ekue omanomba peve.

¹⁴ Ha'e gui apy ju pendekuai avakue ojejavypa va'e regua. Peẽ kuery ju penderu kuery ojapoague rami ae avi pepu'ã pekuapy, pejapo aguã Israel rovai SENHOR ipoxyve aguã rami.

¹⁵ Mba'eta peẽ kuery napenhe'ẽ renduxei ramo teĩgue ju ha'e oejapa 'rã kova'e kuery tekoa e'ya py. Ha'e ramo peẽ kuery káuxa ae 'rã ha'e kuery okanhymba — he'i.

¹⁶ Ha'e ramo Moisés oia py ha'e kuery onhembojave jogueruvy vy aipoe'i okuapy:

— Ore kuery ma apy rojapo 'rã mymba kuery korarã, ha'e tetã orera'y kuery rekoarã.

¹⁷ Ha'e rá ore kuery ma orerembiporu rojopy vy rojapura reve 'rã roje'oi Israel kuery renonde rupi, ha'e kuery ikuai aguã py rogueraa peve. Orera'y kuery anho 'rã opyta tetã ikorapa va'e py, vvy regua kuery ojuka e'y aguã py.

¹⁸ Israel kuery peteĩ-teĩ ovyvyrã va'ekue py ikuaipe e'ya ja ore kuery ndorojevvyvei 'rã orero katy.

¹⁹ Mba'eta ore kuery ma ndorojopyi 'rã ha'e kuery reve vvy Jordão rovai re itui va'e regua, neĩ henondeve katy ma voi, mba'eta ore ma Jordão kyvõ katy rogueroko ae ma oreyvyrã, kuaray oua katy — he'i okuapy.

²⁰ Ha'e ramo Moisés ombovai:

— Xapy'a rei ha'e nunga pejapo ri vy, ha'e SENHOR renonde rupi penerembiporu reve joe pepu'ã aguã katy peje'oi,

²¹ SENHOR renonde rupi peteĩ-teĩ penerembiporu reve Jordão rovai re peaxa, guenonde gui ngovaigua kuery oipe'apa peve,

²² ha'e SENHOR renonde rupi ha'e va'e vvy re pendepo'akapa, ha'e rami ramo ma ha'eve 'rã pejevvy ju aguã. Ha'e gui SENHOR ha'e Israel kuery renonde rupi pejapo ve'y teĩ ha'eve 'rã. Ha'e gui kova'e vvy ma pendekuai aguã 'rã itui SENHOR renonde.

²³ Ha'e rá xapy'a rei ha'e rami e'y ri pendekuai ramo ma ma'ẽ, SENHOR rovai ojevavy va'e 'rã peiko. Ha'e rami vy peikuaa pejevavyague re pepaga 'rãe.

²⁴ Ha'e nunga rupi pejapo tema tetã pendera'y kuery ikuai aguã, penerymba kuery korarã guive. Pejapopa e'y eme guive pendeavyvague — he'i.

²⁵ Ha'e ramo Gade ha'e Rúben ramymino kuery ijavyvvy ju okuapy Moisés reve. Ha'e vy aipoe'i okuapy:

— Ndee oreruvixa, rejapo uka va'ekue meme 'rã ore nerembigui kuery rojapo.

²⁶ Orera'y kuery, orerajy kuery, orera'yxy kuery ha'e orerymba kuery ha'e javi opytapa 'rã apy tetã Gileade vvy re ikuai va'e py ae.

²⁷ Ha'e rã ore nerembiguai kuery ma SENHOR renonde rupi 'rã roaxa orerembiporu reve meme, ndee oreruvixa aipo'reague rami vy — he'i okuapy.

²⁸ Ha'e ramo ha'e kuery ojapo va'erã re Moisés ijayvu sacerdote Eleazar pe, Num ra'y Josué ha'e Israel kuery regua tamoi kuery ro pygua yvatekueve ikuai va'e ha'e javi pe.

²⁹ Ha'e vy aipoe'i ha'e kuery pe:

— Gade ha'e Rúben ramymino kuery pende kuery renonde rupi ri Jordão rovai katy oaxa ramo, SENHOR renonde rupi petei-tei guembiporu reve joe opu'ã aguã katy oo aguã, ha'e xapy'a rei ha'e va'e yvy re pendepo'akapa ri vy ma ha'e kuery pe peme'ẽ 'rã Gileade yvy ikuai aguã.

³⁰ Ha'e rami tei xapy'a rei ha'e kuery guembiporu reve ndoaxai ri vy pende kuery reve, ha'e rami vy pende kuery pendekuaia mbyte rupi ae 'rã ha'e kuery ikuai, Canaã yvy re ae — he'i.

³¹ Ha'e ramo Gade ha'e Rúben ramymino kuery ombovai vy aipoe'i okuapy:

— Ore nerembiguai kuery pe SENHOR ijayvua rami tema rojapo 'rã.

³² Ha'e rami vy SENHOR renonde rupi roaxa 'rã Canaã yvy re orerembiporu reve. Ha'e rã oreyvyrã rojopy va'erã ma Jordão yakã kyvõ rami ae itui.

Deuteronomio 3.12-17

³³ Ha'e rami rã Gade ha'e Rúben ramymino kuery, ha'e José ra'y Manassés ramymino kuery va'e regua mbytekue yvyrã ma Moisés ome'ẽ amorreu kuery ruvixa Seom ha'e Basã pygua huvixa Ogue openaague. Ha'e va'e yvy ome'ẽ tetã ikuai va'e reve, mba'eta yvy ha'e javi rupi tetã ikuai.

³⁴ Ha'e gui Gade ramymino kuery ma ojapo Dibom tetã, Atarote ha'e Aroer,

³⁵ Atarote-Sofã, Jazer ha'e Jogbeá,

³⁶ Bete-Ninra ha'e Bete-Harã, tetã ikorapa va'e meme. Vexa'i kuery korarã voi ojapo.

³⁷ Ha'e gui Rúben ramymino kuery ma ojapo Hesbom, Eleale ha'e Quiriataim,

³⁸ Nebo, ha'e Baal-Meom hery oguerova va'e. Sibma voi ojapo. Tetã ha'e kuery ojapo va'e ma amboae rami meme omboery.

³⁹ Ha'e gui Manassés ra'y Maquir ramymino kuery ma Gileade yvy katy oje'oi vy ipo'aka. Amorreu kuery ha'e py ikuai va'ekue ma ha'e kuery oipe'apa.

⁴⁰ Ha'e rami vy Manassés ra'y Maquir kuery pe Moisés ome'ẽ Gileade yvy ha'e kuery ikuai aguã.

⁴¹ Ha'e va'e yvýry rupi tekoa ikuai va'e ma Manassés ra'y Jair ae oo vy ojopypa. Ha'e va'e ma oenoĩ Havote-Jair.

⁴² Ha'e gui Noba oo vy ojopy Quenate, ijyvýry rupi tekoa ikuai va'e guive. Ha'e va'e oenoĩ ju Noba, guery rupi ae.

33

Egito gui ha'e kuery oẽmba guive ikuaiague rery meme oĩa

¹ Pova'e rupi ma Israel kuery Egito yvy gui oje'oi vy petei-tei regua oxondaro kuery reve oguata jogueravyague, Moisés ha'e Arão ijayvua rami meme.

² Moisés ombopara oguata oje'oivya nhavõ, SENHOR ijayvua rami vy. Pova'e rupi ha'e kuery oguata, oje'oia nhavõ rupi.

³ Ramessés tetã gui oje'oi jaxy jypya re quinze araa py. Páscoa ára rire ko'ẽ jevy ma Israel kuery oguata oje'oivy ipy'a guaxu reve, Egito pygua kuery ha'e javi oexaa gui,

⁴ Egito pygua gua'y jypykue onhono porã teri okuapya ja, ha'e kuery mbyte rupi SENHOR ojukapa rire. Ha'e kuery ruete ra'angaa re voi SENHOR ombou imbopagaarã.

⁵ Ha'e gui Ramessés tetã gui Israel kuery oje'oi vy ikuai ranhe Sucote py.

⁶ Sucote gui oje'oi vy ma ikuai ranhe Etã py, tekoa e'ya apy'i py.

⁷ Etã gui oje'oi vy ojeapa oje'oivy vy Pi-Hairote py ju ikuai, Baal-Zefom katy'i peve. Ha'e vy ikuai ju ranhe Migdol rexei'i.

⁸ Ha'e gui Pi-Hairote gui oje'oi ju vy ye'ẽ oĩ va'e mbyte rupi oaxa oje'oivy tekoa e'ya katy oje'oi vy. Ha'e gui mboapy ára re tekoa e'ya Etã rupi oguata rire ma opyta ju ranhe Mara py.

⁹ Mara gui oje'oi jevy vy ova okuapy Elim py. Ha'e gui Elim py ma doze ygua oĩ, setenta pindo avi ikuai. Ha'e py ju opyta ranhe.

¹⁰ Elim gui oje'oi vy Ye'ẽ Pytã rembe'i rupi ju opyta.

¹¹ Ye'ẽ Pytã gui oje'oi vy Sim tekoa e'ya py ju opyta.

¹² Sim gui oje'oi vy Dofca py ju opyta.

¹³ Dofca gui oje'oi vy ma Alus py ju opyta.

¹⁴ Alus gui oje'oi vy ma Refidim py ju opyta, tei ha'e py ma nda'ipoi yy ha'e kuery oy'u aguã.

¹⁵ Refidim gui oje'oi vy Sinai regua tekoa e'ya py ju opyta.

¹⁶ Sinai regua tekoa e'ya gui oje'oi vy ma Quibrote-Hataavã py ju opyta.

¹⁷ Quibrote-Hataavã gui oje'oi vy Hazerote py ju opyta.

¹⁸ Hazerote gui oje'oi vy Ritma py ju opyta.

¹⁹ Ritma gui oje'oi vy Rimom-Perez py ju opyta.

²⁰ Rimom-Perez gui oje'oi vy Libna py ju opyta.

²¹ Libna gui oje'oi vy Rissa py ju opyta.

²² Rissa gui oje'oi vy Queelata py ju opyta.

²³ Queelata gui oje'oi vy Sefer yvyty py ju opyta.

²⁴ Yvyty Sefer gui oje'oi vy Harada py ju opyta.

²⁵ Harada gui oje'oi vy Maquelote py ju opyta.

²⁶ Maquelote gui oje'oi vy Taate py ju opyta.

²⁷ Taate gui oje'oi vy Tera py ju opyta.

²⁸ Tera gui oje'oi vy Mitca py ju opyta.

²⁹ Mitca gui oje'oi vy Hasmona py ju opyta.

³⁰ Hasmona gui oje'oi vy Moserote py ju opyta.

³¹ Moserote gui oje'oi vy Bene-Jaacã py ju opyta.

³² Bene-Jaacã gui oje'oi vy Hor-Hagidgade py ju opyta.

³³ Hor-Hagidgade gui oje'oi vy Jotbatã py ju opyta.

³⁴ Jotbatã gui oje'oi vy Abrona py ju opyta.

³⁵ Abrona gui oje'oi vy Eziom-Geber py ju opyta.

³⁶ Eziom-Geber gui oje'oi vy Zim regua tekoa e'ÿa regua py ju opyta. Ha'e va'e ma Cades ae.

³⁷ Cades gui oje'oi vy ma Hor vyvty py ju opyta, Edom yvy apy'i py.

Números 20.22-29

³⁸ Ha'e gui sacerdote Arão ma SENHOR ijavyvague rami vy oẽ ovy Hor vyvty re. Ha'e py ae omano, quarenta ma'et'ÿ re ma Israel kuery Egito yvy gui oje'oi pa rire, peteĩ nhiruí jaxy, ijypp'ia ára py.

³⁹ Arão ma cento e vinte e três ma'et'ÿ oguerekoa py omano Hor vyvty re.

⁴⁰ Ha'e gui cananeu Arade pygua huvixa oendu Israel kuery oupa ta maa. Ha'e va'e ma Canaã yvy regua kuaray puku-a katy oiko va'e.

⁴¹ Ha'e gui Hor vyvty gui ha'e kuery oje'oi vy Zalmona py ju opyta.

⁴² Zalmona gui oje'oi vy Punom py ju opyta.

⁴³ Punom gui oje'oi vy Obote py ju opyta.

⁴⁴ Obote gui oje'oi vy Ijé-Abarim py ju opyta, Moabe yvy apy'i py.

⁴⁵ Ijé-Abarim gui oje'oi vy Dibom-Gade py ju opyta.

⁴⁶ Dibom-Gade gui oje'oi vy Almom-Diblataim py ju opyta.

⁴⁷ Almom-Diblataim gui oje'oi vy vyvty Abarim py ju opyta, Nebo katy'i.

⁴⁸ Yvyty Abarim gui oje'oi vy opyta ju Moabe yvy ka'aguy e'ÿa rupi, Jordão vyvry, Jericó tetã rexei.

⁴⁹ Ha'e gui Jordão yakã vyvry opyta ranhe okuapy, Bete-Jesimote guive Abel-Sitim oĩa peve, Moabe yvy ka'aguy e'ÿa rupi.

Canaã yvy regua kuery Nhanderuete oipe'a ukapaague

⁵⁰ Ha'e gui SENHOR aipoe'i Moisés pe, Moabe yvy ka'aguy e'ÿa rupi ha'e kuery ikuai jave, Jordão yakã vyvry, Jericó tetã rexei:

⁵¹ — Ndeayvu ke Israel kuery pe. Ha'e vy aipo're: Jordão yakã peaxapa ma vy Canaã yvy katy peje'oi ma jave

⁵² penerenonde katy gui peipe'apa 'rã ha'e va'e yvy regua kuery. Pembovaipa 'rã ita ta'angaa oĩa va'e ha'e javi, ta'angaarã mba'emo ryku gui ha'e kuery ojapo va'ekue voi. Peitypa 'rã yvy'ã rupi ombojerovia atyrã ojapo va'ekue.

⁵³ Ha'e va'e yvy pejopypa 'rã penemba'erã, ha'e py ae pendekuai aguã, mba'eta ha'e va'e yvy ae ame'ẽ pendeyvyrã.

⁵⁴ Xortea pexaa rami 'rã pemboja'o yvy, pendera'y kuery peteĩ-teĩ mbovy pa ikuai rami vy. Hetave va'e regua pe ma tuvixave va'e 'rã peme'ẽ ijyvyrã, ha'e rã mboapy'ive va'e pe kyrive'i va'e 'rã peme'ẽ ijyvyrã. Xorte pexaa rami ae 'rã opyta peteĩ-teĩ peguarã. Penderu kuery guigua peteĩ-teĩ regua mbovy pa ikuai rami 'rã pejopy pendeyvyrã.

⁵⁵ Ha'e rami avi penerenonde gui yvy regua kuery ndapeipe'apai ri ramo peẽ kuery mbyte py opyta va'ekue ma penderexa py juu haxy va'e rami 'rã ikuai, penderyepy rupi hakua va'e oĩa rami 'rã pendu. Ha'e rami vy penemoangekoarã rive 'rã opyta yvy pendekuaia re.

⁵⁶ Ha'e gui pendere ju ajapo 'rã ha'e kuery re ajapo aguã re anhembopy'aague.

34

Ijyvy apy ikuai va'e re ijavyvague

¹ Ha'e gui SENHOR aipoe'ive ju Moisés pe:

² — Ndeayvu ke Israel kuery pe. Ha'e vy aipo're: Canaã yvy re pevaẽmba ma rire itui 'rã penderekoarã, Canaã yvy ae, ijapy'a'i nhavõ peve.

³ — Yvy kuaray puku-a katy itui va'e re pendekuai 'rã Zim regua tekoa e'ÿa regua guive Edom yvy apy'i peve. Kuaray puku-a katy pendeyvy oo 'rã ye'ẽ apy guive kuaray oua katy.

⁴ Ha'e va'e apy ma ojeapa 'rã ovy kuaray puku-a katy rupi, Acrabim yvy'ã katy, ha'e gui ma oaxa ju 'rã Zim peve. Ha'e gui ma oo 'rã Cades-Barnéia kuaray puku-a katy rupi. Ha'e vy Hazar-Adar katy oẽ vy Azmom peve 'rã oaxa.

⁵ Ha'e va'e apy ma Azmom gui ojeapave 'rã ovy Egito katy'i yakã'i oĩ va'e rembe peve. Ha'e gui oove 'rã ye'ẽ rembe'i peve ae.

⁶ — Ha'e gui kuaray oieka katy rupi pendeyvy apyrã ma ye'ẽ tuvixave va'e rembe 'rã opyta. Ha'e va'e ae 'rã opyta pendeyvy apy kuaray oieka katy rupi.

7 — Pova'e ma ijapy kuaray ijapu'a'ia katy rupi: ye'ê tuvixave va'e guive oaxa 'rã Hor vvyty peve.

⁸ Ha'e gui Hor vvyty guive ma oo 'rã Hamate py nhavaêa'i peve. Ha'e va'e apy ma Zedade peve 'rã oo.

⁹ Ha'e va'e gui ma oo 'rã Zifrom peve, ha'e gui opaa ma Hazar-Enã py 'rã opyta. Ha'e va'e ae ma ijapy kuaray ijapu'a'ia katy rupi oo va'e.

¹⁰ — Ha'e gui kuaray oua katy rupi ijapy oo 'rã Hazar-Enã guive Sefã peve.

¹¹ Ha'e gui Sefã guive ogejy 'rã Ribla peve, Aim kuaray oua katy rupi ae. Ha'e gui ma ogejyve vy oo 'rã Quinerete ye'ê rembe rupi kuaray oua katy rupi.

¹² Ha'e gui ogejyve 'rã ovy Jordão yakã rembe ha'e javi rupi, ha'e gui ye'ê rembe py ju 'rã opa. Ha'e va'e ae 'rã pendeyvyrã itui, ijapy'a'i ha'e javi peve — he'i.

¹³ Ha'e gui Moisés ijayvu Israel kuery pe. Ha'e vy aipoe'i:

— Kova'e vvy ma pendeyvyrã xortea pexaa rami pejopy va'erã, nove regua pe ha'e peteí regua mbytekue ikuai va'e pe ju SENHOR ome'ê uka va'ekue.

¹⁴ Mba'eta Rúben ha'e Gade ramymino kuery ma ovyvrã ojopy ae ma okuapy guamoí ro pygua kuery mbovy pa ikuai rami vy. Ha'e gui Manassés kuery regua mbytekue voi ojopy ma avi ovyvrã.

¹⁵ Ha'e va'e mokoí regua ha'e peteí regua mbytekue ikuai va'e ju ojopy ae ma okuapy ovyvrã Jordão yakã kyvõ rami, Jericó tetã rexei, kuaray oua katy ae.*

Yvy mboja'oarã kuery rery oia

¹⁶ Ha'e gui SENHOR aipoe'ive ju Moisés pe:

¹⁷ — Pova'e avakue ae ma vvy mboja'oarã ikuai. Hery ma sacerdote Eleazar ha'e Num ra'y Josué.

¹⁸ Peteí-teí regua gui peiporavo avi 'rã peteí huvixa, vvy mboja'oarã.

¹⁹ Ha'e va'e avakue rery ma po rami: Judá kuery va'e regua ma Jefoné ra'y Calebe,

²⁰ Simeão ramymino kuery va'e regua ma Amiúde ra'y Samuel,

²¹ Benjamim kuery va'e regua ma Quislom ra'y Elidade,

²² Dã ramymino kuery va'e regua ma Jogli ra'y huvixa Buqui,

²³ José ra'y Manassés ramymino kuery va'e regua ma Éfode ra'y huvixa Haniel,

²⁴ Efraim ramymino kuery va'e regua ma Siftã ra'y huvixa Quemuel,

²⁵ Zebulom ramymino kuery va'e regua ma Parnaque ra'y huvixa Elizafã,

²⁶ Issacar ramymino kuery va'e regua ma Azã ra'y huvixa Paltiel,

²⁷ Aser ramymino kuery va'e regua ma Selomi ra'y huvixa Aiúde,

²⁸ Naftali ramymino kuery va'e regua ma Amiúde ra'y huvixa Pedaél — he'i.

²⁹ Ha'e va'e kuery pe ae SENHOR omboja'o uka Canaã vvy Israel kuery rekoarã.

35

Levita kuery pegua tetã re ijayvuague

¹ SENHOR aipoe'ive ju Moisés pe, Moabe vvy ka'aguy e'ÿa py ha'e kuery ikuai jave, Jordão yakã vvyry, Jericó tetã rexei:

² — Ndeayvu ke Israel kuery pe, amongue tetã ha'e kuery vvy re ikuai va'e ome'ê aguã levita kuery rekoarã. Peteí-teí tetã vvyry rupigua ome'ê avi 'rã levita kuery vvyvrã, guymba kuery oguereko aguã.

³ Ha'e va'e tetã py ae 'rã ha'e kuery ikuai. Ha'e rã ijyvyry rupi ma vaka, vexa'i ha'e guymba kuery ha'e javi 'rã oguereko.

⁴ Tetã ikuai va'e vvyrykue levita kuery pe ome'ê va'erã va'e ma tetã kora guive oo 'rã mombyry'i, quatrocentos e cinqüenta metros peve tetã vvyry ha'e javi rupi.

⁵ Tetã gui mombyrya py kuaray oua katy rupi ma pea'ã 'rã novecientos metros, ha'e gui kuaray puku-a katy rupi, oikea katy, ha'e kuaray ijapu'a'ia katy rupi ma novecientos metros ju 'rã pea'ã. Ha'e va'e mbyte py oí 'rã tetã. Ha'e rami ae 'rã peteí-teí tetã vvyrykue oí.

⁶ — Levita kuery pe tetã peme'ê va'e regua ma mboapy meme tetã opyta 'rã onhemi atyrã. Ha'e va'e ma peiporavo 'rã jojuka rive va'ekue onhemi aguã. Ha'e va'e áryve levita kuery pe peme'êve 'rã quarenta e dois tetã.

⁷ Levita kuery pe tetã peme'ê va'erã ma quarenta e oito tetã ha'e javi vy, ijyvyrykue reve.

⁸ Ha'e gui tetã Israel kuery mba'e regua levita kuery pe peme'ê va'erã va'e ma xapy'a rei peteí regua heta raxa ri ikuai ramo ma levita kuery pe heta 'rã pemboaxa tetã. Ha'e rã xapy'a rei peteí regua ndaetai ramo mboapy'i 'rã pemboaxa levita kuery pe. Peteí-teí regua guetã mbovy pa ojopyague rami amongue ome'ê 'rã levita kuery pe ikuai aguã.

Deuteronomio 4.41-43; 19.1-3

⁹ Ha'e gui SENHOR aipoe'ive ju Moisés pe:

¹⁰ — Ndeayvu ke Israel kuery pe, ha'e vy aipo're: Canaã vvy re pevaê aguã Jordão yakã peaxa ma vy

¹¹ amboae tetã ju 'rã peiporavo onhemia atyrã, ha'e va'e py jojuka rive va'ekue oike 'rã onhemi aguã.

¹² Ha'e va'e tetã pereko 'rã jouguy moêare onhemi aguã imbopagaarã va'e gui, heta va'e kuery mbyte py jojuka rive va'ekue ojukaa e'ÿ aguã ojexa uka e'ÿ mbove onhemboayvu uka aguã.

¹³ Mboapy meme tetã peiporavo 'rã onhemia atyrã.

* 34:15 Kova'e kuaxia py ma "Jordão kyvõ rami" he'ia ma Jordão yakã regua kuaray oua katy vvy itui va'e re ijayvu vy, mba'eta ha'e py teri ha'e kuery ikuai.

¹⁴ Ha'e va'e tetã va'e regua ma mboapy peme'ê 'rã Jordão kyvõ rami oĩ va'e, ha'e rã amboae mboapy va'e ma Canaã yvy re 'rã oĩ, tetã onhemia atyrã ae oĩ aguã.

¹⁵ Ha'e va'e mboapy meme tetã ma Israel kuery pe opyta 'rã onhemi atyrã, ha'e amboae regua kuery pe guive, ha'e kuery mbyte rupi ovaê va'ekue pe, ha'e va'e tetã py jojuka rive va'ekue onhemi aguã.

Deuteronomio 19.11-13

¹⁶ — Ha'e gui amongue tembiporu ferro guigua py mba'e nhonupã rã omano ramo hembiporu revegua pe “Jojukaare” peje 'rã. Ha'e ramo jojukaare ma guive rã pejuka 'rã.

¹⁷ Ha'e'y vy amongue opo py ita oguereko va'e py amboae ojapi 'rã omano aguã rami. Ha'e va'e pe voi “Jojukaare” peje 'rã. Ijukaare ramo pejuka 'rã.

¹⁸ Ha'e'y vy amongue opo py yvyra oguereko va'e py amboae oinupã 'rã omano aguã rami. Ha'e va'e pe voi “Jojukaare” peje 'rã. Ijukaare ramo pejuka 'rã.

¹⁹ Jouguy moêare reve joepyarã ou va'ekue nhovaexĩ vy ojuka 'rãe.

²⁰ Ha'e gui xapy'a rei amongue nhomoanha 'rã nda'iporayvui vy, ha'e'y vy amongue ojukaxe vy mba'emo hexe omombo 'rã omano aguã rami,

²¹ ha'e rami e'y vy ija'ea rupi e'y opo py ae ounga 'rã omano aguã rami. Ha'e ramo pejuka 'rã ijukaare, jojukaare ramo. Jojukaare reve joepyarã ou va'ekue nhovaexĩ vy ojuka 'rã.

Deuteronomio 19.4-10

²² — Ha'e gui xapy'a rei amongue potae vy e'y nhomoanha xapy'a 'rã, ha'e'y vy mba'emo omombo rive 'rã hexe ojukaxe vy e'y.

²³ Ha'e'y vy oexa e'y re hi'áry ita oity rive ramo omano 'rã, hovaigua e'y oiko, neĩ ixupe ojapo vaixe rei e'y teĩ.

²⁴ Ha'e ramo ma heta va'e kuery ha'e javi oikuaa pota 'rã okuapy jojukaare ha'e joepyarã ou va'e re, kova'e lei oĩ rami vy ae.

²⁵ Ha'e rami vy joepyarã ou va'ekue po gui ogueraa jepe 'rã okuapy jojukaare, hekoa katy'i tetã onhemia aty oĩ va'e katy omondouka vy, ha'e py onhemi aguã. Ha'e py ae 'rã jojukaare opyta, sacerdote yvateve va'erã azeite iky'a e'y va'e py omoĩ mbyte omano e'ya ja.

²⁶ Ha'e rã xapy'a rei jojukaare tetã onhemi aguã ooague gui oê ri ramo

²⁷ ha'e va'e tetã gui mombyrya py joepyarã ojou vy jojukaare ojuka teĩ napembopagai 'rã huguy omoêague re.

²⁸ Tetã onhemiaty py ae jojukaare opyta 'rãgue sacerdote yvateve va'e omano e'ya ja. Ha'e gui sacerdote omano ma rive jojukaare ojevuy ju 'rã oyvy py.

²⁹ Ha'e va'e ma penderekorã ombopara pyre, peneramymino kuery ikuai va'erã pe guive, penderekoa ha'e javi rupi.

³⁰ — Jojukaague hexaare kuery omombe'u ramo mae ma jojukaare pejuka 'rã. Pete'i ri hexaare oiko ramo ma nda'evei 'rã pejuka aguã.

³¹ Jojukaare omano aguã rami oiko rive ma nda'evei 'rã pemboekovia uka aguã. Pejuka 'rãe.

³² Ha'e rami ae avi xapy'a rei tetã py onhemi oikovya gui ojevuy ju 'rã oyvy re ae, sacerdote yvateve va'e omano e'y mbove ma voi. Ha'e va'e voi napemboekovia ukai 'rã,

³³ pejapo e'y aguã yvy pendekuaia ha'eve'y va'e itui aguã rami, mba'eta jouguy omoêague ma ojapo 'rã yvy ha'eve'y va'e itui aguã rami. Peteive henda py pendeyvy ndapeiky'a'oi jouguy omoêague gui, jouguy moêare ruguy pemoê e'y vy.

³⁴ Ha'e nunga rupi pejapo eme yvy pendekuaia ha'eve'y va'e opyta aguã rami, ha'e va'e mbyte rupi xee aiko avi ramo. Mba'eta xee SENHOR aiko Israel kuery mbyte.

36

Kunhague yvy jopyare omenda aguã re ijayvuague

¹ Ha'e gui Moisés oĩa py ovaêmba okuapy Gileade ramymino kuery huvixa ikuai va'e. Gileade ma Maquir ra'y, Maquir ma Manassés ra'y, Manassés ma José ra'y. Ha'e gui ha'e kuery ijayvu okuapy Moisés ha'e Israel kuery ruvixa ikuai va'e renonde py.

² Ha'e vy aipoe'i okuapy:

— Oreruvixa, ndevy SENHOR ojapo ukaague rami vy kova'e yvy xortea oexaa rupi reme'ê uka va'ekue Israel kuery yvyrã. Ha'e gui oreruvixa, SENHOR ijayvuague rami ae avi rejapo va'ekue oreryke'y Zelofeade yvykue tajy kuery pe ju omboaxaa aguã rami.*

³ Ha'e rami teĩ xapy'a rei ha'e va'e kuery omenda 'rã Israel kuery regua mboae re. Ha'e ramo ma ha'e kuery yvyrã ojopy va'ekue oipe'aa 'rã oreramoĩ kuery yvykue gui, ha'e omboaxaa 'rã amboae regua mba'erã, ime kuery regua mba'e ae. Ha'e rami 'rã oipe'aa oreyvyrã xortea oexaa rupi rojopy va'ekue gui.

⁴ Mba'eta jubileu ma'etỹ Israel kuery pegua ojeupity nhavõ ma kunhague yvyrã ojopy va'ekue oaxa 'rã ime kuery regua pe ae.* Ha'e rami vy oyvyrã ojopy va'ekue oipe'aa 'rã oreramoĩ kuery regua yvykue gui — he'i okuapy.

⁵ Ha'e ramo Moisés ijayvu Israel kuery pe, SENHOR ojapo ukaa rami vy. Ha'e vy aipoe'i:

— José ramymino kuery va'e regua ma anhetê rupi meme ijayvu.

* 36:2 Números 27.1-11

* 36:4 Levítico 25.8-34

⁶ Mba'eta po rami ae SENHOR oēja va'ekue Zelofeade rajy kuery pe. Aipoe'i va'ekue: “Ha'e kuery pe ma ha'eve amongue va'e re rei omenda aguã teĩ guamoĩ ramymino kuery regua re anho.

⁷ Ha'e rami vy Israel kuery peteĩ-teĩ regua mba'e yvy ndoaxai 'rã amboae regua mba'erã. Mba'eta Israel kuery ikuai 'rã guamoĩ kuery mba'ekue yvy py ae.

⁸ Xapy'a rei Israel kuery peteĩ regua tajy omba'erã ojopy 'rã guamoĩ kuery yvykue. Ha'e rami vy omenda 'rã guamoĩ ramymino kuery regua re ae, Israel kuery peteĩ-teĩ ikuai aguã guamoĩ kuery yvykue py.

⁹ Ha'e rami vy peteĩ-teĩ regua oyvyrã ojopy va'ekue gui ndoaxai 'rã amboae regua pe. Mba'eta Israel kuery peteĩ-teĩ ikuai 'rã guamoĩ kuery yvykue py ae”, he'i va'ekue.

¹⁰ Moisés pe SENHOR ojapo ukaague rami ae Zelofeade rajy kuery ikuai.

¹¹ Ha'e rami vy Zelofeade rajy kuery Macla, Tirza, Hogla, Milca ha'e Noa ma otuty ra'y kuery re meme omenda,

¹² José ra'y Manassés ramymino kuery va'e regua re ae omendapa. Ha'e rami vy oyvyrã ojopy va'ekue opytapa tamõi ramymino kuery regua mba'e ae.

¹³ Ha'e va'e ayvu ha'e javi SENHOR oēja va'ekue Moisés pe Israel kuery rekorã, Moabe yvy ka'aguy e'ya py ikuai jave, Jordão yakã yvýry, Jericó tetã rexei.

Deuteronomio peteĩ nhiruĩa kuaxia Moisés ombopara va'ekue

Jordão yakã vyvry Moisés ijayvu py'iaque

Deuteronomio peteĩ nhiruĩa kuaxia Moisés ombopara va'ekue

Tery Deuteronomio ma “lei omombe'u porãveague” he'ia, mba'eta kova'e kuaxia para re Israel kuery pe Moisés omombe'u porãve Nhanderuete guigua lei. Omombe'u avi ha'e kuery tekoa e'ya rupi oguata jave Nhanderuete opena porãveague, ha'e omongeta guive Canaã vvy re oo vy onhe'ẽ rendu aguã. Moabe vvy re teri ikuai jave omombe'u, Jordão yakã regua kuaray oua katy, Canaã vvy re oo ta jave.

Kova'e kuaxia para re Moisés omombe'u porãve avi Nhanderuete reko: “Pendu ke, Israel kuery. Peteĩ'i oiko Senhor, Senhor Nhanderuete ae. Ha'e nunga rupi peayvu 'rã Senhor Penderuete pendepy'a, penenhe'ẽ ha'e penembaraetea ha'e javi py”, he'i (6.4-5). Moisés ijayvu avi Nhanderuete renonde jajererokyjea rupi nhanhe'ẽ rendu aguã: “Ha'e nunga rupi Israel kuery, mba'e nunga tu Senhor oipota pejapo? Senhor Penderuete renonde pejererokyjea rupi pendekuai aguã anho, heko rupi pendekuai, Senhor Penderuete peayvu ha'e ixupe peiko aguã pendepy'a ha'e penenhe'ẽ ha'e javi py, ha'e pejapopa aguã Senhor ojapo uka va'e ha'e oayvu oea va'ekue, aỹ pëvy amboaxa va'e, ha'e rami vy pendekuai porã aguã”, he'i (10.12-13).

Kuaxia para opaa py ijayvu Moisés omanoague re, mba'eta Meribã py Nhanderuete nonhe'ẽ rendui rire ixupe noguerovaẽ ukai heta va'e kuery ijyvyrã ome'ẽ va'ekue py. Moisés rekovia Nhanderuete oiporavo uka ipytyvõare Josué heta va'e kuery ogueraa aguã. Ha'e rã Moisés ma Pisca yvyty oẽ, ha'e va'e gui Canaã vvy katy oma'ẽ ranhe aguã. Ha'e rire vvyty áry ae Moisés omano raka'e, Israel kuery pegua profeta yvateve va'e.

Israel kuery ikuaiague Moisés omombe'uague

¹ Kova'e ayvu rupi ma Israel kuery pe Moisés ijayvu raka'e Jordão yakã rovai teri ikuai jave, tekoa e'ya vvy joja reia py, Sufe ye'ẽ vyvry, Parã, Tofel, Labã, Hazerote ha'e Di-Zaabe mbyte ikuai py.

² Onze ára ogueraa 'rã va'ekue Horebe vvyty guive Cades-Barnéia peve oguata oje'oivy aguã, Seir vvy'ã rupi tape oo va'e rupi.*

³ Quarenta ma'et'ya va'e onze jaxy ijypy'ia ára py Moisés ijayvu raka'e Israel kuery pe, SENHOR ha'e kuery re ijayvuague rami ae,

⁴ amorreu kuery ruvixa Seom Hesbom pygua, ha'e Basã pygua kuery ruvixa Ogue Astarote py oiko va'ekue ha'e kuery ojuka rire Edrei py.

⁵ Jordão yakã rovai, Moabe vvy re teri ikuai py Moisés omboypy kova'e lei omombe'u porãve aguã. Ha'e vy aipoe'i:

⁶ — SENHOR Nhanderuete ma ijayvu Horebe vvyty re nhande kuery nhandekuai jave. Ha'e vy aipoe'i va'ekue: “Kova'e vvyty re pepyta ranheague ha'eve ma.

⁷ Pejere ha'vy, pejepe'apa. Tapeo vvyty rupi amorreu kuery ikuai katy, ha'e vvy joja reia re vvyty ikuai katy, Neguebe katy voi, ha'e ye'ẽ vyvry cananeu kuery ikuai katy, Líbano katy Eufates yakã guaxu peve.

⁸ Ne'exa, ha'e va'e vvy ha'e javi amoĩ penerenonde. Pevaẽ ha'vy, ha'e va'e vvy re penhemboekoa aguã, SENHOR oura reve peneramoĩ kuery pe ome'ẽ rire, Abraão, Isaque ha'e Jacó, ha'e gui ha'e kuery ikuai rire hamymino jevy-jevuy kuery peguarã voi”, he'i va'ekue.

Êxodo 18.13-27

⁹ — Ha'e va'e jave py ae aipoa'e pendevy: “Xee ae'i ndaxepo'aka reguai peẽ kuery rogueraa aguã,

¹⁰ SENHOR Penderuete penemboetave rire. Ha'e ramo aỹ pendereta ma jaxy-tata yva re ojekuaa va'e rami.

¹¹ Tove SENHOR peneramoĩ kuery Ruete tapenemboetave mil-kue peve ju, ha'e ijayvuague rami vy.

¹² Ha'e rami avi mba'exa tu xee ae'i aropo'aka ta pendepoyikue ha'e javi, pendevoyi, ha'e pepu'ã reia?

¹³ Peiporavo ha'vy avakue hi'arandu, oiko kuua ha'e opena kuua va'e, peẽ kuery peteĩ-teĩ regua gui ae, amoĩ aguã pendere opena va'erã”, ha'e va'ekue.

¹⁴ — Ha'e rã xembovai vy “Ha'evea rami ndeayvu”, peje va'ekue.

¹⁵ Ha'e rã peẽ kuery peteĩ-teĩ regua akã aenoĩ vy amoĩ peẽ kuery ruvixarã, avakue hi'arandu ha'e opena va'e meme. Ha'e vy amoĩ mil ikuai va'e-va'e re opena va'erã, ha'e gui cem, cingüenta ha'e dez ikuai va'e re opena va'erã, peẽ kuery peteĩ-teĩ regua re ae.

¹⁶ Ha'e va'e jave py xeayvu pendere opena va'ety kueryrã pe. Ha'e vy aipoa'e va'ekue: “Pendu 'rã penderegua kuery joe nda'evei reia, ha'evea'i rami 'rã peikuaa pota avakue joegua meme nda'evei rei va'e re, ha'e'y vy amboae regua ha'e kuery reve ikuai va'e re teĩ.

¹⁷ Ha'e rami vy peikuaa potaa py peteĩ regua peayvuvu eme joegui, pendu 'rã vvy'igüeve'i ha'e yvatekueve ijayvua teĩ. Pekyje eme guive avave gui, mba'eta peikuaa pota kuua aguã ma Nhanderuete gui ae ou. Ha'e rami avi mba'emo peikuaa pota aguã haxy ete ri ramo pemboaxa 'rã xea py, ha'e rã xee voi aendu 'rã”, ha'e va'ekue.

¹⁸ Ha'e rami ae ha'e va'e jave py xeayvu va'ekue mba'emo pejapo aguã ha'e javi re.

Números 13.1-24

* ¹ Horebe ma Sinai vvyty ae (Êxodo 3.1, Malaquias 4.4). Onze ára ete'i oguata 'rãgue py quarenta ma'et'ry re ha'e kuery ikuai raka'e tekoa e'ya rupi, Nhanderuete ombopaga rã nonhe'ẽ renduiague re (Números 14.26-34).

¹⁹ — Ha'e gui ma Horebe vvyty gui jaje'oi vy jaguata tekoa e'ÿa ijava etea pexaague ha'e javi rupi. Tape amorreu kuery regua vvyty ikuai va'e rupi jaje'oi SENHOR Nhanderuete ojapo ukaague rami vy. Ha'e vy Cades-Barnéia peve nhavaê karamboae.

²⁰ Ha'e ramo xee aipoa'e va'ekue peê kuery pe: “Amorreu kuery regua vvyty ikuai va'e re nhavaê ma, nhandevyvrã SENHOR Nhanderuete ome'ê va'e re ae.

²¹ Ne'ixa, kova'e vvy ma SENHOR Nhanderuete omoï ma penerenonde. Tapeo ha'vy penhemboekoa aguã, SENHOR peneramoï kuery Ruete aipoe'iaque rami vy. Pekyje eme, penhemondy eme guive”, ha'e va'ekue.

²² Ha'e ramo peê kuery xea py pevaêmba vy aipopeje va'ekue: “Nhamondouka 'rã avakue nhanerenonde guarã, vvy re oexa pota aguã nhandevy, ha'e gui nhandevy omombe'u ju aguã tape jaa aguã, ha'e tetã oïa py tema nhavaê aguã”, peje va'ekue.

²³ Ha'e rami pendeayvua xee ajou porã vy doze avakue aiporavo karamboae penembyte gui, peteï-teï regua peteï'i ava.

²⁴ Ha'e ramo ha'e kuery jogueraa vy vvyty ikuai va'e rupi oguata vy vvy re oexa pota oje'oivy raka'e. Ha'e vy Escol yvyugua peve ovaê vy

²⁵ vvy re mba'emoaju ikuai va'ekue opo py ojopy vy ha'e nunga ogueru okuapy nhandea py. Ha'e vy nhandevy omombe'u vy “Vvy porã ete SENHOR Nhanderuete nhandevy ome'ê va'e”, he'i va'ekue.

Números 13.25-33

²⁶ — Ha'e rami teï peê kuery ma ndapeoxei. Ha'e rami 'rãgue py SENHOR Penderuete ojapo ukaague rupi e'ÿ pendekuai.

²⁷ Ha'e rami vy pendero rupi voi penhembopoxy rivea rami pendeayvu tema pekuapy. Ha'e vy aipopeje va'ekue: “ SENHOR ma nanhanderayvui vy ae ma nhi'ã nhandepe'apa Egito vvy gui, amorreu kuery po py nhamemboaxapa rã ha'e kuery nhamemboaxaguã rive.

²⁸ Ha'e gui marã katy 'rã tu jaje'oi aguã ha'eve? Mba'eta nhanderyvy kuery ojapo nhandepy'a ikangy rei aguã rami. Mba'eta ha'e kuery aipoe'i va'ekue: 'Ha'e pygua kuery ma nhandegui tuvixakueve ha'e yvatekueve ikuai. Ha'e kuery retã voi tuvixave, ha'e yva peve ikorapa va'e. Ha'e gui roexa avi ha'e py Enaque ra'y kuery regua', he'i", peje va'ekue.†

²⁹ Ha'e ramo xee aipoa'e va'ekue pendeivy: “Penhemondy rei eme, pekyje eme guive.

³⁰ Mba'eta SENHOR Penderuete penerenonde rupi oo vy ha'e ae joe opu'ã 'rã peê kuery repy vy, Egito vvy re pexa pavêa py nhandevy mba'emo ojapoaague rami ae,

³¹ ha'e tekoa e'ÿa re nhandekuaia rupi ojapoaague rami voi. Ha'e py ma pexapa karamboae ava gua'y ogueraa rami avi SENHOR Nhanderuete pendereraa henoiny tape peguataa ha'e javi rupi, apy pevaê peve.

³² Ha'e rami teï aÿ ma ndapejeroviai pekuapy SENHOR Penderuete re,

³³ penerenonde tape ha'e javi rupi oo teï, ojou uka vy peê kuery pepyta aguã. Pyávy ma tata py oexa uka tape peo aguã, ha'e rã ára py ma arai rupi”, ha'e va'ekue pendeivy.

Números 14.20-38

³⁴ — Ha'e rami pendeayvua SENHOR oendu vy ivai reve oura reve aipoe'i va'ekue:

³⁵ “Anhetê ete aipoa'e, kova'e avakue heko vai va'e regua peteïve ndoexai 'rã vvy porã, tamoi kuery pe ame'ê aguã xeayvuague,

³⁶ Jefoné ra'y Calebe anho e'ÿ vy. Ha'e va'e ma oexa 'rã. Ha'e rami vy vvy ha'e opyrã ma oikovyague ame'ê 'rã ixupe ha'e ta'y kuery pe ju, SENHOR rupive oiko aguã onhea'ã rire”, he'i va'ekue SENHOR.

³⁷ Ha'e rami avi pendekáuxa xevy voi SENHOR ivai vy aipoe'i va'ekue: “Ha'e rami ae avi ndee voi ndereupityi 'rã ha'e va'e vvy.

³⁸ Ha'e rã Num Josué ra'y nerenonde rupi oiko va'e, ha'e va'e ae 'rã oupity. Embopy'a guaxu ke ha'vy, mba'eta ha'e va'e ojapo 'rã Israel kuery hekoa aguã rami vvy ame'ê va'e re.

³⁹ Ha'e gui pendera'y kue'iry, ha'e kuery pe 'Ombo'a pyrã' pejeague va'e, pendera'y kuery mba'emo vai neï mba'emo porã ma voi ndoikuai va'e kuery ae oïke 'rã ha'e py. Ha'e kuery pe ae 'rã ame'ê, ha'e ramo hekoa 'rã okuapy ha'e py.

⁴⁰ Ha'e rã peê kuery ma pejere, tapeopa ju tekoa e'ÿa katy, tape Ye'ê pytã katy oo va'e rupi”, he'i va'ekue SENHOR.

Números 14.39-45

⁴¹ — Ha'e ramo peê kuery aipopeje va'ekue xevy: “Rojejavy rima SENHOR rovai. Roje'oi nho 'rã joe ropu'ã vy, SENHOR Nhanderuete ijayvuague rami vy”, peje vy peteï-teï penerembiporu joe opu'ã pygua pejopya vy pendeivy'a py pemoï ae pekuapy vvyty ikuai katy peje'oi aguã.

⁴² Ha'e ramo SENHOR aipoe'i karamboae xevy: “Aipo're ha'e kuery pe: ‘Tapeo eme, pepu'ã eme joe, mba'eta xee ndaikoi 'rã peê kuery mbyte, penderovaigua kuery penderitypa e'ÿ aguã', re”, he'i va'ekue.

⁴³ Ha'e rami pendeivy xeayvu va'ekue ri napenduxei pekuapy. Ha'e rami 'rãgue py SENHOR nhe'ê rendua rupi e'ÿ, ha'e pendejee anho rei pejeroviaa rupi peje'oi karamboae vvyty ikuai katy.

⁴⁴ Ha'e ramo ha'e va'e vvy re amorreu kuery ikuai va'e penderovaexi aguã joguerupa vy eiru rami penemonha. Ha'e rami vy penderitypa Seir guive Horma peve.

⁴⁵ Ha'e ramo pejevypa ma vy pejae'o va'ekue SENHOR renonde. Ha'e rami teï SENHOR noendui, ndojapyxakai ae pejapukaia re.

⁴⁶ Ha'e va'e rire mbovy ára rei e'ÿ pendekuai va'ekue Cades py ae.

† 1:28 Enaque ra'y kuery ma gigante ikuai raka'e (Números 13.28).

2

Cades gui Zerede peve oguata oje'oivvy jave guare

¹ — Ha'e va'e rire ma jajeapa vy tekoa e'ya katy ju jaje'oi, tape ye'ë pytä katy oo va'e rupi, SENHOR xeivy aipoe'iague rami vy. Ha'e rami vy mbovy ára re rei e'ÿ jajere-jere jakuapy Seir regua vyvty vyvry rupi.

² Ha'e rá SENHOR ijayvu vy aipoe'i xeivy:

³ “Pejere-jere vaipa ma kova'e vyvty vyvry rupi. Pejeapa ju ke kuaray ijapu'a'ia katy.

⁴ Ha'e vy heta va'e kuery pe ndeayvu vy aipo're 'rã: 'Peaxa 'rã penderyke'y kuery Esaú ramymino kuery Seir re ikuai rupi. Ha'e va'e kuery ma okyje 'rã peë kuery gui. Va'eri peiko kuaa pota ta'vy opa mba'e py.

⁵ Pejoguero'a rei eme ha'e kuery reve, mba'eta ha'e kuery vyv ma name'ëi 'rã pendevy, neï ruxã'i pepyrõ aguã rive voi. Mba'eta Esaú kuery pe ae ame'ë raka'e Seir vyvty regua ha'e javi.

⁶ Ha'e kuery gui tembi'u pe'u va'erã pejogua 'rã perãta re ae. Yy pey'u va'erã voi pejogua perãta re, 're 'rã' he'i va'ekue SENHOR.

⁷ Mba'eta SENHOR Penderuete penemoingo porã va'ekue pendepo py penembiapoia ha'e javi re. Ha'e ma oikuaapa kova'e tekoa e'ÿa rupi penguataa. Quarenta ma'etÿ re SENHOR Penderuete oiko pendereve. Ha'e ramo mba'eve rei ndoatã pendevy.

⁸ Ha'e gui jaaxa nhanderyvy Esaú ramymino kuery Seir re ikuai yke rupi. Ha'e rami vy tape Elate ha'e Eziom-Geber gui vyv joja reia katy oo va'e gui jajeapa vy tape Moabe regua tekoa e'ÿa rupi oo va'e rupi ju jaa.

⁹ — Ha'e gui SENHOR aipoe'i xeivy: “Pejavyky rei eme Moabe pygua kuery, neï pepu'ã rei eme guive ha'e kuery re, mba'eta ha'e kuery vyv ma name'ëi 'rã pendevy, mba'eta Ar tetã ame'ë ma voi Ló ramymino kuery pe”, he'i.

¹⁰ (Ha'e py ymave rupi ikuai va'ekue ma emim kuery. Ha'e va'e kuery ma tuvixakue, heta ete, ha'e anaquim kuery rami ipuku va'ekue raka'e.

¹¹ Ha'e kuery pe ma “Refaim ikuai” 'ea va'ekue, anaquim kuery pe rami avi. Ha'e rá ha'e kuery pe Moabe pygua kuery ma “Emim kuery” he'i.

¹² Ha'e horeu kuery voi ikuai va'ekue Seir py. Va'eri Esaú ra'y kuery omomba vy omondyipa guenonde gui, ha'e rami vy hekoague py ha'e kuery ju ikuai, Israel kuery ojapoague rami avi ovyvã SENHOR ome'ë va'ekue py.)

¹³ Ha'e gui “Pepu'ã ke aÿ, ha'e peaxa Zerede yakã rovaigua re”, SENHOR he'iague rami vy jaaxa va'ekue Zerede yakã rovaigua re.

¹⁴ Cades-Barnéia guive Zerede yakã rovaigua peve jaguataague ha'e javi ma trinta e oito ma'etÿ, nhande kuery regua avakue joe opu'ã va'ety ha'e javi omanomba peve nhandeaty mbyte py ae, SENHOR oura reve ijayvu ma voiaque rami vy.*

¹⁵ Ha'e rami vy SENHOR ae opo oupi ha'e kuery rovai, nhandeaty mbyte gui omomba ha'e omokanhymba peve.

Ar tetã rupi Arnorn yakã oaxapa oje'oivvyague re ima'endu'aague

¹⁶ — Ha'e gui heta va'e kuery mbyte gui avakue joe opu'ã va'ety omanomba ma rire

¹⁷ SENHOR ijayvu vy aipoe'i xeivy:

¹⁸ “Aÿ ma peaxa 'rã Ar rupi, Moabe pygua kuery vyv rupi,

¹⁹ ha'e pevaë 'rã Amom ra'y kuery renonde katy peve. Ha'e rá pejavyky rei eme, neï pepu'ã rei eme ha'e kuery re, mba'eta Amom ra'y kuery vyv ma name'ëi 'rã pendevvyrã, Ló ra'y kuery vyvã ame'ë ma voi rire.”

²⁰ (Ha'e rami avi ha'e va'e vyv pe “Refaim kuery vyv” 'ea avi, ha'e kuery voi ikuai ranhe rire, ha'e kuery pe amonita kuery “Zanzumim kuery” 'ea va'e ae.

²¹ Ha'e kuery ma tuvixakue, heta ete, ha'e anaquim kuery rami ipuku va'ekue raka'e. Ha'e gui SENHOR omomba va'ekue amonita kuery renonde gui. Ha'e ramo ha'e kuery ju omondyipa ma vy ikuai hekoague py.

²² Ha'e rami ae avi Esaú ra'y kuery re ojapo raka'e Seir py, mba'eta ha'e kuery renonde horeu kuery omomba rire Esaú ra'y kuery ju ikuai hekoague py, kova'e ára peve.

²³ Ha'e gui Caftor pygua kuery voi guekoa gui ae ou vy omomba avi raka'e aveu kuery Gaza tekoa peve ikuai va'ekue, ha'e vy ikuai hekoague py.)

²⁴ Ha'e gui “Pepu'ã ke ha'vy. Tapeo, ha'e peaxa Arnorn yakã. Ne'exa, ndepo py ma amboaxa Hesbom pygua huvixa Seom amorreu regua, ha'e ijyvy ha'e javi. Tapeo ha'vy, pendekuai ha'e py, pepu'ã ha'e kuery re.

²⁵ Aÿ gui amboypy 'rã yva guy rupi ikuai va'e ha'e javi re amoï aguã peë kuery gui okyjepa rei aguã. Ha'e kuery pendepo'akaa omombe'ua rá oendu vy oryryipa 'rã okuapy pendegui, ndaekorãvei rei vy”, SENHOR he'i va'ekue.

Números 21.21-30

²⁶ — Ha'e ramo Quedemote tekoa e'ÿa gui xee amondouka ayvu mombe'uarã kuery Hesbom pygua huvixa Seom-a py. Ayvu ha'evepa rei aguã regua amombe'u uka vy aipoa'e:

²⁷ “Tove toroaxa ndeyvy rupi. Tape rupi anho 'rã roo. Ndoroyepei'ai 'rã roiporu kuaa katy, neï roiporu kuaa e'ÿa katy voi.

²⁸ Tembi'u ro'u va'erã reme'ë perãta re ae, yy roy'u va'erã voi perãta re reme'ë. Ha'e vy tove toroaxa ndeyvy rupi,

* 2:14 Números 14.28-35

²⁹ Esaú ra'y kuery Seir py ikuai va'e oremboaxaague rami avi, ha'e Moabe pygua kuery Ar py ikuai va'e voi. Ha'e rami vy roaxa aguã Jordão yakã rovaigua re, oreyyvrã SENHOR Oreruete ome'ê va'ekue py rovaê peve", ha'e uka va'ekue.

³⁰ Ha'e rami teĩ Hesbom pygua huvixa Seom ndoipotai jaaxa ijyvy rupi, mba'eta SENHOR ae ojapo inhakã ratãa rupi onhe'ê py ndoipotai oendu aguã rami, pendepo py omboaxa aguã aỹ pexaa rami ae.

³¹ Ha'e vy SENHOR aipoe'i: "Ne'ixa, apy amboypy ma pendepo py omboaxa aguã Seom ha'e ijyvy ha'e javi. Tapeo ha'vy peipe'apa, peẽ ju ijyvykue py penhemboekoa aguã", he'i va'ekue.

³² — Ha'e gui Seom ojeuepuga kuery ha'e javi reve ou okuapy nhanderovai opu'ã aguã Jaza py.

³³ Ha'e rami teĩ nhandepo py SENHOR Nhanderuete omboaxa ramo jaitypa, ta'y kuery ha'e ixupegua kuery ha'e javi.

³⁴ Ha'e va'e jave ha'e kuery retã ikuai va'e jajopypa vy nhamomba katui'i, avakue, kunhague ha'e kyrĩgue'i guive. Neĩ peteive ma voi ndajaejai va'ekue ikuai ve aguã.

³⁵ Mymba kuery anho tema jajopy nhanerymbarã, ha'e hetã jaipe'a va'ekue py mba'emo oeja va'ekue voi.

³⁶ Arnom yvugua yvĩy Aroer oi va'e, ha'e ha'e py tetã oi va'e guive Gileade peve, tetã ikora yvateve va'e meme teĩ jaipe'apa, nhandepo py SENHOR Nhanderuete omboaxa ramo.

³⁷ Ha'e rã Amom ra'y kuerya py anho nanhavaẽi va'ekue, neĩ Jaboque yakã yvĩy rupi, yvyty yvĩy tetã ikuai va'e rupi, neĩ teĩve henda py SENHOR Nhanderuete nanhanemondoukaia rupi.

3

Números 21.31-35

¹ — Ha'e gui jajeapa vy Basã katy tape oo va'e rupi ju jaa. Ha'e ramo Basã pygua huvixa Ogue nhanerovaexi vy oo ojeuepuga kuery ha'e javi reve, nhandere opu'ã aguã Edrei py.

² Ha'e rã SENHOR Nhanderuete aipoe'i xeivy: "Ekyje eme ha'e kuery gui, mba'eta amboaxa ndepo py, ixupegua kuery ha'e ijyvy ha'e javi reve. Ha'e va'e re pejapo 'rã amorreu kuery ruvixa Seom re pejapoague rami, Hesbom pygua ae va'ekue", he'i va'ekue.

³ Ha'e rami vy nhandepo py SENHOR Nhanderuete omboaxa avi Basã pygua huvixa Ogue, ixupegua kuery ha'e javi reve. Jajukapa, neĩ peteĩ'i voi oikove aguã rami e'ỹ.

⁴ Ha'e va'e jave py nhandepo'aka hetã ha'e javi re. Teĩve tetã noĩ nhandepo'akaa e'ỹ va'ekue. Sessenta tetã re nhandepo'aka Argobe regua yvy ha'e javi, Basã pygua huvixa Ogue openaague.

⁵ Ha'e va'e tetã ha'e javi ma ikora yvate va'e meme, ikora rokẽ jokoa va'e voi. Tetã mbovy e'ỹ rei avi jajopy ikora e'ỹ va'e.

⁶ Nhamomba katui'i, Hesbom pygua huvixa Seom mba'ekue re jajapoague rami. Peteĩ-teĩ tetã nhamomba, avakue, kunhague ha'e kyrĩgue ha'e javi.

⁷ Mymba kuery anho tema jaraa nhandevy guarã, tetã pygua kuery oguereko va'ekue voi.

⁸ Ha'e rami py amorreu kuery huvixa mokoĩve po gui jaipe'a va'ekue ijyvy Jordão yakã kyvõ rupi itui va'ekue, Arnom yakã guive yvyty Hermom yvyty peve.

⁹ (Hermom yvyty pe ma Sidom pygua kuery "Siriom" he'i, ha'e rã amorreu kuery ma "Senir" he'i okuapy va'e.)

¹⁰ Ha'e rami vy nhandepo'aka yvy joja reia rupi tetã ikuai va'e re, Gileade regua ha'e javi re, Basã regua re voi, Salca ha'e Edrei peve. Ha'e va'e ma Basã pygua huvixa Ogue openaague meme.

¹¹ (Mba'eta Basã pygua huvixa Ogue anho'i ma oikove va'ekue refaim kuery regua. Ha'e va'e rupa ma ferro guigua, Amom ra'y kuery retã Rabã re oi teri va'e. Ipuku-a ma irundy metros, ha'e rã ipya ma mokoĩ metros, aỹ nha'ã rami.)

Números 32.33-42

¹² — Ha'e va'e jave py ae jajopypa nhandevyvrã. Ha'e gui Arnom yvugua yvĩy Aroer tekoa oi va'ekue guive Gileade regua yvyty mbytekue peve, tetã ikuai va'e ha'e javi reve amboaxa Rúben ha'e Gade ramymino kuery pe.

¹³ Ha'e rã Manassés ramymino kuery mbytekue ikuai va'e pe ma amboaxa Gileade yvy rembyre ha'e Ogue openaague Basã yvy ha'e javi. Argobe regua Basã ha'e javi pe ma "Refaim kuery yvy" 'ea va'ekue.

¹⁴ Ha'e gui Manassés ra'y Jair ojopy Argobe, ha'e va'e ma Basã ae, gesurita ha'e maacatita kuery yvy oje'aa peve. Ha'e vy tekoa ikuai va'e ma guery py ae oenoĩ rire "Havote-Jair" 'ea aỹ peve.

¹⁵ Maquir pe ma amboaxa Gileade.

¹⁶ Ha'e rã Rúben ha'e Gade regua kuery pe ma amboaxa Gileade guive Arnom yvugua peve, ha'e va'e mbyte rupi ija'orã opyta oiny rupo, ha'e gui Jaboque yakã yvĩy Arnom ra'y kuery yvy oje'aa peve.

¹⁷ Ha'e rami ae avi Arabã rami ma Jordão yakã opyta ija'orã, Quinerete yupa guive Arabã regua ye'ero peve, ha'e gui kuaray oẽa katy ma Pisga yvy'ã guy katy rupi oo.

¹⁸ — Ha'e va'e jave py pendevy xeayvu vy aipoa'e va'ekue: " SENHOR Penderuete ae ome'ê kova'e yvy penderekoarã. Ha'e nunga rupi penderegua avakue ipy'a guaxukue guembiporu reve toxaxa guyy kuery Israel regua mboae renonde.

¹⁹ Penda'yxy kuery, pendera'y ha'e penderajy kuery anho 'rã opyta penderekoarã amboaxa va'ekue py, penerymba kuery guive, mba'eta aikuaa penerymba reta va'ea,

²⁰ ha'e rami penderyvy kuery voi SENHOR opytu'u aguã ome'êa ára peve peẽ kuery pe ranhe pepytu'u aguã ome'êague rami avi, ha'e kuery voi hekoa aguã ijyvyvrã Jordão yakã rovai re SENHOR Penderuete ome'ê va'e py. Ha'e gui mae ma peteĩ-teĩ pejevy 'rã pendevyvrã amboaxa va'ekue py", ha'e va'ekue.

²¹ — Ha'e va'e jave py Josué pe voi xeayvu vy aipoa'e va'ekue: “Nderexa py ae rexapa ma kova'e mokoí huvixa re SENHOR Nderuete ojapoague. Ha'ekue rami ae ju 'rã SENHOR ojapo huvixa ikuai va'e openaa rupi ndee reaxa aguã rupi.

²² Pekiye eme ha'e kuery gui, mba'eta SENHOR Penderuete ae 'rã opu'ã peẽ kuery repy vy”, ha'e va'ekue.

Números 27.12-23

²³ — Ha'e va'e jave xee voi ajapukai SENHOR pe. Ha'e vy aipoa'e:

²⁴ “Ah SENHOR Oruete, remboypy ma xee nerembiguai pe rexa uka aguã mba'emo ndepo'akaa rupi ndepo imbaraete va'e py rejapo va'e. Mba'eta mba'e nunga tuuete yva re, e'y vy yvy re teĩ ikuai va'e, ha'e kuery ojapo avi 'rã ndepo'akaa rupi rejapo va'e ramigua?”

²⁵ Ha'e nunga rupi ajerure ndevy, tove taaxa avi, xee voi aexa aguã yvy porã Jordão yakã rovai re itui va'e, ha'e va'e vvytya ha'e javi, Líbano peve”, ha'e va'ekue SENHOR pe.

²⁶ — Ha'e rami teĩ peẽ kuery káuxa SENHOR xevy ivai vy noendu potai. Ha'e rami vy aipoe'i: “Ha'evé ma! Ndeayvuve eme xereve ha'e nunga re.

²⁷ Eẽ eovy Pisga vvyty apyte áry, ha'e ema'ẽ kuaray ijapu'a'ia katy, ipuku-a katy ha'e oikéa katy. Nderexa py rive 'rã rexa, mba'eta nda'evei kova'e Jordão yakã rovai re reaxa aguã.

²⁸ Ha'e rami avi Josué pe ndeayvu 'rã rembopy'a guaxu ha'e remombaraetea rupi, mba'eta ha'e ma oaxa 'rã kova'e kuery renonde, ojapo 'rã vvy ndee rexa rive va'ekue py hekoa aguã rami”, he'i va'ekue.

²⁹ — Ha'e ramo japytave'i ranhe Bete-Peor katy'i vvyugua oĩ va'e py.

4

SENHOR nhe'ẽ rendua rupi heta va'e kuery ikuai aguã re Moisés ijayvuague

¹ — Aỹ ma Israel kuery, pendu ke ayvu oeja pyre ha'e 'arandua rupigua re rombo'e ta va'e. Pejapo ete peikove ha'e peupity aguã pendeyvyrã SENHOR Penderuete ome'ẽ va'e.

² Napemoívei 'rã ayvu xee amboaxa va'e áryve, neĩ napemboivei 'rã guive, SENHOR Penderuete ojapo uka va'ekue pejapopa aguã, xee amboaxaa rami ae.

³ Penderexa py ae pexa va'ekue tuuete Baal re oje'oi va'ekue re SENHOR Penderuete ojapoague, mba'eta avakue Peor pygua kuery nguete Baal re oje'oi va'ekue ma omokanhymba raka'e penembyte gui.

⁴ Ha'e rã peẽ kuery SENHOR Penderuete re pejerovia ete va'e ma pekuavepa aỹ peve.

⁵ Ne'exa, SENHOR Xeruete omombe'u ukaague rami vy xee rombo'e ma oayvu oeja va'ekue ha'e hi'arandua rupigua re, pendeyvyrã pejopy va'ekue py pendekuai ma vy ha'e rami ae pendekuai aguã.

⁶ Pendejee pemoi ha'vy pejapo ete aguã, mba'eta ha'e rami vy pexa uka 'rã pene'arandua ha'e peiko porã kuua amboae regua kuery rembiexa py. Ha'e nunga ayvu oeja pyre ha'e kuery oendu vy “Anhetẽ ete kova'e kuery ma hi'arandu ete ha'e ikuai porã kuua va'e”, he'i 'rã okuapy.

⁷ Mba'eta mba'e nunga kuery regua tu heta teĩ nguue ete oguereko SENHOR Nhanderuete jajapukai nhavõ nhanepytyvõ va'e ramigua?

⁸ Mba'e nunga kuery regua tu heta teĩ oguereko ayvu oeja pyre ha'e 'arandu rupigua aỹ pendekorã amboaxa va'e ha'e javi ramigua?

⁹ — Ha'e rami avi pereko kuua pota peẽ ae pendekuaia ha'e penenhe'ẽ, penderexari e'y aguã penderexa py pexa va'ekue-ekue re, ha'e pendepy'a gui pemokanhy eme peikoa pukukue re. Peikuaa uka avi 'rã pendera'y ha'e peneramymino kuery pe.

¹⁰ Pendexarai eme Horebe vvyty re Penderuete renonde pendekuai jave guare re, xevy SENHOR aipoe'i jave: “Emboatypa ke kova'e kuery, tojapyxaka xeayvu re, vvy re ikuai'a pukukue re xerenonde ikuai aguã ojererokyjea rupi, ha'e gua'y kuery voi ombo'e aguã aguã ha'e rami” he'i va'ekue.

¹¹ Ha'e va'e vvyty vvyry pevaẽ vy pearõmba pekuapy. Vvyty ma tata raku jekuaa yva mbyte peve, ha'e gui pytũ vaikue, arai pytũ guive.

¹² Ha'e gui tata mbyte gui SENHOR ijayvu. Ijayvu nhendu rã pendu va'ekue. Ha'e rami ete ijayvua pendu va'eri neĩ peteíve py ndapexai va'ekue.

¹³ Pendevy peguarã omombe'u guexeve guarã, ojapo uka avi dez ayvu ojapo pyrã. Ha'e va'e ma ombopara mokoí itape re.

¹⁴ Ha'e va'e jave ae SENHOR xevy penembo'e uka avi oayvu oeja va'ekue ha'e o'arandu rupigua re, pendeyvyrã pejopy va'ekue py pendekuai ma vy pejapopa aguã.

¹⁵ Perekó kuua pota ha'vy penenhe'ẽ, mba'eta Horebe vvyty re tata mbyte gui SENHOR Penderuete pendevy ijayvu jave neĩ teigüeve ma ndapexai va'ekue,

¹⁶ penhemboeko ky'a rei e'y aguã mba'emo ra'angaa pembojerovia va'erã rive pejapoa py, ava e'y vy kunha ra'angaa teĩ ae ma,

¹⁷ ha'e'y vy mba'emo mymba vvy rupi ikuai va'e, e'y vy yva guy rupi oveve va'e ramigua,

¹⁸ mymba vvy rupi otyryry va'e, e'y vy pira yy guýry ikuai va'e voi.

¹⁹ Peiko kuua pota ke, yva re pema'ẽ vy kuaray, jaxy, jaxy-tata ha'e mba'emo yva re ojekuaa va'e ha'e javi pexa vy pejekore vy henonde penenapy'ã re peĩ reve pemboete e'y aguã, mba'eta ha'e nunga ma SENHOR Penderuete ae oeja va'ekue yva guýry ha'e javi regua ikuai va'e peguarã rive.

²⁰ Ha'e rã peẽ kuery ma SENHOR penderjogua vy penerenoẽmba tata rupa ferro ky'a'oaty, Egito vvy re pendekuaia gui, ojeupe guarã ae pendereru, aỹ minha pexaa rami.

²¹ — Ha'e gui pendekáuxa xevy SENHOR ivai vy oura xee aaxa e'y aguã yvy porã Jordão yakã rovai re pendekoarã SENHOR Penderuete ome'ẽ va'e py.

²² Ha'e rami rã xee ma kova'e tekoa py ae 'rã amano, ndaaxai 'rã Jordão yakã rovai re. Ha'e rã peẽ kuery ma peaxa 'rã ha'e va'e vvy porã py penderekoa aguã.

²³ Peiko kuaa pota ke penderexarai e'ÿ aguã SENHOR Penderuete guexeve guarã ojapo va'ekue gui, pejapo e'ÿ aguã mba'emo ra'angaa pembojerovia va'erã, ha'e nunga SENHOR Penderuete ndojapo ukai rire.

²⁴ Mba'eta SENHOR Penderuete ma tata nhomokanhyarã. Ha'e ma oipota hexe anho pejerovia.*

²⁵ — Ha'e gui pendera'y ha'e peneramymino jevy vvy re pendetuja'ipa ma jave, xapy'a rei penhem-boeko ky'aa rupi pejapo 'rã mba'emo ra'angaa pembojerovia va'erã, ha'e vvy SENHOR Penderuete renonde ha'eve'ÿ va'e pejapo 'rã pendevy ivai aguã rami,

²⁶ aÿ gui ma yva ha'e vvy opyta peẽ kuery rekokue moma'endu'aarã, mba'eta pemanomba voi 'rã pendevyvrã Jordão yakã rovai re peaxa vvy pejopyague py. Ha'e py ma ndapeiko pukui 'rã. Ha'e rami 'rãgue py penemombaa 'rã.

²⁷ Ha'e rami vvy SENHOR penemoaimba 'rã amboae regua ikuai rupi. Mboapy'i ete'i 'rã pekuave, vvy regua kuery ikuai rupi SENHOR penemondoukaague rupi.

²⁸ Ha'e py ma penderueterã pembojerovia 'rã avakue rembiapo rive, vvyra ha'e ita guigua, oexa e'ÿ va'e, oendu e'ÿ va'e, okaru e'ÿ va'e, neĩ oetũ e'ÿ va'e.

²⁹ Ha'e gui mae ma peka 'rã SENHOR Penderuete, ha'e vvy pejou 'rã, penenhe'ẽ ha'e pendepy'a ha'e javi py ri peka vvy.

³⁰ Mba'eta pejexavaia py opaa ára ha'e nunga ha'e javi pendere ou ramo SENHOR Penderuete pe pejevy vvy penhe'ẽ rendu nho ramo

³¹ SENHOR Penderuete napenepytyvõ e'ÿi 'rã, nhomboaxy kuaa va'e vvy. Napenemomba etei 'rã, ndaexarai 'rã guive oura reve guexeve guarã peneramoĩ kuery reve ojapo va'ekue gui.

³² — Aÿ ma peikuaa pota yma peiko e'ÿ mbove mba'emo oikoague re, mba'eta vvy re Nhanderuete avakue omoingo guive, yva guy ha'e javi rupi ndoikoi neĩ noenduai teri gui ramigua.

³³ Tyrã pa amongue va'e regua nda'u oendu ma tata mbyte gui tuuete ijayvu va'e teĩ okuave teri, peẽ kuery re oikoague rami?

³⁴ Tyrã amongue tuuete nda'u onhembopy'a ma amboae regua kuery mbyte gui ojeupe guarã oipe'a aguã, joeko a'aa py, mba'emo porã oexa ukua py, iporã va'e ojapoa py, joe opu'aa py, opo oupi vvy opo'akaa oexa ukua py, opa marã nhomondyipa py, Egito vvy re SENHOR Penderuete penembixarã ojapoague rami ete?

³⁵ Pendevy ae ha'e nunga oexa uka raka'e, peikuaa aguã SENHOR ae Penderuete oikoa. Jipoi amboae, ha'e anho e'ÿ vvy.*

³⁶ Yva gui oayvua omonhendu penembo'e aguã, ha'e vvy re ju oexa uka guata tuvixa va'e. Ha'e ramo hata mbyte gui pendu va'ekue ijayvua.

³⁷ Peneramoĩ kuery ha'e oayvua rupi, hamymino kuery ju oiporavo vvy penerenoẽmba raka'e Egito vvy gui, ha'e ae ojekuaa uka opo'akaa ha'e javi py,

³⁸ penerenonde gui oipe'apa aguã amboae regua pendegui ipo'akapave va'e voi, ha'e gui pendevyvrã va'ekue py peru aguã, aÿ jaexaa rami ae.

³⁹ Ha'e nunga rupi aÿ gui ma peikuaa 'rã, pendepy'a py peikuaa pota porã 'rã SENHOR anho Nhanderuete oikoa re, yva re ha'e vvy re ndoikoi amboae.

⁴⁰ Pejapopa ha'vy oayvu oexa va'ekue ha'e ojapo ukaague aÿ xee ju amboaxa va'e, pendekuai porã'i aguã, ha'e pendera'y kuery ju peẽ ndapeikovei jave, pendevyvrã SENHOR Penderuete raka'e rã peve guarã ome'ẽ va'ekue py pendekuai puka aguã — he'i Moisés.

Números 35.9-15; Deuteronomio 19.1-3

⁴¹ Moisés oiporavo mboapy tetã onhemi atyrã Jordão yakã regua kuaray oua katy ikuai va'e, ⁴² ha'e py potae vvy e'ÿ oirũ ojuka va'ekue onhemi aguã, neĩ omotare'ÿ-e'ÿkyue py ri vvy, ha'e va'e tetã va'e regua py rei ovaẽ vvy oiko aguã.

⁴³ Ha'e vvy Rúben kuery peguarã ma Bezer tetã oiporavo tekoa e'ÿa py vvyypea re oĩ va'e. Gade kuery pe ma Gileade regua Ramote tetã oiporavo, ha'e rã Manassés kuery pe ma Basã regua Golã tetã ju.

Mokoigue ma Moisés ijayvu jevyague

Lei oexa pyre Moisés omombe'u porãveague

⁴⁴ Pova'e lei ma Israel kuery rekorã Moisés omboaxa va'ekue.

⁴⁵ Po rami ma mba'emo oikuaa uka pyre, ayvu oexa pyre ha'e 'arandu rupigua Israel kuery pe Moisés omombe'u va'ekue Egito vvy gui oupa jave py,

⁴⁶ Jordão yakã rovai teri ikuai re, Bete-Peor katy'i vvyugua rupi ikuai jave, amorreu kuery Hesbom pygua ruvixa Seom oiko va'ekue vvy re. Ha'e va'e ma Moisés ha'e Israel kuery ojuka va'ekue Egito vvy gui oupa ma jave,

⁴⁷ ha'e ijyvykue guive ojopypa ikuai aguã, Basã pygua huvixa Ogue vvykue guive. Ha'e va'e mokoive ma amorreu kuery huvixa ikuai va'ekue meme. Ijyvykue ma Jordão yakã regua kuaray oua katy itui,

⁴⁸ Arnom vvyugua katy'i Aroer tekoa oĩ va'e guive, ha'e Siom vvyty peve (ha'e va'e ma Hermom),

⁴⁹ Vvy joja reia ha'e javi Jordão yakã regua kuaray oua katy oĩ va'e, vvy joja reia regua ye'ẽ rembe peve Pisga vvyty katy'i vvy'ã guy rupi.

5

Êxodo 20.1-17

¹ Ha'e gui Israel kuery Moisés oenoimba vy aipoe'i:

— Israel kuery, pendu ke ayvu oea pyre ha'e 'arandu rupigua re pendeapya py xeyvy ramo, peikuaa porã vy pejapopa ete aguã.

² Horebe vyvty re nhandekuai jave nhande kuery reve SENHOR Nhanderuede ojapo guexeve guarã.

³ Nhaneramoí kuery reve'y SENHOR ojapo, ha'e rã nhande kuery apy a'y'í jakuave'i teri va'e reve ae.

⁴ Nhande kuery nhaendua py ete SENHOR ijayvu, vyvty áry tata mbyte gui.

⁵ (Ha'e rami jave ma xee ha'ã va'ekue Nhanderuede ha'e peẽ kuery mbyte SENHOR ijayvua mboaxaarã, mba'eta tata gui pekyje vy napeẽi vyvty re.) Ha'e gui SENHOR aipoe'i va'ekue:

⁶ “Xee ma SENHOR Nderuede Egitto vyvty re escravo pendekuai vy pemba'eapo poyiague gui pendepe'a va'ekue.

⁷ Ndererekoí 'rã nderuede mboae xerenonde.

⁸ Nderejapoi 'rã mba'emo ra'angaa nderueterã, yva re ikuai va'e ra'angaa, yva guýry vyvty re ikuai va'e ramigua, neí vyvty guý rupi yy oí va'e rupi ikuai va'e ra'angaa voi.

⁹ Ha'e nunga neremboetei 'rã, neí nerembojeroviaí 'rã, mba'eta xee SENHOR Nderuede ma aipota xere anho pejerovia, mba'eta aju vy ambopaga 'rã xere nda'ija'ei va'e reko vaiague re, tuu kuery, ta'y kuery, hamymino ha'e hamymino jevy kuery ikuai peve.

¹⁰ Ha'e rã amongue xerayvu vy ajapo ukaague rami ikuai va'e ma amboaxy 'rã mil-kue hamymino kuery ikuai peve.

¹¹ “Ndeayvu rive eme SENHOR Nderuede rery rupi, mba'eta SENHOR nomboeko porã 'rã hery rupi ijayvu rive va'ekue.

¹² “Nema'endu'a ke sábadó ára py iky'a e'y'í va'erã remboete aguã, SENHOR Nderuede ojapo ukaague rami vy.

¹³ Mboapy meme ára re 'rã remba'eapo, ha'e rejapopa 'rã rejapo va'erã va'ekue ha'e javi.

¹⁴ Ha'e rã sete-a ára ma sábadó SENHOR Nderuede pegua ára. Neremba'eapoi 'rã mba'eve py, ndera'y, nderajy, nerembiguai avakue ha'e kunhague, nerymba vaka, mburika'i, neí peteíve nerymba, neí mombyrygua kuery ndero py removaẽ va'ekue voi, nerembiguai kuery voi ndee rami avi topytu'u.

¹⁵ Mba'eta nema'endu'a Egitto vyvty re escravo reiko jave ha'e gui SENHOR Nderuede ndepe'aague re, opo oupi vy opo'akaa oexa ukaa py. Ha'e rami rire SENHOR Nderuede omboete uka sábadó ára.

¹⁶ “Remboete 'rã nderu ha'e ndexy, SENHOR Nderuede ojapo ukaague rami, reikove puku ha'e reiko porã aguã ndeyvyrã SENHOR Nderuede ome'ẽ va'ekue py.*

¹⁷ “Ejojuka eme.*

¹⁸ “Ndetavy eme.*

¹⁹ “Nemonda eme.*

²⁰ “Ndeayvu rive eme neirũ re.

²¹ “Emoarũ eme neirũ ra'yxy. Emoarũ eme neirũ ro, neí imba'ety, hembigui ava neí kunha, hymba vaka neí mburika'i, neí mba'eve neirũ mba'e rei-rei oguereko va'e.”*

Êxodo 20.18-21, 31.18

²² — Ha'e va'e ayvu rupi ma pendeaty va'e kuery pe SENHOR ijayvu raka'e vyvty oia gui. Tata ha'e arai pytũ mbyte gui onhendu atã. Ha'e va'e rire nda'ijayvuve jevyi. Mokoí itape re omboparapa ma rire ome'ẽ xevy.

²³ Vyvty tata ojopeayi teri reve arai pytũ gui ijayvu rã pendu vy penhemboja xere, peteí-teí regua akã ha'e nhomongeta va'ety kuery.

²⁴ Ha'e vy aipopeje va'ekue xevy: “Apy ma SENHOR Nhanderuede orevy oexa uka opo'akaa ha'e imarã e'y'í va'ea. Roendu guive tata mbyte gui ijayvu rã. A'y'í roexa rã Nhanderuede ndee ava reiko va'e reve ijayvu teí reikove teri.

²⁵ Ha'vy a'y, mba'e re tu romanomba ta? Mba'eta peva'e tata tuvixa va'e oremokanhymba 'rã. SENHOR Nhanderuede ayvu roenduve tema ri vy romanomba 'rã.

²⁶ Mba'eta mava'e ava nda'u SENHOR Nhanderuede oikove va'e tata mbyte gui ijayvu rã oexa teí oikove 'rã, nhande kuery jaexaa rami?

²⁷ Enhemboja ndee, ha'e endu SENHOR Nhanderuede mba'e he'ia. Ha'e gui orevy ju remombe'upa 'rã SENHOR ijayvuague. Ha'e ramo roendu vy rojapopa 'rã”, peje va'ekue.

²⁸ Ha'e rami xevy pendeayvu rã SENHOR oendu vy aipoe'i xevy: “Xee aendu heta va'e kuery ndevy pe ijayvu rã. Ha'e kuery ha'evea rami meme ijayvu.

²⁹ Ha'e kuery py'a re oí ete 'rãgue xerenonde ojererokyjea rupi ikuai aguã, ha'e ajapo uka va'e ha'e javi rupi, ha'e kuery ikuai porã aguã, ta'y kuery voi, raka'e rã peve guarã!

³⁰ Tereo ha'vy, ha'e kuery pe ‘Tapeopa ju pendero katy’, 're.

* 5:16 Mateus 15.4, Marcos 7.10, Efésios 6.2-3 * 5:17 Mateus 5.21, Romanos 13.9, Tiago 2.11 * 5:18 Mateus 5.27, Romanos 13.9, Tiago

2.11 * 5:19 Romanos 13.9 * 5:21 Romanos 7.7, 13.9

³¹ Ha'e rā ndee ma repytave ju 'rā apy xereve. Ha'e rā xee amombe'uve 'rā ajapo uka va'e, xeayvu ha'e aipota va'e ha'e javi. Ha'e va'e re ma ndee rembo'e 'rā ha'e kuery oyvyrā ame'ẽ va'e py ikuai jave ojapopa aguã rami", he'i va'ekue SENHOR.

³² Ha'e nunga rupi pejapopa pota 'rā SENHOR Penderuete ojapo uka va'ekue. Ha'e ramia gui pejepe'a eme peiporu kuaa katy, neĩ peiporu kuaa e'ỹa katy.

³³ SENHOR Penderuete ojapo uka va'e ha'e javi rupi pendekuai, pendekuai porã ha'e peiko pukuve aguã pendeyvyrã pejopy aguã va'e re.

6

"Nhanhe'ẽ rendu aguã ae lei oejã", he'iague

¹ — Kova'e ayvu ma SENHOR Penderuete ojapo uka va'ekue, 'arandua rupigua ha'e oipotaa reve, ha'e va'e re penhembo'e vy pejapo ete aguã yvy re pendekuai ma vy,

² SENHOR Penderuete renonde pejererokyjea rupi pendekuai aguã, 'arandua rupigua ha'e oayvua ojapo uka va'e xee amboaxa rã peẽ ha'e pendera'y kuery, ha'e peneramymino kuery voi ikuaia pukukue reguarã, peiko pukuve aguã.

³ Ha'e nunga rupi pendu ke Israel kuery, peikuaa pota ha'e pejapo ete aguã, pendekuai porã ha'e penderetave ete aguã pendeyvy kamby ha'e ei oata e'ỹa py, SENHOR peneramoĩ kuery ruete aipoe'iague rami vy.

⁴ Pendu ke, Israel kuery. Peteĩ'i oiko SENHOR, SENHOR Nhanderuete ae.*

⁵ Ha'e nunga rupi peayvu 'rã SENHOR Penderuete pendeyvu'a, penenhe'ẽ ha'e penembaraeta ha'e javi py.*

⁶ Kova'e ayvu aỹ amombe'u va'e ma pemoĩ 'rã pendeyvu'a re.

⁷ Ha'e va'e rupi pembo'e 'rã pendera'y kuery. Ha'e va'e rupi avi 'rã pendeayvu pekuapy pendero py, tape rupi peikoa py, penheno ha'e pevy ju ma vy guive.

⁸ Ha'e va'e re penemoma'endu 'aarã pejokua 'rã imoiny pendepo re, ha'e penderova re penderexa mbyte py.

⁹ Pembopara avi 'rã pendero rokẽ áry, ha'e okẽ re.

¹⁰ — Ha'e gui SENHOR Penderuete peneramoĩ Abraão, Isaque ha'e Jacó pe ouraague rami vy pendeyvyrã va'e py pendereraa ma rire pendepo py omboaxa 'rã tetã tuvixa ha'e iporã va'e peẽ kuery pejapo va'ekue'ỹ, ¹¹ ha'e gui oo opa mba'e porã oĩa pemonyẽ va'ekue'ỹ, ha'e yguarã pejo'o va'ekue'ỹ, uvaty ha'e oliveira ty penhotý va'ekue'ỹ. Ha'e va'e gui pe'u vy penevyatãmba ma vy

¹² penheangu penderexarai e'ỹ aguã SENHOR, Egito yvy re escravo peiko vy pemba'eapo poyiague gui pendepe'a va'ekue gui.

¹³ SENHOR Penderuete renonde pejererokyjea rupi 'rã peiko, ixupe ae 'rã pendekuai, hery rupi anho 'rã peura.

¹⁴ Peiko eme amboae tuuete ramigua pe, neĩ teĩve yvy regua kuery pendeyvúry ikuai va'e ruete pe,

¹⁵ mba'eta SENHOR Penderuete penembyte oiko va'e oipota hexe anho pejerovia. Ha'e rami e'ỹ rã SENHOR Penderuete poxya penderovai hendy vy penemomba 'rã yvy áry gui.

¹⁶ Peko a'ã eme SENHOR Penderuete, Massá py peko a'ãague rami.*

¹⁷ Pejapo ete 'rã SENHOR Penderuete ojapo uka va'ekue, ayvu ha'e 'arandua rupigua ha'e ojapo uka va'ekue ha'e javi.

¹⁸ SENHOR renonde rupi pejapo 'rã ha'eve va'e ha'e iporã va'e anho, pendekuai porã aguã, ha'e yvy porã re pendekoa aguã, SENHOR peneramoĩ kuery pe oura reve ome'ẽ aguã re ijayvuague py ae,

¹⁹ ha'e penerenonde gui pendovaigua kuery SENHOR oipe'apa aguã aipoe'iague rami.

²⁰ — Raka'eve rã ndera'y kuery oporandu 'rã ndevy. Ha'e vy aipoe'i 'rã: "Mba'erã tu ayvu 'arandua rupigua ha'e oipotaa SENHOR Nhanderuete oejã raka'e nhandevy?" he'i ramo

²¹ rembovai 'rã ndera'y kuery pe: "Egito yvy re Faraó pegua escravo orekuai va'ekue ri teĩ SENHOR opo'akaa rupi orepe'apa ha'e gui.

²² Roexaa py SENHOR ojapo karamboae mba'emo kuaa ukaarã ha'e nhomondyipaarã tuvixa ete va'e nhomongyjea rupi, Faraó rovai, hoo pygua kuery ha'e Egito pygua kuery ha'e javi rovai.

²³ Ha'e rami vy ha'e gui orepe'a orereru aguã kova'e yvy nhaneramoĩ kuery pe oura reve nhanderekoarã ome'ẽ aguã re ijayvuague py.

²⁴ SENHOR ijayvu avi kova'e ayvu oejã va'ekue ha'e javi jajapopa ete aguã, ha'e henonde jajererokyjea rupi nhandekuai aguã, raka'e rã peve nhanemoingo porã ha'e nhanemoingove aguã, aỹ peve ojapoa rami ae.

²⁵ Ha'e gui SENHOR Nhanderuete renonde kova'e ayvu ojapo uka va'ekue ha'e javi ri jajapo ramo aipoe'iague rami ae, ha'e nunga oĩ 'rã nhandereko porãrã", 're 'rã.

7

Êxodo 34.10-17

¹ — SENHOR Penderuete pendereru 'rã pendeyvyrã py pendekoa aguã, ha'e penerenonde gui oipe'a reta 'rã yvy regua: hetue kuery, girgaseu, amorreu, cananeu, ferezeu, heveu ha'e jebuseu kuery, sete regua 'rã oipe'a pendegui hetave ha'e imbaraetekueve va'e teĩ.

² Ha'e va'e kuery ma SENHOR Penderuete omboaxapa 'rã pendepo py. Ha'e ramo pemomba katui'i 'rã. Ha'e kuery reve ndapejapoi 'rã peteĩ rami pendekuai aguã, napemboaxyi 'rã guive.

* 6:4 Marcos 12.29,32 * 6:5 Mateus 22.37, Marcos 12.30,33, Lucas 10.27 * 6:16 Kova'e ayvu rupi Jesus ombovai anha omoangeko rã (Mateus 4.7,10, Lucas 4.8,12).

³ Neĩ napemendai 'rã ha'e va'e regua kuery reve. Ta'y kuery re napemomendai 'rã penderajy kuery, tajy kuery ma voi ndaperui 'rã pendera'y kuery re omenda va'erã.

⁴ Mba'eta ha'e kuery ojapo 'rã pendera'y kuery xegui ojepe'a aguã rami, amboae tuuete ramigua kuery pe ju ikuai aguã. Ha'e ramo penderovai SENHOR poxya hendy vy penemomba vyvoi 'rã.

⁵ Ha'e rami 'rãgue py po rami 'rã pejapo ha'e kuery re: Peitypa 'rã altar ha'e kuery ojapo va'ekue, pemopẽmba 'rã ita omopu'ã va'ekue, peake'o 'rã vyvra ta'angaarã omopu'ã va'ekue, ha'e gui peapypa 'rã mba'emo ra'angaarã ojapo va'ekue.

⁶ — Mba'eta peẽ kuery ma SENHOR Penderuete pegua iky'a e'y va'e pendekuai. Yvy regua ha'e javi gui SENHOR Penderuete pendeporavo ojeupe guarã.

⁷ Amboae regua gui penderetave va'e ramo e'y guive SENHOR penderayvu vy pendeporavo, mba'eta yvy regua ha'e javi gui mboapy'ive va'e peiko.

⁸ Ha'e rami 'rãgue py SENHOR penderayvu ete vy rive pendepe'a opo'akaa rupi, ha'e peneramoĩ kuery pe oura reve ijayvuague ojapo vy. Ha'e vy ae penderepy escravo peiko vy pemba'eapo poyia gui, ha'e Egito pygua huvixa Faraó po'akaa gui.

⁹ Ha'e nunga rupi peikuaa pota SENHOR Penderuete anho Nhanderuete oikoa re. Nhanderuete ojeroviapy va'e vy guexeve guarã ojapo va'ekue rupi ae 'rã oiko nhanemboaxya rupi, jayvua rupi ojapo uka va'e jajapo va'e kuery pe, mil-kue nhaneramymino ikuai jevy-jevuy va'e pe guive.

¹⁰ Ha'e rã hexe nda'ija'ei va'e kuery ma ha'e ombopaga 'rã omokanhymba peve. Ndareĩ 'rã hexe nda'ija'ei va'e re oikuaa pota vy ombopaga vyvoi aguã.

¹¹ Ha'e nunga rupi pejapopa 'rã ojapo uka va'ekue, ayvu ha'e 'arandua rupigua kova'e ára gui pendevy amboaxa va'e.

Levítico 26.3-13; Deuteronômio 28.1-14

¹² — Pova'e 'arandua rupigua pendu vy pemoĩ porã ha'e pejapo ete ri ramo SENHOR Penderuete oiko 'rã guexeve guarã peneramoĩ kuery pe oura reve ojapo va'ekue rami.

¹³ Ha'e rami vy penderayvua rupi penemoingo porã ha'e penemboetave 'rã heravy. Omoingo porã avi 'rã pendera'y kuery, ha'e pendevy re mba'emo aju oiko va'e, mba'emo ra'yĩ, vinho, azeite, ha'e penerymba vaka ha'e vexa'i ra'y kuery, vyvy peneramoĩ kuery pe oura reve ome'ẽ aguã re ijayvuague py ae.

¹⁴ Yvy regua ikuai va'e ha'e javi gui penemoingo porãve 'rã. Ha'e ramo pendekuaia py ndoikoĩ 'rã avakue ta'y e'y va'erã, kunhague imemby e'y va'erã, neĩ penerymba kuery regua ma voi.

¹⁵ Pendegui SENHOR oipe'apa 'rã opa marãgua mba'eaxy. Peẽ kuery re nomoĩ 'rã mba'eaxy vaikue Egito yvy re pexa va'ekue ramigua. Ha'e nunga ma pendere ija'e'y va'e kuery ha'e javi re 'rã omoĩ.

¹⁶ Pemomba 'rã ha'e javi regua pendepo py SENHOR Penderuete omboaxa va'ekue. Ha'e kuery re pema'ẽ teĩ pemboaxy eme, peiko eme guive ha'e kuery pegua tuuete pe, mba'eta ha'e rami rã pendereity 'rã.

¹⁷ — Xapy'a rei aipojeje 'rã pendepy'a py: "Kova'e yvy regua kuery ma nhande kuery gui hetave ramo mba'exa tu jaipe'a 'rã?" peje teĩ

¹⁸ pekyje eme ha'e kuery gui. Penema'endu'a tema Faraó re SENHOR Penderuete ojapo va'ekue re, ha'e Egito yvy ha'e javi rupi

¹⁹ mba'emo tuvixa ete va'e pexaa py ojapo va'ekue re, hexa pyrã ha'e mba'emo porã ete ojapo va'ekue re, mba'eta SENHOR Penderuete opo oupi vy opo'akaa oexa uka reve penerenoẽ ha'e gui. Ha'ekue rami ae ju 'rã ojapo yvy regua pekyjea va'e kuery ha'e javi re.

²⁰ Ha'e kuery mbyte rupi SENHOR Penderuete ombou avi 'rã kavy guaxu, pendegui nonhai vy onhemi va'e ndaekorãveĩ pavẽ peve.

²¹ Ha'e nunga rupi penhemondyipa rei eme ha'e kuery pexa vy, mba'eta penembyte SENHOR Penderuete oĩ, Nhanderuete ipo'akapa ha'e okyjevpevy va'e ae.

²² Ha'e rami avi mbegue'i rupi anho 'rã SENHOR Penderuete oipe'a 'rã kova'e kuery regua penerenonde gui. Napemomba vyvoi 'rã, penderovai guarã mymba inharõ va'e hetave oje'oivy e'y aguã.

²³ Ha'e rami avi pendepo py SENHOR Penderuete omboaxapa 'rãe, nda'evei reive va'e ojapo vy omomba peve.

²⁴ Pendepo py omboaxa avi 'rã huvixa kuery, ha'e ramo pejapo aguã yva guy rupi ha'e kuery rery na'ima'endu'aavei aguã rami. Avave rei nda'ipo'akaaĩ 'rã pendere, pemomba peve.

²⁵ Ha'e kuery ruete ra'angaa ma peapypa 'rã tata py. Prata ha'e ouro ha'e nunga onhovãague re voi pepena rei eme, perra eme penemba'erã, ha'e va'e py pe'a e'y aguã. Mba'eta ha'e nunga ma SENHOR Penderuete pe rã ojegarupy.

²⁶ Ha'e nunga rupi peru eme ojegarupy penderopy guarã, ayvu vaipy peẽ voi peiko e'y aguã ha'e nunga rami ae. Ha'e nunga ha'e javi pejou vai ha'e pembojearu ete 'rã, ayvu vaipy meme ramo.

8

SENHOR opena porãague re ima'endu'a aguã regua

¹ — Peikuaa pota ke ojapo uka pyre aỹ amboaxa va'e pejapopa ete aguã, peikove ha'e penderetave aguã. Ha'e gui yvy SENHOR penamoĩ kuery pe oura reve ome'ẽ aguã re ijayvuague py pevaẽ vy pendekuai aguã.

² Penema'endu'a ke tape rupi SENHOR Penderuete pendereraa ague ha'e javi re. Quarenta ma'etỹ re pendereraa tekoo e'ya rupi penemo'yvyĩ'i aguã pendereko a'ã vy, pendepy'a re oĩ va'e oikuaa aguã, xapy'a rei ojapo uka va'e rupi pa pendekuai tyrã pa any.

³ Ha'e rami vy penemo'yvyĩ'ia rupi ojapo pendekaruai aguã rami. Ha'e gui maná re ju penemongaru, ha'e nunga pexa va'ekue'ỹ teri, neĩ penderu kuery ma voi oikuaa va'ekue'ỹ. Ha'e ramigua ome'ẽ pendevy oikuaa uka aguã mbojape re anho e'ỹ avakue oikoa. Ha'e rã SENHOR ayvu ha'e javi re 'rã avakue oiko.*

⁴ Pendeao penhemondea va'e voi nda'ivaipai raka'e, pendepy ma voi nda'irurupai, quarenta ma'etỹ pukukue re teĩ.

⁵ Ha'e nunga rupi peikuaa pota penekuraxõ py, mba'eta avakue gua'y kuery omo'arandua rami avi SENHOR Penderuete penemo'arandu herekovy.

⁶ Pendekuai SENHOR Penderuete ojapo uka va'ekue rupi ete, gueko ojea va'ekue rupi ae peiko aguã henonde pejererokyjea rupi.

⁷ Mba'eta SENHOR Penderuete pendereraa 'rã vvy porãa py, yakã ikuai, yvu, yvu typy va'e guive yvugua ha'e yvyty áry gui oxyry oiny va'e,

⁸ yvy trigo ha'e cevada oiko porãa, uva, figo ha'e romã'a oiko porãa guive, ha'e gui oliveira, azeite ha'e ei ikuai.

⁹ Ha'e va'e vvy re ma tembi'u oata aguã rami e'ỹ 'rã pe'u, mba'eve rei ndoatavei ma 'rã ha'e py. Yvy re ita ikuai va'e py ferro oĩ, ha'e yvyty ikuai va'e gui ma penoẽ 'rã overa va'e.

¹⁰ Pekaru vy penevyatãmba 'rã, ha'e vy perovy'a 'rã SENHOR Penderuete vvy porã pendevy ome'ẽague re.

¹¹ — Ha'e rami avi penheangu, penderexarai eme SENHOR Penderuete re, ha'e ojapo uka va'ekue ndapejapo e'ỹi aguã, 'arandua rupigua ha'e ayvu ojea va'ekue, pendevy aỹ amboaxa va'e ae.

¹² Ha'e rami pekarupa vy penevyatãmba ma rire teĩ, oo porã pejapo vvy ha'e va'e py peĩ ma rire,

¹³ penerymba vaka ha'e vexa'i kuery hetave ma rire, ha'e penemba'e prata ha'e ouro voi ndoatavei aguã rami rire teĩ

¹⁴ xapy'a rei pendepy'a py pendevyate rei vvy penderexarai 'rã SENHOR Penderuete re, Egito vvy re escravo peiko vy pemba'epo poyiague gui penerenoẽ va'ekue ri,

¹⁵ ha'e gui tekoa e'ỹa tuvixa ha'e ijavaete va'e rupi pendereraa herekovy va'ekue ri mboi inharõ ete va'e ikuai rupi, japeuxa popia va'e ha'e vvy pirua yvy ikuai e'ỹa rupi. Ha'e gui pendevy itaova gui yvy omoẽ va'ekue,

¹⁶ ha'e tekoa e'ỹa rupi penemongaru va'ekue maná penderu kuery oikuaa va'ekue'ỹ re, penemo'yvyĩ'i vvy pendereko a'ã aguã, ha'e gui opaa py penemoingo porã aguã.

¹⁷ Ha'e nunga rupi pendepy'a py “Xepo'akaa ha'e xejyva mbaraetea py ae arekopa”, peje eme.

¹⁸ Ha'e rami 'rãgue py penema'endu'a SENHOR Penderuete re, mba'eta ha'e ae penemombaraete mba'emo pejoupa aguã rami, ha'e rami pendevy pe ojapo guexeve guarã peneramoĩ kuery pe oura reve ojapo va'ekue ojeupity aguã, aỹ pexaa rami.

¹⁹ Mba'eta SENHOR Penderuete re penderexarai ri vvy amboae tuete kuery re peo vvy ha'e kuery pemboetea rupi ju pendekuai ramo aỹ ma'ẽ, penderovai xeyvu pekanhymba aguã re.

²⁰ Ha'e javi regua penerenonde gui SENHOR omombaague rami pekanhymba avi 'rã, SENHOR Penderuete napenhe'ẽ rendu potai rire.

9

SENHOR Israel kuery oipytyvõague re Moisés omoma'endu'aague

¹ — Pendu ke, Israel kuery. Aỹ peaxa 'rã Jordão yakã, amboae regua kuery pendegui hetave ha'e imbaraeeteve va'e re pendepo'aka aguã katy. Hetã ikuai va'e ma tuvixa ha'e yva peve ikorapa va'e.

² Ha'e kuery ma heta ha'e yvateve va'e, Enaque ra'y kuery ae. Ha'e va'e kuery reko ma pendua ae ma, “Mava'e 'rã tu ipo'aka Enaque ra'y kuery re?” 'ea ramo.

³ Ha'e nunga rupi aỹ peikuaa pota, mba'eta SENHOR Penderuete ae oaxa 'rã penerenonde rupi. Tata nhomokanhyarã rami 'rã omomba ha'e oitypa penerenonde rupi. Ha'e rami rã peipe'a ha'e pemokanhymba vvyoi 'rã, SENHOR ijayvuague rami vvy.

⁴ — Ha'e nunga rupi penerenonde gui SENHOR Penderuete oipe'apa ma ramo aipopeje eme pendepy'a py: “Xereko porã ramo ae SENHOR xereru kova'e vvy re xerekoa aguã”, peje eme. Mba'eta kova'e vvy regua kuery heko vai ramo SENHOR oipe'apa 'rã penerenonde gui.

⁵ Pendereko porãa re e'ỹ ta'vy, neĩ pendepy'a py iporã va'e oĩa re e'ỹ guive vvy re pendekoa aguã pevaẽ 'rã. Kova'e vvy regua kuery reko vaia re rima SENHOR Penderuete oipe'apa 'rã penerenonde gui, ojapo aguã peneramoĩ kuery pe oura reve ijayvuague ojeupity aguã, Abraão, Isaque ha'e Jacõ pe.

Êxodo 32.1-20

⁶ — Ha'e nunga rupi peikuaa pota ke, mba'eta pendereko porãa re e'ỹ SENHOR Penderuete ome'ẽ kova'e vvy porã pendekuai aguã, mba'eta peẽ kuery ma peneakã ratãgue ae.

⁷ Penema'endu'a tema, pendexarai eme tekoa e'ỹa rupi SENHOR Penderuete pembopoxyague re. Egito vvy gui peopaa ára guive apy pevaẽmba peve pepu'ãmba reia rupi pendekuai SENHOR rovai.

⁸ Horebe vvyty re pendekuai jave SENHOR pembopoxy rei ramo penderovai ipoxya hendy va'ekue penemomba aguã.

⁹ Mba'eta xee ma vvyty áry aa va'ekue itape ajopy aguã, guexeve guarã SENHOR pendereve ojapo va'ekue oĩa. Yvyty áry ma quarenta ára ha'e pytũ re aiko mbojape ha'u e'ỹ re, neĩ yvy ay'u e'ỹ re.

* 8:3 Kova'e ayvu rupi Jesus ombovai anha omoangeko rã (Mateus 4.4, Lucas 4.4).

¹⁰ Ha'e ramo xevy pe SENHOR ome'ë mokoï itape Nhanderuete okuã py ae ombopara va'ekue. Ha'e va'e re oï avyu pendeivy guarã SENHOR yvyty áry omombe'u va'ekue ha'e javi, tata mbyte oia gui, peë kuery ha'e javi pendeatypa pekuapy jave.

¹¹ Ha'e gui quarenta ára ha'e quarenta pytũa py ma SENHOR ome'ë xevy mokoï itape ipara va'e, guexeve guarã ojapo va'ekue oia.

¹² Ha'e vy SENHOR aipoe'i xevy: "Epu'ã ju ke, eguejy pojava apy gui, mba'eta ndevyguia kuery Egitto yvy gui reru va'ekue onhemongy'apa ma oje'oivy. Are e'ÿ'i re ojepe'apa ma ha'e kuery rekorã aeja va'ekue gui, mba'emo ryku gui rive nguuet ra'angaarã ojapo vy", he'i va'ekue.

¹³ — Xevy pe SENHOR ijayvuve ju vy aipoe'i: "Kova'e kuery xee aexa rã inhakã ratã ete okuapy.

¹⁴ Tamomba ete, yva guy ha'e javi rupi gui hery amboguepa aguã. Ha'e gui ma ndegui ju amoingo 'rã petei regua ha'e kuery gui imbaraetekueve ha'e hetave va'erã", he'i va'ekue xevy

¹⁵ Ha'e ramo ajere vy aguejy yvyty gui. Ha'e ramo yvyty ojopeayi oiny tata gui. Xepo py araa mokoï itape guexeve guarã ojapo va'ekue oia.

¹⁶ Ha'e gui ama'ë rã pejejavyva rei ra'e SENHOR Penderuete rovai. Ha'e rami vy penderueterã mba'emo ryku gui pejapo ra'e petei vaka ra'y ra'angaa rive. Are e'ÿ'i re pejepe'apa penderekorã SENHOR oea va'ekue gui.

¹⁷ Ha'e ramo mokoï itape areko va'e amombo xepo gui, ha'e vy pexaa py amboa'ypa.

¹⁸ — Ha'e gui teigue ju quarenta ára ha'e quarenta pytũ re aiko SENHOR renonde py jypy guare rami. Xerenapy'ã re aï, mbojape nda'ui neï yy ma voi nday'ui pejejavyva ha'e javi re vy, mba'eta SENHOR oexaa py mba'emo vai ete pejapo ipoxy aguã rami.

¹⁹ Xee voi akjye va'ekue SENHOR penemomba aguã rami ipoxy etea gui. Ha'e rami teï petei'gue ju SENHOR oendu xeyvua.*

²⁰ Arão pe voi SENHOR ipoxy raxa va'ekue omomba aguã rami. Ha'e rami teï ha'e va'e jave py Arão re voi ajerure.

²¹ Ha'e rami vy pejejavyva rupi vaka ra'y ra'angaa pejapo va'ekue ajopy vy apyva, ha'e gui amou'ũmba porã iku'ipa peve. Iku'ikue ma yakã yvyty gui oxyry oiny va'e py amombo.

²² — Ha'e gui Taberã py, Massã ha'e Quibrote-Hataavã py ju pejapo SENHOR ipoxy ete aguã rami.

²³ Cades-Barnéia gui SENHOR penemondouka vy aipoe'i: "Tapeo, ha'e penderekoa yvy pendeivy ame'ë va'e py", he'i ramo ndapejapoxei raka'e SENHOR Penderuete ijayvuague. Ndaperoviai vy napenhe'ë rendui.

²⁴ Ha'e rami vy SENHOR rovai pepu'ã rei va'e ae tema roexa ypya ára guive ma voi.

Êxodo 32.11-14,30-35

²⁵ — SENHOR renonde py ajero'a ainy, ha'e quarenta ára ha'e quarenta pytũ re xetui, pendeivy SENHOR "Amomba 'rã" he'i rire.

²⁶ Ha'e vy SENHOR pe ajerure vy aipoe'a: "Ah SENHOR Oreruete! Emomba eme ndevyguia kuery, ndejeupe guarã ae nembaraetea rupi repy vy Egitto yvy gui ndepo'akaa rupi renoẽmba va'ekue.

²⁷ Nderexarai eme nerembigui kuery Abraão, Isaque ha'e Jacó re. Eikuaa pota eme kova'e kuery inhakã atã re, neï heko vaia re, neï ojejavy okuapy re.

²⁸ Ha'e rami Egitto yvy orerenõague pygua kuery aipoe'i e'ÿ aguã: 'Ha'e kuery rima SENHOR ndogueraa reguai yvy ijayvuague py. Ha'e kuery re ha'e nda'ija'vevei vy ae rima oguenõemba raka'e tekoe e'ÿa py ojukapa aguã', he'i okuapy e'ÿ aguã.

²⁹ Ha'e rami avi ha'e kuery ma ndevyguia ae, ndevy guarã ae renoẽmba raka'e ndepo'aka etea rupi, ha'e ndepo reupi reve", ha'e va'ekue SENHOR pe.

10

Mokoïguea itape re lei omboparaague

¹ — Ha'e va'e jave py SENHOR aipoe'i xevy: "Mokoï itape ju ke emoatyrõ jypy guare rami guarã. Ha'e vy eju ju xea katy yvyty áry. Ejapo avi petei hyru vyvra gui.

² Ha'e gui mokoï itape re xee ombopara 'rã jypygua remopẽmba va'ekue re oia'gue rami. Ha'e ramo remboyru 'rã hyrurã rejapo va'ekue py", he'i xevy.

³ Ha'e rami rã petei hyru vyvra acácia guigua ajapo, ha'e mokoï itape amoatyrõ jypy guare rami guarã. Ha'e gui aë avy yvyty re mokoïve itape xepo py araa reve.

⁴ Ha'e gui itape re SENHOR jypy iparaague rami ju ombopara dez avyu ojapo uka va'e, pendeatya ára py yvyty áry tata oï va'e mbyte gui omombe'u ypy va'ekue rami ae. Ha'e rami vy SENHOR omboaxa xevy.

⁵ Ha'e ramo ajere vy yvyty gui aguejy ju. Itape ma amboyru hyrurã ajapo va'ekue py. Ha'e va'e py ae opyta, xevy SENHOR ojapo uka'gue rami vy.

Levi kuery regua oiporovaague

⁶ — Ha'e gui ma Israel kuery oje'oipa Beerote-Bene-Jaacã gui Mosera katy ju oo aguã. Ha'e py ma Arão omano, ha'e ramo onhono porãa ha'e pyve. Hekovia ta'y Eleazar ju oï sacerdote.

⁷ Ha'e va'e gui ma oje'oi ju Gudgoda katy, ha'e Gudgoda gui ma Jotbatã katy ju oje'oi. Ha'e va'e yvy re ma yakã'i ikuai rei.

⁸ Ha'e va'e jave py SENHOR oiporavo Levi ramymino kuery ogueraa aguã hyru SENHOR guexeve guarã ojapo va'ekue oia, SENHOR renonde ikuai aguã, ixupe omba'eapo, ha'e hery rupi jogueroavyu porã aguã, aÿ peve guarã ae.

* 9:19 Hebreus 12.21

⁹ Ha'e rami rire Levi kuery ndoguereko'i ae tema oyvyrã guyke'y kuery reve. SENHOR ae oiko ha'e kuery mba'erã, SENHOR Penderuete ijayvuague rami vy.

¹⁰ — Ha'e gui jypy'i guare rami aiko tema vyty re, quarenta ára ha'e pytũ re. Ha'e ramo xeayvua peteĩgue ju SENHOR oendu, napenembaxe'i.

¹¹ Ha'e gui SENHOR aipoe'i xevy: “Epu'ã ke, tereo ju heta va'e kuery renonde rupi, vvy peneramoĩ kuery pe aura reve ame'ẽ agua re xeayvuague py ha'e kuery ovaẽ vy ikuai agua.”

Onhe'ẽ rendu agua regua

¹² — Ha'e nunga rupi Israel kuery, mba'e nunga tu SENHOR oipota pejapo? SENHOR Penderuete renonde pejererokyjea rupi pendekuai agua anho, heko rupi pendekuai, SENHOR Penderuete peayvu ha'e ixupe peiko agua SENHOR pendepy'a ha'e penenhe'ẽ ha'e javi py,

¹³ ha'e pejapopa agua SENHOR ojapo uka va'e ha'e oayvu oea va'ekue, aỹ pëvy amboaxa va'e, ha'e rami vy pendekuai porã agua.

¹⁴ Ma'ẽ, yva ha'e yvate rupi yva oĩ va'e ma SENHOR Penderuete mba'e meme, vvy ha'e hexe ikuai va'e ha'e javi guive.

¹⁵ Ha'e rami avi peneramoĩ kuery SENHOR oayvu etea rupi omboaxy rire peẽ kuery ha'e kuery ramymino pendekuai va'e ju ojeupe guarã pendeporavo ha'e javi regua gui, aỹ pexaa rami.

¹⁶ Ha'e nunga rupi penekuraxõ gui pemboi mba'emo vai oĩ va'e, ha'e pendekuaive eme penekã ratãa rupi.

¹⁷ Mba'eta SENHOR Penderuete ma tuete ikuai va'e ruete, ha'e senhor ikuai va'e SENHOR, Nhanderuete yvateve va'e, ipo'akapa ha'e okyjevpey va'e. Ha'e ma peteĩ rive joegui oayvute va'e'ỹ, neĩ ome'ẽmby ndojopyi 'rã guive ha'eve'ỹa rami joguereko agua.

¹⁸ Ha'evea rami 'rã ogueroko tyre'ỹ ha'e imeve'ỹ va'e, oayvu avi amboae regua kuery, ha'e kuery pe tembi'u ha'e ijaorã ojou uka vy.

¹⁹ Ha'e nunga rupi peẽ avi peayvu 'rã amboae regua, mba'eta peẽ kuery voi amboae regua pendekuai va'ekue Egito vvy re peiko jave.

²⁰ Ha'e gui SENHOR Penderuete renonde pendekuai 'rã pejererokyjea rupi. Ixupe ae 'rã peiko, hexe ae penhemboja, ha'e hery rupi anho 'rã peura.

²¹ Mba'eta ha'e ma perovy'a va'erã ha'e Penderuete oiko, pendevy ojapo va'e mba'emo tuvixa ete va'e nhomondyipaará, penderexa py ae pexa va'ekue.

²² Mba'eta peneramoĩ kuery ma setenta ikuai va'e reve oje'oi raka'e Egito vvy katy. Ha'e gui aỹ ma SENHOR Penderuete pendeapo yva re jaxy-tata ikuai va'e rami pendereta agua rami.

11

¹ — Ha'e nunga rupi peayvu 'rã SENHOR Penderuete, ha'e ára nhavõ peiko 'rã penembo'ea rupi, ayvu oea va'ekue, 'arandua rupigua ha'e ojapo uka va'ekue ha'e javi rupi.

² Aỹ gui peikuaa pota ha'vy. (Pendera'y kuery pe'ỹ xeayvu, mba'eta ha'e kuery ma ndoikuai neĩ ndoexai SENHOR Penderuete penemo'arandua rupi pendererekoague.) Peikuaa pota ke SENHOR yvate etea, ipo'aka etea ha'e opo oupia reve mba'emo ojapoague re.

³ Penema'endu'a avi hexa pyrã Egito mbyte rupi ojapo va'ekue re, Egito pygua huvixa Faraó re, ijyvy jave rupigua ha'e javi re,

⁴ Egito pygua xondaro kuery re, ha'e gui kavaju árygua ha'e karóxa ikuai va'e re SENHOR ojapoague re, mba'eta ha'e kuery áry rupi ombou Ye'ẽ Pytã, penderakykue ha'e kuery ou jave py. Aỹ peve guarã SENHOR omomba.

⁵ Penema'endu'a avi tekoa e'ỹa py ojapoague re, apy pevaẽ peve,

⁶ ha'e gui Rúben ramymino Eliabe ra'y kuery Datã ha'e Abirão re ojapoague re. Mba'eta vvy ojepe'a ramo ho'apa raka'e, hoo pygua kuery, hoo ha'e hupive oo va'ekue ha'e javi, Israel kuery pavẽ oexaa py.

⁷ Penderexa py ae pexa va'ekue tuvixa ete va'e SENHOR ojapo rá.

Onhe'ẽ rendu rá omoingo porã agua re ijayvua

⁸ — Ha'e nunga rupi pendekuai SENHOR ojapo uka va'ekue aỹ amboaxa va'e ha'e javi rupi, penembaraete agua, ha'e vvy katy peoa py pevaẽ vy penderekoa agua,

⁹ ha'e rami vvy peiko pukuve agua vvy SENHOR oura reve peneramoĩ kuery pe ome'ẽ agua re ijayvuague py, hamymino kuery pe avi. Ha'e va'e vvy ma kamby ha'e ei oata e'ỹa.

¹⁰ Mba'eta vvy penderekoará ma Egito vvy pejepe'aague va'e rami e'ỹ. Mba'eta ha'e va'ekue py ma mba'emo ra'yĩ penhot'ague katy pendepy py pemboxyry vvy pemoak'ỹ va'ekue horta rami ae.

¹¹ Ha'e rá vvy penderekoará SENHOR ome'ẽ va'e ma vyty ha'e vyvugua reia, oky yva gui ho'a va'e gui ae 'rã inhak'ỹ va'e.

¹² Ha'e va'e vvy re SENHOR Penderuete ae 'rã opena. Ha'e va'e re SENHOR Penderuete oma'ẽ riae 'rã, ma'et'ya ypy'i guive opa peve.

¹³ Xapy'a rei aỹ ayvu amboaxa va'e rupi peiko ramo, SENHOR Penderuete peayvua rupi, ha'e pendepy'a ha'e penenhe'ẽ ha'e javi py ixupe anho pendekuai ramo

¹⁴ vvy áry rupi ambou 'rã oky hi'ára py porã, mba'emo henhoĩ jave ha'e ipoty jave ju, mba'emo ra'yĩ penhot'ỹ va'ekue gui pemono'õ agua, uva rykue ha'e azeite pereko agua.

¹⁵ Pendevy rupi amoingo 'rã jaj rogue penerymba kuery rembi'urã. Ha'e ramo pekaru vvy penevyatãmba 'rã pekuapy.

¹⁶ Penheangu ke pendepý'a py pejokore e'y agua, ha'e pejepe'a vy tuuete mboae pe pendekuai vy ha'e kuery renonde penerenapy'a re pei e'y agua.

¹⁷ Mba'eta peẽ kuery rovai SENHOR poxya hendy ramo ojoko 'rã yva nda'okyvei agua rami, ha'e ramo yvy re mba'emo naenhoivei 'rã, ha'e are e'y re pekanhymba 'rã yvy porã SENHOR pendevy ome'ẽ va'ekue gui.

¹⁸ — Ha'e nunga rupi pemoi porã xeayvuague pendepý'a ha'e penenhe'ẽ py. Pejokua 'rã imoiny pendepo re penemoma'endu'araã, ha'e penderova re penderexa mbyte py.

¹⁹ Ha'e va'e re pembo'e 'rã pendera'y ha'e penderajy kuery, penderopy rupi peguapy peiny vy pendeyvyu 'rã, tape rupi peoa py, penhenoa py ha'e pevy ju ma vy.

²⁰ Ha'e va'e ayvu pembopara avi 'rã penerokẽ áry rupi, ha'e penerokẽ re ae,

²¹ pende'ára hetave agua pendera'y ha'e penderajy kuery pe voi, yvy SENHOR oura reve peneramoĩ kuery pe ome'ẽ agua re ijayvuague py penderekoa ma vy, yvy áry yva oi temaa rami avi.

²² Mba'eta xapy'a rei kova'e ayvu pendevy amboaxa va'e ha'e javi pejapo ramo, SENHOR Penderuete peayvua rupi, heko rupi pendekuai, ha'e hexeve peiko ramo

²³ SENHOR oipe'apa 'rã amboae regua kuery ha'e javi. Ha'e ramo pejopy 'rã ha'e kuery ikuaiague, peẽ kuery gui hetave ha'e imbaraetekueve teĩ.

²⁴ Ha'e gui mamõ rã rei pepyrõa ma penemba'e meme 'rã, tekoa e'ya guive, Líbano ha'e yakã Eufrates yakã guive, ye'ẽ kuaray oikea katygu peve.

²⁵ Avave rei nda'ipo'akai 'rã pendere. Mba'eta yvy pepyrõa ha'e javi rupi SENHOR Penderuete omoingo 'rã pendegui okyja agua rami, ijayvuague rami vy.

Imoingo porãarã e'y vy imoingo vaiarã re ijayvuague

²⁶ — Ma'ẽ, aỹ penerenonde py amoĩ penemoingo porãarã, e'y vy penemoingo vaiarã.

²⁷ Penemoingo porãa oiko 'rã SENHOR Penderuete ojapo uka va'ekue pejapopa ramo, aỹ amboaxa va'e rupi ae.

²⁸ Ha'e rã penemoingo vaia ma oiko 'rã SENHOR Penderuete ojapo uka va'ekue pejapo 'rãgue py pejepe'a ramo tape pendevy aỹ aikuaa uka va'e gui, amboae tuuete kuery rupi ndapeikuai va'eri peo vy.

²⁹ Ha'e gui yvy penderekoarã peo agua py SENHOR Penderuete pendereraa ma jave pemombe'u 'rã penemoingo porãa regua Gerizim vyvty áry gui, ha'e rã penemoingo vaia regua ma Ebal vyvty áry gui 'rã pemombe'u.

³⁰ Ha'e va'e mokoive vyvty ma Jordão yakã rovai re oi, kuaray oikea katy, cananeu kuery yvy re, yvy joja reia re Gilgal rexei, Moré py vyvra carvalho ikuai va'e katy'i.

³¹ Mba'eta peaxa ta ma Jordão yakã, pendevvyrã SENHOR Penderuete ome'ẽague py pendekuai agua. Ha'e py 'rã penhemboekoa.

³² Ha'e rami avi penhea'ã ayvu ha'e 'arandua rupigua aỹ aikuaa uka va'e ha'e javi rupi pendekuai agua.

12

Anhetẽ va'e rupi ombojerovia atyrã oiporavoague

¹ — Pova'e ayvu oēja pyre ha'e 'arandu rupigua pejapo 'rã pendevvyrã SENHOR peneramoĩ kuery Ruete ome'ẽ va'ekue py, ára nhavõ ha'e va'e yvy re peikoa pukukue re.

² Amboae regua kuery peipe'a vy pemomba 'rã nguete ramigua mboeteaty, vyvty ha'e yvy'ã'i áry ha'e javi rupi, ha'e vyvra rovana guy rupi ikuai va'e ha'e javi.

³ Peitypa 'rã ha'e kuery mba'e altar ha'e javi, ita omopu'ã va'ekue pemboa'ypa 'rã, ta'angaa vyvra gui omo'ã va'ekue peapypa 'rã tata py, mba'emo ryku gui nguete ra'angaarã ojapo va'ekue pemboa'ypa avi 'rã, hery pemboguepa agua ha'e va'e yvy gui.

⁴ — Mba'eta SENHOR Penderuete ma ha'e rami e'y 'rã pemboete.

⁵ Ha'e rami 'rãgue py ha'e javi regua ikuaiague mbyte py SENHOR Penderuete petei henda oiporavo 'rã guery omoi, ha'e ojeupegua oo oi agua. Ha'e py ae 'rã peo peka vy.

⁶ Ha'e katy 'rã peru mba'emo peapy vy peme'ẽ va'erã ha'e mymba pejuka vy peme'ẽ va'erã, dízimo pereko va'e, mba'emo pendepo py peru va'e, mba'emo penhenhandua'i rami peme'ẽ va'erã, ha'e gui jypy'i guare penerymba vaka ha'e vexa'i ra'y'i oiko va'ekue.

⁷ Ha'e py SENHOR Penderuete renonde py ae 'rã pekaru ha'e perovy'a pekuapy opa mba'e pejapoa py, peẽ ha'e pendero pygua kuery reve, SENHOR Penderuete penemoingo porã rive.

⁸ Apy jajapoa rami ve'y 'rã pendekuai, mba'eta aỹ peve petei-teĩ ha'e ae ojou porãa rami rive 'rã ikuai,

⁹ mba'eta ndapeupity teri pepytu'u agua pendevvyrã SENHOR Penderuete ome'ẽ va'e.

¹⁰ Ha'e rami avi peaxa 'rãe Jordão yakã, pendekuai agua pendevvyrã SENHOR Penderuete ome'ẽ va'erã py. Ha'e ramo pendevy pe ome'ẽ 'rã pepytu'u agua penderovaigua kuery pendevvyry rupi ikuai va'e ha'e javi gui. Ha'e ramo pendekuai porã 'rã opa mba'e vai gui.

¹¹ Ha'e ramo SENHOR Penderuete oiporavo 'rã petei henda hery oi agua. Ha'e py ae 'rã peru pendevy aruruka va'ekue ha'e javi: mba'emo peapy vy peme'ẽ va'erã ha'e mymba pejuka vy peme'ẽ va'erã, dízimo pereko va'e, mba'emo pendepo py pejapo va'ekue, ha'e gui iporãgueve SENHOR peguarã peme'ẽ agua penhemboayvuague ha'e javi.

¹² Ha'e rami vy pevy'a 'rã SENHOR Penderuete renonde py, peẽ kuery, pendera'y ha'e penderajy kuery, pendevyguava escravo avakue ha'e kunhague, ha'e gui levita kuery peneretã py ikuai va'e, penembyte rupi ijyvy e'y va'e teĩ.

¹³ Penheangu ke, mba'emo peapy vy peme'ê e'y aguaã mamã rã pexa rã ha'eve reia py rive.

¹⁴ Ha'e rami 'rãgue py peê kuery va'e regua pendekuaia gui pete'i henda SENHOR oiporavoague py 'rã peo mba'emo peapy vy peme'ê aguaã, ha'e ayvu amboaxa va'e ha'e javi pejapo aguaã.

Xo'o ho'u ha'e mba'emo ome'ê aguaã re ijayvua

¹⁵ — Ha'e rami avi nderekoa py ae ha'eve xo'o rejuka vy re'u tema aguaã, nenhe'ê py re'uxea rami, SENHOR Nderuete ojou uka va'e rei. Ha'eve va'e e'y vy ha'eve'y va'e reiko te'i ha'eve re'u aguaã, guaxu puku ha'e guaxu ete'i ro'o re'ua rami.*

¹⁶ Ha'e rã huguykue ma ndere'ui 'rã. Yy rami renhoê 'rã yvy py.

¹⁷ Ha'e rami te'i nderekoa py ma nda'evei re'u aguaã dízimo-rã remboja'o va'ekue, mba'emo aju gui, e'y vy uva rykue gui, azeite, nerymba kuery vaka ha'e vexa'i ra'y jypyguare regua gui voi. Ne'i nda'evei re'u aguaã mba'emo reme'ê aguaã re renhemboayvuague regua gui, mba'emo renhenhandua'i rami reme'ê va'erã, ne'i reme'ê aguaã ndepo py rejapo va'ekue gui voi.

¹⁸ Ha'e nunga ma SENHOR Nderuete renonde anho 'rã re'u, henda ha'e oiporavoague py ae, ndee, ndera'y kuery, nderajy kuery, ndevyguia escravo avakue ha'e kunhague, ha'e levita kuery nderekoa py ikuai va'e. Ha'e rami vy SENHOR Nderuete renonde py ae 'rã revy'a rejapoa ha'e javi py.

¹⁹ Enheangu ke, eipytyvô e'y eme levita kuery yvy re reikoa py.

²⁰ — Ha'e gui SENHOR Nderuete oayvuague rami vy ndevyryrã ombotuvixave ma ramo, xapy'a rei xo'o re'uxe vy "Ha'u 'rã xo'o" 're 'rã. Ha'e rami vy nderekoa py ae 'rã re'u, re'uxea rami.

²¹ Ha'e rami avi henda SENHOR Nderuete guery omo'i aguaã oiporavoague gui mombyry ri reiko vy ma rejuka 'rã nerymba vaka ha'e vexa'i kuery SENHOR ojou uka va'ekue, ha'e nderekoa py ae te'i ha'eve re'u aguaã, re'uxea rami, ndevy amboaxaague rami vy.

²² Guaxu puku ha'e guaxu ete'i ro'o re'ua rami 'rã re'u xo'o. Ha'e nunga gui ma avakue ha'eve va'e ha'e ha'eve'y va'e te'i ha'eve ho'u aguaã.

²³ Ha'e rami avi eikuaa pota huguy reve re'u e'y aguaã, mba'eta tuguy re ma o'i tekove. Nda'evei tekove xo'o reve re'u aguaã.

²⁴ He'u eme tuguy. Yvy py 'rã renhoê yy rami.

²⁵ Ndere'ui 'rãe. Ndera'y kuery ndereikovevei rire ndo'ui avi 'rã, SENHOR penemoingo porã aguaã, henonde ha'evea ramigua anho pejapo ramo.

²⁶ Ha'e rã mba'emo rereko va'e gui reiky'a'o uka va'ekue, ha'e reme'ê aguaã re renhemboayvuague va'e ma henda SENHOR oiporavoague py ae 'rã reraa.

²⁷ SENHOR Penderuete pegua altar áry ae 'rã reapy vy reme'ê, ho'okue ha'e huguykue guive. Mymba reme'ê va'e ruguykue ma onhoêa 'rã SENHOR Penderuete pegua altar áry rupi. Ha'e rã ho'okue gui ma re'u 'rã.

²⁸ Eikuaa pota rejapopa aguaã ayvu amboaxa va'ekue ha'e javi, ndee ha'e ndera'y kuery peiko porã aguaã raka'e rã peve, SENHOR Penderuete renonde ha'evea ramigua pejapo ramo.

²⁹ — Ha'e gui penerenonde gui SENHOR Nderuete amboae regua kuery oi-pe'apa ma jave, ha'e ijyvykue py reo ma vy nderekoa aguaã,

³⁰ enheangu ha'e kuery ikuaiague rami avi reiko e'y aguaã, nerenonde gui omombaa rire te'i. Eikuaa pota rei eme guive ha'e kuery ruete ra'angaa kuery re, ne'i "Ha'e kuery nguue ete ra'angaa omboeteague rami xee voi ajapo 'rã", 're eme.

³¹ Emboete eme SENHOR Nderuete ha'e rami, mba'eta ha'e kuery nguete kuery pe ojapo va'e ma SENHOR pe rã ojegarua ha'e ojou vaipy meme, mba'eta nguete kuery pe ha'e kuery oapy 'rã gua'y ha'e guajy kuery eteve voi.

³² — Rejapopa 'rã ayvu amboaxa va'e ha'e javi. Hi'áryve neremoivei 'rã, ne'i neremboivei 'rã guive.

13

Profeta ramigua rive ha'e mba'emo ra'angaa mboetea rupi nhomoiogoxe va'e re ijayvua

¹ — Ha'e gui xapy'a rei pete'i profeta, ha'e'y vy mba'emo rexa ra'ua penembyte py oiko vy omombe'u ma voi 'rã hexa pyrã e'y vy nhomondyipaará,

² ha'e rire hexa pyrã e'y vy nhomondyipaará omombe'u va'ekue oiko 'rã, te'i ha'e va'e aipoe'i avi 'rã: "Jaa ke amboae tuete kuery ndajaiakua'i teri va'ekue pe ju jaiko", he'i ramo ma

³ pendu pota eme profeta e'y vy mba'emo rexa ra'ua ayvu. Mba'eta SENHOR Penderuete pendereko a'ã, oikuaaxe vy anhetê pa pendepy'a ha'e penhe'ê ha'e javi py peayvu ra'ea.

⁴ SENHOR Penderuete rupive anho 'rã peiko, henonde pejererokyjea rupi 'rã pendekuai. Pejapo 'rã ha'e ojapo uka va'e, pendu 'rã ijayvua, ixupe ae 'rã peiko, hexe anho 'rã penhemboja.

⁵ Ha'e gui ha'e va'e profeta e'y vy mba'emo rexa ra'ua ma pejuka 'rã, SENHOR Penderuete rovai nhomopu'ãa rupi ijayvu rire, Egito yvy re escravo pendekuaiaague gui penerenoêare rovai ijayvu, pendep'e'axe vy SENHOR Penderuete tape oaja va'ekue gui. Ha'e rami vy penembyte gui peipe'a 'rã mba'emo vai.

⁶ Xapy'a rei nderyvy e'y vy nderyke'y ndexy pi'a ae ha'e rami 'rã ijayvu, ndera'y e'y vy nderajy, ndera'yxy reayvu va'e mba'e, e'y vy neirũ ndee ae rejeayvua rami reayvu va'e te'i nhemi rupi ndereroayvu vy aipoe'i 'rã: "Jaa jaiko amboae tuete kuery pe ju, ha'e nunga ndee ne'i neramo'i kuery ma voi ndoikuaai va'e te'i,

* 12:15 Mba'eta guaxu puku ma ka'aguy rupigua rã SENHOR pe ome'ê mbyrã e'y. Ha'eve amongue va'e rei ho'u tema aguaã.

⁷ amboae regua ndeyvýry ikuai va'e ruete ra'angaa pe ae, ndea gui mombyry e'y vy ha'e'i rupigua, pendeyvy re mamo rá rei", he'i ramo ma

⁸ enhembotavy uka eme ixupe, endu pota eme, hexe ema'ê eme guive remboaxya rupi. Ndereraa jepe ukai 'rá, nerenhomi 'rá guive.

⁹ Ha'e rami 'râgue py rejuka 'râe. Ndee ranhe'i 'rá ndepo reupi rejuka aguã, ha'e gui heta va'e kuery ha'e javi ju 'rá.

¹⁰ Pejapipa 'rá ita py omano peve, mba'eta SENHOR Penderuete Egito vyv re escravo peikoague gui penerenoêare gui pendepé'axe rire.

¹¹ Ha'e rami rá Israel kuery ha'e javi omombe'ua rá oendu vy ojererokyje 'rá okuapy, ha'e ha'ekue ramigua mba'emo vai ndojapovei 'rá penembyte rupi.

¹² — Ha'e gui xapy'a rei amongue tetã pendekoarã SENHOR Penderuete ome'ê va'ekue rupi pendu 'rá omombe'ua vy aipo'ea rá:

¹³ “Penderekoa py avakue heko vai va'e oje'oi vy nhombotavy tetã pygua kuery, 'Jaa amboae ruete ndajaikuuai va'ekue pe jaiko' he'i va'e”,

¹⁴ 'ea ramo pendu vy ma peikuaa pota porã 'rá, pexa pota ha'e peporandu porã 'rá. Xapy'a rei ha'e rami ete mba'emo vai penembyte rupi anhetê ri oiko ra'e ramo

¹⁵ ha'e va'e tetã pygua kuery pejukapa 'râe kyxe py. Pemomba 'rá ha'e py ikuai va'ekue ha'e javi, mymba kuery guive.

¹⁶ Imba'e rei-reikue ma pemboaty 'rá tetã mbyte py, ha'e vy tetã ha'e mba'e rei-rei reve peapypa 'rá SENHOR Penderuete pe mba'emo oapy vy ome'êmy rami. Ha'e rami rire ha'e va'e tetã mba'emo vaikueaty rive 'rá oí raka'e rá peve, ndojapoavei 'rá guive.

¹⁷ Omomba pyrã regua neí peteive topyta eme pendepo py, SENHOR penemboaxy nhombopaga ve'y aguã poxya rupi, ha'e penderayvua rupi penemboetave aguã, peneramoi kuery pe ouraague rami vy,

¹⁸ xapy'a rei SENHOR Penderuete ijavyvua pendu vy ha'e ojapo uka va'ekue ha'e javi pejapo ri ramo, aý amboaxa va'e ae, SENHOR Penderuete renonde rupi ha'evea ramigua anho pejapo aguã.

14

Onhekyxi rei e'y aguã re ijavyvua

¹ — SENHOR Penderuete ra'y kuery ae peiko. Ha'e nunga rupi penhekyxi rei eme, neí penderova katy ma voi penhopi eme omano va'ekue káuxa pendepy'a vai vy.

² Mba'eta peê kuery ma SENHOR Penderuete pegua iky'a e'y va'e pendekuai. Ha'e javi regua vyvave rupi ikuai va'e gui SENHOR pendeporavo va'ekue ojeupe guarã.

Levítico 11.1-47

³ — Neí peteive ndape'ui 'rá ojeguarupy regua.

⁴ Pova'e mymba ro'o anho 'rá pe'u: vaka, vexe'i, kavara,

⁵ guaxu ete'i, guaxu puku, guaxu miri, kavara ka'aguy regua, antílope, vexe vyvvy rupigua ha'e gamo.

⁶ Mymba ikuai va'e regua ipypã mbyte rupi ja'o va'e, ha'e oixu'u jevy va'e ma ha'eve meme 'rá pe'u aguã.

⁷ Ha'e rá povae ma ndape'ui 'rá: mymba oixu'u jevy va'e anho, ha'e'y vy ipypã ja'o va'e anho: camelo, tapixi ha'e arganaz, oixu'u jevy va'eri ipypã ja'o va'e'y vy. Ha'e nunga ma ha'eve'y va'e 'rá pendevy.

⁸ Poryko voi nda'evei, mba'eta ipoapã ja'o va'eri oixu'u jevy va'e'y guive vy ha'eve'y va'e 'rá pendevy. Ha'e va'e ro'o ndape'ui 'rá, he'ogue re voi pepoko eme.

⁹ — Yy rupi ikuai va'e gui ma povae regua 'rá pe'u: ipepo ha'e ipekue va'e ha'e javi.

¹⁰ Ha'e rá opa mba'e ipepo e'y va'e, ha'e'y vy ipekue e'y va'e ma ndape'ui 'rá. Ha'eve'y va'e meme 'rá pendevy.

¹¹ — Ha'e gui guyra ja'u aguã ha'eve va'e ha'e javi regua ma pe'u 'rá.

¹² Ha'e rá povae ma pe'u va'erã e'y: taguato guaxu, quebrantosso, taguato guaxu ye'ê rupigua,

¹³ açor, taguato ha'e milhano, ha'e ha'e va'e regua ma guive rá;

¹⁴ ha'e javi uruvu, ha'e ha'e va'e regua ma guive rá;

¹⁵ ha'e gui avestruz, urukure'a, mbyju ye'ê rupigua, taguato, ha'e ha'e va'e regua ma guive rá;

¹⁶ ha'e gui mocho, íbis, aka'ê,

¹⁷ oko, abutre, uruvu ye'ê rupigua,

¹⁸ kuruka ha'e guyraxi, ha'e ha'e va'e regua ma guive rá; ha'e gui poupa ha'e mbopi.

¹⁹ — Ha'e javi regua omy'i ha'e oveve'i va'e ma guive rá ha'eve'y va'e pendevy, pe'u va'erã e'y.

²⁰ Ha'e rá guyra ha'eve va'e ha'e javi regua ma pe'u 'rá.

²¹ — Mymba omano rive va'ekue ma ndape'ui 'rá. Ha'eve peme'ê aguã amboae regua kuery peneretã py ikuai va'e pe ho'u aguã, ha'e'y vy amboae regua kuery pe pemboekovia aguã, mba'eta peê kuery ma SENHOR Penderuete pegua iky'a e'y va'e.

— Napembojyi 'rá kavara ra'y ixy kamby py ae.

SENHOR peguarã dízimo ome'ê aguã regua

²² — Ha'evea rami kuerei 'rá dízimo reme'ê mba'emo ra'y renhoty va'ekueaju guigua, ma'etya nhavo mba'ety rupi remono'ô va'e gui.*

* 14:22 Levítico 27.30-33, Números 18.21

²³ Dízimo regua gui ma SENHOR Nderuete renonde 'rã re'u, guery omoĩ aguã oiporavoague py, mba'emo aju guígua, vinho, azeite, ha'e gui nerymba vaka ha'e vexa'i kuery ra'y ypy'i regua gui. Ha'e rami vy 'rã reikuaa SENHOR Nderuete renonde rejerekyjea rupi reiko aguã, reikovea pukukue re.

²⁴ Ha'e gui xapy'a rei henda SENHOR Nderuete guery omoĩ aguã oiporavoague mombry ete ramo nda'evei 'rã ha'e py reraa aguã, nderekoa gui mombry ramo ha'e SENHOR Nderuete ojou uka reta va'ekue reme'ẽ aguã,

²⁵ ha'e ramo remboekovia 'rã dízimo, ha'e hepykue peráta ndepo py reraa reve tereo henda SENHOR Nderuete oiporavoague py.

²⁶ Ha'e va'e peráta re ma rejogua 'rã nenhe'ẽ py reme'ẽxe va'e rei, vaka, vexa'i, e'ỹ vy vinho, oy'u pyrã irove va'e, ha'e'ỹ vy nenhe'ẽ py reme'ẽxe rendua rami tema. Ha'e rami vy ha'e py, SENHOR Nderuete renonde py ae re'u vy revy'a 'rã ndero pygua kuery ha'e javi reve.

²⁷ — Ha'e rami teĩ eipytyvõ e'ỹ eme levita kuery neretã mbyte ikuai va'e, pendevvy rupi oyvyrã ndojopyi rire.

²⁸ Mboapy ma'etỹa opa nhavõ ma dízimo ha'e va'e ma'etỹa mba'emo aju regua remono'õ vy neretã py ae 'rã remoĩ porã.

²⁹ Ha'e ramo levita kuery ou 'rã ho'u aguã (pendevvy rupi oyvyrã ndojopyi rire). Ou avi 'rã amboae regua kuery, tyre'ỹ ha'e imeve'ỹ va'e neretã py ikuai va'e. Okaru 'rã okuapy hev yatãmba peve, SENHOR Nderuete nemoingo porã aguã ndepo py rejapo va'e ha'e javi py.

15

Orevaague omboguepaa aguã ára pyguarã re ijayvua

¹ — Ha'e gui sete ma'etỹa opa nhavõ remboguepa kuerei 'rã ndevy oreveaague.

² Po rami 'rã rembogue: Neirũ kuery pe mba'emo reiporuka va'ekue ha'e javi rembogue 'rã omboekovia aguã va'ekue. Ha'e rami vy neremboekovia ukai 'rã neirũ e'ỹ vy nderyvy kuery pe, rembogue aguã SENHOR oikuaa uka ramo.

³ Ha'e rã amboae regua kuery pe ma ha'eve remboekovia uka aguã, ha'e rã nderyvy oiporu vy ogueraa va'ekue ma neremboekovia ukavei 'rã.

⁴ Ha'e rami vy pendekuaia py iporiaukue'i ikuai e'ỹ aguã, mba'eta opa mba'e py SENHOR Penderuete penemoingo porã 'rã yvy penderekoarã ome'ẽ va'ekue py,

⁵ xapy'a rei SENHOR Penderuete ayvu pendu ri ramo, aỹ amboaxa va'e ha'e javi pejapo ete aguã.

⁶ Mba'eta SENHOR Penderuete penemoingo porã 'rãe, aipoe'iaque rami vy. Ha'e ramo heta regua kuery pe peiporuka 'rã mba'emo, teĩ ha'e kuery gui ma peẽ kuery ndapeiporui 'rã mba'eve. Heta regua re pendepo'aka 'rã, teĩ ha'e kuery ma pendere nda'ipo'akai 'rã.

Levítico 25.35-38

⁷ — Ndeyvyrã SENHOR Nderuete ome'ẽague rupi xapy'a rei nderekoa rupi oiko 'rã nderyvy iporiaukue'i va'e, neretã oĩ va'e pygua. Ha'e ramo ma ndepy'a ratã eme, neĩ nerakãte'ỹ eme guive nderyvy iporiaukue'i pe.

⁸ Ha'e rami 'rãgue py reipe'a 'rã ndepo opa marãgua reiporuka aguã ixupe oata va'e rei.

⁹ Enheangu ke amboae rami rei ndepy'a e'ỹ aguã, aipo're eme guive: “Sete ma'etỹa ovaẽ ta ma, orevea nhamboguepa aguã”, 're eme, nderyvy iporiau'i va'e re rema'ẽ vai vy ixupe mba'eve nereme'ẽi aguã. Mba'eta ha'e rami rã SENHOR pe ojapukai 'rã nderovai, ha'e ndere oĩ 'rã rejajavya.

¹⁰ Reme'ẽxe'a'i py eme'ẽ ixupe, ndepy'a re mba'emo vai toĩ eme reme'ẽa py. Ha'e rami rã SENHOR Nderuete nemoingo porã 'rã ndepo py rejapo va'e ha'e rejapoaxa ha'e javi py.

¹¹ Mba'eta ikuai 'rãe iporiaukue'i yvy re. Ha'e nunga rupi aipoa'e ndevy: Eipe'a ndepo, reme'ẽxe'a'i py reme'ẽ aguã nderyvy ojexavai rei'i va'e ha'e iporiaukue'i ndevvy re ikuai va'e pe.

Êxodo 21.1-11

¹² — Xapy'a rei peteĩ nderyvy e'ỹ vy nereindy hebreu regua ndevy ovendea ramo ma mboapy meme ma'etỹ peve'i 'rã remomba'eapo. Ha'e gui sete ma'etỹa py ma repoi ju 'rã.

¹³ Ndea gui oo ma jave emondouka rive eme mba'emo reraa uka e'ỹ re.

¹⁴ Ixupe reme'ẽxe'a'i py eme'ẽ nerymba kuery regua, mba'emo moa'yĩaty gui, ha'e uva renhamiaty gui guare. SENHOR Nderuete nemoingo porãague regua gui reme'ẽ 'rã ixupe.

¹⁵ Nema'endu'a ke Egito yvy re ndee voi escravo reikoague gui SENHOR Nderuete nerenoẽague re. Aỹ gui ma ha'e nunga amboaxa ndevy.

¹⁶ Ha'e rã xapy'a rei nerembigui “Xee ndaai 'rã ndea gui” he'i 'rã ndevy, mba'eta nderayvu ha'e ndero pygua kuery voi, ha'e ndea py oiko porã.

¹⁷ Ha'e ramo mba'emo mombua py remombu 'rã inambi okẽ py. Ha'e rami rire nerembigui ae 'rã oiko raka'e rã peve. Ha'e rami ae avi 'rã rejapo nerembigui kunha va'e re.

¹⁸ Ndejeupe “Haxy xee apoi aguã” 'ere eme, mba'eta mboapy meme ma'etỹ re ma ndevy omba'eapo rire mbyte rupi ete'i omba'eapo va'e repy re, SENHOR Nderuete nemoingo porã aguã rejapo va'e ha'e javi py.

Lei mymba ra'y kuery oiko ypy'i va'ekue re ijayvua

¹⁹ — Nerymba vaka e'ỹ vy vexa'i ra'y oiko ypy'i va'ekue ha'e javi ma, ava ri ramo remboaxa 'rã SENHOR Nderuete peguarã. Vaka ra'y jypy guare ma neremomba'eapoi 'rã, ha'e vexa'i ra'y jypy guare rague ma nderejayai 'rã.

²⁰ Ha'e va'e ro'o re'u 'rã SENHOR renonde py ndero pygua kuery reve. Ma'etÿa nhavõ 'rã re'u, henda SENHOR oiporavoague py ae.

²¹ Ha'e rami teĩ ha'e va'e mymba re ivaikuea oĩ ri ramo, hetyma vaikue'i e'ÿ vy oexa e'ÿ va'e mba'e, ha'e'ÿ vy amboae rami ivaikuea oĩ ramo ma nereme'ei 'rã SENHOR Nderuete pe.

²² Ha'e va'e ma neretã py ae 'rã re'u. Peẽ kuery va'e regua ha'eve va'e ha'e ha'eve'ÿ va'e teĩ pe'u 'rã joa py, guaxu puku e'ÿ vy guaxu ete'i ro'o pe'ua rami.

²³ Ha'e rã huguykue ma ndape'ui 'rãe. Penhoẽ 'rã yvy py yv rami.

16

Judeu kuery pegua ngaru mboapy regua ojapo aguã re ijayvua

Páscoa ára regua

Êxodo 23.14,15; 34.18; Levítico 23.4-8

¹ — Abibe jaxy re Páscoa ára ojeupity nhavõ pejapo 'rã ngaru SENHOR Penderuete pegua. Mba'eta abibe jaxy py ae, pyávy SENHOR Penderuete penerenoẽmba raka'e Egito yvy gui.

² Ha'e rami rire Páscoa ára ojeupity jave SENHOR Penderuete pe peme'ẽ 'rã penerymba vaka ha'e vexa'i regua, SENHOR guery omoĩ aguã oiporavoague py ae.

³ Ha'e va'e jave py ma mbojape ombovu pyre ndape'ui 'rã. Sete ára re 'rã pe'u mbojape imbovua revegua e'ÿ, jexavai regua, (mba'eta Egito yvy gui pejepe'a pojava raka'e), peikoa pukukue re penema'endu'a aguã Egito yvy gui pejepe'aaague ára re.

⁴ Sete ára re pendea py noĩ 'rã mbojape mbovua, pendeyvy ha'e javi rupi. Ha'e rami avi jypya ára ka'arukue xo'o pejuka va'ekue ma topyta eme ko'ẽguerã.

⁵ Páscoa ára pyguarã neĩ peteĩve pejuka eme penderekoarã SENHOR Penderuete ome'ẽ va'ekue py,

⁶ ha'e rã SENHOR Penderuete guery omoĩ aguã oiporavoague py ae 'rã pejuka Páscoa ára pyguarã. Ka'arukue, kuaray oike ma jave 'rã pejuka, Egito yvy gui peẽmbaague hora ojeupity jave ae.

⁷ Pembojy vy pe'u 'rã SENHOR Penderuete oiporavoague py ae. Ha'e gui ko'ẽgue jevy peo 'rã pendero katy pejevy aguã.

⁸ Mboapy meme ára re 'rã pe'u mbojape imbovua revegua e'ÿ. Ha'e gui sete araa py ma SENHOR Penderuete pe pejapo 'rã nhemboaty iky'a e'ÿ va'e. Neĩ peteĩve ma napemba'epoi 'rã.

Pentecostes ára regua

Êxodo 23.16; 34.22; Levítico 23.15-21

⁹ — Ha'e gui peipapa 'rã sete semana peve. Mba'ety rupi kyxe py mba'emo aju pemono'õ ypya ára guive sete semana peve 'rã peipapa.

¹⁰ Ha'e vy SENHOR Penderuete pe pejapo 'rã ngaru semanas regua. Pendepo py ae 'rã peme'ẽ mba'emo peme'ẽxea'i py, SENHOR Penderuete penemoingo porãague rami.

¹¹ Pevy'á 'rã pekuapy SENHOR Penderuete renonde py, pendera'y, penderajy kuery, penerembiguaĩ avakue ha'e kunhague reve, levita kuery penderekoa py ikuai va'e reve, ha'e gui amboae regua, tyre'ÿ ha'e imeve'ÿ va'e kuery pendea rupi ikuai va'e reve, SENHOR Penderuete guery omoĩ aguã oiporavoague py ae.

¹² Penema'endu'a ke Egito yvy re escravo pendekuaiaague re. Ha'e rami vy kova'e ayvu oea pyre re peikuaa pota 'rã pejapo ete aguã.

Oguy'i py ikuai aguã regua

Levítico 23.33-43

¹³ — Ha'e gui sete ára re pejapo 'rã ngaru oguy'i py pendekuai aguã regua, mba'emo pemoa'yimba ma jave, ha'e uva rykue penhamimba ma rire.

¹⁴ Ngarua py pevy'a 'rã, pendera'y, penderajy kuery, penerembiguaĩ avakue ha'e kunhague, ha'e gui levita, amboae regua, tyre'ÿ ha'e imeve'ÿ va'e kuery penderekoa py ikuai va'e reve.

¹⁵ Sete ára re 'rã ngaru pejapo SENHOR Penderuete pegua, SENHOR oiporavoague py ae, mba'eta SENHOR Penderuete penemoingo porã 'rã mba'emo pemono'õa ha'e pendepo py pejapo va'e ha'e javi py, opa mba'e py perovy'a aguã rami.

¹⁶ — Ha'e rami py ma'etÿa nhavõ mboapykue-pykue peẽ kuery va'e regua avakue ikuai va'e ojexa uka 'rã SENHOR Penderuete renonde, oiporavoague py ae: ngaru mbojape imbovua revegua e'ÿ va'e regua oikoa py, ngaru semanas regua, ha'e gui ngaru oguy'i py ikuai aguã regua oikoa py. Opo py mba'emo ogueru reve anho 'rã ojexa uka SENHOR renonde py.

¹⁷ Peteĩ-teĩ ome'ẽ 'rã ojoua'i rami, SENHOR Tuuete omoingo porãague rami.

Êxodo 23.6-9

¹⁸ — Penderekoarã SENHOR Penderuete ome'ẽ va'ekue py peẽ kuery regua ikuai ha'e javi rupi pemoĩ 'rã nhomboayvu va'ety ha'e huvixa kueryrã, heta va'e kuery re oikuaa pota aguã ha'evea rami.

¹⁹ Joe peikuaa pota eme ha'eve e'ÿa rami rei. Peteĩ peayvuve eme joegui. Pejopy eme ome'ẽmby, mba'eta ome'ẽmby ombogue 'rã hi'arandu va'e rexa ha'e omboeko vai rive 'rã heko porã va'e.

²⁰ Ha'evea rami meme 'rã peikuaa pota, ha'e rami anho'i, peikove ha'e penderekoa aguã pendeyvyrã SENHOR Penderuete ome'ẽ va'ekue py.

²¹ Pemo'ã eme yvyra ta'angaarã SENHOR Penderuete pegua altar yvÿry.

²² Neĩ pemo'ã eme ita SENHOR Penderuete ojou vai va'e regua rive.

17

Tuute ra'angaa mboeteare ombopagaa aguã re ijayvua

¹ — Ha'e gui vaka ra'y e'y vy vexa'i iporã e'y, ivaikue rei va'e ma peme'ê eme SENHOR Penderuete pe, mba'eta ixupe ramo ojeguaru pyrã.

² Xapy'a rei pendea py penderekoarã SENHOR Penderuete ome'ê va'ekue rupi pejou 'rã ava e'y vy kunha teĩ SENHOR Penderuete renonde teko vai rupi oiko va'e, guexeve guarã ojapo va'ekue rupi e'y.

³ Ha'e va'e nunga oo vy tuute mboae pe rive 'rã ikuai omboetea rupi, ha'e'y vy kuaray, jaxy, ha'e'y vy yva re ojekuaa va'e pe rei, xee ajapo ukaague rami e'y.

⁴ Ha'e va'e reko omombe'ua rã pendu vy ma peikuaa pota porã 'rã. Ha'e gui xapy'a rei anhetê ete ri Israel kuery mbyte ha'eve'y va'e ojapo ramo

⁵ ava e'y vy kunha va'e ha'eve'y va'e apoare peraa 'rã peneretã rokê peve, ha'e vy pejapipa 'rã ita py omano peve.

⁶ Moko'i e'y vy mboapy hexaare omombe'u ramo mae ma pejuka omano aguã rami ojevavy va'ekue. Pete'i hexaare omombe'u ramo nomanoi 'rã.*

⁷ Hexaare ranhe 'rã ita omombo ojuka aguã. Ha'e gui ma heta va'e kuery ha'e javi 'rã ojapi. Ha'e rami vy pendea gui peipe'a aguã heko vai va'e.*

Haxy ete va'e re huvixa oikuaa pota kuaa aguã re ijayvua

⁸ — Ha'e gui mba'emo re reikuaa pota aguã haxy ete ri ramo, jojukaague re mba'e, e'y vy mba'emo re ojerurea, joapo vaiague, e'y vy amboae ramigua oikuaa pota ukua py, ha'e ramo repu'a vy reo 'rã SENHOR Nderuete oiporavoague py.

⁹ Ha'e vy rejexa uka 'rã levita regua sacerdote kuery ha'e nhomboayvu va'ety ha'e jave py ikuai va'e pe. Ha'e kuery pe reporandu rã omombe'u 'rã rejapo va'erã.

¹⁰ SENHOR oiporavoague py ndevy ombovaiague rami 'rã rejapo. Enhea'ã ndevy ojapo uka va'ekue rejapopa aguã.

¹¹ Lei re ha'e kuery nembro'eague rami 'rã rejapo. Ayvu ndevy omombe'uague gui nderejepe'ai 'rãe, reiporu kuaa regua katy, neĩ reiporu kuaa e'ya katy ma voi.

¹² Ha'e gui ava onhemboyvate rei vy SENHOR Nderuete pegua sacerdote ayvu noendu potai, neĩ nhomboayvu va'ety ayvu ri ramo ma ojukaa 'rã, Israel kuery mbyte gui peipe'a aguã mba'emo vai,

¹³ ha'e nunga heta va'e kuery ha'e javi oendu vy okyje aguã, onhemboyvate ve'y aguã rami.

Huvixaverã omo'i mbyre rekorã re ijayvua

¹⁴ — Xapy'a rei vyv penderekoarã SENHOR Penderuete ome'ê va'ekue py pevaê ma vy aipopeje 'rã: “Nhamo'i huvixave nhandere opena va'erã, ha'e javi regua nhandevy'yry rupi ikuai rami” peje 'rã.

¹⁵ Ha'e rami vy penderuvixaverã pemo'i 'rã SENHOR Penderuete oiporavo va'e ae. Ha'e rã amboae regua ava penderyvy kuery regua e'y ma nda'evei pemo'i aguã, ha'e rã Israel kuery va'e regua anho.

¹⁶ Ha'e rami avi penderuvixave ma nda'evei ojeupe guarã kavaju omboetea aguã, neĩ Egitto vvy katy heta va'e kuery ogueraa jevy aguã, kavaju ojovexe vy. Mba'eta pende vy “Ndapejevvyvei 'rã kova'e tape rupi” he'i va'ekue SENHOR.

¹⁷ Nda'evei avi ojou reta aguã gua'yxy jevyrã, opy'a py tape porã gui opia e'y aguã. Nda'evei guive ojeupe guarã prata e'y vy ouro ojou reta aguã.

¹⁸ — Ha'e gui guenda opena atyrã py ogyapy ma vy ojeupe ae oguero va 'rã kova'e lei kuaxia re ombopara vy. Ha'e va'e ma levita regua sacerdote kuerya py oĩ va'e.

¹⁹ Ngupive oguereko riae 'rã, oikovea ára nhavõ ogueroayvu aguã. Ha'e rami vy oikuaa 'rã SENHOR Nguete renonde ojererokyjea rupi oiko aguã, ha'e kova'e lei re ayvu oĩ va'e ha'e javi rupi omo'i porã ha'e ojapopa ete aguã.

²⁰ Mba'eta ha'e va'e ayvu ojapo 'rã opy'a py guvyvy kuery gui onhemboyvateve e'y aguã, ha'e ojapo uka pyre gui ojepe'a e'y aguã, oiporu kuaa regua katy neĩ oiporu kuaa e'ya katy ma voi. Ha'e rami vy Israel kuery mbyte huvixa oĩ are aguã, ha'e gui ta'y kuery ju.

18

Sacerdote ha'e levita kuery peguarã ha'e hekorã re ijayvua

¹ — Ha'e gui levita regua sacerdote kuery, ha'e levita kuery ha'e javi ndoguereko'i 'rã ovyvrã Israel kuerya py. Ha'e kuery okaru 'rã SENHOR pe oapy vy ome'ê mbyre re, ha'e kuery peguarã opyta va'e gui.

² Ovyvrã ma ndoguereko'i 'rã guvyvy kuery ikuai rupi. SENHOR ae 'rã ha'e kuery mba'erã va'ekue, ha'e kuery pe ijayvuague rami vy.

³ Ha'e nunga rupi pova'e ma sacerdote kuery peguarã heta va'e kuery ome'ê va'ekue regua, vaka e'y vy vexa'i kuery mba'e. Sacerdote pegua ma ijaxi'y kãgue, ha'e gui ha'i'y kãgue ha'e hyekue.

⁴ Ha'e kuery pe peme'ê avi 'rã jypygua mba'emo aju, uva rykue ha'e azeite iporãgueve gui, ha'e gui vexa'i rague jypy guare voi.

⁵ Mba'eta ha'e kuery ma Israel kuery ha'e javi regua gui SENHOR Penderuete oiporavo va'ekue, SENHOR rery rupi omba'eapo aguã, ha'e gui ta'y kuery ju, ára nhavõ reguarã.

* 17:6 Hebreus 10.28 * 17:7 1 Coríntios 5.13

⁶ — Ha'e gui xapy'a rei peteĩ levita ou 'rã guekoa peteĩ tetã Israel regua va'e rei gui. Opy'a py omba'eapoxea'i ha'e javi rupi 'rã ou henda SENHOR oiporavoague py.

⁷ Ha'e rami vy omba'eapo 'rã SENHOR Nguuete rery rupi, guvyvy kuery levita regua ha'e javi SENHOR renonde opena okuapya rami.

⁸ Ha'e va'e ho'u va'erã ma ha'e kuery pegua reve joo rami ae 'rã, mba'emo guekoa py ovendeague repy áryve ome'ëa 'rã.

Imba'ekuaa ha'e imba'evyky va'e kuery rovai ijayvua

⁹ — Ha'e gui yvy SENHOR Penderuete ome'ëague py pevaë ma vy napenhembo'ei 'rã ha'e pygua kuery ha'eve'ỹ va'e ojapoa rami pendekuai avi agüã.

¹⁰ Penembyte py toiko eme guive gua'y e'ỹ vy guajy tata py oapy va'e, imba'ekuaa va'e, tenondegua mombe'ua, oexa'ã kuaa va'e, neĩ imba'evyky va'e ma voi,

¹¹ onhembo'e va'ike va'e, neĩ omanogue mboayvua, nhe'ë vai revegua, neĩ omanogue pe oporandu va'e ma voi.

¹² Mba'eta ha'e nunga apoa ma SENHOR pe rã ojegarupy meme. Ha'e nunga ha'e kuery ojapo okuapya re ae SENHOR Penderuete oipe'a raka'e penerenonde gui.

¹³ Opa mba'e py heko porã va'e 'rã peiko SENHOR Penderuete renonde.

¹⁴ Mba'eta yvy pejopy va'erã va'e regua kuery ojapyxaka 'rã okuapy tenondegua mombe'ua ha'e imba'ekuaa va'e kuery re. Ha'e rã pendevy pe ma SENHOR Penderuete ndojapo ukai ha'e nunga.

Profeta yvate ete va'e oiko aguã re ijayvua

¹⁵ — Penembyte gui SENHOR Penderuete omoingo 'rã peteĩ profeta-rã, penderyvy regua xee rami guarã ae. Ha'e va'e re ma pejapyxaka 'rã,*

¹⁶ mba'eta Horebe vyty re penhemboaty pekuapya py SENHOR Penderuete pe pejerure vy “Nda'evei SENHOR Oeruete ayvu roenduve aguã, neĩ kova'e tata tuvixa ete va'e roexave aguã, romano e'ỹ aguã”, peje va'ekue.

¹⁷ Ha'e ramo SENHOR aipoe'i xeivy: “Ha'veea rami ha'e kuery ijayvu.

¹⁸ Ha'e rami rã ha'e kuery pe xee amoingo 'rã peteĩ profeta-rã penderyvy kuery mbyte gui, ndee ramigua ae. Ha'e va'e juru py amoĩ 'rã xeayvu, ha'e kuery pe ju omombe'u aguã ixupe ajapo ukague ha'e javi.

¹⁹ Xerery rupi xeayvu ha'e omombe'u ramo ambopaga 'rã ndojapyxaka potai va'e ha'e javi.

²⁰ Ikuai avi 'rã profeta kuery xerery rupi merami ijayvu va'eri xeayvu namombe'u ukai va'e, ha'e'ỹ vy tuuete mboae rery rupi ijayvu va'e. Ha'e va'e regua profeta kuery ma pejuka 'rã.

²¹ Xapy'a rei aipopeje 'rã pendepy'a py: ‘Mba'exa vy tu jaikuaa 'rã SENHOR gui e'ỹ aipoe'i rã?’

²² Peikuaa pota ke: Peteĩ profeta SENHOR rery rupi ijayvu teĩ ijayvuague ndojeupityi, ndoiko ri ramo ma SENHOR guigua e'ỹ ae ijayvu. Ha'e va'e profeta ma onhemboyvatei rupi rive ijayvu ra'e. Pkyje eme ixugui.”

19

Números 35.9-15; Deuteronomio 4.41-43

¹ — SENHOR Penderuete yvy regua oipe'apa vy ijyvykue pendevy ju ome'ë ramo ha'e kuery rekoague ha'e hoogue ikuai va'e pejopy vy ha'e py pendekuai ma rire,

² ha'e jave py mboapy tetã ju pemboja'o 'rã pendevy'ã SENHOR Penderuete ome'ë va'ekue mbyte rupi.*

³ Pejapo 'rã tape ha'e va'e katy oo va'erã, ha'e pendevy'ã SENHOR Penderuete ome'ë va'ekue pemboja'o 'rã mboapy henda rupi, ha'e va'e tetã py jojukaare ma guive rã onhemi aguã.

Números 35.22-28

⁴ — Pova'e nunga jojukaare ha'eve 'rã ha'e va'e tetã py onhemi vy oikove aguã: oirũ ojukaxe reia py e'ỹ, potae vy e'ỹ ojuka va'ekue anho.

⁵ Xapy'a rei amongue oo 'rã oirũ reve ka'aguy re xakã ojaya aguã. Ha'e vy haxa py vyvra ojaya aguã oity ratã ramo hi'y gui ferro oë xapy'a ramo oirũ omongarau rire omano 'rã. Ha'e gui ijukaare oo vy onhemi 'rã ha'e va'e tetã py oo jepe aguã.

⁶ Ha'e rami e'ỹ rã huguy repy'ã opy'a py ipoxy reve jojukaare omonha vy oupity 'rã tape ipuku-a rupi. Ha'e vy ojuka 'rã, omano aguã rami e'ỹ oiko teĩ, jojukaxe reia py e'ỹ rire.

⁷ Ha'e nunga rupi aipoa'e mboapy tetã peiporavo aguã.

⁸ Xapy'a rei SENHOR Penderuete peneramoĩ kuery pe ouraague rami vy ombotuvixave 'rã pendevyvy, ha'e pendevy ome'ëmba 'rã yvy ome'ë 'rã va'ekue,

⁹ xapy'a rei ha'e ojapo uka va'ekue aỹ amboaxa va'e ha'e javi pejapo ramo SENHOR Penderuete peayvu, ha'e ára nhavõ ixuguigua tape rupi peiko aguã, ha'e rami vy ma mboapy tetã ju 'rã pejouve, mboapy ae ma va'ekue áryve,

¹⁰ ha'e rami pendevy'ã SENHOR Penderuete ome'ë va'ekue py heko porã va'e ruguy omoëa e'ỹ aguã, pendere oĩ e'ỹ aguã tuguy omoëague re opaga aguã.

Números 35.16-21

* 18:15 Profeta Moisés ramigua SENHOR omoingo va'erã ma Jesus ae (Atos 3.22-23, 7.37).

* 19:2 Jordão yakã vyvry ha'e kuery ovaë ppyague py mboapy tetã omboja'o ma voi raka'e (4.41-43). Apy ma mboapy ju omboja'o aguã re ijayvu, ha'e javi vy mboapy meme tetã oĩ aguã jojukaare onhemi atyrã.

¹¹ — Ha'e gui xapy'a rei oiko 'rã oirũ ndoayvui vy oity aguã re onhembopy'a va'e. Ha'e vy hexe opu'ã vy oinupã vy ojuka 'rã, ha'e gui onhemi 'rã petei tetã peiporavo va'ekue py.

¹² Ha'e ramo hekoa ae pygua nhomongeta va'ety kuery omondouka 'rã heruarã, ha'e oguerua ma ramo omboaxa 'rã huguy repyará po py ojuka aguã.

¹³ Ha'e va'e re pema'ê eme pemboaxya rupi, Israel kuery mbyte gui peipe'a aguã heko porã va'e ruguy moãare ojevayague, pendekuai porã aguã.

Yvy ja'oa ha'e mba'emo mombe'ua kuery re ijayvua

¹⁴ — Erova eme neirũ kuery yvy markaa, ymagua kuery pendevy re omo'ã va'ekue, yvy SENHOR Penderuete penderekoarã ome'ê va'ekue py.

¹⁵ — Amongue teko vai, e'y vy jejavya ma guive rã ojapo rire teĩ petei'i hexaare nda'evei hovai opu'ã vy hekokue omombe'u aguã. Mokoĩ, mboapy hexaare omombe'u rire mae 'rã peikuaa anhetãgua.*

¹⁶ Xapy'a rei joe amongue opu'ã vy hekokue ramigua omombe'u 'rã teko vai ojapoague rami.

¹⁷ Ha'e rami rã mokoĩve avakue joupe ijayvu va'ekue ojexa uka 'rã SENHOR renonde py, sacerdote ha'e nhomboayvu va'ety kuery ha'e va'e ára ikuai va'e renonde.

¹⁸ Nhomboayvu va'ety kuery oikuaa pota porã 'rã. Ijayvu riveague, guyy rovai ijapuaque ri oikuaa vy

¹⁹ hexe ojapo 'rã guyy re ojapoxeague rami. Ha'e rami vy 'rã peipe'a teko vai penembyte gui,

²⁰ amboae kuery oendu vy okyje aguã, ha'ekue ramigua ndojapoavei aguã penembyte rupi.

²¹ Joapo vaiare re pema'ê eme pemboaxya rupi: joekove oipe'ague re peipe'a avi 'rã hekove, joexa omobuague re pemombu avi 'rã hexa, nhoaĩ omopẽague re pemopẽ avi 'rã haĩ, jopo ojayaague re pejaya avi 'rã ipo, e'y vy jopy ojayaague re pejaya avi 'rã ipy.

20

Joe opu'ã rã guarã re ijayvua

¹ — Ha'e gui penderovaigua kuery reve pepu'ã aguã peo vy pexa 'rã kavaju áry e'y vy karóxa py ou va'e pendegui hetave va'e. Ha'e rami teĩ pekyje eme, mba'eta pendereve oiko SENHOR Penderuete Egito yvy gui penereoãare ae.

² Joe pepu'ã aguã py pevaẽ ta ramo penerenonde sacerdote oo vy ijayvu 'rã peẽ kuery pe.

³ Ha'e vy aipoe'i 'rã: "Pendú ke, Israel kuery. A'y pevaẽ ta ma penderovaigua kuery reve joe pepu'ã aguã py. Penhemondy eme penekuraxõ py. Pekiye eme, peryryipa eme, napenderekorãvei eme guive penderovai ha'e kuery ou rã pexa vy,

⁴ mba'eta SENHOR Penderuete oo 'rã peẽ kuery reve. Pendere vy ha'e opu'ã 'rã penderovaigua kuery re, pendereraa jepe aguã", he'i 'rã.

⁵ — Ha'e gui yvatekueve ju peẽ kuery pe ijayvu 'rã. Ha'e vy aipoe'i 'rã: "Peẽ kuery va'e regua mava'e tu ngoorã ojapo teĩ nomboaxai teri SENHOR peguarã? Ha'e va'e tojevy ju ngoo katy, joe opu'ã py omano ramo amboae ju omboaxa e'y aguã.

⁶ Ha'e peẽ kuery va'e regua mava'e tu uva tyrã onhot'y va'eri hi'a nomono'õi teri? Ha'e va'e tojevy ju ngoo katy, joe opu'ã py omano ramo amboae ju omono'õ e'y aguã.

⁷ Peẽ kuery va'e regua mava'e tu kunha re omendaxe va'eri nomendai teri? Ha'e va'e tojevy ju ngoo katy, joe opu'ã py omano ramo amboae ju kunha re omenda e'y aguã.

⁸ Peẽ kuery va'e regua mava'e tu okyje raxa ha'e ipy'a vava rei va'e? Ha'e va'e tojevy ju ngoo katy, tyvy kuery voi opy'a py okyjea oendu avi e'y aguã, ha'e va'e opy'a py okyjea rami", he'i 'rã yvatekueve heta va'e kuery pe ijayvu vy.

⁹ Heta va'e kuery pe yvatekueve ijayvupa ma vy mae ma omoĩ 'rã xondaro kuery ruvixarã ha'e kuery renonde katy guarã.

¹⁰ — Ha'e gui amongue tetã re pepu'ã aguã py pevaẽ ta ma vy peporandu ranhe ha'e kuery reve petei rami pendekuai aguã re.

¹¹ Xapy'a rei petei rami ikuaixea rami penembovai, ha'e pendevy guetã rokẽ oipe'a ramo ma ha'e pygua kuery ha'e javi pemomba'eapo atã 'rã penerembiguairã.

¹² Ha'e rami teĩ pendereve petei rami nda'ikuaixei vy pendere opu'ã ri ramo ma pejokopa 'rã tetã.

¹³ Ha'e ramo SENHOR Penderuete omboaxa 'rã pendepo py. Ha'e pygua avakue ikuai va'e ma guive rã pejuka 'rã kyxe py.

¹⁴ Ha'e rã kunhague, kyrĩgue, mymba kuery, ha'e mba'emo tetã py ikuai va'e ha'e javi ma peraapa 'rã penemba'erã. Peẽ ae peiporu 'rã penderovaigua kuery mba'e rei-reikue pendepo py SENHOR Penderuete omboaxa va'ekue.

¹⁵ Ha'e rami ae 'rã pejapo tetã pendegui mombyry ikuai va'e ha'e javi re, ha'e katy'igua kuery pegua e'y ramo.

¹⁶ Ha'e rã amboae regua kuery pendepo py SENHOR Penderuete omboaxa va'e retã py ma neĩ peteĩve ndapejai 'rã oikove vy ipytuẽ va'e.

¹⁷ Ha'e rami 'rãgue py SENHOR Penderuete ijayvuague rami vy pemomba ete 'rã: heteu kuery, amorreu, cananeu, ferezeu, heveu ha'e jebuseu kuery,

¹⁸ ha'e kuery penembo'e e'y aguã ha'eve'y va'e pejapo aguã, nguete ra'angaa kuery pe ojapoa rami, mba'eta ha'e rami pejevay 'rã SENHOR Penderuete rovai.

*

¹⁹ — Xapy'a rei petei tetã pejoko 'rã mbovy ára re rei e'ý, ha'e kuery re pepu'ã 'rã pendepo'aka aguã. Ha'e rami tei pembovaipa rive eme yvyra ha'e va'e rupi ikuai va'e haxa py peake'o vy, mba'eta hi'a ha'eve 'rã pe'u aguã. Pemboguai eme, mba'eta vyvra mba'ety rupi ikuai va'e nda'u avakue teve, ha'e va'e re pepu'ã aguã?

²⁰ Ha'e rã vyvra hi'a pe'u e'ý va'erã ma ha'eve peake'o vy peity aguã. Ha'e va'e py tetã re pepu'ã pekuapya va'e rovai pemo'ã 'rã ijokoarã, peitypa peve.

21

Oikuaa e'ýpy jokuague oja'o' i ukaa aguã re ijayvua

¹ — Ha'e gui pendeyvyrã SENHOR Penderuete ome'ëague py petei te'õgue pejou xapy'a 'rã mba'ety py itui va'e, ha'e ndapeikuaai 'rã guive mava'e pa ojukaague.

² Ha'e ramo nhomongetaa ha'e oikuaa pota va'ety kuery oë 'rã jogueruvy, ha'e vy omano va'ekue ituia gui oa'ã 'rã petei-tei tetã ijyvyry rupi oí va'e peve.

³ Ha'e gui omano va'ekue ituia katy'ive tetã oí va'e pygua nhomongeta va'ety kuery ogueraa 'rã petei vaka kunha nomba'eapoi teri va'e, neí canga re voi nomoatã teri va'ekue.

⁴ Ha'e va'e ogueraa 'rã petei yvyugua yy xyry oía vvy noikaraíai, neí nonhotýai teria py. Ha'e va'e vyvugua py ae 'rã ojyryvi poka vaka kunha.

⁵ Ha'e gui Levi ramymino va'e regua sacerdote kuery ovaë avi 'rã, mba'eta ha'e va'e kuery SENHOR Penderuete oiporavo va'ekue ojeupe omba'eapo aguã, SENHOR rery rupi jogueroyvu porã, ha'e ijayvua rupi oikuaa pota aguã petei-tei ojerurea ha'e joguero'apaague re.

⁶ Ha'e gui nhomongeta va'ety kuery tetã omano va'ekue ituia katy'ivegua ha'e javi ma ojepoei 'rã vaka kunha vyvugua py ojuka va'ekue áry.

⁷ Ha'e vy aipoe'i 'rã okuapy: “Orepo e'ý ae kova'e ava ruguy omoë va'ekue, orerexa ndoexai guive huguy omoëa rã.

⁸ Ha'e gui SENHOR, emboaxy ndevyguia Israel kuery, ndee ae reraa jepe rire. Eja eme heko porã va'e ruguy omoëague py jejavy opyta aguã ndevyguia Israel kuery mbyte”, he'i okuapy ramo oja'o'ia 'rã huguy omoëague py jejavy oí va'e.

⁹ Ha'e rami py penembyte gui peipe'a uka 'rã heko porã va'e ruguy omoëague py jejavy oí va'e, SENHOR reonde ha'evea ramigua pejapo vy.

Kunha escravo-rã ogueraa pyre re ijayvua

¹⁰ — Penderovaigua kuery reve joe pepu'ã aguã peo ramo xapy'a rei SENHOR Penderuete omboaxa 'rã pendepo py, ha'e peraapa 'rã escravo-rã.

¹¹ Ha'e vy ha'e kuery mbyte xapy'a rei petei kunha iporã ete va'e rexa vy ndea'e rei 'rã hexe, ha'e reraaxe 'rã ndera'yxyrã.

¹² Ha'e rami vy reraa 'rã ndero katy, ha'e o'a ojayapa 'rã oakã re oí va'ekue, ojaya 'rã opoapë,

¹³ ha'e gui omboekovia 'rã oao escravo-rã peraa jave onhemondeague. Ndero py ae 'rã oiko, ha'e petei jaxy re ojae'o 'rã nguu ha'e oxy re. Ha'e va'e rire mae ma rejogueroko 'rã hexeve. Ndee ma ime 'rã reiko, ha'e rã kunha va'e ma ndera'yxy 'rã.

¹⁴ Ha'e gui xapy'a rei ndevy pe rã kunha va'e nda'evei rei ramo tove too ha'e ae ooxea katy rei. Nda'evei 'rã perãta re revende aguã, ereko axy eme guive, ndee ae ma remo'yvyt'i rire.

Ta'y jypy guare peguarã re ijayvua

¹⁵ — Xapy'a rei petei ava omenda 'rã mokoí kunha re. Petei ma oayvuve 'rã, ha'e rã amboae ma ndoayvuive 'rã. Ha'e vy gua'yxy mokoíve re ta'y 'rã, ha'e ndoayvuive va'e re ranhe 'rã ta'y.

¹⁶ Ha'e gui gua'y kuery pe mba'emo ogueroko va'e omboja'opaa ára py ma nda'evei 'rã jypy guare peguarã ogueroko va'e oayvuve va'e pi'a pe ome'ë aguã, ndoayvuive va'e pi'a pe 'rãgue py, mba'eta ha'e va'e ae ta'y jypy guare.

¹⁷ Ndoayvuive va'e pi'a pe ae tuu “Jypy guare” he'i vy ixupe ome'ë retave 'rã ogueroko va'e gui mokoíguea va'ekue. Kumumive jave py ta'ya pe ae ojopy 'rã jypy guare peguarã tuu ogueroko va'ekue.

Ta'y nhonhe'ë rendu e'ý va'e re ijayvua

¹⁸ — Xapy'a rei amongue ogueroko 'rã petei gua'y inhe'ë rendu e'ý ha'e opu'ã rei va'e, nguu neí oxy ayvu ma voi noendu potai va'e, tuu oinupã tei ndoikuaa potai rive ae va'e.

¹⁹ Ha'e ramo tuu ha'e ixu ojopy vy ogueraa 'rã tetã pygua nhomongeta va'ety kuery ikuai py, guetã rokë py ae.

²⁰ Ha'e rami vy aipoe'i 'rã ha'e kuery pe: “Kova'e orera'y ma orere opu'ã rei ha'e norenhe'ë rendui va'e, neí ndojapyxakai oreayvua re. Opa marã rei oiko, oka'uxe guive oikovy”, he'i 'rã.

²¹ Ha'e ramo tetã pygua avakue ha'e javi ojapipa 'rã ita py, omano peve. Ha'e rami vy penembyte gui peipe'a 'rã teko vai. Ha'e ramo Israel kuery ha'e javi oendu vy ojererokyje 'rã okuapy.

Yvyra re omano va'ekue oupi pyre oipe'aa jevy aguã re ijayvua

²² — Xapy'a rei amongue ojejavvy vy omano aguã rami oiko 'rã. Ha'e ramo pejuka ma vy hetekue vyvra re peupi imoiny rire,

²³ hetekue ndopytai 'rā vyvra re pytū mbuku re. Ha'e va'e árave 'rāe pemboguejy ha'e pejaty. Mba'eta vyvra re oupi pyre ma Nhanderuete ijayvu vaia va'e oiko. Ha'e rami vy 'rāe napemongy'a rei pendevyvrā SENHOR Penderuete ome'ē va'ekue.*

22

Okanhygue re ijayvua

¹ — Xapy'a rei nderyvy rymba vaka e'ŷ vy vexa okanhygue rexa vy enhomi eme ixugui. Reme'ē jevy 'rā nderyvy pe.

² Ha'e rami avi ija ndea katygua e'ŷ ramo, e'ŷ vy rexa va'ety e'ŷ ramo ma ndero py ranhe eraa rereko aguā, nderyvy ogueraa aguā ou rā ixupe remboaxa jevy peve.

³ Ha'e rami ae 'rā rejapo hymba mburika'i re, ha'e ijao re voi. Ha'e rami ae avi 'rā rejapo nderyvy omokanhy va'ekue re rei, rejou ri vy. Nda'evei renhomi aguā.

⁴ Ha'e gui nderyvy rymba mburika'i e'ŷ vy vaka tape rupi ho'a va'ekue rexa vy enhomi eme ixugui. Reipytyvō 'rāe remopu'ā vy.

Lei opa mba'e rei regua

⁵ — Kunhague nonhemondei 'rā avakue pegua ao py, avakue ma voi nonhemondei 'rā kunha pegua ao py. Mba'eta ha'e ramigua ojapo va'e rei tema SENHOR Nderuete ojeguarua meme.

⁶ — Tape rupi reoa rupi xapy'a rei rexa 'rā guyra'i raity vyvra re, e'ŷ vy vyv py, ha'e va'e re guyra ra'y kue'iry ikuai, e'ŷ vy hupi'a, ha'e gui ta'y kue'iry áry, e'ŷ vy hupi'a áry ixu oí. Ha'e rami rā ejopy eme ixu ta'y kue'iry reve.

⁷ Tove ixu too ooxea katy, eraa ta'y kue'iry anho ndejeupe guarā, reiko porā ha'e reiko pukuve aguā.

⁸ — Ha'e gui oorā rejapo vy ijao'ia rembe rupi rejapo 'rā kora jokokoarā, xapy'a rei ijao'ia gui amongue ho'a ramo oo káuxa ndere oí e'ŷ aguā huguy omoēague re repaga aguā.

⁹ — Nde'uvaty rupi enhotý eme mokoí regua ha'yí'i, ha'yí renhotý va'ekue gui hi'a oiko vy ha'eve'ŷ va'e opyta e'ŷ aguā, ha'e remono'ō va'ekue ha'e javi.

¹⁰ — Yvy reikaraí aguā eraa eme vaka mburika reve irū va'e.

¹¹ — Enhemonde eme ao vexa rague guigua ipererí va'e reve ombojo'a pyre py.

Lei ombojeguaa aguā regua

¹² — Ao puku renheovāa rembojegua 'rā ijapy irundy va'e py.

Lei itavy reia ha'e omenda va'e pegua

¹³ — Xapy'a rei peteí ava omenda 'rā kunha re, ha'e kunha va'e reve jogueroke ma rire nda'ija'evei 'rā hexe.

¹⁴ Ha'e rami vy omombe'u 'rā itavy rei va'ea rami, kunha va'e re ijayvu rei vy. Ha'e vy aipoe'i 'rā: “Kova'e kunha re amenda teí hexeve ajoguereko vy ndaexai kunhataí'i teria” he'i ramo

¹⁵ kunha va'e ru ha'e ixu ma kunhataí'i teria kuaa ukaarā ojou vy ogueraa 'rā tetā py nhomongeta va'ety kuery okē py ikuai py.

¹⁶ Nhomongeta va'ety kuery pe kunha va'e ru aipoe'i 'rā: “Kova'e ava re xerajy amomenda teí kunha va'e re ha'e nda'ija'eí vy

¹⁷ hexe ijayvu oximba aguā rami. Ha'e vy xevy 'Nderajy ma kunhataí'i e'ŷ ra'e' he'i. Ko, apy ma oí xerajy kunhataí'i teri oikoa kuaa ukaarā”, he'i vy ajukue oipyopa 'rā tetā pygua nhomongeta va'ety kuery renonde.

¹⁸ Ha'e nunga ha'e kuery oexa vy ime ojopy vy oinupāmba 'rā.

¹⁹ Ha'e rami vy ome'ē uka 'rā cem hatā'i va'e prata guigua kunha va'e ru peguarā, Israel regua kunhataí va'e rovai ijayvu rei rire. Ha'e gui kunha va'e oiko 'rā ta'yxy ae, ha'e ime nomoxēvei 'rā oikoa pukukue re.

²⁰ Ha'e rami avi anhetē ae ri kunhataí'i oikoa ndoexai ramo

²¹ ha'e pygua kuery kunha va'e ogueraa 'rā tuu kuery rokē peve, ha'e tetā pygua avakue ojapipa 'rā ita py omano peve, Israel kuery mbyte oiko vaikue rei rire, itavy rei ra'e nguu ru rupi teri oiko reve. Ha'e rami vy penembyte gui peipe'a 'rā teko vai.

²² — Ha'e gui xapy'a rei peteí ava ojoua 'rā kunha ome oguereko va'e reve onheno ramo. Ha'e vy mokoíve omano 'rā, ava kunha reve onheno va'ekue, ha'e kunha va'e teí ae ma. Ha'e rami py peipe'a 'rā teko vai Israel kuery mbyte gui.

²³ — Xapy'a rei peteí kunhataí ete teri omenda aguā rami oiko, ha'e gui peteí ava tetā py ojou vy ogueronheno 'rā.

²⁴ Ha'e ramo mokoíve peraa 'rā tetā rokē peve ita py pejapipa aguā, omano peve. Kunha va'e ma tetā py ndojapukaiaague re 'rā pejuka, ha'e rā ava ma oirū ra'yxy omo'yvyí'iaague re. Ha'e rami py peipe'a 'rā teko vai penembyte gui.

²⁵ — Ha'e rā mba'ety rupi ava ojou 'rā kunha omenda aguā rami oiko va'e, ha'e vy onhea'ā vy ogueronheno 'rā. Ha'e rami vy ava va'e anho'i omano 'rā kunha ogueronhenoague re.

²⁶ Ha'e rā kunha va'e re ma mba'eve ndapejapoi 'rā. Hexe ma noí omano aguā regua, mba'eta ava va'e ojapo oirū rovai opu'ā vy ojukaa rami,

²⁷ mba'ety py ojou rire. Kunha omenda aguā rami oiko va'e ojapukai teí nda'ipoai heraa jepearā.

* 21:23 Gálatas 3.13

²⁸ — Ha'e gui xapy'a rei peteī ava ojou 'rā kunhataī'i ete va'eri omenda aguā rami e'ŷ teri oiko va'e, ha'e. ojopy vy ogueronheno 'rā. Ha'e nunga ojoua ramo

²⁹ kunha va'e ru pe ava va'e kunha reronhenoare ome'ē 'rā cingüenta hatā'i va'e prata guigua. Ava omo'yvyi'i rire kunha va'e oiko 'rā ta'yxyrā. Neī nda'evei 'rā omoxē aguā oikoa pukukue re.

³⁰ — Ha'e gui peteīve ava ma voi nogueronhenoi 'rā oxy ranga, nguu rupa omongy'a e'ŷ aguā.

23

Nhemboaty iky'a e'ŷ va'e py oī aguā nda'evei va'e re ijayvua

¹ — Avakue oa'yījo pyre e'ŷ vy oembo aya pyre ma ndoikei 'rā SENHOR pegua nhemboaty oīaty py.

² Omenda e'ŷ va'ekue pi'a ma voi ndoikei 'rā SENHOR pegua nhemboaty oīaty py. Neī hamymino kuery dez-kue peve ikuai va'e voi ndoikei 'rā.

³ Amom ha'e Moabe pygua kuery va'e regua mava'eve voi ndoikei 'rā SENHOR pegua nhemboaty oīaty py. Neī hamymino kuery dez-kue peve ikuai va'e voi ndoikei 'rā, raka'e rā peve teī,

⁴ mba'eta ha'e va'e kuery ndogueraai rire mbojape ha'e yy penerovaexī aguā, Egito yvy gui peopa jave tape rupi peguataa rupi. Ha'e rami 'rāgue py peráta re penderovai guarā ogueru Beor ra'y Balaão, Mesopotâmia re Petor guigua, peē kuery rovai ijayvu vai aguā.

⁵ Ha'e rami teī SENHOR Penderuete Balaão ayvu noendu potai vy ojapo pendereroayvu porā aguā rami ijayvu vai 'rāgue py, penderayvu ete vy.

⁶ Ha'e va'e regua kuery reve peteī rami pendekuai aguā nda'evei pejapo aguā, neī ha'e kuery ikuai porā aguā rami ma voi, pendekuaia pukukue re, raka'e rā peve.

⁷ — Ha'e rā Edom pygua kuery ma peayvu e'ŷ eme, penderivy kuery ae ramo. Peayvu e'ŷ eme avi Egito pygua kuery, ha'e kuery yvy re amboae regua rami pendekuai rire.

⁸ Ha'e va'e ramymino kuery regua peteī-teī oike 'rā SENHOR pegua nhemboaty oīaty py.

Tekoa iky'a e'ŷ va'e opyta aguā re ijayvua

⁹ — Penderovaigua kuery re xondaro kuery opu'ā aguā oje'oi jave ma penheangu 'rā ha'eve'ŷ va'e ha'e javi gui.

¹⁰ Xapy'a rei peē kuery va'e regua oiko 'rā ha'eve'ŷ va'e pyávy otyy omondykya py. Ha'e rami vy ha'e va'e ojepe'a 'rā pendekuaia gui. Ndopytai 'rāe ha'e py.

¹¹ Ha'e gui ko'ē jevy ka'aru ma jave ojau 'rā yy py. Kuaray oike ma jave oike ju 'rā pendekuaia py.

¹² Pendekuaia gui mombyry'ia py oī 'rā peteī henda peo aguā.

¹³ Tembiporu rereko va'e reve reraa avi 'rā peteī vyvra, reguapy ma vy ha'e va'e py rejo'o aguā yvy. Ha'e gui rejeyv ta ma vy rejaty 'rā nderepoxi.

¹⁴ Mba'eta SENHOR Penderuete oiko avi 'rā pendekuaia mbyte rupi, penderovaigua kuery gui pendereraa jepe ha'e penderepy aguā. Ha'e nunga rupi pendekuaia ma iky'a e'ŷ va'e 'rā opyta, pendere SENHOR ha'eve'ŷ va'e oexa vy pendegui ojepe'a e'ŷ aguā.

Escravo oo jepe va'ekue, itavy rei va'e ha'e oiporuka pyre rekovia re ijayvua

¹⁵ — Peteī escravo opatō gui ojava vy ndea py ri onhemi ramo neremboaxa jevy 'rā ipatō pe.

¹⁶ Ndea py ae toiko ha'e ae oiporovaogue py, peē kuery rekoa rupi ojou porāa py ae. Perekō axy eme.

¹⁷ — Israel regua rajy kuery ta'ikuai eme ta'angaa pegua itavy rei va'e, neī Israel regua ra'y kuery ma voi ta'ikuai eme ha'e rami.*

¹⁸ SENHOR Penderuete pegua opy ndaperui 'rā itavy rei va'e repykue, neī ava itavy rei va'e repykue voi, penhemboayvuague pejapopaa regua peme'ē aguā teī ae ma. Mba'eta ha'e va'e mokoīve repy ma SENHOR Penderuete ojeguarua meme.

¹⁹ — Nderivyv pe mba'emo reiporuka rire emboekovia uka retave eme, peráta, tembi'u, e'ŷ vy mba'emo rei, ha'e nunga oiporukaa vy hekovia ojopyave aty teī.

²⁰ Amboae regua kuery pe mba'emo reiporuka vy ha'eve 'rā remboekovia uka retave aguā. Ha'e rā nderyvy pe ma mba'emo reiporuka vy emboekovia uka retave eme, SENHOR Nderuete nemoingo porā aguā ndeyvy reīa rupi mba'emo rejapo va'e ha'e javi py.

Mba'emo ojapo aguā re onhemboayvu okuapyague

²¹ — SENHOR Nderuete pe mba'emo rejapo aguā re renhemboayvu ri vy emboare eme rejapo aguā. Mba'eta SENHOR Nderuete nembopaga 'rā, ha'e ndere ae oī 'rā rejajavya.

²² Ha'e rami avi mba'emo rejapo aguā re nerenhemboayvui rire ma ndere noī 'rā rejajavya.

²³ Enhea'ā ndeayvuague rejapo ete aguā, mba'eta ndejuru py ae SENHOR Nderuete pe rejapoxea'i py ndeayvu rire.

²⁴ — Neirū mba'e uvaty rupi reaxa vy ha'eve 'rā uva re'uxea rami re'u aguā nerevyatā peve, teī eraa eme ajaka py.

²⁵ Ha'e rami ae avi neirū mba'ety rupi reaxa vy ha'eve mba'emo aju reipo'o aguā, teī kyxe py nderejayai 'rā imba'ety rupi.

24

Omenda va'e oja'o rā guarā re ijayvua

* 23:17 Ha'e jave py itavy reia 'rā amboae regua kuery ruete ra'angaa pegua templo py (1 Reis 14:24).

¹ — Xapy'a rei peteĩ ava kunha va'e ojou vy omenda 'rã hexe, teĩ kunha va'e re ha'eve'ỹ va'e ojou rire ndojou porãvei 'rã. Ha'e rami vy oja'o aguã regua ombopara vy kunha va'e po py ome'ẽ ma vy mae ma omondouka 'rã ngoo gui.*

² Ha'e gui xapy'a rei hoo gui kunha va'e oo rire amboae ava re ju 'rã omenda.

³ Ha'e gui ha'e va'e ju ndoayvuvei vy oja'o aguã regua ombopara vy ipo py ome'ẽ ma vy omondouka ju 'rã ngoo gui, ha'e rami e'ỹ vy mokoĩ ava gua'yxyrã ogueraa ma rire omano 'rã.

⁴ Ha'e gui ime jypygua imondoukaare ma nda'evei 'rã ogueru ju aguã gua'yxyrã omongy'a ma rire, mba'eta SENHOR pe ojeguarua ae 'rã. Pejapo eme pendeyvyrã SENHOR Nderuete ome'ẽ va'ekue re jejavya oĩ aguã rami.

Lei nhomboaxya rupi ikuai aguã re ijayvuague

⁵ — Ava omenda ramo'i va'e ma joe opu'ã aguã katy oo e'ỹ teĩ ha'eve, neĩ napemopenai 'rã mba'eve rei re. Peteĩ ma'et'ya peve toiko ngoo py ae, gua'yxyrã ogueraa va'ekue ombovy'a aguã.

⁶ — Ndevy amongue oreve ramo eraa eme mokoĩ ita mba'emo ra'yĩgue mongu'ia oguereko va'e, neĩ ita hi'árygua eraa eme, mba'eta ha'e rami reipe'a 'rãgue oikove aguã.

⁷ — Xapy'a rei amongue imonda 'rã guvyv Israel regua va'e re escravo-rã, e'ỹ vy ovende va'erã. Imondaague peikuaa ramo tomano. Ha'e rami vy 'rã penembyte gui peipe'a teko vai.

⁸ — Penheangu ke mba'eaxy lepra gui, ha'e penhea'ã levita regua sacerdote kuery penembo'ea pejapopa aguã. Penhea'ã ha'e kuery pe ajapo ukaague rami pejapo aguã.

⁹ Nema'endu'a ke Miriã re SENHOR Penderuete ojapoaque re, tape rupi Egito yvy gui peopa jave.*

¹⁰ — Neirũ pe mba'emo reiporuka ri vy eike eme hoo py hekovia renõẽ aguã.

¹¹ Repyta 'rã oka py, ha'e 'rã mba'emo poruare ae 'rã ogueru hekovia reraa aguã.†

¹² Ha'e rami teĩ ha'e va'e ava iporiaukue'i ri ramo nda'evei hekovia rereko aguã pytũ mbukukue re.

¹³ Kuaray oike'i jave ixupe reme'ẽ ju 'rã ao puku reraa va'ekue ha'e va'e py onheovã aguã, ha'e ramo ndereroayvu porã 'rã. Ha'e ramigua ma SENHOR Nderuete renonde "Ndereko porãa" he'i 'rã.

¹⁴ — Ereko axy eme nerembigui iporiaukue'i ojexavai va'e, nderyvy ae'i e'ỹ vy amboae regua ndeyvy re nderekoa py oiko va'e.

¹⁵ Hi'ára py porã ixupe reme'ẽ 'rã omba'eapoaque repy, kuaray oike e'ỹ teri reve, mba'eta iporiaukue'i vy oipota oikove aguã. Ha'e rami e'ỹ rã SENHOR pe ha'e oiapukai 'rã nderovai, ha'e ndere oĩ 'rã jejavya.

¹⁶ — Tuu kuery ndapejukai 'rã ta'y kuery ojejavyague re, neĩ ta'y kuery ma voi ndapejukai 'rã tuu kuery ojejavyague re. Peteĩ-teĩ omano 'rã ha'e ae ojejavyague re.

¹⁷ — Eikuaa pota porã e'ỹ eme amboae guigua ha'e tyre'ỹ kuery. Eraa eme imeve'ỹ va'e ao ixupe reiporuka va'ekue rekovia.

¹⁸ Nema'endu'a tema Egito yvy re escravo pendekuaiaque re, ha'e SENHOR ha'e gui pendereraa ague re. Ha'e nunga rupi ae ajapo uka ndevy ha'e rami aguã.

¹⁹ — Nema'ety py mba'emo aju remono'õ jave peteĩ jokuaa re nderexari ri vy ejevy eme rejopy nho aguã. Topyta amboae regua, tyre'ỹ ha'e imeve'ỹ va'e peguarã. Ha'e ramo SENHOR Nderuete nemoingo porã 'rã ndepo py rejapo va'e ha'e javi py.

²⁰ Azeite remondopa ma rire ejevy ju eme remondove aguã hakã gui. Topyta amboae regua, tyre'ỹ ha'e imeve'ỹ va'e peguarã.

²¹ Ha'e gui uva'a reipo'opa ma rire ejevy ju eme reipo'ove aguã. Hembyrekue topyta amboae regua, tyre'ỹ ha'e imeve'ỹ va'e peguarã.

²² Nema'endu'a Egito yvy re escravo pendekuaiaque re. Ha'e nunga rupi ajapo uka ndevy ha'e rami aguã.

25

Nhombopagaa py nhonupã aguã re ijayvua

¹ — Xapy'a rei mokoĩ joguero'a vy jogueraa rã oikuaa pota va'ety kuerya py. Ha'e ramo oikuaa pota vy omboeko porã 'rã ha'evea rami oiko va'ekue, ha'e ombopaga 'rã ha'eve'ỹa rami oiko va'ekue.

² Xapy'a rei ha'eve'ỹa rami oiko va'ekue pembopi aguã rami ri oiko ramo nhomboayvu va'ety omonheno uka, ha'e gui oinupã uka 'rã guenonde py, mbovykue pa ojapo vaique re oinupãa oikuaa rami.

³ Quarenta-kue peve'i 'rã peinupã, ha'e va'e áryve nda'evei peinupã aguã, mba'eta penderivyv peinupãve ri vy pemo'yvyi'ĩ 'rã penerenonde.

⁴ — Vaka mba'emo aju moa'yĩa rupi omba'eapo va'e ma pejokua eme ijuru rupi.*

Guyke'y ra'yxykue re omenda aguã re ijayvua

⁵ — Xapy'a rei joegua meme joa py oiko, ha'e peteĩ omano 'rã ta'y e'ỹ re. Ha'e ramo omano va'ekue ra'yxy nomendai 'rã amboae re, ngoo pygua re ae e'ỹ vy. Hovaja ae gua'yxyrã ogueraa vy omenda 'rã hexe, hexe ta'y aguã hovaja rekorã oea pyre rami vy.*

⁶ Ha'e gui kunha va'e re jypy'i ta'ya omboery 'rã guyke'y omano va'ekue rery rupi, hery okanhy e'ỹ aguã Israel kuery mbyte gui.

* 24:1 Mateus 5.31, 19.7-9 * 24:9 Moisés reindy Miriã ma hovai ijayvu rire Nhanderuete omomba'eaxy lepra py (Números 12.9-10).

† 24:11 Ha'e kuery reko rami vy amongue oirũ pe mba'emo oiporuka ramo iporukaare pe irũ ogueraa uka 'rã mba'emo, oiporu va'e hekovia ome'ẽ ju peve guarã. * 25:4 1 Coríntios 9.9, 1 Timóteo 5.18 * 25:5 Mateus 22.24, Marcos 12.19, Lucas 20.28

7 — Ha'e rā xapy'a rei ngovaja re tyvy nomendaxei ri ramo kunha va'e oo 'rā tetā rokē py nhomongeta va'ety kuery ikuiaa py. Ha'e vy aipoe'i 'rā: “Xerovaja xere ndata'yxei guyke'y rery oī ae aguā Israel kuerya rupi. Xereve ndojapoxei hovaja ojapo aguā va'e”, he'i 'rā.

8 Ha'e ramo hetā pygua mongeta va'ety kuery oenoī uka 'rā ava va'e, ixupe ijayvu aguā. Ha'e gui ndoipotai vy “Ndaraaxei ae” he'i ramo

9 hovaja kunha ou ju 'rā nhomongeta va'ety kuerya py. Ha'e vy ipy gui omboi 'rā ngovaja py regua, ha'e onyvō 'rā hova re. Ha'e rami vy “Ha'e rami 'rā ojapoa ava guyke'y rekovia ndata'yxei va'e re” he'i 'rā.

10 Ha'e rami rire ava va'e ro pygua kuery pe “Ipy rei va'e regua” 'ea 'rā Israel kuerya rupi.

11 — Xapy'a rei mokoī ava joe opu'āa py petēi va'e ra'yxy ovaē 'rā ome oepy aguā hovaigua po gui. Ha'e rami vy okuave'ē vy ojopy 'rā hako rupi.

12 Ha'e ramo ma pejaya 'rā ipo. Hexe pema'ē eme pemboaxya rupi.

Levitico 19.35,36

13 — Ndevoxa py eraa eme ipoyia joo rami e'ŷ va'e: petēi tuvixave va'e, ha'e rā amboae kyrīve va'e.

14 Ha'e ndero py ereko eme hyru joo rami e'ŷ va'e: petēi tuvixave va'e, ha'e rā amboae kyrīve va'e.

15 Te'i'i regua rereko 'rā opejaa aguā, ha'evea'i ramigua anho, ha'e hyru ha'evea'i ramigua anho avi. Ha'e rami vy reiko pukuve aguā ndevyvrā SENHOR Nderuete ome'ē va'ekue py.

16 Mba'eta ha'e ramigua teko vai ojapo va'e ha'e javi ma SENHOR Nderuete ojegarua meme.

Amaleque kuery omokanhymba aguā re ijayvuague

17 — Penema'endu'a ke Egito vvy gui peopa jave Amaleque kuery pendere ojapo vaiague re tape rupi.

18 Mba'eta tape rupi pendeporaiu ha'e penekangy reve peguata jave ha'e kuery ovaē xapy'a vy opu'ā okuapy takykue penekangykueve peju va'ekue re, Nhanderuete renonde ojererokyjea rupi e'ŷ.

19 Ha'e nunga rupi pendevyvrā SENHOR Penderuete ome'ē va'ekue py pendekuai ma ramo ha'e ome'ē 'rā pepytu'u aguā penderovaigua kuery pendevyry rupi ikuai va'e ha'e javi gui. Ha'e ramo pemokanhymba 'rā Amaleque kuery, ha'e kuery re ima'endu'aave aguā rami e'ŷ, yva guy rupi rei. Penderexarai eme ke.

26

Mba'emo aju oiko ypy'i va'ekue re ijayvua

1 — Ha'e gui pendevyvrā SENHOR Penderuete ome'ē va'ekue py revaē vy ha'e py nderekoa ma vy

2 rejopy 'rā mba'emo aju remono'ō ypy'i va'ekue, ndevyvy gui oiko va'ekue regua iporāgueve. Ha'e va'e ma petēi ajaka py remoi vy reraa 'rā henda SENHOR Penderuete guery omoī aguā oiporavoague py.

3 Ha'e gui reo 'rā sacerdotē ha'e va'e jave oī va'ea py. Ha'e vy aipo're 'rā ixupe: “Aŷ SENHOR Nhanderuete pe amombe'u porā, vvy nhaneramoī kuery pe ome'ē aguā oura reve ijayvuague py xerekoa maa”, peje 'rā.

4 Ha'e ramo ndepo gui sacerdotē ajaka ojopy vy omoī 'rā SENHOR Nderuete pegua altar oī va'e rexei.

5 Ha'e gui ma SENHOR Nderuete renonde py renhemombe'u porā vy aipo're 'rā: “Xeramoi ma arameu regua oiko raka'e. Ha'e va'e ma omano rai'i ma vy oo Egito vvy re. Ha'e py ju amboae regua rami oiko raka'e ngoo pygua kuery mboapy'i va'e reve. Ha'e gui ixugui oiko petēi regua hetave ha'e imbaratekueve, ha'e py ae.

6 Ha'e rami tei Egito pygua kuery orembojaru ha'e orembojaxvai rei vy oremoī romba'eapo raxa aguā rami.

7 SENHOR oreramoi kuery Ruete pe rojapukai ramo oreayvua oendu vy oikuaa pota rojexavaia, romba'eapoa ha'e oreomingo axya re.

8 Ha'e rami vy Egito vvy gui SENHOR orerenoē opo oupi py opo'akaa oexa uka reve, ha'e nhomondyipaarā ojapo reve, mba'emo kuua ukaarā ha'e hexa pyrā reve.

9 Apy ju orereru vy kova'e vvy ome'ē orevy, kamy ha'e ei oata e'ŷa.

10 Ha'e gui ma'ē, aŷ ma aru mba'emo aju jypy guare iporāgueve va'e vvy ndee SENHOR xevy reme'ē va'ekue guigua”, 're 'rā. Ha'e rami vy SENHOR Nderuete renonde ajaka remoi vy rejero'a 'rā henonde.

11 Ha'e gui rorevy'a 'rā mba'emo porā SENHOR Nderuete ndevy ome'ē va'ekue ha'e javi, ndero pygua kuery pe, ha'e nderekoa py levita ha'e amboae regua ikuai va'e pe guivē.

Dízimo ome'ē kuua aguā re ijayvua

12 — Ha'e gui mboapy ma'etŷa py dízimo reme'ē ojeupity nhavō dízimo-rā remboja'opa ma rire reme'ē 'rā levita kuery pe, amboae vvy guigua, tyre'ŷ ha'e imeve'ŷ va'e kuery pe, nderekoa rupi ha'e kuery okaru vy hevayatā okuapy aguā.

13 Ha'e vy SENHOR Nderuete renonde py aipo're 'rā ixupe: “Ndevy peguarā amboaxa va'ekue xero gui anoē vy levita kuery pe ame'ē, amboae guigua, tyre'ŷ ha'e imeve'ŷ va'e kuery pe, xevy rejapo uka va'ekue ha'e javi rami vy. Rejapo uka va'ekue neī petēive ndajapo e'ŷi, petēive re ndaxerexarai.

14 Dízimo gui ma xee nda'ui xepy'a vai jave, neī ruxā'i ma voi nanoēi xevy ha'eve'ŷ va'e aiko reve, namboaxai guive oo omanogue ituia py oī aguā. Xee anhe'ē rendu SENHOR Xeruete. Xevy ojapo uka va'ekue ajapopa ma.

15 Ema'ē yva re ne'amba iky'a e'ŷ va'e oīa gui, ha'e vy emoingo porā ndevyguia Israel kuery, ha'e vvy oreramoi kuery pe reuraague rami orevy reme'ē va'ekue, vvy kamy ha'e ei oata e'ŷa”, 're 'rā.

Onhe'ē rendu aguā re ijayvua

16 — Aŷ gui ma pendevy SENHOR Penderuete ojapo uka kova'e avyu oeja va'ekue ha'e oipotaa. Pemoī porā pendejee, ha'e pejapo pendepy'a ha'e penenhe'ē ha'e javi py.

17 Ange SENHOR oikuaa uka Penderuete oikoa regua, ha'e ixuguigua tape rupi, ha'e oayvu oeja va'ekue rupi pendekuai aguā, ha'e gui ojapo uka va'ekue ha'e nhomongetaa rupi, ha'e ijayvua re pejapyxaka aguā.

¹⁸ Ange SENHOR pendevy oikuaa uka avi ixupegua pendekuai aguã, pendevy aipoe'iague rami vy, ha'e ojapo uka va'ekue ha'e javi rupi pendekuai aguã.

¹⁹ Ha'e rami rã ha'e javi regua SENHOR omoingo va'ekue gui penemboyvateve 'rã, ha'e kuery gui pendererovy'aave, penemboeteave ha'e pendejou porãave aguã, ha'e SENHOR Penderuete pegua iky'a e'y va'e peiko aguã, aipoe'iague rami vy — he'i Moisés.

Mboapykuea ma Moisés ijavyuague

27

Omboetea rupi lei ita re ombopara ukaague

¹ Israel regua nhomongeta va'ety kuery reve Moisés ijavyu heta va'e kuery pe. Ha'e vy aipoe'i:

— Pejapopa ke kova'e ojapo uka pyre a'y javi amombe'u va'e.

² Peaxa 'rã Jordão yakã rovai re pendevyvrã SENHOR Penderuete ome'ẽ va'e katy peo vy. Yakã peaxaa árave pemo'ã 'rã ita tuvixakue, ha'e cal py pemoxiimba 'rã.

³ Peaxapa ma rire ha'e va'e ita re pembopara 'rã kova'e lei re ayvu oĩ va'e ha'e javi, ha'e rami vy pevaẽ aguã pendevyvrã SENHOR Penderuete ome'ẽ va'ekue py. Ha'e va'e vyv ma kambu ha'e ei oata e'ya, SENHOR peneramoi kuery Ruete ijavyuague rami vy.

⁴ Kova'e ára aipoa'e Jordão yakã rovai re peaxa ma vy Ebal vyvty re ita pemo'ã aguã, ha'e pemoxiimba 'rã cal py.

⁵ Ha'e py SENHOR Penderuete pe pejapo 'rã petei altar ita gui. Ha'e va'e re ndapeiporui 'rã tembiporu ferro guigua.

⁶ Ita pejou va'ekue py rive 'rã pejapo altar SENHOR Penderuete peguarã. Hi'áry peapy 'rã mba'emo peme'e va'e.

⁷ Peme'ẽ avi 'rã petei rami pendekuaia regua ha'e py. Ha'e rami vy pekaru ha'e pevy'a 'rã SENHOR Penderuete renonde.

⁸ Ha'e va'e ita re pembopara 'rã ayvu kova'e lei re oĩ va'e ha'e javi, ojekuaa porã aguã rami — he'i.

⁹ Ha'e gui levita regua sacerdote kuery reve Moisés ijavyu vy aipoe'i Israel kuery heta e' javi pe:

— Israel kuery, pekyriimba ke pendu aguã! A'y gui ma SENHOR Penderuete pegua ete 'rã peiko.

¹⁰ Ha'e nunga rupi penhe'ẽ rendu SENHOR Penderuete, ha'e pejapopa ojapo uka ha'e ayvu ojea va'ekue a'y pëvy amombe'u va'e.

Ebal vyvty áry gui ayvu vai omombe'ua aguã re ijavyuague

¹¹ Ha'e va'e ára Moisés ojapo uka heta va'e kuery pe. Ha'e vy aipoe'i:

¹² — Jordão yakã rovai re peaxa ma rire pova'e kuery ikuai 'rã Gerizim vyvty áry jogueroayvu porã aguã: Simeão, Levi, Judá, Issacar, José ha'e Benjamim regua.

¹³ Ha'e rã pova'e kuery ma ayvu vai mombe'uarã 'rã ikuai Ebal vyvty áry: Rúben, Gade, Aser, Zebulom, Dã ha'e Naftali regua.

¹⁴ — Ha'e gui levita kuery ijavyu atã 'rã Israel kuery ha'e javi pe. Ha'e vy aipoe'i 'rã:

¹⁵ “Ayvu vaipy 'rã oiko ava ta'angarã onhopi e'y vy, mba'emo ryku gui ojapo vy hi'ã py omopu'tã va'e. Ha'e nunga ojapo kuaa va'e rembiapo teĩ SENHOR pe rã ojegarupy meme.”

Ha'e ramo heta va'e kuery ha'e javi ombovai vy “Ha'eve va'e” he'i 'rã okuapy.

¹⁶ Aipoe'i avi 'rã: “Ayvu vaipy 'rã oiko oxy e'y vy nguu nomboetei va'e.”

Heta va'e kuery ombovai vy “Ha'eve va'e” he'i 'rã.

¹⁷ Aipoe'i 'rã: “Ayvu vaipy 'rã oiko oirũ vyv markaa oguero va'e.”

Heta va'e kuery ombovai vy “Ha'eve va'e” he'i 'rã.

¹⁸ Aipoe'i 'rã: “Ayvu vaipy 'rã oiko hexa pyxo ve'y va'e tape ojavy aguã rami ojapo va'e.”

Heta va'e kuery ombovai vy “Ha'eve va'e” he'i 'rã.

¹⁹ Aipoe'i 'rã: “Ayvu vaipy 'rã oiko mombyry guigua, e'y vy tyre'y ha'e imeve'y va'e mba'e oipe'a va'e.”

Heta va'e kuery ombovai vy “Ha'eve va'e” he'i 'rã.

²⁰ Aipoe'i 'rã: “Ayvu vaipy 'rã oiko oxy ranga reve onheno va'e, nguu rupa omongy'a rire.”

Heta va'e kuery ombovai vy “Ha'eve va'e” he'i 'rã.

²¹ Aipoe'i 'rã: “Ayvu vaipy 'rã oiko mymba reve itavy va'e.”

Heta va'e kuery ombovai vy “Ha'eve va'e” he'i 'rã.

²² Aipoe'i 'rã: “Ayvu vaipy 'rã oiko gueindy reve, nguu rajy e'y vy oxy memby reve onheno va'e.”

Heta va'e kuery ombovai vy “Ha'eve va'e” he'i 'rã.

²³ Aipoe'i 'rã: “Ayvu vaipy 'rã oiko guaixo reve onheno va'e.”

Heta va'e kuery ombovai vy “Ha'eve va'e” he'i 'rã.

²⁴ Aipoe'i 'rã: “Ayvu vaipy 'rã oiko oirũ nhemi rupi ojuka va'e.”

Heta va'e kuery ombovai vy “Ha'eve va'e” he'i 'rã.

²⁵ Aipoe'i 'rã: “Ayvu vaipy 'rã oiko amongue ome'emby ojopy va'e heko porã va'e ojuka aguã.”

Heta va'e kuery ombovai vy “Ha'eve va'e” he'i 'rã.

²⁶ Aipoe'i 'rã: “Ayvu vaipy 'rã oiko kova'e lei re ayvu oĩ va'e nomboetei vy ndojapoi va'e.”

Heta va'e kuery ombovai vy “Ha'eve va'e” he'i 'rã.*

* 27:26 Gálatas 3.10

28

Levítico 26.3-13; Deuteronômio 7.12-26

1 — Ha'e gui SENHOR Penderuete ayvu re pejapypxaka porã vy ha'e ojapo uka va'ekue aỹ amombe'u va'e pejapopa ri ramo SENHOR Penderuete penemboyvate 'rã vvy jave re ikuai va'e áryve.

2 SENHOR Penderuete penhe'ẽ rendu ramo pendere ombou 'rã kova'e ayvu porã ha'e javi, peẽ kuery re ojeupitypa 'rã.

3 Ayvu porãmby 'rã peiko tetã py ha'e penemba'ety rupi.

4 Ayvu porãmby 'rã ikuai kyrĩgue pereko va'e, mba'emo'a pendeyvy gui oiko va'e, ha'e penerymba kuery vaka ha'e vexe'i ta'y'ia.

5 Ayvu porãmby 'rã peiko hyru py mba'emo aju pemono'õa, ha'e mbojaperã pemoapomoa py.

6 Ayvu porãmby 'rã peiko peike ha'e peẽ ju maa ha'e javi py.

7 SENHOR ojapo 'rã penerenonde py penderovaigua kuery pendere opu'ã va'ekue oitypaa aguã rami. Peteĩ tape rupi penderovai ou va'ekue ri sete tape rupi ju 'rã ojava jogueravy pendegui.

8 SENHOR ombou 'rã mba'emo aju pemoi porãaty oĩ porã aguã, ha'e opa mba'e pendepo py pejapo va'e voi. Ha'e rami vy penemoingo porã 'rã pendeyvyrã SENHOR Penderuete ome'ẽ va'ekue py.

9 SENHOR ojeupe guarã penemoingo 'rã iky'a e'ỹ va'e regua, pendevy ouraague rami vy, SENHOR Penderuete ojapo uka va'ekue pejapo, ha'e ixuguigua tape rupi pendekuai ramo.

10 Ha'e ramo vvy regua kuery ha'e javi SENHOR guery rupi penerenoia oexa vy okyjepa 'rã pendegui.

11 SENHOR opa mba'e 'rã ome'ẽ pëvy: kyrĩgue perekoa py, penerymba kuery ta'y'ia py, ha'e pendeyvy gui mba'emo oikoa py, SENHOR pendeyvyrã ome'ẽ aguã re peneramoĩ kuery pe ouraague py ae.

12 SENHOR oipe'a 'rã yva mba'emo porã ombou aguã, hi'ára py porã vvy re ombo'oky aguã, pendepo py mba'emo pejapo va'e ha'e javi py penemoingo porã aguã. Ha'e ramo heta regua pe mba'emo peiporuka 'rã teĩ peẽ ma ndapeiporui 'rã ha'e kuery mba'e.

13 SENHOR penemoĩ 'rã ha'e kuery akärã, tuguairã ve'ỹ. Ha'e ramo hi'arykue'i 'rã pendekuai, iguy rupi rive'ỹ, xapy'a rei SENHOR Penderuete ojapo uka va'ekue aỹ amombe'u va'e pejapopa aguã pemoi ramo.

14 Pejepe'a eme peteive ayvu aỹ ajapo uka va'e gui, pendeaxua re neĩ pendeaxua e'ỹa re ma voi, tuete mboae kuery re rive peaxa vy ha'e kuery pe pendekuai e'ỹ aguã.

Levítico 26.14-45

15 — Ha'e rami teĩ xapy'a rei SENHOR Penderuete napenhe'ẽ rendui vy, ojapo uka va'ekue ha'e ayvu aỹ amombe'u va'e ha'e javi ndapejapoi ramo, pendere ou 'rã kova'e ayvu vai ha'e javi, pendere ojeupitypa 'rã.

16 Ha'e ramo ayvu vaipy 'rã peiko tetã py ha'e penemba'ety rupi.

17 Ayvu vaipy 'rã peiko hyru py mba'emo aju pemono'õa, ha'e mbojaperã pemoapomoa py.

18 Ayvu vaipy 'rã ikuai kyrĩgue pereko va'e, mba'emo'a pendeyvy gui oiko va'e, ha'e penerymba vaka ha'e vexe'i kuery ta'y'ia.

19 Ayvu vaipy 'rã peiko peike ha'e peẽ ju maa ha'e javi py.

20 — Pendere SENHOR ombou 'rã ayvu vai penemoĩ vaiarã ha'e pendere opu'ã va'e mba'emo pejapoa ha'e javi py, penemomba rã pekanhymba xapy'a peve, teko vai pejapoa rupi xegui pejepe'ague re.

21 SENHOR ombou 'rã mba'eaxy vaikue pendere oja va'erã, pendeyvyrã pejopy aguã katy peoa va'e omomba peve.

22 SENHOR pendejuka 'rã mba'eaxy vaikue py, pire raku, ai ipeupa va'e, kuaray aku raxa va'e, pirupa va'e, hu'ũmbaa ha'e hatãmba reia py. Ha'e nunga penemoingo axy 'rã pekanhymba peve.

23 Yva peneakã áry rupi oĩ va'e ma overa va'e rami 'rã onhemboty, ha'e vvy pepyrõa ma ferro rami 'rã hatãmba.

24 Pendeyvy rupi oky 'rãgue py SENHOR ombou 'rã vvy ku'i ha'e tanhimbu rive. Yva gui ha'e nunga anho ho'a 'rã pende'áry penemomba peve.

25 SENHOR penderesity 'rã penderovaigua kuery renonde rupi. Peteĩ tape rupi ha'e kuery rovai peju rire teĩ sete tape rupi ju 'rã pejavapa ha'e kuery gui. Ha'e vvy vvy jave regua ikuai rupi pendekuaa 'rã ojeuaru reia rami.

26 Penderetekue opyta 'rã guyra yvate rupi oveve va'e ha'e mymba vvy re ikuai va'e rembi'urã rive. Ha'e nunga mondyiarã ndoikoi 'rã.

27 SENHOR penembojexavai 'rã ai vaikue Egito pyguare regua py, tyepy peu, temo ha'e ai vaikue py, ndapekueravei aguã rami.

28 SENHOR penembojexavai 'rã peneakã vai reia py, napema'ëveia ha'e pendepy'a eta reia py.

29 Ha'e ramo kuaray mbyte teĩ pekuave'ẽ rei 'rã peovy, pytũ rupi oexa e'ỹ vy okuave'ẽ rei ovy va'e rami. Ha'e rami vy ndapeiko porãvei 'rã. Ha'e rami 'rãgue py peikoa pukukue re pejexavai 'rã, penemba'e rei-rei re imondapaa riaa 'rã. Ha'e avave rei napendereraa jepeai 'rã.

30 Peteĩ kunha re pemenda teĩ hexeve amboae ava onheno 'rã. Penderorã pejapo teĩ ha'e py ndapeikoi 'rã. Uva penhotỹ teĩ napemono'õi 'rã.

31 Penerymba toro ojukaa 'rã pexaa py, teĩ ho'okue ndape'ui 'rã. Pendegui penerymba mburika'i re imondaa 'rã, ha'e ndojevyvei 'rã pendea py. Penerymba kuery vexe'i ogueraa ukapaa 'rã penderovaigua kuery pe. Ha'e avave rei napendereraa jepeai 'rã.

32 Pendera'y ha'e penderajy kuery omboaxapaa 'rã amboae regua kuery pe. Ha'e nunga penderexa py ae pexa rire penema'endu'aa rupi pejexavai rei 'rã ára nhavõ. Ha'e rami teĩ pendepo py mba'eve ndapejapo kuaai 'rã.

- ³³ Pendeyvy rupi pamba'eapoague gui mba'emo aju oiko va'ekue ma petei va'e regua kuery peikuaa e'y va'e ho'upa 'rã. Ha'e vy penembojexavai ha'e penembojero'a rei 'rã ára nhavõ.
- ³⁴ Ha'e ramo peneakã vaipa 'rã mba'emo vai ete pexa rire.
- ³⁵ SENHOR penembojexavai 'rã ai vaikue karu penerenapy'ã ha'e peneretyma re oĩ va'e py. Ha'e va'e gui ma ndapekueravei 'rã, pendepy guive pendeapye peve.
- ³⁶ — Ha'e gui SENHOR pendereraa uka 'rã penderuvixaverã pemoi va'ekue reve, pexa va'ety e'y regua kuery pe, nei peẽ nei penderu kuery ma voi ndapeikuaai va'e regua pe. Ha'e py pendekuai 'rã amboae tuuete kuery yvyra ha'e ita gui rive ojapo pyre pe.
- ³⁷ Ha'e javi regua ikuai rupi SENHOR pendereraa ukaague rupi ha'e kuery onhemondy 'rã pendegui, pendere ijayvu ha'e pendejojai rei 'rã okuapy.
- ³⁸ Mba'ety rupi mba'emo ra'yĩ penhoty'õ reta teĩ mbovy'i 'rã pemono'õ, tuku ho'upa ramo.
- ³⁹ Uva voi penhoty'õ reta vy pepena porã'i teĩ ndapey'ui 'rã hykue, nei napemono'õi 'rã hi'a, haxo'i ho'upa ramo.
- ⁴⁰ Pendeyvy ha'e javi rupi azeitona'y ikuai teĩ azeite ndapereko 'rã pendejee peikyty aguã, hi'a okuipa rã.
- ⁴¹ Pendera'y ha'e penderajy kuery pereko teĩ pendereve ndopytai 'rã, escravo-rã ogueraapaa rã.
- ⁴² Pendeyvy re yvyra ikuai ha'e ijaju okuapy va'e tuku-karu ho'upa 'rã.
- ⁴³ Penembyte py amboae regua ikuai va'e yvateve 'rã oje'oivy, ha'e rã peẽ ma pene'yvyive 'rã peje'oivy.
- ⁴⁴ Ha'e kuery mba'emo oiporuka 'rã pendevy, teĩ peẽ ma ndapereko 'rã ha'e kuery pe peiporuka aguã. Ha'e kuery ikuai 'rã peneakã, ha'e rã peẽ ma peiko 'rã huguai.
- ⁴⁵ Kova'e avyu vai ha'e javi ou 'rã pende'áry. Penembojexavai rei 'rã, pendere ojeupitypa vy penemokanhymba peve, SENHOR Penderuete napenhe'ẽ rendui rire, pendevy ojapo uka ha'e avyu oeja va'ekue ndapejapoi guive.
- ⁴⁶ Penembyte py mba'emo oiko va'e opyta 'rã mba'emo kuaa ukaarã ha'e hexa pyrã, ha'e peneramymino kuery pe voi, raka'e rã peve guarã.
- ⁴⁷ — Mba'eta SENHOR Penderuete perovy'a ha'e peayvu rupi ve'y ixupe peiko, opa mba'e pereko teĩ,
- ⁴⁸ ha'e rire karuai, yuvei, pire reia ha'e opa mba'e oataa py 'rã peiko, penderovaigua kuery SENHOR ombou va'e pe ae. Pendeaju'y re ha'e omoĩ 'rã kanga ferro guigua penemomba peve.
- ⁴⁹ Pendere SENHOR ombou 'rã petei regua kuery mombyry gui. Ha'e ramo vvy apy gui 'rã ou pojava taguato oveve ouvy va'e rami. Nei ha'e va'e kuery avyu ma voi napendu kuaai 'rã.
- ⁵⁰ Ha'e kuery ngova py oexa uka 'rã opoxya, nei peẽ kuery va'e regua tujakue'i omboete va'e'y, nei kunumigüe'i ma voi nomboaxyi 'rã.
- ⁵¹ Ha'e kuery ho'u 'rã penerymba ra'y kuery ha'e pendeyvy gui mba'emo aju oiko va'ekue, omokanhymba peve. Ndoejai 'rã ha'yigüe'i, uva rykue, azeite, nei penerymba vaka ha'e vexe'i ta'y'i aguã, omomba ete peve.
- ⁵² Peneretã ikuai va'e ojokopa 'rã, pendeyvy ha'e javi rupi kora yvateve ha'e hatãve va'e pejeroviaague oitypa peve. Peneretã ikuai va'e ojokopa 'rã, pendeyvyrã SENHOR Penderuete ome'ẽ va'ekue ha'e javi rupi.
- ⁵³ Penderovaigua kuery pendejokopaa py penemoĩ vai ete ramo pe'u 'rã kyrigüe pereko va'ekue, pendera'y ha'e penderajy kuery SENHOR Penderuete pendevy ome'ẽ va'ekue ro'okue.
- ⁵⁴ Avakue penembyte py porayvuve ha'e ojou porãvepy ikuai va'e teĩ hakate'y 'rã guyvvy, gua'yxy oayvu va'e, ha'e gui gua'y kuery okuave va'e pe,
- ⁵⁵ mba'eta ha'e kuery pe nomboja'oxei 'rã gua'y ha'e guajy kuery ro'okue ha'e ae ho'upa aguã, mba'eta tetã ha'e javi hovaigua kuery ojokopa ramo ixupe nei mba'eve'i ndopytai, oĩ vaia py ombojexavai rire.
- ⁵⁶ Ha'e kunhague penembyte py porayvuve ha'e ojou porãvepy ikuai va'e teĩ, porayvu ha'e ojou porãvepy vy nei vvy re nopyrõĩ va'ekue teĩ hakate'y 'rã ome oayvu va'e, opi'a ha'e omemby pe,
- ⁵⁷ mba'eta tetã ha'e javi hovaigua kuery ojokopa vy ombojexavai ete 'rã.
- ⁵⁸ Xapy'a rei kova'e lei kuaxia para re oĩ va'e pejapo aguã napemoĩ, ha'e SENHOR Penderuete rery hexakãmba va'e renonde ndapejererokyjevei ramo
- ⁵⁹ pendere SENHOR ombou 'rã mba'eaxy vaikue, peneramymino kuery re guive. Ha'e va'e mba'eaxy vaikue ma tuvixa ha'e opa voi va'erã e'y.
- ⁶⁰ Ha'e vy penemoingo axy 'rã mba'eaxy vaikue Egito pyguare regua pekyjea py. Ha'e ramo pendere ju 'rã oja oiny.
- ⁶¹ Pende'áry SENHOR ombou avi 'rã mba'eaxy ha'e mba'emo vaikue kova'e kuaxia lei oĩa re ipara noĩ va'e voi, penemokanhymba peve.
- ⁶² Ha'e ramo mboapy'i ete 'rã pendekuai, yva re jaxy-tata rami pendereta va'ekue teĩ, SENHOR Penderuete napenhe'ẽ rendui rire.
- ⁶³ SENHOR pendererovy'a vy penemoingo porã ha'e penemboetave heravyague rami ae ju ovy'a 'rã penemokanhymbaa rupi, penemomba peve. Vvy penderekoarã peoa va'e gui pendepe'apa 'rã.
- ⁶⁴ SENHOR penemoaimba 'rã ha'e javi regua mbyte rupi, vvy apy guive hovai re peve. Ha'e py ma peiko 'rã amboae tuuete peikuaa e'y va'ekue pe, nei penderu kuery ma voi ndoikuaai va'ekue pe. Ha'e vy pembojerovia 'rã yvyra ha'e ita guigua rive.
- ⁶⁵ Ha'e gui nei ha'e va'e regua ikuai rupi pendekuai py ndapepytu'ui 'rã, nei pendepy opytu'ui aguã ma voi ndapejoui 'rã, mba'eta ha'e py SENHOR ombou 'rã pendepy'a oryryipa, penderexa kangypa ha'e penenhe'ẽ py pe'a rive aguã.

⁶⁶ Penderekove okanhy rai'i 'rã, penerenonde nhimbo py omoxã mbyre rami. Ara py ha'e pyávý pekyjepa 'rã, ndapeikovei aguã re pepêxaa py.

⁶⁷ Ko'êgue aipopeje 'rã: "Pytũ ma va'e rire ha'eve 'rãgue!" Ha'e gui pytũ'i jave ma "Aikore! Ko'êmba ma va'e rire ha'eve 'rãgue!" peje 'rã pekuapy, mba'eta pendepy'a re pendu 'rã pekyje reia, ha'e penderexa py nhomondyipa rei va'e pexa vy.

⁶⁸ SENHOR ojapo 'rã Egito katy kanoã guaxy py pendereraa jevy aguã, ha'e tape pendevy "Ndapeovei ma 'rã" he'iague rupi teĩ. Ha'e py ma penhevendexe 'rã penderovaigua kuery escravo-rã avakue ha'e kunhague, teĩ ndoiko 'rã pendejoguuaarã — he'i Moisés.

Irundykuea ma Moisés ijavyuague

29

Heta va'e kuery reve Nhanderuete guexeve guarã ojapo pyauague

¹ Kova'e ayvu ma Moisés rupi SENHOR guexeve guarã Israel kuery reve ojapo va'ekue Moabe vyv re, ha'e kuery pe Horebe vyv re ojea va'ekue áryve.

² Ha'e rami vy Moisés Israel kuery ha'e javi oenoimba vy aipoe'i:

— Peẽ kuery pexapa va'ekue Egito vyv re SENHOR ojapoague ha'e javi. Pexaa py ojapo Faraó re, hembiguai kuery ha'e ijyvy ha'e javi re.

³ Hexa pyrã tuvixa va'e penderexa py ae pexa va'ekue, mba'emo kuaa ukaarã ha'e iporã ete va'e.

⁴ Ha'e rami teĩ aỹ peve nome'ei pêvy penekuraxõ py pejapaxaka ete aguã, neĩ penderexa py pexa aguã, neĩ pendeapypxa py mba'emo pendu aguã.*

⁵ Aipoe'i: "Quarenta ma'etỹ re tekoa e'ỹa rupi xee roguereko jave pendeao na'inhymai, neĩ pendepy regua ma voi nda'ivaipai.

⁶ Mbojape ndaperekoi va'ekue pe'u va'erã, ha'e vinho neĩ iro va'e voi ndapey'ui, peikuaa aguã xee ae SENHOR Penderuete aikoa", he'i va'ekue.

⁷ Apy ju peju jave Hesbom pygua huvixa Seom ha'e Basã pygua huvixa Ogue voi ou nhandere opu'ã aguã, teĩ nhande kuery jaity karamboae.

⁸ Ha'e kuery vyvkue re nhandepo'aka vy nhamboaxa Rúben kuery peguarã, Gade ha'e Manassés kuery pe.

⁹ Ha'e nunga rupi pendu porã ke kova'e ayvu guexeve guarã ojapo pyre regua. Pejapopa ete, peiko porã aguã opa mba'e pejapopa py.

¹⁰ — Ha'e gui aỹ peẽ kuery ha'e javive pene'aĩ SENHOR Penderuete renonde py: peẽ kuery va'e regua huvixa kuery, tujakueve ha'e yvatekueve, avakue Israel kuery regua ha'e javive,

¹¹ ha'e gui pendera'y ha'e penderajy kuery, pendera'lyx ha'e amboae regua pendekuaia rupigua kuery, pendevy yxakã ayaaty ha'e yy reruaty kuery voi,

¹² pendejee pemoĩ aguã SENHOR Penderuete guexeve guarã ojapo va'ekue rupi pendekuai aguã, ha'e aỹ pendevy oura reve ijavyva rupi.

¹³ Ha'e rami ojapo aỹ gui ojeupe guarã penemoingo aguã, ha'e Penderuete oiko aguã, pendevy ijavyuague rami vy, ha'e peneramoĩ kuery Abraão, Isaque ha'e Jacó pe ouraague rami.

¹⁴ Ha'e gui peẽ kuery peguarã anho e'ỹ guĩ rami Nhanderuete reve guarã ajapo aura reve.

¹⁵ Aỹ apy SENHOR Nhanderuete renonde py pene'aĩ va'e reve, ha'e gui aỹ apy nhandereve ikuai e'ỹ va'e kuery reve voi.

¹⁶ — Mba'eta peikuaa ae ma Egito vyv re nhandekuai jave, ha'e gui vyv regua kuery vyv mbyte rupi jaaxa jave guare ha'e javi.

¹⁷ Pexa ha'e kuery pegua ojegarua, mba'emo ra'angaarã vyvra ha'e ita gui ojapo va'ekue. Pexa avi ha'e kuery mbyte rupi prata ha'e ouro guigua oguereko va'e,

¹⁸ ha'e rami vy peẽ kuery mbyte rupi oiko e'ỹ aguã neĩ peteĩve ava, kunha neĩ hoo pygua kuery, neĩ peẽ kuery va'e regua ma voi opy'a re omoĩ va'e SENHOR Nhanderuete gui ojepe'a vy vyv regua kuery ruete pe rive oiko aguã, peẽ kuery mbyte rupi oiko e'ỹ aguã mba'emo vai rapo, ha'e va'e gui henhoĩ aguã moã vaikue iro va'e.*

¹⁹ Avave rei kova'e ayvu vai oendu vy aipote'i eme ha'e ae opy'a py ojereroayvu porã rupi rive: "Xee aiko porã 'rã, xepy'a py mba'emo vai oĩ va'e rupi aiko teĩ", te'i eme, mba'eta oka'u ma teĩ oy'uvexea oendu va'e rami ijavyvu.

²⁰ Ha'e va'e ma SENHOR ndoperdoai 'rãe. Ha'e rami 'rãgue py ha'e va'e ava pe SENHOR oexa uka 'rã ipoxya ha'e nda'evai etea. Hi'áry ombou 'rã ayvu vai kova'e kuaxia re ipara oiny va'e ha'e javi, ha'e SENHOR ombogue 'rã hery yva guy rupi gui.

²¹ Ha'e va'e ma SENHOR omboja'o 'rã Israel kuery regua ikuaiia gui ojexavai aguã, ayvu vai kova'e kuaxia re ombopara pyre ha'e javi rami vy.

²² — Ha'e ramo raka'eva rã ikuai va'e kuery omombe'u 'rã okuapy, peẽ kuery rire pendera'y ju ikuai va'e, ha'e amboae regua vyv mboae momybyr gui ou va'e voi. Mba'eta oexa 'rã kova'e vyv re mba'emo vai ha'e mba'eaxy vaikue oikoague, nhomoingo axyarã SENHOR ombou va'ekue.

* 29:4 Romanos 11.8

* 29:18 "Mba'emo vai rapo" he'ia ma nhombojejavý va'e re ijavyvu vy (Hebreus 12.15).

²³ Mba'eta pendevy ha'e javi rupi okaipa 'rã enxofre ha'e juky ho'aague rami. Mba'eve rei nonhot'jai 'rã, neĩ ndai'avei 'rã, neĩ ka'aguy ma voi ndoikovei 'rã, tetã Sodoma ha'e Gomorra, Admã ha'e Zeboim SENHOR ojou vai vy opoxya rupi omombaague rami.

²⁴ Ha'e ramo ha'e javi regua aipoe'i 'rã okuapy: "Mba'e re nda'u SENHOR guĩ ramigua ojapo peva'e yvy re? Mba'e nunga káuxa py tu nami ete oexa uka opoxya?"

²⁵ he'i okuapy ramo ombovaia 'rã: "Mba'eta SENHOR tamoĩ kuery Ruete gui ha'e kuery herexaraipa rire, ha'e Egito yvy gui oguenoẽ vy guexeve guarã ojapo va'ekue gui ojepe'a ramo.

²⁶ Ha'e rami ojepe'a vy amboae tuuete kuery pe ikuai, ombojeroviapa rei okuapy, ha'e va'e tuuete ha'e kuery ndoikuuai va'ekue ri, ha'e SENHOR nombojerovia ukai teĩ.

²⁷ Ha'e nunga rupi ae kova'e yvy rovai SENHOR poxya hendy vy ombou ayvu vaipy kova'e kuaxia re ipara oiny va'e ha'e javi.

²⁸ Ha'e rami vy SENHOR opoxya reve oipe'apa ijyvy gui. Ojou vai ete ha'e ombopagaxea oendu vy omombopa yvy mboae katy, aỹ jaexaa rami ae", he'i 'rã ombovai vy.

²⁹ — Mba'eta mba'emo jaikuaa e'ỹ va'e ma SENHOR Nhanderuete pegua ae. Ha'e rã mba'emo oikuaa uka va'ekue ma nhandevy ha'e nhandera'y kuery pegua raka'e rã peve guarã, kova'e lei re ayvu oĩ va'e jajapopa agua.

30

Omboaxy jevy aguã re ijyvuague

¹ — Raka'eve rã ha'e nunga ha'e javi ou 'rã pendere, ayvu porã ha'e ayvu vai, penerenonde amombe'u va'ekue voi. Ha'e ramo yvy regua kuery ikuaiã mbyte SENHOR Penderuete penemomboague py penema'endu'a ju 'rã ha'e nungakue re.

² Ha'e gui peẽ ha'e pendera'y kuery reve pejevypa ju 'rã SENHOR Penderuete pe, penekuraxõ ha'e penenhe'ẽ ha'e javi py. Pejapyxaka ju 'rã ijyvua re, aỹ ajapo uka va'e rami vy.

³ Ha'e ramo SENHOR Penderuete penemboaxy nho vy penemoingo porã ju 'rã. Ha'e vy teĩgue ju 'rã penemboatypa heruvy yvy regua kuery mbyte penemoaĩague gui.

⁴ Yva mamõ rã ijapy rupi penemoxẽ va'ekue teĩ ha'e gui voi SENHOR Penderuete penemboatypa 'rã heruvy, ha'e gui ae 'rã penderu.

⁵ Ha'e vy SENHOR Penderuete pendereraa 'rã yvy peneramoĩ kuery ikuaiague py ae, peẽ kuery ju pendekuai aguã. Ha'e vy penemoingo porã vy peneramoĩ kuery gui voi penemboetave 'rã.

⁶ Ha'e vy penekuraxõ gui SENHOR Penderuete ombõ 'rã mba'emo vai oĩ va'e, peneramymino kuery kuraxõ gui voi, penekuraxõ ha'e penenhe'ẽ ha'e javi py peayvu aguã SENHOR Penderuete, peikove aguã.

⁷ Ha'e gui penderovaigua kuery áry ae 'rã SENHOR Penderuete ombou kova'e ayvu vai ha'e javi, pendere ija'e e'ỹ va'e penembojaxavaiare kuery re ju oiko aguã.

⁸ Ha'e rami rire SENHOR ijyvua re pejapyxaka ju vy pejapo 'rã ojapo uka va'ekue aỹ xeayvua ha'e javi.

⁹ Ha'e ramo SENHOR Penderuete ojapo 'rã pendepo py mba'emo pejapo va'e oiko porã aguã rami, pendera'y ha'e penderajy kuery itui'ia py, penerymba kuery ta'y'ia py, mba'ety rupigua hi'a porã aguã pendekuai porã aguã rami. Mba'eta teĩgue ju SENHOR pendererovy'a 'rã penemoingo porã aguã, peneramoĩ kuery ogerovy'aague rami,

¹⁰ xapy'a rei SENHOR Penderuete ayvu re pejapyxaka vy ojapo uka va'ekue ha'e ayvu kova'e kuaxia re ipara oiny va'e ha'e javi pemoĩ porã ramo, ha'e penekuraxõ ha'e penenhe'ẽ ha'e javi py SENHOR Penderuete peguarã ju pejeko rerova ri ramo.

¹¹ — Mba'eta kova'e ayvu aỹ pendevy amboaxa va'e ma haxy vaipa va'e e'ỹ, neĩ pendegui mombyry e'ỹ oĩ.

¹² Mba'eta yva re e'ỹ oĩ, aipopeje aguã: "Mava'e nda'u oo 'rã yva re, nhandevy ogeru re vy omombe'u aguã, jajapo kuaa aguã rami?" peje e'ỹ aguã.

¹³ Neĩ ye'ẽ rovai re e'ỹ guive ayvu oĩ, aipopeje aguã: "Mava'e nda'u nhanderekovia oaxa 'rã yy rovai re ogeru vy nhandevy omombe'u aguã, jajapo kuaa aguã?" peje e'ỹ aguã.

¹⁴ Mba'eta kova'e ayvu ma pendea'i py oĩ, pendejuru py pemombe'u kuaa, ha'e pendepy'a py peikuaa va'e ae, pejapo kuaa aguã.*

Tekove e'ỹ vy manoa oiporavo ukaague

¹⁵ — Ma'ẽ, aỹ penerenonde xee amoĩ tekove mba'emo porã reve, ha'e gui manoa mba'emo vai reve.

¹⁶ Xapy'a rei aỹ kova'e ayvu ajapo uka va'e pemoĩ porã vy, ha'e SENHOR Penderuete peayvu vy ixuguigua tape rupi peiko, ha'e gui ojapo uka va'ekue, ayvu ha'e 'arandua rupigua pemoĩ porã ri vy peikove ha'e penderetave 'rã, mba'eta SENHOR Penderuete penemoingo porã 'rã yvy pendekuai aguã peoague py.

¹⁷ Ha'e rami teĩ xapy'a rei pendepy'a py pejepe'a vy ndapejapyxakaxevei 'rã, ha'e pendererovaa rã tuuete mboae pemboete, ha'e kuery pe ju peiko aguã ramo,

¹⁸ ha'e ramo aỹ amombe'u porã ma voi anhetẽ pemano 'rã. Napendekuai arei 'rã yvy Jordão yakã rovai re peaxaague py.

¹⁹ Aỹ gui ma aenõ yva ha'e yvy penderovai xeayvua moma'endu'aaarã. Mba'eta penerenonde amoĩ tekove ha'e manoa, ayvu porã ha'e ayvu vai. Peiporavo ha'vy tekove peikove aguã, peẽ ha'e pendera'y kuery.

²⁰ Peayvu tema SENHOR Penderuete. Pejapyxaka ijayvua re, hexeve peiko aguã. Mba'eta ha'e rami vy 'rãe peikove ha'e peiko puku vvy peneramoĩ kuery pe SENHOR oura reve ome'ẽ aguã re ijayvuague py, Abraão, Isaque ha'e Jacó pe ae — he'i Moisés.

Opa vygua omombe'uague

31

Moisés rire Josué ju joguerekoarã oiko aguã re ijayvuague

¹ Pova'e ayvu Moisés omombe'u Israel kuery ha'e javi pe.

² Ha'e vy aipoe'i:

— Kova'e ára ma cento e vinte ma'etỹ ma areko. Aỹ nda'evevei aẽ ha'e aike ju aguã, SENHOR ae xevy ijayvuague rami: “Ndee ndereaxai 'rã Jordão yakã”, he'i.

³ SENHOR Penderuete ae oaxa 'rã penerenonde rupi. Ha'e ae omomba 'rã amboae regua kuery penerenonde gui, peẽ kuery ju pendekuai aguã. Josué ma oaxa 'rã penerenonde rupi, SENHOR ijayvu ma voiaque rami vy.

⁴ Ha'e kuery re SENHOR ojapo 'rã amorreu pygua huvixa Seom ha'e Ogue re ojapoague rami. Ha'e va'e kuery ma omomba va'ekue, ijyvy voi.

⁵ Ha'e gui penerenonde ikuai va'e kuery ma pendepo py SENHOR omboaxa ma ramo ha'e kuery re pejapo 'rã pẽvy ajapo uka ma voiaque ha'e javi rami vy.

⁶ — Penembaraete ha'e pendepy'a guaxu. Pekiye eme, ha'e kuery pexa vy penhemondyi eme guive, mba'eta SENHOR Penderuete ae oo 'rã pendereve. Napenderejai 'rã, napenepytyvõ e'ỹi 'rã guive — he'i.*

⁷ Ha'e gui Moisés oenoĩ Josué, ha'e vy Israel kuery ha'e javi renonde py aipoe'i ixupe:

— Nembaraete ha'e ndepy'a guaxu ke. Mba'eta kova'e kuery reve reo 'rã vvy SENHOR oura reve nhaneramoĩ kuery pe ome'ẽ aguã re ijayvuague py. Ha'e rami vy ndee reraa 'rã ha'e py ikuai aguã.

⁸ SENHOR ae 'rã oo nerenonde rupi. Ha'e ma oiko 'rã ndereve. Nanderejai 'rã, naneipytyvõ e'ỹi 'rã. Ekyje eme, enhemondyi eme guive — he'i.

Sete ma'etỹ ojeupity nhavõ heta va'e kuery pe lei ogueroayvua aguã re ijayvuague

⁹ Kova'e lei ae Moisés ombopara va'ekue. Ha'e gui Levi ramymino kuery sacerdote ikuai va'e pe ju omboaxa, SENHOR guexeve guarã ojapo va'ekue ryruru reraaty kuery pe, ha'e Israel kuery mongetaaty kuery ha'e javi pe.

¹⁰ Ha'e kuery pe Moisés ojapo uka vy aipoe'i:

— Sete ma'etỹ opa'ia py kuerei, ma'etỹ oreveague pemboguepa aguã ojeupity nhavõ, ngaru oguy'i py pendekuai aguã regua oiko jave,

¹¹ Israel kuery ha'e javi ojexa uka 'rã okuapy SENHOR nguete renonde. Ha'e va'e jave py peroayvu 'rã kova'e kuaxia para lei oia va'e, henda SENHOR oiporavoague py ae.

¹² Ha'e rami vy pemboatypa 'rã heta va'e kuery: avakue, kunhague, kyrĩgue ha'e amboae regua penderekoa rupi ikuai va'e, ha'e kuery oendu vy oikuaa aguã, ha'e SENHOR Penderuete renonde ojererokyjea rupi ikuai aguã, ha'e ayvu kova'e lei regua ojapopa aguã,

¹³ pendera'y kuery lei oikuaa e'ỹ teri va'eri oendu vy oikuaa avi aguã SENHOR Penderuete renonde ojererokyjea rupi ikuai aguã, Jordão yakã rovai re vvy peoague py peikoa pukukue re.

Raka'eva rã Israel kuery nonhe'ẽ renduvei 'rãa re ijayvuague

¹⁴ Ha'e gui SENHOR aipoe'i Moisés pe:

— Ma'ẽ, ovaẽ rai'i ma remano aguã ára. Enoĩ ha'vy Josué, ha'e vy pejexa uka 'rã oguy nhemboaty oĩaty py, ixupe aeja aguã ojapo va'erã — he'i ramo Moisés ha'e Josué jogueraa vy ojexa uka oguy nhemboaty oĩaty py.

¹⁵ Ha'e py SENHOR ojekuaa arai rupi, hokẽ áry rupi opyta oiny.

¹⁶ SENHOR aipoe'i Moisés pe:

— Ma'ẽ, ovaẽ rai'i ma neramoĩ kuery reve repytu'u aguã. Ha'e va'e rire kova'e kuery opu'ã vy itavy rei 'rã okuapy, amboae regua tuuete kuery pe 'rã ikuai, vvy oje'oiague mbyte py. Ha'e rami vy xegui ojepe'apa 'rã oje'oiavy, xereve guarã ha'e kuery reve ajapo va'ekue ombovaipa vy.

¹⁷ Ha'e va'e jave py xepoxya hendy 'rã ha'e kuery rovai. Ha'e vy naipytyvõvei 'rã, ha'e kuery pe ndajexa ukai 'rã omombaa aguã. Ha'e kuery áry mba'emo vai ha'e ikuai axy aguã ou reta ramo ijayvu 'rã: “Nhanderuete orembyte py noĩvei ramo e'ỹ teve ha'e rami ete oiko orere?” he'i 'rã okuapy.

¹⁸ Ha'e va'e jave anhetẽ ete ha'e kuery pe ndajexa ukai 'rã, opa marã rei ikuaiague re, amboae regua tuuete kuery re rive ovapa rire.

¹⁹ Ha'e ramo pembopara kova'e mboraiei pendejeupe ae, ha'e pembo'e Israel kuery ha'e javi oporaiei aguã rami, Israel kuery rovai xeyvua moma'endu'arã opyta aguã.

²⁰ Mba'eta xee araa 'rã xevyguia kuery vvy kamby ha'e ei oata e'ỹa py, tamoĩ kuery pe aura reve ame'ẽ aguã re xeyvuague rami vy. Ha'e ramo ha'e kuery okaru porã vy hevya'atã ha'e ikyrapa 'rã. Ha'e gui ma ovapa 'rã amboae regua tuuete kuery re xembopoxy aguã rami, xereve guarã ajapo va'ekue ombovaipa vy.

²¹ Ha'e gui opa marã ikuai axy ha'e ojexavai ramo, ha'e jave py kova'e mboraiei rupi ima'endu'a 'rã mba'e re pa ha'e kuery rovai aikoa re, mba'eta hamymino kuery oporai riae 'rã. Mba'eta aikuaa ha'e kuery py'a re aỹ voi oĩ va'e ha'e javi, vvy aura reve ame'ẽ aguã re xeyvuague py araa e'ỹ re ma voi — he'i.*

* 31:6 Hebreus 13.5 * 31:21 “Kova'e mboraiei” he'ia ma 32 py oĩ.

²² Ha'e va'e árave Moisés ombopara kova'e mboraerã ha'e javi, ha'e vy ombo'e Israel kuery oporaei aguã.
²³ Ha'e gui Num ra'y Josué ojapo va'erã re SENHOR ijayvu vy aipoe'i:
 — Nembaraete ha'e ndepy'a guaxu ke, mba'eta ndee reraa 'rã Israel kuery vyv ame'ê aguã re aura reve xeyvuague py. Ha'e ramo xee aiko 'rã ndereve.

Hyrú vyvry kuaxia lei oia omoia aguã re ijayvuague

²⁴ Kuaxia re Moisés ombopara ayvu kova'e lei regua ha'e javi.
²⁵ Ijayvu guive levita kuery SENHOR guexeve guarã ojapo va'ekue ryrú reraa kuery pe. Ha'e vy aipoe'i:
²⁶ — Pejopy ke kova'e kuaxia lei oia, ha'e pemoi porã SENHOR Penderuete guexeve guarã ojapo va'ekue ryrú oiaty vyvry, ha'e py itui riae aguã mba'e re pa penderovai oikoa kuua ukaarã.
²⁷ Mba'eta xee aikuaa ae ma pendevei reia ha'e peneakã ratãa. Mba'eta ay peẽ kuery reve xee aiko teri jave SENHOR rovai rupi pendekuai rire, amano rire katuve ma ha'e ramive 'rã pendekuai.
²⁸ Pemboatypa ke xerenonde rupi peẽ kuery regua nhomongeta va'ety ha'e penderuvixa kuery, ha'e kuery apyxa py xeyvu aguã pova'e ayvu rupi. Ha'e vy xee aenoi yva ha'e vyv ha'e kuery rovai xeyvua moma'endu'aarã.
²⁹ Mba'eta xee aikuaa porã amano rire opa marã rei pendekuai 'rãa. Pejepe'apa 'rã tape xee rombo'eague gui. Ha'e rami vy opaa ára py kova'e ayvu vai penderupity 'rã, mba'eta SENHOR renonde pejapo vai, pendepo py pejapo va'ekue py peko a'ã rei rire, ipoxy aguã rami.

Moisés mboraerã re nhombo'eague

³⁰ Ha'e ramo Israel kuery ha'e javi pe Moisés ombo'e pova'e ayvu mboraerã:

32

- 1 — Yva, xeyvu rã ejapxaka ke ndeapxya py.
 Yvy, endu ke xejuru gui ayvu oẽ va'e.
- 2 Xe'arandua ma opa rupi too oky otykya rami,
 xeyvua tanhomoingo porã yxapy vyv omoakya rami,
 nhuũ áry oky rayvi'i, ha'e mba'ety áry rupi otykya rami.
- 3 Mba'eta amombe'u porãve 'rã SENHOR rery.
 Amboyvate ete 'rã Nhanderuete.
- 4 Ha'e ma itaova! Ha'e ojapo va'e ma ha'evea ramigua meme,
 oikoa ha'e javi rupi oexa uka gueko porãa.
 Nhanderuete ma ojeroviapy, hexe noi 'rã mba'emo vai.
 Heko porã va'e vy ha'evea rami joguereko.
- 5 Ha'e rã peẽ kuery ma hovai rupi pendekuai, ojeroviaa rupi e'y.
 Ha'e rami vy ta'y kuery regua e'y ma peiko,
 ha'e rã love ramigua rive.
 Peẽ kuery ma ha'eve e'ya rami pendekuai teko vai rupi.
- 6 Ha'e rami ete teve pemboekovia SENHOR pendererekoa re,
 inhakã porã e'y ha'e oikuaa e'y rei va'e peiko va'e?
 Ha'e'y nda'u Penderu ojeupe guarã pendejoguare,
 penemoingoare ha'e penemombaraetea?
- 7 Penema'endu'a ke ára ymave rupi oiko va'ekue re,
 peikuaa pota na ma'etya oaxapa rei ma va'ekue rupi ikuai va'ekue re.
 Peporandu ke penderu kuery pe, ha'e ramo omombe'u porãve 'rã.
 Penemongeta va'ety kuery pe peporandu rã omombe'u avi 'rã.
- 8 Mba'eta Yvate ete va'e vyv regua ikuai aguã ome'ê-me'ê raka'e,
 avakue ra'y kuery joegui omboja'o vy.
 Ha'e va'e jave py oa'anga raka'e ha'e kuery rekoarã,
 Israel ra'y kuery regua mbovy pa ikuai rami vy.
- 9 Mba'eta SENHOR pegua oi va'e ma ixupegua kuery,
 Jacó kuery ae ikuai ixupegua regua.
- 10 Yvy ipirupa reia py ojou va'ekue ojeupe guarã,
 peteĩ henda tekoa e'ya hi'ãgue-'ãgue nhendua py.
 Ha'e vy ojoko herekovy vy opena ha'e kuery re,
 opena porã imoiny guexa ra'yí re rami ae.
- 11 Taguato minha gua'y kuery ombo'e vy
 ha'e kuery áry rupi oveve oikovy va'e rami,
 opepo oipyo vy ojopy imoiny vy opepo áry ogueraa va'e rami,
- 12 ha'e rami ae SENHOR nhanderereko, ha'e anho'i.
 Hexeve ndoikoí amboae regua tuuete.
- 13 Ha'e vy vyty áry rupi ojapo kavaju árygua rami oje'oi aguã rami.
 Ojapo mba'ety rupi ikuai va'e gui okaru okuapy aguã rami,
 ei itaova re ikuai va'e oipyte aguã, ha'e azeite itaty reia rupi ikuai va'e,
- 14 vaka kamby kekue, vexe'i kamby gui,

- ha'e gui vexa ra'y kyrakue,
kavara ha'e kavara ava Basã py ikuai va'e gui,
trigo porãgüeve va'e gui ae.
Ojapo uva rykue oy'u aguã rami, pytä porã va'e.
- 15 Ha'e rami teĩ hymba hembiaiyvu va'e ikyrapa ma vy opyvoi hexe.
Ikyrapa, tuvixapa, oguerékopa ma vy
hexaraipa Nhanderuete imoingoare gui,
ndoipotavei itaova gueraa jeppeare.
- 16 Mba'eta amboae regua tuuete re rive ha'e kuery oo vy ojapo SENHOR nda'evei etea oendu aguã rami,
ojeguarupy omboetea py ombopoxy.
- 17 Anha kuery pe rive ome'ẽ okuapy mba'emo, Nhanderuete pe e'ỹ.
Amboae regua tuuete ndoikuaai rei va'ety pe,
tuuete ojapoa pyau va'ekue pe,
tuu kuery omboete va'ety pe e'ỹ.
- 18 Hexaraipa okuapy itaova ha'e kuery re ta'y va'e gui,
nguete imoingoare gui ae hexarei.
- 19 Ha'e nunga SENHOR oexa vy nopenavei,
ta'y kuery ha'e taji kuery ombopoxy rire.
- 20 Ha'e vy aipoe'i: "Ha'e kuery pe ndajexa ukavei 'rã.
Aexa 'rã oapa py ha'e kuery re oiko va'e.
Mba'eta ha'e kuery ma teko vai rupi ikuai va'erã ae,
ta'y kuery ojeroviapy e'ỹ.
- 21 Ha'e rami vy nguete pe rai'i ra'aga e'ỹ ikuai vy xeapo nda'evei etea aendu aguã rami,
mba'emo ra'angaa pe rive ikuai vy xembopoxy.
Ha'e nunga rupi xee ju ajapo 'rã ha'e kuery nda'evei etea oendu aguã rami peteĩ regua e'ỹ ikuai va'e
arua py,
inhakã porã e'ỹ va'e regua arekoa py xee ajapo 'rã ha'e kuery ivai aguã rami.*
- 22 Mba'eta xepoxya rupi amoendy 'rã tata
manoa guyve katy peve hendy va'erã.
Ha'e va'e omomba 'rã yvy ha'e mba'ety ikuai va'e,
yvyty guy rupi peve 'rã amoendy.
- 23 Ha'e kuery rovai heta 'rã ambou mba'emo vai.
Xeru'y amombo 'rã ha'e kuery re.
- 24 Ha'e ramo okanhymba 'rã karuai gui,
omano 'rã pire raku ha'e mba'eaxy vaikue gui.
Ha'e kuery rovai ambou 'rã mymba haĩmba rei va'e,
ha'e mboi vaikue yvy ku'i rupi onhembotyryry va'e.
- 25 Oka rupi omanomba 'rã kyxe gui,
ha'e rã ngopy rupi ma ho'apa 'rã nhemondy gui,
kunumigue ha'e kunhataĩgue,
kyrĩgue'i okambu'i ha'e tujakue hi'a xiĩmba'i va'e voi.
- 26 Xee aipoa'e 'rãgue opa rupi romoĩmba aguã rami,
ajapo 'rãgue pendere avave ima'endu'aa ve'ỹ aguã rami,
- 27 va'eri xee ndaipotai penderovaigua kuery ovy'a rei,
penderovaigua kuery ojekore vy
aipoe'i e'ỹ aguã: 'Nhandepo py ae jaity,
SENHOR e'ỹ rima ha'e nunga ha'e javi ombou va'ekue', he'i okuapy e'ỹ aguã.
- 28 Mba'eta xeivygua kuery ma imongetaarã va'e'ỹ merami ikuai,
ha'e kuery re noĩ 'arandu.
- 29 Ha'e kuery ma hi'arandu va'e tamo ra'e ikuai!
Ha'e rami va'e rire ma oikuaa 'rãgue ha'e nunga,
oikuaa pota 'rãgue opa taa re.
- 30 Mba'exa vy tu peteĩ'i va'eri ha'e kuery va'e regua mil omondyi,
e'ỹ vy mokoĩ'i va'e dez mil omondyi.
Ha'e kuery repyará itaova oĩ va'ekue oeja ramo ae oiko ha'e rami,
ha'e jopo py SENHOR omboaxa ramo.
- 31 Mba'eta hovaigua kuery pegua itaova ma nhande'itaova rami e'ỹ,
nhanderoivaigua eteve voi oikuaa.
- 32 Mba'eta ha'e kuery uvaty ma Sodoma py ikuai va'e ramigua,
ha'e imba'ety ma Gomorra regua.
Ha'e kuery uva ma veneno rami jojukaarã,
ha'e ijaju va'e voi iro va'e meme.*

* 32:21 1 Corintios 10.22, Romanos 10.19

* 32:32 Uvaty re ijavyua py Israel kuery re ae ijavyu, ha'e rã uva'a ma ha'e kuery reko porãrã

va'ekue.

- ³³ Ha'e kuery uva rykue ma onhembotyryry va'e veneno rami iro va'e, mboi guigua rami ete nda'evei va'e.
- ³⁴ Ha'e rami aguã ma xejee e'ÿ ri ty'y amoĩ imoiny, mba'emo moĩ porãaty py rami?
- ³⁵ Mba'eta anhombopaga aguã rami aiko mba'emokue amboekovia vy, ha'evea ára py ha'e kuery onhepyxanga jave. Mba'eta ovaẽ rai'i ma ha'e kuery ojexavai aguã ára, ha'e kuery renonderã ou poujava."
- ³⁶ Mba'eta SENHOR oikuaa pota 'rã ojeupegua kuery re, ha'e vy omboaxy 'rã guembiguai kuery, ha'e kuery mbaraeteague opa ma ova ha'e oexa vy, mba'eta ha'e kuery va'e regua nonhenduvei 'rã, escravo ha'e escravo e'ÿ va'e ma voi.*
- ³⁷ Ha'e ramo aipoe'i 'rã: "Mamo tu ikuai tuuete ramigua pemboete va'ekue, ha'e itaova re pejeroviaa va'ekue?"
- ³⁸ Ha'e va'e tuuete kuery nda'u ho'u 'rã mba'emo kyra peme'ẽ va'e, ha'e oy'u 'rã vinho peme'ẽ va'e? Ha'e kuery ae ha'vy topu'amba penepytyvõ aguã, peẽ kuery penhemi atyrã ojeapo vy!
- ³⁹ Pexa ke aÿ, xee ae, xee anho'i aiko. Amboae regua tuuete ndoikoi, xee e'ÿ vy. Xee ma ajojuka ha'e anhomoiingove 'rã. Xee anhomoiingo axy ha'e anhomonguera ju 'rã. Ndoikoi guive xepo py ho'a va'ekue reraa jepearã.
- ⁴⁰ Yvate katy xepo aupi reve xee ae rekove opa va'erã e'ÿ rupi aura vy aipoa'e:
- ⁴¹ Xekyxe hendy rei va'e aĩmbe'e, ha'e xepo'akaa rupi aikuaa pota vy ambopaga 'rã xerovaigua kuery, amboekovia 'rã xere nda'ija'ei va'e kuery ojapoague.
- ⁴² Ajapo 'rã xeru'y tuguy omoẽ aguã rami, (xekyxe voi omomba 'rã ho'o,) omanogue ha'e ombo'a pyre kuery ruguy, penderovaigua kuery akã hi'a vuku va'e regua voi", he'i.
- ⁴³ Amboae regua kuery, perovy'a ke ixupegua kuery, mba'eta SENHOR nhombopaga 'rã guembiguai kuery ruguy omoẽa ague re, ombopaga 'rã hovaigua kuery, ha'e vy oiky'a'o ju 'rã ojeupegua kuery yvy.*
- ⁴⁴ Ha'e va'e ayvu mboraie regua ha'e javi Moisés omombe'u heta va'e kuery remiendurã, Num ra'y Josué reve.
- ⁴⁵ Ha'e va'e ayvu rupi Israel kuery pe Moisés ijayvupa ma rive
- ⁴⁶ aipoe'ive ju:
— Penekuraxõ re pemoĩ porã 'rã ayvu aÿ penembyte amombe'u va'e ha'e javi, pendera'y kuery pe pejapo uka aguã kova'e lei re ayvu oĩ va'e ha'e javi.
- ⁴⁷ Mba'eta pova'e ma pendeivy ayvu rive e'ÿ, ha'e rã penemoiingovearã ae. Pova'e ayvu rupi vy ae 'rã peiko pukuve pendeivyã Jordão yakã rovai re peaxa ma vy pendekuaia py.

Moisés rekove opa ma aguã ára pyguare

Nebo yvyty apyte gui Moisés Canaã yvy oexa aguã re ijayvuague

⁴⁸ Ha'e va'e árave SENHOR ijayvu Moisés pe. Ha'e vy aipoe'i:

⁴⁹ — Eẽ ke Abarim yvyty rupi Nebo yvyty peve. Ha'e va'e ma Moabe yvy re oĩ Jericó rexei'i katy. Ha'e vy rexa 'rã Canaã yvy, Israel kuery rekoarã ame'ẽ va'ekue.

⁵⁰ Ha'e gui yvyty reẽague áry ae 'rã remano, ha'e rã nenhe'ẽ heraa 'rã neramoĩ kuerya py, nderyke'y Arão Hor yvyty py omano rã inhe'ẽ tamoi kuerya py heraa ague rami avi.

⁵¹ Mba'eta peẽ naxenhe'ẽ rendui va'ekue Israel kuery mbyte, Meribá yakã katy'i Cades re, Zim tekoa e'ÿa py. Mba'eta Israel kuery mbyte py ndapeikuaa ukai iky'a e'ÿ va'e aikoa.

⁵² Ha'e rami vy yvy nerenonde oĩ va'e rexa rive 'rã, nerevaẽi 'rã Israel kuery yvyã ame'ẽ va'ekue py.

33

Moisés jogueroayvu porãague

¹ Po rami ma Nhanderuetete remimbo'e Moisés omano ta jave ogueroayvu porã Israel kuery.

² Ha'e vy aipoe'i:

— SENHOR ma Sinai yvyty katy gui ou vy

* 32:36 Romanos 12.19, Hebreus 10.30 * 32:43 Romanos 15.10, Hebreus 1.6

- ha'e kuery pe ojekuaa Seir katy gui ko'ẽmba'i ouvya rami,
 Parã yvyty guive hexakãmba ouvy.
 Mbovy rei e'ỹ ojeupegua iky'a e'ỹ va'e kuery reve ou.
 Oĩporu kuaa regua re tata rami ojekuaa ha'e kuery pegua lei.
- ³ Anhetê ete ae ra'e reayvu heta va'e kuery.
 Ndevyguia kuery iky'a e'ỹ va'e ndepo py meme ikuai.
 Ndepý yvy'iry ha'e kuery onhemboja okuapy vy
 onhembo'e uka 'rã ndeayvua re.
- ⁴ Moisés ombopara va'ekue
 Jacó guigua kuery peguarã lei.
- ⁵ Ha'e gui SENHOR ae oĩ guembiayvu kuery ruvixarã,
 ha'e kuery regua yvatekueve onhemboatya py,
 Israel kuery regua ha'e javi reve.
- ⁶ — Rúben kuery ma tokuave, tomanomba eme.
 Ha'e va'e regua avakue mbovy'i e'ỹ ta'ikuai.
- ⁷ Judá kuery renonderã ma po rami omombe'u:
 — SENHOR, endu ke Judá kuery ojerurea,
 epena heta va'e kuery ikuai py ju ojevy aguã rami.*
 Ndepó py ke ejoguero'a ha'e kuery repya rupi,
 eipytyvõ hovaigua kuery rovai rupi.
- ⁸ Ha'e gui Levi kuery va'e regua pe aipoe'i:
 — Xerueete, Tumim ha'e Urim rupi ejekuaa uka ke
 ndevyguia ava ojeroviapy va'e pe.
 Ha'e va'e reko ma Massá py reikuaa porã raka'e,
 ha'e Meribá yakã py ixupe ndeayvu ete.†
- ⁹ Ha'e va'e ma oxy ha'e nguu pe aipoe'i va'ekue
 peteigueve oexa e'ỹa rami,
 neĩ guyvy kuery oexa e'ỹ va'ekue,
 gua'y kuery re voi openaa rupi ndoikoi.
 Ha'e rami 'rãgue py ojee omoĩ porã ndeayvuague,
 ha'e ndereve guarã rejapo va'ekue rupi anho oiko.‡
- ¹⁰ Ha'e vy ne'arandua re ombo'e oikovy Jacó kuery,
 Israel kuery ombo'e ndeguigua lei re.
 Oapy avi heakuã porã va'e rejou porã aguã,
 mymba kuery voi oapy ndevyguia altar áry.
- ¹¹ SENHOR, emoiingo porã ke ha'e kuery imbarate aguã,
 erovy'a avi opo py ojapo va'e.
 Ha'e rã emoiingo axypa ha'e kuery re ija'e e'ỹ vy opu'ã rei va'e,
 raka'eve rã opu'ã ve'ỹ aguã.
- ¹² Ha'e gui Benjamim kuery va'e regua pe ma aipoe'i:
 — SENHOR rembiayvu oĩ porã ete 'rã hexeve.
 Ára nhavõ SENHOR opena porã 'rã.
 Ha'e ramo opytu'u 'rã ijyva áry rupi.
- ¹³ Ha'e gui José kuery va'e regua pe ma aipoe'i:
 — SENHOR tomoingo porã pendeivy,
 yva gui ho'a va'e iporãgueve py,
 yxapy ha'e yy yvy guy rupi oĩ va'e py guive,
- ¹⁴ kuaray omboaju va'e iporãgueve,
 ha'e jaxy nhavõ hi'a va'e py,
- ¹⁵ ha'e gui yvyty ymave guare,
 ha'e yvy'ã raka'eve rã peve oĩ va'e rupi henhoĩ porãgueve va'e py,
- ¹⁶ yvy gui oiko va'e iporãgueve va'e ha'e javi py,
 yvyra'a iporãgueve va'e py voi.
 Ha'e nunga ha'e javi tou José kuery re,
 tyvy kuery yvateve va'e rã.§
- ¹⁷ Ha'e kuery ipo'aka 'rã vaka jypy guare va'e rami,
 hakua ma vaka ka'aguy regua rakua rami.
 Ha'e va'e py ma ipo'aka 'rã yvy regua ha'e javi re,
 yvy apy peve voi.

* 33:7 Judá kuery va'e regua ma heta va'e kuery renonde 'rã oje'oi joe opu'ã aguã katy (Números 2.9). † 33:8 Apy ma ijayvu sacerdote yvateve Levi regua oiko va'e re. Sacerdote jypygua ma Arão ae oiko raka'e. Ha'e gui Tumim ha'e Urim ma sacerdote kuery mba'ekuaa-arã oĩ (Êxodo 28.30). ‡ 33:9 Levi kuery ma pavẽ gui oayvuve Nhanderueete ayvu (Êxodo 32.25-29). § 33:16 José ramymino kuery ma mba'emo ojopy retave aguã rami ikuai (1 Crônicas 5.1).

- Ha'e rami ae mbovy e'ÿ ta'ikuai Efraim
ha'e Manassés regua kuery.
- 18 Ha'e gui Zebulom kuery va'e regua pe ma aipoe'i:
— Pevy'a ke Zebulom kuery, ye'ë rembe rupi peoa py,
ha'e peë Issacar kuery voi pendekoa py peia rupi.
- 19 Ha'e kuery mokoï regua ma oenoi 'rã amboae regua kuery vyvty áry oupa aguã.
Ha'e py ma Nhanderuet pe ome'ë 'rã ha'evea ramigua.
Mba'eta ha'e kuery okaru porã 'rã ye'ë rupigua re,
ha'e mba'emo iporãve va'e ita ku'ia guýry oï va'ekue gui.*
- 20 Ha'e gui Gade kuery va'e regua pe ma aipoe'i:
— Tovy'a porã Gade kuery vyvrã omboetavea rupi.
Ha'e kuery ma guary kunha rami 'rã ikuai,
jojyva ha'e nhoakã omboa'ypaa rupi.
- 21 Ha'e vy omba'erã ojopy 'rã iporãve va'e,
huvixa kuery peguarã ha'e py omoï porã mbyre.
Ha'e vy heta va'e kuery renonde rupi uguata vy
ojapo 'rã SENHOR oipotaa ha'evea ramigua,
Israel kuery re ijayvuague rami vy.
- 22 Ha'e gui Dã kuery va'e regua pe ma aipoe'i:
— Dã kuery ma guary'i
Basã gui opo va'e rami 'rã ikuai.
- 23 Ha'e gui Naftali kuery va'e regua pe ma aipoe'i:
— Naftali kuery ma SENHOR omoingo porãa rupi 'rã ovy'a okuapy.
Opa mba'e py SENHOR ogueroayvu porãa rami vy
hekoo 'rã yupa rupi, kuaray puku-a katy.
- 24 Ha'e gui Aser kuery va'e regua pe ma aipoe'i:
— Aser kuery ma ta'ikuai porãve Jacó ra'y kuery ikuai mbyte.
Tyvy kuery rembiayvve toiko,
ha'e ipy rupi tomoakÿ azeite py.
- 25 Ha'e kuery retã rokë jokoia ma ferro ha'e overa va'e guigua toï.
Ta'ikuai porã okuave teria ja.
- 26 — Hembiaiyvu peiko va'e, Penderuete ramigua mboae ndoikoï.
Yva áry rupi ha'e ou 'rã penepytyvõ aguã,
yvatevea rupi ou arai áry.
- 27 Nhanderuet imarã e'ÿ va'e re ae 'rã pendekoa,
ha'e ramo ojyva áry rupi penekuavã 'rã raka'e rã peve guarã.
Penerenonde katy gui oipe'a 'rã penderovaigua kuery
“Pemomba katu”, he'i vy.
- 28 Ha'e ramo Israel kuery ikuai porã 'rã,
Jacó ramymino kuery, ygua oï ae'i va'e rami 'rã ikuai,
vyv mba'emo aju ha'e vinho oia va'e re.
Yva gui ma ho'a 'rã yxapy imoakÿarã.
- 29 Israel kuery, pevy'a ete 'rã!
Marã ramigua tu ikuai peë kuery ramigua?
SENHOR ogueraa jepe va'e peiko.
Ha'e ma mba'emo vai jokoia oï penepytyvõarã,
ha'e kyxe penembopo'akaarã.
Ha'e rami rire penderovaigua kuery ma peipotaa rami meme 'rã ikuai,
ha'e rã peë ma pepyrõ 'rã ha'e kuery ombojeroviaaty vyv'ã re ojapo va'ekue áry.

34

Moisés omanoague

¹ Ha'e gui Moabe vyv gui Moisés oë vy Nebo vyvty katy oo, Písga vyv'ã yvatevea py, Jericó rexei'i ae. Ha'e ramo ixupe SENHOR oexa uka vyv ha'e javi Gileade guive Dã peve,

² Naftali, Efraim ha'e Manassés kuery peguarã, ha'e judá kuery peguarã vyv ha'e javi, ye'ë kuaray oikea katy oï va'e peve,

³ ha'e gui Neguebe ha'e Jericó tetã pindo ty va'e katy'i vyvugua oï va'e ha'e javi rupi, Zoar peve.

⁴ Ha'e rami vyv SENHOR aipoe'i ixupe:

— Kova'e vyv ae ma Abraão, Isaque ha'e Jacó pe aura reve ame'ë aguã re xeayvuague va'e, “Peneramymino kuery pe ame'ë 'rã”, ha'eague ae. Ha'e va'e ma nderexa py rexa aguã rami ajapo va'eri ndereoi 'rã ha'e katy — he'i.

⁵ Ha'e pyve SENHOR rembiguai Moisés omano, Moabe vyv re, SENHOR ijayvuague rami vy.

* 33:19 Zebulom kuery ma ye'ë rembe rupi ikuai raka'e.

⁶ Ha'e ramo onhono porã peteĩ yvy'ã guy py Moabe re, Bete-Peor rexei'i. Aỹ peve avave rei ndoikuaai teri onhono porãague.

⁷ Moisés omano jave py cento e vinte ma'etỹ oguereko va'ekue. Ha'e rami teĩ hexa ndoguepai teri va'ekue, imbaraete rei guive.

⁸ Peteĩ jaxy re Israel kuery ojae'opa okuapy Moisés re, Moabe yvy re ae, ojae'o aguã va'ekue opa peve.

⁹ Ha'e gui Num ra'y Josué re Moisés opo omoĩ rire hexe Nhe'ẽ imo'arandua anho oĩ. Ha'e ramo ijayvua re Israel kuery ojapyxaka vy ojapo okuapy Moisés rupi SENHOR ojapo ukaague rami.

¹⁰ Israel kuery mbyte ndoikovei teri profeta Moisés ramigua ju, mba'eta jova re oma'ẽ reve SENHOR ijayvu hexeve.

¹¹ Ndoikovei teri mba'emo kuaa ukaarã ha'e hexa pyrã SENHOR ojapo ukaa rami vy Egito yvy re ha'e ojapo va'ekue ramigua, Faraó re, ixupegua yvatekueve re, ha'e ijyvy ha'e javi rupi.

¹² Mba'eta Moisés ma opo'akaa rupi ojapo va'ekue mba'emo nda'evei ete ha'e tuvixave va'e, Israel kuery pavẽ oexaa py.

Josué rekokie oia Josué rekokie oia

Jy'py'i kova'e kuaxia para py aipoe'i: "Senhor rembiguai Moisés omano rire ipytyvõare Num ra'y Josué va'e ju Senhor oenoĩ. Ha'e vy aipoe'i: 'Xerembigui Moisés omano ma. Epu'ã ke aỹ, eaxa Jordão yakã kova'e kuery ha'e javi reve, Israel kuery yvyrã ame'ẽ va'ekue py. Opa rupi pepyrõa yvy ame'ẽ ma voi pende'vy, Moisés pe xeayvuague rami vy. ... Moisés reve aikoague rami ae ju 'rã aiko ndereve. Ndoroejai 'rã, noroipytyvõ e'ỹi 'rã guive. Nembaraete ha'e ndepy'a guaxu ke'", he'i (1.1-2, 5b-6a). Ha'e rami rã kova'e kuaxia re oĩ Josué Israel kuery ogueraa vy Canaã yvy re ipo'akaague.

Jy'py ma Jericó tetã oipe'a okuapy, Nhanderueete opo'akaa rupi ikora oitypa ramo. Ha'e gui amboae tetã ikuai va'e re ju ha'e kuery ipo'aka. Amongue henda py nda'ipo'akai guive. Josué opena vy peteĩ-teĩ regua pe ome'ẽ ijyvyrã.

Opa py Josué aipoe'i Israel kuery ha'e javi pe: "Xetuja'i ma, are ma aiko. Ha'e gui peẽ kuery pexapa ma Senhor Penderuete peẽ kuery re oma'ẽ vy amboae regua kuery re ojapoague. Mba'eta ha'e kuery re Senhor Penderuete ae opu'ã oikovy penderepy vy", he'i (23.2b-3).

Josué ipy'a guaxu aguã re Nhanderueete ijayvuague

¹ SENHOR rembiguai Moisés omano rire ipytyvõare Num ra'y Josué va'e ju SENHOR oenoĩ. Ha'e vy aipoe'i:

² — Xerembigui Moisés omano ma. Epu'ã ke aỹ, eaxa Jordão yakã kova'e kuery ha'e javi reve, Israel kuery yvyrã ame'ẽ va'ekue py.

³ Opa rupi pepyrõa yvy ame'ẽ ma voi pende'vy, Moisés pe xeayvuague rami vy.

⁴ Tekoa e'ỹa ha'e Líbano yvy guive Eufrates yakã tuvixa va'e peve, heteu kuery yvy ha'e javi ame'ẽ, ha'e gui kuaray oikoa katy ye'ẽ tuvixa va'e oĩ va'e peve, pende'vy guarã meme itui.

⁵ Reikovea pukukue re avave rei nda'ipo'akaa 'rã pendere. Moisés reve aikoague rami ae ju 'rã aiko ndereve. Ndoroejai 'rã, noroipytyvõ e'ỹi 'rã guive.

⁶ Nembaraete ha'e ndepy'a guaxu ke, mba'eta ndee rejapo 'rã kova'e kuery yvy re hekoa aguã rami, tuu kuery pe aura reve ame'ẽ aguã re xeayvu rire.

⁷ Nembaraete ha'e ndepy'a guaxu ete ke, rejapopa aguã lei xerembigui Moisés ojapo ukaague. Ejepe'a eme ndeaxu e'ỹa katy, neĩ ndeaxua katy, mamõ rã reikoa py reiko porã aguã.

⁸ Ejepe'a eme kuaxia re lei oia re ndeayvua gui. Ha'e va'e re reikuaa pota 'rã reikovy ara py ha'e pyávy. Enhea'ã tema ipara re oia rami rejapopa aguã. Ha'e rami vy reiko porã 'rã, ha'e rejapopa 'rã rejapo va'erã va'e.

⁹ Xee ae aipo nda'ei ri ty'y ra'e? Nembaraete ha'e ndepy'a guaxu ke. Ekyje eme, enhemondyĩ eme guive, mba'eta SENHOR Nderuete oiko ndereve mamõ rã reikoa py rei.

Canaã yvy re oaxa e'ỹ mbove ijayvuague

¹⁰ Ha'e ramo Josué ijayvu heta va'e kuery regua yvatekueve pe. Ha'e vy aipoe'i:

¹¹ — Peaxa ke heta va'e kuery ikuai mbyte rupi. Ha'e kuery pe pendeayvu vy aipopeje 'rã: "Pereko katu ke temb'i'u, mba'eta mboapy araa py peaxa 'rã kova'e Jordão yakã, pevaẽ aguã pende'yvyrã SENHOR Penderuete ome'ẽ va'ekue re, penderekoa aguã", peje.

¹² Ha'e gui Rúben regua, Gade ha'e Manassés regua mbyte rupi oja'o va'ekue pe ju Josué ijayvu vy aipoe'i:*

¹³ — Penema'endu'a ke SENHOR rembigui Moisés ijayvu vy pende'vy aipoe'iaague re: " SENHOR Penderuete ome'ẽ 'rã pepytu'aguã kova'e yvy ome'ẽ va'e re.

¹⁴ Pendera'yxy kuery, pendera'y ha'e penderajy kuery ha'e penerymba vaka kuery topyta Jordão yakã kyvõgua re pende'vy Moisés omboaxa va'ekue re. Ha'e rã peẽ ma tembiporu reve 'rã peaxa penderyvy kuery renonde, xondaro peiko va'e ha'e javi. Peipytyvõ 'rã,

¹⁵ penderyvy kuery voi opytu'u aguã SENHOR ome'ẽ, peve peẽ kuery pe rami avi. Ha'e kuery voi 'rã hekoa oyvyrã SENHOR Penderuete ome'ẽ va'e re. Ha'e rami vy 'rãe pejey pende'yvyrã SENHOR rembigui Moisés omboaxa va'ekue re, kuaray oua katy pendekoa aguã, Jordão yakã kyvõgua re", he'i va'ekue.

¹⁶ Ha'e ramo Josué pe ha'e kuery ombovai okuapy vy aipoe'i:

— Orey pe ndeayvua ha'e javi 'rã rojapo, ha'e mamõ rã oremondouka py tema roo 'rã.

¹⁷ Opa mba'e py Moisés ronhe'ẽ renduague rami avi ndee ju 'rã ronhe'ẽ rendu.

¹⁸ Ha'e rã ha'e javi ava ndeayvua rami ndoikoxei, ha'e rejapo uka va'e ha'e javi ndojapoxei va'e ma omano 'rã. Ha'e nunga rupi nembaraete ke, ha'e ndepy'a guaxu.

2

Jericó tetã re oikuaa pota vy oo va'e kuery Raabe ro py ikuai jave guare

¹ Sitim gui Num ra'y Josué omondouka mokoĩ ava yvy re oma'ẽ nhemi aguã. Ha'e vy aipoe'i:

* 1:12 Rúben, Gade ha'e Manassés regua mbyte rupi oja'o va'ekue opyta raka'e Jordão yakã regua kuaray oẽa katy oĩ va'e re, amboae kuery reve yakã oaxa 'rãgue py. Ha'e kuery va'e regua xondaro kuery anho oaxa Jordão yakã guyvy kuery oipytyvõ aguã (Números 32).

— Peguataa rupi peikuaa pota peovy vyv re, Jericó tetã peve — he'i ramo oje'oi. Ha'e rami vy ovaẽ peteĩ kunha itavy rei va'e ro py. Hery ma Raabe. Ha'e py ae ha'e kuery oke.

² Ha'e ramo Jericó pygua huvixa pe omombe'ua vy aipo'ea:

— Ma'ẽ, ange pyávy apy ovaẽ ra'e avakue Israel kuery regua nhandevvy re oikuaa pota va'e — 'ea.

³ Ha'e ramo Jericó pygua huvixa aipoe'i uka Raabe pe:

— Emoẽ ju avakue ou vy ndero py ovaẽ va'ekue, mba'eta nhandevvy ha'e javi re oikuaa pota aguã ou — he'i uka.

⁴ Ha'e rami teĩ kunha va'e ma mokoĩ avakue omovaẽ vy onhomi ma voi va'ekue. Ha'e rami vy aipoe'i:

— Anhetẽ xea py ovaẽ kuri mokoĩ avakue. Va'eri xee ndaikuaai maguigua paa.

⁵ Ha'e gui pytũ ma jave tetã kora rokẽ pemboty ta ramo ha'e kuery oexa vy jogueraa ju kuri. Ndaikuaai marã katy pa oje'oiã. Tapeo pojava ha'e kuery rakykue, peupity nho 'rã — he'i.

⁶ Mba'eta ha'e va'e e'ỹ mbove ngoo áry ojeupi vy onhomi va'ekue linho 'ygue omoĩ porã va'ekue guy py.

⁷ Ha'e gui huvixa rembiguai kuery oje'oi ju vyv re oikuaa pota va'e kuery rakykue, Jordão yakã oxaaty katy tape oo va'e rupi. Ha'e kuery rekaa oẽ ramove tetã kora rokẽ ombotyã.

⁸ Ha'e gui oikuaa pota va'e kuery onheno e'ỹ mbove kunha va'e oo ha'e kuerya py oo áry.

⁹ Ha'e vy aipoe'i ha'e kuery pe:

— Xee aikuaa porã pende kuery pe SENHOR kova'e vyv ome'ẽague. Pende kuery gui ore kuery rokyjea anho roendu, ha'e vyv re ikuai va'e ha'e javi ikangypa guive.

¹⁰ Mba'eta roendu Egitó gui peo jave Ye'ẽ Pytã penerenonde oĩ va'e SENHOR omboypaague, ha'e gui mokoĩ amorreu kuery ruxiva re pejapo va'ekue voi, Jordão rovai re Seom ha'e Ogue pemomba va'ekue.

¹¹ Ha'e nungakue roendu vy orep'y'a kangy, neĩ peteĩve re noĩvei imbaraetea, pende kuery peju ramo. Mba'eta SENHOR Penderuete ae Nhanderuete yva ha'e vyv re ipo'aka va'e ae.

¹² Ha'e gui aỹ ma peura xevy SENHOR rery rupi, xee romboaxyague rami peẽ kuery ju xeru ro pygua kuery pemboaxy aguã. Ha'e aikuaa porã aguã aipota avi mba'emo xevy pemboaxa,

¹³ xeru ha'e ha'i hekove reve peja aguã, xekyvvy ha'e xekyp'y kuery voi, ha'e roguereko va'e ha'e javi, orejukaarã gui orereraa jepe vy — he'i.

¹⁴ Ha'e ramo avakue aipoe'i kunha va'e pe:

— Ndee oremombe'u e'ỹ ramo orerekovea voi rome'ẽ 'rã nderekove rekovia. Ha'e vy kova'e vyv SENHOR orevy ome'ẽ ma jave anhetẽ ete romboaxy 'rã — he'i okuapy.

¹⁵ Ha'e ramo kunha va'e ojapo janela oĩ va'e py ixã va'e rupi ha'e kuery oguejy aguã rami, tetã kora áry ae hoo oĩ ramo.

¹⁶ Ha'e gui aipoe'i ha'e kuery pe:

— Tapeo vyvty reia re, pendereka vy oo va'e kuery pendejou e'ỹ aguã. Mboapy ára peve 'rã penhemi ha'e py, ha'e kuery ojevvy ju peve. Ha'e gui mae ma tapeo tape rupi — he'i.

¹⁷ Ha'e ramo avakue aipoe'i ixupe:

— Ndevy rouraague ndorojapoi 'rã,

¹⁸ teĩ po rami 'rã rejapo: pendeivy re ore kuery rovaẽ jave kova'e ixã pytã va'e janela roguejyague py rejokua 'rã, ha'e gui nderu, ndexy, ndekyvvy ha'e nderu ro pygua kuery ha'e javi remboatypa 'rã ndero py. Ha'e rami e'ỹ rã ndorojapoi 'rã rouraague.

¹⁹ Ha'e rami avi peteĩ va'e rei ndero rokẽ gui oka py oẽ ri ramo ma hexe ae 'rã oĩ huguy omoẽague opaga aguã, orere e'ỹ. Ha'e rã ndereve opy ikuai va'e ruguy omoẽa ramo ma orere ae toĩ ropaga aguã, ha'e kuery re amongue opo omoĩ rã.

²⁰ Ha'e rami avi ndee oremombe'u ramo ore ndorojapoi 'rã ndevy rouraague — he'i.

²¹ Ha'e ramo kunha va'e

— Pendeayvuague rami toiko — he'i vyve omondouka. Ha'e rã ha'e kuery oo. Ha'e gui janela re kunha va'e ojokua ixã pytã va'e.

²² Avakue jogueraa vy vyvty reia re ovaẽ. Ha'e py ma mboapy ára opyta, heka vy oo va'e kuery guetã katy ju ojevypa peve, ha'e kuery tape ha'e javi rupi oeka okuapy teĩ ndojouĩ vy.

²³ Ha'e rami vy mokoĩve ava ma yvy'ã gui oguejy vy jogueraa ju. Yakã oaxa ma vy ovaẽ Num ra'y Josué oĩa py. Ixupe omombe'u ha'e kuery re oiko va'ekue ha'e javi.

²⁴ Ha'e vy aipoe'i Josué pe:

— Anhetẽ ete nhandepo py SENHOR omboaxa ha'e va'e vyv ha'e javi. Ha'e py ikuai va'e ha'e javi ipy'a kangypa nhandegui — he'i.

3

Jordão yakã oaxa oje'oiyague

¹ Ko'ẽ ju ramove Israel kuery ha'e javi reve Josué nhomopu'ãmba vy Sitim gui oje'oi, Jordão yakã rembe peve ovaẽmba. Ha'e py ma oke ju ranhe okuapy oaxa e'ỹ mbove.

² Ha'e gui mboapy araa py huvixa kuery oaxa ju oje'oiy heta va'e kuery mbyte rupi.

³ Ha'e vy heta va'e kuery pe omombe'u-mbe'u vy aipoe'i:

— SENHOR Penderuete guexeve guarã ojapo va'ekue rryru ma levita regua sacerdote kuery oupi heravy rã pexa vy peẽ kuery voi peo 'rã ha'e kuery rakykue.*

* 3:3 Êxodo 25.10-16, Hebreus 9.1-5

4 Ha'e rami avi hyru gui mombyry'i 'rã peiko, mil metros-a py. Ha'e va'e re penhemboja eme, marupi pa peo aguã peikuaa aguã, mba'eta ha'e va'e tape rupi peo va'e'ÿ teri — he'i.

5 Josué avi aipoe'i avi heta va'e kuery pe:

— Pejeki'a'o ke ko'ê rã guarã, mba'eta peë kuery mbyte SENHOR ojapo 'rã iporã va'e — he'i.

6 Sacerdote kuery pe voi ijayvu vy aipoe'i:

— Peupi heravy Nhanderuete guexeve guarã ojapo va'ekue ryru, ha'e peroaxa heta va'e kuery renonde — he'i ramo hyru oupi vy heta va'e kuery renonde ogueroguata heravy.

7 Ha'e gui SENHOR aipoe'i Josué pe:

— Kova'e ára amboypy 'rã romboyvate aguã Israel kuery pavê oexaa py, ha'e kuery oikuaa aguã Moisés reve aikoague rami ndereve ju aikoa.

8 Ha'e gui ndee ma sacerdote kuery hyru reraa va'e pe ndeayvu vy aipo're: “Jordão yakã py peguejy ma vy pepyta ranhe 'rã ha'e py”, 're.

9 Ha'e ramo Josué aipoe'i Israel kuery pe:

— Penhemboja ke kyvô rami, SENHOR Penderuete ayvu pendu aguã.

10 Ha'e va'e rire Josué aipoe'ive ju:

— Po rami 'rã peikuaa Nhanderuete oikove va'e penembyte oikoa, ha'e anhetê penerenonde gui oipe'apa 'rãa cananeu, heteu, heveu, ferezeu, girgaseu, amorreu ha'e jebuseu kuery ha'e javi.

11 Ma'ê, SENHOR yvy jave re ipo'aka va'e guexeve guarã ojapo va'ekue ryru ma penerenonde oguerooxa 'rã heravy Jordão yakã.

12 Ha'e gui aÿ ma peiporavo doze avakue Israel regua, peteï-teï regua gui peteï ava peiporavo,

13 mba'eta Jordão yakã py sacerdote kuery SENHOR yvy jave re ipo'aka va'e ayvu ryru reraa kuery oguejy ramove yy ojeaya 'rã, yvate katy gui yy ou 'rã va'ekue ijaty ramo — he'i.

14 Ha'e gui ma ha'e kuery guekoa gui uguata oje'oivyy Jordão yakã oaxa aguã. Ha'e kuery renonde sacerdote kuery ogueraa okuapy SENHOR ayvu ryru.

15 Hyru reraa kuery Jordão yakã py oguejy ramo yy py ipy inhakÿ. (Mba'eta Jordão ma ára pyau nhavô tyguaxu raxa va'e, hembe ikuai va'e áry rupi guive.)

16 Ha'e gui yy yvate katy gui ou va'e opyta. Adã tetã gui mombyry'i ono'ô, Zaretã rexei oï va'e katy. Ha'e rã yvy joja reia regua ye'ê ro katy oxyryague ma typa. Ha'e ramo ha'e kuery oaxa oje'oivyy, Jericó tetã rexei'i ae.

17 Ha'e rã sacerdote kuery SENHOR ayvu ryru reraa va'e ma Jordão yakã mbyte py opyta okuapy. Ha'e ramia ja Israel kuery ha'e javi ipiru reia rupi oaxa.

4

Jordão yakã mbyte gui doze ita oguenoëague

1 Ha'e kuery ha'e javi Jordão yakã oaxapa ma ramo SENHOR ijayvu Josué pe. Ha'e vy aipoe'i:

2 — Eiporavo doze avakue, peteï-teï regua gui eiporavo peteï.

3 Ha'e va'e kuery pe ndeayvu vy aipo're: “Apy Jordão yakã mbyte gui penoë doze ita sacerdote kuery opyta vy opyrô okuapygui. Ha'e va'e ma peraa vy pemboaty kova'e pytü pepyta aguã py”, 're.

4 Ha'e rami rã Josué oenoï doze avakue Israel kuery regua oiporavo va'ekue,

5 peteï-teï regua gui peteï oiporavo. Ha'e vy aipoe'i ha'e kuery pe:

— Tapeo Jordão yakã mbyte py peë ranhe SENHOR Penderuete ayvu ryru reraa kuery renonde, ha'e peteï-teï pendeaxi'y áry peupi 'rã heravy peteï ita, Israel kuery regua mbovy pa ikuai rami vy.

6 Ha'e va'e ma pende kuery mbyte oï 'rã penema'endu'a aguã. Ha'e gui pendera'y kuery raka'e rã ikuai va'e oporandu vy “Mba'erã tu kova'e ita?” he'i ramo

7 aipojeje 'rã ha'e kuery pe: “ SENHOR ayvu ryru renonde ma Jordão yakã ojeaya raka'e. Hyru oguerooaxa ramove yy ojeaya. Ha'e rami rire kova'e ita ma raka'e rã peve guarã ikuai Israel kuery ima'endu'a aguã”, peje 'rã — he'i.

8 Ha'e rami rã Israel kuery ojapo Josué ijayvua. Ha'e vy Jordão yakã mbyte gui ojopy heravy doze ita, Josué pe SENHOR aipoe'iague rami vy, Israel kuery regua mbovy pa ikuai rami vy. Ha'e va'e ma ha'e kuery opyta aguã py ogueraa vy omboaty ha'e py.

9 Ha'e gui Jordão yakã mbyte py ma Josué ju doze ita omopu'ã, sacerdote kuery ayvu ryru reraa va'e opyta vy opyrôague py ae. Ha'e va'e ita ma aÿ peve ikuai ha'e py.*

10 Mba'eta sacerdote hyru reraa kuery ma Jordão mbyte opyta okuapy, Moisés pe SENHOR aipoe'i ukaague ojeupitypa peve, heta va'e kuery pe Josué ijayvuague rami vy. Ha'e ramo heta va'e kuery oaxapa pojava.

11 Heta va'e kuery ha'e javi yakã oaxapa ma ramo sacerdote kuery opytaague gui oguenoë ju SENHOR ayvu ryru, pavê oexaa py.

12 Israel kuery renonde oaxa avi jogueravy Rúben regua, Gade ha'e Manassés regua mbyte rupi oja'o va'ekue. Tembiporu reve meme oaxa, Moisés ijayvuague rami vy.

13 SENHOR renonde quarenta mil xondaro rãnda'u oaxa joe opu'ã aguã katy, Jericó tetã yvÿry nhuũndy reia py.

14 Ha'e va'e ára ma SENHOR omboyvate Josué Israel kuery pavê oexaa py. Ha'e ramo omboete okuapy oikovea pukukue re, Moisés omboetague rami avi.

* 4:9 “Aÿ peve” he'i mba'eta kova'e kuaxia omboparaa jave ita opyta teri.

¹⁵ Ha'e gui SENHOR aipoe'i Josué pe:

¹⁶ — Aipo're sacerdote kuery xeavyu ryru reraa va'e pe Jordão yakā gui oguenoê aguā — he'i.

¹⁷ Ha'e ramo sacerdote kuery pe Josué ijavyu vy

— Peê ju ke Jordão yakā gui — he'i ramo

¹⁸ sacerdote kuery avyu ryru reraa va'e ma Jordão mbyte gui oêmba. Ha'e gui vvy pirua re ha'e kuery opyrô ramove Jordão yakā oiague rupi ju oxyry. Yy rembe ha'e javi rupi oxyry, oiague rami ae ju.

¹⁹ Dez-a jaxy jypy'ia ára ha'e kuery oje'oi Jordão yakā gui. Gilgal py ju opyta okuapy, Jericó rexei kuaray oua katy.

²⁰ Doze ita Jordão yakā gui oguenoê va'ekue ma Josué omboaty Gilgal py.

²¹ Ha'e vvy aipoe'i Israel kuery pe:

— Raka'e rā pendera'y kuery pendevy pe oporandu vvy aipoe'i 'rā: “Mba'erā tu kova'e ita?” he'i ramo

²² pendera'y kuery pe pemombe'u vvy aipojepe 'rā: “Peva'e Jordão yakā ma Israel kuery oaxa raka'e ipirua rupi.

²³ Mba'eta peê kuery renonde SENHOR Nhanduete ojapo Jordão yakā ipiru aguā rami, peaxapa peve. Mba'eta ore kuery renonde SENHOR Nhanduete Ye'ê Pytā omombiru karamboae roaxapa peve, ha'e gui ha'ekue rami ae ju ojapo orevy,

²⁴ vvy regua kuery ha'e javi oikuaa aguā SENHOR ipo'akapa va'ea, ha'e peê voi SENHOR Penderuete renonde pejererokyjea rupi pendekuai aguā, raka'e rā peve.”

5

Israel kuery pire omboia ague

¹ Ha'e va'e vvy regua huvixa kuery oendupa ha'e nunga. Amorreu kuery Jordão yakā kyvô katy ikuai va'e kuaray oikea katy, ha'e cananeu kuery ye'ê vyvry ikuai va'e ruvixa kuery ha'e javi oendu Israel kuery renonde Jordão yakā SENHOR omombirupaague, ha'e kuery oaxapa peve. Ha'e va'e oendu vvy ipy'a kangypa Israel kuery káuxa, noívei ma imbaraterā.

² Ha'e va'e jave py SENHOR aipoe'i Josué pe:

— Pejapo kyxe ita gui, ha'e emboi uka Israel kuery pire — he'i.*

³ Ha'e ramo Josué ojapo uka kyxe ita gui, ha'e vvy omboi uka Israel kuery pire, Gibeate-Haralote py.

⁴ Pova'e nunga rupi ae Josué omboi uka ipire, mba'eta Egito vvy gui oê va'ekue tekua e'ÿa re oguataa rupi omanomba ma rire, avakue xondaro ikuai va'ekue ha'e javi.

⁵ Mba'eta Egito vvy gui oê va'e kuery ma opire omboi uka va'ekue meme, ha'e rā oê va'ekue gui tekua e'ÿa rupi oiko'i va'ekue ma nomboi ukai.

⁶ Quarenta ma'etÿ re Israel kuery ikuai tekua e'ÿa rupi, avakue xondaro ikuai va'e Egito gui oê va'ekue omanomba peve, SENHOR nonhe'ê rendui rire. Ha'e va'e kuery pe ma SENHOR oura reve ijavyu vvy neí ndoexa ukai aguā re, tamoi kuery pe SENHOR ome'ê aguā re oura reve ijavyuague, vvy kamby ha'e ei oata e'ÿa.

⁷ Ha'e rami vy ha'e kuery rekovia ma ta'y kuery ju omoingo. Ha'e va'e kuery pire ae Josué omboi uka, nomboi ukai teri va'ekue ikuai ramo, oguataa rupi nomboiai rire.

⁸ Ha'e kuery pire omboipa ma rire opyta ranhe ikuaiia py ae, okuerapa peve.

⁹ SENHOR aipoe'ive ju Josué pe:

— Kova'e ára peê kuery gui aipe'a Egito vvy re escravo pendekuai vvy pexĩmba reiague — he'i.

Ha'e nunga rupi ha'e va'e tekua Gilgal hery aÿ peve.*

Páscoa ára py ngaru ojapo okuapyague

¹⁰ Gilgal py Israel kuery ikuai jave ojapo okuapy ngaru Páscoa ára. Ha'e va'e jaxy catorze ára va'e ka'arukue py ojapo, Jericó vyvry nhuũndy reia oi va'e py.

¹¹ Páscoa ára rire ko'ê jevy ho'u okuapy mba'emo aju ha'e va'e vvy re ojou va'ekue: mbojape imbovia e'ÿ va'e ha'e mba'emo ra'ÿ oiaimbe va'ekue ho'u okuapy ha'e va'e ára.

¹² Ha'e va'e vvy regua mba'emo aju ho'ua ára rire'ive ma opa maná.† Ha'e rā Israel kuery ndojouvei. Ha'e rami 'rãgue py ha'e va'e ma'etÿ guive okaru okuapy Canaã vvy re mba'emo aju ikuai va'e re.

Josué pe SENHOR pegua xondaro ruvixa ojekuaa ukaague

¹³ Jericó vyvry Josué oikoa py oma'ê vvy guenonde oexa pete'i ava opu'ã ho'amy va'e, opo py kyxe hyru gui oekyi va'ekue reve. Ha'e va'e re Josué onhemboja vvy oporandu ixupe:

— Ndee pa orea katygua tyrã pa orerovaigua reiko?

¹⁴ Ha'e rā ombovai:

— Any. Xee ma SENHOR pegua xondaro kuery ruvixa aÿ aju va'e — he'i.

Ha'e ramo Josué ojapo'a vvy ngova omovaê vvy re omboete vvy. Ha'e vvy oporanduve ju ixupe:

— Xeruvixa, mba'e 're 'rã tu xee nerembiguai pe?

¹⁵ SENHOR pegua xondaro kuery ruvixa ombovai Josué pe:

— Emboi ndepy regua, mba'eta vvy reia ma iky'a e'ÿ va'e — he'i.

Ha'e ramo Josué ojapo ha'e rami.

* 5:2 Gênesis 17.10-14 ha'e Êxodo 12.43-48

* 5:9 Tery Gilgal nhaendu rã "Oipe'a" 'ea rami.

† 5:12 Maná ma Israel kuery rembi'urã

Nhanduete yva gui ombou va'ekue (Êxodo 16).

6

Jericó tetã oitypaague

- ¹ Ha'e gui Jericó rokê ma Israel kuery gui onhemboty porã. Avave rei noëai, neï ndoikeai 'rã.
- ² Ha'e ramo SENHOR aipoe'i Josué pe:
— Ma'ê, ndepo py amboaxa ma Jericó tetã, huvixa ha'e ixupegua ipy'a guaxukueve guive.
- ³ Ha'e rã peê avakue joe opu'ãa pygua kuery ha'e javive ma pembojere 'rã tetã peteïgue. Ha'e rami ma mboapy meme ára re 'rã pejapo.
- ⁴ Xeayvu ryru renonde ma sete sacerdote ogueraa 'rã sete mimby guaxu vexa'i ava rakuakue guigua. Ha'e gui sete araa py ma sete-kue 'rã pembojere tetã, ha'e sacerdote kuery omonhe'ê 'rã mimby guaxu.
- ⁵ Ha'e gui mimby guaxu vexa'i ava rakuakue guigua omonhe'ê puku rã pendu vy peê kuery ha'e javive pejapukai ratã 'rã. Ha'e gui tetã kora ho'apa 'rã vvy katy, ha'e peê kuery pejeupi 'rã hi'áry rupi, peteï-teï penerenonde katy — he'i.
- ⁶ Ha'e ramo Num ra'y Josué oenoï sacerdote kuery. Ha'e vy aipoe'i ha'e kuery pe:
— Pejopy heravy SENHOR ayvu ryru. Ha'e gui SENHOR ayvu ryru renonde ma sete sacerdote togueraa sete mimby guaxu vexa'i ava rakuakue guigua — he'i.
- ⁷ Heta va'e kuery pe ju aipoe'i:
— Tapeo, pembojere tetã. Ha'e rã tembiporu revegua kuery ma SENHOR ayvu ryru renonde toje'oi — he'i.
- ⁸ Josué ijayvuague rami heta va'e kuery oje'oi. SENHOR renonde sete sacerdote ranhe oaxa jogueravy sete mimby guaxu vexa'i ava rakuakue guigua reve, mimby guaxu omonhe'ê jogueravy. Ha'e rã hakykue ma SENHOR ayvu ryru ogueraa.
- ⁹ Ha'e gui sacerdote kuery mimby guaxu omonhe'ê va'e renonde ma avakue tembiporu revegua oje'oi. Takykue ete oo va'e ma hyru rakykue oje'oi. Ha'e rã mimby guaxu omonhe'ê ae tema jogueravy.
- ¹⁰ Heta va'e kuery pe Josué ijayvu vy aipoe'i:
— Pejapukai eme, penhendu eme, neï peteï ayvu toê eme pendejuru gui. Xee xeayvu vy “Pejapukai ke” ha'e ramo mae ma pejapukai — he'i.
- ¹¹ Ha'e rami py SENHOR ayvu ryru revegua kuery ma peteïgue ombojere jogueravy tetã, ha'e ojevuy ju. Tekoa py ju ovaê. Ha'e vy oke okuapy ha'e py.
- ¹² Ko'ê rai Josué opu'ã rã sacerdote kuery ogueraa ju okuapy SENHOR ayvu ryru.
- ¹³ SENHOR ayvu ryru renonde sete sacerdote kuery sete mimby guaxu vexa'i ava rakuakue guigua omonhe'ê tema jogueravy. Ha'e kuery renonde ma avakue tembiporu revegua oje'oi. Ha'e rã takykuegua kuery ma SENHOR ayvu ryru rakykue oje'oi. Ha'e ramia ja mimby omonhe'ê tema jogueravy.
- ¹⁴ Mokoï araa py teïgue ju ha'e kuery ombojere tetã, ha'e ojevypa ju tekoka py. Ha'e rami ma mboapy meme ára re ojapo okuapy.
- ¹⁵ Sete araa py ma ko'ê ju hexakã ramove oje'oi ju. Ha'ekue rami ae ombojere tetã, sete-kue. Ha'e va'e ára anho sete-kue ombojere tetã.
- ¹⁶ Ha'e gui sete-kuea py sacerdote kuery mimby guaxu omonhe'ê jave Josué aipoe'i heta va'e kuery pe:
— Pejapukai ke, mba'eta SENHOR omboaxa ma tetã pendepo py.
- ¹⁷ Pemomba ete aguã rami oi, ha'e py ikuai va'e ha'e javi voi. Oikove va'erã ma Raabe itavy rei va'ekue anho, hoo pygua kuery guive, mba'eta avakue vvy re oikuaa pota aguã romondouka va'ekue onhomi rire.
- ¹⁸ Ha'e rami avi pejepoyvu ke pejopy e'y aguã mba'emo pemomba aguã rami omboaxa pyre, Israel kuery rekoa ayvu vaipy pejapo e'y aguã, nda'evei rei va'e perua py.
- ¹⁹ Ha'e rã prata ha'e ouro guigua, ha'e mba'emo ryru overa va'e ha'e ferro guigua ha'e javi ma SENHOR peguarã ae 'rã opyta. Ha'e nunga ma jaraa 'rã ixupe guarã nhamoï porã aguã — he'i.
- ²⁰ Ha'e ramo heta va'e kuery ojapukai, ha'e sacerdote kuery omonhe'ê mimby guaxu. Omonhe'ê rã ha'e kuery oendu vy ojapukai ratã okuapy. Ha'e ramo tetã kora ho'apa. Hi'áry ha'e kuery ojeupi jogueravy vy oikepa tetã py, peteï-teï ooa katy ae. Ha'e rami py oipe'a tetã.
- ²¹ Tetã py ikuai va'e ma guive 'rã ojukapa kyxe py: avakue, kunhague, kyrïgue, tujakue, mymba kuery vaka, vexa'i ha'e mburika kuery guive.
- Raabe ogueraa jepeague*
- ²² Ha'e gui Josué ijayvu mokoï ava vvy re oikuaa pota aguã oo va'ekue pe. Ha'e vy aipoe'i:
— Peike kunha itavy rei va'ekue ro py, penoê ha'e gui, ha'e javi ikuai va'e reve, ixupe peuraague rami vy — he'i.
- ²³ Ha'e ramo kunumigue oikuaa pota va'ekue ma oo py oike vvy oguenoê Raabe, ha'e tuu, ixy, ikvyvy kuery, ha'e oguereko va'e ha'e javi. Hetarã kuery ha'e javi ogueraa Israel kuery rekoa katy'i ikuai aguã.
- ²⁴ Ha'e rã tetã ha'e opa mba'e ha'e py ikuai va'e ma oapypa tata py. Ha'e rã prata, ouro, ha'e overa va'e guigua, ferro guigua anho oguenoê SENHOR ropy guarã.
- ²⁵ Josué omingove itavy rei va'ekue Raabe, tuu ro pygua kuery, ha'e opa mba'e oguereko va'e voi. Ha'e rami rire Israel kuery mbyte ha'e kuery ikuai aý peve, Jericó tetã re oikuaa pota aguã Josué omoudouka va'ekue onhomi rire.
- ²⁶ Ha'e va'e jave py Josué ojapo heta va'e kuery oura vy aipoe'i okuapy aguã: “Ayvu vaipy toiko SENHOR renonde ava opu'ã vy kovã'e tetã Jericó ojapo jevy va'e. Ijytarã omo'ã va'e omokanhy 'rã gua'y jypygua, ha'e rã tetã rokê omoï jevy va'e ma omokanhy 'rã kyrïve va'e” he'i okuapy aguã.
- ²⁷ Ha'e rami SENHOR oiko Josué reve. Ha'e ramo heko oendupaa vvy jave re.

7

Acã ojevavyague káuxa Israel kuery Ai tekoa re nda'ipo'akaiague

¹ Ha'e rami tei Israel kuery ikuai aguã va'ekue rupi nda'ikuai, mba'emo omomba pyrã re nda'evei vy. Mba'eta Judá regua Carmi ra'y Acã, Zabdi ramymino ha'e Zera ramymino jevy va'e ma ojeupe guarã ojopy mba'emo omomba aguã rami omboaxa pyre. Ha'e nunga rupi SENHOR poxya hendy Israel kuery rovai.

² Ha'e rami jave py Josué omondouka avakue Jericó gui Ai tekoa katy. Ha'e va'e tekoa ma Bete-Áven katy'i oĩ, Betel regua kuaray oua katy. Ha'e kuery pe ijayvu vy aipoe'i imondovy:

— Tapeo, peiko kuaa yvy re — he'i ramo ha'e kuery oje'oi vy Ai tekoa re oikuaa pota.

³ Josué oia py ha'e kuery ojevvy vy aipoe'i ixupe:

— Heta va'e kuery ha'e javi e'y toje'oi. Dois mil e'y vy três mil avakue ete'i ri toje'oi Ai tekoa mombaara. Emokane'õmba eme heta va'e kuery, nhanderoavagua kuery ha'e pygua mbovy'i ri ikuai rá — he'i okuapy.

⁴ Ha'e rami vy ha'e kuery regua avakue ma três mil oje'oi. Ha'e rami ra'aga vy ha'e kuery onhamba Ai pygua avakue gui.

⁵ Ha'e kuery regua avakue ma Ai pygua ojuka trinta e seis, ha'e omonha amboae kuery tetã kora rokẽ gui ita oguenoëaty oĩ va'e peve. Yvy'ã guy rupi oo vy ojukave. Ha'e nunga rupi heta va'e kuery ipy'a kangypa, yy rami rive opyta.

⁶ Ha'e rami rá Josué omondoro oao, ha'e ho'a oupy ngova yvy re omovaẽ reve. Ka'aru peve onhenho SENHOR ayvu ryrú renonde. Israel mongetaaty kuery voi ha'e rami nda'evei vy oakã re omoĩ okuapy yvy ku'i.

⁷ Josué ojapukai vy aipoe'i:

— Ah SENHOR Xerueté! Mba'e re tu rejapo kova'e kuery Jordão yakã oaxa aguã rami? Amorreu kuery po py oremboaxa aguã pa rejapo, ha'e kuery oremomba aguã rive? Jordão yakã rovai re ae ropyta aguã rov'y'a va'e rire!

⁸ Ah SENHOR, mba'e pa aipoa'e ta? Mba'eta Israel kuery onhamba rire ngovaigua kuery gui!

⁹ Ha'e nunga ma cananeu kuery ha'e yvy re ikuai va'e ha'e javi oendu vy orejoko 'rá jogueruvy, ojapo 'rá orerery re na'ima'endu'avei aguã rami yvy re. Ha'e gui ha'e rami vy mba'e 'rá tu rejapo nderery ipo'akapa va'e re ima'endu'aa aguã?

¹⁰ Ha'e ramo SENHOR aipoe'i Josué pe:

— Epu'ã ke. Mba'e re tu evoko rami re'a rejupy nderova yvy re?

¹¹ Israel kuery ojevavy, nda'ikuaixei xereve guarã ajapo va'ekue rami. Ha'e rami vy ojopy omomba pyrã regua. Imonda, ijapu, ha'e omba'e rei-rei guýry onhomi imoiny.

¹² Ha'e nunga rupi ae Israel kuery nopy'ã kuaavei kuri ngovaigua kuery renonde. Onhamba oje'oivy amboae regua renonde gui, Israel kuery ae ju omomba pyrã ojeapo. Peẽ kuery mbyte gui mba'emo onhomi mbyte peipe'a e'yã ja xee ndaikovei ma 'rá peẽ kuery reve.

¹³ Eiko katu ke, eiky'ao uka heta va'e kuery. Aipo're ha'e kuery pe: “Pejky'a'o ke ko'ẽ rá guarã. Mba'eta po rami Israel kuery Ruete ijayvu: Peẽ Israel kuery, peẽ kuery mbyte oĩ omomba pyrã va'ekue. Penembyte gui mba'emo omomba pyrã peipe'a e'yã ja nda'evei penderovaigua kuery renonde pepu'ã aguã.

¹⁴ Aỹ ma ko'ẽ rá aje'ive'i reve pejexa ukapa 'rá peteĩ-teĩ regua. Ha'e ramo xorte rupi SENHOR oikuaa uka 'rá peteĩ regua. Ha'e va'e kuery ma ojexa uka 'rá, peteĩ-teĩ tekoa pygua. Ha'e ramo SENHOR oikuaa uka 'rá peteĩ tekoa. Ha'e va'e kuery ju peteĩ-teĩ oo rupi 'rá ojexa uka. Ha'e ramo SENHOR oikuaa uka 'rá peteĩ oo. Ha'e va'e gui ma peteĩ-teĩ ava 'rá ojexa uka.

¹⁵ Ha'e gui mba'emo omomba pyrã jopyare pejou va'e rei peapypa 'rá tata py, opa mba'e oguereko va'e guive, mba'eta SENHOR guexeve guarã ojapo va'ekue rami ndoikoxei vy ha'eve'y va'e ojapo Israel kuery mbyte", 're 'rá.

¹⁶ Ha'e rami rá Josué opu'ã ko'ẽ rai. Ha'e vy ojapo Israel kuery ojexa ukapa aguã rami, peteĩ-teĩ regua. Ha'e gui xorte oexa rá Judá regua ae ra'e.

¹⁷ Ha'e gui Judá regua kuery ojexa uka rá Zera ramymino kuery re ojekuaa. Ha'e gui Zera ramymino kuery peteĩ-teĩ ojexa uka rá Zabdi ro pygua kuery re ojekuaa.

¹⁸ Ha'e gui ha'e va'e ro pygua kuery ojexa uka rá ojekuaa Judá regua Carmi ra'y Acã, Zabdi ramymino, Zera ramymino jevy va'e re.

¹⁹ Ha'e gui Acã pe Josué aipoe'i:

— Xera'y, embojerovia na SENHOR Israel kuery Ruete, eporaei ixupe. * Aỹ emombe'u porã xeivy mba'e pa rejapoague. Enhenhomi eme — he'i.

²⁰ Ha'e ramo Josué pe Acã ombovai vy aipoe'i:

— Anhetẽ ae ajevavy ra'e SENHOR Israel kuery Ruete pe, po rami ajapo.

²¹ Mba'emo rei-reikue re ama'ẽ vy aexa peteĩ ao puku Babilônia guigua iporãve va'e, ha'e duzentos hatã'i va'e prata guigua, ha'e gui peteĩ ouro guigua meio quilo poiykie oĩ va'e. Ha'e nunga aipota vy ajopy karamboae. Ha'e vy anhomi yvy guýry, ajaty xeroguy mbyte py, ha'e iguýry ma prata oĩ — he'i.

²² Ha'e ramo hoo katy Josué omondouka oikuaa pota va'erã kuery. Onha reve oje'oi hoguy katy. Ha'e py ma onhomi va'ekue oĩmba ra'e, ha'e rá iguýry ma prata oĩ.

²³ Ha'e rami vy hoguy mbyte gui ojopypa heruvy vy ogueru Josué ha'e Israel kuery pavẽ ikuiaa py. SENHOR renonde omoĩmba.

* 7:19 “Embojerovia Nhanderuede” he'i hery rupi omboura vy (João 9.24).

²⁴ Ha'e ramo Israel kuery ha'e javi reve Josué ogueraa Zera ra'y Acã. Ogueraa avi prata, ao puku, ouro guigua, ha'e ta'y kuery, tajy kuery, hymba kuery vaka, mburika, vexa'i kuery, ha'e gui hoguy, ha'e oguereko va'ekue ha'e javi. Acor vvyugua py ogueraapa.

²⁵ Ha'e py ma Josué aipoe'i:

— Mba'e re tu orembojexavai rei ri? Kova'e ára ma ndee ju 'rã SENHOR nembojexavai — he'i ramo Israel kuery ha'e javi ojapipa ita py. Ojapipa ma rire oapypa tata py.

²⁶ Ha'e gui hetekue áry heta omboaty ita. Ha'e nunga ma aỹ peve oĩ ha'e py. Ha'e rami rire SENHOR nda'ipoxvyei. Ha'e va'e vvyugua ma Acor hery aỹ peve.†

8

Ai tekoa omomba okuapyague

¹ Ha'e gui SENHOR aipoe'i Josué pe:

— Ekyje eme, enhemondy'i eme guive. Emboaty uka ju xondaro kuery ha'e javi, ha'e pepu'ã. Tapeo ju Ai tekoa katy. Mba'eta ndepo py amboaxa ma Ai pygua huvixa ha'e ixupegua kuery, hetã ha'e ijyvy guive.

² Ha'e rã Ai tekoa ha'e huvixa re rejapo 'rã Jericó ha'e huvixa re rejapoague rami. Ha'e rã imba'e rei-reikue ha'e hymba kuery ma ha'eve 'rã pendejeupe guarã peraa aguã. Peiko katu tetã kupe rupi penhemi aguã, tetã re pepu'ã aguã ha'e gui — he'i.

³ Ha'e ramo Josué ha'e joe opu'ãa pygua kuery ha'e javi reve opu'ã vvy oje'oi Ai pygua kuery re opu'ã aguã. Trinta mil avakue imbarateve va'e Josué oiporavo vvy omoundouka pyávy.

⁴ Ha'e kuery pe ijayvu vvy aipoe'i:

— Ma'ẽ, romoĩ 'rã penhemi aguã tetã re pepu'ã aguã ikupe katy gui. Mombyry vaipa e'ỹ ke pendekuai tetã gui. Ha'e javive peke eme.

⁵ Ha'e rã xee ha'e xerupive ikuai va'e ha'e javi ma tetã renonde py rovaẽ rai'i 'rã rokuapy. Ha'e gui kueve guare rami orea katy ha'e kuery oẽ ramo ma ronha 'rã ranhe ha'e kuery renonde gui.

⁶ Tove ha'e kuery orerakykue tou tetã gui oẽmba peve. Mba'eta ha'e kuery “Onhamba po nhanerenonde gui” he'i 'rã kueve guare rami. Ha'e rami ae ronhamba ranhe 'rã teĩ.

⁷ Ha'e gui ma peẽ kuery penhemiague gui peju vvy pendepo'aka 'rã tetã re. Mba'eta SENHOR Penderuete omboaxa 'rã pendepo py.

⁸ Tetã re pendepo'aka ma vvy pemboja 'rã tata, SENHOR ijayvuague rami vvy. Ma'ẽ, ha'e rami aguã ae pendevy xeyvu — he'i.

⁹ Ha'e gui Josué omoundouka ramo ha'e kuery oo onhemi aguã py. Betel ha'e Ai mbyte opyta okuapy, Ai regua kuaray oikea katy. Ha'e rã Josué ma ha'e va'e pytũ oaxa heta va'e kuery mbyte.

¹⁰ Ko'ẽ rai ma jave Josué opu'ã vvy oikuaa pota ju heta va'e kuery re. Ha'e rire heta va'e kuery renonde oje'oi Israel mongetaaty kuery reve Ai tekoa katy opu'ã aguã.

¹¹ Hupive oje'oi avakue joe opu'ãa pygua kuery ha'e javi. Ovaẽmba ma okuapy tetã renonde katy, Ai regua kuaray ijapu'a'ia katy opyta. Ha'e kuery ikuai ha'e Ai tekoa pa'ũ re ma peteĩ vvyugua oĩ.

¹² Cinco mil avakue ogueraa avi vvy Betel ha'e Ai mbyte py omoĩ onhemi aguã, tetã regua kuaray oikea katy.

¹³ Ha'e rami vvy ha'e javi omoĩ imbokuapy ikuai aguã py ae. Hetave ikuai tetã gui kuaray ijapu'a'ia katy, ha'e rã onhemi va'e kuery ma ka'arua katy opyta. Ha'e va'e pytũ ma Josué oguejy vvyugua peve.

¹⁴ Ai tekoa pygua huvixa oexa vvy tetã pygua kuery reve ikuai atã. Ko'ẽ rai jave opu'ã okuapy vvy oo Israel kuery rovai vvy joja reia py opu'ã aguã katy. Ndoikuaai okuapy hovaigua kuery tetã kupe rupi onhemi okuapy.

¹⁵ Ha'e kuery renonde Josué ha'e Israel kuery ha'e javi ojeapo ipo'akaa pyre rami. Ha'e vvy onhamba tenonde gui, tekoa e'ỹa katy tape oo va'e rupi oje'oi vvy.

¹⁶ Ha'e nunga rupi tetã pygua kuery ha'e javive oenoĩa omonha aguã. Ha'e ramo Josué kuery rakykue oje'oi, tetã gui mombyry'ia peve.

¹⁷ Neĩ peteĩ'i ava ndopytai Ai py, neĩ Betel py, Israel kuery rakykue oje'oi pa vvy. Israel kuery rakykue oje'oi vvy oea tetã rokẽ ojepe'a reve.

¹⁸ Ha'e ramo SENHOR aipoe'i Josué pe:

— Ai tekoa katy eupi hu'y guaxu ndepo py rereko va'e, mba'eta amboaxa 'rã ndepo py — he'i.

Ha'e rã Josué hu'y guaxu opo py oguereko va'e oupi tetã katy.

¹⁹ Opo oupi rã onhemi va'ekue oexa vvy opu'ã pojava onhemiague gui. Tetã py ovaẽ vvy oikepa. Omboja pojava tata ha'e py.

²⁰ Ha'e gui Ai tekoa pygua avakue guakykue katy ojere vvy oexa tetã mbyte gui hataxĩ opu'ã jekuaa rã yvate katy. Nda'evei onheguaẽ aguã guakykue katy neĩ guenonde katy, mba'eta tekoa e'ỹa katy onha va'ekue voi ojere okuapy, hakykue rupi ou va'e kuery rovai opu'ã aguã.

²¹ Ha'e gui Josué ha'e Israel kuery ha'e javive oexa okuapy onhemi va'ekue tetã re ipo'aka rã. Hataxĩ tetã gui opu'ã va'e avi oexa vvy ojeyv vvy ojukapa Ai pygua avakue.

²² Tetã gui amboae kuery voi oẽ ngovaigua kuery rovai opu'ã aguã. Ha'e ramo opyta okuapy Israel kuery mbyte py. Amongue peteĩ hendã katy gui ou, amboae ma amboae katy gui ou. Ha'e rami vvy ojukapa. Peteĩve ndoikovei, neĩ ndoo jepei.

²³ Ha'e rã Ai pygua huvixa ma oikove reve ojopy vvy ogueru okuapy Josué-a py.

† 7:26 Tery Acor ma “Moangekoa” 'ea ha'e kuery ayvu py.

²⁴ Ha'e rami py Israel kuery Ai pygua kuery ojukapa yvy'ãmbe reia py, tekoa e'ÿa py hakykue oje'oiague rupi ae. Ojukapa kyxe py, omomba. Ha'e vy Israel kuery Ai tekoa py ojevvy vy ha'e py ju ojukapa kyxe py.

²⁵ Ha'e va'e ára ojuka va'ekue avakue kunhague reve vy ma doze mil, Ai pygua kuery ha'e javi.

²⁶ Mba'eta Ai pygua kuery omomba ete e'ÿa ja Josué nomboguejyi opo hu'ÿ guaxu reve oupiague gui.

²⁷ Mymbakue ha'e mba'e rei-reikue ma Israel kuery ojeupe guarã ogueraa tetã gui, Josué pe SENHOR jayvuague rami vy.

²⁸ Ai tekoa re Josué tata omboja uka vy mba'emo vaikueaty ojapo raka'e rã peve guarã. Aÿ peve opyta ha'e rami.

²⁹ Ha'e rã Ai pygua huvixa ma ojryvipy, ha'e yvyra re oeja ka'aru peve. Kuaray oïke jave mae ma Josué omboi uka he'õgue yvyra gui. Tetã kora rokẽ py omombo inony. Hi'áry omboaty reta ita aÿ peve oï va'erã.

Lei ogueroyvu jevyague

³⁰ Ha'e ramo Ebal yvyty re Josué ojapo peteĩ altar SENHOR Israel kuery Ruete pe,

³¹ Israel kuery pe SENHOR rembiguai Moisés jayvuague rami vy. Mba'eta kuaxia lei oĩa re Moisés ombopara va'ekue po rami: “Xevyguia altar pejapo 'rã ita omoatyõ mbyre gui e'ÿ, tembiporu ferro guigua ndapeiporui 'rã” he'ïague rami. Ha'e va'e áry ma mba'emo mymba oapy okuapy Senhor pe. Ome'ẽ avi hexeve peteĩ rami ikuai aguã regua.

³² Ha'e py ita re ju Josué ombopara lei Israel kuery renonde Moisés ombopara va'ekue oguerova vy.

³³ Israel kuery ha'e javive ikuai ha'e py, imongetaaty kuery, yvatekueve ha'e nhomboayvu va'ety kuery reve. SENHOR guexeve guarã ojapo va'ekue ryrũ jovaive-ive rupi ikuai, levita regua sacerdote kuery hyru reraa va'e renonde. Yvy mboae regua ikuai avi, ha'e kuery mbyte py ae ikuai va'ekue reve. Ha'e kuery regua omboja'o mbyte rupi, amongue ikuai aguã Gerizim yvyty rexei, ha'e rã amboae kuery ma Ebal yvyty rexei ikuai aguã, SENHOR rembiguai Moisés jayvuague rami meme, Israel regua ogueroyvu porã uka vy.

³⁴ Ha'e rire ogueroyvu lei re ayvu oï va'e ha'e javi, ayvu porã ha'e ayvu vai oï va'e, kuaxia re lei ipara oĩa rami vy.

³⁵ Israel kuery pavẽ nhomboaty py Josué neĩ peteĩ henda py ma voi ndogueroyvu e'ÿi Moisés ojapo ukaague regua. Kunhague, avakue'i ha'e kunhague'i pe voi ogueroyvu, ha'e yvy mboae regua kuery ha'e kuery mbyte ikuai va'e pe guive.

9

Gibeão pygua kuery nhombotavyppaague

¹ Ha'e nunga huvixa kuery oendu okuapy Jordão yakã kyvõgua ha'e javi: yvy'ãa rupi, yvy'ãmbe reia rupi, ye'ẽ tuvixa va'e rembe ha'e javi rupi, Líbano katy'i ikuai va'e, heteu kuery, amorreu, cananeu, ferezeu, heveu ha'e jebuseu kuery.

² Ha'e vy peteĩ rami ha'e kuery ono'õ okuapy Josué ha'e Israel kuery rovai opu'ã aguã.

³ Ha'e gui Gibeão pygua kuery ma Jericó ha'e Ai tekoa re Josué ojapo va'ekue oendu vy

⁴ jogueroyvu okuapy ombotavy aguã re. Ha'e vy Josué-a katy oje'oi huvixa rembiguai rami rive ojeapo vy. Voxa ymague anho ogueraa mburika áry, ha'e vinho ryrũ ymague, oxorokue ha'e ombojapa pyre.

⁵ Opy re xapatu ymague, ombojapa pyre omoĩ, ha'e ojee ao yma py onhemonde. Mbojape tape rupi guarã ogueru va'e ma ipiru ha'e ivaipa va'e meme.

⁶ Oje'oi Josué-a py Gilgal py hekoa oĩa py. Ha'e rami vy ixupe aipoe'i okuapy, ha'e Israel regua avakue ha'e javi pe:

— Rovaẽ apy oreyvy mombyry oï va'e gui. Aÿ ma jajapo peẽ kuery reve peteĩ rami nhandekuai aguã — he'i okuapy.

⁷ Ha'e ramo Israel regua avakue aipoe'i ha'e kuery heveu ikuai va'e pe:

— Xapy'a rei ore kuerya katy'i rupi ae pendekuai va'e. Ha'e rami rã mba'exa tu rojapo ta peẽ kuery reve peteĩ rami nhandekuai aguã?

⁸ Ha'e kuery ombovai Josué pe:

— Ore ma nerembiguai roiko — he'i okuapy.

Josué peteĩgue ju oporandu ha'e kuery pe:

— Marã ramigua ete tu peẽ? Magui tu peju?

⁹ Ombovai okuapy:

— Ore nerembiguai kuery ma oreyvy mombyry ete oï va'e gui roju, SENHOR Nderuete omombe'ua rã roendu rire. Roendu heko, ha'e Egito yvy re ojapo va'ekue ha'e javi,

¹⁰ ha'e amorreu kuery ruvixa mokoive Jordão yakã rovai ikuai va'e re ojapo va'ekue: Hesbom pygua huvixa Seom, ha'e Basã Astarote py oï va'e pygua huvixa Ogue re.

¹¹ Ha'e nunga rupi oremongeta va'ety kuery ha'e oreyvy re ikuai va'e ha'e javi aipoe'i oreyvy: “Peraa temb'i'u tape rupi peguata rã guarã, ha'e tapeo ha'e kuery peovaexĩ aguã. Aipopeje ha'e kuery pe: ‘Ore kuery ma penerembiguai roiko. Ha'e gui aÿ ma pejapo ke peẽ kuery reve peteĩ rami nhandekuai aguã’, he'i va'ekue oreyvy.”

¹² Kova'e mbojape rogueru va'e ma haku teri reve rojopy va'ekue orero gui, peẽ kuerya py rovaẽ aguã rojua ára. Ha'e gui ma'ẽ, apy oï ipirupa ha'e ivaipa ma.

¹³ Ha'e gui kova'e vinho ryrũ ma ipyau va'ekue vinho romboyru jave, aÿ ma oxoropa ma. Ha'e kova'e oreao, ha'e xapatu voi inhymamba ma, mombyry ete gui roguata ramo — he'i okuapy.

- ¹⁴ Ha'e ramo Israel kuery ha'e kuery rembi'u oa'anga teĩ SENHOR pe ma noporandui.
- ¹⁵ Ha'e rami vy ha'e kuery reve Josué ojapo peteĩ rami ikuai aguã, ojapo ha'e kuery okuave aguã rami. Ha'e Israel regua yvatekueve voi oura okuapy ha'e rami.
- ¹⁶ Ha'e kuery reve peteĩ rami ikuai aguã ojapo ma rire mboapy araa py oikuaa ha'e'i rupi ae ikuai ra'ea, ha'e kuery mbyte ikuai va'e ae.
- ¹⁷ Mba'eta Israel kuery oo vy ovaẽ ha'e kuery retã py mboapy araa py ete'i. Ha'e kuery retã ma Gibeão, Cefira, Beerote ha'e Quiriate-Jearim.
- ¹⁸ Ha'e rami teĩ Israel kuery ndojukai, SENHOR Israel kuery Ruete rery rupi yvatekueve oura rire. Ha'e ramo heta va'e kuery ijayvu vai okuapy yvatekueve rovai.
- ¹⁹ Ha'e ramo yvatekueve aipoe'i okuapy heta va'e kuery ha'e javi pe:
— Ore ma SENHOR Israel kuery Ruete rery rupi roura ae ma ha'e kuery pe. Ha'e nunga rupi nda'evei ha'e kuery re nhandepo nhamoĩ aguã.
- ²⁰ Ha'e rami avi po rami 'rã jajapo ha'e kuery re: Nhamoingove 'rã, roura rire nhande'áry Nhanderuete poxya ou e'ỹ aguã.
- ²¹ Ta'ikuai tema — he'i yvatekueve ha'e kuery pe. Ha'e rami rire Gibeão pygua kuery ma yxakã mbovoarã ha'e yy renoẽarã ikuai heta va'e kuery pavẽ pe, yvatekueve ijayvuague rami vy.
- ²² Ha'e gui Josué oenoĩmba vy aipoe'i ha'e kuery pe:
— Mba'e re tu orembotavy vy “Peẽ kuerya gui mombyry orerekoa va'e” peje va'ekue, ore kuerya katy'i ae pendekoa va'eri?
- ²³ Ha'e nunga rupi aỹ ma ayvu vaipy pendekuai. Ore kuery pegua escravo pendekuai riae 'rã yxakã pembovo ha'e yy penoẽ aguã Xeruete ro pyguarã — he'i.
- ²⁴ Ha'e kuery ombovai Josué pe:
— Rombotavy rupi oreayvu va'ekue, mba'eta ore nerembigui kuery roendu omombe'ua rã anhetẽ SENHOR Nderuete guembigui Moisés pe ijayvu pendeivy ome'ẽ aguã kova'e yvy ha'e javi, ha'e peẽ kuery renonde omomba aguã yvy re ikuai va'e ha'e javi. Peẽ kuery orejukapa gui rokyje vy ae orekuai va'ekue ha'e rami.
- ²⁵ Ma'ẽ, ndepo py orekuai. Ha'evea rami ha'e anhetẽ rupi orerereko — he'i okuapy.
- ²⁶ Ha'e rami rã Josué ogueroko ha'e rami. Ogueraa jepepa Israel kuery po gui, ndojuka ukai.
- ²⁷ Ha'e va'e ára guive Josué omoingo yxakã mbovoarã ha'e yy renoẽarã heta va'e kuery pe, ha'e SENHOR pegua altar pyguarã. Aỹ peve ha'e rami ikuai, henda Nhanderuete oiporavoague py ae.

10

Peteĩ nhiruĩ huvixa Gibeão rovai opu'ã okuapyague

- ¹ Ha'e gui Jerusalém pygua huvixa Adoni-Zedeque oendu Ai tekoa re Josué kuery ipo'aka vy omomba eteague. Oendu avi Ai ha'e huvixa re ojapoague, Jericó ha'e ha'e pygua huvixa re ojapoague rami avi. Oendu avi Gibeão pygua kuery Israel kuery reve peteĩ rami ikuai aguã ojapoague, ha'e ha'e kuery mbyte ikuai. Ha'e nunga oendu vy
- ² okyje vaipa okuapy, mba'eta Gibeão ma tetã guaxu oĩ huvixave oĩa ramigua, Ai tekoa gui tuvixave va'e. Oikuaa avi ha'e pygua ipy'a guaxukue memea.
- ³ Ha'e ramo Jerusalém pygua huvixa Adoni-Zedeque omondouka guembigui Hoão Hebrom pygua huvixaa py, ha'e Jarmute pygua huvixa Pirã hery va'ea py, Laquis pygua huvixa Jafia-a py, ha'e Eglom pygua huvixa Debir-a py. Ha'e vy ha'e kuery pe aipoe'i uka:
- ⁴ — Peju ke xea py, xepytyvõ Gibeão pygua kuery jajukapa aguã. Mba'eta ha'e kuery ma Josué ha'e Israel kuery reve ojapo raka'e peteĩ rami ikuai aguã — he'i.
- ⁵ Ha'e rami rã amorreu regua huvixa kuery nhomboaty vy oje'oi peteĩ nhiruive: Jerusalém pygua huvixa, Hebrom, Jarmute, Laquis ha'e Eglom pygua huvixa. Xondaro kuery ha'e javi reve oje'oi vy Gibeão katy'i ikuai. Ha'e gui opu'ã okuapy ha'e pygua kuery rovai.
- Gibeão pygua kuery Josué pe ojepy ukaague*
- ⁶ Ha'e ramo Gibeão pygua avakue omondouka oayvu reraa Josué kuery rekoa Gilgal py. Ha'e vy aipoe'i ixupe:
— Orereja eme ore ae'i, nerembigui orekuai rã. Eju pojava oreka katy, orereraa jepe, orepytyvõ ke. Mba'eta amorreu kuery yvytya rupi ikuai va'e regua huvixa kuery reve ono'õ ma okuapy orere opu'ã aguã — he'i.
- ⁷ Ha'e ramo Josué ma Gilgal gui oje'oi oxondaro kuery ha'e ipy'a guaxukue ha'e javi reve.
- ⁸ Ha'e gui SENHOR aipoe'i Josué pe:
— Ekyje eme ha'e kuery gui, mba'eta ndepo py amboaxapa. Neĩ peteive nda'ipo'akai 'rã ndere — he'i.
- ⁹ Pytũ mbukukue re Gilgal gui Josué oguata ovy vy ovaẽ xapy'a ha'e kuerya py.
- ¹⁰ SENHOR omõ vai Israel kuery renonde, ojapo ojuka reta aguã rami Gibeão py. Ha'e rami vy omonha Bete-Horom katy tape oo va'e rupi, Azeca ha'e Maquedã peve oitypa oje'oivy.
- ¹¹ Ha'e gui Israel kuery Bete-Horom yvy'ã guy katy onha oje'oivy jave ma ha'e kuery áry SENHOR yva gui ombo'oky amandau guaxu Azeca ovaẽa peve. Ha'e ramo omanomba. Israel kuery kyxe py ojuka va'ekue gui hetave amandau gui omano va'ekue.

¹² Israel kuery po py SENHOR amorreu kuery omboaxaa ára ma Josué ojakukai SENHOR pe. Ha'e vy Israel kuery oendua py aipoe'i:

— Kuaray, epyta ke Gibeão áry, ha'e ndee jaxy, epyta Aijalom vvyugua áry — he'ia rami

¹³ kuaray opyta, jaxy guive, ngovaigua kuery ojukapa peve. Yva mbyte py ae kuaray opyta, are oike aguã peteĩ ára ha'e javi re rai'i. Kuaxia heko porã va'e rekokie oia re ha'e nunga ipara oiny.

¹⁴ Ha'e va'e'y mbove ha'e va'e ramigua ára ndoikoi, neĩ ha'e va'e rire, SENHOR peteĩ ava ojakukai rá onhe'ẽ rendu vy ojapo va'ekue ramigua. Mba'eta SENHOR ae Israel kuery re oma'ẽ vy opu'ã hovaigua kuery re.

¹⁵ Ha'e gui ma Israel kuery ha'e javi reve Josué ojevny guekoa Gilgal py oĩ va'e py.

Peteĩ nhiruĩ huvixa Josué omboty ukapa rire ojukaague

¹⁶ Ha'e rá peteĩ nhiruĩve huvixa kuery ma onha vy onhemimba Maquedá py itakua oĩ va'e py.

¹⁷ Ha'e ramo Josué pe omombe'ua vy

— Peteĩ nhiruĩve huvixa kuery ojua ra'e Maquedá py itakua oĩ va'e py onhemi va'ekue — 'ea.

¹⁸ Ha'e gui Josué aipoe'i:

— Itakua juru mbotyará ha'vy pembojere peteĩ ita guaxu, ha'e pemoĩ avakue harõará. Ha'e rá peẽ ae ma pepyta eme ha'e py.

¹⁹ Ha'e rami 'rãgue py tapeo pendovaigua kuery rakykue, pejukapa takykue oo va'e-va'e. Pemoinge eme ha'e kuery retã py, mba'eta SENHOR Penderuete omboaxa ma pendepo py — he'i.

²⁰ Ha'e rami py Israel kuery reve Josué ojuka reta, omomba. Ha'e rami avi ha'e kuery regua amongue ete'i oo jepe tetã ikorapa va'e py oike vy.

²¹ Ha'e gui Josué oia katy ixupegua kuery ha'e javi ojevny okuapy ovy'a reve, Maquedá py ikuaigué py ae. Ha'e rami rire avave rei nda'ijavy kuaavei Israel kuery rovai.

²² Ha'e va'e rire mae Josué aipoe'i:

— Peipe'a ke itakua juru gui ita guaxu oĩ va'e, ha'e xea py ju peru peteĩ nhiruĩve huvixa kuery ha'e gui.

²³ Ha'e ramo ma ha'e rami ikuai vy itakua gui ogueru peteĩ nhiruĩve huvixa: Jerusalém pygua, Hebrom, Jarmute, Laquis ha'e Eglom pygua.

²⁴ Josué-a py huvixa kuery ogueru ma ramo oenoimba avakue Israel regua ha'e javi. Ha'e vy aipoe'i xondaro ruvixa kuery hexeve oje'oi va'ekue pe:

— Peju ke. Pepyrõ kova'e huvixa kuery ajuy re — he'i ramo ha'e kuery oo vy opyrõ ha'e kuery ajuy re.

²⁵ Ha'e ramo Josué aipoe'i ha'e kuery pe:

— Pekiye eme, penhemondyĩ eme guive. Penembaraete ha'e pendepy'a guaxu, mba'eta guĩ rami ae SENHOR ojapo 'rá pendovaigua kuery ha'e javi re, ha'e kuery rovai pepu'ãa va'e re rei — he'i.

²⁶ Ha'e gui Josué oikutu vy ojukapa. Ha'e vy yvyra re oupi imoyny peteĩ nhiruĩve. Hetekue yvyra re ovava okuapy ka'aru peve.

²⁷ Kuaray oike ma jave Josué omboguejy uka vvyra gui. Ha'e rá omombo itakua onhemiague py ae. Ha'e gui itakua juru py omboaty reta ita guaxu. Ha'ekue py teri oĩ aỹ peve.

Sete huvixa re vyvoi ju Josué kuery ipo'akaague

²⁸ Ha'e va'e árave Josué ipo'aka Maquedá tetã re. Ha'e pygua kuery ojukapa kyxe py, huvixa voi. Omomba katui'i ha'e py ikuai va'ekue. Ndoejai neĩ peteĩve. Maquedá pygua huvixa re ojapo Jericó pygua huvixa re ojapoague rami ae.

²⁹ Maquedá gui ma Israel kuery ha'e javi reve Josué oje'oi Libna katy, ha'e vy ha'e pygua re ju opu'ã.

³⁰ Ha'e ramo SENHOR omboaxa Israel kuery po py, huvixa guive. Kyxe py ojukapa ha'e py ikuai va'e ha'e javi. Ndoejai neĩ peteĩ'i. Ha'e pygua huvixa re ojapo Jericó pygua huvixa re ojapoague rami.

³¹ Libna gui Israel kuery ha'e javi reve Josué oo vy Laquis tetã ju ojoko, ha'e vy opu'ã ha'e pygua re.

³² Laquis voi SENHOR omboaxa Israel kuery po py. Ha'e ramo ko'ẽ jevny oike vy ojukapa kyxe py ha'e py ikuai va'e ha'e javi, Libna re ojapoague rami ae.

³³ Ha'e ramo Geber pygua huvixa Hoão va'e oo Laquis pygua kuery oipytyvõ vy, teĩ Josué ojuka, hupivegua kuery voi. Neĩ peteĩ'i ndoejai.

³⁴ Laquis gui Israel kuery ha'e javi reve Josué oo Eglom katy. Ha'e py ju ojoko vy opu'ã ha'e pygua re.

³⁵ Ha'e va'e árave oike vy ojukapa kyxe py. Ha'e py ikuai va'e ha'e javi omomba. Laquis re ojapoague rami ae ju ojapo.

³⁶ Ha'e rire ma Eglom gui Israel kuery ha'e javi reve Josué oo Hebrom katy. Ha'e pygua kuery re ju opu'ã.

³⁷ Ha'e py oike vy ojukapa kyxe py: huvixa ha'e ha'e katy'i hekoa va'ekue ha'e javi. Neĩ peteĩ'i voi ndoejai, Eglom re ojapoague rami ae. Omomba ukaague rami ae Josué omomba, ha'e pygua kuery ha'e javi.

³⁸ Ha'e gui Debir py ju Israel kuery ha'e javi reve Josué ojevny vy opu'ã ha'e pygua re.

³⁹ Oipe'a tetã, ha'e huvixa voi ojuka kyxe py. Ha'e py ikuai va'e ha'e javi omomba katui'i. Peteĩ'i voi ndoejai. Hebrom, Libna ha'e huvixa re ojapoague rami ojapo Debir ha'e huvixa re voi.

⁴⁰ Ha'e rami py Josué kuery ojukapa ha'e va'e vvy regua kuery vvy'ã reia rupi ikuai va'e, Neguebe rupi, nhuũndy reia ha'e vvy'ã guy rupi ikuai va'e, huvixa kuery ha'e javi reve. Omomba ipytuẽ va'e ha'e javi. Neĩ peteĩ'i voi ndoejai, SENHOR Israel kuery Ruete ijayvuague rami vy.

⁴¹ Cades-Barnéia guive Gaza peve Josué kuery jojukapa, vvy ha'e javi Gósen guive Gibeão rupi peve.

⁴² Josué kuery oitypa vyvoi ha'e va'e huvixa kuery, ha'e ijyvy ha'e javi, mba'eta SENHOR Israel kuery Ruete ae Israel kuery re oma'ẽ vy opu'ã joe.

⁴³ Ha'e rire ma Israel kuery ha'e javi reve Josué ojevny ju guekoa Gilgal katy.

Amboae kuery re Josué kuery ipo'akaague

¹ Ha'e nunga ma omombe'ua rã Hazor pygua huvixa Jabim oendu vy guembiguai omondouka Madom pygua huvixa Jobabe-a py, Sinrom ha'e Acsafe pygua huvixaa py,

² ha'e vyvty reia kuaray ijapu'a'ia katy huvixa kuery ikuai va'ea py, Quinerete regua kuaray puku-a katy vvy joja reia py, Dor regua vvy'ãme ha'e vvy'ãme tuvixa va'e ikuai va'e rupi, ye'ẽ rexei oĩ va'e py,

³ omondouka avi cananeu kuery kuaray oua katy, ha'e kuaray oikea katy ikuai va'e pe: amorreu kuery, heteu, ferezeu, jebuseu kuery vvyvtya rupi ikuai va'e pe, ha'e heveu kuery Hermom vvy'ã guy py Míspa vvy re ikuai va'e pe.

⁴ Ha'e rami rã ha'e va'e kuery oupa, oxondaro kuery ha'e javi reve. Mbovy e'ỹ ete ikuai, ita ku'i ye'ẽ rembe rupi ikuai va'e rami heta. Guymba kavaju ha'e karóxa heta ete ogueru.

⁵ Ha'e va'e huvixa kuery jogueruvy vy Merom yakã vvy'ry ono'o okuapy, Israel kuery re opu'ã aguã.

⁶ Ha'e gui SENHOR aipoe'i Josué pe:

— Ekyje eme ha'e kuery gui. Ko'ẽ rã kova'e hora-ve amboaxapa 'rã Israel kuery po py ojuka pyre. Kavaju kuery pemongaraupa 'rã, ha'e karóxa peapypa 'rã tata py — he'i.

⁷ Ha'e rami rã Merom yakã katy Josué oxondaro kuery ha'e javi reve ou pojava vy opu'ã okuapy ha'e kuery rovai.

⁸ Israel kuery po py SENHOR omboaxapa ramo ojukapa. Omonha Sidom tuvixa va'e peve, ha'e Misrefote-Maim ha'e Míspa regua vvyugua kuaray oua katy oĩ va'e peve. Ojukapa, neĩ pete'i voi ndoējai.

⁹ Ha'e kuery re Josué kuery ojapo SENHOR aipoe'iaque rami. Kavaju omongaraupa, ha'e karóxa oapypa.

¹⁰ Ha'e va'e jave py Josué kuery ojevvy vy Hazor tetã re ju ipo'aka. Kyxe py ojuka ha'e pygua huvixa. Hazor ma tetã mboae ae ha'e javi re ipo'aka va'ekue.

¹¹ Kyxe py ojuka ha'e py ikuai va'e ha'e javi, omomba katũ'i. Peteĩve ndoikovevei. Ha'e Hazor tetã ma oapypa.

¹² Ha'e va'e huvixa kuery tetã openaa ha'e javi ma Josué kuery ojopypa, huvixa kuery voi. Ojukapa kyxe py, omomba katũ'i, SENHOR rembiguai Moisés ijayvuague rami vy.

¹³ Ha'e rã tetã vvy'ã reia rupi ikuai va'e ma Israel kuery ndoapyyi, Hazor e'ỹ vy. Ha'e va'e ma Josué oapy uka.

¹⁴ Ha'e va'e tetã pygua mba'e rei-reikue ma Israel kuery ogueraapa, hymbakue guive. Ha'e rã ha'e pygua kuery ma ojukapa kyxe py omomba peve. Peteĩve ndoikovevei.

¹⁵ SENHOR guembiguai Moisés pe ijayvuague rami ae Moisés ju ijayvu Josué pe. Ha'e rã ha'ekue rami Josué ojapo. Neĩ peteĩ avvu'i voi ndojapo e'ỹ Moisés pe SENHOR ijayvuague ha'e javi.

¹⁶ Ha'e rami py Josué kuery ipo'aka ha'e va'e vvy ha'e javi re: vvyvty reia rupi, Neguebe ha'e Gósen vvy ha'e javi, vvy joja reia rupi, Arabá, ha'e gui Israel peguarã vvyvty reia, ha'e ijyvy'ry vvy'ã reia oĩ va'e reve,

¹⁷ Halaque vvyvty Seir katy oo va'e guive Baal-Gade Líbano regua vvyugua re oĩ va'e peve, Hermom vvyvty vvy'iry. Ha'e va'e rupi huvixa kuery ikuai va'e voi ojopypa. Oitypa, ha'e ojukapa.

¹⁸ Are vaipa Josué kuery opu'ã okuapy ha'e va'e huvixa kuery rovai.

¹⁹ Jipoi tetã Israel kuery reve peteĩ rami ikuai va'e, heveu kuery Gibeão pygua e'ỹ vvy. Joe opu'ã rupi anho ojopypa.

²⁰ Mba'eta SENHOR gui ae ou ha'e kuery inhakã ratã aguã, Israel kuery rovai opu'ã aguã rami, ha'e rami rã omboaxy e'ỹ re omomba ete aguã omokanhymba peve, Moisés pe SENHOR ijayvuague rami vy.

²¹ Ha'e va'e jave py Josué kuery oje'oi vy omomba anaquim kuery vvyvty reia rupi ikuai va'e, ha'e gui Hebrom, Debir ha'e Anabe pygua, ha'e Judá ha'e Israel regua vvyvty re ikuai va'ekue ha'e javi. Josué kuery omomba ete, hetã guive.

²² Anaquim regua neĩ peteĩve ndoikovei Israel kuery vvy re. Gaza py anho, Gate ha'e Asdode py ma amongue'i okuave.

²³ Ha'e rami py Moisés pe SENHOR ijayvuague rami vy Josué ipo'aka ha'e va'e vvy ha'e javi re. ha'e omboja'o Israel kuery vvy'ã. Joegua-egua ikuai va'e peguarã omboja'o. Ha'e va'e rire vvy re opytu'upa joe opu'ãa gui.

Mokoĩ huvixa Moisés oity va'ekue rery oĩa

¹ Pova'e kuery ma ha'e va'e vvy regua huvixa Israel kuery ojukapa va'ekue Jordão yakã rovai re kuaray oua katy, ha'e ijyvy re voi ipo'aka, Arnom yakã'i guive Hermom vvyvty peve, ha'e vvy joja reia kuaray oua katygua ha'e javi.

² Amorreu kuery ruvixa Seom ma Hesbom py oĩ va'ekue. Ha'e va'e openaague ma Arnom vvyugua vvy'ry Aroer oĩ va'e guive, ha'e Arnom vvyugua mbyte gui Gileade mbyte peve, Jaboque yakã'i peve, Amom ramymino kuery vvy peve.

³ Vvy joja reia guive ye'ẽ Quinerete kuaray oua katy peve, ha'e gui Ye'ẽ ro regua kuaray oua katy tape Bete-Jesimote katy oo va'e rupi, ha'e gui kuaray puku-a katy guive Asdote-Pisga vvy'ã guy katy.

⁴ Amboae vvy ma Basã pygua huvixa Ogue mba'ekue. Ha'e va'e ma refaim kuery ramymino, Astarote ha'e Edrei py oĩ va'ekue.

⁵ Ha'e va'e openaague ma Hermom vvyvty, Salca ha'e Basã ha'e javi, gesurita ha'e maacatita kuery vvy peve, ha'e gui Gileade mbyte rupi Hesbom pygua huvixa Seom vvy peve.

⁶ Ha'e va'e kuery SENHOR rembiguai Moisés Israel kuery reve ojukapa. Ijvykyue ma SENHOR rembiguai Moisés omboaxa Rúben regua, Gade ha'e Manassés regua mbyte rupi oja'o va'ekue pe.

Huvixa kuery Josué oitypa va'ekue retã rery oĩa

⁷ Ha'e gui po rami ma Jordão yakã kyvõ rupi kuaray oikea katy huvixa kuery ikuai va'e rery, Israel kuery reve Josué ojukapa va'ekue, Baal-Gade Líbano regua vyvugua guive, Halaque vyvty Seir katy oo va'e peve. Ha'e va'e vvy ma Josué omboaxa Israel regua kuery pe omboja'o vy.

⁸ Ha'e va'e vvy ma vyvty reia rupi oĩ, vvy'ãmbe reia rupi, vvy joa reia rupi, vvy'ã guy rupi, tekoa e'ÿa rupi, ha'e Neguebe rupi. Ha'e py ikuai va'ekue ma heteu, amorreu, cananeu, ferezeu, heveu ha'e jebuseu kuery.

⁹ Huvixa ojuka pyy'i va'ekue ma Jericó pygua, ha'e gui Betel rexei Ai oĩ va'e pygua,

¹⁰ ha'e gui Jerusalém pygua huvixa, Hebrom pygua,

¹¹ Jarmute pygua, Laquis pygua,

¹² Eglom pygua, Gezer pygua,

¹³ Debir pygua, Geder pygua,

¹⁴ Horma pygua, Arade pygua,

¹⁵ Libna pygua, Adulão pygua,

¹⁶ Maquedá pygua, Betel pygua,

¹⁷ Tapua pygua, Hefer pygua,

¹⁸ Afeca pygua, Lasarom pygua,

¹⁹ Madom pygua, Hazor pygua,

²⁰ Sinrom-Merom pygua, Acsafe pygua,

²¹ Taanaque pygua, Megido pygua,

²² Quedes pygua, Carmelo py Jocneão oĩ va'e pygua,

²³ Nafate-Dor pygua, Goim pygua Gilgal py oĩ va'e,

²⁴ ha'e gui ma Tirza pygua huvixa. Ha'e javi vy ma trinta e um huvixa kuery ikuai va'ekue.

13

Vvy ndojopypai teri va'ekue re ijavyuague

¹ Ha'e gui Josué tja'i ma, heta ma'etÿ ma oguereko jave ixupe SENHOR aipoe'i:

— Ndetuja'i ma, heta ma rereko ma'etÿ. Ha'e rami teĩ heta ete teri oĩ vvy ndapejopypai va'e.

² Vvy ndapejopyi teri va'e ma filisteu kuery vvy ha'e javi, Gesur ha'e javi,

³ Egito katy'i Sior oĩ va'e guive Ecom rupi kuaray ijapu'a'ia katy oĩ va'e peve, “Cananeu kuery vvy” 'epy va'e, ha'e gui filisteu kuery ruvixa petei nhiru'i ikuai va'e openaa: Gaza, Asdode, Asquelom, Gate ha'e Ecom tetã.

⁴ Kuaray puku-a katy oĩ va'e ma aveu kuery vvy ndapejopyi teri avi, ha'e gui cananeu kuery vvy ha'e javi, ha'e Sidom regua kuery Meara vvy, amorreu kuery vvy katy'i Afeca oĩ va'e.

⁵ Oime teri avi gibléu kuery vvy, ha'e Líbano vvy ha'e javi kuaray oëa katy oĩ va'e, Hermom vvy'ã guy py Baal-Gade oĩ va'e guive Hamate katy oaxaa peve,

⁶ ha'e gui vyvty reia rupi ikuai va'e ha'e javi, Líbano gui Misrefote-Maim peve, Sidom regua kuery ha'e javi. Ha'e va'e vvy xee aipe'a 'Ira Isráel kuery renonde gui. Ha'e nunga rupi emboja'o ma voi vvy Israel kuery peguarã, ndevy xeyvuague rami vy.

⁷ Ha'e nunga rupi aÿ ma emboja'o vvy nove regua ikuai va'e peguarã, ha'e Manassés regua mbyte rupi oja'o va'ekue pe — he'i.

⁸ Ha'e rã Manassés regua mboae mbyte rupi oja'o va'ekue reve ma Rúben ha'e Gade regua kuery hekoa ae ma Jordão yakã rovai re kuaray oua katy, SENHOR rembiguai Moisés omboxaague rami vy.

⁹ Ha'e kuery vvy ma Arnom vyvugua py Aroer oĩ va'e gui ijyppy, ha'e gui tetã vyvugua mbyte py oĩ va'e, ha'e Medeba py vvy'ãmbe tuvixa va'e ha'e javi Dibom peve oo va'e,

¹⁰ ha'e amorreu kuery ruvixa Seom Hesbom py oĩ va'e openaague tetã, Amom ramymino kuery vvy peve.

¹¹ Ha'e gui Gileade, ha'e gesurita ha'e maacatita kuery vvy, Hermom vyvty ha'e javi, ha'e gui Basã ha'e javi Salca peve,

¹² Basã pygua huvixa Ogue openaague ha'e javi, Astarote ha'e Edrei py voi opena va'ekue. Ha'e va'e ma gigante kuery regua rembyrekue. Ha'e va'e kuery ma Moisés ojukapa rai vy oipe'apa va'ekue.

¹³ Ha'e rã gesurita ha'e maacatita kuery ma Israel kuery ndoipe'ai riere aÿ peve ha'e kuery ikuai Israel kuery mbyte.

Moisés vvy omboja'o-ja'oaague

¹⁴ Ha'e rã Levi regua pe anho nomboja'oi ijvyvrã, mba'eta SENHOR Israel kuery Ruete pe mba'emo oapy reve ome'ẽ mbyre ma ha'e kuery pegua oĩ, aipoe'i ma voiaque rami vy.

¹⁵ Ha'e gui Rúben ramymino kuery regua pe ma Moisés omboja'o petei-teĩ hoo pygua kuery ikuai rami vy.

¹⁶ Ha'e kuery rekoarã ijyppy Arnom vyvugua apy re Aroer oĩ va'e gui, ha'e gui tetã vyvugua mbyte py oĩ va'e, ha'e vvy'ãmbe tuvixa va'e ha'e javi Medeba peve.

¹⁷ Oĩ avi Hesbom ijvyvry tetã ikuai va'e ha'e javi reve, vvy'ãmbe tuvixa va'e py oĩ va'e: Dibom, Bamote-Baal ha'e Bete-Baal-Meom,

¹⁸ ha'e gui Jaza, Quedemote, Mefaate,

¹⁹ Quiriataim, Sibma, ha'e Zerete-Saar yvy'ã rugua oĩ va'e re,

²⁰ Bete-Peor, Pisga re yvy'ã reia oĩ va'e, Bete-Jesimote,

²¹ tetã yvy'ãmbe tuvixa va'e ha'e javi, ha'e amorreu kuery ruvixa Seom Hesbom py oĩ va'e openaague ha'e javi. Ha'e va'e ma Moisés ojuka Midiã pygua ruvixa kuery Evi, Requém, Zur, Hur ha'e Reba ojukaague rami avi. Ha'e va'e kuery ma Seom pegua yvatekueve yvy re opena va'ekue.

²² Israel kuery kyxe py ojuka avi Balaão Beor ra'y imba'ekuaa va'e, amboae kuery ojuka py.

²³ Rúben regua kuery yvy ma Jordão yakã peve oo, ha'e ha'e katy rai'i ikuai va'e peve. Ha'e va'e yvy ma Rúben ramymino kuery pegua, peteĩ-teĩ hoo pygua kuery ikuai rami vy, tetã ha'e tekoa ijyvyry ikuai va'e reve.

²⁴ Ha'e gui Gade regua kuery pe ma Moisés omboja'o ta'y kuery peguarã peteĩ-teĩ hoo pygua kuery ikuai rami vy.

²⁵ Ha'e kuery yvy ma Jazer ha'e Gileade re tetã oĩ va'e ha'e javi, ha'e Amom ramymino kuery yvy mbyte rupi, Rabá apy re Aroer oĩ va'e peve;

²⁶ Ha'e gui Hesbom guive Ramate-Mispa ha'e Betonim peve, ha'e Maanaim guive Debir yvy peve;

²⁷ ha'e gui yvugua py oĩ va'e ma Bete-Ará, Bete-Ninra, Sucote ha'e Zafom ma Hesbom pygua huvixa Seom openaague rembyrekue, ha'e gui Jordão yakã, ha'e ijyvyry rupi ikuai va'e ye'ẽ Quinerete apy peve, Jordão rovai re kuaray oua katy oĩ va'e.

²⁸ Ha'e va'e yvy ma Gade ramymino kuery pegua peteĩ-teĩ hoo pygua kuery ikuai rami vy, tetã ha'e tekoa ijyvyry ikuai va'e reve.

²⁹ Ha'e gui Manassés regua mbyte rupi oja'o va'ekue peguarã ma Moisés omboja'o peteĩ-teĩ hoo pygua kuery ikuai rami vy.

³⁰ Ha'e kuery rekoa ma Maanaim gui ijypy, ha'e gui Basã ha'e javi, Basã pygua huvixa Ogue openaague ha'e javi, ha'e tekoa Jair openaague ha'e javi, sessenta tetã Basã re ikuai va'e;

³¹ ha'e gui Gileade yvy mbyte rupi, ha'e Astarote ha'e Edrei tetã Basã pygua huvixa Ogue openaague. Ha'e va'e tetã ma Manassés ra'y Maquir pe omboaxa va'ekue, Maquir ramymino kuery mbyte rupi ikuai va'e pe omboaxa, peteĩ-teĩ hoo pygua kuery ikuai rami vy.

³² Ha'e va'e yvy ma Moisés omboja'o va'ekue Moabe regua nhuũndy rupi oiko teri jave. Jordão yakã rovai re opyta, Jericó regua kuaray oua katy.

³³ Ha'e rã Levi regua pe ma Moisés nomboja'oi yvy, mba'eta ha'e kuery pegua ma SENHOR Israel kuery Ruete ae oiko, ha'e kuery pe ijayvu ma voiaque rami vy.

14

Canaã yvy xorte rupi omboja'ogue

¹ Po rami ma Canaã yvy re Israel kuery oyvyrã ojopy raka'e. Sacerdote Eleazar, Num ra'y Josué ha'e Israel kuery regua huvixa ikuai va'e omboja'o okuapy ha'e kuery pe.

² Ha'e kuery yvyrã xorte oexaa rupi omboja'o okuapy Moisés pe SENHOR ijayvuague rami vy, nove regua pe, ha'e peteĩ mbyte rupi oja'o va'ekue peguarã ae.

³ Ha'e rã mokoĩ regua ha'e amboae mbyte rupi oja'o va'ekue yvyrã ma Moisés omboaxa ma voi Jordão yakã rovai re. Ha'e rã levita kuery pe ma nomboaxai ijyvyrã tyke'y kuery yvy mbyte rupi.

⁴ Mba'eta José ramymino kuery Manassés ha'e Efraim gui ma mokoĩ regua ikuai. Ha'e gui levita kuery pe ma nomboaxai ijyvyrã.* Ha'e rami avi tetã omboaxa ha'e kuery ikuai aguã, ha'e gui tetã yvyry rupi omboaxa avi guymba vaka ha'e mymba mboae oguereko aguã.

⁵ Moisés pe SENHOR ijayvuague rami ae Israel kuery ikuai vy omboja'opa yvy.

Calebe pe Josué Hebrom yvy omboaxaague

⁶ Ha'e gui Josué-a py Judá ramymino kuery ovaẽ avi Gilgal py. Ha'e rami vy quenezeu regua Jefoné ra'y Calebe aipoe'i ixupe:

— Ndee reikuaa Nhanderuete remimbo'e Moisés pe SENHOR ijayvuague Cades-Barnéia py, xereko re ha'e ndereko re avi.†

⁷ Xee ma quarenta ma'etý areko va'ekue Cades-Barnéia gui SENHOR rembiguai Moisés xemondouka jave yvy re aikuaa pota aguã. Ha'e rã xee amombe'u porã ixupe xepy'a re aendu va'e.

⁸ Ha'e rã xeryvy kuery xerupive oje'oi va'ekue ma omongyjepa rei heta va'e kuery. Ha'e rã xee ma aĩ atãve tema SENHOR Xeruete oipota va'e ajapo aguã.

⁹ Ha'e ramo ha'e va'e ára Moisés oura vy aipoe'i va'ekue xevy: “Anhetẽ yvy repyrõague ma ndee ha'e neramymino kuery pegua oĩ raka'e rã peve guarã, SENHOR Xeruete oipota va'e rejapo aguã rei atã ramo”, he'i va'ekue xevy.

¹⁰ Ma'ẽ, SENHOR xere opena aỹ peve aikove aguã rami, ijayvuague rami vy. Quarenta e cinco ma'etý ma ojapo Moisés pe ha'e rami SENHOR ijayvuague, Israel kuery tekoa e'ya rupi teri oguata jave py. Ha'e gui aỹ ma xee oitenta e cinco ma'etý ma areko.

* 14:4 José ramymino kuery reve doze ma ikuai araka'e Israel regua. Ha'e va'e doze regua pe anho ome'ẽ ijyvyrã, Levi regua pe e'ỹ.

† 14:6 Calebe ha'e Josué ma Canaã yvy re oikuaa pota aguã omondouka pyre regua, ha'e kuery anho nhomongeta va'ekue yvy py heta va'e kuery oiko oje'oi yvy aguã re. Ha'e rã amboae kuery oje'oi va'ekue ma okyjepa. Ha'e nunga rupi Calebe ha'e Josué pe anho SENHOR ijayvu yvy re oiko aguã re (Números 14.24).

¹¹ Xembaraete teri, Moisés xemondouka jave guare rami. Aỹ voi xembaraete aikovy ha'ekue rami ae, joe apu'ã agua katy aa ha'e ajevvy agua.

¹² Ha'e nunga rupi aỹ ma emboaxa xevy vyvty reia SENHOR aipoe'iague. Ha'e jave py rendu karamboae anaquim kuery ha'e py ikuai, ha'e tetã guaux ikorapa va'ea. Ha'e rami teĩ xereve SENHOR oiko rã aipe'apa rã ijayvuague rami vy — he'i.

¹³ Ha'e rami rã Josué ogueroayvu porã Jefoné ra'y Calebe. Ha'e vy ixupe omboaxa Hebrom regua ijyvyrã.

¹⁴ Ha'e rami rã Hebrom opyta quenezeu regua Jefoné ra'y Calebe mba'e, ixupe guarã ome'ẽ aỹ peve, SENHOR Israel kuery Ruete oipota va'e ojapo agua oĩ atã ramo.

¹⁵ Ha'e va'e e'ỹ mbove Hebrom tetã rery ma Quiriate-Arba. Arba ma anaquim kuery regua gui yvateve va'ekue. Ha'e va'e rire yvy re opytu'upa ju joe opu'ãa gui.‡

Nove regua ha'e amboae regua mbyte rupi oja'oa va'ekue yvyrã omboja'oague

15

Judá kuery pe ijyvyrã omboja'oague

¹ Ha'e gui Judá ramymino kuery yvyrã xorte rupi omboja'oa peteĩ-teĩ hoo pygua kuery ikuai rami vy. Ha'e kuery yvy itui kuaray puku-a katy Edom yvy peve, Zim tekoa e'ỹa kuaray puku-a katy itui va'e apy peve.

² Kuaray puku-a katy rupi ijyvy itui Ye'ẽ ro apy guive, ijapy kuaray puku-a katyguia guive.

³ Ha'e gui oo kuaray puku-a katy Acrabim katy oẽ ovya peve, Zim rupi oaxa, ha'e gui kuaray puku-a katy gui oẽ ovy Cades-Barnéia katy.

⁴ Oaxa Hezrom rupi, oẽ Adar peve, ha'e gui Carca rupi ju ojere ovy. Oaxa Azmom, ha'e ova'ẽ Egipto katy'i yakã'i oĩ va'e py. Ha'e gui ijyvy oo ye'ẽ peve. Ha'e va'e rupi oo 'rã pendeyvyrã omboja'oa kuaray puku-a katy oĩ va'e.

⁵ Ha'e rã ijapy kuaray oua katyguia ma Ye'ẽ ro rembe rupi itui, Jordão yakã 'aa peve. Ijapy ka'arua katyguia ma ye'ẽ rembe ojere va'e gui oo, Jordão 'aa guive.

⁶ Ha'e gui oo Bete-Hogla peve, ha'e oaxa Bete-Arabá kuaray ijapu'a'ia katy rupi, oẽ ovy Rúben ra'y Boã pegua ita oĩa peve.

⁷ Oëve tema ovy Acor yvyugua guive Debir katy, ha'e gui kuaray ijapu'a'ia katy rupi ju oo Gilgal katy. Ha'e va'e ma oĩ Adumim katy oẽ ovya katy'i, kuaray puku-a katy yakã'i oĩa rami. Ha'e gui ma oaxa ovy En-Semes py yvy oĩ va'e peve. Ha'e gui oove En-Rogel peve.

⁸ Ha'e va'e gui ma oẽ ovy Hinom ra'y rekoa yvyugua rupi, ha'e gui jebuseu kuery ikuai regua kuaray puku-a katy rupi. Ha'e va'e ma Jerusalém. Ha'e gui oẽ ovy Hinom yvyugua rexei kuaray oua katy yvyty oĩ va'e apyte peve, yvyugua refaim kuery ikuaiague kuaray ijapu'a'ia katy itui va'e apy peve.

⁹ Ha'e gui yvyty apyte guive oo yvu Neftoa py oĩ va'e peve. Ha'e gui oo oiny Efraim tetã vyvty reia rupi ikuai va'e peve. Oove tema Baalá peve. Ha'e va'e ma Quiriate-Jearim.

¹⁰ Ha'e gui ojere ovy Baalá guive kuaray oieka katy Seir yvyty peve oo vy. Oaxa ovy Jearim yvyty kuaray ijapu'a'ia katy oĩ va'e vyvry rupi. Ha'e va'e ma Quesalom. Ha'e gui oguejy ovy Bete-Semes katy. Timna rupi oaxa.

¹¹ Oove ju Ecrom yke kuaray puku-a katy oĩ va'e katy rupi. Siquerom katy oo vy oaxa yvyty Baalá, Jabneel py oẽ, ye'ẽ py mae ijapy.

¹² Ha'e rã yvy omboja'oa kuaray oieka katy itui va'e ma ye'ẽ tuvixa va'e rembe ae. Ha'e rami ma itui Judá ramymino kuery yvyrã omboja'oa, peteĩ-teĩ hoo pygua kuery ikuai rami vy.

Juízes 1.11-15

¹³ Ha'e gui Jefoné ra'y Calebe pe ma Josué omboaxa Judá ramymino kuery yvy mbyte py oiko agua, SENHOR aipoe'iague rami vy. Ha'e va'e ma Quiriate-Arba, Hebrom 'epy va'e. Arba ma Enaque ru oiko va'ekue.

¹⁴ Ha'e va'e tetã gui Calebe oipe'a mboapy Enaque ra'y kuery regua: Sesai, Aimã ha'e Talmai, Enaque ramymino kuery meme.

¹⁵ Ha'e va'e gui oo Debir pygua kuerya katy. Ymave heryague ma Quiriate-Sefer.

¹⁶ Calebe aipoe'i:

— Quiriate-Sefer re ipo'aka vy oipe'apa va'ekue pe ma ame'ẽ 'rã xerajy Acsa ta'yxyrã — he'i.

¹⁷ Ha'e gui Calebe ryke'y Quenaz ra'y Otniel ae oipe'a. Ha'e ramo ta'yxyrã ome'ẽ guajy Acsa.

¹⁸ Ha'e va'e kunha Otniel-a py oo vy ixupe ijayvu guaty pe peteĩ yvy re ojerure agua re. Ha'e gui mburika áry gui oguejy ramo ixupe Calebe oporandu:

— Mba'e tu reipotã?

¹⁹ Ombovai:

— Eme'ẽ mba'emo xevy. Yvy pirua rive xevy reme'ẽ rire eme'ëve ju ygua ikuai va'e — he'i ramo ixupe ome'ẽ yvu yvy'ã re ha'e yvy'ã guy rupi ikuai va'e.

Judá kuery retã rery oĩa

²⁰ Pova'e ma Judá ramymino kuery rekoarã omboaxa pyre, peteĩ-teĩ hoo pygua kuery ikuai rami vy.

²¹ Judá ramymino kuery retã kuaray puku-a katy, Edom yvy katy'i ikuai va'e rery ma Cabzeel, Éder, Jagur,

²² Quiná, Dimona, Adada,

‡ 14:15 Tery Quiriate-Arba ma "Arba pegua tetã" 'ea.

- ²³ Quedes, Hazor, Itnā,
²⁴ Zife, Telém, Bealote,
²⁵ Hazor-Hadata, Queriote-Hezrom (ha'e va'e ma Hazor),
²⁶ Amā, Sema, Moladá,
²⁷ Hazar-Gada, Hesmom, Bete-Pelete,
²⁸ Hazar-Sual, Berseba, Biziotiá,
²⁹ Baalá, Iim, Ezém,
³⁰ Eltolade, Quesil, Horma,
³¹ Ziclague, Madmana, Sansana,
³² Lebaote, Silim, Aim ha'e Rimom. Ha'e javi vy ma vinte e nove tetā ikuai, ijyvyry tekoa ikuai va'e reve.
³³ Ha'e gui yvy'ámbe reia rupi ma Estaol, Zorá, Asná,
³⁴ Zanoa, En-Ganim, Tapua, Enā,
³⁵ Jarmute, Adulão, Socó, Azeca,
³⁶ Saaraim, Aditaim, Gedera ha'e Gederotaim. Ha'e javi vy ma catorze tetā ikuai, ijyvyry tekoa ikuai va'e reve.
³⁷ Ha'e gui Zenā, Hadasa, Migdal-Gade,
³⁸ Dileā, Mísipa, Jocteel,
³⁹ Laquis, Bozcate, Eglom,
⁴⁰ Cabom, Laamás, Quitlis,
⁴¹ Gederote, Bete-Dagom, Naamá ha'e Maquedá. Ha'e javi vy ma dezesseis tetā ikuai ijyvyry tekoa ikuai va'e reve.
⁴² Ha'e gui Libna, Eter, Asā,
⁴³ Ífta, Asná, Nezibe,
⁴⁴ Queila, Aczibe ha'e Maressa. Ha'e javi vy ma nove tetā ikuai ijyvyry tekoa ikuai va'e reve.
⁴⁵ Ha'e gui Ecom avi, ha'e ijyvyry tetā'i ha'e tekoa ikuai va'e reve,
⁴⁶ ha'e gui Ecom tetā guive ye'ê peve, Asdode katy tekoa ikuai va'e ha'e javi reve.
⁴⁷ Ha'e gui Asdode ha'e ijyvyry tetā'i ha'e tekoa ikuai va'e reve, Gaza ha'e ijyvyry tetā'i ha'e tekoa ikuai va'e reve, Egito regua yakā ha'e ye'ê tuvixa va'e rembe peve.
⁴⁸ Yvy'ā reia rupi ikuai va'e ma Samir, Jatir, Socó,
⁴⁹ Daná, Quiriate-Sana (ha'e va'e ma Debir),
⁵⁰ Anabe, Estemoa, Anim,
⁵¹ Gósen, Holom ha'e Gilo. Ha'e javi vy ma onze tetā ikuai ijyvyry tekoa ikuai va'e reve.
⁵² Ha'e gui Arabe, Dumá, Esā,
⁵³ Janim, Bete-Tapua, Afeca,
⁵⁴ Hunta, Quiriate-Arba (ha'e va'e ma Hebróm) ha'e Zior. Ha'e javi vy ma nove tetā ikuai ijyvyry tekoa ikuai va'e reve.
⁵⁵ Ha'e gui Maom, Carmelo, Zife, Jutá,
⁵⁶ Jezreel, Jocdeão, Zanoa,
⁵⁷ Caim, Gibeá ha'e Timna. Ha'e javi vy ma dez tetā ikuai ijyvyry tekoa ikuai va'e reve.
⁵⁸ Ha'e gui Halul, Bete-Zur, Gedor,
⁵⁹ Maarate, Bete-Anote ha'e Eltecom. Ha'e javi vy ma mboapy meme tetā ikuai ijyvyry tekoa ikuai va'e reve.
⁶⁰ Ha'e gui Quiriate-Baal (ha'e va'e ma Quiriate-Jearim) ha'e Rabá. Ha'e javi vy ma mokoí tetā oí ijyvyry tekoa ikuai va'e reve.
⁶¹ Tekoa e'ya py oí va'e ma Bete-Arabá, Midim, Secaca,
⁶² Nibsā, Tetā-juky ha'e En-Gedi. Ha'e javi vy ma mboapy meme tetā ikuai ijyvyry tekoa ikuai va'e reve.
⁶³ Ha'e rá jebuseu kuery Jerusalém py ikuai va'e ma Judá ramymino kuery ndoipe'a kuaai. Ha'e ramo ay peve Jerusalém py jebuseu kuery ikuai Judá ramymino kuery mbyte.

16

Efraim kuery pe ijyvyry omboja'oaque

- ¹ Ha'e gui José ramymino kuery yvyry xorte rupi omboaxaa va'ekue ma ijypy Jordão yakā ha'e Jericó katy'i gui. Ha'e gui oo Jericó regua kuaray oua katy yy oí va'e rupi, ha'e gui tekoa e'ya ha'e yvy'ā reia rupi oo Betel peve.
² Betel gui ma oo Luz katy, ha'e arquita kuery yvy oaxa Atarote peve.
³ Ha'e gui oguejy ovy kuaray oikea katy Jafleti yvy peve, Bete-Horom yvy'ā gui oí va'e ha'e Gezer peve. Ye'ê rembe py ma ijapy.
⁴ Ha'e va'e ma José ra'y kuery Manassés ha'e Efraim regua yvyry ojopy va'ekue.
⁵ Ha'e gui Efraim ramymino kuery yvyry peteí-teí hoo pygua kuery ikuai rami vy ojopy va'ekue apy ma kuaray oua katy rupi oo Atarote-Adar guive Bete-Horom yvy'ā oí va'e peve.
⁶ Ha'e gui ye'ê katy oo. Kuaray japu'a'ia katy rupi oo Micmetate katy'i. Ha'e va'e gui ma kuaray oua katy ojevvy ovy Taanate-Siló peve. Ha'e va'e rupi oo ju kuaray oua katy Janoa peve.
⁷ Janoa guive oguejy ovy Atarote ha'e Naarate katy. Jericó py ovaé vy Jordão yakā rembe py ijapy.
⁸ Ha'e gui Tapua guive kuaray oikea katy oo oiny Caná yakā'i peve. Ye'ê rembe py ma ijapy. Ha'e va'e ma Efraim ramymino kuery regua yvyry omboaxa pyre, peteí-teí hoo pygua kuery ikuai rami vy.

⁹ Efraim ramymino kuery pe omboja'oa avi amongue tetã Manassés ramymino kuery vvy mbyte ikuai va'e, ijyvyry tetã'i ha'e tekoa'i ikuai va'e ha'e javi reve.

¹⁰ Ha'e rã cananeu kuery Gezer py ikuai va'e ma ndoipe'ai okuapy. Ha'e rire ha'e va'e kuery ma Efraim kuery mbyte ikuai aỹ peve. Ha'e ramo omomba'eapo nhea'ã imbokuapy.

17

Manassés kuery mbyte rupi oja'o va'ekue pe ijyvyrã omboja'oague

¹ Ha'e gui Manassés regua kuery yvyrã ma xorte rupi avi omboaxaa. Manassés ma José ra'y oiko ppy'i va'ekue. Ha'e gui Manassés ra'y jypy'igua ma Maquir Gileade ru va'e, joe opu'ãa rupi oiko va'ekue. Ixupe ma Gileade ha'e Basã tekoa omboaxaa.

² Manassés ramymino kuery mboae ojopy avi ovyvrã, peteĩ-teĩ hoo pygua kuery ikuai rami vy. Ha'e va'e kuery ma Abiezer ra'y kuery, Heleque, Asriel, Siquém, Hefer ha'e Semida ra'y kuery. Ha'e va'e kuery ma José ra'y Manassés ramymino kuery meme, peteĩ-teĩ hoo pygua kuery ikuai rami vy.

³ Ha'e rã Manassés ra'y Maquir ramymino, Gileade ra'y Zelofeade hery va'e ma ndata'yi, tajy anho rei. Tajy kuery rery ma Macla, Noa, Hogla, Mílca ha'e Tirza.

⁴ Ha'e va'e kuery ma ovaẽmba sacerdote Eleazar, Num ra'y Josué ha'e huvixa kuery renonde. Ha'e vvy aipoe'i okuapy:

— Moisés pe SENHOR aipoe'i raka'e oreyvyrã omboaxa aguã oreyvy kuery ikuai mbyte — he'i ramo ha'e kuery yvyrã Josué omboaxa tuu ryvy kuery ikuai mbyte, SENHOR aipoe'iaque rami vy.

⁵ Ha'e vvy Manassés regua rekoarã omboaxave ju dez henda py, Gileade ha'e Basã vvy Jordão yakã rovai re oĩ va'e ojopy ae ma va'ekue áryve.

⁶ Mba'eta Manassés ramymino kuery kunhague ma ta'y kuery mbyte ogueroko 'rãe vvy. Ha'e rã Manassés ramymino kuery mboae ma Gileade vvy ojopy ae ma va'ekue.

⁷ Ha'e gui Manassés kuery vvy apy ma Aser gui oo Micmetate, Siquém regua kuaray oua katy oĩ va'e peve. Ha'e gui kuaray puku-a katy oo En-Tapua pygua kuery ikuai peve.

⁸ Manassés kuery ma Tapua vvy re hekoa. Ha'e rã Tapua tetã ma Efraim ramymino kuery pegua opyta, Manassés regua vvy apy py oĩ va'eri.

⁹ Ha'e ramo ijyvy apy oaguejy ovy Canã yakã peve. Ha'e rã Manassés vvy re, yakã gui kuaray puku-a katy tetã ikuai va'e ma Efraim pegua opyta. Ha'e gui Manassés vvy apy ma yakã gui kuaray ijapu'a'ia katy rupi oo oiny. Ijapy ma ye'ẽ rembe py.

¹⁰ Efraim regua vvy ma kuaray puku-a katy oĩ, ha'e rã Manassés regua vvy ma kuaray ijapu'a'ia katy oĩ. Ha'e gui ijapy ma ye'ẽ rembe. Kuaray ijapu'a'ia katy rupi oĩ va'e ma Aser regua vvy. Ha'e rã kuaray oua katy rupi ma Issacar regua vvy oĩ.

¹¹ Mba'eta Issacar ha'e Aser regua vvy re amongue tetã ikuai va'e ma Manassés kuery peguarã opyta. Ha'e va'e ma Bete-Seã ha'e tetã'i ijyvyry ikuai va'e, Ibleão, Dor, Taanaque ha'e Megido, vvy mboapy vvyty'i oĩ va'e re.

¹² Ha'e rami avi ha'e va'e tetã pygua kuery ma Manassés ramymino kuery ndoipe'a kuaai. Ha'e nunga rupi cananeu kuery ikuai ae tema ha'e va'e vvy re.

¹³ Ha'e gui Israel kuery heta-etave ovy vvy omomba'eapo nhea'ã cananeu kuery, ndoipe'apai.

¹⁴ Ha'e gui José ramymino kuery regua aipoe'i Josué pe:

— Mba'e re tu peteĩ henda py ete'i ri remboaxa oreyvyrã? Mba'eta ore kuery ma heta orekuai, aỹ peve SENHOR oremoingo porã ramo.

¹⁵ Josué ombovai:

— Pendereta va'e vvy tapeo ka'aguy re, ha'e py pembokatuferezeu ha'e refaim kuery vvy re, pendeyvy Efraim re vvy'ã reia oĩ va'e ipo'i'i vaipa ri ramo — he'i.

¹⁶ Ha'e ramo José ramymino kuery aipoe'ive ju:

— Vvy'ã reia re orerekoa oĩ va'e ma nda'evei. Ha'e gui cananeu kuery vvyugua py ikuai va'e ma karóxa ferro guígua ogueroko va'e meme. Bete-Seã py ha'e ijyvyry tetã'i rupi ikuai va'e ha'e javi ogueroko avi, Jezreel vvy'ã guy py ikuai va'e kuery voi.

¹⁷ Ha'e ramo José ra'y Efraim ha'e Manassés regua kuery pe Josué ombovai vvy aipoe'i:

— Peẽ kuery ma pendereta ha'e penembaraete va'e. Peteĩ henda py ete'i e'y'ã rã penderekoa.

¹⁸ Aỹ ma vvy'ã reia ma pendevy guarã itui. Ka'aguy anho rei teĩ pembokatupa 'rã. Ijapy peve 'rã penderekoa, mba'eta peipe'apa 'rã cananeu kuery, imbaraetekue ha'e karóxa ferro guígua guive ogueroko va'eri — he'i.

18

Vvy nombaja'opai teriaque sete henda rupi omboja'oague

¹ Ha'e gui Israel kuery ijatypa okuapy Siló py. Ha'e py oupi okuapy oo onhemboaty atyrã, vvy ha'e javi re ha'e kuery ipo'aka rire.

² Ha'e rami avi Israel kuery mbyte sete regua ikuai ovyvrã ndojopyi teri va'e.

³ Ha'e ramo Josué aipoe'i Israel kuery pe:

— Raka'e peve tu pearõ 'rã pendeyvyrã SENHOR peneramoĩ kuery Ruete ome'ẽ va'ekue pejopy aguã?

⁴ Peteĩ-teĩ regua gui peiporavo 'rã mboapy avakue xee amondouka va'erã. Ha'e kuery toiko katu oo aguã. Yvy jave rupi toguata, tombopara kuaxia re peteĩ-teĩ regua ovyvrã ndojopyi va'ekue. Ha'e gui toupá ju xea py.

⁵ Ha'e rami vy omboja'o 'rã vvy sete henda rupi. Ha'e rã Judá kuery ma ovyv re ae ma ikuai kuaray puku-a katy. José ramymino kuery voi ovyv re ae ma ikuai kuaray ijapu'a'ia katy.

⁶ Pembopara 'rã vvy sete henda rupi omboja'oa aguã regua. Ha'e gui peru 'rã xe'vy, xee xortea aexa aguã SENHOR Nhanduerete renonde peikuaa aguã.

⁷ Ha'e rã levita kuery ma ndojopyi 'rã ovyvrã peẽ kuery mbyte, mba'eta ha'e kuery pegua ma sacerdote SENHOR pegua ikuai aguã. Ha'e rami avi Gade, Rúben ha'e Manassés regua mbyte rupi oja'o va'ekue ma ojopy ae ma ovyvrã Jordão yakã rovai re kuaray oua katy, ha'e kuery pe SENHOR rembiguai Moisés omboaxa va'ekue — he'i.

⁸ Ha'e rami rã ha'e va'e avakue opu'ã vy oje'oi. Yvy regua ombopara aguã oje'oi va'e kuery pe Josué ijavyv vy aipoe'i imondovy:

— Tapeo, peguata vvy ha'e javi rupi. Pemboparapa kuaxia re. Ha'e vy pejevy ju xea py apy Siló py ae, xortea aexa aguã pëvy SENHOR renonde — he'i.

⁹ Ha'e ramo avakue oje'oi. Yvy ha'e javi rupi oaxa jogueravy. Kuaxia re ombopara tetã ikuai va'e ha'e javi, sete henda rupi ombopara oje'oi. Yvy ha'e vvy ojeyvpa ju Josué-a py tekoa Siló py.

¹⁰ Ha'e ramo SENHOR renonde Josué ha'e kuery pe oexa xortea Siló py. Ha'e rami vy Israel kuery vvyvrã Josué omboja'o ha'e py, peteĩ-teĩ regua jave ikuai rami vy.

Benjamim regua kuery pe ijyvyvrã omboja'oaague

¹¹ Ha'e gui Benjamim ramymino kuery pe ma xorte oexa peteĩ-teĩ hoo pygua kuery ikuai rami vy. Ha'e gui ijyvyvrã xorte rupi opyta Judá ha'e José ramymino kuery vvy mbyte py.

¹² Ha'e kuery vvy apy ma kuaray ijapu'a'ia katy oo oiny Jordão yakã guive. Jericó rexei gui oẽ ovy kuaray ijapu'a'ia katy, ha'e gui oẽ ovy vvy'ã reia rupi kuaray oikea katy. Bete-Áven tekoa e'ya py ma ijapy.

¹³ Ha'e va'e gui oaxa ovy Luz tekoa katy, Luz regua ka'arua katy. Ha'e va'e ma Betel. Oguejy ovy Atarote-Adar peve, Bete-Horom vvy'ã guy rupi oĩ va'e regua vvyty kuaray ijapu'a'ia katy oĩ va'e vvy'iry peve.

¹⁴ Oove tema vvyty yke kuaray puku-a katy oĩ va'e rupi kuaray oikea katy oo vvy. Ijapy ma Judá ramymino kuery retã Quiriate-Baal py. Ha'e va'e ma Quiriate-Jearim. Ha'e va'e ma ijapy kuaray oikea katy oĩ va'e.

¹⁵ Ha'e gui ijapy kuaray puku-a katygua ma ijyvy Quiriate-Jearim apy kuaray oẽa katy oĩ va'e gui. Ha'e gui oove ju Neftoa py yvu ikuai va'e peve.

¹⁶ Oguejy ovy vvyty Hinom ra'y rekoa vvyugua rexei oĩ va'e peve, refaim kuery rekoa vvyugua regua kuaray ijapu'a'ia katy rupi. Ha'e gui oguejy ovy Hinom vvyugua rupi, jebuseu kuery rekoa vvy'ã guy reia rupi kuaray puku-a katy oo vvy. Ha'e gui En-Rogel katy ju oguejy.

¹⁷ Ojeapa ovy kuaray ijapu'a'ia katy vy ovaẽ En-Semes py. Ha'e gui ma oaxa oiny Adumim vvy'ã re Gelilote oĩ va'e katy'i. Ha'e vvy oguejy ovy Rúben ra'y Boã pegua ita oĩa peve.

¹⁸ Oo ju kuaray puku-a katy vvy joja reia rupi, yvu ikuai va'e katy'i rupi oo vvy. Ha'e gui oguejy ovy vvy'ãmba reia katy.

¹⁹ Ha'e va'e gui ma ijapy oaxa ovy Bete-Hogla peve, kuaray ijapu'a'ia katy rupi. Opa 'rã Ye'ẽ ro rembe py, Jordão yakã 'aa py. Ha'e va'e ma vvy apy kuaray puku-a katy oĩ va'e.

²⁰ Ha'e gui ijapy kuaray oua katy rupi oĩ va'e ma Jordão rembe rupi oĩ. Ha'e va'e ma Benjamim ramymino kuery pegua vvy apy ojere ovy va'e regua, peteĩ-teĩ hoo pygua kuery ikuai rami vy.

Benjamim kuery retã rery oĩa

²¹ Benjamim regua peteĩ-teĩ hoo pygua kuery ikuai rami vy ha'e kuery pegua tetã ma Jericó, Bete-Hogla, Emeque-Quesis,

²² Bete-Arabá, Zemaraim, Betel,

²³ Avim, Pará, Ofra,

²⁴ Quefar-Amonai, Ofni ha'e Geba. Ha'e javi vy ma doze tetã ikuai, ijyvyry tekoa ikuai va'e reve.

²⁵ Ha'e gui Gibeão, Ramá, Beerote,

²⁶ Mispa, Cefira, Mosa,

²⁷ Requém, Irpeel, Tarala,

²⁸ Zela, Elefe, Jebus (ha'e va'e ma Jerusalém), Gibeá ha'e Quiriate. Ha'e javi vy ma catorze tetã ikuai, ijyvyry rupi tekoa ikuai va'e reve. Ha'e va'e ma Benjamim ramymino kuery vvy, peteĩ-teĩ hoo pygua kuery ikuai rami vy.

19

Simeão kuery pe ijyvyvrã omboja'oaague

¹ Ha'e gui Simeão pe, Simeão ramymino kuery pe ma mokoĩa xorte oexa, peteĩ-teĩ hoo pygua kuery ikuai rami vy. Ha'e va'e kuery vvy ma Judá ramymino kuery vvy mbyte py itui.

² Ha'e kuery vvyvrã ojopy va'ekue re oĩ Berseba, Seba, Moladá,

³ Hazor-Sual, Balá, Ázen,

⁴ Eltolade, Betul, Horma,

⁵ Ziclague, Bete-Marcabote, Hazar-Susa,

⁶ Bete-Lebaote ha'e Saruém. Ha'e javi vy ma treze tetã ikuai, ijyvyry tekoa ikuai va'e reve.

⁷ Ha'e gui Aim, Rimom, Eter ha'e Asã, irundy tetã, ijyvyry tekoa ikuai va'e reve.

⁸ Ha'e gui oĩ avi ha'e va'e tetã yvyry tekoa ikuai va'e ha'e javive, Baalate-Beer peve. Ha'e va'e ma Ramã Neguebe regua. Ha'e va'e ma Simeão ramymino kuery yvyryã ojopy va'ekue, peteĩ-teĩ hoo pygua kuery ikuai rami vy.

⁹ Simeão ramymino kuery yvyryã ma Judã ramymino kuery yvy gui omboja'oa, mba'eta ha'e kuery yvy ma tuvixa ete ha'e kuery pe. Ha'e nunga rupi Simeão ramymino kuery pe ha'e kuery yvy gui omboja'oa ikuai aguã.

Zebulom kuery pe ijyvyryã omboja'oague

¹⁰ Ha'e gui Zebulom ramymino kuery pe mboapya xorte oexa peteĩ-teĩ hoo pygua kuery ikuai rami vy. Ha'e kuery yvy apy ma Saride peve oo.

¹¹ Oẽ ovy kuaray oikea katy rupi Marala peve. Dabesete gui oo va'e ovaẽ yakã'i Joceneo katy'i oĩ va'e peve.

¹² Saride gui ojeapa ovy kuaray oua katy, Quislote-Tabor kyvõ peve. Daberate katy oo vy Jafia peve oẽ ovy.

¹³ Ha'e va'e gui oaxa ovy kuaray oẽa katy Gate-Hefer ha'e Ete-Cazim katy. Rimom katy oo oiny Neã peve.

¹⁴ Ha'e va'e rupi ojere ovy vy oaxa kuaray ijapu'a'ia katy Hanatom peve. Ijapy Ifta-El yvy'ã gu py.

¹⁵ Oive ju Catate, Naalal, Sinrom, Idala ha'e Belém. Ha'e javi vy doze tetã ikuai, ijyvyry tekoa ikuai va'e reve.

¹⁶ Ha'e va'e ma Zebulom ramymino kuery yvyryã ojopy va'ekue, peteĩ-teĩ hoo pygua kuery ikuai rami vy, ha'e va'e tetã ha'e ijyvyry tekoa ikuai va'e reve.

Issacar kuery pe ijyvyryã omboja'oague

¹⁷ Ha'e gui Issacar ju. Issacar ramymino kuery pe ma irundya xorte oexa, peteĩ-teĩ hoo pygua kuery ikuai rami vy.

¹⁸ Ha'e va'e kuery yvy re oĩ Jezreel, Quesulote, Suném,

¹⁹ Hafaraim, Siom, Anacarate,

²⁰ Rabite, Quisãio, Ebes,

²¹ Remete, En-Ganim, En-Hada ha'e Bete-Pazes.

²² Ijyvy apy ma Tabor, Saazima ha'e Bete-Semes rupi oaxa ovy vy Jordão yakã rembe py ijapy. Ha'e javi vy dezesses tetã ikuai, ijyvyry tekoa ikuai va'e reve.

²³ Ha'e va'e ma Issacar ramymino kuery yvyryã ojopy va'ekue, peteĩ-teĩ hoo pygua kuery ikuai rami vy, ha'e va'e tetã ha'e ijyvyry tekoa ikuai va'e reve.

Aser kuery pe ijyvyryã omboja'oague

²⁴ Aser ramymino kuery pe ma peteĩ nhiruia xorte oexa, peteĩ-teĩ hoo pygua kuery ikuai rami vy.

²⁵ Ha'e kuery yvy re ma oĩ Helcate, Hali, Béten, Acsafe,

²⁶ Alameleque, Amade ha'e Misal. Ha'e gui oaxa ovy kuaray oikea katy Carmelo peve, ha'e gui Sior-Libnate katy.

²⁷ Ojeapa ovy kuaray oua katy Bete-Dagom peve. Oaxa ovy Zebulom ha'e Ifta-El yvyvugua rupi, kuaray ijapu'a'ia katy oo Bete-Emeque ha'e Neiel peve. Ha'e gui oo oiny nhandeaxua regua rupi Cabul peve.

²⁸ Oaxa avi Ebrum, Reobe, Hamom ha'e Canã rupi, Sidom tuvixa va'e peve oo.

²⁹ Ojere ovy Ramã katy, Tiro tetã ikorapa va'e peve. Ha'e gui ma ojeapa ovy Hosa katy. Aczibe yvyry ye'ẽ rembe py ijapy.

³⁰ Oĩ avi Umã, Afeca ha'e Reobe. Ha'e javi vy ma vinte e duas tetã ikuai ijyvyry tekoa ikuai va'e reve.

³¹ Ha'e va'e ma Aser ramymino kuery yvyryã ojopy va'ekue, peteĩ-teĩ hoo pygua kuery ikuai rami vy.

Naftali kuery pe ijyvyryã omboja'oague

³² Ha'e gui Naftali ramymino kuery pe ma mboapy memea xorte oexa, peteĩ-teĩ hoo pygua kuery ikuai rami vy.

³³ Ha'e kuery yvy apy ma Helefe guive oo carvalho yvyraty Zaananim py oĩ va'e peve. Ha'e gui Admim-Neguebe katy oo, ha'e Jabneel katy Lacum peve. Ha'e gui Jordão yakã rembe py ijapy.

³⁴ Ojere ovy kuaray oikea katy rupi Aznote-Tabor katy. Ha'e gui ma oaxa ovy Hucoque katy. Kuaray puku-a katy oĩ Zebulom yvy, ha'e rã kuaray oikea katy oĩ Aser yvy. Ha'e gui kuaray oikea katy oĩ Judã regua yvy Jordão rembe rupi.

³⁵ Tetã ikorapa va'e ma Zidim, Zer, Hamate, Racate, Quinerete,

³⁶ Adamã, Ramã, Hazor,

³⁷ Quedes, Edrei, En-Hazor,

³⁸ Irom, Migdal-El, Horém, Bete-Anate ha'e Bete-Semes. Ha'e javi vy dezenove tetã ikuai, ijyvyry tekoa ikuai va'e reve.

³⁹ Ha'e va'e ma Naftali ramymino kuery yvyryã ojopy va'ekue peteĩ-teĩ hoo pygua kuery ikuai rami vy, ha'e va'e tetã ha'e ijyvyry tekoa ikuai va'e reve.

Dã kuery pe ijyvyryã omboja'oague

⁴⁰ Ha'e gui Dã ramymino kuery pe ma sete-a xorte oexa, peteĩ-teĩ hoo pygua kuery ikuai rami vy.

⁴¹ Ha'e kuery yvy re ma oĩ Zorã, Estaol, Ir-Semes,

⁴² Saalabim, Aijalom, Itla,

⁴³ Elom, Timna, Ecrum,

⁴⁴ Elteque, Gibetom, Baalate,

⁴⁵ Jeúde, Bene-Beraque, Gate-Rimom,

46 Me-Jarcom, Racom ha'e vvy Jope katy'i oĩ va'e.

47 Dã ramymino kuery pe ijyvy kyrĩve'i ramo ha'e kuery oje'oi vy joguero'a okuapy Lesém pygua kuery reve. Ipo'aka vy ojukapa kyxe py. Tetã re ipo'aka ma vy ikuai ha'e py. Ha'e vy omboery Dã, guamoĩ rery rupi ae.

48 Ha'e va'e ma Dã ramymino kuery yvyrã ojopy va'ekue, petei-teĩ hoo pygua kuery ikuai rami vy, ha'e va'e tetã ha'e ijyvyry tekoa ikuai va'e reve.

Josué peguarã tetã omboaxaague

49 Ha'e gui Israel kuery vvy omboja'opa ma rire Num ra'y Josué pe ome'ẽ hekoarã ha'e kuery vvy mbyte py.

50 SENHOR ijayvuague rami vy ixupe ome'ẽ Timnate-Sera tetã ojerureague, Efraim kuery ikuai mbyte py vvy'ã reia oĩ va'e py. Ha'e ramo ha'e va'e tetã ha'e ojapo jey vy oiko ha'e py.

51 Ha'e va'e vvy ma sacerdote Eleazar, Num ra'y Josué ha'e heta va'e kuery ruvixa kuery omboja'o okuapy xorte oexa vy. Israel kuery yvyrã omboja'o Siló py SENHOR renonde, onhemboaty atyrã ojapo va'ekue rokẽ py. Ha'e rami vy opa ma vvy omboja'o.

20

Tetã jojukaare onhemi aguã oiporavoague

¹ Ha'e gui SENHOR aipoe'i Josué pe:

² — Aipo're Israel kuery pe: “Peiporavo ke amongue tetã onhemi atyrã, Moisés rupi pendeivy ajapo ukaague rami vy.*

³ Ha'e va'e tetã jojukaare onhemiaty 'rã oĩ, jojuka rive va'e, potae vy e'ỹ, ojekore vy rive jojuka va'ekue oo jepe aguã jouguy omoëague re imbopagaarã gui.

⁴ Ha'e va'e tetã katy oo 'rã onhemi aguã. Tetã kora rokẽ py ovaẽ vy ha'e pygua nhomongeta va'ety kuery pe omombe'upa 'rã guekokue. Ha'e ramo mae omoinge 'rã tetã py. Ha'e vy ixupe ome'ẽ 'rã ha'e kuery reve oiko aguã.

⁵ Xapy'a rei jouguy omoëague re imbopagaarã ha'e py ovaẽ ramo ipo py ha'e pygua kuery nomboaxai 'rã jojukaare, potae vy e'ỹ jojuka rire, nda'ija'e e'yi guive.

⁶ Ha'e ramo ha'e va'e tetã py ae 'rã jojukaare oĩ, heta va'e kuery renonde ojexa uka rã omboayvu rã guarã, ha'e gui sacerdote yvateve va'e ha'e va'e jave py oĩ va'e omano e'ỹa ja. Ha'e ramo mae ma jojuka rive va'ekue oẽ vy ngoo katy ju 'rã ojevy tetã onhaague py ae”, 're.

⁷ Ha'e gui ma tetã ha'e kuery oiporavo va'e ma Galiléia regua Quedes, Naftali regua vvy'ã reia re oĩ va'e; Efraim regua Siquém vvy'ã reia re oĩ va'e; ha'e Quiriate-Arba Hebrom hery mboae va'e, Judá regua vvy'ã reia re oĩ va'e.

⁸ Ha'e gui Jordão yakã rovai re Jericó rexei kuaray oua katy ma oiporavo ae ma Rúben kuery ikuai Bezer tekoa e'ỹa vvy'ãmbea tuvixa va'e re oĩ va'e; ha'e Gileade regua Ramote Gade kuery ikuai py, ha'e gui Basã regua Golã, Manassés kuery ikuai py.

⁹ Ha'e va'e tetã oiporavo Israel kuery ha'e javi pe, amboae vvy regua ha'e kuery mbyte ikuai va'e pe guive. Ha'e py potae vy e'ỹ jojuka va'ekue ha'e javi onhemi atyrã, jouguy omoëague re imbopagaarã po py omano e'ỹ aguã, ha'e rami 'rãgue py heta va'e kuery renonde ojexa uka aguã.

21

1 Crônicas 6.54-81

¹ Ha'e gui sacerdote Eleazar ha'e Num ra'y Josué oĩa py ovaẽ okuapy levita regua tujakueve ruvixa ikuai va'e, ha'e Israel kuery regua ruvixa ikuai py.

² Canaã vvy re Siló oĩ va'e py ha'e kuery ijayvu vy aipoe'i:

— Moisés rupi SENHOR ijayvu raka'e orevy pemboaxa aguã tetã orekuai aguã, ha'e ijyvyry rupi vvy itui va'e orerymba kuery roguereko aguã — he'i.

³ Ha'e rami rã SENHOR aipoe'iague rami vy levita kuery pe Israel kuery omboaxa tetã oyvy re oĩ va'e, ha'e ijyvyry vvy itui va'e.

⁴ Coatita kuery pe ranhe xorte oexa. Ha'e kuery regua sacerdote Arão ramymino kuery levita ikuai va'e ma xorte rupi ojopy treze tetã Judá, Simeão ha'e Benjamim kuery vvy regua.

⁵ Ha'e rã Coate ramymino kuery mboae ma xorte rupi ojopy dez tetã Efraim, Dã ha'e Manassés regua mbyte rupi oja'o va'ekue vvy regua.

⁶ Ha'e gui Gérson ramymino kuery ma xorte rupi ojopy treze tetã Issacar, Aser, Naftali ha'e Manassés regua oyvyrã ojopy ppy va'ekue vvy regua Basã py.

⁷ Ha'e gui Merari ramymino kuery ma petei-teĩ hoo pygua kuery ikuai rami vy ojopy doze tetã Rúben, Gade ha'e Zebulom kuery vvy regua.

⁸ Ha'e rami py levita kuery pe Israel kuery omboaxa ha'e va'e tetã ha'e javi, ijyvyrykue reve. Xorte rupi omboaxa, Moisés rupi SENHOR ojapo ukaague rami vy.

⁹ Ha'e gui Judá ha'e Simeão ramymino kuery vvy regua pova'e tetã omboaxa.

¹⁰ Levi ra'y Coate ramymino Arão ra'y kuery ikuai aguã, ha'e kuery pe ranhe xorte oexa.

¹¹ Ha'e kuery pe omboaxa Quiriate-Arba Judá regua vvy'ã reia re oĩ va'e (ha'e va'e ma Hebrom), ijyvyrykue reve. Arba ma Enaque ru oiko va'ekue.

* 20:2 Números 35.9-28; Deuteronomio 4.41-43; 19.1-13

¹² Ha'e rā tetā yv'yrykue ha'e tekoa ikuai va'e ma Jefoné ra'y Calebe peguarā omboaxaa ae ma.

¹³ Ha'e gui sacerdote Arão ramymino kuery pe omboaxa Hebrom tetā jojukaare oo jepe aguā, ijy'yrykue reve. Omboaxa avi Libna,

¹⁴ Jatir, Estemoa,

¹⁵ Holom, Debir,

¹⁶ Aim, Jutā ha'e Bete-Semes ijy'yrykue reve meme. Ha'e javi vy ma nove tetā omboaxa mokoī regua yvy re.

¹⁷ Ha'e gui Benjamim kuery yvy regua ma irundy tetā omboaxa: Gibeão, Geba,

¹⁸ Anatote ha'e Almom, ijy'yrykue reve meme.

¹⁹ Ha'e javi vy sacerdote Arão ramymino kuery pegua ma treze tetā omboaxaa ijy'yrykue reve.

²⁰ Ha'e gui Levi ra'y Coate ramymino kuery ma tetā ojopy xorte rupi Efraim kuery yvy regua.

²¹ Ha'e kuery pe omboaxa Siquém tetā jojukaare oo jepe aguā Efraim regua yvy'ā reia re, ijy'yrykue reve. Omboaxa avi Gezer,

²² Quibzaim ha'e Bete-Horom ijy'yrykue reve meme, irundy tetā.

²³ Ha'e gui Dā kuery yvy regua ma irundy tetā omboaxa: Elteque, Gibetom,

²⁴ Aijalom ha'e Gate-Rimom, ijy'yrykue reve meme.

²⁵ Ha'e gui Manassés regua mbyte rupi oja'o va'ekue yvy regua ma mokoī tetā omboaxa: Taanaque ha'e Gate-Rimom, ijy'yrykue reve meme.

²⁶ Ha'e javi vy ma dez tetā ijy'yrykue reve omboaxaa Coate ramymino kuery mboae pe.

²⁷ Ha'e gui Levi ra'y Gérson ramymino kuery pe ma Basā py Manassés regua kuery yvy regua omboaxa mokoī tetā: Golā jojukaare oo jepe aguā, ha'e Beesterā guive, ijy'yrykue reve meme.

²⁸ Issacar kuery yvy regua ma irundy tetā omboaxa: Quisião, Daberate,

²⁹ Jarmute ha'e En-Ganim, ijy'yrykue reve meme.

³⁰ Aser kuery yvy regua ma irundy tetā omboaxa: Misal, Abdom,

³¹ Helcate ha'e Reobe, ijy'yrykue reve meme.

³² Naftali kuery yvy regua ma Galiléia py omboaxa Quedes jojukaare oo jepe aguā, ijy'yrykue reve. Omboaxa avi Hamote-Dor ha'e Cartā ijy'yrykue reve meme, mboapy tetā.

³³ Ha'e javi vy Gérson regua kuery peteī-teī hoo pygua kuery ikuai rami vy ma treze tetā ojopy ijy'yrykue reve meme.

³⁴ Ha'e gui Levita kuery mboae Merari ramymino kuery pe ma Zebulom kuery yvy regua ma irundy tetā omboaxa: Jocneão, Cartā,

³⁵ Dimna ha'e Naalal, ijy'yrykue reve meme.

³⁶ Rúben kuery yvy regua ma irundy tetā omboaxa: Bezer, Jaza,

³⁷ Quedemote ha'e Mefaate, ijy'yrykue reve meme.

³⁸ Gade kuery yvy gui ma Gileade py omboaxa Ramote jojukaare oo jepe aguā, ijy'yrykue reve. Omboaxa avi Maanaim,

³⁹ Hesbom ha'e Jazer ijy'yrykue reve meme, irundy tetā ha'e javi vy.

⁴⁰ Ha'e va'e tetā ha'e javi ma xorte rupi omboaxaa Merari ramymino kuery pe, peteī-teī hoo pygua kuery ikuai rami vy, Levi regua voi ikuai ramo. Doze tetā ojopy.

⁴¹ Ha'e rami vy Israel kuery yvy regua ma quarenta e oito tetā omboaxa levita kuery pe, ijy'yrykue reve meme.

⁴² Peteī-teī tetā omboaxa ijy'yry rupi yvy itui va'e reve. Ha'e va'e tetā ha'e javi ma ha'e rami meme omboaxa.

⁴³ Ha'e rami py Israel kuery pe SENHOR ome'ê yvy ha'e javi, tamōi kuery pe ome'ê aguā re ouraague rami vy. Ha'e ramo ojopy ma vy ikuai ha'e py.

⁴⁴ Ha'e kuery pe SENHOR ome'ê opytu'u aguā ovyvy ha'e javi rupi, tamōi kuery pe ouraague ha'e javi rami vy. Hovaigua kuery neī peteīve nda'ipo'akai ha'e kuery re, ha'e kuery po py SENHOR omboaxapa ramo.

⁴⁵ Israel kuery pe mba'emo porā ojapo aguā re SENHOR ijayvuague peteī henda py voi ndoaxa rivei. Ha'e javi ojeupity.

22

Mokoī regua ha'e amboae regua mbyte rupi oja'o va'ekue Josué ogueroayvu porāmba ma vy hoo katy omon-doukaague

¹ Ha'e ramo Josué oīa py oenoī Rúben, Gade ha'e Manassés regua mbyte rupi oja'o va'ekue.

² Ha'e vy aipoe'i ha'e kuery pe:

— Peē kuery pe SENHOR rembiguai Moisés ijayvuague pejapopa ma. Ha'e gui xee voi xenhe'ê rendu pekuapy ajapo uka va'e ha'e javi py.

³ Are ma, aī peve napeipytyvō e'jyi penderivy kuery. Ha'e rami 'rāgue py pendejee pemoī SENHOR Penderuete ojapo uka va'ekue pejapopa aguā.

⁴ Penderivy kuery pe SENHOR Penderuete ome'ê ma opytu'u aguā, ijayvuague rami vy. Ha'e nunga rupi pejevvy aī, tapeo penderekoa katy, yvy penderivygua itui va'e katy, SENHOR rembiguai Moisés Jordão yakā rovai re penderivy omboaxa va'ekue py.

⁵ Ha'e rami teĩ pemoĩ porã pota ke lei SENHOR rembiguai Moisés pendeivy ojapo uka va'ekue, po rami: Peayvu 'rã SENHOR Penderuete, peiko 'rã ixuguigua tape rupi anho, pemoĩ 'rã ojapo uka va'ekue pejapopa aguã, pejepe'a eme ixugui, ha'e peiko ixupe pendepey'a ha'e penenhe'ẽ ha'e javi py — he'i.

⁶ Ha'e rami vy Josué ogueroayvu porãmba ma vy omondoukapa. Ha'e ramo guekoa katy ae oje'oi.

⁷ Ha'e rami mba'eta Manassés regua kuery yvyrã ma Basã yvy re Moisés omboaxa ae ma va'ekue. Ha'e rã ha'e kuery regua mboae kuery yvyrã ma Josué omboaxa va'ekue tyvy kuery ikuaia mbyte, kuaray oikea katy Jordão yakã kyvõgua re. Ha'e gui Josué hekoa katy omondoukapa ta ma vy ogueroayvu porãmba.

⁸ Ha'e vy aipoe'i ha'e kuery pe:

— Perekopa reve tapejevy porã'i penderekoa katy, penerymba kuery reta reve, prata, ouro, overa va'e, ferro ha'e ao heta ete reve. Penderyvy kuery pe tapemboja'õ penderovaigua kuery mba'e rei-reikue — he'i.

⁹ Ha'e ramo Rúben, Gade ha'e Manassés regua mbyte rupi oja'õ va'ekue ojevypa. Canaã yvy re Israel kuery rekoa Siló gui oje'oi ju Gileade yvy re ha'e kuery yvy itui va'e katy, ha'e py ae hekoarã Moisés omboaxa rire, SENHOR ijayvuague rami vy.

Jordão yakã rembe re altar ojapo jave guare

¹⁰ Ha'e gui Rúben, Gade ha'e Manassés regua mbyte rupi oja'õ va'ekue oje'oi vy Jordão yakã rembe peve ovaẽ. Ha'e py ma peteĩ altar ojapo okuapy Jordão rembe re. Ha'e va'e altar ma tuvixa ete oexaa pavẽ va'erã.

¹¹ Ha'e ramo Israel kuery oendu aipo'ea rã: “Rúben ha'e Gade kuery Manassés regua mbyte rupi oja'õ va'ekue reve ojapo okuapy peteĩ altar Jordão yakã rembe re, Canaã yvy Israel kuery ikuaia katy”, 'ea rã.

¹² Ha'e ramigua Israel kuery oendu vy ono'õmba okuapy Siló py, ha'e gui oje'oi vy guvyvy kuery rovai opu'ã aguã.

¹³ Ha'e gui Gileade yvy katy Israel kuery omondouka sacerdote Eleazar ra'y Finéias hery va'e, Rúben ha'e Gade kuery Manassés regua mbyte rupi oja'õ va'ekue ikuaia katy.

¹⁴ Hupive omondouka avi dez huvixa kuery, Israel kuery peteĩ-teĩ regua gui. Ha'e va'e kuery ma ngoo pygua kuery tujakueve ikuai, Israel regua heta va'e kuery ikuaia gui omondouka.

¹⁵ Ha'e ramo ha'e kuery oje'oi vy Rúben ha'e Gade kuery Manassés regua mbyte rupi oja'õ va'ekue reve ikuaia py ovaẽ. Ha'e vy ha'e kuery pe ijayvu vy aipoe'i okuapy:

¹⁶ — SENHOR pegua kuery nhomboaty va'e ha'e javi aipoe'i uka okuapy: Mba'exa tu pendeayvuague rami e'ỹ peiko Israel kuery Ruete rovai? Kova'e ára SENHOR pe pendekuaia gui pejepe'apa ri pekuapy. Mba'eta altar pejapo SENHOR rovai pendekuai aguã.

¹⁷ Yma Peor py nhande kuery ojapo vaiague ri ty'y kyri'i ete pëvy? * Ha'e nungakue gui ndajajeky'a'õ ukapai teri aỹ peve, nhaneramoĩ kuery re SENHOR mba'emo vai ombou va'ekue ri.

¹⁸ Mba'erã tu ha'vy aỹ voi peipoipa ri SENHOR gui? Mba'eta SENHOR rovai aỹ pendekuai ramo araka'eva rã ipoxy 'rã Israel kuery ha'e javi rovai.

¹⁹ Xapy'a rei pendeivyvã pejopy va'ekue re ha'eva'ya ramo peva ju SENHOR pegua yvy re, ha'e SENHOR pegua oo oĩa py. Mba'eta ha'e've 'rã ore kuery mbyte penderekoa aguã. Ha'e rami e'ỹ vy teĩ pejapo vai eme guive SENHOR rovai, neĩ ore kuery rovai, SENHOR pegua altar 'rãgue py altar mboae pejapopa ky.

²⁰ Tyrã pa Zera ra'y Acã mba'emo omomba pyrã ojopy vy ha'eva'ya rami ojapo jave Israel kuery ha'e javi áry e'ỹ teve ou raka'e mboxy? Mba'eta ha'e anho'i e'ỹ omano va'ekue ojapo vaiague re — he'i okuapy. *

²¹ Ha'e ramo Rúben, Gade ha'e Manassés regua mbyte rupi oja'õ va'ekue ombovai okuapy Israel kuery ruxixa ikuai va'e pe. Ha'e vy aipoe'i:

²² — SENHOR, Nhanderuete ipo'akapa va'el SENHOR, Nhanderuete ipo'akapa va'el Ha'e ma oikuaa porã. Ha'e Israel kuery voi toikuaapa. Xapy'a rei ronhe'ẽ rendu e'ya rupi, e'ỹ vy SENHOR rovai rojapo vaia rupi roiko ramo toremomba aỹ'ive.

²³ Xapy'a rei SENHOR gui rojepe'a aguã ri altar-rã rojapo, ha'e rami e'ỹ vy hi'áry ojuka pyre, mba'emoaju, e'ỹ vy peteĩ rami orekuai aguã regua rome'ẽ aguã rojapo ramo SENHOR ae torembopaga.

²⁴ Ha'e rami 'rãgue py kova'e altar rojapo roexa'ãmba rei reve orekuai vy, mba'eta xapy'a rei raka'eva rã orera'y kuery pe pendera'y kuery aipoe'i 'rã: “Mba'e nunga tu peẽ kuery pereko SENHOR Israel kuery Ruete reve?”

²⁵ Mba'eta Jordão yakã SENHOR onhono vy yvy apyrã omoĩ raka'e ore ha'e peẽ kuery mbyte, peẽ Rúben ha'e Gade ramymino kuery. Mba'eva ndaperekoi SENHOR reve”, he'i 'rã okuapy. Ha'e rami vy pendera'y kuery ojapo 'rã orera'y kuery ojepe'a aguã rami SENHOR renonde ojererokyjea rupi ikuaia gui.

²⁶ Ha'e nunga rupi aiporo'e va'ekue orejeupe ae: “Po rami 'rã jajapo, peteĩ altar-rã, mba'emo roapy aguã e'ỹ, neĩ mymba rome'ẽ aguã e'ỹ.

²⁷ Ha'e rami 'rãgue py ha'e va'e toĩ ore ha'e peẽ kuery mbyte ikuaa ukaarã, nhaneramymino kuery raka'e rã nhande rire ikuai va'erã pe, ha'e kuery oikuaa aguã SENHOR pe ete ore kuery orekuai, ha'e henonde anho mba'emo roapy, mymba rome'ẽ, ha'e peteĩ rami orekuai aguã regua rogueraa 'rã rome'ẽ aguã. Ha'e rami rã raka'eva rã orera'y kuery pe pendera'y kuery 'Mba'eva ndaperekoi SENHOR reve’, he'i e'ỹ aguã.”

²⁸ Ha'e nunga rupi ae orejeupe aiporo'e va'ekue: “Xapy'a rei raka'eva rã ha'e rami ha'e kuery ijayvu 'rã nhandevy, ha'e nhaneramymino kuery pe. Ha'e rami rã aipoja'e 'rã: 'Peikuaa pota SENHOR pegua altar-rã oreru kuery ojapo va'ekue re, mba'emo oapy aguã e'ỹ, neĩ mymba ome'ẽ aguã e'ỹ, ha'e rã ikuaa ukaarã opyta aguã ore ha'e peẽ kuery mbyte', ja'e 'rã”, ro'e.

²⁹ Ha'e nunga rupi nda'evai ete ore kuery SENHOR rovai roiko aguã, neĩ kova'e ára ixugui rojepe'a aguã. Altar-rã rojapo va'ekue áry ma norome'ei 'rãe mba'emo roapy reve, mba'emo aju, e'ỹ vy mymba rojuka va'ekue, SENHOR Nhanderuede pegua opy renonde altar hi'ái va'e áry e'ỹ vy — he'i okuapy.

³⁰ Ha'e rami Rúben, Gade ha'e Manassés ramymino kuery ijayvu rã sacerdote Finéias ha'e Israel regua heta va'e kuery tujakueve ikuai va'e oendu vy oguerovy'a okuapy.

³¹ Ha'e rami vy sacerdote Eleazar ra'y Finéias aipoe'i Rúben, Gade ha'e Manassés ramymino kuery pe:

— Aỹ roikuaa ma SENHOR nhanembyte oikoa. Mba'eta mba'eve ndapejapoi ra'e SENHOR rovai. Aỹ ma pejapo Israel kuery SENHOR po py jaiko vai e'ỹ aguã rami — he'i.

³² Ha'e gui mae sacerdote Eleazar ra'y Finéias huvixa kuery mboae reve oeja oje'oivy Rúben ha'e Gade ramymino kuery ha'e py. Gileade yvy gui ha'e kuery ojevypa ju Canaã yvy re Israel kuery ikuai katy. Ha'e py ovaẽ vy heta va'e kuery pe omombe'upa.

³³ Ha'e rami ijayvu rã Israel kuery oendu vy oguerovy'a vy ima'endu'a porã okuapy Nhanderuede re. Ha'e vy nda'ijayvuvei Rúben ha'e Gade ramymino kuery rovai opu'ã aguã re, neĩ ha'e kuery yvy ombovaipa aguã.

³⁴ Ha'e gui Rúben ha'e Gade ramymino kuery ma altar-rã ojapo va'ekue pe “Ikuaa ukaa” he'i okuapy, mba'eta aipoe'i: “Nhanembyte oikuaa uka 'rã SENHOR ae Nhanderuede oikoa.”

23

SENHOR guigua lei rami ikuai aguã re Josué ijayvuague

¹ Yma ete rire, Israel kuery hovaigua kuery ijyvyry rupi ikuai va'e ha'e javi gui SENHOR omombytu'upa rire Josué tuja'i ma, oiko are'i ma.

² Ha'e vy Josué oia py oenoĩ Israel kuery ha'e javi, nhomongeta va'ety, huvixa kuery, nhomboayvu va'ety ha'e mba'emo re opena va'e kuery. Ha'e vy aipoe'i ha'e kuery pe:

— Xetuja'i ma, are ma aiko.

³ Ha'e gui peẽ kuery pexapa ma SENHOR Penderuede peẽ kuery re oma'ẽ vy amboae regua kuery re ojapoague. Mba'eta ha'e kuery re SENHOR Penderuede ae opu'ã oikovy penderepy vy.

⁴ Ma'ẽ, apy peẽ kuery pegua xorte aexa karamboae, amboae regua kuery amomba va'e yvykue pejopy aguã, Jordão yakã guive ye'ẽ tuvixa va'e peve kuaray oikoa katy. Ha'e rami avi ha'e kuery va'e regua amongue okuave teri.

⁵ SENHOR Penderuede oipe'apa 'rã penembyte gui, omox'ẽ 'rã penerenonde gui. Ha'e ramo pejopy 'rã ha'e kuery yvykue, SENHOR Penderuede ijayvuague rami vy.

⁶ Ha'e nunga rupi penhea'ã ete ke kuaxia re lei Moisés ombopara va'ekue pejapopa aguã, ha'e va'e gui pejepe'a e'ỹ aguã pendeaxu e'ỹa katy, neĩ pendeaxua katy,

⁷ penhemoirũ e'ỹ aguã amboae regua kuery peẽ kuery mbyte okuave va'e re. Penema'endu'a eme ha'e kuery ruete rery re, peura eme ha'e kuery re, peiko eme ha'e kuery pe, pembojerovia eme guive.

⁸ Ha'e rami 'rãgue py SENHOR Penderuede re tema peĩ atã, kova'e ára peve pendekuaia rami ae.

⁹ Mba'eta penerenonde gui SENHOR oipe'a ma amboae regua imbaraeteve ha'e heta ikuai va'e teĩ. Ha'e rã peẽ kuery re ma avave rei nda'ipo'akaai aỹ peve.

¹⁰ Peẽ kuery regua pete'i ava teĩ omonha 'rã mil ikuai va'e, SENHOR Penderuede ae penderepy vy joe opu'ã ramo, ijayvuague rami vy.

¹¹ Ha'e nunga rupi penhea'ã penenhe'ẽ re pepenaa py, SENHOR Penderuede anho peayvu aguã.

¹² Mba'eta xapy'a rei ixugui pejepe'a vy kova'e regua kuery penembyte okuave va'e re penhemoirũ ha'e penhemoetarã, ha'e gui ha'e kuery reve peẽ kuery penhemoirũ vy,

¹³ peikuaa pota ke pova'e re: SENHOR Penderuede anhet'ẽ ndoipe'avei ma 'rã peẽ kuery renonde gui. Ha'e rami 'rãgue py nhuã ha'e mba'emo mbo'aa rami 'rã oĩ pëvy. Oiko 'rã pendekupe rupi penenupãa rami, ha'e juu penderexa py oĩ va'e rami, kova'e yvy porã SENHOR Penderuede ome'ẽ va'ekue áry gui pekanhymba peve.

¹⁴ — Ma'ẽ, aỹ xee aa ta ma tape yvy regua ha'e javi oje'ovia rupi.* Ha'e gui peẽ kuery ma pendepya' ha'e penenhe'ẽ ha'e javi re peikuaa porã neĩ peteive ayvu ndoaxa riveia SENHOR Penderuede pëvy mba'emo porã re ijayvuague ha'e javi. Ha'e nunga ha'e javi ojeupitypa, neĩ peteive ndoaxa rivei.

¹⁵ Ha'e rami avi mba'emo porã oiko aguã re SENHOR Penderuede ijayvuague ha'e javi ojeupityague rami ae ju pendere ha'e ombou 'rã mba'emo vai ijayvuague rami vy, yvy porã pëvy ome'ẽ va'ekue áry gui pekanhymba peve.

¹⁶ Xapy'a rei SENHOR Penderuede guexeve guarã ojapo va'ekue rupi e'ỹ pendekuaia gui pejepe'a vy amboae regua ruete pe ju pendekuai ha'e pemboete ramo SENHOR poxya hendy 'rã pendere. Ha'e are'ỹ re pekanhy 'rã yvy porã pëvy ome'ẽ va'ekue áry gui.

24

Josué omano ta vy heta va'e kuery omongetaague

¹ Ha'e va'e rire Siquém py Josué oenoĩ Israel regua kuery ha'e javi. Israel mongetaaty kuery, huvixa, nhomboayvu va'ety ha'e mba'emo re opena va'e kuery oenoĩmba ramo ojexa uka okuapy Nhanderuede renonde.

² Ha'e ramo Josué aipoe'i heta va'e kuery ha'e javi pe:

* 23:14 Ha'e rami ijayvu omano ta maa oikuaa vy.

— Po rami SENHOR Israel kuery Ruete ijayvu: “Ymave rupi peneramoĩ kuery ikuai va'ekue Eufrates yakã rovai re. Tuuete mboae pe ikuai, Abraão ha'e Naor ru Terã voi.

³ Ha'e gui peneramoĩ Abraão yakã rovai gui xee aru vy ajapo raka'e Canaã yvy ha'e javi rupi oguata aguã rami. Amboeta avi hamymino kuery. Ta'yra ame'ẽ Isaque,

⁴ ha'e gui Isaque pe ma Jacó ha'e Esaú ame'ẽ. Esaú yvyra ame'ẽ Seir regua yvy'ã reia. Ha'e rã Jacó ha'e ta'y kuery ma Egipto katy oje'oi.

⁵ Ha'e ramo ambou Moisés ha'e Arão, ha'e Egipto pygua kuery amoiingo axy mba'emo vai ambou vy. Ha'e va'e rire peẽ kuery roguenoẽ ha'e gui.

⁶ Egipto yvy gui peneramoĩ kuery anoẽmba ramo pevaẽ va'ekue ye'ẽ rembe re. Ha'e kuery rakykue Egipto pygua kuery voi karóxa ha'e kavaju árygua reve ou va'ekue Ye'ẽ Pytã peve.

⁷ Ha'e gui peneramoĩ kuery ojapukai ramo SENHOR omoĩ pytũ reia peẽ ha'e Egipto pygua kuery mbyte. Ha'e gui Egipto pygua kuery áry yy ombou ramo ojao'ipa. Peẽ kuery pexa xee Egipto yvy re mba'emo ajapo rã. Ha'e ramo pendekuai are va'ekue tekoa e'yã rupi.

⁸ Ha'e va'e gui amorreu kuery Jordão yakã rovai re ikuai va'e yvy re ju xee rogueru. Ha'e va'e kuery ma peẽ kuery rovai opu'ã va'ekue ri pendepo py amboaxapa. Ha'e ramo pejopy ha'e kuery yvy, penerenonde gui amomba rire.

⁹ Israel kuery re opu'ã avi raka'e Moabe pygua huvixa, Zipor ra'y Balaque. Ha'e rami vy oenoĩ uka Beor ra'y Balaão peẽ kuery re ijayvu vai aguã.

¹⁰ Ha'e rami teĩ xee naendu potai Balaão avyu. Ha'e rami 'rãgue py pendereroayvu porã aguã rami ajapo. Ha'e rami vy rogueraa jepe ha'e kuery po gui.*

¹¹ Ha'e gui Jordão yakã peaxa vy Jericó tetã peve pevaẽ rã peẽ kuery re Jericó pygua kuery opu'ã raka'e, ha'e amorreu kuery, ferezeu, cananeu, heteu, girgaseu, heveu ha'e jebuseu kuery guive. Ha'e rami teĩ ha'e kuery amboaxapa raka'e peẽ kuery po py.

¹² Penerenonderã amondouka kanharõ guaxu. Ha'e va'e ma penerenonde gui oipe'apa, mokoĩve amorreu kuery ruxiva va'e voi. Pendekyxe py e'y, penderapa py e'y guive oipe'aa.

¹³ Pëvy ame'ẽ yvy pemba'epoague e'y, ha'e tetã pejapo va'ekue e'y. Ha'e ramo aỹ penderekoa ha'e py. Pe'u pekuapy uva ha'e oliveira'a penhotyague gui e'y", he'i SENHOR.

SENHOR pe ikuai aguã regua ombopyau jevyague

¹⁴ — Ha'e nunga rupi aỹ gui ma SENHOR renonde pendekuai pejererokyjea rupi. Ixupe pendekuai opa mba'e py, pejepe'a e'y re. Ha'e gui pemombopa tuuete ramigua Eufrates rovai ha'e Egipto yvy re peneramoĩ kuery ombojerovia va'ekue, SENHOR pe anho pendekuai.

¹⁵ Ha'e rami avi xapy'a rei pëvy SENHOR pe pendekuai aguã nda'evei ramo aỹve peiporavo marã ramigua pe ete pa peiko aguã: tuuete ramigua Eufrates rovai re peneramoĩ kuery ombojerovia va'ekue pe, e'y vy amorreu kuery ruete kuery pe rive, ha'e kuery yvy re pendekuai vy. Ha'e rã xee ha'e xero pygua kuery ma SENHOR pe ae 'rã roiko — he'i.

¹⁶ Ha'e ramo heta va'e kuery ombovai vy aipoe'i:

— Nda'evei ete SENHOR gui rojepe'a aguã tuuete mboae kuery pe rive orekuai aguã.

¹⁷ Mba'eta SENHOR ae ma Nhanderuete. Ha'e ma Egipto yvy gui nhande ha'e nhaneramoĩ kuery nhanerenoẽ va'ekue, escravo nhandekuaigae gui. Ojapo guive hexa pyrã tuvixa va'e jaexa va'e, ha'e gui opa rupi tape jaguataa rupi opena porã nhandere, amboae regua kuery ikuaiã rupi roaxaa rupi guive.

¹⁸ Nhanerenoẽ gui SENHOR oipe'a va'ekue ha'e va'e kuery ha'e javi, amorreu kuery kova'e yvy re ikuai va'ekue voi. Ha'e nunga rupi ore kuery voi orekuai 'rã SENHOR pe, ha'e ae ma Nhanderuete oiko ramo — he'i okuapy.

¹⁹ Josué aipoe'ive ju heta va'e kuery pe:

— Nda'evei 'rã ko SENHOR pe pendekuai aguã, mba'eta Nhanderuete ma icky'a e'y va'e. Ha'e ma oipota hexe anho pejerovia. Ha'e rami vy ixupe pendereko vai ramo nombogui 'rã pejejavyague.

²⁰ Mba'eta SENHOR pe peikoa gui pejepe'a vy tuuete amboae ramigua pe ju pendekuai ramo ha'e onhemoiingo 'rã peẽ kuery rovai, penemoiingo axy 'rã penemokanhymba peve, peẽ kuery pe ojapo porã ranhe rire teĩ — he'i.

²¹ Ha'e rami rã heta va'e kuery ombovai:

— Any ri, SENHOR pe 'rã orekuai — he'i okuapy.

²² Ha'e gui Josué aipoe'i heta va'e kuery pe:

— Ha'e rami vy peẽ kuery ma penderovai ae peikuaa uka SENHOR peiporavao rami, ixupe pendekuai aguã. Ombovai vy

— Tá, ha'e rami ae roikuaa uka — he'i okuapy.

²³ Josué aipoe'i:

— Ha'e rami vy aỹ pemombopa tuuete amboae ramigua penembyte ikuai va'e, ha'e pendepy'a re pemoĩ SENHOR Israel kuery Ruete pe anho peiko aguã.

²⁴ Heta va'e kuery ombovai Josué pe:

— SENHOR Nhanderuete pe orekuai 'rã, ha'e ijayvu rã ronhe'ẽ rendu 'rã guive — he'i okuapy.

²⁵ Ha'e rami py ha'e va'e ára Siquém py Josué heta va'e kuery reve ojapo SENHOR pe ikuai aguã regua. Ha'e kuery pe oeja ha'e rami ae ikuai aguã.

*

Ita nhomoma'endu'aarã omopu'ãague

²⁶ Ha'e ramigua ayvu Josué ombopara kuaxia para Nhanderuete guigua lei oĩa va'e re. Ha'e gui petei ita tuvixa va'e ojopy vy omopu'ã imo'amy ha'e py, yvyra carvalho SENHOR pegua henda iky'a e'ỹ va'e py hi'aĩ va'e guy py.

²⁷ Ha'e vy heta va'e kuery pavẽ pe Josué aipoe'i:

— Ma'ẽ, kova'e ita ma penema'endu'a aguã oĩ, mba'eta hexei ha'e va'e ayvu ha'e javi SENHOR omombe'u. Ha'e va'e ma penemoma'endu'a 'rã Penderuete pe pendeapu e'ỹ aguã — he'i.

²⁸ Ha'e gui Josué omondoukapa ju heta va'e kuery, petei-teĩ hekoa katy.

Juízes 2.6-9

²⁹ Ha'e va'e nunga oiko rire SENHOR rembiguai Num ra'y Josué omano, cento e dez ma'etỹ re ma oikoa py.

³⁰ Ha'e ramo ijyvy re ae onhono porãa, Timnate-Sera, Efraim regua yvyty reia re oĩ va'e py, Gaás yvyty regua kuaray ijapu'a'ia katy.

³¹ Josué oikovea pukukue re Israel kuery ikuai SENHOR pe, ha'e gui Josué ndoikovevei ma rire nhomongeta va'ety kuery ikuai pukukue re ju, Israel kuery pe SENHOR ojapo va'ekue oikuaapa va'e ramo.

³² Ha'e gui José kãgue Israel kuery Egito yvy gui ogueru va'ekue ma Siquém yvy re ojaty inony. Yvy Siquém ru Hamor ra'y kuery gui cem hatã'i va'e prata guigua re Jacó ojogua va'ekue py ae onhono porã. Ha'e rami rire ha'e va'e yvy ma José ramymino kuery mba'erã itui.

³³ Arão ra'y Eleazar omano avi ramo onhono porãa Gibeá py. Ha'e va'e yvy Efraim regua yvyty reia re oĩ va'e ma ta'y Finéias peguarã ome'ẽ mbyre.

Joguerekoa juiz kuery opena jave guare oĩa

Joguerekoa juiz kuery opena jave guare oĩa

Josué omano ma ramo Israel kuery “Oeja rivepa guamoĩ kuery Ruete Senhor Egito yvy gui oguenoẽmba va'ekue ri. Ha'e vy ovapa nguete kuery mboae re, ha'e kuerya katy rai'i rupi ikuai va'e kuery ruete re. ... Ha'e nunga rupi Israel kuery rovai Senhor poxya hendy vy omboaxa mba'emo pe'apaa'ã kuery po py. Ha'e rã oi'pe'apa ha'e kuery oguereko va'ekue. Hovaigua kuery ha'e katy'i rupi ikuai va'e kuery po py ae omboaxa ramo ojejopy uka ngovaigua kuery pe. ... Ha'e gui Senhor omoĩ joguerekoarã kuery, mba'emo pe'apaa kuery po gui oepy aguã. ... Joguerekoarã omoĩ va'ekue reve Senhor oiko vy oepypa hovaigua kuery po gui, joguerekoa oikoa pukukue re. Mba'eta ha'e kuery moingo axya ha'e imbojexavai reia kuery káuxa ipoaẽ okuapy. Ha'e nunga Senhor oendu vy omboaxy. Ha'e rami teĩ joguerekoa omano ma rire ha'ekue rami ae ju 'rã ikuai” (2.12a, 14, 16, 18-19a).

Ha'e javi vy treze joguerekoarã Nhanderuete omoĩ raka'e. Ha'e kuery va'e regua ma Gideão ha'e Sansão. Ha'e rami teĩ heta va'e kuery ha'ev'e'ỹa rami anho ikuai. Opa py aipoe'i: “Ha'e va'e jave ma ndoikoĩ huvixave Israel kuery re opena va'erã. Ha'e ramo peteĩ-teĩ ikuai 'rã ha'e kuery ae oipotaa rami rive” (21.25).

Kova'e kuaxia py ijayvua rami vy Nhanderuete pegua kuery ixupe ete ri ikuai vy ikuai porã 'rã. Ha'e rã ndojerovai rei ramo ha'e kuery pe nda'eveĩ 'rã. Jajevy rei teĩ Nhanderuete pe jajapukai ramo nhandeperdoa 'rãe tema.

Cananeu kuery re Judá kuery ipo'akaague

¹ Josué omano rire Israel kuery oporandu okuapy SENHOR pe. Ha'e vy aipoe'i:

— Ore kuery va'e regua mava'e nda'u ha'e ranhe oo 'rã cananeu kuery ikuai py, ha'e kuery rovai opu'ã aguã?

² SENHOR ombovai:

— Judá kuery ma oo 'rã. Mba'eta ha'e kuery po py ma amboaxa ma yvy — he'i.

³ Ha'e ramo Judá kuery aipoe'i guavy kuery Simeão regua pe:

— Jaa ke orerupive jajopy aguã oreyvyrã xorte rupi ome'ẽ mbyre. Nhapu'ã 'rã cananeu kuery rovai. Ha'e va'e rire ore kuery ju 'rã penderupive roo, pendeivyrã xorte rupi ome'ẽ mbyre py — he'i ramo ha'e kuery rupive Simeão kuery oo avi.

⁴ Judá kuery oje'oi rã ipo py SENHOR omboaxa cananeu ha'e ferezeu kuery. Ha'e ramo Bezeque py ojukapa ha'e kuery va'e regua dez mil avakue.

⁵ Bezeque py ma ha'e kuery Adoni-Bezeque ojou vy hexe opu'ã okuapy. Ha'e vy ojuka cananeu ha'e ferezeu kuery.

⁶ Ha'e rã Adoni-Bezeque ma ojava ovy teĩ hakykue oje'oi vy oupity vy ojaya ikuã guaxu jovaive ha'e ipyxã guaxu voi.

⁷ Ha'e ramo Adoni-Bezeque aipoe'i:

— Setenta huvixave ikuai ha'e va'e kuery kuã guaxu ha'e ipyxã guaxu ojapypaa reve omono'õ okuapy va'ekue temb'i'u kure'i xe-mesa guy py. Ha'e gui joe xee ajapoague rami ae Nhanderuete xembopaga avi — he'i.

Ha'e rire Jerusalém py ogueraa ramo omano ha'e py.

⁸ Judá kuery ma Jerusalém rovai ju opu'ã vy ipo'akapa. Ha'e vy ojukapa kyxe py, ha'e tetã re omboja tata.

⁹ Ha'e va'e rire Judá kuery oje'oi ju opu'ã aguã cananeu kuery yvyty áry rupi ikuai va'e re, Neguebe rupi ha'e yvy'ã guy rupi ikuai va'e re.

¹⁰ Ha'e gui cananeu kuery Hebrom py ikuai va'e rovai ju Judá kuery oje'oi. Ha'e va'e rery ypy ma Quiriate-Arba. Ha'e vy Judá kuery ojuka Sesai, Aimã ha'e Talmi.

Josué 15.14-19

¹¹ Ha'e va'e gui ma Debir tetã py ikuai va'e rovai opu'ã aguã ju oje'oi. Ymave ma Debir rery ma Quiriate-Sefer.

¹² Calebe aipoe'i:

— Amongue va'e rei Quiriate-Sefer oitypa vy ipo'aka va'ekue pe ma ame'ẽ 'rã xerajy Acsa ta'yxyrã — he'i.

¹³ Ha'e gui Calebe ryvy Quenaz ra'y Otniel va'e ae ipo'aka tetã re. Ha'e ramo ixupe Calebe ome'ẽ guajy Acsa ta'yxyrã.

¹⁴ Ha'e va'e ma omea py oo vy aipoe'i:

— Tereo xeru pe ejerure peteĩ henda yvy re — he'i. Ha'e gui kunha va'e ae mburika'i áry gui ogejy ramo Calebe oporandu ixupe:

— Mba'e tu reipotã?

¹⁵ Ombovai:

— Eme'ẽ rive xevy peteĩ mba'e. Yvy pirua rive ma xevy reme'ẽ va'ekue ri yvu avi eme'ẽ xevy — he'i ramo ixupe Calebe ome'ẽ yvy'ã re ha'e yvy'ã guy rupi yvu ikuai va'e.

¹⁶ Judá kuery reve Moisés ratyu queneu va'e ra'y kuery oguata avi oje'oivy. Tetã pindoty va'e gui oje'oi Judá regua tekoa e'ÿa peve, Arade rexei kuaray puku-a katy.* Ha'e py oje'oi vy ikuai ha'e pygua kuery reve.

¹⁷ Ha'e gui Judá kuery guvyvy kuery Simeão regua reve oje'oi vy ojukapa cananeu kuery Zefate py ikuai va'ekue, omomba ete. Ha'e nunga rupi ha'e va'e omboerya ju Horma.†

¹⁸ Judá kuery ojopypa avi Gaza, Asquelom ha'e Ecrom, ha'e katy'i rupi vvy ikuai va'e ha'e javi reve.

¹⁹ Judá kuery reve SENHOR oiko ramo oipe'apa vvyty rupi ikuai va'ekue. Ha'e rã vvyguua re ikuai va'e ma ndoipe'a kuaai, karóxa ferro guigua ha'e kuery oguereko ramo.

²⁰ Ha'e gui Moisés ijayvuague rami vy Calebe pe omboaxaa Hebrom tetã. Ha'e ramo ha'e gui Calebe oipe'apa Enaque ra'y kuery mboapy ikuai va'ekue.

²¹ Ha'e rã Benjamim kuery ma ndoipe'a reguai jebuseu kuery Jerusalém py ikuai va'e. Ha'e rami 'rãgue py Benjamim kuery reve jebuseu kuery ikuai Jerusalém py ae, aÿ peve.

²² José ramymino kuery voi oje'oi Betel tetã rovai opu'ã aguã. Ha'e ramo ha'e kuery reve SENHOR oiko.

²³ Ha'e rami vy Betel re ha'e kuery omondouka avakue oikuaa pota nhemi aguã. Ha'e va'e tetã omboery pyyague ma Luz.

²⁴ Oikuaa pota va'e kuery oexa okuapy peteĩ ava tetã gui oẽ ovvy rã. Ha'e vvy aipoe'i ixupe:

— Exa uka na orevy tetã katy oikeyaty. Ha'e rami rã romboaxy 'rã — he'i.

²⁵ Ha'e gui tetã katy oikeyaty ha'e oexa uka ramo ha'e kuery ojukapa tetã pygua kuery kyxe py. Ha'e rã ha'e va'e ava hoo pygua kuery reve ma ndojukai.

²⁶ Ha'e ramo heteu kuery vvy re ju ava va'e oo vy peteĩ tetã ojapo ha'e py, ha'e omboery Luz. Ha'e va'e ma hery oime aÿ peve.‡

Vvy Israel kuery ndojopypai teri va'ekue re ijayvuague

²⁷ Ha'e gui Manassés kuery ma ndoipe'ai Bete-Seã pygua kuery, neĩ Taanaque, Dor, Ibleão, neĩ Megido pygua kuery, neĩ ha'e katy'i rupi tekoa ikuai va'e pygua kuery, mba'eta cananeu kuery oi atãve okuapy ovvy re ae ikuai aguã.

²⁸ Israel kuery imbaraeteve ma vy omomba'eapo nhea'ã cananeu kuery. Ha'e rami teĩ ndoipe'apai.

²⁹ Efraim kuery ma ndoipe'ai cananeu kuery Gezer py ikuai va'e. Ha'e ramo ha'e kuery reve ikuai tema Gezer py ae.

³⁰ Zebulom kuery ma ndoipe'ai avi Quitrom neĩ Naalol py ikuai va'e. Ha'e ramo cananeu kuery ikuai tema ha'e kuery reve, omba'eapo nhea'ã aguã rami ikuai.

³¹ Aser kuery ma ndoipe'ai Aco py ikuai va'e, neĩ Sidom, Alabe, Aczibe, Helba, Afeca, neĩ Reobe pygua kuery voi.

³² Ha'e rami rire Aser kuery ma cananeu kuery mbyte rupi ae ikuai ha'e va'e vvy re, ndoipe'apai rire.

³³ Naftali kuery ma ndoipe'ai Bete-Semes pygua kuery, neĩ Bete-Anate pygua kuery voi. Ha'e rami vy cananeu kuery mbyte rupi ikuai tema ha'e va'e vvy re. Ha'e rã Bete-Semes ha'e Bete-Anate pygua kuery ma omomba'eapo nhea'ã.

³⁴ Ha'e gui amorreu kuery ojapo Dã kuery vvy'ã rupi anho ikuai aguã rami, vvy'ã guy katy oguejy e'ÿ aguã.

³⁵ Ha'e rami ae avi amorreu kuery onhea'ã okuapy Heres vvyty re ikuai aguã, Aijalom ha'e Saalabim re. Ha'e rami teĩ José ramymino kuery ipo'aka nho vy omomba'eapo nhea'ã.

³⁶ Amorreu kuery ikuai apy ma Acrabim ha'e Sela guive oo oiny vvy'ã katy.

2

Israel kuery pe Nhanderueté ijayvu atãague

¹ Ha'e gui SENHOR-a guigua anjo ma Gilgal gui oẽ vy oo Boquim tetã py. Ha'e vvy aipoe'i:

— Ajapo raka'e Egitó gui peẽmba aguã rami, ha'e rogueru vvy aura reve peneramoĩ kuery pe ame'ẽ aguã re ju. Xee aipoa'e va'ekue: “Nambovaipai 'rã xereve guarã peẽ kuery reve ajapo va'ekue.

² Ha'e rã peẽ ma nda'evei kova'e vvy regua kuery reve pejapo aguã peteĩ rami pendekuai aguã. Ha'e rami 'rãgue py peitypa 'rã ha'e kuery altar ikuai va'e”, ha'e va'ekue ri peẽ naxenhe'ẽ rendui. Mba'e re tu ha'e rami pejapo?

³ Ha'e nunga rupi xee aipoa'e avi: “Xee ma ndaie'ai 'rã ha'e kuery penerenonde gui. Ha'e rami 'rãgue py penderovaigua riae 'rã ikuai, ha'e tuuete ramigua ikuai va'e voi nhuã penembo'aarã 'rã ikuai”, ha'e va'ekue — he'i.

⁴ SENHOR-a guigua anjo ha'e rami Israel kuery ha'e javi pe ijayvu ramo ha'e kuery onhendu atã vy ojae'o okuapy.

⁵ Ha'e nunga rupi ha'e va'e henda omboery Boquim.* Ha'e gui ha'e py mba'emo ome'ẽ okuapy SENHOR pe. Josué 24.29-31

⁶ Josué heta va'e kuery omondoukapa rã Israel kuery peteĩ-teĩ regua oje'oi ovvyrã ojopy aguã katy.

⁷ Josué oikoa pukukue re ma SENHOR pe anho heta va'e kuery ikuai, ha'e gui Josué ndoikovei ma rire nhomongeta va'ety kuery ikuai pukukue re ju. Ha'e va'e kuery ma Israel kuery pe SENHOR mba'emo porã tuvixa va'e ojapo rã oexapa va'ekue.

* 1:16 Tetã pindoty ma Jericó ae (Deuteronomio 34.3, 2 Crônicas 28.15). † 1:17 Tery Horma ma “Ombovaipague” 'ea. ‡ 1:26 Tery

Luz ma “Amẽndoa'y” 'ea ha'e kuery ayvu py. * 2:5 Tery Boquim ma “Ojae'oa” 'ea.

⁸ Ha'e gui ma Num ra'y Josué SENHOR rembiguai va'e omano, cento e dez ma'et'y ma oguerekoa py.

⁹ Ha'e ramo onhono porãa ijyvy apy re ae, Timnate-Heres py, Efraim kuery yvy re yvyty oĩ va'e re, Gaás yvyty regua kuaray ijapu'a'ia katy.

¹⁰ Ha'e va'e javegua kuery ha'e javi avi omano rã ogueraa tuu kuerya py. Ha'e va'e kuery rire ma ta'y ha'e taji kuery ju ikuai SENHOR oikuaa e'y va'e, neĩ Israel kuery pe mba'emo porã ojapo va'ekue voi ndoikuaai okuapy.

¹¹ Ha'e rami vy SENHOR renonde Israel kuery ojapo okuapy ha'eve'y va'e, Baal ra'angaa ikuai va'e re rive ikuai vy.

¹² Oeja rivepa guamoĩ kuery Ruete SENHOR Egito yvy gui oguenoẽmba va'ekue ri. Ha'e vy ovapa nguete kuery mboae re, ha'e kuerya katy rai'i rupi ikuai va'e kuery ruete re. Ha'e nunga rive ha'e kuery omboete vy ombopoxy SENHOR,

¹³ SENHOR gui ojepe'apa vy Baal ha'e Astarote pe rive ikuai py.

¹⁴ Ha'e nunga rupi Israel kuery rovai SENHOR poxya hendy vy omboaxa mba'emo pe'apara kuery po py. Ha'e rã oipe'apa ha'e kuery oguereko va'ekue. Hovaigua kuery ha'e katy'i rupi ikuai va'e kuery po py ae omboaxa ramo ojejopy uka ngovaigua kuery pe.

¹⁵ Ha'e kuery rovai tema SENHOR po oĩ oje'oiã rupi rei. Ha'e kuery re ma mba'emo vai anho SENHOR ombou, oura reve ijayvuague rami vy. Ha'e rami rã ojexavai ete okuapy.

¹⁶ Ha'e gui SENHOR omoĩ joguerekoarã kuery, mba'emo pe'apaa kuery po gui oepy aguã.

¹⁷ Ha'e rami teĩ nonhe'ẽ rendui avi okuapy joguerekoa kuery. Ha'e vy ovapa okuapy amboae ramigua tuuete kuery re, ha'e vy omboete okuapy. Ojepe'a pojava guamoĩ kuery SENHOR onhe'ẽ rendua rupi oje'oiague gui. Ha'e vy nda'ikuaivei guamoĩ kuery ikuaiague rami.

¹⁸ Joguerekoarã omoĩ va'ekue reve SENHOR oiko vy oepyapa hovaigua kuery po gui, joguerekoa oikoa pukukue re. Mba'eta ha'e kuery moingo axya ha'e imbojexavai reia kuery káuxa ipoãẽ okuapy. Ha'e nunga SENHOR oendu vy omboaxy.

¹⁹ Ha'e rami teĩ joguerekoa omano ma rire ha'ekue rami ae ju 'rã ikuai. Ha'e vy guamoĩ kuery ikuaiague gui nda'eveive ete ju okuapy, amboae regua tuuete re ovapa, ha'e nunga pe rive ikuai ha'e omboete okuapy. Peteĩ henda py voi ndojepe'ai teko vai ojapo okuapya gui, neĩ ha'eve'yã rami rei ikuaiã gui.

²⁰ Ha'e nunga rupi Israel kuery rovai SENHOR poxya hendy. Ha'e vy aipoe'i:

— Kova'e kuery nda'ikuaĩ ae tamoi kuery pe xereve guarã ajapo va'ekue rupi, naxenhe'ẽ rendui guive.

²¹ Ha'e ramo ha'e kuery renonde gui xee voi ndaĩpe'avei 'rã amboae regua kuery, Josué omano vy oeja rive va'ekue rembyre.

²² Ha'e rami 'rãgue py ha'e va'e regua aeja 'rã Israel kuery aeko a'ã aguã, aikuaa aguã SENHOR guigua tape rupi tamoi kuery ikuaiague rami ikuai 'rãa, tyrã pa anya — he'i.

²³ Ha'e rami vy ha'e kuery mbyte py SENHOR oeja amboae regua kuery, ndoipe'a voi, neĩ nomboaxapai guive Josué po py.

3

Israel kuery mbyte amboae rami rei onhembo'ea rupi ikuai va'e re ijayvuague

¹ Pova'e regua kuery ma SENHOR oeja va'ekue Israel kuery oa'anga aguã, mba'eta Israel kuery pavẽ e'y oikuaa Canaã yvy re joe opu'ãa katy oo aguã.

² Ha'e rami ojapo Israel kuery joe opu'ã aguã oikuaa e'y teri va'ekue-'ekue ombo'e vy.

³ Ijyvy re oeja va'ekue ma peteĩ nhĩruĩ filisteu regua yvatekueve va'e, ha'e cananeu kuery ha'e javi, Sidom tetã pygua ha'e heveu kuery Líbano yvy'ã re ikuai va'e, Baal-Hermom yvy'ã guive Hamate katy oikoa peve.

⁴ Ha'e va'e kuery opyta SENHOR oeko a'ã aguã Israel kuery, oikuaa aguã ha'e kuery ojapyxaka 'rã paa tamoi kuery pe Moisés rupi ojapo uka va'ekue re.

⁵ Ha'e ramo Israel kuery ma heteu kuery mbyte rupi, amorreu, ferezeu, heveu ha'e jebuseu kuery mbyte rupi ikuai vy

⁶ gua'yxyrã ogueraa ha'e va'e regua rajy kuery, ha'e guajy kuery omomenda ha'e va'e regua ra'y kuery re. Ha'e kuery ruete kuery omboete avi okuapy.

Cusã-Risataim po gui Otniel Israel kuery oepyague

⁷ SENHOR renonde rupi Israel kuery ha'eve'yã rami ikuai, hexaraipa SENHOR nguete gui. Ha'e vy omboete okuapy Baal ra'angaa ikuai va'e ha'e yvyra aygue gui ta'angara omopu'ã mbyre.

⁸ Ha'e ramo ha'e kuery rovai SENHOR poxya hendy vy omboaxapa Mesopotãmia pygua huvixa Cusã-Risataim po py. Ha'e ramo oito ma'et'y re Cusã-Risataim rembiguai ikuai.

⁹ Ha'e gui SENHOR pe Israel kuery ojapukai okuapy ramo hepyarã ombou Calebe ryvy Quenaz ra'y Otniel. Ha'e ramo oepy.

¹⁰ Ha'e va'e re SENHOR guigua Nhe'ẽ ou ramo oikuaa pota Israel kuery re. Joe opu'ã aguã katy ha'e oo ramo ipo py SENHOR omboaxa Mesopotãmia pygua huvixa Cusã-Risataim. Ha'e ramo Otniel ipo'aka hexe.

¹¹ Ha'e rami rire quarenta ma'et'y re opyty'upaa yvy re. Ha'e gui ma Quenaz ra'y Otniel omano.

Eglom rembiguai ranhe ha'e kuery ikuaiague

¹² Peteĩgue ju Israel kuery ha'eve'yã ramigua ikuai SENHOR renonde. Ha'e ramo Israel kuery re SENHOR ombopo'aka Moabe pygua huvixa Eglom, henonde ha'eve'yã rami ikuai rive.

¹³ Ha'e va'e ma ojea py omboaty Amom ha'e Amaleque kuery. Ha'e kuery reve oje'oi vy ojuka Israel kuery regua. Tetã pindoty va'e re avi ipo'aka.

¹⁴ Dezoito ma'etÿ re Israel kuery ikuai Moabe pygua huvixa Eglom va'e rembiguai.

Eúde joepy jevyague

¹⁵ Ha'e gui SENHOR pe Israel kuery ojapukai okuapy ramo hepyarã ombou peteï ava ijaxu va'e, Benjamim regua Gera ra'y Eúde. Ha'e va'e po rupi Israel kuery omondouka perãta Moabe pygua kuery ruvixa Eglom pe omboaxa va'erã.

¹⁶ Ha'e rã Eúde ma peteï kyxe haimbe jovai va'e ojapo, ijyva ku'a peve ipuku-a va'e. Ha'e va'e ma oku'a oiporu kuaa re omoï, oao guy rupi.

¹⁷ Ogueraa avi perãta Moabe pygua kuery ruvixa Eglom pe ome'ẽ va'erã. Eglom ma ava guaxu rei.

¹⁸ Perãta ogueru va'ekue ome'ẽ rire ma omondoukapa ju avakue ngupivegua, ha'e kuery reve oẽ avi ranhe.

¹⁹ Ha'e gui Gilgal py ta'angaa ikuai peve oague gui ojevy ju. Ha'e vy aipoe'i huvixa pe:

— Xeruvixa, xee areko peteï ayvu xee ae'i aikuaa va'e ndevy guarã.

Huvixa ombovai vy

— Ekyrirĩ ranhe — he'i vy guenonde gui omondoukapa ijyvÿry ikuai va'ekue.

²⁰ Yro'yxãvea'i jave ramo huvixa oguapy oiny peteï opy ja'o'i py. Oĩa py Eúde oïke vy aipoe'i:

— Areko peteï ayvu Nhanduerete guigua ndevy amombe'u va'erã — he'i ramo Eglom opu'ã tenda oĩa gui.

²¹ Ha'e ramo Eúde oaxua regua okuave'ẽ vy oekyi kyxe oyke oiporu kuaa regua gui, ha'e oipyxo hye py.

²² Haimbea reve hi'y voi oïke, ha'e hye gui kyxe ndoekyi ramo ikyra onhembotpya hi'ãry. Ha'e gui Eúde ma okẽ'i oï va'e rupi oẽ vy

²³ oaxa ovy oïkeaty rupi, okẽ ombotpya vy ojoko rire.

²⁴ Ha'e oo ma rire ou huvixa rembiguai kuery. Ha'e kuery oma'ẽ rã opy yro'yxãvea'i rokẽ ojokoa ra'e imoiny. Ha'e ramo “Opy yro'yxãvea'i py po opytu'u oiny” he'i ranhe.

²⁵ Ha'e gui noarõxevei ma okuapy vy opy katygua okẽ ndoipe'a reguai vy ipe'aa ogueru vy oipe'a. Ha'e gui oexa rã huvixa re'õgue ipukupu oupy yvy rupi.

²⁶ Ha'e kuery ikuai area ja Eúde oo jepe. Ta'angaa ojapo pyre ikuai rupi oaxa vy Seirã katy oo.

²⁷ Ha'e py ovaẽ vy omõnhe'ẽ mimby guaxu Efraim regua vyvty reia rupi. Ha'e rã Israel kuery ogeuejy oje'oivy hupive, tenonde ha'e oo ramo.

²⁸ Ha'e kuery pe aipoe'i:

— Jaa ke xerupive, mba'eta pendepo py SENHOR omboaxa ma penderovaigua kuery Moabe pygua — he'i. Ha'e ramo hakykue oje'oi vy ojoko Jordão yakã oaxaaty, Moabe pygua kuery oaxa e'y aguã. Ha'e kuery va'e regua neï peteïve nombõaxai.

²⁹ Ha'e va'e jave py ojuka dez mil avakue Moabe pygua kuery regua, imbaraetekue ha'e ipy'a guaxukue meme. Peteïve ndoo jepei.

³⁰ Ha'e rami py ha'e va'e ára Israel kuery ipo'aka okuapy Moabe re. Ha'e ramo yvy re opytu'upa oitenta ma'etÿ re.

³¹ Ha'e va'e rire ma oïko avi Anate ra'y Sangar. Ha'e va'e ma peteï toro mondyia py ojuka seiscentos avakue filisteu regua. Ha'e rami vy ha'e voi oepy Israel kuery.

4

Canaã pygua huvixa Jabim rembiguai ha'e kuery ikuaiague

¹ Eúde omano rire ma peteïgue ju Israel kuery ha'eve'yã rami ikuai SENHOR renonde.

² Ha'e ramo SENHOR omboaxapa Canaã pygua huvixa Jabim po py. Ha'e va'e openaa ma Azor tetã. Ixupegua xondaro kuery ruvixa ma Harosete-Hagoim pygua Sísera hery va'e.

³ Ha'e gui Israel kuery ojapukai okuapy SENHOR pe, mba'eta Jabim ma novecentos karõxa ferro guigua oguereko va'e reve vinte ma'etÿ re ma oguereko axy.

Débora ha'e Baraque joepyague

⁴ Ha'e va'e jave Israel kuery oguereko oïkovy va'e ma peteï profeta kunha Lapidote ra'yxy Débora hery va'e.

⁵ Débora ma peteï pindo hi'ã va'e “Débora oiaty” 'epy va'e guy py opena oiny, Ramá ha'e Betel mbyte py Efraim regua yvy'ã reia py. Ha'e oĩa py Israel kuery jogueru 'rã mba'emo re oikuaa pota aguã.

⁶ Ha'e gui ha'e va'e kunha va'e oenõi uka Abinoão ra'y Baraque, Naftali regua Quedes tetã py oïkoa gui. Ha'e vy aipoe'i ixupe:

— SENHOR Israel kuery ruete nda'u ndevy ijayvu vy aipo nde'i raka'e: “Tereo, eraa avakue Tabor vyvty peve. Dez mil avakue eraa Naftali ha'e Zebulom kuery regua.

⁷ Ha'e gui xee ajapo 'rã ndea py Quisom yakã'i py Jabim pegua xondaro kuery ruvixa Sísera va'e ou aguã rami, karõxa ha'e xondaro kuery reve, ha'e amboaxapa 'rã ndepo py”, nde'i pa?

⁸ Ha'e rã Baraque aipoe'i:

— Xerupive ndee reo ramo ma aa 'rã. Ha'e rã xerupive ndereoi ramo ma xee ndaai 'rã — he'i.

⁹ Kunha va'e ombovai:

— Anhetẽ aa 'rã nderupive, teï ndee e'y 'rã nembroetea joe nhapu'ã aguã katy jaa rire. Mba'eta SENHOR omboaxa 'rã Sísera peteï kunha va'e po py — he'i. Ha'e vy Débora ojepe'a vy Baraque reve jogueraa Quedes katy.

¹⁰ Quedes py ma Baraque oenoĩ Zebulom ha'e Naftali kuery va'e regua. Ha'e rã hupive oje'oi dez mil avakue. Débora voi oo avi hupive.

¹¹ Quedes katy'i oiko avi peteĩ ava queneu regua Héber hery va'e. Ha'e va'e ma queneu kuery Moisés ratyu Hobabe ramymino kuerya ikuaiã gui ojepe'a ma vy Zaananim katy'i ojapo va'ekue ngorã, yvyra carvalho hi'aĩ va'e guy py.

¹² Ha'e gui Sísera pe omombe'ua rã oikuaa Tabor yvyty katy Abinoão ra'y Baraque oo maa.

¹³ Ha'e rami vy Sísera ogueru rukapa karóxa ha'e javi, novecientos karóxa ferro guigua meme, ha'e hexeve ikuai va'e ha'e javi, Harosete-Hagoim gui ogueraapa Quisom yakã'i peve.

¹⁴ Ha'e ramo Débora aipoe'i Baraque pe:

— Epu'ã ke, mba'eta kova'e árave SENHOR omboaxa 'rã Sísera ndepo py. Xapy'a rei nda'u SENHOR ndooi ri nerenonde rupi? — he'i. Ha'e ramo Baraque ma Tabor yvyty gui oguejy ovy, ngupivegua dez mil avakue reve.

¹⁵ Ha'e gui Baraque rupivegua kuery kyxe reve ovaẽ ramo SENHOR oitypa Sísera, karóxa ha'e xondaro kuery ha'e javi. Ha'e rã Sísera ma karóxa gui opo vy onha ovy yvy rupi.

¹⁶ Baraque ma karóxa ha'e xondaro kuery rakykue monha Harosete-Hagoim peve. Ha'e rami py Sísera pegua xondaro kuery oitypa kyxe py, nei peteive ndoo jepei.

Jael ojukaague Sísera

¹⁷ Ha'e gui Sísera ma vvy rupi onha ovy vy ovaẽ queneu regua Héber ro py, mba'eta peteĩ rami ikuai Hazor pygua huvixa Jabim ha'e queneu regua Héber ro pygua kuery reve. Ha'e gui Héber ra'yxy Jael oia py ovaẽ ramo

¹⁸ Jael oẽ ovy Sísera ovaexĩ vy. Ha'e vy aipoe'i iuxpe:

— Eike ke, xeruvixa. Eike na xero py, ekyje eme — he'i. Ha'e ramo opy ovaẽ ramo kunha va'e onhovã peteĩ nheovã py.

¹⁹ Ava va'e aipoe'i iuxpe:

— Ajerure ndevy, eme'ẽ na xevy ruxã'i yy ay'u aguã, xey'uvei ramo.

Ha'e rã kunha va'e ma kamby ryrú oipe'a vy kamby ome'ẽ oy'u aguã. Ha'e va'e rire onhovã ju.

²⁰ Ha'e gui ava va'e aipoe'ive ju iuxpe:

— He'ã ke okẽ py. Xapy'a rei amongue ou rã oporandu vy “Oĩa pa?” 'ea ramo “Any” 're 'rã — he'i.

²¹ Ha'e ramo Héber ra'yxy Jael ma peteĩ yvyra rakua oguy pygua ha'e peteĩ karavo mbotaa ogueru vy oo mbegue'i ava va'e onhenoa py. Ha'e rami vy hexapy kã rexe'i ombota yvyra rakua, oaxa vy yvy re oike aguã peve, mba'eta oke rana oupy, ikane'õ vaipa vy. Ha'e rami vy omano.

²² Ha'e gui Sísera rakykue Baraque oo rã Jael oexa vy oẽ ju ovaexĩ vy. Ha'e vy aipoe'i iuxpe:

— Eju, aexa uka 'rã ava reka va'ekue — he'i ramo oo hakykue'i. Ha'e vy oexa rã Sísera omano ra'e oupy, yvyra rakua hexapy kã rexe'i oĩ reve.

²³ Ha'e rami py ha'e va'e ára Israel kuery renonde Nhanderuete omo'yvyĩ'i Canaã pygua huvixa Jabim.

²⁴ Ha'e gui Canaã pygua huvixa Jabim kuery re Israel kuery ipo'akave tema oje'oivy, omomba peve.

5

Débora oporaeiague

¹ Ha'e va'e ára Débora ha'e Abinoão ra'y Baraque reve oporaei vy aipoe'i:

² — Israel kuery renonde huvixa kuery onhemoĩmba, ha'e heta va'e kuery onhenhandua rupi ojeko me'ẽmba ramo penema'endu'a porã SENHOR re.

³ Pendu ke, huvixa kuery. Pejapyxaka, yvatekueve:

Xee, xee ae ma aporaei ta SENHOR pe.

Aporaei ta SENHOR Israel kuery Ruete pe.

⁴ Ndee SENHOR, Seir gui reẽ vy, Edom regua nhuũndy guive rejerojy reovy ramo yvy oryryl, yva gui hayvi avi. Tá, arai voi ombo'oky rayvi.

⁵ SENHOR renonde rupi yvyty ikuai va'e omy-omyĩ, yvyty Sinai voi, SENHOR Israel kuery Ruete renonde.

⁶ Anate ra'y Sangar oiko jave, Jael avi oiko jave ma ndoaxavei mba'emo vendea kuery. Oguata va'e kuery voi opia oje'oivy tape vaikue rupi.*

⁷ Israel yvy re tekoa ikuai va'ekue tekoa e'ya opyta, okyryrĩmba rei, xee Débora apu'ã peve, Israel kuery va'e regua xy aiko va'e apu'ã.

⁸ Nguuete pyaurã Israel kuery ojou ramo hetã kora rokẽ py oiko joe opu'ã va'e. Israel kuery quarenta mil ikuai va'eri

* 5:6 Ha'e kuery okyjepa rei Canaã pygua huvixa Jabim ha'e iuxpegua xondaro ruvixa Sísera gui. Ha'e nunga rupi ndoguatavei tape rupi, ha'e guekoa voi oaja reipa.

- ha'e kuery mbyte py ndojoui hu'y jokoa neĩ hu'y guaxu.
- ⁹ Xekuraxô oo Israel regua xondaro kuery ruvixa re,
heta va'e kuery rerekoarã onhenhandua rupi onhemoĩ ramo.
Penema'endu'a porã SENHOR re!
- ¹⁰ Peẽ kuery mburika xiĩ va'e áry peĩ va'e,
peikuaa potaa py peguapy va'e,
ha'e tape rupi peguata va'e voi pendeayvu avi ha'e nunga re.
- ¹¹ Yy rerua kuery oporaei va'e,
mymba kuery oy'uaty yakã ikuai va'e mbyte rupi
pendeayvu SENHOR gueko porãa rupi ojapo va'e re,
mba'eta gueko porãa rupi oipytyvõ Israel re hekoe va'e.
Ha'e rami rire SENHOR pegua kuery
ha'eve ju ngoo katy ojevyy aguã.
- ¹² Emyĩ ke Débora, emyĩ ke.
Evy ke, ekeve eme, emonhendu mboraei.
Epu'ã ke Baraque, ndee Abinoão ra'y,
eraapa ke ndejoyyare kuery rejokua reve.
- ¹³ Ha'e ramo oguejy avi yvatekueve rembyre,
SENHOR pegua kuery xereve guarã oje'oi ipo'akakueve rovai.
- ¹⁴ Efraim kuery va'e regua Amaleque yvy yma guare re ikuai va'e
ma joe opu'ãa katy oguejy jogueravy.
Ha'e gui ndee Débora nderakykue
oje'oi avi Benjamim regua guetarã kuery reve.
Maquir gui oguejy xondaro ruvixa kuery,
Zebulom gui voi ou po pygua ojopy reve jogueraa va'e kuery.
- ¹⁵ Issacar regua yvatekueve voi Débora rupive oje'oi.
Issacar kuery ma Baraque rupive oje'oi,
hakykue oguejy jogueravy yvy'ã guy katy.
Ha'e rã Rúben kuery va'e regua mbyte ma
joo rami e'y-e'y ijayvu okuapy.
- ¹⁶ Mba'e re tu vaka kora rupi ri pepyta pekuapy
mimby pu pendua py rive?
Rúben regua joo rami e'y-e'y ijayvu okuapy.
- ¹⁷ Gileade pygua kuery voi Jordão yakã rovai re opyta.
Ha'e Dã kuery, mba'e re tu kanoã guaxu yv'yry opyta okuapy?
Aser kuery voi oguapypa okuapy ye'ẽ rembe re,
opytu'u porã okuapy ye'ẽ rakã pa'ũ py.
- ¹⁸ Ha'e rã Zebulom kuery va'e regua ma ndojeayvuveikue py oo,
Naftali kuery voi nhuũndy yvy'ã re oje'oi.
- ¹⁹ Ha'e gui huvixave kuery ono'õ vy joe opu'ã okuapy.
Canaã pygua huvixa kuery opu'ã okuapy Taanaque py,
Megido yy yv'yry.
Ha'e rami teĩ prata guigua mba'eve ndogueraai omba'erã.
- ²⁰ Mba'eta yva guive ma voi jaxy-tata opu'ã okuapy Sísera rovai,
oaxa ovyva rupi ae opu'ã.
- ²¹ Quisom yakã voi ogueroxyrpa,
Quisom yakã opu'ã jepiaty ae.
Xenhe'ẽ, ejerojyve tema, nembraete ke.
- ²² Ha'e ramo kavaju kuery ipyambu onhaa rupi,
hi'árygua kuery joe opu'ã aguã katy ogueronha ramo.
- ²³ SENHOR-a guigua anjo aipoe'i: "Pendeayvu vai ke Meroz tetã re.
Pendeayvu vai ha'e py ikuai va'e re,
mba'eta ha'e kuery ma SENHOR jogueraa jepe aguã katy ndooi rire,
SENHOR jogueraa jepe aguã katy ndooi ixupegua ipy'a guaxukueve reve", he'i.
- ²⁴ Ha'e rã Jael ma kunhague mboae gui ayvu porãvepy toiko,
queneu regua Héber ra'yxy va'e.
Ayvu porãvepy toiko kunhague oguy py ikuai va'e ha'e javi gui.
- ²⁵ Mba'eta ava va'e ovaẽ vy yy re ojerure ramo ixupe ome'ẽ kamby.
Karo yvatekueve pegua va'e py ae ome'ẽ kamby nhandykue.
- ²⁶ Ha'e gui okuave'ẽ yvyra rakua ituia katy,
oiporu kuaa regua re okuave'ẽ omba'eapo va'e kuery karavo ombotaaty re.
Ha'e vy Sísera re ombota vy
ombovo inhakã,
ombokua vy omboaxa inhakã rupi.

- ²⁷ Ha'e rā kunha va'e py yvy'iry ojero'a,
ho'a vy ipukupa oupy.
Ipy yvy'ry ojero'a vy ho'a.
Ojero'aa pyve ho'a vy omano.
- ²⁸ Ha'e gui ma Sísera xykue'i ma janela joko'a pa'ũ rupi oma'ẽ ho'amý.
Ha'e vy janela gui haxẽ reve aipoe'i:
“Mba'e re tu ikaróxa ndou voi ri?
Mba'e re tu hymba kavaju kuery ndoguata pojavai ri?” he'i.
- ²⁹ Ha'e rā kunhague hi'arandukueve ombovai okuapy,
ha'e rā ha'e voi ombovai ojeupe ae:
- ³⁰ “Ndojoui 'rā ri nda'u, nomboja'oi 'rā ri nda'u mba'emo oipe'apa va'ekue?
Peteĩ-teĩ ava pe peteĩ e'ỹ vy mokoĩ kunhataĩ nome'ẽi 'rā ri ty'y?
Ha'e gui Sísera peguarã ae ma opyta 'rā ajukue joegua e'ỹ-e'ỹ pytã va'e,
ha'e ramo peteĩ e'ỹ vy mokoĩ ajukue ombojeguapa pyre e'ỹ nda'u
gua'yxy aju'y re omói 'rã?” he'i.
- ³¹ Ha'e rami ae SENHOR, tomanomba nderovaigua kuery ha'e javi.
Ha'e rā nderayvua kuery ma
kuaray hexakã ouvya rami taexakã — he'i.
Ha'e rami rire yvy re opytu'upa quarenta ma'etỹ re.

6

Midiã pygua kuery Israel kuery ojavyky reiaque

- ¹ Israel kuery ha'eve'ỹ va'e ojapo SENHOR renonde. Ha'e nunga rupi SENHOR sete ma'etỹ re omboaxa Midiã pygua kuery po py.
- ² Israel kuery re Midiã pygua kuery ipo'akapave tema oje'oi'vy ramo ha'e kuery gui onhemi atyrã ojapo okuapy yvy'ã re itavape guy ha'e itakua oĩ va'e rupi, ha'e tetã ikorapa va'e py.
- ³ Mba'eta Israel kuery oma'etỹ nhavõ Midiã pygua kuery, amalequita ha'e kuaray oua katyguá kuery regua opu'ã 'rã jogueruvy ha'e kuery rovai.
- ⁴ Ha'e vy ha'e kuery rovai ono'õ vy omomba 'rã mba'emo aju yvy re ikuai va'e Gaza katy'i peve. Israel kuery pe mba'eve ndoejai ho'u va'erã. Oipe'a avi 'rã hymba kuery vexa'i, vaka ha'e mburika'i.
- ⁵ Mba'eta ovaẽ 'rã okuapy guymba kuery ha'e oguy omopu'ã va'erã reve. Tuku-karu rami mbovy e'ỹ reve ou ramo neĩ oipapaa aguã nda'evei, neĩ hymba camelo kuery voi. Ou okuapy yvy regua ombotyguapa aguã.
- ⁶ Ha'e rami rã Israel kuery ikangy ete okuapy Midiã pygua kuery ikuai rã. Ha'e rami vy ha'e kuery ojapukai okuapy SENHOR pe.
- ⁷ Midiã pygua kuery káuxa SENHOR pe Israel kuery ojapukai ramo
- ⁸ SENHOR ombou peteĩ profeta ha'e kuery pe aipoe'i va'erã:
— Po rami SENHOR Israel kuery Ruete ijayvu: “Xee ae ma Egito yvy gui roguerupa va'ekue, escravo pendekuaigué gui roguenoẽ.
- ⁹ Ha'e rami vy rogueraa jepe Egito pygua ha'e penemoingo axya kuery ha'e javi po gui. Penerenonde gui ha'e kuery aipe'a vy pendevy ju ame'ẽ ijyvykue.
- ¹⁰ Ha'e gui aipoa'e: “Xee ma SENHOR nhanenoẽmba raka'e?” he'i okuapy va'eri aỹ ma SENHOR orerejapa, kuery yvy re pendekuai teĩ, ha'e va'ekue ri xeayvu re peẽ kuery ndapejapaxakai.”

Nhanderuete oenoiaque Gideão

- ¹¹ Ha'e gui SENHOR-a guigua anjo ou vy oguapy Ofra py vyvra carvalho hi'ai va'e guy py, Abiezer ra'y Joás yvy re. Ha'e va'e jave ma ta'y Gideão ma uva'a ombiriaty py omoa'yí oiny trigo, Midiã pygua kuery gui onhomi aguã.
- ¹² Ha'e va'e pe SENHOR-a guigua anjo ojexa uka vy aipoe'i:
— SENHOR oiko ndereve, ava ipy'a guaxu va'e — he'i.
- ¹³ Gideão ombovai:
— Ai xeruvixa! SENHOR orereve oiko va'eri mba'e re tu ha'vy orere ou kova'e nunga ha'e javi? Mamo 'rã tu oĩ mba'emo porã ha'e ojapo va'ekue oreru kuery omombe'u va'e ramigua? Mba'eta aipoe'i orevy: “Egito yvy gui e'ỹ ri nda'u SENHOR nhanenoẽmba raka'e?” he'i okuapy va'eri aỹ ma SENHOR orerejapa, oremboaxapa ri Midiã pygua kuery po py — he'i.
- ¹⁴ Ha'e ramo Gideão oĩa katy SENHOR ojere vy aipoe'i:
— Tereo ndere mbaratea oĩ va'e rupi, ha'e eraa jepe Israel kuery Midiã pygua kuery po gui. Xee e'ỹ ri nda'u romondouka? — he'i.
- ¹⁵ Ha'e ramo aipoe'i ixupe:
— Aikore xeruvixa! Mba'e nunga py 'rã tu araa jepe Israel kuery? Ma'ẽ, Manassés kuery ikuai va'e gui xero pygua kuery iporiauve va'e, ha'e gui xee ma xeru ro pygua kuery gui kyrĩve va'e aiko.
- ¹⁶ SENHOR ombovai:
— Ndereve xee aiko ramo ma rejukapa vyvoi 'rã Midiã pygua kuery peteĩ'i ava rami rive — he'i.
- ¹⁷ Gideão aipoe'i ju:

— Xapy'a rei aỹ xejou porã ha'e xemboaxy ri vy ejapo ha'vy mba'emo, ndee ae ri SENHOR ndeayvua reikuaa uka aguã.

¹⁸ Ambe'i ranhe, apy gui ejepe'a eme ajevuy e'ỹa ja, mba'emo nerenonde amoí va'erã aru aguã.

Ombovai vy

— Roarõ 'rã ha'vy rejevuy peve — he'i.

¹⁹ Opy Gideão oike vy oguereko katu peteí kavara'i ha'e peteí rryru trigo gui ojapo mbojape imbovua revegua e'ỹ. Xo'o omoí peteí ajaka py, ha'e rã tykue ma peteí oja py omoí. Ha'e rami vy yvyra carvalho gyy py oĩa py oguerupa vy omoí henonde.

²⁰ Ha'e ramo SENHOR-a guigua anjo aipoe'i ixupe:

— Ejopy xo'o ha'e mbojape imbovua revegua e'ỹ, emoimba peva'e ita áry, ha'e hi'áry enhoẽmba tykue — he'i rã ha'e rami ojapo.

²¹ Ha'e ramo SENHOR-a guigua anjo ma popoka opo py ogueru va'ekue omokuave'ẽ vy omovaẽ xo'o ha'e mbojape imbovua revegua e'ỹ oí va'e re. Ha'e ramo ita gui tata opu'ã vy oapypa vyvoi xo'o ha'e mbojape. Ha'e gui SENHOR-a guigua anjo ojope'a vyvoi henonde gui.

²² Ha'e gui Gideão ma anjo SENHOR-a guigua etea oikuaa vy aipoe'i:

— SENHOR Xeruete, nda'evet eite xevy! Mba'eta xerexa py ae aexa kuri SENHOR-a guigua anjo.

²³ Ha'e rã SENHOR ombovai:

— Toí ndere mby'a porã! Ekyje eme! Neremanoi 'rã ri — he'i.

²⁴ Ha'e ramo SENHOR pe Gideão ojapo peteí altar ha'e py. Ha'e va'e omboery “ SENHOR gui ou mby'a porã.” Aỹ peve ha'e va'e altar oí Ofra py Abiezer ramymino kuery yvy re.

Baal pegua altar Gideão oitypaague

²⁵ Ha'e va'e pyavyve SENHOR aipoe'i ixupe:

— Eraa peteí vaka nderu rymba, ha'e va'e ma toro sete ma'etỹ va'e regua mokoĩa pereko va'e. Ha'e va'e reve eity Baal pegua altar nderu ojapo va'ekue, ha'e ejaya yvyra gui ta'angaarã omo'ã mbyre, altar yvúry hi'ái va'e.

²⁶ Ha'e gui SENHOR Nderuete pe ju ejapo peteí altar. Ha'e va'e yvy'ã apyte áry pyve ejapo, ita py remboupa vy. Ha'e vy toro mokoĩa rejopy vy rejuka ha'e reapy 'rã ome'ẽ mbyrã, ta'angaa'y yxakarã rejaya va'ekue remoendy vy — he'i.

²⁷ Ha'e ramo Gideão dez avakue guembigua'i ikuai va'e ogueraa vy ojapo SENHOR ijyvuague. Ha'e rami teí okyje avi nguu ro pygua kuery ha'e guetã pygua avakue gui. Ha'e rami vy ara py ndojapoi, pyávy anho.

²⁸ Ha'e gui ko'ẽ rai jave ha'e va'e tetã pygua avakue opu'ã vy oexa rã Baal pegua altar oitya ma ra'e, ha'e ijyvyry ta'angaa'y guigua hi'ái va'ekue ojaya ra'e. Ha'e toro mokoĩa va'e voi oapypaa inony altar ojapo va'ekue áry.

²⁹ Ha'e rami vy joupe-upe aipoe'i okuapy:

— Mava'e tu ojapo peva'e nunga?

Ha'e vy oporanduve ha'e oikuaa pota porã ma vy

— Joás ra'y Gideão rima ojapo — he'i okuapy.

³⁰ Ha'e ramo ha'e va'e tetã pygua avakue aipoe'i okuapy Joás pe:

— Eraa na ndera'y apy gui mombyry'i, jajuka aguã. Mba'eta oity altar Baal pegua ha'e ojaya ijyvyry ta'angaa'y hi'ái va'ekue.

³¹ Ha'e ramo Joás aipoe'i hexe opu'ã va'e kuery ha'e javi pe:

— Baal repya rupi ri ty'y pejoguero'a ta? Peẽ ae ri ty'y pepy 'rã? Hepyã rupi joguero'a va'e rei omano 'rã kova'e ko'ẽ re ma voi. Mba'eta tuuete ae ri vy ha'e ae tojepy ixupegua altar oityague re — he'i.

³² Ha'e va'e ára guive Gideão omboerya Jerubaal, mba'eta aipoe'i:

— Baal ae tojepy, ixupegua altar oityague re — 'ea.*

³³ Ha'e gui Midia pygua kuery, amalequita ha'e kuaray oua katy ikuai va'e kuery ono'õmba okuapy. Ha'e vy oupa vy Jezreel yvygua py ikuai.

³⁴ Ha'e ramo Gideão re SENHOR Nhe'ẽ onhemonde ramo omonhe'ẽ atã mimby guaxu. Ha'e ramo Abiezer ramymino kuery oupa oĩa py.

³⁵ Ha'e rami vy guembigua'i kuery omoudouka Manassés regua ikuai ha'e javi rupi, ha'e kuery avi oenoí oĩa py oupa aguã. Aser regua ikuai rupi avi omoudouka guembigua'i, Zebulom ha'e Naftali regua ikuai rupi guive. Ha'e ramo oupa oĩa py.

³⁶ Ha'e gui Gideão aipoe'i Nhanderuete pe:

— Xapy'a rei ndeayvuague rami vy xee rupi ae ri Israel kuery reraa jepe 'rã ramo

³⁷ ma'ẽ, peteí pirekue vexa'i rague amoí 'rã mba'emo moa'yiaty py. Xapy'a rei ha'e va'e re anho ri yxapy oí ramo, ha'e ijyvyry rupi ipiru rei ramo aikuaa 'rã xee rupi ae Israel kuery reraa jepe 'rã, ndeayvuague rami vy — he'i.

³⁸ Ha'e ramo ha'ekue rami oiko, mba'eta ko'ẽgue, ko'ẽ rai ramove Gideão ovy vy vexa'i rague onhami vy yxapykue peteí hy'a omonyẽ.

³⁹ Ha'e gui Gideão aipoe'ive ju:

— Ndevai eme xevy, xeayvuve ju ta pova'e re anho. Aỹ ma ajerure ndevy teĩgue ju rejapo aguã vexa'i rague re xee aikuaa aguã. Tove vexa'i rague anho ta'ipiru, ha'e rã ijyvyry ma ta'ixapypa — he'i.

* 6:32 Tery Jerubaal ma “Baal tojepy”'ea.

⁴⁰ Ha'e ramo ha'ekue rami ae Nhanderuete ojapo ha'e va'e pytũ re. Vexa'i rague anho ipiru oiny, ha'e rã ijyvyry rupi ma vvy inhakũmba xyapy gui.

7

Trezentos avakue reve Gideão oitypaague Midĩa pygua kuery

¹ Ko'ẽ rai ramove Jerubaal Gideão va'e opu'ã, hexeve ikuai va'e ha'e javi reve. Ha'e vvy oje'oi vvy Harode vvy oĩ va'e vyvry ju ikuai. Kuaray ijapu'a'ia katy ikuai Midĩa pygua kuery, Moré vvyty rexei.

² Gideão pe SENHOR aipoe'i:

— Heta ete rima ndereve ikuai va'e, ha'e kuery po py Midĩa pygua kuery amboaxa aguã. Ha'e rami va'e rire xerovai Israel kuery onhemboyvate vvy “Orepo'akaa rupi ae roo jepe” he'i 'rãgue okuapy.

³ Ha'e nunga rupi ndeyvu ke heta va'e kuery oendua py. Ha'e vvy aipo're: “Amongue ndooxeia ha'e okyjea oendu va'e ma tojeyv ju, tojepe'a ovy Gileade vvyty reia gui”, 're 'rã — he'i. Ha'e rami rã ha'e kuery va'e regua ojevvy vinte e dois mil, ha'e rã dez mil ma opyta.

⁴ SENHOR aipoe'ive ju Gideão pe:

— Oĩ reta ete teri ha'e kuery va'e regua. Ejapo yy py oguejyva aguã rami, ha'e rã ha'e py ndevy aikuaa pota uka 'rã. Amongue xee ndevy aipoe'ea va'e: “Kova'e ma oo 'rã nderupive” ha'ea va'e ma oo 'rã nderupive. Ha'e rã ndevy “Kova'e ma nderupive ndooi 'rã”, ha'ea va'e ma ndooi 'rãe — he'i.

⁵ Ha'e ramo Gideão ojapo yy py oguejyva aguã rami. Ha'e ramo ixupe SENHOR aipoe'i:

— Reipe'a 'rã opu'ã reve jagua rami oapekũ py oy'u va'e ha'e javi, ha'e rã oy'u aguã guenapy'ã re oĩ va'e kuery ma amboae katy 'rã reipe'a — he'i.

⁶ Opu'ã reve opo py oy'u va'e ma trezentos avakue ikuai. Ha'e rã hembyrekue ha'e javi ma guenapy'ã re oĩ vvy oy'u aguã.

⁷ Ha'e gui SENHOR aipoe'i Gideão pe:

— Peva'e trezentos avakue oapekũ py oy'u va'ekue reve ma xee rogueraa jepe 'rã, ndepo py Midĩa pygua kuery amboaxapa vvy. Ha'e rã amboae kuery ma tojepe'a pavẽ, peteĩ-teĩ too guekoa katy ae — he'i.

⁸ Ha'e rami rã avakue Israel regua peteĩ-teĩ Gideão omondoukapa hoo katy, ha'e rã trezentos ete'i ma ojea py omombyta. Ha'e va'e kuery ma opo py ojopy heravy guembi'urã ha'e mimby guaxu mymba rakuakue guigua. Ha'e rã Midĩa pygua kuery ma vvy'ã guy py ono'õ okuapy.

⁹ Ha'e va'e pyavyve SENHOR aipoe'i ixupe:

— Epu'ã ke ha'e eguejy ono'õ okuapya katy, mba'eta amboaxapa ma ndepo py.

¹⁰ Xapy'a rei repu'ã aguã rekyje teri ri vvy ono'õ okuapya katy eguejy nerembiguai kunumi va'e Pura reve.

¹¹ Ha'e vvy pendu 'rã ha'e kuery joupe-upe ijayvu va'e. Ha'e va'e rire ndepy'a guaxua rendu ma ramo peguejy 'rã ono'õ okuapy va'e rovai pepu'ã aguã — he'i. Ha'e ramo guembiguai Pura reve oo ono'õ okuapya apy'i peve.

¹² Midĩa pygua kuery, amalequita ha'e kuaray oua katyguia kuery ha'e javi ma mbovy e'ỹ vvy omonyẽ rei vvyugua tuku rami. Ha'e kuery rymba camelo kuery voi mbovy rei e'ỹ ikuai, ita ku'i ye'ẽ rembe re ikuai va'e rami.

¹³ Ha'e gui Gideão ovaẽ vvy oendu peteĩ ava oirũ pe omombe'u rã oexa ra'u va'ekue. Ha'e vvy aipoe'i:

— Xee aexa ra'u kuri rã peteĩ mbojape cevada guigua ojere ovy Midĩa pygua kuery nhano'õ jakuapya katy. Ha'e vvy onhembota xondaro kuery ruvixa roguy re. Ha'e va'e ho'a vvy ojere yvate katy guare vvy katy. Ha'e vvy ha'ekue rami ae itui — he'i.

¹⁴ Irũ ma ombovai:

— Ha'e va'e ma Israel regua Joás ra'y Gideão kyxe ae. Ipo py tuuete omboaxa ra'e Midĩa pygua kuery, ha'e nhano'õ jakuapy va'e ha'e javi — he'i.

¹⁵ Ha'e rami rã oexa ra'u pyre ha'e mba'erã paa Gideão oendu ma vvy omboete Nguuete. Ha'e gui ojevvy ju Israel kuery onhemboatya py. Ha'e vvy aipoe'i ha'e kuery pe:

— Pepu'ã ke, mba'eta pendepo py SENHOR omboaxa ma Midĩa pygua kuery.

¹⁶ Ha'e gui omboja'o trezentos avakue mboapy aty ikuai aguã. Peteĩ-teĩ po py ome'ẽ mimby guaxu ha'e yryru, ipy py takua ryxa rendy oĩ va'e reve.

¹⁷ Ha'e vvy ha'e kuery pe aipoe'i:

— Pema'ẽ ke xere, ha'e pejapo xee ajapoa rami. Ono'õ okuapya apy'i peve xee avaẽ vvy ajapoa rami pejapo avi 'rã.

¹⁸ Ha'e gui xee ha'e xereve ikuai va'e mimby guaxu romonhe'ẽ ramove peẽ voi pemonhe'ẽ 'rã pekuapy ono'õ va'e kuery vvyry rupi. Ha'e vvy pejapukai reve “ SENHOR ha'e Gideão rery rupi!” peje 'rã — he'i

¹⁹ Ha'e gui ma Gideão ha'e cem avakue hexeve ikuai va'e ma ono'õa apy'i peve ovaẽ, pytũ mbyte rai'i nhoarõa kuery omboekovia aguã rami ikuai jave. Ha'e vvy mimby guaxu omonhe'ẽ vvy ombovo yryru opo py ogueru va'ekue.

²⁰ Ha'e rami vvy mboapy aty ikuai va'e omonhe'ẽ pavẽ mimby guaxu ha'e ombovo yryru. Oaxua regua re ojopy tataendy'y, ha'e rã oiporu kuaa regua re ma mimby guaxu omonhe'ẽ va'e ogueroko. Ha'e vvy ojapukai okuapy:

— Kyxe SENHOR ha'e Gideão rery rupigual

²¹ Ha'e vvy peteĩ-teĩ ma hi'aĩague py ae opyta ono'õ okuapy va'e vyvry. Ha'e ramo ha'e javi omboopy onha, ojapukai ha'e ojava oje'oivy aguã.

²² Trezentos mimby guaxu onhendu rã SENHOR ojapo peteĩ-teĩ kyxe jomeme oiporu aguã rami. Ono'õ okuapya ha'e javi rupi oiko ha'e rami. Ha'e rami vy Zererã katy onhamba, ha'e gui Bete-Sita ha'e Abel-Meolá apy peve, Tabate rovai.

²³ Ha'e ramo Israel regua avakue, Naftali, Aser ha'e Manassés regua oenoĩmbaa avi Midiã pygua kuery rakykue oje'oi aguã.

²⁴ Efraim regua yvy'ã reia ha'e javi rupi Gideão omondouka guembiguai kuery. Ha'e vy aipoe'i imondovy:

— Peguejy ke Midiã pygua kuery pejoko aguã. Pemboaxa eme Jordão yakã, Bete-Bara peve — he'i ramo Efraim regua avakue oenoĩ mbyre ojokopa Jordão yakã Bete-Bara peve.

²⁵ Ha'e rami vy ojopy okuapy Midiã pygua huvixave mokoĩ oiko va'ekue, Orebe ha'e Zeebe. Ojuka Orebe itaova Orebe regua py ae, ha'e rã Zeebe ma ojuka Zeebe regua uva onhamiaty py. Oje'oiive Midiã pygua kuery rakykue. Ha'e gui Jordão rovai re Gideão oĩa py ogueru Orebe ha'e Zeebe akãgue.

8

Efraim kuery reve Gideão ijayvu porã'i, ha'e rã Midiã pygua huvixave kuery ojukaapaague

¹ Ha'e gui Efraim regua avakue aipoe'i okuapy Gideão pe:

— Mba'e re tu ha'e rami ete rejapo orere? Mba'eta Midiã pygua kuery rovai repu'ã aguã reo jave norerenoi — he'i okuapy ixupe ijayvu atã vy.

² Ha'e ramo ombovai ha'e kuery pe:

— Aỹ ma mba'ixa tu peẽ kuery pejapoa gui xee ajapove? Peẽ Efraim kuery mba'e uva'a rembyrekue na'iporãive ri ty'y ore Abiezer ramymino kuery mba'e uva'a gui?

³ Pendepo py ae Nhanderueteko omboaxa Midiã pygua huvixave kuery Orebe ha'e Zeebe. Mba'ixa tu xee ajapo ta peẽ pejapo va'ekue ramigua? — he'i vy ojapo ha'e kuery nda'ivaivei aguã rami.

⁴ Ha'e gui Jordão yakã yvýry peve Gideão ovaẽ vy oaxapa oje'oi vy trezentos avakue hexeve ikuai va'e reve. Ha'e kuery ikane'õmba ma teĩ joakykue teri oje'oi.

⁵ Ha'e gui aipoe'i Sucote pygua avakue pe:

— Ajerure pëvy, peme'ẽ xerupivegua kuery ho'u va'erã, mba'eta ikane'õmba ma, ha'e xerupive oje'oi Midiã pygua huvixa kuery Zeba ha'e Zalmuna rakykue.

⁶ Ha'e rã Sucote pygua yvatekueve ombovai:

— Ndee rereko ma pa Zeba ha'e Zalmuna pokue, nexondaro kuery ho'u va'erã rome'ẽ aguã? — he'i.*

⁷ Ha'e ramo Gideão ju aipoe'i:

— Ha'e rami rã Zeba ha'e Zalmuna xepo py SENHOR omboaxa ma ramo pendero'o rupi roikutupa 'rã juu tekoa e'ỹ regua ha'e juu rakuandey py — he'i.

⁸ Ha'e gui Penuel py oo vy ha'ekue rami ae ju ijayvu ha'e pygua avakue pe. Ha'e rã Penuel pygua kuery voi ombovai Sucote pygua avakue ombovaiaague rami.

⁹ Ha'e ramo Penuel pygua avakue pe ijayvu vy aipoe'i avi:

— Xee ma ajevny porã ju vy aitypa 'rã kova'e torre — he'i.

¹⁰ Ha'e gui Zeba ha'e Zalmuna ma Carcor py ikuai oxondaro kuery reve, quinze mil avakue ha'e javi vy, kuaray oua katygua kuery va'e regua xondaro kuery hembyre va'ekue. Ha'e rã ojuka pyre ma cento e vinte mil avakue kyxe reve guare.

¹¹ Gideão ma ijyvy e'ỹ va'e rape rupi oo oiny, Noba ha'e Jogbeá katy rupi kuaray oua katy. Ha'e vy ojokupa ha'e va'e xondaro kuery nonheangui rei jave.

¹² Zeba ha'e Zalmuna ma ojava jogueravy va'eri ha'e kuery rakykue Gideão oo. Ha'e vy ojopy mokoĩve Midiã pygua huvixa Zeba ha'e Zalmuna, oitypa avi oxondaro kuery.

¹³ Ha'e gui Joás ra'y Gideão opu'ãague gui Heres yvy'ã rupi ojeyvy

¹⁴ ojoko peteĩ kunumi va'e Sucote pygua, ha'e ixupe oporandu mba'emo re. Ha'e ramo kunumi va'e ixupe ombopara Sucote pygua yvatekueve ha'e nhomongeta va'ety kuery rery ha'e javi, setenta e sete avakue rery.

¹⁵ Ha'e ramo Gideão ou ju Sucote pygua avakue ikuai py. Ha'e vy aipoe'i:

— Ema'ẽ apy ma Zeba ha'e Zalmuna re, ha'e kuery reko re xejojai vy aipo pejeague: “Rereko ma pa Zeba ha'e Zalmuna pokue, ndevyguava avakue ikane'õmba va'e ho'u va'erã rome'ẽ aguã?” pejeague — he'i.

¹⁶ Ha'e rami vy ojopy ha'e va'e tetã pygua nhomongeta va'ety kuery, ha'e ombopi ukapa Sucote pygua avakue juu tekoa e'ỹ regua ha'e juu rakuandey py.

¹⁷ Oity avi torre Penuel py oi va'ekue, ha'e ojuka tetã pygua avakue.

¹⁸ Ha'e rire aipoe'i Zeba ha'e Zalmuna pe:

— Marã ramigua avakue tu pejuka raka'e Tabor py?

Ha'e kuery ombovai:

— Ndee ramigua meme ri ha'e kuery ikuai karamboae. Peteĩ-teĩ ma huvixave ra'y ramigua — he'i.

¹⁹ Ha'e ramo aipoe'i:

— Ha'e va'e kuery rima xeryvy kuery, ha'i pi'a kuery ae'i. Anhetẽ ete SENHOR oikove va'e rery rupi aura vy aipoa'e: Ha'e kuery ndapejukai va'e rire xee voi ndorojukai 'rãgue — he'i.

²⁰ Ha'e gui aipoe'i gua'y jypygua Jéter va'e pe:

— Epu'ã ha'e ejuka mokoĩve — he'i teĩ kunumi teri vy okyxe ndoeky'i, okyje vy.

* 8:6 Ha'e jave ma ngovaigua ruxiva kuery ojuka vy inhakã e'ỹ vy ipokue ojaya 'rã oexa uka aguã (Juízes 7.25).

²¹ Ha'e ramo Zeba ha'e Zalmuna aipoe'i:

— Epu'ã ke ndee ae, ha'e eju orere, mba'eta tuja va'e anho 'rã ipy'a guaxu — he'i ramo Gideão opu'ã vy ojuka mokoïve. Ha'e vy ha'e kuery rymba cameloaju'y gui oi'pe'a ijeguarã jaxy pëgue ramigua oï va'ekue.

Gideão huvixarã noïxei va'eri manto sacerdote peguarã ojapo ma rire omanoague

²² Ha'e ramo Israel regua avakue aipoe'i okuapy Gideão pe:

— Eï ke oreruvixarã, ndee ha'e gui ndera'y ju, ha'e va'e rire neramymino voi ju, Midiã pygua kuery po'akaa gui orereraa jepe rire.

²³ Gideão ombovai:

— Xee ma naï reguai penderuvixarã, xera'y voi nopenai 'rã pendere. SENHOR ae ma 'rã penderuvixa oï — he'i.

²⁴ Gideão aipoe'ive ju ha'e kuery pe:

— Ha'e rami avi peteï mba'e re ma ajerure ta pëvy: Peme'ë xe'vy namixã penemba'erã peipe'a va'ekue-ekue — he'i, mba'eta hovaigua kuery ma Ismael regua vy namixã ouro guigua oguereko va'ekue.

²⁵ Ha'e kuery aipoe'i:

— Rovy'a ete reve 'rã rome'ë ndevy — he'i okuapy vy peteï ao puku ha'e kuery oipyo vy hi'áry peteï-teï omoï peteï namixã oi'pe'a va'ekue.

²⁶ Namixã ouro guigua ojerurea va'ekue poyikue oikuaa rã dezenove quilos ouro ete anho oï, amboae ramigua jegua reve'y vy: jaxy pëgue, mbo'y, ao púrpura guigua Midiã pygua huvixa kuery omoï va'ekue ha'e cameloaju'y re jegua oï va'ekue reve'y vy.

²⁷ Ha'e va'ekue gui ma Gideão ojapo peteï manto sacerdote peguarã, ha'e guekoa Ofra py omoï. Ha'e ramo ha'e va'e re Israel kuery ovapa vy opa marã rei ikuai. Ha'e va'e manto ma nhuã rami opyta Gideão pe, hoo pygua kuery pe voi.

²⁸ Ha'e rami py Midiã pygua kuery ma Israel kuery oitypa ma rire neï oakã nomoptu'avei ha'e kuery rovai ou aguã. Ha'e rami rã vvy re opytu'upa quarenta ma'et'y re, Gideão oikovea pukukue re.

²⁹ Ha'e gui Joás ra'y Jerubaal va'e ojepe'a vy oiko ngoo py ae.[†]

³⁰ Gideão ma setenta gua'y kuery oguereko, ta'y ae meme, mba'eta ta'yxy reta vy.

³¹ Siquém py ta'yxy jevy oiko va'e voi oikuavã'i peteï ava'i. Ha'e rã omboery Abimeleque.

³² Ha'e gui Joás ra'y Gideão tuja'i ete ma vy omano. Ha'e rã onhono porãa tuu Joás onhono porãague py ae ju, Abiezer ramymino kuery rekoa Ofra py.

³³ Ha'e gui Gideão omano rire Israel kuery opa marã rei ju ikuai, Baal ra'angaa ikuai va'e re rive ovapa vy. Ha'e rami vy nguueeterã omoï okuapy Baal-Berite ra'angaa.

³⁴ Israel kuery na'ima'endu'avei SENHOR nguete re, hovaigua kuery ijyvýry ikuai va'e ha'e javi gui ogueraa jepe va'ekue ri.

³⁵ Neï Jerubaal Gideão va'e ro pygua kuery re voi ha'e kuery nda'ija'evei, Israel kuery pe ha'e ojapo porã va'ekue ri.

9

Abimeleque guvvy kuery ojukapa vy ha'e ju onhembouvixave oinyague

¹ Ha'e gui Jerubaal ra'y Abimeleque ma Siquém tetã py oo, oxy kyvy kuery ikuai py. Ha'e pygua kuery pe ijayvu, ha'e guamoï ro pygua kuery ha'e javi pe. Ha'e vy aipoe'i:

² — Ajerure pendeayvu ke Siquém pygua kuery ha'e javi oendua py. Ha'e vy aipopeje: “Mava'e tu peë kuery pejou porãve penderuvixarã: Setenta avakue Jerubaal ra'y kuery ha'e javi, tyrã pa peteï'i penderuvixarã oï aguã? Penema'endu'a ke xee voi peë kuery va'e regua, pendero'oe aikoa re”, peje — he'i.

³ Ha'e va'e ayvu ha'e javi ma Siquém pygua kuery pe ju icy kyvy kuery omombe'u. Ha'e ramo ha'e kuery py'a re oï Abimeleque-a katy anho oje'oi aguã, “Nhanderegua” he'i okuapy vy.

⁴ Ha'e rami vy iuxpe ome'ë okuapy setenta hatã'i va'e prata guigua Baal-Berite ra'angaa oia gui oi'pe'a va'ekue. Ha'e va'e perãta Abimeleque ome'ë avakue hi'arandu e'y ha'e ojerovia rei rive va'e pe ngupive guarã.

⁵ Ha'e rami vy Ofra tetã py nguuro py oje'oi vy ojuka guvvy kuery Jerubaal ra'y ikuai va'ekue. Peteï ita áry pyve ojuka setenta avakue. Ha'e rã Jerubaal ra'y kyrive Jotão va'e ma onhemi vy oikove.

⁶ Ha'e gui Siquém ha'e Bete-Milo pygua kuery ha'e javi ono'õmba jogueru vy nguvixaverã omoï okuapy Abimeleque, Siquém katy'i vvyra carvalho ima'endu'aapy hi'ái va'e vvy'iry.

Jotão ijayvuague

⁷ Ha'e gui Jotão pe ha'e nunga omombe'ua rã oo vy oë Gerizim vvyty re. Ha'e py oia gui ojapukai reve ijayvu ho'amy. Ha'e vy aipoe'i ha'e kuery pe:

— Siquém pygua kuery, pejapyxaka ke xeayvua re, Nhanderue te ju pendeayvu oendu aguã.

⁸ Peteïgue ma vvyra ikuai va'e oje'oi nguvixaverã omoï aguã azeite oikyty reve. Ha'e rami vy peteï azeitona'y hi'ái va'e pe aipoe'i okuapy: “Eï ke oreruvixarã.”

⁹ Ha'e rami teï azeitona'y ombovai: “Ha'e rami avi xee ajepe'a 'rã ri ty'y azeite ame'ëa gui, Nhanderue te ha'e avakue oguerovy'a va'eri, vvyra pendekuai va'e áry rupi rive xerakã ovava aguã?” he'i.

¹⁰ Ha'e gui figo'y pe ju vvyra ikuai va'e aipoe'i: “Eju ndee oreruvixarã.”

[†] 8:29 Jerubaal ma Gideão rery mboae (Juízes 6.32).

¹¹ Ha'e rã figo'y ombovai: “Xee ajepe'a 'rã ri ty'y xe'a he'ê ha'e iporã va'e ame'êa gui, vyvra pendekuai va'e áry rupi rive xerakã ovava agua?” he'i.

¹² Ha'e gui uva rembypy pe ju vyvra ikuai va'e aipoe'i: “Eju ndee oreruvixarã.”

¹³ Ha'e rã uva rembypy ombovai: “Xee ajepe'a 'rã ri ty'y vinho ame'êa gui, Nhanderuete ha'e avakue oguerovy'a va'eri, vyvra pendekuai va'e áry rupi rive xerakã ovava agua?” he'i.

¹⁴ Ha'e gui juu'y pe rive ju vyvra ikuai va'e aipoe'i okuapy: “Eju ndee oreruvixarã.”

¹⁵ Ha'e ramo juu'y ombovai vyvra ikuai va'e pe: “Anhetê ri penderuvixarã xemoixe vy peju ha'vy, penhemi xekuaray'ã guy py. Ha'e rã any ri ramo juu'y gui toê tata, toapypa yary Líbano py ikuai va'e voi” he'i.

¹⁶ — Ha'e gui aỹ ma anhetê rupi ri nda'u pendekuai Abimeleque penderuvixarã pemoia py? Ha'evea rami ri nda'u Jerubaal ha'e hoo pygua kuery re pejapo? Ha'e va'e mba'emo porã ojapogue rami ri nda'u pejapo hexe?

¹⁷ (Mba'eta xeru ma pendere vy joe opu'ã vy ndojeayvuiveike py pendereraa jepe raka'e Midia pygua kuery po gui.

¹⁸ Ha'e rã peê kuery ma aỹ xeru ro pygua kuery re pepu'ã vy pete'í ita áryve pejukapa kuri ta'y kuery setenta ikuai va'e. Ha'e gui peê Siquém pygua kuery, hembiguai pi'a Abimeleque va'e ju pemoi penderuvixarã, penderegua ramo rive.)

¹⁹ Ha'e gui xapy'a rei anhetê rupi ha'e ha'evea rami ri Jerubaal ha'e hoo pygua kuery re pejapo vy ma tapererovy'a Abimeleque, ha'e voi toguerovy'a peê kuery.

²⁰ Ha'e rã any ri ramo Abimeleque gui toê tata, tomomba Siquém ha'e Bete-Milo pygua kuery. Ha'e Siquém ha'e Bete-Milo pygua kuery gui voi toê tata, Abimeleque ju tomomba — he'i.

²¹ Ha'e va'e rire'ive Jotão ojava vy oo Beer katy guyke'y Abimeleque gui okyje vy. Ha'e py ju oiko.

Abimeleque rovai Gaal ijayvuague

²² Ha'e gui Abimeleque mboapy ma'et'y re ma Israel kuery ruvixa oĩ jave

²³ Nhanderuete ombou pete'í nhe'ê Abimeleque ha'e Siquém pygua kuery reve joe ija'e e'ỹ agua rami nhomoingorã. Ha'e ramo ha'e kuery nhemi rupi ikuai Abimeleque rovai.

²⁴ Ha'e rami oiko Jerubaal ra'y kuery setenta ikuai va'e ojukapaague repyrã ou agua, ha'e tyke'y Abimeleque ojukapa va'ekue áry ae huguy omoêague re imbopagaarã ou agua, ha'e Siquém pygua kuery áry voi, mba'eta ha'e kuery onhemoirũ rire guvyv kuery ojukapa agua py.

²⁵ Ha'e rami vy Abimeleque rovai Siquém pygua kuery omo'i avakue vyty ikuai va'e áry oma'ê mbegue agua, ha'e va'e rupi oaxa va'e ha'e javi ha'e kuery oguero'a agua. Ha'e rã ha'e nunga Abimeleque pe omombe'ua.

²⁶ Ha'e gui Ebede ra'y Gaal va'e guvyv kuery reve ou avi vy Siquém py ikuai. Ha'e ramo hexe Siquém pygua kuery ojerovia okuapy.

²⁷ Ha'e gui ha'e kuery mba'ety py oje'oi vy omono'õ uva'a. Ha'e vy hi'a onhamimba ma rire ojapo okuapy ngaru. Ha'e rami vy nguu ete ra'angaa pegua oo py ju oje'oi vy okaru ha'e oy'u okuapy, Abimeleque re ijayvu vai guive.

²⁸ Ha'e rami vy Ebede ra'y Gaal aipoe'i:

— Marã ramigua tu Abimeleque, ha'e marã ramigua tu nhande Siquém pygua jaiko, ixupe jaiko agua? Ha'e va'e ma Jerubaal ra'y e'ỹ ri ty'y? Zebul e'ỹ ri ty'y hembiguai oiko? Mba'erã tu ixupe rive jaiko? Ha'e rami 'rãgue py ha'eveve Siquém ru Hamor ramymino kuery pe jaiko.

²⁹ Peê kuery ma xepo py penemoia va'e rire xee aipe'a 'rãgue Abimeleque, ha'e ixupe “Emboatypa ndevyguá xondaro kuery, ha'e erupa” ha'e 'rãgue — he'i.

³⁰ Ha'e rami Ebede ra'y Gaal ijayvu rã tetã pygua huvixa Zebul oendu vy ivai vaipa.

³¹ Ha'e rami vy Abimeleque-a py omondouka nhemi guembiguai omombe'u va'erã: “Ebede ra'y Gaal ma guvyv kuery reve Siquém py ou vy tetã pygua kuery omopu'ãmba nderovai.

³² Epu'ã ke ha'vy pyávy, ndee ha'e ndereve ikuai va'e kuery ha'e javi. Penhemi ranhe mba'ety rupi.

³³ Ha'e gui ko'ê aje'ive reve pevyvpa kuaray oê'i ramove, ha'e pepu'ã pekuapy tetã re. Ha'e rã Gaal ngupive ikuai va'ekue reve penderovai oêmba jogueruvy ramo pejapo tema hexe pejapoxea rami”, he'i uka.

Gaal ha'e Siquém pygua kuery re Abimeleque opu'ã vy omombaague

³⁴ Ha'e va'e pyavyve Abimeleque ha'e hexeve ikuai va'e ovypa vy onhemi okuapy Siquém tetã re opu'ã agua. Irundy henda py ikuai.

³⁵ Ha'e gui Ebede ra'y Gaal oê vy opu'ã ho'amy tetã rokê py. Ha'e ramo Abimeleque ha'e hexeve ikuai va'e ha'e javi opu'ãmba ju onhemiague gui.

³⁶ Ha'e rã ha'e kuery ou rã Gaal oexa vy aipoe'i Zebul pe:

— Ma'ê, oguejya jekuaa vyty áry gui.

Zebul ombovai:

— Any, vyty'ã rima ava rami rexa — he'i.

³⁷ Ha'e gui Gaal ijayvuve ju. Ha'e vy aipoe'i:

— Ma'ê, pee ma oguejya jogueruvy nhaneronde katy gui, ha'e ou reta avi vyvra carvalho imba'ekuaa aty rupi tape ou va'e gui.

³⁸ Zebul ombovai:

— Ha'e gui mamu tu a'yi oĩ ndejuru, ha'e va'e py aipo'reague: “Marã ramigua tu Abimeleque ixupe jaiko agua?” 'reague? Peva'e e'ỹ ri ty'y nerembovarei va'ekue? Ha'e rami vy eê ha'vy, epu'ã hovai — he'i.

³⁹ Ha'e ramo Siquém pygua kuery renonde Gaal oê ovy vy opu'ã Abimeleque kuery rovai.

⁴⁰ Ha'e rã Abimeleque omonha vy ou ramo Gaal ojava henonde gui. Ha'e gui heta ojuka pyre ho'a tetã rokê rupi oike ta maa peve.

⁴¹ Ha'e gui Abimeleque ma Arumá py ranhe oo opyta ramo Zebul ae omoxê Gaal ha'e tyvy kuery Siquém py ikuai ve'y agua.

⁴² Ko'ê jevy tetã pygua kuery oêmba ju oje'oivy mba'ety katy. Ha'e nunga Abimeleque pe omombe'ua rã ⁴³ ojeupegua avakue ojopy vy omboja'o mboapy henda py. Ha'e rami vy omondouka mba'ety rupi onhemi agua. Amboae kuery tetã gui oê rã oexa vy opu'ã hovai, oitypa.

⁴⁴ Abimeleque hexevegua kuery reve onha pojava vy tetã rokê py ae ikuai. Ha'e rã amboae mokoï aty va'e mba'ety katy oê oje'oivy va'ekue re opu'ã vy oitypa avi.

⁴⁵ Ha'e va'e ára pukukue re Abimeleque kuery opu'ã okuapy ha'e va'e tetã re. Ha'e vy ipo'aka. Ha'e pygua kuery ojukapa vy ombovaipa tetã, ha'e juky avi omoaï.*

⁴⁶ Ha'e ramo Siquém pygua kuery torre py ikuai va'e ha'e nunga oendu vy oikepa El-Berite pegua templo gyy py onhemi atyrã ojo'o pyre py.

⁴⁷ Abimeleque pe omombe'ua Siquém py torre pygua kuery ono'õ okuapya.

⁴⁸ Ha'e ramo Zalmom yvyty re Abimeleque oê ojeupegua kuery ha'e javi reve. Haxa Abimeleque ojopy vy ojaya peteï vyvra rakã. Ha'e va'e oupi vy oaxi'y áry omoï reve aipoe'i ngupive ikuai va'e pe:

— Xee ajapo rã pexa vy peê voi ha'ekue rami pejapo pojava — he'i ramo

⁴⁹ ha'e kuery peteï-teï vyvra rakã ojaya vy oo Abimeleque rakykue. Ha'e vy onhonomba imoiny onhemi atyrã ojo'o pyre áry. Ha'e vy omoendy Siquém pygua kuery torre py ikuai va'ekue ha'e javi áry, oapypa. Ha'e rami vy omanomba, mil avakue ha'e kunhague.

Abimeleque omanoague

⁵⁰ Ha'e gui Abimeleque ma Tebes tetã py oo vy ojokopa vy ipo'aka.

⁵¹ Ha'e va'e tetã mbyte py oi peteï torre imbarae va'e. Ha'e va'e katy tetã pygua kuery avakue ha'e kunhague onha vy oikepa. Ha'e vy guakykue torre rokê omboty vy ojeupipa okuapy ijapyte áry.

⁵² Torre oia peve Abimeleque ou vy opu'ã hovai. Ha'e vy okê peve ovaê oapy agua.

⁵³ Ha'e ramo peteï kunha ma peteï ita guaxu mba'emo mongu'ia regua oupi vy omombo Abimeleque hakã re, ombovo ikãgue.

⁵⁴ Ha'e ramo ha'e oenoï vyvoi ojeupegua kunumi hu'y jokoia reraa. Ha'e vy aipoe'i ixupe:

— Ekyi ndekyxe ha'e xejuka, “Kunha rive ojuka”, 'ea e'y agua — he'i ramo kunumi va'e oipyxo ramo omano.

⁵⁵ Abimeleque omano maa Israel regua avakue oexa vy oje'oipa peteï-teï ngoo katy.

⁵⁶ Ha'e rami py Abimeleque re Nhanderuete ombou nguu pe ojapo vaiague rekovia, guvyvy kuery setenta va'e ojukapaague re.

⁵⁷ Ha'e rami ae avi Siquém pygua avakue áry Nhanderuete ombou ojapo vaiague ha'e javi rekovia. Ha'e rami vy ha'e kuery re ojeupity Jerubaal ra'y Jotão ijayvu vaiague.

10

Israel rerekoa kuery Tola ha'e Jair rekokie oia

¹ Abimeleque oiko rire ma Israel kuery repyará oiko Issacar regua Puá ra'y Tola, Dodô ramymino. Ha'e va'e ma Samir py oiko Efraim regua yvy'ã reia re.

² Ha'e va'e ma vinte e trêš ma'etý re opena Israel kuery re. Ha'e gui omano, ha'e rã onhono porãa Samir py ae.

³ Tola oiko rire ma oiko Jair. Ha'e va'e ju opena Israel kuery re, vinte e dois ma'etý re.

⁴ Ha'e va'e ma trinta gua'y kuery oguereko, trinta mburika'i áry ikuai va'e. Oguereko avi trinta tetã. Ha'e va'e ma Havote-Jair omboery kova'e ára peve, Gileade yvy re ikuai va'e.

⁵ Ha'e gui Jair omano, ha'e rã Camom py onhono porãa.

Filisteu ha'e Amom kuery rembiguai ikuai jave guare

⁶ Ha'e gui Israel kuery ha'eve'yã rami ju ikuai SENHOR renonde. Ha'e vy Baal ra'angaa kuery pe rive ikuai, Astarote, ha'e Síria pygua kuery ruete ramigua ikuai va'e pe, Sidom, Moabe, Amom ha'e filisteu kuery pegua va'e pe. Ojepe'apa okuapy SENHOR pe ikuaii gui, ixupe nda'ikuavei.

⁷ Ha'e ramo Israel kuery rovai SENHOR poxya hendy vy omboaxapa filisteu ha'e Amom kuery po py.

⁸ Ha'e ramo ha'e va'e kuery ombojexavai Israel kuery ha'e va'e ma'etý guive, oguereko axy rei. Dezoito ma'etý re oguereko axy Israel kuery Jordão yakã rovai re ikuai va'e ha'e javi, amorreu kuery yvy re Gileade py ikuai va'e.

⁹ Ha'e gui Amom kuery ma Jordão yakã kyvõ rupi oaxa Judá kuery rovai ju opu'ã avi agua, Benjamim ha'e Efraim kuery rovai guive. Ha'e ramo Israel kuery ikuai axy ete.

¹⁰ Ha'e gui Israel kuery ojapukai okuapy SENHOR pe. Ha'e vy aipoe'i:

— Rojejavy nderovai, mba'eta oreruete roeja vy Baal ra'angaa kuery pe rive orekui.

¹¹ Ha'e rã SENHOR ombovai Israel kuery pe:

— Egito pygua kuery penemoingo axy jave, ha'e gui amorreu kuery ju, Amom kuery, filisteu,

* 9:45 Juky omoaï mba'eva henhoi e'y agua (Deuteronômio 29.23, Salmo 107.33-34).

¹² Sidom pygua, amalequita ha'e maonita kuery penderereko axy rã xevy pe pejapukai jave xee ndorogueraa jepei ri ty'y ha'e kuery po gui?

¹³ Ha'e rami teĩ peẽ xereja ma tuete ramigua pe rive pendekuai aguã. Ha'e nunga rupi xee ndorogueraa jepevei ma 'rã.

¹⁴ Tapeo, pejapukai penderueterã peiporavo va'ekue pe ae. Ha'e kuery ae tapendereraa jepe pejexavaia gui — he'i.

¹⁵ Ha'e rami teĩ Israel kuery ojpukaive ju SENHOR pe:

— Rojejavy ae ma. Ejapo orere rejapoxea ha'e javi rami, va'eri orereraa jepe ju aỹ ete'i ri jepe, rojerure ndevy — he'i okuapy.

¹⁶ Ha'e rami vy ha'e kuery mbyte gui oipe'apa okuapy amboae kuery ruete ra'angaa, ha'e vy SENHOR pe ju ikuai. Ha'e ramo ndoexa uka e'ỹvei Israel kuery omboaxya, ikuai axy rã.

¹⁷ Amom kuery ma ono'õ vy Gileade py ikuai. Ha'e rã Israel kuery ma oupa vy Mispa py ikuai.

¹⁸ Ha'e ramo heta va'e kuery regua Gileade pygua huvixa kuery joupe-upe aipoe'i okuapy:

— Mava'e ava nda'u ha'e ranhe 'rã oo Amom kuery rovai opu'ã aguã? Ha'e va'e oĩ 'rã Gileade pygua ha'e javi ruvixarã.

11

Israel kuery repyará Jefté onhemoiaque

¹ Ha'e gui Gileade tetã pygua Jefté ju oiko. Ha'e va'e ava ma ipy'a guaxu va'e, kunha itavy rei va'e pi'a, Gileade ra'y.

² Gileade ra'yxy ae oguereko avi ta'y kuery. Ha'e va'e kuery tujapa ma vy omoxẽ Jefté. Ha'e vy aipoe'i okuapy ixupe:

— Ndee ma mba'eve ndererekoi 'rã orevy guarã nhanderu oguereko va'e regua, kunha mboae pi'a reiko vy — he'i okuapy.

³ Ha'e ramo gukye'y kuery renonde gui Jefté ojava vy Tobe yvy re ju oiko. Ha'e pygua avakue hi'arandu e'ỹ rei va'e hexe onhemoirũ vy oje'oi 'rã hupive.

⁴ Ha'e va'e rire Amom kuery opu'ã okuapy Israel kuery rovai.

⁵ Ha'e kuery opu'ã rã Gileade pygua nhomongeta va'ety kuery oje'oi Jefté oĩa py, Tobe yvy gui ogueru aguã.

⁶ Ha'e vy aipoe'i okuapy Jefté pe:

— Eju oreruvixarã, Amom kuery rovai nhapu'ã aguã.

⁷ Jefté ombovai Gileade pygua nhomongeta va'ety kuery pe:

— Ha'e rami avi peẽ kuery ndaxerayvui vy naxemoxẽi ri ty'y raka'e xeru ro gui? Ha'e vy mba'e re tu aỹ peju xea py, pendekuai axy vy rive? — he'i

⁸ Ha'e ramo Gileade pygua nhomongeta va'ety kuery aipoe'i ju Jefté pe:

— Ha'e rami rã ae roju ndea py. Eju orereve, Amom kuery rovai nhapu'ã aguã. Ha'e rã ndee ma rei 'rã Gileade pygua kuery ha'e javi ruvixa — he'i okuapy.

⁹ Ha'e ramo Jefté ju oporandu Gileade pygua nhomongeta va'ety kuery pe:

— Ha'e gui xapy'a rei xereraa ju ri Amom kuery rovai apu'ã aguã, ha'e SENHOR xepo py omboaxa ramo anhetẽ ri pa xee aiko 'rã penderuvixa?

¹⁰ Gileade pygua nhomongeta va'ety kuery ombovai:

— SENHOR ae 'rã nhanembyte oĩ oreayvu renduarã, ha'e rami vy orembopaga 'rã ndeayvuague ndorojapoi ramo — he'i.

¹¹ Ha'e rami rã Jefté oo Gileade pygua nhomongeta va'ety kuery reve. Ha'e rã ha'e pygua kuery omoĩ nguvixarã. Ha'e gui SENHOR renonde Mispa py ju Jefté omombe'upa SENHOR ijayvuague.

¹² Ha'e gui Amom kuery ruvixaa katy Jefté omondouka guembiguaĩ kuery oayvu mombe'uarã. Ha'e vy aipoe'i uka:

— Mba'e tu rereko xereve, xea py reju vy xeyvy rovai repu'ã aguã?

¹³ Jefté rembiguai kuery pe Amom pygua huvixa ombovai:

— Mba'eta Egito yvy gui Israel kuery ou vy ojopy raka'e oreyvy Arnom guive Jaboque peve, ha'e gui Jordão yakã peve ju. Aỹ eme'ẽ porã'i ju xeyvy — he'i.

¹⁴ Ha'e rami teĩ guembiguaĩ kuery mboae ju Jefté omondouka Amom kuery ruvixa pe oayvu mombe'uarã.

¹⁵ Ha'e vy aipoe'i ixupe:

— Jefté aipoe'i uka: Israel kuery ma ndojopyi raka'e Moabe pygua kuery yvy, neĩ Amom kuery yvy.

¹⁶ Mba'eta Egito gui Israel kuery ou vy tekoa e'ỹa rupi uguata Ye'ẽ Pytã peve, ha'e rupi ae Cades py ovaẽ aguã.

¹⁷ Ha'e ramo Israel kuery oayvu mombe'uarã omondouka raka'e Edom pygua kuery ruvixaa py. Ha'e vy aipoe'i uka: “Rojerure ndevy roaxa ta ndeyvy rupi”, he'i uka. Ha'e rami teĩ Edom pygua kuery ruvixa noendu potai. Ha'ekue rami ae ju Israel kuery ojerure Moabe pygua kuery ruvixa pe, ha'e va'e voi noendu potai. Ha'e rami rã Cades py ranhe Israel kuery ikuai.

¹⁸ Ha'e va'e rire tekoa e'ỹa rupi uguata vy ojeapa raka'e Edom ha'e Moabe pygua kuery yvy yke rupi. Ha'e vy ha'e va'e kuery yvy gui mombyry'i ovaẽ kuaray oua katy, Arnom yakã rovai re ae ikuai. Ha'e rami vy novaẽi raka'e Moabe kuery yvy re, mba'eta Arnom yakã ma ijyvy apy oĩ.

¹⁹ Ha'e ramo amorreu kuery ruvixa Hesbom pygua Seom pe ju Israel kuery omondouka oayvu mombe'uarã. Ha'e vy aipoe'i uka ixupe: “Rojerure ndevy, toroaxa ndeyvy rupi orekuai aguã py rovaẽ aguã”, he'i

²⁰ teĩ Israel kuery re Seom ndojeroviai vy nomboaxai ovyv rupi. Ha'e rami 'rãgue py ojeuepegua kuery ha'e javi oenoĩ vy Jaza py ikuai, ha'e vy opu'ã okuapy Israel kuery rovai.

²¹ Ha'e gui Israel kuery po py SENHOR Israel kuery ruete omboaxa Seom ha'e ixuepegua kuery ha'e javi, ha'e rammo ojukapa. Ha'e ramo Israel kuery oi'pe'apa amorreu kuery ijyvy rupi ikuaiague gui.

²² Ipo'aka amorreu kuery yvy ha'e javi re, Arnom guive Jaboque peve, ha'e gui tekoa e'ỹa guive Jordão yakã peve.

²³ Ha'e rami py SENHOR Israel kuery ruete ae oi'pe'a uka raka'e amorreu kuery ojeuepegua kuery renonde gui. Ha'e gui ndee ma nhi'ã kova'e yvy ja renhemoingo ta?

²⁴ Anhetẽ e'ỹ ri ty'y penderuete Camos mba'emo pendeivy omboaxa va'e ramo "Oremba'e" peje? Ha'e rami ae avi ore kuery voi rojopy 'rã oreruete SENHOR orerenonde gui oi'pe'a va'ekue yvy.

²⁵ Ndee ma nhi'ã Zipor ra'y Balaque Moabe pygua ruvixa oĩ va'ekue gui nembaraeteve? Mba'eta ha'e va'e ma peteĩgueve nda'ijayvu rei raka'e Israel kuery rovai, ha'e kuery re nupu'ãi guive.*

²⁶ Ha'e gui Israel kuery trezentos ma'et'ỹ re Hesbom ha'e Aroer re hekoa jave, ha'e ijyvy'ỹ tekoa'i ikuai va'e rupi, ha'e gui Arnom yakã rembe ha'e javi rupi tetã ikuai va'e re ha'e kuery hekoa jave ma, ha'e va'e jave mba'e re tu ndapejopy jevyi raka'e ha'e va'e tetã?

²⁷ Ha'e nunga rupi xee e'ỹ ajejavu nderovai! Ha'e rã ndee ae ma rejapo vai orerovai repu'ãa py. Tove SENHOR pavẽ re oikuaa pota va'e toikuaa pota aỹ Israel ha'e Amom kuery re, he'i uka.

²⁸ Ha'e rami teĩ Amom kuery ruvixa ndojapyxaka potai Jeftẽ oayvu omombe'u uka va'ekue re.

Jeftẽ onhemboayvague

²⁹ Ha'e ramo Jeftẽ re SENHOR Nhe'ẽ ou ramo oaxa ovy Gileade ha'e Manassés rupi, ha'e vy Gileade regua Mispá oĩ va'e peve oo, ha'e Mispá gui oo ju Amom kuery rovai opu'ã aguã.

³⁰ Jeftẽ onhemboayvu vy oura SENHOR pe. Ha'e vy aipoe'i:

— Xapy'a rei Amom kuery xepo py remboaxa ramo

³¹ Amom kuery re xepo'akaague gui ajevuy ju ma ramo xerokẽ gui xerovaexĩ aguã ha'e ranhe oẽ ouvy va'e rei amboaxa 'rã SENHOR peguarã, ixupe xee ame'ẽ 'rã apy reve — he'i.

³² Ha'e rami vy Jeftẽ oo Amom kuery reve nhovaexĩ, ha'e kuery rovai opu'ã aguã. Ha'e gui Jeftẽ po py SENHOR omboaxapa.

³³ Ha'e ramo oitypa Aroer guive Minite katy'i peve (vinte tetã ha'e javi vy), ha'e Abel-Queramim peve ju. Heta tekoa oity. Ha'e rami vy Israel kuery renonde Amom kuery nda'ipo'akavei aguã rami ikuai.

³⁴ Ha'e gui Mispá py Jeftẽ ou jevuy vy ngoo py ovaẽ ramo tajy ae ha'e ranhe oẽ ouvy ovaexĩ aguã. Pandeiro reve ojerokya rupi ou. Ha'e va'e ma tajy peteĩ'i va'e ae, tajy mboae nda'ipoi, ta'y e'ỹ va'e guive.

³⁵ Guajy oexa vy Jeftẽ oao omondoropa reve aipoe'i:

— Aikore xerajy, ndee xemomboraiu ete! Ndee ma reiko ajexavai aguã rami, mba'eta nda'evei SENHOR pe anhemboayvague amboaxa rive ju aguã.

³⁶ Ha'e rã kunhataĩ ombovai nguu pe:

— Xeru, ndee renhemboayvu ae ma SENHOR pe. Ha'e rami xere ejapo SENHOR pe renhemboayvague rami ae. Mba'eta nderovaigua Amom kuery gui SENHOR nderepy rire — he'i.

³⁷ Aipoe'ive ju nguu pe:

— Peteĩ mba'e ejapo xevy: Taa ranhe, mokoĩ jaxy re taiko yvy'ã rupi, amenda e'ỹ va'e aikoa re ajae'o aguã, xeirũ kuery reve.

³⁸ Tuu ombovai vy — Tereo — he'i vy mokoĩ jaxy re omoudouka. Ha'e ramo oirũ kuery reve tajy oo vy yvy'ã rupi ojae'o omenda e'ỹ va'e oikoa re.

³⁹ Mokoĩ jaxy opa ma ramo ojevuy ju nguua py. Ha'e ramo hexe ojapo onhemboague. Kunhataĩ va'e ma ava reve nonhemoirũ ae. Ha'e va'e gui oiko Israel kuery rekorã,

⁴⁰ mba'eta ma'et'ỹ nhavõ Israel rajy kuery oje'oi 'rã irundy ára re, Gileade pygua Jeftẽ rajy re ipy'a vaia rupi oporaei aguã.

12

Efraim kuery re Jeftẽ kuery opu'ãague

¹ Ha'e ramo Efraim regua avakue oenoĩmbaa rã oje'oi'pa Zafom katy. Ha'e vy aipoe'i okuapy Jeftẽ pe:

— Mba'e re tu Amom kuery rovai repu'ã aguã reo jave norerenoi ore avi nderupive roo aguã? Roapy 'rã ndero, ha'e py rei teri reve.

² Ha'e kuery pe Jeftẽ ombovai:

— Ha'e rami avi Amom kuery reve xevyguia kuery joguero'a ete jave xee roenoĩ teĩ peẽ kuery ndapeoi va'ekue ha'e kuery po gui xereraa jepe aguã.

³ Peẽ ndaxereraa jepei taa aikuaa vy mae ajeayvukue'i py e'ỹ aa Amom kuery rovai apu'ã aguã. Ha'e ramo xepo py SENHOR omboaxa ha'e kuery ha'e javi. Ha'e gui mba'e re tu aỹ peju xea py xerovai pepu'ãxe vy? — he'i

⁴ Ha'e rami vy Gileade pygua avakue Jeftẽ omboatyva vy opu'ã okuapy Efraim kuery rovai. Gileade pygua avakue oitypa Efraim regua, mba'eta Efraim pygua kuery ijayvu vy "Peẽ Gileade pygua kuery Efraim gui pejepe'a va'ekue, Efraim ha'e Manassés kuery mbyte pendekuai va'ekue", he'i rire.

* 11:25 Números 22 guive 24 peve.

⁵ Ha'e ramo Gileade pygua kuery ojokopa Jordão yaká oxaaty Efraim katy oo va'e py. Ha'e rami vy Efraim regua ojava ovy vy "Aaxaxe" he'i ramo ha'e kuery pe Gileade pygua avakue ju oporandu 'rã: "Ndee pa Efraim pygua ae?" Ha'e rã ombovai vy "Any" he'i

⁶ ramo aipoe'ive ju 'rã: "Ha'e vy aipo're: 'Chibolete' 're", he'i 'rã. Ha'e ramo ombovai vy xapy'a rei "Sibolete" he'i 'rã ayvu ndoupity porã vy. Ha'e ramo oguero'a vy ojuka 'rã Jordão yaká oxaaty pyve. Ha'e rami vy ha'e va'e jave py Efraim kuery va'e regua omano quarenta e dois mil.

⁷ Gileade pygua Jefe'te ma mboapy meme ma'et'ý re opena rak'a'e Israel kuery re. Ha'e gui omano rã onhono porãa pete'i tetã Gileade re o'i va'e py.

Joguerkoa kuery Ibsã, Elom ha'e Abdòm ikuai jave guare

⁸ Ha'e va'e rire ma Belém pygua Ibsã ju opena Israel kuery re.

⁹ Ha'e va'e ma trinta gua'y kuery oguereko, trinta guajy kuery guive mombyrygua kuery re omenda va'e meme. Ha'e rami ae avi mombyry gui trinta kunhague oguero gua'y kuery ra'yxyrã. Sete ma'et'ý re opena Israel kuery re.

¹⁰ Ha'e gui Ibsã omano rã onhono porãa Belém tetã py ae.

¹¹ Ha'e va'e rire ma Zebulom pygua Elom oiko. Ha'e va'e ma dez ma'et'ý re opena Israel kuery re.

¹² Zebulom pygua Elom omano rã onhono porãa Zebulom yvy re Aijalom py.

¹³ Ha'e va'e rire ma piratonita Hilel ra'y Abdòm ju opena Israel kuery re.

¹⁴ Ha'e va'e ma quarenta gua'y kuery oguereko, ha'e gui trinta guamymino kuery. Ha'e va'e kuery ma sententa mburika'i áry ikuai. Oito ma'et'ý re opena Israel kuery re.

¹⁵ Ha'e gui piratonita Hilel ra'y Abdòm omano rã onhono porãa Efraim yvy re Piratom py, yvyty reia rupi amalequita kuery ikuai py.

13

Sansão itui'iaque

¹ SENHOR renonde Israel kuery ha'eve'ýa rami ju ikuai ramo quarenta ma'et'ý re omboaxa filisteu kuery po py.

² Zorá tetã py oiko pete'i ava Dã ramymino, Manoá hery va'e. Ta'yxy ma imemby va'erã e'ý ae oiko vy na'imembyi.

³ Ha'e gui kunha va'e pe SENHOR-a guigua anjo ojexa uka vy aipoe'i ixupe:

— Ma'ë, ndee ma nememby va'erã e'ý ae reiko va'ekue, nememby va'e'ý teri va'eri rereko'i 'rã, ha'e vy reikuavã nho 'rã pete'i ava'i.

⁴ Ha'e rã aý ma eiko kuaa ke, ey'u eme vinho, ne'i iro va'e. He'u eme ha'eve'ý va'e.

⁵ Mba'eta ndee rereko'i vy reikuavã 'rã pete'i ava'i. Ha'e va'e akã re napemovaëi 'rã kyxe hi'a pejaya aguã. Mba'eta ava'i guive oiko 'rã nazireu, guyru'i py teri o'i reve ae 'rã oiko Nhanderuete pe omboaxa pyre. * Ha'e gui omboypy 'rã Israel kuery ogueraa jepe aguã filisteu kuery po'akaa gui — he'i.

⁶ Ha'e rami rã omea py kunha va'e oo vy aipoe'i ixupe:

— Pete'i ava Nhanderuete remimbo'e ou kuri xea py, Nhanderuetea guigua anjo ramigua ojekuaa, nhanemongyje rei va'e. Ha'e rã xee ma naporandui maguigua paa re, ne'i ha'e voi guery nomombe'ui xevy,

⁷ va'eri aipoe'i xevy: "Ma'ë, ndee rereko'i vy reikuavã 'rã pete'i ava'i. Ha'e nunga rupi aý ma ey'uve eme vinho, ne'i iro va'e, he'u eme guive ha'eve'ý va'e, mba'eta ava'i ma oiko 'rã nazireu Nhanderuete pe omboaxa pyre, guyru'i py o'i reve omanoa ára peve", he'i va'ekue xevy.

⁸ Ha'e ramo Manoá onhembo'e SENHOR pe. Ha'e vy aipoe'i:

— Xe-SENHOR, ajerure ndevy, embou ju ava neremimbo'e, torembo'e ava'i itui'i va'erã roguereko aguã re.

⁹ Ha'e rami Manoá ijayvu rã Nhanderuete oendu ramo SENHOR-a guigua anjo te'igüe ju ou kunha va'e o'ia py, mba'ety py oguapy oiny jave. Ha'e rã ime Manoá ma no'i hexeve.

¹⁰ Ojekuaa ramo kunha va'e opu'ã pojava ho'amy vy onha ovy ome pe omombe'u. Ha'e vy aipoe'i ixupe:

— Ma'ë, xevy ojexa uka ju ava kueve'i ojexa uka va'ekue — he'i.

¹¹ Ha'e ramo Manoá opu'ã avi vy gua'yxy rakykue oo. Ha'e gui ava va'e hi'a'ia py ovaë vy aipoe'i ixupe:

— Ndee pa kova'e kunha pe ndeayvu ra'e?

Ombovai:

— Xee ae ri — he'i.

¹² Ha'e ramo Manoá aipoe'i:

— Ha'e gui ndeayvuague ojeupity ma jave marã rami 'rã tu roguereko ava'i, ha'e mba'e nunga 'rã tu ojapo?

¹³ Ixupe SENHOR-a guigua anjo ombovai ju:

— Tove kunha va'e toiko xeayvuague rami ae.

¹⁴ Ha'e rami vy pete'ive henda py ndo'ui 'rã uva'a guigua, vinho ne'i iro va'e ndoy'ui 'rã, ndo'ui 'rã guive ha'eve'ý va'e. Ixupe xeayvuague ha'e javi 'rã ojapo — he'i.

¹⁵ Ha'e ramo Manoá te'igüe ju aipoe'i SENHOR-a guigua anjo pe:

— Epytave'i ranhe ke, ha'e rã ndevy roguereko katu 'rã pete'i kavara'i — he'i,

* 13:5 Nazireu kuery mboae ma Nhanderuete pe mba'emo ojapo aguã re onhemboayvu va'e (Números 6.1-21). Ha'e rã Sansão ma itui'i e'ý re voi anjo oiporavo uka va'ekue nazireu oiko aguã.

¹⁶ mba'eta Manoá ndoikuaai SENHOR-a guigua anjo oikoa. Ha'e gui SENHOR-a guigua anjo aipoe'i Manoá pe:

— Apytave teĩ nda'ui 'rã tembi'u reme'ê va'e. Xapy'a rei mba'emo reapy reve reme'ê va'erã ri rereko katu vy SENHOR pe ae eme'ê — he'i.

¹⁷ Manoá oporandu ju SENHOR-a guigua anjo pe:

— Marã rami tu nderery, ndeayvuague ojeupity ramo romboete aguã?

¹⁸ SENHOR-a guigua anjo ombovai vy

— Mba'e re tu reporandu xerery re? Mba'eta iporã ete va'e oikuaa pyrã e'ỹ — he'i.

¹⁹ Ha'e gui Manoá ojopy peteĩ kavara'i ha'e mba'emo aju guigua ome'ê va'erã. Ha'e va'e ma SENHOR pe ome'ê peteĩ ita áry. Ha'e ramo SENHOR-a guigua anjo ma peteĩ mba'e ojapo iporã ete va'e, Manoá ha'e ta'yxy oexaa py.

²⁰ Ha'e rami vy altar áry gui tata yva katy ojeupi ovy va'e rupi SENHOR-a guigua anjo voi ojeupi ovy. Ha'e rã Manoá ha'e ta'yxy oexa vy guenapy'ã re ikuai ngova yvy re omovaẽ reve.

²¹ Manoá pe, neĩ ta'yxy pe anjo SENHOR-a guigua ndojexa ukavei ramo Manoá oikuaa SENHOR-a guigua anjo oikoa.

²² Ha'e rami vy aipoe'i gua'yxy pe:

— Anhetê ete nhamano 'rã, Nhanderueete jaexa rire.

²³ Ha'e rã ta'yxy ombovai:

— SENHOR nhandejukaxe va'e rire nhandepo gui ndojopyi 'rãgue mba'emo jaapy reve nhame'ê va'ekue, neĩ mba'emo aju guigua. Neĩ ndoexa ukai 'rãgue ha'e nunga ha'e javi, neĩ ndoikuaa ukai 'rãgue guive — he'i.

²⁴ Ha'e va'e rire ma kunha va'e oikuavã'i peteĩ ava'i. Ha'e vy omboery Sansão. Ha'e gui ava'i tuvixa ovy, ha'e SENHOR omoingo porã.

²⁵ Ha'e gui Zorá ha'e Estaol mbyte Maané-Dã py oiko jave SENHOR Nhe'ê omboypy ogueroko aguã.

14

Sansão omendaxeague

¹ Ha'e gui Sansão ma Timna tetã py oo. Ha'e py ma peteĩ filisteu rajy oexa vy

² ojevy vy omombe'u nguu ha'e oxy pe. Ha'e vy aipoe'i:

— Timna py aexa kuri peteĩ kunha, filisteu kuery rajy regua. Peru ta'vy xera'yxyrã.

³ Ha'e rami teĩ tuu ha'e ixy ombovai:

— Jipoi ri ty'y kunha nhaneretarã kuery rajy regua, ha'e'ỹ vy nhande kuery ha'e javi regua, filisteu kuery ikuaia gui ndera'yxyrã rejopy 'rãgue py? Mba'eta ha'e kuery ma opire omboi uka e'ỹ va'e.

Sansão aipoe'i nguu pe:

— Eru xevy ha'e va'e ae, mba'eta ha'e va'e anho ajou porã — he'i.

⁴ Ha'e gui tuu ha'e ixy ndoikuaai SENHOR gui ha'e rami aguã oikoa. Ha'e va'e jave py Israel kuery re filisteu kuery ipo'aka ramo SENHOR oarõ filisteu kuery ombopaga aguã.

⁵ Ha'e gui nguu ha'e oxy reve jogueraa Timna py. Timna katy'i uvaty ikuai va'e py ovaẽ jave ome'ê vy oexa peteĩ guary ra'y okororõ reve oẽ ouvy rã oĩa katy.

⁶ Ha'e ramo hexe SENHOR Nhe'ê onhemonde rã omondoropa vyvoi kavara'i omondoroa rami avi, opo py mba'eve ogueroko e'ỹ re. Ha'e rami teĩ nguu neĩ oxy pe nomombe'ui ojukaague.

⁷ Oove vy kunha va'e reve ijayvu vy ojou porã.

⁸ Kueve ma rire Sansão ojevy ju gua'yxyrã ogueraa aguã. Ha'e gui tape rupi oo vy opia ovy oexa aguã guary re'õgue. Ha'e va'e oexa rã eiru oĩ ei reve.

⁹ Opo py hetãgue ojopy vy ho'u heravy uguata reve. Ha'e gui nguu ha'e oxya py ovaẽ vy ha'e kuery pe ome'ê ei, ha'e rã ho'u avi. Ha'e rami teĩ ha'e kuery pe nomombe'ui guary re'õgue gui oguenoẽague.

Ayvu py mba'emo re Sansão oporanduague

¹⁰ Ha'e gui kunha va'e ro py Sansão ojapo peteĩ ngaru, mba'eta ha'e rami ae kunumigue ojapo va'erã ha'e kuery reko rami vy. Tuu avi oo.

¹¹ Ha'e gui filisteu kuery Sansão oexa vy trinta avakue oenoĩ hexeve ikuai aguã.

¹² Ha'e gui ha'e va'e kuery pe Sansão aipoe'i:

— Pëvy amombe'u ta peteĩ ayvu pembovai va'erã. Xapy'a rei sete ára re ngaru ndopai peve pembovai kuaa ri ramo pëvy ame'ê 'rã trinta kamixa ha'e trinta ao ngaru oĩa py oiporupy.

¹³ Ha'e rã napembovai kuaa ri vy peẽ ae 'rã peme'ê xevy trinta kamixa ha'e trinta ao ngaru oĩa py oiporupy — he'i.

Ha'e kuery aipoe'i:

— Emombe'u ha'vy orevy, toroendu ayvu rombovai aguã.

¹⁴ Ha'e ramo ha'e kuery pe omombe'u vy

— Okaru va'ekue gui oẽ tembi'u,

imbaraete va'ekue gui oẽ he'ê va'e — he'i.

Ha'e rã mboapy ára re ha'e kuery nombovai kuaa ikuapy.

¹⁵ Sete araa py ma ha'e kuery aipoe'i Sansão ra'yxy pe:

— Ndeayvu na neme pe orevy oporanduague omombe'u porãve aguã re, ndee ha'e nderu ro roapypa e'ỹ aguã. Tyrã pa oreмба'e rei-rei reipe'a aguã rive orerenõ uka? Ha'e rami e'ỹ teve? — he'i ikuapy.

¹⁶ Ha'e ramo Sansão renonde ta'yxy ojae'õ. Ha'e vy aipoe'i:
— Xembomboriau ete, ndaxerayvui vy. Mba'eta xeretã pygua kuery pe remombe'u ayvu ha'e kuery ombovai va'erã, teĩ xevy voi neremombe'u porãvei teri.

Ha'e ramo ombovai:

— Neĩ xeru neĩ ha'i pe voi namombe'ui. Ha'e gui ndevy ma nhi'ã amombe'u 'rã? — he'i.

¹⁷ Ha'e rã henonde ojae'õ oikovy sete ára re ngaru oikoa pukukue re. Ha'e ramo sete araa py mae omombe'u porãve ixupe oporandu riae ramo. Ha'e ramo kunha va'e ju omombe'u guetã pygua kuery pe.

¹⁸ Ha'e gui sete araa py kuaray oike e'y mbove ma ha'e va'e tetã pygua avakue aipoe'i Sansão pe:

— Mba'e nunga tu oiko ei gui he'ëve va'e, ha'e guary gui imbarateve va'e? — he'i.

Ha'e rã ha'e kuery pe Sansão aipoe'i:

— Xerymba vaka kunha py vyv napeikaraĩ va'e rire napembovai kuaai 'rãgue aporanduague.*

¹⁹ Ha'e ramo hexe SENHOR Nhe'ẽ onhemonde ramo Asquelom pygua kuery ikuai py oo vy ha'e va'e regua ojuka trinta avakue. Ha'e rami vy ha'e kuery ao ngaru oĩa py oiporu va'e oipe'apa vy ome'ẽ oporanduague ombovai va'ekue pe. Va'eri ivai raxa reve oo ju ngu ro katy.

²⁰ Ha'e gui Sansão irũ ae pe ju ome'ẽa kunha va'e ta'yxyrã.

15

Filisteu kuery mba'ety rupi Sansão oapypaague

¹ Kueve ma rire trigo omono'õa ára py Sansão peteĩ kavara'i ogueraa reve vy oo guembirekoa py, “Avaẽ 'rã xerembireko oĩa py” he'i vy. Ha'e rami teĩ hatyu nomovaẽi.

² Ha'e vy aipoe'i ixupe:

— Xee aexa'ã ndereayvuveia rami. Ha'e rami vy neirũ pe ju ame'ẽ. Ha'e rami avi ikypy'y kyrĩve va'e ixugui iporãve va'e'y ri ty'y? Ha'e rami rã eraa hekovia.

³ Sansão ombovai:

— Aỹ ma xee ha'evea rami 'rã ambopaga filisteu kuery — he'i.

⁴ Ha'e rami vy oo vy ojopy trezentos aguara'i, ha'e mokõ-mokõ ruguai re ojokua hendy va'erã.

⁵ Hendy va'erã omoendy py opoipa filisteu kuery mba'ety rupi. Ha'e rami vy omoendy mba'emo aju jokuaa ikuai va'e, nomono'õi teri va'ekue guive, ha'e gui uvaty ha'e oliveira-ty ha'e javi rupi.

⁶ Filisteu kuery oporandu okuapy:

— Mava'e tu ha'e nunga ojapo?

Ombovaia:

— Timna pygua rajy me Sansão ojapo, mba'eta ixugui ta'yxy oipe'a vy irũ pe ju ome'ẽ rire — 'ea. Ha'e ramo filisteu kuery oje'oi vy oapy kunha va'e tuu reve.

⁷ Sansão aipoe'i ha'e kuery pe:

— Evoko rami pejapo rire ndapytu'ui 'rã aipotaa rami ajepy e'ya ja — he'i.

⁸ Ha'e rami vy oguera'a vy ojuka reta. Ha'e vy oo ju, Etã py itaovape guy oĩ va'e py opyta.

Judá regua avakue Sansão ojokua reve ogueraa ague

⁹ Ha'e ramo filisteu kuery oje'oi vy Judá rovai opu'ã okuapy. Ha'e rami vy Leĩ tetã katy'i rupi ikuai.

¹⁰ Ha'e kuery pe Judá regua avakue oporandu:

— Mba'e re tu peju ore kuery rovai?

Ha'e kuery ombovai:

— Sansão re roju rojokua heravy aguã, hexe rojapo aguã ore kuery re ojapoaque rami avi — he'i okuapy.

¹¹ Ha'e ramo três mil avakue Judá regua oje'oi Etã py itaovape guy oĩ va'e py. Ha'e vy aipoe'i okuapy Sansão pe:

— Ndereikuaii teve filisteu kuery nhandere ipo'akaa? Mba'e re tu ha'vy ha'e rami ete rejapo nhande kuery re?

Ombovai:

— Xere ha'e kuery ojapoaque rami ae avi xee ajapo karamboae ha'e kuery re — he'i.

¹² Ha'e kuery aipoe'i:

— Ore roju rojokua heravy aguã, filisteu kuery po py romboaxa aguã.

Sansão aipoe'i ha'e kuery pe:

— Peura ha'vy peẽ ae xejuka e'y aguã.

¹³ Ha'e kuery ombovai:

— Any ri, rojokua heravy aguã rive roju ha'e kuery po py romboaxa aguã. Mba'eve py rei ndorojukai 'rã — he'i. Ha'e rami vy mokoĩ ixã pyau py ojokua vy oguenoẽ heravy itaovape guy py oĩa gui.

Mburika raĩ'y kãgue py Sansão mil avakue ojukaague

¹⁴ Leĩ tetã py ha'e kuery ogueraoẽ ramo filisteu kuery ovy'a reve oẽmba jogueruvy ovaexĩ aguã. Ha'e rami teĩ Sansão re SENHOR Nhe'ẽ onhemonde ramo ixã ijyva rupi ojokuaague omondo nhimbo kaĩgue'i rami rive. Ha'e rami vy ojokuaague ojerapa ipo gui.

¹⁵ Peteĩ mburika'i raĩ'y kãgue pyau teri va'e ha'e katy'i itui va'e ojou vy ha'e va'e py ojuka mil avakue.

¹⁶ Ha'e vy aipoe'i:

* 14:18 “Xerymba vaka kunha” he'ia ma gua'yxy re ae ijayvu vy, “Xera'yxy pe napeporandui va'e rire napembovai kuaai 'rãgue” he'i aguã.

— Peteĩ mburika'i raĩ'y kãgue py ajapo opa rupi ono'õa aguã rami,
peteĩ mburika'i raĩ'y kãgue py rive ajuka mil avakue — he'i.

¹⁷ Ha'e rami ijayvupa ma vy omombo haĩ'y kãgue opo gui. Ha'e va'e henda ma omboery Ramate-Leĩ.*

¹⁸ Ijy'uvei vaipa vy ojavukai SENHOR pe. Ha'e vy aipoe'i:

— Xee nerembiguaĩ pe heta reraa jepe uka kuri. Ha'e gui xee amano 'rã teve xey'uvei gui? Aĩ vai 'rã teve ha'e va'e kuery opire omboi uka e'ỹ va'e po py? — he'i.

¹⁹ Ha'e ramo itakua Leĩ py oĩ va'e SENHOR oipe'a vy ojapo py oxyry ouvvy aguã rami. Sansão oy'u ma vy imbaraeete ha'e oiko porã ju. Ha'e va'e rire ha'e va'e henda omboerya En-Hacorẽ aỹ peve.†

²⁰ Sansão ma vinte ma'etỹ re opena Israel kuery re, filisteu kuery ipo'aka jave ae.

16

Gaza py Sansão ooaque

¹ Ha'e gui Gaza tetã py ju Sansão oo. Ha'e py ma peteĩ kunha itavy rei va'e oexa vy hexeve jogueroke rive.

² Gaza pygua kuery joupe-upe

— Sansão ovaẽ ra'e apy — he'i okuapy.

Ha'e ramo ojoko mbeguepa, pytũ mbukukue re oarõ okuapy tetã kora rokẽ py onhemia py. Pytũ mbukukue re okyrirĩ okuapy, mba'eta aipoe'i:

— Nharõ tema ko'ẽ peve. Ha'e rami vy jajuka 'rã — he'i vy.

³ Ha'e rã Sansão ma pytũ mbyte peve'i nhogueronheno joguerupy. Ha'e gui ovy vy ojopy tetã kora rokẽ joavaie regua. Ijokoa reve oipe'a vy omoĩ oaxi'y áry, ha'e vy yvy'ã katy ogueraa, vyvty apyte áry Hebrom renonde katy peve.

Dalila Sansão ojopy uka nhemiague

⁴ Ha'e va'e rire Sansão inhakã vai peteĩ kunha Soreque vyvuyuga py oiko va'e Dalila hery va'e re.

⁵ Ha'e ramo kunha va'e oĩa py filisteu regua yvatekueve oje'oi vy aipoe'i ixupe:

— Ndeavvu na ixupe ndevy omombe'u porãve aguã mba'e nunga rupi pa imbaraeete oikovya, ha'e mba'e nunga py pa rojokua vy rojopy ete aguã. Ha'e ramo ore kuery peteĩ-teĩ ndevy rome'ẽ 'rã mil e cem hatã'i va'e prata guigua — he'i okuapy.

⁶ Ha'e rami rã Dalila aipoe'i Sansão pe:

— Ajerure ndevy remombe'u aguã xevy mba'e nunga rupi tu nembraetea, ha'e mba'e nunga py ndejokua vy 'rã tu ndere ipo'akaa.

⁷ Sansão ombovai:

— Sete vaka pi pyau, ipiru e'ỹ teri va'e py ri xejokuaa ramo xekangy 'rã. Ha'e rami vy avakue mboae rami rive 'rã aiko — he'i.

⁸ Ha'e ramo Dalila pe filisteu regua yvatekueve ogueru sete vaka pi pyau, ipiru e'ỹ teri va'e. Ha'e rã ha'e va'e py kunha va'e ojokua,

⁹ ha'e rã avakue ma opy ja'o mboae py onhomi okuapy. Ha'e rami vy kunha va'e aipoe'i Sansão pe:

— Sansão, filisteu kuery ou ma ra'e ndere! — he'i ramove omondopa vaka pi, mandyju okai va'ekue omondopa rami. Ha'e rami py ndoikuai okuapy mba'e nunga rupi pa imbaraeetea.

¹⁰ Ha'e gui Dalila aipoe'i Sansão pe:

— Ma'ẽ, ndee ma xejojai rei ha'e ndeapu xevy. Ma'ẽ, aỹ ma emombe'u porã xevy: Mba'e nunga py pa ndejokuaa ramo 'rã tu ha'eve?

¹¹ Ombovai:

— Ixã pyau mba'eve py oiporu pyre e'ỹ teri va'e py ri xejokuaa porã ramo xekangy vy amboae avakue rami rive 'rã aiko — he'i.

¹² Ha'e ramo Dalila ma opy ja'o mboae py avakue onhomi ma vy ixã pyau ogueru, ha'e ojokua. Ha'e vy

— Sansão, filisteu kuery ou ma ra'e ndere! — he'i teĩ ojyva kuaa omondopa vyvoti peteĩ nhimbo omondopa rami.

¹³ Ha'e gui Dalila aipoe'i Sansão pe:

— Aỹ peve xejojai anho rei ha'e ndeapu xevy. Ha'e rã aỹ ma emombe'u porã xevy: Mba'e nunga py pa ndejokuaa ramo 'rã tu ha'eve?

Ombovai:

— Ajukue popẽa py xe'a sete henda py ri reipopẽ, ha'e vyvra rakua py rembopija atã ramo xekangy vy aiko 'rã avakue mboae rami rive — he'i.

Ha'e ramo oke oupy jave kunha va'e hi'a sete popẽa oĩ va'e oipopẽmba ajukue popẽa py,

¹⁴ ha'e peteĩ vyvra rakua py ju ombopija atã. Ha'e vy aipoe'i ixupe:

— Sansão, filisteu kuery ou ma ra'e ndere! — he'i ramo okeague gui omyĩ vy vyvra rakua omboi vy oguenoẽ o'a ajukue popẽa gui.

¹⁵ Ha'e gui kunha va'e aipoe'i ixupe:

— Mba'exa tu xevy “Roayvu” re va'eri nekuraxõ py xere nerenhemoirũxi? Mba'eta mboapykue ma xejojai rei, neremombe'ui teri guive mba'e nunga rupi pa nembraetea — he'i.

* 15:17 Tery Ramate-Leĩ ma “Yvy'ã haĩ'y kãgue oĩa” ea. † 15:19 Tery En-Hacorẽ ma “Ojavukai va'e pegua yvu” ea.

¹⁶ Ko'ê nhavõ kunha va'e oporandu tema, omombe'u ete aguã omoangeko rei riae ramo Sansão onhe'ê py nonhenhandu porãvei, omanoxe rive peve.

¹⁷ Ha'e rami vy kunha va'e pe onhemombe'upa opy'a re oĩ va'e ha'e javi. Ha'e vy aipoe'i iuxpe:

— Xee ma xeaã rague re kyxe omovaëa va'erã e'y, mba'eta ha'i rye py teri aĩ reve nazireu aiko Nhanderuete omboaxa pyre. Xeaã rague onhopã ri ramo xembaraetea ojepe'apa 'rã xegui. Ha'e ramo xekangy vy aiko 'rã avakue mboae rami rive — he'i.

¹⁸ Opy'a re oĩ va'e ha'e javi onhemombe'ua Dalila oikuaa ma vy oenoĩ uka filisteu regua yvatekueve. Ha'e vy aipoe'i:

— Peju ke teĩgue ju, mba'eta aỹ ma xevy onhemombe'u ma opy'a re oĩ va'e ha'e javi — he'i. Ha'e ramo oĩa py filisteu regua yvatekueve oupa okuapy, peráta guive oguera.

¹⁹ Ha'e ramo Dalila ojapo o'u áry Sansão oke aguã rami. Ha'e vy peteĩ ava oenoĩ vy onhopĩ uka hi'a sete popëa oĩ va'ekue ha'e javi. Ha'e rami py ipo'aka nho hexe, imbaraetea okanhy ete ramo.

²⁰ Ha'e gui kunha va'e aipoe'i:

— Sansão, filisteu kuery ou ra'e ndere!

Ha'e rã okeague gui omyĩ vy ojeupe ae “Jepiaty rami aẽ ju 'rã aỹ, ha'e vy aa jepe 'rã” he'i, mba'eta ndoikuai teri iugui SENHOR opo'akaa oipe'a maa.

²¹ Ha'e ramo filisteu kuery ojopy vy omombupa hexa, ha'e Gaza tetã py ogueraa. Mokoĩ corrente overa va'e guigua py ojokua. Ha'e rã mba'emo mongu'ia ombojere herekovy nhuã py omboty'a py.

²² Ha'e rami teĩ inhakã rague onhopã rire ipukuve ju ma ovy.

Sansão omanoague

²³ Ha'e gui filisteu regua yvatekueve ono'õ okuapy nguu ete Dagom ra'angaa pe mba'emo ome'ê ha'e ovy'a okuapy aguã. Mba'eta

— Nhandevyguia nhanderuete ma nhandepo py Sansão nhanderoivaigua omboaxa rire — he'i vy.

²⁴ Ha'e rami heta va'e kuery oexa vy oporaẽ okuapy nguu ete ramigua pe, mba'eta aipoe'i:

— Nhandevyguia nhanderuete nhandepo py omboaxa nhanderoivaigua nhandevyvy ojapo vai ha'e nhanderegua ojuka va'ety — he'i okuapy.

²⁵ Ha'e gui opy'a py ovy'a okuapy vy aipoe'i:

— Pembou na Sansão jarovy'a rei aguã — he'i. Ha'e ramo Sansão nhuã gui herua rã oguerovy'a rei okuapy.

Oo ytarã mokoĩ omo'ã mbyre pa'ũ py omopu'ãa imo'amy.

²⁶ Ha'e gui Sansão aipoe'i kunumi ipo re ogueno'ã va'e pe:

— Xerereko ke oo yta hi'ái va'e re apoko aguã peve, hexe ajeko aguã — he'i.

²⁷ Ha'e va'e oo ma tynyẽ rei avakue ha'e kunhague. Ikuai avi filisteu regua yvatekueve ha'e javi. Oo ao'ia áry ma três mil ju ikuai avakue ha'e kunhague, Sansão re oma'ê okuapy ojoi rei reve.

²⁸ Sansão ojapukai SENHOR pe. Ha'e vy aipoe'i:

— SENHOR Xeruete, ajerure ndevy xere nema'endu'a aguã, ha'e eme'ê aỹ ete'i ri jepe xembaraete ju aguã. Xeruete, filisteu kuery re ajepy 'rãgue xerexa omombuague rekovia — he'i.

²⁹ Ha'e rami vy Sansão oikuaã mokoĩve oo yta oo mbyte py hi'ái va'e, ha'e va'e re onhemomburu ete ho'amy, peteĩ re ma oiporu kuaa regua re, ha'e rã amboae re ma oaxua re.

³⁰ Ha'e vy aipoe'i:

— Tamano filisteu kuery reve — he'i vy onhemomburu ete reve ojero'a ramo oo ho'apa yvatekueve ha'e heta va'e kuery ha'e py ikuai va'e ha'e javi áry. Ha'e rami py oiko vaia ára ma oikove teri reve jojukaague gui ojuka retave.

³¹ Ha'e gui oo tyvy kuery ha'e tuu ro pygua kuery ha'e javi. Hetekue oupi heravy vy onhono porã Zorã ha'e Estaol mbyte, tuu Manoá onhono porãague py ae. Vinte ma'etỹ re Sansão opena va'ekue Israel kuery re.

17

Mica ngoo py ta'angaa oguerekoague

¹ Oiko peteĩ ava Efraim regua Mica hery va'e, yvy'ã reia re oiko.

² Ha'e va'e ma aipoe'i oxy pe:

— Ha'e gui mil e cem hatã'i va'e prata guigua ndegui imondaague va'e, ha'e va'e re ndeavyvua vaiague ha'e xevy remombe'u avi va'ekue, ma'ê, ha'e va'e peráta ma xee ae areko. Xee ae xemonda karamboae ndegui.

Ha'e ramo ixy ombovai:

— Tove SENHOR tanemoingo porã, xepi'a! — he'i.

³ Oxy pe mil e cem hatã'i va'e prata guigua ome'ê jevy ramo ixy aipoe'ive ju:

— Kova'e peráta ma xepo gui ae amboaxa SENHOR pe. Ndee xepi'a, ndee ae 'rã reiporu peteĩ ta'angaarã rejapo uka aguã yvyra gui, ha'e gui amboae ju ma prata ryku gui. Aỹ gui ma ame'ẽmba ju 'rã ndevy — he'i.

⁴ Ha'e rami rã oxy pe peráta ome'ê ramo duzentos hatã'i va'e prata guigua ogueraa vy opaga prata re omba'eapo va'e pe. Ha'e va'e ju peteĩ ta'angaarã ojapo yvyra gui, ha'e amboae ju ma hyku va'e gui ojapo. Ha'e va'e ta'angaa ma Mica ro py ae opyta.

⁵ Ha'e rami py ava Mica hery va'e oguereko oo tuuete ra'angaa ikuaiaty. Ojapo avi peteĩ manto sacerdote pegua ha'e ta'angaa opy guarã. Peteĩ gua'y omboaxa avi sacerdote-rã.

⁶ Ha'e jave py ma ndoikoĩ huvixave Israel kuery re opena va'erã. Ha'e ramo peteĩ-teĩ ikuai 'rã ha'e kuery ae oipotaa rami rive.

Mica ro py levita ovaē jave guare

⁷ Ha'e gui Judá regua Belém tetã py oiko peteĩ kunumi va'e. Ha'e va'e ma levita oiko va'eri ha'e py oiko.

⁸ Ha'e gui Judá regua Belém gui ha'e va'e ojepe'a ovy, mamō rã ojou porã reia py oiko aguã. Ha'e rami vy tape rupi oo vy ovaē Efraim regua yvy'ã reia re, Mica ro oĩa py ae.

⁹ Ha'e gui Mica oporandu ixupe:

— Magui tu reju?

Ombovai:

— Xee ma levita Judá regua Belém guigua. Ha'e vy mamō rã ajou porãa py 'rã aiko — he'i.

¹⁰ Ha'e ramo Mica aipoe'i ixupe:

— Eiko xea py ae. Xerurã rami eiko, xeivygua sacerdote-rã. Ha'e rã ma'et'ya nhavõ ndevy ame'ẽ 'rã dez hatã'i va'e prata guigua, ndeaorã ha'e tembi'u — he'i rã levita va'e oendu vy ovaē ha'e py.

¹¹ Ovy'a reve kunumi va'e oiko ava ro py. Ta'y rami oiko.

¹² Ha'e ramo Mica ma levita regua kunumi va'e omoĩ ojepegua sacerdote-rã. Ha'e ramo Mica ro py oiko.

¹³ Ojeupe ae Mica aipoe'i:

— Aỹ xee aikuaa SENHOR xemoingo porã 'rãa, xeivygua sacerdote-rã levita areko ramo.

18

Dã regua kuery oyvy tuvixave va'erã ojouxave jave guare

¹ Ha'e va'e jave ma ndoikoi huvixave Israel kuery re opena va'erã. Ha'e rami rã Dã regua kuery oeka okuapy oyvyrã ikuai aguã, mba'eta ha'e va'e ára peve ha'e kuery ndojopyi teri oyvyrã xorte rupi ome'ẽ mbyre Israel regua ikuai mbyte.*

² Ha'e rami vy Dã kuery omondouka peteĩ nhirui'avakue ha'e kuery va'e regua ae, Zorã ha'e Estaol pygua kuery ipy'a guaxuvekue, yvy re oma'ẽ mbegue ha'e oikuaa pota aguã. Ha'e vy ha'e kuery pe

— Tapeo, peikuaa pota yvy re — he'i. Ha'e ramo oje'oi vy Efraim regua yvy'ã reia re ovaē Mica ro py. Ha'e vy oke okuapy ha'e py.

³ Mica ro py ha'e kuery ikuai jave oendu kuaa kunumi va'e levita regua ayvu. Ha'e vy oĩa py onhemboja vy aipoe'i ixupe:

— Mava'e tu ndereru apy? Mba'e tu rejapo reikovy apy? Ha'e mba'e tu apy rereko?

⁴ Ombovai:

— Po rami Mica ojapo xeivy. Peráta re ixupe amba'eapo vy aiko ixupegua sacerdote — he'i.

⁵ Ha'e ramo aipoe'i okuapy ixupe:

— Eporandu ha'vy Nhanderuete pe, roikuaa aguã tape rupi rooa rupi iporã va'e rojou 'rã paa.

⁶ Sacerdote ombovai:

— Tapeo porã ke. Tape rupi peguataa rupi SENHOR oma'ẽ 'rã — he'i.

⁷ Ha'e ramo peteĩ nhirui'avakue oje'oi vy Laís tetã py ju ovaē. Ha'e py ma oexa rã ha'e pygua kuery ikuai porã. Sidom pygua kuery reko rami ikuai mby'a porã ha'e joe ojeroviaa rupi. Peteĩve jipoi huvixa mba'emo py omoingo axy va'erã. Sidom tetã gui mombyry ikuai, amboae kuery re nonhemoirũ guive.

⁸ Ha'e ramo ojevypa ju guivy kuery Zorã ha'e Estaol py ikuai py. Ha'e rã ha'e kuery pe oporandu vy

— Mba'e pa pemombe'u orevy? — he'i ramo

⁹ ombovai:

— Pepu'ã ke, jaje'oi ha'e kuery rovai. Mba'eta yvy re roikuaa potaa rupi roexa rã iporã. Peĩ rive ta tema ri ty'y upe py? Pemboave eme ta'vy peje'oi vy ha'e va'e yvy pejopy aguã.

¹⁰ Mba'eta ha'e py pevaẽ vy pejou 'rã joe ojeroviaa rupi rive ikuai va'e, ijyvy ma tuvixa guive. Nhanderuete omboaxa ma pendepo py. Ha'e va'e yvy ma mba'eve oata e'ya ha'e py ikuai va'e kuery pe — he'i.

¹¹ Ha'e rami rã Dã regua kuery ma Zorã ha'e Estaol gui oje'oi, seiscentos avakue tembiporu joe opu'aa pygua revegua meme.

¹² Ha'e kuery oje'oi vy Judá regua Quiriate-Jearim py ranhe ikuai. Ha'e nunga rupi ha'e va'e henda pe “Maanẽ-Dã” he'i okuapy aỹ peve. Quiriate-Jearim rovai katy oĩ.

¹³ Ha'e va'e gui oje'oi ju Efraim regua yvy'ã reia katy. Ha'e vy Mica ro py ju ovaē okuapy.

Mica pegua ta'angaa oipe'a vy Laís tetã re ipo'aka okuapyague

¹⁴ Peteĩ nhirui'avakue Laís yvy re oikuaa pota aguã oje'oi va'ekue aipoe'i guivy kuery pe:

— Peikuaa pa ha'e va'e oo py oĩa peteĩ manto sacerdote pegua, ha'e ta'angaa oo pygua, ta'angaa yvyra guigua ha'e amboae ma mba'emo ryku guigua oĩa? Penhembopy'a ke ha'vy mba'emo pejapo aguã re — he'i.

¹⁵ Ha'e ramo ha'e py ovaē okuapy kunumi levita regua ro py, Mica ro py ae. Ha'e vy oxarura okuapy ixupe.

¹⁶ Seiscentos avakue Dã regua tembiporu joe opu'aa pygua oguereko va'e ma okẽ rupi opyta okuapy oikeaty py.

¹⁷ Ha'e rã peteĩ nhirui'avakue yvy re oikuaa pota aguã oje'oi va'ekue oike vy ojopy ta'angaa yvyra guigua, manto sacerdote pegua, ta'angaa oo py ikuai va'ekue ha'e ta'angaa mba'emo ryku gui ojapo pyre guive. Ha'e rã sacerdote ma opyta ho'amy okẽ py, seiscentos avakue tembiporu joe opu'aa pygua revegua kuery ikuai py.

¹⁸ Mica ro py ha'e kuery oike vy ta'angaa yvyra guigua oipe'a heravy, manto sacerdote pegua, ta'angaa oo py ikuai va'e ha'e ta'angaa mba'emo ryku guigua. Ha'e ramo sacerdote aipoe'i ha'e kuery pe:

*

— Mba'e tu pejapo?

¹⁹ Ha'e kuery ombovai:

— Ekyriri ke, emoĩ ndepo ndejuru py, ha'e eju orerupive. Orevy ju 'rã reiko oreru rami ha'e sacerdote-rã. Mba'eta ndevy pe ha' eveve pa petei'i ava ro py sacerdote reikoa, tyrã pa Israel re petei regua ha'e javi pe sacerdote reiko aguã? — he'i rã

²⁰ sacerdote oendu vy ovy'a opy'a py. Ha'e rami vy ha'e ae ju manto sacerdote pegua oipe'a, ta'angaa oo py ikuai va'e ha'e ta'angaa yvyra guigua oipe'a avi vy oguenoẽ heravy ha'e kuery mbyte rupi.

²¹ Ha'e kuery ojevy aguã katy ju oo ta vy guenonde omoĩ gua'y kue'iry, guymba kuery ha'e omba'e rei-rei ha'e javi. Ha'e rami vy oje'oi.

²² Mica ro gui mombyry'i ma Dã kuery oje'oi jave avakue Mica ro katy'igua kuery nhomboaty vy oupity okuapy.

²³ Ha'e vy hakykue katy gui ojapukai oje'oivy. Ha'e rã ha'e kuery ojere vy aipoe'i Mica pe:

— Mba'e tu oiko upe va'e kuery remboaty aguã?

²⁴ Ombovai:

— Tuuete ra'angaarã ajapo va'ekue peipe'apa ra'e, xevygua sacerdote guive. Ha'e gui peo ju kuri. Mba'e tu oiko xevy guarã peja va'ekue? Ha'e gui mba'e re tu xevy peporandu vy “Mba'e tu oiko?” peje? — he'i.

²⁵ Ha'e ramo Dã kuery aipoe'i ixupe:

— Ndeayvive eme orevy, xapy'a rei avakue ipy'a guaxukueve ndere opu'ã rã pekanhymba e'ỹ aguã, ndero pygua kuery reve — he'i okuapy.

²⁶ Ha'e rami vy Dã kuery oje'oive tema. Ha'e rã Mica ma ixugui ha'e kuery ipo'akavea oikuaa vy ojevy ju ngoo katy.

²⁷ Ha'e kuery ogueraa ta'angaarã Mica ojapo va'ekue ha'e sacerdote oguereko va'ekue. Ha'e gui Laís tetã py ju ovaẽ, petei regua ikuai porã ha'e joe ojeroviaa rupi rive ikuaia py. Ha'e vy ojukapa kyxe py, ha'e oapypa tetã.

²⁸ Nomoingovei avave rei, mba'eta Sidom tetã gui mombyry, avave rei re na'irũĩ guive. Ha'e va'e tetã ma Bete-Reobe katy'i oĩ yvyugua oĩ va'e py. Ha'e gui ha'e kuery ae ju tetã omoatyrõ ju vy ha'e py ikuai.

²⁹ Tetã omboery guamoĩ Dã Israel ra'y oiko va'ekue rery py. Ha'e rã tetã rery ypyague ma Laís.

³⁰ Dã kuery ojeupe ae ogueraa ta'angaa yvyra guigua. Ha'e gui Dã regua kuery pe ju Gérson ra'y Jônatas, Manassés ramymino va'e oĩ sacerdote, ha'e va'e rire ta'y kuery pe ju, ha'e kuery escravo-rã ogueraapaá ara peve.

³¹ Ha'e rami py Mica ta'angaa ojapo va'ekue ma ojeupe ae ju ha'e kuery oguereko, Siló py Nhanderuete pegua oo oĩ teria ja.

19

Levita ha'e ta'yxy jevy rekoke oĩa

¹ Ha'e va'e jave py huvixave ndoikoi Israel kuery re opena va'erã. Ha'e gui oiko petei levita regua. Ha'e va'e ma Efraim yvy'ã rupi oguata oikovy vy petei gua'yxy jevyrã ogueraa Judã regua Belém tetã pygua.

² Ha'e rã kunha va'e ma hexe nda'ija'evei vy opoi. Ha'e rami vy nguu ro katy ju ojevy Judã regua Belém py. Ha'e py ju oiko irundy jaxy re.

³ Ha'e gui ime opu'ã vy guembiguai ha'e mokoĩ mburika ogueraa hakykue oo vy. Hexeve ijayvu porã'ixe ogueru ju aguã. Ha'e py ovaẽ ramo kunha va'e omovaẽ nguu ro py. Tuu oexa vyve ovy'a reve oẽ, omovaẽ porã'i.

⁴ Hatyu kunha va'e ru va'e ma mboapy ára re omombyta ojea py. Okaru ha'e oy'u okuapy, ha'e gui omenda va'e kuery oke ha'e py.

⁵ Irundy araa py ovy voi, opu'ã oje'oi aguã. Ha'e ramo kunha va'e ru aipoe'i guajy me pe:

— Penhemombaraete ranhe ke petei mbojape'i re. Ha'e va'e rire ma peo 'rã — he'i ramo

⁶ oguapy mokoĩve, okaru ha'e oy'u nhoguenoiny.

Ha'e gui kunha va'e ru aipoe'i ava pe:

— Ajerure ndevy, kova'e pytũ ju peke apy, pendepy'a py pevy'a aguã.

⁷ Ha'e rami teĩ ava va'e opu'ã ju oo aguã. Ha'e rã hatyu ma hexeve ijayvu tema vy ha'e va'e pytũ re ju omombyta.

⁸ Peteĩ nhirũĩ araa py ovy voi oo aguã. Ha'e rã kunha va'e ru aipoe'i:

— Penhemombaraete ke, pepytave'i ju ka'aru peve — he'i ramo mokoĩve okaru nhoguenoiny.

⁹ Ha'e ramo ava va'e opu'ã ju oo aguã, ta'yxy jevy ha'e hembiguai kunumi va'e reve. Ha'e rã ixupe aipoe'i hatyu kunha va'e ru:

— Ma'ẽ, ka'aru ma, pytũ ovaẽ ju ta ma. Ajerure ndevy pytũ peaxa ju aguã apy. Ára oaxa ta ramo peaxa pytũ apy, pendepy'a py pevy'a aguã. Ha'e gui ko'ẽ rã mae ma pepu'ã pendero katy peo aguã — he'i.

¹⁰ Ha'e rami teĩ ava va'e ndoaxaxevei pytũ ha'e py. Ha'e rami vy opu'ã vy oo. Ngupive ogueraa va'e ma mokoĩ mburika ikupe árygua va'e ha'e ta'yxy jevy. Ha'e gui Jebus tetã katy'i peve ovaẽ (ha'e va'e ma Jerusalém tetã).

¹¹ Jebus katy'i oje'oi jave ka'aru ete ma ramo kunumi va'e aipoe'i opatõ pe:

— Aỹ ma jaa, nhavaẽ jebuseu kuery retã py, pytũ jaaxa aguã ha'e py.

¹² Ipatõ ombovai:

— Any, nda'evei tetã jaikuaa e'ỹ va'e py nhavaẽ aguã, Israel kuery e'ỹ ikuaia py. Jaave 'rã Gibeá peve.

¹³ Jaave 'rã, nhavaê 'rã amboae tekoa py, Gibeá py e'ÿ vy Ramá py jake aguã — he'i guembiguai pe.

¹⁴ Ha'e gui oje'oive. Gibeá tetã katy'i ovaê jave kuaray oike, Benjamim regua yvy py.

¹⁵ Ha'e rami vy opia oje'oivy Gibeá katy, pytũ oaxa aguã ha'e py. Ha'e py ovaê vy oguapy okuapy tetã mbyte py, mba'eta avave rei nomovaêai ngoo py pytũ oaxa aguã.

¹⁶ Ha'e gui pytũ ma jave ou pete'i tuja'i mba'ety rupi omba'epoague gui. Ha'e va'e ma Efraim yvy'ã reia pygua va'eri Gibeá py hekoa va'e. Ha'e rã ha'e pygua kuery ae ma Benjamim regua meme.

¹⁷ Tuja'i va'e oma'ê vy tetã mbyte py oexa oguata va'e. Ha'e vy oporandu ha'e kuery pe:

— Marã katy peo, ha'e magui tu peju?

¹⁸ Ombovai:

— Judá regua Belém gui roguata roje'oivy, mombyry Efraim yvy'ã reia katy roo. Xee ma ha'e pygua ae. Aa karamboae Judá regua Belém py. Ha'e gui aÿ ma aguata avy SENHOR pegua oo oia katy. Tei avave rei naxemovaêai ngoo py,

¹⁹ roguereko tei ae ma mba'emo pirukue ha'e mba'emo rogue orerymba mburika peguarã. Mbojape ha'e vinho voi roguereko xevy, kunha ha'e kunumi va'e nerembiguai reve ou va'ekue pe. Mba'eve rei ndoatai orevy — he'i.

²⁰ Ha'e ramo tuja'i va'e aipoe'i:

— Tove mby'a porã to'i ndere. Xapy'a rei ndevy mba'emo oata ramo xee ae tajou. Ha'e rami avi nda'evei tetã mbyte py peaxa aguã pytũ — he'i.

²¹ Ha'e rami vy ngoo py ae omovaê vy mba'emo rogue ome'ê mburika kuery pe. Ha'e kuery py ojoipa ma rire okaru ha'e oy'u okuapy.

²² Ha'e kuery ovy'a okuapy jave ha'e va'e tetã pygua avakue nhe'ê vai ra'y kuery oupa vy ombojere okuapy oo. Omboata-mbota okuapy okê re. Ha'e vy hoo va'e tuja'i va'e pe ijavyvy

— Emoê apy oka py ava ndero py removaê va'ekue rojavyky rei aguã — he'i.

²³ Ha'e rã hoo va'e ma ha'e kuerya py oê vy aipoe'i ha'e kuery pe:

— Any xeryvy kuery, pejapo eme ha'e rami ete ha'e've'ÿ va'e. Xee ae ma xero py ava amovaê rire pejapo vai eme.

²⁴ Xee aru 'rã oka py xerajy omenda e'ÿ teri va'e, ha'e ava va'e ra'yxy jevy. Ha'e va'e kuery ma pemo'yvy'i 'rã, ha'e kuery re 'rã pejapo pejapoxea rami. Ha'e rã ava va'e re ma pejapo vai eme ha'e rami ete — he'i.

²⁵ Ha'e pygua avakue noendu potaxe'i ramo levita ra'yxy jevy ojopy vy ogueraa oka py, omboaxa ha'e kuery pe. Ha'e ramo ha'e kuery ju ojopy vy ojavyky reia rupi oguenonhemo okuapy pytũ mbukukue re, ko'ê peve. Ha'e gui ko'êmba ma ramo oejapa rive oje'oivy.

²⁶ Ko'ê rai'i ma ramo kunha va'e ou vy ho'a oo ome oia rokê py. Ha'e py ma iko'êmba ete'i oupy.

²⁷ Ko'êgue ime opu'ã vy oipe'a okê. Ha'e rami vy ooove aguã oê vy oexa rã kunha gua'yxy jevy okê rupi itui ra'e, opyrõ ovyaty áry opo omo'i reve.

²⁸ Ha'e vy aipoe'i ixupe:

— Epu'ã ke, ha'e gui jaa — he'i tei nombovai. Ha'e ramo ava va'e oupi inony mburika'i áry, ojepe'a, oo ju ngoo katy.

²⁹ Ngoo py ovaê ma vy gua'yxy omboguejy jevy retekue. Ha'e vy kyxe ogueru vy ombo'a'ypa, ikãgue reve, doze henda py. Ha'e va'e ma ogueraa uka Israel kuery ikuaia ha'e javi rupi.

³⁰ Petei-tei oexa va'e aipoe'i okuapy joupe-oupe:

— Kova'e nunga ojapoa va'e'ÿ teri, ne'i oexaa va'e'ÿ teri, Egito yvy gui Israel kuery oua ára guive aÿ peve. Peikuaa pota ha'e nunga re, penhembopy'a ha'e pejogueroayvu — he'i okuapy.

20

Levita ra'yxy jevy ojavyky reia ague re Israel kuery nhombopagaague

¹ Ha'e gui Israel kuery ha'e javi ma Mispa py oje'oi vy nhomboatypa okuapy SENHOR renonde. Petei'i rami ou Dã guive Berseba peve ikuai va'e, Gileade yvy gui guive.

² Ha'e kuery va'e regua yvatekueve ha'e javi ha'e Israel kuery pete'i-tei regua oupa okuapy Nhanderuede pegua onhemboaty okuapy py. Quatrocentos mil avakue ikuai opu'ã okuapy va'e, kyxe revegua meme.

³ Benjamim kuery voi oendu okuapy Israel kuery Mispa katy oje'oia omombe'ua rã.

Ha'e gui ava pe Israel kuery oporandu okuapy:

— Emombe'upa orevy marã rami vy pa ha'e nunga oikoague.

⁴ Ha'e ramo ava levita kunha omano va'ekue megue ombovai vy aipoe'i:

— Xera'yxy jevy reve rovaê Benjamim regua kuery retã Gibeá py, pytũ roaxa aguã.

⁵ Ha'e ramo Gibeá pygua kuery xere opu'ã vy pyávy ombojere oo xee aia va'e. Xejukaxe, ha'e gui xera'yxy jevy voi ojavyky rei okuapy. Ha'e ramo omano.

⁶ Ha'e ramo xera'yxy jevy retekue araa. Ambo'a'ypa vy araa uka Israel kuery yvy ha'e javi rupi, nhande Israel kuery moximbaará ojapo rire.

⁷ Ma'ê, peê kuery ma Israel kuery regua meme pendekuai. Peikuaa pota porã ke! Pejogueroayvu ha'e penhomongeta ha'e nunga re — he'i.

⁸ Ha'e rami rã heta va'e kuery ha'e javi ma pete'i'i rami opu'amba okuapy vy aipoe'i:

— Nhande kuery va'e regua peteive ndojevyi 'rã ngoo katy, peteive ndajaii 'rã nhandero katy.

⁹ Ha'e rami vy po rami 'rã jajapo Gibeá pygua kuery re: Jaje'oi 'rã ha'e kuery rovai nhapu'ã aguã xorte jaexaa rami.

¹⁰ Ha'e rami vy Israel kuery regua cem avakue ikuai va'e-va'e gui ma dez kuerei 'rã nhamondouka, mil ikuai va'e-va'e gui cem kuerei 'rã, ha'e dez mil ikuai va'e-va'e gui ma mil kuerei 'rã nhamondouka tembi'u ojou aguã nhande kuery pe. Ha'e rã nhande kuery ma Benjamim regua Gibeá py jaa vy ha'e kuery re jajapo 'rã Israel kuery mbyte ojapo vaiague rami — he'i.

¹¹ Ha'e rami vy Israel regua avakue ha'e javi nhomboaty okuapy ha'e va'e tetã rovai opu'ã vy oo aguã. Peteĩ rami onhemoirũba okuapy.

¹² Ha'e gui Israel kuery omoudouka avakue Benjamim regua vyv ha'e javi rupi, aipoe'i aguã:

— Mba'e nunga ha'eve'ỹ va'e tu penembyte ojapoa?

¹³ Aỹ orepo py pemboaxa na Gibeá pygua avakue nhe'ẽ vai ra'y kuery rojukapa aguã, ha'e rami vy Israel kuerya gui roipe'a aguã ha'e rami ete nda'evei va'e — he'i. Ha'e rã Benjamim kuery ma noendu potai guyvvy Israel kuery ayvu.

¹⁴ Ha'e rami 'rãgue py Benjamim kuery ma Gibeá katy'i tetã ikuai va'e gui oupa vy ono'õmba okuapy, oje'oi aguã Israel kuery re opu'ã aguã.

¹⁵ Ha'e va'e ára ma oipapaa Benjamim kuery tetã ikuai va'e gui ou va'ekue. Oikuaa rã vinte e seis mil avakue ikuai kyxe revegua, Gibeá pygua kuery reve'ỹ vy. Ha'e va'e kuery ma oipapaa rã seiscentos avakue ikuai oiporavo pyre meme.

¹⁶ Ha'e va'e kuery ha'e javi regua ma setecentos avakue ikuai oiporavo pyre ijaxu va'e meme. Ha'e va'e kuery ma ita momboa py peteĩ 'ague'i re omombo vy voi ndojavyi 'rã.

¹⁷ Ha'e rã Israel regua avakue ma oipapaa rã quatrocentos mil avakue ikuai kyxe revegua, joe opu'ãa rupi ikuai va'ety meme, Benjamim regua e'ỹ.

¹⁸ Ha'e gui Israel regua kuery opu'ã vy Betel py oo. Ha'e py ma Nhanderuede pe oporandu vy aipoe'i:

— Ore kuery va'e regua mava'e ranhe 'rã tu oo Benjamim kuery rovai opu'ã aguã?

SENHOR ombovai:

— Judá kuery ranhe 'rã oo — he'i.

¹⁹ Ha'e gui ko'ẽ aje'ive reve Israel kuery opu'ã vy oje'oi. Ono'õ okuapy Gibeá rovai opu'ã aguã.

²⁰ Israel regua avakue ae oje'oi Benjamim kuery rovai opu'ã aguã. Gibeá katy'i ikuai joe opu'ã aguã rami.

²¹ Ha'e ramo Gibeá gui Benjamim kuery oẽ oje'oi vyv ha'e va'e ára oitypa Israel regua vyv rupi, vinte e dois mil avakue.

²² Ha'e gui avakue Israel kuery regua peteĩgue ju ipy'a guaxu vy oiko katu okuapy joe opu'ã aguã, jypya ára opu'ãague py ae ju.

²³ Ha'e va'e'ỹ mbove ma Israel kuery oje'oi ranhe vy ojae'o okuapy SENHOR renonde. Ka'aru peve oporandu okuapy SENHOR pe,

— Roje'oi ju 'rã pa oreryvy kuery Benjamim regua rovai ropu'ã aguã? — he'i vy.

SENHOR ombovai:

— Tapeo ha'e kuery re pepu'ã aguã — he'i.

²⁴ Ha'e gui ma ko'ẽ jevy Israel kuery ovaẽ ma okuapy Benjamim kuery rovai opu'ã aguã.

²⁵ Ha'e va'e ára voi Benjamim kuery Gibeá tetã gui oẽ oje'oi vyv ha'e kuery ovaexĩ aguã. Ha'e vy dezoito mil avakue ju oity vyv rupi, kyxe revegua meme.

²⁶ Ha'e rami rã Israel kuery ha'e javi oje'oi vy Betel py ovaẽ. Ha'e vy ojae'o ete okuapy, ha'e py SENHOR renonde ikuai py. Ha'e va'e ára okaru e'ỹ re ikuai ka'aru peve. SENHOR renonde ome'ẽ avi okuapy mba'emo oapy reve ha'e peteĩ rami ikuai regua.

²⁷ Ha'e rami vy Israel kuery oporandu ju okuapy SENHOR pe. (Mba'eta ha'e va'e jave ma ha'e py ae oi Nhanderuede guexeve guarã ojapo va'ekue ryru.

²⁸ Ha'e va'e oĩa rupi Eleazar ra'y Finéias, Arão ramymino va'e omba'eapo oikovy ha'e jave py.) Ha'e gui aipoe'i okuapy:

— Roo jevy 'rã pa oreryvy kuery Benjamim regua rovai ropu'ã aguã, tyrã pa ndoroovei ma 'rã?

SENHOR ombovai:

— Tapeo, mba'eta ko'ẽ ramo xee amboaxa 'rã pendepo py — he'i.

²⁹ Ha'e ramo Israel kuery ma Gibeá yv'ỹ rupi omoĩ xondaro kuery onhemi aguã.

³⁰ Ha'e gui mboapy araa py ma Benjamim kuery rovai Israel kuery opu'ã aguã oje'oi vy jypy guare rami ae oiko katu okuapy Gibeá rovai opu'ã aguã.

³¹ Ha'e ramo ha'e kuery ovaexĩ aguã Benjamim kuery oẽ jogueruvy vy tetã gui mombyry ojereru uka vy omboypy ju ojuka aguã ha'e kuery regua. Jypy guare rami ojuka trinta avakue Israel regua tape rupi. Ha'e va'e regua peteĩ ma Betel katu oo, ha'e rã amboae ma Gibeá nhuũndy katu oo va'e.

³² Ha'e rami vy Benjamim kuery aipoe'i:

— Kue'i guare rami ae ju ho'apa ta ma nhanerenonde — he'i okuapy.

Ha'e rã Israel kuery ma aipoe'i:

— Nhanhamba, ha'e kuery nhanderakyue tape rupi oopa aguã tetã gui mombyry peve — he'i.

³³ Ha'e rami vy Israel regua avakue ikuaiague gui opu'ãba jogueruvy, joe opu'ã aguã rami ikuai Baal-Tamar py. Israel regua onhemia py ikuai va'ekue voi oẽmba jogueruvy Geba katy'i ikuaiague gui.

³⁴ Ha'e rami vy dez mil avakue Israel kuery regua oiporavo pyre ou okuapy Gibeá re opu'ã aguã. Opu'ãa ma nda'evei ete va'e, ha'e rã amboae kuery ma noexa'ãi okuapy okanhymba taa.

³⁵ Ha'e ramo Israel kuery renonde SENHOR omoĩ vai Benjamim kuery. Ha'e ramo ha'e va'e ára Israel kuery ojuka Benjamim regua vinte e cinco mil e cem avakue, kyxe revegua meme.

- ³⁶ Ha'e ramo mae Benjamim kuery oexa ombojexavai maa. Mba'eta avakue Israel regua ojepe'apa ranhe Benjamim regua kuery renonde gui, Gibeá rovai opu'ã va'erã kuery onhomi va'ekue re ojerovia vy.
- ³⁷ Ha'e gui onhemi okuapy va'ekue oẽmba pojava vy oikepa Gibeá tetã py. Ha'e vy oitypa ha'e javi kyxé py ojuka vy.
- ³⁸ Avakue Israel regua ma jogueroayvu ae ma onhemi va'e kuery reve, tetã gui peteĩ arai tuvixa va'e rami hataxĩ omopu'ã aguã re.
- ³⁹ Ha'e nunga Israel regua kuery oexa vy ojevý ju opu'ã aguã katy. Ha'e kuery re ae Benjamim regua kuery omboypy ojapo vai aguã, trinta avakue Israel regua ojuka vy
— Kuee nhapu'ãague rami ae ri ha'e kuery ho'apa ma 'rã nhanerenonde — he'i okuapy teĩ.
- ⁴⁰ Ha'e rami teĩ tetã gui hataxĩ opu'ã ma ovy arai rami, oo yta hi'ái va'e rami ae. Ha'e ramo Benjamim regua kuery guakykue katy oma'ẽ vy oexa rã tetã ha'e javi rupi tata rendy vuku ojeupi ma ovy ra'e yvate.
- ⁴¹ Israel regua avakue ojerepa rã Benjamim regua kuery oexa vy onhemondyipa okuapy, imombaarã ou ta maa oexa vy.
- ⁴² Ha'e rami vy Israel regua avakue renonde gui ojevypa, tekoa e'ýa katy tape oo va'e rupi onhambaxe va'eri opu'ã va'e kuery omoĩ vai. Ha'e rã tetã gui ou va'e kuery ju ojukapa ha'e kuery mbyte.
- ⁴³ Ha'e rami vy ojokopa rei Benjamim regua kuery. Hakykue monha vy mamõ rã opyту'ua py oupity, Gibeá katy'i, kuaray oua katy.
- ⁴⁴ Ha'e rami py Benjamim regua ho'a dezoito mil avakue, ipy'a guaxuve va'e meme.
- ⁴⁵ Ha'e gui ojevypa vy tekoa e'ýa katy ju onhamba, Rimom py itaova oĩ va'e katy. Tape rupi hembyrekue onha va'e regua ma cinco mil avakue ju ojukave. Ha'e gui hupive rei omõnhave Gidom peve. Ha'e py ju ojukave dois mil avakue ha'e kuery regua.
- ⁴⁶ Ha'e va'e ára Benjamim regua omano va'e ha'e javi vy ma vinte e cinco mil avakue kyxé revegua, ipy'a guaxuve va'e meme.
- ⁴⁷ Ha'e rami teĩ seiscentos avakue ojere vy ojava tekoa e'ýa katy, Rimom py itaova oĩ va'e py. Ha'e py ma irundy jaxy re ikuai.
- ⁴⁸ Ha'e gui ma Israel regua avakue ojevý ju Benjamim kuery rekoa katy. Ha'e vy ojukapa kyxé py tetã py hembyre va'ekue ha'e javi, avakue ha'e mymba kuery, ojou va'e rei. Tetã ojou va'e rei oapypa tata py.

21

Benjamim regua avakue ra'yxyrã ojouague

- ¹ Ha'e gui Israel regua avakue Mísapa py teri ikuai py oura okuapy reve
— Nhande kuery regua peteĩve nomomendai 'rã guajy Benjamim regua ra'yxyrã — he'i ma voi va'ekue.
- ² Ha'e rami teĩ Betel py ha'e kuery oo vy ka'aru peve ikuai Nhanderueete renonde ha'e py. Ojapukai ha'e ojae'o okuapy hexay ete reve.
- ³ Ha'e vy aipoe'i:
— Ah! SENHOR Israel kuery ruete, mba'e re tu ha'e rami ete oiko Israel re, mba'eta aý oata ma peteĩ regua — he'i okuapy.*
- ⁴ Ha'e gui ko'ẽ jevy, ko'ẽmba ramove ha'e kuery opu'ã vy peteĩ altar ojapo ha'e py. Hi'áry ome'ẽ okuapy mba'emo oapy reve, peteĩ rami ikuai regua guive ome'ẽ.
- ⁵ Ha'e gui Israel kuery joupe-úpe oporandu vy
— Mava'e tu Israel regua ndooi va'ekue SENHOR pegua nhemboaty oikoa py? — he'i.
Mba'eta Mísapa py SENHOR renonde oura ae ma voi onhemboaty aguã ndoui va'e ojukaa aguã re.
- ⁶ Israel kuery omboaxy okuapy guyv Benjamim regua kuery,
— Kova'e ára opa rai'i ete peteĩ regua Israel gui.
- ⁷ Ha'e gui marã rami vy nda'u jajou 'rã hembyrekue ra'yxyrã? Mba'eta SENHOR pe jaura ae ma nhanderajy kuery nhamomenda e'ý aguã ha'e kuery ra'yxyrã — he'i okuapy.
- ⁸ Ha'e rami vy aipoe'i:
— Oiko pa Israel regua SENHOR pegua nhemboaty Mísapa py oiko va'e py ndooi va'ekue? — he'i.
Ha'e rami vy oikuaa pota rã Jabes-Gileade pygua kuery peteĩve ndooi ra'e ono'õ okuapy vy nhemboaty ojapoa py.
- ⁹ Heta va'e kuery oipapaa rã oikuaa Jabes-Gileade pygua kuery peteĩve noĩ ha'e py.
- ¹⁰ Ha'e nunga rupi ha'e katy ijaty okuapy va'e omõndouka doze mil avakue ipy'a guaxukueve. Ijavyu imõndovy vy aipoe'i ha'e kuery pe:
— Tapeo pejukapa Jabes-Gileade pygua kuery kyxé py, kunhague ha'e kyrĩgue guive.
- ¹¹ Po rami 'rã pejapo: Avakue ha'e kunhague avakue reve onheno ma va'ekue ha'e javi 'rã pejuka — he'i.
- ¹² Ha'e rami rã Jabes-Gileade py oo vy quatrocentos kunhataĩgue ojou avakue reve onheno e'ý teri va'e. Ha'e va'e kuery Siló py oguerupa heta va'e kuery ikuai py, Canaã yvy re.
- ¹³ Ha'e gui ono'õ okuapy va'e ha'e javi omõndouka Benjamim kuery pe imõmbe'uarã, Rimom itaovape guy py onhemi va'ekue pe. Ha'e rami vy ijavyu jomeme ikuai porã ju aguã re.
- ¹⁴ Ha'e ramo Benjamim regua kuery ojevypa. Ha'e rã ha'e kuery ra'yxyrã ome'ẽa Jabes-Gileade py kunhataĩgue ndojukai va'ekue. Ha'e rami teĩ oata teri ha'e kuery ra'yxyrã.
- ¹⁵ Ha'e rami py ha'e kuery omboaxy Benjamim kuery, Israel regua oata aguã rami SENHOR ojapo riré.

* 21:3 "Peteĩ regua oata" he'i okuapy, mba'eta Benjamim regua avakue ojukapa rai'i ma riré (versículo 6).

¹⁶ Ha'e gui nhomongeta va'ety kuery aipoe'i ijaty okuapy va'e pe:

— Marã rami vy nda'u jajouve ju 'rã hembyrekue ra'yxyrã, Benjamim regua kunhague opa rire?

¹⁷ Mba'eta nda'evei Benjamim regua rembyrekue ndata'yi aguã, mba'eta nda'evei peteĩ regua ha'e javi oata aguã.

¹⁸ Ha'e rami avi nhande ma nda'evei ha'e kuery ra'yxyrã nhamomenda aguã nhanderajy kuery, mba'eta nhande Israel kuery jaura vy "Ayyvu vaipy toiko Benjamim regua ra'yxyrã guajy omomenda va'e", ja'e rire — he'i.

¹⁹ Ha'e ramo ombovai:

— Ma'etÿa nhavõ ma oiko 'rã SENHOR pegua nhemboaty Siló py. Ha'e nunga oiko 'rã Betel tetã katy'i kuaray ijapu'a'ia katy, tape Betel gui Siquém katy yvy'ã rupi oo va'e rupi kuaray oua katy, ha'e Lebona regua kuaray ipuku-a katy — he'i.

²⁰ Ha'e rami vy Benjamim kuery pe ju ijayvu vy aipoe'i:

— Tapeo, penhemi uvaty ikuai va'e rupi.

²¹ Ha'e py ma pema'ẽ mbegue peiny, mba'eta Siló pygua rajy kuery oẽ 'rã jogueruvy oguyryĩ reve ojeroky vy. Ha'e ramo ma peẽ 'rã uvaty py penhemia gui, ha'e ha'e kuery regua peteĩ-teĩ pejopy 'rã pendera'yxyrã. Ha'e vy tapeo ju Benjamim vvy re.

²² Ha'e gui tuu ha'e ikvyvy kuery ou 'rã nhandea py ndojou porãia rupi ijayvu aguã. Ha'e ramo ha'e kuery pe aipo ja'e 'rã: "Orerayvua rupi ke pemboaxy avi Benjamim regua avakue, mba'eta Jabes-Gileade tetã re ropu'ã jave ta'yxyrã ndorojoupai rire. Ha'e rami avi penderajy kuery napeme'ẽi va'ekue ha'e kuery pe. Ha'e rami e'y va'e rire pepaga aguã rami peiko 'rãgue", ja'e 'rã — he'i.†

²³ Ha'e rami ae Benjamim kuery ikuai. Ha'e rami vy gua'yxyrã peteĩ-teĩ ogueraa oguyryĩ reve ojeroky okuapy va'e kuery gui, mbovy pa ikuai rami vy ogueraa. Ha'e gui oje'oi vy ovyv py ju ojevypa. Ojapo ju guetã, ha'e vy ikuai ha'e py.

²⁴ Ha'e gui mae ma Israel kuery voi ojevvy ju ha'e gui. Peteĩ-teĩ guetarã kuerya py ae oo, gua'y kuerya py ha'e ovyv py ae.

²⁵ Ha'e va'e jave ma ndoiko huixave Israel kuery re opena va'erã. Ha'e ramo peteĩ-teĩ ikuai 'rã ha'e kuery ae oipotaa rami rive.

† 21:22 Ha'e kuery ha'e javi oura va'ekue Benjamim regua avakue ra'yxyrã guajy kuery ome'ẽ e'y aguã (versículo 1). Ha'e gui apy ojerure guajy kuery pe Benjamim regua avakue ra'yxyrã ojereraa uka aguã, ouraague ombovai pa e'y aguã.

Rute rekokue oia Rute rekokue oia

“Joguerekoa kuery opena jave py ma oiko karuai Israel vvy re. Ha'e gui petei ava oo Judá regua Belém tetã py oikoa gui Moabe vvy re ju oiko aguã, gua'yxy ha'e mokoí gua'y kuery reve” (1.1). Ha'e rami ijypy kova'e kuaxia para. Moabe vvy re ava va'e omano, ta'y kuery avi. Ha'e ramo ta'yxykue Noemi hery va'e ojevy ju Belém tetã py. Hexeve oo avi petei ipi'a ra'yxykue Rute hery va'e, Moabe pygua. Ha'e va'e ma oayvu ete ome xykue'i, Nhanderuete anhetê va'e re ojerovia guive oikovy.

Belém tetã py oiko jave petei ava heko porã va'e ogueraa gua'yxyrã, Boaz hery va'e. Ha'e rami vy Rute ma huvixa Davi jaryi, ha'e Jesus Cristo jaryi guive oiko raka'e.

Ha'e jave py heko vai va'e heta ikuai tei Rute rami ikuai avi vvyígueve'i ojerovia ete va'e. Ha'e va'e kuery ma Nhanderuete omoingo porã.

Moabe vvy gui Noemi ha'e Rute ojevyague

¹ Joguerekoa kuery opena jave py ma oiko karuai Israel vvy re. Ha'e gui petei ava oo Judá regua Belém tetã py oikoa gui Moabe vvy re ju oiko aguã, gua'yxy ha'e mokoí gua'y kuery reve.

² Ha'e va'e ava ma Elimeleque hery va'e, ha'e rã ta'yxy ma Noemi. Ta'y kuery ma Malom ha'e Quiliom. Efrateu kuery ikuai Judá regua Belém py hekoa va'e. Moabe vvy re ha'e kuery ovaẽmba vy hekoa ha'e py.

³ Ha'e gui ma Noemi me Elimeleque omano. Ha'e rã kunha va'e ha'e anho opyta mokoí opi'a reve.

⁴ Ha'e gui mokoíve omenda Moabe pygua kunhague re. Ta'yxy kuery regua petei rery ma Orfa, ha'e rã amboae ma Rute. Ha'e rami vy ha'e py ikuai dez ma'etÿ rai'i.

⁵ Ha'e gui mokoíve ipi'a Malom ha'e Quiliom omano avi. Ha'e rami vy kunha va'e ha'e anho'i opyta, ipi'a kuery mokoíve ha'e ime ndoikovevei ma rire.

⁶ Ha'e gui kunha va'e oendu SENHOR ojeupegua kuery re ima'endu'a vy ho'u va'erã ojou uka jevya. Ha'e rami vy opi'a ra'yxykue reve opu'ã jogueravy Moabe vvy gui ojevy aguã.

⁷ Ha'e ramo opi'a ra'yxykue mokoíve reve oje'oi ikuaiague gui. Mboapyve oguata jogueravy, Judá vvy katy ovaẽ aguã.

⁸ Ha'e gui ma Noemi aipoe'i ha'e kuery pe:

— Tapeo, pejevy ju petei-tei pendexya py. Tove SENHOR tapenemboaxy, omano va'ekue peẽ pemboaxyague rami, ha'e xevy voi.

⁹ Tove SENHOR tapenembovy'a, petei-tei penemerã ro py — he'i. Ha'e vy oayvupa.

Ha'e rami rã ha'e kuery ojae'o atã.

¹⁰ Ha'e rami vy ime xykue pe aipoe'i:

— Any, ore voi roo avi 'rã nderupive neretarã kuerya katy.

¹¹ Ha'e rã Noemi aipoe'i:

— Pejevy ke, xememby kuery. Mba'erã tu peo ta xerupive? Xee nda'u areko teri ri xerye py xepi'a penemerã?

¹² Pejevy ke, xememby kuery. Tapeo ke, mba'eta xeguaimi'i ete ma amenda jevy aguã. Xee ma “Aendu teri arõ aguã” ha'e va'e rire, ha'e rami e'ÿ vy kova'e pytũ re xemerã ajou vy xememby voi va'e rire ma

¹³ pearõ 'rãgue ri ty'y ha'e kuery tujapa peve? Imeve'y va'e teri 'rãgue ri ty'y peiko? Any teve, xememby kuery. Mba'eta pendere vy xee xeporiau vaipa tei, xerovai SENHOR opo oupi rire — he'i.

¹⁴ Ha'e ramo ha'e kuery teígue ju ojae'o atã okuapy. Orfa ma peteígue oayvu reve oxarura ovy ome xykue pe. Ha'e rã Rute ma oikuavã ratã tema oiny.

¹⁵ Ha'e ramo Noemi aipoe'i ixupe:

— Ne'exa, neirũ ojevy ma ovy guetarã kuery ha'e nguete kuerya katy. Ejevy ke ndee voi neirũ rakykue.

¹⁶ Ha'e rã Rute ombovai:

— Ejeja uka eme xevy, xejoko eme guive nderupive aa aguã. Mba'eta mamõ rã reoa py rei xee aa avi 'rã, ha'e mamõ rã rekea py xee voi ake 'rã. Neretarã kuery ma xeretarã kuery ae avi 'rã ikuai, ha'e Nderuete pe ma “Xeruete” ha'e avi 'rã.

¹⁷ Mamõ rã remanoa py xee amano avi 'rã, ha'e py ae 'rã xenhono porãa. Ha'e gui tove SENHOR taxemoingo axy ha'e oikuaa rami, xapy'a rei ndegui mba'emo pe ajepe'a uka ramo, manoa e'ÿ vy — he'i.

¹⁸ Ha'e ramo Noemi ngupive ooxe etea oexa vy nonhea'ãvei ojevy aguã.

¹⁹ Ha'e rami vy jogueraa mokoíve Belém peve.

Ha'e py ovaẽ ramo tetã pygua kuery onhemondyipa rei okuapy ha'e kuery oexa vy. Ha'e vy kunhague ma aipoe'i okuapy:

— Peva'e e'ÿ teve Noemi?

²⁰ Ha'e ramo ombovai:

— Xevy pe “Noemi” pejeve eme, ha'e rã “Mara” peje xevy, mba'eta Ipo'akapa va'e ha'e rami ete xemoingo axy rire.*

²¹ Arekopa reve apy gui aa va'ekue ri SENHOR ojapo xeporiaukue'i reve ajevy aguã rami. Mba'e re tu “Noemi” peje xevy, xerovai SENHOR onhemoi ramo, Ipo'akapa va'e xembojexavai rei rire? — he'i.

* 1:20 Tery Noemi ma “Iporã va'e” 'ea. Ha'e rã tery Mara ma “Haxy va'e, iro va'e” 'ea (Êxodo 15.23).

²² Ha'e rami py Noemi ojevy Moabe vvy gui, opi'a ra'yxykue Moabe pygua Rute reve. Cevada omono'õa pyy'i jave ovaẽ Belém py.†

2

Cevada ra'yĩgue 'are Rute ojeupe guarã omono'õague

¹ Ha'e gui peteĩ ava oiko Noemi me rãgue'i retarã oguerekopa va'e. Ha'e va'e ma Elimeleque retarã, Boaz hery va'e.

² Ha'e gui Moabe pygua Rute aipoe'i Noemi pe:

— Taa nhomba'ety rupi taiko, xemboaxy'i va'e rakykue rupi rei aa vvy cevada ra'yĩgue 'are amono'õ aguã. Ombovai:

— Tereo ha'vy, xememby — he'i.

³ Ha'e gui Rute nhomba'ety py oo vvy omono'õ oikovy omono'õ va'e kuery rakykue rupi. Elimeleque retarã Boaz mba'ety py guive oo.

⁴ Ha'e jave py ae Boaz ou Belém gui. Ha'e rami vvy guembigui kuery omono'õ va'e pe oxarura:

— SENHOR toiko peẽ kuery reve.

Ha'e kuery ombovai:

— Ndee voi SENHOR tanemoingo porã — he'i okuapy.

⁵ Ha'e gui Boaz oporandu guembigui kuery re opena va'e pe:

— Mava'e rajy tu pe kunha va'e?

⁶ Hembigui ombovai:

— Pe kunha va'e ma Moabe pygua, Noemi reve Moabe vvy gui ou va'ekue.

⁷ Ha'e va'e ma ange xevy aipoe'i: “Tajopy ha'yĩgue, tamono'õ avy omboaty pyre pa'ũ rupi omono'õ va'e kuery rakykue rupi”, he'i vvy ou kuri. Ko'ẽmba'i ramove koropi ae oiko a'y'i peve, xapy'a'i opytu'u oguy py guive — he'i.

Rute reve Boaz ijayvu porã'iaque

⁸ Ha'e gui Boaz aipoe'i Rute pe:

— Endu ke, xerajy. Tereo eme mba'ety mboae py remono'õ vvy, apy gui tereove eme. Apy ae 'rã reiko xerembigui kunhague reve.

⁹ Rexa pota 'rã cevada mono'õa kuery omba'epaoa re, hakykue rupi reo aguã. Xerembigui kuery pe xeyavu ae ma ndere opena rei e'y aguã. Ndey'uvei vvy tereo yryru oĩa py, ha'e ey'u xerembigui kuery ojara va'ekue — he'i.

¹⁰ Ha'e ramo kunha va'e ngova omovaẽ vvy re. Ha'e vvy aipoe'i:

— Mba'exa'vy tu xepytyvõ 'rã, amboae tekoa guigua aiko va'eri?

¹¹ Boaz ombovai vvy aipoe'i:

— Xevy omombe'ua porã neme omano rire ixykue pe rejapo porãague. Mba'eta nderu, ndexy ha'e vvy ndetui'iaque reja vvy peteĩve reikuaa e'y va'e kuerya py reju va'ekue.

¹² SENHOR tomboekovia joupe rejapo porãague. Tove SENHOR Israel kuery ruete gui toupã ndevy guarã ha'e javi, ipepo guýry renhemi aguã reju rire — he'i.

¹³ Ha'e ramo kunha va'e aipoe'i:

— Xeruvixa, ndee xepytyvõ vaipa ma. Xembopy'a porã xee nerembigui py'a re peve guarã ndeayvu vvy, xee nerembigui regua ndaikoi va'eri — he'i.

¹⁴ Ha'e gui okarua jave ju Boaz aipoe'i ixupe:

— Enhemboja ke kyvõ katy, ekaru einy mbojape re, vinho reve — he'i. Ha'e ramo omono'õ va'e kuery reve oguapy oiny. Ha'e rã ixupe ome'ẽ ha'yĩgue mbixy. Ixupe ome'ẽ retave ramo okaru porã, hev yatã peve.

¹⁵ Ha'e gui kunha va'e ha'yĩgue oekave ju aguã opu'ã ramo Boaz peteĩgue ju ijayvu guembigui kuery pe. Ha'e vvy aipoe'i:

— Tove tomono'õ pemboaty va'ekue ikuai rupi voi, pendeayvu eme ixupe.

¹⁶ Peity-ityve tema upe py pemboaty va'ekue gui, tove ta'ikuai ojopy aguã. Pendevai eme ixupe — he'i.

¹⁷ Ha'e gui mba'ety rupi kunha va'e omono'õ oikovy ka'aru peve. Omono'õ va'ekue ojyky vvy oexa rã peteĩ ajaka renyẽ rai'i cevada oĩ.

¹⁸ Ha'e va'e oupi heravy tetã katy. Ha'e ramo ime xykue oexa omono'õ va'ekue. Ha'e ramo okaru okuapy jave guare rembyre voi oguenoẽ vvy ome'ẽ avi ome xykue pe.

¹⁹ Ha'e rami rã ime xykue aipoe'i ixupe:

— Mamo tu remono'õ ange? Mamo tu remba'epo ra'e? Ta'ima'endu'a porãa neptytyvõ vvy nemovaẽ porãare re!

Ha'e ramo ome xykue pe Rute omombe'u mamo pa omba'epoague. Ha'e vvy aipoe'i:

— Mba'ety amba'epoa va'e ja rery ma Boaz — he'i.

²⁰ Ha'e ramo Noemi aipoe'i opi'a ra'yxykue pe:

† 1:22 Israel kuery vvy py ma mba'emo ra'yĩgue omono'õ 'rã abril ha'e maio py. Cevada ranhe 'rã omono'õ, ha'e gui trigo ju. Po rami 'rã omono'õ. Hi'y ma avakue ojaya rire kunhague hakykue oo vvy ojokua 'rã. Ha'e gui oo ju 'rã ndojokuapai va'ekue ojopy vvy. Ha'e gui mae ma ogueraa 'rã ojyky aguã py. Vaka omopyrõ vvy 'rã ojyky, ha'e'y vvy hi'áry rupi mba'emo ipoyi va'e omoatã 'rã heruvy, e'y vvy karõxa omboguata reve. Ha'e gui omboveve 'rã, ha'e oiky'a'o ju 'rã omboayru aguã.

— SENHOR tomoingo porā, mba'eta ndojepe'ai jaikove va'e ha'e omano va'ekue omboaxy oikovya gui. Ha'e va'e ava ma petei nhanderepya regua oiko — he'i.*

²¹ Ha'e ramo Moabe pygua Rute aipoe'i:

— Ha'e va'e ma xevy “Xerembiguai kuery reve ae 'rā reiko ha'yīgue omono'ōmba peve”, he'i avi.

²² Opi'a ra'yxykue Rute pe Noemi ombovai:

— Xememby, ha'eve ete 'rā hembiguai kunhague reve reiko aguā, amboae kuery mba'ety rupi reiko axy 'rāgue py — he'i.

²³ Ha'e rami vy Boaz rembiguai kunhague reve kunha va'e omono'ō oikovy cevada ha'e trigo omono'ōmba peve, ha'e ome xykue'ia py oke jepi oikovy.

3

Mba'emo moa'yīaty py Boaz oia py Noemi omondoukaague

¹ Ha'e gui ime xykue Noemi aipoe'i ixupe:

— Xememby, nda'evei ri ty'y nemerā xee ajou aguā revy'a aguā?

² Ne'ixa, Boaz ma nhaneretarā oiko, guembiguai kunhague reve nemoingo va'ety guive. Ma'ē, kova'e pyávvy ojyky 'rā mba'emo moa'yīaty py.

³ Ejau ke, enhemoakuā ha'e emoi ndeao iporāve va'e. Ha'e vy tereo mba'emo moa'yīaty py. Va'eri ava va'e okaru ha'e oy'u e'y teria ja ejekuaa uka eme ta'vy ixupe.

⁴ Ha'e gui oke ta ma ramo reikuaa pota 'rā mamo pa onhenoa re. Ha'e gui reo avi 'rā ha'e py. Eipe'a inhovā ipy gui, ha'e enheno avi ha'e py. Ha'e gui ma ava va'e omombe'u 'rā rejapo va'erā.

⁵ Rute ombovai:

— Xee ajapopa 'rā ndeayvuague — he'i.

Rute re Boaz omenda aguā re ijayvuague

⁶ Ha'e rami rā mba'emo moa'yīaty py oo vy ojapo ime xykue ijayvuague ha'e javi.

⁷ Ha'e rami vy Boaz okaru ha'e oy'upa ma vy, ha'e opy'a py ovy'a ete oiny reve oo onhenoa ha'yīgue omboaty pyre yvy'iry, ha'e ramo kunha va'e onhemboja mbeguei'i vy oipe'a inhovā ipy gui. Ha'e vy onhenoa avi oupy ha'e py.

⁸ Pytū mbyte jave ava va'e onhemondy. Ovy vy oexa rā petei kunha va'e ipy rupi onhenoa oupy ra'e.

⁹ Ha'e vy aipoe'i:

— Mava'e tu ndee?

Ombovai:

— Xee ma nerembiguai Rute. Eipy ke nde-capa xee nerembiguai áry, mba'eta ndee ma orepytyvōarā reiko — he'i.*

¹⁰ Ha'e ramo aipoe'i:

— Xerajy, SENHOR tanemoingo porā. Jypy joupe rejapo porāague gui a'y xevy rejapo va'e iporāve ete, mba'eta kunumigue rakykue rupi ma ndereoi, iporiaukue'i e'y vy oguerekopa va'e rakykue rupi voi.

¹¹ Ha'e gui a'y ma xerajy, ekjye eme. Ndeayvua ha'e javi 'rā ajapo, mba'eta tetā py xeretarā kuery ikuai va'e ha'e javi oikuaa ndee kunha heko porā va'ea.

¹² Ne'ixa, anhetē ete xee penepytyvōarā aiko va'eri penepytyvōarā mboae oiko avi xegui peneretarā ae'ive va'e.

¹³ Epyta apy kova'e pytū re. Ha'e gui ko'ēmba'i jave xapy'a rei ha'e va'e nepytyvōxe vy ha'eve nepytyvō aguā. Ha'e rā nanepytyvōxei ri ramo anhetē ete SENHOR oikove va'e rery rupi aura vy aipoa'e: Xee ae 'rā roipytyvō. Enhenove ranhe ejupy ko'ēmba peve — he'i.

¹⁴ Ha'e rami rā ipy rupi onhenoa oupy ko'ēmba peve. Aje'ive'i reve opu'ā ovy joexa kuaa e'y re teri, ava va'e

— Toikuaa eme kunha va'e mba'emo moa'yīaty py ouague — he'i ramo.

¹⁵ Ava va'e aipoe'i avi:

— Eupi xevy ajukue renheovāa va'e, ejopy imoiny — he'i. Kunha va'e oupi ma ramo omonyē mboapy meme ryrū cevada ra'yīgue. Ikupe áry oupi ma ramo oo ju tetā katy.

¹⁶ Ome xykue ro py ovaē ramo ixupe oporandu:

— Xememby, mba'e pa oiko ra'e?

Ha'e ramo omombe'u ava va'e ixupe ojapo porāague ha'e javi.

¹⁷ Aipoe'ive ju:

— Kova'e cevada ra'yīgue mboapy meme ryrū ome'ē xevy, mba'eta aipoe'i: “Mba'eve reraa e'y re ejevy eme teri neme xykuea katy”, he'i va'ekue.

¹⁸ Ha'e ramo Noemi aipoe'i ixupe:

— Xememby, earō ke, mba'e pa oiko 'rāa jaikuaa peve. Mba'eta ha'e va'e ava ma ndopytu'ui 'rā kova'e árave ha'e nunga re oikuaa pota e'y re.

* 2:20 Ha'e kuery reko rami vy hetarā ae'ive va'e pe “Nhanderepya” he'i 'rā. Ha'e va'e ma ojogua ju 'rā guetarā vyv operde va'ekue (Levítico 25.25), opena 'rā guetarā iporiaukue'i re (Levítico 25.35), ojogua ju 'rā guetarā escravo-rā ogueraa pyre (Levítico 25.47-49), oepy 'rā guetarā ojukaague re (Números 35.19), ha'e omenda 'rā guyvvy rebirekokue re imemby va'e'y teri ramo (Deuteronomio 25.5-10). Ha'e gui nhande kuery repya ma Jesus ae (Gálatas 4.5, Tito 2.14). * 3:9 Hexe omendaxea rami ijayvu ojevavy e'y re, ha'e kuery reko rami vy.

Rute re Boaz omenda aguã re jogueroayvuague

¹ Ha'e gui tetã kora rokê py Boaz oo vy oguapy oiny ha'e py.* Ha'e rami vy oexa oiny hetarã pytyvõa mboae ijayvuague va'e oaxa rã. Ha'e va'e pe Boaz aipoe'i:

— Xeretarã, eju apy, eguapy ke — he'i ramo ha'e va'e ojere vy oguapy oiny avi ha'e py.

² Ha'e ramo Boaz oenoĩ dez avakue tetã pygua nhomongeta va'ety ikuai va'e. Ha'e kuery pe aipoe'i:

— Peê voi peguapy ke apy — he'i ramo oguapy avi okuapy.

³ Ha'e gui guetarã oipytyvõ aguã rami oiko va'e pe ju aipoe'i:

— Ha'e gui nhanderyke'y Elimeleque vykyue ma ta'yxykue ovendea va'erã itui, Noemi Moabe vyv gui ojevy va'ekue ae 'rã ovendexe.

⁴ Ha'e nunga rupi xee anhembopy'a ndevy amombe'u aguã. Ha'e rami vy nhaneretarã kuery apy oguapy okuapy va'e renonde aipoa'e ndevy: Ejogua na ha'e va'e vyv. Rejoguaxe ri vy ejogua. Ha'e rã any ri vy emombe'u porã xevy aikuaa aguã, mba'eta amboae ipytyvõara ndoikoĩ ndee e'ÿ vy, ha'e ndee rire ma xee ju aiko — he'i.

Ombovai:

— Xee ma ajogua 'rã — he'i.

⁵ Ha'e gui Boaz aipoe'ive ju:

— Ha'e rami avi Noemi po gui vyv rejoguaa ára ma Moabe pygua imeve'ÿ va'e Rute gui avi 'rã rejogua, hexe remenda ramo ndera'y oiko va'erã pe ime vykyue opyta aguã hery py — he'i.*

⁶ Ha'e ramo ojogua ta va'ekue aipoe'i:

— Ha'e rami ri ramo xee ma nda'eveĩ ajogua aguã, amokanhy e'ÿ aguã xera'y kuery peguarã ae mba'emo areko va'e ha'e javi. Ejogua ndee ae ajogua 'rã va'ekue, xee ajogua aguã nda'eve reguai ramo — he'i.

⁷ Po rami ae yma rupi Israel kuery reko, amongue mba'emo ovende, e'ÿ vy omboekoviaa py. Ha'e va'e oikuaa uka porã aguã ma omboi 'rã opy ryrur, ha'e ijoguaa pe ome'ẽ 'rã. Ha'e rami py oikuaa pavê 'rã omboekoviaague, Israel kuery reko rami vy.

⁸ Ha'e rami rã hetarã oipytyvõ aguã rami oiko va'e Boaz pe “Ndee ae ejogua” he'i vy omboi opy ryrur.

⁹ Ha'e ramo Boaz aipoe'i nhomongeta va'ety ha'e guetarã kuery ha'e javi pe:

— Kova'e ára pexa pavêa py Noemi po gui ajogua mba'emo Elimeleque, Quiliom ha'e Malom oguereko va'ekue ha'e javi.

¹⁰ Ha'e xera'yxyrã araa avi Malom ra'yxykue Moabe pygua Rute, herykue py xera'y oiko ma ramo ixupe guarã vvy opyta aguã, Malom rerykue re hexegua kuery ha'e tetã rokê py onhemboaty va'e hexarai e'ÿ aguã. Ha'e nunga rexaare ma peê kuery ae pendekuai aÿ — he'i.

¹¹ Ha'e ramo nhomongeta va'ety kuery ha'e okê py ikuai va'e ha'e javi aipoe'i:

— Ore kuery ma roexa ri. Ha'e ramo ha'e va'e kunha ndero py reraa va'erã ma SENHOR tomoingo porã Raquel ha'e Lia omoingoague rami, mba'eta ha'e va'e mokoĩve omboetave raka'e Israel kuery. Ha'e gui ndee Boaz voi tanemboetea Efrata py, nderery re ta'ima'endu'aa pavê Belém tetã py.

¹² Ndero pygua kueryrã ta'ikuai Judá ra'y Perez, Tamar pi'a va'e ro py ikuaia rami, ndera'yxy rupi ndera'y kueryrã SENHOR ome'ẽ va'erã ha'e javi.

Rute opi'a Obede oikuavã'iaque

¹³ Ha'e gui Boaz ogueraa Rute gua'yxyrã. Hexeve joguereko ramo ixupe SENHOR ome'ẽ oguereko'i aguã. Ha'e rã oikuavã'i ava'i.

¹⁴ Ha'e ramo Noemi pe kunhague ikuai va'e aipoe'i:

— SENHOR toiko ima'endu'a porãmby, mba'eta kova'e ára nome'ẽ e'ÿi neremiarirõ nepytyvõarã. Tove ha'e va'e rery re ta'ima'endu'aa pavê Israel kuery ikuaia rupi.

¹⁵ Ha'e va'e ma nembopy'a porã ju 'rã nderekove pukukue re, ha'e nembopy'a porã 'rã neguaimi'i ma jave teĩ, mba'eta ndepi'a ra'yxykue nderayvu va'e oikuavã'i ma. Ha'e va'e kunha ma sete ndepi'a kuery oiko 'rã va'ekue gui owareve va'e ndevy — he'i.

¹⁶ Ha'e ramo guamiarirõ ava'i Noemi ojopy vy omoĩ o'u áry, hexe opena oikovy guive.

¹⁷ Hoo katy'i rupi ikuai va'e omboery okuapy.

— Oiko ma peteĩ ava'i Noemi remiarirõ — he'i vy omboery Obede. Ha'e va'e ma Jessé ru, ha'e Jessé ma Davi ru raka'e.

¹⁸ Po rami ma Perez ramymino kuery rery: Perez ra'y ma Hezrom,

¹⁹ Hezrom ra'y ma Rão, Rão ra'y ma Aminadabe,

²⁰ Aminadabe ra'y ma Naassom, Naassom ra'y ma Salmom,

²¹ Salmom ra'y ma Boaz, Boaz ra'y ma Obede,

²² Obede ra'y ma Jessé, ha'e rã Jessé ra'y ma Davi.

* ⁴ 1 Ha'e jave py ma huvixa kuery mba'emo re oikuaa pota vy oo 'rã tetã rokê py, tetã rokê vyvry oguapy 'rã okuapy jogueroayvu aguã. Ha'e rami vy amongue mba'emo oguereko va'e oo 'rã tetã rokê py huvixa kuery oikuaa pota aguã (Deuteronômio 21.18-19; 2 Samuel 15.1-4, 19.8; Jó 29.7-12; Provérbios 31.23; Jeremias 38.7-8, 39.3).

* ⁴ 5 Deuteronômio 25.5-10

Jypygua kuaxia Samuel 'epyre oĩa

Jypygua kuaxia Samuel 'epyre oĩa

Kova'e kuaxia para re oĩ Samuel ha'e huvixa Saul rekokué. Samuel ma Nhanderuete renonde profeta oiko, ha'e joguerekoa opa yvigua. Saul ma Israel pygua huvixave jypy'i oĩ va'ekue. Saul oĩ jave Davi oiko avi, Saul rekovia Israel kuery ruvixa oĩ va'erã.

Heta va'e kuery ae ojerure okuapy raka'e nguvixaverã omoĩa aguã re. Ha'e rami teĩ Samuel nomoĩxei ranhe. Ha'e vy'ixupe Nhanderuete aipoe'i: "Ha'e kuery oipota ramo emoĩ" he'i ramo mae omoĩ Saul. Huvixa Saul ma jypy onhe'ẽ rendu Nhanderuete, ha'e rã araka'eve rã ojepe'a onhe'ẽ rendua gui, ha'e ae oikuaa rami rive oiko vy'. Nhanderuete pe mymba ome'ẽ teĩ ixupe Samuel aipoe'i: "Mba'emo nham'eãa gui ma ha'eveve nhamhe'ẽ rendu. Vexa'i kyrakue nham'eãa gui ha'eveve ojapo uka va'e jajapo. ... Ha'e gui Senhor ayvu reja rire ha'e voi ndereja, huvixa nereĩve aguã", he'i (15.22b, 23b). Ha'e ramo Saul oiko vai, Senhor ndoguerovy'avei rã. Nhanderuete nanhanhe'ẽ rendui ramo ou 'rã jajexavai aguã.

Saul oĩ teri reve hekovia Nhanderuete oiporavo Davi. Ha'e va'e ma kunumi va'e, guymba vexa'i kuery openaa rupi oiko. Ha'e rami teĩ Nhanderuete po'akaa rupi ojuka raka'e gigante Golias ita momboa py rive. Aipoe'i: "Ndee ma kyxe reve reju xerovai, hu'y guaxu ha'e hu'y jokoia reve. Ha'e rã xee ma nderovaiaju Senhor ixondaro reta va'e rery rupi. ... Apy heta va'e kuery ikuai va'e ha'e javi oexa 'rã Senhor jogueraa jepea kyxe py e'ỹ, hu'y guaxu py e'ỹ guive. Mba'eta pendere opu'ã va'e ma Senhor ae. Ha'e ae 'rã penemboaxapa orepo py", (17.45a, 47) he'i vy'ojuka.

Elcana ha'e mokoĩ ta'xy rekokué oĩa

¹ Oiko peteĩ ava Ramataim-Zofim guigua, Efraim yvy'ã reia katygua, Elcana hery va'e. Ha'e va'e ma Jeroão ra'y, Jeroão ma Eliú ra'y, Eliú ma Tou ra'y, Tou ma Zufe ra'y. Efraim regua meme ikuai.

² Ha'e va'e ma ta'xy mokoĩ va'e. Peteĩ ma Ana, amboae ma Penina. Penina ma imemby va'e, ha'e rã Ana ma imemby va'e'ỹ.

³ Ha'e va'e ava ma'et'ya nhavõ guekoa gui oo 'rã Siló tetã katy, omboetea rupi mba'emo ome'ẽ aguã SENHOR ixondaro reta va'e pe. Ha'e py oiko avi sacerdote Eli ta'y mokoĩve Hofni ha'e Finéias reve. SENHOR pegua sacerdote meme ikuai.

⁴ Elcana ma SENHOR pe mba'emo omboaxa va'e nhavõ gui mba'emo ome'ẽ avi 'rã gua'xy Penina pe, ha'e gua'y ha'e guajy kuery ha'e javi pe.*

⁵ Ha'e rã gua'xy Ana pe ma hetave 'rã ome'ẽ oayvuve vy, SENHOR nomomemby ukai teĩ.

⁶ Ta'xy mboae omoango reia rupi tema oguereko, SENHOR nomomemby ukai ramo.

⁷ Ha'e rami ae tema oiko ma'et'ya nhavõ. SENHOR pegua oo katy Ana oo nhavõ ta'xy mboae omomboriaua rupi tema ijayvu. Ha'e ramo ojae'o oiny vy' ndokarui.

⁸ Ha'e rami rã ime Elcana aipoe'i ixupe:

— Ana, mba'e re tu rejae'o? Mba'e re tu nderekarui ri? Mba'e re tu ndepy'a py ndeporiau reiny? Peteĩ nhirui meme ndepi'a 'rãgue py xee ndereve aikoa ha'eveve e'ỹ ri ty'y? — he'i.

Ana ojerure vy onhemboayvuaque

⁹ Ha'e gui Siló py ha'e kuery okaru ha'e oy'u jave oĩ avi sacerdote Eli. Ha'e ma peteĩ tenda py oguapy oiny SENHOR pegua oo yta vvy'ry.

¹⁰ Ha'e va'e rire Ana opu'ã vy onhe'ẽ py nda'evei etea oendu reve ojerure ho'amy SENHOR pe, ojae'o vaipa guive.

¹¹ Ha'e vy onhemboayvu reve aipoe'i:

— SENHOR nexondaro reta va'e, xapy'a rei xee nerembiguai ajexavaia re rema'ẽ vy xere nema'endu'a ri ramo, xapy'a rei xee nerembiguai re nema'endu'a vy peteĩ xepi'arã reme'ẽ ri ramo ma ndevy ju SENHOR amboaxa 'rã oikoa pukukue re ndevy guarã anho oiko aguã, ha'e peteĩgueve hi'a ndojayaa 'rã guive kyxe py — he'i.†

¹² SENHOR renonde onhembo'ea py oĩ are ramo Eli oma'ẽ oiny ijuru omyã re.

¹³ Mba'eta Ana ma opy'a py rive'i ijayvu. Hembe omyĩ va'eri nda'ijayvuẽi. Ha'e ramo Eli "Oka'u rai po" he'i vy

¹⁴ aipoe'i ixupe:

— Raka'e peve 'rã tu reka'u rei reiny? Ey'uve eme vinho! — he'i.

¹⁵ Ha'e rami teĩ Ana ombovai:

— Any, xeruvixa! Xee ma kunha xenhe'ẽ py ajexavai rei va'e. Xee nday'ui ri vinho, neĩ iro va'e. Ha'e rami 'rãgue py SENHOR renondeaju xenhe'ẽ py ajexavaia rami anhemombe'u aguã.

¹⁶ Ha'e nunga rupi xee nerembiguai pe "Nhe'ẽ vai rajy" 're eme. Mba'eta xeporiaua ha'e ajexavaia rima aroayvu ainy aỹ — he'i.

¹⁷ Ha'e rami rã Eli ombovai:

* 1:4 Ha'e kuery reko rami vy SENHOR pe temb'u omboaxa va'e amongue regua gui ha'eve 'rã ha'e kuery ae ho'u aguã, ngoo pygua kuery ha'e javi reve (Deuteronomio 12.17-18, 16.13-17). † 1:11 SENHOR pe opi'a omboaxa aguã re Ana ijayvu Números 6.1-21 py oĩa rami. Ha'e rami ae avi oiko Sansão (Juizes 13.2-5) ha'e Paulo (Atos 18.18).

— Tereo porã'i ha'vy. Tove Israel kuery ruete tojapo rejerureague — he'i.

¹⁸ Ha'e rã kunha va'e ju

— Xee nerembiguai taxejou vai eme — he'i. Ha'e rami ijavyu ma vy kunha va'e oo ju tape rupi. Okaru jevy rire iporiaua noívei hova re.

Samuel itui'i rire Nhanderuete peguarã omboaxaague

¹⁹ Ha'e gui ko'ê rai ramove ha'e kuery ovy vy SENHOR renonde omboete okuapy. Ha'e rami vy ojevypa vy ngoo py ae ovaê Ramá tetã py. Ha'e gui gua'yxy Ana reve Elcana joguereko ju. Ha'e ramo hexe SENHOR ima'endu'a ramo

²⁰ oguereko'i peteĩ kyrĩ va'e. Hi'ára ovaê ramo oikuavã'i opi'a'i. Ha'e va'e ma omboery Samuel,

— SENHOR pe ajerureague ae oiko — he'i vy.

²¹ Ha'e gui ime Elcana ma ngoo pygua kuery ha'e javi reve oje'oi SENHOR pe mba'emo ma'etÿa nhavõ ome'êa rami ome'ê ha'e onhemboayvuague ojapopa aguã.

²² Ha'e rã Ana ma ndooi. Ha'e vy ome pe aipoe'i:

— Ava'i nokambuvei jave ma xee araa 'rã aexa uka SENHOR pe, ha'e rã ha'e py ae oiko aguã.

²³ Ime Elcana ombovai:

— Eiko ha'vy ndevy ha'veeva rami. Eropyta okambu teria ja. Ha'e rami vy eiko SENHOR ijavyvuague ojapopa aguã rami — he'i. Ha'e ramo ta'yxy opyta vy ombotuvixa kyrĩ va'e okã re, okambu teria ja.

²⁴ Nokambuvei ma jave mae ma ogueraa. Peteĩ vaka ra'y mboapy ma'etÿ va'e reve ogueraa avi, peteĩ ajaka trigo ku'ikue ha'e peteĩ vinho ryru. Ha'e rami vy SENHOR pegua opy oexa uka Silõ py, ava'i va'e kyrĩ'ete teri reve.

²⁵ Ha'e rami vy vaka ra'y ojuka ukapa ma vy opi'a'i ogueraa sacerdote Eli oĩa py.

²⁶ Ha'e vy ixupe ixu aipoe'i:

— Aÿ ma xeruvixa, anhetê ete nderekove rupi aura vy aipoa'e: Xee ma kunha apy ndereve aĩ va'ekue, SENHOR renonde anhembo'e ha'amyia py.

²⁷ SENHOR pe kova'e ava'i re ae ajerure ramo ojapo ma ajerureague.

²⁸ Ha'e nunga rupi aru oikoa pukukue re SENHOR peguarã amboaxa aguã, SENHOR pe ajerure rire — he'i. Ha'e ramo omboete SENHOR ha'e py.

2

Ana oporaiaague

¹ Ha'e rami vy Ana onhembo'e vy aipoe'i:

— Xepy'a py arovy'a SENHOR,

xembaraetevea aendu avi SENHOR re vy.

Xejuru py ma xerory xerovaigua kuery gui,

ndee xereraa jepea re avy'a vy.

² SENHOR rami iky'a e'ÿ va'e ndoikoi,

ndee ramigua amboae ndoikoi vy.

Neĩ peteĩve'i py ndoikoi itaova ndee Oneruete rami guarã.

³ Pemboeteve eme ayvu pejejou porã reia rupigua,

pendejuru gui toê eme nhemboyvate reia rupigua.

Mba'eta SENHOR Nhanderuete anho hi'arandua rupi oiko va'e.

Jaikoa ha'e javi re ha'e oikuaa pota 'rã mba'emo opejaa py rami.

⁴ Ha'e rami vy omopẽmba 'rã imbaraeete va'e kuery rapa,

ha'e rã ikangykue'i va'ekue ma omombaraete 'rã.

⁵ Karuai oendu e'ÿ va'ekue ma aÿ escravo-rã onhemoiingo uka 'rã mbojape re rive,

ha'e rã okaruxe reia rupi ikuai va'ekue ma ndojexavai reivei ma 'rã karuai gui.

Na'imembyi ae va'ekue voi sete kyrĩ va'e oguereko,

ha'e rã imemby reta va'ekue ma na'imbaraetevei ma 'rã.

⁶ SENHOR ae ma tekove pe'aa ha'e tekove me'êa oiko.

Yvykua katy nhomboguejy, ha'e jogueru jevy kuua va'e.

⁷ SENHOR ma nhomomboriau kuua, ha'e nhombovy'a jevy kuua va'e,

nhomo'yvyi' kuua, ha'e nhomboyvate jevy kuua va'e.

⁸ Ha'e omopu'ã 'rã iporiaukue'i yvy ku'i ituiague gui,

ytyaty ikuaiia gui omboyvate 'rã iporiaukue'i va'e,

yvatekueve va'e mbyte ju 'rã omboguapy,

ojapo 'rã ipo'akapa va'e renda áry oguapy aguã rami.

Mba'eta SENHOR gui vy ae yvy yta itui va'e oĩ atã,

ha'e va'e áry omoĩ atã yvy ha'e javi.

⁹ Ha'e opena 'rã ojeupe guarã oiky'a'o va'ekue re opyrõa rupi,

ha'e rã heko vai va'e kuery ma omokyrirĩmba 'rã pytũ manoa oĩa py.

Mba'eta avakue ma ombaraetea rupi rive nda'ipo'akai 'rã.

¹⁰ SENHOR re opu'ãa rupi ikuai va'e ma omomba 'rã,

ha'e kuery rovai hyapu 'rã yva gui.

SENHOR nhombopaga 'rã vvy apy rupi voi,
 ha'e rã ojeupegua huvixa ma omombaraete 'rã,
 ombopo'aka 'rã guembiporavo — he'i.

¹¹ Ha'e gui Elcana ojevvy ju Ramá py ngoo oĩa py. Ha'e rã ava'i ma sacerdote Eli renonde rupi mba'emo ojapo oikovy SENHOR pe.

Eli ra'y kuery mba'emo vai ojapo jepiague

¹² Eli ra'y kuery ma nhe'ẽ vai ra'y ete ikuai, nomboetei guive SENHOR.

¹³ Mba'eta ha'e jave ma po rami 'rã sacerdote kuery ojapo heta va'e kuery re. Amongue mba'emo ome'ẽ nhavõ ou 'rã petei sacerdote rembiguai kunumi va'e xo'o ombojy teria py, opo py kuxa rakua oguereko reve,

¹⁴ ha'e vvy omopo'ẽ 'rã oja ferro guigua py, e'y vvy oja py, oja guaxu py, e'y vvy hy'a py mba'e, ha'e gui kuxa rakua py oguenoẽ va'e rei sacerdote kuery ogueraa 'rã ojeupe guarã. Ha'e rami ae tema 'rã ojapo Israel kuery ha'e py Siló py oo va'e nhavõ re.

¹⁵ Ikyrakue oapy e'y mbove ma voi sacerdote rembiguai kunumi va'e ou vvy aipoe'i 'rã ava oapy ta va'e pe: "Upe va'e xo'o eme'ẽ sacerdote kuery pe oxy aguã, mba'eta ndepo gui ndojopyi 'rã xo'o jyku, ipyrygua anho", he'i 'rã.

¹⁶ Ha'e gui xapy'a rei xo'o me'ẽa ombovai vy "Tove ikyrakue ranhe taapy, ha'e rire ma rejopyxa rami ejopy", he'i ramo ma aipoe'i 'rã: "Any, eme'ẽ xevy a'y ma voi. Ha'e rami e'y rã aipe'apa nhea'ã 'rã", he'i 'rã.

¹⁷ Ha'e rami py ha'e va'e kunumigue opa mba'e py ojevvy SENHOR renonde, ixupe mba'emo ome'ẽmby nombovarei vy.

Samuel kyrĩ jave guare

¹⁸ Ha'e gui Samuel ma kyrĩ reve ma voi mba'emo ojapo oikovy SENHOR renonde, manto sacerdote pegua ipererĩ va'e py onhemonde guive.

¹⁹ Ixy ma ma'etã nhavõ ao puku ruxã'i va'e ojapo vvy ixupe ogueru 'rã ome reve, ma'etã nhavõ mba'emo ome'eaty rami ome'ẽ jave.

²⁰ Ha'e ramo Eli ogueroayvu porã 'rã Elcana ha'e ta'yxy. Ha'e vvy aipoe'i 'rã:

— Tove SENHOR tome'ẽve ju kova'e kunha pi'arã, SENHOR pe opi'a omboaxa va'ekue rekovia — he'i. Ha'e ramo ha'e kuery ojevvy ju 'rã guekoa katy.

²¹ Ha'e rã Ana re SENHOR opena porã ramo oguereko raka'e mboapy avakue ha'e mokoĩ kunha. Ha'e gui kunumi va'e Samuel ma tujave ovy SENHOR renonde.

Gua'y kuery pe Eli ijayvuague

²² Ha'e gui Eli tujã'i ete reve oendu nomombe'ua rã Israel kuery ha'e javi re ta'y kuery ojapo vaia, mba'eta nhogueronheno 'rã kunhague oguy nhemboaty oĩaty rokẽ rupi omba'eapo va'e kuery reve.

²³ Ha'e rami vvy gua'y kuery pe aipoe'i:

— Mba'e re tu ha'e nunga pejapo? Mba'eta aendu riae tema heta va'e kuery omombe'u rã pendeko vaia.

²⁴ Ha'e rami e'y ta'vy xera'y kuery, peiko porã e'yã ae tema aendu. SENHOR pegua kuery ojevvyppa aguã rami pejapo.

²⁵ Xapy'a rei petei ava oirũ rovai ri ojevvy ramo Nhanderuete oikuaa pota 'rã mokoive re. Ha'e rã SENHOR rovai ri ojevvy ramo ma mava'e 'rã tu oiko hepyarã? — he'i. Ha'e rami tuu ijayvu teĩ ha'e kuery noendu potai, SENHOR ojukaxe ae ramo.

²⁶ Ha'e rã kunumi va'e Samuel ma tujave ha'e ijyvateve ovy, SENHOR ha'e avakue ojou porãve tema aguã rami oiko.

Eli ro pygua kuery rovai profeta ijayvuague

²⁷ Ha'e gui Eli oĩa py ou petei ava Nhanderuete remimbo'e. Ha'e vvy aipoe'i ixupe:

— Po rami SENHOR ijayvu: "Neramõi ro pygua kuery pe xee ajekuaa uka va'ekue Egito vvy re teri Israel kuery ikuai jave, Faraó rekoa py. Anhetẽ e'y ri ty'y?

²⁸ Ha'e rami vvy Israel kuery pavẽ regua mbyte gui xee aiporavo ae ma sacerdote xejeupe guarã, xevygua altar oĩa py oo vvy heakuã porã va'e oapy aguã, ha'e xerenonde manto sacerdote pegua py onhemonde reve ikuai aguã. Neramõi kuery peguarã ame'ẽmba va'ekue mba'emo Israel kuery oapy va'ekue ha'e javi.

²⁹ Mba'e re tu ha'vy pepyrõmba rei ri xevy pe mymba ha'e mba'emo ra'yigue ome'ẽmby re, xeayvuague rami vvy xevygua oo py ome'ẽa teĩ? Ha'e ndee, mba'e re tu xegui remboeteve ndera'y kuery rive? Mba'eta ha'e kuery reve penhemongyra rivepa ma pekuapy xevygua Israel kuery ome'ẽ va'e iporãgueve re."

³⁰ Ha'e nunga rupi SENHOR Israel kuery ruete aipoe'i: "Anhetẽ xee aipoa'e va'ekue ndero pygua ha'e neramõi ro pygua kuery raka'e rã peve guarã amingo aguã", he'i va'ekue. Ha'e rami teĩ a'y SENHOR aipoe'i: "Ha'e nunga toive eme, mba'eta amboete uka 'rã xemboetea kuery, ha'e rã xerayvua rupi e'y ikuai va'e ma ojou vaia 'rã.

³¹ Ne'exa, ovaẽ ouvvy ndejvya ajaya aguã ára, ha'e neramõi jvya voi, ndero py tujakueve ndoikovei aguã rami.*

³² Ndee ae rexa 'rã jexavaia Nhanderuete pegua opy rupi oiko rã. Israel kuery re mba'emo porã oikoa ramive ndero pygua kuery va'e regua ma ndoikoi 'rã tujã va'e.

* 2:31 "Ndejvya ajayapa 'rã" he'ia ma ta'y kuery ojukapa aguã re ijayvu vvy. Ha'e rami ae ojapo (1 Samuel 4.11-18).

³³ Xapy'a rei neramymino kuery va'e regua amongue ava xeivygua altar oikoa gui ndaibe'ai 'rã va'eri nderexay py amboguepa 'rã nderexa, nenhe'ë py ndeporiaua rendu va'e gui. Ha'e rami vy neramymino kuery, ndero pygua kuery ha'e javi ma kunumi rei teri reve teĩ omanomba 'rã.

³⁴ Ha'e gui ndera'y kuery mokoĩ Hofni ha'e Finéias re mba'emo oiko 'rã reikuaa aguã, mba'eta peteĩ ára pyve omano 'rã mokoive.

³⁵ Ha'e gui ma xejeupe guarã amoingo 'rã peteĩ sacerdote ojerovia pyrã. Ha'e va'e ma oiko 'rã xepy'a re oĩ va'e ha'e javi rami, anhembopy'aa rami meme. Hoorã ajapo 'rã oĩ atã aguã rami, ha'e oiko riae 'rã xerembiporavo renonde.

³⁶ Ha'e va'e renonde ou 'rã okuapy ndero gui hembyre va'ekue ha'e javi, guenapy'ã re oĩ 'rã peteĩ'i hatã'i va'e prata guigua ojopy aguã rive, ha'e peteĩ jururã'i mbojape. Ha'e vy aipoe'i 'rã: 'Ajerure ndevy, sacerdote kuery omba'eapoa rupi xee voi xemoĩ aguã re, mbojape ra'yku'e'i ha'u va'erã ajou aguã', he'i 'rã okuapy.'

3

Ikéry py SENHOR Samuel oenoiaque

¹ Kunumi va'e Samuel mba'emo ojapo oikovy SENHOR pe, Eli oexaa rupi. Ha'e va'e jave ma SENHOR oayvu nombou retai, mba'emo ndoexa uka riaei guive.

² Ha'e gui peteĩ pytũ ma sacerdote Eli onheno oupy onhenoaty rupi. Hexa pytũmba rei ma guive vy ndoexavei rai'i ma.

³ Samuel voi onheno ma avi oupy SENHOR ayvu ryrũ oĩa oo py, Nhanderuete pegua tataandy oĩ va'e nombogueai teri jave.

⁴ Ha'e gui ma SENHOR oenoĩ kunumi va'e:

— Samuel, Samuel!

Ha'e ramo ombovai:

— Apy ma aĩ! — he'i.

⁵ Ha'e rami vy onha ovy Eli ituia py. Ha'e vy aipoe'i:

— Apy ma ha'ã, ndee xerenõi ramo.

Ha'e rã aipoe'i:

— Any, xee e'ỹ ri roenoĩ xera'y. Tereo ju enheno — he'i ramo oo ju onheno.

⁶ SENHOR teĩgue ju oenoĩ:

— Samuel! — he'i.

Ha'e ramo ovy jevy vy Eli ituia py oo vy aipoe'i:

— Apy ma ha'ã, ndee xerenõi ramo.

Ha'e rã aipoe'i:

— Any, xee e'ỹ ri roenoĩ xera'y. Tereo enheno ju — he'i.

⁷ Mba'eta Samuel ndoikuaai teri SENHOR ae ria, ixupe SENHOR oayvu nomboui teri ramo.

⁸ Ha'e gui mboapykue ma SENHOR oenoĩ Samuel. Ha'e rã ovy vy oo ju Eli-a py. Ha'e vy aipoe'i:

— Apy ma ha'ã, ndee xerenõi ramo.

Ha'e ramo mae ma Eli oikuaa SENHOR ae ri kunumi va'e oenoĩa.

⁹ Ha'e rami vy aipoe'i Samuel pe:

— Tereo enheno ju. Ha'e gui xapy'a rei nerenõia ju rã aipo're: "Ndeayvu ke SENHOR, xee nerembiguai aendu ainy ndeayvu", 're 'rã — he'i. Ha'e ramo Samuel oo ju ngupa py onheno.

¹⁰ Ha'e gui SENHOR ou vy hi'ái ha'e py. Ha'e rami vy oenoĩ ppyague rami ae ju oenoĩ:

— Samuel, Samuel! — he'i ramove ombovai:

— Ndeayvu ke, mba'eta xee nerembiguai aendu ma ainy — he'i.

¹¹ Ha'e gui SENHOR aipoe'i Samuel pe:

— Ne'exa, peteĩ mba'e ajapo ta Israel kuery re, ha'e va'e oendu va'e rei ijapyxa nhe'ẽmba 'rã nhemondyi gui.

¹² Mba'eta ha'e va'e ára Eli rovai amoingo 'rã hoo pygua kuery rekorã xeayvuague ha'e javi. Amboypy vy ma ajapopa 'rã.

¹³ Mba'eta ixupe aipoa'e ae ma va'ekue hoo pygua kuery ambopaga aguã raka'e rã peve, ha'e kuery ojevavya ha'e voi oikuaa porã rire. Ta'y kuery opa marã rei ikuai va'eri tuu ndojokoi.

¹⁴ Ha'e nunga rupi aura Eli ro pygua kuery ojevavyague ndojao'iai ae aguã re, mymba e'ỹ vy mba'emo ra'yĩgue ha'e kuery ome'ë teĩ.

Eli pe Samuel oexa va'ekue omombe'uague

¹⁵ Ko'ẽmba peve Samuel onheno oupy. Ha'e vy ma oipe'a SENHOR pegua oo rokẽ. Ha'e rami teĩ okyje teri Eli pe oexa va'ekue omombe'u aguã.

¹⁶ Ha'e gui Eli oenoĩ Samuel. Ha'e vy aipoe'i:

— Xera'y Samuel!

Ombovai:

— Apy ma ha'ã! — he'i.

¹⁷ Ha'e ramo aipoe'i:

— Mba'e he'i tu SENHOR ijayvu vy? Ajerure renhomi e'ỹ aguã. Tove Nhanderuete ha'e oipotaa rami ete tojapo ndevy, xapy'a rei ijayvuague ha'e javi remombe'u porãmba e'ỹ rã.

¹⁸ Ha'e ramo Samuel omombe'upa, mba'eve py ndoikuaa uka e'yi. Ha'e rami rã Eli aipoe'i:

— SENHOR ae rima ra'e. Ha'e oipota va'e ae tojapo — he'i.

¹⁹ Ha'e gui Samuel okakuaave tema ovy. Hexeve SENHOR oiko vy peteĩve henda py ndoejai ijayvuague oaxa rive agua rami.

²⁰ Ha'e rami rã Israel kuery ha'e javi, Dã guive Berseba peve ikuai va'e oikuaapa okuapy SENHOR pegua profeta Samuel oikoa.

²¹ Siló py SENHOR ojekuaa uka ae tema Samuel pe, oayvu ombou guive.

4

Israel kuery re filisteu kuery ipo'akaague

¹ Ha'e rami rã Samuel ayvu oendupaa Israel kuery ikuai rupi.

Ha'e gui ma Israel kuery oje'oipa filisteu kuery rovai opu'ã agua. Ha'e rami vy Ebenézer tekoa katy'i ijaty okuapy. Ha'e rã filisteu kuery ma Afeca katy'i ijaty okuapy.

² Filisteu kuery ma hyxy porãmba okuapy, Israel kuery reve joguero'a agua oje'oi. Ha'e gui joguero'a okuapya py filisteu kuery omoingo axypa Israel kuery. Ha'e vy nhuũndy reia rupi ojuka okuapy quatro mil avakue Israel regua.

³ Ha'e gui Israel kuery ijaty okuapyague py ojevypa ramo nhomongeta va'ety kuery aipoe'i:

— Mba'e re nda'u SENHOR nhanemoingo axy uka ange filisteu kuery renonde? Siló tetã gui jaru 'rãgue SENHOR guexeve guarã ojapo va'ekue ryrur, nhanembyte ou vy nhanderovaigua kuery po gui nhanderepy agua — he'i.

⁴ Ha'e ramo heta va'e kuery ogueru ruka SENHOR ixondaro reta va'e anjo ipepo va'e ra'angaa ikuai va'e mbyte oĩ va'e ayvu ryrur. Nhanderue te guexeve guarã ojapo va'ekue ryrur oguerua py ma Eli ra'y kuery mokoive ikuai, Hofni ha'e Finéias.

Hyru oipe'aa heravy, ha'e Hofni ha'e Finéias ojuka okuapyague

⁵ Ha'e gui Israel kuery ijaty okuapya py SENHOR ayvu ryrur oguerua jave ma ha'e kuery ha'e javi onhendu atã xapy'a okuapy. Ha'e ramo yvy jave rupi rai oendua.

⁶ Ha'e kuery ovy'a reve ojapukai atã filisteu kuery oendu vy aipoe'i okuapy:

— Mba'exa tu ovy'a ete nhendu va'e hebreu kuery ijaty py? — he'i. Ha'e vy mae oikuaa SENHOR ayvu ryrur ijaty py oguerua maa.

⁷ Ha'e rami vy filisteu kuery okyjepa aipoe'i okuapy.

— Nhanderue te ramigua kuery ou ra'e ha'e kuery ijaty okuapya py — he'i. — Nda'evei ete nhandevy! Ha'e nunga oiko va'e'y teri aỹ peve.

⁸ Nda'evei ete nhandevy! Mava'e tu nhandereraa jepe 'rã Nhanderue te ramigua kuery ipo'akapa va'e gui? Mba'eta ha'e va'e Nhanderue te ramigua kuery ae ma Egito pygua kuery opa marãgua mba'eaxy py omoingo axy va'ekue tekoa e'ya re ikuai py.

⁹ Filisteu kuery, penembaraete ke ha'vy! Avakue ipy'a guaxukueve peiko, hebreu kuery pegua escravo nhandekuai e'y agua, ha'e kuery nhande-escravo ikuaiague rami e'y! Avakue ipy'a guaxukueve nhandekuai reve jaje'oi joe nhapu'ã agua! — he'i okuapy.

¹⁰ Ha'e rami vy filisteu kuery joe opu'ã okuapy. Ha'e vy ombojexavai Israel kuery ramo peteĩ-teĩ onhamba ngoo katy. Israel kuery regua ikuai axypa, trinta mil avakue yvy rupigua ojuka ramo.

¹¹ Oipe'aa avi heravy Nhanderue te ayvu ryrur. Ojuka avi Eli ra'y mokoive, Hofni ha'e Finéias.

Eli omanoague

¹² Ha'e va'e árave peteĩ ava Benjamim regua hyxy okuapya mbyte gui onha ovy vy ovaẽ Siló tetã py. Oao xorokue reve ovaẽ, yvy oakã re omombo reve.

¹³ Ha'e va'e ovaẽ jave Eli oguapy oiny guenda py, tape yvỹry. Oma'ẽ oiny, Nhanderue te ayvu ryrur re nda'evei vy ipy'a ryrỹpa rei guive. Ava va'e tetã py ovaẽ vy omombe'upa ma rirre tetã ha'e javi rupi hevovo rei xapy'a okuapy haxẽ vy.

¹⁴ Haxẽ rei va'e Eli oendu vy oporandu:

— Mba'e nunga teovo tu povae? — he'i ramo ava va'e ojapurave ovy reve omombe'u Eli pe.

¹⁵ Eli ma noventa e oito ma'etỹa ogueroko ha'e va'e jave py. Ndoexavei ae ma, oexa agua nda'evevei ae va'e vy.

¹⁶ Ha'e gui ava va'e aipoe'i Eli pe:

— Xee ma hyxy va'e gui aẽ vy ange'i anha ajuvy kuri va'ekue — he'i.

Eli oporandu:

— Xera'y, mba'e nunga tu oiko ra'e?

¹⁷ Imombe'ua ombovai:

— Filisteu renonde gui Israel kuery onhamba kuri. Nhande kuery mbyte rupi oiko nhandejukapaa. Ndera'y mokoive, Hofni ha'e Finéias ojuka avi. Nhanderue te ayvu ryrur voi oipe'aa heravy — he'i.

¹⁸ Nhanderue te ayvu ryrur omombe'u ramove Eli guakykue katy ho'a guenda okẽ katy'i oĩ va'e gui. Oaju'y omopẽ vy omano vyvoi, tujã'i ete ha'e ipoyi guive vy. Quarenta ma'etỹ re ma Israel kuery re opena va'ekue.

¹⁹ Ha'e gui ma ta'y Finéias ra'yxy omemby oikuvã rai'i va'e oendu avi omombe'u rã Nhanderue te ayvu ryrur oipe'a heravyague ha'e ime ru ha'e ime omanoague. Ha'e nunga oendu vy onhea'ã xapy'a vy kyrĩ'i va'e oikuvã'i oiny, omemby raxya oendu vy.

²⁰ Kunha va'e omano ta ramo kunhague ipytyvõa kuery aipoe'i okuapy:

— Ekyje eme, reikuavã'i ae ma ava'i — he'i.

Ha'e rami teĩ kunha va'e nombovai, ha'e rami ijayvua re ndojapyxaka potai.

²¹ Va'eri opi'a'i omboery Icabô,

— Israel kuery pegua hexakãmba va'ekue okanhy ra'e — he'i vy.

Ha'e rami ijayvu Nhanderuete ayvu ryru oipe'aa heravyague re, ime ru ha'e ime omanoague re guive.*

²² Aipoe'ive ju:

— Israel kuery pegua hexakãmba va'ekue okanhy ra'e, Nhanderuete ayvu ryru oipe'aa rã.

5

Dagom pegua opy hyru oĩ jave guare

¹ Ha'e gui Nhanderuete ayvu ryru ma filisteu kuery ogueraa Ebenézer tekoa gui, ha'e Asdode tetã py oguerovaẽ.

² Ha'e py ma Nhanderuete ayvu ryru ogueraa vy Dagom ra'angaa oĩa oo py omoĩ, ta'angaa yvy'iry ae.

³ Ha'e gui ko'ẽ ramo aje'ive'i reve Asdode pygua kuery ovypa vy oma'ẽ rã Dagom ra'angaa ho'a ma oupy ra'e, ngova yvy rami itui SENHOR ayvu ryru renonde. Ha'e ramo ojopy vy hi'aĩague py ju omopu'ã imo'amy.

⁴ Ko'ẽ jevy aje'ive'i reve ovypa ju vy oma'ẽ rã Dagom ra'angaa ho'a ju oupy ra'e, ngova yvy rami ae ju itui SENHOR ayvu ryru renonde. Dagom akã ha'e ipo jovaive ojayaa ma ra'e inony okẽ renda áry. Hete mbytekue rive ma ouve.

⁵ Ha'e rami rire Dagom pegua sacerdote kuery ha'e ixupegua opy oike va'e rei ma ha'e va'e okẽ renda re nopyrõvei 'rã Asdode tetã py, aỹ peve.

⁶ Ha'e gui Asdode pygua kuery rovai SENHOR opo omoĩ vy omoingo axy vaipa. Ombojexavai vy omomba'eaxypa tuguy rape mbopeupaa py, ha'e katy'i rupi ikuai va'e kuery guive.

⁷ Ha'e rami rã avakue Asdode pygua ha'e nunga oexa vy aipoe'i okuapy:

— Nda'evevei nhanderekoa py Israel kuery ruete ayvu ryru opyta aguã. Mba'eta nhande'áry ma ipo ipoyi ete, nhande kuery ruete Dagom áry voi — he'i.

⁸ Ha'e rami vy ayvu reraarã omondouka guekoa py omboatypa aguã filisteu kuery ruxiva ikuai va'e ha'e javi. Ha'e vy ha'e kuery pe aipoe'i okuapy:

— Mba'e nda'u jajapo 'rã Israel kuery ruete ayvu ryru re?

Ombovai:

— Peraa ju Israel kuery ruete ayvu ryru Gate tetã py, ha'e gui tetã nhavõ rupi toguerekoa — he'i ramo Gate tetã py ju ogueraa.

⁹ Ayvu ryru ogueraa ma rire ha'e va'e tetã rovai ju SENHOR po oĩ. Ha'e ramo nda'eveipa rei okuapy, mba'eta ha'e va'e tetã py voi omomba'eaxypa yvyĩgueve ha'e yvatekueve voi. Ha'e kuery ha'e javi re oĩ tuguy rape mbopeupaarã.

¹⁰ Ha'e ramo E Crom tetã py ju ogueraa Nhanderuete ayvu ryru. Teĩ ha'e py oguerovaẽ rã E Crom pygua kuery ijayvu atã reve aipoe'i:

— Nhandea py ju oguerua ra'e Israel kuery ruete ayvu ryru. Nhande kuery ha'e javi ojukupaxe vy rima ogueru — he'i.

¹¹ Ha'e rami vy ayvu reraarã omondouka vy filisteu kuery ruxiva ikuai va'e omboaty ju aguã. Ha'e vy aipoe'i:

— Peraa uka ju apy gui Israel kuery ruete ayvu ryru, tojevny ju oĩague py ae, ore kuery ha'e javi orejukapa e'ỹ aguã — he'i. Mba'eta hetã ha'e javi rupi oiko manoa gui okyjepa rei va'e, ha'e py Nhanderuete po ombojexavai ete ramo.

¹² Mba'eta omano e'ỹ va'ekue re voi oĩ tuguy rape mbopeupaa. Ha'e ramo ha'e va'e tetã pygua kuery ojapukaia onhendu ovny yva peve.

6

Filisteu kuery ovvy rovai katy hyru ogueraa ukaague

¹ Sete jaxy re SENHOR ayvu ryru oĩ filisteu kuery yvy re.

² Ha'e ramo ha'e kuery oenoĩmba sacerdote ha'e imba'ekuaa va'e kuery. Ha'e vy aipoe'i okuapy:

— Mba'e tu jajapo 'rã SENHOR ayvu ryru re? Pemombe'u marã rami vy pa oĩague katy ae rogueraa uka jevy aguã.

³ Ha'e kuery ombovai:

— Ha'e gui Israel kuery ruete ayvu ryru peraa ukaxe vy peraa uka eme hyru rive. Ha'e kuery ruete oĩa katy peraa uka avi 'rã nhandereko vaia rekovia peme'ẽ va'e. Ha'e vy 'rãe pekuera, ha'e peikuaa mba'e re pa opo pende'áry gui ndoipe'ai teria — he'i.

⁴ Ha'e ramo oporanduve ju okuapy:

— Mba'e nunga 'rã tu orereko vaia rekovia rome'ẽ?

Ha'e kuery ombovai:

* 4:21 Tery Icabô ma "Okanyha ma hexakã va'e" 'ea.

— Filisteu kuery yvatekueve mbovy pa ikuaia rami vy peme'ê 'rã peteĩ nhiruĩ tuguy rape mbopeupaa ra'angaa ha'e peteĩ nhiruĩ anguja ra'angaa ouro guigua meme, mba'eta tekoaxy pende'áry ha'e yvatekueve ikuai va'e áry ou va'ekue ma pete'i regua.

⁵ Pejapo ke pendekoaxy ra'angaa ha'e anguja ra'angaa guive Israel kuery ruete pemboete aguã, mba'eta anguja heta ikuai nhandevyvy jave rupi ombovaipa va'e. Xapy'a rei rã pende'áry gui oi'pe'a nho 'rã opo, pendehuete ramigua ha'e pendevyvy ha'e javi áry gui guive.

⁶ Mba'eta mba'e re rã'vy peneakã ratã Faraó ha'e Egito pygua kuery ha'e javi inhakã ratãague rami? Mba'eta ha'e va'e minha oguereko axy rire omondoukapa raka'e, ojea ha'e kuery oje'oi'pa aguã.

⁷ Ha'e gui aỹ ma pejapo peteĩ karóxa ipyau va'e heraarã. Pejopy avi mokoĩ vaka ta'y'i va'e, canga hexe omoĩmby e'ỹ teri va'e, ha'e pemoĩ karóxa re. Ha'e rã ta'y'i ma peraa uka vy pemboty uka 'rã hoo py.

⁸ Ha'e vy mae ma SENHOR ayvu ryrú peupi vy pemoĩ karóxa py. Ijyke re hyru mboae oĩ va'e py ma pemoĩ ouro gui mba'emo ra'angaa pejapo va'ekue, pendeko vaia rekovia peme'ê va'e. Ha'e gui ma tove too.

⁹ Pexa pota porã ke. Xapy'a rei Bete-Semes katy tape oo va'e rupi ri oo ramo jaikuaa 'rã ha'e ae nhanemoingo axyare oikoa. Ha'e rã ha'e katy e'ỹ ri oo ramo jaikuaa 'rã ipo e'ỹ ae nhanemoingo axyare oikoa, ha'e xapy'a-py'a py rive nhandere oiko va'e ae — he'i.

Bete-Semes py hyru ovaẽague

¹⁰ Ha'e rami ae ha'e va'e avakue ojapo. Ha'e vy mokoĩ vaka ta'y'i va'e ogueraa vy omoĩ karóxa re. Ha'e rã ta'y'i ma omboty hoo py.

¹¹ Karóxa py omoĩ SENHOR ayvu ryrú. Omoĩ avi hyru py anguja ra'angaa ouro guigua ha'e tuguy rape mbopeupaa ra'angaa guive.

¹² Ha'e gui ma vaka oguata oje'oi'vy Bete-Semes katy ma voi. Oguataa rupi haxê jogueravy va'eri ha'e va'e tape rupi ae tema oo, opia e'ỹ re oiporu kuaa katy neĩ oiporu kuaa e'ỹa katy. Hakykue rupi oje'oi' filisteu yvatekueve, Bete-Semes tetã katy'i peve oo.

¹³ Ha'e va'e jave py ma Bete-Semes pygua kuery trigo omono'õ okuapy vyvugua rupi. Ha'e gui oma'ê-ma'ê vy oexa ayvu ryrú oguerua oiny rã. Oexa vy ovy'a pavê.

¹⁴ Karóxa ma Bete-Semes pygua Josué vvy peve oguerua. Ha'e py ae opyta peteĩ ita tuvixa va'e ituia py. Ha'e ramo karóxa regua yvyrápe ikuai va'e omboipa vy omoendy. Tata ojapo va'e áry oapy okuapy vaka, SENHOR pe ome'ê vy.

¹⁵ Levita kuery ma SENHOR ayvu ryrú omboguejy, ijyvýry hyru ouro gui ojapo pyre oĩ va'e voi. Ha'e rami vy ita tuvixa va'e áry ju omoĩ. Ha'e va'e árave Bete-Semes pygua avakue mba'emo ome'ê avi SENHOR pe, mymba oapy reve.

¹⁶ Ha'e nunga ha'e javi peteĩ nhiruĩ filisteu yvatekueve va'e oexa ma vy ojevypa ju E Crom tetã katy ha'e va'e árave.

¹⁷ Ha'e gui tuguy rape mbopeupaa ra'angaa ouro guigua filisteu kuery gueko vaia rekovia SENHOR pe ogueru ruka va'ekue ma povae: Asdode tetã regua peteĩ, ha'e Gaza, Gate, Asquelom ha'e E Crom tetã regua avi.

¹⁸ Anguja ra'angaa ouro guigua ha'e rami ae avi filisteu kuery guetã mbovy pa ikuaia rami vy ogueru ruka, mba'eta tetã peteĩ nhiruĩ ikuai va'e ma yvatekueve peteĩ-teĩ openaa, ikorapa va'e ha'e ha'e katy'i tekoa ikuai va'e guive. Ha'e gui ita tuvixa va'e hi'áry SENHOR ayvu ryrú omoĩague va'e ma aỹ peve oime Bete-Semes pygua Josué mba'etygüe py.

Quiriate-Jearim peve ayvu ryrú ogueraa ague

¹⁹ Bete-Semes pygua avakue ayvu ryrupy katy oma'ê ramo SENHOR omomba'eaxypa. Ha'e kuery regua cinqüenta mil e setenta ojuka. Ha'e ramo heta va'e kuery ojae'opa okuapy ha'e kuery va'e regua SENHOR ojuka reta ramo.

²⁰ Ha'e rami vy Bete-Semes pygua kuery avakue aipoe'i okuapy:

— Mava'e nda'u ha'eve SENHOR renonde oĩ aguã? Mba'eta Nhanderuete ma iky'a e'ỹ va'e oiko. Mava'e kuery rekoa katy ju 'rã jaraa uka nhanderekoa gui? — he'i.

²¹ Ha'e nunga rupi Quiriate-Jearim pygua kuery pe omondouka ayvu reraarã. Ha'e vy aipoe'i:

— Filisteu kuery ogueru ruka ju ma SENHOR ayvu ryrú. Peju ha'vy, peraa peẽ kuerya py.

7

¹ Ha'e ramo Quiriate-Jearim pygua avakue ou vy SENHOR ayvu ryrú ogueraa Abinadabe ro py, vvy'ã áry. Ha'e rami vy ta'y Eleazar omoĩ SENHOR ayvu ryrú re opena aguã.

Ojeko rerova jevy okuapy aguã re Samuel ijayvuague

² Ha'e va'e ára guive SENHOR ayvu ryrú opyta Quiriate-Jearim py. Mbovy ára re rei e'ỹ oaxa oiny ha'e py, vint ma'et'ỹ oaxapa peve. Ha'e nunga re Israel kuery ha'e javi ojae'o okuapy SENHOR renonde.

³ Ha'e rami rã Samuel ijayvu Israel ro pygua kuery ha'e javi pe. Ha'e vy aipoe'i:

— Pendepy'a ha'e javi py ri SENHOR pe pejevvy vy peipe'a ha'vy penembyte gui Nhanderuete ramigua rive pereko va'e, Astarote ra'angaa ikuai va'e voi. Perekó katu pendepy'a SENHOR peguarã, ha'e ixupe anho peiko. Ha'e rami ri ramo pendererera jepe 'rã filisteu kuery po gui — he'i.

⁴ Ha'e ramo Israel kuery ombyte gui oi'pe'a Baal ha'e Astarote ra'angaa oguereko va'ekue ha'e javi, ha'e SENHOR pe anho ju ikuai.

Filisteu kuery nda'ipo'akaveiague

⁵ Samuel aipoe'ive ju:

— Israel kuery ha'e javi tonhemboaty Mispa py. Ha'e rã xee ma SENHOR pe anhembo'e 'rã pendere — he'i.

⁶ Ha'e ramo Mispa py onhemboaty okuapy vy yy oguenoê vy SENHOR renonde onhoê, okaru e'ÿ re ikuai vy ha'e va'e ára. Ha'e py aipoe'i:

— Jajevy SENHOR rovai — he'i okuapy. Israel kuery Mispa py ikuai va'e re ma Samuel ae opena.

⁷ Mispa py Israel kuery onhemboaty okuapya omombe'ua rã filisteu kuery oendu vy yvatekueve ikuai va'e reve ou Israel kuery rovai. Ha'e nunga Israel kuery oendu vy okyjepa rei okuapy filisteu kuery gui.

⁸ Ha'e rami vy Israel kuery aipoe'i okuapy Samuel pe:

— Epytu'u eme ta'vy SENHOR Nhanderueté pe orere rejapukaia gui, filisteu kuery po gui orerepy aguã — he'i.

⁹ Ha'e gui Samuel pete'i vexa'i okambu teri va'e ogueraa vy ojuka, ha'e SENHOR pe ome'ê oapy reve. SENHOR pe Samuel ojavukai Israel kuery re. Ha'e ramo ombovai.

¹⁰ Samuel mymba ome'ê jave py filisteu kuery ovaê Israel kuery reve joguero'a aguã. Ha'e rami te'i ha'e va'e ára SENHOR hyapu opororo ratã reve filisteu kuery áry rupi. Ha'e rami vy omongyja py rive oitypa, Israel kuery renonde.

¹¹ Israel regua avakue Mispa gui oje'oi filisteu kuery rakykue. Ha'e rami vy oity Bete-Car katy'i yvy'ã guy o'i va'e peve.

¹² Ha'e gui Samuel pete'i ita ojopy vy omopu'ã Mispa ha'e Sem mbyte py. Ha'e va'e omboery Ebenézer. Po va'e ma "Apy peve SENHOR nhanepytyvõ" he'ia.

¹³ Ha'e rami vy filisteu kuery oitypaa rire ndouvei Israel kuery yvy re, Samuel oikovea ja ha'e kuery rovai SENHOR po o'i rã.

¹⁴ Ha'e gui tetã ikuai va'e re filisteu kuery ipo'akaague va'e ma Israel kuery po py ju omboaxapa, Ecmrom guive Gate peve. Ha'e katy'i yvy itui va'e voi Israel kuery oipe'a filisteu kuery po gui. Amorreu kuery voi ndajoguero'avei ranhe Israel kuery reve.

¹⁵ Samuel oikovea pukukue re opena Israel kuery re.

¹⁶ Ma'et'ya nhavõ ojeapa 'rã ovy Betel, Gilgal ha'e Mispa tetã rupi. Ha'e va'e tekoa ha'e javi rupi oikuaa pota Israel kuery re.

¹⁷ Ramá tetã py ojevuy kuerei 'rã, ha'e py ae hoo o'i ramo. Ha'e py voi Israel kuery re opena, ha'e pete'i altar SENHOR peguarã ojapo avi ha'e py.

8

Nguvixaverã re Israel kuery ojerure okuapyague

¹ Samuel tuja'i ma vy gua'y kuery ju omo'i Israel kuery re opena aguã.

² Ta'y ypy rery ma Joel, ha'e rire jevyguá ma Abias. Ha'e kuery ma Berseba py opena.

³ Ha'e rami te'i Samuel ra'y kuery ma nguú oikoague rami e'ÿ ikuai. Perãta re rive nda'eveive va'e vy mba'emo ome'êã rã ojopy 'rã ha'eve e'ÿa rami joguereko aguã.

⁴ Ha'e ramo Israel regua nhomongeta va'ety kuery onhemboaty vy oupa okuapy Ramá py Samuel oia py.

⁵ Ha'e vy aipoe'i okuapy ixupe:

— Ne'exa, ndee ndetuja'i, ha'e ndera'y kuery ma reikoague rami e'ÿ ikuai. Ha'e nunga rupi aÿ ejou pete'i oreruvixaverã orere opena va'erã, yvy regua ha'e javi oguerekoa rami — he'i.

⁶ Ha'e rami ijayvu rã Samuel oendu vy ndojou porã, "Ejou oreruvixaverã orere opena va'erã", he'i ramo. Ha'e rami vy Samuel oporandu oiny SENHOR pe.

⁷ Ha'e gui SENHOR aipoe'i Samuel pe:

— Endu pota heta va'e kuery ijayvua ha'e ndevy ojerurea ha'e javi re, mba'eta ndee e'ÿ ndereja, ha'e rã xee anho ndaxepotai ha'e kuery re apena aguã.

⁸ Ha'e kuery Egito yvy gui anoêmã jave ma voi rire aÿ peve ikuai tema ha'e rami. Mba'eta nguete mboae pe ikuai vy xereja jepi okuapy. Ha'e rami ae ju ojapo ndere voi.

⁹ Ha'e rami te'i aÿ ma endu pota ha'e kuery ijayvua re. Ha'e rami avi ndeayvu atã 'rã ha'e kuery pe, emombe'u porãve marã rami pa huvixave o'i va'e oguereko 'rãa — he'i.

¹⁰ Ha'e ramo heta va'e kuery nguvixaverã re ojerure rire ha'e kuery pe Samuel omombe'upa SENHOR ijayvuague.

¹¹ Ha'e vy aipoe'i:

— Po rami ma huvixave o'i va'e penderereko 'rã. Ha'e va'e ma pendera'y kuery oipe'a vy omomba'eapo 'rã karóxa py ha'e kavaju áry guarã, ha'e karóxa renonde onha va'erã.

¹² Ha'e kuery va'e regua omo'i 'rã mil re opena va'erã, ha'e'ÿ vy cinqüenta va'e re mba'e. Amboae kuery ma omomba'ety rupi 'rã omomba'eapo, mba'emo ra'yígue omono'õa py. Ha'e rã amboae kuery ju ma ojapo uka 'rã tembiporu joe opu'ãa pyguarã, ha'e'ÿ vy karóxa reguarã.

¹³ Penderajy kuery voi ogueraa 'rã heakuã porã va'e apoarã, tembi'u mbojyarã ha'e mbojape apoarã.

¹⁴ Ojeupe ae oipe'a 'rã penemba'ety iporãvea, uvaty ha'e oliveira ty gui. Guembiguai kuery pe ju 'rã omboaxa.

¹⁵ Mba'emo ra'yígue ha'e uva pemono'õ va'ekue gui ojopy 'rã dízimo ojeupe ae, ojeupegua opena va'e ha'e guembiguai kuery pe omboaxapa aguã.

¹⁶ Ogueraa avi 'rã penerembiguai avakue ha'e kunhague, ha'e kunumigue iporãve va'e, penerymba mburika'i kuery voi. Ha'e vy omomba'eapo 'rã mba'emo ojapo ukua py.

¹⁷ Penerymba vexa'i kuery gui voi ojopy 'rã dízimo, ha'e penemoingo 'rã guembiguairã.

¹⁸ Ha'e rami rā ha'e va'e ára pejapukai 'rā SENHOR pe penderuvixarā peiporavo uka va'ekue káuxa. Ha'e rami teĩ ha'e va'e ára SENHOR noendui 'rā pejapukaia — he'i.

¹⁹ Ha'e rami Samuel ijayvu rā heta va'e kuery noendu potai. Ha'e vy aipoe'i okuapy:

— Any rima! Roguereko nho 'rā huvixave orere opena va'erā,

²⁰ yvy regua kuery ha'e javi ikuaia rami ore kuery voi orekuai aguã. Oreruvixave ae 'rā opena orere, ha'e ore kuery renonde 'rā oo joe ropu'ã aguã katy — he'i okuapy.

²¹ Ha'e rami heta va'e kuery ijayvua Samuel oendu vy SENHOR pe ju omombe'u.

²² Ha'e ramo Samuel pe SENHOR ombovai vy

— Endu ke ha'e kuery ijayvua, ha'e emoĩ huvixaverā teĩ — he'i.

Ha'e rami rā Israel kuery pe ju Samuel aipoe'i:

— Pejevy ju peteĩ-teĩ penderekoa katy.

9

Mburika'i kanhygue reka vy Saul oo vy Samuel reve joexaague

¹ Peteĩ ava oiko oguerekopa va'e Benjamim regua Quis hery va'e. Ha'e va'e ma Abiel ra'y, Abiel ma Zeror ra'y, Zeror ma Becorate ra'y, Becorate ma Afia ra'y.

² Ha'e va'e ma peteĩ gua'y oguereko Saul hery va'e. Ha'e va'e kunumi ma iporãve va'e. Israel kuery regua nda'ipoi ixugui iporãve va'e. Heta va'e kuery ha'e javi gui ipukuve va'e, joaxi'y gui oaxa reive va'e.

³ Ha'e gui Saul ru Quis rymba kuery mburika okanhymba. Ha'e ramo gua'y Saul pe Quis aipoe'i:

— Eraa peteĩ kunumi va'e nderupive guarã. Peiko katu, ha'e tapeo mburika'i peka vy — he'i.

⁴ Ha'e ramo oo vy oaxa jogueravy Efraim yvy'ã reia ha'e Salisa yvy rupi teĩ ndojoui. Ha'e va'e rire Saalim yvy katy ju oo va'eri ha'e py voi nda'ipoi avi. Benjamim yvy rupi ju oaxa teĩ ndojoui ae tema.

⁵ Ha'e gui ma Zufe yvy re ha'e kuery ovaẽ ramo Saul aipoe'i kunumi hupive oo va'e pe:

— Eju, jajevy ju. Nda'evei xeru guymba kuery mburika'i re iporiaua gui nhandere ju iporiauve aguã.

⁶ Kunumi va'e ombovai:

— Ha'e rami avi kova'e tetã py oiko peteĩ ava Nhanderuetete remimbo'e omboetepevy. Ha'e va'e ijayvua ma oiko 'rãe. Jaa mba'e ha'e pe. Xapy'a rei ha'e oexa uka 'rã tape jaa aguã — he'i.

⁷ Ha'e ramo Saul aipoe'ive ju kunumi va'e pe:

— Ha'e rami avi ha'e va'e oĩa py jaa vy mba'e nunga ta'vy jaraa 'rã ixupe? Mba'eta nhandevoko py mbojape jareko va'ekue opa ma. Nda'ipoi teve ava Nhanderuetete remimbo'e pe nhame'ẽ va'erã. Mba'e tu jareko?

⁸ Kunumi va'e ombovai Saul pe:

— Apy ko arekove teri peteĩ hatã'i kyri'i va'e prata guigua. Ha'e va'e ae 'rã ame'ẽ ava Nhanderuetete remimbo'e pe, nhandevy tape oexa uka aguã — he'i.

⁹ (Ymave rupi Israel yvy re ma Nhanderuetete pe oporandu uka vy oo va'e “Peju, jaje'oi imba'ekuaa va'e oĩa py”, he'i 'rã. Aỹ “Profeta” ja'ea va'e pe ma yma rupi “Imba'ekuaa va'e” 'ea rak'a'e.)

¹⁰ Ha'e gui Saul aipoe'i kunumi va'e pe:

— Aipo'rea ma ha'eva va'e. Eju ha'vy, jaa. Ha'e rami vy oo tema tetã Nhanderuetete remimbo'e oĩa katy.

¹¹ Tetã py ovaẽ rai'i ma vy ovaexĩ kunhataigüe yy re oẽ okuapy va'e. Ha'e vy oporandu ha'e kuery pe:

— Apy nda'u oĩ 'rã ri imba'ekuaa va'e?

¹² Ha'e kuery ombovai:

— Oĩ rima. Ma'ẽ, peove ma penerenonde. Pejapurave'i ke, mba'eta ange ou kuri tetã py. Mba'eta apygua kuery oo 'rã kuri yvy'ã re Nhanderuetete pe mba'emo ome'ẽ aguã.

¹³ Tetã py pevaẽ vyve pejou 'rã, yvy'ã katy okaru aguã oo e'ỹ mbove'i. Mba'eta apygua kuery ndokaru 'rã ha'e ovaẽ e'ỹ ja, mba'emo ome'ẽ va'erã oguereko va'e ogueroayvu porã ranhe e'ỹ ja. Ha'e va'e rire mae ma oenoĩ uka pyre kuery okaru 'rã okuapy. Tapeo ha'vy aỹ'i ma voi pejou aguã — he'i.

¹⁴ Ha'e ramo tetã katy oo. Ovaẽ ramove Samuel ae oẽ ouvvy yvy'ã katy oo aguã. Ha'e rami vy nhovaexĩ okuapy.

¹⁵ Peteĩ ára teri Saul ovaẽ aguã oata jave SENHOR oikuaa uka ma voi Samuel pe. Ha'e vy aipoe'i:

¹⁶ “Ko'ẽ rã kova'e hora ndea py ambou 'rã peteĩ ava Benjamim yvy guigua. Ha'e va'e ma azeite reikyty reve remoĩ 'rã xevygua Israel kuery ruxivarã. Ha'e ma ogueraa jepe 'rã xevygua kuery filisteu kuery po gui. Mba'eta xee aendu xevygua kuery ojerure rã, ha'e kuery ojavukaia xea peve onhendu ramo”, he'i va'ekue.

¹⁷ Ha'e gui ma Samuel oexa Saul ramove SENHOR aipoe'i ixupe:

— Pee ma ava aipoa'eague. Evoko va'e ae ma opena 'rã xevygua kuery re — he'i.

¹⁸ Okẽ py Saul Samuel re onhemboja vy aipoe'i:

— Ajerure ndevy, rexa uka aguã mamo pa imba'ekuaa va'e ro oĩa.

¹⁹ Samuel ombovai vy aipoe'i Saul pe:

— Xee ae ma imba'ekuaa va'e. Tereo xerenonde yvy'ã katy. Kova'e ára ma jakaru 'rã xereve. Ko'ẽ rã aje'ivekue ma romondouka ju 'rã, ha'e amombe'upa 'rã ndepy'a re oĩ va'e ha'e javi.

²⁰ Ndepy'a vai eme guive mboapy ára re mburika'i okanhvy va'ekue re, mba'eta ojoua ma. Mava'e peguarã tu oĩ ovareve va'e Israel ha'e javi re, ndevy e'ỹ vy, ha'e nderu ro pygua kuery ha'e javi pe e'ỹ teve? — he'i.

²¹ Ha'e ramo Saul ombovai:

— Ha'e rami avi xee ma Benjamim regua Israel kuery ikuai va'e gui yvy'ive va'e, xero pygua kuery voi Benjamim regua gui ore'yvy'ive va'e orekuai. Mba'e re tu ha'vy ha'e rami ndeayvu? — he'i.

²² Ha'e gui Samuel ogueraa Saul ha'e hexevegua kunumi va'e, ha'e vy ogueroike opy mboae'i okaruaty py. Ha'e kuery pe ome'ê henda iporãve va'e oenoï uka va'ekue mbyte py, trinta rivyvyi ikuiaia py.

²³ Tembi'u mbojya pe Samuel aipoe'i:

— Eru ke ndevy tembi'u ame'ê va'ekue, “Emoï porã ndea py”, ha'eague.

²⁴ Ha'e ramo tembi'u mbojya ma xo'ò 'ugue hexegua ha'e javi reve ogueru vy Saul renonde omoï. Samuel aipoe'i:

— Ne'exa, upe va'e ma amoï porã va'ekue. Ejopy ke, he'u, mba'eta ndevy pe ae amoï porã kova'e hora guarã, “Penoi ukapa apyguua kuery”, ha'e va'ekue guive — he'i. Ha'e ramo Samuel reve Saul okaru ha'e va'e ára.

²⁵ Ha'e gui yvy'ã gui ogeujy jogueruvy vy tetã re ju ovaê rire Samuel ijayvu oiny Saul reve ngoo áry.

²⁶ Ko'êmba rai jave ko'ê mbija oê jekuaa ouvy ramove Samuel ovy vy onhenduka Saul hoo áry okea py. * Ha'e vy aipoe'i:

— Evy ke. Xee aa 'rã ndereve romondouka aguã — he'i ramo Saul ovy vy jogueraa mokoïve, Samuel reve.

²⁷ Tetã apy katy ha'e kuery ogeujy jogueravy jave Samuel aipoe'i Saul pe:

— Aipo're kunumi va'e pe nhanerenonde oo aguã re. Ha'e rã ndee ma ha'e oo rire earôve'i ke, ndevy amombe'u aguã Nhanderuete ijayvuague.

10

Israel kuery ruvixarã Saul re Samuel azeite onhoëague

¹ Ha'e gui petei rryru azeite Samuel oguenoë vy onhoë Saul akã re. Oayvu vy aipoe'i:

— SENHOR ae ndere onhoë uka azeite ojeuepegua Israel kuery ruvixa reiko aguã.

² Ha'e gui xea gui kurive reo vy rexa 'rã mokoï avakue Raquel ojatyaague katy'i, Benjamim yvy re Zelza py. Ha'e va'e kuery aipoe'i 'rã ndevy: “Ojoua ju ma mburika'i peka peikovy va'e. Ha'e gui ay ma nderu mburika'i re nda'ipy'a vaivei ma, pendere ju iporiau oikovy. Ha'e rami vy ojeupe ae 'Mba'e 'rã tu ajapo xera'y ajou aguã?” he'i.”

³ Ha'e gui peove'i vy pevaê 'rã Tabor katy'i yvyra carvalho hi'aï va'e py. Ha'e py penerovaexi 'rã jogueruvy mboapy avakue Betel py Nhanderuete omboete vy oje'oi va'e. Petei ma omondyi 'rã heravy mboapy kavara. Amboae ma mboapy mbojape he'ê va'e 'rã ogueraa. Ha'e rã amboae ju ma petei rryru ipire guigua py 'rã ogueraa vinho.

⁴ Ha'e kuery ma ndevy oxarura ma vy ndevy ome'ê 'rã mokoï mbojape. Ha'e va'e ma rejopy 'rã ipo gui.

⁵ Ha'e gui peove 'rã Gibeá-Eloim katy. Ha'e py ma oi filisteu regua xondaro kuery ijaty okuapy. Tetã py pevaê ma vy peovaexi 'rã profeta kuery yvy'ã katy gui ou va'e. Ha'e kuery renonde ou 'rã okuapy mbaraka revegua, angu'a pu, mimby ha'e mba'epu ixã reta va'e revegua. Ayvu omombe'u reve 'rã ou.

⁶ Ha'e gui ndere voi SENHOR Nhe'ê oi 'rã. Ha'e ramo ayvu remombe'u avi 'rã ha'e kuery reve, amboae ava rami nemoingo ramo.

⁷ Ha'e nunga ndere oiko ramo ejapo reipota va'e ha'e py, mba'eta ndereve Nhanderuete oiko ramo.

⁸ Ha'e gui ndee ranhe xegui reo 'rã Gilgal py. Ne'exa, xee voi aa avi 'rã reia py, mymba aapy reve ame'ê aguã, petei rami ikuai aguã regua voi. Sete ára re xerarõ 'rã ndea py aju peve. Ha'e ramo ma ndevy amombe'u potã 'rã rejapo va'erã — he'i.

Profeta kuery mbyte Saul oikoague

⁹ Saul oo ta vy Samuel-a katy ojere oxarura aguã. Ha'e ramove Nhanderuete oguerova ipy'a. Ha'e gui ha'e va'e árave ha'e nunga ha'e javi oiko ikuaa ukaarã.

¹⁰ Ha'e gui Gibeá py ha'e kuery ovaê jogueravy ramo profeta kuery oë ouvy ovaexi aguã. Saul re Nhanderuete Nhe'ê onhemonde ramo ha'e voi ayvu omombe'u avi ha'e kuery mbyte.

¹¹ Yma guive oexa va'ety kuery ha'e javi ma profeta kuery mbyte ayvu omombe'u avi rã oexa vy petei-teï aipoe'i okuapy joupe-upe:

— Mba'e nunga tu oiko Quis ra'y re? Saul voi nda'u profeta kuery regua avi oiko?

¹² Ha'e rã petei ava ombovai:

— Ha'e rami avi mava'e ha'vy amboae kuery ru? — he'i. Ha'e nunga rupi aipo'ea va'ety: “Saul voi nda'u profeta kuery regua avi oiko?”

¹³ Saul ayvu omombe'upa ma rire yvy'ã katy ju oo.

¹⁴ Ha'e gui Saul tuty oporandu ixupe, hexevegua kunumi va'e pe guive:

— Marã katy tu peo ra'e?

Ombovai:

— Mburika'i reka vy roo teï ndorojou reguai vy roove ju Samuel oia py — he'i.

¹⁵ Ha'e ramo Saul tuty aipoe'i:

— Ajerure ndevy, emombe'u ke xevy mba'e he'i tu Samuel pendevy?

¹⁶ Saul ombovai otuty pe:

— Orevy omombe'u mburika'i ojoua jevyague rive — he'i. Nomombe'u porã potai huvixa oi aguã re Samuel ijayvuague.

Saul huvixarã oïague

* 9:26 Ha'e kuery ro ao'ia ma pyrõa rami ae ijoja rei va'e hiny, hi'áry ha'e kuery oke, e'ÿ vy mba'emo ojapo aguã ha'eve va'e.

- ¹⁷ Ha'e gui Mispa py Samuel oī teria py omboatypa SENHOR pegua kuery.
¹⁸ Ha'e vy aipoe'i Israel kuery pe:
 — Po rami SENHOR Israel kuery ruete ijayvu: “Xee ma Israel kuery anoẽmba va'ekue Egito vvy gui. Egito pygua kuery po gui araa jepe, huvixa ikuai va'e imbojexavaia gui guive.”
¹⁹ Ha'e rami teĩ aĩ ma pejapa Penderuete mba'emo vai py pejexavaia gui pendereraa jepe va'ekue. Ha'e vy aipopeje: “Any! Emoĩ peteĩ huvixave ore re opena va'erã”, peje. Ha'e gui aĩ SENHOR renonde pendekuai, penderegua ikuai va'e ha'e javi, ha'e mil jevy-jevvy pendekuai va'e reve — he'i.
²⁰ Ha'e javi regua Samuel omboatypa rire xortea py Benjamim regua oiporavoa oikuaa ukua.
²¹ Ha'e gui Benjamim regua kuery peteĩ-teĩ ro pygua ikuai va'e oguerupa rã oikuaa ukua va'e ma Matri ro pygua kuery. Ha'e va'e kuery gui ju Quis ra'y Saul oikuaa ukua. Ha'e rami teĩ oeka vy ndojouai.
²² Ha'e ramo SENHOR pe ju oporandu Saul pa ou ra'ea re. Ha'e ramo SENHOR ombovai vy
 — Upe py ae ma oĩ, mba'e rei-rei mbyte py onhemi oiny — he'i.
²³ Ha'e ramo onha oje'oivy vy ogueru ha'e gui. Ha'e ramo heta va'e kuery mbyte hi'aĩa py pavẽ gui ipukuve ho'amy joaxi'y gui oaxa reive va'e.
²⁴ Ha'e gui Samuel aipoe'i heta va'e kuery pe:
 — Pexa ma pa SENHOR oiporavo va'ekue? Nhande kuery va'e regua amboae ndoikoĩ ae ha'e ramigua ete'i — he'i rami heta va'e kuery ha'e javi ojavukai atã reve
 — Toikove riae nhandervixa! — he'i okuapy.
²⁵ Heta va'e kuery pe Samuel omombe'u porãve huvixa ikuai va'e joguereko aguã. Ha'e nunga peteĩ kuaxia re ombopara vy omoĩ porã SENHOR renonde. Ha'e rami vy Samuel omondoukapa heta va'e kuery peteĩ-teĩ hoo katy.
²⁶ Saul voi oo avi ngoo katy Gibeá py. Hupive heta oje'oi avi avakue ipy'a Nhanderuete oguerovaague va'e kuery.
²⁷ Ha'e rã nhe'ẽ vai ra'y kuery ma aipoe'i okuapy:
 — Mba'exa 'rã ha'e va'e ava nhandereraa jepe? — he'i. Ha'e rami vy ombojaru rei okuapy, mba'eve ndoguerui guive ixupe ome'ẽ va'erã. Ha'e rami teĩ Saul ma oendu rive.

11

Amom pygua kuery re Saul ipo'akaague

- ¹ Ha'e gui Amom pygua Naás opu'ã ovy vy ojoko Jabes-Gileade tetã. Ha'e ramo Naás pe Jabes pygua avakue aipoe'i okuapy:
 — Ejapo ke orerereko porã aguã regua, ha'e ramo ndevy pe orekuai 'rã — he'i.
² Ha'e rami teĩ Amom pygua Naás ombovai:
 — Ajapo 'rã ri teĩ penderexa peiporu kuua regua re amombupa avi 'rã — he'i Israel kuery ha'e javi omoximbaxe vy.
³ Ha'e ramo Jabes pygua nhomongeta va'ety kuery aipoe'i:
 — Ha'e rami rã ma earõ ranhe sete ára ayvu mombe'uarã romondouka aguã Israel ha'e javi rupi. Ha'e gui xapy'a rei orerepyarã nda'ipoai ramo ma rojevopy ukapa 'rã ndevy — he'i okuapy.
⁴ Ha'e gui Saul rekoa Gibeá py ayvu mombe'ua kuery ovaẽ vy ha'e pygua kuery pe omombe'u oiko va'ekue. Ha'e ramo ha'e kuery ojae'o atã okuapy.
⁵ Ha'e jave py ma Saul nhuũndy rupi vaka kuery re openaa gui ojevvy vy oporandu:
 — Mba'e tu ha'e kuery oguereko ha'e rami ete ojae'o okuapy aguã? — he'i ramo ixupe omombe'u Jabes pygua avakue ijayvuague.
⁶ Ha'e rami ijayvu rã Saul oendu ramo hexe oĩ Nhanderuete Nhe'ẽ. Ha'e ramo oendu ipoxy raxaa.
⁷ Ha'e rami vy mokoĩ toro ojuka ha'e ombo'ipa vy ogueraa uka Israel vvy regua ha'e javi pe. Ayvu mombe'ua kuery heraa va'e pe aipoe'i uka:
 — Saul ha'e Samuel oipotaa rami amongue nda'ikuai ramo nami ae 'rã ojavopa hymba toro re — he'i uka. Ha'e ramo heta va'e kuery SENHOR gui okyjae oendu vy peteĩ ava rami oupa.
⁸ Bezeque py ovaẽa py oipapaa rã Israel kuery va'e regua ma trezentos mil, ha'e gui Judá guigua ma trinta mil avakue ju ikuai.
⁹ Ayvu mombe'ua kuery ou va'ekue pe ha'e kuery aipoe'i:
 — Po rami 'rã aipopeje Jabes-Gileade pygua kuery pe: “Ko'ẽ rã kuaray ojope'i ramove penderepya 'rã”, peje.
 Ha'e ramo ayvu mombe'ua kuery oo vy omombe'u okuapy Jabes pygua kuery pe.
 Ha'e rami rã ha'e kuery ovy'apa vy
¹⁰ Amom pygua kuery pe ju aipoe'i:
 — Ko'ẽ rã rojevopy ukapa 'rã pendevy. Ha'e ramo ma peipotaa rami oreapo teĩ ha'eve — he'i okuapy.
¹¹ Ha'e gui ko'ẽ jevvy Saul omboja'o ngupivegua kuery mboapy henda py. Ha'e ramo aje'ive'i reve ha'e kuery Amom pygua kuery ikuai mbyte oo vy ojokapa rai'i, kuaray akuve peve. Okuave va'e joa rupi e'ỹ-e'ỹ onha vy ndopytai peteĩve ma joa py.
Huvixarã Saul oĩ ete aguã re ijayvu okuapyague
¹² Ha'e gui heta va'e kuery aipoe'i Samuel pe:
 — Mava'e kuery tu nhandere Saul opena aguã ndoipotai va'ekue? Peru apy, rojukapa aguã.

¹³ Ha'e rā Saul ombovai:

— Kova'e ára ma mava'eve nomanoi 'rā, mba'eta ange SENHOR ogueraa jepepa Israel kuery — he'i.

¹⁴ Heta va'e kuery pe Samuel ju aipoe'i:

— Peju, jaje'oi Gilgal py nhamoi atāve aguā huvixarā oī aguā regua — he'i.

¹⁵ Ha'e ramo ha'e kuery ha'e javi Gilgal py oo vy SENHOR renonde ijavyvu okuapy nguvixarā Saul oī ete aguā re. Henonde ogueru avi okuapy pefe'i rami ikuai aguā regua SENHOR pe ome'ē va'erā. Saul voi ovy'a vaipa ha'e py Israel regua kuery ha'e javi reve.

12

Samuel opa vy ijavyvu heravyague

¹ Ha'e gui Samuel aipoe'i Israel kuery ha'e javi pe:

— Ne'exa, pendeayvua aendu vy ajapopa va'ekue pejerurea. Ha'e vy amoi penderuvixaverā.

² Aỹ ma pereko ma huvixa penerenonde oiko va'erā. Ha'e gui xee ma xetuja'i ma, xe'a xiimba ma guive. Xera'y kuery ikuai avi apy pendekuaia py. Xee ae penerenonde aiko va'ekue, xekunumi guive aỹ peve.

³ Ha'e gui apy ma ha'ā SENHOR renonde, ha'e penderuvixarā omoi va'ekue renonde. Pemombe'u ha'vy xapy'a rei xerovai mba'emo pereko ri vy. Mava'e rymba toro to aipe'a raka'e? Mava'e gui tu mburika'i aipe'a raka'e? Mava'e tu akore raka'e? Mava'e tu areko axy raka'e? Mava'e po gui tu perāta ajopy raka'e ha'evea rami e'ỹ aikuua pota aguā? Ha'e nungakue ajopy va'e rire ame'ēmba ju 'rāgue — he'i.

⁴ Ha'e ramo heta va'e kuery ombovai:

— Any rima, mba'eve py ndee ndorekorei, norembojexavai, nei mba'eve nderejopyi orepo gui — he'i.

⁵ Ha'e rā ha'e aipoe'i:

— Kova'e ára SENHOR ae oī pendeayvuague renduarā, ha'e penderuvixarā omoi va'ekue voi oī omombe'u aguā xepo py mba'eve ndapejouia.

Ha'e rā heta va'e kuery ombovai vy

— Nhanderuete oī ri oreayvuague renduarā — he'i okuapy.

⁶ Ha'e ramo Samuel aipoe'i heta va'e kuery pe:

— SENHOR ae pendeayvu renduarā oī. Ha'e ae Moisés ha'e Arão oiporavo va'ekue Egito yvy gui penderu kuery oguenoē aguā.

⁷ Ha'e gui aỹ ma apy pendekuai va'e xee romoma'endu'apa 'rā SENHOR renonde, mba'emo porā pende vy ha'e penderu kuery pe ojapoague re.

⁸ Mba'eta Jacó kuery Egito yvy py ova'ēmba raka'e. Ha'e va'e rire penderu kuery SENHOR pe ojapukai okuapy ramo ombou Moisés ha'e Arão. Ha'e rami vy Egito yvy gui oguenoēmba vy ojapo apy ju hekoa aguā rami.

⁹ Ha'e rami te'i ha'e kuery hexaraipa SENHOR Nguete gui. Ha'e ramo omboaxapa Hazor pygua xondaro kuery ruvixa Sísera va'e po py, filisteu kuery po py, ha'e gui Moabe pygua huvixa po py ju. Ha'e ramo ha'e kuery reve joguero'a.

¹⁰ — Ha'e gui ma SENHOR pe ju ojapukai vy aipoe'i okuapy: “Rojevavy, mba'eta SENHOR roeja vy Baal ha'e Astarote ra'angaa pe rive orekuai va'ekue. Ha'e rami te'i aỹ orereraa jepe jevy ke orerovaigua kuery po gui. Ha'e ramo ndevy ae ju 'rā orekuai”, he'i va'ekue.

¹¹ Ha'e rami rā SENHOR ombou Jerubaal, Baraque, Jetté ha'e gui xee Samuel ju, penderovaigua kuery penembojere rei va'e po gui pendereraa jepe uka vy. Ha'e va'e rire pendekuai porāmba va'ekue.

¹² — Ha'e rami te'i penderovai Amom kuery ruvixa Naás ou rā pexa vy aipopeje xevy: “Nda'evei! Tove toi oreruvixaverā”, peje, SENHOR Penderuete ae penderuvixave oī ae va'eri.

¹³ Ha'e gui aỹ, pee ma hi'āi penderuvixaverā pejou uka va'ekue, pejerureague. Ma'ē, SENHOR penderuvixaverā omoi va'ekue hi'āi.

¹⁴ Ha'e gui xapy'a rei SENHOR renonde pejererokyjea rupi vy iuxpe pendekuai, ha'e penhe'ē rendu, ha'e ojapo uka va'e rovai napepu'āi, ha'e rami 'rāgue py peē ha'e penderuvixave pendere opena va'e reve SENHOR penderuete pe ete ri peiko ramo ma ha'eve 'rā pende vy.

¹⁵ Ha'e rami avi xapy'a rei SENHOR ayvu re ndapejapyxakai vy ojapo uka va'e ndapejapoi ri ramo ma SENHOR oupi 'rā opo penderovai, peneramoi kuery rovai opiague rami avi.

¹⁶ Ha'e gui aỹ voi apy pene'āi va'e pexa 'rā mba'emo porā SENHOR penerenonde ojapo va'e.

¹⁷ Aỹ e'ỹ teve trigo mono'ōa ára? Ha'e rami te'i aỹ ajerure 'rā SENHOR pe. Ha'e rā ombou 'rā yapu oky reve. Ha'e nunga pexa vy peikuua 'rā SENHOR renonde pejevavy vaipa eteague, mba'eta pejerure penderuvixaverā omoi aguā re — he'i.

¹⁸ Ha'e rami vy SENHOR pe Samuel ojerure ramo ha'e va'e árave SENHOR ombou yapu oky reve. Ha'e ramo ojererokyje okuapy SENHOR renonde, Samuel guive omboete pavē.

¹⁹ Ha'e gui ha'e kuery ha'e javi aipoe'i Samuel pe:

— Ejerure ke SENHOR nderuete pe ore nerembiguai kuery romanomba e'ỹ aguā re. Mba'eta rojevavyague ha'e javi romboetave ma heravy oreruvixaverā re rojerurea py.

²⁰ Samuel ombovai:

— Pekyje eme. Ha'e rami pejapoa py pejevavy ete ri. Ha'e rami te'i pejepe'a eme SENHOR pe pendekuaia gui. Ha'e rami 'rāgue py pende py'a ha'e javi py pendekuai SENHOR pe.

²¹ Pejepe'a eme mba'emo ra'angaa pe rive pendekuai aguā, ha'e nunga mba'everā ndovarei, nei pendereraa jepearā e'ỹ, mba'emo ra'angaa rive ae vy.

²² Ha'e rami teĩ SENHOR guery tuvixa va'e omboete ukaa rupi vy noipytyvõ e'yi 'rã ojeupegua kuery, ojeupe guarã SENHOR pendereru rire.

²³ — Ha'e gui xee ma ndajejavyi 'rãe SENHOR pe, peẽ kuery re ajerure e'ya py rive. Ha'e rami 'rãgue py xee rombo'e tema 'rã tape porã hi'yvi va'e re.

²⁴ Ha'e nunga rupi SENHOR renonde pejererokyjea rupi pendekuai, ixupe anho peiko pendepy'a ha'e javi py. Mba'eta pexa ae mba'emo porã pendevy ojapo va'ekue tuvixa ete va'e.

²⁵ Ha'e rami teĩ xapy'a rei pejejavya rupi tema pendekuai vy pekanhy 'rãe, peẽ kuery, ha'e penderuvixave voi.

13

Israel ha'e filisteu kuery reve joe opu'ã aguã rami ikuaiaague

¹ Peteĩ ma'etỹ ma Israel kuery re Saul opena rire mokoĩ ma'etỹa py

² ojeupe oiporavo três mil avakue Israel regua. Ha'e kuery va'e regua ma dois mil ikuai Saul reve Micmãs py, Betel vvy'ã reia re, ha'e rã amboae mil avakue ma ta'y Jônatas reve ikuai Benjamim regua Gibeá py. Heta va'e kuery rembyrekue ma omondoukapa ju peteĩ-teĩ hoo katy.

³ Ha'e gui Jônatas kuery ojukupara rai'i filisteu kuery Gibeá py ikuai va'e. Ha'e nunga filisteu kuery oendupa vy ivai ramo Saul omonhe'ẽ uka mimby guaxu ovvy ha'e javi rupi, “Hebreu kuery toendupa” he'i vy.

⁴ Ha'e rami py Israel kuery ha'e javi oendu okuapy Saul kuery filisteu ikuai va'e ojukupara rai'i ramo filisteu kuery Israel kuery pe ivai okuapya. Ha'e ramo Saul oenoĩ ukapa heta va'e kuery Gilgal py oĩa py.

⁵ Filisteu kuery voi ono'õmba okuapy Israel kuery reve joguero'a aguã. Ha'e kuery va'e regua ma trinta mil karõxa, seis mil kavaju árygua kuery ha'e gui amboae kuery ju ita ku'i ye'ẽ rembe re ikuai va'e rami heta va'e. Ha'e vy oje'oi vy ijaty okuapy Micmãs py, Bete-Áven regua kuaray oua katy.

⁶ Ha'e gui avakue Israel regua omoĩ vaia rã oexa okuapy heta va'e kuery ndaekorãvei rei. Ha'e rami vy onhemi okuapy itakua ikuai va'e rupi, vvykua, itaova yvateve va'e pa'ũ, vvyra rupa ha'e yy oĩ atyrã ojo'õ pyre rupi.

⁷ Hebreu kuery va'e regua amongue ma Jordão yakã oaxa oje'oivy Gade ha'e Gileade vvy katy oo aguã. Ha'e rã heta va'e kuery Gilgal py Saul reve ae opyta va'ekue ma okyjea anho oendu okuapy.

Saul mymba kuery ome'ẽ ramo ixupe Samuel ijayvu eteague

⁸ Ha'e gui Saul ma sete ára re oarõ Samuel ijayvuague rami vy.* Va'eri Gilgal py Samuel ndoui ramo heta va'e kuery omboypy ha'e gui joa katy e'y-e'y oje'oi aguã.

⁹ Ha'e ramo Saul aipoe'i:

— Peru ha'vy xevy mymba aapy reve ame'ẽ va'erã, ha'e peteĩ rami nhandekuai aguã regua guive — he'i. Ha'e rami vy mymba ome'ẽ oapy reve.

¹⁰ Oapy reve ome'ẽmba'i ramove Samuel ovaẽ ovvy. Ha'e rã Saul oẽ ovvy ovaexĩ vy oipopy aguã.

¹¹ Samuel oporandu:

— Mba'e tu rejapo?

Saul ombovai:

— Heta va'e kuery apy gui joa katy e'y-e'y oje'oi ta, ha'e ndee reju 'rãgue ára py nderejui, ha'e gui filisteu kuery Micmãs py ono'õmba ma avi. Ha'e nunga aexa vy

¹² aipoa'e xejeupe ae: “Aỹ ma xerovai filisteu kuery ou ma 'rã Gilgal py, SENHOR pe ajerure e'y re.” Ha'e rami vy aĩ vai ma vy mymba kuery ame'ẽ kuri aapy reve — he'i.

¹³ Ha'e rami rã Samuel aipoe'i Saul pe:

— Ne'arandua rupi e'y reiko ra'e SENHOR nderuete ojapo uka va'ekue e'y rejapo vy. Ha'e rami e'y va'e rire SENHOR ojapo ma 'rãgue raka'e rã peve Israel kuery re repena aguã rami.

¹⁴ Ha'e rami teĩ aỹ gui ma repenaa noĩ riaei 'rã. SENHOR ojeupe guarã ojou ae ma peteĩ ava oguero'vy'a va'e. Ha'e va'e ma omoĩ 'rã ojeupegua kuery ruvixarã, SENHOR ojapo uka va'ekue ndee nderejapoĩ rire — he'i.

¹⁵ Ha'e vy Samuel opu'ã vy Gilgal gui oo Benjamim regua Gibeá katy. Ha'e rire'ive Saul oipapa heta va'e kuery hexeve opyta va'e, seiscentos avakue ikuai.

¹⁶ Ha'e gui Saul, ta'y Jônatas ha'e heta va'e kuery hexeve opyta va'ekue ma Benjamim regua Geba py ikuai. Ha'e rã filisteu kuery ma Micmãs py ijaty okuapy.

¹⁷ Filisteu kuery rekoa gui ma mboapy henda katy oje'oi mba'emo re imonda aguã. Ha'e kuery regua peteĩ aty ma tape Ofra via rupi oje'oi Sual vvy katy.

¹⁸ Amboae kuery ma oje'oi tape Bete-Horom via rupi. Ha'e rã mboapya ma tape kavaju árygua ooaty rupi oje'oi Zeboim vvyugua rupi, tekoa e'ya katy.

¹⁹ Ha'e gui Israel vvy ha'e javi re peteĩve ndoikoi ferro moaty'õa, filisteu kuery “Hebreu kuery ojapo e'y aguã kyxe, neĩ hu'y rakua” he'i rire.

²⁰ Ha'e nunga rupi Israel ha'e javi oje'oi 'rã filisteu kuery rekoa py oaĩmbe'e uka aguã vvy karaña, enxada, haxa ha'e foice.

²¹ Filisteu kuery ma Israel kuery gui mokoĩ hatã'i va'e repy re 'rã oaĩmbe'e vvy karaña ha'e enxada, ha'e gui haxa ha'e foice oaĩmbe'e aguã ma peteĩ repy 'rã ojopy.

²² Ha'e nunga rupi joguero'aa ára ma Saul ha'e Jônatas reve ikuai va'e po py neĩ kyxe, neĩ hu'y rakua ma voi ndoguerekoĩ. Ha'e nunga oguereko va'e ma Saul ha'e ta'y Jônatas anho'i.

* 13:8 Samuel ijayvu ma voi va'ekue Gilgal py sete ára re Saul oarõ aguã (1 Samuel 10.8).

23 Ha'e jave py filisteu regua xondaro kuery oê oje'oivy Micmás tape rugua katy.

14

Filisteu kuery re Jônatas ipo'akaague

1 Ha'e gui petei ára Saul ra'y Jônatas aipoe'i hu'y jokoia reraa kunumi va'e pe:

— Eju, jaa filisteu kuery yvy'ã ugua rovai re ijaty va'e katy — he'i. Nguu pe oikuaa uka e'ÿ re oo.

2 Ha'e jave py Saul ma Gibeá apy katy oiko Mígron py romá'y hi'ái va'e yvy py. Hexeve ikuai va'e ma seiscentos avakue.

3 Ha'e py oiko avi sacerdote Afás, manto sacerdote pegua py onhemonde va'e. Ha'e va'e ma Icabô ryvy Aitube ra'y, Icabô ma Finéias ra'y, Finéias ma Eli ra'y. Eli ma sacerdote SENHOR pegua Siló py oiko va'ekue. Saul reve ikuai va'e ndoikuaa okuapy Jônatas ooague.

4 Ha'e gui Jônatas ma onhembopy'a tape rugua oaxa aguã filisteu kuery ijaty katy. Kyvô rupi hi'ái petei itaova, ha'e rá hovai re ma amboae hi'ái. Petei rery ma Bozez, amboae ma Sené.

5 Petei ma kuaray apu'a'ia katy hi'ái Micmás katy, ha'e rá amboae ma kuaray puku-a katy hi'ái Geba katy.

6 Ha'e gui hu'y jokoia reraa pe Jônatas aipoe'i:

— Eju, jaa opire omboi uka e'ÿ va'ekue ijaty katy. Xapy'a rei SENHOR nhandepytyvô 'rá, mba'eta ixupe ma ndaxyi jogueraa jepe aguã heta va'e rupi e'ÿ vy mboapy'i va'e rupi tei — he'i.

7 Ha'e ramo hu'y jokoia reraa ombovai:

— Ejapo tema ndepy'a re oí va'e ha'e javi. Apy ma xee aiko avi ndereve, ajapo 'rá ndee reipota va'e.

8 Ha'e ramo Jônatas aipoe'i:

— Jaa ha'vy ha'e va'e avakue ikuai katy. Ha'e kuery pe jajexa uka 'rá.

9 Xapy'a rei nhandevy “Pepyta peía py rovaê peve” he'i ramo ma japyta 'rá nhane'aía py ae, ndajai 'rá ha'e kuerya katy.

10 Ha'e rá xapy'a rei “Peju oreá katy” he'i ramo ma nhavaê 'rá javy ha'e katy, mba'eta SENHOR omboaxapa 'rá nhandepo py. Ha'e rami ma jaikuaa 'rá — he'i.

11 Ha'e gui filisteu kuery ijaty va'e pe mokoíve ojexa uka ramo joupe-upe aipoe'i:

— Pee ma hebreu kuery oê jogueruvy itakua py onhemiague gui — he'i okuapy.

12 Ha'e rami vy Jônatas ha'e hu'y jokoia reraa ojexa uka rá filisteu kuery ijaty va'e ombovai vy aipoe'i:

— Peju oreá katy, ha'e ore rombopaga 'rá — he'i.

Ha'e ramo hu'y jokoia reraa pe Jônatas aipoe'i:

— Eju einy xerakykue'i rupi, mba'eta SENHOR omboaxapa ma Israel kuery po py — he'i.

13 Ha'e rami vy Jônatas oponhy reve ojeupi ovy. Hakykue'i rupi ma hu'y jokoia reraa ou avi oiny. Jônatas guenonde rupi oitypa filisteu kuery. Hakykue rupi ma hu'y jokoia reraa voi jojuka ovy.

14 Ha'e rami jypy Jônatas ha'e hu'y jokoia reraa reve jojuka vinte avakue meio litro yvy py rive'i.

15 Ha'e ramo filisteu kuery ijaty py oiko nhemondyi tuvixa va'e, nhuúndy rupi ha'e kuery ikuai ha'e javi rupi guive. Ijaty va'e ha'e imonda aguã oje'oi va'ekue voi oryryipa okuapy. Yvy voi oryryi, ngyje Nhanderue te guigua oiko rá.

16 Ha'e gui Benjamim regua Gibeá py Saul pegua harôa kuery oma'ê vy oexa rá filisteu kuery heta va'ekue oaimba ra'e, joa katy e'ÿ-e'ÿ onha oje'oivy.

17 Ha'e ramo Saul aipoe'i hexeve ikuai va'e pe:

— Ne'exa, peipapa xerevegua kuery, mava'e pa nhandea gui oo ra'ea peikuaa aguã — he'i ramo oipapa vy oikuaa Jônatas ha'e py noía, neí hu'y jokoia reraa va'e voi.

18 Saul aipoe'i Afás pe:

— Eru apy Nhanderue ayvu ryru — he'i, mba'eta ha'e va'e ára ma Israel kuery ikuai py ae hyru oí.

19 Ha'e gui sacerdote pe Saul ijavyvú jave filisteu kuery ijaty py hevovo nhendu va'e onhenduve tema ramo Saul aipoe'i sacerdote pe:

— Aÿ gui ma ayvu ryru reru e'ÿ tei ha'eve — he'i.*

20 Ha'e ramo Saul ha'e hexeve ikuai va'e ono'ômba jevy vy joguero'a aguã katy oje'oi. Ha'e ramo filisteu kuery jomeme ae opu'ã okuapy ra'e kyxe oguerojerovia reve, opa marã jojuka rive okuapy.

21 Ha'e gui hebreu kuery filisteu kuery ijaty py ikuai va'ekue ma Israel kuerya katy ju oje'oi, ha'e vy Saul ha'e Jônatas reve ikuai va'e re ju onhemoirú okuapy.

22 Ha'e gui Efraim yvy'ã reia rupi Israel regua avakue onhemi va'ekue oendupa okuapy filisteu kuery onhambaa. Ha'e rami vy ha'e kuery voi oje'oi hakykue joguero'a vy.

23 Ha'e rami py ha'e va'e ára SENHOR ogueraa jepe Israel kuery. Bete-Áven rovai rupi voi joguero'a oje'oivy.

Saul onhemboayvu jave guare

24 Ha'e va'e ára Israel regua avakue ojexavai okuapy, mba'eta ojeupegua kuery oendua py Saul oura vy: “Ayvu vaipy toiko ava pytú e'ÿ mbove tembi'u ho'u va'e rei, xerovaigua kuery re ajepyva e'ÿa ja”, he'i rire. Ha'e rami rá heta va'e kuery neí mba'eve ndo'ui.

25 Ha'e gui ha'e kuery ha'e javive ovaê okuapy ka'aguy re, ei yvy re oía py.

26 Ka'aguy re ha'e kuery ovaê rá ei oí vaipa tei mava'eve rei ndoerei, ouraague káuxa okyje vy.

* 14:19 Nhanderue ayvu ryru Saul oipota, ha'e va'e rupi Nhanderue peoporandu aguã mba'e pa oikoa re, ha'e filisteu kuery rakykue oo aguã re. Ha'e gui filisteu kuery onhamba ma rire Saul ndoipotavei hyru.

²⁷ Ha'e rā Jônatas ma noendui nguu heta va'e kuery oendua py ouraague. Ha'e rami vy yvyra'i opo py oguereko va'e apy omoaë vy omoaký ei rykue'i py. Oere vyve hexa hendypa.

²⁸ Ha'e ramo heta va'e regua peteï aipoe'i:

— Ange nderu oura kuri ore roendua py. Ha'e vy aipoe'i: “Ayyv vaipy toiko ava kova'e ára tembi'u ho'u va'e rei”, he'i va'ekue. Ha'e ramo ore kuery orekangypa ma rokuapy — he'i.

²⁹ Ha'e ramo Jônatas aipoe'i:

— Xeru ma ojapo ra'e nhandeyvy re ojexavaia aguã rami. Ne'exa, xerexa hendypa kuri kova'e ei ruxã'i aere va'ekue gui teï.

³⁰ Ha'e gui nhande kuery katuve ma imbaraeete 'rãgue kova'e ára ngovaigua kuery tembi'u ogueru va'ekue gui okaruxea rami okaru va'e rire. Ha'e rami teï kova'e py filisteu kuery ndajajuka reta vaipai kuri — he'i.

³¹ Ha'e va'e ára ma filisteu kuery Micmãs guive Aijalom peve ojukupaa py ha'e kuery ikangypa.

³² Ha'e vy hovaigua kuery mba'emo ogueru va'ekue re oje'oi pojava vy ojopypa vexa'i, vaka ha'e ta'y'i guive. Yvy rupi rive ojuka vy ho'u okuapy huguy reve.

³³ Ha'e nunga Saul pe omombe'ua vy

— Nhande revegua kuery ojejavy okuapy SENHOR rovai, xo'o huguy reve ho'u vy — 'ea.

Ha'e ramo Saul aipoe'i:

— Ha'eve'ÿa rami raxa pejapo. Pembojere aÿve ita guaxu kyvõ katy.

³⁴ Aipoe'ive ju:

— Tapeo, nhande kuery mbyte rupi aipopeje: “Peteï-teï peru mymba vaka e'ÿ vy vexa'i pejou va'ekue, ha'e pejuka apy ae. Ha'e gui mae pe'u. Pejejavyve jevy eme SENHOR rovai, huguy reve pe'ua py”, peje — he'i.

Ha'e ramo pyavyve ha'e kuery peteï-teï ogueru vaka ojopy va'ekue. Ha'e vy ojuka ha'e py.

³⁵ Saul ojapo avi peteï altar SENHOR peguarã. Ha'e va'e altar ma jypygua ha'e ojapo.

Jônatas oo jepe aguã rami heta va'e kuery ojapo okuapyague

³⁶ Saul aipoe'ive ju:

— Kova'e pyavyve jaje'oi 'rã filisteu kuery rakykue. Jaitypa 'rã ko'ëmba peve. Nhamoemyre eme peteïve ava ha'e kuery va'e regua — he'i.

Hexevegua kuery ombovai okuapy:

— Ejapo rejou porãa rami.

³⁷ Ha'e rã sacerdote oi va'e aipoe'i:

— Ha'e rami avi Nhanderuete pe ranhe nhaporandu — he'i.

Ha'e ramo Nhanderuete pe Saul oporandu uka vy aipoe'i:

— Toroo pa filisteu kuery rakykue? Remboaxa 'rã pa ore Israel kuery po py? — he'i uka teï ha'e va'e ára ma Nhanderuete nombovai.

³⁸ Ha'e rami rã Saul aipoe'i:

— Peë heta va'e kuery re pepena va'e ha'e javi, pejupa apy. Peikuaa pota pexa aguã mba'e nunga jejavvy pa ange ojapoa ra'e.

³⁹ Mba'eta anhetë ete SENHOR oikove va'e Israel kuery reraa jepea rery rupi aura vy aipoa'e: Ojejavy va'ekue omano 'rã, xera'y Jônatas ae teï — he'i va'eri heta va'e kuery peteïve nombovai.

⁴⁰ Ha'e gui aipoe'ive ju Israel kuery pe:

— Peë kuery ma peteï henda py 'rã peï, ha'e rã xee ha'e xera'y Jônatas reve ma amboaxa py 'rã ore'ai.

Heta va'e kuery ombovai:

— Ejapo ha'vy rejou porãa rami — he'i okuapy.

⁴¹ Ha'e gui Saul aipoe'i SENHOR Israel kuery ruete pe:

— Eikuaa uka ke anhetë va'e.

Ha'e ramo xortea py oikuaa uka Jônatas ha'e Saul, ha'e rã heta va'e kuery e'ÿ ae ra'e.

⁴² Saul aipoe'i ju:

— Pexa ha'vy xortea xere ha'e xera'y Jônatas re — he'i ramo Jônatas ae oikuaa ukaa.

⁴³ Ha'e ramo Saul oporandu Jônatas pe:

— Emombe'u porã ke mba'e pa rejapo ra'ea.

Jônatas ombovai:

— Aere kuri ei yvyra'i xepo py areko va'e py. Ha'e gui apy ma aï amano aguã.

⁴⁴ Ha'e ramo Saul aipoe'i:

— Nhanderuete taxembopaga ha'e oipotaa rami, Jônatas omano e'ÿ rã.

⁴⁵ Ha'e rami teï heta va'e kuery aipoe'i Saul pe:

— Jônatas ri ty'y omano 'rã, nhande Israel kuery nhandereraa jepe va'ekue ri? Tomano eme. Anhetë ete SENHOR oikove va'e rery rupi roura vy aiporo'e: Ha'e va'e akã gui neï peteï hi'a ma voi ndo'ai 'rã. Nhanderuete reve vy ae ha'e nunga ojapo ange — he'i okuapy. Ha'e rami py heta va'e kuery ojapo Jônatas omano aguã gui oo jepe aguã rami.

⁴⁶ Ha'e gui filisteu kuery rakykue Saul kuery ndoovei ramo ha'e kuery ojevypa ju ovyvy katy.

⁴⁷ Israel kuery ruvixarã Saul oi ma vy joguero'a oikovy ngovaigua kuery jovaive rupi ikuai va'e ha'e javi reve: Moabe, Amom ra'y kuery ha'e Edom ha'e Zobá pygua huvixa kuery reve, ha'e gui filisteu regua huvixa kuery reve. Ooa katy rei ipo'akapa va'e raka'e.

⁴⁸ Imbaraetea rupi joguero'a vy ojuka Amaleque pygua kuery voi. Ha'e rami vy ogueraa jepe Israel kuery mba'emo re imonda aguã oje'oi va'ekue po gui.

⁴⁹ Saul ra'y kuery ma Jônatas, Isvi ha'e Malquisua raka'e. Tajy guaimive va'e rery ma Merabe, ha'e rã kyríve va'e ma Mical.

⁵⁰ Saul ra'lyxy ma Aimaás rajy Ainoã. Ixupe xondaro kuery re opena va'e rery ma Abner, Saul tuty Ner ra'y ae.

⁵¹ Saul ru ma Quis raka'e. Ha'e gui Abner ru Ner ma Abiel ra'y raka'e.

⁵² Saul oia pukukue re joguero'a tema filisteu kuery reve. Ha'e rami vy avakue imbaraetekue ha'e ipy'a guaxukueve Saul oexa vy ogueraapa 'rã ojeupe guarã.

15

Saul SENHOR nonhe'ẽ rendui rire huvixa noívei aguã re ijayvuague

¹ Ha'e gui Samuel aipoe'i Saul pe:

— SENHOR xembou karamboae ndere azeite aikyty vy ixupegua Israel kuery ruvixarã amoí aguã. Ha'e rire aỹ ejapyxaka SENHOR ijayvua re.

² Po rami SENHOR ixondaro reta va'e ijayvu: Xee ambopaga 'rã Amaleque pygua kuery Israel kuery re ojapo vaiague re, mba'eta Egito gui Israel kuery ou ramo ha'e kuery rovai opu'ã okuapy tape rupi.

³ Ha'e nunga rupi tereo aỹ. Ejukapa Amaleque pygua kuery, ha'e emomba katui'i guive oguereko va'e ha'e javi, emomba e'ỹ eme mba'eve'i. Rejuka 'rã avakue ha'e kunhague, avakue'i ha'e kyrigüe'i okambu va'e ha'e javi, vaka ha'e vexe'i, camelo ha'e mburika'i kuery — he'i.

⁴ Ha'e rami rã Saul heta va'e kuery oenoí ukapa vy oipapa Telaim py: duzentos mil avakue vvy rupi guarã ha'e dez mil avakue Judá regua ikuai.

⁵ Amaleque tetã py Saul ogueraa ma vy vvyugua py omoí oarõ nhemiarã.

⁶ Ha'e rami vy queneu kuery pe ranhe aipoe'i:

— Tapeo, pejepe'a. Peẽmba Amaleque pygua kuery mbyte gui, ha'e kuery amombaa py peẽ kuery romomba avi e'ỹ aguã. Mba'eta Israel kuery Egito gui ou jave pemboaxypa raka'e — he'i. Ha'e rami rã queneu kuery ojepe'apa Amaleque pygua kuery mbyte gui.

⁷ Ha'e ramo mae ma Saul ojuka Amaleque pygua kuery, Havilá guive Egito katy'i Sur peve.

⁸ Ojopy avi Amaleque pygua huvixa Agague oikove reve. Ha'e rã ha'e pygua kuery ma ojukapa kyxe py.

⁹ Ha'e rã Agague ma Saul ha'e hexevegua kuery ndojukai, neĩ mymba kuery vexe'i ha'e vaka ra'y porãgueve, mymba ikyrakueve va'e, vexe'i ra'y kuery ha'e mba'emo porãgueve ha'e javi guive. Nomomba etei. Ivaikue-ikue'i, oipota e'ỹ va'e rive omomba.

¹⁰ Ha'e ramo SENHOR oayvu ombou Samuel pe. Ha'e vy aipoe'i:

¹¹ — Xee ndavy'avei huvixarã Saul amoíague re, mba'eta xeivy oikoa gui ojepe'a vy ndojapoi xeayvuague — he'i ramo Samuel iporiau vaipa vy pytũ mbukukue re ojerure oiny SENHOR pe.

¹² Ko'ẽ rai ramove Samuel oo aje'ive'i reve Saul ovaexĩ aguã. Teĩ ixupe omombe'ua:

— Saul oo ma Carmelo katy. Ha'e py ma mba'emo omopu'ã ha'e ae onhemoma'endu'a uka aguã. Ha'e gui ojevy vy Gilgal katy ogejey ovy — 'ea.

¹³ Ha'e ramo Samuel oo Saul oia py. Ha'e py ovaẽ ramo Saul aipoe'i ixupe:

— Tove SENHOR topena porã ndere. Xee ajapopa ma SENHOR ijayvuague.

¹⁴ Ha'e ramo Samuel oporandu:

— Mba'exa tu ha'vy vexe'i ha'e vaka nhendua xeapyxa py aendu va'e?

¹⁵ Saul ombovai:

— Ha'e nunga tu Amaleque tekoa gui ogueru pyre rima. Mba'eta vexe'i ha'e vaka kuery iporãgueve ma xerevegua kuery nomombai, SENHOR Nderuete pe ojuka aguã ogueru. Ha'e rã hembyrekue ma rojukapa katui'i — he'i.

¹⁶ Ha'e ramo Samuel aipoe'i Saul pe:

— Earõ ranhe, ndevy amombe'u aguã kuee pyávy xeivy SENHOR aipoe'iague.

Saul ombovai vy

— Ndeayvu ke — he'i.

¹⁷ Samuel ijayvuve:

— Ndejeupe ae “Xe'vyvĩ'ive” 're va'ekue ri Israel kuery akārã e'ỹ ri ty'y nemoia? Ha'e vy ndere azeite SENHOR oikyty uka reve nemoí raka'e ha'e kuery ruvixarã.

¹⁸ Ha'e gui kyvõ rupi ju SENHOR nemondouka vy aipoe'i va'ekue: “Tereo, emomba katui'i ojejavu va'e kuery Amaleque regua. Ha'e kuery rovai pejoguero'a 'rã pemomba peve”, he'i va'ekue.

¹⁹ Mba'e re ha'vy nderejapyxakai SENHOR ijayvua re? Ha'e rami 'rãgue py renha reve imba'e rei-reikue rejopy. Ha'eve'ya rami rejapo SENHOR renonde — he'i.

²⁰ Ha'e rami teĩ Saul ombovai Samuel pe:

— Ha'e rami e'ỹ ko, aendu ri SENHOR ayvu. Ha'e vy tape SENHOR xemondoukaague rupi ae aa vy Amaleque pygua huvixa Agague aru, ha'e rã Amaleque pygua kuery ma ajukapa katui'i.

²¹ Ha'e rami avi heta va'e kuery ogueru avi imba'e rei-reikue mba'emo mymba vexe'i ha'e vaka ra'y kuery. Romomba aguã va'ekue gui iporãgueve ha'e kuery oiporavo heruvy SENHOR nderuete pe ome'ẽ aguã Gilgal py — he'i.

²² Va'eri Samuel aipoe'i:

— SENHOR nda'u ijayvua nhaendua gui oguerovy've 'rã teve mba'emo japy vy nham'e'ẽ va'e rive? Ne'exa, mba'emo nham'e'ẽa gui ma ha'eveve nhamhe'ẽ rendu. Vexa'i kyrakue nham'e'ẽa gui ha'eveve ojapo uka va'e jajapo.

²³ Mba'eta onhemboyvate va'e kuery ma imba'veyky va'e rami ae ojevavy, nonhe'ẽ rendui va'e kuery ma ngopy ta'angaa ombojerovia aguã oguereko va'e rami ojevavy. Ha'e gui SENHOR ayvu reja rire ha'e voi ndereja, huvixa nereivei aguã — he'i.

²⁴ Ha'e ramo Saul ombovai Samuel pe:

— Xee ma ajevavy ri, SENHOR ojapo uka va'e ndajapoi vy, ndeayvua guive. Mba'eta heta va'e kuery gui akjye vy ha'e kuery ijayvua aenduve.

²⁵ Ha'e rami teĩ aỹ ma ndevy ajerure xeperdoa aguã ajevavyague. Ha'e rami vy ejevvy ju xereve SENHOR romboete aguã — he'i.

²⁶ Ha'e rami teĩ Samuel aipoe'i Saul pe:

— Xee ndajevyi 'rã ndereve. SENHOR ayvu reja rire ha'e voi ndereja, Israel kuery ruvixa nereivei aguã — he'i.

²⁷ Ha'e gui Samuel oo ju aguã ojere rã Saul ojopy ijao puku apy re. Ha'e ramo oxoro.

²⁸ Ha'e ramo Samuel aipoe'i ixupe:

— Ange ndepo gui SENHOR omondoro avi Israel kuery re repenaague. Ha'e vy ndea katy'igua ndegui heko porãve va'e pe ju ome'ẽ.

²⁹ Ha'e gui Israel kuery ruete Hexakãmba va'e ma nda'ijapui, nda'evei nho va'e'ỹ guive, mba'eta ava e'ỹ oiko ojeko rerova rive aguã.

³⁰ Ha'e ramo Saul aipoe'i:

— Xee ajevavy teĩ xemboete uka ri jepe heta va'e kuery yvatekueve ha'e Israel kuery ha'e javi renonde. Ejevvy ju ha'vy xereve, SENHOR nderuete nhamboete aguã — he'i.

³¹ Ha'e ramo Saul reve Samuel jogueraa nho ju, ha'e vy omboete SENHOR.

Samuel Agague ojukaague

³² Ha'e gui Samuel aipoe'i:

— Peru apy Amaleque pygua huvixa Agague — he'i.

Ha'e ramo oia py Agague oikuaa rei reve ou, ojeupe “Anhetẽ, amano aguã gui akjyea ko oaxa ma” he'i vy.

³³ Ha'e rami teĩ Samuel aipoe'i:

— Ndekyxe kunhague pi'a kuery rekove oipe'aague rami ae avi ndexy voi oiko 'rã ipi'a ve'ỹ va'e kunhague mbyte rupi — he'i vyve SENHOR renonde Gilgal py Samuel omboa'y-a'ypa Agague.

³⁴ Ha'e gui Samuel oo Ramã katy. Ha'e rã Saul ma guekoa Gibeã py oo ngoo oĩ va'e katy.

³⁵ Saul omanoa ára peve Samuel ndoexavei teĩ oendu guive Saul re ipy'a vaia. SENHOR voi ndovy'vei Israel kuery ruvixarã Saul omõague re.

16

Jessé rekoa py Samuel omondoukaa ague

¹ Ha'e gui SENHOR aipoe'i Samuel pe:

— Raka'e peve 'rã tu ndepy'a vai Saul re? Mba'eta xee SENHOR amboyke ma Israel kuery re openaa gui. Emonyẽ peteĩ hakuakue azeite, ha'e tereo. Romondouka 'rã Jessé rekoa Belém py. Mba'eta ta'y kuery va'e regua peteĩ ajou ma huvixarã.

² Samuel oporandu:

— Mba'exa 'rã tu aa? Saul oikuaa ri vy xejuka 'rã.

SENHOR ombovai:

— Eraa peteĩ vaka ra'y. Ha'e vy aipo're: “Aju SENHOR pe mymba ajuka vy ame'ẽ aguã”, 're.

³ Ha'e rami vy renoĩ 'rã Jessé mymba reme'ẽ aguã py ou aguã. Ha'e rã xee aikuaa uka 'rã mba'e pa rejapo 'rãa. Ha'e ramo xee aikuaa uka va'e ae 'rã remoĩ, azeite reikyty vy — he'i.

⁴ Ha'e gui SENHOR aipoe'iague rami Samuel oiko vy oo Belém tekoa py. Ha'e ramo tetã pygua nhomongeta va'ety kuery oexa vy oryryipa reve oẽ jogueruvy ovaexĩ aguã. Ha'e vy oporandu:

— Ha'evempa reia rupi pa reju?

⁵ Ombovai:

— Ha'evempa reia rupi ri aju SENHOR pe mymba ajuka vy ame'ẽ aguã. Pejyky'a'o ke ha'e peju xereve mymba ame'ẽa py — he'i. Ha'e rami vy oiky'a'o Jessé ha'e ta'y kuery. Ha'e vy oenõimba avi mymba ome'ẽ aguã katy.

⁶ Ha'e kuery oiko ouvy rã Samuel oexa Eliabe. Ha'e vy ojeupe ae “Kova'e nhi'ã SENHOR renonde oiporavo va'ekue hi'airi” he'i.

⁷ Ha'e rami teĩ SENHOR aipoe'i Samuel pe:

— Eikuaa pota eme hova re, neĩ ipuku-a re, mba'eta ha'e va'e ma xee ndaiporavoi. Mba'eta SENHOR ma avakue joexaa rami e'ỹ oexa va'e. Avakue ma hi'arykue rive 'rã oexa, ha'e rã SENHOR ma ipy'apy re oexa va'e — he'i.

⁸ Ha'e gui gua'y Abinadabe ju Jessé oenoĩ vy ojapo Samuel reionde rupi oaxa aguã rami. Ha'e rami teĩ

— Kova'e voi SENHOR oiporavo va'ekue'ỹ — he'i.

⁹ Ha'e gui gua'y Samã ju Jessé ojapo oaxa aguã, teĩ Samuel

— Kova'e e'ỹ SENHOR oiporavo — he'i.

¹⁰ Ha'e rami vy Jessé sete-ve ojapo gua'y kuery Samuel renonde rupi oaxa aguã rami, teĩ Jessé pe Samuel ombovai vy

— Kova'e kuery voi SENHOR ndoiporavoi avi — he'i.

¹¹ Ha'e gui ma Samuel oporandu Jessé pe:

— Opa ma teve ndera'y kuery?

Ombovai:

— Oata teri kunumive ete va'e teĩ vexa'i re opena oikovy — he'i.

Samuel aipoe'i ju Jessé pe:

— Enoĩ uka ha'vy, mba'eta ha'e ou e'ỹ re nda'ëvei mesa py jaguapy aguã.

¹² Ha'e ramo oenoĩ uka vy ogueroiuke uka. Ha'e va'e ma ipytã rei porã, hexa porãmba, ha'e hete porã rei va'e. SENHOR aipoe'i Samuel pe:

— Epu'ã ha'e eikyty azeite hexe, mba'eta upe va'e ae ma — he'i.

¹³ Ha'e ramo Samuel hakuakue py azeite oĩ va'e oupi vy oikyty inhakã re omoĩ tyke'y kuery oexaa py. Ha'e va'e ára guive SENHOR Nhe'ẽ onhemonde Davi re. Ha'e gui ma Samuel opu'ã vy Ramá katy ju oo.

Saul renonde Davi mba'epu ixã reta va'e ombopu oinyague

¹⁴ Saul gui SENHOR Nhe'ẽ ojepe'a ramo nhe'ẽ vai ju ombou rã oguereko axy.

¹⁵ Ha'e ramo Saul rembiguai kuery aipoe'i okuapy:

— Ne'exa, aỹ ma nhe'ẽ vai Nhanderuete ombou va'ekue nembojexavai.

¹⁶ Ha'e nunga rupi oreruvixa, emondouka na nerembiguai kuery nerenonde ikuai va'e peteĩ ava rogueru aguã ixã reta va'e mbopuarã. Ha'e ramo rãnda'u nhe'ẽ vai SENHOR ombou va'ekue ndere ou jave peteĩ-teĩ okuã py ombopu rã rendu vy rekerave 'rã — he'i okuapy.

¹⁷ Saul ombovai guembiguai kuery pe:

— Pejou ha'vy peteĩ ava imba'epu porã kuaa va'e, ha'e peru xea py — he'i.

¹⁸ Ha'e gui peteĩ kunumi va'e ombovai vy aipoe'i:

— Xee ma aikuaa peteĩ ava Belém pygua Jessé ra'y kuery va'e regua. Ha'e va'e ma imba'epu porã kuaa va'e, imbaraeete ha'e ipy'a guaxu va'e guive, ava joguero'aa pygua rami rei oiko va'e, ijayvu kuaa ha'e hete porã rei va'e, ha'e hexeve SENHOR oikoa va'e — he'i.

¹⁹ Ha'e rami rã Jessé oĩa py Saul ayvu mombe'uarã ombou vy aipoe'i uka:

— Embou xevy ndera'y Davi, vexa'i kuery re opena oikovy va'e — he'i uka.

²⁰ Ha'e ramo Jessé guymba mburika'i ojopy vy ombovoyi mbojape ha'e peteĩ vinho ryru re. Peteĩ kavara ra'y'i voi ogueru vy Saul peguarã ogueraa uka avi gua'y Davi pe.

²¹ Ha'e rami vy Saul oĩa py Davi oo vy henonde oiko. Ha'e ramo ha'e oayvu vaipa vy hu'y jokoã reraarã omoingo.

²² Saul aipoe'i uka Jessé pe:

— Tove Davi xerenonde rupi riaete toiko, xembovy'a rei ramo — he'i.

²³ Ha'e gui Saul re nhe'ẽ vai Nhanderuete ombou va'e ou nhavõ Davi mba'epu ixã reta va'e oupi vy peteĩ-teĩ okuã py ombopu rã oiny. Ha'e ramo Saul onhenhandu 'rã ha'eve raive, okuerave 'rã, ixuguĩ nhe'ẽ vai ojepe'a kuerei rã.

17

Golias opu'axe reia rupi ijayvuaque

¹ Ha'e gui filisteu kuery omboaty xondaro kuery joguero'a aguã. Ono'õmba okuapy Judá re Socó oĩ va'e py. Socó ha'e Azeca mbyte ijaty okuapy Efes-Damim py.

² Ha'e rã Saul ha'e Israel kuery ma ono'õmba vy Elá vvyugua py ijatypa okuapy. Ha'e py ma oiko katu okuapy filisteu kuery re opu'ã okuapy aguã.

³ Filisteu kuery ma hovai re ikuai vvy'ã oĩ va'e re, ha'e rã Israel kuery ma vvy'ã kyvõ rupigua re ikuai. Ha'e kuery ikuai mbyte ma vvyugua oĩ.

⁴ Ha'e gui filisteu kuery ijaty okuapya gui peteĩ ava oẽ ovvy joguero'a kuaa rei va'e. Golias hery va'e, Gate pygua, mboapy metros ipuku va'e.

⁵ Oakã re oguereko akã regua overa va'e guigua, ha'e onhemonde ao ratã ipore-pore va'e py. Ha'e va'e poyia ma cinquenta e cinco quilos.

⁶ Hetyma re ma oĩ tetyma regua hatã va'e overa va'e guigua. Ijaxy'y re ma peteĩ hu'y guaxu overa va'e guigua oĩ.

⁷ Hu'y guaxy'y ma ipoguaxu ajukue popẽa'y rami. Hu'y guaxy' apy ma seis quilos va'e. Henonde ma oo oiny hu'y jokoã tuvixa va'e reraa.

⁸ Ha'e va'e ojapukai ho'amy Israel regua xondaro kuery ikuai katy. Ha'e vy aipoe'i:

— Mba'e re tu pejoguero'a aguã peju va'eri pendeyxy rei pekuapy? Xee ma filisteu e'ỹ teve aiko, ha'e peẽ nda'u Saul rembiguai kuery e'ỹ teve pendekuai? Peiporavo ha'vy peteĩ ava penderegua xerovaiguarã.

⁹ Ha'e gui xereve rojoguero'aa py ha'e va'e xejuka ri ramo ore kuery orekuai 'rã penerembiguairã. Ha'e rã xee ri xepo'aka vy ajuka ramo peẽ 'rã orerembiguairã pendekuai ore roipotaa rami anho.

¹⁰ Aipoe'ive tema:

— Aỹ ma xeyvu ha'amy xondaro kuery Israel regua rovai. Embou na xevy peteĩ ava, mokoĩve rojoguero'a aguã — he'i.

¹¹ Ha'e rami filisteu va'e ijayvu rā Saul ha'e Israel kuery ha'e javi oendu vy onhemondyipa rei okuapy, okyje vaipa guive.

Tyke'y kuery ikuaia katy Davi omondoukaa ague

¹² Davi ru ma efrateu Judá regua Belém pygua, Jessé hery va'e, ta'y irundy meme va'e. Saul opena oikovy jave ma tujave va'e ae ma oiko.

¹³ Jessé ra'y kuery tujakueve mboapy ikuai va'e ma Saul pe ojexa uka vy hupive oo joguero'a aguā katy. Ha'e va'e kuery regua tujave va'e ma Eliabe, mokoia ma Abinadabe, ha'e rā mboapya ma Samá.

¹⁴ Davi ma kunumive ete va'e. Tyke'y tujakueve anho oo mboapyve Saul rupive.

¹⁵ Ha'e rā Davi ma Saul oia py oo rire ojeyv kuerei 'rā guekoa Belém py nguu rymba vexa'i kuery re opena aguā.

¹⁶ Ha'e ramia ja filisteu va'e ma aje'ive'i nhavō 'rā ou, ka'aru'i avi. Quarenta ára re ha'e rami oiko.

¹⁷ Ha'e gui ma Jessé aipoe'i gua'y Davi pe:

— Eraa ke nderyke'y kuery pe petei rryu trigo oaimbe pyre ha'e kova'e dez mbojape. Tereo pojava kova'e nunga reraa vy ijaty okuapya py, nderyke'y kuery pe.

¹⁸ Ha'e gui kova'e dez queijo ma mil xondaro re opena va'e pe eraa. Nderyke'y kuery reipou 'rā reikuaa aguā ikuai porā pa ra'ea. Ha'e gui reju vy ha'e kuerya gui reru 'rā mba'emo aikuaa aguā.

¹⁹ Ha'e kuery ma Saul ha'e Israel kuery ha'e javi reve 'rā ikuai Elá yvyugua py, filisteu kuery reve joguero'a aguā py — he'i tuu.

²⁰ Ha'e ramo ko'ēmba rai'i ramove Davi ovy vy vexa'i kuery re opena va'erā po py oejapa vy mba'emo ojopy heravy nguu Jessé aipoe'iaque rami vy. Xondaro kuery ijaty okuapya py ovaē jave ha'e kuery joguero'a aguā katy oje'oi. Ojapukai okuapy reve nhoenōi joguero'a aguā py oje'oi aguā.

²¹ Israel kuery ha'e filisteu kuery nhoarō okuapy, jovaipe re hyxy okuapy.

²² Ha'e ramo Davi mba'emo ogueraa va'ekue oejapa ranhe mba'emo re opena va'ety po py. Ha'e vy onha ovy joguero'a va'erā ikuaia katy. Ha'e py ovaē vy oporandu guyke'y kuery pe ikuai porā paa re.

²³ Ha'e kuery reve Davi ijayvu teri ho'amy reve filisteu regua xondaro kuery ikuaia gui ou oiny ha'e ae'i opu'ā va'erā Goliath hery va'e, filisteu Gate pygua. Ha'e va'e ma ijayvuaty rami ae ijayvu ramo Davi oendu.

Israel kuery rovai gigante Goliath ijayvuague

²⁴ Ha'e va'e ava Israel kuery ha'e javi oexa vy onhamba ixugui okyje vaipa vy.

²⁵ Ha'e vy joupe-upe aipoe'i:

— Pexa pa ha'e va'e ava ou rā? Israel kuery rovai ijayvu aguā ou. Ha'e va'e jukaare pe ma huvixa ome'ē 'rā opa mba'e nunga, guajy ae ome'ē avi 'rā ta'yxyrā, ha'e tuu ro pygua kuery imposto re ndopagavei ma 'rā Israel regua — he'i okuapy.

²⁶ Ha'e rami rā Davi oporandu oia katy'i ikuai va'e pe. Ha'e vy aipoe'i:

— Mba'e nunga ete tu ome'ēa 'rā ava ha'e va'e filisteu ojuka vy Israel kuery moximbaare oipe'a va'e pe? Marā ramigua tu ha'e va'e opire omboi uka e'ỹ va'ekue oiko, Nhanderuete oikove va'e pegua xondaro kuery rovai ha'e rami ete ijayvu aguā? — he'i.

²⁷ Ha'e kuery ijayvuague rami ae ju ijayvu vy

— Ha'e nunga ome'ēmbaa 'rā ava ijukaare pe — he'i.

²⁸ Ha'e gui ha'e kuery reve ijayvu rā tyke'y tujave va'e Eliabe oendu vy ivai vaipa Davi pe. Ha'e vy aipoe'i: — Mba'e re tu reju ra'e apy? Mava'e po py tu reja ra'e vexa'i kuery mboapy'i repenaa va'e tekoa e'ỹa rupi? Xee aikuaa porā renhemboyvateve reia ha'e ndereko vaia. Joguero'a va'e rexa aguā rive reju.

²⁹ Davi ombovai:

— Mba'e nunga py tu xee ajapo vai aỹ? Aporandu rive'i merami va'eri — he'i.

³⁰ Ha'e rami vy ixugui ojepe'a vy amboae pe ju oporandu ha'ekue rami ae. Ha'e rā jypyguare rami ae ju ombovai.

Gigante rovai Davi joguero'a aguā oiko katuague

³¹ Ha'e rami Davi ijayvua oendupaa vy Saul pe omombe'u uka. Ha'e ramo oenōi uka Davi.

³² Davi ou vy aipoe'i Saul pe:

— Avave py'a re toī eme ixugui okyjea. Xee nerembiguai ae 'rā aa filisteu rovai ajoguero'a aguā — he'i.

³³ Ha'e rami tei Saul aipoe'i Davi pe:

— Nda'evei ndee reo aguā filisteu reve rejoguero'a vy, mba'eta ndee ma nekunumi ete teri. Ha'e rā ha'e ma kunumi guive joguero'a va'ety ae rei.

³⁴ Davi ombovai Saul pe:

— Ha'e gui xee nerembiguai ma xeru rymba kuery vexa'i re apena va'e. Guary e'ỹ vy urso mba'e ou vy mymba kuery ikuaia gui vexa ra'y'i ojopy ramo

³⁵ hakyue xee aa vy ajuka 'rā. Ha'e vy ijuru gui araa jepe kuerei 'rā vexa ra'y'i. Xere opu'ā tei hendyva re ajopy vy ajuka 'rā.

³⁶ Xee nerembiguai ajuka karamboae guary ha'e urso. Ha'e gui filisteu va'e voi omano 'rā ha'e kuery rami, Nhanderuete oikove va'e pegua xondaro kuery rovai ijayvu rire — he'i.

³⁷ Davi aipoe'ive tema:

— Guary ha'e urso xejopya gui SENHOR xereraa jepe rire filisteu va'e po gui voi xereraa jepe 'rā — he'i.

Ha'e rami rā Saul aipoe'i Davi pe:

— Tereo ha'vy, SENHOR toiko ndereve — he'i.

³⁸ Saul omonhemonde Davi oao ratā py ae, inhakā re ngora overa va'e guigua omoī, ha'e ipexo re omba'e pexo regua ae omoī.

³⁹ Ao ratā re Davi kyxe omoī vy onhea'anga oguata aguā, oiporu va'ety e'ỹ vy. Ha'e rami vy Davi aipoe'i Saul pe:

— Kova'e nunga reve tu nda'evei rima aguata aguā, aiporu va'ety e'ỹ vy — he'i. Ha'e vy Davi omboipa ju ojogui.

⁴⁰ Opo py yvyra'i oiporu va'ety ogueraa reve oo yakā'i rembe py. Ha'e py oiporavo peteī nhiruī ita yxyī rei'i va'e. Ha'e va'e ita omboyru ovoko vexe'i re openaa rupi oguereko va'ety py. Ha'e vy ita momboa ogueraa avi vy onhembojave ovy filisteu va'e re.

Gigante reve Davi nhovaexī vy ojukaague

⁴¹ Davi onhemboja ovy rā filisteu va'e oexa vy ha'e voi ovaexī ovy. Henonde ma hu'y jokia tuvixa va'e reraa ou avi oiny.

⁴² Filisteu va'e oma'ē porā vy oexa Davi. Ha'e rami vy ojoi rei, kunumi pytā rei ha'e hete porā rei va'e ou rā.

⁴³ Ha'e rami vy filisteu va'e aipoe'i Davi pe:

— Ha'e gui jagua ri ty'y xee aiko, yvyra'i reve rive reju aguā? — he'i. Ha'e vy nguete ramigua rery rupi filisteu ijayvu vai Davi re.

⁴⁴ Filisteu va'e aipoe'ive tema Davi pe:

— Eju ke xere, ndero'okue ame'ē aguā guyra oveve va'e ha'e vixo vaikue ikuai va'e pe — he'i.

⁴⁵ Ha'e ramo Davi aipoe'i filisteu pe:

— Ndee ma kyxe reve reju xerovai, hu'y guaxu ha'e hu'y jokia reve. Ha'e rā xee ma nderovai aju SENHOR ixondaro reta va'e rery rupi. Ha'e va'e ma Israel regua xondaro kuery rovai ndeayvu vaiaty va'e ruete ae oiko.

⁴⁶ Aỹ'ive SENHOR nemboaxa 'rā xepo py. Rojuka 'rā, ha'e amboi 'rā neakāgue. Ha'e rami vy filisteu ijaty okuapy va'e retেকে voi aỹve ame'ēmba 'rā guyra yvate rupi oveve va'e ha'e vixo vaikue pe. Ha'e rami rire vvy jave re oikuapaa 'rā Israel kuery mbyte Nhanderuete oikoa.

⁴⁷ Apy heta va'e kuery ikuai va'e ha'e javi oexa 'rā SENHOR jogueraa jepea kyxe py e'ỹ, hu'y guaxu py e'ỹ guive. Mba'eta pendere opu'ā va'e ma SENHOR ae. Ha'e ae 'rā penemboaxapa orepo py — he'i.

⁴⁸ Ha'e gui filisteu va'e Davi ovaexī aguā ouve ramo hyxy okuapy va'e oeja ovy vy onha ovy filisteu va'e ovaexī vy.

⁴⁹ Ovoko'i py Davi opo'ē ovy vy oguenoē peteī ita. Ha'e va'e ma ita momboa py omombo vy ojapi filisteu rova py. Hova mbyte py ita oike oiny ramo ho'a ngova vvy re.

⁵⁰ Ha'e rami py filisteu re Davi ipo'aka raka'e ita py ha'e ita momboa py rive'i. Ojapi vy ojuka, opo py kyxe oguereko vy e'ỹ.

⁵¹ Ha'e gui Davi onha ovy vy filisteu áry onhemombo vy ikyxé ojopy vy oguenoē hyru gui. Ojuka ma vy ha'e va'e py ojaya inhakā. Ha'e ramo filisteu kuery ma guepyarā va'ekue omano maa oexa vy onhamba.

⁵² Ha'e ramo Israel ha'e Judá pygua avakue opu'amba. Ovy'apa reve oje'oi filisteu kuery rakykue Gate ha'e Ecrom tetā rokē peve. Filisteu kuery ojuka pyre ho'a-o'apa tape rupi, Saaraim guive Gate ha'e Ecrom peve.

⁵³ Ha'e gui ma filisteu kuery rakykue oague gui Israel kuery ojeyvpa ju. Filisteu kuery ijaty okuapyague gui ojopypa heravy mba'emo oeja re.

⁵⁴ Davi ma filisteu akāgue ojopy vy ogueraa Jerusalém tetā py. Ha'e rā hembiporukue ma ngoo py ae omoī porā.

⁵⁵ Filisteu va'e re nhovaexī aguā Davi oo rā Saul oexa vy aipoe'i xondaro kuery ruvixa Abner pe:

— Abner, mava'e ra'y tu peva'e kunumi va'e?

Abner ombovai:

— Xeruvixa, anhetē ete nderekove rupi aura vy aipoe'e: Xee ndaikuaai — he'i.

⁵⁶ Huvixave aipoe'i ju:

— Eporandu ha'vy mava'e ra'y pa ha'e va'e kunumi va'e — he'i.

⁵⁷ Ha'e gui ma filisteu ojukaague gui Davi ojeyv ju ma ramo Abner ogueraa Saul oĩa py, filisteu akāgue opo py ogueru reve.

⁵⁸ Ha'e ramo Saul oporandu:

— Kunumi, mava'e ra'y tu ndee?

Davi ombovai:

— Xee nerembiguai ma Belém pygua Jessé ra'y aiko — he'i.

18

Davi reve Jônatas joayvuague

¹ Ha'e gui Saul reve Davi ijayvupa ma ramo ta'y Jônatas onhe'ē py joayvu Davi reve. Jônatas ha'e ae ojeayvua rami oayvu.

² Ha'e va'e ára guive Saul oĩa py ae omombyta Davi, tuu ro katy nomondoukavei.

³ Davi reve Jônatas ojapo peteī rami ikuai aguā, ha'e ae ojeayvua rami oayvu py.

⁴ Ha'e rami vy Jônatas oao puku oiporu va'ety omboi vy ome'ē Davi pe, tembiporu joe opu'āa pygua guive: kyxe, guyrapa ha'e ku'akuaa.

⁵ Davi oo tema 'rã Saul omoudoukaa py rei, ha'evea rami meme ojapo oikovy. Ha'e ramo ipo py Saul omboaxa oxondaro kuery opena aguã. Heta va'e kuery ojou porãmba okuapy, Saul rembiguai kuery ikuai va'e voi.

Kunhague oporaeia Saul oendu vy ivai oinyague

⁶ Ha'e gui Saul oxondaro kuery reve oupa jave Davi avi ojevvy filisteu kuery ojukaague gui. Ha'e ramo kunhague Israel tetã py ikuai va'e ha'e javi oẽmba huvixa Saul ovaexĩ vy. Oporaei oje'oiivy, pandeiro reve ojeroky guive. Ovy'a oje'oiivy mba'epu reve.

⁷ Kunhague ovy'a reve jorire-rire'i oporaei vy

— Saul ma mil ojuka va'ekue,

ha'e rã Davi ma dez mil peve ojuka va'ekue — he'i oje'oiivy.

⁸ Ha'e rami ijayvu rã Saul oendu vy ivai vaipa oiny, ha'e va'e ayvu nombovy'ai ete rã. Ha'e aipoe'i:

— Davi pe ma “Dez mil peve ojuka va'ekue” he'i kunhague, ha'e rã xeivy pe ma “Mil ete'i ojuka va'ekue” he'i. Anhetẽ ixupe oata va'e ma huvixarã oĩ aguã anho — he'i.

⁹ Ha'e va'e ára guive Saul ndoexaxe porãvei Davi.

¹⁰ Ko'ẽ jevvy Saul re nhe'ẽ vai Nhanduete ombou va'ekue oĩ ramo ivaiã re anho oĩ ngoo py. Ha'e rã Davi ma jypyguare rami ae ixã reta va'e ombopu oiny. Saul ma hu'y guaxu oguereko opo py.

¹¹ Ojeupe “Anhyvõ 'rã Davi oo mbotyã reve” he'i vy omombo teĩ Davi ojevvy uka. Hu'y guaxu mokoĩgue omombo teĩ Davi ojevvy uka kuerei.

¹² Davi reve SENHOR oiko rã Saul okyje ixugui, Saul-a gui ma SENHOR ojepe'a riere.

¹³ Ha'e rami vy Saul oĩa gui omoudouka ju Davi, ha'e vy mil xondaro kuery re ju omopena. Ha'e ramo oxondaro kuery reve oẽ ha'e ojevvy 'rã heta va'e kuery oexaa py.

¹⁴ Davi reve SENHOR oiko rã ha'evea rami meme ojapo.

¹⁵ Ha'e ramo Saul ma Davi ha'evea rami ojapo oikovya oexa vy okyjeve tema ixugui.

¹⁶ Ha'e rã Israel ha'e Judã kuery ha'e javi ma oayvu okuapy Davi, mba'eta ha'e kuery oexaa py oxondaro kuery reve oẽ ha'e ojevvy 'rã.

Saul Davi ojuka ukaxeague

¹⁷ Ha'e gui Saul aipoe'i Davi pe:

— Ne'exa, apy ma oĩ xerajy guaimive va'e Merabe. Ame'ẽ 'rã ndera'yxyrã. Ha'e gui ndee ma xeivy anho 'rã reiko xera'y ipy'a guaxu va'erã, SENHOR pe vy rejoguero'a aguã — he'i, ojeupe ae “Xepo py e'ỹ 'rã oiko vai, ha'e rã filisteu kuery po py” he'i vy.

¹⁸ Ha'e ramo Davi ombovai vy aipoe'i Saul pe:

— Ha'e rami avi marã ramigua tu xee, ha'e mba'eta tu xereko, ha'e xeru kuery marã ramigua tu ikuai Israel yvy re, xeruvixa rajy me xee aiko aguã? — he'i.

¹⁹ Ha'e rami teĩ Davi pe Saul guajy Merabe ome'ẽ 'rãgue py amboae pe ome'ẽ ta'yxyrã, Meolã pygua Adriel pe.

Mical Davi oayvu vy hexe omendaague

²⁰ Ha'e rã Saul rajy mboae Mical ma oayvu Davi. Ha'e nunga Saul pe omombe'ua rã oendu vy ovy'a vaipa.

²¹ Mba'eta ojeupe aipoe'i: “Xerajy Mical ae 'rã ame'ẽ ixupe, oiko aguã nhuã imbo'arã, filisteu kuery ojuka aguã”, he'i vy.

Ha'e rami vy Davi pe Saul aipoe'i:

— Kova'e xerajy mokoĩa va'e re ma aỹ xerajy me 'rã reiko — he'i.

²² Saul aipoe'i uka guembiguai kuery pe:

— Pendeayvu ke Davi pe ha'e ae'ia py. Ha'e vy aipopeje 'rã: “Ne'exa, huvixa ma nderayvu vaipa, hembiguai kuery ha'e javi nderayvu avi. Eiko ha'vy huvixa rajy merã”, peje 'rã.

²³ Ha'e rami Davi pe Saul rembiguai kuery ijayvu rã ombovai:

— Pavẽ gui xeporiaukueve va'eri huvixa rajy me ta ri ty'y aiko? — he'i.

²⁴ Ha'e rami ijayvuague Saul rembiguai kuery ixupe omombe'u vy aipoe'i:

— Po rami ma Davi ijayvu.

²⁵ Saul aipoe'ive ju:

— Po rami aipopeje ju 'rã Davi pe: “Oreruvixa ma mba'eve ndoipotai reme'ẽ tajy re remenda aguã, cem filisteu kuery pirekue e'ỹ vy, ngovaigua kuery re ojevvy uka aguã” peje 'rã — he'i Saul, mba'eta oipotã filisteu kuery po py Davi omano.

²⁶ Ha'e va'e ayvu Davi pe Saul rembiguai kuery omombe'u rã ovy'a vaipa huvixa rajy merã oiko aguã. Ha'e rami vy oa'angaague ára ovaẽ e'ỹ mbove

²⁷ Davi opu'ã vy ojevvyguã kuery ogueraa vy ojuka duzentos filisteu regua. Ipirekue omboipa heruvy vy ome'ẽ huvixa pe, tajy me oiko aguã. Ha'e ramo ta'yxyrã Saul ome'ẽ guajy Mical.

²⁸ Ha'e nunga Saul oexa vy oikuaa Davi reve SENHOR anhetẽ oikoa, ha'e tajy Mical Davi oayvua guive oexa.

²⁹ Ha'e rami vy Davi gui Saul okyjeve oikovy vy nda'ija'ei ae tema hexe.

³⁰ Filisteu yvatekueve pegua xondaro kuery joguero'a vy oje'oi nhavõ Saul rembiguai kuery ikuai va'e gui Davi ojukave 'rã. Ha'e ramo hery opa rupi oendupaa.

¹ Ha'e gui ma gua'y Jônatas pe Saul ijayvu Davi ojuka aguã re, guembiguai kuery ha'e javi pe guive. Ha'e rami teĩ Saul ra'y Jônatas Davi oayvu ete vy

² omombe'u ixupe. Ha'e vy aipoe'i:

— Xeru Saul ndejuka ukaxe. Enheangu ke ko'ê rã aje'ivekue guarã. Tereo renhemi aguã katy, epyta ha'e py ae.

³ Ha'e rã xee ma aa 'rã xeru reve nhuũndy rupi reĩa katy'i peve. Xeru reve xeayvu 'rã ndere, ha'e aexa 'rã oiko va'e. Ha'e gui ma aikuaa uka 'rã ndevy — he'i.

⁴ Ha'e gui ma nguu Saul reve Jônatas ijayvu porã Davi re. Ha'e vy aipoe'i:

— Xeruvixa, ejejavy eme nerembiguai Davi rovai, mba'eta ndevy pe ndojapo vai. Ha'e rami 'rãgue py ndevy ojapo oikovy va'e ma iporã va'e meme.

⁵ Mba'eta ndojeayvuve reve filisteu kuery ojuka reta ramo SENHOR ogueraa jepe Israel kuery. Ndee ae voi rexa vy roeroy'a va'ekue. Mba'e re 'rã'vy rejevavy heko porã'i va'e ruguy remoê vy, Davi rejuka rive vy? — he'i.

⁶ Ha'e rami Jônatas ijayvu 'rã Saul oendu vy oura:

— Anhetê ete SENHOR oikove va'e rupi aura vy aipoa'e: Davi ma nomanoi 'rã — he'i.

⁷ Ha'e rã Jônatas Davi oeno'ũ uka vy ixupe omombe'upa tuu ijayvuague ha'e javi. Ha'e rami vy Saul oĩa py ju ogueru. Ha'e ramo henonde rupi ju oiko jypyguare rami ae.

Peteĩgue ju Saul Davi ojuka ukaxeague

⁸ Ha'e gui teĩgue ju oiko joe opu'ãa. Ha'e ramo filisteu kuery reve Davi joguero'a vy oitypa ramo onhamba okuapy ixugui.

⁹ Ha'e rã Saul re ma nhe'ê vai ju oĩ SENHOR ombou va'ekue. Ngoo py uguapy oiny, opo py hu'y guaxu oguereko reve. Henonde Davi ombopu oiny mba'epu ixã reta va'e.

¹⁰ Ha'e rami vy Davi re Saul hu'y omombo xapy'a oo mbotya reve onhyvõxe vy, teĩ ojeavy uka rã hu'y guaxu ipija oiny oo mbotya re. Ha'e ramo Davi onha vy oo jepe.

¹¹ Ha'e va'e pyavyve Saul omondouka guembiguai kuery Davi ro py, oarõ vy aje'ive reve ojuka aguã. Ha'e nunga Davi pe ta'yxy Mical omombe'u vy

— Kova'e pyávy ndereo jepei ri vy ko'ê rã ndejukaa 'rã — he'i.

Mical nguu ombotavy ramo Davi oo jepeague

¹² Ha'e gui Mical ma janela yvate oĩ va'e gui omboguejy Davi. Ha'e ramo onha ovy vy oo jepe.

¹³ Mical ojopy peteĩ ta'angaa ngopy oguereko va'e. Ha'e va'e ma tupa py omonheno vy inhakã re omoĩ peteĩ ajukue kavara rague guigua, ha'e ao puku py ju onhovãmba inony.

¹⁴ Saul rembiguai kuery Davi reraarã ombou va'ekue pe ma ta'yxy ijayvu vy

— Imba'eaxy oupy — he'i.

¹⁵ Ha'e rire Saul guembiguai kuery omondouka ju Davi oexa ete aguã. Ha'e vy aipoe'i ha'e kuery pe:

— Peru tema hupa reve teĩ, ajuka aguã — he'i.

¹⁶ Ha'e ramo hembiguai kuery oo ju vy tupa py oexa rã ta'angaa oo pygua ae itui ra'e, ha'e inhakã re ajukue kavara rague guigua oĩ.

¹⁷ Ha'e ramo guajy Mical pe Saul aipoe'i:

— Mba'e re tu nami xembotavy vy remondouka xerovaigua?

Mical ombovai:

— Mba'eta ha'e aipoe'i xeivy: “Eja taa. Ha'e rami e'ỹ ramo xee rojuka 'rã”, he'i va'ekue.

Guembiguai kuery reve Saul ayvu omombe'u okuapyague

¹⁸ Ha'e rami py Davi onha vy oo jepe. Ha'e vy Ramá tetã py Samuel oĩa py ovaê vy ixupe omombe'u Saul ojapoague ha'e javi. Ha'e rami vy Samuel reve ojepe'a vy profeta kuery ro oĩ va'e py ju oiko.

¹⁹ Ha'e gui Saul pe aipo'ea:

— Davi je Ramá tetã py oiko profeta kuery ro py — 'ea.

²⁰ Ha'e rami rã Saul omondouka guembiguai kuery Davi ogueru aguã. Ha'e kuery oo vy oexa profeta kuery ikuai va'e ayvu omombe'u okuapy rã. Samuel voi oĩ ha'e kuery roayvu py. Saul rembiguai kuery re voi ou Nhanderueete Nhe'ê, ha'e ramo ha'e kuery omombe'u avi okuapy ayvu.

²¹ Ha'e nunga Saul pe omombe'ua rã oendu vy guembiguai kuery mboae ju omondouka. Ha'e rã ha'e kuery voi omombe'u avi ayvu. Ha'e ramo Saul ma mboapykuea ju omondouka. Ha'e kuery voi omombe'u avi ayvu.

²² Ha'e ramo ha'e ae ma voi oo Ramá tetã py. Ygua tuvixa va'e Seco tekoa katy'i oĩ va'e py ovaê vy oporandu:

— Mamo tu ikuai Davi ha'e Samuel?

Ombovai vy

— Ha'e kuery ma Ramá tetã py ikuai profeta kuery ro py — 'ea.

²³ Ha'e ramo Ramá tetã py profeta kuery ro oĩ va'e katy oo. Ha'e rã hexe voi Nhanderueete Nhe'ê ou. Ha'e ramo oguata ovy ramive ayvu omombe'u ovy Ramá py profeta kuery ro oĩ va'e py ovaê peve.

²⁴ Ha'e py ma oao puku omboi vy omombe'u oiny ayvu Samuel renonde. Ha'e rami onheno oupy ha'e va'e ára re, pytũ mbukukue re guive. Ha'e rami rã aipo'ea:

— Saul voi teve oiko profeta kuery va'e regua?

20

Davi ha'e Jônatas joayvu eteague

- ¹ Ha'e gui Ramá tetã py profeta kuery ro oĩ va'e gui Davi onhave ju ovy. Ha'e vy aipoe'i Jônatas pe:
— Mba'e tu xee ajapo? Mba'e nungakue py tu ajevavy? Mba'e py tu xee ajapo vai nderu pe, xejuka ukaxe aguã?
- ² Ombovai:
— Ha'e nunga ndoikoi 'rã. Nanderejukai 'rãe. Xeru ma ndojapoi 'rã mba'eve, tuvixa va'e nei kyrĩ'i va'e xevey ranhe omombe'u e'ỹ re. Mba'erã tu xeru ha'e ramigua ndoikuaa ukai 'rã xevey? Ha'e nunga ndoikoi 'rãe — he'i.
- ³ Ha'e rã Davi oura reve ombovai:
— Nderu ma oikuaa ae ndee xemboaxya. Ha'e nunga rupi ojeupe ae aipoe'i: “Jônatas toikuaa eme ha'e nunga, iporiau e'ỹ aguã”, he'i va'ekue. Anhetẽ ete SENHOR oikove va'e rupi, ha'e ndee Jônatas nderekove rupi avi aura vy aipoa'e: Xee amano aguã ovaẽ rai'i ma — he'i.
- ⁴ Ha'e rami rã Jônatas aipoe'i Davi pe:
— Ndee reipota va'e tema xee ajapo 'rã.
- ⁵ Davi ombovai:
— Ko'ẽ ramo oiko 'rã ngaru jaxy pyau pygua, huvixa reve xee akaru ainy aguã 'rãgue. Va'eri tove taa nhuũndy rupi anhemí aguã, mboapy araa ka'arukue peve.
- ⁶ Ha'e gui xee naña nderu oikuaa rã ndee aipo're 'rã: “Davi ojerure kuri Belém guetã katy oo aguã re, mba'eta ha'e py hetarã kuery ha'e javi 'rã ojapo mymba ome'ẽ okuapy aguã ma'et'ya nhavõ”, re 'rã.
- ⁷ Ha'e ramo xapy'a rei nderu “Ha'eve” he'i ramo xee nerembiguai aiko porã 'rã. Teĩ ivai ri ramo reikuaa ma 'rã xejukaxea.
- ⁸ Xee nerembiguai pe exa uka xemboaxya, xereve SENHOR renonde peteĩ rami jaiko aguã rami rejapo rire. Ha'e rami e'ỹ rã xapy'a rei xere ha'eve'ỹ va'e oĩa reikuaa vy ndee ae xejuka. Mba'e re 'rã tu nderu pe xemboaxa? — he'i.
- ⁹ Jônatas ombovai:
— Ha'e nunga ma ndoikoi 'rãe ndere. Xeru ndejukaxea aikuaa ri vy aju voi 'rã ndea py, xee ae amombe'u aguã — he'i.
- ¹⁰ Davi oporandu Jônatas pe:
— Ha'e rami rã nderu ivai reve ri ombovai rã mava'e tu ou 'rã xevey pe omombe'u aguã?
- ¹¹ Jônatas ombovai:
— Eju ha'vy, jaa nhuũndy rupi — he'i. Ha'e vy jogueraa.
- Davi reve peteĩ rami ikuai aguã Jônatas ojapoague*
- ¹² Ha'e gui Jônatas aipoe'i Davi pe:
— SENHOR Israel kuery ruete oendua py aipoa'e: Ko'ẽ rã e'ỹ vy ko'ẽ mboae ramo aikuaa pota 'rã xerua py. Xapy'a rei ndee Davi pe ha'e ojapo porãxe ri ramo xee amombe'u uka 'rã.
- ¹³ Ha'e rami avi xapy'a rei xeru ndejukaxe teĩ ndevy xee ndaikuaa ukai ri ramo reo jepe aguã rami, ha'e ramo tove SENHOR xee Jônatas taxembopaga ha'e ae oipotaa rami. SENHOR toiko ndereve, xeru reve oikoague rami.
- ¹⁴ Ha'e gui xapy'a rei xee aikove teri ramo xemboaxy ke SENHOR rami, amano e'ỹ aguã.
- ¹⁵ Ha'e yvy gui SENHOR omomba teĩ ndee Davi rovaigua kuery ha'e javi, ha'e rami teĩ emboaxy e'ỹ eme xero pygua kuery — he'i.
- ¹⁶ Ha'e rami Davi ro pygua kuery re Jônatas oma'ẽ vy ojapo peteĩ rami ikuai aguã. Ha'e vy aipoe'i:
— Tove SENHOR tombopaga Davi rovaigua kuery ha'e javi — he'i.
- ¹⁷ Teĩgue ju Jônatas ojapo Davi oayvua rupi oura aguã rami, mba'eta Jônatas oayvu onhe'ẽ ha'e javi py.
- ¹⁸ Ha'e gui Jônatas aipoe'ive:
— Ko'ẽ ramo oiko 'rã ngaru jaxy pyau pygua. Ha'e va'e py oporandua 'rã ndere, nerenda oĩ rive ramo.
- ¹⁹ Mboapy araa py ma reo pojava 'rã jypy renhemíague katy, Ezel py itaova rovai hi'ãa py 'rã repyta.
- ²⁰ Ha'e gui xee ma ha'e katy amombo 'rã mboapy hu'y, itaova re rive omombo va'e rami.
- ²¹ Ha'e rami vy amondouka 'rã kunumi va'e, “Tereo, eka hu'y”, ha'e vy. Ha'e va'e gui xapy'a rei kunumi va'e pe “Ne'exa, hu'y tu kyvõ'i rami ikuai, eru”, ha'e ramo ke eju ju Davi, mba'eta anhetẽ ete SENHOR oikove va'e rupi aura vy aipoa'e: Reiko porã 'rã, mba'eve gui rekyje e'ỹ re.
- ²² Ha'e rami teĩ xapy'a rei kunumi va'e pe “Neĩ ke, hu'y nderovaive'i ma ikuai”, ha'e ramo tereo, SENHOR nemondouka ramo.
- ²³ Ha'e gui jajogueroayvuague rami vy nhanembyte SENHOR oĩ 'rã raka'e rã peve — he'i.
- ²⁴ Ha'e rami rã Davi oo vy nhuũndy rupi onhemí.
Ha'e gui ngaru jaxy pyau pygua oiko jave py ma huvixa ma mesa py oĩ okaru aguã.
- ²⁵ Gueko rami vy guenda py ae oĩ oo mbotya yvy'iry. Jônatas ma henonde'i oĩ, ha'e gui Saul yvy'iry ma Abner oĩ avi. Ha'e rã Davi renda ma oĩ rive.
- ²⁶ Ha'e rami teĩ ha'e va'e ára ma Saul mba'eve nde'i, ojeupe ae “Davi re ko mba'emo rei oĩ rã ha'eve'ỹ va'e teri oiko, onhemongy'a uka va'ekue ae 'rã”, he'i vy.
- ²⁷ Ko'ẽ jevy ha'ekue rami ae ju oiko moko'ĩ araa ma ngaru jaxy pyau pygua. Davi renda oĩ rive ae tema.
Ha'e ramo Saul aipoe'i gua'y Jônatas pe:

— Mba'e re tu Jessé ra'y ndoui okaru vy, kuee neĩ aỹ ma voi?

²⁸ Jônatas ombovai:

— Davi ijavyv porã'ia rupi ojerure xevy Belém tekoa katy oo aguã re.

²⁹ Ha'e vy aipoe'i xevy: “Ajerure aa aguã, mba'eta xeretarã kuery mba'emo ome'ẽ aguã rami ikuai tekoa py. Ha'e vy xeretarã kuery va'e regua onhea'ã rei xereraa aguã re. Aỹ ha'eve ri ramo ajerure aa aguã re, xeregua kuery aexapa aguã”, he'i rire. Ha'e nunga rupi ae ndoui xeruvixa ngaru rejapoa py.

Jônatas pe Saul ivai reve ijavyvague

³⁰ Ha'e ramo Saul ma Jônatas pe ae ivai. Ha'e vy aipoe'i:

— Kunha heko vai ha'e inhakã ratã va'e pi'a! Xee ndaikuaai teve Jessé ra'y reiporavoague nemoxĩmbaarã, ha'e ndexy nekuavãare voi oximba aguã?

³¹ Ha'e nunga rupi Jessé ra'y yvy re oikovea ja neĩ ndee ma voi riae ndereikoi 'rã, neĩ repenaa voi noĩ atãĩ 'rã. Eru ruka ha'vy aỹ ma voi, ajuka 'rãe — he'i.

³² Ha'e ramo Jônatas ombovai vy aipoe'i nguu Saul pe:

— Mba'e re 'rã ha'vy rejuka? Mba'e tu ojapo vai?

³³ Ha'e rami teĩ hexe Saul omombo hu'y guaxu onhyvõ aguã. Ha'e rami rã Jônatas oikuaa anhetẽ ae tuu onhembopy'aa Davi ojuka aguã.

³⁴ Ha'e rire Jônatas ivai vy mesa gui opu'ã ovy. Mokoĩ araa ma ngaru jaxy pyau pygua va'e ára ma ndokarui, tuu ha'e rami ete Davi re ijavyv rã iporiau vy.

Jônatas Davi mondoukaa rupi ijavyvague

³⁵ Ko'ẽ jevy Davi reve Jônatas oa'angaague ára py oo nhuũndy katy. Ogueraa avi peteĩ guembiguai kunumi va'e.

³⁶ Kunumi va'e pe

— Enha ke hu'y amombo rã reru aguã — he'i. Ha'e ramo ha'e va'e onha jave omombo peteĩ hu'y henonderã katy.

³⁷ Jônatas hu'y omombo va'ekue ho'aague py kunumi va'e ovaẽ ramo Jônatas ojapukai ixupe. Ha'e vy aipoe'i:

— Nderovaive'i e'ỹ teve hu'y ho'a?

³⁸ Teĩgue ju Jônatas ojapukai:

— Neĩ ejapura ke, neakuã ta'vy — he'i. Ha'e ramo kunumi Jônatas rembiguai hu'y ojopy ma vy ojevuy ju herekoa oĩa py.

³⁹ Kunumi va'e mba'eve ma voi ndoikuai. Jônatas ha'e Davi anho'i oikuaa ha'e nunga.

⁴⁰ Ha'e gui ma kunumi ogueru va'ekue po py Jônatas omoĩ guapa. Ha'e vy aipoe'i:

— Tereo, eraa tetã katy.

⁴¹ Kunumi va'e oo'i ramove Davi opu'ã ovyv kuaray puku-a katy oĩague gui. Mboapykue oĩ guenapy'ã re, ngova yvy re omovaẽ reve. Ha'e vy Jônatas reve mokoĩve joavyv vyve ojae'o. Davi ma ojae'ove oiny.

⁴² Jônatas aipoe'i Davi pe:

— Tereo porã'i ke, nhande mokoĩve SENHOR rery rupi jaura vy “ SENHOR toĩ nhanembyte, ha'e gui xero pygua ha'e ndero pygua kuery mbyte avi”, ja'e rire — he'i.

Ha'e ramo Davi opu'ã ovy. Ha'e rã Jônatas ma tetã katy ju ojevuy.

21

Sacerdote Aimeleque oĩa py Davi ooague

¹ Ha'e gui ma Nobe tetã py Davi ovaẽ sacerdote Aimeleque oĩa py. Ha'e ramo Aimeleque ma Davi ou rã oexa vy oryryipa reve oẽ ovaexĩ vy. Ha'e vy aipoe'i:

— Mba'e re tu ndee ae'i reju? Mava'eve pa ndoui ndereve?

² Davi ombovai sacerdote Aimeleque pe:

— Huvixave xembou vy aipoe'i: “Mava'eve toikuaa eme mba'e re pa romondoukaa, ha'e mba'e nunga rupi paa voi”, he'i va'ekue. Ha'e rã xevygua xondaro kuery pe ma aipoa'e peteĩ henda py rojoexa ju aguã rami.

³ Aỹ ma mba'e tu rereko apy ndepo py? Eme'ẽ xevy peteĩ nhiruí mbojape, e'ỹ vy rereko va'e rei tema — he'i.

⁴ Sacerdote ombovai vy Davi pe aipoe'i:

— Mbojape rive'i ma ndarekoi xepo py. Mbojape icy'a e'ỹ va'e anho oĩ. Ha'e rami avi nderevegua avakue kunha reve nhogueronheno ve'ỹ teri va'e pe ma guive rã — he'i.

⁵ Davi ombovai vy aipoe'i sacerdote pe:

— Tã, ha'e rami ae jepi, rojoguero'a aguã katy roo nhavõ nda'evei ae kunhague reve roĩ aguã. Ha'e rami vy xerevegua avakue nonhemoete ky'ai 'rã roo rivea rupi, ha'e gui aỹ katuve ma nda'iky'aive ma 'rã — he'i.

⁶ Ha'e rami rã sacerdote ome'ẽ mbojape icy'a e'ỹ va'e, amboae regua ha'e py nda'ipoi rã. Mbojape icy'a e'ỹ va'e anho oĩ, SENHOR renonde gui oguenoẽ mbyre, hi'ára py porã omboekovia rire mbojape haku rei teri va'e re.

⁷ Ha'e va'e ára py oĩ ra'e peteĩ Saul rembiguai regua, SENHOR renonde oĩ aguã rami oiko va'e ae. Doegue hery va'e, Edom pygua, Saul rymba kuery re opena va'e.

⁸ Ha'e gui Davi aipoe'i Aimeleque pe:

— Ndererekoi pa hu'y guaxu, e'y vy kyxe? Mba'eta xee ndarekoi kyxe nei xerembiporu ma voi, huvixa zembou pojava ra.

⁹ Sacerdote ombovai:

— Apy oi va'e ma kyxe filisteu Golias Ela yvugua py rejuka va'ekue mba'ekue. Manto sacerdote pegua'a katy oi ajukue py onhovã mbyre. Reraaxe vy ke eraa, mba'eta amboae nda'ipoi kova'e anho e'y vy — he'i.

Davi aipoe'i:

— Amboae nda'ipoi ri ha'e va'e ramigua. Eme'e xevy.

Gate pygua huvixa Aquis oia katy ojavaague

¹⁰ Ha'e va'e ara Davi opu'a vy ojava ovy Saul gui. Ha'e vy Gate pygua huvixa Aquis oia py ju ovaẽ.

¹¹ Ha'e rami teĩ Aquis pe hembiguaĩ kuery aipoe'i okuapy:

— Peva'e pa Davi ovy re huvixa opena va'e e'y teve? Ixupe e'y teve ojeroky reve oporaei reve "Saul ma mil ete'i ojuka, ha'e ra Davi ma dez mil peve ojuka va'e", he'i okuapyague va'e? — he'i okuapy.

¹² Ha'e rami ijavyu ra Davi oendu vy ima'endu'a riae oikovy ha'e ae'i. Ha'e rami vy Gate pygua huvixa Aquis gui okyje.

¹³ Ha'e rami vy ha'e kuery oexaa py onhembotavy rei vy inhaka porã e'y va'e rami oiko. Ha'e vy okẽ yta rupi oikaraĩmba, ha'e hendyry xyrypa rei oikovy guendyva rupi.

¹⁴ Ha'e ramo Aquis aipoe'i guembiguaĩ kuery pe:

— Pexa ma kova'e ava na'inhaka porãia va'eri. Mba'e re tu xea py peru?

¹⁵ Xevy pe oata ri ty'y inhaka porã e'y va'e, ha'e va'e peru avi aguã, xerenonde inhaka vai rei oikovy aguã? Ha'e va'e voi ri ty'y oike 'ra xero py? — he'i.

22

Adulão ha'e Moabe py Davi onhemiague

¹ Ha'e rami ra Davi ha'e gui oo vy Adulão katy'i itakua oi va'e py ju onhemi. Ha'e py ha'e oikoa tyke'y kuery ha'e tuu ro pygua kuery ha'e javi oendu vy oupa ha'e py hexeve ikuai aguã.

² Hexe onhemoirũ avi avakue mba'emo py ojavurapa rei va'e ha'e javi, oreve va'e e'y vy ndovy'ai rei va'e. Ha'e ra ha'e ma oiko ha'e kuery re opena va'e. Ha'e javi vy hexeve ikuai quatrocentos avakue rivyvyi.

³ Ha'e va'e gui Davi oo ju Moabe regua Mispã katy. Ha'e rami vy ha'e pygua huvixa pe aipoe'i:

— Toiko xeru ha'e ha'i pendereve, mba'e pa Nhanderuete xere ojapo 'raa aikuaa peve — he'i.

⁴ Ha'e rami vy Moabe pygua huvixa oia py ha'e kuery ogeru ramo hexeve ikuai, Davi itakua py oikoa ja.

⁵ Ha'e gui profeta Gade aipoe'i Davi pe:

— Epytave eme apy. Tereo, Judã yvy re ju eike — he'i ramo Davi oẽ vy Herete ka'aguy'i re ju oo.

Nobe py sacerdote ikuai va'ekue Saul ojuka ukapaague

⁶ Davi ha'e hexevegua avakue ikuaiã oikuaa okuapy. Ha'e nunga Saul pe omombe'ua ra oendu. Ha'e jave py Saul ma Gibea py oi, vyvra-vyra'i guy py, yvy'a'ia re. Opo py ogereko hu'y guaxu, ha'e hexeve hembiguaĩ kuery voi ikuai.

⁷ Ha'e va'e kuery pe aipoe'i:

— Benjamim ramymino kuery, pendu ke xeayvua! Pẽvy voi ty'y Jessẽ ra'y ome'e 'ra yvy ha'e uvaty? Peẽ kuery ha'e javi pendeapo 'ra ri ty'y mil ha'e cem re pepena aguã rami?

⁸ Ha'e rami aguã ae ri ty'y pejogueroayvu pekuapy xerovai? Mava'eve rei nomombe'ui xevy Jessẽ ra'y reve xera'y petei rami ikuai aguã re jogueroayvuaque. Peẽ kuery va'e regua peteive naxemboaxy vy xevy napemombe'ui xera'y eteve voi xerembiguaĩ reve xemoingo axy aguã rami jogueroayvuaque, aỹ minha jaexaa rami — he'i.

⁹ Ha'e ramo Edom pygua Doegue ma ombovai, Saul rembiguai kuery mboae reve hi'aĩ avia py. Ha'e vy aipoe'i:

— Ha'e gui xee ma aexa Jessẽ ra'y Nobe tetã py ovaẽ ra, Aitube ra'y Aimeleque oia py.

¹⁰ Ha'e gui ha'e ojerure ra Aimeleque oporandu SENHOR pe. Ha'e vy ixupe ome'e temb'i'u. Ixupe ome'e avi kyxe filisteu Golias mba'ekue — he'i.

¹¹ Ha'e rami ra huvixa onofũ aka sacerdote Aitube ra'y Aimeleque, ha'e tuu ro pygua kuery ha'e javi. Ha'e va'e kuery ma Nobe py sacerdote ikuai va'e. Ha'e ramo ha'e kuery ha'e javi ou okuapy huvixaa py.

¹² Saul aipoe'i:

— Aitube ra'y, endu ke xeayvua!

Ombovai:

— Apy ma aĩ, xeruvixa — he'i.

¹³ Ha'e ramo Saul aipoe'i:

— Mba'e re tu Jessẽ ra'y reve penhomongeta xerovai? Mba'eta ixupe reme'e mbojape ha'e kyxe. Hexe reporandu avi Nhanderuete pe, xerovai opu'a vy xejuka nhemi aguã, aỹ jaexaa rami — he'i.

¹⁴ Ha'e ramo Aimeleque ombovai vy huvixa pe aipoe'i:

— Ha'e rami avi mava'e ha'vy nerembiguaĩ kuery ikuai va'e regua Davi rami heko porã va'e? Ha'e ma nderajy me, nerarã kuery re opena va'e, ha'e ndero pygua kuery omboeteve okuapy va'e.

¹⁵ Tyrã aỹ ramo teve jypy'i Nhanderuete pe ajerure hexe? Any! Ndeayvu rive eme xee nerembiguaĩ re, nei xeru ro pygua kuery re. Mba'eta xee nerembiguaĩ va'e ma mba'eve aikuaa va'e'y, tuvixa va'e nei kyri'i va'e — he'i.

¹⁶ Ha'e rami teĩ huvixave ombovai:

— Aimeleque, ndee remano 'rã, nderu ro pygua kuery ha'e javi reve.

¹⁷ Huvixa aipoe'ive ju harõa kuery hexeve ikuai va'e pe:

— Peju, pejukapa SENHOR pegua sacerdotu kuery, mba'eta ha'e kuery voi Davi re onhemoirũ vy ojava rã oikuaa va'eri xevy ndoikuaa ukai rire — he'i teĩ hembiguai kuery ndojukaxei SENHOR pegua sacerdotu kuery.

¹⁸ Ha'e ramo Doegue pe ju huvixa aipoe'i:

— Eju, ejukapa sacerdotu kuery — he'i ramo Edom pygua Doegue ou vy ojukapa sacerdotu kuery. Ha'e va'e ára ojuka oitenta e cinco avakue manto sacerdotu pegua py onhemonde va'ekue.

¹⁹ Nobe tetã sacerdotu kuery rekoa py voi ojukapa kyxe py: avakue ha'e kunhague, kyrĩgue ha'e okambu'i va'e, vaka, mburika'i ha'e vexa'i kuery.

Davi reve Abiatar voi onhemiguague

²⁰ Aitube ra'y Aimeleque ra'y kuery regua ojukaa rã peteĩ'i anho oo jepe, Abiatar hery va'e. Ha'e va'e ma Davi oĩa katu onha ovy.

²¹ Ha'e vy ixupe omombe'u vy aipoe'i:

— Saul ma ojuka ukapa ma SENHOR pegua sacerdotu kuery.

²² Ha'e ramo Davi aipoe'i Abiatar pe:

— Xee aikuaa porã ae ma Edom pygua Doegue ha'e py oĩ rire nomombe'u e'yi 'rãe Saul pe. Xekáuxa ae nderu ro pygua kuery omanomba.

²³ Eiko ri xereve, ekyje eme, mba'eta xejukaxea ma ndee voi ndejukaxe avi. Xereve vy ma reo jepe 'rã — he'i.

23

Queila pygua kuery Davi ogueraa jepeague

¹ Ha'e gui ma Davi pe omombe'ua:

— Queila pygua kuery reve filisteu kuery joguero'a vy imondapa mba'emo ra'yĩgue re — 'ea.

² Ha'e rami rã SENHOR pe Davi oporandu vy aipoe'i:

— Ha'e gui xee aa vy pa aity 'rã filisteu kuery?

SENHOR ombovai vy aipoe'i Davi pe:

— Tereo, filisteu kuery peitypa 'rã, ha'e vy peraa jepe 'rã Queila pygua kuery — he'i.

³ Ha'e rami teĩ avakue Davi reve ikuai va'e aipoe'i:

— Apy Judá yvy re rive voi rokyye, ha'e gui Queila katu filisteu regua xondaro kuery rovai roje'oi vy katuve ma — he'i okuapy.

⁴ Ha'e rami rã Davi teĩgue ju oporandu SENHOR pe. Ha'e rã SENHOR ombovai vy aipoe'i:

— Peiko katu tema Queila katu peo aguã, mba'eta pendepo py amboaxapa 'rã filisteu kuery — he'i.

⁵ Ha'e ramo Queila katu Davi oje'oi hexevagua kuery va'e reve. Filisteu kuery rovai opu'ã vy ogueraapa ju mymba kuery imondaague. Heta avi ojuka ha'e kuery regua. Ha'e rami py Davi ogueraa jepe Queila pygua kuery.

⁶ Davi oĩa katu Aimeleque ra'y Abiatar ojava va'ekue Queila katu oo avi vy opo py ogueraa manto sacerdotu pegua.

⁷ Ha'e gui Saul pe omombe'ua Queila katu Davi ooague. Saul aipoe'i:

— Nhanderuete omboaxa ma xepo py. Ojejoko uka ma, peteĩ tetã hokẽ joko va'e py oike rire — he'i.

⁸ Ha'e rami vy Saul enoĩ ukapa ojepeguva kuery, joe opu'ã vy Queila katu oje'oi aguã, Davi ha'e hexevagua kuery ojokopa aguã.

⁹ Ha'e rami teĩ Davi oikuaa ae Saul ojukaxe oikovya. Ha'e vy aipoe'i sacerdotu Abiatar pe:

— Eru apy manto sacerdotu pegua — he'i ramo ogueru.

¹⁰ Ha'e gui Davi onhembo'e SENHOR pe:

— Xe-SENHOR Israel kuery ruete va'e, xee nerembiguai aendu Saul xekáuxa Queila tetã py ou vy ombovaipaxea.

¹¹ Ha'e gui Queila pygua avakue xemboaxa 'rã teve ipo py? Ha'e Saul ou ae 'rã teve, xee nerembiguai aendua rami? Ah SENHOR Israel kuery ruete, eikuaa uka ke xee nerembiguai pe.

SENHOR ombovai:

— Ou 'rã — he'i.

¹² Ha'e gui teĩgue ju Davi oporandu ixupe:

— Ha'e gui avakue Queila pygua xemboaxa 'rã teve Saul po py, xerembiguai kuery reve?

SENHOR ombovai ju:

— Penemboaxa 'rã ipo py — he'i.

¹³ Ha'e rami rã Davi ma hexeve avakue seiscentos ikuai va'e reve oiko katupa vy Queila gui oẽmba vy ooa katu rei oje'oi. Ha'e gui Queila rupi Davi ojava maa omombe'ua rã Saul oendu vy ndoo potavei.

¹⁴ Ha'e rã Davi ma tekoa e'ya rupi ae tema oiko onhemia py. Yvy'ã reia Zife tekoa e'ya re oiko. Saul ko'ẽ nhavõ oeka oikovy teĩ Nhanderuete nomboaxai ipo py.

Teĩgue ju Davi ha'e Jônatas peteĩ rami ikuai aguã re jogueroavyvague

¹⁵ Ha'e gui Saul ojukaxe vy oo jevyague Davi oikuaa vy opyta ranhe Horesa py Zife tekoa e'ya py.

¹⁶ Ha'e ramo Saul ra'y Jônatas opu'ã vy oo Davi oia katy Horesa py. Ha'e vy ombopy'a guaxuve Nhanderuete re ojeroviaa py.

¹⁷ Ha'e vy aipoe'i:

— Ekyje eme, mba'eta xeru Saul nandejoui 'rã. Ha'e rami 'rãgue py ndee ae 'rã repena Israel kuery re. Ndereve xee voi aĩ 'rã nepytyvõarã. Ha'e nunga xeru ae voi oikuaa porã — he'i.

¹⁸ Ha'e rami vy SENHOR renonde mokoive ojapo peteĩ rami ikuai aguã. Ha'e gui Davi opyta Horesa py, ha'e rã Jônatas ma ngoo katy ju ojevvy.

Zife pygua kuery Davi omboaxa nhemi aguã re ijayvu okuapyagua

¹⁹ Ha'e gui Zife pygua kuery oje'oi Gibeã katy Saul oia py. Ha'e vy aipoe'i:

— Ore kuery orerekoa Horesa py e'y teve Davi onhemi oikovy? Haquila yvy'ã reia rupi oiko Jesimom regua kuaray puku-a katy.

²⁰ Aỹ ma oreruvixa, tereo ndepy'a py rejou porãa rami vy. Ha'e gui ore kuery ma ndepo py romboaxa aguã rami 'rã roiko — he'i okuapy.

²¹ Saul aipoe'i:

— SENHOR tapenemoingo porã, xemboaxya rupi peiko rã.

²² Tapeo ha'vy peporandu porãve. Peikuaa pota porã mamo pa oikoa re, ha'e mava'e pa oexa jepi va'ea re. Mba'eta xevy omombe'ua ha'e oiko kuaa raxa va'ea rami.

²³ Ha'e nunga rupi pejapyxaka, peikuaa pota porã onhemiaty ha'e javi re. Ha'e gui ma pejevvy ju xea py pemombe'u porãve aguã, Judã regua mbovy e'y ikuai rupi teĩ ajou aguã — he'i.

²⁴ Ha'e rami rã ha'e kuery opu'ã vy Zife katy ju ojevvy Saul renonderã. Davi ha'e hexevegua avakue ikuai Maom regua tekoa e'ya py Jesimom katy, yvy joja reia oĩ va'e re.

²⁵ Hakykue Saul ha'e hexevegua avakue oje'oi rã Davi pe omombe'ua. Ha'e rami rã oo itaova pa'ũ tekoa e'ya Maom oĩ va'e katy. Ha'e nunga Saul oendu vy oo avi Davi rakykue tekoa e'ya Maom katy.

²⁶ Ha'e gui ma Saul ha'e hexevegua avakue oje'oi peteĩ yvy'ã katy, ha'e rã Davi ha'e hexevegua avakue ma amboae katy oje'oi. Davi ojapura Saul gui oo jepe aguã onha vy. Ha'e rami teĩ ha'e kuery ojoko Davi kuery ojopypa aguã.

²⁷ Ha'e gui Saul oia py ou peteĩ avvu mombe'ua. Ha'e vy aipoe'i:

— Ejapura ke ha'e tereo ju, mba'eta filisteu kuery oupa ma nhandevvy re — he'i.

²⁸ Ha'e rami rã Saul ojepe'a Davi rakykue ooa gui, filisteu kuery re opu'ã ovy aguã. Ha'e nunga rupi ha'e va'e tekoa omboerya Ita oo jepea.

²⁹ Ha'e va'e gui Davi oo vy En-Gedi py ju onhemi oĩ porã aguã py.

24

Davi Saul ndojukaiaague

¹ Filisteu kuery rakykue Saul ooague gui ojevvy jave omombe'ua ixupe:

— Davi ma En-Gedi tekoa e'ya re oiko — 'ea.

² Ha'e ramo Saul ogueraa trës mil avakue Israel kuery ha'e javi gui oiporavo va'ekue. Ha'e rami vy itaova pa'ũ ijavaete reia rupi oje'oi Davi ha'e hexevegua avakue rakykue.

³ Tape rupi ooa rupi ovaẽ vexa'i kuery kora oĩ va'e py. Ha'e py oĩ avi peteĩ itakua. Ha'e va'e py ma Saul oike, jai py opytaxea oendu vy. Ha'e va'e itakua py ae Davi oirũ kuery reve ikuai, iguyve katy onhemi okuapy.

⁴ Ha'e ramo Davi revegua avakue aipoe'i okuapy:

— Ange ma SENHOR aipoe'iaague ára: “Ndepo py amboaxa 'rã nderovaigua, reipotaa rami rereko aguã” he'iaague — he'i okuapy ramo Davi opu'ã mbeguei'i ovy vy ojaya Saul ao puku apy.

⁵ Ha'e rami teĩ Saul ao apy ojaya rire Davi oendu ipy'a tytyvea.

⁶ Ha'e rami vy hexevegua avakue pe aipoe'i:

— SENHOR taxejoko mba'emo rei xeruvixa re ajapo e'y aguã, hovai xepo amoĩ e'y aguã, SENHOR oiporavo va'ekue oiko rã — he'i.

⁷ Ha'e rami Davi ijayvu vy ojoko hexevegua avakue Saul rovai opu'ã okuapy gui. Ha'e gui Saul ma itakua gui oẽ ju vy oove tema.

⁸ Ha'e rire Davi voi opu'ã vy oẽ avi itakua gui. Ha'e rami vy ojapukai ho'amy Saul pe. Ha'e vy aipoe'i:

— Huvixave, xeruvixa!

Saul guakykue re oma'ẽ ramo Davi guenapy'ã re oĩ omboetea rupi, ngova yvy re omovaẽ reve.

⁹ Ha'e vy Davi aipoe'i Saul pe:

— Mba'e re tu rejapyxaka 'rã avakue “Davi ndejukaxe”, he'i va'e kuery re?

¹⁰ Mba'eta nderexa py ae rexa ange kova'e itakua py SENHOR xepo py SENHOR nemboaxa rã. Ha'e gui amongue aipoe'i rojuka aguã teĩ xee ma ndorujukai, mba'eta aipoa'e: “Xee namoĩ 'rã xepo xeruvixa re, Nhanderuete oiporavo rire”, ha'e kuri.

¹¹ Ema'ẽ ha'vy xeru, exa apy xepo py ndeao apykue areko va'e. Ndeao apy'i rive xee ajaya kuri rojuka 'rãgue py. Eikuaa pota ha'vy rexa aguã xere noia romoingo axy aguã. Xee ma mba'eve ndajapoxei ndere, ndajapo vai ndevvy, ndee xejukaxe vy xereka reikovy teĩ.

¹² SENHOR toikuaa pota xere ha'e ndere, SENHOR ae tanembopaga xere rejapo vaiague re, ha'e rã xee ma namoĩ 'rã xepo ndere.

¹³ Ymagua kuery ayvu omombe'u vy “Heko vai va'e gui ae oiko teko vai”, he'iaty rami ae. Ha'e rã xee ma namoi 'rã xepo nderovai.

¹⁴ Ha'e gui mava'e rakykue tu ndee Israel pygua huvixa va'e reo? Marã ramigua tu rejopyxe? Peteĩ jagua re'õgue ri ty'y? Tyrã pa peteĩ jagua ky teve?

¹⁵ SENHOR toikuaa pota xere, toikuaa pota xere ha'e ndere, toexa pota porã, taxemboeko porã, xevy pe tojapo ha'evea ramigua, ha'e taxereraa jepe ndepo gui — he'i.

¹⁶ Ha'e rami Davi ijayvupa ma ramo Saul ombovai:

— Pova'e ae pa ndeayvua, xera'y Davi? — he'i vyve ojae'o atã.

¹⁷ Aipoe'ive Davi pe:

— Ndee ma xegui ndereko porãve va'e, mba'eta mba'emo porã anho rejapo xere, ha'e rã xee ma mba'emo vai ajapoxe ndere.

¹⁸ Ange rexa uka xere rejapo porãa. Ndepo py SENHOR xemboaxa teĩ ndee ndaxejukai.

¹⁹ Mba'eta mava'e nda'u ngovaigua ojou teĩ omondouka porã rive 'rã tape rupi? SENHOR tome'ẽ ndevy mba'emo porã ange xere nderejapo vaiague re.

²⁰ Aỹ aikuaa porã ma ndee ae 'rã huvixave reiko, ha'e Israel kuery re repena oĩ atã 'rã ndepo py.

²¹ Ha'e nunga rupi eura ke xevy SENHOR re, xeguigua kuery remomba e'ỹ aguã, xerery rembogue e'ỹ aguã xeru ro gui — he'i.

²² Ha'e rami rã Saul pe Davi oura ramo oo ju ngoo katy. Ha'e rã Davi ma hexeve avakue reve oje'oi peteĩ henda py onhemi jevy aguã.

25

Samuel omanoague

¹ Ha'e gui Samuel omano. Ha'e ramo Israel kuery ha'e javi ono'õmba vy ojae'o okuapy. Hekoague py ae onhono porã, Ramã tetã py. Ha'e va'e rire Davi opu'ã vy oove ju Parã tekoa e'ỹa katy.

Nabal rekoa py Davi kuery ova'ẽ jave guare

² Oiko peteĩ ava Maom pygua, Carmelo katy'i ijyvy va'e. Ha'e va'e ma oguerekopa va'e, trẽs mil vexa'i ha'e mil kavara oguereko va'e. Ha'e vy vexa'i rague ojaya oikovy Carmelo py ae.

³ Ha'e va'e rery ma Nabal.* Ha'e rã ta'yxy rery ma Abigail. Kunha va'e ma hi'arandu ha'e iporã guive. Ha'e rã ime ma ivai ja rei ha'e nda'iporayvui guive opa mba'e py. Ha'e va'e ma Calebe ramymino oiko raka'e.

⁴ Ha'e gui Davi ma tekoa e'ỹa re oikoa py oendu Nabal vexa'i rague ojaya oikovya.

⁵ Ha'e rami vy dez guembiguai kunumigue ha'e katy omondouka vy aipoe'i:

— Tapeo Carmelo py Nabal omba'eapoa py. Ixupe peporandu 'rã xerery rupi, mba'exa pa oikoa re.

⁶ Ha'e vy oguerekopa va'e pe aipopeje 'rã: “Toĩ ndere mby'a porã, ndero pygua re voi, ha'e rereko va'e ha'e javi re.

⁷ Aendu vexa'i rague pejaya pekuapya. Nerymba vexa'i re opena va'e kuery romova'ẽ orea py. Ha'e kuery pe ndorojapo vai, ha'e ha'e kuery pe mba'eve rei ndoatai Carmelo py orea py ikuai jave.

⁸ Ndevyguia kunumigue ikuai va'e pe reporandu rã ha'e kuery oremombe'u porã 'rã. Ha'e nunga rupi xevyguia kunumigue voi ndea py ou ramo emova'ẽ porã, mba'eta pevy'aa ára py rova'ẽ ramo. Eme'ẽ ha'vy xerembiguai kuery pe ndepo py rereko va'e tema, xee ndera'y Davi pe voi”, he'i uka imondovy.

⁹ Ha'e gui kunumigue Davi omondouka va'ekue Nabal oĩa py ova'ẽmba vy ixupe omombe'upa Davi ayvu ha'e javi, hery rupi. Ha'e vy ojapyxaka okuapy.

¹⁰ Ha'e ramo Davi rembiguai kuery pe Nabal ombovai vy aipoe'i:

— Mava'e tu Davi? Mava'e tu Jessẽ ra'y? Mba'eta aỹ gui ma heta ikuai tembiguai opatõ gui ojavapa va'ekue.

¹¹ Xee nda'u aipe'a 'rã ri xemba'e mbojape ha'e yy, ha'e xevy omba'eapo va'e kuery peguarã xo'o ajuka va'ekue, ha'e nunga amboaxa aguã avakue aikuaa e'ỹ va'e pe, magui pa oua aikuaa e'ỹ re? — he'i.

¹² Ha'e rami rã Davi rembiguai kuery ojevyy ju oje'oi vy tape ouague rupi. Ova'ẽmba vy Davi pe omombe'upa ju ijayvuague ha'e javi.

¹³ Ha'e ramo Davi aipoe'i guembiguai kuery pe:

— Peteĩ-teĩ pemoi kyxe pendejeje — he'i ramo peteĩ-teĩ ojee omoi okyxe, Davi voi omoi avi okyxe. Davi rupive avakue oje'oi va'e ma quatrocentos rivyvyi, ha'e gui duzentos ju mba'e rei-rei rarõa py opyta.

¹⁴ Ha'e rami jave Nabal rembiguai kuery va'e regua omombe'u ta'yxy Abigail pe. Ha'e vy aipoe'i:

— Davi tekoa e'ỹa py oĩa gui ombou guembiguai kuery orererekoa va'e pe ijayvu porã'i uka aguã teĩ ha'e ombovai atã.

¹⁵ Ha'e va'e avakue ma ha'eve vai'i va'e orevy. Mba'eve py ha'e kuery noremoingo axyi. Ha'e rami ae avi ha'e kuery reve orekuai ja mba'eve rei ndoatai oremba'e, nhuũndy rupi orekuai jave teĩ.

¹⁶ Ore kuery pe ma ha'e kuery ara py ha'e pyávy ikuai kora mba'emo jokoarã, ha'e kuery reve vexa'i ropenaa rupi orekuai ja.

¹⁷ Aỹ ma eikuaa pota. Exa mba'e pa rejapo va'erã, mba'eta anhetẽ mba'emo vai oiko 'rã tema orererekoa re, ha'e hoo pygua kuery ha'e javi re. Ha'e ma nhe'ẽ vai ra'y ramo ndoikoi hexeve ijayvu porã'ia aguã — he'i.

Davi jojuxaxea gui Abigail omombytu'u eteague

* 25:3 Tery Nabal ma “Hi'arandu e'ỹ va'e”'ea (versículo 25).

¹⁸ Ha'e ramo ta'yxy Abigail ojpura reve ogueraa duzentos mbojape, mokoī ryrū vinho, teī nhiruī vexe'i ro'okue, teī nhiruī ryrū trigo ra'yīgue mbixy, cem uva'a pirukue ha'e duzentos figo pirukue apomo. Ha'e vy guymba kuery mburika'i áry omoimba vy

¹⁹ aipoe'i guembiguai kunumigüe pe:

— Tapeo xerenonderā. Xee ma penderakykue'i 'rā aa — he'i va'eri ome Nabal pe ma mba'eve nomombe'ui.

²⁰ Mburika'i áry oo oiny vy yvy'ā güy oguejy vy ojeapa'i ma ovy jave Davi ha'e lupivegua avakue ou avi okuapy. Ha'e vy nhovaexī ha'e kuery reve.

²¹ Davi aipoe'i ma voi va'ekue: “Anhetē tekoa e'ya rupi arō uka rive va'ekue mba'emo Nabal oguereko va'e. Xee ma imba'e rei-rei regua mba'eve namboatāi heta teī. Ixupe xee ajapo porāague rekovia ha'e ojapo vai xevy.

²² Tove Nhanderüete oipotaa rami tombopaga Davi rovaigua kuery, xapy'a rei ko'ēmba peve peteī ava ha'e kuery va'e regua oikove reve aeja ri ramo”, he'i va'ekue.

²³ Ha'e gui Abigail oexa Davi vy oguejy pojava guymba mburika'i áry gui. Davi renonde py guenapy'ā re oī ngova yvy re omovaē reve, yvy re peve ojero'a oiny.

²⁴ Ipy yvy'iry oīa py aipoe'i:

— Ake'e xeruvixa, xere ae toī xeme ojapo vaiague repy. Ha'eve rā xee nerembiguai xeayvu ta ndereve. Endu ke xee nerembiguai xeayvu rā.

²⁵ Xeruvixa, epena eme nhe'ē vai ra'y Nabal hery va'e re. Mba'eta hery he'ia rami avi heko. Hery ma Nabal, a rami avi hexe oī va'e ma 'arandu e'y reia anho. Ha'e rā xee nerembiguai ma ndaxai kuri nerembiguai kuery remondouka va'ekue.

²⁶ Ha'e gui aỹ ma xeruvixa, anhetē ete SENHOR oikove va'e rupi, ha'e ndee avi nderekove rupi aura vy aipoa'e: SENHOR ndejoko kuri jouguy remoē e'y aguā, ha'e ndepo py ae rejepy e'y aguā. Nabal rami ae avi topagapa nderovaigua kuery ndee xeruvixa pe ojapo vaixe va'e ha'e javi.

²⁷ Ha'e gui kova'e ma xee nerembiguai aru va'ekue ndee xeruvixa pe ame'ē rive va'erā. Eme'ē ndrerpivegua kunumigüe pe.

²⁸ Xeperdoxa ke xee nerembiguai ajexavya. Mba'eta SENHOR ojapo 'rā ndero pygua kuery imbaraete aguā rami meme, SENHOR pe vy rejoguero'a ramo. Teko vai toī eme ndere reikoa pukukue re.

²⁹ Xapy'a rei amongue ava nderakykue opu'ā 'rā nderekovea oipe'a aguā teī nderekovea SENHOR Nderüete ojokua 'rā ojeupegua ikuai va'e mbyte. Ha'e rā nderovaigua kuery rekovea ma omombo 'rā ita momboa py rami.

³⁰ Ha'e gui ma SENHOR ndere ijayvuague rami vy oexa uka 'rā nderayvua, Israel kuery ruvixaverā nemoī vy.

³¹ Ha'e va'e jave py xeruvixa, noī 'rā nemomboriauarā, neī ndepy'a re ipoyi va'e jouguy mba'eve re'y remoēague re, neī ndepo py ae rejepyague re. Ha'e gui SENHOR nemoingo porā jave ma nema'endu'a ke xee nerembiguai re — he'i.

³² Ha'e rami rā Abigail pe Davi ombovai:

— Tove SENHOR Israel kuery ruete ta'ima'endu'a porāa, ange xerovaexī aguā nembou rire.

³³ Ta'ima'endu'a porāa ne'arandu reikovya re, ha'e ima'endu'a porāmby tereiko ndee ae, mba'eta ange xejoko jouguy amoē taa gui, ha'e xepo py ae ajepy taa gui.

³⁴ Mba'eta anhetē ete SENHOR Israel kuery ruete oikove va'e rupi aura vy aipoa'e: Xejoko kuri ajapo vai taa gui. Mba'eta xerovaexī aguā ndereju pojavai va'e rire Nabal ndoikovei 'rāgue ko'ēmba peve, neī peteīve ava ixupegua ma voi — he'i.

³⁵ Ha'e gui Abigail po gui Davi ojopy mba'emo oguera va'ekue. Ha'e vy aipoe'i:

— Tereo porā'i ke ndero katy. Ne'exa, rejerürea aendu vy ajapo 'rāe.

Nabal omanoague

³⁶ Ha'e rire Abigail ojeyv ju Nabal oīa py. Ha'e rā ha'e ma ngoo py ojapo oikovy ngaru, huvixave ngaru ojapo va'e ramigua. Opy'a re ovy'aa anho rei oendu, oka'u vaipa ma vy. Ha'e rami rā ixupe ta'yxy nomombe'ui ranhe mba'eve, neī mboapy'i neī heta ma voi, nako'ēi teria ja.

³⁷ Ko'ē jeyv Nabal okuera ju ma oiny vinho py oka'uague gui. Ha'e gui ma ta'yxy omombe'u ha'e nunga. Ha'e rā ipy'a he'ōmba rire ita rami ju opyta.

³⁸ Dez araa py ma SENHOR ojuka Nabal. Ha'e rā omano.

Abigail re Davi omendaague

³⁹ Nabal omanoague Davi pe omombe'ua rā oendu vy aipoe'i:

— SENHOR toiko ima'endu'a porāmby, mba'eta xerepy ma Nabal xevy ijayvu atāague re, xejoko guive mba'emo vai ajapo taa gui. Nabal ojapo vaiague repy ma hexe ae ju SENHOR ombou — he'i.

Ha'e gui Abigail pe Davi oporandu uka gua'yxyrā ogueraa aguā re.

⁴⁰ Ha'e ramo Davi rembiguai kuery oje'oi Carmelo py Abigail oīa py. Ha'e vy aipoe'i okuapy ixupe:

— Davi orembou gua'yxyrā rogueraa aguā — he'i.

⁴¹ Ha'e ramo kunha va'e opu'ā vy guenapy'ā re oī ngova yvy re omovaē reve. Ha'e vy aipoe'i:

— Apy ma āi hembiguaīrā. Xeruvixa rembiguai kuery py ajoī aguā rami aiko — he'i.

⁴² Ha'e rami vy kunha va'e ojapura vy oo mburika'i áry teī nhiruī guembiguai kunhataīgue reve. Ha'e vy oo Davi rembiguai kuery rupive. Ha'e ramo ogueraa gua'yxyrā.

⁴³ Davi ogueraa avi Ainoā Jezreel guigua. Ha'e vy ta'yxy mokoī.

⁴⁴ Mba'eta Saul ma guajy Mical Davi ra'yxy va'e ome'ē ju va'ekue Galim pygua Laís ra'y Palti ra'yxyrā.

26

Teĩgue ju Davi Saul ndojukaiague

- 1 Ha'e gui Zife pygua kuery ou Gibeá py Saul oĩa py. Ha'e vy aipoe'i okuapy:
— Davi ma Haquila yvy'ã reia rupi nonhemi teve, Jesimom katy'i? — he'i okuapy.
- 2 Ha'e rami rã Saul opu'ã vy Zife tekoa e'ÿa katy oo Davi reka vy. Hexeve oje'oi avi trës mil avakue Israel gui oiporavo va'ekue.
- 3 Saul kuery ijaty okuapy Haquila yvy'ã re, Jesimom katy, tape yvýry. Ha'e rã Davi ma tekoa e'ÿa re oiko. Ha'e rami vy Saul oeka ouvva Davi oikuaa vy
- 4 omondouka oexa pota va'erã kuery. Ha'e vy oikuaa Saul ou ete ae ra'ea.
- 5 Davi opu'ã vy oo Saul kuery ijaty okuapy py. Ha'e vy oexa Saul onheno oupy rã, Ner ra'y Abner xondaro kuery re opena va'e guive. Saul ma ijaty okuapy va'e mbyte py onheno oupy. Ijyvýry rupi ma heta va'e kuery ikuai.
- 6 Ha'e gui Davi aipoe'i Heteu pygua Aimeleque ha'e Joabe ryke'y Abisai Zerua pi'a va'e pe:
— Mava'e tu peo ta xerupive ha'e kuery ijaty okuapy py Saul ituaa py?
Abisai ma ombovai:
— Xee aa 'rã nderupive — he'i.
- 7 Ha'e rami vy Abisai reve Davi ou pyávy heta va'ea py. Ha'e rã ha'e py Saul onheno vy oke oupy ijaty okuapy va'e mbyte. Oakã katy'i hu'y guaxu oipyxo imo'amy yvy re. Abner ha'e heta va'e kuery mboae ma ijyvýry rupi meme onheno okuapy.
- 8 Ha'e gui Abisai aipoe'i Davi pe:
— Aÿ ma ndepo py Nhanderuete omboaxa ma nderovaigua. Taa xee aÿ taipyxo yvy re hu'y guaxu py ae, peteĩgue'i pyve. Mokoĩgue aipyxo e'ÿ teĩ ha'eve 'rã — he'i.
- 9 Teĩ Davi ombovai vy aipoe'i Abisai pe:
— Ejuka eme. Mava'e tu SENHOR oiporavo va'ekue rovai opo oupi 'rã ojevavy e'ÿ re?
- 10 Davi aipoe'ive ju:
— Anhetê ete SENHOR oikove va'e rupi aura vy aipoa'e: SENHOR ae 'rã ojuka, e'ÿ vy omano agua ára ovaẽ 'rã, e'ÿ vy joguero'aa py oo rã ojukaa 'rã, xee e'ÿ.
- 11 SENHOR taxejoko oiporavo va'ekue re xepo aupi e'ÿ agua. Ha'e rami avi aÿ ma ejopy hu'y guaxu inhakã katy'i oĩ va'e, yryru guive. Ha'e gui jaa ju — he'i.
- 12 Ha'e rami vy Davi ojopy uka hu'y guaxu Saul akã katy'i oĩ va'e ha'e yryru. Ha'e gui oo ju. Mava'eve ndoexaai, neĩ ndoikuaai, nomyĩai guive. Ha'e javive okepa tema okuapy, ha'e kuery hopeyi vaipa agua rami SENHOR ojapo rã.
- 13 Ha'e gui Davi ma yvugua rovai re oo ma vy yvy'ã apyte py hi'ãĩ mombyry'ia py. Saul kuery ikuaiã gui mombyry'i ete hi'ãĩ.
- 14 Ha'e rami vy ha'e kuery pe ojapukai nhendu ho'amy, Ner ra'y Abner pe guive. Ha'e vy aipoe'i:
— Abner, nerembovai va'e ty'y?
Ha'e ramo Abner omyĩ vy oporandu:
— Mava'e tu ndee, huvixave pe rejapukai agua?
15 Ha'e ramo Davi ombovai Abner pe:
— Ndee ta'vy ava e'ÿ teve reiko? Israel kuery va'e regua mava'e tu oiko ndee rami ipo'aka va'e? Mba'e re ha'vy nerepenai ri nderuvixa re? Mba'eta ou kuri peteĩ regua nderuvixa omomba agua.
- 16 Ha'eve'ÿa rami rejapo. Anhetê ete SENHOR oikove va'e rupi aura vy aipoa'e: Ha'eveve pemano, penderuvixarã SENHOR oiporavo va'ekue re napepenai rire. Aÿ ma exa pota: Mamo tu oĩ huvixa mba'e hu'y guaxu ha'e yryru inhakã katy'i oĩ va'ekue? — he'i.
- Teĩgue ju Davi reve Saul peteĩ rami ikuai agua re ijayvuague*
- 17 Ha'e gui Davi ri ty ra'ea Saul oendu kuaa vy aipoe'i:
— Ndeayvu e'ÿ teve, xera'y Davi?
Davi ombovai:
— Tá xeruvixa, xeayvu ae ri — he'i.
- 18 Aipoe'ive tema:
— Xeruvixa, mba'e re tu ha'e rami ete ri reka riae nerembiguai? Mba'e tu xee ajapo ndere? Mba'e nunga teko vai tu rejou xere?
- 19 Aÿ ma xeruvixa, ajerure ndevy: Endu ke xee nerembiguai xeayvu rã. SENHOR ae xerovai reo agua rami ndeapo va'e rire ojopy 'rãgue mba'emo ixupe ame'ẽ va'e. Ha'e rami avi avakue ri ha'e rami agua rami ndeapo vy ayvu vaipy ta'ikuai SENHOR renonde. Mba'eta aÿ ha'e kuery xemoxẽ ma SENHOR pegua yvy re aikoague gui, “Tereo, embojerovia tuuete mboae ramigua pe”, he'ia rami.
- 20 Ha'e rami teĩ aÿ xeruguy tomoẽa eme SENHOR pegua yvy gui mombyrya py. Mba'eta ndee Israel pygua huvixave ma jagua ky ramigua rakykue rive reo, inambu pytã rakykue yvy'ã reia rupi oo va'e rami — he'i.
- 21 Ha'e rami rã Saul aipoe'i:
— Ajevavy rima. Xera'y Davi, ejevay ju ha'vy, mba'eta ndajapo vai jevy 'rã ndevy. Ange rexa uka xerekovea rembovre va'ea. Xee ae ma inhakã porã e'ÿ va'e rami aiko ajevavy riae py.
- 22 Davi ombovai:
— Ne'exa, apy ma nembra'e hu'y guaxu areko. Tou xea py peteĩ kunumi ogueru agua.

²³ Ha'e gui peteī-teī pe SENHOR toamboekovia heko porāa rupi ojeroviapy oikoa. Mba'eta xepo py SENHOR nemboaxa va'eri xee ma xepo ndaupixei SENHOR oiporavo va'ekue rovai.

²⁴ Ange nderekovea ambovareague rami ae avi SENHOR tombovare xerekovea voi, taxereraa jepe opa mba'e vai gui — he'i.

²⁵ Ha'e ramo Saul aipoe'i Davi pe:

— Xera'y Davi, ima'endu'a porāmbi tereiko. Mba'eta rejapo 'rā mba'emo tuvixa va'e, ndepo'aka 'rāe — he'i.

Ha'e ramo Davi oove ju, ha'e rā Saul ma guekoa katy ju ojevy.

27

Teĩgue ju Davi Gate pygua huvixa Aquis oĩa py ooague

¹ Ha'e rami teī Davi ojeupe ae aipoe'i: “Xapy'a rei ramo amongue ára xee akanhy 'rā Saul po py. Ha'eveve filisteu kuery yvy katy ajava, Israel ha'e javi rupi Saul xereka oikovya gui ikane'õ vy opytu'aguã. Ha'e ramo 'rāe xee aa jepe ipo gui” he'i.

² Ha'e rami vy Davi oiko katy vy seiscentos avakue hupive ikuai va'e reve oje'oi Gate pygua huvixa Maoque ra'y Aquis oĩa katy.

³ Gate tetã py ae Davi oiko Aquis reve. Ha'e rā hupivegua avakue ma peteī-teī gua'yxy kuery reve ikuai. Davi voi mokoive gua'yxy reve oiko: Jezreel guigua Ainoã, ha'e Carmelo pygua Nabal ra'yxykue Abigail.

⁴ Gate katy Davi ojavaague Saul pe omombe'ua rā oendu vy ndoeka potavei.

⁵ Ha'e gui Davi aipoe'i Aquis pe:

— Xapy'a rei ndee xemboaxya rendu vy ke eme'ẽ peteī tetã ndeyvy regua py aĩ aguã. Xee nerembiguai nda'evei ndeyvy'iry aĩ aguã tetã huvixave oĩaty mbyte py — he'i ramo

⁶ ha'e va'e árave ixupe Aquis omboaxa Ziclague tetã. Ha'e rami rire aỹ peve Ziclague opyta huvixa Judá pygua mba'e ae.

⁷ Filisteu kuery yvy re Davi oiko peteī ma'etỹ rire irundy jaxya peve.

⁸ Ha'e gui Davi ngupivegua avakue reve oje'oi jepi 'rā gesurita kuery, gersita ha'e amalequita kuery rovai. Ha'e va'e kuery ma ha'e va'e yvy re ikuai Sur katy Telã guive Egito yvy peve.

⁹ Ha'e va'e yvy Davi kuery ombovaipa 'rā heravy, ojuka 'rā avakue ha'e kunhague. Ojeupe guarã ogueraapa kuerei vexa'i, vaka, mburika'i ha'e camelo kuery, ajukue guive. Ojevy vy ovaẽ kuerei Aquis oĩa py.

¹⁰ Ha'e ramo Aquis oporandu 'rā: “Marã ramigua kuery reve tu ange pejoguero'a ra'e?” he'i nhavõ Davi ombovai 'rā: “Judá regua kuaray puku-a katy ikuai va'e reve ri, jerameel ha'e queneu kuery kuaray puku-a katy ikuai va'e reve” he'i 'rã.*

¹¹ Davi ndojuka e'ỹi peteive ava neĩ kunha ma voi Gate tetã py oguerojevy va'erã. Mba'eta ojeupe ae aipoe'i: “Oremombe'ua e'ỹ aguã, 'Ha'e rami Davi ojapo', he'i vy.” Ha'e rami vy filisteu kuery yvy re oĩ teria ja ojapo oikovy ha'e rami ae.

¹² Aquis ma ojerovia Davi re. Ha'e vy aipoe'i:

— Ha'e anhetẽ ete ri ojapo guetarã Israel pygua kuery ae voi nda'ija'ei aguã rami. Ha'e nunga rupi xevy anho'i riae 'rã oiko.

28

En-Dor py omanogue mboayvua oiko va'ea py Saul ooague

¹ Ha'e va'e jave py filisteu regua xondaro kuery ono'õmba okuapy Israel kuery rovai joguero'a aguã. Ha'e rami vy huvixa Aquis aipoe'i Davi pe:

— Aikuaa uka ma voi ndevy: Xereve ndee voi reo 'rã joguero'aa py, nderevegua avakue reve.

² Davi ombovai:

— Ha'e rami rã reikuaa 'rã xee nerembiguai mba'e pa ajapo 'rãa — he'i.

Aquis aipoe'ive ju Davi pe:

— Ha'e rami rire romoĩ 'rã xerarõarã reikoa pukukue re — he'i.

³ Samuel omano ma va'ekue, ha'e ramo Israel kuery ha'e javi ojae'o vy onhono porã raka'e Ramã tetã py hekoague py ae. Ha'e gui Saul ovyvy gui oipe'apa raka'e omanogue mboayvua ha'e imba'ekuaa va'e kuery ha'e javi.

⁴ Ha'e gui filisteu kuery ono'õ vy ou Suném py ju ijaty okuapy aguã. Ha'e ramo Saul omono'õmba avi Israel kuery ramo Gibeá py ijaty okuapy.

⁵ Filisteu kuery ijaty okuapy Saul oexa vy oendu okyjea. Ha'e vy ipy'a tyty vaipa oiny onhemondy'i vy.

⁶ Ha'e rami vy SENHOR pe oporandu tetã nombovai, ra'u rupi, Urim rupi, neĩ profeta kuery ayvu rupi ma voi.*

⁷ Ha'e ramo Saul aipoe'i guembiguai kuery pe:

— Pejou na peteī kunha omanogue mboayvua, ha'e va'e oĩa py aa vy aporandu uka aguã.

Hembiguai kuery ombovai:

— Oiko peteī kunha En-Dor py omanogue mboayvua — he'i.

⁸ Ha'e gui Saul ndojekuaa ukai aguã amboae ao omõĩ reve oo. Hupive ma oo avi mokoĩ avakue. Ha'e vy pyávy ovaẽmba kunha va'ea py. Ha'e vy aipoe'i:

* 27:10 Ha'e rami Davi ombovai ombotavy vy. Guetarã Israel kuery reve ae joguero'aa rami ijavyu, Israel kuery rovaigua kuery reve joguero'a va'eri. * 28:6 Urim ma sacerdote kuery mba'ekuaa-a oguereko raka'e (Êxodo 28.30, Números 27.21).

— Ndevy ajerure omanogue remboayvu aguã. Ha'e vy rembovy 'rã aipota va'e ae.

⁹ Kunha va'e ombovai:

— Ha'e rami avi reikuaa porã huvixa Saul ojapoague, mba'eta oipe'apa raka'e omanogue mboayvua ha'e imba'ekuaa va'e kuery. Mba'e re tu amano aguã rami rive reju, xejuka ukaxe vy? — he'i

¹⁰ Ha'e ramo ixupe Saul oura SENHOR rery rupi:

— Anhetê ete SENHOR oikove va'e rupi aura vy aipoa'e: Ndoikoi 'rãe ha'e nungakue re nembopagaarã — he'i.

¹¹ Ha'e rami rã kunha va'e aipoe'i:

— Mava'e ha'vy ambovy 'rã?

Ombovai:

— Embovy xeivy Samuel — he'i.

¹² Ha'e gui kunha va'e Samuel oexa vy ojapukai atã reve aipoe'i Saul pe:

— Mba'e re tu xembotavy? Mba'eta ndee ae ri tu huvixa Saul.

¹³ Huvixa ombovai:

— Ekyje eme. Mba'e tu rexa? — he'i.

Kunha va'e ombovai Saul pe:

— Petei aexa nhanderuede ramigua yvy gui oê rã — he'i.

¹⁴ Ha'e ramo oporandu ju:

— Mba'exa tu ojekuaa?

Kunha va'e ombovai:

— Oê ouvy va'e ma tuja'i, ao puku py onheovã va'e — he'i. Ha'e ramo Samuel ae ria Saul oikuaa vy guenapy'ã re oi ngova yvy re omovaê reve.

¹⁵ Ha'e gui Samuel aipoe'i Saul pe:

— Mba'e re tu xemoangeko, aê jevy aguã rami rejapo vy?

Saul ombovai:

— Xeporiau vaipa aikovy, xerovai filisteu kuery joguero'a rã. Nhanderuede voi xegui ojepe'a vy naxemboavei, profeta kuery rupi, neĩ ra'u rupi ma voi. Ha'e nunga rupi roenõ uka, xeivy remombe'u aguã ajapo va'erã — he'i.

¹⁶ Ha'e ramo Samuel aipoe'i:

— Mba'e re ha'vy xeivy reporandu ri, SENHOR ndereja vy nderovaigua oiko rire?

¹⁷ Mba'eta SENHOR ndere ojapo xeivy aipoe'i ukaague rami. Ndepo gui ndepo'akaa oipe'a vy neirũ Davi pe ju omboaxa.

¹⁸ SENHOR ayvu re nderejapyxakai vy neremombai karamboae Amaleque kuery opoxya rupi omomba ukaague rami vy. Ha'e nunga rupi ae SENHOR nemoĩ vai aĩ.

¹⁹ SENHOR nemboaxa 'rã filisteu kuery po py, Israel kuery ha'e javi reve. Ha'e gui ko'ê ramo ndee ha'e ndera'y kuery xereve ma 'rã peiko. Filisteu kuery po py SENHOR omboaxa avi 'rã Israel kuery ijaty okuapy va'e — he'i.

²⁰ Ha'e ramove Saul ho'a vy ipukupa oupy yvy rupi. Okyje vaipa oupy Samuel ayvu gui. Ha'e vy na'imbaraetevei, ha'e va'e ára, pyávy voi mba'eve ndo'ui rire.

²¹ Saul ituia katy kunha va'e ovaêve'i ovy vy oexa ndojepokuaavei etea. Ha'e vy aipoe'i:

— Ma'ê, xee nerembiguai ma rejerurea aendu vy ndajeayvuveikue py ajapopa kuri ndeayvuague.

²² Teĩ aĩ ma ndee ju endu xee nerembiguai xeayvua. Tamõ mbojape re'u va'erã. He'u, nembaraete ma vy tape rupi reo aguã.

²³ Ha'e rami teĩ ndoipotai vy aipoe'i:

— Xee nda'ui 'rã — he'i. Ha'e rami teĩ hembiguai kunha va'e reve ome'ê nhea'ã rei ramo ojapypxaka. Ha'e vy yvy gui opu'ã vy oguapy oiny tupa py.

²⁴ Kunha va'e oguereko petei vaka ra'y omongyra va'ekue. Ojuka pojava. Trigo ku'i avi ogueru vy omoapomo, ha'e ombojy mbojape imbovua e'ỹ va'e.

²⁵ Ha'e rami vy Saul ha'e hembiguai kuery pe ogueru ramo okaru okuapy. Ha'e gui opu'ãmba vy oje'oipa ju pyavyve.

29

Davi re filisteu kuery ndojeroviaveiague

¹ Ha'e gui filisteu kuery omono'õmba xondaro kuery Afeca py. Ha'e rã Israel kuery ma Jezreel py yvu oi va'e katy'i ijaty okuapy.

² Ha'e katy filisteu kuery yvatekueve va'e oje'oi cem ha'e mil reve-reve. Ha'e rã Davi ha'e avakue hexeve ikuai va'e ma oo Aquis reve hakykue guarã.

³ Filisteu kuery yvatekueve va'e aipoe'i okuapy:

— Kova'e hebreu kuery, mba'e tu ojapo okuapy apy?

Aquis ombovai filisteu kuery yvatekueve va'e pe:

— Ha'e va'e pa Davi e'ỹ, Israel pygua huvixa Saul rembiguai e'ỹ teve? Kueve ma guive xereve ae oiko.

Ha'e gui hexe ndajou vai, xea py ou guive aĩ peve — he'i.

⁴ Ha'e rami teĩ filisteu kuery yvatekueve va'e ivai vaipa ixupe. Ha'e vy aipoe'i okuapy:

— Embojevy ju ha'e va'e ava hekoarā reme'ēague katy. Nda'evei nhandereve oo aguā jajoguero'aa py, nhanderoivaigua oiko e'ŷ aguā. Mba'eta ha'e rami e'ŷ vy mba'exa vy 'rā tu ha'eve nguvixa reve peteī rami ju ikuai aguā, nhande kuery akāgue ogueraa e'ŷ vy?

⁵ Ha'e va'e pa Davi e'ŷ? Ojerokya py joupe-upe ombovai vy aipoe'i: “Saul ma ojuka mil, ha'e rā Davi ma dez mil ojuka va'ekue” he'ŷague va'e e'ŷ teve?

⁶ Ha'e rami rā Aquis oenoī Davi. Ha'e vy aipoe'i iixupe:

— Anhetē ete SENHOR oikove va'e rupi aura vy aipoe'i: Ndee ma anhetē rupi reiko va'e. Ha'e gui xevy rā ha'evea rami vy rei orereve kova'e rojoguero'aa py reo. Mba'eta xea py rejuague guive kova'e ára peve mba'eve py ndojou vaiiai ndere. Ha'e rami teī yvatekueve va'e ma ndojou porāi.

⁷ Ejevy ju aŷ, ejevy porā ke, filisteu kuery yvatekueve va'e ndejou vai rei e'ŷ aguā — he'i.

⁸ Ha'e ramo Davi aipoe'i Aquis pe:

— Ha'e rami avi mba'e tu xee ajapo? Ha'e e'ŷ vy mba'e tu xee nerembiguai re rejou vai, ndevy amba'eapo pypa ára guive aŷ peve, xeruvixa rovaigua kuery rovai xee voi ajoguero'a e'ŷ aguā?

⁹ Aquis ombovai:

— Xee ma aikuaa porā. Xevy rā anhetē Nhanderuetē guigua anjo rami reiko porā va'e teī. Ha'e rā filisteu kuery yvatekueve va'e ma “Too eme orereve joguero'aa py” he'i okuapy.

¹⁰ Evy voi ha'vy ko'ē rai ramove nerembiguai kuery ndereve ou va'ekue reve. Kuaray hexakā'i ramove pevypa, ha'e tapeo — he'i.

¹¹ Ha'e ramo ko'ē rai ramove Davi ovy avakue hexeve ikuai va'e reve, filisteu kuery vvy katy ju ojevy oje'oivy aguā. Ha'e rā filisteu kuery ma Jezreel katy oje'oī.

30

Ziclague tetā gui Amaleque kuery opa mba'e ogueraapaague

¹ Ha'e gui mboapy araa py Davi hexevegua avakue reve ovaēmba Ziclague tetā py. Ha'e vy oikuaa Amaleque pygua kuery ou vy kuaray puku-a katygua kuery re opu'āague, ha'e Ziclague tetā ombovaipa vy oapypa ma raka'eague.

² Ha'e vy kunhague ojou va'e tema ogueraapa raka'e ojeupe guarā. Ha'e rami avi mava'eve ndojukai: kyrīgue neī tujakue. Ngupive ogueraapa rive oje'oivy ouague rupi.

³ Ha'e gui tetā py Davi ha'e hexevegua avakue ou vy oexa rā okaipa raka'e. Ha'e rā ta'yxy kuery, ta'y ha'e taju kuery ogueraapaa raka'e.

⁴ Ha'e rami rā Davi ha'e hexeve ikuai va'e ojavukai atā reve ojae'o. Ojae'o raxa okuapy ikangypa peve.

⁵ Davi ra'yxy mokoīve avi ogueraa raka'e: Jezreel guigua Ainoā, ha'e Carmelo pygua Nabal ra'yxykue'i Abigail.

⁶ Davi iporiau vaipa, mba'eta hexevegua avakue ita py ojavipa aguā re jayvy okuapy rā. Peteī-teī ivai okuapy gua'y ha'e guajy kuery re. Ha'e rami teī Davi ma SENHOR nguuetē re vy ipya'a guaxuve ju.

Ojukua reve reve ogueraa pyre Davi oguerupa jevyague

⁷ Ha'e gui Davi aipoe'i sacerdote Aimeleque ra'y Abiatar pe:

— Eru manto sacerdote pegua — he'i ramo Abiatar ogueru Davi pe.

⁸ Ha'e gui SENHOR pe Davi oporandu vy aipoe'i:

— Aa 'rā teve ha'e kuery rakykue? Aupity 'rā teve?

SENHOR ombovai:

— Tereo, peupity 'rāe. Ha'e vy peraa jepepa ju 'rā ogueraa va'ekue ha'e javi — he'i.

⁹ Ha'e gui Davi oo seiscientos avakue hexeve ikuai va'e reve. Besor yakā'i py ovaē ramo amongue opyta ikane'ōve va'e-va'e.

¹⁰ Ha'e rā Davi quatrocentos avakue reve oove tema. Duzentos ma takykue opyta va'ekue, ikane'ō vy Besor yakā'i ndoaxai va'ekue.

¹¹ Ha'e gui nhuūndy rupi ojou okuapy peteī ava Egito pygua, Davi oīa py ogueru. Ixupe mbojape ome'e'ē rā ho'u. Ome'e'ē avi yy oy'u aguā.

¹² Ome'e'ē avi peteī figo pirukue apomo ra'ykue'i, mokoī uva'a pirukue guive. Ha'e ramo ho'upa. Ha'e gui ikangy gui imbarateve ju, mboapy pytū re ma mba'eve ndo'uvei, neī yy ndoy'uvei va'ekue.

¹³ Ha'e ramo ma Davi oporandu:

— Mava'e regua tu ndee? Magui tu reju?

Egito pygua kunumi va'e ombovai:

— Xee tu Amaleque regua rembiguai rima. Mboapy ára re xemba'eaxy ramo xepatō xereja apy.

¹⁴ Ore kuery romomba rojuvy kuaray puku-a katy queretita kuery, Judá vvy regua kuery, ha'e gui Calebte regua kuaray puku-a katygua. Ha'e vy Ziclague tetā voi roapypa rojuvy — he'i.

¹⁵ Davi aipoe'i:

— Ha'eve pa reo vy ha'e kuerya py xereraa aguā?

Ombovai:

— Nhanderuetē rery rupi ha'vy eura xejuka e'ŷ aguā, ha'e xepatō po py ju xemboaxa e'ŷ aguā. Ha'e rami rā aa 'rā roguereko aguā ha'e kuery ikuai peve — he'i.

¹⁶ Ha'e gui oo, ogueraa henoiny. Ha'e ramia ja Amaleque pygua kuery ma joa rupi e'ÿ-e'ÿ ikuai ha'e va'e vvy re. Okaru ha'e oy'u okuapy, ovy'a vaipa okuapy omondakue ha'e javi filisteu kuery vvy ha'e Judá gui ogueru va'ekue re.

¹⁷ Ko'ê rai'i ramove Davi kuery ojuka okuapy ka'aru'i peve. Ha'e ramo ha'e kuery va'e regua peteïve ma ndoo jepei, quatrocentos kunumigue camelo áry oï va'e anho onhamba.

¹⁸ Ha'e rami py Davi ogueraa jepepa nho ju Amaleque pygua kuery ogueraa va'ekue-'ekue. Ogueraa jepe avi gua'yxy mokoïve.

¹⁹ Mba'eve'i ndoatai, kyrîgue neï tujakue, ta'y neï tajy kuery, neï omondakue ogueraa va'ekue ma voi, neï mba'eve ha'e kuery ogueraapa va'ekue. Davi oguerupa nho ju.

²⁰ Ha'e gui Davi ojopypa avi heruvy vexa'i ha'e vaka. Ha'e nunga Davi renonde omondyi heravy va'e aipoe'i: — Kova'e ma Davi ogueru va'e.

Davi mba'emo omboja'o ukaague

²¹ Ha'e gui Davi ovaê ouvy duzentos avakue ikane'ô vvy ndoovei va'ekue py, Besor yakã yvýry opytapa okuapyague py ae. Ha'e ramo ha'e va'e kuery oupa Davi ovaexi vvy, hupive ou okuapy va'e voi. Ha'e kuery oua py Davi ovaêve'i ouvy vy oxarura porã'i.

²² Ha'e rami teï Davi rupive oje'oi va'ekue regua iporayvu e'ÿ va'e, nhe'ê vai ra'y kuery ombovai vaikue reve aipoe'i okuapy:

— Nhande kuery reve ha'e kuery ndooi rire nanhame'êi 'rã mba'eve rei ogueraapa pyre jaru ju va'ekue. Peteï-teï peraa pendera'yxy ha'e pendera'y kuery rive. Ha'e vvy tapeopa ju — he'i okuapy.

²³ Ha'e rami teï Davi aipoe'i:

— Xeryvy kuery, evoko rami e'ÿ pejapo SENHOR nhandevy ome'ê va'ekue re, nhandere opena vvy nhande po py nhanderovai ou va'ekue omboaxapa rire.

²⁴ Mava'e 'rã tu ojapyxaka ha'e rami pendeayvua re? Mba'eta pejoguero'a vvy peo va'ekue pejopya rami ae avi 'rã mba'e rei-rei rarôa py opyta va'ekue voi ojopy. Joo rami meme 'rã jajopy — he'i.

²⁵ Ha'e rami rire ha'e rami aguã ma Israel kuery rekorã oï, ha'e va'e ára guive aÿ peve.

²⁶ Ziclague tetã py Davi ovaê vvy mba'emo re imonda vvy ogueraapa pyre ogueraa ukapa ju Judá regua tujakueve oirũ kuery ikuai va'e pe. Ha'e vvy ha'e va'e kuery pe aipoe'i uka:

— Kova'e ma pendeavy rome'ê rive SENHOR rovaigua kuery ogueraapa va'ekue regua — he'i.

²⁷ Ha'e rami vvy Betel pygua kuery pe ogueraa uka, Ramote Neguebe pygua kuery pe, Jatir,

²⁸ Aroer, Sifmote, Estemoa,

²⁹ Racal, jerameel ha'e queneu kuery ikuai tetã pygua kuery pe,

³⁰ Horma, Borasã, Atace,

³¹ Hebrom, ha'e gui Davi avakue hexeve ikuai va'e reve oje'oiague ha'e javi rupi ikuai va'e pe.

31

1 Crônicas 10.1-7

¹ Ha'e gui Israel kuery reve filisteu kuery joguero'a ramo avakue Israel regua onhamba filisteu kuery gui. Ha'e ramo Gilboa vvy'ã re ojukapa.

² Filisteu kuery ojoko avi Saul ha'e ta'y kuery. Ha'e vy ojuka Saul ra'y kuery Jônatas, Abinadabe ha'e Malquisua.

³ Joguero'aa py Saul oï vaive ovy. Hu'y momboa kuery ojou ramo ha'e kuery gui okyje vaipa.

⁴ Ha'e gui Saul aipoe'i hu'y jokoia reraa pe:

— Ekyi ndekyxe ha'e xepyxo, ha'e kuery opire omboi uka e'ÿ va'ekue ou vvy xepyxo vvy xejojai rei e'ÿ aguã — he'i teï hu'y jokoia reraa ndoipyxoxei, okyje vaipa vvy. Ha'e ramo Saul ae kyxe ojopy vvy hakua re ho'a.

⁵ Hu'y jokoia reraa Saul omano ma ri ty ra'ea oexa vvy ha'e voi kyxe re ho'a vvy omano avi hexeve.

⁶ Ha'e rami py Saul omano, ta'y kuery voi, hu'y jokoia reraa reve. Avakue hexeve ikuai va'e voi ha'e va'e ára ojukapaa.

⁷ Ha'e gui avakue Israel regua vvyugua rupi ha'e Jordão yakã rovai hekoa va'e oexapa okuapy oirũ kuery onhambaa, ha'e Saul gua'y kuery reve omanomba maa. Ha'e rami vvy ha'e kuery voi guekoa oejapa vvy onhamba avi. Ha'e gui filisteu kuery ou vvy ha'e py ju hekoa.

1 Crônicas 10.8-12

⁸ Ko'ê jevy filisteu kuery ou omanogue mba'ekue ogueraapa aguã. Ha'e rami vvy ojou Saul ha'e ta'y kuery mboapyve Gilboa vvy'ã re omanoague py.

⁹ Ha'e rami vvy Saul akãgue ojaya vvy hembiporukue ogueraapa. Filisteu kuery vvy ha'e javi rupi omondouka ayvu mombe'uarã, ha'e nungakue omombe'u aguã ta'angaa pegua oo ikuai va'e rupi, ha'e guetarã kuery ha'e javi pe.

¹⁰ Saul rembiporukue ma Astarote ra'angaa oïa py ogueraa. Ha'e rã hetekue ma Bete-Seã tetã kora re omboja imoiny.

¹¹ Ha'e gui ma Jabes-Gileade pygua kuery oendu okuapy filisteu kuery Saul re ojapogue.

¹² Ha'e rami vvy avakue ipy'a guaxukueve va'e opu'ãmba vvy pytũ mbukukue re oguata oje'oivy. Ha'e vvy Bete-Seã tetã kora gui omboi heruvy Saul ha'e ta'y kuery retekue. Jabes tetã py oupa ju vvy oapypa.

¹³ Ikãgue ojopy vvy ojatyapa Jabes py ae, vvyra ikuai va'e guy py. Ha'e vvy sete ára re okaru e'ÿ re ikuai.

Mokoïa kuaxia Samuel 'epyre oïa Mokoïa kuaxia Samuel 'epyre oïa

Kova'e kuaxia ma Davi rekokie oïa, huvixa oï jave guare. Jypy ma Judá regua kuery ruvixa oï. Ha'e rire ma Israel kuery ha'e javi ju oipota huvixa oï aguã.

Davi ma Nhanderuete re ojerovia ete va'e. Ha'e ramo ojapo ngovaigua kuery ha'e javi re ipo'aka aguã rami. Ijyvate ete, ha'e heta va'e kuery ha'e javi ombojepokuaapa ojee. Ha'e rami tei itavy reia py ojapo vai guive. Ha'e ramo ixupe profeta Natã ijayvu ramo Davi onhemombe'u: "Ajejavy raka'e Senhor pe." Natã ombovai Davi pe: "Senhor ndeperdoa rejeyavyague gui. Ndee ma neremanoi 'rã. Ha'e rami avi rejapo vaiague káua ma Senhor rovaigua kuery ijayvu rei okuapy. Ha'e gui ndera'y oiko rire omano 'rã", he'i (12.13-14). Nhanderuete ombopaga rã Davi ojou porã ha'e ogueropo'aka. Ha'e rami tei Davi ro pygua kuery ojapo jepi iporiau aguã rami.

Davi ma Israel pygua huvixa ikuai va'e gui yvateve va'e oiko raka'e. Ha'e nunga rupi nhandereraa jepearã Nhanderuete ombou va'ekue pe ma "Davi ra'y" e'y vy "Davi ramymino" 'ea. Davi ma heta salmo ojapo raka'e Nhanderuete pe oporai vy.

Israel kuery oitypa ha'e Saul omano aviague Davi pe omombe'uaque

¹ Saul omano ma rire Davi ojevy ju Amaleque kuery oitypaague gui. Ha'e vy mokoï ára re oiko Ziclague tetã py.

² Mboapy araa py, Saul pegua kuery ijaty okuapya gui ou petei ava ijao xoropa rei va'e, oakã áry yvy omoimba rei reve.* Davi oïa py ha'e va'e ovaẽ vy ojero'a, yvy re oï guenapy'ã re.

³ Ixupe Davi oporandu:

— Magui tu reju?

Ombovai:

— Anha ajuvy Israel kuery ijaty okuapya gui — he'i.

⁴ Davi oporanduve ju:

— Mba'e tu oiko ha'e py? Emombe'u ke xevy.

Ombovai:

— Joguero'aa gui ore kuery ronhamba, heta ho'a vy omano rã, Saul ha'e ta'y Jônatas guive — he'i.

⁵ Ha'e rami rã Davi aipoe'i kunumi imombe'ua va'e pe:

— Mba'exa tu ha'vy reikuaa Saul ha'e ta'y Jônatas omanoa?

⁶ Ha'e rã kunumi imombe'ua va'e aipoe'i:

— Avaẽ xapy'a rei Gilboa yvyty re. Ha'e rã Saul ojeko oiny guembiporu hu'y re. Ha'e gui karóxa ha'e kavaju árygua kuery ojokove tema okuapy.

⁷ Guakykue katy oma'ẽ vy xerexa vy xerenoi. Ha'e ramo xee "Apy ma ai" ha'e ixupe.

⁸ Xevy pe oporandu "Mava'e tu ndee?" he'i ramo xee ambovai: "Xee ma Amaleque regua", ha'e.

⁹ Ha'e ramo aipoe'i xevy: "Eju ha'vy, xe'áry epu'ã he'amy ha'e xejuka, mba'eta xerajyjeapa rei va'eri xerekovea oime teri", he'i.

¹⁰ Ha'e ramo hi'áry apu'ã ha'amy vy ajuka, mba'eta xee aikuaa porã ndoikovei 'rãa ho'a ma rire. Ha'e vy coroa oï va'ekue ajopy ha'e ipoapy regua, ha'e gui aru apy ndevy xeruvixa — he'i.

Davi ojuka ukaague Amaleque regua

¹¹ Ha'e rami rã Davi oao ae ojopy vy omondoro, avakue hexeve ikuai va'e ha'e javive Davi ojapoa rami avi ojapo okuapy.

¹² Iporiaupa, ojae'opa okuapy, ha'e va'e ára okaru e'y re ikuai ka'aru peve, Saul ha'e ta'y Jônatas omano ramo, ha'e SENHOR pegua Israel kuery re guive, kyxe py ho'apa rire.

¹³ Davi aipoe'ive ju kunumi imombe'ua va'e pe:

— Maguigua tu ndee?

Ombovai:

— Xee tu amboae guigua ra'y, Amaleque regua — he'i.

¹⁴ Davi aipoe'i ixupe:

— Mba'exa tu nderekyjei ri ra'e SENHOR oiporavo va'ekue rovai ndepo reupi aguã?

¹⁵ Ha'e gui ma Davi oenoí petei kunumi va'e. Ha'e vy aipoe'i:

— Eju, epu'ã peva'e ava re — he'i. Ha'e ramo oipyxo rã omano.

¹⁶ Davi aipoe'i va'ekue:

— Ndere ae toí nderuguy moëague repaga aguã, mba'eta ndejuru py ae nderovai remombe'u vy "Ajuka SENHOR oiporavo va'ekue", 're va'ekue.

Saul ha'e Jônatas re Davi ipy'a vaia rupi oporaiague

¹⁷ Ha'e gui Davi ojae'o Saul ha'e ta'y Jônatas re. Po rami oporaei iporiaua rupi.

* 1:2 Oao omondoropa rei ha'e oakã re yvy omoí Saul omanoague re ipy'a vai vy (Gênesis 37.29,34, 1 Samuel 4.12, 2 Samuel 1.11).

18 Judá ra'y kuery ha'e javi ombo'e uka avi kova'e mboraei guyrapa regua, kuaxia para heko porã va'e kuery rekokie oĩa va'e re.

19 — Israel kuery, perovy'a rei va'ekue ho'a ma pendeyvy re yvy'ã oĩ va'e re!
Mba'eta tu ipy'a guaxukueve ho'apa!

20 Ha'e rã Gate tetã py ma pemombe'u eme,
peikuaa uka eme guive Asquelom tetã py tape ikuai va'e rupi,
filisteu kuery rajy kuery oguerovy'a rei e'ỹ aguã,
opire omboi uka e'ỹ va'e rajy kuery ovy'a rei reve opo-opo e'ỹ aguã.†

21 Ha'e gui Gilboa yvy'ã peiko va'e,
pende'ary to'ave eme yxapy neĩ oky,
pendere toikove eme mba'emo aju,
mba'eta ha'e py ma ipy'a guaxukueve mba'e hu'y jokoia ojeatypa yvy re,
Saul mba'e hu'y jokoia voi ho'a rire nomboveraavei ma 'rã azeite py.

22 Jônatas peteĩgieve ma voi ndogueropytu'ui va'ekue guapa,
neĩ Saul ndogueru jevy rivei va'ekue okyxe,
ojuka va'ekue ruguy ha'e ipy'a guaxukueve kyrakue oĩ e'ỹ re.

23 Saul ha'e Jônatas ma ija'ea ha'e oayvuve pyre,
oikovea ja ha'e omano ma teĩ nomboja'oail!
Taguato gui ipojavave,
ha'e guarý gui imbaraeete va'ekue.

24 Peẽ Israel rajy kuery, pejae'o Saul re,
ajukue pytã va'e py pemonhemonde,
ha'e ouro guigua py pendeao ombojegua va'ekue re.

25 Mba'eta tu ipy'a guaxukueve ho'apa raka'e joguero'aa py!
Jônatas voi ojukaa yvy'ã re!

26 Xeryvy Jônatas, xeporiau aikovy ndere!
Ndee xerayvu vaipa va'ekue!
Xerayvu ete vy
kunhague gui voi ndee xerayvuve va'ekue.

27 Mba'eta tu ipy'a guaxukueve ho'apa,
ha'e hembiporu joguero'aa pygua okanhymba! — he'i.

2

Judá pygua ruvixarã Davi omoĩ okuapyague

1 Ha'e va'e rire Davi oporandu SENHOR pe. Ha'e vy aipoe'i:
— Aa 'rã teve Judá tetã regua py?

SENHOR ombovai:

— Tereo — he'i.

Davi oporanduve ju:

— Mamo katy ete 'rã aa?

SENHOR ombovai:

— Hebrom katy — he'i.

2 Ha'e ramo Davi oo ha'e katy. Ta'yxy mokoive oje'oi avi: Jezreel pygua Ainoã ha'e Carmelo pygua Nabal ra'yxykue'i Abigail.

3 Davi oguerupa avi hexevegua avakue, peteĩ-teĩ ta'y kuery reve. Ha'e rami vy Hebrom tekoa py ju ikuai.

4 Ha'e gui Davi oĩa py Judá pygua avakue ou vy omoĩ nguixarã. Davi pe pemombe'u avi:

— Avakue Saul retekue nhono porãare ma Jabes-Gileade pygua mame — he'i.

5 Ha'e ramo Jabes-Gileade pygua avakue pe Davi omondouka ayvu mombe'uarã kuery aipoe'i aguã: “Tove SENHOR tapenemoingo porã, penderuvixakue pe pejapo porãague re, Saul retekue penhono porã rire!”*

6 Ha'e gui aỹ ma tove SENHOR tapenderereko penemboaxya ha'e ojeroviapy oikoa rupi. Xee voi ajapo porã 'rã ha'e rami pejapo porãague re.

7 Aỹ ma pendepo ta'imbaraete, tapendepy'a guaxu guive, mba'eta penderuvixa Saul omano ma teĩ xee ju Judá regua kuery xemoĩ nguixarã” he'i uka.

Israel pygua ruvixarã Abner omoĩague Isbosete

8 Ha'e gui Saul pegua xondaro kuery ruvixa Ner ra'y Abner ma Maanaim tetã py ogueraa Saul ra'ykue Isbosete.

9 Ha'e py ma omoĩ huvixarã Gileade yvy re, Aser, Jezreel, Efraim, Benjamim ha'e Israel ha'e javi re opena aguã.

10 Saul ra'ykue Isbosete ma quarenta ma'etỹ rivyvyi oguereko Israel re opena ppy'i jave. Ha'e vy mokoĩ ma'etỹ peve'i oĩ. Judá regua kuery anho ikuai Davi pegua.

† 1:20 Gate ha'e Asquelom ma Israel rovaigua kuery filisteu va'e retã. * 2:5 Jabes-Gileade tekoa ma Davi retarã kuery Judá regua e'ỹ, Israel regua ramo ma ha'e pygua kuery reve ijayvu porã'i, ixupe guarã ju ikuai aguã.

11 Davi ma sete ma'etÿ ha'e seis jaxy re opena Judá pygua kuery re, Hebrom tetã py ae.

Isbosete pegua kuery re Davi pegua kuery ipo'akaague

12 Ha'e gui Ner ra'y Abner ma Maanaim gui ogueraa Saul ra'ykue Isbosete pegua avakue Gibeão peve.

13 Ha'e rã Davi pegua avakue ma Zerua pi'a Joabe ogueraa avi ha'e py. Ha'e rami vy nhovaexĩmba Gibeão vy omboty pyre katy'i. Jovaive-ive re ikuai, hovai katy ha'e kyvõ katy.

14 Abner aipoe'i Joabe pe:

— Topu'ã kunumigue, tajoguero'a nhanerenonde.

Joabe ombovai vy

— Topu'ã ha'vy — he'i.

15 Ha'e rami rã opu'ã jogueruvy jojo'i rami: doze Benjamim regua Saul ra'y Isbosete pegua, ha'e gui doze avakue Davi pegua ju.

16 Peteĩ-teĩ ojopy ngovaigua akã re, jopyxo kyxe py joyke py. Ha'e vy jovai ho'apa. Ha'e rami rire ha'e va'e henda pe ma “Yvy kyxe” 'ea, Gibeão katy'i oĩ.

17 Ha'e va'e árave joguero'ave tema okuapy. Ha'e rã Davi pegua avakue oitypa Abner ha'e Israel regua kuery re.

Abner ojukaague Asael

18 Ha'e py ma ikuai Zerua pi'a mboapyve: Joabe, Abisai ha'e Asael. Asael ma guaxu ka'aguy regua rami inhakuã va'e.

19 Ha'e gui Asael ma Abner rakykue oo. Oeka ovy rupi ndoikei oiporu kuaa katy, neĩ oiporu kuaa e'ÿa katy ma voi.

20 Ha'e ramo Abner guakykue katy oma'ẽ vy oporandu ovy:

— Ndee ae ri ty'y Asael?

Ombovai vy:

— Xee ae rí — he'i.

21 Ha'e ramo Abner aipoe'i ixupe:

— Eike ha'vy reiporu kuaa katy, e'ÿ vy reiporu kuaa e'ÿa katy. Ejoguero'a Peteĩ kunumi va'e reve, ixugui ae eipe'a hembiporu joguero'aa pygua — he'i teĩ Asael ma ndojepe'axe hakykue ooa gui.

22 Teĩgue ju Abner aipoe'i ixupe:

— Ejepe'a na xerakykue gui. Mba'e re tu xee rojuka ta, ha'e vvy py roity rive? Ha'e rami vy mba'eta tu xee ajoexa ta nderyvy Joabe reve?

23 Ha'e rami teĩ Asael ndojepe'axe ae ramo hye py Abner oipyxo hu'y guaxu rapyta py rive, ikupe gui omboaxa. Ha'e ramo Asael ho'a vy ha'e pyve omano. Omanoague py ovaẽ va'e tema opyta kuerei 'rã.

Abner pegua avakue rakykue Joabe ooaague

24 Ha'e gui Joabe ha'e Abisai ju Abner rakykue oje'oi. Kuaray oike'i ma jave ovaẽ jogueravy Amá yvy'ã re. Ha'e va'e ma Gíá katy'i oĩ, Gibeão tekoa e'ÿa katy tape oo va'e yvy'iry.

25 Ha'e gui Benjamim ra'y kuery ono'õmba vy Abner rupive oje'oi vy Peteĩ yvy'ã apyte áry ijaty okuapy Peteĩ rami.

26 Ha'e ramo Abner oiapukai Joabe pe. Ha'e vy aipoe'i:

— Kyxe py nhandhomomba riae 'rã teve? Ndereikuaii teve opaa py joe nanhandea'evei 'rãã? Raka'e peve 'rã tu neremombytu'ui penderegua kuery reve orerakykue peoa gui?

27 Joabe ombovai:

— Anhetẽ ete Nhanderuete oikove va'e rery rupi aura vy aipoa'e: Nami nandeyvui va'e rire ko'ẽ rã aje'ive'i mae ma 'rãgue ore kuery ropytu'u oreryvy kuery rakykue rupi rooa gui — he'i.

28 Ha'e rami vy Joabe mimby guaxu omonhe'ẽ rã ha'e kuery ha'e javi opytapa, ha'e vy ndoovei Israel kuery rakykue rupi, ndajoguero'a nhoi guive.

29 Ha'e ramo ha'e va'e pytũ mbukukue re Abner ha'e ixupegua avakue oguata vvy joja reia rupi. Jordão yakã oaxapa vy aje'ive'i reve oguatave vy ovaẽmba Maanaim py.

30 Ha'e rami py Joabe ndoovei Abner rakykue. Ha'e vy ojeuegua kuery omboaty rã oata ra'e dezenove Davi pegua avakue, Asael oipapa e'ÿ re.

31 Va'eri Davi rembiguai kuery ma trentos e sessenta avakue ojuka va'ekue Benjamim regua Abner reve oje'oi va'ekue, ha'e ramo omanomba.

32 Asael retekue ma ha'e kuery ogueraa vy onhono porã okuapy tuu rupa py ae, Belém katy'i. Ha'e va'e pytũ mbukukue re Joabe ha'e avakue hexeve ikuai va'e oguatave vy Hebrom tetã py iko'ẽmba jogueravy.

3

1 Davi ro pygua kuery reve Saul ro pygua kuery joguero'a are raka'e. Ha'e rami teĩ Davi kuery imbaraeteve, ha'e rã Saul ro pygua kuery ma ikangyve oje'oivy.

1 Crônicas 3,1-4

2 Hebrom tetã py Davi ra'y kuery ikuai. Ta'y ypy'i ma Jezreel pygua Ainoã pi'a Amnom.

3 Mokoia ma Carmelo pygua Nabal ra'yxykue'i Abigail pi'a Quileabe. Mboapya ma Gesur pygua huvixa Talmai rajy Maaca pi'a Absalão.

4 Irundya ma Hagite pi'a Adonias. Peteĩ nhiruĩa ma Abital pi'a Sefatias.

5 Mboapy memea ma Davi ra'yxy Eglá pi'a Itreão. Ha'e kuery ma Davi ra'y kuery Hebrom py ae ikuai va'ekue.

Davi reve peteī rami ikuai aguā Abner ojapoaue

- ⁶ Davi ha'e Saul ro pygua kuery joguero'a jave Saul ro pygua ikuai va'e gui Abner ipo'akave ovy.
- ⁷ Oiko avi raka'e Saul ra'yxy jevykue Rispa hery va'e, Aiá rajy. Ha'e gui Isbosete oporandu Abner pe:
— Mba'e re tu ndee renheno xeru ra'yxy jevykue reve?
- ⁸ Ha'e rami Isbosete ijayvu rā Abner oendu vy ivai vaipa ixupe. Ha'e vy aipoe'i:
— Xee ri ty'y jagua akā aiko, Judá kuerya katy aa aguā? Ange teri ajapo porā nderu Saul ro pygua kuery pe, tyvy ha'e irū kuery pe guive. Xee ma noromboaxai Davi po py. Ha'e rami teī aỹ remombe'u ha'e va'e kunha reve ateoavya rami.
- ⁹ Xee Abner Nhanderuete taxembopaga oipotaa rami, Davi pe SENHOR ouraague rami xee ndajapoi ri ramo.
- ¹⁰ Mba'eta Saul ro pygua po'akaague amboaxa 'rā joupe. Ha'e rami vy ajapo 'rā Davi ju Israel ha'e Judá kuery re ipo'aka aguā rami, Dā guive Berseba peve — he'i.
- ¹¹ Ha'e rami Abner ijayvua Isbosete nda'evei ombovai aguā neī peteī ayvu'i py ma voi, okyje vy.
- ¹² Ha'e ramo Abner ojegui ae omondouka ayvu mombe'uarā Davi pe. Ha'e vy aipoe'i uka:
— Mava'e po py tu kova'e jvy itui? Xereve ha'vy ejapo peteī rami jaiko aguā, ha'e ramo xee roipytyvō 'rā ndepo py Israel kuery ha'e javi amboaxa vy — he'i uka.
- ¹³ Davi ombovai:
— Ha'eve, ndereve ajapo 'rā peteī rami jaiko aguā, va'eri peteī mba'e ma aipota: Xea py reju vy reru 'rā Saul rajy Mical. Ha'e rami e'ỹ vy nderexai 'rā xerova — he'i.*
- ¹⁴ Saul ra'ykue Isbosete pe voi Davi ombou ayvu mombe'uarā. Ha'e vy aipoe'i uka:
— Embou ju xera'yxy Mical, cem filisteku kuery pire amboiaue re xera'yxyrā ajogua va'ekue — he'i.
- ¹⁵ Ha'e rami rā Isbosete kunha va'e oipe'a uka ju ime Paltiel Laís ra'y va'e ro gui.
- ¹⁶ Ime oo ranhe oiny hakykue'i, ooa rupi ojae'o ovy Baurim peve. Ha'e rā ixupe Abner
— Tereo, ejevju ju eovy — he'i ramo mae ojevju.
- ¹⁷ Ha'e gui Abner jogueroayvu Israel regua nhomongetaa ikuai va'e reve. Ha'e vy aipoe'i:
— Kueve ma pemoixe Davi penderuvixarā.
- ¹⁸ Aỹ ma pejapo ete, mba'eta Davi pe SENHOR ijayvu va'ekue: “Xerembiguai Davi rupi vy xevygua kuery araa jepepa 'rā filisteku kuery ha'e hovaigua kuery ha'e javi po gui”, he'i va'ekue.
- ¹⁹ Benjamim kuery pe ju Abner omombe'u uka ha'e rami ae. Ha'e vy Davi oia katy oo Hebrom tetā py, ixupe omombe'u aguā Israel ha'e Benjamim regua kuery ha'e javi oipota okuapy.
- ²⁰ Ha'e gui Hebrom tetā py Davi ro oī va'e py Abner ovaē, hexeve vinte avakue ou va'ekue reve.
- ²¹ Ha'e rami vy Abner aipoe'i Davi pe:
— Xeruvixa, xee apu'ā vy aa 'rā Israel kuery ha'e javi amono'ōmba aguā ndeea py, ndereve ojapo okuapy aguā ndevy ikuai aguā — he'i. Ha'e rami rā Davi Abner omondouka ramo oo porā'i.
- Nhemi rupi Joabe Abner ojukaague*
- ²² Ha'e jave ma Davi ha'e Joabe rembiguai kuery joguero'a vy oje'oiague gui oupa ju. Ngupive ogueru reta joegui oipe'a va'ekue. Ha'e rā Abner ma Hebrom tetā py noīvei ma Davi-a py, omondouka rā oo porā ma rire.
- ²³ Ha'e gui Joabe guexevagua kuery reve ou rā ixupe aipo'ea:
— Huvixa Davi-a py Ner ra'y Abner ou ra'e, ha'e gui omondouka rire oo porā ju ma oiny — 'ea.
- ²⁴ Ha'e rami rā huvixaa py Joabe oo vy aipoe'i ixupe:
— Mba'e tu rejapo ra'e? Abner ou ra'e ndea py. Mba'eta tu remondouka rive ju?
- ²⁵ Reikuaa porā Ner ra'y Abner reko. Ha'e ma nembotavy aguā ou, ha'e mba'emo rejapo va'e re oikuaa pota vy oikuaa aguā renhembopy'aa ha'e javi — he'i.
- ²⁶ Ha'e gui Davi-a gui Joabe ojepe'a ma vy Davi pe oikuaa uka e'ỹ re omondouka ayvu mombe'uarā Abner rakykue, ha'e rami vy ojapo Sirá ygua gui ojevju aguā.
- ²⁷ Hebrom tetā py Abner ojevju ma ramo Joabe ogueruoke okē rupi ha'e kuery ae'ia py jogueroayvu aguā merami. Ha'e vy hye py Joabe oipyxo ramo omano, guyk'e'y Asael ojukaague re oepy vy.
- ²⁸ Ha'e rire ma Davi oikuaa vy aipoe'i:
— Xee ha'e xevygua kuery ma SENHOR pe mba'eve py ndorojevavi Ner ra'y Abner ruguy omoēague py, raka'e rā peve.
- ²⁹ Huguuy moēague re opaga aguā toī Joabe ha'e tuu ro pygua kuery ha'e javi re! Joabe ro py toī riae ijai peupa va'e, lepra revegua, vyvra re oguata va'e, kyxe py ho'a va'e ha'e tembi'u oipota rei va'e voi — he'i.
- ³⁰ Ha'e rami py Joabe guvyv Abisai reve ojuka raka'e Abner, Gibeão py joguero'aa py tyke'y Asael ojukaague re.
- Abner omanoague re Davi ojae'oague*
- ³¹ Ha'e gui Davi aipoe'i Joabe ha'e hexevagua kuery ha'e javi pe:
— Pemondoro pendeao, penhemonde voxa py, ha'e vy tapeo pejae'o peovy Abner retekue renonde ogueraa rā — he'i. Ha'e rā huvixa Davi ma mba'e guaxu rryru rakykue'i oo oiny.
- ³² Ha'e rami vy Hebrom tetā py onhono porā okuapy Abner retekue. Abner onhono porāague yvy'iry huvixa onhendu ratā reve ojae'o oiny. Heta va'e kuery ha'e javi ojae'o avi okuapy.
- ³³ Abner re huvixa ojae'o vy aipoe'i:

* 3:13 Saul rajy Mical ma Davi ra'yxyrā ome'ē va'ekue ri ixugui oipe'a vy amboae ava pe ju omboaxa raka'e (1 Samuel 18.27, 25.44).

— Mba'e re tu Abner omano heko vai va'ekue rami?

³⁴ Mba'eta ipo ndojokuaai,

neĩ ipy re voi noĩ corrente.

Ha'e rami 'rãgue py heko vai va'e ra'y kuery po py ho'a rive va'e rami ho'a! — he'i.

Ha'e ramo heta va'e kuery ha'e javi ojae'ove hexe.

³⁵ Ha'e gui ma heta va'e kuery ha'e javi ou vy ojapo okuapy Davi okaru aguã rami, ára rei teri reve. Ha'e rami teĩ Davi oura vy aipoe'i:

— Kuaray oike e'ỹ mbove mbojape e'ỹ vy tembi'u mboae xee ha'u ramo tove Nhanduerete taxembopaga ha'e oipotaa rami — he'i.

³⁶ Ha'e rami Davi ijayvu rã heta va'e kuery oendu vy ojou porã okuapy, huvixa ojapo va'e rei ojou porã memea rami avi.

³⁷ Ha'e rami vy ha'e va'e ára guive ha'e kuery ha'e Israel kuery ha'e javi oikuaapa okuapy Ner ra'y Abner ojukaague py huvixa Davi mba'eve ndoguerekoiaque.

³⁸ Ha'e gui huvixa aipoe'i guembiguai kuery pe:

— Ndapeikuaai teve ange Israel yvy re peteĩ ava yvateve ha'e imbaraete va'e ho'aague?

³⁹ Ha'e rã xee ma xekangy aỹ, huvixarã xemoĩa teĩ. Xegui ma kova'e avakue Zeruia pi'a kuery imbaraetekueve va'e. SENHOR ae tombopaga mba'emo vai apoare kuery ojapoague re — he'i.

4

Isbosete ojukaa ague

¹ Hebróm tetã py Abner ojukaa ague Saul ra'ykue Isbosete oendu vy ikangypa, ha'e Israel kuery ha'e javi okyjepa.

² Saul ra'ykue pegua mokoĩ ava oiko, xondaro kuery ruvixa meme. Peteĩ ma Baaná, ha'e rã amboae ma Recabe hery va'e. Beerote pygua Rimom ra'y va'e meme, Benjamim kuery regua, mba'eta Beerote ma Benjamim yvy regua ae,

³ mba'eta Beerote pygua kuery yma guare onha vy Gitaim tetã py ova va'ekue. Ha'e py ae ikuai aỹ peve.

⁴ Ha'e gui Saul ra'y Jônatas ma peteĩ gua'y oguereko va'ekue oguata e'ỹ va'e. Peteĩ nhirui ma'etỹ rivivyvi oguereko va'ekue Saul ha'e Jônatas omanoague mombe'ua ou jave Jezreel gui. Ha'e ramo hexe opena va'ety oupi heravy oguerojava vy. Oguerojava aguã ojapura ramo ava'i ho'a vy oguata karẽ'i va'e oiko. Hery ma Mefibosete raka'e.

⁵ Ha'e gui Beerote pygua Rimom ra'y kuery Recabe ha'e Baaná jogueraa vy Isbosete ro py ovaẽ. Kuaray mbyte jave hakuve ma ramo oke oupy.

⁶ Ha'e py Recabe ha'e tyvy Baaná joguerouke jogueravy oguy katy, trigo re ou va'e rami. Ha'e rami vy oipyxo hye py, ha'e gui onha jepe.

⁷ Ha'e kuery ma oguy py oike rã Isbosete ngupa okeaty py itui jave oipyxo vy ojuka. Ha'e rire inhakãgue ojaya vy ogueraa. Pytũ mbukukue re oguata jogueravy yvy joja reia rupi.

⁸ Isbosete akãgue ma ha'e kuery ogueru huvixa Davi pe Hebróm py. Ha'e vy aipoe'i ixupe:

— Apy ma nderovaigua Saul ndejukaxeara ra'ykue Isbosete akãgue. Xeruvixa, ha'e rami ange SENHOR ojapo rejepy aguã rami Saul ha'e ta'y kuery ojapoague ha'e javi re — he'i.

⁹ Ha'e rami teĩ Davi ombovai Beerote pygua Rimom ra'y kuery Recabe ha'e tyvy Baaná pe. Ha'e vy aipoe'i:

— Anhetẽ ete SENHOR oikove va'e xenhe'ẽ ojexavaia ha'e javi gui ogueraa jepe va'ekue rery rupi aura vy aipoa'e:

¹⁰ Yma xea py amongue ayvu ogueru vy “Saul ma omano ma” he'i ramove araa vy Ziclague tetã py ajuka karamboae, ojeupe rã iporã va'e merami omombe'u rã.

¹¹ Ha'e gui heko vai va'e kuery katuve ma ambopaga 'rã, peteĩ ava heko porã va'e ngoo py ngupa py ae itui va'e jukaare kuery. Ha'e rami vy aỹ xee rombopaga 'rã huguy pendepo py pemoẽague re, romomba 'rã yvy gui — he'i.

¹² Ha'e rami vy Davi guembiguai kunumigue pe ijayvu rã ha'e kuery ojuka. Ha'e vy ipokue ha'e ipykue ojaya ma vy oupi imoiny Hebróm tetã py, y omboty pyre oĩ va'e yvy'iry. Ha'e rã Isbosete akãgue ma ogueraa vy Abner rupa katy'i ojaty, Hebróm py ae.*

5

1 Crônicas 11.1-3

¹ Ha'e gui ma Israel regua kuery ha'e javi ou okuapy Hebróm py Davi oĩa py. Ha'e vy ijayvu vy aipoe'i okuapy:

— Ore kuery voi ma nderegua kuery ae avi.

² Yma Saul oiko teri vy orere opena jave py ndee ae reo ha'e rejepy 'rã va'ekue Israel regua xondaro kuery reve. Ha'e gui SENHOR aipoe'i: “Ndee repena 'rã xevyguia Israel kuery re, reiko 'rã ha'e kuery ruvixa”, he'i va'ekue ndevy — he'i okuapy.

³ Hebróm py huvixa Davi-a py Israel regua nhomongetaa kuery ha'e javi ou ramo ha'e kuery reve Davi ojapo oguereko porã aguã regua, SENHOR renonde. Ha'e ramo omoĩ okuapy Davi nguvixarã Israel kuery re opena aguã.

* 4:12 Ha'e kuery ma Isbosete akãgue ojaya rire Davi ojaya uka ipo ha'e ipy.

⁴ Davi opena pyp'i jave ma trinta ma'etÿa oguereko. Ha'e gui ma quarenta ma'etÿ re opena.

⁵ Hebrom py ma Judá kuery re anho ranhe opena sete ma'etÿ ha'e mboapy meme jaxy re. Ha'e gui Jerusalém py ju trinta e três ma'etÿ re opena Israel ha'e Judá kuery ha'e javi re.

1 Crônicas 11.4-9

⁶ Ha'e gui Jerusalém tetã katu huvixa Davi ogueraa ojepegua avakue, jebuseu kuery ha'e va'e yvy re ikuai va'e rovai opu'ã agüã. Ha'e ramo Davi pe ha'e pygua kuery aipoe'i okuapy:

— Ndereikei 'rã apy, ára revegua e'ÿ ha'e oguata e'ÿ va'e kuery rive teĩ ndejoko rã — he'i okuapy, ojeupe “Davi ndoikei 'rã apy”, he'ia rami.

⁷ Ha'e rami teĩ Davi oipe'a nho Sião py oo ikorapa va'e. Ha'e va'e pe ma “Tetã Davi rekoa” 'ea.

⁸ Mba'eta ha'e va'e ára Davi aipoe'i:

— Jebuseu kuery pejuxaxe va'e tapeo yy raperã ita ombokuaague rupi, ha'e vy pejukapa “Ára revegua e'ÿ ha'e oguata e'ÿ va'e” 'ea va'e kuery — he'i, mba'eta Davi onhe'ẽ py nda'ija'ei ae ha'e kuery re. (Ha'e nunga rupi aipo'ea: “Ára revegua e'ÿ ha'e oguata e'ÿ va'e ndoikei 'rã ha'e va'e oo py”, 'ea.)

⁹ Ha'e rami vy oo ikorapa va'e py Davi ae oĩ, ha'e vy omboery tetã Davi rekoa. Ha'e va'e vy'ry rupi tetã omoaty'ro heravy, Milo guive oika peve.

¹⁰ Davi ipo'akave tema ovy, hexeve SENHOR Nhanderueite ixondaro reta va'e oiko ramo.

1 Crônicas 14.1,2

¹¹ Davi-a py Tiro pygua huvixa Hirão ombou ayvu mombe'uarã. Ogueru ruka avi yvyra yary, oo apoa kuery ha'e ita re omba'eapo va'e kuery, Davi rorã ojapo va'erã.

¹² Ha'e ramo Davi oikuaa SENHOR omoĩ atãvea Israel re opena agüã, ojepegua kuery oayvua rupi ombopo'akave.

1 Crônicas 3.5-9; 14.3-7

¹³ Hebrom tetã gui Davi ou rire Jerusalém py ju ojouve gua'yxy jevyrã. Ha'e rã ikuave ju ta'y ha'e tajy kuery.

¹⁴ Po rami ma Jerusalém py itui'i va'ekue rery: Samua, Sobabe, Natã, Salomão,

¹⁵ Ibar, Elisua, Nefegue, Jafia,

¹⁶ Elisama, Eliada ha'e Elifelete.

1 Crônicas 14.8-17

¹⁷ Filisteu kuery oendu okuapy Davi omoĩa Israel kuery ha'e javi ruvixarã. Ha'e vy oupa ojopy agüã Davi. Ha'e nunga Davi oendu vy ova ju oo ikorapa va'e py.

¹⁸ Ha'e rã filisteu kuery ou vy Refaim yvyugua ha'e javi rupi ijaty.

¹⁹ Ha'e ramo Davi oporandu SENHOR pe. Ha'e vy aipoe'i:

— Taa pa filisteu kuery rovai? Remboaxa 'rã teve xepo py?

SENHOR ombovai:

— Tereo, mba'eta anhetẽ amboaxa 'rã filisteu kuery ndepo py — he'i.

²⁰ Ha'e rami rã Baal-Perazim py Davi ou vy oitypa ha'e py. Ha'e vy aipoe'i:

— SENHOR omoãmiba xerovaigua filisteu kuery ryxya xerenonde py ikuai va'ekue, yy mba'emo ogueroxyry heravya rami — he'i. Ha'e nunga rupi ha'e va'e tekoo oenoĩa Baal-Perazim.*

²¹ Ha'e py ma filisteu kuery oejapa oje'oivy ta'angaa oguereko va'ekue. Ha'e rã Davi ha'e avakue hexeve ikuai va'e ogueraapa.

²² Ha'e gui filisteu kuery ou nho jevy vy ijaty ju okuapy Refaim yvyugua ha'e javi rupi.

²³ SENHOR pe Davi oporandu jevy ramo ombovai:

— Tereo eme. Pembojere 'rã hakykue katu gui, ha'e gui ma ha'e kuery re pepu'ã 'rã amora ikuai va'e guy rupi.

²⁴ Ha'e gui xapy'a rei rendu 'rã amora rovapy rupi opyrõ-pyrõ nhendu va'e. Ha'e va'e rendu vy ke ejapura. Ha'e va'e ma nerenonde SENHOR ae oo nhendua, filisteu kuery ijaty okuapy va'e jukapaarã — he'i.

²⁵ SENHOR ojapo ukaa rami Davi ojapo vy ojukapa filisteu kuery Geba guive Gezer py ovaẽa peve.

6

1 Crônicas 13.5-14

¹ Davi ma Israel kuery gui omboatypa ju oiporavo va'ekue ha'e javi, trinta mil avakue.

² Oiko katupa ma vy ogueraa ha'e kuery Judá re Baalá oĩ va'e katu, ha'e va'e gui Nhanderueite ayvu rryru ogueru agüã yvy'ã katu. Ha'e va'e re oĩ SENHOR ixondaro reta va'e anjo ipepo va'e kuery ikuai va'e mbyte oĩ va'e rery.

³ Nhanderueite ayvu rryru ma peteĩ karóxa ipyau va'e áry omoĩ vy ogueru Abinadabe ro yvy'ã re oĩague gui. Ha'e rã Abinadabe ra'y kuery Uzã ha'e Aiô oje'oi karóxa pyau reraarã.

⁴ Ha'e rami py Abinadabe ro yvy'ã re oĩague gui ogueru inony Nhanderueite ayvu rryru. Ha'e rã Aiô oo inony hyru renonde.

⁵ Davi ha'e Israel ro pygua kuery ha'e javi ovy'a oje'oivy SENHOR renonde rupi, opa marãgua ipu va'e yvyra faia gui ojapo pyre py, ixã reta va'e, mbaraka, angu'a pu'i, pandeiro ha'e hy'a pu py.

⁶ Ha'e gui Nacom mba'emo moa'yĩaty re ovaẽa py ma Nhanderueite ayvu rryru re Uzã opoko vy omombyta, vaka onhepyxanga rã.

* 5:20 Tery Baal-Perazim ma “Senhor omoãmiba” 'ea.

7 Ha'e ramo Uzá rovai SENHOR poxya hendy vy ha'e pyve ojuka, nomboetei reia re. Ha'e rã omano Nhanderuete ayvu ryrú yvy'iry ae.

8 SENHOR Uzá ojuka rã Davi ndojou porã. Ha'e vy ha'e va'e tekoa omboery Perez-Uzá, aỹ peve guarã.

9 Ha'e va'e ára SENHOR gui Davi okyje vy aipoe'i:

— Mba'exa nda'u SENHOR ayvu ryrú aru 'rã? — he'i.

10 Ha'e rami vy Davi ndogueruxevei SENHOR ayvu ryrú guekoa katy. Ha'e rami 'rãgue py Gate guigua Obede-Edom va'e ro katy rive ogueraa uka.

11 Mboapy jaxy re SENHOR ayvu ryrú opyta Gate guigua Obede-Edom ro py. Ha'e rã SENHOR omoingo porã, hoo pygua ha'e javi reve.

1 Crônicas 15.25-16.3

12 Ha'e gui ma Davi pe omombe'ua vy aipo'ea:

— SENHOR oayvu ryrú re vy omoingo porã Obede-Edom ro pygua kuery ha'e mba'emo oguereko va'e ha'e javi — 'ea. Ha'e ramo Davi ovy'a reve oo vy Obede-Edom ro gui ogueru ruka guekoa katy Nhanderuete ayvu ryrú.

13 SENHOR ayvu ryrú rerua kuery mboapy memekue opyrõa py kurei 'rã SENHOR pe ojuka vaka ha'e vexe'i omongyra pyre.

14 Davi ojeroky ratã ouvy SENHOR renonde ovy'a reve. Onhemonde sacerdote pegua manto ajukue pererĩ'i gui ojapo pyre py.

15 Ha'e rami vy Israel kuery ha'e javi reve Davi ogueru SENHOR ayvu ryrú, ovy'a reve ha'e mimby guaxu omonhe'ëa rupi.

16 Tetã Davi rekoa py SENHOR ayvu ryrú oguerovaëa ma heruvy jave Saul rajykue Mical janela rupi oma'ë vy oexa oiny SENHOR renonde huvixa Davi ojeroky ha'e opo-opo reve ou rã. Ha'e rami vy opy'a py ojou vai.

17 Ha'e gui SENHOR ayvu ryrú ogueroike vy omoĩ oo'i hendarã ae ma voi Davi ojapo va'ekue py. Davi ae SENHOR renonde ogueru mba'emo oapy reve ha'e peteĩ rami ikuiaia regua ome'ë va'erã.

18 Mba'emo oapy reve ha'e peteĩ rami ikuiaia regua Davi ome'ëmba ma rire ogueroyvu porã heta va'e kuery SENHOR ixondaro reta va'e rery rupi.

19 Ha'e gui ha'e kuery ha'e Israel kuery ha'e javi pe ome'ë tembi'u, avakue ha'e kunhague pe. Peteĩ-teĩ ikuai va'e pe ome'ë peteĩ ra'ykue mbojape, peteĩ ra'ykue ja'ea'i xo'o ha'e uva pirukue. Ha'e rire ma ha'e kuery ojepe'apa oje'oivy ngoo katy.

Mical pe Davi ijayvu eteague

20 Davi ngoo pygua kuery ae ogueroyvu porã aguã ojevye jave Saul rajykue Mical oë ovaexĩ aguã. Ha'e vy aipoe'i:

— Ojexa uka porã ete pa Israel pygua huvixa! Ange ojekuaa uka guembiguai kuery rembiguai kunhague pe, oxĩ e'ỹ va'e rami ojekuaa uka, ovare'ỹ va'e rive rami ete.

21 Ha'e rã Davi ombovai Mical pe:

— SENHOR renonde ae xee ajapo. Ha'e va'e ma xeporavo karamboae nderu ha'e hoo pygua kuery ha'e javi 'rãgue py, ha'e vy xemoĩ uka ojeuepegua Israel kuery ruxixarã. SENHOR renonde ae xee avy'a kuri.

22 Ha'e gui xee ange aikoague gui ndajeayvu ukaive tema 'rã, ha'e anhemoyvy'i've 'rã aikoa py. Ha'e rã tembiguai kunhague ndeayvua va'e ma xemboeteve 'rã okuapy — he'i.

23 Saul rajykue Mical ma na'imembyi, omanoa ára peve.

7

1 Crônicas 17.1-15

1 Ha'e gui huvixa Davi ngoo py ae oĩ jave, hovaigua kuery jova-jovai re ikuai va'e opu'ãague gui SENHOR omombytu'u ma rire

2 huvixa aipoe'i profeta Natã pe:

— Ma'ë, xee ma xero ainy yary guigua py, ha'e rã hyru Nhanderuete pegua ma peteĩ oo'i py rive oĩ.

3 Natã ombovai huvixa pe:

— Tereo, ejapo ndepy'a re rendu va'e ha'e javi, ndereve SENHOR oiko ramo — he'i.

4 Ha'e gui ha'e va'e pyavyve, Natã pe SENHOR ombou oayvu. Ha'e vy aipoe'i:

5 — Tereo ha'e aipo're xerembiguai Davi pe: “Po rami SENHOR ijayvu: Ndee ae 'rã teve rejapo peteĩ oo xee aĩ aguã?”

6 Mba'eta neĩ peteĩve oo py ma voi xee naĩ teri Egito yvy gui Israel kuery arupa guive aỹ peve. Ha'e rami 'rãgue py oo'i py rive aiko va'e, xembojerovia aty py ae.

7 Opa rupi Israel kuery aru herekovya rupi nda'u xeayvu ri raka'e amongue nderegua pe, xeivygua Israel kuery re apena uka va'ekue pe nda'u aipoa'e: ‘Mba'e re tu nderejapoi peteĩ xerorã yary guigua?’ ha'e teve?

8 Ha'e gui aỹ ma po rami 'rã ndeayvu xerembiguai Davi pe: ‘SENHOR ixondaro reta va'e aipoe'i: Xee roiporavo karamboae vexe'i kuery re repenaa gui, ha'e kuery rakykue reikoa gui, huvixarã xeivygua Israel kuery re ju repena aguã.

9 Ndereve xee aa avi karamboae, mamõ rã reoa rupi tema. Nderovaigua kuery amomba nerenonde gui, amboyvate guive nderery, yvy regua ipo'akakueve anho ikuiaia rami.

10 Areko katu avi xeivygua Israel kuery rekoarã, ha'e vy amboekoapa ha'e py, mava'eve omoangekoave e'ỹ aguã, ha'e heko vai va'e ombojexavaive e'ỹ aguã jypy guare rami e'ỹ,

¹¹ xeivygua Israel kuery rerekoarā amoīa ára guive. Ha'e rami avi ndevy ame'ê 'rā nderovaigua kuery opu'āague gui repytu'u aguā' ", he'i va'ekue. SENHOR ma oikuaa uka pova'e: Ha'e ae 'rā ojapo oo ndevy.* Aipoe'i:

¹² "Nderekovea opa rā nderu kuery reve repytu'u ma jave nderekovia xee amoingo 'rā ndeguigua, ndegui ete oiko va'erā. Ha'e vy ajapo 'rā ipo'akaa oī atā aguā rami.

¹³ Ha'e va'e ae ma ojapo 'rā petēi oo xerery oī aguā, ha'e rā xee ajapo 'rā raka'e rā peve ipo'aka oiny aguā rami.

¹⁴ Xee ma tuu 'rā, ha'e rā ha'e ma xera'y 'rā oiko. Xapy'a rei ha'e ojevavy ramo ma ambopaga 'rā avakue hyvyra po'i'i py, avakue gua'y kuery ombopia rami.*

¹⁵ Ha'e rami teī ixugui ndaip'e'ai 'rā amboaxya, Saul nerenonde gui aipe'a vy namboaxyveiague rami e'y.

¹⁶ Ha'e rā ndero ha'e ndepo'akaa ma amoī atāve 'rā nerenonderā. Ha'e rami vy oī riae 'rā ndepo'aka reinya", he'i.

¹⁷ Ha'e va'e ayvu ha'e javi ma Natā pe oexa ukaague rami ae omombe'u Davi pe.

1 Crônicas 17.16-27

¹⁸ Ha'e gui ma SENHOR pegua opy Davi oike vy hi'āi henonde. Ha'e vy aipoe'i:

— SENHOR Xeruete, mba'e nunga tu xee aiko, ha'e mba'e nunga tu xero pygua kuery ikuai, apy peve ndee xereru aguā?

¹⁹ SENHOR Xeruete, ha'e nunga tu ndevy pe mba'e'y rima, ndeayvu ma voi guive xee nerembigui ro pygua raka'e rā guarā re. SENHOR Xeruete, ha'e nunga ma avakue ha'e javi mo'aranduarā rejapo.

²⁰ Ha'e gui xee nerembigui Davi, mba'e ta'eve ju ndevy pe? Mba'eta ndee ma xekuaa porā, SENHOR Xeruete.

²¹ Ndeayvua ha'e ndepy'a re rendua rami vy rejapo kova'e nunga tuvixa va'e ha'e javi, xee nerembigui pe reikuaa uka guive.

²² Ha'e nunga rupi SENHOR Xeruete, ndetuvixa ete va'e, mba'eta ndoikoī ndee ramigua ete'i, ndoikoī guive Oeruete mboae ndee e'y vy, oreapyxa py ae roenduague rami.

²³ Mava'e regua tu ndevyguia Israel kuery ikuai ramigua? Xeruete, ha'e kuery anho'i ae vyv re ikuai va'e mbyte gui ndejeupe guarā reipe'a va'ekue. Ha'e rami ndejeupe ae rejapo nderery re ima'endu'aa aguā rami, ha'e ndevyguia kuery pe rejapo mba'emo porā ete, ndevy re guive, mba'eta ha'e gui vyv regua kuery remoxēmba raka'e tuuete ramigua kuery reve, ndevyguia kuery Egito vyv gui renoēmba va'ekue renonde gui.

²⁴ SENHOR, Israel kuery ndejeupe guarā ae remoingo raka'e rā peve, ha'e gui ndee ju renhemoingo Tuuete.

²⁵ Ha'e gui a'y ma SENHOR Xeruete, ha'e va'e ayvu xee nerembigui rekorā re, ha'e xero pygua re guive aipo'reague toī atāve, ejapo ndeayvuague rami ae.

²⁶ Nderery tombootea riae, ha'e vy " SENHOR ixondaro reta va'e ma Israel kuery Ruete", ta'ea. Ha'e ramo xee Davi nerembigui ro ma oī atā riae 'rā nerenonde.

²⁷ Mba'eta SENHOR ixondaro reta va'e, Israel kuery Ruete va'e, xee nerembigui pe ha'e nunga reikuaa uka vy "Ajapo 'rā oo ndevy", 're va'ekue. Ha'e nunga rupi ae xee nerembigui xepy'a guaxu nami anhembo'e aguā ndevy.

²⁸ Ha'e gui a'y, SENHOR Xeruete, ndee ae ma Oeruete, ha'e ndeayvua ma anhetē va'e meme. Ha'e vy xee nerembigui pe rejapo porā aguā re ndeayvu.

²⁹ Ha'e nunga rupi a'y SENHOR Xeruete, emoingo porā xee nerembigui ro pygua kuery, nerenonde rupi orekuai riae aguā rami, mba'eta ha'e rami aguā re ndeayvu rire. Ha'e rami vy xee nerembigui ro pygua roeryvu porā rire raka'e rā peve 'rā roiko porā — he'i.

8

1 Crônicas 18.1-13

¹ Ha'e rire ma Davi filisteu kuery oitypa vy ipo'aka ha'e kuery re. Ha'e kuery po gui oipe'a avi hetā tuvixakueve re ipo'aka aguā.

² Oitypa avi Moabe pygua kuery. Ha'e rami vy vyv rupi omonhenomba vy oa'ā: mokoī ixā'i oa'āgue ma ojuka aguā rami ikuai, ha'e rā petēi ixā'i oa'āgue ma ndojukai. Ha'e rami vy Moabe pygua kuery ikuai Davi rembiguairā, ha'e ixupe mba'emo opaga jepi 'rā okuapy.

³ Ha'e gui Zobá pygua huvixa Reobe ra'y Hadadezer ma yakā Eufrates re ipo'aka ju aguā oo jave hexe voi Davi ipo'aka.

⁴ Ixupegua kavaju árygua kuery ma Davi ojopy mil e setecentos, ha'e gui vinte mil avakue vyv rupigua. Ojayapa guive kavaju karóxa regua pytaxā, cem ete'i oeja ojaya e'y re.

⁵ Ha'e ramo Síria pygua kuery ma Damasco tetā gui ou Zobá pygua huvixa Hadadezer repyarā. Ha'e rami teī ha'e va'e avakue Síria guigua ma Davi ojuka vinte e dois mil.

⁶ Ha'e gui Damasco regua Síria py Davi omoī harōarā kuery. Ha'e ramo Síria pygua kuery Davi rembiguairā ikuai vy mba'emo opaga 'rā okuapy ixupe. Davi ooa nhavō rupi SENHOR ombopo'akave tema.

⁷ Hadadezer rembigui yvatekueve hu'y jokoa ouro guigua oguereko va'ekue Davi ojopy vy oguerupa Jerusalém py.

⁸ Hadadezer pegua tetā Betá ha'e Berotai gui voi huvixa Davi oipe'ave tema overa va'e guigua.

* 7:11 Oo ojapo aguā re SENHOR ijayvu, raka'eve rā Davi ramymino kuery regua huvixarā omoingo aguā re (versículos 12, 16). Ha'e va'e regua ma Jesus Cristo ae oiko (Lucas 1.32-33,69; Atos 13.23). * 7:14 2 Coríntios 6.18, Hebreus 1.5, Apocalipse 21.7

- ⁹ Ha'e gui Hamate pygua huvixa Toí oendu Hadadezer pegua xondaro kuery Davi oitypaague.
¹⁰ Ha'e rami vy huvixa Davi-a py ombou gua'y Jorão. Ha'e va'e ma oxarura vy oguerovy'a Hadadezer reve joguero'aa py ojukapaague re (mba'eta Toí reve Hadadezer joguero'a tema rire). Jorão ou vy ogueru mba'emo prata, ouro ha'e overa va'e guigua ome'ê va'erã.
¹¹ Ha'e nunga huvixa Davi ojopy vy omboaxapa SENHOR peguarã, ha'e javi regua re ipo'akaague va'e kuery gui prata ha'e ouro ojopy va'ekue reve:
¹² Síria guigua, Moabe regua, Amom ra'y kuery, filisteu kuery, Amaleque ha'e Zobá pygua huvixa Recabe ra'y Hadadezer mba'e rei-rei guigua guive.
¹³ Síria pygua kuery Davi oitypaague gui ou vy "Juky yvyugua" 'ea va'e py dezoito mil avakue ju ojuka. Ha'e rami rã Davi rery re ima'endu'aa opa rupi.
¹⁴ Edom re voi omoí harōarã kuery. Edom ha'e javi rupi omoí harōarã. Ha'e ramo Edom pygua kuery ha'e javi ikuai Davi rembiguairã. Davi ooa nhavō rupi SENHOR ombopo'akave tema.

2 Samuel 20.23-26; 1 Crônicas 18.14-17

- ¹⁵ Ha'e rami vy Davi opena Israel kuery ha'e javi re. Joe oikuaa potaa py ha'evea rami ogereko ojeupegua kuery.
¹⁶ Ixupegua xondaro kuery ruvixa ma Zerua pi'a Joabe. Mba'emo oiko va'ekue mboparaa ma Ailude ra'y Josafá.
¹⁷ Sacerdote ma Aitube ra'y Zadoque, ha'e gui Abiatar ra'y Aimeleque. Ha'e rã kuaxia re opena va'ety ma Seraías.
¹⁸ Huvixa ro rarōa kuery ruvixa ma Joiada ra'y Benaia. Ha'e rã Davi pytyvōa kuery ma ta'y kuery ae.

9

Jônatas ra'ykue re Davi opena porãague

- ¹ Davi aipoe'i:
 — Oikove teri teve Saul ro pygua kuery va'e regua, Jônatas ayvua rupi xee apena porã aguã? — he'i.
² Saul ro py oiko raka'e petei hembiguai Ziba hery va'e. Ha'e va'e oenoí ukaa Davi-a py oo aguã. Davi oporandu ixupe:
 — Ndee pa Ziba?
 Ombovai:
 — Xee ae ri, nerembiguai aiko — he'i.
³ Huvixa aipoe'i:
 — Ndoikovei ma teve Saul ro pygua Nhanderueete porayvua rami apena porã aguã?
 Ziba ombovai huvixa pe:
 — Oiko teri petei Jônatas ra'ykue, opy jovaive oiporu ve'y va'e — he'i.
⁴ Huvixa oporandu:
 — Mamo ha'vy oí?
 Ziba ombovai:
 — Amiel ra'y Maquir ro py ko oí, Lo-Debar py — he'i.
⁵ Ha'e ramo Lo-Debar gui huvixa ogueru ruka Amiel ra'y Maquir ro gui.
⁶ Davi-a py Saul ra'y Jônatas ra'ykue Mefibosete ou vy guenapy'ã re oí, ngova yvy re omovaê reve. Ixupe Davi aipoe'i:
 — Mefibosete!
 Ombovai:
 — Apy ma nerembiguai aiko! — he'i.
⁷ Ha'e gui Davi aipoe'i:
 — Ekyje eme, mba'eta nderu Jônatas ayvua rupi apena porã 'rã ndere. Ha'e vy ndevy ame'êmba 'rã neramoí Saul yvykue ha'e javi. Ha'e rã ndee ma rekaru riae 'rã xe-mesa py.
⁸ Ha'e ramo ojero'a ju reve aipoe'i:
 — Mba'e tu xee nerembiguai aiko, jagua re'ōgue rami xee aiko va'e re rema'ê aguã? — he'i.
⁹ Ha'e gui Davi oenoí uka ju Saul rembiguai Ziba. Ha'e vy aipoe'i ixupe:
 — Saul mba'e va'ekue ha'e imba'e rei-reikue ha'e javi ma amboaxa ange nepatō ra'ykue pe.
¹⁰ Pempa'eapo 'rã ijyvy re, ndera'y kuery ha'e nerembiguai kuery reve. Ha'e vy mba'emo aju pemono'ō kuerei 'rã, nepatō rogue py oí aguã pe'u va'erã. Ha'e rã nderuvixa ra'ykue Mefibosete ma xe-mesa py riae 'rã okaru — he'i. Ziba ra'y kuery ikuai raka'e quinze, ha'e gui hembiguai kuery ma vinte.
¹¹ Ziba aipoe'i huvixa pe:
 — Xeruvixa, xee nerembiguai pe rejapo uka va'e ha'e javi 'rã ajapo — he'i. Ha'e rami vy Mefibosete okaru oikovy Davi mesa py, huvixa ra'y kuery rami ae avi.
¹² Mefibosete ra'y kyrí'i va'e rery ma Mica. Ziba ro py ikuai va'e ma Mefibosete rembiguai meme raka'e.
¹³ Mefibosete ma Jerusalém tetã py hekoa raka'e, huvixa mesa py ae tema okaru vy. Ha'e ma opy jovaive oiporu ve'y va'e.

10

1 Crônicas 19.1-19

- ¹ Ha'e rire ma Amom ra'y kuery ruvixa omano, ha'e rã ta'y Hanum ju oí nguu rekovia.

² Ha'e ramo Davi aipoe'i:

— Naás ra'ykue Hanum pe aexa uka 'rã ayvua, tuu xerayvuague rami — he'i. Ha'e rami vy Davi omondouka guembiguai kuery ombopy'a porã ju aguã tuu omanoague gui. Ha'e rã Davi rembiguai kuery ovaẽ Amom ra'y kuery yvy re.

³ Ha'e rami teĩ Amom regua yvatekueve aipoe'i okuapy nguivixa Hanum pe:

— Rexa'ã teve Davi nderu rãgue'i omboteeta rupi guembiguai ombou nembopy'a porãarã? Xapy'a rei ma ndea py merami guembiguai kuery ombou vy neretã re oikuaa pota ha'e yvy re oexa pota rire ombovaipa aguã e'y teve? — he'i okuapy.

⁴ Ha'e rami rã Hanum ojopy Davi rembiguai kuery, ha'e vy onhopĩmba hendyva ijykekue'i rupi, ijao ojaya guive hevi ro'o ojekuaa peve. Ha'e rire mae ma omondouka ju.

⁵ Ha'e nunga Davi oikuaa vy ombou ayvu mombe'uarã ha'e kuery ovaexĩ aguã, omoxĩmbaa rire. Huvixa aipoe'i uka:

— Pepyta ranhe Jericó tetã py, penerendyva ipukupa ju peve. Ha'e rire ma peju ju — he'i uka.

⁶ Amom ra'y kuery oikuaa okuapy Davi nda'ija'evei aguã rami ojapoaague. Ha'e vy omondouka ayvu mombe'uarã vinte mil Síria pygua avakue ogueru aguã Bete-Reobe ha'e Zobá gui, ha'e gui mil avakue Maaca pygua huvixa pegua, ha'e doze mil ju Tobe gui ogueru aguã.

⁷ Ha'e nunga Davi oendu vy ha'e kuery rovaĩ ombou Joabe oxondaro kuery ha'e javi reve, ipy'a guaxukueve meme.

⁸ Amom ra'y kuery oje'oi vy tetã kora rokẽ py oarõ okuapy joe opu'ã aguã. Ha'e rã Síria pygua kuery Zobá ha'e Reobe guigua ma amboa rupi ranhe ikuai nhuĩndy rupi, avakue Tobe ha'e Maaca guigua kuery reve.

⁹ Ha'e gui Joabe oexa hovaigua kuery henonde ha'e hakykue katy gui oarõ okuapy, ha'e rami vy Israel kuery ikuai va'e gui opu'ã kuaave va'e oiporavo vy omboyxy imbokuapy Síria pygua kuery rovai.

¹⁰ Ha'e rã hembyrekue ma guyvy Abisai po py omboaxa. Ha'e ramo ha'e va'e ma Amom ra'y kuery rovai ju omboyxy imbokuapy.

¹¹ Ixupe Joabe aipoe'i:

— Xapy'a rei Síria pygua kuery xegui imbaraeveve ramo ndee reo 'rã xepytyvõ aguã. Ha'e rã Amom ra'y kuery ri ndegui imbaraeveve ramo xeeaju 'rã roipytyvõ vy.

¹² Nhanembaraete ke ha'vy. Jajoguero'a nhandepy'a guaxua rupi nhaneretarã kuery ha'e Nhanderuete pegua tetã ikuai va'e jaepya rupi. Ha'e SENHOR tojapo ojou porãa rami — he'i.

¹³ Ha'e vy Joabe guexevegua kuery ogueraa vy joguero'a okuapy Síria pygua kuery reve. Ha'e rã ha'e va'e kuery onhamba henonde gui.

¹⁴ Ha'e rã Síria pygua kuery onhamba maa Amom ra'y kuery oexa vy ha'e kuery voi onhamba avi Abisai renonde gui, ha'e vy guetã py ju oikepa. Ha'e ramo Joabe ma Amom ra'y kuery reve joe opu'ãague gui ojey vy oopa ju Jerusalém katy.

¹⁵ Ha'e gui Síria pygua kuery ma Israel kuery renonde oitypaa oexa vy ono'õmba ju.

¹⁶ Hadadezer ogueru rukave ju Síria pygua kuery yakã rovai re ikuai va'ekue, ha'e rã ha'e va'e kuery ma Helã tetã py ou. Ha'e kuery renonde ou oiny Sobaque, Hadadezer pegua xondaro kuery rerekoarã.

¹⁷ Ha'e nunga Davi pe omombe'ua rã oendu vy omboatypa Israel kuery ha'e javi, ha'e vy Jordão yakã oexa vy Helã katy oje'oi. Síria pygua kuery oarõ okuapy Davi kuery rovai joguero'a aguã, ha'e vy joguero'a ha'e kuery reve.

¹⁸ Ha'e rami teĩ Israel kuery renonde gui Síria pygua kuery onhamba ju. Ha'e ramo Davi ojuka Síria pygua kuery va'e regua setecentos karóxa pygua ha'e quarenta mil kavaju árygua. Oipyxo avi xondaro kuery rerekoa Sobaque, ha'e rami rã ha'e pyve omano.

¹⁹ Hadadezer rembiguai kuery huvixa ikuai va'e oitypa maa oexa okuapy vy ojapo Israel kuery reve ikuai porã ju aguã, ha'e kuery rembiguai ikuai aguã. Ha'e rami rire Síria pygua kuery okyje vy noipytyvõxevei Amom ra'y kuery.

11

Bate-Seba reve Davi itavyague

¹ Peteĩ ma'etyã ma rire huvixa kuery joguero'a vy oopa jepi jave Davi omondouka Joabe guembiguai kuery ha'e Israel kuery ha'e javi. Ha'e ramo ha'e kuery oitypa Amom ra'y kuery, ojokopa okuapy guive hetã Rabá. Ha'e rã Davi ma Jerusalém py ae opyta.

² Peteĩgue ka'aru rai jave Davi ngupa py ituia gui opu'ã vy oiko-iko rei ngoo áry rupi. Ha'e vy oexa peteĩ kunha ojau rã, iporã raxa va'e.

³ Davi oporandu uka mava'e paa re. Ha'e rã ombovaia:

— Bate-Seba ri, Eliã rajy ha'e heteu regua Urias ra'yxy va'e — 'ea.

⁴ Ha'e ramo Davi omondouka guembiguai kuery ogueru aguã. Ha'e ou ramo onhenho hexeve. Ha'e ramo kunha va'e ma ha'eve'yague gui ojeky'a'o ma vy ngoo katy ju ojeyvy.

⁵ Kunha va'e oguereko'i vy Davi pe

— Areko'i ma — he'i uka.

Davi Urias ogueru ruka jave guare

⁶ Ha'e ramo Davi omondouka ayvu mombe'ua Joabe pe. Ha'e vy aipoe'i uka:

— Embou ke xea py heteu regua Urias — he'i ramo Davi-a py Joabe ombou Urias.

⁷ Davi-a py Urias ou rã ixupe oporandu mba'exa pa Joabe oikoa re, ha'e kuery ikuaia re ha'e joguero'a okuapya re.

⁸ Ha'e gui ma Davi aipoe'i Urias pe:

— Tereo ndero py epytu'u — he'i.

Davi ro gui Urias oo ramove'i ixupe huvixa ogueraa uka mba'emo ome'ê rive va'e.

⁹ Ha'e rami teĩ Urias ma huvixa ro rokê py rive onheno, nguvixa rembiguai kuery ha'e javi reve. Ha'e vy ngoo katy ndooi.

¹⁰ Davi pe omombe'ua vy

— Urias tu ndooi ma ngoo katy — 'ea.

Ha'e ramo Davi aipoe'i Urias pe:

— Mombyry gui e'ÿ teve reju? Mba'e re tu ndereoi ndero katy?

¹¹ Urias ombovai:

— Lei ryrú ha'e Israel ha'e Judá kuery ma oguy'i py rive opytapa teri okuapy. Xepatô Joabe ha'e nerembiguai kuery ha'e javi ma ijaty okuapy oka py rive. Ha'e rã xee teve aike ta xero py akaru ha'e ay'u aguã, ha'e xera'yxy reve anheno aguã? Anhetê ete nderekove rupi aura vy aipoa'e: Xee ndajapoi 'rã ha'e nunga — he'i.

¹² Ha'e ramo Davi aipoe'i Urias pe:

— Epytave'i ranhe aÿ ete'i ri jepe, ha'e vy ko'ê ramo romondouka ju aguã — he'i ramo ha'e va'e ára pukukue re Urias oiko Jerusalém tetã py, ko'êgue peve.

¹³ Davi oenô vy hexeve okaru ha'e oy'u, omonga'u guive. Ka'aru'i ma jave Urias oo ngupa py onheno aguã nguvixa rembiguai kuery reve, ha'e rã ngoo katy ma ndooi ae.

Urias omanoague

¹⁴ Aje'ivekue, kuaxia para Joabe pe Davi ojapo vy Urias po py ogueraa uka.

¹⁵ Kuaxia para re aipoe'i imoiny:

— Emondouka Urias pavê renonde joguero'avea py. Ha'e vy peja ha'e ae'i, ojukaa aguã — he'i.

¹⁶ Ha'e ramo tetã Joabe kuery ojoko imoinya py omondouka Urias avakue imbaraetekueve reve joe opu'ã aguã py.

¹⁷ Avakue tetã py ikuai va'e oÿ vy Joabe kuery reve joguero'a okuapy tamã Davi rembiguai kuery va'e regua amongue ho'a. Heteu regua Urias omano avi.

¹⁸ Ha'e ramo imombe'uarã Joabe ombou vy Davi pe omombe'u joguero'aa py oiko va'ekue ha'e javi.

¹⁹ Ayvu mombe'ua pe ijayvu imondovy vy aipoe'i:

— Xapy'a rei joguero'aa oiko va'ekue remombe'upa rã

²⁰ ha'e ivai vy aipoe'i 'rã ndevy: “Mba'e re tu tetã yvy'iry ete ri pejoguero'a? Ndapeikuaai ri ty'y tetã kora gui omombo 'rãa?”

²¹ Mba'exa tu ojukaa raka'e Jerubesete ra'y Abimeleque? Peteĩ kunha va'e e'ÿ xero kora áry gui hexe omombo ita, ha'e va'e gui ae omano raka'e Tebes py?” he'i ramo ndee ju “Omano avi nerembiguai heteu regua Urias” 're 'rã — he'i.

²² Ha'e ramo ayvu mombe'ua oo vy ovaê, ha'e Davi pe omombe'upa Joabe aipoe'i ukaague.

²³ Ha'e vy ayvu mombe'ua aipoe'i Davi pe:

— Anhetê, ha'e va'e avakue ma oregui ipo'akave vy nhuũndya rupi ou orerovai. Teĩ ore kuery roo avi ha'e kuery rovai, tetã kora rokê py oikea peve.

²⁴ Ha'e ramo hu'y revegua kuery ikora yvatea gui nerembiguai kuery rovai omombo ramo amongue'i omano ndee xeruvixa rembiguai kuery. Ha'e gui omano avi nerembiguai heteu regua Urias.

²⁵ Davi aipoe'i ayvu mombe'ua pe:

— Po rami 'rã aipo're Joabe pe: “Ndepy'a vai eme ha'e nungakue re, mba'eta kyxe py jojuka 'rãe joguero'aa py. Pejoguero'ave tema tetã rovai ha'e peitypa”, 're 'rã. Po rami 'rã rembopy'a guaux Joabe — he'i.

Bate-Seba re Davi omendaague

²⁶ Ha'e gui Urias ra'yxy ma ome omano oendu vy ojae'o.

²⁷ Ojae'o vaipa ma rire Davi omonger ruka rã herua hoo py. Ha'e rã ta'yxy ju ma oiko vy oguereko peteĩ kyrĩ va'e. Ha'e rami teĩ Davi ojapo va'ekue ma SENHOR pe nda'evei va'e.

12

Davi pe Natã ijayvuague

¹ Davi-a py SENHOR ombou profeta Natã. Ha'e py Natã ovaê vy aipoe'i ixupe:

— Peteĩ tetã py ma je oiko mokoĩ avakue. Peteĩ je oguerekopa va'e, ha'e rã amboa ma je iporiaukue'i.

² Oguerekopa va'e ma vexa'i ha'e vaka kuery heta oguereko.

³ Ha'e rã iporiaukue'i va'e ma je mba'eve ndoguerekoi, peteĩ vexa ra'y'i ojogua va'ekue ombotuvixa va'e e'ÿ vy. Ha'e va'e ma hoo py tuvixa'i ta'y kuery reve. Ha'e kuery reve okaru, ha'e kuery karo gui oy'u guive. Ijyva áry oke ramo guajy rami oguereko.

⁴ Ha'e gui oguerekopa va'ea py peteĩ ovaê mombyry gui ou va'ekue. Ha'e ramo ha'e va'e ndojukaxeĩ guymba kuery vexa'i ha'e vaka ae, mombyry gui ou va'ekue omongaru aguã. Ha'e rami 'rãgue py ojopy iporiaukue'i va'e rymba vexa'i, ha'e vy ae omongaru ava ovaê va'ekue — he'i.

⁵ Ha'e ramo Davi ivai raxa ava ha'e rami ete joapo va'ekue pe. Ha'e vy aipoe'i Natã pe:

— Anhetē ete SENHOR oikove va'e rery rupi aura vy aipoa'e: Ava ha'e rami joapo va'ekue ma ojukaa ramo 'rā ha'eve.

⁶ Ha'e vexe ra'y'i ojuka va'ekue rekovia ma irundy ju 'rā ome'ē, nhomboaxya rupi e'y ojapo rire — he'i.

⁷ Ha'e ramo Natā ombovai Davi pe:

— Ha'e va'e ava ma ndee ae. Po rami SENHOR Israel kuery ruete ijayvu: Xee roiporavo va'ekue Israel kuery ruvixarā, Saul po gui rogueraa jepe guive.

⁸ Ndevy ame'ē nderuvixa rokue, ha'e ndeyjva py amboaxa ta'yxykue ha'e javi. Ndevy amboaxa avi Israel ha'e Judá kuery. Ha'e rā ha'e nunga mboapy'i raka'e va'e rire mba'emo ame'ē retave heravy 'rāgue ndevy.

⁹ Mba'e re tu nderexari ri SENHOR ijayvua gui, mba'emo vai rei rejapo vy? Mba'eta heteu regua Urias ma rejuka uka kyxe py. Ha'e gui ta'yxykue ma ndera'yxyrā rejopy, Amom ra'y kuery kyxe py ime rejuka uka rire.

¹⁰ Ha'e rami rire a'y guive ndero py ndoiko e'y'i 'rā kyxe jojukaarā, mba'eta xereja vy heteu regua Urias ra'yxy reraa rire.

¹¹ — Po rami SENHOR ijayvu: Ma'ē, ndero gui ae amoingo 'rā mba'emo vai nde'ary, ha'e vy ndee ae rexaa py ajopy ukapa 'rā ndera'yxy kuery, neirū pe ju 'rā amboaxa. Ha'e va'e ae ju 'rā onheno ha'e kuery reve, ára porā rei jave.

¹² Mba'eta ndee ma nhemi rupi rejapo, ha'e rā xee ma ha'e nunga ajapo 'rā Israel kuery ha'e javi oexaa py, kuaray rexakāa py ae — he'i.

¹³ Ha'e rami rā Davi aipoe'i Natā pe:

— Ajevavy raka'e SENHOR pe.

Natā ombovai Davi pe:

— SENHOR ndeperdoa rejeyavyague gui. Ndee ma neremanoi 'rā.

¹⁴ Ha'e rami avi rejapo vaiguae káuxa ma SENHOR rovaigua kuery ijayvu rei okuapy. Ha'e gui ndera'y oiko rire omano 'rā — he'i.

¹⁵ Ha'e gui ma Natā oo ju ngoo katy.

Bate-Seba pi'a omanoague

Ha'e gui SENHOR omoingo axy Davi ra'y'i Urias ra'yxykue oguereko va'ekue. Ha'e rā kyrī va'e imba'eaxy vaipa.

¹⁶ Kyrī va'e re Davi ojapukai Nhanderuede pe. Okaru e'y re guive oiko, ha'e pytū mbukukue oaxa oupy yvy rupi ipukupave.

¹⁷ Ha'e ramo nhomongeta va'ety kuery hoo py ikuai va'e onhemboja okuapy hexe, yvy gui omopu'axe vy. Ha'e rā ha'e ma nupu'axe, ha'e kuery reve ndokaruxei guive.

¹⁸ Sete araa py ma kyrī va'e omano. Ha'e rā hembiguai kuery okyje okuapy kyrī va'e omano maa Davi pe omombe'u aguā, mba'eta ha'e kuery aipoe'i okuapy:

— Ma'ē, kyrī va'e oikove'i teri reve nhandeayvu ramo noendu potai. Mba'exa 'rā tu kyrī va'e omano maa nhamombe'u ramo? Mba'eta iporiauve ju 'rā — he'i okuapy.

¹⁹ Davi ma hembiguai kuery joupe-upe ijayvu mbegue rā oexa vy oikuaa kyrī va'e omano maa. Ha'e vy oporandu guembiguai kuery pe:

— Kyrī va'e pa omano ma ra'e?

Ha'e kuery ombovai:

— Omano ma — he'i.

²⁰ Ha'e ramo Davi opu'ā ju yvy gui. Ojau, onhemoatyrō ha'e oao omboekovia ma vy SENHOR pegua opy oike vy omboete. Ha'e gui ma ngoo katy ju ou vy ojerure tembi'u oguerua aguā re. Henonde omoia rā ho'u.

²¹ Hembiguai kuery aipoe'i okuapy:

— Mba'e tu rejapo? Kyrī va'e oikove'i teria ja ma rekaru e'y re reiko, rejae'o guive. Va'eri omano ma rire revy vy mbojape guive re'u reiny.

²² Ombovai:

— Kyrī va'e oikove'i teria ja rima akaru e'y re aiko, ajae'o guive, mba'eta aipoa'e vy: “ SENHOR xemboaxy nho rivyvyi gui, ha'e rā pa kyrī va'e oikove tema 'rā?” ha'e va'ekue.

²³ Ha'e gui a'y ma omano ma rire mba'e re 'rā'vy akaru e'y re aiko? Xee nda'u amoingove ju 'rā teve? Xee aa 'rā ha'e oia py, tei ha'e ma ndou jevyvei 'rā xeve — he'i.

²⁴ Ha'e gui ma Bate-Seba oia py Davi oo vy ijayvu porā'i, hexeve onheno guive. Ha'e ramo oguereko'i petē'ava'i. Ha'e va'e ma Davi omboery Salomão. Ha'e rā SENHOR voi oayvu.

²⁵ Profeta Natā po py Davi omoī ramo oenoī Jedidias, SENHOR oayvu ramo.*

1 Crônicas 20.1-3

²⁶ Ha'e ramia ja Joabe kuery joguero'a teri Amom ra'y kuery retā Rabá rovai, ha'e vy ipo'aka okuapy huvixa rekoa oi va'e re.

²⁷ Ha'e ramo Davi-a py Joabe ombou ayvu mombe'ua aipoe'i va'erā: “Rabá rovai ajoguero'a vy xepo'aka ma yy tetā pygua kuery oy'u aguā va'ekue re.

²⁸ Ha'e gui a'y ma emono'ōve ju ndejepegua kuery mboae, ha'e pejoko tetā pendepo'aka peve, xee ae xepo'aka ramo xerery rupi oenoia e'y aguā”, he'i uka.

* 12:25 Salomão ma hery mokoī va'e. Tery Jedidias ma “ SENHOR rembiayvu” 'ea. Ha'e rā tery Salomão ma “Joguereko porā'i va'e” 'ea.

²⁹ Ha'e ramo Davi amboae kuery ha'e javi omono'õmba vy Rabá tetã katy oje'oi. Ha'e va'e tetã rovai joguero'a vy ipo'aka.

³⁰ Ha'e pygua huvixa akã gui omboi coroa. Ha'e va'e re ouro oĩ va'e poyia ma trinta e três quilo rivyvyi, ha'e va'e re oĩ avi ita hepykueve va'e. Ha'e gui Davi akã re ju omoĩa. Ha'e va'e tetã gui ogueraa reta mba'emo.

³¹ Ha'e py ikuai va'ekue ogueraa avi vy omomba'eapo yvyra ayaa py, picareta ha'e haxa ferro guigua py, ha'e gui yvy jykue apoa py. Ha'e rami Davi ojaço Amom ra'y kuery retã ha'e javi re. Ha'e gui heta va'e kuery ha'e javi reve Davi ojevvy ju Jerusalém katy.

13

Amnom gueindy reve itavyague

¹ Davi ra'y Absalão oguereko raka'e gueindy iporã vaipa va'e, Tamar hery va'e. Ha'e va'e re ma Davi ra'y mboae Amnom va'e opena rei.

² Amnom nda'evei oiko gueindy Tamar re, imba'eaxy peve, teĩ kunha va'e ma avakue oikuaa va'e'y teri ramo haxy ete ha'e nunga ojaço aguã.

³ Amnom oguereko peteĩ oirũ, Davi ryvy Siméia ra'y, Jonadabe hery va'e. Jonadabe ma oiko kuaa rei va'e.

⁴ Ha'e va'e aipoe'i Amnom pe:

— Mba'e re tu ko'ẽ nhavõ ne'angaive reovy? Neremombe'uxei teve xevy?

Ha'e ramo Amnom onhemombe'u:

— Ayvu xeryvy Absalão reindy Tamar — he'i.

⁵ Jonadabe aipoe'i ixupe:

— Enheno nderupa py, enhemomba'eaxy merami ejupy. Nderu ndepou vy ou ramo aipo're: "Ajerure xereindy Tamar ou vy mbojape ome'ẽ aguã, mba'eta tembi'u ojaço rã aexa vy ha'u 'rã ipo gui", 'rã 'rã — he'i.

⁶ Ha'e ramo Amnom enheno vy onhemomba'eaxy oupy. Huvixa oipou vy ou rã Amnom aipoe'i ixupe:

— Ajerure xereindy Tamar ou vy tojapo mokoĩ mbojape aexaa py, ipo gui ha'u aguã — he'i.

⁷ Ha'e ramo Davi aipoe'i uka Tamar pe ngoo py oĩa py:

— Tereo ndekyvy Amnom ro py, ejapo tembi'u ixupe — he'i.

⁸ Okyvy Amnom ro py Tamar ovaẽ rã onheno oupy. Kunha va'e trigo apomo ogueru vy mbojape ojaço, ha'e vy ombojy oexaa py.

⁹ Oexya renda oguerova ixupe teĩ Amnom ndo'uxei. Ha'e rami 'rãgue py aipoe'i:

— Tojepe'apaa xea gui — he'i. Ha'e ramo ha'e javive ojepe'apa.

¹⁰ Ha'e gui ma Amnom aipoe'i gueindy Tamar pe:

— Eru tembi'u xerupa py, ha'e ramo ha'u 'rã ndepou gui — he'i ramo Tamar mbojape ojaço va'ekue ogueru okyvy Amnom rupa okeaty peve.

¹¹ Ome'ẽ ramove ojopy kunha va'e jyva re, ha'e vy aipoe'i:

— Xereindy, eju, enheno xereve — he'i.

¹² Ha'e rami teĩ kunha va'e ombovai:

— Any xekyvy, enhea'ã rei eme, mba'eta Israel re ma namigua ojaço va'e'y. Ejapo eme mba'emo vai.

¹³ Mamo 'rã tu aa aximba reve? Ha'e rã ndee ma Israel kuery ndekuaa 'rã inhakã porã e'y va'e rami. A'y ma ajerure huvixa reve ndeayvu aguã re. Ha'e ma naxeme'ẽ e'y'i 'rã ndera'yxyrã — he'i.

¹⁴ Ha'e rami teĩ ikyvy noendu potai kunha va'e ijayvua re. Ha'e imbaraeteve vy onhea'ã rei vy nhogueronheno kunha va'e reve.

¹⁵ Ha'e rire Amnom oendu nda'ija'evei etea, jypy oayvuague rami e'y. Ha'e vy Amnom aipoe'i ixupe:

— Epu'ã, tereo ju.

¹⁶ Ha'e ramo kunha va'e ombovai:

— Any, xekyvy. Xemondouka rive jevvy va'e rire jypy xere rejapo va'ekue gui nda'eveive 'rãgue — he'i.

Ha'e rami teĩ ikyvy noendu potai vy

¹⁷ guembiguai kunumi va'e oenoĩ vy aipoe'i:

— Emoẽ kunha va'e oka py, ha'e gui emboty okẽ — he'i.

¹⁸ Ha'e ramo hembiguai kunumi va'e oka py omoẽ vy omboty okẽ.

Tamar ma ao ijyva puku va'e py onhemonde, huvixa rajy kuery kunhata'i va'e onhemondea rami.

¹⁹ Ha'e gui tanhimbu ojopy vy omoĩ oakã re, omondoropa oao ijyva puku va'e onhemondea, ha'e vy oakã re oyo omoĩ reve ojepe'a. Ojae'õ atã ovy.

²⁰ Ha'e gui ikyvy Absalão ju oexa vy aipoe'i ixupe:

— Ndekyyvy Amnom teve oĩ ra'e ndereve? Ma'ẽ xereindy, ekyrirĩ ma'vy. Ndekyyvy ranga oiko. Ndepoy'a vai eme ha'e nungakue re — he'i. Ha'e rami rire Tamar iporiau vaipa reve okyvy Absalão ro py ju oiko.

²¹ Huvixa Davi ha'e nunga ha'e javi oendu vy ivai.

²² Ha'e rã Absalão ma guyke'y Amnom reve nda'ijayvu porã neĩ nda'ijayvu vai guive, gueindy Tamar re onhea'ã reiaque re.

Guyke'y Amnom Absalão ojuka ukaague

²³ Mokoĩ ma'etỹa ma oaxa rire Absalão ojaya oikovy guymba kuery vexa'i rague Baal-Hazor py, Efraim katy'i oĩ va'e py. Ha'e vy Absalão oenoĩ uka huvixa ra'y kuery ha'e javi ha'e py ou aguã.

²⁴ Ha'e vy huvixaa py Absalão oo vy aipoe'i ixupe:

- Ma'ê, xee nerembiguai ajaya aikovy vexa'i rague. Xeruvixa, ajerure reo aguã nerembiguai kuery reve.
- ²⁵ Ha'e rami teĩ huvixa ombovai:
— Any xera'y, ndorooi 'rã rojavai, ndevy pe mba'emo oata e'ÿ aguã — he'i. Ta'y Absalão ogueraaxea rami ijayvu tema va'eri ndooxei. Ha'e rami teĩ ogueroayvu porã.
- ²⁶ Ha'e rami rã Absalão aipoe'i:
— Ndee ndereoxei teĩ xeryke'y Amnom ri jepe emondouka orereve.
Huvixa oporandu:
— Mba'erã tu ha'e oo 'rã ndereve? — he'i ramo
- ²⁷ Absalão onhea'ã rei tema. Ha'e ramo huvixa omondouka nho Amnom, gua'y kuery ha'e javive reve.
- ²⁸ Ha'e gui Absalão ma guembiguai kunumigue pe ijayvu vy aipoe'i:
— Peikuaa pota rei ke. Amnom vinho gui oka'u vaipa ma vy ovy'a rei jave pendeivy “Pejuka ke Amnom” ha'e ramo pejuka. Pekiye eme. Xee e'ÿ ri ty'y ha'e rami ajapo uka? — he'i.
- ²⁹ Ha'e rami rã Absalão rembiguai kunumigue Amnom re ojapo okuapy Absalão ojapo ukaague. Ha'e ramo huvixa ra'y kuery ikuai va'e oexa vy opu'ãmba vy peteĩ-teĩ guymba áry oĩ vy onhamba.
- ³⁰ Ha'e kuery tape rupi teri oo reve ayvu mombe'ua ovaê Davi-a py aipoe'i va'e:
— Xeruvixa, Absalão tu ndera'y kuery ha'e javive ma ojukapa, neĩ peteĩve ndopytai — he'i.
- ³¹ Ha'e rami rã huvixa opu'ã vy omondoro oao, ha'e ho'a yvy rupi. Hembiguai kuery hexeve ikuai va'e ha'e javi avi omondoro oao.
- ³² Davi ryvy Siméia ra'y Jonadabe oĩ avi. Ha'e va'e ombovai vy aipoe'i:
— Xeruvixa, exa'ã eme ndera'y kuery ha'e javi ojukapaa rami, Amnom anho'i omano. Mba'eta Absalão ma gueindy Tamar re Amnom onhea'ã reia ára guive ha'e rami aguã ae onhembopy'a va'ekue.
- ³³ Ha'e nunga rupi aÿ xeruvixa, erovia eme ha'e rami ete, ndera'y kuery omanombaa rami e'ÿ. Mba'eta Amnom anho'i ko omano — he'i.
- ³⁴ Ha'e gui Absalão ma ojava ma ra'e.
Ha'e gui tembiguai oikuaa pota ho'amy va'e ma guakykue katy tape oĩ va'e re oma'ê vy oexa yvy'ã katy gui heta oguejy jekuaa jogueruvy va'e.
- ³⁵ Ha'e ramo Jonadabe aipoe'i huvixa pe:
— Xeruvixa, pee ma ou jekuaa ndera'y kuery. Xee nerembiguai xeayvuague rami ae oiko ra'e — he'i.
- ³⁶ Ha'e va'e ijayvupa ramove'i huvixa ra'y kuery ovaẽmba okuapy. Ha'e vy onhendu ratã reve ojae'o okuapy. Ha'e rã huvixa ha'e hembiguai kuery ha'e javive avi ojae'o raxa okuapy.

Talmai rekoa katy Absalão ojavaague

- ³⁷ Ha'e rã Absalão ma ojava vy oo Gesur pygua huvixa Amiúde ra'y Talmai rekoa katy. Ha'e rã Davi ma ojae'o tema gua'y re ko'ê nhavõ.
- ³⁸ Ha'e rami vy Absalão ojava vy oo Gesur katy. Ha'e py ma mboapy ma'et'ÿa peve oiko.
- ³⁹ Ha'e ramo ma Davi opytu'u Absalão oekaa gui, mba'eta ipy'a porã ju ma Amnom omanoague gui.

14

Jerusalém tetã katy Absalão ojevjuague

- ¹ Ha'e gui huvixa opy'a py oexa nga'u tema gua'y Absalão. Ha'e nunga Zerua pi'a Joabe oikuaa vy
- ² ogueru ruka peteĩ kunha hi'arandu va'e Tecoa tetã gui. Ha'e vy aipoe'i ixupe:
— Ejexa uka iporiau vaipa va'e rami, emoi ao ndeporiau pygua, enhemoatyro eme azeite py, ha'e enhemoingo omano va'ekue re are ma iporiau oikovy va'e rami.
- ³ Ejexa uka ha'e rami huvixa pe, ha'e ndeayvu hexeve aipoa'eague rupi anho — he'i. Ha'e vy Joabe omombe'u ijayvu aguã.
- ⁴ Ha'e gui huvixa pe Tecoa pygua kunha ojexa uka vy ojero'a reve oĩ guenapy'ã re, ngova yvy re omovaẽ reve. Ha'e vy aipoe'i:
— Xeruvixa, xepytyvõ ke!
- ⁵ Huvixa oporandu:
— Mba'e ha'vy rereko?
Ombovai:
— Aikore! Xee nerembiguai ma kunha imeve'ÿ va'e aiko xeme omano rire.
- ⁶ Xee areko va'ekue mokoi xepi'a. Ha'e kuery ma jomeme joguero'a mba'ety py. Imboja'oarã nda'ipoai rã peteĩ ma gukye'y oipyxo vy ojuka.
- ⁷ Ha'e ramo xeretará kuery ha'e javi opu'ãmba okuapy xee nerembiguai rovai, ha'e vy aipoe'i okuapy xevy: “Emboaxa na orepo py gukye'y jukaare, rojuka aguã omano va'ekue rekovia, ha'e rami vy romomba aguã ndee rire nembra'ekue jopyarã”, he'i okuapy. Ha'e rami vy 'rã ha'e kuery ombogue tapyĩ opa vygua areko va'ekue, ha'e xeme rery voi, ta'ykue yvy re ndoikovevei aguã rami — he'i.
- ⁸ Kunha va'e pe huvixa ombovai:
— Tereo ndero katy. Ha'e rã xee ajapo 'rã ndeayvuague — he'i.
- ⁹ Tecoa pygua kunha aipoe'ive ju huvixa pe:
— Ha'e gui xeruvixa, tove xere ha'e xeru ro pygua kuery re toĩ ha'e nungakue re ropaga aguã. Ha'e rã ndee xeruvixa, tenda repenaaty py rei va'e re toĩ eme.
- ¹⁰ Huvixa ombovai:

— Nderovai ijayvuave ri ramo eru xea py. Ha'e ramo nanemoangekovei 'rã — he'i.

¹¹ Kunha va'e aipoe'i:

— Ha'e rami rã xeruvixa, eura ke SENHOR Nderuete rery rupi, ojepyxe vy ou va'e kuery ojuka e'y aguã xepi'a jouguy omoëague re.

Ombovai:

— Anhetê ete SENHOR oikove va'e rupi aura vy aipoa'e: Neĩ peteĩ'i ma voi ndepi'a'a ndo'a rivei 'rã vvy py — he'i.

¹² Ha'e gui ma kunha va'e aipoe'i:

— Xeruvixa, tove xee nerembiguai tamombe'uve'i ju peteĩ ayvu ndevy.

Ombovai:

— Emombe'u tema — he'i.

¹³ Kunha va'e ijayvuve tema:

— Mba'e re tu ndee ha'e rami e'y renhembopy'a Nhanderuete pegua kuery rovai reiko aguã? Mba'eta xeruvixa, ha'e rami ndeayvua rami vy ndee ae renhembopaga uka, mba'eta ndee voi ndereru ruka jevyxei ndera'y amboae vvy katy remondouka va'ekue.

¹⁴ Mba'eta nhande kuery ma nhamano 'rãe, vvy py yy onhoê mbyre nanhamboyru kuaaveia rami. Ha'e rã Nhanderuete ma nanhandejuka rivei 'rã, ha'e rami 'rãgue py onhembopy'a 'rã henonde gui omondouka pyre mombyry riae ikuai e'y aguã re.

¹⁵ Aỹ ma xeruvixa, pova'e ayvu rupi ndereve xea yvu vy ae aju, heta va'e kuery xemongyje ramo. Ha'e ramo xee nerembiguai aipoa'e: “Xea yvu 'rã huvixa reve. Xapy'a rei rã ha'e ojapo 'rã xea yvua”, ha'e vy aju.

¹⁶ Mba'eta ndee xeruvixa, xee nerembiguai re reikuaa pota 'rã avakue po gui xerepy aguã, xee ha'e xepi'a rekove ha'e kuery oipe'a e'y aguã, Nhanderuete mba'emo ome'ê rã rojopy e'y aguã rami.

¹⁷ Xee nerembiguai teĩgue ju aipoa'e ta: Aỹ xeruvixa, ndeayvu ke aiko porã ju aguã rami. Mba'eta ndee ma Nhanderuete guigua anjo rami reikuaa va'e mba'emo porã ha'e mba'emo vai. Ha'e SENHOR Nderuete oiko 'rã ndereve — he'i.

¹⁸ Ha'e ramo huvixa ombovai vy aipoe'i kunha va'e pe:

— Ajerure renhenhomi e'y aguã ndevy aporandu taa re.

Kunha va'e ombovai:

— Ndeayvu ha'vy, xeruvixa — he'i.

¹⁹ Huvixa aipoe'i:

— Joabe e'y teve ndereve ijayvu va'ekue pova'e ha'e javi rupi ndeayvu aguã?

Kunha va'e ombovai:

— Anhetê ete xeruvixa, nderekove rupi aura vy aipoa'e: Ndeayvua gui mava'eve ojepe'a aguã nda'evei, oiporu kuaa regua katy neĩ oiporu kuaa e'ya katy. Mba'eta anhetê nerembiguai Joabe ae ri xembou ra'e pova'e ayvu ha'e javi rupi xea yvu aguã.

²⁰ Ha'ekue rami ve'y reiko aguã ae ri nerembiguai Joabe ojapo uka ha'e rami. Ha'e rami teĩ xeruvixa, Nhanderuete guigua anjo rami ne'arandu va'e vy vvy jave re oiko va'e teĩ reikuaapa 'rã — he'i.

²¹ Ha'e gui ma Joabe pe ju huvixa aipoe'i:

— Aendu ma rejerure ukaa. Tereo ha'vy, eru kunumi Absalão — he'i.

²² Ha'e ramo Joabe ojero'a vy guenapy'ã re oĩ ngova vvy re omovaẽ peve. Ha'e vy huvixa ogueroayvu porã vy aipoe'i:

— Aỹ ma xeruvixa, aikuaa ma ndee xejou porã, xee nerembiguai ajerure ukaague rejapo rire — he'i.

²³ Ha'e rami vy Joabe opu'ã vy oo Gesur katy. Ha'e vy Jerusalém py ju ogueru Absalão.

²⁴ Ha'e rami rã huvixa aipoe'i:

— Tojey ju ngoo py xerova oxa e'y re — he'i ramo Absalão ngoo py ae ojey huvixa rova oxa e'y re.

Absalão iporã re ijayvuague

²⁵ Israel ha'e javi rupi amboae nda'ipoi Absalão rami ojou porãmy. Ipy guive ijapyte peve noĩ ivaikuea.

²⁶ Hi'a ma ma'et'ya oapa nhavõ ojaya vy ipoyia oexaa rã dois quilos raxa'i 'rã, mba'emo opejaa huvixa oiporu uka va'e rami.

²⁷ Oiko avi ta'y mboapy ha'e peteĩ'i tajy, Tamar hery va'e. Ha'e va'e kunha ma jaexa rã iporã ete va'e.

Davi oĩa py Absalão ooague

²⁸ Mokoĩ ma'et'y re ma huvixa rova oxa e'y re Jerusalém py Absalão oiko vy

²⁹ oenoĩ uka Joabe, huvixaa py omondouka aguã teĩ ha'e ndouxei. Peteĩgue ju oenoĩ uka teĩ ha'e ndouxei.

³⁰ Ha'e ramo aipoe'i guembiguai kuery pe:

— Ma'ẽ, pee py ma Joabe mba'ety itui xemba'ety re oje'a va'e, cevada onhot'yague. Tapeo peapy — he'i ramo Absalão rembiguai kuery oapy imba'ety.

³¹ Ha'e rami rã Joabe opu'ã vy oo Absalão ro py. Ha'e vy aipoe'i:

— Mba'e re tu nerembiguai kuery oapy ri xemba'ety?

³² Absalão ombovai:

— Roenoĩ uka vy aipoa'e va'ekue: “Eju apy, huvixaa py romondouka aguã, po rami xea yvu remombe'u aguã: ‘Mba'erã tu aju raka'e Gesur tetã aikoague gui? Ha'eeve 'rãgue ha'e py ae aiko va'e rire’, 're aguã.” Aỹ ma xee aexaxe huvixa rova. Xapy'a rei xee ri ajejavu ramo ma taxejuka — he'i Joabe pe.

³³ Ha'e ramo huvixaa py Joabe oo vy omombe'upa. Ha'e ramo mae huvixa oenoĩ uka Absalão. Ha'e ramo oo vy ojexa uka huvixa renonde, ngova yvy re omovaẽ reve. Ha'e ramo huvixa oayvupa.

15

Absalão opu'ã rei ramo Davi kuery onhambaaague

¹ Ha'e va'e rire ma Absalão ojeupe ae ojou peteĩ karóxa, kavaju kuery ha'e cinqüenta avakue henonde oo va'erã.*

² Ha'e rami vy aje'ive'i reve Absalão ovy vy opyta 'rã ho'amy tetã kora rokẽ py. Ha'e ramo avakue huvixaa katy mba'emo re oikuaa pota uka vy oo va'e ha'e javi pe Absalão aipoe'i 'rã: "Mava'e tetã guigua tu ndee?" he'i rã ombovai vy "Israel regua ae ri xee nerembiguaĩ aiko" he'i

³ ramo ma Absalão aipoe'ive ju 'rã ixupe: "Ma'ẽ, reikuaa pota ukaa va'e ma ha'evea ramigua, ha'evea rami meme. Ha'e rami teĩ huvixa ma avave rei nomoĩ oendu va'erã", he'i 'rã.

⁴ Absalão aipoe'ive ju 'rã: "Aikore! Yvy re opena va'etryã xemoĩa va'e rire, avakue mba'emo re oikuaa pota uka vy, e'ỹ vy ojerure aguã xea py ou ramo ha'e kuery re ajapo 'rãgue ha'evea ramigua memel!" he'i 'rã.

⁵ Ha'e rami ae avi henonde amongue ou vy henonde yvy py ojero'a ta ramo ha'e okuave'ẽ vy omopu'ã ju 'rã oayvupa reve.

⁶ Ha'e rami py Absalão ojapo Israel kuery huvixaa katy mba'emo re oikuaa pota uka vy oo va'e ha'e javi re. Ha'e rami vy ojee meme oguerovapa avakue Israel kuery kuraxõ.

⁷ Irundy ma'etỹ opaa py ma Absalão aipoe'i huvixa pe:

— Tove Hebrom tetã katy taa SENHOR pe anhemboavyuague ajapo aguã.

⁸ Mba'eta Síria re Gesur tekoa py teri aiko jave xee nerembiguaĩ anhemboavyvu vy aipoa'e va'ekue: "Xapy'a rei Jerusalém katy ajeyu aguã rami SENHOR xeapo ri ramo ambojerovia 'rã", ha'e rire.

⁹ Huvixa ombovai:

— Tereo porã ke — he'i. Ha'e ramo opu'ã vy Hebrom katy oo.

¹⁰ Ha'e rami avi Absalão nhemi rupi omondouka ayvu mombe'uarã Israel kuery va'e regua ha'e javi rupi. Ha'e vy aipoe'i:

— Mimby guaxu pu pendu vy aipopeje 'rã: "Absalão ma Hebrom tetã py oĩ nhanderuvixa", peje.

¹¹ Jerusalém gui Absalão rupive oje'oi duzentos avakue oenoĩ va'ekue. Ha'e va'e kuery ma oo tema rive, mba'erã paa oikuaa vy e'ỹ.

¹² Absalão mba'emo Nhanderuetete pe ome'ẽ oikovy jave oenoĩ uka avi Davi mongetaaty Aitofel Gilo tetã py hekoa va'e. Ha'e rami py huvixa rovaigua kuery imbaraeteve oje'oivy, heta-etave tema ou Absalão-a katy guarã.

¹³ Ha'e gui peteĩ ou ayvu mombe'ua Davi pe. Ha'e vy aipoe'i:

— Israel kuery ha'e javive ko Absalão re anho ovapa — he'i.

¹⁴ Ha'e rami rã Davi aipoe'i Jerusalém py hexevegua avakue ikuai va'e pe:

— Pepu'ã ke, nhanha, mba'eta Absalão gui ndajaa jepe reguai teve. Pejapura ke jaje'oi pojava, nhanderupity xapy'a e'ỹ aguã, ha'e nhande'ary mba'emo vai ogueru reve tetã py ikuai va'e ha'e javi ojukapa e'ỹ aguã kyxe py.

¹⁵ Ha'e ramo huvixa Davi revegua avakue ombovai:

— Ma'ẽ, apy ma nerembiguaĩ orekuai, oreruvixa ojapo uka va'e tema rojapo aguã ae — he'i okuapy.

¹⁶ Ha'e gui huvixa ojepe'a ramo hoo pygua kuery ha'e javi oje'oi hexeve. Va'eri ojea avi dez gua'yxy jevy kuery ngoo re opena va'erã.

¹⁷ Ha'e rami vy heta va'e kuery hupive oje'oi va'e reve huvixa oo rã oo ijapy'i py oĩ va'e py opytapa ranhe.

¹⁸ Ha'e gui hexevegua avakue ha'e javi oaxa henonde katy. Ha'e vy harõa ha'e Gate pygua kuery ha'e javi ju, seiscentos avakue Gate pygua hupive oje'oi va'ekue oaxa jogueravy huvixa renonde.

Itai ojeroviapy oikoa oexa ukaague

¹⁹ Ha'e gui ma huvixa aipoe'i Gate pygua Itai va'e pe:

— Mba'e re tu ndee reoxe avi ore kuery reve? Ejevy ju, epyta penderuvixarã ou va'e reve, mba'eta amboae yvy guigua reiko, ndeyvy gui ae mombyry reiko va'e.

²⁰ Kuee rei revaẽ va'ekue ma nhi'ã xee rogueraa ta ma avi xerupive aỹ, neĩ xee ma voi ndaikuaai marã katy pa aa aguã va'eri? Ejevy ju, erojevypa avi nderyvy kuery. Tove ndere toĩ Nhanderuetete nemoaxya ha'e ojeroviapy oikoa.

²¹ Ha'e ramo Itai ombovai huvixa pe:

— Anhetẽ ete SENHOR oikove va'e rupi, ha'e ndee xeruvixa nderekove rupi avi aura vy aipoa'e: Mamo rã rei ndee xeruvixa reia py ae xee nerembiguaĩ aiko avi 'rã, amano e'ỹ vy aikove aguã teĩ — he'i.

²² Ha'e ramo Davi aipoe'i Itai pe:

— Tereo ha'vy, eaxa xerenonde katy — he'i. Ha'e ramo Gate pygua Itai ma hexevegua avakue ha'e javi reve oo, kyrĩgue guive.

²³ Ha'e kuery oo rã ha'e va'e yvy re ikuai va'e oexa vy ojae'o ratã pavẽ.† Ha'e rã ha'e kuery oaxa oje'oivy. Cedrom yakã huvixa voi oaxa, tekoa e'ỹa katy tape oĩ va'e rupi oo vy.

* 15:1 Israel pygua huvixa kuery gui Absalão ranhe guendarã karóxa ojou raka'e. Opa mba'e ojapo huvixarã onhemoingo aguã. † 15:23 Ha'e kuery ojae'o mba'eta huvixa guetã gui onha ramo (versículo 20).

Jerusalém tetã katy ju Zadoque, Abiatar ha'e Husai ombojevuyague

²⁴ Oaxa avi sacerdote Abiatar ha'e Zadoque. Ha'e kuery reve oje'oi avi levita kuery SENHOR guexeve guarã ojapo va'ekue ryru reraa kuery. Ha'e py omboguejy ranhe, tetã gui ha'e kuery ha'e javi oẽ vy oaxapa peve.

²⁵ Ha'e ramo huvixa Davi aipoe'i Zadoque pe:

— Perojevuy ju SENHOR ayvu ryru tetã katy. SENHOR rembiexa rupi xemboaxy ri vy xeapo 'rã ha'e katy ju ajevuy aguã rami hyru aexa ju aguã, oiaty voi.

²⁶ Ha'e rami teĩ xapy'a rei SENHOR xevy “Xee ndoguerovy'avei”, he'i ramo, ma'ẽ, xee ma apy ha'ã. Tojapo xere ha'e oipotaa rami — he'i.

²⁷ Sacerdote Zadoque pe huvixa aipoe'ive ju:

— Ndee ha'e Abiatar imba'ekuaa va'e vy pejevuy porã'i ke tetã katy. Penderere too porã'i avi pendera'y mokoĩ: ndera'y Aimaás, Abiatar ra'y Jônatas guive.

²⁸ Ma'ẽ, peẽ pemombe'u uka jevy e'ÿa ja xee apyta ranhe 'rã yy oaxaaty tekoa e'ÿa katy oĩ va'e py — he'i.

²⁹ Ha'e ramo Zadoque ha'e Abiatar ma Jerusalém katy ju ogueraa Nhanduerete ayvu ryru. Ha'e py ae opyta.

³⁰ Ha'e gui Davi oguatave ovy vy Oliveiras yvy'ã rupi oẽ ovy ojae'o reve. Oakã ojae'i ha'e ipy rei reve oguata ovy. Hupive oje'oi va'e ha'e javi oakã ojae'i reve meme ojae'o avi jogueravy.

³¹ Ha'e rire Davi pe omombe'ua vy aipoe'ea:

— Aitofel voi Absalão reve opyta ndere opu'ã rei va'e kuery mbyte.

Ha'e ramo Davi aipoe'i:

— SENHOR, xee ajerure: ejapo Aitofel o'arandua rupi e'ÿ nhomongeta aguã rami — he'i.[‡]

³² Ha'e gui vyty apyte áry Davi ovaẽ SENHOR ombojeroviiaaty py. Ha'e jave ha'e oma'ẽ rã peteĩ ovaẽ ouvy arquita regua Husai. Ha'e va'e ma oao puku oxoropa va'e py onhemonde reve ou, ha'e oakã re vvy omoĩ reve.

³³ Ixupe Davi aipoe'i:

— Xerupive reo aguã ri reju ramo nda'evei xevy.

³⁴ Ha'eveve 'rã tetã katy rejevy vy Absalão pe aipo're: “Aÿ ma xeruvixa, xee ma nerembiguai ju 'rã aiko, nderu rembiguai aikoague rami avi. Ha'ekue rami ae 'rã aiko nerembiguai”, 're vy rejapo 'rã Aitofel ijayvu rã Absalão oendu ve'ÿ aguã rami.

³⁵ Ha'e py ndereve ikuai avi 'rã sacerdote kuery Zadoque ha'e Abiatar. Huvixa ro py mba'emo rendu va'ekue ha'e javi 'rã remombe'u uka ha'e kuery pe.

³⁶ Ta'y kuery avi 'rã ikuai ha'e py: Zadoque ra'y Aimaás ha'e Abiatar ra'y Jônatas. Ha'e kuery pe ma xeremiendurã pemombe'u uka 'rã mba'emo pyau pendu va'ekue ha'e javi — he'i.

³⁷ Ha'e ramo Davi irũ Husai ojevy ju tetã katy. Absalão voi ovaẽ ma avi Jerusalém py.

16

Davi reve Ziba ijayvuague

¹ Ha'e gui Davi ma vvy'ã guy katy ojapyro ovy jave ou jekuaa oiny Mefibosete rembiguai Ziba.* Ha'e va'e ma mokoĩ mymba mburika'i ogueru ombokupe áryguapa va'ekue, ha'e hi'áry duzentos mbojape, ha'e cem xã uva pirukue, cem avi hi'a pyau, ha'e gui peteĩ ryru vinho.

² Ziba ou rã Davi oexa vy oporandu ixupe:

— Mba'erã tu kova'e nunga reru?

Ziba ombovai:

— Mymba mburika'i ma hi'áry huvixa ro pygua kuery oĩ aguã. Ha'e rã mbojape ha'e mba'emo'a ma kunumigüe ho'u va'erã aru. Vinho ma tekoa e'ÿa rupi penekane'õ vy pey'u va'erã — he'i.

³ Ha'e rã Davi oporanduve ju:

— Ha'vy nderuvixa ra'y, mamó tu opyta?

Ziba ombovai:

— Ha'e ma Jerusalém py ae opyta, mba'eta ojeupe ae “Kova'e ára po xevy ju 'rã Israel ro pygua kuery omboaxa xeru rekovia xepo'aka aguã”, he'i vy.

⁴ Ha'e rami rã Davi aipoe'i Ziba pe:

— Mefibosete ogueroko va'ekue-ekue ma ame'ẽmba ndevy.[†]

Ziba ombovai:

— Xeruvixa, xee ajero'a romboete vy. Taxemboaxy nerenonde — he'i Davi pe.

Davi re Simei ijayvu vaiague

⁵ Ha'e gui Baurim tekoa py huvixa Davi ovaẽ vy oma'ẽ rã peteĩ ovaexĩ jogueruvy Saul ro pygua kuery regua Simei hery va'e, Gera ra'y. Ha'e va'e ovaexĩ vy ijayvu vai ouvy hexe.

⁶ Davi re ita omombo ouvy, hembigui kuery re guive, Davi revegua ha'e hembigui xondaro kuery ooa yke jovaive rupi oje'oi oiny va'eri.

⁷ Simei ijayvu vai vy aipoe'i:

[‡] 15:31 Aitofel ma huvixa mongetaaty oiko. Davi mongetaa rupi ranhe oiko, ha'e gui Absalão mongetaa rupi ju (versículo 12). * 16:1 Ziba ma Saul rembiguai ranhe oiko, ha'e gui Jônatas ra'ykue Mefibosete rembiguai ju (2 Samuel 9.9-10). † 16:4 Ziba pe Davi omboaxa mba'emo Mefibosete ogueroko va'ekue, mba'eta ixupe Ziba jayvu vy Absalão re Mefibosete oague rami omombe'u ramo. Ha'e rã Mefibosete ma ndooi (2 Samuel 19.24-30).

— Tereo apy gui, tereo ke, ndee ava tuguy moëaty, nhe'ë vai ra'y.

⁸ Aÿ Nhanderuete nembopaga ma Saul ro pygua kuery ruguy omoëague re, hekovia ndee nhemi rupi rei rire. Ha'e rami teĩ ndera'y Absalão po py ju SENHOR omboaxa. Ma'ë, aÿ ma reximba reia rupi reiko, ava tuguy moëaty reiko vy — he'i.

⁹ Ha'e rami rã Zeruia pi'a Abisai aipoe'i Davi pe:

— Xeruvixa, mba'e re tu peva'e jagua re'ogue ijayvu vai ri ndere? Tove taaxa apy gui akã'o aguã.

¹⁰ Huvixa ombovai:

— Mba'e tu xee areko peë Zeruia pi'a kuery reve? Tove ri ta'ijayvu vai. Mba'eta xapy'a rei SENHOR ae ixupe ijayvu vy “Ndeayvu vai Davi pe”, he'i raka'e. Ha'e rami ri ramo mava'e tu “Mba'e re tu ha'e rami ete rejapo?” he'i aguã ha'eve ta? — he'i.

¹¹ Davi aipoe'ive ju Abisai ha'e guembigua kuery ha'e javive pe:

— Ne'exa, xera'y ae teĩ xejukaxe aÿ, ha'e rami peva'e Benjamim regua katuve ma. Tove ta'ijayvu vai, mba'eta SENHOR ae ojapo uka ha'e rami.

¹² Xapy'a rei SENHOR oma'ë 'rã xee ajexavaia re. Ha'e rami ri vy mba'emo porã anho 'rã SENHOR ome'ë xeivy kova'e ára ayvu vaiague rekovia — he'i.

¹³ Ha'e gui ma oguatave oje'oivy, Davi ha'e ixupegua avakue reve. Ijyke rupi Simeí voi oo avi oiny yvy'ã pukukuea rupi. Ijayvu vai tema ovy, ita ha'e yvy guive omombo ovy hexe.

¹⁴ Ha'e gui huvixa ha'e hupive uguata va'e kuery reve ma ikangypakue ovaë oje'oivy Jordão yakã rembe re. Ha'e py ma ikane'ogua ranhe okuapy.

Absalão pegua oikoa rami Husai ombotavya rupi onhemombe'uague

¹⁵ Ha'e gui Jerusalém tetã py Absalão kuery ovaëmba okuapy ixupegua avakue Israel regua ha'e javi reve. Ha'e kuery reve ou avi Aitofel.

¹⁶ Ha'e gui Davi irũ Husai arquita va'e voi ojexa uka avi Absalão pe. Ha'e vy aipoe'i ixupe:

— Toikove huvixa, toikove huvixa!

¹⁷ Ha'e rã Absalão aipoe'i Husai pe:

— Ha'e rami ae teve rexa uka neirũ Davi pe reikoa? Mba'e re tu ndereoi neirũ rupive?

¹⁸ Husai ombovai:

— Any ri. Xee apyta 'rã hekovia SENHOR omoí va'ekue reve. Kova'e kuery Israel pygua avakue ha'e javi oiporavo va'ekue reve xee voi aiko 'rã, hexeve ae 'rã.

¹⁹ Mba'eta mava'e pe 'rã tu aiko aguã ha'eve? Ndee ta'y pe e'ÿ ri ty'y? Nderu rembiguai aikoague rami ae ndeyvu ju 'rã aiko xee — he'i.

Davi ra'yxy jevy kuery reve Absalão onhenoague

²⁰ Ha'e gui ma Absalão aipoe'i Aitofel pe:

— Oremongeta na mba'e nunga pa rojapo aguã.

²¹ Aitofel ombovai Absalão pe:

— Nderu ra'yxy jevy kuery ojea ovy ngoo re opena va'erã. Enheno ha'vy ha'e kuery reve. Ha'e ramo nderu reve joe napendea'veia Israel kuery ha'e javi oikuaa ramo nderevegua kuery ipy'a guaxuve 'rã okuapy — he'i.

²² Ha'e gui ma oo áry ojapo okuapy peteí oo'i Absalão oí aguã. Ha'e ramo ha'e py, Israel kuery pavë oexaa py onheno nguu ra'yxy jevy kuery reve.

²³ Ha'e va'e jave Aitofel nhomongeta 'rã Nhanderuete pe oporandua rã ombovaia rami avi. Ha'e rami ae tema Aitofel ijayvu nhomongeta vy, Davi omongetaague rami ae avi omongeta Absalão.

17

Aitofel ha'e gui Husai ju omongetaague

¹ Aitofel aipoe'ive ju Absalão pe:

— Tove taiporavo doze mil avakue. Ha'e vy Davi rakykue aa 'rã kova'e pyavyve.

² Hexe apu'ã 'rã ikane'õ ha'e ikangypa rei jave. Amondypa 'rã. Ha'e rã hexeve ikuai va'ekue onhamba 'rã. Huvixa anho'i 'rã ajuka.

³ Ha'e kuery ajapo 'rã ndere oupa ju aguã rami meme. Mba'eta ha'e kuery ha'e javi ojevypa 'rã, pete'i'i ava rejukaxea rami rejuka uka rire. Ha'e rami vy ikuai porãmba 'rã — he'i.

⁴ Ha'e rami ijayvu rã Absalão ha'e Israel regua nhomongeta va'ety kuery ha'e javi oendu vy ojou porã rei okuapy.

⁵ Ha'e rami teĩ Absalão aipoe'ive ju:

— Penoí ta'vy arquita regua Husai ju, nhaendu aguã ha'e pa mba'e he'i ra'e — he'i.

⁶ Absalão-a py Husai ovaë ramo aipoe'i ixupe:

— Ha'e rami Aitofel ijayvu ange. Ha'eve 'rã pa ijayvua rami jajapo aguã? Ha'e rami e'ÿ vy ndee ju ke ndeayvu.

⁷ Husai ombovai Absalão pe:

— Aitofel ange ijayvuague ma ha'eve va'e'ÿ — he'i.

⁸ Husai aipoe'ive ju:

— Reikuaa porā nderu ha'e avakue hexeve ikuai va'e reko, reikuaa avi ha'e kuery ipy'a guaxukueve ikuai, ha'e urso kunha ka' aguy rupi gua'y kuery omokanhy va'e rami ipoxy va'e memea. Nderu voi joe opu'ā va'ety vy pyávy teĩ ndopytai 'rā ojeuegua kuery reve.

⁹Ne'exa, aý ma ha'e oma'ẽ mbegue 'rā peteĩ itakua gui, e'ý vy amboae henda py. Ha'e gui jypy'i hexe pepu'āa py ndevygua kuery amongue oitya ri ramo ha'e nunga oendu va'e rei ijavyu vy "Absalão rupi ou va'ekue oitypaa ra'e" he'i 'rā.

¹⁰Ha'e rami rā ma avakue ipy'a guaxukueve voi okyjepa rei 'rā, xivi rami ipy'a guaxu va'e teĩ. Mba'eta Israel kuery pavẽ oikuaa nderu ma joe opu'āa py ipo'akave va'ety ae, ha'e hexevegua avakue voi ipy'a guaxukueve memea.

¹¹Xee ma po rami romongeta: Emboatypa pojava ndejeupe Israel kuery ha'e javi, Dã guive Berseba peve ikuai va'e, ye'ẽ rembe re ita ku'i ikuai rami mbovy rei e'ý ikuai va'e. Ha'e vy ndee ae 'rā reraa henoiny ha'e kuery mbyte rupi.

¹²Ha'e vy ma Davi re jaje'oi 'rā mamo rā rei oĩa py, ha'e vy jajopy xapy'a 'rā, yxapy minha yvy re ho'aa rami. Ha'e ramo ndoikovevei 'rā, hexevegua avakue voi ndokuavei 'rā teĩve.

¹³Xapy'a rei amongue tetã py ha'e onhemi ramo ma ha'e katy Israel kuery ha'e javi 'rā ogueraa ixã. Ha'e vy jaitypa 'rā heravy yakã katy, oïague py nei peteĩ'i ita ra'y'i voi nda'ipovei peve — he'i.

¹⁴Ha'e rami rā Absalão ha'e Israel pygua avakue aipoe'i okuapy:

— Aitofel ijavyvague gui ma arquita regua Husai ijavyva ha'eveve — he'i okuapy, mba'eta SENHOR ae ojapo Aitofel ijavyva oendu rivepa aguã rami, Absalão kuery áry mba'emo vai ombouxe vy.

¹⁵Ha'e gui ma Husai aipoe'i sacerdote kuery Zadoque ha'e Abiatar pe:

— Aitofel ma ha'e rami omongeta kuri Absalão ha'e Israel regua nhomongeta va'ety kuery. Ha'e rā xee ma amboae rami amongeta.

¹⁶Aý pemondouka pojava ha'vy Davi pe ayvu mombe'uarã aipoe'i aguã: "Epyta eme kova'e pytý y oaxaaty tekoa e'ýa katy oĩ va'e py. Ha'e rami 'rãgue py eaxa pojava hovaigua re, huvixa ojukaa e'ý aguã, hexeve ikuai va'e kuery reve", peje uka — he'i.

¹⁷Ha'e jave ma Jónatas ha'e Aimaás ma En-Rogel katy'i oĩ, tetã py ha'e kuery ovaẽ rã oexaa e'ý aguã. Ha'e gui ha'e kuery pe peteĩ tembiguai kunha'i omombe'u ha'e nunga, Davi pe ju ha'e kuery omombe'u aguã.

¹⁸Ha'e rami teĩ peteĩ kunumi va'e oexa nho vy ou Absalão pe omombe'u. Ha'e rā mokoĩve ma ojapura reve jogueraa vyvoi vy peteĩ ava ro py ovaẽ, Baurim tekoa py. Ha'e va'e roka py oĩ peteĩ ykua ojo'o pyre. Ha'e va'e py ha'e kuery oguejy jogueravy.

¹⁹Ykua mbotya hoo va'e ra'yxy ogueru vy omoĩ hi'áry. Imbotya áry ju mba'emo ra'yígue onhoẽ. Ha'e rami rā mava'eve ndoikuaai.

²⁰Ha'e va'e oo py Absalão rembiguai kuery ovaẽ vy aipoe'i okuapy kunha va'e pe:

— Mamo tu ikuai Aimaás ha'e Jónatas?

Kunha va'e ombovai:

— Ha'e kuery oaxapa ae ma yy oaxaaty — he'i. Ha'e ramo ha'e kuery oeka teĩ ndojoui vy ojevypa ju Jerusalém katy.

²¹Ha'e kuery oje'oi ramove ykua gui oẽ mokoĩve. Ha'e rami vy oo vy omombe'u Davi pe. Ha'e vy aipoe'i: — Pepu'ã ke, peaxapa pojava yy rovai re, mba'eta ha'e rami Aitofel ijavyu penderovai — he'i.

²²Ha'e rami rā Davi ha'e hexevegua kuery ha'e javi oaxapa Jordão yakã. Ko'ẽmba ma jave takykue re nei teĩ'i voi nda'ipoi Jordão oaxa e'ý va'e.

²³Ha'e gui Aitofel ma nhomongetaague rami e'ý ikuai rã oexa vy ombokupe árygua guymba mburika'i, ha'e oĩ vy oo tetã py ngoo oĩ va'e py. Mba'emo omoĩmba porã ma vy ha'e ae oo ojejryrvipy. Omano ramo onhono porãa tuu rupa vyvíry.

²⁴Ha'e gui Davi kuery ma Maanaim py ovaẽ. Absalão kuery voi Jordão yakã oaxapa, avakue Israel kuery hexeve ikuai va'e reve.

²⁵Ha'e vy xondaro kuery ruvixa Joabe rekovia ma Absalão omoĩ Amasa. Ha'e va'e ma Ismael guigua Itra ra'y, Naás rajy Abigail pi'a. Abigail ma Joabe xy Zerua kypy'y.

²⁶Ha'e rami vy Israel kuery Absalão reve ijatypa okuapy Gileade yvy re.

Absalão revegua xondaro kuery re Davi revegua kuery ipo'aka okuapyague

²⁷Maanaim py Davi kuery ovaẽ ma ramo ovaexĩ jogueruvy pova'e kuery: Amom kuery va'e regua Rabá pygua Naás ra'y Sobi, ha'e gui Lo-Debar pygua Amiel ra'y Maquir, ha'e gui Rogelim pygua gileadita regua Barzilai avi.

²⁸Ha'e va'e kuery ma Davi oĩa py ogueru tupa, hy'a, hyru nhae'ũ guigua, trigo, cevada, mba'emo ku'ikue, ha'yígue maimbe, ei retã, kumanda pe'i,

²⁹ei, kamby kekue, vexa'i kuery ha'e gui queijo vaka guigua. Ha'e nunga oguerupa Davi ha'e hexeve ikuai va'e pe ho'u va'erã, mba'eta aipoe'i okuapy: "Kova'e kuery ma tekoa e'ýa rupi ikuai py inhembyayi, ikane'õ ha'e ije'yuvei guive" he'i vy.

18

¹Davi guexevegua kuery oipapa vy ha'e kuery ruvixarã omoĩ mil e'ý vy cem re opena va'erã.

²Ha'e gui mboapy henda py omboja'o vy omoudoukapa ju: peteĩ aty ma Joabe ogueraa, amboae aty ma Zerua pi'a Abisai ogueraa, ha'e rã amboae aty ma Gate pygua Itai ogueraa. Huvixa aipoe'i ha'e kuery pe:

— Xee voi aa 'rã peẽ kuery reve.

³ Ha'e rā ha'e kuery ombovai:

— Ndee ma ndereoi 'rā. Xapy'a rei nhanderoavaigua kuery oremonha vy orere ha'e kuery nopenai 'rā, nēi mbyte rupi pepe ore romano teĩ ae ma, mba'eta ore kuery va'e regua dez mil ikuai va'e gui ndee anho'i teĩ revareve va'e. Ha' eveve ndee orerepy aguã rami reiko aguã, tetã py reia gui ae — he'i okuapy.

⁴ Davi ju aipoe'i ha'e kuery pe:

— Peẽ kuery peipotaa rami ha'vy xee aiko 'rā — he'i. Ha'e rami rā tetã kora rokẽ yvúry huvixa hi'ái jave ixupegua kuery ha'e javi oẽ jogueravy cem ha'e mil ma voi-voi.

⁵ Ha'e gui ma Joabe, Abisai ha'e Itai pe ju Davi ijavyu. Ha'e vy aipoe'i:

— Xere pema'ẽ vy pereko porã'i xera'y Absalão — he'i. Amboae kuery ha'e javi oendu okuapy xondaro huvixa kuery pe huvixa gua'y Absalão re opena porã uka rā.

⁶ Ha'e gui ma ha'e javi oje'oi tetã rovai rupi, Israel kuery reve joguero'a aguã. Efraim regua ka'aguy rupi joe opu'ã okuapy.

⁷ Ha'e py ma Davi rembiguai kuery oitypa Israel kuery. Ha'e va'e ára ho'a reta, vinte mil avakue ojukaa py.

⁸ Mba'eta joe opu'ã va'e kuery oaĩmba oje'ovivy ha'e va'e yvy ha'e javi rupi. Ha'e va'e ára kyxe py ojukaa gui okanhy retave ka'aguy re ikuai py rive.

Absalão omanoague

⁹ Absalão ma mburika áry oo oiny vy nhovaexĩ Davi rembiguai avakue reve. Hymba mburika ma peteĩ yvyra carvalho hi'ái va'e rakã guy rupi oaxa ovy jave Absalão akã ipija oiny yvyra rakãmy py, ha'e vy ovava oiny yvate katy gui yvy katy. Hymba mburika ma oaxa tema ovy.

¹⁰ Peteĩ ava ha'e nunga oexa vy oo omombe'u Joabe pe. Ha'e vy

— Absalão ma yvyra carvalho rakã re ovava oiny — he'i.

¹¹ Ha'e rā Joabe aipoe'i ava imombe'uare pe:

— Rexa va'eri mba'e re tu nderejukai ha'e pyve, ha'e reity 'rãgue inony yvy rupi? Ha'e rami reiko va'e rire ma ndevy ame'ẽ 'rãgue dez hatã'i va'e prata guigua ha'e peteĩ ku'akuaa — he'i.

¹² Ha'e ramo ava va'e aipoe'i Joabe pe:

— Xepo py mil hatã'i va'e prata guigua reme'ẽ teĩ xee ma nakuave'ẽi 'rā huvixa ra'y rovai, mba'eta roendu porã ange huvixa ndevy, Abisai ha'e Itai pe ijavyu ramo, “Pereko porã'i xera'y Absalão”, he'i rā.

¹³ Xapy'a rei xee ma nanhe'ẽ renduia rupi hexe ajapo vai va'e rire huvixa ndoikuaa e'yi 'rãgue. Ha'e rami avi ndee eteve voi xejou vai 'rãgue — he'i.

¹⁴ Joabe ombovai:

— Nda'evei ndereve ha'á rive aguã — he'i vyve mboapy hu'y ogueraa vy oipyxo Absalão kuraxõ py, oikove teri reve yvyra carvalho rakãmy re ipija oinya py.

¹⁵ Ha'e gui dez kunumigue Joabe rembiporu reraa va'e kuery ju ombojere okuapy vy ojuka ete'i Absalão.

¹⁶ Ha'e gui ma Joabe mimby guaxu omonhe'ẽ rā ixondaro kuery opytu'upa Israel kuery monhaa gui. Ha'e vy ojevypa, Joabe omombytu'u ramo.

¹⁷ Absalão retekue ogueraa vy omombo ka'aguy re yvykua tuvixa va'e oĩ va'e py, ha'e vy hi'áry omboaty reta ita. Ha'e rā Israel kuery ma peteĩ-teĩ ngoo katy onhamba oje'ovivy.

¹⁸ Absalão oikove teri reve omopu'ã va'ekue peteĩ ita ojeupe ae, huvixa rekoa yvyugua py. Mba'eta aipoe'i: “Xee ndarekoi xera'y peteĩ'i ma voi xerery re ima'endu'aa aguã”, he'i. Ha'e rami vy ita re ae omoĩ guery. Ha'e rami rire ha'e va'e pe aỹ peve “Absalão pegua ita” 'ea.

Absalão omano rā Davi ojae'o vaipaague

¹⁹ Ha'e gui Zadoque ra'y Aimaás aipoe'i:

— Tove taa tamombe'u huvixa pe hovaigua kuery po'akaa gui SENHOR ogueraa jepe maague.

²⁰ Ha'e rami teĩ Joabe ombovai:

— Ndee ma neremombe'ui 'rā teve ange mba'emo oiko va'ekue, amboae ára py ha'eve 'rā teĩ, huvixa ra'y ae omano rire — he'i.

²¹ Ha'e gui peteĩ Etiópia pygua hi'ái va'e pe ju Joabe aipoe'i:

— Ndee katu tereo emombe'u mba'emo rexa va'ekue — he'i ramo Joabe renonde ojero'a ma vy onha ovy.

²² Ha'e gui Zadoque ra'y Aimaás aipoe'ive ju Joabe pe:

— Ha'e rami teĩ ma tove xee voi taa Etiópia pygua rakykue.

Joabe aipoe'i:

— Mba'erã tu ndee voi renha ta, xera'y? Mba'eta ha'e nunga remombe'ua gui nderejoui 'rā hekovia — he'i.

²³ — Ha'e rami teĩ ae ma xee aanha ta avi — he'i ju Aimaás.

Ixupe Joabe

— Enha ha'vy eovy — he'i ramove Aimaás onha avi ovy tape yvy'ãmbe rupi, ha'e vy onhokuã ovy Etiópia pygua.

²⁴ Tetã jaikae py Davi oguapy oiny mokoĩ okẽ oĩ va'e mbyte py. Peteĩ jopya ojeupi ovy okẽ yke rupi kora oĩ va'e áry. Ha'e vy oma'ẽ vy oexa peteĩ ava ha'e ae'i onha ouvy va'e.

²⁵ Ha'e vy jopya ojapukai vy omombe'u huvixa pe. Ha'e rā huvixa ombovai:

— Ha'e ae'i ri ou va'e ma mba'emo porã mombe'uarã 'rã ou — he'i. Ha'e vy ou oiny va'e ovaẽ ouvy.

²⁶ Ha'e gui jopya oma'ẽ jevy vy oexa amboae ava onha ouvy va'e. Ha'e vy teigue ju ojapukai okẽ py oĩ va'e pe. Ha'e vy aipoe'i:

- Amboae ava ju ha'e ae'i onha jekuaa ouvya.
 Huvixa ombovai:
 — Ha'e rami rã ha'e va'e voi mba'emo porã momb'e'uarã 'rã ou — he'i.
²⁷ Aipoe'ive ju jopya:
 — Tenonde onha ouvya va'e ma ko Zadoque ra'y Aimaás.
 Huvixa ombovai:
 — Ha'e va'e ma heko porã va'e vy mba'emo porã omombe'u 'rã ouvya — he'i.
²⁸ Ha'e gui ma Aimaás ovaẽ vy ojavukai huvixa pe:
 — Ha'evepa rei! — he'i vy huvixa renonde ojero'a ngova vvy re omovaẽ peve. Ha'e vy aipoe'ive ju:
 — Ta'ima'endu'a porãa SENHOR Nderuete re, mba'eta nhandepo py omboaxapa xeruvixa rovai opu'ã va'ekue — he'i.
²⁹ Huvixa oporandu:
 — Oiko porã pa xera'y Absalão?
 Aimaás ombovai:
 — Ha'e rami avi xeruvixa, xee ma nerembiguai Joabe xembou ma jave aexa nhomoanha-anha ha'e hevovo rei va'eri xee ndaikuaai guive mba'e paa — he'i.
³⁰ Huvixa aipoe'i:
 — Apy he'ã, earõ ranhe — he'i ramo oarõ ho'amy ha'e py.
³¹ Ha'e gui Etiópia pygua ju ovaẽ vy aipoe'i:
 — Xeruvixa, mba'emo porã aru neremiendurã. Ange ma SENHOR nderepy nderovai opu'ã va'ekue po'akaa gui — he'i.
³² Ha'e ramo huvixa oporandu Etiópia pygua pe:
 — Oiko porã pa xera'y Absalão?
 Etiópia pygua ombovai:
 — Xeruvixa, tove ha'e va'e oiko vaiague ramigua toiko nderovaigua kuery ha'e javi re, ndevy ojapo vai aguã opu'ã va'ekue ma guive rã — he'i.
³³ Ha'e rami rã huvixa opy'a py onhenhandu vai ete vy ojepe'a ovy tetã kora rokẽ áry opy ja'o oĩ va'e py oĩ aguã. Ha'e vy ojao'o. Oguata vy ojeyv-jeyv oikovya rupi aipoe'i:
 — Xera'y Absalão, xera'y, xera'y Absalão! Nderekovia xee amano 'rãgue teĩ, Absalão xera'y, xera'y!

19

Davi pe Joabe ijayvuague

- ¹ Ha'e gui ma Joabe pe aipo'ea:
 — Ma'ẽ, huvixa tu ojao'e'o rima oikovy gua'y Absalão re ipy'a vaia rupi — 'ea.
² Ha'e rami py ha'e va'e ára ha'e kuery ipo'aka teĩ iporiaupa okuapy, “Huvixa ma gua'y Absalão re ipy'a vai” 'ea ramo.
³ Ha'e va'e árave ha'e kuery nda'evei reve oike ju okuapy tetã py, joe opu'ãa gui oxĩmba rei vy onha va'e rami.
⁴ Huvixa Davi ma oakã ojao'ipa reve ojavukai ratã:
 — Xera'y Absalão, Absalão xera'y, xera'y! — he'i oikovy.
⁵ Ha'e ramo Joabe ma huvixa oĩa py oike vy aipoe'i iuxupe:
 — Aỹ ma rejapo nerembiguai kuery ha'e javi oxĩmba aguã rami, ha'e kuery ange nderekove ogueraa jepe rire teĩ, ha'e ndera'y ha'e nderajy kuery rekove, ha'e ndera'yxy ha'e ndera'yxy jeyv kuery rekove guive.
⁶ Ndee ma nhi'ã reayvu ndere ija'e e'ỹ va'e kuery, ha'e rã nderayvua kuery ma remomborriu rive. Aỹ ma xee aikuaa rã ange Absalão nomanoi, ha'e rã ore kuery ma romanomba va'e rire revy'a 'rãgue.
⁷ Epu'ã ke aỹ, eẽ, ha'e ndeayvu nerembiguai kuery ipy'a porã ju aguã rami. Xee ma Nhanderuete rery rupi aura vy aipoa'e: Aỹ ndeayvu aguã nereẽi ri ramo ndereve neĩ peteĩ'i ava ma voi ndopytavei 'rã kovae pyávy. Nekunumi guive aỹ peve rejexavaiaty gui ma ha'e nunga nda'eveive 'rã ndevy — he'i.
⁸ Ha'e rami rã huvixa opu'ã vy ogyeju tetã kora rokẽ py oguapy oiny. Ha'e rã heta va'e kuery ha'e javi pe omombe'ua vy
 — Ne'exa, huvixa ma okẽ py hiny — 'ea rã ha'e kuery ha'e javi ou vy ojexa uka okuapy huvixa renonde.
 Ha'e rã Israel kuery ma onhamba ma voi, peteĩ-teĩ ngoo katy.
⁹ Ha'e rami vy Israel kuery ha'e javi regua joupe-upe ijayvu okuapy, ha'e vy aipoe'i:
 — Huvixa ma nhanderovaigua ha'e filisteu kuery po gui nhandereraa jepe va'ekue ri ovyv gui ae onha va'ekue Absalão káuxa.
¹⁰ Ha'e rami teĩ Absalão nhanderuvixarã nhamoĩ va'ekue ma joe opu'ãa py omano. Aỹ ka, mba'e re tu pekyriri ri? Pejapo 'rãgue huvixa ojeyv ju aguã rami.

Jerusalém tetã katy Davi ojeyvague

- ¹¹ Israel kuery ha'e rami joupe-upe ijayvua omombe'upaa ma huvixa Davi pe. Ha'e ramo huvixa aipoe'i uka sacerdote kuery Zadoque rama'e Abiatar pe:
 — Aipopeje ke Judá regua nhomongetaa kuery ikuai va'e pe: “Mba'e re tu peẽ kuery gui amboae kuery ha'e javi ranhe ogueru ju 'rã huvixa hekoa py?”

¹² Peë kuery ma xeryvy kuery ae'i, xekāgue ha'e xero'o regua'i ae peiko. Mba'e re tu ha'vy peë kuery gui amboae regua kuery ranhe xereri jevy ta?" peje.

¹³ Ha'e gui Amasa pe ma aipopeje: "Ndee nda'u xero'o ha'e xekāgue regua ae'i e'ÿ avi? Xevyguia xondaro kuery ruvixa Joabe rekovia ndee romoi e'ÿ ramo Nhanderuete taxembopaga ha'e oipotaa rami" peje.

¹⁴ Ha'e rami huvixa ijavyvua Judá regua avakue oendu vy pete'i rami ovy'a okuapy opy'a py. Ha'e vy aipoe'i uka okuapy ixupe:

— Oreruvixa, ejevuy ju nerembiguai kuery ha'e javi reve — he'i uka.

¹⁵ Ha'e ramo huvixa ojevuy vy Jordão yakã peve ranhe ovaë. Ha'e rã Judá kuery avi Gilgal py oje'oi huvixa reve nhovaexĩ aguã, Jordão yakã ogueroaxa heruvuy aguã.

Davi reve Simeĩ nhovaexĩague

¹⁶ Ha'e gui Gera ra'y Simeĩ, Benjamim regua Baurim pygua va'e ojapura ovy vy Judá regua avakue rupive ogejevuy, huvixa Davi reve nhovaexĩ avi aguã.*

¹⁷ Ha'e va'e reve oo avi mil xondaro kuery Benjamim regua. Saul ro pygua kuery rembiguai Ziba oo avi, gua'y kuery quinze ha'e guembiguai vinte va'e reve. Ha'e kuery jogueraa pojava Jordão yakã py huvixa pe ojexa uka vy.

¹⁸ Ha'e rami vy ha'e kuery yy oxapa huvixa ro pygua kuery ogueroaxa ju heruvuy aguã, ha'e ixupe ojapo aguã oipotaa rami rei.

Gera ra'y Simeĩ ma huvixa renonde oĩ guenapy'ã re, huvixa Jordão yakã oaxa ta ramo.

¹⁹ Ha'e vy aipoe'i ixupe:

— Xeruvixa, xembopaga eme ajevyague re, nema'endu'a eme xee nerembiguai xe'arandu e'ÿa rupi ajapo vaiague re, Jerusalém gui reoa ára. Xeruvixa, nema'endu'ave eme ha'e nungakue re ndepy'a py.

²⁰ Mba'eta xee nerembiguai va'e aÿ anhemombe'upa ajevyague. Ha'e rami vy ae xeruvixa, José ramymino kuery gui xee ranhe aju rovaexĩ aguã — he'i.

²¹ Ha'e ramo Zeruia pi'a Abisai aipoe'i:

— Simeĩ nomanoi 'rã ri nda'u huvixarã SENHOR omoĩ va'ekue pe ijavyvua vaiague re?

²² Ha'e rã Davi ombovai:

— Mba'e tu xee areko peë Zeruia pi'a kuery reve? Mba'e re tu aÿ penhemoingo xeroivaiguarã? Aÿ nda'u Israel regua omano ta? Tyrã pa xee ndaikuaai teve Israel kuery ruvixa ju aia? — he'i

²³ Ha'e gui Simeĩ pe ju huvixa oura vy

— Ndee neremanoi 'rã — he'i.

Davi reve Mefibosete nhovaexĩague

²⁴ Saul ramymino Mefibosete voi oo huvixa reve nhovaexĩ aguã. Ha'e va'e ma huvixa ooa ára guive ojevuy porã ára peve ndojepyivei, nonhendyva apoi, neĩ oao voi ndojoivei va'ekue.

²⁵ Ha'e gui Jerusalém py huvixa ovaë ramo hexeve Mefibosete nhovaexĩ aguã ou ramo huvixa aipoe'i:

— Mefibosete, mba'e re tu ndereoi raka'e xerupive?

²⁶ Ombovai:

— Xeruvixa, xerembiguai xembotavy ramo ndaai. Mba'eta xee nerembiguai aguata porã e'ÿ va'e vy aipoa'e teĩ: "Ambokupe árygua uka 'rã xerymba huvixa rupive aa aguã", ha'e va'ekue.

²⁷ Ha'e rami teĩ xeruvixa, xerembiguai ma nerenonde ijavyvui rei xere.† Ha'e rami avi xeruvixa, ndee ma Nhanderuetea guigua anjo rami reikuapa va'e. Xerereko ke ndee reipotaa rami.

²⁸ Ha'e gui xeruvixa, ha'evea rami 'rāgue xeru ro py ikuai va'ekue rejuka ukapa va'e rire. Ha'e rami teĩ ndee xereri imoiny nde-mesa py okaru va'e kuery mbyte. Ha'e nunga rupi xeruvixa, nda'evei mba'emo re rive xee ajerure aguã ndevy — he'i.

²⁹ Ha'e rã huvixa ombovai:

— Ha'eve ma. Mba'e re tu ha'e nunga re teri ndeayvu? Xeayvu Ziba reve pemboja'o pendejvy.

³⁰ Mefibosete aipoe'i huvixa pe:

— Ixupe ae topytapa, xeruvixa, ndero py rejevuy porã ma rire.

Davi reve Barzilai nhovaexĩague

³¹ Ha'e gui Gileade pygua Barzilai voi Rogelim gui ou vy huvixa reve oaxa Jordão yakã, yy rovai re peve.

³² Barzilai ma tuja'i ete, oitenta ma'e'tÿ ma oguereko va'e. Ha'e ae huvixa kuery pe ome'ë va'ekue ho'u va'erã Maanaim py ikuai jave, ava oguerokopa va'e vy.*

³³ Ha'e gui huvixa aipoe'i Barzilai pe:

— Jaa ke xerupive, Jerusalém tetã py xee ame'ë 'rã nerembi'urã.

³⁴ Barzilai ombovai huvixa pe:

— Mbovy ára peve teri nda'u aiko 'rã? Nda'evei teve ndee xeruvixa reve aa aguã Jerusalém peve.

³⁵ Oitenta ma'e'tÿ ma xee areko. Ndaikuaavei ma mba'e nunga pa iporã va'e, ha'e'ÿ vy iporã e'ÿ va'ea voi. Tembi'u ha'u va'e voi naendu kuaavei ma heea, ha'u va'e ha'e ay'u va'e voi. Xee nda'u aendu kuaa teri 'rã avakue ha'e kunhague oporaei rã? Xeruvixa, mba'erã tu xee nerembiguai romoingo eta rei rive ta?

* 19:16 Simeĩ ma Jerusalém gui Davi onha jave ixupe ijavyvui vai, ha'e hexe ita omombo va'ekue (2 Samuel 16.5-14). † 19:27 Mefibosete ma Saul ra'y Jônatas ra'ykue, hexe Davi opena porã va'ekue Jônatas re ima'endu'a vy. Hembiguai ma Ziba (9.1-13). Ha'e gui Ziba ma Mefibosete rekoke ramigua rive omombe'u va'ekue Davi pe, ijavyvui ojeupe guarã ae ojopyxe vy (16.1-4). * 19:32 2 Samuel 17.27-29

³⁶ Ha'e rami avi xeruvixa, ndereve xee aa 'rã Jordão yakã rovai peve'i. Mba'e re tu ndee remboekovia ta mba'emo porã ndevy ajapoague?

³⁷ Tove xee nerembiguai taa ju, ha'e vy xerekoa py ae amano'i 'rã xeru ha'e ha'i kuery rupa katy'i xenhono porãa aguã. Ha'e rami avi ne'exa, Quimã toĩ nerembiguirã. Xeruvixa, toaxa ha'e ae nderupive, ha'e rã rereko 'rã reipotaa rami — he'i.

³⁸ Huvixa ombovai:

— Toaxa ha'vy Quimã xereve, ha'e ixupe ajapo 'rã reipotaa rami tema. Ndevy voi ajapo 'rã reipotaa va'e ha'e javi — he'i.

³⁹ Pavê rei Jordão yakã oaxapa ramo huvixa voi oaxa ma vy oayvupa Barzilai rova py, ha'e vy ogueroayvu porã imondovy. Ha'e rã Barzilai ojevuy ju ngoo katy.

⁴⁰ Gilgal peve huvixa oaxa ovy ramo Quimã oo avi oiny hupive. Huvixa rupive oje'oi avi Judá regua kuery ha'e javi, ha'e Israel regua mbyte rupi peve.

⁴¹ Ha'e gui Israel regua avakue ha'e javi oupa okuapy huvixaa py. Ha'e vy aipoe'i okuapy ixupe:

— Orevuxixa, mba'e re tu oreryvy kuery gui Judá regua ranhe rive ndereru nhemi okuapy? Mba'eta Jordão yakã kyvõgua re ha'e kuery ndereru ndero pygua kuery reve, nerembiguai kuery ha'e javi avi — he'i.[‡]

⁴² Ha'e ramo Judá regua avakue ha'e javi ombovai Israel kuery pe:

— Ha'e rami rojapo mba'eta huvixa ma oreretarã ae. Mba'e re tu ha'e rami rã rive pendevai ta? Ore kuery nda'u huvixa rembi'u re rokaru, tyrã pa orevy mba'emo ome'ê rive va'ekue?

⁴³ Ha'e gui avakue Israel kuery ombovai ju Judá kuery pe:

— Ore kuery ma pendegui dez-kue oreretave va'e vy peê kuery gui roguerekove Davi reve. Mba'e re tu ha'vy peê kuery norembovareive? Ore kuery ranhe oreayvu raka'e nhandervuxixa rogueru jevy aguã re — he'i teĩ Israel kuery ijayvua gui Judá kuery ijayvu poyive tema.

20

Seba huvixa rovai opu'ã rã ojukaa ague

¹ Ha'e py oĩ avi peteĩ ava nhe'ê vai ra'y Seba hery va'e, Bicri ra'y, Benjamim regua va'e. Ha'e va'e ma mimby guaxu omonhe'ê vy aipoe'i:

— Nhande kuery ma mba'eve ndajarekoi Jessé ra'y Davi reve. Israel kuery, peteĩ-teĩ jaje'oi nhandero katy! — he'i.

² Ha'e ramo Israel regua avakue ha'e javi oja'o jogueravy Davi-a gui, Bicri ra'y Seba rupive anho oje'oi. Ha'e rã Judá regua kuery ma huvixa reve tema ikuai, ha'e vy Jordão yakã guive ogueru okuapy Jerusalém peve.

³ Jerusalém tetã py ngoo oĩ va'e py Davi ovaê vy ogueraapa dez gua'yxy jevy oguereko va'ekue ngoo re opena va'erã oja va'ekue. Ha'e va'e kuery ma ombotipa vy omongaru uka porã va'eri neĩ teĩve reve nonhenovei. Ha'e kuery omano e'ÿja ja oo omboty pyre py ikuai imeve'ÿ va'e rami ae.

⁴ Ha'e gui Davi aipoe'i Amasa pe:

— Mboapy araa py embotypa ke xea py Judá regua avakue, ha'e ndee voi eju ju apy rejexa uka aguã — he'i.

⁵ Ha'e ramo Amasa oo Judá regua avakue oguerupa aguã, teĩ ou ju e'ÿ re ára oa'angaague oaxa rive.

⁶ Ha'e ramo Abisai pe ju Davi aipoe'i:

— Aÿ Absalão ojapoague gui Seba ojapo vaive 'rã nhandevy. Ha'e rami vy eraapa na xerembiguai kuery, ha'e pemonha, tetã ikorapa va'e py onhemi vy nhandegui oo jepe e'ÿ aguã — he'i.

⁷ Ha'e ramo Joabe revegua kuery ma Jerusalém gui kuery oje'oi'pa Bicri ra'y Seba omonha vy, huvixa rarõa ha'e xondaro kuery ipy'a guaxukue ha'e javi reve.

⁸ Ha'e gui Gibeão katy'i ita tuvixa va'e hi'aña py ha'e kuery ovaẽmba jave ma Amasa ovaexĩ ouvy. Joabe ma xondaro kuery ao py onhemonde ho'amy ha'e py. Hi'áry ku'akuaa oĩ va'e reve kyxe avi oĩ hyru py. Ovaexĩ ovy vy oity kyxe.

⁹ Ha'e vy Amasa pe Joabe

— Xeryvy, reiko porã'i pa? — he'i reve hendyva re ojopy oiporu kuaa regua py, oayvu aguã merami.

¹⁰ Ha'e rã Amasa neĩ ndoikuaa potai Joabe opo rovai py kyxe oguereko re. Ha'e rã ha'e va'e py ae oye'o, hyekue onhoẽmba. Teĩgu ju oikyxi e'ÿ re omano ha'e pyve. Ha'e ramo guvyv Abisai reve Joabe omonhave ju jogueravy Bicri ra'y Seba.

¹¹ Joabe reve ikuai va'e regua peteĩ ma Amasa retেকে yv'ry hi'ái vy aipoe'i:

— Joabe revegua Davi-a katygua peiko va'e ma jaa ke Joabe rupive — he'i.

¹² Tape mbyte rupi Amasa nguguy re omyi teri oupy ramo oexa va'e nhavõ opyta kuerei 'rã. Ha'e nunga rupi xondaro va'e oexa vy tape mbyte gui oguerovave heravy Amasa retেকে nhuũndy katy. Ha'e vy hi'áry omombo peteĩ ao puku, ituia py ovaê va'e nhavõ opyta ramo.

¹³ Tape gui oguerova ma rire avakue ha'e javi oo Joabe rupive, Bicri ra'y Seba rakykue monha vy.

¹⁴ Seba kuery ma Israel ha'e javi regua ikuai rupi oaxapa jogueravy, Abel-Bete-Maaca peve. Ha'e rami teĩ berita kuery anho onhemboatypa vy oje'oi hupive.

[‡] 19:41 Apy "Israel kuery" he'ia ma Judá regua e'ÿ re ijayvu vy. Ha'e rã amboae py ma jaikuaa 'rã judeu kuery ha'e javi re ijayvua.

¹⁵ Ha'e gui Joabe oxondaro kuery reve ovaẽmba vy ojoko imoiny Abel-Bete-Maaca tetã. Ha'e va'e tetã katy'i omboaty reta yvy, tetã kora yvatekuea peve. Ha'e javi Joabe reve ikuai va'e ojo'o-jo'o okuapy tetã kora oity aguã.

¹⁶ Ha'e gui ma tetã gui peteĩ kunha hi' arandu va'e ojapukai:

— Pendu ke, pendu ke. Aipopeje Joabe pe tou kyvõ katy, hexeve xeayvu aguã.

¹⁷ Ha'e va'e ovaẽ ramove kunha va'e oporandu:

— Ndee ae pa Joabe?

Ombovai:

— Xee ae — he'i.

Ha'e rã kunha va'e aipoe'i:

— Endu ke xee nerembiguai xeayvua.

— Aendu 'rã — he'i Joabe.

¹⁸ Ha'e rã kunha va'e aipoe'ive ju:

— Yma guive aipo'ea: “Penhemongeta uka 'rã Abel py, mba'emo pereko va'e re oikuaa pota porãa aguã”¹ea.

¹⁹ Ha'e rami ae xee ma Israel kuery joe opu'ã va'e regua e'ỹ, ore kuery ma ojeroviapy meme. Ha'e rã ndee ma rembovaipaxe peteĩ tetã, xee Israel regua xy aiko va'eri. Mba'e re tu oremokanhy ta SENHOR pegua orekuai va'e?

²⁰ Joabe ombovai vy aipoe'i:

— Xee ma namokanhyi 'rãe, nambovaipavei 'rã guive.

²¹ Ndee rexa'ãa rami e'ỹ aikoa. Ha'e rami avi peteĩ ava Efraim yvyty re oiko va'e, Bicri ra'y Seba hery va'e, opu'ã karamboae huvixa Davi rovai. Ha'e va'e anho'i pemboaxa xevy, ha'e ramo ajepe'a ju 'rã peneretã gui — he'i.

Ha'e rã kunha va'e aipoe'i Joabe pe:

— Ma'ẽ, inhakãgue amombo uka 'rã ndevy tetã kora áry rupi.

²² Ha'e gui kunha va'e o' arandua rupi oo guetarã kuery ha'e javi reve jogueroayvu aguã. Ha'e rire Bicri ra'y Seba akã ojaya okuapy vy omombo Joabe oexa aguã. Ha'e rã omonhe'ẽ mimby guaxu, ha'e ramo ojepe'apa ju tetã gui. Peteĩ-teĩ ngoo katy ju oje'oi. Ha'e rã Joabe ma Jerusalém katy ojevy huvixa reve jogueroayvu aguã.

2 Samuel 8.15-18; 1 Crônicas 18.14-17

²³ Joabe ma Israel regua xondaro kuery ha'e javi re opena va'e. Ha'e rã Joiada ra'y Benaia ma huvixa rarõa kuery re opena.

²⁴ Adorão ma omomba'eapo nhea'ãmby kuery re opena. Ha'e rã Ailude ra'y Josafá ma mba'emo oiko va'ekue mboparaa ae.

²⁵ Seva ma kuaxia re opena va'ety. Zadoque ha'e Abiatar ma sacerdote ikuai.

²⁶ Ha'e gui Jair ramymino Ira ma Davi mongetaaty oiko.

21

Gibeão pygua kuery ojepy okuapyague

¹ Davi oĩ jave oiko karuai mboapy ma'etỹ re. Ha'e rã SENHOR pe Davi oporandu rã aipoe'i iuxupe:

— Ha'e rami oiko mba'eta Saul ha'e hoo pygua kuery jouguy omoẽague re ndopagai teri, Gibeão pygua kuery regua ojukaague re guive — he'i.

² Ha'e rami rã Gibeão pygua kuery huvixa oenoĩ uka vy ijayvu ha'e kuery reve. Gibeão pygua ma Israel regua e'ỹ, amorreu regua rembyrekue ae. Ha'e gui Israel kuery oura ma voi va'ekue omomba e'ỹ aguã re, va'eri Saul ma omombaxe Israel ha'e Judá kuery re nda'evei ete vy.*

³ Ha'e gui Davi oporandu Gibeão pygua kuery pe:

— Mba'e tu peipota ajapo pendeivy kuery pe? Mba'e nunga tu ame'ẽ 'rã pendeivy teko vai ojapoague rekovia, SENHOR pegua kuery peroayvu porã aguã?

⁴ Gibeão regua kuery ombovai okuapy:

— Saul ha'e hoo pygua kuery mba'e prata ha'e ouro ma ndoroipotai. Israel regua ndorojuxaxei guive peteĩve — he'i.

Davi oporanduve ju:

— Mba'e nunga tu ha'vy tajapo pendeivy kuery pe?

⁵ Ha'e kuery ombovai huvixa pe:

— Ha'e gui oreregua kuery jukaare, Israel mbyte rupi roikove e'ỹ aguã oremokanhymbaxe va'ekue,

⁶ ha'e va'e ra'y kuery regua gui emboaxa orevy sete avakue SENHOR renonde rojryrvipy aguã, Gibeã SENHOR rembiporavo Saul rekoague py ae — he'i.

Ha'e ramo huvixa aipoe'i:

— Xee amboaxa 'rã pendeivy — he'i.

⁷ Ha'e rã Jônatas ra'y Mefibosete Saul ramymino va'e ma huvixa nomboaxai, SENHOR rery rupi Saul ra'y Jônatas reve SENHOR Davi ouraague rami vy.

* 21:2 Gibeão regua kuery reve Josué jogueroavyague rami vy Israel kuery pe omba'eapo 'rã avave rei ojuka e'ỹ re (Josué 9).

⁸ Ha'e rami vy huvixa ojopy Saul ra'y kuery Aiá rajy Rispa pi'a mokoïve, Armoni ha'e Mefibosete hery va'e, ha'e gui Saul rajy Merabe pi'a kuery peteï nhiruïve, meolatita Barzilai ra'y Adriel ra'y kuery ikuai va'e.

⁹ Ha'e va'e kuery ma Gibeão pygua kuery po py omboaxa yvy'ã áry ojyryvipyppa aguã, SENHOR renonde. Ha'e rá sete-ve ho'apa vyvoi. Ha'e vy omano, mba'emo mono'õa ypy'ia ára, jypy cevada omono'õa ára py ae.

¹⁰ Ha'e ramo Aiá rajy Rispa ma peteï ajukue voxa guigua ogueraa vy peteï ita tuvixa va'e áry oipyo imoiny oï aguã. Ha'e py ma jypy omono'õa ára guive opyta yva gui oky ho'a ju peve. Ha'e va'e ma ara py neï pyávy ndoejai oikovy tetekue ikuai py guyra oveve va'e onhemboja aguã, mymba ka'aguy rupigua guive.

¹¹ Davi pe omombe'ua Saul ra'yxy jevy Rispa oikoa ha'e javi, Aiá rajy va'e.

¹² Ha'e rami rá Davi oo vy Jabes-Gileade gui ogueru Saul ha'e ta'y Jônatas kãgue, ha'e pygua kuery Bete-Seã tetã mbyte gui ogueraa rire. Ha'e py ma Gilboa yvyty re filisteu kuery Saul ojukaa ára py oeja imoiny va'ekue.

¹³ Ha'e kuery po gui Saul ha'e ta'y Jônatas kãgue ogueru vy ha'e va'e reve onhono porã avi ojyryvipy pyre kãgue.

¹⁴ Ha'e rami vy Benjamim regua yvy re ojaty okuapy Saul ha'e ta'y Jônatas kãgue, Zela py, tuu Quis onhono porãague py ae. Huvixa ojapo ukaa rami ojapopa. Ha'e va'e rire ma ha'e va'e yvy re Nhanderuete ojapo porã ju.

1 Crônicas 20.4-8

¹⁵ Ha'e gui filisteu kuery opu'ã ju okuapy Israel kuery rovai. Ha'e rá Davi oxondaro kuery reve oje'oi vy joguero'a filisteu kuery reve. Ha'e gui ma Davi ikane'õ vaipa.

¹⁶ Isbi-Benobe ma gigante ramymino regua. Hu'y guaxu oguereko va'e ma cinco quilos ipoyi va'e, ha'e onhemonde oikovy hu'y jokoia regua ipyaukue py. Ha'e va'e ma ojukaxe Davi.

¹⁷ Ha'e rami teï Zerua pi'a Abisai oepy vy filisteu oipyxu vy ojuka. Ha'e ramo Davi pegua kuery ixupe oura vy aipoe'i okuapy:

— Aÿ gui ma orereve ndee ndereovei 'rá joe ropu'ã aguã katy, Israel kuery moexakãa ogue e'y aguã — he'i okuapy.

¹⁸ Ha'e va'e rire ma joguero'ave ju Gobe py, filisteu kuery reve. Ha'e py ma husatita Sibecai va'e ojuka gigante ramymino Safe.

¹⁹ Ha'e va'e rire teïgue ju joguero'a filisteu kuery rovai Gobe py. Ha'e gui Belém pygua Jaaré-Oregim ra'y Elanã ojuka Gate pygua Golias. Ha'e va'e guembiporu hu'y guaxu oguereko va'ekue ma ajukue popëa'y rami tuvixa va'e.*

²⁰ Teïgue ju opu'ã okuapy joe, Gate py ae. Ha'e py oiko peteï ava yvate ete va'e. Ha'e va'e ma mboapy meme ikuã ha'e ipyxã voi, ha'e javi vy vinte e quatro ikuã ha'e ipyxã oguereko. Ha'e va'e voi gigante ramymino regua.

²¹ Ha'e va'e ma Israel kuery mbojaru reia rupi ijayvu ramo Davi ryke'y Simei ra'y Jônatas ojuka.

²² Ha'e va'e avakue irundy ikuai gigante ramymino Gate tetã py. Ha'e rami teï Davi ha'e ixondaro kuery oitypa raka'e.

22

Salmo 18.1-50

¹ Ha'e gui SENHOR pe Davi ijayvu kova'e mboraie rupi, Saul ha'e hovaigua kuery ha'e javi po gui SENHOR ogueraa jepe jave.

² Ha'e vy aipoe'i:

— SENHOR, ndee ma xe'itaova.

Ndee ma oo imbaraeete va'e ha'e xerepya.

³ Xeruete ma xe'itaova anhemiaty, mba'emo vai jokoia, xereraa jepea imbaraeete va'e, oo yvate va'e, ha'e anhemiaty.

Ndee Xeruete, xereraa jepe 'rá xejukaxea kuery gui.

⁴ Ajapukai SENHOR ogueroporaieipy va'e pe.

Ha'e rami vy aa jepe 'rá xerovaigua kuery gui.

⁵ Manoa pygua xejoko va'ekue yai rami, heko vai va'e yai rami xere opu'ã vy xemongyje.

⁶ Manoa pygua xejokua va'ekue, nhu'ã xã xejura xapy'a.

⁷ Ha'e ramo ajexavaia py ajapukai karamboae SENHOR pe. Xeruete pe ajapukai ainy.

Ha'e rá ojeupegua templo gui oendu xeayvua,

ijapyxa peve ajapukaia ovaé ramo.

⁸ Ha'e ramo yvy omyï ha'e oryryi.

Yva yta ikuai va'e voi ovavapa, oryryipa, ogueropoxy ramo.

⁹ Inhapyïgua gui opu'ã hataxi,

ijuru gui ma tata nhombaarã oë,

- tapyī hexakā va'e.
- ¹⁰ Yva omo'yvyī vy oguejy,
ipy guýry pytū vaikue oī reve.
- ¹¹ Peteī anjo ipepo va'e áry oī vy oveve ouvý,
vyvytu opepo áry ogueru pojava ramo.
- ¹² Oyvýry rupi rami omoī pytū reia oo'irā,
pytū, yy ijatya ha'e yva re arai ikuai va'e voi.
- ¹³ Hexakāa henonde oo va'e gui
hendy ovy tapyī rexakā ramigua.
- ¹⁴ Ha'e gui SENHOR yapu yva re,
Yvate ete va'e ijayvu atā.
- ¹⁵ Ngu'y omombo vy omoaimba xerovaigua kuery.
Overa vy omondyipa.
- ¹⁶ Ha'e ramo ojekuaa yy rupa,
ha'e yvy yta avi ojekuaapa,
ndeayvu atāa py SENHOR,
ndepoxya rupi neapyīgua gui nepytuē ramo.
- ¹⁷ Yvate gui ha'e okuave'ē vy xejopy,
xerenoē yy tuvixa va'e gui.
- ¹⁸ Xereraa jepe xerovaigua kuery imbaraete va'e gui,
xemomboriau rei va'e kuery gui ae,
xegui ipo'akave ete va'ekue ri.
- ¹⁹ Xere ha'e kuery opu'āmba rei ajexavai jave,
teī SENHOR onhemōi xepytyvōarā.
- ²⁰ Ha'e rami vy xereru peteī henda ipa'ū ja'eavea py.
Xereraa jepe xererovy'a vy.
- ²¹ Xereko porāa re SENHOR xerereko porā,
xevy pe ome'ē ndaxepo ky'aiague repy.
- ²² Mba'eta xee ma SENHOR guigua tape rupi aiko va'e,
ndajepe'ai Xeruete gui ha'eve'yā rami aiko aguā.
- ²³ Xejee amoī ijayvuague ha'e javi,
xejegui ndaipe'ai ayvu omoī va'ekue.
- ²⁴ Henonde aiko anhetēa rupi,
ajejoko teko vai rupi aiko e'y āguā.
- ²⁵ Ha'e ramo SENHOR ome'ē xereko porāague repy,
henonde rupi ndaxereko ky'ai rire.
- ²⁶ Heko porā va'e kuery pe rejekuaa uka 'rā heko porā va'e,
anhetē rupi ikuai va'e pe rejekuaa uka anhetē rupigua avi,
- ²⁷ icy'a e'y va'e pe rejekuaa uka icy'a e'y va'e,
ha'e rā heko vai va'e pe ma rejekuaa uka 'rā nhombopaga kuaa va'e.
- ²⁸ Ndee reraa jepe 'rā onhemo'yvyī'i va'e,
ha'e rā oma'ē vaikue reia rupi onhemboyvate va'e ma remomba 'rā.
- ²⁹ Ndee SENHOR ma xerexapea,
SENHOR omoexakā pytū rupi aiko rā.
- ³⁰ Ndereve vy amomba 'rā xondaro kuery,
Xeruete reve vy apo 'rā hetā kora áry rupi.
- ³¹ Nhanderuete guigua tape ma icy'a e'y va'e,
SENHOR ayvu ma oa'anga pyre.
Hexe onhemi va'e ha'e javi pe ma mba'emo vai jokoia oiko.
- ³² Mava'e tu Nhanderuete oiko SENHOR e'y vy?
Mava'e tu nhande'itaova oiko Nhanderuete e'y vy?
- ³³ Nhanderuete ma xemombaraetea xekangy e'y āguā,
omoatyrō 'rā aguata āguā rupi.
- ³⁴ Ha'e ojapo xepy guaxu rami inhakuā āguā.
Ha'e vy yvatea rupi xemoingo.
- ³⁵ Xepo pe voi ome'ē joe apu'ā kuaa āguā.
Ha'e ramo guyrapa overa va'e guigua voi aipira 'rā.
- ³⁶ Mba'emo vai jokoarā reme'ē xereraa jepea,
xemboaxya rupi xemboyvate.
- ³⁷ Apyrō āguā tape rembopyve ramo
ndaxepxyryi 'rā.
- ³⁸ Xerovaigua kuery amonha 'rā aupity peve.
Amomba rire ma ajevvy ju.
- ³⁹ Amomba ae, amou'ūmba opu'ā āguā nda'evevei peve.

- Xepy yvýry ho'apa.
- ⁴⁰ Mba'eta ndee xemombaraete ajoguero'a kuaa aguã,
rejapo xere opu'ã va'ekue re xepo'aka aguã rami.
- ⁴¹ Xerovaigua kuery rejapo ojavapa aguã rami.
Xerayvu e'ÿ va'e amomba.
- ⁴² Ha'e kuery oma'ẽ rã avave rei ndoepyai.
Tá, SENHOR pe ha'e kuery ojapukai teĩ nombovai.
- ⁴³ Ha'e ramo amongu'ipa vvy ku'i rami.
Amou'ũmba, yapo tape guiguare rami amomba.
- ⁴⁴ Xeretã pygua kuery xere opu'ãa gui xereraa jepe,
xemoi vvy regua kuery ruvixarã.
Amboae regua kuery ndaexai va'ety voi xeivygua ikuai.
- ⁴⁵ Amboae regua kuery xenhe'ẽ rendu.
Xeayvu oendu vvy ojapopa okuapy.
- ⁴⁶ Ha'e gui amboae regua kuery okanhymba,
onhemiague gui oẽmba onhemondyipa vvy.
- ⁴⁷ SENHOR ma oikove va'e, togueroayvu porãa xe'itaova!
Tomboetea Xeruete, ita xereraa jepea.
- ⁴⁸ Nhanderuete xerepy vvy jojukapa,
heta va'e kuery re xembopo'aka.
- ⁴⁹ Nhanderuete ae xereraa jepe xerovaigua kuery gui.
Ndee ma xemboyvate xerovaigua kuery áry,
ha'e xerepy avakue jojuka va'ety po gui.
- ⁵⁰ Ha'e ramo SENHOR, rogueroovy'a 'rã vvy regua kuery oendua py,
aporaie 'rã nderery rupi.*
- ⁵¹ Ha'e ae ombopo'aka 'rã huvixave omoi va'ekue,
oexa uka 'rã guembiporavo oayvua,
Davi ha'e hamymino kuery pe, raka'e rã peve.

23

Davi opa vvgua ijayvuague

- ¹ Pova'e ayvu ma opa vvgua Davi ijayvuague.
Jessé ra'y Davi ijayvua,
ava omboyvate pyre, Jacó kuery ruete omoi va'ekue,
Israel regua ha'eve rei'ia rupi oporai va'e.
- ² — SENHOR Nhe'ẽ ijayvu xejuru rupi,
ha'e ijayvua rupi ae xejuru omombe'u.
- ³ Israel kuery ruete ijayvu,
Itaova Israel kuery onhemiaty aipoe'i xevy:
“Teko porã rupi avakue re opena va'e,
SENHOR renonde ojererokyjea rupi joe opena va'e ma
- ⁴ ko'ẽ aje'ive omoexakã ouvy va'e rami oiko,
ko'ẽ aje'ive nda'araivei jave kuaray ojope ouvy va'e rami,
oky rire ojope ju vvy mba'emo renhoi ombo'okypa va'e rami”, he'i.
- ⁵ Ha'e rami e'ÿ ri pa Nhanderuete renonde xero pygua kuery ikuai?
Mba'eta xereve ojapo ngupive guarã opa e'ÿ va'erã,
ha'evea rami meme ae ojapo, ivaipa aguã rami e'ÿ.
Ha'e rami vvy ndojapoi avi 'rã teve aa jepe aguã,
aupity aguã arõ aikovy va'e ha'e javi?
- ⁶ Ha'e rã nhe'ẽ vai ra'y kuery ma oipe'apaa 'rã
juu nhandepo py e'ÿ nhamondo va'e rami.
- ⁷ Mba'eta amongue omondoxe vvy
oiporu 'rã ferro guigua, e'ÿ vvy hu'y guaxu.
Ha'e rire hi'ãague pyve okai katui'i 'rã tata py.
1 Crônicas 11.10-47
- ⁸ Po rami ma Davi pegua ipy'a guaxukueve rery oi: Taquemoni ra'y Josebe-Bassebete ma mboapyve va'e kuery ruvixa. Ha'e va'e ma guembiporu hu'y guaxu reve onhea'ã oikovy oitocentos avakue rovai, ha'e vvy ojukapa vyvoi peteĩgue'i pyve.
- ⁹ Ha'e va'e rire ma Dodô ra'y Eleazar, Aoi ramymino va'e. Ha'e va'e ma mboapyve ipy'a guaxukueve va'e regua oiko. Peteĩ ára Davi reve ha'e kuery ikuai vvy filisteu kuery ijaty okuapy va'e ombovai okuapy joe opu'ã aguã. Israel kuery mboae ma ojepe'apa ma teĩ

* 22:50 Romanos 15.9

¹⁰ ha'e opu'ã vy onhea'ã filisteu kuery rovai, ipo kyxe ojopya haxypa peve. Ha'e va'e ára SENHOR ogueraa jepepa rá heta va'e kuery Eleazar opu'ã ho'amya py ojevypa ju mba'emo oeja pyre ojopy heravy aguã.

¹¹ Ha'e va'e rire ma Agé ra'y Samá, hararita va'e. Léif tekoa py peteĩ mba'ety kumanda pe'i anho ikuaia py filisteu kuery ijaty okuapy ramo ha'e kuery gui heta va'e kuery onhamba teĩ

¹² mba'ety mbyte py Samá hi'ái vy ojokopa. Ha'e rami vy ojukapa filisteu kuery. Ha'e rami py teĩgue ju SENHOR ogueraa jepepa.

¹³ Ha'e gui trinta yvatekueve ikuai va'e regua mboapy ma mba'emo mono'õa ára oje'oi avi Adulão itakua py Davi onhemia py. Ha'e va'e jave py filisteu regua xondaro kuery voi ijaty okuapy Refains yvyugua py.

¹⁴ Ha'e rami vy Davi onhemia py oĩ, ha'e rá filisteu regua xondaro kuery ma Belém py ikuai.

¹⁵ Ha'e gui Davi ijy'uvei etea rupi aipoe'i:

— Mava'e tu xemboy'u ta ygua Belém tetã kora rokẽ py oĩ va'e gui? — he'i ramo

¹⁶ ha'e va'e mboapyve ipy'a guaxukueve ikuai va'e ma filisteu kuery ijaty okuapy mbyte rupi oaxa vy ygua Belém tetã rokẽ py oĩ va'e gui oguenoẽ yy, ha'e Davi oĩa py ogueru. Ha'e rá ha'e ndoy'uxeĩ vy onhoẽ SENHOR renonde ome'ẽ mbyrã.

¹⁷ Ha'e vy aipoe'i:

— SENHOR, nda'evei ete xee ha'e nunga ay'u aguã! Xee ay'u 'rã ri nda'u avakue ndojeayvuveikue py oje'oi va'ekue ruguy rami? — he'i vy ndoy'ui. Ha'e ramigua ae mboapy ipy'a guaxukueve ojapo va'ekue.

¹⁸ Ha'e gui Joabe ryke'y Abisai, Zerua pi'a va'e ma trinta ikuai va'e ruvixa. Ha'e va'e ma guembiporu hu'y guaxu reve opu'ã trezentos ikuai va'e rovai, ha'e vy ojukapa. Ha'e rami vy tenondegua mboapyve ikuai va'e rami ete ima'endu'a porãmby oiko.

¹⁹ Ha'e ma trinta ikuai va'e gui omboetepevy vy ha'e kuery ruvixa oiko va'eri tenondegua mboapyve ikuai va'e regua e'ỹ guive.

²⁰ Ha'e gui Joiada ra'y Benaia ma ipy'a guaxuve va'e avi. Cabzeel pygua oiko, mba'emo tuvixa va'e ojapo avi va'e. Ha'e rami vy ojuka mokoĩ Moabe pygua joe opu'ã kuaave va'ekue. Yro'y apĩ ho'a jave ma itakua py ogejy vy ojuka peteĩ guary okua py oĩ va'ekue.

²¹ Ojuka avi peteĩ ava Egito guigua ipukue va'ekue. Egito pygua ma hu'y guaxu reve ou rá Benaia popoka py rive opu'ã ovy vy ipo gui hu'y guaxu ogueroko va'ekue oipe'a vy ha'e va'e py ae ju ojuka.

²² Ha'e nunga Joiada ra'y Benaia ojapo rire mboapyve tenondegua ipy'a guaxukueve re rami ima'endu'a porãmby oiko.

²³ Ha'e va'e ma trinta ikuai va'e gui omboetevea va'eri mboapyve tenondegua regua ndoikoi guive. Ha'e gui Davi omõi guarõa kuery re opena va'erã.

²⁴ Trinta ikuai va'e ma po rami hery: Joabe ryvy Asael, Belém pygua Dodô ra'y Eaná,

²⁵ ha'e gui Samá ha'e Elica harodita va'e meme,

²⁶ paltita va'e Heles, Tecoa pygua Iques ra'y Ira,

²⁷ Anatote pygua Abiezer, Mebunai husatita va'e,

²⁸ Zalmom aoíta va'e, Maarai netofatita va'e,

²⁹ Baaná netofatita va'e ra'y Helebe, Gibeá pygua Ribai ra'y Itai Benjamim regua va'e,

³⁰ Benaia piratonita va'e, Gaás yakã katygua Hidai,

³¹ Abi-Albom arbitita va'e, Azmavete barumita va'e,

³² Eliaba saalbonita va'e, Jasém ra'y kuery, Jônatas,

³³ Sama hararita va'e, Sarar ararita va'e ra'y Aiã,

³⁴ Aasbai maacatita va'e ra'y Elifelete, Aitofel gilonita va'e ra'y Eliã,

³⁵ Hezrai carmelita va'e, Paarai arbita va'e,

³⁶ Zobá pygua Natã ra'y Jigeal, Bani gadita va'e,

³⁷ Zeleque amonita va'e, Naarai beerotita va'e, Zerua pi'a Joabe rembiporu reraaty,

³⁸ Ira ha'e Garebe itrita va'e meme,

³⁹ ha'e gui Urias heteu va'e. Ha'e javi vy trinta e sete ikuai.

24

1 Crônicas 21.1-6

¹ Ha'e gui teĩgue ju SENHOR poxya hendy jevy Israel kuery rovai. Ha'e vy Davi py'a re omõi ha'e kuery rovai oiko aguã. Ha'e vy aipoe'i ixupe:

— Tereo eipapa Israel ha'e Judá kuery ha'e javi — he'i.

² Ha'e ramo huvixa Davi aipoe'i xondaro ruvixa Joabe pe:

— Eiko ke Israel regua ha'e javi ikuai rupi, Dã guive Berseba peve. Ha'e vy eipapapa, aikuaa aguã mbovy pa ikuai.

³ Joabe ombovai huvixa pe:

— Ha'e rami avi tove SENHOR Nderuete cem-kue ju tomoetave, ndee xeruvixa rexa py. Ha'e rami teĩ xeruvixa, mba'e re tu ndee ha'e rami ete rejapoxe? — he'i.

⁴ Ha'e rami teĩ huvixa ayvu Joabe ha'e xondaro ruvixa kuery ijavyua gui ipoyive ramo huvixa renonde gui Joabe ha'e xondaro ruvixa kuery oje'oi vy oipapa jogueravy Israel kuery ha'e javi.

⁵ Ha'e rami vy ha'e kuery Jordão yakã oaxa vy opyta Aroer py Gade yvyugua mbyte py tetã oĩ va'e yke jaiporu kuaa regua katy. Ha'e vy oo Jazer katy.

⁶ Ha'e gui ma Gileade katy oo vy ovaë Cades peve, heteu kuery yvy re. Ha'e gui Dã-Jaã katy oo vy ojeapa jogueravy Sidom katy.

⁷ Ha'e vy ovaë Tiro tetã ikorapa va'e py, ha'e gui heteu ha'e cananeu kuery rekoa ha'e javi rupi. Ha'e gui oje'oi ju Judá regua Neguebe yvy katy Berseba peve.

⁸ Ha'e rami py oguata jogueravy Israel yvy ha'e javi rupi.

Ha'e gui nove jaxya vinte araa py ma ovaë ju okuapy Jerusalém py.

⁹ Huvixa pe Joabe omombe'u heta va'e kuery mbovy pa ikuai. Israel re ikuai ra'e oitocentos mil avakue joe opu'ãa py kyxe oiporu kuaa va'e. Ha'e rã Judá re ma quinhentos mil ikuai.

1 Crônicas 21.7-17

¹⁰ Ha'e gui Davi heta va'e kuery oipapa ukapa ma rire opy'a py oendu ramo nda'eveia. Ha'e vy aipoe'i SENHOR pe:

— Ajejavy vaipa ra'e ha'e rami ajapoa py. Ha'e rami teĩ aỹ SENHOR, ajerure rembogue aguã xee nerembigui ajevyague, inhakã porã ve'ỹ va'e rami ajapo rire — he'i.

¹¹ Ko'ë aje'ive'i reve Davi ovy ramove Davi pegua imba'ekuaa va'e profeta Gade rupi SENHOR ombou oavyu. Ha'e vy aipoe'i iuxpe:

¹² — Tereo aipo're Davi pe: “Po rami SENHOR ijavyu: ‘Mboapy regua va'e aikuaa uka 'rã peteĩ eiporavo ajapo aguã', he'i.”

¹³ Ha'e ramo Davi-a py profeta Gade ovaë vy omombe'u. Ha'e vy aipoe'i:

— Reipota pa sete ma'etỹ re karuai ou ndeyvy re? Tyrã pa mboapy jaxy re renha ta reikovy nderovaigua kuery gui, ha'e kuery nemonha rã? Tyrã pa reipota mboapy ára re mba'eaxy vaikue oiko ndeyvy re? Eiporavo ke aỹ, ha'e emombe'u xembouare pe ambovai va'erã — he'i.

¹⁴ Gade pe Davi ombovai:

— Xee ma ajexavaia aendu. Ha'eveve SENHOR po py anhemboaxa uka rã, mba'eta ha'e ma opa e'ỹ va'e nhanemboaxy va'e. Ha'e rã avakue po py ma xee nanhemboaxa ukaxei — he'i.

¹⁵ Ha'e rami rã SENHOR ombou mba'eaxy vaikue Israel yvy ha'e javi rupi, ko'ë aje'ive'i guive oa'angaague ára peve. Ha'e ramo Dã guive Berseba peve omano setenta mil avakue ha'e kuery regua.

¹⁶ Ha'e gui Jerusalém áry SENHOR-a guigua anjo tetã omomba aguã opo oupi ho'amy jave SENHOR opytu'u ma mba'emo vai omoingoa gui. Ha'e vy aipoe'i anjo heta va'e kuery mombaarã ou va'ekue pe:

— Ha'eve ma, emboguejy ju ndepo — he'i. Ha'e va'e jave ma anjo hi'aĩ jebuseu regua Araúna mba'emo moa'yiaty yvy'iry.

¹⁷ Ha'e gui anjo heta va'e kuery omomba rã Davi oexa vy ojapukai SENHOR pe. Ha'e vy aipoe'i:

— Xee rima ajejavy, xee rima hi'arandu e'ỹ va'e rami ajapo. Ha'e rã kova'e vexa'i kuery, mba'e tu ha'e kuery ojapo? Xerovai ae eupi ndepo, ha'e xeru ro pygua kuery rovai.

1 Crônicas 21.18-27

¹⁸ Ha'e va'e árave profeta Gade ou Davi oĩa py. Ha'e vy aipoe'i:

— Tereo na, ejapo SENHOR pe peteĩ altar-rã jebuseu regua Araúna mba'emo moa'yiaty py.

¹⁹ Gade ayvu rupi SENHOR ojapo ukaague rami vy Davi oo.

²⁰ Ha'e gui Araúna ma yvy'ã re oĩa gui oexa huvixa guembigui kuery reve jogueru nhoguenoiny ramo. Ha'e rami vy guenapy'ã re oĩ ngova yvy peve.

²¹ Ha'e vy oporandu:

— Xeruvixa, mba'e re tu ndee reju apy xee nerembigui aĩa py?

Davi ombovai:

— Mba'emo moa'yiaty ajogua aguã rimaaju, SENHOR pe altar-rã ajapo aguã, mba'eaxy vaikue heta va'e kuery áry ombou va'ekue opytu'u aguã — he'i.

²² Ha'e rã Araúna aipoe'i Davi pe:

— Ejopy ha'e eme'ë SENHOR pe reme'ëxe va'e, reipota va'e rei teĩ. Apy ma vaka ikuai reapy vy reme'ë va'erã. Oĩ avi vyvrape mba'emo moa'yiaty regua yxakãrã, canga guive oĩ.

²³ Xeruvixa, ha'e nunga ha'e javi ndepo py xee Araúna ame'ëmba — he'i.

Ha'e vy aipoe'ive ju:

— SENHOR Nderuete tojapo rejerurea.

²⁴ Ha'e rami teĩ huvixa ombovai Araúna pe:

— Any, ndegui xee ajogua 'rã hepyrã porã re, mba'eta SENHOR Xeruete pe name'ei 'rã xeivy ome'ë rive pyre — he'i. Ha'e rami vy Davi ojogua mba'emo moa'yiaty, ha'e vaka re ma ome'ë cinqüenta hatã'i va'e prata guigua.

²⁵ Ha'e py ma Davi ojapo peteĩ altar SENHOR pe, ha'e vy ome'ë mba'emo oapy reve, peteĩ rami ikuai regua guive. Ha'e rami rã ha'e va'e yvy re SENHOR ojapo porã jevy ramo Israel kuery ikuai áry gui mba'eaxy vaikue opytu'u.

Jypy'igua kuaxia huvixave rei kuery rekokue oïa

Jypy'igua kuaxia huvixave rei kuery rekokue oïa

Huvixa Davi omano rire ta'y Salomão ju oï hekovia. “Salomão pe Nhanderueete ome'ê avi hi'arandurã, opa mba'e py oikuaa pota ha'e mba'emo oikuapa rei aguã rami, ye'ê rembe rupi ita ku'i ikuaiia rami. ... Omombe'u avi três mil avyu arandua regua, ha'e gui mil e cinco mboraeirã. ... Ha'e ramo ha'e javi regua ou Salomão arandua oenduxe vy” (4.29, 32, 34a). Nhanderueete ombojerovia atyrã Salomão ojapo peteï templo iporã vaipa va'e, ouro ha'e overa va'e py onhovãmbaa. Mbovy rei e'y' oguereko kavaju ha'e karóxa joe opu'ãa pyguarã. “Ha'e rami vy setecentos kunhague oguereko huvixa räjy meme, ha'e gui trezentos ta'yxy jevy kuery. Ha'e va'e kunhague ma ojapo amboae rami rei ipy'a aguã. Ha'e vy tuja'ive ma jave ta'yxy kuery ombopy'a roerova ete tuuete mboae ramigua kuery re ju ombojerovia aguã. Ha'e ramo opy'a re anhetë rupi ve'y' oiko Senhor nguete pe, nguu Davi oikoague rami e'y'” (11.3-4).

Salomão omano rire openaague omboja'oa mokoï henda py. Kuaray puku-a katy opyta Judá regua, ta'ykue opena aguã. Ha'e rã kuaray ijapu'a'ia katy ma Israel regua opyta, amboae kuery openaa. Ha'e va'e mokoive regua joe opu'ã jepi raka'e.

Israel regua re opena raka'e peteï huvixa Acabe hery va'e. Ha'e va'e ma Nhanderueete re ndojerovia ramo ixupe profeta Elias ijayvu, tuuete ramigua Baal pegua sacerdote kuery reve oeko a'ã guive. Aipoe'i heta va'e kuery pe: “Raka'e peve 'rã tu pendepy'a py ndapeikuaai rei pekuapy mokoï rupi rei vy? Senhor ae ri Nhanderueete oiko ramo ixupe ete pendekuai. Ha'e'y' vy xapy'a rei Baal ri Nhanderueete oiko ramo ixupe pendekuai” he'i (18.21). Ha'e ramo Nhanderueete ombovai vy tata ombou yva gui, opo'akaa oexa uka vy.

Davi tuja'i ete jave guare

¹ Huvixa Davi tuja'i ete, ha'e heta ma'etÿa oguereko ma ramo ajukue py onhovãmbaa teï ijeyro'y ae tema.

² Ha'e ramo ixupe hembiguai kuery aipoe'i:

— Oreruvixa, tove tojoua peteï kunhata'i nerenonde oiko va'erã. Tove ndere topena toikovy, toke avi ndejyva py, ndeyro'y riae e'y' aguã — he'i.

³ Ha'e rami vy Israel ha'e javi rupi oeka oje'oivy kunhata'i iporãve va'e. Ha'e vy Suném pygua Abisague hery va'e ojou vy ogueru huvixaa py.

⁴ Kunhata'i va'e ma iporã ete va'e. Huvixa re opena oikovy, oipytyvõa rupi oiko teï huvixa ma hexe nopena rei.

Adonias huvixarã onhemoï uka rivexeague

⁵ Ha'e gui Davi ra'y Adonias Hagite pi'a va'e ma onhemboyvate rei. Ha'e vy aipoe'i:

— Xee ae 'rã aï huvixarã — he'i. Ha'e rami vy ojou karóxa, kavaju áry guarã kuery ha'e cinqüenta avakue henonde rupi onha okuapy aguã.

⁶ Ha'e rami teï tuu ma neï peteïgue ma voi nda'ijayvui ixupe. Neï aipo nde'i: “Mba'e re tu guï rami reiko?” nde'i. Ha'e ma jaexa rã iporãve va'e avi, Absalão oiko rire oiko va'ekue.*

⁷ Ha'e rami vy Zeruia pi'a Joabe ha'e sacerdote Abiatar reve jogueroayvu, ha'ea katy ha'e kuery oo vy oipytyvõ aguã re.

⁸ Ha'e rã sacerdote Zadoque ma Adonias-a katy ndooi, neï Joiada ra'y Benaia, profeta Natã, Simei, Reï ha'e Davi hembiguai kuery ipy'a guaxukueve va'e ma voi.

⁹ Ha'e rire Adonias ma ita Zoelete py oïa py oo vy ome'ê mymba kuery vexe'i, vaka ha'e ikrya ete va'e oapy reve, Rogel katy'i yvu oï va'e py. Ha'e katy oenoimba avi guyvy kuery huvixa ra'y ikuai va'e, ha'e gui avakue Judá pygua huvixa hembiguai kuery ha'e javive.†

¹⁰ Ha'e rã profeta Natã ma noenoï ukai ae, neï Benaia, avakue ipy'a guaxukueve neï guyvy Salomão ma voi.

Bate-Seba reve Salomão huvixarã oï aguã re Natã ijayvuague

¹¹ Ha'e rami rã Natã aipoe'i Salomão xy Bate-Seba va'e pe:

— Nerendui ri ty'y Hagite pi'a Adonias huvixarã onhemoïague? Ha'e rami teï nhanderuvixa Davi ndoikuaai.

¹² Ha'e nunga rupi eju, toromongeta, reikove reve reo jepe aguã, ndepi'a Salomão voi.

¹³ Tereo, ejexa uka huvixa Davi pe. Ha'e vy aipo're ixupe: “Xeruvixa, reura ma e'y' teve xee nerembiguai pe? Mba'eta aipo're va'ekue: ‘Ndepi'a Salomão ae ma oï 'rã huvixave xerekovia, xerenda áry ae 'rã oï, 're va'ekue. Mba'e re tu ha'vy Adonias ri huvixarã onhemoï?’ ‘re 'rã ixupe.

¹⁴ Ha'e gui huvixa reve ndee ndeayvu teri reve ma xee voi avaê 'rã nderakykue. Ha'e vy xee ju xeayvu 'rã ndeayvuague rupi — he'i.

¹⁵ Ha'e gui Bate-Seba ma opy huvixa oïa py oo vy ojexa uka ixupe. Huvixa ma tuja'i raxa ma ramo Suném pygua Abisague oï avi oipytyvõa rupi.

¹⁶ Ha'e gui huvixa renonde py Bate-Seba ojero'a vy oï guenapy'ã re. Ha'e ramo oporandu vy

— Mba'e tu reipota? — he'i huvixa.

* 1:6 Adonias ma Absalão ryvy (2 Samuel 3.2-5), teï ha'e kuery ikuaiia re tuu Davi ndoikuaa potai (2 Samuel 14). † 1:9 Adonias ma ngaru ojapo Nhanderueete peguarã merami teï huvixa oï aguã rive, tyke'y Absalão ojapoague rami avi (2 Samuel 15.7-12).

¹⁷ Kunha va'e ombovai:

— Xeruvixa, SENHOR Nderuete renonde reura va'ekue xee nerembiguai va'e pe. Ha'e vy aipo're va'ekue: “Ndepi'a Salomão ae ma oĩ 'rã huvixarã xerekovia. Ha'e ae 'rã oguapy xerenda áry”, 're va'ekue.

¹⁸ Ha'e rami teĩ aỹ ma Adonias ae onhemoi ra'e huvixaverã. Ha'e gui ndee xeruvixa, ndereikuai teri.

¹⁹ Ha'e va'e ma mymba kuery ojuka uka vy ome'ẽ ma vaka ra'y ikyrave va'e ha'e vexe'i oata aguã rami rei e'ỹ. Oenoĩmba avi huvixa kuery ha'e javi, sacerdote Abiatar ha'e xondaro kuery ruvixa Joabe. Ha'e rã ndera'y Salomão ma ha'e noenoĩ ukai.

²⁰ Ha'e rami teĩ xeruvixa, Israel kuery ha'e javi ma ndere meme oma'ẽ okuapy, ndee ae reikuaa uka porãve aguã mava'e ete pa nerenda áry oguapy va'erã nderekovia huvixarã oĩ aguã.

²¹ Ha'e rami e'ỹ rã xeruvixa, neramoi kueryague rami nenhono porã rã xee ha'e xepi'a Salomão voi orerereko axya rei 'rã joapo vai va'ety rami rive — he'i.

²² Huvixa reve kunha va'e ijayvu teri reve ovaẽ avi profeta Natã ha'e py.

²³ Ha'e ramo huvixa pe omombe'ua vy ixupe aipo'ea:

— Apy ma ko ovaẽ profeta Natã — 'ea ramove ha'e va'e ju ojero'a vy henonde ngova omboja vvy peve.

²⁴ Ha'e vy aipoe'i:

— Xeruvixa, ndee ae ri nhi'ã aipo're va'ekue: “Adonias 'rã huvixa oĩ xee ndaikovevei ma rire, ha'e vy ha'e ae ma 'rã oguapy xerenda áry”, 're ri ty'y?

²⁵ Mba'eta ange ma ha'e ou vy ojuka uka vaka ha'e mymba kuery ikyrakueve va'e, vexe'i kuery oata aguã rami e'ỹ guive. Ha'e vy oenoĩ ukapa huvixa ra'y kuery ha'e javi, xondaro kuery ruvixa ha'e sacerdote Abiatar. Ha'e ramo ha'e kuery oguero'ya vy okaru ha'e oy'u okuapy henonde py. Ha'e vy ixupe aipoe'i okuapy: “Ha'eve ete ma nhanderuvixave Adonias!” he'i okuapy.

²⁶ Ha'e rã xee nerembiguai aiko va'e ma naxerenoi, neĩ sacerdote Zadoque, Joiada ra'y Benaia ha'e ndera'y Salomão ma voi.

²⁷ Xeruvixa, ndee ae ri nhi'ã rejapo uka va'ekue ha'e nunga? Mba'eta nerembiguai kuery pe ndereikuai ukai teve nderekovia nerenda áry oguapy va'erã — he'i.

²⁸ Ha'e ramo huvixa Davi ijayvu vy

— Penoi ju ha'vy Bate-Seba xea py — he'i. Ha'e rã kunha va'e ma huvixa renonde py ou ju vy ojexa uka ho'amy ixupe.

²⁹ Ha'e ramo huvixa oura reve aipoe'i:

— Anhetẽ ete ajexavaia ha'e javi gui SENHOR oikove va'e xerepy va'ekue rery rupi aura vy aipoa'e:

³⁰ Kova'e ára pyve ajapo 'rã ndevy auraague. Mba'eta SENHOR Israel kuery Ruete rery rupi aipoa'e va'ekue: “Ndepi'a Salomão ae 'rã oĩ xee naivei jave. Ha'e ae ju 'rã oguapy xerenda áry xerekovia”, ha'e va'ekue.

³¹ Ha'e ramo Bate-Seba ma huvixa renonde py ojero'a vy vvy peve omboja ngova. Ha'e vy aipoe'i:

— Ha'eve ete ma xeruvixa Davi, raka'e rã peve guarã!

Huvixarã Salomão omoi okuapyague

³² Ha'e gui ma Davi aipoe'i:

— Penoi xea py sacerdote Zadoque, profeta Natã ha'e Joiada ra'y Benaia — he'i ramo ha'e va'e kuery oguerua rã ojexa uka okuapy huvixa pe.

³³ Ha'e kuery pe huvixa aipoe'i:

— Peraa ke xee penderuvixa rembiguai kuery, ha'e pejapo xera'y Salomão mburika áry oĩ aguã rami. Ha'e vy peraapa Giom katy.

³⁴ Ha'e py ma profeta Natã reve sacerdote Zadoque omoi 'rã huvixarã Israel kuery re opena aguã. Ha'e gui pembopu 'rã mimby guaxu, ha'e vy “Ha'eve ete ma huvixave Salomão!” peje 'rã.

³⁵ Ha'e gui ma peju jevy 'rã hupive. Ha'e rã ha'e ma ou vy oguapy 'rã xerenda áry, xerekovia ha'e ju oĩ aguã, mba'eta xeyvuague rami vy ha'e ae 'rã opena Israel ha'e Judá kuery re — he'i.

³⁶ Ha'e rami rã Joiada ra'y Benaia huvixa ombovai vy aipoe'i:

— Ha'eve va'e. Po rami ae ta'ijayvu avi SENHOR xeruvixa Ruete va'e.

³⁷ Xeruvixa, ndere SENHOR openaague rami ae topena Salomão re voi. Ha'e rami vy tompopo'aka xeruvixa Davi po'akaa gui eteve voi — he'i.

³⁸ Ha'e gui huvixa pegua xondaro kuery reve oje'oi sacerdote Zadoque, profeta Natã ha'e Joiada ra'y Benaia. Huvixa Davi rymba mburika'i áry ae Salomão omoi vy oguerua okuapy Giom py.

³⁹ Ha'e gui sacerdote Zadoque ma azeite ryrú ombojerovia aty gui ogueru va'ekue oupi vy omoi Salomão re. Ha'e vy mimby guaxu ombopu rã heta va'e kuery ha'e javi oendu vy ojapukai:

— Ha'eve ete ma huvixa Salomão! — he'i okuapy.

⁴⁰ Ha'e gui hakykue oje'oupa vy gaita ombopu reve oguero'ya ete heravy. Onhendu atã oje'ouvy vvy voi omomyĩ rei aguã rami.

Adonias ojeuegua kuery reve onhemondyipa okuapyague

⁴¹ Ha'e ramo Adonias ha'e oenoĩ va'ekue okarupa ma rire oendu okuapy. Joabe voi mimby pu oendu vy aipoe'i:

— Mba'e nungarã tu pova'e tetã katy gui hevovo rei va'e onhendu?

⁴² Ha'e ijayvu teri reve ovaẽ sacerdote Abiatar ra'y Jônatas. Ha'e ramo ixupe Adonias aipoe'i:

— Eike na, mba'eta ndee ma ava ndepy'a guaxu va'e vy mba'emo pyau porã va'e anho 'rã nhi'ã reru oreyv — he'i.

⁴³ Ha'e rã Jônatas ombovai vy aipoe'i Adonias pe:

— Ha'e rami 'rãgue py nhandervuxa Davi ma omoí uka ra'e Salomão huvixaverã.

⁴⁴ Ha'e rami vy hexeve Davi omondouka sacerdote Zadoque, profeta Natã, Joiada ra'y Benaia ha'e ojeuegua xondaro kuery. Ha'e va'e kuery ma omoí huvixa rymba mburika'i áry ae.

⁴⁵ Ha'e vy Giom py sacerdote Zadoque ha'e profeta Natã omoí huvixaverã. Ha'e gui oguerovy'a ete reve ojevypa jogueruvy ramo tetã ha'e javi rupi hevovo rei okuapy. Ha'e va'e kuery ae rima ojapukai rã pendu va'e.

⁴⁶ Ha'e gui Salomão ma huvixa renda áry uguapy ae.

⁴⁷ Ha'e rami ae avi Davi rembiguai kuery yvatekueve ou okuapy ixupe oxarura. Ha'e vy aipoe'i okuapy: “Nderuete tojapo nderery gui Salomão rery omboeteveva aguã rami. Tombopo'akave ndepo'akaa gui eteve”, he'i okuapy ramo huvixa ngupa áry ituia pyve ojero'a.

⁴⁸ Ha'e rami vy aipoe'i: “Ta'ima'endu'a porã SENHOR Israel kuery Ruete re, mba'eta ange nhandevy ombou xerenda áry uguapy va'erã, xee ae rexa py ma voi aexa va'e”, he'i.

⁴⁹ Ha'e rami rã Adonias hexeve guarã oenoí va'ekue oryryipa reve opu'amba vy oje'oipa joa katy e'y'e'y.

Adonias onhemboaxy ukaague

⁵⁰ Ha'e rã Adonias ma Salomão gui okyje vaipa avi vy opu'ã vy templo py oo, ha'e ojopy oiny altar apy'i ikuai va'e re.[‡]

⁵¹ Salomão pe aipo'ea:

— Ma'ë, Adonias ma ndegui okyje vy oo altar apy'i re ojopy oiny. Ha'e vy aipoe'i: “A'y gui huvixa Salomão toura xejuka uka e'y aguã kyxe py, hembiguai aiko rã”, he'i.

⁵² Ha'e ramo Salomão ombovai:

— Ha'e va'e ma ha'evea rami ri oiko va'e ramo neí pete'i hi'a ma voi ndo'ai 'rã yvy py. Ha'e rã hexe nda'evei va'e oia jaikuaa ramo omano rã — he'i.

⁵³ Ha'e ramo guembiguai kuery Salomão omondouka rã omboguejy okuapy altar gui. Ha'e ramo ha'e ou vy huvixa Salomão renonde py ojero'a. Ha'e rã aipoe'i ixupe:

— Tereo ju ndero katy.

2

Salomão pe Davi mba'emo ojapo va'erã omboaxapa ma vy omanoague

¹ Ovaë ma ouvy Davi omano aguã ára. Ha'e vy gua'y Salomão pe mba'emo ojapo uka vy aipoe'i:

² — Xee aa ta ma tape omano va'e pavë oje'oia rupi. Ha'e gui ndepy'a guaxu ke ava rami!

³ Eiko SENHOR Nderuete nhanembo'eague rami, ha'e oikoa rami ae reiko vy ijayvua ojea va'ekue rejapopa aguã, ha'e ojapo uka va'ekue, oipotaa, ha'e oikuaa uka va'ekue lei Moisés ombopara va'ekue re oia rami, ha'e rami vy opa mba'e rejapoa py reiko porã aguã, mamã rã reoa rupi rei.

⁴ Ha'e ramo 'rãe SENHOR ndevy voi omoí atã xevy ijayvuague. Mba'eta aipoe'i va'ekue: “Ndera'y kuery ma ikuai re ae oikuaa pota ri vy anhetë ete rupi xerenonde ikuai aguã opy'a ha'e onhe'ë ha'e javi py, ha'e ramo ndoatai 'rã nderekovia tenda Israel kuery re openaaty áry oí va'e”, he'i va'ekue.

⁵ — Ha'e rami avi ndee ma reikuaa porã Zeruia pi'a Joabe xeapo vaiague, ha'e gui Israel pygua xondaro kuery ruvixa mokoí va'e re voi: Ner ra'y Abner ha'e Jéter ra'y Amasa re. Ha'e va'e kuery ma ha'e ojuka joe nopy'aaevi ma jave teí. Ha'e rami vy ojepy joe opu'ãa jave py jouguy omoëague re. Ha'e nungakue py onhemongy'a, oku'ãkuaa ha'e oxapatu voi.*

⁶ Ha'e nunga rupi ejapo hexe ne'arandua rami. Ha'e rami vy eja eme hi'a xiimba rire ma omano aguã.

⁷ — Ha'e rã Gileade pygua Barzilai ra'y kuery re ma repena porã 'rã. Ha'e kuery va'e regua ta'ikuai riae nde-mesaa py okaru va'e, mba'eta ha'e rami ae xere opena karamboae nderyke'y Absalão gui anha jave py.

⁸ — Ha'e gui apy ndereve avi oiko teri Benjamim regua Gera ra'y Simeí, Baurim pygua. Ha'e va'e ma xevy ijayvu vaikue rei ete karamboae, Maanaim katy aa jave py. Ha'e rami rire teí Jordão yakã rembe re xerovaexí vy ou ramo xee ma SENHOR rery rupi aura vy aipoa'e karamboae kyxe py ajuka e'y aguã re.

⁹ Ha'e rami teí a'y ma exa'ã eme ojevavy e'y va'e oikoa rami, mba'eta ne'arandu va'e vy reikuaa porã 'rã hexe rejapo va'erã, huguy omoëa ramo omano aguã — he'i.

¹⁰ Ha'e va'e rire Davi ndoikoveve'i ma guamoí kueryague rami. Ha'e ramo onhono porã tetã Davi rekoague py ae.

¹¹ Davi ma quarenta ma'etý re oí huvixa Israel kuery re opena va'e. Hebrom py ranhe opena sete ma'etý re, ha'e gui trinta e três ma'etý re ju Jerusalém py opena.

¹² Ha'e rami py Salomão ju oí nguu Davi rekovia. Ha'e vy opa mba'e py ipo'akave tema ovy.

Adonias omanoague

¹³ Ha'e gui Hagite pi'a Adonias ou Salomão xy Bate-Seba oia py. Ha'e rami ixupe kunha va'e oporandu:

— Ha'evepa reia rupi pa reju?

Ombovai:

— Ha'evepa reia rupi rima — he'i.

[‡] 1:50 Templo py Adonias oike vy altar apy'i ikuai va'e re ojopy onhemboaxy ukua rupi (Êxodo 21.12-14). * 2:5 Joabe ma Abner ha'e Amasa ojukaague omombe'u 2 Samuel 3.25-32 ha'e 20.9-10 py. Ha'e rã Barzilai ra'y kuery Davi re opena porãgue omombe'u 2 Samuel 17.27-29 py.

¹⁴ Ha'e vy aipoe'ive ju:

— Peteĩ ayvu xeayvu ta ndevy.

Kunha va'e ombovai vy

— Ndeayvu tema — he'i.

¹⁵ Ha'e ramo aipoe'i:

— Reikuua porã xee ae huvixa aĩ aguã rami aiko va'ekue, ha'e Israel kuery ha'e javi oarõ okuapy va'ekue xee apena aguã, teĩ opena aguã ma xeryvy pe ju omboaxaa. SENHOR gui ae ojopy ha'e rami aguã.

¹⁶ Ha'e gui aỹ ma peteĩ mba'e re anho ajerure ndevy. Ejapo e'y'yme xeivy.

Kunha va'e ombovai:

— Ndeayvu ha'vy — he'i.

¹⁷ Ha'e ramo aipoe'i:

— Ajerure ndeayvu aguã huvixa Salomão pe, mba'eta ndevy pe ma nome'ẽ e'y'i 'rã. Tome'ẽ xeivy Suném pygua Abisague xera'yxyrã.

¹⁸ Bate-Seba ombovai:

— Ha'eve, ndeayvuague rami vy xee xeayvu 'rã huvixa pe — he'i.

¹⁹ Ha'e gui ma Bate-Seba oo huvixa Salomão-a py, Adonias ojerureague omombe'u aguã. Huvixa opu'ã oxy reve nhovaexĩ aguã, ha'e vy ojero'a henonde py. Ha'e gui guenda áry ju oguapy vy ogueru ruka peteĩ tenda oxy pe. Ha'e ramo oguapy oiny oiporu kuaa regua re.

²⁰ Ha'e vy aipoe'i:

— Peteĩ mba'e kyrĩ'i ete va'e re tema ajerure ta ndevy. Eme'ẽ e'y'eme.

Huvixa ombovai:

— Ha'i, ejerure tema. Xee name'ẽ e'y'i 'rã ndevy — he'i.

²¹ Kunha va'e aipoe'i:

— Reme'ẽ 'rãgue Suném pygua Abisague nderyke'y Adonias ra'yxyrã.

²² Ha'e ramo huvixa Salomão ombovai vy aipoe'i oxy pe:

— Mba'e re tu rejerure Suném pygua Abisague re Adonias ra'yxyrã? Mba'e re tu nderejerurei avi ha'e ipo'aka aguã re (mba'eta xeryke'y oiko rã), ha'e sacerdote Abiatar ha'e Zerua pi'a Joabe peguarã re voi? — he'i.

²³ Ha'e vy huvixa Salomão oura SENHOR rery rupi. Ha'e vy aipoe'i:

— Adonias guekove rovai ae e'y'ri ijayvu ramo Xeruete oipotaa rami taxembopaga.†

²⁴ Ha'e gui aỹ anhetẽ ete SENHOR xeru Davi rekovia xemoĩ, ha'e ijayvuague rami vy xero pygua kueryrã omoingo va'ekue oikove va'e rery rupi aura vy aipoa'e: Aỹ ma Adonias omano 'rã — he'i.

²⁵ Ha'e rami vy huvixa Salomão ma Joiada ra'y Benaia omondouka rã oo vy oguero'a Adonias, ha'e vy ojuka.

Salomão sacerdote Abiatar omoxëague

²⁶ Ha'e gui sacerdote Abiatar pe ju huvixa aipoe'i:

— Tereo Anatote katy nembra'ety ituia py, mba'eta ndee ma ava ojuka pyrã. Ha'e rami teĩ aỹ ma ndorojukai 'rã, mba'eta xeru Davi renonde rupi SENHOR ayvu rryru reraa va'ekue, ha'e xeru ojexavaiaague ha'e javi py ndee voi rejexavai rire — he'i.

²⁷ Ha'e rami vy Salomão omoxë Abiatar, SENHOR pegua sacerdote-ve'y oiko aguã. Ha'e rami py ojeupity Siló py Eli ramymino kuery rekorã re SENHOR ijayvuague.‡

Joabe ojukaa ague

²⁸ Ha'e nunga Joabe pe omombe'ua rã oendu vy ojava ovy vy oike SENHOR ombojerovia aty ropy, ha'e vy ojopy oiny altar apy'i oĩ va'e re, mba'eta Joabe voi Adonias reve onhemoirũ va'ekue, Absalão reve onhemoirũ va'ekue ri.

²⁹ Ha'e ramo Salomão pe omombe'ua SENHOR ombojerovia aty katy Joabe ojava vy altar yvy'iry oĩa. Ha'e ramo Salomão Joiada ra'y Benaia omondouka vy aipoe'i:

— Tereo ke, ero'a.

³⁰ Ha'e ramo SENHOR ombojerovia aty py Benaia oo vy aipoe'i Joabe pe:

— Po rami huvixa ijayvu: Eẽ ke upe gui.

Ombovai:

— Any, apy ae 'rã amano — he'i.

Ha'e gui Benaia oo jevy vy ha'e nunga huvixa pe omombe'u vy aipoe'i:

— Po rami Joabe xembovai kuri.

³¹ Ha'e ramo ixupe huvixa aipoe'i:

— Ejapo ha'vy aipoe'iaague rami vy. Ero'a vy ejuka, ha'e gui enhono porã. Ha'e rami vy 'rãe xegui ha'e xeru ro pygua kuery gui reipe'a heko porã va'e ruguy Joabe omoẽ riveague re rombopaga aguã oĩ va'ekue.

³² Ha'e rami rã Joabe re ae ju 'rã SENHOR omoĩ tuguy omoëague re opaga aguã. Mba'eta mokoĩ avakue ixugui heko porãve ha'e ha'eveve va'e re opu'ã vy ojuka ete rire kyxe py, xeru Davi oikuaa e'y' re. Ha'e va'e ma Ner ra'y Abner Israel kuery xondaro huvixa va'e, ha'e gui Jéter ra'y Amasa Judã pygua xondaro huvixa.

† 2:23 Adonias ojerureague omombe'ua rã Salomão oendu vy ndojou porã, mba'eta Suném pygua Abisague Davi ra'yxy jevy rami ae irũ oiko va'ekue (1.1-4), ha'e pavẽ oikuaa rã huvixa ra'yxykue re omenda va'e huvixa jevyrã oikoa rami (2 Samuel 16.20-23). ‡ 2:27 Eli pe SENHOR ijayvuague ma 1 Samuel 2.27-33 py oĩ.

³³ Ha'e rami rã Joabe re ae 'rã oĩ ha'e kuery ruguy omoëague re opaga aguã, hamymino kuery re guive, raka'e rã peve guarã. Ha'e rã Davi re ma, hamymino kuery, hoo pygua kuery, ha'e henda áry oĩ va'e re ma oĩ 'rã SENHOR omoingo porã aguã, raka'e rã peve guarã — he'i.

³⁴ Ha'e ramo Joiada ra'y Benaia Joabe re oguero'a vy ojuka. Ha'e vy onhono porã hoogue py ae, tekoa e'ÿa py.

³⁵ Ha'e gui Joabe rekovia ma huvixa omoĩ Joiada ra'y Benaia xondaro ruvixarã, ha'e rã Abiatar rekovia ma omoĩ Zadoque sacerdote-rã.

Simei ojukaa ague

³⁶ Ha'e rire ma huvixa oenoĩ uka Simei. Ha'e vy aipoe'i ixupe:

— Ejapo ke nderorã Jerusalém py, ha'e py ae eiko. Apy gui eẽ-eëve eme ke peteĩve henda katy.

³⁷ Mba'eta eikuaa pota porã ke: Apy gui reo vy Cedrom yakã reaxa vyve remano 'rã. Ha'e gui ndere ae ju 'rã oĩ nderuguy omoëague re repaga aguã.

³⁸ Ha'e ramo Simei ombovai huvixa:

— Xeruvixa, ha'evea rami ndeayvu. Ndeayvuague rami 'rãe xee nerembiguai aiko — he'i. Ha'e rami vy Simei are'i ma oiko Jerusalém py.

³⁹ Ha'e gui mboapy ma'etÿa py ma mokoĩ Simei rembiguai ojava jogueravy Gate pygua huvixa Maaca ra'y Aquis ro katy. Ha'e ramo Simei pe omombe'ua vy

— Nerembiguai kuery je Gate py ikuai — 'ea.

⁴⁰ Ha'e rami rã Simei opu'ã vy guymba mburika'i oguereko katy vy oo Gate katy, Aquis ro gui guembiguai kuery oguero aguã. Ha'e rami vy Gate gui oguero ju guembiguai kuery.

⁴¹ Salomão pe omombe'ua Simei Jerusalém gui Gate katy oo rire ojevuy ju maague.

⁴² Ha'e ramo huvixa oenoĩ uka Simei. Ha'e vy aipoe'i ixupe:

— Xee ndajapoi ri ty'y raka'e SENHOR rery rupi reura aguã rami? Ha'e romongeta vy aipo nda'ei teve raka'e: "Marã katy rã rei reoa árave remano 'rã", nda'ei ri ty'y? Ha'e ramo xeivy aipo're va'ekue: "Ha'evea rami ndeayvu aendu", 're va'ekue ri.

⁴³ Mba'e re ha'vy nderejapoi ri SENHOR pe reuraague, neĩ xee romongetaague ma voi?

⁴⁴ Huvixa aipoe'ive ju Simei pe:

— Ndepy'a re reikuaa porã xeru Davi re rejapo vaiague ha'e javi. Ha'e nunga rupi ndere ae ju SENHOR ombou ta rejapo vaiague repy.

⁴⁵ Ha'e rã huvixa Salomão ma ogueroayvu porãa 'rã, ha'e SENHOR renonde py Davi po'akaa va'ekue omoĩ porãa 'rã raka'e rã peve — he'i.

⁴⁶ Ha'e gui Joiada ra'y Benaia pe huvixa ijayvu ramo oo vy hexe opu'ã vy ojuka. Ha'e rami py Salomão po'akaa oĩ atãve.

3

Faraó rajy re Salomão omendaague

¹ Salomão hatyu oikovy Egitto pygua huvixa Faraó re. Ha'e vy gua'yxyrã Faraó rajy ogueraa vy tetã Davi rekoague py ranhe oguero, ngoorã ojapopa e'ÿa ja, ha'e gui SENHOR pygua oo ha'e Jerusalém tetã ha'e javi rupi kora ojapopa e'ÿa ja.

² Ha'e rami teĩ heta va'e kuery ma yvy'ã rupi ombojeroviaaty ikuai va'e rupi oo vy mba'emo ome'ẽ teri okuapy ha'e py, mba'eta ha'e va'e jave ma oo SENHOR rery oĩ atyrã ndojapoi teri.

2 Crônicas 1.2-13

³ Salomão oayvu ete SENHOR. Ha'e rami vy nguu Davi ombo'eague rami oiko. Ha'e rami teĩ yvy'ã rupi ombojeroviaaty ikuai va'e rupi teri ome'ẽ jepi mba'emo, hekuã va'e oapy guive.

⁴ Ha'e rami vy Gibeão katy oo mba'emo ome'ẽ aguã, ombojeroviaaty yvy'ã re oĩ va'e tuvixave va'e ramo. Ha'e py altar oĩ va'e áry Salomão oapy uka mil mymba.

⁵ Ha'e gui ma Gibeão py ae Salomão pe SENHOR ojexa uka pyávy, ra'u rupi. Ha'e vy aipoe'i:

— Ejerure ke xeivy reipota va'e re, ha'e rã xee ame'ẽ 'rã.

⁶ Ha'e rã Salomão ombovai:

— Nerembiguai xeru rãgue'i Davi pe reayvua rexa uka raka'e opa mba'e py, mba'eta ha'e ma ojerovia etea rupi ndereve oiko va'ekue, gueko porãa rupi ha'e nerenonde rupi opy'a re anhet'ẽ ete va'e omoĩ reve. Reayvua rexa ukua rupi ixupe reme'ẽ peteĩ ta'y hekovia oĩ va'erã, aÿ ojekuaa rami.

⁷ Ha'e rami vy SENHOR Xeruete, xeru Davi rekovia xee nerembiguai ju xembopo'aka. Ha'e rami teĩ xee xekyrĩ ete teri, mba'eva py ndaiko kuaai.

⁸ Xee nerembiguai ma ndevyua kueryrã reiporavo va'ekue mbyte rupi aiko. Ha'e va'e kuery ma heta raxa va'e, neĩ aipapapa rei va'erã e'ÿ va'e.

⁹ Ha'e nunga rupi xee nerembiguai pe eme'ẽ xepy'a py xe'arandu aguã, ndevyua kuery areko kuaa, ha'e xe'arandua rupi aikuaa pota aguã heko porã ha'e heko vai va'e re. Mba'eta mava'e 'rã tu oguereko kuaa kova'e kuery heta va'e? — he'i.

¹⁰ Ha'e rami ijayvu rã SENHOR oendu vy ojou porã, ha'e rami oiko aguã re Salomão ojerure ramo.

¹¹ Ha'e vy Nhanderueete ombovai:

— Ha'e rami aguã re ae rejerure rire, reiko pukuve aguã re'ÿ, rerekopa aguã re, neĩ nderovaigua kuery omanomba aguã re'ÿ ma voi rejerure, ha'e rã ne'arandurã re anho ha'evea ramigua reikuaa aguã,

¹² ha'e ramo ma xee ajapo 'rāe ndeayvuague. Ha'e vy ndepy'a re amōi rā ne'arandu ha'e reikuaapa aguā. Ndoikoi teri ndee reiko 'rāa rami oiko va'ekue, neī reī rire voi ndoikoi 'rā amboae.

¹³ Ndevy pe ame'ēve avi 'rā rejerureague'ŷ teī, rerekopa ha'e ndeporaiu e'ŷ aguā. Huvixa kuery ikuai va'e regua ndoikoi 'rā ndee ramigua, repena reikovya pukukue re.

¹⁴ Xapy'a rei aikoa rami ri reiko ramo, ha'e nderu Davi oikoague rami avi xeayvuague ha'e ajapo uka va'ekue rejapopa ramo xee amboetave 'rā nde'āra — he'i.

¹⁵ Ha'e gui ma Salomão omyī vy oikuaa oexa ra'u ra'ea. Ha'e vy Jerusalém py ojevvy vy SENHOR guexeve guarā ojapo va'ekue rryu renonde py hi'āi. Ha'e vy ome'ē mymba kuery oapy uka reve, ome'ē avi hexeve petēi rami ju ikuai regua. Ha'e vy petēi ngaru ojapo guembiguai yvatekueve ikuai va'e ha'e javi pe.

Mokoī kunhague re Salomão oikuaa potaague

¹⁶ Ha'e gui huvixaa py mokoī kunhague itavy rei va'e ovaē vy opu'ā okuapy henonde py.

¹⁷ Ha'e kuery va'e regua petēi aipoe'i ixupe:

— Xeruvixa, kova'e kunha va'e reve ma petēi oo py ae roiko va'e. Ha'e py ae aikuavā'i xepi'a.

¹⁸ Kyri va'e aikuavā rire mboapy araa py ma kova'e kunha va'e voi aikuavā'i avi ava'i. Joa py roī va'ekue, neī petēiē ma voi jipoi oo py roī jave, ore anho'i ae roī ha'e py.

¹⁹ Ha'e gui pyávy ma kova'e kunha va'e pi'a'i omano, hi'áry onheno oupy rive ramo.

²⁰ Ha'e gui pytū mbyte xee nerembiguai ake teri ajupy jave ha'e va'e ovy vy xejyva áry gui xepi'a'i oguerova vy ojyva áry ju omonheno. Ha'e rā opi'a'i omano va'ekue ma omonheno xejyva áry.

²¹ Ko'ē rai jave avy amokambu aguā teī xepi'a'i omano ma ra'e merami. Ha'e gui ko'ēgue aikuua pota rā ha'e va'e ava'i aikuavā'i va'ekue'ŷ — he'i.

²² Ha'e ramo amboae kunha va'e aipoe'i:

— Any, oikove'i va'e ma xepi'a'i ae, ndepi'a'i ae ma omano va'ekue.

Ha'e rā amboae ju ombovai:

— Any, omano va'ekue ma ndepi'a, xepi'a'i ma oikove va'e — he'i. Ha'e rami ijayvu tema okuapy huvixa renonde py.

²³ Ha'e ramo huvixa aipoe'i:

— Kova'e kunha aipoe'i: “Kova'e oikove va'e ma xepi'a, ha'e rā ndepi'a ma omanogue.” Ha'e rā amboae ombovai vy “Any, omanogue ma ndepi'a, xepi'a ma oikove va'e”, he'i.

²⁴ Huvixa aipoe'ive ju:

— Peru petēi kyxe xevy — he'i ramo huvixaa py oguerua petēi kyxe.

²⁵ Huvixa aipoe'i:

— Pemboja'o ava'i oikove va'e, ha'e gui mbytekue peme'ē 'rā petēi kunha pe, ha'e rā hovaikue ma amboae pe peme'ē — he'i.

²⁶ Ha'e rami rā ava'i oikove va'e xy ijayvu huvixa pe, mba'eta ixy ae vy oendu opi'a oayvua anho. Ha'e vy aipoe'i:

— Xeruvixa, eme'ē na amboae pe ava'i oikove va'e. Ejuka uka eme teve.

Ha'e rā amboae kunha ma

— Ndoikoi 'rā xepi'a, neī ndepi'a voi. Tomboja'oa — he'i.

²⁷ Ha'e ramo huvixa ombovai:

— Peme'ē ava'i oikove va'e kunha jypygua pe. Pejuka eme ta'vy, mba'eta peva'e ma ixy ae — he'i.

²⁸ Huvixa ijayvuague Israel kuery ha'e javi oendu vy omboete ete okuapy, mba'eta oikuaa okuapy hexe Nhanderuete guigua 'arandua oīa, ha'evea rami joguereko kuaa aguā.

4

Salomão rembiguai kuery yvatekueve rery oīa

¹ Ha'e gui Salomão opena oikovy Israel kuery ha'e javi re.

² Pova'e avakue ma hembiguai yvatekueve va'e: yvateve ete va'e ma Zadoque ra'y Azarias.

³ Sisa ra'y kuery Eliorefe ha'e Aías ma kuaxia mboparaaty kuery. Mba'emo oiko va'ekue ombopara va'ety ma Ailude ra'y Josafá.

⁴ Joiada ra'y Benaia ma xondaro kuery ruvixa. Zadoque ha'e Abiatar ma sacerdote ikuai.

⁵ Ha'e gui Natā ra'y Azarias ma opena va'ety kuery ruvixa. Natā ra'y Zabude ma mba'emo re opena ha'e huvixa irū oiko.

⁶ Ha'e gui Aisar ma mba'emo re opena va'ety. Abda ra'y Adonirāo ma omomba'eapo nhea'āmby kuery rerekoa.

⁷ Salomão omōi doze avakue Israel kuery ha'e javi re opena va'erā, huvixa ha'e hoo pygua kuery ho'u va'erā ojoua rupi. Ha'e kuery regua petēi-teī ma ma'etŷa nhavō ojou 'rā petēi jaxy reguarā.

⁸ Ha'e kuery rery ma po rami: Ben-Hur ma Efraim vyvty rupi opena va'e.

⁹ Ben-Dequer ma Macaz, Saalabim, Bete-Semes, Elom ha'e Bete-Hanā rupi opena.

¹⁰ Ben-Hesede ma Arubote rupi opena. Ha'e va'e pegua ma Socó ha'e Hefer yvy ha'e javi avi.

¹¹ Ben-Abinadabe ma opena Dor yvy'ā ha'e javi rupi. Ta'yxy ma Salomão rajy Tafate.

¹² Ailude ra'y Baaná ma opena Taanaque, Megido ha'e Bete-Seā ha'e javi rupi. Ha'e va'e ma Zaretā katy'i rupi opyta Jezreel yvy'ā guy katy, Bete-Seā guive Abel-Meolá peve, ha'e Jocmeão tetā rovai peve.

¹³ Ben-Geder ma Ramote–Gileade rupi opena. Ha'e va'e ma Manassés ra'y Jair rekoague Gileade re ikuai va'e rupi opena. Opena avi Basā regua Argobe tetā oī va'e re, ha'e javi vy sessenta tetā ikorapa ha'e hokē jokia overa va'e guigua va'e meme.

¹⁴ Ido ra'y Ainadabe ma Maanaim rupi opena.

¹⁵ Aimaás ma Naftali rupi opena. Ha'e va'e ma gua'yxyrā ogueraa petēi Salomão rajy, Basemate hery va'e.

¹⁶ Husai ra'y Baaná ma opena Aser ha'e Bealote rupi.

¹⁷ Parua ra'y Josafá ma Issacar rupi opena.

¹⁸ Elá ra'y Simei ma Benjamim rupi opena.

¹⁹ Uri ra'y Geber ma Gileade rupi opena amorreu kuery ruvixa Seom ha'e Basā pygua huvixa Ogue yvykue re. Ha'e va'e yvy re petēi'í anho oī opena va'e.

Salomão openaa rupi oguerekopaague

²⁰ Judá ha'e Israel kuery ma heta ikuai, ye'ē yvýry ita ku'i ikuai va'e rami heta. Okaru, oy'u ha'e ovy'a okuapy.

²¹ Salomão ma amboae regua ikuai va'e re opena avi, Eufrates yakā guive filisteu kuery yvy ha'e Egito yvy peve. Ha'e pygua kuery ma mba'emo ome'ē 'rā okuapy Salomão pe, iuxpe omba'eapo 'rā guive okuapy ha'e oikovea pukukue re.

²² Ko'ē nhavō Salomão peguarā ome'ē 'rā okuapy trinta ryru trigo iporāve va'e ha'e sessenta ryru trigo mboae,

²³ ha'e gui dez vaka ra'y ikyra va'e, vinte vaka ikora pygua, ha'e cem vexa'í, guaxu ete'i, guaxu puku, guaxu mirí ha'e guyra ikyrakue rei'í va'e.

²⁴ Mba'eta ha'e va'e yvy ha'e javi rupi opena, ha'e Eufrates yakā yvýry rupi Tifsa guive Gaza peve huvixa kuery ikuai va'e re. Ha'e gui ijyvy yvýry ha'e javi rupi ma mba'eve rei ndoikoi.

²⁵ Ha'e rami py Judá ha'e Israel kuery ikuai porā'í. Salomão oikovea pukukue re petēi-te'i oguapy 'rā okuapy ngoka py ae uva ha'e figo'y ikuai guy rupi, Dā guive Berseba peve.

²⁶ Salomão oguereko avi quarenta mil kavaju oguy pygua karóxa reraarā, ha'e gui imboguataa kuery ma doze mil.

²⁷ Ha'e gui tembi'u re opena va'ety kuery ojou 'rā okuapy petēi-te'i jaxy reguarā, huvixa Salomão ha'e i-mesa py ovaē va'e pe rei, mba'eve oata e'y aguā rami.

²⁸ Mamo rā huvixa oia py ogueraa avi 'rā cevada ha'e hi'ygue kavaju kuery ha'e kavaju porāgueve peguarā, ijayvuague rami vy ae.

Salomão arandua re ijayvua

²⁹ Salomão pe Nhanderuete ome'ē avi hi'arandurā, opa mba'e py oikuaa pota ha'e mba'emo oikuaapa rei aguā rami, ye'ē rembe rupi ita ku'í ikuai rami.

³⁰ Kuaray oua katygua ha'e Egito pygua kuery 'arandua gui voi Salomão hi'aranduve va'e.

³¹ Avakue ikuai va'e ha'e javi gui hi'aranduve, ezraíta Etā gui voi, ha'e gui Maol ra'y kuery Hemā, Calcol ha'e Darda gui voi. Ha'e ramo hi'arandua oendupaa ha'e javi regua ijyvyry ikuai va'e rupi.

³² Omombe'u avi três mil ayvu 'arandu regua, ha'e gui mil e cinco mboraeirā.

³³ Omombe'u kuaa avi hogue va'e ha'e javi, yary Líbano re ikuai va'e, hissopo kora áry henhoi va'e guive. Omombe'u avi mymba kuery ha'e guyra ikuai va'e, yvy rupi otyryry va'e ha'e pira ikuai va'e voi.

³⁴ Ha'e ramo ha'e javi regua ou Salomão 'arandua oenduxe vy. Heta avi oo yvy regua huvixa kuery rembiguai Salomão 'arandua omombe'ua rā oendu va'ekue.

5

2 Crônicas 2.1-16

¹ Salomão-a py Tiro pygua huvixa Hirão voi ombou guembigui kuery, mba'eta oendu tuu rekovia Salomão ju huvixarā omoiaague. Hirão ma Davi irū ae oiko va'ekue.

² Ha'e ramo Hirão pe ju Salomão omondouka guembigui kuery aipoe'í va'erā:

³ “Reikuaa porā xeru Davi SENHOR nguete pegua oorā ojapo aguā nda'eveiague, ngovaigua kuery reve juguero'a riae ramo, ipo'akaa guýry SENHOR ha'e kuery omoimba e'ya ja.

⁴ Ha'e rā xezy pe ma SENHOR Xeruete ome'ē jovaive rupi orekuai porā'í aguā. Ha'e vy ndoikoi orerovaiguarā, neī oremoangeko reiarā voi.

⁵ Ha'e nunga rupi anhembopy'a petēi oo ajapo aguā SENHOR Xeruete rery oī aguā, xeru Davi pe ijayvuague rami vy. Ha'e vy aipoe'í va'ekue: 'Nderekovia ndera'y amoī va'erā va'e ae 'rā ojapo oo xerery oī aguā', he'í va'ekue.

⁶ Ha'e nunga rupi ejaya na xezy yvyra yary Líbano yvy re ikuai va'e. Xerembigui kuery ma nerembigui kuery reve avi 'rā ikuai, ha'e gui ha'e va'e kuery omba'eapoague repy xee ame'ē 'rā ndeayvua rami ae. Mba'eta reikuaa porā nerembigui kuery Sidom pygua yvyra ojaya kuaa va'e rami ete xerembigui avakue regua petēive ndoikoi”, he'í.

⁷ Ha'e rami Salomão ayvukue Hirão oendu vy ovy'a vaipa. Ha'e vy aipoe'í:

— Ta'ima'endu'a porāa SENHOR re aỹ, mba'eta Davi pe petēi ta'y hi'arandu ete va'e ome'ē heta va'e kuery re opena va'erā — he'í.

⁸ Ha'e rami vy Salomão oia py ju Hirão ombou guembigui kuery aipoe'í va'erā: “Aendu ma rejerure ukaague. Ha'e rami vy reipotaa rami ajaya uka 'rā yvyra yary ha'e cipreste.

⁹ Ha'e va'e ma Líbano vvy gui xerembiguai kuery ogueraa 'rã ye'ê rembe peve. Ha'e gui ye'ê rupi ma xee aru rukapa 'rã ojokuapa va'ekue ndee rejopy aguã peve. Ha'e gui ha'e py ma ogorapa ju 'rã, ha'e ndee ju reraa ukapa 'rã. Ha'e gui ndee voi rejapo 'rã xee aipotaa rami, xero pygua kuery pe tembi'u reme'ê vy", he'i va'erã.

¹⁰ Ha'e rami py Salomão oipotaa rami vvy ixupe Hirão ogueru ruka vvyra yary ha'e cipreste.

¹¹ Ha'e gui Hirão pe ma Salomão ome'ê vinte mil ryrü trigo hoo pygua kuery rembi'urã, ha'e vinte ryrü azeite-rã oumbiri pyre. Ha'e rami ojapo ma'et'ya nhavõ.

¹² Salomão pe Nhanderuete ijayvuague rami vvy ome'ê hi'arandurã. Ha'e gui Hirão ha'e Salomão reve peteĩ rami ikuai, jogueroayvuague rami vvy.

2 Crônicas 2.17,18

¹³ Israel kuery va'e regua avakue ma Salomão omomba'eapo trinta mil.

¹⁴ Ha'e va'e kuery ma omondouka kuerei 'rã Líbano katy, jaxya nhavõ re dez mil 'rã oo. Peteĩ jaxya re ma ikuai 'rã Líbano re, ha'e gui mokoĩ jaxya re ma ngoo rupi 'rã ikuai. Ha'e kuery herekoa ma Adonirão.

¹⁵ Salomão oguereko avi oitenta mil mba'emo reraaty kuery, ha'e gui oitenta mil ju vvyty rupi ita mbovoa kuery.

¹⁶ Salomão rembiguai três mil e duzentos avi ikuai joe opena va'ety. Ha'e va'e kuery ma omba'eapo va'e kuery re opena vy ojapo uka 'rã mba'emo.

¹⁷ Huvixa ogueru ruka ita tuvixakueve ha'e iporãgueve va'e, omoatyro mbyre guive ogueru ruka oo ytarã.

¹⁸ Salomão ha'e Hirão rembiguai kuery ae imoatyroarã ikuai, Gibal pygua kuery voi. Vvyra ha'e ita omoatyro okuapy templo-rã ojapo aguã.

6

2 Crônicas 3.1-9

¹ Egito vvy gui Israel kuery oje'oipa rire ma quatrocentos ma'et'ya py Salomão omboypy templo-rã ojapo aguã, Israel kuery re openaa py irundy ma'et'ya py, mokoĩ jaxya zive 'epy va'e re.

² Ha'e gui oo SENHOR peguarã huvixa Salomão ojapo va'ekue puku-a ma vinte e sete metros va'e, ipya ma nove, ha'e yvatea ma treze raxa'i va'e.

³ Ha'e rã templo roka ja'oa renonde katy oĩ va'e pya ma nove metros va'e, henda iky'a e'ÿ va'e rami ae. Ha'e rã ipuku-a katy ma quatro metros raxa'i.

⁴ Oo re omoĩ avi janela-rã opy katy oĩ va'e gui oka katy ipo'i'ive'i va'e.

⁵ Oo mbotya re oka katy rupi ma ojapo opy ja'orã yvatevea py, henda iky'a e'ÿ va'e ha'e iky'a e'ÿ ete va'e vvyty rupi guive.

⁶ Pyrõa jypygua pya ma mokoĩ metros raxa'i, mokoĩa ma mboapy metros rai'i va'e, ha'e rã mboapy ma mboapy metros raxa'i va'e, mba'eta imbotya oka katyguia ha'e javi rupi ojapo pyrõa yta renderã, imbotya ombokua e'ÿ aguã.

⁷ Oorã ojapo ita imbovoty py ae oguereko katu pyre py. Ha'e rami vvy oo ojapo okuapya py ndoiporuai martelo, haxa neĩ tembiporu ferro guigua ma voi, nombota-mbota nhenduai aguã ha'e py.

⁸ Opy ja'o vvyty va'e rokẽ ma kuaray puku-a katy oĩ, ha'e tape pyrõ-pyrõa'i rupi nhaẽ 'rã mokoĩa ha'e mboapy peve.

⁹ Ha'e rami vvy oo ojavope heravy ojavopa peve. Ha'e vvy oipyovãmba vvyrape yary guigua py.

¹⁰ Ha'e gui oo re opy ja'o ojapo va'ekue yvatea ma mokoĩ metros raxa'i va'e meme. Templo re ombojoapy yary guigua py ae.

¹¹ Ha'e gui ma SENHOR oayvu ombou Salomão pe. Ha'e vvy aipoe'i:

¹² — Upe va'e oo rejapo reikovy va'e ma, xapy'a rei xeyvuy aejã va'ekue rupi reiko ramo, ha'e aipotaa rejapopa, ajapo uka va'e rejapo avi vvy ha'e va'e rupi anho ri reiko, ha'e ramo ndevy pe ajapo 'rã nderu Davi pe xeyvuague.

¹³ Ha'e rami vvy aiko 'rã Israel kuery mbyte rupi, xevyguia kuery naipytyvõ e'ÿi 'rã guive.

Henda iky'a e'ÿ ete va'e re ijayvua

¹⁴ Ha'e rami py Salomão ojavopa oo.

¹⁵ Imbotya ma opy rupi ojao'ipa vvyrape yary guigua py. Opyrõa guive ijao'ia peve ojao'ipa vvyrape py, opy rupi. Ha'e rã pyrõa ma ojao'i vvyrape cipreste guigua py.

¹⁶ Ha'e rami ae vvyrape yary guigua py ojao'ipa avi opy ja'o'i ijapy katy oĩ va'e, nove metros ipya va'e, pyrõa guive ijao'ia peve. Ha'e va'e opy ja'o ma henda iky'a e'ÿ ete va'erã ojapo.

¹⁷ Templo ropy iky'a e'ÿ va'e puku-a ma dezoito metros va'e.

¹⁸ Ha'e gui vvyrape opy rupi omo'ã mbyre ma ombojeguapa hy'a ha'e yvoty ra'angã py. Yary guigua anho ojekuaa, ita ma neĩ peteĩ henda'i py ma voi ndojekuaa.

¹⁹ Ijapy katy ma oguereko katu henda iky'a e'ÿ ete va'erã, ha'e va'e py omoĩ aguã SENHOR guexeve guarã ojapo va'ekue ryrü.

²⁰ Henda iky'a e'ÿ ete va'e puku-a ma nove metros, ipya ha'e yvatea ha'e rami ae avi nove metros va'e meme. Ouro ete py onhovãmba, altar yary guigua voi ouro ete py onhovã avi.

²¹ Opy rupi voi Salomão onhovãmba ouro ete py. Henda iky'a e'ÿ ete va'e ropy rupi omoatã avi imoiny corrente ouro guigua, ouro py avi ojao'i rire.

²² Ha'e rami py ouro py meme onhovãmba opy rupi, altar henda iky'a e'ÿ ete va'e renonde py oĩ va'e voi.

2 Crônicas 3.10-14

²³ Henda iky'a e'ÿ ete va'e pyguarã ma vyvra oliveira gui ojapo avi mokoï anjo ipepo va'e ra'angaa. Peteĩ-teĩ yvatea ma irundy metros raxa'i meme.

²⁴ Peteĩ-teĩ anjo pepo puku-a ma mokoï metros raxa'i. Ha'e rami vy irundy metros raxa'i oĩ ipepo apy jovaive re.

²⁵ Amboae anjo ra'angaa ma ha'ekue rami ae ju yvatea irundy metros raxa'i va'e avi. Mokoïve tuvixaa ma joo rami ete'i.

²⁶ Peteĩ anjo ra'angaa yvatea ma irundy metros raxa'i, ha'e rami ae amboae voi ramo.

²⁷ Anjo ra'angaa ma opy omo'ã. Ipepo ma oipyo imoiny. Ha'e gui peteĩ pepo ma ovaẽ oiny oo mbotya re, ha'e rã amboae pepo ma oo mbotya mboae re ovaẽ oiny. Ha'e rami vy opy mbyte rupi peve mokoïve jovai gui opepo omoaẽ imoiny joe.

²⁸ Ha'e gui mokoïve anjo ra'angaa ombojupa ju ouro py.

Opy rupi ha'e okẽ rupi ombojeguaague

²⁹ Oo mbotya opy ha'e javi rupi ombojuguapa anjo ipepo va'e ra'angaa, pindo ha'e vyoty ojepe'apa va'e ra'angaa py, opyve rupi ha'e kyvõ rupi voi.

³⁰ Pyrõa ha'e javi rupi voi ombojupa ju ouro py, opyve rupi ha'e kyvõ rupi voi.

³¹ Henda iky'a e'ÿ ete va'e rokẽrã ma ojapo vyvrape oliveira guigua gui. Ha'e rã yvateve rupi guarã ha'e ijytarã ma ojapo vy omboapyte rakua, peteĩ nhiruĩ ijapy va'e oĩ aguã.

³² Okẽrã ma mokoï vyvrape oliveira guigua gui ojapo. Ha'e vy ombojuguapa anjo ipepo va'e, pindo ha'e vyoty ojepe'apa va'e ra'angaa py. Ha'e nunga ha'e javi ouro py meme onhovã, pindo ha'e anjo ra'angaa guive.

³³ Henda iky'a e'ÿ va'e oikeaty ytarã ma vyvra oliveira gui avi ojapo. Oikeaty ma ijapy irundy va'erã ojapo.

³⁴ Ha'e va'e okẽrã ma mokoï vyvrape cipreste guigua gui ojapo. Mokoïve vyvrape ma ojerea oĩ va'e meme.

³⁵ Ha'e va'e ombojeguã avi anjo, pindo ha'e vyoty ojepe'apa va'e ra'angaa py, ha'e vy onhovãmba ouro py, ombojeguaague rupi porã.

³⁶ Ha'e gui opy ja'o mbyte pygua rupi omoĩ avi ita ojaya pyre mboapy jo'aa rupi, ha'e gui peteĩ jo'aa vyvra yary guigua.

³⁷ Irundy ma'et'ya py, mokoï jaxya zive 'epy re ma omoĩ oo SENHOR pegua ytarã.

³⁸ Ha'e gui onze ma'et'ya py, oito jaxya bul 'epy re, opa ete ma oo ojapoxeague rami, hexegua ha'e javi. Ha'e rami py sete ma'et'ý ogueraa Salomão ojapopa aguã.

7

Salomão oo mboae ju ojapoveague

¹ Ha'e gui Salomão ngoorã ojapo avi, treze ma'et'ý ogueraa ojapopa aguã.

² Ojapo avi oo Líbano ka'aguy regua guigua. Ipuku-a ma quarenta e cinco metros, ipya ma vinte e dois, ha'e yvatea ma treze raxa'i. Ijytarã ma irundy ryxy rupi omo'ã imo'amy yary guigua. Ha'e gui ijyta hi'ái va'e áry omoĩ ijao'ia ytarã, yary guigua meme ju.

³ Ijao'ia ma yary guigua. Opy ja'o ijyvryrupigua ma quarenta e cinco ikuai. Peteĩ-teĩ opy yvate va'e ja'o ma quinze oĩ. Ha'e va'e ma oyta re meme oĩ.

⁴ Janela ma oĩ avi mboapy ryxy rupi, mboapy ryxy-ryxy jovai rupi janela oĩ.

⁵ Okẽ ha'e janela ikuai va'e ma ijapy irundy va'e meme, janela jova-jovai rupi oĩ va'e ha'e javi.

⁶ Ha'e gui ma Salomão ojapo avi opy guaxurã ijyta reta va'e. Ipuku-a ma vinte e dois metros, ha'e rã ipya ma treze raxa'i. Hexei'i rupi oĩ avi oike atyrã ijyta va'e, ijao'ia reve.

⁷ Ojapo avi oo henda openaaty oĩ aguã. Ha'e py ma mba'emo re oikuaa pota 'rã. Ha'e nunga rupi oikuaa potaaty 'ea. Yary gui meme ojaol'ipa, pyrõa guive ijao'ia peve.

⁸ Ha'e rã ngoo oke atyrã ma ojapo oo henda openaaty oĩa rovai oka oĩ va'e mbyte py, ha'e va'e rami guarã ae ojapo. Faraó rajy Salomão ra'yxyrã ogueru va'ekue rorã avi ojapo, henda openaaty oĩa rami guarã ae ju.

⁹ Ha'e va'e oo ha'e javi ma ita iporãve va'e guigua, oa'ãague rami ojaya pyre meme, oka katy ha'e opy katy guarã ojaya pyre anho oiporu, vyv guive ijao'ia rembe peve, ha'e oka katy rupi oka guaxu oĩ va'e peve.

¹⁰ Ha'e gui vyv re ijytarã omoĩ ita ovareve va'e tuvixakueve, mboapy e'ÿ vy irundy metros meme ipuku-a va'e.

¹¹ Ha'e va'e áry rupi ma ita ovarekueve oa'ãague rupi ojaya pyre, yary voi.

¹² Ha'e gui oka guaxu vyry rupi ma oĩ mboapy jo'aa ita ojaya pyre, ha'e irundya ma yary gui ombojo'a. Ha'e ramigua ae avi oĩ SENHOR pegua opy ja'o mbyte pygua, ha'e oikeaty rupi voi.

¹³ Ha'e gui ma huvixa Salomão omondouka guembiguai kuery Tiro tetã gui Hirão ogueru aguã.

¹⁴ Ha'e va'e ma kunha Naftali regua imeve'ÿ va'e pi'a. Tuu ma ava Tiro pygua overa va'e re omba'eapo va'ekue. Hirão ma hi'arandú raxa ha'e oikuaapa va'e. Overa va'e gui voi ojapo kuaapa va'e. Ha'e va'e Salomão-a py ou ma vy ojapopa ojapo uka va'e.*

2 Crônicas 3.15-17

¹⁵ Ojapo avi mokoï oo ytarã overa va'e guigua. Peteĩ-teĩ yvatea ma oito metros, ha'e gui ixã cinco metros raxa'i va'e ojerea rupi.

¹⁶ Overa va'e gui ojapo avi mokoï ijyta áry guarã. Peteĩ-teĩ yvatea ma mokoï metros raxa'i.

* 7:14 Tiro pygua huvixa ma Hirão avi (5.1-12). Ha'e rã apy omombe'u va'e ma Hirão mboae, overa va'e re omba'eapo va'e, huvixa e'ÿ.

¹⁷ Ijyta áry guarã ojapo va'ekue ma ombojegua corrente oipoka pyre py. Sete corrente ojapo peteĩ árygua reguarã, ha'e sete avi ojapo amboae reguarã.

¹⁸ Ojapo avi yvyra'a ra'angaa mokoĩ ryxy corrente oĩ va'e áry rupi ombojegua vy ojao'i aguã ijyta árygua rupi. Ha'e rami ae avi ojapo amboae yta áry rupi.

¹⁹ Ijyta áry ojekuaa va'e ma yvoty rami meme, oo henda oĩa va'e py rami avi, mokoĩ metros va'e meme.

²⁰ Ijyta árygua re, yvoty katy'i, oipoka pyre py ombojeguaague rovai'i rupi ma ikuai avi duzentos yvyra'a ra'angaa. Ha'e va'e ma ijyvyry rupi omoĩ ryxy pyre, mokoĩve yta re.

²¹ Ha'e gui ma ijyitarã omopu'ã imo'amy templo oikeaty py. Ijaxu e'ya re omopu'ã va'ekue ma omboery Jaquim, ha'e rã ijaxua re omopu'ã va'ekue ma omboery Boaz.†

²² Ijyta árygua ma yvoty rami ojekuaa. Ha'e rami py ojapopa ijyitarã.

Overa va'e ryku gui yy mbotyarã ojapoague

²³ Ha'e gui overa va'e ryku gui ojapo avi peteĩ yy mbotyarã. Ha'e va'e ma ojere rei va'e, irundy metros raxa'i ipya va'e, ha'e rã yvatea ma mokoĩ metros raxa'i. Ha'e gui ijyke rupi ixã treze metros raxa'i va'e oa'ãa va'e.*

²⁴ Iguýry rupi ma omoĩ hy'akua ra'angaa, meio metro nhavõ re dez ta'angaa omoĩ. Mokoĩ ryxy omoĩ, hy'a guaxu reve jojavi ojapo avi.

²⁵ Yy mbotya ma doze vaka ra'angaa áry oĩ. Mboapy ma kuaray ijapu'a'ia katy hi'aĩ, mboapy ma kuaray oikea katy, mboapy ma kuaray puku-a katy, ha'e mboapy ma kuaray oua katy hi'aĩ. Ha'e va'e kuery áry ae oĩ hy'a guaxu. Ha'e rã hevi ma mbyte katy meme ovaẽ oiny.

²⁶ Ipo guaxu-a ma irundy kuã oĩa rami. Ijyvyrykue ma karo rami hembe va'e, yvoty rami ojekuaa. Yy henyẽa ma quarenta mil litros rivyvyi va'e.

2 Crônicas 4.6-22

²⁷ Overa va'e gui ojapo avi dez ryrurendarã. Peteĩ-teĩ ipuku-a ha'e ipya ma mokoĩ metros rai'i, ha'e rã yvatea ma peteĩ metro raxa'i.

²⁸ Po rami ma hendarã ojapo: hexe oĩ imbotya, ijyta reve.

²⁹ Ha'e va'e re ma oĩ guary, vaka ha'e anjo ipepo va'e ra'angaa. Ijyta re guary ha'e vaka ra'angaa ikuai va'e áry ha'e iguýry ma ombojegua avi.

³⁰ Peteĩ-teĩ henda ma iruéra irundy va'e overa va'e guigua meme. Iruéra'y voi overa va'e guigua. Ipy irundy va'e áry ma oĩ yryru ytarã mba'emo ryku gui ojapo pyre. Ha'e va'e yvyry ombojegua.

³¹ Hi'áry oĩ avi ijyta ojere va'e. Ha'e va'e yvatea ma meio metro. Hi'yvypy ho'amy va'e yta ma ojere rei va'e. Ipya ma meio metro raxa. Hexe oĩ avi ijeguarã. Imbotya ma ijapy irundy va'e, ojere rei e'y va'e.

³² Iruéra irundy va'e ma imbotya guy rupi ikuai. Hi'y ma henda regua ae oĩ. Peteĩ-teĩ ruéra yvatea ma meio metro raxa'i.

³³ Iruéra ma karõxa regua ramigua meme. Hi'y, ijyvyry rupigua, raios, ha'e mbyte regua voi ma overa va'e ryku guigua meme.

³⁴ Peteĩ-teĩ hyru renda re, ijapy irundyve re oĩ hendarã. Ha'e va'e voi hexegua ae oĩ.

³⁵ Peteĩ-teĩ hyru renda áry re oĩ peteĩ ojere va'e peteĩ po yvatea va'e. Henda áry rupi mba'emo yta ha'e imbotya ikuai va'e ma hexegua ae oĩ.

³⁶ Hexegua ijyta ha'e imbotya ikuai va'e re ma ojapo anjo, guary ha'e pindo ra'angaa. Peteĩ-teĩ oĩ aguã ha'evea py ae. Ijyvyry rupi oĩ avi ijeguarã.

³⁷ Ha'e rami vy ojapo dez hyru rendarã. Peteĩ-teĩ ma overa va'e ryku guigua, joo rami meme tuvixa ha'e ojekuaa oiny va'e voi.

³⁸ Ha'e gui ojapo avi dez hy'a overa va'e guigua. Peteĩ-teĩ ma oitocentos litros raxa'i va'e. Peteĩ-teĩ pya ma mokoĩ metros rai'i. Dez hyru renda ikuai va'e peteĩ-teĩ áry ma oĩ peteĩ hy'a.

³⁹ Ha'e gui peteĩ nhiruĩ henda omoĩ opyve katy jaiporu kuaa regua re, ha'e rã peteĩ nhiruĩ mboae ma jaiporu kuaa e'ya re omoĩ. Ha'e rã hy'a guaxu ma omoĩ jaiporu kuaa regua re, kuaray puku-a ha'e oua katy rami.

⁴⁰ Ha'e va'e rire ma Hirão ojapo avi oja guaxu, mba'emo reraa ha'e hy'a. Ha'e rami py ojapopa SENHOR pegua opy guarã huvixa Salomão ojapo uka va'ekue.

⁴¹ Ha'e va'e ma mokoĩ oo ytarã, mokoĩ ojere va'e oo yta áry oĩ va'erã, mokoĩ oipoka pyre mokoĩ ijyta árygua reguarã,

⁴² quatrocentos yvyra'a ra'angaa mokoĩ oipoka pyre reve guarã, ha'e rami vy peteĩ-teĩ oipoka pyre re mokoĩ ryxy omoĩ yvyra'a ra'angaa, ombojegua aguã mokoĩ oo yta árygua,

⁴³ dez hyru rendarã, ha'e hi'áry dez hy'a oĩ va'erã,

⁴⁴ hy'a guaxu, ha'e iguýry doze vaka ra'angaa hi'aĩ va'erã,

⁴⁵ oja guaxu, mba'emo reraa, hy'a mboae, ha'e va'e tembiporu ha'e javi Hirão ojapo huvixa Salomão pe, SENHOR pegua opy guarã. Ha'e javive ma overa va'e guigua omoexakã mbyte meme.

⁴⁶ Ha'e nungarã ma huvixa ojapo ukapa Jordão yakã yvyry mba'emo ombooyku vy yapo porã reia áry, Sucote ha'e Zaretã mbyte.

⁴⁷ Ha'e nunga heta raxa ramo Salomão ndopeja ukai. Ha'e rami vy ndoikuaa porã potai overa va'e guigua poyia re.

† 7:21 Tery Jaquim ma "Imoĩ atãa" 'ea, ha'e rã Boaz ma "Imombaraetea" 'ea, Nhanduerete re ima'endu'aa rupi omboery vy.

* 7:23 2

⁴⁸ Salomão ojapo uka avi tembiporu SENHOR pegua henda iky'a e'ÿ va'e reguarã: altar ouro guigua, ouro guigua mesa hi'áry mbojape SENHOR renonde omoïa aguã,

⁴⁹ tataendy'y ouro ete'i guigua, peteï nhiruï ijaxu e'ÿa re, ha'e peteï nhiruï ju ijaxua re omoïa va'erã henda iky'a e'ÿ ete va'e rexei. Yvoty ra'angaa, tataendyrã ha'e tata mbogua ma ouro guigua meme.

⁵⁰ Ha'e gui hy'a'i, tapyï araa, hy'a, heakuã porã va'e ryrurã, tapyï ryrurã, ouro ete'i guigua meme. Ha'e gui henda iky'a e'ÿ ete va'e ha'e templo ropy henda iky'a e'ÿ va'e rokẽ ma ouro guigua meme ojapo.

2 Crônicas 5.1

⁵¹ Ha'e rami py huvixa Salomão ojapo ukapa oo SENHOR peguarã. Salomão ogueru avi mba'emo nguui Davi omboaxa ma voi va'ekue: prata, ouro ha'e tembiporu ha'e javi omoïmba SENHOR pegua oo re mba'emo hepyve va'e reve.

8

2 Crônicas 5.2-14

¹ Ha'e gui Salomão omboatyia Israel regua nhomongeta va'ety kuery, peteï-teï regua akã ikuai va'e ha'e Israel regua yvatekueve. Guenonde py omboaty Jerusalém py ae, tetã Davi rekoague Sião va'e gui templo katy oguerova aguã SENHOR guexeve guarã ojapo va'ekue ryru.

² Ha'e ramo avakue Israel regua ha'e javi onhemboatyia okuapy huvixa Salomão-a py. Ngaru ojapoa py ijaty sete jaxya etanim 'epy va'e py.

³ Israel regua nhomongeta va'ety kuery oupa ramo sacerdote kuery oupi heravy SENHOR avyu ryru.

⁴ Ha'e vy yvy'ã katy oguerova heravy oguy nhemboaty oïaty reve ha'e tembiporu iky'a e'ÿ va'e ha'e py ikuai va'ekue ha'e javi. Sacerdote ha'e levita kuery ae ogueraa.

⁵ Ha'e rã huvixa Salomão ha'e Israel kuery onhemboaty va'ekue ha'e javi reve ma hyru renonde rupi oje'oi. Vexa'i ha'e vaka ojuka oje'oivy. Mymba kuery heta raxa ramo oipapaa aguã voi nda'evei.

⁶ Ha'e gui SENHOR guexeve guarã ojapo va'ekue ryru ma sacerdote kuery omoï okuapy oï aguã py ae, templo ropyve henda iky'a e'ÿ va'e py, henda iky'a e'ÿ ete va'e py ae, anjo ra'angaa ikuai va'e pepo guuy rupi.

⁷ Mba'eta anjo pepo ma oipyo imoiny hyru itui aguã áry rupi. Ha'e rami vy yvate rupi ojao'i hyru ha'e yvyra po'i'i hi'yrã ikuai va'e.

⁸ Yvyra po'i'i ipuku ete ramo henda iky'a e'ÿ va'e gui ojekuaa henda iky'a e'ÿ ete va'e rexei'i, va'eri oka katy gui ma ndojekuaai. Ha'e py ma itui aÿ peve.

⁹ Ha'e gui avyu ryru py ma mba'eve nda'ipoi Horebe py Moisés itape omoï va'ekue e'ÿ vy. Egito yvy gui Israel kuery oje'oipa jave py ha'e kuery reve guexeve guarã SENHOR ojapo va'ekue.

¹⁰ Ha'e gui henda iky'a e'ÿ va'e gui sacerdote kuery oẽ ju ramove peteï arai ou vy omonyẽ SENHOR pegua opy rupi.

¹¹ Ha'e ramo sacerdote kuery nda'evei ha'e py omba'epove aguã, mba'eta arai rupi SENHOR guigua rexakã ojekuaa va'e omonyẽ ixupegua opy rupi.

2 Crônicas 6.1-11

¹² Ha'e gui Salomão aipoe'i:

— SENHOR aipoe'i va'ekue pytũa mbyte oï aguã re.

¹³ Ha'e rami rã anhetẽ ete xee ajapo peteï oo porã, peteï henda raka'e rã peve reiko aguã — he'i.*

¹⁴ Ha'e gui huvixa ojere vy ogueroyvy porã Israel kuery onhemboaty va'ekue ha'e javi, opu'ãmba teri okuapy reve.

¹⁵ Ha'e vy aipoe'i:

— Ta'ima'endu'a porã SENHOR Israel kuery ruete re, mba'eta xeru rãgue'i Davi pe ijayvuague ojapopa ma opo'akaa rupi. Ha'e vy aipoe'i va'ekue:

¹⁶ “Egito yvy gui xevygua kuery Israel regua aipe'apa ára guive, Israel kuery ikuai tetã neï peteïve ndaiporavoi ha'e py peteï oo rejapo aguã xerery oï aguã. Ha'e rami teï aiporavo Davi xevygua Israel kuery ruvixarã”, he'i va'ekue.

¹⁷ Ha'e rami avi xeru Davi opy'a re omoï peteï oo SENHOR Israel kuery ruete rery oï atyrã ojapo aguã.

¹⁸ Ha'e rami teï xeru Davi pe SENHOR aipoe'i: “Peteï oo xerery oï atyrã rejapoxea py ha'eva rami ndepy'a re remoï ha'e rami aguã.

¹⁹ Ha'e rami teï ndee e'ÿ 'rã oo rejapo, ha'e rã ndera'y ndegui oiko va'ekue ae 'rã ojapo xerery oï atyrã”, he'i raka'e.

²⁰ Ha'e rami rire SENHOR ojapopa ma ijayvuague, mba'eta xeru Davi rekovia xee aï vy aguapy ma ainy tenda Israel kuery re openaaty áry, SENHOR ijayvuague rami vy. Ha'e rami vy ajapo ma oo SENHOR Israel kuery ruete rery oï atyrã.

²¹ Ha'e py ajapo avi ijayvy ryru oï aguã. Ha'e va'e py oï itape nhaneramoi kuery reve Egito yvy gui SENHOR oipe'a jave guexeve guarã ojapo va'ekue oïa.

2 Crônicas 6.12-42

²² Ha'e gui Salomão ma Israel kuery ha'e javi oexaa py SENHOR pegua altar renonde py oï. Ha'e vy yva katy opo oupi reve

* 8:13 Nhanderuete Moisés reve ijayvu jave aipoe'i va'ekue arai pytũa py oï aguã, heta va'e kuery ijayvuva oendu teï oexa e'ÿ aguã (Êxodo 19.9). Ha'ekue rami ae avi templo ropy henda iky'a e'ÿ ete va'e py SENHOR pegua hyru oia py ma pytũ rei, janela noi, ha'e oikeaty onhemboty ramo, ajukue hokẽrã omoï mbyre Jesus omano jave omondoroa peve (Mateus 27.51).

²³ aipoe'i:

— SENHOR Israel kuery ruete, ndoikoi amboae ndee rami guarã ete yva re neĩ yva guy yvy re voi, mba'eta nerembiguai kuery opy'a ha'e javi py nerenonde rupi ikuai va'e ndee rereko 'rã ndereve guarã rejapo va'ekue rami, ha'e remboaxya rupi.

²⁴ Mba'eta rejapo ae ma nerembiguai xeru Davi pe ndeayvuague. Ndee ae ndeayvu rire ndepo'akaa rupi rejapo ma, aỹ roexaa rami ae.

²⁵ Ha'e gui aỹ SENHOR Israel kuery ruete, ejapopa ke nerembiguai xeru Davi pe ndeayvuague. Ha'e vy aipo're va'ekue: “Xerenonde ndoatai 'rã nderekovia tenda Israel kuery re openaaty áry oguapy oiny va'erã, xapy'a rei xerenonde rupi ndera'y kuery voi ndee reikoague rami ikuai aguã omoĩ porã ramo”, 're va'ekue.

²⁶ Ha'e gui aỹ Israel kuery ruete, tojeupity nerembiguai xeru Davi pe ndeayvuague.

²⁷ — Ha'e rami avi ha'eve 'rã ri nda'u Oreruete yvy re reiko aguã? Ma'ẽ, mba'eta yva neĩ yva yvatevea rupi peve voi nandejai 'rã, ha'e vy kova'e oo xee ajapo va'ekue py katuve ma nda'evei 'rã.

²⁸ Ha'e rami avi SENHOR Xeruete, endu pota ke xee nerembiguai anhembo'e vy ajerurea re, rendu aguã aỹ nerenonde xee nerembiguai ajapukai reve anhembo'ea.

²⁹ Ha'e rami vy ara py ha'e pyávy kova'e oo re rema'ẽ riae aguã, ha'e kova'e henda “Ha'e py 'rã xerery oĩ”, 'reague re, kova'e henda py nerembiguai onhembo'e oinya rendu aguã.

³⁰ Ha'e gui aỹ, endu nerembiguai ha'e Israel kuery ha'e javi kova'e henda py rojapukai rokuapya. Endu ke yva re ne'amba py reĩa gui. Endu ha'e orepdoa guive.

³¹ — Xapy'a rei amongue oirũ pe otekoavy ramo ha'ekue re omboayvua ramo ou vy kova'e ndevyguia opy altar oĩ va'e renonde py oura ramo

³² endu ke yva re reĩa gui, ha'e embovai. Eikuaa pota nerembiguai kuery re. Ha'e rami vy embopaga ojevavy va'ekue, hexe ae ojeapa aguã ojapo vaiague. Ha'e rã ha'evea rami oiko va'e ma emboeko porã, ha'evea rami oikoa repy reme'ẽ vy.

³³ — Ha'e gui xapy'a rei ndevyguia Israel kuery ndevy ojevavy rire ngovaigua kuery renonde rupi ho'apa ma vy ndevy ju ojeko rero va 'rã okuapy. Ha'e vy nderery rupi ojapukai vy kova'e oo py ndevy onhembo'e ha'e ojerure ramo

³⁴ endu ke yva re reĩa gui, ha'e vy eperdoapa ndevyguia Israel kuery ojevavyague. Ha'e gui ejapo ju yvy tuu kuery pe reme'ẽ va'ekue katy ojevvy aguã rami.

³⁵ — Ha'e gui xapy'a rei nderovai heta va'e kuery ojevavya rire yva rembotypa 'rã nda'okyvei aguã rami, ha'e gui kova'e henda py onhembo'e okuapy vy nderery rupi ojapukai 'rã, ha'e remoingo axy rire ojevavya gui ojeko rero va ramo

³⁶ endu ke yva re reĩa gui, ha'e vy eperdoapa nerembiguai kuery, ndevyguia Israel kuery ojevavyague. Embo'e ju tape porã rupi ikuai aguã, ha'e gui embou oky yvy ndevyguia kuery ikuai aguã reme'ẽ va'ekue áry.

³⁷ — Ha'e gui xapy'a rei kova'e yvy re oiko 'rã karuai e'ỹ vy mba'eaxy vaikue, ha'e'ỹ vy hu'ũmbaa, hatãmba reia, e'ỹ vy tuku karu ha'e ape'i okaru va'e, xapy'a rei hovaigua kuery ojokopa 'rã ha'e kuery retã, ha'e'ỹ vy oiko 'rã ai vaikue e'ỹ vy mba'eaxy va'e rei,

³⁸ ha'e gui xapy'a rei mava'e rã rei onhembo'e vy ojerure 'rã, ha'e'ỹ vy ndevyguia Israel kuery ha'e javi 'rã ojjerure okuapy, peteĩ-teĩ opy'a raxya oikuaa vy kova'e oo oĩa katy omoĩ ramo

³⁹ endu ke yva re ne'amba py reĩa gui, ha'e vy eperdo. Ejapo, ha'e vy eme'ẽ peteĩ-teĩ pe oikoague repy, ha'e kuery py'a re oĩ va'e reikuaapa va'e vy, mba'eta ndee anho'i pavẽ py'a regua oikuaa va'e reiko.

⁴⁰ Ha'e ramo nerenonde ha'e kuery ojererokyje aguã, oreru kuery yvyrã reme'ẽ va'ekue re ikuai pukukue re.

⁴¹ — Ha'e gui amboae regua voi, ndevyguia Israel kuery regua e'ỹ ikuai va'eri oyvy mombrya gui ou avi 'rã nderery rupi ikuai aguã,

⁴² (mba'eta ha'e kuery voi endu 'rã nderery yvateve va'e omombe'ua rã, ha'e ndejyva reupi vy ndepo'akaa rexa ukaague), ha'e gui ha'e kuery onhembo'e avi 'rã kova'e oo oĩa katy oma'ẽ reve,

⁴³ ha'e ramo endu ke yva re ne'amba py reĩa gui, ha'e ejapopa amboae regua kuery ndevy ojerurea, ha'e rami vy yvy regua ha'e javi nderery oikuaa aguã, ndevyguia Israel kuery rami ha'e kuery voi nerenonde ojererokyjea rupi ikuai aguã, ha'e oikuaapa aguã kova'e oo xee ajapo va'ekue py nderery remoĩague.

⁴⁴ — Ha'e gui xapy'a rei ndevyguia kuery oje'oi 'rã ngovaigua kuery reve joe opu'ã aguã katy, ha'e gui tape rupi remondoukaa py onhembo'e 'rã ndevy pe SENHOR, kova'e tetã reiporavo va'ekue ha'e kova'e oo nderery oĩ atyrã rejapo uka va'ekue katy oma'ẽ ramo

⁴⁵ endu ke yva re reĩa gui onhembo'e vy ojerure okuapya, ha'e ejapo ha'evea rami.

⁴⁶ — Xapy'a rei ma ha'e kuery ojevavy 'rã nderovai (mba'eta jipoi ojevavy e'ỹ va'erã), ha'e ramo ha'e kuery rovai ndepoxy vy remboaxapa 'rã hovaigua kuery po py, ha'e kuery guetoka katy ogueraapa aguã escravo-rã, mombry e'ỹ vy ha'e'i rupi teĩ ae ma.

⁴⁷ Ha'e gui yvy mamã rã rei escravo-rã ogueraa ague re ikuai py xapy'a rei ha'e kuery onhemboaxy vy ojeko rero va 'rã, ha'e yvy escravo ikuai py ae ndevy ojerure vy aipoe'i 'rã okuapy: “Rojevavya, teko vai rupi anho orekuai va'ekue”, he'i 'rã okuapy.

⁴⁸ Ha'e rami vy xapy'a rei ndevy guarã ju ojeko rero va 'rã opy'a ha'e onhe'ẽ ha'e javi py, yvy hovaigua kuery escravo-rã ogueraa ague py ae, ha'e vy ndevy onhembo'e 'rã okuapy oyvyrã tuu kuery pe reme'ẽ va'ekue katy oma'ẽ reve, kova'e tetã ha'e kova'e oo nderery oĩ atyrã ajapo va'ekue katy voi.

⁴⁹ Ha'e ramo endu ke yva re ne'amba py reĩa gui ha'e kuery onhembo'e vy ojerure okuapya, ha'e ejapo ha'evea rami.

⁵⁰ Eperdoa ndevyguia kuery ndevy ojevavyague, nderovai rupi opa mba'e py ojapo vai rã. Ejapo escravo-rã heraaere kuery omboaxy aguã rami.

⁵¹ Mba'eta ndevyguia kuery ma ndevy guarã ae Egito vvy gui reipe'a va'ekue, tata rupa ferro guigua mbyte py ojexavaia gui.

⁵² Ha'e rami vvy eikuaa pota riae nerembiguai ha'e ndevyguia Israel kuery ojerure okuapy re, opa mba'e re ndevy ojapukai rã rendu aguã.

⁵³ Mba'eta SENHOR xerue, ndee ma kova'e vvy regua ha'e javi mbyte gui reipe'apa raka'e ore ndevyguia kuery ae orekuai aguã, Egito vvy gui oreru kuery reipe'apa jave nerembiguai Moisés rupi ndeayvuague rami vvy — he'i.

Salomão heta va'e kuery ogueroayvu porãague

⁵⁴ Ha'e gui Salomão opa ma SENHOR pe onhembo'e ha'e ojerure rire, guenapy'ã re oĩ reve yvate katy opo oupi oinya gui opu'ã ju SENHOR pegua altar oĩ va'e renonde gui.

⁵⁵ Opu'ã ho'amý vvy ogueroayvu porã Israel kuery ijaty okuapy va'e ha'e javi. Ha'e vvy ijayvu atã reve aipoe'i:

⁵⁶ — Ta'ima'endu'a porã SENHOR re, ojeuepegua Israel kuery pe opytu'u u aguã ome'ẽ rire ijayvuague ha'e javi rami vvy. Nhanemoingo porã aguã re guembiguai Moisés rupi ijayvuague neĩ pete'i ayvu nomboaxa rivei.

⁵⁷ Ha'e gui SENHOR Nhanderue toiko riae peẽ kuery reve, nhaneramoĩ kuery reve oikoague rami ae. Tanhanepytyvõ e'ỹ eme, tanhandereja eme guive,

⁵⁸ nhanekuraxõ tomombyta ojeupe guarã ae, ixuguigua tape ha'e javi rupi nhandekuai aguã, ha'e jajapopa aguã ojapo uka va'ekue, ijayvuague ha'e oipotaa nhanderu kuery pe omombe'u va'ekue.

⁵⁹ Tove po rami xeayvu vvy SENHOR renonde rupi ajerurea toĩ riae SENHOR Nhanderue renonde py, ara py ha'e pyávy, ha'e rami vvy guembiguai ha'e ojeuepegua Israel kuery oepy kuerei aguã, ko'ẽ nhavõ nhaikotevẽa rami,

⁶⁰ vvy regua ha'e javi oikuaa aguã SENHOR ae Nhanderue oikoa, ha'e amboae ndoikoa.

⁶¹ Tove penekuraxõ py SENHOR Nhanderue pegua ete tapendekuai, ha'e ijayvuague rupi anho peiko ha'e ojapo uka va'ekue pejapopa aguã, aỹ pejapoa rami ae — he'i.

2 Crônicas 7.4-10

⁶² Ha'e gui huvixa ha'e Israel kuery hexeve ikuai va'e ha'e javi ma mymba kuery ome'ẽ okuapy SENHOR renonde.

⁶³ Salomão ma SENHOR reve peteĩ rami ju ikuai reguarã ome'ẽ avi vinte e dois mil vaka ha'e cento e vinte mil vexa'i kuery. Ha'e rami py huvixa ha'e Israel kuery ha'e javi reve SENHOR pegua oo omboaxa okuapy ipo py.

⁶⁴ Ha'e va'e áreve huvixa omboaxa avi oka SENHOR pegua oo rexei oĩ va'e. Mba'eta ha'e py ae ome'ẽ mymba oapy reve, ha'e hexeve peteĩ rami ikuai aguã regua kyrakue. Mba'eta altar overa va'e guigua SENHOR renonde oĩ va'e ma kyr'i ete rã noĩmba reguai mymba oapy reve ome'ẽ va'e, mba'emo aju guigua ha'e hexeve peteĩ rami ikuai aguã regua kyrakue oapy va'e.

⁶⁵ Ha'e va'e jave ae avi Salomão ojapo ngaru oguy'i py ikuai aguã Israel kuery ha'e javi reve.[†] Heta ete ijaty okuapy SENHOR Nhanderue renonde py, Hamate tekoka py nhavaẽa'i ha'e Egito yakã katy'i gui oo va'ekue. Sete ára rire sete ára re ju, ha'e javi vvy catorze ára re ikuai.

⁶⁶ Ngaru oikoa py oito ára py ma omoundokapa heta va'e kuery, ha'e rã ha'e kuery ju ogueroayvu porã okuapy nguvixa. Ha'e gui mae ma oje'oipa ju ngoo katy, ovy'a ete ha'e opy'a py ogueroav'a reve opa mba'e py SENHOR guembiguai Davi pe ojapoaque, ha'e ojeuepegua Israel kuery pe guive.

9

2 Crônicas 7.11-22

¹ Ha'e gui huvixa Salomão ojapopa ma oo SENHOR peguarã, ngoorã ha'e opa mba'e onhembopy'aa rami ojapoxe va'ekue voi.

² Ha'e ramo peteĩgue ju ixupe SENHOR ojexa uka, Gibeão py ojexa ukaague rami.

³ Ha'e vvy SENHOR aipoe'i:

— Xee aendu ae ma xerenonde py renhembo'e vvy rejerurea. Ha'e rami vvy xee ajapo oo rejapo va'ekue icky'a e'ỹ va'e oĩ aguã rami, ha'e py xerery amoĩ aguã raka'e rã peve guarã. Ha'e va'e re ama'ẽ vvy xepy'a py xema'endu'a riae 'rã ára nhavõ.

⁴ Ha'e gui xapy'a rei xerenonde rupi nderu Davi oikoague rami ndee voi reiko ramo, ndepy'a ha'e javi py anhetẽ ete rupi ae ri reiko vvy ajapo uka va'ekue, xeayvuague ha'e aipotaa ha'e javi rejapopa ramo,

⁵ ha'e ramo raka'e rã peve guarã amoĩ atã 'rã nderu Davi pe xeayvuague, hamymino kuery va'e regua amoingo riae 'rã xevyguia Israel kuery re opena va'erã. Ixupe aipoa'e va'ekue: "Nderekovia ndoiko e'ỹi 'rã tenda Israel kuery re openaaty áry oguapy oiny va'erã", ha'e va'ekue.

⁶ Ha'e gui xapy'a rei peẽ ha'e pendera'y kuery marã rami vvy xegui pejepe'a vvy ajapo uka va'ekue ha'e xeayvuague ndapejapovei vvy peo 'rã tuete kuery mboae re, ha'e kuery pembojeroviaa rupi,

⁷ ha'e rami ri ramo xee aipe'apa 'rã Israel kuery ijyvyrã ame'ẽ va'ekue gui, ha'e kova'e oo xerery oĩ atyrã aiky'a'opa va'ekue voi mombyry amombopa 'rã xerenonde gui. Ha'e rami rire Israel kuery ikuai 'rã vvy regua kuery ojoi rei vvy ijayvu rei okuapy aguã rami.

[†] 8:65 Ngaru oguy'i py ikuai aguã regua ma ha'e kuery rekorã Moisés rupi oea pyre (Levítico 23.33-36; Deuteronomio 16.13-15).

⁸ Kova'e oo ma aỹ omboeteave teĩ ha'e va'e jave py oĩague rupi oaxa va'e kuery oexa vy onhemondyipa 'rã. Ha'e vy otuvy nhe'ẽ ha'e aipoe'i 'rã: "Mba'e re tu SENHOR guĩ rami ete ri ombovaipa uka kova'e vyv ha'e kova'e oo?" he'i 'rã okuapy.

⁹ Ha'e rã ombovaia 'rã: "Ha'e rami ete ombovaipa uka mba'eta ha'e kuery oejapa rire SENHOR nguete Egito vyv gui tuu kuery oipe'a va'ekue, ha'e tuuete mboae pe ju ova vy omboete ha'e ombojerovia okuapy ramo. Ha'e nunga rupi ae rima ha'e kuery áry SENHOR ombou raka'e guĩ rami ete ojexavai aguã", 'ea 'rã.

2 Crônicas 8,1-18

¹⁰ Vinte ma'etỹa py mae ma Salomão ojapopa mokoĩ oo, SENHOR peguarã ha'e ojeupe guarã guive.

¹¹ Ha'e Salomão oipotaa rami ixupe Tiro pygua huvixa Hirão ma ombou vyvrya yary ha'e cipreste guigua, ouro guive. Ha'e gui Hirão pe ju Salomão omboaxa vinte tetã Galiléia vyv regua.

¹² Ha'e ramo guetã Tiro gui Hirão oo oexa aguã tetã Salomão omboaxa va'ekue, teĩ ndojou porã.

¹³ Ha'e rami vy aipoe'i ixupe:

— Xeryvy, kova'e tetã ae ma nhi'ã xevy remboaxa va'ekue? — he'i. Ha'e rami vy omboery Cabul vyv, aỹ peve guarã.*

¹⁴ Hirão ma huvixa pe ouro guigua quatro mil quilos rivyvyi omoudouka va'ekue.

¹⁵ Ha'e gui Salomão ma nhomomba'eapo nhea'ã SENHOR pegua oo ojapo aguã, ngorã, ha'e gui Milo, Jerusalém korarã, Hazor tetã, Megido ha'e Gezer tetã avi,

¹⁶ mba'eta Egipto pygua huvixa Faraó oo vy Gezer tetã re ipo'aka va'ekue. Ha'e vy oapya vy ojukapa ha'e py cananeu kuery ikuai va'ekue. Ha'e vy Salomão pe ju omboaxa ta'yxyrã guajy ome'ẽ jave.

¹⁷ Ha'e nunga rupi ae Salomão ojapo ju Gezer, Bete-Horom vyv'ã guy rupigua,

¹⁸ Baalate ha'e Tadmor, ha'e va'e vyv re tekoa e'ỹa oĩ va'e py ae.

¹⁹ Ojapo avi tetã mba'emo oguereko va'e ha'e javi omoĩ porã atyrã, ha'e tetã ikaróxa ikuai aguã, kavaju árygua kuery rekoarã, ha'e Jerusalém py ojapoxe va'ekue ha'e javi, Líbano ha'e amboae vyv re openaa ha'e javi rupi peve.

²⁰ Ha'e gui okuave teri amorreu kuery regua, heteu, ferezeu, heveu ha'e jebuseu kuery Israel kuery regua e'ỹ ikuai va'e.

²¹ Ha'e va'e kuery ra'y kuery okuave va'e ma Israel kuery ndojukapai va'ekue teĩ Salomão omomba'eapo nhea'ã, aỹ peve guarã.

²² Ha'e rã Israel kuery va'e regua ma neĩ peteĩve Salomão nomomba'eapoi escravo rami. Ha'e va'e kuery ma ixupe ikuai joe opu'ãa rupi, huvixa kuery, yvatekueve, capitão kuery, karóxa re opena va'e ha'e imboguataaty kuery.

²³ Ha'e gui Salomão rembiguai kuery mba'emo ojapo uka va'e re opena va'ety yvatekueve ma quinhentos e cinqüenta ikuai. Ha'e va'e kuery ma omba'eapo va'e kuery re opena.

²⁴ Ha'e gui Faraó rajy ma tetã Davi rekoague py oĩague gui ova ju hoorã Salomão ojapo uka va'ekue py. Ha'e gui mae ojapo Milo.†

²⁵ Ma'etỹa nhavõ mboapykue kuerei 'rã Salomão ome'ẽ mymba kuery oapy reve ha'e peteĩ rami ikuai aguã regua, altar SENHOR peguarã ojapo va'ekue áry. SENHOR renonde altar oĩ va'e áry oapy uka avi hekuã porã va'e. Ha'e rami py ojapopa oo ixupe guarã.

²⁶ Eziom-Geber py huvixa Salomão ojapo avi kanoã guaxu, Elate katy'i, ye'ẽ pytã va'e vyvry, Edom vyv re ae.

²⁷ Ha'e va'e kanoã guaxu mboguataarã Hirão ombou guembiguai kuery yy rupi oguata va'ety, ye'ẽ rupi ikuai kuaa va'e meme, Salomão rembiguai kuery reve omboguata va'erã.

²⁸ Ha'e kuery ma Ofir py ovaẽ vy ha'e gui ojogua catorze mil quilos ouro guigua, ha'e gui huvixa Salomão pe ju ogueru.

10

2 Crônicas 9,1-12

¹ Ha'e gui Sabá pygua huvixa kunha oendu avi Salomão reko omombe'ua rã, SENHOR rery omboetea voi. Ha'e rami vy ou haxy-axy va'e re oporandu aguã.

² Ha'e vy Jerusalém tetã py ovaẽ guembiguai kuery heta va'e reve. Guymba camelo kuery ombovoyi heruvy temb'i'u irürã, mbovy rei e'ỹ ouro ha'e ita iporãve va'e re. Ha'e gui Salomão renonde py ovaẽ vy ixupe oporandu onhembopy'ague ha'e javi rami.

³ Ha'e ramo opa mba'e re oporandu rã Salomão ombovai, mba'eta ixupe neĩ peteĩ henda py ma voi ndaxyi omombe'u porãve aguã.

⁴ Ha'e ramo Sabá pygua huvixa kunha oikuaa Salomão 'arandua ha'e javi, oexa avi oo ojapo uka va'ekue,

⁵ mesa áry temb'i'u oguerua va'e, yvatekueve ikuaiaty, hembiguai kuery omba'eapoa, ijao guive, karo rerua kuery ha'e mymba kuery altar áry SENHOR pe oapyaty. Ha'e va'e ha'e javi oexa vy onhemondyĩ rei oiny.

⁶ Ha'e vy aipoe'i huvixa pe:

— Anhetẽ ete ae ra'e xerekoa py ayvua ndereko regua aendu va'ekue ha'e ne'arandua regua voi.

⁷ Ha'e rami teĩ xee ma ha'e va'e ayvu ndaroviai va'ekue, apy aju vy xee ae rexa py aexa e'ỹa ja. Anhetẽ neĩ mbyte rupi peve ma voi xevy nomombe'uai va'ekue, mba'eta ndereko omombe'ua rã aendugue gui ne'arandupave ra'e, rerekopave ha'e ndere ima'endu'a porã mbyve ete va'e.

* 9:13 Tery Cabul ma "Mba'everã ndovarei va'e" 'ea. Ha'e rami omboery ndojou porã vy.

† 9:24 Milo ma peteĩ henda Jerusalém tetã regua Salomão omombaraete va'ekue.

⁸ Ovy'a ete okuapy nerembiguai avakue nerenonde rupi ikuai va'ety, mba'eta ha'e kuery oendu 'rã ne'arandua rupi ndeayvua.

⁹ Ta'ima'endu'a porã avi SENHOR Nderuete re, mba'eta ndererovy'a vy tenda Israel kuery re openaaty áry nemoi rire. Israel kuery SENHOR oayvu riae vy ae nemoi huvixarã, ha'evea rami rejojuereko ha'e reikuaa pota aguã — he'i.

¹⁰ Ha'e rami vy huvixa pe kunha va'e ome'ê quatro mil quilos ouro guigua, heta tembi'u irürã ha'e ita iporãve va'e guive. Neĩ peteĩguive ma ndogueruai teri mba'emo porã Sabá pygua huvixa kunha Salomão pe ome'ê va'ekue ramigua ete.

¹¹ Ha'e gui Hirão mba'e kanoã guaxu Ofir gui ouro ogueru va'e ma ha'e katy gui ogueru avi yvyra sândalo aygue ha'e ita iporãve va'e.

¹² Ha'e va'e yvyra sândalo gui ma huvixa Salomão ojapo uka jopy-jopy ovyaty SENHOR pegua opy ha'e ngopy guarã, ha'e gui mba'epu ixã reta va'e ha'e mbaraka oporaẽ va'e kuery peguarã. Ha'e va'e regua yvyra ma neĩ peteĩguive ndogueruai teri ha'e py, ha'e aỹ peve voi ndoexaavei ha'e va'e regua yvyra.

¹³ Ha'e gui Sabá pygua huvixa kunha pe huvixa Salomão ju ome'ê mba'emo ojerurea ha'e javi, mba'emo ome'êxa'i py ome'ê va'e áryve rupi. Ha'e ramo ojevvy vy ovyvy katy ju oo, guembiguai kuery ha'e javi reve. *2 Crônicas 1.14-17; 9.13-28*

¹⁴ Ha'e gui ma'etã nhavõ Salomão pe ouro oguerua va'e poykue ma vinte e dois mil quilos,

¹⁵ mba'emo vendea kuery, mba'emo mboekoviaaty, Arábia pygua huvixa ha'e ijyvy re opena va'ety kuery ixupe ome'ê kuerei va'e áryve.

¹⁶ Ha'e ramo ouro ombope pyre gui Salomão ojapo duzentos hu'y jokoã tuvixave va'e. Peteĩ-teĩ hu'y jokoarã ma seis quilos ouro opejaa.

¹⁷ Ouro ombope pyre gui ojapo avi trezentos hu'y jokoã kyrĩve va'e. Ha'e va'e regua hu'y jokoarã peteĩ-teĩ ma dois quilos rai'i ouro opejaa. Ha'e va'e ma oo Líbano ka'aguy regua guigua py huvixa omoĩ porã ukapa.

¹⁸ Huvixa ojapo avi peteĩ tenda tuvixave va'e marfim guigua, ha'e vy onhovãmba ouro ete py anho.

¹⁹ Ha'e va'e tenda renonde guarã ma ojapo mboapy meme pyrõa. Henda kupe ma ojere rei va'e. Ijyke jovaive re ma omoĩ avi jyva ytarã oguapyaty yvýry, ha'e ijyva yta yvýry ma mokoĩ guary ra'angaa omopu'ã imo'amy.

²⁰ Mboapy meme pyrõa ikuai va'e áry ma doze avi omoĩ guary ra'angaa, peteĩ-teĩ pyrõa apy reguarã. Ha'e va'e nunga ma neĩ peteĩve huvixa pe ma voi ojapoa va'e'ỹ teri.

²¹ Karo huvixa Salomão oy'uaty va'e ma guive rã ouro guigua meme, ha'e gui oo Líbano ka'aguy regua guigua py tembiporu ikuai va'e voi ouro guigua meme avi. Ha'e va'e re neĩ ruxã'i ma voi noĩ prata, mba'eta Salomão oĩ jave prata rive nombovarei.

²² Mba'eta huvixa ogueroko reta ye'ê rupi Társis guigua kanoã guaxu, Hirão mba'e reve omboguataa va'e. Mboapy ma'etã py kuerei 'rã Társis gui kanoã guaxu ojevvy okuapy vy ogueru ouro, prata, marfim, karaja ha'e jayru guaxu.

²³ Ha'e rami vy yvy jave re huvixa kuery ikuai va'e gui huvixa Salomão ipo'akave, o'arandua py ha'e mba'emo oguerekopaa py.

²⁴ Ha'e ramo oĩa py yvy jave gui ou 'rã okuapy o'arandua rupi ijayvu rã oendu aguã.

²⁵ Ma'etã nhavõ peteĩ-teĩ ogueru 'rã mba'emo ixupe ome'ê va'erã: ouro ha'e prata guigua, ajukue, tembiporu, kavaju ha'e mburika kunha, tembi'u irürã guive.

²⁶ Ha'e ramo Salomão oguerekopave ovy karõxa ha'e kavaju áry guarã. Mil e quatrocentos karõxa ogueroko, ha'e doze mil kavaju áry guarã. Ha'e va'e ma joa py e'ỹ-e'ỹ 'rã ogueroko tetã karõxa ikuaiaty rupi, Jerusalém tetã py huvixa oĩa py guive.

²⁷ Prata ma ita rami rive huvixa omboetave Jerusalém py, ha'e gui yary voi oata aguã rami e'ỹ ojapo sicômoro'y tekoa e'ya rupi ikuai va'e rami rive.

²⁸ Kavaju Salomão rymbarã ma Egito ha'e Cilícia vvy gui ogueru. Cilícia guigua ma huvixa rembiguai mba'emo vendea kuery ae ogueru hepy oĩa rami.

²⁹ Ha'e rã Egito gui peteĩ-teĩ karõxa ogueru 'rã seiscentos hatã'i va'e repy prata guigua re, ha'e rã kavaju ma cento e cinqüenta repy re. Ha'e rami ae avi mba'emo vendea kuery ovende ju 'rã heravy heteu ha'e Síria pygua huvixa kuery peguarã.

11

Tuuete kuery mboae re rive Salomão ojeroviaague

¹ Ha'e gui Faraó rajy anho e'ỹ huvixa Salomão oayvu, heta ogueroko avi kunhague vvy mboae guigua: Moabe, Amom, Edom, Sidom ha'e Hete guigua.

² Ha'e va'e regua kunhague re ma SENHOR aipoe'i ma voi va'ekue Israel kuery pe: “Pejoguereko eme ha'e kuery reve, neĩ ha'e kuery ma voi tapenderereko eme, pendepya py penhembotavy uka e'ỹ aguã tuuete kuery mboae re rive pevapa aguã”, he'i raka'e teĩ ha'e va'e regua ae Salomão oayvu.

³ Ha'e rami vy setecentos kunhague ogueroko huvixa rajy meme, ha'e gui trezentos ta'xy jevvy kuery. Ha'e va'e kunhague ma ojapo amboae rami rei ipy'a aguã rami.

⁴ Ha'e vy tujã'ive ma jave ta'yxy kuery ombopy'a rerova ete tuuete mboae ramigua kuery re ju ombojerovia aguã. Ha'e ramo opy'a re anhetẽ rupi ve'ỹ oiko SENHOR nguete pe, nguu Davi oikoague rami e'ỹ.

⁵ Ha'e rami vy Sidom pygua kuery xyete ra'angaa Astarote pe Salomão oiko, ha'e gui Amom pygua kuery ruete Milcom ojeguarpuy va'e pe guive.

⁶ Ha'e rami vy SENHOR renonde ha'eve'y' va'e Salomão ojapo vy SENHOR pe anho ve'y' oiko, nguu Davi oikoague rami e'y'.

⁷ Ha'e va'e jave ma Salomão ojapo pete'i oo Moabe kuery ruete Quem os ojeuarupy peguarã, vvyty Jerusalém katy'i ae, ha'e Amom kuery ruete Moloque ojeuarupy peguarã guive.

⁸ Ha'e rami ae avi gua'yxy kuery pete'i-te'i regua pe ojapo, ha'e kuery nguueete ramigua kuery pe heakuã porã va'e oapy ha'e mymba ojuka aguã.

Salomão rovai Nhanderuete onhemoiague

⁹ Ha'e nunga rupi SENHOR opu'ã Salomão rovai, SENHOR Israel kuery ruete pe oikoa gui ova ramo opy'a py, mokoígue ixupe ojexa uka va'ekue ri.

¹⁰ Ha'e rami e'y' aguã ijayvu ae ma, tuuete ramigua kuery mboae pe oiko e'y' aguã. Ha'e rami te'i ndoikoi ae SENHOR ijayvuague rami.

¹¹ Ha'e nunga rupi SENHOR aipoe'i ju Salomão pe:

— Nami ete reiko vy xerupive guarã ajapo va'ekue ha'e ajapo uka va'ekue gui rejep'e'a ma ramo ndegui ju aipe'a 'rã ndepo'akaa, nerembiguai pe ju amboaxa aguã.

¹² Ha'e rami te'i re'i teria ja ndaípe'ai 'rã, nderu Davi re ama'ê vy. Ha'e rami 'rãgue py ndera'y po gui 'rã aipe'a.

¹³ Ha'e rami avi ndaípe'apai 'rã guive ndepo'akaa. Ha'e vy ndera'y po py aeja 'rã pete'i regua, xerembiguai Davi re ha'e Jerusalém tetã re xema'endu'a vy, aiporavo rire.

Salomão rovai guarã Nhanderuete omopu'ãague

¹⁴ Ha'e gui SENHOR omopu'ã Salomão rovai guarã. Ha'e va'e ma Edom pygua Hadade, Edom pygua huvixa ramymino ae.

¹⁵ Mba'eta Edom vvy re Davi oiko jave ixondaro kuery ruxiva Joabe voi ou avi omanogue onhono porã aguã. Ha'e va'e jave py ojuka avakue Edom pygua ha'e javi.

¹⁶ (Mba'eta mboapy meme jaxy re Joabe oiko raka'e ha'e py Israel pygua xondaro kuery reve, Edom pygua avakue ojokapa peve.)

¹⁷ Ha'e va'e jave py Hadade kunumi teri reve onha ovy amongue avakue Edom pygua tuu rembiguai kuery reve, Egito katy oje'oi aguã.

¹⁸ Midiã vvy gui oje'oi vy Parã katy oguata jogueravy. Ha'e py ojouve ju ngupive guarã, ha'e vy oguerovaemba Egito pygua huvixa Faraó-a py. Ha'e va'e ma Hadade pe ome'ê pete'i oo ijyvyrã guive, ha'e vy ijayvu oipytyvõ aguã re.

¹⁹ Faraó omboaxy ete vy Hadade ra'yxyrã ome'ê avi ngovaja gua'yxy kypy'y va'e.

²⁰ Ha'e va'e ma ta'yxy Tafnes kypy'y. Ha'e va'e ma oikuavã'i ava'i, Genubate hery va'e. Ha'e va'e ma Faraó ro py ae Tafnes omongakuaa herekovy, Faraó ra'y kuery rupi ae Genubate oiko.

²¹ Ha'e gui Egito vvy re Hadade oikoa py oendu Davi guamo'i kueryague rami ndoikovei'i maa, ha'e ixondaro kuery ruxiva Joabe voi omano ma avia. Ha'e ramo Hadade aipoe'i Faraó pe:

— Tajejy ju xerekoa katy.

²² Ha'e ramo Faraó oporandu ixupe:
— Mba'e tu xereve reikoa py oata ndevy, ndeyvy re rejevy aguã?

Ombovai:

— Any, mba'eve rei ndoatai, te'i taa ju — he'i.

²³ Nhanderuete omoingo avi amboae Salomão rovai guarã. Ha'e va'e ma Eliada ra'y Rezom, opatõ Zobá pygua huvixa Hadadezer gui ojava va'ekue.

²⁴ Ha'e va'e ma guembiguai kuery avakue omboaty vy onhemoingo ha'e kuery ruxiva. Ha'e gui Davi pegua xondaro kuery jojokapa rire ha'e kuery ma Damasco katy oje'oi. Ha'e py ma huvixaverã omo'i okuapy Rezom.

²⁵ Ha'e va'e ma Salomão oikovea pukukue re Israel kuery rovaigua oiko. Hadade rami ae avi omoingo axy, Israel kuery re nda'ija'ei vy Síria pygua kuery ruxiva onhemoingo rire.

Israel kuery ruxiva Jeroboão o'i 'rã re profeta Aías ijayvu ma voiaque

²⁶ Ha'e gui Nebate ra'y Jeroboão ma Efraim regua oiko tekoa Zereda pygua, Salomão rembiguai ae oiko. Ixy ma imeve'y' va'e, Zerua hery va'e. Ha'e va'e ava ae opo oupi huvixa rovai.

²⁷ Po rami ae huvixa rovai oupi opo. Ha'e va'e jave py Salomão ma Milo ojapoa rupi ombojoja vvy nguu Davi rekoague rupi.

²⁸ Ha'e gui Salomão oexa rã Jeroboão ava ipy'a guaxu ha'e oiko kuaa va'e, kunumi omba'eapo kuaa va'e ae. Ha'e ramo omopena José ramymino kuery regua omomba'eapo nhea'ãmby kuery ha'e javi re.

²⁹ Ha'e gui ma Jerusalém tetã gui Jeroboão oguata vy tape rupi nhovaexi Siló pygua profeta Aías reve. Ha'e va'e ma pete'i ao puku ipyau'i va'e py onhemonde ovy, ha'e rã ha'e kuery moko'i ikuai nhuündy py.

³⁰ Ha'e ramo Aías ao puku ipyau'i va'e ojee gui omboi vy omondoro. Doze ra'ykue omboja'o.

³¹ Ha'e vy aipoe'i Jeroboão pe:

— Ejopy ke dez ra'ykue ndejeupe guarã, mba'eta po rami ijayvu SENHOR Israel kuery ruete: Ma'ê, Salomão po gui amondoropa 'rã ipo'akaa, ha'e vy ndevy pe ju amboaxa 'rã dez regua.

³² Ha'e rami avi pete'i regua aeja teri 'rã ipo py, xerembiguai Davi ha'e Jerusalém tetã re ama'ê vy, Israel kuery ha'e javi regua gui aiporavo rire.

³³ Mba'eta xegui Salomão ojepe'a vy guenapy'ã re oĩ Sidom kuery xyete Astarote ra'angaa renonde, Moabe pygua kuery ruete Quemos ha'e Amom pygua kuery ruete Milcom ra'angaa renonde. Xeguigua tape rupi ve'ỹ oiko, xerenonde ha'eve va'e ndojapoxevei vy. Xeayvuague rupi ve'ỹ, aipotaa rami ve'ỹ oiko, tuu Davi oikoague rami e'ỹ.

³⁴ Ha'e rami teĩ ixugui ipo'akaa ndaipe'apa etei 'rã guive. Ha'e rami 'rãgue py oikovea pukukue reguarã amoi huxixarã, xerembiguai Davi aiporavo va'ekue re ama'ẽ vy, mba'eta Davi ma mba'emo ajapo uka va'ekue ha'e xeayvuague ha'e javi rupi oiko va'ekue.

³⁵ Ha'e rã ta'y po gui ma aipe'a 'rã ipo'akaa, dez regua va'e, ndevy pe ju amboaxa 'rã.

³⁶ Ta'y po py petei regua'i 'rã ame'ẽ, xerenonde xerembiguai Davi rekovia petei hendy va'e oĩ riae aguã raka'e rã peve guarã, Jerusalém tetã xerery oĩ atyrã aiporavo va'ekue py ae.*

³⁷ Ha'e gui ndee romoi ramo ndepo'aka 'rã ndepy'a py reipota va'e re rei, Israel pygua huvixa rei vy.

³⁸ Ha'e gui xee ajapo uka va'e ha'e javi ri rejapo ramo, ha'e xeguigua tape rupi reiko vy xerenonde rupi ha'evea ramigua ri rejapo, xeayvuague ha'e ajapo uka va'ekue remoiimba ri xerembiguai Davi ojapoague rami avi, ha'e ramo xee aiko 'rã ndereve, ha'e ndevy ajapo 'rã petei oo oĩ riae va'erã, Davi pe ajapo va'ekue ramigua, mba'eta ndevy pe amboaxa 'rã Israel kuery re repena aguã.

³⁹ Ha'e rã Davi ramymino kuery ma ambojexavai 'rã, teĩ raka'e rã peve'ỹ guive — he'i.

⁴⁰ Ha'e rami rã Salomão ojukaxe teĩ Jeroboão. Ha'e va'e oiko katu vy Egito yvy katy ojava, Egito pygua huvixa Sisaque reve jogueroayvu aguã. Ha'e py ae oiko Salomão omano peve.

2 Crônicas 9.29-31

⁴¹ Ha'e gui oive rei tema Salomão rekouke regua. Ha'e rami avi hi'arandua ha'e mba'emo ojapo va'ekue ha'e javi noi 'rã teve kuaxia Salomão rekouke oia re?

⁴² Quarenta ma'et'ỹ re Salomão oĩ huvixa Jerusalém py, Israel kuery ha'e javi re openaa rupi.

⁴³ Ha'e gui guamoi kueryague rami ndoikovevei'ĩ ma ramo onhono porãa tetã Davi rekoague py ae. Ha'e gui ta'y Roboão ju oĩ nguu rekovia.

12

2 Crônicas 10.1-15

¹ Ha'e gui Roboão oo Siquém katy, mba'eta ha'e py Israel kuery onhemboatypa ma nguixarã omoi aguã. ² Ha'e nunga Nebate ra'y Jeroboão oendu. (Ha'e va'e ma Egito yvy re teri oiko, huvixa Salomão gui onhaague py.

³ Ha'e gui ju oenoãa ramo) ha'e voi ou Israel kuery ha'e javi ikuaia py, Roboão reve ha'e kuery jogueroayvu aguã. Ha'e rami vy aipoe'i okuapy Roboão pe:

⁴ — Nderu ma orerereko axy ete va'ekue. Ha'e gui aỹ gui ma ndee orerereko porã'i ju ke nderu orembojexavai ha'e orerereko axyague gui. Ha'e ramo ma ndevy ae 'rã orekuai — he'i okuapy.

⁵ Ha'e ramo Roboão ombovai:

— Tapeopa ju. Ha'e gui mboapy araa py ma peju ju xea py — he'i. Ha'e ramo heta va'e kuery oje'oiipa.

⁶ Ha'e gui ma huvixa Roboão onhemongeta uka nguu Salomão oikove teri jave tujakueve henonde ikuai va'ekue pe. Ha'e vy oporandu ha'e kuery pe:

— Mba'eta tu peẽ kuery xemongeta ta heta va'e kuery ambovai aguã?

⁷ Ha'e ramo ha'e kuery ombovai:

— Aỹ gui kova'e kuery ruvixa reiko vy xapy'a rei reipytyvõxe ha'e repena kuaaxe ri vy ndeayvu porã'i, ha'e ramo ha'e kuery raka'e rã peve 'rã ikuai nerembiguai — he'i okuapy.

⁸ Ha'e rami teĩ tujakueve omongeta rã Roboão noendu potai. Ha'e vy guembiguai kunumigue ojavegua kuery pe ju onhemongeta uka.

⁹ Ha'e vy ha'e kuery pe aipoe'i:

— Peẽ kuery, mba'eta tu xemongeta ta kova'e kuery ambovai aguã? Mba'eta xevy ojerure vy “Orerereko porã'i ju nderu orerereko axyague gui”, he'i okuapy ramo.

¹⁰ Ha'e ramo kunumigue ijavegua kuery ombovai okuapy:

— Po rami 'rã ndeayvu heta va'e kuery “Nderu orerereko axy, va'eri ndee orerereko porã'i ju”, he'i va'ekue pe. Po rami 'rã ndeayvu: “Xekuã kyrĩ'i va'e teĩ xeru ku'aa gui tuxivaxe.

¹¹ Xeru penderereko axy ae ma, ha'e rã xee ma roguereko axyve ete 'rã. Xeru ma vaka pi py penembojexavai penenupã vy, ha'e rã xee ma japeuxa popia py 'rã rombojexavai”, 're 'rã — he'i okuapy.

¹² Ha'e va'e rirre mboapy araa py Jeroboão ha'e heta va'e kuery reve joguerupa ju Roboão-a py, huvixa “Mboapy araa py pejevy ju xea py”, he'iague rami vy.

¹³ Ha'e ramo huvixa Roboão ombovai vy ayvu poyi py ijayvu, tujakueve omongetaa noendu potai rirre.

¹⁴ Kunumigue omongetaague rami rive ijayvu vy aipoe'i:

— Xeru penderereko axy, ha'e rã xee ma roguereko axyve 'rã. Xeru ma vaka pi py penembojexavai, ha'e rã xee ma japeuxa popia py 'rã rombojexavai — he'i.

¹⁵ Ha'e rami vy huvixa Roboão noendu potai heta va'e kuery ayvu re, mba'eta ha'e rami aguã ma SENHOR gui ae oiko, Nebate ra'y Jeroboão pe Siló pygua Afás ijayvuague SENHOR omoingo aguã.

2 Crônicas 10.16-19

* 11:36 “Hendy va'e” he'ia ma huvixa raka'eve rã oiko aguã re ijayvu vy, ha'e Jesus Cristo rekorã re guive (1 Reis 15.4; 2 Reis 8.19; 2 Crônicas 21.7; Salmo 132.17; Lucas 2.30-32; João 8.12).

¹⁶ Ha'e gui Israel kuery ha'e javi oexa rã ijayvua re huvixa Roboão ndojapyxaka potai ramo ivai vaipa okuapy. Ha'e vy aipoe'i:

— Mba'e tu ha'vy jareko Davi ramymino kuery reve? Jessé ra'y reve guarã noívei ri nhandevy! Israel kuery, jaje'oipa nhandero katy! Ha'vy Davi ramymino kuery, pepena pendero re ae! — he'i okuapy. Ha'e rami vy Israel kuery peteĩ-teĩ oje'oipa ju ngoo katy.

¹⁷ Ha'e rã Judá regua tetã rupi Israel kuery hekoa va'e re ma Roboão ae opena oikovy.

¹⁸ Ha'e gui heta va'e kuerya py huvixa Roboão omondouka omomba'eapo nhea'amby kuery re opena va'ety Adorão. Ha'e rami teĩ Israel kuery ojapipa ita py, ha'e ramo omano. Ha'e rã huvixa Roboão ma okaróxa ogueraa nho vy onha ovy Jerusalém katy.

¹⁹ Ha'e rami py Israel kuery onhemoingo Davi ramymino kuery rovaigua, aỹ peve guarã.

²⁰ Ha'e rami vy Israel kuery ha'e javi ma Jeroboão ojevuy ju maa oendu vy oenõ uka onhemboaty okuapya py, ha'e vy omoĩ okuapy nguvixarã. Mava'eve nda'ikuai Davi ramymino kuery rupive, Judá regua anho e'ỹ vy.*

2 Crônicas 11.1-4

²¹ Ha'e gui Jerusalém py Roboão ovaẽ ma vy omboatypa Judá ha'e Benjamim kuery, cento e oitenta mil oiporavo pyre, joe opu'ã kuaa va'e meme, Israel kuery rovai opu'ã aguã, ha'e kuery re Salomão ra'y Roboão ju ipo'aka aguã rami ojapo aguã.

²² Ha'e rami teĩ Nhanderuete oayvu ombou peteĩ ava guemimbo'e Semaías hery va'e pe. Ha'e va'e pe aipoe'i:

²³ — Ndeayvu Salomão ra'y Roboão Judá pygua huvixa va'e pe, ha'e gui Judá ha'e Benjamim kuery pe, heta va'e kuery rembyrekue pe guive. Ha'e vy aipo're:

²⁴ “Po rami SENHOR ijayvu: ‘Tapeo eme, pepu'ã eme penderovy Israel kuery rovai. Peteĩ-teĩ pejevuy ju pendero katy, mba'eta xee ae ha'e nunga amoingo va'ekue, he'i’,’ re rã.

Ha'e rami SENHOR ijayvua omombe'u rã ha'e kuery oendu vy ojevypa, ijayvuague rami vy.

Jeroboão mba'emo ra'angaa rive ombojeroviaague

²⁵ Ha'e gui Jeroboão omoatyrõ Siquém tetã Efraim regua yvy'ã re. Ha'e vy onhemboekoa ha'e py. Omoatyrõ avi Penuel.

²⁶ Ha'e vy Jeroboão ojeupe ae aipoe'i:

— Aỹ ma nhi'ã xepo'akaa 'rãgue py Davi ramymino kuery nho 'rã ipo'aka.

²⁷ Mba'eta kova'e kuery ma Jerusalém tetã katy oo jepi 'rã SENHOR pe mba'emo ome'ẽ aguã. Ha'e rami vy opy'a re oendu 'rã okuapy Judá pygua huvixa Roboão re ju oopa aguã. Ha'e vy xejuka 'rã okuapy, Judá pygua huvixa pe ojevypa vy — he'i.

²⁸ Ha'e gui huvixa onhemongeta uka vy mokoĩ vaka ra'y ra'angaa ojapo ouro gui. Ha'e vy aipoe'i heta va'e kuery pe:

— Peẽ Israel kuery, aỹ gui ma Jerusalém katy peove e'ỹ teĩ ha'leve. Apy ae pexa Penderuete ramigua Egito yvy gui pendererupaare — he'i.

²⁹ Ha'e va'e ta'angaa ma peteĩ omoĩ Betel py, ha'e rã amboae ma Dã py.

³⁰ Ha'e ramia káuxa heta va'e kuery ojevavy okuapy, Dã py voi oje'oi tema vy, vaka ra'y ra'angaa rive peteĩ-teĩ omboete aguã.

³¹ Yvy'ã ikuaia rupi Jeroboão ojapo avi ombojerovia atyrã. Ha'e vy heta va'e kuery regua rive omoĩ sacerdote kueryrã, Levi ramymino kuery regua e'ỹ teĩ.

³² Ha'e gui irundy meme jaxya re quinze araa py ojapo peteĩ ngaru, Judá re ngaru oiko va'e ramigua. Ha'e rami vy mba'emo oapy okuapy altar áry. Ha'ekue ramigua Betel tetã py avi ojapo vy mba'emo ome'ẽ okuapy vaka ra'y ra'angaa ojapo va'ekue pe. Betel py voi omoĩ sacerdote kueryrã, yvy'ã re ombojerovia atyrã omopu'ã mbyre peguarã.

³³ Ha'e gui oito jaxya re quinze araa py, ha'e ae oipotaa rami rive oa'angaague py ae, oo oiny Betel py altar ojapo uka va'ekuea py. Ha'e py voi ojapo ngaru Israel kuery pegua. Heakuã porã va'e oapy avi ha'e py.

13

Altar oĩ va'e re profeta ijayvuague

¹ Ha'e gui ma peteĩ ava Nhanderuete remimbo'e SENHOR ijayvuague rami vy Judá gui oo vy Betel py ovaẽ. Ha'e jave py altar vyvry Jeroboão hi'ai heakuã porã va'e oapya py.

² Ha'e ramo profeta ojapukai reve ijayvu altar re. SENHOR aipoe'i ukaague rami vy aipoe'i:

— Altar, altar! Nhanderuete ijayvu po rami: “Ma'ẽ, oiko 'rã peteĩ Davi ro pygua ramymino, Josias hery va'e. Ha'e va'e ma nde'áry oapy 'rã sacerdote kuery yvy'ã regua, nde'áry ha'e va'e kuery heakuã porã va'e oapy va'ekue ae. Ha'e rami py nde'áry oapya 'rã nhande va'e kãgue”, he'i.

³ Ha'e va'e árave ma omombe'u avi mba'emo kuaa ukaarã. Ha'e vy aipoe'i:

— Po rami SENHOR omombe'u uka mba'emo kuaa ukaarã. Ma'ẽ, altar ovopa rive 'rã, ha'e vy hi'áry tanhimbu oĩ va'ekue voi onheẽmba 'rã — he'i.

⁴ Ha'e rami Nhanderuete remimbo'e Betel pygua altar re ijayvu rã huvixa Jeroboão oendu vy altar áry gui opo oipe'a vy okuave'ẽ vy “Pejopy”, he'i ramove ipo ipiru vyvoi, Nhanderuete remimbo'e rovai okuave'ẽ ramo. Ha'e ramo nomomyĩ kuaavei.

* 12:20 Apy “Israel kuery” he'ia ma dez-ve regua kuery Judá regua e'ỹ ikuai va'e re ijayvu vy. Ha'e rã amboae py ma jaikuaa 'rã judeu kuery ha'e javi re ijayvua.

⁵ Ha'e ramo altar ovo xapy'a rã hi'áry tanhimbu oĩ va'ekue onheẽmba, SENHOR ijayvuague rami mba'emo kuaa ukaarã hemimbo'e omombe'u va'ekue rami vy.

⁶ Ha'e rami rã huvixa aipoe'i Nhanderuetete remimbo'e pe:

— Ejapukai te'i ae ri SENHOR nderuete pe, ha'e vy ejerure xere, xepo ratãmbaa gui ha'eve ju aguã — he'i. Ha'e ramo Nhanderuetete remimbo'e ojerure SENHOR pe. Ha'e ramove huvixa po ha'eve ju, ha'ekue rami

ae.

⁷ Ha'e gui ma huvixa aipoe'ive ju Nhanderuetete remimbo'e pe:

— Eju xerupive xero py, ha'e he'u mba'emo nembaraete aguã. Ha'e rã xee ma ame'ẽ rã mba'emo ndevy.

⁸ Ha'e rami teĩ Nhanderuetete remimbo'e va'e ombovai huvixa pe:

— Ndero py rereko va'e regua ma mbyte rupi peve xevy reme'ẽ teĩ xee ndaai 'rã nderupive, nda'ui 'rã mbojape, nday'ui 'rã guive yy kova'e tekoa py.

⁹ Mba'eta po rami ae xevy SENHOR ijayvu vy aipoe'i va'ekue: “Ndere'ui 'rã mbojape, neĩ nderey'ui 'rã yy, ha'e neĩ nderejevvy 'rã guive tape rejuague rupi”, he'i va'ekue.

¹⁰ Ha'e rami vy ojeppe'a vy amboae tape rupi oo, Betel katy ouague rupi e'ỹ.

Profeta nonhe'ẽ rendui rã ombopagaague

¹¹ Ha'e gui Betel py oiko avi peteĩ profeta tuja'i va'e. Ha'e va'e oĩa py ta'y kuery ou vy omombe'u Nhanderuetete remimbo'e ha'e va'e ára Betel py ojapo va'ekue ha'e javi. Nguu pe omombe'u avi huvixa pe ijayvuague.

¹² Ha'e ramo tuu oporandu ha'e kuery pe:

— Mava'e tape rupi ha'vy oo? — he'i ramo ta'y kuery oexa uka tape Nhanderuetete remimbo'e Judá guigua ooague.

¹³ Ha'e gui ma gua'y kuery pe aipoe'ive ju:

— Pembokupe árygua ha'vy xerymba mburika xevy pe — he'i. Ixupe ombokupe áryguapa ramo oĩ hi'áry,

¹⁴ ha'e oo Nhanderuetete remimbo'e rakykue. Ha'e vy oupity vyvra carvalho guy py oguapy oiny rã. Ha'e rami vy aipoe'i ixupe:

— Ndee ae pa Nhanderuetete remimbo'e Judá gui reju va'ekue?

Ombovai:

— Xee ae ri — he'i.

¹⁵ Ha'e ramo aipoe'i:

— Eju ha'vy xerupive xero py, ja'u mbojape.

¹⁶ Ha'e rã ombovai:

— Nda'evei ndereve ajevy aguã, neĩ navaeĩ 'rã ndero py, nda'ui 'rã mbojape, neĩ yy ma voi nday'ui 'rã kova'e tekoa py.

¹⁷ Mba'eta SENHOR ayvu rupi aipo'ea xevy: “Ha'e py ma ndere'ui 'rã mbojape neĩ nderey'ui 'rã yy, tape rejuague rupi guive ndereo jevvy 'rã”, 'ea rire — he'i.

¹⁸ Ha'e rami rã aipoe'ive ju ixupe:

— Xee voi profeta aiko ndee rami ae. Ha'e SENHOR ayvu rupi peteĩ anjo aipoe'i xevy: “Ejapo ke nderupive ndero py ojeyv aguã rami, mbojape ho'u ha'e yy oy'u aguã”, he'i va'ekue — he'i ijapua rupi.

¹⁹ Ha'e ramo ma ojeyv vy hoo py ovaẽ vy mbojape ho'u, yy oy'u guive.

²⁰ Mesa py ha'e kuery ikuai jave joguerojevvyare pe SENHOR ombou oayvu.

²¹ Ha'e ramo Nhanderuetete remimbo'e Judá guigua pe ojapukai vy aipoe'i:

— Po rami ijayvu SENHOR: “Nerenhe'ẽ rendui ra'e SENHOR, nderejapoi SENHOR nderuete ojapo uka va'ekue.

²² Ha'e rami 'rãgue py rejevy vy re'u mbojape ha'e rey'u guive yy ndevy, 'Ndere'ui 'rã mbojape, neĩ yy ma voi nderey'ui 'rã', he'iague py ae. Ha'e rami rire nderetekue nonhono porãai 'rã nderu kuery onhono porãague py”, he'i.

²³ Ha'e gui profeta joguerojevvyare va'e opa ma mbojape ho'u ha'e yy oy'upa ma vy joupe ombokupe árygua ju mburika.

²⁴ Ha'e gui ma amboae ma oo ramo tape rupi ooa py peteĩ guary ovaexĩ vy ojuka. Hetekue ma tape rupi oity inony rive, mburika ha'e guary ma hi'ái hetekue vyvry.

²⁵ Ha'e rupi oguata va'e kuery oaxa vy oexa okuapy hetekue tape rupi itui rã, ha'e guary voi hetekue yvy'iry hi'ái rã. Ha'e vy oje'oi vy profeta tuja'i va'e rekoa py omombe'u.

²⁶ Ha'e gui profeta joguerojevvyare ha'e nunga oendu vy aipoe'i:

— Nhanderuetete remimbo'e va'ekue ae ri, SENHOR nonhe'ẽ rendui va'ekue. Ha'e nunga rupi ae SENHOR omboaxa guary pe. Ha'e rã ombo'ypa vy ojuka, SENHOR ixupe aipoe'i ukaague rami vy.

²⁷ Ha'e gui aipoe'i gua'y kuery pe:

— Pembokupe árygua ha'vy xerymba mburika — he'i ramo ombokupe áryguapa.

²⁸ Ha'e ramo oo vy ojou tetekue tape rupi oity pyre, ha'e tetekue vyvry mburika'i ha'e guary hi'ái va'eri ndo'ui, neĩ mburika ma voi nomboa'ypai ra'e.

²⁹ Ha'e gui Nhanderuetete remimbo'e retekue profeta oupi vy mburika'i áry omoĩ vy ogueraa ju. Ha'e rami vy guekoa py ju profeta tuja'i ojae'o reve oguerovaẽ onhono porã aguã.

³⁰ Nguparã oguereko katu ma voi va'ekue py ae onhono porã. Ha'e vy ha'e kuery ojae'opa okuapy vy

— Aikore xeryvy! — he'i okuapy.

³¹ Onhono porã ma rire aipoe'i gua'y kuery pe:

— Xee amano ma ramo ke xenhono porã avi Nhanderuete remimbo'e nhanhono porãague py ae. Pemoĩ ke xekãgue ikãgue yvĩry.

³² Mba'eta ojeupity 'rãe Betel py altar oĩ va'e rovai SENHOR omombe'u ukaague, Samaria vvy re ombojorovi-aaty ikuai va'e rovai guive — he'i.

Jeroboão ojevavyve tema ovyague

³³ Ha'e nunga oiko rire teĩ Jeroboão ndojepe'ai ae tema gueko vaia gui. Ha'e rami 'rãgue py heta va'e kuery regua rive omoĩve sacerdote kuery vvy'ã rupi ombojeroviaaty ikuai va'e peguarã. Ha'e va'e oipota va'e rei tema omoĩ sacerdote kuery vvy'ã rupi ombojeroviaaty ikuai va'e peguarã.

³⁴ Ha'e rami tema oiko Jeroboão ro pygua kuery ojevavyva rei aguã rami, ko vvy gui ha'e kuery omombaa aguã okanhymba peve.

14

Jeroboão rovai profeta Aías ijayvuague

¹ Ha'e va'e jave py Jeroboão ra'y Abias imba'eaxy.

² Ha'e ramo gua'yxy pe aipoe'i:

— Tereo aỹ'i ma voi, ejexa uka amboae rami, “Jeroboão ra'yxy teve” 'ea e'ỹ aguã. Ha'e vvy tereo Siló py. Ha'e py ma oiko profeta Aías, kova'e kuery ruvixarã xee aĩ aguã re ijayvua ma voi va'ekue.

³ Eraa avi dez mbojape, xipa'i ha'e peteĩ ryru ei. Evaẽ oĩa py hexeve ndeayvu aguã. Ha'e ramo ha'e ma omombe'u 'rã xera'y re oiko 'rãa — he'i.

⁴ Ha'e ramo Jeroboão ra'yxy oiko ha'e rami ae. Ha'e vvy opu'ã ovy Siló katy, ha'e Aías ro py ovaẽ. Ha'e rã Aías ma tuja'i ete vvy ndoexavei ma.

⁵ Ha'e gui SENHOR aipoe'i Aías pe.

— Ma'ẽ, ou ma oiny Jeroboão ra'yxy opi'a imba'eaxy re oporandu aguã. Po rami-rami 'rã ijayvu oike ma ouvvy vvy, “Jeroboão ra'yxy ae rima ra'e” 're e'ỹ aguã — he'i.

⁶ Ha'e gui Aías ma kunha va'e okẽ rupi oike nhendu rã oendu vyve aipoe'i:

— Eike ke, Jeroboão ra'yxy. Mba'e re tu amboae rami rejexa ukaxe? Mba'eta ndevy pe haxy va'e amombe'u aguã rami aiko.

⁷ Tereo ju, aipo're Jeroboão pe: “Po rami ijayvu SENHOR Israel kuery ruete va'e: Xee ma heta va'e kuery mbyete gui roiporavo vvy romoĩ huvixa Israel kuery re repena va'erã.

⁸ Davi ro pygua kuery po'akaa aipe'a vvy ndevy ju amboaxa, va'eri ndee ma xerembiguai Davi oikoague rami e'ỹ reiko. Mba'eta ha'e va'e ma ajapo uka va'ekue ojapoa rupi xerupive oiko va'ekue opy'a ha'e javi py, xerenonde rupi ha'evea ramigua anho ojapo.

⁹ Ha'e rã ndee ma mba'emo vai anho rejapo, huvixa reĩ e'ỹ mbove ikuai va'ekue ha'e javi gui ndereko vaive ete vvy. Ha'e vvy amboae tuuete kuery ra'angaarã rejapo avi mba'emo ryku gui rive, xembopoxy aguã rami. Ha'e rami vvy ndeupe rive roerova xea katy.

¹⁰ Ha'e nunga rupi Jeroboão ro pygua kuery áry xee ambou 'rã mba'emo vai anho. Ha'e vvy Jeroboão ramymino kuery amomba 'rã ava ma guive rã, escravo e'ỹ vvy ikuai rive'i va'e teĩ. Ha'e vvy Jeroboão ro pygua kuery amombopa 'rã mymba repoxi mombyry omombopaa rami, ha'e kuery ha'e javi opa peve.

¹¹ Ha'e ramo Jeroboão guigua tetã py omano va'ekue jagua ho'upa kuerei 'rã, ha'e rã mba'ety rupi omano va'ekue ma guyra yvate rupigua 'rã ho'u", he'i SENHOR.

¹² — Ha'e rami rã ejere ju, tereo ndero katy. Ha'e gui nderekoa re ndepy removaẽ ramove ndepi'a'i omano 'rã.

¹³ Ha'e ramo Israel kuery ha'e javi ojae'opa reve 'rã onhono porã. Ha'e rami avi Jeroboão ra'y kuery va'e regua ma ha'e va'e anho'i 'rã onhono porãa, mba'eta Jeroboão ro pygua kuery regua ha'e va'e re anho oĩ SENHOR ojou porã va'e.

¹⁴ Ha'e gui SENHOR amboae ju 'rã omoĩ huvixa ojeupegua Israel kuery re opena va'erã. Ha'e va'e ma oĩ vvy omomba 'rã Jeroboão ro pygua kuery. Xee aipoa'eague oikopa vyvoi 'rã.

¹⁵ Ha'e gui Israel kuery voi SENHOR oity ukapa 'rã mba'emo'ygue-ygue vvy rupi ivevui vvy omyĩ rei va'e rami ikuai peve. Kova'e vvy porã tuu kuery pe ome'ẽ va'ekue gui oipe'apa 'rã Israel kuery, Eufrates yakã rovai rupi ju omoaĩmba 'rã, SENHOR ombopoxya rupi ta'angaarã vvyra omopu'ã rive.

¹⁶ Ha'e rami py Jeroboão ojevavyague re ojae 'rã Israel kuery, joguerojevavyva rire — he'i.

¹⁷ Ha'e gui ma Jeroboão ra'yxy opu'ã vvy oo ju. Tirza tekoo py ovaẽ. Ngoo py ovaẽ ramove ava'i va'e omano ma.

¹⁸ Ha'e ramo Israel kuery ha'e javi onhono porã vvy ojae'opa okuapy, SENHOR oayvu guembiguai profeta Aías rupi ombou va'ekue rami vvy.

¹⁹ Ha'e gui oive rei tema Jeroboão rekouke regua. Ha'e rami avi joe opu'ãague, joe openaague ha'e mba'emo ojapo va'ekue ha'e javi noi 'rã teve kuaxia Israel pygua huvixa kuery rekouke oĩa re?

²⁰ Vinte e dois ma'etỹ re ma Jeroboão oĩ huvixa. Ha'e gui ndoikovevei'i ma guamoĩ kueryague rami. Ha'e ramo ta'y Nadabe ju oĩ nguũ rekovia.

2 Crônicas 12.1-16

²¹ Ha'e gui Salomão ra'y Roboão ma Judá re oĩ huvixa. Ixy ma Amom guigua, Naamá hery va'e. Quarenta e um ma'etỹ ma oguerekoa py Roboão omboypy huvixa oĩ aguã, ha'e gui dezessete ma'etỹ re peve opena Jerusalém py. Ha'e va'e tetã ma Israel re ikuai va'e gui SENHOR oiporavo va'ekue hery oĩ aguã.

²² Ha'e gui ma Judá pygua kuery ha'e've'ỹ ete va'e ojapo okuapy SENHOR renonde. Ojevavy rupi anho ikuai vy guamoĩ kuery gui voi nda'eveive va'e ojapo okuapy SENHOR nda'evei etea oendu aguã rami.

²³ Mba'eta Judá pygua kuery voi yvy'ã re omopu'ã mba'emo ra'angaa, ita ha'e yvyra ta'angaarã yvy'ã ikuai va'e áry, ha'e yvyra ikuai va'e guy rupi.

²⁴ Ijyvy re ikuai avi avakue ta'angaa pegua itavy rei va'e. Ha'e rami vy ojapo okuapy ha'e've'ỹ va'e yvy regua Israel kuery renonde gui SENHOR oipe'a va'ekue ikuaiague rami rive.

²⁵ Ha'e gui peteĩ nhiruĩ ma'et'ya re ma Roboão huvixa oĩ jave py Egito pygua huvixa Sisaque ou Jerusalém re opu'ã aguã.

²⁶ Ha'e vy ogueraapa SENHOR pegua opy ha'e huvixa ropy iporãgueve oĩ va'ekue. Ogueraa avi hu'y jokoarã ouro guigua Salomão ojapo va'ekue.

²⁷ Ha'e gui ha'e va'ekue rekovia ma huvixa Roboão ojapove ju hu'y jokoia, teĩ overa va'e guigua rive. Ha'e va'e ma omboaxa huvixa rokẽ rarõa kuery rerekoa po py.

²⁸ Ha'e gui SENHOR pegua oo py huvixa oike nhavõ harõa kuery ogueraa 'rã hu'y jokoia. Ha'e rire ogueru kuerei 'rã opy ja'o harõa kuery ikuaiaty py.

²⁹ Ha'e gui oĩve rei tema Roboão rekokie regua. Ha'e rami avi mba'emo ojapo va'ekue ha'e javi noi 'rã teve kuaxia Judá pygua huvixa kuery rekokie oĩa re?

³⁰ Jeroboão kuery reve Roboão kuery joguero'a okuapy oikoeva pukukue re.

³¹ Ha'e gui ma Roboão ndoikovevei'ĩ ma guamoĩ kueryague rami. Ha'e gui ha'e kuery reve onhono porãa tetã Davi rekoague py. Ixy rery ma Naamã, Amom guigua. Ha'e gui ta'y Abias ju oĩ nguu rekovia.

15

2 Crônicas 13.1-22

¹ Ha'e gui Nebate ra'y Jeroboão dezoito ma'et'ỹ re ma huvixa oĩ jave py Abias oĩ Judá pygua huvixarã.

² Ha'e vy mboapy ma'et'ỹ re opena Jerusalém py. Ixy ma Absalão rajy Maaca.

³ Ha'e va'e ma nguu ojevavyapaague ha'e javi rupi ae ju oiko. Ha'e vy ipy'a re noi SENHOR nguete pe ete oiko aguã, nguu Davi oikoague rami e'ỹ.

⁴ Ha'e rami teĩ SENHOR tuete Davi re oma'ẽ vy hekovia omoĩ peteĩ hendy va'e Jerusalém py, ha'e va'e oiko rire ta'y ju omoingo vy. Ha'e rami vy omoĩ atãve Jerusalém.*

⁵ Mba'eta Davi ma SENHOR renonde ha'evea rami anho ojapo va'ekue, oikoeva pukukue re ndojepe'ai guive peteĩve ojapo uka va'ekue gui ma voi, Urias heteu va'e re ojapo va'ekue py e'ỹ vy.

⁶ Roboão ha'e Jeroboão ikuaia pukukue re oiko riae joe opu'ã va'e.

⁷ Ha'e gui oĩve rei tema Abias rekokie regua. Ha'e rami avi hi'arandua ha'e mba'emo ojapo va'ekue ha'e javi noi 'rã teve kuaxia Judá pygua huvixa kuery rekokie oĩa re? Oiko avi raka'e Abias ha'e Jeroboão kuery reve joe opu'ãa.

⁸ Ha'e gui ma Abias ndoikovevei'ĩ ma guamoĩ kueryague rami. Ha'e ramo onhono porãa tetã Davi rekoague py. Ha'e gui ta'y Asa ju oĩ nguu rekovia.

2 Crônicas 14.1-8; 15.16-16.14

⁹ Ha'e gui Israel pygua huvixa Baasa vintente ma'et'ya re ma oĩ jave py Asa oĩ Judá pygua huvixarã.

¹⁰ Ha'e va'e ma quarenta e um ma'et'ỹ re opena Jerusalém py. Ijaryi ma Absalão rajy Maaca hery va'e.

¹¹ Ha'e gui Asa ma SENHOR renonde rupi ha'evea rami oiko, guamoĩ Davi rami ae.

¹² Mba'eta ovyvy gui oipe'apa avakue ta'angaa pegua itavy rei va'ekue, oitypa avi ta'angaa nguu kuery ojapo va'ekue.

¹³ Ojaryi Maaca eteve voi oipe'a huvixa xy po'akaa gui, mba'eta ha'e va'e ma yvyra gui ta'angaa ojeguaru pyrã ojapo uka rive. Ha'e rã Asa ma ta'angaa ombovaipa vy oapypa Cedrom yvyugua py.

¹⁴ Ha'e rami teĩ yvy'ã rupi ombojerovia atyrã ojapo pyre ma nombovaipai va'eri Asa oikoeva pukukue re SENHOR pe ae oiko opy'a py.

¹⁵ Ha'e vy SENHOR pegua opy ogueru ju SENHOR pe mba'emo nguu omboaxa uka va'ekue, ha'e ae omboaxa uka va'ekue guive: prata, ouro ha'e tempiporu.

¹⁶ Israel pygua huvixa Baasa reve Asa opu'ã riae, oikoeva pukukue re.

¹⁷ Mba'eta Israel pygua huvixa Baasa ma Judá kuery rovai ou vy ojokopa Ramá tetã, Judá pygua huvixa Asa openaa gui mava'eve oo e'ỹ aguã, neĩ ovaẽa e'ỹ aguã ha'e py.

¹⁸ Ha'e ramo Asa oipe'apa ouro ha'e prata SENHOR pegua opy oĩ teri va'e, ha'e huvixa ropy omoĩ porã mbyre voi. Ha'e vy guembiguai kuery po py huvixa Asa omboaxapa vy omondoukapa Síria pygua huvixa Ben-Hadade pe, Damasco tetã py oĩa py. Ha'e va'e ma Heziom ramymino Tabrimom ra'y. Ha'e vy ixupe aipoe'ĩ uka:

¹⁹ — Jajapo ke jomeme nhandekuai porã'i aguã, nderu xeru reve ikuaiague rami. Ne'exa, aru ruka ndevy ame'ẽ rive va'e, prata ha'e ouro. Ha'e rã tereo, Israel pygua huvixa Baasa-a py ombovaipa hexeve guarã rejapo va'ekue, xeretã ojokoa gui ojope'a aguã — he'ĩ uka.

²⁰ Ha'e ramo Asa ijayvua Ben-Hadade oendu vy xondaro huvixa kuery omondouka Israel kuery retã re opu'ã aguã. Ha'e rami vy oitypa Ijom, Dã, Abel-Bete-Maaca ha'e Quinerete tekoa ha'e javi rupi, Naftali yvy rupi voi.

²¹ Ha'e nunga Baasa oendu vy opytu'u Ramá tetã ojokoa gui, ha'e vy Tirza tekoa py ju opyta.

* 15:4 "Hendy va'e" he'ia ma hekovia huvixa mboae raka'eve rã oiko va'erã re ijavyvy (1 Reis 11.36).

²² Ha'e ramo huvixa Asa ma Judéia ha'e javi rupi omombe'u uka oupaa vy Ramá gui oguerupaa ju aguã ita ha'e yvyra huvixa Baasa ojokoa py oiporu va'ekue. Ha'e va'ekue py ma huvixa Asa ju ojapo Geba tetã Benjamim regua ha'e Mispá.

²³ Ha'e gui oive rei tema Asa rekokie regua. Ha'e rami avi ipo'akaague, tetã ojapoague, ha'e mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekokie oĩa re? Ha'e gui tuja'i ma jave imba'eaxy opy rupi.

²⁴ Ha'e gui Asa ndoikovevei'i ma guamoĩ kueryague rami. Ha'e ramo onhono porãa tetã Davi rekoague py, tuu kuery ituia py ae. Ha'e gui ta'y Josafá ju oĩ nguu rekovia.

Israel pygua huvixa Nadabe ha'eve'ỹa rami joguerekoague

²⁵ Ha'e gui Judá pygua huvixa Asa mokoĩ ma'etỹa re ma oĩ jave py Jeroboã ra'y Nadabe oĩ Israel pygua huvixarã. Ha'e vy mokoĩ ma'etỹ re oiko Israel kuery re openaa rupi.

²⁶ Ha'e va'e ma SENHOR renonde rupi ha'eve'ỹ va'e ojapo oikovy nguu oikoague rami, ha'e nguu Israel kuery oguerojavyppaague rupi ae.

²⁷ Ha'e ramo hexe Issacar regua Aías ra'y Baasa opu'ã vy oity filisteu kuery rekoa Gibetom py, Gibetom tekoa Nadabe ha'e Israel kuery ha'e javi ojokopa jave.

²⁸ Ha'e vy Baasa ma Judá pygua huvixa Asa oĩ jave mboapy ma'etỹa py Nadabe ojuka vy ha'e ju huvixarã oĩ hekovia.

²⁹ Ha'e gui oĩ ppy'ia pyve ojukapa Jeroboã ramymino kuery ha'e javi. Neĩ peteive ma voi ndoejai oikove reve, omomba ete, SENHOR guembiguai Siló pygua Aías rupi oayvu ombou va'ekue rami vy,

³⁰ Jeroboã ojejavypaague re ae, ha'e Israel kuery oguerojavyppa ague re, mba'emo vai py SENHOR Israel kuery ruete ombopoxya py.

³¹ Ha'e gui oive rei tema Nadabe rekokie regua. Ha'e rami avi mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokie oĩa re?

³² Asa ha'e Israel pygua huvixa Baasa ikuaiia pukukue re oiko raka'e jomeme opu'ã va'e.

Israel pygua huvixa Baasa oĩ jave guare

³³ Ha'e gui Judá pygua huvixa Asa mboapy ma'etỹa re ma oĩ jave Aías ra'y Baasa oĩ huvixarã. Ha'e va'e ma Israel kuery ha'e javi re opena oikovy Tirza py. Vinte e quatro ma'etỹ re opena.

³⁴ SENHOR renonde ojapo ha'eve'ỹ va'e. Ha'e vy Jeroboã ojejavypaague rupi ae oiko, ha'e Israel kuery oguerojavyppa ague rupi.

16

Baasa rovai guarã Jeú ijayvu ma voiaque

¹ Ha'e gui SENHOR oayvu ombou Hanani ra'y Jeú pe. Baasa rovai ijayvu vy aipoe'i:

² — Xee ma yvy ku'i gui romopu'ã vy romoĩ va'ekue xeivygua Israel kuery ruvixarã, va'eri Jeroboã rekokie rupi reiko vy xeivygua Israel kuery roerojavyppa, xembopoxy aguã rami.

³ Ne'ixa Baasa, xee romomba ma 'rã neramymino kuery reve. Ha'e vy ndero pygua kuery re ajapo 'rã Nebate ra'y Jeroboã ro pygua kuery re ajapoague rami.

⁴ Ha'e rami rã Baasa guigua kuery tetã rupi omano va'ekue jagua kuery ho'upa 'rã, ha'e rã mba'ety rupi omano va'ekue ma guyra yvate rupigua 'rã ho'u — he'i.

⁵ Ha'e gui oive rei tema Baasa rekokie regua. Ha'e rami avi opo'akaa rupi mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokie oĩa re?

⁶ Ha'e gui Baasa ndoikovevei'i ma guamoĩ kueryague rami. Ha'e ramo onhono porãa Tirza py ae. Ha'e gui ta'y Elá ju oĩ nguu rekovia.

⁷ Ha'e rami aguã ae SENHOR oayvu ombou Hanani ra'y profeta Jeú pe Baasa ha'e hamymino kuery rovai, mba'eta SENHOR renonde opa mba'e py ojapo vai vy ombopoxy, Jeroboã ro pygua kuery ikuaiague rami oikoa py, ha'e Jeroboã ro pygua kuery ojokapaa py.

Israel pygua huvixa Elá re Zinri opu'ãague

⁸ Ha'e gui Judá pygua huvixa Asa vinte e seis ma'etỹa re ma oĩ jave py Baasa ra'y Elá oĩ Israel kuery ruvixarã, tetã Tirza py ae. Mokoĩ ma'etỹ re opena.

⁹ Ha'e va'e re opu'ã hembiguai Zinri joe opu'ãa pygua karóxa ikuai va'e re mbyte rupi peve opena va'e. Elá ma Tirza py oĩ guembiguai Arsa ro py, oy'u ha'e oka'u vaipaa rupi.

¹⁰ Ha'e gui Zinri oike vy oguero'a vy ojuka ete, Judá pygua huvixa Asa vinte e sete ma'etỹa re ma oĩ jave. Ha'e vy ha'e ae ju oĩ hekovia.

¹¹ Ha'e va'e ma tenda openaaty áry oĩ ppy vyve ojokapa Baasa kuery. Ndoejai neĩ peteive avakue, hetarã, neĩ irũ kuery ma voi.

¹² Ha'e rami py Zinri ojokapa Baasa kuery, profeta Jeú rupi Baasa rovai SENHOR oayvu ombouague rami vy.

¹³ Baasa ha'e ta'y Elá opa mba'e py ojejavypaague re ojuka, ha'e Israel kuery oguerojavyppa ague re, SENHOR Israel kuery ruete ombopoxy aguã rami, mba'emo ra'angaa ojapoague re guite.

¹⁴ Ha'e gui oive rei tema Elá rekokie regua. Ha'e rami avi mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokie oĩa re?

Israel pygua huvixa Zinri oĩ jave guare

¹⁵ Ha'e gui Judá pygua huvixa Asa vinte e sete ma'et'ya re ma oĩ jave py Zinri sete ára ete'i oĩ Tirza py. Ha'e jave py heta va'e kuery ma filisteu kuery rekoa Gibetom re opu'ã rupi ikuai.

¹⁶ Ha'e gui ha'e py ikuai va'e oendu "Zinri ma huvixa rovai opu'ã vy ojuka" 'ea rã. Ha'e rami vy ha'e va'e árave Israel kuery ikuai va'e ha'e javi nguixarã omoĩ xondaro kuery rerekoa Onri.

¹⁷ Ha'e ramo Gibetom gui Onri ogueraa Israel kuery ha'e javi. Ha'e vy Tirza tekoa ojokopa okuapy.

¹⁸ Ha'e gui Zinri ma tetã re ipo'akaa ta ma ramo oexa vy oo huvixa ropy imbaraetevea py. Ha'e py oike ma vy oĩa áry omoendypa vy omano.

¹⁹ Ojeyavyague re ae omano, SENHOR renonde ha'eve'y' va'e ojapo rire, Jeroboão oikoague rami ae Israel kuery oguerojeyavypa ague re.

²⁰ Ha'e gui oĩve rei tema Zinri rekokie regua. Ha'e rami avi huvixa rovai opu'ãague ha'e mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokie oĩa re?

Israel pygua huvixa Onri oĩ jave guare

²¹ Ha'e gui Israel kuery oja'o mokoĩ henda katy. Peteĩ ja'okie ma Ginate ra'y Tibni rupive oje'oi nguixarã omoĩ aguã, ha'e rã amboae ja'okie ma Onri rupive oje'oi.

²² Ha'e gui Onri rupive oje'oi va'ekue ma ipo'aka okuapy Ginate ra'y Tibni rupive oo va'ekue re. Ha'e gui Tibni omano ramo Onri ae ju opena.

²³ Ha'e rami py Judá pygua huvixa Asa trinta e um ma'et'ya re ma oĩ jave py Onri oĩ Israel kuery ruixarã. Ha'e javi vy doze ma'et'y re opena. Ha'e rã Tirza py ma seis ma'et'y re opena.

²⁴ Ha'e gui Semer gui ojogua Samaria vyvty sessenta e seis quilos prata re, ha'e vy omombaraete. Yvyty áry tetã ojapo va'ekue ma omboery Samaria, Semer vyv jakue rery rupi.

²⁵ Onri ma SENHOR renonde ojapo oikovy ha'eve'y' va'e. Ha'e oiko e'y' mbove ikuai va'ekue gui ojapo vaive. ²⁶ Nebate ra'y Jeroboão oikoague ha'e javi rupi oiko, Israel kuery oguerojeyavypa ague rupi. Ha'e vy SENHOR Israel kuery ruete ipoxy aguã rami ojapo ta'angaarã ojapoa py.

²⁷ Ha'e gui oĩve rei tema Onri rekokie regua. Ha'e rami avi opo'akaa oexa ukaa rupi mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokie oĩa re?

²⁸ Ha'e gui Onri ndoikovevei'i ma guamoĩ kueryague rami. Ha'e ramo onhono porãa Samaria py. Ha'e gui ta'y Acabe ju oĩ nguu rekovia.

Israel pygua huvixa Acabe oĩ, ha'e Jezabel re omendaague

²⁹ Ha'e gui Judá pygua huvixa Asa trinta e oito ma'et'ya re ma oĩ jave py Onri ra'y Acabe oĩ Israel kuery ruixarã. Ha'e vy vinte e dois ma'et'y re opena oikovy Israel kuery re, Samaria py ae.

³⁰ Onri ra'y Acabe ma SENHOR renonde ojapo oikovy ha'eve'y' va'e, ha'e oiko e'y' mbove ikuai va'e gui heko vaive va'e.

³¹ Nebate ra'y Jeroboão oejavyague rupi anho e'y' oiko, gua'yxyrã ogueraa avi Sidom pygua huvixa Etbaal rajy Jezabel. Ha'e vy ova vy Baal pegua ete oiko, ombojerovia ete.

³² Ha'e vy peteĩ altar Baal peguarã ojapo Samaria py, Baal peguarã oo ojapo va'ekue py ae.

³³ Acabe omopu'ã avi imo'amy yvyra mba'emo ra'angaarã. Ha'e vy ha'e oiko e'y' mbove Israel pygua huvixa kuery ikuai va'ekue gui ha'eve'y've va'e ojapo, SENHOR Israel kuery ruete ombopoxy aguã rami rive.

³⁴ Ha'e va'e oĩ jave Betel pygua Hiel ojapo ju Jericó. Ikora ytarã omoĩ jave omano ta'y jypkyue Abirão. Ha'e gui ikora rokẽ omoĩ jave ma Segube ju omano ijapyre va'ekue, Num ra'y Josué rupi SENHOR ijavyvague rami vy.*

17

Nda'oky pukuvei aguã re Elias ijavyu rire xapirẽ kuery omongaruague

¹ Ha'e gui Gileade gui ou Tisbé pygua Elias. Ha'e va'e ma aipoe'i Acabe pe:

— Anhetẽ ete SENHOR Israel kuery ruete henonde aikoa va'e rekove rupi aura vy aipoa'e: Ndo'ai 'rã yxapy neĩ oky kova'e ma'et'y guive, xee aipoa'e jevy e'y'ja ja — he'i.

² Ha'e gui SENHOR oavyu teĩgue ju ombou Elias pe. Ha'e vy aipoe'i:

³ — Ejepe'a ke apy gui, ha'e tereo kuaray oua katy. Enhemi Querite yakã yv'yry rupi, Jordão yakã rovai.

⁴ Ha'e va'e yakã gui ae 'rã rey'u reikovy. Ha'e py ombou avi 'rã xapirẽ kuery nemongaru va'erã — he'i.

⁵ Ha'e ramo oo vy SENHOR ijavyvague rami ojapo. Ha'e vy ojepe'a vy oiko Jordão yakã rovai Querite yakã yv'yry.

⁶ Ha'e gui ko'ẽmba'i nhavõ ixupe xapirẽ ogueru jepi 'rã mbojape ha'e xo'o. Ka'aru'i jave ju 'rã ogueru mbojape ha'e xo'o. Ha'e rã yakã gui ae oy'u oikovy.

⁷ Ha'e gui kueve ma rire yakã gui oy'uaty typa, vyv re nda'okvyvei ramo.

Imeve'y' va'e Sarepta pygua ro py Elias oiko jave guare

⁸ Ha'e gui ixupe SENHOR oavyu ombou jevy vy aipoe'i:

⁹ — Aỹ ma epu'ã ke, tereo ju Sidom re tekoa Sarepta oĩ va'e katy. Eiko are ha'e py, mba'eta ha'e py oiko peteĩ kunha imeve'y' va'e, ha'e va'e pe xavyu ma nemongaru aguã re — he'i.

¹⁰ Ha'e ramo opu'ã ovy Sarepta katy. Tetã rokẽ py ovaẽ ovy py oma'ẽ rã ha'e py oiko peteĩ kunha imeve'y' va'e xakã omono'õa rupi. Ha'e rã onhenduka vy aipoe'i kunha va'e pe:

— Ajerure ndevy, eru ke xevy peteĩ rryu vy ay'u aguã.

*

- 11 Ha'e rā kunha va'e yy re oo ta ramo onhenduka jevy vy aipoe'i:
 — Eru avi ke mbojape ra'ykue'i petei jururā'i ri jepe.
- 12 Ha'e ramo kunha va'e ombovai:
 — Anhetē ete SENHOR nderuete oikove va'e rery rupi aura vy aipoa'e: Mba'eve ndarekoi ojykue ma voi. Oī va'e ma petei po'i trigo oja py, ha'e ruxā'i azeite hyru py. Ema'ē, ko ma mokoī vyvra rakāgue'i ajopy va'ekue, tembi'u'i ajapo aguā xevy ha'e xepi'a pe. Ha'e va'e ro'upa ma rire romano 'rā — he'i.
- 13 Ha'e ramo Elias aipoe'i:
 — Ekyje eme. Tereo ha'e ejapo tema xeayvuague. Jypy ma xevy ranhe ejapo petei mbojape'i, ha'e vy eru apy oka katy. Ha'e gui mae ejapove ju ndejeupe ha'e ndepi'a pe avi.
- 14 Mba'eta po rami SENHOR Israel kuery ruete ijayvu: “Trigo oja py oī va'e ndopavei 'rā, ha'e azeite ndoatavei 'rā hyru py, vvy áry SENHOR ombo'oky e'ŷa ja”, he'i.
- 15 Ha'e ramo kunha va'e oo vy ojapo Elias ijayvuague. Ha'e rami rire kunha va'e ha'e hoo pygua kuery ha'e javi reve okaru okuapy, mbovy ára re e'ŷ.
- 16 Oja py trigo oī va'e ndopavei, azeite voi ndoatavi hyru py, Elias pe SENHOR aipoe'i ukaague rami vy.
- 17 Ha'e va'e rire ma kunha hoo va'e pi'a imba'eaxy. Ha'e vy nda'eveive ovy vy omano.
- 18 Ha'e ramo kunha va'e aipoe'i Elias pe:
 — Nhanderuete remimbo'e, mba'e tu xee ajapo ra'e? Tyrā pa xea py reju raka'e xereko vaiaque re xemoma'endu'a aguā, ha'e va'ekue káuxa rive ava'i omano aguā?
- 19 Ha'e ramo Elias ombovai:
 — Emboaxa ha'vy ndepi'a xevy — he'i. Ha'e vy ixv jyva áry gui ojopy vy ogueraa opy ja'o yvateve ha'e ae'i okeaty py. Ha'e vy omonheno ngupa rupi.
- 20 Ha'e gui ma ojapukai oiny SENHOR pe. Ha'e vy aipoe'i:
 — SENHOR Xeruete, kova'e imeve'ŷ va'e xemovaēare voi ri ty rembojexavai ra'e, ipi'a rejuka vy — he'i.
- 21 Ha'e vy ava'i va'e áry rupi mboapykue onheno vy ojapukai ju SENHOR pe. Ha'e vy aipoe'i:
 — SENHOR Xeruete, ajerure ndevy, ejapo inhe'ē ojevy vy hexe ju oī aguā rami — he'i.
- 22 Ha'e ramo Elias ayvu SENHOR oendu. Ha'e ramo ava'i nhe'ē ojevy vy hexe oī ju. Ha'e rā oikove ju.
- 23 Ha'e gui Elias ava'i va'e oupi vy opy ja'o gui ogueroguejy ju. Ha'e vy ixv pe ju ome'ē vy aipoe'i:
 — Ne'exa, ndepi'a oikove ju ma — he'i.
- 24 Ha'e ramo kunha va'e aipoe'i Elias pe:
 — Namia py aŷ aikuaa ma ndee anhetē ae Nhanderuete remimbo'e reikoa, ha'e ndejuru rupi SENHOR ijayvua anhetē va'e meme.

18

Acabe pe Elias ojexa uka jevyague

- 1 Are ma rire mboapy ma'etŷa py ma SENHOR oayvu ombou ju Elias pe. Ha'e vy aipoe'i:
 — Tereo, ejexa uka ju huvixa Acabe pe, mba'eta ambo'oky ju 'rā vvy áry — he'i.
- 2 Ha'e ramo Elias oo huvixa Acabe pe ojexa uka aguā. Ha'e va'e jave ma karuai nda'evei ete Samaria tetā py.
- 3 Ha'e gui Acabe oenoī mba'emo re opena va'ety Obadias. (Obadias ma SENHOR renonde ojererokyjea rupi ete oiko va'e.
- 4 Ha'e rami vy SENHOR pegua profeta kuery Jezabel ojuka ta jave Obadias cem profeta ogueraa vy mokoī itakua py onhomi. Cinqüenta meme omboja'o vy ha'e kuery pe mbojape ha'e yy py omongaru jepi raka'e.)
- 5 Ha'e gui Acabe aipoe'i Obadias pe:
 — Tereo xevvy re yakā ryapy ha'e yupa ikuai va'e ha'e javi rupi. Xapy'a rei jajou 'rā nhuū pyau xerymba kuery kavaju ha'e mburika'i jaraa jepe nho aguā, omanomba e'ŷ aguā — he'i.
- 6 Ha'e gui mokoīve ma vvy rupi joa katy e'ŷ oje'oi oikuaa pota aguā. Acabe oo petei tape rupi, ha'e rā Obadias ma amboae tape rupi oo avi ha'e ae'i.
- 7 Ha'e gui Obadias tape rupi ooa rupi Elias reve nhovaexi xapy'a. Obadias oexa kuaa vy guenapy'ā re oī ngova vvy re omovaē reve. Ha'e vy aipoe'i:
 — Xeruvixa Elias, ndee ae pa?
- 8 Ombovai:
 — Xee ae ri. Ha'e gui tereo aipo're nderuvixa pe: “Pe py ma Elias oī”, 're — he'i.
- 9 Ha'e rami tei ha'e aipoe'i:
 — Mba'e nunga py tu ajapo vai, Acabe po py xee nerembigui xemboaxa aguā, xejuka aguā?
- 10 Anhetē ete SENHOR nderuete oikove va'e rupi aura vy aipoa'e: Mamo rā vvy regua ikuaia ha'e huvixa kuery ipo'akaa rupi ma voi xeruvixa guembigui kuery omoudouka ndereka vy. Ha'e gui ha'e pygua kuery “Apy ma noī”, he'i tei ha'e kuery pe huvixa oura uka guive nandejouiaque rami.
- 11 Ha'e gui aŷ ma ndee aipo're kuri: “Tereo, aipo're nderuvixa pe: ‘Pe py ma Elias oī’”, 're uka xevy.
- 12 Tei xapy'a rei ma ndea gui aa ramove SENHOR guigua Nhe'ē ndereraa ju 'rā, marā katy paa xee aikuaa e'ŷ re. Ha'e gui reŷague py huvixa Acabe aru vy ndorojoui ramo xejuka 'rā. Ha'e rami avi xee nerembigui SENHOR re ajerovia va'e xekunumi guive.
- 13 Ha'e gui xeruvixa, ndevy pe nomombe'uai teve SENHOR pegua profeta kuery ajapo porāague Jezabel ojuka ta jave? Mba'eta SENHOR pegua profeta kuery va'e regua anhomi cem avakue, cinqüenta meme anhomi petei-tei henda itakua py, ha'e vy mbojape ha'e yy py amongaru va'ekue.

¹⁴ Ha'e gui aỹ ma ndee aipo're: “Tereo, aipo're nderuvixa pe: ‘Pe py ma oĩ Elias’”, 're uka. Ha'e ramo ma xejuka 'rã — he'i.

¹⁵ Ha'e gui Elias ombovai:

— Anhetê ete SENHOR ixondaro reta va'e henonde rupi aikoa va'e rekove rupi aura vy aipoa'e: Aỹve ajexa uka 'rã Acabe pe — he'i.

¹⁶ Ha'e ramo mae Obadias oo Acabe-a py, ixupe omombe'u. Ha'e ramo Acabe oo Elias reve ijayvu aguã katy.

¹⁷ Ha'e gui huvixa oexa vy aipoe'i:

— Israel kuery moangeko reiaty, ndee ae pa reiko?

¹⁸ Elias ombovai:

— Xee'ỹ ma Israel kuery moangekoa, ha'e rã ndee ae, ha'e nderu ro pygua kuery reve, mba'eta SENHOR ojapo uka va'ekue gui pejepe'a vy Baal kuery mboeteta rupi peiko.

¹⁹ Ha'e gui aỹ ma xea py ombaty ukapa Israel kuery ha'e javi, Carmelo vyvity áry. Toupa avi quatrocentos e cinqüenta Baal pegua profeta kuery, ha'e quatrocentos profeta kuery vyvira ta'angaarã omopu'ã mbyte pegua, Jezabel omongaru jepi va'e — he'i.

Carmelo vyvity áry Baal pegua profeta kuery reve Elias joeko a'ã okuapyagua

²⁰ Ha'e gui Israel kuery ikuaiia rupi Acabe omondouka guembiguai kuery omombe'u va'erã. Ha'e vy omboatypa profeta kuery Carmelo vyvity áry.

²¹ Ha'e rã heta va'e kuery ikuaiia py Elias ovaẽ vy aipoe'i ha'e kuery pe:

— Raka'e peve 'rã tu pendep'y a py ndapeikuaii rei pekuapy mokoĩ rupi rei vy? SENHOR ae ri Nhanderuete oiko ramo ixupe ete pendekuai. Ha'e'ỹ vy xapy'a rei Baal ri Nhanderuete oiko ramo ixupe pendekuai — he'i. Ha'e ramo heta va'e kuery teĩve nombovai.

²² Ha'e gui Elias aipoe'ive ju heta va'e kuery pe:

— Xee anho'i aikove SENHOR pegua profeta kuery va'e regua. Ha'e rã Baal pegua profeta kuery ma quatrocentos e cinqüenta avakue ikuai.

²³ Aỹ ma peru orevy mokoĩ vaka ra'y. Tove amboae kuery ranhe toiporavo peteĩ vaka ra'y, ha'e tomboa'ypa. Ha'e vy tomoĩ xakã áry, teĩ tomboja eme guive tata. Ha'e gui xee voi amboae vaka ra'y areko katu vy amoĩ 'rã xakã áry, tata amboja e'ỹ re avi.

²⁴ Ha'e gui ma peẽ kuery pejapukai 'rã pekuapy penderuete rery rupi, ha'e rã xee ma SENHOR rery rupi 'rã ajapukai. Ha'e gui tata omboua py nhanembovai va'e jaikuaa 'rã Nhanderuete oikoa — he'i.

Ha'e ramo heta va'e kuery ombovai vy

— Ha'e rami ma ha'eve — he'i okuapy.

²⁵ Ha'e gui ma Elias aipoe'i Baal pegua profeta kuery pe:

— Aỹ peiporavo peteĩ vaka ra'y pendejeupe guarã. Peẽ kuery ranhe pereko katu, penderetave vy. Pejapukai penderuete rery rupi. Ha'e rami teĩ pemboja eme tata — he'i.

²⁶ Ha'e ramo ha'e kuery ranhe oiporavo okuapy peteĩ vaka ra'y ogueru pyre regua. Oguereko katupa ma vy ojapukai okuapy nguete Baal rery rupi. Ko'ẽmba'i guive kuaray mbyte peve aipoe'i okuapy:

— Baal, orembovai na! — he'i okuapy teĩ mamove gui nombovaia nhendui. Ha'e ramo opa marã opo-opo reve ojeroky oje'oivy altar ojapo va'ekue vyviry rupi.

²⁷ Kuaray mbyte jave ma Elias ojojai rei vy aipoe'i ha'e kuery pe:

— Pejapukai ratãve ke, mba'eta ha'e ma tuete va'e vy xapy'a rei mba'emo re oikuaa pota ra'e, e'ỹ vy oo 'rã ra'e jai katy, ha'e'ỹ vy amboae katy 'rã uguata ra'e, ha'e rami e'ỹ vy oke 'rã. Ha'e rami ri vy omyi 'rã nhi'ã oupy — he'i.

²⁸ Ha'e rami rã ha'e kuery ojapukai ratãve tema, ha'e gueko rami vy onhekyxĩ okuapy kyxe ha'e hu'y py, huguy onheẽmba peve.

²⁹ Kuaray mbyte rire ma teĩ ha'e kuery ojapukai teri, mba'emo aju guigua ome'ẽa aguã hora peve. Ha'e rami teĩ nombovaia nhendui, ndojapyxakaai ae tema.

³⁰ Ha'e gui mae ma Elias aipoe'i heta va'e kuery ha'e javi pe:

— Penhembojapa ke xere — he'i. Ha'e ramo heta va'e kuery onhembojapa hexe. Ha'e gui jypy Elias omoatyromba ju SENHOR pegua altar ivaipa va'ekue.

³¹ Ha'e vy doze ita ojou heruvy Jacó ra'y kuery mbovy pa ikuaiague rami. Ha'e va'e pe ma SENHOR ijayvu vy “Aỹ gui ma Israel 'rã nderery”, he'i raka'e.

³² Ha'e va'e ita py omoatyromba ju altar SENHOR rery rupi guarã. Altar vyviry rupi ojo'o yy raperã tuvixave va'e, mba'emo ra'yĩ ryrुकue vinte quilo va'e rami.

³³ Ha'e gui xakã omoĩ vy vaka ra'y omboa'ypa ha'e onhono xakã áry.

³⁴ Ha'e gui ma aipoe'i:

— Pemonyẽ ke irundy yryru. Penhoẽ xo'o áry, ha'e xakã ikuai va'e ha'e javi rupi.

Aipoe'ive ju:

— Teĩgue ju pejapo — he'i ramo ojapo ju okuapy.

Aipoe'ive ju:

— Teĩgue ju pejapo mboapykuera — he'i ramo mboapykuea ma ojapo okuapy.

³⁵ Ha'e ramo altar vyviry rupi peve yy oxyry vy omonyẽmba ojo'oague.

³⁶ Ha'e gui mba'emo aju guigua ome'ẽa aguã jave ma profeta Elias ju onhemboja ouvy vy aipoe'i:

— Xe-SENHOR Abraão ruete, Isaque ha'e Israel ruete va'e, aÿ gui toikuaa pavê ndee ae Israel kuery ruete reikoa, ha'e rã xee ma nerembiguai aikoa, ha'e ndeayvua rami ae kova'e nunga ha'e javi ajapoague.

³⁷ Xembovai ke SENHOR, xembovai ke, kova'e kuery oikuaapa aguã ndee ae SENHOR Oeruetete reikoa, ha'e ndejeupe guarã ha'e kuery py'a rerupa jevy 'rãa — he'i.

³⁸ Ha'e gui ma SENHOR-a gui tata ho'a vy oapypa xo'o omo'i mbyre, xakã, ita ha'e yvy voi, omombirupa avi yv ojo'oague rupi o'i va'ekue.

³⁹ Ha'e nunga heta va'e kuery oexa vy guenapy'ã re ikuai ngova yvy re omovaẽmba reve. Ha'e vy aipoe'i: — SENHOR ae ma Nhanderuetete! SENHOR ae ma Nhanderuetete! — he'i okuapy.

⁴⁰ Ha'e ramo Elias aipoe'i ha'e kuery pe:

— Pejopypa na Baal pegua profeta kuery, neĩ peteĩve oo jepe e'ÿ aguã — he'i. Ha'e ramo ojopypa ramo Elias ogueraa ukapa Quisom yakã katy, ojukapa okuapy ha'e py.

Oky aguã re Elias ojerureague

⁴¹ Ha'e gui ma Elias aipoe'i Acabe pe:

— Tereo, ekaru ha'e ey'u, mba'eta onhendu ma oovy oky ja'ea revovo! — he'i.

⁴² Ha'e ramo Acabe oy'u ha'e okaru aguã katy oo jave Elias oẽ ovy Carmelo yvyty re. Ha'e py ojero'a oiny yvy katy, guenapy'ã re ngova omovaẽ reve.

⁴³ Ha'e vy aipoe'i guembiguai kunumi va'e pe:

— Tereo, ema'ẽ ye'ẽ katy.

Ha'e rã kunumi va'e oo vy oma'ẽ. Ha'e vy ombovai:

— Ndaexai mba'eve — he'i.

Ha'e rã Elias aipoe'i ixupe:

— Tereo ju ha'vy.

Ha'ekue rami sete-kue peve oiko.

⁴⁴ Ha'e gui sete-kuea py ma aipoe'i:

— Aÿ ma ye'ẽ gui oẽ jekuaa oovy peteĩ arai, teĩ nhandepo rami kyr'i va'e guive — he'i.

Ha'e rã ombovai:

— Tereo ha'vy aipo're Acabe pe: “Ereko katu na ndekaróxa ha'e tereo katu, oky ndejoko e'ÿ aguã”, 're.

⁴⁵ Ha'e gui are e'ÿ'i re yva pytũmba araipe vy. Ha'e vy yvytu ha'e oky vaipa. Ha'e rã Acabe okaróxa py oĩ vy ojepe'a ma ovy Jezreel tetã katy.

⁴⁶ Ha'e rã Elias re SENHOR opo omo'i ramo ojeku'akua rire onha ovy Acabe renonde, Jezreel tetã py jaikea'i peve.

19

Horebe yvyty py Elias oikoague

¹ Ha'e gui Jezabel pe Acabe omombe'upa Elias ojapo va'ekue, Baal pegua profeta kuery kyxe py ojuka ukapaague guive.

² Ha'e ramo Elias oĩa py Jezabel omondouka peteĩ guembiguai ixupe aipoe'i va'erã: “Ko'ẽ rã kova'e hora ojeupity peve xee nderekove ndaípe'ai ramo amboae kuery re rejapoague rami, tuuete kuery ikuai va'e taxerereko axy oipotaa rami”, he'i uka.

³ Ha'e rami rã Elias okyje vy opu'ã ovy. Ojeayvu vy Berseba tetã py ovaẽ, Judá yvy re ae. Ha'e py ojea ovy guembiguai kunumi va'e.

⁴ Ha'e gui ha'e anho oove ju tekoa e'ÿa katy, peteĩ ára re oguata. Ha'e py ovaẽ vy oguapy oiny peteĩ yvyra zimburo hi'ái va'e yvyty py. Ha'e vy ojerure oiny omano aguã re. Ha'e vy aipoe'i:

— SENHOR, ha'eve ma, aÿ eípe'a xerekove, mba'eta xeru kuery gui xereko porãve va'e'ÿ ae — he'i.

⁵ Ha'e vy onheno vy oke oupy zimburo hi'ái va'e guy py.

Ha'e gui ma peteĩ anjo omomyĩ vy

— Evy ke, ekaru — he'i.

⁶ Ha'e rã oma'ẽ vy oakã yvy'iry oexa peteĩ mbojape ita raku áry oiy va'ekue, ha'e peteĩ yryru. Ha'e vy okaru ha'e oy'u. Ha'e gui oke ju.

⁷ Teĩgue ju ou SENHOR guigua anjo. Omomyĩ vy aipoe'i ixupe:

— Evy ke, ekaru, mba'eta reguata aguã mombyry vaipa teri — he'i.

⁸ Ha'e ramo ovy vy okaru ha'e oy'u ju. Ha'e va'e tembi'u gui imbaraeete ma vy oguatae ju quarenta ára ha'e quarenta pytũ re, Nhanderuetete pegua Horebe yvyty py ovaẽ peve.

⁹ Ha'e py ma peteĩ itakua oĩ va'e py oíke vy oaxa oiny peteĩ pytũ. Ha'e gui ixupe SENHOR oayvu ombou vy aipoe'i:

— Elias, mba'e tu rejapo reiny apy?

¹⁰ Elias ombovai:

— Xee ma SENHOR Xeruetete ixondaro reta va'e pe aikoa rupi nda'evei ete, mba'eta Israel kuery hexaraipa ma okuapy ndereve guarã rejapo va'ekue gui. Ha'e rami vy oitypa altar ndevy guarã ojapo mbyre, kyxe py ojokapa guive ndevyguia profeta kuery. Aÿ xee anho'i ma aikove, ha'e xee voi xereka okuapy xejuka aguã — he'i.*

¹¹ Ha'e ramo Nhanderuetete aipoe'i ixupe:

* 19:10 Romanos 11.3-4

— Eê ha'e he'ã kova'e vyty re SENHOR renonde — he'i.

Ha'e gui ma SENHOR oaxa ovy. Jypy peteĩ vytytu vaikue oitypa vytytã ikuai va'e, omboa'ypa avi ovy itaova SENHOR renonde rupi. Ha'e rami teĩ vytytu py ma SENHOR noĩ ra'e. Ha'e gui vytytu rire ma vyv ju oryryipa, teĩ vyv oryryia py ma SENHOR noĩ avi.

¹² Ha'e gui vyv oryryi rire ojekuaa tata, teĩ SENHOR ma noĩ tata py. Ha'e gui ma tata oaxa rire peteĩ ayvu onhendu mbeguei'i ha'e ha'eve rei'i va'e.

¹³ Ha'e va'e ma Elias oendu vy oao puku apy py ngova omo'ã reve oê vy ho'ã itakua rokê py.

Ha'e gui ma ixupe ou peteĩ ayvu.

— Elias, mba'e tu rejapo re'amy apy? — he'i ju.

¹⁴ Ombovai:

— Xee ma SENHOR Xeruete ixondaro reta va'e pe aikoa rupi nda'eveite ete, mba'eta Israel kuery hexaraipa ma okuapy ndereve guarã reja va'ekue gui. Ha'e rami vy oitypa altar ndevy guarã ojapo mbyre, ha'e kyxe py ojukapa ndevygua profeta kuery. Aỹ xee anho'i ma aikove, ha'e xee voi xereka okuapy xejuka aguã — he'i.

¹⁵ SENHOR aipoe'i ixupe:

— Tereo, ejevuy ju rejuague katy ae, Damasco regua tekoa e'ÿa katy. Ha'e py revaê vy emoĩ Hazael Síria pygua huvixarã.

¹⁶ Ninsi ra'y Jeú remoĩ avi 'rã Israel pygua huvixarã. Ha'e gui Abel-Meolá pygua Safate ra'y Eliseu ma remoĩ 'rã profeta-rã nderekovia.

¹⁷ Ha'e gui Hazael kyxe gui oo jepe va'ekue ma Jeú 'rã ojuka, ha'e Jeú kyxe gui oo jepe va'ekue ma Eliseu 'rã ojuka.

¹⁸ Ha'e gui xejeupe guarã amoinrove ma voi sete mil Israel kuery va'e regua. Ha'e va'e kuery ma Baal renonde guenapy'ã re oi va'e'ÿ, ha'e ha'angaa ojuru rayvu va'e'ÿ meme.

Elias ngupive guarã Eliseu oenoiaque

¹⁹ Ha'e gui Elias oo vy ojou Safate ra'y Eliseu, doze canga vaka omba'eapo va'e reve vyv oikaraia jave, ha'e rã ha'e ma doze-a va'e ogueraa. Ha'e rupi Elias oaxa ovy vy Eliseu kupe re omombo oao puku.

²⁰ Ha'e ramo Eliseu vaka oejapa vy onha ovyv Elias rakykue. Ha'e vy aipoe'i ixupe:

— Taa ranhe taxarura xeru ha'e ha'i pe ayvua rupi, ha'e gui ma aa 'rã nderupive.

Elias ombovai:

— Tereo ha'vy, ha'e gui ejevuy ju. Mba'eta reikuaa porã ma ndevy ajapogue — he'i.

²¹ Elias oia gui Eliseu ojepe'a ranhe vy ojevuy mokoĩ vaka omba'eapo va'e ikuai py. Mokoive ojopy vy ojuka, ha'e ijaju'y regua canga omoendy vy oexy ho'okue. Ha'e vy heta va'e kuery pe ome'ẽmba ramo ho'upa okuapy. Ha'e gui mae ma ojepe'a ovyv vy Elias rupive oo ipytyvõarã.

20

Acabe Síria pygua kuery re ipo'akaague

¹ Ha'e gui Síria pygua huvixa Ben-Hadade omboaty oxondaro kuery ha'e javi. Hexeve ikuai avi trinta e dois huvixa kuery, kavaju kuery ha'e karóxa. Ha'e kuery oje'oi vy Samaria tetã ojokopa ha'e kuery rovai opu'ãa rupi.

² Ha'e gui tetã katy omondouka Israel kuery huvixa Acabe pe imombe'uarã kuery.

³ Ha'e vy aipoe'i okuapy ixupe:

— Po rami ijayvu Ben-Hadade: “Prata ha'e ouro rereko va'e ma xemba'e ae. Ha'e ndera'yxy kuery ha'e ndera'y ipo'akakueve voi xemba'e meme 'rã!” he'i.

⁴ Ha'e rã Israel pygua huvixa ombovai:

— Xeruvixa, ndeayvua rami ae tema toiko. Xee ha'e opa mba'e areko va'e ha'e javi ma ndevy guarã meme — he'i.

⁵ Ha'e gui imombe'uare kuery teĩgue ju ou vy aipoe'i okuapy:

— Po rami ijayvuve Ben-Hadade: “Ndea py anhetẽ amondouka va'ekue pe aipoa'e uka: ‘Xevy remboaxa mate 'rã prata ha'e ouro, ha'e gui ndera'yxy ha'e ndera'y kuery’, ha'e uka va'ekue.

⁶ Ha'ekue rami ae teĩ ko'ê rã, kova'e hora ojepeity jevya py xerembuguai kuery ambou ju 'rã. Ha'e va'e kuery ma nderopy rupi oi ke vy oexapa 'rã, nerembuguai kuery opena va'ety ro rupi guive. Ha'e vy oipe'a 'rã heravy iporãgueve oexa va'e rei”, he'i.

⁷ Ha'e nunga Israel pygua huvixa oendu vy oenoĩ ukapa nhomongeta va'ety kuery oyvy re ikuai va'e. Ha'e vy aipoe'i ha'e kuery pe:

— Peikuaa ae ha'e va'e ava ha'eve'ÿ va'e anho ojapoxe oikovya. Mba'eta xera'yxy ha'e xera'y kuery, ha'e gui prata ha'e ouro guive ome'ẽ ukapa ramo xee name'ẽxe e'ÿi — he'i.

⁸ Ha'e ramo nhomongeta va'ety kuery ha'e heta va'e kuery ha'e javi aipoe'i okuapy ixupe:

— Ejapxaka rei eme ta'vy ijayvua re, ejapo eme guive.

⁹ Ha'e ramo huvixa ombovai Ben-Hadade rembuguai kuery pe:

— Aipopeje penderuvixa pe: “Jypy xee nerembuguai pe rejerure ukaague ajapo ta va'ekue. Ha'e rã angegua ma ndajapo reguai”, peje. Ha'e rami ombovai ramo tembuguai kuery ojevuy vy omombe'upa.

¹⁰ Ha'e gui Ben-Hadade omondoukave ju imombe'uarã kuery. Ha'e vy aipoe'i:

— Xapy'a rei Samaria guigua vvy ku'i xerupivegua kuery po tynyẽmba aguã rami peve teĩ opyta ramo tuuete kuery ikuai va'e taxerereko axy oipotaa rami — he'i.*

¹¹ Ha'e rã Israel pygua huvixa ombovai:

— Aipojepe ixupe: “Joe opu'ã aguã onhemoatyrõ teri reve oiko va'e ma nda'eve ijayvu aguã joity maague gui ojevy va'ekue ijayvua rami rive”, peje 'rã.

¹² Ha'e rami ombovaiaque Ben-Hadade oendu oo py huvixa kuery mboae reve oy'u okuapya py. Ha'e vy aipoe'i guembiguai pe:

— Peiko katu pavẽ ha'vy — he'i ramo oiko katupa ma tetã pygua kuery rovai opu'ã aguã.

¹³ Ha'e gui ma Israel pygua huvixa Acabe-a py ovaẽ peteĩ profeta. Ha'e vy aipoe'i ixupe:

— Po rami ijayvu SENHOR: “Rexa pa peva'e avakue nhomboaty va'e ha'e javi? Ha'e va'e kuery ma kova'e árave amboaxapa 'rã ndepo py. Ha'e ramo reikuaa 'rã xee ae SENHOR aikoa”, he'i.

¹⁴ Ha'e ramo Acabe oporandu:

— Mava'e kuery po rupi 'rã ha'vy aity uka?

Profeta ombovai:

— Po rami SENHOR ijayvu: “Kunumigue xondaro ruvixa kuery rembiguai ikuai va'e po rupi 'rã reity uka”, he'i.

Ha'e ramo Acabe oporanduve ju:

— Mava'e ranhe 'rã tu omboypy joe opu'ã aguã?

— Ndee ae 'rã ri — he'i profeta.

¹⁵ Ha'e ramo oipapa ukapa kunumigue xondaro ruvixa kuery rembiguai ikuai va'e. Ha'e ramo duzentos e trinta e dois oikuaa. Ha'e gui Israel kuery ha'e javi ju oipapa uka vy sete mil oikuaa.

¹⁶ Kuaray mbyte jave ha'e kuery oje'oi. Ha'e va'e jave py Ben-Hadade ma opy oy'u tema oiny, oka'upa rei guive okuapy, huvixa kuery mboae trinta e dois oipytyvõa rupi ikuai va'e reve.

¹⁷ Ha'e gui kunumigue ranhe tenonde jogueraa, huvixa kuery rembiguai va'e. Ha'e ramo oexa pota va'erã Ben-Hadade omondouka va'ekue oexa vy

— Samaria tetã gui ou jekuaa avakue — he'i uka ixupe.

¹⁸ Ombovai:

— Ha'e kuery ma xapy'a rei peteĩ rami nhandekuai aguã re ojerure vy ou ramo pejopya rive 'rã oikove reve. Orere opu'ã aguã ri ou teĩ ha'e rami ae avi pejopya rive 'rã oikove reve — he'i.

¹⁹ Ha'e gui tetã gui kunumigue huvixa kuery rembiguai va'e jogueru, ha'e hupive xondaro kuery ha'e javi ou va'e ma

²⁰ peteĩ-teĩ ojuka avakue ojee opu'ã va'e. Ha'e ramo Síria pygua kuery onhamba ramo Israel kuery oje'oi hakykue. Ha'e rã Síria pygua huvixa Ben-Hadade ma kavaju áry oo jepe, kavaju árygua kuery mboae reve.

²¹ Ha'e gui Israel pygua huvixa ou vy ojukapa kavaju, karõxa guive ombovaipa. Ha'e vy ojuka reta avi Síria pygua kuery.

²² Ha'e gui Israel pygua huvixaa py profeta ou jevy vy aipoe'i ixupe:

— Tereo, ha'e enhemombaraeteve na. Eikuaa pota porã mba'e pa rejapo aguã re, mba'eta peteĩ ma'etỹa py Síria pygua huvixa ou jevy 'rã nderovai — he'i.

²³ Ha'e gui Síria pygua huvixa rembiguai kuery aipoe'i okuapy ixupe:

— Israel kuery ruete nhi'ã vvyty rupi rive ipo'aka va'e. Ha'e nunga rupi ae ipo'aka karamboae nhande kuery re. Ha'e rã vvy joja reia rupi ri ha'e kuery rovai nhapu'ã vy nhande ju 'rã jaity ha'e kuery.

²⁴ Ha'e nunga rupi ejapo po rami: Reipe'apa 'rã huvixa ndereve ikuai va'ekue ha'e javi, ha'e hekovia remoĩ 'rã xondaro ruvixa ae.

²⁵ Ha'e gui rejoue ju 'rã xondaro kuery, omanomba va'ekue hetaa rami ae. Ha'ekue rami ae ju 'rã rejou kavaju ha'e karõxa voi. Ha'e gui vvy joja reia rupi ha'e kuery rovai nhapu'ã vy nhi'ã jaitypa 'rã — he'i okuapy. Ha'e rami ha'e kuery ijayvua oendu ma vy ha'e rami ae ju ojapo.

²⁶ Ha'e gui peteĩ ma'etỹa py Ben-Hadade oo jevy vy Síria pygua xondaro kuery re oexa potapa. Ha'e vy Afeca katy ogueraa Israel kuery re opu'ã aguã.

²⁷ Ha'e gui Israel kuery re voi oexa potaa, ha'e ho'u va'erã ogueraa reve oje'oi amboae kuery rovai. Israel kuery ma amboae kuery renonde ikuai py mokoĩ henda py mbovy'i e'ỹ kavara kuery rami rive'i ojekuaa. Ha'e rã Síria pygua kuery ma vvy jojaa opa rupi ikuai.

²⁸ Ha'e gui ovaẽ peteĩ ava Nhanderuete remimbo'e. Ha'e vy Israel pygua huvixa pe ijayvu vy aipoe'i:

— Po rami SENHOR ijayvu: “Síria pygua kuery aipoe'i: 'SENHOR ma vvyty rupi anho ri ipo'aka va'e, vvyugua rupi ipo'aka va'e'ỹ', he'i okuapy teĩ xee ma ndepo py amboaxapa rã peva'e kuery ha'e javi. Ha'e ramia py reikuaa aguã xee ae SENHOR aikoa”, he'i.

²⁹ Ha'e gui sete ára re ikuai joexei'i. Sete araa py ma omboypy okuapy joe opu'ã aguã. Ha'e vy Israel kuery ma peteĩ ára pyve cem mil avakue vvyoi ojuka Síria pygua xondaro kuery vvy rupigua.

³⁰ Ha'e ramo hembyrekue ma Afeca katy onhamba vy oikepa jogueravy tetã py. Tetã kora ma vinte e sete mil avakue hembyre va'ekue áry ho'a ramo omanomba. Ha'e rã Ben-Hadade ma onha vy tetã katy ou vy onhemi peteĩ opy ja'o py.

³¹ Ha'e gui ixupe hembiguai kuery aipoe'i:

* 20:10 Ha'e rami Ben-Hadade ouraa rupi ijayvu Samaria tetã omomba ete aguã re.

— Ma'ê, roendu ma Israel pygua huvixa kuery nhomboaxya rupi ikuai. Ha'e nunga rupi nhandeje nhamoi 'rã ajukue voxa guigua rive, ha'e nhaneakã rupi ixã nhaimama 'rã heravy, Israel pygua huvixaa py nhaê aguã. Xapy'a rei ma nandekukai nho 'rã — he'i okuapy.

³² Ha'e rami ojee omoi okuapy ajukue voxa guigua, ha'e oakã rupi ixã omoi va'e reve oê okuapy Israel pygua huvixaa py. Ha'e vy ixupe aipoe'i okuapy:

— Nerembiguai Ben-Hadade aipoe'i uka: “Xejuca eme nho ta'vy”, he'i uka.

Ha'e rã Acabe ombovai:

— Oikove teri ri ty'y? Ha'e ma xeryvy — he'i.

³³ Ha'e rami ijavyu rã avakue ipy'a guaxuve vy ombovai ju aipoe'iague rami.

— Ben-Hadade ma nderyvy ae! — he'i okuapy ramo ombovai:

— Peju ha'vy peru xea py — he'i. Ha'e ramo mae Ben-Hadade oê ouvvy oia katy. Ha'e rã ogueroeupi okaróxa py ae.

³⁴ Ben-Hadade aipoe'i Acabe pe:

— Ndevy amboaxapa ju 'rã tetã nderu gui xeru oipe'a va'ekue. Damasco py ae 'rã remondouka ndevyguia mba'emo vendea kuery, xeru Samaria py ojapoague rami.

Acabe ombovai:

— Ha'e gui xee ma romondouka porã ju 'rã, ndereve petei rami nhandekuai aguã regua ajapo va'erã rami vy — he'i. Ha'e vy hexeve petei rami ikuai aguã ojapo ma vy omondouka ju.

³⁵ Ha'e ramo petei profeta remimbo'e aipoe'i oirũ pe SENHOR aipoe'iague rami vy:

— Ejeai ha'vy xere — he'i oirũ pe tei irũ ndojeaixei.

³⁶ Ha'e ramo aipoe'i ixupe:

— Ndee ma SENHOR nerenhe'ê rendui rire a'y'i xea gui rejepe'a ramove petei guary ou vy ndejuca 'rã — he'i. Ha'e gui ojepe'a ovy ramove petei guary ovaexi vy ojuka.

³⁷ Ha'e gui profeta ma ava mboae ju ojou vy aipoe'i ixupe:

— Ejeai xere — he'i ramove ojeai vy oity.

³⁸ Ha'e gui profeta oo tape huvixa ouaty va'e rupi tei ngova omo'ãmba reve hi'ai ojexa kuaa uka e'y aguã.[†]

³⁹ Huvixa oaxa rã ojapukai vy aipoe'i:

— Xee nerembiguai ma joe opu'ãa mbyte py aiko jave xea py xeirũ ou vy ogueru petei ava xea py. Ha'e vy aipoe'i xeivy: “Epena ke kova'e ava re, mba'eta kova'e okanhy ri ramo ndee ae 'rã remboekovia nderekove py, ha'e rami e'y ri vy hekovia reme'ê 'rã trinta e cinco quilos prata guigua”, he'i va'ekue xeivy.

⁴⁰ Ha'e gui xee nerembiguai xereko eta rei jave ava va'e oo ma ra'e — he'i.

Ha'e ramo Israel pygua huvixa ombovai:

— Nembopagaa 'rã ndee ae aipo'reague rami vy — he'i.

⁴¹ Ha'e ramove oakã oimamaague omboi vyvoi ngova gui. Ha'e ramo mae ma Israel pygua huvixa oexa kuaa ramo profeta kuery va'e regua ae ra'e.

⁴² Ha'e vy aipoe'i huvixa pe:

— Po rami SENHOR ijavyu: “Ndee ma ava ndepo py opaga aguã amboaxa va'ekue, tei repoi rire ma hekovia aipe'a 'rã nderekove, ha'e ixupeguia kuery ikuai axy 'rãgue py ndevyguia kuery 'rã ikuai axy”, he'i uka ndevy.

⁴³ Ha'e ramo Israel pygua huvixa oo ju ngoo katy, ndojou porã ha'e nonhenhandu porãve reve. Ha'e vy Samaria tetã py ju ovaê.

21

Acabe pe Nabote omba'e uvaty novendexeiague

¹ Ha'e va'e rire ma povae oiko. Jezreel pygua Nabote hery va'e ogueroko petei uvaty. Jezreel py ae onhoty va'ekue Samaria pygua huvixa Acabe ro yvy'iry.

² Ha'e gui Acabe aipoe'i Nabote pe:

— Eme'ê na nembra'e uvaty xe-hortarã, mba'eta xero yvy'iry opyta. Ha'e rã hekovia ame'ê 'rã uvaty mboae iporãve va'e. Ha'e rami e'y vy amboae rami reipota ramo ndevy ame'ê 'rã perãta hepya rami ae tema.

³ Nabote ombovai Acabe pe:

— SENHOR taxejoko xeramoi kuery yvy ojea va'ekue joupe amboaxa e'y aguã — he'i.

⁴ Ha'e gui Acabe ma ndojou porã ha'e nda'evei ete reve oo ju ngoo py, ixupe Jezreel pygua Nabote “Ndevy name'êi 'rã xeramoi kuery yvy ojea va'ekue”, he'i rire. Ha'e vy ngupa rupi onheno oupy vy hovai katy ngova ombojere vy nei ndokaru potai.

⁵ Ha'e gui ituia py ta'yxy Jezabel ou vy oporandu:

— Mba'e tu oi ha'e rami ete nderejou porã va'e nenhe'ê py, nei nderekarui aguã?

⁶ Ime ombovai:

— Mba'eta Jezreel pygua Nabote pe “Emboekovia na nde'uvaty perãta re, e'y vy reipotaa rami amboae uvaty ame'ê va'erã re”, ha'e ramo ombovai: “Ndevy name'êi 'rã xe'uvaty”, he'i.

⁷ Ha'e ramo ta'yxy Jezabel aipoe'i:

— Israel kuery huvixa e'y ri ty'y ndee reiko? Evy ke, ekaru, ha'e evy'a guive ndepy'a py. Ha'e rã xee ma ndepo py amboaxa 'rã Jezreel pygua Nabote uvaty — he'i.

Jezabel Nabote ojuka ukaague

[†] 20:38 Profeta omboaxe ojee huvixa oexa vy oikuaa e'y aguã profeta oikoa.

⁸ Ha'e gui Acabe rery rupi ta'yxy ombopara kuaxia. Acabe rery oia reve guive omboja vy ogueraa uka Nabote rekoa py nhomongeta va'ety ha'e yvatekueve ikuai va'e pe.

⁹ Ha'e vy kuaxia re ombopara vy aipoe'i: "Pejapo okaru e'y re ikuai aguã, ha'e gui peru Nabote heta va'e kuery renonde.

¹⁰ Henonde py peru avi 'rã mokoï avakue heko vai va'e hexe ijayvu rive va'erã, 'Nabote ijayvu vai Nhanderuete ha'e huvixa rovai', he'i aguã. Ha'e gui ma tetã gui peraa 'rã mombyrya py, ha'e pejapipa 'rã ita py omano peve", he'i ombopara vy.

¹¹ Ha'e gui ma ha'e va'e tetã pygua nhomongeta va'ety kuery ha'e yvatekueve ojapo okuapy Jezabel aipoe'iague rami, kuaxia para ogueraa uka va'ekue re oia rami ae.

¹² Ha'e rami vy omombe'u petei ára re okaru e'y re ikuai aguã. Ha'e vy heta va'e kuery renonde ogueru Nabote.

¹³ Henonde py ogueru avi mokoï avakue heko vai va'e. Heta va'e kuery oendua py ijayvu rive Nabote rovai.

— Ijayvu vai Nhanderuete ha'e huvixa rovai — he'i okuapy. Ha'e ramo tetã gui ogueraa okuapy vy ita py ojapipa, ha'e rã omano.

¹⁴ Ha'e va'e rire Jezabel pe omombe'u uka Nabote ojapipaa rã omano maa.

¹⁵ Ha'e gui Nabote ojapipaa rã omano maa Jezabel oendu vy aipoe'i Acabe pe:

— Epu'ã ke, ha'e ejopy uvaty Jezreel pygua Nabote peráta re nomboekovixai va'ekue. Mba'eta Nabote ndoikovei ma, omano ma — he'i.

¹⁶ Nabote omano maa Acabe oendu vy opu'ã ju, ha'e Nabote mba'ekue uvaty katy oo ojopy aguã.

Acabe ha'e Jezabel pe Elias ijayvu poyiague

¹⁷ Ha'e gui ma Tisbé pygua Elias pe SENHOR oayvu ombou vy aipoe'i:

¹⁸ — Epu'ã ke, tereo revaexi aguã Israel pygua huvixa Acabe Samaria py hekoa va'e. Nabote mba'ekue uvaty py 'rã rexa, ojeupe guarã ojopy aguã ooague py.

¹⁹ Ixupe ndeayvu vy aipo're: "Po rami SENHOR ijayvu: 'Rejojuka uka ma, ha'e gui rejapo vaive vy imba'ekue'i ae reipe'apa ta?' he'i. Po rami SENHOR ijayvuve ju: 'Nabote ruguy jagua oy'uague py ae ju oy'u avi 'rã nderuguy', he'i", 're rã.

²⁰ Ha'e gui Acabe Elias oexa vy oporandu ixupe:

— Aỹ pa xejou ma, xerovaigua?

Elias ombovai:

— Tá, rojou ae ma, mba'eta renheme'ẽ ma SENHOR renonde ha'eve'y va'e rejapo aguã.

²¹ Po rami SENHOR ijayvu ndere: "Ne'exa, ndere ambou 'rã mba'emo vai. Ha'e rami vy amokanhymba 'rã neramymino kuery, Israel gui amomba 'rã ndee Acabe ramymino kuery avakue ikuai va'e ma guive rã, escravo e'y vy ikuai rive'i va'ekue tei.

²² Ndero pygua kuery re ajapo 'rã Nebate ra'y Jeroboão ro pygua kuery re ajapogue ramigua, ha'e Afias ra'y Baasa ro pygua re, xembopoxy rei rire, ha'e Israel kuery oguerorejavya ague re", he'i.

²³ Ha'e gui Jezabel re voi SENHOR ijayvu: "Jezreel tetã py ae jagua ho'upa 'rã Jezabel retakue.

²⁴ Acabe kuery va'e regua tetã rupi omano rã jagua ho'upa 'rã, ha'e rã mba'ety rupi omano ramo ma guyra oveve va'e 'rã ho'upa", he'i.

²⁵ Mava'eve ndoikoi raka'e Acabe rami ete, mba'eta onheme'ẽ rei SENHOR renonde ha'eve'y va'e ojapo aguã, ta'yxy Jezabel ombo'eague rami rive.

²⁶ Mba'eta mba'emo ra'angaa re rive ojeroviaa rupi oiko vy ojapo ha'eve'y ete va'e, amorreu kuery ojapogue ramigua meme. Ha'e va'e kuery ma SENHOR oi-pe'apa Israel kuery ikuai aguã gui.

²⁷ Ha'e gui ma ha'e va'e ayvu Acabe oendu vy omondoropa oao, ha'e ajukue voxa guigua py rive onheovãmba vy okaru e'y re oiko. Voxa py guive oke, ha'e oakã oity rei reve oiko.

²⁸ Ha'e gui SENHOR oayvu ombou ju Tisbé pygua Elias pe. Ha'e vy aipoe'i:

²⁹ — Rexa pa Acabe xerenonde onhemo'yvy'i oikovya? Xerenonde onhemo'yvy'i ramo ma oikove teria ja namboui 'rã mba'emo vai ambou 'rã va'ekue. Ha'e rã ta'y ju ma oi jave ambou 'rã hoo pygua kuery re.

22

2 Crônicas 18.1-3

¹ Mboapy ma'et'y oaxa Síria ha'e Israel kuery reve joe opu'ã ve'y re.

² Ha'e gui mboapy ma'et'ya py ma Judá pygua huvixa Josafá oo joexa aguã Israel pygua huvixa reve.

³ Ha'e jave py Israel pygua huvixa aipoe'i guembiguai kuery pe:

— Ndapeikuaai ri ty'y Ramote-Gileade tetã nhanemba'erã opytaa? Mba'exa tu ha'vy ndajaa potai teri Síria pygua huvixa po gui jaipe'a ju aguã? — he'i.

⁴ Huvixa Josafá pe ju oporandu:

— Ndee pa reo avi 'rã orereve Ramote-Gileade re ropu'ã aguã katy?

Josafá ombovai Israel pygua huvixa:

— Xee ma aiko 'rã ndereve, xevyguia kuery voi ndevyguia kuery reveguia ae avi 'rã, xerymba kuery kavaju voi nerymba kuery kavaju rami avi 'rã ikuai — he'i.

2 Crônicas 18.4-11

⁵ Ha'e gui Josafá aipoe'ive ju Israel pygua huvixa pe:

— Eikuaa pota ranhe ke SENHOR ijayvua re — he'i.

⁶ Ha'e ramo Israel pygua huvixa omboatypa profeta kuery, quatrocentos avakue ha'e javi vy. Ha'e vy aipoe'i ha'e kuery pe:

— Taa pa Ramote-Gileade re apu'ã aguã, tyrã pa taa eme?

Ha'e kuery ombovai vy

— Tereo oreruvixa, mba'eta SENHOR omboaxapa 'rã ndepo py — he'i okuapy.

⁷ Ha'e rã Josafá ma aipoe'i:

— Nda'ipoi teri pa apy profeta SENHOR pegua ete jaikuaa pota ranhe aguã?

⁸ Israel pygua huvixa ombovai Josafá pe.

— Pete'i teri oiko ha'e va'e rupi SENHOR ayvu re jaikuaa pota aguã. Ha'e rami avi hexe ma xee ndaxea'ei, mba'eta xerenonderã re nomombe'ui iporã va'e, iporã e'y va'e anho. Ha'e va'e ma Inlá ra'y Micaías — he'i.

Ha'e rã Josafá aipoe'i:

— Huvixa, ha'e rami ndeayvu eme.

⁹ Ha'e gui Israel pygua huvixa ma pete'i guembiguai oeno'i vy ixupe aipoe'i:

— Tou vyvoi ta'vy xea py Inlá ra'y Micaías — he'i.

¹⁰ Ha'e va'e jave py ma Israel pygua huvixa ha'e Judá pygua huvixa reve jogueroguapy nhoguenoiny pete'i-te'i guenda py ae, ha'e huvixa pegua ao py ae onhemonde reve, Samaria tetã oike ovy roké vy'ry, mba'emo moa'yiaty py. Ha'e kuery renonde ma profeta kuery ha'e javi ijayvu okuapy.

¹¹ Ha'e gui Quenaana ra'y Zedequias ma vaka rakua ra'angaa oguereko ferro gui ojapo va'ekue. Ha'e vy aipoe'i:

— Po rami SENHOR ijayvu: “Kova'e ramigua py reipyo 'rã Síria pygua kuery reitypa peve”, he'i.

¹² Ha'e gui profeta mboae kuery pova'e ayvu rupi meme ijayvu okuapy.

— Oreruvixa, tereo ke Ramote-Gileade katy, ha'e py ma ndepo'aka 'rã, mba'eta SENHOR omboaxapa 'rã ndepo py — he'i okuapy.

2 Crônicas 18.12-27

¹³ Ha'e gui tembiguai Micaías reruarã oo va'ekue ixupe ijayvu vy aipoe'i:

— Ma'ë, profeta kuery ikuai va'e ma pete'i rami ijayvu kuri huvixa pe mba'emo porã re anho. Ndee voi ndeayvu 'rãgue ha'e kuery ijayvuague rami ae, mba'emo porã re anho.

¹⁴ Ha'e rã Micaías ombovai:

— Anhetë ete SENHOR oikove va'e rupi aura vy aipoe'e: Xee ma SENHOR aipoe'i ukua rami ae 'rã xeyvu — he'i.

¹⁵ Ha'e gui ma huvixaa py ovaë ramove ixupe oporandu:

— Micaías, toroo ae pa Ramote-Gileade re ropu'ã vy, tyrã pa toroo eme?

Micaías ombovai:

— Tapeo, ha'e vy pendepo'aka 'rã, mba'eta ndepo py SENHOR omboaxapa 'rã — he'i.*

¹⁶ Ha'e rami rã huvixa aipoe'i ixupe:

— Mbovykue ma tu ndevy xeyvu, SENHOR rery rupi anhetë va'e re anho ndeayvu aguã?

¹⁷ Ha'e rã Micaías aipoe'i:

— Israel kuery aexapa vyty áry rupi omoaĩmbaa ramo, vexe'i ija e'y va'e rami. Ha'e ramo SENHOR aipoe'i: “Peva'e kuery ma ija e'y va'e vy pete'i-te'i too porã ngoo katy”, he'i kuri xevy.

¹⁸ Ha'e ramo Israel pygua huvixa aipoe'i Josafá pe:

— Aipoe'a ae ma ndevy: “Ha'e va'e ma xerenonderã re nomombe'ui ae iporã va'e, ha'e rã iporã e'y va'e anho”, ha'e ma voi kuri.

¹⁹ Ha'e gui ma Micaías ijayvuve tema:

— Endu ha'vy SENHOR ayvu. Xee aexa SENHOR guenda openaaty py oguapy oiny rã, ha'e oia py ikuai avi ixondaro kuery yva pygua ha'e javi, ijaxu e'ya re ha'e ijaxua re.

²⁰ SENHOR oporandu: “Mava'e 'rã tu Acabe mbotavyarã oo, Ramote-Gileade tetã py omano aguã?” he'i ramo pete'i ma pete'i rupi ijayvu, ha'e rã amboae ma amboae rami ijayvu.

²¹ Ha'e gui ma pete'i nhe'ë ou vy ojexa uka SENHOR renonde. Ha'e va'e aipoe'i: “Xee ma ambotavy 'rã” he'i. Ha'e rã SENHOR oporandu: “Mba'e py ha'vy?”

²² Ombovai: “Aa 'rã nhe'ë imbotavyarã aĩ ixepugua profeta kuery ha'e javi juru re”, he'i. Ha'e rami rã SENHOR aipoe'i: “Ndee ma rembotavy 'rã, amboae kuery gui ndepo'akave vy. Tereo ha'vy, ejapo ha'e rami”, he'i.

²³ Ha'e rami rã kova'e profeta kuery ndevyguia ikuai va'e juru re SENHOR omo'i ra'e nhe'ë nembotavyarã. Ha'e rã SENHOR ae nderovai ijayvu mba'emo vai oiko aguã re — he'i.

²⁴ Ha'e ramo Quenaana ra'y Zedequias onhemboja vy oipete Micaías. Ha'e vy aipoe'i:

— Ma rupi tu ha'vy xegui SENHOR nhe'ë oë ndereve ijayvu aguã?

²⁵ Micaías ombovai:

— Reikuaa 'rã opy ja'o py renhemi aguã reike jave — he'i.

²⁶ Ha'e gui Israel pygua huvixa ju aipoe'i:

— Pejopy ke Micaías, ha'e pemboaxa tetã ruvixa Amom ha'e huvixa ra'y Joás po py.

²⁷ Ha'e vy aipopeje: “Po rami huvixa ijayvu: ‘Pemboty nhuã py kova'e ava, ha'e pembojexavai mbojape ha'e yx ruxã'i kuerei peme'ëa py, ajevvy porã ju e'ya ja', he'i.”

* ^{22:15} Micaías ma profeta ramigua kuery ayvu rupi rive ranhe ijayvu, anhetë va'e'ya rami oikuaa uka vy.

²⁸ Ha'e ramo Micaías aipoe'i:

— Tei xapy'a rei anhetê ri rejevvy porã ramo SENHOR ayvu rupi e'y'xayvu ramo ma 'rã.

Aipoe'ive ju:

— Peê kuery ha'e javi, pendu pota pova'e re! — he'i.

2 Crônicas 18.28-34

²⁹ Ha'e gui ma Ramote-Gileade tetã katy Israel pygua huvixa jogueraa Judá pygua huvixa Josafá reve.

³⁰ Israel pygua huvixa aipoe'i Josafá pe:

— Xee ma amboae rami anhemonde reve 'rã aa joe apu'ã aguã katy. Ha'e rã ndee ma ndeao py ae 'rã renhemonde — he'i. Ha'e rami vy Israel pygua huvixa amboae rami onhemonde reve oo joe opu'ãa py.

³¹ Síria pygua huvixa aipoe'i ma voi okaróxa mboguataa trinta e dois huvixa ikuai va'e pe: “Pepu'ã eme ou va'e-va'e rovai, yvatekueve ikuai teĩ, ha'e rã Israel pygua huvixa rovai anho'i”, he'i va'ekue.

³² Ha'e gui huvixa karóxa mboguataa kuery ma Josafá oexa vy

— Peva'e ae ri nhi'ã Israel pygua huvixa — he'i okuapy. Ha'e vy ha'e katy oje'oi ojoko aguã. Ha'e ramo Josafá ojavukai.

³³ Ha'e gui huvixa karóxa mboguataa kuery ma Israel pygua huvixa e'y' ae ra'ea oikuaa vy oejapa ju oje'oiivy.

³⁴ Ha'e gui ma peteĩ ava guyrapa xã omoatã vy opoia katy rei opoi vy onhyvõ Israel pygua huvixa pexo regua pa'ũa py rive. Ha'e ramo aipoe'i guembiguai karóxa mboguataa va'e pe:

— Ejere joe opu'ãa mbyte gui xereraa aguã, mba'eta xepyxa ma — he'i.

³⁵ Ha'e va'e ára ma joe opu'ãve tema okuapy. Ha'e rã huvixa ma Síria kuery oexaa py omopu'ãa imoiny ikaróxa py, ha'e ijaia gui huguy onheẽ oiny karóxa py rupi. Ha'e rire ka'aru ma jave omano.

³⁶ Kuaray ndojopevei ma jave onhendu peteĩ ayvu xondaro kuery ikuai rupi, “Peteĩ-teĩ tapeo pendekoa katy, peteĩ-teĩ tapeo pendeyvy katy ae”, he'i va'e.

³⁷ Huvixa Acabe omano ma ramo Samaria tetã py ogueraa vy onhono porã okuapy ha'e py.

³⁸ Ha'e rã ikaróxa ma Samaria py yy ojoko pyre yv'yry ojoi ramo jagua oere okuapy huvixa ruguykue, SENHOR aipoe'igague rami vy. Ha'e va'e yy py kunhague itavy rei va'e voi ojau 'rã.

³⁹ Ha'e gui oive rei tema Acabe rekokue regua. Ha'e rami avi oora marfim gui anho ojapoaague, tetã ha'e mba'emo ojapo va'ekue ha'e javi noi 'rã teve kuaxia Israel pygua huvixa kuery rekokue oia re?

⁴⁰ Ha'e rami py Acabe ndoikovevei'i ma guamoĩ kueryague rami. Ha'e ramo ta'y Acazias ju oĩ nguu rekovia.

2 Crônicas 20.31-37

⁴¹ Ha'e gui Israel pygua huvixa Acabe irundy ma'et'y re ma oĩ jave py Asa ra'y Josafá oĩ Judá kuery ruvixarã.

⁴² Huvixa oĩ ypy'i jave Josafá ma trinta e cinco ma'et'y oguereko. Ha'e vy vinte e cinco ma'et'y re huvixa oĩ Jerusalém py. Ixy rery ma Azuba, Sili rajy.

⁴³ Ha'e ma nguu Asa oikoague rupi ae oiko. Ha'e va'e rupi oikoa gui ndojepe'ai vy ha'evea ramigua meme ojapo SENHOR renonde.

⁴⁴ Ha'e rami teĩ yvy'ã rupi ombojerovia atyrã ojapo pyre ndoipe'ai ramo ha'e va'e py heta va'e kuery mba'emo ome'ẽ ha'e heakuã porã va'e oapy tema okuapy.

⁴⁵ Josafá ma peteĩ rami ikuai Israel pygua huvixa reve.

⁴⁶ Ha'e gui oive rei tema Josafá rekokue regua. Ha'e rami avi opo'akaa oexa ukaague, joe opu'ãague, ha'e mba'emo ojapo va'ekue ha'e javi noi 'rã teve kuaxia Judá pygua huvixa kuery rekokue oia re?

⁴⁷ Ha'e rami avi oyvy gui oi'pe'apa avakue ta'angaa pegua itavy rei va'ekue, nguu Asa teri oĩ jave py opyta va'ekue ha'e javi.

⁴⁸ Ha'e va'e jave ma noi huvixave Edom py, ha'e rã peteĩ oiko joe opena ukua va'e.

⁴⁹ Josafá ojapo kanoã guaxu Társis guigua Ofir katy ouro re oo aguã, va'eri ndooi, Eziom-Geber py kanoã guaxu opêmba rã.

⁵⁰ Acabe ra'y Acazias aipoe'i Josafá pe:

— Xerembiguai kuery toje'oi avi kanoã guaxu py nerembiguai kuery reve — he'i teĩ Josafá ndoipotai.

⁵¹ Ha'e gui Josafá ndoikovevei'i ma guamoĩ kueryague rami. Ha'e ramo onhono porã tetã guamoĩ Davi rekoague py. Ha'e gui ta'y Jeorão ju oĩ nguu rekovia.

Israel pygua huvixa Acazias oĩ jave guare

⁵² Ha'e gui Judá pygua huvixa Josafá dezessete ma'et'y re ma oĩ jave py Acabe ra'y Acazias oĩ Israel pygua huvixarã, Samaria py. Ha'e vy mokoĩ ma'et'y peve opena Israel kuery re.

⁵³ Ha'e va'e ma ha'eve'y' va'e ojapo oikovy SENHOR renonde rupi, mba'eta nguu ha'e oxy oikoague rami ae oiko, ha'e Nebate ra'y Jeroboão Israel kuery oguerojevypa ague rupi.

Ha'e rami vy Baal pe rive oiko omboetea py. Ha'e rami py ojapo SENHOR Israel kuery ruete ipoxy aguã rami, nguu ojapoaague ha'e javi rami ae ju.

Mokoña kuaxia huvixave rei kuery rekokie oĩa

Mokoña kuaxia huvixave rei kuery rekokie oĩa

Kova'e kuaxia para re ma oĩ mokoĩ henda py judeu kuery ikuaia: kuaray ijapu'a'ia katy ha'e ipuku-a katy. Kuaray ijapu'a'ia katy ikuai va'e ma Israel kuery. Opa py Assíria pygua kuery ou vy ojuka, ombojexavai ha'e escravo-rã ogueraapa. "Ha'e va'e nunga oiko raka'e mba'eta Senhor nguete pe Israel kuery ojevavypa ramo, Egito yvy gui oguerupa rire teĩ, Egito pygua huvixa Faraó po'akaa rupi ikuaiaague gui. Ha'e rami rire teĩ amboae regua tuete ramigua kuery ju ha'e kuery omboete okuapy. Yvy regua kuery reko rupi rive ikuai. ... Ha'e nunga rupi Senhor ojou vai ete Israel kuery, ha'e vy guenonde gui oipe'apa. Omomytave ranhe va'e ma Judá kuery anho" (17.7-8a, 18).

Ha'e gui ma Judá kuery voi nonhe'ẽ rendui ramo Babilônia pygua kuery po py Senhor omboaxapa. "Mba'eta profeta ha'e imba'ekuaa va'e kuery ha'e javi rupi Senhor ijayvu va'ekue Israel ha'e Judá kuery pe. ... Ha'e rami teĩ ha'e kuery noendu potai okuapy. ... Ha'e nunga rupi Senhor oea Israel kuery regua ha'e javi. Omoingo axy rei vy omboaxapa hovaigua kuery po py, guenonde gui oipe'apa peve" (17.13a, 14a, 20).

Huvixa Acazias pe profeta Elias ayvu omombe'ua ague

¹ Huvixa Acabe omano ma rire Moabe kuery opu'ã okuapy Israel kuery rovai.

² Ha'e gui huvixa Acazias ma Samaria tetã py oikoa py peteĩ oo yvateve va'e py janelo oĩ va'e gui ho'a vy imba'eaxy vaipa. Ha'e rami vy guembiguai kuery omondouka oayvu reraarã. Ha'e kuery pe aipoe'i:

— Tapeo, peporandu Ecom pygua kuery ruete Baal-Zebube pe, aikuaa aguã xemba'eaxy gui akuera 'rã, tyrã pa anya — he'i.

³ Ha'e gui ma Tisbé pygua Elias pe SENHOR-a guigua anjo aipoe'i:

— Epu'ã ke, tereo penhovaexĩ aguã Samaria pygua huvixa rembiguai kuery reve. Aipo're ha'e kuery pe: "Xapy'a rei nda'u Israel yvy re nda'ipoi ri Nhanderuete, Ecom pygua ruete Baal-Zebube pe rive peporandu aguã?"

⁴ Ha'e nunga rupi SENHOR aipoe'i uka: 'Nderupa ndetuaia gui nderevyvei 'rã, remano 'rãe', he'i uka', 're 'rã. Ha'e rire Elias oo ju.

⁵ Ha'e gui tembiguai kuery ma huvixaa py ju ojevvy. Ha'e rã oporandu ha'e kuery pe:

— Mba'e tu oiko, pejevvy aguã?

⁶ Ha'e kuery ombovai:

— Peteĩ ava orerovaexĩ ouvy kuri. Ha'e vy aipoe'i orevy: "Tapeo ke, pejevvy ju huvixa penembouarea py. Ha'e vy aipopeje ixupe: 'Po rami SENHOR ijayvu: Xapy'a rei nda'u Israel yvy re nda'ipoi ri Nhanderuete, Ecom kuery ruete Baal-Zebube pe rive reporandu uka aguã? Ha'e nunga rupi nderupa ndetuaia gui nderevyvei 'rã, remano 'rãe' ", he'i kuri.

⁷ Ha'e ramo huvixa oporandu ha'e kuery pe:

— Mba'exagua ava tu penerovaexĩ ouvy vy ha'e rami ijayvu ra'e?

⁸ Ombovai vy

— Mba'emo pirekue py onhemonde ha'e vaka pire py iku'axã va'e — he'i okuapy.

Ha'e ramo aipoe'i:

— Ha'e va'e ko Tisbé pygua Elias ae ra'e.

Elias-a py mboapy xondaro ruvixa oo rã guare

⁹ Ha'e gui Elias oĩa katy huvixa omondouka peteĩ xondaro ruvixa cinqüenta avakue re opena va'e, ixupegua xondaro kuery ha'e javi reve. Ha'e ramo ha'e kuery ma profeta oĩa katy oẽ jogueravy. Yvyty apyte áry oguapy oinya py ovaẽ vy xondaro ruvixa aipoe'i ixupe:

— Nhanderuete remimbo'e, huvixa ma "Toguejy ke", he'i uka.

¹⁰ Ha'e rã Elias ombovai xondaro ruvixa cinqüenta re opena va'e pe:

— Xapy'a rei xee Nhanderuete remimbo'e ri aiko ramo toguejy ha'vy tata yva gui, tanemomba, ndevygua cinqüenta avakue reve — he'i ramove yva gui tata ho'a xapy'a vy omomba, cinqüenta va'ekue guive.

¹¹ Ha'e gui ma ha'e oĩa katy huvixa omondoukave ju xondaro ruvixa cinqüenta avakue reve. Ha'e ramo ha'e va'e ju aipoe'i ixupe:

— Nhanderuete remimbo'e, huvixa ma "Toguejy pojava ke", he'i uka.

¹² Elias ombovai vy aipoe'i ixupe:

— Xapy'a rei rã xee Nhanderuete remimbo'e ri aiko ramo toguejy tata yva gui, ha'e tanemomba, ndevygua cinqüenta avakue reve — he'i ramove yva gui Nhanderuete guigua tata ho'a vy omomba, cinqüenta va'ekue guive.

¹³ Ha'e gui mboapykuea ma huvixa omondouka xondaro ruvixa cinqüenta avakue reve. Ha'e ramo xondaro ruvixa oo vy oẽ yvy'ã re, ha'e Elias renonde py oĩ guenapy'ã re. Ha'e vy ixupe ojerure vy aipoe'i:

— Nhanderuete remimbo'e, ajerure ndevy: Tovare xerekove xere rema'ëa rupi, ha'e kova'e nerembiguai kuery cinqüenta ikuai va'e rekove guive.

¹⁴ Mba'eta yva gui tata ho'a vy omomba raka'e mokoĩve xondaro ruvixa, ixondaro cinqüenta ikuai va'ekue reve. Ha'e nunga rupi toware xerekove xere rema'ëa rupi — he'i.

¹⁵ Ha'e gui SENHOR-a guigua anjo aipoe'i Elias pe:

— Eguejy ke peva'e reve, ekyje eme guive — he'i. Ha'e ramo opu'ã vy oguejy ovy hexeve huvixaa katy.

¹⁶ Ha'e gui ma huvixa pe aipoe'i:

— Po rami SENHOR ijayvu: “Mba'e re tu nerembiguai kuery remondouka Ecom kuery ruete Baal-Zebube pe oporandu va'erã? Israel vyv re nda'u nda'ipoi ri Nhanderumete, ixupe reporandu aguã? Ha'e nunga rupi upe va'e tupa ndetuia gui nderevyvei 'rã, remano 'rãe”, he'i.

Acazias omanoague

¹⁷ Ha'e gui ma huvixa omano, SENHOR avyu Elias omombe'uague rami vy. Ha'e gui Acazias ta'y va'e'y ramo tyvy Jorão ju oĩ hekovia. Josafá ra'y Jeorão Judá pygua huvixa oĩ rire mokoĩ ma'etỹ rai'i maa py omboypy opena aguã.

¹⁸ Ha'e gui oĩve rei tema Acazias rekokie regua. Ha'e rami avi hi'arandua ha'e mba'emo ojapo va'ekue ha'e javi noi 'rã teve kuaxia Israel pygua huvixa kuery rekokie oia re?

2

Elias rupive Eliseu ooaque

¹ Ha'e gui SENHOR ma yvate katy omboaguyje ta heravy Elias peteĩ yvytu jere rupi. Ha'e rami jave Elias oo Gilgal gui, hupive Eliseu oo avi.

² Ha'e ramo Elias aipoe'i Eliseu pe:

— Epyta ke apy, mba'eta SENHOR xemondouka ta Betel katy.

Eliseu ombovai:

— Anhetẽ ete SENHOR oikove va'e rupi, ha'e nderekove rupi avi aura vy aipoa'e: Xee ma noromondoukai 'rã ndee anho'i — he'i. Ha'e rami vy oguejy jogueravy Betel katy.

³ Ha'e gui Betel py profeta kuery remimbo'e ikuai va'e oẽmba jogueravy Eliseu ovaexĩ aguã. Ha'e vy aipoe'i okuapy ixupe:

— Reikuaa ma pa kurive'i SENHOR omboaguyje heravy 'rãa nderuvixa neakã áry rupi?

Ombovai:

— Xee voi aikuaa ae ma. Pekyrirĩ ke — he'i.

⁴ Ha'e gui ma Elias aipoe'i Eliseu pe:

— Epyta ke apy ae, mba'eta SENHOR ma Jericó katy ju xemondouka ta.

Ombovai:

— Anhetẽ ete SENHOR oikove va'e rupi, ha'e nderekove rupi avi aura vy aipoa'e: Xee ma noromondoukai 'rã ndee anho'i — he'i vy jogueraave ju Jericó katy.

⁵ Ha'e gui Jericó py profeta kuery remimbo'e ikuai va'e oẽmba jogueravy Eliseu ovaexĩ aguã. Ha'e vy aipoe'i okuapy ixupe:

— Reikuaa ma pa kurive SENHOR omboaguyje heravy 'rãa nderuvixa neakã áry rupi?

Ombovai:

— Xee voi aikuaa ae ma. Pekyrirĩ ke — he'i.

⁶ Ha'e gui ma ixupe Elias aipoe'i:

— Epyta ke apy, mba'eta SENHOR xemondouka ta Jordão yakã katy.

Ombovai:

— Anhetẽ ete SENHOR oikove va'e rupi, ha'e nderekove rupi avi aura vy aipoa'e: Xee ma noromondoukai 'rã ndee anho'i — he'i vy joupive ju jogueraa.

⁷ Oje'oi avi cingüenta avakue profeta kuery remimbo'e va'e. Ha'e gui Jordão yakã rembe re mokoĩve opyta ramo hembiguai kuery voi opytapa okuapy mombyry'i.

⁸ Ha'e gui ma Elias oao puku omboi vy oipokapa, ha'e oinupã yy. Ha'e ramo yy ma mbyte rupi oja'o. Ha'e ramo mokoĩve ipiru reia rupi oaxa jogueravy.

Yva re Elias ogueraague

⁹ Ha'e gui mokoĩve oaxa ma vy Elias aipoe'i Eliseu pe:

— Ejerure xevy peteĩ ndevy ajapo aguã, ndegui xepe'aa e'y'i re.

Eliseu aipoe'i:

— Ajerure xevy pe hetave remboaxa aguã nenhe'ẽ — he'i.

¹⁰ Elias ombovai:

— Haxy va'e re ri rejerure, teĩ xapy'a rei ndegui xepe'aa jave xerexa ri ramo rejejureague rami ae 'rã oiko. Ha'e rã ndaxerexai ri ramo ndoikoĩ 'rã rerejureague — he'i.

¹¹ Mokoĩve oove ha'e jogueroavy jogueravy teri reve ha'e kuery mbyte ojekuaa xapy'a peteĩ karóxa ha'e kavaju tata revegua, joegui omboja'o. Ha'e rã Elias ma yvate katy oipe'aa heravy peteĩ yvytu jere mbyte py.

¹² Ha'e nunga Eliseu oexa ho'amy vy ojapukai:

— Xeru, xeru! Ha'vy Israel kuery karóxa ha'e kavaju árygua kuery! — he'i vyve ndoexa jevyvei. Ha'e vy oao ojopy vy omondo mbyte rupi.

¹³ Ha'e vy ojopy Elias mba'e va'ekue ao puku ixupe guarã oity va'ekue. Ojopy heravy vy ojevyy ju. Ha'e gui ovaẽ ju ho'amy Jordão yakã rembe re.

¹⁴ Ha'e vy ao puku Elias oity va'ekue py oinupã yy. Ha'e vy aipoe'i:

— Mamo tu oĩ SENHOR Elias ruete va'e? — he'i vy yy oinupã ramove oja'o mbyte rupi. Ha'e ramo Eliseu oaxa ju ouvy.

Profeta remimbo'e kuery Elias oeka teĩ okuapyague

¹⁵ Ha'e nunga profeta kuery remimbo'e henonde rupi ikuai va'e ha'e nunga oexa okuapy, Jericó py ikuai py ae. Ha'e vy ijayvu:

— Elias re nhe'ê oĩ va'ekue ma Eliseu re ju oĩ ra'e — he'i okuapy. Ha'e vy ovaexĩ aguã katy jogueru, ha'e henonde ojero'a okuapy yvy peve.

¹⁶ Ha'e vy aipoe'i okuapy:

— Apy ore neremimbo'e kuery regua ikuai cinqüenta avakue ipy'a guaxukueve va'e. Emondouka na nderuvixa oeka aguã. Xapy'a rei rã SENHOR guigua nhe'ê ogueraa ri teĩ, oea nho 'rã peteĩ vyty áry, e'ỹ vy yvy'ã guy katy mba'e.

Ombovai vy

— Pemondouka eme — he'i.

¹⁷ Ha'e rami teĩ ha'e kuery onhea'ãve tema hexeve ramo nda'evei vy

— Pemondouka ha'vy — he'i ha'e kuery pe. Ha'e ramo omondouka okuapy cinqüenta avakue. Mboapy ára re ha'e va'e kuery oeka okuapy teĩ ndojoui.

¹⁸ Ha'e gui ma Jericó py ojevypa ju Eliseu oĩ teria py. Ha'e ramo ha'e kuery pe aipoe'i:

— “Tapeo eme” nda'ei ri ty'y raka'e?

Jericó py yy iporã jevy aguã rami Eliseu ijayvuague

¹⁹ Ha'e gui Eliseu pe tetã pygua avakue aipoe'i okuapy:

— Xeruvixa, apy ma rexa rami oretetã oĩ porã ete teĩ yy ma na 'iporã, neĩ yvy ma voi na 'iporã nhamat'etỹ aguã — he'i okuapy.

²⁰ Ha'e ramo

— Peru ha'vy xeve pe hy'a ipyau'i va'e, juky reve — he'i ramo ogueru okuapy oĩa py.

²¹ Ha'e gui Eliseu ma yvu oĩ va'e py oo vy onhoẽ juky yy py. Ha'e vy aipoe'i:

— Po rami SENHOR ijayvu: “Ajapo kova'e yy iporã ju aguã rami. Ha'e rami rire ndajojukavei, neĩ mba'emo aju ma voi nomoingo e'ỹve ma 'rã”, he'i.

²² Ha'e ramove yy ikuai va'e iporãmba ju aỹ peve guarã, Eliseu ijayvuague rami vy.

Kunumigue Eliseu ojoi rei okuapyague

²³ Ha'e gui ma Jericó tetã gui Eliseu oove ju Betel katy. Tape rupi oo oiny ramo amongue kunumigue'i oẽ jogueruvy tetã katy gui. Ha'e va'e kuery ojoi rei rupi aipoe'i okuapy ixupe:

— Neĩ ke akã perõ, eẽ ke eovy. Neĩ ke akã perõ, eẽ ke eovy — he'i okuapy.

²⁴ Ha'e ramo Eliseu guakykue katy ojere vy oexa vy ha'e kuery pe ijayvu vai, SENHOR rery rupi. Ha'e ramove ka'aguy gui mokoĩ urso oẽ ouvy vy omboa'ypa quarenta e dois kunumigue ikuai va'ekue.

²⁵ Ha'e rire Eliseu Carmelo vyty katy oo, ha'e gui Samaria tetã katy ju ojevuy.

3

Israel pygua huvixa Jorão oĩ jave guare

¹ Ha'e gui ma Acabe ra'y Jorão ju oĩ Israel kuery ruvixa. Samaria tetã py oĩ ypy, dezoito mat'etỹ re ma Judá pygua huvixa Josafá oĩ rire. Ha'e vy doze mat'etỹ re oĩ.

² Ha'e va'e ma SENHOR renonde rupi ha'eva'ã ramigua ojapo. Ha'e rami avi nguu rami ete'ỹ ojapo, neĩ oxy rami e'ỹ guive. Mba'eta oi'pe'a Baal peguarã ita nguu omo'ã va'ekue.

³ Ha'e rami teĩ Nebate ra'y Jeroboão ojevuyague rupi ae tema oiko, Israel kuery oguerovejavya py. Ha'e rami oikoa gui ndojepe'ai ae.

Huvixa kuery Moabe pygua kuery oitypa 'rã rami Eliseu omombe'u ma voiaque

⁴ Ha'e gui Moabe pygua huvixa Mesa va'e ma mymba kuery re opena va'e ramo ixugui Israel pygua huvixa okobra jepi 'rã cem mil vexa'i ra'y ha'e gui cem mil vexa'i ava rague.

⁵ Ha'e rami teĩ huvixa Acabe omano ma rire Moabe pygua huvixa opu'ã Israel pygua huvixa Jorão rovai.

⁶ Ha'e ramove Samaria tetã gui Jorão oẽ vy omboatypa Israel kuery ha'e javi.

⁷ Judá pygua huvixa Josafá pe voi aipoe'i uka:

— Moabe pygua huvixa opu'ã ma xerovai. Ndee voi pa reo 'rã xereve Moabe kuery rovai re nhapu'ã aguã? Ombovai:

— Xee aa 'rã. Xee voi aa 'rã ndee rami, xevelygua avakue ma ndevygua avakue rami avi 'rã ikuai, ha'e xerymba kavaju kuery ma nerymba kuery rami avi 'rã ikuai ndepo py — he'i.

⁸ Ha'e ramo Jorão oporandu:

— Mava'e tape rupi 'rã tu jaje'oi?

Ombovai:

— Edom tekoa e'ã rupi tape oĩ va'e rupi rima ha'eve — he'i.

⁹ Ha'e rami vy huvixa Israel pygua, Judá pygua ha'e Edom pygua reve jogueraa.

Ha'e gui sete araa py ma ha'e kuery uguataa rupi nda'ipovei ma yy xondaro kuery ha'e mymba kuery ogueraa va'e pe.

¹⁰ Ha'e ramo Israel pygua huvixa aipoe'i:

— Aikore! Mba'eta mboapy huvixa jaiko va'e SENHOR nhanerenoi nhanemboaxapa aguã Moabe kuery po py.

¹¹ Ha'e rã Josafá oporandu:

— Ndoikoi pa apy SENHOR pegua profeta, ixupe ranhe SENHOR pe nhaporandu uka aguã?

Ha'e ramo petei Israel pygua huvixa rembiguai oi va'e ombovai:

— Apy ma oi Safate ra'y Eliseu, Elias ojepoei aguã yy ogueru va'ekue — he'i.

¹² Josafá aipoe'i:

— Ha'e va'e ma oikuaa 'rã SENHOR guigua ayvu — he'i ramo Eliseu-a katy Josafá reve jogueraa huvixa Israel ha'e Edom pygua.

¹³ Ha'e rami tei Eliseu aipoe'i Israel pygua huvixa pe:

— Mba'e tu areko ndereve? Tereo ke eporandu nderu ha'e ndexy pegua profeta kuery pe ae.

Ha'e rã Israel pygua huvixa aipoe'i ixupe:

— Nda'evei, mba'eta SENHOR ae mboapyve huvixa roiko va'e orerenoi va'ekue Moabe kuery po py oremboaxa aguã — he'i.

¹⁴ Eliseu aipoe'ive ju:

— Anhetê ete SENHOR ipo'akapa ha'e oikove va'e henonde rupi xee aikoa va'e rupi aura vy aipoa'e: Judá pygua huvixa Josafá xee namboetei va'e rire naendu potai 'rãgue ndeayvua, nei ndere nama'ei 'rãgue guive.

¹⁵ Ha'e gui peru ha'vy xea py petei imba'epu va'erã — he'i.

Ha'e ramo oia py imba'epu va'e ombopu jave Eliseu re ou Nhandueruete po'akaa.

¹⁶ Ha'e ramo aipoe'i:

— Po rami SENHOR ijayvu: “Pejo'o-jo'o ke vyvya kova'e vyvugua ha'e javi rupi”, he'i.

¹⁷ Mba'eta SENHOR ijayvuve ju: “Vytytu napendui, ha'e oky ndapexai tei kova'e vyvugua ha'e javi rupi 'rã tynyê yy. Ha'e ramo peê kuery pey'u 'rã, penerymba vaka ha'e penerymba kuery ha'e javi guive”, he'i.

¹⁸ Ha'e va'e ma SENHOR pe rã mba'e'y. Ha'e gui pendepo py omboaxa avi 'rã Moabe kuery.

¹⁹ Pembovaipa 'rã ha'e kuery retã ikorapa ha'e vyvatekueve va'e ha'e javi. Pejajapa 'rã vyvra porãgue, ha'e pembotyapa 'rã yvu ikuai va'e ha'e javi. Ha'e gui mba'ety porãgueve ha'e javi rupi 'rã pemombo ita — he'i.

²⁰ Ha'e gui ma ko'êgue mba'emo aju ome'êa jave oma'ê rã Edom yvy katy gui yy ou xapy'a vy omonyêmba yvy.

Moabe kuery oitypaa ague

²¹ Ha'e gui ma Moabe kuery oendupa okuapy ha'e kuery rovai huvixa kuery opu'ã aguã ouague. Ha'e rami vy omboatypa tembororu revegua ma guive rã, kunumigieve ha'e tujakueve va'e voi. Ovyvy apy rupi omoimba avi imbokuapy harõarã.

²² Ha'e gui ko'êgue yy áry rupi kuaray oê jekuaa jave Moabe kuery ovypa vy guenonde katy rupi oma'ê okuapy rã yy tuguy rami ojekuaa.

²³ Ha'e vy aipoe'i okuapy:

— Peva'e tu tuguy rima. Huvixa kuery meme nhi'ã nhomomba ra'e, jujukaa py! Ha'e gui Moabe kuery, aỹ ma jaa jajopy imba'e rei-reikue! — he'i.

²⁴ Ha'e gui ma Israel kuery ikuai py ha'e kuery ovaê rã Israel kuery opu'ãmba vy oitypa Moabe kuery. Ha'e rã ha'e kuery gui onhamba. Ha'e ramo ijyvy re Israel kuery oo vy ha'e py voi ojukapa okuapy Moabe kuery regua.

²⁵ Ha'e vy ombovaipa hetã ikuai va'e, ha'e vy mba'ety porãgueve rupi petei-tei omombo ita, omonyêmba peve. Ombotyapa yvu ikuai va'e, ha'e ojajapa vyvra iporãgueve ikuai va'ekue. Quir-Haresete py anho hi'ai teri tetã kora, va'eri nhemoatã va'e revegua kuery ojokopa vy ojukapa avi okuapy.

²⁶ Ha'e gui Moabe pygua huvixa ma hovaigua kuery ipo'akave ta ramo oexa vy setecentos avakue kyxe revegua ogueraa ngupive, Edom pygua huvixa reve joguero'a aguã, tei novaê reguai.

²⁷ Ha'e rami vy ojopy gua'y jypykue'i, guekovia huvixarã omoi va'erã va'e, ha'e vy ikora áry ae ojuka vy oapypa. Ha'e rami rã Israel kuery rovai ju ojerovia reive okuapy. Ha'e ramo ojepe'apa ha'e gui, ovyvy katy ae ju ojevyy aguã.

4

Imeve'y va'e pe azeite oata e'y aguã rami Eliseu ojapougue

¹ Ha'e gui petei profeta remimbo'e ra'yxykue imeve'y va'e ojerure Eliseu pe. Ha'e vy aipoe'i:

— Xeme neremimbo'e oiko va'ekue ma omano. Ndee voi reikuaa SENHOR renonde ojererokyjea rupi oikoague. Ha'e gui aỹ mba'emo porukaare ovaê ta ma ouvy xepi'a kuery mokoive ogueraa aguã escravo-rã.

² Ha'e ramo Eliseu oporandu ixupe:

— Mba'e tu ajapo 'rã ndevy? Emombe'u ke mba'e pa rereko ndero py.

Kunha va'e ombovai:

— Xee nerembiguai mba'eve ndarekoi xero py, petei ryru azeite e'y vy — he'i.

³ Ha'e ramo Eliseu aipoe'i:

— Tereo ha'vy, hyrurã re ejerure ndero katy'i rupi ikuai va'e ha'e javi pe. Hyrukue anho eru, mboapy'i e'y ta'vy.

⁴ Ha'e gui ma eike ju ndero py, ha'e emboty ju okê, ndepi'a kuery reve penhembotyapa aguã. Ha'e vy azeite rereko va'e enhõê hyru rejou va'ekue ha'e javi py. Ha'e vy ke erova tynyê va'e-va'e ijyke katy — he'i.

⁵ Ha'e gui ma oia gui kunha va'e ojepe'a vy onhembotypa opi'a kuery reve. Ha'e gui oxy oia py ha'e kuery hyru omboaxa ra'ixy omonyẽ tema.

⁶ Hyru omonyẽmba ma vy ixu aipoe'i peteĩ opi'a pe:

— Eru ju peteĩ hyrurã.

Ha'e va'e ombovai:

— Apy ma nda'ipovei ma hyrurã — he'i. Ha'e ramove azeite opa.

⁷ Ha'e gui kunha va'e oo vy omombe'u Nhanderuete remimbo'e va'e pe. Ha'e ramo ha'e aipoe'i:

— Tereo, evende azeite, ha'e gui epagapa rereveague. Ha'e gui hembryekue ma topyta ndepi'a kuery reve pe'u va'erã.

Suném pygua kunha Eliseu oipytyvõague

⁸ Peteĩ ára Eliseu oaxa ovy Suném tetã rupi. Ha'e py ma oiko peteĩ kunha oguerekopa va'e. Ha'e va'e ma oenoĩ okaru aguã. Ha'e rupi oaxa nhavõ ovaẽ kuerei 'rã ha'e py okaru aguã.

⁹ Kunha va'e aipoe'i ome pe:

— Xee aexa rã kova'e ava nhandea rupi oaxa jepi va'e ma Nhanderuete remimbo'e icky'a e'ỹ va'e.

¹⁰ Ha'e nunga rupi jajapo na vyate katy peteĩ opy ja'o'i oke atyrã. Ita gui 'rã jajapo uka huparã nhamoĩ aguã ha'e py, mesa, tenda ha'e tataendy renderã, nhandero py ovaẽ vy ha'e py oke aguã — he'i.

¹¹ Ha'e gui peteĩ ára ha'e py Eliseu ovaẽ jevy vy okeaty py oo vy onheno oupy.

¹² Ha'e vy aipoe'i guembiguai Geazi pe:

— Enoĩ ranhe Suném pygua kunha — he'i ramo oenoĩ rã kunha va'e oĩ profeta oia py.

¹³ Eliseu aipoe'i uka kunumi va'e pe:

— Aipo're kunha va'e pe: “Ma'ẽ, orere repena porã opa mba'e py. Mba'e 'rã tu ha'vy ajapo ndevy? Oiko pa nderekovia huvixa pe ajerure aguã? Tyrã pa xondaro kuery ruxixa pe?” 're 'rã ixupe.

Kunha va'e ombovai:

— Arekopa rei apy xeretarã kuery mbyte py aikoa py — he'i.

¹⁴ Ha'e ramo profeta oporanduve ju:

— Mba'exagua nda'u ajapo 'rã ixupe?

Geazi ombovai:

— Ne'exa, ha'e ndoguerekoĩ omemby, ime tuja'i ma guive — he'i.

¹⁵ Eliseu ju

— Enoĩ ha'vy — he'i.

Oenoĩ ramo kunha va'e ou vy okẽ py hi'aĩ.

¹⁶ Ha'e ramo profeta aipoe'i:

— Peteĩ ma'et'ya py kova'e ára ojeupity jevy ma jave reikuavã'i 'rã peteĩ kyri va'e — he'i.

Kunha va'e aipoe'i:

— Any teve xeruvixa, Nhanderuete remimbo'e reiko va'e. Ndeapu eme xee nerembiguai pe — he'i.

¹⁷ Ha'e va'e rire kunha va'e oguereko'i ma. Ha'e vy peteĩ ma'et'ỹ opaa py porã oikuavã peteĩ ava'i, Eliseu aipoe'iaque rami vy.

¹⁸ Ha'e gui ma ipi'a tujave ma vy peteĩ ára oo nguũ omba'eapo va'e kuery reve oikoa py.

¹⁹ Ha'e vy nguũ pe

— Xeakã raxy! — he'i.

Ha'e ramo guembiguai kunumi va'e pe tuu

— Eraa na ixya py — he'i.

²⁰ Ha'e ramo oupi vy ogueraa ixya py. Ha'e ramo guenapy'ã áry oikuavã ranhe imoiny, ha'e gui kuaray mbyte jave omano.

²¹ Ha'e ramo kunha va'e oguerojeupi heravy vy onhono inony Nhanderuete remimbo'e rupa rupi. Ha'e vy okẽ omboty vy oo ju.

²² Ha'e gui ome oenoĩ uka vy aipoe'i uka ixupe:

— Embou xea py peteĩ nerembiguai ha'e peteĩ mburika'i, Nhanderuete remimbo'e oia katy aa ranhe, ha'e gui ajevy ju aguã — he'i.

²³ Ha'e ramo ime oporandu:

— Mba'e re tu aỹ reo ta ri ha'e py, jaxy pyau e'ỹ teri, neĩ sábadõ e'ỹ guive va'eri?

Kunha va'e ombovai:

— Tove ri, ha'eve 'rã — he'i.

²⁴ Ha'e gui kunha va'e ombokupe árygua ukapa mburika'i. Ha'e vy aipoe'i guembiguai pe:

— Eraa, eroguatã tema, eropytu'u eme guive, xee amombytu'u uka e'ya ja — he'i.

²⁵ Ha'e gui ma kunha va'e oo vy Nhanderuete remimbo'e oia py ovaẽ, Carmelo vyvity re. Ha'e ramo mombryteri oxa vyve aipoe'i guembiguai Geazi pe:

— Pee ma ou jekuua oiny Suném pygua kunha.

²⁶ Eẽ ke eovy reovaexi aguã, ha'e vy aipo're ixupe: “Ha'eve vai pa ndee, neme ha'e ndepi'a voi?” 're.

Oporandu rã kunha va'e ombovai:

— Ha'evepa rei — he'i.

²⁷ Ha'e gui ma vyvity re Nhanderuete remimbo'e oia py kunha va'e ovaẽ vyve oikuavã ipy. Ha'e ramo Geazi oipe'a aguã ovaẽ ta ramo ixupe Nhanderuete remimbo'e aipoe'i:

— Tove katu, mba'eta onhe'ê py nda'evei ete va'e oendu. Ha'e nunga ma SENHOR onhomi xegui, ndoikuaa ukaxeí vy.

²⁸ Ha'e ramo kunha va'e aipoe'i:

— Xeruvixa, xapy'a rei nda'u ndevy ajerure va'ekue xepi'arã re? “Xembotavy eme ke”, ha'e va'ekue e'y ri? — he'i.

²⁹ Ha'e gui profeta aipoe'i Geazi pe:

— Eiko katu ke, ejopy xemba'e popoka, ha'e tereo. Xapy'a rei amongue reovaexĩ vy ma exarura eme. Ndevy pe amongue oxarura ri ramo embovai eme guive. Ha'e gui xepopoka remoĩ 'rã ava'i va'e rova áry — he'i.

³⁰ Ha'e rami teĩ ixu aipoe'i Eliseu pe:

— Anhetê ete SENHOR oikove va'e rupi, ha'e nderekove rupi avi aura vy aipoe'i: Xee ma ndorozejai 'rã — he'i. Ha'e ramo ha'e voi opu'ã vy oo ma oiny kunha va'e reve.

³¹ Ha'e rã Geazi ma ha'e kuery renonde rupi oo vy ava'i va'e rova áry rupi omoĩ popoka. Ha'e rami teĩ nda'ijayvuê nhendui, neĩ ipytuêa ma voi ndojekuaai. Ha'e ramo oo ju Eliseu reve nhovaexĩ aguã. Ha'e vy ixupe omombe'u vy aipoe'i:

— Ava'i va'e nomyĩ ae tema — he'i.

³² Ha'e gui oo py profeta ju ovaê ramo ava'i va'e omano oupy tupa rupi.

³³ Ha'e ramo oike vy omboty okê ha'e kuery mokoive oĩa py, ha'e vy onhembo'e SENHOR pe.

³⁴ Ha'e vy tupa oĩa katy oo vy onheno ava'i va'e áry rupi. Ha'e vy ojuru omboja ijuru re, guexa ma hexa re, ha'e opo ma ipo re, hi'áry rupi itui vy. Ha'e ramo ava'i va'e rete hakupa ju ma ovy.

³⁵ Ha'e gui ma opu'ã ju vy oguata-guata oikovy opy rupi, ha'e gui ma oo ju ha'e py. Ha'e vy ava'i va'e áry rupi ju onheno oupy. Ha'e ramo mae sete-kue vyvoi inhaxiã reve oi'pe'a ju guexa.

³⁶ Ha'e ramo oenoĩ Geazi, ha'e vy aipoe'i ixupe:

— Enoĩ ke Suném pygua kunha — he'i. Oenoĩ ramo kunha va'e ojexa uka ho'amy profeta pe.

Ha'e ramo aipoe'i kunha va'e pe:

— Eraa ju ke ndepi'a.

³⁷ Ha'e ramo kunha va'e oike ouvy vy ipy vyv'y'iry rupi oĩ, ha'e ojero'a vyv'y katy guenapy'ã re. Ha'e gui ma opi'a'i oupi heravy vy oê ju.

Oja py jojukaarã oĩ va'ekue oi'pe'aaque

³⁸ Ha'e gui ma ha'e va'e vyv'y re karuai oiko, ha'e Eliseu ojevuy ju Gilgal katy. Ha'e py ma henonde profeta kuery remimbo'e kuery oguapypa okuapy. Ha'e ramo aipoe'i guembiguaĩ pe:

— Emoĩ ke oja guaxu tata áry, ha'e vy ejapo tembi'u profeta kuery remimbo'e kuery pe — he'i.

³⁹ Ha'e ramo peteĩ oo mba'ety rupi mba'emo aju re. Ha'e vy ojou peteĩ hi'y rupi hi'a va'e ka'aguy reguae. Ha'e vy hi'y gui hi'a oi'po'opa vy omonyê oao puku. Ha'e gui ma ou ju vy oi'pe'ãmba'i vy omoĩmba oja py, oexa va'e'y teri va'eri.

⁴⁰ Ha'e gui ma ome'ê avakue pe ho'u aguã. Ojykue ho'u teri okuapy reve ojapukai okuapy:

— Nhanderueté remimbo'e! Oja py rima oĩ jojukaarã! — he'i okuapy. Ho'uve aguã ma voi nda'evei.

⁴¹ Ha'e rami rã aipoe'i:

— Peru ke trigo — he'i. Ha'e vy oja py omoĩ vy aipoe'i:

— Ejara ju ke, emongaru heta va'e kuery — he'i. Ha'e ramove oja py noĩvei ma ra'e jojukaarã.

Vinte mbojape re cem avakue okaru porã okuapyague

⁴² Ha'e gui ou peteĩ ava Baal-Salisa gui. Ha'e va'e ma Nhanderueté remimbo'e pe ogueru mbojape jypykue'i regua voxa py. Vinte mbojape cevada guigua ha'e hary pyau ogueru. Ha'e rã Eliseu aipoe'i:

— Emboja'o heta va'e kuery pe ho'u aguã — he'i.

⁴³ Ha'e ramo hembiguaĩ aipoe'i ixupe:

— Mba'exa tu amoĩ ta cem avakue ikuai va'e ho'u va'erã?

Ombovai:

— Eme'ê katu heta va'e kuery pe ho'u aguã, mba'eta po rami SENHOR ijayvu: “Ho'u 'rã okuapy, ha'e gui hembyre ju 'rã”, he'i.

⁴⁴ Ha'e ramo omoĩ ha'e kuery renonde py. Ha'e ramo ho'u okuapy, ha'e gui hembyre ju, SENHOR ijayvuague rami vy.

5

Lepra gui Naamã okueraague

¹ Oiko peteĩ Sírĩa pygua huvixa pegua xondaro kuery ruvixa, Naamã hery va'e. Ha'e va'e ma huvixa renonde rupi ipo'akave va'e ha'e omboetepy oiko, mba'eta hupive ma SENHOR ojapo Sírĩa kuery ipo'aka aguã rami. Joe opu'ãa py ipo'akapave. Ha'e rami avi lepra revegua oiko.

² Ha'e gui Sírĩa gui xondaro kuery oje'oi vy Israel kuery vyv'y gui vo ogueraa peteĩ kunha'i va'e escravo-rã. Ha'e va'e ma Naamã ra'yxy pe oiko omba'epoa rupi.

³ Ha'e gui ma kunha'i va'e aipoe'i herekoa pe:

— Xeruvixa Samaria py profeta oiko va'ea py oo va'e rire omongueraa 'rãgue lepra gui — he'i.

⁴ Ha'e ramo Naamã oo vy aipoe'i nguvixa pe:

— Po rami ijayvu kunha'i Israel vyv'y gui aru va'ekue.

⁵ Ha'e ramo Síria pygua huvixa ombovai:

— Tereo ha'vy, eguata. Ha'e rā xee ma peteī kuaxia araa uka 'rā Israel pygua huvixa pe reme'ê va'erā — he'i. Ha'e ramo oo ma. Ngupive ogueraa dez poyikue prata guigua, seis mil hatā'i va'e ouro guigua, ha'e gui dez ao ngarua pygua.

⁶ Ogueraa avi kuaxia Israel pygua huvixa pegua ijavyv imoinya va'e: “Kova'e kuaxia ndea py ome'êa ramove reikuaa 'rā xerembigui Naamā ambouague lepra gui remonguera aguā”, he'ia va'e.

⁷ Ha'e gui ma Israel pygua huvixa kuaxia para ogueroayvu ma vy omondoro oao. Ha'e vy aipoe'i:

— Xapy'a rei nda'u xee Nhanderuete ri aiko, joekove amboi, e'y vy anhomoiingove aguā rami xepo'akapa va'e? Mba'eta xea py ombou kova'e ava lepra gui amonguera aguā. Peikuaa pota ke, ha'e pexa porā, mba'eta xereve joguero'axe vy teve ombou — he'i.

⁸ Ha'e gui ma Nhanderuete remimbo'e Eliseu oendu Israel pygua huvixa oao omondoroague. Ha'e vy aipoe'i uka huvixa pe:

— Mba'e re tu ndeao remondoropa ri? Tou ava xea py, ha'e vy oikuaa 'rā Israel re profeta oikoa — he'i uka.

⁹ Ha'e gui ma Naamā ou guymba kavaju kuery ha'e karóxa reve. Ha'e vy ovaēmba okuapy Eliseu rokē rexei'i.

¹⁰ Ha'e ramo Eliseu omondouka peteī guembigui. Ha'e vy aipoe'i uka:

— Tereo, ejau sete-kue Jordão yakā py. Ha'e ramo ndero'o oī porāmba ju 'rā, nda'eve e'yvei ma 'rā — he'i uka.

¹¹ Ha'e rami rā Naamā ndojou porāi ete. Ha'e vy aipoe'i ovy:

— Xee aexa'ā va'ekue teī xee aīa py profeta oē ho'amy vy ojerure 'rāgue SENHOR Nguuete rery rupi, ha'e lepra oīa áry rupi okuave'ê reve xemonguera 'rāgue.

¹² Ha'e rā xapy'a rei nda'u Damasco py Abana ha'e Farfar yakā ikuai va'e ma Israel re yakā ikuai va'e gui na'iporāive 'rā ri? Nda'evei nda'u ha'e va'e py ae xee ajau aguā, akuera ju aguā? — he'i. Ha'e rami vy ojevuy ju ivai reve.

¹³ Ha'e ramo oīa py ovaē joguervy ixupegua kuery yvatekueve va'e. Ha'e vy aipoe'i okuapy ixupe:

— Oreruvixa, xapy'a rei profeta mba'emo haxy va'e ojapo uka va'e rire ndee nda'u nderejapoi 'rāgue? Mba'eta ndevy pe “Ejau ke, ha'e rā ha'eve va'e ju 'rā reiko” he'i va'ekue rive — he'i okuapy.

¹⁴ Ha'e rami rā Naamā oo vy Jordão yakā py oguejy sete-kue, Nhanderuete remimbo'e ijavyvague rami vy. Ha'e ramove ho'o oī porā ju kyri va'e ro'o rami. Ha'e vy ha'eve va'e ju oiko.

¹⁵ Ha'e gui ma ojevuy ju joguervy Nhanderuete remimbo'ea katy, hexevagua kuery ha'e javi reve. Ovaē ma vy henonde py hi'āi. Ha'e vy aipoe'i:

— Aỹ aikuua ma vyvave rupi ndoikoi Nhanderuete, Israel kuery Ruete e'y vy. Ha'e nunga rupi aỹ ma ajerure rejopy aguā mba'emo xee nerembigui ame'ê va'e.

¹⁶ Eliseu ombovai:

— Anhetê ete SENHOR oikove va'e henonde rupi aikoa va'e rupi aura vy aipoa'e: Xee ma mba'eve ndaipotai — he'i. Ha'e ramo hexeve onhea'ā tema ojopy aguā re, va'eri ndoipotai ae.

¹⁷ Ha'e rami rā Naamā aipoe'i:

— Ndereipotai ae ramo ajerure apy gui taraa vyv mokoī mburika'i áry. Mba'eta aỹ gui xee nerembigui ma tuuete ra'angaa pe rive name'êvei 'rā mymba apy reve ajuka uka va'e, SENHOR pe e'y vy.*

¹⁸ Ha'e gui aỹ SENHOR pe xee hembigui ajerure ajevyva ombogue aguā re. Mba'eta xeruvixa ma nguete Rimom pegua opy oike jepi 'rā omboete aguā, ha'e xepo re ojopy 'rā oiny. Ha'e gui xee voi aī 'rā xerenapy'ā re Rimom pegua opy ajero'a ainya py. Ha'e nunga rupi tove SENHOR tomboguepa xee hembigui ajevyva.

¹⁹ Eliseu ombovai vy

— Tereo porā ke — he'i.

Geazi re ju lepra ovaague

Ha'e gui Naamā ojepe'a ma mombyry'i ovy jave

²⁰ Nhanderuete remimbo'e Eliseu rembigui Geazi va'e ma aipoe'i ojeupe ae:

— Xeruvixa ma ndoipotai Síria pygua Naamā ome'ê mba'emo ogueru va'ekue. Ha'e rami avi anhetê ete SENHOR oikove va'e rupi aura vy aipoa'e: Xee ae 'rā anha avy hakykue rupi, ixugui ajopy aguā mba'emo — he'i.

²¹ Ha'e rami vy Geazi oo Naamā oupity aguā. Ha'e rā Naamā ma hakykue rupi onha ouvvy ramo oexa vy opo okaróxa gui ovaexī aguā. Ha'e vy oporandu:

— Ha'eve vai pa?

²² Ombovai:

— Ha'evépa rei. Xeruvixa aipoe'i uka: “Aỹ ma ou mokoī kunumigue profeta remimbo'e kuery Efraim vyvty reia gui. Eme'ê ha'e va'e kuery pe peteī poyikue prata guigua ha'e mokoī ao ngarua pygua”, he'i uka.

²³ Ha'e ramo Naamā aipoe'i:

— Eraa ha'vy mokoī poyikue prata guigua — he'i. Ha'e rami vy ogueraa uka ete vy mokoī voxa py ojokua mokoī poyikue prata guigua ha'e mokoī ao ngarua pygua. Ha'e va'e py ombovoyi mokoī guembigui Geazi renonde rupi ogueraa va'erā.

* 5:17 Ha'e kuery reko rami vy Israel regua vyv Naamā ogueraa ovyv re, ha'e py ju omboete aguā Nhanderuete.

²⁴ Ha'e gui yvy'ã áry peve ovaẽ ma vy ha'e kuery po gui ju ojopy, ha'e omoĩ porã oo py. Avakue omondoukapa ramo oje'oi ju.

²⁵ Ha'e ramo oike vy nguviãa renonde py hi'ãi. Ixupe Eliseu oporandu:

— Geazi, magui tu reju?

Ombovai:

— Xee nerembuguai ma mamove rei ndai — he'i.

²⁶ Ha'e ramo aipoe'i ixupe:

— Ndea py xenhe'ẽ oĩ avi kuri, ava nerovaexĩ aguã karóxa gui oguejy ovyvave. Aỹ voi pa ha'eve prata ha'e ao rejopy aguã, ha'e gui oliveira ha'e uvaty, vexa'i ha'e vaka kuery, tembiguaui avakue ha'e kunhague?

²⁷ Ha'e nunga rupi ndere ju 'rã Naamã guigua lepra ova, neramymino kuery re guive, raka'e rã peve guarã — he'i. Ha'e ramove lepra yro'y rami xii va'e reve ae ojepe'a ovy henonde gui.

6

Eliseu peteĩ haxa ova aguã rami ojapague

¹ Ha'e gui profeta kuery remimbo'e kuery ikuai va'e aipoe'i okuapy Eliseu pe:

— Apy ndereve orekuai ma nhanemboty rei'i ete.

² Ha'e nunga rupi toroo Jordão yakã re, ha'e gui peteĩ-teĩ rogueru aguã vyvra, peteĩ oo nhandekuai atyrã rojapo aguã.

Ombovai:

— Tapeo ha'vy — he'i.

³ Ha'e ramo ha'e kuery va'e regua peteĩ aipoe'i:

— Ha'eve 'rã ndee voi reo aguã ore nerembuguai kuery reve.

Eliseu ombovai:

— Xee aa avi 'rã — he'i.

⁴ Ha'e rami vy oo ha'e kuery reve.

Jordão yakã rembe re ha'e kuery ovaẽ vy oake'o okuapy vyvra.

⁵ Ha'e gui peteĩ vyvra hi'ái va'e oake'o vy haxa oity yy py. Ha'e ramo ojapukai vy aipoe'i:

— Aikore xeruvixa! Haxa ma nhomba'e aiporu va'ekue — he'i.

⁶ Ha'e ramo Nhanderuete remimbo'e oporandu:

— Mamo tu ho'a ra'e?

Ha'e gui ixupe oexa uka ramo Eliseu peteĩ vyvra ojaya vy omombo yy py. Ha'e vy ojapo ferro guigua ova aguã rami.

⁷ Ha'e vy

— Emoatã ju ke — he'i ramo okuave'ẽ vy ojopy.

Síria pygua kuery reve joquero'aa jave Eliseu nhopytyvõague

⁸ Ha'e gui Síria pygua huvixa opu'ã Israel kuery rovai. Ha'e vy vyatekueve reve nhomongeta vy peteĩ henda re onhembopy'aa rupi aipoe'i:

— Ha'e py 'rãe ha'eve japyta ranhe aguã — he'i.

⁹ Ha'e rami teĩ Israel pygua huvixa pe Nhanderuete remimbo'e aipoe'i uka:

— Penheangu ke ha'e rupi peaxa e'ỹ aguã, mba'eta ha'e py 'rã Síria pygua kuery oo — he'i uka.

¹⁰ Ha'e ramo Nhanderuete remimbo'e omombe'u ma voi rire ijayvague katy Israel pygua huvixa voi omondouka guembiguaui kuery oikuaa pota va'erã. Ha'e rami vy oo jepe nho. Ha'e va'e ramigua ma mbovykue rei e'ỹ oiko.

¹¹ Ha'e nunga rupi Síria pygua huvixa opy'a py nda'evei etea oendu. Ha'e vy guembiguaui kuery oenoĩ vy aipoe'i ha'e kuery pe:

— Pemombe'u na xevy nhande kuery va'e regua mava'e tu Israel pygua huvixaa katy oo va'e.

¹² Ha'e ramo hembiguaui va'e regua ombovai:

— Xeruvixa, avave rei ndoroo ri. Ha'e rami avi profeta Eliseu Israel re oĩ va'e ae ri Israel pygua huvixa pe omombe'u kuerei 'rã rekeaty py ndeayvua voi — he'i.

¹³ Ha'e ramo aipoe'i:

— Tapeo, pexa pota mamo pa oĩa re, xee ajopy uka aguã — he'i.

Ha'e gui ma ixupe

— Dotã tetã py rima oĩ — he'i.

¹⁴ Ha'e ramo ha'e katy omondouka kavaju, karóxa ha'e xondaro kuery ipy'a guaxukueve. Pyávy ha'e kuery ovaẽ vy ojokopa tetã.

¹⁵ Ha'e gui ma Nhanderuete remimbo'e rembiguai aje'ive'i reve ovy vy oẽ vy oexa mbovy rei e'ỹ ikuai va'e, kavaju árygua ha'e karóxa revegua kuery. Jovaive re ojokopa ra'e. Ha'e ramo hembiguaui aipoe'i Eliseu pe:

— Aikore xeruvixa! Mba'e tu jajapo ta?

¹⁶ Eliseu ombovai:

— Ekyje eme. Mba'eta ha'e kuery reve ikuai va'e gui nhanderevegua kuery hetave — he'i.

¹⁷ Ha'e gui ma Eliseu onhembo'e vy aipoe'i:

— SENHOR, ajerure hexa reipe'a aguã oexa kuaa aguã rami — he'i. Ha'e ramo hembiguai rexa SENHOR oipe'a ramo Eliseu vy'ry rupi oexa tata revegua kuery kavaju árygua ha'e karóxa vyv'ã rupi ikuai va'e.

¹⁸ Ha'e gui ma hovaigua kuery ha'e kuery rovai ou ramo Eliseu onhembo'e ju SENHOR pe. Ha'e vy aipoe'i: — Ajerure ndevy: Embogue ke ha'e kuery rexa oexa e'y aguã — he'i ramo Eliseu ijayvuague rami vy omboguepa hexa, ndoexai aguã rami.

¹⁹ Ha'e gui ma ha'e kuery va'e regua pe Eliseu aipoe'i:

— Kova'e tape ma ha'evea ramigua e'y, neí kova'e tetã oí va'e voi. Peju xerakykue, ha'e rogueraa 'rã ava peka va'ea katy — he'i. Ha'e rami vy Samaria tetã py ogueraa.*

²⁰ Ha'e gui ma Samaria tetã py ha'e kuery ovaẽ ma ramo Eliseu aipoe'i:

— SENHOR, eipe'a ju kova'e avakue rexa, ha'e kuery oexa ju aguã — he'i. Ha'e ramo ha'e kuery rexa SENHOR oipe'a ramo oexa rã Samaria tetã mbyte py ra'e ma ikuai.

²¹ Ha'e nunga Israel pygua huvixa oexa vy oporandu Eliseu pe:

— Xeru, ajukapa 'rã? Tajukapa pa?

²² Ombovai:

— Any teve, ejuka eme. Rejuka aguã ha'eve va'e ma ndee ae kyxe ha'e nderapa reve rejopy va'ekue anho. Ha'e rã kova'e kuery pe ma eru ruka mbojape ho'u va'erã ha'e yy oy'u aguã. Ha'e gui ma tojevypa ju nguvixaa katy ae — he'i.

²³ Ha'e ramo ha'e kuery pe huvixa ojapo ngaru tuvixa ete va'e. Ha'e ramo okaru ha'e oy'u okuapy. Ha'e ramo mae omondoukapa rã nguvixaa katy ju oje'oi. Ha'e rami rire Síria pygua kuery ndouvei ranhe Israel vyv re mba'emo oipe'a aguã.

Samaria py karuai oikoague

²⁴ Ha'e va'e rire Síria pygua huvixa Ben-Hadade va'e ma teígue ju ojepeguia xondaro kuery omboaty ramo oje'oi vy ojokopa okuapy Samaria tetã.

²⁵ Ha'e nunga rupi Samaria py oiko karuai vaikue. Ojokopaa rã tetã mbyte py mburika'i kãgue rive ovende 'rã oitenta hatã'i va'e prata re, ha'e apykaxu'i repoxi mboapy rai teí cinco re 'rã ovende.

²⁶ Ha'e gui ma Israel pygua huvixa tetã kora rupi oaxa ovy jave ixupe ojaxukai nhendu peteí kunha va'e: — Xepytyvõ ke, xeruvixa — he'i.

²⁷ Huvixa ombovai vy aipoe'i:

— SENHOR nanepytyvõ'i ri ramo magui tu xee ajou 'rã roipytyvõ aguã? Mba'emo moa'yiaty gui, tyrã pa uva onhamiaty gui teve 'rã ajou?

²⁸ Huvixa oporanduve ju ixupe:

— Mba'e tu ha'vy rereko?

Kunha va'e ombovai:

— Kova'e kunha xerevegua aipoe'i va'ekue xevy: “Eme'ẽ ndepi'a'i ja'u va'erã, ha'e gui ko'ẽ ramo ma xepi'a ju 'rã ja'u”, he'i va'ekue xevy.

²⁹ Ha'e rami vy xepi'a'i ranhe nhamomimoi vy ja'u. Ha'e rami teí ko'ẽ jevy ixupe xee “A'y ma ndepi'a ju eme'ẽ ja'u aguã”, ha'e ramo onhomi — he'i.

³⁰ Ha'e rami kunha va'e ijayvu rã huvixa oendu vy omondoro oao tetã kora rupi oaxa ovy pyve. Ha'e ramo heta va'e kuery oexa rã oao guýry huvixa onhemonde ra'e ajukue voxa guigua py rive.†

Eliseu “Heta mba'e ju 'rã pejou”, he'iaque

³¹ Ha'e ramo huvixa aipoe'i:

— Kurive Safate ra'y Eliseu akã ijaxi'y áry gui aipe'a e'y rã Nhanderuete taxemoingo axy oipotaa rami — he'i.

³² Ha'e rami vy huvixa peteí ava omondouka Eliseu-a katy, ngoo py oguapy oiny ramo nhomongeta va'ety kuery reve. Tembiguai ovaẽ e'y mbove ma voi Eliseu aipoe'i nhomongeta va'ety kuery pe:

— Pexa 'rã rojuka rive va'e ra'y xeakã ayaarã ombou va'e. Pexa pota ke, tembiguai ovaẽ jave pemboty okẽ, pejoko guive. Ha'e va'e rakykue rupi ou avi 'rã ri huvixa. Ipy ambua pendu 'rã — he'i.

³³ Ha'e kuery reve ijayvu teri jave ovaẽ nhendu tembiguai. Ha'e gui huvixa voi ovaẽ, mba'eta aipoe'i: “Kova'e mba'emo vai ma SENHOR-a gui ae ou ramo mba'e re tu xee arõve ta orerepy aguã?” he'i.

7

¹ Ha'e ramo Eliseu aipoe'i:

— Pejapyxaka ke SENHOR ijayvu va. Po rami SENHOR ijayvu: “Ko'ẽ rã, kova'e hora rupi rivyvyi, Samaria tetã rokẽ py peteí varai trigo ku'ikue ovendea 'rã peteí hatã'i va'e re rive, ha'e mokoí ryrú cevada guigua ma peteí hatã'i va'e re 'rã ovendea”, he'i.

² Ha'e ramo xondaro ruvixa huvixa pytyvõa va'e ombovai Nhanderuete remimbo'e:

— SENHOR ha'e nunga ombou aguã yva oipe'a teí ha'e nunga oiko 'rã nda'u? — he'i.

Profeta ombovai:

— Ha'e nunga nderexa py ae 'rã rexa va'eri ndere'ui 'rã ta'vy.

Síria pygua kuery onhambaague irundy lepra revegua omombe'u okuapyague

* ^{6:19} Ha'e kuery ma Eliseu re ae oje'oi va'ekue ri oexa e'y rã Eliseu ogueraa ngovaigua Israel kuery retã mbyte peve, Samaria py ae. † ^{6:30} Ha'e kuery reko rami vy ajukue voxa guigua py onhemonde 'rã ipy'a vai, e'y vy nda'evei etea oendu vy.

³ Tetã rokê py irundy avakue lepra revegua ikuai. Ha'e va'e kuery ma joupe-upe aipoe'i okuapy:

— Mba'erã tu apy jaguapy jakuapy nhamanomba peve teve?

⁴ Xapy'a rei “Tetã py jaike” ja'e teĩ tetã rupi karuai nhaendu vy nhamanomba 'rã ha'e py. Ha'e rã “Apy ae 'rã jaguapyve nhainy” ja'e vy ma nhamanomba avi 'rã. Ha'e nunga rupi aÿve jaje'oi Síria pygua kuery ikuai katy. Ha'e kuery nghanemoingove ri ramo jaikeve 'rã. Ha'e rã nhandejukapa ramo nhamanomba 'rãe ma vy — he'i okuapy.

⁵ Ha'e rami vy ha'e kuery ma pytũmba ramove opu'ãmba Síria pygua ikuai katy oje'oi aguã. Ha'e py ovaẽ vy ndoexai avave rei.

⁶ Mba'eta Síria pygua kuery ikuai rupi SENHOR oenduka ma voi va'ekue kavaju árygua, karóxa revegua ha'e xondaro kuery hyapu rei nhendu va'e. Ha'e nunga Síria pygua kuery oendu vy joupe-upe “Pendu ke, Israel pygua huvixa nhanderovai oiporuka ra'e huvixa heteu regua ha'e Egito pygua, nhanderovai opu'ã aguã”, he'i va'ekue.

⁷ Ha'e nunga rupi ha'e kuery oje'oipa ra'e. Ha'e vy pytũ rupi onhamba vy oejapa oje'oivy oguy ikuai va'e ha'e guymba kavaju ha'e mburika'i kuery. Ikuaiague ha'e javi oja ha'ekue rami ae. Onhamba oje'oivy oo jepexe vy.

⁸ Ha'e kuery ikuaiague py lepra revegua kuery ju ovaẽ ma jogueruvy. Peteĩ oguy py oike vy okaru ha'e oy'u okuapy. Ha'e gui ae oipe'a prata, ouro ha'e ao. Oje'oipa ju vy onhomimba. Ha'e gui ojevvy vy amboae oguy py ju oike vy ha'e va'e gui voi mba'emo oipe'ave vy onhomi.

⁹ Ha'e gui mae aipoe'i joupe-upe:

— Ha'eve'ya ramigua jajapo. Kova'e ára ma mba'emo porã nhamombe'u aguã ára va'eri nhakyrirĩmba jakuapy. Xapy'a rei ko'ê rã peve nhamombe'u aguã nharõ ramo pavẽ rei 'rã oikuaa jajejavy va'ea. Ha'e nunga rupi aÿ ma voi jaje'oi, huvixa ro peve nhamombe'u aguã — he'i okuapy.

¹⁰ Ha'e rami vy ha'e kuery oo vy oiapukai okuapy tetã rokê rarõa kuery pe. Onhemombe'u porã'i vy aipoe'i:

— Roje'oi kuri Síria pygua ikuai py teĩ ha'e py ma avave rei nda'ipoavei ma, nonhenduai guive. Kavaju ha'e mburika'i kuery ojokua pyre anho ikuai, ha'e gui oguy voi ha'ekue rami ae ikuai — he'i.

¹¹ Ha'e ramo okê rarõa kuery ju oiapukai reve omombe'u ukapa huvixa ro rupi peve.

¹² Ha'e gui ma pyavyve huvixa opu'ã vy aipoe'i guembigua'i kuery pe:

— Aÿ ma xee amombe'u ta pëvy Síria pygua kuery nhandere ojaopague. Ha'e kuery oikuaapa mba'eve ndajarekoveia. Ha'e rami vy ikuai rupi mombyry'i peve ojepe'apa ra'e mba'ety rupi onhemi aguã. Mba'eta aipoe'i: “Tetã pygua kuery oẽmba jogueruvy ramo jajopypa 'rã oikove reve, tetã py jaike aguã”, he'i okuapy ra'e.

¹³ Ha'e ramo peteĩ hembiguai va'e regua ombovai vy aipoe'i:

— Ejou ha'vy peteĩ nhiruĩ kavaju tetã py hemybre va'ekue regua. Nhamondouka 'rã avakue ha'e py oikuaa pota aguã. Mba'eta Israel kuery apy hemybrekuie ikuai va'e okanhymba avi 'rã Israel kuery mboae rami ae — he'i.

¹⁴ Ha'e ramo mokoĩ karóxa kavaju revegua ojou rã huvixa omondouka avakue Síria pygua xondaro kuery rakykue. Ha'e vy aipoe'i:

— Tapeo pexa pota — he'i.

¹⁵ Ha'e ramo hakykue rupi oje'oi Jordão yakã peve. Ha'e vy oexa rã tape rupi omboty rei ra'e ao ha'e tembiporu Síria kuery onhamba vy omombopa va'ekue. Ha'e ramo tembiguai kuery ojevypa ju vy omombe'upa okuapy huvixa pe.

Eliseu ayvu ojeupityague

¹⁶ Ha'e gui ma heta va'e kuery oẽmba oje'oivy tetã gui. Ha'e vy Síria pygua kuery ikuaiague gui oipe'apa. Ha'e SENHOR ijavyuague rami vy peteĩ varai trigo ovendea peteĩ hatã'i va'e re rive, mokoĩ varai cevada guive ha'e rami ae avi.

¹⁷ Ha'e gui huvixa ma xondaro ruvixa ipytyvõaty pe oarõ uka tetã rokê. Ha'e rami teĩ heta va'e kuery okê py ae opyrõmba okuapy ramo omano, Nhanderuetu remimbo'e oĩa py huvixa oo jave ijavyuague rami vy.

¹⁸ Ha'e rami py ojeupity huvixa pe Nhanderuetu remimbo'e ijavyu ma voiaque: “Ko'e rã kova'e hora rivyvyi mokoĩ varai cevada ovendea 'rã peteĩ hatã'i va'e re Samaria py ae, peteĩ varai trigo guive”, he'iaque.

¹⁹ Ha'e jave ma xondaro ruvixa ombovai va'ekue Nhanderuetu remimbo'e pe: “ SENHOR yva oipe'a teĩ pov'a'e ayvu oiko 'rã nda'u?” he'i va'ekue. Ha'e profeta ju “Ha'e nunga nderexa py ae 'rã rexa va'eri ndere'ui 'rã ta'vy”, he'i va'ekue.

²⁰ Ha'ekue rami ae oiko. Tetã rokê py heta va'e kuery opyrõmba ramo omano.

8

Kunha Suném pygua pe mba'emo oguereko va'ekue ome'ẽ ukapaa jevyague

¹ Ha'e gui Eliseu ijavyu ju ava'i omboete ju va'ekue xy pe. Ha'e vy aipoe'i:*

— Epu'ã ke, tapeo ndero pygua kuery reve, ha'e gui penderekoa ju 'rã mamõ rã ha'evea py rei. Mba'eta pendevy re SENHOR ombou ta karuai sete ma'etý re oiko va'erã — he'i.

² Ha'e ramo kunha va'e opu'ã vy Nhanderuetu remimbo'e ijavyuague rami oiko. Ha'e rami vy ngoo pygua kuery ha'e javi reve oje'oi vy sete ma'etý re ikuai filisteu kuery yvy re.

* 8:1 Kunha va'e pi'a Eliseu omboete jevyague omombe'u 2 Reis 4.8-31 py.

³ Sete ma'etÿ opaa py ma filisteu kuery vvy gui kunha va'e ojevuy ju. Ha'e vvy huvixaa py oo ngoo ha'e ovyv oguereko va'ekue re ojerure ju aguã.

⁴ Ha'e va'e jave py huvixa ijayvu oiny Nhanderuete remimbo'e rembiguai Geazi reve. Ha'e vvy ixupe aipoe'i:

— Xee ajerure, emombe'u ke xevy mba'emo tuvixa va'e Eliseu ojapo va'ekue ha'e javi — he'i.

⁵ Ha'e ramo huvixa pe Geazi omombe'u oiny Eliseu ava'i omano va'ekue omopu'ã jevyague. Ha'e ramove ava'i omboete ju va'ekue xy ae ovaë, ha'e vvy huvixa pe ojerure ngoo ha'e ovyv re.

Ha'e ramo Geazi aipoe'i:

— Xeruvixa, kova'e kunha ae ma Eliseu omboete jevy va'ekue xy.

⁶ Ha'e gui kunha va'e pe huvixa oporandu ramo omombe'upa. Ha'e ramo ipytyvõarã huvixa omo'i petei guembiguai. Ha'e va'e pe aipoe'i:

— Ixupe eme'ë ukapa ju oguereko va'ekue ha'e javi, ha'e ovyv gui oëa ára guive aÿ peve imba'ety gui omono'õ mbyre repykue voi — he'i.

Eliseu-a py Damasco pygua Hazael oague

⁷ Ha'e gui ma Síria pygua huvixa Ben-Hadade imba'eaxy oupy jave Eliseu oo Damasco tetã py. Huvixa pe omombe'ua vvy

— Nhanderuete remimbo'e ovaë ra'e apy — 'ea.

⁸ Ha'e ramo huvixa aipoe'i Hazael pe:

— Eiporavo mba'emo Nhanderuete remimbo'e pe reme'ë va'erã, ha'e tereo eovaexi. Ixupe eporandu uka xere SENHOR pe, kova'e mba'eaxy areko va'e gui akuera 'rãa aikuaa aguã — he'i.

⁹ Ha'e gui Hazael ma mba'emo ome'ë va'erã reve oo ovaexi aguã katy. Ha'e vvy quarenta camelo áry ogueraa Damasco tetã py iporãgueve oi va'ekue regua. Eliseu oia py ovaë vvy ojexa uka henonde py. Ha'e vvy aipoe'i:

— Síria pygua huvixa ndera'y Ben-Hadade ae xembou aporandu aguã: “Akuera 'rã pa mba'eaxy areko va'e gui?” he'i uka.

¹⁰ Ha'e ramo Eliseu ombovai:

— Tereo, ha'e aipo're ixupe: “Rekuera ju 'rãe”, 're. Ha'e rami tei xevy SENHOR oikuaa uka avi omano nho 'rãa — he'i.

¹¹ Ha'e vvy Hazael re Eliseu oma'ë ngatu oiny. Hexe oma'ë ngatu ete ramo nda'evei reia oendu. Ha'e gui Nhanderuete remimbo'e ojae'o.

¹² Ha'e ramo Hazael aipoe'i:

— Xeruvixa, mba'e re tu rejae'o ri?

Ombovai:

— Mba'eta aikuaa ma voi Israel kuery re mba'emo vai rejapo 'rãa. Mba'eta reapyra 'rã ha'e kuery ro ikorapa va'e, kyxe py rejukapa 'rã ha'e kuery va'e regua kunumigue, remou'ũmba 'rã kyrĩgue'i, ha'e remondoropa 'rã kunhague imemby ryrui va'e — he'i.

¹³ Ha'e ramo Hazael aipoe'i:

— Ha'e gui mba'eta tu xee nerembiguai jagua ramigua'i va'eri ha'e ramigua ete ajapo aguã?

Eliseu ombovai:

— SENHOR ma xevy oikuaa uka ndee ju Síria pygua ruvixarã rei aguã — he'i.

¹⁴ Eliseu oia gui Hazael oo ju vvy nguvixaa py ovaë. Ha'e rã ixupe oporandu:

— Mba'e he'i Eliseu ndevy?

Ombovai:

— Aipoe'i xevy rekuera 'rãa rami — he'i.

¹⁵ Ha'e gui ko'ë jevy ma Hazael petei nheovãa ogueraa yy py. Omoakÿ ma vvy onhovã huvixa rova, omano peve. Ha'e gui hekovia Hazael ju oi huvixa.

2 Crônicas 21.1-20

¹⁶ Petei nhirui ma'etÿ re ma Acabe ra'y Jorão Israel pygua huvixa oi rire, Judá pygua huvixa Josafá oi teri reve ta'y Jeorão ju omboypy Judá pygua huvixa oi aguã.

¹⁷ Ha'e va'e ma huvixa oi ypy'i jave py trinta e dois ma'etÿ oguereko. Ha'e gui oito ma'etÿ re opena Jerusalém py.

¹⁸ Israel pygua huvixa kuery ikuaiague rupi oiko, Acabe ro pygua kuery ikuaiague rami avi, tajy re ae omenda rire. Ha'e rami vvy SENHOR renonde rupi mba'emo vai anho ojapo oikovy.

¹⁹ Ha'e rami tei SENHOR guembiguai Davi re oma'ë vvy nomombaxei Judá pygua kuery, mba'eta ixupe ijayvuague rami vvy hekovia nhomoexakarã omo'i riae aguã re, ha'e gui hamymino kuery rekovia ju.†

²⁰ Ha'e gui Jeorão oi jave Edom pygua kuery opu'ã okuapy Judá kuery rovai, ipo'akaa guy py nda'ikuaixevei vvy. Ha'e rami vvy omo'i okuapy nguvixarã ae.

²¹ Ha'e nunga rupi Jeorão ma Zair katy oje'oi karóxa oguereko va'e ha'e javi reve. Ha'e rã Edom pygua kuery ojoko okuapy, ha'e ikaróxa ja ruvixa kuery voi, tei pyavyve Jeorão kuery opu'ã vvy oitypa. Ha'e rami tei ixupegua kuery onhamba ju ngoo katy.

† 8:19 Davi pe SENHOR ijayvuague ma 1 Reis 11.34-36, 15.4, 2 Crônicas 21.7 ha'e Salmo 132.17 py. Ha'e gui “Nhomoexakãa” he'ia ma huvixave raka'eve rã oiko aguã re ijayvu vvy, ha'e Jesus Cristo rekorã re guive (Lucas 2.30-32; João 8.12).

²² Ha'e rami py Edom pygua kuery opu'ãmba okuapy Judá kuery po'akaa gui oo jepe aguã, aỹ peve guarã. Ha'e va'e jave ae avi Libna pygua kuery opu'ã okuapy.

²³ Ha'e gui oive rei tema Jeorão rekokie regua. Ha'e rami avi mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekokie oĩa re?

²⁴ Ha'e gui Jeorão ndoikovevei' ma guamoĩ kueryague rami.[‡] Ha'e ramo onhono porãa tetã Davi rekoague py. Ha'e gui ta'y Acazias ju oĩ nguu rekovia.

2 Crônicas 22.1-6

²⁵ Ha'e gui Acabe ra'y Jorão doze ma'etỹ re ma Israel pygua huvixa oĩ rire ma Jeorão ra'y Acazias oĩ Judá pygua huvixarã.

²⁶ Acazias ma huvixa oĩ ypy'i jave py vinte e dois ma'etỹ oguereko, ha'e gui peteĩ ma'etỹ ete'i opena Jerusalém py. Ixy ma Israel pygua huvixa Onri rajy, Atalia hery va'e.

²⁷ Ha'e gui Acazias voi Acabe ro pygua kuery ikuaiague rupi oiko. Ha'e vy mba'emo vai anho ojapo oikovy SENHOR renonde rupi. Acabe ro pygua rami oiko, tajy me ae vy.

²⁸ Ha'e rami vy Acabe ra'y Jorão reve jogueraa Ramote-Gileade katy, Síria pygua huvixa Hazael kuery re opu'ã aguã. Ha'e ramo Síria pygua kuery oĩpyxo Jorão.

²⁹ Ha'e ramo huvixa Jorão ma Jezreel tetã katy ju ojevy Síria kuery oĩpyxoague gui okuera aguã, Ramá py Síria pygua huvixa Hazael re opu'ãa py. Ha'e gui ma Jezreel py Acabe ra'y Jorão imba'eaxy oupya py Judá pygua huvixa Jeorão ra'y Acazias oo avi oexa aguã.

9

Israel pygua huvixarã Jeú omoiaague

¹ Ha'e gui profeta Eliseu ma peteĩ oenoĩ profeta kuery remimbo'e regua. Ha'e vy aipoe'i ixupe:

— Eiko katu, eraa kova'e azeite ryrú, ha'e tereo Ramote-Gileade katy.

² Ha'e py revaẽ vy ejou Josafá ra'y Jeú, Ninsi ramymino. Eike ha'e emopu'ã tyvy kuery mbyte gui, ha'e opyvea py ju eraa.

³ Ha'e gui azeite ryrú reve enhoẽ inhakã re. Ha'e vy aipo're: “Po rami SENHOR ijayvu: ‘Israel pygua huvixarã romoĩ’, he’i.” Ha'e gui okẽ reipe'a ju vy enha pojava eovy — he’i.

⁴ Ha'e ramo profeta kunumi va'e ma Ramote-Gileade katy oo.

⁵ Ha'e py kunumi va'e ovaẽ vy oma'ẽ rã xondaro ruvixa kuery oguapypa okuapy ra'e. Ha'e rami vy aipoe'i ixupe:

— Xeruvixa, areko ndevy amombe'u va'erã — he’i.

Jeú oporandu:

— Mava'e tu ore kuery ha'e javive regua pe?

Ombovai:

— Ndevy pe ae, xeruvixa — he’i.

⁶ Ha'e ramo Jeú opu'ã vy oike opy katy. Ha'e rã inhakã re kunumi va'e azeite onhoẽ vy aipoe'i:

— Po rami SENHOR Israel kuery ruete ijayvu: “Romoi Israel pygua huvixarã, SENHOR pegua kuery re repena aguã.

⁷ Ha'e gui rejukapa 'rã nderuvixa Acabe ro pygua kuery, ambopaga aguã Jezabel po py xerembiguai profeta kuery ruguy omoëague re, ha'e SENHOR rembiguai kuery ojuka ukaague ha'e javi re.

⁸ Ha'e rami py Acabe ro pygua kuery omanomba 'rã. Israel gui amomba 'rã Acabe guigua avakue ikuai va'e ha'e javi, escravo, ha'e'ỹ vy escravo e'ỹ teĩ.

⁹ Mba'eta Acabe ro pygua kuery re ajapo 'rã Nebate ra'y Jeroboão ro pygua re ajapoague rami, ha'e Aías ra'y Baasa ro pygua kuery re rami.

¹⁰ Ha'e gui Jezreel tetã yvỹry rupi jagua kuery ho'upa 'rã Jezabel retেকে. Ijatyarã nda'ipoai 'rã guive”, he’i. Pova'e nunga kunumi va'e omombe'upa vyve okẽ oipe'a ju vy onha ovy.

¹¹ Ha'e gui Jeú ma nguvixa rembiguai kuery ikuai py ou ju ramo oporandu okuapy ixupe:

— Ha'eve vai pa? Mba'erã tu ou peva'e inhakã porã e'ỹ va'e?

Jeú ombovai:

— Peikuaa porã ha'e va'e ava, ha'e ijayvua re — he’i.

¹² Ha'e ramo aipoe'i okuapy:

— Ndeapu rima. Aỹ ma rojerure ndevy, emombe'u porã tema roikuaa aguã.

Ha'e ramo Jeú aipoe'i:

— Peikuaaxe rã po rami ri ijayvu: “ SENHOR aipoe'i: ‘Romoi Israel pygua huvixarã’, he’i.”

¹³ Ha'e ramove ha'e kuery ojapura vy peteĩ-teĩ oao puku omboi vy omoĩ okuapy tenda oĩ va'e guy rupi escada oĩ va'e áry rupi. Ha'e vy mimby guaxu omonhe'ẽ vy ijayvu okuapy:

— Jeú ma nhanderuvixa oĩ.

Jorão ha'e Acazias Jeú ojukaague

¹⁴ Ha'e gui ma Josafá ra'y Jeú, Ninsi ramymino va'e jogueroayvu rei Jorão rovai. Ha'e rami teĩ Jorão ma Ramote-Gileade oaró okuapy Israel kuery ha'e javi reve, Síria pygua huvixa Hazael gui.

¹⁵ Ha'e gui Jorão ojevy ju va'ekue Jezreel katy onhepoano uka aguã, Síria pygua huvixa Hazael pegua kuery re opu'ã rã oĩpyxopaaague gui. Ha'e gui Jeú aipoe'i:

[‡] 8:24 Apy “Opytu'u ma guamoĩ kueryague rami”, he'ia ma omano maa rami ijayvu vy.

— Xapy'a rei penderuvixarā xepota ri vy avave rei toē eme tetā gui Jezreel py joupe omombe'u aguā — he'i.

¹⁶ Ha'e rami vy Jeú ae petēi karóxa py ojeupi vy oo Jezreel katy, mba'eta ha'e py Jorão itui ramo tupa rupi. Ha'e Judá pygua huvixa Acacias voi oo ma avi va'ekue Jorão oexa aguā.

¹⁷ Ha'e gui Jezreel py torre oí va'e re oí petēi oexa pota va'ety. Ha'e va'e ma Jeú revegua kuery mbovy rei e'y ou jekuua va'e oexa vy aipoe'i:

— Aexa mbovy rei e'y ou va'e — he'i.

Ha'e ramo Jorão aipoe'i:

— Emondouka ha'vy petēi kavaju árygua ovaexī vy ha'e kuery pe oporandu aguā: “Petei rami nhandekuai aguā pa peju?” he'i aguā.

¹⁸ Ha'e ramo kavaju árygua ovaexī aguā oo vy aipoe'i:

— Po rami huvixa aipoe'i uka: “Petei rami nhandekuai aguā pa peju?” he'i uka.

Ha'e rā Jeú ombovai:

— Mba'e tu rereko petēi rami ikuai va'e reve? Eju ke xerakykue — he'i.

Ha'e nunga ju oexa pota va'ety omombe'u vy aipoe'i:

— Ha'e kuerya py tembiguai ovaē tei ndojevyvei ju — he'i.

¹⁹ Ha'e gui Jorão ma amboae ju omondouka kavaju árygua. Ha'e rā ha'e kuerya py ha'e va'e ovaē vy aipoe'i:

— Po rami huvixa aipoe'i uka: “Petei rami nhandekuai aguā pa peju?” he'i uka.

Jeú ombovai:

— Mba'e tu rereko petēi rami ikuai va'e reve? Eju ke xerakykue — he'i.

²⁰ Ha'e gui oexa pota va'ety ha'e nunga ju omombe'u vy aipoe'i:

— Peva'e voi ha'e kuerya py ovaē tei ndojevyvei ju. Ha'e gui karóxa ogueroguata heruvy va'e ma ko Ninsi ramymino Jeú, mba'eta ojerovia rei reve ou ta — he'i.

²¹ Israel pygua huvixa Jorão aipoe'i:

— Emoatyrō xekaróxa — he'i. Ha'e rami vy ikaróxa omoatyrōa ma ramo Jorão oo oiny, Judá pygua huvixa Acacias avi, petēi-tei okaróxa py ae jogueraa Jeú reve nhovaexī aguā. Ha'e vy ovaexī okuapy Jezreel pygua Nabote mba'ety py.

²² Ha'e gui Jorão ma Jeú rexa vy oporandu ixupe:

— Jeú, petēi rami nhandekuai aguā pa reju?

Ombovai:

— Mba'ixa vy 'rā tu petēi rami nhandekuai, ndexy Jezabel tavy reia ha'e imba'evykya ha'e javi rupi nhomoingo teria ja? — he'i.

²³ Ha'e ramove Jorão ma kavaju juru xā ombojeapa vy ogueronha heravy. Ha'e vy aipoe'i ovy Acacias pe:

— Nhanderoaigua ae ra'e, Acacias!

²⁴ Ha'e rami tei Jeú ma ombaratekuea ha'e javi py guyrapa omoatā vy ojapi Jorão kupe mbyte py. Ikuraxō rupi hu'y oxa oiny ramo okaróxa py ae ho'a.

²⁵ Ha'e ramo Jeú aipoe'i oxondaro ruvixa Bidcar pe:

— Eraa ke, ha'e emombo Jezreel pygua Nabote yvykue py. Mba'eta nema'endu ke, ndereve tuu Acabe rakykue rupi kavaju áry jaa jave hovai SENHOR aipoe'i ma voiague re:

²⁶ “Kuee ka'aru Nabote ha'e ta'y kuery ruguy omoē rā aexa va'ekue rupi aipoe'i: Anhetē ha'e va'e mba'ety py ae avi 'rā amboaga”, he'iaque re. Ha'e nunga rupi eraa ha'e va'e mba'ety py ae emombo, SENHOR ijayvuaque rami vy — he'i.

²⁷ Ha'e nunga Judá pygua huvixa Acacias oexa vy onha ovy Bete-Hagā katy tape oo va'e rupi. Ha'e rami tei Jeú ma hakykue monha avi vy aipoe'i:

— Pejuka avi — he'i ramo oipyxo ikaróxa py ae, Ibleão katy'i Gur katy ooa py. Ha'e ramo Megido katy onhave vy ha'e py mae omano.

²⁸ Ha'e ramo karóxa pyve hembiguai kuery ogueraa Jerusalém py. Ha'e vy onhono porā okuapy tetā Davi rekoague py, tamoi kuery rupa vyvry ae.

²⁹ Acabe ra'y Jorão onze ma'et'y re ma huvixa oí rire Acacias omboypy va'ekue Judá kuery re opena aguā.

Jezebel omanoague

³⁰ Ha'e gui Jezebel oendu omombe'ua rā Jezreel py Jeú ovaē maa. Ha'e rami vy onhemopytāmba guexa vyvry rupi, omoatyrōmba o'a, ha'e vy janela gui oma'ē ho'amy.

³¹ Ha'e gui ma huvixa roka rokē rupi Jeú oxa ramo kunha va'e aipoe'i:

— O nderuvixa jukaare Zinri, jomeme reiko porā'i vy teve reju?^{*}

³² Ha'e ramo Jeú yvate katy oma'ē janela oí va'e re. Ha'e vy aipoe'i:

— Mava'e tu xea katygua peiko? Mava'e tu? — he'i. Ha'e ramo mokoí e'y vy mboapy tembiguai ikuai va'e oma'ē okuapy hexe.

³³ Ha'e kuery pe aipoe'ive ju:

— Pemombo ke kunha va'e upe gui yvy katy — he'i. Ha'e ramo kunha va'e emombo okuapy yvy katy. Ha'e vy oo mbotya re huguy hayvipa, ha'e kavaju kuery re voi, hi'áry rupi Jeú ogueroguata rā.

* 9:31 Jeú pe ma “Zinri” he'i ombotea rupi e'y, mba'eta Zinri ma ymave rupi nguvixa ojuka avi, ha'e gui sete ára ete'i rire ojukaa avi va'ekue (1 Reis 16.8-20).

³⁴ Ha'e gui ma opy oike ma vy okaru ha'e oy'u ma. Ha'e rire mae ma aipoe'i:

— Pepeña ke kii heko vai va'e retekue re. Peraa, penhono porã, huvixa rajyuke ae ramo — he'i.

³⁵ Ha'e ramo oje'oi okuapy onhono porã aguã. Ha'e rami teĩ hetekue ma ndojouvei inhakãgue e'ÿ vy, ha'e gui ipykue ha'e ipokue anho'i.

³⁶ Ha'e kuery ojevuy ju vy omombe'u okuapy ixupe. Ha'e ramo aipoe'i:

— Ha'e nunga ma SENHOR ijayvuague rami ae oiko, guembiguai Tisbé pygua Elias rupi aipoe'i ukaague rami. Ha'e vy aipoe'i: “Jezreel yvy py jagua kuery ho'upa 'rã Jezabel retekue.

³⁷ Ha'e gui Jezabel rete rembyrekue ma tepoxi rami rive 'rã opyta Jezreel yvy rupi. Ha'e rami rire avave rei 'Apy ma Jezabel itui', nda'eavei 'rã.”

10

Acabe ro pygua kuery Jeú ojuka ukapaague

¹ Samaria tetã py setenta ikuai Acabe ra'y kuery. Ha'e gui Jeú ma kuaxia ombopara vy omondouka ha'e katy, tetã pygua huvixa kuery pe, nhomongeta va'ety ha'e Acabe ra'y kuery re opena va'ety kuery pe. Ha'e vy aipoe'i:

² “Peẽ kuerya py pereko penderuvixakue ra'y kuery, ha'e gui karóxa, kavaju, tetã ikorapa va'e ha'e tembiporu joe opu'ãa pygua ha'e javi. Ha'e nunga rupi peẽ kuerya py kova'e kuaxia para oguerovaẽa ramove'i

³ peiporavo penderuvixa ra'ykue'i va'e kuery regua hi'aranduve ha'e omboetevepy. Ha'e va'e ma pemoĩ 'rã penderuvixarã penderu rãgue'i rekovia, ha'e gui peju xereve pejoguero'a aguã penderuvixa ro pygua kuery pepya rupi”, he'i uka.

⁴ Ha'e rami teĩ ha'e kuery okyje ete vy joupe-upe aipoe'i okuapy:

— Mokoĩ huvixa voi nda'ipo'akai raka'e hexe. Ha'e nunga rupi mba'ixa tu nhande kuery nhandepo'aka ta hexe? — he'i joupe-upe.

⁵ Ha'e rami vy huvixa ro re ha'e tetã rupi opena va'e kuery, nhomongeta va'ety ha'e huvixa ra'y kuery re opena va'e kuery ombovai okuapy Jeú:

— Ore ma nerembiguai kuery ae, ha'e gui rejapo uka va'e ha'e javi tema ore kuery rojapo 'rã. Ore ma oreruvixarã noroiporavo reguai neĩ teĩve. Orereko tema ndee reipotaa rami — he'i uka okuapy.

⁶ Ha'e ramo Jeú ma kuaxia mboae ju ombopara ha'e kuery pe. Ha'e vy aipoe'i:

“Xapy'a rei xea katygua ae peiko vy, ha'e xenhe'ẽ rendu ta ri vy ma peipe'a 'rã penderuvixakue ra'y kuery akã. Ha'e gui ma ko'ẽ rã kova'e hora ojeupity ju jave peru xea py Jezreel py”, he'i.

Ha'e va'e jave huvixakue ra'y kuery setenta va'e ma tetã pygua mongakuaa kuery yvatekueve py ikuai.

⁷ Ha'e gui ha'e kuerya py kuaxia para oguerovaẽa ramo nguvixakue ra'y kuery ojopypa vy ojukapa setentave. Ha'e vy inhakãgue ajaka py omboyruva vy ogueraa uka okuapy Jezreel katy.

⁸ Jeú oia py peteĩ tembiguai ou vy aipoe'i ixupe:

— Oguerupaa ma huvixa ra'y kuery akãgue.

Ha'e ramo ombovai:

— Pemoĩ mokoĩ aty okẽ jaike'ia py, ko'ẽ rã peve.

⁹ Ha'e gui ma ko'ẽgue ha'e oo ha'e py. Ha'e vy opyta ho'amy vy aipoe'i heta va'e kuery pe:

— Kova'e nunga ma peẽ kuery kãuxa e'ÿ oiko. Xee ae rima xeruvixa rovai anhembopy'a vy ajuka. Ha'e rami teĩ mava'e tu kova'e kuery jukapaare?

¹⁰ Ha'e nunga rupi aÿ peikuaa ma SENHOR oayvu Acabe rovai omombe'u ma voi va'ekue ndoaxa rivei 'rãe, mba'eta SENHOR ojapo ma oayvu guembiguai Elias pe omombe'u ukaague — he'i.

¹¹ Ha'e rami vy Jeú ojukapa Jezreel tetã py Acabe ro pygua kuery okuave va'ekue, ixupegua yvatekueve ikuai va'ekue voi, irũ ha'e sacerdote kuery guive. Neĩ peteĩ'i ma voi ndoejai hembyre aguã.

¹² Ha'e gui ma Jeú oiko katu vy Samaria katy ojepe'a ovy. Tape rupi oo oiny vy, Bete-Equede dos Pastores tekoa py

¹³ nhovaexĩ Judã pygua huvixakue Acazias retarã kuery reve. Ha'e vy oporandu ha'e kuery pe:

— Mava'e kuery peẽ?

Ha'e kuery ombovai:

— Acazias rãgue'i retarã kuery roiko. Oreruvixakue ra'y kuery roexa aguã rima roje'oi, ha'e ixykue pi'a kuery voi — he'i okuapy.

¹⁴ Ha'e ramo Jeú ngupive oje'oi va'e pe

— Pejopypa ke oikove reve — he'i. Ha'e ramo oikove reve ojopypa vy ojukapa Bete-Equede ygua py ae. Quarenta e dois avakue ikuai va'ekue regua neĩ peteĩ'i ma voi ndoejai hembyre aguã.

Jonadabe reve Jeú nhovaexĩague

¹⁵ Ha'e gui oove vy nhovaexĩ Recabe ra'y Jonadabe reve, hexeve ovaexĩ aguã ae ou rã. Jeú oxarura reve oporandu ixupe:

— Anhetẽ ete pa nekuraxõ py xea katy reiko, xee ma ndea katy anhenhandua rami?

Jonadabe ombovai:

— Tá, ha'e rami ae ri aiko — he'i.

Ha'e ramo aipoe'i:

— Ha'e rami ete ri reiko vy xepopyy — he'i ramo Jonadabe oipopyy.

Ha'e gui Jeú ma okaróxa py ombojeupi ngupive oo aguã.

¹⁶ Ha'e vy ixupe aipoe'i:

— Jaa ha'vy xerupive, ha'e vy rexa 'rã SENHOR pe ete aikoa rupi ajapo va'e — he'i. Ha'e rami vy Jeú ogueraa okaróxa py.

¹⁷ Ha'e gui Samaria py Jeú ovaê ma vy ojukapa Acabe pegua kuery ha'e py okuave va'ekue omomba peve, Elias pe SENHOR ijavyuague rami vy.

Baal mbojeroviaa kuery Jeú ojuka ukapaague

¹⁸ Ha'e gui Jeú omboatypa heta va'e kuery, ha'e vy aipoe'i:

— Acabe ma amongue py ete'i ombojerovia va'ekue Baal. Ha'e rã xee Jeú ma opa mba'e py 'rã ambojerovia.

¹⁹ Ha'e nunga rupi penoimba xea py Baal pegua profeta kuery, imbojeroviaa ha'e ixupegua sacerdote ikuai va'e ha'e javi. Neĩ peteĩve ma voi toata eme, mba'eta heta mba'e areko Baal pe ame'ê va'erã. Ha'e javi oata va'e ma ndoikovei 'rã — he'i. Ha'e rami Jeú ijavyu nhombotavy vy, Baal mbojeroviaa kuery ojukapaxe vy.

²⁰ Jeú aipoe'ive ju:

— Pejapo ke Baal pegua nhemboaty iky'a e'y va'erã — he'i. Ha'e ramo omombe'u okuapy.

²¹ Israel ha'e javi rupi Jeú omondouka ayvu reraarã. Ha'e ramo oupa okuapy Baal mbojeroviaa kuery ha'e javi, neĩ peteĩ'i ma voi ndou e'y'i. Ha'e rami vy oikepa okuapy Baal pegua opy, ha'e javi rupi omoneyê.

²² Ha'e gui ma ao re opena va'ety pe Jeú aipoe'i:

— Erupa ke ao Baal mbojeroviaa kuery pegua, ha'e kuery ha'e javi onhemonde aguã — he'i. Ha'e ramo ha'e rami ojapo.

²³ Ha'e gui mae Jeú oike Baal ropy Recabe ra'y Jonadabe reve. Ha'e vy aipoe'i Baal mbojeroviaa kuery pe: — Peikuaa pota, pexa pota porã apy peê kuery mbyte SENHOR rembiguai kuery ndoiko'i pa ra'e, Baal mbojeroviaa anho e'y vy mba'e — he'i.

²⁴ Ha'e gui ha'e kuery oike jogueravy mba'emo oapy reve ome'ê aguã. Ha'e rã oka katy ma Jeú omoĩ ma voi va'ekue oitenta avakue. Ha'e va'e kuery pe “Avakue pendepo py amboaxa va'ekue regua oo jepe ri ramo hekovia aipe'a 'rã imondoukaare rekove”, he'i va'ekue.

²⁵ Ha'e gui Jeú mba'emo oapy reve ome'êmba ma vy aipoe'i uka jopya ha'e xondaro ruvixa kuery pe:

— Peike ke, pejukapa. Pemondouka eme neĩ peteĩve voi — he'i. Ha'e ramo ojukapa okuapy kyxé py, ha'e jopya ha'e xondaro ruvixa kuery omombopa oka py. Ha'e va'e rire oikeve jogueravy Baal ra'angaa oĩaty opyve katy.

²⁶ Ha'e rami vy oguenoê mba'emo ra'angaa omopu'ã mbyre Baal ropy oĩ va'ekue. Ha'e vy oapypa okuapy.

²⁷ Oguenoê avi Baal ra'angaa omopu'ã mbyre ae. Ha'e rami vy oitypa okuapy Baal pegua oo oĩ va'ekue, ha'e oĩague ma ojapo tepoxi rorã rive ju, a'y peve guarã.

²⁸ Ha'e rami vy Israel gui Jeú omomba Baal peguare kuery.

²⁹ Ha'e rami teĩ Jeú ae ma ndojepe'ai tema Nebate ra'y Jeroboão ojevavyague ramigua gui, mba'eta ha'e va'e ma Israel kuery oguerojevavy aguã vaka ra'y ouro guigua ojapo va'ekue, Betel ha'e Dã py omoĩ vy.

³⁰ SENHOR ijavyu Jeú pe:

— Ndee ma xerenonde rupi ha'evea ramigua rejapo vy xee anhembopy'aaague ha'e javi rupi remomba Acabe ro pygua kuery, ha'e rami rire neramymino jevy-jevuy ikuai va'e voi oquapy 'rã Israel kuery ruvixa renda áry — he'i.

³¹ Ha'e rami teĩ Jeú ma opy'a ha'e javi py e'y oiko SENHOR Israel kuery ruete guigua lei rupi, neĩ ndojepe'ai guye Jeroboão Israel kuery oguerojevavyague ramigua gui.

Jeú omanoague

³² Ha'e va'e ára guive SENHOR omboypy Israel kuery yvy omokyrĩve aguã, Hazael ojukapa rire ijyvy ha'e javi rupi,

³³ Jordão yakã guive kuaray oua katy peve, ha'e Gileade yvy ha'e javi. Ha'e va'e ma Gad, Rúben ha'e Manassés regua yvy itui va'ekue Arnom yvyugua katy'i Aroer oĩ va'e guive, Gileade ha'e Basã yvy ae.

³⁴ Ha'e gui oĩve rei tema Jeú rekokie regua. Ha'e rami avi ipo'akaague ha'e mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokie oĩa re?

³⁵ Ha'e gui ma Jeú ndoikovei'i ma guamoĩ kueryague rami. Ha'e ramo onhono porã Samaria py. Ha'e gui ta'y Jeocaz ju oĩ huvixarã ngu rekovia.

³⁶ Samaria py Jeú vinte e oito ma'et'y re huvixa oĩ va'ekue.

11

2 Crônicas 22.10-12

¹ Ha'e gui Acazias xy Atalia oendu opi'a omano maa. Ha'e vy opu'ã vy ojukapa guemiarirō kuery voi.*

² Ha'e rã Acazias ra'y Joás ma ha'e kuery ojukaa ta jave Jorão rajy Jeoseba Acazias reindy va'e ogueraa jepe huvixa ra'y kuery mbyte gui. Ha'e rami vy onhomi peteĩ opy mbyteve katy hexe opena va'ety reve. Atalia gui onhomi vy ndojuka ukai nho.

³ SENHOR pegua opy ae Jeoseba onhomi mboapy meme ma'et'y re. Ha'e va'e jave ma Atalia ae huvixa oĩ ha'e va'e yvy re.

2 Crônicas 23.1-11

* 11:1 Guemiarirō kuery ojukapa ha'e ae anhembouvixaxe vy.

⁴ Ha'e gui sete ma'etÿa py Joiada oenoï uka Cária guigua kuery ha'e harõa ikuai va'e ruvixa kuery.[†] Ha'e vy oïa py omoinge ukapa SENHOR pegua opy ae. Ha'e kuery reve jogueroayvu. Ojapo avi ha'e kuery oura aguã SENHOR ropy ae. Ha'e vy mae ha'e kuery pe oexa uka huvixa ra'ykue.

⁵ Ha'e rami vy ha'e kuery pe ijayvu vy aipoe'i:

— Peë kuery ma mboapy henda py 'rã pendekuai. Peteï regua ma sábadu py peike vy pearõ 'rã huvixa ro py.

⁶ Ha'e gui amboae regua ma Sur Okê 'epy va'e py 'rã pearõ. Ha'e gui amboae regua ma okê jopya kuery ikuai va'e rovai rupi 'rã pearõ. Ha'e rami 'rã pearõ pekuapy kova'e oo.

⁷ Ha'e gui mokoï regua sábadu py oje'oi va'e kuery ha'e javi 'rã oarõ SENHOR pegua oo, huvixa yvÿry.

⁸ Ha'e rami vy huvixa yvÿry ae 'rã pendekuai, peteï-teï pendepo py tembiporu pereko reve. Ha'e gui mava'e rã rei penderyxy va'e mbyte rupi oaxa ta va'e pejuka 'rã. Huvixa reve ae 'rã peiko oë ovy jave, ha'e gui oïke ovy jave voi — he'i.

⁹ Ha'e ramo cem ikuai va'e-va'e ruvixa kuery ojapo okuapy sacerdote Joiada ojapo uka va'ekue ha'e javi. Ha'e rami vy peteï-teï ogueraa guexevagua avakue sacerdote Joiada oïa py, sábadu ára py oïke ha'e oë ta va'e kuery.

¹⁰ Ha'e ramo cem ikuai va'e-va'e ruvixa kuery pe sacerdote omboaxa hu'y guaxu ha'e hu'y jokia huvixa Davi mba'ekue, SENHOR pegua opy omoï porã mbyre.

¹¹ Ha'e ramo huvixa ro rarõa kuery ikuai, peteï-teï guembiporu reve, huvixa ro oïporu kuaa ha'e oïporu kuaa e'ÿa rupi, altar ha'e templo peve.

¹² Ha'e gui mae ma Joiada oguenoë huvixa ra'ykue. Inhakã re coroa omoï vy ixupe ome'ë kuaxia para Nhanderuete ayvu oïa. Ha'e rami vy nguvixarã omoï okuapy azeite oikyty reve. Ha'e vy ojepopete-pete reve ojapukai okuapy:

— Toiko riaa nhanderuvixa!

2 Crônicas 23.12-15

¹³ Harõa ha'e heta va'e kuery ojapukai okuapy rã Atalia oendu vy ha'e kuerya py ou SENHOR pegua opy.

¹⁴ Ha'e py oma'ë rã huvixa hi'ai ma oo yta yvÿry huvixa va'e nhavõ hi'aiaty py ae. Huvixa renonde ikuai avi harõa kuery ruvixa ha'e mimby guaxu monhe'ëa kuery. Heta va'e kuery ha'e javi oguero vy'a okuapy, ha'e omonhe'ëa avi mimby guaxu. Ha'e nunga Atalia oexa vy oao omondoro reve ojapukai:

— Xerovaigua ra'el! Xerovaigua ra'el! — he'i.

¹⁵ Ha'e ramo sacerdote Joiada ma xondaro ruvixa kuery pe ijayvu vy aipoe'i:

— Kunha va'e penoë ke heravy hyxy okuapy va'e kuery mbyte rupi. Amongue hupive oo ta ramo pejuka 'rã kyxe py — he'i. Mba'eta sacerdote ae “Pejuka eme SENHOR pegua opy” he'iaque rami.

¹⁶ Ha'e ramo ojopy okuapy kunha va'e. Ha'e rami vy kavaju rape oï va'e rupi ogueraa huvixa ro peve. Ha'e py mae ma ojuka.

2 Crônicas 23.16-21

¹⁷ Ha'e gui ma Joiada ojapo SENHOR pe ete ha'e kuery ikuai aguã regua, ha'e ae ha'e heta va'e kuery reve.

¹⁸ Ha'e ramo heta va'e kuery ovyvy ha'e javi gui ou va'ekue oïke okuapy Baal pegua oo py, ha'e vy ombovaipa. Ixupegua altar ikuai va'ekue omopêmba okuapy, ta'angaa ikuai va'e voi. Baal pegua sacerdote Matã voi ojuka altar yvy'iry.

Ha'e gui sacerdote Joiada omoï SENHOR pegua oo rarõarã kuery.

¹⁹ Ha'e rami vy ogueraapa Cária guigua kuery ruvixa, harõa kuery ruvixa kuery ha'e heta va'e kuery ovyvy ha'e javi gui ou va'ekue. Ha'e va'e kuery ha'e javi reve ogueraa huvixa SENHOR pegua oo gui. Ha'e rami vy nhoarõa kuery rokê rupi tape oo va'e rupi oguenovaë huvixa ro py ae. Ha'e ramo Joás oguapy oiny tenda huvixa va'e nhavõ openaaty áry.

²⁰ Ha'e ramo heta va'e kuery ovyvy gui ou va'ekue ha'e javi ovy'a okuapy, tetã rupi voi ha'ave rei va'e ikuai, huvixa ro py Atalia kyxe py ojukaa ma rire.

²¹ Joás ma sete ma'etÿ oguereko huvixarã omoïa ypy'i jave.

12

2 Crônicas 24.1-14

¹ Israel pygua huvixa Jeú sete ma'etÿ re ma oï rire Joás oï huvixarã. Ha'e gui quarenta ma'etÿ re opena Jerusalém py. Ixy ma Berseba pygua Zíbia.

² Joás ma ha'eva ramigua ojapo oikovy SENHOR renonde, sacerdote Joiada ombo'e herekovya ja.

³ Ha'e rami teï ombojeroviaaty yvy'ã rupi ikuai va'e nombovaipai. Ha'e ramo heta va'e kuery mba'emo ome'ë okuapy ha'e py, heakuã porã va'e oapy avi teri okuapy.

⁴ Ha'e gui Joás aipoe'i sacerdote kuery pe:

— Pemono'õ 'rã peráta iky'a e'ÿ va'e SENHOR pe ome'ë mbyre, imposto re peteï-teï ome'ë va'ekue, amongue rekovia ome'ë mbyre, ha'e gui peráta peteï-teï onhenhandua'i rami ome'ë va'ekue SENHOR ropy guarã.

⁵ Ha'e va'e ma sacerdote ikuai va'e ae 'rã ojopy, peteï-teï oïrũ kuery gui. Ha'e va'e py ha'e kuery omoatyrõ 'rã oo ivaipaa oïa rupi — he'i.

⁶ Ha'e gui vinte e três ma'etÿ re ma huvixa Joás oï teï sacerdote kuery nomoatyrõ teri oo ivaipaague.

[†] 11:4 Joiada ma sacerdote yvateve va'e ha'e Joseba me, Nhanderuete pe ete oiko va'e. Gua'yxy reve onhomi huvixa ra'y Joás sete ma'etÿ oguereko peve, ha'e gui omoï uka huvixarã.

⁷ Ha'e ramo huvixa Joás oenoĩ sacerdotete Joiada ha'e sacerdotete kuery mboae. Ha'e vy aipoe'i ha'e kuery pe: — Mba'e re tu napemoatyroi ri oo ivaipaa oĩa rupi? Aỹ gui ma ndapejopyvei ma 'rã peráta peneirũ kuery gui. Ha'e rami 'rãgue py pemboaxapa 'rã oo moatyroiã kuery pe — he'i.

⁸ Ha'e ramo sacerdotete kuery ojou porã okuapy heta va'e kuery gui peráta ojopy ve'yã aguã, oo ivaipaa oĩa rupi ha'e kuery ae omoatyroiã ve'yã aguã.

⁹ Ha'e ramo sacerdotete Joiada ma petei hyru ojopy uka vy ombokua uka imbotya re. Ha'e vy altar vyryry omoĩ, SENHOR ropy oike va'e kuery oiporu kuaa regua re. Ha'e rami vy ha'e py ae sacerdotete kuery okẽ rarõa ikuai va'e omoĩ peráta SENHOR pegua opy ogueru pyre ha'e javi.

¹⁰ Ha'e gui hyru py heta ma peráta oĩ nhavõ oexa rã huvixa pegua kuaxia re opena va'ety oo kuerei 'rã sacerdotete vyateve va'e reve, ha'e vy oipapa vy omboyrupa 'rã okuapy SENHOR ropy peráta ogueru pyre.

¹¹ Ha'e rami vy peráta opesapa rire omboaxapa 'rã SENHOR pegua oo moatyroiã kuery re opena va'e kuery po py. Ha'e va'e kuery ju opaga 'rã oo apoa ha'e oo ivaipaague omoatyroiã va'e kuery pe,

¹² ita re omba'eapo ha'e imboa'ya kuery pe guive. Ha'e ramo ha'e kuery ojogua 'rã yvyra ha'e ita omoatyroiã mbyre SENHOR pegua oo ivaipaa oĩa rupi omoatyroiã aguã. Opaga avi SENHOR pegua oo omoatyroiã py oiporua va'erã ha'e javi.

¹³ Ha'e gui peráta SENHOR pegua oo py ogueru pyre gui ma ndojapoai hy'a prata guigua, nei tapyĩ araa, hy'a guaxu, mimby guaxu, nei hyru SENHOR pegua oo pyguarã ndojapoai ha'e va'e ouro ha'e prata gui.

¹⁴ Ha'e rami 'rãgue py omboaxapa omba'eapo va'e kuery re opena va'e kuery pe. Ha'e ramo ha'e va'e py omoatyroiã okuapy SENHOR pegua oo.

¹⁵ Ha'e ramive nei ndoikuaa potaavei avakue peráta jopyare re, omba'eapo va'e kuery pe ome'ẽ va'erã kuery re. Mba'eta ha'e kuery ma ojeroviapy meme ikuai omba'eapoa py.

¹⁶ Ha'e rã peráta mba'emo omboekovia aguã regua ha'e jejavya regua ome'ẽmby ma ndogueruai SENHOR pegua oo py. Ha'e va'e ma sacerdotete kuery peguarã anho.

¹⁷ Ha'e va'e jave ma Síria pygua huvixa Hazael opu'ã vy joguero'a Gate tetã ojopy aguã, ha'e vy ipo'aka. Ha'e va'e rire Hazael kuery Jerusalém katy ooxe avi ojopy aguã.

¹⁸ Ha'e ramo Judã pygua huvixa Joás ma oipe'apa mba'emo iky'a e'y va'erã guamoĩ kuery Judã pygua huvixa va'e SENHOR pe omboaxa va'ekue, Josafã, Jeorãõ ha'e Acazias. Oipe'a avi ouro SENHOR ropy ha'e huvixa ropy omoĩ porã mbyre. Ha'e va'e ma Síria pygua huvixa Hazael pe omondouka. Ha'e ramo nopenavei Jerusalém tetã re.

¹⁹ Ha'e gui oĩve rei tema Joás rekokie regua. Ha'e rami avi mba'emo ojapo va'ekue ha'e javi noĩ 'rã teve kuaxia Judã pygua huvixa kuery rekokie oĩa re?

2 Crônicas 24.25-27

²⁰ Ha'e gui ma Joás rembiguai kuery hovai opu'ã vy oipyxo okuapy Milo ro py, Sila katy jaguejy'i javya py.

²¹ Ha'e vy hembiguai Simeate ra'y Jozacar ha'e Somer ra'y Jozabate ae oipyxopa okuapy ramo omano. Ha'e ramo onhono porã tuu kuery rupa katy'i Davi rekoague py. Ha'e gui ta'y Amazias ju huvixarã oĩ nguu rekovia.

13

Israel pygua huvixa Jeoacaz oĩ jave guare

¹ Acazias ra'y Joás vinte e três ma'etỹ re ma Judã pygua huvixa oĩ rire Jeú ra'y Jeoacaz oĩ Israel pygua huvixarã. Samaria py opena dezesseite ma'etỹ re.

² Ha'e va'e ma ha'eve'yã va'e ojapo oikovy SENHOR renonde, mba'eta Nabote ra'y Jeroboãõ Israel kuery oguerojejavague rupi ae ju oiko, ndojepe'ai guive ha'e rami oikoague gui.

³ Ha'e nunga rupi SENHOR poxya hendy Israel kuery rovai. Ha'e rami vy omboaxapa Síria pygua huvixa Hazael ha'e ta'y Ben-Hadade po py, Jeoacaz oĩa pukukue re.

⁴ Ha'e rami teĩ SENHOR renonde Jeoacaz ojerure ramo oendu guive, mba'eta oexa Síria pygua huvixa Israel kuery ombojexavai rã.

⁵ Ha'e rami vy SENHOR petei ombou Israel kuery reraa jepearã. Ha'e ramo Israel kuery ma Síria kuery po'akaa gui oo jepe nho vy ha'ekue rami ae ju ikuai ngoogue rupi.

⁶ Ha'e rami teĩ ndojepe'ai tema okuapy Jeroboãõ Israel kuery oguerojejavague ramigua gui, ha'e va'ekue rupi ae tema ikuai, ndoipe'ai guive ta'angaarã yvyra Samaria py omopu'ã mbyre.

⁷ Ha'e ramo Jeoacaz pegua xondaro kuery ma Síria pygua huvixa omomba rire ndokuavei, cinqüenta kavaju árygua ete'i e'y vy, ha'e dez karõxa ha'e dez mil avakue yvy rupigua. Yvy ku'i rami ojapo omou'ũmba vy.

⁸ Ha'e gui oĩve rei tema Jeoacaz rekokie regua. Ha'e rami avi mba'emo opo'akaa rupi ojapo va'ekue ha'e javi noĩ 'rã teve kuaxia Israel pygua huvixa kuery rekokie oĩa re?

⁹ Ha'e gui ma Jeoacaz ndoikovevei'i ma guamoĩ kueryague rami. Ha'e ramo onhono porã Samaria py. Ha'e ramo ta'y Jeoás ju oĩ nguu rekovia.

Israel pygua huvixa Jeoás oĩ jave guare

¹⁰ Judã pygua huvixa Joás trinta e sete ma'etỹ re ma oĩ rire Jeoacaz ra'y Jeoás oĩ Israel pygua huvixarã. Ha'e gui Samaria py opena dezesseis ma'etỹ re.

¹¹ Ha'e va'e ma ha'eve'yã ramigua ojapo oikovy SENHOR renonde. Ha'e rami vy ndojepe'ai Nabote ra'y Jeroboãõ Israel kuery oguerojejavague ramigua gui. Ha'e rami vy hekokie rupi ae oiko.

¹² Ha'e gui oïve rei tema Jeoás rekokie regua. Ha'e rami avi Judá pygua huvixa Amazias rovai opu'ãague, ha'e mba'emo opo'akaa rupi ojapo va'ekue ha'e javi noi 'rã teve kuaxia Israel pygua huvixa kuery rekokie oïa re?

¹³ Ha'e gui Jeoás ndoikovevei'i ma guamoï kueryague rami. Ha'e ramo onhono porãa Samaria py ae, Israel pygua huvixa kuery rupa vyýry. Ha'e gui hekovia ma oï Jeroboão.

Eliseu opa vygua ayvu omombe'u rire omanoague

¹⁴ Ha'e gui Eliseu ma ojexavai oupy mba'eaxy gui, omano rai'i ma. Ha'e ramo Israel pygua huvixa Jeoás ou oipou aguã. Ha'e vy hexe ojae'o vy aipoe'i:

— Xeru, xeru! Ha'vy Israel kuery karóxa ha'e kavaju árygua kuery!

¹⁵ Ha'e ramo ixupe Eliseu

— Ejopy ke peteï guyrapa ha'e hu'y — he'i. Ha'e ramo ojopy peteï guyrapa ha'e hu'y.

¹⁶ Aipoe'ive ju Israel pygua huvixa pe:

— Emoatã ke guyrapa — he'i ramo omoatã. Ha'e gui ma huvixa po áry Eliseu omoï opo.

¹⁷ Ha'e vy aipoe'i:

— Peipe'a janelá kuaray puku-a katygua. Ha'e kuery oipe'a ramo Eliseu aipoe'ive ju:

— Emombo ke — he'i ramo omombo.

Aipoe'ive ju:

— Ha'e va'e hu'y ma SENHOR ipo'akaa regua kuaa ukaarã, hu'y Síria kuery re ipo'aka aguã regua, mba'eta Afeca py reitypa 'rã Síria kuery remomba peve — he'i.

¹⁸ Ha'e gui ma aipoe'ive teri:

— Hu'y rembyrekue ju ejopy — he'i ramo Israel pygua huvixa hu'y ojopy jevy ramo aipoe'i ixupe:

— Einupã ke yvy re — he'i. Ha'e ramo mboapykue yvy re oinupã ma vy opytu'u.

¹⁹ Ha'e rami rã ixupe Nhanduerete remimbo'e ivai vaipa vy aipoe'i:

— Cinco-kue e'y vy seis-kue reinupã va'e rire Síria pygua kuery reity ete 'rãgue remomba peve. Ha'e rami teï aý mboapykue'i 'rã reity Síria pygua kuery — he'i.

²⁰ Ha'e gui ma Eliseu omano. Ha'e ramo onhono porãa.

Ha'e gui Moabe pygua kuery regua ma ára pyau ojeupity nhavõ ijyvy re jogueru jepi 'rã mba'emo oipe'apa aguã.

²¹ Ha'e gui ma peteï ava retekue hetarã kuery ojaty jave oexa okuapy Moabe pygua kuery ou rã. Ha'e rami vy hetekue ma Eliseu rupa py rive omombo okuapy. Ha'e gui Eliseu kãgue re hetekue oje'a ramove ava va'e oikove jevy vy opu'ã ho'amý.

²² Jeocaz oïa pukukue re Síria pygua huvixa Hazael ombojexavai imbokuapy Israel kuery.

²³ Ha'e ramo SENHOR omboaxy nho oayvu vy. Ha'e kuery re oma'ẽ Abraão, Isaque ha'e Jacó reve guexeve guarã ojapo va'ekue re ima'endu'a vy. Nomombaxe etei, guenonde gui nomomboi teri guive.

²⁴ Ha'e gui Síria pygua huvixa Hazael omano ma ramo ta'y Ben-Hadade ju oï nguu rekovia.

²⁵ Jeocaz oï jave hexeve Ben-Hadade joguero'a vy ojopy ixupegua tetã ikuai va'ekue. Ha'e va'e tetã ma Jeocaz ra'y Jeoás ju ojopypa Ben-Hadade po'akaa gui. Mboapykua ma Jeoás oitypa vy ojopy Israel kuery retã ikuai va'ekue.

14

2 Crônicas 25.1-4

¹ Jeocaz ra'y Jeoás mokoï ma'etý re ma Israel pygua huvixa oï rire Joás ra'y Amazias oï Judá pygua huvixarã.

² Ha'e va'e ma vinte e cinco ma'etý ogueroko huvixa oï ypy'i jave py, ha'e vinte e nove ma'etý re opena Jerusalém py. Ixy rery ma Jeoadã, Jerusalém pygua ae.

³ Ha'e ma ha'eva ramigua ojapo oikovy SENHOR renonde rupi, teï guamoï Davi rami ete'y ju ta'vy. Ha'e rami vy nguu Joás ojapoague ramigua meme ojapo oikovy.

⁴ Ha'e rami avi ombojeroviaaty yvy'ã rupi ikuai va'e nombovaipai. Ha'e rami vy ha'e va'e rupi teri heta va'e kuery mba'emo ome'ẽ, ha'e hekuã porã va'e oapy okuapy.

⁵ Ha'e gui opo'akaa re oï atã ma rire ojuka ukapa guembigua kuery tuu jukaare.

⁶ Ha'e rã ijukaare ra'y kuery ma ndojuka ukai, Moisés kuaxia re omboparaague rami vy, mba'eta SENHOR ojapo uka vy aipoe'i: “Tuu kuery ma ndojukaai 'rã ta'y kuery ojapo vaiague re, ta'y kuery voi ndojukaai 'rã tuu kuery ojapo vaiague re. Peteï-teï ojukaai 'rã ha'e ae ojevavyague re”, he'iaque rami.

2 Crônicas 25.5-13

⁷ Yvyugua Juky 'epy va'e oïa py Amazias ojuka Edom pygua kuery dez mil, ha'e vy joguero'aa py ojopy Sela tekoa. Ha'e va'e ma omboery ju Jocteel, aý peve guarã.

2 Crônicas 25.17-24

⁸ Israel pygua huvixa ma Jeocaz ra'y Jeoás, Jeú ramymino va'e. Ha'e va'ea katy Amazias omoundouka ayvu momb'e'uarã kuery.

— Peju, jajoguero'a — he'i uka.

⁹ Ha'e rami teï Israel pygua huvixa Jeoás ombovai Judá pygua huvixa Amazias:

— Ha'e gui Líbano vvy re ma je peteĩ juu rakuaendy hi'aĩ va'e oayvu omondouka yary ha'e py hi'aĩ avi va'e pe: “Eme'ê na nderajy xera'y ra'yxyrã”, he'i uka. Ha'e rami teĩ juu rakuaendy re mymba kuery Líbano vvy regua opyrõmba rive.*

¹⁰ Ha'e gui ndee ma anhetê ete Edom pygua kuery re ndepo'aka va'ekue, ha'e rami vy nekuraxõ re oĩ renhemboyvate reixea. Ha'e nungakue roeroy'a vy ndero py ae repyta 'rãgue. Mba'e re tu rejeyty ukaxe ri mba'emo vai py, Judá pygua kuery reve? — he'i uka.

¹¹ Ha'e rami teĩ Judá pygua huvixa Amazias noendu potai. Ha'e rami vy oo nho Judá regua Bete-Semes tekoa py joe opu'ã aguã Israel pygua huvixa Jeoás reve.

¹² Ha'e gui ma Israel kuery renonde rupi Judá pygua kuery oitypaa. Ha'e vy peteĩ-teĩ onhamba ngoo katy.

¹³ Ha'e gui Bete-Semes py ae Israel pygua huvixa Jeoás ojopy Judá pygua huvixa Joás ra'y Amazias, Acazias ramymino va'e. Ha'e rami vy Jerusalém py oo vy oitypa tetã kora rokê Efraim 'epy va'e guive ojerea katy'i okê hi'aĩague peve, cento e oitenta metros va'ekue ha'e javi.

¹⁴ Ha'e rami vy oipe'apa ouro, prata ha'e mba'emo ryrũ SENHOR ropy ikuai va'ekue, huvixa ro py mba'emo omoĩ porã mbyre ha'e javi guive. Ogueraa avi avakue mba'emo re omboekovia va'erã. Ha'e gui mae ma ojevũ ju Samaria katy.

Israel pygua huvixa Jeoás omanoague

¹⁵ Ha'e gui oĩve rei tema Jeoás rekokie regua. Ha'e rami avi Judá pygua huvixa Amazias re opu'ãague, ha'e mba'emo opo'akaa rupi ojapo va'ekue ha'e javi noĩ 'rã teve kuaxia Israel pygua huvixa kuery rekokie oĩa re?

¹⁶ Ha'e gui ma Jeoás ndoikovevei'i ma guamoĩ kueryague rami. Ha'e ramo onhono porãa Samaria py, Israel pygua huvixa kuery rupa yrýry ae. Ha'e ramo ta'y Jeroboão ju oĩ nguu rekovia.

2 Crônicas 25.25-28

¹⁷ Jeocaz ra'y Jeoás Israel pygua huvixa omano ma rire Joás ra'y Amazias Judá pygua huvixa oikove ranhe quinze ma'etý re.

¹⁸ Ha'e gui oĩve rei tema Amazias rekokie regua. Ha'e rami avi mba'emo opo'akaa rupi ojapo va'ekue ha'e javi noĩ 'rã teve kuaxia Judá pygua huvixa kuery rekokie oĩa re?

¹⁹ Ha'e va'e rovai Jerusalém py jogueroayvua ramo onha Laquis katy. Ha'e rami teĩ hakykue omondoukaa avakue Laquis peve. Ha'e rami vy ha'e pyve ojuka.

²⁰ Ha'e rami vy kavaju áry ogueru vy Jerusalém tetã py ae onhono porãa, tetã Davi rekoague py tuu kuery rupa vyvry.

²¹ Ha'e gui ta'y Uzias ma dezesseis ma'etý oguereko reve Judá pygua kuery omoĩ okuapy tuu Amazias rekovia.

²² Ha'e va'e ma Elate tetã omoatyrõ ma vy ojapo Judá kuery rekoarã, tuu Amazias guamoĩ kueryague rami ndoikovevei'i ma rire.

Israel pygua huvixa Jeroboão mokoĩa va'e oĩ jave guare†

²³ Joás ra'y Amazias Judá pygua huvixa quinze ma'etý re ma oĩ jave Samaria py oĩ Jeoás ra'y Jeroboão Israel pygua huvixarã. Ha'e rami vy quarenta e um ma'etý re oĩ huvixa.

²⁴ Ha'e va'e ma mba'emo vai anho ojapo oikovy SENHOR renonde rupi. Neĩ ruxã'i ma voi ndojepe'ai Nabote ra'y Jeroboão Israel kuery oguerojeyavyague ramigua gui.

²⁵ Ha'e va'e ma Israel kuery omoĩ atã ju ijyvy apy rupi, Hamate py jaikeaty guive vvy joja reia regua ye'ê rembe peve, SENHOR Israel kuery ruete ijavyuague rami vy, guembigui Amitai ra'y profeta Jonas Gate-Hefer pygua ayvu rupi.

²⁶ Mba'eta SENHOR oexa rã Israel kuery opa mba'e py ojexavai okuapy, ndoikoĩ guive Israel kuery repyará, neĩ escravo ha'e escravo e'y voi.

²⁷ Ha'e va'e jave ma SENHOR nda'ijavyvui teri Israel rery ombogue aguã re yva guy rupi gui. Ha'e rami vy Jeoás ra'y Jeroboão pe ogueraa jepe uka.

²⁸ Ha'e gui oĩve rei tema Jeroboão rekokie regua. Ha'e rami avi joe opu'ãa rupi Judá regua tetã Damasco ha'e Hamate re ipo'akaague Israel rekoarã, ha'e mba'emo opo'akaa rupi ojapo va'ekue ha'e javi noĩ 'rã teve kuaxia Israel pygua huvixa kuery rekokie oĩa re?

²⁹ Ha'e gui Jeroboão ndoikovevei'i ma nguu kuery Israel pygua huvixa ikuai va'ekue rami. Ha'e ramo ta'y Zacarias ju oĩ nguu rekovia.

15

2 Crônicas 26.1-15

¹ Vinte e sete ma'etý re ma Israel pygua huvixa Jeroboão oĩ jave py Amazias ra'y Azarias oĩ Judá pygua huvixarã.*

² Ha'e va'e ma dezesseis ma'etý oguereko jave py oĩ ypy'i huvixa, ha'e vy cinqüenta ma'etý re opena Jerusalém py. Ixy ma Jecolias, Jerusalém pygua ae.

³ Ha'e ma ha'evea ramigua ojapo oikovy SENHOR renonde rupi, nguu Amazias ojapoague rami meme.

* 14:9 “Juu rakua endy” he'ia ma Amazias ombojaru reia rupi ijavyvui vy, ha'e rã “Yary hi'aĩ va'e” he'ia ma ojee ae ijavyvui vy. † 14:22 Jeoás ra'y Jeroboão pe ma “Jeroboão mokoĩa va'e” 'ea, mba'eta jypygua Jeroboão Nabote ra'y va'e oĩ ae ma va'ekue Israel pygua huvixa. * 15:1 Azarias rery mboae ma Uzias raka'e (14.21, 15.13).

⁴ Ha'e rami teĩ nombovaipai guive ombojeroviaaty yvy'ã rupi ikuai va'e. Ha'e rupi heta va'e kuery mba'emo ome'ẽ teri, ha'e heakuã porã va'e guive oapy okuapy.

2 Crônicas 26.16-23

⁵ Ha'e gui SENHOR omomba'eaxy huvixa. Ha'e ramo lepra revegua oiko omano peve, oo ha'e ae'i oĩ aguã py. Ha'e ramo ta'y Jotão ju opena oikovy hoo re, ijyvy pygua kuery re guive.

⁶ Ha'e gui oĩve rei tema Azarias rekokie regua. Ha'e rami avi mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekokie oĩa re?

⁷ Ha'e gui Azarias ndoikovevei'i ma guamoĩ kueryague rami. Ha'e ramo onhono porãa tuu kuery rupa yv'ýry ae, Davi rekoague py. Ha'e ramo ta'y Jotão ju oĩ nguu rekovia.

Israel pygua huvixa Zacarias oĩ jave guare

⁸ Trinta e oito ma'et'ý re ma Azarias Judá pygua huvixa oĩ rire Jeroboão ra'y Zacarias oĩ Israel pygua ruvixarã. Samaria py opena seis jaxy re ete'i.

⁹ Ha'e va'e ma ha'eve'ý va'e ojapo oikovy SENHOR renonde, nguu kuery ojapoague ramigua ae. Ndojepe'ai Nabote ra'y Jeroboão Israel kuery oguerorejavyague ramigua gui. Ha'e rami vy hekokue rupi ae oiko.

¹⁰ Ha'e va'e rovai opu'ã Jabes ra'y Salum. Heta va'e kuery oexaa py oipyxo vy ojuka. Ha'e vy ha'e ju oĩ hekovia.

¹¹ Ha'e gui oĩve rei tema Zacarias rekokie regua. Ha'e rami avi mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokie oĩa re?

¹² Ha'e rami vy ojeupity Jeú pe SENHOR ijayvuague: "Neramymino jevy kuery ikuai peve ha'e kuery oguapy 'rã tenda Israel kuery re openaaty áry", he'iaque rami ae oiko raka'e.

Israel pygua huvixa Salum oĩ jave guare

¹³ Trinta e nove ma'et'ý re ma Uzias Judá pygua huvixa oĩ rire Jabes ra'y Salum oĩ Israel kuery ruvixarã. Ha'e va'e ma peteĩ jaxy ete'i opena Samaria py.

¹⁴ Ha'e gui ma Tirza tetã gui Gadi ra'y Menaém Samaria py ou vy oipyxo Jabes ra'y Salum, ha'e vy ojuka. Ha'e gui ha'e ju oĩ hekovia.

¹⁵ Ha'e gui oĩve rei tema Salum rekokie regua. Ha'e rami avi nguvixa rovai opu'ãague, ha'e mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokie oĩa re?

¹⁶ Ha'e ramo Menaém ojukapa Tifsa pygua kuery, Tirza guive ikuai va'ekue ha'e javi reve, ixupe guetã rokẽ ndoipe'ai ramo rive. Ha'e rami vy omomba ha'e omondoro ukapa kunhague hye guaxu'i va'ekue rye.

Israel pygua huvixa Menaém oĩ jave guare

¹⁷ Trinta e nove ma'et'ý re ma Judá pygua huvixa Azarias oĩ rire Gadi ra'y Menaém oĩ Israel pygua ruvixarã. Ha'e vy dez ma'et'ý re opena Samaria py.

¹⁸ Ha'e va'e ma ha'eve'ý va'e anho ojapo oikovy SENHOR renonde rupi. Ndojepe'ai Nabote ra'y Jeroboão Israel kuery oguerorejavyague ramigua gui. Ha'e rami vy hekokue rupi ae oiko.

¹⁹ Ha'e ramo Síria pygua huvixa Pul ou ijyvy re opu'ã aguã. Ha'e va'e Pul pe Menaém ome'ẽ trinta e três toneladas prata guigua, onhembopo'aka ukavexe vy.

²⁰ Ha'e va'e perãa ma Israel ha'e javi rupi gui Menaém ojopy Assíria pygua huvixa pe ome'ẽ aguã. Ipo'akapa ha'e oguerokopa va'e peteĩ-teĩ gui ojopy cinqüenta hatã'i va'e prata guigua. Ha'e rire ma Assíria pygua huvixa oo ju ovyv katy, Israel yvy re ndopytavei.

²¹ Ha'e gui oĩve rei tema Menaém rekokie regua. Ha'e rami avi mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokie oĩa re?

²² Ha'e gui Menaém ndoikovevei'i ma guamoĩ kueryague rami. Ha'e gui ta'y Pecaías ju oĩ nguu rekovia.

Israel pygua huvixa Pecaías oĩ jave guare

²³ Cinqüenta ma'et'ý re ma Judá pygua huvixa Azarias oĩ rire Menaém ra'y Pecaías oĩ Israel pygua ruvixarã. Samaria py ae opena mokoĩ ma'et'ya peve.

²⁴ Ha'e va'e ma ha'eve'ý va'e ojapo oikovy SENHOR renonde rupi. Ndojepe'ai Nabote ra'y Jeroboão Israel kuery oguerorejavyague ramigua gui. Ha'e rami vy hekokue rupi ae oiko.

²⁵ Ixupegua xondaro ruvixa ma Remalias ra'y Peca. Ha'e va'e ma Pecaías re opu'ã vy oipyxo Samaria tetã py, huvixa ro ikorapa va'e py ae. Ojuka avi Argobe ha'e Arié. Peca revegua ma cinqüenta avakue ikuai Gileade pygua meme. Ha'e vy huvixa ojuka rire ha'e ju oĩ hekovia.

²⁶ Ha'e gui oĩve rei tema Pecaías rekokie regua. Ha'e rami avi mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokie oĩa re?

Israel pygua huvixa Peca oĩ jave guare

²⁷ Cinqüenta e dois ma'et'ý re ma Judá pygua huvixa Azarias oĩ rire Remalias ra'y Peca oĩ Israel pygua ruvixarã. Samaria py ae opena vinte ma'et'ý re.

²⁸ Ha'e va'e ma ha'eve'ý va'e ojapo oikovy SENHOR renonde rupi. Ndojepe'ai Nabote ra'y Jeroboão Israel kuery oguerorejavyague ramigua gui.

²⁹ Israel pygua huvixa Peca oĩ jave py ou Assíria pygua huvixa Tiglate-Pileser. Ha'e va'e ou vy ipo'aka Ijom re, Abel-Bete-Maaca, Janoa, Quedes, Hazor, Gileade, Galiléia ha'e Naftali yvy ha'e javi re. Ha'e rupi ikuai va'ekue ogueraapa ovyv Assíria katy.

³⁰ Ha'e gui ma Remalias ra'y Peca rovai Elá ra'y Oséias opu'ã vy oipyxo, ha'e vy ojuka. Ha'e rami vy ha'e ae ju oĩ hekovia, vinte ma'et'ý re ma Uzias ra'y Jotão Judá pygua huvixa oĩ rire.

³¹ Ha'e gui oïve rei tema Peca rekokué regua. Ha'e rami avi mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokué oĩa re?

2 Crônicas 27.1-9

³² Mokoĩ ma'etỹ re ma Remalias ra'y Peca Israel pygua huvixa oĩ rire Uzias ra'y Jotão oĩ Judá pygua ruvixarã.

³³ Ha'e va'e ma vinte e cinco ma'etỹ oguereko jave py oĩ ypy'i huvixarã. Ha'e vy dezesseis ma'etỹ re opena Jerusalém py. Ixy ma Zadoque rajy Jerusa.

³⁴ Ha'e ma ha'evea rami oiko SENHOR renonde rupi, nguu Uzias oikoague ha'e javi rami.

³⁵ Ha'e rami teĩ nombovaipai ae tema ombojeroviaaty yvy'ã rupi ikuai va'e. Ha'e rami rã yvy'ã rupi heta va'e kuery mba'emo ome'ẽ ha'e heakuã porã va'e oapy okuapy. Jotão ma ojapo uka SENHOR pegua oo rokẽ yvate rupi guarã.

³⁶ Ha'e gui oïve rei tema Jotão rekokué regua. Ha'e rami avi mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekokué oĩa re?

³⁷ Ha'e va'e jave py SENHOR omboypy Judá rovai guarã ombou aguã Síria pygua huvixa Rezim ha'e Remalias ra'y Peca.

³⁸ Ha'e gui Jotão ndoikovevei'i ma guamoĩ kueryague rami. Ha'e ramo tuu kuery rupa vyvry ae onhono porã, Davi rekoague py. Ha'e gui ta'y Acaz ju oĩ nguu rekovia.

16

2 Crônicas 28.1-4

¹ Dezessete ma'etỹ re ma Remalias ra'y Peca Israel pygua huvixa oĩ rire Jotão ra'y Acaz oĩ Judá pygua ruvixarã.

² Acaz ma oĩ ypy'i jave vinte ma'etỹ ramo'i oguereko. Ha'e gui dezesseis ma'etỹ re opena Jerusalém py. Ha'e va'e ma ha'eve'ỹa ramigua ojapo oikovy SENHOR nguete renonde rupi, guamoĩ Davi rami e'ỹ.

³ Mba'eta Israel pygua huvixa kuery reko rami oiko. Ha'e vy gua'y ae oapy nguete ramigua pe, amboae regua kuery Israel kuery renonde gui SENHOR oipe'a va'ekue ojegarupy ojapo okuapyague rami.

⁴ Ombojeroviaaty yvy'ã rupi ikuai va'e py voi mba'emo ome'ẽ oikovy, heakuã porã va'e oapy avi yvy'ã rupi, yvyra rogue ana ikuai va'e guvry rupi guive.

2 Crônicas 28.16-21

⁵ Ha'e gui ma Jerusalém tetã re jogueru nhoguenoiny Síria pygua huvixa Rezim ha'e Israel pygua huvixa Remalias ra'y Peca reve, ha'e pygua re opu'ã aguã. Ojoko okuapy Acaz oĩa teĩ nda'ipo'akai hexe.

⁶ Ha'e va'e jave py Síria pygua huvixa Rezim ipo'aka ju Elate tetã Síria reguarã. Ha'e va'e gui oipe'apa judeu ikuai va'ekue. Ha'e gui Elate katy Síria pygua kuery ju oo vy ha'e py ikuai aỹ peve.

⁷ Ha'e ramo Acaz ma Assíria pygua huvixa Tiglate-Pileser pe omondouka ayvu mombe'uarã. Ha'e vy aipoe'i uka:

— Xee ma neremiguai ha'e ndera'y aiko. Eju ha'vy, xereraa jepe Síria ha'e Israel pygua huvixa po'akaa gui, mba'eta ha'e kuery opu'ã okuapy orerovai — he'i uka.

⁸ Ha'e rami vy prata ha'e ouro guigua SENHOR pegua templo ropy ikuai va'ekue Acaz oipe'a vy omondoukapa Assíria pygua huvixa pe, huvixa ro py ikuai va'ekue voi omboaxa ixupe.

⁹ Ha'e ramo Assíria pygua huvixa oendu vy Damasco tetã re ju oo opu'ã aguã. Ha'e va'e tetã re ipo'aka ma vy ha'e pygua kuery escravo-rã ogueraapa Quir katy. Ha'e vy ojuka avi Rezim.*

2 Crônicas 28.22-25

¹⁰ Damasco tetã katy huvixa Acaz voi oo Assíria pygua huvixa Tiglate-Pileser reve joexa aguã. Ha'e py ma peteĩ altar oexa vy sacerdote Urias pe omondouka oa'amba ha'e ha'angaa ojapo uka va'ekue, ha'e nunga ha'e javi'i oĩa rami vy.

¹¹ Ha'e ramo sacerdote Urias ojapo peteĩ altar huvixa Acaz Damasco tetã py oexa va'ekue ramigua, ojapo ukaague ha'e javi rami. Damasco tetã gui huvixa Acaz ou jevy e'ỹ re ma voi sacerdote Urias ojapopa.

¹² Damasco gui huvixa ou ma vy oexa altar. Ha'e rami vy ha'e katy onhemojya vy mba'emo ome'ẽ hi'áry.

¹³ Ha'e rami vy oapy mymba, mba'emo aju guigua guive ome'ẽ. Altar áry onhoẽ mba'emo rykue, ha'e hi'áry rupi omboayvipa avi mymba kuery ruguykue, peteĩ rami ikuai aguã regua ome'ẽ va'ekue guigua.

¹⁴ Ha'e rã altar overa va'e guigua SENHOR renonde oĩ va'ekue ma oipe'a heravy oo rexi oĩague gui, SENHOR pegua oo ha'e omba'e altar mbyte gui, ha'e vy omba'e altar yvy'iry ju oguerova, kuaray apu'a'ia katy.

¹⁵ Ha'e gui huvixa Acaz ojapo ukave ju sacerdote Urias pe. Ha'e vy aipoe'i:

— Altar tuvixave va'e áry ma eapy aje'ive nhavõ reme'ẽ va'e, ha'e mba'emo aju guigua ka'aru nhavõ reme'ẽ va'e guive, ha'e xee huvixa mba'emo apy uka va'e, ha'e mba'emo aju guigua ame'ẽ va'e. Hi'áry rupi remboayvi 'rã mba'emo oapya aguã ome'ẽ mbyre ruguykue ha'e javi. Ha'e rã altar overa va'e guigua ma xee ae aiporu 'rã xemba'ekuaa aguã — he'i.

¹⁶ Ha'e ramo huvixa Acaz ojapo ukaague rami meme sacerdote Urias ojapo.

¹⁷ Ha'e gui mba'emo rendarã omoĩ mbyre gui ma huvixa Acaz ojaya imbotya oĩ va'ekue, ha'e gui hi'áry gui omboi hy'a ikuai va'ekue. Ha'e gui mba'emo yy mbotya oĩ va'e voi omboi vaka ra'angaa overa va'e guigua áry oĩague gui, ha'e vy ita ombojopegue áry rive ju omboguejy.

* 16:9 Damasco ma Síria hyvy re opena va'e huvixa retã, aỹ peve voi.

¹⁸ Omboi avi oo oikeaty ao'iarã omoí mbyre sábadu py anho'i oiporu va'ekue. SENHOR ro roka katy gui omboi avi huvixa oikeaty. Ha'e va'ekue ma omboipa, Assíria pygua huvixa oipotaa rami rive.

2 Crônicas 28.26,27

¹⁹ Ha'e gui oive rei tema Acaz rekokie regua. Ha'e rami avi mba'emo ojapo va'ekue ha'e javi noí 'rã teve kuaxia Judá pygua huvixa kuery rekokie oia re?

²⁰ Ha'e gui Acaz ndoikovevei'i ma guamoí kueryague rami. Ha'e ramo onhono porãa tuu kuery rupa yvýry, Davi rekoague py. Ha'e ramo ta'y Ezequias ju oí hekovia.

17

Israel pygua huvixa Oséias oí jave guare

¹ Doze ma'etý re ma Acaz Judá pygua huvixa oí rire Elá ra'y Oséias oí Israel pygua ruvixarã. Samaria py ae opena nove ma'etý peve.

² Ha'e va'e ma ha'eve'y va'e ojapo oikovy SENHOR renonde rupi, teí huvixa ymavegua kuery rami e'y guive.

Samaria tetã re ipo'akaa ha'e Israel kuery escravo-rã ogueraapaa ague

³ Ha'e gui ma Oséias rovai ou Assíria pygua huvixa Salmaneser. Ha'e va'e rembiguai Oséias oiko, ixupe mba'emo ome'ë oikovy guive.

⁴ Ha'e ramo Assíria pygua huvixa ojeupe “Xere Oséias opu'ã” he'i, mba'eta Egito pygua huvixa Sô oia katy ayvu mombe'uarã omondouka ramo, ha'e jypy guare rami e'y nome'ëvei kuerei mba'emo huvixa Assíria pygua pe, ma'etý nhavõ ome'ëague rami e'y. Ha'e nunga rupi Assíria pygua huvixa ojokua vy omboty nhuã py.

⁵ Mba'eta huvixa Assíria pygua ma ijyvy jave rupi oiko vy Samaria tetã re ou vy mboapy ma'etý re ojoko.

⁶ Oséias nove ma'etý re ma oí rire Assíria pygua huvixa ipo'aka Samaria re. Ha'e vy ogueraapa Israel kuery oyvy Assíria katy. Ha'e rami vy Hala tetã py ju omboekoa, Habar ha'e Gozã yakã yvýry, ha'e gui Média pygua kuery retã ikuai va'e rupi.

Mba'e ojapo vai rã pa ogueraapaa ague

⁷ Ha'e va'e nunga oiko raka'e mba'eta SENHOR nguete pe Israel kuery ojevavya ramo, Egito yvy gui oguerupa rire teí, Egito pygua huvixa Faraó po'akaa rupi ikuaiague gui. Ha'e rami rire teí amboae regua tuuete ramigua kuery ju ha'e kuery omboete okuapy.

⁸ Yvy regua kuery reko rupi ikuai, Israel kuery renonde gui SENHOR oipe'apa va'ekue rekokie rupi ae, ha'e Israel pygua huvixa kuery amboae rami rei ombo'eague rami.

⁹ Ha'e rami vy SENHOR nguete rovai Israel kuery ojapo ha'eve'y va'e. Ha'e vy yvy'ã rupi ojapo okuapy ha'e kuery oikuaa rami rive ombojerovia atyrã, guekoa ikuai va'e rupi, nhoarõa kuery ikuai ha'e tetã ikorapa va'e ha'e javi rupi.

¹⁰ Ha'e vy yvy'ã rupi ha'e yvyra rogueana ikuai va'e ha'e javi guýry rupi omopu'ã avi imo'amy ita ha'e yvyra ta'angaarã.

¹¹ Ombojeroviaaty yvy'ã rupi ikuai va'e ha'e javi py oapy okuapy heakuã porã va'e, ha'e kuery renonde gui SENHOR amboae regua oipe'apa va'ekue reko rami ae ju. Ha'e vy opa marã ikuai SENHOR ombopoxy aguã rami rive.

¹² Mba'emo ra'angaa pe rive ikuai. Ha'e va'e nunga re SENHOR ijavyvy vy aipoe'i: “Ha'e ramigua peë kuery ndapejapoi 'rã”, he'i va'ekue ri.

¹³ Mba'eta profeta ha'e imba'ekuaa va'e kuery ha'e javi rupi SENHOR ijavyvy va'ekue Israel ha'e Judá kuery pe. Ha'e vy aipoe'i: “Pejepe'a nho ke tape vai rupi pendekuaia gui, ha'e gui pemoi porã xee ajapo uka va'e ha'e ayvu aeja va'ekue, lei peneramoí kuery pe ambopara uka va'ekue xerembiguai profeta kuery pe”, he'i va'ekue.

¹⁴ Ha'e rami teí ha'e kuery noendu potai okuapy. Ha'e rami 'rãgue py inhakã ratãve tema oje'oivy nonhe'ë renduxeí vy, guamoí kuery SENHOR nguete re ndojeroviaague rami ae ju.

¹⁵ Ha'e kuery noendu potai okuapy ayvu SENHOR oeja va'ekue ha'e guamoí kuery reve guexeve guarã ojapo va'ekue re, neí ha'e kuery pe ijavyvy ete jepiague re. Ha'e rami 'rãgue py ta'angaa ndovareí va'e pe rive ikuai, ha'e kuery ae ju ndovareí va'e ikuai peve. Mba'eta amboae regua kuery reko rupi ikuai, SENHOR “Napendekuai 'rã ha'e rami”, he'i va'ekue ri.

¹⁶ SENHOR nguete ojapo uka va'ekue ha'e kuery omboykepa vy ha'e kuery oikuaa rami rive ojapo okuapy ta'angaarã mba'emo rykukue gui. Mokoí toro ra'y ra'angaarã ojapo, ha'e yvyra omopu'ã avi imo'amy mba'emo ra'angaarã rive. Ha'e vy omboete okuapy yva re ikuai va'e, ha'e tuuete ramigua Baal pe rive ikuai.

¹⁷ Gua'y ha'e guajy kuery ae oapy okuapy nguete ramigua pe ome'ë vy. Ha'e vy onhembo'e okuapy imba'ekuaa aguã re rive, oexa'ã kuaa va'e kuery re anho ojerovia vy. SENHOR renonde rupi ojeko me'ë okuapy ha'eve'y va'e ojapo aguã, ombopoxy aguã rami rive.

¹⁸ Ha'e nunga rupi SENHOR ojou vai ete Israel kuery, ha'e vy guenonde gui oipe'apa. Omombytave ranhe va'e ma Judá kuery anho.

¹⁹ Ha'e rami teí Judá kuery voi nomoi porã SENHOR nguete ojapo uka va'ekue. Ha'e rami 'rãgue py Israel kuery ikuai rami ae ju ikuai.

²⁰ Ha'e nunga rupi SENHOR ojeja Israel kuery regua ha'e javi. Omoingo axy rei vy omboaxapa hovaigua kuery po py, guenonde gui oipe'apa peve.

²¹ Mba'eta Davi ramymino kuery po gui SENHOR Israel kuery oi'pe'apa ma rire Nabote ra'y Jeroboão nguixarã ha'e kuery omo'i okuapy ramo ha'e va'e ojapo Israel kuery SENHOR re ojeroviaague gui ojepe'a vy ojevavyapa aguã rami.

²² Ha'e rami vy Israel kuery ikuai Jeroboão ojevavyague rupi anho, ne'i pete'igieve ma voi ndojepe'ai ha'e rami ikuaiia gui,

²³ SENHOR guenonde gui Israel kuery oi'pe'apa peve, guembiguai profeta kuery rupi ijayvuague ha'e javi rami vy. Ha'e rami vy Assíria vvy katy escravo-rã ogueraa ukapa raka'e Israel kuery, a'y peve ha'e py ae ikuai.

Assíria pygua huvixa Samaria tetã py hekoo va'erã ogueru rukaveague

²⁴ Ha'e gui ma huvixa Assíria pygua ogueru rukave ju Babilônia tetã pygua, Cuta, Ava, Hamate ha'e Sefarvaim gui, Samaria tetã py hekoo va'erã Israel kuery rekoague py. Ha'e ramo Samaria tetã re ha'e kuery ipo'aka ma vy onhemboekoo okuapy ha'e katy tetã ikuai va'e ha'e javi rupi.

²⁵ Ha'e kuery ikuai vvy jave SENHOR renonde ojererokyjea rupi e'y ranhe ikuai. Ha'e ramo ha'e kuery mbyte rupi SENHOR ombou guary ha'e kuery va'e regua jukaarã.

²⁶ Ha'e ramo Assíria pygua huvixa pe omombe'ua vy aipo'e'a:

— Samaria tetã py hekoo aguã remondouka va'ekue ma ndoikuaai rei okuapy ha'e va'e vvy regua tuuete ombojerovia aguã. Ha'e nunga rupi ae ha'e kuery mbyte rupi ombou rima guary, ha'e ramo ojukapa rai'i, ha'e pygua tuuete nombojerovia kuaai okuapy ramo — 'ea.

²⁷ Ha'e ramo Assíria pygua huvixa aipo'e'i uka:

— Peraa ju ha'e katy pete'i sacerdote ha'e gui peru va'ekue, ha'e katy oo vy ha'e kuery ombo'e oikovy aguã ha'e pygua tuuete ombojerovia aguã re — he'i.

²⁸ Ha'e ramo oo ju pete'i sacerdote Samaria gui ogueru pyre, ha'e vy Betel py oiko. Ha'e va'e ma nhombo'e oikovy SENHOR renonde ojererokyjea rupi ikuai aguã re.

Samaria pygua kuery joo rami e'y-e'y rei ombojerovia okuapyague

²⁹ Ha'e rami te'i pete'i-te'i regua ojapo teri okuapy ha'e kuery ruete ra'angaa rive tetã py ikuai rupi, ha'e omopu'a imo'amy vvy'ã rupi ombojerovia atyrã Samaria pygua kuery ojapo va'ekue ha'e javi py.

³⁰ Ha'e rami vy Babilônia guigua kuery ojapo okuapy Sucote-Benote ra'angaa, Cuta guigua ma Nergal ra'angaa ojapo okuapy, Hamate guigua ma Asima ra'angaa ojapo,

³¹ Avenu kuery ma Nibaz ha'e Tartaque ra'angaa ojapo, ha'e rã Sefarvaim guigua kuery ma gua'y ha'e guajy kuery ae oapy okuapy tata py nguete ra'angaa Adrameleque ha'e Anameleque peguarã.

³² Ha'e rami rei te'i SENHOR ojererokyjea rupi avi ikuai, va'eri ha'e kuery regua omo'i avi okuapy sacerdote kuery ombojeroviaaty vvy'ã rupi ikuai va'e py, ha'e pygua kuery re vy mba'emo ome'e aguã.

³³ Ha'e rami py SENHOR ojererokyjea rupi ikuai va'eri nguete ra'angaa ombojerovias rupi avi ju, ha'e kuery ikuaiague pygua kuery reko rami vy.

³⁴ A'y peve ma ha'e kuery gueko ymague rupi ae tema ikuai. SENHOR renonde ojererokyjea rupi e'y ikuai, oayvu ha'e oipotaa ojea va'ekue rupi e'y guive, ne'i lei Jacó ramymino kuery pe SENHOR ombopara uka vy ojapo uka va'ekue rupi. Ha'e va'e ma omboery ju Israel raka'e.

³⁵ Mba'eta ha'e kuery reve SENHOR guexeve guarã ojapo vy aipo'e'i va'ekue: “Pombojerovia eme tuuete mboae rive, ne'i ha'e nunga renonde rupi pe'i eme penerenapy'ã re, ha'e kuery pe pendekuai eme, peme'ê eme mba'emo guive.

³⁶ SENHOR pe anho ha'eve, Egito vvy gui opo'aka etea rupi ha'e opo oupi reve penerenoê va'ekue pe ae. Henonde ma pejererokyjea rupi pendekuai, henonde penerenapy'ã re pe'i rã guive, ha'e ixupe ae 'rã peme'ê mba'emo.

³⁷ Ha'e gui oayvu ha'e oipotaa ojea va'ekue, lei, ha'e nunga pendevy ojapo uka va'ekue ma pemo'i porã pota 'rã ára nhavõ. Ha'e rã tuuete mboae ramigua ma pombojerovia eme.

³⁸ Penderexarai eme guive guexeve guarã ojapo va'ekue re. Pombojerovia eme tuuete mboae ramigua rive.

³⁹ SENHOR Penderuete renonde pejererokyjea rupi anho 'rã pendekuai. Ha'e ramo pendereraa jepepa 'rã penderovaigua kuery po gui”, he'i va'ekue.

⁴⁰ Ha'e rami te'i ha'e kuery ndojapyxakai ha'e nunga re. Ha'e rami 'rãgue py gueko ymague rupi ae tema ikuai.

⁴¹ Ha'e rami py ha'e va'e regua kuery ma SENHOR ojererokyjea rupi ikuai va'eri ombojerovia avi okuapy ta'angaarã ha'e kuery ae ojapo va'ekue. Guamo'i kuery ikuaiague rami ae ju ta'y kuery ha'e hamymino kuery voi ikuai, a'y peve.

2 Crônicas 29,1,2

¹ Ha'e gui mboapy ma'et'y re ma Elã ra'y Oséias Israel pygua huvixa o'i jave py Acaz ra'y Ezequias o'i Judã pygua ruvixarã.

² Ha'e va'e o'i vvy'i jave vinte e cinco ma'et'y oguereko, ha'e vy vinte e nove ma'et'y re opena Jerusalém py. Ixy ma Zacarias rajy Abi.

³ Ha'e va'e ma ha'evea ramigua ojapo oikovy SENHOR renonde rupi, guamo'i Davi ojapoague ha'e javi rami.

⁴ Ombojerviaaty yvy'ã rupi ikuai va'ekue ombovaipa vy omopẽmba ita omopu'ã mbyre, oitypa guive ta'angaarã yvyra omopu'ã mbyre. Omboa'yapa mboi ra'angaa overa va'e guigua Moisés ojapo va'ekue, mba'eta ha'e va'e jave ha'e va'e pe Israel kuery oapy 'rã okuapy heakuã porã va'e, Neustã omboery vy.

⁵ Ezequias ma ojerovia oikovy SENHOR Israel kuery ruete re. Ha'e oĩ rire nda'ipovei ha'ekue ramigua, Judá pygua huvixa kuery ma voi ndoikoi, neĩ ha'e oiko e'ỹ mbove voi.

⁶ Mba'eta SENHOR pe ae ma voi oiko, ndojepe'ai ixupe oikoa gui, ha'e vy omoĩ porãmba Moisés rupi SENHOR ojapo uka va'ekue.

⁷ Ha'e ramo hexeve SENHOR oiko. Mamo rã rei ooa py tema ha'evea ramigua meme ojapo. Assíria pygua huvixa rovai re opu'ã, oipota va'e ndojapoxevei vy.

⁸ Ojukapa guive filisteu kuery Gaza ha'e ijyvyry tekoa ikuai va'e peve, harõa kuery oikuaa potaaty ha'e tetã ikorapa va'e py voi.

⁹ Ha'e gui ma irundy ma'etỹ re ma huvixa Ezequias oĩ jave, ha'e sete ma'etỹ re ma Elã ra'y Oséias Israel pygua huvixa oĩ jave py ou Assíria pygua huvixa Salmaneser kuery Samaria tetã re, ha'e vy ojokopa.

¹⁰ Ha'e gui mboapy ma'etỹa py ipo'aka. Ha'e va'e jave py mboapy meme ma'etỹ ma ojapo Ezequias oĩague, ha'e nove ma'etỹ ojapo Israel pygua huvixa Oséias oĩague.

¹¹ Assíria pygua huvixa ma ovyv katy ae ogueraapa Israel kuery ha'e javi. Hala py ju omboekoa, Habor katy'i Gozã yakã yvyry, tetã Média pygua kuery rekoa ikuai va'e rupi guive.

¹² Ha'e nunga oiko mba'eta SENHOR nguete ha'e kuery nonhe'ẽ rendui okuapy rire. SENHOR guexeve guarã ojapo va'ekue rupi e'ỹ ikuai, hembiguai Moisés ojapo uka va'ekue rupi e'ỹ guive. Noendu potai, ha'e ndojapoĩ guive okuapy.

2 Crônicas 32.1-8; Isaías 36.1-3

¹³ Ha'e gui catorze ma'etỹa re ma huvixa Ezequias oĩ jave py ou Assíria pygua huvixa Senaqueribe. Ha'e va'e ma Judá regua tetã ikorapa va'e ha'e javi re opu'ã vy ipo'aka.

¹⁴ Ha'e ramo Judá pygua huvixa Ezequias ma Laquis tetã py omondouka guembiguai huvixa Assíria pygua oĩa katy. Ha'e vy aipoe'i uka:

— Ha'eve'ỹa rami aiko va'ekue. Ejepe'a ke xeyvy gui. Ha'e gui opa mba'e reme'ẽ uka va'e tema ame'ẽmba 'rã ndevy — he'i uka.

Ha'e ramo huvixa Assíria pygua ojapo Judá pygua huvixa Ezequias dez mil quilos prata ha'e mil quilos ouro ome'ẽ aguã rami.

¹⁵ Ha'e ramo ixupe Ezequias ome'ẽ prata SENHOR ropy ojou va'ekue ha'e javi, ngoo py pe omoĩ porã va'ekue guive.

¹⁶ Ha'e rami vy SENHOR pegua templo rokẽ ha'e ijyta oĩ va'e gui Ezequias omboipa ouro Judá pygua huvixa ae omoneovãague. Ha'e nunga ha'e javi ome'ẽ avi Assíria pygua huvixa pe.

¹⁷ Ha'e ramive ma Assíria pygua huvixa Laquis tetã py oĩa gui omondouka reta xondaro kuery Jerusalém py huvixa Ezequias oĩa katy, Tartã, Rabe-Saris ha'e Rabsaqué rupive. Ha'e va'e kuery ma Jerusalém tetã py oupa. Ovaẽmba ma vy ijatypa okuapy yy omboty pyre yvy'ã re oĩ va'e gui yy oxyry ouvyaty rovai katy, tape ao joiaty kuery yvy via yvyry.

¹⁸ Ha'e rami vy ha'e kuery oenoi uka huvixa Ezequias. Ha'e ramo ha'e kuery ijaty okuapya py huvixa ombou uka guembiguai kuery Hilquias ra'y Eliaquim huvixa ro re opena va'ety, kuaxia para re opena va'e Sebna, ha'e gui Asafe ra'y Joã mba'emo oiko va'ekue mboparaaty.

2 Crônicas 32.9-20; Isaías 36.4-22

¹⁹ Ha'e ramo ha'e kuery pe Rabsaqué aipoe'i:

— Aipopeje ke Ezequias pe: Po rami Assíria pygua huvixa yvateve va'e ijavyu: Mba'e nunga re tu rejervia?

²⁰ Ha'e ramo ndevy pe xeyvyu: Ndee ore kuery re repu'ã aguã re renhembopy'aa ma ayvu rive'i. Marã ramigua kuery re tu rejervia reikovy, xerovai repu'ã aguã?

²¹ Egito pygua kuery re rima rejervia, ha'e rami teĩ ha'e kuery ma popoka takua ovopa va'e ramigua rive, mba'eta ha'e va'e re amongue ojeko rã ipo py oixu'upa 'rã. Ha'e ramigua ae 'rã oiko Egito pygua huvixa Faraó ha'e hexe ojerovia va'e kuery ha'e javi re.

²² Ha'e rã xapy'a rei xeivy aipopeje 'rã: “Ore ma SENHOR Oreruete re ae rojerovia va'e”, peje teĩ ha'e va'e peguare e'ỹ teve ombojerviaaty yvy'ã rupi ikuai va'e ha'e altar Ezequias oitypa va'ekue? Mba'eta ha'e ma Judá ha'e Jerusalém pygua kuery pe aipoe'i va'ekue: “Kova'e altar Jerusalém py oĩ va'e katy anho 'rã pembojervia pekuapy”, he'i va'ekue pendeivy.

²³ Ha'e nunga rupi ejeruna na xeruvixa Assíria pygua pe, ha'e gui xee ma ame'ẽ 'rã ndevy dois mil kavaju, xapy'a rei avakue hi'áry guarã rejou ri ramo.

²⁴ Mba'e re tu rejervia reikovy Egito pygua karóxa ha'e kavaju árygua kuery re? Mba'eta xeruvixa rembiguai yvyĩgueve teĩ nderakykue monha 'rã.

²⁵ Ha'e gui xapy'a rei xee nda'u SENHOR reve'ỹ ri aju peneretã amomba aguã? Any, mba'eta SENHOR ae xeivy aipoe'i: “Tereo ke, epu'ã ha'e kuery yvy re, ha'e emomba”, he'i va'ekue xeivy.

²⁶ Ha'e rami rã Rabsaqué pe Hilquias ra'y Eliaquim, Sebna ha'e Joã ombovai vy aipoe'i okuapy:

— Rojerure ndevy: Ore nerembiguai kuery pe ndeayvu ke aramaico ayvu py anho, roendu kuaa rã. Ndeayvuve eme judeu kuery ayvu py, heta va'e kuery tetã kora áry rupi ikuai va'e oendu kuaa e'ỹ aguã — he'i.

²⁷ Ha'e rami teĩ Rabsaqué ombovai:

— Ha'e gui pëvy ha'e penderuvixa remiendurā anho teve xeruvixa xembou xeavyu aguā? Avakue tetā kora áry rupi ikuai va'e pe guive e'ÿ teve xeavyu, mba'eta peë kuery rami avi ha'e kuery voi ikuai guepoxi ho'u ha'e otyrai ae oy'u okuapy aguā rami — he'i.*

²⁸ Ha'e rami vy Rabsaqué opu'ã vy ijayvu atãve ho'amy judeu kuery avyu py. Ha'e vy aipoe'i:

— Pejapyxaka ke Assíria pygua huvixa yvateve va'e avyu re.

²⁹ Po rami xeruvixa ijayvu: “Penhembotavy uka eme Ezequias pe, mba'eta ha'e ma napendereraa jepei 'rã xepo gui.

³⁰ Ezequias tapendeapo eme SENHOR re pejerovia aguā rami, mba'eta aipoe'i: ‘SENHOR nhandereraa jepe 'rãe, ha'e vy kova'e tetā nomboaxai 'rã Assíria pygua huvixa po py', he'i 'rã.”

³¹ Pejapyxaka eme Ezequias avyu re. Mba'eta po rami Assíria pygua huvixa ijayvu: “Pejapo ke xereve petei rami nhandekuai aguā, ha'e vy peju xea katy. Ha'e rami vy petei-tei pekaru 'rã penemba'e vinho ha'e figo'a re, ha'e penemba'e ygua gui ae 'rã pey'u pekuapy,

³² xee pendeivy re xee aju peve. Ha'e gui ma xee rogueraa 'rã petei vvy pendeivy rami ae itui va'e katy. Ha'e va'e vvy ma mba'emo aju ha'e uva rykue oikoa, mbojape ha'e uva, oliveira ty ha'e ei oata e'ÿa, peiko puku aguā pemanomba e'ÿ re. Ha'e nunga rupi pejapyxa eme Ezequias avyu re. Mba'eta penembotavya rupi rive 'SENHOR nhandereraa jepe 'rã', he'i pëvy.

³³ Mba'eta vvy regua kuery ruete ra'angaa ikuai va'e nda'u ogueraa jepe ri vvy Assíria pygua huvixa po gui?

³⁴ Mba'eta mamu tu ikuai Hamate ha'e Arpade pygua kuery ruete ra'angaa? Mamu tu ikuai Sefarvaim, Hena ha'e Iva pygua kuery ruete ra'angaa? Ha'e kuery nda'u ogueraa jepe raka'e Samaria tetā xepo gui?

³⁵ Mba'eta ha'e va'e vvy re ikuai va'e ruete ra'angaa regua mava'e rei ogueraa jepe ovvy xepo gui. Mba'exa 'rã tu ha'vy SENHOR ogueraa jepe Jerusalém xepo gui?” he'i.

³⁶ Ha'e rami heta va'e kuery oendu tei okyiririmba okuapy, peteive ma voi nombovai, huvixa “Pembovai eme” he'i rire.

³⁷ Ha'e ramo Hilquias ra'y Eliaquim mba'emo re opena va'ety, kuaxia re opena va'ety Sebna ha'e Asafe ra'y Joá mba'emo oiko va'ekue ombopara va'ety jogueru ju Ezequias oia py. Oao omondoropa va'ekue reve ou vy ixupe omombe'u okuapy Rabsaqué ijayvuague ha'e javi.

19

Isaías 37.1-7

¹ Ha'e nunga huvixa Ezequias oendu vy omondoro oao, ha'e ajukue voxa guigua py rive onheovãmba vy oike SENHOR pegua oo py.

² Ha'e rami vy Amoz ra'y profeta Isaías oia katy omondouka ngoo re opena va'ety Eliaquim ajukue voxa guigua py onheovã va'ekue reve, kuaxia re opena va'ety Sebna ha'e sacerdote kuery yvatekueve va'e guive,

³ Isaías pe ha'e kuery aipoe'i aguā:

— Po rami Ezequias aipoe'i: “Kova'e ára ma jajexavai aguā ha'e nhanembopagaa rã nhaximba aguā ára, kunha oikuvã'i ta tei oguereko ete aguā na'imbaratevei va'e rami nhandekuai.

⁴ Mba'eta Assíria pygua huvixa remimbou Rabsaqué ijayvu va'ekue Nhanderueete oikove va'e rovai. Ijayvua SENHOR Nderueete oendu vy ijayvu ete 'rãgue. Ha'e nunga rupi ejapukai ke ixupe jakuave'i teri va'e re”, he'i aguā.

⁵ Ha'e ramo Isaías oia py huvixa Ezequias rembiguai kuery ou ramo

⁶ Isaías aipoe'i ha'e kuery pe:

— Aipopeje ke penderuvixa pe: “Po rami SENHOR ijayvu: Ekyje eme avyu rendu va'ekue káuxa. Ha'e va'e avyu rupi ma xerovai ae Assíria pygua huvixa rembiguai kuery ijayvu okuapy.

⁷ Ha'e rami tei hexe ambou 'rã petei nhe'ë imongyjaar. Ha'e ramo ixupe mba'emo omombe'ua rã oendu vy ojpe'a ju 'rã ovvy py katy ae. Ha'e gui ma ha'e py ajapo 'rã kyxe py ojukaa aguā rami”, he'i.

Isaías 37.8-13

⁸ Ha'e gui ma Rabsaqué oo ju vy oikuaa Assíria pygua huvixa kuery Libna tetā re opu'ã okuapy, mba'eta oendu ma voi huvixa Laquis tetā re opu'ãa gui ojpe'a ma ovague.

⁹ Assíria pygua huvixa oendu avi “Etiópia pygua huvixa Tiraca ma je ou oiny nderovai opu'ã vy”, 'ea ramo. Ha'e rami vy peteigue ju Ezequias oia katy omondouka guembiguai kuery. Ha'e vy aipoe'i uka ha'e kuery pe:

¹⁰ — Po rami pendeavyu 'rã Judá pygua huvixa Ezequias pe: “Enhembotavy uka eme nderuete re rejeroviaa py. Mba'eta aipo're: 'Jerusalém tetā ma nomboaxai 'rã Assíria pygua huvixa po py', 're.

¹¹ Ndee nerendui teve Assíria pygua huvixa kuery vvy jave re ojapo va'ekue? Mba'eta omomba ete. Ha'e nunga rupi ndee rexa'ã ri ty'y reo jepe aguā?

¹² Mba'eta vvy regua ruete ra'angaa ikuai va'e nda'u ogueraa jepe ri raka'e xeramoi kuery omomba aguā gui? Ha'e va'e kuery ma Gozã, Harã ha'e Rezefe pygua, ha'e Éden ramymino kuery Telassar py ikuai va'ekue.

¹³ Ha'e mamu tu oiko aÿ Hamate pygua huvixa, ha'e Arpade, Sefarvaim tetā, Hena ha'e Iva pygua huvixa kuery?” — he'i uka.

Isaías 37.14-20

¹⁴ Ha'e gui ma tembiguai kuery po gui kuaxia para Ezequias ojopy vy ogueroavyu. Ha'e rami vy SENHOR pegua oo py oike vy oexa uka imoiny henonde.

* 18:27 Ha'e rami ijayvu, mba'eta tetā ojokopa ha'e pygua kuery ho'u va'erã ha'e yy oy'u aguā ojou e'ÿ aguā, tetā re ipo'akaxe vy.

¹⁵ Ha'e rami vy SENHOR renonde ojakupai vy aipoe'i:

— SENHOR Israel kuery ruete, anjo kuery pepo áry rupi reguapy reiny va'e repenaa py, ndee anho'i reiko vvy jave regua kuery ruete. Ndee ma yva ha'e vvy apoare.

¹⁶ SENHOR, ejaxyaxa rendu pota aguã. Eipe'a ke nderexa, rexa pota aguã. Ha'e vy endu pota Senaqueribe ijayvuague ha'e javi re, mba'eta Oreruete reikove va'e, nderovai ae ijayvu.

¹⁷ Ha'e gui SENHOR, anhetê ete ae Assíria pygua huvixa kuery omomba raka'e vvy regua ikuai va'e, ha'e kuery vvy guive.

¹⁸ Ha'e gui oapypa guive ha'e kuery ruete ra'angaa oguereko va'ekue. Ha'e rami avi ha'e nunga ma tuuete e'ÿ ae, avakue rembiapo, vvyra ha'e ita guigua rive. Ha'e nunga rupi ae omomba.

¹⁹ Ha'e ramo SENHOR Oreruete, orereraa jepe ke ipo gui, vvy regua ha'e javi oikuaa aguã ndee anho SENHOR reikoa — he'i.

Isaías 37.21-35

²⁰ Ha'e gui Amoz ra'y Isaías oayvu ogueraa uka Ezequias pe:

— Po rami SENHOR Israel kuery ruete ijayvu: Assíria pygua huvixa Senaqueribe káuxa xeivy rejerure ramo xee aendu ae ma.

²¹ Ha'e rami vy po rami xee SENHOR xeayvu hexe. Ndere ma kunhataigue'i Sião pygua rajy kuery opuka rei okuapy. Nderakykue Jerusalém pygua rajy kuery oguerova-rova oakã.

²² Mba'eta mava'e re tu ndeayvu vai? Mava'e tu rejojai? Mava'e rovai rupi tu ndeayvu ha'e nderexa py rema'ê vaikue rei? Xee Israel kuery ruete xeky'a e'ÿ va'e rovai ae.

²³ Mba'eta nerembiguai kuery rembo'e SENHOR rovai ijayvu aguã re. Ha'e vy aipo're: “Xekaróxa reta va'e vy ajepi 'rã vvyty áry peve, Líbano vvy re mombyryvea rupi teĩ. Xee aitypa 'rã ha'e py yary vyatekueve ha'e cipreste iporãgueve ikuai va'e, avaê 'rã mombyryvea py apyta aguã, ka'aguy inhanavea py peve.

²⁴ Ha'e gui vvy ajo'o vy ay'u amboae regua kuery pegua yy gui, ha'e Egíto vvy re apyrô vvy rive amombirupa yakã ikuai va'e”, 're va'ekue.

²⁵ — Ha'e rami teĩ nerendui teve yma rupi ma voi xee ae amoĩ ha'e va'e nunga oiko aguã, ymave guive anhemboy'a ae ma ha'e rami aguã re? Ha'e rami vy aÿ ma amoiingo ete ma ha'e nungakue. Xee ae aipotaa rami vy ndee rembovaipa karamboae tetã ikorapa va'ekue.

²⁶ Ha'e nunga rupi ae ha'e pygua kuery ikangypa, okyjepa ha'e oximba rei raka'e. Ha'e rami vy okanhymba vyvoi nhuu rami rive, e'ÿ vy jai rogue pyau, nhuu oo ao'ia áry henhoĩ rive va'e rami, e'ÿ vy mba'emo onhotÿ mbyre ijaju e'ÿ re okaipa va'e rami rive.

²⁷ Ha'e rã xee ma aikuaa porã reguapy reiny rã, repu'ã reovy ha'e reike ju rejuyv nhavô, ha'e gui xerovai repu'ã reia guive.

²⁸ Ha'e ramo xerovai repu'ã reia ha'e renhemboyvate reia aendupa ma vy aÿ ma nexi re amoĩ 'rã ty'ái ndereruarã, ndejuru re amoĩ avi 'rã juru xã, ha'e rami vy ajapo 'rã rejuague rupi ae ju rejeyv aguã rami.

²⁹ — Ha'e gui ndee Ezequias reikuaa aguã ma pova'e 'rã oiko: Aÿ kova'e ma'etÿ ma peê kuery pekaru 'rã mba'emo ha'e ae gui henhoĩ va'ekue re, ha'e gui amboae ma'etÿ ma ha'e va'ekue gui ikuai va'ekue re ju 'rã pekaru. Ha'e rã mboapy ma'etÿa py ma penhotÿ ju 'rã mba'emo, ha'e gui pemono'ô 'rã. Penhotÿ 'rã uva, hi'a pe'u aguã.

³⁰ Ha'e gui Judá regua rembyre oo jepe va'ekue ma hapo ju 'rã vvy katy, ha'e vy hi'árykue ma hi'a ju 'rã.

³¹ Mba'eta Jerusalém tetã py ikuai 'rã okuave va'e, Sião vvyty re ikuai 'rã oo jepe va'ekue. SENHOR ixondaro reta va'e ae 'rã ojapo, nhandarayvu etea rupi.

³² — Mba'eta po rami SENHOR ijayvu Assíria pygua huvixa rekorã re: “Ha'e ma kova'e tetã py ndoikei 'rãe, neĩ peteive hu'y nomomboi 'rã tetã katy, hu'y jokoa reve nonhembojai 'rã ouvy, neĩ vvy nombo'yvatei 'rã guive tetã kora áry rupi ojeupi aguã.

³³ Ha'e rami 'rãgue py tape ouague rupi ae ju 'rã ojevy. Kova'e tetã py ndoikei 'rãe”, he'i SENHOR.

³⁴ “Mba'eta xee ae ajoko 'rã tetã araa jepe vy, xeeje ha'e xerembiguai Davi re ama'ê vy”, he'i.

2 Crônicas 32.21,22; Isaías 37.36-38

³⁵ Ha'e gui ma ha'e va'e pyavyve anjo SENHOR-a guigua ou vy Assíria pygua kuery ijatya rupi ojuka cento e oitenta e cinco mil. Ko'êgue okuave'i va'e ovy vy oexa rã hetekue rive ikuai.

³⁶ Ha'e ramo Assíria pygua huvixa Senaqueribe ojepe'a ju ovy. Ojevy vy ngetã ae Nínive py ju opyta.

³⁷ Ha'e gui ma nguete ra'angaa Nisroque pegua opy omboetea py oi jave ta'y kuery ae Adrameleque ha'e Sarezzer ojuka kyxe py. Ha'e vy onhamba jogueravy Ararate vvy katy. Ha'e ramo ta'y Esar-Hadom ju oi nguu rekovia.

20

2 Crônicas 32.24; Isaías 38.1-8

¹ Ha'e va'e jave py huvixa Ezequias imba'eaxy vy omano ta ma oupy. Ha'e ramo oia py ou Amoz ra'y profeta Isaías. Ha'e vy aipoe'i ixupe:

— Po rami SENHOR ijayvu: “Emoatyro mba'emo ndero py ikuai va'e, mba'eta remano 'rã, nderekovevei ta ma”, he'i.

² Ha'e ramo Ezequias ojere vy ngoo mbotya re ngova omboja oupy. Ha'e vy SENHOR pe ojerure vy aipoe'i:

³ — SENHOR, ajerure ndevy. Nema'endu'a ke nerenonde rupi ha'eeva rami aikoaerve, xepy'a ha'e javi py. Ha'eeva ramigua ajapo aikovy va'ekue nerenonde rupi — he'i. Ha'e vy ojae'o vaipa oupy.

⁴ Ha'e gui Isaías ma tetã mbyte gui oo e'ÿ mbove ma voi ixupe SENHOR ombou ju oayvu. Ha'e vy aipoe'i:

⁵ — Ejevy ke, ha'e vy aipo're xevygua kuery ruvixa Ezequias va'e pe: Po rami SENHOR neramoĩ Davi ruete va'e ijayvu: “Xee aendu ma renhembo'ea, nderexay aexa guive. Ma'ê, xee romonguera 'rã. Ha'e ramo mboapy araa py reo 'rã SENHOR pegua oo py.

⁶ Ha'e vy amoĩve 'rã nde'ára quinze ma'etỹ peve ju, ha'e rogueraa jepe 'rã Assíria pygua huvixa po gui, kova'e tetã guive. Aepy 'rã kova'e tetã xejee ha'e xerembiguaĩ Davi re ama'ê vy”, he'i.

⁷ Isaías aipoe'ive ju:

— Peru ke peteĩ figo ru'ũguẽ — he'i ramo ha'e kuery ogueru vy omoĩ huvixa ai re. Ha'e ramo okuera ju.

⁸ Ezequias aipoe'i Isaías pe:

— Mba'exagua hexa pyrã tu aexa 'rã aikuaa agua SENHOR xemonguera ete 'rãa, mboapy araa py SENHOR pegua oo py aa agua?

⁹ Isaías ombovai:

— Pova'e nunga SENHOR oexa uka 'rã ndevy, reikuaa agua oayvuague ojapo 'rãa. Mava'e pa reipotave? Escada rupi kuaray'ã tenonde katy oove ma voi 'rã dez pyrõa, tyrã pa hakykue katy?

¹⁰ Ha'e ramo Ezequias aipoe'i:

— Ndaxyl'i ae guive dez pyrõa kuaray'ã tenonde katy oove vyvoi. Ha'e rami agua ma nda'eve. Ha'e rami 'rãgue py tojevy ju dez pyrõa hakykue katy — he'i.

¹¹ Ha'e ramo SENHOR pe profeta Isaías ojarukai ramo escada Acaz ojapo va'ekue rupi ojapo dez pyrõa hakykue katy ju ojevy agua rami.

Isaías 39.1-8

¹² Ha'e va'e jave py Babilônia pygua huvixa Baladã ra'y Merodaque-Baladã va'e ma “Huvixa Ezequias haxy oupy” 'ea rã oendu vy oĩa katy ombou kuaxia para, mba'emo ome'ê va'erã reve.

¹³ Ha'e ramo herua kuery ova'ê rã Ezequias oguerovy'a vy ha'e kuery pe oexa uka mba'emo omoĩ porãaty py ogueroko va'e ha'e javi: prata, ouro, temb'i'u irũrã, azeite iporãve va'e ha'e tembiporu joe opu'ãa pygua. Omoĩ porãaty py ikuai va'e ha'e javi oexa uka. Neĩ peteĩ'ĩ voi Ezequias ndoexa ukai ha'e kuery pe, ngoo py ae, neĩ openaa ha'e javi rupi ogueroko va'e.

¹⁴ Ha'e ramo huvixa Ezequias oĩa py profeta Isaías ou vy oporandu ixupe:

— Mba'e nunga re tu avakue ou va'ekue ijayvu okuapy ra'e? Magui tu ou okuapy ndea py?

Ezequias ombovai:

— Peteĩ yvy mombyryvea gui ou, Babilônia gui ae — he'i.

¹⁵ Ha'e ramo oporanduve ju:

— Mba'e tu ha'e kuery oexa okuapy ndero py?

Ezequias ombovai:

— Xero py oexa okuapy mba'emo ikuai va'e ha'e javi. Xemba'e amoĩ porãaty py oĩ va'e regua neĩ peteĩve ndaexa ukai ha'e kuery pe — he'i.

¹⁶ Ha'e gui ma Isaías aipoe'i Ezequias pe:

— Endu ha'vy SENHOR ixondaro reta va'e ayvu.

¹⁷ “Ova'ê 'rã ára ndero py ikuai va'e ha'e javi Babilônia yvy katy oguerapaa agua, ymave guive neramoĩ kuery omoĩ porã va'ekue kova'e ára peve. Ndoejaai 'rã neĩ peteĩ regua ma voi”, he'i SENHOR.

¹⁸ Ndera'y kuery rereko va'ekue ae voi ogueraapaa avi 'rã okuapy, Babilônia pygua huvixa ro py oa'yjyo pyre meme ikuai agua — he'i.*

¹⁹ Ha'e ramo Ezequias aipoe'i Isaías pe:

— Pova'e ayvu SENHOR guigua remombe'u va'e ma ha'eve va'e — he'i, ojeupe ae “Xee aikuaa rã aikovea ja mby'a porã anho ha'e ha'evepa rei'i ta merami”, he'i vy.

2 Crônicas 32.32,33

²⁰ Ha'e gui oĩve rei tema Ezequias rekoue regua. Ha'e rami avi yy omboty vy tetã mbyte peve yy ogueru agua haperã ojapoague, ha'e mba'emo opo'akaa rupi ojapo va'ekue ha'e javi noĩ 'rã teve kuaxia Judá pygua huvixa kuery rekoue oĩa re?

²¹ Ha'e gui Ezequias ndoikovevei'ĩ ma guamoĩ kueryague rami. Ha'e ramo ta'y Manassés ju oĩ nguũ rekovia.

21

2 Crônicas 33.1-9

¹ Manassés ma doze ma'etỹ ogueroko jave py oĩ huvixarã. Ha'e vy cingüenta e cinco ma'etỹ re opena Jerusalém py. Ixy rery ma Hefzibá.

² Ha'e va'e ma ha'e've'ỹ va'e ojapo oikovy SENHOR renonde rupi, amboae regua kuery Israel kuery renonde gui SENHOR oipe'apa va'ekue ikuaiague rami ae ju.

³ Ha'e rami vy omoatyromba ju ombojeroviaaty yvy'ã rupi ikuai va'e nguu Ezequias ombovaipa va'ekue, altar Baal peguarã ojapo reta guive. Omopu'ã avi imo'amy ta'angaarã yvyra guigua Israel pygua huvixa Acabe omopu'ã va'ekue ramigua. Ha'e vy guenapy'ã re oĩ yva re jaxy-tata ikuai katy omboetea rupi.

⁴ SENHOR pegua opy rupi eteve voi ojapo altar-rã, SENHOR aipoe'iaque: “Jerusalém py amoĩ 'rã xerery”, he'iaque py.

⁵ SENHOR pegua oo roka mokoĩve oĩ va'e rupi ojapo avi altar jaxy-tata yva re ikuai va'e ha'e javi peguarã.

* 20:18 Ha'e va'e jave ma huvixave kuery oa'yjyo uka 'rã guembiguaĩ kuery ngoo rupi guarã.

⁶ Ha'e rami vy gua'y ae oapy reve ome'ê, ha'e arai rupi rive imba'ekuaa ha'e oexa'ã oikovy. Oporandu uka oikovy omanogue mboavyua ha'e imba'evyky va'e kuery pe rive. Ha'e rami vy SENHOR renonde rupi ojapo oikovy ha'eve'ÿ va'e meme, ombopoxy aguã rami rive.

⁷ Ha'e vy vyvra gui ta'angaarã ojapo uka va'ekue omo'i avi opy Davi ha'e ta'y Salomão pe SENHOR aipoe'ïague va'e py: “Kova'e oo ha'e Jerusalém tetã aiporavo Israel regua ha'e javi gui, ha'e py xerery amo'i aguã raka'e rã peve guarã.

⁸ Mba'eta xee ajapo uka va'ekue ha'e lei xerembiguai Moisés ijavyvague ha'e javi rupi Israel kuery ikuai ramo xee namoxêvei 'rã tuu kuery vyvyrã ame'ê va'ekue gui oguata rei aguã rami”, he'ïague py ae.

⁹ Ha'e rami te'i ha'e kuery noendu potai okuapy. Ha'e rami vy Manassés oguerojejavu ramo amboae regua Israel kuery renonde gui SENHOR omomba va'ekue gui heko vaive okuapy.

Judá kuery ombopaga aguã re ijavyvague

¹⁰ Ha'e nunga rupi SENHOR ijavyvu guembiguai kuery profeta ikuai va'e rupi. Ha'e vy aipoe'ï:

¹¹ — Ha'e rami ete Judá pygua huvixa Manassés ojeguaru pyrã ojapo oikovy. Ha'e va'e o'i e'ÿ mbove amorreu kuery ikuaiague gui nda'evive va'e ojapo ta'angaa oguereko va'e rupi Judá kuery voi ojevavy aguã rami.

¹² Ha'e rive SENHOR Israel kuery ruete aipoe'ï: “Ma'ê, Jerusalém ha'e Judá re ambou 'rã mba'emo vai, ha'e nunga oendu va'e rei ijavyxa jovaive nhe'êmba 'rã nhemondy gui.

¹³ Ha'e rami vy Jerusalém áry rupi amoatã 'rã ixã ha'ãarã, Samaria ha'e Acabe ro pygua kuery aa'ãague rami avi. Ha'e rami vy Jerusalém tetã gui aipe'apa 'rã ikuai va'e, hy'a oiky'a'o vy ombopoxy va'e rami.

¹⁴ Ha'e rami vy aejapa 'rã xevygua kuery rembyrekue, hovaigua kuery po py amboaxapa vy. Ha'e ramo hovaigua kuery ojuka ha'e ogueraa aguã rami rive 'rã ikuai,

¹⁵ mba'eta xerenonde rupi ha'e kuery ojapo okuapy ha'eve'ÿ va'e xembopoxy aguã rami rive, jypy tuu kuery Egipto yvy gui oupaa ára guive aÿ peve.

¹⁶ Ha'e rami ae avi Manassés omo'ê reta ojevavy e'ÿ va'e ruguy, Jerusalém ha'e javi rupi omonyẽmba peve. Oguerojevavyva avi Judá kuery, SENHOR renonde rupi ha'eve'ÿ va'e ojapoa py.”

2 Crônicas 33.18-20

¹⁷ Ha'e gui oïve rei tema Manassés rekokie regua. Ha'e rami avi ojevavyague, ha'e mba'emo ojapo va'ekue ha'e javi no'i 'rã teve kuaxia Judá pygua huvixa kuery rekokie oïa re?

¹⁸ Ha'e gui Manassés ndoikovevei'i ma guamo'i kueryague rami. Ha'e ramo onhono porãa hoo py vyotyty ituia py, Uzã py ae. Ha'e gui ta'y Amom ju oï nguu rekovia.

2 Crônicas 33.21-25

¹⁹ Amom ma vinte e dois ma'etÿ oguereko huvixa oï ypy'i jave py. Ha'e gui moko'i ma'etÿ re ete'i opena Jerusalém py. Ixy ma Mesulemete, Jotbã pygua Haruz rajy.

²⁰ SENHOR renonde rupi ha'eve'ÿ va'e anho ojapo oikovy, nguu Manassés ojapogue rami.

²¹ Nguu oikoague ha'e javi'i rupi oiko, mba'emo ra'angaa tuu ojerovaiaque re ae ju ojerovia, omboete guive.

²² Ha'e rami vy SENHOR nguu kuery ruete gui ojepe'a vy SENHOR guigua tape rupi ndoikovei.

²³ Ha'e ramo huvixa Amom rovai hembiguai kuery jogueroayvu vy hoo py ae ojuka okuapy.

²⁴ Ha'e rã ijyvy re ae ikuai va'e ju ojukapa huvixa Amom jukaare kuery. Ha'e rami vy ta'y Josias ju omo'i okuapy hekovia.

²⁵ Ha'e gui oïve rei tema Amom rekokie regua. Ha'e rami avi mba'emo ojapo va'ekue ha'e javi no'i 'rã teve kuaxia Judá pygua huvixa kuery rekokie oïa re?

²⁶ Ha'e gui onhono porãa vyotyty Uzã py oï va'e py. Ha'e ramo ta'y Josias oï nguu rekovia.

22

2 Crônicas 34.1,2

¹ Josias ma oito ma'etÿ oguereko huvixa oï ypy'i jave py. Ha'e vy trinta e um ma'etÿ re opena Jerusalém py. Ixy ma Jedida, Bozcate pygua Adaias rajy.

² Ha'e va'e ma SENHOR renonde rupi ha'evea ramigua ojapo oikovy, guamo'i Davi ojapogue ha'e javi rupi. Ha'e vy ndojepe'ai oiporu kuaa katy, ne'i oiporu kuaa e'ÿa katy ma voi.

2 Crônicas 34.8-13

³ Huvixa Josias dezoito ma'etÿ re ma oï jave py omondouka kuaxia re opena va'ety Azalias ra'y Safã, Mesulão ramymino va'e SENHOR pegua oo katy.

⁴ Ha'e vy ixupe aipoe'ï:

— Tereo ke sacerdote yvateve va'e Hilquias-a katy, reipapa aguã perãta SENHOR pegua opy ogueru pyre. Ha'e va'e perãta ma heta va'e kuery ome'ê rã okê rarõa kuery omono'õ va'ekue.

⁵ Ha'e kuery tomboaxapa SENHOR pegua opy rupi omba'eapo va'e kuery re opena va'e kuery po py. Ha'e kuery ju omboekovia aguã SENHOR pegua opy rupi omba'eapo va'e kuery pe. Ha'e rami vy 'rãe opy rupi ivaipaague ikuai va'e omoatyrõmba okuapy.

⁶ Yvyra gui mba'emo ojapo va'e, oo apoa ha'e ita re omba'eapo va'e kuery pe 'rã omboekovia. Ha'e gui ojogua 'rã vyvra ha'e ita omoatyrõ mbyre, opy rupi ivaipaague omoatyrõmba aguã — he'i.

⁷ Omba'eapo va'e kuery ma opa mba'e py ojeroviapy ikuai ramo ndoikuaa potavei ha'e kuery po py perãta omboaxa pyre re.

2 Crônicas 34.14-18

⁸ Ha'e gui sacerdote yvateve va'e Hilquias aipoe'ï kuaxia re opena va'ety Safã pe:

— SENHOR pegua opy xee ajou kuaxia para lei oĩa — he'i. Ha'e rami vy Safã pe Hilquias ome'ẽ ramo ogueroayvu.

⁹ Ha'e gui kuaxia re opena va'ety Safã ma huvixaa py ou vy ixupe omombe'u. Ha'e vy aipoe'i:

— Nerembiguai kuery oipapapa ma peráta SENHOR pegua opy omoĩ porã mbyre, ha'e omboaxapa ma SENHOR pegua opy rupi omba'eapo va'e kuery re opena va'e kuery po py.

¹⁰ Ha'e gui Safã omombe'uve ju huvixa pe. Ha'e vy aipoe'i:

— Sacerdote Hilquias ma xevy ome'ẽ kova'e kuaxia para — he'i. Ha'e rami vy huvixa renonde py Safã ogueroayvu.

2 Crônicas 34.19-28

¹¹ Kuaxia para lei oĩa ogueroayvu rã huvixa oendu vy omondoropa oao.

¹² Ha'e rami vy huvixa ijayvu sacerdote Hilquias, Safã ra'y Aicão, Micaías ra'y Acbor, nhomongeta va'ety Safã ha'e guembiguai Asaías pe. Ha'e vy aipoe'i ha'e kuery pe:

¹³ — Tapeo ke, peporandu uka SENHOR pe xereko re, ha'e heta va'e kuery Judá regua ha'e javi re. Mba'eta nhanderovai SENHOR poxya hendy vaipa, mba'eta kova'e kuaxia para re ayvu oĩ va'e re nhaneramoĩ kuery ndojapxyaka potai, neĩ nhanderekorã re ipara oĩ va'e ha'e javi re ma voi rire — he'i.

¹⁴ Ha'e ramo sacerdote Hilquias, Aicão, Acbor, Safã ha'e Asaías oje'oi Jerusalém tetã yvy'ã guy katy profeta kunha Hulda oikoa py. Ha'e va'e ma Harás ra'y Ticvá ra'y Salum sacerdote kuery ao re opena va'ety ra'xy. Ha'e gui kunha va'e pe ha'e kuery omombe'u okuapy oiko va'ekue.

¹⁵ Ha'e ramo ha'e kuery pe kunha va'e aipoe'i:

— Po rami SENHOR Israel kuery ruete aipoe'i uka: "Aipopeje ava xea py penembouare pe:

¹⁶ Po rami SENHOR ijayvu: Ma'ẽ, mba'emo vai ambou rã kova'e tekoa ha'e apy ikuai va'e re, kuaxia para Judá pygua huvixa ogueroayvu uka va'ekue ha'e javi rami vy.

¹⁷ Mba'eta ha'e kuery xerejapa vy amboae regua tuuete ramigua kuery pe oapy okuapy heakuã porã va'e, opo py mba'emo ojapo va'ekue py xembopoxy aguã rami rive. Ha'e nunga rupi xepoxya hendy ma kova'e tekoa áry, ndoguei "rã guive", he'i.

¹⁸ Ha'e rã Judá pygua huvixa SENHOR pe peporandu uka aguã penembou va'ekue pe pemombe'u rã: "Po rami SENHOR Israel kuery ruete ijayvu, ayvu rendu va'ekue omombe'u porãve vy:

¹⁹ "Ndee ma rendu kova'e tekoa ha'e apy hekoa va'e kuery amomba aguã re xeyavu vai rã, ha'e rami vy xee SENHOR renonde py renhemo'yvy'i vy ndeao remondoro ha'e rejae'õ va'ekue. Ha'e va'e ma xee ju aendu', he'i SENHOR.

²⁰ "Ha'e nunga rupi xee romombytu'u rã neramoĩ kueryague rami, ha'e rã nenhono porã rã, nderexa py rexa e'ỹ aguã mba'emo vai kova'e tekoa re ambou rã", he'i."

Ha'e ramo kunha va'e ombovaigague ha'e kuery omombe'u okuapy huvixa pe.

23

2 Crônicas 34.29-33

¹ Ha'e gui ma huvixa oenoĩ uka ijayvu nhomongeta va'ety kuery Judá re ha'e Jerusalém py ikuai va'e oĩa py onhemboatyapa okuapy aguã.

² Ha'e gui Judá regua avakue, Jerusalém pygua, sacerdote, profeta ha'e heta va'e kuery ha'e javi reve huvixa oo SENHOR pegua oo katy. Yvyĩgieve ha'e yvatekueve guive oje'oi. Ha'e rami vy ha'e kuery oendu pavẽa py huvixa ogueroayvu kuaxia para re oĩ va'e rupi ikuai aguã, SENHOR guexeve guarã ojapo va'ekue regua ayvu oĩ va'e ha'e javi ogueroayvu.

³ Ha'e vy oo yta hi'aĩ va'e yvĩry huvixa opu'ã ho'amy vy SENHOR renonde ojapo ixupe anho ha'e kuery ikuai aguã, opy'a ha'e onhe'ẽ ha'e javi py ojapopa okuapy aguã SENHOR ojapo uka va'ekue, ijayvua ha'e oipotaa, ha'e rami vy ayvu kuaxia para re oĩ va'e rupi ikuai aguã, SENHOR guexeve guarã ojapo va'ekue rupi anho. Ha'e ramo heta va'e kuery ha'e javi onhemboayvu okuapy ha'e va'e ayvu rupi ikuai aguã re.

2 Crônicas 34.3-7

⁴ Ha'e gui ma huvixa ijayvu sacerdote yvateve va'e Hilquias, sacerdote yvyĩgieve ha'e okẽ rarõa kuery pe, SENHOR pegua templo ropy gui ha'e kuery oipe'apa aguã tembiporu Baal peguarã ojapo pyre, ha'e gui ta'angaarã yvyra omopu'ã mbyre ha'e yva re jaxy-tata ikuai va'e peguarã ojapo pyre ha'e javi. Ha'e rami vy Jerusalém gui mombyrya py oapypa, Cedrom nhuũndy py, ha'e gui tanhimbukue ma ogueraa Betel katy.

⁵ Oipe'apa guive sacerdote kuery Judá rupi ha'e Jerusalém yvĩry ombojeroviaaty yvy'ã rupi ikuai va'e peguarã Judá pygua huvixa kuery omoĩ va'ekue. Ha'e va'e kuery ma tuuete ramigua pe heakuã porã va'e oapy va'ekue, Baal pe, kuaray, jaxy, ko'ẽ mbija ha'e jaxy-tata ha'e javi pe.

⁶ Ha'e rami vy SENHOR pegua opy gui oipe'a avi ta'angaarã yvyra omopu'ã mbyre, ha'e vy Jerusalém gui mombyrya py ogueraa Cedrom yvyugua peve. Ha'e va'e ma oapypa vy omongu'ipa, ha'e vy ha'e pyguare rupa ikuai va'e áry rupi omombopa.

⁷ Oitypa avi SENHOR pegua oka py oo avakue ombojeroviaa rupi itavy rei okuapyague. Ha'e va'e opy rupi kunhague ojapo va'ekue oo'i ajukue guigua ta'angaarã yvyra omopu'ã va'ekue rorã.

⁸ Ha'e gui ma ogueru rukapa sacerdote kuery Judá regua tetã py ikuaiague gui, ha'e vy omongy'apa ombojeroviaaty yvy'ã rupi ikuai va'e ha'e kuery heakuã porã va'e oapyaty va'ekue, Geba guive Berseba peve. Ha'e vy oitypa avi altar tetã rokẽ py oĩ va'ekue, tetã re opena va'ety Josué pegua okẽ regua oiporu kuaa e'ya re.

⁹ Ha'e rã ombojeroviaaty yvy'ã rupi sacerdote kuery ikuai va'ekue pe ma mba'eve ndoapy ukai SENHOR pegua altar Jerusalém py oĩ va'e áry, mbojape mbovua revegua e'ỹ guvyvy kuery reve ho'u okuapy va'eri.

¹⁰ Ha'e gui huvixa omongy'apa avi Hinom ra'y kuery vyvugua re Tofete oĩ va'ekue, ha'e py avave rei gua'y e'ỹ vy guajy kuery ndoapyvavei aguã ta'angaa Moloque peguarã.

¹¹ Oipe'apa avi kavaju Judá pygua huvixa kuery kuaray re ojeroviaa rupi omboaxa va'ekue. Ha'e va'e ma SENHOR pegua oka py opyta va'ekue jaikeaty rexei, opy rupi opena va'ety Natã-Meleque renda katy'i rupi. Ha'e rã karóxa kuaray peguarã omboaxa va'ekue ma oapypa.

¹² Huvixa oipe'apa avi Acáz rendakue yrýry rupi altar ikuai va'ekue, oo áry rupi. Ha'e va'e altar ma Judá pygua huvixa kuery ha'e Manassés ojapo va'ekue SENHOR pegua oka mokoĩ oĩ va'e rupi. Ha'e va'e omboaxa'ypa vy oipe'apa heravy. Ha'e vy iku'ikue ma omombo Cedrom yakã áry rupi.

¹³ Huvixa omongy'apa avi ombojeroviaaty Jerusalém katy'i yvy'ã rupi ikuai va'ekue, vyvty mba'emo omombaaty katy'i ijaxu e'ya re. Ha'e va'e ma Sidom pygua kuery ha'eve'ỹ va'e Astarote pe ojapo atyrã Israel pygua huvixa Salomão omopu'ã va'ekue, ha'e Moabe pygua kuery Camo pe, ha'e gui Amom ra'y kuery ruete ramigua ojegarupy Milcom pe ojapo atyrã va'ekue voi.

¹⁴ Ha'e rami ae avi omboaxa'ypa ita omopu'ã mbyre, ta'angaarã yvyra omopu'ã mbyre voi ojayapa. Ha'e vy ha'e nunga ikuaiague rupi omonyẽmba imoiny avakue kãgue.

Betel py altar oĩ va'ekue ju omongy'apa ha'e oitypaague

¹⁵ Huvixa oity avi altar Betel py oĩ va'ekue, ha'e yvy'ã rupi ombojerovia atyrã Nebate ra'y Jeroboão ojapo va'ekue Israel kuery oguerojevay aguã. Ombovaipa ombojeroviaaty yvy'ã re oĩ va'ekue, altar oĩ va'ekue ma omongu'ipa, ha'e oapypa ta'angaarã yvyra omopu'ã mbyre.

¹⁶ Ha'e gui huvixa Josias oma'ẽ-ma'ẽ vy oexa yvyra rupa yvy'ã re ikuai va'e. Ha'e va'e gui ma ikãgue ikuai va'ekue oguenoẽ ukapa vy oapypa altar oĩ va'e áry. Ha'e vy omongy'apa, SENHOR ayvu Nhanderuede remimbo'e omombe'u ma voiaque rami vy.*

¹⁷ Ha'e gui huvixa oporandu:

— Mava'e rupa markaague tu pe py xee aexa va'e?

Ha'e rã tetã pygua avakue ombovai okuapy:

— Peva'e ma ava Nhanderuede remimbo'e Judá gui ou va'ekue rupa. Ha'e va'e ma omombe'u ma voi va'ekue Betel py altar oĩ va'e ndee remongy'a 'rãa — he'i okuapy.

¹⁸ Ha'e ramo Josias aipoe'i:

— Tove ha'vy ta'itui. Avave rei topena eme ikãgue re — he'i. Ha'e ramo ha'e va'e kãgue ma ha'e kuery ojea okuapy, Samaria gui profeta ou va'ekue kãgue ha'e py oĩ va'e reve.

¹⁹ Ha'e gui Samaria re tetã ikuai va'e rupi ju Josias ombovaipa yvy'ã rupi ombojerovia atyrã Israel pygua huvixa kuery ojapo va'ekue SENHOR ombopoxy aguã rami rive. Ha'e va'e re ju ojapo Betel rupi ojapoague ha'e javi rami.

²⁰ Ha'e vy altar ha'e py ikuai va'e áry ae ojokapa sacerdote kuery ombojeroviaaty yvy'ã rupi ikuai va'e peguare, ha'e vy ikãgue ma oapypa hi'áry. Ha'e gui mae ma ojevvy ju Jerusalém katy.

2 Crônicas 35.1-19

²¹ Ha'e gui ma heta va'e kuery ha'e javi pe huvixa omombe'u uka vy aipoe'i:

— Páscoa ára pejapo ngaru SENHOR Penderuede peguarã, kuaxia para re guexeve guarã ojapo va'ekue oĩa rami vy — he'i.

²² Ha'e ramo Páscoa ára ngaru ojapo okuapy va'e ramigua ma neĩ peteĩgueue ma voi ndojapoi teri Israel rerekoa kuery opena jave, neĩ Israel ha'e Judá pygua huvixa kuery opena jave ma voi.

²³ Huvixa Josias dezoito ma'etỹ re ma oĩa py ojapo okuapy Páscoa ára ngaru SENHOR peguarã, Jerusalém py.

Josias Nhanderuede pe ete oikoague

²⁴ Josias omomba avi omanogue mboayvua ha'e imba'vevvy va'e kuery, opy rupi ta'angaa ikuai va'ekue, ta'angaa mboae, ha'e Judá yvy re ha'e Jerusalém py ojegarupy ikuai va'ekue-ekue. Ha'e rami oiko ojapopa aguã kuaxia para SENHOR ropy sacerdote Hilquias ojou va'ekue re lei oĩa rami vy.

²⁵ Ha'e oĩ e'ỹ mbove ma ndoikoi teri huvixa ha'e ramigua, mba'eta opy'a, onhe'ẽ ha'e ombaraeetea ha'e javi py SENHOR pe ojeko me'ẽ va'e, Moisés lei ombopara va'ekue ha'e javi rami vy. Ha'e va'e rire ma ha'ekue ramigua ete ju ndoikovei guive.

²⁶ Ha'e rami avi SENHOR nda'ipoxy ve'ỹi guive Judá rovai, Manassés opa marã ombopoxy aguã rami ojapo vai rire.

²⁷ Ha'e rami vy SENHOR aipoe'i:

— Judá regua voi aipe'apa 'rã xerenonde gui, Israel regua aipe'aague rami ae ju. Ha'e rami vy aea 'rã kova'e tetã Jerusalém jejeupe guarã aiporavo va'ekue ri, xevelygua oo "Ha'e py oĩ 'rã xerery", ha'eague voi.

2 Crônicas 35.20-27

²⁸ Ha'e gui oĩve rei tema Josias rekokie regua. Ha'e rami avi mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekokie oĩa re?

²⁹ Josias oĩ teri jave ma Egito pygua huvixa Faraó-Neco oo Eufrates yakã katy Assíria pygua huvixa rovai. Ha'e ramo Neco rovai ju Josias oo vy hexe opu'ã ramo ojuka, Megido py.

* 23:16 Ha'e va'e ayvu jaexa 'rã 1 Reis 13.1-32 py.

³⁰ Hetekue ma hembiguai kuery ogueru okuapy peteĩ karóxa py. Jerusalém py ogueroaẽ ma vy onhono porã okuapy hupará oĩ va'ekue py ae. Ha'e rire ma ha'e va'e yvy re ikuai va'e kuery Josias ra'y Jeocaz ogueraa vy omoĩ okuapy nguvixará tuu rekovia.

2 Crônicas 36.1-4

³¹ Jeocaz oĩ ypy'i jave py ma vinte e três ma'etỹ oguereko, ha'e gui mboapy jaxy re ete'i opena Jerusalém py. Ixy ma Hamutal, Libna pygua Jeremias rajy.

³² Ha'e va'e ma ha'eve'ỹ va'e ojapo oikovy SENHOR renonde rupi, guamoĩ kuery ojapoague ha'e javi rami.

³³ Ha'e ramo Faraó-Neco ombo'a uka imoĩny Ribla py Hamate yvy re, Jerusalém py opena ve'ỹ aguã. Ha'e vy ijyvy re ikuai va'e gui okobra três mil e trezentos quilos prata ha'e trinta e três quilos ouro guigua.

³⁴ Huvixará ma Faraó-Neco omoĩ Josias ra'y Eliaquim, tuu Josias rekovia opena aguã. Ha'e vy hery ogueroa vy Jeoaquim ju omboery. Ha'e rã Jeocaz ma Egito yvy katy ju ogueraa. Ha'e ramo omano ha'e py.

³⁵ Ha'e gui ma Jeoaquim prata ha'e ouro omboaxa Faraó pe. Ha'e rami vy oyvy jave rupi ome'ẽ uka, Faraó ijayvuague rami vy ixupe omboaxapa aguã. Oyvy re ikuai va'e prata ha'e ouro ome'ẽmba aguã rami ojapo, peteĩ-teĩ gui oipe'a ha'e ae ome'ẽ ukaa rami vy, Faraó-Neco pe omboaxa aguã.

2 Crônicas 36.5-8

³⁶ Jeoaquim ma vinte e cinco ma'etỹ oguereko jave py huvixa oĩ ypy. Ha'e gui onze ma'etỹ re opena Jerusalém py. Ixy ma Zebida, Ruma pygua Pedaías rajy.

³⁷ Ha'e va'e ma ha'eve'ỹ va'e anho ojapo oikovy SENHOR renonde rupi, guamoĩ kuery ojapoague ha'e javi rami.

24

¹ Jeoaquim oĩ jave py Babilônia pygua huvixa Nabucodonosor ou hexe opu'ã aguã. Ha'e ramo mboapy ma'etỹ peve Jeoaquim oiko hembiguai. Ha'e va'e rire ma Jeoaquim ju opu'ã hexe.

² Ha'e ramo Jeoaquim rovai SENHOR ombou caldeu kuery, Síria pygua, Moabe pygua ha'e Amom ra'y kuery. Judá yvy re ombou ombovaipa aguã, guembiguai profeta kuery rupi SENHOR ijayvuague rami vy.

³ Ha'e nunga oiko Judá kuery re SENHOR ijayvuague rami vy ae, guenonde gui oipe'apa aguã, Manassés opa marã ojejavyague káuxa,

⁴ ojejavy e'ỹ va'e kuery ruguy omoëague káuxa guive, Jerusalém tetã ha'e javi rupi huguy omoë rire. Ha'e rami ete ojejavyague ma SENHOR nomboguexei.

⁵ Ha'e gui oĩve rei tema Jeoaquim rekoke regua. Ha'e rami avi mba'emo ojapo va'ekue ha'e javi noi' rã teve kuaxia Judá pygua huvixa kuery rekokie oia re?

⁶ Ha'e gui Jeoaquim ndoikovevei'i ma guamoĩ kueryague rami. Ha'e ramo ta'y Joaquim ju oĩ nguu rekovia.

⁷ Ha'e rã Egito pygua huvixa ma neĩ peteĩgue ma voi noëvei oyvy gui. Mba'eta mba'emo oguereko va'ekue ha'e javi Babilônia pygua huvixa oipe'apa ma, Egito katy'i yakã'i oĩ va'e guive Eufrates yakã peve.

2 Crônicas 36.9

⁸ Joaquim ma dezoito ma'etỹ oguereko jave py huvixa oĩ ypy. Ha'e gui mboapy jaxy re ete'i opena Jerusalém py. Ixy ma Neústa, Jerusalém pygua Elnatã rajy.

⁹ Ha'e va'e ma ha'eve'ỹ va'e anho ojapo oikovy SENHOR renonde rupi, guamoĩ kuery ojapoague ha'e javi rami.

Jerusalém gui yvatekueve Nabucodonosor escravo-rã ogueraapaague

¹⁰ Ha'e va'e jave py ma Jerusalém katy ou Babilônia pygua huvixa Nabucodonosor rembiguai kuery. Ha'e vy ojokopa tetã.

¹¹ Ha'e gui tetã re Babilônia pygua huvixa Nabucodonosor ae ou, guembiguai kuery ojokopa okuapy jave.

¹² Ha'e ramo Judá pygua huvixa Joaquim oo Babilônia pygua huvixa reve nhovaexĩ aguã. Ngupive ogueraa oxy, guembiguai kuery, ojeupegua yvatekueve ha'e joe opena va'ety kuery. Ha'e ramo Babilônia pygua huvixa ogueraa escravo-rã, oito ma'etỹ re ma oĩ jave py.

¹³ Ogueraa avi SENHOR pegua opy mba'emo omoĩ porã mbyre ha'e javi, huvixa ro gui guive. SENHOR ijayvuague rami vy omboa'ypa tembiporu Israel pygua huvixa Salomão ojapo va'ekue, ouro guigua SENHOR pegua templo ropy guarã va'ekue meme.

¹⁴ Ha'e rami py oipe'apa Jerusalém py ikuai va'ekue ha'e javi. Yvatekueve, avakue ipy'a guaxukue, mba'emo apoa ha'e ferro re omba'eapo va'e kuery ha'e javi vy ma dez mil ogueraa. Avave rei ndopytaĩ yvy re, iporiaukue'i e'ỹ vy.

¹⁵ Babilônia katy ogueraa Joaquim. Jerusalém gui escravo-rã ogueraa avi huvixa xy, ta'yxy kuery ha'e hembiguai kuery ha'e javi.

¹⁶ Avakue ipy'a guaxukueve sete mil ikuai va'e, mba'emo apoa ha'e ferro re omba'eapo va'e kuery mil ikuai va'e joe opu'ã kuua va'ekue meme ma Babilônia pygua huvixa ogueraapa escravo-rã.

¹⁷ Ha'e gui Joaquim rekovia ma Babilônia pygua huvixa omoĩ tuy'i Matanias. Ha'e va'e rery ogueroa vy Zedequias ju omboery.

2 Crônicas 36.10-16; Jeremias 52.1-3

¹⁸ Zedequias ma vinte e um ma'etỹ oguereko jave py oĩ ypy huvixa. Ha'e gui onze ma'etỹ re opena Jerusalém py. Ixy ma Hamutal, Libna pygua Jeremias rajy.

¹⁹ Ha'e va'e ma ha'eve'ỹ va'e anho ojapo oikovy SENHOR renonde rupi, Joaquim ojapoague ha'e javi rami.

Jeremias 39.1-7; 52.3-11

²⁰ Ha'e nunga oiko Jerusalém tetã ha'e Judá pygua kuery rovai SENHOR ipoxy ramo, guenonde gui oipe'apa agua. Ha'e gui ma huvixa Zedequias opu'ã Babilônia pygua huvixa rovai.

25

¹ Zedequias nove ma'etÿ re ma huvixa oĩ jave, dez jaxya re dez araa py ma Babilônia pygua huvixa Nabucodonosor ou Jerusalém py, oxondaro kuery ha'e javi reve. Tetã re ipo'akaxe vy ojokopa okuapy jovaive re.

² Onze ma'etÿ re ma Zedequias oĩ peve ojokopa tetã.

³ Irundy jaxya re nove araa py ma tetã ha'e javi rupi karuai oiko rã ha'e pygua kuery ndojouvei ho'u va'erã.
⁴ Ha'e va'e jave py oitya tetã kora. Ha'e ramo ha'e pygua avakue joe opu'ã pygua onhamba pyávy. Mokoĩ kora pa'ũ okẽ oĩ va'e rupi oje'oi huvixa mba'e yvotyty oĩ va'e yvÿry tape oĩ va'e rupi, caldeu kuery tetã jovaive re ikuai teĩ. Ha'e rã huvixa ma vvy joja reia rupi tape oĩ va'e rupi onha.*

⁵ Ha'e ramo caldeu regua xondaro kuery ma huvixa Zedequias rakykue oje'oi vy oupyta Jericó tetã katy'i vvy joja reia oĩ va'e py. Hexevegua xondaro kuery oaĩmba vy oejapa oje'oiivy.

⁶ Ha'e ramo ojokua reve ogueraa Ribla py Babilônia pygua huvixa oĩa py. Ha'e ramo ijavyvu opaga agua re.

⁷ Ha'e rami vy Zedequias oexaa py ae ojukapa ta'y kuery. Ha'e gui ma hexa omombupa. Mokoĩ corrente overa va'e guigua py ojokua reve ogueraa okuapy Babilônia katy.

2 Crônicas 36.17-21; Jeremias 39.8-10; 52.12-27

⁸ Dezenove ma'etÿ re ma Babilônia pygua huvixa Nabucodonosor oĩ jave py, peteĩ nhiruĩ jaxya re sete araa py ma peteĩ ou Jerusalém peve, Babilônia pygua huvixa rembiguai, jopya kuery ruvixa Nebuzaradã.

⁹ Ha'e va'e ma oapypa SENHOR pegua oo, huvixa rogue ha'e Jerusalém tetã rupi oo ikuai va'ekue ha'e javi. Oo iporãgueve ikuai va'e oapypa.

¹⁰ Ha'e rami vy jopya kuery ruvixa reve caldeu regua xondaro kuery ou va'ekue oitypa okuapy Jerusalém tetã yvÿry rupi kora oĩ va'ekue.

¹¹ Ha'e gui jopya kuery ruvixa Nebuzaradã ma heta ogueraa escravo-rã: tetã rupi ikuai va'ekue, Babilônia pygua huvixa pe ojejopy uka va'ekue, heta va'e kuery regua guive.

¹² Ha'e rã iporiaukueve ma jopya kuery ruvixa oejapa uva nhotyãrã ha'e mba'ety rupi omba'eapo va'erã.

¹³ Caldeu kuery omopẽmba okuapy SENHOR pegua oo ytarã overa va'e guigua mokoĩve hi'ã va'ekue, mba'emo renda ha'e yy mbotyarã overa va'e gui ojapo pyre, SENHOR pegua opy oĩ va'ekue. Ha'e vy overa va'e oĩ va'ekue ogueraapa Babilônia katy.

¹⁴ Ogueraa avi oja, pá, tapyĩ araa, heakuã porã va'e ryrukue, tembiporurã overa va'e gui ojapo pyre, ha'e mba'emo omboetea rupi oiporua va'ekue ha'e javi.

¹⁵ Jopya kuery ruvixa ogueraa avi tapyĩ rryru, hy'a guaxu, ha'e gui ouro ha'e prata guigua ha'e javi.

¹⁶ Ha'e gui mokoĩve oo yta hi'ã va'ekue, mba'emo ojoiaty ha'e mba'emo rendarã Salomão ojapo va'ekue SENHOR pegua opy rupi guarã, ha'e va'e tembiporu re overa va'e oĩ va'ekue ha'e javi ma jaipapapa va'erã e'ÿ.

¹⁷ Peteĩ-teĩ oo yta yvatekuea ma oito metros, ha'e gui hi'áry ma oĩ ju overa va'e guigua mokoĩ metro yvatea va'e. Hi'árygua yvÿry rupi imbojeguaraã kya corrente guigua ha'e yvyra'a ra'angaa oĩ va'ekue ma overa va'e guigua meme. Ha'e rã hovai re ijyta hi'ã va'e reve ma joegua, kya imbojeguaraã oĩ va'e voi.

¹⁸ Jopya kuery ruvixa ogueraa avi sacerdote yvateve va'e Seraías, sacerdote yvyĩve va'e Sofonias, ha'e gui okẽ rarõa kuery mboapy ikuai va'ekue.

¹⁹ Tetã gui ogueraa avi peteĩ xondaro kuery ruvixa oĩ va'ekue, ha'e gui peteĩ nhiruĩ avakue huvixa mongetaaty tetã py ojou va'ekue, ha'e xondarorã ha'e py ikuai va'e rery ombopara va'ety, ha'e gui sessenta avakue ha'e py hekoa va'ekue tetã rupi ojou va'ekue.

²⁰ Ha'e va'e kuery ma jopya kuery ruvixa Nebuzaradã ojokua reve ogueraapa Ribla py Babilônia pygua huvixa oĩa py.

²¹ Ha'e ramo Ribla py ae Babilônia pygua huvixa oipyxo uka vy ojuka ukapa, Hamate vvy re. Ha'e rami py Judá kuery ijyvy gui ogueraapaa escravo-rã.

²² Babilônia pygua huvixa Nabucodonosor ma Safã ra'y Aicão ra'y Gedalias omoĩ Judá vvy re oja va'ekue re opena va'erã.

Ismael Gedalias ojukaague

²³ Ha'e gui xondaro ruvixa kuery, hexevegua avakue reve oendu okuapy Babilônia pygua huvixa Gedalias ju huvixarã omoĩague. Ha'e rami vy Mispá py Gedalias oĩa py ha'e kuery ou okuapy oikuaa porãve agua. Ha'e va'e kuery regua ma Netanias ra'y Ismael, Careá ra'y Joanã, netofatita Tanumete ra'y Seraías ha'e maacatita ra'y Jazánias. Guexevegua avakue reve ou okuapy.

²⁴ Ha'e ramo Gedalias onhemboayvu ha'e kuery pe ha'e hexevegua avakue ikuai va'e pe. Ha'e vy aipoe'i: — Pkyje eme caldeu kuery gui. Pepyta tema nhandevvy re, ha'e penhe'ẽ rendu Babilônia pygua huvixa. Ha'e ramo peẽ kuery pendekuaĩ porã 'rã — he'i.

²⁵ Ha'e rami teĩ sete jaxya py ou Netanias ra'y Ismael, Elisama ramymino va'e, ipo'akave va'e ra'y. Hexeve ou avi dez avakue. Ha'e va'e kuery Gedalias oipyxo ramo omano, judeu ha'e caldeu kuery Mispá py hexeve ikuai va'ekue voi.

* 25:4 Caldeu kuery ma Babilônia pygua kuery ae. Ha'e gui caldeu kuery ruvixa ma Nabucodonosor (versículo 1).

²⁶ Ha'e ramo heta va'e kuery ha'e javi caldeu kuery gui okyje vy opu'ãmba oje'oivy, yvyĩgieve ha'e yvatekueve, xondaro ruvixa kuery voi oje'oi Egito yvy katy.

Jeremias 52.31-34

²⁷ Judá pygua huvixa Joaquim dezessete ma'etỹ ma escravo-rã ogueraague ojapo rire, doze jaxya re vinte e sete araa py ma Evil-Merodaque oĩ Babilônia pygua huvixarã. Ha'e va'e ma Judá pygua huvixa Joaquim opoi nhuã py ombo'aague gui.

²⁸ Ha'e vy hexeve ha'eve reia'i rupi ijayvu vy omboyvateve amboae huvixa kuery Babilônia py hexeve ikuai va'e gui.

²⁹ Ha'e ramo Joaquim oao nhuã py oiporu va'ekue omboekovia vy huvixa renonde ae okaru oikovy ko'ẽ nhavõ, oikoa pukukue re.

³⁰ Ha'e vy ko'ẽ nhavõ huvixa po gui ae ojopy mba'emo repyrã, oikovea ja guarã.

Jypya Crônicas huvixa kuery rekokue oĩa Jypya crônicas huvixa kuery rekokue oĩa

Kova'e kuaxia para re ma omombe'ua porãve ju mba'emo omombe'ua ma va'ekue, omo'arandu ha'e omobopy'a guaxy aguã judeu kuery escravo-rã ogueraa ague gui ovvy re ojevy va'ekue. Ha'e rami vy jypya omombe'ua ovvy re ojevy va'ekue ramoĩ kuery rery. Ha'e gui ma huvixa Davi openaague ju omombe'ua vy ima'endu'a yvatea ha'e ipo'akaa re. Omombe'u avi Senhor pegua templo peguarã Davi oguereko katupaague.

Heta va'e kuery oendua py Davi oguerovy'a Senhor. Ha'e vy aipoe'i: "Senhor Israel kuery ruete, Oeruete reiko va'e, ndere ae ta'ima'endu'a porã yma ete guive raka'eve rã peve. ... Ndere ae oĩ ndepo'aka aguã, ha'e pavẽ ikuai va'e aryve rupi ndeyvateve va'e repenaa py. ... Ha'e gui aỹ ma Oeruete, roguerovy'a vy rogueroporaie rokuapy nderery hexakãmba va'e rupi" (29.10b, 11b, 13).

Adão ramymino kuery rery oĩa

Gênesis 5.1-32

¹ Adão, ha'e gui Sete, Enos,

² Cainã, Maalalel, Jaredé,

³ Enoque, Metusalém, Lameque,

⁴ Noé, Sem, Cam ha'e Jafé.*

Gênesis 10.1-32

⁵ Jafé ra'y kuery ma Gômer, Magogue, Madai, Javã, Tubal, Meseque ha'e Tiras.

⁶ Gômer ra'y kuery ma Asquenaz, Rifate ha'e Togarma.

⁷ Javã ra'y kuery ma Elisá, Társis, Quitim ha'e Rodanim.

⁸ Ha'e gui Cam ra'y kuery ma Cuxe, Mizraim, Pute ha'e Canaã.

⁹ Cuxe ra'y kuery ma Sebá, Havilá, Sabtá, Raamá ha'e Sabtecá. Raamá ra'y kuery ma Sabá ha'e Dedá.

¹⁰ Cuxe ra'y ma Ninrode. Ha'e va'e ma jypyi ipo'akapa va'e oiko vyv re.

¹¹ Mizraim ra'y kuery ma Ludim, Anamim, Leabim, Naftuim,

¹² Patrusim, Casluim (ha'e va'e ma filisteu kuery ypy'i) ha'e Caftorim.

¹³ Canaã ra'y kuery ma jypygua Sidom, ha'e gui Hete,

¹⁴ ha'e jebuseu kuery, amorreu, gírgaseu,

¹⁵ heveu, arqueu, sineu,

¹⁶ arvadeu, zemareu ha'e hamateu kuery.

¹⁷ Ha'e gui Sem ra'y kuery ma Elão, Assur, Arfaxade, Lude, Arã, Uz, Hul, Geter ha'e Meseque.

¹⁸ Arfaxade ra'y ma Selá, ha'e Selá ra'y ma Héber.

¹⁹ Héber ra'y kuery ma mokoĩ oiko: Petēi rery ma Pelegue, mba'eta ha'e va'e oiko jave py vyv omboja'oa.†

Ha'e rã tyvy rery ma Joctã.

²⁰ Joctã ra'y ma Almodá, Salefe, Hazar-Mavé, Jerá,

²¹ Hadorão, Uzal, Dicla,

²² Ebal, Abimael, Sabá,

²³ Ofir, Havilá ha'e Jobabe. Ha'e va'e kuery ha'e javi ma Joctã ra'y kuery meme.

Gênesis 11.10-32

²⁴ Sem, ha'e gui Arfaxade, Selá,

²⁵ Héber, Pelegue, Reú,

²⁶ Serugue, Naor, Terá,

²⁷ ha'e gui Abrão, hery mboae Abraão va'e.

Gênesis 25.12-18

²⁸ Abraão ra'y kuery ma Isaque ha'e Ismael.

²⁹ Po rami ma ha'e va'e ra'y kuery: Ismael ra'y jypygua ma Nebaiote, ha'e gui Quedar, Adbeel, Mibsaõ,

³⁰ Misma, Dumá, Massá, Hadade, Temá,

³¹ Jetur, Nafis ha'e Quedemá. Ha'e va'e kuery ma Ismael ra'y kuery meme.

Gênesis 25.1-6

³² Ha'e gui Abraão ra'yxy jevy Quetura opi'a kuery oikuavã'i va'ekue ma Zinrã, Jocsã, Medã, Midiã, Isbaque ha'e Suá. Jocsã ra'y kuery ma Sabá ha'e Dedá.

³³ Midiã ra'y kuery ma Efá, Efer, Enoque, Abida ha'e Elda. Ha'e va'e kuery ma Quetura pi'a kuery meme.

³⁴ Ha'e gui Abraão ra'y ma Isaque. Isaque ra'y kuery ma Esaú ha'e Israel.

Gênesis 36.1-19

³⁵ Esaú ra'y kuery ma Elifaz, Reuel, Jesús, Jalão ha'e Coré.

³⁶ Elifaz ra'y kuery ma Temã, Omar, Zefi, Gaetã, Quenaz, Timna ha'e Amaleque.

³⁷ Reuel ra'y kuery ma Naate, Zerá, Samá ha'e Mizá.

Gênesis 36.20-30

* 1:4 Sem, Cam ha'e Jafé ma Noé ra'y kuery ikuai (Gênesis 5.32). † 1:19 Tery Pelegue ma "Mboja'o" 'ea.

- ³⁸ Ha'e gui Seir ra'y kuery ma Lotā, Sobal, Zibeão, Aná, Diso, Eser ha'e Disā.
³⁹ Lotā ra'y kuery ma Hori ha'e Homā. Ha'e gui Lotā reindy ma Timna.
⁴⁰ Sobal ra'y kuery ma Aliá, Manaate, Ebal, Sefô ha'e Onā. Zibeão ra'y kuery ma Aiá ha'e Aná.
⁴¹ Aná ra'y ma Disom. Disom ra'y kuery ma Hanrão, Esbā, Itrā ha'e Querā.
⁴² Eser ra'y kuery ma Bilā, Zaavā ha'e Jaacā. Disā ra'y kuery ma Uz ha'e Arā.
Gênesis 36.31-43
⁴³ Pova'e kuery ma Edom vvy re huvixave oĩ va'ekue, Israel kuery ruvixave oĩ e'ỹ teri jave: Beor ra'y Bela.
 Ha'e va'e retā openaaty ma Dinabá.
⁴⁴ Ha'e gui Bela omano rire hekovia oĩ Bozra pygua Zera ra'y Jobabe.
⁴⁵ Jobabe omano rire hekovia oĩ temanita kuery vvy guigua Husão.
⁴⁶ Husão omano rire hekovia oĩ Bedade ra'y Hadade. Ha'e va'e ma oitypa Midiā pygua kuery Moabe vvy re.
 Hetā openaaty ma Avite.
⁴⁷ Ha'e gui Hadade omano rire hekovia oĩ Masreca pygua Samlá.
⁴⁸ Samlá omano rire hekovia oĩ Saul. Ha'e va'e ma Eufrates yakā vvyry Reobote oĩ va'e guigua.
⁴⁹ Ha'e gui Saul omano rire hekovia oĩ Acbor ra'y Baal-Hanā.
⁵⁰ Baal-Hanā omano rire hekovia oĩ Hadade. Ha'e va'e retā openaaty ma Paí. Ha'e rā ta'yxy ma Matrede memby Meetabel, Me-Zaabe remiarirō va'e.
⁵¹ Ha'e gui Hadade ju omano.
 Po rami ma Edom pygua yvatekueve rery: yvatekueve Timna, Alva, Jetete,
⁵² Oolibama, Elá, Pinom,
⁵³ Quenaz, Temā, Mibzar,
⁵⁴ Magdiel, ha'e gui Irā. Ha'e va'e kuery ma Edom pygua yvatekueve meme.

2

Gênesis 35.22-26

- ¹ Ha'e gui pova'e ma Israel ra'y kuery: Rúben, Simeão, Levi, Judá, Issacar, Zebulom,
² Dā, José, Benjamim, Naftali, Gade ha'e Aser.

Judá ramymino kuery rery oĩa

- ³ Ha'e gui Judá ra'y kuery ma Er, Onā ha'e Selá. Ha'e va'e kuery mboapy ma Canaā pygua Bate-Sua pi'a ikuai raka'e. Ha'e gui Judá ra'y jypygua Er ma SENHOR renonde rupi heko vai ramo ojuka.
⁴ Ha'e rā gua'y ra'yxy Tamar re Judá ta'yague ma Perez ha'e Zera. Judá ra'y kuery ha'e javi vy ma petei nhiruí ikuai.
⁵ Ha'e gui Perez ra'y kuery ma Hezrom ha'e Hamul.
⁶ Zera ra'y kuery ma Zinri, Etā, Hemā, Calcol ha'e Dara. Ha'e javi vy ma petei nhiruí ikuai.
⁷ Carmi ra'y ma Acar. Ha'e va'e ma Israel kuery ikuai axy aguā rami ojapo ha'eve'ỹ va'e py ojevavy vy.
⁸ Etā ra'y ma Azarias.
⁹ Hezrom ra'y kuery ikuai va'ekue ma Jerameel, Rão ha'e Quelubai.
¹⁰ Ha'e gui Rão ra'y ma Aminadabe. Aminadabe ra'y ma Naassom, Judá regua kuery ruvixa va'e.
¹¹ Naassom ra'y ma Salma, ha'e Salma ra'y ma Boaz.
¹² Boaz ra'y ma Obede, ha'e Obede ra'y ma Jessé.
¹³ Jessé ra'y jypygua ma Eliabe, mokoĩa ma Abinadabe, mboapy ma Siméia,
¹⁴ irundya ma Natanael, petei nhiruí ma Radai,
¹⁵ mboapy memea ma Ozém, ha'e gui sete-a ma Davi.
¹⁶ Ha'e va'e reindy kuery ma Zeruia ha'e Abigail. Zeruia pi'a kuery ma mboapy: Abisai, Joabe ha'e Asael.
¹⁷ Abigail ma oikuavā'i Amasa. Ha'e rā Amasa ru ma Ismael guigua Jéter.
¹⁸ Ha'e gui Hezrom ra'y Calebe ma gua'y kuery oguereko gua'yxy Azuba ha'e gui Jeriote re. Ha'e va'e pi'a kuery ma Jeser, Sobabe ha'e Ardor.
¹⁹ Ha'e gui Azuba omano ma rire gua'yxyrā Calebe ogueraa Efrata. Ha'e va'e re ta'ya ma Hur.
²⁰ Hur ra'y ma Uri, ha'e Uri ra'y ma Bezalel.
²¹ Ha'e gui Hezrom ma Gileade ru Maquir rajy re omenda, sessenta ma'etỹ ma oguereko py. Ha'e ramo oikuavā'i Segube.
²² Segube ra'y ma Jair. Ha'e va'e ma vinte e três tetā re opena Gileade vvy rupi.
²³ Ha'e rami teĩ Jair pegua tekoa ikuai va'ekue ma Gesur ha'e Arā oipe'apa, Quenate vvyry tekoa'i ikuai va'e ha'e javi guive, ha'e javi vy ma sessenta tekoa ikuai. Ha'e va'e kuery ha'e javi ma Gileade ru Maquir ra'y kuery meme.
²⁴ Calebe-Efrata py Hezrom omano ma rire Hezrom ra'yxy Abia oikuavā'i Tecoa rurā Asur.
²⁵ Ha'e gui pova'e ma Hezrom ra'y jypygua Jerameel ra'y kuery: jypygua Rão, ha'e gui Buna, Orém, Ozém ha'e Afás.
²⁶ Ha'e gui Jerameel amboae ju ogueraa gua'yxyrā, Atara hery va'e. Ha'e va'e ma Onā xyará.
²⁷ Jerameel ra'y jypygua Rão ra'y kuery ma Maaz, Jamim ha'e Equer.
²⁸ Onā ra'y kuery ma Samai ha'e Jada. Samai ra'y kuery ma Nadabe ha'e Abisur.
²⁹ Abisur ra'yxy rery ma Abiail. Ha'e va'e oguereko Abā ha'e Molide.
³⁰ Nadabe ra'y kuery ma Seleda ha'e Apaim. Ha'e rā Seleda ma ta'y e'ỹ re omano.
³¹ Apaim ra'y ma Isi. Isi ra'y ma Sesā. Sesā ra'y ma Alai.

³² Ha'e gui Samai ryvy Jada ra'y kuery ma Jéter ha'e Jônatas. Ha'e rã Jéter ma omano ta'y e'y re.

³³ Jônatas ra'y kuery ma Pelete ha'e Zaza. Ha'e va'e kuery ma Jerameel ra'y kuery.

³⁴ Ha'e gui Sesã ma ndata'yi, tajy kuery anho. Ha'e rami avi Sesã oguereko peteĩ guembiguai Egito guigua, Jara hery va'e.

³⁵ Ha'e gui Jara ra'yxyrã ma Sesã ome'ẽ guajy. Ha'e va'e ma oikuavã'i Atai.

³⁶ Atai ra'y ma Natã, ha'e Natã ra'y ma Zabade.

³⁷ Zabade ra'y ma Eflal, ha'e Eflal ra'y ma Obede.

³⁸ Obede ra'y ma Jeú, ha'e Jeú ra'y ma Azarias.

³⁹ Azarias ra'y ma Heles, ha'e Heles ra'y ma Eleasa.

⁴⁰ Eleasa ra'y ma Sismai, ha'e Sismai ra'y ma Salum.

⁴¹ Salum ra'y ma Jecamias, ha'e rã Jecamias ra'y ma Elisama.

⁴² Ha'e gui Calebe ra'y jypygua, Jerameel ryke'y va'e ma Maressa. Ha'e va'e ma Zife ru oiko. Maressa ra'y ma Abi-Hebrom.

⁴³ Hebrom ra'y kuery ma Coré, Tapua, Requéim ha'e Sema.

⁴⁴ Sema ra'y ma Jorqueão rurã Raão. Ha'e gui Requéim ra'y ma Samai.

⁴⁵ Samai ra'y ma Maom, ha'e Maom ra'y ma Bete-Zur.

⁴⁶ Ha'e gui Calebe ra'yxy jevy Efã ma oikuavã'i Harã, Mosa ha'e Gazez. Ha'e Harã ra'y ma Gazez.

⁴⁷ Jadaí ra'y kuery ma Regém, Jotão, Gesã, Pelete, Efã ha'e Saafe.

⁴⁸ Ha'e gui Calebe ra'yxy jevy Maaca oguereko Seber ha'e Tiranã.

⁴⁹ Maaca oikuavã'i avi Madmana rurã Saafe, ha'e gui Macbena ha'e Gibeá rurã Seva. Ha'e gui Acsa ma Calebe rajy ae.

⁵⁰ Ha'e va'e kuery ma Calebe ra'y kuery meme.

Ha'e gui Efrata ra'y jypygua Hur ra'y kuery ma Quiriate-Jearim rurã Sobal,

⁵¹ ha'e gui Belém pygua kuery rurã Salma, ha'e Bete-Gade rurã Harefe.

⁵² Ha'e gui Quiriate-Jearim pygua kuery ru Sobal ra'y kuery ma Haroé ha'e Hazi-Hamenuote.

⁵³ Ha'e gui Quiriate-Jearim pygua kuery regua ikuai va'e ma itrita kuery, puteu, sumateu ha'e misraeu kuery.

Ha'e va'e kuery guigua ma zoratita ha'e estaoleu kuery.

⁵⁴ Ha'e gui Salma ra'y kuery ma Belém netofatita kuery reve, Atrote-Bete-Joabe ha'e Hazi-Hamanaati, zoreu va'e.

⁵⁵ Lei re nhombo'e va'ety kuery Jabez py ikuai va'e regua ma tiratita, simeatita ha'e sucatita kuery. Ha'e va'e kuery ae ma queneu kuery Hamate gui ou va'ekue. Ha'e va'e ma Recabe regua kuery ru ae.

3

2 Samuel 3.2-5

¹ Pova'e ma Davi ra'y kuery Hebrom tetã py itui'i va'ekue. Jypygua ma Jezreel pygua Ainoã pi'a Amnom. Mokoia ma Carmelo pygua Abigail pi'a Daniel.

² Mboapya ma Gesur pygua huvixave Talmai rajy Maaca pi'a Absalão. Ha'e gui irundya ma Hagite pi'a Adonias.

³ Peteĩ nhiruia ma Abital pi'a Sefatias. Mboapy memea ma ta'yxy Eglã pi'a Itreão.

⁴ Ha'e va'e mboapy meme ta'y kuery Hebrom tetã py itui'i va'ekue, ha'e py sete ma'etã ha'e mboapy meme jaxy re huvixave oĩ jave.

Ha'e va'e rire ma Jerusalém tetã py ju trinta e três ma'etã re oĩ.

⁵ Pova'e ma Jerusalém py ta'y kuery itui'i va'ekue: Siméia, Sobabe, Natã ha'e Salomão. Ha'e va'e irundy ma Amiel rajy Bate-Seba pi'a kuery.

⁶ Ha'e va'e rire ju ta'ya ma Ibar, Elisama, Elifelete,

⁷ Nogá, Nefegue, Jafia,

⁸ Elisama, Eliada ha'e Elifelete, nove ikuai ha'e javi vy.

⁹ Ha'e va'e kuery ma Davi ra'y kuery meme, ta'yxy jevy pi'a kuery rery oĩ e'y re. Ha'e gui Tamar ma ha'e kuery reindy ae avi.

Salomão ramymino kuery rery oia

¹⁰ Ha'e gui Salomão ra'y ma Roboão, Roboão ra'y ma Abias, Abias ra'y ma Asa, Asa ra'y ma Josafá,

¹¹ Josafá ra'y ma Jorão, Jorão ra'y ma Acázias, Acázias ra'y ma Joás,

¹² Joás ra'y ma Amazias, Amazias ra'y ma Azarias, Azarias ra'y ma Jotão,

¹³ Jotão ra'y ma Acáz, Acáz ra'y ma Ezequias, Ezequias ra'y ma Manassés,

¹⁴ Manassés ra'y ma Amom, Amom ra'y ma Josias.

¹⁵ Ha'e gui Josias ra'y kuery ma pova'e: ta'y jypygua ma Joanã, mokoia ma Jeaquim, mboapya ma Zedequias, irundya ma Salum.

¹⁶ Ha'e gui Jeaquim ra'y kuery ma Jecônias ha'e Zedequias.

¹⁷ Jecônias escravo-rã ogueraa pyrã ra'y kuery ma Sealtiel,

¹⁸ Malquirão, Pedaiás, Senazar, Jecamias, Hosama ha'e Nedabias.

¹⁹ Pedaiás ra'y kuery ma Zorobabel ha'e Simei. Zorobabel ra'y kuery ma Mesulão ha'e Hananias. Ha'e va'e kuery reindy ma Selomite.

²⁰ Ikuai avi Hasuba, Oel, Berequias, Hasadías ha'e Jusabe-Hesede, peteĩ nhiruĩ ikuai ha'e javi vy.

²¹ Ha'e gui Hananias ra'y kuery ma Pelatias ha'e Jesaías. Ikuai avi Refaías ra'y kuery, Arnã ra'y kuery, Obadías ra'y kuery ha'e Secanias ra'y kuery.

²² Secanias ra'y ma Semaías. Ha'e rã Semaías ra'y kuery ma Hatus, Igal, Barias, Nearias ha'e Safate, mboapy meme ikuai ha'e javi vy.

²³ Ha'e gui Nearias ra'y kuery ma Elioenai, Ezequias ha'e Azricão, mboapy ikuai ha'e javi vy.

²⁴ Elioenai ra'y kuery ma Hodavias, Eliasibe, Pelaías, Acube, Joanã, Delaías ha'e Anani, sete ikuai ha'e javi vy.

4

Judá ramymino kuery rery oĩa

¹ Ha'e gui Judá ra'y kuery ma Perez, Hezrom, Carmi, Hur ha'e Sobal.

² Sobal ra'y Reaías ra'y ma Jaate. Jaate ra'y kuery ma Aumai ha'e Laade. Ha'e va'e kuery regua ma zoratita ikuai.

³ Pova'e ma Etã ru ra'y kuery: Jezreel, Isma ha'e Idbas. Ha'e kuery reindy rery ma Hazelelponi.

⁴ Ikuai avi Gedor ru Penuel ha'e Husa ru Ezer. Pova'e kuery ma Hur ra'y kuery meme. Ha'e va'e ma Efrata ra'y jypygua, ha'e Belém pygua kuery ru.

⁵ Ha'e gui Tecoa ru Asur ma mokoĩ ogueraa gua'yxyrã: Hela ha'e Naara.

⁶ Naara ma oikuavã'i Auzão, Héfer, Temeni ha'e Haastari. Ha'e va'e kuery ma Naara pi'a kuery meme.

⁷ Hela pi'a kuery ma Zerete, Izar ha'e Etnã.

⁸ Coz ma Anube ha'e Zobeba ru, ha'e Harum ra'y Aarel guigua kuery ru avi.

⁹ Jabez ma guvy kuery gui omboeteave va'e. Ixy Jabez omboery vy aipoe'i: "Mba'eta haxy ete py aikuavã'i va'ekue", he'i.*

¹⁰ Ha'e gui Jabez ma ojerure Israel kuery ruete pe. Ha'e vy aipoe'i:

— Xemoingo porã tamo ra'e, ha'e emoive xeyvyrã. Tove xereve riaa toĩ ndepo, ha'e xepe'a mba'emo vai gui, xemoingo axyarã ou e'y aguã rami — he'i. Ha'e ramo Nhanderuetee ojapo ojerureague.

¹¹ Ha'e gui Suã ryke'y Quelube ra'y ma Meir. Ha'e va'e ma Estom ru.

¹² Estom ra'y ma Bete-Rafa, Paséia ha'e Ir-Naás pygua kuery rurã Tefna. Ha'e va'e avakue ma Reca pygua meme.

¹³ Quenaz ra'y kuery ma Otniel ha'e Seraías. Ha'e rã Otniel ra'y ma Hatate.

¹⁴ Meonotai ra'y ma Ofra, ha'e Seraías ra'y ma Joabe. Ha'e va'e ma yvugua py mba'emo ojapo kuaa va'e kuery retã ojapo ypy va'ekue, ha'e py mba'emo ojapoa rupi ikuai va'e meme.

¹⁵ Ha'e gui Jefoné ra'y Calebe ra'y kuery ma Iru, Elã ha'e Naã. Ha'e gui Elã ra'y ma Quenaz.

¹⁶ Jealelel ra'y kuery ma Zife, Zifa, Tiria ha'e Asareel.

¹⁷ Ezra ra'y kuery ma Jéter, Merede, Efer ha'e Jalom. Ha'e gui Merede ma gua'yxyrã ogueraa Faraõ rajy Bitia. Ha'e va'e pi'a kuery ma Miriã, Samai ha'e Estemoa rurã Isbã.

¹⁸ Ha'e gui ta'yxy Judá regua va'e oikuavã'i Gedor pygua kuery rurã Jerede, Socó pygua kuery rurã Héber, ha'e gui Zanoa pygua kuery rurã Jecutiel.

¹⁹ Ha'e gui Hodias ra'yxy Naã reindy va'e pi'a kuery ma Garmi pygua Abiqueila, ha'e Maacá pygua Estemoa.

²⁰ Simão ra'y kuery ma Amnom, Rina, Ben-Hanã ha'e Tilom. Ha'e gui Isi ra'y kuery ma Zoete ha'e Bene-Zoete.

²¹ Ha'e gui Judá ra'y Selã ra'y kuery ma Leca pygua kuery rurã Er ha'e Maressa pygua kuery rurã Lada. Selã ma linho re omba'eapo va'e kuery ru avi, Asbéia py hekoa va'e.

²² Oiko avi Joquim, Cozeba pygua kuery, Joás ha'e Sarafe pygua kuery Moabe re ipo'aka va'e, Jasubi-Leém pygua kuery guive. Ha'e va'e ma ymavegua kuery rery ombopara pyre.

²³ Ha'e kuery ma nhae'ũ re omba'eapo va'e, Netaim ha'e Gedera py hekoa va'e. Ha'e py ae ikuai nguvixave pe omba'eapo aguã.

Simeão ramymino kuery rery oĩa

²⁴ Ha'e gui Simeão ra'y kuery ma Nemuel, Jamim, Jaribe, Zerã ha'e Saul.

²⁵ Ha'e va'e ra'y ma Salum, Salum ra'y ma Mibsão, Mibsão ra'y ma Misma.

²⁶ Ha'e gui Misma ra'y ma Hamuel, Hamuel ra'y ma Zacur, Zacur ra'y ma Simei.

²⁷ Simei ra'y kuery ma dezesseis ikuai, ha'e rã tajy kuery ma mboapy meme. Ha'e rã tyvy kuery ma ndata'y retaipe meme rei, ndaetaive guive Judá ramymino kuery rami e'y.

²⁸ Ha'e kuery ma Berseba py hekoa va'e, ha'e Moladã py, Hazar-Sual,

²⁹ Bila, Ezém, Tolade,

³⁰ Betuel, Horma, Ziclague,

³¹ Bete-Marcabote, Hazar-Susim, Bete-Biri ha'e Saaraim py. Ha'e va'e tetã py ikuai Davi huvixave oĩ peve.

³² Ha'e kuery pegua tekoa'i ikuai va'e ma Etã, Aim, Rimom, Toquém ha'e Asã, petei nhiruũ tetã.

³³ Ha'e va'e tetã yvyrã rupi tekoa ikuai va'e ha'e javi, Baal peve. Ha'e py ae ha'e kuery ikuai, ha'e oguereko avi kuaxia guamoĩ kuery rery oĩa.

³⁴ Petei-tei regua huvixa omboparaa hery rupi: Mesobabe, Janleque, Amazias ra'y Josa,

³⁵ ha'e gui Joel ha'e Josibias ra'y Jeú. Josibias ma Asiel ra'y, ha'e Asiel ma Seraías ra'y.

³⁶ Ha'e gui Elioenai, Jaacobã, Jesoaiás, Asaiás, Adiel, Jesimiel, Benaia,

* 4:9 Ha'e kuery ayvy py ma tery Jabez "Haxy va'e" 'ea rami onhendu.

³⁷ ha'e gui Sifi ra'y Ziza. Sifi ma Alom ra'y, Alom ma Jedaías ra'y, Jedaías ma Sinri ra'y, Sinri ma Semaías ra'y.

³⁸ Ha'e va'e kuery ramymino kuery hetave tema ovy.

³⁹ Ha'e rami vy Gedor yvy re ovaë ovy peve oje'oi, yvyugua gui kuaray oua katy oje'oi nhuũ oeka vy guymba kuery vexa'i omongaru agua.

⁴⁰ Ha'e py ma ojou nhuũindy oata e'ỹ va'e, ha'eve reia, ha'e yvy voi tuvixaa ojou, mba'eve noía, ha'e ovy'a rei agua va'e. Ha'e py ma Cam ramymino kuery rekoague.

⁴¹ Ha'e gui hery ombopara pyre ma oupa okuapy Judá pygua huvixa Ezequias oĩ jave py. Ha'e rami vy ha'e py oo ikuai va'e oitypa vy ojukapa meunita kuery ha'e py ojou va'e rei. Omomba ete aỹ peve guarã. Ha'e rami vy ha'e kuery ikuaiague py ae ikuai, mba'eta ha'e py oĩ nhuũindy hymba kuery vexa'i okaru agua.

⁴² Ha'e gui ha'e kuery va'e regua ae, Simeão ramymino kuery, quinhentos avakue oje'oi Seir yvyty katy. Ha'e va'e kuery rerekoa kuery ma Pelatias, Nearias, Refaías ha'e Uziel, Isi ra'y kuery va'e meme.

⁴³ Ha'e rami vy ojukapa nho amalequita kuery gui oo jepe va'ekue. Ha'e vy ha'e kuery ju ikuai ha'e py, aỹ peve.

5

Rúben ramymino kuery rery oĩa

¹ Ha'e gui Rúben ramymino kuery ju. (Ha'e va'e ma Israel ra'y jypygua va'eri otekoavy nguu rupa py ae. Ha'e nunga rupi ta'y jypygua oikoa regua ixugui oipe'aa vy Israel ra'y José pe ju omboaxaa. Ha'ekue rami ju jypygua oikoa omombe'ua py ma hery noi.*

² Ha'e rami avi Judá anhetê guyvy ha'e guyke'y kuery gui ipo'akave va'e, ha'e hamymino oiko huvixarã, va'eri José pe ae omboaxaa jypygua pegua.)

³ Ha'e gui Rúben ra'y kuery ma Enoque, Palu, Hezrom ha'e Carmi.

⁴ Joel ra'y ma Semaías, Semaías ra'y ma Gogue, Gogue ra'y ma Simeí,

⁵ Simeí ra'y ma Mica, Mica ra'y ma Reaías, Reaías ra'y ma Baal,

⁶ Baal ra'y ma Beera, Assíria pygua huvixa Tiglate-Pileser escravo-rã ogueraa va'ekue. Ha'e va'e ma Rúben ramymino kuery ruvixa oiko.

⁷ Ha'e gui tyvy kuery rery omboparaa avi hamymino kuery ikuai rami, peteĩ-teĩ oo pygua rery oĩa. Ha'e va'e kuery akãrã omoĩ mbyre ma Jeiel, ha'e gui Zacarias,

⁸ Azaz ra'y Bela, Sema ramymino ha'e Joel ramymino kuery regua. Ha'e va'e kuery ma Aroer py hekoa va'ekue, Nebo ha'e Baal-Meom peve oje'oi.

⁹ Ikuai avi va'ekue kuaray oua katy, tekoa e'ỹa re ovaë ovy peve. Ijyvy oo 'rã Eufates yakã peve, hymba kuery Gileade yvy re heta-etave ramo.

¹⁰ Ha'e gui Saul huvixave oĩ jave py ma ha'e kuery opu'ã okuapy Agar regua kuery rovai. Ha'e rami vy ha'e kuery rogue ha'e javi rupi ju hekoa okuapy, Gileade katy'i rupi, kuaray oua katy.

Gade ramymino kuery rery oĩa

¹¹ Ha'e gui Gade ramymino kuery ma hekoa avi raka'e ha'e kuery ikuai rexe'i rupi, Basã yvy re, Salca peve.

¹² Joel ma ha'e kuery re opena va'erã omoĩ mbyre yvateve va'e, ha'e gui jevy guare ma Safã omoĩa. Janai ha'e Safate ikuai va'ekue Basã py.

¹³ Ha'e rã tyvy kuery ma pova'e, tuu ro pygua kuery rery rami: Micael, Mesulão, Seba, Jorai, Jacã, Zia ha'e Héber, ha'e javi vy sete ikuai.

¹⁴ Ha'e va'e kuery ma Abiail ramymino kuery ae. Ha'e va'e ma Huri ra'y, Huri ma Jarao ra'y, Jarao ma Gileade ra'y, Gileade ma Micael ra'y, Micael ma Jesisai ra'y, Jesisai ma Jado ra'y, ha'e Jado ma Buz ra'y.

¹⁵ Ha'e gui Abdiel ra'y Aí, Guni ramymino va'e ma hetarã kuery akã oĩ.

¹⁶ Ha'e kuery ma Gileade py ae hekoa va'ekue, Basã py, ha'e ijyvýry rupi tekoa ikuai va'e py, ha'e Sarom yvýry tekoa ikuai va'e ha'e javi rupi peve.

¹⁷ Ha'e kuery rery ha'e javi ma omboparaa raka'e, Judá pygua huvixave Jotão ha'e Israel kuery ruvixave Jeroboão oĩ jave py.

Jordão yakã rovaigua rupi ikuai va'e kuery rekokie oĩa

¹⁸ Ha'e gui Rúben, Gade ha'e Manassés regua mbyte rupi oja'o va'ekue ma avakue ipy'a guaxukueve meme ikuai raka'e. Ha'e kuery ma ojee omoĩ 'rã okuapy hu'y jokoa ha'e kyxe. Guyrapa voi oiporu kuua, ha'e joe opu'ãa py ikuai kuua va'e. Ha'e kuery va'e regua ma quarenta e quatro mil setecentos e sessenta ikuai, joe opu'ãa py ikuai kuua va'e meme.

¹⁹ Ha'e gui ha'e kuery joguero'a okuapy Agar kuery, Jetur, Nafis ha'e Nodabe reve.

²⁰ Ha'e va'e kuery reve joguero'aa py oipytyvõa, ha'e ipo py omboaxapaa Agar kuery re ipo'aka agua, imoirũa kuery ha'e javi re guive, joguero'aa py Nhanderuete pe ojapukai okuapy ramo. Hexe ojerovia ete okuapy ramo oendu.

²¹ Ha'e rami rã ogueraapa hymba kuery: cinqüenta mil camelo, duzentos e cinqüenta mil vexa'i ha'e dois mil mburika. Ogueraa avi cem mil avakue.

²² Heta ete avi ikuai kyxe py ojuka va'ekue, ha'e kuery rovai opu'ã okuapy agua Nhanderuete gui ae ou ramo. Ha'e rire hekoague py ae ju ikuai, escravo-rã herapaa peve.

* 5:1 Rúben ma nguu Israel pe otekoavy ta'xy jevy reve (Gênesis 35.22, 49.3-4).

²³ Ha'e gui Manassés regua mbyte rupi oja'o va'ekue ma ha'e py ae hekoa Basā yvy re, Baal-Hermom, Senir ha'e Hermom yvyty peve. Ha'e kuery heta-etave tema ovy.

²⁴ Pova'e ma hetarā kuery akā ikuai va'ekue: Efer, Isi, Eliel, Azriel, Jeremias, Hodavias ha'e Jadiel. Ha'e va'e kuery ma joe opu āa py ipy'a guaxukueve, avakue omboetevepy ha'e hetarā kuery akā.

²⁵ Ha'e rami teĩ ha'e kuery ojevavy nguu kuery ruete rovai. Ha'e vy itavy rei ha'e va'e vvy regua kuery ruete pegua ikuai rupi, henonde gui ha'e va'e kuery Nhanderuete omomba rire teĩ.

²⁶ Ha'e nunga rupi ae Israel kuery ruete omokyre'ỹ Assíria pygua huvixa Pul ha'e Tiglate-Pileser. Ha'e ramo ha'e va'e ma escravo-rā ogueraa Rūben, Gade ha'e Manassés regua mbyte rupi oja'o va'ekue. Hala katy ogueraa, Habor ha'e Hara py, Gozā yakā peve. Ha'e py ae ha'e kuery ikuai aỹ peve.

6

Levi ramymino kuery rery oĩa

¹ Ha'e gui Levi ra'y kuery ma Gérson, Coate ha'e Merari.

² Coate ra'y kuery ma Anrão, Isar, Hebrom ha'e Uziel.

³ Anrão ra'y kuery ma Arão, Moisés ha'e Miriã. Arão ra'y kuery ma Nadabe, Abiú, Eleazar ha'e Itamar.

⁴ Eleazar ra'y ma Finéias, Finéias ra'y ma Abisua,

⁵ Abisua ra'y ma Buqui, Buqui ra'y ma Uzi,

⁶ Uzi ra'y ma Zeraías, Zeraías ra'y ma Meraiote,

⁷ Meraiote ra'y ma Amarias, Amarias ra'y ma Aitube,

⁸ Aitube ra'y ma Zadoque, Zadoque ra'y ma Aimaás,

⁹ Aimaás ra'y ma Azarias, Azarias ra'y ma Joanã,

¹⁰ Joanã ra'y ma Azarias. Ha'e va'e ma sacerdote oĩ va'ekue Jerusalém py Salomão oorã ojapo va'ekue py.

¹¹ Ha'e gui Azarias ra'y ma Amarias, Amarias ra'y ma Aitube,

¹² Aitube ra'y ma Zadoque, Zadoque ra'y ma Salum,

¹³ Salum ra'y ma Hilquias, Hilquias ra'y ma Azarias,

¹⁴ Azarias ra'y ma Seraías, Seraías ra'y ma Jeozadaque.

¹⁵ Ha'e gui Jeozadaque ma escravo-rā heraa, Judá regua ha'e Jerusalém pygua kuery Nabucodonosor pe SENHOR ogueraa uka ramo.

¹⁶ Ha'e gui Levi ra'y kuery ma Gérson, Coate ha'e Merari.

¹⁷ Gérson ra'y kuery ma Libni ha'e Simei.

¹⁸ Coate ra'y kuery ma Anrão, Isar, Hebrom ha'e Uziel.

¹⁹ Merari ra'y kuery ma Mali ha'e Musi. Ha'e va'e kuery ma Levi ra'y kuery va'e regua meme, tamoi kuery rery rami ae.

²⁰ Gérson ra'y ma Libni, Libni ra'y ma Jaate, Jaate ra'y ma Zima,

²¹ Zima ra'y ma Joá, Joá ra'y ma Ido, Ido ra'y ma Zerá, Zerá ra'y ma Jeaterai.

²² Ha'e gui Coate ra'y ma Aminadabe, Aminadabe ra'y ma Coré, Coré ra'y ma Assir,

²³ Assir ra'y ma Elcana, Elcana ra'y ma Ebiasafe, Ebiasafe ra'y ma Assir,

²⁴ Assir ra'y ma Taate, Taate ra'y ma Uriel, Uriel ra'y ma Uzias, Uzias ra'y ma Saul.

²⁵ Ha'e gui Elcana ra'y kuery ma Amasai ha'e Aimote.

²⁶ Elcana ra'y ma Zofai, Zofai ra'y ma Naate,

²⁷ Naate ra'y ma Eliabe, Eliabe ra'y ma Jeroão, Jeroão ra'y ma Elcana.

²⁸ Ha'e gui Samuel ra'y jypygua ma Joel, ha'e va'e riregua Abias.

²⁹ Merari ra'y ma Mali, Mali ra'y ma Libni, Libni ra'y ma Simei, Simei ra'y ma Uzá,

³⁰ Uzá ra'y ma Siméia, Siméia ra'y ma Hagias, ha'e Hagias ra'y ma Asaías.

Levi ramymino kuery oporaei va'erã omoi mbyre rery oĩa

³¹ Pova'e kuery ma Davi omoi va'ekue jogueroporai va'erã SENHOR pegua oo py, ixupegua hyru ogueru ma imoiny rire.

³² Ha'e ramo ha'e kuery ma oporaia rupi ikuai onhemboaty oĩaty renonde, Jerusalém py SENHOR peguarã oo Salomão ojapo e'ỹa ja. Ha'e rami vy ipara oĩa rami ojapo okuapy SENHOR pe.

³³ Pova'e kuery ma gua'y kuery reve omba'eapo va'ekue. Coate ramymino kuery regua ma oporai va'e Hemã. Ha'e va'e ma Joel ra'y, Joel ma Samuel ra'y,

³⁴ Samuel ma Elcana ra'y, Elcana ma Jeroão ra'y, Jeroão ma Eliel ra'y, Eliel ma Toá ra'y,

³⁵ Toá ma Zufe ra'y, Zufe ma Elcana ra'y, Elcana ma Maate ra'y, Maate ma Amasai ra'y,

³⁶ Amasai ma Elcana ra'y, Elcana ma Joel ra'y, Joel ma Azarias ra'y, Azarias ma Sofonias ra'y,

³⁷ Sofonias ma Taate ra'y, Taate ma Assir ra'y, Assir ma Ebiasafe ra'y, Ebiasafe ma Coré ra'y,

³⁸ Coré ma Isar ra'y, Isar ma Coate ra'y, Coate ma Levi ra'y, Levi ma Israel ra'y.

³⁹ Ha'e gui tyvy Asafe ma irũrã oĩ oiporu kuaa regua re. Asafe ma Berequias ra'y, Berequias ma Siméia ra'y,

⁴⁰ Siméia ma Micael ra'y, Micael ma Baaséias ra'y, Baaséias ma Malquias ra'y,

⁴¹ Malquias ma Etni ra'y, Etni ma Zera ra'y, Zera ma Adaías ra'y,

⁴² Adaías ma Etã ra'y, Etã ma Zima ra'y, Zima ma Simei ra'y,

⁴³ Simei ma Jaate ra'y, Jaate ma Gérson ra'y, Gérson ma Levi ra'y.

⁴⁴ Ha'e gui tyvy kuery Merari ramymino kuery ma ijaxua re ikuai. Ha'e va'e ma Quisi ra'y Etã. Ha'e gui Quisi ma Abdi ra'y, Abdi ma Maluque ra'y,

⁴⁵ Maluque ma Hasabias ra'y, Hasabias ma Amazias ra'y, Amazias ma Hilquias ra'y,

⁴⁶ Hilquias ma Anzi ra'y, Anzi ma Bani ra'y, Bani ma Semer ra'y,

⁴⁷ Semer ma Mali ra'y, Mali ma Musi ra'y, Musi ma Merari ra'y, Merari ma Levi ra'y.

⁴⁸ Ha'e gui tyvy kuery Levi ramymino ikuai va'e ma omoia Nhanderuete pegua opy rupi opa mba'e re omba'eapo aguã.

Arão ramymino kuery rery oia

⁴⁹ Ha'e gui Arão ma gua'y kuery reve mba'emo ome'ê 'rã okuapy altar mba'emo oapyaty oĩ va'e áry, heakuã porã va'e oapyaty áry guive. Ha'e kuery ma henda iky'a e'ÿ ete va'e py avi ikuai guetarã Israel kuery ojevavyague oja'o i uka aguã SENHOR pe, Nhanderuete guembiguai Moisés pe ojapo ukaague ha'e javi rami vy.

⁵⁰ Arão ra'y ma Eleazar, Eleazar ra'y ma Finéias, Finéias ra'y ma Abisua,

⁵¹ Abisua ra'y ma Buqui, Buqui ra'y ma Uzi, Uzi ra'y ma Zeraías,

⁵² Zeraías ra'y ma Meraiote, Meraiote ra'y ma Amarias, Amarias ra'y ma Aitube,

⁵³ Aitube ra'y ma Zadoque, ha'e rã Zadoque ra'y ma Aimaás.

Josué 21.1-42

⁵⁴ Pova'e py ma ha'e kuery hekoa okuapy, ha'e kuery rekoarã ome'êague rami vy, ijapya peve: Arão ramymino kuery Coate regua pe ranhe xortea oexa ramo

⁵⁵ ha'e kuery pe ome'êa Hebrom tetã Judá vvy re, ha'e ijyvyry rupi vvy itui va'e ha'e javi.

⁵⁶ Ha'e rã vvy tetã ha'e tekoa'i ikuai va'e vvyry rupigua ma Jefoné ra'y Calebe pe ome'êa.

⁵⁷ Arão ramymino kuery pe ome'êa tetã jojukaarã gui onhemia aguã: Hebrom ha'e Libna ijyvyry rupi vvy itui va'e reve, ha'e gui Jatir ha'e Estemoa ijyvyry rupi vvy itui va'e reve,

⁵⁸ Hilém ha'e Debir ijyvyry rupi vvy itui va'e reve,

⁵⁹ Asã ha'e Bete-Semes ijyvyry rupi vvy itui va'e reve,

⁶⁰ ha'e gui Benjamim regua gui ome'êa Geba, Alemete ha'e Anatote ijyvyry rupi vvy itui va'e reve. Ha'e javi vy ma treze tetã ome'êa ha'e kuery va'e regua ikuai aguã.

⁶¹ Ha'e gui Coate ramymino kuery mboae pe ma xortea oexaague rami ome'êa dez tetã Manassés regua mbyte rupi oja'o va'ekue ikuai re.

⁶² Ha'e gui Gérson ramymino kuery pe ma treze tetã ome'êa ha'e kuery ikuai aguã, Issacar, Aser, Naftali ha'e Manassés regua Basã vvy re ikuai va'e.

⁶³ Ha'e gui Merari ramymino kuery pe ma doze tetã ome'êa Rúben, Gade ha'e Zebulom regua, xortea oexaague rami vy.

⁶⁴ Ha'e rami py Levi ramymino kuery pe Israel kuery ome'ê ha'e va'e tetã ha'e javi ijyvyry rupi vvy itui va'e reve.

⁶⁵ Ha'e va'e tetã peteĩ-teĩ rery rupi ome'êa avi Judá, Simeão ha'e Benjamim regua va'ekue, xorte oexaague rami.

⁶⁶ Ha'e gui Coate ramymino kuery amongue regua pe ma ome'êa tetã Efraim regua vvy re ikuai va'e.

⁶⁷ Ha'e kuery pe ome'êa avi tetã onhemia aguã, pova'e: Siquém vvyty Efraim regua re oĩ va'e ijyvyry rupi vvy itui va'e ha'e javi reve, ha'e gui Gezer,

⁶⁸ Jocmeão, Bete-Horom,

⁶⁹ Aijalom ha'e Gate-Rimom ijyvyry rupi vvy itui va'e ha'e javi reve.

⁷⁰ Ha'e gui Manassés regua mbyte rupi oja'o va'ekue vvy gui Coate ramymino kuery mboae pe ome'êa Aner ha'e Bileã ijyvyry rupi vvy itui va'e ha'e javi reve.

⁷¹ Ha'e gui Gérson ramymino kuery pe ma ome'êa Manassés regua mbytekue Basã vvy re oĩ va'e Golã ha'e Astarote ijyvyry rupi vvy itui va'e ha'e javi reve,

⁷² ha'e gui Issacar regua gui ome'êa Quedes ha'e Daberte ijyvyry rupi vvy itui va'e ha'e javi reve,

⁷³ Ramote ha'e Aném ijyvyry rupi vvy itui va'e ha'e javi reve guive.

⁷⁴ Ha'e gui Aser regua gui ma ome'êa Masal ha'e Abdom ijyvyry rupi vvy itui va'e ha'e javi reve,

⁷⁵ ha'e Hucoque ha'e Reobe ijyvyry rupi vvy itui va'e ha'e javi reve guive.

⁷⁶ Ha'e gui Naftali regua Galiléia re ikuaiã gui ma ome'êa Quedes, Hamom ha'e Quiriataim ijyvyry rupi vvy itui va'e ha'e javi reve.

⁷⁷ Ha'e gui Merari ramymino kuery mboae pe ma ome'êa Zebulom regua gui Rimono ha'e Tabor ijyvyry rupi vvy itui va'e ha'e javi reve.

⁷⁸ Ha'e gui Jordão yakã rovai, Jericó tetã rexei Jordão gui kuaray oua re oĩ va'e voi ome'êa avi Rúben regua gui Bezer ha'e Jaza ijyvyry rupi vvy itui va'e ha'e javi reve,

⁷⁹ ha'e Quedemote ha'e Mefaate ijyvyry rupi vvy itui va'e ha'e javi reve guive.

⁸⁰ Ha'e gui Gade regua Gileade re oĩ va'e gui ome'êa Ramote ha'e Maanaim ijyvyry rupi vvy itui va'e ha'e javi reve,

⁸¹ ha'e Hesbom ha'e Jazer ijyvyry rupi vvy itui va'e ha'e javi reve guive.

- ¹ Ha'e gui Issacar ra'y kuery ma Tola, Puá, Jasube ha'e Sinrom, ha'e javi vy irundy ikuai.
² Tola ra'y kuery ma Uzi, Refaías, Jeriel, Jamai, Ibsão ha'e Samuel, Tola ramymino kuery re opena va'e, avakue ipy'a guaxukueve meme. Ha'e kuery va'e regua rery huvixa Davi oĩ jave ombopara pyre ma vinte e dois mil e setecentos ikuai.
³ Ha'e gui Uzi ra'y ma Izraías. Ha'e gui Izraías ra'y kuery ma Micael, Obadias, Joel ha'e Issias, ha'e javi vy peteĩ nhiruĩ ikuai, huvixa meme.
⁴ Ha'e kuery va'e regua rery ombopara pyre ma trinta e seis mil avakue ikuai joe opu'ãa pygua, mba'eta ha'e kuery va'e regua heta ete avi ikuai kunhague ha'e ta'y kuery.
⁵ Tyvy kuery Issacar ramymino kuery va'e regua avakue ipy'a guaxukueve ha'e javi vy ma oitenta e sete mil ikuai, hery ombopara pyre oĩa rami vy.

Benjamim ramymino kuery rery oĩa

- ⁶ Ha'e gui Benjamim ra'y kuery ma Bela, Bequer ha'e Jediael, ha'e javi vy mboapy ikuai.
⁷ Ha'e gui Bela ra'y kuery ma Esbom, Uzi, Uziel, Jerimote ha'e Iri, ha'e javi vy peteĩ nhiruĩ ikuai. Guetarã kuery re opena va'e meme, avakue ipy'a guaxukueve. Vinte e dois mil e trinta e quatro ikuai hery ombopara pyre oĩa rami vy.
⁸ Ha'e gui Bequer ra'y kuery ma Zemira, Joás, Eliézer, Elioenai, Onri, Jerimote, Abias, Anatote ha'e Alemete, Bequer ra'y kuery meme ikuai.
⁹ Ha'e javi vy vinte mil e duzentos ikuai guamoĩ jypygua kuery rery ombopara pyre oĩa rami. Guetarã kuery re opena va'e, avakue ipy'a guaxukueve ikuai.
¹⁰ Ha'e gui Jediael ra'y ma Bilã. Ha'e rã Bilã ra'y kuery ma Jeús, Benjamim, Eúde, Quenaana, Zetã, Társis ha'e Aisaar.
¹¹ Ha'e va'e Jediael ra'y kuery ha'e javi ma ma guetarã kuery re opena va'e. Avakue ipy'a guaxukueve ma dezessete mil e duzentos ikuai joe opu'ãa py ikuai kuaa va'e.
¹² Ha'e gui Supim ha'e Hupim ma Ir ra'y kuery ae. Ha'e rã Husim ma Aer ra'y ju.
¹³ Ha'e gui Naftali ra'y kuery ma Jaziel, Guni, Jezer ha'e Salum, Bila ramymino meme.

Manassés ramymino kuery rery oĩa

- ¹⁴ Ha'e gui Manassés ra'y ma Asriel, ta'yxy jevy Síria guigua oguereko va'ekue. Ha'e va'e oikuavã'i avi Gileade rurã Maquir.
¹⁵ Ha'e gui Maquir ma gua'yxyrã ojou Hupim ha'e Supim reindy, Maaca hery va'e. Ha'e rã Maquir ryvy rery ma Zelofeade. Ha'e va'e ma guajy anho oguereko raka'e.
¹⁶ Ha'e gui Maquir ra'yxy Maaca ma peteĩ opri'a oguereko vy omboery Perez. Tyvy ma Seres hery va'e. Ha'e rã Perez ra'y kuery ma Ulão ha'e Requém.
¹⁷ Ulão ra'y ma Bedã. Ha'e kuery ae Gileade ramymino ikuai. Ha'e va'e ma Maquir ra'y, Manassés ramymino.
¹⁸ Heindy Hamolequete ma oikuavã'i Is-Hode, Abiezer, ha'e Macla.
¹⁹ Ha'e rã Semida ra'y kuery ma Aiã, Siquém, Liqui, ha'e Aniã.

Efraim ramymino kuery rery oĩa

- ²⁰ Ha'e gui Efraim ra'y ma Sutela. Ha'e gui Sutela ra'y ma Berede, Berede ra'y ma Taate, Taate ra'y ma Eleada, ha'e Eleada ra'y ma Taate avi.
²¹ Ha'e gui Taate ra'y ma Zabade, ha'e Zabade ra'y ma Sutela. Ha'e rã Ezer ha'e Eleade ma avakue Gate pygua ae ojuka, ha'e va'e kuery rymba re imonda aguã oje'oi ramo.
²² Ha'e nunga rupi mbovy ára re rei e'y' tuu Efraim ojae'o oiny ha'e kuery re. Ha'e ramo tyke'y kuery ou ombopy'a porã ju aguã.
²³ Ha'e va'e rire ma gua'yxy reve joguereko ramo oguereko'i vy oikuavã peteĩ opri'a. Ha'e ramo tuu omboery Berias, hoo py mba'emo vai oiko ramo.*
²⁴ Ha'e gui tajy ma Seerã, Bete-Horom tetã ojapo va'erã, yvy'ã guy katy ha'e yvy'ã katy voi. Ojapo avi Uzém-Seerã.
²⁵ Ha'e gui Berias ra'y ma Refa, Refa ra'y ma Resefe, Resefe ra'y ma Tela, Tela ra'y ma Taã,
²⁶ Taã ra'y ma Ladã, Ladã ra'y ma Amiúde, Amiúde ra'y ma Elisama,
²⁷ Elisama ra'y ma Num, ha'e Num ra'y ma Josué.
²⁸ Ha'e kuery yvy ha'e hekoa ma povae: Betel ijyvyry rupi tekoa'i ikuai va'e reve, ha'e gui kuaray oua katy Naarã oĩ, ha'e rã kuaray oieka katy oĩ va'e ma Gezer, Siquém ha'e Aia peve, ijyvyry rupi tekoa'i ikuai va'e reve.
²⁹ Ha'e gui Manassés ramymino kuery rekoa rexei rupi ma Bete-Seã ijyvyry rupi tekoa'i ikuai va'e reve, Taanaque, Megido ha'e Dor ijyvyry rupi tekoa'i ikuai va'e reve. Ha'e va'e tetã ha'e javi rupi Israel ra'y José ramymino kuery ikuai.

Aser ramymino kuery rery oĩa

- ³⁰ Ha'e gui Aser ra'y kuery ma Imna, Isvá, Isvi ha'e Berias. Ha'e rã Sera ma ha'e kuery reindy oiko.
³¹ Berias ra'y kuery ma Héber ha'e Malquiel. Malquiel ra'y ma Birzavite.
³² Héber ra'y kuery ma Jaflete, Somer, Hotão ha'e Suã ha'e kuery reindy.
³³ Jaflete ra'y kuery ma Pasaque, Bimal ha'e Asvate. Ha'e kuery ma Jaflete ra'y kuery ikuai.
³⁴ Ha'e gui Semer ra'y kuery ma Aí, Roga, Jeubá ha'e Arã.

* 7:23 Ha'e kuery ayvu py tery Berias ma "Mba'emo vai" lea rami onhendu.

³⁵ Tyvy Helém ra'y kuery ma Zofa, Imna, Seles ha'e Amal.

³⁶ Ha'e gui Zofa ra'y kuery ma Sua, Harnefer, Sual, Beri, Inra,

³⁷ Bezer, Hode, Sama, Silsa, Itrā ha'e Beera.

³⁸ Ha'e gui Jéter ra'y kuery ma Jefoné, Pispā ha'e Ara.

³⁹ Ula ra'y kuery ma Ara, Haniel ha'e Rizia.

⁴⁰ Ha'e kuery ha'e javi ma Aser ramymino kuery ikuai, guetarā kuery re opena va'erā oiporavo pyre, avakue ipy'a guaxukueve, huvixa yvatekueve ikuai, hetarā kuery rery oia py hery omboparaa joe opu'āa rupi ikuai va'erā. Ha'e javi vy ma vinte e seis mil avakue ikuai raka'e.

8

Benjamim ramymino kuery rery oia

¹ Ha'e gui Benjamim ra'y ma Bela jypygua va'e. Mokoia ma Asbel, mboapya ma Aarā,

² irundya ma Noá, ha'e rā petei nhiruia ma Rafa.

³ Ha'e gui Bela ra'y kuery ma Adar, Gera, Abiúde,

⁴ Abisua, Naamā, Aoá,

⁵ Gera, Sefufá ha'e Hurāo.

⁶ Pova'e kuery ma Eúde ramymino kuery. Ha'e kuery ma Geba pygua kuery re opena va'ekue ri ha'e gui oguerovapaa Manaate py ju ikuai aguā.

⁷ Ha'e kuery ma Naamā, Afas ha'e Gera. Ha'e va'e ae oguerovapa, ha'e gui ta'ya ma Uzā ha'e Aiúde.

⁸ Ha'e gui Saarim ma gua'yxy kuery Husim ha'e Baara gui opoi ma rire Moabe regua yvy re oiko jave

⁹ gua'yxyrā Hode ju ojou va'e reve oguereko Jobabe, Zíbia, Messa, Malcā,

¹⁰ Jeús, Saquias ha'e Mirma. Ha'e va'e kuery ma ta'y kuery ikuai, guetarā kuery re opena va'e meme.

¹¹ Ha'e gui Husim ra'y kuery ma Abitube ha'e Elpaal.

¹² Elpaal ra'y kuery ma Héber, Misā ha'e Semede. Ha'e va'e ma ojapo Ono ha'e Lode, ha'e ijyvíry rupi tekoa ikuai va'erā.

¹³ Ha'e gui Berias ha'e Sema ma Aijalom py hetarā kuery akā ikuai. Ha'e kuery ma Gate py hekoa va'ekue omoxêmba.

¹⁴ Ha'e gui Aiô, Sasaque, Jeremote,

¹⁵ Zebadias, Arade, Éder,

¹⁶ Micael, Ispa ha'e Joá, Berias ramymino kuery meme ikuai.

¹⁷ Ha'e gui Zebadias, Mesulão, Hizqui, Héber,

¹⁸ Ismerai, Izlias, ha'e Jobabe ma Elpaal ramymino kuery ikuai.

¹⁹ Ha'e gui Jaquim, Zicri, Zabdi,

²⁰ Elienai, Ziletai, Eliel,

²¹ Adaías, Beraías ha'e Sinrate ma Simei ramymino kuery ikuai.

²² Ha'e gui Ispā, Héber, Eliel,

²³ Abdom, Zicri, Hanā,

²⁴ Hananias, Elão, Antotias,

²⁵ Ifdías ha'e Penuel ma Sasaque ramymino kuery ikuai.

²⁶ Ha'e gui Sanserai, Searias, Atalias,

²⁷ Jaeresias, Elias ha'e Zicri ma Jeroão ramymino kuery ikuai.

²⁸ Ha'e kuery ma Jerusalém tetā py guetarā kuery re opena va'e, ha'e kuery va'e regua rery oia rami vy.

²⁹ Ha'e gui Gibeão py oiko Gibeão rurā. Ha'e rā ta'yxy rery ma Maaca.

³⁰ Ha'e py oiko avi ta'y jypyguare Abdom, ha'e gui Zur, Quis, Baal, Nadabe,

³¹ Gedor, Aiô ha'e Zequer.

³² Ha'e gui Miclote ra'y ma Siméia. Ha'e va'e kuery ma Jerusalém py ikuai guivy kuery reve joa katy'i.

³³ Ha'e gui Ner ra'y ma Quis, Quis ra'y ma Saul, Saul ra'y ma Jónatas, Malquisua, Abinadabe ha'e Esbaal.

³⁴ Jónatas ra'y ma Meribe-Baal, ha'e gui Meribe-Baal ra'y ma Mica.

³⁵ Mica ra'y kuery ma Pitom, Meleque, Taréia ha'e Acaz.

³⁶ Acaz ra'y ma Jeoda, ha'e Jeoda ra'y kuery ma Alemete, Azmavete ha'e Zinri. Ha'e gui Zinri ra'y ma Mosa,

³⁷ Mosa ra'y ma Bineá, Bineá ra'y ma Rafa, Rafa ra'y ma Eleasa, Eleasa ra'y ma Azel.

³⁸ Ha'e gui Azel ra'y kuery ma mboapy meme ikuai raka'e. Ha'e kuery rery ma Azricão, Bocru, Ismael, Searias, Obadias ha'e Hanā. Ha'e va'e kuery ha'e javi ma Azel ra'y ikuai.

³⁹ Ha'e gui tyvy Esequē ra'y kuery ma pova'e: Ulão ma jypykue, Jeú ma mokoia, Elifelete ma mboapya.

⁴⁰ Ulão ra'y kuery ma avakue ipy'a guaxukueve, guyrapa oiporu kuaa va'e. Ha'e gui heta avi ta'y ha'e hamymino kuery, ha'e javi vy cento e cinqüenta ikuai. Ha'e kuery ha'e javi ma Benjamim ramymino kuery meme.

9

Escravo ikuai rire Jerusalém py ju ikuai va'e kuery rery oia

¹ Ha'e gui Israel kuery ha'e javi rery omboparapaa imoiny kuaxia Israel kuery ruvixa rekokie oia re. Ha'e gui Judá regua kuery ma ojevavy okuapya re Babilônia katy ogueraapaa escravo ikuai aguā py.

² Ha'e va'e rire amongue ou ju ovyv re, ha'e tetã ikuaiague py ae ju hekoa. Ou ypy va'ekue ma Israel regua sacerdote kuery, levita kuery ha'e templo py omba'eapo va'ekue.

³ Ha'e gui amongue Judá ramymino kuery, Benjamim, Efraim ha'e Manassés ramymino kuery Jerusalém py ae ikuai va'e ma pova'e:

⁴ Utai ma Amiúde ra'y, Amiúde ma Onri ra'y, Onri ma Inri ra'y, Inri ma Bani ra'y, Bani ma Judá ra'y Perez ramymino kuery va'e regua.

⁵ Ou avi Siló py hekoa va'ekue: jypyguare Asaías, hamymino kuery guive,

⁶ ha'e gui Zerá ramymino kuery regua Jeuel ha'e tyvy kuery reve vy seiscentos e noventa ikuai.

⁷ Benjamim ramymino kuery regua ma Salu, ha'e va'e ma Mesulão ra'y, Mesulão ma Hodavias ra'y, ha'e Hodavias ma Hassenuá ra'y.

⁸ Ou avi Jeroão ra'y Ibnéias, ha'e gui Uzi ra'y Elá, Micri ramymino, ha'e gui Sefatias ra'y Mesulão, Mesulão ma Reuel ra'y, Ibnijas ramymino.

⁹ Ha'e gui tyvy kuery ma ha'e kuery rery oia rami vy novecentos e cinqüenta e seis ha'e javi vy. Ha'e va'e avakue ha'e javi ma hetarã kuery akã ikuai peteĩ-teĩ oo rupi.

¹⁰ Ha'e gui sacerdote kuery va'e regua ma Jedaías, Jeoiaribe, Jaquim

¹¹ ha'e Azarias. Ha'e va'e ma Hilquias ra'y, Hilquias ma Mesulão ra'y, Mesulão ma Zadoque ra'y, Zadoque ma Meraiote ra'y, Meriaote ma Aitube ra'y, ha'e Aitube ma Nhanderueete pegua opy rupi openaa py yvateve va'e.

¹² Ou avi Jeroão ra'y Adaías, Jeroão ma Pasur ra'y, Pasur ma Malquias ra'y. Ou avi Adiel ra'y Masai, Adiel ma Jazera ra'y, Jazera ma Mesulão ra'y, Mesulão ma Mesilemite ra'y, ha'e Mesilemite ma Imer ra'y.

¹³ Ou avi tyvy kuery hetarã kuery akã ikuai va'e, ha'e javi vy mil setecentos e sessenta ikuai, avakue Nhanderueete pegua ropy rupi omba'eapo kuvaa va'e meme.

¹⁴ Ha'e gui levita kuery regua ou va'ekue ma Semaías. Ha'e va'e ma Hassube ra'y, Hassube ma Azricão ra'y, Azricão ma Hasabias ra'y, Hasabias ma Merari ramymino kuery regua.

¹⁵ Ou avi Baquebacar, Heres, Galal ha'e Matanias. Ha'e va'e ma Mica ra'y, Mica ma Zicri ra'y, ha'e Zicri ma Asafe ra'y.

¹⁶ Ou avi Semaías ra'y Obadias, Semaías ma Galal ra'y, Galal ma Jedutum ra'y, Jedutum ma Berequias ra'y, Berequias ma Asa ra'y, Asa ma Elcana netofatita kuery yvy re hekoa va'e ra'y.

¹⁷ Ha'e gui okẽ rarõa kuery ma Salum, Acube, Talmom ha'e Aimã, ha'e tyvy kuery guive. Salum ma ha'e kuery ruvixa oiko.

¹⁸ Aỹ peve ha'e kuery huvixa rokẽ rarõa rupi ae ikuai, kuaray oua yke katy. Ha'e va'e kuery ae Levi ramymino kuery rekoa kora rokẽ rarõa rupi ikuai va'e.

¹⁹ Salum ma Coré ra'y, Coré ma Ebiasafe ra'y, ha'e Ebiasafe ma Corá ra'y. Tyvy kuery nguu ro pygua ikuai va'e reve ma Coré regua kuery omoia ixupe omba'eapo va'erã ha'e ombojerovia aty rokẽ rarõarã. Tamoi kuery ma SENHOR pegua kuery ikuai re opena, ha'e tekoa rokẽ rarõa rupi ikuai va'ekue.

²⁰ Ha'e jave ma Eleazar ra'y Finéias opena ha'e kuery re, ha'e hexeve SENHOR oiko.

²¹ Ha'e gui Meselemias ra'y Zacarias ma onhemboaty aty rokẽ rarõa rupi avi oiko.

²² Ha'e va'e okẽ rarõarã oiporavo pyre kuery ha'e javi vy ma duzentos e doze ikuai. Tamoi kuery rery oia py ha'e kuery rery omboparaa peteĩ-teĩ rekoa py ae. Davi ha'e profeta Samuel ae omoi va'ekue peteĩ-teĩ rembiaporã.

²³ Ha'e rami rire ha'e kuery, gua'y kuery reve oarõ 'rã okuapy SENHOR pegua rokẽ, oo py oikea ikuai va'e.

²⁴ Okẽ rarõa kuery ma irundy henda yvytu oipejua katy ikuai: kuaray oua katy, oikea katy, apu'a'ia katy ha'e kuaray puku-a katy.

²⁵ Ha'e rã tyvy kuery tekoa'py ikuai gui ou jepi 'rã ha'e kuery reve sete ára re omba'eapo aguã.

²⁶ Ha'e rami teĩ ha'e jave py ikuai riae 'rã irundy okẽ rarõa yvatekueve Levi ramymino kuery va'e regua. Ha'e kuery ae opena 'rã Nhanderueete pegua oo ja'o ikuai va'e re, ha'e perãta omoi porã mbyre re.

²⁷ Ha'e kuery ma oke 'rã Nhanderueete pegua oo yvy'iry rupi ae, opena va'erã omoia rire, ha'e ko'ẽ nhavõ okẽ oipe'a aguã.

²⁸ Ha'e kuery va'e regua amongue ma tembiporu re openaa rupi ikuai. Ha'e kuery ma oipapapa 'rã ogueraa ha'e oguerua jevy rã.

²⁹ Ikuai avi amboae kuery tenda ha'e mesa ikuai va'e re opena va'erã, ha'e henda iky'a e'ỹ va'e pygua tembiporu ikuai va'e re, ha'e gui trigo, vinho, azeite, heakuã porã va'e ha'e irũrã oguereko va'e re.

³⁰ Mba'eta sacerdote ra'y kuery amongue va'e ma ojapo 'rã heakuã porã va'e irũrã.

³¹ Ha'e gui peteĩ levita va'e regua oiko Matitias hery va'e, Salum ra'y jypykue, Coré ramymino kuery va'e regua. Ha'e va'e ma mbojape apoa kuery re opena.

³² Ha'e rã tyvy kuery Coate ramymino kuery va'e regua ma sãbado nhavõ ojapo 'rã mbojape SENHOR renonde omoi mbyrã.

³³ Ha'e gui oporai va'e kuery ma levita regua kuery akã ikuai va'e meme. Ha'e kuery ma templo ropy ja'o ikuai va'e py ae 'rã ikuai. Amboae rupi nomba'eapoi 'rãe, mba'eta ara py ha'e pyávy omba'eapo 'rã okuapy hembiaporã ome'ẽ mbyre rupi ae.

³⁴ Ha'e va'e kuery ma levita regua kuery akã ikuai, ojavagua kuery ruvixa. Jerusalém py ae hekoa va'e meme.

³⁵ Gibeão py ma oiko raka'e Jeiel, Gibeão ru va'e. Ha'e rã ta'xyx ma Maaca.

³⁶ Ta'y jypykue ma Abdom, ha'e gui Zur, Quis, Baal, Ner, Nadabe,

³⁷ Gedor, Aiô, Zacarias ha'e Miclote.

³⁸ Ha'e gui Miclote ra'y ma Siméia. Ha'e va'e kuery ma Jerusalém py ae hekoa va'ekue, guyvy kuery reve joa katy'i ikuai.

³⁹ Ner ra'y ma Quis, Quis ra'y ma Saul, ha'e Saul ra'y kuery ma Jônatas, Malquisua, Abinadabe ha'e Esbaal.

⁴⁰ Jônatas ra'y ma Meribe-Baal, ha'e Meribe-Baal ra'y ma Mica.

⁴¹ Mica ra'y kuery ma Pitom, Meleque ha'e Taréia.

⁴² Ha'e gui Acaz ra'y ma Jaerá, ha'e rá Jaerá ra'y kuery ma Alemete, Azmavete ha'e Zinri. Ha'e rá Zinri ra'y ma Mosa,

⁴³ Mosa ra'y ma Bineá, Bineá ra'y ma Refaías, Refaías ra'y ma Azel.

⁴⁴ Ha'e rá Azel ra'y kuery ma mboapy meme ikuai. Hery ma Azricão, Bocru, Ismael, Searias, Obadias ha'e Haná. Ha'e kuery ha'e javi ma Azel ra'y kuery meme.

10

1 Samuel 31.1-7

¹ Ha'e gui Israel kuery reve filisteu kuery joguero'a ramo avakue Israel regua onhamba filisteu kuery gui. Ha'e ramo Gilboa yvy'ã re ojukapa.

² Filisteu kuery ojoko avi Saul ha'e ta'y kuery. Ha'e vy ojuka Saul ra'y kuery Jônatas, Abinadabe ha'e Malquisua.

³ Joguero'aa py Saul oĩ vaive ovy. Hu'y momboa kuery ojou ramo ha'e kuery gui okyje vaipa.

⁴ Ha'e gui Saul aipoe'i hu'y jokoia reraa pe:

— Ekyi ndekyxe ha'e xepyxo, ha'e kuery opire omboi uka e'ỹ va'ekue ou vy xejojai rei e'ỹ aguã — he'i.

Ha'e rami teĩ hu'y jokoia reraa okyje vaipa vy ndoipyxoxei. Ha'e ramo Saul ae kyxe ojopy vy onhemombo hakua re.

⁵ Hu'y jokoia reraa Saul omano ma ri ty ra'ea oexa vy ha'e voi kyxe re onhemombo vy omano avi.

⁶ Ha'e rami py Saul omano gua'y kuery mboapyve reve. Hoo pygua kuery voi omanomba avi hexeve.

⁷ Ha'e gui avakue Israel regua yvyugua rupi hekoa va'e oexa okuapy oirũ kuery onhambaa, ha'e Saul gua'y kuery reve omanomba maa. Ha'e rami vy ha'e kuery voi guekoa oejapa vy onhamba avi oje'oivy. Ha'e gui filisteu kuery ou vy ha'e py ju ikuai.

1 Samuel 31.8-13

⁸ Ko'ẽ jevy filisteu kuery ou omanogue mba'ekue ogueraapa aguã. Ha'e rami vy ojou Saul ha'e ta'y kuery mboapyve retেকে Gilboa yvy'ã re ho'apaague py.

⁹ Ha'e rami vy Saul akãgue ojaya vy hembiporukue ogueraapa. Filisteu yvy ha'e javi rupi omondouka ayvu mombe'uarã, ha'e nungakue omombe'u aguã ta'angaa pegua oo ikuai va'e rupi, ha'e guetarã kuery ha'e javi pe.

¹⁰ Saul rembiporukue ogueraa nguete kuery pegua oo py. Ha'e rá inhakãgue ma nguete Dagom pegua oo re omboja imoiny.

¹¹ Ha'e gui Jabes-Gileade pygua kuery oendu okuapy filisteu kuery Saul re ojapoague.

¹² Ha'e rami vy avakue ipy'a guaxukueve va'e opu'ãmba vy omboi heruvy Saul ha'e ta'y kuery retেকে. Jabes tetã py ogueru vy ojatypa ha'e py, yvyra ikuai va'e guy py. Ha'e vy sete ára re okaru e'ỹ re ikuai.

¹³ Ha'e rami py Saul omano SENHOR rovai ojejavayague re, SENHOR ijayvua noenduxeĩ rire, omanogue mboayvua pe rive oporandu ramo guive,

¹⁴ SENHOR pe e'ỹ. Ha'e nunga rupi SENHOR ojuka uka vy Jessé ra'y Davi pe ju omboaxa huvixave oĩ aguã.

11

2 Samuel 5.1-5

¹ Ha'e gui ma Israel regua kuery ha'e javi ou okuapy Hebrom tetã py Davi oĩa py. Hexeve jogueroayvu vy aipoe'i okuapy:

— Ore kuery voi ma nderegua kuery ae avi.

² Yma Saul oiko teri vy orere opena jave py ndee ae reo ha'e rejeyv 'rã va'ekue Israel regua xondaro kuery reve. Ha'e gui SENHOR aipoe'i ndevy: “Ndee repena 'rã xevyguia Israel kuery re, ha'e reiko 'rã ha'e kuery ruvixa”, he'i va'ekue.

³ Ha'e rami vy Israel regua nhomongetaa kuery ha'e javi ou okuapy Hebrom py huvixa reve jogueroayvu aguã. Ha'e ramo Hebrom py, SENHOR renonde ha'e kuery reve huvixa Davi ojapo oguereko porã aguã regua. Ha'e rá omoĩ okuapy Davi nguvixarã Israel kuery ha'e javi re opena aguã, Samuel ayvu rupi SENHOR aipoe'iague rami vy.*

2 Samuel 5.6-10

⁴ Ha'e gui Davi ha'e Israel kuery ha'e javi reve oje'oi Jerusalém tetã hery mboae Jebus va'e katy, mba'eta ha'e py ae jebuseu kuery ha'e va'e yvy regua rekoa.

⁵ Ha'e ramo Jebus py hekoa va'e kuery aipoe'i Davi pe:

— Apy ma ndereikei 'rã — he'i okuapy. Ha'e rami teĩ Davi oipe'a oo ikorapa va'e Sião py oĩ va'e. Ha'e va'e pe ma “Davi rekoa” 'ea.

⁶ Mba'eta Davi aipoe'i ma voi va'ekue: “Amongue va'e rei jypy'i jebuseu kuery oity va'e amoĩ 'rã xondaro kuery ruvixarã”, he'i va'ekue. Ha'e ramo Zeruia pi'a Joabe ha'e ranhe opu'ã ovy ha'e kuery re. Ha'e ramo omoĩ xondaro ruvixarã.

* 11:3 Davi huvixave oĩ aguã Samuel oikuaa ukaague omombe'u 1 Samuel 16.1-13 py.

7 Ha'e rami vy oo ikorapa va'e py ae Davi oĩ. Ha'e nunga rupi ha'e va'e pe "Davi rekoa" 'ea.

8 Ha'e va'e vyvry rupi mba'emo ojapo avi. Milo guive tetã omoatyrõ heravy omboypyague py ovaẽ peve. Ha'e rã tetã rembyre ma Joabe ju omoatyrõmba.

9 Davi ma ipo'akave tema ovy, hexeve SENHOR ixondaro reta va'e oiko ramo.

2 Samuel 23.8-39

10 Pova'e kuery ma Davi pegua ipy'a guaxukueve yvateve va'e. Ha'e kuery ma Israel kuery ha'e javi reve oipytyvõ okuapy huvixave oĩ aguã, ha'e va'e kuery reko re SENHOR ijayvuague rami vy.

11 Po rami ma Davi pegua kuery ipy'a guaxukueve rery: hacmonita Jasobeão ma trinta ikuai va'e ruvixa. Ha'e va'e ma guembiporu hu'y reve trezentos ikuai va'e rovai opu'ã vy peteĩgue'i pyve ojukapa va'ekue.

12 Ha'e va'e rire ma Dodô ra'y Eleazar, Aof ramymino. Ha'e va'e ma mboapyve ipy'a guaxukueve va'e regua oiko.

13 Ha'e gui ha'e va'e kuery ma Pas-Damim py Davi reve ikuai filisteu kuery ijaty okuapy jave py. Ha'e py peteĩ vyv cevada-ty oĩa py xondaro kuery onhamba filisteu kuery renonde gui.

14 Ha'e va'e vyv mbyte py ha'e kuery opu'ã vy ojoko nho, oitypa filisteu kuery. Ha'e rami py SENHOR ogueraa jepepa raka'e.

15 Ha'e gui trinta yvatekueve ikuai va'e regua mboapy oje'oi avi Adulão itakua py Davi onhemia py. Ha'e va'e jave py filisteu regua xondaro kuery voi ijaty okuapy Refains vyvugua py.

16 Ha'e rami vy Davi onhemia py oĩ, ha'e rã filisteu regua xondaro kuery ma Belém tetã py ikuai.

17 Ha'e gui Davi ijy'uvei etea rupi aipoe'i:

— Mava'e tu xemboy'u ta ygua Belém rokẽ py oĩ va'e gui? — he'i.

18 Ha'e ramo ha'e va'e mboapyve ma filisteu kuery ijaty okuapy rupi oje'oi vy ygua Belém kora rokẽ py oĩ va'e gui vy oguenoẽ, ha'e Davi oĩa py ogueru. Ha'e rã ha'e ndoy'uxei vy SENHOR renonde onhoẽ ixupe guarã.

19 Ha'e vy aipoe'i:

— SENHOR, nda'evei ete xee ha'e va'e ay'u aguã! Xee ay'u 'rã ri nda'u avakue ojeayvu ve'ỹkue py oje'oi va'ekue ruguy rami? Mba'eta ha'e kuery ndojeayvuveikue py ogueru okuapy va'ekue — he'i vy ndoy'uxei. Ha'e ramigua ae mboapy ipy'a guaxukueve ojapo va'ekue.

20 Ha'e gui Joabe ryke'y Abisai ma trinta ikuai va'e akã. Ha'e va'e ma guembiporu hu'y guaxu reve opu'ã trezentos ikuai va'e rovai, ha'e vy ojukapa. Ha'e rami vy mboapyve tenonde re ikuai va'e rami ete ima'endua'a porãmby oiko.

21 Ha'e ma trinta ikuai va'e gui yvateve va'e vy ha'e kuery akã oiko, va'eri mboapyve tenonde re ikuai va'e regua e'ỹ guive.

22 Ha'e gui Joiada ra'y Benaia ma ipy'a guaxuve va'e avi Cabzeel pygua, mba'emo tuvixa va'e ojapo avi va'e. Ha'e rami vy ojuka mokoĩ Moabe pygua joe opu'ã kuaave va'ekue. Yro'y apĩ ho'a jave ma itakua py oguejy vy guary okua py oĩ va'ekue ojuka.

23 Ojuka avi peteĩ ava Egito pygua mokoĩ metros raxa'i yvate va'ekue. Egito pygua ma hu'y guaxu ajukue popẽa 'y rami ipo guaxu va'e reve ou rã Benaia ma popoka py rive opu'ã ovy vy ipo gui hu'y guaxu ogueroko va'ekue oipe'a vy ha'e va'e py ae ju ojuka.

24 Ha'e nunga Joiada ra'y Benaia ojapo rire mboapyve tenondegua ipy'a guaxukueve re rami ima'endua'a porãmby oiko.

25 Ha'e va'e ma trinta ikuai va'e gui omboetevea va'eri mboapyve tenonde re ikuai va'e regua ndoiko'i guive. Ha'e gui Davi omoĩ guarõa kuery re opena va'erã.

26 Ha'e gui xondaro kuery regua ipy'a guaxukueve ma Joabe ryvy Asael, Belém pygua Dodô ra'y Elanã,

27 Harode guigua Samote, Pelete guigua Heles,

28 Tecoa pygua Iques ra'y Ira, Anatote guigua Abiezer,

29 Husa guigua Sibecai, Aof guigua Ilai,

30 Netofa guigua Maarai, Netofa pygua Baaná ra'y Helede,

31 Gibeá pygua Ribai ra'y Itai Benjamim ramymino va'e, Piratom guigua Benaia,

32 Gaás yakã'i vyvry guigua Hurai, Arba guigua Abiel,

33 Baarum guigua Azmavete, Saalbom guigua Eliaba,

34 Gizom guigua Benê-Hasém, Aião pygua Sage ra'y Jônatas,

35 Aião pygua Sacar ra'y Aião, ha'e Ur ra'y Elifal,

36 Mequerá guigua Hefer, Pelom guigua Aías,

37 Carmelo guigua Hezro, Ezbai ra'y Naarai,

38 Natã ryvy Joel, Hagri ra'y Mibar,

39 Amom guigua Zeleque, Beerote guigua Naarai, Zeruia pi'a Joabe rebiporu reraaty va'e,

40 ha'e gui Jatir guigua kuery Ira ha'e Garebe,

41 heteu Urias, Alai ra'y Zabade,

42 Rúben regua Siza ra'y Adina Rúben ramymino kuery ruvixa, hexevegua trinta avi ikuai,

43 ha'e gui Maaca ra'y Hanã, Mitã guigua Josafá,

44 Asterá pygua Uzias, Aroer pygua Hotão ra'y kuery Sama ha'e Jeiel,

45 Sinri ra'y Jediel, ha'e tyvy Joá Tiz guigua,

46 Maavá guigua Eliel, Elnaão ra'y kuery Jeribai ha'e Josavias, Moabe guigua Itma,

47 ha'e gui Zobá guigua kuery Eliel, Obede ha'e Jaasiel.

12

Davi pegua xondaro kuery re ijayvua

¹ Pova'e kuery ma Davi-a katy ou va'ekue Ziclague py Quis ra'y Saul gui onhaague py. Ha'e va'e kuery ma ipy'a guaxukueve joe opu'ãa rupi ikuai va'e regua.

² Ha'e va'e kuery rembiporu ma guyrapa. Oiporu kuaa regua re ha'e oiporu kuaa e'ÿa re oiporu ita momboa, hu'y voi omombo 'rã guyrapa py. Ha'e va'e kuery ma Saul regua ae, Benjamim ramymino kuery.

³ Ha'e kuery ruvixa ma Gibeá pygua Semaã ra'y kuery Aiezer ha'e Joás, ha'e gui Azmavete ra'y kuery Jeziel ha'e Pelete, Beraca, Anatote guigua Jeú,

⁴ Gibeão guigua Ismaías ma trinta ipy'a guaxukueve ikuai va'e regua, ha'e kuery akã avi oiko, ha'e gui Jeremias, Jaaziel, Joanã ha'e Gedera pygua Jozabade,

⁵ ha'e gui Eluzai, Jerimote, Bealias, Semarias ha'e Harife pygua Sefatias,

⁶ Elcana, Issias, Azarel, Joezer ha'e Jasobeão, Corá ramymino meme,

⁷ ha'e gui Gedor pygua Jeroão ra'y kuery Joela ha'e Zebadias.

⁸ Gade regua kuery voi oaxa Davi-a katy, tekoa e'ÿa py oo ikorapa va'e py oĩ jave. Ha'e va'e avakue ma ipy'a guaxukueve joe opu'ãa kuaa va'e meme. Hembiporu ma hu'y jokoia ha'e imo'ãa tuvixa va'e. Hova ma guary rami, ha'e guaxu yvyty áry rupi onhaa rami inhakuã va'e.

⁹ Ha'e gui Ezer ma ha'e kuery akã, ha'e va'e gui mokoia ma Obadias, mboapy ma Eliabe,

¹⁰ irundaya ma Mismana, peteĩ nhiruia ma Jeremias,

¹¹ mboapy memea ma Atai, sete-a ma Eliel,

¹² oito-a ma Joanã, nove-a ma Elzabade,

¹³ dez-a ma Jeremias ha'e onze-a ma Macbanai.

¹⁴ Ha'e kuery Gade ramymino ma xondaro kuery ruvixa ikuai. Ha'e va'e regua yvytyve va'e ma cem avakue rami ovare va'e opu'ãa py, ha'e rã yvateve va'e ma mil avakue rami ovare va'e.

¹⁵ Ha'e va'e kuery ma Jordão yakã rupi oaxa va'ekue jaxy ijypya re, hembe ha'e javi áry rupi yy oja'o'i teĩ. Ha'e rami vy omonhamba yvyugua rupi ikuai va'ekue ha'e javi, kuaray oua katy ha'e kuaray oikea katy guive.

¹⁶ Ha'e gui Davi oia py ou avi Benjamim ha'e Judá ramymino kuery regua, oo ikorapa va'e py.

¹⁷ Ha'e ramo Davi ovaexĩ aguã oo vy ijayvu ha'e kuery reve. Ha'e vy aipoe'i:

— Xapy'a rei rã peẽ kuery nepytyvõ aguã ri peju ramo xepy'a py anhemoirũ 'rã peẽ kuery reve. Ha'e gui pëvy ajapo vai e'ÿ teĩ xerovaigua kuery pe xemboaxa aguã rive ri peju ramo ma tove nhaneramõĩ kuery ruete ae toexa pota, ha'e vy ta'ijayvu pëvy — he'i.

¹⁸ Ha'e ramo trinta va'e akã Amasai re Nhe'ẽ oĩ ramo aipoe'i:

— Ha'e rami avi ore kuery ma ndevyguã ae, Davi! Jessé ra'y, ndereve ete 'rã orekuai! Tereiko porã, nepytyvõa kuery voi ta'ikuai porã! Mba'eta Nderuete ma nepytyvõ 'rã — he'i ramo Davi omovaẽ imbokuapy vy xondaro kuery ruvixarã omoĩ.

¹⁹ Ha'e gui Manassés va'e regua voi Davi-a katy oaxa, filisteu kuery reve ha'e ou jave Saul reve ha'e kuery joguero'a aguã katy. Ha'e rami teĩ ha'e noipytyvõĩ va'ekue filisteu kuery, mba'eta ha'e kuery va'e regua huvixa kuery jogueroayvuague rami vy nomondoukai. Ha'e vy aipoe'i okuapy:

— Nguvixave Saul-a katy ri Davi oaxa ramo ma nhaneakã ojayapaa 'rã — he'i okuapy.

²⁰ Ha'e ramo Ziclague tetã katy Davi ojevy ju ramo ha'ea katy oaxapa okuapy Manassés ramymino kuery. Ha'e va'e kuery ma Adna, Jozabade, Jediael, Micael, Jozabade, Eliú ha'e Ziletai, Manassés regua mbovy rei e'ÿ ruvixa kuery ikuai va'ekue.

²¹ Ha'e va'e kuery ma oipytyvõ Davi hexe opu'ã va'e mbovy rei e'ÿ ikuai va'e rovai, avakue ipy'a guaxukueve ha'e xondaro ruvixa meme ikuai va'e vy.

²² Ha'e va'e jave py ko'ẽ nhavõ ou retave 'rã Davi pytyvõarã. Ha'e rami py mbovy e'ÿ ikuai ixondaro kuery, Nhanderuete pegua xondaro kuery hetaa rami.

Hebrom tetã py xondaro kuery Davi nguvixaverã omoĩ okuapyague

²³ Pova'e avakue ma joe opu'ãa aguã katy guarã hembiporu va'e Davi Hebrom py oia py ou va'ekue, Saul rekovia ha'e ju nguvixaverã omoĩ aguã, SENHOR ijayvuague rami vy.

²⁴ Ha'e gui Judá ramymino kuery regua hu'y jokoia ha'e imo'ãa tuvixa va'e oguereko va'e ha'e javi vy ma seis mil e oitocentos ou, joe opu'ãa aguã katy guarã hembiporu va'e meme.

²⁵ Ha'e gui Simeão ramymino kuery regua avakue joe opu'ãa aguã ipy'a guaxu va'e ma sete mil e cem ou.

²⁶ Levi ramymino kuery regua ma quatro mil e seiscentos ou.

²⁷ Joiada ma Arão ramymino kuery ruvixa oiko va'e vy ngupive três mil e setecentos avi ogueru.

²⁸ Ha'e gui Zadoque ma kunumi teri va'eri ava ipy'a guaxu va'e vy ogueru avi vinte e dois huvixa kuery nguu ro py ikuai va'ekue.

²⁹ Benjamim ramymino kuery regua, Saul regua kuery ma três mil ou. Mba'eta ha'e va'e jave py heta teri ikuai Saul-a katyguã.

³⁰ Efraim ramymino kuery regua ma vinte mil e oitocentos avakue ipy'a guaxukueve ha'e omboetepevy nguu ro py ikuai va'ekue.

³¹ Manassés regua mbyte rupi oja'o va'ekue ma dezoito mil ikuai hery rupi oiporavo pyre Davi nguvixaverã omoĩ aguã ou va'ekue.

³² Issacar ramymino kuery regua ou ha'e va'e ára Israel kuery mba'e pa ojapo aguã re oikuaa pota kuaa va'e. Ha'e rami vy ou duzentos huvixa kuery, guvyvy kuery hembiguai ikuai va'e meme reve.

³³ Ha'e gui Zebulom regua joe opu'ãa katy oo va'e, opa marãgua tembiporu oguereko va'e ma cinqüenta mil ikuai. Ha'e kuery ma joguero'a aguã py ikyre'y va'e, ndokyje kuaai guive.

³⁴ Naftali rekoa gui ma mil xondaro ruvixa ou. Ha'e va'e kuery reve ou avi trinta e sete mil hu'y jokia ha'e hu'y guaxu tuvixa va'e revegua.

³⁵ Dã ramymino kuery regua ma vinte e oito mil e seiscentos ou joe opu'ã aguã katy guarã hembiporu va'e.

³⁶ Aser guigua ma quarenta mil ou joe opu'ã aguã katy guarã hembiporu va'e, joguero'a kuaa rei va'e.

³⁷ Jordão yakã rovai guigua Rúben, Gade ha'e Manassés regua kuery mboae ma cento e vinte mil ou okuapy opa marãgua tembiporu oguereko va'e joe opu'ã aguã.

³⁸ Ha'e va'e avakue joe opu'ã aguã ombo'e pyre ma Hebrom tetã py ou okuapy Davi omoĩ aguã Israel kuery ha'e javi ruvixaverã. Ha'e gui Israel kuery ndoui va'e voi peteĩ rami Davi omoixe avi okuapy nguvixaverã.

³⁹ Ha'e py ma ikuai mboapy ára re Davi oĩa py. Ha'e rami vy okaru ha'e oy'u okuapy ha'e py, ho'u va'erã tyvy kuery ome'ẽmba rire.

⁴⁰ Ha'e rami ae ha'e'i rupi ikuai va'e, Issacar, Zebulom ha'e Naftali guigua kuery ogueru avi okuapy tembi'u. Mburika áry, camelo, kavaju ha'e vaka áry ogueru farinha, figo ha'e uva'a pirukue, vinho, azeite, vaka ha'e vexa'i guive, mymba kyrĩgueve'i voi ogueru oata aguã rami e'y, mba'eta Israel kuery ovy'a ete okuapy.

13

Davi Jerusalém py lei ryrú ogueru aguã re ijayvuaque

¹ Ha'e gui ma Davi jogueroayvu huvixa kuery mil ha'e cem re opena va'e kuery, ha'e yvatekueve ikuai va'e reve.

² Ha'e vy Israel kuery ha'e javi pe aipoe'i onhemboatya py:

— Xapy'a rei pejou porã ri ramo, ha'e SENHOR Nhanderue te guigua ri ramo ma nhamondouka pojava 'rã ayvu mombe'uarã nhanderyvy kuery Israel vyv ha'e javi rupi ikuai va'e pe, sacerdote kuery pe, ha'e Levi regua kuery tetã ha'e ijyvyry rupi ikuai va'e ha'e javi pe, ha'e kuery ono'õmba avi aguã nhande reve.

³ Aỹ gui ma jatu ju 'rã Nhanderue ayvu ryrú nhanderekoa py. Mba'eta Saul oĩ teri jave py ha'e va'e re nanhapenavei ranhe va'ekue — he'i.

⁴ Ha'e ramo ono'õmba va'e ha'e javi ojou porã okuapy ha'e rami ae ojapo aguã, iporã va'ea oikuaa pavẽ vy.

2 Samuel 6.1-11

⁵ Ha'e gui ma Davi omboaty Israel kuery ha'e javi Egitó vyv re Sior oĩ va'e guive Hamate py nhavãea peve, Nhanderue ayvu ryrú ogueru aguã Quiriate-Jearim py oĩa gui.

⁶ Ha'e rami vy Israel kuery ha'e javi reve Davi oje'oi Baalá Quiriate-Jearim hery mboae va'e, Judá re oĩ va'e py, Nhanderue ayvu ryrú ogueru aguã ha'e gui. Ha'e va'e renonde ma SENHOR rery re ima'endu'aa riae, anjo kuery ipepo va'e ikuai va'e áry oguapy oiny va'e re.

⁷ Ha'e rami vy Nhanderue pegua hyru omoĩ okuapy peteĩ karõxa ipyau va'e áry. Abinadabe ro gui ogueru okuapy. Uzã ha'e Aiõ oje'oi karõxa reraarã.

⁸ Israel kuery ha'e javi reve Davi ovy'a ovy Nhanderue renonde rupi ombaraetea ha'e javi reve, oporaeci okuapy py, ixã reta va'e pu reve, mbaraka, pandeiro ha'e hy'a pu py, mimby guaxu omonhe'ẽa py guive.

⁹ Ha'e gui Quidom mba'emo moa'yĩaty re ovaẽa py vaka onhepyxanga rã Uzã opoko hyru re ho'a e'y aguã.

¹⁰ Uzã hyru re opoko ramo hovai SENHOR poxya hendy vy oity. Ha'e pyve omano Nhanderue renonde.

¹¹ SENHOR Uzã ojuka rã Davi ndojou porã. Ha'e vy ha'e va'e tekoa omboery Perez-Uzã, aỹ peve guarã.

¹² Ha'e va'e ára Nhanderue gui Davi okyje vy aipoe'i:

— Mba'exa vy nda'u aru 'rã Nhanderue ayvu ryrú? — he'i.

¹³ Ha'e rami vy Davi ndogueruxevei SENHOR ayvu ryrú guekoa katy. Ha'e rami 'rãgue py Gate guigua Obede-Edom va'e ro py ranhe ogueraa uka.

¹⁴ Mboapy jaxy re Nhanderue ayvu ryrú opyta Obede-Edom kuerya py. Ha'e rã SENHOR omoingo porã Obede-Edom ro pygua kuery ha'e mba'emo oguereko va'e ha'e javi.

14

2 Samuel 5.11,12

¹ Davi oĩa py Tiro pygua huvixa Hirão ombou ayvu mombe'uarã. Ogueru ruka avi vyvra yary, oo apoa ha'e ita re omba'eapo va'e kuery, hoorã ojapo va'erã.

² Ha'e ramo Davi oikuaa SENHOR omoĩ atãvea Israel re opena aguã, ha'e ombopo'akave ojeupegua kuery re oma'ẽ vy.

2 Samuel 5.13-16; 1 Crônicas 3.5-8

³ Jerusalém tetã py Davi ojouve kunhague gua'yxy jevyrã. Ha'e vy ikuave ju ta'y ha'e taxy kuery.

⁴ Po rami ma Jerusalém py itui'i va'ekue rery: Samua, Sobabe, Natã, Salomã,

⁵ Ibar, Elisua, Elpelete,

⁶ Nogã, Nefegue, Jafia,

⁷ Elisama, Beeliada ha'e Elifelete.

2 Samuel 5.17-25

⁸ Filisteu kuery oendu avi okuapy Davi omoĩa Israel kuery ha'e javi ruvixarã. Ha'e vy oje'oipa ojopy aguã Davi. Ha'e nunga Davi oendu vy ha'e voi oo avi ha'e kuery ovaexĩ aguã.

⁹ Ha'e rã filisteu kuery ou Refaim yvyugua py mba'emo oipe'apa agüã.

¹⁰ Davi ma SENHOR pe oporandu vy aipoe'i:

— Taa pa filisteu kuery rovai? Remboaxa 'rã teve xepo py?

SENHOR ombovai:

— Tereo, mba'eta amboaxa 'rã ndepo py — he'i.

¹¹ Ha'e ramo Davi Baal-Perazim py oo vy oitypa ha'e py. Ha'e vy aipoe'i:

— SENHOR xepo rupi omoaimba xerovaigua filisteu kuery ryxya xerenonde py ikuai va'ekue, yy mba'emo ogueroxyry heravya rami — he'i. Ha'e nunga rupi ha'e va'e tekoa oenoia Baal-Perazim.*

¹² Ha'e py ma filisteu kuery oejapa oje'oivy nguete kuery ra'angaa. Ha'e rã Davi oapy ukapa tata py.

¹³ Ha'e gui filisteu kuery ou nho ju yvyugua gui mba'emo oipe'apa agüã.

¹⁴ Peteigue ju Nhanderuete pe Davi oporandu ramo ombovai:

— Tereo eme hakykue rupi. Ha'e rami 'rãgue py hakykue katy rupi ranhe 'rã pejeapa, ha'e gui ma ha'e kuery re pepu'ã 'rã amora ikuai va'e guy rupi.

¹⁵ Ha'e gui xapy'a rei rendu 'rã amora ty rovapy rupi opyrõ-pyrõ nhendu va'e. Ha'e va'e rendu ramove peẽ 'rã ha'e kuery re pepu'ã agüã. Ha'e va'e ma nerenonde Nhanderuete oo nhendua, filisteu kuery ijaty okuapy va'e jukapaarã — he'i.

¹⁶ Nhanderuete ojapo ukaa rami Davi ojapo vy ojukapa filisteu kuery Geba guive Gezer py ovaẽa peve.

¹⁷ Ha'e rami vy ha'e va'e yvy jave rupi Davi rery re ima'endu'aave ovy, mba'eta SENHOR ojapo Davi gui pavẽ regua okyje agüã rami.

15

Levita kuery lei ryru reraarã omoiaque

¹ Ha'e gui Davi pegua tetã 'epy va'e py ojapo ngoorã. Oguereko katu avi Nhanderuete ayvu ryru oĩ agüã, ha'e hi'áry guarã ma peteĩ oo'i ojapo.

² Ha'e gui Davi aipoe'i:

— Avave rei nda'vei Nhanderuete ayvu ryru ogueru agüã levita kuery e'ỹ vy, SENHOR ae omoĩ rire oayvu ryru reraarã, ha'e ixupe anho omba'epao riae agüã raka'eve rã peve guarã — he'i.

³ Ha'e nunga rupi Jerusalém tetã py Davi omboatypa Israel kuery ha'e javi, SENHOR ayvu ryru ogueru agüã oĩ agüã ojapo va'ekue py.

⁴ Davi omboaty avi Arão ramymino kuery, levita kuery guive, po rami hery va'e:

⁵ Coate ramymino kuery va'e regua ma huvixa Uriel ha'e tyvy kuery reve vy cento e vinte ikuai,

⁶ Merari ramymino kuery va'e regua ma huvixa Asafas ha'e tyvy kuery reve vy duzentos e vinte ikuai,

⁷ Gérson ramymino kuery va'e regua ma huvixa Joel ha'e tyvy kuery reve vy cento e trinta ikuai,

⁸ Elisafã ramymino kuery va'e regua ma huvixa Semafas ha'e tyvy kuery reve vy duzentos ikuai,

⁹ Hebrom ramymino kuery va'e regua ma huvixa Eliel ha'e tyvy kuery reve vy oitenta ikuai,

¹⁰ Uziel ramymino kuery va'e regua ma huvixa Aminadabe ha'e tyvy kuery reve vy cento e doze ikuai.

¹¹ Davi oenoĩ avi sacerdote kuery va'e regua Zadoque ha'e Abiatar, ha'e gui levita kuery Uriel, Asafas, Joel, Semafas, Eliel ha'e Aminadabe.

¹² Ha'e vy aipoe'i ha'e kuery pe:

— Peẽ kuery ma levita kuery akã peiko. Pejesty'a'o uka ke ha'vy penderyvy kuery reve, SENHOR Israel kuery ruete ayvu ryru peru agüã hendarã areko katu va'ekue py.

¹³ Mba'eta jypy peẽ kuery ndaperui ramo SENHOR Nhanderuete ipoxy va'ekue nhande kuery rovai, ojapo ukaague rami e'ỹ jaru rire — he'i.

¹⁴ Ha'e rami rã sacerdote kuery ojesty'a'o uka okuapy, levita kuery guive, SENHOR Israel kuery ruete ayvu ryru ogueru agüã.

¹⁵ Ha'e rami vy levita kuery ogueru okuapy Nhanderuete ayvu ryru oaxi'y áry, hi'yrã omoĩ va'ekue reve, SENHOR ijavyvague rami vy Moisés ojapo ukaague rami vy.

Imba'epua rupi ikuai va'erã omoiaque

¹⁶ Ha'e gui Davi aipoe'i levita ruvixa kuery pe guyyvy kuery regua omoĩ agüã oporaei va'erã. Ha'e va'e kuery ma mba'epu reve, mbaraka, mba'epu ixã reta va'e ha'e hy'a pu reve ovy'aa rupi oporaei agüã pavẽ oendu agüã rami.

¹⁷ Ha'e ramo levita kuery oiporavo Joel ra'y Hemã tyvy kuery regua Berequias ra'y Asafe reve, Merari ramymino kuery va'e regua Cusafas ra'y Etã guive.

¹⁸ Ha'e kuery reve ma tyvy kuery yvyĩgueve avi. Ha'e va'e kuery ma Zacarias, Bene, Jaaziel, Semiramote, Jeiel, Uni, Eliabe, Benaia, Maaséias, Matitias, Elifeleu ha'e Micnéias, ha'e gui Obede-Edom ha'e Jeiel ma okẽ raroarã ikuai.

¹⁹ Ha'e rami py oporaei va'e Hemã, Asafe ha'e Etã ma onhendu 'rã okuapy hy'a pu overa va'e guigua py.

²⁰ Ha'e rã Zacarias, Aziel, Semiramote, Jeiel, Uni, Eliabe, Maaséias ha'e Benaia ma mbaraka reve 'rã oporaei yvatea py.

²¹ Matatias, Elifeleu, Micnéias, Obede-Edom, Jeiel ha'e Azazias ma oporaeia py ombojogy 'rã ixã reta va'e, irundy meme xã oia peve.

* 14:11 Tery Baal-Perazim ma "Senhor omoaimba" 'ea.

²² Ha'e gui Quenianias levita kuery oporaeia re opena va'e ma jogueroporaieiarã omoĩ mbyre, ha'e rami aguã oikuaave va'e ramo.

²³ Berequias ha'e Elcana ma lei ryrú oĩa rokê rarõarã omoĩ.

²⁴ Ha'e rã Sebanias, Josafá, Natanael, Amasai, Zacarias, Benaia ha'e Eliézer sacerdote ikuai va'e ma omonhe'ẽ 'rã okuapy mimby guaxu, Nhanderüete ayvu ryrú renonde py. Ha'e gui Obede-Edom ha'e Jeías ma hyru oĩa rokê rarõa avi ikuai.

Jerusalém tetã py lei ryrú oguerú okuapyague

²⁵ Ha'e gui ma Davi ha'e Israel regua nhomongetaa kuery reve oje'oi, xondaro kuery ruvixa ikuai va'e reve. Ovy'aa rupi jogueraa Obede-Edom ro gui oguerú aguã SENHOR guexeve guarã ojapo va'ekue ryrú.

²⁶ Ha'e gui levita kuery hyru oguerua rupi Nhanderüete oipytyvõ ramo ixupe ome'ẽ okuapy sete vaka ra'y ha'e sete vexa'i ojuka vy.

²⁷ Ha'e rã Davi ma onhemonde ovy peteĩ ao puku xiĩ porã rei ha'e ipererĩ'i va'e py. Ha'e rami ae avi levita kuery hyru reraa voi onhemonde okuapy, ha'e oporaie va'e kuery, hyru reraa kuery ha'e oporaie va'e kuery re opena va'e Quenianias guive. Davi onhemonde avi manto sacerdote pegua, ajukue ipererĩ'i va'e guigua.

²⁸ Ha'e rami py Israel kuery ha'e javi ovy'a reve oguerú okuapy SENHOR guexeve guarã ojapo va'ekue ryrú, mimby ha'e mimby guaxu omonhe'ẽ reve, ha'e hy'a pu, mbaraka ha'e ixã reta va'e omonhendu ratãa rupi.

2 Samuel 6.16,20-22

²⁹ SENHOR guexeve guarã ojapo va'ekue ryrú Davi rekoa py oguerúkea jave ma Saul rajkyue Mical janelã gui omã'ẽ ho'amy. Ha'e rami vy huvixa Davi ovy'aa rupi ojeroky oikovy rã oexa vy ndojou porãi opy'a py.

16

Mba'emo ome'ẽ okuapyague

¹ Ha'e rire ma Nhanderüete pegua hyru oguerúke vy omoĩ oo'i Davi ojapo va'ekue mbyte py. Nhanderüete renonde py oguerú avi okuapy mba'emo oapy reve ome'ẽ va'erã, hexeve peteĩ rami ju ikuaia regua guive.

² Ha'e gui opa ma oapy va'erã ha'e hexeve peteĩ rami aguã regua Davi ome'ẽmba ma vy SENHOR rery rupi oguerúayvu porã heta va'e kuery ha'e javi.

³ Ha'e gui ma Israel kuery avakue ha'e kunhague ikuai va'e peteĩ-teĩ pe omboja'o peteĩ mbojape, xo'o ra'ykue ja'ea-'ea ha'e uva'a pirukue.

⁴ Omoĩ avi levita kuery va'e regua SENHOR ayvu ryrú renonde rupi ikuai va'erã, SENHOR Israel kuery ruete oguerúvy'a, oguerúoporaie ha'e omboete aguã. Ha'e va'e kuery ma pova'e:

⁵ huvixa Asafe, ha'e gui mokoĩa ma Zacarias, ha'e va'e rire ma Jeiel, Semiramote, Jeiel mboae, Matitias, Eliabe, Benaia, Obede-Edom ha'e Jeiel mboapya mbaraka ha'e ixã reta va'e reve guarã. Ha'e gui Asafe ma omonhendu ratãve 'rã hy'a pu.

⁶ Ha'e gui sacerdote kuery Benaia ha'e Jaaziel ma mimby guaxu omonhe'ẽã rupi riaie 'rã ikuai Nhanderüete guexeve guarã ojapo va'ekue ryrú oĩa renonde rupi.

Salmos 105, 96, 106

⁷ Ha'e va'e ára ma Davi omoĩ ypy'i Asafe ha'e tyvy kuery SENHOR pe oporaieia rupi oguerúvy'a aguã. Aipoe'i:

⁸ — Perovy'a SENHOR, hery rupi pejapukai.

Yvy regua kuery pe peikuaa uka ojapo va'ekue.

⁹ Peporaie ke ixupe, peporaie salmos.

Pemombe'upa ke nhomondyipaarã ojapo va'ekue.

¹⁰ Perovy'a hery iky'a e'y va'e.

SENHOR oeka va'e kuery tovy'a opy'a py.

¹¹ Peka SENHOR, ipo'akaa guive.

Peka ke henonde peĩ riaie aguã.

¹² Penema'endu'a ke mba'emo porã ojapo va'ekue re, nhomondyipaã ha'e oipota va'e re ijayvuague re,

¹³ peẽ hembiguaĩ Israel ramymino kuery, peẽ Jacó ra'y kuery hembiporavo pendekuai va'e.

¹⁴ Ha'e ma SENHOR Nhanderüete.

Oipotaa ma yvy jave re ojekuaa.

¹⁵ Ima'endu'a riaie 'rã guexeve guarã ojapo va'ekue re, mbovy rei e'y ikuai va'erã peve guarã ayvu ome'ẽ va'ekue re,

¹⁶ Abraão reve ngupive guarã ojapo va'ekue re, Isaque pe ouraa rupi ijayvuague re guive.

¹⁷ Ha'e nungakue re ma Jacó reve ju ijayvu,

raka'e rã peve guarã re ijayvu Israel reve.

¹⁸ Ha'e vy aipoe'i:

"Ndevy ame'ẽ 'rã Canaã yvy penemba'erã", he'i.

¹⁹ Ha'e jave py ha'e kuery mbovy'i teri ikuai,

yvy mboae guigua mbovy'i ete ikuai raka'e,

- ²⁰ oguata va'ekue yvy mboae-ae ikuai va'e rupi,
joyvy-yvy re.
- ²¹ Ha'e rami teĩ avave rei pe ha'e ndoguereko axy ukai.
Ha'e kuery re oma'ẽ vy ijayvu ete huvixave ikuai va'e pe.
- ²² Ha'e vy aipoe'i: "Emoĩ eme ndepo xerembiporavo kuery re,
pereko axy eme xeivygua profeta kuery", he'i.
- ²³ Peroporaie ke SENHOR pe yvy jave regua kuery!
Ko'ẽ nhavõ peikuaa uka nhandereraa jepea.
- ²⁴ Yvy regua kuery pe peikuaa uka hexakãa,
ha'e javi regua pe pemombe'u mba'emo porã ojapoa.
- ²⁵ Mba'eta SENHOR ma yvate ete va'e.
Ha'evea rami ixupe japoraeia,
tuuete ikuai va'e gui okyjevpevy oiko.
- ²⁶ Mba'eta yvy regua kuery ruete ha'e javi ma mba'emo ra'angaa rive.
Ha'e rã SENHOR ma yva apoare.
- ²⁷ Henonde ma guexakãa ha'e ijyvatea oexa uka.
Ipo'akaa ha'e iporãa ojekuaa ixupegua henda iky'a e'ỹ va'e py.
- ²⁸ Yvy regua ha'e javi, peroporaie ke SENHOR!
Peroporaie SENHOR rexakãa ha'e ipo'akaa.
- ²⁹ Peroporaie SENHOR rery iporã ete ramo.
Peme'ẽ va'erã peru vy peroike ixupegua roka py.
Pembojerovia SENHOR iky'a e'ỹa rexakãa py.
- ³⁰ Yvy jave regua kuery, peryryipa henonde.
Mba'eta yvy omoĩ atã raka'e omyĩ e'ỹ aguã rami.
- ³¹ Ha'e nunga rupi tovy'a yva ha'e yvy.
Yvy regua kuery ikuai rupi " SENHOR ma huvixave oĩ", peje.
- ³² Taovovo ye'ẽ ha'e hexe ikuai va'e ha'e javi!
Tovy'a nhuũndy ha'e hexe ikuai va'e ha'e javi!
- ³³ Tovy'apa yvyra ka'aguy re ikuai va'e Senhor renonde,
mba'eta ou 'rã yvy regua kuery re oikuaa pota aguã.
- ³⁴ Perovy'a ke SENHOR, porayvu va'e ramo,
mba'eta nhomboaxya opa va'erã e'ỹ.
- ³⁵ Ha'e gui aipopeje: "Oreruede orereraa jepea, orereraa jepe ke!
Oremboatypa ju, orereraa jepe ke yvy regua kuery gui,
nderery iky'a e'ỹ va'e rupi roguerovy'a aguã,
ha'e rovy'aa rupi rogueroporaie aguã."
- ³⁶ Ima'endu'a porãmbý toiko SENHOR Israel kuery Ruete
aỹ, ha'e raka'e rã peve! — he'i.
Ha'e ramo heta va'e kuery "Amém!" he'i vy ogueroporaie okuapy SENHOR.

SENHOR pe mba'emo ojapo va'erã Davi omoĩve juague

- ³⁷ Ha'e ramo SENHOR guexeve guarã ojapo va'ekue ryrú oĩa renonde py ae Davi omoĩ Asafe tyvy kuery
reve, ha'e kuery opena riaa aguã henonde py, ko'ẽ nhavõ opena ukaague rami vy.
- ³⁸ Omoĩ avi Obede-Edom tyvy kuery ha'e javi reve, sessenta e oito ha'e javi vy. Jedutum ra'y Obede-Edom
ha'e Hosa ma omoĩ okẽ re opena va'erã.
- ³⁹ Ha'e rã sacerdote Zadoque ha'e tyvy sacerdote ikuai va'e ma omoĩ oo'i SENHOR pegua Gibeão yvy'ã re oĩ
va'e renonde rupi ikuai va'erã,
- ⁴⁰ altar oĩ va'e áry SENHOR pe mba'emo oapy reve ome'ẽ riaa aguã, aje'ivekue ha'e ka'arukue. Ha'e rami
ikuai Israel kuery pe SENHOR lei oexa va'ekue re ipara oĩa ha'e javi rami.
- ⁴¹ Ha'e kuery reve omoĩ avi Hemã ha'e Jedutum, ikuai ve ju hery rupi oiporavo pyre SENHOR pe oporaie
va'erã, mba'eta nhanemboaxya rupi oiko riaa 'rã raka'e rã peve.
- ⁴² Ha'e kuery reve ikuai avi Hemã ha'e Jedutum mimby guaxu omonhe'ẽ aguã, ha'e hy'a pu ha'e mba'epu
Nhanderuede pe ombopu aguã. Ha'e rã Jedutum ra'y kuery ma okẽ rarõa ikuai.
- ⁴³ Ha'e va'e rire mae ma onhemboaty va'ekue peteĩ-teĩ ngoo katy oje'oi. Davi voi oo ju ngoo pygua kuery
ogueroyvu porã aguã.

17

2 Samuel 7.1-17

- ¹ Ha'e gui huvixa Davi ngoo py ae oiko vy aipoe'i profeta Natã pe:
— Ma'ẽ, xee ma xero ainy yary guigua py, ha'e rã Nhanderuede guexeve guarã ojapo va'ekue ryrú ma oo'i
py rive oĩ.
- ² Natã ombovai huvixa pe:
— Tereo, ejapo ndepy'a re rendu va'e ha'e javi, mba'eta ndereve Nhanderuede oiko — he'i.
- ³ Ha'e va'e pyavyve SENHOR oayvu ombou Natã pe. Ha'e vy aipoe'i:

4 — Tereo ha'e aipo're xerembiguai Davi pe: "Po rami SENHOR ijayvu: 'Ndee ma oo xee aī aguā apoarā e'ŷ reiko.

5 Mba'eta neī peteīve oo py ma voi xee naī teri Israel kuery Egito gui arupa guive aŷ peve. Ha'e rami 'rāgue py oo'i py rive aiko va'e, xembojerovia aty py ae mamō rā oīa rupi rei.

6 Opa rupi Israel kuery aru herekovya rupi nda'u xeaŷvu ri raka'e amongue herekoa pe, e'ŷ vy xevyguia kuery re apena uka va'ekue pe nda'u aipoa'e: "Mba'e re tu nderejapoi peteī xerorā yary guigua?" ha'e teve?"

7 Ha'e gui aŷ ma po rami 'rā ndeaŷvu xerembiguai Davi pe: 'SENHOR ixondaro reta va'e aipo'e'i: Xee roiporavo karamboae vexa'i kuery re repenaa gui, ha'e hakykue reikoa gui, huvixarā xevyguia Israel kuery re ju repena aguā.

8 Xee aa avi karamboae ndereve, reoa rupi tema. Nderovaigua kuery amomba nerenonde gui, amboyvate guive nderery, ipo'akakueve anho ikuai rami.

9 Areko katu avi xevyguia Israel kuery ikuai aguā, amboekoapa guive ha'e py, mava'eve omoangekoave e'ŷ aguā, ha'e heko vai va'e ombojexavaive e'ŷ aguā jypy guare rami e'ŷ,

10 xevyguia Israel kuery rerekoarā amoīa ára guive. Ha'e rami avi nderovaigua kuery aitypa, ha'e aikuaa uka pova'e: Xee SENHOR ae 'rā ajapo oo ndevy.*

11 Mba'eta nderekovea opa rā nderu kuery ooague py ndereraa avi ma jave nderekovia amoingo 'rā ndeguigua, ndera'y kuery ramymino va'e regua. Ha'e va'e ma ajapo 'rā ipo'akaa oī atā aguā rami.

12 Ha'e va'e ae ma ojapo 'rā peteī oo xevy guarā, ha'e rā xee ajapo 'rā raka'e rā peve huvixave oī aguā rami.

13 Xee ma tuu 'rā, ha'e rā ha'e ma xera'y 'rā oiko. Ha'e rami vy ixugui ndaipe'ai 'rā amboaxya, ndee rei e'ŷ mbove guare gui aipe'a vy namboaxyveiague rami e'ŷ.*

14 Ha'e rami 'rāgue py ha'e va'e amoī atāve 'rā xero re opena aguā, ha'e huvixave oī riae aguā rami. Ha'e ramo huvixave oī riae 'rā raka'e rā peve', he'i."

15 Ha'e va'e ayvu ha'e javi, Natā pe oikuaa ukaague rami ae Davi pe ju omombe'u.

2 Samuel 7.18-29

16 Ha'e gui ma SENHOR pegua opy Davi oike vy hi'aī henonde. Ha'e vy aipo'e'i:

— SENHOR Xeruete, mba'e nunga tu xee aiko, ha'e mba'e nunga tu xero pygua kuery ikuai, apy peve ndee xereru aguā?

17 Xeruete, ha'e nunga tu ndevy pe mba'e'ŷ rima, ndeaŷvu ma voi guive xee nerembiguai ro pygua raka'e rā guarā re. SENHOR Xeruete, ha'e rami xereroayvu porā avakue omboetepepy rami.

18 Xee nerembiguai Davi nami xemboete uka rire mba'e ta'eve ju ndevy? Mba'eta ndee ma xee nerembiguai xekuaa porā.

19 SENHOR, nerembiguai remboaxya ha'e ndepy'a re rendua rami vy rejapo kova'e nunga tuvixa va'e ha'e javi, oikuaa pavē aguā.

20 Ha'e nunga rupi SENHOR Xeruete, ndoikoi ndee ramigua ete'i, ndoikoi guive Oreruete mboae ndee e'ŷ vy, oreapya py ae roenduague rami.

21 Mava'e regua tu ndevyguia Israel kuery ikuai ramigua? Xeruete, ha'e kuery anho'i ae vyv re ikuai va'e mbyte gui ndejeupe guarā reipe'a va'ekue. Mba'emo porā ete rejapoa py ndejeupe ae rejapo aguā nderery re ima'endu'aa aguā rami. Mba'eta vyv regua kuery remoxēmba raka'e, ndevyguia kuery Egito gui renoēmba va'ekue renonde gui.

22 Israel kuery ndejeupe guarā ae remoingo raka'e rā peve, ha'e gui SENHOR, ndee ju renhemoingo Tuuete.

23 Ha'e gui aŷ ma SENHOR, ha'e va'e ayvu xee nerembiguai rekorā re aipo'reague, ha'e xero pygua re voi, toī atāve. Ejapo ndeaŷvuague rami ae.

24 nderery toikuaa pavē, toamboetea riae, ha'e vy aipo ta'ea: " SENHOR ixondaro reta va'e ma Israel kuery Ruete, Israel kuery pegua ae", ta'ea. Ha'e ramo xee Davi nerembiguai ro ma oī atā riae 'rā nerenonde.

25 Mba'eta Xeruete, xee nerembiguai pe reikuaa uka xevy pegua oorā rejapo 'rāa. Ha'e nunga rupi ae xee nerembiguai xepy'a guaxu nami anhembo'e aguā ndevy.

26 Aŷ ma SENHOR, ndee ae ma Oreruete, ha'e xee nerembiguai pe rejapo porā aguā re ndeaŷvu.

27 Ha'e nunga rupi aŷ, emoingo porā nerembiguai ro pygua kuery, nerenonde rupi orekuai riae aguā rami. Mba'eta SENHOR, ndee orereroayvu porā rire raka'e rā peve 'rā roiko porā — he'i.

18

2 Samuel 8.1-14

1 Ha'e rire ma Davi filisteu kuery oitypa vy ipo'aka ha'e kuery re. Ha'e kuery po gui oipe'a avi Gate tetā ha'e ijyvyry rupi tekoa ikuai va'e.

2 Oitypa avi Moabe pygua kuery. Ha'e rire Davi rembiguirā ikuai, ixupe mba'emo ome'ē 'rā okuapy guive.

3 Ha'e gui Zobā pygua huvixa Hadadezer ma yakā Eufrates re ipo'aka ju aguā oo jave hexe voi Davi ipo'aka Hamate peve.

4 Ixupegua kavaju aŷyguia kuery regua ma Davi ogueraa mil e setecentos, vinte mil avakue vyv rupigua reve. Davi ojayapa avi kavaju karóxa regua pytaxā, cem ete'i ojaya e'ŷ re oeja.

* 17:10 Oo ojapo aguā re SENHOR ijayvu py ma raka'e've rā Davi ramymino kuery regua huvixarā omoingo aguā re ijayvu (versículos 12,16). Ha'e va'e regua Jesus Cristo ae oiko (Lucas 1.32-33,69; Atos 13.23). Ha'e rami avi "Israel ro" he'ia ma Israel ramymino kuery re ijayvu vy.

* 17:13 Hebreus 1.5, Apocalipse 21.7

⁵ Ha'e ramo Síria pygua avakue ou Damasco gui, huvixa Zobá pygua Hadadezer pytyvōarā. Ha'e rami teĩ Síria guigua ma Davi ojuka vinte e dois mil.

⁶ Ha'e gui Síria Damasco regua py Davi omoĩ harōarā kuery. Síria pygua kuery voi Davi rembiguirā ikuai vy mba'emo ome'ẽ 'rā okuapy ixupe. Davi ooa nhavō rupi SENHOR ombopo'akave tema.

⁷ Hadadezer rembiguai kuery yvatekueve hu'y joko o ouro guigua oguereko va'ekue Davi ojopy vy oguerupa Jerusalém py.

⁸ Hadadezer pegua tetã Tibate ha'e Cum gui voi huvixa Davi oi'pe'ave tema overa va'e guigua. Ha'e va'e overa va'e gui ma Salomão ojapo 'rā yy mbotyta, oo ytarā ha'e tembiporu.

⁹ Ha'e gui Hamate pygua huvixa Tou oendu Zobá pygua huvixa Hadadezer pegua xondaro kuery Davi oitypaague.

¹⁰ Ha'e vy Davi-a py huvixa ombou gua'y Hadorão oxarura vy oguero'va'aguã Hadadezer reve joguero'aa py oitypaague re (mba'eta Tou reve Hadadezer joguero'a avi tema rire). Hadorão oo vy ogueru mba'emo ouro, prata ha'e overa va'e guigua ome'ẽ va'erã.

¹¹ Ha'e nunga huvixa Davi ojopy vy omboaxapa SENHOR peguarã, ha'e javi regua gui prata ha'e ouro ojopy va'ekue reve: Edom guigua, Moabe, Amom ramymino kuery, filisteu kuery ha'e Amaleque guigua guive.

¹² Ha'e gui Zeruia pi'a Abisai ojuka avi dezoito mil Edom pygua juky yvyugua 'epy va'e py.

¹³ Edom re voi omoĩ harōarā kuery. Ha'e ramo Edom pygua kuery ha'e javi ikuai Davi rembiguirā. Davi ooa nhavō rupi SENHOR ombopo'akave tema.

2 Samuel 8.15-18; 20.23-26

¹⁴ Ha'e rami vy Davi opena Israel kuery ha'e javi re. Mba'emo re oikuaa potaa py ha'veva rami meme oguereko.

¹⁵ Ixupegua xondaro kuery ruvixa ma Zeruia pi'a Joabe. Mba'emo oiko va'ekue mboparaa ma Ailude ra'y Josafá.

¹⁶ Sacerdote ma Aitube ra'y Zadoque, ha'e gui Abiatar ra'y Abimeleque ju. Kuaxia re opena va'ety ma Sausa.

¹⁷ Huvixa ro rarōa kuery ruvixa ma Joiada ra'y Benaia. Ha'e rã huvixa Davi revegua yvatekueve ma ta'y kuery ae.

19

2 Samuel 10.1-19

¹ Ha'e rire ma Amom kuery ruvixa Naás omano, ha'e rã ta'y ju oĩ ngu u rekovia.

² Ha'e ramo Davi aipoe'i:

— Naás ra'ykue Hanum pe aexa uka 'rã ayvua, tuu xerayvu rire — he'i. Ha'e rami vy Davi omondouka guembigui kuery ombopy'a porã ju aguã tuu omanoague gui. Ha'e gui Davi rembiguai kuery ovaẽ Amom kuery yvy re, Hanum ombopy'a porã aguã.

³ Ha'e rami teĩ Amom regua yvatekueve aipoe'i okuapy Hanum pe:

— Rexa'ã teve Davi nderu rãgue'i omboetea rupi guembigui ombou nembopy'a porãarã? Xapy'a rei ma ndea py merami guembigui kuery ombou vy neretã re oikuaa pota ha'e nhandevy re oexa pota rire ombovaipa aguã e'y teve? — he'i okuapy.

⁴ Ha'e rami rã Hanum omboty Davi rembigui kuery, ha'e vy onhopi hendyva, ijao ojaya guive hevi ro'o ojekuaa peve. Ha'e rire ma omondouka ju.

⁵ Ha'e ramo amongue oje'oi vy Davi pe omombe'upa hembigui kuery re oiko va'ekue. Ha'e kuery omoxĩmbaa rire huvixa ombou ayvu mombe'uarã ha'e kuery ovaexĩ aguã. Aipoe'i uka:

— Pepyta ranhe Jericó tetã py, penderyva ipukupá ju peve. Ha'e rire ma peju ju — he'i uka.

⁶ Amom kuery oikuaa okuapy Davi nda'ija'evei aguã rami ojapoa. Ha'e rami vy Hanum ha'e Amom kuery omondouka trinta e três mil quilos prata guigua, Mesopotâmia gui ojeupe guarã ogueru ruka aguã karóxa ha'e kavaju árygua kuery, Síria pygua kuery Maaca ha'e Zobá gui guive.

⁷ Ha'e rami vy ojeupe guarã ogueru ruka trinta e dois mil karóxa ha'e Maaca pygua huvixa ixupegua kuery reve. Ha'e kuery ha'e javi ou vy Medeba tetã rexe'i ikuai. Amom kuery voi guetã ikuai va'e ha'e javi gui ou vy ono'õmba avi. Ha'e rami vy mae ma oje'oi joe opu'ã aguã katy.

⁸ Ha'e nunga Davi oendu vy ha'e kuery rovai ombou Joabe oxondaro kuery ipy'a guaxukueve ha'e javi reve.

⁹ Amom kuery oje'oi vy oarõ okuapy tetã kora rokẽ py joe opu'ã aguã. Ha'e rã huvixa kuery ipytyvōarã ou va'ekue ma amboae rupi ranhe ikuai nhuũndy rupi.

¹⁰ Ha'e gui Joabe oexa hovaigua kuery henonde ha'e hakykue katy gui voi oarõ okuapy rã, ha'e rami vy Israel kuery ikuai va'e gui opu'ã kuaave va'e oiporavo vy omboxy imbokuapy Síria pygua kuery rovai.

¹¹ Ha'e rã hembyrekue ma guyyv Abisai po py omboaxa, ha'e rã ha'e ma Amom kuery rovai ju omboxy imbokuapy.

¹² Ixupe Joabe aipoe'i:

— Xapy'a rei Síria pygua kuery xegui imbarateve ramo ndee reo 'rã xepytyvõ aguã. Ha'e rã Amom kuery ri ndegui imbarateve ramo xee aju 'rã roipytyvõ vy.

¹³ Nhanembarate ke ha'vy. Jajoguero'a nhandepy'a guaxua rupi nhaneretã kuery ha'e Nhanderete pegua tetã ikuai va'e jaepya rupi. Ha'e SENHOR tojapo ojou porã rami — he'i.

¹⁴ Ha'e gui Joabe guexevagua kuery reve oje'oi vy joguero'a okuapy Síria pygua kuery reve. Ha'e rã ha'e va'e kuery onhamba henonde gui.

¹⁵ Síria pygua kuery onhamba maa Amom kuery oexa vy ha'e kuery voi onhamba avi Joabe ryvy Abisai renonde gui. Ha'e rami vy onhemimba ju guetã py. Ha'e ramo Joabe ojevyy ju Amom kuery reve joe opu'ãague gui, ha'e vy oopa ju Jerusalém katy.

¹⁶ Ha'e gui Síria pygua kuery ma Israel kuery renonde oitypaa oexa okuapy vy omondouka ayvu reraarã guetã pygua kuery yakã rovai re hekoa va'e oupa avi aguã. Ha'e kuery renonde ou oiny Sofaque, Hadadezer pegua xondaro kuery rerekoarã.

¹⁷ Ha'e nunga Davi pe omombe'ua rã omboatyã Israel kuery ha'e javi, ha'e vy Jordão yakã oaxa ma vy ha'e kuery ikuaiã katy oje'oi joguero'a aguã. Síria pygua kuery rovai joguero'a aguã Davi kuery oje'oi ramo ha'e kuery voi opu'ã jogueruvy hovai.

¹⁸ Ha'e rami teĩ Israel kuery renonde gui Síria pygua kuery onhamba ju. Ha'e ramo Síria pygua kuery va'e regua avakue ma Davi ojuka sete mil karóxa pygua ha'e quarenta mil vyv rupigua. Ojuka avi xondaro kuery ruvixa Sobaque.

¹⁹ Hadadezer rembiguai kuery oitypa ae maa oexa okuapy vy Davi reve ojapo ikuai porã aguã, ha'e vy hembiguai ju ikuai. Ha'e rami rire Síria pygua kuery nei raka'e ramo voi noipytyvõxevei Amom kuery.

20

2 Samuel 12.26-31

¹ Ha'e gui peteĩ ma'etã opaã py, huvixa kuery joe opu'ã aguã katy oo 'rã jave py ma Joabe ogueraa xondaro kuery. Ha'e rami vy Amom kuery vyv ombovaipa vy Rabá tetã peve ou ha'e ojokopa okuapy. Ha'e rã Davi ma Jerusalém tetã py opyta. Ha'e gui Joabe kuery ma Rabá re opu'ã vy omomba ete okuapy.

² Ha'e pygua kuery ruvixa akã gui Davi omboi coroa. Ha'e gui opejaa rã oikuaa trinta e três quilos ouro guigua ipoyia. Hexe oĩ avi ita rexakã iporãve va'e. Ha'e rami vy Davi akã re ju omoĩa. Tetã gui imba'e rei-rei va'ekue ogueraa reta avi.

³ Ha'e pygua kuery ogueraa avi vy omomba'eapo vyvra ayaa py, picareta ha'e haxa ferro guigua py. Ha'e rami ae Davi ojapo Amom kuery retã ha'e javi re. Ha'e gui ojeupegua kuery ha'e javi reve Davi ojevyy ju Jerusalém katy.

2 Samuel 21.15-22

⁴ Ha'e va'e rire ma Gezer py joguero'a okuapy filisteu kuery reve. Ha'e vy Husa pygua Sibecai ojuka gigante ramymino Sipai. Ha'e rami vy ipo'aka okuapy filisteu kuery re.

⁵ Ha'e gui filisteu kuery reve ju joguero'a okuapy. Ha'e vy Jair ra'y Elanã ojuka Gate pygua Golias ryvy Lami. Ha'e va'e guembiporu hu'y guaxu oguereko va'ekue ma ajukue popẽa 'y rami tuvixa va'e.

⁶ Ha'e gui teigue ju opu'ã okuapy joe, Gate py ae. Ha'e py oiko peteĩ ava yvate ete va'e. Ha'e va'e ma mboapy meme ikuã ha'e ipyxã voi, ha'e javi vy vinte e quatro ikuã ha'e ipyxã oguereko. Ha'e va'e voi gigante ramymino regua.

⁷ Ha'e va'e ma Israel kuery mbojaru reia rupi ijavyv ramõ Davi ryke'y Simei ra'y Jônatas ojuka.

⁸ Ha'e va'e avakue ma gigante ramymino ikuai Gate py. Ha'e rami teĩ Davi ha'e ixondaro kuery oitypa raka'e.

21

2 Samuel 24.1-9

¹ Ha'e gui Israel kuery rovai Satanás opu'ã vy Davi py'a re omõĩ Israel kuery oipapapa aguã.*

² Ha'e rami vy Davi aipoe'i Joabe ha'e heta va'e kuery ruvixa ikuai va'e pe:

— Tapeo, peipapapa Israel kuery ikuai va'e, Berseba guive Dã peve. Ha'e vy peikuaa va'ekue peru ju xea py, xee voi aikuaa aguã mbovy pa ikuaiã — he'i.

³ Joabe ombovai:

— Ha'e rami avi tove SENHOR Nderuete toamboetave cem-kue ju. Ha'e rami teĩ Xeruvixa, ha'e kuery ha'e javi e'ỹ teve nerembiguai ikuai? Mba'e re tu ha'e rami ete rejapoxe? Xeruvixa, mba'e re tu ha'e rami ete rejapo Israel kuery ha'e javi re jejavya ou aguã rami? — he'i.

⁴ Ha'e rami teĩ huvixa ayvu Joabe ijavyv rami ipoyive ramo Joabe oo vy Israel vyv ha'e javi rupi oikuaa pota. Ha'e gui mae ma ojevyy ju Jerusalém katy,

⁵ ha'e Davi pe omombe'u heta va'e kuery mbovy pa ikuaiã. Israel re avakue kyxe oiporu kuaa va'e ma um milhão e cem mil ikuai ra'e. Ha'e rã Judá py ma quatrocentos e setenta mil ikuai avakue kyxe oiporu kuaa va'e.

⁶ Ha'e rã ha'e kuery reve Levi ha'e Benjamim regua ma Joabe ndoipapai, huvixa ayvu ndojou porã ete vy.

2 Samuel 24.10-17

⁷ Ha'e nunga ha'e javi Nhanderuete ndojou porã vy omoingo axy Israel kuery.

⁸ Ha'e ramo Davi aipoe'i Nhanderuete pe:

— Ajevavy vaipa ra'e ha'e rami ajapoa py. Ha'e rami teĩ aỹ SENHOR, ajerure xee nerembiguai ajevavyague rembogue aguã, inhakã porã ve'ỹ va'e rami aiko rire — he'i.

⁹ Ha'e gui SENHOR ijavyv Davi pegua profeta Gade pe. Ha'e vy aipoe'i:

¹⁰ — Tereo aipo're Davi pe: “Po rami SENHOR ijavyv: ‘Mboapy regua va'e peteĩ ma ambou 'rã ndere. Ha'e va'e regua peteĩ eiporavo ajapo aguã’, he'i.”

¹¹ Ha'e ramo Davi oĩa py Gade ou vy aipoe'i ixupe:

— SENHOR ma po rami ijavyv: “Eiporavo reipotã va'e rei:

* 21:1 Davi oipapa uka avakue joe opu'ã kuaa va'e. Ha'e nunga py ojevavy, oxondaro kuery re ojerovia vy, Nhanderuete re 'rãgue py.

¹² Mboapy ma'et'ý re karuai oiko aguã, tyrã pa mboapy ma'et'ý re nderovaigua kuery nhandereity aguã kyxe nderupitya py, tyrã pa mboapy ára re SENHOR okyxe ae oiporu aguã. Ha'e va'e ma mba'eaxy vaikue oiko aguã ndeyvy re, Israel ha'e javi rupi SENHOR-a guigua anjo nhomokanhymba aguã." Eikuaa pota porã ke aÿ, xembouare pe ambovai kuaa aguã — he'i.

¹³ Ha'e ramo Davi ombovai Gade pe:

— Xee ma ajexavai vaipaa aendu. Ha'eveve SENHOR po py anhemboaxa uka rã, mba'eta ha'e ma opa e'ý va'e nhanemboaxy va'e. Ha'e rã avakue po py ma xee nanhemboaxa ukaxei — he'i.

¹⁴ Ha'e rami rã SENHOR ombou mba'eaxy vaikue Israel ha'e javi rupi. Ha'e ramo Israel kuery va'e regua setenta mil avakue omano.

¹⁵ Jerusalém tetã py voi Nhanderuete ombou petei anjo nhomombaarã. Ha'e rami tei omomba ta ma ramo SENHOR oma'ê vy opytu'u ma mba'emo vai omoingoa gui. Ha'e vy aipoe'i anjo nhomombaarã ombou va'ekue pe:

— Ha'eve ma, emboguejy ju ndepo — he'i. Ha'e va'e jave ma anjo hi'aĩ jebuseu regua Ornã mba'emo moa'yĩaty vvy'iry.

¹⁶ Ha'e gui Davi oma'ê vy oexa anjo SENHOR-a guigua vvy ha'e yva mbyte opyta rã, opo py kyxe oekyi va'ekue oupi ho'amy Jerusalém rovai. Ha'e ramo Davi ha'e nhomongeta va'ety kuery hexeve ikuai va'e ajukue vaikue py onhemonde reve ojero'apa vvy vvy re ngova omovaê okuapy.

¹⁷ Ha'e ramo Davi aipoe'i Nhanderuete pe:

— Xee ae e'ý ri ty'ly heta va'e kuery aipapa aguã re xeyvva va'ekue? Xee rima ajejavy, xee ae ha'eve'ý va'e ajapo. Ha'e rã kova'e vexa'i kuery, mba'e tu ha'e kuery ojapo? SENHOR Xeruete, xerovai anho eupi ndepo, ha'e xeru ro pygua kuery rovai. Ha'e rã ndevyguia kuery ma embopaga eme.

2 Samuel 24.18-25

¹⁸ Ha'e gui ma SENHOR-a guigua anjo aipoe'i Gade pe:

— Davi too petei altar SENHOR peguarã tojapo, jebuseu regua Ornã mba'emo moa'yĩaty py — he'i.

¹⁹ Ha'e gui SENHOR rery rupi Gade ha'e rami ijavyu ramo Davi oo ijavyuague rami vy.

²⁰ Ornã ma ha'e va'e jave trigo moa'yĩa rupi oiko. Ha'e gui ojere vy oexa anjo hi'aĩ rã. Ha'e ramo hexeve ta'ly kuery irundy omba'eapo okuapy va'e onhemimba jogueravy.

²¹ Ha'e gui Ornã oia py Davi ovaê ouvy ramo oma'ê. Oexa kuaa vy mba'emo moa'yĩaty gui oê vy Davi renonde py oĩ guenapy'a re, ngova vvy re omovaê reve.

²² Davi aipoe'i Ornã pe:

— Xevy pe eme'ê kova'e vvy petei altar SENHOR peguarã ajapo aguã, mba'eaxy vaikue heta va'e kuery áry ombou va'ekue opytu'u aguã. Emboaxa xevy, ha'e rã hepy xee ame'ê 'rã ha'eva rami.

²³ Ha'e rã Ornã aipoe'i Davi pe:

— Xeruvixa, ejopy tema ndejeupe guarã, ha'e ejapo reipota va'e rei. Apy ma vaka ikuai, ame'ê reapy reve reme'ê va'erã. Ame'ê avi vyvrape mba'emo moa'yĩaty regua yxakãrã, ha'e trigo ra'yigue guive reme'ê va'erã irurã. Ame'êmba rive — he'i.

²⁴ Huvixa Davi ombovai Ornã:

— Any, ha'e rami 'rãgue py ndevy pe xee amboekovia 'rã hepyrã porã re. Mba'eta ndepo gui nda'evei ajopy rive aguã SENHOR pe ame'ê va'erã. Ome'ê rive pyre ma xee name'ê reguai — he'i.

²⁵ Ha'e rami vvy ha'e va'e vvy repyrã Davi ome'ê Ornã pe seiscentos hatã'i va'e ouro guigua.

²⁶ Ha'e py ma Davi ojapo altar SENHOR peguarã. Hi'áry ma ome'ê mymba oapy reve, hexeve petei rami ju ikuai regua guive. Ha'e gui SENHOR pe ojapukai ramo ombovai tata yva gui altar áry ombou vy.

²⁷ Ha'e gui anjo pe SENHOR ijavyu ramo omboyru ju kyxe.

Templo oĩ aguã py mba'emo ome'êague

²⁸ Ha'e jave py Davi oexa rã jebuseu Ornã mba'emo omoa'yĩaty py SENHOR ombovai. Ha'e rami vvy mba'emo ome'ê ixupe ha'e py.

²⁹ Mba'eta ha'e va'e jave py ma oo'i SENHOR peguarã tekoa e'ýa py Moisés ojapo va'ekue ma Gibeão vvy'a re teri oĩ, altar mba'emo oapyty voi.

³⁰ Ha'e katy nda'evei Davi oo aguã Nhanderuete pe oporandu aguã, SENHOR-a guigua anjo kyxe oguereko va'e gui okyje vy.

22

Templo ojapoa rã guarã Davi mba'emo oguereko katuague

¹ Ha'e gui Davi aipoe'i:

— Apy ae ojapoa 'rã oo SENHOR Nhanderuete peguarã, altar Israel kuery mba'emo oapy aguã guive — he'i.

² Ha'e rami vvy Davi omboaty uka amboae guigua kuery Israel vvy ha'e javi rupi hekoo va'e. Ha'e kuery va'e regua omoĩ ita re omba'eapo va'erã, ita omoatyrõ aguã oo SENHOR peguarã ojapoa rã guarã.

³ Ikaravorã ma Davi ojou uka reta avi ferro, okê re omoĩ aguã ijao'ia ha'e hexe guarã. Overa va'e voi ojou uka oata aguã rami e'ý, opejapaa rei aguã rami e'ý guive,

⁴ yary aygue guive heta avi. Ha'e nunga ma Sidom ha'e Tiro pygua kuery ogueru okuapy Davi pe oata aguã rami e'ý.

⁵ Mba'eta Davi aipoe'i: "Xera'y Salomão ma kunumi'i teri vy mba'emo ojapo kuaa va'e'y teri. Ha'e gui oo SENHOR peguarã ojapo pyrã ma iporãve ete va'e 'rã, ha'e va'e re ima'endu'a porãa aguã rami vyvave re. Ha'e nunga rupi xee areko katupa ma voi 'rã mba'emo ojapo vy oiporu va'erã", he'iaque rami Davi omano e'y mbove voi ogueroko katupa oata aguã rami e'y.

Salomão pe Davi templo-rã ojapo ukaague

⁶ Ha'e ramo Davi oeno'i gua'y Salomão. Ha'e vy ixupe ojapo uka oo SENHOR Israel kuery ruete peguarã.

⁷ Ha'e vy aipoe'i Salomão pe:

— Xera'y, xee aendu va'ekue oo SENHOR Xeruete pe ajapoxea hery o'i aguã.

⁸ Ha'e rami te'i xevy SENHOR ombou avi oayvu. Ha'e vy aipoe'i: "Ndee ma tuguy ndopavei aguã rami remoẽ va'ekue, joe repu'ãa py rejoguero'aa rupi. Ha'e rami vy ndee nda'evei 'rã rejapo aguã oo xerery o'i aguã, mbovy e'y tuguy remoẽ rire kovae vyvave re, xerenonde rupi.

⁹ Ne'exa, oiko 'rã petei'ndera'y. Ha'e va'e ma joe opu'ãa rupi e'y 'rã oiko, mba'eta amombytu 'rã hovaigua kuery ha'e javi gui. Ha'e ma Salomão hery va'erã. Ha'e o'i jave ma ajapo 'rã Israel kuery ikuai porã aguã rami, mba'eve ndoikoi rã.

¹⁰ Ha'e va'e ae 'rã ojapo oo xerery o'i aguã. Xera'y rami ae 'rã oiko, ha'e rã xee ma tuu rami 'rã aiko. Ha'e gui raka'e rã peve amo'i atã 'rã Israel kuery re opena aguã", he'i va'ekue xevy.

¹¹ Ha'e gui a'y ma xera'y, tove SENHOR toiko ndereve, reiko porã aguã, SENHOR Nderuete peguarã oo rejapo aguã rami, ndekorã re ijayvuague rami vy.

¹² Tove SENHOR tome'ẽ ne'arandurã ha'e reiko kuaa aguã, Israel kuery re repenaa ja SENHOR Nhanderuete guigua lei rami ete reiko aguã rami.

¹³ Ha'e rami vy 'rãe reiko porã, nekyre'yã rupi Israel kuery rekorã SENHOR Moisés pe ombopara uka va'ekue rejapopa aguã. Nembaraete ke ha'vy, ndepy'a guaxu, ekyje eme guive nekangy e'y aguã.

¹⁴ Ha'e gui ne'exa, xee ma amba'eapo vaipaa rupi anho areko katu ma oo SENHOR peguarã três milhões e trezentos mil quilos ouro guigua, ha'e trinta e três milhões de quilos prata guigua, ha'e gui overa va'e ha'e ferro oata aguã rami e'y, ne'i ndopejaai guive. Ha'e gui vyvra ha'e ita voi areko katu avi va'ekue. Ha'e rami avi ndee ju rejou retave aguã ha'eve.

¹⁵ Ha'e gui ndevy guarã ikuave ju omba'eapo va'e kuery heta ete, ita moatyrõa, ita re omba'eapo va'e, oo apoa kuery, ha'e opa mba'e ojapo kuaa va'e,

¹⁶ ouro ha'e prata guigua, overa va'e ha'e ferro guigua re omba'eapo va'e mbovy e'y. Ha'e nunga rupi nekyre'y ke rejapopa aguã. Ha'e tove SENHOR toiko ndereve — he'i.

¹⁷ Ha'e gui Davi ijayvu avi Israel kuery ruvixa ikuai va'e gua'y Salomão oipytyvõ aguã re. Ha'e vy aipoe'i:

¹⁸ — SENHOR Penderuete peẽ kuery reve oiko ojapo jova-jovai rupi pendere nopu'ãavei aguã rami. Mba'eta xepo py omboaxapa ma nhandevyvy re ikuai va'e ha'e javi. Ha'e rami rire ha'e kuery SENHOR rembiguai ikuai, ixupegua kuery rembiguai guive.

¹⁹ Ha'e nunga rupi a'y penekyre'y ke pendepy'a ha'e penenhe'ẽ ha'e javi py SENHOR Penderuete peka aguã. Pejapo ete oo SENHOR Nhanderuete pegua iky'a e'y va'erã, ha'e py hery o'i aguã, ha'e SENHOR guexeve guarã ojapo va'ekue ryru peru aguã, tembiporu ixupegua ikuai va'e guive — he'i.

23

Levita kuery petei-teĩ regua omba'eapo aguã re ijayvuague

¹ Ha'e gui Davi tuja'i ma, ha'e hi'ãra opa rai'i ma ramo omo'i gua'y Salomão Israel kuery ruvixarã.

² Ha'e rami vy omboaxapa Israel kuery ruvixa ikuai va'e, sacerdote ha'e levita kuery guive.

³ Levita kuery trinta ma'etỹ va'e guive tujakue peve oipapaa rã ha'e javi vy trinta e oito mil avakue ikuai.

⁴ Ha'e kuery va'e regua ma vinte e quatro mil ikuai SENHOR pegua oo py omba'eapo va'e kuery re opena va'erã, ha'e gui seis mil ju ikuai huvixarã mba'emo re oikuaa pota va'erã.

⁵ Quatro mil ikuai okẽ rarõarã, ha'e gui quatro mil ju ikuai SENHOR pe oporaei va'erã, mba'epu Davi ha'e rami aguã ojapo uka va'ekue ombojoguy reve.

⁶ Ha'e kuery Levi ramymino ikuai va'e ma Davi omboja'o ta'y kuery rery rupi petei-teĩ regua ikuai aguã: Gérson, Coate ha'e Merari.

⁷ Gérson ra'y kuery ma Ladã ha'e Simei.

⁸ Ladã ra'y kuery ma huvixa Jeiel, ha'e gui Zetã ha'e Joel, ha'e javi vy mboapy ikuai.

⁹ Simei ra'y kuery ma Selomite, Haziel ha'e Harã, mboapy ikuai. Ha'e kuery ma Ladã ramymino kuery re opena va'e meme.

¹⁰ Simei ra'y kuery ma Jaate, Ziza, Jeús ha'e Berias. Ha'e kuery Simei ra'y ikuai va'e ma irundy.

¹¹ Jaate ma huvixa oiko, ha'e rã Ziza ma mokoãa. Ha'e gui Jeús ha'e Berias ma ndata'y reta vaipai. Ha'e nunga rupi ha'e va'e mokoãve ramymino kuery ma petei'i regua rive ikuai.

¹² Ha'e gui Coate ra'y kuery ma Anrão, Isar, Hebrom ha'e Uziel, irundy ikuai.

¹³ Anrão ra'y kuery ma Arão ha'e Moisés. Ha'e gui Arão ma omoia henda iky'a e'y va'e rupi omba'eapo aguã, hamymino kuery voi, raka'e rã peve, ha'e gui SENHOR renonde py oapy aguã heakuã porã va'e, ixupe omba'eapo aguã, ha'e hery rupi jogueroayvu porã aguã, raka'e rã peve.

¹⁴ Nhanderuete remimbo'e Moisés ra'y kuery voi Levi ramymino ikuai.

¹⁵ Moisés ra'y kuery ma Gérson ha'e Eliézer.

¹⁶ Gérson ra'y ma huvixa Sebul.

¹⁷ Eliézer ra'y ma huvixa Reabias. Nda'ipoi ae ta'y kuery mboae. Ha'e rami avi Reabias ramymino kuery ma heta-etave oje'oivy.

¹⁸ Isar ra'y ma huvixa Selomite.

¹⁹ Hebrom ra'y kuery ma huvixa Jerias, mokoña ma Amarias, mboapya ma Jaaziel, ha'e gui irundya ma Jecameão.

²⁰ Uziel ra'y kuery ma huvixa Mica, ha'e mokoña ma Issias.

²¹ Merari ra'y kuery ma Mali ha'e Musi. Mali ra'y kuery ma Eleazar ha'e Quis.

²² Eleazar ma ta'y e'y re omano va'eri tajy kuery ikuai. Ha'e kuery re ikyyv kuery Quis ra'y ikuai va'e omenda okuapy.

²³ Musi ra'y kuery ma Mali, Éder ha'e Jeremote, mboapy ikuai.

²⁴ Ha'e va'e kuery ma Levi ramymino kuery meme, peteĩ-teĩ regua re opena va'e kuery reve. Peteĩ-teĩ oipapaa hery rupi. Ha'e gui vinte ma'etỹ va'e guive tujakue peve omoña SENHOR pegua oo rupi omba'eapo va'erã.

²⁵ Mba'eta Davi aipoe'iaague rami: “ SENHOR Israel kuery ruete ojapo ojeuegua kuery re nopu'aaavei aguã rami, Jerusalém py hekoa riae aguã.

²⁶ Ha'e nunga rupi Levi ramymino kuery ndogueraavei 'rã oo'i, neĩ tembiporu oiporu va'erã ma voi”, he'i va'ekue.

²⁷ Ha'e nunga rupi Davi opa vy ijayvuague rami vy oipapapaa Levi ramymino kuery vinte ma'etỹ va'e guive tujakue peve.

²⁸ Ha'e kuery omoña Arão ramymino kuery oipytyvõ aguã SENHOR pegua opy rupi omba'eapo ramo, oka rupi, opy ja'o ikuai va'e rupi, mba'emo oiky'a'oa rupi, ha'e Nhanderuete pegua opy omba'eapoa ha'e javi rupi.

²⁹ Ha'e kuery opena 'rã mbojape SENHOR renonde omoĩmby re, trigo ku'i mba'emo irũ ome'ẽ mbyrã oĩ va'e re, mbojape imbovua revegua e'y ojapoa re, mba'emo oexy ha'e oxyryrya re, ha'e mba'emo opejaa ha'e oa'ãa ha'e javi re.

³⁰ Ko'ẽ nhavõ aje'ive'i reve ikuai aguã SENHOR oguero'vy'aa rupi oporaei aguã, ka'arukue voi ha'ekue rami ae ju 'rã ikuai,

³¹ ha'e gui SENHOR pe mba'emo oapy reve ome'ẽ aguã, sábado ára ha'e jaxy ipyau'ia ára nhavõ ngaru oikoa py, ngaru aguã ára oa'anga pyre ojeupity nhavõ. SENHOR renonde py omba'eapo 'rã oipapaague rami vy.

³² Ha'e rami vy opena 'rã onhemboaty aty re, henda iky'a e'y va'e re guive. Oipytyvõ avi 'rã guexegua Arão ramymino kuery SENHOR pegua opy rupi omba'eapoa py.

24

Sacerdote kuery peteĩ-teĩ regua omba'eapo aguã re ijayvuague

¹ Ha'e gui Arão ramymino kuery ju omboja'o-ja'opaa peteĩ-teĩ regua rami. Arão ra'y kuery ma Nadabe, Abiú, Eleazar ha'e Itamar.

² Ha'e gui Nadabe ha'e Abiú ma nguu omano e'y mbove omano raka'e ta'y e'y re. Ha'e va'e rire ma Eleazar ha'e Itamar ju sacerdote ikuai.

³ Ha'e gui Davi ma Eleazar ramymino Zadoque ha'e Itamar ramymino Aimeleque reve omboja'o peteĩ-teĩ regua omba'eapoa py ojapo 'rã va'ekue rami.

⁴ Ha'e rami vy omboja'o vy oikuaa Itamar ramymino kuery ikuai va'e gui Eleazar ramymino kuery re opena va'e hetave ra'ea. Mba'eta Eleazar ramymino kuery re opena va'e ma dezesseis, ha'e rã Itamar ramymino kuery regua ma oito ete'i ikuai.

⁵ Ha'e gui xortea oexa vy omboja'opa peteĩ-teĩ regua rami ikuai aguã. Ha'e rami py Eleazar ha'e Itamar ramymino kuery va'e regua ma henda iky'a e'y va'e re ha'e mba'emo Nhanderuete pegua ikuai va'e re opena va'erã ikuai.

⁶ Ha'e rami vy ha'e kuery rery Semaías omboparapa imoiny. Ha'e va'e ma levita Natanael ra'y kuaxia mboparapa rupi oiko va'e. Huvixave oexaa py ombopara, ha'e gui huvixa kuery, sacerdote Zadoque ha'e Abiatar ra'y Aimeleque, ha'e gui sacerdote ha'e levita kuery akã ikuai va'e ha'e javi oexaa py guive. Ha'e rami py xortea oexa vy jorire-rire oiporavo heravy Eleazar ha'e Itamar ramymino va'e regua.

⁷ Jypy xortea oexaa rami vy oiporavo Jeoiaribe, ha'e gui mokoña ma Jedaías,

⁸ mboapya ma Harim, irundya ma Seorim,

⁹ peteĩ nhiruía ma Malquias, mboapy memea ma Miamim,

¹⁰ sete-a ma Hacoç, oito-a ma Abias,

¹¹ nove-a ma Jesua, dez-a ma Secanias,

¹² onze-a ma Eliasibe, doze-a ma Jaquim,

¹³ treze-a ma Hupá, catorze-a ma Jesebeabe,

¹⁴ quinze-a ma Bilga, dezesseis-a ma Imer,

¹⁵ dezessete-a ma Hezir, dezoito-a ma Hapises,

¹⁶ dezenove-a ma Petaías, vinte-a ma Jeezquel,

¹⁷ vinte e um-a ma Jaquim, vinte e dois-a ma Gamul,

¹⁸ vinte e três-a ma Delaías, vinte e quatro-a ma Maazias.

¹⁹ Ha'e rami hery ikuaiami rami peteĩ-teĩ SENHOR pegua opy oike 'rã omba'eapo aguã, guamoĩ Arão ha'e SENHOR Israel kuery ruete ojapo ukaague rami.

²⁰ Ha'e gui Levi ramymino kuery mboae ikuai va'e ruvixa kuery rery ma po rami: Anrão ra'y kuery va'e regua Subael, Subael ra'y kuery va'e regua Jeadias,

²¹ Reabias ra'y kuery va'e regua huvixa Issias,

²² Isar ramymino kuery va'e regua Selomite, Selomite ra'y kuery va'e regua Jaate,

²³ Hebrom ra'y kuery va'e regua jypygua ma Jerias, mokoia ma Amarias, mboapya ma Jaaziel, ha'e gui irundya ma Jecameão,

²⁴ Uziel ra'y kuery va'e regua Mica, Mica ra'y kuery va'e regua Samir,

²⁵ Mica ryvy Issias, Issias ra'y kuery va'e regua Zacarias,

²⁶ Merari ra'y kuery va'e regua Mali ha'e Musi, Jaazias ra'y kuery va'e regua Beno,

²⁷ Merari ramymino Jaazias guigua ikuai va'e regua ma Beno, Soão, Zacur ha'e Ibri,

²⁸ Mali ramymino Eleazar ta'y e'ÿ va'e,

²⁹ Quis ra'y kuery va'e regua Jerameel,

³⁰ Musi ra'y kuery va'e regua Mali, Éder ha'e Jerimote. Ha'e va'e kuery ma Levi ramymino kuery meme, peteĩ-teĩ regua ikuaiã rami.

³¹ Ha'e kuery voi guvyvy kuery Arão ramymino ikuai va'e ojopague rami ae ju oexa okuapy xorteã. Guetarã kuery re opena va'e ha'e yvyĩgueve voi oexa okuapy xorteã huvixa Davi oexaa py, Zadoque ha'e Aimeleque, ha'e gui sacerdote ha'e levita kuery akã ikuai va'e ha'e javi oexaa py guive.

25

Oporaei va'e kuery omba'eapo aguã re ijayvuague

¹ Ha'e gui Davi ha'e omba'eapo va'e kuery ruvixa ikuai va'e reve omõi Asafe, Hemã ha'e Jedutum ra'y kuery regua omba'eapo aguã. Ha'e va'e kuery ma ikuai ayvu omombe'u aguã mba'epu ixã reta va'e reve, mbaraka ha'e hy'a pu reve. Ha'e rami aguã omõi va'ekue rery ma po rami:

² Asafe ra'y kuery ma Zacur, José, Netanias ha'e Asarela. Asafe ra'y kuery meme ikuai, ha'e ae opena ha'e kuery omba'eapoa re. Ha'e rã Asafe omba'eapoa re ma huvixave ae opena oikovy.

³ Ha'e gui Jedutum ra'y kuery ma Gedalias, Zeri, Jesaías, Hasabias ha'e Matitias, ha'e javi vy mboapy meme ikuai. Ha'e kuery omba'eapoa re tuu Jedutum ae opena oikovy. Mba'epu ixã reta va'e reve omombe'u 'rã ayvu, SENHOR oguerovy'aa rupi oporaiea py.

⁴ Ha'e gui Hemã ra'y kuery ma Buquias, Matanias, Uziel, Sebul, Jerimote, Hananias, Hanani, Eliata, Gidalti, Romanti-Ézer, Josbecasa, Maloti, Hotir ha'e Maaziote.

⁵ Ha'e kuery ma Hemã ra'y kuery meme. Ha'e rã ha'e ma huvixave pegua profeta oiko. Nhanderuete oayvuague rami vy omombarate, ha'e vy ixupe ome'ẽ catorze ta'y ha'e mboapy tajy kuery.

⁶ Ha'e kuery peteĩ-teĩ omba'eapoa re tuu ae opena oikovy. SENHOR pegua opy oporaie 'rã hy'a pu reve, mbaraka ha'e ixã reta va'e reve Nhanderuete pegua oo rupi omba'eapo vy. Ha'e rã tuu Asafe, Jedutum ha'e Hemã omba'eapoa re ma huvixave ae opena oikovy.

⁷ Ha'e kuery ryvy kuery ma SENHOR pe oporaie aguã re ombo'ea rã oporaie kuaa va'e meme. Ha'e javi vy duzentos e oitenta e oito ikuai.

⁸ Ha'e kuery oexa okuapy oxorteã peteĩ-teĩ regua omba'eapo aguã okuaa aguã, yvyĩgueve ha'e yvatekueve, nhombo'ea ha'e hemimbo'e kuery guive.

⁹ Jypy xorteã oexa vy oikuaa Asafe ra'y kuery va'e regua José. Mokoia ma Gedalias. Ha'e va'e ma guvyvy ha'e gua'y kuery reve vy doze ikuai.

¹⁰ Ha'e gui mboapya ma Zacur. Ta'y ha'e tyvy kuery reve vy doze avi ikuai.

¹¹ Irundya ma Izri. Ta'y ha'e tyvy kuery reve vy doze avi ikuai.

¹² Peteĩ nhiruia ma Netanias. Ta'y ha'e tyvy kuery reve vy doze avi ikuai.

¹³ Mboapy memea ma Buquias. Ta'y ha'e tyvy kuery reve vy doze avi ikuai.

¹⁴ Sete-a ma Jesarela. Ta'y ha'e tyvy kuery reve vy doze avi ikuai.

¹⁵ Oito-a ma Jesaías. Ta'y ha'e tyvy kuery reve vy doze avi ikuai.

¹⁶ Nove-a ma Matanias. Ta'y ha'e tyvy kuery reve vy doze avi ikuai.

¹⁷ Dez-a ma Simei. Ta'y ha'e tyvy kuery reve vy doze avi ikuai.

¹⁸ Onze-a ma Azarel. Ta'y ha'e tyvy kuery reve vy doze avi ikuai.

¹⁹ Doze-a ma Hasabias. Ta'y ha'e tyvy kuery reve vy doze avi ikuai.

²⁰ Treze-a ma Subael. Ta'y ha'e tyvy kuery reve vy doze avi ikuai.

²¹ Catorze-a ma Matitias. Ta'y ha'e tyvy kuery reve vy doze avi ikuai.

²² Quinze-a ma Jerimote. Ta'y ha'e tyvy kuery reve vy doze avi ikuai.

²³ Dezesseis-a ma Hananias. Ta'y ha'e tyvy kuery reve vy doze avi ikuai.

²⁴ Dezessete-a ma Josbecasa. Ta'y ha'e tyvy kuery reve vy doze avi ikuai.

²⁵ Dezoito-a ma Hanani. Ta'y ha'e tyvy kuery reve vy doze avi ikuai.

²⁶ Dezenove-a ma Maloti. Ta'y ha'e tyvy kuery reve vy doze avi ikuai.

²⁷ Vinte-a ma Eliata. Ta'y kuery, ha'e tyke'y tyvy kuery reve vy doze avi ikuai.

²⁸ Vinte e um-a ma Hotir. Ta'y ha'e tyvy kuery reve vy doze avi ikuai.

²⁹ Vinte e dois-a ma Gidalti. Ta'y ha'e tyvy kuery reve vy doze avi ikuai.

³⁰ Vinte e três-a ma Maaziote. Ta'y ha'e tyvy kuery reve vy doze avi ikuai.

³¹ Vinte e quatro-a ma Romanti-Ézer. Ta'y ha'e tyvy kuery reve vy doze avi ikuai.

26

Okê rarôarâ kuery omoïague

¹ Ha'e gui okê rarôarâ omoïa avi. Ha'e kuery va'e regua ma Coré ramymino kuery. Meselemias ma Coré ra'y, Asafe ramymino kuery va'e regua.

² Meselemias ra'y kuery ma jypygua Zacarias, mokoïa ma Jediel, mboapya ma Zebadias, irundya ma Jatniel,

³ peteï nhiruïa ma Elão, mboapy memea ma Joanã, ha'e sete-a ma Elioenai.

⁴ Obede-Edom ra'y kuery ma jypygua Semaías, mokoïa ma Jeozabade, mboapya ma Joá, irundya ma Sacar, peteï nhiruïa ma Natanael,

⁵ mboapy memea ma Amiel, sete-a ma Issacar, ha'e oito-a ma Peuletai, mba'eta Nhanderuete ha'e rami aguã omoingo porã rire.

⁶ Ha'e gui ta'y Semaías ra'y kuery avi ikuai. Ha'e kuery ma nguuro re opena okuapy, avakue ipy'a guaxukueve meme.

⁷ Semaías ra'y kuery ma Otni, Rafael, Obede ha'e Elzabade. Tyvy kuery Eliú ha'e Semaquias ma avakue ipy'a guaxukueve meme.

⁸ Ha'e kuery ha'e javi ma Obede-Edom ramymino meme. Ta'y ha'e tyvy kuery reve vy ma sessenta e dois ikuai, avakue mbaraetekue ha'e omba'eapo kuaa va'e meme.

⁹ Meselemias ra'y kuery, ha'e tyvy kuery reve vy ma dezoito ikuai, avakue ipy'a guaxukueve meme.

¹⁰ Ha'e gui Merari ramymino Hosa ra'y ma Sinri. Ha'e va'e ma huvixarã tuu omoï va'ekue, jypygua e'y teï.

¹¹ Ha'e gui mokoïa ma Hilquias, mboapya ma Tebalias, ha'e irundya ma Zacarias. Hosa ra'y kuery, tyvy kuery reve vy ma treze ikuai.

¹² Ha'e va'e okê rarôarâ omoï mbyre ruvixa kuery pe ome'êa ojapo va'erã, guexegua kuery rami omba'eapo aguã SENHOR pegua opy rupi.

¹³ Peteï-teï okê ikuai va'e rarôarã re oexa okuapy oxortea, vvygüeve ha'e yvatekueve ojapo va'erã oikuaa aguã, peteï-teï regua ikuai rami vy.

¹⁴ Ha'e rami vy okê kuaray oua katygua rarôarâ omoï Selemias xortea oexaa rami vy. Ha'e va'e rire ma xortea oexa jevy vy omoï ta'y Zacarias. Ha'e va'e ma nhomongetaa py ijayvu porã kuaa va'e. Ha'e ma kuaray ijapu'a'ia katy okê oï va'e rarôarã oiko.

¹⁵ Obede-Edom ma kuaray puku-a katy oï va'e rarôarã oiko. Ha'e gui ta'y kuery ma mba'emo omoï porãaty rarôarã ikuai.

¹⁶ Supim ha'e Hosa ma kuaray oikua katy oï va'e rarôarã ikuai, okê Salequete 'ea va'e rexei'i rupi, tape vvy'ã katy oo va'e regua vvyry. Jovaive rupi harôarã ikuai.

¹⁷ Ha'e gui kuaray oua yke katy ma mboapy meme Levi regua kuery ikuai oarôa py. Ha'e gui kuaray ijapu'a'ia katy ha'e ipuku-a katy irundy 'rã ikuai ára nhavô. Ha'e gui oo mba'emo omoï porãaty jovaive re ikuai 'rã mokô-mokoï oarôa py.

¹⁸ Ha'e gui oka kuaray oikua katy oï va'e rarôarã ikuai irundya tape joaxa va'e py, ha'e gui oka katyve'i ma mokoï ju.

¹⁹ Ha'e va'e kuery ma Coré ha'e Merari ramymino kuery va'e regua okê rarôarã omoï mbyre.

Hepyve va'e rarôarã kuery omoïague

²⁰ Tyvy kuery levita va'e regua ma omoïa mba'emo hepyve va'e Nhanderuete pegua opy ikuai va'e ha'e mba'emo iky'a e'y va'e omoï porã mbyre rarôarã.

²¹ Gérson ra'y Ladã ramymino kuery re opena va'e ma Jeieli.

²² Jeieli ra'y kuery ma Zetã ha'e tyvy Joel. Ha'e va'e kuery ma opena hepyve va'e SENHOR pegua opy ikuai va'e re.

²³ Ha'e gui Anrão ramymino kuery, Isar, Hebrom ha'e Uziel ramymino kuery va'e regua ma

²⁴ Gérson ra'y Sebuél, Moisés ramymino. Ha'e va'e ma oiko hepyve va'e omoï porã mbyre rarôa kuery re openaa rupi.

²⁵ Tyvy kuery ma Eliézer, ha'e ta'y Reabias, Reabias ra'y ma Jesaías, Jesaías ra'y ma Jorão, Jorão ra'y ma Zicri, Zicri ra'y ma Selomite.

²⁶ Ha'e gui Selomite ha'e tyvy kuery reve omoïa oarô aguã mba'emo hepyve va'e Nhanderuete pe omboaxa pyre. Ha'e va'e ma huvixa Davi, guetarã kuery re opena va'e kuery, ha'e xondaro kuery mil ha'e cem ikuai va'e ruvixa kuery omboaxa va'ekue.

²⁷ Joe opu'ãa py ha'e kuery mba'emo ojou va'ekue omboaxapa SENHOR pegua oo omoatyroã aguã.

²⁸ Ha'e rami ae avi opa mba'e profeta Samuel ome'ê va'ekue, ha'e gui Quis ra'y Saul, Ner ra'y Abner, Zeruia pi'a Joabe, ha'e kuery ha'e javi omboaxa va'ekue ma Selomite ha'e tyvy kuery oarô okuapy.

Yvatekueve ha'e mba'emo re oikuaa pota va'erã kuery omoïague

²⁹ Isar ramymino kuery regua Quenianias ha'e ta'y kuery avi omoïa Israel kuery re opena va'erã, yvatekueve mba'emo hovai rupi oiko va'e re oikuaa pota aguã.

³⁰ Hebrom ramymino kuery va'e regua ma omoïa Hasabias ha'e tyvy kuery reve. Ha'e va'e kuery ma avakue ipy'a guaxukueve, mil e setecentos ikuai. Ha'e kuery ma Israel kuery re openaa rupi ikuai, Jordão yakã rovai kuaray oikua katy. SENHOR pe omba'eapoa rupi ikuai, huvixave mba'emo oguereko va'e re openaa rupi guive.

³¹ Hebrom ramymino kuery ruvixa ma Jerias oī. Ha'e kuery va'e regua tamoī kuery ha'e hamymino kuery rery ha'e javi re oikuaa potaa, quarenta ma'et'ya re ma Davi huvixave oī jave py. Ha'e rami vy ha'e kuery va'e regua ojoua avakue ipy'a guaxukueve Jazer pygua Gileade yvy re.

³² Ha'e va'e ryvy kuery ma dois mil e seiscentos ikuai avakue ipy'a guaxukueve, guetarā kuery re opena va'e meme. Ha'e va'e kuery ma huvixa Davi omoī Rúbén, Gade ha'e Manassés ramymino kuery oja'o va'ekue re opena va'erā. Opena avi 'rā mba'emo Nhanderuete pegua re, huvixave mba'emo oguereko va'e ha'e javi re guive.

27

Peteī-teī jaxy re huvixave pegua xondaro ikuai va'erā omoīague

¹ Israel ramymino kuery mbovy pa ikuai rami vy peteī-teī regua re opena va'e rery, ha'e mil ha'e cem ikuai va'e ruvixa kuery rery oīa. Ha'e va'e kuery ma nguvixave pe omba'epao 'rā mba'emo ojapoa rupi, mba'eta peteī-teī jaxy re oike 'rā ha'e va'e jaxy reguarā, ha'e rā amboae kuery ma oē 'rā oje'oivy, ha'e rami ae tema ikuai ma'et'ya pukukue re. Ha'e peteī-teī regua ma vinte e quatro mil ikuai.

² Ha'e gui jypygua, jaxy ijypya re ikuai va'e kuery ruvixa ma Zabdiel ra'y Jasobeão. Ha'e va'e kuery regua ma vinte e quatro mil ikuai.

³ Ha'e va'e ma Perez ramymino kuery va'e regua, jaxy ijypya re xondaro kuery ikuai va'e ruvixa kuery re opena va'erā omoī mbyre.

⁴ Ha'e gui mokoī jaxya re ikuai va'e re opena va'e ma Aoí ramymino Dodai. Ha'e va'e pytyvōarā oiko Miclote. Ha'e va'e kuery regua ma vinte e quatro mil avi ikuai.

⁵ Ha'e gui mboapy xondaro kuery ruvixa, mboapy jaxya re ikuai va'e re opena va'e ma Benaia. Ha'e va'e ma huvixa oiko, sacerdote Joiada ra'y. Ha'e va'e kuery regua ma vinte e quatro mil avi ikuai.

⁶ Ha'e va'e Benaia ae trinta avakue ikuai va'e regua ipo'akave va'e, ha'e kuery akā oiko. Ha'e rami vy ojeupegua kuery re opena uka gua'y Amizabade va'e pe.

⁷ Ha'e gui irundya, irundy jaxya re ikuai va'e re opena va'e ma Joabe ryvy Asael. Ha'e va'e rire ma oiko ta'y Zebadias. Ha'e va'e kuery regua ma vinte e quatro mil avi ikuai.

⁸ Peteī nhiruīa huvixa, peteī nhiruī jaxya re ikuai va'e re opena va'e ma Isar ramymino Samute. Ha'e va'e kuery regua ma vinte e quatro mil avi ikuai.

⁹ Mboapy memea huvixa, mboapy meme jaxya reguarā ma Tecoa pygua Iques ra'y Ira. Ha'e va'e kuery regua ma vinte e quatro mil avi ikuai.

¹⁰ Sete-a huvixa, sete jaxya reguarā ma Pelom pygua Heles, Efraim ramymino kuery va'e regua. Ha'e va'e kuery regua ma vinte e quatro mil avi ikuai.

¹¹ Oito-a huvixa, oito jaxya reguarā ma Husa pygua Sibecai, Zera ramymino kuery va'e regua. Ha'e va'e kuery regua ma vinte e quatro mil avi ikuai.

¹² Nove-a huvixa, nove jaxya reguarā ma Anatote pygua Abiezer, Benjamim ramymino kuery va'e regua. Ha'e va'e kuery regua ma vinte e quatro mil avi ikuai.

¹³ Dez-a huvixa, dez jaxya reguarā ma Netofa pygua Maarai, Zera ramymino kuery va'e regua. Ha'e va'e kuery regua ma vinte e quatro mil avi ikuai.

¹⁴ Onze-a huvixa, onze jaxya reguarā ma Piratom pygua Benaia, Efraim ramymino va'e regua. Ha'e va'e kuery regua ma vinte e quatro mil avi ikuai.

¹⁵ Doze-a huvixa, doze jaxya reguarā ma Netofa pygua Heldai, Otniel ramymino kuery va'e regua. Ha'e va'e kuery regua ma vinte e quatro mil avi ikuai.

Israel kuery peteī-teī regua ruvixa kuery rery oīa

¹⁶ Ha'e gui Israel kuery peteī-teī regua rerekoa ma po rami: Rúben ramymino kuery re opena va'e ma Zicri ra'y huvixa Eliézer. Simeão ramymino kuery re opena va'e ma Maaca ra'y Sefatias.

¹⁷ Levi ramymino kuery re opena va'e ma Quemuel ra'y Hasabias. Arão ramymino kuery re opena va'e ma Zadoque.

¹⁸ Judá ramymino kuery re opena va'e ma Davi ryke'y Eliú. Issacar ramymino kuery re opena va'e ma Micael ra'y Onri.

¹⁹ Zebulom ramymino kuery re opena va'e ma Obadias ra'y Ismaías. Naftali ramymino kuery re opena va'e ma Azriel ra'y Jerimote.

²⁰ Efraim ramymino kuery re opena va'e ma Azazias ra'y Oséias. Manassés ramymino kuery mbyte rupi oja'o va'ekue re opena va'e ma Pedaias ra'y Joel.

²¹ Ha'e rā Manassés ramymino kuery mboae Gileade yvy re hekoa va'e re opena va'e ma Zacarias ra'y Ido. Benjamim ramymino kuery re opena va'e ma Abner ra'y Jaasiel.

²² Dã ramymino kuery re opena va'e ma Jeroão ra'y Azarel. Ha'e va'e kuery ma Israel kuery peteī-teī regua ruvixa kuery ikuai va'ekue meme.

²³ Ha'e gui Davi ma ndoipapa ukai vinte ma'et'y teri ndoguerekoī va'e, mba'eta SENHOR ijayvu ae ma rire jaxy-tata yva re ikuai va'e rami Israel kuery omboetave aguā re.

²⁴ Ha'e gui Zeruaī pi'a Joabe ma omboypy heta va'e kuery oipapa aguā teī ndoipapapai, oipapaa káuxa Israel kuery áry poxya ou ramo. Ha'e nunga rupi ae oipapague nomboparaai huvixa Davi rekoue oīa re.

²⁵ Adiel ra'y Azmavete ma huvixave mba'e hepyve va'e omoí poráaty re opena va'e. Ha'e rá yvy ituia rupi oguereko va'e re, tetã mboae rupi, tekoa ha'e oo imbaraete va'e ikuai rupi oguereko va'e re opena va'e ma Uzias ra'y Jônatas.

²⁶ Mba'ety rupi omba'eapo ha'e oma'etý va'e kuery re opena va'e ma Querube ra'y Ezri.

²⁷ Uva onhotý mbyre re opena va'e ma Ramá pygua Simeí. Ha'e gui vinho omoí porã mbyre re opena va'e ma Sifá pygua Zabdi.

²⁸ Oliveira ha'e sicômoro rembypy mba'ety rupi ikuai va'e re opena va'e ma Gedera pygua Baal-Hanã. Ha'e gui azeite omoí porã mbyre re opena va'e ma Joás.

²⁹ Mymba kuery Sarom yvýry rupi okaru okuapy va'e re opena va'e ma Sarom pygua Sitrai. Ha'e rá yvygua rupi mymba ikuai va'e re opena va'e ma Adlai ra'y Safate.

³⁰ Mymba camelo kuery re opena va'e ma Ismael ramymino Obil. Mburika'i kuery re opena va'e ma Meronote pygua Jedias.

³¹ Ha'e rá mymba kyrígueve'i re opena va'e ma hagareno regua Jaziz. Ha'e va'e kuery ma huvixa Davi mba'emo oguereko va'e ha'e javi re opena va'ekue meme.

Huvixave mongetaa kuery rery oĩa

³² Ha'e gui Davi ruy'i Jônatas ma nhomongetaa rupi oiko. Ha'e va'e ma lei re nhombo'e va'ety hi'arandu va'e. Ha'e rá Hacmoni ra'y Jeiel ma huvixa ra'y kuery re opena oikovy.

³³ Aitofel ma huvixave mongetaa oiko. Arquita regua Husai ma huvixave irũ ae oiko.

³⁴ Ha'e gui Aitofel noívei ma rire Benaia ra'y Joiada ju oí, Abiatar guive. Ha'e gui Joabe ma huvixave pegua xondaro kuery ruvixa.

28

Davi rekovia Salomão ju oĩ aguã re ijayvuaque

¹ Ha'e gui Davi oenoimba Israel regua yvatekueve, peteí-teí regua ruvixa kuery, ojepegua xondaro kuery ruvixa kuery, xondaro mil ha'e cem ikuai va'e re opena va'e, mba'emo ha'e ae ha'e ta'y kuery oguereko va'e re opena va'e, guembiguai yvatekueve ha'e ipo'akave va'e, ha'e avakue ipy'a guaxukueve ha'e javi. Jerusalém tetã py onhemboaty aguã oenoí.

² Ha'e rami vy Davi opu'ã ho'amy. Ha'e vy aipoe'i:

— Pendu ke, xeretarã kuery ha'e xevyguá kuery. Xee anhembopy'a va'ekue teí ajapo aguã peteí oo SENHOR guexeve guarã ojapo va'ekue ryrũ oĩ aguã, ha'e Nhanderue te py renderã. Ha'e rami vy xee areko katupa ma ajapo aguã.

³ Ha'e rami teí Nhanderue aipoe'i xevy: “Ndee ma nda'evei rejapo aguã oo xerery renderã, mba'eta ndee ma joe repu'ã py jouguy remoẽ vaipa va'ekue”, he'i.

⁴ Ha'e rami avi SENHOR Israel kuery ruete xeporavo xeru ro pygua kuery ha'e javi gui, Israel kuery ruvixarã aĩ aguã raka'e rá peve guarã. Mba'eta oiporavo raka'e Judá regua huvixarã, ha'e gui Judá regua mbyte gui ju oiporavo xeru ro pygua kuery, ha'e gui xeru ra'y kuery ikuai va'e gui xeporavo, Israel kuery ha'e javi ruvixaverã xemoí aguã.

⁵ Ha'e gui xera'y kuery ha'e javi gui — mba'eta heta ete ikuai xera'y kueryrã SENHOR ome'ẽ va'ekue — ha'e kuery va'e regua peteí va'e oiporavo Salomão, SENHOR pegua tenda Israel kuery re openaaty áry oĩ aguã.

⁶ Ha'e rami vy aipoe'i xevy: “Ndera'y Salomão ae 'rã xevy oo ojapo, oka guive, xera'yra' aiporavo rire, ha'e gui xee ma tuu 'rã aiko.

⁷ Ha'e rami vy ajapo 'rã raka'e rá peve guarã ipo'akava oĩ aguã rami, xapy'a rei xee ajapo uka va'e ha'e aipotaa ha'e javi ri ojapopa ramo, aý peve oikoa rami”, he'i.

⁸ Ha'e gui aý Israel kuery SENHOR pe penhemboaty va'e ha'e javi renonde, ha'e Nhanderue xeyvua oendu va'e renonde py xee aipoa'e pëvy: Pejapopa ete ke SENHOR Penderue te ojapo uka va'e, penhea'ã ke ha'e va'e rupi anho pendekuai aguã, kova'e yvy porã re pendekoa riae aguã, ha'e gui pendera'y kuery rekoarã ju peja aguã, raka'e rá peve guarã.

⁹ — Ha'e gui ndee xera'y Salomão, eikuaa porã pota ke nderu ruete. Ixupe ete ke eiko anhetẽ rupi ndepy'a ha'e nenhe'ẽ ha'e javi py. Mba'eta SENHOR ma oikuaa pota katui'i 'rã nhandepy'a re oĩ va'e re, oikuaa 'rã nhandembopy'aa ha'e javi. Ndee reka ri ramo ojejou uka 'rã ndevy. Ha'e rá reja ri ramo ha'e ju ndereja 'rã raka'e rá peve guarã.

¹⁰ Ha'e gui aý ma, eikuaa pota porã ha'e nunga ha'e javi re, mba'eta SENHOR ndeporavo ixupe rejapo aguã oo henda iky'a e'ý va'e oĩ aguã. Nembaraete ke ha'vy, ha'e ejapopa — he'i.

Gua'y Salomão pe Davi templo marã ramigua paa oexa ukaague

¹¹ Ha'e gui Davi gua'y Salomão pe ome'ẽ oo ra'angaa ombopara pyre, ha'e rami vy ojapo kuaa aguã oka pygua, oo mboae ikuai va'erã, hepyve va'e omoí poráaty, opy ja'o yvate rupi ha'e opyve rupi ikuai va'erã, ha'e oo teko vai mbogue atyrã.

¹² Onhembopy'aa ha'e javi rami vy ome'ẽ oo ra'angaa opa mba'e oĩa, SENHOR pegua oo yvýry rupi oguy ha'e opy ja'o ikuai va'erã, ha'e ixupegua opy mba'emo hepyve va'e ha'e ixupe omboaxa pyre omoí poráaty guive,

¹³ ha'e gui sacerdote ha'e levita kuery peteí-teí regua SENHOR pegua opy rupi omba'eapo aguã, tembiporu opy rupi oiporu va'erã guive.

¹⁴ Davi oikuaa uka avi tembiporu ouro guigua ikuai va'e ha'e javi poyia, peteĩ-teĩ omba'eapoa rupi tembiporu ouro ha'e prata guigua ojapo pyrã mbovy pa opejaa aguã.

¹⁵ Ha'e rami vy peteĩ-teĩ tataendy renda ha'e hi'áry tataendy ikuai va'erã ojapoa rã oikuaa uka mbovy poyia ouro guigua pa peteĩ-teĩ re oiporu va'erãa,

¹⁶ ha'e gui ouro guigua mbovy poyia avi Nhanderuete renonde mesa ikuai va'erã peguarã, peteĩ-teĩ oia rami vy, ha'e gui mesa prata guigua avi mbovy poyia paa.

¹⁷ Ouro ete gui anho 'rã ojapoa kuxa rakuarã, hy'a ha'e karo. Ha'e gui hy'a'i ouro guigua ikuai va'e peguarã oikuaa uka peteĩ-teĩ poyia. Hy'a'i prata guiguarã voi ha'e rami ae avi, peteĩ-teĩ poyia oikuaa uka.

¹⁸ Ha'e gui ouro oiky'a'opa pyre altar hekuã porã va'e rapyaty reguarã avi oikuaa uka oa'angaague rami vy, ha'e ouro anjo ipepo va'e ra'angaa rendarã oĩ aguã voi, mba'eta ha'e va'e pepo oĩ 'rã SENHOR guexeve guarã ojapo va'ekue ryru áry rupi ojao'ipa aguã.

¹⁹ Ha'e nunga ha'e javi ra'angaa pejapo kuaapa aguã xevy pe omboparapa reve ome'êa SENHOR ijavyuague rami vy — he'i Davi nhomongeta vy.

²⁰ Ha'e gui gua'y Salomão pe ju Davi aipoe'i:

— Nembaraete ke, ndepy'a guaxu guive, rejapo va'erã va'e rejapopa aguã. Ekyje eme, ndekuerai eme guive, mba'eta SENHOR Nhanderuete, Xeruete va'e oiko 'rã ndereve. Nanderejai 'rã, nanepytyvõ e'yi 'rã guive, SENHOR pegua oo ha'e opy rupi oiporu pyrã rejapopa aguã.

²¹ Apy ma ikuai sacerdote ha'e levita kuery SENHOR pegua opy rupi omba'eapo va'erã amoĩ va'ekue. Ndereve ikuai avi opa mba'e py rei omba'eapo va'e o'arandua ha'e ojapoxea'i py, opa mba'e rei tema ojapo kuaa va'e. Yvatekueve ha'e heta va'e kuery ha'e javi ikuai avi 'rã rejapo uka va'e rei ojapo aguã — he'i.

29

Davi ha'e yvatekueve mba'emo ome'êague

¹ Ha'e gui huvixa Davi ijavyvuve ju onhemboaty va'e kuery ha'e javi pe. Ha'e vy aipoe'i:

— Xera'y Salomão ae Nhanderuete oiporavo teĩ kunum'i ha'e mba'eva ndojapo kuaii teri. Ha'e rami avi kova'e nunga ojapo va'erã heta ete oĩ. Mba'eta oo tuvixa va'e ojapo pyrã ma avakue peguarã e'ỹ, ha'e rã SENHOR Nhanderuete peguarã.

² Ha'e nunga rupi xee ma xembaraetea ha'e javi py ajoupa ma Xeruete pegua oo reguarã: ouro mba'emo ouro gui anho guarã, prata ma prata gui anho guarã, overa va'e ma overa va'e gui anho guarã, ferro ma ferro gui anho guarã, ha'e yvyra ma yvyra gui anho guarã. Ajou uka va'ekue avi ita ñnix, ita mba'emo jeguarã, ita joo rami e'ỹ-e'ỹ pytä va'e, ita mba'emo ra'angaa ojapoa aguã va'e, ita porãgueue ha'e javi regua, ha'e gui ita mármore guive. Ha'e javi regua ma oata aguã rami e'ỹ oĩ.

³ Ha'e rami ae avi Xeruete pegua oo xee ayvu ete vy ouro ha'e prata xemba'e ae areko va'e ame'ëve ju 'rã Xeruete pegua oo reguarã, henda iky'a e'ỹ va'e reguarã areko katupa va'ekue áryve.

⁴ Ha'e va'e ma cem mil quilos ouro Ofir vyv guigua, ha'e duzentos e trinta mil quilos prata oiky'a'o pyre, oo mbotya ha'e javi ao'iarã.

⁵ Ouro oĩ 'rã mba'emo ouro gui anho guarã, prata guive oĩ prata gui anho guarã, opa marãgua ojapo kuaa va'e po py amboaxa va'e. Ha'e gui aỹ ma mava'e ju ome'êxea'i py ogueru 'rã SENHOR pe ome'ê va'erã? — he'i.

⁶ Ha'e ramo guetarã kuery re opena va'e kuery ome'êxea'i py ogueru okuapy ome'ê va'erã, Israel kuery peteĩ-teĩ regua ruvixa kuery, xondaro kuery mil ha'e cem ikuai va'e ruvixa kuery, ha'e huvixave pe omba'eapo va'e kuery re opena va'e kuery guive.

⁷ Ha'e vy Nhanderuete pegua oo rupi omba'eapo va'e kuery peguarã ome'ê okuapy cento e sessenta e cinco mil quilos ouro anho rei va'e, dez mil hatã'i va'e ouro guigua, trezentos e trinta mil quilos prata guigua, sessenta mil quilos overa va'e guigua, ha'e gui três milhões e trezentos mil quilos ferro guigua.

⁸ Ita iporãve va'e oguereko va'e ogueru avi okuapy SENHOR pegua opy omoĩ porãaty pyguarã. Ha'e nunga re Gêrson ramymino Jeiel opena aguã rami oiko.

⁹ Ha'e rami vy heta va'e kuery ha'e javi ovy'apa okuapy ome'êxea'i py ome'êmba vy. Mba'eta anhetẽ rupi ipy'a reve SENHOR pe ome'ê oata aguã rami e'ỹ. Ha'e ramo huvixa Davi voi ovy'a vaipa avi.

Davi onhembo'eague

¹⁰ Ha'e gui onhemboaty va'e kuery ha'e javi oendua py Davi oguerovy'a SENHOR. Ha'e vy aipoe'i:

— SENHOR Israel kuery ruete, Oruete reiko va'e, ndere ae ta'ima'endu'a porãa yma ete guive raka'eva rã peve.

¹¹ SENHOR, ndere ae oĩ po'akaa, tuvixaa, ima'endu'a porãa aguã, opa mba'e re ndepo'aka aguã, ha'e yvatea. Mba'eta nembra'e meme oĩ yva ha'e yvy re ikuai va'e. SENHOR, ndere ae oĩ ndepo'aka aguã, ha'e pavẽ ikuai va'e áryve rupi ndeyvateve va'e repenaa py.

¹² Ndegui ae ou amongue oguerokopa aguã, ombotea guive. Ndee ma ha'e javi áry rupi repena va'e. Ndepo py ae oĩ mbaraetea ha'e po'akaa. Ndere anho oĩ renhomboyvatea ha'e renhombaratepa aguã.

¹³ Ha'e gui aỹ ma Oruete, roguerovy'a vy rogueroporaie rokuapy nderery hexakãmba va'e rupi.

¹⁴ Mba'eta mava'e tu xee aiko, xevyguia kuery voi mava'e regua tu ikuai kova'e regua ha'e javi rome'êxea'i py rome'ê aguã ha'eve va'e? Mba'eta ndegui meme ou opa marãgua, ha'e ndepo guiguare meme rome'ê ju.

¹⁵ Mba'eta ore kuery ma nerenonde rupi oikuaapy e'ỹ rami orekuai, oreramoĩ kuery ikuaiague rami ore kuery voi oguata rei va'e orekuai. Ore kuery ára ma kuaray'ã okanhya rami oaxa pojava avi vyv re, ropyta riae aguã ndoroguerekoi va'e vy.

¹⁶ Ha'e gui SENHOR Oreruete, kova'e nunga oata aguã rami e'ỹ rojou va'ekue petei oo rojapo aguã nderery iky'a e'ỹ va'e rendarã. Ha'e rami avi ndepo gui ae ou va'ekue, namba'e meme ae.

¹⁷ Ha'e gui Xeruete, xee aikuaa porã orep'y'a re oi va'e reikuaapa va'ea, ha'e anhetê va'e rupi ikuai va'e anho rerovy'a va'ea. Ha'e gui xee voi xepy'a py anhetê rupi aiko vy kova'e nunga ha'e javi ame'êxea'i py ame'ê. Ha'e rami ae avi ndevygua kuery apy onhemboaty va'e ome'êxea'i py mba'emo ndevy ome'êmba rã aexa vy avy'a vaipa.

¹⁸ Ha'e nunga rupi SENHOR, oreramoĩ Abraão, Isaque ha'e Israel ruete reiko va'e, emoĩ riae ke ndevygua kuery py'a re ha'e rami onhembopy'a ha'e ome'êmbaxe aguã. Ipy'a re emoĩ avi ndevy ete ikuai aguã.

¹⁹ Xera'y Salomão re voi emoĩ anhetê rupi ipy'a aguã, rejapo uka va'ekue ojapopa aguã rami, ndeayvua ha'e ndeguigua lei ha'e javi guive. Tojapopa kova'e oo xee mba'emo areko katu rire — he'i.

²⁰ Ha'e gui Davi aipoe'i onhemboaty va'e kuery ha'e javi pe:

— Aỹ peporai SENHOR Penderuete pe — he'i. Ha'e ramo onhemboaty va'e ha'e javive oguerovy'a okuapy SENHOR guamoĩ kuery ruete. Yvy re oakã omovaê reve omboete okuapy SENHOR, nguvixa renonde guive ojero'a okuapy.

²¹ Ko'ê jevy ma ha'e kuery ogueru SENHOR pe ome'ê va'erã. Ha'e vy ixupe oapy okuapy mil vaka ra'y, mil vexa'i ra'y ha'e mil vexa mba'emo rykue onhoê reve. Ome'ê mbyre guigua Israel kuery pe oata aguã rami e'ỹ ombojoja.

²² Mba'eta ha'e va'e ára okaru ha'e oy'u okuapy SENHOR renonde, ovy'a ete guive.

Salomão nguvixaverã omoĩ okuapyague

Ha'e gui mokoĩguea py ma Davi ra'y Salomão omoĩ okuapy nguvixaverã. Ha'e vy SENHOR renonde hexe omoĩa azeite huvixaverã, ha'e rã Zadoque re ma omoĩ sacerdote-rã.

²³ Ha'e ramo Salomão oguapy oiny SENHOR pegua tenda openaaty py, nguu Davi rekovia huvixave oi vy. Ha'e rire oiko porã, ha'e rã Israel kuery ha'e javi onhe'ê rendu okuapy.

²⁴ Ha'e rami vy yvatekueve, omboetevepy ha'e Davi ra'y kuery mboae oguerovy'a okuapy huvixa Salomão.

²⁵ SENHOR voi omboyvate ete Salomão Israel kuery renonde rupi. Ha'e vy ixupe ome'ê huvixave rami ipo'aka aguã. Ha'e oi e'ỹ mbove nei peteive Israel regua huvixa noi teri ha'e rami ete yvateve va'e.

Davi omanoague

²⁶ Jessé ra'y Davi ma Israel kuery ha'e javi re opena va'ekue.

²⁷ Quarenta ma'etỹ re opena Israel kuery re. Hebrom py ranhe sete ma'etỹ re oi, ha'e gui Jerusalém tetã py ju trinta e três ma'etỹ re opena.

²⁸ Tuja'i raxa ma vy omano, heta ára oguereko reve. Iporiau e'ỹ re ha'e ipo'akapa va'e omano. Ha'e rã ta'y Salomão oi nguu rekovia.

²⁹ Ha'e gui huvixa Davi mba'emo ojapo va'ekue jypy guive opaa peve omboparaa ma imoiny kuaxia profeta Samuel, profeta Natã ha'e Gade ombopara va'ekue py voi.

³⁰ Oi avi ha'e opena jave py mba'emo oiko va'ekue ha'e javi, ipo'akaa ha'e hexe opa mba'e oiko va'ekue, Israel kuery ha'e vyv mboae re ikuai va'e ha'e javi re voi.

Mokoia Crônicas huvixa kuery rekokue oia

Mokoia crônicas huvixa kuery rekokue oia

Kova'e kuaxia para re ma nomombe'ua vaipai Israel kuery regua ikuai, ha'e rã Judá regua anho. Ha'e rami vy omombe'u huvixa Salomão Senhor pegua templo ojapoague. Ojapopaa ma ramo Salomão oguero'vy'a ho'amy Nhanderuete, ijayvu guive ixupe heta va'e kuery ojapukai aguã re. Ha'e ramo Senhor ombovai: "Xapy'a rei xe'vygua kuery xerery rupi ae aeno'i va'ekue onhemo'yvy'i vy onhemo'ea rupi xereka, ha'e gueko vaia gui ojeko rerova ri ramo xee aendu 'rã yva re aia gui. Ha'e vy aperdoa 'rã ojevavyague ha'e amoingo porã ju 'rã ijyvy regua", he'i (7.14).

Opa py omombe'u porãve mba'e re pa escravo-rã Nhanderuete ogueraa ukaague Judá kuery. Aipoe'i: "Senhor tamoi kuery Ruete va'e ma yma guive te'i ijayvu ha'e kuery pe, ayvu mombe'ua kuery pe oayvu omombe'u uka tema, ojeuepegua kuery omboaxy ha'e ojeuepegua oo re oma'ẽ vy. Ha'e rami te'i ha'e kuery ma Nhanderuete ayvu mombe'ua kuery ombojaru rei vy noendu potai, ojojai rei guive okuapy profeta kuery. Ha'e ramo Senhor ojeuepegua kuery rovai opoxya ombou ramo ha'e kuery pe noive ma oo jepe aguã", he'i (36.15-16).

Gibeão py Nhanderuete pe Salomão mba'emo ome'ẽague

1 Reis 3.3,4

¹ Davi ra'y Salomão imbarateve tema ovy openaa rupi. Hexeve SENHOR tuuete oiko vy omboyvateve tema.

² Ha'e gui Salomão ijayvu Israel kuery ha'e javi pe, xondaro kuery mil ha'e cem ikuai va'e re opena va'e, nhomboayvu va'ety, Israel regua yvatekueve ha'e hetarã kuery akã ikuai va'e pe guive,

³ ha'e kuery ha'e javi reve oje'oi aguã Gibeão py ombojeroviaaty yvy'ã re oi va'e py, mba'eta ha'e py ma oi oguy nhemboaty oi atyrã tekoa e'ya py SENHOR rembiguai Moisés ojapo va'ekue.

⁴ Ha'e rã Nhanderuete ayvu ryrũ ma Quiriarte-Jearim gui Davi ogueru ruka ma vy omoi hendarã oguereko katu ma voiaque py, Jerusalemi tetã py ae petei'oi ojapo va'ekue py.

⁵ Ha'e rã altar overa va'e guigua Uri ra'y Bezalel, Hur ramymino ojapo va'ekue ma SENHOR ombojeroviaaty renonde py oi. Ha'e py ae Salomão guetarã kuery reve oje'oi SENHOR pe oporandu okuapy aguã.

⁶ Ha'e py SENHOR renonde py ma Salomão ome'ẽ mymba kuery, oguy nhemboaty oiaty py altar overa va'e guigua oi va'e áry. Ha'e va'e áry ma mil mymba oapy reve ome'ẽ.

1 Reis 3.5-15

⁷ Ha'e va'e pyavyve Nhanderuete ojexa uka Salomão pe. Ha'e vy aipoe'i:

— Ejerure ke xe'vy reipota va'e re, ha'e rã xee ame'ẽ 'rã.

⁸ Salomão ombovai:

— Xeru Davi pe rexa uka raka'e opa mba'e py reayvua. Ha'e gui xee ju xemoi hekovia.

⁹ Ha'e gui aỹ ma SENHOR Xeruete, ejapo xeru Davi pe ndeayvuaque, ndee ae huvixarã xemoi rire kova'e kuery yvy ku'i rami heta ikuai va'e re apena kuaa aguã.

¹⁰ Aỹ gui ma eme'ẽ xe'arandurã ha'e aikuaa aguã, kova'e kuery areko kuaa aguã rami. Mba'eta mava'e 'rã tu oguereko kuaa kova'e kuery heta va'e? — he'i.

¹¹ Ha'e rami rã Nhanderuete aipoe'i Salomão pe:

— Ha'e ramigua ae ndepy'a re oi ramo nderejerurei mba'emo rerekopa aguã re, nembra'e rei-reirã, nei renhemboyvate aguã re, ndere ija'e e'y va'e kuery omano aguã re, nei reiko pukuve aguã, ha'e rami 'rãgue py ne'arandurã ha'e reiko kuaa aguã re ae rejerure xe'vygua kuery rereko kuaa aguã, huvixarã romoi rire.

¹² Ha'e ramo ndevy pe xee ame'ẽ ae 'rã ne'arandurã ha'e reiko kuaa aguã. Ame'ẽ avi 'rã nandeporiauvei ha'e rerekopa aguã, romboyvate 'rã guive. Ha'e ramigua nei peteive huvixa pe ma voi nome'ẽai va'ekue ndee rei e'y mbove, ha'e ndee nereivei ma rire ndoikovei 'rã ndee rami guarã — he'i.

¹³ Ha'e gui ma Salomão ma Gibeão py yvy'ã re ombojeroviaaty oi va'e gui ojevuy Jerusalemi tetã katy, oguy nhemboaty oiaty renonde oiague gui guive. Ha'e rami vy Israel kuery re opena oikovy ha'e py.

1 Reis 10.26-29

¹⁴ Salomão ma karóxa ha'e kavaju áry guarã oguerekopave ovy. Mil e quatrocentos karóxa oguereko, ha'e doze mil kavaju áry guarã. Ha'e va'e ma joa py e'y-e'y 'rã oguereko tetã karóxa ikuaiaty rupi, Jerusalemi py ngoo katy'i guive.

¹⁵ Jerusalemi tetã py ma prata ha'e ouro ma ita rami rive huvixa omboetave, yvyra yary voi ojapo sicômoro'y tekoa e'ya rupi ikuai va'e rami oata e'y aguã.

¹⁶ Salomão rymba kuery kavaju ma Egipto ha'e Cilícia gui ogueru. Cilícia guigua ma huvixa rembiguai mba'emo vendea kuery ogueru hepy oia rami.

¹⁷ Ha'e rã karóxa ma Egipto yvy gui 'rã ogueru. Petei-te'i repy ma seiscentos hatã'i va'e repy prata guigua, ha'e rã kavaju repy ma cento e cinqüenta. He'e rami ae avi mba'emo vendea kuery amboae katy 'rã ogueraa hetu ha'e Síria pygua huvixa kuery peguarã.

2

1 Reis 5.1-12

¹ Ha'e gui ma Salomão onhembopy'a templo ojapo aguã SENHOR rery oi atyrã, ngoo opena atyrã guive.

² Ha'e rami vy Salomão omoī setenta mil avakue mba'emo reraarā, ha'e oitenta mil ju vyvty ikuai va'e gui ita mbovoarā, ha'e gui três mil e seiscentos ju omba'eapo va'e kuery re opena va'erā.

³ Ha'e gui Salomão aipoe'i uka Tiro pygua huvixa Hirão pe:

— Xeru Davi ndee reipytyvō vy ngoorā ojapo aguā ixupe vyvra yary reme'ē va'ekue. Ha'ekue rami ae ju ke xepytyvō.

⁴ Mba'eta ma'ē, xee aiko peteī oo SENHOR Xerue te rery oī atyrā ajapo aguā rami. Ixupe guarā ae amboaxa 'rā, henonde py heakuā porā va'e oapya aguā ha'e henonde mbojape omoīa riae jepi aguā, ha'e gui aje'ive ha'e ka'aru nhavō mymba kuery oapy reve ome'ēa aguā, sábadu nhavō, ha'e jaxy pyau jave guarā, ha'e gui ngaru SENHOR Oerue te pe oikoa ára py guive. Mba'eta ha'e rami aguā ae ha'e oeja raka'e ore Israel kuery rekorā raka'e 'rā peve guarā.

⁵ Ha'e gui oo ajapo va'erā ma tuvixa 'rā, mba'eta Oerue te ma tuuete ra'angaa ikuai va'e gui yvateve va'e.

⁶ Ha'e rami avi mava'e 'rā tu ojapo kuaa oo ixupe guarā? Mba'eta yva oī va'e, ha'e yva yvatea peve nda'evei ha'e oī aguā. Mava'e tu ha'vy xee aiko oo ixupe guarā ajapo aguā, henonde heakuā porā va'e oapya aguā e'y vy?

⁷ Ha'e nunga rupi aỹ emondouka xea katy peteī ava ouro re omba'eapo kuaa va'e, ha'e prata re, overa va'e, ferro, púrpura guigua, pytā ha'e hovy va'e guigua re, vyvra ombojegua kuaa va'e, xereve Judá ha'e Jerusalém py mba'emo ojapo kuaa va'e kuery ikuai va'e reve omba'eapo va'erā. Ha'e va'e kuery ma xeru Davi omba'eapo va'erā omoī va'ekue.

⁸ Emondouka avi Líbano gui vyvra yary, cipreste ha'e sândalo aygue. Mba'eta xee aikuaa porā nerembigui kuery oikuaa vyvra Líbano regua ojaya aguā. Ne'exa, apy xerembigui kuery ikuai va'e ma nerembigui kuery reve 'rā omba'eapo okuapy

⁹ vyvra omoatyō retaa py. Mba'eta oo ajapo va'erā ma tuvixa ha'e iporā raxa 'rā.

¹⁰ Ha'e ramo nerembigui vyvra ayaa kuery pe xee ame'ē 'rā trinta mil ryru trigo ku'ikue, vinte mil ryru cevada, vinte mil ryru uva rykue, ha'e vinte mil ryru avi azeite — he'i.

¹¹ Ha'e ramo Tiro pygua huvixa Hirão ombovai vy kuaxia para ombou Salomão pe. Ha'e vy aipoe'i:

— Ndevygua kuery oayvu vy ae SENHOR nemoī huvixaverā — he'i.

¹² Hirão aipoe'ive ju:

— Ima'endu'a porāmbi toiko SENHOR Israel kuery ruete yva ha'e vvy apoare. Ha'e ma huvixa Davi pe ome'ē avi raka'e peteī ta'y hi'arandu va'erā, oiko kuaa ha'e mba'emo oikuaapa va'e, oo SENHOR peguarā ojapo va'erā, ha'e gui ha'e ae opena atyrā guive.

¹³ Ha'e nunga rupi aỹ ambou 'rā peteī ava oikuaapa ha'e hi'arandu raxa va'e, Hirão-Abi hery va'e.

¹⁴ Ha'e va'e xy ma Dā ramymino kuery regua, ha'e rā tuu ma Tiro tetā pygua ae. Ha'e ma mba'emo ojapo kuaa 'rā ouro gui, prata, overa va'e, ferro, ita ha'e vyvra gui, ajukue púrpura, hovy va'e, ipererī'i va'e ha'e pytā va'e gui. Ha'e ma vyvra ombojegua kuaa 'rā ixupe raxa ukua rami rei, ndevygua ha'e xeruvixa Davi nderu oiko va'ekue pegua omba'eapo va'e kuery ha'e javi reve.

¹⁵ Ha'e gui aỹ ma xeruvixa, xea py xerembigui kuery ikuai katy eraa uka trigo, cevada, azeite ha'e vinho ndeayvuague.

¹⁶ Ha'e ramo ore kuery ma Líbano vvy re rojayapa 'rā vyvra reipotaa rami. Ha'e gui ye'ē rupi 'rā romondouka ojokua-jokua pyre Jope tetā peve. Ha'e gui ndee ju 'rā reru ruka Jerusalém katy — he'i.

1 Reis 5.13-18

¹⁷ Ha'e gui ma Salomão oipapa ukapa avakue amboae guigua Israel vvy re hekoa va'e, nguu Davi ojapoague rami. Ha'e rami vy oikuaa cento e cinqüenta e três mil e seiscentos ha'e javi vy.

¹⁸ Ha'e kuery va'e regua omoī setenta mil mba'emo reraarā, oitenta mil vyvty rupi ita mbovoarā, ha'e gui três mil e seiscentos ju omba'eapo va'e kuery re opena va'erā.

3

1 Reis 6.1-10

¹ Ha'e gui ma Jerusalém tetā py Salomão omboypy oo SENHOR peguarā ojapo aguā, Moriá vyvty áry. Ha'e py ma tuu Davi pe SENHOR ojexa ukaague, ha'e jebuseu Ornā mba'emo moa'yjaty py Davi oiporavo va'ekue.

² Salomão irundy ma'et'ya re ma huvixa oī jave py, mokoī jaxya re ha'e mokoī araa py omboypy ojapo aguā.

³ Po rami ma Salomão oa'ā Nhanderuete pegua oo rendarā: ipuku-a ma vinte e sete metros ymave rupi oa'āague rami vy, ha'e rā ipya ma nove metros.

⁴ Henonde py oguy oī va'e ipya ma nove metros, henda iky'a e'y va'e ipya rami ae. Yvateve avi nove metros. Opy rupi ma ouro ete py onhovāmba.

⁵ Ha'e gui opy ja'o tuvixave va'e mbotya rupi ma vyvrape cipreste guigua anho omoī, ha'e ouro ete py ju onhovāmba. Ha'e va'e rupi ombojegua imoiny pindo rakā ha'e corrente ra'angaa py.

⁶ Opy ja'o ombojegua avi ita iporāve va'e ha'e ouro Parvaím guigua py.

⁷ Ouro ete py onhovāmba opy rupi: vyvra hi'áry rupigua, okē yta, hi'áry rupigua ha'e okē ikuai va'e ha'e javi. Oo mbotya ha'e javi rupi ma ombojegua anjo ipepo va'e ra'angaa py.

⁸ Ojapo avi henda iky'a e'y ete va'erā. Ipuku-a ha'e ipya ma nove metros, opy ja'o tuvixave va'e rami avi ipya. Onhovāmba ouro ete vinte mil quilos va'e py.

⁹ Ha'e rā karavo oiporu va'e ma cinqüenta hatā'i va'e ouro guigua rami ipoyi va'e. Opy ja'o yvate rupi ikuai va'e voi onhovāmba ouro py.

1 Reis 6.23-28

¹⁰ Ha'e gui henda iky'a e'ÿ ete va'e pyguarã ma yvyra gui ojapo avi mokoĩ anjo ipepo va'e ra'angaa. Ouro py ju onhovã.

¹¹ Anjo pepo ha'e javi oipyo imoinya ma nove metros. Peteĩ va'e regua pepo ma mokoĩ metros raxa'i ipuku-a va'e, ha'e oo mbotyá re ovaẽ oiny. Ha'e rã amboae pepo mokoĩ metros raxa'i ipuku avi va'e ma ovaẽ oiny amboae anjo hi'ái va'e pepo re.

¹² Amboae anjo pepo voi mokoĩ metros raxa'i ipuku va'e, ha'e oo mbotyá mboae re ovaẽ oiny. Ipepo mboae voi mokoĩ metros raxa'i ipuku va'e avi, ha'e amboae anjo pepo re ovaẽ oiny. Mokoĩve anjo pepo ha'e javi vy ma nove metros ipuku-a va'e.

¹³ Ha'e rami vy omopu'ã imo'amy mokoĩve, henda iky'a e'ÿ va'e katy oma'ẽ ho'amy aguã rami.

¹⁴ Okêrã ojapo avi hovy va'e, púrpura, pytã va'e ha'e ajukue iporãve va'e gui. Ombojegua avi imoinya anjo ipepo va'e ra'angaa py.

1 Reis 7.15-22

¹⁵ Oo yvy'iry ojapo avi mokoĩ oo ytarã dezesseis metros yvatea va'e. Peteĩ-teĩ áry guarã ma mokoĩ metros raxa'i yvatea va'e.

¹⁶ Ojapo avi corrente henda iky'a e'ÿ va'e py oĩ va'e rami guarã. Ha'e va'e ma omoĩ ijyta hi'ái va'e áry. Ojapo avi cem yvyra'a ra'angaa, ha'e vy corrente re omoĩ.

¹⁷ Oo ytarã ma omopu'ã imo'amy templo rokẽ py. Peteĩ ma omopu'ã oiporu kuaa regua re, ha'e rã amboae ma oiporu kuaa e'ÿa re. Oiporu kuaa regua re omopu'ã va'ekue ma omboery Jaquim, ha'e rã oiporu kuaa e'ÿa re omopu'ã va'ekue ma omboery Boaz.*

4

1 Reis 7.23-26

¹ Ojapo avi peteĩ altar overa va'e guigua. Ipuku-a ma nove metros, ipya ma nove metros avi, ha'e rã yvatea ma irundy metros raxa.

² Overa va'e ryku gui ojapo avi peteĩ yy mbotyará. Ha'e va'e ma ojere rei va'e, irundy metros raxa ipya va'e, ha'e rã yvatea ma mokoĩ metros raxa'i. Ha'e gui ijyke rupi ixã treze metros raxa'i va'e oa'ãa.

³ Iguýry rupi ma omoĩ hy'akua ra'angaa, meio metro-a py dez kuerei 'rã omoĩ. Mokoĩ ryxy omoĩ, yy mbotyá reve jojavi ojapo vy.

⁴ Yy mbotyá ma doze vaka ra'angaa áry oĩ. Mboapy ma kuaray ijapu'a'ia katy hi'ái, mboapy ma oikea katy, mboapy ma ipuku-a katy, ha'e rã mboapy ma kuaray oua katy hi'ái. Hevi ma mbyte katy ovaẽ oiny. Ha'e va'e kuery áry ae yy mbotyá oĩ.

⁵ Ipo guaxua ma irundy kuã oĩa rami. Ijvyrykyue ma karo rami hembe va'e, yvoty rami ojekuaa. Yy henyẽa ma sessenta mil litros rivyvvy va'e.

1 Reis 7.27-50

⁶ Ojapo avi dez hy'a. Ha'e va'e regua ma peteĩ nhiruĩ omoĩ oiporu kuaa regua re, ha'e rã peteĩ nhiruĩ ma hovai re. Ha'e va'e ma ojoia aguã mba'emo oapy reve ome'ẽ mbyrã. Ha'e rã hy'a guaxu oĩ va'e ma sacerdote kuery anho ojejoĩ aguã.

⁷ Ouro gui ojapo avi dez tataendy 'yrã, ojapo ukaague rami ae. Ha'e va'e ma omoĩ templo py. Peteĩ nhiruĩ omoĩ oiporu kuaa regua re, ha'e rã peteĩ nhiruĩ avi hovai re.

⁸ Ojapo avi dez mesa-rã. Ha'e va'e voi omoĩ templo py. Peteĩ nhiruĩ ma oiporu kuaa regua re omoĩ, ha'e peteĩ nhiruĩ avi hovai re. Ha'e gui ojapo avi cem hy'a ouro gui.

⁹ Oka korarã ojapo avi sacerdote kuery anho ikuai aguã, ha'e gui oka tuvixa va'e. Ha'e va'e rokêrã ojapo vy onhovãmba overa va'e py.

¹⁰ Yy mbotyá ma omoĩ oiporu kuaa regua re, kuaray puku-a yke katy.

¹¹ Ha'e gui ma Hirão ojapo avi oja, pá iky'a'oarã ha'e hy'a. Ha'e rami py ojapopa ma Nhanderuede pegua oo pyguarã huvixa Salomão pe ojapo 'rã va'ekue.

¹² Ha'e va'e ma oo yta mokoĩ va'e, mokoĩ ijyta árygua ojere rei va'e, ha'e gui mokoĩ kya yta árygua ojere rei va'e ao'iarã ojapopa.

¹³ Quatrocentos yvyra'a ra'angaa ojapo avi mokoĩ kya oĩ va'e reguarã, peteĩ-teĩ kya re mokoĩ ryxy yvyra'a oĩ aguã. Ha'e va'e py ma ojao'i ojere rei va'e mokoĩ oo yta áry oĩ va'e.

¹⁴ Ojapo avi hy'arã ijyta reve,

¹⁵ ha'e gui yy mbotyá, hendarã doze vaka ra'angaa ikuai va'e reve.

¹⁶ Ha'e rami py huvixa Salomão pe Hirão-Abi ojapopa oja, pá iky'a'oarã, kuxa rakua ha'e tembiporu ha'e javi. Overa va'e oiky'a'o pyre gui ojapo SENHOR pegua oo pyguarã.

¹⁷ Jordão yakã katy'i yvy'ã guy py yvy yapo revegua oĩa py ae huvixa ojapo uka overa va'e ryku gui, Sucote ha'e Zeredã mbyte py.

¹⁸ Ha'e va'e ha'e javi ma oata aguã rami e'ÿ Salomão ojapo uka. Neĩ overa va'e ipoyia ma voi ndopejaai.

¹⁹ Salomão ojapo uka avi tembiporu henda SENHOR pegua iky'a e'ÿ va'e pyguarã: altar ouro guigua, mesa ouro guigua hi'áry SENHOR renonde mbojape omoĩa aguã,

²⁰ tataendy ha'e hi'y ouro ete'i guigua meme, gueko rami vy henda iky'a e'ÿ ete va'e renonde rupi omoendy aguã,

²¹ yvoty ra'angaa, tataendyrã ha'e tapyĩ jopyarã ma ouro guigua meme.

* 3:17 Tery Jaquim ma "Imoĩ atãa" 'ea, ha'e rã Boaz ma "Imombaraetea" 'ea, Nhanderuede re ima'endu'aa rupi omboery vy.

²² Ha'e gui tapyī araa, hy'a, hy'a'i heakuā porā va'e oapy atyrā, tapyī ryrurā ma ouro ete'i guigua meme. Ha'e gui oo oike atyrā, henda iky'a e'y ete va'e rokē ha'e templo ropy henda iky'a e'y va'e rokē ma ouro gui meme ojapo.

5

1 Reis 7.51

¹ Ha'e rami py huvixa Salomão ojapo ukapa oo SENHOR peguarā. Ha'e py ogueru avi mba'emo nguu Davi omboaxa va'ekue: prata ha'e ouro guigua, tembiporu ha'e javi guive omoī SENHOR pegua oo re mba'emo hepyve va'e reve.

1 Reis 8.1-11

² Ha'e gui Salomão omboatyapa Israel regua nhomongeta va'ety kuery, petei-tei regua akā ikuai va'e, Israel regua yvatekueve guive. Jerusalém py ae omboaty tetā Davi rekoague Sião va'e gui templo katy ogueru aguā SENHOR guexeve guarā ojapo va'ekue rryru.

³ Ha'e ramo avakue Israel regua ha'e javi onhemboatyapa okuapy huvixaa py. Ngaru ojapoa py ijaty sete jaxya py.

⁴ Israel regua nhomongeta va'ety kuery oupa ramo levita kuery hyru oupi vy

⁵ oguerova heravy yvy'ā katy. Ogyu nhemboaty oiaty reve oguerova, ha'e tembiporu iky'a e'y va'e ha'e py ikuai va'ekue ha'e javi. Levita regua sacerdote ikuai va'e ae ogueraa.

⁶ Ha'e rā huvixa Salomão ha'e Israel kuery onhemboaty va'ekue ha'e javi reve ma hyru renonde rupi oje'oi. Vexa'i ha'e vaka ojuka oje'oi. Mymba kuery heta raxa ramo oipapaa aguā voi nda'evei.

⁷ Ha'e gui SENHOR guexeve guarā ojapo va'ekue rryru ma sacerdote kuery omoī okuapy oī aguā py ae, templo ropyve henda iky'a e'y va'e py, henda iky'a e'y ete va'e py ae, anjo ipepo va'e ra'angaa ikuai va'e pepo guy py.

⁸ Mba'eta anjo pepo ma oipyo imoiny hyru itui aguā áry rupi. Ha'e rami vy yvate rupi ojao'i hyru ha'e yvyra po'i'i hi'yra ikuai va'e.

⁹ Yvyra po'i'i ipuku ete ramo henda iky'a e'y va'e gui ojekuaa henda iky'a e'y ete va'e rexe'i. Ha'e rā oka katy gui ma ha'e nunga ndojekuaai.

¹⁰ Ha'e py ma itui a'y peve. Ha'e gui hyru py ma mba'eve nda'ipoi itape Moisés Horebe py omoī va'ekue e'y vy. Egitto gui Israel kuery oje'oi'pa jave py guexeve guarā SENHOR ojapo va'ekue.

¹¹ Ha'e gui sacerdote kuery oēmba ju henda iky'a e'y va'e gui. Ha'e va'e jave guarā sacerdote ikuai va'e ha'e javi ojeky'a'ouka ma voi va'ekue, ha'e va'e ára omba'eapo aguā rami ikuai va'e anho e'y.

¹² Levita kuery oporaei va'e ha'e javi ikuai avi ha'e py. Ha'e kuery va'e regua ma Asafe, Hemā, Jedutum ha'e tyvy kuery. Ha'e kuery ma ajukue ipereri'i va'e py onhemonde reve opu'amba okuapy altar yvyry, kuaray oua katy. Hy'a pu, mbaraka ha'e ixā reta va'e reve ikuai. Ha'e kuery reve ikuai avi cento e vinte sacerdote mimby guaxu monhe'ēa kuery.

¹³ Ha'e jave py petei rami omombe'ē okuapy mimby guaxu ha'e oporaei okuapy pavē oendu aguā rami, SENHOR oguerovy'a ha'e omboetea rupi. Ha'e rami vy oporaei atāve tema mimby guaxu, hy'a pu ha'e mba'epu mboae reve SENHOR mboetea rupi, "Mba'eta ha'e ma porayvu va'e, iporayvua ma opa va'erā e'y", he'ia rupi. Ha'e rami rā petei arai ou vy omonyē templo SENHOR pegua opy rupi.

¹⁴ Ha'e ramo sacerdote kuery nda'evei opy rupi omba'eapo aguā, arai SENHOR guigua rexakāa oīa opy rupi omonyē ramo.

6

1 Reis 8.12-21

¹ Ha'e gui Salomão aipoe'i:

— SENHOR aipoe'i va'ekue petei arai ana mbyte oī aguā re.

² Ha'e ramo SENHOR, xee ajapo petei oo raka'e rā peve rei aguā — he'i.*

³ Ha'e gui ma huvixa ojere ju vy ogueroyvu porā Israel kuery onhemboaty va'e kuery ha'e javi, opu'amba teri okuapy reve.

⁴ Ha'e vy aipoe'i:

— Ta'ima'endu'a porāa SENHOR Israel kuery ruete re, mba'eta xeru Davi pe ijayvuague ojapopa ma opo'akaa rupi. Ha'e vy aipoe'i va'ekue:

⁵ "Egitto yvy gui xevyguia kuery Israel regua aipe'apa ára guive, Israel kuery ikuai tetā nei petei ve ndaiporavoi ha'e py petei oo rejapo aguā xerery amoī aguā. Ha'e rami ae avi nei petei ve ava ndaiporavoi va'ekue Israel kuery ruvixarā.

⁶ Ha'e rami avi aiporavo Jerusalém ha'e py xerery oī atyrā, ha'e Davi voi aiporavo avi xevyguia kuery Israel regua ruvixarā", he'i va'ekue.

⁷ Ha'e rami avi xeru Davi opy'a re omoī petei oo SENHOR Israel kuery ruete rery oī atyrā ojapo aguā.

⁸ Ha'e rami tei xeru Davi pe SENHOR aipoe'i: "Petei oo xerery oī atyrā rejapoxea py ha'evea rami ndepy'a re remoi ha'e rami aguā.

* 6:2 Nhandruete Moisés reve ijayvu jave aipoe'i va'ekue arai pytia py oī aguā, heta va'e kuery ijayvua oendu tei oexa e'y aguā (Êxodo 19.9). Ha'ekue rami ae avi templo ropy henda iky'a e'y ete va'e py SENHOR avyu rryru oīa py ma pytū rei, janēla noi, ha'e oikeaty onhemboty ramo, ajukue hokērā omoī mbyre Jesus omano jave omondoroa peve (Mateus 27.51).

⁹ Ha'e rami teĩ ndee e'ỹ 'rã oo rejapo, ha'e rã ndera'y ndegui oiko va'ekue ae 'rã ojapo xerery oĩ atyrã", he'i raka'e.

¹⁰ Ha'e rami rire SENHOR ojapopa ma ijayvuague, mba'eta xeru Davi rekovia xee aĩ vy aguapy ma ainy tenda Israel kuery re openaaty áry, SENHOR ijayvuague rami vy. Ha'e rami vy ajapo ma oo SENHOR Israel kuery ruete rery oĩ atyrã.

¹¹ Ha'e py ma amoĩ avi ijayvu ryrú. Ha'e va'e py oĩ itape Israel kuery reve SENHOR guexeve guarã ojapo va'ekue oĩa.

1 Reis 8.22-53

¹² Ha'e gui ma Israel kuery ha'e javi oexaa py Salomão oĩ SENHOR pegua altar renonde py. Ha'e vy opo oupi ho'amy.

¹³ Mba'eta Salomão ojapo uka ma voi va'ekue peteĩ pyrõarã overa va'e guigua. Ha'e va'e puku-a ha'e ipya ma mokoĩ metros raxa'i va'e, ha'e rã yvatekuea ma peteĩ metro raxa'i. Ha'e va'e oka mbyte py omoĩ rire hi'áry hi'ái vy guenapy'ã re oĩ Israel kuery ha'e javi oexaa py. Ha'e vy yva katy opo oupi vy

¹⁴ aipoe'i:

— SENHOR Israel kuery ruete, yva re neĩ vyv re ndoikoi amboae ndee rami guarã ete, mba'eta nerembiguaĩ kuery opy'a ha'e javi py nerenonde rupi ikuai va'e ndee rereko 'rã ndereve guarã rejapo va'ekue rami, ha'e remboaxya rupi.

¹⁵ Mba'eta rejapo ae ma nerembiguaĩ xeru Davi pe ndeayvuague. Ndee ae ndeayvu rire ndepo'akaa rupi rejapo, aỹ roexaa rami ae.

¹⁶ Ha'e gui aỹ SENHOR Israel kuery ruete, ejapopa ke nerembiguaĩ xeru Davi pe ndeayvuague. Ha'e vy aipoe' re va'ekue: “Xerenonde ndoatai 'rã nderekovia tenda Israel kuery re openaaty áry oguapy oiny va'erã, xapy'a rei xerenonde rupi ndera'y kuery avi lei rupi ikuai aguã omoĩ porã ramo, ndee reikoague rami ae”, 're va'ekue.

¹⁷ Ha'e gui aỹ SENHOR Israel kuery ruete, tojeupity nerembiguaĩ Davi pe ndeayvuague.

¹⁸ — Ha'e rami avi ha'ev'e 'rã ri nda'u ndee Oreruete vyv re reiko aguã ore avakue reve? Ma'ẽ, mba'eta yva neĩ yva yvatevea rupi peve voi nandejai 'rã, ha'e vy kova'e oo xee ajapo va'ekue py katuve ma nda'ev'e 'rã.

¹⁹ Ha'e rami avi SENHOR Xeruete, endu pota ke xee nerembiguaĩ anhembo'e vy ajerurea re, rendu aguã aỹ nerenonde xee nerembiguaĩ ajapukai reve anhembo'ea.

²⁰ Ha'e rami vy ara py ha'e pyávy kova'e oo re rema'ẽ riae aguã, ha'e kova'e henda “Xerery oĩ atyrã”, 'reague re, kova'e henda py nerembiguaĩ onhembo'e oinya rendu aguã.

²¹ Ha'e gui aỹ, endu nerembiguaĩ ha'e Israel kuery ha'e javi kova'e henda py rojapukai rokuapya. Endu ke yva re reĩa gui. Endu ha'e orepdoa guive.

²² — Xapy'a rei amongue oirũ pe otekoavy ramo ha'ekue re omboayvua ramo ou vy kova'e ndevyguia opy altar oĩ va'e renonde py oura rambo

²³ endu ke yva re reĩa gui, ha'e embovai. Eikuaa pota nerembiguaĩ kuery re. Ha'e rami vy embopaga ojevavy va'ekue, hexe ae ojeapa aguã ojapo vaiague. Ha'e rã ha'ev'evea rami oiko va'e ma emboeko porã, ha'ev'evea rami oikoa repy reme'ẽ vy.

²⁴ — Ha'e gui xapy'a rei ndevyguia Israel kuery ndevy ojevavy 'rã, ha'e gui ngovaigua kuery renonde rupi ho'apa ma vy ndevy ju ojeko rerova 'rã okuapy. Ha'e vy nderery rupi ojapukai vy kova'e oo py nerenonde py onhembo'e ha'e ojerure ramo

²⁵ endu ke yva re reĩa gui, ha'e vy eperdoapa ndevyguia Israel kuery ojevavyague. Ha'e gui ejapo tuu kuery yvyrã reme'ẽ va'ekue katy ju ojevvy aguã rami.

²⁶ — Ha'e gui xapy'a rei yva rembotypa rã nda'okyvei 'rã, nderovai heta va'e kuery ojevavya rire, ha'e gui kova'e henda py onhembo'e okuapy vy nderery rupi ojapukai 'rã, ha'e remoingoo axy rire ojevavya gui ojeko rerova ramo

²⁷ endu yva re reĩa gui, ha'e vy eperdoapa nerembiguaĩ kuery, ndevyguia Israel kuery ojevavyague. Embo'e ju tape porã rupi ikuai aguã, ha'e embou noĩ oky vyv ndevyguia kuery ikuai aguã reme'ẽ va'ekue áry.

²⁸ — Ha'e gui ma xapy'a rei kova'e vyv re oiko 'rã karuai e'ỹ vy mba'eaxy vaikue, ha'e'ỹ vy hu'umbaa, hatãmba reia, e'ỹ vy tuku karu ha'e ape'i okaru va'e, xapy'a rei hovaigua kuery ojokopa 'rã ha'e kuery retã, ha'e'ỹ vy oiko 'rã ai vaikue e'ỹ vy mba'eaxy va'e rei,

²⁹ ha'e gui xapy'a rei mava'e rã rei onhembo'e vy ojerure 'rã, ha'e'ỹ vy ndevyguia Israel kuery ha'e javi 'rã ojerure okuapy, peteĩ-teĩ haxy va'e ha'e poriaua hexe oĩ va'e oendu vy kova'e oo oĩa katy opo omoĩ ramo

³⁰ endu ke yva re ne'amba py reĩa gui, ha'e vy eperdoa. Eme'ẽ peteĩ-teĩ pe oikoague repy, ha'e kuery py'a re oĩ va'e reikuapaa va'e vy, mba'eta ndee anho'i pavẽ py'a regua oikuaa va'e reiko.

³¹ Ha'e ramo nerenonde ha'e kuery ojererokyjea rupi ikuai aguã ndeguigua tape rupi, oreru kuery yvyrã reme'ẽ va'ekue re ikuaia pukukue re.

³² — Ha'e gui amboae regua voi, ndevyguia Israel kuery regua e'ỹ ikuai va'eri ovyv mombyrya gui ou avi 'rã nderery tuvixa va'e rupi ikuai aguã, ndejyva reupi vy ndepo'akaa rexa ukaague ha'e kuery pe omombe'ua rã oendu rire. Ha'e gui ha'e kuery onhembo'e avi 'rã kova'e oo oĩa katy oma'ẽ reve, ha'e ramo

³³ endu yva re ne'amba py reĩa gui, ha'e ejapopa amboae regua kuery ndevy ojerurea, ha'e rami vy vyv regua ha'e javi nderery oikuaa aguã, ndevyguia Israel kuery rami ha'e kuery voi nerenonde ojererokyjea rupi ikuai aguã, ha'e oikuaapa aguã kova'e oo xee ajapo va'ekue py nderery remoĩague.

³⁴ — Ha'e gui xapy'a rei ndevygu kuery oje'oi 'rã ngovaigua kuery reve joe opu'ã aguã katy, ha'e gui tape rupi remondoukaa py onhembo'e 'rã ndevy, kova'e tetã reiporavo va'ekue ha'e kova'e oo nderery oĩ atyrã rejapo uka va'ekue katy oma'ẽ ramo

³⁵ endu yva re reĩa gui onhembo'e vy ojerure okuapya, ha'e ejapo ha'evea rami.

³⁶ — Xapy'a rei ma ha'e kuery ojejavý 'rã nderovai (mba'eta jipoi ava ojejavý e'ý va'erã), ha'e ramo ha'e kuery rovai ndepoxy vy remboaxapa 'rã hovaigua kuery po py, ha'e kuery guekoa katy ogueraapa aguã escravo-rã, mombyry e'ý vy ha'e'i rupi teĩ ae ma.

³⁷ Ha'e gui vvy mamõ rã rei ogueraa ague re ikuai py ha'e kuery onhemboaxy vy ojeko rerova 'rã, ha'e vvy escravo ikuai py ae ndevy ojerure vy aipoe'i 'rã okuapy: “Rojejavypa, teko vai rupi anho orekuai va'ekue”, he'i 'rã, ha'e ndevy guarã ju ojeko rerova 'rã opy'a ha'e onhe'ẽ ha'e javi py.

³⁸ Ha'e rami vy vvy escravo-rã ogueraapaague py ae ndevy onhembo'e 'rã okuapy oyvyrã tuu kuery pe reme'ẽ va'ekue katy oma'ẽ reve, kova'e tetã ha'e kova'e oo nderery oĩ atyrã ajapo va'ekue katy guive. Ha'e ramo

³⁹ endu ke yva re ne'amba py reĩa gui ha'e kuery onhembo'e vy ojerure okuapya, ha'e ejapo ha'evea rami. Eperdoa ndevygu kuery nderovai rupi ojejavýague.

⁴⁰ — Ha'e gui aỹ ma Xeruete, nderexa tojepe'a, ha'e ndeapya toendu riaa apy rojerure rã.

⁴¹ Ha'e gui Xeruete, epu'ã ke, eike ejavy repytu'u aguã py, ndee ha'e ndeayvu ryru ndepo'akaa kuaa ukua va'e reve. SENHOR Oruete, tove ndevygu sacerdote kuery re toĩ reraa jepea kuaa ukua, ha'e ndevygu iky'a e'ý va'e kuery toguerovy'a iporã va'e.

⁴² SENHOR Oruete, eipytyvõ e'ý eme huvixaverã remoĩ va'ekue. Nema'endu'a ke nerembigui Davi reyvuague rami reiko riaa aguã re — he'i.*

7

Nhanderuete rexakãa templo ropy rupi tynyẽague

¹ Salomão onhembo'epa ma rire tata yva gui oguejy vy oapypa mymba kuery ome'ẽ va'erã ogueru va'ekue. Ha'e rami vy SENHOR rexakãa omonyẽmba opy rupi.

² Neĩ sacerdote kuery ma voi nda'evei ikuai va'eguã aguã SENHOR pegua opy, mba'eta opy rupi SENHOR rexakãa tynyẽ ramo.

³ Ha'e ramo Israel ramymino kuery ikuai va'e ha'e javi ma tata reve SENHOR rexakãa oo re oguejy rã oexa vy ojero'a okuapy oka py ikuai py. Ngova vvy re omovaẽ reve omboete okuapy. Oguerovy'a okuapy SENHOR poravyua ha'e nhomboaxya opa e'ý va'e.

1 Reis 8.62-66

⁴ Ha'e gui huvixa ha'e heta va'e kuery ha'e javi SENHOR renonde ome'ẽ okuapy mymba kuery.

⁵ Huvixa Salomão avi ome'ẽ vinte e dois mil vaka ha'e cento e vinte mil vaxa'i.

⁶ Ha'e rami py huvixa ha'e heta va'e kuery ha'e javi reve Nhanderuete pegua oo omboaxa okuapy ipo py. Sacerdote kuery ha'e javi ma peteĩ-teĩ oĩ aguã py ae ikuai, levita kuery ha'e rami ae avi mba'epu reve oporaei okuapy SENHOR pe. Ha'e va'e ma Davi ojapo uka va'ekue ha'e kuery SENHOR oguerovy'aa rupi oiporu va'erã, mba'eta iporavyua oĩ riaa 'rã. Ha'e kuery renonde py ma sacerdote kuery mimby guaxu monhe'ẽa ikuai avi. Ha'e rami vy Israel kuery ha'e javi opu'ãmba nhogueno'amy.

⁷ Ha'e va'e árave Salomão omboaxa avi oka SENHOR pegua oo rexei oĩ va'e. Mba'eta ha'e py ae ome'ẽ mymba oapy reve, hexeve peteĩ rami ju ikuai regua kyrakue guive. Mba'eta altar overa va'e guigua Salomão ojapo uka va'ekue py ma noĩmba reguai mymba oapy reve ome'ẽ va'e, mba'emo aju guigua ha'e hexeve peteĩ rami ikuai aguã regua kyrakue oapy va'e.

⁸ Ha'e rami py sete ára re Salomão ojapo ngaru. Hexeve ikuai avi Israel kuery heta ete ijaty va'e, Hamate tekoa py nhavaẽa'i ha'e Egitõ yakã katy'i guĩ ou va'ekue.

⁹ Ha'e gui oito araa guive ma omboopy ju ngaru oguy'i py ikuai aguã regua, sete ára re ma altar omboaxa okuapy rire. Ha'e rami vy sete ára re ju ojapo ngaru.

¹⁰ Ha'e gui sete jaxya ha'e vinte e três araa py ma huvixa omõndoukapa ju heta va'e kuery. Ha'e rã ha'e kuery oje'oi pa ju ngoo katy, ovy'a ete ha'e opy'a py oguerovy'a reve Davi pe SENHOR mba'emo porã ojapoague, Salomão ha'e ojepegua Israel kuery ha'e javi pe guive.

1 Reis 9.1-9

¹¹ Ha'e rami py SENHOR pegua oo huvixa Salomão ojapopa ma, ngoorã ae ha'e opa mba'e onhembo'py'aa rami ojapoxe va'ekue voi. SENHOR pegua oo ha'e ngoo ae ojapoa py oiko porã.

¹² Ha'e gui ma pyávy SENHOR ojexa uka Salomão pe. Ha'e vy aipoe'i ixupe:

— Aendu rejerurea. Ha'e rami vy xevy guarã aiporavo kova'e oo mba'emo peme'ẽ atyrã.

¹³ Ha'e gui ma xapy'a rei xee yva amboty 'rã nda'okyvei aguã rami, e'ý vy tuku karu vvy re onhotý mbyre ho'upa aguã re xeyvu, ha'e'ý vy xevygu kuery ikuai rupi mba'emo vai ambou, ha'e ramo

¹⁴ xapy'a rei xevygu kuery xerery rupi ae aenoĩ va'ekue onhembo'vvy'i vy onhembo'ea rupi xereka, ha'e gueko vaia gui ojeko rerova ri ramo xee aendu 'rã yva re aĩa gui. Ha'e vy aperdoa 'rã ojejavýague ha'e amõingo porã ju 'rã ijvy regua.

¹⁵ Xerexa ojepe'a riaa 'rã, xepya py voi aendu riaa 'rã apy xevy pejerurea.

* 6:42 Salmo 132.8-10

¹⁶ Mba'eta kova'e oo ma aiporavo vy xevy guarã ae aiky'a'opa, ha'e py xerery oĩ aguã raka'e rã peve guarã. Ha'e va'e re ama'ê vy xepy'a py xema'endu'a riae 'rã ára nhavõ.

¹⁷ Ha'e gui ndee ma xapy'a rei xerenonde rupi nderu Davi oikoague rami ndee voi reiko ramo, ha'e ajapo uka va'ekue, xeayvuague ha'e aipotaa ha'e javi rejapopa ri ramo,

¹⁸ ndevy pe voi amoĩ atã 'rã ndepo'akaa raka'e rã peve guarã, nderu Davi pe xereve guarã ajapo va'ekue rami vy. Ha'e vy ixupe aipoa'e va'ekue: "Ndoiko e'yĩ 'rã nderekovia Israel kuery re opena va'erã", ha'eague rami vy.*

¹⁹ — Ha'e rami avi xapy'a rei peê ha'e pendera'y kuery xegui pejepe'a vy ajapo uka va'ekue ha'e xeayvuague ndapejapovei vy tuuete kuery mboae re peo vy pembojerovia ri ramo,

²⁰ ha'e ramo roipe'a 'rã pendevyvrã ame'ê va'ekue gui, ha'e kova'e oo xerery rupi aiky'a'opa va'ekue amombo 'rã mombrya xerenonde gui. Ha'e rami rire vyv regua kuery ojoi rei ha'e ijayvu rei okuapy aguã rive 'rã oĩ.

²¹ Mba'eta kova'e oo aỹ omboeteave va'eri ha'e jave py oĩague rupi oaxa va'e kuery oexa vy onhemondyipa 'rã. Ha'e vy aipoe'i 'rã: "Mba'e re tu SENHOR gui rami ete ri oeja kova'e vyv ha'e kova'e oo?" he'i 'rã okuapy.

²² Ha'e gui ombovaia 'rã: "Ha'e rami ete oeja mba'eta ha'e kuery oejapa rire SENHOR guamoĩ kuery ruete Egito vyv gui oipe'a va'ekue, ha'e tuuete mboae pe ju ova vy omboete ha'e ombojerovia okuapy ramo. Ha'e nunga rupi ae rima ha'e kuery áry ombou raka'e gui rami ete ojexavai aguã", 'ea 'rã.

8

1 Reis 9.10-28

¹ Vinte ma'etỹa py mae ma Salomão ojapopa SENHOR pegua oo, ngoorã ae guive.

² Omoatyrõ avi huvixa Hirão tetã ipo py omboaxa va'ekue. Ha'e va'e py ma Israel kuery ju omboekoa.

³ Ha'e va'e rire ma Hamate-Zoba tetã katy Salomão oo vy oipe'a.

⁴ Tekoa e'yã py ojapo avi Tadmor tetã. Hamate katy'i guive tetã ojapo reta tembi'u omoĩ porã atyrã.

⁵ Omoatyrõ avi Bete-Horom, vyv'ã katy ha'e vyv'ã guy katy. Ha'e va'e tetã ha'e javi omombaraete vy ojapo imoĩny korarã, okê jokoarã guive.

⁶ Omombaraete avi imoĩny Baalate ha'e tetã rupi tembi'u omoĩ porã atyrã ha'e oguereko va'e ha'e javi, ha'e gui tetã karóxa ha'e guymba kavaju ikuai atyrã. Jerusalém py voi ojapoxe va'ekue ojapopa, Líbano vyv re ha'e oyvy openaa ha'e javi rupi.

⁷ Ha'e gui heteu kuery regua okuave va'e, amorreu, ferezeu, heveu ha'e jebuseu kuery Israel kuery regua e'yĩ ikuai va'e,

⁸ ha'e ta'y kuery okuave va'e Israel kuery ndojukapai va'ekue, ha'e va'e kuery ae Salomão omomba'eapo nhea'ã, aỹ peve guarã.

⁹ Ha'e rã Israel kuery va'e regua ma neĩ peteĩve Salomão nomomba'eapoi escravo rami. Ha'e va'e kuery ma ixupe ikuai joe opu'ãa rupi, huvixa kuery, ha'e gui karóxa ha'e imboguataaty kuery re openaa rupi ikuai.

¹⁰ Ha'e kuery ae huvixa Salomão rembiguai yvatekueve, duzentos e cinqüenta ikuai guetarã kuery re openaa rupi.

¹¹ Ha'e gui ma Salomão ojapo Faraó rajy tetã Davi rekoague py oĩague gui ova aguã rami hoorã ojapo uka va'ekue py. Mba'eta aipoe'i: "Xera'yxy ma nda'evei Israel kuery ruvixa Davi rogue py oiko aguã, mba'eta SENHOR ayvu ryru oĩague ma icky'a e'yĩ va'e meme", he'i.

¹² Altar SENHOR peguarã Salomão ojapo va'ekue áry ome'ê jepi mymba kuery, oikeaty rexe'i.

¹³ Ko'ê nhavõ 'rã ome'ê Moisés ijayvuague rami vy, sábado nhavõ guive, ngaru jaxy ipyau'i jave ha'e oa'angaague ára py, mboapykue kuerei 'rã ome'ê ma'etỹa nhavõ: ngaru mbojape imbovia revegua e'yã ára, semana regua ngaru ára ha'e oguy'i py ikuaiã aguã ára guive.

¹⁴ Nguu Davi ojapo ukaague rami vy omoĩ avi sacerdote kuery peteĩ-teĩ regua omba'eapo aguã, levita kuery ha'e rami ae avi peteĩ-teĩ omoĩ omba'eapo aguã rami, Nhanderuete pe oporaei aguã, sacerdote kuery renonde rupi oipytyvõ aguã ko'ê nhavõ ojapo 'rã va'ekue ojapoa rupi, okê rarõa kuery peteĩ-teĩ regua okê ikuai va'e oarõ aguã rami guive, ha'e rami aguã ae Nhanderuete rembiguai Davi ojapo uka rire.

¹⁵ Neĩ peteĩve henda py ma voi sacerdote ha'e levita kuery ndojapo e'yĩ huvixa ojapo uka va'ekue, perãta omoĩ porãa rupi voi.

¹⁶ Ha'e rami py Salomão ojapopa SENHOR pegua oo rupi ojapoxe va'ekue, omboypya ára guive ojapopa peve. Ha'e rami py ae ojapopa oo SENHOR pegua.

¹⁷ Ha'e gui ma Salomão oo Eziom-Geber ha'e Elate py ye'ê rembe re, Edom vyv re.

¹⁸ Ha'e py oĩa py huvixa Hirão guembiguai kuery pe ogueru ruka kanoã ha'e omboguata kuaa va'e kuery. Ha'e kuery ma Salomão rembiguai kuery reve Ofir py oje'oi vy ha'e gui ogueru okuapy quinze mil quilos ouro guigua. Huvixa Salomão pe ae ogueru.

9

1 Reis 10.1-13

¹ Ha'e gui Sabá pygua huvixa kunha oendu Salomão reko omombe'ua rã. Ha'e rami vy Jerusalém py oo haxy-axy va'e re oporandu aguã. Guembiguai kuery heta va'e reve ovaẽ. Guymba camelo kuery ombovoyi heruvy tembi'u irurã, ouro ha'e ita iporãgueve va'e heta re guive. Ha'e gui Salomão renonde py ovaẽ vy ixupe oporandu onhembopy'aague ha'e javi rami.

* ⁷ 7:18 Ha'e rami Davi pe Nhanderuete ijayvu ma voi (1 Reis 9.6-9; 1 Crônicas 17.12-14).

² Ha'e ramo opa mba'e re oporandu rã Salomão ombovai, mba'eta ixupe ma neĩ peteĩ henda py ma voi ndaxyi omombe'u porãve aguã.

³ Ha'e ramo Sabá pygua huvixa kunha oendu Salomão 'arandua ha'e javi, oexa avi oo ojapo uka va'ekue,

⁴ mesa áry temb'i'u oguerua va'e, yvatekueve ikuaiaty, hembiguai ha'e karo rerua kuery omba'eapoa, ijao guive, ha'e mymba kuery altar áry SENHOR pe oapyaty. Ha'e nunga ha'e javi oexa vy onhemondy rei oiny.

⁵ Ha'e vy aipoe'i huvixa pe:

— Anhetê ete ae ra'e ndereko regua ayvua xerekoa py aendu va'ekue ha'e ne'arandua regua voi.

⁶ Ha'e rami teĩ xee ma ha'e va'e ayvu ndaroviai va'ekue, apy aju vy xee ae rexa py aexa e'ya ja. Anhetê neĩ mbyte rupi peve ma voi xeve nomombe'uai va'ekue, mba'eta ndereko omombe'ua rã aenduaque gui ne'arandupave ra'e, rerekopave ha'e ndere ima'endu'a porã mbyve ete va'e.

⁷ Ovy'a ete 'rã okuapy ndevyguava'ekue, nerembiguai nerenonde rupi ikuai va'ety, mba'eta ha'e kuery oendu 'rã ne'arandua rupi ndeayvua.

⁸ Ta'ima'endu'a porã avi SENHOR Nderuete re, mba'eta ndererovy'a vy tenda Israel kuery re openaaty áry nemoi rire huvixa SENHOR nderuete peguarã. Mba'eta SENHOR ma Israel kuery raka'e rã peve omingo porã aguã rami oyvvy vy ae nemoi huvixarã, ha'evea rami rereko aguã teko porã rupi — he'i.

⁹ Ha'e rami vy huvixa Salomão pe kunha va'e ome'ê quatro mil quilos ouro guigua, heta temb'i'u irürã, ita iporãve va'e guive. Neĩ peteĩgieve ma ndogueruai teri mba'emo porã Sabá pygua huvixa kunha Salomão pe ome'ê va'ekue ramigua ete.

¹⁰ Ha'e gui huvixa Hirão ha'e Salomão rembiguai kuery Ofir gui ouro ogueru va'e ma ha'e katy gui ogueru avi yvyra sândalo aygue ha'e ita iporãve va'e.

¹¹ Yvyra sândalo gui ma huvixa Salomão ojapo uka jopy-jopy ovyaty SENHOR pegua opy ha'e ngopy guarã, ha'e gui harpa ha'e mbaraka oporaei va'e kuery peguarã. Ha'e nunga ma neĩ peteĩve ma Judá vvy re oexapy e'ỹ teri.

¹² Ha'e gui Sabá pygua huvixa kunha pe huvixa Salomão ju ome'ê ixupe ogueru va'ekue gui hetave, mba'emo oipota ha'e ojerurea ha'e javi. Ha'e ramo ojevy vy ovyv katy ju oo, guembiguai kuery ha'e javi reve.

1 Reis 10.14-29

¹³ Ma'et'ya nhavõ ouro Salomão pe oguerua va'e poyikue ma vinte e dois mil quilos,

¹⁴ mba'emo vendea kuery ha'e mba'emo mboekoviaaty gui ojou va'e áryve. Arábia pygua huvixa ha'e va'e vvy re opena va'ety kuery voi ome'ê 'rã ixupe ouro ha'e prata.

¹⁵ Ha'e ramo ouro ombope pyre gui Salomão ojapo duzentos hu'y jokoia tuvixa va'e. Peteĩ-teĩ hu'y jokoarã ma seis quilos ouro opejaa.

¹⁶ Ouro ombope pyre gui ojapo avi trezentos hu'y jokoia. Ha'e va'e regua hu'y jokoarã peteĩ-teĩ ma três quilos raxa ouro opejaa. Ha'e va'e ma huvixa omoĩ porã ukapa oo Líbano ka'aguy regua guigua py.

¹⁷ Huvixa ojapo avi peteĩ tenda opena atyrã tuvixave va'e marfim guigua, ha'e vy onhovãmba ouro ete py anho.

¹⁸ Tenda renonde guarã ma ojapo mboapy meme pyrõa. Oĩ avi peteĩ py renderã ouro gui ojapo pyre, tenda re omboja pyre. Ijyke jovaive re ma omoĩ avi jyva ytarã oguapyaty yvúry, ha'e ijyva yta yvúry ma mokoĩ guary ra'angaa omopu'ã imo'amy.

¹⁹ Mboapy meme pyrõa ikuai va'e áry ma doze avi omoĩ guary ra'angaa, peteĩ-teĩ pyrõa apy reguarã. Ha'e va'e nunga ma neĩ peteĩve huvixa pe ma voi ojapoa va'e'ỹ teri.

²⁰ Karo huvixa Salomão oy'uaty va'e ma guive rã ouro guigua meme. Oo Líbano ka'aguy regua guigua py ikuai va'e voi ouro guigua meme avi. Ha'e rã prata ma Salomão oĩ jave mba'everã nombovareĩ merami.

²¹ Mba'eta huvixa oguereko reta kanoã guaxu Társis katy oo va'erã, Hirão rembiguai kuery reve omboguataa va'e. Mboapy ma'et'ya py kuerei 'rã Társis gui kanoã guaxu ojevy okuapy vy ogueru ouro, prata, marfim, karaja ha'e jayru guaxu.

²² Ha'e rami vy huvixa Salomão vvy jave re huvixa kuery ikuai va'e gui ipo'akave, o'arandua py ha'e mba'emo oguerkopaa py.

²³ Ha'e ramo vvy jave gui huvixa kuery ou 'rã ha'e oĩa py o'arandua rupi ijayvu rã oendu aguã.

²⁴ Ma'et'ya nhavõ peteĩ-teĩ ogueru 'rã mba'emo ixupe ome'ê va'erã: ouro ha'e prata guigua, ajukue, tembiporu, kavaju ha'e mburika kunha, temb'i'u irürã guive.

²⁵ Ha'e gui Salomão oguereko quatro mil kavaju oguy py karóxa regua. Kavaju árygua doze mil ju oguereko imboguataarã. Ha'e va'e kuery ma tetã ikuai va'e rupi oguereko karóxa, Jerusalém tetã py ngoo katy'i py guive.

²⁶ Ha'e gui Salomão ipo'aka oiny huvixa kuery ha'e javi re, Eufrates yakã guive filisteu kuery vvy peve, ha'e gui Egito vvy apy peve.

²⁷ Prata ma Jerusalém py huvixa omboetave ita rami rive, vvyra yary guive ojapo oata aguã rami e'ỹ sicômoro'y tekoa e'ya rupi ikuai va'e rami.

²⁸ Kavaju Salomão peguarã ma Egito vvy ha'e vvy jave gui oguerua.

1 Reis 11.41-43

²⁹ Ha'e gui oive rei tema Salomão rekoke regua. Ha'e rami avi mba'emo ojapo va'ekue jypy guive opaa peve noi 'rã teve kuaxia Nebate ra'y Jeroboão rekoke profeta Natã ha'e Siloé pygua Aías ombopara va'ekue py, profeta Ido mba'emo oexa va'ekue ombopara va'ekue re guive?

³⁰ Quarenta ma'et'ỹ re Salomão opena oikovy Jerusalém py Israel kuery ha'e javi re.

³¹ Ha'e gui guamoĩ kueryague rami ndoikovevei'i ma ramo onhono porãa tetã Davi rekoague py ae. Ha'e gui ta'y Roboão ju oĩ nguũ rekovia.

10

1 Reis 12.1-15

¹ Ha'e gui ma Roboão oo Siquém katy, ha'e py Israel kuery onhemoatypa ma ramo nguvixarã omoĩ aguã.

² Ha'e nunga Nebate ra'y Jeroboão avi oendu. (Ha'e va'e ma Egito vyv re teri oiko, huvixa Salomão gui onhaague py.) Ha'e gui Egito gui ojevuy ju ramo

³ oenoĩ ukua okuapy. Ha'e ramo Israel kuery ha'e javia py ou Roboão reve jogueroavyv aguã. Ha'e ramo ha'e kuery aipoe'i okuapy Roboão pe:

⁴ — Nderu ma orerereko axy ete va'ekue. Ha'e gui aỹ ma orerereko porã'i ju nderu orembojexavai ha'e orerereko axyague gui. Ha'e ramo ma ndevy ae 'rã orekuai.

⁵ Roboão ombovai ha'e kuery pe:

— Mboapy araa py ma peju ju xea py — he'i. Ha'e rã heta va'e kuery oje'oipa.

⁶ Ha'e gui ma huvixa Roboão onhemongeta uka tujakueve nguũ Salomão oikove teri jave henonde ikuai va'ekue pe. Ha'e vy aipoe'i:

— Mba'ixa tu peẽ kuery xemongeta ta heta va'e kuery ambovai aguã?

⁷ Ha'e kuery ombovai:

— Xapy'a rei kova'e kuery re repena porã, ha'e rerorya rupi ndeavyv porã'i ramo ha'e kuery raka'e rã peve 'rã ikuai nrembiguai — he'i okuapy.

⁸ Ha'e rami teĩ ha'e noendu potai tujakueve omongeta rã. Ha'e vy guembiguai kunumigüe ojavegua ngupive ikuai va'e pe ju onhemongeta uka.

⁹ Ha'e vy aipoe'i ha'e kuery pe:

— Peẽ kuery, mba'ixa tu xemongeta ta kova'e kuery ambovai aguã? Mba'eta xevy ojerure vy “Orerereko porã'i ju nderu orerereko axyague gui”, he'i okuapy ramo.

¹⁰ Ha'e ramo kunumigüe ijavegua huvipe ikuai va'e ombovai:

— Po rami 'rã ndeavyv ha'e va'e kuery aipoe'i va'ekue pe: “Nderu orerereko axy, va'eri ndee orerereko porã'i ju”, he'i va'e kuery pe. Po rami 'rã ndeavyv: “Xekuã kyri'i ma xeru poataa gui tuvixave.

¹¹ Xeru penderereko axy ae, ha'e rã xee ma roguereko axyve ete 'rã. Xeru penembojexavai vaka pi py penenupã vy, ha'e rã xee ma japeuxa popia py 'rã rombojexavai”, 're 'rã — he'i okuapy.

¹² Ha'e va'e rire mboapy araa py Jeroboão ha'e heta va'e kuery reve joguerupa ju Roboão-a py, huvixa “Mboapy araa py pejevuy ju xea py”, he'iague rami vy.

¹³ Ha'e ramo huvixa Roboão ombovai vy avyv poyi py ijavyv, tujakueve omongetaa noendu potai rire.

¹⁴ Kunumigüe omongetaague rami rive ijavyv vy

— Xeru penderereko axy, ha'e rã xee ma roguereko axyve 'rã. Xeru ma penembojexavai vaka pi py, ha'e rã xee ma japeuxa popia py 'rã rombojexavai — he'i.

¹⁵ Ha'e rami vy huvixa Roboão noendu potai heta va'e kuery avyv re, mba'eta ha'e rami aguã ma Nhanderuete gui ae oiko, Nebate ra'y Jeroboão pe Siló pygua Afás ijavyvague SENHOR omoingo aguã.*

1 Reis 12.16-20

¹⁶ Ha'e gui Israel kuery ha'e javi avyv re huvixa Roboão ndojapyxaka potai ramo oexa vy ivai vaipa okuapy. Ha'e vy aipoe'i:

— Mba'e ha'vy jareko Davi ramymino kuery reve? Jessé ra'y reve guarã noĩvei ri nhandevy! Israel kuery, jaje'oipa nhandero katy! Ha'vy Davi ramymino kuery, pepena pendero re ae! — he'i okuapy. Ha'e rami vy Israel kuery peteĩ-teĩ oje'oipa ju ngoo katy.

¹⁷ Ha'e rã Israel kuery Judá regua tetã rupi hekoa va'e re ma Roboão ae opena oikovy.

¹⁸ Ha'e gui huvixa Roboão omondouka omomba'epo nhea'ãmby kuery re opena va'ety Adorão, teĩ ha'e va'e ma Israel kuery ha'e javi ojapipa ita py, ha'e ramo omano. Ha'e rã huvixa Roboão ma okaróxa ogueraa nho vy onha ovy Jerusalém katy.

¹⁹ Ha'e rami py Israel kuery onhemoingo Davi ramymino kuery rovaigua, aỹ peve guarã.

11

1 Reis 12.21-24

¹ Jerusalém tetã py Roboão ovaẽ ma vy omboatypa Judá ha'e Benjamim regua kuery, cento e oitenta mil oiporavo pyre, joe opu'ã kuaa va'e meme, Israel kuery rovai opu'ã aguã, ha'e rami vy Roboão pe ju omboaxa okuapy aguã ipo'akaague.

² Ha'e rami teĩ SENHOR oavyv ombou peteĩ ava guemimbo'e Semaías va'e pe. Ha'e vy aipoe'i:

³ — Ndeavyv ke Salomão ra'y Roboão Judá pygua huvixa va'e pe, ha'e Israel kuery Judá ha'e Benjamim regua ikuai va'e ha'e javi pe. Ha'e vy aipoe'i:

* 10:15 Profeta Afás Jeroboão pe ijavyv ma voi Israel kuery Nhanderuete omboja'o va'erãa rami (1 Reis 11.29-33). Ha'e gui Judá ha'e Benjamim regua kuery reve kuaray puku-a katy ikuai va'e gui ma Efraim regua, ha'e kuaray ijapu'a'ia katy ikuai va'e regua reve oja'o. Mokoĩ regua “Judá kuery” 'ea va'e gui dez regua “Israel kuery” 'ea va'e oja'o, ha'e kuery ojevavyv re Nhanderuete ombopaga ramo.

4 “Po rami SENHOR ijayvu: ‘Tapeo eme, pepu'ã eme penderivy kuery rovai. Peteĩ-teĩ pejevuy ju pendero katy, mba'eta xee ae ha'e nunga amoingo va'ekue', he'i.’” Ha'e rami SENHOR ijayvua ha'e kuery oendu vy ndoo nhoi teve Jeroboão kuery rovai opu'ã agua.

Roboão peteĩ-teĩ tetã ikorará ojapogue rery oĩa

5 Roboão ma Jerusalém py hekoa oikovy vy ojapo Judá re tetã ikuai va'e korará, ngovaigua kuery gui.

6 Ha'e rami vy ojapo Belém tetã korará, Etã, Tecoa,

7 Bete-Zur, Socó, Adulão,

8 Gate, Maressa, Zife,

9 Adoraim, Laquis, Azeca,

10 Zorá, Aijalom ha'e Hebrom tetã guive. Ha'e va'e tetã ikorapa va'e ma Judá ha'e Benjamim vvy regua meme.

11 Ha'e va'e tetã omombaraetepa ma vy ha'e py omoingo harõarã kuery. Omoĩ avi mba'emo ho'u va'erã, azeite, vinho guive.

12 Peteĩ-teĩ tetã py omoĩ reta hu'y jokia tuvixa va'e ha'e hu'y guaxu. Omombaraetepa. Ha'e rami vy Judá ha'e Benjamim vvy jave rupi ipo'aka.

Jerusalém py sacerdote ha'e levita kuery oupa okuapyague

13 Ha'e rami ae avi Roboão-a katy sacerdote ha'e levita kuery Israel ha'e javi rupi gui oupa.

14 Mba'eta levita kuery tetã katy'i rupi gui ou vy mba'emo oguereko va'ekue oejapa vy oupa Judá ha'e Jerusalém katy, Jeroboão ha'e gua'y kuery omoxêmba rire SENHOR pe ikuai va'e agua.

15 Ha'e kuery rekovia ma Jeroboão omoĩ sacerdote kueryrã ha'e ae oikuaa rami, ombojeroviaaty vvy'ã rupi ikuai va'e pe, kavara ha'e vaka ra'y ra'angaa ojapo va'ekue peguarã rive.

16 Ha'e rami rã Israel kuery ha'e javi regua Jerusalém tetã py ou, opy'a py SENHOR Israel kuery ruete oeka agua omoĩ va'ekue ha'e javi, SENHOR guamoĩ kuery ruete pe mba'emo ome'ẽ agua.

17 Ha'e rami py ha'e kuery omombaraete Judá kuery, ojapo avi Salomão ra'y Roboão ipo'akave agua rami, mboapy ma'etỹ re. Mba'eta mboapy ma'etỹa peve'i ikuai Davi ha'e Salomão oikoague rami.

Roboão ro pygua kuery rery oĩa

18 Ha'e gui ma Roboão gua'yxyrã ogueraa Maalate. Ha'e va'e ru ma Davi ra'y Jerimote, ha'e rã ixu ma Jessé rajy Eliabe memby Abiail.

19 Ha'e va'e omemby kuery oguereko va'ekue ma Jeús, Semarias ha'e Zaã.

20 Ha'e va'e rire ma gua'yxyrã ogueraa avi Absalão rajy Maaca. Ha'e va'e ma oguereko ju Abias, Atai, Ziza ha'e Selomite.

21 Gua'yxy ha'e gua'yxy jevy kuery gui Roboão oayvuve va'e ma Absalão rajy Maaca. Mba'eta dezoito gua'yxy ha'e sessenta gua'yxy jevy kuery oguereko. Vinte e oito ta'y kuery ha'e sessenta tajy kuery ikuai raka'e.

22 Maaca pi'a Abias ma Roboão omoĩ gua'y kuery mboae áryve, mba'eta oipota hekovia huvixarã oĩ.

23 O'arandua rupi vy ojapo gua'y kuery Judá ha'e Benjamim ovvy jave rupi hekoa agua rami, tetã ikorapa va'e rupi. Ha'e kuery pe ome'ẽ tembi'u oata agua rami e'y, ta'yxyrã ojou reta avi.

12

1 Reis 14.25-28

1 Roboão opo'akaa py oĩ atã ha'e imbarate ma vy ojea SENHOR guigua lei, Israel kuery ha'e javi reve.

2 Ha'e gui peteĩ nhiruĩ ma'etỹa re ma Roboão huvixa oĩ jave py Egito pygua huvixa Sisaque ou Jerusalém re opu'ã agua, ha'e pygua kuery SENHOR rovai ojevavy okuapy rire.

3 Mil e duzentos karóxa ha'e sessenta mil kavaju árygua kuery reve ou. Hupive Egito vvy gui ou va'ekue ma heta raxa ikuai, Líbia guigua, suquita ha'e Etiópia guigua kuery guive.

4 Ha'e rami vy Judá regua tetã ikorapa va'e ha'e javi oipe'apa ma vy Jerusalém katy ju oo.

5 Ha'e gui ma Roboão-a py ou profeta Semaías, Judá regua yvatekueve Sisaque gui Jerusalém tetã py ono'õ va'ekue ikuai py guive. Ha'e vy profeta aipoe'i ha'e kuery pe:

— Po rami SENHOR ijayvu: “Peẽ kuery ma xerejapa pekuapy. Ha'e nunga rupi xee voi roeja ma Sisaque ju pendere ipo'aka agua”, he'i.

6 Ha'e ramo Israel regua yvatekueve onhemo'yvyĩ'i okuapy, huvixa guive. Ha'e rami vy aipoe'i okuapy:

— SENHOR ma ha'evea rami nhanderereko va'e — he'i.

7 Ha'e kuery onhemo'yvyĩ'i okuapy rã SENHOR oexa vy teĩgue ju oayvu ombou uka Semaías pe. Ha'e vy aipoe'i:

— Ha'e kuery onhemo'yvyĩ'i okuapy ramo xee namombai 'rã. Ha'e rami 'rãgue py are e'y'i re araa jepe 'rã, Jerusalém tetã re xepoxya ambou uka e'y agua Sisaque po rupi.

8 Ha'e rami avi ha'e kuery ikuai 'rã hembiguairã, oikuaa agua vvy regua huvixa kuery pe ikuai gui xevy pe ikuai agua ha'evevea — he'i.

9 Ha'e gui ma Egito pygua Sisaque ou vy Jerusalém re opu'ã. Ha'e rami vy ogueraapa SENHOR pegua opy iporãgueve oĩ va'ekue, huvixa ropy gui guive. Ogueraa avi hu'y jokoarã ouro gui Salomão ojapo va'ekue.

10 Ha'e va'ekue rekovia ma huvixa Roboão ojapo hu'y jokia overa va'e gui rive. Ha'e va'e ma omboaxa huvixa rokẽ rarõa kuery rerekoa po py.

¹¹ Ha'e gui SENHOR pegua oo py huvixa oike nhavõ harõa kuery ou vy ogueraa avi 'rã hu'y joko. Ha'e va'e rire ogueru kuerei 'rã opy ja'o harõa kuery ikuaiaty py.

¹² Ha'e rami py huvixa onhemo'yvy'i rire ixugui SENHOR oipe'a ju opoxya, omomba vyvoi e'y agua. Mba'eta Judá yvy re ma ikuai teri heko porã va'e.

1 Reis 14.21-31

¹³ Jerusalém py huvixa Roboão ipo'akave ovy vy oive tema huvixa rami. Ixy ma Amom guigua, Naamá hery va'e. Quarenta e um ma'et'y ma oguerekoa py Roboão omboypy huvixa o'i agua, ha'e gui dezessete ma'et'y re opena Jerusalém py. Ha'e va'e tetã ma Israel re ikuai va'e gui SENHOR oiporavo va'ekue hery o'i atyrã.

¹⁴ Ha'e rami teĩ ha'eve'y va'e ojapo oikovy, opy'a re nomoĩ guive SENHOR oeka agua.

¹⁵ Ha'e gui oive tema Roboão rekokue regua. Ha'e rami avi mba'emo ojapo va'ekue jypy guive opaa peve noĩ 'rã teve kuaxia yma guare kuery rekokue oĩa profeta Semaías ha'e Ido ombopara va'ekue py? Jeroboão kuery reve Roboão kuery joe opu'ã okuapy oikovea pukukue re.

¹⁶ Ha'e gui Roboão ndoikovevei'i ma guamoĩ kueryague rami. Ha'e ramo ha'e kuery reve onhono porã tetã Davi rekoague py. Ha'e gui ta'y Abias ju oĩ nguu rekovia.

13

1 Reis 15.1-8

¹ Jeroboão dezoito ma'et'y re ma huvixa oĩ jave py Abias oĩ Judá pygua huvixarã. Ha'e vy mboapy ma'et'y re opena Jerusalém py.

² Ixy ma Gibeá pygua Uriel rajy Micaía hery va'e. Ha'e gui ma Abias kuery joe opu'ã ju Jeroboão kuery reve.

³ Ha'e rami vy Abias ma joe opu'ã agua katy ogueraa oxondaro kuery ipy'a guaxukueve quatrocentos mil avakue oiporavo va'ekue. Ha'e rã Jeroboão kuery ma hexe opu'ã agua katy oje'oi oitocentos mil avakue reve, joe opu'ã py ipy'a guaxukueve meme.

⁴ Ha'e gui Abias ma Zemaraim vyvty áry opu'ã ho'amy, Efraim regua vyvty ikuai va'e mbyte. Ha'e vy aipoe'i ho'amy:

— Jeroboão ha'e Israel kuery pendekuai va'e ha'e javi, pendu ke xea'yvua.

⁵ Peẽ kuery ndapeikuai ri ty'y SENHOR Israel kuery ruete Davi pe ae ome'ëague ha'e kuery ruvixa oĩ riae agua? Mba'eta hexeve, ha'e ta'y ra'y kuery reve ojapo oguereko agua juky revegua.*

⁶ Ha'e rami teĩ ha'e kuery re Jeroboão kuery opu'ã nho. Ha'e va'e ma Davi ra'y Salomão rembiguai Nebate ra'y. Ha'e rami py onhembopoxy nguvixa rovai.

⁷ Ixupe guarã ono'õ avakue vare'y, mba'emo vai apoa kuery rive. Ha'e va'e kuery reve onhemombaraete okuapy Salomão ra'y Roboão rovai. Ha'e jave py ma Roboão kunumi'i ha'e ndoiko kuaai teri vy ndojoko kuaai.

⁸ — Aỹ ma peẽ kuery peikuaa teĩ SENHOR po'akaa Davi ra'y kuery po py ome'ë va'ekue gui pendepo'akavea, mba'eta pendeta raxa, ha'e pereko avi vaka ra'y ra'angaa penderuete ra'angara ouro guigua Jeroboão ojapo va'ekue.

⁹ Ha'e rami teĩ ndapeipe'apai avi teve sacerdote kuery Arão ramymino SENHOR pe ikuai va'ekue, ha'e levita kuery voi? Ha'e kuery rekovia pendejeupe guarã sacerdote ramigua rive ju pejou, yvy mboae regua oguerekoa rami. Mba'eta amongue va'e rei sacerdote-rã onhemoĩ ukaxe vy ogueru 'rã petei vaka ra'y ha'e sete vexe'i ra'y ome'ë va'erã. Ha'e rami ramo peẽ kuery pemoĩ 'rã sacerdote-rã, Nhanderuete peguarã e'y guive.

¹⁰ Ha'e rã ore kuery ma SENHOR ae oiko Oruete, ha'e neĩ pete'igüe ma voi ndorojai 'rã. Ha'e gui sacerdote kuery ore roguereko va'e ma SENHOR pe ae omba'eapo va'e. Ha'e va'e kuery ma Arão ramymino meme, ha'e levita kuery voi ikuai avi omba'eapo rupi.

¹¹ Ha'e rami vy ko'ë nhavõ, aje'ive'i ha'e ka'aru ha'e kuery ome'ë 'rã mymba ha'e heakuã porã va'e oapy reve. Ha'e gui mesa iky'a e'y va'e áry ma SENHOR renonde omoĩ 'rã mbojape. Tataendy 'y ouro guigua, tataendy reve opena avi 'rã ka'aru nhavõ, mba'eta ore kuery ae ma SENHOR Nhanderuete lei ojapo uka va'ekue rojapopa va'e. Ha'e rã peẽ kuery ma pejapa.

¹² Ha'e nunga rupi ne'exa, Nhanderuete ma ore kuery reve ae oiko, orerenonde oo. Ixupegua sacerdote kuery oje'oi avi mimby guaxu omonhe'ë heravy va'e, peẽ Israel kuery rovai roo agua. Ha'e nunga rupi pepu'ã eme SENHOR peneramoĩ kuery ruete rovai, mba'eta peẽ kuery ma napendepo'akai 'rãe — he'i.

¹³ Ha'e ramo Jeroboão ijayvu ixupegua kuery onhemia py ikuai va'e ojere vy amboae kuery hakykue katy gui ou agua re. Ha'e rami py ha'e kuery amongue va'e ma Judá kuery renonde, ha'e rã amboae kuery ma hakykue katy ikuai.

¹⁴ Ha'e ramo Judá kuery oma'ë vy oexa okuapy xondaro kuery henonde ikuai va'e, hakykue guive. Ha'e ramo SENHOR pe ojapukai okuapy, sacerdote kuery voi omonhe'ë okuapy mimby guaxu,

¹⁵ ha'e Judá regua avakue ojapukai atã okuapy. Ojapukai okuapy ramo Nhanderuete omoingo axy Jeroboão ha'e Israel kuery ha'e javi, Abias ha'e Judá kuery renonde gui.

¹⁶ Ha'e rami vy Judá kuery renonde gui Israel ramymino kuery onhamba, ipo py Nhanderuete omboaxa ramo.

* 13:5 Juky reve ma ha'e kuery ojapo 'rã petei rami ikuai agua. Juky ma anhetë etea kuaa ukaarã (Levítico 2.13).

¹⁷ Ha'e kuery regua Abias ha'e hexeve ikuai va'e ojuka reta. Ha'e ramo Israel kuery va'e regua ho'apa okuapy quinhentos mil avakue oiporavo pyre meme.

¹⁸ Ha'e va'e jave py ma Israel ramymino kuery omo'yvyĩmbaa raka'e. Judá ramymino kuery ae ipo'akapa okuapy, SENHOR guamoĩ kuery ruete re ojerovia ete vy.

¹⁹ Ha'e gui Abias ma Jeroboão oakykue monha vy ixupe guare tetã re ipo'aka avi: Betel, Jesana, Efrom ha'e tekoa'i ha'e'i rupi ikuai va'e re voi.

²⁰ Ha'e va'e rire Abias oĩa pukukue re ma Jeroboão ndojouvei ipo'aka jevy aguã. SENHOR omomba'eaxy rã omano.

²¹ Ha'e rã Abias ma imbarateve tema ovy vy gua'yxyrã ojou catorze kunhague. Ha'e vy vinte e dois ta'y, ha'e dezesseis tajy kuery ikuai.

²² Ha'e gui oĩve rei tema Abias rekokue regua. Ha'e rami avi mba'emo ojapo va'ekue ha'e javi noĩ 'rã teve kuaxia profeta Ido ombopara va'ekue re?

14

1 Reis 15.9-12

¹ Ha'e gui ma Abias ndoikovevei'i ma guamoĩ kueryague rami. Ha'e ramo onhono porãa tetã Davi reokague py. Ha'e gui ta'y Asa ju oĩ nguũ rekovia. Ha'e va'e ma dez ma'etỹ peve huvixa oĩa ja ijyvy re joe opu'ã va'e ndoikoi.

² Asa ma SENHOR nguete renonde rupi ha'evea rami oiko, heko porã va'e vy.

³ Mba'eta ombovaipa altar amboae regua ruete ra'angaa peguarã omopu'ã mbyre, ombovaipa avi ombojeroviaaty yvy'ã rupi ikuai va'ekue. Oitypa ita omopu'ã mbyre, oake'o avi ta'angaarã yvyra omopu'ã mbyre.

⁴ Ha'e rami vy omongeta Judá kuery SENHOR guamoĩ kuery ruete oeka ha'e lei ojapo uka va'ekue rupi ikuai aguã re.

⁵ Ha'e rami ae avi Judá re tetã ikuai va'e rupi gui omomba ombojeroviaaty yvy'ã rupi ikuai va'ekue, altar heakuã porã va'e rapyaty guive. Ha'e ramo huvixa oĩa pukukue re ma ikuai porã anho.

⁶ Judá kuery ikuai jave rupi ojapo tetã korarã, ijyvy rupi ikuai porã ramo. Oĩa ma'etỹ ha'e javi re ma jipoi hexe opu'ã va'e, ikuai rive aguã rami SENHOR ome'ẽ rã.

⁷ Ha'e nunga rupi ae aipoe'i Judá kuery pe:

— Nhamombaraete ma'vy apy tetã ikuai va'e, ikorarã ha'e torre jajapo guive. Okẽrã ijokoa revegua avi jajapo, nhandeyvy nhanerenonde itui va'e rupi mba'eve ndoikoi teria ja, mba'eta SENHOR Nhanderuete jaeka ramo jovaive rupi ome'ẽ nhandekuai rive'i aguã — he'i.

⁸ Ha'e ramo ha'e kuery tetã omoatyrõ vy ikuai porã. Huvixa Asa ma Judá regua xondaro kuery hu'y jokoa ha'e imo'ãa tuvixa va'e revegua ogueroko trezentos mil. Ha'e gui Benjamim regua ma duzentos e oitenta mil ju ikuai hu'y jokoa ha'e guyrapa oipero kuua va'e. Avakue ipy'a guaxukueve meme ikuai.

Etiópia pygua Zerã re Asa ipo'akaague

⁹ Ha'e gui ma ha'e kuery rovai guarã ou peteĩ Etiópia pygua Zerã. Avakue um milhão va'e reve ou, trezentos karóxa reve guive. Ha'e vy ovaẽmba okuapy Maressa tetã peve.

¹⁰ Ha'e ramo ha'e kuery rovai Asa oo. Ha'e vy Maressa katy'i Zefatã regua yvy'ã guy py ma oiko katupa okuapy joe opu'ã aguã.

¹¹ Ha'e rami vy Asa oiapukai SENHOR nguete pe. Ha'e vy aipoe'i:

— SENHOR, ndee e'ỹ vy amboae ndoikoi ikangy va'e repyará imbarate va'e reve joe opu'ã py. Ha'e nunga rupi SENHOR Oreruete, orepytyvõ ke. Mba'eta ore ma ndere ae rojerovia va'e, ha'e nderery rupi roju kova'e kuery heta ikuai va'e rovai. SENHOR, ndee ma Oreruete. Avakue rive ta'ipo'aka eme ndere — he'i.

¹² Ha'e ramo Asa ha'e Judá kuery renonde py SENHOR oitypa Etiópia guigua kuery. Ha'e ramo onhamba jogueravy.

¹³ Hakykue rupi Asa ha'e hexeve ikuai va'e oje'oi Gerar peve. Ha'e gui Etiópia pygua kuery ho'apa, neĩ peteĩve ma voi ndoikovevei. Ha'e kuery omboal'ypaa SENHOR ha'e ixupegua xondaro kuery renonde. Ha'e ramo ogueraapaa tembiporu oaja pyre.

¹⁴ Gerar tetã yvy'iry ikuai va'e voi oitypa, SENHOR gui okyje reia anho oendu okuapy rã. Ha'e ramo ha'e va'e tetã ikuai va'e gui oipe'apa heravy mba'emo, ha'e py heta ikuai va'ekue ogueraapa.

¹⁵ Oitypa avi mymba ja kuery rekoa. Ha'e rami vy oipe'a reta heravy vexa'i ha'e camelo. Ha'e gui ma ojevypa ju Jerusalém katy.

15

Ha'evea rami ju Nhanderuete ombojeroviaa aguã rami Asa ojapoaague

¹ Ha'e gui ma Obede ra'y Azarias re ou Nhanderuete Nhe'ẽ.

² Ha'e ramo oẽ ovy huvixa Asa oĩa py. Ha'e vy aipoe'i ixupe:

— Pendu ke xeayvua, Asa, Judá ha'e Benjamim kuery ha'e javi. SENHOR ma oiko peẽ kuery reve, hexeve peẽ kuery peikoa ja. Peẽ kuery peka ri ramo ha'e ojejou uka 'rã pẽvy. Ha'e rã peja ri ramo ha'e voi pendereja 'rã.

³ Mba'eta Israel kuery are ete ikuai Nhanderuete anhetẽ va'e reve'ỹ, sacerdote imbo'earã ha'e lei e'ỹ re.

⁴ Ha'e rami teĩ ojexavaĩ etea anho oendu vy SENHOR nguete pe ju ikuai aguã ojevypa ha'e oeka okuapy ramo ojejou uka ju.

⁵ Ha'e va'e jave py ma oê ovy va'e nda'ikuai porâi, neî ovaê ouvy va'e kuery voi. Mba'eta ha'e va'e yvy ikuai va'e ha'e javi nda'ivei ete okuapy.

⁶ Mba'eta peteî-teî regua opu'ã 'rã amboae regua re, ha'e peteî-teî tetã opu'ã 'rã amboae tetã re. Ha'e rami vy nhomomba-mombave 'rã oje'oivy, Nhanderuete opa marãgua jexavaia py omoingo axy ramo.

⁷ Ha'e rami teî penembaraete ke, pemokangy eme pendepo. Mba'eta pamba'epoague repy ome'êmbaa 'rã — he'i.

⁸ Pova'e ayvu profeta Odede ra'y omombe'u rã huvixa Asa oendu vy ipy'a guaxu ju. Ha'e rami vy omombopa ojeguarupy Judá ha'e Benjamim yvy re ikuai va'ekue, Efraim regua tetã vyvty rupi ikuai va'e gui guive. Ha'e va'e tetã ma ha'e oi'pe'a va'ekue meme. Ha'e rami vy oiky'a'o ukapa ju altar SENHOR pegua, oo ixupegua okê renonde oî va'e.

⁹ Ha'e rami vy omboaty Judá ha'e Benjamim kuery ha'e javi, ha'e kuery mbyte rupi Efraim, Manassés ha'e Simeão regua ikuai va'e guive. Mba'eta heta avi Israel yvy gui ou va'ekue hexe guarã, hexeve SENHOR Tuuete oiko rã.

¹⁰ Jerusalém py ha'e kuery onhemboaty okuapy mboapy jaxya py, quinze ma'etÿa re ma huvixa Asa oî jave py.

¹¹ Ha'e va'e ára ma SENHOR pe ome'ê okuapy joe opu'ãa gui ogueru va'ekue regua setecentos vaka ra'y ha'e sete mil vexa'i kuery.

¹² Jomeme jogueroayvu okuapy SENHOR guamoî kuery ruete pe anho ikuai aguã re, opy'a ha'e onhe'ê ha'e javi py,

¹³ ha'e rã SENHOR Israel kuery ruete ndoekai va'e rei ojuka aguã, kyrîgueve ha'e tuvixakueve teî, avakue ha'e kunhague guive.

¹⁴ Ha'e rami aguã re oura okuapy SENHOR pe onhendu atã reve, oporaei vy mimby ha'e mimby guaxu reve.

¹⁵ Ha'e rami Judá kuery opy'a ha'e javi py oura ma vy ovy'a okuapy. SENHOR oekaxea'i py oeka ramo ha'e kuery pe ojejou uka. Ha'e rami vy ha'e kuery pe SENHOR ome'ëve ju ovyv jave rupi ikuai porã aguã.

¹⁶ Ojaryi Maaca eteve voi huvixa Asa oi'pe'a huvixa xy po'akaa gui, Aserã pe peteî ta'angaa ojeguarupy ojapo rire. Ta'angaa ojapo va'ekue ma Asa ombovaipa, ha'e iku'ikue oapypa Cedrom yvyugua py.

¹⁷ Ha'e rami teî Israel yvy re yvy'ã rupi ombojeroviaaty ikuai va'e ma nombovaipai, va'eri Asa oikovea pukukue re ha'evea rami anho oiko opy'a py.

¹⁸ SENHOR pegua opy ogueru mba'emo porã tuu ha'e rami aguã rami omboaxa va'ekue, ha'e ae omboaxa va'ekue voi: prata, ouro ha'e tembiporu.

¹⁹ Trinta e cinco ma'etÿ re huvixa Asa oî peve ma joe opu'ã va'e ndoikoi.

16

1 Reis 15.16-22

¹ Trinta e seis ma'etÿa re ma huvixa Asa oî jave py Israel pygua huvixa Baasa ou Judá kuery rovai. Ha'e rami vy omombaraete Ramá tetã, Judá pygua huvixa Asa openaa gui mava'eve oo e'ÿ aguã, neî ovaêa e'ÿ aguã ha'e py.

² Ha'e ramo Asa oi'pe'apa ouro ha'e prata SENHOR pegua opy ha'e huvixa ropy omoî porã mbyre. Ha'e rami vy guembiguaî kuery ayvu reraarã omoudoukapa Síria pygua huvixa Ben-Hadade pe Damasco py oia py. Ha'e vy ixu'pe aipoe'i uka:

³ — Jajapo ke jomeme nhandekuai porã'i aguã, nderu xeru reve ikuaiague rami. Ne'exa, aru ruka ndevy ame'ê rive va'e, prata ha'e ouro. Ha'e rã tereo, Israel pygua huvixa Baasa-a py embovaipa hexeve guarã rejapo va'ekue, xee apenaa ojokoa gui ojepe'a aguã — he'i uka.

⁴ Ha'e ramo Asa ijayvua Ben-Hadade oendu vy omoudouka xondaro huvixa kuery Israel kuery retã re opu'ã aguã. Ha'e rami vy oitypa Ijom, Dã, Abel-Maim ha'e tetã tembi'u omoî porãaty Naftali yvy re ikuai va'e ha'e javi.

⁵ Ha'e nunga Baasa oendu vy opytu'u Ramá tetã omombaraetea gui, ndojapove jevyi guive.

⁶ Ha'e rire huvixa Asa ma Judá kuery ogueraapa vy Ramá tetã gui oguerupa ju ita ha'e vyvra Baasa omombaraetea py oiporu va'ekue. Ha'e va'ekue py ma huvixa Asa ju ojapo Geba ha'e Mispa tetã korarã.

Asa pe Hanani ijayvuague

⁷ Ha'e va'e jave py Judá pygua huvixa Asa oia py ou Hanani. Ha'e vy aipoe'i ixu'pe:

— Ha'e gui Síria pygua huvixa re rive rejeroivia vy SENHOR Nderuete re nderejeroviaí ramo Síria pygua huvixa pegua xondaro kuery oo jepepa ma ndepo gui.

⁸ Ha'e rami avi xondaro kuery Etiópia ha'e Líbia gui ou va'ekue pa heta raxa e'ÿ raka'e? Heta ete e'ÿ teve karóxa ha'e kavaju árygua kuery reve ou? Ha'e rami teî SENHOR re rejeroivia ramo ndepo py omboaxapa raka'e.

⁹ Mba'eta SENHOR ma yvy jave rupi oexa potapa oiny, opo'akaa oexa uka aguã opy'a ha'e javi py ixu'pe ete ikuai va'e pe. Ha'e rã ndee ma reikoague py ne'arandua rupi e'ÿ reiko. Ha'e nunga rupi aÿ gui ma oiko 'rã nderovai opu'ã va'e — he'i.

¹⁰ Ha'e rami profeta ijayvu ramo Asa ivai vy omboty nhuã py, vyvra pa'ũ py ombo'a, ha'e nungakue re ixu'pe ipoxy vy. Ha'e va'e jave py Asa omoingo axyve ju heta va'e kuery regua.

1 Reis 15.23,24

¹¹ Ha'e gui oive rei tema Asa rekokue regua. Ha'e rami avi mba'emo ojapo va'ekue jypy guive opaa peve oî 'rã kuaxia Judá ha'e Israel pygua huvixa kuery rekokue oia re.

¹² Trinta e nove ma'et'ya re ma Asa huvixa o'i jave py opy raxy gui popu'avei. Imba'eaxy raxa oupy. Ha'e rami te'i SENHOR pe ma voi ndojerurei, poropoanoa kuery re rive ojeroviave vy.

¹³ Ha'e gui ma Asa ndoikoveve'i ma guamo'i kueryague rami. Quarenta e um ma'et'ya re openaa py ma omano.

¹⁴ Ha'e ramo onhono poraa okuapy tetã Davi rekoague py nguparã ae ojo'o ukaague py. Ha'e rami vy pete'i tupa áry onhono okuapy, ha'e ijyvyry rupi omonyê heakuã porã va'e, mba'emo heakuã porã va'e apoa kuery anho oikuaa rami vy oguereko katu va'ekue. Heta raxa avi hexe ima'endu'aa rupi mba'emo oapy okuapy va'e.

17

Josafá po'akaa omo'i atãague

¹ Ha'e gui ma Judá pygua huvixa Asa rekovia ta'y Josafá ju o'i. Ha'e rami vy mba'emo oguereko katu Israel kuery rovai guarã.

² Judá vyv rupi tetã ikorapa va'e ha'e javi rupi omo'i xondaro kuery harðarã, ha'e Efraim vyv re tuu Asa tetã ojopy va'ekue rupi voi.

³ SENHOR oiko Josafá reve, mba'eta tamoi Davi jypy oikoague rami oiko ramo, Baal ra'angaa pe'ÿ.

⁴ Ha'e rami vy oeka oikovy nguu ruete, ojapo uka va'e rupi oiko vy, Israel kuery ikuaia rami e'ÿ.

⁵ Ha'e ramo ipo py SENHOR omo'i atãve huvixa o'i aguã, ha'e ixupe Judá kuery pavê ome'ê okuapy mba'emo hepyve ha'e iporã va'e oguerekopa peve.

⁶ SENHOR guigua tape rupi oikoa rupi ipy'a guaxuve ovy. Ha'e vy Judá vyv jave gui ombovaipa vyv'ã rupi ombojeroviaaty ikuai va'ekue, mba'emo ra'angaarã vyvra omopu'ã mbyre guive.

⁷ Ha'e gui mboapy ma'et'ya re ma huvixa o'i jave py omondouka guembiguai yvatekueve Ben-Hail, Obadias, Zacarias, Natanael ha'e Micaías, Judá regua tetã ikuaia rupi nhombo'e aguã.

⁸ Ha'e va'e kuery reve omondouka avi levita kuery Semaías, Netanias, Zebadias, Asael, Semiramote, Jônatas, Adonias, Tobias ha'e Tobe-Adonias. Levita kuery reve omondouka avi sacerdote kuery Elisama ha'e Jeorão.

⁹ Ha'e ramo Judá vyv jave rupi kuaxia SENHOR guigua lei oia ogueraa vy nhombo'e jogueravy. Ha'e rami vy Judá re tetã ikuai va'e ha'e javi rupi ombo'e oje'oivy heta va'e kuery.

¹⁰ Ha'e ramo Judá vyv'ry rupi huvixa ikuai va'e áry ou SENHOR po'akaa gui okyjepa aguã, huvixa Josafá rovai popu'ã aguã rami.

¹¹ Ha'e rami ae avi flisteu kuery va'e regua ogueru okuapy mba'emo Josafá pe, prata voi ome'ê ukua rami ome'ê. Ixupe Arábia pygua kuery voi ogueru okuapy mymba kyrigüeve va'e: sete mil e setecentos vexa'i ava ha'e sete mil e setecentos kavara ava.

¹² Ha'e ramo Josafá ipo'akave tema ovy. Ha'e rami vy Judá re ojapove oo ikorapa va'e, ha'e tetã tembi'u omo'i porã atyrã.

¹³ Judá re tetã ikuai va'e rupi ojapo reta mba'emo. Jerusalém tetã py oguereko avi avakue joe opu'ã aguã katy oo va'erã ipy'a guaxukueve anho.

¹⁴ Po rami ma ha'e kuery mbovy pa pete'i-te'i regua ikuaia: Judá re ma ikuai huvixa kuery mil xondaro re opena va'e. Ha'e kuery ruvixa ma Adna oiko, ha'e hexeve ikuai avi trezentos mil avakue ipy'a guaxukueve va'e meme.

¹⁵ Ha'e rire ma huvixa Joanã, ha'e hexevegua duzentos e oitenta mil.

¹⁶ Ha'e gui ma Zicri ra'y Amasias ju. Ha'e va'e ma opy'a ha'e javi py SENHOR pe omba'eapoxea rupi oiko. Hexevegua ma duzentos mil avakue ipy'a guaxukueve ikuai ijayvua ojapo va'erã.

¹⁷ Ha'e gui Benjamim kuery va'e regua ava ipy'a guaxuve va'e ma Eliada. Hexevegua ma duzentos mil ikuai guyrapa ha'e hu'y jokia revegua.

¹⁸ Ha'e va'e rire ma Jozabade ha'e hexeve cento e oitenta mil ikuai joe opu'ã aguã rami hembiporupa va'e.

¹⁹ Ha'e va'e kuery ma huvixa pe ikuai va'e meme, xondaro kuery mboae Judá vyv re tetã ikuai va'e rupi huvixa omo'i va'ekue jaipapa e'ÿ re.

18

1 Reis 22.1-4

¹ Josafá ma mba'emo hepyve ha'e iporã va'e anho oguereko, oata aguã rami e'ÿ. Acabe reve onhemoirü guive.

² Ha'e rami vy mbovy ma'et'ÿ re rei e'ÿa py ma Acabe pou vy oo Samaria tetã py oia py. Ha'e ramo Acabe omovaê vy ojuka vexa'i ha'e vaka ra'y oata aguã rami e'ÿ, Josafá ha'e hupive ou va'ekue ha'e javi pe. Ha'e vy ijayvu joupive Ramote-Gileade re opu'ã aguã katy jogueraa aguã re.

³ Ha'e vy huvixa Israel pygua Acabe oporandu Judá pygua huvixa Josafá pe:

— Ndee pa reo avi 'rã xereve Ramote-Gileade katy?

Josafá ombovai:

— Xee ma aiko 'rã ndereve, ha'e xeivygua kuery voi ndevygua kuery revegua ae avi 'rã ikuai. Roje'oi 'rã nderupive joe nhapu'ã aguã — he'i.

1 Reis 22.5-12

⁴ Ha'e gui ma Josafá aipoe'ive ju Israel pygua huvixa pe:

— Eikuaa pota ranhe ke SENHOR ijayvua re.

⁵ Ha'e ramo Israel pygua huvixa omboatpa profeta kuery, quatrocentos avakue ha'e javi vy. Ha'e vy aipoe'i ha'e kuery pe:

— Taa pa Ramote-Gileade re apu'ã aguã, tyrã pa taa eme?

Ha'e kuery ombovai:

⁶ — Tereo oreruvixa, mba'eta Nhanderuete omboaxapa 'rã ndepo py — he'i okuapy.

Ha'e rã Josafá ma aipoe'i:

— Nda'ipoi teri pa apy profeta SENHOR pegua ete jaikuaa pota ranhe aguã?

⁷ Ha'e rã Israel pygua huvixa aipoe'i Josafá pe:

— Pete'i teri oiko ixupe SENHOR ayvu re nhaporandu uka aguã. Ha'e rã hexe ma xee ndaxea'ei, mba'eta xerenonderã re nomombe'ui teri iporã va'e, iporã e'ỹ va'e anho.

⁸ Ha'e va'e ma Inlá ra'y Micaías — he'i.

Josafá ombovai:

— Huvixa, ha'e rami ndeayvu eme — he'i.

Ha'e gui ma Israel pygua huvixa pete'i guembiguai oenoĩ vy ixupe aipoe'i:

— Tou pojava ta'vy xea py Inlá ra'y Micaías — he'i.

⁹ Ha'e va'e jave py ma Israel pygua huvixa ha'e Judá pygua huvixa reve jogueroguapy nhoguenoiny pete'i-te'i guenda openaaty py ae, huvixa pegua ao py ae onhemonde reve, Samaria tetã kora rokê vy'vy, mba'emo moa'iyaty py. Ha'e kuery renonde ma profeta kuery ha'e javi ijayvu okuapy.

¹⁰ Ha'e gui Quenaana ra'y Zedequias ma oguereko vaka rakua ra'angaa ferro gui ojapo va'ekue. Ha'e vy aipoe'i:

— Po rami SENHOR ijayvu: “Kova'e ramigua py reipyxo 'rã Síria pygua kuery reitypa peve”, he'i.

¹¹ Ha'e gui profeta kuery mboae ma ha'e va'e ayvu rupi meme ijayvu vy

— Tereo ke Ramote-Gileade katy, oreruvixa, ha'e py ma ndepo'aka 'rã, mba'eta SENHOR omboaxapa 'rã ndepo py — he'i okuapy.

1 Reis 22.13-28

¹² Ha'e gui Micaías reruarã tembiguai oo va'ekue ixupe ijayvu vy aipoe'i:

— Ma'ẽ, profeta kuery ikuai va'e ma pete'i rami ijayvu kuri huvixa pe mba'emo porã re anho. Ndeayvu 'rãgue ha'e kuery ijayvuague rami ae, mba'emo porã re anho.

¹³ Micaías ombovai:

— Ha'e rami avi anhetẽ SENHOR oikove va'e rupi aura vy aipoa'e: Xee ma Xeruite aipoe'i ukua rami ae 'rã xeayvu — he'i.

¹⁴ Ha'e gui huvixaa py ovaẽ ramove ixupe oporandu:

— Micaías, toroo ae pa Ramote-Gileade re ropu'ã vy, tyrã pa toroo eme?

Jypy Micaías ombovai:

— Tapeo, ha'e vy pendepo'aka 'rã, mba'eta ndepo py SENHOR omboaxapaa 'rã — he'i.*

¹⁵ Ha'e rami rã huvixa aipoe'ive ju ixupe:

— Mbovykue ma tu ndevy xeayvu, SENHOR rery rupi anhetẽ va'e re anho ndeayvu aguã?

¹⁶ Ha'e rã Micaías ombovai:

— Ha'e gui Israel kuery xee aexapa vvyty áry rupi omoaĩmbaa ramo, vexa'i ija e'ỹ va'e rami. Ha'e ramo SENHOR aipoe'i: “Peva'e kuery ma ija e'ỹ va'e vy pete'i-te'i too porã ngoo katy”, he'i xevy.

¹⁷ Ha'e ramo Israel pygua huvixa aipoe'i Josafá pe:

— Aipo nda'ei ri ty'y ndevy: “Ha'e va'e ma xerenonderã re nomombe'ui ae iporã va'e, ha'e rã iporã e'ỹ va'e anho”, ha'e ma voi kuri?

¹⁸ Ha'e gui ma Micaías ijayvuve tema:

— Endu ha'vy SENHOR ayvu. Xee aexa SENHOR guenda openaaty py oguapy oiny rã, ha'e oĩa py ikuai avi ixondaro kuery yva pygua ha'e javi, ijaxu e'ỹa re ha'e ijaxua re.

¹⁹ Ha'e gui SENHOR oporandu: “Mava'e 'rã tu Acabe mbotavyarã oo, Ramote-Gileade py ho'a aguã?” Ha'e ramo pete'i ma pete'i rupi ijayvu, ha'e rã amboae ma amboae rami ijayvu.

²⁰ Ha'e gui pete'i nhe'ẽ ou vy ojexa uka SENHOR renonde. Ha'e va'e aipoe'i: “Xee ma aa 'rã ambotavy”, he'i. Ha'e rã SENHOR oporandu: “Mba'e py ha'vy?”

²¹ Ombovai: “Aa 'rã nhe'ẽ imbotavyarã aĩ ixupegua profeta kuery ha'e javi juru re”, he'i. Ha'e ramo SENHOR aipoe'i: “Ndee ma rembotavy 'rã, ndepo'aka 'rãe. Tereo, ejapo ha'e rami”, he'i.

²² Ha'e rami rã kova'e profeta kuery ndevyguia ikuai va'e juru re SENHOR omoĩ ra'e nhe'ẽ nembotavyarã. Ha'e rã SENHOR ma nderovai ijayvu guive mba'emo vai oiko aguã re — he'i.

²³ Ha'e gui Quenaana ra'y Zedequias onhemboja vy oipete Micaías. Ha'e vy aipoe'i:

²⁴ — Ma rupi tu ha'vy xegui SENHOR nhe'ẽ oẽ ndevy ijayvu aguã?

Micaías ombovai:

— Reikuaa 'rã opy ja'o py renhemi aguã reike jave — he'i.

²⁵ Ha'e gui ma Israel pygua huvixa ju aipoe'i:

— Pejopy ke Micaías, ha'e pemboaxa tetã ruvixa Amom ha'e huvixa ra'y Joás po py.

²⁶ Ha'e vy aipopeje: “Po rami huvixa ijayvu: ‘Pemboty nhuã py kova'e ava, ha'e pembojexavai mbojape ha'e vy yuxã'i kuerei peme'ẽa py, ajevvy porã ju e'ỹa ja', he'i uka”, peje.

* 18:14 Micaías ma profeta ramigua kuery ayvu rupi rive ranhe ijayvu, anhetẽ va'e'ỹa rami oikuaa uka vy.

²⁷ Ha'e gui Micaías aipoe'i:

— Ha'e rami teĩ xapy'a rei anhetē ri rejeyv porā ramo SENHOR ayvu rupi e'ỹ xeayvu ramo ma 'rā. Pendu pota pova'e re, peē kuery ha'e javi! — he'i.

1 Reis 22.29-40

²⁸ Ha'e gui ma Ramote-Gileade katy Judá pygua huvixa Josafá reve Israel pygua huvixa jogueraa.

²⁹ Israel pygua huvixa aipoe'i Josafá pe:

— Xee ma amboae rami anhemonde reve 'rā aa joe apu'ā aguā katy. Ha'e rā ndee ma ndeao py ae 'rā renhemonde — he'i. Ha'e rami vy Israel pygua huvixa amboae rami onhemonde reve oo joe opu'āa py.

³⁰ Síria pygua huvixa aipoe'i ma voi okaróxa mboguataa trinta e dois huvixa ikuai va'e pe: “Ou va'e-va'e rovai rive pepu'ā eme yvatekueve teĩ, ha'e rā Israel pygua huvixa rovai anho'i”, he'i va'ekue.

³¹ Ha'e gui huvixa karóxa mboguataa kuery ma Josafá oexa vy aipoe'i okuapy:

— Peva'e ae ri nhi'ā Israel pygua huvixa — he'i vy ha'e katy oje'oi ojoko aguā. Ha'e ramo Josafá ojumpukai rā SENHOR oepy vy ojoko oĩa katy oje'oi ve'ỹ aguā.

³² Ha'e gui huvixa karóxa mboguataa kuery ma Israel pygua huvixa e'ỹ ae ra'ea oikuaa vy oejapa ju.

³³ Ha'e gui peteĩ ava guyrapa omoatā vy opoia katy rei opoi vy onhyvō Israel pygua huvixa pexo regua pa'ũa py rive. Ha'e ramo aipoe'i guembiguai karóxa mboguataa va'e pe:

— Ejere joe opu'āa mbyte gui xereraa aguā, mba'eta xepyxaa ma — he'i.

³⁴ Ha'e va'e ára ma joe opu'āve tema okuapy. Ha'e rā huvixa ma Síria kuery oexaa py opu'ā ho'amý okaróxa py ka'aru peve. Ha'e gui kuaray oike ma jave omano.

19

Josafá pe profeta Jeú ijayvu eteague

¹ Ha'e gui Judá pygua huvixa Josafá ma oiko porā'i reve ojevy ju Jerusalém py ngoo oĩa katy.

² Ha'e rā Hanani ra'y profeta Jeú ma oē ouvvy huvixa Josafá ovaexĩ aguā. Ha'e vy aipoe'i ixupe:

— Ha'eve nda'u heko vai va'e reipytyvō SENHOR re nda'ija'ei va'e kuery reayvuvea rupi? Ha'e nunga rupi nde'áry ou 'rā SENHOR poxya.

³ Ha'e rami avi ndere ojou guive iporā va'e, mba'eta nhandevvy gui reipe'apa va'ekue ta'angaarā yvyra omopu'ā mbyre, ndepy'a re Nhanderuete reka aguā remoĩ guive — he'i.

Joguerekoarā kuery omoĩague

⁴ Josafá ma Jerusalém pygua ae oiko va'eri oo avi 'rā heta va'e kuery ikuai rupi Berseba guive Efraim re yvyty ikuai va'e rupi. Ojapo 'rā ovy SENHOR guamoĩ kuery ruete pe ju ojevy aguā.

⁵ Ovyv jave rupi omoĩ joguerekoarā kuery, tetā ikorapa va'e ha'e javi rupi, peteĩ-teĩ tetā py ikuai aguā.

⁶ Joguerekoa kuery omoĩ vy aipoe'i ha'e kuery pe:

— Pexa pota 'rā mba'exa pa pejapo aguā re, mba'eta avakue 'arandua rupi rive e'ỹ 'rā peikuaa pota, SENHOR guigua rupi anho. Ha'e ramo penhomboayvua py ha'e oĩ 'rā peē kuery reve.

⁷ Ha'e nunga rupi aỹ SENHOR renonde peiko tema pejererokyjea rupi. Penheangu tema pejoguerekoa rupi, mba'eta SENHOR Nhanderuete re ma noĩ ha'ev'e'ya rami joguereko aguā, mba'eta ha'e ma ndoayvuvei 'rā peteĩ anho, neĩ ndojopyi 'rā ome'ẽmby — he'i.

⁸ Ha'e rami ae avi Jerusalém tetā py ju Josafá ojevy ma rire ha'e py voi omoĩ levita ha'e sacerdote kuery va'e regua, Israel kuery akā ikuai va'e guive, SENHOR gui vy nhomboayvu ha'e joo rami e'ỹ-e'ỹ oikuaa va'e re oikuaa pota aguā.

⁹ Ha'e kuery omoĩ vy aipoe'i:

— Peteĩ rami pendepy'aa py ojeroviapy 'rā peiko SENHOR renonde pejererokyjea rupi.

¹⁰ Ha'e gui peē kuerya py ou 'rā penderyvy kuery tetā py ikuai gui, jouguy omoẽague re oikuaa pota uka vy, ha'e'ỹ vy lei re oĩ va'e re, ojapo uka pyre re, ombopara pyre e'ỹ vy imongetaague re mba'e. Ha'e ramo ha'e kuery pe pendeayvu 'rā SENHOR renonde ojevavy e'ỹ aguā, peē ha'e penderyvy kuery re ipoxya ou e'ỹ aguā. Ha'e rami ae ke peiko pejevavy e'ỹ aguā.

¹¹ Ha'e gui apy ma oĩ sacerdote yvateve va'e Amarias. Ha'e va'e ma opena 'rā mba'emo SENHOR regua ikuai va'e re. Ha'e rā mba'emo huvixa regua re opena va'e ma Ismael ra'y Zebadias, Judá regua yvateve va'e. Levita kuery voi ikuai 'rā penepytyvōarā. Penembaraete ke ha'vy pejoguereko porā aguā. Ha'e gui SENHOR oiko 'rā heko porā va'e reve — he'i.

20

Moabe ha'e Amom pygua kuery re Josafá ipo'akaague

¹ Ha'e va'e rire ma Moabe ha'e Amom ramymino kuery ou okuapy Josafá re opu'ā aguā, meunita kuery regua reve.

² Ha'e ramo amongue ou vy Josafá pe omombe'u. Ha'e vy aipoe'i:

— Heta raxa ou ta okuapy nderovai opu'ā aguā, ye'ẽ rovai gui ha'e Síria yvy gui ou. Ne'exa, Hazazom-Tamar py ma ovaẽ, En-Gedĩ py — he'i.

³ Ha'e ramo Josafá okyje vy ojee omoĩ SENHOR oeka aguā. Ha'e rami vy ijayvu Judá regua ha'e javi okaru e'ỹ re ikuai aguā.

⁴ Ha'e ramo Judá kuery onhemboatypa okuapy SENHOR oepy aguā re ojerure aguā. Judá regua tetā ha'e javi rupigua ou okuapy SENHOR oeka aguā.

⁵ Ha'e gui ma Judá ha'e Jerusalém pygua kuery ijaty va'e renonde py Josafá opu'ã ho'amy, SENHOR pegua oo py, oka pyau vvy'iry.

⁶ Ha'e vy aipoe'i:

— SENHOR oreramoí kuery ruete, ndee ae e'ÿ teve Oreruete yva pygua? Ndee ae e'ÿ teve ha'e javi regua ruvixa re ndepo'aka va'e? Mba'eta ndepo py oí mbaraetea ha'e po'akaa, nda'ipoi guive ndejokoarã.

⁷ Ha'e gui Oreruete, ndee e'ÿ ri ty'y kova'e vvy regua reipe'apa va'ekue ndevyguia Israel kuery renonde gui? Ha'e nerembiayvu Abraão ramymino kuery pe'ÿ teve kova'e vvy reme'ẽ raka'eve rã peve ikuai aguã?

⁸ Ha'e ramo apy ae ha'e kuery hekoa ha'e ojapo okuapy peteí henda iky'a e'ÿ va'e nderery oí aguã. Ha'e vy aipoe'i:

⁹ “Xapy'a rei mba'emo vai orere ou ramo, kyxe oremonoingy axyarã, vixo vaikue e'ÿ vy karuai mba'e, ha'e ramo kova'e oo py roexa uka 'rã ndevy, mba'eta kova'e oo re ae nderery oí. Ha'e gui rojexavai reia py rojapukai 'rã ndevy. Ha'e ramo ndee ma rojapukaia rendu vy orerepy 'rã”, he'i okuapy raka'e.

¹⁰ Ha'e gui aÿ ou ma Amom ha'e Moabe guigua, Seir vvyty guigua kuery guive. Ha'e va'e kuery vvy re ma Egipto vvy gui Israel kuery reru jave nerembopo'akai va'ekue. Ha'e ramo oreramoí kuery amboae katy ojepekuavo vy nomombai raka'e.

¹¹ Ha'e rami va'ekue ri aÿ ha'e kuery ou okuapy ndevyguia vvy gui oremoxẽmba aguã, oreyvyrã reme'ẽ va'ekue teí.

¹² Ha'e gui Oreruete, nerembopagai ta ri ty'y ha'e kuery? Mba'eta ore kuery re ma noí mbaraetea kova'e kuery orere opu'ã ouvy va'ekue rojoko aguã. Ore ma ndoroikuai rojapo aguã. Ha'e rami avi ndea katy roma'ẽ tema rokuapy — he'i.

¹³ Ha'e jave SENHOR renonde py Judá kuery ha'e javi opu'ã okuapy, kyrĩgue'i, kunhague ha'e ta'y kuery ha'e javi reve.

¹⁴ Ha'e gui ijaty va'e kuery mbyte py SENHOR Nhe'ẽ ou vy onhemonde Zacarias ra'y Jaaziel re. Ha'e va'e ma Benaia ra'y, Benaia ma Jeiel ra'y, Jeiel ma Matanias ra'y, Matanias ma levita, Asafe ramymino kuery va'e regua.

¹⁵ Ha'e ramo ha'e va'e aipoe'i:

— Pendu ke, peẽ Judá ha'e Jerusalém py penderekoa va'e, ndee huvixa Josafá voi, pendevy SENHOR ijavyva rã. Pekiye eme, penhemondy eme guive kova'e kuery gui heta teí. Mba'eta ha'e kuery re opu'ã va'erã ma peẽ e'ÿ, Nhanderuete ae.

¹⁶ Ha'e nunga rupi ko'ẽ ramo peje'oi 'rã ha'e kuery rovai. Ha'e kuery ou 'rã okuapy Ziz vvy'ãmbea rupi, ha'e Jeruel tekoa e'ÿa renonde katy 'rã ovaẽ.

¹⁷ Ha'e py peovaexi teí peẽ ma napepu'ãi 'rã ha'e kuery re. Pepyta ranhe pe'amy, ha'e gui pexa 'rã SENHOR pendereraa jepe ramo, Judá ha'e Jerusalém pygua kuery ha'e javi. Pekiye eme, penhemondy eme guive. Ko'ẽ ramo tapo ha'e kuery peovaexi aguã, mba'eta SENHOR oiko 'rã peẽ kuery reve — he'i.

¹⁸ Ha'e ramo huvixa Josafá oí guenapy'ã re, ngova vvy re omovaẽ reve. Judá ha'e Jerusalém py hekoa va'e kuery voi guenapy'ã re ikuai SENHOR renonde py. Ha'e rami vy omboete okuapy.

¹⁹ Levita Coate ha'e Corá ramymino kuery voi oporaei atã reve omboete okuapy SENHOR Israel kuery ruete.

²⁰ Ha'e gui ma ko'ẽgue aje'ive'i reve ovypa ma vy tekoa e'ÿa katy oje'oi, Tecoa tetã rupi. Ha'e kuery oje'oi jave Josafá opu'ã ho'amy vvy aipoe'i:

— Judá ha'e Jerusalém py penderekoa va'e, pendu ke xeavyu rã! Pejerovia tema SENHOR Penderuete re, ha'e ramo peí atã 'rã. Ixupegua profeta kuery ijavyvague perovia tema, ha'e ramo peiko porã 'rã — he'i.

²¹ Heta va'e kuery reve ijavyu ju ranhe vy omoí SENHOR pe oporaei va'erã. Ha'e kuery ma ao iky'a e'ÿ va'e py onhemonde reve oje'oi xondaro kuery renonde rupi. Ha'e vy Nhanderuete pe oporaei vvy aipoe'i:

— Perovy'a tema SENHOR, mba'eta nhanemboaxya oí riae raka'e rã peve — he'i jogueravy.

²² Ha'e gui ha'e kuery oporaei reve omboete aguã omboypy ramove SENHOR ojapo Amom, Moabe pygua ha'e Seir vvyty pygua kuery Judá rovai guarã ou va'ekue re opu'ã aguã rami. Ha'e ramo oitypaa.

²³ Mba'eta Seir vvyty pygua kuery rovai re Amom ha'e Moabe pygua kuery ae opu'ã okuapy, omomba ha'e ojukapa aguã. Ha'e gui ha'e kuery omomba Seir pygua kuery rire jomeme nhomoirũ-irũ okuapy jova-jovai gui jujukapa peve.

²⁴ Ha'e gui Judá pygua kuery ma vvyty áry ovaẽague gui vvy'ã juy katy oma'ẽ vy oexa pota rã heta va'ekue te'õgue anho rive ikuai ra'e vvy rupi ho'apaague py, peteíve ma ndoikovevei.

²⁵ Ha'e rami vy Josafá ngupivegua kuery reve ogeujy jogueravy imba'e rei-reikue ogueraa aguã. Ha'e vy te'õgue ikuai va'e mbyte rupi ojou okuapy mba'emo porãgue ha'e ovare ete va'e oata aguã rami e'ÿ. Omba'erã oipe'apa vvyoi aguã nda'evei. Heta vaipa rã mboapy ára re oipe'a okuapy mba'emo ikuai va'ekue.

²⁶ Ha'e gui irundy araa py mae ma onhemboaty ju okuapy vvyvgua “Nhomoiny porãa” 'epy va'e py. Ha'e py ma oporaei okuapy SENHOR pe. Ha'e nunga rupi ae ha'e va'e vvyugua pe “Nhomoiny porãa” 'ea aÿ peve.

²⁷ Ha'e gui Judá ha'e Jerusalém pygua avakue ojevypa ju. Ha'e kuery renonde ma Josafá oo. Ha'e rami vy Jerusalém katy ojevypa ju jogueravy ovy'a reve, hovaigua kuery re SENHOR ombopo'akapa vy ombovy'a rire.

²⁸ Jerusalém tetã py ju ovaẽmba okuapy. Mbaraka, ixã reta va'e ha'e mimby guaxu py omonhe'ẽ re jogueraa SENHOR pegua oo peve.

²⁹ Ha'e gui amboae vvy regua kuery ma Israel rovaigua kuery re SENHOR opu'ãague oendu okuapy ramo ha'e kuery re Nhanderuete ombou ndaekorãvei okuapy aguã.

³⁰ Ha'e rami py Josafá openaa rupi ikuai porã ju, jovaive-ive re opytu'u aguã Nhandueruete ome'ê rire.

1 Reis 22.41-50

³¹ Ha'e rami py Josafá opena Judá kuery re. Huvixa oĩ ypy'i jave trinta e cinco ma'et'ý oguereko. Ha'e vy vinte e cinco ma'et'ý re opena Jerusalém py. Ixy ma Sili rajy Azuba.

³² Ha'e ma nguu Asa oikoague rupi ae oiko. Ha'e va'e rupi oikoa gui ndojepe'ai vy ha'evea ramigua meme ojapo SENHOR renonde.

³³ Ha'e rami teĩ yvy'ã rupi ombojeroviaaty ikuai va'e ma nombovaipai, mba'eta heta va'e kuery opy'a re nomoi teri guamoĩ kuery ruete pe anho ikuai aguã.

³⁴ Ha'e gui oĩve rei tema Josafá rekouke regua. Ha'e rami avi mba'emo ojapo va'ekue jypy guive opaa peve noi 'rã teve kuaxia Israel pygua huvixa kuery rekouke Hanani ra'y Jeú ombopara va'ekue re?

³⁵ Ha'e va'e rire ma Judá pygua huvixa Josafá onhemoirũ Israel pygua huvixa Acazias reve, heko vai ete va'eri.

³⁶ Hexeve onhemoirũ kanoã guaxu ojapo okuapy aguã Társis katy oo va'erã. Ezium-Geber py ojapo.

³⁷ Ha'e rami teĩ Josafá rovai profeta Maressa guigua Dodavã ra'y Eliézer ijayvu. Ha'e vy aipo'e'i: — Acazias reve renhemoirũ ramo SENHOR omomba ma 'rã mba'emo rejapo uka va'ekue — he'i. Ha'e rami rire kanoã guaxu ha'e javi opẽmba vy Társis katy ndooi.

21

2 Reis 8.16-24

¹ Ha'e gui ma Josafá ndoikovevei'i ma guamoĩ kueryague rami. Ha'e ramo onhono porãa tetã Davi rokoague py. Ha'e gui ta'y Jeorão ju oĩ nguu rekovia.

² Ikuai avi tyvy kuery Josafá ra'ykuue mboae: Azarias, Jeiel, Zacarias, Azarias, Micael ha'e Sefatias. Ha'e va'e kuery ma Israel pygua huvixa Josafá ra'y kuery meme.

³ Ha'e kuery peguarã ma tuu ojapo uka reta va'ekue prata ha'e ouro guigua, mba'emo iporãgue ha'e Judá regua tetã ikorapa va'e voi. Ha'e rã huvixa oĩ aguã ma gua'y Jeorão pe oeja, jypykuu ramo.

⁴ Ha'e gui ma nguu rekovia Jeorão oĩ ma vy onhemombarateve. Guyvy kuery voi ojukapa kyxe py, Israel pygua yvatekueve guive.

⁵ Jeorão ma huvixa oĩ ypy'i jave py trinta e dois ma'et'ya oguereko. Ha'e gui oito ma'et'ý re opena Jerusalém py.

⁶ Ha'e ma Israel pygua huvixa kuery ikuaiague rupi rive oiko, Acabe ro pygua kuery ikuaiague rami avi, tajy re ae omenda rire. Ha'e rami vy SENHOR renonde rupi mba'emo vai anho ojapo oikovy.

⁷ Ha'e rami teĩ SENHOR nomombaxeĩ Davi ramymino kuery, Davi reve ngupive guarã ojapo rire. Mba'eta ixupe ijayvuague rami vy hekovia nhomoexakãarã omoĩ riae aguã re, ha'e gui hamymino kuery rekovia ju.*

⁸ Jeorão oĩ jave ma Edom pygua kuery opu'ã okuapy Judá kuery rovai ipo'akaa guy py nda'ikuaixevei vy. Ha'e rami vy omoĩ okuapy nguvixarã ae.

⁹ Ha'e nunga rupi Jeorão ma guembiguai yvatekueve ha'e karóxa oguereko va'e ha'e javi reve oje'oi ha'e katy. Ha'e rã Edom pygua kuery ojoko imbokuapy, ikaróxa ja huvixa kuery guive. Ha'e rami teĩ pyavyve Jeorão kuery opu'ã vy oitypa.

¹⁰ Ha'e rami py Edom pygua kuery opu'ãmba okuapy Judá kuery po'akaa gui oo jepe aguã, aỹ peve guarã. Ha'e va'e jave ae avi Libna pygua kuery opu'ã avi Jeorão rovai, SENHOR guamoĩ kuery ruete gui ojepe'a rire.

¹¹ Judá re yvy'ã ikuai va'e áry Jeorão ojapo avi ombojerovia atyrã. Ha'e va'e py ma ojapo Jerusalém pygua kuery mba'emo ra'angaa re rive ojerovia aguã rami, Judá kuery ha'e javi ndojejokoi aguã rami ojapo.

¹² Ha'e gui ipo py ome'ëa peteĩ kuaxia para profeta Elias ombou va'ekue. Ha'e va'e re ipara oiny: "Po rami SENHOR neramoĩ Davi ruete ijayvu: 'Ndee ma nderu Josafá ha'e Judá pygua huvixa Asa oikoague rami e'y reiko,

¹³ Israel pygua huvixa ikuaiague rami anho reiko va'e. Ha'e vy rejapo Judá ha'e Jerusalém pygua kuery mba'emo ra'angaa re rive ojerovia aguã rami, Acabe ro pygua kuery ombojeroviaa rami ae avi. Ha'e gui nderyvy kuery nderu ro pygua ae rejukapa, ha'e kuery ndegui hi'arandukueve va'eri.

¹⁴ Ha'e rami rire SENHOR ombojexavai 'rã ndevyguu kuery opa marãgua mba'eaxy py, ndera'y ha'e ndera'yxy kuery guive, ha'e gui ndejeupe guarã rejou va'ekue ha'e javi.

¹⁵ Ha'e ramo rejexavai ete 'rã nderyekue rupi mba'eaxy rendu va'e gui, ko'ẽ nhavõ rejexavaive tema 'rã reovy, nderyekue oẽmba peve', he'i."

¹⁶ Ha'e gui ma SENHOR ojapo Jeorão rovai filisteu kuery opu'ã aguã rami, Arábia pygua kuery Etiópia katy'i hekoa va'e guive.

¹⁷ Ha'e ramo ha'e kuery oupa vy opu'ã okuapy Judá kuery rovai. Ha'e rami vy huvixa ro py imba'e rei-rei ojou va'e ogueraapa, ta'y ha'e ta'yxy kuery voi. Neĩ peteĩ ta'y kuery va'e regua ndoejai, kunumive'i va'e Jeoacaz anho e'ỹ vy.

¹⁸ Ha'e nunga oikopa ma rire SENHOR omoingo axy hyekue rupi okuera aguã rami e'ỹ.

¹⁹ Ko'ẽ nhavõ ojexavaive tema ovy. Ha'e gui mokoĩ ma'et'ya py ma mba'eaxy gui hyekue oẽmba oiny. Ha'e vy ojexavai ete reve omano. Ha'e rã ixupe guare kuery ma hekuã porã va'e ndoapyi ima'endu'a aguã, guamoĩ kuery omano rã ojapoaty rami e'ỹ.

* 21:7 Davi pe SENHOR ijayvuague ma 1 Reis 11.34-36, 15.4, 2 Crônicas 21.7 ha'e Salmo 132.17 py. Ha'e gui "Nhomoexakãa" he'ia ma huvixave raka'eve rã oiko va'erã re ijayvu vy, Jesus Cristo rekorã re guive (Lucas 2.30-32; João 8.12).

²⁰ Ha'e va'e ma trinta e dois ma'et'ý oguereko huvixa oĩ ypy jave. Ha'e gui Jerusalém py opena oito ma'et'ý re. Omano ramo avave rei nda'ipy'a vai. Ha'e rami vy tetã Davi rekoague py onhono porãa teĩ yma guare huvixa kuery rupa vyv'ýry e'ý guive.

22

2 Reis 8.25-29

¹ Jeorão rekovia Jerusalém pygua kuery nguivixarã omoĩ ta'y kyríve va'ekue Acazias, mba'eta ha'e kuery ikuaia py mba'emo pe'aparaã Arábia pygua kuery reve ovaẽ va'e tyke'y kuery ojukapa rire. Ha'e rami vy Jeorão ra'y Acazias ae oĩ Judá pygua ruvixarã.

² Acazias vinte e dois ma'et'ý oguereko jave oĩ ypy'i huvixa. Ha'e vy peteĩ ma'et'ý ete'i opena Jerusalém py.

³ Ixy ma Onri rajy Atalia. Ixy ombo'e vai rire Acazias oiko Acabe kuery ikuaia rami.

⁴ Acabe kuery ikuaia rami ae mba'emo vai anho ojapo SENHOR renonde rupi, mba'eta tuu omano rire ha'e kuery ae omongeta okuapy okanhy aguã rami.

⁵ Ha'e kuery omongetaa rami oiko vy Israel pygua huvixa Jorão reve jogueraa Ramote-Gileade katy Síria pygua huvixa Hazael rovai opu'ã aguã. Ha'e ramo Síria pygua kuery oipyxo Jorão.

⁶ Ha'e ramo Acabe ra'y huvixa Jorão ma Ramã tetã py Síria pygua huvixa Hazael re opu'ãa py oipyxo okuapy. Ha'e ramo Jezreel tetã py ju ojevye okuera aguã. Ha'e gui Jezreel py Jorão imba'eaxy oupya py ou Judá pygua huvixa Jeorão ra'y Acazias oexa aguã.

Jeú Acazias ojukaague

⁷ Nhanderuetee Acazias ojukaxe ramo ae oo huvixa Jorão pou vy. Mba'eta ha'e ou vyve Jorão reve jogueraa Ninsi ra'y Jeú rovai opu'ã aguã. Ha'e va'e ma SENHOR oiporavo ma voi huvixa Acabe ro pygua kuery mombaaraã.

⁸ Ha'e ramo Jeú Acabe ro pygua kuery ojukapa ma rire ojou avi Judá regua yvatekueve ha'e Acazias ryvy ra'y kuery oipytyvõa rupi ikuai va'ekue. Ha'e rami vy ha'e kuery voi ojukapa.

⁹ Ha'e va'e rire oeka uka avi Acazias. Ha'e rã Samaria tetã py ojou onhemia rupi oikoa py. Ha'e rami vy Jeú oĩa py ogueru vy ojuka okuapy. Hembiguaĩ kuery ae onhono porã okuapy, mba'eta aipoe'i: "Josafá opy'a ha'e javi py SENHOR oeka va'ekue ra'y", he'i vy. Ha'e rami rire Acazias ro pygua kuery regua ndoikovei huvixa oĩ va'erã.*

2 Reis 11.1-3

¹⁰ Ha'e gui ma Acazias xy Atalia oendu opi'a omano maa. Ha'e vy opu'ã vy ojukapa Judá pygua huvixa ramymínokue ha'e javi.*

¹¹ Ha'e rã Acazias ra'y Joás ma ha'e kuery ojukaa ta jave huvixa Jeroão rajykue Jeosabeate ogueraa jepe huvixa ra'y kuery mbyte gui. Ha'e rami vy onhomi peteĩ opy mbyteve katy hexe opena va'ety reve. Atalia gui Jeosabeate onhomi vy ndojuka ukai nho. Jeosabeate ma huvixa Jeroão rajykue, sacerdote Joiada ra'yxy, ha'e Acazias reindy.

¹² Ha'e ramo Joás ma mboapy meme ma'et'ýa peve oiko ha'e kuery reve SENHOR pegua opy. Ha'e va'e jave ma Atalia ae huvixa oĩ ha'e va'e yvy re.

23

2 Reis 11.4-12

¹ Sete ma'et'ýa py ma Joiada* ipy'a guaxy vy ojapo peteĩ rami ikuai aguã xondaro kuery ruvixa ikuai va'e reve. Ha'e va'e kuery ma Jeorão ra'y Azarias, Joanã ra'y Ismael, Obede ra'y Azarias, Adaías ra'y Maaséias ha'e Zicri ra'y Elisafate.

² Ha'e va'e kuery ma Judá yvy jave rupi oje'oi vy Judá regua tetã ha'e javi gui omono'õmba heruvy levita kuery ha'e Israel kuery akã ikuai va'e. Ha'e ramo oupa okuapy Jerusalém py.

³ Ha'e va'e kuery ha'e javi Nhanderuetee pegua opy oua py huvixa reve ojapo okuapy peteĩ rami ikuai aguã. Ha'e ramo ha'e kuery ha'e javi pe Joiada aipoe'i:

— Ne'exa, huvixa ra'ykue ae 'rã oĩ huvixarã, Davi ramymino kuery rekorã re SENHOR ijayvu ma voiague rami vy.

⁴ Po rami 'rã peẽ kuery pendekuai. Mboapy henda py 'rã pendekuai. Ha'e gui peteĩ regua sacerdote ha'e levita kuery pendekuai va'e ma sábado ára py peike vy okẽ rarõa rupi 'rã pendekuai.

⁵ Ha'e gui amboae regua ma huvixa ro py 'rã pearõ. Ha'e gui mboapya va'e regua ma Okẽ Yta 'epy va'e py 'rã pearõ. Ha'e rã heta va'e kuery ha'e javi 'rã ikuai SENHOR pegua oo roka py.

⁶ Ha'e rami avi SENHOR pegua opy ete avave rei ndoikeai 'rã, sacerdote ha'e levita kuery ipytyvõa rupi ikuai va'e e'ý vy. Ha'e kuery anho 'rã oike, iky'a e'ý va'e vy. Ha'e rã heta va'e kuery ha'e javi ma SENHOR ijayvuague rami ae 'rã ikuai.

⁷ Ha'e gui levita kuery pendekuai va'e ma huvixa vyv'ýry ae 'rã pendekuai, peteĩ-teĩ pendepo py tembiporu pereko reve. Ha'e gui mava'e rã rei oo py oike ta va'e pejuka 'rã. Huvixa reve ae 'rã peiko oẽ ovy jave, ha'e gui oike ouvy jave voi — he'i.

* 22:9 2 Reis 9.21-29 * 22:10 Guemiarirõ kuery ojukapa ha'e ae onhembouvixaxe vy. * 23:1 Joiada ma sacerdote vy oipytyvõ SENHOR pegua templo ropy huvixa Joás onhomia aguã (22.11-12).

⁸ Ha'e ramo levita ha'e Judá pygua kuery ha'e javi ma sacerdote Joiada ojapo ukaague rami ikuai. Ha'e rami vy petei-teí ogueraa guexevegua avakue, sábado ára py oike ha'e oê ta va'e kuery, mba'eta sacerdote Joiada nomondoukai omba'epoaty gui.

⁹ Ha'e ramo cem ikuai va'e-va'e ruvixa kuery pe sacerdote Joiada omboaxa huvixa Davi mba'ekue hu'y guaxu, hu'y jokia ha'e imo'ãa tuvixa va'e, SENHOR pegua opy omoí porã mbyre.

¹⁰ Ha'e gui heta va'e kuery ha'e javi ma petei-teí opo py tembiporu oguerako va'e reve ha'e omoí huvixa ro yke jovaive re ha'e altar hi'aña peve, huvixa ombojere vy oarõ okuapy aguã.

¹¹ Ha'e gui mae ma oguenoê heruvy huvixa ra'ykue. Inhakã re coroa omoí vy ixupe ome'ê kuaxia para Nhanderuete ayvu oña. Ha'e rami vy omoí okuapy nguvixarã. Inhakã rupi Joiada ha'e ta'y kuery azeite oikyty reve ojapukai okuapy:

— Toiko riae nhanderuvixa!

2 Reis 11.13-16

¹² Ha'e gui heta va'e kuery onha-onhaa rupi huvixa pe oporai okuapy Atalia oendu vy ha'e kuerya py ou SENHOR pegua opy.

¹³ Ha'e vy oma'ê rã huvixa hi'ai ma oikeaty py oo yta vy'ry. Huvixa renonde ikuai avi harõa kuery ruvixa ha'e mimby guaxu monhe'êa kuery. Heta va'e kuery ha'e javi oguerovy'a okuapy, mimby guaxu omonhe'ê guive. Oporaei va'ety kuery voi omba'epu reve ogueroporaei okuapy. Ha'e ramo Atalia oao omondoro reve ojapukai:

— Xerovaigua ra'e! Xerovaigua ra'e! — he'i.

¹⁴ Ha'e ramo sacerdote Joiada xondaro ruvixa kuery oka katy ogueru vy aipoe'i ha'e kuery pe:

— Kunha va'e penoê ke heravy hyxy okuapy va'e kuery mbyte rupi. Amongue hupive oo ta ramo pejuka 'rã kyxe py — he'i. Mba'eta sacerdote ae "Pejuka eme SENHOR pegua opy" he'iaague rami.

¹⁵ Ha'e ramo kunha va'e ojopy okuapy vy kavaju rape oí va'e rupi ogueraa huvixa ro peve. Ha'e py mae ma ojuka.

2 Reis 11.17-21

¹⁶ Ha'e gui ma Joiada ojapo SENHOR pe ete ha'e kuery ikuai aguã regua, ha'e ae ha'e heta va'e kuery ha'e javi reve.

¹⁷ Ha'e ramo heta va'e kuery oyvy ha'e javi gui ou va'ekue ma Baal pegua oo py oike okuapy vy oitypa. Ixupegua altar ikuai va'ekue omopêmba okuapy, ta'angaa ikuai va'e guive. Baal pegua sacerdote Matã voi ojuka altar yvy'iry.

¹⁸ Ha'e gui sacerdote regua levita ikuai va'e po py Joiada omboaxa SENHOR pegua oo re opena ha'e opy rupi ha'e kuery omba'epo aguã Davi omoíague rami, ha'e gui SENHOR pe mba'emo oapy reve ome'ê aguã, Moisés kuaxia re lei oña rami vy, ovy'a ha'e oporaei reve, Davi ojeaague rami vy.

¹⁹ Omoí avi SENHOR pegua oo rokê rarõarã kuery, ha'eve'ÿa oña va'e regua peteive oike e'ÿ aguã.

²⁰ Joiada ogueraa xondaro kuery cem ikuai va'e-va'e ruvixa kuery, yvatekueve, guetarã kuery re opena va'e, ha'e ha'e va'e yvy regua kuery ha'e javi. Ha'e rami vy ha'e va'e kuery reve SENHOR pegua oo gui ogueraa avi huvixave. Okê yvy'ã katy oí va'e rupi oguerooxa heravy huvixa ro katy oje'oi vy. Ha'e py ma omboguapy imoiny tendã openaaty áry.

²¹ Ha'e va'e yvy regua kuery ovy'a pavê okuapy. Tetã pygua kuery voi ikuai porã'i, Atalia kyxe py ojukaa rire.

24

2 Reis 12.1-16

¹ Joás ma sete ma'etÿ'i ogueroko jave py oí ypy'i huvixa. Ha'e gui quarenta ma'etÿ re opena Jerusalém py.

² Ixy ma Berseba pygua Zíbia. Joás ma ha'evea ramigua ojapo oikovy SENHOR renonde rupi, sacerdote Joiada oña pukukue re.

³ Ta'lyxyrã Joiada ojou mokoí kunha. Ha'e rami vy ta'y ha'e tajy kuery ikuai.

⁴ Ha'e va'e rire ma Joás onhembopy'a SENHOR pegua oo omoatyrõ uka aguã re.

⁵ Ha'e rami vy sacerdote ha'e levita kuery omboatypa vy aipoe'i ha'e kuery pe:

— Tapeo Judá yvy re tetã ikuai va'e rupi. Ha'e vy pemono'õ peráta Israel kuery ha'e javi gui, ma'etÿa nhavõ ha'e kuery ome'ê va'erã, Penderuete pegua oo pemoatyrõmba aguã. Pejapo pojavave'i ke ha'e nunga — he'i. Ha'e rami teí levita kuery ma nonhea'ai okuapy ha'e rami aguã.

⁶ Ha'e ramo huvixa oenoí uka sacerdote yvateve va'e Joiada. Ha'e vy oporandu ixupe:

— Mba'e re tu neremondoukai ri levita kuery Judá ha'e Jerusalém pygua kuery peráta ome'ê 'rã va'ekue ogueru aguã? Ha'e nunga Israel kuery ha'e javi pe SENHOR rembiguai Moisés ome'ê uka raka'e, oo ijayvu oíaty omoatyrõa aguã — he'i.

⁷ Mba'eta Atalia ha'e ipi'a kuery heko vaia rupi vy ombovaipa rei va'ekue Nhanderuete pegua oo. Mba'emo SENHOR pegua opy rupigua iky'a e'ÿ va'erã oí va'ekue oiporupa Baal kuery pe ikuai rupi rive.

⁸ Ha'e nunga rupi huvixa ijayvua rami vy ha'e kuery ojapo okuapy peráta ryrurã. Ha'e va'e ma omoí oka py, SENHOR pegua oo rokê rexe'i'i.

⁹ Ha'e rami vy Judá yvy ha'e Jerusalém tetã rupi ijayvu SENHOR pe ogueru aguã peráta hembiguai Moisés ogueru rukaague rami vy, Israel kuery tekoa e'ÿa rupi ikuai jave ome'ê uka va'ekue.

¹⁰ Ha'e ramo yvatekueve ha'e heta va'e kuery ha'e javi ovy'a reve ogueru okuapy peráta ome'ê va'erã. Hyru py ae omoí, oo omoatyrõmbaa peve.

¹¹ Peráta ryru levita kuery ogueraa 'rã opena va'erã kuery huvixa omoí va'ekue ikuaiia py. Ha'e gui heta peráta oí maa ha'e kuery oexa ramo ou ju 'rã huvixa rembiguai kuaxia para re opena va'ety ha'e sacerdote yvateve va'e oía py. Ha'e kuery ju hyru gui peráta oguenoẽmba vy hyru omoí ju 'rã henda py ae. Ko'ê nhavõ ha'e rami ojapo vy peráta omono'õ reta okuapy oata aguã rami rei e'y.

¹² Ha'e va'e ha'e javi ma huvixa ha'e Joiada ome'ẽmba SENHOR pegua oo moatyrõa kuery re opena va'e kuery po py. Opaga avi ita re omba'eapo va'e ha'e oo apoarã kuery SENHOR pegua oo omoatyrõmba aguã. Ojou avi ferro ha'e overa va'e re omba'eapo va'erã, SENHOR pegua oo omoatyrõmba aguã.

¹³ Ha'e ramo omba'eapo va'erã omoí mbyre omba'eapo okuapy vy omoatyrõ porã heravy. Ha'e rami vy Nhanderuete pegua oo ha'ekue'i rami ae ju ojapo, omo'ã ratãmbave guive.

¹⁴ Ha'e nunga ojapopa ma vy huvixa ha'e Joiada pe ogueru okuapy peráta rembyrekue. Ha'e va'ekue gui ma ojapo uka mba'emo SENHOR pegua opy ha'e ombojeroviaa rupi oiporu pyrã. Ouro ha'e prata gui ojapo mba'emo oapyaty rupi oiporu va'erã, hy'a'i ha'e tembiporu ha'e javi. Ha'e ramo Joiada oía pukukue re ma SENHOR pegua opy mba'emo oapy reve ome'êa jepi 'rã.

¹⁵ Ha'e gui ma Joiada tuja'i, ha'e hi'ára reta ma vy omano. Cento e trinta ma'etỹ ma ogueroko reve omano.

¹⁶ Ha'e ramo tetã Davi rekoague py onhono porãa huvixa kuery rupa vyvry, Nhanderuete pe ha'e ixupegua oo re vy ojapo porã rire Israel re.

Huvixa aipoe'iaque rami vy Zacarias ojuka okuapyague

¹⁷ Joiada omano ma rire ou okuapy Judã regua yvatekueve. Guenapy'ã re ikuai huvixa Joás renonde py. Ha'e kuery ijayvu rã huvixa oendu.

¹⁸ Ha'e kuery oejapa ma okuapy SENHOR guamoí kuery Ruete pegua oo. Ha'e rami vy ta'angaarã vyvra omopu'ã mbyre pe rive ikuai, ta'angaa mboae pe guive. Ha'e kuery káuxa ae Judã ha'e Jerusalém re ou poxya.

¹⁹ Ha'e rami teĩ ha'e kuerya py SENHOR omondouka profeta kuery ojeupe ju ogueru aguã teĩ. Ha'e ramo ha'e kuery rovai profeta kuery ijayvu rã noendu potai okuapy.

²⁰ Ha'e gui Nhanderuete Nhe'ê ou sacerdote Joiada ra'ykuie Zacarias re. Ha'e ramo heta va'e kuery renonde py opu'ã ho'amy vy aipoe'i ha'e kuery pe:

— Po rami Nhanderuete ijayvu: “Mba'e re tu SENHOR ojapo uka va'ekue rupi e'y pendekuai? Mba'eta napendekuai porã 'rã. SENHOR pejapa ramo ha'e voi pendereja 'rã”, he'i.

²¹ Ha'e ramo Zacarias rovai ha'e kuery jogueroayvu vy oja'papa ita py. Huvixa aipoe'ia rami ojuka, SENHOR pegua oo roka py ae.

²² Ha'e rami py huvixa Joás na'ima'endu'ai Zacarias ru Joiada ixupe ojapo porãague re. Ha'e rami 'rãgue py ojuka uka ta'ykuie. Ha'e va'e omano ta ma oupy vy aipoe'i:

— Rejapo va'e SENHOR oexa vy nembopaga 'rã — he'i.

Nhanderuete Joás ombopagaague

²³ Ha'e va'e ma'etỹa pyve ou Síria pygua xondaro kuery Joás rovai opu'ã okuapy aguã. Ha'e rami vy Judã ha'e Jerusalém peve ovaẽ vy heta va'e kuery yvatekueve ojukapa. Imba'e rei-reikue ma Damasco pygua huvixa pe omondoukapa.

²⁴ Síria guigua xondaro kuery mbovy'i ete ou teĩ SENHOR ombopo'aka Judã regua xondaro kuery heta raxa ikuai va'e re, guamoí kuery ruete oejapa rire. Nhanderuete huvixa Joás ombopaga aguã ae Síria pygua kuery ombou.

2 Reis 12.20,21

²⁵ Joás oía gui Síria pygua kuery ojepe'apa vy oja omano rai'i va'e. Ha'e ramo hovai hembigui kuery jogueroayvu. Ha'e rami vy hupa pyve ojuka, sacerdote Joiada ra'y kuery ruguy omoẽague re.

²⁶ Ha'e ramo onhono porãa tetã Davi rekoague py teĩ yma guare huvixa kuery rupa vyvry e'y guive. Hovai jogueroayvu va'ekue ma po rami: Amom pygua Simeate pi'a Zabade ha'e Moabe pygua Sinrite pi'a Jeozabade.

²⁷ Ha'e gui ta'y kuery rekokie, hovai ijayvu jepiague, ha'e Nhanderuete pegua oo omoatyrõague, ha'e nunga ha'e javi ma ipara oiny huvixa kuery rekokie oía re. Ha'e gui ta'y Amazias ju oĩ nngu rekovia.

25

2 Reis 14.1-6

¹ Amazias ma vinte e cinco ma'etỹ ogueroko huvixa oĩ ypy'i jave py. Ha'e vy vinte e nove ma'etỹ re opena Jerusalém py. Ixy ma Jeoadã, Jerusalém pygua ae.

² SENHOR renonde rupi ha'evea rami oiko va'eri opy'a ha'e javi py e'y guive.

³ Opo'akaa re oi atã ma rire ojuka ukapa guembigui kuery tuu jukaare.

⁴ Ha'e rã ijukaare ra'y kuery ma ha'e ndojuka ukai. Ha'e rami 'rãgue py Moisés kuaxia re omboparaague rami oiko, mba'eta SENHOR ojapo uka vy aipoe'i: “Tuu kuery ma ndojukaai 'rã ta'y kuery ojapo vaiaque re, neĩ ta'y kuery ndojukaai 'rã tuu kuery ojapo vaiaque re. Peteĩ-teĩ ojukaai 'rã ha'e ae ojevavyague re”, he'iaque rami.

2 Reis 14.7

⁵ Ha'e gui Amazias omboatypa Judá kuery ha'e javi. Ha'e vy peteĩ-teĩ ro pygua ikuai va'e omoĩ xondarorã, omoĩ avi mil ikuai va'e re ha'e cem ikuai va'e re opena va'erã. Judá ha'e Benjamim regua ha'e javi omoĩ ha'e rami aguã. Ha'e vy vinte ma'etỹ va'e guive tujakue peve oipapa vy oikuaa trezentos mil ikuaia oiporavo pyre joe opu'ãa py hu'y guaxu ha'e hu'y jokoa tuvixa va'e ogueraa va'e meme.

⁶ Ha'e gui Israel kuery va'e regua ojoguave ju cem mil avakue ipy'a guaxukueve, três mil e trezentos quilos prata guigua re.

⁷ Ha'e rami teĩ oĩa py ou peteĩ ava Nhanderuete remimbo'e. Ha'e vy aipoe'i ixupe:

— Xeruvixa, eraa eme Israel regua xondaro kuery. Mba'eta Israel ha'e Efraim kuery reve'ỹ SENHOR oiko.

⁸ Ha'e nunga rupi tereo tema nhande kuery reve anho. Ha'e rami vy joe pepu'ã ramo ndepo'aka 'rã. Ha'e rami e'ỹ ri ramo Nhanderuete ojapo 'rã nhanderoaigua kuery renonde re'a aguã rami, mba'eta Nhanderuete ma nhopytyvõ ha'e joity aguã ipo'aka va'e — he'i.

⁹ Ha'e ramo Nhanderuete remimbo'e pe Amazias oporandu:

— Ha'e rami avi mba'eta tu ha'vy ajapo 'rã três mil e trezentos quilos prata guigua ajou ju aguã, ha'e va'e re Israel regua xondaro kuery ajogua rire?

Nhanderuete remimbo'e ombovai:

— Ha'e va'ekue gui SENHOR hetave oguereko ndevy ome'ẽ va'erã — he'i.

¹⁰ Ha'e ramo ojeupegua kuery ae gui huvixa Amazias omboja'opa xondaro kuery Efraim gui ou va'ekue, ngoo katy ju ojevypa aguã. Ha'e ramo ha'e kuery ivai ete okuapy Judá kuery rovai. Ipoxy reve ojevypa ju ngoo katy.

¹¹ Ha'e gui ma Amazias ipy'a guaxu reve ogueraa ojeupegua kuery ae. Ha'e rami vy oje'oi Yvyugua Juky 'ea va'e katy. Ha'e py ma dez mil ojuka Seir ramymino kuery va'e regua.

¹² Ha'e rami vy Judá kuery ma dez mil ju ojuka e'ỹ re ojopy vy ogueraapa peteĩ itaova yvatevea py. Ha'e va'e gui ma omombopa ramo omanomba hu'ũmba vy.

¹³ Ha'e rami teĩ xondaro kuery Amazias ngupive joe opu'ãa katy oje'oi e'ỹ aguã omondoukapa ju va'ekue ma ombovaipa Judá re tetã ikuai va'e Samaria guive Bete-Horom peve. Ha'e rami vy três mil ojuka okuapy ha'e pygua kuery, ha'e imba'e rei-reikue ma ogueraapa.

Amazias mba'emo ra'angaa pe oikoa re Nhanderuete omongeta ukaague

¹⁴ Ha'e gui Edom pygua kuery ojukaague gui Amazias ojevvy vy ogueru Seir ramymino kuery ruete ra'angaa oguereko va'ekue. Ha'e rami vy ngueterã ae rive omopu'ã imo'amy. Ha'e va'e omboetea rupi oapy imoĩny heakuã porã va'e.

¹⁵ Ha'e ramo Amazias rovai SENHOR poxya hendy rã oĩa py ombou peteĩ profeta ixupe oporandu aguã:

— Mba'e re tu remboete reikovy ta'angaa, ndepo gui ojeupegua kuery ndogueraa jeppei va'ekue ri? — he'i.

¹⁶ Ha'e ramo profeta ixupe ijayvu teri reve huvixa ombovai:

— Xapy'a rei tu ndee huvixa mongetaarã renhemoi? Epytu'u ma ta'vy. Mba'e re tu rejapo rojuka aguã rami? — he'i.

Ha'e ramo profeta opytu'u va'eri aipoe'i nho ju:

— Ha'e rami ete reiko ramo xee aikuaa Nhanderuete nemomba taa, xee romongeta teĩ nerendui rire — he'i.

2 Reis 14.8-14

¹⁷ Judá pygua huvixa Amazias ma amboae rami onhemongeta uka rire omondouka ayvu mombe'uarã Israel pygua huvixa Jeoacaz ra'y Jeoás pe, Jeú ramymino va'e pe. Ha'e vy aipoe'i uka:

— Peju, jajoguero'a.

¹⁸ Ha'e rami teĩ Israel pygua huvixa Jeoás ombovai Judá pygua huvixa Amazias:

— Líbano yvy re ma je peteĩ juu rakuandy hi'aĩ va'e aipoe'i uka yary ha'e py hi'aĩ avi va'e pe: “Eme'ẽ na nderajy xera'y ra'yxrã”, he'i. Ha'e rami teĩ mymba Líbano yvy re ikuai va'e opyrõmba rive juu rakuandy re.*

¹⁹ Ha'e gui ndee ma “Edom pygua kuery ma xee ajukapa” 're vy nekuraxõ re oĩ renhemboyvate reixea ha'e rejeyou porã rivea. Aỹ ndero py ae repyta 'rãgue. Mba'e re tu rejeyty ukaxe ri mba'emo vai py, Judá pygua kuery reve? — he'i uka.

²⁰ Ha'e rami teĩ Judá pygua huvixa Amazias noendu potai. Mba'eta ha'e rami aguã ma Nhanderuete gui ae ou, hovaigua kuery po py omboaxa aguã, Edom pygua kuery ruete ra'angaa pe oiko ramo.

²¹ Ha'e ramo Judá pygua huvixa Amazias oo nho Judá regua Bete-Semes tekoa py, Israel pygua huvixa Jeoás reve joe opu'ã aguã.

²² Ha'e gui ma Israel kuery renonde py Judá pygua kuery oitypaa. Ha'e vy peteĩ-teĩ onhamba ngoo katy.

²³ Bete-Semes py ae Israel pygua huvixa Jeoás ombo'a Judá pygua huvixa Joás ra'y Amazias, Jeoacaz ramymino va'e. Ha'e rami vy Jerusalém re ogueraa vy oity tetã kora Efraim guive ojerea katy'i okẽ hi'aĩague peve, cento e oitenta metros va'ekue ha'e javi.

²⁴ Tetã gui oipe'apa avi ouro, prata ha'e mba'emo ryrú SENHOR ropy Obede-Edom openaague, ha'e huvixa ro py mba'emo omoĩ porã mbyre ha'e javi. Ogueraa avi avakue mba'emo re omboekovia va'erã. Ha'e gui ma Samaria tetã katy ju ojevvy.

2 Reis 14.17-20

* 25:18 “Juu rakua endy” he'ia ma huvixa Amazias ombojary reia rupi ijayvu vy, ha'e rã “Yary hi'aĩ va'e” he'ia ma ojee ae ijayvu vy.

²⁵ Jeoacaz ra'y Jeoás Israel pygua huvixa va'e omano rire Joás ra'y Amazias Judá pygua huvixa oikove ranhe quinze ma'et'y re.

²⁶ Ha'e gui oïve rei tema Amazias rekokie regua. Ha'e rami avi mba'emo ojapo va'ekue jypy guive opaa peve noï 'rã teve kuaxia Judá ha'e Israel pygua huvixa kuery rekokie oia re?

²⁷ Amazias ma SENHOR pe oikoa gui ojepe'a ramo hovai jogueroayvua Jerusalém py. Ha'e ramo Laquis katy onha teï hakykue omondoukaa avakue. Ha'e ramo Laquis py ae ojuka.

²⁸ Ha'e rami vy kavaju áry ogueru vy Jerusalém py ae onhono porãa, tuu kuery rupa vyry tetã Davi rekoague py.

26

2 Reis 14.21,22; 15.1-7

¹ Ha'e gui ma Judá kuery ha'e javi oiporavo Uzias dezesseis ma'et'y oguereko va'e. Ha'e rami vy nguvisarã omoï okuapy nguu Amazias rekovia.*

² Ha'e va'e ma ojapo Elate tetã, omoatyrõ avi Judá yvy ha'e javi rupi, tuu huvixa guamoï kueryague rami ndoikovevei'i ma rire.

³ Uzias ma dezesseis ma'et'y oguereko huvixa oï ypy'i jave py. Ha'e gui cinquentã e dois ma'et'y re opena Jerusalém py. Ixy ma Jecolias, Jerusalém pygua ae.

⁴ Ha'evea ramigua ojapo oikovy SENHOR renonde rupi, nguu Amazias ojapogague rami meme.

⁵ Ha'e rami vy ojee omoï Nhanderuete oeka aguã. Imongetaaty Zacarias Nhanderuete guigua oexaa py hi'arandu va'e oikoa pukukue re ha'e rami oiko. SENHOR oekaa ja ma omoingo porã.

⁶ Ha'e gui ma filisteu kuery rovai opu'ã aguã oo vy ombovaipa Gate tetã kora, Jabné ha'e Asdode py guive. Ha'e gui Asdode katy'i rupi ojapove ju tetã, filisteu kuery yvy ha'e javi rupi guive.

⁷ Nhanderuete oipytyvõ filisteu kuery rovai opu'ãa py, Arábia regua Gur-Baal pygua kuery rovai, meunita kuery rovai guive.

⁸ Uzias ipo'akapa rã Egipto py nhavaëa'i peve ima'endu'a porãa hexe. Ha'e ramo ixupe Amom pygua kuery voi ome'ë 'rã mba'emo.

⁹ Jerusalém tetã py Uzias ojapo reta torre: Okê Ojerea 'epy va'e py, Okê Yvyugua ha'e Okê Hakua 'epy va'e py ojapo, ha'e vy omombarateta.

¹⁰ Tekoa e'ÿa rupi guive ojapo torre, yguarã ojo'o reta guive hymba kuery heta ramo, yvyugua ha'e nhuũndya rupi. Mba'ety rupigua oguerovy'a va'e vy guembiguai kuery oguereko mba'ety rupi omba'eapo va'e, uva ty rupi, yvyty ikuai va'e rupi, ha'e mba'ety porãa rupi.

¹¹ Uzias rembiguai regua ikuai avi xondaro kuery tembiporu oiporu kuaa ete va'e. Ha'e kuery ma joe opu'ã aguã katy hyxy 'rã jogueravy. Ha'e kuery rery ma kuaxia re opena va'ety Jeiel omboparapa imoiny, huvixa Maaséias reve, huvixa rembiguai yvateve va'e Hananias openaa rupi.

¹² Ha'e gui hetarã kuery akã ikuai va'e rery oï va'ekue ma dois mil e seiscentos, avakue ipy'a guaxukueve meme.

¹³ Hembiguai xondaro kuery ma trezentos e sete mil e quinhentos ikuai. Ha'e va'e kuery ma ombarateta rupi opu'ã 'rã okuapy joe, hovaigua kuery gui huvixa oipytyvõ va'e.

¹⁴ Xondaro kuery ha'e javi rembiporurã Uzias ojapo uka hu'y jokoã, hu'y guaxu, akã regua, pexo regua, guyrapa ha'e ita momboa.

¹⁵ Jerusalém py ma mba'emo tuvixa va'e momboarã ojapo uka avi avakue ojapo kuaa va'e pe. Ha'e va'e ma torre ha'e kora ojerea áry omoï 'rã hu'y ha'e ita tuvixakueve omombo aguã. Hexe ima'endu'aa mombyrya rupi peve, opa mba'e py SENHOR omombarateta ramo.

2 Reis 15.5-7

¹⁶ Ha'e gui Uzias ipo'aka ete ma vy opy'a py onhemboyvate rei, okanhy aguã rami oiko peve. Ha'e vy opa marã rei ojejavu SENHOR nguete rovai. Ha'e rami vy ixupegua opy oïke altar oï va'e áry heakuã porã va'e oapy aguã.

¹⁷ Hakykue sacerdote Azarias oïke avi SENHOR pegua sacerdote kuery oitenta ipy'a guaxukueve ikuai va'e reve.

¹⁸ Ha'e vy huvixa Uzias reve nhombovake okuapy. Ha'e vy aipoe'i okuapy ixupe:

— Ndee huvixa Uzias pe ma nda'evei SENHOR renonde py heakuã porã va'e reapy aguã, sacerdote kuery Arão ramymino ikuai va'e pe anho, ha'e rami aguã rami omoia rire. Eë he kenda iky'a e'ÿ va'e gui, mba'eta rejeyavy ma. SENHOR Nhanderuete nanemboete ukavei ma 'rã — he'i okuapy.

¹⁹ Ha'e ramo Uzias ivai vaipa, opo py heakuã porã va'e rryru oguereko reve. Sacerdote kuery pe ivai ramove hova mbyte re ojekuaa lepra ha'e kuery ha'e javi oexaa py, SENHOR pegua opy altar heakuã porã va'e oapyaty vyry hi'aia pyve.

²⁰ Sacerdote yvateve va'e Azarias ha'e sacerdote kuery mboae hexe oma'ë vy oexa okuapy lepra hova re oï ra'ea. Ha'e ramo ogueraa pojava oka katy. Ha'e ae ma voi guive oë pojava ovy, SENHOR omoingo axy rire.

²¹ Ha'e rami py huvixa Uzias ma omanoa ára peve lepra revegua oiko. Lepra revegua vy peteï oo ha'e ae'i oï aguã ojapo pyre py oiko, SENHOR pegua opy gui omoxê rire. Ha'e gui ta'y Jotã ju opena oikovy huvixa ro re. Ovyvy re ikuai va'e re oikuaa pota avi oikovy.

²² Ha'e gui oïve rei tema Uzias rekokie regua. Ha'e rami avi mba'emo ojapo va'ekue jypy guive opaa peve noï 'rã teve kuaxia Amom ra'y profeta Isaías ombopara va'ekue re?

* 26:1 Uzias rery mboae ma Azarias raka'e (2 Reis 14.21-22, 15.1-7).

²³ Ha'e rire Uzias opytu'u ma guamoĩ kueryague rami. Ha'e ramo tamoĩ kuery onhono porãague rami avi onhono porãa peteĩ yvy vyra ruparã huvixa kuery oguereko katu va'ekue py, ixupe "Lepra revegua va'ekue" he'i okuapy vy. Ha'e gui ma ta'y Jotão ju oĩ nguu rekovia.

27

2 Reis 15.32-38

¹ Jotão ma vinte e cinco ma'etỹ oguereko jave py oĩ ypy'i huvixarã. Ha'e vy dezesseis ma'etỹ re opena Jerusalém py. Ixy ma Jerusa, Zadoque rajy.

² Ha'e ma ha'eva rami oiko SENHOR renonde rupi, nguu Uzias oikoague rami ae ju. Ha'e rami avi ndoikei guive SENHOR pegua opy. Ha'e rã heta va'e kuery ma mba'emo vai rupi tema ikuai.

³ Jotão ojapo uka SENHOR pegua oo rokẽ yvate rupi guarã, ha'e tetã kora Ofel 'epy va'e áry rupi heta avi ojapo mba'emo.

⁴ Judá re vvyty ikuai va'e rupi ojapo avi tetã, ha'e ka'aguy rupi ma oo ikorapa va'e ha'e torre ojapo.

⁵ Ha'e gui ma Amom kuery ruvixa rovai re opu'ã vy ipo'aka ha'e kuery re. Ha'e ramo ha'e va'e ma'etỹ re ma ixupe Amom kuery ome'ẽ três mil e trezentos quilos prata guigua, ha'e dez mil voxa trigo ha'e cevada. Ha'e ramigua ma Amom kuery mokoĩ ma'etỹ, ha'e gui mboapy ma'etỹa peve ome'ẽ okuapy ixupe.

⁶ Jotão ipo'akave tema ovy, SENHOR nguu ete oipotaa rami oiko va'e vy.

⁷ Ha'e gui oĩve rei tema Jotão rekoku regua. Ha'e rami avi joe opu'ãague ha'e mba'emo ojapo va'ekue ha'e javi noĩ 'rã teve kuaxia Israel ha'e Judá pygua huvixa kuery rekoku oĩa re?

⁸ Vinte e cinco ma'etỹ oguereko jave py oĩ ypy'i huvixarã. Ha'e vy dezesseis ma'etỹ re opena Jerusalém py.

⁹ Ha'e rire Jotão ndoikovei'i ma guamoĩ kueryague rami. Ha'e ramo onhono porãa tetã Davi rekoague py. Ha'e ramo ta'y Acáz ju oĩ nguu rekovia.

28

2 Reis 16.1-4

¹ Acáz oĩ ypy'i jave ma vinte ma'etỹ ramo'i oguereko. Ha'e gui dezesseis ma'etỹ re opena Jerusalém py. Ha'e ma ha'eva 'ya ramigua ojapo oikovy SENHOR nguuete renonde rupi, guamoĩ Davi rami e'ỹ.

² Israel pygua huvixa kuery reko rami oiko, ha'e Baal kuery ra'angaraã ojapo mba'emo ryku gui.

³ Yvugua Hinom ra'y rekoague py oapy avi heakuã porã va'e, gua'y kuery ae'i guive oapy, amboae regua kuery Israel kuery renonde gui SENHOR oipe'apa va'ekue opa marã rei ikuaiague rami ae.

⁴ Ombojeroviaaty yvy'ã rupi ikuai va'e py voi mba'emo ome'ẽ oikovy, heakuã porã va'e oapy avi yvy'ã rupi, vyra rogue ana ikuai va'e gu'ry rupi guive.

⁵ Ha'e nunga rupi SENHOR tuete omboaxa Síria pygua huvixa po py. Ha'e va'e kuery ma hexe ipo'aka vy ixupegua kuery reve ogueraa Damasco tetã katy escravo-rã. Omboaxa avi Israel kuery ruvixa po py. Ha'e va'e ju ipo'aka vy omoingo axy raxa.

⁶ Ha'e rami vy peteĩ ára pyve Remalias ra'y Peca ojuka cento e vinte mil avakue Judá regua imbaraetekueve, SENHOR guamoĩ kuery ruete gui hexarai rire.

⁷ Ha'e gui ma peteĩ ava Efraim regua ipy'a guaxuve va'e Zicri hery va'e ojuka huvixa ra'y Maaséias. Ojuka avi huvixa ro re opena va'ety yvateve va'e Azricão, huvixa irũ Elcana guive.

⁸ Ha'e gui Israel ramymino kuery ju Judá gui ogueraa duzentos mil kunhague, ipi'a ha'e imemby kuery, ha'e kuery reve joegua ikuai va'eri. Ha'e rami vy imba'e rei-rei va'e kuery oipe'a reta vy Samaria py ogueraapa.

⁹ Ha'e rami teĩ ha'e py oĩ peteĩ profeta SENHOR pegua, Odede hery va'e. Ha'e va'e ma oẽ ovy xondaro kuery Samaria katy ojevy jogueruvy va'e ovaexĩ aguã. Ha'e vy aipoe'i ha'e kuery pe:

— Ne'exa, SENHOR peneramoĩ kuery ruete Judá pygua kuery pe ipoxy vy omboaxapa pendepo py meme. Ha'e ramo peẽ kuery pendepoxy reve pejukapa yva peve oendua aguã rami.

¹⁰ Ha'e rami vy aỹ escravo-rã peru ta Judá ha'e Jerusalém pygua avakue ha'e kunhague. Ha'e nunga py peẽ voi e'ỹ teve SENHOR Penderuete rovai pendepo ky'a?

¹¹ Ha'e gui aỹ ma pendu ke xea'yvua. Pembojevypa ju penderegua kuery escravo-rã peru va'ekue, mba'eta SENHOR guigua poxya hendy ma pende'áry — he'i.

¹² Ha'e ramo amongue avakue Efraim regua opu'ã okuapy nhombovake aguã joe opu'ãague gui ojevy va'e kuery reve. Ha'e va'e kuery ma Joanã ra'y Azarias, Mesilemote ra'y Berequias, Salum ra'y Jeizquias ha'e Hadlai ra'y Amasa.

¹³ Ha'e vy aipoe'i okuapy ha'e kuery pe:

— Peroike eme apy escravo-rã peru va'ekue, mba'eta pemboetave 'rã SENHOR renonde py jajevyva ha'e nhandepo ky'aa. Nhandepo ky'aa tuvixa ma ramo nhande'áry hendy ma SENHOR guigua poxya — he'i okuapy.

¹⁴ Ha'e ramo yvatekueve ha'e heta va'e kuery ha'e javi oexaa py xondaro kuery oejapa ojokua reve ogueru va'ekue, imba'e rei-rei va'ekue voi.

¹⁵ Ha'e rami vy hery rupi oiporavo okuapy escravo-rã ogueru pyre re opena va'erã. Ha'e ramo ha'e kuery opu'ã vy omonhemondepa ju ipire rei va'ekue-ekue mba'emo ogueru pyre py ae. Omonhemonde, ipy ryrurã ome'ẽ, omongarupa, omboy'u ha'e oipoano porãmba. Ha'e rã kangy gui ndoguatavei va'e ma mburika'i áry omoĩ vy ogueraa Jericó "Pindoty tetã" 'ea va'e py, hexegua kuery ikuai py. Ha'e gui ma ojevyva ju Samaria katy.

Assíria pygua kuery pe Acáz oipytyvõ aguã re ojerureague

¹⁶ Ha'e va'e jave py ma huvixa Acaz ojerure uka Assíria pygua huvixa kuery oiptytvõ agüã re.

¹⁷ Mba'eta Edom pygua kuery teĩgue ju ou vy Judá kuery re ipo'aka ramo, escravo-rã ogueraa guive.

¹⁸ Filisteu kuery voi ou vy opu'ã okuapy tetã yvy'ambe reia rupi, Judá regua kuaray puku-a katy ikuai va'e re guive. Ha'e rami vy ipo'aka Bete-Semes tetã re, Aijalom, Gederote, Socó, Timna ha'e Ginzo ha'e ijyvíry rupi tekoa ikuai va'e re. Ha'e rire ha'e kuery ju hekoa ha'e py.

¹⁹ Israel pygua huvixa Acaz káuxa ae SENHOR omo'yvy'i Judá kuery, huvixa opa marã ikuai agüã rami ojapoague re. Ha'e va'e eteve voi ndojejkoi SENHOR rovai heko vai agüã gui.

²⁰ Ha'e ramo oia py ou Assíria pygua huvixa Tiglate-Pileser teĩ oiptytvõ 'rãgue py omoĩ vaive.

²¹ Ha'e ramo Acaz ma mba'emo porã SENHOR pegua oo gui oguenoẽ vy omboaxapa Assíria pygua huvixa po py, ngoo gui ae, ha'e yvatekueve ikuai va'e ro gui guive. Ha'e rami teĩ ae ma mba'eve py noipytyvõi.

Nhanderuet ramigua rive pe huvixa Acaz oikoague

²² Huvixa Acaz ojexavai jave pyve heko vai raxave SENHOR rovai.

²³ Ha'e rami vy mba'emo mymba ome'ẽ tema Damasco pygua kuery ruete ramigua ikuai va'e pe, hexe ha'e kuery ipo'aka rire. Mba'eta aipoe'i:

— Síria pygua huvixa kuery ruete ramigua ma ha'e kuery oiptytvõ rire xee voi ha'e kuery pe ame'ẽ ta mba'emo anhepytvõ uka vy — he'i. Ha'e rami teĩ ha'e rami oiko vy ojapo ha'e ae okanhy agüã rami, Israel kuery ha'e javi reve.

²⁴ Ha'e rami vy Acaz oipe'apa mba'emo ryru Nhanderuet pegua opy ikuai va'ekue. Omboa'ypa ma vy ombotyta py SENHOR pegua okẽ ikuai va'e. Ha'e rami vy ojeupe guarã ojapo altar Jerusalém ha'e javi rupi.

²⁵ Judá regua tetã ha'e javi katy'i yvy'ã ikuai va'e rupi omopu'ã tuuete ra'angaa pe heakuã porã va'e oapy atyrã. Ha'e rami py ombopoxy SENHOR guamoĩ kuery ruete.*

2 Reis 16.19,20

²⁶ Ha'e gui oive rei tema Acaz rekokie regua. Ha'e rami avi ha'e oikoa jypy guive opaa peve ipara oiny kuaxia Judá ha'e Israel pygua huvixa kuery rekokie oia re.

²⁷ Ha'e gui Acaz ndoikovevei'ĩ ma guamoĩ kueryague rami. Ha'e ramo onhono porãa Jerusalém tetã py, teĩ Israel pygua huvixa kuery rupa yvýry e'y guive. Ha'e gui ma ta'y Ezequias ju oĩ nguu rekovia.

29

Ezequias templo oipe'a uka juague

¹ Ezequias ma vinte e cinco ma'etỹ oguereko huvixa oĩ ypy'i jave py. Ha'e vy vinte e nove ma'etỹ re opena Jerusalém py. Ixy ma Zacarias rajy Abia.

² Ha'e ma ha'evea rami oiko SENHOR renonde rupi, guamoĩ Davi ojapoague ha'e javi rami.

³ Ha'e gui jypygua ma'etỹa ha'e jypygua jaxya pyve oipe'apa ju SENHOR pegua oo rokẽ ikuai va'e, omoatyrõmba guive.

⁴ Ha'e rami vy sacerdote ha'e levita kuery oguerupa vy omboatyta kuaray puku-a katy oka oĩ va'e py.

⁵ Ha'e vy aipoe'i ha'e kuery pe:

— Pendu ke xeavyua, levita kuery. Pejegy'a'o ukapa ke a'y'i ma voi, ha'e gui peiky'a'opa avi SENHOR peneramoĩ kuery ruete pegua oo. Henda iky'a e'y va'e gui peipe'apa ke mba'emo ky'akue oĩ va'e.

⁶ Mba'eta nhaneramoĩ kuery ma anhetẽ rupi e'y ikuai vy SENHOR Nhanderuet renonde py ha'eve'yã ramigua ojapo. Oejapa okuapy vy SENHOR pegua oo oia katy gui ngova oguerova vy okupe rive oguerova okuapy.

⁷ Oka rokẽ ombotyta, tataendy ikuai va'e omboguepa, ixupe ndoapyvei guive heakuã porã va'e, neĩ mymba ma voi nome'ẽvei okuapy Israel kuery ruete pegua henda iky'a e'y va'e rupi.

⁸ Ha'e nunga rupi Judá ha'e Jerusalém pygua kuery áry ou SENHOR poxya. Ha'e vy omboaxapa imongyjarã, imondyiarã ha'e ijoiar reiarã pe, peẽ kuery penderexa py ae pexaa rami.

⁹ Ha'e ramo nhaneramoĩ kuery kyxe py ojukupaa, ha'e gui nhandera'y kuery, nhanderajy kuery ha'e nhandera'yxy kuery ju escravo-rã ogueraa ague py ikuai.

¹⁰ Ha'e nunga rupi a'y ma xejee amoĩ SENHOR Israel kuery ruete reve ajapo agüã peteĩ rami ju nhandekuai agüã, nhandegui oipe'a nho agüã opoxya tata rami nhanembojexavai va'e.

¹¹ Xera'y kuery, penderexarai eme pejapo 'rã va'e gui, mba'eta SENHOR ae pendeporavo henonde rupi pendekuai agüã, ixupe pamba'eapo ha'e heakuã porã va'e peapy agüã — he'i.

Levita kuery templo oiky'a'opa jevyague

¹² Ha'e ramo levita kuery opu'ãmba okuapy. Coate ramymino kuery va'e regua ikuai Amasai ra'y Maate ha'e Azarias ra'y Joel. Merari ramymino regua ma Abdi ra'y Quis ha'e Jealelel ra'y Azarias. Ha'e gui Gêrson ramymino regua ma Zima ra'y Joã ha'e Joã ra'y Êden.

¹³ Elisafã ramymino regua ma Sinri ha'e Jeuel. Asafe ramymino regua ma Zacarias ha'e Matanias.

¹⁴ Hemã ramymino regua ma Jeuel ha'e Simei. Jedutum ramymino regua ma Semaiás ha'e Uziel.

¹⁵ Ha'e kuery ma guvyv kuery omboaty ukapa vy ha'e kuery ae ranhe ojegy'a'o ukapa. Ha'e rire mae ma ou SENHOR pegua oo py ju huvixa aipoe'i ukaague rami vy oiky'a'opa agüã, SENHOR ijavyvague rupi guive.

¹⁶ Ha'e rami vy sacerdote kuery ma SENHOR pegua opy rupi oike jogueravy oiky'a'o agüã. Ha'e rami vy oka py, SENHOR pegua oka oĩ va'e py oguenoẽmba iky'akue templo ropy rupi ikuai va'ekue. Ha'e nunga levita kuery oipe'apa vy mombyrya py ogueraa, Cedrom yakã peve.

* 28:25 2 Reis 16.10-16

¹⁷ Jyppygua jaxy ha'e ára ppy'i py ma omboypy okuapy oiky'a'o aguã. Ha'e gui ma oito araa py oiky'a'o ma SENHOR pegua oo oikeaty peve. Ha'e gui oito araa jevy py oiky'a'opa SENHOR pegua opy rupi. Jyppygua jaxy ha'e dezesseis araa py ma oiky'a'opa ma okuapy.

¹⁸ Ha'e gui mae ma oje'oipa huvixa Ezequias ngoo py oia py. Ha'e vy aipoe'i okuapy:

— Roiky'a'opa ma SENHOR pegua oo, altar mymba rapyaty, tembiporu ikuai va'e, ha'e mesa SENHOR renonde mbojape omoiaty va'e, hexegua tembiporu ikuai va'e ha'e javi reve.

¹⁹ Ha'e gui mba'emo huvixa Acaz oĩ jave heko vai reia rupi oka katy rive omombo va'ekue ma romoaty rōmba ju, romboaxapa ma guive SENHOR peguarã. Ha'e nunga ha'e javi ma SENHOR pegua altar renonde py ju ikuai — he'i okuapy.

Nhanderuete ombojeroviaa aguã Ezequias omboypy jevyague

²⁰ Ha'e ramo huvixa Ezequias ma ko'ê rai'i teri reve ovy vy omboatyva yvatekueve tetã rupi ikuai va'e. Ha'e vy ogueraapa SENHOR pegua oo py.

²¹ Ogueru ruka avi sete vaka ra'y, sete vexa'i, sete vexa'i ra'y ha'e sete kavara, jejavya regua ome'ê aguã huvixa openaa rupi ikuai va'e re vy, henda iky'a e'ỹ va'e ha'e Judã kuery re guive. Ha'e va'e ma Arão ramymino kuery sacerdote ikuai va'e pe ome'ê ukapa SENHOR pegua altar áry.

²² Vaka ra'y ma sacerdote kuery ojukapa ma vy huguykue oupi vy omboayvipa altar áry rupi. Ha'e gui vexa'i ha'e vexa'i ra'y ikuai va'e ju ojukapa ma vy huguykue omboayvipa avi altar áry rupi.

²³ Ha'e gui jejavya regua ome'ê va'erã kavara kuery ju ogueru huvixa renonde heta va'e kuery oexaa py. Ha'e va'e kuery áry ma omo'i okuapy opo.

²⁴ Ha'e rami vy sacerdote kuery ojukapa ma vy huguykue ma jejavya reguarã ome'ê altar yvy'iry rupi onhoê vy, Israel kuery ha'e javi ojevavyague ojao'i uka aguã, mba'eta huvixa ijayvu rire Israel kuery ojevavyague re oapy reve ome'ê aguã re.

²⁵ Omo'i avi levita kuery SENHOR pegua opy rupi hy'a pu, mbaraka ha'e ixã reta va'e reve ikuai aguã, Davi ojapo ukaague rami vy, huvixa pegua profeta kuery Gade ha'e Natã ijayvuague rami guive. Ha'e rami aguã ma SENHOR ae ojapo uka profeta kuery pe ijayvu vy.

²⁶ Ha'e gui ma levita kuery hi'ai okuapy mba'epu Davi oeja va'ekue reve, ha'e rã sacerdote kuery ma mimby guaxu reve ikuai.

²⁷ Ha'e gui mae ma Ezequias ijayvu altar áry mymba oapya aguã re. Ha'e ramo mymba oapy aguã omboypy ramove omboypy avi SENHOR pe oporaei okuapy aguã mimby guaxu omonhe'ê reve, mba'epu Israel pygua huvixa Davi oeja va'ekue reve guive.

²⁸ Ha'e ramo oporaei okuapy, ha'e mimby guaxu omonhe'ê atã ramove ijaty va'e kuery ha'e javi ikuai guenapy'ã re. Ha'e rami ae tema ikuai mymba oapypa e'ỹa ja.

²⁹ Ha'e gui mymba ome'ẽmba ma ramo huvixa Ezequias ha'e hexeve ikuai va'e ha'e javi voi guenapy'ã re ikuai avi omboetea py.

³⁰ Ha'e ramo huvixa ha'e hexevegua kuery yvatekueve ijayvu levita kuery SENHOR pe oporaei okuapy aguã re, Davi ha'e profeta Asafe ijayvuague rupi. Ha'e ramo ha'e kuery ovy'a reve oporai, ha'e ojero'a reve avi omboete okuapy.

³¹ Ha'e gui Ezequias aipoe'ive ju:

— Aỹ SENHOR peguarã pejeky'a'o ukapa ma. Penhemboja ke ha'vy, ha'e peru mymba peme'ê va'erã, perovy'a reve peru SENHOR pegua oo oia katy — he'i.

Ha'e ramo ijaty va'e kuery ogueru okuapy mymba ome'ê va'erã, SENHOR oguerovy'aa rupi. Opy'a re ome'ẽxa omo'i va'ekue reve ogueru okuapy mymba oapy aguã py.

³² Ijaty va'e kuery mymba ogueru va'e oipapaa rã setenta vaka ikuai, cem vexa'i ava ha'e gui duzentos vexa'i ra'y. Ha'e nunga ha'e javi SENHOR pe oapy okuapy.

³³ Ixupe ome'ê avi seiscientos vaka ra'y ha'e três mil vexa'i.

³⁴ Ha'e rã sacerdote kuery ma mbovy'i ete vy ndoipiropa reguai. Ha'e ramo hexegua levita kuery oipytyvõ okuapy oipiropa, ha'e sacerdote kuery mboae ojeky'a'o ukapa peve. Mba'eta sacerdote kuery gui levita kuery opy'a py heko porãve va'e ikuai ojeky'a'o ukaa py.

³⁵ Ha'e gui mymba oapy va'erã heta raxa ogueru va'ekue áryve oĩ avi mymba pete'i rami ikuai aguã regua ome'ê va'ekue kyrakue, ha'e uva rykue mymba oapy reve ome'ê va'e. Ha'e rami py omboypy ju SENHOR pe omba'eapo aguã.

³⁶ Heta va'e kuery ha'e javi reve Ezequias oguerovy'a ete Nhanderuete oipytyvõague, mba'eta ojapopa pojava okuapy vy.

30

Páscoa regua ngaru ojapo okuapyague

¹ Ha'e va'e rire Ezequias omoundouka ayvu reraarã Israel ha'e Judã ha'e javi rupi. Efraim ha'e Manassés kuery pe voi ombopara kuaxia Jerusalém py oupa avi aguã, SENHOR pegua oo py Páscoa áry py okaru okuapy aguã SENHOR Israel kuery ruete pe.

² Mba'eta huvixa ma guembiguai yvatekueve ha'e Jerusalém pygua kuery ha'e javi pe onhemongeta uka ma moko'i jaxya py Páscoa regua ngaru ojapo aguã re.

³ Mba'eta oa'angaague ára py porã nda'evei ngaru ojapo aguã, ha'e va'e ára peve sacerdote kuery mbovy'i ete ojeky'a'o uka ramo, ha'e pavê e'ỹ teri ono'õ Jerusalém py.

⁴ Ha'e nunga rupi heta va'e kuery reve huvixa oikuaa ha'e rami.

⁵ Ha'e rami vy onhembopy'a Israel kuery ikuaiia ha'e javi rupi omombe'u uka aguã, Berseba guive Dã peve, Jerusalém py oupa aguã Páscoa regua ngaru SENHOR Israel kuery ruete peguarã. Ha'e va'e ngaru py ha'e javi ete e'ÿ teri ikuai raka'e, ipara oia rami e'ÿ tei.

⁶ Ha'e gui huvixa ha'e yvatekueve kuaxia ombopara va'ekue reraa kuery oje'oipa Israel ha'e Judá javi rupi. Huvixa ijayvuague rami vy aipoe'i oje'oivvy:

— Israel ramymino kuery, pejevy ju SENHOR Abraão, Isaque ha'e Israel ruetea katy. Ha'e ramo 'rãe ha'e ju ojevy Assíria pygua huvixa po'akaa gui peo jepe va'ekue repyará.

⁷ Pendekuai eme penderu ha'e penderyke'y kuery ikuaiague rami. Ha'e kuery ma ojevavy va'ekue SENHOR guamo'i kuery ruete rovai. Ha'e nunga rupi ae omboaxapa imombaará pe, aÿ pexaa rami ae.

⁸ Aÿ gui ma peneakã ratãve eme penderu kuery ikuaiague rami e'ÿ. Pejerovia tema SENHOR re, ha'e peju ixupegua henda iky'a e'ÿ va'e raka'e rã peve guarã oiky'a'o va'ekuea katy. SENHOR Penderuete pe anho pendekuai, ipoxy etea peẽ kuery áry ou va'ekue oaxa nho aguã.

⁹ Mba'eta xapy'a rei rã SENHOR peguarã ju pejeko reroa ramo omboaxy nho 'rã penderyvvy ha'e pendera'y kuery escravo-rã ogueraapa pyre, kova'e yvy re ju ha'e kuery ojevypa aguã. Mba'eta SENHOR Nhanderuete nhomboaxy kuaa ha'e poroayvu va'e vy ngova nomo'ái 'rã peẽ kuerya gui, ixupe ete ri pejeko reroa ramo — he'i okuapy.

¹⁰ Ha'e gui ma ayvu reraa kuery ma tetã nhavõ rupi oguata oje'oivvy, Efraim ha'e Manassés yvy guive Zebulom peve. Ha'e rami tei ojoi rei, ojavyky rei okuapy.

¹¹ Ha'e rami tei ma Aser, Manassés ha'e Zebulom regua amongue onhemo'yvyi'i reve oje'oi Jerusalém tetã katy.

¹² Judá regua kuery voi oendu opy'a py Nhanderuete opo omo'i rã petei rami huvixa ha'e yvatekueve ojapo uka va'ekue ojapo aguã, SENHOR ijayvuague rami vy.

¹³ Ha'e gui ma Jerusalém tetã py heta ono'õ okuapy ngaru mbojape imbovua revegua e'ÿ ojapo aguã. Moko'i jaxya py heta ete ou okuapy.

¹⁴ Ha'e rami vy ikyre'ÿa oendu reve oipe'apa heravy altar mboae Jerusalém py ikuai va'ekue, altar heakuã porã va'e rapyaty guive. Ha'e va'e ma Cedrom yvyugua py ombomba.

¹⁵ Ha'e ramo mae ma ojuka okuapy vexa'i Páscoa regua, moko'i jaxya re ha'e catorze araa py. Sacerdote ha'e levita kuery ha'e nunga oexa vy oximba vy ojeky'a'o ukapa okuapy. Ha'e rami vy ha'e kuery voi ogueru mymba SENHOR pegua oo py oapy reve ome'ẽ aguã*.

¹⁶ Ha'e kuery ma ikuai aguã va'ekue py ae ju ikuai, Nhanderuete rembiguai Moisés lei omboparaague rami vy. Ha'e rami vy sacerdote kuery pe levita kuery mymba ruguykue ome'ẽ ramo omboayvi okuapy altar áry rupi.

¹⁷ Mba'eta heta teri ikuai onhemoaty va'e kuery regua ndojeky'a'o ukai teri va'ekue. Ha'e nunga rupi ha'eva'e'ÿ teri va'e kuery re vy vexa'i Páscoa reguarã ogueru va'ekue levita kuery ju ojuka, SENHOR peguarã oiky'a'opa aguã.

¹⁸ Mba'eta heta ete teri ikuai ndojeky'a'o ukai va'ekue: Efraim, Manassés, Issacar ha'e Zebulom kuery va'e regua. Ha'e kuery voi okaru okuapy Páscoa regua re, ipara oia rami e'ÿ tei. Ha'e ramo Ezequias ojerure ha'e kuery re. Ha'e vy aipoe'i:

— SENHOR ha'eva'e rami orerereko va'e, eperdoapa ke

¹⁹ opy'a py ndee SENHOR guamo'i kuery ruete ndereka aguã omo'i va'e ha'e javi, henda iky'a e'ÿ va'e regua lei rami ndojeky'a'o ukai teri va'e tei — he'i.

²⁰ Ha'e rami Ezequias ojerurea SENHOR oendu vy oiky'a'o heta va'e kuery py'a.

²¹ Ha'e rami py Jerusalém py Israel ramymino kuery ikuai va'e ojapo okuapy ngaru mbojape imbovua revegua e'ÿ. Sete ára re ojapo ovy'a ete reve. Ko'ẽ nhavõ levita ha'e sacerdote kuery opora'i okuapy SENHOR pe, mba'epu omhendu atã guive SENHOR omboetea rupi.

²² Ha'e gui levita kuery SENHOR pe o'arandua rupi omba'eapo va'e kuery pe ma Ezequias ijayvu porã'i ombopy'a guaxua rupi. Ha'e ramo sete ára re ha'e kuery okaru okuapy ngaru pyguarã ome'ẽ mbyre re. Ome'ẽ avi petei rami ikuai aguã regua, ha'e opora'i okuapy SENHOR guamo'i kuery ruete pe.

²³ Ha'e gui ijaty va'e kuery ojou porãmba okuapy sete ára re ju ngaru ojapove aguã. Ha'e rami vy ojapove ju oporaia rupi.

²⁴ Ijaty va'e kuery pe Judá pygua huvixa Ezequias ome'ẽ mil vaka ra'y ha'e sete mil vexa'i ojuka uka va'erã. Ha'e gui yvatekueve ju mil vaka ra'y ha'e dez mil vexa'i avi ome'ẽ ijaty va'e kuery pe. Ha'e gui sacerdote kuery regua heta ete ojeky'a'o uka.

²⁵ Ha'e rami vy Judá kuery ijaty va'e ha'e javi ovy'a okuapy, sacerdote ha'e levita kuery, Israel gui ou va'ekue ha'e javi reve, amboae regua kuery Israel yvy gui ou va'ekue ha'e Judá pygua kuery ae guive.

²⁶ Jerusalém tetã py ovy'a ete okuapy. Israel pygua huvixa Davi ra'y Salomão oia guive Jerusalém py ndoiko'i teri va'ekue ha'e ramigua ngaru.

²⁷ Ha'e ramo sacerdote ha'e levita kuery opu'ã okuapy heta va'e kuery ogueroyvu porã aguã. Ha'e ramo ha'e kuery ijayvua ma Nhanderuete 'amba iky'a e'ÿa py onhendu, yvate etea peve.

* 30:15 Sacerdote kuery oximba mba'eta na'ikyre'ÿi va'ekue ngaru oiko rã guarã ojeky'a'o uka aguã (versículo 3 ha'e 29.34).

31

¹ Ha'e nunga ha'e javi opa ma jave Israel kuery onhemboatypa va'ekue ma tetã Judá yvy re ikuai va'e rupi oje'oi vy omopêmba ta'angaa ikuai va'e, oake'opa ta'angaarã yvyra omopu'ã mbyre, ha'e ombovaipa yvy'ã rupi ombojérovia atyrã ojapo pyre, altar Judá rupi ikuai va'ekue, Benjamim, Efraim ha'e Manassés rupi guive, omomba ete peve. Ha'e rami vy mae ma Israel ramymino kuery peteĩ-teĩ ojevypa ju ovyvy katy, e'y' vy guetã katy.

Sacerdote ha'e levita kuery peguarã huvixa Ezequias mba'emo ome'ẽ ukaague

² Ezequias omõi sacerdote ha'e levita kuery peteĩ-teĩ regua jorire-rire omba'eapo aguã, ha'e kuery omõi ypyague rami ae. Ha'e ramo ha'e kuery ikuai mymba oapy reve ha'e peteĩ rami ikuai aguã regua ome'ẽ aguã rami, ha'e SENHOR pegua oo rokẽ py omba'eapo ha'e oporaẽi okuapy aguã guive.

³ Huvixa ma guymba kuery ae ome'ẽ oapy reve ome'ẽa va'erã. Aje'ive ha'e ka'aru ju 'rã ome'ẽa oapy reve, sábado ára, jaxy pyau'i ha'e ngaru oiko nhavõ guive, SENHOR guigua lei re ipara oinya rami vy.

⁴ Ha'e rami vy heta va'e kuery Jerusalém py hekoa va'e pe ijayvu ha'evea rami ome'ẽ aguã re sacerdote ha'e levita kuery peguarã, ha'e va'e kuery SENHOR guigua lei oĩa rami anho omba'eapo okuapy aguã.

⁵ Ha'e va'e ayvu omombe'ua ramove Israel ramymino kuery oata aguã rami e'y' ogueru mba'emo aju omono'õ ypy'i va'ekue iporãgueve, vinho, azeite, ei ha'e mba'ety rupi onhot'y' va'ekue guigua ha'e javi. Opa mba'e oguereko va'e gui ogueru okuapy dízimo oata aguã rami e'y'.

⁶ Ha'e gui Israel ha'e Judá regua Judá yvy re hekoa va'e ma dízimo-rã ogueru okuapy guymba vaka ha'e vexe'i, SENHOR nguete peguarã omboaxa va'ekue guive. Ha'e nunga omboaty reta joapy e'y'-e'y'.

⁷ Mboapy jaxya py ma mboopy okuapy omono'õ aguã. Ha'e gui sete jaxya py mae ma omono'õmba okuapy.

⁸ Ha'e gui Ezequias ha'e vyatekueve ou vy ha'e nunga omboaty pyre oexa vy ogueroyvuy porã SENHOR, ixupegua Israel kuery guive.

⁹ Ha'e gui mba'emo omboaty pyre re Ezequias oporandu sacerdote ha'e levita kuery pe.

¹⁰ Ha'e ramo Zadoque ramymino sacerdote vyateve va'e Azarias ombovai:

— Ha'e nunga gui ma ore kuery rokaru porã rokuapy SENHOR pegua opy oguerua ypya ára guive a'y' peve, orerevyatãmba guive. Ha'e gui hembyre ju oata aguã rami e'y', SENHOR ojepegua kuery omoingo porã ramo. Guí rami ete tuvixa va'e ma hembyrekue ituí — he'i.

¹¹ Ha'e ramo SENHOR pegua oo py Ezequias ojapo uka mba'emo omõi porã atyrã.

¹² Ha'e nunga ojapopaa ma ramo ha'e py omõi porã tema mba'emo ome'ẽ mbyre, dízimo ha'e mba'emo SENHOR pe omboaxa pyre. Ha'e nunga re openaa rupi oiko va'e ma levita Conanias. Ha'e rã ipytyvõarã ma tyvy Simeĩ oĩ.

¹³ Ha'e gui Conanias ha'e tyvy Simeĩ pytyvõarã ma omõi avi Jeiel, Azarias, Naate, Asael, Jerimote, Jozabade, Eliel, Ismaquias, Maate ha'e Benaia. Ha'e va'e kuery ma huvixa Ezequias ha'e Nhanderuede pegua oo re opena va'ety Azarias ae omõi.

¹⁴ Ha'e gui levita Imna ra'y Coré okẽ kuaray oua katy oĩ va'e rarõa ma omõia avi Nhanderuede pe ome'ẽxea'i py ome'ẽ mbyre re opena aguã. Ha'e nungakue ha'e javi omboja'o ju 'rã, SENHOR pe ome'ẽ mbyre, mba'emo iky'a e'y' ete va'e guive.

¹⁵ Ha'e va'e rembiguirã ikuai Édén, Miniamim, Jesua, Semaías, Amarias ha'e Secanias. Ha'e kuery ma sacerdote kuery tetã ikuai va'e rupi oje'oi 'rã ha'evea rami guvyvy kuery pe omboja'o aguã peteĩ-teĩ regua ikuai rami, yvy'gueve ha'e vyatekueve pe guive.

¹⁶ Ha'e rã avakue mboapy ma'et'y' guive va'e kuaxia re hery omboparaa va'ekue ma any guive, mba'eta ha'e kuery ma omõague rami vy ko'ẽ nhavõ SENHOR pegua opy 'rã oike omba'eapo aguã.

¹⁷ Sacerdote kuery rery omboparaa peteĩ-teĩ ramo'i kuery ikuaiague rami, ha'e rã levita kuery vinte ma'et'y' guive va'e rery ma peteĩ-teĩ omba'eapo aguã omõague rami vy omboparaa.

¹⁸ Kuaxia re omboparaa avi ha'e kuery regua kyrĩgue'i, kunhague, ta'y kuery ha'e tajy kuery rery ha'e javi. Heta ete ikuai, mba'eta ha'evea rami omba'eapo okuapy mba'emo iky'a e'y' va'e ikuai rami.

¹⁹ Ha'e gui Arão ramymino sacerdote kuery peteĩ-teĩ tetã yvy'ry rupi hekoa va'e regua omõia hery rupi, sacerdote ha'e levita kuery mboae hery omboparaa va'ekue pe mba'emo omboja'o va'erã.

²⁰ Ha'e rami aguã huvixa Ezequias ojapo uka Judá yvy ha'e javi rupi. SENHOR nguete renonde rupi iporã va'e, ha'evea ramigua ha'e anhetẽ va'e meme ojapo oikovy.

²¹ Opy'a ha'e javi py ojapo mba'emo Nhanderuede pegua opy, lei ha'e ojapo uka pyre rami vy. Nhanderuede oekaa rupi ojapo vy oiko porã.

32

2 Reis 18.13-18; Isaías 36.1-3

¹ Ha'e gui ha'e rami Ezequias anhetẽ rupi oiko rire teĩ Síria pygua huvixa Senaqueribe kuery ou Judá yvy re. Ha'e kuery ovaẽmba ma vy ojoko tetã ikorapa va'e ha'e javi, oipe'axe vy.

² Ha'e gui Senaqueribe kuery ou va'ekue Jerusalém tetã re opu'ã ta maa Ezequias oexa vy

³ onhemongeta uka guembigua'i vyatekueve ha'e avakue ipy'a guaxukueve pe. Ha'e rami vy onhembopy'a yvu tetã rovai rupi ikuai va'e ojao'ipa aguã. Ha'e ramo ha'e kuery oipytyvõ okuapy.

⁴ Ha'e rami vy heta va'e kuery onhemboaty okuapy vy ojao'ipa yvu ikuai va'e ha'e javi, yvyugua rupi yy oxyry oiny va'e guive. Ha'e vy aipoe'i:

— Mba'e re tu jaeja rive Assíria pygua huvixa kuery ou vy yvu ikuai va'e ojoupa aguã? — he'i okuapy.

⁵ Ha'e ramo huvixa ipy'a guaxu vy omoatyrō ukapa ju tetā kora ivaipaague ha'e javi, ha'e hi'áry rupi ma ojapo torre. Ojapo avi kora hovai rupi oĩ va'erā, ha'e tetā Davi rekoague py ojapo Milo korarā. Ojapo avi tembiporu ha'e hu'y jokoarā oata aguā rami e'ý.

⁶ Heta va'e kuery rerekoarā omoĩ avi xondaro ruvixa. Ha'e rami vy tetā rokē rexei omboatypa vy ha'e kuery pe ijayvu ombopy'a guaxua rupi. Ha'e vy aipoe'i:

⁷ — Penembaraete ke, pendepy'a guaxu guive. Pekiye eme, penhemondyi eme guive Assíria pygua huvixa gui, neĩ hupive ou va'e kuery gui heta teĩ. Mba'eta hexeve ikuai va'e gui ma nhande kuery reve peteĩ oiko pavê gui ipo'akave va'e.

⁸ Ha'e kuery reve ikuai va'e ma to'o guigua ijyva va'e. Ha'e rā nhanderevegua ma SENHOR Nhanderuete. Ha'e ma nhanepytyvō aguā rami oiko, nhandere opu'ã va'e kuery rovai opu'ã aguā — he'i. Ha'e rami Judá pygua huvixa Ezequias ijayvu ramo heta va'e kuery ipy'a guaxuve okuapy.

2 Reis 18.19-37; Isaías 36.4-22

⁹ Ha'e rire Assíria pygua huvixa Senaqueribe oxondaro kuery reve Laquis tetā ojoko okuapya gui omondouka guembiguaĩ kuery Jerusalém py Judá pygua huvixa Ezequias-a py. Ha'e vy aipoe'i uka:

¹⁰ — Po rami Assíria pygua huvixa Senaqueribe ijayvu: “Mba'e nunga re tu peẽ kuery pejerovia pekuapy? Mba'eta Jerusalém tetā pejoko ukapa ri.

¹¹ Penhembotavy uka eme Ezequias pe, karuai ha'e yuvei gui rive pamanomba e'ý aguā. Mba'eta ha'e va'e aipoe'i: 'Assíria pygua huvixa po gui ma SENHOR Nhanderuete nhandereraa jepe 'rã', he'i va'ekue teĩ.

¹² Ha'e gui Ezequias ae e'ý teve Penderuete pegua pembojeroviaaty ha'e altar ikuai va'e mboipaare? Ha'e vy Judá ha'e Jerusalém pygua kuery pe ijayvu vy aipoe'i va'ekue: 'Peteĩ altar oĩ va'e py 'rã pejero'a. Ha'e va'e áry anho 'rã peapy heakuã porã va'e', he'i va'ekue.

¹³ Peẽ kuery ndapeikuaii teve xee ha'e xeramoĩ kuery vyv regua kuery ha'e javi re rojapoague? Ha'e pygua kuery ruete ra'angaa ri ty'y ogueraa jepe raka'e xepo gui?

¹⁴ Mba'eta xeramoĩ kuery omomba va'ekue ruete ra'angaa kuery va'e regua mava'e tu ojepegua kuery ogueraa jepe raka'e xepo gui? Ha'e gui penderuete ju mba'eta tu xepo gui pendereraa jepe kuaa ta?

¹⁵ Ha'e nunga rupi aĩ gui ma penhembotavy ukave eme Ezequias pe. Ixupe pejerereko uka eme, neĩ pejerovia eme hexe. Mba'eta peteĩve vyv re ikuai va'e ruete, peteĩve vyv regua ruete ta'angaa nda'ipoi xepo gui ojepegua kuery ogueraa jepe va'ekue, xeramoĩ kuery po gui e'ý guive. Ha'e gui penderuete katuve ma napendereraa jepei 'rã ri xepo gui”, he'i uka teĩ.

¹⁶ Ha'e rami vy Senaqueribe rembiguai kuery ijayvuve tema oje'oivy SENHOR Nhanderuete ha'e hembiguaĩ Ezequias rovai rupi.

¹⁷ Senaqueribe ombopara avi kuaxia SENHOR Israel kuery ruete ombojaru reia rupi. Hexe ijayvu vai vy aipoe'i: “Amboae vyv regua ruete ra'angaa xepo gui ojepegua kuery ndogueraa jepeague rami ae avi Ezequias ruete voi ojepegua kuery ndogueraa jepei avi 'rã xepo gui”, he'i.

¹⁸ Hembiguaĩ kuery voi judeu kuery ayvu py ojapukai atã okuapy Jerusalém pygua kuery tetā kora áry ikuai va'e rovai. Tetã re ipo'akaxe vy omondyi ha'e omongyja rupi ijayvu teĩ.

¹⁹ Jerusalém pygua kuery ruete re ijayvu vyv regua kuery ruete ra'angaa re rami rive, avakue opo py ojapo va'ekue meme teĩ.

²⁰ Ha'e rami teĩ huvixa Ezequias ha'e Amoz ra'y profeta Isaías ojerure ha'e nunga re, Yva pygua pe ojapukai.

Assíria pygua xondaro kuery omombaague

²¹ Ha'e gui ma SENHOR omondouka peteĩ anjo Assíria pygua huvixa rembiguai kuery ikuai py. Ha'e rami vy ojupaka avakue ipy'a guaxukueve, huvixa kuery ha'e yvatekueve ha'e javi. Ha'e ramo huvixa ma oxĩmbaa ngova re oexa uka reve onha ju ovy ovyv katy. Ha'e rami vy nguete ra'angaa pegua opy oike ramo ta'y kuery ae ojuka kyxe py.

²² Ha'e rami py SENHOR ogueraa jepe Ezequias ha'e Jerusalém pygua kuery ha'e javi, Assíria pygua huvixa Senaqueribe ha'e hovai gua kuery ha'e javi po gui, ha'e kuery pe ome'ẽ guive ovy'a aguã opa rupi.

²³ Ha'e ramo heta ete Jerusalém py ou vy ogueru okuapy SENHOR pe ome'ẽ va'erā, ha'e Judá pygua huvixa Ezequias pe voi ogueru mba'emo hepyve va'e. Ha'e rami rire vyv jave regua kuery omboete pavê.*

2 Reis 20.1-11; Isaías 38.1-8

²⁴ Ha'e va'e jave py Ezequias imba'eaxy oupy vy omano aguã rami itui. Ha'e rami vy SENHOR pe ojerure ramo ombovai vy peteĩ mba'e oexa uka oikuaa aguã.

²⁵ Ha'e rami teĩ Ezequias ma Nhanderuete omoingo porãague rekovia mba'eve ndojapoi. Ha'e rami 'rãgue py opy'a py onhembovyate rei. Ha'e nunga rupi hexe ou ipoxy etea, Judá ha'e Jerusalém pygua kuery re guive.

²⁶ Ha'e gui ma Ezequias opy'a py onhemoyvy'i ju onhembovyateague gui, Jerusalém pygua kuery reve. Ha'e nunga rupi huvixa Ezequias oĩ teria ja SENHOR poxya ndouvei ha'e kuery rovai.

²⁷ Ha'e gui Ezequias ma oguerrekopa ogueovy'aa anho oata rei aguã rami e'ý. Ojeupe guarã ojapo uka prata omoĩ porã atyrã, ouro, ita porãgueve, temb'u irürã, hu'y jokoã ha'e opa marãgua iporãve va'e oĩ aguã.

²⁸ Ojapo uka avi mba'emo ra'yigue omono'õ mbyre omoĩ porã atyrã, vinho ha'e azeite guive. Guymba kuery opa marãgua oguereko va'e ikuai atyrã voi ojapo, vexe'i korarã guive.

* 32:23 2 Reis 19.35-36; Isaías 37.36-37

²⁹ Ojapo uka avi tetã. Guymba kuery vexa'i ha'e vaka ra'y oguereko avi oata aguã rami e'y, ixupe Nhanderuete heta raxa ome'ẽ ramo.

³⁰ Ha'e va'e Ezequias ae ojao'i yvy'ã Giom guive yvu gui oxyry va'e, ha'e vy ojapo tetã Davi rekoague regua kuaray oua katy rupi ju oxyry aguã rami. Mba'emo ojapoa ha'e javi py Ezequias oiko porã.

³¹ Ha'e rami teĩ ha'e oĩa py Babilônia pygua yvatekueve ayvu reraarã omoundouka oikuaa pota aguã ijyvy re iporã va'e ikuai va'e re. Ha'e va'e jave py ma Nhanderuete noipytyvõi merami, anhetẽ pa ipy'a re oĩ va'e ha'e javi re oikuaa pota aguã.

2 Reis 20.20,21

³² Ha'e gui oĩve rei tema Ezequias rekokie regua. Ha'e rami avi mba'emo porayvua rupi ojapo va'ekue ha'e javi noĩ 'rã teve kuaxia Amoz ra'y profeta Isaías mba'emo oexa va'ekue, ha'e Judá ha'e Israel pygua huvixa kuery rekokie oĩa re?

³³ Ha'e gui Ezequias ndoikovevei'i ma guamoĩ kueryague rami. Ha'e ramo onhono porãa yvy'ã re Davi ra'y kuery rupa ikuai py. Ha'e omano ramo Judá ha'e Jerusalém pygua kuery ha'e javi ima'endu'a porã okuapy. Ha'e gui ta'y Manassés ju oĩ nguu rekovia.

33

2 Reis 21.1-9

¹ Manassés ma doze ma'etỹ oguereko jave py oĩ huvixarã. Ha'e vy cinqüenta e cinco ma'etỹ re opena Jerusalém py.

² Ha'e va'e ma ha'eva'e'y va'e ojapo oikovy SENHOR renonde rupi, amboae regua kuery Israel kuery renonde gui SENHOR oipe'apa va'ekue ikuaiague rami ae ju.

³ Ha'e rami vy omoatyrõmba ju ombojeroviaaty yvy'ã rupi ikuai va'e nguu Ezequias ombovaipa va'ekue, ojapo avi altar Baal kuery peguarã. Omopu'ã avi imo'amy ta'angaarã yvyra guigua. Ha'e vy guenapy'ã re oĩ yva re jaxy-tata ikuai katy omboeta rupi.

⁴ SENHOR pegua opy rupi eteve voi ojapo altar-rã, SENHOR aipoe'iaague: “Jerusalém tetã py amoĩ 'rã xerery raka'e rã peve guarã”, he'iaague py.

⁵ Ha'e vy SENHOR pegua oka mokoĩve oĩ va'e rupi ojapo avi altar jaxy-tata yva re ikuai va'e ha'e javi peguarã.

⁶ Ha'e rami vy yvyugua Hinom ra'y rekoague py gua'y ae oapy reve ome'ẽ, ha'e arai rupi rive imba'ekuaa ha'e oexa'ã oikovy. Ha'e vy imba'evykya rupi oiko, ha'e omanogue mboayvua ha'e imba'evyky va'e kuery pe rive oporandu oikovy. Ha'e rami vy SENHOR renonde rupi ojapo oikovy ha'eva'e'y va'e meme, ombopoxy aguã rami rive.

⁷ Ha'e vy yvyra gui ta'angaarã ojapo uka va'ekue omoĩ avi Nhanderuete pegua opy Davi ha'e ta'y Salomão pe aipoe'iaague py: “Kova'e oo ha'e Jerusalém tetã aiporavo Israel regua ha'e javi gui, ha'e py xerery amoĩ aguã raka'e rã peve guarã.”

⁸ Mba'eta xee namoxẽvei 'rã Israel kuery tuu kuery yvyrã ame'ẽ va'ekue gui, xapy'a rei xeguigua lei, anhombo'ea ha'e aipotaa xerembiguai Moisés pe ame'ẽ uka va'ekue rupi ha'e kuery ikuai ramo”, he'iaague py.

⁹ Ha'e rami py Manassés ojapo Judá ha'e Jerusalém pygua kuery ojevavy aguã rami. Ha'e ramo amboae regua Israel kuery renonde gui SENHOR omomba va'ekue gui eteve voi heko vaive okuapy.

Manassés ombo'aa jave ojerureague

¹⁰ Manassés ha'e ixupegua kuery pe SENHOR ijayvu teĩ noendu potai okuapy.

¹¹ Ha'e nunga rupi ha'e kuery re SENHOR ombou Assíria pygua huvixa rembiguai yvatekueve oxondaro kuery reve. Ha'e va'e kuery ou vy ojopy okuapy Manassés ty'aĩ py. Ha'e rami vy corrente py ju ojokua reve ogueraa Babilônia katy.

¹² Ha'e ramo ojexavaia oendu vy ojerure oiny SENHOR nguete pe. Opa mba'e py onhemo'yvy'i guamoĩ kuery ruete renonde py.

¹³ Ha'e rami ojerure ramo Nhanderuete omboaxy. Ojerurea oendu vy ojapo Jerusalém tetã katy ju ojevvy aguã rami, huvixa ju oĩ aguã. Ha'e ramo mae ma Manassés oikuaa SENHOR ae Nhanderuete oikoa.

¹⁴ Ha'e va'e rire ma tetã Davi rekoague hovai katy rupi ojapo ikorarã, Giom regua kuaray oua katy, yvyugua rupi ha'e Okẽ Pira 'epy va'e rupi jaikea py. Ofel rupi ojapo ikora yvate ete va'erã. Ha'e gui Judá re tetã ikorapa va'e ha'e javi rupi omoĩ harõarã kuery huvixa reve.

¹⁵ Ha'e rami vy SENHOR pegua opy gui oipe'apa tuete ramigua, ta'angaa hi'aĩ va'ekue voi. Oipe'a avi altar SENHOR pegua yvyty áry ojapo pyre, Jerusalém tetã ha'e javi gui guive. Ha'e va'e ha'e javi omombo tetã gui mombry'i.

¹⁶ Ha'e rã SENHOR pegua altar ma omoatyrõmba ju, ha'e hi'áry ome'ẽ hexeve peteĩ rami ju ikuai regua ha'e oguero'y'aa rupigua. Ha'e rami vy Judá kuery pe ijayvu SENHOR Israel kuery ruete pe anho ikuai aguã re.

¹⁷ Ha'e ramive ma yvy'ã ikuai va'e áry rupi teri heta va'e kuery mba'emo ome'ẽ okuapy, teĩ SENHOR Nhanderuete pe anho guive.

2 Reis 21.17,18

¹⁸ Ha'e gui oĩve rei tema Manassés rekokie regua. Ha'e rami avi Nhanderuete pe ojerureague, ha'e ixupe SENHOR Israel kuery ruete rery rupi profeta kuery ijayvuaque, ha'e gui mba'emo ojapo va'ekue ha'e javi oĩ 'rã kuaxia Israel pygua huvixa kuery rekokie oĩa re.

¹⁹ Ha'e ojerureague, Nhanderuete omboaxyague, ha'e ojevavyague ha'e javi, heko vai reiaque, ha'e gui vvy'ã áry rupi ombojerovia atyrã ha'e vvyra gui ta'angaarã ojapoague, ha'e ta'angaa ita guigua voi onhemo'yvy'i e'y mbove omopu'ãmbaague, ha'e nunga ha'e javi ma oĩ profeta kuery rekokie ombopara pyre re.

²⁰ Ha'e gui Manassés ndoikovevei'i ma guamoĩ kueryague rami. Ha'e ramo onhono porã hekoague py ae. Ha'e gui ta'y Amom ju oĩ nguu rekovia.

2 Reis 21.19-26

²¹ Amom ma vinte e dois ma'etỹ oguereko huvixa oĩ ypy'i jave py. Ha'e gui mokoĩ ma'etỹ re ete'i opena Jerusalém py.

²² Ha'e ma SENHOR renonde rupi ha'eve'y va'e anho ojapo oikovy, nguu Manassés ojapoague rami. Mba'eta mba'emo ra'angaarã tuu Manassés ojapo va'ekue ha'e javi pe ta'y Amom ju ome'ẽ tema mymba, ha'e nunga pe rive oiko.

²³ Va'eri nguu Manassés oikoague rami e'y Amom ma nonhemo'yvy'i xei SENHOR renonde py. Ha'e rami 'rãgue py ojevavyve tema ovy.

²⁴ Ha'e ramo hovai hembiguaĩ kuery jogueroavyvy hoo py ae ojuka okuapy.

²⁵ Ha'e rami teĩ ha'e va'e vvy pygua kuery ojukapa ju huvixa Amom jukaare kuery ha'e javi. Ha'e rami vy hekovia omoĩ ju ta'y Josias.

34

2 Reis 22.1,2

¹ Josias ma oito ma'etỹ oguereko huvixa oĩ ypy'i jave py. Ha'e vy trinta e um ma'etỹ re opena Jerusalém py.

² Ha'e va'e ma SENHOR renonde rupi ha'evea ramigua ojapo oikovy, guamoĩ Davi ojapoague ha'e javi rupi. Ha'e vy ndojepe'ai oiporu kuaa katy, neĩ oiporu kuaa e'ya katy ma voi.

2 Reis 23.4-20

³ Oito ma'etỹa re ma huvixa Josias oĩ jave py kunumi'i teri reve omboypy guamoĩ Davi ruete oeka aguã. Ha'e gui doze ma'etỹa py ma omboypy Judá ha'e Jerusalém oiky'a'o aguã vvy'ã áry rupi ombojerovia atyrã ojapo pyre gui, ta'angaarã vvyra omopu'ã mbyre, ha'e gui ta'angaa ita ha'e mba'emo ryku gui ojapo pyre ha'e javi gui.

⁴ Ha'e ae oexaa py oity Baal kuery pegua altar ikuai va'ekue. Ha'e va'e áry rupi altar heakuã porã va'e rapyaty omoĩ mbyre ma ha'e ae ombovopa. Omopẽmba avi ta'angaarã vvyra omopu'ã mbyre, ha'e mba'emo ra'angaa ita ha'e mba'emo ryku gui ojapo pyre ha'e javi. Ha'e nunga omongu'ipa ma vy iku'ikue omombopa ha'e nunga pe mba'emo ome'ẽ va'ekue rupa rupi rive.

⁵ Ha'e nunga pegua sacerdote ikuai va'ekue kãgue ma oapypa altar ha'e kuery ombojeroviaague áry ae. Ha'e rami py oiky'a'opa ju Judá ha'e Jerusalém ha'e javi rupi.

⁶ Ha'e rami ae avi ojapo Manassés, Efraim ha'e Simeão regua tetã ikuai va'e rupi, Naftali vvy ha'e javi rupi peve, tekoague ikuai va'e rupi guive.

⁷ Altar ha'e ta'angaa vvyra ha'e ita guigua oitypa ma vy omongu'ipa ju. Omboa'ypa avi altar heakuã porã va'e rapy atyrã Israel vvy jave rupi ojapo pyre. Ha'e gui ma ojevvy ju Jerusalém katy.

2 Reis 22.3-7

⁸ Dezoito ma'etỹa re ma huvixa Josias oĩ jave py ha'e va'e vvy ha'e Nhanderuete pegua oo oiky'a'o ukapa ma vy omboypy SENHOR nguete pegua oo omoatyrõ uka aguã. Ha'e rami vy omondouka Azalias ra'y Safã, tetã re opena va'ety Maaséias, ha'e Joacaz ra'y kuaxia mboparaaty Joã.

⁹ Ha'e kuery ma sacerdote yvateve va'e Hilquias-a py oje'oi vy ixupe ome'ẽ peráta SENHOR pegua opy ogueru pyre levita regua okẽ rarõa kuery omoĩ porã va'ekue. Ha'e va'e peráta ma Manassés, Efraim ha'e Israel kuery ikuai ha'e javi gui omono'õ mbyre, Judá ha'e Benjamim gui, Jerusalém tetã gui guive.

¹⁰ Ha'e va'e ma ha'e kuery ome'ẽ okuapy SENHOR pegua oo py omba'eapo va'e kuery re opena va'e pe, omba'eapoague repy ome'ẽ aguã, oo omoatyrõ vy ombopyaupa ju aguã.

¹¹ Oo apoa ha'e ita re omba'eapo va'e kuery pe ome'ẽ peráta ita omoatyrõ mbyre ojogua aguã, ha'e vvyra oo ytarã ha'e hi'áry ipyaxa va'erã, Judá pygua huvixa kuery ivaiapa aguã rami rive oeja rire.

¹² Ha'e va'e avakue ma anhetẽ rupi meme ikuai omba'eapo py. Ha'e kuery re opena va'e ma levita regua Merari ramymino kuery Jaate ha'e Obadias, Coate ramymino kuery Zacarias ha'e Mesulão guive, omba'eapo va'e kuery re openaa rupi ikuai.

¹³ Ha'e gui levita kuery mba'epu ombopu kuaa va'e opena avi okuapy mba'emo reraa kuery re, mba'emo py omba'eapo va'e kuery ha'e javi re guive. Ha'e rã levita kuery mboae ma kuaxia re opena okuapy, ha'e'y vy joe openaa ha'e okẽ rarõa rupi ikuai.

2 Reis 22.8-10

¹⁴ Ha'e gui peráta SENHOR pegua opy ogueru pyre oguenoẽa jave ma sacerdote Hilquias ojou kuaxia para SENHOR lei Moisés pe ome'ẽ uka va'ekue oĩa.

¹⁵ Ha'e rami vy Hilquias aipoe'i kuaxia re opena va'ety Safã pe:

— SENHOR pegua opy xee ajou kuaxia para lei oĩa — he'i.

¹⁶ Ha'e gui kuaxia ma Safã pe Hilquias ome'ẽ ramo ogueraa huvixa pe. Ha'e vy ixupe omombe'u vy aipoe'i:

— Nerembiguaĩ kuery ojapopa ma rejapo uka va'ekue ha'e javi.

¹⁷ Ha'e rami vy peráta SENHOR pegua opy oĩ va'ekue ha'e kuery oipapa ma vy ome'ẽmba omba'eapo va'e kuery re opena va'e po py, ha'e mba'emo apoa kuery pe — he'i.

¹⁸ Ha'e gui Safã omombe'uve ju huvixa pe. Ha'e vy aipoe'i:

— Sacerdote Hilquias ma xevy ome'ê kova'e kuaxia para — he'i. Ha'e rami vy huvixa renonde py Safã ogueroayvu.

2 Reis 22.11-20

¹⁹ Ha'e gui ma kuaxia para lei oia ogueroayvu rã huvixa oendu vy omondoropa oao.

²⁰ Ha'e rami vy huvixa ijayvu Hilquias pe, Safã ra'y Aicão, Mica ra'y Abdom, nhomongeta va'ety Safã ha'e guembiguaí Asaías pe. Ha'e vy aipoe'i ha'e kuery pe:

²¹ — Tapeo ke, SENHOR pe peporandu uka xereko re, ha'e Israel ha'e Judá pygua kuery ha'e javi re. Mba'eta nhande pavê áry SENHOR ombou opoxy etea, mba'eta kova'e kuaxia para re ayvu oi va'e rupi nhaneramoí kuery nda'ikuai raka'e, ipara oi va'e ha'e javi ndojapoi vy — he'i.

²² Ha'e ramo Hilquias ha'e huvixa omondouka va'ekue mboae reve oje'oi Jerusalém tetã yvy'ã guy katy profeta kunha Hulda oikoa py. Ha'e va'e ma Harás ra'y Tocate ra'y Salum sacerdote kuery ao re opena va'ety ra'yxy. Ha'e gui kunha va'e pe ha'e kuery omombe'upa okuapy ha'e nunga.

²³ Ha'e ramo ha'e kuery pe kunha va'e aipoe'i:

— Po rami SENHOR Israel kuery ruete aipoe'i uka: Aipopeje ava xea py penembouare pe:

²⁴ Po rami SENHOR ijayvu: “Ma'ê, mba'emo vai ambou 'rã kova'e tekoa ha'e apy ikuai va'e áry, ayvu vai kuaxia para Judá pygua huvixa pe ogueroayvuague ha'e javi rami vy.

²⁵ Mba'eta ha'e kuery xerejapa vy amboae regua tuuete ramigua kuery pe rive oapy okuapy heakuã porã va'e, opo py mba'emo ojapo va'ekue py xembopoxy aguã rami. Ha'e nunga rupi xepoxya ou ta ma kova'e tekoa áry, ndoguei 'rã guive”, he'i.

²⁶ Ha'e gui pemombe'u 'rã Judá pygua huvixa SENHOR pe peporandu uka aguã penembouare pe: “Po rami SENHOR Israel kuery ruete ijayvu, ayvu rendu va'ekue omombe'u porãve vy:

²⁷ ‘Ndee ma kova'e tekoa ha'e apy hekoa va'e kuery rovai xeayvu rã rendu va'ekue, ha'e xee SENHOR renonde py renhemo'yvyi'i vy ndeao remondoro ha'e rejae'o va'ekue guive. Ha'e ramo xee aendu', he'i SENHOR.

²⁸ ‘Ha'e nunga rupi xee romombytu'u 'rã neramoí kueryague rami, ha'e rã nenhono porãa 'rã. Ha'e gui ndee ae nderexai 'rã mba'emo vai kova'e tekoa re ambou rã', he'i.”

Ha'e ramo kunha va'e ombovaiaague ha'e kuery omombe'u okuapy huvixa pe.

2 Reis 23.1-3

²⁹ Ha'e rami rã huvixa ijayvu nhomongeta va'ety Judá re ha'e Jerusalém py ikuai va'e onhemoatypa okuapy aguã.

³⁰ Ha'e gui SENHOR pegua oo py huvixa oo Judá regua avakue, Jerusalém pygua, sacerdote, levita ha'e heta va'e kuery ha'e javi reve, yvyigueve ha'e yvatekueve guive. Ha'e kuery ha'e javi oendua py ogueroayvu kuaxia para SENHOR pegua opy ojou pyre re guexeve guarã ojapo va'ekue regua ayvu oi va'e ha'e javi.

³¹ Huvixa hi'áiaty py ae opu'ã ho'amy vy SENHOR renonde ojapo ixupe anho ha'e kuery ikuai aguã, ha'e vy opy'a ha'e onhe'ê ha'e javi py ojapopa okuapy aguã ha'e ojapo uka va'ekue, ijayvua ha'e oipotaa, ha'e rami vy ayvu kuaxia para re oi va'e rupi ikuai aguã, SENHOR guexeve guarã ojapo va'ekue rupi anho.

³² Ha'e ramo Jerusalém ha'e Benjamim py ikuai va'e ha'e javi onhemoayvu okuapy ha'e va'e ayvu rupi ikuai aguã re. Ha'e rami vy Jerusalém pygua kuery ha'e javi ikuai Nhanderuede guamoí kuery ruete va'e guexeve guarã ojapo va'ekue rupi.

³³ Ha'e gui Josias oipe'apa ojegarupy Israel kuery ovvy re oguereko va'ekue ha'e javi. Ha'e rami vy ojapo Israel re hekoa va'e ha'e javi SENHOR nguete pe anho ikuai aguã rami. Ha'e rami rire ha'e oikovea ja ha'e kuery ndojepe'ai SENHOR guamoí kuery ruete pe ikuaia gui.

35

2 Reis 23.21-23

¹ Ha'e gui huvixa Páscoa ára py Josias ojapo SENHOR pegua ngaru Jerusalém py. Ha'e ramo jypygua jaxya catorze araa py ojuka okuapy Páscoa regua vexe'i.

² Ha'e omoí sacerdote kuery omba'eapo aguã rami. Ha'e vy ombopy'a guaxuve SENHOR pegua opy rupi omba'eapoa py.

³ Ijayvu avi levita kuery SENHOR peguarã ojeky'a'o uka va'ekue Israel kuery ha'e javi mbo'ea rupi ikuai va'e pe. Ha'e vy aipoe'i:

— Lei ryru iky'a e'ÿ va'e ma pemoí ju oo hendarã Davi ra'y Israel pygua huvixa Salomão ojapo va'ekue py. Ndapevovivei ma 'rã pendeaxi'y áry. Pempa'eapo 'rã SENHOR Penderuede pe, ixupegua Israel kuery pe guive.

⁴ Peiko katu ke peteí-teí regua pendekuaia rami pempa'eapo aguã, penemoiaque rami, pendevy Israel pygua huvixa Davi ha'e ta'y Salomão ijayvuague rami vy.

⁵ Pempa'eapo ke henda iky'a e'ÿ va'e py, heta va'e kuery penderyvvy ikuai va'e peteí-teí regua rekovia penemoiaque rami. Heta va'e kuery peteí-teí regua rekovia toí peteí levita kuery va'e regua.

⁶ Ha'e rami vy pejuka 'rã vexe'i Páscoa ára pyguarã. Pejegy'a'o uka reve pereko katu 'rã penderyvvy kuery ho'u va'erã. Pejapopa tema SENHOR oayvu Moisés pe omombe'u uka va'ekue rami vy — he'i.

⁷ Ha'e gui ma heta va'e kuery ha'e javi pe Josias ome'ê vexe'i ha'e kavara. Guymba kuery regua ae ome'ê Páscoa ára py ojuka va'erã. Ha'e javi vy trinta mil mymba ome'ê ha'e py heta va'e kuery mbovy pa ikuaia rami. Vaka ra'y ma três mil ju huvixa ome'ê, guymba kuery va'e regua meme.

⁸ Hembiguai yvatekueve voi ome'êxea'i py avi ome'ê heta va'e kuery peguarã, sacerdote ha'e levita kuery pe guive. Nhanderueete pegua opy rupi openaa va'ety Hilquias, Zacarias ha'e Jeiel ma sacerdote kuery pe ome'ê dois mil e seiscentos vexa'i ha'e kavara, ha'e gui trezentos vaka ra'y Páscoa ára py oapy va'erã.

⁹ Ha'e gui tyvy kuery Conanias, Semaías ha'e Natanael, ha'e gui levita kuery ruvixa Hasabias, Jeiel ha'e Jozabade reve ma levita kuery mboae pe ome'ê cinco mil vexa'i ha'e kavara, ha'e gui quinhentos vaka ra'y Páscoa ára py ome'ê va'erã.

¹⁰ Ha'e rami py oguereko katupa ha'e kuery ojapo va'erã. Sacerdote kuery omoía ikuai aguã va'ekue py, levita kuery voi omoía avi peteĩ-teĩ regua omba'eapo aguã rami, huvixa ojapo ukaague rami meme.

¹¹ Ha'e gui ma ojuka okuapy vexa'i Páscoa ára pyguarã ome'ê va'ekue. Huguakyue ma levita kuery po gui sacerdote kuery ojopy vy omboayvi okuapy, oipiro avi ojuka va'ekue.

¹² Omboja'o okuapy heta va'e kuery oapy reve ome'ê va'erã, peteĩ-teĩ regua ikuai rami, heta va'e kuery ae SENHOR pe ome'ê aguã, Moisés kuaxia omboparaague rami vy. Ha'e rami ae avi ojapo vaka ikuai va'e re.

¹³ Tata py oexy okuapy vexa'i Páscoa ára pygua, hekorã ojea pyre rami vy. Oja py ombojy okuapy ome'ẽmby iky'a e'ỹ va'e, oja guaxu ha'e oja pe py guive. Ha'e gui levita kuery ju omboja'opa okuapy heta va'e kuery ha'e javi pe.

¹⁴ Ha'e va'e rire ma ojeupe guarã ju oexy okuapy, sacerdote kuery peguarã guive. Mba'eta sacerdote kuery Arão ramymino ikuai va'e ma pytũ peve omba'eapo mymba ojukaa ha'e ikyrakue rapya rupi. Ha'e nunga rupi levita kuery ojeupe guarã ae oexy, sacerdote kuery Arão ramymino ikuai va'e pe guive.

¹⁵ Ha'e gui Asafe ramymino kuery oporaei va'ety ikuai va'e ma ikuai aguã py meme ikuai, Davi ojapo ukaague rami vy, ha'e gui Asafe, Hemã ha'e huvixa pegua profeta Jedutum ojapo ukaague rami. Okê rarõa kuery voi okê nhavõ rupi ikuai. Neĩ peteive ma voi ndojepe'ai okê oarõa gui, ha'e kuery peguarã tyke'y kuery levita regua oexy avi ramo.

¹⁶ Ha'e rami py ha'e va'e ára peteĩ-teĩ regua omoĩmbaa SENHOR pe omba'eapo aguã py, Páscoa ára ngaru ojapo ha'e SENHOR pegua altar áry mymba ome'ê aguã, huvixa Josias ojapo ukaague rami vy.

¹⁷ Ha'e va'e jave py Israel kuery ha'e py ikuai va'e ojapo okuapy ngaru Páscoa ára py, ha'e gui ngaru mbojape imbovia revegua e'ỹ ju. Sete ára re ojapo okuapy.

¹⁸ Páscoa ára pygua ngaru ha'e ramigua Jerusalém py ndojapoi teri profeta Samuel oikoa ára guive. Mba'eta peteive huvixa Israel py Páscoa ára pygua ngaru ndojapoi va'ekue Josias ngaru ojapoague ramigua, sacerdote ha'e levita kuery reve, ha'e gui Judá ha'e Israel kuery ha'e py ikuai va'e ha'e Jerusalém pygua kuery ha'e javi reve.

¹⁹ Dezoito ma'etÿa re ma huvixa Josias oĩ jave py Páscoa ára pygua ngaru ojapo.

2 Reis 23.28-30

²⁰ Ha'e nunga oikopa rire Josias templo omoatyrõ ukapa ma ramo ou Egito pygua huvixa Neco, Carquemis tetã py joe opu'ã aguã Eufrates yakã vyry. Ha'e ramo Josias voi oẽ ovy ha'e kuery re opu'ã aguã.

²¹ Ha'e ramo Josias oĩa py Neco ombou ayvu reraarã kuery. Ha'e vy aipoe'i uka: "Judá pygua huvixa, mba'e tu areko ndereve? Xee ma aỹ nderovai guarã e'ỹ aju, xere opu'ã va'e kuery rovai anho. Ha'e gui Nhanderueete ijayvu xepojavave'i nho aguã re. Enheangu ke Nhanderueete re repu'ã e'ỹ aguã, ha'e ju nemomba e'ỹ aguã", he'i uka.

²² Ha'e rami teĩ huvixa Josias guakykue re ndojevyi. Ha'e rami 'rãgue py amboae rami onhemonde ha'e kuery re opu'ã aguã. Noendu potai Nhanderueete ayvu rupi Neco ijayvuague re. Ha'e rami vy oo nho Megido vvyugua katy joe opu'ã aguã.

²³ Ha'e gui ma huvixa Josias-a katy guyrapa revegua kuery omombo okuapy. Ha'e ramo aipoe'i guembiguai kuery pe:

— Xepe'a ke apy gui, mba'eta xenhyvõa ete ra'e — he'i.

²⁴ Ha'e ramo hembiguai kuery ma ikarõxa gui ae oguenoẽ vy amboae karõxa oguereko va'e py oguerova vy ogueraa okuapy Jerusalém py. Ha'e py ma omano. Ha'e ramo onhono porãa guamoĩ kuery rupa vyry. Huvixa Josias re Judá ha'e Jerusalém pygua kuery ha'e javi ojae'opa okuapy.

²⁵ Jeremias voi ombopara Josias re ipy'a vaia aguã regua. Ha'e gui aỹ peve guarã oporaei va'e kuery avakue ha'e kunhague ojae'o reve ima'endu'a 'rã Josias re. Ha'e rami aguã ojepokuaa okuapy Israel vy re, kuaxia ipy'a vaia oĩa re ombopara guive imoiny.

²⁶ Ha'e gui oive rei tema Josias rekokie regua. Ha'e rami avi SENHOR guigua lei ipara oinya rami vy mba'emo porã ojapoague,

²⁷ ha'e mba'emo ojapo va'ekue jypy guive opaa peve noĩ 'rã teve kuaxia Israel ha'e Judá pygua huvixa kuery rekokie oĩa re?

36

2 Reis 23.31-34

¹ Ha'e gui ma ha'e va'e vy re hekoa va'e kuery Josias ra'y Jeocaz ogueraa vy nguvixarã omoĩ okuapy tuu rekovia, Jerusalém tetã py ae.

² Jeocaz oĩ pyy'i jave py ma vinte e três ma'etÿy oguereko, ha'e gui mboapy jaxy re ete'i opena Jerusalém py.

³ Mba'eta Egito pygua huvixa ma oipe'a Jeocaz Jerusalém tetã py huvixa oĩa gui. Ha'e rami vy ijyvy re ikuai va'e gui okobra três mil e trezentos quilos prata ha'e trinta e três quilos ouro guigua.

⁴ Jeoacaz rekovia Egito pygua huvixa omoĩ tyvy Eliaquim Jerusalém ha'e Judá pygua kuery ruvixarã. Ha'e rami vy hery oguerova vy Jeoaquim ju omboery. Ha'e rã tyke'y Jeoacaz ma Egito vvy katy Neco ogueraa.

2 Reis 23.36-24.6

⁵ Jeoaquim ma vinte e cinco ma'etỹ ogueroko jave py huvixa oĩ pyy. Ha'e gui onze ma'etỹ re opena Jerusalém py. Ha'e va'e ma ha'eve'ỹ va'e anho ojapo oikovy SENHOR nguete renonde rupi.

⁶ Ha'e ramo hexe ou Babilônia pygua huvixa Nabucodonosor. Ha'e vy mokoĩ corrente overa va'e guigua py ojokua reve Babilônia katy ogueraa.

⁷ Babilônia katy Nabucodonosor ogueraa avi mba'emo ryrú SENHOR pegua opy ikuai va'ekue. Ha'e py ma nguete pegua templo py ju omoĩ.

⁸ Ha'e gui oive rei tema Jeoaquim rekokué regua. Ha'e rami avi ojegarupy ojapague, ha'e hexe oĩ va'ekue ha'e javi noĩ 'rã teve kuaxia Israel ha'e Judá pygua huvixa kuery rekokué oĩa re? Ha'e gui ta'y Joaqui ju oĩ nguu rekovia.

2 Reis 24.8,9

⁹ Ha'e gui Jeoaquim ma dezoito ma'etỹ ogueroko jave py huvixa oĩ pyy. Ha'e gui mboapy jaxy ha'e dez ára re ete'i opena Jerusalém py. Ha'e va'e ma ha'eve'ỹ va'e anho ojapo oikovy SENHOR renonde rupi.

2 Reis 24.18,19

¹⁰ Ha'e va'e ma'etỹ kuaray aku pyy'i jave py huvixa Nabucodonosor ogueraa uka Babilônia katy, mba'emo ryrú iporãgueve SENHOR pegua opy ikuai va'ekue reve. Hekovia tyvy Zedequias ju omoĩ uka Judá ha'e Jerusalém pygua kuery ruvixarã.

¹¹ Zedequias ma vinte e um ma'etỹ ogueroko jave py huvixa oĩ pyy. Ha'e gui onze ma'etỹ re opena Jerusalém py.

¹² Ha'e ma ha'eve'ỹ va'e anho ojapo oikovy SENHOR nguete renonde rupi. Ixupe profeta Jeremias SENHOR gui ijayvu teĩ nonhemo'yvy'i'ixei.

¹³ Nabucodonosor rovai opu'ã guive, Nhanderuete rery rupi oura aguã rami Nabucodonosor ojapo rire teĩ. Inhakã ratã vy opy'a py ndojeko rerovaxei tema SENHOR Israel kuery ruete pe ojev y e'ỹ aguã.

¹⁴ Ha'e gui sacerdote yvatekueve ha'e heta va'e kuery ha'e javi ojevayvve tema oje'oivy, amboa regua kuery reko vaia rami rive. Ha'e rami vy omongy'apa okuapy oo SENHOR ojeupe guarã Jerusalém py oiky'a'oa va'ekue.

¹⁵ SENHOR tamoi kuery Ruete va'e ma yma guive teĩ ijayvu ha'e kuery pe, ayvu mombe'ua kuery pe oayvu omombe'u uka tema, ojeupegua kuery omboaxy ha'e ojeupegua oo re oma'ẽ vy.

¹⁶ Ha'e rami teĩ ha'e kuery ma Nhanderuete ayvu mombe'ua kuery ombojaru rei vy noendu potai, ojojai rei guive okuapy profeta kuery. Ha'e ramo SENHOR ojeupegua kuery rovai opoxya ombou ramo ha'e kuery pe noĩvei ma oo jepe aguã.

2 Reis 25.8-12; Jeremias 39.8-10; 52.12-16

¹⁷ Ha'e nunga rupi ae ha'e kuery rovai SENHOR ojapo caldeu kuery ruvixa opu'ã aguã rami.* Ha'e va'e huvixa ma kyxe py ojuka kunumigúe regua, oo henda iky'a e'ỹ va'e oĩa py eteve voi. Nomboaxy kunumigúe neĩ kunhataĩgue, tujakue'i neĩ tujakueve'i ma voi, ipo py omboaxa pavẽ rire.

¹⁸ Babilônia katy ogueraa avi mba'emo ryrú Nhanderuete pegua opy ikuai va'ekue, tuvixakue ha'e kyrĩgue'i voi. Ha'e rami vy mba'emo porã SENHOR pegua opy. ha'e huvixa ha'e yvatekueve ropy guive ikuai va'ekue ma Babilônia katy meme ogueraa.

¹⁹ Oapypa Nhanderuete pegua oo, oitypa guive Jerusalém kora. Huvixa ro ikuai va'ekue ha'e javi oapypa avi, ha'e py mba'emo porã ikuai va'ekue ombovaipa.

²⁰ Ha'e rã kyxe gui oo jepe va'ekue ma Babilônia katy ogueraa. Ha'e py ma hembiguai ikuai, ta'y kuery rembiguai guive, Pérsia pygua huvixa ipo'aka e'ya ja.

²¹ Ha'e nunga oiko SENHOR oayvu Jeremias pe omombe'u uka va'ekue ojeupity aguã, ha'e kuery vvy opyta rive aguã sábado regua opyutu aguã ma'etỹ ha'e javi ojeupitypa e'ya ja. Yvy ivaipa reve opyta rive oiny ára nhavõ, setenta ma'etỹ oa'angaage ojeupitypa e'ya ja.†

Esdra 1.1-4

²² Ha'e gui peteĩ ma'etỹ re ma Pérsia pygua huvixa Ciro oĩ jave py SENHOR ojapo oayvu Jeremias omombe'u va'ekue. Ha'e rami vy Ciro py'a re omoĩ openaa ha'e javi rupi pova'e ayvu omombe'u ukapa ha'e ombopara uka guive aguã. Ha'e vy aipoe'i uka:

²³ "Pérsia pygua huvixa Ciro po rami ijayvu: SENHOR Nhanderuete yvategua ma xevy omboaxapa vvy ha'e javi re apena aguã, xemoĩ guive peteĩ oo ixupe guarã ajapo uka aguã Judá re Jerusalém tetã py. Ha'e nunga rupi ixupegua pendekuai va'e ha'e javi tapeo. SENHOR Penderuete toiko peẽ kuery reve", he'i uka.*

* 36:17 Caldeu kuery ma Babilônia pygua kuery ae. Ha'e gui caldeu kuery ruvixa ma Nabucodonosor (versículo 6). † 36:21 Nhanderuete lei ojeague rami vy ha'e kuery ovvy re nomba'eapoi 'rã teĩ sete ma'etỹa ojeupity nhavõ, ijyvy voi sábado regua ma'etỹ re oĩ rive aguã (Levítico 25.1-7). Ha'e rami teĩ ha'e kuery ma'etỹa nhavõ ovvy re omba'eapo tema ramo Nhanderuete oa'anga ju sábado regua ma'etỹ ijyvy noĩ riveiague rekovia, ha'e rami peve vvy ivaipa reve opyta rive aguã (Levítico 26.40-45). Ha'e nunga rupi setenta ma'etỹ ijyvy noĩ riveiague rami avi setenta ma'etỹ re ju ivaipa reve opyta rive aguã rami ojapo, ha'e kuery Babilônia py escravo ikuai jave (Jeremias 25.1-14). Ha'e rami vy setenta ma'etỹ oaxapa rire ma ha'e kuery ojevuy ju 'rã ovvy katy. * 36:23 Esdras 1.1-3

Esdras rekokue oĩa Esdras rekokue oĩa

Kova'e kuaxia re ma oĩ Israel kuery Babilônia py escravo-rã ogueraa pyre oyvy re ju ojevy va'ekue rekokue. Mba'eta huvixave Babilônia re opena va'e ae omondouka. Po rami ipara oiny: "Peteĩ ma'etỹ re ma Pérsia pygua huvixa Ciro oĩ jave py Senhor ojapo oayvu Jeremias omombe'u va'ekue ojeupity aguã rami. Ha'e vy Ciro py'a re omoĩ openaa ha'e javi rupi omombe'u uka pova'e ayvu, ombopara uka guive. Ha'e vy aipoe'i uka: 'Pérsia pygua huvixa Ciro po rami ijayvu: Xevy pe Senhor Nhanderuete yva pygua omboaxa yvy ha'e javi re apena aguã. Xemoĩ avi peteĩ oo ixupe guarã ajapo uka aguã Judá yvy re Jerusalém tetã py. Ha'e nunga rupi ixupegua pendekuai va'e ha'e javi reve Penderuete toiko, ha'e tapeo Judá regua Jerusalém py, Senhor Israel kuery ruete pegua oorã pejapo jevy aguã. Ha'e va'e ma Jerusalém pygua kuery ruete ae', he'i" (1.1-3).

Ha'e gui ma omombe'u ha'e kuery oguataague, Jerusalém tetã py ovaëague, templo omoatyrõ aguã omboypyague, hovaigua kuery omombytu'u ranheague, ojapopaague, ha'e gui oguerovy'ague, Nhanderuete gui meme ha'e nunga oiko rire.

Esdras ma sacerdote oiko raka'e. Ha'e ae Jerusalém py ou vy opena oikovy templo omoatyrõa rupi. Ijayvu avi heta va'e kuery gueko vaia gui ojepe'a aguã rami.

Huvixa Ciro oayvu omondoukaague

2 Crônicas 36.22,23

¹ Peteĩ ma'etỹ re ma Pérsia pygua huvixa Ciro oĩ jave py SENHOR ojapo oayvu Jeremias omombe'u va'ekue ojeupity aguã rami. Ha'e vy Ciro py'a re omoĩ openaa ha'e javi rupi omombe'u uka pova'e ayvu, ombopara uka guive. Ha'e vy aipoe'i uka:

² "Pérsia pygua huvixa Ciro po rami ijayvu: Xevy pe SENHOR Nhanderuete yva pygua omboaxa yvy ha'e javi re apena aguã. Xemoĩ avi peteĩ oo ixupe guarã ajapo uka aguã Judá yvy re Jerusalém tetã py.

³ Ha'e nunga rupi ixupegua pendekuai va'e ha'e javi reve Penderuete toiko, ha'e tapeo Judá regua Jerusalém py, SENHOR Israel kuery ruete pegua oorã pejapo jevy aguã. Ha'e va'e ma Jerusalém pygua kuery ruete ae.

⁴ Ha'e gui guekoa py ae avakue okuave va'e ha'e javi penepytyvõ 'rã prata ome'ẽ vy, ha'e gui ouro, omba'e rei-rei ha'e mymba kuery oguereko va'e, Nhanderuete ro Jerusalém py oĩ va'e peguarã. Ha'e nunga ome'ẽ va'e áryve tome'ëve ju ome'ëxea'i rupi", he'i uka.*

⁵ Ha'e ramo Judá ha'e Benjamim kuery akã ikuai va'e opu'ãmba jogueravy, sacerdote ha'e levita kuery guive, amboae kuery reve. Ha'e kuery ha'e javi py'a re Nhanderuete omoĩ Jerusalém py oje'oi vy oo SENHOR pegua oĩ va'ekue ojapo jevy aguã.

⁶ Ijyvyry rupi ikuai va'e voi oipytyvõ okuapy prata ome'ẽ vy, ha'e gui ouro, omba'e rei-rei, mymba kuery oguereko va'e ha'e iporãgueve. Mba'emo ome'ẽ va'ekue áryve ome'ëve ju ome'ëxea'i rupi.

⁷ Huvixa Ciro voi oguenoẽ tembiporu SENHOR ropy ikuai va'ekue, Jerusalém gui Nabucodonosor ogueru vy nguete ra'angaa pegua ropy ju omoĩ va'ekue.

⁸ Ha'e va'e nunga ma Pérsia pygua huvixa Ciro ju oguenoẽ mba'emo re opena va'ety Mitredate oexaa py. Ha'e rã ha'e va'e oipapapa ma vy Judá regua yvateve va'e Sesbazar pe ju omboaxa.

⁹ Apy ma oĩ mbovy pa oĩa regua: trinta hy'a ouro guigua, mil hy'a prata guigua, vinte e nove kyxe,

¹⁰ trinta hy'a'i ouro guigua, quatrocentos e dez hy'a'i prata guigua amboae regua va'e, ha'e gui mil avi tembiporu mboae.

¹¹ Tembiporu ouro ha'e prata guigua ha'e javi vy ma cinco mil e quatrocentos. Ha'e javi ma Sesbazar ogueraapa Babilônia gui, ogueru pyre kuery Jerusalém katy ju ojevy jogueravy jave.

2

Babilônia gui ojevy va'ekue rery oĩa

¹ Pova'e ma ijyvy gui Babilônia pygua huvixa Nabucodonosor oyvy katy ogueraa va'ekue ramymino kuery. Ha'e va'e kuery ma escravo ikuaiague gui oẽ vy ojevy ju Jerusalém ha'e Judá katy, peteĩ-teĩ guekoa py ae.*

² Ha'e kuery ma oupa okuapy Zorobabel reve, Jesua, Neemias, Seraías, Reelaías, Mordecai, Bilsã, Mispar, Bigvai, Reum ha'e Baaná reve. Ha'e gui apy ma avakue Israel regua mbovy pa ikuaiã:

³ Parós ramymino kuery ma dois mil cento e setenta e dois.

⁴ Sefatias ramymino kuery ma trezentos e setenta e dois.

⁵ Ara ramymino kuery ma setecentos e setenta e cinco.

⁶ Paate-Moabe ramymino kuery Jesua-Joabe ra'y kuery regua ma dois mil oitocentos e doze.

⁷ Elão ramymino kuery ma mil duzentos e cinqüenta e quatro.

⁸ Zatu ramymino kuery ma novecentos e quarenta e cinco.

⁹ Zacai ramymino kuery ma setecentos e sessenta.

¹⁰ Bani ramymino kuery ma seiscentos e quarenta e dois.

¹¹ Bebai ramymino kuery ma seiscentos e vinte e três.

¹² Azgade ramymino kuery ma mil duzentos e vinte e dois.

* 1:4 2 Crônicas 36.22-23 * 2:1 Neemias 7.6-73

- 13 Adonição ramymino kuery ma seiscentos e sessenta e seis.
 14 Bigvai ramymino kuery ma dois mil e cinqüenta e seis.
 15 Adim ramymino kuery ma quatrocentos e cinqüenta e quatro.
 16 Ater ramymino kuery Ezequias ro pygua kuery regua ma noventa e oito.
 17 Bezai ramymino kuery ma trezentos e vinte e três.
 18 Jora ramymino kuery ma cento e doze.
 19 Hasum ramymino kuery ma duzentos e vinte e três.
 20 Gibar ramymino kuery ma noventa e cinco.
 21 Belém ramymino kuery ma cento e vinte e três.
 22 Netofa guígua avakue ma cinqüenta e seis.
 23 Anatote guígua avakue ma cento e vinte e oito.
 24 Azmavete ramymino kuery ma quarenta e dois.
 25 Quiariate-Arim, Cefira ha'e Beerote ramymino kuery ma setecentos e quarenta e três.
 26 Ramá ha'e Geba ramymino kuery ma seiscentos e vinte e um.
 27 Micmás guígua avakue ma cento e vinte e dois.
 28 Betel ha'e Ai guígua avakue ma duzentos e vinte e três.
 29 Nebo ramymino kuery ma cinqüenta e dois.
 30 Magbis ramymino kuery ma cento e cinqüenta e seis.
 31 Elão mboae guígua ramymino kuery ma mil duzentos e cinqüenta e quatro.
 32 Harim guígua ramymino kuery ma trezentos e vinte.
 33 Lode, Hadide ha'e Ono guígua ramymino kuery ma setecentos e vinte e cinco.
 34 Jericó guígua ramymino kuery ma trezentos e quarenta e cinco.
 35 Senaá guígua ramymino kuery ma três mil seiscentos e trinta.
 36 Ha'e gui sacerdote kuery regua: Jedaías ramymino kuery Jesua ro pygua ikuai va'e regua ma novecentos e setenta e três.
 37 Imer ramymino kuery ma mil e cinqüenta e dois.
 38 Pasur ramymino kuery ma mil e duzentos e quarenta e sete.
 39 Harim ramymino kuery ma mil e dezessete.
 40 Ha'e gui levita kuery ju: Jesua ha'e Cadmiel ramymino kuery Hodavias ra'y kuery regua ma setenta e quatro.
 41 Oporaei va'e kuery Asafe ramymino kuery regua ma cento e vinte e oito.
 42 Okê rarôa kuery ramymino kuery ju: Salum ramymino kuery, Ater, Talmom, Acube, Hatita ha'e Sobai ramymino kuery, ha'e va'e kuery ha'e javi vy ma cento e trinta e nove.
 43 Templo py nhopytyvô va'ety kuery ju: Zia ramymino kuery, Hasufa, Tabaote,
 44 Queros, Sia, Padom,
 45 Lebana, Hagaba, Acube, Hagabe,
 46 Sanlai, Hanã,
 47 Gidel, Gaar, Reaías,
 48 Rezim, Necoda, Gazão,
 49 Uzã, Paseá, Besai,
 50 Asná, meunita ha'e nefuseu kuery ramymino kuery,
 51 Baquebuque ramymino kuery, Hacufa, Harur,
 52 Baslute, Meída, Harsa,
 53 Barcos, Sísera, Tama,
 54 Neias ha'e Hatifa ramymino kuery.
 55 Ha'e gui Salomão rembiguai kuery ramymino kuery ju: Sotai ramymino kuery, Soferete, Peruda,
 56 Jaala, Darcom, Gidel,
 57 Sefátias, Hatil, Poquerete-Hazebaim ha'e Ami ramymino kuery.
 58 Templo py nhopytyvô va'ety ha'e Salomão rembiguai kuery ramymino kuery ha'e javi vy ma trezentos e noventa e dois.
 59 Pova'e kuery ma Tel-Melã gui oje'oi va'ekue, Tel-Harsa, Querube, Adã ha'e Imer gui, teĩ ndoikuaai ae tema Israel regua ikuai:
 60 Delaías ramymino kuery, Tobias ha'e Necoda ramymino kuery ma seiscentos e cinqüenta e dois.
 61 Ha'e gui sacerdote ramymino kuery voi: Habaías ramymino kuery, Coz ha'e Barzilai ramymino kuery. Ha'e va'e ma Barzilai Gileade pygua va'e rajy re omenda rire hery rupi ae oenoña.
 62 Ha'e va'e kuery ma guery oeka okuapy kuaxia tery oĩa re teĩ ndojoui. Ha'e nunga rupi sacerdote ikuai aguã ha'e've'y' va'e.
 63 Ha'e ramo ha'e kuery pe huvixa aipoe'i:
 — Pe'u eme tembi'u iky'a e'y' va'e, Urim ha'e Tumim rupi sacerdote oikuaa va'e oiko e'y'a ja — he'i.
 64 Ha'e va'e kuery ha'e javi vy ma quarenta e dois mil trezentos e sessenta ikuai,
 65 hembiguai avakue ha'e kunhague sete mil trezentos e sete ikuai va'e reve'y' vy. Ha'e gui oporaei va'e avakue ha'e kunhague ma duzentos ju ikuai.
 66 Hymba kuery kavaju ma setecentos e trinta e seis. Ha'e gui mburika ma duzentos e quarenta e cinco ikuai.
 67 Mymba camelo ma quatrocentos e trinta e cinco ikuai. Mburika ra'y'i ma seis mil setecentos e vinte.

⁶⁸ Ha'e gui ovaë okuapy Jerusalém tetã py. SENHOR pegua oo oïague py oo ramo hetarã kuery akã ikuai va'e regua ma mba'emo ome'ëxea'i rupi ome'ë okuapy oo oïague pyve ju ojapo jevy aguã.

⁶⁹ Ha'e kuery mba'emo ojoua rami vy ome'ë okuapy omba'eapo va'e kuery oiporu va'erã: sessenta e um mil hatã'i va'e ouro guigua, cinco mil prata guigua tuvixakueve va'e, ha'e gui cem ao sacerdote kuery pegua.

⁷⁰ Ha'e gui Israel kuery ha'e javi guetã rupi ae-ae ikuai: sacerdote kuery, levita ha'e heta va'e kuery regua, oporai va'e, okê rarõa, templo py nhopytyvõ va'ety kuery guive.

3

Altar ojapo jevy okuapyague

¹ Sete jaxya ovaë jave Israel ramymino kuery ikuai pa ma guetã py ae-ae. Ha'e rami vy petei'i rami onhemboatypa okuapy Jerusalém py.

² Ha'e ramo Jozadaque ra'y Jesua ha'e tyvy kuery sacerdote ikuai va'e, Sealtiel ra'y Zorobabel tyvy kuery reve onhemoi okuapy altar Israel kuery ruete peguarã ojapo ju aguã, ha'e va'e áry mymba kuery oapy reve ome'ë aguã Nhanderuete remimbo'e Moisés lei ombopara va'ekue oia rami vy.

³ Hendarã py ae ojapo okuapy altar. Hekoa vyvry ikuai va'e kuery gui okyje teri va'eri altar áry mymba kuery oapy reve ome'ë okuapy SENHOR pe, aje'ivekue, ka'arukue guive.

⁴ Ipara re oia rami vy ojapo avi okuapy ngaru oo'i regua. Ha'e rami vy ko'ë nhavõ mymba kuery oapy vy ome'ë okuapy, mbovy-mbovy 'rã pa petei-tei ára py ome'ë ukaague rami vy.

⁵ Ha'e va'e rire mba'emo ome'ë jepi okuapy. Jaxy pyau nhavõ mba'emo ome'ë, ha'e gui ngaru SENHOR peguarã hi'ára py porã oiko aguã oa'angaague rami vy. Ikuai avi SENHOR pe mba'emo ome'ëxea'i py ogueru va'e.

⁶ Sete jaxya ijypy'i guive omboypy okuapy SENHOR pe mymba ome'ë aguã, ha'e jave py SENHOR pegua templo rendarã nonhonombai teri tei.

⁷ Oo apoa ha'e ita re omba'eapo va'e kuery pe ome'ë okuapy peráta. Sidom ha'e Tiro pygua kuery pe ome'ë avi tembi'u, oy'u va'erã ha'e azeite, Líbano gui vyvra yary haygue ha'e kuery ogueru aguã. Ye'ë áry rupi 'rã ogueru Jope tetã peve, Pérsia pygua huvixa Ciro va'e ojapo ukaague rami vy.

Templo rendarã onhonombaa ague

⁸ Jerusalém tetã py Nhanderuete pegua oo py ovaë rire mokoï ma'etÿa ha'e mokoï jaxya ma ojapo jave Sealtiel ra'y Zorobabel omboypy ojapo jevy aguã. Jozadaque ra'y Jesua reve, ha'e tyvy kuery sacerdote ha'e levita regua, ha'e gui escravo-rã ogueraa pyre kuery Jerusalém katy ojevvy va'ekue ha'e javi reve. Ha'e va'e kuery omboypy okuapy SENHOR pegua oo re omba'eapo aguã. Ha'e nunga re opena va'erã omoi okuapy levita kuery vinte ma'etÿ va'e guive tujakue peve.

⁹ Jesua gua'y ha'e guvyvvy kuery reve, Cadmiel gua'y kuery reve guive onhemoirũ okuapy Judá ramymino kuery, Nhanderuete pegua oo rupi omba'eapo va'e kuery re opena aguã, Henadade ramymino kuery, ta'y ha'e tyvy kuery levita regua reve guive.

¹⁰ Ha'e gui oo apoa kuery templo SENHOR pegua rendarã onhonomba ramo sacerdote kuery onhemondepa reve ikuai mimby guaxu reve. Levita kuery Asafé ramymino kuery regua avi ikuai hy'a pu reve SENHOR omboete aguã, Israel kuery ruvixa Davi ojapo ukaague rami vy.*

¹¹ Jorire-rire oporaei okuapy. SENHOR omboete ha'e oguerovy'a okuapy po rami: "Porayvu va'e vy oexa uka riae 'rã Israel kuery omboaxya", he'i okuapy. Ha'e gui ha'e kuery ha'e javive oguerovy'a vy onhendu atã reve oporaei okuapy SENHOR pe, oo rendarã onhonomba ma rire.

¹² Heta avi ikuai sacerdote ha'e levita kuery jypy'igua oo oexa va'ekue, hetarã kuery akã tujakue'i guive. Ha'e rami vy ha'e kuery ma oo rendarã onhonoo rã oexa vy ojae'o atã okuapy. Heta avi ikuai oguerovy'aa rupi ojapukai va'e.

¹³ Ha'e rami vy mava'eve noendu kuaai ovy'aa rupi ojapukai va'e, neï ojae'o va'e kuery onhendua. Mba'eta pavẽ onhendu atã reve ojapukai okuapy mombyry rupi ikuai va'e voi oendu aguã rami.

4

Templo ojapo okuapya gui hovaigua kuery omombytu'uaque

¹ Judá ha'e Benjamim regua rovaigua kuery oendu avi okuapy ogueraapa pyre kuery ojevvy ma vy SENHOR Israel kuery ruete pegua templo ojapo jevy okuapy.

² Ha'e rami vy ha'e kuery ovaëmba okuapy Zorobabel ha'e hetarã kuery akã ikuai pa py. Ha'e vy aipoe'i okuapy:

— Ore voi toromba'eapo peë kuery reve, mba'eta peë kuery rami ae ore kuery voi Penderuete pe 'rã orekuai. Ore voi ixupe mba'emo rome'ë ae ma, Assíria pygua huvixa Esar-Hadom apy oreru guive — he'i.*

³ Ha'e rami tei Zorobabel, Jesua ha'e hetarã kuery akã ikuai va'e ombovai:

— Peë kuery ma mba'eve ndaperekoi ore kuery reve Oreruete pegua oo rojapo jevvy py. Ore kuery ae'i tei rojapopa 'rã SENHOR Israel kuery ruete va'e pe, Pérsia pygua huvixa Ciro ojapo ukaague rami vy — he'i.

⁴ Ha'e ramo ha'e va'e vyvvy regua kuery Judá kuery omba'eapoa py omongeta rei vy nomokyre'ÿvei.

* 3:10 Hy'a pu ma hy'a overa va'e gui ojapo pyre, ombotaa rã onhendu va'e. * 4:2 Ha'e kuery ma Samaria pygua ikuai tei judeu regua e'ÿ, mombyry ikuaiague gui Assíria ruvixa kuery oguerova vy ha'e py omboekoa jevvy va'ekue. SENHOR omboete merami tei nguu ete kuery ae omboete avi okuapy (2 Reis 17.24-41).

⁵ Ha'e rami vy peráta re ogueru ha'eve'ýa rami omongeta va'erá, Judá kuery ojapo 'rã va'ekue ndojapovei aguã. Pérsia pygua huvixa Ciro oía pukukue re ha'e rami ijayvu, huvixa Dario oía peve.

⁶ Ha'e gui Assuero huvixa oĩ pyp'i guive ma voi hovaigua kuery ombopara okuapy Judá ha'e Jerusalém pygua kuery rekokie ramigua rive.

⁷ Ha'e rami ae avi Pérsia pygua huvixa Artaxerxes oĩ jave Bislão, Mitredate ha'e Tabeel oirũ kuery reve ixupe ombopara okuapy peteĩ kuaxia aramaico ha'e Síria pygua kuery ayvu py.

⁸ Xondaro kuery ruvixa Reum ha'e kuaxia re opena va'ety Sinsai voi ombopara avi peteĩ kuaxia. Jerusalém pygua kuery rovai re ombopara huvixa Artaxerxes pe, po rami:

⁹ “Rombopara va'e ma xondaro kuery ruvixa Reum ha'e kuaxia re opena va'ety Sinsai oirũ kuery reve: dinaíta kuery, afarsaquita, tarpelita, afarsita, arquevita, Babilônia guigua kuery, Susã guigua, deavita kuery, Elão guigua kuery,

¹⁰ ha'e gui amboae kuery regua Samaria tetã py huvixa Osnapar ipo'akapa ha'e ima'endu'apy va'e orembou vy oremboekoa va'ekue, ha'e gui amboae kuery Eufrates yakã kyvõ rupi orerekoa va'e.”

¹¹ Po rami ma kuaxia huvixa Artaxerxes pe ha'e kuery omboparaa ague:

¹² “Oreruvixa, ore nerembiguai kuery Eufrates yakã kyvõ rupi orerekoa va'e, kova'e ára rombopara rokuapy ndevy. Reikuaa ae ma judeu kuery ndea gui oje'oiague Jerusalém tetã katy orerekoa peve etc. Aý ha'e kuery ma ojapo ju okuapy ha'e va'e tetã ayvu vaipy joe opu'áaty. Ikora voi omoatyrõ heravy, omoatyrõ avi 'rã ijytará.

¹³ Oreruvixa, eikuaa pota ke, mba'eta ha'e kuery tetã ojapo jevy vy ikora voi omoatyrõmba ma vy ndopagavei ma 'rã imposto neĩ pedágio opaga 'rã va'ekue. Ha'e rami vy 'rã ojapo peráta nderejopyvei aguã rami.

¹⁴ Ha'e rá ore kuery ma ndepo gui mba'emo rojopy jepi va'e vy orevy pe voi nda'evei ha'e kuery neremboetevei ramo. Ha'e nunga rupi ae oreyvua rogueru ruka ndevy.

¹⁵ Eikuaa pota ke ha'vy kuaxia neramoĩ kuery rekokie oía re. Ha'e va'e kuaxia rejou vy reikuaa 'rã ha'e va'e tetã pygua kuery opu'amba vy ojapo raka'e huvixa kuery ojexavai aguã rami, yvy openaa rupi voi. Yma guive tetã py oiko jepi joguero'aa. Ha'e nunga rupi ae tetã omombaa va'ekue.

¹⁶ Ha'e nunga rupi oreruvixa, ndevy roikuaa uka xapy'a rei ha'e va'e tetã ha'e kora omoatyrõmba ma ramo Eufrates yakã kyvõ rupi yvy itui va'e re nandepo'akavei 'rãa.”

¹⁷ Ha'e ramo huvixa ombovai:

“Xondaro kuery ruvixa Reum, kuaxia re opena va'ety Sinsai ha'e irũ kuery Samaria py ikuai va'e pe xeayvu araa uka, Eufrates rovai hembyrekue ikuai va'e pe guive: Tapendekuai porã!

¹⁸ Ha'e gui kuaxia para orevy pembou va'ekue ma aendu kuaa aguã rami ogueroayvua xerenonde py.

¹⁹ Ha'e rami rá xee ajapo uka rá oeka vy oikuaa yma guive ae ma ha'e va'e tetã pygua kuery opu'ã ae ri okuapyague huvixa kuery rovai re, ha'e gui ha'e py oiko raka'e joguero'aa ha'e joe ijayvu rei va'e.

²⁰ Jerusalém tetã py ikuai avi va'ekue huvixa ipo'akapa va'e. Ha'e va'e kuery ma Eufrates yakã rovai ha'e javi rupi ipo'aka va'ekue. Ha'e kuery pe ae opagapaa va'ekue imposto ha'e pedágio opaga 'rã va'ekue.

²¹ Ha'e nunga rupi aý gui ma pendeayvu 'rã ha'e va'e avakue omba'eapoa gui opytu'upa aguã rami, ha'e va'e tetã ndojapovei aguã, xee ajapo uka e'ýa ja.

²² Penekyre'ý ke ha'e pejapo ete xee aipotaa. Mba'e re tu huvixa roiko va'e ndorojopyive-ive ri rovy?” he'i.

²³ Ha'e va'e kuaxia huvixa Artaxerxes ombopara va'ekue ma ogueroayvupaa Reum, kuaxia re opena va'ety Sinsai ha'e irũ kuery renonde. Ha'e ramo ha'e kuery oje'oiapa pojava Jerusalém tetã py judeu kuerya katy. Opo py tembiporu oguereko reve oo vy omombytu'u nhea'ã mba'emo ojapo okuapy guí.

²⁴ Ha'e rami py opytu'upa Nhanderuete pegua oo Jerusalém py oĩ va'e re omba'eapoa guí. Ha'e rami vy Pérsia pygua huvixa Dario mokoí ma'etý re ma oĩ peve ndojapovei.

5

Ageu ha'e Zacarias nhomokyre'ýa rupi ijayvuague

¹ Ha'e gui profeta Ageu ha'e Ido ra'y Zacarias ma ayvu omombe'u judeu kuery Judá ha'e Jerusalém py ikuai va'e pe. Mokoíve re Israel kuery ruete nhe'ẽ oĩ ramo hery rupi ae ijayvu.

² Ha'e ramo Sealtiel ra'y Zorobabel ha'e Jozadaque ra'y Jesua ma onhemoĩ vy omboypy ju okuapy Nhanderuete pegua oo Jerusalém py oĩ va'e omoatyrõ aguã. Ha'e va'e kuery reve mokoíve profeta Nhanderuete pegua avi ikuai oipytyvõ vy.

³ Ha'e va'e jave py ma ha'e kuerya py ou Eufrates yakã kyvõ rupi opena va'e Tatenai ha'e Setar-Bozenai oirũ kuery reve. Ha'e rami vy ha'e kuery pe oporandu okuapy:

— Mava'e tu pëvy ojapo uka ju upe va'e oo ha'e ikora?

⁴ Ha'e gui marã rami tu upe va'e ojapoa rupi ikuai va'e rery? — he'i okuapy oporandu vy.

⁵ Ha'e rami teĩ judeu kuery yvatekueve re Nhanderuete oma'ẽ ramo hovaigua kuery nomombytu'u reguai huvixa Dario-a py ayvu ogueraa ha'e kuaxia para rupi ombovaiague ou e'ýa ja.

Huvixa Dario pe hovaigua kuery oayvu omondoukaague

⁶ Ha'e gui ma huvixa Dario pe Eufrates yakã kyvõ rupi opena va'e Tatenai peteĩ kuaxia para omondouka, Setar-Bozenai ha'e oirũ kuery afarsaquita va'e yakã kyvõ rupi ikuai va'e reve. Ha'e va'e kuaxia omboparaague ma apy ju oĩ.

⁷ Kuaxia para re ma ixupe omondouka okuapy pova'e ayvu:

“Huvixa Dario, tove tereiko porã!

⁸ Oreruvixa, reikuaa ae ma ore kuery Judá vvy katy roje'oiague, Nhanderuete pegua oo tuvixa va'e py. Ha'e va'e ma ita tuvixa va'e gui anho ojapoave heravy va'e. Yvyrape py ma omboty-mbotyve heravy. Omba'eapo aguã ikyre'ý okuapy vvy ojapo pojava heravy.

⁹ Ha'e gui ma yvatekueve pe roporandu vy 'Mava'e tu pëvy ojapo uka ju upe va'e oo ha'e ikora?' ro'e va'ekue.

¹⁰ Ha'e rami ae avi yvatekueve pe roporanduve tema hery re, ndevy romombe'u aguã, ndevy rombopara rá avakue opena va'e rery reikuaa aguã.

¹¹ Po rami orembovai vvy ijavyv okuapy: 'Ore kuery ma Nhanderuete yva ha'e vvy apoare rembiguai. Ha'e vvy romoatyrdõ ju rokuapy kova'e oo yma raxa ma ojapo pyre. Petei huvixa Israel pygua yvateve va'e ojaopapa ypy va'ekue.

¹² Ha'e va'e rire ma oreramoi kuery ma Nhanderuete yva pygua ipoxy aguã rami ikuai ramo omboaxapa raka'e Babilônia pygua huvixa Nabucodonosor caldeu va'e po py. Ha'e va'e ae ma kova'e oo ombovaipa, ha'e Babilônia katy oreretarã kuery ogueraapa raka'e.

¹³ Ha'e rami tei Babilônia pygua huvixa Ciro ma jypy ma'etý re oi jave ojapo uka ju kova'e oo Nhanderuete peguarã.

¹⁴ Ha'e gui ma tembiporu ouro ha'e prata guigua Jerusalém py templo py ikuaiague gui Nabucodonosor ogueraapa vvy Babilônia py templo oi va'e py ju omoi va'ekue. Ha'e nunga huvixa Ciro ha'e gui oguenoëmba vvy omboaxa raka'e petei ava Sesbazar hery va'e pe. Ha'e va'e joe opena va'erã omoi vvy

¹⁵ aipoe'i ixupe: "Ejopy kova'e tembiporu ikuai va'e, ha'e tereo. Eraapa Jerusalém py templo oi va'e pyguarã. Ha'e gui ejapo uka ju Nhanderuete pegua oo, oiague py ae", he'i va'ekue.

¹⁶ Ha'e gui ma Jerusalém py Sesbazar oo ma vvy onhonomba ju Nhanderuete pegua oo rendarã. Ha'e jave gui ma voi rojapo rokuapy tei ndorojapopai teri', ha'e kuery he'i va'ekue oreyv.

¹⁷ Ha'e ramo ndee oreruvixa rejou porã ri vvy reikuaa pota uka 'rãgue Babilônia py huvixa kuery kuaxia ikuai va'e re, roikuaa aguã anhetë pa ra'e huvixa Ciro Nhanderuete pegua oo ojapo ukaague Jerusalém py, ha'e gui oreyv pe ju mba'emo rejapo uka aguã", he'i okuapy.

6

Dario oavyv omondoukaague

¹ Ha'e ramo huvixa Dario ijavyv rá oikuaa potaa Babilônia py huvixa mba'e kuaxia para omoi porãaty rupi.

² Ha'e gui Média vvy re Acmetá py oo imbarae va'e oi va'e py ojou petei kuaxia oimama pyre. Ha'e va'e re ma nhomoma'endu'arã ipara oiny po rami ijavyv va'e:

³ "Huvixa Ciro ma petei ma'etýa re oi jave oikuaa uka pova'e avvu: 'Jerusalém py Nhanderuete pegua oo oi va'e ma ha'eve ojaopoa ju aguã mymba oapy vvy ome'ë atyrã. Ha'e rami aguã ma omoi atãave 'rã hendarã. Ijyvatea ma vinte e sete metros peve 'rã. Ipya voi vinte e sete metros ae avi 'rã. Mboapy rxyx ita tuvixa va'e anho omoia 'rã, ha'e gui petei ju vvyra pyau guigua.

⁴ Huvixa ro gui ae 'rã ome'ëa mba'emo repyrã.

⁵ Ha'e rami ae avi mba'emo ryrõ ouro ha'e prata guigua Nhanderuete pegua opyguã Jerusalém py templo oi va'e gui Nabucodonosor oguenoë vvy Babilônia katy ogueraa va'ekue ma ome'ëmba ju 'rã Jerusalém py templo oi va'e pyguarã. Petei-tei tembiporu oiague py ae ju 'rã omoia, Nhanderuete pegua opy', he'i va'ekue.

⁶ "Ha'e nunga rupi Eufrates yakã rovai rupi repena va'e Tatenai, Setar-Bozenai ha'e peneirũ kuery afarsaquita yakã rovai pendekuai va'e, pejepe'a ke ha'e gui mombyry katy.

⁷ Pemombytu'uve eme Nhanderuete pegua oo re omba'eapo va'e kuery. Tove judeu kuery huvixa ha'e yvatekueve tojapo ju Nhanderuete pegua oo oiague py ae.

⁸ Xeavyv avi judeu kuery regua yvatekueve pe mba'emo peme'ë aguã, Nhanderuete pegua oo ojapo ju aguã. Yakã rovai perãta huvixa pegua omoiaty py oi va'e regua ma ha'e va'e avakue pe peme'ë jepi 'rã hi'ara py porã, omba'eapoa gui opytu'u e'ý aguã.

⁹ Ha'e rami ae avi ha'e kuery pe ára nhavõ peme'ë kuerei 'rã peme'ë aguã va'e: vaka ra'y, vexa'i ha'e vexa'i ra'y oapy vvy Nhanderuete yva pygua pe ome'ë mbyrã. Trigo, juky, vinho ha'e azeite voi peme'ë 'rã, Jerusalém py sacerdote kuery mbovy pa ikuai rami vvy,

¹⁰ ha'e kuery ome'ë aguã mba'emo heakuã porã va'e Nhanderuete yva pygua ojou porã va'erã, huvixa ha'e ta'y kuery re ha'e kuery ojerure okuapy aguã guive.

¹¹ Po rami avi xeavyv: Ava oiko va'e rei kova'e kuaxia re oi va'e oguerova ramo ma hoo gui petei vvyra omboia 'rã, ha'e gui ha'e va'e re ae oupia 'rã imoiny, ha'e rá hoogue ma ojaopoa 'rã ytyrã.

¹² Ha'e rami ae avi xapy'a rei Jerusalém py Nhanderuete pegua oo oi va'e amongue huvixa e'ý vvy pavë regua ombovaipaxe vvy opo py kova'e ipara oguerova va'e rei tove Nhanderuete tomokanhymba, ha'e py query omoi rire. Xee Dario ae kova'e avvu amondouka va'e. Tojapopaa pojava."

Templo ojaopapa ma okuapyague

¹³ Ha'e gui ma huvixa Dario ijavyvague rami ae Eufrates yakã kyvõ rupi opena va'e Tatenai, Setar-Bozenai ha'e oirũ kuery ojaopapa pojava okuapy.

¹⁴ Ha'e ramo judeu kuery regua yvatekueve ojapo tema heravy oo, ikuai porã guive profeta Ageu ha'e Ido ra'y Zacarias ijavyvague rami. Oo ojaopapa Israel kuery ruete ojapo ukaague rami, ha'e gui huvixa Ciro, Dario ha'e Pérsia pygua Artaxerxes ijavyvague rami guive.

15 Oo oĵapopa okuapy jaxya Adar 'ea py mboapy araa py, huvixa Dario mboapy meme ma'etÿ re ma oĵave.

Nhanderuete po py templo omboaxa okuapyague

16 Ha'e gui Israel kuery, sacerdote, levita ha'e escravo ikuaiaque gui ojevny va'ekue mboae kuery ou vy ma Nhanderuete pegua oo oĵapopaague oguerovy'a reve omboaxa okuapy ipo py.

17 Omboaxa vy ome'ë okuapy cem vaka ra'y, duzentos vexe'i ra'y, quatrocentos vexe'i ha'e doze kavara ra'y. Israel kuery ha'e javi ojevnyague reguarã ome'ë okuapy, mbovy regua pa ikuai rami.

18 Omoĵ avi okuapy sacerdote ha'e levita kuery peteĵ-teĵ Nhanderuete pe omba'eapo aguã Jerusalém py, Moisés kuaxia omboparaague rami vy.

Ngaru Páscoa regua oĵapo okuapyague

19 Escravo ikuaiaque gui ojevny va'ekue ha'e javi ma ngaru Páscoa regua oĵapo okuapy peteĵ jaxya ha'e catorze araa py.

20 Mba'eta sacerdote ha'e levita kuery ma peteĵ'i rami ojevny'a'o ukapa ma vy ha'eve va'e ju ikuai. Ha'e rami vy ojuka okuapy Páscoa pygua vexe'i escravo ikuaiaque gui ou va'ekue ha'e javi re, guyke'y kuery sacerdote ikuai va'e re, ojevny ae guive.

21 Ha'e rami vy Páscoa ára py Israel ramymino kuery escravo ikuaiaque gui ou va'ekue ha'e javi okaru okuapy, ha'e gui ha'e kuery reve onhemoirũ avi amboae regua kuery SENHOR Israel kuery ruete oeka aguã ha'e va'e vyvny re amboae regua kuery hekoa va'e reko vaia gui ojevny'a va'ekue.

22 Sete ára re ovy'aa rupi oĵapo okuapy ngaru mbojape mbovua revegua e'ÿ va'e regua, ovy'a aguã SENHOR ombou ramo. Mba'eta ha'e kuery re oma'ë vy huvixa Assíria pygua py'a oguerova va'ekue, Israel kuery ruete pegua oo oĵapopa py omombaraete aguã rami.

7

Jerusalém katy huvixa Artaxerxes Esdras omondoukaague

1 Ha'e va'e rirny Pérsia pygua huvixa Artaxerxes oĵave ou Esdras. Ha'e va'e ma Seraías ra'y, Seraías ma Azarias ra'y, Azarias ma Hilquias ra'y,

2 Hilquias ma Salum ra'y, Salum ma Zadoque ra'y, Zadoque ma Aitube ra'y,

3 Aitube ma Amarias ra'y, Amarias ma Azarias ra'y, Azarias ma Meraiote ra'y,

4 Meraiote ma Zeraías ra'y, Zeraías ma Uzi ra'y, Uzi ma Buqui ra'y,

5 Buqui ma Abisua ra'y, Abisua ma Finéias ra'y, Finéias ma Eleazar ra'y, Eleazar ma Arão sacerdote yvateve va'e ra'y raka'e. Ha'e va'e jave py ma Esdras ou avi Babilônia gui.

6 Ha'e va'e ma SENHOR Israel kuery ruete lei oeva rã Moisés ombopara va'ekue re nhombo'e va'ety oikuapa va'e. Hexe SENHOR Tuete po oĵi ramo ixupe huvixa ome'ëmba ojevny rami tema.

7 Jerusalém katy jogueru avi Israel ramymino kuery va'e regua sacerdote, levita, oporaĵ va'ety, okë rarõa ha'e templo py nhopytyvõ va'ety kuery. Huvixa Artaxerxes sete ma'etÿ re ma oĵave py jogueru.

8 Ha'e gui huvixa sete ma'etÿ re ma oĵave peteĵ nhirũ jaxya py Esdras ovaë Jerusalém py.

9 Mba'eta peteĵ jaxya ára pyy'i py Babilônia gui ou rirny peteĵ nhirũ jaxya ára pyy'i py ma ovaë Jerusalém py, hexe Nhanderuete po oĵi ramo.

10 Mba'eta Esdras ovy'a re omoĵ ae ma va'ekue SENHOR guigua lei oĵa rami ixupe ete oiko aguã, ha'e gui oĵapopa aguã, ha'e Israel ha'e javi rupi nhombo'e aguã Nhanderuete avny ha'e oipotaa oeva va'ekue re.

11 Sacerdote Esdras ma SENHOR avny re nhombo'e va'ety, oĵapo uka va'ekue ha'e oavyu Israel kuery peguarã oeva va'ekue ha'e javi re. Ixupe kuaxia para huvixa Artaxerxes ome'ë va'ekue ma po rami ipara oiny:

12 "Xee ma Artaxerxes huvixa ikuai va'e ruvixa aiko. Kova'e kuaxia amondouka sacerdote Esdras, Nhanderuete yva pygua va'e guigua lei re nhombo'e va'ety pe: Tove tereiko porã!

13 Po rami xeyvny: Xee apenaa rupi Israel kuery va'e regua ikuai va'e, sacerdote ha'e levita kuery nderupive Jerusalém tetã katy ooxe va'e rei toje'oi.

14 Ha'e gui ma xee ha'e xemongeta va'ety kuery reve romondouka Judá ha'e Jerusalém tetã re reikuaa pota aguã, nderuete guigua lei ndepo py rereko va'e rami vy.

15 Reraa avi 'rã prata ha'e ouro xee ha'e xemongeta va'ety kuery Israel kuery ruete pe rome'ëxea'i rupi rome'ë va'e, Jerusalém py ixupegua oo oĵi ramo.

16 Ha'e rami ae avi prata ha'e ouro Babilônia vyvny ha'e javi rupi rejou va'e reraapa avi 'rã, neretarã kuery ha'e sacerdote kuery rome'ëxea'i py ome'ë va'e reve, Jerusalém py Nhanderuete pegua oo oĵi va'e pyguarã.

17 Ha'e va'e perãta re ma rejogua 'rã vaka ra'y, vexe'i, vexe'i ra'y, mba'emo ra'yÿgue ha'e mba'emo rykue reme'ë va'erã. Ha'e nunga ha'e javi reme'ë 'rã Jerusalém py Nhanderuete pegua ovy altar oĵi va'e áry.

18 Ha'e rã prata ha'e ouro rembyrekua ma ndee ha'e nderyvy kuery peikuaa rami ae 'rã peiporu. Penderuete oipotaa rami pejapo.

19 Ha'e gui tembiporu Nhanderuete pegua ovy rupi oiporu pyrã ndevny ome'ë mbyre ma Penderuete renonde reme'ëmba ju 'rã Jerusalém tetã py.

20 Ha'e rã amboae nunga Nhanderuete pegua ovy guarã reikotevë va'e rei tema reraa avi 'rã xeropy mba'emo omoĵ porãaty gui ae.

21 "Ha'e gui ma Eufrates yakã rovai mba'emo re pepenya va'ety kuery pe ju xee huvixa Artaxerxes xeyvny: Pendeivy sacerdote Esdras Nhanderuete yva pygua lei re nhombo'e va'e mba'emo re ojevny ramo peme'ëmba vyvny.

²² Trinta e três mil quilos prata guigua peve teí, cem voxá trigo, cem ryrú vinho ha'e cem ryrú azeite peve, ha'e gui júky oata aguã rami e'ý 'rã peme'ê.

²³ Ha'e gui ma Nhanderuete yva pygua ojapo ukaague rami vy tojapopaa vyvói ixupegua oo pyguarã. Mba'eta nda'evei ipoxy etea ou aguã xee huvixa ha'e xera'y kuery ropenaa re.

²⁴ Ha'e rami avi peteí re ju xeayvu pêvy. Sacerdote ha'e levita kuery, oporaéi va'e, okê rarôa, Nhanderuete pegua opy omba'eapo va'e kuery ha'e javi, ha'e kuery va'e regua pe ma peteíve henda py napeme'ê ukai 'rã imposto neí pedágio.

²⁵ "Ha'e gui ndee Esdras, ne'arandua Nhanderuete gui ae rereko va'e rami vy emoí joe opena va'erã ha'e nhomongetaarã. Ha'e va'e kuery ma opena 'rã Eufrates yakã rovai rupi ikuai va'e ha'e javi re, nderuete guigua lei oikuaa va'e kuery ha'e javi re. Ha'e rã oikuaa e'ý teri va'e ma ndee rembo'e avi 'rã.

²⁶ Ha'e rã Nhanderuete guigua ha'e huvixa guigua lei rupi e'ý ikuai va'e ma rembopaga vy rejuka 'rã, e'ý vy mombyrya katy 'rã remondouka, imba'e rei-rei va'ekue reipe'apa 'rã, e'ý vy rembo'a mba'e 'rã", he'i va'ekue.

²⁷ Ta'ima'endu'a porã SENHOR nhaneramoí kuery ruete re, mba'eta ha'e rami aguã oguerova huvixa py'a, Jerusalém py Nhanderuete pegua oo oí va'e omoatyrô uka aguã.

²⁸ Xevy pe ojapo avi huvixa xemboaxy aguã rami, imongeta va'ety kuery ha'e yvatekueve ipo'akapa va'e renonde py aí jave. Ha'e rã xere SENHOR Xeruete po oí ramo aendu xembaraetea. Ha'e rami vy Israel kuery ruvixa va'e kuery regua amboaty xerupive oje'oi aguã.

8

Esdras rupive ojevju va'ekue rery oia

¹ Ha'e ramo Artaxerxes huvixa oí jave py heta va'e kuery akã regua oje'oi xerupive Babilônia gui. Ha'e kuery rery ma po rami:

² Finéias ramymino kuery va'e regua ma Gérson. Itamar ramymino kuery va'e regua ma Daniel. Davi ramymino kuery va'e regua ma Hatus.

³ Secanias ha'e Parós ramymino kuery va'e regua ma Zacarias, ha'e gui hexeve cento e cinqüenta avakue rery avi omboparaa.

⁴ Paate-Moabe ramymino kuery va'e regua ma Zeraías ra'y Elioenai, ha'e hexevegua duzentos avakue ju.

⁵ Secanias ramymino kuery va'e regua ma Jaaziel ra'y, ha'e hexevegua trezentos avakue ju.

⁶ Adim ramymino kuery va'e regua ma Jônatas ra'y Ebede, ha'e hexevegua cinqüenta avakue.

⁷ Elão ramymino kuery va'e regua ma Atalias ra'y Jesaías, ha'e hexevegua setenta avakue ikuai.

⁸ Sefatias ramymino kuery va'e regua ma Micael ra'y Zebadias, ha'e hexevegua oitenta avakue ikuai.

⁹ Joabe ramymino kuery va'e regua ma Jeiel ra'y Obadias, ha'e hexevegua duzentos e dezoito avakue ikuai.

¹⁰ Bani ramymino kuery va'e regua ma Josifias ra'y Selomite, ha'e hexevegua cento e sessenta avakue ikuai.

¹¹ Bebai ramymino kuery va'e regua ma Bebai ra'y Zacarias, ha'e hexevegua vinte e oito avakue ikuai.

¹² Azgade ramymino kuery va'e regua ma Hacatã ra'y Joanã, ha'e hexevegua cento e dez avakue ikuai.

¹³ Adonício ramymino kuery va'e regua ma opa vygua ovaêague. Ha'e kuery rery ma pova'e: Elifelete, Jeiel ha'e Semaías, ha'e gui ha'e kuery revegua sessenta avakue ikuai.

¹⁴ Bigvai ramymino kuery va'e regua ma Utai ha'e Zabude, ha'e hexevegua setenta avakue ikuai.

Esdras levita kuery ogueru rukaague

¹⁵ Ha'e va'e kuery ae amboatypa Aava katy yakã oxry ovy va'e yvýry. Ha'e py ma mboapy ára re ranhe ropyta. Ha'e kuery ha'e sacerdote kuery re aikuaa pota vy neí peteí ma voi ndajouí Levi ramymino va'e regua.

¹⁶ Ha'e rami vy aenoí uka huvixa kuery Eliézer, Ariel, Semaías, Elnatã, Jaribe, Elnatã, Natã, Zacarias ha'e Mesulão, ha'e gui hi'arandukueve va'e Joiaribe ha'e Elnatã.

¹⁷ Ha'e va'e kuery ma Casifia pygua huvixa Ido oia katy amondouka vy ha'e kuery pe ame'ê avyu ixupe omombe'u va'erã, ha'e gui tyvy kuery Casifia pygua templo rupi nhopytyvô va'ety kuery pe voi, orea py ha'e kuery ogueru aguã Nhanderuete pegua opy rupi opena va'erã.

¹⁸ Ha'e ramo orere Nhanderuete po iporã va'e oí ramo orea py ogueru peteí ava hi'arandu va'e. Ha'e va'e ma Mali ramymino Serebias, Israel ra'y Levi ramymino va'e. Ta'y ha'e tyvy kuery reve vy dezoito ikuai.

¹⁹ Ogueru avi Hasabias, Merari ramymino kuery va'e regua Jesaías guive. Ha'e va'e kuery ryvy ha'e ta'y kuery reve vy vinte ikuai.

²⁰ Ha'e gui templo rupi levita kuery pytyvôarã Davi ha'e yvatekueve omôí va'ekue ma duzentos e vinte ikuai. Ha'e va'e kuery ma hery rupi meme omoía.

Okaru e'ý re ikuaiague

²¹ Ha'e gui ma Aava yakã yvýry orekuai pyve ae xeayvu rokaru e'ý re orekuai aguã, Nhanderuete renonde py ronha'mo'yvyi'i reve ixupe roguata porã aguã re rojapukai aguã, orera'y kue'iry ha'e oremba'e rei-rei ha'e javi reve guive.

²² Mba'eta xee axí huvixa pe xondaro ha'e kavaju árygua kuery re ajerure aguã roguataa rupi orerovaigua kuery gui orerarôarã, mba'eta ixupe oreayvu ae ma va'ekue: "Nhanderuete oeka va'e kuery ha'e javi re ipo iporã va'e oí imoingo porãarã. Ha'e rã ixugui hexarai pa va'e ha'e javi rovai ma opo'akaa ha'e javi reve ombou 'rã opoxya", ro'e rire.

²³ Ha'e nunga rupi ore kuery rokaru e'ÿ re orekuai vy Nhanderuete pe rojerure tema rokuapy. Ha'e ramo oreayvua oendu vy orepytyvõ.

Sacerdote kuery pe mba'emo re opena ukaa ague

²⁴ Ha'e ramo aiporavo doze yvatekueve va'e regua. Ha'e va'e kuery ma Serebias, Hasabias ha'e tyvy kuery dez ikuai va'e.

²⁵ Ha'e va'e kuery pe ma apena uka prata, ouro ha'e tembiporu Nhanderuete pegua opy guarã ome'ê mbyre re, ajeja rire. Ha'e nunga ma huvixave, imongeta va'ety kuery, yvatekueve ha'e Israel kuery ha'e py ikuai va'e ome'ê va'ekue.

²⁶ Ha'e rami vy ha'e kuery po py amboaxa vinte mil quilos raxa prata guigua, tembiporu prata guigua três mil e trezentos quilos va'e, três mil e trezentos quilos ouro guigua,

²⁷ vinte karo ouro guigua oito quilos va'e meme, ha'e gui moko'i tembiporu overa va'e iporãve va'e guigua hexakãmba va'e, ouro rami avi hepy va'e.

²⁸ Ha'e rami vy aipoa'e ha'e kuery pe:

— Peẽ kuery ma SENHOR pegua omboaxa pyre pendekuai, kova'e tembiporu ikuai va'e voi omboaxa pyre meme. Mba'eta kova'e prata ha'e ouro ma SENHOR peneramo'i kuery ruete peguarã ome'êxea'i py ome'ê mbyre.

²⁹ Ha'e nunga rupi pepena porã 'rã, pearõ 'rã Jerusalém py sacerdote yvatekueve va'e, levita ha'e Israel kuery akã ikuai va'e renonde py ju pepeja reve pemboaxaa ára peve — ha'e.

³⁰ Ha'e ramo sacerdote ha'e levita kuery ma prata, ouro ha'e tembiporu ojeja pyre ojopypa, Jerusalém py Nhanderuete pegua oo o'i va'e pyguarã ogueraa aguã.

Jerusalém py ovaẽmbaague

³¹ Ha'e gui Aava yakã gui ma ijyppy jaxya doze araa py roje'oi, Jerusalém katy roo aguã. Orere Nhanderuete opo py opena porã vy orereraa jepe orerovaigua kuery ha'e tape rupi jokuaka kuery ikuai va'e ha'e javi gui.

³² Ha'e rami vy rovaẽ ma Jerusalém py. Ha'e py ma mboapy ára re ranhe ropyta.

³³ Ha'e gui irundy araa py ma Nhanderuete pegua oo py roo vy rojeja ju prata, ouro ha'e tembiporu. Ha'e vy sacerdote Urias ra'y Meremote pe je romboaxapa. Ha'e va'e reve o'i Finéias ra'y Eleazar. Ha'e kuery reve ikuai avi levita kuery Jesua ra'y Jozabade ha'e Binui ra'y Noadias.

³⁴ Ha'e nunga roipapa ha'e ropejapa ma rire ipoyia ha'e javi ombopara kuaxia re.

³⁵ Ha'e gui escravo ikuaiague gui oo va'ekue ma ome'ê okuapy mymba Israel kuery ruete peguarã. Noventa e seis vexa'i, setenta e sete vexa'i ra'y ome'ê. Ha'e gui ma doze kavara ava ju jejavya reguarã. Oapy reve meme ome'ê SENHOR pe.

³⁶ Ha'e gui ma huvixave ayvu omombe'u okuapy hembiguai huvixa kuery Eufrates yakã kyvõ rupi opena va'e pe. Ha'e ramo ha'e kuery orepytyvõ okuapy Nhanderuete pegua oo romoatyrõa py.

9

Esdras onhembo'e vy ha'e kuery reko vaia omombe'upaague

¹ Ha'e nunga oikopa ma rire xea py oo okuapy yvatekueve va'e. Ha'e vy ha'e kuery aipoe'i okuapy:

— Israel kuery va'e regua sacerdote ha'e levita kuery ma ndojepe'ai okuapy amboae yvy regua reko vaia gui, cananeu kuery, heteu, ferezeu, jebuseu, Amom pygua, Moabe, Egito pygua ha'e amorreu kuery reko vaia gui.

² Mba'eta ha'e kuery va'e regua rajy kuery ae ogueraa gua'yxyrã, gua'y kuery ra'yxyrã guive. Ha'e rami vy nhande kuery nhandeky'a e'ÿ aguã va'ekue jaje'apa ma jakuapy kova'e yvy re ikuai va'e re. Yvatekueve ha'e huvixa kuery ranhe ho'apa ma ha'e rami ojejavya py — he'i okuapy.

³ Ha'e nunga xee aendu vy ajou vai vaipa. Ha'e rami vy amondoropa xeaõ, xe-manto guive. Xeapyte gui xe'a ha'e xerendyva aeiky'i reve aguapy ainy.

⁴ Ha'e ramo xea py onhemboatypa okuapy Israel kuery ruete ayvu oendu vy oryryipa va'e, escravo ikuaiague gui ojevvy va'ekue ojejavypa rei okuapya re nda'evei vy. Ha'e ramo xee ma aguapy tema ainy ajou vai ete reve, ka'aru mymba ome'êa jave peve.

⁵ Ha'e gui ka'aru mymba ome'êa jave py ma apu'ã ha'amy anhem'o'yvy'i ainya gui, xeaõ ha'e manto oxorokue rei reve. Ha'e vy xerenapy'ã re ju a'i vy xepo aupi SENHOR Xeruetete oia katy.

⁶ Ha'e vy aipoe'i:

— Xeruetete! Xee nda'evei rei aiko, ndea katy ama'ê aguã aximba guive. Mba'eta rojejavya ma o'i-oive tema oreakã áryve rupi, orereko vaia ma yva peve oo.

⁷ Oreramo'i kuery ikuaiaga ára guive a'y peve ore kuery voi orereko vai rokuapy. Rojejavypaague re ae oremboaxapa raka'e huvixa amboae yvy regua po py, oreruvixa ha'e sacerdote kuery voi. Ha'e rami vy orere ou kyxe revegua, escravo orekuai aguã, imonda va'e ha'e roximba aguã, a'y peve roexaa rami ae.

⁸ Ha'e gui a'y ma xapy'a'i ndee SENHOR Oreruetete oremboaxya rexa uka vy rejapo roo jepe nho aguã rami, ha'e henda iky'a e'ÿ va'e py ju orekuai porã aguã. Ha'e rami vy Oreruetete, orevy reme'ê orerexa pyxo'i jevy aguã, ha'e teigue ju nhoembiguai orekuai te'i rokuave'i aguã.

⁹ Ore kuery nhoembiguai roikoa py te'i ndee Oreruetete, norepytyvõ e'ÿi. Ha'e rami 'rãgue py oremboaxya rexa uka vy Pérsia pygua huvixa kuery renonde rupi voi oremboaxya roendu. Ha'e rami vy orepy'a guaxuve ndevyguã oo oitypaa va'ekue rojapo ju aguã, ivaipaague romoatyrõ vy, ha'e gui Judá ha'e Jerusalém py orekuai rupi renhemõ'i kora rami orerepyarã.

¹⁰ — Ha'e vy aÿ Oruete, kova'e nunga oiko rire mba'e ro'e 'rã tu? Mba'eta roejapa ma rejapo uka va'ekue
¹¹ nerembiguai profeta kuery pe aipo're uka va'ekue: “Yvy pendekoa aguã peoa va'e re ma ha'eve'ya oï, ha'e pygua kuery omongy'apa rire, mba'eta jovaive-ive rupi ha'e kuery ojejavypaa rupi vy omonyẽmba okuapy ojeuarupy.

¹² Ha'e nunga rupi napeme'ëi 'rã penderajy kuery ha'e kuery ra'y kuery ra'yxyrà, ha'e kuery rajy kuery re voi napemomendai 'rã pendera'y kuery. Ha'e kuery reve ndapejapoi 'rã peteï rami pendekuai aguã, neï pevy'a pekuapy aguã. Ha'e rami vy 'rãe penembaraeteve kova'e yvy re iporãgueve oiko va'e re pekaru pekuapy aguã, ha'e vy pendera'y kuery peguarã kova'e yvy peja aguã raka'e rã peve guarã”, 're uka va'ekue.

¹³ Ha'e gui Oruete, ore kuery orereko vaiaque re ha'e rami ete mba'emo vai oiko, ha'e rami avi roejavyague re orembopaga aguã gui ndee noremboagaive guive, ha'e rami 'rãgue py rejapo rokuave'i va'ekue roo jepe nho aguã rami, roexaa rami.

¹⁴ Ha'e rami teï ha'ekue rami ae tema roejapa ju rejapo uka va'ekue, ha'e vy apyguã kuery re romenda rokuapy, ojeuarupy rojapo vy. Ha'e rami rire orerovai nandepoxyi 'rã teve oremomba peve, neï peteïve oo jepe va'e naembryei aguã rami?

¹⁵ SENHOR Israel kuery ruete va'e! Ndee ma ndereko porã va'e, ha'e rã ore kuery ma oo jepe va'ekue regua rembyrekue rive, aÿ roexaa rami. Apy ma nerenonde py ma orereko vaia py orekuai, nerenonde peteïve heko vai va'e oï aguã nda'evei teï — he'i.

10

Avakue Israel regua gua'yxy heteu regua omondoukapa jevyague

¹ Ha'e rami vy Nhanderuete pegua oo renonde py Esdras onhembo'e vy heta va'e kuery reko vaia omombe'ua, ha'e ojero'a reve ojae'o oiny. Ha'e rami jave oïa py ono'õ reta ete jogueruvy Israel kuery avakue, kunhague ha'e kyrĩgue guive. Ha'e rami vy pavẽ rei ojae'o vaipa okuapy.

² Ha'e ramo Elão ramymino kuery va'e regua Jeiel ra'y Secanias ijayvu vy aipoe'i Esdras pe:
 — Ore kuery ma Nhanderuete rovai orereko vai va'ekue amboae regua kunhague re romendaa py, amboae regua re ae. Ha'e rami teï nhande Israel kuery pe oï teri nharõ jaikovy aguã.

³ Mba'eta aÿ gui ma Nhanderuete reve rojapo 'rã ixupe ju orekuai aguã, orera'yxy kuery ha'e imemby kuery ha'e javi romondoukapa ju aguã Senhor ijayvuague rami vy, ha'e Nhanderuete ayvu gui oryryi va'e kuery ijayvua rami vy, lei oïa rami ae 'rã rojapo.

⁴ Ha'e nunga rupi epu'ã ke, mba'eta kova'e nunga re ma ndee ae repena va'erã rei. Ha'e rã ore ma ndereve meme 'rã roiko. Nembaraete ha'vy rejapo ete aguã — he'i.

⁵ Ha'e ramo Esdras opu'ã vy ojapo sacerdote yvatekueve va'e oura aguã rami, levita ha'e Israel kuery ha'e javi guive, ha'e rami ijayvuague ha'e kuery ojapopa aguã. Ha'e ramo ha'e kuery oura okuapy ha'e rami.

⁶ Ha'e gui Nhanderuete pegua oo renonde Esdras oïague gui ojepe'a vy opy ja'o Eliasibe ra'y Joanã pegua py ju oïke. Ha'e py ma ndo'ui oiny mbojape, neï ndoy'ui vinho. Ojae'o oiny escravo ikuaiaque gui ojevy va'ekue ojejavypaa re.

⁷ Ha'e gui Judá ha'e Jerusalém rupi omombe'ua escravo ikuaiaque gui ojevy va'ekue ha'e javi onhemboatypa aguã Jerusalém py,

⁸ ha'e gui xapy'a rei amongue mboapy araa py teï ndoui va'e ma imba'e rei-rei ha'e javi omomba aguã, yvatekueve ha'e nhomongeta va'ety kuery ijayvuague rami vy, ha'e gui ha'e ae ma voi oipe'aa aguã escravo ikuaiaque gui ojevy va'ekue ikuaia mbyte gui.

⁹ Ha'e ramo mboapy araa py Judá ha'e Benjamim regua avakue ha'e javive onhemboatypa okuapy Jerusalém py. Ha'e rami vy nove jaxya ha'e vinte araa py ete ha'e kuery oguapypa okuapy Nhanderuete pegua oo rexe'i. Oryryi okuapy ha'e nunga káuxa, oky tuvixa va'e oiko va'e gui guive.

¹⁰ Ha'e gui ma sacerdote Esdras opu'ã vy aipoe'i ha'e kuery pe:
 — Peẽ kuery ma pendereko vai pekuapy amboae regua kunhague re pemendaa py. Ha'e rami vy pejapo Israel kuery re hetave oï aguã ojevavya.

¹¹ Ha'e gui aÿ ma penhemombe'upa 'rã SENHOR peneramoï kuery ruete pe, pejapo ha'e oipota va'e anho. Peje'ave eme amboae yvy regua re, amboae regua kunhague re guive — he'i.

¹² Ha'e ramo ha'e kuery ombovai vy ijayvu atã reve aipoe'i okuapy:
 — Ha'e rami ma ha'eve 'rã. Ndeayvua rami orekuai aguã ae ha'eve.

¹³ Ha'e ramive heta ae avi orekuai, oky vaipa ára guive. Ha'e nunga rupi nda'evei oka py nhandekuai aguã. Ha'e rami avi ha'e nunga ma peteï, mokoï ára'i guarã e'ÿ guive, mba'eta ha'e nunga py heta orekuai rojevavy va'e.

¹⁴ Ha'e nunga rupi aÿ gui ma yvatekueve toikuaa nhande kuery ha'e javi rekovia. Tove ára oa'angaague py ae ha'e kuerya py tou tetã ikuai va'e-va'e pygua amboae regua kunha re omenda va'ekue. Ha'e kuery reve tou avi peteï-teï tetã pygua nhomongetaa ha'e joguerekoa kuery, nhandegui Nhanderuete oipe'apa peve orereko vaia káuxa opoxya ombou va'ekue — he'i okuapy.

¹⁵ Ha'e rami aguã Asael ra'y Jônatas ha'e Tivcã ra'y Jazeías anho ndojou porã. Ha'e kuery reve levita regua Mesulão ha'e Sabetai avi nhomoiri.

¹⁶ Ha'e rami ae escravo ikuaiaque gui ojevy va'ekue ojapo okuapy. Ha'e rami vy sacerdote Esdras oiporavo avakue hery rupi, dez jaxya jypy'i araa py ha'e nunga re oikuaa pota okuapy aguã. Ha'e va'e kuery ma hetarã kuery akã, nguũ kuery ro pygua kuery ikuaia rami omõi mbyre.

¹⁷ Ha'e rami vy peteĩ jaxya ha'e jypy'ia ára py oikuaa potapa ma okuapy amboae regua kunhague re avakue omenda va'ekue re.

¹⁸ Ha'e gui sacerdote ramymino kuery va'e regua kunhague amboae regua re omenda va'ekue ma ojou okuapy pova'e: Jozadaque ra'y Jesua ramymino kuery ha'e tyvy kuery va'e regua ma Maaséias, Eliézer, Jaribe ha'e Gedalias.

¹⁹ Ha'e va'e kuery ma jopopyy reve jogueroayvu okuapy kunhague omondoukapa aguã re. Ha'e rami vy ojevavyague re peteĩ-teĩ ome'ẽ okuapy peteĩ vexa'i ikora py oguereko va'ekue gueko vaiague rekovia.

²⁰ Imer ramymino kuery va'e regua ma Hanani ha'e Zebadías.

²¹ Harim ramymino kuery va'e regua ma Maaséias, Elias, Semaías, Jeiel ha'e Uzias.

²² Pasur ramymino kuery va'e regua ma Elioenai, Maaséias, Ismael, Natanael, Jozabade ha'e Elasa.

²³ Ha'e gui levita kuery va'e regua ma Jozabade, Simei, Quelaías hery mboae va'e Quelita, Petaías, Judá ha'e Eliézer.

²⁴ Oporaei va'ety kuery va'e regua ma Eliasibe. Okẽ rarõa kuery va'e regua ma Salum, Telém ha'e Uri.

²⁵ Ha'e gui Israel kuery va'e regua ju. Parós ramymino kuery va'e regua ma Ramias, Jezias, Malquias, Miamim, Eleazar, Malquias ha'e Benaía.

²⁶ Elão ramymino kuery va'e regua ma Matanias, Zacarias, Jeiel, Abdi, Jerimote ha'e Elias.

²⁷ Zatu ramymino kuery va'e regua ma Elioenai, Eliasibe, Matanias, Jerimote, Zabade ha'e Aziza.

²⁸ Bebai ramymino kuery va'e regua ma Joanã, Hananias, Zabai ha'e Atlai.

²⁹ Bani ramymino kuery va'e regua ma Mesulão, Maluque, Adaías, Jasube, Seal ha'e Jerimote.

³⁰ Paate-Moabe ramymino kuery va'e regua ma Adna, Quelal, Benaia, Maaséias, Matanias, Bezalel, Binui ha'e Manassés.

³¹ Harim ramymino kuery va'e regua ma Eliézer, Issias, Malquias, Semaías, Simeão,

³² Benjamim, Maluque ha'e Semarias.

³³ Hasum ramymino kuery va'e regua ma Matenai, Matatá, Zabade, Elifelete, Jeremai, Manassés ha'e Simei.

³⁴ Bani ramymino kuery va'e regua ma Maadai, Anrão, Uel,

³⁵ Benaia, Bedias, Queluí,

³⁶ Vanias, Meremote, Eliasibe,

³⁷ Matanias, Matenai, Jaasai,

³⁸ Bani, Binui, Simei,

³⁹ Selemias, Natã, Adaías,

⁴⁰ Macnadbai, Sasai, Sarai,

⁴¹ Azarel, Selemias, Semarias,

⁴² Salum, Amarias ha'e José.

⁴³ Nebo ramymino kuery va'e regua Jeiel, Matitias, Zabade, Zebina, Jadai, Joel ha'e Benaia.

⁴⁴ Ha'e va'e kuery ha'e javive ma amboae regua kunhague gua'yxyrã ogueraa va'ekue meme, amongue ma kunhague re ta'y va'ekue guive.

Neemias rekokue oia Esdras rekokue oia

Kova'e kuaxia re ma oí Israel kuery Babilônia py escravo-rã ogueraa pyre oyvy re ju ojevuy va'ekue rekokue. Mba'eta huvixave Babilônia re opena va'e ae omondouka. Po rami ipara oiny: "Peteí ma'etý re ma Pérsia pygua huvixa Ciro oí jave py Senhor ojapo oayvu Jeremias omombe'u va'ekue ojeupity agua rami. Ha'e vy Ciro py'a re omoí openaa ha'e javi rupi omombe'u uka pova'e ayvu, ombopara uka guive. Ha'e vy aipoe'i uka: 'Pérsia pygua huvixa Ciro po rami ijayvu: Xevy pe Senhor Nhanderuete yva pygua omboaxa yvy ha'e javi re apena agua. Xemoí avi peteí oo ixupe guarã ajapo uka agua Judá yvy re Jerusalém tetã py. Ha'e nunga rupi ixupegua pendekuai va'e ha'e javi reve Penderuete toiko, ha'e tapeo Judá regua Jerusalém py, Senhor Israel kuery ruete pegua oorã pejapo jevy agua. Ha'e va'e ma Jerusalém pygua kuery ruete ae', he'i'" (1.1-3).

Ha'e gui ma omombe'u ha'e kuery oguataague, Jerusalém tetã py ovaëague, templo omoatyrõ agua omboypyague, hovaigua kuery omombytu'u ranheague, ojapopaague, ha'e gui oguerovy'aague, Nhanderuete gui meme ha'e nunga oiko rire.

Esdras ma sacerdote oiko raka'e. Ha'e ae Jerusalém py ou vy opena oikovy templo omoatyrõa rupi. Ijayvu avi heta va'e kuery gueko vaia gui ojepe'a agua rami.

Jerusalém tetã re Neemias ojerureague

¹ Hacalias ra'y Neemias ayvu oia. Ha'e gui vinte ma'etýa re, jaxya Quisleu 'ea jave py, Susã py huvixa ro imbaraete va'e oí va'e py xee aiko jave

² ou xeryvy Hanani. Avakue Judá yvy gui ou va'ekue reve ovaë. Ha'e rã ha'e kuery pe aporandu judeu kuery oo jepe rã escravo-rã ndogueraai va'ekue re. Jerusalém tetã re voi aporandu.

³ Ha'e ramo ombovai:

— Escravo-rã ndogueraapaai va'ekue ha'e py ae teri ikuai huvixa openaa yvy re. Ha'e va'e kuery ma ojexavai okuapy karuai gui, nda'ija'eai guive. Ha'e gui Jerusalém tetã kora ma oitypaa, hokê ikuai va'e voi oapypaa — he'i' okuapy.

⁴ Ha'e ramigua aendu vy ajae'o ainy. Mbovy ára re rei e'y nda'evei ete aiko. Akaru e'y re aiko reve ajerure ainy Nhanderuete yva pygua renonde py.

⁵ Ha'e vy aipoa'e:

— Aÿ SENHOR, Oruete yva pygua ndepo'akapa ha'e okyjevvey va'e! Ndereve guarã rejapo va'ekue ha'e ndeporayvua rupi reiko, nderayvu va'e kuery rejapo uka va'ekue rupi ikuai va'e ha'e javi pe.

⁶ Tove ndeapyya toendu, nderexa tojepe'a guive, xee nerembiguai ajerurea re reikuaa pota agua. Aÿ nenonende py aï. Ara py ha'e pyávuy Israel kuery nerembiguai ikuai va'e re ajerure ainy. Amombe'u guive Israel kuery nderovai ojevavy okuapyague. Mba'eta xee ha'e xeru ro pygua kuery voi rojevavy va'ekue.

⁷ Opa mba'e vai rojapo va'ekue nderovai, ndorojapoí guive rejapo uka va'ekue, ndeayvu reja va'ekue, neí reipota va'e nerembiguai Moisés rupi rejapo uka va'ekue.

⁸ Nema'endu'a ke ayvu nerembiguai Moisés pe remombe'u va'ekue re. Ha'e vy aipo're va'ekue: "Xapy'a rei peê kuery naxenhe'ë rendui ramo romoaimba 'rã yvy regua kuery mbyte rupi.

⁹ Ha'e rami teí xevy pe pejavy ju vy ajapo uka va'ekue rupi peiko vy pejapo ete ri ramo yva apy rupi ete penemomboaa rire teí ha'e gui romboaty'a ju 'rã heruvy henda xerery amoí agua aiporavoague py", 're va'ekue.

¹⁰ Mba'eta kova'e kuery ma nerembiguai ikuai, nembraetepaa ha'e ndepo'akaa rupi ndejeupe guarã reraa jepe va'ekue.

¹¹ Ha'e nunga rupi SENHOR, ndeapyya tojapyyaka tema xee nerembiguai ajerurea re, ha'e nerembiguai kuery ovy'a reve nderery oendu vy nemoete va'e ojerure okuapy re. Ejapo a'y'i ma voi xee nerembiguai ajapo taa py aiko porã agua rami. Ava renonde py aa rã ejapo ajerurea oendu agua rami — ha'e, mba'eta ha'e va'e jave ma huvixave karo reruaty aiko.*

2

Jerusalém tetã katy Neemias omondoukaa aague

¹ Vinte ma'etý re ma huvixa Artaxerxes oí jave, jaxya nisã 'ea py ma vinho oy'u va'erã oguerua rã ajopy vy ame'ë ixupe. Ha'e va'e e'y mbove ma neí peteígueve ma voi henonde xeporiaua ndaexa ukai teri.

² Ha'e ramo huvixa aipoe'i xevy:

— Mba'e re tu nembra'eaxy vy e'y nderova poriau rei ri? Ndepy'a py ae 'rã ndeporiau — he'i.

Ha'e rã xee aendu akyye etea reve

³ ambovai:

— Xeruvixa, tereikove riael! Ha'e rami avi mba'eta tu xerova re avy'aa aexa uka 'rã tetã xeramoi kuery rupa oia ivaiipa teria ja, hokê tata py oapypaa rire guive? — ha'e.

* 1:11 "Ava" he'ia ma huvixave Artaxerxes pe ae (2.1). Ha'e va'e jave huvixa karo reruaty Neemias oiko va'e vy onhembopy'a henonde guetarã kuery re ojerure agua re. Ha'e rami agua re ojerure ma voi Nhanderuete pe, oo vy huvixa pe ojerure agua irundy jaxy teri oata reve.

- ⁴ Huvixa oporandu ju xevy:
— Mba'e nunga re tu rejerure ta xevy?
Ha'e rã Nhanderuete yva pygua pe ranhe ajerure.
- ⁵ Ha'e rami vy ambovai huvixa:
— Xeruvixa, ndevy pe ha'eve ramo, ha'e nerenonde py xee nerembiguai xemboaxy ri ramo ajerure Judá yvy katy xemondouka aguã re, tetã xeramoĩ kuery rupa oĩa va'e amoatyrõ ju aguã — ha'e.
- ⁶ Ha'e gui huvixa, ijyvyry ta'yxy oĩ avi va'e reve aipoe'i xevy:
— Raka'e peve 'rã tu nereivei apy? Raka'e 'rã tu rejeyu ju?
Ha'e rã amombe'u raka'e peve pa ha'e py aiko ha'e ajevy aguã.
- ⁷ Ha'e gui aipoa'eve ju huvixa pe:
— Xeruvixa, rejou porã ri vy eme'ẽ ha'vy kuaxia para Eufrates yakã rovai rupi huvixa opena va'e kuery peguarã, ha'e kuery ovyv rupi xemboaxa rã Judá yvy re avaẽ aguã.
- ⁸ Eme'ẽ avi kuaxia huvixa pegua ka'aguy re opena va'ety Asafe pegua, xevy yvyra ome'ẽ aguã templo kora rokẽ ytarã, tetã korarã, ha'e oo aĩ aguã ojapoa avi aguã — ha'e. Ha'e ramo huvixa ome'ẽmba xevy, xere Nhanderuete po ipo'akapa va'e oĩ ramo.
- ⁹ Ha'e gui ma Eufrates yakã rovai huvixa kuery opena py avaẽ vy ha'e kuery pe amboaxa kuaxia para huvixa ogueru ruka va'ekue. Xerupive huvixa ombou avi xondaro ruvixa ha'e kavaju árygua kuery.
- ¹⁰ Ha'e nunga ma Horonaim pygua huvixa Sambalate ha'e hembiguai Amom guigua Tobias oikuaa vy ndojou porã. Ojou vai ete Israel kuery aipytyvõ aguã ajuague.

Heta va'e kuery tetã kora omoatyrõ ju aguã re Neemias ijyvuague

- ¹¹ Ha'e gui Jerusalém tetã py avaẽ vy mboapy ára re ranhe aiko rive.
- ¹² Ha'e gui peteĩ pytũ apu'ã avy. Xerupive mbovy'i ete avi avakue oje'oi, mba'eta avave pe namombe'ui teri Jerusalém py ajapo aguã xepy'a re Xeruete omoĩ va'ekue. Mymba kuery voi ndaraai xereve, xerymba aĩa e'y vy.
- ¹³ Pyavyve aẽ avy Yvyugua Rokẽ gui, ha'e gui Teju Jagua Yvu oĩa katy ju aa Yty Renda Rokẽ katy aa vy. Ha'e py mae ma aexa Jerusalém tetã kora ivaipaa ha'e hokẽ ikuai va'ekue tata py oapypaague.
- ¹⁴ Ha'e gui ma aave Yvu Rokẽ ha'e huvixa pegua yy omboty pyre peve. Ha'e rami teĩ mamove noĩ xerymba aĩa oaxa aguã.
- ¹⁵ Ha'e rami vy pytũ teri reve aëve avy yakã rembe rupi. Ha'e py aexave ju tetã kora oĩ va'e. Ha'e gui ajevy vy Yvyugua Rokẽ rupi aike vy xero py ju aa.
- ¹⁶ Huvixa kuery ma ndoikuai marã katy pa aa ague, neĩ mba'e pa ajapoaague voi, mba'eta mba'eve rei namombe'ui teri judeu kuery pe, sacerdote kuery, yvatekueve, huvixa kuery, neĩ omba'eapo va'erã kuery pe voi.
- ¹⁷ Ha'e gui ma xee aipoa'e ha'e kuery pe:
— Pexa ma aỹ opa mba'e py nhandekuai axya. Jerusalém tetã ivaipa, hokẽ voi oapypaa tata py. Peju ha'vy nhamoatyrõ ju Jerusalém kora. Ha'e ramo 'rãe nanhandejojaiavei — ha'e.
- ¹⁸ Ha'e kuery pe amombe'u avi Xeruete po ipo'akapa va'e xere oĩa ha'e huvixave xereve ijyvuague.
Ha'e ramo ha'e kuery aipoe'i:
— Ronhemoĩ 'rã ha'vy nhamoatyrõ aguã — he'i okuapy. Ha'e rami vy ikyre'y okuapy omba'eapo porã aguã.
- ¹⁹ Ha'e rã Horonaim pygua huvixa Sambalate, hembiguai Amom guigua Tobias ha'e Arábia guigua Gesém ha'e nunga oikuaa vy orejojai rei okuapy. Orembojaru reia rupi aipoe'i:
— Mba'e tu pejapo ta? Tyrã pa huvixave rovai pepu'ã ta?
- ²⁰ Ha'e rã xee ambovai:
— Oruete yva pygua ae orepytyvõ 'rã rojapopa aguã rami. Ha'e nunga rupi hembiguai kuery orekuai va'e ronhemoĩ 'rã romoatyrõmba ju aguã. Ha'e rã peẽ kuery ma ore kuery reve mba'eve rei ndaperekoi Jerusalém tetã py. Ha'e py nda'evei guive peike aguã, pendere na'ima'endu'aai rã — ha'e.

3

Tetã kora omoatyrõa rupi omba'eapo va'e kuery rery oĩa

- ¹ Ha'e gui sacerdote yvateve va'e Eliasibe voi onhemoĩ avi tyvy kuery sacerdote ikuai va'e reve Vexa'i Rokẽ omoatyrõ ju aguã. Ha'e va'e ma Nhanderuete peguarã omboaxa, ha'e hokẽrã omoĩ. Ha'e gui Torre dos Cem ha'e Torre Hananel pegua oĩa peve omoatyrõ heravy kora.
- ² Ha'e va'e kuery yvyry ma avakue Jericõ guigua ju omba'eapo okuapy. Ha'e va'e kuery yvyry Inri ra'y Zacur ju omba'eapo.
- ³ Ha'e gui Hassenaá ra'y kuery ma omoatyrõ okuapy Pira Rokẽ 'ea. Omboytapa ma vy okẽ ju omoĩ, ijokoarã ferro ha'e yvyra guigua reve.
- ⁴ Ha'e kuery yvyry ma Urias ra'y Meremote ju omba'eapo, Coz ramymino va'e. Ha'e va'e yvyry ma Berequias ra'y Mesulão ju omoatyrõ, Mesezabel ramymino. Ha'e va'e yvyry ma Baaná ra'y Zadoque ju omoatyrõ.
- ⁵ Ha'e va'e kuery yvyry ma Tecoa tetã pygua kuery omoatyrõ. Ha'e rã ha'e pygua yvatekueve ma nomba'eapoxei okuapy opena va'erã oĩ va'e pe.
- ⁶ Ha'e gui Paséia ra'y Joiada ha'e Besodias ra'y Mesulão omoatyrõ Okẽ Ymague. Ha'e rami vy omboyta vy omoĩ ju imo'amy okẽ, ijokoarã ferro ha'e yvyra guigua reve.

⁷ Ha'e va'e kuery yvýry ma Gibeão pygua Melatias ha'e Merom pygua Jadom ju omba'eapo, ha'e gui avakue Gibeão ha'e Mispa guigua, Eufrates yakã rovai huvixa oĩ va'e rembiguai ikuai va'ekue meme.

⁸ Ha'e kuery yvýry ma omba'eapo avi Haraías ra'y Uziel ouro re omba'eapo va'ety. Ha'e va'e yvýry ma Hananias ju omba'eapo, heakuã porã va'e apoa. Ha'e rami vy ha'e kuery Jerusalém rupi omoatyrõmba Kora Ipyve Va'e oĩa peve.

⁹ Ha'e va'e kuery yvýry omba'eapo avi Jerusalém tetã mbyte rupi opena va'e Hur ra'y Refaías.

¹⁰ Ijyvýry omba'eapo avi Harumafe ra'y Jedaías. Ngoo yvýry rupi ae omoatyrõ. Ha'e va'e yvýry ma Hasabnéias ra'y Hatús ju omba'eapo.

¹¹ Amboae rupi ma Harim ra'y Malquias ha'e Paate-Moabe ra'y Hassube omoatyrõ heravy, Torre Tatakua 'ea voi.

¹² Ijyvýry omba'eapo avi Jerusalém tetã mbyte rupi opena va'e Haloés ra'y Salum. Guajy kuery reve omba'eapo okuapy.

¹³ Ha'e gui Yvyugua Rokẽ omoatyrõ va'e ma Hanum, Zanoa pygua kuery mboae reve. Ha'e kuery omoatyrõmba imo'omõ okẽ, ijokoarã ferro ha'e vyvra guigua reve. Kora quatrocentos e cinqüenta metros peve omoatyrõ avi, Yty Renda Rokẽ oĩa peve.

¹⁴ Ha'e gui Yty Renda Rokẽ ae ma Bete-Haquerém pygua huvixa Recabe ra'y Malquias omoatyrõ. Ha'e va'e omoatyrõ okẽ, ijokoarã ferro ha'e vyvra guigua reve.

¹⁵ Yakã Ryapy Rokẽ omoatyrõ va'e ma Mispa pygua huvixa Col-Hozé ra'y Salum. Omoatyrõmba ma yy ojao'i. Ha'e gui okẽ ju omõ imo'amy, ijokoarã ferro ha'e vyvra guigua reve. Kora omoatyrõve heravy yy omboty pyre Selá py oĩ va'e yvýry rupi, huvixa mba'e vyotyty rexei, Davi rekoague katy gui tape pyrõ-pyrõa'i ogejy ovvy va'e peve.

¹⁶ Ha'e rire Bete-Zur pygua huvixa Azbuque ra'y Neemias ju omoatyrõ heravy. Davi rupa rexei peve omoatyrõ, yy omboty pyre ha'e ipy'a guaxukueve rogue rupi peve.

¹⁷ Ha'e va'e rire levita kuery ju omoatyrõ okuapy Bani ra'y Reum revegua kuery. Ha'e va'e kuery yvýry ma Queila vvy mbyte rupi opena va'e Hasabias ju omba'eapo.

¹⁸ Ha'e va'e rire ma tyvy ju omba'eapo, Queila vvy mbyte rupi opena va'e Henadade ra'y Bavai.

¹⁹ Ijyvýry ma Mispa pygua huvixa Jesua ra'y Ezer ju omoatyrõve heravy tembiporu moĩ porãaty via tape oẽ ovy va'e rupi, kora ojerea peve.

²⁰ Ha'e va'e rire ma Zabai ra'y Baruque ju ikyre'y'ỹ reve omoatyrõ amboae rupi, kora ojerea guive sacerdote yvateve va'e Eliasibe ro rokẽ peve.

²¹ Ha'e va'e rire ma Urias ra'y Meremote, Coz ramymino va'e ju omoatyrõ heravy Eliasibe ro rokẽ guive hoo apy peve.

²² Ha'e va'e rire sacerdote kuery tetã rovai rupi ikuai va'e ju omba'eapo.

²³ Ha'e gui ma Benjamim ha'e Hassube ju omoatyrõ heravy ngoo yvýry rupi ae. Ha'e va'e kuery rire ma Maaséias ra'y Azarias ju omoatyrõ, Hananias ramymino, ngoo yvýry rupi.

²⁴ Ha'e va'e rire ma Henadade ra'y Binui ju omoatyrõ amboae rupi, Azarias ro guive opa ova'i peve, kora ojerea peve ete.

²⁵ Ha'e gui opa ova'i guive ma Uzai ra'y Palal ju omoatyrõ, ha'e nhuã roka yvýry huvixa ro oĩ va'e áry torre hi'ái va'e guive. Ha'e va'e rire ma Parós ra'y Pedaías ju omoatyrõ,

²⁶ ha'e gui templo py omba'eapo va'ety kuery Ofel py ikuai va'e guive. Yy Rokẽ oĩa guive omoatyrõ heravy kuaray oua katy, torre yvateve va'e hi'áiã peve.

²⁷ Ha'e va'e rire ma Tecoa tetã pygua kuery amboae rupi ju omoatyrõ okuapy, torre guaxu hi'áiã guive Ofel kora oĩa peve.

²⁸ Ha'e gui Kavaju Rokẽ rovai guive ma sacerdote kuery ae omoatyrõ heravy, peteĩ-teĩ ngoo yvýry rupi ae.

²⁹ Ha'e va'e kuery rire ma Imer ra'y Zadoque ju omoatyrõ heravy ngoo yvýry rupi ae. Ha'e va'e rire ma Secanias ra'y Semaías ju omoatyrõ, okẽ kuaray oua katyguararõa.

³⁰ Ha'e va'e rire amboae rupi omoatyrõ va'e ma Selemias ra'y Hananias ha'e Zalafé ra'y mboapy memea va'e Hanum. Ha'e va'e kuery rire ma Berequias ra'y Mesulão ju omoatyrõ heravy ngoo yvýry rupi ae.

³¹ Ha'e va'e rire omoatyrõ va'e ma ouro re omba'eapo va'ety ra'y Malquias. Ha'e va'e ma omoatyrõ heravy templo py omba'eapo va'ety ha'e mba'emo vendea kuery ro ikuai peve, Harõa kuery Rokẽ rexei rupi, kora ojerea py opy oĩa peve.

³² Ha'e gui kora ojerea py opy oĩa guive Vexa'i Rokẽ peve omoatyrõ va'e ma ouro re omba'eapo va'ety ha'e mba'emo vendea kuery.

4

Ngovaigua kuery jokoarã omoague

¹ Ha'e gui kora romoatyrõmba maa Sambalate oendu vy ipoxy ete. Ivai vaipa reve ijayvu vai judeu kuery rovai.

² Guyvy kuery ha'e Samaria pygua xondaro kuery ha'e javi oendua py ijayvu. Ha'e vy aipoe'i:

— Mba'e tu peva'e judeu kuery ikangykue ojapo ta? Ha'e rami aguã ojapo ukaa 'rã ri nda'u? Mba'emo mymba ojuka vy nda'u ome'ẽ 'rã ri? Peteĩ ára pyve'i nda'u omomba 'rã? Ita ra'ykue oa pyra pyre aty gui nda'u omoatyrõve ju 'rã? — he'i.

³ Hexeve hi'ái avi Amom guigua Tobias. Ha'e vy aipoe'i avi:

— Kora ita gui anho ha'e kuery ojapo teĩ hi'áry mbyku rive ojeupi vy oitypa 'rã — he'i.

⁴ Oreruete, endu ke mba'eta ombojaru reipy orekuai. Ha'e kuery re ae tojeapa ju orembojaru reiaque. Escravo-rã togueraapaa guive yvy mboae katy.

⁵ Ejao'i eme ha'e kuery reko vaiague, nerenonde gui embogue eme ojevavyague, mba'eta omba'eapo va'e kuery oendua py nembopoxy okuapy.

⁶ Ha'e rami py romoatyřo heravy kora. Ha'e vy yvatea mbyte peve rombotypa, heta va'e kuery omba'eapo aguã ikyre'ỹ ramo.

⁷ Ha'e rami teĩ Sambalate ha'e Tobias ha'e nunga oendu. Arábia guigua kuery, Amom ha'e Asdode guigua kuery avi oendu okuapy Jerusalém kora romoatyřove tema heravya. Kora pa'ũ ikuai va'ekue rombotypa rai'i maa ha'e kuery oikuaa vy ivai vaipa okuapy.

⁸ Ha'e rami vy ha'e kuery peteĩ rami ono'õmba okuapy Jerusalém tetã re opu'ã vy oremoango rei aguã.

⁹ Ha'e rami teĩ Nhanderuete pe rojerur rokuapy. Harõarã romoĩ guive kuery ara py ha'e pyávý ijkoarã.

¹⁰ Ha'e gui Judá regua avakue aipoe'i:

— Mba'emo reraa kuery na'imbaraetevei ma, mba'emo ra'ykue-'ykue aty heta vai ete rã. Kora jajapopa aguã nda'eve reguai — he'i okuapy.

¹¹ Oreroavaigua kuery aipoe'i avi:

— Ha'e kuery mba'eve ndoikuai neĩ ndoexai 'rã ha'e va'e kuery mbyte rupi roike vy rojukapa rã. Ha'e rami vy romombytu'upa 'rã omba'eapo va'e kuery — he'i okuapy.

¹² Ha'e gui ha'e kuery yvy'iry judeu kuery hekoa va'e mbovykue rei e'ỹ ou vy aipoe'i oreyv:

— Opa rupi ha'e kuery ikuai gui ou ta nhanderovai opu'ã aguã — he'i ramo

¹³ heta va'e kuery peteĩ-teĩ hoo pygua ikuai rami amoĩ kora yvy'ã guy katy teri oĩa py oarõ aguã, onhembotypa e'ỹ teria rupi. Kora ropy katy amombytapa imo'amy kyxe, hu'y guaxu ha'e hapa reve-reve.

¹⁴ Ha'e vy aexa potapa ma vy apu'ã reve aipoa'e yvatekueve, huvixa kuery ha'e heta va'e kuery mboae pe:

— Pekyje rei eme. Penema'endu'a tema SENHOR re, mba'eta ha'e ma ipo'akapa ha'e okyjevepy va'e. Ha'e rami vy pejoguero'a penderyvvy ha'e penderyke'y kuery repya rupi, pendera'y ha'e penderajy kuery, pendera'yxy ha'e pendero ikuai va'e repya rupi guive — ha'e.

¹⁵ Ha'e gui oreroavaigua kuery oendu okuapy roikuaa ae maa, Nhanderuete ojoko ramo ha'e kuery ojapoxea. Ha'e ramo kora oĩa katy ju roopa, peteĩ-teĩ romba'eapo aguã katy ae.

¹⁶ Ha'e va'e ára guive xerembiguai kunumigue regua mbytekue ma omba'eapo 'rã okuapy kora re, ha'e rã amboae kuery ma hu'y guaxu reve ikuai, hu'y joko, guyrapa ha'e pexo regua reve guive. Ha'e gui opena va'e kuery ma Judá kuery mbopy'a guaxua rupi ikuai.

¹⁷ Ha'e rã mba'emo reraa kuery ma peteĩ-teĩ opo rovai py oupi 'rã mba'emo, ha'e rã hovai re ma ojopy 'rã heravy guembiporu.

¹⁸ Omba'eapo va'e kuery ha'e rami ae avi peteĩ-teĩ oku'a re oguereko 'rã kyxe. Ha'e rami py omba'eapo okuapy. Ha'e rã mimby guaxu monhe'ëarã amoĩ va'ekue ma xevvy'iry riaa oiko.

¹⁹ Aipoa'e yvatekueve, huvixa ha'e heta va'e kuery ha'e javi pe:

— Jajapo va'erã oĩ va'e ma tuvixa ete, joapy e'ỹ-e'ỹ guive. Ha'e rami avi kora áry rupi ikuai va'e ma joegui mombyry-mbyry ikuai.

²⁰ Ha'e nunga rupi mimby guaxu nhe'ë pendu vyve ta'vy penha reve peno'õmba orea py. Mba'eta Nhanderuete ae 'rã opu'ã nhanderepya rupi — ha'e.

²¹ Ha'e rami py tema romba'eapo. Amongue va'e ma opo py hu'y guaxu reve ikuai kuaray hexakã guive ka'aru jaxy-tata ojekuaapa peve.

²² Ha'e va'e jave ma voi aipoa'e heta va'e kuery pe:

— Peteĩ-teĩ pepyta 'rã Jerusalém tetã py ae penerembiguai kunumigue reve, pyávý tetã rarõa rupi pendekuai, ha'e gui ara py ju pemba'eapo aguã — ha'e.

²³ Ha'e gui xee neĩ namboivei xeao xejegui, xeryvy kuery, xepytyvõa kuery, neĩ avakue tetã rarõa xerupive ikuai va'e ma voi. Peteĩ-teĩ roke rojupy orerembiporu reve.

5

Peráta omboekovia retave e'ỹ aguã re ijayvuague

¹ Ha'e rami teĩ heta va'e kuery kunhague reve ojapukai okuapy guvyvy kuery judeu regua rovai.

² Ha'e vy amongue aipoe'i:

— Orereta raxa rima, orera'y ha'e orerajy kuery reve. Ha'e rami vy peme'ë na trigo ro'u va'erã rokuave'i aguã — he'i.

³ Ikuai avi aipoe'i va'e:

— Oreyvy, oremba'ety uva ha'e orero voi jopo py romboaxa ma trigo rekovia, kova'e karuai gui — he'i.

⁴ Ha'e gui ikuave ju aipoe'i va'e:

— Peráta oreyv oiporukaa va'ekue oreyvy ha'e uvaty regua imposto ropaga aguã.

⁵ Oreyvyvy kuery reve peteĩ'i to'o orekuai, orera'y kuery voi ha'e kuery ra'y kuery rami ae avi heko porã va'e. Ha'e rami teĩ ne'ixa, orera'y ha'e orerajy kuery romboaxa ma oreyvyvy kuery escravo-rã. Orerajy kuery va'e regua ma ogueraa ma escravo-rã. Ndrepo'akavei ma guive rogueru ju aguã, mba'eta oremba'ety ha'e uvaty ma jopo py opyta — he'i okuapy.

⁶ Ha'e rami ete ha'e kuery ojapukai reve ijayvu ramo aendu vy xeporiau vaipa.

⁷ Ha'e rami vy xee ae aikuaa pota porã ma vy xeyavy ete yvatekueve ha'e huvixa kuery pe. Ha'e vy ha'e kuery pe aipoa'e:

— Peẽ kuery tu peteĩ-teĩ penderivy kuery pe mba'emo peiporuka rire pemboekovia retave rima — ha'e. Ha'e gui ma ha'e kuery ikuaia re aikuaa pota aguã ajapo nhemboaty guaxu.

⁸ Ha'e vy aipoa'e ha'e kuery pe:

— Ore ma mba'emo rojou va'ekue re rojogua ju oreryvy kuery judeu ikuai va'e vvy regua kuery pe ovendeague gui. Ha'e rã peẽ ju ri ty'y penderivy kuery pevende ta joupe, ore ju rojogua aguã? — ha'e.

⁹ Ha'e rami rã ha'e kuery okyriřimba okuapy nombovai kuaai vy. Ha'e ramo aipoa'e ju:

— Peẽ kuery pejapo va'e ma ha'eve e'ỹ. Nda'evei ri ty'y Nhanderuete renonde pejererokyje aguã, amboae regua nhanderoaigua ikuai va'e nhanembojaru rei e'ỹ aguã?

¹⁰ Ha'e gui xee voi, xeryvy kuery ha'e xerembiguai kunumigüe reve ha'e kuery pe roiporuka avi perãta ha'e trigo. Ha'e rami teĩ nhamboekovia retave eme jaiporuka va'ekue áryve.

¹¹ Ha'e nunga rupi aỹ'i ma voi peẽ kuery peme'ẽ ju ha'e kuery vvy, uvaty, oliveira ty ha'e hoo peipe'a va'ekue. Peme'ẽmba avi perãta pemboekovia retaveague, trigo, uvaty ha'e azeite ha'e kuery gui peipe'a va'ekue — ha'e.

¹² Ha'e ramo ombovai okuapy:

— Ha'e kuery pe rome'ẽmba ju 'rã ha'vy, ndorojerurevei ma 'rã guive. Ndee aipo'rea rami ae 'rã rojapo — he'i okuapy. Ha'e ramo aenoĩ avi sacerdote kuery, ha'e vy ajapo ha'e kuery oura aguã rami ha'e va'e ayvu ojapo avi aguã.

Neemias ojapo porã re ijavyuague

¹³ Ha'e gui xea ambovava ratã reve aipoa'e:

— Nami avi Nhanderuete tojapo, tombovava imondovy ava oavyuague ojapopa e'ỹ va'e. Ixugui toipe'apa hoo ha'e omba'eapoa rupi ojou va'e ha'e javi — ha'e.

Ha'e ramo ijaty va'e kuery ha'e javi ombovai vy

— Ha'eve va'e! — he'i okuapy. Ha'e vy omboete okuapy SENHOR. Ha'e rire ma ha'e kuery ojapo oavyuague.

¹⁴ Ha'e gui ma Judá vvy rupi opena va'erã xemoiague ára guive, Artaxerxes huvixa oĩa vinte ma'et'ya guive trinta e dois ma'et'ya peve, ha'e javi vy doze ma'et'ỹ re aĩ jave ma xee neĩ xeryvy kuery voi ndoro'ui temb'i'u huvixa peguarã xevy ome'ẽa va'ekue gui.

¹⁵ Ha'e rã yma huvixa kuery xee aĩ e'ỹ mbove ikuai va'ekue ma heta va'e kuery ojavyky rei vy ha'e kuery gui oipe'apa va'ekue temb'i'u ha'e vinho, quarenta hatã'i va'e prãta guigua guive. Hembiguai kuery kunumigüe voi oguereko rei va'ekue heta va'e kuery. Ha'e rã xee ma ha'ekue rami ndajapoi Nhanderuete renonde ajererokyje vy.

¹⁶ Ha'e rami 'rãgue py tetã kora re omba'eapoa py xee voi amoatyrõ aikovy. Neĩ peteĩ henda py ma voi ndajoguai xeyvyrã. Xerembiguai kunumigüe voi ono'õmba ha'e py omba'eapo avi aguã.

¹⁷ Ha'e rami ae avi xero py amovaẽ cento e cinquenta avakue judeu regua huvixa kuery reve ou va'ekue, ha'e gui orea py vvy regua oreyv'ỹ rupi hekoa va'e kuery ou rã amovaẽmba avi imbokuapy.

¹⁸ Ára nhavõ ha'e kuery ho'u va'erã ajuka uka 'rã peteĩ vaka ha'e mboapy meme vexa'i oiporavo pyre. Uru ma heta ajuka uka avi, ha'e gui dez araa py nhavõ ajogua reta avi vinho joegua e'ỹ-e'ỹ. Ha'e rã temb'i'u huvixa peguarã ome'ẽa va'ekue ma xee ndajopyi xejeupe ae, kova'e kuery pe mba'emo ome'ẽ ukua reta ae ma ramo.

¹⁹ Ha'e nunga rupi Xeruete, nema'endu'a ke xere xemoingo porã aguã, kova'e kuery pe ajapo porã aikovya ha'e javi re.

6

Hovaigua kuery omongy'jea rupi ijavyu okuapyague

¹ Ha'e gui Sambalate, Tobias, Arãbia pygua Gesém ha'e orerovaigua kuery ha'e javi oendupa okuapy kora romoatyrõmba maa, mba'eta nda'ipovei ma kora pa'ũ ikuai va'ekue, ha'e va'e jave kora rokẽ noromõi rei teĩ.

² Ha'e rami vy Sambalate aipoe'i uka xevy:

— Eju ke orerovaexĩ Ono vvyugua py tekoa oĩa py — he'i, mba'emo vai xevy ojapoxe vy rive.

³ Ha'e ramo ha'e kuery pe amondouka po rami omombe'ua aguã:

— Xee ndaa reguai teve, mba'emo tuvixa va'e rojapo rokuapy ramo. Mba'e re tu amba'eapoa gui apytu'upa ta, peẽ kuerya katy aa aguã rive? — ha'e uka.

⁴ Irundykue ha'e kuery xerenõ uka ha'ekue rami ae. Ha'e rã xee voi ha'ekue rami ae tema ombovai.

⁵ Ha'e gui peteĩ nhiruĩguea ma xea py Sambalate ombou guembiguai opo py kuaxia para omboja pyre'ỹ ogueraa va'e.

⁶ Ha'e va'e re ma po rami oĩ:

“Yvy regua kuery ikuaia rupi oendu ndee ha'e judeu kuery ha'e javi reve nhanderuvixave re pepu'axe vy rive pemoatyrõ tetã kora. Gesém voi ha'e rami ae omombe'u. Ha'e kuery oikuaa rami vy ma je ndee ae reixe ha'e kuery ruxarã.

⁷ Ha'e rami aguã vy rive ae ma je profeta kueryrã remoĩ Jerusalém py, nderekorã re ijayvu vy 'Ha'e va'e ma Judá pygua ruvixa', he'iarã. Ha'e rami ha'e kuery ijayvua omombe'ua rã nhanderuvixave avi 'rã oendu. Eju vyvoi ha'vy ha'e nunga re jajogueroayvu aguã", he'i uka xevy.

⁸ Ha'e ramo xee aipoa'e uka ju:

— Ndeayvuague ma neĩ teĩgue ma ndoikoi. Neakã gui rive rima ndeayvu — ha'e uka.

⁹ Ha'e kuery oremongyje reixe tema okuapy, mba'eta aipoe'i:

— Ha'e kuery ojepe'a 'rã omba'epaoa gui, omba'epoague gui mba'eve oiko e'y aguã rami — he'i. Ha'e nunga rupi Xeruete, xemombaraete ke aỹ.

¹⁰ Ha'e gui ma aa Semaías ro py. Ha'e va'e Delaías ra'y, Meetabel ramymino, ngoo py ae onhemboty va'ekue. Ha'e gui ha'e va'e aipoe'i xevy:

— Jaa na Nhanderueete pegua oo py, ha'e templo ropy apy katy nhaĩ. Templo rokẽ ma nhamboty porã 'rã. Mba'eta pyávy oua 'rã ndejukaarã — he'i.

¹¹ Ha'e ramo xee aipoa'e:

— Ha'e rami avi ava xee ramigua teve onha 'rã? Mava'e tu xee ramigua oike 'rã templo ropy oikove aguã? Xee ndaikei 'rã neĩ peteĩgueve — ha'e.

¹² Ha'e rami xeayvu mba'eta aikuaa Nhanderueete e'y ae ha'e va'e ayvu mbouare. Ixupe Sambalate ha'e Tobias peráta ome'ẽ rive rive ha'e rami ijayvu xerekorã re.

¹³ Xemongyje reixe vy rive peráta ome'ẽ, xee ha'e ramia py ajevavy aguã, ha'e kuery xemboetea rupi e'y ijayvu aguã.

¹⁴ Ha'e nunga rupi Xeruete, nderexarai eme Tobias ha'e Sambalate ojapo vaiague re. Eikuaa pota avi profeta kunha Noadia ha'e profeta ramigua mboae kuery re, xemongyje reia rupi ijayvu okuapy rã.

Tetã kora omoatyrõmba ma okuapyague

¹⁵ Tetã kora rojapopa aguã ma cinqüenta e dois ára re romba'epao, jaxya elul 'epy va'e re vinte e cinco araa peve.

¹⁶ Ha'e nunga orerovaigua kuery oendupa vy vyv regua kuery oreyvúry rupi ikuai va'e ha'e javi okyjepa rei, okangya anho oendu okuapy, mba'eta oikuaa nho Nhanderueete po'akaa rupi ha'e nunga rojapopaague.

¹⁷ Ha'e va'e jave py Judá regua yvatekueve voi heta ombopara kuaxia Tobias pe ogueraa uka va'e, ha'e Tobias ju ha'e kuery pe kuaxia ombopara avi.

¹⁸ Mba'eta Judá py mbovy e'y ikuai Tobias pe ikuai aguã re oura va'ekue, Ará ra'y Secanias rajy me oiko ramo. Ha'e gui ta'y Joanã ma Mesulão rajy Berequias ramymino re omenda va'e.

¹⁹ Ha'e kuery ma xee aendua py ijayvu okuapy mba'emo porã Tobias ojapoa re. Ha'e rami avi xeayvuague ju 'rã omombe'ua ixupe. Heta ma Tobias ombopara kuaxia xemongyje aguã.

7

Jerusalém tetã rarõarã kuery Neemias omoĩague

¹ Ha'e gui tetã kora rojapopa ha'e okẽ romoĩmba ma rive amoĩ okẽ rarõarã kuery, oporaei va'erã ha'e levita kuery.

² Jerusalém tetã re opena va'erã ma mokoĩ amoĩ: xeryvy Hanani ha'e huvixa ro re opena va'ety Hananias reve. Hananias ma Nhanderueete renonde ojererokyjea rupi oiko, amboae kuery gui ojerovia pyve guive.

³ Ha'e gui ha'e kuery mokoĩve pe xee aipoa'e:

— Peipe'a uka eme Jerusalém kora rokẽ kuaray hakupa porã e'ya ja. Ha'e gui ka'aru'i pemboty ju 'rã imoiny okẽ rarõa kuery ikuai teria ja, ijokoa pemoĩ guive. Pemoĩ avi Jerusalém py hekoa va'e kuery harõarã, peteĩ-teĩ omoĩague py toarõ ngoo rexei rupi ae — ha'e,

⁴ mba'eta tetã ma tuvixa va'eri mboapy'i orekuai ha'e py. Oo ikuai va'erã ma mbovy'i ete teri ojapoa.

Esdras 2.1-70

⁵ Ha'e gui xepy'a re Nhanderueete omoĩ amboatypa aguã yvatekueve, huvixa ha'e heta va'e kuery ha'e javi, tery ambopara uka aguã hamymino kuery rery oĩa rami. Ha'e rami vy ajou kuaxia jypy'i ojevvy va'ekue rery oĩa. Ha'e va'e re ma po rami oĩ:

⁶ Po rami ma yvy mboae re escravo-rã ogueraa ague gui ojevvy ju va'ekue rery. Ha'e va'e kuery ma Babilônia pygua huvixa Nabucodonosor escravo-rã ogueraa uka va'ekue ri ojevvy ju Jerusalém tetã ha'e Judá vyv katy, peteĩ-teĩ guekoague py ae.

⁷ Ha'e va'e kuery ma Zorobabel reve ojevvy va'ekue, ha'e gui Jesua reve, Neemias, Azarias, Raamias, Naamani, Mordecai, Bilsã, Misperete, Bigvai, Neum ha'e Baanã reve. Pova'e ma Israel kuery va'e regua avakue meme.

⁸ Parós ramymino kuery va'e regua ma dois mil e cento e setenta e dois ojevvy.

⁹ Sefatias ramymino kuery ma trezentos e setenta e dois.

¹⁰ Ara ramymino kuery ma seiscentos e cinqüenta e dois.

¹¹ Paate-Moabe, Jesua ha'e Joabe ramymino kuery ma dois mil oitocentos e dezoito.

¹² Elão ramymino kuery ma mil duzentos e cinqüenta e quatro.

¹³ Zatu ramymino kuery ma oitocentos e quarenta e cinco.

¹⁴ Zacai ramymino kuery ma setecentos e sessenta.

¹⁵ Binui ramymino kuery ma seiscentos e quarenta e oito.

¹⁶ Bebai ramymino kuery ma seiscentos e vinte e oito.

¹⁷ Azgade ramymino kuery ma dois mil trezentos e vinte e dois.

¹⁸ Adonição ramymino kuery ma seiscentos e sessenta e sete.

¹⁹ Bigvai ramymino kuery ma dois mil e sessenta e sete.

²⁰ Adim ramymino kuery ma seiscentos e cinqüenta e cinco.

²¹ Ater ha'e Ezequias ramymino kuery ma noventa e oito.

²² Hasum ramymino kuery ma trezentos e vinte e oito.

²³ Bezai ramymino kuery ma trezentos e vinte e quatro.

²⁴ Harife ramymino kuery ma cento e doze.

²⁵ Gibeão ramymino kuery ma noventa e cinco.

²⁶ Avakue Belém ha'e Netofa guigua ma cento e oitenta e oito.

²⁷ Avakue Anatote guigua ma cento e vinte e oito.

²⁸ Avakue Bete-Azmavete guigua ma quarenta e dois.

²⁹ Avakue Quiriate-Jearim, Cefira ha'e Beerote guigua ma setecentos e quarenta e três.

³⁰ Avakue Ramá ha'e Geba guigua ma seiscentos e vinte e um.

³¹ Avakue Micmás guigua ma cento e vinte e dois.

³² Avakue Betel ha'e Ai guigua ma cento e vinte e três.

³³ Avakue Nebo mboae guigua ma cinqüenta e dois.

³⁴ Elão mboae guigua ramymino kuery ma mil duzentos e cinqüenta e quatro.

³⁵ Harim guigua ramymino kuery ma trezentos e vinte.

³⁶ Jericó guigua ramymino kuery ma trezentos e quarenta e cinco.

³⁷ Lode, Hadide ha'e Ono guigua ramymino kuery ma setecentos e vinte e um.

³⁸ Senaá guigua ramymino kuery ma três mil novecentos e trinta.

³⁹ Ha'e gui sacerdote kuery ju: Jedaiás ramymino kuery Jesua ramymino ikuai va'e ma novecentos e setenta e três.

⁴⁰ Imer ramymino kuery ma mil e cinqüenta e dois.

⁴¹ Pasur ramymino kuery ma mil duzentos e quarenta e sete.

⁴² Harim ramymino kuery ma mil e dezessete.

⁴³ Ha'e gui levita kuery ju: Jesua, Cadmiel ha'e Hodeva ramymino kuery ma setenta e quatro.

⁴⁴ Oporai va'ety kuery: Asafe ramymino kuery ma cento e quarenta e oito.

⁴⁵ Okê rarôa kuery: Salum, Ater, Talmom, Acube, Hatita ha'e Sobai ramymino kuery ma cento e trinta e oito.

⁴⁶ Templo py omba'eapo va'ety kuery ma Zia ramymino kuery, Hasufa, Tabaote,

⁴⁷ Queros, Sia, Padom,

⁴⁸ Lebana, Hagaba, Salmal,

⁴⁹ Hanã, Gidel, Gaar,

⁵⁰ Reafas, Rezim, Necoda,

⁵¹ Gazão, Uzã, Paséia,

⁵² Besai, Meunim, Nefusesim,

⁵³ Baquebuque, Hacufa, Harur,

⁵⁴ Bazlite, Meida, Harsa,

⁵⁵ Barcos, Sísera, Tama,

⁵⁶ Nesias ha'e Hatifa ramymino kuery guive.

⁵⁷ Salomão rembiguai kuery ramymino kuery ma Sotai ramymino kuery, Soferete, Perida,

⁵⁸ Jaala, Darcom, Gidel,

⁵⁹ Sefatias, Hatil, Poquerete-Hazebaim ha'e Amom ramymino kuery guive.

⁶⁰ Templo py omba'eapo va'ety kuery Salomão rembiguai ramymino kuery reve ha'e javi vy ma trezentos e noventa e dois.

⁶¹ Pova'e kuery ma Tel-Melã gui ojevy va'ekue, ha'e Tel-Harsa, Querube, Adom ha'e Imer gui teĩ ndoikuaii ae tema Israel regua ikuaii:

⁶² Delaiás, Tobias ha'e Necoda ramymino kuery ma seiscentos e quarenta e dois ikuai.

⁶³ Sacerdote kuery ha'e rami ae avi: Habaías, Coz ha'e Barzilai ramymino kuery ikuai. Ha'e va'e Barzilai ma Gileade pygua rajy re omenda rire hery rupi ae oenoia.

⁶⁴ Ha'e kuery ma kuaxia para tery oia re guery oeka teĩ ndojoui okuapy. Ha'e nunga rupi nda'evei sacerdote ikuai aguã, ha'eve va'e ndoikoio va'e vy.

⁶⁵ Ha'e ramo ha'e kuery pe huvixa aipoe'i temb'u iky'a e'ÿ va'e ho'u e'ÿ aguã, sacerdote Urim ha'e Tumim revegua oiko e'ÿa ja.

⁶⁶ Ha'e va'e kuery ha'e javi vy ma quarenta e dois mil trezentos e sessenta ikuai,

⁶⁷ hembiguai avakue ha'e kunhague jaipapa e'ÿ re. Ha'e va'e kuery ju ma sete mil trezentos e trinta e sete ikuai. Ikuai avi duzentos e quarenta e cinco oporaei va'ety avakue ha'e kunhague.

⁶⁸ Ha'e kuery rymba kavaju ma setecentos e trinta e seis oguereko. Ha'e rã hymba mburika ma duzentos e quarenta e cinco ikuai.

⁶⁹ Hymba camelo ma quatrocentos e trinta e cinco. Mburika'i ma seis mil setecentos e vinte ha'e javi vy.

Templo reguarã ome'ẽ okuapyague

⁷⁰ Ha'e gui hetarã kuery akã ikuai va'e regua ma mba'emo ome'ẽ okuapy omba'eapo va'e kuery peguarã. Huvixa ma mil hatã'i va'e ouro guigua ome'ẽ omof porãaty py, cinqüenta hy'a ha'e quinhentos e trinta ao puku sacerdote pegua guive.

⁷¹ Ha'e rā hetarā kuery akā mboae ma omoī porāaty py ome'ē avi vinte mil hatā'i va'e ouro guigua, ha'e dois mil e duzentos prata guigua tuvixakueve va'e.

⁷² Heta va'e kuery mboae ma hatā'i va'e ouro guigua ome'ē vinte mil, ha'e dois mil prata guigua tuvixakueve va'e, sessenta e sete ao puku sacerdote pegua guive.

⁷³ Ha'e gui sacerdote kuery, levita, okē rarōa, oporaei va'ety, heta va'e kuery regua, templo py omba'eapo va'ety ha'e Israel kuery ha'e javi ma guekoague py ae ju ikuai.

8

Heta va'e kuery oendua py Neemias lei ogueroayvuague

¹ Ha'e gui sete jaxya py Israel kuery guekoague py ikuaiavi gui ou vy petē'i rami ono'ōmba okuapy tetā mbyte py Yy Rokē oī va'e vvyry. Ha'e rami vy lei re nhombo'e va'ety Esdras pe ojerure okuapy kuaxia Israel kuery peguarā lei oīa ogueru aguā, Moisés pe SENHOR ombopara uka va'ekue ae.

² Ha'e ramo heta va'e kuery ijatya py sacerdote Esdras ogueru lei. Avakue ha'e kunhague ikuai, ha'e javi oendu kuaa va'e reve. Ha'e va'e ára ma sete jaxya, jypy'ia ára.

³ Ha'e gui ma Yy Rokē rexei tetā mbyte py Esdras ogueroayvu ho'amy kuaxia lei oīa, ko'ēmba'i guive kuaray mbyte peve ogueroayvu, avakue, kunhague ha'e ha'e javi oendu kuaa va'e pe. Kuaxia lei oīa ogueroayvu rā heta va'e kuery ojapyxaka porā okuapy.

⁴ Lei re nhombo'e va'ety Esdras ma hendarā vvyra gui ha'e va'e ára pyguarā ae ojapo pyre áry hi'āi. Oiporu kuaa regua re ikuai avi Matitias, Sema, Anaías, Urias, Hilquias ha'e Maaséias. Ha'e rā ijaxua re ma Pedaías, Misael, Malquias, Hasum, Hasbadana, Zacarias ha'e Mesulão ikuai.

⁵ Ha'e gui ma heta va'e kuery áry Esdras hi'āia py oipe'a kuaxia pavē oexaa py. Oipe'a ramove heta va'e kuery opu'āmba okuapy.

⁶ Ha'e ramo Esdras omboete SENHOR Nhanderuete ipo'akapa va'e. Ha'e ramo heta va'e kuery ha'e javi ombovai vy

— Amém, amém — he'i okuapy opo oupi reve. Ha'e rami vy ojero'a reve SENHOR omboete okuapy, ngova vvy katy omoī reve.

⁷ Ha'e ramo Jesua, Bani, Serebias, Jamim, Acube, Sabetai, Hodias, Maaséias, Quelita, Azarias, Jozabade, Hanā ha'e Pelaiás levita kuery ombo'e okuapy heta va'e kuery lei re. Ha'e ramia ja heta va'e kuery ikuai py ae opyta okuapy.

⁸ Pavē oendu kuaa aguā rami ogueroayvu okuapy Nhanderuete guigua lei. Omombe'u porāve guive ogueroayvu rā heta va'e kuery oendu kuaa porāmba aguā rami.

⁹ Lei regua ayvu heta va'e kuery ha'e javi oendu vy ojae'opa okuapy. Ha'e ramo huvixa Neemias, lei re nhombo'e va'ety sacerdote Esdras ha'e levita kuery omongeta vy aipoe'i ha'e kuery pe:

— Kova'e ára ma SENHOR Nhanderuete peguarā ae nhamboaxa va'ekue. Ha'e nunga rupi pendeporiau eme, pejae'o eme — he'i.

¹⁰ Aipoe'ive ju:

— Tapeo, pe'u xo'o ikyrave va'e, pey'u yre'ē, ha'e peraa uka oguereko e'y'i va'e-va'e pe ho'u va'erā. Mba'eta kova'e ára ma SENHOR Nhanderuete pegua. Ha'e nunga rupi pendeporiau eme, mba'eta Nhanderuete guigua vya'aa oī penembaraeterā — he'i.

¹¹ Levita kuery voi heta va'e kuery omokyririmba vy aipoe'i:

— Pkyriri, mba'eta kova'e ára ma SENHOR pegua. Pendeporiau eme pekuapy — he'i okuapy.

¹² Ha'e ramo heta va'e kuery ngoo rupi ae ju oo okaru ha'e oy'u aguā, ha'e oguereko e'y'i va'e kuery pe temb'i'u ogueraa uka avi. Ha'e rami vy ovy'a porāmba rei okuapy, ayvu oendu va'ekue omombe'ua porāve rā oikuaa porā rire.

Oguy'i py ikuai aguā regua ngaru ojapo okuapyague

¹³ Ko'ē jevy lei re nhombo'e va'ety Esdras oīa py hetarā kuery akā ikuai va'e ha'e javi onhemboatypa ju okuapy sacerdote ha'e levita kuery reve, lei regua ayvu oikuaa porāvexe vy.

¹⁴ Ha'e rami vy lei Moisés pe SENHOR ombopara uka va'ekue re ojou imoiny sete jaxya regua ngaru oiko jave Israel kuery oguy'i py ikuai aguā.

¹⁵ Ha'e ramo Jerusalém ha'e tetā ha'e javi rupi oje'oi vy omombe'u. Ha'e vy aipoe'i:

— Tapeo vvyty ikuai va'e rupi, peru oliveira rogue, zambujeiro, murta, pindo ha'e vvyra hovana va'e rogue, ipara oīa rami vy oguy'i pejapo aguā — he'i.

¹⁶ Ha'e ramo ha'e kuery oje'oi vy mba'emo rogue ogueru vy ojapo imoiny oguy'i ikuai aguā. Petē-tei ojapo ngoo ao'ia áry, ha'e'y vy ngoka py, Nhanderuete pegua roka py mba'e, e'y vy tetā mbyte py Yy Rokē ha'e Efraim Rokē avi va'e rexei.

¹⁷ Escravo ikuaiague gui ojevya va'ekue ha'e javi oguy'i ojapo vy ikuai ha'e py. Teigüeve ma voi ha'e ramigua Israel kuery ndojapoi va'e teri Num ra'y Josué oikoa guive ha'e va'e ára peve. Ha'e rami vy ovy'a porāmba rei okuapy.

¹⁸ Ko'ē nhavō tema Esdras ogueroayvu kuaxia Nhanderuete guigua lei oīa, jypy'ia ára guive opa peve. Sete ára re okaru okuapy. Ha'e gui oito araa py ma ipara oīa rami vy oiko nhemboaty iky'a e'y va'e.

9

Ojevya omombe'u ha'e ojeko rerova okuapyague

¹ Ha'e va'e jaxy re vinte e quatro araa py ma Israel kuery onhemboaty ju. Okaru e'ÿ re ikuai, voxa vaikue py rive onhemonde okuapy, o'áry vvy ku'i omoí reve.

² Israel kuery amboae regua kuery gui oja'opa vy opu'amba reve omombe'upa okuapy ojevavya, guamoí kuery ojevavyague guive.

³ Três horas re opu'amba okuapy jave ha'e kuery pe ogueroavyua kuaxia SENHOR Nguuete guigua lei oía. Ha'e gui três horas re ju ojevavya omombe'upa ha'e SENHOR Nguuete omboete okuapy.

⁴ Ha'e gui levita kuery ikuai aguã pyrôa oí va'e áry ma Jesua, Bani, Cadmiel, Sebanias, Buni, Serebias, Bani ha'e Quenani opu'ã vy ojapukai atã okuapy SENHOR Nguuete pe.

⁵ Ha'e rami vvy levita kuery Jesua, Cadmiel, Bani, Hasabnéias, Serebias, Hodias, Sebanias ha'e Petaías aipoe'i okuapy:

— Pepu'amba ke, pemboete SENHOR Penderuete imarã e'ÿ va'e raka'e rã peve guarã.

Ha'e ramo heta va'e kuery aipoe'i okuapy:

— Tove nderery ima'endu'a porãmby toiko hexakãmba va'e, orema'endu'aa ha'e romboetea ha'e javi gui yvateve va'e vvy.

⁶ Mba'eta ndee anho SENHOR reiko. Rejapo raka'e yva yvate oí va'e hexe ikuai va'e ha'e javi reve, vvy ha'e ye'ê voi hexe ikuai va'e ha'e javi reve. Ha'e nunga ha'e javi moingovea ma ndee ae reiko. Ha'e ramo yva re ikuai va'e nembroete okuapy.

⁷ Ndee SENHOR Oreruete, ndejeupe guarã Abrão reiporavo vvy reipe'a raka'e caldeu kuery rekoa Ur gui. Ha'e vvy remboery ju Abraão.

⁸ Nerenonde py ojeroviapy oiko aguã ípy'a re oía reikuaa vy ixupe rejapo raka'e nderupive guarã, hamymino kuery pe reme'ê aguã vvy cananeu kuery, heteu, amorreu, ferezeu, jebuseu ha'e girgaseu kuery ikuai. Ndeavyuague rejapopa guive, ndereko porã va'e vvy.

⁹ Ha'e rami vvy Egito vvy re oreramoi kuery ojexavai rã rexa raka'e, rendu guive Ye'ê Pytã vvyry ojapukai okuapy rã.

¹⁰ Ha'e rami vvy huvixa Faraó rovai rejapo oikuaa pyrã ha'e ndepo'akaa regua, hembiguai kuery ha'e ijyvy re ikuai va'e rovai, mba'eta reikuaa ae onhemboyvate reia rupi ndevygua kuery oguerekoa. Ha'e rami vvy rejapo nderery re ima'endu'aa aguã rami, aÿ peve roexaa rami.

¹¹ Ha'e kuery renonde remboja'o avi ye'ê, vvy piru rupi oaxa aguã. Ha'e rã hakykue monhaa kuery ma yy typyvea py remombopa, yy oxyry atã reia py ita oike vyvoi va'e rami.

¹² Ara py ndevygua kuery reraa peteí arai hi'ái va'e py, ha'e gui pyávy ma tata hexakãmba va'e hi'ái va'e py reraa, ha'e kuery oexa vy oo aguã.

¹³ Ha'e gui Sinai vvyty apyte áry peve reguejy vvy ha'e kuery reve ndeavyu raka'e yva py reía gui. Ha'e vvy ha'e kuery pe reikuaa uka reipota va'e ha'evea ramigua, lei anhetê va'e ha'e gui ndeavyu rejapo uka va'e iporã va'e ha'e javi.

¹⁴ Ha'e kuery pe reikuaa uka avi sábado ára icky'a e'ÿ va'erã reja va'ekue. Nerembiguai Moisés pe remombe'u uka rejapo uka va'e, rembo'ea ha'e lei ha'e javi.

¹⁵ Ha'e kuery inhembyayi ramo reme'ê raka'e mbojape yva guigua, ha'e gui ijy'uvei rã rejapo itaova gui yy oxyry ovvy aguã rami. Ha'e kuery pe aipo're avi oje'oi vvy vvy ndepo reupi ha'e reura reve reme'ê aguã py hekoo aguã.*

¹⁶ — Ha'e rami teí oreramoi kuery ndojapyxaka potai raka'e. Inhakã ratã vvy noendu potai rejapo uka va'e re.

¹⁷ Nanenhe'ê renduxeí vvy na'ima'endu'ai guive ha'e kuery pe mba'emo porã rejapo va'ekue re. Inhakã ratãve oje'oivy vvy nderovai ete ikuai vvy peteí omoí okuapy nguvixarã, Egito vvy re escravo ikuaiague py ju ojevypaxe vvy. Ha'e rã ndee Oreruete orepéroa kuua va'e, oreravyu ha'e oremboaxy kuua va'e. Nandevai voi va'e, ha'e opa mba'e py mboravyu rupi reiko va'e vvy nderejai raka'e,

¹⁸ ha'e kuery nguuterã vaka ra'y ra'angaa rive ojapo okuapy teí. Ha'e rami vvy aipoe'i: “Kova'e ae ma Nhanderuete Egito vvy gui nhandereru va'ekue”, he'i vvy opa marã rei ijavyu okuapy nderovai.

¹⁹ Ha'e rami teí ndee riaa tema ndeporavyua ndopai va'e vvy nderejai raka'e tekoa e'ÿa re. Ha'e kuery renonde gui ndereipe'ai ara py arai hi'ái va'e oo aguã kuua ukaa, neí tataendy pyávy hi'ái va'e voi ndereipe'ai guive, rexa uka ae tema oo aguã.

²⁰ Ha'e kuery rekombó'earã rembou avi Nenhe'ê Porã. Maná voi nereme'ê e'ÿi guive ho'u va'erã, ha'e ijy'uvei rã reme'ê avi yy.

²¹ Ha'e rami py quarenta ma'etÿ re tekoa e'ÿa rupi rereko jave ha'e kuery pe ndoatai mba'eve. Ijao voi na'inhymai, nda'ipy rurupai guive.

²² Ha'e kuery po py remboaxa avi joyvy ha'e amboae regua kuery. Ha'e kuery peguarã remboja'o-ja'o vvy. Ha'e rami vvy oyvyrã ojopy Hesbom pygua huvixa Seom ha'e Basã pygua huvixa Ogue vvykue.

²³ Ta'y kuery remboetave guive jaxy-tata yva re ikuai va'e rami. Ha'e rami vvy reru vvy tuu kuery pe “Tapeo, pejopy penderekoarã”, 'reague py.

²⁴ Ha'e ramo ha'e va'e vvy re ta'y kuery oo vvy ojopy. Ha'e kuery renonde gui cananeu kuery hekoo va'ekue reitypa vvy ndevygua kuery po py ju remboaxa ijyvykue, ha'e pygua huvixa ha'e vvy regua kuery guive, oipotaa rami ae oguereko aguã.

* 9:15 João 6.31

²⁵ Ha'e rami ramo ojopy tetã imbaraeve va'ekue ha'e vvy porãa. Ojopy avi oo mba'emo porãgue anho oĩa, yy rendarã vvy ojo'o pyre, uvaty, oliveira-ty ha'e vvyra oata aguã rami e'ỹ ikuai va'e. Ha'e ramo okaru porã okuapy hevayatãmba peve, ikyrapa guive. Iporã va'e re anho okaru, ndeporayvua rupi.

²⁶ — Ha'e rami teĩ nanenhe'ẽ rendui jepi, nderovai guive opu'ã okuapy. Ndea katy okupe rive oguero va, ha'e profeta kuery ndevy pe ju ha'e kuery ojevuy aguã re ijayvu ramo ojuka. Ha'e rami vvy opa marã rei ijayvu okuapy nderovai.

²⁷ Ha'e nunga rupi imoingo axyarã kuery po py remboaxa ramo ombojexavai ete imbokuapy. Ha'e ramo ojexavai ma vvy mae ojapukai okuapy ndevy. Ha'e rã vvy py reia gui rendu. Ha'e rami vvy ndee nhomboaxya opa e'ỹ va'e vvy rebou imoingo axy reia kuery po gui ogueraa jepe va'erã.

²⁸ Ha'e ramia gui ikane'õguapa ma vvy nerenonde ojapove ju okuapy mba'emo vai. Ha'e ramo remboaxa ju hovaigua kuery po py ipo'aka aguã. Ha'e rami rã ha'e kuery ojeko rerova vvy ojapukai ju okuapy ndevy. Ha'e ramo vvy py reia gui rendu vvy ndeporayvua rupi reraa jepe kuerei.

²⁹ Ha'e kuery pe ndeayvu jepi teĩ lei reja va'ekue rupi ikuai ju aguã. Ha'e rami teĩ ha'e kuery onhemboyvate rei vvy noendu potai rejapo uka va'e. Ha'e rami vvy ojevayv tema okuapy ndeayvu rovai rupi, ha'e va'e rupi jaiko vvy jaikove 'rã teĩ. Inhakã ratã vvy okupe rive oguero va ndea katy. Onhemoakã ratã vvy ndojapyxaka potai.

³⁰ Mbovy ma'etỹ re rei e'ỹ reropo'aka vvy ha'e kuery rovai ndeayvu Nenhe'ẽ rupi, profeta kuery pe ndeayvu remboke'u uka vvy. Ha'e rami teĩ ndojapyxakaxei ae okuapy. Ha'e rami rã remboaxa amboae vvy regua kuery po py.

³¹ Ha'e rami teĩ Oreruete, ndeporayvua opa e'ỹ va'e rupi vvy nerembombai neĩ nderejai, ndeporayvu ha'e renhomboxy va'e vvy.

³² — Ha'e nunga rupi aỹ Oreruete, ndevyate ete ha'e ndepo'akapa va'e, okyjevpepy guive reiko. Ndereve guarã rejapo va'ekue rupi, ha'e nhomboaxya rupi reiko va'e vvy “Mba'e'ỹ” 'ere eme rojexavaia ou va'ekue pe. Ha'e nunga ma ore kuery re, oreruvixa, yvatekueve, oreregua sacerdote ha'e profeta kuery, oreramoĩ kuery ha'e ndevyguia kuery ha'e javi re ou va'ekue, Assíria pygua huvixa kuery ou guive aỹ peve.

³³ Ha'e nunga ha'e javi orere ou teĩ ndee ma ha'evea rami orerereko. Ndee ma ojeroviapy reiko, ha'e rã ore ma ojeroviapy e'ỹ orekuai.

³⁴ Oreruvixa kuery, yvatekueve, sacerdote ha'e oreramoĩ kuery voi ojee nomoĩ ndeguigua lei rupi ikuai aguã, noendu potai guive rejapo uka va'ekue re, ha'e kuery rovai ndeayvu teĩ.

³⁵ Mba'eta ha'e kuery ma guetã py ikuai py, opa mba'e reme'ẽ va'ekue oguereko teĩ, vvy tuvixa ha'e iporã va'e ikuai aguã reme'ẽ va'ekue re ikuai teĩ ndevy pe ma ha'e kuery nda'ikuai, ndojeko rerovai guive mba'emo vai ojapoa gui.

³⁶ Ne'exa, aỹ ma nhoembiguai orekuai. Vvy oreramoĩ kuery mba'emo aju re okaru porã aguã reme'ẽ va'ekue re ae orekuai teĩ ha'e py voi nhoembiguai orekuai.

³⁷ Mba'emo aju iporãve va'e ma huvixa kuery orere rembopo'aka va'ekue pe remboaxa jepi rojevavypague kãuxa. Ha'e kuery oipotaa rami ae orerereko, orerymba kuery guive. Ha'e rami rã ore kuery rojexavai ete rokuapy — he'i.

Heta va'e kuery lei rupi ikuai aguã ojapo okuapyague

³⁸ Ha'e nunga ha'e javi rupi ore kuery rojapo rokuapy lei rupi ju orekuai aguã. Romoĩ atã aguã rombopara imoiny. Ha'e va'e re ma oreruvixa yvatekueve, levita ha'e sacerdote kuery ombopara imoiny guery.

10

¹ Kuaxia re guery ombopara va'ekue ma huvixa Hacialias ra'y Neemias, ha'e Zedequias,

² Seraías, Azarias, Jeremias,

³ Pasur, Amarias, Malquias,

⁴ Hatús, Sebanias, Maluque,

⁵ Harim, Meremote, Obadías,

⁶ Daniel, Ginetom, Baruque,

⁷ Mesulão, Abias, Miamim,

⁸ Maazias, Bilgai ha'e Semaías. Ha'e va'e kuery ma sacerdote ikuai.

⁹ Ha'e gui levita kuery ma Azanias ra'y Jesua, ha'e gui Henadade ramymino kuery Binui, Cadmiel,

¹⁰ tyvy kuery reve: Sebanias, Hodias, Quelita, Pelafas, Hanã,

¹¹ Mica, Reobe, Hasabias,

¹² Zacur, Serebias, Sebanias,

¹³ Hodias, Bani ha'e Beninu.

¹⁴ Ha'e gui heta va'e kuery ruvixa ikuai va'e ma Parós, Paate-Moabe, Elão, Zatu, Bani,

¹⁵ Buni, Azgade, Bebai,

¹⁶ Adonias, Bigvai, Adim,

¹⁷ Ater, Ezequias, Azur,

¹⁸ Hodias, Hasum, Bezai,

¹⁹ Harife, Anatote, Nebai,

²⁰ Magpias, Mesulão, Hezir,

²¹ Mesezabel, Zadoque, Jadua,

²² Pelatias, Hanã, Anaías,

²³ Oséias, Hananias, Hassube,

²⁴ Haloés, Pilha, Sobeque,

²⁵ Reum, Hasabna, Maaséias,

²⁶ Afás, Haná, Aná,

²⁷ Maluque, Harim ha'e Baaná.

²⁸ Ha'e gui heta va'e kuery mboae, sacerdote ha'e levita kuery, okê rarôa, oporai va'ety kuery, templo py omba'eapo va'ety, amboae vvy regua kuery gui oja'o va'ekue Nhanderuete guigua lei rupi ikuai aguã, ha'e gui ha'e kuery ra'yxy, gua'y ha'e guajy kuery reve, oendu kuaa va'e ha'e javive ma

²⁹ guyvy ha'e guyke'y kuery reve ojapo okuapy ha'e rami ikuai aguã. Ha'e rami vvy huvixa kuery yvatekueve ou vy oura reve ojapo okuapy Nhanderuete guigua lei rupi anho ikuai aguã, Nhanderuete rembiguai Moisés rupi oikuaa uka rire. Ha'e kuery ojee omôĩ SENHOR Nhanderuete ojapo uka va'ekue ojapopa aguã, oipotaa ha'e ijayvuague oeja va'ekue ha'e javi;

³⁰ ha'e gui vvy regua kuery re guajy kuery omomenda e'y aguã, neĩ ha'e kuery rajy kuery re ma voi gua'y kuery omomenda e'y aguã;

³¹ ha'e gui sábadô ára py vvy regua kuery guemiapio e'y vvy mba'emoaju ovende va'erã ogueru ramo ha'e kuery gui mba'eve ojogua e'y aguã sábadô ára py, neĩ ára mboae Nhanderuete peguarã omboaxa pyre py ma voi; ha'e gui sete ma'et'ya re omba'eapoa gui opytu'u aguã, ha'e mba'emo oiporuka va'ekue áryve omboekovieva e'y aguã.

³² Ha'e rami ae orerekorã romoĩ avi ma'et'ya nhavõ hatã'i va'e irundy grama ipoyikue rome'ê aguã Nhanderuete pegua opy omba'eapo va'e kuery peguarã,

³³ ha'e henonde mbojape omôĩ mbyrã ojapo aguã, mba'emoaju guigua ha'e mba'emo oapy pyrã ome'ê jepi aguã, sábadô pyguarã, ngaru jaxy pyau nhavõ guarã, ngaru ára oa'angaa ague py mba'emo ojapo aguã, mba'emo iky'a e'y va'erã ojapo aguã, jejavya re mba'emo ome'ê aguã, Israel kuery ojevavya oja'o uka aguã regua ome'ê aguã, ha'e Nhanderuete pegua oo pyguarã mba'emo ojapo aguã.

³⁴ Ha'e gui ore kuery regua sacerdote, levita ha'e heta va'e kuery ha'e javi reve roexa rokuapy xortea mava'e pa xakã Nhanderuete pegua opy ogueru aguã roikuaa aguã. Ma'et'ya nhavõ, ára oa'angaa ague py porã, peteĩ-teĩ regua orekuai rami vvy rogueru aguã xakã SENHOR Nhanderuete pegua altar áry oapy pyrã, lei re oĩa rami vvy.

³⁵ Ha'e gui ma'et'ya nhavõ oremba'ety gui rogueru aguã iporãgueve romono'õ ypy'i va'e, vvyra hi'a va'e gui jypy'igua guive SENHOR pegua opy guarã,

³⁶ ha'e jypygua orera'y oiko va'ekue, orerymba vaka kuery jypy oiko va'ekue guive rome'ê aguã lei re ipara oinya rami vvy, kavara ha'e vexe'i kuery ha'e rami ae avi jypy oiko va'ekue rogueru aguã Nhanderuete pegua opy, ha'e py sacerdote kuery omba'eapo va'e peguarã;

³⁷ ha'e gui romoapomo ypy va'ekue, ha'e mba'emoaju jypygua rome'ê avi aguã, opa marãgua vvyra'a gui, vinho ha'e azeite rogueru aguã sacerdote kuery pe Nhanderuete pegua opy. Ha'e gui oremba'ety gui oiko va'ekue guigua dízimo ma levita kuery pegua meme, mba'eta tetã oma'et'ya va'e ikuai va'e ha'e javi rupi ha'e kuery ae ikuai dízimo ojopy aguã rami.

³⁸ Sacerdote Arão ramymino va'e oĩ avi 'rã levita kuery dízimo ojopya py. Ha'e rã levita kuery ogueru 'rã dízimo Nhanderuete pegua opy ja'o mba'emo omôĩ porãaty py.

³⁹ Mba'eta ha'e va'e opy ja'o py ae Israel ha'e Levi ramymino kuery ogueru 'rã mba'emoaju ome'ê mbyre, vinho ha'e azeite. Mba'eta ha'e py ae 'rã ikuai mba'emo ryrũ henda iky'a e'y va'e pygua, sacerdote kuery voi ha'e py ae 'rã omba'eapo, okê rarôa ha'e oporaẽ va'ety kuery guive. Ha'e rami vvy 'rãe ndorerexarai Nhanderuete pegua oo gui.

11

Jerusalém py hekoa va'e kuery rery oĩa

¹ Heta va'e kuery ruvixa kuery yvatekueve ma Jerusalém tetã py ae ikuai. Ha'e rã amboae kuery ma oexa okuapy xortea ikuai aguã oikuaa aguã. Ha'e rami vvy dez ikuai va'e va'e gui peteĩ-teĩ ha'e kuery ogueru 'rã Jerusalém tetã iky'a e'y va'e py ikuai aguã, ha'e rã nove va'e ma amboae tetã rupi 'rã ikuai.

² Heta va'e kuery ima'endu'a porã avakue Jerusalém py hekoa aguã ooexa'i py oo va'ekue re.

³ Pova'e ma huvixa kuery ovvy re openaa rupi Jerusalém py ikuai va'e. Ha'e rã Judã regua tetã ikuai va'e rupi ma peteĩ-teĩ guekoa py ae ikuai, guetã rupi ae. Ha'e va'e kuery ma Israel kuery, sacerdote ha'e levita kuery, templo py omba'eapo va'ety ha'e Salomão rembiguai ramymino kuery.

⁴ Ha'e gui Jerusalém tetã py ae ikuai Judã ha'e Benjamim ramymino kuery va'e regua. Judã kuery va'e regua ma Ataías. Ha'e va'e ma Uzias ra'y, Uzias ma Zacarias ra'y, Zacarias ma Amarias ra'y, Amarias ma Sefatias ra'y, Sefatias ma Maalalel ra'y, Maalalel ma Perez ra'y.

⁵ Ha'e gui Maaséias ju. Ha'e va'e ma Baruque ra'y, Baruque ma Col-Hozé ra'y, Col-Hozé ma Hazaías ra'y, Hazaías ma Adaías ra'y, Adaías ma Joiaribe ra'y, Joiaribe ma Zacarias ra'y, Zacarias ma Siló pygua ra'y.

⁶ Perez ramymino kuery Jerusalém py ikuai va'e ha'e javi vvy ma quatrocentos e sessenta e oito avakue ipy'a guaxukueve.

⁷ Ha'e gui Benjamim ramymino kuery ma pova'e: Salu ma Mesulão ra'y, Mesulão ma Joede ra'y, Joede ma Pedaías ra'y, Pedaías ma Colaías ra'y, Colaías ma Maaséias ra'y, Maaséias ma Itiel ra'y, Itiel ma Jesaías ra'y.

⁸ Ha'e va'e rire jevyguia ma Gabai ha'e Salai. Ha'e javi vvy noventa e vinte e oito ikuai.

⁹ Zicri ra'y Joel ma ha'e kuery re opena va'e. Ha'e va'e rire ju Senua ra'y Judã voi opena avi 'rã tetã re.

- ¹⁰ Ha'e gui sacerdote kuery ma Joiaribe ra'y Jedaías, Jaquim
¹¹ ha'e Seraías. Ha'e va'e ma Hilquias ra'y, Hilquias ma Mesulão ra'y, Mesulão ma Zadoque ra'y, Zadoque ma Meraiote ra'y,
¹² Meraiote ma Aitube ra'y. Ha'e va'e ma Nhanderuete pegua opy re opena va'e. Guyvy kuery reve mba'emo ojapo okuapy templo py, oitocentos e vinte e dois ikuai. Ha'e gui Adaías ma Jeroão ra'y, Jeroão ma Pelalias ra'y, Pelalias ma Anzi ra'y, Anzi ma Zacarias ra'y, Zacarias ma Pasur ra'y, Pasur ma Malquias ra'y.
¹³ Tyvy kuery peteī-teī regua akã ikuai va'e reve ma duzentos e quarenta e dois ikuai. Ha'e gui Amasai ma Azarel ra'y, Azarel ma Azai ra'y, Azai ma Mesilemote ra'y, Mesilemote ma Imer ra'y.
¹⁴ Tyvy kuery avakue ipy'a guaxukueve ikuai va'e reve ma cento e vinte e oito ikuai. Ha'e kuery re opena va'e ma Gedolim ra'y Zabdíel.
¹⁵ Ha'e gui levita kuery ma Hassube ra'y Semaías. Hassube ma Azricão ra'y, Azricão ma Hasabias ra'y, Hasabias ma Buni ra'y.
¹⁶ Sabetai ha'e Jozabade ma levita kuery akã ikuai, Nhanderuete pegua oo roka rupi omba'eapo va'e kuery re opena va'e.
¹⁷ Ha'e gui Mica ra'y Matatias. Mica ma Zabdi ra'y, Zabdi ma Asafe ra'y. Ha'e va'e ma onhembo'e okuapya py jogueroporaēi 'rã. Ha'e gui Baquebuquias ma tyvy ju oiko. Ha'e va'e riregua ma Samua ra'y Abda. Samua ma Galal ra'y, Galal ma Jedutum ra'y.
¹⁸ Levita kuery tetã iky'a e'y va'e py ikuai va'e ha'e javi vy ma duzentos e oitenta e quatro.
¹⁹ Ha'e gui okê rarõa kuery ma Acube, Talmom ha'e tyvy kuery. Okê rarõa kuery ha'e javi vy ma cento e setenta e dois ikuai.

Judá regua tetã ikuai va'e rupi hekoa va'e kuery rery oĩa

- ²⁰ Ha'e gui Israel kuery mboae, sacerdote ha'e levita kuery mboae voi tetã Judá vyv re ikuai va'e rupi hekoa, peteī-teī ijyvyrã oēja pyre py.
²¹ Templo py omba'eapo va'e kuery ma Ofel py ikuai. Ha'e va'e kuery re opena va'e ma Zia ha'e Gispa.
²² Ha'e gui levita kuery Jerusalém py ikuai va'e re opena va'e ma Bani ra'y Uzi. Ha'e gui Bani ma Hasabias ra'y, Hasabias ma Matanias ra'y, Matanias ma Mica ra'y, Mica ma Asafe ra'y kuery Nhanderuete pegua opy oporai va'e regua.
²³ Mba'eta ha'e kuery omba'eapo aguã re huvixa ae ijayvu, jogueroporaēi va'e kuery pe voi oēja avi ko'ê nhavõ ojapo aguã.
²⁴ Ha'e gui Judá regua Mesezabel ra'y Petaías, Zera ramymino va'e ma huvixa ojapo ukaa rami oiko, heta va'e kuery re opena ha'e javi rupi.

Tekoa ikuai va'e rupi hekoa va'e kuery rery oĩa

- ²⁵ Ha'e gui amongue Judá ramymino kuery hekoa okuapy imba'ety katy'i tekoa ikuai va'e py: Quiriate-Arba ha'e ha'e'i rupi tekoa ikuai va'e py, Dibom ha'e Jecabzeel ha'e ha'e'i rupi tekoa ikuai va'e py voi,
²⁶ ha'e gui Jesua py, Moladá, Bete-Pelete,
²⁷ Hazar-Sual, ha'e gui Berseba ha'e ha'e'i rupi tekoa ikuai va'e py,
²⁸ Ziclague py, ha'e Mecona ha'e ha'e'i rupi tekoa ikuai va'e py,
²⁹ En-Rimom py, Zorá, Jarmute,
³⁰ Zanoa, ha'e Adulão, Laquis ha'e Azeca ha'e ha'e'i rupi tekoa ikuai va'e py. Berseba guive Hinom vyvugua peve ha'e kuery ikuai.
³¹ Ha'e gui Benjamim ramymino kuery ma Geba tekoa py ikuai, Micmás, Aia, Betel ha'e ha'e'i rupi tekoa ikuai va'e py voi,
³² Anatote, Nobe, Ananias,
³³ Hazor, Ramá, Gitaim,
³⁴ Hadide, Zeboim, Nebalate,
³⁵ Lode, Ono, ha'e gui vyvugua mba'emo apoa kuery ikuai py.
³⁶ Ha'e gui levita kuery va'e regua ma Judá ha'e Benjamim re ikuai.

12

Jerusalém py sacerdote kuery ou va'ekue rery oĩa

- ¹ Pova'e ma sacerdote ha'e levita kuery Sealtiel ra'y Zorobabel reve ojevvy ju va'ekue, Jesua reve voi: Seraías, Jeremias, Esdras,
² Amarias, Maluque, Hatus,
³ Secanias, Reum, Meremote,
⁴ Ido, Ginetoi, Abias,
⁵ Miamim, Maadías, Bilga,
⁶ Semaías, Joiaribe, Jedaías,
⁷ Salu, Amoque, Hilquias ha'e Jedaías. Ha'e va'e kuery ma Jesua oĩ jave sacerdote kuery re opena va'ekue, guyvy kuery re voi.
⁸ Ha'e levita kuery regua ikuai avi Jesua, Binui, Cadmiel, Serebias, Judá ha'e Matanias. Ha'e va'e ma guyvy kuery reve jogueroporaēi va'e.
⁹ Ha'e va'e kuery vy'yry ma tyvy kuery Baquebuquias ha'e Uni ikuai, peteī-teī ojapo aguã va'ekue py ae.
¹⁰ Ha'e gui Jesua ra'y ma Joiaquim, Joiaquim ra'y ma Eliasibe, Eliasibe ra'y ma Joiada,

¹¹ Joiada ra'y ma Jônatas, Jônatas ra'y ma Jadau.

¹² Sacerdote Joiacquim oĩ jave py sacerdote peteĩ-teĩ regua akã ma pova'e: Seraías ramymino kuery akã ma Meraías, Jeremias ramymino kuery akã ma Hananias,

¹³ Esdras ramymino kuery akã ma Mesulão, Amarias ramymino kuery akã ma Joanã,

¹⁴ Maluqui ramymino kuery akã ma Jônatas, Sebanias ramymino kuery akã ma José,

¹⁵ Harim ramymino kuery akã ma Adna, Meraiote ramymino kuery akã ma Helcai,

¹⁶ Ido ramymino kuery akã ma Zacarias, Ginetom ramymino kuery akã ma Mesulão,

¹⁷ Abias ramymino kuery akã ma Zicri, Miniamim ha'e Moadias ramymino kuery akã ma Piltai,

¹⁸ Bilga ramymino kuery akã ma Samua, Semaías ramymino kuery akã ma Jônatas,

¹⁹ Joiaribe ramymino kuery akã ma Matenai, Jedaías ramymino kuery akã ma Uzi,

²⁰ Salai ramymino kuery akã ma Calai, Amoque ramymino kuery akã ma Héber,

²¹ Hilquias ramymino kuery akã ma Hasabias, Jedaías ramymino kuery akã ma Natanael.

²² Ha'e gui levita kuery va'e regua Eliasibe oĩ jave py pova'e kuery rery omboparaa peteĩ-teĩ regua akã ikuai ramo: Joiada, Joanã ha'e Jadau, sacerdote kuery rery omboparaague rami avi, Pérsia pygua huvixarã Dario oĩ peve.

²³ Levi ramymino kuery peteĩ-teĩ regua akã rery omboparaa kuaxia huvixa kuery rekokie oĩa re, Eliasibe ra'y Joanã oĩ peve.

²⁴ Ha'e gui levita kuery va'e regua akã ma Hasabias, Serebias ha'e Cadmiel ra'y Jesua. Ha'e va'e kuery guyyv kuery reve ikuai jogueroporaí ha'e ombojerovia aguã Nhanderuetete rembiguai Davi ojeague rami vy, jorire rire oporaí aguã rami ikuai.

²⁵ Ha'e okẽ rarõa kuery ma Matanias, Baquebuquias, Obadias, Mesulão, Talmom ha'e Acube. Ha'e va'e kuery okẽ katy'i mba'emo omoĩ porãaty oĩ va'e oarõ avi okuapy.

²⁶ Ha'e va'e kuery ma Jesua ra'y Joiacquim, Jozadaque ramymino oĩ jave py ikuai, Neemias huvixa oĩ jave, ha'e Esdras sacerdote ha'e lei re nhombo'e va'ety oĩ jave voi.

Nhanderuetete po py tetã kora omboaxa okuapyague

²⁷ Ha'e gui Jerusalém tetã kora Nhanderuetete po py omboaxa aguã ma oeka okuapy levita kuery opa rupi ikuai guí oupa aguã, ovy'a reve kora omboaxa aguã, mboraeí py, hy'a pu, mbaraka ha'e ixã reta va'e py guive.

²⁸ Ha'e ramo oporaí va'ety ra'y kuery voi oupa okuapy Jerusalém katy'i ovyv itui va'e gui, netofatita kuery rekoa ikuai va'e gui voi,

²⁹ ha'e gui Bete-Gilgal, Geba ha'e Azmavete katy'i vyv itui va'e gui, mba'eta oporaí va'ety kuery ma guekoarã Jerusalém vyvry rupi ae ojou rire.

³⁰ Ha'e gui sacerdote kuery ojeky'a'o ukapa okuapy, levita kuery guive. Oiky'a'o avi heta va'e kuery, tetã rokẽ ha'e kora guive.

³¹ Ha'e gui ma xee ajapo Judá pygua huvixa kuery yvatekueve ojeupipa aguã kora áry. Mokoĩ henda rupi ajapo oporaí va'e kuery ojerojy jogueravy aguã rami. Peteĩ regua ma kora áry rupi ojerojy aiporu kuaa regua re Yty Renda Rokẽ katy.

³² Ha'e kuery rakykue rupi ma Hosaías ha'e Judá regua yvatekueve mbytekue oje'oi nhoguenoiny,

³³ ha'e gui Azarias, Esdras, Mesulão,

³⁴ Judá, Benjamim, Semaías ha'e Jeremias.

³⁵ Ha'e gui sacerdote ra'y kuery mimby guaxu revegua oje'oi avi va'e ma Jônatas ra'y Zacarias. Jônatas ma Semaías ra'y, Semaías ma Matanias ra'y, Matanias ma Micaías ra'y, Micaías ma Zacur ra'y, Zacur ma Asafe ra'y.

³⁶ Tyvy kuery oje'oi avi va'e ma Semaías, Azareel, Milalai, Gilalai, Maai, Natanael, Judá ha'e Hanani, mba'epu Nhanderuetete rembiguai Davi ojea va'ekue revegua. Ha'e kuery renonde ma lei re nhombo'e va'ety Esdras oo oiny.

³⁷ Yakã Ryapy Rokẽ katy oẽ jogueravy tape pyrõ-pyrõa'i Davi rekoague katy oo va'e rupi. Ha'e py ma kora oaxa 'rã ovy Davi rogue áry rupi Yakã Rokẽ oĩ va'e peve, kuaray oua katy.

³⁸ Ha'e gui jevygua oporaí va'e kuery ma ha'e kuery rovai katy rupi oje'oi. Heta va'e kuery mboae oje'oi avi kora áry rupi Torre Tatakua hi'aia guive Kora Ipyve 'ea va'e peve.

³⁹ Ha'e gui Efraim regua Rokẽ guive oaxa jogueravy Okẽ Yma ha'e Pira Rokẽ oĩ va'e áry rupi. Ha'e gui Hananel Torre rupi oaxave vy Cem Torre rupi avi oaxa Vaka Rokẽ peve. Ha'e gui opytapa Okẽ Rarõa 'ea va'e py.

⁴⁰ Ha'e gui oporaí va'e kuery jovaive rupi gui ou va'ekue opytapa Nhanderuetete pegua oo py, xee voi, xereve huvixa kuery mbytekue oje'oi va'ekue guive.

⁴¹ Sacerdote kuery Eliaquim, Maaséias, Miniamim, Micaías, Elieoenai, Zacarias ha'e Hananias ma mimby guaxu reve oje'oi,

⁴² Maaséias, Semaías, Eleazar, Uzi, Joanã, Malquias, Elão ha'e Ezer guive. Ha'e gui oporaí va'e kuery ma Jezraías ogueroporaí rã oporaí nhendu okuapy.

⁴³ Ha'e va'e ára ae avi mymba kuery heta ete oapy vy ome'ẽ okuapy ovy'a reve, Nhanderuetete ombovy'a ete ramo. Kunhague ha'e kunumigue ovy'apa avi okuapy. Mombyry rupi peve oendua Jerusalém tetã py ovy'a reve oporaí va'e.

Sacerdote ha'e levita kuery pegua ome'ẽa aguã re ijavyvague

⁴⁴ Ha'e va'e árave omoia avakue templo ropy ja'o mba'emo porágue omoí poráaty re opena va'erã. Ha'e py ma mba'emo ome'ê mbyre, hi'a ypy'i va'ekue regua iporágueve ha'e dízimo guive omoí porãa. Ha'e py ae ha'e kuery omono'ô 'rã tetã ikuai va'e gui sacerdote ha'e levita kuery peguarã ome'êa va'erã lei oia rami vy. Ha'e ramo Judá kuery ovy'apa okuapy ha'e py sacerdote ha'e levita kuery opena ramo.

⁴⁵ Mba'eta ha'e kuery omba'eapo 'rã Nguuete pe anho, mba'emo oiky'a'o 'rã guive, oporaei va'e ha'e okê rarõa kuery rami ae avi, Davi ha'e ta'y Salomão ojapo ukaague rami vy.

⁴⁶ Mba'eta ymave rupi Davi ha'e Asafe oiko jave voi ikuai avi raka'e oporaei va'e kuery re opena va'e, jogueroporaei, ha'e Nhanderuete rerovy'aa kuery re opena va'e.

⁴⁷ Ha'e nunga rupi Zorobabel ha'e Neemias oí jave voi Israel kuery pavê ome'ê 'rã okuapy jogueroporaei va'e ha'e okê rarõa kuery pe ko'ê nhavõ ho'u va'erã. Ha'e kuery ome'ê avi 'rã levita kuery peguarã oipe'a pyre, ha'e gui levita kuery ju 'rã ome'ê Arão ramymino kuery peguarã.

13

Israel kuery mbyte gui amboae regua oipe'apaa ague

¹ Ha'e va'e ára ma heta va'e kuery pe ogueroayvua Moisés ombopara va'ekue. Ha'e va'e re ojou "Amonita ha'e moabita kuery Nhanderuete pegua kuery re nda'evei ae onhemoirũ aguã" he'ia oia,

² mba'eta ha'e va'e kuery ndogueraai raka'e tembi'u ha'e yy Israel kuery ovaexi aguã. Ha'e rami 'rãgue py Balaão pe opaga okuapy Israel kuery rovai ijayvu vai aguã re. Ha'e rami tei ijayvu vaikue 'rãgue py Nhanderuete ojapo ogueroayvu porã aguã rami.*

³ Ha'e va'e lei heta va'e kuery oendu vy Israel kuery mbyte gui oipe'a imondovy amboae regua ha'e javi.

Templo gui Tobias oipe'aa ague

⁴ Ha'e va'e e'y mbove ma sacerdote Eliasibe onhemoirũ Tobias kuery re, Nhanderuete pegua opy mba'emo re opena aguã omoia tei.

⁵ Ha'e rami vy Tobias pe omboaxa petei opy ja'o tuvixa va'e mba'emoaju ome'ê mbyre omoí poráaty va'ekue, ha'e heakuã porã va'e, mba'emo ryrur, dízimo mba'emo ra'yí guigua, vinho ha'e azeite guigua omoí porã aty. Ha'e nunga ma levita kuery peguarã ome'ê ukaa va'ekue, oporaei va'ety, okê rarõa ha'e sacerdote kuery peguarã avi.

⁶ Ha'e nunga oiko Jerusalém tetã py xee naí jave, mba'eta trinta e dois ma'et'y re ma Babilônia pygua huvixa Artaxerxes oí jave py ha'e oia katy aa rire. Ha'e gui kieve ma rire huvixa pe ajerure Jerusalém py ajeyvu ju aguã.

⁷ Ha'e gui mae ma aendu Eliasibe mba'emo vai ojapoague Tobias ombopy'a porãxe vy, mba'eta ixupe omboaxa opy ja'o Nhanderuete pegua oo roka py.

⁸ Ha'e nunga aendu vy xevai vaipa reve opy ja'o gui amombopa Tobias mba'e rei-rei.

⁹ Ha'e rami vy opy ja'o ikuai va'e aiky'a'o ukapa vy ha'e py aru rukapa ju tembiporu Nhanderuete pegua opyguã, mba'emoaju ome'ê mbyre, heakuã porã va'e guive.

Levita kuery pegua ome'êa jevyague

¹⁰ Ha'e gui aendu avi levita kuery peguarã nome'êaveia. Ha'e nunga rupi levita ha'e jogueroporaei va'e kuery Nhanderuete pe omba'eapo aguã omoí mbyre tei oejapa ma ra'e oje'oivy petei-tei guekoa katy.

¹¹ Ha'e rami vy huvixa kuery pe xeyavu vy aipoa'e:

— Mba'e re tu napenavei ri Nhanderuete pegua oo re? — ha'e. Ha'e rami vy levita kuery teigue ju aru vy amoí ju ojapo aguã va'ekue py.

¹² Ha'e ramo Judá regua kuery ha'e javi ogueru ju okuapy dízimo mba'emo ra'yigue guigua omoí poráaty py, vinho ha'e azeite guigua guive.

¹³ Ha'e gui mba'emo ome'ê mbyre re opena va'erã amoí sacerdote Selemias, kuaxia re omba'eapo va'e Zadoque ha'e levita Pedafias. Ha'e kuery pytyvõarã amoí avi Zacur ra'y Hanã, Matanias ramymino va'e. Mba'eta ha'e va'e kuery ma pavê oikuaa ojeroviapy memea. Ha'e ramo ha'e kuery pe amboja'o uka tyvy kuery peguarã.

¹⁴ Ha'e nunga rupi Xeruete, nema'endu'a ke xere. Embogue eme guive mba'emo ndee Xeruete pegua oo re ajapo porãague, ha'e py omba'eapo va'e kuery pe guive.

Sábado ára omboetea jevy aguã re ijayvuague

¹⁵ Ha'e va'e jave Judá py aexa avi sábado ára py tei uva onhami va'e, trigo py kavaju ombovoyi heruvy va'e guive. Ha'e gui vinho, uva, figo ha'e opa mba'e rei sábado ára py tei ogueru avi 'rã Jerusalém tetã katy. Ha'e kuery pe xeyavu ete ha'e va'e ára py tembi'u ovende okuapy rã.

¹⁶ Ha'e gui Jerusalém py ikuai avi avakue Tiro tetã guigua. Ha'e va'e kuery ma sábado ára tei ogueru 'rã okuapy pira ha'e opa mba'e rei Judá kuery pe ovende va'erã, Jerusalém tetã rupi guive.

¹⁷ Ha'e rami vy Judá regua huvixa kuery pe xeyavu vy aipoa'e:

— Mba'e re tu mba'emo vai rive pejapo sábado ára pemongy'aa rupi?

¹⁸ Peneramoí kuery ha'e ramigua ojapo rire e'y nda'u nhandere Nhanderuete ombou raka'e opa mba'e vai, kova'e tetã re guive? Ha'e ramive ma poxya tuvixave va'e ju pejapo Israel áry ou aguã, sábado ára pemongy'aa py — ha'e.

* 13:2 Balaão rekokie omombe'ua ma jaexa 'rã Deuteronômio 23.3-5 ha'e Números 22-24 py.

¹⁹ XeaYvu avi Jerusalém kora rokê sábadu ára ovaê ta nhavô ombotya aguã kuaray'ã ojero'a ramove, ha'e gui sábadu ára oaxa e'ÿa ja oipe'aa jevy e'ÿ aguã. Okê py amoí avi xerembiguaí kuery, sábadu ára peteíve ivoyi revegua omoinge e'ÿ aguã.

²⁰ Ha'e gui ma mokoígue mba'emo vendea ha'e ijoguaa kuery ipytü okuapy Jerusalém roka rupi.

²¹ Ha'e ramo ha'e kuery pe xeaYvu vy aipoa'e:

— Mba'e re tu penepytü rive pekuapy tetã kora yvýry? Ha'ekue rami ju pejapo ramo rombo'a 'rã — ha'e. Ha'e va'e rire ma ha'e kuery ndouvei sábadu ára py.

²² Ha'e gui levita kuery reve xeaYvu kora rokê oiky'a'o ju aguã, ha'e ou vy oarô aguã, sábadu ára iky'a e'ÿ va'e opyta aguã. Ha'e nunga rupi voi Xeruete, nema'endu'a ke xere. Xeperdoa avi opa mba'e py renhomoaxy va'e vy.

Amboae regua re omenda va'ekue pe ijayvuague

²³ Ha'e va'e jave aexa avi Asdode guigua kunhague re judeu kuery omenda va'ekue, Amom ha'e Moabe guigua re guive.

²⁴ Ta'y kuery ma Asdode pygua ayvu py ijayvu vai-vai okuapy, nhande judeu ayvu py nda'ijayvu kuaai, amboae regua ayvu py anho rive.

²⁵ Ha'e nunga rupi ha'e kuery amongeta ete vy xeaYvu vai, amondyi ete amongue, ha'e kuery regua'a voi amondoro. Ha'e vy Nhanderuete rery py aura reve aipoa'e:

— Pemomendave eme ta'vy penderajy kuery amboae regua ra'y kuery re. Peruve eme guive ha'e kuery rajy kuery pendera'y kuery ra'yxyrã, neí pendera'yxyrã eteve voi.

²⁶ Ha'e nunga py e'ÿ ri ty'y Israel kuery pegua huvixa Salomão ojevavy raka'e? Huvixa ha'e va'e ramigua ete ndoikoi raka'e vyv regua kuery mbovy e'ÿ mbyte rupi, tuuete rembiayvu oiko avi, Nhanderuete ae omoí va'ekue huvixarã Israel kuery ha'e javi re opena aguã. Ha'e ramive ma amboae regua kunhague oguerovejavy raka'e.

²⁷ Ha'e gui mba'exa tu roendu ha'e rami ete ha'eve'ÿ va'e pejapoa? Mba'eta Nhanderuete rovai anhetê rupi e'ÿ pendekuai amboae regua kunhague re pemendaa py — ha'e.

²⁸ Ha'e gui ma peteí ava sacerdote Joiada ra'y, Eliasibe ramymino va'e ma horonita pygua Sambalate rajy me oiko. Ha'e nunga rupi xee amoxê aía gui.

²⁹ Xeruete, eikuaa pota ha'e kuery re, mba'eta omongy'apa sacerdote ikuai regua, sacerdote ha'e levita kuery rekorã reja va'ekue guive.

Neemias joquereko kuaa jevyague

³⁰ Ha'e rami py heta va'e kuery aiky'a'opa amboae regua kuery re onhemoirüague gui. Ha'e rami vy amoí ju sacerdote ha'e levita kuery peteí-teí ojapo 'rã va'ekue py omba'eapo aguã.

³¹ Ha'e gui ára oa'angaague py porã kakã oguerua aguã re xeaYvu, ha'e mba'emo aju ypy'i va'ekue regua iporãgueve ome'êa aguã re. Xeruete, nema'endu'a ke xere aiko porã aguã.

Ester rekokue oia Ester rekokue oia

Judeu kuery pavê e'ÿ ojevuy raka'e Judá vyv re. Heta ete opyta Babilônia ha'e Pérsia vyv re. Ha'e va'e kuery regua ma Ester oiko raka'e, Pérsia regua Susã tetã py.

Ester ma kunha iporã ete va'e ramo huvixave oguerovy'a vy ogueraa gua'yxyrã. Ha'e rami rã oendu omombe'ua rã petei ava heko vai va'e Hamã hery va'e judeu kuery ha'e javive ojuka ukaxe. Huvixa eteve voi ixupe ojuka uka, ndoikuaii vy gua'yxy Ester ae judeu oikoa. Ha'e nunga Ester oikuaa vy huvixa renonde ojerure guetarã kuery ogueraa jepe aguã re. Jeayvuveikue'i py e'ÿ ojerure huvixa pe, guenonde py noenoí ramo. Ha'e rami tei Ester mongakaare aipoe'i uka ixupe: "Huvixa ro py ndee reiko va'eri exa'ã eme ndee anho'i reo jepe aguã re, ore judeu kuery mboae orejukapaa tei. Mba'eta ha'e rami ete oiko taa ára rekyriiri ri ramo amboae henda gui ju 'rã oiko judeu kuery pytyvõarã ha'e heraa jepearã. Ha'e rã ndee ma rekanhy 'rã nderu ro pygua kuery ha'e javi reve. Xapy'a rei nhi'ã ha'e rami aguã ae nemoia raka'e huvixa ra'yxyrã" he'i uka. Ester ombovai: "Tereo ha'vy, emboatypa judeu kuery Susã tetã py ikuai va'e ha'e javi. Pekarú e'ÿ re pendekuai xere pejerure vy. Mboapy ára re pe'u eme mba'eve, pey'u eme guive, ara py ha'e pyávy. Xee voi xerembiguai kuery reve rokaru e'ÿ re avi 'rã orekuai. Ha'e va'e rire ma aa 'rã huvixa oia py, lei oi va'e rovai tei ae ma. Xapy'a rei xejukaa aguã rami ri rã amano 'rã", he'i (4.13-16).

Huvixa renonde py Ester ou ramo omovaẽ porã, ojapo guive ojerureague. Ha'e rami rã judeu kuery ndojukaai raka'e. Ojukaa va'e ma ijukaxearé kuery anho. Ha'e rami rã judeu kuery ovy'a vaipa okuapy, Nhanderueté ogueraa jepe ramo.

Huvixa Assuero ngaru tuvixa va'e ojapoague

¹ Huvixa Assuero ma Índia guive Etiópia peve opena oikovy cento e vinte e sete vyv oi va'e re. Ha'e va'e jave py

² huvixa Assuero tenda openaaty áry oguapy oiny Susã tetã py oo yvateve va'e oi va'e py.

³ Mboapy ma'et'ya re ma huvixa oi jave ojapo petei ngaru ojeupegua kuery yvatekueve ha'e guembiguai kuery ha'e javi pe. Ha'e kuery ma Pérsia ha'e Média pygua ipo'akave va'e. Ha'e ramo yvatekueve ha'e hembigui kuery vyv ikuai va'e re opena va'e oupa vy henonde ikuai.

⁴ Ha'e kuery pe huvixa oexa uka iporãgueve ha'e hepykueve openaa rupi ogueroko va'e, yvate ete va'e vy iporãa guive. Heta ára ma ikuai, cento e oitenta ára peve.

⁵ Ha'e gui ha'e va'e ára opa ma rire huvixa ojapo petei ngaru tuvixa va'e. Susã tetã py oo yvateve va'e oi va'e py ojapo tetã pygua kuery ha'e javi pe, yvatekueve ha'e yvyigieve pe guive. Sete ára re ojapo ngoka py yvotyty oi va'e py.

⁶ Ha'e py ma omoia ajukue xií ipereri'i va'e ha'e púrpura regua, ixã ipereri'i va'e ha'e púrpura py ojokua pyre. Ha'e va'e ma inhapyi va'e prata guigua re ojokuaa, oo yta ita alabastro guigua hi'ái va'e re guive. Tenda ikuai va'e ma ouro ha'e prata guigua py ombojeguaa. Pyrõa ma ita xií, mármore, alabastro ha'e ita iporãve va'e guigua anho.

⁷ Ha'e kuery oy'u aguã ogueru ruka karo ouro guigua joegua e'ÿ-e'ÿ py. Heta avi oi vinho huvixa pegua anho rei, huvixa ome'ëxa'i py ome'ë va'ekue.

⁸ Ha'e ramo huvixa oipotaa rami vy ha'e kuery oy'uxea rami oy'u okuapy, mba'eta ngoo rupi opena va'e kuery ha'e javi pe huvixa ijayvu petei-tei oy'uxea rami ome'ë aguã re.

⁹ Huvixa Assuero ro py ta'yxy Vasti voi ojapo avi ngaru tuvixa va'e kunhague pegua anho.

Ngarua py huvixa ra'yxy Vasti ndouxéiague

¹⁰ Sete araa py huvixa opy'a re vinho gui ovy'a anho rei. Ha'e rami vy ijayvu guembiguai kuery Meumã, Bizta, Harbona, Bigtã, Abagta, Zetar ha'e Carcas pe. Ha'e va'e avakue sete-ve va'e ma eunuco meme ikuai huvixa Assuero renonde rupi omba'eapo va'e.

¹¹ Ha'e va'e kuery pe huvixa ijayvu henonde py ogueru aguã ta'yxy Vasti akã regua reve, iporã ete ramo amboae regua kuery ha'e yvatekueve ikuai va'e ha'e javi oexa aguã.

¹² Ha'e rami tei huvixa ra'yxy Vasti ma sete-ve eunuco kuery ijayvua rami e'ÿ ndouxéi, huvixa ayvu ae ha'e kuery omombe'u tei. Ha'e rami rã huvixa oendu vy ojou vai, ipoxy vaipa guive.

¹³ Ha'e gui ma huvixa oporandu hi'arandu va'e kuery ára nhavõ mba'emo oikuaa porã va'e pe, (mba'eta ha'e rami ae 'rã huvixa oikuaa pota uka lei oia rami oikuaapa va'e kuery pe.

¹⁴ Ha'e va'e regua irú kuery ae'ive va'e ma kova'e: Carsena, Setar, Admata, Tãrsis, Meres, Marsena ha'e Memucã. Ha'e va'e sete-ve ma Pérsia ha'e Média pygua yvatekueve ikuai. Yvateve va'e vy huvixa renonde ikuai riaa, openaa rupi oguapy avi 'rã okuapy.)

¹⁵ Ha'e gui ha'e kuery ma lei oia rami vy jogeroayvu okuapy mba'exa pa huvixa Assuero gua'yxy Vasti re ojapo aguã re, huvixa ayvu eunuco kuery omombe'u rã ndojapoi rire.

¹⁶ Ha'e gui ma Memucã aipoe'i huvixa ha'e yvatekueve va'e renonde py:

— Oreruvixa, ndera'yxy Vasti ma nderovai anho e'ÿ ojapo vai, ha'e javi regua yvatekueve ndee huvixa Assuero openaa ha'e javi rupi ikuai va'e rovai guive.

¹⁷ Mba'eta ndera'yxy oikoague regua ma kunhague ikuai va'e ha'e javi oendupa 'rã. "Huvixa Assuero oia py gua'yxy Vasti oenoí uka tei ndou", 'ea rã oendu vy nomboeteveipa 'rã ome kuery.

¹⁸ Ange ma voi kunhague Pérsia ha'e Média pygua yvatekueve ma ndera'yxy oikoague oendupa vy ha'ekue rami ae ju 'rã ijayvu nerembiguai yvatekueve va'e pe. Ha'e rami rã heta 'rã ikuai nhomboetea rupi ve'ÿ, joupe ivaia rupi guive.

¹⁹ Ha'e gui ndee xeruvixa, rejou porã ri vy embopara uka peteï ayvu Pérsia ha'e Média pygua lei reguarã, ombovaipa pyrã e'ÿ. Ha'e va'e re toï ndee huvixa Assuero renonde py ta'yxy Vasti ndouvei aguã, ha'e ndera'yxy oikoague gui oi'pe'aa vy amboae kunha ha'eveve va'erã pe ome'ëa aguã.

²⁰ Oreruvixa, ha'e va'e ayvu repenaa ha'e javi rupi remombe'u uka rã oikuaapa ramo pavê kunhague omboete 'rã okuapy ome, yvatekueve ha'e yvygüeve guive — he'i.

²¹ Ha'e ramo ha'e va'e ayvu huvixa ojou porã, yvatekueve ikuai va'e avi. Ha'e rami vy ojapo Memucã jayvuague rami.

²² Ha'e rami vy kuaxia huvixa ombopara uka ma vy omondouka openaa ha'e javi rupi. Peteï-teï vyv re ikuai va'e pe ombopara okuapy ha'e kuery oexa kuaa aguã rami, peteï-teï regua ayvu py ombopara, peteï-teï ava ngoo pygua kuery re ipo'aka aguã, ha'e guetarã kuery ayvu py ae ijayvu aguã.

2

Ester ju huvixa gua'yxyrã oiporavoague

¹ Ha'e va'e rire huvixa Assuero opoxya noenduvei ma vy ima'endu'a ju Vasti oikoague re, ha'e hexe ombopara uka va'ekue re.

² Ha'e ramo ixupe aipoe'i okuapy hembiguai kunumigüe:

— Oreruvixa, toguerua nerenonde kunhataigüe'i iporãgueve va'e anho.

³ Tove repenaa ha'e javi rupi tomoïa ha'e nunga re opena va'erã, kunhataigüe'i iporãgueve va'e anho tomboatypa, Susã tetã py oupa aguã. Kunhague ro py ae toupa, nerembiguai eunuco Hegai kunhague ro rarõaty va'e opena aguã. Ha'e gui ma ha'e kuery pe tome'ë pïre poã.

⁴ Ha'e gui oreruvixa, kunhataï rexa vy reayvuve va'e rei tema toï Vasti rekovia — he'i. Ha'e rami ijayvu ramo huvixa ojou porã. Ha'e vy ojapo uka ha'e rami ae.

⁵ Ha'e gui ma Susã tetã py oiko peteï ava judeu, Benjamim ramymino va'e, Mordecai hery va'e, Jair ra'y, ha'e Quis ra'y Simeï ramymino va'e.

⁶ Ha'e va'e ma Jerusalém tetã gui escravo-rã ogueraapa pyre regua. Babilônia pygua huvixa Nabucodonosor ae ogueraa uka va'ekue Judã pygua huvixa Jeconias kuery reve.

⁷ Ha'e va'e ava ma omongakuaa otuty rajy ae'i Hadassa. Ha'e va'e ma Ester hery mboae, tuu ha'e ixy ve'ÿ va'e, kunhataï porã. Tuu ha'e ixy nda'ïpovei ma ramo Mordecai ogueru va'ekue guajy ae'i rami omongakuaa aguã.

⁸ Ha'e gui ma huvixa ojapo uka va'ekue, ixuguigua lei omombe'upaa ramo heta omboaty heruvy kunhataigüe'i anho Susã tetã py oo yvateve va'e oï va'e py, Hegai opena aguã. Ha'e va'e kuery reve Ester voi herua huvixa ro py, kunhague re opena va'ety Hegai opena aguã py.

⁹ Ha'e va'e ma kunhataï oexa rã iporã vaipa, ojou porãa aguã rami oiko guive. Ha'e ramo Ester pe ojapura pïre poã ogueru aguã, tembï'u ho'u va'erã guive. Hembiguairã ome'ë avi sete kunhataigüe oiporavo pyre huvixa ro py ikuai va'e. Ha'e vy hembiguai kunhataigüe reve omboaxapa kunhague pegua opy ja'o ha'eveve py.

¹⁰ Ha'e va'e jave py Ester nomombe'u porã teri hetarã kuery mava'e regua pa ikuai, neï imongakuaa re, Mordecai nomombe'u ukai rere.

¹¹ Ha'e gui ko'ë nhavõ Mordecai ou 'rã kunhague ikuai roka py, oikuaa pota 'rã Ester oiko porã paa, ha'e mba'e pa hexe oiko 'rãa re.

¹² Ha'e gui doze jaxy re ma kunhague rekorã va'ekue oïa rami vy openambaa ma rire ova'ë ta ma ára peteï-teï kunhataï huvixa Assuero oïa py ojexa uka aguã. (Mba'eta ha'e rami ae 'rã oiko kunhague onhemoatyrõa ára ojeupitypa peve. Mboapy memea jaxy re azeite mirra guigua oikyty 'rã ojee, ha'e gui mboapy memea jaxy re ju amboae regua heakuã porã va'e ha'e kunhague pegua pïre poã ae 'rã oikyty.)

¹³ Ha'e gui ma peteï-teï kunhataï ova'ë 'rã huvixa oïa py. Kunhague ikuai gui huvixa ro katy oo ta ramo peteï-teï ome'ëa 'rã ogueraaxe va'e rei.

¹⁴ Ka'arukue ma oïke 'rã opy, ha'e rã aje'ivekue ma oo ju 'rã amboae py kunhague ikuai aguã py. Ha'e va'e py huvixa rembiguai eunuco Saasgaz ju opena 'rã oïkovy ta'yxy jevy kuery ikuai va'e re. Ha'e pygua kunhague neï peteïve ndouvei ju 'rã huvixa oïa py, huvixa oïpota vy hery rupi ae oenoï uka e'ÿa ja.

¹⁵ Ha'e gui ova'ë ma Ester ju huvixa oïa py oo aguã. Ha'e ma Mordecai ryvy Abiail rajykue'i, guajy ae'i rami omongakuaa va'ekue. Ha'e gui oo ta ma vy ha'e ae ndojerurei mba'eve ogueraa va'erã re, huvixa rembiguai eunuco Hegai kunhague ro rarõaty va'e ogueraa uka va'e anho ogueraa. Ha'e rami vy Ester rexa kuery ha'e javi ojou porã rei okuapy.

¹⁶ Ha'e rami py huvixa Assuero ro py heraa Ester. Dez jaxy tebete 'ea va'e py ogueraa, sete ma'etÿ re ma huvixa opena oiny jave.

¹⁷ Ha'e gui huvixa ma kunhague mboae gui oayvuve Ester. Kunhataigüe'i mboae huvixa oïa py ou va'e ha'e javi gui ojou porãve, oayvuve ete. Ha'e rami vy inhakã re akã regua ouro guigua huvixa omoï reve Vasti rekovia ogueru gua'yxyrã.

¹⁸ Ha'e gui ma huvixa ojapo peteï ngaru tuvixa va'e ojeupeguia kuery yvatekueve ha'e guembiguai kuery ha'e javi pe. Ester peguarã ae ojapo ngaru. Ha'e rami vy openaa ha'e javi rupi oikuaa uka pavê opytu'u aguã ára, ha'e huvixa ome'ëxea'ï py mba'emo ome'ë rive pavê pe.

¹⁹ Ha'e gui mokoïguea kunhataïgue omboaty ukaa jave ma Mordecai oguapy oiny tenda huvixa ro rokê py.

²⁰ Ha'e jave py ma Mordecai ijayvuague rami vy Ester ndoikuaa ukai teri guetarâ kuery ha'e imongakuaare mava'e regua paa. Ester onhe'ê rendu teri oikovy Mordecai omongakuaa jave rami ae.

Huvixa ojukaxe okuapy rã Mordecai oikuaa ague

²¹ Ha'e va'e jave huvixa rokê py Mordecai oguapy oiny jave py ma huvixa Assuero rembiguai mokoï ikuai eunuco meme va'e, okê rarôa va'e regua Bigtã ha'e Teres hery va'e. Ha'e va'e kuery ma nguvixa pe ivai vaipa vy jogueroayvu ojuka agua re.

²² Ha'e nunga Mordecai oikuaa vy omombe'u uka huvixa ra'yxy Ester pe. Ha'e rã Ester ma huvixa pe ju omombe'u uka Mordecai rery rupi.

²³ Ha'e ramo ha'e nunga re oikuaa potaa rã anhetêgua ra'e. Ha'e rã mokoïve ojyryvipy imoiny yvate. Ha'e nunga ma huvixa renonde py omboparaa imoiny kuaxia mba'emo oikoague oia re.

3

Mordecai re Hamã nda'ija'eiaque

¹ Ha'e nunga oikopa ma rire huvixa Assuero omboyvate Hamedata ra'y Hamã, Agague ramymino va'e. Ha'e vy oirü kuery yvatekueve ikuai va'e ha'e javi áry omoi.

² Ha'e ramo huvixa rembiguai kuery hokê py ikuai va'e ha'e javi ma Hamã oaxa nhavô ojero'a vy guenapy'ã re 'rã ikuai henonde, ha'e rami ae huvixa ojapo uka rire. Ha'e rã Mordecai ma henonde ndojero'ai, guenapy'ã re noï guive.

³ Ha'e rami rã huvixa rembiguai kuery hokê py ikuai va'e aipoe'i okuapy Mordecai pe:

— Mba'e re tu huvixa ojapo ukaague rami e'y reiko? — he'i okuapy.

⁴ Ko'ê nhavô ixupe ha'e rami ijayvu okuapy teï ndojapyxaka potai. Ha'e ramo ha'e kuery omombe'u Hamã pe, oikuaaxe vy Mordecai pa ayvu py ipo'aka 'rãa. Mba'eta ha'e kuery pe onhemombe'u ma voi judeu oikoa.

⁵ Ha'e ramo Hamã oexa rã henonde py Mordecai ndojero'ai neï guenapy'ã re voi noï ramo ipoxy ete ixupe.

⁶ Ha'e rami avi onhembopy'a Mordecai ojuka uka agua re, ha'e anho rive'y guive ojukaxe. Mba'eta Hamã pe omombe'ua ma mava'e regua pa Mordecai oikoa. Ha'e rami vy Hamã onhembopy'a Mordecai retarã kuery judeu ikuai va'e ha'e javi ojuka uka agua re, huvixa Assuero openaa ha'e javi rupi.

Hamã judeu kuery ojukapaxaegue

⁷ Ha'e gui doze ma'etÿa re ma huvixa Assuero oï jave, jaxy ijypy'ia nisã 'epy va'e py ma Hamã guenonde py oexa uka xortea Pur 'epy py. Ko'ê nhavô guarã doze jaxya peve ojapo. Ha'e rami vy oikuaa jaxy adar 'epy va'e py ha'eve 'rãa.

⁸ Ha'e ramo Hamã aipoe'i huvixa Assuero pe:

— Xeruvixa, repenaa ha'e javi rupi pavê regua mbyte rupi peteï regua ikuai. Ha'e va'e kuery reko ma amboae regua ikuai va'e reko reve joo rami e'y rei, lei remombe'u uka va'e rami e'y guive ikuai. Ha'e va'e kuery ma nda'evei reja rive agua.

⁹ Xeruvixa, ha'eve ri ramo embopara uka ha'e kuery ojukapaa agua regua. Ha'e rami agua ijukaarã kuery po py ame'ê 'rã trezentos e trinta mil quilos prata guigua, ndee huvixa mba'emo remoï porãaty pyguarã ae — he'i.

¹⁰ Ha'e ramo huvixa okua gui kuã regua omboi vy ome'ê Hamedata ra'y Hamã, Agague ramymino ha'e judeu kuery rovaigua oiko va'e pe.*

¹¹ Ha'e vy aipoe'i ixupe:

— Ha'e va'e prata ma ndepo py ae topyta, judeu kuery ha'e rami ae avi. Ha'e kuery re ma reikuaa rami ejapo.

Judeu kuery ojukapaa agua huvixa oikuaa ukaague

¹² Ha'e gui peteï jaxya ha'e treze araa py ma oenoïa huvixa rembiguai kuaxia mboparaa kuery. Ha'e ramo Hamã ijayvua ombopara okuapy huvixa kueryrã huvixave omoi va'ekue peguarã, ijyvy ha'e javi re opena va'e pe, peteï-teï regua yvatekueve pe guive. Peteï-teï regua ayvu py ombopara okuapy, peteï-teï regua oendu kuaa agua rami. Huvixa Assuero rery rupi ae ombopara, huvixa kuã regua py omboja vy hery omoi guive.

¹³ Ha'e va'e kuaxia para omondouka ayvu reraaty kuery pe. Huvixa pegua vyv ha'e javi rupi omondouka judeu kuery omomba, ojukapa ha'e omokanhymba vyvoi agua regua, kunumigue ha'e tujakue, kyrïgue'i ha'e kunhague guive. Peteï ára pyve ojukapa agua, doze jaxya adar 'epy va'e treze araa py, ha'e gui imba'e rei-reikue oipe'apa agua guive.

¹⁴ Ha'e va'e ayvu oguerova avi peteï-teï vyv re lei ojapo pyre ogueroayvua agua. Ha'e vy oguerova va'ekue ma ha'e javi regua pe omondouka, ha'e va'e ára pyguarã oiko katu pavê agua.

¹⁵ Ha'e gui ma ayvu reraa kuery huvixa ojapo uka va'ekue oikuaa vy oje'oi pojava. Ha'e ramo Susã tetã py omombe'ua oo yvateve va'e oï va'e rupi. Huvixa ha'e Hamã ma oy'u agua py ogyapy okuapy, ha'e rã Susã tetã rupi ma onhemondyipa rei okuapy.

* 3:10 Kuã regua omboi vy Hamã pe ome'ê kuery rupi ojapo uka agua.

4

Judeu kuery re Ester ojerure aguã re ijayvuague

¹ Ha'e nunga ha'e javi Mordecai oendu vy omondoro oao ha'e ajukue voxa vaikue guigua py rive onhemonde, tanhimbu guive omoï ojee. Ha'e gui oë vy tetã rupi oiko-iko. Ipy'a vai nhendu rei ovy nda'evei etea oendu vy.

² Ha'e rami vy huvixa rokê peve'i ovaë, mba'eta huvixa rokê rupi ma avave rei nda'evei oike aguã voxa vaikue guigua py onhemonde reve.

³ Ha'e gui yvy mboae-mboae rupi huvixa ijayvuague ha'e lei ojapo va'ekue omombe'ua rupi judeu kuery ipy'a vai ete okuapy, okaru e'y re ikuai, ojae'o ha'e hexay vaipa reve. Mbovy rei e'y tanhimbu áry onhenho okuapy voxa vaikue guigua py onhemonde reve.

⁴ Ha'e gui Ester oia py hembigui kunhague ha'e eunuco kuery ou vy ixupe omombe'u okuapy Mordecai oikoa ha'e javi. Ha'e nunga huvixa ra'yxy oendu vy nda'evei etea oendu. Ha'e vy ajukue mboae omoudouka Mordecai pe voxa guigua ojegui omboi vy onhemonde aguã. Ha'e rami tei ha'e ma ndoipotai.

⁵ Ha'e ramo Ester oenoï huvixa rembiguai eunuco va'e regua Hataque hery va'e, Ester rembiguirã ju omboaxa va'ekue. Ha'e va'e ma Mordecai oia py Ester omoudouka mba'e nunga pa oikoa oikuaa aguã.

⁶ Ha'e ramo tetã mbyte py Hataque oo Mordecai reve nhovaexi aguã huvixa rokê py oguapy oinya py.

⁷ Ixupe Mordecai omombe'upa hexe oiko va'ekue ha'e javi, huvixa pe Hamã prata ome'ë vy judeu kuery omomba aguã re ijayvuague guive omombe'u.

⁸ Ixupe ome'ë avi ipara oguerova pyre Susã tetã rupi ogueraa uka pyre, judeu kuery omombaa aguã regua, Ester pe hembigui oexa uka vy oikuaa avi aguã, ha'e ju huvixa oia py oo vy omboaxy aguã re ojerure aguã, henonde py guetarã kuery re ojerure aguã.

⁹ Ester oia py Hataque ojevvy vy omombe'upa Mordecai ijayvuague ha'e javi.

¹⁰ Ha'e ramo Hataque pe Ester ombovai vy aipoe'i uka Mordecai pe:

¹¹ — Ha'e rami avi huvixa rembiguai kuery ha'e javi, ha'e ijyvy ikuai va'e regua oikuaa pavë ava e'y vy kunha tei ha'e ae rive opy ja'o py huvixa pe ojexa uka vy oike va'e rei, ha'e va'e peguarã peteri ayvu oi, ojukaa aguã, xapy'a rei ixupe huvixa opo pygua ouro guigua omokuave'ë e'y vy, oikove aguã. Ha'e gui xee ma kova'e jaxy ha'e javi re huvixa naxerenoi teri oia py aa aguã — he'i.

¹² Ha'e rami Ester ijayvuague ma Mordecai pe ju omombe'ua.

¹³ Ha'e ramo imombe'ua kuery pe Mordecai ombovai Ester pe omombe'u aguã:

— Ha'e rami avi huvixa ro py ndee reiko va'eri exa'ã eme ndee anho'i reo jepe aguã re, ore judeu kuery mboae orejukapaa tei.

¹⁴ Mba'eta ha'e rami ete oiko taa ára rekryriri ri ramo amboae henda gui ju 'rã oiko judeu kuery pytyvõarã ha'e heraa jepearã. Ha'e rã ndee ma rekanhy 'rã nderu ro pygua kuery ha'e javi reve. Xapy'a rei nhi'ã ha'e rami aguã ae nemoia raka'e huvixa ra'yxyrã — he'i uka.

¹⁵ Ha'e rami rã Ester ju aipoe'i uka Mordecai pe:

¹⁶ — Tereo ha'vy, emboatypa judeu kuery Susã tetã py ikuai va'e ha'e javi. Pekarú e'y re pendekuai xere pejerure vy. Mboapy ára re pe'u eme mba'eva, pey'u eme guive, ara py ha'e pyávy. Xee voi xerembiguai kuery reve rokaru e'y re avi 'rã orekuai. Ha'e va'e rire ma aa 'rã huvixa oia py, lei oi va'e rovai tei ae ma. Xapy'a rei xejukaa aguã rami ri rã amano 'rã — he'i.

¹⁷ Ha'e ramo Mordecai oo vy ojapo Ester ojapo uka va'ekue ha'e javi.

5

Huvixa ha'e Hamã okaru aguã py Ester oenoïague

¹ Mboapy araa py Ester onhemotyrõ vy oao porãgueve py onhemonde. Ha'e vy oo vy huvixa ro roka py hi'ai, huvixa openaaty rexei. Ha'e rã huvixa ma guenda openaaty py oguapy oiny okë oi va'e yvy'iry.

² Ester oka py opyta ho'amy rã huvixa oexa vy oendu omovaëxea vy ixupe omokuave'ë py pygua ouro guigua. Ha'e rami rã Ester onhemboja vy po pygua apy re opoko.

³ Huvixa aipoe'i ixupe:

— Xera'yxy Ester, mba'e tu rereko, mba'e nunga re ha'vy rejerure ta? Mba'eta apenaa mbyte rupi peve tei xee ame'ë 'rã.

⁴ Ester ombovai:

— Xeruvixa, ndevy pe ha'eve ri ramo tereo ndee Hamã reve. A'y'i areko katupa ma ngaru ndevy — he'i.

⁵ Ha'e ramo huvixa aipoe'i:

— Pejapo ha'vy Hamã ojapura aguã rami, Ester oipota va'e rei rojapo aguã — he'i.

Ha'e gui huvixa ha'e Hamã ovaë ngaru tuvixa va'e Ester ogueroko katu va'ekue py.

⁶ Vinho oy'u okuapya py huvixa oporandu Ester pe:

— Mba'e nunga re tu rejerure? Mba'eta xee ame'ë 'rã. Mba'e tu rejapo ukaxe? Apenaa mbyte rupi peve rejerure tei ojapoa 'rã.

⁷ Ha'e ramo Ester ombovai vy aipoe'i:

— Xee aipota va'e re ajerurea ma po rami:

⁸ Xeruvixa, xapy'a rei xemboaxy ramo, ha'e aipota va'e ojapoa aguã ndevy ha'eve ri ramo tove ko'ë ramo ju terevaë Hamã reve ngaru areko katu aguã py. Ha'e ramo mae ma rombovai 'rã, xeruvixa — he'i.

⁹ Ha'e va'e árave Hamā ojepe'a ovy ovy'aa onhenhandu reve. Ha'e rami teĩ huvixa rokē py Mordecai oguapy oinya py oexa rā henonde py nopy'ái neĩ nomboteĩ guive oiny ramo oendu Mordecai rovai ipoxy etea.

¹⁰ Ha'e rami teĩ Hamā ojejoko vy ngoo katy oo. Ha'e vy oirū kuery oenōi ukapa, gua'yxy Zeres guive.

¹¹ Ha'e kuery reve Hamā ijayvu iporiau e'ýa re, gua'y kuery heta ikuai re, opa mba'e py huvixa omboete ukaague re, ha'e huvixa rembiguai kuery yvatekueve mboae áry omboyvateveague re guive.

¹² Ha'e vy aipoe'ive ju:

— Huvixa ra'yxy Ester ae ma voi avave noenōi ngaru oguereko katuague py oo aguã, xee e'ý vy. Ha'e rami ae avi ko'ē rā guarā voi xerenōi ju huvixa reve aa aguã.

¹³ Ha'e rami teĩ ha'e nunga ha'e javi ma naxembovy'ai, huvixa rokē py judeu Mordecai oguapy oiny rā aexaa ja — he'i.

¹⁴ Ha'e ramo ixupe ta'yxy Zeres ha'e irū kuery ikuai va'e ha'e javi aipoe'i:

— Ejapo uka ha'vy peteĩ jojryvipya renderā, vinte e dois metros yvatea va'e ejapo. Ha'e gui ko'ē rā aje'ive'i reve huvixa pe aipoe'ere Mordecai ojryvipya aguã. Ha'e gui ma revy'a reve 'rā reo huvixa reve ngarua py — he'i. Ha'e rami ijayvua Hamā oendu vy ojou porā. Ha'e rami vy ojapo uka jojryvipya renderā.

6

Hamā pe Mordecai omboete ukaa ague

¹ Ha'e va'e pyávy ma huvixa ndokei re oiko. Ha'e rami vy kuaxia mba'emo oiko va'ekue-'ekue oĩa ogueru ruka ramo henonde py ogueroavyua.

² Ha'e va'e kuaxia para re ojou Bigtā ha'e Teres ojapo vaixea Mordecai oikuaa ukaague. Mba'eta ha'e va'e mokoive eunuco huvixa rokē rarōa kuery va'e regua ae huvixa Assuero ojukaxe teĩ va'ekue.

³ Ha'e gui ma huvixa oporandu:

— Mordecai ha'e rami ojapoague re mba'e nunga tu ixupe ojapo porāa raka'e omboete ukaa rupi?

Huvixa renonde hembigui kuery ikuai va'e ombovai:

— Mba'eve rei ixupe ndojapo porāai teri — he'i okuapy.

⁴ Ha'e va'e jave py Hamā oike ae ma ra'e huvixa roka apy rupi, jojryvipya renderā Hamā ojapo uka va'ekue py huvixa pe ojerure aguã Mordecai ojryvipy uka aguã. Ha'e ramo huvixa va'e oporandu:

— Mava'e tu oĩ oka py? — he'i.

⁵ Hembigui kuery ombovai:

— Hamā rima oka py hi'ái — he'i. Ha'e ramo huvixa aipoe'i oike aguã.

⁶ Hamā oike ma ramo huvixa oporandu ixupe:

— Ava xee amboete ukaxe va'e pe ma mba'exa nda'u ha'eve 'rā ojapo porāa aguã? — he'i.

Ha'e rami rā Hamā ojeupe ae “Mava'e ha'vy oiko huvixa omboete uka vy oguerovy'ave 'rā, xee e'ý vy?” he'i.

⁷ Ha'e rami vy huvixa pe ombovai:

— Ava remboete ukaxe vy rejapo porāa va'e pe ma

⁸ toguerua ijaorā iporāve va'e ndee xeruvixa ae renhemondea va'ety regua, ha'e kavaju hi'áry riae ndee xeruvixa reikoaty va'e guive. Inhakā re ma tomoĩa akā regua ndee xeruvixa pegua ae.

⁹ Ndee xeruvixa rembiguai yvatekueve va'e ae tome'ē ijao ha'e kavaju ixupe, tomonhemonde avi ndee xeruvixa remboete ukaxe va'e. Ha'e gui ma kavaju áry togueraa tetā rupi tape ikuai va'e rupi, ha'e henonde rupi tomombe'u herekovy: “Ha'e rami ae ojapoa ava huvixa omboete ukaxe va'e pe”, te'i — he'i.

¹⁰ Ha'e ramo huvixa aipoe'i Hamā pe:

— Ejapura ke ha'vy. Ndeayvuague rami ae ejopy ao ha'e kavaju, ha'e huvixa rokē py judeu Mordecai oguapy oiny va'e pe ejapo. Neĩ peteĩ henda'i py ma voi ejapo e'ý eme ndeayvuague — he'i.

¹¹ Ha'e gui Hamā ma ao ha'e kavaju ogueraa vy omnonhemonde Mordecai. Ha'e vy kavaju áry omoĩ vy tetā rupi ogueraa. Henonde rupi omombe'u herekovy:

— Ha'e rami ae ojapoa ava huvixa omboete ukaxe va'e pe — he'i ovy.

¹² Ha'e va'e rire ma huvixa rokē py Mordecai ojevuy. Ha'e rā Hamā ma oẽ vy onha ovy ngoo katy. Nda'evei ete reve oakā onhovamba ovy.

¹³ Ha'e gui ma gua'yxy Zeres pe omombe'u oiko va'ekue ha'e javi, oirū kuery pe guive. Ha'e ramo irū kuery hi'aranduve va'e ta'yxy Zeres reve aipoe'i okuapy ixupe:

— Ha'e gui ma Mordecai renonde nemo'yvyi'ia ma. Judeu kuery regua oiko ramo nandepo'akai 'rā hexe. Ha'e rami 'rāgue py anhetē henonde py nemo'yvyi'ite 'rā — he'i.

¹⁴ Hexeve ha'e kuery ijayvu teri reve ovaẽ okuapy huvixa rembiguai eunuco kuery. Ha'e vyve ogueraa pojava Hamā ngaru Ester oguereko katu va'ekue oiko aguã katy.

7

Hamā ojapoxea Ester omombe'u rire ojryvipya ague

¹ Ha'e gui ma huvixa oguerovaẽ Hamā gua'yxy Ester reve oy'u okuapy aguã py.

² Mokoigua ma vinho oy'u okuapy py huvixa oporandu Ester pe:

— Xera'yxy Ester, mba'e nunga re ete tu rejerure ta? Ndevy pe xee ame'ē 'rā. Mba'e ha'vy reipota? Xee ajapopa 'rā ndevy apenaa mbyte rupi peve rejerure teĩ.

³ Ha'e ramo ta'yxy Ester ombovai:

— Xeruvixa, xapy'a rei nerenonde py xemboaxy, ha'e ndevy pe ha'eve ri ramo eme'ê xee ajerurea xerekoverã re ae. Ha'e gui xee aipota va'e ma xeretarã kuery rejuka ukapa e'y'ã aguã.

⁴ Mba'eta ore kuery ma orevendepaa ma, xee ha'e xeretarã kuery reve, oremomba aguã, orejukapa ha'e oremokanhymba vyvoi aguã. Nhoembiguairã rive orevendea va'e rire xee akyriri 'rãgue, mba'eta xeruvixa, ha'e rami va'e rire orerovaigua kãuxa nda'evei 'rãgue romoangeko aguã — he'i.

⁵ Ha'e ramo huvixa Assuero oporanduve vy aipoe'i gua'xy Ester pe:

— Mava'e tu ndeayvua va'e? Mamo tu oiko ha'e rami ete pendeapo aguã opy'a re oendu va'e?

⁶ Ester ombovai:

— Orerovaigua oremombaxe va'e ma peva'e mba'emo vai apoa Hamã — he'i.

Ha'e rami rã Hamã ma huvixa ha'e ta'xy renonde py okyje reia anho oendu.

⁷ Huvixa ipoxy ete vy vinho oy'u oinya gui opu'ã vy oẽ ovy yvotyty ngoka py õi va'e katy. Ha'e rã Hamã ma opy opyta huvixa ra'xy Ester pe ojerure aguã guekoverã re, mba'eta oikuaa huvixa ombopaga aguã re onhembopy'a maa.

⁸ Ha'e gui yvotyty ngoka py õi va'e gui huvixa oike ju ramo opy vinho oy'u okuapyague py, ha'e va'e jave tenda Ester oia áry Hamã ho'a ra'e. Ha'e nunga huvixa oexa vy aipoe'i:

— Peva'e ta'vy omoangeko teve ra'e xera'xy Ester xerenonde, xero py ae?

Huvixa ha'e rami ijayvu ramove onhovã Hamã rova.

⁹ Ha'e ramo pete'i huvixa rembiguai eunuco regua Harbona hery va'e aipoe'i:

— Hamã ro katy'i ko hi'ã pete'i jojryvipya renderã ojapo va'ekue vinte e dois metros yvatea va'e, ha'e va'e py huvixa reraa jepeare Mordecai ojryvipy aguã ojapo uka va'ekue — he'i.

Ha'e ramo huvixa aipoe'i:

— Ha'e va'e py ae pejryvipy Hamã — he'i.

¹⁰ Ha'e ramo Mordecai ojryvipy aguã Hamã ojuka uka va'ekue py ae ojuka okuapy. Ha'e ramo mae ma huvixa noenduvei opoxyague.

8

Ngovaigua kuery re judeu kuery opu'ã aguã re ijayvuague

¹ Ha'e va'e árave judeu kuery rovaigua Hamã rogue huvixa Assuero ome'ê gua'xy Ester pe. Mordecai avi oguerua huvixa renonde py, huvixa pe Ester hetarã ae oikoa omombe'u rire.

² Ha'e ramo huvixa okuã regua Hamã gui ojopy ju va'ekue omboi vy Mordecai pe ju ome'ê. Hamã rogue re opena va'erã ma Ester omo'i Mordecai ae.

³ Huvixa renonde py Ester ijayvuve tema. Ha'e vy ipy rupi ojero'a oiny vy ojae'o reve ojerure oiny ombovaipa aguã Agague ramymino Hamã judeu kuery ojukapa aguã regua ombopara va'ekue.

⁴ Ha'e ramo Ester-a katy pete'igue ju huvixa omokuave'ê po pygua ouro guigua. Ha'e ramo Ester opu'ã ho'amy huvixa renonde py.

⁵ Ha'e vy aipoe'i ixupe:

— Xeruvixa, xapy'a rei ndevy pe ha'eve ramo, xemboaxya rendu ha'e ha'evea ramigua reikuaa ramo, po rami aguã rejou porã ri ramo tomboparaa Hamedata ra'y Hamã Agague ramymino onhembopy'aague ombovaipaa aguã regua, mba'eta vvy repenaa ha'e javi rupi judeu kuery ikuai va'e omombaa aguã ombopara uka.

⁶ Mba'exa 'rã tu xee aexa ha'e rami ete mba'emo vai xeretarã kuery re oiko rã? Mba'exa 'rã tu aexa xeretarã kuery ojukapaa rã? — he'i.

⁷ Ha'e ramo huvixa Assuero aipoe'i gua'xy Ester ha'e judeu regua Mordecai pe:

— Ha'e gui ma Hamã judeu kuery ojukapaxe ramo Ester pe xee amboaxa ma hogue, ajryvipy uka guive imo'amy.

⁸ Aỹ ma pembopara avi ha'vy judeu kuery pe. Xee penderuvixa rery rupi pembopara peikuaa rami ae. Ha'e gui pemboja avi xekuã regua py xerery remo'i reve. Mba'eta huvixa rery rupi pembopara vy ikuã regua py pemboja rire imbovaipa rive pyrã e'y ae opyta — he'i.

⁹ Ha'e ramove oenõi huvixa rembiguai kuaxia mboparaaty kuery, mboapy jaxya sivã 'epy va'e ha'e vinte e três araa py. Ha'e vy Mordecai ijayvua ha'e javi rami ombopara okuapy judeu kuery pe, opena va'e ha'e huvixa kuery pe guive, ha'e vvy mboae Índia ha'e Etiópia rupi yvatekueve opena va'e kuery pe. Cento e vinte e sete vvy re opena va'e kuery pe ombopara pete'i-te'i regua avyu py, pete'i-te'i regua oendu kuaa aguã rami. Judeu kuery pe voi ha'e rami ae avi ombopara ha'e kuery avyu py, oendu kuaa aguã rami.

¹⁰ Huvixa Assuero rery rupi ombopara, ha'e huvixa kuã regua py ju omboja. Ha'e rami vy kuaxia para ogueraa uka avyu reraaty kuery pe. Ha'e va'e kuery ma kavaju iporãgueve huvixa rymbarã imoingo pyre áry oje'oi.

¹¹ Ha'e va'e kuaxia re ma tetã nhavõ rupi judeu kuery ikuai va'e pe huvixa po rami ojapo uka, ono'õmba okuapy vy guekove oepya rupi joe opu'ã aguã. Ha'e kuery re, kyrígue e'y vy kunhague re ha'e va'e vvy regua amongue tembiporu reve ou va'e rei tema judeu kuery ha'eve ojuka aguã. Omomba 'rã okanhymba vyvoi aguã rami, oipe'apa 'rã guive imba'e rei-reikue.

¹² Petei ára pyve ha'e nunga ojapo 'rã okuapy vvy huvixa Assuero openaa ha'e javi rupi, doze jaxya adar 'epy va'e ha'e treze araa py.

¹³ Ha'e va'e kuaxia lei ombopara pyre oia ma vvy ikuai va'e ha'e javi rupi ogueroayvu pavê aguã. Ha'e javi regua kuery pe ogueraa, ha'e va'e ára pyguarã judeu kuery oiko katu aguã, ngovaigua kuery re opu'ã okuapy aguã.

¹⁴ Ha'e rami vvy ayvu reraa kuery ma huvixa rymba kavaju áry ikuai vvy oje'oiapa pojava. Huvixa ijayvuague oikuaa vy inhakuãve tema oje'oiivy. Susã tetã rupi voi oikuaa ukapa.

¹⁵ Ha'e gui Mordecai ma huvixa renonde gui oê vvy onhemonde ovy ao iporãve va'e yva rami hovv ha'e xii rei va'e py. Inhakã re ma akã regua tuvixave va'e ouro guigua oí. Imanto-rã ma omoi ajukue xii ipererí'i va'e púrpura revegua. Ha'e ramo Susã tetã rupi ovy'apa okuapy.

¹⁶ Ha'e rami vvy judeu kuery oendu okuapy ovy'aa. Oguerovy'apa okuapy, ha'e kuery omboetepaa ramo.

¹⁷ Ha'e rami ae avi vvy ha'e javi ha'e tetã ikuai va'e rupi huvixa ayvu oikuaa ukaa py rei tema judeu kuery ovy'a vaipa okuapy, joguero'vy'a, ngaru guive ojapo. Ha'e gui vvy regua kuery heta avi judeu rami onhemoiingo, judeu kuery gui okyjae anho oendu okuapy vy.

9

Ngovaigua kuery judeu kuery ojukapaague

¹ Ha'e gui doze jaxya adar 'epy va'e ha'e treze araa py ma ojeupity ma huvixa ayvu ojapoa aguã. Ha'e rami vvy judeu kuery re hovaigua kuery ipo'aka aguã re oarõ okuapya ára ma oexa'ãague rami e'y oiko, mba'eta judeu kuery ae ipo'aka okuapy nda'ija'ei va'e kuery re.

² Mba'eta huvixa Assuero openaa vvy ha'e javi rupi judeu kuery ikuai va'e guekoa tetã nhavõ rupi ono'õmba okuapy imombaxea kuery omomba aguã. Avave rei ndojoko kuaai, mba'eta vvy regua ha'e javi oendu okuapy okyje reia anho.

³ Ha'e gui vvy ha'e javi pygua yvatekueve, opena va'e ha'e huvixa kuery huvixave omoi va'ekue ha'e javi ma oipytyvõ okuapy judeu kuery, Mordecai gui okyjepa vy.

⁴ Mba'eta Mordecai ma huvixa ro pygua kuery gui yvateve va'e oiko, vvy ha'e javi rupi oikuaa guive. Ha'e rami vvy ipo'akave ovy tema 'rã.

⁵ Ha'e rami py judeu kuery oitypa ngovaigua kuery. Kyxe py ojukapa, omomba. Ngovaigua kuery oguerekoxea rami tema oguereko.

⁶ Susã tetã py voi judeu kuery ojuka vvy omomba quinhentos avakue ikuai va'ekue.

⁷ Ha'e rami ae ojuka avi Parsandata, Dalfom, Aspata,

⁸ Porata, Adalia, Aridata,

⁹ Farmasta, Arisai, Aridai ha'e Vaizata.

¹⁰ Ha'e va'e kuery ma judeu rovaigua Hamedata ra'y Hamã ra'y kuery dez ikuai va'ekue. Ha'e rã ha'e kuery mba'e rei-reikue re ma ndopokoi.

¹¹ Ha'e va'e árave huvixa pe omombe'ua mbovy pa Susã tetã py ojukapa pyre.

¹² Ha'e ramo huvixa aipoe'i gua'yxy Ester pe:

— Susã tetã py judeu kuery ojuka vvy omomba va'ekue ha'e javi vvy ma je quinhentos avakue, ha'e Hamã ra'y kuery dez va'ekue ju. Ha'vvy vvy mboae rupi ikuai va'e ma mbovy ju 'rã nda'u ojukaa? Ha'e rami vvy mba'e re tu aỹ rejereureve ju? Mba'eta ha'e nunga ome'êa 'rã ndevy. Mba'e nunga ju reipota ajapo? Ha'e nunga ojapoa 'rãe — he'i.

¹³ Ha'e ramo Ester ombovai:

— Ha'e rami rã xeruvixa, xapy'a rei rejou porã ramo tove Susã tetã py judeu kuery ikuai va'e ko'ê rã ju ta'ikuai aỹ guarã re ndeayvuague rami. Ha'e rã Hamã ra'y kuery dez ikuai va'ekue retekue ma tombovavaa imoiny jojryrvipya rendarã ojapo pyre re — he'i.

¹⁴ Ha'e ramo huvixa aipoe'i ha'e rami ae tojapoa. Ha'e ramo Susã tetã py oikuaa ukapaa. Ha'e gui Hamã ra'y kuery dez va'ekue retekue ombovavaa imoiny.

¹⁵ Ha'e gui jaxya adar 'epy va'e ha'e catorze araa py ma judeu kuery Susã tetã py ikuai va'e ono'õmba okuapy vy trezentos avakue ju ojuka. Ha'e rã imba'e rei-reikue re ma ndopokoi.

Ngaru Purim 'epy va'e ojapo ypy okuapyague

¹⁶ Ha'e rami ae avi judeu kuery huvixa openaa vvy mboae rupi ikuai va'e voi ono'õmba okuapy vvy guekove oepya rupi ikuai, ngovaigua kuery gui oo jepe aguã. Ha'e rami vvy setenta e cinco mil ojuka ija'e e'y va'ekue. Ha'e rã imba'e rei-reikue re ma ndopokoi.

¹⁷ Ha'e nunga ma jaxy adar 'epy va'e re oiko treze araa py. Ha'e gui catorze araa py ma opytu'upa okuapy. Ha'e va'e ára ojapo okuapy ngaru ovy'a aguã.

¹⁸ Ha'e rã Susã tetã py judeu kuery ikuai va'e ma ha'e va'e jaxy re treze ha'e catorze araa py ju onhemboaty okuapy. Ha'e va'e kuery ma quinze araa py opytu'u vvy ojapo ngaru ovy'a aguã.

¹⁹ Ha'e rami ae avi judeu kuery tetã'i ikora e'y va'e py ikuai va'e ma jaxy adar 'epy va'e re catorze araa py ae avi ojapo ngaru ovy'a okuapy vy. Ha'e va'e ára ngaru ojapoa gui tembi'u ogueraa vvy joupe-upe omboja'o okuapy.

²⁰ Ha'e nunga Mordecai ombopara vvy kuaxia omondouka huvixa Assuero openaa vvy ha'e javi rupi judeu kuery ikuai va'e pe, ha'e'i rupi ha'e mombyry rupi ikuai va'e pe guive.

²¹ Ha'e kuery rekorã ombopara ma'etã nhavõ jaxy adar 'epy va'e re catorze araa py ngaru ojapo aguã quinze araa peve,

²² ha'e va'e ára py ae ngovaigua kuery gui oo jepepa rire. Ha'e va'e jaxy re ma iporiaupa okuapyague gui judeu kuery ovy'aa rupi ju ikuai, ojae'opa reiague gui ngaru py ju ovy'a okuapy. Ha'e nunga rupi ha'e oeja ovy'a reve ngaru ojapo okuapy aguã, ha'e ngarua gui tembi'u ogueraa vy joupe-upe ome'ẽ aguã, iporiaukue'i pe guive.

²³ Ha'e ramo judeu kuery ojou porã okuapy guekorã va'ekue py ae ha'e rami ikuai aguã, Mordecai ojapo ukaague rami vy.

²⁴ Mba'eta ha'e va'e jave py Hamedata ra'y Hamã Agague ramymino judeu kuery rovaigua va'e onhembopy'a teĩ judeu kuery omomba aguã. Ha'e rami vy xorte Pur 'epy va'e oexa avi ombovaipa ha'e ojukapa aguã.

²⁵ Ha'e rami teĩ huvixa renonde py Ester oo ramo kuaxia ombopara vy ojapo Hamã judeu kuery ojukaxea hexe ae ju ojeapa aguã rami. Ha'e rami vy ojyryvipy uka, ta'y kuery guive.

²⁶ Ha'e nunga rupi ae ha'e va'e ára pe "Purim" 'ea, tery Pur va'e rami. Mba'eta ha'e va'e kuaxia para re oĩa rami ha'e nunga ha'e javi oiko rã ha'e kuery oexa okuapy.

²⁷ Ha'e rami rire judeu kuery guekorã ojou porã okuapy ha'e va'e mokoĩ ára ojeupity nhavõ ha'e rami ikuai aguã hexarai e'ỹ re, hamymino kuery ha'e onhemoirũ va'e kuery ha'e javi peguarã. Ha'e rami vy ojee omoĩ ombopara pyre oĩa rami ikuai aguã, ma'etỹa nhavõ oa'angaague ára ojeupity jave.

²⁸ Ha'e rami vy hamymino kuery ikuai jevy-jevy va'e peguarã ha'e va'e ára re ima'endu'a okuapy aguã, peteĩ-teĩ oo pygua kuery, vvy ha'e tetã ikuai va'e pygua ha'e javi. Ha'e rami vy Purim ára ojeupity nhavõ judeu ha'e hamymino kuery hexarai e'ỹ aguã raka'e rã peve.

²⁹ Ha'e gui ma Abiail rajy huvixa ra'yxy Ester, judeu Mordecai reve teĩgue ju ombopara kuaxia. Opo'akaa ha'e javi rupi ombopara Purim omombe'u ypy va'ekue omoĩ atãve aguã.

³⁰ Opa rupi judeu kuery pe kuaxia para ogueraa uka cento e vinte e sete vvy huvixa Assuero openaa ha'e javi rupi. Ombovy'a aguã ombopara ombopy'a guaxua rupi.

³¹ Ha'e vvy omoĩ atãve aguã Purim oa'angaague ára py porã ikuai aguã judeu Mordecai, huvixa ra'yxy Ester reve ojapo ukaague rami, mba'eta ha'e kuery ae ranhe ikuai ha'e rami, ha'e gui guamymino kuery peguarã ju oeja, iporiau vy okaru e'ỹ re ikuaiague re ima'endu'a aguã.

³² Ha'e rami py Purim ára re marã rami pa ha'e kuery ikuai aguã Ester ae ojapo uka, kuaxia re ombopara vy.

10

Mordecai yvatevea re ijayvua

¹ Ha'e nunga oikopa ma rire huvixa Assuero ojapo ha'e va'e vvy ha'e ye'ẽ rembe rupi ikuai va'e ha'e javi iuxupe opaga aguã.

² Ha'e gui oive rei tema huvixa Assuero rekokue regua. Ha'e rami avi opo'akaa rupi mba'emo ovareve va'e ojapo va'ekue, ha'e Mordecai omboyvateveague ha'e javi noĩ 'rã teve kuaxia Média ha'e Pérsia pygua huvixa kuery rekokue oĩa re?

³ Mba'eta judeu Mordecai ma huvixa Assuero rembiguai yvateve va'e oiko. Judeu kuery voi omboete vaipa, hetarã kuery ha'e javi omboetepa okuapy, mba'eta ha'e kuery pe mba'emo porã ojapoa rupi anho oiko, ha'e kuery ikuai porã aguã re onhea'ã oikovy guive.

Jó rekokuẽ oĩa Jó rekokuẽ oĩa

Jó ma peteĩ ava iporayvu va'e, iporiaukue va'e'y, Nhanderuete re ojerovia ete va'e ha'e ovy'aa rupi tema oiko va'e. Ha'e gui Nhanderuete pe Satanás ojerure Jó oeko a'ã aguã re, anhetẽ ri Nhanderuete pe oikoa oexaxe vy. Ha'e ramo Nhanderuete oeko a'ã uka. Ha'e rami rã Jó mba'emo oguereko va'e opa vyvoi, ta'y kuery omanomba xapy'a, ha'e Jó re ae ou ai vaikue imbojexavaiařã.

"Ha'e ramo Jó opu'ã vy omondoro oao, onhopi oakã ha'e ipukupa oupy vyvy rupi. Nhanderuete omboete vy aipoe'i: 'Xepire rei reve aiko'i va'ekue ha'i rye gui, ha'e xepire rei reve ju 'rã aa. Senhor ma mba'emo me'ẽa, ha'e oipe'a va'erã avi oiko. Ta'ima'endu'a porãa Senhor rery re!' he'i. Ha'e nunga ha'e javi py Jó ndojejavuy, neĩ nda'ijayvui Nhanderuete ha'eve'yã rami joguerekoa rami'" (1.20-22).

Ha'e gui ma ou Jó irũ kuery mboapy ikuai va'e. Oĩa py opyta are rire hexeve jogueroayvu okuapy ojexavaia re. Ha'e kuery oikuaa rami teĩ Jó guoko vaia re oiko axy. Ha'e rã Jó ma "Xereko porã va'e" he'i, ndoikuai guive mba'e re pa haxy va'e Nhanderuete ombouague. Amongue py Nhanderuete reko re ijayvu ndovy'aia rupi, ndoikuai rei vy.

Ha'e gui oopa py ma Nhanderuete ombovai vy oexa uka pavẽ gui ipo'akapave ha'e hi'aranduve va'ea. Ha'e ramo Jó nda'evei ramo vy aipoe'i: "Anhetẽ ri aikuaa vy e'y xeyvu va'ekue, mba'emo xevy pe iporã vaipa ha'e aikuaa va'erã e'y re anho", he'i (42.3b). Ha'e rami rire jypy guare gui Nhanderuete omoingo porãve Jó.

Jó heko porã ha'e mba'emo oguerekopaa re ijayvua

¹ Oiko peteĩ ava Uz vyvy pygua, Jó hery va'e. Ha'e va'e ava ma anhetẽ rupi ipy'a ha'e heko porã va'e. Nhanderuete renonde ojererokyjea rupi vy mba'emo vai gui ojepe'a kuerei va'e.

² Sete gua'y ha'e mboapy guajy kuery oguereko.

³ Hymba kuery ma sete mil vexe'i, três mil camelo, quinhentos toro meme ha'e quinhentos mburika'i. Ixupe omba'eapo va'e kuery voi mbovy rei e'y ikuai. Ha'e rami vy kuaray oua katy ikuai va'e gui oguerekopave va'e oiko.

⁴ Ta'y kuery ma peteĩ-teĩ ro rupi oje'oi 'rã jorire-rire ngaru ojapo aguã. Ha'e rami vy mboapy gueindy kuery oenoĩ kuerei 'rã ha'e kuery reve okaru ha'e oy'u aguã.

⁵ Ha'e kuery okarupa ma nhavõ Jó gua'y kuery oenoĩmba kuerei vy oiky'a'o ukapa 'rã teko vai gui. Ha'e rami vy ko'ẽ ramove opu'ã vy mymba oapy reve ome'ẽ 'rã Nhanderuete pe ha'e kuery mbovy pa ikuai rami vy, mba'eta aipoe'i: "Xapy'a rei ma xera'y kuery ojevavy ra'e, opy'a py nguete rovai ijayvu vai vy", he'i vy. Ha'e ramigua ae Jó ojapo riaa oikovy.

⁶ Ha'e gui peteĩ ára Nhanderuete ra'y kuery ou okuapy SENHOR renonde ojexa uka aguã. Ha'e kuery reve anha voi ou.*

⁷ Ha'e ramo SENHOR oporandu anha pe:

— Magui tu reju?

Anha ombovai SENHOR:

— Yvy ha'e javi rupi aikoague gui aju — he'i.

⁸ SENHOR oporanduve ju anha pe:

— Rexa pota pa xerembiguai Jó re? Mba'eta vyvy re jipoi avave rei ha'e va'e ramigua anhetẽ rupi ipy'a ha'e heko porã va'e, Nguete renonde ojererokyjea rupi vy mba'emo vai gui ojepe'a va'e — he'i.

⁹ Ha'e ramo anha aipoe'i SENHOR pe:

— Jó nda'u rive teve nguete renonde ojererokyjea rupi oiko?

¹⁰ Mba'eta ndee ma repena porã hexe, hoo re ha'e opa mba'e oguereko va'e re guive. Ha'e rami vy opo py ojapo va'e rei remoingo porã, ha'e rejapo mba'emo vyvy re oguereko va'e hetave ovy aguã rami.

¹¹ Ha'e rami teĩ emokuave'ẽ ndepo, ha'e ixugui eipe'apa opa mba'e oguereko va'e. Ha'e rami vy rexa 'rã nerononde py ijayvu vai rã nderovai — he'i.

¹² Ha'e rã SENHOR aipoe'i anha pe:

— Ma'ẽ, Jó oguereko va'e ha'e javi ma ndepo'akaa py oĩ, ha'e rã hexe anho ta'vy emoĩ eme ndepo — he'i.

Ha'e ramo SENHOR renonde gui anha oo ju.

Jó ojexavaia py teĩ ndojejavuyiague

¹³ Peteĩ ára, ta'y kuery guyke'y jypygua ro py okaru ha'e vinho oy'u okuapy.

¹⁴ Ha'e gui Jó-a py ou peteĩ hembiguai aipoe'i va'e:

— Vaka kuery reve vyvy roikarai, ha'e kuery katy'i rupi mburika kuery avi okaru jave

¹⁵ ore kuery re sabeu kuery ou xapy'a vy ogueraapa. Ha'e rami vy nerembiguai kuery ikuai va'ekue ojukapa kyxe py. Xee anho'i aa jepe, ndevy pe amombe'u vy aju — he'i.

¹⁶ Ha'e va'e ijayvu teri reve ou amboae ju. Ha'e vy aipoe'i:

— Tata Nhanderuete-a guigua yva gui ho'a vy oapypa ra'e vexe'i ha'e nerembiguai kuery ikuai va'ekue. Ha'e vy omomba. Xee anho'i aa jepe, ndevy pe amombe'u vy aju — he'i.

¹⁷ Ha'e va'e ijayvu teri reve ou amboae ju. Ha'e vy ha'e va'e aipoe'i:

* 1:6 "Nhanderuete ra'y kuery" he'ia ma hembiguai anjo kuery re ijayvu vy.

— Caldeu kuery mboapy henda rupi nhomboja'o vy camelo kuery re ou vy ogueraapa ra'e. Ha'e vy ojukapa nerembiguai kuery kyxe py. Xee anho'i aa jepe, ndevy pe amombe'u vy aju — he'i.

¹⁸ Ha'e va'e voi ijayvu teri reve ou amboae. Ha'e vy aipoe'i:

— Ndera'y ha'e nderajy kuery tujave va'e ro py okaru ha'e vinho oy'u okuapy jave

¹⁹ tekoa e'ÿa katy gui vyvutu atã opu'ã ouvy vy oo re ojeapi jova-jovai katy gui. Ha'e ramo ha'e kuery áry ho'a ramo amanomba. Xee anho'i aa jepe, ndevy pe amombe'u vy aju — he'i.

²⁰ Ha'e ramo Jó opu'ã vy omondoro oao, onhopĩ oakã ha'e ipukupa oupy vyvy rupi. Nhanderuete omboete vy

²¹ aipoe'i:

— Xepire rei reve aiko'i va'ekue ha'i rye gui, ha'e xepire rei reve ju 'rã aa. SENHOR ma mba'emo me'ëa, ha'e oipe'a va'erã avi oiko. Ta'ima'endu'a porãa SENHOR rery re! — he'i.

²² Ha'e nunga ha'e javi py Jó ndojejavyi, neĩ nda'ijayvui Nhanderuete ha'eve'ÿa rami joguerekoa rami.

2

¹ Peteĩ ára Nhanderuete ra'y kuery ou ju SENHOR renonde ojexa uka aguã, ha'e anha voi ha'e kuery reve ou henonde ojexa uka avi aguã.

² Ha'e ramo SENHOR aipoe'i anha pe:

— Magui tu reju?

Anha ombovai SENHOR:

— Yvy ha'e javi rupi aikoague gui aju — he'i.

³ SENHOR oporandu anha pe:

— Rexa pota pa xerembiguai Jó re? Mba'eta yvy re jĩpoi avave rei ha'e va'e ramigua anhetẽ rupi ipy'a ha'e heko porã va'e, Nguuete renonde ojererokyjea rupi vy mba'emo vai gui ojepe'a va'e. Ha'e ma oĩ atã ha'evea rami oikoa py, hovai apu'ã vy amomba rive aguã rami ndee xeapoxe teĩ — he'i.

⁴ Ha'e ramo anha aipoe'i SENHOR pe:

— Opire ha'e javi'i ha'vy tome'ë, mba'eta avakue opa mba'e oguereko va'e ome'ë 'rã guekove rekovia.

⁵ Ekuave'ëve ju ha'vy, ikãgue ha'e ho'o re epoko. Ha'e rami vy rexa 'rã nerenonde py nderovai ijayvu vai rã — he'i.

⁶ SENHOR aipoe'i anha pe:

— Ma'ë, ndepo'akaa py amboaxa, va'eri ejuka eme ta'vy — he'i.

⁷ Ha'e gui SENHOR-a gui anha oo vy omomba'eaxy Jó ai vaikue py, ipy mbyte guive ijapyte peve.

⁸ Ha'e ramo Jó uguapy oiny tanhimbu áry, ha'e vy ojopy peteĩ nhae'ũ ra'ykue onhekarai aguã.

⁹ Ha'e gui ta'yxy ou vy aipoe'i ixupe:

— Rei atã teri va'e ta'y ha'evea rami reikoa py? Ndeayvu vai na Nhanderuete re, ha'e gui emano.

¹⁰ Ombovai:

— Oikuaa ve'ÿ rei va'e rami ndeayvu. Nhanderuete gui iporã va'e anho ri ty'y jajopy 'rã, ha'e rã iporã e'ÿ va'e ma ndajajopyi avi 'rã teve? — he'i. Ha'e ramia ha'e javi py Jó ndojejavyi oayvu py.

¹¹ Ha'e gui ma mboapy Jó irũ kuery mba'emo vai hexe oikoague oendu vy peteĩ-teĩ ou guekoa gui: Temã pygua Elifaz, Sua pygua Bildade ha'e Naamã pygua Zofar. Ha'e va'e kuery jogueroayvu vy Jó oĩa katy jogueru omombaraete ha'e ombopy'a porã aguã.

¹² Mombyry rupi teri ha'e kuery oma'ë jogueru vy ndoexa kuaai okuapy. Ha'e rami vy onhendu ratã ha'e ojae'o okuapy. Ha'e vy peteĩ-teĩ oao puku omondoro, ha'e yvate rami oakã áry rupi omombo-mombo yvy ku'i.

¹³ Ha'e rami vy hexeve uguapy okuapy yvy py. Sete ára ha'e sete pytũ re ikuai va'eri peteĩve hexeve nda'ijayvui peteĩ ayvu py ma voi, haxy ete va'e oendua oexa vy.

3

Jó otui'iague ára re ijayvu vaiague

¹ Ha'e va'e rire Jó ae ijayvu. Ha'e vy ijayvu vai otui'iague ára re.

² Ha'e vy aipoe'i:

³ — Xetui'iague ára ndoikoi ma voi va'e rire,

ha'e va'e pytũ "Ixy oguereko peteĩ ava'i", 'ea va'e avi.

⁴ Ha'e va'e ára pytũmba va'e rire,

Nhanderuete yvate gui nopenai ramo,

yvate oĩa gui omoexakã e'ÿ va'e rire.

⁵ Pytũ reia ha'e kuaray'ã manoa anho oĩ va'e rire,

hi'áry rupi araipe va'e rire guive.

Ha'e va'e ára omoũmba va'e rire opa marã rei.

⁶ Ha'e va'e pyávy re ma pytũ ete va'e omo'ã va'e rire.

Ma'etÿ re ára mboae ikuai va'e rami toguerovy'aave eme.

Ha'e va'e jaxy pe "Jaxy ikuai va'e regua" ta'eave eme.

⁷ Ha'e va'e pytũ imemby e'ÿa va'e rire,

ha'e va'e py nonhenduai va'e rire ovy'a va'e.

⁸ Ijayvu vai kuaa va'e kuery ma ha'e va'e ára re ijayvu vai ma va'e rire,

- vixo vaikue ye'ē rupigua momyī kuaa kuery ae.
- ⁹ Tá, ha'e va'e pytū jaxy-tata ko'ē mbijarā ndojekuaai va'e rire, ha'e hendy va'e oarōmby ndojekuaai va'e rire. Ko'ē rai jave ko'ē oexaxe va'e kuery ndoexai ma voi va'e rire.
- ¹⁰ Mba'eta ha'e jave py nomboty raka'e ha'i ryepy rokē, xerexa py ajexavaia aexa e'ŷ aguā.
- ¹¹ — Mba'e re tu xee namanoi raka'e xeryru'i pyve? Mba'e re tu ha'e va'e gui aiko'i vy ndaxeayvuēvei?
- ¹² Mba'e re tu oiko raka'e o'u áry xekuavāarā? Mba'e re tu oī ikā xemokambuarā?
- ¹³ Mba'eta ha'e va'e ndoikoi va'e rire aŷ apytu'u porā rei 'rāgue. Ake ramo xevy oī 'rāgue apytu'u aguā,
- ¹⁴ huvixave ha'e nhomongeta va'ety vvy re ikuai va'ekue onhono porāa aguā ojapo ma voi va'ekue py itui va'e rami,
- ¹⁵ ha'e rami e'ŷ vy yvatekueve ouro ha'e prata oguereko va'ekue py ngoo omonyē va'ekue itui va'e rami,
- ¹⁶ ha'e rami e'ŷ vy hyru'i py oī va'e ojuka nhemi va'e rami xee ndaikoi ma voi va'e rire, kyrī'i va'e hexakāa peteĩgüeve oexa e'ŷ va'e rami.
- ¹⁷ Ha'e py ma ha'eve'ŷa rami ikuai va'ekue nanhomoangekovei ma 'rā. Ikane'ō va'ekue guive ikane'ōgua nho 'rā ha'e py.
- ¹⁸ Ha'e py ma escravo-rā ogueraa pyre ikane'ōgua 'rā okuapy, herekoa kuery ayvu nonhenduvei ramo.
- ¹⁹ Ha'e py vvyĩgüeve ha'e yvatekueve ikuai va'ekue itui pavē 'rā, tembigua'i ikuai va'ekue voi opatō pe ve'ŷ ma 'rā ikuai.
- ²⁰ — Mba'erā tu iporiaukue ojapoa ri hendy va'e oexa riae aguā rami? Mba'erā tu ikuera'i va'e okuave aguā rami ojapoa?
- ²¹ Ha'e kuery ma omano aguā anho oarō okuapy, ha'e rā novaēi. Ha'e kuery omano aguā oekave 'rā okuapy hepyve va'e onhomi mbyre oekaa rupi vvy ojo'o va'e gui.
- ²² Ha'e kuery ma onhono porāa rā ovya' a 'rā okuapy, oguerovy'a rei 'rā vvykua py ovaē vy.
- ²³ Mba'erā tu avakue pe oexa ukaa 'rā hexakā va'e haperā oikuaa uka e'ŷ re? Mba'eta Nhanderuete ojoko 'rā joa katy gui e'ŷ-e'ŷ.
- ²⁴ Mba'e re tu xee ha'u va'erā 'rāgue py ajou xepytuē atā aguā, ha'e yy onhoē va'e rami ajae'o ete aguā?
- ²⁵ Mba'eta akyjea ou ma xe'áry, aexa'āa oiko ma xere.
- ²⁶ Ndapytu'uvei, naī rivevei, neī naxekane'ōgua kuaavei, xepy'a reta rei aguā anho ou ramo — he'i.*

4

Jó pe Elifaz ijayvu eteague

- ¹ Ha'e ramo Temā pygua Elifaz ombovai. Ha'e vy aipoe'i Jó pe:
- ² — Xapy'a rei amongue ndevy ijayvu ramo nerendui 'rā ri ty'y? Ha'e rami avi mava'e tu ojejoko 'rā ijayvu e'ŷ aguā?
- ³ Ma'ē, ndee ma mbovy e'ŷ rei rekombo'e va'ekue, ha'e ipo kangy va'e remombaraete kuerei va'ekue.
- ⁴ Ndeayvua py reipytyvō va'ekue onhepyxanga va'e kuery, ha'e remombaraete ju va'ekue henapy'ā kangy va'e.
- ⁵ Ha'e rā aŷ ma ndere ju ha'e nunga ou ramo ndee nerenduxei 'rā. Ndee rejexavai vy nanderekorāvei.
- ⁶ Nhanderuete renonde rejererokyjea rupi ve'ŷ ri ty'y rejerovia, rearō reikovya ha'e ndereko porāa rupi ve'ŷ ri ty'y reiko?
- ⁷ — Nema'endu'a pota ke: Ojejavy e'ŷ va'e pa okanhy 'rā? Mamo tu heko porā va'e omombaague?
- ⁸ Xee aexaa rami, mba'emo vai nhotŷare kuery ma ha'e nungakue ae ju 'rā omono'ō.
- ⁹ Nhanderuete ipytuē ramo rive ha'e kuery ikuai axy 'rā. Opoxya rupi oipeju rā okanhymba 'rā.
- ¹⁰ Ha'e ramo guary kuery voi inharō teĩ okyrirī 'rā okororōa gui, guary ra'y kuery raī guive opēmba 'rā.
- ¹¹ Ha'e rami vy guary kuery ikangy 'rā oje'oivy mba'eve ndojukavei vy.

* 3:26 Jó ndoikuaai raka'e mba'e re pa ojexavaia. Ha'e rami vy ndovy'aia rupi ijayvu Nhanderuete re. Ha'e gui opaa py Nhanderuete ijayvu ixupe om'o'arandua rupi, capítulo 38 guive 40 peve, ha'e rā Jó ma nda'evei ramo ha'e rami ijayvuague re.

- Guary kunha ra'y kuery voi opa rupi 'rã oaĩmba.
 12 — Peteĩ ayvu aendu xee ae'ia py omombe'ua rã.
 Haxy'i py aendu kuaa xeapyxa py ijayvua mbegue rã.
 13 Pyávy, ajexa ra'ua re aikuaa pota ete reve,
 avakue oke vaipa jave
 14 ou karamboae xemondyi ha'e xemboryryipaará.
 Xekãgue eteve voi oryryipa.
 15 Ha'e ramo peteĩ nhe'ẽ oaxa xerenonde rupi.
 Ha'e rami vy ojapo xe'a xerete rupi ikuai va'e opu'ãmba aguã rami.
 16 Ha'e va'e opyta ho'amy va'eri ndaexa kuaai hova.
 Peteĩ mba'e rive ojekuaa aexaa py.
 Jypy nonhendui mba'eve. Ha'e gui ma aendu peteĩ aipoe'i va'e:
 17 “Imarã va'e kuery nda'u heko porã 'rã Nhanderuede renonde?
 Avakue nda'u iky'a e'ỹ va'e 'rã oiko imoingoare renonde?
 18 Ma'ẽ, Nhanderuede ma guembiguai kuery re ndojeroviai 'rã.
 Mba'eta guembiguai anjo kuery re eteve voi oikuaa teko vai oĩa.
 19 Ha'e rã yapo guigua py hoo va'e re katuve ma.
 Ha'e kuery ma vyvuku'i gui rive ojapo pyre,
 ha'e tanambi rami rive ju 'rã omou'ũa.
 20 Aje'ive ha'e kuery itui'i 'rã, ha'e gui ka'arukue ju omombaa 'rã.
 Okanhy 'rã raka'e rã peve guarã, avave rei oikuaa pota e'ỹ re.
 21 Ha'e kuery rekove oipe'aa ramo
 omano 'rã 'arandua oupity e'ỹ re”, he'i.

5

Jó Nhanderuede oeka aguã re Elifaz ijayvuague

- 1 — Ejapukai aỹ! Ha'e rami teĩ oiko ri nda'u nerenduarã?
 Mava'e anjo iky'a e'ỹ va'e pe tu renhepytyvõ uka ta?
 2 Mba'eta hi'arandu e'ỹ va'e ipoxya ae ombovaipa 'rã.
 Inhakã porã e'ỹ va'e ivaia rive 'rã ojuka.
 3 Xee ma aexa porã hi'arandu e'ỹ va'e onhemoingo porã merami ramo.
 Ha'e rami teĩ are'ỹ'i re aikuaa hoo oĩa ayvu vaipy oikoa.
 4 Ta'y kuery voi mombyry ikuai ipytyvoarã gui.
 Tetã kora rokẽ py ha'e kuery ojexa uka rã ombopagaa,
 heraa jepearã ndoiko ramo.
 5 Ha'e kuery onhotỹ va'ekue ma ijajupa rã ikaruai va'e kuery ho'upa rive 'rã,
 juu mbyte rupi henhoĩ va'ekue voi oipe'apa 'rã.
 Ha'e mba'emo oguerako va'ekue ma oikuaa pota rei va'e kuery omokanhymba 'rã.
 6 Mba'eta teko axy ma vyvuku'i gui rive ndoiko,
 vvy gui e'ỹ henhoĩ jajexavai aguã.
 7 Ha'e rami 'rãgue py avakue ojexavai aguã rami ae 'rã itui'i,
 tapyĩ gui tata raviju yvate katy ae 'rã ovevea rami.
 8 — Ha'e gui xee va'e rire ma aeka 'rãgue Nhanderuede,
 ixupe anho amboaxa 'rãgue xereko.
 9 Mba'eta ha'e ma ojapo 'rã mba'emo tuvixa va'e oikuaa pyrã e'ỹ,
 ha'e nhomondyipaará omombe'u kuaa pyrã e'ỹ.
 10 Ombo'oky 'rã vvy áry rupi,
 omoakỹ 'rã mba'ety ikuai va'e.
 11 Ha'e rami vy ogueraa jepe 'rã vvyĩgue'i peteĩ henda yvate py,
 oja'e va'ekue oiko porã rupi ovy'a nho aguã.
 12 Ha'e rã jokorea kuery onhembopy'aa ma ha'e ombovaipa 'rã,
 opo py ojapoxe va'ekue ndojapo kuaai aguã.
 13 Ombo'a 'rã oikuaapave va'e nhombotavya py ae.
 Ha'e ramo oikuaapa va'e onhembopy'aague opa rive 'rã.*
 14 Ha'e kuery ma ara py teĩ ojou 'rã pytüa anho,
 kuaray mbyte jave teĩ pytü rupi merami ikuai, opovyvy 'rã oje'oivy.
 15 Nhanderuede ma jogueraa jepe 'rã ha'e kuery juru gui kyxe oẽ va'e gui,
 ipo'akave va'e po gui ogueraa jepe 'rã ojexavai va'e.
 16 Ha'e rami rã oĩ 'rã iporiaukue'i oarõ okuapy aguã,
 ha'e rã joapo vaia kuery ma okyrirĩmba 'rã.
 17 — Ovy'a ete 'rã avakue Nhanderuede omo'arandu va'e.
 Ha'e nunga rupi endu rive eme Ipo'akapave va'e nemo'arandu rã.

* 5:13 1 Coríntios 3:19

- 18 Mba'eta ha'e ma nhomboai 'rā, ha'e gui ha'e ae ju oipoano 'rā.
Nhomomba'eaxy 'rā, ha'e gui opo py ae ju 'rā omonguera.
- 19 Seis-kue rejexavaia gui ha'e ndereraa jepe 'rā,
ha'e sete-a py voi mba'emo vai nanderupityi 'rā.
- 20 Karuai py tei ndereraa jepe 'rā remano aguā gui,
joe opu'āa py guive ndereraa jepe 'rā kyxe po'akaa gui.
- 21 Nderepy 'rā ayvu vai gui,
ha'e ramo mba'emo mbovaipaarā ovaē rā rexa tei nderekyjei 'rā.
- 22 Mba'emo mbovaipaa ha'e karuai oiko rā repuka 'rā,
vixo ka'aguy regua gui guive nderekyjei 'rā.
- 23 Mba'eta yvy rupi ita ikuai va'e reve voi rejapo 'rā petei rami ikuai porā aguā,
mymba yvy regua voi ndereve ikuai 'rā petei rami.
- 24 Reikuaa 'rā ndero py mby'a porā oia,
ha'e mba'emo rereko va'e ikuai rupi reikuaa pota reovy rā ndoatai 'rā mba'eve.
- 25 Reikuaa avi 'rā neramymino kuery heta 'rā,
ndeguigua kuery yvy re jai rogue ikuai va'e rami 'rā heta.
- 26 Ndetuja'i jave tei nembaraete reve 'rā reo yvyra rupa py,
trigo ojokua pyre hi'āra py porā omono'ōa rami.
- 27 — Ma'ē, ha'e nunga re roikuaa pota rā ha'e rami ae.
Ejapyxaka ndee voi, ha'e nunga re eikuaa pota avi reiko porā aguā — he'i.

6

Jó onhemboeko porāa rupi ijayvuague

- 1 Ha'e ramo Jó ombovai:
- 2 — Ai! Xeayvua re anhetē oikuaa potaa va'e rire,
ha'e mba'emo opejaa py xeporiaua opejaa va'e rire
- 3 ha'e va'e ma anhetē ita ku'i ye'ē rembe rupi ikuai va'e gui ipoyive 'rāgue.
Ha'e nunga rupi ae xevai reve xeayvu va'ekue.
- 4 Mba'eta Ipo'akapave va'e ma guembiporu hu'y py xenhyvōmba,
ha'e ramo xenhe'ē py aendu veneno ramigua.
Xerovai meme Nhanderueete ombou xemongyjaarā.
- 5 Mburika'i yvy'āa rupigua nda'u nhuū re okaru reve onhe'ē 'rā teve?
Vaka kuery nda'u onhe'ē 'rā okaru porāa py?
- 6 Juky e'y re teve ja'u 'rā he'ē e'y va'e?
Tyrā uru rupi'a xiā re oī 'rā teve heea?
- 7 Xenhe'ē py nda'uxei va'ekue
a'y ajeguaru reve tei ha'u.*
- 8 — Nhanderueete ajerurea ojapo va'e rire,
aipota va'e ha'e omoingo va'e rire!
- 9 Nhanderueete pe ha'eve va'e rire xemokanhy voi aguā,
opo oupi vy xejuka ete aguā!
- 10 Ha'e nunga oiko ma va'e rire xepy'a guaxu 'rāgue,
haxy aendu temaa py tei apo-apo 'rāgue avy.
Mba'eta xee ma lky'a e'y va'e ayvu rovai xeayvu va'e'y.
- 11 — Mba'e tu arōve ta, xembaraete vy e'y?
Mba'erā tu aikove riae ta, amano aguā rami tema aiko vy?
- 12 Xembaraetea nda'u ita rami hatā va'e?
Xero'o nda'u overa va'e guigua rami hatā va'e?
- 13 Any! Naendui ae xepytyvōarā.
Xegui oipe'apaa ma xembaraeterā va'ekue.
- 14 — Ojexavai va'e pe irū kuery omboaxya'i oexa uka va'e rire,
Nhanderueete renonde ojererokyjea gui ojepe'a e'y rā.
- 15 Ha'e rā xeryvy kuery ma anhetē rupi e'y xerereko.
Ha'e kuery ikuai petei yakā oxyry atā vy hembe rupi oia rami
- 16 yro'y ogueroxyry reve,
yro'y apī huku ovy jave,
- 17 ha'e rami tei haku jave oxyry atā va'ekue typa rive va'e rami,
ndaevovovei ha'e oxyryague rupi ndoxyryvei va'e rami.
- 18 Ha'e ramo uguata va'e kuery yy rekā rupi ojepekuavo 'rā jogueravy tape oo aguā va'ekue gui,
ha'e vy tekoo e'yā katy oje'oi vy omanomba 'rā ha'e py.
- 19 Temá yvy gui uguata va'e kuery oeka tei yy oxyry atā va'e,
Sabá gui uguata va'e kuery voi iporiaupa 'rā yy re.

* 6:7 Apy tembi'u hee e'y va'e re Jó ombojoja, ojexavaia re ijayvu vy.

- ²⁰ Yy oī aguā re ojerovia va'ekue oxīmba 'rā okuapy.
Oxyryague py ovaē vy ndoikuaavei rei 'rā okuapy.
- ²¹ Ha'e rami ae peē kuery voi xevy pe mba'everā ovare e'ŷ va'e pendekuai.
Mba'eta ajexavai rā pexa vy penhemondyipa rive.
- ²² Xee nda'u aipoa'e: “Peme'ē ke mba'emo xevy”, ha'e teve?
Tyṛā pa “Peme'ē mba'emo pereko va'e xepytyvō aguā”, ha'e teve?
- ²³ “Xereraa jepe ke xemoingo axya po'akaa gui”,
e'ŷ vy “Xerepy ke porayvu e'ŷ va'e kuery po gui”, ha'e teve pēvy?
- ²⁴ — Xerekombo'e na, ha'e rā xee akyriri' rā.
Pemombe'u porāve na mba'e nunga py pa ajejavyague.
- ²⁵ Anhetē ayvu ha'evea ramigua ma oenduxe vai pyrā meme!
Ha'e rā peē kuery ma mba'erā tu pendeayvu ete xevy?
- ²⁶ Peē kuery xemongetaxe ri ty'y xeayvua re,
petēi ndaekorāvei va'e yvytu pe rive ijayvu va'e rami xeayvu rive?
- ²⁷ Tyre'ŷ kuery re teve pexa 'rā xortea,
ha'e pejogueroayvu 'rā teve peneirū repyrā re?†
- ²⁸ Ha'e gui aŷ peē kuery xemboaxy'i ri vy pema'ē porā xere,
ha'e pexa penerenonde ndaxeapuia.
- ²⁹ Peikuaa pota ju ke, ajerure pēvy, ha'eve'ŷa rami xekuaa e'ŷ aguā.
Peikuaa pota ju, ha'e vy peikuaa 'rā ha'evea rami aikoa.
- ³⁰ Xeayvua py teve ha'eve'ŷa ramigua pendu?
Xejuuru py ha'eve'ŷ va'e re xeayvu va'e rire nda'u xee voi ndaikuaai 'rāgue teve?

7

Nhanderuete pe Jó ijayvuague

- ¹ — Yvy re avakue ojexavai aguā rami e'ŷ teve ikuai?
Oikovea āra omba'eapo va'e rami e'ŷ teve ojexavai?
- ² Escravo kuaray'ā oeka teī va'e rami,
ha'e omba'eapo va'e opagaa aguā oarō va'e rami,
- ³ xevy pe ha'e rami ae avi ome'ēa mba'erā e'ŷ aiko aguā jaxy nhavō re,
ha'e pytū aiko axy aguā ome'ēa avi.
- ⁴ Anhenō vy aipoa'e: “Mbovy hora nda'u ha'eve 'rā avy ju aguā?”
Ha'e rami teī pytū ipuku ramo
xerupa rupi ajere-jere tema ajupy ko'ē peve.
- ⁵ Xero'o re oī taxo ha'e pekue vaikue.
Xepire re ipekue oī va'e gui ipeu jepi.
- ⁶ Xe'āra ma mba'emo mbovyvya gui ipojavave,
ha'e vy opa 'rā arō e'ŷkue re.
- ⁷ Nema'endu'a ke xerekovea yvytu rami rive oaxapa vyvoia re.
Xerexa ndoexavei ma 'rā iporā va'e.
- ⁸ Aŷ xerexa okuapy va'e ma ndaxerexavei ma 'rā.
Ha'e kuery rexa oxareko rei teī xee ndajekuaavei ma 'rā.
- ⁹ Arai ivaipa reve oaxa va'e rami avi
onhono porā mbyre noēvei 'rā.
- ¹⁰ Ha'e kuery ndojevyvei 'rā ngoo katy,
ikuaiague py ae teī ha'e kuery re na'ima'endu'aavei ma 'rā.
- ¹¹ — Ha'e nunga rupi ae xee ndajokoi xejuuru.
Ha'e rami vy xeayvu 'rā xenhe'ē py ajexavaia aendu va'e re,
anhemombe'u 'rā xerekove re ajexavaia rupi.
- ¹² Xee nda'u ye'ē, e'ŷ vy vixo ye'ē rupigua teve,
ndee xerarō uka aguā?
- ¹³ Xee aipoa'e: “Xerupa py aīa py avy'a 'rā,
xerupa py apytu'u 'rā ajexavaia re xeayvua gui”, ha'e.
- ¹⁴ Ha'e rami teī ndee xemondy'i 'rā mba'emo aexa ra'u va'e gui,
xemongyje aexa merami va'e gui.
- ¹⁵ Ha'e nunga rupi xenhe'ē pe ha'eveve 'rāgue xejryvipya va'e rire.
Aiko axy 'rāgue py ha'eveve amano aguā.
- ¹⁶ Xevy pe ha'eve ma aikovea.
Raka'e rā peve xee ndaikovexei.
Xereja ha'vy, mba'eta xe'āra ma yvytu rami rive oaxapa vyvoi.
- ¹⁷ Mba'e nunga tu avakue ikuai rejou porā aguā,
ha'e kuery re repena aguā?

† 6:27 Apy Jó ijayvu oirū kuery nomboaxya re.

- 18 Mba'eta ára nhavô reju reikuaa pota aguã,
ha'e hora nhavô 'rã rexa pota.
- 19 Raka'e peve tu ndereipe'ai 'rã nderexa xegui?
Raka'e peve 'rã nda'evei xerendry amokô aguã?
- 20 Xapy'a rei ajevavy vy mba'e nunga ha'eve'y va'e tu ajapo ndevy,
ndee avakue re reikuaa pota va'e?
Mba'e re tu xeapo hu'y rea'anga aguã,
xejeupe ae ipoyi va'e apyta aguã rami?
- 21 Mba'e re tu nerembogueti xereko vaia,
ha'e ndereipe'ai ajevavyague?
Mba'eta aỹ ha'a ta ma yvy rupi.
Ha'e va'e rire ndee xereka vy ndaxejouvei ma 'rã — he'i.

8

Nhanderuete reko porãa re Bildade ijayvuague

- 1 Ha'e ramo Sua pygua Bildade ombovai:
2 — Raka'e peve 'rã tu pova'e nunga re ndeayvu?
Raka'e peve 'rã tu ndejuru gui ndeayvuẽ yvytu atã va'e rami rive?
- 3 Nhanderuete nda'u ha'eve'yã rami 'rã oikuaa pota?
Ipo'akapa va'e nda'u gueko porãa rupi e'y 'rã nhanderereko?
- 4 Hovai ndera'y kuery ojevavy rire
omombo ma ojevavyague re opaga aguã py.
- 5 Ha'e rami avi xapy'a rei ndee Nhanderuete reka rã,
ha'e Ipo'akapa va'e pe nemboaxy aguã re rejerure rã,
6 xapy'a rei nandeky'aia ha'e ndereko porãa rupi ri reiko ramo,
are'y re ha'e onhemoi 'rã nepytyvô aguã,
ha'e vy nemoi ju 'rã ndereko porãa ojekuaa porã aguã py.
- 7 Jypy reikoague py ma anhetẽ ne'yvy'i va'ekue,
ha'e rã opaa py ma ndeyvate ete 'rã.
- 8 — Ha'e gui aỹ ma xee ajerure ndevy, eporandu na ymagua kuery rekokue re,
eikuaa pota neramoĩ kuery ikuaiague re.
- 9 Mba'eta nhande ma kue'ive guare jaiko vy mba'eve ndajaikuuai.
Ha'e nhande'ára yvy re jaikoa ma kuaray'ã rami oaxa ovy va'e.
- 10 Neramoĩ kuery nanembo'e'i ri ty'y,
ha'e kuery nanemongetai ri ty'y?
Ha'e vy ha'e kuery ae o'arandua rupi nomombe'ui ri ty'y po rami?
- 11 Mba'eta papiro renhoĩ ma yapo py anho 'rã yvate,
junco renhoĩ guive yy py anho 'rã oiko porã.
- 12 Ha'e va'e nunga ipyau teri reve ojayaa e'y re teĩ
amboae jai rogue gui ipiru voive 'rã.
- 13 Ha'e rami ae avi ikuai Nhanderuete gui hexarai va'e kuery ha'e javi.
Mba'eta heko vai va'e kuery mba'emo oarô okuapy va'e opa rive 'rã.
- 14 Ha'e kuery oĩ atã merami teĩ opa xapy'a 'rã,
ha'e kuery ojeroviaa ma nhandu kya rami rive 'rã ivaipa.
- 15 Ikya re amongue ojeko rã oxopa 'rã.
Ha'e va'e re amongue ojopy rã ivaipa rive 'rã.
- 16 Ha'e kuery ma ikuai kuaray py mba'emo rogue oiko porã vy
yvotyty ha'e javi rupi hoky pojava va'e rami.
- 17 Hapo ma onhemamamba 'rã ovy ita ijaty oupy va'e áry rupi,
henhoĩ vy oike 'rã kora hi'ái va'e re voi.
- 18 Ha'e rami teĩ xapy'a rei oĩague gui Nhanderuete omondoro ramo
oĩague py ae teĩ hexe na'ima'endu'aavei ma 'rã.
- 19 Ha'e rami rire hekove mba'everã ndovare!
Ha'e gui yvy ku'i py henhoĩague gui amboae ju 'rã henhoĩ.
- 20 — Ha'e rã anhetẽ rupi ipy'a va'e kuery ma Nhanderuete ndoejai 'rã,
nomboaxai 'rã guive heko vai va'e kuery po py.
- 21 Ha'e ma ndejuru py omoĩ 'rã nderory nho aguã,
nerembe re omoĩ 'rã revy'a aguã.
- 22 Ha'e rã ndejojai reiare kuery ma ojee ae omoĩ 'rã oxĩmba reia.
Heko vai va'e kuery ro okanhymba 'rã — he'i.

9

Nhanderuete pe Jó nombovai kuaaia rami ijayvuague

- 1 Ha'e ramo Jó ombovai vy aipoe'i:

- 2 — Anhetē, xee voi aikuaa rā ha'e rami ae.
Ha'e rami teī marā rami vy 'rā tu avakue onhemboeko porā Nhanderuete renonde?
- 3 Mba'eta xapy'a rei hexeve avakue nhombojovake ramo
mil-kue oporandua regua neī peteīve ma nombovai kuaai 'rā.
- 4 Ha'e ma opy'a py oikuaapa ha'e ipo'akapave va'e.
Mava'e tu hexe opu'ā reague gui oo porā ju 'rā?
- 5 Ha'e ma oipe'a 'rā yvyty ikuai va'e oikuaa okuapy e'ŷ re.
Opoxya py ombovaipa 'rā.
- 6 Ha'e ma vvy omomyī vy oguerova 'rā oīa gui,
ha'e ramo ijyta oī va'e oryryipa 'rā.
- 7 Kuaray pe ha'e ijayvu rā ndojopevei 'rā.
Omo'ā 'rā guive jaxy-tata ikuai va'e.
- 8 Ha'e ae'i oipyo va'ekue yva,
ha'e ye'ē áry rupi oguata 'rā oikovy.
- 9 Ha'e ma jaxy-tata apoare: Ursa, Hendy guaxu va'e,
Eixu, jaxy-tata kuaray ijapu'a'ia katy ikuai va'e guive.
- 10 Ha'e ma mba'emo tuvixa va'e oikuaapy e'ŷ apoa,
mba'emo porā omombe'u kuaapy e'ŷ guive.
- 11 Ma'ē, xapy'a rei xeyvy'iry rupi ha'e oaxa rā xee ndaexai 'rā.
Xerenonde rupi ete oiko teī xee ndaikuaai 'rā.
- 12 Mba'emo ha'e oipe'a ta ramo mava'e tu ojoko 'rā?
Mava'e tu aipoe'i 'rā ixupe: “Mba'e tu rejapo?”
- 13 — Nhanderuete ma nomboaxa rivei 'rā opoxya.
Ha'e ramo henonde rupi ojero'a 'rā okuapy Egito pygua pytyvōa kuery.
- 14 Ha'e ramo mba'exa tu xee ambovai ta?
Mba'exa tu aikuaa 'rā xeyvurā, hexeve ajogueroayvu aguā?
- 15 Xee xereko porā va'e rire teī ixupe ma ndaxeayvu kuaai 'rāgue.
Ha'e rami 'rāgue py xemboayvuarā pe ajerure 'rāgue xemboaxy aguā re.
- 16 Hery rupi ajapukai rā ombovai teī
xee aikuaa rā noendui 'rā ajerurea.
- 17 Mba'eta xemou'ū vytytu atā va'e py,
ha'e mba'e re'ŷ xemoingo axyve tema.
- 18 Ha'e ndoejai xepytuē aguā rive.
Ha'e rami 'rāgue py xere ombou xereko axyarā.
- 19 Xapy'a rei ipo'akaa re aikuaa potaxe ramo ma ha'e aipoe'i 'rā: “Apy ma aī.”
Ha'e gui anhemboeko porāxe ri ramo “Mava'e tu xerenoi?” he'i 'rā.
- 20 Xee ma heko porā va'e aiko va'e rire teī xeyvy py ae rive 'rāgue aexa uka xereko vaia.
Anhetē rupi xepy'a teī ae ma ha'e xekuaa 'rā otekoavy va'e rami.
- 21 — Ha'e rami avi xee ma anhetē rupi xepy'a va'e, xenhe'ē py ndajeayvuiveikue py aiko,
neī xerekove re ae ma voi napenai.
- 22 Xevy pe ma opa mba'e peteī'i rami meme merami.
Ha'e rami vy aipoa'e: “Ha'e ma joo rami 'rā omomba anhetē rupi ipy'a va'e ha'e heko vai va'e”, ha'e.
- 23 Mba'emo vai jojuka xapy'a ramo
ha'e ojojai 'rā ojejavy e'ŷ va'e ojexavai rā.
- 24 Heko vai va'e kuery po py omboaxaa ma vvy
teī Nhanderuete omo'ā joguerekoa kuery rova.
Ha'e'ŷ ri ha'e nunga moingoa oiko ramo mava'e tu omoingo?
- 25 — Xe'ára aikoa ma onha va'e gui oaxa pojavave.
Oaxa vyvoi, ha'e rā ndaexai xembovy'arā va'ekue.
- 26 Oaxa pojava ovy kanoā jai rogue gui ojapo pyre rami,
ha'e taguato vixo'i re oguejy xapy'a va'e rami.
- 27 Xapy'a rei xee aipoa'e 'rā: “Xee xerexarai 'rā ajexavaia re,
ajepe'a 'rā xeporiaua gui, ha'e vy avy'a 'rā”, ha'e.
- 28 Ha'e rami va'e rire teī haxy aendu va'e xemongyje teri 'rāgue,
mba'eta aikuaa porā ndee xekuaa 'rā heko porā va'e rami e'ŷ.
- 29 Ha'e rami vy xembopaga 'rāe.
Ha'e ramo mba'erā tu anhea'āve ta?
- 30 Xapy'a rei yro'y rykukue py ajau,
ha'e kavō py xepo aiky'a'o
- 31 teī ndee yapo py ju 'rā xemombo.
Ha'e ramo xeao ae voi ojapo 'rā xegui ojeguarua aguā rami.
- 32 Mba'eta Nhanderuete ma xee ramigua ava e'ŷ oiko.
Ha'e rami e'ŷ va'e rire xee ambovai 'rāgue oremboayvu aguā katy rojoguera rupi ma voi.
- 33 Ndoikoi orembyte

- ore mokoïve re opo omoï va'erā.
³⁴ Xe'áry rupi gui vyvya po'i'i ha'e oipe'a,
 ha'e naxemongyjevei ma va'e rire
³⁵ ha'eve 'rāgue akyje e'ý re xeayvu aguā.
 Ha'e rami e'ý rā nda'evei xevy.

10

- Nhanderuetē rovai Jó ijayvuague*
¹ — Xenhe'ē py ndarovy'avei ma xerekove.
 Xeayvu 'rā ndavy'aia ha'e javi re,
 xenhe'ē py ajexavaia aendu reve 'rā xeayvu.
² Aipoa'e 'rā Nhanderuetē pe: “Xembopagave eme.
 Eikuaa uka porā ke mba'emo vai xere rejou va'e.
³ Ndee nda'u xembojexavaixe vai ri?
 Mba'eta reja merami neremimoingo ndepo py ae rejapo va'ekue.
 Tyrā pa heko vai va'e kuery onhembopy'aa rive rejou porāve?
⁴ Ndee voi teve to'o guigua nderexa va'e?
 Avakue oexaa rami ae avi teve ndee voi rejoexa?
⁵ Imarā va'e kuery oikoa ára rami teve nde'ára voi oï?
 Ha'e ndee reikoa ma'etý teve avakue oikoa ma'etý rami,
⁶ xereko vaia re reikuaa pota aguā,
 ha'e ajevavya re rexa pota aguā?
⁷ Ndee ma reikuaa porā ojevavy va'ety e'ý aikoa.
 Ha'e rami teï ndoikoi ndepo gui xereraa jepearā.
⁸ Ndepō py ae xemboypy ha'e xeapopa va'ekue.
 Aý ma xemombaxe ju.
⁹ Nema'endu'a ke yapo gui rive xeapoague re.
 Ha'e rā aý ta'vy yvy ku'i ju xemoingoxe?
¹⁰ Kamby rami e'ý teve renhoē xerekove,
 ha'e kamby kekue rami rive teve xeapo?
¹¹ Xepire ha'e xero'orā py xemonhemonde,
 ha'e gui xekāgue ha'e xerajyrā reipopē va'ekue.
¹² Xerekoverā reme'ē va'ekue ndeporayvua rupi,
 ha'e xere repenaa rupi xerarō va'ekue.
¹³ Ha'e nunga renhomi nekuraxō py.
 Va'eri aikuaa porā po rami renhembopy'aa.
¹⁴ Xapy'a rei ajevavy ramo ndee reikuaa pota 'rā.
 Ha'e rami vy neremboguetē 'rā xereko vaiague.
¹⁵ Xapy'a rei xereko vai ramo nda'evei ete 'rā xevy!
 Ha'e rami avi xereko porā vy ma nda'evei avi xekā amopu'ā aguā,
 mba'eta aximba reve anho aexa xeporiaukuea.
¹⁶ Mba'eta xekā amopu'ā ramo ndee xembo'a 'rā guary inharō va'e rami.
 Ha'e vy xerovai rexa uka ju 'rā ndepo'akapaa.
¹⁷ Rembou ju 'rā xerovai ijayvu va'erā,
 ha'e remboeta 'rā xerovai ndevaia.
 Mba'emo vai anho rembou 'rā xere opu'ā va'erā.
¹⁸ Mba'erā tu ha'vy xerenoē raka'e ha'i rye gui?
 Ai! Avave xerexa e'ý re amano ma voi va'e rire
¹⁹ xee ndaikoi ma voiague rami 'rāgue aï,
 ha'e xeryru'i py aia guive xereraa 'rāgue xenhono porāa aguā katy.
²⁰ Mbovy'i e'ý teve oï xe'ára?
 Epytu'u ke ha'vy, xereja,
 xapy'a'i ri jepe xekane'ōgua aguā,
²¹ ha'e xee aa e'ý mbove peteï henda ha'e gui ajevvy ju e'ýa katy,
 yvy pytūa ha'e manoa'ā oïa py,
²² yvy huū reia, pytūa etea,
 yvy manoa'ā ha'eve'ýa ramigua anho oïa,
 hendy va'e eteve voi pytūa py”, he'i.

11

- Jó ojevavya rami Zofar ijayvuague*
¹ Ha'e ramo Naamá pygua Zofar ju ombovai:
² — Nanembovaiai 'rā ri ty'y po rami ndeayvu reta rei rā?
 Ha'evea rami teve reiko ndeayvu kuaa etea py?

- ³ Ndeayvu reta rivea gui teve avakue okyrirí 'rã?
Ha'e rã ndee rejojai 'rã teve avave rei nemoxĩmbaa ju e'ỹ re?
- ⁴ Mba'eta aipo're: "Xee ma anhetêgua meme aikuaa va'e,
ha'e nerenonde iky'a e'ỹ va'e aiko", 're va'ekue.
- ⁵ Ai! Nhanderuete ijayvu ma va'e rire,
nderovai ojuru oipe'a va'e rire,
- ⁶ omombe'u porãve 'rãgue 'arandua ndoikuaa ukai teri va'e,
mba'eta hi'arandua ma anhetê va'e meme, joo rami e'ỹ-e'ỹ oikuaa uka teĩ.
Ha'e rami teĩ reikuaa pota pova'e re:
Amongue henda py Nhanderuete neĩ ndoikuaa potai rejeyavya ha'e javi re.
- ⁷ — Ndee teve reikuaa 'rã Nhanderuete mba'emo oikuaa uka e'ỹ va'e?
Reikuaa pota ta teve lpo'akapa va'e re oi va'e ha'e javi re?
- ⁸ Mba'eta hi'arandua ma yvatea rupi peve oo.
Mba'e tu ndee rejapo kuaa ta?
Hi'arandua ma vyvukua vaikue gui ipy pukuve va'e.
Mba'e tu ndee reikuaa ta?
- ⁹ Ko vvy gui eteve voi ipukuve va'e,
ha'e ye'ẽ gui ipyve va'e.
- ¹⁰ Xapy'a rei ha'e oaxaa rupi amongue ombo'a vy
omboayvu aguã katy ogueraa ta ramo mava'e 'rã tu ojoko?
- ¹¹ Mba'eta ha'e ma oikuaa avakue ovare e'ỹ va'e ha'e javi,
oexa pota e'ỹ re oexa ma voi 'rã heko vaia.
- ¹² Ha'e gui ava hi'arandu e'ỹ va'e onhemoingo kuaa 'rã teve hi'arandu va'e?
Mburika'i vvy'ã rupigua ra'y ava ojeapo kuaa ramo mae ha'e nunga ha'eve.
- ¹³ — Xapy'a rei nekuraxõ rovera vy
Nhanderuete pe ndepo reupi,
- ¹⁴ xapy'a rei ndepo py rejapo vaiague mombyry remombo,
ha'e ndero gui ha'eve'ya ramigua reipe'a vy,
- ¹⁵ ha'e rami vy mae nderova reupi 'rã ndeky'a e'ỹ reve,
ha'e reĩ atã 'rã mba'eve nemongyjeve e'ỹ re.
- ¹⁶ Ha'e rami vy nderexarai 'rã rejexavaiaague re,
ha'e nungakue re nema'endu'a teĩ yvy oxyry ovy va'ekue re rami rive.
- ¹⁷ Reikoa ma kuaray mbyte jave hexakãa gui hexakãve 'rã.
Pytũ oia py teĩ ko'ẽa rami 'rã ndevy.
- ¹⁸ Renhenhandu porã 'rã, mba'eta oi ju 'rã rearõ reikovy aguã.
Ndevvỹry rupi rema'ẽ ma vy reke porã 'rã.
- ¹⁹ Renheno rejupy ramo avave rei nanemondyi 'rã.
Heta 'rã ou ndevy onhepytyvõ uka vy.
- ²⁰ Ha'e rã heko vai va'e ma ndaexa pyxovei 'rã,
ha'e kuery onhemi aguã va'ekue ivaipa 'rã.
Ha'e kuery oarõ okuapya ma ojeapo 'rã inhe'ẽ okanhy aguã rami rive — he'i.

12

Oirũ kuery ijayvuague Jó ombovaiaague

- ¹ Ha'e ramo Jó ombovai:
- ² — Peẽ kuery anho ma nhi'ã avakue peiko,
ha'e pmano ramo ndoikovei 'rã hi'arandu va'e.
- ³ Ha'e rami avi xee voi peẽ rami xe'arandu va'e.
Xee ma pendegui xe'yvyĩve va'e'ỹ.
Mava'e tu ndoikuaai 'rã ha'e ramigua?
- ⁴ Ha'e gui xee ma xeirũ kuery xejojai rei va'e aiko,
Nhanderuete pe ajapukai rã xembovai teĩ.
Mba'eta heko porã ha'e ha'evea rami ikuai va'e ma ojojai rei pyrã meme ae ikuai.
- ⁵ Iporiau e'ỹ va'e kuery oikuaa rã iporiaukue'i ojou vaipy ikuai.
Ha'e rami vy ha'e kuery omoanha-anha 'rã ho'a rai'i va'e oityxe vy.
- ⁶ Porayvu e'ỹ va'e kuery ikuai py ovy'apa rei 'rã,
Nhanderuete re ijayvu rei va'e kuery ma iporiau e'ỹ va'e meme merami.
Ha'e kuery nguuetã rami oguereko opo mbaraetea rive.
- ⁷ — Ha'e rami teĩ eporandu na aỹ mymba ikuai va'e pe.
Ha'e rã ha'e kuery nembo'e 'rã ha'e nunga re.
Guyra oveve va'e pe reporandu rã ha'e kuery oikuaa uka 'rã ndevy.
- ⁸ Ha'e rami e'ỹ vy eporandu na vvy pe,
ha'e ramo nembo'e 'rã.
Pira ye'ẽ rupigua voi omombe'u porã 'rã ndevy.

- ⁹ Mava'e nda'u ha'e va'e kuery regua ndoikuaai 'rã
SENHOR opo py ha'e nunga ojapopaague?
- ¹⁰ Mba'eta opo py oguereko guemimoingo kuery ha'e javi,
avakue ha'e javive nhe'ê guive.
- ¹¹ Xeapyxa py nda'u naendu kuaa potai 'rã ayvu aendu va'e,
xejuru py tembi'u heea aendua rami avi?
- ¹² Tyrã pa tujakue'i re anho teve oĩ 'arandua?
Oikove puku va'ekue re anho teve oĩ mba'emo oikuaa aguã?
- ¹³ — Any! Nhanderuete re ae oĩ 'arandua ha'e mbaraetea.
Hexe ma oĩ nhomongeta ha'e mba'emo oikuaapa aguã.
- ¹⁴ Mba'emo ha'e oity va'ekue ma nomopu'ãavei 'rã.
Nhuã py ha'e ombo'a va'ekue avave rei ndoipe'a kuaai 'rã.
- ¹⁵ Yy ha'e ojoko ramo opa mba'e ipirupa 'rã.
Ha'e rã yy ha'e ombou ramo ombovaipa 'rã vvy.
- ¹⁶ Hexe anho oĩ mbaraetea ha'e 'arandua.
Ombotavy pyre ha'e imbotavya ma ha'e oguereko va'e meme.
- ¹⁷ Oipe'a 'rã nhomongeta va'ety kuery nhomongetaague gui,
nhomboayvua kuery voi ojapo 'rã na'inhakã porãvei aguã rami.
- ¹⁸ Ombovaipa 'rã huvixave kuery po'akaa,
ha'e omoxã uka 'rã heravy iku'a rupi.
- ¹⁹ Sacerdote kuery ma ha'e oipe'a 'rã sacerdote ikuaiague gui,
ha'e iporiau e'ỹ va'ekue ma oitypa vyvoi 'rã.
- ²⁰ Ijayvu kuaa va'e kuery gui ha'e oipe'a 'rã ayvu,
ha'e tujakueve gui ma oipe'a 'rã hi'arandua.
- ²¹ Yvatekueve re omoĩ 'rã nomboeteavei aguã,
ha'e ojora 'rã imbaraete va'e kuery ku'akuaa.
- ²² Pytũ reia gui oexa uka 'rã mba'emo ndoikuaai pyre,
pytũ ana eteve voi ogueru 'rã omoexakã aguã katy.
- ²³ Yvy regua kuery ha'e omboetave 'rã, ha'e gui omokanhymba ju 'rã.
Omoaimba 'rã, ha'e gui omboatypa ju 'rã.
- ²⁴ Yvy regua yvatekueve gui oipe'a 'rã 'arandua,
ojapo 'rã tekoe e'ỹ rupi uguata rei aguã rami, tape rupi e'ỹ.
- ²⁵ Ha'e ramo pytũ reia rupi ha'e kuery opovyvy 'rã oje'oivy hendy va'e ndoguerekoi vy,
ojapo 'rã oka'u va'e rami ho'a-o'a oje'oivy aguã rami.

13

- Jó anhetê va'e rupi oikoa re ijayvuague*
- ¹ — Ma'ê, ha'e nunga ha'e javi xerexa oexa ma,
xeapyxa voi oendu ramo xee aikuaa ae ma.
- ² Peê kuery peikuaa rami ae avi xee voi aikuaa.
Xee ma pendegui xe'vyvive va'e'ỹ.
- ³ Ha'e rami avi Ipo'akapa va'e pe anho 'rã anhemombe'u,
Nhanderuete renonde ae anhemboeko porã ukaxe.
- ⁴ Mba'eta peê ma anhetêgua 'rãgue py apu rive pemoĩ.
Peê kuery ha'e javi ma poropoanoa mba'everã ovare e'ỹ va'e rami peiko.
- ⁵ Peê pekyririmba vyvoi va'e rire!
Ha'e rami vy 'rãe pexa uka pene'arandua!
- ⁶ Aỹ ma pejapyxaka xerexo amombe'u rã,
pendu pota xejuru py mba'emo re xeayvua re.
- ⁷ Penhombotavya rupi nda'u pendeayvu ta Nhanderuete pemboete ukaxe vy?
Pemboete ukaxe vy ri nda'u pendeayvu ta apu rupi?
- ⁸ Ixupe vy ae nda'u peikuaa potaa py peteĩ peayvuve ta joegui?
Ha'e rami ri ty'y peipytyvô ta Nhanderuete?
- ⁹ Peê kuery re ha'e oikuaa pota va'e rire nda'u peo jepe 'rãgue?
Ha'e rami e'ỹ vy pembotavy kuaa 'rã teve, amongue va'e rei pembotavya rami?
- ¹⁰ Joegui peteĩ peayvuve nhemi ramo
pendevy pe ijayvu atã 'rã.
- ¹¹ Napenemongyjei 'rã teve guexakãmbaa py?
Pende'ary nomboui 'rã teve penemongyjeearã?
- ¹² Pendeayvu jepiaty ma ayvu tanhimbu ramigua rive,
penhemboytaa ma yapo guigua rive.
- ¹³ — Pkyrirĩ ranhe ke xerenonde, xee ju xeayvu aguã.
Ha'e va'e rire xere toiko oiko va'e rei.
- ¹⁴ Xeayvu ta xeraĩ py xero'o areko reve,

- ha'e xerekove xepo py ajopy reve.*
- 15 Mba'eta anhetē ri ha'e ma xejuka ta ramo ndarekovei arō aguā.
Ha'e rami teī ae ma xeayvu 'rā xereko re.
- 16 Ha'e rami aiko vy aikuaa aa jepe aguā,
mba'eta heko vai va'e ma ndojexa ukai 'rā henonde.
- 17 Pendu pota ke xeayvua re,
pejapyxaka amombe'u va'e re.
- 18 Areko katu porāmba ma xereko amombe'u aguā.
Aikuaa porā guive Nhanderuete xemboeko porā aguā.
- 19 Mava'e tu xereve ijayvu ete 'rā?
Ha'e rami oiko ramo xee akyrirī 'rā, ha'e xenhe'ē amondouka 'rā.
- 20 Eme'ē xevy po rami mokoī ete'i ajerurea.
Ha'e rami ri rā nanhemivei 'rā nderova gui.
- 21 Eipe'a ke ndepo xegui,
ha'e xemondyive eme xemongyjea py.
- 22 Ha'e gui eporandu xevy, ha'e rā xee rombovai 'rā.
Ha'e rami e'ŷ vy xee ranhe taxeyvu, ha'e gui ndee ju xembovai 'rā.
- 23 — Mbovy henda py tu xereko vai ha'e ajejavy?
Emombe'u porā ke xereko vaia ha'e ajejavya.
- 24 Mba'e re tu nderova remo'ā
nderovaigua rami xerereko vy?
- 25 Remongyje ta teve yvyra rogue yvytu oguoveve heravy va'e rive?
Remonha ta teve jai rogue pirukue?
- 26 Mba'eta xerovai rembopara mba'emo ipoyi va'e,
xekunumi reve ajejavyague reikuaa vy.
- 27 Ha'e rami vy xepy remboty yvyra pa'ū py,
reikuaa pota aikoa ha'e javi re.
Xejoko imoiny aē e'ŷ aguā,
- 28 mba'emo ru'ūgue opa ovy va'e,
e'ŷ vy ajukue vixo'i ho'upa va'e rami aiko teī.

14

Nhanderekove oaxa pojava ovya re Jó ijayvuague

- 1 — Kunhague gui itui'i va'ekue ma xapy'a'i 'rā ikuai,
ha'e kuery re oī ojexavai aguā anho.
- 2 Itui'i 'rā yvoty ixorī va'erā rami rive.
Kuaray'ā rami okanhy vy ndojekuaavei 'rā.
- 3 Ha'e ramigua avakue re ri ty'y reikuaa pota ta,
ha'e nerenonde remboayvu ta?
- 4 Mava'e nda'u ha'eve'ŷa gui oguenoē kuaa ta mba'emo ha'eve va'e?
Avave rei.
- 5 Ha'e kuery ikuai aguā ára reipapa ma voi imoiny,
ndereve ae oī mbovy jaxy pa ikuai aguā.
Avakue rekove rejoko rire
ha'e va'e rovai ndoaxai 'rāe.
- 6 Ha'e kuery re ema'ëve eme ikane'ōgua'i aguā,
ombaeapo va'e rami o'ára opaa py ovy'a'i aguā.
- 7 — Mba'eta yvyra voi oguereko oarō aguā,
mba'eta ojayaa ma teī hoky jevy nho 'rā,
mbovy rei e'ŷ 'rā ikuai henhoī ju va'ekue.
- 8 Yvy re hapo inhyma ramo,
ha'e yvy py hi'y ipiru ramo
- 9 yy reakuā gui rive ju 'rā henhoī.
Ha'e rami vy hapo ju 'rā ovy yvyra ipyau va'e rami.
- 10 Ha'e rā avakue ma omano ma vy itui tema 'rā.
Avakue omano rire mamō tu opyta?
- 11 Yupa py yy oī va'ekue typa,
ha'e yakā typa vy ipiru va'e rami,
- 12 ha'e rami ae avi avakue onheno vy nopu'āvei ma 'rā.
Yva oime teria ja nomyivei 'rā,
okeague gui nombovya jevyi 'rāe.
- 13 Xenhono porāa ma ramo ndee xemo'ā 'rāgue,

* 13:14 Apy ma ndojeayvuiekue py Jó ijayvu.

- xenhomi 'rãgue ndepoxya ára oaxa peve!
 Ha'e gui petei ára rea'anga 'rãgue
 xere nema'endu'a ju aguã!
- 14 Avakue omano ma rire nda'u ovy ju 'rã ri?
 Ha'e rami rã xee amba'eapo poyi aikovya pukukue re arõ 'rã aikovy
 xerekoviarã ovaë peve.
- 15 Ndee xerenõ 'rã, ha'e rã xee ma rombovai 'rã.
 Rexaxe ju 'rã neremimoingo ndepo py rejapo va'ekue.
- 16 Ha'e rami vy reipapapa 'rã aguataa,
 ha'e nanema'endu'avei 'rã ajejavayague re.
- 17 Xereko vaiague re nderexarai 'rã voxa py omboyru pyre re rami,
 rejao 'ipa 'rã atekoavyague.
- 18 Ha'e rami avi yvyty iku'ipa ha'e ivaipa 'rã ovy,
 itaova voi ho'a 'rã oïague gui,
- 19 yy omomba 'rã ita,
 ha'e tyguaxu vy ogueroxyry 'rã heravy vyv ku'i.
 Ha'e rami ae avi ndee rembovaipa 'rã mba'emo avakue oarõ va'e.
- 20 Ha'e kuery re ndepo'aka riae ramo
 ha'e kuery opa 'rã oje'oivy.
 Ha'e kuery pe nderova amboa rami rexa uka reve
 remondouka 'rã mombyry.
- 21 Ta'y kuery omboetea tei tuu kuery ndoikuaai 'rã.
 Ha'e rami e'ÿ vy omo'yvyti'ia tei ae ma tuu kuery ndoikuaai 'rã.
- 22 Ha'e kuery ma guete re anho 'rã oendu haxy va'e,
 ha'e guekovea re ae 'rã ojexavai — he'i.

15

Jó reko vaia re Elifaz ijayvuague

- 1 Ha'e ramo Temã pygua Elifaz ombovai:
 2 — Hi'arandu va'e nda'u ombovai 'rã yvytu rami rive?
 Onhemonyë 'rã ri ty'y kuaray oua katy gui yvytu ou va'e py?
 3 Ayvu mba'everã ovare'ÿ va'e py nda'u ijayvu 'rã,
 ayvu nhomoingo porã va'erã py 'rãgue py?
 4 Mba'eta ndee ma Nhanderuete renonde ojererokyje va'e pe “Ovare va'e'ÿ” re,
 ha'e rejapoxe nomboeteavei aguã rami.
 5 Mba'eta ndereko vaia rupi ae ndeayvu,
 ha'e nhombotavy va'e kuery ayvu anho rejou porãve.
 6 Ndejuru guigua ae 'rã nembopaga, xee e'ÿ.
 Nerebbe ae ijayvu nderovai.
 7 — Ndee teve ava jypy'i itui va'ekue reiko?
 Yvyty ikuai e'ÿ mbove ma voi teve reiko raka'e?
 8 Ndee teve rendu raka'e Nhanderuete opy'a re mba'emo omoï rã?
 Ndere anho'i teve oï 'arandua?
 9 Mba'e nunga tu ndee reikuaa, ore kuery roikuaa avi va'e'ÿ?
 Mba'e nunga 'arandu tu ndere oï, ore kuery re oï va'e'ÿ?
 10 Mba'eta oreregua ikuai avi tujakue'i hi'a xiimba va'e,
 nderu gui voi tujakue'ive va'e.
 11 Ndee teve nerembovareive ta Nhanderuete nembopy'a guaxu ukaa,
 ha'e ayvu porã'i rupi ndevy oreayvua?
 12 Mba'e re tu rejereraa uka nekuraxõ py oï va'e rupi rive?
 Mba'e re tu rema'ë vaikue rei ri,
 13 Nhanderuete rovai ndevaia rupi,
 ha'e rami ete ndeayvu aguã?
 14 Marã ramigua tu avakue, iky'a e'ÿ va'e ikuai aguã?
 Marã ramigua tu kunha gui itui'i va'ekue, heko porã va'e oiko aguã?
 15 Ma'ë, Nhanderuete ma ndojeroviai nei ojeupegua iky'a e'ÿ va'e kuery re.
 Ha'e oexa rã nei yva re voi iky'a e'ÿ va'e noi.
 16 Avakue katuve ma ojou vaipy ha'e ojegarupy meme ikuai,
 yy oy'u va'e rami mba'emo vai ojee omoï va'e!
Heko vai va'e kuery opagaa aguã re Elifaz ijayvuague
 17 — Ejapyxaka ke xeayvua re, ha'e rã rombo'e 'rã.
 Mba'emo aexa va'ekue amombe'u 'rã ndevy,
 18 hi'arandu va'e kuery omombe'u va'ekue ae,

- nguu kuery gui oendu vy ndoikuaa uka e'ÿi va'ekue.
 19 (Ha'e va'e kuery pe ae yvy ome'êa raka'e,
 peteïve henda rupi amboae regua kuery nda'ikuai.)
 20 Ha'e rã heko vai va'e kuery ma ko'ê nhavõ 'rã ojexavai,
 ikuai ma'etÿ ijapu'a'i 'rã, nhomoingo axya kuery pegua ae.
 21 Ha'e kuery apyxa py onhendu 'rã imongyjaarã.
 Mba'emo oguerékopa rei teï ha'e kuery re ou 'rã imbovaipaará.
 22 Ha'e kuery ndoguerovia pytÿ vaikuea gui ojevuy ju aguã,
 ha'e rami 'rãgue py oarõ kyxe imombaarã rive.
 23 Ho'u va'erã oeka oje'oivvy "Mamo tu oi?" he'i 'rã okuapy.
 Oikuaa porã avi pytÿ aguã ára hexe ou ta maa.
 24 Jexavaia ha'e moingo axya ma omongyjepa rei 'rã.
 Ha'e kuery re ha'e nunga ipo'aka 'rãe, huvixave joe opu'ã aguã oiko katu porã va'ekue rami,
 25 Nhanderuete rovai opo oupi rive,
 Ipo'akapa va'e ombojaru rei vy.
 26 Ha'e rami vy hexe opu'ã okuapy onhea'ã rei reve,
 hu'y jokoa inhana va'e re rive ojerovia va'e rami.
 27 Hova re ikyra anho oï,
 ijyke kyrapa avi
 28 teï tetã ivaipa va'ekue py hekoa,
 oo oï aguã nda'eveia py,
 ombovaipa pyrã py rive ikuai.
 29 Ha'e nunga rupi ha'e kuery ndojou retai 'rã mba'emo,
 mba'emo ojapo va'e noï arei 'rã guive,
 imba'e rei-rei voi ndaetai 'rã vvy re.
 30 Ha'e kuery ndoo jepei 'rã pytÿ vaikue gui.
 Tata rendy vuku-vuku overepa 'rã hoky.
 Ha'e gui Nhanderuete ojuru gui oipejua rive 'rã ogueraa.
 31 Ha'e nunga rupi ovare e'ÿ va'e re ejerovia eme, ndee ae rejekore vy,
 mba'eta ovare e'ÿ va'e rive 'rã oï ndevy guarã.
 32 Ha'e nunga omomba 'rã hi'ára ovaë e'ÿ mbove,
 ha'e ramo hakã nda'ipyauvei ma 'rã.
 33 Ha'e kuery ikuai 'rã uva aky'i oitypa pyre rami,
 ha'e oliveira ipoty ho'apa va'ekue rami rive.
 34 Mba'eta heko vai va'e kuery heta ikuai teï ndata'yi 'rã,
 ha'e tata oapypa 'rã nhomba'e rei-rei pe'aare kuery ro.
 35 Ha'e kuery ma mba'emo vai anho oguereko'i rive oikuavã'i 'rã teko vai,
 nhombotavy aguã rive opy'a re omoï rive — he'i.

16

Nhanderuete openaa re Jó ijayvuague

- 1 Ha'e ramo Jó ombovai:
 2 — Aendu riae ma ha'e ramigua.
 Peë ha'e javive ma xembopy'a porã 'rãgue py xemoangeko rei.
 3 Ndopai 'rã teve yvytu rami pendeayvua?
 Mba'e tu pendu ra'e ha'e rami ete xembovai aguã?
 4 Xee voi xeyvuu kuaa peë pendeayvua rami.
 Xee aiko axya rami peë peïko axy va'e rive
 xee voi xeyvuu reta kuaa 'rãgue peë kuery pe,
 penderovai xeakã ambovava reve.
 5 Xee romombaraete kuaa avi 'rãgue xeyvua py,
 xejuru py romboaxya aexa uka va'e py aipe'a aguã haxy pendu va'e!
 6 — Xeyvuu ainy teï haxy aendu va'e ndoaxai 'rã.
 Ha'e rami e'ÿ vy akyriri teï mba'e nunga py 'rã tu anhenhandu porã?
 7 Anhetê opa ma xembaraetea areko va'ekue.
 Ndee Xeruete remomba ma xero pygua kuery ha'e javi.
 8 Ha'e nunga aexa uka xexorimbaa py,
 xeangaia voi xerovai opu'ã vy xembojexavai riae.
 9 Ndepoxya py xemboa'ypa, xere nandea'eï vy.
 Xerovai neraï jekyty ha'e rema'ê ratã xerovaigua rami.
 10 Avakue voi xerovai oipe'a okuapy ojuru.
 Ha'e rami vy xere ija'e e'ÿa rupi xepetepa,
 xerovai ha'e javive ijaty okuapy.
 11 Ojerovia e'ÿ va'e po py Nhanderuete xemboaxa,

- heko vai va'e kuery po py ha'a aguã rami xeapo.
¹² Xee aiko porã rei va'ekue ri ha'e xemopêmba.
 Xeaju'y re ojopy vy xemboa'ypa.
 Xemoi guembiporu hu'y oa'anga aguã.
¹³ Xejoko ngu'y py,
 oipyxo xepyky raxi re xemboaxy e'y re,
 ha'e ramo xepy'a upia onheẽ vvy re.
¹⁴ Xemboguaiague rupi ae ju xemboguai,
 ha'e vy xere ou joe opu'ã va'e ramigua.
¹⁵ Xejee amoĩ ae ajukue voxa guigua,
 ha'e vvy ku'i py aity anhemboyvate reia rupi aikoague.
¹⁶ Ajae'o rã xerova ma pytãmba rei,
 ha'e xerexa pepi ma manoa guigua omo'ãmba,
¹⁷ xepo re ajojukaague noĩ,
 ha'e xeky'a e'ya rupi anhembo'e teĩ.
¹⁸ — Ndee vvy, ejao'i eme xeruguy,
 toĩ eme guive ajapukaia onhendu e'ya!
¹⁹ Ma'ẽ, aỹ ma voi xereko mombe'u porãvearã oĩ yva re,
 yvate ma oĩ xere ojerure va'erã.
²⁰ Xeirũ kuery xejojai rei okuapy ramo
 Nhanderueten renonde xerexay reve tema aĩ,
²¹ arõ vy Nhanderueten pe ha'e va'e ojerure aguã avakue re,
 oirũ pe avakue ra'y kuery joe ojerurea rami avi.
²² Mba'eta ma'etã oĩ reta ve'ya py
 aa 'rã peteĩ tape rupi ndajevyvei aguã.

17

Jó mba'eve noarõveia re ijayvuague

- ¹ — Xenhe'ẽ opa ovy ma,
 xe'ára voi opa avi ovy,
 ha'e xerenonde oĩ va'e ma xenhono porãa aguã anho.
² Anhetẽ porojoi rei va'e kuery xembojere rei okuapy,
 xerexa py xemoangeko reia kuery anho rei aexa.
³ Ha'e gui eme'ẽ xevy mba'emo aikuaa aguã ndee xemboeko porã 'rãa.
 Enhemoĩ ndee ae ha'e nunga kuaa ukaarã.
 Mba'eta ndee e'y vvy mava'e 'rã tu ikuaa ukaarã oĩ?
⁴ Mba'e ha'e kuery kuraxõ remboty ma hi'arandua oĩ e'y aguã.
 Ha'e rami vy neremboyvatevei ma.
⁵ Amongue oirũ kuery imombaarã pe omboaxa ramo
 ta'y kuery voi ndaexa pyxovei 'rã.
⁶ — Ha'e rã xee ma xemoĩa heta va'e kuery xejojai rei okuapy aguã.
 Xemoingoa xerova re onyvõmbaa rei aguã.
⁷ Ha'e nunga rupi ae ndaxerexa pyxovei ma xeporiau rã,
 ha'e xeretẽ regua ha'e javi kuaray'ã rami ndojekuaa porãvei.
⁸ Heko porã va'e kuery xerexa vy onhemondyipa rei okuapy.
 Ha'e rami vy ojevavy e'y va'e kuery opu'ã 'rã heko vai va'e rovai.
⁹ Ha'e rami teĩ heko porã va'e kuery oo tema 'rã guape rupi ae,
 ipo ky'a e'y va'e kuery imbaraeteve 'rã oje'oivy.
¹⁰ Ha'e gui peẽ kuery ha'e javi pejevvy, peju ju kyvõ katy.
 Ha'e rami avi peẽ kuery regua peteĩve ma ndajoui 'rã hi'arandu va'e.
¹¹ Xe'ára oaxa ma ovy,
 anhembopy'ague voi oaxa rivepa ma,
 xepy'a re aipotaa amoĩ va'ekue ha'e javi.
¹² Xevy pe pytũ peikuaa uka ára oĩa rami rive.
 Ha'e vy aipo peje: “Pytũ teri teĩ hendy va'e ovaẽ rai'i ma”, peje rive.
¹³ Ha'e rã xee ma xenhono porãa aguã py arõ xerorã,
 pytũa py ae xeruparã itui.
¹⁴ Xenhono porãarã pe ajapukai vy “Ndee ma xeru”, ha'e.
 Taxo ikuai va'e pe voi “Peẽ ma ha'i ha'e xereindy kuery”, ha'e.
¹⁵ Ha'e gui mba'e tu oĩ arõ aikovy aguã?
 Tá, xee arõ va'e mava'e 'rã tu oikuaa?
¹⁶ Ha'e nunga oquejy 'rã manoa rokẽ peve
 xereve vvy ku'i py apytu'u ma jave — he'i.

18

Heko vai va'e kuery opa aguã re Bildade ijayvuague

- ¹ Ha'e ramo Sua pygua Bildade ju ombovai:
² — Raka'e peve 'rã tu ndeayvu aguã re renhea'ã?
 Eikuaa pota porã ranhe, ha'e gui ma jajogueroayvu 'rã.
³ Mba'e re tu mymba rami ri ndee orekuaa,
 ha'e hi'arandu e'y va'e roikoa rami reikuaa?
⁴ Ai! Ndee ndepoxya py ae renhemboa'y pa va'e,
 ndere vy ri nda'u roejapa ta vvy?
 Ha'e itaova ikuai va'e nda'u ova 'rã oïague gui?
⁵ — Anhetê, heko vai va'e kuery rataendy ogue 'rã,
 neĩ hata raviju ma voi ndojekuaavei 'rã.
⁶ Ha'e kuery ro rupi hendy va'e oĩ va'ekue pytũmba 'rã,
 yvate tataendy oupi imoiny va'ekue ogue 'rã.
⁷ Oguata porã oje'oivyague gui ipxyry 'rã ovy,
 ha'e gui onhembopy'aague py ae oitya 'rã.
⁸ Mba'eta ha'e kuery py ae ombo'a 'rã,
 nhuã juru áry rupi ae oo rire.
⁹ Mba'emo mbo'aa ojopy 'rã ipyta rupi,
 ha'e nhuã ojopy 'rã.
¹⁰ Ha'e kuery ndoexai 'rã ixã vvy rupi itui va'e,
 neĩ imbo'arã tape py oĩ va'e.
¹¹ Jova-jovai katy gui imongyjaarã ou vy omondyi 'rã,
 omonha 'rã heravy oikoa nhavõ rupi.
¹² Ha'e kuery áry ou 'rã imoingo axyarã omomba aguã,
 ha'e iporiau aguã oarõ 'rã ijyvýry.
¹³ Ha'e nunga ombovaipa 'rã hete regua ha'e javi.
 Manoa regua jypygua omomba 'rã.
¹⁴ Heko vai va'e kuery oi'pe'aa 'rã ngoo py ojerovia oinyague gui,
 ha'e vy ogueraa 'rã imongyjea tuvixave va'ea py.
¹⁵ Hoo pygua kuery peteive ma noĩvei 'rã hogue py,
 ha'e oïague rupi omoaña 'rã enxofre.
¹⁶ Iguy rupi hapo ipirupa 'rã,
 ha'e rã hakã ma hi'áry rupi 'rã ipirupa.
¹⁷ Ha'e kuery re na'ima'endu'aavei 'rã vvy re,
 ha'e tetã mbyte gui nonhenduvei 'rã hery.
¹⁸ Hendya gui ha'e kuery omomboa 'rã pytũa py,
 oi'pe'apaa 'rã vvy gui.
¹⁹ Ndata'yi neĩ namyminoi 'rã guetarã kuery mbyte,
 ha'e hoo pygua kuery peteive ma ndoikovevei 'rã hogue py.
²⁰ Okanhyague ára gui kuaray oikoa katygua kuery onhemondyipa 'rã,
 ko'êa katygua kuery voi okyjepa 'rã okuapy.
²¹ Anhetê ha'e rami ae heko vai va'e kuery reko,
 ha'e rami ae opa 'rã Nhanderuete oikuaa e'y va'e kuery — he'i.

19

Jó ojexavai teĩ hepyarã oikoa rami ijayvuague

- ¹ Ha'e ramo Jó ombovai:
² — Raka'e peve 'rã tu pemoingo axy xenhe'ê,
 ha'e ayvu py xemou'ũmba rive?
³ Dez-kue ma pendeayvu rei xere,
 xembojexavai aguã napexĩ vy.
⁴ Xapy'a rei anhetê xee ajejavy va'e rire
 xere anho 'rãgue oĩ ajejavyague re apaga aguã.
⁵ Xapy'a rei xerovai penhemboyvatexe,
 ha'e xemo'yvyt'iague re pendeayvu reixe vy,
⁶ peikuaa porã pota aỹ pova'e re:
 Nhanderuete ae xemoingo axy va'ekue okya py xejoko vy.*
⁷ Ajapukai: “Xemomba tal!” ha'e teĩ noenduai.
 “Xepytyvõ ke!” ha'e teĩ ndoikoi xemboeko porãarã.
⁸ Xerape ha'e ojoko rã nda'evei aave aguã.
 Xee aa aguã rupi ha'e omoĩ pytũa.

* 19:6 Jó ma “Nhanderuete xemoingo axy” he'i va'eri oayvu ha'e oguerovy'a (2.3-6).

- ⁹ Omboetepy aikoague gui xepe'a vy
xeakā gui omboi xembojeguaarā oī va'ekue.
- ¹⁰ Jova-jovaive gui xereity rire aa ma ainy.
Xegui oipe'a arō va'ekue yvyra hi'aïague gui oapo'o va'e rami.
- ¹¹ Xerovai hendy ipoxya,
ngovaigua rami xerereko ramo.
- ¹² Ixondaro kuery ou okuapy xere.
Xerupity aguā ha'e kuery oguereko katu guaperā,
ha'e vy xero vyýry rupi xejoko okuapy.
- ¹³ Xegui ha'e oipe'a xeryvy kuery mombyry.
Xekuaa va'e kuery voi ojepe'apa xegui, xerexa va'ety e'y rami rive.
- ¹⁴ Xeretarā kuery xerejapa oje'oiyv,
ha'e xekuaa va'e kuery hexaraipa ma xegui.
- ¹⁵ Xero py amovaē va'ekue ha'e xerembiguai kuery ma amboae vvy regua rami xekuaa,
ha'e kuery pe rā vvy mboae regua aiko.
- ¹⁶ Amongakuaa va'ekue ma aenoī teī naxembovaivei,
mba'emo re xee ae ajerure porā'i teī.
- ¹⁷ Xera'yxy ma noetixevei ma xepytuēa,
ha'e xeryvy kuery pe ojeguarupy aiko xereakuā vaikue va'e vy.
- ¹⁸ Kyri'gue voi naxemovaēxevei,
xee apu'āxe rā xejojai rei okuapy.
- ¹⁹ Xerayvu ete va'ekue xembojeguarupa okuapy,
ha'e xee ayvu va'ekue voi xerovaigua onhemoingo.
- ²⁰ Xepire ojapa ma xekāgue ha'e xero'o re,
ha'e haxy'i py aa jepe nho.
- ²¹ Xemboaxy ke, xerembiayvu kuery.
Xemboaxy, mba'eta Nhanderuete po xerupity.
- ²² Mba'e re tu xemonha rei pekuapy Nhanderuete xemonhaa rami?
Mba'e re tu ndapepytu'ui ri xero'o pemombaa gui?
- ²³ Xeayvua omboparaa va'e rire!
Kuaxia re ipara oiny va'e rire!
- ²⁴ Ferro rakua ha'e chumbo reve
ita re ipara va'e rire raka'e rā peve guarā!
- ²⁵ — Mba'eta xee aikuaa xerepyarā oikoa,
ha'e opaa py opu'ā 'rā kova'e vvy re.
- ²⁶ Ha'e va'e rire kova'e xepire ivaipa ma teī
xero'o reve ae 'rā aexa Nhanderuete.
- ²⁷ Aexa 'rā xee ae, xerexa py ae aexa 'rā, amboae nda'ei.
Aexaxe ete rā
xekuraxō na'imbaraetevei ma xeryepy py.
- ²⁸ Xapy'a rei aipopeje 'rā: “Marā rami 'rā tu romoingo axy?
Ndekáuxa ae upe va'e mba'emo vai oiko”, peje teī
- ²⁹ pejererokyje ikyxé gui,
mba'eta xere pendeayvua re ou 'rā ipoxya,
pendere oikuaa pota va'erā oikoa peikuaa aguā — he'i.

20

Heko vai va'e kuery ojexavai aguā re Zofar ijayvuague

- ¹ Ha'e ramo Naamā pygua Zofar ju ombovai:
- ² — Aikuaa va'e re xeayvuxe vy
ajapura rombovai aguā.
- ³ Xee aendu ndeayvu etea xemoximba va'e,
xenhe'ē py aendu aikuaa va'e rupi rombovaixea.
- ⁴ Ndee nderekuaai teve ha'e javi oiko ypy guive,
vvy re avakue omoingo ypya guive
- ⁵ heko vai va'e kuery xapy'a'i rive ovy'a okuapya,
ojerovia e'y va'e kuery ovy'a xapy'a'i 'rāa?
- ⁶ Ha'e kuery ojejou porāa yva re peve oo,
ha'e arai re peve oakā oupi teī ae ma
- ⁷ hu'umba 'rā raka'e rā peve guarā, hepxoi rami rive.
Ha'e rā oexa va'ety kuery “Mamo tu ikuai?” he'i 'rā okuapy.
- ⁸ Ha'e kuery ma oexa ra'u pyre rami okanhymba 'rā,
ha'e rā ndojouavei 'rā.
Omonhaa 'rā imondovy pyávy mba'emo oexa pyre rami.

- ⁹ Hexaare kuery ndoexavei ma 'rã,
ikuaiague py ae teĩ ha'e kuery re na'ima'endu'aavei ma 'rã.
- ¹⁰ Ta'y kuery ju onhea'ã 'rã iporiaukue'i oguerorya rupi,
ha'e vy opo py ae ome'ẽmba ju 'rã imba'e rei-rei oipe'aa va'ekue.
- ¹¹ Ikãgue kunumi jave rami imbarae teĩ,
imbarae reve 'rã itui vyvvy ku'i rupi.
- ¹² — Ha'e kuery pe rã ijuru py mba'emo vai he'ẽ 'rã,
ha'e vy oapekũ guy py ogueroko.
- ¹³ He'ẽ ramo nomokõxei vy
ogueroko ranhe 'rã ojuru py.
- ¹⁴ Ha'e rami teĩ hyepy py ma amboae rami 'rã ojeapo.
Mboi guigua rami 'rã iro vaikue ojeapo hyepy py.
- ¹⁵ Mba'emo oguerokopa va'e omokõ va'ekue ombojevypa ju 'rã.
Nhanderuete ae 'rã ojapo guyepy gui ombojevypa aguã rami.
- ¹⁶ Mboi guigua veneno oy'u rire
inhapekũ ae ju ojuka 'rã.
- ¹⁷ Ha'e kuery ndoguerovy'ai 'rã yakã'i oexa vy,
neĩ ei ha'e kamby yakã rami oxyry va'e.
- ¹⁸ Mba'eta omba'eapogue repy ojou va'ekue omokanhymba ju 'rã
mba'eve ho'u e'ỹ re.
Ojeupe guarã ojopy va'ekue regua peteĩve henda py ndojoui 'rã ombovy'aarã,
- ¹⁹ ha'e kuery iporiaukue'i omoingo axy ha'e noiptyvõĩ rire,
ha'e oo ojapo va'ekue'ỹ gui mba'emo oipe'apa rire.
- ²⁰ — Oipotapa reia gui ndojepe'ai rire
nda'evei 'rã mba'emo oipota va'ekue ogueraa jepe aguã.
- ²¹ Oipotapa reia gui ndopytu'ui rire
imba'e rei-rei noĩ arei 'rã.
- ²² Ojoupa ete maa py ae 'rã ojexavai.
Ha'e kuery re ou 'rã opa marãgua imomboriauarã.
- ²³ Ha'e kuery rye monyẽarã Nhanderuete ombou 'rã opoxy etea.
Tembu'u 'rãgue py ha'e nunga anho ombou 'rã oky rami ha'e kuery áry.
- ²⁴ Tembiporu ferro guigua gui ha'e kuery ojava teĩ
guyrapa overa va'e guigua py 'rã onhyvõa.
- ²⁵ Ha'e ramo okupe gui hu'y oekyi rã
overa rei 'rã huguy re.
Ha'e ramo oendu 'rã onhemondyia.
- ²⁶ Ha'e kuery peguarã omoĩa 'rã opa marã ojexavai aguã.
Tata omomba 'rã avave rei oipeju e'ỹ teĩ,
hoo py opyta va'ekue-'ekue omomba peve.
- ²⁷ Yva gui oikuaa ukaa 'rã heko vaia.
Ha'e rã vyvvy gui ma opu'ã 'rã hovai guarã.
- ²⁸ Ngoo py oguerokopa va'ekue oipe'apaa 'rã
Nhanderuete poxya ára py, yy onhoẽa va'e rami.
- ²⁹ Ha'e ramigua ae 'rã avakue heko vai va'e ojopy Nhanderuete po gui.
Ha'e nunga anho ha'e kuery peguarã oĩ Nhanderuete ijayvuague rami vy — he'i.

21

Heko vai va'e kuery ovy'aa re Jó ijayvuague

- ¹ Ha'e ramo Jó ombovai:
- ² — Pendu porã pota ke xeayvua.
Ha'e ramia py peẽ xembopy'a porã 'rã.
- ³ Xereroangekove eme, ha'e rã xee ju xeayvu 'rã.
Ha'e gui xeayvupa ma ramo mae ha'eve 'rã xejojaive aguã.
- ⁴ Avakue re rive teve xee xeayvu ndavy'aia rupi?
Mba'e re'ỹ teve arõ are aguã nda'evei?
- ⁵ Pema'ẽ xere, ha'e vy pekyriri 'rã.
Ha'e rami vy pejoko 'rã pendejuru pendepo py.
- ⁶ Mba'eta ha'e nunga re xema'endu'a vy rive ndaxerekorãvei,
ha'e xero'o ha'e javi re aendu xepirĩmbaa.
- ⁷ — Ha'e gui mba'exa tu heko vai va'e kuery okuave are?
Mba'eta ha'e kuery tuja'i teĩ ipo'akapave tema 'rã.
- ⁸ Henonde ma ta'y kuery ikuai porã 'rã.
Guamymino kuery voi oexa avi 'rã.
- ⁹ Ha'e kuery ro rupi oĩ mby'a porã,

- ha'e Nhanderuete nombopagai 'rã vvyra po'i py.
¹⁰ Hymba toro ma ta'y'i 'rã ma'et'y nhavõ,
 hymba vaka ta'y vvy ndoityi 'rã.
¹¹ Hoo pygua kyr'igue'i ma onha-onha 'rã okuapy vexa'i rami,
 ta'y kue'iry voi opo-opo 'rã ovy'a vy.
¹² Oporaei 'rã okuapy pandeiro ha'e ixã reta va'e reve,
 mimby pu guive oendu vvy oguerovy'a vaipa 'rã.
¹³ Ára nhavõ ha'e kuery oaxa 'rã oguerokopaa py,
 mby'a porã reve ogeejy peve vvyra rupa py.
¹⁴ Ha'e kuery ae 'rã aipoe'i Nhanderuete pe: "Ejepe'a ke oreguil!
 Ndoroiquaaxei ndeguigua tape.
¹⁵ Mba'eta mava'e tu Ipo'akapa va'e, ixupe jaiko aguã?
 Mba'e tu jajopy 'rã ixupe nhandembo'eague re?" he'i 'rã okuapy.
¹⁶ Ha'e rami te'i ma'ẽ, ha'e kuery oguerokopa aguã ma ipo gui ae e'y'ou.
 Xevy pe nda'evei ae heko vai va'e kuery onhemongetaa rami aiko aguã!
¹⁷ — Mbovykue tu heko vai va'e kuery rataendy omboguea?
 Mbovykue tu ha'e kuery áry omboua 'rã imombaarã?
 Mbovykue tu Nhanderuete opoxya rupi ombou 'rã ha'e kuery ikuai axy aguã?
¹⁸ Mbovykue tu ha'e kuery omoxãa 'rã jai pirekue vvytu ogueroveve heravy va'e rami,
 e'y' vvy mba'emo pirekue vvytu jere ogueraa va'e rami?
¹⁹ Ha'e rã peẽ kuery aipopeje: "Nhanderuete ma oarõ 'rã heko vai va'e ra'y kuery ombopaga aguã", peje 'rã.
 Ha'e rami te'i ha'e kuery ae Nhanderuete ombopaga va'e rire, ha'e kuery ae oendu aguã haxya.
²⁰ Ha'e kuery ae toexa imombaarã ou rã,
 ha'e kuery ae toy'u Ipo'akapa va'e poxya gui.
²¹ Mba'eta ha'e kuery omano ma rire, hekove oipe'aa ma ramo,
 mba'exa tu ha'e kuery oendu 'rã ngoo pyguare kuery reko gui?
²² Amongue nda'u omo'arandu kuaa 'rã Nhanderuete?
 Mba'eta ha'e ma yva re ikuai va'e re voi oikuaa pota va'e.
²³ Amongue ma imbaraeete reve 'rã omano,
 heko eta rei e'y', mba'eve rei oendu e'y' re guive,
²⁴ imba'e yryru kamby tynyẽ reve,
 ha'e ikãgue ratã e'yã hexaimba rei reve.
²⁵ Ha'e rã amboa'e kuery ma ikuera'i rei reve 'rã omano,
 mba'emo porã ndojoui rire.
²⁶ Ha'e rami te'i mokoive regua joapy 'rã ikuai vvy ku'i py,
 taxo oja'o'ipa aguã py.
²⁷ — Ma'ẽ, xee aikuaa ae ma pejapoxea,
 mba'eta ha'e've'yã rami penhembopy'a xembojexavaive aguã re.
²⁸ Mba'eta aipopeje: "Mamo tu opyta yvateve va'e
 teko vai rupi oiko va'e rogue?" peje 'rã.
²⁹ Ha'e rami te'i peporandu na oguataa rupi ikuai va'e pe.
 Npendu potai teve mba'emo ha'e kuery omombe'u rã?
³⁰ Mba'eta aipoe'i 'rã: "Jexavaia ára py heko vai va'e kuery omboaxya 'rã,
 ogueraa jepea 'rã poxya ára gui", he'i 'rã.
³¹ Mava'e tu omboayvu 'rã ha'e kuery ikuai re?
 Mava'e tu ombopaga 'rã ojapo vaiague re?
³² Mba'eta opaa py ha'e kuery retekue ogueraa 'rã onhono porãa aguã katy,
 ha'e onhono porãague re openaa 'rã.
³³ Ha'e kuery rupa áry vvy itui va'e nda'ipoyi 'rã,
 ha'e avakue ha'e javi oje'oi 'rã hetekue rakykue,
 henonde oje'oi va'e voi mbovy rei e'yã rami avi.
³⁴ Ha'e nunga rupi mba'e re tu xembopy'a porãa rupi merami te'i pendeayvu rive?
 Pembovaia ha'e javi re ma apu anho oĩ — he'i.

22

Jó ojevavy etea rami Elifaz ijayvuague

- ¹ Ha'e ramo Temã pygua Elifaz ju ombovai:
² — Ha'e gui avakue nda'u mba'emo ovare 'rã ri Nhanderuete pe?
 Any, oikuaapa va'e te'i ojeupe ae ovare va'e.
³ Tyrã pa ndereko porãa teve ombovy'a 'rã Ipo'akapa va'e?
 Xapy'a rei ndee rejevavy e'y' re reiko rã ha'e ojou porã 'rã teve?
⁴ Nhanderuete renonde rejererokyjea re teve nembopaga,
 nderovai oikuaa potaa py?
⁵ Ndereko vaia ndatuvixai teve?

- Rejejavya ma opa va'erā e'ý teve?
- ⁶ Mba'eta mba'e re'ý reipe'a mba'emo nderyvy gui,
ha'e iporiaukue'i gui voi reipe'a ijao.
- ⁷ Ikane'õ va'e pe ma yy nereme'ëi oy'u aguã,
okaruxe va'e pe voi nerakâte'ý tembi'u re.
- ⁸ Ipo'akakueve pe rive vyv yvituí,
avakue yvatekueve anho 'rã ikuai ha'e py.
- ⁹ Ha'e rã imeve'ý va'e kuery ma ipo rei reve rembojevý,
ha'e tyre'ý kuery mbaraetea remomba.
- ¹⁰ Ha'e nunga rupi ae nhuã ndejokopa,
ha'e rekyjea rendu xapy'a vy renhemondyipa rei,
- ¹¹ pyttüa guive, mba'eve rexa e'ý teí.
Ha'e ramo ae yy tyguaxu va'e ndeao'i 'rã.
- ¹² — Yva re yvatevea py e'ý teve Nhanderuete oí?
Ema'ë ha'vy jaxy-tata yva re ikuai va'e re.
Ha'e va'e ma nda'yvate ma ra'agai!
- ¹³ Ha'e rami teí aipo're: “Mba'e tu Nhanderuete oikuaa?
Ha'e nda'u oikuaa pota 'rã mba'emo re,
oexa 'rã teve pytū ana rupi?”
- ¹⁴ Mba'eta yva apy rupi ha'e uguata oikovya rupi
arai ana ojao'i 'rã
mba'emo oexa aguã rami e'ý”, 're.
- ¹⁵ Ha'e gui ndee nda'u reikoxe teri tape ymague rupi,
heko vai va'e kuery ikuaiaty rupi?
- ¹⁶ Ha'e va'e kuery ma oipe'apaa vyvoi raka'e hi'ára ovaë e'ý mbove.
Ha'e kuery ytarã oí va'ekue ma xxyry atã va'e ogueraapa.
- ¹⁷ Mba'eta Nhanderuete pe aipoe'i: “Ejepe'a ke orea gui!
Mba'e tu Ipo'akapa va'e ojapo 'rã orere?” he'i rire.
- ¹⁸ Ha'e rami teí ha'e kuery ro ha'e omonyë mba'emo porã anho.
Ha'e rã xeivy pe nda'ëvei ae heko vai va'e kuery onhemongetaa rami aiko aguã.
- ¹⁹ Ha'e kuery opa rã heko porã va'e kuery oexa vy ovy'a 'rã.
Ha'e kuery re ojevavy e'ý va'e opuka 'rã.
- ²⁰ Ha'e vy aipoe'i 'rã: “Anhetë, nhanderovaigua kuery omombaa ra'e,
ha'e rã mba'emo oeja va'ekue ma tata ju omomba”, he'i 'rã okuapy.
- ²¹ — Ha'e nunga rupi peteí rami ju pota ke eiko Nhanderuete reve,
revy'a nho aguã.
Ha'e ramo ndere ou 'rã iporã va'e.
- ²² Ajerure ndevy, ejapyxaka porã pota ke nemo'e rã,
ha'e ndepy'a re emoí ijayvua.
- ²³ Mba'eta Ipo'akapa va'e pe rejeko rerova uka ramo reiko porã ju 'rã.
Xapy'a rei ndero gui mba'emo vai reipe'a ramo,
- ²⁴ ha'e ouro rereko va'e vyv yvituí py remombo ramo,
ouro Ofir guigua rereko teí yakã'i rupi ita ikuai va'e mbyte rupi remombo ri ramo,
- ²⁵ ha'e ramo Ipo'akapa va'e ae 'rã ndevygua oiko
ouro ha'e prata oiporavo pyre rami.
- ²⁶ Mba'eta rerovy'a 'rã Ipo'akapa va'e anho,
ha'e nderova rembovy 'rã Nhanderuete-a katy.
- ²⁷ Ixupe rejapukai ramo oendu 'rã,
ha'e ixupe ju rejapo 'rã renhemboayvuague.
- ²⁸ Mba'emo rejapo aguã re renhembopy'a ramo oiko porã 'rã,
ha'e tape reikoa rupi omoexakãmba 'rã.
- ²⁹ Nhomoyvyí'ia rã rexa vy “Emopu'ã ju ke” 're ramo
Nhanderuete ogueraa jepe 'rã onhemoyvyí'i va'ekue,
- ³⁰ oepy 'rã ojevavy va'ekue teí.
Ndepo icy'a e'ýa re oma'ë vy 'rã ogueraa jepe — he'i.

23

Nhanderuete renonde Jó ojexa ukaxea re ijayvuague

- ¹ Ha'e ramo Jó ombovai:
- ² — Aý voi ju xeayvu ta opu'ã rei va'e rami,
xepo py xepoaëa ajoko teí.
- ³ Ail! Xee aikuaa va'e rire Nhanderuete ajou aguã!
Ha'e rami vy ajexa uka 'rãgue oikuaa pota oinya py.
- ⁴ Henonde anhemombe'u porã 'rãgue,

- xejuru amonyē 'rāgue aikoa re xeayvu aguā.
 5 Ha'e rami vy xembovai rā aikuaa 'rāgue,
 aendu kuaa 'rāgue xevy ijayvu rā.
 6 Opo'aka etea rupi nda'u ijayvu ete 'rāgue xeivy?
 Any, oikuaa pota porā'i 'rāgue xere.
 7 Ha'e py ma heko porā va'e ijayvu 'rāgue hexeve,
 ha'e raka'e rā peve xee aa jepe 'rāgue xemboayvu aguā gui.
 8 — Ha'e rami teĩ ma'ē, xerenonde katy xee aa rā noi 'rā ha'e py.
 Xerakykue katy ajevy teĩ ha'e py voi ndajoui.
 9 Xeaxua katy mba'emo ojapo teĩ xee ndaexa reguai.
 Xeaxua katy voi onhemi rā xee ndaexai 'rāe.
 10 Ha'e rā ha'e ma oikuaapa xee aikoa.
 Xera'anga va'e rire ouroiky'a e'ỹ va'e rami ajekuaa 'rāgue.
 11 Mba'eta xepy ma ha'e oikoa rupi anho oiko.
 Aĩ atā ixuguigua tape rupi aikoa rupi, ndajepe'ai ae.
 12 Ojuru py ojapo uka va'e gui xee ndajepe'ai,
 xepy'apy py amoĩ porā ijayvuague.
 13 Ha'e rā ha'e ma mba'emo ojapo aguā re onhembopy'a ramo
 mava'e 'rā tu ojoko?
 Mba'eta ha'e ojaxoxe vy ojapo 'rāe.
 14 Ha'e rami vy ojaxopa avi 'rā xerekorā re ijayvuague.
 Ha'e va'e ramigua ma mbovy rei e'ỹ ojee omoĩ ojapo va'erā.
 15 Ha'e nunga rupi xepy'a eta rei 'rā henonde.
 Ha'e nunga re aikuaa pota vy akyje.
 16 Nhanderuete ojapo xepy'a re xekangya aendu aguā rami,
 Ipo'akapa va'e ae xembopy'a eta rei.
 17 Mba'eta pytū vaikue gui e'ỹ xekangya aendu,
 pytū reia xerova ojao'i va'e gui e'ỹ guive.

24

- Mbovykue rei e'ỹ heko vai va'e kuery nombopagaia rami Jó ijayvuague*
 1 — Mba'e re nda'u Ipo'akapa va'e noa'angai ri joe oikuaa pota aguā ára?
 Mba'e re tu oikuaa va'e kuery ndoikuaai ha'e va'e ára?
 2 Mba'eta ikuai vvy markaa oguero va'e,
 ha'e mymba re imonda vy guymba kuery reve ae omongaru va'e.
 3 Ha'e kuery oi'pe'a 'rā tyre'ỹ rymba mburika,
 imeve'ỹ va'e gui voi oi'pe'a 'rā hymba vaka.
 4 Ojexavai va'e kuery pe ojavy uka 'rā tape.
 Ha'e kuery gui iporiaukue'i vvy re ikuai va'e onhemimba 'rā okuapy,
 5 Ha'e va'e kuery ma omba'eapo aguā katy oje'oi 'rā kavaju'i tekoa e'ỹa rupigua rami,
 iporiaukue'i voi vvy joja reia rupi oeka 'rā oje'oivy ho'u va'erā.
 Ha'e rami vvy 'rāe ojou tembi'u ojeupe ha'e gua'y kuery pe.
 6 Heko vai va'e mba'ety py omono'ō 'rā mba'emo aju,
 ha'e omondoro 'rā uva.
 7 Ipire rei reve oaxa 'rā pytū ao oguereko e'ỹ vy.
 Onheovā aguā ndoguereko'i vvy yro'y oendu.
 8 Yvyty rupi inhakýmba 'rā oky gui.
 Onhemi aguā oguereko e'ỹ vy itaova rupi rive 'rā onhemi okuapy.
 9 Tyre'ỹ'i kuery omboia 'rā okambua gui,
 ha'e iporiaukue'i gui oi'pe'a 'rā oguereko'i va'ekue.
 10 Ha'e ramo ha'e va'e kuery ipire rei va'e ikuai ao oguereko e'ỹ vy.
 Karuai oendu vy ogueraa 'rā mba'emo aju ojokua pyre.
 11 Heko vai va'e kuery roka py onhami 'rā azeite-rā,
 uva ombiri avi teĩ oendu riae 'rā oy'uxea.
 12 Tetā rupi voi avakue ipoāē 'rā okuapy, ojeaipy kuery ojaxukai 'rā onhe'ē py.
 Ha'e rami teĩ ha'e nunga re Nhanderuete ndoikuaa potai merami.
 13 — Ha'e rā heko vai va'e ma hendy va'e rovaigua ikuai,
 ndoikuaai 'rā guive tape hendy katy oo va'e,
 ha'e va'e rupi ndooxei guive.
 14 Ko'ē rai jave jojuka rive-rive va'e opu'ā vy
 ojuka 'rā iporiaukue'i ha'e ojexavai va'e.
 Ha'e gui pyávy ma oo ju 'rā imonda aguā katy.
 15 Itavy rei va'e voi oarō 'rā pytū'i ta maa.
 Ha'e vy aipoe'i ojeupe: “Avave rei ndaxerexa kuaai 'rā”, he'i vy omo'ā 'rā ovy ngova.

- ¹⁶ Pytū jave avakue oike 'rā joo rupi,
ha'e gui ara py ma ngoo rupi ae 'rā ikuai.
Neī ndoexaxevei 'rā hendy va'e.
- ¹⁷ Mba'eta ha'e kuery ma ko'ēa pe “Manoa pytū guigua” he'i 'rā,
ha'e rā pyávy nhomongyje reia ma ha'e kuery oexa va'ety ae oiko.
- ¹⁸ — Peē aipopeje: “Heko vai va'e kuery ma ogueraapaa vyvoi 'rā yxyrya py.
Yvy re ha'e kuery pegua oī va'e ma ayvu vaipy anho.
Ndoovei 'rā tape uvaty katy oo va'e rupi omba'eapo aguā.
- ¹⁹ Ipirua ha'e haku ma yro'y omboyku-a rami avi
manoa voi omomba 'rā ojejavý va'e kuery.
- ²⁰ Ha'e ramo ha'e kuery re ixy ae hexarai 'rā,
ho'okue re taxo ovy'a reve okaru 'rā okuapy.
Heko vai kuery re na'ima'endu'aavei ma 'rā.
Ha'e kuery omopēmbaa 'rā vyvra rami,
- ²¹ imemby va'erā e'ý ha'e kuery omomba rire,
ha'e imeve'ý va'e pe ndojapo porāi rire”, peje.
- ²² — Any! Ha'e rami 'rāgue py Nhanderuete ombaraetea rupi ombopukuve 'rā ojerovia rei va'e kuery ára.
Ha'e kuery ndaekorāvei teī opu'ā ju nho 'rā.
- ²³ Ha'e kuery pe ha'e ome'ē 'rā opytu'u aguā.
Ha'e ramo ikuai atā 'rā.
Nhanderuete oma'ē 'rā ha'e kuery ikuai rupi.
- ²⁴ Ha'e kuery ma xapy'a'i 'rā omboyvatea.
Ha'e rire oaxa ju xapy'a 'rā, amboae kuery rami oipe'apaa 'rā,
mba'emo ra'yigue rami avi ojayaa 'rā.
- ²⁵ Ha'e rami e'ý rā mava'e 'rā tu oikuaa uka xepua,
ha'e ombovaipa xeyvua? — he'i.

25

Nhanderuete renonde avave rei nonhemboeko porā kuaia rami Bildade ijayvuague

- ¹ Ha'e ramo Sua pygua Bildade ombovai:
- ² — Ha'e rami avi Nhanderuete pegua anho oī opena ha'e ipo'aka aguā.
Ha'e ma ojapo yva yvatevea rupi voi ikuai porāa aguā rami.
- ³ Guembiguai xondaro kuery ma ndajaiapapapa kuaai 'rā.
Ixuguigua hexakāa ojope 'rā ha'e javi áry.
- ⁴ Ha'e rami rā mba'exa tu avakue onhemboeko porā 'rā Nhanderuete renonde?
Mba'exa tu kunha gui itui'i va'ekue oiko 'rā iky'a e'ý va'e?
- ⁵ Ma'ē, ha'e oexa rā jaxy eteve voi naendy
ha'e jaxy-tata ikuai va'e iky'a e'ý va'e ndoikoi.
- ⁶ Ha'e gui avakue katuve ma taxo rami rive 'rā vvy'igieve'i.
Avakue ra'y kuery ma taxo ramigua meme ae ikuai — he'i.

26

Nhanderuete ipo'akapaa re Jó ijayvuague

- ¹ Ha'e ramo Jó ombovai:
- ² — Ikangy va'e pytyvōa merami rive reiko,
ijyva mbaraete e'ý va'e reipytyvō merami rive!
- ³ Hi'arandu e'ý va'e remongeta kuaa merami rive,
ha'e anhetē va'e reikuaa uka porāmba merami rive!
- ⁴ Mava'e nembo'ea rupi tu ndeayvu ha'e rami ete?
Mava'e guigua nhe'ē tu ndere oī ndeayvu kuaa aguā?
- ⁵ — Ha'e gui omano va'ekue nhe'ē ma oryryipa 'rā okuapy
yy guy py ikuai py.
- ⁶ Nhanderuete gui manoa pygua kuery nonhemi kuaai,
vyvkua vaikue ao'iarā noī ramo.
- ⁷ Mba'eve oī e'ýa áry ha'e oipyto kuaray apu'a'ia katygua,
mba'eve oī e'ýa áry ae avi onhono yvy.
- ⁸ Arai ana ikuai va'e mbyte ojoko 'rā yy,
ha'e rami teī arai ndoxoi 'rā iguy py.
- ⁹ Ojao'i 'rā guenda opena oinyaty,
hi'áry arai pytūa py ojao'i vy.
- ¹⁰ Omoī raka'e yy apyrā,
hexakāa ha'e pytūa mbyte py.
- ¹¹ Ijayvu atā ramo yva yta
oryryi 'rā onhemondyipa vy.

- ¹² Ombaraetea rupi omboja'o raka'e ye'ë,
ha'e o'arandua rupi oity ngoavaigua kuery.
- ¹³ Opejua py rive omoexakã 'rã yva,
ha'e opo py ojuka 'rã teju jagua inhakuã va'e.
- ¹⁴ Ma'ë, ha'e ramigua ma hembiaipo ppy rive!
Mba'eta ixugui ma nhaendu mbeguei'i anho.
Ha'e gui mava'e tu oendu kuaa 'rã ipo'akaa ryapu atã va'e?

27

Heko vai va'e kuery ikuai axy aguã re Jó ijayvuague

- ¹ Jó ijayvuue tema. Ha'e vy aipoe'i:
- ² — Anhetë ete Nhanderueete Ipo'akapa va'e xevy guarã va'ekue pe'aa
ha'e xenhe'ë moingo axya va'e rekove rupi aura vy aipoa'e:
- ³ xee aikove teria ja,
ha'e xeapyígya py xepytuë aguã Nhanderueete ome'ë teria ja
- ⁴ xejuru nda'ijayvui 'rã ha'eve'ÿa rami,
xeapekũ nda'ijapui 'rã guive.
- ⁵ Nda'evei ete “Ha'evea rami pendeayvu”, ha'e aguã!
Amano peve ndajepe'ai 'rã anhetë rupi aikoa gui.
- ⁶ Aĩ atã 'rã xereko porãa re, ndajepe'ai 'rãe.
Aikoa ára nhavõ xepy'apy py ndaikuaai ajevavya.
- ⁷ — Xerovaigua kuery topa heko vai va'e rami,
xerovai opu'ã va'e kuery ma ha'eve'ÿa rami ikuai va'e rami topa.
- ⁸ Mba'eta ojerovia e'ÿ va'e kuery ma mba'e tu oĩ oarõ aguã,
hekove ojayaa,
ha'e inhe'ë Nhanderueete oipe'a rã guarã?
- ⁹ Ha'e kuery áry teko axy ou ramo
Nhanderueete oendu 'rã teve ojapukaia?
- ¹⁰ Heko vai va'e nda'u oguerovy'a 'rã Ipo'akapa va'e?
Ixupe ojapukai 'rã teve oikoa ha'e javi py?
- ¹¹ — Xee rombo'e 'rã Nhanderueete po'akaa re,
namombe'u e'ÿi 'rã Ipo'akapa va'e reve mba'emo oĩ va'e.
- ¹² Mba'eta peë kuery ha'e javi pexa ae ma ha'e nunga.
Mba'e re tu ha'vy ovare e'ÿ va'e anho pejou porã?
- ¹³ Ma'ë, po ramigua anho heko vai va'e ojopy 'rã Nhanderueete po gui,
Ipo'akapa va'e gui nhomoingo axya kuery ojopy 'rã po rami.
- ¹⁴ Ha'e kuery ra'y kuery hetave oje'oivy teĩ kyxe pyguarã meme ikuai,
hamymino kuery voi ndojou retai 'rã ho'u va'erã.
- ¹⁵ Ha'e kuery va'e regua hembyre va'ekue ma mba'eaxy omomba 'rã,
ha'e rã ta'xykyue ndojae'oi 'rã.
- ¹⁶ Heko vai va'e ma yvyku'i rami 'rã omboaty prata,
oaurã guive yapo rami ojou-jouve 'rã.
- ¹⁷ Ha'e nunga omoĩ porã teĩ heko porã va'e kuery ju 'rã onhemonde,
prata ogueroko va'ekue voi ojevavy e'ÿ va'e kuery ju omboja'o 'rã okuapy.
- ¹⁸ Heko vai va'e ngoorã ojapo va'e ma tanambi raity rami,
ha'e oguy'irã mba'ety rarõa ojapo va'e rami rive.
- ¹⁹ Iporiaui e'ÿ va'e ma mba'emo oguerokopa va'e mbyte py onhenho teĩ
guexa oipe'a ju vy ndoexavei 'rã.
- ²⁰ Ha'e kuery re imongyjaarã ou vy ipo'aka 'rã yy oxyry atã va'e rami,
pyávy ma yvytu vaikue ogueraapa 'rã.
- ²¹ Kuaray oua katy gui yvytu ou va'e ogueraa ramo okanhymba 'rã.
Oipe'apa 'rã heravy oiague gui.
- ²² Nhanderueete po gui ojava vyvoixe teĩ
hi'áry ha'e nunga ha'e javi ombou 'rã omboaxy e'ÿ re.
- ²³ Heko vai va'e ho'a rã ojepopetepaa 'rã,
okanhyy ovy ramo otuvy nhe'ë pavë 'rã imondovy — he'i.

28

Yvy guýry mba'emo porã oĩ va'e avakue oguenoë kuaa re Jó ijayvuague

- ¹ — Anhetë, prata re yvy jo'oa ikuai,
oĩ avi ouro ky'a'oaty.
- ² Ferro guive oguenoëa 'rã yvy gui,
ha'e rã overa va'e ma ita py ojoua.
- ³ Avakue omoexakã 'rã pytũ anaa rupi,

- ha'e hexakāa opaa peve oo vy oeka 'rā ita porāgueve
pytū anaa py oī va'e.
- ⁴ Ojo'o 'rā vvy oike aguā avakue ikuaia gui mombyry,
oguata va'e kuery oikuaa e'ŷa py.
Ha'e kuery ikuaia gui mombyry 'rā ikuai
peteī iā re ovava-vava oinya py.
- ⁵ Vvy gui ma oiko 'rā tembi'u,
ha'e rā iguýry ma tata py okaiague rami 'rā ojekuaa.
- ⁶ Ha'e pygua ita re oī 'rā safira,
ha'e gui iku'ikue re ma ouro oī.
- ⁷ — Ha'e va'e tape ma guyra jo'ua kuery ndoikuaai,
taguato ndoexai va'e ae.
- ⁸ Vixo inharō ha'e tuvixa va'e nopyrōi 'rā ha'e rupi,
guary ra'y voi ndoaxai ha'e rupi.
- ⁹ — Avakue opo py tembiporu ogueroko va'e py ombota-mbota 'rā ita re,
ha'e vvy vytytū ikuai va'e oipe'a 'rā iguy peve.
- ¹⁰ Ombokua 'rā ita rupi
oexa aguā hepyve va'e oī va'e ha'e javi.
- ¹¹ Omboty 'rā yy rape ikuai va'e peteīve henda py otyky e'ŷ aguā rami,
hexakāa katy oguerupa aguā hi'ā py oī va'ekue.
- Arandu anhetē* va'e me'ēa Nhanderuete oikoa re Jó ijayvuague
- ¹² — Ha'e rā 'arandua ma mamō tu oī?
Mamō tu oī mba'emo jaikuaa ete aguā?
- ¹³ Ha'e va'e repy ma avave ndoikuaai,
vvy re avakue ikuaia rupi ndojouai 'rāe.
- ¹⁴ Yvykua vaikue aipoe'i: “Xere ma ha'e nunga noī”,
ye'ē voi “Xea py noī avi” he'i.
- ¹⁵ Ouro oiky'a'o pyre re teī nda'evei jajogua aguā,
neī prata voi nda'evei hekovia japeja aguā.
- ¹⁶ Mba'eta ouro Ofir gui ogueru pyre ha'e javi gui ovareve va'e,
ōnix hepyve va'e ha'e safira ikuai va'e gui guive.
- ¹⁷ Ouro teī ma 'arandu rami e'ŷ iporā va'e, neī itaendy ma voi.
Jeguaa ouro oiky'a'o pyre guigua re teī nanhamboekovia 'rā.
- ¹⁸ 'Arandu oīa py ma ita coral ha'e itaendy ikuai va'e re nhandexeraipa 'rā.
Pérola jajoua gui voi ha'eveve 'arandu jarekoa.
- ¹⁹ Etiópia gui topázio herua teī ha'e va'e ma 'arandu rami e'ŷ ovare,
neī ouro iky'a e'ŷ va'e voi.
- ²⁰ — Ha'e nunga rupi magui tu ou 'arandu?
Mamō tu oī mba'emo jaikuaa aguā?
- ²¹ Mba'eta temimoingo ikuai va'e oexaa gui onhomia,
guyra yvate rupi oveve va'e gui guive.
- ²² Yvykua vaikue ha'e manoa aipoe'i:
“Oreapyya py roendu rive 'arandu oikoa”, he'i.
- ²³ Nhanderuete anho oikuaa 'arandua katy tape oo va'e,
ha'e ae oikuaa oīa.
- ²⁴ Mba'eta ha'e ma vvy apy rupi peve oexa pota,
yva guýry ikuai va'e ha'e javi 'rā oexapa.
- ²⁵ Yvytytū poyia ha'eveve'i rami Nhanderuete oeja
yy guive ituia peve oa'anga jave,
- ²⁶ oky nhavō guarā oeja,
ha'e yapu overa reve va'e raperā omoī jave,
- ²⁷ ha'e va'e jave py ae 'arandu oexa avi vvy oikuaa uka raka'e.
Ha'e va'e re oikuaa pota ma vvy omoī atā raka'e.
- ²⁸ Ha'e vvy aipoe'i avakue pe: “Pendu ke:
SENHOR renonde pejererokyjea ma pene'arandurā oī,
ha'eve'ŷ va'e gui pejepe'a vvy 'rāe peikuaa mba'emo”, he'i.

Jó ymave rupi oiko porāague re ima'endu'aague

- ¹ Jó ijayvuvē tema. Ha'e vvy aipoe'i:
² — Ail Kueve'igua jaxy re aikoague rami ju aiko va'e rire,
Nhanderuete xere opena javegua re rami!
³ Ha'e jave ma xeakā áry rupi omoexakā va'ekue,

- ha'e hendy va'e xerereko heravy ramo pytū rupi ete aguata aikovy va'ekue.
- ⁴ Ha'e jave ma xerexai aikovy va'ekue,
xero áry rupi Nhanderuete xerayvua oexa uka rã.
- ⁵ Ha'e jave ma Ipo'akapa va'e oiko teri xereve,
ha'e xera'y kuery voi xeyvúry teri ikuai.
- ⁶ Kamby py xepy ajoí ainy va'ekue,
ha'e itaova gui yakã'i oxyry va'e rami azeite oxyry oiny jave.
- ⁷ — Tetã kora rokê katy aa,
ha'e tetã mbyte py guive aguapy ainy aguã ome'ëa jave
- ⁸ kunumigue xerexa vy ojepe'apa,
ha'e tujakue'i voi opu'amba okuapy va'ekue.
- ⁹ Yvatekueve voi ijayvu ta vy ojuru ojoko okuapy va'ekue,
ojuru re opo omoí reve.
- ¹⁰ Omboetevepy kuery ayvu nonhenduvei va'ekue,
ijurupy py inhapekū nomyívei ramo.
- ¹¹ Xeayvua rendua kuery ma “Ovy'a va'e” he'i okuapy xevy,
xerexaa kuery voi xere ima'endu'a porã va'ekue.
- ¹² Mba'eta xee ma iporiaukue'i oiapukai rã aepe va'ekue,
tyre'y opytyvõarã oguereko e'y va'e kuery guive.
- ¹³ Omano ta va'e voi xereroayvu porã va'ekue,
xee ajapo avi va'ekue imeve'y va'e kuery okuraxõ py ovy'a aguã rami.
- ¹⁴ Xejee amoí va'ekue teko porã,
ha'e va'e anho oí va'ekue xeaó rami.
Manto ha'e akã nhovãa rami oí va'ekue ha'evea rami joe apenaa.
- ¹⁵ Xee ajeapo va'ekue ára revegua e'y rexarã rami,
hi'u rovaikue'i va'e pyrã rami guive.
- ¹⁶ Iporiaukue'i pe ma tuu aiko va'ekue,
oikuaapy e'y ikuai va'e re guive aikuaa pota va'ekue.
- ¹⁷ Ha'e rã porayvu e'y va'e kuery rai'y kã ma xee amopëmba va'ekue,
ha'e kuery rai gui xee araa jepe va'ekue omokõ ta va'e.
- ¹⁸ Xee aipoa'e va'ekue: “Xero py ae 'rã amano,
amboetave 'rã xe'ára ita ku'i rami.
- ¹⁹ Xee aiko 'rã yy peve yvyra rapo ovy va'e rami,
ha'e pyávy hakã re xyapy oia va'e rami.
- ²⁰ Xemboeteave tema 'rã,
ha'e xepo py xerapa ajopy atã tema 'rã aikovy”, ha'e va'ekue.
- ²¹ — Xeayvu rã ojapyxaka va'e kuery oarõ okuapy va'ekue amongeta aguã,
xeayvua oendua rupi okyriiri pavê va'ekue.
- ²² Xee xeayvupa ma rã naxembovai kuaai va'ekue.
Ha'e kuery áry xeayvua oguejy va'ekue yxapy rami.
- ²³ Ha'e kuery xerarõ va'ekue oky re rami,
ojuru oipe'a reve oarõ okuapy xeayvu aguã, haku-a ára py oky oarõ va'e rami.
- ²⁴ Ha'e kuery nda'ipy'a guaxui jave ha'e kuery pe xerory va'ekue.
Xerova omoexakã rã xererovy'a va'ekue.
- ²⁵ Ha'e kuery raperã xee aiporavo va'ekue huvixa rami aguapy ainy reve,
huvixave oxondaro kuery mbyte oí va'e rami,
ha'e ojae'o va'e kuery mbopy'a porãa rami ajoguereko va'ekue.

30

Jó iporiaua oguerojae'oague

- ¹ — Ha'e gui aý ma xegui kyriigueve xejojai okuapy,
ha'e va'e kuery ru ma nei jagua reve xerymba vexa'i kuery oarõ aguã katy
namondoukai va'ekue ri.
- ² Mba'eta ha'e kuery inhangaipa ramo
mba'e nunga py tu xevy ovare 'rãgue ipo mbaraetea?
- ³ Jexavai ha'e karuai gui ha'e kuery ikangypa okuapy.
Oixu'u okuapy mba'emo pirukue,
yma ma tekoa noíveia rupi mba'emo vaikue ikuai va'e guive.
- ⁴ Jai rogue ha'e yvyra'i rogue rive oi'po'o,
zimbroy rapo guive ho'u okuapy.
- ⁵ Avakue mbyte gui omoxëa.
Ha'e kuery rovai oiapukaia okuapy imonda va'e rakykue oiapukaia rami.
- ⁶ Yvy'ã peguy kuaray'ã reia rupi ikuai,
vyykua ha'e itakua rupi.

- ⁷ Onhendu okuapy jai rupi,
juu guy rupi rive ijaty okuapy.
- ⁸ Inhakā porā e'ŷ va'e ra'y kuery ikuai,
ima'endu'apy e'ŷ regua,
ijyvy gui omoxēmba pyre.
- ⁹ — Ha'e rā aŷ ma ha'e kuery xembojaru rei okuapy,
ojojai pyrā aiko ramo.
- ¹⁰ Xegui ojeguaru vy ojepe'a 'rā mombyry'i,
ndokyjei guive xerova re onyvō aguā.
- ¹¹ Mba'eta Nhanderuete ombopyu xerapa xā xembojexavai vy.
Ha'e ramo ha'e kuery ndojejokovei ma xerenonde.
- ¹² Ha'e rami vy xeaxu e'ŷa re opu'ā okuapy xemoanha rei aguā,
ha'e xerovai jogueroayvu okuapy xemomba vy ou aguā re.
- ¹³ Ombovaipa okuapy xee aa aguā va'e rupi,
xeapo ajexavai aguā rami.
Ha'e kuery ma oipytyvō pyrā e'ŷ ae.
- ¹⁴ Xere ou okuapy tetā kora oitypaague rupi oike va'e rami,
ha'e kuery ouve tema 'rā ivaipaague mbyte rupi.
- ¹⁵ Xere ou xemongyjarā,
yvytu ombovepepa rire omboetepy aikoague.
Avy'aague oaxa ma ovy arai rami.
- ¹⁶ — Aŷ ma xepy'apy py anhenhandu xenhe'ē ivaipa maa rami.
Xembojexavaia ára ou ma xere.
- ¹⁷ Pyávy xekāgue hu'ũmba ha'e ovapa va'e ramigua aendu,
ha'e mba'emo vai xexu'u va'e ndopytu'ui.
- ¹⁸ Mba'emo vai aendu va'e gui xeaou voi ojepokapa rei 'rā,
mba'emo vai xejryvipy 'rā xeaou puku jyryvi rami.
- ¹⁹ Xeruete, ndee ae xemombo yapo py,
ha'e ramo vyv ku'i ha'e tanhimbu rami aiko.
- ²⁰ Ndevy ajapukai rā ndee naxembovai.
Apu'ā ha'amy teĩ rema'ē rive xere.
- ²¹ Porayvu e'ŷ va'e renhemoingo xevy.
Ha'e vy ndepo mbaraete reve repu'ā xere.
- ²² Rejapo yvytu xereupi vy hi'áry xereraa aguā rami.
Xemou'ũmba ára vai revovo rupi.
- ²³ Ha'e gui xee aikuaa amano aguā katy xereraa,
oikove va'e ha'e javi ikuai aguā katy.
- ²⁴ — Ha'e rami avi yty áry ava omombo imoinyague gui nokuave'ēi 'rā teve,
ojexavaia gui ndojapukai ratāi 'rā teve ipytyvōarā pe?
- ²⁵ Xee ndajae'oi va'ekue teve ojexavai va'e re,
ha'e xenhe'ē py namboaxyi teve oiko axy va'e?
- ²⁶ Iporā va'e xee arō teĩ xere ou mba'emo vai.
Hendy va'e arō va'e 'rāgue py pytū anho ou xere.
- ²⁷ Xeryepy rupi omyí va'e ndopytu'ui,
xere aiko axya ára ou ramo.
- ²⁸ Xeporiau aikovy kuaray ojope e'ŷa rupi.
Heta va'e kuery mbyte py ajerure ha'amy xepytyvōa aguā.
- ²⁹ Xee ma jagua-tuvy nhe'ē ryke'y,
ha'e guyra nhandu ryvy aiko.
- ³⁰ Xepire hu'ũmba reve ho'apa xegui,
xekāgue voi okai merami xepire raku gui.
- ³¹ Ha'e nunga rupi ixā reta va'e ambopu 'rāgue py xeraxē ainy xepy'a vai vy,
ha'e mimby amonhe'ē 'rāgue py ojae'o va'e rami anhendu.

31

Jó anhetē rupi oikoa re ijayvuague

- ¹ — Xerexa reve ajapo ma areko aguā.
Mba'exa tu ha'vy xee apena reia rupi ama'ē ta kunhataĩ re?
- ² Ha'e rami rire mba'e 'rā tu xee ajopy Nhanderuete yvategua gui,
mba'e nunga tu yvate oĩa gui ome'ē 'rā xevy?
- ³ Mba'eta heko vai va'e peguarā omoĩ okanhy aguā,
mba'emo vai apoa pe omoĩ oiko axy aguā.
- ⁴ Ha'e rā xee aikoa ma Nhanderuete oexapa,
oipapa aguataa ha'e javi.

- 5 — Ha'e gui aiko porā merami rive va'e rire,
ha'e ajokore aguā katy xepy inhakuā ovvy va'e rire,
- 6 (Nhanderuete toikuaa pota porā xere,
anhetē rupi aikoa oikuaa aguā,)
- 7 xapy'a rei tape porā gui ajepe'a vy
mba'emo aexa va'e rupi rive anhembopy'a,
e'ŷ vy xepo re iky'a va'e oī va'e rire,
- 8 ha'e rami ri ramo amboae kuery rive to'u xee ama'etŷague gui,
ha'e xemba'ety rupi henhoī va'ekue tomondoropa rive.
- 9 — Xapy'a rei xekuraxō py kunha mboae re anhembotavy uka,
ha'e xea katygua rokē py ama'ē mbeguea rupi aiko va'e rire,
- 10 ha'e ramo xera'yxy tojapo tembi'u amboae ava pe,
hexeve amboae tonheno.
- 11 Mba'eta ha'e rami aiko va'e rire nda'evei ete 'rāgue,
ajejavyague re huvixa kuery xembopaga 'rāgue.
- 12 Ha'e ramigua ma tata rami ombovaipe 'rāgue opa peve,
omomba 'rāgue mba'emo areko va'e ha'e javi.
- 13 — Xapy'a rei xerembiguai ava e'ŷ vy kunha mba'e
ha'eve'ŷa rami xee areko va'e rire,
- 14 mba'e tu xee ajapo 'rāgue Nhanderuete xere opu'ā ramo?
Xere oikuaa pota ramo mba'exa tu xee ambovai 'rāgue?
- 15 Mba'eta xeryru'i py aī aguā xemoingo va'ekue e'ŷ ri ty'y ha'e kuery voi omoingo raka'e?
Ha'e e'ŷ teve nhanderyru'i py nhanemoingo pavē va'ekue?
- 16 — Xapy'a rei iporiaukue'i oipota va'e name'ēi vy
imeve'ŷ va'e ndaexa pyxovei aguā rami ajapo va'e rire,
- 17 ha'e rami e'ŷ vy xee ae'ia py akaru va'e rire
tyre'ŷ pe amboja'o e'ŷ re,
- 18 (mba'eta xekunumi guive xereve ae areko tuu rami,
ha'e xeryru'i py aī guive imeve'ŷ va'e rerekoa aiko,)
- 19 xapy'a rei ijao e'ŷ va'e ojexavai rā ama'ē rive va'e rire,
e'ŷ vy onheovā aguā oguereko e'ŷ vy ojexavai rā,
- 20 xapy'a rei xerymba vexa'i rague py namboakui ramo
ha'e kuery opy'a py ndaxereroayvu porāi va'e rire,
- 21 xapy'a rei okē py joguerekoa kuery ikuai va'e xemboeko porā reve teī
tyre'ŷ rovai xepo aupi va'e rire,
- 22 ha'e rami ri ramo to'a rive xeaxi'y kāgue,
ha'e tomboia xejyva oīague gui.
- 23 Mba'eta ha'e rami va'e rire Nhanderuete xembopaga aguā gui ndaxerekorāvei 'rāgue,
hexakāa rive xee ndarop'akai 'rāgue.
- 24 — Xapy'a rei ouro re rive ajerovia vy
ouro oiky'a'o pyre pe “Ndere ajeko” ha'e va'e rire,
- 25 xapy'a rei arekopa etea
ha'e xepo py ajou reta va'e arovy'a va'e rire,
- 26 xapy'a rei kuaray rexakāa re,
e'ŷ vy jaxy hendy porāa re ama'ē reve
- 27 xepy'a py ajekore nhemia rupi
xepo py ayvua aikuaa uka va'e rire,
- 28 ha'e va'e py voi ajejavy 'rāgue joguerekoa kuery xembopaga aguā rami,
Nhanderuete yvategua e'ŷ amboete rire.
- 29 — Ha'e gui xere ija'e'ŷ va'e kuery ojexavai rā aexa vy ndavy'ai,
ha'e kuery re mba'emo vai oiko rā ndarovy'ai.
- 30 Ha'e rami avi ndarojejavyi xejuru
ha'e kuery omano aguā re ajerurea py.
- 31 Ha'e xero py ikuai va'e aipo nde'i:
“Xo'o ha'e nome'ē porāi rire ndajakaru porāi”, nde'i,
- 32 mba'eta xee ndaejai vvy mboae guigua tape py rive pytū oaxa aguā,
xerokē aipe'a jepi riaa oguata va'e kuery amovaē vy.
- 33 Ha'e gui Adāo rami e'ŷ xepy'apy py nanhomi
xereko vaia ha'e ajejavya.
- 34 Mba'eta xee ma heta va'e kuery gui ndakyjei,
xeretarā kuery xere ija'e'ŷ va'e naxemongyjei
akyriiri ha'e xero gui naēi aguā rami.
- 35 Xeayvu renduarā oī va'e rire!
Ma'ē, apy ma oī xereko regua xerery reve ambopara va'ekue!

- Ipo'akapa va'e xembovai va'e rire,
 ha'e rami e'ý vy xerovaigua ombopara va'e rire xere ijayvua!
- ³⁶ Ha'e va'e kuaxia para araa 'rãgue xeaxi'y áry,
 xeakã áry ajokua 'rãgue coroa rami.
- ³⁷ Nhanderuete pe xee aikuaa uka 'rãgue aikoa ha'e javi.
 Ha'e oia py ajexa uka 'rãgue yvateve va'e rami.
- ³⁸ — Xapy'a rei xemba'ety káuxa xere ijayvua,
 ha'e yvy aikarã heravyague káuxa ojae'oa va'e rire,
- ³⁹ xapy'a rei ijaju ma ramo ha'u omba'eapo va'e kuery pe ha'evea rami apaga e'ý re,
 ha'e ijopyarã va'ekue amomba va'e rire,
- ⁴⁰ ha'e rami ri ramo trigo 'rãgue py juu rive toiko xevy,
 ha'e cevada 'rãgue py toiko trigo ramigua rive — he'i.
 Apy ma opa ma Jó ijayvuague.

32

Jó ha'e irũ kuery mboapy ikuai va'e pe Eliú ivaiague

- ¹ Ha'e gui mboapyve avakue opytu'u ma Jó onhemboeko porã rupi ijayvu rã ombovaia gui.
- ² Ha'e ramo buzita Baraquel ra'y Eliú, Rão ramymino regua ju ivai Jó pe, Nhanderuete gui eteve voi onhemboeko porãvexe ramo.
- ³ Irũ kuery mboapyve pe voi ivai, mba'eta ha'e kuery nombovai kuaavei va'eri Jó rovai tema ijayvu rire.
- ⁴ Ha'e gui Eliú ma Jó gui kunumive va'e vy oarõ ranhe ixupe ijayvu aguã.
- ⁵ Ha'e rami avi mboapy avakue nombovai kuaaveia Eliú oexa vy ivaiive oiny.

Jó pe ombovai ypy vy Eliú ijayvuague

- ⁶ Ha'e gui buzita Baraquel ra'y Eliú aipoe'i:
 — Xee ma xekunumive va'e, ha'e rã peẽ ma pendetujakueve meme.
 Ha'e rami vy xee arõ ranhe, pendua py xee aikuaa va'e amombe'u aguã ndaxepy'a guaxui vy.
- ⁷ Xee aipoa'e va'ekue: “Heta ára ha'e ma'etỹ mbovy e'ý oguereko va'e kuery ranhe ta'ijayvu 'arandu re nhombo'ea rupi”, ha'e va'ekue.
- ⁸ Ha'e rami teĩ anhetẽ avakue re oĩ 'rã peteĩ Nhe'ẽ,
 mba'eta Ipo'akapa va'e oipejua py rive nhomo'arandu 'rã.
- ⁹ Hi'arandukueve ma tujakueve anho e'ý ikuai,
 tujakue'i anho e'ý 'rã oikuaa ha'evea ramigua.
- ¹⁰ Ha'e nunga rupi xee aipoa'e: “Pejapyxaka ke xere,
 ha'e gui xee voi amombe'u 'rã aikuaa va'e”, ha'e.
- ¹¹ — Ma'ẽ, xee amoĩ porã pendeayvuague,
 pendeayvua re ajapyxaka pota porã
 pendeayvurã re teri peikuaa pota peiny reve.
- ¹² Ha'e gui pendeayvu aendu rã
 peẽ kuery peteĩve ma voi ndapeikuaa ukai Jó ha'eve'ya rami ijayvu,
 napembovai kuaai pekuapy ha'e ae oikuaa rami ijayvu rã.
- ¹³ Ha'e gui nda'evei penhemboeko porã ukua rupi aipopeje aguã:
 “Ore rojou ma 'arandu.
 Nhanderuete ju tombovai, avakue ma nda'evei”, peje aguã.
- ¹⁴ Ma'ẽ, xevey pe'ý ha'e ijayvu rire
 xee ma pendeayvuague rupi e'ý 'rã ambovai.
- ¹⁵ — Jó, neirũ kuery mboapyve onhemondy vy nanembovai kuaavei,
 ha'e kuery pe oata ma merami ayvu.
- ¹⁶ Ha'e gui xee pa arõve ta ha'e kuery nda'ijayvui ma rire?
 Mba'eta okyriřimba ma, peteĩ henda py ma voi nombovaivei vy.
- ¹⁷ Ha'e rami vy xee ju 'rã xeayvu,
 amombe'u 'rã aikuaa va'e.
- ¹⁸ Mba'eta heta areko xeayvu aguã,
 xenhe'ẽ oĩ va'e ae xemokyre'ỹ ramo.
- ¹⁹ Mba'eta xepy'apy rupi aendu vinhos ryrũ mba'emo pirekue guigua ipyau va'e ramigua,
 onhembotypa vy oxoro ra'i va'e rami.
- ²⁰ Ha'e rami vy tove taxeyvu oẽmba ovy aguã.
 Aipe'a 'rã xejuru rombovaia rupi xeayvu vy.
- ²¹ Xee ma peteĩ rive joegui ayvuvea rupi e'ý 'rã xeayvu,
 neĩ avakue pe ajejou porã ukua rupi e'ý guive.
- ²² Mba'eta xee ma ajejou porã ukua rupi ndaxeyvu kuaai.
 Ha'e rami e'ý va'e rire xemoingoare xereraa voi 'rãgue.

33

Jó pe Eliú ijayvu eteague

- 1 — Ha'e gui Jó, endu ke aikuaa va'e re xeyvuu rä,
ejapyxaka xeyvua ha'e javi re.
- 2 Aÿ ma xeyvuu ta,
xejuru py xeapekū ijayvu aguā rami oī.
- 3 Xeyvua oikuaa uka 'rā xepy'a re anhetē va'e anho oīa,
xeyvuu 'rā mba'emo aikuaa va'e re anho.
- 4 Nhanderuete Nhe'ē ae xemoingo va'ekue,
Ipo'akapa va'e oipejua py rive ome'ē xerekoverā.
- 5 Xapy'a rei rembovai kuaa vy ke xembovai,
ereko katu reikuaa va'e xevy pe remombe'u va'erā.
- 6 Ma'ē, Nhanderuete renonde ma ndee ramigua ae avi aiko,
Yapo gui avi xeapo rire.
- 7 Ha'e ramo xee noromongyjei 'rā,
nde'áry noī 'rā xepo poyia.
- 8 — Anhetē xee aendua py ndeayvuu rä
ange aendu kuri
- 9 "Ha'eve va'e aiko, ajejavy va'e'ÿ.
Xeky'a va'e'ÿ ha'e xereko vai va'e'ÿ", 're ramo.
- 10 "Ma'ē, Nhanderuete xembopagaa rupi onhea'ā,
hovaigua aikoa rami xekuaa vy.
- 11 Ha'e rami vy yvyra pa'ū py omboty xepy,
ha'e oikuaa pota 'rā aikoa ha'e javi re", 're va'ekue.
- 12 Ha'e rami ndeayvuague ha'eve'ÿa ramigua ramo
xee rombovai 'rā.
Mba'eta avakue ikuai va'e gui Nhanderuete yvateve va'e.
- 13 Mba'e re tu ixupe ndeayvuu ete vy
"Peteive henda py nerenhemombe'u porāi ri", 're?
- 14 Ha'e rami 'rāgue py Nhanderuete ma peteī rami ijayvuu ma vy
teigue ju 'rā omombe'u porāve.
Ha'e rami teī ijayvua re avakue noendu porā potai 'rā.
- 15 Nhandevy pe oexa ra'u uka 'rā mba'emo, pyávy mba'emo jaexaa rupi,
nhanderopeyi vaipa reve
nhanderupa rupi jake jajupy jave.
- 16 Nhandeapyxa voi oipe'a vy
nhanembo'e 'rā oipota va'e re,
- 17 ojapo aguā nhanhembopy'aa gui jajep'e'a aguā rami,
jajejou porā reia gui nhandererā jepe aguā,
- 18 yvykua katy nhanderekove oo rā ojoko vy,
kyxe py nhandejukaa gui guive.
- 19 — Nhanderupa rupi nhandetui ramo nhanembopaga 'rā haxy va'e py,
nhanekāgue re haxy nhaendu riaa va'e py.
- 20 Ha'e ramo jajeguaru 'rā tembi'u gui,
tembi'u hee va'e teī nhanenhe'ē py ndaja'uxei ae.
- 21 Nhandero'o oī porā va'ekue aÿ ndojekuaavei.
Ha'e rā nhanekāgue ndojekuaai va'ekue ma aÿ ojekuaapa.
- 22 Nhanenhe'ē oo tema 'rā yvykua katy,
nhanderekove onhemboja 'rā ovy ipe'aa'ā kuerya katy.
- 23 — Xapy'a rei oo 'rā peteī anjo nhandere ojerure va'erā, mbovy e'ÿ ikuai va'e regua,
nhandevy oikuaa uka aguā ha'evea ramigua jajapo aguā.
- 24 Ha'e ramo Nhanderuete nhanemboaxy vy aipoe'ī 'rā anjo pe:
"Eraa jepe ke, yvykua py ho'a e'ÿ aguā.
Ajou ma hepyrā", he'ī 'rā.
- 25 Ha'e rami rā nhandero'o hexaī ju 'rā nhanekyrī jave nhanembaraeteague rami,
nhanekunumi jave jaikoague rami ae ju 'rā jaiko.
- 26 Ha'e ramo jajerure 'rā Nhanderuete pe, ha'e rā nhanepytyvō 'rā.
Ha'e ramo javy'a reve 'rā jaexa Nhanderuete rova.
Ha'e ramo nhanemboeko porā ju 'rā.
- 27 Ha'e ramo avakue oendua py japoraai reve aipoja'e 'rā:
"Ajejavy va'ekue, ha'eve'ÿa ramigua ajapo,
teī apaga aguā va'ekue rami e'ÿ guive xembopagaa.
- 28 Nhanderuete ojogua xenhe'ē yvykua py ooa gui,
xerekove reve aexa aguā hendy va'e", ja'e 'rā.

- 29 — Ha'e va'e ha'e javi ma Nhanderuete ojapo
nhandevy mokoigüe, mboapykue mba'e,
30 yvykua gui nhanderekove ogueru ju aguã,
oikove va'e kuery moexakãa py nhanderepape avi aguã.
31 Ha'e nunga rupi Jó, endu ke, ejapyxaka xeayvua re.
Ekyriri ke, ha'e rã xee xeayvu 'rã.
32 Ndee ndeayvu aguã rereko ri vy xembovai.
Ndeayvu ke, mba'eta xee romboeko porãxe.
33 Ha'e gui mba'eva nderereko ri ramo ejapyxakave tema xeayvua re.
Ekyriri, ha'e rã rombo'e 'rã 'arandu re — he'i.

34

Eliú Nhanderuete mboeko porãa rupi ijayvuague

- 1 Ha'e gui Eliú aipoe'ive ju:
2 — Pene'arandu va'e, pendu ke xee aikuaa va'e.
Penembo'epaa va'ekue, pejapyxaka xeayvua re.
3 Mba'eta nhandeapya py nhaendu kuaa 'rã ayvu,
nhandejuru py temb'u u heea nhaendu kuaa rami avi.
4 Ha'evea ramigua jaiporavo 'rã nhandejeupe.
Jojavi 'rã jaikuaa iporã va'e.
5 Mba'eta Jó aipoe'i: "Xereko porã va'eri
Nhanderuete oipe'a xevy guarã va'ekue.
6 Ha'evea rami aiko teĩ ijapu va'e rami xekuaa.
Xeai okuera va'erã e'y õi, ajevavya õi ramo e'y", he'i va'ekue.
7 — Oiko 'rã nda'u ava Jó ramigua?
Mba'eta ha'e ma ojoi 'rã Nhanderuete, yy oy'u va'e rami rive.
8 Ha'e rami vy onhemoirũ 'rã oikovy ojapo vai rei va'e kuery re,
avakue heko vai va'e kuery reve anho oiko.
9 Mba'eta aipoe'i: "Nhanderuete jarovy'a teĩ
mba'everã ndovarei nhandevy", he'i va'ekue.
10 — Ha'e nunga rupi peẽ avakue peneakã porã va'e, pejapyxaka xeayvua re.
Nhanderuete ma peteive henda py ndojapo vai 'rã,
Ipo'akapa va'e ha'eve'ya rami ndajoguereko 'rã.
11 Mba'eta ome'ẽ 'rãe jaikoague repy,
ojapo 'rã peteĩ-teĩ jaikoague repy jajou aguã rami.
12 Anhetẽ ete, Nhanderuete ha'eve'ya rami ndoiko 'rã.
Ipo'akapa va'e ndajoguereko 'rã ha'eve'ya rami.
13 Mba'eta mava'e tu omoĩ raka'e yvy re opena va'erã?
Mava'e tu ipo py omboaxa raka'e ha'e javi regua?
14 Xapy'a rei Nhanderuete ojee rive opena va'e rire,
ha'e ojea katy onhe'ẽ ha'e pytũea oguerupa va'e rire
15 to'o ikuai va'e ha'e javi omanomba 'rãgue,
ha'e yvyku'i ju jajeapo 'rãgue.
16 — Ha'e gui Jó, ndere 'arandu õi ramo endu ke pova'e.
Ejapyxaka xeayvua re.
17 Ha'eve'ya rami joguereko va'e teve õi 'rã joe opena aguã?
Mba'e re tu ha'vy ndee ndeayvu Heko porã ha'e Ipo'akapa va'e ojevavya rami?
18 Huvixave oiko va'e pe nda'u "Mba'e vare'y" 'ea 'rã teve?
Ha'e rami e'y vy yvatekueve pe: "Pendeko vai va'e" 'ea 'rã teve?
19 Yvatekueve rive oayvuve e'y va'e pe katuve ma nda'evei.
Ha'e ma iporiaukue'i gui ndoayvuvei 'rã oguerokopa rei va'e kuery.
Mba'eta ha'e javive ma opo py ojapo va'ekue meme ikuai.
20 Ha'e kuery omano xapy'a va'erã meme.
Pytũ mbyte jave ha'e kuery oryryipa reve oaxa 'rã,
ipo'aka va'ekue teĩ Ipo'akapa va'e jaexa e'y va'e ogueraa 'rã.
21 — Nhanderuete ma oma'ẽ 'rã avakue ikuai rupi.
Ha'e kuery oguataa ha'e javi ha'e oexapa 'rã.
22 Jipoi pytũa neĩ kuaray'ã ana
mba'emo vai apoare kuery ixugui onhemi aguã.
23 Mba'eta Nhanderuete ma avakue reko re oikuaa pota are e'y teĩ
ojapo 'rã henonde ojexa uka aguã rami omboayvu aguã.
24 Ha'e rami vy oikuaa pota e'y re omopẽmba 'rã imbarate va'e kuery,
ha'e vy hekovia omoĩ 'rã amboae kuery.
25 Ha'e kuery ikuai ha'e oikuaa ae vy

- pyávy oity ramo omongu'i pyre ikuai.
- ²⁶ Pavē oexaa py
omoingo axy 'rā heko vai va'e ha'e javi reve,
- ²⁷ ixugui ha'e kuery ojepe'a rire,
peteīve ma voi ndoikuaaxei ixuguigua tape.
- ²⁸ Ha'e kuery ojapo Nhanderuete renonde iporiaukue'i ojapukaia onhendu aguā rami.
Ha'e ramo oendu ae ojaxavai va'e kuery ojae'oa.
- ²⁹ Nhanderuete okyriri teī mava'e 'rā tu ombopaga?
Ngova omo'ā rā mava'e 'rā tu oexa, peteī regua ha'e javi e'ŷ vy peteī ava teī?
- ³⁰ Ha'e rami oiko heko vai va'e ipo'aka e'ŷ aguā,
ha'e oiko e'ŷ aguā heta va'e kuery mbotavyarā.
- ³¹ — Xapy'a rei amongue aipoe'i 'rā Nhanderuete pe:
“Aiko axy vaipa ma, ndajevyvei ma 'rā.
- ³² Xembo'e ke mba'emo xee ndaikuaai va'e re.
Ha'eve'ŷa rami ajapo va'ekue teī ndajapovei ma 'rā”, he'i 'rā.
- ³³ Ha'e rami rā Nhanderuete omboekovia kuaa aguā nda'u
oporandu 'rā teve ndee reipotaa e'ŷ vy ndee ndereipotaa re?
Ndey pe teve aipoe'i 'rā: “Ndee ae eiporavo, xee'ŷ.
Emombe'u ke reikuaa va'e, ndeayvu ke”, he'i 'rā teve?
- ³⁴ — Avakue hi'arandukueve omombe'u 'rā xevy,
inhakā porā va'e kuery xeayvua re ojapxaka vy aipoe'i 'rā xevy:
- ³⁵ “Jó ma oikuaa vy e'ŷ ijayvu,
ijayvua re 'arandua noī”, he'i 'rā.
- ³⁶ Ha'e nunga rupi tove Jó reko re toikuaa pota opa peve,
heko vai va'e rami ombovai rire.
- ³⁷ Mba'eta ojevavya áryve omoī Nhanderuete re opu'ā rei aguā.
Nhanembyte py ojepopete ombojaru reia rupi,
ha'e Nhanderuete rovai ijayvu reta rive.

35

Eliú “Ojerovia e'ŷ va'e kuery ojaxavai vy ojapukai teī Nhanderuete noendui”, he'iague

- ¹ Eliú aipoe'ive ju:
- ² — Ha'evea rami teve aipo're:
“Nhanderuete gui xereko porāve”, 're va'ekue?
- ³ Mba'eta aipo're: “Mba'e nunga py tu xereko porāa ovare?
Mba'e tu xereko porāa py ajouve 'rā ajevavya py ajou va'e gui?” 're va'ekue.
- ⁴ Ha'e ramo xee rombovai 'rā,
ndee ha'e neirū kuery guive.
- ⁵ Ema'ē yva re ha'e exa.
Exa pota nde'áry rupi arai yva re ikuai va'e re.
- ⁶ Rejevavya py mba'e nunga py tu hexe rejapo vai?
Ndereko vaia hetave ovy rā mba'e tu rejapo hexe?
- ⁷ Ha'e rami e'ŷ vy ndereko porāa py mba'e tu reme'ē ixupe?
Mba'e tu ojopy 'rā ndepo gui?
- ⁸ Ha'e rami 'rāgue py ndereko vaia ma avakue ndee ramigua pe ae 'rā ojapo vai.
Ha'e ndereko porāa ma voi ha'e rami ae avi avakue ra'y kuery pe anho 'rā ojapo porā.
- ⁹ — Ha'e gui avakue omoingo axya vaipa rā haxē 'rā,
ha'e vy ojapukai 'rā ipo'aka va'e kuery po gui ogueraa jepea aguā.
- ¹⁰ Ha'e rami teī avave rei aipo nde'i 'rā: “Mamo tu oī Nhanderuete xemoingoare,
pyávy avy'a reve aporaei aguā ome'ē va'e?
- ¹¹ Ha'e ma vyv rupi vixo ikuai va'e gui nhanderekombo'eve va'e,
ha'e guyra yvate rupi oveve va'e gui nhanemo'aranduve va'e”, nde'i.
- ¹² Ha'e kuery ojapukai teī ha'e nombovai,
guelo vaia rupi rive onhemboyvate ramo.
- ¹³ Ojapukai rive ramo Nhanderuete noendui 'rā,
ha'e kuery re Ipo'akapa va'e noma'ēi 'rā.
- ¹⁴ Jó, ndee ma Nhanderuete ndereixaia rami ndeayvu,
ha'e rā henonde ma ndereko ojekuaapa.
Ha'e nunga rupi earō hexe.
- ¹⁵ Aŷ peve Nhanderuete opoxya rupi nanhombopagai,
neī heko vai va'e re ndoikuaa potai teri ramo
- ¹⁶ ndejuru reipe'a vy ayvu ovare'ŷ va'e rupi ndeayvu.
Ndeayvu reta ma, reikuaa vy e'ŷ.

36

Eliú “Avakue ojexavaia py Nhanderuete oikuaa uka 'rã iporã va'e”, he'iaague

- ¹ Eliú ijayvuye tema. Ha'e vy aipoe'i:
² — Ejapyxakave'i ranhe, ha'e rã amombe'u porãve 'rã ndevy
 Nhanderuete amboeko porãa rupi xeayvu aguã arekove teri va'e.
³ Mombyry gui 'rã aru xe'arandurã
 Xemoingoare amboeko porã aguã.
⁴ Mba'eta anhetê, xeayvu ma rive'y.
 Ndereve oĩ va'e ma mba'emo oikuaapa va'e.
⁵ — Ne'exa, Nhanderuete ma tuvixa ete va'e.
 Ha'e rami teĩ nopena e'y'i 'rã peteĩve re.
 Oikuaa py avi tuvixa ete va'e oiko.
⁶ Ndogueraa jepei 'rã heko vai va'e rekove,
 ha'e rã ojexavaia va'e kuery ma ha'evea rami 'rã oguereko.
⁷ Ndopytu'ui 'rã heko porã va'e kuery re oma'êa gui.
 Ha'e rami 'rãgue py omboyvate vy huvixave kuery reve
 omboguapy 'rã henda openaaty py raka'e rã peve.
⁸ Xapy'a rei ha'e kuery corrente py ombo'aague py 'rã ikuai,
 ixã imoingo axyarã py ojokuaa rire.
⁹ Ha'e rami ha'e ojapo 'rã ha'e kuery ha'eve'yã rami ojapoague oikuaa aguã,
 ojejou porã reia rupi ikuai rire.
¹⁰ Ha'e kuery apyxa oipe'a 'rã ombo'e aguã.
 Ha'e rami vy ha'e kuery pe ijayvu 'rã heko vaia gui ojeko rerova aguã.
¹¹ Xapy'a rei ha'e kuery onhe'ê rendu ha'e ixupe ju ikuai ramo
 opaa py oiko 'rã ha'e kuery ovy'a aguã ára,
 ha'e ma'etỹ mba'emo re ovy'a rei okuapy aguã.
¹² Ha'e rã ha'e kuery noendu potai ri ramo
 hu'y guaxu py rami onhyvõa 'rã,
 ha'e ramo omano 'rã hexa ogue reve.
¹³ Opy'a py heko vaia anho omõi va'e ma ojeupe guarã omboaty 'rã poxya.
 Nhanderuete ombo'a uka teĩ ndojapukai 'rã okuapy heraa jepearã va'ekue pe.
¹⁴ Ha'e rami vy kunumi teri reve teĩ omokanhy 'rã guekove.
 Omano 'rã avakue ta'angaa pegua itavy rei va'e mbyte py.
¹⁵ Ha'e rã ojexavaia va'e kuery ma ha'e ogueraa jepe 'rã ojexavaia py ae oeko mbo'e vy,
 mba'eta ombojexavaia rupi oipe'a 'rã ijapyxa.
¹⁶ — Ha'e rami ae ndee voi reiko axya gui Nhanderuete ndepe'axe avi
 peteĩ henda tuvixaa py, reiko axy ve'y aguã py,
 ha'e rekaru aguã mesa áry tembi'u hee va'e anho oĩa py.
¹⁷ Ha'e rã ndee ma renhemonyẽ heko vai va'e kuery reve repaga aguã.
 Ha'e nunga rupi nderupity 'rã ndejou vaia ha'e nembopagaa aguã anho.
¹⁸ Enheangu ke ha'vy ipoxya rendua py rejoi rei e'y aguã,
 ejepe'a uka eme guive “Xerekovia heta ome'êa” 're vy rive.
¹⁹ Rejae'o rei ha'e opa mba'e py renhea'ã ramo rive nda'u
 nemboaxy 'rã rejexavaia gui reo jepe aguã?
²⁰ Earõ eme eikovy pytũ pyguarã,
 mba'eta heta ikuaiague gui oipe'apaa heravy aguã ae oĩ.
²¹ Enheangu ke teko vai re reo e'y aguã,
 ha'e va'e pe “Jexavaia gui ha'eveve va'e” 're vy rive.
²² Ma'ê, Nhanderuete opo'akaa py yvate ete va'e ojekuaal
 Mava'e porombo'ea 'rã tu ha'e rami oiko?
²³ Mava'e tu omboeko mbo'e ta,
 ha'e'y vy ixupe “Ha'eve'yã rami rejapo” he'i ta?
Nhanderuete yvate etea re Eliú ijayvuague
²⁴ — Nema'endu'a porã Nhanderuete rembiapo
 avakue pavê oguero'vy'a va'e re.
²⁵ Ha'e nunga re avakue ha'e javi oma'ê vy
 mombyry gui ojou porã 'rã okuapy.
²⁶ Ma'ê, Nhanderuete ma yvate ete va'e, jaikuaa aguã rami e'y.
 Oikoa ma'etỹ guive ndajaipapa kuaai 'rã.
²⁷ Mba'eta ojea katy ogueru 'rã yy tykyrã,
 yvyxĩ gui ombo'oky aguã.
²⁸ Ha'e rami vy arai gui onhoẽ 'rã
 avakue áry otyky reta va'erã.

- 29 Amongue nda'u oikuaa 'rā ri marā rami pa arai oipyo heravya,
yapu guive oīa gui omohendua?
- 30 Ma'ē, ha'e va'e áry rupi oexa uka 'rā imondovy nhemboxi,
ye'ē tyyvea ha'e javi rupi peve omoexakā va'erā.
- 31 Ha'e nunga py oguereko 'rā vvy regua ikuai va'e,
ha'e vy ha'e kuery pe ome'ē 'rā tembi'u oata aguā rami e'ỹ.
- 32 Opo py overa va'e ojopy reta vy
omombo 'rā ngovaigua kuery re.
- 33 Ára vai revovo voi oikuaa uka 'rā heko,
mba'eta nda'evei etea oexa uka 'rā ha'eve'ỹa rami joguereko va'e rovai.

37

- 1 — Ha'e nunga re xema'endu'a vy xekuraxō oryryi rei,
opo-opo guive, oīaty gui oē ta merami.
- 2 Pendu pota ke Nhanderueete guigua yapu re,
ijuru gui hevovo va'e onhendou va'e re.
- 3 Yva guy ha'e javi rupi gui omoudouka 'rā
ojea gui overa va'e reve vvy apy peve.
- 4 Ha'e va'e rire ijayvu atā nhendu 'rā,
yvatevea py onhemboxi 'rā hyapu reve.
Ha'e ndopoi e'ỹi 'rā overa va'e ijayvua onhendua rupi.
- 5 Nhanderueete ijayvu reve hyapu 'rā nhomondyipaa rupi.
Ojapo 'rā mba'emo tuvixa va'e, jaikuaa e'ỹ va'e.
- 6 Mba'eta yro'y apī pe aipoe'i 'rā: “He'a ke vvy áry”,
ha'e gui oky ha'e oky xapy'a-py'a va'e pe ma “Penembaraeteve ke”, he'i 'rā.
- 7 Ha'e rami vy ojapo 'rā avakue ha'e javi po oī rive aguā rami,
hemiapi re ju ha'e kuery oikuaa pota aguā.
- 8 Vixo ikuai va'e voi oike 'rā onhemiaty py,
ha'e vy okua py 'rā ikuai.
- 9 Yvytu jere oē 'rā ouvy opy ja'o oīaty gui,
ha'e rā vvytu ro'y ma kuaray yke katy gui 'rā oipeju.
- 10 Nhanderueete oipejua py rive ho'a 'rā yro'y,
ha'e ramo yupa itui va'e hatāmba 'rā oupy.
- 11 Arai ana overa va'e oua ma
omonyē 'rā okyrā.
- 12 Ha'e ramo arai ikuai va'e omoudouka rā
oaīmba 'rā oje'oivy opa rupi,
vvy jave áry rupi, ijayvuague ojapo aguā.
- 13 Ha'e nunga ha'e javi ombou 'rā vvy regua kuery re oma'ē vy,
omo'arandu e'ỹ vy omboaxy aguā.
- 14 — Jó, ejapyxaka pota na pova'e re,
Nhanderueete rembiapo iporā va'e re reikuaa pota aguā.
- 15 Ndee reikuaa teve marā rami pa Nhanderueete ojapo
overa va'e arai gui ojekuaa aguā rami?
- 16 Omombe'ua teve ndevy arai ikuai va'e marā rami pa yvate rupi ova-ova,
e'ỹ vy Oikuaapa va'e rembiapo porāgue ha'e javi?
- 17 — Mava'e tu ojapo ndeao raku-a rendu aguā rami
kuaray puku-a katy gui vvytu ou rā vvy jave rupi okyriřimba rei oiny jave?
- 18 Hexeve voi teve ndee yva reipyo kuaa avi yvate rupi,
jajexaa mba'emo ryku guigua rami overa rei va'e?
- 19 Orembo'e ha'vy ore voi ixupe oreayvu kuaa avi aguā.
Mba'eta ore ma pytū rupi orekuai va'e vy mba'eve noromombe'u kuaa ixupe.
- 20 Amongue nda'u ixupe omombe'u 'rā xeayvuague?
Ha'e rami avakue ikuai va'e onhemomba ukaxe vy ma 'rā.
- 21 — Ma'ē, avakue ma yva re kuaray rexakā re noma'ē mbaraetei 'rā,
vvytu oipejua rupi yva oiky'a'opa ma jave.
- 22 Kuaray apu'a'ia katy gui hexakā 'rā ouvy iju va'e,
Nhanderueete yvry rupi ojekuaa 'rā hexakā nhomondyipaarā.
- 23 Ipo'akapa va'e ma ndajaeko upityi 'rā.
Ha'e ma opo'akaa py yvate ete va'e,
ha'evea rami meme joguereko va'e guive, opa mba'e py heko porā va'e vy.
- 24 Ha'e rami rā henonde avakue ojererokyje 'rā.
Ha'e ma onhemo'arandu rei va'e kuery re noma'ēi 'rā — he'i.

Jó ndoikuaai va'e re SENHOR oporanduague

- ¹ Ha'e va'e rire ma SENHOR peteí vyvutu jere mbyte gui ijayvu vy ombovai Jó. Ha'e vy aipoe'i:
- ² — Mava'e tu ndee mba'eve reikuaa e'ý vy
xepy'aa ha'eve'ya rami remombe'u va'e?
- ³ Eiko katu ha'vy ava rami,
mba'eta xee aporandu 'rã ndevy.
Ha'e rã ndee ma xembovai 'rã.
- ⁴ — Mamo tu reí raka'e vyv ytarã anhono jave py?
Ndeayvu ke, anhetê ri ne'arandu va'e vy.
- ⁵ Mava'e tu oa'ã raka'e vyv, xapy'a rei reikuaa rã?
Mava'e tu ixã omoatã raka'e hi'áry rupi?
- ⁶ Mba'e nunga áry tu ijyta oí?
Ha'e mava'e tu omoí raka'e ita jypy guarã?
- ⁷ Ha'e va'e jave py ma jaxy-tata ko'ê rai'i javegua ovy'a ete reve oporaei okuapy,
ha'e Nhanderuete ra'y kuery ikuai va'e oguerovy'a okuapy.
- ⁸ — Ha'e mava'e tu okê py rami ojoko raka'e ye'ê
iguy gui ovu ovuy jave?
- ⁹ Mba'eta xee ae arai amoí ijaorã,
ha'e pytũ py anhovã ajukue py rami.
- ¹⁰ Xee ae amoí raka'e yy apyrã,
okê py rami ajoko vy.
- ¹¹ Ha'e vy aipoa'e: "Apy peve'i 'rã reju, ndereaxavei 'rã.
Apy ae 'rã ndeiguigua yai onhemboyvate reve ojeapi vy oxopa", ha'e va'ekue.
- ¹² — Ndee teve reikoa ára guive ndeayvu raka'e ko'ê rai ouvya va'e pe,
ko'ê va'e pe reikuaa uka vy hexakã aguã,
- ¹³ vyv apy re ovaê aguã,
heko vai va'e kuery omondyi heravy vy?
- ¹⁴ Yvy ojekuaa 'rã yapo omou'ũ mbyre
ha'e ao ixorimba va'e rami.
- ¹⁵ Heko vai va'e kuery gui amokanhy 'rã "Nhandevyguia hexakã va'e" he'ia va'e,*
ha'e amopê 'rã ijyva jojuka aguã oupi va'e.
- ¹⁶ — Ndee teve revaê ma ye'ê ryapy py,
e'ý vy reguata ma iguýry typyvea rupi?
- ¹⁷ Ndevy pe teve oexa ukaa omanogue ikuai rokê?
Ndee rexa ma teve hokê pytũ anaa py oí va'e?
- ¹⁸ Reikuaa teve marã rami ete pa vyv ipya?
Ndeayvu ke, xapy'a rei reikuaa ri vy.
- ¹⁹ — Mamo rupi tu oí tape hendy va'e ro katy oo va'e?
Pytũa oíaty voi mamo tu oí?
- ²⁰ Erojevuy ha'vy hekoa katy,
hoo via reikuaa ri vy.
- ²¹ Ndee nhi'ã reikuaa 'rã, ha'e va'e jave reiko ae ma rire,
ha'e reikoa ára mbovy rei e'ý!
- ²² — Ndee teve revaê ma yro'y apí amoí porãaty py,
ha'e rexa teve amandau amoí porãaty?
- ²³ Mba'eta ha'e va'e ma xee amboyru imoiny anhombojexavai aguã,
joguero'a ha'e joe opu'ãa jave guarã.
- ²⁴ — Mamo rupi tu oí tape hendy va'e oê ovy aguã katy,
ha'e vyvutu kuaray oua katy gui vyv áry rupi oipeju ouvya katy?
- ²⁵ Mava'e tu oi'pe'a 'rã oky xapy'a-py'a ou aguã,
ha'e tape hyapu ha'e overa va'e ou aguã?
- ²⁶ Mba'eta ambo'oky 'rã vyv áry
avave rei oí e'ya py, tekoa e'ya rupi ae,
- ²⁷ amoaký aguã vyv tekoa e'ya ipirupa va'e,
ajapo aguã jai roky yvate ovy aguã rami.
- ²⁸ Oky nda'u tuu va'e oiko?
Mava'e tu ojapo 'rã yxapy otyky aguã rami?
- ²⁹ Magui nda'u oiko yro'y hatã va'e?
Ha'e mava'e tu omoingo 'rã yro'y yva gui ho'a va'e?
- ³⁰ Mba'eta yy hatã 'rã ita rami,
yy typy rei teí hi'áry rupi ma hatãmba 'rã.

* 38:15 Heko vai va'e kuery pegua hendy va'e ma pytũ ae, pytũ rupigua ae ikuai ramo (24.16-17).

- 31 — Tyrā ndee teve rejokua kuaa Eixu jaxy-tata,
e'ý vy rejora kuaa Hendy guaxu va'e ojokuaague?
- 32 Ndee teve reru kuaa 'rā jaxy-tata ijaty va'e,
e'ý vy reraa 'rā teve henoiny Ursa ta'y kuery reve?
- 33 Reikuaa teve yva re ikuai va'e rekorā oeja pyre?
Reikuaa teve marā rami pa yvy re ha'e kuery ipo'akaa?
- 34 — Tyrā ndee teve renhendu kuaa 'rā arai ikuai peve,
oky vaipa aguā yy ndeao'i peve?
- 35 Tyrā overa va'e pe ndeavyu kuaa 'rā teve,
nembovai vy ha'e kuery "Apy ma roi" he'i okuapy aguā?
- 36 Mava'e tu omoī 'arandu arai ikuai va'e áry?
Ha'e mava'e tu omo'arandu jaxy-tata ova aguā re?
- 37 Mava'e nda'u o'arandu rupi oipapa kuaa 'rā arai ikuai va'e?
Ha'e rami e'ý vy mava'e nda'u onhoē kuaa 'rā yy yva re yryru ikuai va'e gui,
- 38 yvy ku'i oī va'e ojeapo aguā oja va'e,
ha'e yvy hakytā joe oje'apa aguā?
- 39 — Ndee teve rejuka 'rā guary kunha ho'u va'erā?
Ha'e guary ra'y kue'iry okaruxe rā remoevyatā kuaa 'rā teve
- 40 okua rupi ikuai jave,
e'ý vy onhemiaty gui oma'ē mbegue jave?
- 41 Mava'e tu uruvu kuery pe ojou uka 'rā ho'u va'erā,
ta'y kue'iry Nguete pe oiapukai reve
ho'u va'erā rekaa rupi ikuai ramo?

39

- 1 — Ndee teve reikuaa kavara yvy'āa rupigua ta'ya ára?
Repena kuaa teve guaxu ta'y'i ta jave?
- 2 Reipapa kuaa teve mbovy jaxy peve pa ha'e kuery ipuru'aa?
Reikuaa teve ha'e kuery ta'y'i aguā ára?
- 3 Ha'e kuery ma ta'y'i aguā ojero'a 'rā,
ha'e rami vy ojequi omoē 'rā haxy va'ekue.
- 4 Ta'y kuery ma imbaraetepa 'rā okuapy,
nhuūndy rupi ae 'rā tuvixapa.
Oopa vy ndojevyvei 'rā oxy kuerya py.
- 5 — Mava'e tu opoi 'rā mburika'i ka'aguy regua?
Ha'e mava'e tu ojora kuaa 'rā mburika onha ratā va'e?
- 6 Ha'e va'e rekoarā ma tekoa e'ýa ame'ē,
yvy re'ēroa rive ame'ē ikuai aguā.
- 7 Ha'e kuery ojojai 'rā tetā revovo,
noendui 'rā guive mymba reraa oiapuka-pukaia.
- 8 Yvy'ā ikuai va'e rupi ae okaruaty oī,
mba'eta hogue pyau va'e rekaa rupi ikuai.
- 9 — Toro ka'aguy rupigua teve omba'eapoxe 'rā ndevy?
Ha'e va'e teve pytū oaxa 'rā nerymba okaruaty py?
- 10 Remoxā kuaa 'rā teve yvy karaña re?
Ha'e va'e nda'u nderakykue rupi oikarai 'rā heravy yvy?
- 11 Hexe teve ndee rejerovia 'rā imbaraete vaipa va'e ramo?
Ixupe teve reja 'rā remba'eapoa rupi opena aguā?
- 12 Hexe rejerovia teve renhotý va'ekue nderopy ogueru aguā,
e'ý vy mba'emo remoa'y'i aguā py?
- 13 — Guyra-nhandu ma opepo ombota-mbota 'rā ovy'a reve.
Ha'e rami teí guague ha'e opepo nda'u joayvu aguā ri oguereko?
- 14 Any, ngupi'a oeja 'rā ovy yvy py,
yvy ku'i py rive haku aguā py.
- 15 Mba'eta hexarai 'rā amongue opyrō vy ombovopa va'erāa gui,
vixo nhuūndy rupi ikuai va'e opyrōmba va'erāa gui guive.
- 16 Nopena porāi 'rā gua'y kuery re, gua'y kuery e'ý re rami.
Ndoikuaa potai 'rā gua'y'i okanhymba teí,
- 17 hi'arandurā Tuuete nome'ēi rive,
nome'ēi mba'emo re oikuaa pota aguā.
- 18 Ha'e rami teí opo reve onha ovy aguā opu'ā ma vy
ojojai 'rā heravy kavaju ha'e hi'árygua.
- 19 — Ha'e gui ndee teve kavaju pe reme'ē 'rā imbaraeterā,
e'ý vy ijaju'y áry rupi remoī 'rā hagnerā?

- ²⁰ Rejapo kuaa teve tuku rami opo ovy aguã rami?
 Nhomondyi 'rã oapyigua gui ipytuê raku rei reve onhendu vy.
²¹ Ojo'o 'rã heravy vyugua ombaraetea ae oguero'vy'aa rupi.
 Ha'e vy ojepe'a 'rã ovy tembiporu revegua kuery reve joguero'a aguã.
²² Ojojai 'rã nhomongyja kuery onhomondyi e'ÿ re.
 Ha'e rami vy guakykue katy ndojevyi 'rã kyxe revegua gui voi.
²³ O'áry hu'y ryrú ogueraa va'e omopará 'rã heravy,
 hu'y guaxu ha'e hu'y'i hexakã va'e reve.
²⁴ Ipoxy ha'e ivai reve omou'ũmba 'rã heravy tape,
 mimby guaxu nhe'ê oendu ma vy ndojejokoi 'rã.
²⁵ Mimby guaxu omonhe'êa ramo "Tenonde katy!" he'i 'rã.
 Joe opu'ãa gui mombyry teri oo reve oetũ 'rã,
 oendu 'rã huvixa kuery ojavukai atãa ha'e tembiporu revovo.
²⁶ — Ndee ne'arandua rupi teve taguato oveve,
 kuaray apu'a'ia katy opepo oipyo reve?
²⁷ Ndeayvua rupi teve taguato guaxu oo 'rã yvate,
 ha'e yvatea py guaityrã ojapo?
²⁸ Ha'e va'e ma itaova yvate va'e re oĩ 'rã guaityrã ojapo aguã py,
 itaova yvate va'e apyte áry, mba'eve rei nomoangekoia py.
²⁹ Ha'e py oĩa gui oexa pota 'rã guembiarã.
 Mombyry guive 'rã oexa.
³⁰ Ha'e va'e rire ta'y kuery oipyte 'rã tuguy.
 Mamo rã rei te'õgue ituia py ha'e voi ovaê 'rã — he'i.

40

- ¹ Jó pe SENHOR aipoe'ive tema:
² — Ha'e gui ijayvu poyi va'e nda'u nhombovake ta Ipo'akapa va'e reve?
 Nguuete rovai ijayvu va'ekue tombovai aÿ — he'i.
Jó onhemo'yvyĩ'ia rupi ombovaiaague
³ Ha'e ramo Jó ombovai SENHOR. Ha'e vy aipoe'i:
⁴ — Xevy pe ma nda'evei. Mba'exa tu rombovai ta?
 Ajoko 'rã xejuru xepo py.
⁵ Peteĩgue xeyvú rire teĩ nambovai kuaavei ma.
 Mokoĩgue katu va'eri ndaxeayvu reguavei ma — he'i.
Nhanderuete po'akaa hembiaipo oexa uka va'e re ijayvuague
⁶ Ha'e ramo yvytu jere mbyte gui SENHOR ombovai ju. Ha'e vy aipoe'ive Jó pe:
⁷ — Eiko katu ha'vy ava rami.
 Xee aporandu 'rã ndevy, ha'e rã ndee xembovai 'rã.
⁸ Ndee ta'vy remboyke rive 'rã xereko porãa?
 Xemboeko vai 'rã teve renhemboeko porãvexe vy?
⁹ Tyrã ndee teve Nderuete rami ndejyva mbaraete va'e?
 Ndee voi ndeayvu ryapu rei 'rã teve xee xeyvua rami?
¹⁰ — Ndejee emoĩ ha'vy ndevvatea ha'e ndetuvixaa.
 Enhemonde ndepo'akaa ha'e nrexakãa py.
¹¹ Xevy pe exa uka ndepoxya.
 Exa pota onhemboyvate rei va'e kuery re, ha'e eitypa.
¹² Exa pota onhemboyvate rei va'e ha'e javi re, ha'e emo'yvyĩ'imba.
 Epyrõmba vyvoi heko vai va'e kuery ikuaiã re.
¹³ Ejatypa imbokuapy yvy ku'i py.
 Ejao'ipa hova ituia py.
¹⁴ Ha'e rami rã mae 'rã xeyvú
 reiporu kuaa regua py ae ndepo'akaa rami.
¹⁵ — Eikuaa pota aÿ hipopótamo ndereve amoingo avi va'ekue re.
 Ha'e va'e ma vaka rami nhuũ ho'u oikovy va'e.
¹⁶ Imbaraetea ma hye re oĩ,
 ipo'akaa ma hyepy ro'o re ae.
¹⁷ Huguai ma yary rakã rami hatã va'e.
 Hi'u rajy ma oipopẽ mbyre rami oĩ.
¹⁸ Ikãgue ma overa va'e aygue rami imbaraeete va'e.
 Hetyma ma ferro aygue ramigua.
¹⁹ Ha'e va'e ma Nhanderuete remimoingo regua omboetevepy.
 Imoingoare ae ome'ê kyxe hembiporurã.
²⁰ Anhetẽ, yvy'ã ikuai va'e áry rupi oĩ nhuũ ho'u va'erã,

- vixo nhuūndy regua ikuaiaty rupi.
 21 Onheno 'rā yvoty ikuai va'e gyy rupi,
 takua'i ha'e yapo oī va'e rupi.
 22 Ha'e ramo yvoty ae omo'ā 'rā inony.
 Yy rembe rupi yvyra ikuai va'e mbyte py itui.
 23 Yakā tyguaxu teī ndojapurai 'rā.
 Ijuru peve ete Jordāo yakā tyy teī oiko porā rei 'rā.
 24 Ha'e rā oma'ē ho'amy ramo amongue nda'u ojopy kuaa 'rā?
 Ha'eve 'rā nda'u ixī rupi omoxāa aguā?

41

- 1 — Ndee renoē 'rā teve jakare pytā pinda py rive,
 ha'e'ŷ vy inhapekū rejokua 'rā ixā py?
 2 Jai 'ygue remboaxa 'rā teve inhapyīgua rupi?
 Ha'e rami e'ŷ vy remombu 'rā teve haīnhykā jepo'oa py?
 3 Ndevy pe ha'e ojerure 'rā teve mba'emo re?
 Ijayvu porā'i 'rā teve ndereve?
 4 Ndereve ojapo 'rā teve petē rami pendekuai aguā?
 Ha'eve 'rā teve reraa aguā nerembiguai raka'e rā peve guarā?
 5 Rembojaru 'rā teve guyra'i rami?
 Ha'e rami e'ŷ vy remoxā 'rā teve heruvy nderajy kuery rymbarā?
 6 Neirū kuery teve jogueroayvu 'rā hepyrā oikuaa aguā?
 Ha'e rami e'ŷ vy mba'emo vendea kuery teve omboja'o 'rā ho'okue?
 7 Pira kutua py teve reikutupa 'rā ipire,
 e'ŷ vy inhakā rupi renhyvō 'rā pira nhyvōa py?
 8 Hexe repoko ri vy nema'endu'a riae 'rā nderero'aague re,
 ha'e rami vy neremoangekovei ma 'rā.
 9 Ma'ē, pembo'a aguā pearō ri vy pejekore 'rā.
 Hexe avakue oma'ē vy rive 'rā ojeity uka.
 10 Avakue ipy'a guaxukueve teī ndoikoi omyī va'erā.
 Ha'e rami rā xerenonde katuve ma mava'e tu ha'vy onhemboyvate aguā ha'eve va'e?
 11 Mava'e tu ha'e ranhe xevy ome'ē mba'emo, xee ju amboekovia aguā?
 Mba'eta yva gyy re ikuai va'e ma xemba'e meme.*
 12 — Xeyyvuvu ta jakare reko re,
 imbaraeete e tea ha'e iporāa re.
 13 Mava'e tu oipiro 'rā ikupe rupi,
 e'ŷ vy oikutu 'rā ipekue jo'a va'e pa'ū rupi?
 14 Mava'e tu oi'pe'a 'rā ijuru?
 Mba'eta haī re onhemboja va'e oendu 'rā ngyje.
 15 Ipekue hyxy ovy re ma ojejou porā,
 petē-teī joe oja 'rā omboja pyre rami.
 16 Petē-teī joe ovaē oiny
 ipa'ū rupi neī yvytu oike aguā rami e'ŷ.
 17 Petē-teī joe ovy vy
 oja ratā oiny oja'o aguā rami e'ŷ.
 18 Ipytuē nhavō ojekuaa 'rā hendy va'e,
 ha'e rā hexa ma ko'ēa rami hexakā va'e.
 19 Ijuru gui ma oē 'rā hendy va'e,
 ixugui tata raviju opo 'rā.
 20 Inhapyīgua gui ma oē 'rā hataxī,
 oja opupu va'e gui, e'ŷ vy jai rogue okai va'e gui rami.
 21 Ipytuēa ma omoendy 'rā tapyūi.
 Ijuru gui ma oē 'rā tataendy vuku.
 22 Ijaju'y re ma imbaraeetea oī.
 Ha'e henonde gui opoa 'rā ovy onhemondyipa reia rupi.
 23 Ho'o regua ma oje'a ratā 'rā.
 Hexe oī atā 'rā, oi rive aguā rami e'ŷ.
 24 Ipy'a ma ita rami hatā,
 ita mba'emo mongu'ia regua rami.
 25 Ha'e opu'ā ramo ipy'a guaxukueve voi onhemondyī 'rā okuapy.
 Ha'e ou xapy'a ramo ndaekorāvei va'e rami ikuai.
 26 Xapy'a rei kyxe py omboguaia teī mba'eve ndojapoi 'rā,
 neī hu'y guaxu py, hu'y'i e'ŷ vy hu'y ete py teī.

*

- ²⁷ Ferro guigua ha'e oikuaa rã jai rogue pirukue rami rive,
ha'e overa va'e guigua ma vvyra ru'ügüe rami oikuaa.
- ²⁸ Hu'y gui ma ha'e nonhai 'rã.
Ita momboa py omomboa rã ha'e oikuaa kapi'i rami rive.
- ²⁹ Vvyra aygue py ojapia rã jai 'ygue rami rive 'rã oendu,
ojojai 'rã hu'y guaxu revegua.
- ³⁰ Hye guy rupi oĩ ipekue hakua va'e.
Yapo áry rupi otyryryague ma mba'emo ra'yĩ ykya rami ipore.
- ³¹ Yy guy katy oike vy ojapo 'rã oja opupu va'e yjuipaa rami,
ye'ë eteve voi mba'emo rykue ombojyaty rami ombokururu 'rã.
- ³² Guakykue oēja 'rã hape ovy va'e overa aguã rami.
Yy ha'e oĩa ma hi'a xiimba va'e rami yjuipa 'rã.
- ³³ Yvy re jipoi 'rã ha'e ramigua,
mba'eta okyjae oendu va'erã e'y amoingo.
- ³⁴ Yvatekueve ha'e javi re oma'ë vy nombovarei 'rã,
vixo yvatekueve ikuai va'e ruvixave oiko vy — he'i.

42

Jó onhemombe'uague

- ¹ Ha'e ramo Jó ombovai vy aipoe'i SENHOR pe:
² — Aỹ aikuaa porã ma opa mba'e rejapo kuaa va'ea,
ha'e renhembopy'aague peteĩve ndoiko e'yi 'rãa.
- ³ Ange xevy reporandu vy “Mava'e tu ndee mba'eve reikuaa e'y vy
xepy'aa ha'eve'ya rami remombe'u va'e?” 're va'ekue.
Anhetẽ ri aikuaa vy e'y xeayvu va'ekue,
mba'emo xevy pe iporã vaipa ha'e aikuaa va'erã e'y re anho.
- ⁴ Aipo're avi: “Ejapyxaka ke xeayvu re, ha'e rã xee xeayvu 'rã.
Xee aporandu 'rã ndevy, ha'e rã ndee xembovai 'rã”, 're va'ekue.
- ⁵ Ha'e rami avi xee roikuaa va'ekue omombe'ua rã aendu vy rive,
ha'e rã aỹ ma xerexa py ae roexa ma.
- ⁶ Ha'e rami vy aỹ anhereroangeko vy anhemboaxy,
vyvy ku'i ha'e tanhumbu áry aguapy ainy reve — he'i.

Jó irũ kuery mboapyve pe Nhanderuete ijayvu eteague

- ⁷ Ha'e rami Jó pe SENHOR ijayvupa ma rire aipoe'i avi Temã pygua Elifaz pe:
— Xepoxya hendy ma nderovai, neirũ kuery mokoĩve rovai guive. Mba'eta anhetẽ rupi e'y peẽ kuery
xemombe'u, xerembiguai Jó rami e'y.
- ⁸ Ha'e nunga rupi peraa sete vaka ra'y ha'e sete vexa'i ava, ha'e tapeo xerembiguai Jó-a py. Ha'e vy peapy
reve peme'ẽ 'rã pejeyavyague re. Ha'e gui xerembiguai Jó ojerure 'rã pendere, mba'eta ha'e ojerurea ma
aendu 'rã, pene'arandua rupi e'y peikoague re rombopaga e'y aguã. Mba'eta anhetẽ rupi e'y peẽ kuery
xemombe'u, xerembiguai Jó rami e'y — he'i.
- ⁹ Ha'e ramo Temã pygua Elifaz, Sua pygua Bildade ha'e Naamá pygua Zofar oje'oi vy ojapo okuapy SENHOR
ijayvuague. Ha'e ramo SENHOR oendu Jó ojerurea.

Nhanderuete Jó omoingo porã jevyague

- ¹⁰ Ha'e gui Jó oirũ kuery re ojerure ma rire SENHOR omoingo porã ju. Ha'e vy mba'emo oguereko va'ekue
gui mokoĩguea ju ome'ẽ retave ixupe.
- ¹¹ Ha'e ramo ha'e oĩa py ou tyvy ha'e heindy kuery, ymave rupi oexa va'ety ha'e javi reve. Hexeve okaru
okuapy hoo py. Omboaxy vy ombopy'a porã okuapy hexe SENHOR mba'emo vai ombouague ha'e javi gui.
Ixupe peteĩ-teĩ ome'ẽ perãta ha'e kuã regua ouro guigua.
- ¹² Ha'e rami py SENHOR omoingo porãve Jó jypy guare gui. Ha'e ramo vexa'i kuery oguerekove ju catorze
mil, seis mil camelo, mil toro meme ha'e mil mburika.
- ¹³ Ta'y jevy avi sete ta'y ha'e mboapy tajy kuery re.
- ¹⁴ Jypygua guajy omboery Jemima, amboae ma Quezia, ha'e rã mboapy ma Quéren-Hapuque.
- ¹⁵ Jjyvy ha'e javi rupi kunhague ndoikoi Jó rajy kuery rami iporã va'e. Ha'e ramo ha'e kuery pe tuu ome'ẽ
mba'emo ikvyvy kuery pe ome'ẽa ramigua ae.
- ¹⁶ Ha'e va'e rire ma cento e quarenta ma'etỹ re ju Jó oiko. Ha'e rami vy oexa gua'y kuery, gua'y ra'y ha'e
guajy memby kuery guive, irundykue ikuai peve.
- ¹⁷ Ha'e rire Jó omano, tuja'i ha'e hi'ára mbovy rei e'y ma vy.

Salmos Israel kuery oporaeiaty

Salmos Israel kuery oporaeiaty

Salmos ma yma gui oiporua Nhanderuete pe oporaeia rupi. Mbyte rupi peve huvixa Davi ojapo va'ekue, pova'e guive:

“Senhor ma vexa'i mongarua rami xere opena va'e oiko.

Ha'e ramo xevy pe ndoatai 'rã mba'eve rei” (23.1).

Davi omõ avi levita kuery Nhanderuete ombojeroviaa rupi oporai va'erã. Ha'e kuery va'e regua ojapove ju salmos. Três mil ma'etý ma ojapo, salmos ha'e javi rai'i ojapopaa ague. Salmo 80 ma ymave ete, Moisés ojapo va'ekue.

Jyvy Israel kuery ranhe oiporu raka'e salmos Nhanderuete pe oporaia rupi. Jesus ha'e hemimbo'e kuery voi oiporu raka'e. Ha'e gui aý ma yvy jave rupi oiporua, nhande kuery guive.

Salmos ma joo ramigua e'ý-e'ý ikuai. Nhanderuete oguerovy'aa õi, ixupe onhepytyvõ ukaa, ixupe gueko vai oeja vy omombe'ua, ixupe mba'emo vai oiko va'e re oporandua, ixupe joe ojerurea, ixupe ngovaigua kuery gui ojepy ukaa, ha'e õi avi ixuguigua re nhombo'ea. Nhanderuete pe oporaia meme. Oĩ avi salmos Jesus rekorã re ijayvu ma voiague, Novo Testamento py ma omombe'u porãave.

“Yvy jave re pendekuai va'e,

peroporaei Senhor pevy'aa rupi!

Pevy'aa rupi Senhor pe ete peiko.

Henonde pejexa uka pejuvy peporaei reve” (100.1-2).

“Peporaei Senhor pe!

Ha'eve ha'e iporã ete Nhanderuete pe japoraia.

Jaroporaia ma iporã ixupe voi” (147.1).

1

Heko porã ha'e heko vai va'e ikuai re ijayvua

¹ Ovy'a ete 'rã ava heko vai va'e kuery nhomongetaa rami ndoikoi,

ojejavypa rei va'e ikuai rupi ndopytai,

neĩ nhombojaru rei va'e kuerya py voi oguapy e'ý va'e.

² Ha'e rami 'rãgue py SENHOR ayvu oguerovy'a vy

ara py ha'e pyávy ijayvua re anho oikuaa pota oikovy va'e.

³ Ha'e va'e ma vyvra yakã yvýry onhotý mbyre rami oiko,

hi'a aguã ára py porã hi'a va'e rami,

neĩ hogue ma ipiru rive'ý va'e rami.

Ha'e ma ojapo va'e ha'e javi oiko porã 'rã.*

⁴ Ha'e rã heko vai va'e ma ha'e rami e'ý ikuai.

Ha'e kuery ma mba'emo pire yvytu opa rupi ogueraa va'e rami 'rã okanhy.

⁵ Ha'e nunga rupi nhomboayvua ára heko vai va'e ndoo jepei 'rã,

ojejavypa rei va'e ndopytai 'rã heko porã va'e ikuai py.

⁶ Mba'eta SENHOR oma'ẽ heko porã va'e oikoa re.

Ha'e rã heko vai va'e oikoa ma okanhy 'rã.

2

Huvixarã Nhanderuete omõ va'ekue po'akaa re ijayvua

¹ Mba'e re tu yvy regua kuery ipoxypa ri?

Mba'e re tu yvy re ikuai va'e onhembopy'a okuapy ovare e'ý va'e re?

² Mba'eta vyvy regua huvixa kuery opu'ã okuapy,

huvixa ikuai va'e SENHOR rovai jogueroayvu okuapy,

huvixarã SENHOR omõ va'ekue rovai guive.*

Ha'e vy aipoe'i:

³ “Nhamondo 'rã ha'e kuery nhanemoxãague,

jajora 'rã nhandepokuaague” he'i okuapy.

⁴ Ha'e rã yva re oguapy oiny va'e ma opuka 'rã,

SENHOR ojoi 'rã ha'e kuery.

⁵ Ha'e rami vy ipoxya rupi ijayvu ete 'rã ha'e kuery pe.

Opoxya oexa uka vy omondypa 'rã.

Ha'e vy aipoe'i 'rã:

⁶ “Xee ma xejeueguga huvixarã amõ ae ma

yvyty iky'a e'ý va'e São áry.”

⁷ Ha'e rã ha'e va'e ju aipoe'i: “Xee amombe'u 'rã SENHOR ijayvuague.

* 1:3 Jeremias 17.5-8 * 2:2 Atos 4.23-28

Ha'e aipoe'i xevy: 'Ndee ma xera'y.

Kova'e ára romoĩ.*

⁸ Ejerure ke xevy,

ha'e ramo ndevy guarã xee ame'ê 'rã amboae regua kuery,

yvy apy re peve ndepo'aka aguã.

⁹ Popygua ferro guigua py remopê 'rã,

hyru yapo guigua ombovopaa rami 'rã remopêmba', he'i va'ekue xevy.**

¹⁰ Ha'e nunga rupi huvixa kuery, penheangu ke aỹ,

yvy regua huvixa kuery, pendu ke penemongeta rã.

¹¹ SENHOR pe ete ke pendekuai pejererokyjea rupi,

peporaei ixupe peryryipa reve.

¹² Peayvua rupi pemboete Ta'y ipoxy e'ỹ aguã,

peikoa gui pekanhy e'ỹ aguã.

Ha'e rami e'ỹ rã are e'ỹ re oexa uka 'rã opoxya.

Ovy'a ete 'rã hexe onhemi va'e kuery ha'e javi.

Ojexavai teĩ Nhanderuete re ojeroviaa re ijayvua

Mboraeirã Davi gua'y Absalão gui ojava jave py ombopara va'ekue (2 Samuel 15.1-30).

3

¹ SENHOR, heta pojava va'e ty'y xerovaigua kuery ikuai!

Aipapapa aguã rami e'ỹ xere opu'ã va'e.

² Heta ete xevy aipoe'i okuapy va'e:

“Nhanderuete tu ndogueraa jepei 'rã rima.”

³ Ha'e rami teĩ SENHOR, ndee ma mba'emo vai jokoa reiko xevy.

Ndee ae roguerovy'a, ha'e rã xeakã remopu'ã kuerei 'rã.

⁴ Xea'yvu atã reve ajapukai SENHOR pe.

Ha'e rã yvyty iky'a e'ỹ va'e áry gui xembovai.

⁵ Anheny vyve ake vyvoi 'rã,

avy ju 'rã guive, xere SENHOR opena ramo.

⁶ Xee ma ndakyjei 'rã mbovy e'ỹ

jovaive-ive re xere opu'ã va'e gui.

⁷ SENHOR, epu'ã ke.

Xerepy ke, Xeruete.

Xerovaigua kuery ha'e javi reunga 'rã haĩnhykã,

remopêmba 'rã heko vai va'e kuery raĩ.

⁸ Mba'eta SENHOR gui ou 'rã jaa jepe aguã.

Tove ndevyguia kuery re toĩ remoingo porãa.

4

Oiko axy teĩ Nhanderuete re ojeroviaa re ijayvua

Jogueroporaei va'e pe ixã va'e py ombojoguy reve guarã Davi ombopara va'ekue.

¹ Xeruete xemboeko porãa, xembovai ke ajapukai ramo.

Xee ajexavai ramo xemoingo porã jevy va'ekue.

Xemboaxy jevy ke, ha'e endu anhembo'ea.

² Peẽ avakue, raka'e peve 'rã tu axĩmba aguã rami xeapo pekuapy xemboete 'rãgue py?

Raka'e peve 'rã ovare e'ỹ va'e rive pejou porã,

ha'e peikuaa pota apu re?

³ Peikuaa pota ke pova'e re:

SENHOR pe ikuai va'e kuery ma ha'e oiporavo 'rã ojeupe guarã.

Ha'e rami vy SENHOR oendu 'rã ixupe ajapukaia.

⁴ Pendevai teĩ pejejavy eme.

Peneakãngyta áry pendetui vy

pendepy'a py penhemongeta, ha'e pepytu'u.*

⁵ Peme'ẽ ha'evea ramigua,

ha'e pejerovia SENHOR re.

⁶ Heta ikuai aipoe'i va'e: “Mava'e nda'u nhandevy ombou 'rã mba'emo porã?”

SENHOR, ore kuery pe exa uka nderova rexakãa.

⁷ Xepy'a re ma remoĩ avy'a aguã.

Ha'e kuery mba'emo ra'yĩ ha'e vinho ojou reta vy ovy'a okuapya gui

xee avy'ave.

⁸ Xepy'a porã reve anheny vyve ake 'rã,

* 2:7 Atos 13.33; Hebreus 1.5, 5.5 * 2:9 Apy Ta'y omombe'u Nguu ixupe aipoe'iague (Atos 13.33; Hebreus 1.5, 5.5; Apocalipse 2.26-27, 12.5, 19.11-16). * 4:4 Efésios 4.25-27

mba'eta SENHOR, ndee anho xemombytu'u porã.

5

Heko vai va'e kuery gui ogueraa jepe aguã re ojerurea ague
Jogueroporaie va'e pe mimby py ombojoguy reve guarã Davi ombopara va'ekue.

- ¹ SENHOR, ejapyxaka ke xeayvu re,
endu ke xepoaẽ rä.
- ² Xeruvixa, Xeruete, endu ke ajapukai rä.
Ndevy pe ae ajapukai.
- ³ SENHOR, aje'ive guive rendu 'rã xeayvua.
Aje'ive anhembo'e 'rã ndevy,
ha'e rire roarõ 'rã aikovy.
- ⁴ Mba'eta ndee Xeruete, ndererovy'ai 'rã teko vai,
nerenonde ma heko vai va'e noĩ 'rã.
- ⁵ Nerenonde ijayvu vaikue-ikue va'e ndopytai 'rã.
Teko vai re ikuai va'e rejou vai va'e meme.
- ⁶ Ndee remomba 'rã ijapua re ikuai va'e.
SENHOR ojou vai 'rã jouguy moã ha'e nhombotavypa rei va'e.
- ⁷ Ha'e rä xee ma xemboaxy ete ramo aike 'rã ndevygua opy,
ndevygua templo icy'a e'ÿ va'e rexei,
xerenapy'ã re aĩ 'rã nerenonde ajererokyjea rupi.
- ⁸ SENHOR, xerovaigua kuery gui
xerereko ke heravy ndeguigua teko porã rupi,
embo'yvi ke ndeguigua tape xerenonderã.
- ⁹ Mba'eta ha'e kuery ma ijuru re anhetẽ va'e noĩ.
Joupe ojapo vai aguã re anho 'rã ipy'a okuapy.
Ijyryvi ma omanogue rupa ojepe'a va'e rami.
Oapekũ py ma ijayvu porã merami rive 'rã.*
- ¹⁰ Ha'e nunga rupi Xeruete, eikuaa uka ha'e kuery reko vaia.
Embo'apa ke jogueroayvuague py ae.
Opa marã rei ikuaiamo eipe'apa nerenonde gui,
nderovai opu'ã rei rire.
- ¹¹ Ha'e rä ndere ojerovia va'e kuery ma tovy'apa.
Ndererovy'aa rupi toporaie atã okuapy raka'e rä peve,
ndee repy ramo.
Tove nderery oayvu va'e tandererovy'a okuapy.
- ¹² Mba'eta ndee SENHOR, remoingo porã 'rã heko porã va'e.
Reayvu ete vy rejoko 'rã opa mba'e vai gui.

6

Nhanderuete omboaxy aguã re Davi ojerureague
Jogueroporaie va'e pe ixã irundy meme va'e pe py ombojoguy reve guarã Davi ombopara va'ekue.

- ¹ SENHOR, ndepoxya rupi e'ÿ ke xemongeta,
ndeavaia rupi e'ÿ xemboapaga.
- ² Xemboaxy ke SENHOR, mba'eta aendu xekangypaa.
SENHOR, xemonguera ju ke, mba'eta xekãgue oku'epa rei ma,
- ³ xenhe'ẽ voi nda'evei ete.
Ha'e gui ndee SENHOR, raka'e peve 'rã tu naxepytyvõi?
- ⁴ SENHOR, ejevny ju, eraa jepe xerekovea,
xerepy ke xemboaxy vy.
- ⁵ Mba'eta manoa py ma ndoikoi 'rã ndere ima'endu'a va'e.
Onhono porãague py ituia gui mava'e 'rã tu oporaie ndevy?
- ⁶ Xekane'õ ma xepoaẽ riae vy.
Pytũ nhavõ xerexay omoakÿ xerupa,
inhakÿmba peve.
- ⁷ Xerovaigua kuery kãuxa ajexavai ramo xerexa irurupa ma,
tuja'i rami ndaexa porãĩ aikovy.
- ⁸ Teko vai rupi pendekuai va'e, pejepe'apa ke xea gui,*
mba'eta SENHOR oendu ma ajae'o reve xeayvu rä.
- ⁹ Ajapukaia oendu vy
oikuaa pota ma guive ajerurea re.
- ¹⁰ Ha'e ramo xerovaigua kuery oximba ha'e onhemondyipa 'rã okuapy.

* 5:9 Romanos 3.9-20

* 6:8 Mateus 7.23; Lucas 13.27

Ojepe'apa xapy'a 'rã oxĩmba vy.

7

Nhanderuede heko porã va'e kuery oepya re ijayvua

Benjamim regua Cuxe ijayvuague Davi oendu vy SENHOR pe oporaeiague.

¹ SENHOR Xeruete, ndere anhemu va'e.

Xerepy ke xerakykue ou va'e ha'e javi gui,
xereraa jepe guive.

² Ha'e rami e'ỹ rã xivi rami xerero'apa 'rã,
xerepyarã ndoikoi ramo xemondoropa 'rã.

³ SENHOR Xeruete, xere ha'e kuery ijayvu reia va'e nunga xee ajapo va'e rire,
xapy'a rei xepo py ajevavy,

⁴ e'ỹ vy xereve peteĩ rami ikuai porã va'e pe ajapo vai va'e rire —
ha'e rã xee ma araa jepe kuerei mba'e py e'ỹ xembojexavai va'e —

⁵ ha'e rami ajoapo vai va'e rire ma
xerovaigua kuery ha'evea rami 'rãgue xerakykue monha xenhe'ẽ oupity peve,
xerekove re ha'evea rami opyrõ 'rãgue yvy re,
yvy ku'i rupi arovy'ave va'ekue embotyryry vy.

⁶ SENHOR, epu'ã ke ndepoxya rupi.
Exa uka ndepo'akaa xerovaigua kuery ipoxypaa rejoko vy.

Epu'ã ke xerepy aguã,
ha'e kuery rembopaga aguã re ndeayvua rami vy.

⁷ Nerenonde tonhemboatypa yvy regua kuery.
Ha'e gui ha'e kuery áryve rupi ndee ke eĩ yvate.

⁸ Mba'eta SENHOR omboayvu 'rã yvy regua kuery.
SENHOR, xere voi eikuaa pota xereko porãa
ha'e anhetẽ rupi aikoa re.

⁹ Topa heko vai va'e kuery reko vaia,
ha'e rã heko porã va'e kuery ma emoĩ atãve.
Mba'eta Xeruete ndereko porã va'e,
ndee reikuaa pota nhane'arandua ha'e nhandepy'a re oĩ va'e re.*

¹⁰ Nhanderuede ma xejoko 'rã opa mba'e va'e gui.
Ogueraa jepe 'rã opy'a py heko porã va'e.

¹¹ Nhanderuede ma anhetẽ rupi nhomboayvu va'e,
ko'ẽ nhavõ oendu 'rã nhombopaga aguã.

¹² Ha'e rami vy avakue ndojeko rerovai ri ramo
Nhanderuede oaĩmbe'e 'rã okyxe.
Omoxã ae ma guive guyrapa, oguereko katupa ma.

¹³ Oguereko katu avi
hu'y hendy va'e ijukaarã.

¹⁴ Heko vai va'e ma imemby raxy va'e rami oendu 'rã teko vai ojapoxea,
oguereko'i 'rã nhombotavy aguã,
ha'e gui oikuavã 'rã apu.

¹⁵ Ojo'o puku 'rã yvy,
teĩ ikua ojo'ogague py ha'e ae ju 'rã ho'a.

¹⁶ Inhakã re ae ju ojeapa 'rã joupe ojapo vaiague,
ijapyte re ae 'rã ojeapa ipoxyague.

¹⁷ Ha'e rã xee ma arovy'a 'rã SENHOR
anhetẽ rupi joe oikuaa potaa re,
aporaei 'rã guive SENHOR yvate va'e rery rupi.

8

Nhanderuede yvatea ha'e avakue po'akaa re ijayvua

Jogueroporaie va'e pe Davi ombopara va'ekue “Uva'a nhamia” he'ia py oporaiea rami oporaie aguã.

¹ SENHOR, ore kuery SENHOR,
yvy jave re nderery iporã etel
Yva gui voi reikuaa uka ndeyvatevea.

² Kyrĩgue'i ha'e okambu va'e pe reme'ẽ oporaia aguã.
Ha'e kuery oporaia ma remoĩ nderovaigua kuery jokoarã,
remokyriřĩ aguã nderovaigua kuery ha'e joepya rupi jojuka va'e.*

³ Ha'e gui ma yva regua aexa ndepo py rejapo va'ekue,
jaxy, jaxy-tata remoĩ va'ekue ha'e javi —

* 7:9 Apocalipse 2.23

* 8:2 Mateus 21.14-17

- 4 marā ramigua tu avakue ikuai, ha'e kuery re nema'endu'a aguā?
 Marā ramigua ru avakue ra'y kuery, ha'e kuery pe rejekuaa uka aguā?
- 5 Ha'e rami teĩ rembopo'aka ha'e remboete uka vy
 rejapo Nhanderueete gui yvyĩve'i ikuai aguā rami.*
- 6 Ndepo py rejapo va'ekue re rembopo'aka vy
 opa marāgua remoi'ipy guýry:*
- 7 vexa'i ha'e vaka kuery ha'e javi,
 mymba oka regua guive,
- 8 ha'e gui guyra'i yva regua, pira ye'ẽ rupigua,
 ha'e ye'ẽ guýry rupi ikuai va'e ha'e javi.
- 9 SENHOR, ore kuery SENHOR,
 yvy jave re nderery iporã ete.

9

Jarovy'a ete aguā regua

Jogueroporaie va'e pe Davi ombopara va'ekue "Ta'y omano" he'ia py oporaieia rami oporaie aguā.

- 1 SENHOR, ndevy aporaie 'rã xepy'a ha'e javi py.
 Amombe'upa 'rã nerembiapo porãa.
- 2 Avy'a ndere, roguerovy'a 'rã.
 Ndeyvate ete va'e, aporaie 'rã nderery rupi.
- 3 Mba'eta xerovaigua kuery oguevipa.
 Onhepyxanga vy okanhymba nerenonde gui.
- 4 Mba'eta ndee xerepy 'rã xemboeko porã vy.
 Tenda repenaaty py reguapy vy ha'evea rami meme renhomboayvu reiny.
- 5 Ha'e rami vy yvy regua kuery pe ndeayvu ete 'rã,
 remomba 'rã heko vai va'e.
 Ha'e kuery rery voi rembogue raka'e rã peve guarã.
- 6 Ha'e ramo orerovaigua kuery okanhymba,
 hetã voi rembovaipa raka'e rã peve.
 Noivei ma ha'e kuery re ima'endu'aa.
- 7 Ha'e rã SENHOR ma oĩ riae 'rã guenda openaaty py,
 nhomboayvu oiny aguā omoi'va'ekue py ae.
- 8 Ha'e rami vy omboayvu 'rã yvy regua kuery ha'evea rami.
 Ha'evea rami meme oguereko yvy regua kuery.*
- 9 Ojexavai va'e pe ma onhemi aguā yvate va'e SENHOR oiko,
 omoingo axya rã onhemi kuerei aguā.
- 10 Ha'e nunga rupi SENHOR, nderery oikuaa va'e kuery ojerovia ndere,
 mba'eta ndee nereipytyvõ e'ỹi 'rã ndereka va'e.
- 11 SENHOR Sĩaõ py oiko va'e pe peporaie pemboete vy.
 Yvy regua kuery mbyte rupi peikuaa uka hembiaapo porãa.
- 12 Mba'eta ima'endu'a 'rã jouguy moẽare nhombopaga aguā,
 ndaexarai 'rã ojexavai va'e ojapukaia re.
- 13 SENHOR, xemboaxy ke.
 Eikuaa pota ke xerayvu e'ỹ va'e xemoingo axya re.
 Ndee ma xemopu'ã ju manoa rokẽ gui,
- 14 Sĩaõ tetã rokẽ py ju amombe'ua aguā ndereko porãa ha'e javi.
 Roguerovy'a 'rã xereraa jepeague re.
- 15 Yvy regua kuery ma yvykuarã ojo'oague py ae ho'apa.
 Nhuã omoi'nhemi va'ekue py ipy ae ojejura.
- 16 SENHOR ojekuaa uka 'rã ha'evea rami joguerekoa py.
 Mba'eta heko vai va'e kuery ojexavai 'rã opo py ae ojapo va'ekue py.
- 17 Heko vai va'e kuery ma omombo'a 'rã ikuai axya aguā py,
 ha'e javi regua Nhanderueete gui hexarai va'e meme.
- 18 Ha'e rã ojexavai rei va'e kuery gui ma SENHOR ndaexarai riaei 'rã,
 nomboaxa rivei 'rã ojexavai va'e oarõ okuapya.
- 19 SENHOR, epu'ã ke.
 Imarã va'e kuery ta'ipo'aka eme.
 Yvy regua kuery tombopagapaa nerenonde.
- 20 SENHOR, emongyje ete ha'e kuery.
 Yvy regua toikuaa imarã va'e meme ikuai.

* 8:5 Gênesis 1.26-28; Hebreus 2.5-9

* 8:6 1 Coríntios 15.27; Efésios 1.22

* 9:8 Atos 17.31

10

Heko vai va'e kuery ho'apa aguã re ijayvua ague

- ¹ SENHOR, mba'e re tu mombyry rei?
Mba'e re tu rojexavai rã nderejekuaa ukai?
- ² Mba'eta heko vai va'e kuery ma ayvu vaikue-ikue py omoingo axy 'rã iporiaukue'i.
Ha'e kuery tojejurapa jojopy aguã omoĩ va'ekue py ae.
- ³ Mba'eta heko vai va'e ovy'a 'rã oipotapa reia re rive,
mba'emo ojoupaxe va'e ijayvu vaikue-ikue 'rã SENHOR re,
ijayvu vai 'rã hexe.
- ⁴ Heko vai va'e ojee rive ojerovia vy ndoikuaa potai 'rã mba'eve re.
Ha'e rami vy "Nhanderuete ndoikoi", he'i 'rã.
- ⁵ Ha'e kuery oikoa nhavõ rupi ojoupa rei 'rã mba'emo.
Ndoikuaa 'rã guive ne'arandua rupi ndeayvua.
Ojojai rei 'rã okuapy ngovaigua kuery.
- ⁶ Mba'eta opy'a py aipoe'i: "Avave rei ndaxereityai 'rã.
Aỹ ha'e raka'e rã voi ndoui 'rã mba'emo vai xe'áry", he'i.
- ⁷ Ijuru tynyẽ oiny ayvu vai, nhombotavyarã ha'e ayvu poyi,
ha'e rami vy nhomboeko vai ha'e joapo vai aguã re anho 'rã ijayvu.*
- ⁸ Nhoarõ 'rã tetã yvỹry jokuva aguã.
Ojuka 'rã heko porã'i va'e nhemia py.
Oma'ẽ mbegue 'rã openamby e'ỹ oity aguã.
- ⁹ Nhoarõ 'rã oiny guary okua yvy'ã peguy re oĩ va'e py nhoarõ oinya rami.
Oarõ 'rã oity aguã iporiaukue'i,
nhuã py ombo'a vy oimamamba aguã.
- ¹⁰ Onhemombe ovy 'rã,
ipo'akaa py iporiaukue'i ho'apa aguã.
- ¹¹ Aipoe'i 'rã opy'a py: "Nhanderuete ma nopenai.
Ngova ombojere vy peteĩve henda py ndoexa potai 'rã ajapo va'e."
- ¹² SENHOR, epu'ã ke!
Xeruete, eupi ndepo!
Nderexarai eme iporiaukue'i gui.
- ¹³ Mba'e nunga rupi tu heko vai va'e omboyke Nhanderuete?
Mba'eta opy'a py "Nhanderuete nopenai 'rãe" he'i.
- ¹⁴ Ha'e rami teĩ ndee ma rexa ae,
reikuaa pota guive rojexavaia rupi romba'eapoa re,
ndepo py orerepy aguã.
Ndepo py onhemboaxa openamby e'ỹ ikuai va'e.
Ha'e ramo repy 'rã tyre'ỹ.
- ¹⁵ Emopẽ ke heko vai ha'e joupe ojapo vai va'e jyva.
Eikuaa pota ha'e kuery reko vaia re
rejoupa peve.
- ¹⁶ SENHOR ma Huvixave imarã e'ỹ va'e.*
Ijyvy gui okanhymba 'rã amboae regua kuery.
- ¹⁷ SENHOR, rendu ae ma onhemoyvy'i va'e kuery oipotaa.
Ha'e rami vy rembopy'a guaxu ha'e reraa jepe 'rã,
- ¹⁸ repy aguã tyre'ỹ ha'e omoingo axy reipy,
avakue yvy regua nanhomongyveve aguã.

11

SENHOR re nhanhemi aguã regua

Jogueroporaie va'e pe Davi ombopara va'ekue.

- ¹ Xee ma SENHOR re anhemi va'e.
Ha'e nunga rupi mba'exa tu xenhe'ẽ pe aipopeje:
"Ejava ke yvyty katy guyra'i rami.
- ² Mba'eta heko vai va'e kuery omoxã ma guyrapa,
ixã re ma omoĩ ma hu'y oa'anga vy,
nhemia py heko porã va'e rovai opoi aguã.
- ³ Yvy ytarã omoĩ va'ekue omombaa ramo
mba'e tu heko porã va'e ojapo 'rã?'"*
- ⁴ Ha'e rã SENHOR ma oĩ ojeupegua templo iky'a e'ỹ va'e py.

* 10:7 Romanos 3.14 * 10:16 Apocalipse 11.15 * 11:3 Apy ma huvixave irũ kuery oguerokyje vy ixupe ijayvu okuapy hovaigua kuery ojukaxea gui onha aguã re. Ha'e gui "Yvy ytarã omoĩ va'ekue" he'ia ma huvixa openaa re ijayvu vy (Salmo 75.3, 82.5).

- Yva re SENHOR oĩ guenda openaaty py.
 Oma'ẽ oiny avakue ojapo va'e re.
- ⁵ SENHOR oikuaa pota 'rã heko porã ha'e heko vai va'e re.
 Ojou vai 'rã jojukaa rupi anho ikuaixe vai va'e.
- ⁶ Heko vai va'e áry ombou 'rã tapyĩ rexakã enxofre revegua.
 Ha'e kuery oy'u aguã ombou 'rã yvytu tata revegua.*
- ⁷ Mba'eta SENHOR ma heko porã va'e oiko vy
 oayvu teko porã rupi ikuai va'e.
 Ha'e ramo heko porã va'e oexa 'rã hova.

12

Apu gui onhepytyvõ ukaa ague

Jogueroporaie va'e pe ixã irundy meme va'e py ombojoguy reve guarã Davi ombopara va'ekue.

- ¹ SENHOR, orereraa jepe ke!
 Mba'eta ndevyguava avakue ndoikovei.
 Avakue ra'y kuery mbyte gui okanhymba ma ojeroviapy.
- ² Ha'e ramo anhetẽ rupi e'ỹ 'rã ijayvu jomeme,
 opy'a py nhombotavy vy ijayvu mbegue rei okuapy.
- ³ SENHOR, ejaya ijayvu mbegue rei va'e kuery rembe,
 opa marã rei ijayvu va'e apekũ guive.
- ⁴ Mba'eta aipoe'i okuapy: "Nhaneapekũ py 'rãe nhandepo'aka,
 nhanerembe ma nhanemba'e ae.
 Mava'e tu nhandere ipo'aka 'rã?" he'i okuapy.
- ⁵ Ha'e ramo SENHOR aipoe'i:
 "Iporiaukue'i omoingo axya ha'e ojexavai va'e ipoaẽ ramo
 xee aendu vy apu'ã ta aỹ.
 Araa jepe 'rã aepy aguã oarõ oikovy va'e", he'i.
- ⁶ SENHOR ayvu ma iky'a e'ỹ va'e meme,
 prata sete-kue oiky'a'o pyre rami,
 tata rupa yapo gui ojapo pyre py.
- ⁷ Tá SENHOR, ndee ma orerepy 'rãe.
 Aỹgua kuery gui orereraa jepe 'rã raka'e rã peve.
- ⁸ Ha'e rã heko vai va'e ma opa rupi ikuai,
 avakue ra'y kuery ma teko vai anho oguerovy'a.

13

Ojerovaa rupi ojerurea ague

Jogueroporaie va'e pe Davi ombopara va'ekue.

- ¹ SENHOR, raka'e peve 'rã tu nderexarai jegui?
 Raka'e peve 'rã tu xeivy pe nderejexa ukavei?
- ² Raka'e peve 'rã tu nda'evei riaa xepy'a py?
 Mba'eta ko'ẽ nhavõ xepy'a py aendu ndavy'aia.
 Raka'e peve 'rã tu xerovaigua xere opu'ã rei?
- ³ SENHOR Xerujete, eikuaa pota ke xere, xembovai guive!
 Xemboexa pyxo, manoa py ake e'ỹ aguã,
- ⁴ xerovaigua kuery "Xepo'aka ma hexe" he'i e'ỹ aguã,
 ha'e xerovaigua kuery xekangy ramo oexa vy ovy'a rei e'ỹ aguã.
- ⁵ Ha'e rã xee ma ajerovia ndere xemboaxya rupi xerereko aguã.
 Xepy'a py arovy'a xereraa jepea.
- ⁶ Aporaie 'rã SENHOR pe,
 opa mba'e py xemoingo porã rire.

14

Salmo 53.1-6

Jogueroporaie va'e pe Davi ombopara va'ekue.

- ¹ Hi'arandu e'ỹ va'e ma opy'a py:
 "Nhanderujete ndoikoi" he'i.
 Ha'e kuery opa marã ikuai ojejokoa rupi e'ỹ.
 Neĩ peteĩve ma ndoikoi heko porã va'e.
- ² Ha'e rã SENHOR ma yva gui oma'ẽ 'rã avakue ra'y kuery ikuai re,
 oexa aguã amongue pa 'arandu rupi oikoa,
 amongue pa oiko Nhanderujete oeka va'e.

* 11:6 Apocalipse 20.10, 21.8

- ³ Ha'e rami teĩ ha'e javive ojepe'a, opa marã rei ikuai pavẽ rei.
Ndoikovei ae teko porã rupi oiko va'e,
neĩ peteĩve ma.*
- ⁴ Teko vai rupi ikuai va'e 'arandurã noĩ teve?
Ha'e kuery ma xevygua kuery omomba rivepa 'rã mbojape ho'ua rami.
Ndojapukai 'rã guive Nhanderue te.
- ⁵ Ha'e rami teĩ ha'e kuery onhemondyipa 'rã
oexa vy heko porã va'e kuery reve Nhanderue oiko ramo.
- ⁶ Ha'e kuery ma vvyĩgue'i nhomongeta ramo ojoi rei okuapy,
ha'e rã SENHOR ma onhemoi ha'e kuery onhemi aguã.
- ⁷ Sião gui ou ma va'e rire Israel kuery reraa jepearã!
SENHOR ojepegua kuery omoingo porã jevy ramo
Jacó ramymino kuery, Israel kuery ovy'apa 'rã okuapy.

15

Yva pygua re ijayvua

Mboraeirã Davi ombopara va'ekue.

- ¹ SENHOR, marã ramigua nda'u oiko 'rã ndevygua opy?
Marã ramigua nda'u oĩ 'rã ndevygua vvyty iky'a e'ỹ va'e py?*
- ² Teko porã rupi ikuai va'e anho,
gueko porãa oexa uka va'e,
opy'a py anhetẽ rupi ijayvu va'e,
- ³ oapekũ py joe ijayvu vai e'ỹ va'e,
amboae kuery pe ojapo vai e'ỹ va'e,
neĩ ngoo katy rai'i ikuai va'e re voi ima'endu'a vai e'ỹ va'e.
- ⁴ Ha'e kuery ndoguerovy'a rei 'rã ojou vaipy,
ha'e rã omboete 'rã SENHOR renonde ojererokyjea rupi ikuai va'e kuery anho.
Ijayvuague ndojapo e'ỹi 'rã guive,
ha'e nungakue py oiko axy teĩ.
- ⁵ Operáta oiporuka rire nomboekovia retavei 'rã,
neĩ nombopagai 'rã ojevavy e'ỹ va'e kuery mba'emo ome'ẽa ta teĩ.
Ha'e rami ikuai va'e ma mba'eve py ndoityai 'rã.

16

Nhanderue pegua iky'a e'ỹ va'e reko re ijayvua

Davi oporaieague.

- ¹ Xerue te, epena porã ke xere,
ndere anhemi rire.
- ² SENHOR pe aipoa'e: "Ndee ma xe-Senhor.
Iporãve va'e xee ndarekoi ndee e'ỹ vy.
- ³ Ha'e gui ndevygua iky'a e'ỹ va'e vvy re ikuai va'e ma
xee arovy'a vy ha'e kuery pe 'Yvatekueve' ha'e."
- ⁴ Ha'e rã amboae tuueterã re SENHOR omboekovia va'e kuery ma ikuai axy 'rã.
Ha'e kuery ruete pe xee name'ẽi 'rã tuguy revegua,
neĩ ndaxeayvui 'rã hery rupi.
- ⁵ SENHOR anho oiko mba'emo xevelygua me'ẽa, xekaro pygua me'ẽa guive.
Ndee anho remoi xerenonderã.
- ⁶ Ha'e ramo xevelygua ma ha'eve va'e,
xevy guarã ma iporã va'e meme.
- ⁷ Aroayvu porã 'rã SENHOR xemo'arandua,
pyávy voi xemongeta xepy'a re.
- ⁸ Xema'endu'a ria SENHOR xereve oikoa re.
Xeyvúry oĩ ramo ndaxereityai 'rã.
- ⁹ Ha'e rã xekuraxó py avy'a,
xenhe'ẽ ovy'a,
xerete avi opytu'u porã 'rã.
- ¹⁰ Mba'eta xerekovea nderejai 'rã manoa py,
Ndevygua iky'a e'ỹ va'e nderejai 'rã ivaipa aguã py.
- ¹¹ Xevy rexa uka 'rã tape tekove katy oo va'e.
Nerenonde oĩ avy'a ete aguã,
ndeyvúry oĩ xembovy'a va'e raka'e rã peve guarã.*

* 14:3 Romanos 3.9-20 * 15:1 Salmo 24.2-6 * 16:11 Kova'e ayvu rupi Pedro ijayvu Jesus rekokie omombe'u vy (Atos 2.22-36), ha'e
gui Paulo ju ijayvu (Atos 13.32-37; 1 Corintios 15.4).

17

Nhanderuete oepy aguã re ojerurea ague

Davi onhembo'eague.

- ¹ SENHOR, endu ke ajerure ramo ha'evea rami xerereko aguã,
eikuaa pota ajapukaia re,
ejapyxaka ajerurea re,
mba'eta ijapu va'e juru gui e'y xeyvuu onhendu.
- ² Nerenonde gui eikuaa uka xemboeko porãa regua.
Mba'eta orerexa vy ha'evea rami meme reikuaa pota.
- ³ Xekuraxõ re reikuaa pota teĩ,
pyávy voi reikuaa pota vy
tata py rami xereko rea'ã teĩ
peteĩ henda py ma xere nderejoui 'rã teko vai.
Xejuru gui noëi 'rã ayvu vai.
- ⁴ Avakue opa marã ikuai teĩ xee ma ndeayvua rami vy
ajejoko jojuka va'ety ikuai rupi aiko e'y aguã.
- ⁵ Ndeguigua tape rupi anho aiko,
ajavy e'y re.
- ⁶ Xeruete, xee ajapukai ndevy,
mba'eta ndee xembovai 'rã.
Ejapyxaka ha'e endu xeyvua.
- ⁷ Exa uka opa mba'e py ndeporayvu etea.
Mba'eta ndere onhemi va'e kuery reraa jepe 'rã
ha'e kuery re opu'ã va'e gui.
- ⁸ Epena ke xere nderexa ra'yí re rami ae,
xeao'i ke ndepopo guy py
- ⁹ heko vai va'e kuery xembojexavaia gui,
xerovaigua kuery xejukaxea gui.
- ¹⁰ Mba'eta ipy'a ratã va'e kuery ma opy'a omboty reve
ijayvu vaikue-ikue 'rã.
- ¹¹ Aỹ voi orejoko rei okuapy,
orere oma'ẽ vaipa yvy rupi orereityxe vy.
- ¹² Guary guembiarã ojouxu va'e rami ikuai,
guary ra'y onhemia gui oma'ẽ mbegue va'e rami guive.
- ¹³ SENHOR, epu'ã ke, ejoko ha'e eitypa.
Ndekyxe py eraa jepe xerekove heko vai va'e po gui.
- ¹⁴ SENHOR, ndepo py ae xereraa jepe avakue yvy regua gui.
Ha'e kuery ma aỹ oikove teri reve anho 'rã ojou iporã va'e.
Mba'eta ha'e kuery rye remonyẽ mba'emo porã.
Ha'e kuery ta'y reta 'rã.
Ha'e gui mba'emo ndoiporupai va'ekue ma oeja 'rã gua'y kuery pe.
- ¹⁵ Ha'e rã xee ma teko porã rupi vy ama'ẽ 'rã nderova re.
Apu'ã ju vy avy'a 'rã roexa vy.*

18

2 Samuel 22.1-51

Jogueroporaie va'e pe Davi SENHOR rembiguai ombopara va'ekue. SENHOR pe oporaie Saulo ha'e hovaigua kuery ha'e javi po gui oepy ramo. Ha'e vy aipoe'i:

- ¹ SENHOR xemombaraetea, xee roayvu.
- ² SENHOR, ndee ma xe'itaova.
Ndee ma oo ikorapa va'e ha'e xerepya.
Xeruete ma xe'itaova anhemiaty,
mba'emo vai jokoa, xereraa jepea imbarate va'e ha'e oo imbarate ete va'e.
- ³ SENHOR ogueroporaiepy va'e pe xee ajapukai vy
aa jepe kuery 'rã xerovaigua kuery po gui.
- ⁴ Nhuã manoa regua xejura va'ekue,
yai rami heko vai va'e xere opu'ã vy xemongyje.
- ⁵ Manoa pygua xejokua,
nhuã xã xejura xapy'a.
- ⁶ Ha'e ramo ajexavaia py ajapukai karamboae SENHOR pe.
Xeruete pe ajapukai xereraa jepe aguã.
Ha'e rã oĩaty templo gui oendu xeyvua,

* 17:15 Omanoague gui onhemboete ju aguã re ijayvu (Apocalipse 22.4).

- ijapyxa peve ajapukaia ovaē ramo.
 7 Ha'e ramo yvy omyi ha'e oryryi.
 Yvyty yta ikuai va'e voi ovavapa, oryryipa,
 SENHOR ogueropoxy ramo.
- 8 Inhapyĩgua gui opu'ã hataxĩ,
 ijuru gui ma tata nhomombaarã oẽ,
 tapyĩ hexakã va'e avi.
- 9 Yva omo'yvyĩ'i vy oguejy,
 ipy guýry pytũ vaikue oĩ reve.
- 10 Anjo ipepo va'e áry oĩ vy oveve ovvy,
 yvyty opepo áry ou pojava.
- 11 Pytũ gui ojapo onheovã aguã.
 Ha'e va'e ojee omoĩ ovvy.
 Yy ha'e arai pytũ va'e hoo rami oĩ.
- 12 Hexakã henonde oo va'e gui ma arai ivaipa,
 amandau ha'e tapyĩ hexakã va'e ho'a.
- 13 Ha'e gui ma SENHOR yapu yva re.
 Yvate ete va'e ijayvu atã ramo
 ho'a amandau ha'e tapyĩ hexakã va'e.
- 14 Ngu'y omombo vy omoaĩmba xerovaĩgua kuery.
 Overa vy omondyipa.
- 15 Ha'e ramo ojekuaa yy rupa peve,
 yvy yta avi ojekuaapa,
 ndeayvu atãa py SENHOR,
 ndepoxya rupi neapyĩgua gui nepytuẽ ramo.
- 16 Yvate gui SENHOR okuave'ẽ vy xerupity,
 xerenoẽ yy tuvixa va'e gui.
- 17 Xereraa jepe xerovaĩgua kuery imbaraete va'e gui,
 xemomboriau rei va'e kuery gui ae,
 xegui ipo'akave ete va'ekue ri.
- 18 Ha'e kuery ma ajexavai jave opu'ãmba rei va'ekue xere,
 teĩ SENHOR onhemoi xepytyvõarã.
- 19 Ha'e rami vy xereru peteĩ henda ipa'ũ ja'avea py.
 Xererovy'a vy xereraa jepe.
- 20 Xereko porãa rekovia SENHOR ome'ẽ iporã va'e,
 xeve ome'ẽ ndaxepo ky'aia repy.
- 21 Mba'eta xee ma SENHOR guigua tape rupi anho aiko va'e,
 Xeruete gui ndajepe'ai guive ha'eve'ya rami aiko aguã.
- 22 Xejee amoi ijayvuague ha'e javi,
 xejegui ndaibe'ai ayvu omoi va'ekue.
- 23 Henonde aiko anhetẽ rupi,
 ajejoko guive teko vai rupi aiko e'ỹ aguã.
- 24 Ha'e ramo xeve SENHOR ome'ẽ xereko porãa repy,
 henonde rupi ndaxereko ky'ai rire.
- 25 Heko porã va'e kuery pe rejekuaa uka 'rã heko porã va'e,
 anhetẽ rupi ikuai va'e pe rejekuaa uka anhetẽ rupigua avi,
- 26 icy'a e'ỹ va'e pe rejekuaa uka icy'a e'ỹ va'e,
 ha'e rã heko vai va'e pe ma rejekuaa uka 'rã nhombopaga kuaa va'e.
- 27 Mba'eta reraa jepe 'rã onhemoyvyĩ'i va'e,
 ha'e rã oma'ẽ vaikue reia rupi onhemboyvate va'e ma remomba 'rã.
- 28 Ndee rejapo xerata endy hexakãve aguã rami.
 Pytũ rupi aiko rupi ma ndee SENHOR Xeruete remoexakãmba.
- 29 Ndereve vy amomba 'rã xondaro kuery,
 Xeruete reve vy apo 'rã tetã kora áry rupi.
- 30 Nhanderuete guigua tape ma icy'a e'ỹ va'e,
 SENHOR ayvu ma oa'anga pyre.
 Hexe onhemi va'e ha'e javi pe ma mba'emo vai jokoia oĩ.
- 31 Mava'e tu Nhanderuete oiko SENHOR e'ỹ vy?
 Mava'e tu nhande'itaova oiko Nhanderuete e'ỹ vy?
- 32 Xeruete xemombaraetea oiko,
 omoatyro 'rã aguata aguã rupi.
- 33 Xepy ojapo 'rã guaxu rami inhakuã aguã.
 Yvatea rupi aẽ teĩ xemoĩ atã.
- 34 Xepo pe voi ome'ẽ joe apu'ã kuaa aguã.

- Ha'e ramo guyrapa overa va'e guigua teĩ xee aipira 'rã.
³⁵ Mba'emo vai jokoarã reme'ê xereraa jepea,
 reiporu kuaa regua xemoĩ atã,
 xemboaxya rupi xemboyvate.
³⁶ Apyrõ aguã tape rembopyve ramo
 ndaxepyxyryi 'rã.
³⁷ Xerovaigua kuery amonha 'rã aupitypa peve.
 Ha'e gui amomba rire ajevuy ju 'rã.
³⁸ Amou'ũmba opu'ã aguã nda'evevei peve.
 Xepy yvýry ho'apa.
³⁹ Mba'eta ndee xemombaraete ajoguero'a kuaa aguã,
 rejapo xere opu'ã va'ekue re xepo'aka aguã rami.
⁴⁰ Xerovaigua kuery rejapo ojavapa aguã rami.
 Xerayvu e'ỹ va'e amomba.
⁴¹ Guepyarã pe ha'e kuery ojakukai teĩ ndoepyai.
 SENHOR pe voi ha'e kuery ojakukai teĩ nombovai.
⁴² Ha'e ramo amongu'ipa yvy ku'i yvytu rupi ovevepa va'e rami,
 yapo tape guiguare nhamomboia rami amokanhymba.
⁴³ Heta va'e kuery xere opu'ã teĩ xereraa jepe,
 xemoĩ yvy regua kuery ruvixarã.
 Amboae regua kuery ndaxai va'ety voi xeivygua ikuai.
⁴⁴ Xeayvu oendu vyve xenhe'ê rendu okuapy.
 Yvy mboae regua oexa uka xeivy ikuai,
⁴⁵ amboae regua kuery okanhymba,
 onhemiaque gui oẽmba onhemondyipa vy.
⁴⁶ SENHOR ma oikove va'e, togueroayvu porãa xe'itaova!
 Tomboetea Nhanderuede xereraa jepeal!
⁴⁷ Nhanderuede xerepy vy jojukapa,
 heta va'e kuery re xembopo'aka.
⁴⁸ Nhanderuede ae xereraa jepe xerovaigua kuery gui.
 Ndee ma xemboyvate xerovaigua kuery áryve,
 ha'e xerepy avakue jojuka va'ety po gui.
⁴⁹ Ha'e ramo SENHOR, roguerovy'a 'rã yvy regua kuery oendua py,
 aporaie 'rã nderery rupi.*
⁵⁰ Ha'e ae ombopo'aka 'rã huvixaverã omoĩ va'ekue,
 oexa uka 'rã guembiporavo oayvua,
 Davi ha'e hamymino kuery pe, raka'e rã peve.

19

- Nhanderuede rembiapo ha'e ijayvua oguerovy'aa aque*
 Jogueroporaie va'e pe Davi ombopara va'ekue.
¹ Yva re mba'emo ikuai va'e oikuaa uka Nhanderuede hexakãmba va'ea,
 yvate rupi ikuai va'e oikuaa uka 'rã opo py ojapoague.
² Ara nhavõ oikuaa uka 'rã ara pygua pe,
 ha'e pytũ nhavõ oikuaa uka 'rã pytũ rupigua pe.
³ Nda'ijayvui 'rã, neĩ nda'ijayvui 'rã,
 ha'e va'e gui mba'eve nonhendui 'rã.
⁴ Ha'e rami teĩ ha'e nunga 'arandu ma yvy jave rupi oikuaa,
 yvy apy peve 'rã ha'e nunga re ayvua.*
 Ha'e vy yva apy re omoĩ kuaray oike aguã.
⁵ Ha'e va'e ma omena ramo va'e rami 'rã oẽ ouvy ngoo gui,
 ovy'a 'rã ovy imbaraetepa va'e onha ovy'a rami.
⁶ Yva apy gui oẽ vy
 oaxa 'rã ovy ijapy rovai peve.
 Jipoi 'rã haku-a oguerovy e'ỹa.
⁷ Ha'e gui SENHOR guigua lei ma ha'eve vaipa ete vy
 omombaraete ju 'rã nhanderekove.
 SENHOR omombe'u va'e ma ogueroviapy vy
 omo'arandu 'rã hi'arandu e'ỹ'i va'e.
⁸ SENHOR nhombo'ea ma ha'evea ramigua vy
 ombovy'a 'rã nhandekuraxõ.
 SENHOR ojapo uka va'e maiky'a e'ỹ va'e vy

* 18:49 Romanos 15.9

* 19:4 Romanos 1.18-25, 10.16-18

omoexakā 'rā nhanderexa.

- ⁹ SENHOR renonde jajererokyjea ma iky'a e'ŷ va'e,
raka'e rā peve guarā guive.
SENHOR joe oikuaa potaa ma anhetē rupigua,
ha'evea rami meme.
- ¹⁰ Ha'e nunga ma ouro gui jaipotave va'erā,
ouro oiky'a'o pyre gui iporāve ramo.
He'ëve 'rā ei
hetāgue gui onhami va'ekue gui.
- ¹¹ Ha'e va'e rupi nerembiguai kuery remongeta 'rā guive.
Ha'e va'e jajapo vy jajou reta 'rā iporā va'e.
- ¹² Mava'e nda'u oikuaapa 'rā ha'e ae ojevavyague?
Emboguepa ke aikuaa e'ŷ-e'ŷ va'e guive.
- ¹³ Xejoko xee nerembiguai anhemboyvate reia gui voi.
Ha'e nunga ta'ipo'aka eme xere.
Ha'e rami rā iky'a va'e'ŷ 'rā aiko,
ha'e aa jepe 'rā ajevavyve etea gui.
- ¹⁴ SENHOR, xe'itaova ha'e xerepya,
tove ayvu xejuru gui oē va'e ha'e xepy'aa xepy'a re oī va'e
nerenonde toī nembovy'aarā.

20

Huvixave re ojerurea ague

Jogueroporaie va'e pe Davi ombopara va'ekue.

- ¹ Rejexavaia ára tove SENHOR tanembovai.
Jacó Ruete rery tandereraa jepe rei atā aguā py.
- ² Tombou nderepyarā guenda iky'a e'ŷ va'e gui.
Sião gui ma voi topena ndere.
- ³ Ta'ima'endu'a ixupe guarā reme'ē va'e ha'e javi re,
tojou porā mba'emo ixupe reapy rā.
- ⁴ Tome'ēmba ndepy'a re reipotaa oī va'e,
tojapopa rejapoxe va'e ha'e javi.
- ⁵ Ha'e gui ma ndepo'aka ramo ore kuery rovy'a 'rā mboraei rupi,
Nhanderuete rery rupi roupī 'rā imoiny bandeira.
Ixupe SENHOR tomoingo renhemboayvua ha'e javi.
- ⁶ Aŷ ma xee aikuaa SENHOR ogueraa jepe 'rāa huvixarā omoī va'ekue.
Ombovai 'rā o'amba iky'a e'ŷ va'e gui,
ha'e rami vy opo py oexa uka 'rā opo'akaa.
- ⁷ Amongue ma ojerovia 'rā mba'eyru re,
amboae kuery ma kavaju re 'rā ojerovia.
Ha'e rā nhande kuery ma SENHOR Nhanderuete rery anho jarovy'a.
- ⁸ Ha'e kuery ma ojero'a vy ho'apa 'rā.
Ha'e rā nhande kuery ma nhapu'ā 'rā jakuapy.
- ⁹ SENHOR, embopo'aka ke oreruvixave.
Rojapukai ramo orembovai.

21

Ngovaigua kuery re huvixave ipo'aka rā oguerovy'aa ague

Jogueroporaie va'e pe Davi ombopara va'ekue.

- ¹ SENHOR, nembraetea re oreruvixave ovy'a,
reraa jepeague re oporaie.
- ² Mba'eta rejapo ma opy'a py ojapoxe va'ekue,
nerendu e'ŷi ojapukaia.
- ³ Mba'eta reayvu vy iporā va'e anho reme'ē ixupe.
Inhakā re remoī coroa ouro ete'i guigua.
- ⁴ Guekove re ha'e ojerure ramo reme'ē,
raka'e rā peve guarā.
- ⁵ Reraa jepeague ma pavē rei oguerovy'a okuapy.
Hexe remoī hexakārā ha'e yvateve aguā.
- ⁶ Raka'e rā peve guarā remoī nhomoingo porāarā.
Hexeve reiko ramo vy'a anho 'rā oendu.
- ⁷ Mba'eta huvixave ojerovia SENHOR re.
Ha'e rami vy Yvate ete va'e omboaxy ramo peteīve henda py ndo'ai 'rā.

- ⁸ Ha'e rami vy ndepo oupity 'rā nderovaigua kuery ha'e javi,*
reiporu kuaa regua ojopypa 'rā ndere ija'e e'ÿ va'e.
- ⁹ Ha'e kuery pe rejekuaa uka vy
rejapo 'rā tata rupa haku raxa va'e rami.
SENHOR opoxya rupi omomba 'rā,
tata oapypaa rami.
- ¹⁰ Yvy gui remomba 'rā hamymino kuery,
avakue ra'y kuery ikuaiia gui.
- ¹¹ Nderovai ha'e kuery mba'emo vai ojapoxe teĩ
nopa'ã kuaai 'rā, ndojapo kuaai 'rā ha'e nunga.
- ¹² Rejapo 'rā oguevipa aguã rami,
ha'e kuery rova re rea'anga 'rā nderapa.
- ¹³ SENHOR, tandeyvate ndepo'akaa py.
Ha'e rā ore ma roporaai 'rā ndepo'akaa roguerovy'aa rupi.

22

Messias oiko axy rire ipo'aka ju aguã re ijayvua

Jogueroporaai va'e pe Davi ombopara va'ekue, "Guaxu aje'veguea" he'ia py oporaie rami oporaie aguã.

- ¹ Xeruete, Xeruete, mba'e re tu xereja ri?*
- Mba'e re tu ajexavaia rupi ajapukai teĩ
mombyry ri repyta xegui xereraa jepe e'ÿ aguã?
- ² Xeruete, ára py ajapukai ramo naxembovai,
pyávy voi ndapytu'ui ae.
- ³ Ha'e rami teĩ ndee ma iky'a e'ÿ va'e reiko.
Nerenda repenaaty py reguapy reiny Israel kuery oporaie okuapy va'e mbyte.
- ⁴ Oramoĩ kuery ma ndere ojerovia raka'e.
Ojerovia ramo reraa jepe.
- ⁵ Ndevy pe ha'e kuery ojapukai ramo reo jepe raka'e.
Ndere ojerovia, nda'eve e'ÿi nho guive.
- ⁶ Ha'e rā xee ma taxo, ava e'ÿ merami,
mba'eta avakue pe ovare e'ÿ va'e,
heta va'e kuery oipota va'e'ÿ aiko.
- ⁷ Xerexaa kuery ha'e javi xejojai rei.
Hembe'a rei reve oakã ombovava vy aipoe'i:
- ⁸ " SENHOR re rejerovia ramo tanderepy.
Ha'e ae tandereraa jepe, hexe ndererovy'a ri vy", he'i okuapy.
- ⁹ Ha'e rami teĩ ndee ma xetui'i aguã rami xeapo va'ekue.
Xere repena porã va'ekue akambu'i teri jave.
- ¹⁰ Xetui'i guive ndevy aiko.
Xeryru'i py aña pyve ndee Xeruete reiko.
- ¹¹ Aÿ ma enhemombyry eme xegui,
mba'eta ovaẽ ma ajexavai aguã,
ha'e xepytyvõarã ndoikoi.
- ¹² Heta ikuai toro nharõ rami xejoko va'e,
toro mbaraetekueve Basã pygua xembojere rei okuapy.†
- ¹³ Xere ha'e kuery ijuru jai,
guary nhombo'a'ypa va'e rami okororõ.
- ¹⁴ Yy rami anheẽ,
ha'e xekãgue ha'e javi oku'epa,
xeryepy re xekuraxõ ma ei raity hykupa va'e rami ojeapo.
- ¹⁵ Yapo guigua pẽgue ipirupaa rami
xembaraetea voi opa ma,
xeapekũ guive xejurupy re oja ma oiny.
Ha'e rami py ndee xereity vyvy ku'i rupi amano aguã.
- ¹⁶ Jagua kuery xembojere rei okuapy,
joapo vai va'ety kuery nhomoirũmba va'e.
Xepo ha'e xepy ombokuapa.
- ¹⁷ Aexapa xekãgue ha'e javi'i.
Ha'e kuery xere oma'ẽ okuapy xere ovy'a reia py.
- ¹⁸ Xeoam jomeme omboja'opa ma.

* 21:8 Apy guive huvixave pe ijayvu.

* 22:1 Kova'e salmo ha'e javi omombe'u ma voi Jesus kuruxu re omano jave guarã (Mateus 27.33-54,

Marcos 15.22-32, João 19.17-30, Filipenses 2.5-11).

† 22:12 Basã vyvy re ma heta ikuai raka'e vaka. Ha'e rā apy ma toro re ete'ÿ, heko vai

va'e kuery re ijayvu.

- Xekamixa puku re oexa okuapy xorteá.
- ¹⁹ Ha'e rã ndee SENHOR, ejepe'a eme xea gui.
Xemombaraetea, ejapura ke xerepy aguã.
- ²⁰ Eraa jepe xerekove ha'e kuery kyxe gui,
jagua kuery oipe'a ta va'e gui.
- ²¹ Xereraa jepe ke guary juru gui,
búfalo rakua gui guive.
- Tá, ndee ma xembovai ma!
- ²² Ha'e rami rire xeryvy kuery oendua py xema'endu'a 'rã nderery re,*
heta va'e kuery mbyte rogueroporaie 'rã, po rami:
- ²³ “ SENHOR nenonde pejererokyjea rupi pendekuai va'e, peroporaie.
Pembojerovia, peê Jacó ramymino kuery ha'e javi.
Israel ramymino kuery ha'e javi, pemboete pekuapy.
- ²⁴ Mba'eta ha'e naxemboaxy e'ÿi ajexavai rã,
ndojeguarui guive aiko axya gui,
ngova voi nomo'ái xegui.
Ha'e rami 'rãgue py oendu xereraa jepe aguã ajapukai ramo”, ha'e 'rã.
- ²⁵ Mba'eta ndegui ae ou ijaty va'e kuery mbyte xee rogueroporaie aguã.
Nerenonde ojererokyjea rupi ikuai va'e oexaa py ajapo 'rã anhemboayvuague.†
- ²⁶ Ha'e ramo iporiaukue'i okaru 'rã okuapy hevayatãmba peve.
SENHOR oeka va'e oguerovy'a 'rã okuapy.
Ha'e kuery kuraxô toikove riaie!
- ²⁷ Ha'e nunga rupi yvy apy peve ima'endu'aa 'rã SENHOR re,
ixupe guarã ojeko rerova 'rã okuapy.
Henonde guenapy'ã re yvy regua kuery ha'e javi oĩmba 'rã okuapy.
- ²⁸ Mba'eta SENHOR pegua ae ipo'aka aguã.
Ha'e ae 'rã opena yvy regua kuery re.
- ²⁹ Yvy regua oguerekopa rei va'e kuery voi okaru vy ombojerovia 'rã okuapy.
Yvy re onhono porã mbyre ha'e javi 'rã oĩ guenapy'ã re henonde,
gukove ae'i re nopena kuaai va'ekue.
- ³⁰ Tamymino kuery voi ha'e oipotaa rami 'rã ikuai.
Mba'eta raka'eve rã ikuai va'e pe ijayvua 'rã SENHOR reko re.
- ³¹ Ha'e kuery ou vy omombe'u 'rã ixuguigua teko porã.
Raka'eve rã ikuai va'erã pe omombe'ua 'rã ha'e ojapo va'ekue.

23

“Xere SENHOR opena” he'ia

Mboraeirã Davi ombopara va'ekue.

- ¹ SENHOR ma vexa'i mongarua rami xere opena va'e oiko.*
Ha'e ramo xevy pe ndoatai 'rã mba'eve rei.
- ² Xemombytu'u 'rã inony nhuũndy porã py rami.
Xereraa 'rã yy iky'a e'ÿ va'e py.
- ³ Omombaraete kuerei 'rã xenhe'ẽ.
Tape teko porã rupi 'rã xerereko,
guery omboete ukaa rupi vy.
- ⁴ Yvyugua manoa guy pytũ reia rupi aiko teĩ
ndakyjei 'rã mba'eve rei gui,
xereve ndee reiko ramo.
Ndepo pygua ha'e ndepopoka ma xembopy'a guaxu.
- ⁵ Rereko katu akaru aguã†
xeroaigua kuery oexaa py.
Xeakã re renhoẽ 'rã azeite.
Xekaro remonyẽ 'rã onheẽmba rei peve.
- ⁶ Anhetẽ xereve oĩ 'rã ndeporayvua ha'e xemboaxya ára nhavõ, aikovea pukukue re.
Ha'e gui SENHOR ro py aiko 'rã raka'e rã peve.

* 22:22 Hebreus 2.10-12 † 22:25 “Anhemboayvuague ajapo 'rã” he'i vy ma mba'emo mymba ojuka aguã re ijayvuague re ima'endu'a. Ha'e gui ho'okie ombaja'o 'rã guetarã kuery pe Nhanderueete oguerovy'a okuapy aguã (Levítico 7.15-16). * 23:1 Apy ma vexa'i mongarua re ombojoja, Nhanderueete nhandere openaa re ijayvy vy (Apocalipse 7.15-17). † 23:5 Apy ma hoo va'e nhomovaẽ porã va'e re ombojoja. Ha'e va'e jave py hoo va'e ipoua kuery omovaẽ porã vy azeite onhoẽ'i vy oikyty 'rã inhakã re (Lucas 7.46).

24

- Huvixave hexakāmba va'e ou aguā re ijayvua*
Mboraeirā Davi ombopara va'ekue.
- ¹ SENHOR mba'e ae itui yvy ha'e opa mba'e hexe ikuai va'e,
yvy regua kuery ha'e javi guive.*
- ² Mba'eta ha'e onhono raka'e ye'ë áry rupi,
yy oxyry va'e áry omombyta.
- ³ Marā ramigua tu ha'eve SENHOR pegua yvyty re oë aguā?
Marā ramigua nda'u ha'eve henda iky'a e'ÿ va'e py oiko aguā?
- ⁴ Opo py ojevavy e'ÿ va'e, ipy'a ky'a e'ÿ va'e,
tuuete ramigua ovare e'ÿ va'e re onhe'ë nogueroma'endu'ai va'e,
neĩ ndoura rivei va'e.
- ⁵ Ha'e va'e kuery re ma ou 'rā SENHOR omoingo porā,
ha'e ramo Nhanderueete heraa jepea po gui ojopy 'rā teko porā.*
- ⁶ Ha'e rami ikuai ixupe ojavukai va'e kuery,
Jacó Ruete oekaa rupi ikuai va'e.
- ⁷ Peipe'a ke okē ikuai va'e,
peipe'apave okē guaxu marā e'ÿ,
Huvixave hexakāmba va'e oike aguā.
- ⁸ Mava'e tu Huvixave hexakāmba va'e?
SENHOR imbarate ha'e ipo'akapa va'e,
SENHOR joe opu'āa rupi ipo'aka va'e.
- ⁹ Peipe'a ke okē ikuai va'e,
peipe'apave okē guaxu marā e'ÿ,
Huvixave hexakāmba va'e oike aguā.
- ¹⁰ Mava'e tu Huvixave hexakāmba va'e?
SENHOR ixondaro reta va'e,
ha'e ae Huvixave hexakāmba va'e.

25

- Nhanderueete pe onhepytyvō ukaa ague*
Davi ombopara va'ekue.
- ¹ Ndere SENHOR, aroma'endu'a xenhe'ë.
- ² Xerueete, ndere xee ajerovia va'e.
Axĩmba rei aguā rami e'ÿ ke xerereko,
xerovaigua kuery xere ovy'a rei e'ÿ aguā.
- ³ Ha'e rā nerarō va'e kuery ma peteĩve noxĩmbai 'rā.
Oxĩmba va'erā ma nhemi rupi joapo vai va'e kuery.
- ⁴ SENHOR, eikuaa uka xevy ndeguigua tape.
Xembo'e ke reikoa rupi aiko avi aguā.
- ⁵ Xerereko ndeguigua anhetē va'e rupi, xerekombo'e guive,
mba'eta ndee ma Xerueete xereraa jepea,
ndee ae roarō aikovy ko'ë nhavō.
- ⁶ SENHOR, nema'endu'a ke renhomboaxy ha'e ndeporayvua rupi
jypy guive reikoa re.
- ⁷ Nema'endu'a eme ke xekunumi jave ajevyague re,
neĩ nderovai xereko vaiague re.
SENHOR, xemboaxya rupi anho ke nema'endu'a xere,
ndeporayvu va'e vy.
- ⁸ SENHOR ma iporayvu ha'e heko porā va'e vy
ojevavya va'e kuery pe oikuaa uka 'rā tape.
- ⁹ Yvy'igieve ma ha'e oguereko 'rā teko porā rupi,
ombo'e 'rā ojeuguigua tape rupi oiko aguā re.
- ¹⁰ SENHOR guigua tape ha'e javi rupi oĩ nhomboaxya ha'e anhetē va'e,
guexeve guarā ojapo va'ekue ha'e ijayvuague rupi ikuai va'e pe.
- ¹¹ SENHOR, nderery remboete ukaa rupi vy
emboguepa xereko vaiague heta teĩ.
- ¹² Avakue SENHOR renonde ojererokyjea rupi ikuai va'e pe
oikuaa uka 'rā tape oo aguā.
- ¹³ Ha'e ramo ha'e kuery nhe'ë opytu'u 'rā ovy'a reve,
ha'e gui hamymino kuery jevy ikuai porā 'rā yvy re.
- ¹⁴ SENHOR renonde ojererokyjea rupi ikuai va'e ma ha'e omohemboja 'rā.

* 24:1 1 Coríntios 10.23-26

* 24:5 Mateus 5.8

- Ha'e va'e kuery pe oikuaa uka 'rā guexeve guarā ojapo va'ekue.
¹⁵ Ama'ē riae aikovy SENHOR re,
 mba'eta ha'e ae oipe'a 'rā xepy nhuā gui.
¹⁶ Ejevy ju xea py, xemboaxy ju,
 mba'eta xea'e'i aī vy ajexavai.
¹⁷ Xemombytu'u ke xepy'a py nda'eveia gui,
 xepe'a ke ajexavaia gui.
¹⁸ Eikuaa pota aiko axya ha'e ajexavaia re,
 ha'e emboguepa ajejavyague ha'e javi.
¹⁹ Eikuaa pota ke xerovaigua kuery re,
 heta vaipa ramo.
 Xere ija'e e'ỹ va'e kuery xembojeguaru rei okuapy.
²⁰ Earō xenhe'ē re, ha'e xerepy.
 Taiko eme aximba rei aguā rami,
 ndere anhemi rire.
²¹ Anhetē rupi ha'e teko porā rupi aiko tojapo akanhy e'ỹ aguā rami,
 mba'eta ndee ae xee roarō.
²² Xeruete, eraa jepe Israel kuery
 ikuai axya ha'e javi gui.

26

Heko porā va'e oiapukaia

Mboraeirā Davi ombopara va'ekue.

- ¹ SENHOR, xemboeko porā ke,
 anhetē rupi anho aiko
 ha'e SENHOR re ajeroviaa gui ndajepe'ai rire.
² SENHOR, eikuaa pota ke aiko re ha'e xekuaa.
 Exa pota xepy'aa ha'e anhembopy'aa re.
³ Mba'eta ndeporayvua re xema'endu'a riae aikovy,
 ndeguigua anhetē va'e rupi aiko.
⁴ Ndaguapyi guive avakue nhombotavypa rei va'e reve,
 joayvu merami rive va'e kuery reve nanhemoirūi.
⁵ Opa marā rei ikuai va'e xee ndajou porāi,
 ha'e heko vai va'e kuery reve ndaguapyi.
⁶ Ajepoei ajevavy e'ỹa aikuaa uka vy.
 Ha'e rami vy SENHOR, aiko ndevyguia altar yv'ry,
⁷ aporaei atā aguā ndevy,
 nerembiapo porāa amombe'upa aguā.
⁸ SENHOR, xee ma ayvu ndevyguia oo,
 nerexakā oīaty.
⁹ Eipe'a eme xerekove heko vai va'e kuery reve,
 xerekove eipe'a eme jouguoy moēa kuery reve.
¹⁰ Ha'e kuery po ma jojukaague re iky'a,
 oiporu kuaa regua re ma teko vai repyrā rive oguereko.
¹¹ Ha'e rā xee ma xereko porāa rupi aiko.
 Xerepy ke xemboaxy vy.
¹² Xepy oī atā yvy joja reia py.
 Ha'e rami vy heta va'e kuery oendua py xema'endu'a porā 'rā SENHOR re.

27

Nhanderuete reve oikoxea rupi ijayvua

Mboraeirā Davi ombopara va'ekue.

- ¹ SENHOR ma xemoexakāa ha'e xereraa jepea oiko.
 Mava'e gui 'rā tu akyje?
 SENHOR ma xerekovea onhemi aguā.
 Mava'e gui tu akyje ta?
² Ha'e gui joapo vai va'ety kuery xere ou vy xemomba aguā,
 xevyky rei va'e ha'e xerovaigua kuery,
 ha'e kuery onhepyxanga vy ho'apa 'rā okuapy.
³ Xondaro kuery heta xembojere teī
 xepy'a py nanhemondyī 'rā.
 Xere anho opu'āmba teī ajerovia riae 'rā.
⁴ Peteī regua re tema ajerure SENHOR pe,
 ha'e va'e anho ajoux:

- ha'e va'e ma SENHOR pegua oo py aiko aguã aikovea pukukue re,
 SENHOR rexakãa aexa aguã,
 ha'e ixupegua templo py anhembo'e aguã.
- ⁵ Ha'e rami vy ai vaia ára xenhomí 'rã ojeupegua opy,
 xemoinge 'rã ojeupegua oo py anhemí aguã.
 Xereraa 'rã itaova áry.
- ⁶ Ha'e jave py xeakã ombo'yvate ju 'rã
 xerovaigua kuery xembøjere rei va'e áry.
 Ixupegua oo py arovy'a vy mba'emo ame'ẽ 'rã.
 Aporaí ha'e ambopu 'rã SENHOR pe.
- ⁷ SENHOR, endu ke xeayvua,
 ndevy ajapukai rã.
 Xemboaxy ha'e xembovai.
- ⁸ Xepy'a re amoí "Xereka ke xereve reiko aguã" 'rea.
 Ha'e ramo roeka 'rã SENHOR, ndereve aiko aguã.
- ⁹ SENHOR, ejexa uka e'ỹ eme xevy.
 Ndepoxy reve xemoxẽ eme xee nerembiguaí.
 Mba'eta ndee ma xepytyvõa reiko.
 Xeruete xereraa jepea,
 epena e'ỹ eme xere, xereja eme xeae'i.
- ¹⁰ Mba'eta xeru ha'e xexy xereja teí
 SENHOR xereru 'rã.
- ¹¹ SENHOR, xembo'e ke ndeguigua tape rupi aiko aguã,
 tape jojaa rupi xerereko xere oma'ẽ mbegue va'e kuery gui.
- ¹² Xemboaxa eme xerovaigua kuery oipotaa rami xerereko aguã.
 Mba'eta xerovai opu'ã rei okuapy ayvu rive py,
 joapo vai aguã re anho nhomongeta va'e.
- ¹³ Xee ajerovia SENHOR porayvua aexa aguã
 yvy re aikove teri reve.
- ¹⁴ Pearõ ke SENHOR.
 Pendekuerai eme, pendepy'a guaxu
 ha'e pearõ tema SENHOR.

28

Oguerovy'a reve ojerurea

Mboraeirã Davi ombopara va'ekue.

- ¹ SENHOR, ndevy pe ajapukai.
 Xe'itaova, endu e'ỹ eme ke xeayvua,
 mba'eta naxembovai ramo
 yvykua py oguejy va'e kuery rami akanhy 'rã.
- ² Endu ke xereraa jepe aguã re ajapukai ramo,
 nerenda iky'a e'ỹ va'e katy xepo aupi reve.
- ³ Xembotyryry eme ke heko vai va'e kuery
 opa marã rei ikuai va'e reve.
 Ha'e kuery ma ikuai porã aguã re merami rive ijayvu oirũ pe,
 teí ipy'a re ma opa marãgua anho oí.
- ⁴ Embopaga ke ha'e kuery ojapoague rami,
 mba'emo vai ojapoague re.
 Eme'ẽ ha'e kuery opo py ojapoague rekovia,
 embojoja ha'e kuery ojapoague repy.*
- ⁵ Ha'e kuery ndoikuaa potai SENHOR ojapo va'e re,
 neí opo py ojapo va'ekue re.
 Ha'e ramo SENHOR oitypa 'rã, nomopu'ã jevyvei 'rã guive.
- ⁶ Ta'ima'endu'a porã SENHOR re,
 xereraa jepe aguã re ajapukai ramo xerendu rire.
- ⁷ SENHOR ae xemombaraetea ha'e mba'emo vai jokoia.
 Hexe xekuraxõ ojerovia.
 Ha'e xereraa jepe ramo xekuraxõ ovy'a,
 ha'e ixupe aporaí reve amboete 'rã.
- ⁸ SENHOR omombaraete 'rã ixupe ikuai va'e,
 hambiporavo onhemí vy oo jepe aguã.
- ⁹ Eraa jepe ke ndevyguia kuery,

* 28:4 Mateus 16.27; Apocalipse 22.12

emoingo porā ndevyguā kuery.
Ha'e kuery re epena ha'e emboyvate raka'e rā peve.

29

Yapu ha'e overa rupi Nhanderuete ayvu onhendua re ijayvua
Mboraeirā Davi ombopara va'ekue.

- ¹ Nhanderuete ra'y kuery pendekuai va'e, pemboete SENHOR,*
perovy'a SENHOR rexakāa ha'e imbaraetea.
² Pemboete SENHOR hery pemboete aguā ha'evea rami.
Pembojerovia SENHOR iky'a e'ŷa rexakāa py.
³ Yy áry rupi onhendu SENHOR ijayvua.†
Nhanderuete yapu guexakāa gui.
Yy tuvixa va'e áry rupi SENHOR oiko.
⁴ SENHOR ayvu ma ipo'akapa va'e.
SENHOR ayvu re yvatea anho oī.
⁵ SENHOR ayvu omopē 'rā yary ikuai va'e.
Tá, SENHOR omboa'yapa 'rā yary Líbano py ikuai va'e.
⁶ Líbano ha'e Siriom yvyty áry ikuai va'e
ojapo 'rā vaka ra'y rami opo-opo aguā rami, vaka ka'aguy regua rami.
⁷ SENHOR ayvu ojapo 'rā tata hendy ovy aguā rami.
⁸ SENHOR ayvu omboryryi 'rā tekoa e'ŷa.
SENHOR ojapo 'rā Cades tekoa e'ŷa rupi vvy oryryi aguā rami.
⁹ SENHOR ayvu ma ojapo 'rā guaxu kuery ta'y'i aguā rami,
oitypa 'rā ka'aguy.
Ha'e ramo ixupegua templo py ha'e javi "Iporā ete!" he'i okuapy.
¹⁰ SENHOR opena raka'e yy ou jave.
Huvixave rami opena 'rā raka'e rā peve.
¹¹ SENHOR omombaraete 'rā ojeupegua kuery.
SENHOR omoingo porā 'rā ojeupegua kuery.

30

Omano ta ramo ogueraa jepe rire ogueroxy'aa ague
Mboraeirā Davi ombopara va'ekue oo guaxu Nhanderuete pe omboaxa jave.

- ¹ SENHOR, xee ma romboete 'rā,
xereraa jepe rire.
Nderejapoi xerovaigua kuery xere ovy'a rei aguā rami.
² SENHOR Xeruete, ndevy pe ajapukai va'ekue xereraa jepe aguā.
Ha'e ramo xemonguera.
³ Rejapo vvykua gui xenhe'ē oē ju aguā rami.
Xerekove re repena vvykua py aguejy e'ŷ aguā.
⁴ Peē ixupegua pendeky'a e'ŷ va'e, peporaei pekuapy SENHOR pe,
perovy'a hery iky'a e'ŷ va'e.
⁵ Mba'eta ipoxya ma xapy'a'i guarā anho.
Ha'e rā nhandarayvua ma jaikovea pukukue re 'rā oī.
Pytū ovvy rā onhendu 'rā ojae'o va'e.
Va'eri ko'ē ma rā ou 'rā vvy'a.
⁶ Xee aiko porā rei jave
"Ndaxereityai 'rā" ha'e va'ekue.
⁷ Ndee SENHOR xemboaxya rupi ae
rejapo xee aia vvyty oī atā aguā rami.*
Mba'eta nderejexa ukai ramo
xee ajexavai.
⁸ SENHOR, ndevy pe ajapukai.
SENHOR, ndevy ae ajerure.
⁹ Mba'erā tu xeruguy ovare 'rā vvykua py aguejy rā?
Ndevy pe iku'ikue oporaei 'rā ri ty'y?
Ha'e nunga oikuaa uka 'rā teve ndeguigua anhetē va'e?
¹⁰ SENHOR, endu ha'e xemboaxy ke.
SENHOR, enhemoī xepytyvōarā.

* 29:1 "Nhanderuete ra'y kuery" he'ia ma amongue henda py yva pygua anjo kuery pe ijayvu vy (Salmo 103.20), ha'e rami e'ŷ vy ojerovia va'e kuery pe (Salmo 82.6, 96.7-9). † 29:3 Apy ma omombe'u Nhanderuete opo'akaa oexa uka vy oky ryapu ha'e overa vvyty reve ombou. Hyapu pe "Nhanderuete ijayvua" he'i. * 30:7 "Xevyguā vvyty" he'ia ma opo'akaa re ijayvu vy.

- 11 Xerexaya gui xemombytu'u avy'a ju aguã.
 Xegui reipe'a ma ajukue vaikue,[†]
 hekovia avy'a ete aguã ju remoï,
 12 xenhe'ê opytu'u e'ÿ re oporaei aguã.
 SENHOR Xeruete, roguerovy'a 'rã raka'e rã peve.

31

Iporiauaque gui oguerovy'aa ague

Jogueroporaëi va'e pe mboraëirã Davi ombopara va'ekue.

- 1 SENHOR, ndere ae anhemi va'e.
 Taiko eme oximba rei va'e.
 Xereraa jepe ke ndereko porãa rupi vy.
 2 Endu ke ndeapyxa py, xereraa jepe pojava aguã.
 Enhemoï xevy oo ikorapa va'e,
 oo imbaraeite vaipa va'e aa jepe aguã.
 3 Mba'eta ndee ae xe'itaova ha'e oo ikorapa va'e reiko.
 Nderery remboete ukaa rupi vy xerereko ha'e xembo'e 'rã.
 4 Xepe'a 'rã nhuã nhemi rupi omoï mbyre gui,
 mba'eta ndee ma xemombaraetea.
 5 Ndepo py ae amboaxa xenhe'ê.*
 SENHOR Xeruete anhetê va'e, ndee ae xerepy.
 6 Rejou vai mba'emo ra'angaa ombojerovia va'e.
 Ha'e rã xee ma SENHOR re anho ajerovia.
 7 Xee roguerovy'a, ajou porã 'rã ndeporayvua,
 mba'eta reikuaa pota ajexavaia re,
 reikuaa xenhe'ê oiko axya.
 8 Naxemboaxai xerovaigua kuery po py.
 Xemopu'ã imo'amy peteï henda tuvixaa py aiko aguã.
 9 SENHOR, ajexavaia aendu rã xemboaxy ke.
 Xeporiau reia gui xerexa voi opa ovy.
 Xerekove, xerete guive opa.
 10 Xerekovea ma iporiaua re anho oaxa ovy,
 xepoaëa rupi tema aiko ma'etÿa nhavõ.
 Ajejavyppa rire naxembaraeteive-ive avy,
 xekãgue voi opa ovy.
 11 Xerovaigua kuery ha'e javi ojeguaru aguã rami aiko,
 xero katy'i ikuai va'e kuery voi onhemondyipa xegui.
 Xerexa va'ety kuery ndaxerexa xeveipa okuapy,
 tape rupi xerexa va'e onha xegui.
 12 Xegui ha'e kuery hexaraipa ma opy'a py, omanogue gui rami,
 karo nhae'ü guigua vokue rami aiko.
 13 Mba'eta xee aendu heta ijayvu mbegue okuapy ramo,
 xeyke jovaive rupi ikuai xemongyjexe vy.
 Xere ijayvu mbegue vy
 onhembopy'a okuapy xerekove oipe'a aguã.
 14 Ha'e rã xee ma ajerovia SENHOR re.
 Ndevy pe "Ndee ma Xeruete" ha'e.
 15 Ndepo py oï xe'ára.
 Xepe'a ke xerovaigua kuery po gui,
 xerakykue monhaa kuery xejukaxea gui.
 16 Emoexakã ke nderova xee nerembiguai áry.
 Xemboaxy vy xereraa jepe.
 17 SENHOR, ndevy pe ajapukai rire
 ejapo eme aximba aguã rami.
 Toximba heko vai va'e kuery ae,
 tokyririmba omanoa py.
 18 Emokyrirí ijapu va'e kuery,
 heko porã va'e re opa marã rei ijayvu va'e,
 onhemboarai rei, ojee ae ojerovia okuapy va'e.
 19 Ndeporayvua ma yvate ete va'e,
 nerenonde ojererokyjea rupi ikuai va'e pe rexa uka aguã rereko va'e.

[†] 30:11 Ajukue vaikue py ha'e kuery onhemonde 'rã ipy'a vai vy (Mateus 11.21).
 omano jave (Lucas 23.46).

* 31:5 Kova'e ayvu rupi Jesus Cristo ijayvu kuruxu re

- Ha'e va'e ma rexa uka 'rā avakue ra'y kuery gui ndere onhemi va'e kuery pe anho.
²⁰ Ha'e kuery renhomi 'rā ndejee ae avakue ojapo vaixea gui.
 Ha'e py renhomi 'rā opa marāgua ayvu gui.
²¹ Ta'ima'endu'a porāa SENHOR re!
 Mba'eta xemboaxy ete
 petei tetā py xejokopaa ramo.
²² Xee ajapura reve
 “Navaēvei ma 'rā nerenonde py” ha'e va'ekue.
 Ha'e rami tei ndee rendu ajapukaia,
 xereraa jepe aguā re ajapukai ramo.
²³ SENHOR pegua iky'a e'ŷy va'e ha'e javi, peayvu ke.
 SENHOR ndoity ukai 'rā hexe ojerovia va'e.
 Ha'e rā heko vai va'e ma ombopaga vaipa 'rā.
²⁴ SENHOR pearō va'e kuery,
 penembaraete ke, pendepy'a guaxu tema!*

32

- Ojejavyague omboguepa rire oguerovy'aa ague*
 Mboraeirā Davi ombopara va'ekue nhanembo'e aguā.
¹ Ovy'a ete 'rā heko vaiague omboguepaa va'e,
 ojejavyague ojao'ipaa ma ramo.
² Ovy'a ete 'rā ava ixupe SENHOR “Heko vai va'e” nde'i ramo,
 ipy'a re onhenhomi aguā noī va'e.*
³ Xee ma ajejavyague namombe'ui teri jave
 xekāgue voi inhymave ovy ko'ē nhavō xepoaē ramo.*
⁴ Mba'eta ara py ha'e pyávy xere aendu va'ekue ndepo poyia.
 Ha'e ramo xembaraetea opa ovy kuaray puku py yy typaa rami.
⁵ Ha'e gui ma ajejavyague amombe'upa ndevy,
 xereko vaia nanhomivei.
 Xejeupe aipoa'e: “Amombe'u 'rā SENHOR pe xereko vaia.”
 Ha'e ramo remboguepa ajejavyague.
⁶ Ha'e ramo ndevyguā kuery ha'e javi tojapukai ndevy
 ndejou aguā ha'eve teria ja.
 Ha'e rami vy ha'e kuery re yy tyguaxu ovy tei ndoguerovy'i 'rā.
⁷ Ndee ma anhemiaty.
 Xereraa jepe 'rā ajexavaia gui,
 ha'e xereraa jepegue re remoi avy'a reve rogueroporaie aguā.
⁸ Aipo're: “Romo'arandu ha'e rombo'e 'rā tape reo aguā re.
 Ndere ama'ē ha'e romongeta 'rā.
⁹ Kavaju, mburika rami e'ŷy eme eiko.
 Ha'e kuery ijuru xā, e'ŷy vy hova regua reve vy 'rāe rereko.
 Ha'e rami e'ŷy ramo ndoikoi 'rā reipotaa rami” re.†
¹⁰ Heko vai va'e ma ojexavai ete 'rā.
 Ha'e rā SENHOR re ojerovia va'e ma omboaxya rupi 'rā ogueroko.
¹¹ Pendereko porā va'e, perovy'a ke SENHOR, pevy'a ete.
 Pevy'aa rupi peporaie atā,
 pendepy'a re teko porā oia va'e ha'e javi.

33

- Opa mba'e moingoare ha'e opena va'e pe oporaiea*
¹ Pendereko porā va'e, perovy'a SENHOR!
 Anhetē rupi ikuai va'e ogueroporaiea ma ha'eve va'e.
² Penema'endu'a SENHOR re ixā reta va'e reve pembojoguy vy.
 Ixupe peporaie mbaraka dez ixā va'e reve.
³ Pemonthendu mboraei pyau,
 pembopu ke pevy'aa rupi.*
⁴ Mba'eta SENHOR ayvu ma anhetē ete va'e,
 ha'e mba'emo ojapoa ha'e javi rupi ojeroviapy oiko.
⁵ Oguerovy'a 'rā heko porā ha'e ha'evea rami joguereko va'e.
 Yvy jave re oi SENHOR porayvua.

* 31:24 1 Corintios 16.13 * 32:2 Romanos 4.4-8 * 32:3 Davi ojejavyague ha'e onhemombe'uague re ijayvua ma 2 Samuel 11.1-12.14
 † 32:9 Apy ma Nhandeuete ijayvu nhandevy. * 33:3 Apocalipse 5.9, 14.3

- 6 Yva ma oayvu py rive ojapo raka'e,
ijayvuê gui yva regua ha'e ikuai.
- 7 Yy avi omboaty raka'e ye'ê tuvixa va'erã,
ono'õ reta vy omonyê hendarã va'ekue.
- 8 Yvy jave re pendekuai va'e, pemboete SENHOR.
Yvy re pendekuai va'e ha'e javi, henonde pejererokyjea rupi pendekuai.
- 9 Mba'eta ijayvu ramo rive opa mba'e ojekuaa,
ha'e ijayvua rupi opa mba'e oiko raka'e.*
- 10 SENHOR omboaxa rivepa 'rã yvy regua kuery onhembopy'a okuapy,
ombovaipa 'rã ha'e kuery ojapoxe va'e.
- 11 Ha'e rã SENHOR onhembopy'aa ma ndoaxa rivei 'rã raka'e rã peve guarã,
opy'a re omoĩ va'e oĩ 'rã ta'y jevy-jevy ikuai peve.
- 12 SENHOR pe "Oreruete" he'i va'e regua ma ovy'a ete 'rã,
ojeupe guarã ae oiporavo rire.
- 13 Yva gui SENHOR oma'ê oiny vy
oexapa 'rã avakue ra'y kuery ikuai.
- 14 O'amba gui oexapa yvy regua kuery.
- 15 Peteĩ-teĩ kuraxõ apoare
oexapa ha'e kuery ojapo va'e ha'e javi.
- 16 Nda'ipoi huvixave oxondaro kuery po'akaa rupi oo jepe va'erã,
ojerovia rei va'e teĩ ombaraetea py rive ndoo jepei 'rã.
- 17 Kavaju voi nanhombopo'akai 'rã.
Imbaraete teĩ ndogueraa jepei 'rã avave rei.
- 18 Ha'e rã SENHOR ma oma'ê 'rã oiny henonde ojererokyjea rupi ikuai va'e re,
omboaxy aguã oarõ okuapy va'e re.
- 19 Ha'e kuery rekovea ogueraa jepe 'rã omanoa gui,
karuai jave voi opena 'rã okuave aguã rami.
- 20 Nhanenhe'ê py nharõ SENHOR nhanepytyvõ aguã,
nhanderepya ha'e mba'emo vai jokoa oiko ramo.
- 21 Hexe ae nhanekuraxõ ovy'a 'rã,
hery icy'a e'ỹ va'e re jajerovia ramo.
- 22 SENHOR, orerereko ke oremboaxya rupi,
ndee ae roarõ ramo.

34

*"Peikuaa pota SENHOR porayvua re", he'ia
Abimeleque renonde Davi inhakã porã e'ỹa rami onhemoingo ramo omoxê jave oo vy mboraeirã ombopara
va'ekue (1 Samuel 21.10-15).*

- 1 Ára nhavõ xema'endu'a porã 'rã SENHOR re.
Ixupe aporaei riaa 'rã.
- 2 Xenhe'ê py voi aporaei 'rã SENHOR pe.
Ha'e ramo yvyĩgue'i oendu vy ovy'a 'rã.
- 3 Pemboete ke SENHOR xereve,
peteĩ rami jarovy'a hery.
- 4 SENHOR pe ajapukai ramo xere opena karamboae.
Xereraa jepe guive akyjea ha'e javi gui.
- 5 Pema'ê hexe, ha'e ramo penemoexakã 'rã.
Pendere noĩvei 'rã pexĩmbaa.
- 6 Xee ajexavai vy ajapukaia SENHOR oendu vy
xereraa jepe karamboae opa mba'e py aiko axya gui.
- 7 SENHOR renonde ojererokyjea rupi ikuai va'e yvyry ma
ixuguigua anjo oiko ogueraa jepe aguã.
- 8 Peikuaa pota pexa aguã SENHOR porayvua.
Ovy'a ete 'rã hexe onhemi va'e kuery.
- 9 SENHOR rembiporavo pendekuai va'e, pendekuai henonde pejererokyjea rupi,
mba'eta ha'e rami ikuai va'e pe ndoatai 'rã mba'eve rei.
- 10 Guary ra'y kue'iry ojexavai ha'e oendu 'rã karuai.
Ha'e rã SENHOR oeka va'e pe ma mba'emo porã ndoatai.
- 11 Xera'y kuery, peju ke, pejapyxaka xeyvuu re.
Xee rombo'e 'rã SENHOR renonde pejererokyjea rupi peiko aguã re.
- 12 Peê kuery tu pendekove reve peikoxe
ha'e peikove pukuxe, iporã va'e rupi pevy'a aguã?
- 13 Ha'e rami ri vy pejoko peneapekũ mba'emo vaia rupi pendeayvua gui,

* 33:9 Hebreus 11.3

- pendejuru guive pejoko apu gui.
 14 Pejepe'a mba'emo vai gui, iporã va'e rupi anho peiko.
 Peka peteĩ rami pendekuai aguã, penhea'ã ha'e rami aguã re ae.
 15 Heko porã va'e re SENHOR oma'ê 'rã oiny,
 ojapyxaka oendu aguã ojapukaia.
 16 Ha'e rã mba'emo vai apoa ma SENHOR ndoexaxei,
 yvy gui omboguepa 'rã ha'e kuery re ima'endu'aa.*
 17 Ha'e rã heko porã va'e ojapukai ramo ma SENHOR oendu 'rã,
 ogueraa jepe 'rã oiko axya ha'e javi gui.
 18 SENHOR nonhemombyryi 'rã opy'a py nda'evei va'ea gui,
 ogueraa jepe 'rã onhe'ê py ojexavai va'e.
 19 Mbovykue rei e'y 'rã oiko heko porã va'e ojexavai aguã.
 Ha'e rami teĩ SENHOR ogueraa jepe 'rã ha'e nunga ha'e javi gui.
 20 Opena 'rã ikãgue ha'e javi re,
 neĩ peteĩ ma nomopê ukai 'rã.*
 21 Teko vai ae ojuka 'rã heko vai va'e.
 Heko porã va'e ndoayvui va'e kuery ombopagaa 'rã.
 22 Ha'e rã guembiguai kuery rekove ma SENHOR oepy 'rã.
 Hexe ojerovia va'e regua peteive nombopagaai 'rã.

35

Hovaigua kuery ombopaga aguã re ojerurea ague

Mboraeirã Davi ombopara va'ekue.

- 1 SENHOR, emoingo axy ke xemoingo axy va'e kuery,
 epu'ã xere opu'ã va'e re.
 2 Eru hu'y joko ha'e nemo'aa tuvixa va'e,
 epu'ã ejuvy xerepy aguã.
 3 Eru hu'y guaxu,
 ha'e ejoko xerakykue monhaa kuery.
 Xenhe'ê pe aipo're:
 "Xee ma ndereraa jepea."
 4 Tove xejukaxe okuapy va'e nda'evei nho ta'ikuai ha'e toxĩmba.
 Xere ijayvu mbegue rei va'e toguevipa oxĩmba reve.
 5 Ta'ikuai mba'emo pire vyty omboveve heravy va'e rami,
 SENHOR-a guigua anjo omondyipa ramo.
 6 Tojevy ju tape kyjea yxyi va'e rupi,
 ha'e SENHOR-a guigua anjo toakykue monha.
 7 Mba'eta mba'e py e'y ha'e kuery xembo'axe okuapy nhuã py,
 mba'e py e'y yvy ojo'o xerekovea oipe'a aguã.
 8 Ha'e ramo xerovaigua kuery tokanhyimba xapy'a
 noexa'ãvei ma jave.
 Ha'e kuery ae to'a nhuã nhemi rupi ojapo va'ekue py.
 Ha'e va'e py ae ho'a vy tokanhy.
 9 Ha'e ramo xenhe'ê py xee avy'a 'rã SENHOR re,
 xereraa jepeague re xema'endu'a 'rã.
 10 Xerete ha'e javi py aipoa'e 'rã:
 " SENHOR, mava'e nda'u ndee rami guarã oiko?
 Mba'eta ndee ma ojexavai va'e reraa jepe 'rã imbaraeteve va'e gui.
 Ndovy'ai va'e ha'e iporiaukue'i reraa jepe 'rã imbojexavaia kuery gui."
 11 Heko vai va'e kuery opu'ã vy
 xere ijayvu 'rã xee aikuaa va'e rupi e'y.
 12 Mba'emo porã ajapogue rekovia mba'emo vai ha'e kuery ojapo xere,
 xerekove omokanhyxe vy.
 13 Ha'e gui xee ma ha'e kuery imba'eaxy ramo
 ajukue vaikue py anhemonde va'ekue.*
 Xepy'a vai aikovy va'ekue akaru e'y re,
 xeakã amboguejy reve anhembo'e ainy.
 14 Ha'e kuery re xepy'a vai aikovy xeirũ ae'i re rami, xeryvy re rami ae.
 Jexavai gui ajero'a rei'i aikovy oxy re ojae'o va'e rami.
 15 Ha'e rã xee anhepyxanga ramo
 ha'e kuery ovy'a vy onhemboaty okuapy xerovai.

* 34:16 1 Pedro 3.9-12 * 34:20 Kova'e ayvu rami vy Jesus omano jave ikãgue nomopẽai (João 19.28-37). * 35:13 Ajukue vaikue py onhemonde 'rã ipy'a vai vy (Salmo 30.11; Mateus 11.21).

- Omboetepy e'ÿ neĩ xee aexa va'ety e'ÿ ijayvu rei okuapy xere.
- ¹⁶ Ngarua py opa marã ovy'a va'e rami
ha'e kuery haĩ jekyty okuapy xere.
- ¹⁷ SENHOR, raka'e peve 'rã tu rema'ẽ rive?
Eraa jepe xerekove ha'e kuery ipoxya gui,
guary kuery gui epy xerekove.
- ¹⁸ Ha'e ramo xee roguerovy'a 'rã heta va'e kuery ijatya py.
Ndevy aporaei 'rã heta mbyte.
- ¹⁹ Ha'e rã ndaxerayvui rive va'e ma tovy'a reive eme.
Mba'e py e'ÿ xere nda'ija'ei va'e toxapymi reive eme.*
- ²⁰ Peteĩ rami ikuai aguã re e'ÿ ae ha'e kuery ijayvu.
Ha'e rami 'rãgue py vyv re ikuai rive'i va'e ombotavy aguã re anho jogueroayvu okuapy.
- ²¹ Ijuruja-rujai 'rã okuapy xere.
Ha'e vy aipoe'i 'rã:
"Jajopy ma, jajopy ma teve!
Mba'emo ojapo rã nhandereha py ae jaexa."
- ²² Ha'e rami teĩ ndee SENHOR rexa reĩny ha'e kuery ikuai.
Ha'e rami vy ekyriri eme.
SENHOR, ejepe'a eme xea gui.
- ²³ Emyĩ, evy ke xemboeko porã aguã.
Xe-SENHOR Xeruete, eikuaa uka xereko porãa.
- ²⁴ SENHOR Xeruete, xereko re eikuaa pota ndereko porãa rupi.
Ejapo eme xere ha'e kuery ovy'a rei okuapy aguã rami.
- ²⁵ Ha'e kuery aipo te'i eme opy'a py:
"Aÿ ma oiko ma jaiopotaa rami!
Aÿ ma nhamomba 'rã!" te'i eme.
- ²⁶ Ha'e rami 'rãgue py toximba, tojekuaa heko vaia
ajexavai rã ovy'a rei okuapyague re.
Ta'ikuai oximba ete va'e
xerovai onhemboyvate rei rire.
- ²⁷ Ha'e rã xereko porãa oguerovy'a va'e ma
toporaei okuapy ovy'aa rupi.
Ha'e kuery ma aipo te'i riae: "Omboetepy toiko SENHOR,
hembiguai kuery ikuai porã rã ovy'a va'e."
- ²⁸ Xee avi xeyavu reve xema'endu'a 'rã ha'evea rami rejapoa re.
Ára pukukue re aporaei 'rã ndevy.

36

*Avakue reko vaia ha'e Nhandereha reko porãa re ijayvu
Jogueroporaei va'e pe Davi SENHOR rembiguai ombopara va'ekue.*

- ¹ Heko vai va'e py'a re ma oĩ heko vaixea anho.
Ha'e kuery re noĩ SENHOR renonde ojererokyje aguã.*
- ² Mba'eta teko vai ojapo 'rã ojejou porã rei aguã rami rive.
Ha'e vy aipoe'i 'rã ojeupe: "Opa marã aiko teĩ avave rei ndoikuaai 'rã,
neĩ ndaxejou vai 'rã guive", he'i teĩ.
- ³ Ijuru gui ayvu oẽ va'e ma ayvu vai anho, ha'e nhombotavyarã.
Hi'arandua rupi ve'ÿ oiko, joupe ndojapo porãvei ma guive.
- ⁴ Ngupa py voi opa mba'e vai re rive onhembopy'a.
Tape iporã e'ÿ va'e rupi anho ooxe,
ndojejokoi guive mba'emo vai py.
- ⁵ Ha'e rã ndee SENHOR, ndeporayvua ma yva peve 'rã oo,
arai peve 'rã oo ojeroviapy reikoa.
- ⁶ Ndereko porãa ma ndevyguu vyvty rami tuvixa,
ha'e gui ne'arandua ma vyvkua puku rami.
Ndee SENHOR rejapo 'rã avakue ha'e mymba okuave aguã rami.
- ⁷ Xeruete, ndeporayvua ma ha'eve ete!
Ha'e nunga rupi ae avakue ra'y kuery onhemi 'rã ndepepo 'ã py.
- ⁸ Ndero py orerevyatã 'rã mba'emo porã re anho,
ha'e rã roy'u aguã ma orembovy'a va'e anho reme'ẽ.
- ⁹ Mba'eta ndere ae oĩ yvu tekove me'ẽa.
Nerexakãa py anho roexa 'rã hexakã va'e.
- ¹⁰ Ndekuaa va'e kuery pe exa uka riae reayvua,

* 35:19 João 15.25 * 36:1 Romanos 3.18

- ha'e ndereko porāa eikuaa uka anhetē rupi ipy'a va'e pe.
 11 Ojee rive ojerovia va'e kuery topyrō eme xere,
 neī heko vai va'e tojapo eme ajepe'a aguā rami.
 12 Mba'eta teko vai rupi ikuai va'e ho'apa 'rā.
 Ha'e kuery ho'aague gui nopy'āvei 'rā guive.

37

- “Heko vai va'e ovy'aa opa voi 'rā” he'ia
 Mboraeirā Davi ombopara va'ekue.
 1 Heko vai va'e kuery rexa teī eroangeko eme,
 ejou vai eme guive joapo vai rei va'e oguerekopa ramo.
 2 Mba'eta ha'e kuery ma are'ȳ re ipiru 'rā nhuū rami,
 jai rogue pyau ipirua rami 'rā okanhy.
 3 Ejerovia SENHOR re, ndereko porā tema.
 Eiko tema yvy re, anhetē va'e re anho eī atā.*
 4 SENHOR ae erovy'a.
 Ha'e ramo ha'e ojapo 'rā ndepy'a py reipotaa oī va'e.
 5 SENHOR po py emboaxa reikoa, hexe ejerovia guive.
 Ha'e ramo ha'e ojapopa 'rā.
 6 Ha'e vy ojapo 'rā ndereko porāa tataendy rami ojekuaa aguā,
 anhetē rupi reikoa oikuaa uka 'rā kuaray mbyte rami.
 7 Epytu'u ke SENHOR re, ha'e earō.
 Eroangeko eme avakue mamō rā ooa rupi ojoupa ramo,
 neī joapo vaixea rupi ikuai ramo voi.
 8 Ejepe'a ndevaia gui, ndepoxyve eme.
 Nda'evei opa marā ndepy'a aguā.
 Ha'e rami e'ȳ vy ndee ju 'rā ndereko vai.
 9 Mba'eta heko vai va'e ma omombaa 'rā.
 Ha'e rā SENHOR oarō va'e ma ikuai porā 'rā yvy re.
 10 Are'ȳ'i re heko vai va'e ndoikovei 'rā.
 Oīague py reka teī nderejouvei 'rā.
 11 Ha'e rā oiko rive'i va'e ma ikuai porā 'rā yvy re,
 ha'e kuery ovy'a 'rā okuapy ikuai porā aguā ojou vy.*
 12 Heko vai va'e onhembopy'a 'rā heko porā va'e rovai,
 haī jekyty 'rā ojukaxe vy.
 13 Ha'e rami teī SENHOR ojojai 'rā,
 opaga aguā ára ovaē rai'i maa oikuaa vy.
 14 Heko vai va'e kuery oekyi okyxe, guapa guive oipira 'rā
 ojuka aguā iporiaukue'i ha'e ojexavai rei va'e,
 ojuka aguā tape porā rupi oiko va'e.
 15 Ha'e rami teī ikyxe py ae 'rā oikutua ipy'a re,
 hapa avi omopēmbaa 'rā.
 16 Peteī heko porā va'e mbovy'i oguereko teī
 mbovy e'ȳ heko vai va'e oguerekopa va'e gui ovareve.
 17 Mba'eta heko vai va'e po'akaa ma omombaa 'rā.
 Ha'e rā heko porā va'e re ma SENHOR onhangareko.
 18 SENHOR oikuaa anhetē rupi oiko va'e oikoa,
 ha'e kuery pegua ma raka'e rā peve guarā oī.
 19 Mba'emo vai oiko teī ha'e kuery noxĩmbai 'rā,
 karuaia ára teī hevayatāmba 'rā.
 20 Ha'e rā heko vai va'e ma okanhymba 'rā.
 Nhuūndy rami 'rā SENHOR rovaigua kuery okanhymba,
 hataxīrā rive nhuū okai vy ojeapoa rami.
 21 Heko vai va'e ma oiporu aguā re ojerure teī nomboekovia'i 'rā.
 Ha'e rā heko porā va'e ma nhomboaxy vy ome'ē rive 'rā mba'emo.
 22 SENHOR ogueroayvu porā va'e hekoa 'rā yvy re.
 Ha'e rā ijayvu vaia va'e ma okanhymba 'rā.
 23 Heko porā va'e SENHOR oikoa oguerovy'a vy
 ojapo 'rā oī atā aguā rami.
 24 Ha'e kuery ho'a teī nda'itui 'rā yvy rupi,
 ipo re SENHOR ojopy rā.
 25 Xekunumi va'ekue rí aỹ ma xetuja'i ma

* 37:3 Apy “Yvy” he'ia ma ojeuegua kuery pe Nhanderuete oja va'ekue re ijayvu vy.

* 37:11 Mateus 5.5

- va'eri xee ndaexai teri heko porā va'e re nopenaai rā,
neī hamymino kuery voi mbojape re ojerurea rupi ikuai rā ndaexai.
- 26 Ha'e kuery joayvua rupi vy oiporuka 'rā joupe.
Hamymino kuery voi joapo porā va'e ikuai.
- 27 Ejepe'a ke mba'emo vai gui,
ejapo iporā va'e anho.
Ha'e rami vy reiko riae 'rā.
- 28 Mba'eta SENHOR oguerovy'a heko porā va'e.
Ndoeja rivei 'rā ojeupeguaiky'a e'ŷ va'e kuery.
Ha'e kuery re opena 'rā raka'e rā peve guarā.
Ha'e rā heko vai va'e ramymino kuery ma omombaa 'rā.
- 29 Heko porā va'e kuery ikuai porā 'rā vvy re,
ha'e py ikuai 'rā raka'e rā peve.
- 30 Heko porā va'e ijayvu 'rā arandu re,
anhetē rupi meme 'rā ijayvu.
- 31 Opy'a re omōi 'rā Nguete guigua lei.
Na'ikangyi 'rā guive oikoa rupi.
- 32 Heko porā va'e re ma heko va'e va'e ojukaxe vy
oma'ē mbegue teī
- 33 SENHOR nomboaxai 'rā ipo py,
nombopaga ukai 'rā guive omboayvua rā.
- 34 Earō ke SENHOR, ha'e ixugugua tape rupi eiko.
Ha'e ramo nemboyvate 'rā vvy re reiko porā aguā,
ha'e rexa 'rā heko vai va'e omombaa rā.
- 35 Xee aexa va'ekue heko vai va'e ipo'akaa,
yary Lfano regua rami ipo'akave ovy opa rupi.
- 36 Ha'e gui teīgue ju aaxa vy ama'ē rā okanhy ma ra'e.
Aeka teī ndajouvei ma.
- 37 Eikuaa pota ke anhetē rupi ikuai va'e re,
exa pota heko porā va'e oikoa re.
Mba'eta mby'a porā re ikuai va'e ogueroko 'rā guamymino kuery.
- 38 Ha'e rā ojejavypa rei va'e ma omombaa voi 'rā.
Heko vai va'e ramymino kuery voi omombaa 'rā.
- 39 SENHOR gui ae ou heko porā va'e oo jepe aguā.
Ha'e kuery ojexavaia ára py hexe onhemi aguā onhemoī.
- 40 SENHOR oipytyvō ha'e ogueraa jepe 'rā,
heko vai va'e po gui oipe'a 'rā ogueraa jepe vy,
hexe onhemi ramo.

Ojejavvyague gui ojeko rerovaa rupi ijayvua ague
Mboraeirā Davi ombopara va'ekue nhomoma'endu'a aguā.

38

- 1 SENHOR, ndepoxya rupi e'ŷ ke xemongeta,
ndeavaia rupi e'ŷ ke xembopaga.
- 2 Mba'eta xere nderu'y onhexyvō ae,
ha'e ndepo poyi xe'áry oī.
- 3 Ndepoxy ramo xero'o naexaivei,
kekāgue voi naexaivei ajevavyague re.
- 4 Mba'eta xekā áry peve ajevavyague oo,
ndaropo'akavei guive mba'emo ipoyi va'e rami.
- 5 Xeai ivaipa rei, ipeupa ma ovy,
ajekoreague re.
- 6 Ojero'a rei va'e rami anhenhandu naxembaraetevei vy.
Xepy'a vai rei aikovy ára pukukue re.
- 7 Xekupe oiko'ō rei,
noīvei ma xero'o rexaīa.
- 8 Ajexavaī aikovy, naxembaraetevei ma.
Xepy'a py nda'evei ete vy xepoaē aikovy.
- 9 SENHOR, xee aipota va'e ha'e javi ndevy pe meme amboaxa,
xepoaēa nerendu e'ŷi 'rā.
- 10 Xekuraxō ma otyty atā xembaraetea opa ramo,
ndaxerexa pyxovei guive.
- 11 Xereve xeirū kuery ikuai va'ekue ojepe'apa ma xemba'eaxya gui,
xeretarā kuery voi onheguaēmba.

- 12 Xerekove oipe'axe va'e onhembopy'a okuapy xejopy aguã,
xevy ojapo vaixe va'e opa marã ijayvu okuapy,
ára pukukue re oikuaa pota xembotavy aguã re.
- 13 Ha'e rami teĩ xee ma ijapyxa e'ỹ va'e rami aendu rive,
ijayvu e'ỹ va'e rami nambovai.
- 14 Oendu e'ỹ va'e rami ajeapo,
xejuru ndaibe'ai ambovai aguã.
- 15 Mba'eta SENHOR, ndee ae roarõ.
SENHOR Xeruede, ndee ma xere reikuaa pota 'rã.
- 16 Mba'eta aipoa'e jepi: "Ha'e kuery tovy'a rei eme xere,
xepyxyry rã xerovai opu'ã rei e'ỹ aguã", ha'e.
- 17 Mba'eta xee ha'a aguã rami aiko,
xejee nda'eveia aendu riae tema.
- 18 Ha'e rami vy amombe'u xereko vaia.
Ajevavyague py aendu mboriau.
- 19 Ha'e rã xerovaigua kuery ma hexaĩ ha'e imbaraete.
Heta ikuai mba'e py e'ỹ xere nda'ija'ei va'e.
- 20 Ha'e rami ae ikuai ojapo porã va'ekue pe ojapo vai va'e.
Xerovaigua ikuai, teko porã rupi aiko rã.
- 21 SENHOR, xepytyvõ e'ỹ eme.
Xeruede, ejepe'a eme xea gui.
- 22 SENHOR, xereraa jepea,
ejapura ke xerepy aguã.

Imarãa re ijayvua

Jogueropora'ei va'e Jedutum pe Davi ombopara va'ekue.

39

- 1 Xeupe ae aipoa'e va'ekue: "Aỹ aiko kuaa pota 'rã
xeayvu py ajevavy e'ỹ aguã.
Amboty 'rã xejuru,
heko vai va'e xerenonde ikuai jave" ha'e va'ekue.
- 2 Ha'e rami vy akyriri, neĩ iporã va'e rupi voi ndaxeayvivei.
Ha'e rami teĩ haxy aenduve tema.
- 3 Xepy'a re aendu tata rami hendy va'e.
Ha'e aikuaa pota rã hendyve ovy.
Ha'e ramo xee anhemombe'u vy aipoa'e:
- 4 " SENHOR, eikuaa uka ndaikovei aguã ára,
ha'e mbovy ára ete'i ma 'rã pa aiko,
xemarãa aikuaa aguã.
- 5 Ndee aikoa ára reme'ẽ va'ekue mokoĩ, mboapy po puku-a'i rami ipuku aguã.
Nerenonde aikoa opa rive va'erã.
Anhetẽ ae avakue ha'e javi oĩ atãve va'ekue teĩ mba'e e'ỹ meme ikuai.
- 6 Ha'e rami ae avakue oaxa 'rã ovy kuaray'ã rami.
Heko eta reia mba'everã ndovarei.
Ojeupe guarã opa marãgua omoĩ porã teĩ ndoikuaai guive mava'e 'rã pa ogueraa.
- 7 Ha'vy xee, SENHOR, mba'e tu xee arõ?
Ndee ae xee roarõ va'e.
- 8 Xereraa jepe ke xereko vaiague ha'e javi gui.
Xembojaru uka eme heko vai va'e pe.
- 9 Akyriri ha'e ndaxeayvui va'ekue
ndee ae ha'e rami xemoingo ramo.
- 10 Eipe'a ke xegui ndee xemoingo axya.
Ndepo ipoyi ramo akanhy ma avy.
- 11 Avakue ojevavyaague re ndeayvu ete ha'e rembopaga vy
rembovaipa 'rã ha'e kuery oguerovy'a va'ekue, vixo'i mba'emo ho'upaa rami.
Avakue ikuai va'e ma opa rive va'erã meme.
- 12 SENHOR, endu ke ajerurea.
Xerepy aguã re ajapukai ramo ejapyxaka.
Ekyriri eme xerexay rã rexa vy,
mba'eta nerenonde ma mombyry guigua rami rive aiko,
oguata rei va'e aiko xeru kuery ikuaiague rami avi.*
- 13 Eikuaa potave eme xere,

* 39:12 Hebreus 11.13; 1 Pedro 2.11

akanhy avy e'ÿ re avy'a ju aguã."

Salmo 70.1-5

Jogueropora ei va'e pe Davi ombopara va'ekue.

40

- ¹ Arõ SENHOR ajerovia ete reve.
Ha'e ramo xere oikuaa pota vy
oendu xereraa jepe aguã re ajapukaia.
- ² Ha'e rami vy xerenõ vyvkua py akanhyague gui,
yapo hu'ũ rei va'e mbyte ha'aague gui.
Ha'e gui xepy omoĩ atã ju itaova áry.
- ³ Ha'e xejuru py omoĩ mbora ei pyau
Nhanderuete arovy'a aguã.
Ha'e nunga heta oendu vy
ojerokyje 'rã SENHOR renonde, hexe ojerovia 'rã guive.
- ⁴ Ovy'a ete 'rã SENHOR re ojerovia oikovy va'e.
Ha'e kuery nda'ikuai 'rã ojee anho rei ojerovia va'e rami,
neĩ apu rupi oiko va'e rami guive.
- ⁵ SENHOR Xeruete, heta ete ikuai iporã va'e remoingo va'ekue,
orevy rejapo porã aguã re ndepy'aa guive.
Ndereve joo ramigua ndoikoi.
Ndereko ha'e javi amombe'u ta va'e rire
namombe'upai 'rãgue.
- ⁶ Ndee ndereipotai mymba ajuka vy ame'ẽ ndevy.
Neĩ mba'emo apy reve jejavya regua nereme'ẽ ukai.
Ha'e rami 'rãgue py reipe'a xeapyxa.
- ⁷ Ha'e ramo xee aipoa'e: "Apy ma aĩ.
Kuaxia re ipara oiny xerekorã regua.
- ⁸ Ndee reipota va'e xee ajapoxe, Xeruete.
Xepy'a re oĩ ndeguigua lei ajapo aguã", ha'e.*
- ⁹ Heta va'e kuery ijatya py
amombe'u ayvu porã teko porã regua.
Neĩ peteĩ henda py ma voi namombe'u e'ÿi.
SENHOR, ndee ma reikuaa.
- ¹⁰ Xepy'a py ndaikuaa uka e'ÿi ndeguigua teko porã.
Arojapukai anhetẽ rupigua ha'e orereraa jepea reikoa.
Ijaty va'e kuery gui namombe'u e'ÿi ndee oremboaxya ha'e ndeguigua anhetẽ va'e.
- ¹¹ Ha'e nunga rupi SENHOR, exa uka e'ÿ eme xemboaxya.
Xemboaxya rupi riaa ke xerereko,
ndeguigua anhetẽ va'e rupi guive.
- ¹² Mba'eta mbovy e'ÿ ikuai mba'emo vai xejoko rei va'e.
Xereko vaia xerupity ma.
Heta ete ramo ndaexapai.
Xe'a xeaã re ikuai va'e gui voi hetave.
Xekuraxõ voi okanhy ma.
- ¹³ SENHOR, xereraa jepe na!
SENHOR, ejapura ke xerepy aguã.
- ¹⁴ Xerekove oipe'axe va'e toxĩmba,
oxĩmba anho toendu.
Ajexavai ramo ovy'a rei va'e kuery
oxĩmba reve tojevypa ju guakykue katy.
- ¹⁵ Tove "Ha'veea rami! Ha'veea rami!" he'i rive okuapy va'e
toxĩmba nda'ijayvu kuaavei vy.
- ¹⁶ Ha'e rã ndereka va'e kuery ha'e javi ma tandererovy'a opora ei reve.
Rejogueraa jepea oguero vy'a va'e
" SENHOR ima'endu'a porãmby toiko!" te'i riaa okuapy.
- ¹⁷ Ha'e gui xee ma iporiaukue'i, ojexavai rei'i va'e
teĩ xere SENHOR opena porã.
Ndee ma xepytyvõarã ha'e xerepyarã.
Xeruete, ndeare eme kel!

Hovaigua kuery ijayvu reia gui Nhanderuete oepiyague re ijayvua
Jogueropora ei va'e pe Davi ombopara va'ekue.

* 40:8 Hebreus 10.5-10

41

- ¹ Ovy'a ete 'rā iporiaukue'i mboaxya kuery.
Ha'e va'e kuery SENHOR ogueraa jepe 'rā nda'eveia ára.
- ² SENHOR oepy ha'e opena porā 'rā hekovea re.
Ojapo 'rā yvy re ovy'a aguā rami.
Nomboaxai 'rā hovaigua kuery po py ojavyky rei aguā.
- ³ SENHOR omombaraete ju 'rā imba'eaxya gui.
Imba'eaxy teĩ hupa ituia rejapo ha'eve rei'i aguā rami.
- ⁴ Ha'e gui xee aipoa'e: “ SENHOR, xemboaxy ke!
Emonguera xerekovea, ndevy ajevavy rire teĩ” ha'e.
- ⁵ Xerovaigua kuery xere ijayvu vai vy
“Raka'e tu omano 'rā, ha'e hery na'ima'endu'aavei 'rā?” he'i okuapy.
- ⁶ Ha'e kuery regua xerexa aguā ou vy ovare'ỹ va'e rupi 'rā ijayvu.
Opy'a re mba'emo vai anho omoi.
Oẽ vy ha'e nunga re teri rive 'rā ijayvu.
- ⁷ Ndaxerayvui va'e kuery ijayvu mbegue rei 'rā xere.
Mba'emo vai rupi xere ijayvu vy
- ⁸ “Mba'eaxy vaikue hexe oĩ va'e gui rima imba'eaxy oupy,
nupu'avei ma 'rā guive” he'i okuapy.
- ⁹ Xeirũ ayvuvu vy ajeroviave va'ety voi
opu'ã avi xerovai, xereve okaru va'ety ae.*
- ¹⁰ Ha'e rā ndee SENHOR xemboaxy ke.
Xemopu'ã ju, ha'e kuery amompaga aguā ojapo vaiague re.
- ¹¹ Ha'e nunga rupi xee aikuaa ndee xemboaxya,
mba'eta xerovaigua kuery pe ndaxereity ukai.
- ¹² Ha'e rami 'rāgue py anhetẽ rupi aikoa py xemombaraete,
ha'e xemoi nerenonde raka'e rā peve guarã.
- ¹³ SENHOR Israel kuery Ruete toiko ima'endu'a porãmby
jypy'i guive raka'e rā peve.
Amém, amém.

Nhanderuete ombojeroviaaty py ooxea rami ijayvua ague
Jogueroporaie va'e pe Coré ra'y kuery nhombo'e aguā ombopara va'ekue.

42

- ¹ Yy oxyry va'e gui guaxu oy'uxe va'e rami
xenhe'ẽ py xee avi roeka, Xeruete.
- ² Xepy'a py aendu Nhanderuete re nda'evei etea, Nhanderuete oikove va'e re.
Raka'e nda'u aa 'rā Nhanderuete renonde aĩ aguã?
- ³ Ara py ha'e pyávy xerexay re anho aiko akaru e'ỹ re.
Ha'e ramia ja xevy aipo'ea riaie: “Mamo tu oĩ Nderuete?”*
- ⁴ Ymave rupi aikoaegue re xema'endu'a vy
xepy'a vai aikovy xenhe'ẽ py guive,
mba'eta xema'endu'a heta va'e kuery reve aa ague re.
Ajogueraa va'ekue Nhanderuete pegua oo katy.
Rovy'aa rupi rojapukai rovy va'ekue roporaie reve,
heta orekuai ngarua py.
- ⁵ Xenhe'ẽ, mba'e re tu ndeporiau ri?†
Mba'e re tu nda'evei rei rei xepy'apy py?
Earõ tema Nhanderuete, mba'eta aroporaie nho 'rā.
Ha'e ma Xeruete xepytyvõa oiko.
- ⁶ Xepy'a py aendu nda'evei etea.
Ha'e nunga rupi ndere xema'endu'a aikovy
Jordão yvýry aikoa py, Hermom vyty re ha'e Mizar yvy'ã'i re.
- ⁷ Peteĩ vyvkua gui onhendu amboae vyvkua peve ytu revovo.
Ha'e rami aendu ndeguigua yai xe'áry oaxa-axa va'e.
- ⁸ Ha'e rami teĩ ara nhavõ SENHOR oexa uka 'rā xemboaxya,
ha'e pytũ nhavõ ou 'rā ixupe aporaie aguã,
xenhe'ẽ Ruete pe anhembo'e aguã.
- ⁹ Nhanderuete xe'itaova pe aipoa'e:
“Mba'e re tu nderexarai xegui?”

* 41:9 Judas rekorã re ijayvu ma voi Jesus ombo'a uka nhemi aguã re (João 13.18-30).

* 42:3 Ipy'a vai aikovy mba'eta yvy mboae re heraa
escravo-rã, Nhanderuete pegua templo gui mombyry. Ha'e py ma ooxea oendu, Nhanderuete ombojerovixae vy. † 42:5 Apy “Xenhe'ẽ”
he'ia ojeupe ae ijayvu vy.

- Mba'e re tu ajexavai aikovy xerovaigua kuery xeavyky rei rã?" ha'e.
- ¹⁰ Mba'eta aendu xekãgue ha'ypa va'e rami,
xerovaigua kuery xere ijayvu rei ramo.
Ha'e kuery ijayvu vy
"Mamo tu Nderuete oĩ?" he'i okuapy.
- ¹¹ Xenhe'ê, mba'e re tu ndeporiau ri?
Mba'e re tu nda'evei rei reĩ xepy'apy py?
Earõ Nhanderuete, mba'eta aroporaei nho 'rã.
Ha'e ma Xeruete xepytyvõa oiko.

43

- Henda iky'a e'ỹ* va'e py ooexa rami ijayvua ague
- ¹ Xeruete, xemboeko porã ke
xere opu'ã va'e kuery gui.
Xereraa jepe avakue nhombotavy ha'e ijapu va'e gui.
- ² Mba'eta Xeruete, ndere ae anhemí.
Mba'e re tu naxepytyvõí?
Mba'e re tu ajexavai aikovy xerovaigua kuery xeavyky rei rã?
- ³ Emboguejy nerekakã ha'e anhetê va'e,
xereraa aguã ndevygua vyvty iky'a e'ỹ va'e áry
nembojeroviaaty oĩ va'e py.
- ⁴ Ha'e ramo aa aguã Xeruete pegua altar oĩa py,
Xeruete arovy'a va'e renonde.
Xeruete, rogueroporaei 'rã mba'epu ixã reta va'e amonhendu reve.
- ⁵ Xenhe'ê, mba'e re tu ndeporiau ri?
Mba'e re tu nda'evei rei reĩ xepy'apy py?
Earõ Nhanderuete, mba'eta aroporaei nho 'rã.
Ha'e ma Xeruete xepytyvõa oiko.

Nhanderuete pe ojepy ukaa ague
Jogueroporaei va'e pe Coré ra'y kuery nhombo'e aguã ombopara va'ekue.

44

- ¹ Oreruete, oreramoi kuery orevy omombe'u rã
roendu ma oreapyxa py
yma rupi rejapo va'ekue, ha'e kuery ikuai teri jave.
- ² Ha'e jave py ma ndepo py reipe'apa raka'e vvy regua kuery,
ikuaiague py oreramoi kuery ju remoi atã aguã.
Vvy regua kuery remoingo axy,
ha'e rã oreru kuery pe ma reme'ê opa rupi ikuai aguã.
- ³ Okyxe py e'ỹ ha'e kuery oipe'a vvy,
imbaraete vvy e'ỹ guive ipo'aka.
Ha'e rami 'rãgue py ndepo, ndejyva ha'e nderova rexakãa py
rembopo'aka raka'e ha'e kuery reayvu vy.
- ⁴ Xeruete, ndee ma xeruvixave.
Rejapo Jacó kuery ipo'aka aguã.*
- ⁵ Ndee orepytyvõ ramo orepo'aka 'rã oreroivaigua kuery re.
Nderery rupi ropyrõ 'rã orere opu'ã va'e re.
- ⁶ Xerapa re e'ỹ ajerovia,
xekeye e'ỹ guive xereraa jepe 'rã.
- ⁷ Mba'eta ndee anho oreroivaigua kuery gui orerepya reiko,
remoximba 'rã orere ija'e e'ỹ va'e.
- ⁸ Oreruete re ae rovy'a riae,
raka'e rã peve roporaei 'rã nderery rupi.
- ⁹ Ha'e rã aỹ ma ndee oremombo ma mombyry,†
ore kuery ju roximba aguã py oremoi.
Ndereovei guive orexondaro kuery reve,
- ¹⁰ oreapo guive oreroivaigua kuery gui ronhamba aguã rami.
Ha'e orere ija'e e'ỹ va'e kuery orereraa guembiguairã.
- ¹¹ Vexa'i rami oremboaxa ma orejuka aguã katy.
Oremoaimba vvy regua kuery mbyte rupi.
- ¹² Mba'eve re'ỹ guive remboekovia ndevygua kuery,

* 44:4 "Jacó kuery" he'ia ma Israel kuery re ijayvu vy. † 44:9 Apy ma ijayvu Nhanderuete ha'e kuery re hovaigua kuery ipo'aka aguã rami oejague re.

- hepykue re mba'eve rejou aguã e'ý guive.
 13 Ndee oreapo oreka katy'i ikuai va'e gui roximba aguã rami.
 Orembojere okuapy va'e orere ijavyu rei ha'e orejojai rei.
 14 Omombe'u pyrã rami oremo'i yvy regua kuery mbyte.
 Amboae regua oremboetea rupi e'ý ombovava-vava oakã.
 15 Axĩmbaa oĩ riae xere,
 xerova re axĩmbaa anho ojekuaa,
 16 aendu xembojaru rei va'e, ijavyu vaikue-ikue va'e ojapukai ramo,
 xerovaigua kuery xejukaxea aikuaa vy.
 17 Ha'e nunga ha'e javi orere oiko.
 Ha'e rami teĩ ndorerexarai ndegui,
 ndorojepe'ai guive ndereve guarã rejapo va'ekue gui,
 18 orepy'a py ndorojevuyi ha'ekue py,
 ndorojavuyi guive ndeguigua tape.
 19 Oremou'ũ ukapa jagua-tuvy nhe'ẽ ikuai py,
 ha'e manoa'ã py oreao'i.
 20 Oerueete rery gui orerexarai va'e rire,
 ha'e rami e'ý yvy tuuete ramigua rive pe orepo roupí va'e rire
 21 ha'e ramo nda'u Oerueete ndoikuaai 'rãgue teve?
 Ha'e ma nhandepy'a re oĩ va'e oikuaapa.
 22 Ha'e rami avi ndevyguia orekuai ramo ae
 ko'ẽ nhavõ oremboaxaa erejukaarã pe.
 Vexa'i ojukaa aguã katy heraa va'e rami orekuai.*
 23 Emyĩ ke! SENHOR, mba'e re tu reke?
 Ema'ẽ ju ke orere, orejou vai riae eme.
 24 Mba'e re tu nderejexa ukavei?
 Nderexarai teve roiko axy vy rojexavaia re?
 25 Mba'eta orerekovea ojexavai yvy ku'i peve,
 orerete voi yvy re oje'apa maa rami.
 26 Epu'ã ke orerepy aguã.
 Orereraa jepe ndeporavyua rupi.

Huvixarã Nhanderueete omoĩ va'e ha'e hambirekorã re ijavyua
 Jogueroporaie va'e pe Coré ra'y kuery nhombo'e aguã ombopara va'ekue. Mboraei mboravyu regua, "Yvoty lírio" he'ia py oporaieia rami oporaieia aguã.

45

- 1 Avvu porã anho oĩ xekuraxõ re.
 Huvixave peguarã ae kova'e mboraei ajapo.
 Ombopara porã kuaa va'e rami 'rã xeavyu.
 2 Ndee ma avakue ra'y kuery ikuai va'e gui neporãve va'e.
 Ndejuru gui avvu porã anho oẽ.
 Ha'e nunga rupi ae Nhanderueete nemoingo porã raka'e rã peve guarã.
 3 Ndepy'a guaxuve va'e, emoĩ ndejeje ndekyxex.
 Emoĩ avi ndeyvatea ha'e ndepo'akaa.
 4 Ndepo'akaa rupi tereo kavaju áry,
 anhetẽ va'e ha'e teko porã re vy.
 Ha'e gui ndepo reiporu kuaa regua ojapo 'rã nhomondyipaarã ojekuaa aguã rami.
 5 Oreruvixave, nderu'y ma hakua porã,
 nderovaigua kuery kuraxõ re oike 'rã.
 Ha'e ramo yvy regua kuery nenhe'ẽ rendua rupi 'rã ikuai.*
 6 Xerueete, ndepo'akaa ma raka'e rã peve 'rã oĩ.
 Ndepo'akaa py anhetẽ rupi 'rã rejoguereko.
 7 Rerovy'a teko porã, ha'e rã teko vai ma rejou vai.
 Ha'e nunga rupi ae Nhanderueete Nderueete huvixaverã nemoĩ vy
 neakã áry azeite omoĩ neirũ kuery gui ndererovy'ave vy.*
 8 Ndeao ma mirra, aloẽs ha'e cássia gui heakuã porãmba.
 Ndero ma marfim gui ojapo pyre.
 Opy ma onhendu 'rã ixã va'e pu nembovy'aaarã.
 9 Kunhague ikuai 'rã nerembiguai, huvixave rajy kuery guive.
 Reiporu kuaa regua re oĩ ndera'yxy,
 ouro iporãve va'e Ofir guigua py ombojegua pyre.

* 44:22 Romanos 8.36 * 45:5 Apocalipse 19.11-16 * 45:7 Hebreus 1.8-9

- ¹⁰ Xerajy, endu ke. Eikuaa pota xeayvua re.*
 Nderexarai ke neretarā kuery ha'e nderu ro pygua kuery gui.
- ¹¹ Ha'e ramo ma huvixave oguerovy'a 'rā neporāa.
 Ha'e ma nde-Senhor ramo
 henonde eĩ nerenapy'a re.
- ¹² Ndea py ou 'rā Tiro pygua rajy mba'emo ome'ẽ va'erā reve.
 Heta va'e kuery regua oguerekopave va'e ojerure 'rā reipytyvõ aguã.
- ¹³ Opy ma oĩ 'rā huvixave rajy pavẽ gui iporāve va'e.
 Ijao ma ouro guigua py ojegua va'e.
- ¹⁴ Ijao potypa va'e reve ogueroikea 'rā heruvy huvixave renonde.
 Irũ kunhataĩgue hakykue ou va'e ogueru 'rā oĩa py.
- ¹⁵ Ovy'a ete reve 'rā ogueru,
 huvixave ropy ogueroike 'rā.
- ¹⁶ Nderu kuery rekovia ndera'y kuery ikuai 'rā.
 Ha'e va'e kuery remoĩ 'rā huvixarā yvy jave re.
- ¹⁷ Xee ajapo 'rā nderery re ima'endu'aa riaie aguã rami.
 Yvy regua kuery ndereroporaei 'rā raka'e rā peve.
- Nhanderuede nhandemiaty imbaraeete va'e re ijayvua*
 Jogueroporaiei va'e pe Coré ra'y kuery kunhague oporaiei aguã ombopara va'ekue.

46

- ¹ Nhanderuede ma nhandemiaty imbaraeete va'e oiko,
 nhandereraa jepearã jajexavai jave nhandea'i pyve oĩ va'e.
- ² Ha'e nunga rupi ndajakyjei 'rā amboae rami yvy ojeapo teĩ,
 ha'e yvyty ikuai va'e ye'ẽ mbyte py onhemombo,
- ³ yv opu'ã-pu'ã vy yjuipa,
 opu'ã ovy ramo yvyty voi oryryipa teĩ.*
- ⁴ Oĩ peteĩ yakã Nhanderuede pegua tetã mbyte rupi oxyry vy
 ombovy'a 'rā ha'e pygua kuery,
 Yvate ete va'e pegua oo iky'a e'ỹ va'e rupi voi.
- ⁵ Tetã mbyte ma Nhanderuede ae oĩ.
 Ha'e ramo neĩ peteĩ henda py ma voi ndoityai 'rā.
 Nhanderuede oipytyvõ 'rā ko'ẽmba guive.*
- ⁶ Yvy regua kuery haxẽmba,
 tetã ikuai va'e omyĩ 'rā.
 Ha'e rã Nhanderuede oayvu omonhendu ramo yvy tykupa 'rā.
- ⁷ Nhandereve ma oiko SENHOR ixondaro reta va'e,
 Jacó Ruete ae oĩ nhandemi aguã.
- ⁸ Peju ke pexa SENHOR rembiapokue,
 yvy re mba'emo ombovaipagae.
- ⁹ Mba'eta yvy apy peve omomba joe opu'ãa.
 Omopẽmba guyrapa ha'e yvyra rakua,
 karóxa joe opu'ãa pygua guive oapypa tata py.
- ¹⁰ Aipoe'i: "Pepytu'u peikuaa aguã xee ae Penderuede aikoa.
 Xee ma xeyvate 'rā yvy regua kuery áryve,
 yvy jave re ete 'rā xeyvate", he'i.
- ¹¹ Nhandereve oiko SENHOR ixondaro reta va'e,
 Jacó Ruete ae oĩ nhandemi aguã.

Nhanderuede yvy regua kuery ruvixave pe oporaieia
 Jogueroporaiei va'e pe Coré ra'y kuery ombopara va'ekue.

47

- ¹ Ha'e javi regua kuery, pejepopete ke.
 Penema'endu'a Nhanderuede re, pevy'aa rupi penhendu.
- ² Mba'eta SENHOR yvateve ete va'e ma omboetevepy,
 huvixave yvateve va'e yvy jave re ipo'aka va'e.
- ³ Amboae regua kuery re nhandembopo'aka vy
 nhandepy guýry omoĩ yvy regua kuery.
- ⁴ Nhandevy guarã oiporavo nhandekuai aguã.
 Ha'e va'e yvy ma hembiaayvu Jacó ojou porã va'ekue.
- ⁵ Nhanderuede oẽ ovy oguerojapukai va'e mbyte rupi.

* 45:10 Apy ma huvixave ra'yxy pe ju ijayvu. 21.23–22.5 py.

* 46:3 Lucas 21.25–28

* 46:5 Tetã Nhanderuede pegua omombe'u porãve Apocalipse

Mimby guaxu pu rupi guive SENHOR oaxa ovy.

⁶ Peporaei Nhanderuete pe,

peporaei porã ixupe.

Peporaei nhanderuvixave pe,

peporaei porã ixupe.

⁷ Nhanderuete ma yvy jave regua ruvixave oiko.

Ixupe peporaei mboraei porã rupi.

⁸ Nhanderuete ipo'aka 'rã yvy regua kuery re.

Oguapy 'rã tenda openaaty iky'a e'ÿ va'e py.

⁹ Yvy regua ruvixa kuery onhemoatypa vy

Abraão Ruete pegua ju ikuai.

Mba'eta Nhanderuete peguarã ae ikuai yvy regua kuery hu'y jokia oguereko va'ekue ha'e javi.*

Ha'e anho yvate ete va'e oiko.

Nhanderuete pegua tetã re ijayvua

Mboraeirã Coré ra'y kuery ombopara va'ekue.

48

¹ Yvate ete va'e ma SENHOR oiko,

ha'evea rami jaroporaei

Nhanderuete pegua tetã py.

² Ixupegua yvyty iky'a e'ÿ va'e ma yvate ete,

yvy jave re oguero'v'aa va'e.

Sião yvyty oĩ kuaray puku-a yke katy,

huvixave retã oia.

³ Tetã py oo ikorapa va'e rupi

Nhanderuete ojekuaa uka nhandemi aguã yvate va'e rami.

⁴ Ha'e nunga rupi huvixa kuery nhomoirũmba jogueruvy va'ekue

okanhymba.

⁵ Tetã oexa vyve onhemondyipa.

Okyjepa vy onhamba.

⁶ Ha'e py ngyje rive ipo'aka ha'e kuery re,

oendu guive haxy imemby ta va'e rami.

⁷ Yvyty kuaray oua katy gui ou va'e py

rembovaipa Társis gui kanoã ou va'ekue.

⁸ Omombe'ua rã nhaendugue rami

jaexa SENHOR ixondaro reta va'e pegua tetã py oiko va'e,

Nhanderuete pegua tetã py ae.

Nhanderuete omoĩ atã 'rã raka'e rã peve.

⁹ Oreruete, renhomoaxya re orema'endu'a

ndevyguia templo mbyte roĩa py.

¹⁰ Oreruete, nderery oikuaa pavẽ 'rã.

Ha'e rami vy ndevy oporaei rã yvy apy peve 'rã onhendu.

Ndepo py ha'evea rami rejoguereko.

¹¹ Tovy'aa Sião yvyty re,

Judá rajy kuery avi tovy'a ne'arandua re.

¹² Peguata ke Sião rupi,

ha'e javi rupi pejere.

Peipapa torre ikuai va'e.

¹³ Peikuaa pota porã ikora yvatea re,

ha'e pexa pota oo ikorapa va'e ikuai va'e re,

raka'e rã ikuai va'erã pe pemombe'u kuaa aguã:

¹⁴ "Ha'e rami oiko Nhanderuete

raka'e rã peve guarã.

Nhanderereko 'rã nhamano peve."

Avakue okanhymba aguã re ijayvua

Joguero'poraei va'e pe Coré ra'y kuery ombopara va'ekue.

49

¹ Ha'e javi regua, pendu pota ke pova'e.

Yvy re pendekoa va'e ha'e javi, pejapyxaka ke.

² Yvyĩgue'i ha'e yvatekueve,

* 47:9 Ha'e va'e jave py xondaro kuery omoĩ 'rã imoiny hu'y jokia nguvixa retã kora re, ixupegua ikuaia oikuaa uka aguã (Cântico 4.4).

- perekopa va'e ha'e pendeporiaukue'i ha'e javi.
- ³ Ha'e gui xejuru py xeyvuu 'rã' arandu re,
xepy'a py 'arandua re anho 'rã aikuaa pota.
- ⁴ Ajapyxaka porã 'rã mba'emo re ombojoja vy ijayvua rã,
ndoikuaai pyre amombe'u porãve 'rã ixã reta va'e pu rupi.
- ⁵ Mba'e re tu jexavaia ára py akyje 'rã?
Xerakykue monha okuapy va'e ma teko vai rupi xejoko rei teĩ.
- ⁶ Ha'e kuery ma omba'e rei-rei re rive ojerovia,
mba'emo oguereko va'e re rive ovy'a va'e.
- ⁷ Anhetê avave rei ndojogua kuaai 'rã guyvvy rekove.
Nhanderuete pe nome'ê kuaai 'rã jogueraa jepe aguã regua.
- ⁸ Mba'eta joekove jajogua aguã ma hepy vaipa.
Raka'e rã peve nanhanhea'ãvei 'rãgue
- ⁹ jajapo aguã oikove riae aguã rami,
yvykua py oguejy e'ỹ aguã.
- ¹⁰ Ha'e gui jaexa rã hi'arandu va'e voi omano 'rã.
Hi'arandu e'ỹ va'e ha'e ndoikuaai va'e joo rami meme 'rã opa,
ha'e amboae pe ju oeja 'rã omba'e rei-reikue.
- ¹¹ Opy'a py aipoe'i: "Xero opa e'ỹ va'e hi'ã,
xerekoague ma raka'eve rã ikuai va'e peguarã" he'i teĩ.
Ha'e rami vy guery rupi ae 'rã omboery ovyvvy.
- ¹² Ha'e rami teĩ avakue ojejou porã va'eri nda'ikuai riaei 'rã.
Ha'e rami 'rãgue py mymba rami avi okanhy 'rã.
- ¹³ Ha'e rami ikuai ojee ae ojerovia va'e,
hemimbo'e kuery ijayvua oguero'vy'a va'e voi.
- ¹⁴ Ha'e rami teĩ vexa'i rami avi omboguejya 'rã yvykua py.
Ha'e kuery re opena va'erã ma manoa.
Yvykua katy meme 'rã oguejy.
Ha'e py ma iporãague hu'ũmba 'rã.
Ha'e kuery rekoarã oi va'e ma yvykua ae.
- ¹⁵ Ha'e rã xerekove ma Nhanderuete oepy 'rã manoa po'akaa gui,
ojea py xereru vy.
- ¹⁶ Penhemondy eme amongue imba'e rei-reipave ovy rã,
ha'e ngoo pyguarã mba'emo porã ojouve ovy teĩ.
- ¹⁷ Mba'eta ha'e kuery omano vy mba'eve ndogueraai 'rã ngupive,
mba'emo porã oguereko va'ekue nomoirũvei 'rã.
- ¹⁸ Oikove teri jave ojejou porã 'rã,
ha'e ojeupe guarã ojou reta rã pavê ojou porã teĩ
- ¹⁹ ha'e va'e oo avi 'rã tuu kuery ooague py,
hexakã ndoexavei aguã py.
- ²⁰ Avakue ojou porãmby nai'arandui vy
mymba rami avi 'rã okanhy.
- Anhetê rupi Nhanderuete nhamboete aguã regua
Mboraeirã Asafe ombopara va'ekue.

50

- ¹ SENHOR Nhanderuete Ipo'akapa va'e ijayvuu vy
oenõimba 'rã vvy regua kuery kuaray oua katy gui oikea katy peve ikuai va'e.
- ² Sĩaõ tetã iporãve ete va'e gui
Nhanderuete oexa uka 'rã guexakãa.
- ³ Ha'e rami vy Nhanderuete ou 'rã, nokyrirĩ 'rã guive.
Henonde ma ou tata nhomombaarã,
ijyvýry rupi vyvvytũ vaikue hevovo.
- ⁴ Ojeupegua kuery omboayvuu aguã ou.
Ha'e rami vy yvate yva katy ojapukai 'rã,
vvy katy guive. Ha'e vy aipoe'i:
- ⁵ "Pemboatypa ke xevyguã kuery iky'a e'ỹ va'e,
Ha'e va'e kuery ma mba'emo ome'ê va'e py xereve guarã onhemoingo va'ekue", he'i.
- ⁶ Yva gui oikuaa uka heko porãa,
mba'eta nhomboayvuu ma Nhanderuete ae.
- ⁷ "Xevyguã kuery, pejapyxaka ke, ha'e rã xee xeyvuu 'rã.
Israel kuery, amombe'u ta penderekokue.
Xee ma Penderuete, 'Oreruete' pejea va'e.
- ⁸ Mba'emo peme'êague re e'ỹ xeyvuu pëvy,

- mba'emo peapy reve xerenonde pemoĩ riae re e'ỹ guive.
- ⁹ Ha'e rami teĩ pendero gui xee ndaipotai vaka ra'y,
neĩ kavara kora gui peme'ẽ va'e.
- ¹⁰ Mba'eta xerymba meme ikuai ka'aguy regua,
yvyty áry mbovy rei e'ỹ vaka ikuai va'e guive.
- ¹¹ Xee aikuaa guyra yvyty áry ikuai va'e ha'e javi,
xerymba meme ikuai vixo nhuũndy rupigua.
- ¹² Xee akaruxe va'e rire aipo nda'ei 'rãgue pẽvy,
mba'eta yvy ma xemba'e itui,
hexe ikuai va'e ha'e javi avi.*
- ¹³ Tyrã xee nda'u ha'u 'rã ri vaka ro'o?
Ay'u 'rã ri nda'u kavara ruguy?
- ¹⁴ Any, Penderuete pe peme'ẽ perovy'aa,*
ha'e Yvate ete va'e pe pejapo kuerei penhemboayvuague.
- ¹⁵ Pejapukai ke xevy pejexavaia ára.
Ha'e ramo xee rogueraa jepe 'rã,
ha'e rã peẽ ma xemboete 'rã", he'i.
- ¹⁶ Ha'e rã heko vai va'e pe ma Nhanderuete aipoe'i:
"Nda'evei peẽ kuery xeayvua aeja va'ekue re pendeayvu aguã ha'ekue-'ekue rami,
neĩ xereve guarã ajapo va'ekue rupi pendeayvu aguã.
- ¹⁷ Mba'eta napenhemo'arandu ukai,
xeayvua napendu potai vy.
- ¹⁸ Ha'e rã imonda va'e ma pexa vy perovy'a 'rã,
itavy rei va'e re guive penhemoirũxe vai.
- ¹⁹ Mba'emo vai re anho pendeayvu,
pendejuru py penhombotavya rupi anho pendekuai.
- ²⁰ Pendeayvu rei peiny penderyvvy re,
pendeayvu vaikue-ikue 'rã pendexy pi'a re ae.
- ²¹ Ha'e rami pendekuai teĩ xee akyriri ranhe va'ekue.
Ha'e ramo pexa'ã ndee ramigua ae xee aikoa re.
Ha'e rami teĩ xee romboayvu 'rãe.
Ha'e nunga ha'e javi amoĩmba 'rã pexaa py.*
- ²² Peẽ kuery Penderuete gui penderexarai va'e,
peikuaa pota pova'e re.
Ha'e rami e'ỹ ri ramo xee romondoropa 'rã,
ha'e ndoikoi 'rã penderepyarã.
- ²³ Xererovy'aa ome'ẽ va'e ma xemboetea rupi ikuai.
Ha'e rami guape omoatyrõ va'e pe ma
aikuaa uka 'rã Penderuete pendereraa jepea."

Davi onhemombe'u ha'e ojeko rerovaa rupi ijayvuague

Jogueroporaie va'e pe Davi ombopara va'ekue, Bate-Seba reve joguerekoague re profeta Natã ou vy ijayvu jave guare (2 Samuel 11.1–12.20).

51

- ¹ Xeruete, xemboaxy ke ndereko porãa rupi.
Opa mba'e py renhombaoxya rupi vy emboguepa ke ajevayvague.
- ² Xeky'a'o xereko vaia gui,
xejoi ke ajevayvague gui.
- ³ Mba'eta xee ma aikuaa ae xereko vaia,
xema'endu'a riae aikovy ajevayvague re.
- ⁴ Nderovai ae ajevavy va'ekue, ndevy anho,
ndee rexa py ajapo mba'emo vai.
Ha'e nunga rupi xee aikuaa anhetẽ meme xere ndeayvua,
ha'evea rami xembopagaa guive.*
- ⁵ Xee ma teko vai py ma voi aiko'i va'ekue,
ha'i xerereko'i guive xere oĩ ae ma ajevavy aguã.
- ⁶ Ha'e rã ndee ma orep'y'a re anhetẽ va'e oĩ va'e roeroy'a va'e,
ha'e rami vy xepy'apy py reikuaa uka 'arandua.

* 50:12 Atos 17.24-25 * 50:14 "Peme'ẽ 'rã perovy'aa", he'ia ma mboraei, e'ỹ vy nhandepy'a ha'e javi py nhamboetea re ijayvu vy (Hebreus 13.15). * 50:21 Romanos 2.17-24 * 51:4 Romanos 3.4

- 7 Xeky'a'o ke hissopo rogue py iky'a e'ŷ va'e ju aiko aguã,*
xejoi ke, yro'y xiī va'e gui xiī porāve va'e aiko aguã.
- 8 Ejapo ke oporaeia ha'e ovy'aa rā aendu ju aguã rami,
xekāgue remou'ūmba rire teī avy'a nho aguã.
- 9 Ema'ē eme ajejavague re,
emboguepa ke xereko vaia.
- 10 Xeruete, xere emoī kuraxō pyau iky'a e'ŷ va'e,
xenhe'ē py xembopyau xereitya ve'ŷ aguã rami.
- 11 Xemoxē eme nerenonde gui,
neī xegui eipe'a eme guive Nenhe'ē Ky'a E'ŷ.
- 12 Xere emoī ju xereraa jepeague re avy'aa.
Xenhe'ē py xemombaraete ju xekyre'ŷ aguã rami.
- 13 Ha'e ramo 'rāe ambo'e heko vai va'e kuery ndereko re,
ha'e ramo ojevavya va'ekue ojeko rerova 'rā ndevy.
- 14 Xeruete, xereraa jepe ke tuguy amoēague gui,
Xeruete xereraa jepea.
Ha'e ramo aporaēi reve arovy'a 'rā ndereko porāa.
- 15 SENHOR, eipe'a ke xejuru,
ha'e ramo rogueroporaēi 'rā.
- 16 Mba'eta ndererovy'ai mymba rojuka vy rome'ē va'e.
Ha'e rami e'ŷ va'e rire xee ame'ē ma 'rāgue.
Mba'emo roapy reve rome'ē va'e guive ndererovy'ai.
- 17 Ndee Oreruete pe rome'ē rā rorevy'a va'erā va'e ma orenhe'ē py nda'eveia roendua.
Orepy'a re rojeju vai ha'e ronhemboaxy ramo ma ndee Oreruete, noremboaxy e'ŷi 'rā.*
- 18 Emoingue porā ke Sião pygua kuery remboaxya rupi vy.
Emoatyro uka ju Jerusalém tetā kora.
- 19 Ha'e rami vy rorevy'a 'rā teko porā rupi ikuai va'e mba'emo ome'ē ramo,
mba'emo oapy reve ome'ē va'e.
Ndevyua altar áry ome'ē 'rā okuapy vaka ra'y.

Heko vai va'e ombopagaa aguã re ijayvua

Jogueroporaēi va'e pe nhombo'e aguã Davi ombopara va'ekue, Doegue EDOM pygua Saul pe oikuaa uka ramo Abimeleque ro py Davi ovaēague (1 Samuel 22.6-23).

52

- 1 Ava ndepo'akapa va'e, mba'e re tu teko vai ri rejou porā
Mba'eta Nhanderuete porayvua ma opa va'erā e'ŷ.
- 2 Ha'e rā ndee ma ndeayvu 'rā renhomomba aguã re anho.
Kyxē haimbe va'e jojuka va'e rami 'rā ndeayvu,
renhombotavy va'e vy.
- 3 Iporā va'e 'rāgue py mba'emo vai anho rejou porāve.
Anhetē rupi ndeayvu 'rāgue py ndeapuxe vai rive.
- 4 Ndee rejou porā va'e ma ayvu nhomokanhyarā anho,
renhombotavy rupi rive ndeayvu va'e vy.
- 5 Ha'e rami avi Nhanderuete nemomba 'rā raka'e rā peve.
Ndejopy vy ndepe'a 'rā heravy nderopy reia gui,
okuave va'e vvy gui ndepe'a xapy'a 'rā.
- 6 Ha'e nunga oiko rā
heko porā va'e kuery oexa vy ojererokyje 'rā.
Ha'e rami vy ojojai rei vy aipoe'i 'rā:
- 7 "Ha'e rami 'rā okanhy avakue Nhanderuete re e'ŷ imbarate va'e.
Mba'eta omba'e rei-rei retaa re rive ojerovia,
ha'e opa marā rei ikuaia re rive onhemombaraete va'e."
- 8 Ha'e rā xee ma oliveira rembypy ipyau va'e
Nhanderuete pegua roka py hi'aī va'e rami aiko.
Nhanderuete xemboaxya re ajerovia raka'e rā peve.
- 9 Ha'e rami repena rire
xee roguerovy'a 'rā raka'e rā peve.
Ndere ojerovia va'e kuery oendua py

* 51:7 Ha'e kuery reko rami vy sacerdote kuery joky'a'o vy hissopo rogue ojopy 'rā mymba ruguy oia. Ha'e va'e py ojevavy va'ekue áry ombaoyvi 'rā oiky'a'o aguã (Levítico 14.1-7; Hebreus 9.19). Ha'e rā apy ma Nhanderuete pe oiapukai ipy'a oiky'a'o aguã. * 51:17 Mateus 5.3-6; Mateus 11.29-30; Lucas 18.9-14

roarō reve xema'endu'a 'rā nderery re, iporā ramo.

Salmo 14.1-7

Jogueroporaie va'e pe nhombo'e aguā Davi ombopara va'ekue mbaraka py ombojoguy aguā.

53

- ¹ Opa marā rei heko va'e ma opy'a py ijayvu vy
 “Ndoikoi rima Nhanderuete” he'i 'rā.
 Ha'e kuery opa marā 'rā ikuai teko vai ojapo vy.
 Neī peteive ma ndoikoi 'rā heko porāa rupi.
- ² Ha'e rā Nhanderuete ma yva gui oma'ē 'rā avakue ra'y kuery re,
 oexa aguā amongue pa o'arandua rupi,
 Nhanderuete oekaa rupi ikuai oexa aguā.
- ³ Ha'e rami teī ha'e javive ojepe'a vy opa marā rei ikuai.
 Ndoikovei ma teko porā rupi oiko va'e,
 neī peteive.*
- ⁴ “Teko vai rupi ikuai va'e 'arandurā noī teve?
 Ha'e kuery ma xeivyua kuery omomba rivepa 'rā mbojape ho'ua rami.
 Nhanderuete pe ndojapukai 'rā guive.”†
- ⁵ Ha'e rami teī ha'e kuery onhemondyipa 'rā,
 okyje aguā jipoi teī.
 Peē kuery re opu'ā rei va'ekue kāgue Nhanderuete omoaimba 'rā.
 Ha'e kuery oximba 'rā pendegui, Nhanderuete nopenavei ramo.
- ⁶ Siāo tetā gui Israel kuery reraa jepearā ou vy ojekuaa ma 'rāgue!
 Nhanderuete ojepegua kuery omoingo porā jevy ramo
 Jacō ramymino kuery, Israel kuery ovy'a ete 'rā okuapy.

Nhanderuete oepy aguā re ojapukaia ague

Jogueroporaie va'e pe nhombo'e aguā Davi ombopara va'ekue mbaraka py ombojoguy aguā, Zife pygua kuery Saul pe aipoe'i ramo: “Orerekoa py e'y teve Davi onhemi?” (1 Samuel 23.19, 26.1).

54

- ¹ Xeruete, xereraa jepe ke nderery rupi,
 xemboeko porā guive ndepo'akaa rupi.
- ² Xeruete, endu ke anhembo'e ramo,
 ejapyxaka ayvu xejuru gui oē va'e re.
- ³ Mba'eta xere opu'ā okuapy porojoi va'e kuery,
 jojuka va'ety kuery xejukaxe okuapy.
 Ha'e kuery ma Nhanderuete re ima'endu'aa rupi nda'ikuai.
- ⁴ Ha'e rā xee ma Nhanderuete oiko xepytyvōarā.
 SENHOR oiko xemoingovearā.
- ⁵ Ombopaga 'rā heko vai va'e xemoingo axyague re.
 Ojeroviapy reikoa rupi remomba 'rā.
- ⁶ Ndevy ame'ēxea'i py ame'ē 'rā ome'ēmbi.
 SENHOR, aporaie 'rā nderery rupi iporā ramo.
- ⁷ Mba'eta xereraa jepe ajexavaia ha'e javi gui.
 Ha'e ramo aexaa py xerovaigua kuery okanhymba.

Joapo vai va'e kuery omombaa aguā re ojerurea ague

Jogueroporaie va'e pe nhombo'e aguā Davi ombopara va'ekue mbaraka py ombojoguy aguā.

55

- ¹ Xeruete, ejapyxaka ke ajerurea re.
 Endu e'y eme ajapukaia.
- ² Eikuaa pota ke xere, embovai xeayvua.
 Ajexavai vy ndaikuaai rei,
 nda'evei rei aikovy
- ³ xerovaigua kuery ijayvu rei ha'e
 heko vai va'e xemoingo axy rei ramo.
 Mba'eta xere ha'e kuery ombou xembojexavaiarā.
 Xevy ipoxy vaipa vy xemomba 'rā.
- ⁴ Xekuraxō otytypaa aendu xepy'a re.
 Amano aguā gui akyjea aendu xere ou va'e.
- ⁵ Aryryipa reve aendu akyjea,
 akyje vaipaa xere oī.

* 53:3 Romanos 3.9-20 py. † 53:4 Apy ma Nhanderuete ijayvu heko vai va'e reko re.

- 6 Ha'e rami vy xee aipoa'e:
 "Apykaxu rami xepepo va'e rire
 aveve avy vy ajou 'rāgue apytu'u aguã.
- 7 Ajava 'rāgue mombyry,
 tekoa e'ŷa rupi aiko 'rāgue.
- 8 Ajou voi 'rāgue anhemi aguã,
 yvytu vaikue ha'e yai opu'ã va'e gui", ha'e.
- 9 SENHOR, emomba ke xerovaigua kuery,
 ejapo nhomongetaa py ndoikuaavei aguã rami,
 mba'eta tetã py xee aexa joguero'a ha'e joe nda'ija'ei va'e anho.
- 10 Ara py ha'e pyávy ojere okuapy tetã kora yvýry rupi.
 Kora mbyte py ikuai opa marã rei ha'e mba'emo vai apoa kuery.
- 11 Tetã mbyte oĩ 'rã nhomombaa.
 Tape rupi ma ikuai nhomoingo axya ha'e nhombotavya.
- 12 Ha'e rami avi xerovaigua e'ŷ va'ekue ae xembojaru rei oikovy.
 Ha'e rami e'ŷ va'e rire aropo'aka kuaa 'rāgue.
 Ndaxerexaxei va'ekue e'ŷ xere ovy'a rei,
 ha'e rami e'ŷ va'e rire ixugui anhemi 'rāgue.
- 13 Ha'e rami 'rāgue py ndee ava xee ramigua reiko va'e,
 xereve renhemoirũ va'ekue ae,
 xeirũ xepy'a py roayvuve va'e.
- 14 Joupive jaiko va'ekue, joupive javy'a va'ekue,
 teta rupi jaa va'ekue Nhanderue tepegua oo katy.
- 15 Manoa tojopy voi ha'e kuery,
 ha'e oikove reve togejy yvykua py.
 Mba'eta ngoo rupi mba'emo vai re anho oikuaa pota opy'a py.
- 16 Ha'e rã xee ma ajapukai 'rã Nhanderue te.
 Ha'e ramo SENHOR xereraa jepe 'rã.
- 17 Aje'ive, kuaray mbyte ha'e ka'aru'i ju
 amombe'u 'rã aikotevẽ va'e ajapukai reve.
 Ha'e ramo SENHOR oendu 'rã xeayvua.
- 18 Eraa jepe ke xerekovea xerakykue monha va'e kuery gui aiko porã ju aguã,
 mba'eta heta ete ikuai xerovaigua.
- 19 Nhanderue oendu vy ombovai 'rã,
 jypy'i guive opena va'e vy.
 Mba'eta ha'e kuery re noĩ ojeko rerova aguã,
 Nhanderue renonde teĩ ojererokyjea rupi e'ŷ ikuai.
- 20 Ha'e va'e ava ma opu'ã hexeve peteĩ rami ikuai va'ekue re,
 omboaxa rive peteĩ rami ikuai aguã ijayvuague.
- 21 Ijuru ma manteiga gui xxyĩve,
 ha'e rã ipy'a re ma joe opu'ã aguã anho oĩ.
 Ijayvua ma azeite gui iporãve merami
 teĩ kyxe oekyĩ pyre rami nhomomba.
- 22 SENHOR po py pemboaxa pendepy'a eta reia.
 Ha'e ramo penemombaraete 'rã.
 Peteĩve henda py ndoity ukai 'rã heko porã va'e.*
- 23 Xerue te, yvykua vaikue py remombo 'rã
 avakue tuguy moẽa ha'e nhombotavypa rei va'e.
 Ha'e kuery ndoupity'i 'rã oikove aguã va'ekue mbyte peve.
 Ha'e rã xee ma ajerovia tema 'rã ndere.

Ojexavaia gui ombopy'a guaxu aguã re ojerurea ague
 Jogueropora'ei va'e pe "Apykaxu yvyra mombyrygua rupi ikuai" he'ia py opora'ei rami opora'ei aguã Davi
 ombopara va'ekue Gate tetã py filisteu kuery ojopy ramo (1 Samuel 21.10-15).

56

- 1 Xerue te, xemboaxy ke,
 mba'eta avakue xejukaxe okuapy.
 Ára pukukue re xemoingo axy xerero'a vy.
- 2 Xere opu'ã va'e xejukaxe okuapy.
 Heta ete ikuai xere opu'ã va'e onhemboyvatevexe vy.
- 3 Akyjea aendu vy
 ajerovia 'rã ndere.

* 55:22 1 Pedro 5.7 py.

- 4 Nhanderuete re ajerovia, ijayvua arovy'a guive.
 Nhanderuete re ajerovia vy
 ndakyjei 'rã mba'eve gui.
 Mba'e 'rã tu imarã va'e ojapo kuaa xere?
- 5 Ára pukukue re ha'e kuery omombe'u 'rã xeayvukue ramigua.
 Onhembopy'aa ma xere ojapo vai aguã anho.
- 6 Nhomboatypa okuapy nhemi rupi,
 oma'ê mbegue 'rã aiko re oikuaa pota vy,
 xemomba aguã oarõ vy.
- 7 Embopaga ha'e kuery ojapo vaiague re.
 Xeruete, eitypa yvy regua kuery ndepoxya py.
- 8 Reipapa ma ajexavaia rupi aikoague.
 Xerexay voi remboyrupa nde'yryru py.
 Xerekokue ha'e javi e'y teve ipara ndekuaxia re?
- 9 Ndevy ajapukaia ára guive
 xerovaigua kuery ojepe'apa 'rã.
 Aikuaa porã Nhanderuete xereve oikoa.
- 10 Nhanderuete re ajerovia, ijayvua arovy'a guive.
 SENHOR re ajerovia, ijayvua arovy'a guive.
- 11 Nhanderuete re ajerovia aguã amoi vy
 ndakyjei 'rã mba'eve gui.
 Mba'e 'rã tu avakue ojapo kuaa xere?
- 12 Xeruete, ndevy anhemboayvuague ajapo ete 'rã,
 roguerovy'a ete 'rã guive.
- 13 Mba'eta manoa gui xerekovea reraa jepe,
 xepy guive reraa jepe ha'a aguã gui,
 Xeruete renonde aiko aguã hexakã nhomoingovea rupi.

57

Salmo 108.1-5

Jogueroporaie va'e pe "Xemomba eme ke" he'ia py oporaie rami oporaie aguã Davi ombopara va'ekue,
 Saul gui ojava vy itakua py onhemi jave (1 Samuel 24.1-7).

- 1 Xeruete, xemboaxy ke.
 Xemboaxy mba'eta ndere ae xerekovea anhomí.
 Ndepepo 'ã py anhemi,
 mba'emo vai oiko va'e oaxapa peve.
- 2 Ajapukai Nhanderuete Yvate ete va'e pe,
 mba'eta opa mba'e gui xerepy va'e.
- 3 Ha'e ramo yva gui xepytyvõarã ombou vy xereraa jepe.
 Omoximba xeavyky rei va'e kuery.
 Exa uka renhomboaxya ha'e ojeroviapy reikoa.
- 4 Mba'eta xerekovea ma guary ikuai va'e mbyte oiko.
 Ha'e va'e kuery omondoropa 'rã avakue ra'y kuery.
 Hu'y guaxu ha'e hu'y rami haí,
 ha'e inhapekũ ma kyxe haimbe porã va'e rami.
- 5 Xeruete, enhemboyvate yva áryve rupi,
 ha'e yvy jave re tojekuaa nerexakã.
- 6 Ha'e kuery ma xerenonde rupi omoi xembo'a aguã.
 Ha'e ramo xerekovea oiko axy.
 Xerenonde ojo'o okuapy yvy,
 teí ha'e kuery ae ju ho'a ha'e va'ekue py.
- 7 Xeruete, xekuraxõ oi atã ma,
 xekuraxõ oi atã.
 Aporaie vy roguerovy'a 'rã.
- 8 Xenhe'ê, evy ke!
 Mbaraka ha'e mba'epu ixã reta va'e, pevy avi ke.
 Xee ambovy 'rã ko'ê ju.*
- 9 Roguerovy'a 'rã yvy regua kuery mbyte,
 ndevy aporaie 'rã ha'e javi regua mbyte.
- 10 Mba'eta renhomboaxya oo 'rã yva peve,
 ndereko porã avi arai peve 'rã oo.
- 11 Xeruete, enhemboyvate yva áryve rupi.

* 57:8 "Xee ambovy 'rã ko'ê ju" he'ia aje'ive'i reve Nhanderuete pe oporaie vy.

Yvy jave re tojekuaa nerexakãa.

Heko vai va'e kuery renonderã re ijayvua

Jogueroporaie va'e pe Davi ombopara va'ekue "Xemomba eme ke" he'ia py oporaieia rami oporaie aguã.

58

- ¹ Peẽ joe pepena va'e, ha'evea rami teve pendeayvu?
Anhetẽ rupi ri nda'u peikuaa pota avakue ra'y kuery re?
- ² Any teve.
Ha'e rami 'rãgue py pendepy'a re pemoĩ teko vairã,
ha'e yvy jave re pejapo joguero'a aguã rami.
- ³ Heko vai va'e ma oguereko'i ramove ojepe'a 'rã ha'eve e'ya katy.
Itui'i vyve ojavy 'rã onhemboapu vy.
- ⁴ Jojukaarã oguereko mboi rami.
Oapyxa omboty 'rã mboi ijapyxa e'y va'e rami,
- ⁵ oendu e'y aguã imbo'ea ayvu,
ombo'e porãve tei.*
- ⁶ Xeruete, emopẽ ke ha'e kuery raĩ ijuru py.
SENHOR, emboi guary ra'y kue'iry raĩnhykã.
- ⁷ Tokanhymba yy oxyry va'e rami,
ha'e hu'y omomboa rã opẽmba rive va'e rami.
- ⁸ Hevo'ipe yvy re ijaxy ovy va'e rami ta'ikuai,
ha'e kyri'i va'e ixu oity'i va'ekue rami kuaray oexa e'y re ta'ikuai.
- ⁹ Juu'y okai vyvoi va'e e'y vy ipyau va'e teĩ
oja omboaku e'y mbove
vyvytu jere ombovepa va'e rami avi ta'ikuai.
- ¹⁰ Ha'e rã heko porã va'e ma hepyarã ou rã ovy'a 'rã.
Omoakỹ 'rã opy heko vai va'e ruguy py.
- ¹¹ Ha'e ramo aipo'ea 'rã:
"Anhetẽ ae ra'e heko porã va'e ojopy 'rã ojeupegua.
Mba'eta Nhanderuete oiko yvy re nhombopaga va'e."

Ojepy ukaa rupi ojerurea ague

Jogueroporaie va'e pe "Xemomba eme ke" he'ia py oporaieia rami oporaie aguã Davi ombopara va'ekue Saul ojukaxe vy oo py oĩa oarõ uka ramo (1 Samuel 19.11-12).

59

- ¹ Xeruete, xereraa jepe xerovaigua kuery gui.
Xereupi xerovaigua kuery xererovy e'y aguã py.
- ² Xereraa jepe teko vai apoa kuery gui,
xerepy avakue jouguy moẽa gui.
- ³ Mba'eta ha'e kuery ma nhuã ojavy xerekove oipe'a aguã.
SENHOR, imbaratekueve onhemboaty okuapy xerovai,
xereko vai ramo e'y, ajevavy ramo e'y guive.
- ⁴ Mba'eve py atekoavy ramo e'y ha'e kuery ojapura xemoingo axy aguã.
Emyĩ ke, eju xerepy aguã, exa pota guive.
- ⁵ Ndee ma SENHOR Xeruete ixondaro reta va'e,
Israel kuery Ruete reiko.
Ha'e nunga rupi emyĩ, eju voi guive
vyvy regua kuery re reikuaa pota aguã.
Neĩ peteive emboaxy eme hi'ã rupi teko vai ojapo va'ekue.
- ⁶ Ha'e kuery ma pytũ ma ramo onhendu okuapy jagua rami
tetã yvỹry rupi.
- ⁷ Opa marã onhendu okuapy.
Ijuru py ayvu oĩ va'e ma kyxe,
"Mava'e tu oiko nhanerenduarã?" he'i guive.
- ⁸ Ha'e rã SENHOR, ndee repuka 'rã ha'e kuery re.
Rejojai rei 'rã yvy regua kuery ha'e javi.
- ⁹ Xemombaraetea, ndee ae roarõ va'e,
mba'eta ndee ma Xeruete anhemiaty yvate va'e.
- ¹⁰ Xeruete xemboaxy vy ou 'rã xembojoyvyarã.
Xerovaigua kuery re aipota va'e oiko ramo Nhanderuete oexa uka 'rã xeivy.
- ¹¹ Ha'e rami avi ejukapa eme guive, xejavegua kuery hexaraipa e'y aguã.
Ha'e rami 'rãgue py emoãimba opa rupi ndepo'akaa py ho'apa peve,

* 58:5 Apy ijayvu mboi mbo'ea re (Eclesiastes 10.11).

- mba'eta SENHOR, orevy pe mba'emo vai jokoia reiko.
- ¹² Tove ha'e kuery onhemboyvatea rupi ae to'apa ojuru py ojejavyague re, guembe rupi ayvu oëague re, opa marā ikuaiague re ha'e apu omombe'uague re.
- ¹³ Emokanhny ndepoxya rupi, emokanhymba, ha'e kuery opa peve, yvy apy peve oikuaa pavē aguā Jacó ra'y kuery re Nhanderuete openaa.
- ¹⁴ Pytū ma ramo jagua rami ha'e kuery onhendu okuapy tetā vyvry rupi.
- ¹⁵ Opa rupi ikuai ho'u va'erā oeka va'e rami, ha'e naevyātāi vy opa marā onhendu okuapy.
- ¹⁶ Ha'e rā xee ma aporaie 'rā ndepo'akaa re. Ha'e aje'ive reve aporaieive ju 'rā xemboaxya re avy'aa rupi. Mba'eta ndee ae anhemiaty yvate va'e reiko, ajexavaia ára ndee ae xerepy 'rā.
- ¹⁷ Ha'e nunga rupi Xemombaraetea, ndevy pe aporaie 'rā aikovy. Xeruete anhemiaty yvate va'e reiko, Xeruete xemboaxy va'e.

60

Salmo 108.6-13

Jogueroporaie va'e pe “Yvoty lírio omombe'ua va'e” he'ia py oporaieia rami oporaie aguā Davi ombopara va'ekue nhombo'e aguā, Síria regua kuery Mesopotâmia ha'e Zobá guigua re opu'ã jave, ha'e Joabe ou vy doze mil avakue Edom regua re Juky Ugua py ipo'aka jave (1 Samuel 8.13).

- ¹ Xeruete, ndee nerepenavei va'ekue orere, oremoaimba guive ndepoxy vy. Oremono'õmba ju ke ay.
- ² Remomyĩmba va'ekue yvy, rembovopa guive. Embotya ju ke ipa'ũ, mba'eta oipave 'rā ovy.
- ³ Rejapo va'ekue ndevygua kuery mba'emo vai py ikuai axy aguā rami, oremboy'u vinho oremokanhyarā.
- ⁴ Nerenonde ojererokyjea rupi ikuai va'e peguarā reupi uka bandeira,* guyrapa revegua gui onhemi kuaa aguā.
- ⁵ Ore kuery nerembiayvu orekuai va'e roo jepe aguā orereraa jepe ke reiporu kuaa regua py, ha'e orembovai.
- ⁶ Nhanderuete ijayvu oky'a e'ya rupi: “Xepo'akaa rupi vy amboja'o 'rā Siquém yvy, aa'ã 'rā Sucote regua yvyugua guive.†
- ⁷ Gileade ha'e Manassés yvy ma xemba'e meme itui. Efraim yvy ma xengora ratā. Judá ma xepo pygua.
- ⁸ Ha'e rā Moabe yvy ma hy'a ajejoiaty itui, Edom yvy áry amombo 'rā xepy regua, ha'e Filístia pygua kuery re xepo'aka vy avy'a nhendu 'rā.”‡
- ⁹ Mava'e nda'u xereraa 'rā tetā ikorapa va'ea py? Mava'e nda'u xereraa 'rā Edom yvy re?
- ¹⁰ Mba'eta Oeruete, ndee orereja rive va'ekue. Oeruete, ndereovei ma orexondaro kuery revel!
- ¹¹ Orereraa jepe nho ke rojexavaia gui, mba'eta avakue orereraa jepea ma mba'everā ndovarei.
- ¹² Nhanderuete re vy ae 'rā nhandepo'aka, mba'eta ha'e opyrō 'rā nhanderoaigua kuery re.

Huvixave re ojerurea ague

Jogueroporaie va'e pe Davi ombopara va'ekue mbaraka py ombojoguy aguā.

61

- ¹ Xeruete, endu ke ajapukaia.

* 60:4 Bandeira hi'y reve ma joe opu'ã rupi 'rā ogueraa, oupia rā xondaro kuery oexa vy oia py oupa aguā (Jeremias 51.27). † 60:6 Apy ma ijayvu joyvy oipe'a va'ekue ojeupegua kuery pe omboja'o aguā re. ‡ 60:8 Ha'e jave py ma joyvy ojogua vy hi'áry omombo 'rā opy regua, oikuaa uka aguā ija oikoa.

- Eikuaa pota anhembo'e ramo.
² Yvy apy gui ajapukai ndevy,
 xepy'apy py ajexavai vy.
 Xereraa ke itaova xegui yvateve va'e áry.
³ Mba'eta ndee ma anhemiaty,
 xerovaigua kuery gui torre imbaraeete va'e reiko.
⁴ Taiko riae nembojeroviaaty rupi raka'e rá peve.
 Ndepepo guýry xee anhemí va'e.
⁵ Mba'eta Xeruete, ndee rendu anhemboayvu rá.
 Ha'e rami vy xevy pe reme'ê iporã va'e,
 nderery oendu vy ojererokyje va'e kuery reve.
⁶ Remoive 'rá huvixave ára.
 Hi'ára ipukuve ete 'rá aýgua ha'e raka'e rágua ikuiaa peve.
⁷ Toi riae Nhanderuete renonde.
 Ndereko porãa ha'e ndeporayvua rupi vy toikove riae.
⁸ Ha'e rami rá nderery rupi aporaei 'rá raka'e rá peve,
 anhemboayvuague ajapo aguã ko'ê nhavõ.
Jajerovia aguã regua
 Jogueroporaei va'e Jedutum oporaeia rami oporaei aguã Davi ombopara va'ekue.

62

- ¹ Nhanderuete anho arõ aikovy xenhe'ê py, xeyvuu e'y re.
 Mba'eta ixugui ae ou xereraa jepearã.
² Ha'e anho oiko itaova,
 xereraa jepea ha'e anhemiaty yvate va'e.
 Ha'e nunga rupi ndaxereityai 'rá.
³ Peê kuery ha'e javive, raka'e peve tu xee peteĩ ava re pepu'ã rei 'rá xereity aguã
 oo mbotya ojero'a va'e, e'y vy kora ho'a rai'i va'e rami.
⁴ Ha'e va'e kuery xereityxe okuapy naxemboeteavei aguã.
 Apu rive ha'e kuery ojou porãve.
 Ojuru py ijayvu porã teĩ
 opy'a py ma ijayvu vaikue-ikue 'rá.
⁵ Nhanderuete anho xenhe'ê py arõ aikovy xeyvuu e'y re,
 mba'eta ixugui ou 'rá arõ aikovy va'e.
⁶ Ha'e anho oiko itaova aĩ aguã,
 xereraa jepea, anhemiaty yvate va'e.
 Ha'e ramo ndaxereityavei 'rá.
⁷ Nhanderuete gui ae ou aa jepe aguã ha'e xemboetea aguã.
 Nhanderuete re oĩ xembaraete aguã ha'e itaova anhemiaty.
⁸ Xerevegua kuery, pejerovia hexe ára nhavõ.
 Ixupe pemombe'u guive pendepy'a re oĩ va'e ha'e javi.
 Nhanderuete ma nhandemiaty oiko.
⁹ Avakue yvyígue'i ma mba'e'y ikuai,
 ijyvatekueve voi anhetê rupigua e'y meme ikuai.
 Mba'emo opejaa py ipoyia oexaa rá
 ha'e kuery ha'e javi teĩ mba'e'y va'e gui nda'ipoyive 'rá.
¹⁰ Pejerovia eme pejokorea re,
 nei penemondaa re pevy'a eme guive.
 Penemba'e rei-rei hetave ovy teĩ
 ha'e nunga re rive pejerovia eme pendepy'a py.*
¹¹ Peteĩgue Nhanderuete ijayvu, mokoĩguea ma aendu pova'e:
 Po'akaa ma Nhanderuete guigua meme.
¹² SENHOR, ndere anho oĩ oremboaxy aguã.
 Peteĩ-teĩ pe reme'ê 'rá ojapoague repy.*
Nhanderuete jaeka aguã regua
 Mborairã Judá regua teko e'ýa rupi Davi oiko vy ombopara va'ekue (2 Samuel 15.1-30, 16.5-14).

63

- ¹ Xeruete, ndee ma Xeruete imbaraeete va'e.
 Xee ma roekaa rupi anhea'ã aikovy.
 Ndere ma xerekovea nda'eveive.

* 62:10 Mateus 19.21-22; 1 Timóteo 6.17-19 * 62:12 Mateus 16.27; Romanos 2.6-16; Apocalipse 2.23

- Xerete re voi aendu ndere anhembojaxea,
 vvy ipiru reia rupi yy re nda'evei va'e rami.
- ² Mba'eta ndevyguá henda iky'a e'ȳ va'e py aī vy
 aikuaa pota va'ekue nembaraetea ha'e nerekakāa re.
- ³ Mba'eta xerekove 'rāgue py xee arovy'ave ndee xemboaxya.
 Ha'e rami vy rogueroporaēi 'rā.
- ⁴ Ha'e rami vy roguerovy'a 'rā aikove teria ja,
 nderery rupi xepo aupi 'rā guive.
- ⁵ Xenhe'ē py avy'a nhandy ha'e xo'o hee va'e ha'u vy avy'aa rami avi.
 Roguerovy'aa rupi xejuru py rogueroporaēi.
- ⁶ Xerupa py xetuia rupi voi xema'endu'a 'rā ndere,
 pyávy ndakevei vy aikuaa pota 'rā ndere,
- ⁷ xepytyvōa reiko ramo.
- Ndepepo'ā py anhemi vy aporaēi 'rā vy'a rupi.*
- ⁸ Xenhe'ē ma ndere anho oī.
 Ndepo reiporu kuaa regua re xejopy.
- ⁹ Ha'e rā xerekovea oipe'axe vy xereka va'e kuery ma
 ho'apa 'rā vvykua vaikue py.
- ¹⁰ Remboaxa 'rā kyxe py ipo'aka va'e kuery pe,
 jagua-tuvy nhe'ē rembi'urā rive ikuai aguā.
- ¹¹ Ha'e rā huvixave ma ovy'a 'rā Nhanderuete re.
 Hery rupi oura va'e kuery avi ovy'a 'rā okuapy.
 Ha'e rā apu rupi ikuai va'e ma okyriřimba 'rā.
- Hovaigua kuery gui oepy aguā re ojerurea ague*
 Jogueroporaēi va'e pe mboraeirā Davi ombopara va'ekue.

64

- ¹ Xeruete, endu ke ajexavai vy ajapukaia.
 Eraa jepe xerekovea xerovaigua kuery poxya gui.
- ² Xenhomi heko vai va'e ojaxoxe va'e gui,
 heko vai va'e opa marā onhendu okuapya gui.
- ³ Ha'e va'e kuery ma kyxe oaĩmbe'ea rami oguereko katu 'rā oapekū,
 hu'y oa'angaa rami oguereko katu 'rā ayvu vai,
- ⁴ nhemi rupi ojapo vai aguā anhetē rupi ikuai va'e re,
 ha'e kuery re opoi xapy'a 'rā okyje e'ȳ re.
- ⁵ Mba'emo vai rupi ikuaia gui ndojepe'ai 'rāe,
 nhemi rupi ijayvu 'rā joapo vai aguā re.
 Ha'e vy joupe-upe "Mava'e tu nhanderexa 'rā?" he'i.
- ⁶ Teko vai re rive oikuaa pota 'rā,
 ha'e gui ojou 'rā ha'ekue rami ete ojapo aguā.
 Vvykua vaikue rami onhembopy'aa ha'e petēi-teī py'a.
- ⁷ Ha'e gui ma ha'e kuery re Nhanderuete ju 'rā opoi ngu'y.
 Ha'e kuery oendu xapy'a 'rā onhyvōague.
- ⁸ Po ramigua py ha'e kuery ho'a 'rā:
 ijayvuague rami ae oiko 'rā ha'e kuery re.
 Ha'e ramo hexaa kuery ha'e javi oakā ombovava 'rā,
- ⁹ ha'e avakue ikuai va'e ha'e javi ma ojererokyje reve
 oikuaa uka 'rā Nhanderuete rembiapo,
 ha'e ojapo va'e oikuaa vy.
- ¹⁰ Ha'e gui heko porā va'e ma oguerovy'a 'rā SENHOR,
 hexe ojerovia 'rā guive.
 Anhetē rupi ipy'a va'e ha'e javi ovy'a 'rā.
- Mba'emo aju omono'ōmbaa ogueroma'endu'aa ague*
 Jogueroporaēi va'e pe mboraeirā Davi ombopara va'ekue.

65

- ¹ Oreruete, ndere rojeroviaa rupi rogueroporaēi 'rā Sião tetā py!
 Ndevy pe rojapo 'rā ronhemboayvuague.
- ² Ronhembo'ea rendu va'e,
 ndea py ou 'rā opa marāgua avakue
- ³ guoko vaiague re ndovy'ai vy.
 Rojejavyague orere ipo'aka ramo

* 63:7 "Ndepepo'ā py" he'ia ma Nhanderuete opena porāa re ijayvu vy (Mateus 23.37).

- ndee rembogue 'rā.
 4 Ovy'a ete 'rā ndejeupe guarā reiporavo va'ekue.
 Ha'e va'e kuery onhemboja 'rā ndere, nderoka py ikuai aguā.
 Ha'e ramo rovy'a vaipa 'rā ndero py oremboaxya rexa uka va'e re,
 ndevyguia temploiky'a e'y' va'e py.
 5 Oreruete orereraa jepea, ndeguigua teko porā re rojapukai ramo
 ndee orembovai 'rā nhomondyipaarā rejapo vy.
 Yvy apy re ikuai va'e ha'e ye'ē mombyryve oī va'e rupigua
 ndee anho nerarō okuapy.
 6 Nembaraetea rupi vy remombyta porā raka'e vvyty,
 ndepo'akaa py renhemonde reve.
 7 Ye'ē revovo onhendu ramo remombytu'u ju,
 yai opu'ā-pu'ā va'e revovo,
 vvy regua kuery revovo guive.*
 8 Ha'e ramo hexa pyrā rejapo va'e
 vvy apy re ikuai va'e oexa vy onhemondyipa 'rā okuapy.
 Kuaray oua katy gui ha'e oikea katy gui ou va'e
 rejapo 'rā ovy'a reve oporaei okuapy aguā rami.
 9 Vvy re reikuaa pota vy remoakỹ 'rā,
 remoingo porā ete 'rā.
 Yakā'i Nhanderuete pegua typy porā meme 'rā.
 Mba'emo ra'yī oiko porā 'rā,
 ha'e rami aguā rami remoingo rire.
 10 Ha'e rami vy remoakỹ 'rā vvy roikaraīague rupi,
 rembojojapa 'rā vvy'ā ikuai va'e.
 Oky rayvi py remoakỹ
 ronhotỹ va'ekue remoingo porā vy.
 11 Ma'et'ya opaa py rexa uka 'rā ndeporayvua coroa rami iporā va'e.
 Repyrōague rupi reja 'rā vvy moingo porāarā,
 12 teko e'yā rupi jai rogue ikuai va'e re guive.
 Yvy'ā ikuai va'e voi ovy'a 'rā.
 13 Mymba heta 'rā ikuai nhuūndy rupi,
 ha'e vvy'ā guy rupi ma hary anho 'rā ikuai.
 Ha'e nunga ha'e javi ovy'a vy oporaei 'rā okuapy.
 Nhanderuete oguerovy'aa ague
 Jogueroporaiei va'e pe mboraeirā ombopara pyre.

66

- 1 Vvy jave re pendekuai va'e, peroporaiei Nhanderuete!
 2 Peporaiei hery rupi iporā ramo,
 perovy'a mboraei rupi.
 3 Nhanderuete pe aipo peje: “Rejapo va'ekue ma iporā etel
 Ndepo'aka etea rupi nderovaigua ikuai va'ekue ojexa uka 'rā nenhe'ē rendu vy.
 4 Vvy jave regua nerenonde 'rā oī guenapy'ā re,
 mboraei rupi oporaei 'rā ndevy,
 nderery rupi oporaei 'rā okuapy.”
 5 Peju ke, pexa Nhanderuete rembiapokue,
 avakue ra'y kuery pe mba'emo porā ojapo va'ekue ha'e javi.
 6 Ye'ē omboypa raka'e vvy piru reia rive opyta aguā rami,
 ha'e yakā mbyte rupi guive oaxaa vvy rupi.*
 Ha'e py ma javy'a hexe.
 7 Opo'akaa rupi opena riae 'rā,
 oexa pota 'rā vvy regua kuery re.
 Nonhe'ē rendui va'e tonhemboyvate eme.
 8 Vvy regua kuery, penema'endu'a porā ke Nhanderuete re,
 pendu uka peporaieia.
 9 Ha'e ma ojapo jaikove aguā rami,
 ha'e ndojapoi 'rā nhandepyxyry aguā rami.
 10 Mba'eta ndee Oreruete, orereko rexa,
 oreky'a'o prata oiky'a'oa rami.
 11 Oreapo va'ekue nhuā py orembotya aguā rami,
 orevoyirā remoī orekupe re.

* 65:7 Lucas 8.12-15; 21.25-26 * 66:6 Êxodo 14.21-22, Josué 3.17

- ¹² Rejapo avakue kavaju árygua kuery oreakã áry rupi oo aguã rami.
Oremboaxa va'ekue tata ha'e yy rupi.
Ha'e rami rire teĩ peteĩ henda tuvixaa py ju orereru.
- ¹³ Aike 'rã nderopy mba'emo ame'ẽ va'erã reve,
ndevy ajapo aguã anhemboayvuague,
- ¹⁴ ha'e rami aguã re xeayvu rire,
mba'eta ajexavaia ára ha'e rami aguã xeayvu.
- ¹⁵ Ndevy ame'ẽ 'rã ikyra va'e ojuka pyre,
kavara ro'okue reakuã reve.
Ajuka 'rã vaka ha'e kavara ra'y.
- ¹⁶ Nhanderuede renonde pejererokyjea rupi pendekuai va'e ha'e javi, peju ke, pendu,
pëvy amombe'u 'rã xevy ojapo porã va'ekue.
- ¹⁷ Ixupe ajapukai karamboae,
xejuru py aroporaei guive.
- ¹⁸ Xepy'a re ovare e'y va'e amoĩ va'e rire
SEÑHOR naxerendui 'rãgue.
- ¹⁹ Ha'e rami rã Nhanderuede xerendu ae,
oikuaa pota guive ajerure vy xeayvu rã.
- ²⁰ Ima'endu'a porãmby toiko Nhanderuede.
Anhembo'ea noendu rivei,
neĩ ndoexa uka e'y'i guive xemboaxya.
- Yvy regua kuery oguerovy'a aguã regua*
Jogueroporaie va'e pe mboraierã ombopara pyre mbaraka py ombojoguy aguã.

67

- ¹ Nhanderuede topena porã nhandere,
tanhanemoingo porã,
ha'e jaikoa rupi tomboguejy ngova rexakã,
- ² yvy re ikuai va'e oikuaa aguã ndereko,
yvy regua ha'e javi ikuaia rupi oikuaa aguã rejogueraa jepea.
- ³ Oreruete, yvy regua kuery tandereroporaie,
tandereroporaie ha'e kuery ha'e javi.
- ⁴ Amboae regua kuery voi tandererovy'a, tandereroporaie.
Mba'eta yvy regua re reikuaa pota 'rã anhetẽ rupi,
yvy re ikuai va'e rerekopa.
- ⁵ Oreruete, yvy regua kuery tandereroporaie,
tandereroporaie ha'e kuery ha'e javi.
- ⁶ Nhanderuede nhanemoingo porã ramo
yvy re oiko ma mba'emo'a.
- ⁷ Oreruete, oremoingo porã ke,
ha'e ramo yvy apy guive ojererokyjea rupi ikuai 'rã nerenonde.
- Nhanderuede ngovaigua kuery re ipo'akaa re ijayvua*
Jogueroporaie va'e pe mboraierã Davi ombopara va'ekue.

68

- ¹ Nhanderuede opu'ã vy omoaimba ngovaigua kuery.
Henonde gui onhamba oayvu e'y va'e.
- ² Hataxĩ oaimba ovya rami ndee remoaĩ 'rã.
Tata gui ei raity hykupaa rami avi
heko vai va'e kuery okanhymba 'rã Nhanderuede renonde gui.
- ³ Ha'e rã heko porã va'e ma ovy'a 'rã okuapy,
Nhanderuede renonde oporaei 'rã.
Oguerovy'a pavẽ 'rã.
- ⁴ Peporaei ke Nhanderuede pe, hery rupi peporaei.
Pemboete arai áry rupi oiko va'e.
SEÑHOR ae hery. Pevy'a henonde.
- ⁵ Ha'e ma tyre'y ikuai va'e ru, ha'e imeve'y va'e re oikuaa pota va'e oiko.
Nhanderuede oiko o'amba iky'a e'y va'e py.
- ⁶ Nhanderuede ojapo 'rã amongue ha'e ae'i oiko va'ekue ngoo pygua heta reve ju oiko aguã rami.
Nhuã py omboty pyre voi ogueraa jepe 'rã ikuai porã aguã py.
Onhe'ẽ rendu e'y va'e kuery anho 'rã ikuai yvy porã e'y'a re.
- ⁷ Oreruete, ndevyagua kuery renonde reẽ reovy ramo,
tekoa e'y'a rupi reroguata ramo
- ⁸ yvy oryryipa raka'e,

- yva voi otykypa ndee Oreruete renonde.
 Sinai yvyty voi omyimba ndee ore Israel kuery Ruete renonde.*
 9 Oreruete, oky ja'ea rembou ndevvy re.
 Na'iporãvei ramo rembopyau.
 10 Ha'e py ma ikuai nerymba kuery.†
 Oreruete, oikotevê va'e pe rejou uka mba'emo ndeporayvua rupi.
 11 SENHOR ae oikuaa uka ayvu.
 Heta ete ikuai kunhague ayvu porã mombe'ua.
 12 Huvixave kuery onhamba, oxondaro kuery reve ojavapa,
 ha'e gui imba'e rei-rei va'ekue ma kunha hoo va'e ju omboja'o.
 13 Mba'e re tu pepytu'u peiny mymba kora yvýry?‡
 Apykaxu pepo ma prata py onhovãmbaa mbyre,
 hague ipukuve va'e re ma ouro rexakã oĩ.
 14 Ha'e py Ipo'akapa va'e huvixave kuery omoaimba jave
 Zalmom yvyty áry ho'a yro'y apĩ.
 15 Nhanderuete pegua yvyty ma Basã,
 yvy'ã yvateve va'e ma Basã regua yvyty.
 16 Ha'e gui ndee yvyty yvateve va'e,
 mba'e re tu remoarũ reia rupi rema'ẽ yvyty Nhanderuete oiporavo va'ekue re?
 Ha'e py ma SENHOR oiko 'rã raka'e rã peve.
 17 Nhanderuete pegua karóxa joe opu'ãa pygua ma vinte mil ikuai,
 tá, mbovy rei e'ỹ oguereko.
 Ha'e va'e kuery mbyte rupi SENHOR oiko.
 Sinai yvyty ojeapo henda icy'a e'ỹ va'e rami.
 18 Yvate katy reo ju vy reraa nerembiguairã rejopy va'ekue.
 Rejopy avakue ndejeupe guarã, heko vai va'ekue guive,*
 SENHOR Oreruete, ha'e kuery mbyte reiko aguã.
 19 Ima'endu'a porãmby toiko SENHOR ko'ẽ nhavõ nhandevoyi ogueraa va'e.
 Nhanderuete ma nhanderepya oiko.
 20 Nhanderuete ma jogueraa jepea.
 Nhanderuete SENHOR reve vy jaa jepe 'rã manoa gui.
 21 Mba'eta Nhanderuete ombovo ngovaigua kuery akã,
 hi'a vuku va'e ha'e kuery ae oipotaa rupi ikuai va'ekue akã ombovopa.
 22 SENHOR aipoe'i: "Basã yvy gui arojevvy uka ju 'rã ha'e kuery,
 ye'ẽ typyvea peve ojava teĩ ha'e gui aru rukapa ju 'rã", he'i.
 23 Ha'e ramo pepyrõ 'rã penderovaigua kuery ruguy re,
 ha'e penerymba jagua kuery oy'upa 'rã.
 24 Xeruete, ojekuaa ndevyguua kuery hyxy ovy va'e.
 Xeruete, Xeruvixave pegua hyxy jogueravy vy oike henda icy'a e'ỹ va'e py.
 25 Henonde ma oje'oi oporaẽ va'e,
 hakykue ma ixã va'e mbopua kuery oje'oi.
 Mbyte rupi ma kunhataigue oparã'i va'e revegua ou.
 26 Teta mbyte penema'endu'a porã ke Nhanderuete re.
 Peẽ Israel ramymino kuery, penema'endu'a porã SENHOR re.
 27 Pe py ma oĩ kyrĩve va'e Benjamim regua, amboae kuery renonde re oo,
 ha'e Judá regua huvixa kuery ngupivegua kuery reve.
 Ou avi huvixa kuery Zebulon ha'e Naftali regua.
 28 Oreruete, exa uka ju ke nembraetea,
 mbaraete marã e'ỹ orerepya rupi reiporu va'ekue,
 29 Jerusalém tetã py ndevyguua templo guigua.
 Huvixa kuery ome'ẽ 'rã mba'emo nemoetea rupi.
 30 Emonyypa vixo takuaty rupigua,§
 heta regua kuery guive vaka rami imbarate teĩ,
 ha'e gui amboae regua vaka ra'y rami ikuai va'e.
 Epyrõ prata oipota rei va'e kuery re.
 Emoaimba joe opu'ãxe vai va'e.
 31 Huvixa kuery ou Egito yvy gui,
 Etiópia pygua avi onha 'rã jogueruvy,

* 68:8 Egito yvy gui Nhanderuete judeu kuery ogueraa jepe vy henonderã omondouka arai ha'e tata (Êxodo 13.21-22). Ha'e gui Sinai yvyty yvýry ha'e kuery ovaẽ ramo ojapo yvy oryryi aguã rami (Êxodo 19.16-18). † 68:10 "Nerymba kuery" he'ia ma Nhanderuete pegua kuery re ijayvu vy (Salmo 100.3). ‡ 68:13 Kova'e ayvu rupi Débora ijayvu raka'e Rúben kuery pe joe opu'ã aguã katy ndooi ramo (Juizes 5.16). * 68:18 Efésios 4.7-13 § 68:30 "Vixo takua ty rupigua" he'ia ma Egito pygua huvixa re ijayvu vy (Ezequiel 29.3, 32.2).

opo tynyē va'e omokuave'ē reve Nhanderuete pe.
 32 Yvy regua pendekuai va'e, peporaei Nhanderuete pe,
 peroporaei SENHOR.
 33 Ha'e ma yva áryve rupi oī, yva ymave guare áry rupi.
 Ha'e ojapo 'rã ijayvua oendua aguã rami,
 ijayvua ipo'akapa ramo.
 34 Peroporaei Nhanderuete Israel áry rupi ipo'akaa oexa uka va'e,
 ombaraetea oexa uka arai yvatevegua re.
 35 Oreruete, omboetevepy reiko ndevyguia henda icy'a e'ỹ va'e py.
 Israel kuery Ruete omombaraete ha'e ombopo'aka 'rã ojeupegua kuery.
 Ima'endu'a porãmbý toiko Nhanderuete!

Messias nda'eveia re ijayvua

Jogueroporaei va'e pe Davi ombopara va'ekue "Yvoty lírio" he'ia py oporaeia rami oporaei aguã.

69

1 Xeruete, xereraa jepe ke,
 mba'eta yy ou ma xerekovea peve.
 2 Xepija ma yapo py,
 yvy ndarovyi.
 Yy typyvea py aī.
 Oxyry atã vy xemoinge.
 3 Ajapukai riae ete vy xekane'õ ma,
 xejyryvi pirupa ma guive.
 Xerexa voi ndoexavei ma,
 Xeruete arõ riae ete rã.
 4 Mba'e py e'ỹ ndaxerayvui va'e kuery ma
 xe'a xeakã regua gui hetave ikuai.
 Xemombaxe va'e kuery ma ipo'aka va'e meme,
 mba'e py e'ỹ xerovaigua kuery xere opu'ã va'e.*
 Ha'e rami vy xeapo okuapy xemonda ague'ỹ voi ame'ẽ ju aguã rami.
 5 Xeruete, ndee reikuaa porã xee ae 'arandua rupi e'ỹ aikoague,
 atekoavyague ndereikuaa e'yi.
 6 SENHOR, Xeruete nexondaro reta va'e,
 xekáuxa toxĩmba eme ndere ojerovia va'e.
 Israel kuery Ruete,
 xekáuxa toĩ vai eme ndereka va'e kuery.
 7 Mba'eta ndevy aiko ramo xere ijayvua vaikue-ikue.
 Xerova re axĩmbaa anho ojekuaa.
 8 Xeryvy kuery rexaaty rami ve'ỹ ma aiko,
 ha'i pi'a kuery voi ndaxerexa kuaavei ma.
 9 Mba'eta ndevyguia oo ayvu etea xemomba,
 ndere ijayvu rei va'e kuery ijayvu reia ma xere ae ou.*
 10 Ajae'o akaru e'ỹ re aikoa py.
 Ha'e rami aikoa re ju ijayvua.
 11 Ajukue voxa guigua py anhemonde ramo*
 ha'e kuery xembojaru rei rive 'rã okuapy.
 12 Okẽ py oguapy va'e opuka rei okuapy xere.
 Oka'u rei va'e kuery voi xerery rupi oporaei 'rã okuapy.
 13 Ha'e rã SENHOR, xee ma ndevy anhembo'e ha'eve jave.
 Xembovai ke Xeruete, opa mba'e py renhomboaxya rupi,
 mba'eta ojeroviapy reiko vy renhopytyvõ 'rã.
 14 Xereraa jepe ke ijaxuru va'e py aike e'ỹ aguã.
 Xereraa jepe xere ija'e e'ỹ va'e kuery gui,
 yy typyvea py aikeague gui.
 15 Xereroxyry uka eme yy oxyry atã va'e pe,
 yy jere py guive xemoinge uka eme,
 vykyua voi xe'áry tonhemboty eme.
 16 SENHOR, xembovai ke renhomboaxya rupi rejoayvu va'e vy.
 Opa mba'e py renhomboaxya va'e vy ejevý ju xea py.
 17 Xee nrembiguai pe ejexa uka e'ỹ eme,
 ajexavai aikovy ramo.

* 69:4 João 15.25 * 69:9 João 2.17; Romanos 15.3 * 69:11 Ha'e kuery ipy'a vai vy onhemonde 'rã ajukue vaikue voxa guigua py gueko rami vy (Lucas 10.13; Apocalipse 11.3).

- Xembovai voi ke.
- ¹⁸ Enhemboja xerekovea re, xerepy,
xereraa jepe xerovaigua kuery gui.
- ¹⁹ Ndee ma reikuaa ae xembojaru rei okuapya,
xemoxĩmbaa ha'e xemoĩ vai reia guive.
Xerovaigua kuery ha'e javi rexaa rupi meme ikuai.
- ²⁰ Axĩmbaa gui xepy'a ovopa, xekangy vy.
Xemboaxyarã ma arõ rive,
xembovy'aarã aeke teĩ ndajoui.
- ²¹ Ha'u va'erã iro va'e rive ome'ẽa xevy,
ha'e xey'uvei ramo vinagre ome'ẽa.†
- ²² Ha'e kuery mesa tojeapo nhuã rami ha'e kuery renonde,
imba'e rei-rei topyta imbo'aaarã.
- ²³ Ha'e kuery rexa voi tapytũmba ndoexavei aguã,
ikupe ma ejapo oryryipa aguã rami.*
- ²⁴ Ha'e kuery pe exa uka ndepoxya,
ndepoxya toupitypa.
- ²⁵ Hekoa topyta tekoe e'ya rami,
avave rei toiko eme hoogue py.‡
- ²⁶ Mba'eta ha'e kuery omoingo axy raxave rire ndee remoingo axy va'e,
ndee remboguai va'ekue ha'e kuery ojapo haxy oendu vaipave aguã rami.
- ²⁷ Ha'e kuery re emoive tema teko vai kãuxa opaga aguã,
remoaxy aguã rami e'y ikuai aguã.
- ²⁸ Hery emboguepa kuaxia tekove ogueroko va'e kuery rery oĩa gui,*
toive eme heko porã va'e kuery rery reve.
- ²⁹ Ha'e rã xee ma ndavy'ai ete aikovy ajexavai vy.
Xeruete anhemiaty yvate va'e, exa uka ju xereraa jepea.
- ³⁰ Nhanderuete rery rupi aporaei 'rã,
amboete 'rã arovy'a reve.
- ³¹ Namigua ma SENHOR ojou porãve 'rã
vaka ra'y, e'y vy vaka hakua ha'e ipyapẽ va'e ome'ẽmby gui.
- ³² Ha'e va'e ojexavai va'e kuery oexa vy ovy'a 'rã okuapy.
Peẽ Nhanderuete re penema'endu'a va'e,
tapendeky'a guaxuve ju.
- ³³ Mba'eta Nhanderuete ombovai 'rã iporiaukue'i ojavukaia,
ndaexarai 'rã nhuã py ixupegua omboty pyre gui.
- ³⁴ Ha'e gui yva ha'e yvy regua, toporaei ixupe,
ye'ẽ ha'e opa mba'e hexe omyĩ va'e avi.
- ³⁵ Mba'eta Nhanderuete ogueraa jepe 'rã Sião pygua kuery,
ojapo ukapa ju 'rã guive Judá yvy regua tetã.
Ha'e py ma ha'e kuery hekoe ju 'rã, ixupegua ae 'rã ikuai.
- ³⁶ Ha'e gui hembigui ramymino kuery ju 'rã ikuai porã ha'e py,
hery oayvu va'e kuery ikuai avi 'rã ha'e py.
Salmo 40.13-17
- Jogueroporaie va'e pe Davi ombopara va'ekue ima'endu'a aguã.

70

- ¹ Xeruete, xereraa jepe ke.
Ejapura ke SENHOR, xerepy aguã.
- ² Tove xerekove oipe'axe va'e toxĩmba,
oxĩmbaa anho toendu.
Ajexavaia re ovy'a rei va'e kuery
oxĩmba reve tojevypa guakykue katy.
- ³ Tove ovy'a rei va'e xevy "Ha'evea rami! Ha'evea rami!"
he'i va'e kuery toguevipa.
- ⁴ Ha'e rã ndereka va'e kuery ha'e javi ma tandererovy'a oporaei reve.
Rejogueraa jepea oguerovy'a va'e
"Nhanderuete ima'endu'a porãmby toiko!" te'i riaie okuapy.
- ⁵ Ha'e gui xee ma iporiaukue'i, ojexavai rei va'e aiko.
Xeruete, ejapura xerepy aguã.

† 69:21 Ha'e ramigua oiko Jesus kuruxu re oĩ jave (Mateus 27.33-34, 48; João 19.28-30). * 69:23 Romanos 11.9-10 ‡ 69:25 Kova'e ayvu
rupi Judas rekokie re ijayvu Atos 1.15-26 py. * 69:28 Filipenses 4.3; Apocalipse 3.5, 13.8, 17.8, 20.11-15, 21.27

Ndee ma xepytyvōa ha'e xerepyarā.
SENHOR, ndeare eme ke!

71

Tuja'i ojerureague

- ¹ SENHOR, ndere ae xee anhemu va'e.
Taiko eme oximba rei va'e.
- ² Xereraa jepe rejoguereko porāa rupi vy, xejogua ju.
Endu ke ndeapya py, ha'e xerepy.
- ³ Ndee ma xe'itaova anhemiaty.
Ndeayvu aa jepe aguā re,
mba'eta ndee ma xe'itaova ha'e oo imbaraeete va'e.*
- ⁴ Xeruete, xereraa jepe ke heko vai va'e po gui,
avakue heko vai va'e, porayvu e'y va'e xejopy va'e gui.
- ⁵ Mba'eta SENHOR Xeruete, ndee ma roarō aikovy va'e,
xekunumi guive ndere ajerovia va'e.
- ⁶ Ndere ae ajeko va'e xetui' i guive.
Xeryru' i gui xepe'a va'ekue.
Ha'e gui ndere vy 'rāe aporaei ára nhavō.
- ⁷ Heta pe nhomondyipa aiko,
teĩ ndee ma anhemiaty imbaraeete va'e reiko.
- ⁸ Ndevy anho 'rā aporaei,
roguerovy'a 'rā ára nhavō.
- ⁹ Xetuja' i ma teĩ xereja eme xee ae' i.
Xembaraetea opa ramo xerepy e'y eme.
- ¹⁰ Mba'eta xerovaigua kuery ma ijayvu okuapy xere.
Xerekovea oipe'axe va'e nhomboaty tema okuapy.
- ¹¹ Ha'e vy aipoe' i: "Nhanderuete ndoeppyvei ma 'rā.
Nhamonha ke, jajopy,
heraa jeepearā ndoikoi ramo", he' i okuapy.
- ¹² Xeruete, ejepe'a eme xea gui.
Xeruete, ejapura ke xerepy aguā.
- ¹³ Ha'e rā xerekovea rovaigua kuery ma toximba ha'e tokanhymba.
Ejapo ke xemoĩ vaixe va'e kuery ae oximba aguā rami,
omboeteve e'y py ta'ikuai.
- ¹⁴ Ha'e rā xee ma ndee ae roarō ára nhavō,
rogueroporaei riae guive.
- ¹⁵ Xejuru py amombe' u 'rā rejoguereko porāa,
ára nhavō amombe' u 'rā rejogueraa jepea,
ndaikuaapai teĩ.
- ¹⁶ Anhenhandu SENHOR Xeruete mbaraetea rupi.
Ha'e rami vy xema'endu'a jepi 'rā rejoguereko porāa re,
ndeguigua re anho.
- ¹⁷ Xeruete, ndee ma xekunumi guive xerekombo'e reikovy.
Ha'e gui aỹ peve amombe' u aikovy iporā ete va'e rejapo va'ekue.
- ¹⁸ Ha'e nunga rupi Xeruete, xereja eme,
xetuja' i ete ma, xe'a xiimba ma teĩ,
aỹgua kuery pe nembaraetea aikuaa ukapa peve,
ndepe'akaa guive raka'e rā ikuai va'erā pe.
- ¹⁹ Xeruete, ndereko porāa ma yva peve 'rā oo.
Mba'emo vaipa ete rejapo va'e, Xeruete.
Mava'e nda' u ndee ramigua ete 'rā oiko?
- ²⁰ Opa marāgua teko vai ha'e jexavaia rupi xemboaxa rire teĩ
xerekovea remoĩ porā jevy 'rā,
yvykua vaikue gui xerenoẽ kuerei.
- ²¹ Xemoingo porā jevy ke,
xemombaraete ju.
- ²² Xee voi mbaraka py rogueroporaei 'rā.
Xeruete, xema'endu'a 'rā ndeguigua anhetē va'e re.
Ndevy aporaei 'rā mboraei ixā reta va'e pu rupi,
Israel kuery ruete Iky'a e'y va'e pe ae.
- ²³ Roguerovy'aa rupi xejuru py aroporaei 'rā,
xerekovea rupi voi roguerovy'a 'rā, xereraa jepe rire.

* 71:3 Salmo 31.1-3

²⁴ Xeapekū py ára nhavō aroma'endu'a 'rā rejoguereko porāa,
mba'eta xemoī vaixe va'e oximba ha'e nda'evei nho okuapy.

Huvixave raka'e rā peve ipo'aka aguã re ojerurea ague
Salomão ombopara va'ekue.

72

- ¹ Oerueete, huvixave re emoī ke ne'arandua,
huvixave ra'y guive emo'arandu joguereko porā aguã rami.
- ² Ha'evea rami meme toikuaa pota ndevyguia kuery re,
teko porā rupi topena ojexavai rei'i va'e re.
- ³ Vyvty ikuai va'e gui ou 'rā heta va'e kuery moingo porāārā,
yvy'ã gui voi ou 'rā teko porā.
- ⁴ Ha'e gui huvixa toikuaa pota heta va'e kuery iporiaukue'i re,
toepy ojexavai va'e ra'y kuery,
ha'e rā nhomoingo axyare ma tomou'ũmba.
- ⁵ Ha'e ma oiko riae 'rā kuaray hexakā teria ja,
jaxy hexakā ja guive, yvy regua ha'e javi okuavea ja.
- ⁶ Huvixa toiko nhuũndy rupi oky ho'a va'e rami,
oky xapy'a pyávy yvy omoakỹ va'e rami.
- ⁷ Ha'e oia ára heko porā va'e ta'ikuai porā,
jaxy hexakā teria ja toiko ikuai porā aguã.
- ⁸ Ta'ipo'aka ye'ê ha'e javi peve,
ha'e yakā oī va'e guive yvy apy peve.
- ⁹ Henonde toī tekoa e'ya regua kuery ha'e javi guenapy'ã re.
Hovaigua kuery tojero'apa yvy ku'i oere peve.
- ¹⁰ Ixupe Társis tetā ha'e yy pa'ũ pygua huvixa kuery tome'ê imposto repy,
Sabá ha'e Sebá pygua huvixa voi tome'ê mba'emo ixupe.
- ¹¹ Henonde huvixave ikuai va'e toimba guenapy'ã re.
Ha'e javi regua ta'ikuai ixupe anho.*
- ¹² Mba'eta ha'e ma oepy 'rā iporiaukue'i ojapukai ramo,
ojexavai va'e ha'e yvy'igue'i guive.
- ¹³ Omboaxy 'rā ikangy'i ha'e ojexavai va'e,
ogueraa jepe 'rā iporiaukue'i rekove.
- ¹⁴ Ojogua 'rā omoingo axy rei pyre ha'e ojuka pyrã rekove.
Ixupe rā ha'e kuery ruguy hepyve ete.
- ¹⁵ Toikove puku,
ha'e gui ixupe ome'êa 'rā ouro Sabá guigua.
Hexe ojerurea riae 'rā,
ima'endu'a porāa 'rā guive ko'ê nhavō.
- ¹⁶ Ijyvy re toiko porā mba'emo aju,
tomyimba jekuaa yvyty apyte peve.
Tai'a porā Líbano yvy pygua rami.
Tetā pygua kuery voi taetave ovy jai ipoty rami.
- ¹⁷ Hery re ta'ima'endu'aa riae raka'e rā peve,
ta'ima'endu'a porāa kuaray hexakā teria ja.
Hexe vy toiko porā ha'e javi regua avakue,
ixupe yvy regua kuery "Ima'endu'a porãmby" te'i.
- ¹⁸ Ima'endu'a porãmby toiko SENHOR Nhanderueete, Israel kuery Ruete,
ha'e anho nhomondyipaarã ojapo kuaa va'e ramo.
- ¹⁹ Ta'ima'endu'a porāa riae hery re, iporã ete ramo.
Hexakāa tojekuaa yvy jave re.
Amém! Amém!
- ²⁰ Opa ma Jessé ra'y Davi onhembo'ea.

Heko vai va'e kuery reko re ijayvua
Mboraeirã Asafe ombopara va'ekue.

73

- ¹ Nhanderueete anhetē Israel kuery oayvua rupi ete oiko,
ipy'a ky'a e'ỹ va'e kuery pe.
- ² Ha'e rā xee ma aikoa rupi ajavy rai,
kyrĩ'i oata ajavy aguã aguataa py.
- ³ Mba'eta xee ma amaruã va'ekue ojee rive ojerovia va'e kuery,

* 72:11 Apocalipse 21.22-26

- opa marā rei ikuai va'e imba'e rei-reipa rā aexa vy.
 4 Ha'e kuery re noī ipy'a eta reia merami.
 Hete rexaī, imbaraete rei guive.
 5 Ha'e kuery ma avakue imarā va'e rami e'ỹ na'ikane'ōi,
 neī ndojexavai 'rā avakue mboae rami e'ỹ.
 6 Ojee omoī 'rā ojejou porā reia mbo'y rami,
 jojukaxea omoī 'rā ao puku rami.
 7 Ikyra ete gui hexa ěmba rei 'rā,
 ha'e ipy'a re ma opa marā rei ikuai aguā anho oī.
 8 Nhombojaru rei ha'e ijayvu vai rei 'rā okuapy joe,
 nhomoingo axy rei aguā re anho 'rā ijayvu onhemboyvate vy.
 9 Yva pygua gui onhemboyvateve aguā re tema ijayvu 'rā okuapy,
 yvy jave re ikuai va'e re ijayvu.
 10 Ha'e nunga rupi heta va'e kuery oje'oi 'rā hupive,
 yvu gui oy'uxea rami oy'u va'e rami.
 11 Aipoe'i 'rā: "Mba'exa nda'u Nhanderuete oikuaa 'rā?
 Xapy'a rei nda'u Yvate ete va'e re oī ri oikuaa aguā?" he'i.
 12 Ha'e rami ae ikuai heko vai va'e.
 Ha'e kuery noī vai 'rāe,
 omba'e rei-reirā ojou-jouve 'rā.
 13 Ha'e nunga rupi xepy'a ky'a e'ỹa rupi aikoa mba'everā ndovarei,
 neī xepo ky'a e'ỹa guive.
 14 Mba'e re tu aiko axy riae
 ko'ē nhavō xembopagaa rupi?
 15 Ha'e rami xeayvu va'e rire
 ajapo 'rāgue ndera'y kuery ha'e javive pe nda'evei aguā rami.
 16 Ha'e rami avi ha'e nunga re aikuaa pota vy
 xevy pe ipoyi ete va'e aikuaa,
 17 Nhanderuete pegua hendaiky'a e'ỹ va'e py aike peve.
 Ha'e gui mae ma aikuaa ha'e kuery opa aguā.
 18 Anhetē ndee remoī 'rā ha'e kuery yxyī reia py,
 rejapo 'rā ho'apa vy okanhy aguā rami.
 19 Opa xapy'a 'rā,
 nhemondyi gui rive 'rā okanhymba.
 20 Oexa ra'ua gui oma'ē xapy'a va'e rami 'rā
 ndee voi SENHOR repu'ā vy ha'e kuery re nerema'ēvei.
 21 Ha'e gui xepy'a raxy jave,
 xekuraxō py nda'evei reia anho aendu vy
 22 xevai rei aikovy va'ekue aikuaa e'ỹ vy.
 Nerenonde hi'arandu e'ỹ va'e rami aiko va'ekue.
 23 Ha'e rami avi ndereve riae xee aiko,
 ndee ma xepo aiporu kuaa regua re xejopy.
 24 Ndee xerereko 'rā xemongetaa rupi.
 Ha'e rire ma xemovaē 'rā nerexakāa py.
 25 Mava'e 'rā tu areko yva re ndee e'ỹ vy?
 Yvy re voi ndoikoi ndee rami arovy'a va'e.
 26 Xero'o, xekuraxō ikangypa teī
 Nhanderuete oiko xepy'a mombaraetearā,
 xevygua oī raka'e rā peve guarā.
 27 Ndegui ojepe'a va'e ma okanhymba 'rā,
 remomba 'rā ndere ojeroviaague rupi ve'ỹ ikuai va'e.
 28 Ha'e rā xevy ma ha'eve vaipa Nhanderuete reve aikoa.
 SENHOR Nhanderuete re anhemī,
 hembiapokue ha'e javi amombe'upa aguā.

Ooiky'a e'ỹ va'e omongy'apaa re nda'eveia ague
 Mboraeirā nhombo'e aguā Asafe ombopara va'ekue.

74

- 1 Oreruete, mba'e re tu orereja raka'e rā peve?
 Mba'e re tu ndepoxy nerymba vexe'i kuery ndevyvy regua ae orekuai va'e pe?
 2 Nema'endu'a ke ndevygua orekuai va'e re,
 yvy itui ypy'i guive ndejeupe guarā orejogua rire.
 Orejogua raka'e ndevy guarā orekuai aguā.
 Nema'endu'a ke Sião vyty py reikoague re.

- ³ Eju ke ndevyguaa oo ivaipa are ma va'e py,
henda iky'a e'y va'e nderovaigua kuery opa marã omongy'apaague py.
- ⁴ Mba'eta ronhemboatyague py nderovaigua kuery hevovo rei okuapy,
ha'e ojeupeguua ra'angaa rive ju omopu'ã imo'amy.
- ⁵ Ha'e kuery ma ka'aguy re haxa oiporu va'e rami avi ombovaipa.
- ⁶ Ha'e gui a'y yvyrape ombojegua pyre ha'e javi
ha'e kuery omopẽmba va'ekue haxa ha'e karavo mbotaa py.
- ⁷ Ndevyguua henda iky'a e'y va'e re omboja tata,
yvy peve oapy aguã nderery oïague.
- ⁸ Ha'e kuery opy'a py "A'y ma nhamomba vyvoi", he'i okuapy.
Ha'e rami vy oreyvy jave re oapypa Nhanderuete pegua henda iky'a e'y va'ekue ha'e javi.
- ⁹ Ha'e rami rire ndoroexavei ma oreyv guarã oikuaa uka pyre.
Jipovei ma profeta,
orembyte ndoikoi guive raka'e peve 'rã paa oikuaa va'erã.
- ¹⁰ Oreruete, raka'e peve 'rã tu nderovaigua kuery orere opu'ã rei?
Raka'e peve nda'u nderovaigua kuery ijayvu vaikue rei 'rã nderery re?
- ¹¹ Mba'e re tu ndereupivei ri ndepo reiporu kuaa regua,
ndepexo yv'yry remboapu'a va'ekue?
- ¹² Ha'e gui Xeruete Xeruvixave ma yvy itui ypy'i guive oiko.
Ha'e ae ojapo raka'e oo jepe aguã rami yvy mbyte.
- ¹³ Ndee ma ndepo'akaa rupi remboja'o raka'e ye'ẽ.
Ha'e gui yy re ae ju remou'ũ va'ekue ypo akã,*
- ¹⁴ jakare akã rembovopa,
ha'e hetekue reme'ẽ vixo tekoo e'yã rupigua ho'u aguã.
- ¹⁵ Ndee reipe'a va'ekue yvurã ha'e yakã ikuai va'erã,
ha'e rã yakã guaxu ma remboypa va'ekue.
- ¹⁶ Ára ha'e pytũ voi ndevyguua.
Jaxy ha'e kuaray guive ndee rejapo va'ekue meme.
- ¹⁷ Remoï avi yvy apy peve guarã.
Kuaray puku-a ha'e yro'ya ndee ae rejapo va'ekue.
- ¹⁸ Eikuaa pota ke pova'e nunga re:
ndee SENHOR re nderovaigua kuery ijayvu rei okuapy,
hi'arandu e'y va'e regua ijayvu vaikue-ikue nderery re.
- ¹⁹ Emboaxa eme nerymba pyku'i kuery ho'u va'erã pe,
nderexarai eme ndevyguua kuery rojexavai rokuapy va'e re.
- ²⁰ Nema'endu'a ke ndereve guarã rejapo va'ekue re,
mba'eta yvy re nda'evei etea py heko vai va'e anho ikuai.
- ²¹ Ojexavai va'e toxĩmba rei eme.
Ojexavai va'e ha'e iporiaukue'i togueroporaei nho nderery.
- ²² Xeruete, epu'ã ke, eikuaa uka porã ndereko.
Nema'endu'a heko vai va'e ko'ẽ nhavõ nembojaru reia re.
- ²³ Nderexarai eme nderovaigua kuery ojapukai rei okuapy re,
mba'eta nderovaigua kuery opa marã ijayvuvu tema okuapy.
- Nhanderuete nhomboayvua re ijayvua*
Jogueroporaei va'e pe mboraeirã Asafe ombopara va'ekue "Xemomba eme" he'ia py oporaeia rami oporaei aguã.

75

- ¹ Oreruete, roguerovy'a.
Roguerovy'a, rojapukai 'rã nderery rupi,
ha'e roikuaa ukapa 'rã nerembiapo porãa.
- ² Mba'eta aipo're: "Xee ma ambojeupity 'rã ára aa'angaague
ha'evea rupi anhombayvuu aguã.
- ³ Yvy omyĩmba, hexe ikuai va'e ha'e javi guive.
Ha'e rami teĩ xee amoĩ atãve 'rã ijyitarã.*
- ⁴ Aipoa'e ojee ae ojerovia va'e pe: 'Penhemboyvate eme.'
Ha'e opa marã rei ikuai va'e pe voi: 'Peropu'ã eme penembaraetea.
- ⁵ Peropu'ã rive eme penembaraetea pendeayvate py,
pendeayvu vaikue eme guive itaova aiko va'e re.' "
- ⁶ Mba'eta kuaray oua katy gui e'y ou nhanepytyvõarã,
kuaray oikea katy e'y, neĩ tekoo e'yã gui e'y guive.

* 74:13 "Ypo" he'ia ma Egito pyguua huvixa re ijayvu vy (Isaías 27.1, 51.9; Êxodo 14-15).
re ijayvu vy (Salmo 11.3, 82.5).

* 75:3 "Yvy yta" he'ia ma ha'evea rami joguerekoa

7 Nhanderuete ae joe oikuaa pota va'erā oiko.

Amongue ma ha'e omomba 'rā,
ha'e rā amboae kuery ma omboyvate 'rā.

8 Mba'eta SENHOR po py ma oī petei karo.

Ha'e va'e py ma oī vinho yjuu va'e opa marāgua re omoirū mbyre.
Ha'e va'e gui ome'ē 'rā oy'ua aguā.

Ha'e ramo heko vai va'e yvy re ikuai va'e ha'e javi
oy'upa 'rā iky'akue reve.†

9 Ha'e rā xee ma raka'e rā peve 'rā aroporaei.

Arovy'aa rupi aporaei 'rā Jacó Ruete pe.

10 Amomba 'rā heko vai va'e mbaraetea.

Ha'e rā heko porā va'e mbaraetea ma omboyvatea 'rā.

Nhanderuete yvatea ha'e ipo'akaa re ijayvua

Jogueroporaie va'e pe mboraeirā Asafe ombopara va'ekue mbaraka py ombojoguy reve oporaei aguā.

76

1 Nhanderuete reko ma Judá yvy re oikuaapy,

hery ma omboetepy Israel kuerya py.

2 Salém tetā py oī ombojeroviaaty,

Sião ma oiaty ete.*

3 Ha'e py omopēmba hu'y rexakāgue,

hu'y jokoa, kyxe ha'e joe opu'ā va'e ha'e javi.

4 Ndee ma yvate ete ha'e ipo'akapave va'e

yvyty imarā e'y va'e gui voi.

5 Ipy'a guaxukueve gui reipe'apa imba'e rei-rei.

Ha'e kuery okepa ma oupy,

peteīve ojerovia vai va'ekue ndoiporuvei 'rā opo.

6 Ndee Jacó Ruete, ndeayvu atā ramo

opytapa karóxa joe opu'āa pygua ha'e kavaju.

7 Anhetē ndee ma nhomongyjae reiko.

Ndepoxy ramo mava'e 'rā tu opyta nerenonde py?

8 Yva guive rendu uka ndeayvua.

Yvy jave rupi oryryi ha'e okyriřimba okuapy

9 Nhanderuete opu'ā ramo nhomboayvu aguā

ha'e yvyīgueve'i ogueraa jepe aguā.

10 Mba'eta avakue poxya voi rejapo 'rā ndereroporaeia aguā rami,

ha'e gui poxya mboae ma ndejee ae 'rā remoī.

11 SENHOR Penderuete pe penhemboayvu vy pejapo ete.

Ijyvry pendekuai va'e peru peme'ē va'erā,

mba'eta nhomongyjae oiko.

12 Ha'e ma omomba 'rā huvixa kuery ojejou porāa.

Ixugui huvixa yvy regua okyjepa 'rā okuapy.

Nhanderuete rembiapokue ha'e nhanemboaxya re ijayvua

Jogueroporaie va'e Jedutum pe mboraeirā Asafe ombopara va'ekue.

77

1 Nhanderuete pe amonhendu xeayvua, ixupe ajapukai guive.

Amonhendu 'rā xeayvua Nhanderuete pe xere oikuaa pota aguā.

2 Xee ajexavai ára nhavō aeka SENHOR.

Pytū mbukukue re aupi xepo xekane'ō e'y re,

xenhe'ē py nanhembovy'a ukaxeī vy.

3 Nhanderuete re xema'endu'a vy xepoāē ainy.

Mba'emo re aikuaa pota ramo xenhe'ē na'imbaraetevei.

4 Ndee rejapo ake aguā xerexa nambotyvei aguā rami,

ajexavai ete rā xeayvu aguā voi nda'evevei.

5 Aikuaa pota ymave guare,

xema'endu'a ymave rupi ma'etya oaxa va'ekue re.

6 Pyávy ma aikuaa pota xepy'a py,

ha'e rami vy xenhe'ē py aporandu:

7 "Raka'e rā peve 'rā nda'u SENHOR nopenavei?

Ndoexa ukavei 'rā nhanemboaxya?

† 75:8 Ha'e va'e karo re ijayvu ju Apocalipse 14.9-10 ha'e 16.19 py.

* 76:2 Salém ma Jerusalém tetā rery mboae, Sião voi.

- ⁸ Opa ete ma nda'u iporayvua?
Ijayvuague voi nda'u oaxa rive 'rã raka'eve rã peve?
- ⁹ Nhanderueete hexarai ma teve joayvua gui?
Tyrã ipoxy vy teve ndoexa ukavei nhanemboaxya?"
- ¹⁰ Aipoa'eve ju:
"Pova'e aroangeko aikovy,
mba'eta Yvate ete va'e oiporu kuaa regua oiporuaty rami ve'ÿ oiporu", ha'e va'ekue.
- ¹¹ Xema'endu'a SENHOR rembiapokue re,
mba'emo porã ymave rupi rejapo va'ekue re xema'endu'a aikovy.
- ¹² Aikuaa pota nerembiapokue ha'e javi re,
xema'endu'a nhomondyipaara rejapo va'ekue re.
- ¹³ Xerueete, ndee reikoa ma peteï tape icy'a e'ÿ va'e.
Marã ramigua tuuete nda'u ndee Oruerueete rami ipo'aka 'rã?
- ¹⁴ Ndee ma Oruerueete nhomondyipaara rejapo va'e.
Yvy regua kuery pe rexa uka ndepo'akaa.
- ¹⁵ Ndejyva py reraa jepe va'ekue ndevyguia kuery,
Jacó ha'e José ramymino kuery.
- ¹⁶ Ha'e gui Oruerueete, yy nderexa. Yy nderexa vy okyjea oendu raka'e.*
Typya voi omyimba.
- ¹⁷ Arai inhana va'e ojeapo yy.
Yva re yapu atã onhendu.
Ha'e gui hu'y voi oaxa jekuaa joa katy e'ÿ-e'ÿ.
- ¹⁸ Ndeguigua yapua hi'ãgue-'ãgue nhendu opa rupi,
overa va'e voi omoexakã ovy yvy re.
Yvy omyï vy oryryi.
- ¹⁹ Ye'ë rupi nderape ojekuaa,
repyrõa ma yy tuvixa va'e rupi oo.
Ha'e rami teï ndepypo ete ndojekuaai.
- ²⁰ Ndevyguia kuery rereko va'ekue vexa'i rami,
Moisés ha'e Arão po rupi.
- Nhanderueete opena porã re ijayvua*
Mboraeirã nhombo'e aguã Asafe ombopara va'ekue.

78

- ¹ Xeretarã kuery, pejapyxaka ke xee rombo'e ramo.
Pejapyxaka porã ayvu xejuru gui oë va'e re.
- ² Xeayvu 'rã mba'emo re ambojojaa rupi.
Amombe'u porã 'rã ymagua kuery 'arandua.*
- ³ Mba'emo nhanderu kuery nhandevy omombe'u rã
nhaendu ha'e jaikuaa va'ekue,
- ⁴ ha'e nungakue nanhamombe'u e'ÿi 'rã nhandera'y kuery pe.
Raka'eve rã ikuai va'erã pe voi nhamombe'u 'rã
SENHOR opo'akaa rupi opa mba'e porã ojapo va'ekue jarovy'a aguã.
- ⁵ Ha'e ae oeja raka'e oayvu Jacó kuery pe,
Israel kuery pe oeja lei.
Ha'e nhaneramoï kuery pe ijayvu
gua'y kuery pe ju omombe'u aguã re,
- ⁶ ikuai jevy va'e kuery voi oikuaa aguã,
kyrĩgue oiko'i va'erã teri va'e kuery voi.
Ha'e gui ha'e kuery ju opu'ã vy ha'e nungakue re ijayvu aguã guamymino kuery pe,
- ⁷ Nhanderueete re ojerovia aguã,
ha'e hexarai e'ÿ aguã Nhanderueete rembiapokue re,
ha'e rami 'rãgue py ojapo uka va'ekue rupi ete ikuai aguã,
- ⁸ tamoi kuery ikuaiague rami e'ÿ ikuai aguã,
nonhe'ë rendui va'e'ÿ ikuai aguã.
Ha'e kuery ma ha'ekue'ÿ-kue'ÿ rami ipy'a va'e,
onhe'ë py Nhanderueete pe e'ÿ ikuai raka'e.
- ⁹ Efraim ra'y kuery guyrapa reve-reve ikuai raka'e va'eri
onhamba oje'oivy joe opu'ã ara.
- ¹⁰ Ojepe'apa Nhanderueete guexeve guarã ojapo va'ekue gui,
ixuguigua lei rupi nda'ikuaixei vy.

* 77:16 Apy ijayvu Ye'ë Pytã Nhanderueete omboja'oague re (Êxodo 14). Ha'e gui yapu, overa va'e Nhanderueete ombou va'ekue re ijayvu. * 78:2 Mateus 13.35

- 11 Hexaraipa okuapy hembiapokue
ha'e opa mba'e porã oexa uka va'ekue gui.
- 12 Nhomondyipaarã tamoĩ kuery renonde ojapo teĩ,
Egito yvy Zoã regua nhuũndy rupi.*
- 13 Ye'ẽ omboja'o vy omboaxapa heravy ha'e va'e rupi,
yy omopu'ã imo'amy omboty vy.*
- 14 Ara py peteĩ arai ojekuaa va'e rupi ogueraa,
ha'e rã pyávy ma tata hexakãa rupi oguereko.*
- 15 Tekoa e'ỹa py itaova ombovo vy
omboy'u pavẽ tyy vaipa va'e gui rami.
- 16 Ita gui omoẽ yy oxyry atã va'e,
yakã rami omboxyry.*
- 17 Ha'e rami teĩ ha'e kuery ojevavy tema okuapy henonde.
Tekoa e'ỹa py ikuai raka'e Yvate ete va'e rovai.*
- 18 Opy'a py Nhanderuede pe "Taexa" he'ia rupi ikuai.
Ho'u va'erã re rive tema ojerure okuapy.
- 19 Nhanderuede re ijayvu vy aipoe'i okuapy:
"Nhanderuede nda'u tekoa e'ỹa py ojou 'rã ja'u va'erã?"
- 20 Ita re ombota uka vy ha'e va'e gui yy omboxyry va'ekue
mbojape voi nda'u ome'ẽ kuaa 'rã ja'u va'erã?
Xo'o voi nda'u ojou uka 'rã ojepegua kuery pe?" he'i okuapy.
- 21 Ha'e nunga SENHOR oendu vy ojou vai.
Ha'e rami vy Jacó ra'y kuery re omoendy tata,
Israel kuery pe oexa uka opoxya.
- 22 Mba'eta ha'e kuery ndojeroviaí Nhanderuede re,
ndogueroviaí guive ogueraa jepe aguã.
- 23 Ha'e rami teĩ yva pe ha'e ijayvu vy
oipe'a uka yva rokẽ.
- 24 Ojapo ha'e kuery áry ho'a aguã maná ho'u aguã.
Ha'e kuery pe ome'ẽ tembi'u yva guigua,*
- 25 ha'e ramo peteĩ-teĩ ho'u okuapy mbojape anjo kuery rembi'u regua.
Hevyatãmba aguã rami ombou tembi'u.
- 26 Ha'e gui ojapo yva gui yvytu kuaray oëa katy gui oipeju aguã rami,
opo'akaa rupi ombou yvytu kuaray puku-a katy gui.
- 27 Ha'e rami vy xo'o ju ombou ha'e kuerya py yvy ku'i rami,
guyra ombou ita ku'i ye'ẽ rembe re oĩ va'e rami heta va'e.
- 28 Ojapo ha'e kuery ikuaia mbyte ho'a aguã rami,
ha'e kuery ro yv'yry rupi ae.
- 29 Ha'e ramo ho'u okuapy hevyatãmba peve,
ha'e kuery oipota va'e ojapo ramo.
- 30 Ha'e rami teĩ ha'e kuery nonhandu kuaavei.
Ijuru py tembi'u oime rei teri reve
- 31 Nhanderuede oexa uka opoxya ha'e kuery rovai.
Ha'e kuery regua imbaraetekueve voi ojuka,
oity inony Israel regua kunumigüe.
- 32 Ha'e rami rire teĩ ha'e kuery ojevavy riaa tema,
ndojeroviaí okuapy tembiapo porã ojapo teĩ.
- 33 Ha'e nunga rupi ha'e ojapo ha'e kuery oikovea yvytu rami rive oaxapa vyvoi aguã rami,
oikovea pukukue re okyje reia rupi anho ikuai aguã.
- 34 Ojukapa ta ma ramo mae ma oiapukai okuapy ixupe,
onhemboaxya oendu vy oeka okuapy Nhanderuede.
- 35 Ima'endu'a ju Nhanderuede ha'e kuery pegua itaova oikoa re,
Nhanderuede Yvate ete va'e heraa jepea re.
- 36 Ha'e rami teĩ ixupe oiapukai vy ijayvu porã merami rive okuapy,
oapekũ py ma ijapu.
- 37 Mba'eta opy'a py ndojerovia etei,
guexeve guarã ojapo va'ekue rupi e'ỹ ikuai.
- 38 Ha'e rami teĩ Nhanderuede nhomboaxy va'e vy
omboguepa 'rã teko vai, nanhomombai 'rã guive.
Ha'e rami 'rãgüe py mbovykue rei e'ỹ nomoĩ 'rã ipoxy aguã,

* 78:12 Êxodo 7.8-11.10

* 78:13 Êxodo 14.21-22

* 78:14 Êxodo 13.21-22

* 78:16 Êxodo 17.1-7; Números 20.1-13

* 78:17

- opoxya oendu va'eri ndajoguerekoi 'rã ha'e rami.
 39 Ima'endu'a ha'e kuery to'o rive ikuai re,
 yvytu oaxa rire ndojevyveia rami ikuai va'e ramo.
 40 Ha'e rami teĩ mbovykue rei e'ÿ hexe opu'ã rei okuapy tekoa e'ÿa py,
 ha'e kuery ae'i ikuai py ombopoxya rupi ikuai.
 41 Nhanderuete pe "Taexa" he'i jepi,
 ijayvu rei okuapy Israel kuery ruete lky'a e'ÿ va'e re.
 42 Na'ima'endu'avei okuapy ipo'akaa re,
 hovaigua kuery gui ogueraa jepeague re voi,
 43 neĩ Egito yvy re hexa pyrã ojapoague re,
 Zoã regua py nhomondyipaarã ojapoague re.
 44 Mba'eta ha'e py yakã oĩ va'e tuguy ju ojapo va'ekue,
 yy gui ha'e kuery oy'u e'ÿ aguã.
 45 Ha'e kuerya py ombou heta mberu oixu'upa aguã,
 ju'i voi heta ombou omomba aguã.
 46 Ha'e kuery mba'emo omono'õ 'rã va'ekue omboaxapa yxo rembi'urã,
 tuku karu py omomba onhotÿ va'ekue'a.
 47 Amandau ombou vy omomba va'ekue ha'e kuery uva ty,
 ha'e yvyra sicômoro ikuai va'e voi ojukapa yro'y py.
 48 Amandau py omomba hymba vaka kuery,
 ha'e onhemboxi va'e py vexa'i kuery ojuka.
 49 Ha'e kuery pe oexa uka opoxya,
 opa mba'e vai py omoingo axy opoxya rupi,
 anjo kuery mba'emo vai rerua pe omboaxa.
 50 Opoxya rupi ete oiko va'ekue,
 ha'e kuery rekovea ndogueraa jepei manoa gui,
 ha'e rami 'rãgue py mba'eaxy vaikue pe omboaxa hekovea.
 51 Ojukapa Egito pygua ra'y kuery jypyguare ha'e javi,
 jypygua imbaraetekueve Cam regua.
 52 Ha'e rã ojeupegua kuery ma oipe'apa vexa'i rami,
 vexa'i rami oguereko tekoa e'ÿa rupi.
 53 Oguereko porã ramo okyjea noendui okuapy.
 Ha'e rã hovaigua kuery ma oikepa ye'ẽ py.
 54 Ogueraa yvy iky'a e'ÿ va'e katy,
 yvyty opo'akaa rupi oipe'a va'ekue peve.*
 55 Ha'e kuery renonde gui omoxẽmba ha'e va'e yvy pygua kuery,
 ha'e gui ijyvy va'ekue ma Israel kuery peguarã ju omboja'o ukapa,
 hoogue py omoingo Israel kuery.
 56 Ha'e rami teĩ Nhanderuete Yvate ete va'e pe "Taexa" he'i ju okuapy,
 hexe opu'ãa rupi.
 Ijayvague rami e'ÿ ikuai.*
 57 Tamoĩ kuery ikuaiague rami ete ojepe'apa,
 ojeroviaa rupi ve'ÿ ikuai.
 Opa marã rei ikuai guyrapa hembia e'ÿ va'e rami.
 58 Mba'eta yvy'ã rupi ombojerovia atyrã ojapo vy
 ombopoxy,
 mba'emo ra'angaa rive omboetea rupi ojapo okuapy nda'evei etea oendu aguã rami.
 59 Ha'e nunga Nhanderuete oendu vy ipoxy.
 Ha'e vy nopenavei Israel kuery re.
 60 Noĩvei ombojeroviaaty Siló tetã py oĩ va'e py,
 avakue mbyte oo'i oĩ atyrã ojapo rire teĩ.*
 61 Lei ryru ipo'akaa kuaa ukaa voi ogueraa uka amboae yvy katy,
 hexakãa rexa ukaa oĩ va'ekue guive ngovaigua kuery po py omboaxa.
 62 Ojeupegua kuery omboaxapa kyxe py ijukaarã pe,
 ojeupegua kuery rovai ipoxy vy.
 63 Ha'e ramo kunumigue tata omomba ramo
 kunhataigue ogueroporaie va'erã jipoi, neĩ omenda aguã.
 64 Sacerdote kuery voi kyxe py ojukapa rã
 ta'yxykue ojae'o aguã nda'evei.
 65 Ha'e gui mae SENHOR oikuaa pota okeague gui omyĩ va'e rami,
 ipy'a guaxu va'e vinho oy'u vy ojapukai atã va'e rami avi.
 66 Ha'e vy ngovaigua kuery ojuka vy ombogevi atãmba,

* 78:54 Josué 3, 11 * 78:56 Juízes 2.6-15 * 78:60 1 Samuel 4; Jeremias 7.12-15

ojapo raka'e rã peve oximba aguã rami.

⁶⁷ Ha'e gui huvixarã ma José ramymino kuery va'e regua ndoiporavoi,
nei Efraim regua.

⁶⁸ Ha'e rami 'rãgue py Judá regua oiporavo,
Sião yvyty oayvu va'e guive.

⁶⁹ Ha'e áry ojapo ojeuepegua henda iky'a e'y va'e yva rami ete oĩ atã va'erã,
omoĩ atã raka'e rã peve guarã yvy onhono va'ekue rami.

⁷⁰ Ha'e rami vy oiporavo guembiguai Davi
vexa'i kora gui oipe'a vy.*

⁷¹ Vexa'i re opena oikovya gui ogueru vy
omoĩ Jacó kuery re opena va'erã,
ojeuepegua kuery Israel re ae.

⁷² Ha'e ramo opena oikovy anhetê rupi ipy'a va'e vy,
arandu rupi ete oguereko opo py.

Ngovaigua kuery ombopaga aguã re ojerurea okuapyague
Mboraeirã Asafe ombopara va'ekue.

79

¹ Oreruete, yvy regua xondaro kuery ndevygua yvy re ou.

Ndevygua templo iky'a e'y va'e omongy'apa,
ha'e Jerusalém tetã ha'e javi rupi ombovaipa.*

² Nerembiguai kuery retekue oea guyra rembi'urã,
ndevy ikuai va'ekue ro'okue ma ka'aguy rupigua rembi'urã oea.

³ Jerusalém ha'e javi rupi omoẽ huguy yy rami,
nda'ipovei guive hetekue nhono porãarã.

⁴ Ha'e ramo orea katy rai'i rupi ikuai va'e ijayvu vaikue-ikue orere.
Opuka, ovy'a rei guive orere.

⁵ SENHOR, raka'e peve 'rã tu ha'e rami oiko?
Orevy rexa uka riae 'rã teve nda'evei etea?
Orejou vaia nda'u tata rami riae 'rã ri hendy?

⁶ Yvy regua kuery pe jevy ke ndepoxy,
ndekuaa e'y va'e kuery pe,
nderery rupi e'y ojavukai va'e pe.

⁷ Mba'eta ha'e kuery ma omokanhymba Jacó kuery,
orerekoa voi ombovaipa.

⁸ Orere emoĩ eme oreramoĩ kuery ojejavyague.
Ha'e rami 'rãgue py orea py eju pojava oremboaxy aguã,
noronhanimavei ma ramo.

⁹ Oreruete orereraa jepea, orepityvõ ke
nderery remboete ukaa rupi vy.
Orereraa jepe, ha'e emboguepa rojejavyague
nderery re ae vy.

¹⁰ Mba'erã tu yvy regua kuery “Mamo tu Penderuete oĩ?” he'ia okuapy?
Nerembiguai kuery ruguy onhoëague re
yvy regua rembopaga vy exa uka orevy.

¹¹ Endu ke nhuã py ikuai va'e poaãa.
Ndepo'akaa rupi emoingove ju omano aguã rami ikuai va'e.

¹² SENHOR, orea katy rai ikuai va'e ndere ijayvu vai rei ramo
embopaga sete-kue áryve.

¹³ Ha'e rã ore ma ndevygua orekuai,
nerymba vexa'i kuery remongaru va'e ae.
Roguerovy'a riae 'rã.
Aỹ guive raka'e rã peve roporaei 'rã ndevy.

Omoingo porã ju aguã re ojerurea ague

Jogueroporaai va'e pe Asafe ombopara va'ekue “Yvoty lírio” he'ia py oporaia rami oporaie aguã.

80

¹ Israel kuery re repena va'ety, ejapyxaka ke.

Ndee rereko José ramymino kuery mymba rami.
Anjo ipepo va'e ikuaia áry reia gui exa uka nerexakãa.

² Efraim, Benjamim ha'e Manassés regua kuery pe
exa uka ndepo'akaa, eju guive orereraa jepe aguã.

* 78:70 1 Samuel 16.1-13 * 79:1 2 Reis 25.1-21; 2 Crônicas 36.15-21; Jeremias 52.4-30

- ³ Oneruete, oremoingo porā ju ke.
Orevy pe exa uka nderova rexakāa, roo jepe aguā.
- ⁴ SENHOR Oneruete nexondaro reta va'e,
raka'e peve 'rā tu rendu rive ndevyguā kuery onhembo'ea?
- ⁵ Oerexay re ae oremongaru tembi'u 'rāgue py,
karo remonyē orep'y'a vaia roy'u aguā.
- ⁶ Rejapo orea katy'i ikuai va'e orere opu'ā aguā rami,
ha'e orerovaiguā kuery orere opuka rei aguā.
- ⁷ Oneruete nexondaro reta va'e, oremoingo porā ju ke.
Orevy pe exa uka nderova rexakāa, roo jepe aguā.
- ⁸ Egito yvy gui reru raka'e peteī uva rakāgue'i.*
Yvy regua kuery remoxēague py renhoty.
- ⁹ Yvy remboa'eveague rupi hapo porā ovy,
ha'e yvy áry rupi hakā'i oai ovy.
- ¹⁰ Ha'e rami vy omokuaray'āmba vyvty ikuai va'e,
yary tuvixakueve va'e guive.
- ¹¹ Ye'ē peve oo oiny hovapy,
ha'e hoky ma yakā peve oo.
- ¹² Ha'e rire teī mba'e re tu ha'vy reity uka ikora?
Ha'e ramo tape rupi oaxa va'e tema omondo 'rā hi'a.
- ¹³ Tajaxu omou'ūmba 'rā,
ha'e mymba kuery nhuūndy rupiguā ho'upa 'rā.
- ¹⁴ Oneruete nexondaro reta va'e, rojerure ndevy:
Ejevny ju orea py.
Pe yva gui ema'ē orere,
eju eikuaa pota aguā ndevyguā uva rembypy re.
- ¹⁵ Epy ke ndepo py ae renhoty va'ekue,
hakā pyau ndejeupe guarā ae remombaraete va'ekue.
- ¹⁶ Ojayapaa ma rire opypaa ma tata py.
Tokanhymba orerovaiguā kuery ndepoxya nderova py rexa uka ramo.
- ¹⁷ Tove ndepo toī ndeyke re ikuai va'e kuery re,
ava ra'y ndejeupe guarā ae remombaraete va'ekue re.
- ¹⁸ Ha'e rire ore kuery ndorojepe'avei ma 'rā ndea gui.
Oremoingove ju ke.
Ha'e ramo 'rāe nderery rupi rojapukai.
- ¹⁹ SENHOR Oneruete nexondaro reta va'e, oremoingo porā ju.
Orevy exa uka nderova rexakāa, roo jepe aguā.

Jaroporai ha'e nhanhe'ē rendu aguā regua

Jogueroporaēi va'e pe mboraerā Asafe ombopara va'ekue "Uva'a onhamiaty" he'ia py oporaēia rami oporaēi aguā.

81

- ¹ Peporaēi ke pevy'aa rupi Nhanderuete nhanemombaraetea pe.
Perovy'a Jacó Ruete.
- ² Peporaēi vy pembojoguy pandeiro pu py.
Pembopu porā mba'epu ixā reta va'e ha'e mbaraka.
- ³ Pembopu ke mimby guaxu
jaxy pyau ha'e jaxy inhpyptū nhavō,
nhandevyguā ngaru oikoa āra.
- ⁴ Ha'e rami aguā ae Jacó Ruete oeja va'ekue
Israel kuery rekorā.
- ⁵ José kuery rekorā oeja raka'e
Egito pygua kuery re opu'ā vy oo jave.
Peteī ayvu xee naendu kuaai va'ekue aendu ju aipoe'i rā:
- ⁶ "Pendevoiy amboguejy va'ekue pendeaxi'y áry gui,
pendepo voi aipe'a ajaka peupi heravyague gui.
- ⁷ Pejexavai vy xevy pejapukai ramo xee rogueraa jepe va'ekue.
Yapu mbyte gui xee rombovai,
roeko a'ā va'ekue guive Meribá py yy oī va'e yvýry", he'i.*
- ⁸ "Xevyguā kuery, pejapyxaka ke pendeivy xeayvu rā.
Israel kuery, peē kuery xenhe'ē rendu va'e rire.

* 80:8 "Uva rakāgue'i" he'ia ma Israel kuery re ijayvu vy (Isaías 5.1-7, 27.2-6; Lucas 20.9-19).
ma Êxodo 17.1-7 py of.

* 81:7 Meribá py oeko a'āague re ijayvu

- ⁹ Penembyte pereko eme Penderuete ramigua rive,
tuuete mboae renonde pembojerovia eme.*
- ¹⁰ Xee ae ma SENHOR Penderuete,
Egito vvy gui penerenoôare.
Peipe'apa ke pendejuru, ha'e rã xee romongaru 'rã", ha'e va'ekue.
- ¹¹ Ha'e rami teĩ xeivygu kuery naxenhe'ê rendui.
Israel kuery ndaxekuaa potai.
- ¹² Ha'e rire xee ajapo ha'e kuery ae akã ratãa rupi ikuai aguã rami,
ha'e kuery oipotaa rami rive ikuai aguã.
- ¹³ Xeivygu kuery xenhe'ê rendu va'e rire,
Xeguigua tape rupi ae Israel kuery oo va'e rire
- ¹⁴ xee amomba voi 'rãgue hovaigua kuery,
xepo'aka 'rãgue ija'e e'ÿ va'e ha'e javi re.
- ¹⁵ SENHOR re ija'e e'ÿ va'e kuery ikuai 'rãgue ixupe,
ha'e rami ikuai 'rãgue raka'e rã peve.
- ¹⁶ Ha'e rã peê kuery ma trigo iporãve va'e re romongaru 'rãgue,
ei ita pa'ũ gui guare ame'ê 'rãgue penevyatãmba peve.

*Ha'eva e'ÿa rami joe opena va'e kuery pe ijayvua
Mboraeirã Asafe ombopara va'ekue.*

82

- ¹ Nhanderuete renonde ijapy okuapy ojeupegua kuery.
Ha'e ramo tuuete kuery mbyte omboayvu oiny.*
- ² "Raka'e peve 'rã tu ha'eva'e'ÿa rami peikuaa pota joe?
Heko vai va'ea katy jepi ri ty peiko.
- ³ Ha'eva rami ete 'rãgue peikuaa pota vvyÿgue'i ha'e tyre'ÿ re.
Pepena porã ke ojaxava va'e ha'e oipytyvõ pyrã e'ÿ kuery re.
- ⁴ Peipytyvõ vvyÿgue'i ha'e iporiaukue'i,
peraa jepe heko vai va'e po gui."
- ⁵ Ha'e kuery ma mba'eva ndoikuaai,
neĩ ndoikuaa potai va'e,
pytũ reia rupi ikuai.
Ha'e ramo vvy yta omyĩmba.†
- ⁶ Xee aipoa'e va'ekue: "Peê kuery ma tuuete,
Yvate ete va'e ra'y kuery pendekuai", ha'e va'ekue.*
- ⁷ Ha'e rami teĩ avakue rami rive 'rã pemano,
pendekovea opa 'rã huvixa kuery mboae rami.
- ⁸ Oneruete, epu'ã ke, eikuaa pota vvy regua kuery re.
Mba'eta vvy regua ma ndevy guarã meme.

*Nhanderuete nhombopaga aguã re ojerurea ague
Mboraeirã Asafe ombopara va'ekue.*

83

- ¹ Oneruete, ekyrirĩ eme!
Oneruete, ndeayvu e'ÿ eme, eĩ rive eme guive.
- ² Mba'eta nderovaigua kuery opu'ãmba okuapy,
ndere ija'e e'ÿ va'e onhemboyvatepa.
- ³ Nhomongeta rei okuapy ndevygu kuery rovai,
jogueroayvu 'rã repenaa va'e kuery re.
- ⁴ Ha'e vy aipoe'i: "Peju ke, jaa jaipe'a vvy re ikuai va'e mbyte gui,
Israel kuery re ima'endu'aave e'ÿ aguã", he'i okuapy.
- ⁵ Peteĩ rami 'rã jogueroayvu okuapy
nderovaigua ikuai aguã:
- ⁶ Edom regua ha'e Ismael guigua kuery,
Moabe regua ha'e Agar remiarirõ kuery,
- ⁷ Gibal pygua, ha'e Amom, Amaleque, Filístia
ha'e Tiro pygua kuery ha'e javi.
- ⁸ Assíria pygua kuery voi onhemoirũ 'rã ha'e kuery reve
Ló ramymino kuery oipytyvõ vvy.
- ⁹ Ha'e kuery re ejapo Midiã regua kuery re rejapogue rami,

* 81:9 Êxodo 20.1-6 * 82:1 "Tuuete kuery" he'ia ma joguerekoarã omoĩ mbyre re ijayvu vy (João 10.34-36).
ma ha'eva rami joguerekoa re ijayvu vy (Salmo 11.3, 75.3). * 82:6 João 10.34

† 82:5 "Yvy yta" he'ia

- Sísera ha'e Jabim kuery re Quisom yakā vyýry rejapoague rami.*
¹⁰ Ha'e va'e kuery ma rejukapa va'ekue En-Dor py,
 ha'e ramo hu'ũmba vvy re.
¹¹ Ha'e kuery regua yvatekueve re ejapo Orebe ha'e Zeebe re rejapoague rami,
 huvixa kuery re ejapo Zeba ha'e Zalmuna re rejapoague rami.†
¹² Mba'eta "Jajopy 'rã Nhanderuete vvy nhanderekoarã", he'i okuapy.
¹³ Xeruete, emoaimba ke vvyra rogue vvytu jere omboipa heravya rami,
 mba'emo pire vvytu opa rupi ombovevea rami,
¹⁴ ka'aguy rupi tata oapypaa rami,
 tata rendy vvyty ikuai va'e oapypaa rami.
¹⁵ Ha'e rami ae avi eakykue monha nde'vvytu vaikue py,
 emondyipa heravy nde'vvytu atã py.
¹⁶ SENHOR, ejapo ha'e kuery oxĩmba aguã rami,
 nderery rupi ha'e kuery voi ndereka aguã.
¹⁷ Tove ha'e kuery toxĩmba ha'e nda'evei nho ta'ikuai raka'e rã peve.
 Nda'evei reia toendu ha'e tokanhymba.
¹⁸ Ha'e ramo 'rãe oikuaa ndee anho SENHOR nderery va'e reikoa,
 ha'e vvy jave áryve Yvate ete va'ea.

Templo re ima'endu'a etea

Jogueroporaie va'e pe mboraierã Coré ra'y kuery ombopara va'ekue "Uva'a onhamiaty" he'ia py oporaieaty rami oporaie aguã.

84

- ¹ Xeruete nexondaro reta va'e,
 xeve pe nembojeroviaaty ma iporã etel
² Xenhe'ẽ py xepoaẽ SENHOR pegua oka re nda'evei vy.
 Mba'eta xepy'a, xerete ha'e javi py arovy'a Nhanderuete oikove va'e.
³ Kyky'i ma oo 'rã ojou oke atyrã,
 mbyju'i voi ojou 'rã guaityrã'i gua'y kue'iry oguereko aguã,
 ndevyguá altar vyýry,
 SENHOR nexondaro reta va'e, Xeruvixa ha'e Xeruete.
⁴ SENHOR, ovy'a ete 'rã ndevyguá oo py ikuai va'e.
 Ha'e kuery oporaie riaie 'rã ndevy.*
⁵ Ovy'a ete 'rã avakue ndere vy imbaraeete va'e,
 ha'e ipy'a re oĩ taperã omoatyrõ mbyre rupi oguata aguã.
⁶ Vvyugua ipiru rei va'e rupi oaxa teĩ
 ha'e kuery pe ojeapo 'rã yy oxyry porã reia.
 Oky ypy va'e omoakỹ porãmba 'rã guive.
⁷ Ha'e kuery ma imbaraeeteve teve 'rã oje'oivy.
 Peteĩ-teĩ ojexa uka 'rã Nhanderuete renonde Sião py.†
⁸ SENHOR, Xeruete nexondaro reta va'e, endu anhembo'ea.
 Jacó Ruete, ejapyxaka ke.
⁹ Oruete mba'emo vai gui jokia reiko va'e, eikuaa pota ke,
 ema'ẽ huvixave reiporavo va'ekue re.
¹⁰ Amboae henda py mil ára aĩ 'rãgue py
 ha'eveve peteĩ'i ára ndevyguá roka py aĩ aguã.
 Heko vai va'e rekoa py xerekoa 'rãgue py
 ha'eveve Xeruete pegua rokẽ arõ aikovy aguã.
¹¹ SENHOR Nhanderuete ma kuaray ha'e mba'emo vai jokia.
 SENHOR nhanemboaxy ha'e nhanemoexakãarã.
 Teko porã rupi ikuai va'e pe nome'ẽ e'ỹi 'rã iporã va'e.
¹² SENHOR nexondaro reta va'e,
 ndere ojerovia va'e ovy'a ete 'rã.

Ojejavyague Nhanderuete ombogue aguã re ojerurea ague

Jogueroporaie va'e pe mboraierã Coré ra'y kuery ombopara va'ekue.

85

- ¹ SENHOR, remoiingo porã va'ekue ndeyvy,
 Jacó kuery guive remoiingo porã ju.

* 83:9 Midia regua re Nhanderuete mba'emo ojapoague omombe'u Juizes 7 py, ha'e rã Sísera ha'e Jabim re ojapoague ma Juizes 4 py. † 83:11
 Ha'e va'e kuery Gideão ojukapa (Juizes 7.25-8.21). * 84:4 "Ndevyguá oo py ikuai va'e" he'ia ma levita ha'e sacerdote kuery templo py ikuai
 va'e re ijavyvuy. † 84:7 Apy ma ijavyvuy Jerusalém py Nhanderuete omboete aguã katy oguata va'e kuery re.

- ² Ndevygua kuery ojevavyague remboguepa va'ekue,
heko vaiague rejao'ipa.
- ³ Ndepoxya nderexa ukai orevy,
ndepoxya rupi e'ÿ orerereko va'ekue.
- ⁴ Oeruete orereraa jepea, pete'igue ju ke oremoingo porã,
oregui eipe'a ju ndepoxya.
- ⁵ Tyrã ndepoxy ria e 'rã teve orevy?
Raka'e rã peve 'rã nda'u ndepoxy?
- ⁶ Noremoingo porãve jevyi 'rã ri ty'y,
ndevygua kuery ndererovy'a aguã?
- ⁷ SENHOR, exa uka ndeporayvua orevy,
ejapo roo jepe aguã rami.
- ⁸ Ajapyxaka 'rã SENHOR ijayvua re,
mba'eta ijayvu ojeuepegua iky'a e'ÿ va'e kuery omoingo porã aguã re,
o'arandu e'ÿa py ho'a ve'ÿ aguã.
- ⁹ Ou ma oiny henonde ojererokyjea rupi ikuai va'ea py, ogueraa jepe aguã,
nhandevvy re hexakãa ojekuaa aguã.
- ¹⁰ Mborayvu nhomoirũ anhetê va'e reve,
teko porã ha'e jaiko porãa oje'a jova pyte va'e rami.
- ¹¹ Yvy gui henhoi 'rã anhetê va'e,
ha'e teko porã oma'ê 'rã yva gui.
- ¹² SENHOR ome'ê 'rã iporã va'e,
ha'e nhandevvy re oiko 'rã mba'emo'a.
- ¹³ Teko porã oo 'rã henonde,
oguereko katu aguã haperã oo aguã.
- Ojerure ha'e ojerovia etea*
Davi onhembo'eague.

86

- ¹ SENHOR, ejapyxaka ke ajapukai rã, xembovai guive,
mba'eta ajexavai vy xeporiau aikovy.
- ² Ndere ajerovia ramo eraa jepe xerekove.
Xeruete, reraa jepe 'rã nerembiguai ndere ojerovia rã.
- ³ SENHOR, xemboaxy ke,
ára pukukue re ndevy ajapukai ramo.
- ⁴ Embovy'a ju nerembiguai py'a,
ndere xenhe'ê aroma'endu'a ramo.
- ⁵ Mba'eta SENHOR, porayvu ha'e nhomboaxy va'e reiko,
reayvu ete ndevy ojavukai va'e ha'e javi.
- ⁶ SENHOR, endu ke anhembo'ea,
eikuaa pota ajapukaia re.
- ⁷ Ajexavaia ára ajapukai 'rã ndevy,
ndee xembovai ramo.
- ⁸ SENHOR, ndee ramigua tuuete mboae nda'ipoi.
Nda'ipoi avi rejapo va'e ramigua.
- ⁹ Ha'e javi regua remoingo va'ekue ou vy
guenapy'ã re oimba 'rã okuapy nerenonde,
ha'e gui omboete 'rã nderery, SENHOR.*
- ¹⁰ Mba'eta ndee ma yvate ete va'e, nhomondyipaarã apoa guive.
Ndee anho Oeruete.
- ¹¹ SENHOR, xembo'e ke nderape rupi aa aguã.
Ha'e ramo aiko 'rã ndeguigua anhetê etea rupi.
Xepy'a re emo'i nderery aendu vy ajererokyjea rupi anho aiko aguã.
- ¹² SENHOR Xeruete, xee roguerovy'a xepy'a ha'e javi py,
nderery rupi aporaie 'rã raka'e rã peve,
- ¹³ mba'eta ndee xerayvu ete vy
xerekove reraa jepe manoa po'akaa gui.
- ¹⁴ Xeruete, ojejou porã rei va'e kuery opu'ã ma xere,
ojerovia rei va'e xejukaxe okuapy.
Ha'e kuery nemboetea rupi e'ÿ ikuai.
- ¹⁵ Ha'e rã ndee SENHOR Xeruete ma renhomboaxy ha'e ndeporayvu vaipa,
nandekuerai, opa mba'e py renhomboaxy ha'e anhetê rupi reiko va'e.

* 86:9 Apocalipse 15.4

- 16 Ema'ê ke xere, xemboaxy guive.
 Xemombaraete, mba'eta nerembiguai aiko,
 eraa jepe nerembiguai pi'a.
- 17 Eikuaa uka xerayvua,
 xere ija'e e'ÿ va'e kuery oexa vy oxímba aguã.
 Mba'eta SENHOR, ndee ae xepytyvô ha'e xembopy'a guaxua.
- Nhanderuete Jerusalém tetã oayvua re ijayvua*
 Mboraeirã Coré ra'y kuery ombopara va'ekue.

87

- 1 Yvyty iky'a e'ÿ va'e áry SENHOR Sião* tetã omoĩ atã rire
 2 oayvu hokê ikuai va'e voi.
 Jacó kuery rekoa ikuai va'e ha'e javi gui oayvuve.
- 3 Ndevy Nhanderuete pegua tetã, ayvu iporã ete va'e 'ea:
 4 "Xekuaa va'e kuery rekoa regua ma
 Egito ha'e Babilônia.
 Oĩ avi 'rã Filístia, Tiro ha'e Etiópia,
 ha'e py ae itui'i rire."
- 5 Mba'eta Sião tetã pe aipo'ea 'rã:
 "Kova'e ha'e peva'e voi ha'e pygua ae.
 Yvate ete va'e omoĩ atã 'rã."
- 6 SENHOR yvy regua rery ombopara vy aipoe'i 'rã:
 "Kova'e ma ha'e pygua ae."†
- 7 Oporaei va'e kuery ha'e javi opo-opo reve aipoe'i 'rã:
 "Ndere anho oĩ xemoingo porãa ha'e javi."
- Ojexavai va'e ndovy'aia rupi ijayvuague*
 Jogueroporaie va'e pe mboraeirã Coré ra'y kuery nhombo'e aguã ombopara va'ekue mbaraka py ombojoguy
 aguã, Ezra ramymino Hemã oporaie va'ekue.

88

- 1 SENHOR ma Xeruete xereraa jepea.
 Ára pukukue re, pyávy voi ajapukai ndevy.
- 2 Anhembo'ea tonhendu nerenonde.
 Ejapyxaka ke ajapukaia re.
- 3 Mba'eta xenhe'ê py aendu opa marãgua nda'eveia,
 xerekove ma manoa katy'i ma ovaê.
- 4 Yvykua katy oquejy ma ovy va'e rami xekuaa,
 ava imbaraeite va'e ve'ÿ ma aiko ramo.
- 5 Omanogue mbyte omombo pyre rami aiko,
 yvykua py ojuka pyre itui va'e rami.
 Ha'e kuery re ma nanema'endu'avei ma 'rã,
 ha'e ndepo py nereipytyvôvei 'rã.
- 6 Ndee ae xemombo yvykua pukuvea py,
 ijavaetevea ha'e yvykua vaikue py.
- 7 Mba'eta xe'áry ndepoxya ipoyi oiny,
 yai py rami ndeguigua xemokangy.
- 8 Rejapo xerexa va'ety kuery xerejapa aguã rami,
 ha'e kuery ojeguaru rei ma okuapy xegui.
 Nhuã py xembo'aa rire aa jepe aguã ndaikuaavei.
- 9 Ajexavai ete vy ndaxerexa pyxovei ma.
 SENHOR, ndevy pe anho ajapukai ko'ê nhavô,
 ndevy ae xepo aupi.
- 10 Omanogue pe nda'u rejapo 'rã ri hexa pyrã?
 Ha'e kuery nda'u ovypa 'rã ri ndevy oporaie aguã?
- 11 Ha'e kuery nda'u ituia py ijayvu 'rã ri ndeporayvua re?
 Yvykua vaikue py nda'u ijayvu 'rã ri ojeroviapy reikoa re?
- 12 Pytũ reia py nda'u ojekuaa 'rã ri hexa pyrã rejapo va'e?
 Yvy hexarai pyre ikuai re teĩ nda'u ojekuaa 'rã ri ndereko porãa?
- 13 Ha'e gui SENHOR, xee ma ndevy ae ajapukai xepytyvô aguã.
 Ko'ê te'ÿ'i re xee anhembo'e ndevy.
- 14 SENHOR, mba'e re tu xereja ri?

* 87:1 Sião ma Jerusalém tetã rery mboae. † 87:6 "Ha'e py itui'i" he'ia ma ojeupegua kuery re ijayvu vy, Jerusalém pygua ae pe rami,
 mombry itui'i va'ekue teĩ.

Mba'e re tu xevy pe nderejexa ukavei ri?

¹⁵ Xekunumi guive ajexavaia re aiko, amano rai'i ma aikovy.

Ndee xemongyje ramo xee ndaikuaai rei aikovy.

¹⁶ Ndepoxya xere ou,

ndeguigua ngyje xemomba ta ma.

¹⁷ Ha'e nunga ha'e javi xembojere riae yy ou va'e rami,

jova-jovai gui xejoko.

¹⁸ Xerayvu va'e ha'e xeirū kuery ma xea gui mombyry reipe'apa.

Ha'e ramo pytūa rive opyta aexa va'ety rami.

Messias ipo'aka aguã re ijayvua

Mboraeirã Ezra ramymino Etã nhombo'e aguã ombopara va'ekue.

89

¹ SENHOR, aporaei riae 'rã renhomboaxya re,
raka'e rã peve xejuru py aikuaa uka 'rã ojeroviapy reikoa.

² Mba'eta aipoa'e: "Ndeporayvua ndopai 'rã,
ha'e ndereko porãa yva re remoĩ atã", ha'e.

³ Aipo're: "Xerembiguai Davi aiporavo va'ekue pe
aura reve ajapo xereve guarã. Ha'e vy aipoa'e:

⁴ 'Neramymino kuery amoĩ atã 'rã raka'e rã peve guarã,

raka'e rã peve amoĩ 'rã ndepo'akaa', ha'e", 're.*

⁵ SENHOR, yva re oporaeia okuapy mba'emo porã rejapo va'ekue rupi,
ndeivyua iky'a e'ỹ va'e kuery ijatya py ogueroma'endu'a okuapy ojeroviapy reikoa.

⁶ Mba'eta mava'e nda'u SENHOR rami ete oiko 'rã yva re?

Yva regua kuery mava'e 'rã tu SENHOR ramigua ete oiko?

⁷ Mba'eta ixupegua iky'a e'ỹ va'e kuery ijatya py Nhanderuete yvateve ete va'e avi oĩ,
ijyvýry ikuai va'e ha'e javi gui okyjevpepy oiko.

⁸ SENHOR Oneruete nexondaro reta va'e,

mava'e 'rã tu ndee rami ipo'akapa va'e oiko?

SENHOR, ndejee remoĩ ojeroviapy reikoa aguã.

⁹ Ye'ẽ opa marã omyĩ teĩ ndee ndepo'aka 'rã.

Yai opu'ã-pu'ã ramo remombytu'u.

¹⁰ Remokyrirĩ Raabe joguero'aa py ojuka pyre rami.†

Ndejyva ipo'aka va'e py remoaĩmba nderovaigua kuery.

¹¹ Yva ma nempa'e oĩ, yvy voi.

Yvy ha'e hexe ikuai va'e ha'e javi ndee ae rejapo va'ekue.

¹² Ndee rejapo va'ekue kuaray puku-a ha'e ijapu'a'ia.

Tabor ha'e Hermom yvyty oporaei 'rã okuapy nderery rupi.

¹³ Ndejyva ma opa mba'e gui ipo'akave.

Reiporu kuaa regua reupi vy rexa uka ndepo mbaraetea.

¹⁴ Ha'evea rami rejoguereko, ndereko porãa rupi reiko huvixa reĩa py.

Renhomboaxya ha'e anhetẽ va'e ma nerenonde 'rã ojekuaa.

¹⁵ Ovy'a ete 'rã ndereroporaeia rupi ikuai va'e.

Mba'eta SENHOR, ha'e kuery ndereve vy ikuai 'rã nerexakãa rupi.

¹⁶ Nderery rupi ovy'a riae 'rã okuapy,

oporaei 'rã ndereko porãa re.

¹⁷ Mba'eta ndee ma ha'e kuery mombaetea ha'e imoexakãa.

Ndee oremboaxy ramo 'rãe ojekuaa orepo'akaa.

¹⁸ Mba'eta oreivyua mba'emo vai jokoarã ma SENHOR pegua ae oĩ,

oreruvixaverã ma Israel kuery ruete Iky'a e'ỹ va'e pegua.

¹⁹ Ymave rupi ndevyua iky'a e'ỹ va'e kuery pe ndeayvu va'ekue mba'emo rexa ukaa rupi.

Ha'e vy aipo're: "Xee ambopo'aka peteĩ ipy'a guaxu va'e penepytyvõ aguã.

Peẽ kuery mbyte gui amboyvateve peteĩ aiporavo va'ekue.

²⁰ Ha'e rami vy xerembiguairã Davi ajou vy

amoĩ raka'e, azeite iky'a e'ỹ va'e amoĩ uka vy hexe.*

²¹ Xepo py amoĩ atã 'rã,

xepo'akaa py amombaraete 'rã.

²² Ha'e ramo hovaigua kuery nomoĩ vai 'rã,

heko vai va'e nomoingo axy 'rã.

²³ Henonde amou'ũmba 'rã hovaigua kuery,

ajukapa 'rã hexe ija'e e'ỹ va'e.

* 89:4 Davi reve Nhanderuete ijayvuague ma 2 Samuel 7 py oĩ. (Salmo 132.11-12; Atos 2.30).

† 89:10 Apy "Raabe" he'ia ma ypo ye'ẽ

- 24 Ojeroviapy aikoa ha'e xeporayvua rupi 'rā areko.
Ha'e ramo xerery rupi vy ipo'akave 'rā ovy.
- 25 Ajapo 'rā ye'ē ha'e yakā ikuai va'e re
ipo'aka aguā rami.
- 26 Xevy pe ojapukai vy aipoe'i 'rā:
'Ndee ma Xeru, Xeruete,
ha'e itaova xereraa jepea guive', he'i 'rā.
- 27 Ha'e rā ixupe aipoa'e: 'Xera'y jypy guare.
Yvy regua ruvixave ikuai va'e gui ndeyvateve', ha'e 'rā.‡
- 28 Amboaxya rupi riae 'rā areko,
ha'e hexeve amoī atāve 'rā xereve guarā ajapo va'ekue.
- 29 Hamymino kuery ajapo 'rā ikuai riae aguā rami,
ipo'akaa voi yva rami 'rā oī riae.
- 30 Ha'e rā xapy'a rei ta'y kuery nda'ikuaixei 'rā lei aeja va'ekue rupi,
ambo'eague rami e'ŷ ikuai vy,
- 31 xapy'a rei xeayvuague rami nda'ikuai 'rā,
ajapo uka va'ekue ndojapoxei vy.
- 32 Ha'e rami ri ramo yvyra rovi py ambopaga 'rā otekoavyague re,
ambopi 'rā ojejavuague re.
- 33 Ha'e rami teī ixugui ma ndaipe'ai 'rā ayvua,
ndajapo e'ŷi 'rā hexeve xeayvuague.
- 34 Xereve guarā ajapo va'ekue ndajapo e'ŷi 'rā,
xeayvuague ndarovai 'rā guive.
- 35 Peteŷgue'i xee aura karamboae xexy'a e'ŷa rupi ae
(ha'e xee aipo nda'e rivei 'rā Davi pe).
- 36 Aipoa'e: 'Hamymino kuery ikuai riae 'rā,
ha'e ipo'akaa ma kuaray rami 'rā oī riae xerenonde.
- 37 Raka'e rā peve guarā amoī 'rā jaxy rami,
oaxa rive va'e'ŷ 'rā oiko yva re ojekuaa va'e rami', ha'e va'ekue."
- 38 Ha'e rami teī SENHOR, oreruvixa re ndee nerepenavei vy reja.
Ndevai guive nerembiporavo pe.
- 39 Nerembiguai pe ndereve guarā rejapo va'ekue rembovaipa,
ixupegua coroa nerembovarei vy remombo yvy re.
- 40 Ixupegua tetā kora ma reitypa,
hoo ikorapa va'ekue voi rembovaipa.
- 41 Mba'emo oguereko va'ekue-'ekue ma tape rupi oaxa va'e-va'e ogueraapa 'rā,
hoo katy rai'i ikuai va'e voi ovy'a rei okuapy hexe.
- 42 Hovaigua kuery ma rembopo'aka,
rejapo hexe ija'e e'ŷ va'e ha'e javi ovy'a aguā rami.
- 43 Ha'e rā ikyxē ma rejapo naīmbei rei aguā rami,
ha'e joguero'aa py oo ramo nereipytyvōvei.
- 44 Iporāague ma reipe'apa,
ha'e henda oīaty reity yvy rupi.
- 45 Ikunumia āra remomba voi,
ha'e oxīmba aguā rami rejapo.
- 46 SENHOR, raka'e peve 'rā ha'e ramigua oiko,
raka'e peve nda'u nderejexa ukai 'rā?
Ndepoxya nda'u hendy riae 'rā ri tata rami?
- 47 Nema'endu'a xapy'a'i aikoa re.
Mba'everā e'ŷ teve remoingo avakue ra'y kuery.
- 48 Mava'e ava nda'u oikove 'rā manoa oexa e'ŷ re?
Mava'e nda'u onhe'ē ae ogueraa jepe kuaa 'rā yvyra rupa po'akaa gui?
- 49 SENHOR, mba'e tu oiko ymave rupi ndeporayvu aguā re ndeayvuague,
ha'e rami aguā re ojeroviapy reikoa rupi Davi pe reuraague rire?
- 50 SENHOR, nema'endu'a ke nerembiguai kuery re ovy'aa rei okuapy re,
ha'e heta regua ombojaru reia aropo'aka va'e re.
- 51 Nderovaigua kuery ijayvu vaikue-ikue, SENHOR.
Nerembiporavo oikoa re ijayvu vaikue okuapy.
- 52 SENHOR re ta'ima'endu'a porāa raka'e rā peve.
Amém! Amém!

*Nhanderuete imarā e'ŷa ha'e avakue imarāa re ijayvua
Nhanderuete remimbo'e Moisés onhembo'eague.*

‡ 89:27 Apocalipse 1.4-5 py.

90

- ¹ SENHOR, ndee ma ronhemiaty reiko,
ymave rupi oreramoī kuery ikuaia guive.
- ² Yvyty oiko e'ỹ mbove,
yvy renhono e'ỹ mbove ma voi,
jypy'i guive opa peve ndee ae SENHOR reiko.
- ³ Ndee ma avakue remombytapa ju 'rā yvy ku'i rive,
“Ha'ekue rami ju pepyta, avakue ra'y kuery”, 're vy.
- ⁴ Ndevy pe mil ma'etỹ oaxa va'e ma kuegua ára guare rami,
peteī hora'i pyávy oaxa va'e rami guive.*
- ⁵ Ndee ma orembotyryry 'rā yy mba'emo ogueroxyry heravy va'e rami.
Ha'e ramo oke va'e rami meme 'rā ropyta,
jai rogue aje'ive'i reve henhoī va'e rami.
- ⁶ Mba'eta ha'e nunga ma yvate vyve ipotyta 'rā
teī ka'aru jave he'õmba ha'e ipirupa 'rā.
- ⁷ Ndepoxya ma oremokanhy 'rā,
ndeavaia oremondyi 'rā.
- ⁸ Mba'eta nerenonde reru orereko vaia,
nhemi rupi rojejavyague voi remoī nderova rexakāa py.
- ⁹ Roikoa ára ma ndepoxya rupi meme 'rā oaxa ovy,
ma'etỹa roguereko va'e ma xapy'a'i ropēxaa rami 'rā oaxa.
- ¹⁰ Setenta ma'etỹ ete'i 'rā roiko.
Amongue'i imbaraeteve va'e tema oikove 'rā oitenta ma'etỹ peve'i.
Ha'e rami teī roiko porāvea py voi ngane'õ ha'e jexavai tema 'rā roendu.
Mba'eta roikovea oaxapa voi 'rā,
ha'e gui ma roopa 'rā.
- ¹¹ Mava'eve ndoikuaai ndepo'aka etea rupi ndepoxya.
Mba'eta ndepoxya rupi orerereko a gui ma rokyje ete.
- ¹² Orerekombo'e ke roikoa ára re roikuaa pota aguā re,
orepy'a re 'arandu oī aguā.
- ¹³ SENHOR, eju ju!
Raka'e peve 'rā tu nerepenai?
Emboaxy ju neremiguai kuery.
- ¹⁴ Aje'ive'i reve exa uka orerayvua, roporaei aguā.
Ha'e ramo rovy'a 'rā roikoa pukukue re.
- ¹⁵ Orembovy'a ju orembojexavaia ára oīague rami,
mbovy ma'etỹ rei e'ỹ rojexavaia anho roendu rire.
- ¹⁶ Ore neremiguai kuery pe ju tojekuaa mba'emo rejapo va'e,
ha'e oreramymino kuery pe exa uka ju nerexakāa.
- ¹⁷ Orere toī SENHOR Oreruete oremboaxya.
Emoingo porā orepo py mba'emo rojapo va'e.
Tá, emoingo porā mba'emo rojapo va'e.

91

SENHOR re nhanhemi aguā regua

- ¹ Yvate ete va'e oīa py onhemi va'e,
Ipo'akapa va'e 'ā py ikane'õgua va'e ma
- ² aipoe'i 'rā SENHOR pe: “Anhemia imbaraete va'e,
Xeruete, hexe ajeroviaa va'e”, he'i 'rā.
- ³ Mba'eta ha'e ma ndereraa jepe 'rā nhuā py rami nembo'axe va'e gui,
mba'eaxy jojuka va'e gui guive.
- ⁴ Nemo'ā 'rā guague guy py.
Ipepo guy py rei rā mba'eve rei ndoikoi 'rā.
Ixuguigua anhetē va'e ma hu'y joko a ha'e nhomo'āa tuvixa va'e rami oī.
- ⁵ Ha'e ramo pytū rupi jojukaa oiko teī ndee nderekyjei 'rā,
neī ára py hu'y ndere ou va'e gui,
- ⁶ mba'eaxy pytū rupi jojuka va'e gui,
neī mba'emo vai kuaray mbyte jave jojuka va'e gui ma voi.
- ⁷ Ndeyvýry mil ho'a,
ndeaxu e'ya katy dez mil ho'a teī
ndere ma mba'eve rei novaēi 'rā.
- ⁸ Nderexa py rive 'rā rexa

* 90:4 2 Pedro 3.8-9

- heko vai va'e ombopagaa ramo.
⁹ Mba'eta Nhanderuete pe "Anhemia", 're,
 ha'e Yvate ete va'e pe "Xee aĩaty" 're ramo
¹⁰ neĩ peteĩ henda py ma voi nderejexavai 'rã,
 neĩ peteĩve mba'emo vai novaẽi 'rã ndero py.
¹¹ Mba'eta ndere omopena uka 'rã ojeuepegua anjo kuery pe,
 reikoa ha'e javi rupi onhangareko aguã ndere.
¹² Ha'e ramo ha'e kuery opo py ndejopy 'rã
 peteĩve ita re renhepyxanga e'ỹ aguã.*
¹³ Ha'e ramo repyrõ 'rã guary ha'e mboi vaikue re,
 guary ra'y ha'e mboi re voi repyrõ 'rã inony.
¹⁴ Aipoe'i 'rã: "Xerayvu va'e ma araa jepe 'rã,
 aepe 'rã xerery oikuaa va'e.
¹⁵ Xevy pe o japukai ramo xee ambovai 'rã.
 Ojexavaia py xee aĩ 'rã hexeve.
 Araa jepe 'rã, ha'e amboete uka 'rã.
¹⁶ Amoingo porã 'rã hekove puku aguã rami,
 ha'e ixupe aexa uka 'rã araa jepea."
Nhanderuete ogueroovy'aa rupi oporaia
 Mboraei sábadó pyguarã ombopara pyre.

92

- ¹ SENHOR, ha'eve roguerovy'a
 ha'e nderery rupi aporaie, Yvate ete va'e.
² Aje'ive aikuaa uka 'rã ndeporayvua,
 ha'e pyávy ju aikuaa uka 'rã ojeroviapy reikoa,
³ mbaraka dez ixã va'e, mbaraka reve,
 ha'e ixã reta va'e pu rupi guive.
⁴ Mba'eta SENHOR, mba'emo porã rejapo rã aexa vy avy'a.
 Arovy'a mba'emo ndepo py rejapo va'e.
⁵ SENHOR, nerembiapo ma tuvixa ete va'e!
 Ha'e renhembopy'aa guive haxy ete aikuaa aguã.
⁶ Hi'arandu e'ỹ va'e ndoikuaai 'rãe,
 inhakã porã e'ỹ va'e ndoikuaai 'rã pova'e:
⁷ Heko vai va'e kuery ma jai rogue opa rupi henhoĩ va'e rami ikuai,
 teko vai rupi ikuai va'e hetave oje'oivy teĩ
 omombaa 'rã raka'e rã peve.
⁸ Ha'e rã SENHOR, ndee ma Yvate ete va'e raka'e rã peve guarã.
⁹ SENHOR, eexa pota nderovaigua kuery re.
 Mba'eta nderovaigua kuery okanhymba 'rã,
 teko vai rupi ikuai va'e oaimba 'rã.
¹⁰ Ha'e rã xee ma xemombaraete 'rã toro ka'aguy regua rami,
 xere azeite iporãve va'e remoĩ vy.
¹¹ Avy'a reve aexa 'rã xeroivaigua kuery xemoĩ vai va'e re mba'emo oiko ramo,
 aendu 'rã guive heko vai va'e xere opu'ã rei va'e kuery ho'apa rã.
¹² Ha'e rã heko porã va'e ma pindo rami 'rã oiko porã,
 yvateve 'rã Líbano yvy re yary ikuai va'e rami.
¹³ SENHOR roka py onhotỹ mbyre rami 'rã ha'e kuery ikuai,
 oiko porã 'rã okuapy Nhanderuete pegua roka rupi.
¹⁴ Ha'e nunga ma hi'yvyma ma teĩ hi'a riae 'rã,
 tykue tynyẽ riae, ha'e ipyau riae 'rã.
¹⁵ Ha'e rami vy oikuaa uka 'rã SENHOR heko porã va'ea.
 Ha'e ma xe'itaova, hexe ma teko vai noĩ.

93

- Nhanderuete ipo'akaa ha'e yvatea re ijayvua*
¹ SENHOR ma huvixave oĩ.
 Hexe oĩ yvatea,
 Ku'axã rami SENHOR ojee omoĩ opo'akaa.
 Omoĩ atã yvy omyĩ e'ỹ aguã rami.
² Jypy'i guive repenaa oĩ atã,
 jypy'i ete guive reiko.

* 91:12 Kova'e ayvu rupi Satanás ijayvu Jesus omoangeko vy (Mateus 4.5-7; Lucas 4.9-12).

- ³ SENHOR, yakā ikuai va'e opu'ā okuapy,
yakā opu'ā vy hevovo,
yakā hyapu rei teĩ.
- ⁴ Ha'e rā SENHOR yvate oĩ va'e ma
yy tuvixa va'e revovo gui ipo'akapave,
ye'ê py yai vaikue opu'ā-pu'ā va'e po'akaa gui voi.
- ⁵ Ndeayvuague ma oaxa rive va'erā e'ỹ.
SENHOR, nderopy ma iky'a e'ỹ va'e anho 'rā oĩ
raka'e rā peve guarā.

94

Nhanderue te ha'eva rami oikuaa pota aguã re ojeruea ague

- ¹ Ndee SENHOR Orerue te ma nhombopaga va'e reiko.
Orerue te nhombopaga va'e, exa uka nrexakāa!
- ² Epu'ā ke yvy regua ha'e javi remboayvu aguã.
Embopaga ojejou porā rei va'e kuery.
- ³ Raka'e peve 'rā nda'u heko vai va'e kuery ovy'a rei?
SENHOR, raka'e peve 'rā nda'u ha'e ramigua oiko?
- ⁴ Ha'e kuery ma nhombojaru ha'e nhomotare'ỹ reia rupi ijayvu.
Teko vai rupi ikuai va'e ojejou porā reia rupi rive 'rā ijayvu.
- ⁵ SENHOR, ha'e kuery omou'ũmba ndevygu kuery,
ojavyky rei 'rā ndevygu ikuai va'e.
- ⁶ Ojuka 'rā imeve'ỹ va'e ha'e mombyry guigua,
tyre'ỹ kuery voi omomba 'rā.
- ⁷ Ha'e vy aipoe'i 'rā: “ SENHOR ndoexai oiny.
Ha'e nunga re Jacó Ruede ndoikuaa potai 'rā”, he'i okuapy.
- ⁸ Xeretarā kuery peikuaa axy va'e, peikuaa pota!
Pene'arandu e'ỹ va'e, raka'e nda'u pemōi 'rā pene'arandurā?
- ⁹ Apyxa apoare nda'u noendui 'rā ri pejapo va'e?
Texa apoare nda'u ndoexai 'rā ri?
- ¹⁰ Yvy regua kuery pe ijayvu va'e nda'u nanhombopagai 'rā?
Avakue mo'arandua re nda'u noi 'rā 'arandua?
- ¹¹ SENHOR oikuaa ae ma avakue onhembopy'aa,
oikuaa ha'e kuery onhembopy'aa mba'everā ndovareia.*
- ¹² SENHOR, ovy'a ete 'rā avakue remo'arandu va'e,
ndeguigua lei rupi rembo'e va'e.
- ¹³ Ha'e va'e kuery re ojexavaia ára ou teĩ remombytu'u 'rā,
yvykua heko vai va'e kuery mbo'arā rejapo peve.
- ¹⁴ Mba'eta SENHOR ndoejai 'rā ojeupegua kuery,
noipytyvō e'ỹi 'rā ixupe ikuai va'e.*
- ¹⁵ Ha'e rami rā teko porā ojekuaa nho 'rā nhomboayvuaty py.
Ha'e va'e rupi anho 'rā ikuai anhetē rupi ipy'a va'e.
- ¹⁶ Mava'e nda'u heko vai va'e re opu'ā 'rā xerepyarā?
Mava'e nda'u onhemōi 'rā xea katy mba'emo vai apoa jokoarā?
- ¹⁷ SENHOR naxepytyvōi va'e rire
xenhe'ê oo ma 'rāgue okyriři va'e anho ikuai katy.
- ¹⁸ Ha'e rami 'rāgue py “Xepyxyry ta ma”, ha'e nhavō
ndee xejoko 'rā xerayvua rupi.
- ¹⁹ Xepy'a eta reia aendu ramo
ndee xembopy'a porā ha'e xembovy'a ju.
- ²⁰ Ndereve nda'u onhemoirũ 'rā ri teko vai rupi joe opena va'e,
lei oĩa rami merami joguereko teĩ joapo vai va'e?
- ²¹ Mba'eta ha'e kuery ma nhomoirũ 'rā heko porā va'e rekove rovai,
ijayvu 'rā okuapy heko porā va'e ojuka aguã re.
- ²² Ha'e rā xevy pe ma SENHOR oo ikorapa va'e oĩ,
Xerue te ma itaova anhemiatty.
- ²³ Ha'e kuery ma ombopaga 'rā heko vaiague re,
teko vai rupi ikuaiague re omokanhymba 'rā.
SENHOR Nhanderue te ae 'rā omomba.

95

SENHOR pe japora ei aguã regua

* 94:11 1 Corintios 3.19-20 * 94:14 Romanos 11.1-2

- 1 Peju ke, japoraiei SENHOR pe!
Jarovy'a nhande'itaova nhandereraa jepea!
- 2 Jarovy'aa rupi jaa oĩa py,
jaroporaiei ipo'akaa jarovy'a vy.
- 3 Mba'eta SENHOR ma Nhanderuete Yvate ete va'e,
Huvixave ipo'akapa va'e oiko tuuete ikuai va'e áryve.
- 4 Ipo py oĩ yvy guýry vegua,
vyty yvatevea voi ixupegua meme.
- 5 Ye'ẽ avi ixupegua oĩ, ha'e ae ojapo rire,
vyvy voi opo py ojapo va'ekue itui.
- 6 Peju ke, nhanderova yvy re nhamovaẽ nhamboete vy,
nhanerenapy'ã re nhaĩ SENHOR nhamemoingoare renonde.
- 7 Mba'eta ha'e ma Nhanderuete.
Ha'e rã nhande ma hymba kuery vexa'i nhandekuai,
ikora rupi opo py openaa va'e.
- Aỹ voi ijayvua pendu vy
- 8 peneakã ratã eme, Meribá py guare rami e'ỹ,
Massá tekoe e'ya py guare rami e'ỹ.
- 9 Mba'eta ha'e py ma peneramoĩ kuery xereko a'ã vy
xembopoxya rupi ikuai va'ekue,
opa mba'e porã ajapo rã oexa rire teĩ.
- 10 Quarenta ma'etỹ re ajou vai ha'e kuery ikuai.
Ha'e rami vy "Ha'e kuery ma opy'a py ojerovia e'ỹ va'e!
Ndoikuaai ae xeguigua tape!" ha'e va'ekue.
- 11 Ha'e nunga rupi xepoxya rupi aura:
"Ha'e kuery ndoikei 'rãe opytu'u aguã ame'ẽ va'e py."*

96

1 Crônicas 16:23-33

- 1 Pemonhendu ke SENHOR pe mboraiei pyau!
Yvy jave regua kuery, peporaiei SENHOR pe!
- 2 Peporaiei SENHOR pe, peroma'endu'a herye.
Ko'ẽ nhavõ peikuaa uka nhandereraa jepea.
- 3 Yvy regua kuery pe peikuaa uka hexakãa,
ha'e javi regua pe pemombe'u mba'emo porã ojapoa.
- 4 Mba'eta SENHOR ma yvate ete va'e.
Ha'evea rami ixupe japoraiei,
mba'eta tuuete ramigua ikuai va'e gui okyjevepy.
- 5 Mba'eta yvy regua kuery ruete ha'e javi ma mba'emo ra'angaa rive.
Ha'e rã SENHOR ma yva apoare.
- 6 Guenonde oexa uka 'rã guexakãa ha'e ijyvatea.
Ipo'akaa ha'e iporãa ojekuaa hendaiky'a e'ỹ va'e py.
- 7 Yvy regua kuery, peroporaiei ke SENHOR!
Peroporaiei SENHOR rexakãa ha'e ipo'akaa.*
- 8 Peroporaiei SENHOR rery, iporã ete ramo.
Peme'ẽ va'erã peru vy peroike ixupegua roka py.
- 9 Pembojerovia SENHOR iky'a e'ya rexakãa py.
Yvy jave regua kuery, peryryipa henonde.
- 10 Yvy regua kuery ikuai rupi aipopeje: " SENHOR ma huvixave oĩ.
Yvy omoĩ atã raka'e omyĩ e'ỹ aguã rami.
Anhetẽ rupi oikuaa pota 'rã yvy regua kuery re", peje.
- 11 Tovy'a yva ha'e yvy.
Taevovo ye'ẽ ha'e ha'e py ikuai va'e ha'e javi!
- 12 Tovy'a nhuũndy ha'e ha'e rupi ikuai va'e ha'e javi!
Tovy'apa yvyra ka'aguy re ikuai va'e
- 13 SENHOR renonde, mba'eta ou 'rã.
Ou vy oikuaa pota 'rã yvy regua kuery re.
Teko porã rupi 'rã oikuaa pota yvy ha'e
vyvy regua kuery re, ojeroviapy oikoa rupi ae.

* 95:11 Hebreus 3.7-4.11; Êxodo 17.1-7; Números 13.25-14.23

* 96:7 Salmo 29.1-2

97

Nhanderue te yvatea ha'e ipo'akaa re ijayvua

¹ SENHOR ma huvixave oĩ.

Tovy'a yvy re ikuai va'e!

Tovy'a ypa'ũ heta ikuai va'e regua!

² Ijyvýry rupi oĩ arai ha'e pytũ reia.

Tenda openaaty ytarã ma teko porã ha'e ha'evea rami joguerekoa oĩ.

³ Henonde oo 'rã tata

hovaigua kuery ijyvýry ikuai va'e rapypaarã.

⁴ Ixuguigua overa va'e ma omoexakã 'rã yvy.

Ha'e ramo yvy oexa vy oryryipa 'rã.

⁵ Yvyty ikuai va'e voi ei raity rami 'rã tykupa

SENHOR yvy jave re ipo'aka va'e renonde.

⁶ Yva ma oikuaa uka 'rã heko porãa.

Ha'e ramo ha'e javi regua oexa 'rã hexakãa.

⁷ Tove mba'emo ra'angaa pe ikuai va'e ha'e javi nda'evei nho ta'ikuai,

mba'emo ra'angaa rive oguerovy'a va'e.

SENHOR renonde toĩmba tuuete ramigua ikuai va'e SENHOR guenapy'ã re.

⁸ Sião tetã rupi ha'e nunga oendu vy ovy'aa 'rã okuapy,

Judá regua tekoa ikuai va'e rupi voi ovy'apaa 'rã,

SENHOR, ndereko porãa rexa uka ramo.*

⁹ Mba'eta ndee anho SENHOR Yvate ete va'e reiko,

yvy jave re ndepo'aka va'e.

Ndee ma tuuete ikuai va'e áryve reĩ va'e.

¹⁰ Peẽ kuery SENHOR peayvu va'e, pembojeguaru ke teko vai.

Mba'eta onhangareko 'rã ojeupegua kuery iky'a e'ỹ va'e nhe'ẽ re,

ogueraa jepe 'rã guive heko vai va'e po gui.

¹¹ Heko porã va'e pe ma ome'ẽ 'rã hexakã va'e,

ha'e anhetẽ rupi ipy'a va'e pe ome'ẽ 'rã ovy'a aguã.

¹² Pendeko porã va'e, perovy'a ke SENHOR.

Pepora ei hery iky'a e'ỹ va'e rupi!

SENHOR ha'evea rami joguerekoa re ijayvua

Mboraeirã ombopara pyre.

98

¹ Pemonhendu ke SENHOR pe mboraei pyau,

mba'emo iporã ete va'e ha'e ojapo ramo.

Ojyva oiporu kuaa regua imbaraete ha'e iky'a e'ỹ va'e py ipo'aka.

² SENHOR oikuaa uka jogueraa jepeague.

Yvy regua kuery oexaa rupi oexa uka ha'evea rami joguerekoa.

³ Ndaexarai guive Israel kuery omboaxy rupi ojeroviapy oiko aguã re.

Ha'e ramo yvy jave re ha'e javi regua ikuai va'e oexa okuapy Nhanderue te nhandereraa jepeague.

⁴ Yvy jave re ha'e javi regua pendekuai va'e, peropora ei ke SENHOR pevy'aa rupi!

Pepora ei, pevy'a ha'e perovy'a mboraei py!

⁵ Mba'epu ixã reta va'e reve peropora ei SENHOR,

ixã reta va'e pu rupi guive pepora ei.

⁶ Pemonhe'ẽ mimby guaxu ha'e vaka rakuakue guigua.

Pevy'a SENHOR renonde, huvixave oĩ ramo.

⁷ Tonhendu ye'ẽ ha'e hexe ikuai va'e ha'e javi,

yvy ha'e hexe ikuai va'e guive!

⁸ Yakã ha'e javi tojepo pete!

Yvyty ikuai va'e voi topora ei ovy'aa rupi

⁹ SENHOR renonde,

mba'eta ou yvy re ikuai va'e re oikuaa pota aguã.

Teko porã rupi oikuaa pota 'rã yvy ha'e

yvy regua kuery re, peteĩ rami joguerekoa rupi.

99

Nhanderue te iky'a e'ỹ va'ea re ijayvua

¹ SENHOR ma huvixave oĩ.

Yvy regua kuery toryryipa.

Ha'e oguapy oiny anjo ipepo va'e kuery áryve.

* 97:8 "Judá rajy kuery" he'ia ma Judá yvy re tekoa ikuai va'e re ijayvu vy.

- Yvy tomyĩmba.
² SENHOR ma yvate ete Sião tetã py,
 yvy regua kuery ha'e javi áryve oĩ.
³ Ha'e kuery togueroporaei hery yvate ete va'e okyjepy,
 iky'a e'ỹ va'e ramo.
⁴ Ndee ma huvixave ipo'akapa va'e reiko,
 teko porã reayvu va'e.
 Peteĩ rami juguerekoa remoĩ.
 Jacó kuery mbyte rejoguereko anhetê ete rupi, ha'evea rami meme.
⁵ Pemboete ke SENHOR Nhanderuete!
 Ipyrõa renonde peĩ penerenapy'ã re,
 iky'a e'ỹ va'e ramo.
⁶ Moisés ha'e Arão ma ixupegua sacerdote ikuai raka'e,
 Samuel voi hery rupi ojavukai va'ekue regua.
 SENHOR pe ha'e kuery ojavukai ramo ombovai.
⁷ Arai oĩ va'e gui ijayvu raka'e ha'e kuery pe.*
 Ha'e ramo ha'e kuery onhe'ê rendu,
 lei hekorã oeja va'ekue rupi ikuai raka'e.
⁸ SENHOR Oreruete, ndee ma rembovai va'ekue ha'e kuery ojavukai rã.
 Ha'e kuery pe rexa uka Oreruete joperdoa va'e reikoa,
 ojevayvague remboekovia va'e guive.
⁹ Peroporaie SENHOR Nhanderuete.
 Ixupegua vyty iky'a e'ỹ va'e renonde peĩ penerenapy'ã re,
 SENHOR Nhanderuete iky'a e'ỹ va'e ramo.
Templo py oporaia aguã regua
 Mboraei oguerovy'aa aguã regua.

100

- ¹ Yvy jave re pendekuai va'e,
 peroporaie SENHOR pevy'aa rupi!
² Pevy'aa rupi pendekuai SENHOR pe ete.
 Henonde pejexa uka pejuvy peporaie reve.
³ Peikuaa pota pova'e re: SENHOR ma Nhanderuete oiko.
 Ha'e ae nhanemoingo rire ixupegua meme jaiko.
 Nhande kuery ma ixupegua ae,
 hymba kuery vexe'i openaa va'e.
⁴ Ixupegua rokê rupi peike perovy'aa rupi,
 hoka py peike mboraei reve.
 Perovy'a, peroporaie hery rupi.
⁵ Mba'eta SENHOR ma porayvu va'e.
 Nhanemboaxya rupi oiko 'rã raka'e rã peve,
 ojeroviapy 'rã oiko ikuai jevy-jevvy va'e peve.
Huvixave opena porã va'e reko re ijayvua
 Mboraeirã Davi ombopara va'ekue.

101

- ¹ Xee aporaie 'rã ndeporayvu ha'e ha'evea rami rejoguerekoa re.
 SENHOR, ndevy pe ae aporaie.
² Anhea'ã 'rã xe' arandua rupi tape porã rupi anho aiko aguã.
 Raka'e nda'u reju 'rã xea py?
 Xero py aiko py voi xepy'a ky'a e'ỹa rupi pota 'rã aiko.
³ Xee aexaa py ma namoĩ 'rã teko vai.
 Ndajou porãĩ ojepe'a va'e kuery ikuai.
 Ha'e kuery reko neĩ peteĩ henda py voi noĩ 'rã xere.
⁴ Xevy pe nda'evei ete xepy'a ky'aa oĩ aguã.
 Xee ndaikuaaxei teko vai.
⁵ Ha'e gui nhemi rupi joe ijayvu vai va'e ma amokanhy 'rã.
 Opy'a py ojejou porã ha'e onhemboyvate rei va'e ma xee ndaropo'akai.
⁶ Xee aexaxe va'e ma ojeroviapy yvy re ikuai va'e anho,
 aru 'rã xero py xereve ikuai aguã.
 Tape porã rupi ikuai va'e ma amoĩ 'rã xerembiguirã.
⁷ Xero py ma neĩ peteĩve jokore va'e ndoiko 'rã,

* 99:7 Êxodo 33:7-11

nēi petēiḅe ijapu va'e voi ndoikoi 'rā xerenonde.

⁸ Ko'ē nhavō amokanhy 'rā heko vai va'e vvy gui,
SENHOR pegua tetā gui aipe'a aguā teko vai rupi ikuai va'e ha'e javi.

Jajeko rerova vy Nhanderueḅe nharō aguā regua
Ojexavai ha'e ikangy va'e SENHOR pe oĵapukaiague.

102

¹ SENHOR, endu ke ajerurea.

Ndea py tonhendu ajapukaia.

² Xee ajexavaia ára ejexa uka e'ÿ eme.

Endu ke. Ajapukai ramo xepytyvō voi!

³ Mba'eta xerekove opa ma ovy hataxī rami,
xekāgue ma tata py okaia ramigua aendu.

⁴ Nhuū ojaya pyre ipirupaa rami avi xepy'a re oī va'e aendu.
Akaru aguā voi xerexarai jepi.

⁵ Xepire voi ojapa ma xekāgue re,
xepoaē atā ainya va'e gui.

⁶ Xee ma guyra tekoa e'ÿa rupigua rami aiko,
urukure'a oogue rupi rive oiko va'e rami.

⁷ Ndake kuaavei,
guyra'i ha'e ae'i va'e oo áry oiko va'e rami.

⁸ Xerovaigua kuery ma ára pukukue re xere ovy'a reia rupi ikuai.
Xevy ipoxy vy xerery rupi ijayvu vaikue-ikue.

⁹ Mbojape 'rāgue py tanhambu re akaru,
xerexay re irūmba rei va'e ay'u aikovy.

¹⁰ Ha'e ramigua ae aendu ndee xejou vai vy ndevai ramo,
mba'eta xemboyvate va'ekue ri aÿ ma xereity.

¹¹ Xe'ára opa ovy pytū rai'i ovy vy kuaray'ā ovy rami.
Nhuū ipiru ovy va'e rami akanhy.

¹² Ha'e rā ndee SENHOR, raka'e rā peve 'rā reiko.
Nderery re ima'endu'aa 'rā avakue okuave teria ja.

¹³ Ndee repu'ā vy remboaxy 'rā Siāo tetā pygua kuery.
Ovaē ma ha'e kuery remboaxya rexa uka aguā,
hi'ora ovaē ma.

¹⁴ Nerembiguai kuery oayvu Siāo py ita ikuai va'e voi,
ha'e pygua ku'ikue re eteve voi oexaxe vai okuapy.

¹⁵ Vvy regua kuery ha'e javi SENHOR rery oendu vy ikuai 'rā ojererokyjea rupi,
vvy regua ruvixave kuery voi ogueroporaie 'rā hexakāa.

¹⁶ Mba'eta SENHOR Siāo tetā omoī atā vy
oexa uka guexakāa.

¹⁷ Oendu iporiaukue'i ojerurea,
ndoĵapyxaka e'ÿi ha'e kuery oĵapukaia re.

¹⁸ Ha'e nunga ta'ipara toiny raka'eve rā guarā.
Ha'e rire ikuai jevy va'e voi ogueroporaie 'rā SENHOR:

¹⁹ “Guenda iky'a e'ÿ va'e ijyvate va'ea gui,
yva gui ae SENHOR oma'ē oiny vvy katy,

²⁰ oendu aguā nhuā py ikuai va'e poaēa,
ha'e ogueraa jepe aguā omano aguā rami omoingo pyre.

²¹ Siāo tetā py ima'endu'aa aguā SENHOR rery re,
ha'e Jerusalém py ogueroporaieia aguā.

²² Ha'e nunga oiko 'rā vvy regua kuery ono'ōmba,
huvixa kuery ipo'aka va'e voi
SENHOR pe ikuai aguā oupa jave.”

²³ Ha'e rami teī ha'e ma oipe'a xembaraetea,
omboapu'a'ive aikovea.

²⁴ Xee aipoa'e va'ekue:
“Xeruete, xereraa eme ke, aikovea mbyte teria ja.
Ha'e rā ndee ma reikove 'rā raka'e rā peve.

²⁵ Jypy'i ete ma renhono va'ekue vvy ytarā,
ndepo py ae rejapo va'ekue yva.

²⁶ Ha'e nunga ha'e javi okanhyimba 'rā,
ha'e rā ndee ma reiko riae 'rā.
Ha'e nunga inhymave 'rā ovy ajukue rami,
ao rami remboekovia 'rā.

Amboae rami 'rā opyta.

²⁷ Ha'e rā ndee ma ha'ekue ae 'rā reiko.

Nderekove ma opa va'erā e'ŷ.*

²⁸ Nerembiguai ra'y kuery voi ikuai porā 'rā,
hamymino kuery ma remoingo 'rā nerenonde."

Nhanderuete nhanemboaxya re ijayvua

Mboraeirā Davi ombopara va'ekue.

103

¹ Xenhe'ē, eroporaiei ke SENHOR.

Xere oī va'e ha'e javi togueroporaiei hery icy'a e'ŷ va'e rupi!

² Eroporaiei SENHOR, xenhe'ē,

nderexarai eme guive nei peteīve xevy ojapo porāague re.

³ Mba'eta omboguepa ajejavyague,

xemonguera 'rā guive xemba'eaxy gui.

⁴ Xereraa jepe 'rā amano aguā gui,

ha'e xemboaxya ha'e xerayvua rupi xemoingo porā 'rā.

⁵ Xetuja'i teī xembovy'a 'rā opa mba'e porā py,

taguato rami xembopyau vy.*

⁶ SENHOR ha'evea rami joguereko vy

oikuaa pota 'rā ojexavai rei'i va'e re.

⁷ Moisés pe oikuaa uka raka'e ojeguigua tape,

Israel kuery pe oexa uka guembiapo.

⁸ SENHOR ma nhomboaxya ha'e iporayvua rupi oiko va'e.

Ivai ma rei-rei 'rā e'ŷ, iporayvu vaipa guive.*

⁹ Nhandevy nda'ijayvu ete riaei 'rā,

mboxy rupi riae ndoikoi 'rā.

¹⁰ Jajejavyague rami ete e'ŷ nhanembopaga,

nhandereko vaia rami e'ŷ nhanderereko.

¹¹ Mba'eta vyv gui yva yvatevea rami avi

SENHOR nhomboaxya voi yvate ete,
oexa uka 'rā henonde ojererokyjea rupi ikuai va'e pe.

¹² Kuaray oēa gui kuaray oikea mombyrya rami avi

jajejavyague oiipe'a mombyry ete nhandegui.

¹³ Tuu kuery gua'y kue'iry omboaxya rami

SENHOR voi omboaxy 'rā henonde ojererokyjea rupi ikuai va'e.

¹⁴ Mba'eta oikuaa mba'e nunga gui pa jaiko,

oikuaa ae ma vyv ku'i guigua rive jaikoa.

¹⁵ Ha'e rā avakue ma nhuū rami avi hekove apu'a'i,

jai ipoty va'e rami rive 'rā ikuai.

¹⁶ Mba'eta vyvty oipeju ramo ipoty okanhymba 'rā.

Ha'e rire ikuaiague py teī ha'e kuery re na'ima'endu'aavei ma 'rā.

¹⁷ Ha'e rā SENHOR ma jypy'i guive raka'e rā peve

omboaxy 'rā henonde ojererokyjea rupi ikuai va'e.

Gueko porāa oexa uka 'rā hamymino kuery raka'eve rāgua pe voi,

¹⁸ guexeve guarā ojapo va'ekue rupi ikuai va'e ha'e javi pe,

ojapo uka va'ekue ojapo ete aguā re ima'endu'a va'e kuery pe.

¹⁹ SENHOR ma yva re omoī guenda opena atyrā.

Huvixave vy opa mba'e re ipo'aka va'e.

²⁰ Ixupegua anjo kuery, peroporaiei ke SENHOR,

penembaraete ha'e pendepo'akapa va'e,

ojapo uka va'e pejapo, ha'e penhe'ē rendu va'e!

²¹ Ixondaro kuery pendekuai va'e ha'e javi, peē kuery voi peroporaiei SENHOR,

peē hembiguai kuery oipota va'e pejapo va'e!

²² Hemimoingo pendekuai va'e ha'e javi, peroporaiei SENHOR,

mamo rā ipo'akaa py ma guive rā!

Xenhe'ē, ndee voi eroporaiei avi SENHOR!

104

Nhanderuete opa mba'e apoare pe japoraiei aguā regua

¹ Xenhe'ē, eroporaiei ke SENHOR!

* 102:27 Hebreus 1.10-12

* 103:5 Taguato rague hekoviaa rami ome'ē 'rā nhanembaraete pyaurā (Isaías 40.31).

* 103:8

- SENHOR Xeruate, yvate ete va'e reiko!
 Renhemonde 'rā nerexakāa py, nemarā e'ŷa py guive.
² Ajukue puku py rami renheovā 'rā nerexakāa py.
 Yva ma reipyo 'rā heravy ajukue rami.
³ Yy yvate rupi oī va'e áry nderorā rejapo.
 Arai ma remboguata 'rā heravy ndekaróxará.
 Yvytu ndereroveve 'rā heravy opepo áry.
⁴ Ndevygua anjo kuery rejapo 'rā yvytu,
 nerembiguai kuery rejapo 'rā hendy vuku aguā rami.*
⁵ Yvy ma remboyta raka'e
 neī peteī henda py ma omyī e'ŷ aguā.
⁶ Ijaorā typya remoī vy renhovā.
 Ha'e ramo yvyty ikuai va'e áry rupi peve yy itui.
⁷ Ha'e gui ma ndeayvu ramove oxyry ju ovy,
 yapu rupi ndeayvua oendu vy ojepe'a vyvoi.
⁸ Ha'e ramo yvyty opu'ā jekuaa ju,
 yvyguarā voi oquejy,
 hendarā rereko katu va'ekue peve.
⁹ Yy remberā guive remoī oaxave e'ŷ aguā,
 yvy ojao'i jevy e'ŷ aguā.
¹⁰ Ha'e gui yvyvugua rupi rejapo yvu oī aguā rami,
 yvyty pa'ū-pa'ū rupi yy oxyry aguā rami.
¹¹ Ha'e va'e gui ka'aguy rupigua ha'e javi oy'u 'rā,
 mburika ka'aguy regua voi oy'u 'rā.
¹² Yakā vyry ma guyra'i ojapo 'rā guaityrā,
 yvyra rakā mbyte 'rā onhe'ē okuapy.
¹³ Yva re reīa gui remoakŷ 'rā yvyty ikuai rupi.
 Ha'e ramo ndepo py mba'emo rejapo ramo yvy oimba porā 'rā.
¹⁴ Nhuū ma rejapo 'rā mymba kuery rembi'urā henhoī aguā rami,
 ha'e rā mba'emo rogue ma avakue pe reja.
 Ha'e ramo yvy re oiko va'e gui ojou 'rā guembi'urā:
¹⁵ uva rykue imbovy'arā,
 azeite hova moexakāarā,
 ha'e mbojape imombaraetearā guive.
¹⁶ Yvyra ikuai va'e voi SENHOR gui vy oiko porā avi 'rā,
 yary Líbano yvy re onhotŷ va'ekue guive.
¹⁷ Ha'e va'e re ma guyra'i ojapo 'rā guaityrā.
 Ha'e rā oko ma cipreste rakā re 'rā ojapo.
¹⁸ Yvyty áry ikuai 'rā kavara ka'aguy regua,
 ha'e itape guy rupi ma tapixi kuery 'rā onhemi okuapy.
¹⁹ Jaxy ma rejapo ára kuaa ukaarā,
 ha'e rā kuaray ma oike aguā hora py porā 'rā oike.
²⁰ Ha'e gui pytū ma rembou 'rā
 ka'aguy regua pyávy oēmba oje'oivy aguā.
²¹ Guary ra'y kuery ma okororō 'rā guembiarā re,
 oeka 'rā oje'oivy Nhanderuete ojou uka va'ekue ho'u va'erā.
²² Kuaray oē ju ramo ha'e kuery ojevypa ju 'rā,
 okua py 'rā oikepa.
²³ Ha'e rā avakue ju ma oje'oi 'rā omba'eapo aguā.
 Ka'aru peve 'rā omba'eapo okuapy.
²⁴ SENHOR, joo ramigua e'ŷ-e'ŷ rejapo va'ekue ikuai!
 Ne'arandua rupi rejapo.
 Yvy ma tynyē oiny mba'emo porā rejapo va'ekue.
²⁵ Oī avi ye'ē hembe'ŷ ha'e tuvixa va'e.
 Ha'e va'e py mbovy e'ŷ ikuai neremimoingo kuery
 kyrī'i ha'e tuvixa va'e.
²⁶ Hi'áry rupi oaxa 'rā kanoā guaxu.
 Oiko avi 'rā ypo guaxu remoingo va'ekue ha'e py ovy'a va'erā.
²⁷ Ha'e kuery ha'e javi oarō 'rā okuapy ndepo guigua
 hi'ára py porā ho'u va'erā reme'ē aguā.
²⁸ Reme'ē ramo 'rāe ha'e kuery ojou.
 Rejou uka reta ramo ha'e kuery hev yatāmba 'rā.
²⁹ Nderejexa ukai ri ramo okyjepa 'rā.

* 104:4 Hebreus 1.7-14

- Ipytuêa reipe'a ramo omano 'rã,
 yvy ku'i ju 'rã opyta.
³⁰ Ha'e gui ma nenhe'ê rembou vy remoingo'i 'rã.
 Ha'e rami vy rembopyau 'rã yvy re.*
³¹ Tove SENHOR rexakãa toĩ raka'e rã peve.
 SENHOR toguerovy'a mba'emo omoingo va'ekue.
³² Yvy re ha'e oma'ê ramo rive oryryipa 'rã.
 Yvyty re opoko ramo oê 'rã hataxĩ.
³³ Aporaei 'rã SENHOR pe aikovea ja.
 Xeruete pe aporaei 'rã aikoa pukukue re.
³⁴ Hexe xema'endu'a ramo toguerovy'a.
 Xee ma avy'a 'rã aikovy SENHOR re.
³⁵ Ha'e rã ojevavya rei va'e kuery ma tokanhymba yvy gui,
 tokuave eme opa marã rei ikuai va'e.
 Xenhe'ê, eroporaei ke SENHOR!
 Aleluia!

105

1 Crônicas 16.8-22

- ¹ Perovy'a SENHOR, hery rupi pejapukai.
 Yvy regua kuery pe peikuaa uka hembiapokue.
² Peporaei ke ixupe, peporaei salmos rupi.
 Pemombe'u ke nhomondyipaara ojapo va'ekue.
³ Perovy'a hery icy'a e'ÿ va'e rupi.
 SENHOR rekaa rupi ikuai va'e tovy'a opy'a py.
⁴ Peka ke SENHOR, ipo'akaa guive.
 Peka riae ke henonde peĩ aguã.
⁵ Penema'endu'a ke mba'emo porã ojapo va'ekue re,
 nhomondyipaa ha'e oipota va'e re ijayvuague re,
⁶ peê hembiguai Abraão ramymino kuery,
 peê Jacó ra'y kuery hembiporavo pendekuai va'e.
⁷ Ha'e ma SENHOR Nhanderuete.
 Oipotaa ma yvy jave re ojekuaa.
⁸ Ima'endu'a riae 'rã guexeve guarã ojapo va'ekue re,
 mbovy rei e'ÿ ikuai va'erã pe ojapo ukaa rupi ijayvuague re,
⁹ Abraão reve ngupive guarã ojapo va'ekue re,
 Isaque pe ouraa rupi ijayvuague re guive.*
¹⁰ Ha'e nungakue re ma Jacó reve ju ijayvu,
 raka'e rã peve guarã re ijayvu Israel reve.*
¹¹ Ha'e vy aipoe'i:
 "Ndevy pe ame'ê 'rã Canaã pendeyvyrã", he'i.
¹² Ha'e jave py ha'e kuery mbovy'i teri ikuai,
 yvy mboae guigua ikuai raka'e mbovy'i ete,
¹³ oguata va'ekue yvy mboae-ae ikuai va'e rupi,
 joyvy-yvy re.
¹⁴ Ha'e rami teĩ avave rei pe SENHOR ndoguereko axy ukai.
 Ha'e kuery re oma'ê vy ijayvu ete huvixave ikuai va'e pe.
¹⁵ Ha'e vy aipoe'i: "Xerembiporavo kuery re pemoĩ eme pendepo,
 pereko axy eme xevygua profeta kuery", he'i.*
¹⁶ Ha'e gui ma yvy re ombou karuai,
 ha'e vy ndojou ukavei tembi'u.*
¹⁷ Ha'e kuery renonde omondouka peteĩ ava
 José hery va'e, tembiguairã ovende pyre.
¹⁸ Ipy corrente py ojokua,
 ferro guigua omoĩ reve,
¹⁹ hekorã re ijayvuague ojeupity peve,
 SENHOR ijayvuague hexe oiko aguã.
²⁰ Ha'e ramo huvixave opoi uka,
 yvy regua ipo'akapave va'e oipe'a uka.
²¹ Ha'e vy ngoo re ae opena uka,

* 104:30 Yvy re ikuai va'e re Nhanderuete openaa re ijayvu avi Atos 17.24-28 ha'e Colossenses 1.15-17 py.

* 105:10 Gênesis 28.10-15

* 105:15 Gênesis 20.3-7

* 105:16 José rekokue ma Gênesis 37-50 py oĩ.

* 105:9 Gênesis 12.7, 26.2-5

- mba'emo oguereko va'e ha'e javi re opena aguã.
 22 Omoĩ ha'e pygua ruvixa kuery re avi ipo'aka va'erã,
 'arandu re ombo'e aguã nhomongeta va'e kuery.
 23 Ha'e gui ma Egito vvy re Israel ju ovaẽ,
 Jacó onhemboekoa Cam ramymino kuery vvy re.
 24 Nhanderuete ojapo ojeuepegua kuery ta'y reta aguã rami,
 ojapo imoingo axya kuery gui imbarateve aguã rami.*
 25 Ha'e kuery py'a oguerovapa guive ixupegua kuery re nda'ija'evei aguã,
 hembiguai kuery ombotavypaa rupi oguereko aguã rami.
 26 Ha'e gui ha'e kuery ikuaia py ombou guembiguai Moisés,
 hembiporavo Arão guive.
 27 Ha'e va'e kuery po rupi ojapo uka hexa pyrã ikuaia mbyte,
 nhomondyipaará ojapo Cam vvy re.
 28 Ha'e rami vvy pytũ ombou ramo opa rupi pytũ
 teĩ Moisés ha'e Arão ndojapo e'yi ijayvuague.
 29 Ha'e kuery ikuaia rupi yy itui va'e ojapo tuguy,
 pira ikuai va'ekue ojukapa vy.
 30 Ha'e kuery vvy re ju'i heta ombou,
 huvixa ro py peve.
 31 Ha'e ijayvu rã ou mberu arai rami,
 ky voi ou vvy jave rupi.
 32 Oky 'rãgue py ombou amandau,
 ha'e overa va'e gui tata ou vvy re.
 33 Omomba uva ha'e figo ty,
 yvyra ikuai va'e rakã omopẽmba vy.
 34 Ha'e ijayvu rã ou tuku-karu,
 opo va'e heta ete ikuai oipapaa aguã rami e'ỹ.
 35 Ha'e va'e kuery ma vvy jave rupi ho'upa jai rogue,
 omono'õ va'erã ikuai va'ekue guive.
 36 Ojukapa avi jypygua vvy re ikuai va'ekue,
 jypygua imbaraeete teri vvy oguereko va'ekue.
 37 Ha'e gui ojeuepegua kuery oguenoẽ
 ouro ha'e prata reve.*
 Ha'e kuery regua peteĩve jipoi hexaĩ e'ỹ va'e.
 38 Ha'e kuery oje'oi ramo Egito pygua kuery ovy'apa okuapy,
 ha'e kuery gui okyje teria ja.
 39 SENHOR ombou peteĩ arai ojeuepegua kuery áry rupi ijao'iarã,
 ha'e pyávý tataendy ju ombou omoexakã aguã.
 40 Ha'e kuery ojerure ramo ombou reta guyra,
 yva gui mbojape ombou va'ekue re guive hevyatãmba.*
 41 Peteĩ itaova ombovo uka ramo oẽ yy,
 tekoa e'ỹa rupi oxyry ovy yakã rami.
 42 Ijayvuagueiky'a e'ỹ va'e re ima'endu'a vy ojapo,
 guembiguai Abraão re guive.
 43 Ha'e rami py ojeuepegua kuery oguenoẽ ha'e gui,
 hembiporavo kuery oporaei oje'oivy ovy'aa rupi.
 44 Ha'e kuery pe ome'ẽ amboae regua vvy va'ekue,
 ha'e ramo oipe'apa amboae regua mba'ety,*
 45 ha'e kuery onhe'ẽ rendu aguã ijayvuague,
 ha'e lei oeja va'ekue rupi ikuai aguã.
 Aleluia!

106

1 Crônicas 16.35,36

1 Aleluia!

Perovy'a ke SENHOR, porayvu va'e ramo,
 mba'eta nhomboaxya opa va'erã e'ỹ.

2 Mava'e nda'u omombe'u kuaa 'rã SENHOR opo'akaa rupi ojapo va'ekue,
 tyrã pa ogueroporaei kuaa 'rã?

3 Ovy'a ete 'rã anhetẽ rupi ikuai va'e,
 ára nhavõ teko porã rupi ikuai va'e.

* 105:24 Êxodo 1.1-13.16

* 105:37 Êxodo 12.33-36

* 105:40 Êxodo 16.1-17.16; Números 20

* 105:44 Josué 11.16-23

- 4 SENHOR, nema'endu'a ke xere,
ndevelyua kuery reavyua rexa uka vy.
Eikuaa pota xere xereraa jepe aguã,
- 5 nerembiporavo kuery ovy'a rã xee aexa aguã,
ha'e avy'a avi aguã ndevelyua kuery ovy'aa py,
ndevelyua kuery reve xee roguerovy'a aguã.
- 6 Ore kuery ma oreramoĩ kuery rami avi rojejavu rokuapy.
Opa marã orekuai, orereko vai guive rokuapy.
- 7 Egito vvy re oreramoĩ kuery ikuai jave
ndoikuaa potai raka'e iporã ete va'e rejapoa re.*
Na'ima'endu'ai okuapy mbovykue rei e'ỹ omboaxyague re.
Ha'e rami vvy ye'ẽ yv'ry nonhe'ẽ rendui okuapy, Ye'ẽ Pytã va'e py.
- 8 Ha'e rami teĩ SENHOR ogueraa jepe raka'e guery omboete ukaa rupi vy,
ha'e kuery pe opo'akaa oexa uka vy.
- 9 Ye'ẽ Pytã pe ijayvu ramo ipiru.
Ha'e vvy ojapo yy rupakue rupi oaxapa aguã rami,
yvy piru reia rupi.
- 10 Ogueraa jepe ija'e e'ỹ va'e kuery po gui,
oepy hovaigua kuery po'akaa gui.
- 11 Imoingo axyare kuery áry rupi yy ojao'ipa,
ha'e kuery regua neĩ peteive ndoo jepei.
- 12 Ha'e ramo mae oguerovia okuapy ijayvuague,
ha'e vvy oporaẽ ixupe oguerovy'aa rupi.
- 13 Ha'e gui are e'ỹ re hexaraipa ju ojapo va'ekue re,
ha'e oipotaa rupi ve'ỹ ju ikuai.*
- 14 Tekoa e'ỹa py ha'e kuery ae oipotapa reia rupi rive ikuai vy
Nhanderuete pe "Taexa" he'i okuapy.
- 15 Ha'e rã ha'e ome'ẽmba ha'e kuery ojerurea,
va'eri ojapo avi ha'e kuery nhe'ẽ ikangy ovy aguã rami.
- 16 Ha'e kuery rekoa py ijayvu rei okuapy
Moisés ha'e Arão SENHOR peguaiky'a e'ỹ va'e re.*
- 17 Ha'e ramo vvy ojepe'a vy omokõ Datã,
Abirão kuery regua guive ojao'ipa.
- 18 Ha'e va'e kuery re tata omoendy vvy
oapypa raka'e heko vai va'e kuery.
- 19 Horebe vvyty py ojapo okuapy peteĩ vaka ra'y ra'angaa,
ha'angaa ouro ryku gui ojapo pyre ombojerovia okuapy.†
- 20 Ha'e rami Nhanderuete rexakãa omboekovia
mymba nhuũ ho'u va'e ra'angaa re rive.
- 21 Hexaraipa Nhanderuete heraa jepeare gui,
Egito vvy re mba'emo porã ojapo rire teĩ.
- 22 Nhomondyipaarã ojapo Cam vvy re,
ha'e Ye'ẽ Pytã py mba'emo porã ete ojapo rire teĩ.
- 23 Hembiporavo Moisés henonde nonhemoĩ va'e rire
ijayvuague rami vvy omomba ete 'rãgue.
Ha'e rami py Moisés ojapo raka'e opoxya rupi omomba e'ỹ aguã rami.
- 24 Ha'e rami avi ha'e kuery ndooxei vvy iporã va'e py,
ijayvua ndogueroviai vy.‡
- 25 Ha'e rami 'rãgue py peteĩ-teĩ ropy rupi ijayvu rei okuapy,
SENHOR ijayvua re noendu potai vy.
- 26 Ha'e ramo opo oupi reve oura ha'e kuery pe,
tekoa e'ỹa rupi ae omokanhymba aguã re,
- 27 ha'e gui hamymino kuery ju vvy regua kuery ikuai rupi oitypa vvy
vvy mboae rupi omoãimba aguã re.
- 28 Ha'e gui ovapa oje'oivy Peor pygua kuery ruete ramigua Baal re.
Ha'e vvy ho'u okuapy ta'angaa hekove e'ỹ va'e pe ome'ẽ mbyre.§
- 29 Ha'e rami ete ikuai vvy ombopoxy rive Nhanderuete.
Ha'e rami vvy oendu okuapy mba'eaxy vaikue.

* 106:7 Egito gui Nhanderuete ogueraa jepeague omombe'u Êxodo 14-15 py. * 106:13 Números 11 * 106:16 Números 16 † 106:19
Vaka ra'y ra'angaa ojapo okuapyague omombe'u Êxodo 32 py. ‡ 106:24 Vvy porã py ndooxei okuapyague omombe'u Números 13-14 py.
§ 106:28 Peor py ojevavyague omombe'u Números 25 py.

- 30 Ha'e ramo Finéias opu'ã vy otekoavy va'ekue ombopaga rire mba'eaxy opytu'upa.
- 31 Ha'e nunga py oexa uka heko porãa, raka'e rã peve guarã.
- 32 Ha'e gui ma Meribá py yy oia py ju ombopoxy.
Ha'e va'e kuery káuxa mba'emo vai oiko raka'e Moisés pe.*
- 33 Mba'eta Nhanderuete Nhe'ê rovai opu'ã rei okuapy ramo Moisés ijayvu 'rãgue'y rupi ijayvu.
- 34 Ha'e kuery ndojukapa etei amboae regua kuery
SENHOR ojapo ukaague rami e'y.†
- 35 Ha'e rami 'rãgue py yvy regua kuery reve nhomomendapa vy ha'e pygua reko rami ikuai.
- 36 Ha'e vy ombojerovia okuapy ha'e pygua kuery ta'angaa.
Ha'e nunga opyta imbo'aa.
- 37 Gua'y ha'e guajy kuery oapy ukapa anha kuery pe.
- 38 Ha'e vy omoê mba'eve py ojevavy e'y va'e ruguy teĩ, gua'y, guajy kuery ruguy ae, mba'emo ra'angaa Canaã pygua pe ojuka uka vy.
Ha'e vy ijyvy iky'apa va'e opyta huguykue py.
- 39 Ha'e rami ikuai vy onhemongy'apa ha'e kuery ae ojapo py, itavy rei okuapy guembiapokue py.
- 40 Ha'e nunga rupi SENHOR poxya hendy ixupegua kuery rovai, ha'e ojeguaru ojeupe guarã va'ekue gui ae.
- 41 Ha'e vy omboaxapa amboae regua po py.
Ha'e kuery re ija'e e'y va'e kuery ipo'aka okuapy,
- 42 hovaigua kuery oguereko axy, ha'e kuery po'akaa guy py omoingo.
- 43 Mbovykue rei e'y ogueraa jepe, ha'e rami teĩ ha'e kuery nhomongetaa rupi ikuai vy ombopoxy reive tema.
Gueko vaia py ojexavaive oje'oivy.
- 44 Ha'e rami rire teĩ ha'e oikuaa pota ju ojexavaia re, ha'e oendu nho ha'e kuery ojapukaia.
- 45 Ha'e kuery re vy ima'endu'a guexeve guarã ojapo va'ekue re.
Ha'e vy porayvu ete va'e vy omboaxy ju.
- 46 Ojapo escravo-rã heraa are kuery ha'e javi omboaxy nho aguã rami.
- 47 SENHOR Oneruete, orereraa jepe kel
Oreno'õmba ju yvy regua kuery mbyte gui, nderery iky'a e'y va'e rupi roguerovy'a aguã, ha'e rovy'aa rupi rogueroporaei aguã.
- 48 Ima'endu'a porãmby toiko SENHOR Israel kuery Ruete a'y, ha'e raka'e rã peve!
Heta va'e kuery ha'e javive aipo te'i: "Amém!"
Aleluia!

107

Jajexavaia gui Nhanderuete nhandereraa jepea re ijayvua

- 1 "Perovy'a ke SENHOR porayvu va'e ramo, ha'e nhomboaxya opa va'erã e'y",
- 2 te'i SENHOR oepy va'ekue, hovaigua kuery po gui ogueraa jepe va'ekue.
- 3 Mba'eta ono'õmba ju amboae yvy re ikuaiague gui, kuaray oua katy gui, oikea katy gui, ipuku-a katy gui, ha'e ye'ê katy gui ma voi.
- 4 Tekoa e'yã rupi ha'e kuery oguata rei raka'e, tape oikuaa e'yã rupi, tetã ikuai aguã ndojouí guive.
- 5 Karuai ha'e yuvei omokanhy ma heravy ha'e kuery nhe'ê.
- 6 Ha'e gui ojexavaia py ojapukai SENHOR pe.

* 106:32 Meribá py ojevavyague omombe'u Números 20 py. omombe'u Juízes 2 py.

† 106:34 Ha'e kuery ojevavy ramo Nhanderuete omboaxy kuereague

- Ha'e ramo ogueraa jepe ojexavaia gui.
 7 Tape hi'yvi va'e rupi ogueraa
 tetā ikuai aguā peve.
- 8 Ha'e kuery toguerovy'a SENHOR porayvua re,
 avakue ra'y kuery pe mba'emo porā ojapo rire.
- 9 Mba'eta ijy'uvei va'e pe ome'ē oy'u aguā,
 ha'e okaruxe va'e pe heta ojou uka mba'emo porā.
- 10 Amongue ma pytū reia rupi oiko, manoa guy py ae,
 ojexavai oiny nhuā py ferro guigua py ojokua pyre reve.
- 11 Nhanderuete nonhe'ē renduiague re ojexavai,
 Yvate ete va'e ombo'ea re ndojapyxakai rire.
- 12 Ha'e ramo ha'e kuery ikane'ōmba omomba'eapoa vaipa ramo.
 Ho'a teī avave rei ndoikoi ipytyvōarā.
- 13 Ha'e gui ojexavaia py ojapukai SENHOR pe.
 Ha'e ramo ogueraa jepe ojexavaia gui.
- 14 Oguenoē pytū vaikue ha'e manoa guy gui,
 ha'e kuery gui omondopa corrente ferro guigua.
- 15 Ha'e kuery toguerovy'a avi SENHOR porayvua re,
 avakue ra'y kuery pe mba'emo porā ojapo rire.
- 16 Mba'eta oitypa okē overa va'e guigua,
 ijokoa ferro guigua guive omopēmba.
- 17 Ha'e gui hi'arandu e'y va'e ojejavypaa rupi anho ikuai re
 ojexavai okuapy gueko vaia py.
- 18 Ojegarua opa marāgua tembi'u gui.
 Ha'e rami vy ovaē manoa rokē peve.
- 19 Ha'e gui ojexavaia py ojapukai SENHOR pe.
 Ha'e ramo ogueraa jepe ojexavaia gui.
- 20 Oayvu ombou vy omongerapa,
 ogueraa jepe omanomba 'rāgue gui.
- 21 Ha'e kuery toguerovy'a avi SENHOR porayvua re,
 avakue ra'y kuery pe mba'emo porā ojapo rire.
- 22 Ixupe tome'ē mba'emo oguerovy'a vy.
 Ovy'aa rupi toikuaa ukapa ojapo va'ekue.
- 23 Ha'e gui amongue ma kanoā guaxu ojou vy ye'ē rupi oguata 'rā,
 mba'emo vendea kuery yy tuvixa va'e rupi oo va'e.
- 24 Ha'e va'e kuery oguataa rupi oexa SENHOR rembiapo,
 mba'emo porā ete yy typyvea rupi ojapo ramo.
- 25 Mba'eta ha'e ijayvu vy ojapo yvytu vaikue oipeju,
 ha'e yai opu'ā-pu'ā aguā rami.
- 26 Ha'e ramo yvate peve oje'oi,
 ha'e gui yai ogejy ju iguy katy peve.
 Ha'e rami ete ojexavai ramo inhe'ē ikangy ma ovy.
- 27 Oguataa rupi ho'a rai-rai'i okuapy oka'u va'e rami.
 Ha'e rami vy ndoikuaavei rei ma.
- 28 Ha'e gui ojexavaia py ojapukai SENHOR pe.
 Ha'e ramo ogueraa jepe ojexavaia gui.
- 29 Omombytu'u yvytu vaikue,
 yai guive omombytu'upa.
- 30 Ha'e ramo ovy'apa ju opytu'upa ramo.
 Ha'e rami ogueraa ojaaty py ovaēxague peve.
- 31 Toguerovy'a SENHOR porayvua re,
 avakue ra'y kuery pe mba'emo porā ojapo rire.
- 32 Tomboete avi heta va'e kuery onhemboaty py,
 toguerovy'a yvatekueve nhomongetaa py.
- 33 Ha'e ojapo yakā ikuai va'e tyapa aguā rami,
 ha'e rā yvu ma ipiru reia meme opyta aguā rami.
- 34 Yvy porā va'ekue ma ojapo juky re'ē rive opyta aguā rami,
 ha'e pygua kuery heko vai rei ramo.
- 35 Ojapo tekoa e'yā va'ekue yupa ju opyta aguā rami,
 ha'e yvy piru rei va'ekue ma yvu oī aguā rami.
- 36 Ha'e py omboekoa okaruxe rei va'ekue.
 Ha'e ramo ojapo okuapy peteī tetā ikuai aguā.
- 37 Mba'etyrā mba'emo omoai, uva guive onhoty.
 Ha'e vy heta ojou omono'ō va'erā.

- 38 SENHOR omoingo porã heta ete oje'oivy aguã rami,
hymba kuery vaka ndoatai guive.
- 39 Ha'e rami teĩ ha'e kuery ojavyky reia ramo iporiaupa ha'e ndaetavei,
ojexavai ha'e ikuai axy vy.
- 40 SENHOR ojapo huvixa kuery nomboeteavei aguã rami,
ojapo avi oguata rei aguã rami tape oĩa rupi e'ỹ.
- 41 Ha'e rã iporiaukue'i ma ogueraa jepe 'rã
ojexavai reia gui yvate py oĩ porã aguã,
hoo pygua kuery voi omboetave vexa'i rami.
- 42 Ha'e nunga heko porã va'e oexa vy ovy'a 'rã.
Ha'e rã heko vai va'e ha'e javi ma omboty 'rã ojuru.
- 43 Hi'arandu va'e ma toikuaa pota ha'e nunga re,
toikuaa pota SENHOR nhomboaxya re.

108

Mboraeirã Davi ombopara va'ekue.

Salmo 57.7-11; Salmo 60.5-12

- 1 Xeruate, xekuraxõ oĩ atã ma.
Aporaei vy roguerovy'a 'rã xenhe'ẽ ha'e javi py.
- 2 Mbaraka ha'e mba'epu ixã reta va'e, pevy ke.
Xee ambovy 'rã ko'ẽ ju.
- 3 SENHOR, roguerovy'a 'rã vvy regua kuery mbyte,
ndevy aporaei 'rã ha'e javi regua mbyte.
- 4 Mba'eta renhombaxya oo 'rã yva peve,
ha'e ndereko porãa ma arai rovai peve 'rã oo.
- 5 Xeruate, enhemboyvate yva áry rupi,
ha'e vvy jave re tojekuaa nerexakãa,
- 6 ore nerembiayvu kuery roo jepe aguã.
Orereraa jepe ke reiporu kuaa regua py, ha'e orembovai.
- 7 Nhanderuete ijayvu oky'a e'ỹa rupi:
"Xepo'akaa rupi vy amboja'o 'rã Siquém vvy,
aa'ã 'rã Sucote regua vvyugua guive.*
- 8 Gileade ha'e Manassés vvy ma xemba'e meme itui.
Efraim vvy ma xengora ratã.
Judá ma xepo pygua.
- 9 Ha'e rã Moabe vvy ma hy'a ajejiaty itui,
Edom vvy áry ma amombo 'rã xepy regua,†
ha'e Filístia pygua kuery re xepo'aka vy avy'a nhendu 'rã."
- 10 Mava'e nda'u xereraa 'rã tetã ikorapa va'ea py?
Mava'e nda'u xereraa 'rã Edom vvy re?
- 11 Mba'eta Oreruate, ndee orereja rive va'ekue.
Oreruate, ndereovei ma orexondaro kuery reve!
- 12 Orereraa jepe nho ke rojexavaia gui,
mba'eta avakue orereraa jepea ma mba'everã ndovarei.
- 13 Nhanderuete re vy ae 'rã nhandepo'aka,
mba'eta ha'e opyrõ 'rã nhanderoaigua kuery re.

Ngovaigua kuery ombopagaa aguã re ojerurea ague

Jogueroporaie va'e pe mboraeirã Davi ombopara va'ekue.

109

- 1 Xeruate rogueroporaie va'e, ekyrirĩ eme ke!
- 2 Mba'eta xerovai ijapu va'e kuery ma nhombotavya rupi ijayvu,
oapekũ ijapu va'e py ijayvu okuapy xere.
- 3 Ha'e kuery xembojere rei vy xerayvu e'ỹa rupi ijayvu,
mba'e re'ỹ opu'ã okuapy xere.
- 4 Xee ayvuague repy ma xevy ivai okuapy oĩ.
Ha'e rã xee ma ajerure ainy.
- 5 Ajapo porãague repy ome'ẽ mba'emo vai,
ayvuague repy ma xere ija'e e'ỹa oĩ.
- 6 Hovai guarã emoĩ peteĩ heko vai va'e.
Oiporu kuaa regua re topu'ã hekokue mombe'uarã.

* 108:7 Apy ma ijayvu joyvy oipe'va va'ekue ojeuepegua kuery pe omboja'o aguã re.

† 108:9 Ha'e jave py ma joyvy ojogua vy hi'áry omombo
'rã opy regua, oikuaa uka aguã ija oikoa.

- 7 Ha'e gui ma omboayvua py tombopagaa.
Ojerureague tojekuaa teko vai rami.
- 8 Hekove topa voi,
ha'e gui ojapo aguã va'ekue amboae ju tojapo.*
- 9 Ta'y kuery ma tyre'ÿ meme ta'ikuai,
ha'e rã ta'yxy ma imeve'ÿ va'e toiko.
- 10 Ta'y kuery ma hoo e'ÿ va'e ta'ikuai
mba'emo re ojerurea rupi.
Tomoëmbaa hoo ombovaipaa va'ekue gui.
- 11 Mba'emo oguereko va'ekue toipe'apaa oreveague re,
amboae yvy guigua tojopy omba'eapoague repy.
- 12 Avave rei tomboaxy eme,
neï ta'ykue re voi avave rei topena eme.
- 13 Ta'ikuai eme hamymino kuery,
ha'e kuery ikuai aguã 'rãgue ta'ima'endu'aa eme hery re.
- 14 SENHOR ta'ima'endu'a riae tuu kuery ojevavyague re,
tombogue eme ixy ojevavyague.
- 15 Ha'e nunga tojekuaa riae SENHOR renonde,
ha'e kuery re ta'ima'endu'aave eme yvy re.
- 16 Mba'eta ojee nomoï rire nhomboaxya.
Ha'e rami 'rãgue py oakykue monha ojexavai va'e ha'e iporiaukue'i,
ipy'a vaia rupi ikuai va'e guive,
manoa pe omboaxa aguã.
- 17 Joe ijayvu vaia rupi anho oiko rire hexe ae ju ha'e nungakue tojeapa.
Ndajogueroayvu porãxei rire togueroayvu porãa eme.
- 18 Ojee ayvu vai ao puku rami omoï rire
toike ipy'apy katy yy rami,
ikãgue peve too azeite rami.
- 19 Hexe toï oao onheovãa rami,
ha'e ku'akuaa omoï va'ety rami.
- 20 Ha'e rami ae SENHOR tombopaga xerovaigua kuery,
xerekove re ijayvu vai va'e.
- 21 Ha'e rã ndee SENHOR Xeruete, enhemoï xerepyarã nderery remboete ukaa rupi vy.
Xereraa jepe ke, ndeporayvua tuvixa ramo.
- 22 Mba'eta xee ma ajexavai, iporiaukue'i aiko.
Xepy'apy rupi ma xeaiã anho aendu.
- 23 Xerekove opa ovy kuaraj ojero'a ovyã rami.
Momyry omombo pyre aiko tuku karu rami.
- 24 Akaru e'ÿ re riae aiko ramo
xerenapy'ã ikangypa ma,
xeangai gui xero'o voi ipiru ma ovy.
- 25 Ha'e kuery pe rã ojou vaipy aiko.
Xerexa vy oakã ombovava-vava 'rã.†
- 26 SENHOR Xeruete, xepytyvõ ke!
Xereraa jepe ke xemboaxya rupi,
- 27 ha'e kuery oikuaa aguã ndepo gui ae xereraa jepearã oua,
ndee SENHOR rejapo rire.
- 28 Ha'e kuery joe ijayvu vai va'e.
Ha'e rã ndee ma rejogueroayvu porã va'e.
Tove xere opu'ã va'e kuery nda'evei nho ta'ikuai.
Ha'e rã nerembiguai ma tovy'a.
- 29 Xerovaigua kuery re toï oxĩmbaa.
Oxĩmbaa tojao'ipa ao puku py rami.
- 30 Xejuru py arovy'a ete 'rã SENHOR.
Rogueroporaei 'rã heta va'e kuery mbyte,
- 31 mba'eta iporiaukue'i ikuaiã katy onhemoï ramo,
ojukaxe va'e kuery gui ogueraa jepe aguã.

Messias ipo'akaa ha'e sacerdote oikoa re ijayvua
Mboraeirã Davi ombopara va'ekue.

* 109:8 Kova'e ayvu rupi ma Judas rekokue re ijayvu (Atos 1.20).
27.39-40).

† 109:25 Kova'e ayvu rupi ijayvu Jesus kuruxu re oï javegua re (Mateus

110

- ¹ SENHOR aipoe'i xeruvixa pe:
 “Eguapy ke aiporu kuaa regua re,
 nderovaigua kuery ndepy guýry amoí peve”, he'i.*
- ² Sião tetã gui SENHOR omboaxa 'rã po pygua ndepo'aka aguã.
 Ha'e vy aipoe'i 'rã: “Ndepo'aka ke nderovaigua kuery re”, he'i 'rã.
- ³ Ha'e gui ma ndepo'akaa ára
 ndevyguua kuery ojexa ukapa 'rã ndere ouxea'i rami.
 Ndevyguua kunumigue ma icy'a e'y va'e py onhemonde reve 'rã ikuai,
 aje'ive'i yxapy ojekuaa va'e rami.
- ⁴ SENHOR ouraague ndoguerovai 'rã:
 “Ndee ma sacerdote reí raka'e rã peve guarã,
 Melquisedeque reko rami ndereko va'e vy”, he'i rire.*
- ⁵ Senhor reiporu kuaa regua re oí va'e ma
 ipoxya ára omou'ũaba 'rã huvixave kuery.
- ⁶ Ombopaga 'rã yvy regua kuery,
 omonyê 'rã te'ogue anho.
 Nhoakã omou'ũaba 'rã yvy jave re.
- ⁷ Oikoa rupi xyry oí va'e gui oy'u 'rã oiny,
 ha'e gui oakã omopu'ã ju 'rã ovy.

111

Nhanderuede opena porãague re ijayvua

- ¹ Aleluia!
 Xepy'a ha'e javi py aroporaei 'rã SENHOR
 heko porã va'e kuery ijatya py.
- ² SENHOR rembiapokue ma tuvixa meme.
 Oguerovy'a va'e kuery ha'e javi oikuaa pota 'rã ha'e nunga re.
- ³ Guembiapo ha'e javi py oexa uka guexakãa ha'e opo'akaa,
 heko porãa avi oí 'rã raka'e rã peve.
- ⁴ Hembiaapo porã re nhanema'endu'a aguã rami ojapo.
 SENHOR ma porayvu ha'e nhomboaxy va'e.
- ⁵ Omongaru 'rã henonde ojererokyjea rupi ikuai va'e,
 ima'endu'a riae 'rã guexeve guarã ojapo va'ekue re.
- ⁶ Ojeupegua kuery pe oexa uka 'rã opo'akaa mba'emo ojapoa py,
 ijyvyrã amboae regua kuery ikuaiague ome'ëa py.
- ⁷ Opo py ojapo va'e ma anhetê ha'e teko porã rupi meme ojapo,
 nhanembo'ea voi ojeroviapy meme.
- ⁸ Ha'e nunga oí porã 'rã raka'e rã peve,
 ojeroviapy oikoa ha'e teko porã rupi ojea rire.
- ⁹ Ojeupegua kuery pe ombou heraa jepearã,
 guexeve guarã ojapo vy raka'e rã peve guarã.
 Hery ma icy'a e'y va'e ha'e nhomongyjea.
- ¹⁰ SENHOR renonde jajererokyjea rupi jaiko vy 'rãe jaupity 'arandua.
 Ha'e rami ikuai va'e ha'e javi oexa uka 'rã 'arandu.*
 Jaroporaeia oí riae 'rã raka'e rã peve!

112

Heko porã va'e oikove aguã re ijayvua

- ¹ Aleluia!
 Ovy'a ete 'rã avakue SENHOR renonde ojererokyjea rupi ikuai va'e,
 ha'e ojapo uka va'ekue oguerovy'a va'e.
- ² Ha'e va'e kuery ramymino kuery voi ipo'akapa 'rã yvy re,
 heko porã va'e ramymino kuery re ima'endu'a porãa 'rã.
- ³ Hoo py ma opa mba'e 'rã oguereko,
 heko porãa oí 'rã raka'e rã peve.
- ⁴ Heko porã va'e pe ma pytũ 'rãgue py ojekuaa 'rã imoexakãarã.
 Porayvu, nhomboaxya ha'e teko porã rupi ikuai.
- ⁵ Nhomboaxy vy mba'emo oiporuka va'e ma ovy'a 'rã,

* 110:1 Apy “Xeruvixa” he'ia ma Cristo re ae ijayvu vy. Ha'e gui “Eguapy ke aiporu kuaa regua re” he'ia ma Nhanderuede ojee rami av
 ombopo'aka aguã re ijayvu vy (Mateus 22.41-26; Marcos 12.36, Lucas 20.42-42, Atos 2.32-36; 1 Coríntios 15.24-28; Efésios 1.20; Colossenses 3.1;
 Hebreus 1.13, 8.1, 10.11-13). * 110:4 Hebreus 5.1-10, 7.1-28 * 111:10 Provérbios 9.10

- ha'e imboayvua py teĩ oikuaa uka 'rã heko porã va'e oikoa.
⁶ Ha'e kuery ndoityai 'rãe.
 Ha'e kuery re raka'e rã peve 'rã ima'endu'aa.
⁷ Nhomondiyarã oendu teĩ nonhemondyi 'rã.
 Ipy'a guaxu 'rã, SENHOR re ojerovia vy.
⁸ Ipy'aa oĩ atã vy ndokyjei 'rã,
 oexa 'rã oipotaague hovaigua kuery re ojeupity ramo.
⁹ Mba'emo oguereko va'e omboja'o vy ome'ẽ 'rã iporiaukue'i pe.
 Heko porãa oĩ 'rã raka'e rã peve.*
 Ipo'aka ramo omboetea ha'e ima'endu'aa porã 'rã.
¹⁰ Ha'e nunga heko vai va'e oexa vy ivai 'rã teĩ,
 haĩ jekyty rei 'rã okanhy peve.
 Mba'eta heko vai va'e oipotaa ma opa 'rã.

113

SENHOR jaroporaei aguã regua

- ¹ Aleluia!
 SENHOR rembiguai pendekuai va'e, peporaei ke,
 peroporaei SENHOR rery.
² Ta'ima'endu'a porãa SENHOR rery re,
 aỹ ha'e raka'e rã peve!
³ Kuaray oẽa guive oikea peve
 togueroporaeia SENHOR rery!
⁴ SENHOR ma yvate ete va'e, yvy jave regua áryve,
 hexakãa voi yva áryve oo.
⁵ Mava'e nda'u SENHOR Nhanderuete reve joo rami heko va'e?
 Henda openaaty ma yvatea py oĩ.
⁶ Ojero'a 'rã guive oexa aguã
 yva ha'e yvy re mba'emo oiko va'e.
⁷ Omopu'ã ju 'rã imo'amy yvy ku'i py omombo pyre,
 yty gui oipe'a 'rã iporiaukue'i,
⁸ huvixa kuery yvýry ju omboguapy imoiny aguã,
 tá, omoi 'rã ojepegua ruvixa kuery reve guarã.
⁹ Ojapo 'rã kunha imemby e'ỹ va'ekue omemby kuery reve oiko aguã rami.
 Ha'e ramo ovy'a 'rã, kyrĩgue xy oiko vy.
 Aleluia!

114

Egito yvy gui oẽmba jave guare re ima'endu'aague

- ¹ Israel kuery Egito yvy gui oẽ jave,
 Jacó ramymino kuery ayvu mboae py ijayvu va'e ikuaiã gui oẽmba jave ma
² Judá kuery gui Nhanderuete ojapo guenda iky'a e'ỹ va'erã,
 ojapo Israel kuery ojeupe guarã ete.
³ Ha'e nunga ye'ẽ oexa vy ojava ovy,
 Jordão yakã voi guakykue katy oxyry raka'e.*
⁴ Yvyty ikuai va'e opopa vexa ava rami,
 yvy'ã'i voi vexa'i ra'y rami opopa okuapy.
⁵ Ye'ẽ, mba'e tu oĩ ha'e rami rejava aguã?
 Ha'vy ndee Jordão, mba'e re tu nderakykue katy rejevy?
⁶ Peẽ yvyty, mba'e re tu pepopa ri vexa ava rami?
 Ha'vy peẽ yvy'ã, mba'e re tu vexa'i ra'y rami pepo?
⁷ Ndee yvy, eryryi ke SENHOR Jacó Ruete renonde.
⁸ Mba'eta itaty gui ojapo yy ruparã,
 itaova ratã gui ojapo raka'e yvu.*

115

Nhanderuete anho nhamboete aguã regua

- ¹ SENHOR, ore kuery e'ỹ toremboetea, ore e'ỹ,
 ha'e rami 'rãgue py nderery anho tomboetea,
 renhomoaxya ha'e ojeroviapy reikoa re.

* 112:9 2 Coríntios 9.9 * 114:3 Ye'ẽ Pytã ojavaague ma Êxodo 14 py omombe'u, ha'e rã Jordão yakã guakykue katy ojevuyague ma Josué 3 py. * 114:8 Êxodo 17; Números 20

- 2 Mba'e re tu amboae regua kuery joupe-upe oporandu vy
 “Mamo tu oi ha'e kuery Ruete?” he'i 'rã okuapy?
- 3 Mba'eta Nhanderuete ma yva re oi,
 opa mba'e ojapo oikovy ha'e ae oipotaa rami.
- 4 Ha'e rã ha'e kuery pegua tuuete ma prata e'ÿ vy ouro guigua rive,
 avakue opo py ojapo va'ekue meme.*
- 5 Ijuru va'eri nda'ijayvui,
 hexa va'eri ndoexai,
- 6 ijapyxa va'eri noendui,
 inhapyigua va'eri noetüi,
- 7 ipo va'eri mba'eve re ndopokoi,
 ipy va'eri ndoguatai,
 ijyryvi va'eri ha'e kuery gui neĩ peteĩ ayvu nonhendui.
- 8 Ijapoare kuery topyta ha'e nunga rami ae,
 hexe ojerovia va'e kuery voi.
- 9 Ha'e gui Israel kuery ma SENHOR re ae tojerovia.
 Ha'e anho ma ipytyvõa ha'e mba'emo vai jokoia oiko.
- 10 Arão ramymino kuery tojerovia SENHOR re.
 Ha'e anho ma ipytyvõa ha'e mba'emo vai jokoia oiko.
- 11 SENHOR renonde ojererokyjea rupi ikuai va'e ha'e javi tojerovia SENHOR re.
 Ha'e anho ma ipytyvõa ha'e mba'emo vai jokoia oiko.
- 12 Mba'eta nhandere SENHOR ima'endu'a vy nhanemoingo porã 'rã.
 Omoingo porã 'rã Israel kuery,
 omoingo porã 'rã Arão ramymino kuery,
- 13 omoingo porã 'rã henonde ojererokyjea rupi ikuai va'e,
 yvatekueve ha'e yvyigueve voi.*
- 14 SENHOR tomoive tema peiko porã aguã,
 peẽ kuery ha'e penda'y kuery pe guive.
- 15 SENHOR yva ha'e yvy apoare va'e
 ogueroayvu porã va'e tapendekuai.
- 16 Yva ma SENHOR pegua oi.
 Ha'e rã yvy ma ome'ẽ avakue ra'y kuery pe.
- 17 Omanogue ma ndogueroporaie 'rã SENHOR,
 okyriřĩ va'e anho ikuai py oguejy va'ekue.
- 18 Ha'e rã nhande kuery ma jarovy'a 'rã SENHOR,
 aÿ guive raka'e rã peve.
 Aleluia!

116

Oporai vy Nhanderuete oguerovy'aague

- 1 Xee ma ayvu SENHOR,
 mba'eta ajerure ramo oendu xeayvua.
- 2 Xea katy ojero'a vy ojapyxaka rire
 ixupe ajapukai 'rã aikovea ja.
- 3 Manoa regua nhuã xemboty va'ekue,
 jexavaia yvykua vaikue guigua xere ipo'aka va'ekue.
 Ha'e ramo aiko axya ha'e ndavy'ia py ha'a karamboae.
- 4 Ha'e rami vy ajapukai SENHOR rery rupi:
 “ SENHOR, eraa jepe ke xerekovel!” ha'e va'ekue.
- 5 SENHOR ma porayvu ha'e heko porã va'e,
 Nhanderuete ma nhanemboaxya rupi oiko va'e.
- 6 SENHOR ma hi'arandu e'ÿ'i va'e kuery re opena porã va'e.
 Ha'e rami vy ha'a ajupya py xerexa vy xereraa jepe karamboae.
- 7 Xenhe'ẽ, ejevuy ju ke repytu'u aguã py,
 mba'eta xevy SENHOR mba'emo porã ome'ẽ oata aguã rami e'ÿ.
- 8 Ha'e rami vy xenhe'ẽ oepy amano taa gui.
 Oepy xerexa xerexaya gui,
 xepy guive oepy onhepyxangaa gui.
- 9 Ha'e ramo SENHOR renonde aiko 'rã
 okuave va'e yvy re.
- 10 Hexe ajerovia va'eri xejeupe xeayvu vy
 “Ajexavai ete rima aikovy”, ha'e va'ekue.*

* 115:4 Salmo 135:15-18 * 115:13 Apocalipse 11.18, 19.5 * 116:10 2 Coríntios 4.13

- 11 Xepy'a eta rei vy
 "Avakue ikuai va'e ma ijapu va'e meme", ha'e va'ekue.
- 12 SENHOR opa mba'e py xeivy ojapo porãague re
 mba'e nda'u ame'ẽ 'rã ixupe?
- 13 Xereraa jepeague arovy'a vy aupi 'rã karo,*
 ha'e SENHOR rery rupi aroporai 'rã.
- 14 SENHOR pe ajapopa 'rã anhemboayvuague
 ixupegua kuery ha'e javi oexaa py.
- 15 Hepy ete va'e SENHOR oexa 'rã
 ojeupegua icy'a e'ỹ va'e kuery omano rã.
- 16 SENHOR, xee ma nerembiguai ete aiko,
 nerembiguai pi'a guive aiko.
 Remondopa ma xejokuaague.
- 17 Ha'e ramo ndevy ame'ẽ 'rã roguerovy'aa,
 ha'e SENHOR rery rupi aroporai 'rã.
- 18 SENHOR pe ajapopa 'rã anhemboayvuague,
 ixupegua kuery ha'e javi ikuai py,
- 19 SENHOR pegua roka
 Jerusalém mbyte py ae.
 Aleluia!

117

SENHOR pe ha'e javi regua oporaei aguã regua

- 1 Peẽ vvy regua ha'e javi, peporaei ke SENHOR pe!
 Peroporaei, ha'e javi regua!*
- 2 Mba'eta SENHOR ma opa mba'e py nhanemboaxy,
 ha'e ojeroviapy 'rã oiko raka'e rã peve.
 Aleluia!

118

Nhandereraa jepea jarovy'a aguã regua

- 1 Perovy'a ke SENHOR, porayvu va'e ramo.
 Mba'eta nhomboaxya opa va'erã e'ỹ.
- 2 Israel kuery aipo te'i:
 "Tá, nhomboaxya opa va'erã e'ỹ."
- 3 Arão ramymino kuery aipo te'i:
 "Tá, nhomboaxya opa va'erã e'ỹ."
- 4 SENHOR renonde ojererokyjea rupi ikuai va'e ha'e javi aipo te'i:
 "Tá, nhomboaxya opa va'erã e'ỹ."
- 5 Ha'e gui xee ma ajexavaia py ajapukai SENHOR pe.
 Ha'e ramo SENHOR oendu vy xerepy karamboae.
- 6 Xereve SENHOR oiko ramo xee ndakyjei 'rã.
 Mba'e tu avakue ojapo 'rã xere?*
- 7 SENHOR xereve oiko xepytyvõarã.
 Ha'e nunga rupi aexa 'rã xere ija'e e'ỹ va'e kuery re aipotaa ojeupity ramo.
- 8 Avakue re jajerovia 'rãgue py
 ha'eveve SENHOR re nhanhemi.
- 9 Huvixa kuery re jajerovia 'rãgue py
 ha'eveve SENHOR re nhanhemi.
- 10 Ha'e javi regua xembojere rei okuapy,
 teĩ SENHOR rery rupi amomba.
- 11 Jova-jovai gui xejokopa,
 teĩ SENHOR rery rupi amomba.
- 12 Eiru rami ete xeao'i okuapy,
 teĩ tata py juu okaia rami okaipa.
 SENHOR rery rupi amomba.
- 13 Opoxya rupi xemoanha ratã heravy xereity aguã,
 teĩ SENHOR xepytyvõ.
- 14 SENHOR ma xemombaraetee oiko, aroporaei va'e guive,
 xereraa jepe rire.*

* 116:13 Apy ijayvu judeu kuery gueko rami vy Nhanderuete pe mba'emo ome'ẽ aguã re. Tembi'u ha'e vinho oupi 'rã ixupe,
 ha'e gui oguerovy'aa rupi ho'u 'rã (Salmo 22.23-26; Levítico 7.11-16). * 117:1 Romanos 15.9-11 * 118:6 Hebreus

- 15 Heko porā va'e rekoa rupi onhendu
heraa jepeare oguerovy'a va'e:
“ SENHOR opo'akaa rupi ojapo mba'emo porā!
- 16 SENHOR opo oupi vy
mba'emo porā ojapo” he'i va'e.
- 17 Xee ma namanovei 'rā.
Ha'e rami 'rāgue py aikove 'rā,
SENHOR ojapo va'ekue amombe'upa aguā.
- 18 SENHOR xembopaga ete,
tei manoa pe naxemboaxai guive.
- 19 Peipe'a ke xevy teko porā rokē,
ha'e va'e rupi aike vy SENHOR aroporaei aguā.
- 20 Ha'e va'e ae ma SENHOR rokē,
ha'e va'e rupi heko porā va'e anho 'rā oike.
- 21 Xee rogueroporaei 'rā,
xepytyvō vy xereraa jepe rire.
- 22 Oo apoa kuery ita omombo va'ekue ma
yvatevea py opyta iporāvea pyguarā.
- 23 Ha'e nunga ma SENHOR ae ojapo,
ha'e jaexa rā iporā ete va'e.*
- 24 Kova'e ára ma SENHOR omoingo va'ekue.
Ha'e ramo javy'a ha'e jarovy'a 'rā.
- 25 SENHOR, orereraa jepe ke, rojerure!
Oremoingo porā ke, SENHOR!
- 26 Ima'endu'a porāmbuy toiko SENHOR rery rupi ou va'e!*
- SENHOR pegua opy peē kuery ha'e javi peike va'e rogueroayvu porā.
- 27 SENHOR ma Nhanderuete ha'e nhanemoexakāa.
Ngaru oiko aguā py pembojegua mba'emo rogue py,
altar apy peve.
- 28 Ndee ma Xeruete, xee rogueroporaei 'rā.
Ndee Xeruete, xee aikuaa uka 'rā ndeyvatea.
- 29 Perovy'a ke SENHOR, porayvu va'e ramo.
Mba'eta nhomboaxya opa va'erā e'y.

119

Nhanderuete guigua lei iporāa re ijayvua

- 1 Ovy'a ete 'rā iky'a e'yā rupi oiko va'e,
SENHOR guigua lei rupi ae.
- 2 Ovy'a ete 'rā aikuaa uka va'ekue rupi oiko va'e,
opy'a ha'e javi py onhe'ē rendu va'e.
- 3 Ha'e va'e kuery ma mba'emo vai rupi e'y' ikuai,
Nhanderuete guigua tape rupi anho.
- 4 Rejapo uka va'e reikuaa uka
rojapopa ete aguā.
- 5 Aguataa toī atā
ndeayvu reja va'ekue rupi aiko aguā.
- 6 Ha'e rami vy aximba aguā rami e'y' 'rā aiko
rejapo uka va'e ha'e javi re aikuaa pota vy.
- 7 Petei rami xepy'a reve roguerovy'a 'rā,
ha'evea rami ndeayvuague aikuaa rire.
- 8 Xee ma ajapo 'rā ndeayvu reja va'ekue.
Xereja eme ke.
- 9 Mba'exa vy nda'u kunumigye onhemongy'a e'y' re oiko 'rā?
Ndeayvu rupi oiko ri vy tema.
- 10 Xee ma xepy'a ha'e javi py roeka va'e.
Ejapo eme rejapo uka va'ekue gui ajepe'a aguā rami.
- 11 Xepy'a re amoi 'rā ndeayvuague
nderovai ajevay e'y' aguā.
- 12 SENHOR, xee ma rogueroporaei 'rā.
Xembo'e ke ndeayvua reja va'ekue rupi aiko aguā re.
- 13 Xeayvu tema xema'endu'a vy

* 118:23 Mateus 21.42, Marcos 12.10-11, Lucas 20.17, Atos 4.11; 1 Pedro 2.7
19.38; João 12.13

* 118:26 Mateus 21.8-9, 23.37-39; Marcos 11.9; Lucas 13.35,

- reikuaa potaa rupi ndeayvuague ha'e javi re.
- ¹⁴ Opa mba'e porã gui
arovy'ave ndee reikuaa uka va'ekue.
- ¹⁵ Anhembo'e aikovy ndee orembo'ea re,
aikuaa pota 'rã reikoa re.
- ¹⁶ Ndeayvua reja va'ekue re xee avy'a.
Ndaxerexarai 'rã ndeayvuague re.
- ¹⁷ Ejapo porã xee nerembiguai pe,
aikove ha'e ndeayvuague rupi aiko aguã.
- ¹⁸ Eipe'a ke xerexa jokoa,
aexa kuaa aguã ndeguigua lei re iporã ete va'e oĩ va'e.
- ¹⁹ Ko vvy re aikoa ja hekoa e'ỹ va'e rami aiko.
Eikuaa uka e'ỹ eme ke rejapo uka va'ekue.
- ²⁰ Xepy'a py aendu nda'evei etea,
ne'arandua rupi ndeayvuague aenduxe riae vy.
- ²¹ Ndee ma ojejou porã rei va'e ha'e ayvu vaipy kuery pe ndeayvu ete va'e.
Ha'e kuery ojepe'a okuapy rejapo uka va'ekue gui.
- ²² Eipe'a ke xere ijayvu reia ha'e ovy'a reia,
mba'eta xee ma reikuaa uka va'ekue rupi aiko ramo.
- ²³ Xere huvixa kuery ijayvu aguã nhomboatypa teĩ
xee nerembiguai aikuaa pota aikovy ndeayvu reja va'ekue re.
- ²⁴ Reikuaa uka va'ekue ma xembovy'a va'e.
Ha'e va'e ma xemongetaa guive.
- ²⁵ Yvy rupi xereitya ma.
Xemoingo porã ju ke ndeayvuague rami vy.
- ²⁶ Xerekokue amombe'upa ramo ndee xembovai.
Xembo'e ke ndeayvua reja va'ekue rupi aiko aguã.
- ²⁷ Eikuaa uka ke renhomb'o'egue rami aiko aguã,
ha'e xee aikuaa pota 'rã iporã ete va'e reikuaa uka va'e re.
- ²⁸ Xepy'a py xeporiau ndavy'avei vy.
Xemombaraete ju ke ndeayvuague rami vy.
- ²⁹ Xepe'a ke ijapu va'e kuery rape gui.
Xemboaxy ke ndeguigua lei re oĩa rami vy.
- ³⁰ Aiporavo tape vy'aa katygua,
amoĩ ne'arandua rupi aiko aguã.
- ³¹ Reikuaa uka va'ekue rupi pota aiko.
SENHOR, xeapo eme axĩmba aguã rami.
- ³² Anha 'rã avy tape rejapo uka va'ekue oĩa rupi,
xepy'a py xembovy'a rire.
- ³³ SENHOR, xembo'e ke ndeayvua reja va'ekue rupi aiko aguã.
Ha'e va'e rupi aiko 'rã opa peve.
- ³⁴ Xemo'arandu ke, ha'e ramo aiko 'rã ndeguigua lei rupi.
Xepy'a ha'e javi py 'rã ajapo.
- ³⁵ Xerereko ke tape rejapo uka va'ekue oĩa rupi,
mba'eta ha'e va'e anho arovy'a.
- ³⁶ Xepy'a re emoĩ reikuaa uka va'ekue rupi aiko aguã,
mba'emo ajoupave aguã rupi e'ỹ.
- ³⁷ Xemoma'ẽ eme ovare e'ỹ va'e re.
Xembopy'a guaxu ke ndeguigua tape rupi.
- ³⁸ Nerembiguai pe emoĩ atãve ndeayvuague,
nerenonde ojererokyjea rupi ikuai va'e pe reme'ẽ rire.
- ³⁹ Eipe'a ke xere ijayvu reia xemongyje va'e,
mba'eta ne'arandua anho ha'eve.
- ⁴⁰ Ma'ẽ, ndee xembo'ea rami anho aikoxe va'e.
Xembopy'a guaxu ke ndereko porãa rupi.
- ⁴¹ SENHOR, exa uka xemboaxya.
Xereraa jepe guive ndeayvuague rami vy.
- ⁴² Ha'e ramo 'rãe ambovai kuaa xembojaru rei okuapy va'e,
ndeayvua re ajerovia vy.
- ⁴³ Xejuru gui eipe'a eme ayvu anhetẽ rupigua,
mba'eta xee ma arõ aikovy ne'arandua.
- ⁴⁴ Ha'e rami vy ndeguigua lei rupi aiko riae 'rã,
raka'e rã peve.
- ⁴⁵ Aiko 'rã aa jepea rupi,

- ndee xembo'ea rupi pota aiko vy.
 46 Huvixave kuery renonde voi axi e'ÿ re
 amombe'u 'rã reikuaa uka va'ekue.
 47 Xee arovy'a 'rã rejapo uka va'ekue,
 xee ayvu vy.
 48 Rejapo uka va'ekue ayvu vy aupi 'rã xepo,
 ndeayvua reja va'ekue re aikuaa pota 'rã guive.
 49 Nema'endu'a ke xee nerembiguai pe ndeayvuague re,
 mba'eta xeapo arõ aguã rami.
 50 Ajexavaia py xembovy'a va'e ma pova'e:
 ndeayvu xembopy'a guaxua.
 51 Ojejou porã rei va'e kuery xejojai riae,
 teĩ xee ndajepe'ai ndeguigua lei gui.
 52 Xema'endu'a ymave ne'arandua rupi ndeayvuague re.
 Ha'e va'e ma xembopy'a guaxu, SENHOR.
 53 Xee aendu xeavaia,
 heko vai va'e ndeguigua lei rupi ve'ÿ ikuai ramo.
 54 Mamo rã aguataa rupi oo py akea py
 aroporaie aikovy ndeayvua reja va'ekue.
 55 SENHOR, pyávy xema'endu'a 'rã nderery re.
 Ha'e rami vy ndeguigua lei rupi 'rã aiko.
 56 Pova'e ma xevy guarã oĩ va'e,
 ndee xembo'ea rupi aiko aguã.
 57 SENHOR ae xevygua oiko.
 Ha'e ramo aipoa'e: "Ajapo 'rã ndeayvuague", ha'e.
 58 Xepy'a ha'e javi py ajerure xemboaxy aguã.
 Xemboaxy ke ndeayvuague rami vy.
 59 Xee ae aikoa re aikuaa pota vy
 ajevy ju ndee reikuaa uka va'ekue rupi aiko aguã.
 60 Anhea'ã 'rã, namboarei guive
 rejapo uka va'ekue ajapo aguã.
 61 Heko vai va'e kuery nhuã xejura
 teĩ ndaxerexarai 'rã ndeguigua lei gui.
 62 Pytũ mbyte jave teĩ apu'ã 'rã roporaie aguã,
 ne'arandua rupi ndeayvuague anhetê va'e meme ramo.
 63 Anhemoirũ 'rã nerenonde ojererokyjea rupi
 ha'e rembo'eague rami ikuai va'e reve.
 64 SENHOR, yvy jave re rexa uka ndeporayvua.
 Xembo'e ke ndeayvua reja va'ekue re.
 65 SENHOR, xee nerembiguai pe rejapo porã,
 ndeayvuague rami vy.
 66 Xembo'e ke 'arandu ha'e aikuaa aguã re,
 rejapo uka va'ekue rupi ajerovia ramo.
 67 Ajexavai e'ÿ mbove ha'eve e'ÿa rami aiko va'ekue,
 teĩ aÿ ma ajapo aikovy ndeayvua.
 68 Ndee ma heko porã ha'e ojapo porã va'e.
 Xembo'e ke ndeayvua reja va'ekue re.
 69 Ojejou porã rei va'e kuery ma xere ijayvu rive
 teĩ xepy'a ha'e javi py ajapo renhomb'o'eague.
 70 Ha'e kuery ma ipy'a ratã va'e.
 Ha'e rã xee ma arovy'a ndeguigua lei.
 71 Ajexavaiague ma ojapo porã xevy,
 ndeayvu reja va'ekue aikuaa nho aguã.
 72 Mbovy e'ÿ ouro ha'e prata guigua oĩ va'e rire
 xevy pe owareve 'rãgue ndejuru gui lei oê va'e.
 73 Ndepo py ae xeapo ha'e xemoingo raka'e.
 Xembo'e ke aikuaa aguã rejapo uka va'ekue.
 74 Nerenonde ojererokyjea rupi ikuai va'e xerexa vy ovy'a okuapy,
 ndeayvuague re ajerovia ramo.
 75 SENHOR, xee aikuaa porã ha'evea rami ndeayvua,
 ojeroviapy reikoa rupi ae xemoingo axy va'ekue.
 76 Tou ha'vy ndeporayvua xembopy'a guaxu aguã,
 xee nerembiguai pe ndeayvuague rami vy.
 77 Xere embou xemboaxya aikove aguã,

- mba'eta ndeguigua lei re xee avy'a.
 78 Ojejou porã rei va'e kuery toximba, mba'e py e'y xembojexavai rire.
 Ha'e rã xee ma aikuaa pota 'rã ndee xembo'ea re.
 79 Nerenonde ojererokyjea rupi ikuai va'e toupã xeirürã,
 reikuaa uka va'ekue oikuaa va'e guive.
 80 Xepy'a py tajapopa ndeayvu reja va'ekue,
 aximba e'y aguã.
 81 Ndee xereraa jepe aguã arõ vy xenhe'ë ikangy.
 Ha'e rami teĩ arõ tema ndeayvuague.
 82 Xerexa ikane'õmba ma ndeayvuague arõ rã.
 "Raka'e 'rã tu xembopy'a guaxu?" ha'e.
 83 Tata áry hyru ipirekue guigua omoĩ mbyre ipirupaa ramigua aiko,*
 teĩ ndaxerexarai ndeayvu reja va'ekue gui.
 84 Mbovy ára teri 'rã nda'u xee nerembiguai aikove?
 Raka'e nda'u xerepy 'rã xerakykue monhaa kuery gui?
 85 Ojejou porã rei va'e kuery ndeguigua lei rupi e'y ikuai va'e ma
 yvykua ojo'o okuapy xembo'a aguã.
 86 Rejapo uka va'ekue ma anhetë va'e meme.
 Xerepy ke mba'e py e'y xerakykue monhaa kuery gui.
 87 Ha'e kuery xemomba rai'i ma ko yvy re.
 Ha'e rami teĩ xee ndajepe'ai 'rã renhombo'ea gui.
 88 Xembopy'a guaxu ke xemboaxya rupi vy,
 ha'e rã ajapo 'rã ayvu ndejuru gui oë va'e.
 89 SENHOR, yva re ndeayvuague oĩ atã 'rã
 raka'e rã peve guarã.
 90 Ojeroviapy riaa 'rã reiko raka'e rã peve guarã.
 Yvy renhono rire ha'ekue py ae oĩ.
 91 Ndeayvuague rami vy opa mba'e õimba porã aỹ peve,
 mba'eta ndevyguia meme ikuai.
 92 Ndeguigua lei re'y avy'a va'e rire
 yma ma amano 'rãgue aiko axy vaipa vy.
 93 Xee ma ndaxerexarai 'rã renhombo'eague re,
 ha'e va'e rupi xemoingove rire.
 94 Xereraa jepe ke ndevyguia aiko ramo,
 mba'eta aeka renhombo'eague.
 95 Heko vai va'e kuery xerarõ okuapy xemokanhy aguã,
 ha'e rã xee ma aikuaa pota 'rã reikuaa uka va'ekue re.
 96 Xee aexa rã iporãgue ikuai va'e ha'e javi opa va'erã.
 Ha'e rã rejapo uka va'ekue ma opa va'erã e'y.
 97 Xee ma ayvu ete ndeguigua lei!
 Ára pukukue re hexe anho aikuaa pota.
 98 Rejapo uka va'ekue ojapo xerovaigua kuery gui xe'aranduve aguã rami,
 xepy'a re amoĩ riaa ramo.
 99 Xembo'ea kuery ha'e javi gui xee aendu kuaave,
 reikuaa uka va'ekue re aikuaa potaa rupi vy.
 100 Tujakue gui voi xe'aranduve,
 renhombo'eague rami aiko vy.
 101 Tape vai ha'e javi gui xee ajepe'a,
 ndeayvuague re aikuaa pota aguã.
 102 Ha'e rã ndeayvuague gui ma xee ndajepe'ai 'rã,
 ndee xerekombo'e ramo.
 103 Ndeayvu aa'anga rã he'ë va'e ramigua,
 ei gui he'ëve xejuru pe.
 104 Renhombo'eague rupi vy xe'arandu 'rã.
 Ha'e rã tape anhetë e'y va'e ma ajeguarua meme.
 105 Ndeayvu ma tataendy oĩ aguata aguã,
 aikoa rupi omoexakã va'e.
 106 Aura karamboae, ha'e auraague amoĩ atã guive,
 ha'evea rami ndeayvuague rupi aiko aguã.
 107 Xee ma aiko axy vaipa ma.
 SENHOR, xemoingove ke ndeayvuague rami vy.
 108 SENHOR, ejopy ke ame'ëxea'i py xeyvu ame'ë va'e,

* 119:83 Ha'e va'e jave py vinho ryrurã ojapo 'rã vexa'i e'y vy kavara pirekue gui. Hataxã py omoĩa ramo ipiru ha'e
 ivaikueve 'rã ovy.

- ha'e xembo'e ndeayvuague re.
¹⁰⁹ Xejukaxea kuerya rupi riae aiko,
 teĩ ndeguigua lei gui ndaxerexarai 'rã.
¹¹⁰ Heko vai va'e kuery ma nhuã omoĩ xerovai,
 teĩ xee ndajepe'ai 'rã renhombo'ea gui.
¹¹¹ Reikuaa uka va'ekue ma raka'e rã peve guarã amoĩ xejee,
 mba'eta xepy'a py arovy'a.
¹¹² Xepy'a re amoĩ ndeayvu reja va'ekue rupi aiko aguã,
 raka'e rã ha'e opa peve.
¹¹³ Mokoĩ rupi rei ijayvu va'e ma xee ajou vai.
 Ha'e rã ndeguigua lei ma arovy'a.
¹¹⁴ Ndee ma anhemiaty ha'e mba'emo vai joko reiko.
 Ndeayvua re ae ajerovia.
¹¹⁵ Mba'emo vai rupi pendekuai va'e, pejepe'a ke xea gui.
 Xee ma ajapoxe Xeruete ojapo uka va'e.
¹¹⁶ Xepytyvõ ke ndeayvuague rami vy, aikove aguã.
 Emoingo e'ỹ eme arõ va'e, aximba e'ỹ aguã.
¹¹⁷ Xemombaraete ramo 'rãe aa jepe,
 ha'e ndeayvu reja va'ekue rupi aiko.
¹¹⁸ Rejou vai ndeayvuague gui ojepe'a va'e,
 mba'eta apu py ae ha'e kuery nhombotavypa 'rã.
¹¹⁹ Yty rami rive remombo 'rã heko vai va'e yvy jave re ikuai va'e.
 Ha'e nunga rupi xee arovy'a reikuaa uka va'ekue.
¹²⁰ Nerenonde ajererokyje vy xero'o pirimba,
 ndeayvua re ae ajererokyje.
¹²¹ Xee ma anhetê ha'e teko porã rupi ajoguereko va'e.
 Xemboaxa eme ke xerovaigua kuery po py.
¹²² Xee nerembiguai xerepy ke aiko porãve ju aguã.
 Xembojaxavai uka eme ojejou porã rei va'e kuery pe.
¹²³ Xerexa ikane'õmba ma xereraa jepearã arõ riae vy,
 ndereko porãa rupi ndeayvuague ojeupity aguã guive.
¹²⁴ Ereko nerembiguai remboaxya rupi.
 Xembo'e ke ndeayvu reja va'ekue re.
¹²⁵ Xee ma nerembiguai aiko.
 Xemo'arandu ke reikuaa uka va'ekue aikuaa aguã.
¹²⁶ SENHOR, ovaẽ ma reikuaa pota aguã ára,
 mba'eta ndeguigua lei rupi nda'ikuaiai ramo.
¹²⁷ Xee ma ouro gui arovy'ave rejapo uka va'ekue,
 ouro oiky'a'o pyre gui voi.
¹²⁸ Ha'e nunga rupi renhombo'eague pe "Anhetê va'e meme" ha'e.
 Ha'e rã ijapu va'e kuery reko ma ajou vai.
¹²⁹ Reikuaa uka va'ekue ma iporã ete.
 Ha'e va'e rupi aiko xepy'a ha'e javi py.
¹³⁰ Ndeayvu reikuaa uka ramo omoexakã vy
 omo'arandu 'rã hi'arandu e'ỹ'i va'ekue.
¹³¹ Xejuru aipe'a vy xepytuẽ atã,
 rejapo uka va'ekue aikuaa porãvexe vy.
¹³² Eju ju xea py, ha'e xemboaxy,
 nderery oayvu va'e kuery pe rejapoaty rami vy.
¹³³ Emoĩ atã ke ndeayvuague rupi aikoa.
 Ha'e rã teko vai va'e guive rã ta'ipo'aka eme xere.
¹³⁴ Xerepy ke avakue xemoingo axy reia gui,
 ha'e ramo aiko 'rã renhombo'eague rami.
¹³⁵ Xee nerembiguai áry taexakã nderova,
 ha'e xembo'e ndeayvu re.
¹³⁶ Xerexay ma yakã rami oxyry,
 ndeguigua lei rupi e'ỹ avakue ikuai rã aexa vy.
¹³⁷ SENHOR, ndee ma ndereko porã va'e,
 ndeayvua guive anhetê va'e meme.*
¹³⁸ Reikuaa uka va'ekue ma anhetê rupi reja,
 ojeroviapy guive.
¹³⁹ Ndeayvu gui xerovaigua kuery hexaraipa rã aexa vy
 nda'evei etea aendu va'e xemomba rai'i.

* 119:137 Apocalipse 16.5-7, 19.2

- 140 Ndeayvua ma icy'a e'ỹ ete va'e.
Ha'e nunga rupi xee nerembiguai arovy'a.
- 141 Xee ma vyv'i va'e, oayvupy e'ỹ aiko va'eri
ndaxerexarai renhombo'eague re.
- 142 Ndeguigua teko porã ma opa va'erã e'ỹ,
ndeguigua lei ma anhetê va'e meme.
- 143 Xe'áry jexavai ha'e ndavy'ai etea ou teĩ
rejapo uka va'ekue ma xembovy'a kuerei.
- 144 Reikuaa uka va'ekue ma ha'evea ramigua meme raka'e rã peve guarã.
Xemo'arandu ke ha'e va'e rupi, ha'e ramo aikove 'rã.
- 145 Xepy'a ha'e javi py xee ajapukai ndevy.
SENHOR, xembovai ke, ha'e ramo ajapo 'rã ndeayvu reja va'ekue.
- 146 Ndevy ajapukai. Xereraa jepe ke,
ha'e ramo aiko 'rã reikuaa uka va'ekue rupi.
- 147 Ko'ê e'ỹ mbove'i ajapukai,
ndeayvua arõ ajerovia reve.
- 148 Pytũ mbukukue re xerexa ndokei,
ndeayvuague re aikuaa pota aguã.
- 149 SENHOR, ndeporayvua rupi endu ke xeayvua.
Ndeayvuague rami vy xemoingove.
- 150 Teko vai rupi ikuai va'e ovaẽ rai'i ma xea py.
Ha'e kuery ma ndeguigua lei gui ojepe'a va'e.
- 151 SENHOR, mombyry e'ỹ ndee reiko,
rejapo uka va'ekue ma anhetê va'e meme.
- 152 Yma ma aikuaa ndeayvuague
raka'e rã peve guarã reja va'ekue.
- 153 Eikuaa pota ke aiko axya re, xereraa jepe guive,
mba'eta xee ma ndeguigua lei gui ndaxerexarai 'rã.
- 154 Xerepy ke, ha'e xereraa jepe.
Ndeayvuague rami vy xemoingove.
- 155 Heko vai va'e kuery ma oo jepe aguã gui mombyry ikuai,
ndeayvu reja va'ekue ndoikuaaxe'i vy.
- 156 SENHOR, opa mba'e py ndee oremboaxy 'rã!
Ndeayvuague rami vy xemoingove.
- 157 Heta ete ikuai xerovaigua kuery xerakykue monha va'e,
teĩ xee ndajep'e'ai 'rã reikuaa uka va'ekue gui.
- 158 Ojerovia e'ỹ va'e kuery aexa vy aendu ndajou porãia,
ndeayvuague rami e'ỹ ikuai rã.
- 159 Eikuaa pota ke renhombo'eague arovy'aa re.
SENHOR, ndeporayvua rupi xemoingove.
- 160 Ndeayvua ma jypy guive anhetê va'e meme.
Ha'evea rami ndeayvuague raka'e rã peve guarã.
- 161 Huvixa kuery mba'e py e'ỹ xemoingo axy
teĩ xepy'a py ajererokyjea va'e ma ndeayvu ae.
- 162 Mba'emo rejapo aguã re ndeayvuague aendu vy avy'a,
amongue ojou reta va'e rami.
- 163 Xee ma ajeguaru apu gui, ajou vai ete guive.
Ha'e rã ndeguigua lei ma arovy'a.
- 164 Ára nhavõ sete-kue kuerei 'rã rogueroporaei,
ndeayvuague ha'evea ramigua meme ramo.
- 165 Ndeguigua lei ogueovy'a va'e ma ovy'a ete 'rã,
ndoikoi 'rã guive ha'e kuery reityarã.
- 166 SENHOR, arõ aikovy ndee xereraa jepe aguã,
rejapo uka va'ekue ajapo reve.
- 167 Xepy'a py aiko reikuaa uka va'ekue rupi,
arovy'a ete vy.
- 168 Renhombo'eague ha'e reikuaa uka va'ekue rupi aiko,
mba'eta nerenonde ojekuaa aikoa ha'e javi.
- 169 SENHOR, ajapukaia tovaẽ ndea peve.
Xemo'arandu ke ndeayvuague rami vy.
- 170 Nerenonde py tovaẽ ajerurea.
Xereraa jepe ke ndeayvuague rami vy.
- 171 Xejuru tandereroporaei,
mba'eta xembo'e ndeayvu reja va'ekue re.

- 172 Xeayvu py tarovy'a ndeguigua lei,
mba'eta rejapo uka va'ekue ha'evea ramigua meme.
- 173 Embou ndepo xerepy aguã,
renhomb'oague aiporavo rire.
- 174 SENHOR, arõ ete xereraa jepe aguã.
Ndeguigua lei anho arovy'a.
- 175 Emoingove xenhe'ê rogueroporaei aguã.
Ndeayvuague taxepytyvõ.
- 176 Vexa'i kanhygue rami aiko. Xereka ke,
mba'eta xee nerembiguai ndaxerexarai 'rã rejapo uka va'ekue gui.

Ijayvu rei va'e kuery rovai ojerureague
Oguataa rupi ikuai va'e oporaei aguã.

120

- 1 Ajexavaia py ajapukai SENHOR pe.
Ha'e ramo oendu xeayvu.
- 2 SENHOR, xereraa jepe ke apu rupi ijayvu va'e gui,
nhombotavypaa rupi ijayvu va'e kuery gui.
- 3 Nhombotavypaa rupi ndeayvu va'e,
mba'e 'rã tu ndereko rekovia ome'êa,
mba'e 'rã tu ndevy guarã omboua?
- 4 Nembopagaa 'rã ipy'a guaxuve va'e ru'y hakua va'e py,
tapyĩ hexakã va'e zimbrogua py guive.
- 5 Xevy pe nda'evei ete yvy mboae regua Meseque,
Quedar pygua kuery rekoa rupi aikoa.
- 6 Yma ete ma ha'e py aiko,
peteĩ rami nda'ikuaixei va'e kuery mbyte.
- 7 Xee ma peteĩ rami orekuai aguã re xeayvu teĩ
ha'e kuery ma joe opu'ã aguã re anho onhea'ã okuapy.

Nhandere Nhanderue onhangarekoa re ijayvua
Oguataa rupi ikuai va'e oporaei aguã.

121

- 1 Yvyty katy ama'ê.
Magui nda'u ou 'rã xerepyarã?
- 2 SENHOR yva ha'e yvy apoare va'e gui ae
ou xerepyarã.
- 3 Ha'e ma nandereity ukai 'rã.
Nerarõa rupi ndoke oinyi 'rã.
- 4 Israel kuery rarõa ma oke va'erã e'y,
ndojarapai 'rã guive.
- 5 SENHOR ae opena porã 'rã ndere.
Nemo'ãarã SENHOR oĩ reiporu kuaa regua re.
- 6 Ha'e ramo ara py kuaray nandeapo vai 'rã,
pyávy teĩ jaxy voi nandeapo vai 'rã.
- 7 SENHOR ndereraa jepe 'rã opa mba'e vai gui.
Nderekovea re opena porã 'rã.
- 8 Reê ha'e reike ju ramo SENHOR onhangareko 'rã ndere
aỹ guive raka'e rã peve.

Jerusalém tetã oĩ porã aguã re ojerurea
Oguataa rupi ikuai va'e oporaei aguã Davi ombopara va'ekue.

122

- 1 Xevy pe "Jaje'oi ke SENHOR pegua oo py"
'ea rã aendu vy avy'a ete.
- 2 Ndee Jerusalém tetã,
orepy ovaê ma nerokê py.
- 3 Jerusalém ma tetã peteĩ henda'i py ojapo pyre.
- 4 Ha'e katy oje'oi 'rã SENHOR pegua kuery ha'e javi regua,
SENHOR rery oguerovy'a aguã
Israel kuery oje'oi aguã va'e.
- 5 Ha'e py ma ikuai ha'evea rami oikuaa pota va'e renda,
Davi ramymino kuery openaaty ikuai.
- 6 Pejerure ke Jerusalém oĩ porã aguã.

- Ndererovy'a va'e kuery ta'ikuai porā avi.
 7 Ndekora mbyte ikuai va'e ta'ikuai porā,
 huvixave ro pygua kuery voi topytu'u porā.
 8 Xeryvy kuery, xeirū kuery re ama'ē vy
 Jerusalém tetā re ajerure:
 “Toī ha'e py ikuai porā aguā”, ha'e.
 9 SENHOR Nhanderueete pegua oo re ama'ē vy
 anhea'ā 'rā aikovy oī porā aguā.

Nhanderueete oipytyvō aguā ojerureague
 Oguataa rupi ikuai va'e oporaei aguā.

123

- 1 Xee ama'ē ne'amba re reiko va'ea katy.
 2 Tembiguai herekoa po gui mba'emo oarō va'e,
 tembiguai kunha mba'e herekoa po re oma'ē va'e rami
 ore kuery voi roma'ē ndea katy
 oremboaxy peve, SENHOR Oreruete.
 3 SENHOR, endu ke oremboaxya, oremboaxy ke,
 mba'eta orere ija'e e'ỹ va'e anho ikuai.
 4 Orenhe'ē py roendu ha'e kuery ae oipotaa rami orembojaru reia anho,
 ojejou porā rei va'e kuery orere nda'ija'eia roendu.

Nhanderueete nhanderepya ha'e nhandereraa jepea re ijayvua
 Oguataa rupi ikuai va'e oporaei aguā Davi ombopara va'ekue.

124

- 1 SENHOR e'ỹ nhandea katy oiko va'e rire —
 Israel kuery aipo te'i —
 2 Nhandere avakue opu'ā ramo
 SENHOR e'ỹ nhandea katy oiko va'e rire
 3 ha'e kuery jaikove reve nhanemokōmba 'rāgue,
 nhandevy ipoxya vy.
 4 Nhande'áry yy ou 'rāgue,
 ty guaxu vy oaxa 'rāgue nhanderekove áry,
 5 yy oxyry atā va'e
 oaxa 'rāgue nhanderekove áry.
 6 Ta'ima'endu'a porāa SENHOR re,
 ha'e kuery pe nanhanemondoro ukai rire haī py.
 7 Ha'e rami rā nhanenhe'ē oo jepe
 guyra mbo'aa nhuā gui oo jepea rami.
 Nhuā omondo ramo jaa jepe.
 8 SENHOR yva ha'e yvy apoare rery rupi
 jajapukai ramo ou nhanepytyvōarā.

Jajeroviaa re nhaī atā aguā regua
 Oguataa rupi ikuai va'e oporaei aguā.

125

- 1 SENHOR re ojerovia va'e ma Siāo vvyty rami ikuai.
 Ha'e va'e ma nomyī 'rā, oī atā 'rā raka'e rā peve guarā.
 2 Jerusalém tetā yvýry rupi vvyty ikuai va'e rami
 SENHOR opena 'rā ojeuegua kuery yvýry,
 aỹ guive raka'e rā peve.
 3 Heko porā va'e kuery re
 heko vai va'e nda'ipo'aka riaei 'rā,
 heko porā va'e opo py ojapo vai e'ỹ aguā.
 4 SENHOR, emoingo porā ke heko porā va'e,
 anhetē rupi ipy'a va'e kuery.
 5 Ha'e rā tape karē rupi opia va'e ma
 SENHOR ombopaga 'rā heko vai va'e kuery reve.
 Israel kuery re toī ikuai porā aguā.

Ojae'o va'e ombopy'a porāa jevy aguā regua
 Oguataa rupi ikuai va'e oporaei aguā.

126

- ¹ SENHOR Sião tetã py nhanemoingo porã ju ramo
oexa ra'u va'e rami nhandekuai va'ekue.
- ² Ha'e jave py nhanderory,
javy'aa rupi nhandeayvu guive.
Ha'e ramo amboae regua kuery joupe-upe aipoe'i:
"Ha'e kuery pe SENHOR ojapo porã ete", he'i okuapy.
- ³ Anhetê SENHOR nhanemoingo porã va'ekue.
Ha'e nunga rupi ae javy'a.
- ⁴ SENHOR, peteigue ju ke oremoingo porã,
Neguebe rupi yy oxyry va'e rami.
- ⁵ Hexay reve mba'emo rá'yĩgue onhotỹ va'ekue ma
ovy'a reve ju 'rã omono'õ.
- ⁶ Ojae'o reve onhotỹ ovy va'ekue ma
ovy'a vaipa reve 'rã ojevy ouvy,
mba'emo aju jokuaa ogueru vy.
- Nhanderue te gui iporã va'e ha'e javi oua re ijayvua*
Oguataa rupi ikuai va'e Salomão ombopara va'ekue.

127

- ¹ SENHOR ae oorã ojapo e'ỹ ramo
ijapoa kuery omba'eapoa mba'everã ndovarei 'rã.
Tetã re SENHOR nonhangarekoi ri ramo
harõa kuery onhangarekoa mba'everã ndovarei 'rã.
- ² Nda'eve ranhei ko'ẽ e'ỹ mbove nhapu'ãa,
ndajake voia, neĩ jajexavaia rupi mbojape jajoua.
Mba'eta hembiaiyvu kuery okepa okuapy reve voi
ha'e kuery pe ome'ẽ 'rã mba'emo.
- ³ Nhandera'y kuery ma SENHOR ome'ẽ va'ekue meme,
guyru'i gui oiko'i va'e ma nhandevy guarã ome'ẽ.
- ⁴ Nhanekunumi jave nhandera'y kuery jareko va'e ma
opo py xondaro hu'y oguereko va'e rami.
- ⁵ Ovy'a ete 'rã avakue hyru py oguereko reta va'e.
Tetã rokê py ngovaigua kuery reve jogueroayvu
teĩ nda'ipo'aka e'ỹi 'rã.
- Nhanderue te renonde jajererokyjea rupi vy javy'a aguã regua*
Oguataa rupi ikuai va'e oporaei aguã.

128

- ¹ Ovy'a ete 'rã SENHOR renonde ojererokyjea rupi ikuai va'e,
ixuguigua tape rupi ikuai vy.
- ² Remba'eapoa rupi rejou 'rã re'u va'erã.
Revy'a ete 'rã, ha'e opa mba'e oiko porã 'rã ndevy.
- ³ Ndero py ma ndera'yxy uva hi'a reta va'e rami 'rã oiko,
ha'e ndera'y kuery ma oliveira rembypy pyau'i rami meme 'rã ikuai mesa yvỹry uguapya py.
- ⁴ Ha'e rami SENHOR renonde ojererokyjea rupi ikuai va'e ma omoingo porã 'rã.
- ⁵ SENHOR tanemoingo porã Sião tetã gui,
reikove reve rexa aguã
Jerusalém tetã py omoingo porã rã.
- ⁶ Rexa 'rã neramymino kuery.
Israel kuery re toĩ ikuai porã aguã.
- Ogueraa jepeague re ima'endu'aa*
Oguataa rupi ikuai va'e oporaei aguã.

129

- ¹ Xekunumi guive mbovykue rei e'ỹ xembojexavaia —
Israel kuery aipo te'i —
- ² Xekunumi guive xembojexavaia okuapy
teĩ xere nda'ipo'akaai.
- ³ Xekupe rupi xekaraĩmbaa ma,
vyv karaia py rami xemboperepa vy.
- ⁴ Ha'e rami teĩ SENHOR heko porã va'e vy
ojayapa heko vai va'e xejokuaague.
- ⁵ Sião tetã re opu'ã va'e ha'e javi

toxímba, tojavapa guive.
 6 Oo áry mba'emo rogue henhoí vy
 ipoty e'ý re ipirupa va'e rami avi tokanhymba.
 7 Ha'e nunga mba'everã ndovarei ramo
 avave rei opo py nomono'ðai,
 neí ojyva áry ndojokuaai heruvy guive.
 8 Ha'e kuerya rupi oaxa va'e kuery aipo te'i eme:
 " SENHOR topena porã pendere!
 SENHOR rery rupi ore rogueroayvu porã!" te'i eme.
 Yy typyvea gui ojavukaia ague
 Oguataa rupi ikuai va'e oporaei aguã.

130

1 SENHOR, yy typyve etea gui ajapukai ndevy.
 2 SENHOR, endu ke ajapukaia!
 Ndevy pe ajerurea re ejapyxaka pota ke.
 3 SENHOR, rojejavyague re reikuaa pota va'e rire
 mava'e 'rãgue tu oo jepe?
 4 Ha'e rami avi ndere oí oreperdoa aguã,
 nerenonde rojererokyjea rupi roiko aguã.
 5 Xee ma arõ aikovy SENHOR,
 xenhe'ẽ py arõ ijayvuague rupi.
 6 Tetã rarõa kuery ko'ẽ aguã re ojavuraa gui
 xenhe'ẽ py SENHOR arõve.*
 Harõa kuery ko'ẽ aguã re ojavuraa gui
 7 Israel kuery toarõve SENHOR.
 Mba'eta SENHOR re oí nhomboaxy aguã,
 opa mba'e gui joepy aguã guive.
 8 Ha'e ae ma ogueraa jepe 'rã Israel kuery
 heko vai ha'e javi gui.
 Nhanderuete re vy japytu'u aguã regua
 Oguataa rupi ikuai va'e oporaei aguã Davi ombopara va'ekue.

131

1 SENHOR, xepy'a py xee ajejou porã rei va'e'ý.
 Ama'ẽa py nanhemboyvatei guive,
 mba'emo tuvixa va'e re nda'eveia rupi e'ý aiko.
 Mba'eta mba'emo iporãve ete va'e ma xevy guarã e'ý ae.
 2 Ha'e rami 'rãgue py akyriri vy apytu'u 'rã xepy'a py.
 Kyri'í va'e nokambuvei va'e oxy jyva áry oí rive'í va'e rami ae avi
 xekuraxõ voi oí xepy'a py.
 3 Israel kuery, pearõ ke SENHOR,
 aý guive raka'e rã peve.
 Ymave ijayvua ague
 Oguataa rupi ikuai va'e oporaei aguã.

132

1 SENHOR, nema'endu'a ke Davi re,
 opa mba'e py oiko axy ramo.
 2 SENHOR pe Davi onhemboayvu vy
 Jacó "Ipo'akapa va'e" he'ia va'e pe ijayvu raka'e po rami:
 3 "Xee ma akeaty py ndaikevei 'rã,
 tupa anhenõ ajupyaty py ndajeupivei 'rã,
 4 xerexa nambotyvei 'rã ake aguã,
 neí pete'igüe'í nanhenovei 'rã xerexa amombytu'u aguã,
 5 SENHOR oí aguã ajou e'ýa ja,
 Jacó Ruete Ipo'akapa va'e oí atyrã", he'í.*
 6 Nhaendu omombe'ua rã Efrata yvy re lei ryrõ oia,
 ha'e ramo Jaar yvy re ae jajou.†

* 130:6 Ha'e va'e jave py pytũ mbukukue re tetã rarõa kuery opyta 'rã ikora áry, ngovaigua kuery ovaẽ rã oexa aguã. * 132:5 Apy ma oí Davi ouraague Nhanderuete ayvu ryrõ ogueru vy hendarã py porã omoí aguã re (1 Crônicas 13.1-4). † 132:6 Jaar yvy Efrata regua yvy re Quiariate-Jearim tetã py ranhe Nhanderuete ayvu ryrõ opyta raka'e, Jerusalém py Davi ogueru ruka e'ý mbove (1 Crônicas 13.5-6).

- 7 Ha'e gui ma jaike ke oĩaty py.
Nhambojerovia ipy renda renonde.
- 8 SENHOR, epu'ã ke, eike ejuvy repytu'u aguã py,
ndee ha'e hyru ndepo'akaa kuaa ukaa reve.
- 9 Ndevyguia sacerdote kuery re toĩ teko porã,
ha'e ndevy ete ikuai va'e toporaei ovy'a vy.
- 10 Nerembiguai Davi re nema'endu'a vy
ema'ê e'y eme nerembiporavo rova re.
- 11 Davi pe SENHOR oura ete raka'e,
oayvuague gui ndaexarai 'rã guive. Aipoe'i:
“Nderekovia peteĩ ndero'o guigua ae
amoi 'rã tenda repenaaty py opena oiny aguã rami.
- 12 Xapy'a rei xereve guarã ajapo va'ekue ndera'y kuery ikuai ramo,
xeayvua re ambo'eague rupi guive,
ha'e ramo ha'e kuery ra'y kuery ju 'rã uguapy
tenda repenaaty py raka'e rã peve.”*
- 13 Mba'eta SENHOR oiporavo raka'e Sião tetã,
ha'e py oĩ riae aguã. Aipoe'i:
14 “Apy apytu'u riae 'rã raka'e rã peve,
apy ae 'rã apena ainy, aĩxea py ae.
- 15 Ha'e py anhomoiingo porã 'rã tembi'u oata aguã rami e'y ajou uka vy,
iporiaukue'i pe voi ame'ê reta 'rã tembi'u.
- 16 Ha'e pygua sacerdote kuery ma amonhemonde 'rã ajogueraa jepea kuaa ukaa py.
Ha'e pygua ojerovia va'e kuery ovy'a vy oporaei 'rã okuapy.
- 17 Ha'e py ajapo 'rã Davi po'akakue ojekuaa jevy aguã rami.
Xerembiporavo rekoaia ambou 'rã nhomoexakãarã.†
- 18 Hexe coroa oĩ va'e ma ipoty 'rã.
Ha'e rã hovaigua kuery re ma ambou 'rã imoxĩmbaarã.”
- Joegua-egua peteĩ rami ikuai re ijayvua*
Oguataa rupi ikuai va'e oporaei aguã Davi ombopara va'ekue.

133

- 1 Joegua kuery peteĩ rami ikuai ma
ha'eve 'rã, iporã ete guive.
- 2 Ha'e rami ikuai ma azeite hepyve va'e
sacerdote Arão akã re onhoẽ ramo
hendyva re oxyry ovy vy
ijao aju'y peve ovaẽ va'e rami.*
- 3 Ha'e rami ikuai ma Hermom vvyty gui yxapy ou va'e
Sião vvyty ombo'yxapypa va'e rami.†
Mba'eta ha'e py SENHOR ombou nhomoiingo porãarã,
ha'e tekove raka'e rã peve guarã.
- Ka'aru'i jave oporaeia aguã oenoia ague*
Oguataa rupi ikuai va'e oporaei aguã.

134

- 1 Peroporaei ke SENHOR, hembigui pendekuai va'e ha'e javi,
Pyávy SENHOR pegua opy rupi pemba'eapo va'e.
- 2 Henda iky'a e'y va'e katy peupi ke pendepo
SENHOR peroporaei vy.
- 3 Sião tetã gui SENHOR yva ha'e vvy apoare
tapendereroayvu porã.

135

- Nhanderuete pe japoraei aguã regua*
- 1 Aleluia!
Peporaei SENHOR rery rupi,
peroporaei SENHOR, hembigui pendekuai va'e,

* 132:12 2 Samuel 7.1-17; Atos 2.30 † 132:17 Kova'e ayvu rupi ijayvu 1 Reis 11.34-36, 15.4, 2 Reis 8.19 ha'e 2 Crônicas 21.7 py. Ha'e gui “Hendy va'erã” he'ia ma huvixa raka'eve 'rã oiko aguã re ijayvu vy, ha'e Jesus Cristo rekorã re guive (Lucas 2.30-32; João 8.12). * 133:2 Sacerdote-rã Arão omoiã vy inhakã re omoi raka'e azeite (Êxodo 29.1-9), Nhanderuete ojeuppegua kuery omoiingo porã aguã kuaa ukarã (Êxodo 29.43-46). † 133:3 Yxapy py Nhanderuete omoiingo porã 'rã ha'e kuery onhoty va'ekue (Gênesis 27.28).

- 2 ixupegua oo rupi pemba'eapo va'e,
Nhanderuete pegua roka rupi guive.
- 3 Peroporaie ke SENHOR, porayvu va'e ramo.
Peporaie hery rupi, iporã ete ramo.
- 4 Mba'eta ojeupe guarã SENHOR oiporavo Jacó,
oiporavo Israel kuery oguereko aguã.
- 5 Xee aikuaa ae SENHOR yvate ete va'ea,
mba'eta tuuete ikuai va'e áryve Nhanderuete oiko.
- 6 SENHOR ma oipota va'e ha'e javi ojapo va'e,
yva ha'e yvy re, ye'ê py ha'e iguýry rupi.
- 7 Arai omopu'ã 'rã heruvy yvy apy katy gui,
overa va'e voi oguereko katu 'rã oky aguã.
Yvytu ma ojapo 'rã oĩa gui oipeju aguã rami.
- 8 Egito yvy re ha'e ae ojukapa va'ekue ta'y kuery jypy guare,
avakue ha'e mymba kuery guive.
- 9 Ha'e py ojapo hexa pyrã ha'e nhomondyipaarã
Faraó ha'e hembiguai kuery rovai.
- 10 SENHOR ma heta regua omomba va'ekue,
huvixave ipo'akapa va'e guive ojuka.
- 11 Ojuka amorreu kuery ruvixa Seom
ha'e Basã pygua huvixa Ogue,
ha'e gui Canaã yvy regua huvixa kuery ha'e javi.
- 12 Ha'e gui ma ijyvykue
ojepegua Israel kuery pe omboaxapa.
- 13 SENHOR, nderery oĩ 'rã raka'e rã peve,
raka'e rã ikuai va'e voi ima'endu'a 'rã ndere.
- 14 Mba'eta SENHOR ma ojepegua kuery re oikuaa pota 'rã,
omboaxy 'rã guembiguai kuery.*
- 15 Ha'e rã yvy regua kuery ruete kuery ma
prata ha'e ouro guigua rive, avakue ae opo py ojapo va'ekue meme.*
- 16 Ijuru va'eri nda'ijayvui,
hexa va'eri ndoexai,
- 17 ijapypxa va'eri noendui,
ipytuê aguã voi nda'evei.
- 18 Ijapoare kuery ma ha'e rami ae ju 'rã ikuai,
hexe ojerovia va'e kuery ha'e javi guive.
- 19 Israel ramymino kuery, penema'endu'a porã SENHOR re!
Arão ramymino kuery, penema'endu'a porã SENHOR re!
- 20 Levi ramymino kuery, penema'endu'a porã SENHOR re!
SENHOR renonde pejererokyjea rupi pendekuai va'e, penema'endu'a porã SENHOR re!
- 21 Sĩa tetã guive ta'ima'endu'a porã
SENHOR Jerusalém py oĩ va'e re.
Aleluia!

136

Nhanderuete nhomboaxya re ijayvua

- 1 Perovy'a ke SENHOR porayvu va'e ramo,
mba'eta nhomboaxya opa va'erã e'ý.
- 2 Perovy'a tuuete ikuai va'e Ruete,
mba'eta nhomboaxya opa va'erã e'ý.
- 3 Perovy'a senhor ikuai va'e SENHOR,
mba'eta nhomboaxya opa va'erã e'ý.
- 4 Ha'e anho ojapo mba'emo porã tuvixa va'e,
mba'eta nhomboaxya opa va'erã e'ý.
- 5 O'arandua rupi ojapo raka'e yva,*
mba'eta nhomboaxya opa va'erã e'ý.
- 6 Yvy avi onhono raka'e yy áry rupi,
mba'eta nhomboaxya opa va'erã e'ý.
- 7 Ojapo raka'e omoexakã va'erã tuvixa va'e,
mba'eta nhomboaxya opa va'erã e'ý.
- 8 Kuaray ojapo ara py ojope aguã,
mba'eta nhomboaxya opa va'erã e'ý.

* 135:14 Hebreus 10.30 * 135:15 Salmo 115.4-8 * 136:5 Gênesis 1

- 9 Jaxy ha'e jaxy-tata ojapo avi pytū omoexakā va'erā,
mba'eta nhomboaxya opa va'erā e'ÿ.
- 10 Egito pygua kuery ra'y jypy guare ojukapa raka'e,*
mba'eta nhomboaxya opa va'erā e'ÿ.
- 11 Ha'e vy ha'e kuery mbyte gui oipe'a Israel kuery,
mba'eta nhomboaxya opa va'erā e'ÿ.
- 12 Opo oupi vy oexa uka opo'akaa,
mba'eta nhomboaxya opa va'erā e'ÿ.
- 13 Omboja'o Ye'ê Pytā mokoï henda rupi,
mba'eta nhomboaxya opa va'erā e'ÿ.
- 14 Omboja'oague rupi ojapo Israel kuery oaxa aguā rami,
mba'eta nhomboaxya opa va'erā e'ÿ.
- 15 Ha'e gui ye'ê py omoinge Faraó, oxondaro kuery ha'e javi reve,
mba'eta nhomboaxya opa va'erā e'ÿ.
- 16 Tekoa e'ÿa rupi ogueroguata heravy ojepegua kuery,
mba'eta nhomboaxya opa va'erā e'ÿ.
- 17 Ojuka huvixave kuery ipo'akapa va'ekue,†
mba'eta nhomboaxya opa va'erā e'ÿ.
- 18 Huvixave omboetevepy ojuka,
mba'eta nhomboaxya opa va'erā e'ÿ.
- 19 Ojuka amorreu kuery ruvixa Seom,
mba'eta nhomboaxya opa va'erā e'ÿ.
- 20 Ojuka avi Basā pygua kuery huvixa Ogue,
mba'eta nhomboaxya opa va'erā e'ÿ.
- 21 Ha'e kuery yvykue omboaxa ojepegua kuery pe,
mba'eta nhomboaxya opa va'erā e'ÿ.
- 22 Guembiguai Israel kuery yvyrā ome'ê,
mba'eta nhomboaxya opa va'erā e'ÿ.
- 23 Nanhanembaraetevei ramo ima'endu'a nhandere,
mba'eta nhomboaxya opa va'erā e'ÿ.
- 24 Ha'e vy nhanderoaigua kuery po gui nhandereraa jepe,
mba'eta nhomboaxya opa va'erā e'ÿ.
- 25 Guemimoingo kuery ha'e javi pe ojou uka 'rā ho'u va'erā,
mba'eta nhomboaxya opa va'erā e'ÿ.
- 26 Peroporaie ke Nhanderueete yva regua,
mba'eta nhomboaxya opa va'erā e'ÿ.

137

Guetā oexa nga'ua rupi ijayvuague

- 1 Babilônia tetā py yakā oï va'e yvry roguapy roinya py
rojae'o va'ekue Jerusalém tetā re orema'endu'a vy.*
- 2 Oremba'epu ixā reta va'e roupi imoiny va'ekue
ha'e py vyvra ikuai va'e rakā re.
- 3 Mba'eta escravo-rā orereraa are kuery ojerure roporaie aguā.
“Peporaie na orevy Sião regua mboraei”, he'i okuapy.
- 4 Ha'e gui mba'exa 'rā tu roporaie mboraei SENHOR pegua
yvy mboae re orekuai vy?
- 5 Mba'eta ndee Jerusalém tetā gui xerexarai ri ramo
xepo aiporu kuaa regua ta'ipirupa.
- 6 Xeapekū tojapa xejuru py re
xapy'a rei ndere naxema'endu'avei rā,
e'ÿ vy Jerusalém gui mba'emo arovy'ave ramo.
- 7 SENHOR, nema'endu'a ke Edom pygua kuery rembopaga aguā
Jerusalém tetā oitya jave ikuaiague re.†
Mba'eta ha'e kuery ma
“Peitypa ke, peitypa yvy katy peve!” he'i okuapy va'ekue.
- 8 Babilônia tetā pygua kuery, peneretā voi ombovaipa pyrā oï.
Ovy'a ete 'rā orere pejapogue re penembopaga va'e.‡

* 136:10 Egito gui ogueraa jepegue omombe'u Êxodo 12-14 py. † 136:17 Huvixave ojukaague omombe'u Números 21 py. * 137:1

Babilônia pygua kuery ma oipe'a raka'e Jerusalém tetā, ha'e guembiguairā ogueraa ha'e pygua judeu kuery regua. † 137:7 Jerusalém tetā re Babilônia pygua kuery ipo'aka rā Edom pygua kuery oexa vy ovy'a rei okuapy, judeu kuery regua rai tei (Obadias 8-14). ‡ 137:8 Babilônia pygua kuery ombopaga aguā re Apocalipse 18 py ijayvu.

⁹ Ovy'a 'rā penda'y kuery voi ojopy vy
ita re omou'ũmba avi va'e.

*Nhanderuete ojeroviapy oikoa jarovy'a aguã regua
Mboraeirã Davi ombopara va'ekue.*

138

¹ SENHOR, xee roguerovy'a 'rā xepy'a ha'e javi py.

Ipo'akakueve oendua py rogueroporai 'rā.

² Ndevygua templo iky'a e'ỹ va'e oĩa katy ama'ẽ reve
aĩ 'rā xerenapy'ã re nderery aroporaei aguã,
ndeporayvu ha'e ndereko porã va'e ramo.

Mba'eta opa mba'e gui remboyvateve nderery ha'e ndeayvu.

³ Mba'eta ndevy pe ajapukai ramo xerepy,
xembopy'a guaxu vy xemombaraeteve guive.

⁴ SENHOR, yvy regua huvixave kuery ha'e javi oporaei 'rā okuapy ndevy,
ndejuvu gui ndeayvua oendu vy.

⁵ Ogueroporaei 'rā SENHOR reko,
SENHOR rexakãa tuvixa ete ramo.

⁶ SENHOR ma yvate ete va'eri
yvyĩgue'i re oma'ẽ avi 'rā.

Ojejou porã rei va'e kuery ha'e oikuaa mombyry gui teĩ.

⁷ Xee ajexavai aikovy ramo
rembopyau 'rā xerekovea.

Ndepo reupi 'rā xerovaigua kuery poxya káuxa.

Reiporu kuaa regua py xereraa jepe 'rā.

⁸ Xevy pe SENHOR ojapo 'rā ojapo 'rā va'ekue ha'e javi.
SENHOR, renhombaoxya ma opa va'erã e'ỹ.

Eja eme ndepo py ae remoingo va'ekue.

*Nhanderuete oikuaapa ha'e ipo'akapa va'ea re ijayvua
Jogueroporaei va'e pe mboraeirã Davi ombopara va'ekue.*

139

¹ SENHOR, ndee ma xere reikuaa pota vy xekuaa porã va'e.

² Reikuaa 'rā aguapy ha'e apu'ã ju rã.

Mombyry gui teĩ reikuaa xepy'a re oĩ va'e ha'e javi.

³ Aguata ha'e anheno ramo ndee xerexa 'rã.

Reikuaapa 'rã aikoa ha'e javi.

⁴ Xeayvu aguã xejuru py oĩ e'ỹ mbove voi
ndee SENHOR reikuaapa 'rã.

⁵ Xejoko 'rã xerakykue ha'e xerenonde katy,
xere ndepo remoi vy.

⁶ Ha'e rami xekuaapaa ma iporã ete xevy.

Yvate ete rã ndaikuaai 'rãe.*

⁷ Marã katy nda'u anhemombyry 'rãgue Nenhe'ẽ gui?

Marã katy nda'u ajava 'rãgue rexa gui?

⁸ Yva re aa teĩ ha'e py ndee rei 'rãgue.

Yvykua vaikuevea py anhemboupa teĩ ha'e py voi rei 'rãgue.

⁹ Kuaray oĩa katy aveve avy vy
ye'ẽ apy peve aa teĩ

¹⁰ ha'e py voi ndepo xerereko 'rãgue,
reiporu kuaa regua xemombaraete 'rãgue.

¹¹ Xee aipoa'e ramo: "Pytũ xeao'i 'rã,
hexakã xevyry rupigua pytũmba 'rã" ha'e teĩ

¹² ndevy pe pytũvea ete voi napytũ 'rãgue,
mba'eta ndevy pe pytũ ha'e hexakãa ma joo rami meme.

¹³ Mba'eta ndee ma xepy'a apoare,
xexy rye py xemoingo va'ekue.

¹⁴ Xee roguerovy'a, anhemondy aguã rami xeapo rire.
Nerembiapokue ma iporã ete va'e meme.

Ha'e rami aikuaa porã xepy'a py.

¹⁵ Xekãgue nderejao'i teri jave hi'ã py xeapo,

* 139:6 Romanos 11.33

- ha'e gui xembotuvixa'i imoiny vvy guy py rami.
¹⁶ Naxeratai teri jave ndee ma xerexa.
 Ndekuaxia re ipara ma voi xee aiko aguã ára ha'e javi,
 petei-tei ipara oiny peteive oiko e'ÿ mbove ma voi.
¹⁷ Xeruate, renhembopy'aa ma iporã ete xevy.
 Mbovy rei e'ÿ oi.
¹⁸ Xee aipapa va'e rire ita ku'i gui hetave 'rãgue.
 Aipapa, aipapa tei ndaipapapai 'rãgue.
¹⁹ Xeruate, remomba voi 'rãgue heko vai va'e!
 Avakue tuguy moëa, pejepe'apa xea gui!
²⁰ Ha'e kuery ma ndere opu'ã rei okuapy,
 nderovaigua kuery ijayvu vaikue-ikue 'rã.
²¹ SENHOR, xee ajou vai ndejou vaia kuery.
 Ndere opu'ã rei va'e kuery gui xee ajeguaru.
²² Ha'e kuery re ndaxea'eveia oimba,
 nderovaigua kuery ete ikuaia aikuaa.
²³ Xeruate, xerexa pota,
 ha'e eikuaapa xepy'a re oi va'e.
 Xera'anga, ha'e eikuaa anhembopy'aa ha'e javi.
²⁴ Exa xere pa oi ha'eve'ÿa rami aikoa,
 ha'e xerereko tape inarã e'ÿ va'e rupi.
Ngovaigua kuery apu gui oo jepe aguã ojerureague
 Jogueroporaie va'e pe mboraeirã Davi ombopara va'ekue.

140

- ¹ SENHOR, xereraa jepe ke heko vai va'e gui.
 Xerepy avakue ojerovia rei va'e gui.
² Ha'e kuery ma mba'emo vai anho opy'a re omoï.
 Joguero'axea rupi rive ikuai.
³ Mboi rami oaïmbe'e 'rã oapekũ,
 ijayvua ma mboi guigua veneno rami ae.*
⁴ SENHOR, xerepy ke heko vai va'e po gui,
 xereraa jepe avakue ojerovia rei va'e gui,
 xembojepekuavo aguã re onhea'ã okuapy va'e kuery gui.
⁵ Ojejou porã rei va'e kuery ma nhemi rupi omoï 'rã nhuã xã xembo'a aguã,
 tape yvÿry oipyo 'rã xembo'aa.
 Omoï 'rã nhuã xembo'a aguã.
⁶ Aipoa'e SENHOR pe: "Ndee ma Xeruate."
 SENHOR, ajerure ramo xepytyvõ ke.
⁷ SENHOR xereraa jepea ndepo'akapa va'e,
 joe opu'aa ára py ndee xeakã reja'o.
⁸ SENHOR, emoingo eme heko vai va'e oipota va'e.
 Eja eme joapo vaixea rupi ikuai aguã rami.
⁹ Xejokopa rei va'e kuery onhemboyvate ri ramo
 ejapo ha'e kuery re ae ju ijayvu vaiague ojeapa aguã rami.
¹⁰ Ha'e kuery áry tou tapyï, tomomboa tata py.
 Yvykua vaikue py tomomboa, opu'ã ve'ÿ aguã py.
¹¹ Joe ijayvu rei va'e toï atã eme vvy re.
 Teko vai toakykue monha avakue ojerovia rei va'e, omomba peve.
¹² Xee aikuaa SENHOR oepy 'rã iporiaukue'i,
 opena 'rã oikotevẽ rei'i va'e kuery re.
¹³ Ha'e ramo heko porã va'e kuery oguero'vya 'rã nderery,
 anhetẽ rupi ipy'a va'e ikuai 'rã nerenonde.

Ka'aru'i jave oiky'a'o ha'e oipytyvõ aguã re ojerureague
 Mboraeirã Davi ombopara va'ekue.

141

- ¹ SENHOR, ndevy ae ajapukai.
 Eju pojava ke xepytyvõ!
 Ndevy pe ajapukai ramo endu.
² Ajerurea toẽ ndea py hekuã porã va'e rami.*
 Xepo aupia toï ka'aru'i jave ome'ëmby rami.

* 140:3 Romanos 3.13 * 141:2 Apocalipse 5.8

- ³ SENHOR, ejoko xejuru,
earō xeayvua rokē.
- ⁴ Ajapo vaixea toī eme xepy'a re,
teko vai rupi aiko e'ỹ aguã
avakue joapo vai va'e ikuaiã rupi e'ỹ,
ha'e kuery okaru okuapya py xee voi akaru e'ỹ aguã.
- ⁵ Xevy pe heko porã va'e ijayvu ete teĩ ajou porã 'rã.
Xevy rã ijayvu okuapya ma azeite xeaķã re omoĩã rami.
Xee ma naendu e'yi 'rã.
Heko vai va'e jajapo vai okuapy teĩ xee anhembo'e 'rã.
- ⁶ Ha'e kuery rerekoa kuery omombopaa 'rã itaova guy katy.
Ha'e kuery oendu 'rã ha'evea rami xeayvua anho,
- ⁷ xerupa gui xekãgue oipe'a vy ijyvyry rupi omoĩmba teĩ,
yvy oikaraĩague rupi rive.
- ⁸ Mba'eta SENHOR, ndere ae ama'ẽ aikovy.
Ndere ae ajerovia va'e.
Eja eme xerekovea.
- ⁹ Xereraa jepe ke heko vai va'e kuery
nhuã xã xembo'aaarã omoĩ va'ekue gui.
- ¹⁰ Heko vai va'e ae to'a nhuã omoĩ va'ekue py,
ha'e rã xee ma aikove reve taa jepe.

Ijava etea py ojerureague

Itakua py Davi oĩ jave py onhembo'eague ombopara va'ekue nhombo'e aguã (1 Samuel 24).

142

- ¹ SENHOR pe ajapukai, xeayvu ainy.
Ajapukai vy xepytyvō aguã re ajerure.
- ² Ixupe amombe'upa ndavy'ia,
henonde amombe'upa ajexavaia.
- ³ Xee nanhanimavei ma aikovy ramo
ndee reikuaa 'rã aikoa ha'e javi.
- Tape aguata aguã rupi xerovaigua kuery omoĩ 'rã nhuã.
- ⁴ Ema'ẽ na aiporu kuaa regua re, ha'e exa pota,
mba'eta avave rei ndoikoi xerexa kuaa va'e.
Jipoi anhemu aguã,
xere avave rei noma'ẽ potai guive.
- ⁵ SENHOR, ndevy pe ae ajapukai.
Ha'e vy aipoa'e: "Ndee ae anhemiaty.
Xevy guarã ndee anho reiko ko yvy re aikoa py."
- ⁶ Endu ke ajapukaia,
xekangy vaipa ete ramo.
Xereraa jepe xerakykue monha va'e kuery gui,
xegui ha'e kuery imbaraeteve ramo.
- ⁷ Enoẽ xerekovea nhuã gui,
nderery rupi arovy'a aguã.
Heko porã va'e kuery oupa 'rã xeyvyry,
xevy pe ha'e rami rejapo porã rive.

Ogueraa jepe aguã ojerureague

Mboraeirã Davi ombopara va'ekue.

143

- ¹ SENHOR, endu ke anhembo'ea.
Ejapyxaka ajerurea re.
Xembovai ke, ojeroviapy ha'e heko porã va'e reiko vy.
- ² Nerembiguai aiko ramo xemboayvu eme,
mba'eta nerenonde heko porã ete va'e ndoikoi.*
- ³ Ha'e gui xerovaigua kuery ma xerakykue monha,
yvy rupi xereity vy xere opyrõmba.
Xemoĩ pytũa py,
yma ete ma omano va'ekue rami.
- ⁴ Ha'e nunga rupi xenhe'ẽ nonhanimavei,
xepy'a eta rei ma guive.

* 143:2 Romanos 3.20; Gálatas 2.16

- ⁵ Xema'endu'a teĩ yma guare re.
Aikuaa pota aikovy nerembiapokue ha'e javi re,
xema'endu'a ndepo py rejapo va'ekue re.
- ⁶ Ha'e nunga rupi xepo aupi ndevy.
Xenhe'ẽ nda'evei ndere, yvy ipiru reia rami.
- ⁷ SENHOR, xembovai voi ke,
mba'eta xenhe'ẽ py nanhanimavei ma.
Ejexa uka e'ỹ eme xevey,
omanogue rupa py ogeuejy va'e rami apyta e'ỹ aguã.
- ⁸ Ndere ajerovia ramo
aje'ive reve taendu ndegui xemboaxya.
Ndere xenhe'ẽ aroma'endu'a ramo
exa uka tape aguata aguã va'e.
- ⁹ SENHOR, xereraa jepe ke xerovaigua kuery gui,
mba'eta ndee ma anhemiaty.
- ¹⁰ Xembo'e ke ndee reipotaa rupi aiko aguã,
mba'eta ndee ae Xerujete.
Nenhe'ẽ Porã taxerereko
yvy joja porãa rupi.
- ¹¹ SENHOR, nderery re vy xemoingove.
Ha'evea rami rejoguerekoa rupi
eipe'a xenhe'ẽ ojexavaia gui.
- ¹² Xemboaxya rupi emokanhymba xerovaigua kuery.
Emomba ke xenhe'ẽ mbojexavaia kuery ha'e javi,
nerembiguai aiko ramo.
- Nhanderuete oepy rire oguerovy'aa ague*
Mboraeirã Davi ombopara va'ekue.

144

- ¹ Ima'endu'a porãmby toiko SENHOR xe'itaova.
Ha'e ma omombaraete 'rã xepo joe apu'ã aguã,
xekuã voi ombo'e 'rã joe apu'ã aguã.
- ² Ha'e ma xemboaxya ha'e oo ikorapa va'e aĩ aguã,
anhemiaty yvate va'e ha'e xereraa jepea,
mba'emo vai joko oiko ramo ajerovia hexe.
Ha'e ojapo xeretarã kuery apenaa rupi ikuai aguã rami.
- ³ SENHOR, marã ramigua tu avakue, ha'e kuery re reikuaa pota aguã?
Marã ramigua tu avakue ra'y kuery, reayvu aguã?*
- ⁴ Mba'eta avakue ma yvytu rami rive ikuai.
Oikovea ára ma kuaray'ã rami 'rã oaxa ovy va'e.
- ⁵ SENHOR, eipe'a ke yva, ha'e eguejy.
Epoko yvyty re, ha'e ramo oẽ 'rã hataxĩ.
- ⁶ Embou overa va'e xerovaigua kuery moaĩmbaarã.
Emombo nderu'y omondyipa aguã.
- ⁷ Ekuave'ẽ yvate gui,
xereraa jepe ha'e xerenoẽ yy typya gui,
amboae regua kuery po'akaa gui ae.
- ⁸ Ha'e kuery ojuru gui apu rupi anho 'rã ijayvu,
ha'e oiporu kuaa regua py anhetẽ va'e'ỹ 'rã ojapo.
- ⁹ Xerujete, ndevy pe amonhendu 'rã mboraei pyau.
Mbaraka dez ixã va'e ambopu vy rogueroporaei 'rã.
- ¹⁰ SENHOR ojapo 'rã huvixa kuery ipo'aka aguã rami.
Guembiguai Davi ogueraa jepe 'rã kyxe jujukaa gui.
- ¹¹ Xereraa jepe ke, xepe'a amboae regua po'akaa gui.
Ha'e kuery ojuru gui apu rupi anho 'rã ijayvu,
ha'e oiporu kuaa regua py anhetẽ va'e'ỹ 'rã ojapo.
- ¹² Orera'y kuery ipyau va'e ta'ikuai mba'emo rogue iporã va'e rami,
ha'e orerajy kuery ta'ikuai ita oo ytarã rami,
huvixave ro reguarã ombojegua pyre rami.
- ¹³ Oreroguy tatynyẽ romono'õ va'ekue,
opa marãgua tembi'u toĩ.
Orerymba kuery vexa'i taetave tovy,

* 144:3 Salmo 8.4

oreyvvy rupi mbovy rei e'y tata'y.

- ¹⁴ Orerymba vaka voi ta'imbaraete,
toity eme gua'y'i, ta'ikuai porā e'y eme guive.
Oreretā mbyte rupi tonhendu eme ipy'a vaia rupi ojae'o va'e.
¹⁵ Ovy'a ete 'rā ha'e rami ikuai va'e kuery.
Tá, ovy'a ete 'rā SENHOR pe "Nhanderuete" he'i okuapy va'e.

Nhanderuete porayvu, yvate ete ha'e opena porāa re ijayvua
Ogueroporaeia rupi Davi ombopara va'ekue.

145

- ¹ Xeruete xeruvixave, xee romboete 'rā.
Raka'e rā peve rogueroporaiei 'rā nderery rupi.
² Ko'ē nhavō roguerovy'a 'rā,
nderery rogueroporaiei 'rā raka'e rā peve.
³ SENHOR yvate ete ramo ha'eva rami jaroporaiei.
Yvate etea ma jaikuaapa va'erā e'y.
⁴ Tuu kuery voi gua'y kuery oendua py ogueroporaiei 'rā nerembiapo,
omombe'upa 'rā ndepo'akaa rupi rejapo va'ekue.
⁵ Aikuaa pota 'rā ndeyvate etea ha'e nerexakāa re,
mba'emo porā rejapo va'ekue re guive.
⁶ Ijayvua 'rā okuapy ndepo'akaa rupi rejapo va'ekue re,
xee voi amombe'u 'rā ndeyvatea.
⁷ Nhomoma'endu'aa 'rā ndeporayvu etea re,
ovy'aa rupi ogueroporaeia 'rā ndereko porāa.
⁸ SENHOR ma porayvu ha'e nhombooxy kuaa va'e.
Nda'ivai voi kuaai, nhombooxy aguā oī riae va'e.
⁹ Pavē pe SENHOR oexa uka 'rā mborayvu,
nhombooxya rupi opena porā 'rā guemimoingo kuery ha'e javi re.
¹⁰ SENHOR, remoingo va'ekue ha'e javi ndereroporaiei 'rā.
Ndevygua iky'a e'y va'e kuery voi ndererovy'a ete 'rā okuapy.
¹¹ Ijayvu 'rā ndepo'akaa rupi nerexakāa ojekuaa va'e re,
omombe'u porā 'rā ndepo'akaa,
¹² avakue ra'y kuery oikuaa aguā ndepo'akaa rupi rejapo va'ekue,
ha'e repenaa rupi ndeyvatea ha'e nerexakāa ojekuaa va'e.
¹³ Ndep'o'akaa ma raka'e rā peve guarā,
ndee ma huvixave riae 'rā rei, ikuai jevy va'e peve.
SENHOR ijayvua ha'e javi py ojeroviapy oiko,
ojapo va'e ha'e javi py oexa uka 'rā iky'a e'y va'ea.
¹⁴ SENHOR oipytyvō 'rā ikangy va'e ha'e javi,
omopu'amba ju 'rā ho'a va'ekue.
¹⁵ Ndere anho pavē oma'ē 'rā okuapy
hi'ára py porā ho'u va'erā rejou uka aguā oarō vy.
¹⁶ Ndep'o reipe'a vy
neremimoingo ha'e javi pe reme'ē 'rā oikotevē va'e.
¹⁷ SENHOR ha'eva rami nhanderereko oikoa ha'e javi py,
opa mba'e ojapoa py oexa uka 'rā oporayvua.
¹⁸ Ixupe ojavukai va'e ha'e javi yv'yry onhemōi 'rā,
anhetē ete rupi ojavukai ramo.
¹⁹ Henonde ojererokyjea rupi ikuai va'e pe ojapo 'rā oipota va'e.
Ojavukaia oendu vy ogueraa jepe 'rā.
²⁰ SENHOR opena porā 'rā oayvu va'e kuery re.
Ha'e rā heko vai va'e ma omomba 'rā.
²¹ Xejuru py taroporaiei SENHOR.
Temimoingo kuery ha'e javi togueroporaiei hery iky'a e'y va'e rupi, raka'e rā peve.

146

Nhanderuete ojeroviapy oikoa re ijayvua

- ¹ Aleluia!
Xenhe'ē, eroporaiei ke SENHOR.
² Xee aikovea pukukue re aroporaiei 'rā.
Xeruete pe aporaiei 'rā aikovea ja.
³ Pejerovia eme huvixa ikuai va'e re rive.
Pejerovia eme avakue ra'y kuery ikuai va'e re,
mba'eta ha'e kuery re noī jogueraa jepe aguā.

- 4 Ha'e kuery nhe'ê oê ramo yvy ku'i ju 'rã opyta.
Ha'e va'e árave opa 'rã ojapo 'rã va'ekue ha'e javi.
- 5 Ovy'a ete 'rã Jacó Ruete pe “Xepytyvõa” he'i va'e,
SENHOR Nguuete oarõ va'e.
- 6 Ha'e ae yva ha'e yvy apoare,
ye'ê ha'e opa mba'e hexe ikuai va'e guive.
Raka'e rã peve oiko 'rã ojeroviapy.*
- 7 Ha'evea rami oikuaa pota 'rã ombojexavaia va'e kuery re,
ha'e okaruxe va'e pe ma ome'ê 'rã tembi'u.
SENHOR oguenoẽmba 'rã nhuã py ikuai va'ekue.
- 8 SENHOR oipe'a 'rã ára revegua e'ÿ va'ekue rexa.
SENHOR omopu'ã 'rã omo'yvy'i mbyre.
SENHOR oayvu 'rã heko porã va'e.
- 9 SENHOR opena porã 'rã oyvy rupi e'ÿ uguata va'e re.
Oipytyvõ 'rã imeve'ÿ va'e ha'e tyre'ÿ kuery.
Ha'e rã heko vai va'e ikuai ma ombovaipa 'rã.
- 10 SENHOR oĩ 'rã huvixave raka'e rã peve.
Sião pygua kuery, Penderuete ipo'aka 'rã aÿ guive raka'e rã peve.
Aleluia!

147

Nhanderuete ipo'akapa va'e ogueroporaia

- 1 Peporaie SENHOR pe!
Ha'eve ha'e iporã ete Nhanderuete pe japoraia.
Jaroporaia ma iporã ixupe voi.
- 2 SENHOR omoatyrõ ju Jerusalém tetã,
oguerupa ju Israel kuery omoaimba pyre.
- 3 Omonguerapa 'rã opy'a py ikangy va'e,
ijai oipoanomba 'rã guive.
- 4 Oipapa jaxy-tata ikuai va'e,
peteĩ-teĩ hery rupi 'rã oenoĩ.
- 5 Nhande-Senhora ma yvate ete ha'e ipo'akapa va'e.
Hi'arandua ndajaiakuapai 'rã.
- 6 SENHOR ma yvyĩgue'i repya oiko,
ha'e rã heko vai va'e ma omombo 'rã yvy rupi.
- 7 Peporaie SENHOR pe perovy'aa rupi.
Mba'epu ixã reta va'e py pembojoguy vy peporaie Nhanderuete pe.
- 8 Ha'e ma yva onhovã 'rã arai py.
Oky oguereko katu yvy re guarã.
Yvyty ikuai va'e re ojapo mba'emo henhoĩ aguã rami.
- 9 Mymba kuery pe ome'ê 'rã ho'u va'erã,
uruvu ra'y kuery pe guive, ojapukai ramo.
- 10 Ha'e ma kavaju mbaraetea oguerovy'a va'e'ÿ,
neĩ xondaro mbaraetea e'ÿ guive.
- 11 SENHOR oguerovy'a 'rã henonde ojererokyjea rupi ikuai va'e,
ha'e nhomboaxya oarõ okuapy va'e anho.
- 12 Jerusalém pygua kuery, peroporaie ke SENHOR!
Sião tetã pygua, peroporaie Penderuete!
- 13 Mba'eta peneretã mbyte rupi omoĩ atãve ikora rokẽ jokoã,
ha'e penda'y kuery omoingo porã 'rã.
- 14 Pendeyvy katy rai'i rupi ikuai va'e reve omoĩ pendekuai porã aguã,
ha'e trigo iporãve va'e re penemongaru.
- 15 Yvy rupi ha'e oikuaa uka 'rã ojapo uka va'e,
ijayvua ojekuaa pojava 'rã ovy.
- 16 Vexa'i rague rami ombou 'rã yro'y apĩ,
yro'y xii voi omoaĩ 'rã tanhimbu rami.
- 17 Yro'y hatã va'e ha'e omombo 'rã ikurekue rami.
Mava'e nda'u ogueropo'aka 'rã yro'y ombou rã?
- 18 Ha'e gui ma oayvu ombou ramo tykupa ju 'rã.
Yvyty oipeju aguã rami ojapo ramo
yy oxyry 'rã.
- 19 Oayvu oikuaa uka Jacó kuery pe,
ojeguigua lei ha'e nhombo'ea ojea Israel kuery pe.

* 146:6 Atos 4.24, 14.15

- ²⁰ Ha'e ramigua ma amboae regua pe ma ndoejai.
Amboae kuery ma nhombo'ea ndoikuaai okuapy.
Aleluia!

148

- Pavē ogueroporaēi aguā regua
¹ Aleluia!
Peroporaēi SENHOR yva áryve rupi,
peroporaēi yvate etea rupi!
² Ixupegua anjo kuery ha'e javi, peroporaēi pekuapy.
Ixondaro kuery yva regua ha'e javi, peroporaēi pekuapy!
³ Kuaray ha'e jaxy, peroporaēi pekuapy!
Jaxy-tata hendy va'e ha'e javi, peroporaēi pekuapy!
⁴ Yva yvatevea rupi oī va'e, eroporaēi avi,
yva áry yy ikuai va'e voi.
⁵ Togueroporaēi okuapy SENHOR rery!
Mba'eta ha'e ijayvu ramo opa mba'e oiko raka'e.
⁶ Omoī atā guive raka'e rā peve guarā.
Ha'e kuery ikuai aguā oeja va'ekue oaxa va'erā e'ỹ.
⁷ Yvy re pendekuai va'e, peroporaēi SENHOR,
ypo tuvixa va'e ha'e typya regua ha'e javi!
⁸ Onhemboxi va'e ha'e amandau,
yro'y apī ha'e yvy rataxi,
yvytu atā onhe'ē rendu va'e,
⁹ yvyty ha'e yvy'ā'i ikuai va'e,
yvyra hi'a va'e ha'e yary ikuai va'e,
¹⁰ mymba inharō va'e ha'e vaka kuery,
yvy rupi otyryry ha'e guyra'i oveve va'e,
¹¹ yvy regua huvixave kuery, ha'e javi regua guive,
yvatekueve ha'e yvy regua joe oikuaa pota va'e kuery ha'e javi,
¹² kunumigue ha'e kunhataigue,
kakuakueve'i va'e ha'e kyrigue.
¹³ Togueroporaēi okuapy SENHOR rery,
mba'eta hery anho yvateve va'e.
Hexakāa ma yvy ha'e yva áryve rupi oī.
¹⁴ Ombopo'akave ojepegua kuery,
ixupegua iky'a e'ỹ va'e kuery ha'e javi ogueroporaēi aguā,
hembiaiyvu Israel kuery regua guive.
Aleluia!

149

- Nhanderuete re ojerovia va'e kuery ogueroporaēi aguā regua*
¹ Aleluia!
Pemonhendu SENHOR pe mboraēi pyau!
Peroporaēi ixupegua kuery iky'a e'ỹ va'e ijatya py.
² Israel kuery toguevov'a imoingoare.
Siāo pygua kuery toguevov'a nguvixave.
³ Peroporaēi hery mimby pemonhe'ē reve.
Ixupe peporaēi salmos, pandeiro ha'e mba'epu ixā reta va'e pembojoguy vy.
⁴ Mba'eta SENHOR oguevov'a ojepegua kuery.
Yvyigue'i re omoī oo jepe aguā.
⁵ Ixupegua kuery iky'a e'ỹ va'e toguevov'a hexakāa.
Ovy'aa rupi toporaēi ngupa py.
⁶ Ha'e kuery juru py toī Nhanderuete pe oporaēi atā aguā,
ha'e ipo py ma toī kyxe haimbe jovai va'e,
⁷ yvy regua kuery ikuai rupi nhombopaga aguā,
amboae regua ombopaga aguā,
⁸ huvixave kuery corrente py oipokua aguā,
ha'e yvatekueve ferro guigua py
⁹ ha'e kuery ombopaga aguā ayvu ombopara pyre rami vy,
ixupegua kuery iky'a e'ỹ va'e ha'e javi omboetea aguā.
Aleluia!

150

Oguerovy'aa opa vygua

¹ Aleluia!

Peroporaei Nhanderuete, ixupegua henda iky'a e'ỹ va'e py!

Peroporaei yvate ipo'akaa oĩa rupi!

² Peroporaei opo'akaa rupi ojapo va'ekue re!

Peroporaei, yvate ete va'e ramo!

³ Peroporaei mimby guaxu pu rupi!

Peroporaei mbaraka ha'e mba'epu ixã reta va'e reve!

⁴ Peroporaei pandeiro py ha'e pejeroky reve!

Peroporaei mba'epu ixã va'e ha'e mimby reve!

⁵ Peroporaei hy'a pu reve!

Peroporaei hy'a pu onhendu ratãve va'e reve!

⁶ Ipytuẽ va'e ha'e javi togueroporaei SENHOR!

Aleluia!

'Arandu regua ayvu Provérbios Salomão omombe'u va'ekue oĩa

'Arandu regua ayvu provérbios Salomão omombe'u va'ekue oĩa*

Avakue ma opa marãgua re oikuaa pota 'rã oikuaaxe vy. "Ha'e rã 'arandua ma mamotu oĩ? Mamotu oĩ mba'emo jaikuaa ete aguã?" (Jó 28.12). Kova'e kuaxia para re ma ombovaia: "Senhor renonde jajererokyjea rupi jaiko vy 'rãe jaupity 'arandua, iky'a e'ỹ va'e jaikuaa vy 'rãe jaiko kuaa" (9.10).

Huvixa Salomão pe ma Nhanderuete ome'ẽ raka'e pavẽ gui hi'aranduve aguã. Salomão ae ombopara va'ekue 'arandu regua ayvu kova'e kuaxia re oĩ va'e. Amongue henda py ete'i amboae kuery ombopara avi va'ekue. Ha'e va'e regua ayvu ma ijapu'a'i meme, nhanderexarai e'ỹ aguã.

Kova'e kuaxia para re ma avakue 'arandua rive'ỹ oĩ, Nhanderuete guigua anho. Ha'e vy "yvate guigua 'arandua ma jypy'i nhandeapo 'rã nhandereko ky'a e'ỹ aguã rami, ha'e gui nanhandevai rive-rivei 'rã, mborayvu re 'rã nhandekuai, ha'eve vai'i va'e 'rã jaiko, ha'e opa mba'e py nhomboaxy ha'e nhopytyvõ va'e, pete'i regua joegui ndajayvuvei 'rã, nanhandereko porã merami rivei 'rã guive" (Tiago 3.17).

Mba'erã pa 'arandu regua ayvu omombe'uague

1'Arandu regua ayvu Davi ra'y Salomão Israel pygua huvixave va'e omombe'u va'ekue,

2 jaikuaa porã aguã 'arandua ha'e nhanembo'eague,

jaikuaa avi aguã hi'arandu va'e kuery ijayvua,

3 ha'e nhanembo'ea nhaendu vy 'arandua rupi jaiko aguã,

teko porã rupi jaiko vy jaikuaa pota, ha'e joo-joo'i rami jajoguereko aguã,

4 hi'arandu e'ỹ'i va'e kuery nhamo'arandu kuaa aguã,

kunumigue pe voi jaikuaa uka 'arandua rupi ikuai aguã.

5 Hi'arandu va'e toendu hi'aranduve aguã,

ombo'e pyre voi toendu oikuaa porãve aguã,

6 oikuaa aguã 'arandu regua ayvu ha'e mba'emo re ombojoja reve ijayvua,

hi'arandu va'e kuery haxy-axyve va'e re ijayvu teĩ.

7 SENHOR renonde jajererokyjea rupi jaiko vy 'rãe mba'emo jaikuaa.

Ha'e rã hi'arandu e'ỹ va'e kuery ma noenduxe'i 'rã hi'arandurã re ombo'ea teĩ.

Heko vai va'e kuery ayvu rupi jaiko e'ỹ aguã

8 Xera'y, endu ke nderu nembo'e ramo,

ejepe'a eme ndexy ijayvuague rupi reikoa gui.

9 Mba'eta ha'e nunga ndeapo porã 'rã akã regua iporã va'e rami,

ha'e mbo'y ndeaju'y re oĩ va'e rami.

10 Xera'y, heko vai va'e kuery nembotavy aguã rupi ri ijayvu rã

enhembotavy uka eme.

11 Ha'e kuery aipoe'i 'rã: "Eju ke orerupive,

jaa nhanhemi vy,

nhama'ẽ mbegue ikuai rive'i va'e ruguy nhamoẽ aguã.

12 Ha'e kuery ma oikove reve teĩ nhamomba 'rã yvykua py rami,

oikove teĩ yvyra rupa py onhono porã mbyre rami opyta aguã", he'i 'rã.

13 "Iporãgue jajou 'rã opa marãgua nhanemba'erã,

ha'e vy nhanderopy nhamonyẽ 'rã nhanemondakue.

14 Eju ha'vy enhemoirũ ore kuery reve,

ha'e rami vy pete'i'i voko jareko aguã", he'i 'rã okuapy.

15 Xera'y, ha'e rami ijayvu ramo eiko eme ha'e kuery reve,

neĩ epyrõ eme ha'e kuery ikuai rupi.

16 Mba'eta ha'e kuery onha-onha 'rã mba'emo vai ojapo aguã,

ojapura 'rã jogueravy tuguy omoẽ aguã katy.

17 Guyra kuery oexaa py

nda'evei imbo'arã jajapo aguã.

18 Ha'e rami teĩ ha'e kuery ma nguguy ae 'rã omoẽ uka oma'ẽ mbeguea py,

guekove ae oipe'a uka 'rã nhemi rupi joapo vaia py.

19 Ha'e rami ojoupa reixe va'e kuery ha'e javi opyta vai 'rã,

ipy'a re oguerekopa reixea oĩ va'e ma hekove ae oipe'a 'rã heravy.

Arandua ijayvua

20 Ha'e gui 'Arandua ojapukai 'rã tape rupi,

tetã mbyte rupi onhendu atã 'rã oikovy.

21 Tetã kora áry gui voi ijayvu 'rã,

okẽ jaikae py ha'e tetã ikuai va'e rupi ijayvu 'rã po rami:†

*

: "Provérbios" 'epy va'e ma ayvu ijapu'a'i va'e 'arandu regua.

†

1:21 Apy gui ma ijayvu va'e ma Arandua. Ha'e rami avi jaikuaa pota

porã vy Nhanderuete ae ijayvua.

- 22 "Pene'arandu e'ÿ'i va'e! Raka'e peve 'rã tu perovy'a pene'arandu e'ÿ'a?
 Pendeporojojai rei va'e, raka'e peve 'rã tu pendeporojojai reia rive pejou porã?
 Pene'arandu e'ÿ va'e, raka'e peve 'rã tu pejou vai 'arandua?"
- 23 Pendu pota ke xeavyu re,
 mba'eta pêvy amombe'upa 'rã xepy'a re oĩ va'e,
 ajapo 'rã xeavyua peikuaapa aguã rami.
- 24 Peẽ kuery xee roenoĩ teĩ napendu potai,
 pendea katy akuave'ẽ ramo oikuaa pota va'e ndoikoi.
- 25 Ha'e rami 'rãgue py pendu rivepa apomongetaa,
 napenduxeĩ xeavyua.
- 26 Ha'e nunga rupi pejexavai rã xee ju 'rã rojojai.
 Penemongyjaarã ou rã aexa vy apuka rei 'rã peẽ kuery re,
 27 mba'eta penemongyjea ou 'rã yvytu atã rami,
 penemombaará ou 'rã yvytu jere rami,
 ha'e penembojexavaiaarã ha'e penemoingo axyarã ovaẽ avi 'rã.
- 28 Ha'e jave py peẽ pejapukai 'rã xevy teĩ xee nambovai 'rã.
 Opa rupi peẽ kuery xereka teĩ ndaxejoui 'rã,
- 29 Mba'eta 'arandua ndapeipotai rire,
 SENHOR renonde pejererokyje aguã napemoĩxei vy.
- 30 Xee apomongeta ramo napenduxeĩ,
 pendeivy xeavyu rã ndapeikuaaxei,
- 31 ha'e rami rire ma peikoague repy ae 'rã pejopy,
 pejeguaru 'rã penhemongetaague gui ae.
- 32 Mba'eta hi'arandu e'ÿ'i va'e kuery omanomba 'rã ojepe'aague py,
 hi'arandu e'ÿ va'e ojeupe 'Aiko porã' he'i riveague py ae 'rã okanhymba.
- 33 Ha'e rã xeavyu oendu va'e ma oĩ atã 'rã,
 ikuai porã rei 'rã mba'eve gui okyje e'ÿ re."

2

Arandua iporã va'e re ijayvua

- 1 Xera'y, xeavyu rejopy vy,
 ha'e ndejee ajapo uka va'e remoĩ ri vy,
- 2 'arandua re rejapyxaka pota vy,
 ha'e ndepy'a re mba'emo reikuaa aguã re rejerure ri vy,
- 3 xapy'a rei ne'arandurã re rejapukai vy,
 ha'e rendu kuaa aguã re rejerure ete vy,
- 4 ne'arandurã reka reikovy vy prata oeka va'e rami,
 mba'emo porã onhomi mbyre rekaa rami reka vy,
- 5 ha'e rami vy 'rã reikuaa SENHOR renonde rejererokyjea rupi reiko aguã,
 ha'e rejou 'rã Nhanderuete reikuaa aguã.
- 6 Mba'eta SENHOR ae ome'ẽ 'arandurã,
 ijuru gui ae ou nhane'arandurã ha'e jaikuaa aguã.
- 7 Heko porã va'e kuery peguarã omoĩ porã 'rã 'arandua anhetẽ ete va'e,
 ha'e ramo anhetẽ rupi ikuai va'e pe oĩ 'rã mba'emo vai jokoarã.
- 8 Opeña porã 'rã teko porã rupi ikuai va'e re,
 opena 'rã Nhanderuete pegua kuery iky'a e'ÿ va'e oikoa rupi.
- 9 Ha'e rami vy reikuaa 'rã teko porã rupi reikoa, mba'emo re reikuaa potaa, ha'e joo-joo'i rami rejogueroko aguã.
 Ha'e rami jaikoa ma tape porã meme.
- 10 Mba'eta ndepy'a re oĩ 'rã ne'arandurã,
 reikuaave reikovya voi nenhe'ẽ py nembovy'ave 'rã heravy.
- 11 Ha'e ramo 'arandua opena 'rã ndere,
 ne'arandua ae nemoingo porã 'rã.
- 12 Ha'e rami vy ndereraa jepe aguã tape vai rupi ikuai va'e gui,
 ha'e avakue nda'eveia rupi ijayvu va'e gui,
- 13 teko porã gui ojepe'a vy
 pytũ rupi anho ikuai va'e gui.
- 14 Ha'e kuery ma teko vai ojapo vy ovy'a rei 'rã,
 heko vai va'e kuery oexa vy anho 'rã ovy'a okuapy,
- 15 tape karẽ rupi ikuai vy
 oiko aguã va'ekue gui ojepe'apa va'e.
- 16 'Arandua ndereraa jepe 'rã kunha itavy rei va'e gui voi,
 kunha mboae tavy reia rupi ijayvu va'e gui.
- 17 Ha'e nunga ma ojea 'rã kunhataĩ guive ome reve jogueroko gui,

- ha'e Nhanderuete pe oiko aguã re ijayvuague gui voi hexaraipa 'rã.
 18 Mba'eta ha'e va'e ro katy reo vy manoa katy ae 'rã reo.
 Ha'e oikoa ha'e javi ndereraa 'rã pytū guy py manoa po'akaa katy.
 19 Ha'e ramo ha'e va'e kunha pou vy oo va'e ma ndojevyvei 'rã,
 ndojouvei 'rã tape tekove katy oo va'e.
 20 'Arandua rupi vy reiko 'rã avakue heko porã va'e ikuai rupi,
 nderejavyi 'rã teko porã rupi ikuai.
 21 Mba'eta vyv pyau ma heko porã va'e peguarã itui,
 ha'e va'e vyv re ikuai va'erã ma anhetê rupi oiko va'e kuery anho.
 22 Ha'e rã opa marã heko va'e kuery ma oipe'apaa 'rã vyv gui,
 jokorepa va'e kuery omoẽmbaa 'rã ha'e gui.

3

- SENHOR nhanhe* 'ẽ rendu aguã rupi nhanemo'arandua
 1 Xera'y, nderexarai eme xee rombo'eague re.
 Ndepy'a re emoĩ porã ke ajapo uka va'ekue.
 2 Mba'eta ha'e nunga ma nemoingove puku 'rã,
 ndere omoĩ retave 'rã ma'etÿa re reiko aguã.
 3 Nderexarai eme mborayvu ha'e anhetê va'e rupi reikoa aguã gui.
 Ha'e rami reiko aguã emoĩ ndeaju'y re mbo'y remoĩa rami.
 Ndepy'a re embopara vyvrape re rami.
 4 Ha'e rami vyv reupity 'rã Nhanderuete nemboaxya,
 avakue voi nemboete 'rã.
 5 Ndepy'a ha'e javi py ejerovia tema SENHOR re ae,
 ha'e rã ndee ae 'arandua re ma ejerovia eme.
 6 Opa mba'e rejapoa py nema'endu'a hexe.
 Ha'e ramo ha'e oipe'a 'rã nerenonderã.
 7 Enhemo'arandu eme ndee ae reikuaa rupi rive.
 Eiko tema SENHOR renonde rejererokyjea rupi, ha'e ejepe'a teko vai gui.
 8 Ha'e rami reikoa ma ojapo 'rã nderete imbaraeteve aguã rami,
 nekãgue voi omokane'õgua 'rã.
 9 Emboete ke SENHOR mba'emo rereko va'e py,
 ha'e jypy'i rejou va'ekue-'ekue reme'ẽa py.
 10 Ha'e ramo nderoguy tynyẽmba 'rã mba'emo ra'yĩgue,
 vinho hyru gui voi onheẽmba rei 'rã.
 11 Xera'y, endu rive eme ta'vy SENHOR nemo'arandu rã,
 ndekuerai eme guive ndevy ijayvu ramo,
 12 mba'eta SENHOR ma guembiayvu kuery pe ae 'rã ijayvu,
 tuu gua'y oayvu va'e pe ijayvua rami avi.*
 13 Ovy'a ete 'rã ava o'arandurã ojou va'e,
 oikuaa aguã oupity va'ekue.
 14 Mba'eta ha'e rami jaikoague repy ma prata gui ovareve,
 ouro iporãve va'e gui ovareve.
 15 Pérola gui voi ovareve 'rã.
 Opa mba'e reipota va'e ma 'arandu gui ndovareive.
 16 Opo oiporu kuaa regua re 'arandu oguereko nderekove ombopukue aguã,
 ha'e rã oiporu kuaa e'ÿa re ma oĩ mba'emo porã ha'e nemboetea aguã regua.
 17 Ha'e va'e tape ma iporã va'e meme.
 Ha'e va'e rupi jaa vy jaupity 'rã mby'a porã.
 18 Oupity va'e pe ma vyvrape tekove me'ẽa hi'ã.
 Ovy'a ete 'rã oupity va'e ha'e javi.
 19 O'arandua rupi SENHOR vyv onhono raka'e,
 oikuaapaa rupi ojapo imoiny yva.
 20 Opa mba'e oikuaapa va'e vyv yv ombovu raka'e vyv gu'ÿry oĩague gui,
 ha'e rã arai gui ma ombou xypa.
 21 Xera'y, emboyke eme rexa py remoĩ va'ekue,
 ereko ria ke 'arandu anhetê va'e reiko kuaa aguã.
 22 Mba'eta nenhe'ẽ pe ome'ẽ 'rã tekove,
 ndeaju'y re mbo'y remoĩ vy renhembojeguaa rami avi.
 23 Ha'e rami vyv tape rupi reikoa rupi voi reiko porã 'rã,
 renhepyxanga e'ÿ re.
 24 Renheno ta ma vyv nderekyjei 'rã,

* 3:12 Hebreus 12.5-6

- ha'e gui renheno ma vy reke porã 'rã.
²⁵ Enhemondyi eme mba'emo oiko xapy'a teĩ,
 neĩ heko vai va'e kuery mokanhyarã ou va'e gui.
²⁶ Mba'eta SENHOR oĩ 'rã ndere ou va'e jokoarã,
 ndepy re voi opena 'rã nembo'aa e'ỹ aguã.
²⁷ Eipytyvõ e'ỹ eme ojexavai rei'i va'e kuery,
 ndepo py remboja'o aguã rereko ri vy.
²⁸ Xapy'a rei aỹ ma voi mba'emo rereko ri vy
 aipo're eme neirũ pe: “Tereo ju, ha'e gui ko'ẽ rã ma eju ju.
 Ha'e ramo ma ame'ẽ 'rã mba'emo”, 're eme.
²⁹ Enhembopy'a eme neirũ re rejapo vai aguã,
 ndere ojeroviaa rupi ndero katy'i oĩ ramo.
³⁰ Nda'evei joupe ndeayvu ete-ete aguã mba'eve py e'ỹ,
 ndevy ojapo vai e'ỹ re.
³¹ Erovy'a rei eme ojerovia rei va'e,
 eiko eme guive ha'e kuery ikuaiã rami,
³² mba'eta SENHOR ojeguaru heko vai va'e gui,
 ha'e rã heko porã va'e ma oirũ ae rami 'rã oguereko.
³³ SENHOR ijayvu vaiague opyta 'rã heko vai va'e ro re,
 ha'e rã heko porã va'e rekoa re ma imoingo porãarã anho oĩ 'rã.
³⁴ Mba'eta ha'e ojoiã 'rã ojoiã reia rupi ikuai va'e,
 ha'e rã vvyĩgueve'i ma omboaxy 'rã.*
³⁵ Hi'arandu va'e omboetepy 'rã ikuai,
 ha'e rã hi'arandu e'ỹ va'e ma oxĩmba aguã rami ikuai.

4

Nhanderuete nhanemongetaa

- ¹ Xera'y kuery, pendu ke penderu penembo'ea.
 Pejapyxaka porã ke peikuaa porã aguã.
² Mba'eta xee ma iporã va'e re rombo'e.
 Ha'e nunga rupi penderexarai eme rombo'eague re.
³ Ha'e gui xee voi ta'y aiko va'ekue xeru ro py.
 Naxembaraetei teri va'ekue, ha'i reve ipi'a peteĩ'i va'e aiko vy.
⁴ Ha'e jave py xeru xembo'e vy aipoe'i:
 “Emoĩ ke xeyvua ndepy'a re.
 Ejapo tema ajapo uka va'e, ha'e vy 'rã reikove.
⁵ Emoĩ ne'arandurã ha'e mba'emo reikuaa aguã.
 Nderexarai eme, ejepe'a eme guive xeyvua gui.
⁶ Ejepe'a eme 'arandua rupi reikoa gui. Ha'e ramo 'rãe ndere opena porã.
 Embovare ke, ha'e ramo 'rã nderepy.
⁷ 'Arandua ma iporãve va'e ramo emoĩ ne'arandurã.
 Tá, mba'emo rejoua rupi rejou avi 'rã mba'emo reikuaa aguã.
⁸ Embovare ete ke 'arandua, ha'e ramo 'rã nemboyvateve.
 Remoĩ ete ramo nemoingo 'rã omboetepy.
⁹ Neakã re emoĩ 'rã akã regua iporãve va'e,
 coroa hexakãmba va'e ome'ẽ 'rã ndevy”, he'i va'ekue xevy.
¹⁰ Xera'y, ejapyxaka ke, ha'e ejopy xeyvua.
 Ha'e vy 'rãe reikove puku.
¹¹ Mba'eta xee rombo'ea ma tape 'arandua katy oo va'e rupi reo aguã,
 heko porã va'e ikuaiã rupi avi reiko aguã.
¹² Ha'e va'e rupi reguata ramo
 mba'eve rei nandejokoi 'rã reikoa rupi.
 Renha teĩ nerenhepyxangai 'rã.
¹³ Ha'e nunga rupi emoĩ porã ete rombo'eague, nderexarai eme.
 Emoĩ atã ndejee, mba'eta ha'e va'e rupi vy 'rãe reupity nderekoverã.
¹⁴ Nderepiai 'rã heko vai va'e kuery ooa katy.
 Eiko eme heko vai va'e ikuaiã rupi.
¹⁵ Ejapo eme ha'e kuery ojapo va'e.
 Ejepe'a, tereo eme ha'e rupi.
 Ejepekuavo mombyry rupi.
¹⁶ Mba'eta ha'e kuery ma mba'emo vai ojapo e'ỹa ja ndokei 'rã.
 Ndokei 'rã joity e'ỹa ja.

* 3:34 Tiago 4.6, 1 Pedro 5.5

- 17 Mba'eta ha'e kuery mbojape ho'u va'e ma teko vai anho,
ha'e vinho oy'u va'e ma ojerovia reia.
- 18 Ha'e rã heko porã va'e ikuaiã ma ko'ê ouvy va'e rami hexakã,
hexakã porã-porãve 'rã ovy ko'êmba porã peve.
- 19 Ha'e rã heko vai va'e reko ma pytũ rupi oo va'e rami.
Ha'e kuery ndoikuaiã mba'e nunga re 'rã pa onhepyxanga aguã voi.
- 20 Xera'y, endu pota xeayvua re.
Ejapyxaka ke xee rombo'ea re.
- 21 Emboyke eme nderexa py rexa va'ekue.
Ndepy'a py re 'rã remoĩ.
- 22 Mba'eta oupity va'e pe ma tekove me'êã oĩ,
ome'ê avi 'rã hete rexairã.
- 23 Opa mba'e re repenaa gui epena porãve ndepy'a re,
mba'eta ha'e py ae oĩ nderekoverã.
- 24 Emombytu'u ndejuru ndeapu reiaty gui,
eipe'a ndejegui ayvu vai rupi ndeayvua.
- 25 Nderexa toexa porã ovy nerenonderã ae.
Nderova ma nerenonde re ae toĩ.
- 26 Eikuaa pota porã ke repyrõa re,
reikoa ha'e javi hi'yvi aguã.*
- 27 Epia eme reiporu kuaa katy neĩ reiporu kuaa e'ỹã katy.
Ejoko ndepy teko vai katy oo ta ramo.

5

Tavy reia rupi jaiko e'ỹ aguã re ijayvua

- 1 Xera'y, eikuaa pota ke 'arandu rupi xeayvua re.
Ejapyxaka, aikuaa va'e re xeayvu rã endu,
- 2 'arandu re reiko aguã,
ha'e reikuaa va'e rupi anho ndeayvu aguã.
- 3 Ha'e rã kunha itavy rei va'e ijayvua ma ei rami ete he'ê,
azeite gui iporãve merami teĩ
- 4 opaa py ma tai va'e rami 'rã haxy ndevy,
kyxe hakua hãimbe jovai va'e rami.
- 5 Ipy ma manoa katy oguejy ovy,
oguata 'rã tata ogue'ỹ va'e katy.
- 6 Ndoikuaa potai ovy tape tekove katy oo va'e re,
ooa katy rei-rei oo va'e rupi 'rã oo oiny oikuaa e'ỹ vy.
- 7 Ha'e nunga rupi aỹ xera'y, ejapyxaka xeayvu re,
ejepe'a eme aipoa'eague rami reikoa gui.
- 8 Ejepe'a ke kunha tavy rei gui,
neĩ hoo rokẽ katy ma voi enhemboja eme,
- 9 joupe remboaxa e'ỹ aguã nemoetea aguã va'ekue,
ha'e joayvu e'ỹ va'e pe reperde e'ỹ aguã nderekovea,
- 10 reikuaa e'ỹ va'e pe rive remboaxa e'ỹ aguã nembra'e rei-rei,
ha'e remba'eapoague repy opyta e'ỹ aguã amboae kuery peguarã.
- 11 Ha'e rami e'ỹ vy remano ta ma vy nepoaẽ 'rã rejupy,
ndero'õ ha'e nderete opave ovy ramo.
- 12 Ha'e vy aipo're 'rã:
"Mba'e re tu xee naenduxeĩ karamboae xembo'ea rã!
Xepy'a re namoĩxeĩ xemongetaa ramo.
- 13 Naendu potai xembo'ea kuery ijayvua,
ndajapyxakaxeĩ karamboae xemo'aranduxea rã.
- 14 Mba'eta aỹ ma aĩ vai aguã rami aiko
heta va'e kuery ijaty va'e oexaa py", 're 'rã.
- 15 Ha'e nunga rupi ey'u nde'ygua gui ae,
ndevy guarã xxyry oiny va'e gui ae.*
- 16 Tyrã pa oka katy rive ri ty'y renhoẽ ta nde'ygua gui,
tetã mbyte rupi rive oxyry ovy aguã rami?
- 17 Ha'e rami 'rãgue py ndevy guarã ae 'rã rereko,
amboae kuery pe rive remboaxa va'erã e'ỹ.
- 18 Toiko porã nde'ygua,
ha'e erovy'a ke nekunumi guive remendaague va'e.

* 4:26 Hebreus 12.13 * 5:15 Apy ma ijayvu nhandera'yxy ae'i reve anho jajoguereko aguã re (Cântico 4.15).

- ¹⁹ Ha'e ae ndevyua toiko guaxu iporã va'e rami.
Ikã anho erovy'a riae.
Reikoa pukukue re erovy'a pejoayvua rupi.
- ²⁰ Xera'y, mba'e re 'rã tu renhembotavy uka kunha mboae pe?
Mba'e re 'rã tu kunha mboae kã rupi reikuavã?
- ²¹ Mba'eta nhande jaikoa ma SENHOR oexapa,
oikuaa pota 'rã jaikoa ha'e javi re.
- ²² Heko vai va'e ma mba'emo vai ojapogae py ae 'rã ho'a.
Ha'e ae ojevavyague py ojejokua uka 'rã.
- ²³ Omano 'rã ndojejokoi reia py,
ho'a-o'a rei 'rã oikovy okanhy peve.

6

Jarevea re jaiko e'ÿ aguã re ijayvua

- ¹ Xera'y, xapy'a rei neirũ orevea repaga aguã rami reiko 'rã,
e'ÿ vy rexa va'ety e'ÿ reve ha'e rami aguã re pejogueroayvu 'rã.
- ² Xapy'a rei rã aipo'reague py ae reiko 'rã ojokua pyre,
ndeayvua py renhembo'a uka vy.
- ³ Xera'y, ha'e rami ri ramo aÿ ma po rami 'rã reiko
reo jepe aguã, neirũ po py re'a ma rire teĩ
tereo pojava, ejerure tema einy neirũ pe.
- ⁴ Nda'evei reke ranhe aguã,
emboty eme ranhe nderexa.
- ⁵ Tereo jepe nho pota ke, guaxu e'ÿ vy guyra
imba'ejuka va'e po gui oo jepea rami.
- Nhaneate'ÿ e'ÿ aguã re ijayvua*
- ⁶ Ndee inhate'ÿ va'e, tereo eikuaa pota tay kuery reko re,
ha'e kuery reko re reikuaa pota vy ne'arandu nho aguã.
- ⁷ Ha'e kuery ma ndoguerokoi nguvixa,
neĩ herekoa, neĩ imomba'eapoarã.
- ⁸ Ha'e rami teĩ kuaray puku py voi ha'e kuery omoĩ porã 'rã ho'u va'erã,
nhamono'õa ára ha'e kuery voi omono'õ 'rã guembi'urã.
- ⁹ Ndee inhate'ÿ va'e, raka'e peve tu renheno 'rã rejupy?
Raka'e peve 'rã tu reke rejupy?
- ¹⁰ Mba'eta "Takeve'i ju ranhe" 're vy repytu'uve tema 'rã,
ha'e renhekuavã 'rã rejupy.
- ¹¹ Ha'e rami ae 'rã ovaẽ xapy'a nemomboriarã imonda va'e rami,
nemoĩ axyarã ou xapy'a 'rã ava guembiporu revegua rami avi.

Teko vai rupi jaiko e'ÿ aguã re ijayvua

- ¹² Avakue mba'everã ovarẽ e'ÿ va'e, heko vai va'e ma
opa marã rei 'rã ijayvu.
- ¹³ Oxapymi-pymi ha'e opy omomy-momyĩ rei 'rã okuapy,
opo ombovava-vava 'rã guive nhombotavya rupi.
- ¹⁴ Ha'e gui ipy'a re ma ha'eve e'ÿ va'e anho 'rã oĩ,
teko vai re ae 'rã onhembopy'a okuapy,
ha'e joo rami e'ÿ-e'ÿ nhomoingoa re 'rã ikuai.
- ¹⁵ Ha'e nunga rupi imokanhyarã ou xapy'a 'rã.
Ou xapy'a 'rã imopẽmbaarã, ha'e jipoi 'rã imongueraarã.
- ¹⁶ Mba'eta mboapy meme regua oiko SENHOR ndojou porã va'e,
sete-a voi oiko onhe'ẽ py ojou vai va'erã:
- ¹⁷ ha'e va'e ma guexa py onhemboyvate rei va'e,
oapekũ py ijapu va'e,
opo py heko porã'i va'e ruguy omoẽ va'e,
- ¹⁸ opy'a py mba'emo vairã re rive oikuaa pota va'e,
opy py mba'emo vai ojapo aguã katy ojapurave va'e,
- ¹⁹ joekokue ramigua rive ijapu vy omombe'u va'e,
ha'e joegua kuery joo rami e'ÿ-e'ÿ ikuai aguã rami ojapo va'e.

Kunha mboae reve nhandetavy rei e'ÿ aguã re ijayvua

- ²⁰ Xera'y, nderexarai eme nderu ijayvuague re,
ejepe'a eme ndexy nembo'eague rupi reikoa gui.
- ²¹ Emoĩ porã ke ndepy'a re,
mbo'y ndeaju'y re remoĩa rami emoĩ riae ndejeje.
- ²² Mba'eta ha'e va'e ayvu ma reguataa rupi nderereko 'rã,

- reke jave voi opena porā 'rā ndere,
 ha'e rekeague gui revy jave nemo'arandu teri 'rā.
- 23 Mba'eta ojapo uka pyre ma tataendy rami 'rā oī,
 nhanembo'ea nhanemoexakā 'rā,
 arandu rupi nhanemongetaa ma tape tekove katy oo va'e oī,
- 24 ndejoko aguā kunha itavy rei va'e gui,
 kunha mboae nembotavy aguā rupi ijayvu va'e gui.
- 25 Ha'e nunga iporāa rexa teī emoaruā rei eme,
 enhembotavy uka eme oma'ē ngatu teī.
- 26 Mba'eta kunha itavy rei va'e pe ma mbovy'i 'rā opagaa peteī mbojape repyrā rive,
 ha'e rā omenda va'e reve itavy reia rekovia ma guekove ae 'rā ome'ē.
- 27 Amongue opexo re tata oikuavā heravy ramo
 ijao ndokai 'rā ri?
- 28 Ha'e rami e'y vy tapyī áry oguata vy nda'u
 ipy ndokai 'rā ri?
- 29 Ha'e rami ae 'rā oirū ra'yxy reve itavy va'e re oiko.
 Hexeve itavy rei va'ekue ma ndopaga e'yī 'rā.
- 30 Imonda va'e minha karuai gui imonda teī
 ndajajou vai 'rā ri ty'y?
- 31 Mba'eta ha'e nunga ojoua ri vy sete-kue áryve 'rā ombopagaa.
 Ngoo py ogueroko va'ekue ha'e javi ome'ēmba 'rā.
- 32 Ha'e rā kunha mboae reve itavy rei va'e ma na'inhakā porāvei ae.
 Ha'e rami ikuai va'e ma ha'e kuery ae onhemomba ukaxe vy.
- 33 Ha'e rire oendu 'rā oinupāmba rā oximba aguā.
 Raka'e rā peve ima'endu'aa riaae 'rā ha'ekue re.
- 34 Mba'eta ime hakate'y vy ipoxy 'rāe,
 ha'e vy ombopaga aguā ára py noendui 'rā omboaxya.
- 35 Neī mba'eve ndojopyxei 'rā onhemboaxy ukaa rupi ome'ē va'e voi,
 ixupe mba'emo porā ome'ē reta ta teī.

7

Kunha itavy rei va'e re ijayvu jevyague

- 1 Xera'y, nderexarai eme xeayvua re,
 emoī ndepy'a re ajapo uka va'e.
- 2 Ejapo ke ajapo uka va'e, ha'e vy 'rā reikove.
 Ndejee emoī atā xeguigua lei, nderexa ra'yī huūa'i re repenaa rami.
- 3 Emoī ke xee rombo'ea nekuā regua rami,
 ndepy'apy re emoī, yvyrape re remboparaa rami.
- 4 'Arandua pe ma aipo'ere: "Xereindy ae'i",
 ha'e mba'emo reikuaa aguā pe ma "Xeretarā ae'i" 'ere.
- 5 Mba'eta ha'e nunga ndejoko 'rā kunha mboae gui,
 kunha itavy reia rupi ijayvu va'e gui.
- 6 Ha'e gui xero re janela yvate oī gui,
 janela jokoa pa'ū rupi ama'ē ainy vy
- 7 aexa reta karamboae hi'arandu e'y va'e.
 Ha'e va'e kunumigue aexa va'e mbyte py
 peteī aexa avi hi'arandu e'y ete va'e.
- 8 Ha'e va'e ma peteī tape'i rupi oo oiny,
 kunha tavy rei va'e ro rexei'i rupi.
 Ha'e vy hoo via rupi ae oo
- 9 ka'aru'i, kuaray oike ramo'i jave,
 pytū ho'a jave.
- 10 Ha'e gui ma ha'e va'e kunha oē ovaexī aguā.
 itavy rei va'e ao py onhemonde ouvy,
 ombotavy aguā re onhembopy'aa rupi.
- 11 Itavy aguā re anho 'rā ipy'a va'e,
 ndopytai 'rā guive ngoo py, ndopyta kuaai rei 'rā.
- 12 Amongue py tape pia rupi 'rā hekony,
 amongue py ma tetā mbyte rupi 'rā oo,
 opa rupi oma'ē 'rā oikovy nhoarōa rupi.
- 13 Ha'e gui ma kunumi va'e re onhemboja vy oayvu.
 Ha'e vy oma'ē tavy rei reve aipoe'i ixupe:
- 14 "Temb'i'u areko ja'u aguā, ange amboaxa va'ekue regua.
 Ange ajapopa ma kuri anhemboayvague.

- ¹⁵ Ha'e rami vy aju ainy roeka vy.
Ha'e vy aÿ ma rovaexi ma.
- ¹⁶ Ha'e gui xerupa ma anhovãmba ma voi
ajukue iporãve va'e Egito guigua py.
- ¹⁷ Xerupa amoeakuãmba ma avi mirra py,
aloés ha'e cinamomo py guive.
- ¹⁸ Jaa ke, jajoayvua py nhai pytũ mbukukue re.
Javy'a vaipa 'rã jajoayvua rupi anho.
- ¹⁹ Ha'e gui xeme ma noi xero py.
Momyry ete rupi uguata oikovy.
- ²⁰ Peráta heta ogueraa ovoko py.
Raka'eve rã jaxy inhpytũ jave mae ma ou ju 'rã", he'i.
- ²¹ Ha'e rami vy kunha va'e ijayvu porã kuaa vy ombotavy ete,
oayvu kuaa rupi ojopy heravy aguã.
- ²² Ha'e ramo kunumi va'e ma are'ÿ'i re oo oiny hexeve,
vaka ojukaa aguã katy oo va'e rami,
ha'e rami e'ÿ vy guaxu nhuã oia katy onha ovy va'e rami,
- ²³ ipy'a rupi hu'y onhyvõ peve,
ha'e rami e'ÿ vy guyrã'i mondepi katy oveve ovy va'e rami,
ha'e py omano aguã oikuaa e'ÿ vy.
- ²⁴ Aÿ ma xera'y, ejapyxaka porã ke,
eikuaa pota porã xeayvua re.
- ²⁵ Neĩ ndepy'a eme ha'e va'e nunga kunha reve rejereraa uka aguã,
enhemokanhy uka eme oikoa rupi reoa py.
- ²⁶ Mba'eta ha'e nunga heta ma oity avakue, ombojexavai guive.
Mbovy e'ÿ ma omano ikãuxa.
- ²⁷ Ha'e va'e ro via ma vyvra rupa katy nhandereraa va'e,
nhandereroguejy 'rã heravy manoa katy.

8

Arandua opa mba'e gui iporãve va'ea re ijayvua

- ¹ Arandua voi nda'u ndojapukai avi 'rã ri?
Ha'e rami vy nanhanerenoi 'rã ri ty'y mba'emo kuaa ukaa rupi?
- ² Mba'eta oi 'rã vyty yvateve va'e áry,
tape yvÿry, tape pia rexei rupi guive,
- ³ tetã kora rokẽ py nhavaẽ'i javya py,
okẽ py ojavukai 'rã oiny.
- ⁴ Ha'e vy aipoe'i 'rã: "Xee voi ai peẽ avakue roenoĩ ainya py,
xeayvu ainy avakue ha'e javi pe.
- ⁵ Ha'e gui pene'arandu e'ÿ'i va'e,
peikuaa pota ke peiko kuaa aguã re.
Peẽ hi'arandu e'ÿ va'e, peikuaa ke 'arandua.
- ⁶ Mba'emo iporã va'e re xeayvu rã pendu pota ke.
Xeayvu 'rã ha'evea rami anho.
- ⁷ Mba'eta xeayvua ma anhetẽ meme,
ha'e rã apu gui ma xee ajeguaru.
- ⁸ Xee aipoa'ea ma anhetẽ ete va'e meme.
Xeayvua re ma peteive henda py noi nhombotavyarã, neĩ opa marã nhomoingoarã.
- ⁹ Oendu kuaa va'e pe ma anhetẽ va'e meme,
ha'eve va'e meme oikuaa aguã oupity va'e pe.
- ¹⁰ Prata 'rãgue py pejopy ke rombo'ea,
ouro oiporavo pyre 'rãgue py pejopy mba'emo aikuaa uka va'e.
- ¹¹ Mba'eta 'arandua ma ita ovareve va'e gui iporãve va'e,
opa mba'e peipotaa gui ha'eveve.
- ¹² Xee 'Arandua ma peiko kuaa aguã rupi ai.
Xee areko va'e ma peikuaa aguã ha'e penemongetaarã.
- ¹³ SENHOR renonde ojererokyjea rupi oiko va'e ma ojou vai 'rã teko vai.
Ha'e gui xee ajou vai va'e ma nhemboyvate reia, jejou porã reia,
teko vai rupi ikuaiã ha'e opa marã ayvua.
- ¹⁴ Xegui ae 'rã pendu penemongetaa ha'e 'arandua anhetẽ ete va'e.
Xee ma peikuaa porã aguã ae ai, ha'e penembopo'akaarã.
- ¹⁵ Xegui ae huvixave kuery opena kuaa,
ha'e huvixa ikuai va'e anhetẽ rupi 'rã ijayvu kuaa.
- ¹⁶ Xegui ma joguerekoa kuery opena kuaa 'rã,

- yvatekueve ha'e nhomboavyua kuery ha'e javi.
¹⁷ Xee ma avyu 'rã xerayvu va'e kuery,
 ha'e xereka va'e ma xejou 'rã.
¹⁸ Xereve vy 'rã pejou mba'emo porã, ha'e omboetepy peiko,
 mba'emo porã ivaipa va'erã e'ÿ ha'e teko porã 'rã pejou.
¹⁹ Mba'emo xee areko va'e ma ouro gui ovareve ete, ouro oiky'a'lo pyre
 ha'e prata oiporavo pyre gui ha'eveve va'e.
²⁰ Xee ma tape teko porã rupi anho aiko va'e,
 tape joguereko kuua aguã oĩa va'e mbyte rupi aguata va'e,
²¹ ha'e rami vy xerayvu va'e kuery pe ame'ẽ aguã iporã va'e,
 ha'e kuery ro amonyẽ aguã iporã va'e anho.
- Jypy'i guive 'Arandu oikoague re ijayvua*
²² SENHOR mba'emo omoingo ppy'i guive xee ma voi xerereko,
 guembiapo ymavegua ojapo e'ÿ mbove ma voi.
²³ Yma voi xemoi, jypy'i ete guive,
 yvy onhono e'ÿ mbove.
²⁴ Ye'ẽ oiko e'ÿ mbove voi xee aiko ae ma va'ekue,
 yvu ndoikoi teri reve.
²⁵ Yvyty onhono e'ÿ mbove,
 yvy'ã hendarã py omoi e'ÿ mbove xee aiko ae ma va'ekue.
²⁶ Ha'e va'e jave py ma yvy ha'e nhuũndy nomoingo teri,
 neĩ yvy ku'i nomboypy teri.
²⁷ Ha'e gui yva hendarã py omoi jave xee aĩ ae ma,
 ha'e yva apy ye'ẽ áry rupi oa'anga jave.
²⁸ Yva re arai omoi jave py xee aĩ ae ma,
 ye'ẽ iguy gui oẽ aguã oipe'a jave,
²⁹ ye'ẽ remberã oa'anga jave voi
 ha'e va'e rupi yy oxyry ovy e'ÿ aguã,
 ha'e yvy ytarã omoi jave py,
³⁰ ha'e va'e jave py ma xee aĩ ae ma hexeve, ha'e oipota va'e apoarã.
 Ko'ẽ nhavõ aĩ va'ekue ambovy'aa rupi,
 henonde avy'aa rupi tema aiko.
³¹ Xee arovy'a va'ekue yvy tekoarã ojapo va'ekue,
 avakue ra'y kuery ha'e javi guive.
³² Aÿ ma xera'y kuery, pendu ke.
 Ovy'a ete 'rã xee aikoa rupi oiko va'e.
³³ Pendu ke xee rombo'ea pene'arandu aguã,
 penduxe e'ÿ eme.
³⁴ Ovy'a ete 'rã xenhe'ẽ rendu va'e,
 ko'ẽ nhavõ xerokẽ py oĩ va'e,
 xero katy aikea'i py xerarõ oiny va'e.
³⁵ Mba'eta xejou va'e ojou avi 'rã tekove,
 ha'e oupity 'rã SENHOR oguerovy'a aguã.
³⁶ Ha'e rã xerovai ojevavy va'e ma onhe'ẽ pe ae ojapo vai.
 Ha'e javi xejou vai va'e omano aguã rive oguerovy'ave vy."

9

Arandua ngaru ojapo va'e re ijayvua

- ¹ Arandua ojapo ngoorã,
 ha'e vy omoatyrõ sete ijytarã.*
² Ojuka uka mymba ngaru ojapo aguã,
 oguereko katu ma vinho, ha'e gui mesa áry omoĩmba.
³ Ha'e rami vy guembiguai kuery omondouka
 tetã yvateve va'e áry rupi nhoenoĩ aguã. Aipoe'i uka:
⁴ "Ndapeikuaai rei va'e, peikepa ke apy!" he'i uka.
 Hi'arandu e'ÿ va'e kuery pe aipoe'i uka:
⁵ "Peju ke pe'u mbojape xea py,
 ha'e pey'u vinho areko katupa va'ekue.
⁶ Pendekuaive eme 'arandu e'ÿa rupi, ha'e vy 'rã peiko areve.
 Tape 'arandu oĩa rupi anho peiko", he'i uka.
⁷ Ha'e gui porojoi rei va'e kuery pe pendeavyvy vy
 peẽ ae pejejojai uka rei,

* 9:1 Apy ma Arandua re ijayvu, hoo va'e ngaru pavẽ pe ojapo va'e re rami.

- heko vai va'e kuery pe pendeayvu vy pejeavyky uka rei 'rã.
 8 Nda'evei ae porojojaia pe nhandeayvu aguã, nhandevy ipoxy e'ÿ aguã.
 Ha'e rã hi'arandu va'e pe nhandeayvu ramo ma nhandarayvu 'rã.
 9 Hi'arandu va'e nhambo'e ramo ma hi'aranduve 'rã,
 heko porã va'e nhambo'e ramo oiko kuaave 'rã ovy.
 10 SENHOR renonde jajererokyjea rupi jaiko vy 'rãe jaupity 'arandua,
 Iky'a e'ÿ va'e jaikuaa vy 'rãe jaiko kuaa.
 11 Mba'eta xereve vy anho peiko pukuve 'rã,
 penerenonderã ma'etÿa amoï retave ramo.
 12 Pene'arandu ri vy pendejeupe guarã ae 'rã pejou,
 ha'e rã pejojoi rei py ma peë ae 'rã penhemoï vai.
Kunha hi'arandu e'ÿ va'e nhoenoï oinya
 13 'Arandu e'ÿa ma kunha ojejoko kuaa e'ÿ ha'e opa marã rei onhendu va'e.
 Ha'e nunga ma mba'eva ndoikuaai 'rã.
 14 Oguapy 'rã oiny ngokê py,
 tetã yvatevea py tenda áry oï 'rã,
 15 oaxa va'e-va'e ha'e omba'eapo vy
 oje'oi va'e pe aipoe'i aguã:
 16 "Ndapeikuaai rei va'e, pejupa ke apy!"
 Hi'arandu e'ÿ va'e kuery pe aipoe'i 'rã:
 17 "Yy mondakue ma yro'yxã porãve,
 ha'e mbojape nhemi rupi ja'u va'e ma heeve", he'i.†
 18 Ha'e rã ha'e pyguarã oenoï va'ekue ma ndoikuaai oïa py manogue anho ikuai,
 ha'e py oike va'ekue ma yvykua manoa py meme ikuai.

Heko porã ha'e heko vai va'e reko re ijayvua

Arandu regua ayvu Salomão omombe'u va'ekue

10

- 1 Ta'y kuery hi'arandu va'e ombovy'a 'rã nguu,
 ha'e rã ta'y kuery hi'arandu e'ÿ va'e ma omomboriau 'rã oxy.
 2 Mba'emo jajevyva rupi jajou va'e ma mba'everã ndovarei,
 ha'e rã teko porã ma nhandereraa jepe 'rã manoa gui.
 3 SENHOR ndoejai 'rã heko porã va'e karuai oendu oikovy aguã,
 ha'e rã heko vai va'e ma SENHOR ojoko 'rã oipotapa rei va'e ojou e'ÿ aguã.
 4 Inhate'ÿa rupi omba'eapo va'e ndojoui 'rã mba'eva,
 ha'e rã ikyre'ÿa rupi omba'eapo va'e ma ojou-jouve 'rã oipota va'e.
 5 Kuaray aku porã jave ta'y hi'arandu va'e omono'õ 'rã mba'emo,
 ha'e rã mba'emo omono'õa ára py oke rive va'e ma omoximba rei 'rã nguu kuery.
 6 Heko porã va'e akã re oï 'rã imoingo porãarã,
 ha'e rã heko vai va'e ma nhomoingo vai aguã rupi anho ijayvu.
 7 Heko porã va'e re nhanema'endu'aa ma nhanemoingo porã 'rã,
 ha'e rã heko vai va'e rery re nhanema'endu'aa ma mba'emo ru'ügue rami rive.
 8 Opy'a py hi'arandu va'e omoï porã 'rã ojapo uka pyre,
 ha'e rã o'arandua rupi e'ÿ ijayvu va'e ma oï vai 'rã.
 9 Anhetê rupi ikuai va'e oï atã 'rã,
 ha'e rã tape karê rupi ikuai va'e re ma oikuaa potaa 'rãe.
 10 Nhombotavya rupi oxapymi-pymi va'e ma nhomomboriau va'e vy,
 o'arandua rupi e'ÿ ijayvu va'e oï vai 'rãe.
 11 Heko porã va'e ayvu ma tekove me'ëa ae,
 ha'e rã heko vai va'e ma jojuka aguã rupi anho ijayvu.
 12 Mborayvu rupi e'ÿ ikuai va'e nhomopu'ãmba rei 'rã.
 Ha'e rã porayvu va'e ma ojao'i uka 'rã ojevavya ague.*
 13 Oiko kuaa va'e ijayvu rã nhaendu vy jajou 'rã nhane'arandurã,
 ha'e rã hi'arandu e'ÿ va'e ma oinupãa aguã rami ikuai.
 14 Hi'arandu va'e omoï porã 'rã 'arandua,
 ha'e rã heko vai va'e ma onhemokanhy uka aguã rupi rive ijayvu.
 15 Oguerekopa va'e ma omba'e rei-rei re oï atã, tetã ikorapa va'e py rami,
 ha'e rã iporiaukue'i ma ikuai axy 'rã mba'eva ndoguerekoia py.
 16 Heko porã va'e oikoague repy ma tekove,
 ha'e rã heko vai va'e ma ojevavyague repy ae 'rã ojou.
 17 Ombo'ea ague rami ikuai va'e ma tape tekove katy oo va'e rupi oje'oi,

† 9:17 Apy ma ijayvu nhemi rupi jajevyva re. * 10:12 1 Pedro 4.8

- ha'e rā omongeta ague rupi e'ŷ ikuai va'e ma ha'eve e'ŷa katy 'rā oje'oi.
 18 Ijapu va'e ma opy'a re omoi 'rā joe nda'ija'eia,
 joekokue omombe'u merami rive va'e ma hi'arandu e'ŷ va'e ae.
 19 Ijavyu reta rei va'e ojevavy 'rāe,
 ha'e rā ayvu py ojejoko kuaa va'e ma oiko kuaa va'e vy ae.
 20 Heko porā va'e ayvu ma prata oiporavo pyre rami,
 ha'e rā heko vai va'e kuraxō ma mba'erā ndovarei.
 21 Heko porā va'e ayvu ma teta omongaru va'e rami,
 ha'e rā hi'arandu e'ŷ va'e kuery ma omanomba rive 'rā, ndoikuaa potaxei rire.
 22 SENHOR nhandereroayvu porā vy ojapo jajou-joue aguā rami,
 neī peteīve henda py nanhanemomboriaui 'rā.
 23 Hi'arandu e'ŷ va'e oikuaa ramo opa marā rei nhandekuaia rupi merami 'rā javy'a,
 ha'e rā avakue oikuaa ete va'e pe ma nhane'arandua rupi vy 'rāe javy'a.
 24 Heko vai va'e mba'emo gui okyjea va'e ae 'rā oiko hexe,
 ha'e rā heko porā va'e oarō oikovy ma Nhanderuetē ojapo 'rā ojeupity aguā rami.
 25 Vyvytu vaikue opyту'u xapy'aa rami avi heko vai va'e kuery reko voi okanhy xapy'a 'rā,
 ha'e rā heko porā va'e ma oī atā riae 'rā.
 26 Nhanerāi pe vinagre nda'evei, ha'e nhanderexa pe ma hataxī nda'evei,
 ha'e rami ae inhate'ŷ va'e nda'evei avi ijokuaia pe.
 27 SENHOR renonde jajererokyjea rupi vy jaikove puku 'rā,
 ha'e rā heko vai va'e ikuai ma ijapy voi 'rā.
 28 Heko porā va'e oarōa ma ombovy'a 'rā,
 ha'e rā heko vai va'e oarōa ma oaxa rive 'rā.
 29 SENHOR guigua tape ma anhetē rupi ikuai va'e onhemi aguā,
 ha'e rā heko vai va'e pe ma imombaārā rive oī.
 30 Heko porā va'e ma raka'eve rā peve ndoityai 'rā,
 ha'e rā heko vai va'e ma nomombytaai 'rā yvy re.
 31 Heko porā va'e ayvu nhomo'aranduve 'rā,
 ha'e rā ijavyu vaikue rei va'e ma omombaa 'rā.
 32 Heko porā va'e ayvu nhombovy'a 'rā,
 ha'e rā heko vai va'e ma ha'eve'ŷa rupigua re anho 'rā ijavyu.

11

- 1 Jokorea rupi mba'emo opeja va'e gui SENHOR ojeguaru,
 ha'e rā ha'evea'i rami opeja va'e ma oguerovy'a 'rā.
 2 Jajejou porā rei rive ramo avave rei nanhanemboeteai 'rā,
 teī nhandemo'yvyī'i vy ma jajou 'rā nhane'arandurā.
 3 Heko porā va'e anhetē rupi ikuai ma oguereko 'rā ha'evea rupi,
 ha'e rā anhetē rupi e'ŷ ikuai va'e ma anhetē e'ŷa ae 'rā omomba.
 4 Nhombopagaa ára py opa mba'e jarekopa va'ekue ndovarei 'rā mba'everā,
 ha'e rā nhandereko porāa ma nhandereraa jepe 'rā manoa gui.
 5 Anhetē rupi ipy'a va'e pe ma heko porāa ae omoatyrō 'rā haperā,
 ha'e rā heko vai va'e ma ho'apa 'rā ha'e kuery ae reko vaia py.
 6 Heko porā va'e oo jepe 'rā ha'e kuery ae reko porāa py,
 ha'e rā jokorea rupi ikuai va'e ma ha'e kuery ae reko vaia py 'rā ombo'aa.
 7 Heko vai va'e omano ramo mba'emo oarōague voi opa 'rā,
 heko vai va'e oarōague opa rive 'rāe.
 8 Heko porā va'e oguerāa jepea 'rā ojexavaia gui,
 ha'e gui heko vai va'e re jevy 'rā ha'e nunga ou.
 9 Anhetē rupi e'ŷ ikuai va'e ma ayvu py rive oity 'rā oirū kuery,
 ha'e rā heko porā va'e ma mba'emo oikuaa rupi oo jepe 'rā.
 10 Heko porā va'e ikuai porā ramo tetā pygua kuery ha'e javi 'rā ovy'a okuapy,
 ovy'a avi 'rā okuapy heko vai va'e okanhy ramo.
 11 Heko porā va'e ogueroyvyu porāa rupi tetā ha'e javi rupi 'rā ikuai porā,
 ha'e rā heko vai va'e kuery ijavyua rupi ma oitya 'rā.
 12 Oirū pe "Mba'e vare'ŷ" he'i va'e re ma noī 'arandua,
 ha'e rā ha'e hi'arandu va'e ma okyrirī 'rā oikovy.
 13 Joekokue ramigua rive omombe'u va'e onhea'ā 'rā onhomi mbyre oikuaa aguā,
 ha'e rā ojeroviapy ma onhomi mbyre nomboaxai 'rā.
 14 Joguerēkoa hi'arandu va'e ndoikoi ramo avakue pavē 'rā ho'apa,
 teī nhomongetaa heta ikuai ramo ma ikuai porā 'rā.
 15 Oirū orevea opaga aguā rami oiko va'e ojexavai 'rā,
 ha'e rā ha'e rami ndoikoi va'e ma oī atā 'rā.

- 16 Kunha porayvu va'e ojou 'rã imboetearã,
ipo'akakueve ojou-joupavea rami avi.
- 17 Mborayvu rupi ikuai va'e ma ha'e kuery pe ae ojapo porã,
ha'e rã joapo vai rei va'e ma ha'e kuery ae onhemoi vai uka.
- 18 Heko vai va'e ojeupe guarã ojou va'e ma imarã va'erã,
ha'e rã teko porã rupi oiko va'e ma anhetê ete va'e guigua ojou 'rã oikoague repy.
- 19 Heko porã va'e oo 'rãe tekove katy,
ha'e rã teko vai rupi ikuai va'e ma omano ete 'rãe.
- 20 Opy'a py opa marã ikuai va'e gui SENHOR ojeguaru ete 'rã,
ha'e rã anhetê rupi ikuai va'e ma oguerovy'a 'rã.
- 21 Heko vai va'e nombopagaa e'yi 'rã, jaikuaa,
ha'e rã heko porã va'e kuery regua ma oo jepe 'rã.
- 22 Ouro guigua ma poryko xĩ jeguarã oĩ ramo nda'evei.
Ha'e rami ae kunha porã re hi'arandu e'ya oĩ ramo nda'evei.
- 23 Heko porã va'e oipotaa rami vy oiko 'rã nhomoingo porãarã,
ha'e rã heko vai va'e ma mba'emo oarõ va'ekue 'rãgue py oiko 'rã imbopagaarã.
- 24 Joupe mba'emo ome'ê rive-rive'i va'e ojou retave 'rã heravy,
ha'e rã nome'ê rivexei va'e ma oipotapa rei 'rã.
- 25 Imba'eme'ê porã kuaa va'e ma oiko porã 'rã,
joupe oy'u va'erã ome'ê va'ekue ju omboy'ua 'rãe.
- 26 Mba'emo aju nomboja'oxei va'e re ma heta va'e kuery ijayvu vai 'rã okuapy,
ha'e rã ivendeare ma ogueroyvu porãa 'rã.
- 27 Joupe ojapo porãa rupi ikuai va'e omboetea 'rã,
ha'e rã teko vai rupi rive ikuai va'e ma ha'e kuery re ae ju 'rã ojeapa heko vaiague.
- 28 Omba'e rei-rei re rive ojerovia va'e ho'a 'rã,
ha'e rã heko porã va'e ma ijaguyje 'rã mba'emo rogue ipyapuaa rami.
- 29 Ngopygua kuery ndoguereko kuaai va'e ojou 'rã yvytu rive,
ha'e hi'arandu e'y va'e ikuai 'rã hi'arandu va'e rembiguirã.
- 30 Heko porã va'e ma yvyra'a tekove me'êa rami ikuai,
teko verã jousa ma hi'arandu va'e ae vy ma 'rã.
- 31 Yvy re heko porã va'e ikuai teria ja ombopagaa 'rã.
Heko vai ha'e ojevavya rei va'e kuery katuve ma ombopagaa 'rã.*

12

- 1 Onhemo'arandu uka va'e oguerovy'a 'arandua,
ha'e rã nonhemongeta ukai va'e ma hi'arandu e'y va'e ae.
- 2 Heko porã va'e oupity 'rã SENHOR omboaxya,
ha'e rã opa marã rei onhembopy'a va'e ma ombopaga 'rã.
- 3 Avakue ojevavy reia rupi ikuai va'e noĩ atã kuaai 'rã,
ha'e rã heko porã va'e ma ndoipe'aai 'rã.
- 4 Kunhague hi'arandu va'e ma ime oguerovy'a 'rã,
ha'e rã oximba rei aguã rami ikuai va'e ma ikãgue omou'ũmba heravy va'e rami.
- 5 Heko porã va'e ipy'a 'rã ha'evea rupi anho,
ha'e rã heko vai va'e ma nhobotavya rupi rive 'rã nhomongeta.
- 6 Heko vai va'e ayvu ma jouguy omoêxe vy oma'ê mbegue va'e rami,
ha'e rã heko porã va'e ayvu ma jogueraa jepearã.
- 7 Heko vai va'e oitya rã noĩvei ma 'rã,
ha'e rã heko porã va'e ramymino kuery ma ikuai riaa 'rã.
- 8 Avakue hi'arandu va'e re ima'endu'a porãa 'rã,
ha'e rã opa marã onhembopy'a va'e ma ojou vaia 'rã.
- 9 Nanhemboyvate rei teĩ karuai nhaendu jepi 'rãgue py
ha'eveve nanhemo'yvy'i reve nhamba'eapo jaikovy aguã.
- 10 Heko porã va'e opena porã 'rã guymba kuery re,
ha'e rã heko vai va'e py'a re ma nhomoingo axyxea rive oĩ.
- 11 Ovyvy re omba'eapo va'e oguereko reta 'rã tembi'u,
ha'e rã hi'arandu e'y va'e kuery ma mba'emo rive ojou aguã rupi ikuai.
- 12 Heko vai va'e ikuai 'rã teko vairã jousa rupi rive,
ha'e rã heko porã va'e ma yvyra hapo porã ha'e hi'a porã va'e rami.
- 13 Heko vai va'e onhembo'a uka 'rã ha'e ae ijayvua py,
ha'e rã heko porã va'e ma oo jepe 'rã ojexavai aguã gui.
- 14 Avakue ijayvu porãa rupi ojou 'rã imoingo porãarã,
peteĩ-teĩ ojou 'rã opo py ojapoague repy.
- 15 Hi'arandu e'y va'e ma ojeupe ae ha'evea rami merami oiko,

- ha'e rā hi'arandu va'e ma omongetaa rā ojapyxaka pota 'rā.
 16 Hi'arandu e'ŷ va'e ma opoxya oexa uka vyvoi 'rā,
 ha'e rā hi'arandu va'e ma hexe ijayvua te'i ojejoko kuaa 'rā.
 17 Anhetē rupi ijayvu va'e ojapo ha'evea rami oikuaa potaa aguā rami,
 ha'e rā ijapu va'e ma ojapo nhombotavypaa aguā rami.
 18 Kyxe xī py rami avi ijayvuxe va'e ayvu nhomboperepa 'rā,
 ha'e rā hi'arandu va'e ayvu ma moā.
 19 Anhetē rupi ijayvu va'e ikuai riae 'rā,
 ha'e rā ijapu va'e ma xapy'a'i guarā rive.
 20 Heko vai va'e py'a re oī nhombotavy aguā rive,
 ha'e rā petei rami ikuai aguā re nhomongeta va'e ma oendu 'rā ovy'aa.
 21 Heko porā va'e re mba'emo vai ndoiko 'rā,
 ha'e rā heko vai va'e re ma imoingo axyarā rive 'rā ou.
 22 Ijapu va'e gui SENHOR ojeguaru,
 ha'e rā anhetē rupi ikuai va'e ma oguerovy'a.
 23 Hi'arandu va'e ndoikuaa ukapa rei 'rā mba'emo oikuaa va'e,
 ha'e rā hi'arandu e'ŷ va'e ma oexa ukapa vyvoi 'rā o'arandu e'ŷa.
 24 Ikyre'ŷ va'e ipo'aka 'rā joe,
 ha'e rā inhate'ŷ va'e ma omomba'eapo nhea'āa rive 'rā.
 25 Avakue py'a re heko eta reia oī va'e ombojero'a rei 'rā,
 ha'e rā ayvu porā'i ma ombovy'a 'rā.
 26 Heko porā va'e ogueroko 'rā heravy oirū kuery,
 ha'e rā heko vai va'e kuery ma ojavy uka 'rā tape.
 27 Inhate'ŷ va'e ndoexy 'rā xo'o ojuka va'ekue,
 ha'e rā ikyre'ŷ va'e ma mba'emo ojou va'ekue ombovare ete 'rā.
 28 Teko porā rupi oo va'e ojou 'rā tekove,
 ha'e va'e tape rupi manoa noī.

13

- 1 Ta'y hi'arandu va'e oendu pota porā 'rā tuu ombo'e rā,
 ha'e rā jojojai rei va'e ma noendu potai 'rā omongetaa rā.
 2 Avakue ijayvu porāa rupi vy ojou 'rā iporā va'e,
 ha'e rā anhetē rupi e'ŷ ikuai va'e ma joguero'axe vai rive.
 3 Ayvu py ojejoko va'e omoī atā 'rā guekovea,
 ha'e rā ijayvu katu raxa va'e ma ha'e ae onhemoī vai.
 4 Inhate'ŷ va'e ma mba'emo oipota rei te'i ndojou 'rā,
 ha'e rā ikyre'ŷ va'e ma ojoupave 'rā mba'emo.
 5 Heko porā va'e ndojou porāi 'rā apu,
 ha'e rā heko vai va'e ma oximba rei 'rā, ojou vaipy ae vy.
 6 Teko porā ogueraa jepe 'rā anhetē rupi ikuai va'e,
 ha'e rā ojejavya rei va'e ma teko vai oity 'rā.
 7 Amongue ma "Anekopa" he'i va'eri mba'eve ogueroko vy e'ŷ,
 ha'e rā amboae kuery ma "Xeporiau'i" he'i va'eri opa mba'e ogueroko.
 8 Avakue oguerokopa va'e ome'ēmba 'rā guekovia,
 ha'e rā iporiaukue'i ma avave nomoangekoai 'rā.
 9 Heko porā va'e rataendy hexakā porā 'rā,
 ha'e rā heko vai va'e rataendy ma oguepa rive 'rā.*
 10 Jajou porā reia ma joe nhapu'ā rei aguā rive oī,
 te'i nhandemongeta uka vy ma jajou 'rā 'arandu.
 11 Mba'e rei-rei jajou rive va'ekue opa rive avi 'rā,
 ha'e rā nhamba'eapoa rupi jajou va'ekue ma hetave 'rā ovy.
 12 Mba'emo nharō jaikovya ndoiko voi ramo nhandekuerai 'rā,
 te'i jaiopota va'ekue ojeupity rā yvyra tekove me'ēa rami oī.
 13 Omongetaa rā noendu potai va'ekue ombopagaa 'rā,
 ha'e rā ijayvua oendu vy ojererokyjea rupi ikuai va'e pe ma ome'ēa reta 'rā.
 14 Hi'arandu va'e nhandemo'ea ma tekovērā me'ēa,
 nhuā manoa gui jaa jepe aguā.
 15 Hi'arandu porā va'e omboetea 'rā,
 ha'e rā anhetē rupi e'ŷ ikuai va'e reve ma nda'evei nhandekuai aguā.
 16 Hi'arandu va'e ha'e javi oiko kuaa 'rā,
 ha'e rā hi'arandu e'ŷ va'e ma oexa uka 'rā o'arandu e'ŷa.
 17 Heko vai va'e pe mba'emo omombe'u ukaa ramo oiko 'rā mba'emo vai,
 ha'e rā ojeroviapy pe ri omombe'u ukaa ramo ma moā rami oiko.

*

13:9 "Hataendy" he'ia py ma tekove re ijayvu vy.

- 18 Omongetaa rá noendu potai va'e ma iporiau ha'e oxím̄ba rei aguã rami ikuai,
ha'e rá omongetaa rá oendu porã pota va'e ma omboetea 'rá.
- 19 Jaipota va'ekue oiko ramo javy'a 'rá nhandepy'a py,
ha'e rá hi'arandu e'ỹ va'e ma ojeguaru 'rá gueko vaia gui ojepe'a va'e gui.
- 20 Hi'arandu va'e reve ikuai va'e hi'aranduve 'rá,
ha'e rá hi'arandu e'ỹ va'e reve onhemoirũ va'e ma ojexavai rive 'rá.
- 21 Mba'emo vai oupity 'rá ojevavya rei va'e,
ha'e rá heko porã va'e pe ma mba'emo porã anho 'rá ome'ëa.
- 22 Avakue heko porã va'e ma gua'y ra'y kuery pe 'rá ojea omba'e rei-reikue,
ha'e rá ojevavya rei va'e mba'e rei-reikue ma heko porã va'e peguarã ae 'rá opyta.
- 23 Iporiaukue'i ovyv omboa'eve ramo'iague py opa mba'e hi'a porã 'rá,
ha'e rá teko porã rupigua ndoikoi ramo oipe'apaa 'rá.
- 24 Gua'y kuery noinupã potai va'e ma ndoayvui vy,
ha'e rá oayvu vy are e'ỹ re omo'arandu pota 'rá.
- 25 Heko porã va'e oguereko reta 'rá ho'u va'erã,
ha'e rá heko vai va'e ma oendu 'rá karuai.

14

- 1 Kunha hi'arandu va'e ojapo porã 'rá ngoorã,
ha'e rá hi'arandu e'ỹ va'e ma opo py ae ngoo ombovaipave 'rá heravy.
- 2 Heko porã va'e ma SENHOR renonde ojererokyjea rupi 'rá ikuai,
ha'e rá tape vai rupi ikuai va'e ma omboete e'ỹ va'e.
- 3 Hi'arandu e'ỹ va'e oiko axy 'rá ojejou porã reia rupi ijayvuague py,
ha'e rá hi'arandu va'e ma ijayvu porãague py oo jepe 'rá.
- 4 Toro ra'y omba'eapo va'e ndoikoi rá mba'emo ra'yí mboapy'i ae 'rá jareko nhamoĩ porãaty py,
ha'e rá toro ra'y ovare va'e jareko vy nhamono'õ retave 'rá.
- 5 Anhetẽ rupi joeko mombe'ua nda'ijapui 'rá,
ha'e rá anhetẽ rupi e'ỹ nhomombe'u va'e ma opa mba'e py 'rá ijapu.
- 6 Jojojai rei va'e o'arandurã oeka teĩ ndojoui 'rá,
ha'e rá hi'arandu va'e pe ma ndaxyi 'rá mba'emo oikuaa aguã.
- 7 Ejepe'a ke avakue hi'arandu e'ỹ va'ea gui,
mba'eta ha'e kuery ijayvu teĩ peteive henda py ndereikuaa porã 'rá.
- 8 Hi'arandu va'e oexa uka o'arandua ojee ae oikuaa potaa py,
ha'e rá hi'arandu e'ỹ va'e ma ijarakuaa e'ỹa py ojekore.
- 9 Hi'arandu e'ỹ va'e ojevavy teĩ "Mba'e'ỹ" he'i rive 'rá,
ha'e rá heko porã va'e ma joayvua rupi 'rá ikuai.
- 10 Nhandepy'a re nda'eveia oĩ va'e nhande ae 'rá nhaendu,
ha'e javy'aa voi ndajaexa uka kuaai 'rá jaexa va'ety e'ỹ pe.
- 11 Heko vai va'e kuery ro ombovaipaa 'rá,
ha'e rá heko porã va'e roguy rupi ma ipotypa 'rá.
- 12 Oĩ tape jaexa rá ha'eve rei va'e merami,
ha'e rami teĩ opaa py ma nhandereraa 'rá manoa katy.
- 13 Nhanderory rei reve teĩ nhandepy'a py ma ndajavy'ai,
javy'aa opa ramove mboriau ju 'rá nhaendu.
- 14 Opy'a py anhetẽ rupi e'ỹ ikuai va'e ojopy 'rá ikuaiague repy ha'e javi,
heko porã va'e oiko porãague repy ojopy va'erã ramigua e'ỹ.
- 15 Hi'arandu e'ỹ va'e ma ijayvua rá oendu vy ogueroviapa rei 'rá,
ha'e rá hi'arandu va'e ma oikuaa pota 'rá oiko aguã re.
- 16 Hi'arandu va'e oikuaa pota vy ojepe'a 'rá mba'emo vai gui,
ha'e rá hi'arandu e'ỹ va'e ma ivai vyvoi 'rá ojee ae rive ojerovia vy.
- 17 Ipoxo rei rive va'e opa marã 'rá ikuai,
avakue joapo vai rei va'e re nda'ija'eai 'ráe.
- 18 Hi'arandu e'ỹ va'e ma 'arandu rupi e'ỹ 'rá ikuai,
ha'e rá hi'arandu va'e ma oiko kuaa-a py ijegua.
- 19 Heko vai va'e guenapy'ã re 'rá oĩ heko porã va'e renonde,
anhetẽ rupi e'ỹ oiko va'e ojerure 'rá oiny heko porã va'e rokẽ py.
- 20 Iporiaukue'i re hoo katy'igua kuery ae voi nda'ija'ei 'rá,
ha'e rá oguerekopa va'e ma irũ reta 'rá.
- 21 Ngoo katy'i rupi ikuai va'e re ija'e'ỹ va'e ojevavy,
ha'e rá iporiaukue'i mboaxya ma ovy'a 'rá.
- 22 Mba'emo vairã rupi rive onhembopy'a va'e ndojevavyi 'rá teve?
Ha'e rá iporã re nhanhembopy'a ramo nhanderayvua ha'e ojeroviaa 'rá nhandere.
- 23 Nhamba'eapoa ha'e javi rupi jajou retave 'rá,
teĩ nhandeayvu katu rivea py ma nhandeporiauve rive 'rá.

- 24 Hi'arandu va'e mba'e rei-rei retaa ijegua 'rã,
ha'e rã hi'arandu e'ỹ va'e pegua ma nda'ijarakuaai reia.
- 25 Anhetê va'e rupi joeko mombe'ua ma ogueraa jepe 'rã joekove,
ha'e rã ijapu rei va'e ma nhombotavypa rive 'rã.
- 26 SENHOR renonde jajererokyjea rupi vy jajou nhanhemi aguã imbaraeete va'e,
nhandera'y kuery voi ojou 'rã onhemi aguã.
- 27 SENHOR renonde jajererokyjea rupi vy jaupity 'rã yvu tekove me'êa,
nhuã manoa py ja'a e'ỹ aguã.
- 28 Huvixa pegua kuery heta ramo oguerovy'a 'rã,
ha'e rã oatapa ramo huvixa nda'evei rei 'rã.
- 29 Ivai rive e'ỹ va'e ma opa mba'e py oexa uka 'rã o'arandu,
ha'e rã ipoxy rive va'e ma oguerovy'a 'rã hi'arandu e'ỹa rive.
- 30 Ha'eve rei'ia nhaendu vy nhandereete ha'e javi oiko porã 'rã,
ha'e rã joe nhandea'e e'ỹa py ma nhanekãgue hu'ũmbaa rami.
- 31 Iporiaukue'i momboriau reia kuery ma Imoingoare re voi opu'ã rei,
ha'e rã iporiaukue'i mboaxya kuery ma Nhanderueete mboetea rupi avi ikuai.
- 32 Heko vai va'e ho'a 'rã gueko vaia py ae,
ha'e rã heko porã va'e ma manoa py voi ogueroko 'rã oarõ aguã.
- 33 Hi'arandu va'e py'a re oĩ hi'arandua,
ha'e rã heko vai va'e py'a re oĩ va'e ma oikuaa pavê 'rã.
- 34 Peteĩ-teĩ regua teko porã rupi ikuai py yvateve 'rã,
ha'e rã jejavya re anho ikuai va'e ma ojou vai pavê 'rã.
- 35 Huvixave oguerovy'a 'rã tembiguai kuery hi'arandu va'e,
ha'e 'rã ha'eve'ỹa rami ikuai va'e ma ombopaga vaipa 'rã.

15

- 1 Nhambovai porã'i ramo ipoxy va'e opytu'u 'rã ipoxya gui,
va'eri nhandeayvu poyi rei vy ma nhambopoxyve 'rã.
- 2 Hi'arandu va'e ijayvu rã jajou porã 'rã hi'arandua,
ha'e rã hi'arandu e'ỹ va'e ijayvu rã jaikuaa 'rã nda'ijarakuaaia.
- 3 SENHOR oexa 'rã opa rupi,
heko vai va'e ha'e heko porã va'e kuery ha'e javi re onhangareko oiny vy.
- 4 Ayvu porã ma yvyra tekove me'êa,
ha'e rã ayvu vaikue rei ma nhanemonguerai rive 'rã.
- 5 Hi'arandu e'ỹ va'e ma tuu ombo'e ta teĩ noenduxeĩ 'rã,
ha'e rã omongetaa rã oendu va'e ma oupity 'rã 'arandu.
- 6 Heko porã va'e ro py heta 'rã oĩ iporã va'e anho,
ha'e rã heko vai va'e ma ojou 'rã ojexavai aguã rive.
- 7 Hi'arandu va'e ijayvua py oexa uka 'rã hi'arandua,
ha'e rã heko vai va'e ma ha'e ramigua re'ỹ ae ipy'a.
- 8 Heko vai va'e SENHOR pe mba'emo ome'ê teĩ ojeguaru 'rã,
ha'e rã heko porã va'e onhembo'ea oendu vy oguerovy'a 'rã.
- 9 Heko vai va'e reko gui SENHOR ojeguaru,
ha'e rã teko porã rupi ikuai va'e ma oayvu.
- 10 Tape porã gui ojepe'a va'e ma ombopagaa raxa 'rã,
omongetaa rã noenduxeĩ va'e omano 'rãe.
- 11 Yvy manoa ha'e ikua vaikue SENHOR oikuaapa va'e vy
avakue ra'y kuery py'a re oĩ va'e katuve ma oikuaapa!
- 12 Jojojai rei va'e ma imongetaa re nda'ija'ei 'rã,
neĩ nonhembojai 'rã hi'arandu va'e re.
- 13 Nhandepy'a re vy'ã oĩ va'e ojapo 'rã nhanderova porã rei aguã rami,
ha'e rã nhandeporiau reia ma nhanemonguerai reive 'rã.
- 14 Hi'arandu va'e py'a re oĩ oiko kuaaxea,
ha'e rã hi'arandu e'ỹ va'e ijayvua py voi nda'ijarakuaaive tema.
- 15 Ojexavai rei va'e ára ma nda'evei va'e meme,
ha'e rã nhandepy'a py mby'a oĩ vy ojapo 'rã nhanhenhandu porã riae aguã rami.
- 16 Jarekopa reve nhandereko eta rei 'rãgue py
ha'eveve nhandeporiaukue'i teĩ SENHOR renonde jajererokyjea rupi jaiko.
- 17 Jajoayvua rupi e'ỹ vaka ikyrave va'e ro'o mbixy ja'u 'rãgue py
ha'eveve tembi'u jaexa'i va'e tema ja'u jajoayvua rupi.
- 18 Ivai ja rei va'e jogueropoxy rive 'rã,
ha'e rã ivai rive e'ỹ va'e ma nhomombytu'u 'rã joguero'aa gui.
- 19 Inhate'ỹ va'e oikoa ma tape juu anho ikuai rami,
ha'e rã heko porã va'e oikoa ma tape ijoja porã va'e rami.

- ²⁰ Ta'y hi'arandu va'e ombovy'a 'rã nguú,
ha'e rã hi'arandu e'ÿ va'e ma neí oxy voi ndoayvui.
- ²¹ Hi'arandu e'ÿ va'e oguerovy'a rei 'rã ijarakuaa e'ÿa,
ha'e rã avakue hi'arandu va'e ma ha'evea rami 'rã ikuai.
- ²² Nhanemongetaarã ndoikoi ramo jaipota va'e voi ndoikoi avi 'rã,
ha'e rã nhanemongetaa heta ikuai rã ha'eve 'rã.
- ²³ Avakue ha'evea rami ombovai vy ovy'a 'rã,
ayvu oĩ porã aguã rami ijayvua py.
- ²⁴ Hi'arandu va'e tape ooa va'e ma yvate 'rã oo tekove katy,
manoa katy oguejy ovy 'rãgue py.
- ²⁵ SENHOR oitypa 'rã ojejou porã rei va'e ro,
ha'e rã imeve'ÿ va'e kuery pegua ma omoĩ atã 'rã.
- ²⁶ SENHOR ojeguaru heko vai va'e kuery onhembopy'aa gui,
ha'e rã ayvu porã ma oendu vy oguerovy'a 'rã.
- ²⁷ Jokorea rupi ojou-joupavexe va'e ombojexavai 'rã ngoo pygua kuery,
ha'e rã teko vai rekoviarã ndojopyi va'e ma oikove riae 'rã.
- ²⁸ Heko porã va'e onhembopy'a porã ranhe 'rã ombovai kuaa aguã,
ha'e rã heko vai va'e ma opa marã rei 'rã ijayvu.
- ²⁹ Heko vai va'e ikuaiã gui SENHOR mombyry oĩ,
ha'e rã heko porã va'e onhembo'ea ma oendu 'rã.
- ³⁰ Nhanderovy'aa rupi oma'ëa ramo javy'a 'rã,
ayvu porã omombe'ua rã nhaendu vy nhanekãgue rupi voi nhanembaraeteve avi 'rã.
- ³¹ Ha'evea rupi nhanemongetaa rã jajapyxaka vy
hi'arandu va'e kuery reve 'rã nhanhemoirũ.
- ³² Nonhemo'arandu ukai va'e ha'e ae guekove nombovarei,
ha'e rã omongetaa rã oendu pota va'e ma ojou 'rã 'arandu.
- ³³ SENHOR renonde jajererokyjea rupi jaiko ramo nhanembo'e 'rã 'arandu re,
ha'e nhanhemo'yvÿ'i ramo nhanemboetea 'rã.

16

- ¹ Nhande nhanhembopy'a 'rã mba'emo jajapo aguã,
ha'e rã SENHOR gui ae 'rã ou nhambovai kuaa aguã.
- ² Nhandevy ma jaikoa ha'e javi ha'evepa rei teĩ
SENHOR oikuaa pota 'rã nhandepy'a re.
- ³ Emboaxa SENHOR po py mba'emo rejapoxe va'e,
ha'e ramo omoingo 'rã reipotaa ha'e javi.
- ⁴ SENHOR opa mba'e omoingo ha'e ae oipotaa rami,
heko vai va'e voi omoingo ojexavai aguã.
- ⁵ Opy'a py ojejou porã rei va'e gui SENHOR ojeguaru vy
nombopaga e'ÿi 'rãe.
- ⁶ Nhanhomoaxya ha'e anhetẽ rupi jaiko ramo jajevyague ojaop'ipaa 'rã,
SENHOR renonde jajererokyjea rupi vy jaa jepe 'rã mba'emo vai gui.
- ⁷ Xapy'a rei ava oikoa SENHOR oguerovy'a vy
ojapo 'rã ngovaigua kuery reve voi irũ jevy aguã rami.
- ⁸ Jarekopa rei reve teko vai rupi jaiko 'rãgue py
ha'eveve mboapy'i jareko reve teko porã rupi jaiko.
- ⁹ Jaiko aguã re nhande nhanhembopy'a teĩ
jaguataa rupi nhanderereko va'e ma SENHOR ae.
- ¹⁰ Huvixa ijayvu 'rã oikuapaa rupi ae.
Ha'e ramo nemboayvu rã ejavy eme ndeayvua py.
- ¹¹ SENHOR gui ae 'rã ou ha'evea rami mba'emo japeja ha'e nha'anga aguã,
voko py ha'evea ramigua poyia oĩ va'e ma ixuguigua meme.
- ¹² Huvixa kuery ojeguaru 'rã teko vai ha'e javi gui,
gueko porãã rupi ae 'rã opena oiny.
- ¹³ Anhetẽ rupigua ayvu huvixa oendu vy oguerovy'a 'rã,
oayvu 'rãe anhetẽ rupi ijayvu va'e.
- ¹⁴ Huvixa ipoxya nhaendu vy jaikuaa 'rã jokuã ukaxea,
teĩ ha'e ramia gui hi'arandu va'e omombytu'u kuaa 'rã.
- ¹⁵ Huvixa ovy'a ramo jaikuaa nhomoingove ju aguã.
Iporayvua ma ára pyau py arai gui okya rami.
- ¹⁶ Ouro jajoua gui ha'eveve nhane'arandurã jajou,
prata gui ha'eveve va'e ma jaiko kuaavea.
- ¹⁷ Heko porã va'e oikoa ma teko vairã katy e'ÿ 'rã oo,
oiko aguã oikuaa pota porã va'e ma ogueraa jepe 'rã guekove.

- 18 Jajou porā reia ma opaa py nhanembojexavai 'rā,
ha'e nhandepy'a py nhanemboyvate reia ma nhandereityarā oī.
- 19 Yvatekueve reve mba'emo jajoupa va'ekue nhamboja'o 'rāgue py
ha'eveve yvyigüeve'i reve nhanhemo'yvyi'i.
- 20 Ombo'ea rā ojapyxaka va'e ojou 'rā mba'emo porā,
ha'e SENHOR re ojerovia va'e ovy'a ete 'rā.
- 21 Okuraxō py hi'arandu va'e pe "Oiko kuaa va'e" 'ea 'rā,
ha'e ijayvu porā kuaa va'e ma nhambo'e porā 'rā.
- 22 'Arandu ojou va'e pe ma tekove me'ēarā oī,
ha'e rā hi'arandu e'ỹ va'e ma opaga 'rā nda'ijarakuaai reiaque re.
- 23 Hi'arandu va'e okuraxō py onhembo'e ranhe 'rā ijayvu kuaa aguā,
ha'e ramo onhe'ē rendu pavē 'rā.
- 24 Ayvu porā ma ei he'ēa rami oī nhanekuraxō re,
moā nhandereite moexaia rami guive.
- 25 Oī tape avakue oexa rā ha'eve rei va'e merami teī
opaa py ma manoa katy 'rā ogueraa.
- 26 Omba'eapo va'e ma nhemyayi gui ae 'rā omba'eapo,
okaruxea ae omokyre'ỹ.
- 27 Avakue vare'ỹ va'e onhea'ā 'rā okuapy teko vai re anho,
ha'e ijayvua ma tata mba'emo rapyarā.
- 28 Avakue heko vai va'e ojapo 'rā joguero'a rei aguā rami,
ijayvu rei va'e ma joe irū porā va'ekue teī omomboi 'rā joegui.
- 29 Avakue ojerovia rei va'e oirū kuery ombotavy vy
ogueroko 'rā tape vai rupi.
- 30 Oxapymi rei va'e onhembopy'a 'rā oiny teko vai re,
ha'e gui onhembexu'u reve ojapo ete 'rā.
- 31 Omboetepy 'a xiia ma ijegarā oī,
tape teko porā katy oo va'e rupi oje'oi va'e pegua ae.
- 32 Joe nhapu'ā rei aguā re jajerovia rei 'rāgue py ha'eveve nhandevai vyvoi e'ỹa,
tetā ha'e javi re nhandepo'aka 'rāgue py ha'eveve nhande ae jajekoko kuaa.
- 33 Xorteja jaexa teī
SENHOR gui meme ou jaikuaa aguā.

17

- 1 Nhandero py jajoguero'apa rei reve xo'o ja'u vaipa 'rāgue py
ha'eveve nhandekuai rivea py pete'i mbojape ja'u.
- 2 Ta'y kuery oximba aguā rupi ikuai va'e gui ma tembiguai kuery hi'arandu va'e ipo'akave 'rā,
ha'e rami vy ojopy 'rā ta'y kuery peguarā va'ekue ae.
- 3 Prata ma hi'angaraā py 'rā nhamoī, ha'e ouro ma tata py,
ha'e rā nhandepy'a re oikuaa pota va'e ma SENHOR ae.
- 4 Heko vai va'e ojapyxaka 'rā mba'emo vai rupi ijayvu va'e re,
ijapu va'e oenduxe vai 'rā ayvuxe.
- 5 Iporiaukue'i jojai reia kuery ma Imoingoare re voi ijayvu rei rire
jexavaia oguero'va rei va'e ndopaga e'ỹi 'rā.
- 6 Tamoi kuery oguero'va 'rā guamymino kuery,
ha'e rami ae avi ta'y kuery oguero'va 'rā ngu kuery.
- 7 Hi'arandu e'ỹ va'e nda'ijayvu porā kuaai 'rāe,
ha'e huvixa kuery nda'evei ijapu aguā.
- 8 Ha'eve'ỹa rami ojapo ukaxe vy mba'emo ome'ē va'e oikuaa teī oipota va'e rei ita ojapoa rami,
mba'eta mamō rā oikoa py tema oipotaa oiko 'rā.
- 9 Amboae kuery ojejavyague ndoikuaa ukai va'e oexa uka oayvua,
ha'e rā mba'ekue omboaxa-axa rei va'e ma ojapo 'rā joe irūve va'ety joegui oja'o aguā rami.
- 10 Hi'arandu e'ỹ va'e cem-kue oinupāa teī noendui 'rā merami,
ha'e rā hi'arandu va'e ma omongetaa rā oenduxe ete 'rā.
- 11 Nanhonhe'ē rendui va'e kuery onhea'ā mba'emo vai re anho.
Ha'e nunga rupi ha'e kuery rovai omboua 'rā imbojexavaiarā.
- 12 Urso gua'y'i re inharō va'e reve nanhovaexia gui nda'eveive
hi'arandu e'ỹ va'e ijarakuaa rupi e'ỹ ikuai va'e reve nanhovaexi.
- 13 Amongue pe ojapo porāa 'rāgue py mba'emo vai re omboekovia rire
hoo py oiko riae 'rā mba'emo vai.
- 14 Yy ombotyague gui oxyry xapy'aa rami avi jajoguero'a ypya.
Ha'e nunga rupi ha'eveve japytu'u voi, joegui jaja'o e'ỹ aguā.
- 15 SENHOR ndojou porāi 'rā heko vai va'e omboeko porā rivea rā,
nei heko porā va'e ombopaga rivea rā guive.

- 16 Hi'arandu e'ý va'e o'arandurā ojoguaxe vy merami peráta oguereko opo py,
nai'arandui ae ma va'eri.
- 17 Nhaneirū kuery nhanderayvu 'rā jaikoa jave re,
ha'e rami vy jajexavaia py onhemoingo 'rā nhaneretarā ae'i rami.
- 18 Avakue hi'arandu e'ý va'e onhemoi vai uka rive vy
ojea katy'igua orevea opaga aguā rami ikuai.
- 19 Joguero'a reixe vai va'e ojejavý reia rupi rive 'rā ikuai,
ha'e ngokê ombotuvixa va'ekue py ae 'rā ojeity uka.
- 20 Anhetē rupi e'ý ipy'a va'e ndojoui 'rā ha'eve va'e,
petei rupi e'ý ijayvu va'e ho'a 'rā mba'emo vai py.
- 21 Ta'y hi'arandu e'ý va'e omomboríau 'rā nguu kuery.
Ndoiko kuaai rei va'e ru kuery ma ndovy'ai 'rā.
- 22 Nhandepy'a py vy'aa ma moā porā rami 'rā oī,
ha'e rā nhanenhe'ē py nhandekuerai oī vy ma omombirupa 'rā nhanekāgue.
- 23 Heko vai va'e onhevende nhemi 'rā peráta re,
ha'eve e'ýa ramigua rupi joguereko aguā.
- 24 Mba'emo oikuaa va'e onhea'ā 'rā hi'aranduve aguā anho,
ha'e rā hi'arandu e'ý va'e ma yvy re mba'emo ikuai va'e re rei 'rā oma'ē oikovy.
- 25 Ta'y hi'arandu e'ý va'e omomboríau 'rā nguu,
omonguerai rei avi 'rā hereko'iare.
- 26 Heko porā va'e nhambopaga aguā nda'evei,
huvixa nhamoingo axy reia ma ha'eve'ý va'e ae.
- 27 Ayvu py ojejoko va'e ma hi'arandu va'e,
oiko rive'i va'e ma oiko kuaa va'e ae.
- 28 Hi'arandu e'ý va'e tei okyriri oiny rā jaikuaa 'rā hi'arandua rami,
ijayvua py ojejoko va'e jaikuaa 'rā oiko kuaa va'e rami ae.

18

- 1 Joexaxe e'ý rei va'e ma ha'e kuery ae oipotaa rami rive ikuai,
ha'e vy noenduxei 'rā 'arandu anhetē ete va'e.
- 2 Hi'arandu e'ý va'e ndoikuaaxei 'rā 'arandu,
ha'e kuery ae akā gui rive 'rā ijayvu.
- 3 Teko vai oī ramo oī avi 'rā jojou vaia,
ha'e nhaximba aguā rami nhandekuai ramo nanhanemboeteavei ma 'rā.
- 4 Avakue ijayvua ma yy ttypy va'e ramigua,
ha'e hi'arandu va'e ayvu ma yakā'i oxyry va'e rami 'rā.*
- 5 Nda'evei otekoavy va'ekue nhamboeko porā aguā,
neí heko porā'i va'e nhambopaga aguā guive.
- 6 Hi'arandu e'ý va'e ijayvua ojapo 'rā joguero'a rei aguā rami,
onhenupā ukaa rupi merami ijayvu.
- 7 Hi'arandu e'ý va'e ayvu ma ha'e kuery ae imombaarā rive,
ijayvua ma nhuā py inhe'ē mbo'arā.
- 8 Ijayvuxe reia ma he'ëve va'e rami
oguejy 'rā ipy'apy katy.
- 9 Inhate'ýa rupi rive omba'eapo va'e ma
mba'emo ojavyky rei va'e regua ae ikuai.
- 10 SENHOR rery ma torre imbaraeeteve va'e,
ha'e py heko porā va'e onhemi vy oiko porā aguā.
- 11 Oguerekopa va'e pe rā imba'e rei-rei ma tetā ikorapa va'e rami,
ha'e oikuaa rā ikora yvate va'e rami ae.
- 12 Avakue ikuai axy e'ýa ja ojejou porā rei 'rā opy'a py,
ha'e rā onhemo'yvy'i va'e ma omboetea 'rā.
- 13 Nhaendu kuaa e'ý re nhambovai vy
nhaximba rei 'rā nhane'arandu e'ýa py.
- 14 Avakue imba'eaxy tei ipy'a guaxua omombaraete 'rā,
ha'e rā onhe'ē py ikuerai ma noguerombaraetei 'rā.
- 15 Hi'arandu va'e opy'a re omoī 'rā oikuaa porāve aguā,
oapyxa rupi voi onhea'ā 'rā oikuaa aguā.
- 16 Joupe avakue mba'emo ome'ē 'rā tape oipe'a uka vy,
yvatekueve reve ijayvu aguā peve.
- 17 Ha'e ranhe ojejy ukaa rupi ijayvu rā ixupe “Ha'evea ramigua” ja'e ranhe 'rā,
amboae kuery ou vy omboayvu e'ýa ja.

* 18:4 Yy ttypyve va'e ramigua ayvu ma haxyve va'e (20.5). Ha'e rā yakā'i oxyry ovy va'e ramigua ayvu ma nhamembovy'a va'e.

- 18 Nhombovake va'e kuery xorthea oexa vy opytu'upa 'rã joupe ijayvu atãa gui,
ipo'akakueve teĩ oikuaa vyvoi 'rã.
- 19 Nhanderegua nhambopoxy rire haxy ete 'rã ha'eve vai ju aguã,
ijayvu atãa rupi onhemboty 'rã oo ikorapa va'e rokê jokoa rami.
- 20 Nhandeayvuague rami oiko ramo javy'a 'rã nhanekuraxô py,
nhandeayvua ojeupity ramo jarovy'a 'rã.
- 21 Nhandeayvua py jajoapo 'rã omano, e'ÿ vy oikove aguã rami.
Ijayvu porã kuaa va'e oiko porã 'rã.
- 22 Nhandera'yxyrã jajou vy mba'emo porã jajou,
ha'e jaupity SENHOR nhanemoingo porãa.
- 23 Iporiaukue'i ma mba'emo re ojerurea rupi 'rã ijayvu,
ha'e rã oguerékopa va'e ma ombovai atã rei 'rã.
- 24 Avakue irũ reta va'e omokanhy tema 'rã imondovy.
Ha'e rami teĩ peteĩ oiko avi nhaneirũ nhanderegua ae'i gui nhanderayvuve va'e.

19

- 1 Nanhamboetei 'rã hi'arandu e'ÿ va'e kuery anhetê rupi e'ÿ ijayvu va'e.
Ha'e rã iporiaukue'i va'eri anhetê rupi ikuai va'e ma nhamboete.
- 2 Jaikuaa porã pota e'ÿ re mba'emo jajapo aguã nda'evei,
mba'eta oikuaa pota porã e'ÿ va'e ojejavy 'rã.
- 3 Nhande ae 'arandu e'ÿa rupi vy jajavy 'rã tape,
va'eri SENHOR rovai ae 'rã nhandevai nhandepy'a py.
- 4 Oguerekopa rei va'e heta 'rã ojou oirũrã,
ha'e rã iporiaukue'i gui ma irũ kuery ae voi ojepe'apa 'rã.
- 5 Joekokue ramigua rive mombe'uaere ma nombopagaa e'ÿi 'rã,
ha'e apu rupi ijayvu va'e voi ndoo jepei 'rã.
- 6 Mba'emo omboja'o-ja'o va'e oguerovy'a pavê 'rã,
mba'emo ome'ê rive va'e re onhemoirũ pavê 'rã.
- 7 Iporiaukue'i ma hexegua kuery ae'i voi ndoexaxei 'rã,
irũ kuery katuve ma ojepe'apa 'rã ixugui.
Ha'e kuery rakykue mba'emo re ojerure aguã onha teĩ ndoupityi 'rã.
- 8 O'arandurã ojou va'e ma guekove oayvu vy ae,
mba'emo re oikuaa pota porã va'e ojou 'rã ha'eve va'e.
- 9 Joekokue ramigua rive mombe'uaere ma nombopagaa e'ÿi 'rã,
ijapu rei va'e okanhy 'rãe.
- 10 Hi'arandu e'ÿ va'e oguerékopa rei aguã nda'evei,
tembiguai katuve ma nda'eveive huvixa kuery re ipo'aka aguã.
- 11 Jajejokoa rupi vy nanhandevai vyvoi 'rã,
nhandere ijayvu vaiague japerdoaa ma nhandejeguarã oi.
- 12 Huvixa ipoxya ma guary okororõa rami,
ha'e rã iporayvua ma yxapy jai rogue omoakÿa rami.
- 13 Ta'y kuery hi'arandu e'ÿ va'e omoiximba rei 'rã nguu,
ha'e ta'yxy ijayvu mbegue rei va'e ma otyky tema oiny va'e rami.
- 14 Nguu kuery gui avakue ojopy 'rã ngorã ha'e omba'e rei-reirã,
ha'e rã gua'yxyrã hi'arandu va'e ma SENHOR gui ae 'rã ojou.
- 15 Ate'ÿ gui ae nhanderopeyi riae 'rã,
ha'e nhaĩ rive riae vy nhaendu 'rã karuai.
- 16 Ojapo uka pyre rami ikuai va'e ma guekove re ae onhangareko va'e,
ha'e rã ojee ndoikuaa potai va'e ma omano 'rã.
- 17 Iporiaukue'i mboaxya ma SENHOR pe ae oiporuka va'e,
ha'e ramo ha'e ju 'rã omboekovia joapo porãague repy.
- 18 Ha'eve teri reve emo'arandu ke ndera'y,
teĩ rejuka aguã peve'ÿ ta'vy.
- 19 Ivai ja topaga ipoxy reiaque re,
mba'eta ndee repy teĩ ha'ekue rami ae ju 'rã oiko.
- 20 Nemongetaa rã ejapyxaka porã ke, endu pota nembo'ea rã,
hi'arandu va'e reiko aguã reikoa pukukue re.
- 21 Avakue ma opa mba'e re onhembopy'a teĩ,
ha'e rã SENHOR onhembopy'aa ma oiko 'rãe.
- 22 Nhandomboaxya rupi nhandekuai ramo nhanderovy'aa 'rã,
ijapu rei va'e 'rãgue py oguerovy'aave 'rã iporiaukue'i.
- 23 SENHOR renonde jajererokyjea rupi vy jaupity 'rã tekove.
Ha'e rami ikuai va'e ovy'a 'rã, ha'e kuery re ndoui 'rã mba'emo vai.
- 24 Inhate'ÿ va'e ma hy'a py opo'ê teĩ

oju ru katy ndogueru potai 'rã.

- 25 Jojojai rei va'ekue nhambopaga ramo hi'arandu e'ÿ va'ekue oexa vy oiko kuaa pota nho 'rã okuapy, ha'e hi'arandu va'e nhamongeta rã oiko kuaave 'rã.
- 26 Ta'y nguú ojavyky rei, ha'e oxy omoxê rire ma nomboeteavei ramo oxĩmba rei 'rã.
- 27 Xera'y, nembo'ea nerendu potai ri vy rejepe'a 'rã nemo'aranduarã va'ekue ayvu gui.
- 28 Heko vai va'e joekokue omombe'ua py ombojaru rei 'rã imboayvua, heko vai va'e kuery teko vai re anho 'rã ijayvu.
- 29 Jojojai rei va'ekue ma ombopagaa aguã rami ae ikuai, hi'arandu e'ÿ va'e ma oinupãmbaa aguã rami ikuai.

20

- 1 Vinho nhomoingo 'rã jojojai rei aguã rupi, iro va'e ma nhomoingo 'rã joguero'a rei aguã rupi. Ha'e nunga ha'e javi py ojeity uka va'e ma hi'arandu e'ÿ va'e ae vy ma 'rã.
- 2 Guary okororõa rami huvixa oexa uka 'rã opoxya. Amongue ombopoxyve rive vy ha'e ae rekove rovai ojevay.
- 3 Avakue omboetepy ojepe'a 'rã joguero'apa reia gui, ha'e rã hi'arandu e'ÿ va'e ma oike 'rã ovy ijayvu ete va'e kuery mbyte py.
- 4 Inhate'ÿ va'e yro'y py omba'etyrã ndoguereko katui rire omono'õ aguã va'ekue py ndojoui 'rã mba'eve.
- 5 Avakue py'a re oĩ va'e ma yy typy va'e rami rive, teĩ hi'arandu va'e ma oikuaa pota kuaa 'rã.
- 6 Heta 'rã iporayvua rami rive onhemombe'u, ha'e rã ava ojeroviapy ete va'e ma mava'e 'rã tu ojou kuaa?
- 7 Heko porã va'e anhetê rupi 'rã ikuai, ha'e rire ta'y kuery ju ovy'a 'rã okuapy.
- 8 Huvixa nhomboayvuaty py oguapy va'e oma'ê vy rive omomba 'rã mba'emo vai.
- 9 Mava'e tu ha'eve 'rã aipoe'i aguã: "Xee ae py'a aiky'a'opa ma vy iky'a e'ÿ va'e ju aiko ajevavyague gui" he'i aguã?
- 10 Jokorea rupigua poyia ha'e hyru mba'emo oa'ã pyrã oiporua teĩ mokoĩve ma SENHOR ojeuarua meme.
- 11 Kyrĩgue teĩ mba'emo ojapoa jaexa vy jaikuaa 'rã ojapo porã, ha'e ha'evea rami pa oikoa.
- 12 Nhandeapyxa nhaendu aguã, ha'e nhanderexa jaexa aguã, SENHOR ojapo va'ekue meme.
- 13 Enhembopeyi pota rei eme, iporiau va'e reiko e'ÿ aguã. Eipe'a nderexa, ha'e vy 'rãe rejou reta tembi'u.
- 14 Mba'emo ojoguaxe va'e ma ha'e nunga pe "Ovare va'e'ÿ, ovare va'e'ÿ", he'i 'rã. Ha'e gui ma ojogua ma rire oguero'vy'a rei 'rã.
- 15 Heta oiko ouro ha'e ita iporãve va'e, ha'e rã 'arandu rupi ijayvu va'e ma ovareve ete va'e.
- 16 Oreve va'e rekovia opaga aguã rami amongue oiko rire ixugui ijao oi'pe'aa 'rã, oexa va'ety e'ÿ rekovia onhemoingo va'ekue gui katuve ma oi'pe'aa 'rã.
- 17 Jokorepa reia rupi avakue mbojape ojou va'ekue ma hee 'rã merami, ha'e rami teĩ opaa py ma ita ra'y ku'i rami rive 'rã oĩ ijuru py.
- 18 Nhanhemongeta ukaa rupi nhandembopy'aa ma oiko porã 'rã. Ha'e nunga rupi eikuaa pota porã ranhe joe repu'ã aguã.
- 19 Ijayvu katu raxa va'e omombe'upa 'rã nda'evei rei va'e. Ha'e nunga rupi neirũ eme ijayvuxe rei va'e re.
- 20 Nguú ha'e oxy re ijayvu vai va'ekue rekovea ogue rive 'rã tataendy rami pytũve etea py.
- 21 Mba'emo jajopy aguã ára ovaê e'ÿ re ri jajopy ramo opaa py noi porã 'rã nhandevy.
- 22 "Xee ae ajepy 'rã mba'emo vai re", re eme. Earõ tema SENHOR, ha'e ramo nderepy 'rã.
- 23 Jokorea rupigua poyia ma SENHOR jeguarua meme, jokorea rupi mba'emo oa'ãa ma na'iporã.
- 24 Avakue uguataa rupi SENHOR ae 'rã oguereko. Mba'exa tu ha'e kuery ae oikuaa 'rã tape oo aguã?
- 25 Jaikuaa pota e'ÿ re mba'emo pe "Iky'a e'ÿ va'e" ja'e vy jajekore 'rã, nhandemboayvupa rire mae ma nda'evei ramo 'rã.
- 26 Huvixa hi'arandu va'e oikuaa pota kuaa 'rã heko vai va'e re,

ombopaga aguã.

- 27 Nhanenhe'ê ma SENHOR ae omoĩ nhanemoexakäärã,
nhandepy'apy rupi oĩ va'e ha'e javi oikuaa uka aguã.
28 Huvixa ma porayvua ha'e ojeroviapy oiko vy 'rãe oĩ atã,
nhomboaxya rupi ipo'akave tema 'rã oiny.
29 Kunumigue imbaraetea ma ijeguarã oĩ,
ha'e rã ikakuaa jeguaarã ma hi'a xiĩ porãa.
30 Nhandeai pore ojapo 'rã mba'emo vai guiiky'a e'ỹ va'e ju jaiko aguã rami,
nhanenupãa ma nhanekuraxõ oĩ porã aguã rami ojapo.

21

- 1 Yxyry rami huvixa py'a oĩ SENHOR po py,
mba'eta SENHOR oipotaa rupi ae 'rã oguereko.
2 Avakue pe rã ikuaia ha'e javi ha'evea rami meme,
ha'e rami teĩ SENHOR oikuaa pota 'rã ipy'a re.
3 SENHOR pe mymba nham'eãa gui
oguerovy'ave 'rã nhandereko porãa ha'e ha'evea rami jajoguerekoa.
4 Jejou porã reia ha'e opy'a py nhemboyvate reia ma
heko vai va'e kuery pe rã tataandy rami teĩ jejavya meme.
5 Oikuaa pota porãa rupi onhembopy'a va'e ojoupa 'rã,
ha'e rã oiapura rei va'e ma iporiau 'rã.
6 Apu rupi nhanhea'ã vy mba'emo jajoupa va'ekue ma
opaa py ma mba'everã ndovareĩ 'rã, ha'e nhanembo'a 'rã manoa nhuã py.
7 Heko vai va'e ma nhomoingo axyague py ae omombaa 'rã,
teko porã rupi ndoikoxei rire.
8 Ava otekoavypa rei va'e oikoa ma ikarẽ rei,
ha'e rã heko porã va'e oikoa ma hi'yvi porã.
9 Nhanderopy kunha ivai ja rei va'e reve nhaia gui
ha'eveve 'rãgue oo apyte áry nhaĩ.
10 Heko vai va'e opy'a re omoĩ 'rã mba'emo vai anho,
neĩ nomboaxyi 'rã ngoo katy'igua voi.
11 Jojojai rei va'ekue ombopagaa rã hi'arandu e'ỹ va'ekue oexa vy hi'arandu nho 'rã okuapy,
ha'e hi'arandu va'e ombo'ea rã oiko kuaave 'rã.
12 Heko vai va'e ngoo py ae ojapo va'e re Heko porã ete va'e oikuaa pota vy
omokanhymba 'rã heko vaia rupi ae.
13 Iporiaukue'i oiapukaia noendu potai va'ekue ma
ha'e ju oiapukai rã noendu potaai avi 'rã.
14 Mba'emo nhemi rupi amongue ome'ê rã nhomombytu'u 'rã ipoxy reiaque gui,
mba'emo oexaa py e'ỹ ome'ê rã nda'ipoxy reiavei 'rã.
15 Ha'evea rami jajoguereko ramo heko porã va'e kuery ovy'a 'rã,
ha'e rã heko vai va'e kuery ma onhemondyipa rei 'rã.
16 Oiko kuaa rupi oikoa gui ojepe'va va'ekue ma
omanogue ikuai py 'rã opyta oupy.
17 Vy'aa rive oguerovy'a va'ekue ma iporiaupa 'rã,
vinho ha'e azeite ho'uxe riae va'e ma mba'eve ndojouvei 'rãe.
18 Heko vai va'e ome'êa 'rã heko porã va'e rekovia,
ha'evea rupi ikuai va'e 'rãgue py ha'eve e'ỹa rupi ikuai va'e ojexavai aguã.
19 Kunha ivai rei ha'e ijayvu vaipa-ipa va'e reve nhaĩ 'rãgue py
ha'eveve peteĩ vyv tekoa e'ỹa py nhaĩ.
20 Hi'arandu va'e ro py oĩ 'rã imba'e rei-rei ha'e ho'u va'erã,
ha'e rã hi'arandu e'ỹ va'e ma ha'e nunga mokanhymbaarã.
21 Teko porã ha'e porayvua rupi ikuai va'e
ojou 'rã tekove, teko porã ha'e omboetea aguã.
22 Ojerovia rei va'e kuery retã kora re hi'arandu va'e ojeupi vy
oitypa 'rã ha'e kuery onhemiatty ojeroviavea va'ekue.
23 Ojuru py ijayvu aguã gui ojejoko va'e ma
ojoko avi onhe'ê imoingo axyarã gui.
24 Onhemboyvate py ojejou porã rei va'e rery ma jojojai rei va'e.
Ha'e kuery ma ojerovia rei ha'e nda'ija'ei rei va'e ae.
25 Inhate'ỹ va'e omano 'rã mba'emo oikotevêa py,
opo py nomba'eapoxei rire.
26 Mba'emo omoaruã rei va'e ma ko'ê nhavõ 'rã omoaruã,
ha'e rã heko porã va'e ma ome'ê 'rã hakate'ỹ reve'ỹ.
27 Heko vai va'e mba'emo ome'ê va'e ma jeguarua meme,

otekoavypa rei reve ome'ê rã katuve ma.

- 28 Joekokue ramigua rive omombe'u va'ekue okanhy 'rã,
ha'e rã mba'emo oendu porã va'ekue mombe'ua ma nombovaia kuaai 'rã.
29 Ava heko vai va'e ma ngova re voi oexa uka 'rã ipy'a ratãa,
ha'e rã heko porã va'e ma oikuaa pota 'rã oiko aguã re.
30 SENHOR rovai rupi ma ndoikoi 'arandua, neĩ mba'emo kuaapa va'e,
neĩ nhomongeta kuaa va'erã voi.
31 Joe opu'ã aguã kavaju oguereko katupaa teĩ
ipo'aka aguã ma SENHOR gui ae 'rã ou.

22

- 1 Nhanemba'e rei-rei retaa gui ovareve va'e ma nhanderery re ima'endu'a porãa.
Prata ha'e ouro gui ha'eveve va'e ma nhanemboetea.
2 Oguerekopa rei va'e ha'e iporiaukue'i ma peteĩ'i guigua meme,
mokoĩve moingoare SENHOR ae oiko.
3 Hi'arandu va'e mba'emo vai oexa vy onhemi 'rã,
ha'e rã hi'arandu e'ỹ va'e ma oo tema 'rã ojexavai aguã katy rive.
4 SENHOR renonde jajererokyjea rupi vy nhanhemo'yvy'i vy
jaupity 'rã mba'emo porã, nhanemboetea aguã ha'e tekove.
5 Heko vai va'e oikoa rupi oĩ nhuã ha'e juu vaikue,
ha'e rã guekovea ombovare va'e ma ha'e va'e gui mombyrya rupi 'rã oo.
6 Pembo'e ke kyrĩgue oiko aguã re.
Ha'e rami rive tuja ma teĩ ndojepe'ai 'rã pembo'eague gui.
7 Oguerekopa va'e oguereko axy 'rã iporiaukue'i,
ha'e nhomba'e oiporu va'ekue ma oiko 'rã iporukaare rembiguai rami.
8 Teko vai rive omoã va'ekue omono'õ 'rã mba'emo vai ae,
ha'e yvyra py nhombojexavaiague opa 'rã.
9 Akate'ỹa rupi e'ỹ ome'ê va'ekue omoingo porãa 'rã,
iporiaukue'i pe ho'u va'e regua ome'ê rive.
10 Pemoxê ke jojojai reiaty, ha'e ramo opa avi 'rã joguero'a reiaty,
opytu'upaa 'rã nda'evei rei ha'e nanhomoetei reiaque gui.
11 Opy'a re teko porã anho omoĩ reve ijayvu porã kuaa va'e ma
oiko 'rã huvixave irũ.
12 Hi'arandu va'e re SENHOR oma'ê vy omoĩ atã 'rã,
ha'e rã heko vai va'e ijayvua ma omboaxapa rive 'rã.
13 Inhate'ỹ va'e aipoe'i 'rã: "Guary oka py hiny,
tape rupi aa ramo xejuka 'rã", he'i rive 'rã.
14 Kunha reko rei ijayvua ma vyvkua puku rami,
ha'e py ho'a 'rã SENHOR ombopaga aguã rami ikuai va'e.
15 Kyrĩgue py'a re oĩ 'rã 'arandu e'ỹa,
teĩ yvyra rovi py nhamo'arandu vy jaibe'a 'rã.
16 Iporiaukue'i gui omba'e rei-reirã oipe'a va'e,
ha'e oguerekopa va'e pe mba'emo me'êa kuery ma iporiau va'erã meme.

Nhanembo'ea ha'e nhanemongetaa oĩa

- 17 Ejapyxaka porã ke rendu aguã hi'arandu va'e kuery ijayvua.
Emoĩ ndepy'a re mba'emo aikuaa uka va'e.
18 Mba'eta ndepy'a re remoĩ ramo nembovy'a 'rã,
ha'e nunga ha'e javi re ndeayvu kuaa aguã.
19 SENHOR re rejerovia riae aguã rami
aỹ ame'ê ne'arandurã, ndevy ae.
20 Xapy'a rei nda'u ndevy namboparai ri ty'y mba'emo iporã ete va'e re,
nhomongetaa ha'e mba'emo kuaa ukaa regua,
21 ndevy aikuaa uka aguã ayvu anhetê ete va'e,
nemondoukaare kuery rembovai porã aguã?
22 Nemonda eme iporiaukue'i gui, mba'eta iporiaukue'i ae ma,
ojexavai'i va'e ekorepa rei eme guive omboayvua py.
23 Mba'eta ha'e va'e regua ma SENHOR ae oepy 'rã,
ha'e vy oipe'a 'rã imbojexavaiare rekove.
24 Neirũ eme ivai ja rei va'e re,
neĩ eiko eme avakue ojerovia rei va'e reve,
25 ndee avi reiko e'ỹ aguã ha'e kuery reko vaia rupi,
mba'eta ha'e ramia py rembo'a uka 'rã nderekovea.
26 Nda'evei ndee voi reiko aguã ha'e ae oĩ vai aguã rami ijayvu va'e regua,
oreve va'e rekovia opaga aguã rami opyta va'e kuery rami,

- ²⁷ mba'eta xapy'a rei nderejoui 'rã repaga aguã.
Mba'e re 'rã tu nderupa reipe'a uka ndeguy gui?
²⁸ Erova eme vvy markaarã
neramoí kuery yma omo'ã va'ekue.
²⁹ Rexa pa avakue omba'eapo porã kuaa va'e?
Ha'e kuery ma huvixa kuery renonde 'rã omoia, vvyígueve mbyte py e'ÿ.

23

- ¹ Huvixa reve rekaru aguã nemboguapy ri ramo
eikuaa pota porã nerenonde py marã ramigua pa oí va'e re.
² Emboaxa peteí kyxe ndejyryvi re,
okaru guaxu va'e ri reiko vy.
³ He'uxepa rei eme tembi'u porã omoimba teí,
mba'eta tembi'u ma nembotavyarã oí.
⁴ Enhea'ã rei eme rerekopaxea rupi rive,
emoí eme ha'e nunga ne'arandua py.
⁵ Mba'emo rei re rive teve rema'ẽ riae ta?
Mba'eta anhetê ete nemba'e rei-rei okanhymba vyvoi 'rã ipepo va'e rami,
taguato yvate rupi oveve ovya rami.
⁶ Nda'evei hakate'ÿ va'e rembi'u re rekaru aguã,
neí he'upaxe rei eme tembi'u porã omoí teí.
⁷ Mba'eta ha'e va'e oikuaa pota rei 'rã ndere, ha'e ramigua ae vy.
Ndevy pe "He'uve ha'e ey'uve tema" he'i 'rã
teí opy'a py anhetê rupi e'ÿ oí ndereve.
⁸ Ha'e gui rembojevypa ju 'rã re'u vaipa vyvoi va'ekue,
ha'e ijavyu porãa rerovy'aague oaxapa rive 'rã.
⁹ Ndeayvu eme hi'arandu e'ÿ va'e kuery oendu aguã,
mba'eta oendu rivepa 'rã 'arandu rupi ndeayvua.
¹⁰ Perova eme vvy markaarã yma omo'ã mbyre,
neí peike eme ta'vy tyre'ÿ kuery vvy re,
¹¹ mba'eta ha'e kuery Repyarã ma imbaraete,
ha'e penderovai onhemoi 'rã ha'e kuery repyarã.
¹² Emoí ndepy'a re nembo'eague,
ha'e ejapyxaka ayvu mba'emo kuaa ukaa re.
¹³ Emo'arandu e'ÿ eme kyrígue.
Mba'eta vyvra rovi py reinupãa gui rive nomanoi 'rã.
¹⁴ Vyvra rovi'i py reinupã vy
inhe'ẽ reraa jepe 'rã omano aguã gui.
¹⁵ Xera'y, ndepy'a py ne'arandu ramo
xee voi xepy'a py roguerovy'a 'rã.
¹⁶ Ha'evea rupi ndeayvu ramo
xepy'apy re avy'a riae.
¹⁷ Ndepy'a py eroangeko rei eme ojevavyva rei va'e ikuaia.
Ha'e rami 'rãgue py SENHOR renonde rejererokyjea rupi eiko ára nhavõ.
¹⁸ Mba'eta ha'e rami vy 'rãe nerenonde oí porã,
ha'e rearõ reikovya ndoaxa rivei 'rã.
¹⁹ Xera'y, endu ke ne'arandu aguã,
ha'e ereko nekuraxõ tape hi'yvi va'e rupi.
²⁰ Enhemoirũ eme vinho gui oka'u rei va'e kuery reve,
neí xo'o ho'u raxa rei va'e kuery reve.
²¹ Mba'eta oy'u raxa ha'e okaru guaxu va'e ma iporiaupa 'rã,
avakue hopeyi rei va'e ijao vaikue rei 'rã okuapy.
²² Endu ke nderu ndere ta'y va'ekue ayvu.
Ndexy gui nderexarai rei eme guive, guaimi'ive'i ma ovy ramo voi.
²³ Ejogua ke anhetê va'e, ha'e gui emboekovia ju eme.
Ejogua avi 'arandu ha'e nembo'earã, reiko kuaa aguã.
²⁴ Heko porã va'e ru ma ovy'a vaipa 'rã,
hi'arandu va'e re ta'y va'e ma oguerovy'a 'rã.
²⁵ Tandererovy'a nderu ha'e ndexy,
ejapo nderereko'iare ndererovy'a aguã rami.
²⁶ Xera'y, eme'ẽ xeve nekuraxõ,
ha'e nderexa toguerovy'a xee aikoa.
²⁷ Mba'eta kunha itavy rei va'e ma vvykua puku va'e rami,
ha'e amboae ava ra'yxy ma yguarã ojo'o po'i'i pyre rami.

- 28 Ha'e nunga kunha ma jojuka va'ety rami oma'ē mbegue 'rā oiny joe,
heta avakue ma ojapo heko vai aguā rami.
- 29 Mava'e pe 'rā tu haxypa rei?
Mava'e pe 'rā tu ipoyi ete?
Mava'e re 'rā tu joguero'aa rei?
Mava'e pe 'rā tu onhemombe'u?
Mava'e 'rā tu mba'e py e'ŷ ojejukapa rei?
Mava'e 'rā tu hexa pytā rei va'e?
- 30 Vinho oy'ua rupi tema ikuai va'e pegua ae,
oy'u va'erā omoirū mbyre re onhea'ā va'e.
- 31 Ema'ē rive ke vinho pytā porā rei va'e re,
karo py oī va'e jaexa rā hexakā rei'i ha'e onheē porā rei'i oiny teī,
- 32 va'eri opaa py ma ndexu'u 'rā mboi rami,
nekarai 'rā jai ra'y rami.
- 33 Rexa 'rā mba'emo vaikue,
ha'e opa marā 'rā ndeayvu ndepy'a py.
- 34 Renhenhandu 'rā ye'ē mbyte oguataa rupi onheno oupy va'e rami,
ajukue 'y áry itui va'e rami.
- 35 Ha'e vy aipo're 'rā: “Xepetea ra'e va'eri ndaxyil!
Xenupāa ra'e teī naendui!
Raka'e 'rā tu akuera ju?
Ay'uve ju ramo 'rāe ma ha'eve”, 're 'rā.

24

- 1 Eroangeko rei eme avakue heko vai va'e ikuai,
neirū eme guive ha'e kuery re.
- 2 Mba'eta ha'e kuery ma opy'a re omoī 'rā jojukaxe aguā,
ha'e ojuru py ijayvu 'rā teko vairā re rive.
- 3 'Arandu rupi vy jajapo 'rā nhandererā,
mba'emo jaikuaa rupi nhamo'ā atā 'rā.
- 4 Jaiko kuaa vy 'rāe opy ja'o'i ha'e javi rupi nhamonyē
opa mba'e porā nhandembovy'arā.
- 5 Imbaraete va'e gui hi'arandu va'e ipo'akave,
hexai rei va'e gui oiko kuaa va'e mba'emo ojapo kuaave 'rā.
- 6 Mba'eta jaikuaa pota vy 'rāe joe nhapu'ā kuaa,
nhanemongetaarā heta ikuai ramo nhandepo'aka 'rā.
- 7 Hi'arandu e'ŷ va'e pe haxy ete 'rā 'arandu oikuaa aguā,
omboayvua py nombovai kuaai 'rā guive.
- 8 Teko vairā re rive onhembopy'a va'e pe ma
“Nhombo'e vaikue va'e” 'ea 'rā.
- 9 Hi'arandu e'ŷa rupi onhembopy'aa ma jeyavya meme,
jojojai rei va'e re avakue nda'ija'ei 'rā.
- 10 Rejexavaia ára py nekangy ri vy ma
nembaraetea ruxā'i ae.
- 11 Peepy pota ke omano aguā katy heraa va'e kuery,
peraa jepe ojukaa aguā katy ho'a-o'a jogueravy va'e.
- 12 Xapy'a rei aipopeje 'rā: “Ndooroikuaai va'ekue rima”,
teī nhandepy'a ha'e javi Rexaa ndoexai 'rā ri ty'y?
Nhandereko Kuaa potaa ndoikuaai 'rā ri ty'y?
Ha'e nombopagai 'rā ty'y petē-teī oikoague re?*
- 13 Xera'y, he'u ke ei, mba'eta nemoexai 'rā,
hetāgue guive, mba'eta ndejurupy rupi voi he'ēmba 'rā.
- 14 Ha'e rami ae avi 'arandu voi nemoingo porā 'rā nenhe'ē py.
Ha'e va'e rejou ramo ojapo 'rā nerenonderā oī porā aguā rami,
rearō reikovya voi ndoaxa rivei 'rā.
- 15 Ndee heko vai va'e, nda'evei rema'ē mbegue aguā
heko porā va'e ro gui nemondaye vy.
Embovaipa eme ha'e kuery opytu'uaty,
- 16 mba'eta heko porā va'e ma sete-kue ho'a rire teī opu'ā ju 'rā.
Ha'e rā heko vai va'e ma jexavaia py 'rāe ho'a.
- 17 Nderovaigua ho'a ramo nda'evei revy'a rei aguā,
onhepyxanga rā nda'evei ndepy'a py rerovy'a rei aguā,
- 18 ndereko SENHOR oexa vy ndojou porāi vy

* 24:12 Mateus 16.27, Romanos 2.6

- nderovaigua gui oipe'a e'ÿ aguã opoxya.
- 19 Mba'emo vai apoa kuery káuxa eiko eme nda'evei reia rupi,
neĩ eroangeko rei eme heko vai va'e ikuaia,
- 20 mba'eta heko vai va'e renonderã ma iporã va'e'ÿ,
ha'e kuery rataendy oguepa rive 'rã.
- 21 Xera'y, eiko SENHOR ha'e huvixa kuery renonde rejererokyjea rupi.
Enhemoirũ eme opu'ã rei va'e kuery reve,
- 22 mba'eta ha'e kuery mombaarã ou xapy'a 'rã.
SENHOR ha'e huvixa gui imoingo axyarã ou va'e tu mava'e 'rã oikuaa?
- Hi'arandu va'e kuery 'arandu regua omombe'u va'ekue oĩa*
- 23 Pova'e ayvu voi 'arandu regua hi'arandu va'e kuery omombe'u va'ekue.
Renhomboyvua py nda'evei peteĩ reepyvea rupi rejoguereko aguã.
- 24 Heko vai va'e mboeko porãare re
heta va'e kuery voi ijayvu vai 'rã, amboae regua avi nda'ija'ei 'rã okuapy.
- 25 Ha'e rã heko vai va'e mbopagaare re ma ima'endu'a porã 'rã,
ha'e hexe oĩ reta 'rã imoingo porãarã.
- 26 Jójuru rayvu va'e rami avi
ayvu porã rupi nhombovaia iporã.
- 27 Enhea'ã oka rupi mba'emo rejapo aguã,
ereko katupa nemba'etyrã,
ha'e gui mae ma ejapo nderorã.
- 28 Ndero katy'igua re ndeayvu rive eme mba'e py e'ÿ,
embotavy eme guive ndeayvua py.
- 29 Aipo're eme: "Ha'e va'e xere ojapo vaiague rekovia hexe ju 'rã xee ajapo ha'ekue rami.
Peteĩ-teĩ pe amboekovia 'rã ojapo vaiague re", 're eme.
- 30 Xee aaxa avy inhate'ÿ va'e mba'ety rupi,
ava hi'arandu e'ÿ va'e uva onhotyague rupi.
- 31 Ha'e vy aexa rã juuty anho itui,
pyno ojaol'ipa ma yvy,
ikora ita guigua voi ivaipa ma.
- 32 Ha'e nunga aexa vy aikuaa porã pota
vy ajopy xe'arandurã:
- 33 Xapy'a'i rekeve jave, xapy'a'i nderopeyi vy
repytu'ua py renhekuavã jave ma
- 34 ou xapy'a 'rã nemomboriauarã imonda va'e rami,
nembojexavaiarã ou 'rã ava guembiporu revegua rami.

25

Mba'emo re ombojoja reve nhanderekombo'ea oĩa

- 1 Po rami voi 'arandu regua ayvu Salomão omombe'u rã Judá pygua huvixa Ezequias rembiguai kuery ombopara va'ekue.
- 2 Nhanderuede gueko ndoikuaa ukapai ramo nhamboete,
ha'e rã huvixa kuery ma mba'emo re oikuaa pota porã ramo nhamboete.
- 3 Huvixa kuery py'a re oĩ va'e jaikuaa va'erã e'ÿ,
yva yvatea ha'e yvy guýry oĩ va'e rami avi.
- 4 Prata gui icy'a oĩ va'ekue oipe'aa ramo
opyta 'rã mba'emo ryrurã apoa pe.
- 5 Huvixa renonde gui heko vai va'e oipe'aa ramo
ipo'akaa oĩ atãve 'rã teko porã rupi anho.
- 6 Enhemboyvate rei eme huvixa renonde,
eĩ eme guive yvatekueve mbyte,
- 7 mba'eta huvixa renonde reĩ jave nemo'yvyi'i 'rãgue py
ha'eveve ndevy "Ejuve kyvõ katy" he'i.
- Mba'emo nderexa py rexa va'ekue
- 8 nda'evei remombe'lupa vyvoi rei aguã nemboayvua py.
Mba'eta opaa py mba'exa 'rã tu rejapo nderovaigua nemoĩ vai ramo?
- 9 Eikuaa pota ha'e nungakue re ndea katy'igua reve anho'i,
eikuaa uka eme oikuaa uka e'ÿ pyre,
- 10 nerenduare ijayvu rei e'ÿ aguã ndere,
ha'e rexĩmbaa py reĩ vai e'ÿ aguã.
- 11 Ha'eve jave ayvu nhamombe'u va'e ma
maçã ouro guigua prata py ombojeguaa rami avi.
- 12 Namixã ha'e jegua ouro ete'i gui ojapo pyre rami avi,

- hi'arandu va'e nhomongetaa ha'eve 'rã ojapyxaka porã va'e pe.
 13 Mba'emo omono'õa ára py yro'y nhanemoro'yxãmba va'e rami avi
 tembiguai ojeroviapy ombovy'a 'rã imondoukaare kuery,
 ipatõ kuery onhe'ẽ py oguerovy'a ramo.
 14 Mba'emo ome'ẽ aguã re ijayvu rive va'e ma
 arai ha'e vyvutu oky vy e'y va'e rami avi.
 15 Nhandevaia rupi e'y nhandeayvu ramo huvixa kuery ojapo 'rã jajerurea,
 nhandeayvu porã'ia ma ombovopa 'rã mba'emo kãgue voi.
 16 Ei rejou ri vy he'u vaipa eme,
 re'u vaipa vy rembojevypa e'y aguã.
 17 Tereo riae eme ndero katy'i oĩ va'ea py,
 ndejou vai vy ndereroporiatu e'y aguã.
 18 Avakue guetarã rekukue rive momba'ua ma
 nhomboguaiaty, kyxe ha'e hu'y haimbe va'e rami avi 'rã nhomomba.
 19 Jajexavaia py ojeroviapy re'y jajeroviaa ma
 nhanerai opẽ va'e py jakaru, e'y vy nhandepy vaikue'i py jaguataa rami avi.
 20 Iporiaui va'e oĩa py oporaei rive reia ma
 yro'y teĩ oao omboi va'e rami,
 e'y vy joai py vinagre oikyty va'e rami avi.
 21 Ndere ija'e e'y va'e kuery okaruxe ramo eme'ẽ ho'u va'erã,
 ijy'uvei ramo eme'ẽ oy'u aguã,
 22 mba'eta ha'e rami vy 'rã rejapo inhakã áry tapyĩ hexakã va'e ramigua oendu aguã rami,*
 ha'e rã ndevy pe ma SENHOR ome'ẽ 'rã mba'emo porã.
 23 Kuaray apu'a'ia katy gui vyvutu oky oguerua rami avi
 nhombotavya rupi ijayvu va'e nhombopoxypa 'rãe.
 24 Opy kunha ivai ja rei va'e reve nhaĩa gui
 ha'eeve 'rã oo apyte áry nhai.
 25 Tekoa mombyrya guigua ayvu porã omombe'u rã nhaendua ma
 nhandey'uvei reve yro'yxã jay'ua rami avi.
 26 Heko porã va'ekue ri heko vai va'e pe ojerereko uka va'e ma
 yvu yapo rei ha'e iky'a rei va'e rami avi.
 27 Nhande ae rive jajejou porã reia ma
 ei ja'u vaipa rã nda'eveia rami avi.
 28 Avakue ojejoko e'y va'e ma
 peteĩ tetã nda'ikoravei vy oitypa pyre rami avi ikuai.

26

- 1 Hi'arandu e'y va'e nda'eve ranhei nhamboete aguã,
 kuaray puku py yro'y apĩ ho'aa rami,
 e'y vy mba'emo nhamono'õa ára py oky riae rã nda'eveia rami avi.
 2 Mba'e py e'y joe ijayvu vaia oaxapa rive 'rã,
 guyra'i ha'e mbyju'i oveve jogueravya rami avi.
 3 Vakapi ma kavaju peguarã,
 juruxã ma mburika peguarã,
 ha'e rã yvyra rovi'i ma hi'arandu e'y va'e kupe peguarã.
 4 Hi'arandu e'y va'e embovai eme 'arandu e'yã rupi ijayvuague rami,
 ha'e va'e reko rami ndee voi reiko e'y aguã.
 5 Hi'arandu e'y va'e 'arandu e'yã rupi ijayvu rã rembovai 'rãe,
 ha'e ae oikuaapa va'e rami rive onhemoingo e'y aguã.
 6 Hi'arandu e'y va'e pe ri ayvu nhamombe'u uka vy jajexavai 'rã
 nhandepy rupi nhanhekyxĩ, e'y vy veneno jay'u rivea rami avi.
 7 Hetyma rovaikue va'e oguata aguã nda'eveia rami avi
 arandu regua ayvu rupi hi'arandu e'y va'e ijayvu aguã nda'evei.
 8 Hi'arandu e'y va'e nda'eve ranhei nhamboete aguã,
 ita hepyve va'e mba'emo vaikue reiaty py omombo va'e rami avi.
 9 Oka'u va'e opo py juu rakãgue ogueroko aguã nda'eveia rami avi
 arandu regua ayvu rupi hi'arandu e'y va'e ijayvu aguã nda'evei.
 10 Hi'arandu e'y va'e ha'e otekoavy rei va'e kuery omba'eapo aguã ojou va'e ma
 hapa va'e nhonhyvõmbaa rami avi.
 11 Hi'arandu e'y va'e ijarakuaa e'yague rami ae ikuai va'e ma
 jagua ha'e ae ombojevuyague py juu oo va'e rami avi.*
 12 Rexa ma pa peteĩ ava ha'e ae oikuaa rami rive onhemo'arandu va'e?

* 25:22 Apy ma ijayvu nhanderoavaigua kuery oxĩmbaa oendu va'e re (Romanos 12.20-21).

* 26:11 2 Pedro 2.22

- Ha'e va'e gui hi'arandu e'ÿve va'ekue oikuaave 'rã.
 13 Inhate'ÿ va'e ma aipoe'i:
 "Peteĩ guary oiko tape rupi, peteĩ guary oĩ tape'i py", he'i rive 'rã.
 14 Inhate'ÿ va'e ngupa py itui va'e ma
 okẽ oĩa re ae ojevny-jevny va'e rami.
 15 Inhate'ÿ va'e hy'a py opo'ẽ teĩ
 ndogueru potai 'rã ojuru katy.
 16 Inhate'ÿ va'e ha'e ae oikuaa rami rive
 sete avakue ombovai porã kuaa va'e gui oikuaave merami 'rã.
 17 Jagua oaxa ovy va'e nambi re omoatã va'e ma
 joe rive oikuaa pota va'e reve joo rami.
 18 Inhakã porã e'ÿ va'e jujukaxe vy
 tata ha'e hu'y omombo rive va'e rami,
 19 ha'e rami ae ava oirũ ombotavyva rive teĩ
 "Xeroryai vy rima ha'e rami ajapo", he'i va'e.
 20 Yxakã e'ÿ ramo tata ogue 'rã,
 ha'e rami ae avi ijayvu vaikue rei va'e ndoikoia py opytu'upa 'rã joguero'a rei va'e.
 21 Tapyĩgue ma tapyĩrã, ha'e yxakã ma tatarã oĩa rami avi
 ava ivai ja va'e ojapo 'rã joguero'a rei aguã rami.
 22 Ijayvu vaikue rei va'e ijayvua ma
 tembi'u hee va'e rami oguejy 'rã nhandepy'apy katy.
 23 Porayvua rupi merami ijayvu va'eri ipy'a re mba'emo vai anho oĩ va'e ma
 mba'emo ryru yapo guigua hi'áry rupi rive prata py onhovã mbyre rami avi.
 24 Porayvu vy e'ÿ ijayvu porã'i merami va'e ma
 opy'a re omoĩ 'rã nhombotavyva aguã rive.
 25 Ndereve ha'e va'e ijayvu porã'i teĩ erovia eme,
 mba'eta ipy'a re oĩ sete-kue otekoavy aguã.
 26 Ha'e va'e onhenhomi 'rã ndajoavyvai reia jaikuaa e'ÿ aguã,
 teĩ jaikuaa pavẽ nho 'rã.
 27 Yvy jo'oare ho'a 'rã ha'ekue py ae,
 ha'e ita mbojerea áry ae 'rã ojere.
 28 Apu rupi rive ijayvu va'e ombojexavai 'rã hendua kuery,
 anhetẽ rupi e'ÿ ijayvu va'e ma nhomoingo axy 'rãe.

27

- 1 Nda'vevei ko'ẽ rã guarã rerovy'a ma voi aguã,
 mba'eta ndereikuaai mba'e pa oiko 'rãa.
 2 Tove amboae kuery tandererovy'a, ndee ae e'ÿ.
 Mombyry guigua tandererovy'a, ndee ae 'rãgue py.
 3 Ita ma ipoyi va'e, ita ku'i voi voyi avi,
 ha'e rami teĩ mokoĩve gui ipoyive va'e ma hi'arandu e'ÿ va'e ipoxya rupi ijayvua.
 4 Ivai ja rei va'e nhomoingo axy 'rã, ojerovia rei va'e voi nhombojexavai 'rã,
 ha'e rã oexa'ã vaikue rei va'e ma mava'e 'rã tu ojoko kuaa?
 5 Jajoavyvua ndajaexa ukai 'rãgue py
 ha'eveve anhetẽ ete va'e rupi nhanhomongeta porãa.
 6 Nhanderayvu va'e nhandevy ijayvu ete teĩ ojapo porã 'rã,
 ha'e rã nhandere ija'e e'ÿ va'e ma nhandejuru rayvu teĩ jaikuaa 'rã nhanembotavy vy ria.
 7 Hevyatã va'e ma ei retãgue omombo rive 'rã,
 ha'e rã inhembyayi va'e pe ma iro va'e teĩ he'ẽ 'rã.
 8 Ngoo gui mombyry rupi ava oguata rei oikovy va'e ma
 guyra'i guaity gui mombyry oveve oikovy va'e rami avi.
 9 Nhaneirũ nhanemongeta porã ramo jajou porã 'rã,
 azeite ha'e heakuã porã va'e nhanembovy'aa rami avi.
 10 Nderexarai rei eme neirũ gui, neĩ nderu irũ gui,
 ha'e rã nderegua ro py ma eva'ẽ eme rejexavaia ára.
 Mba'eta ndero katy'i oĩ va'e nepytyvõve 'rã nderegua ae'i mombyry oĩ va'e gui.
 11 Xera'y, ne'arandu ke. Ha'e ramo 'rãe avy'a xepy'a py,
 xere ijayvu rei va'e kuery pe ambovai kuaa 'rã guive.
 12 Hi'arandu va'e ma mba'emo vai ou rã oexa vy onhemi 'rã,
 ha'e rã hi'arandu e'ÿ va'e ma oove tema vy oiko axyve rive 'rã.
 13 Orevea rekovia opaga aguã rami opyta va'ekue gui ijao oipe'aa 'rã,
 oexa va'ety e'ÿ rekovia onhemoingo va'ekue gui katuve ma oipe'aa 'rã.
 14 Aje'ive'i reve ngoo katy'igua pe oxarura atã va'e ma
 ijayvu vai va'e rami rive ojeapo.

- 15 Oky vaipa oiny jave otyky tema va'e ma
kunha ivai ja rei va'e reve joo rami;
- 16 ha'e va'e nanhamokyriiri kuaai 'rã yvytu nanhamombytu'u kuaaia rami,
ha'e azeite nhandepo py rive nanhanoë kuaaia rami avi.
- 17 Ferro guigua ma ferro py ae nhaĩmbe'e,
ha'e rami ae avi avakue oirũ reve nhomombaraete.
- 18 Figo rembypy re opena porã va'e pe ha'eve 'rã hi'a gui ho'u aguã,
ha'e opatõ re oikuaa pota porã va'ety ma omboetea 'rã.
- 19 Yy py nhanderova 'ã ojekuaa 'rã,
ha'e rami ae avi nhandepy'a re oĩ va'e ojekuaa 'rã nhandekuaia re.
- 20 Manoa ha'e vykyua vaikue py oĩve tema 'rã,
ha'e avakue rexa voi oexapavexe tema.
- 21 Prata nhamboyku-a py, ha'e ouro tata rupa py jaiky'a'oa rami avi,
nhande voi nhanera'angaa 'rã nhandererovy'aa rã nhaendua py.
- 22 Mba'emo ra'yĩ nhamongu'ia rami avi
hi'arandu e'ỹ va'e re rejajei teĩ,
ndajaipe'ai 'rã ijarakuaa e'ỹa.
- 23 Eikuaa pota porã ke nerymba vexa'i ikuaia re,
ha'e epena porã nerymba kuery re,
- 24 mba'eta mba'emo jareko va'e noĩ riaei 'rã,
huvixa po'akaa voi ndoiko riaei 'rã hamymino jevy-jevvy kuery peve.
- 25 Yvyty ikuai va'e gui jai rogue reru aguã rejaya rive
hokypa ju 'rã,
- 26 ha'e rive rereko 'rã vexa'i rague ndeaorã,
ha'e kavara ava gui rejou 'rã yvy repyrã.
- 27 Kavara kunha gui ndoatai 'rã kamby rey'u aguã,
ndero pygua kuery ha'e javi okaru porã aguã,
nerembiguai kunhague ikuai va'e voi.

28

Arandu regua ayvu joo ramigua e'ỹ-e'ỹ oĩa

- 1 Heko vai va'e ojava 'rã ovy oakykue monhaa e'ỹ teĩ,
ha'e rã heko porã va'e ma guaru rami 'rã ipy'a guaxu.
- 2 Yvy re ikuai va'e heko vai rei ramo huvixa kuery nhomboekovia jepi 'rã,
va'eri peteĩ hi'arandu ha'e oiko kuaa va'e oĩ vy
ojapo 'rã ikuai porã ha'e oĩ atã aguã rami.
- 3 Ava iporiaukue oirũ kuery iporiaukue'i avyky reia omomba 'rã,
oky mba'emo aju ogueroxyrypa ha'e neĩ mba'eve ndoejai va'e rami.
- 4 Lei rupi e'ỹ ikuai va'e ogueroxyrypa rei 'rã heko vai va'e reko,
ha'e rã lei rupi ete ikuai va'e ma ndojou porã 'rã.
- 5 Avakue heko vai va'e ndoikuai 'rã mba'e pa teko porã,
ha'e rã SENHOR oeka va'e ma oikuaapa 'rã.
- 6 Iporiau e'ỹ va'e teko vai rupi ikuai va'e gui
ha'eveve iporiaukue'i iky'a e'ỹa rupi ikuai va'e.
- 7 Lei rupi ta'y oiko va'e ma hi'arandu va'e,
ha'e rã opa marã rei ikuai va'e reve onhemoirũ va'e ma omoxĩmba rei 'rã ngu.
- 8 Jokorea ha'e ojou retavexea rupi mba'emo ojouve heravy va'e ma
iporiaukue'i mboaxya peguarã ae omono'õ.
- 9 Lei py oĩ va'e re ndojapyxakaxei vy oapyxa omboty va'ekue ma
mba'emo re ojerure ára teĩ ixugui ojegarua 'rã.
- 10 Tape vai rupi heko porã va'e reropĩaare kuery ma
ha'e kuery ae ho'a 'rã vykyua ojo'ogue py,
ha'e rã anhetẽ rupi ikuai va'e ma iporã va'e anho 'rã ojou.
- 11 Avakue oguerekopa va'e ha'e kuery ae oikuaa rami ojeupe "Hi'arandupa va'e", he'i 'rã,
ha'e rã iporiaukue'i hi'arandu va'e ma oikuaa pota kuaa 'rã.
- 12 Heko porã va'e ipo'aka ramo ovy'a pavẽ 'rã,
ha'e rã heko vai va'e ipo'akave ramo ma avakue onhemimba 'rã.
- 13 Ojejavvyague onhomi va'e ndoiko porã 'rã,
ha'e rã ojejavvyague omombe'u ha'e oejapa va'e ma oupity 'rã omboaxya aguã.
- 14 Ovy'a ete 'rã Nhanderuite renonde ojererokyjea rupi oĩ atã va'e,
ha'e rã inhakã ratã va'e ma ho'a 'rã teko vai py.
- 15 Heko vai va'e guetarã kuery iporiaukue'i va'e re ipo'aka va'e ma
guary okororõ, e'ỹ vy urso joguero'a va'e rami avi.
- 16 Huvixa hi'arandu e'ỹ va'e nhombojexavaive rive 'rã,

- ha'e rã akate'ȳ reia ojou vai va'e ma oikove riae 'rã.
 17 Avakue tuguy moëa rupi ikuai va'e okanhy 'rã yvykua katy oo vy.
 Mava'eve rei tojokoa eme.
 18 Anhetê rupi ikuai va'e oo jepe 'rã,
 ha'e rã teko vai rupi ikuai va'e ma ho'apa vyvoy 'rã.
 19 Ovyv karaĩ riae va'e ojou reta 'rã mbojape,
 ha'e rã ovare e'ȳ va'e kuery reve onhemoirũ va'e ma iporiaukue riae 'rã.
 20 Avakue ojeroviapy va'e omoingo porã 'rã,
 ha'e rã oguerékopa aguã re rive nda'ëveive va'e ma ndopaga e'ȳ 'rã.
 21 Peteĩ rive jayvuv ramo nda'ëvei,
 mba'eta avakue onhemboapu 'rã peteĩ juru'i mbojape re rive.
 22 Guexa py oipotapa rei va'e ma omba'e rei-reirã rakykue rupi rive 'rã onha-onha oikovy,
 va'eri ndoikuai guive imomboriarã ou oinya.
 23 Oapekũ py ijayvu porã rei rive va'e 'rãgue py
 nhomongeta porã va'e omboeteave 'rã.
 24 Nguu e'ȳ vy oxy gui imonda vy "Ajevavya e'ȳ" he'i va'e ma
 nhomombaaty irũ oiko.
 25 Oipotapa rei va'e ojapo 'rã joguero'apa rei aguã rami,
 ha'e rã SENHOR re ojerovia va'e ma oiko porã 'rã.
 26 Opy'a py ojee ae ojerovia va'e ma hi'arandu e'ȳ va'e,
 ha'e rã 'arandu rupi ikuai va'e ma oo jepe 'rã.
 27 Iporiaukue'i pe mba'emo ome'ê va'e pe ma mba'eve ndoatai 'rã,
 ha'e rã iporiaukue'i gui ojeova mo'ã va'e re ma ijayvu vaia 'rã.
 28 Heko vai va'e ipo'akave ovy ramo avakue onhemimba 'rã,
 ha'e gui heko vai va'e okanhymba ma rire heko porã va'e hetave 'rã.

29

- 1 Ava omongetaa riae teĩ inhakã ratã va'e pe ma
 ou xapy'a 'rã heityarã, oo jepe e'ȳ re.
 2 Heko porã va'e heta-etave ramo heta va'e kuery ovy'a 'rã,
 ha'e rã heko vai va'e ipo'aka ramo heta va'e kuery ndovy'ai 'rã.
 3 Ava hi'arandu va'e ombovy'a 'rã nguú,
 ha'e rã kunha itavy rei va'e re irũ va'e ma omokanhymba rive 'rã oguereko va'ekue.
 4 Huvixa heko porã va'e opena porã 'rã yvy re,
 ha'e rã imposto re anho oiko va'e ma nhomoingo axy rei 'rã.
 5 Ava ojea katy'igua oguerorya rupi rive oiko va'e ma
 nhuã omoĩ oikoaty rupi ae.
 6 Heko vai va'e ojevavya py oĩ nhuã imbo'arã,
 ha'e rã heko porã va'e ma oporai 'rã ovy'aa rupi.
 7 Heko porã va'e oikuaa pota 'rã iporiaukue'i re,
 ha'e rã heko vai va'e ma ha'e kuery re ndoikuaa potai 'rã.
 8 Avakue porojai rei va'e ojapo 'rã tetã ha'e javi rupigua joguero'a aguã rami,
 ha'e rã hi'arandu va'e ma omombytu'u 'rã ipoxy va'e.
 9 Heko vai va'e pe hi'arandu va'e ijayvu ramo
 ipoxy, e'ȳ vy jojojai reia gui opytu'u e'ȳ re ae 'rã oiko.
 10 Jouguy moëaty kuery nda'ija'ei 'rã anhetê rupi ipy'a va'e re,
 ha'e vy onhea'ã 'rã oi'pe'a aguã heko porã va'e rekove.
 11 Heko vai va'e oexa ukapa rei 'rã opoxya,
 ha'e rã hi'arandu va'e ma onhenhomi kuaa 'rã.
 12 Ayvu anhetê e'ȳ va'e re rive huvixa ojapxaka ramo
 hembiguai kuery ha'e javi heko vai 'rã.
 13 Iporiaukue'i ha'e imbojexavaiare pe joo ramigua oiko,
 mba'eta mokoĩve pe ma SENHOR oiko omoexakã va'e.
 14 Iporiaukue'i re huvixa ha'ëvea rami oikuaa pota va'e
 ojapo opo'akaa oĩ atã aguã raka'e rã peve guarã.
 15 Yvyra rovi'i py 'rã nhanhomo'arandu, oikuaa aguã,
 ha'e rã kyri'gue ha'e kuery ae oikuaa rami rive ikuai vy omoiximba rei 'rã oxy kuery.
 16 Heko vai va'e hetave ovy ramo teko vai voi hetave 'rã ovy,
 va'eri ha'e kuery okanhymba rã heko porã va'e kuery oexa 'rã.
 17 Emo'arandu ke ndera'y kuery, ha'e ramo nembovy'a 'rã,
 ojapo 'rã nenhe'ê py revy'a aguã rami.
 18 Profeta ayvu nonhendui rã heta va'e kuery opa marã rei 'rã ikuai,
 ha'e rã lei rupi ikuai va'e ma ovy'a 'rã.
 19 Tembiguai ma nomo'aranduai 'rã ayvu py rive,

- oendu kuaa rei teĩ nanhonhe'ẽ rendui 'rã.
 20 Rexa ma pa peteĩ ava oikuaa pota e'ỹ re ijayvu va'e?
 Ha'e va'e gui hi'arandu e'ỹve va'ekue hi'aranduve 'rã.
 21 Nerembiguaĩ kuery kyri'i guive rerory rive rire
 raka'eve rã onhemoingoxe 'rã ndera'y ae'i rami.
 22 Ivai ja rei va'e ojapo 'rã joguero'apa rei aguã rami,
 ojerovia rei va'e joapo 'rã otekoavyve aguã rami.
 23 Onhemboyvate va'e omo'yvyĩ'ave 'rã,
 ha'e rã onhe'ẽ py onhemo'yvyĩ'i va'ekue ma omboeteave 'rã.
 24 Imonda va'e re onhemoirũ va'e ma onhe'ẽ re ae nda'ija'ei,
 ayvu poyi oendu teĩ mba'eve py nonhemombe'ui 'rã.
 25 Avakue gui okyjea rupi rive ikuai va'e ojejopy uka 'rã nhuã py,
 ha'e rã SENHOR re ojerovia va'e ma oĩ atã 'rã.
 26 Heta 'rã ikuai huvixa ojou porãa aguã rive onhea'ã va'e,
 ha'e rã ava mboeko porãarã ma SENHOR gui ae ou.
 27 Heko porã va'e pe rã heko vai va'e ma ojeguarupy,
 ha'e rã heko vai va'e ma ojeguaru 'rã heko porãa rupi oiko va'e gui.

30

Agur ayvu oĩa

- 1 Massá pygua Jaque ra'y Agur ijayvuague oĩa:
 Amongue aipoe'i: “Xeruete, anhea'ã riae ete ma.
 Anhea'ã riae ete ma, Xeruete.
 Ha'e rami vy xekane'õ ma.
 2 Mba'eta xee ma ava rami e'ỹ aikuua axy raxa,
 neĩ ava 'arandua xee ndarekoi,
 3 ndaikuaai 'arandu,
 neĩ lky'a e'ỹ va'e guigua voi ndaikuaai va'e.
 4 Mava'e tu yva re oo, ha'e gui ogejy ju?
 Mava'e tu opo py ojopy kuaa ta yvytu?
 Mava'e tu yy ojokua 'rã oao apy py?
 Mava'e tu onhono raka'e vvy ha'e javi, ijapy peve?
 Mba'eta tu hery, ha'e ta'y rery?
 Ndee nda'u nderekuaai ri?” he'i 'rã.
 5 Nhanderuete ayvu ma iky'a e'ỹ va'e meme,
 hexe ojerovia va'e kuery pe mba'emo vai jokoa oiko.
 6 Emoive eme ijayvuague ramigua,
 ndevy ijayvu atã e'ỹ aguã, ha'e ijapu va'e reikoa oikuaa e'ỹ aguã.
 7 Mokoĩ regua re ajerure ndevy,
 eme'ẽ e'ỹ eme, aikove teria ja.
 8 Eipe'a ke xegui anhetẽ rupi e'ỹ aikoa ha'e xeapu reixea.
 Eme'ẽ eme xeporiaukue aguã, neĩ arekopa aguã.
 Eme'ẽ tembi'u aikotevẽ nhavõ,
 9 xapy'a rei arekopa ma rire ndegui xerexarai vy
 “Mava'e tu SENHOR?” ha'e e'ỹ aguã.
 Ha'e rami e'ỹ vy xeporiaukue'i vy xemonda aikovya rupi
 Nhanderuete rery iky'a va'ea rami aikuua uka e'ỹ aguã.
 10 Tembiguaĩ re ndeayvu rei eme ipatõ renonde,
 ha'e va'e ju ndere ijayvu poyi e'ỹ aguã, ha'e repaga aguã rami reiko e'ỹ aguã.
 11 Ikuai nguu kuery re ijayvu vai va'e,
 ha'e oxy voi ndogueroayvu porã va'e.
 12 Ikuai ha'e kuery ae ojeupe ae “Ojejavy va'e'ỹ” he'i va'eri
 peteĩgueve ma voi gueko vaia gui ndojeky'a'o ukai.
 13 Ikuai ojejou porã rei va'e,
 onhemboyvate rei va'e ha'e kuery ae oikuaa rami, ha'e yvate rupi rei oma'ẽ va'e.
 14 Ikuai kyxe guaxu rami haĩ va'e,
 kyxe rami haimbe va'e oguereko
 vvy gui omomba aguã iporiaukue'i,
 ha'e oipotapa rei va'e kuery, avakue mbyte gui.
 15 Tuguy pytea ma oguereko mokoĩ guajy,
 ha'e va'e ma “Eme'ẽ, eme'ẽ”, he'i va'e.
 Ha'e mboapy oiko hev yatã kuaa e'ỹ va'e,
 tá, irundy ikuai “Ha'eve mal” nde'i kuaai va'e.
 16 Ha'e va'e ma yvyra rupa,

- kunha imemby e'ŷ va'e ae,
 vyv pirukue yy noia,
 ha'e tata voi "Ha'eve ma" nde'i va'e.
- ¹⁷ Nguu ojojai rei va'e,
 ha'e oxy nonhe'ẽ rendui va'e rexa ma
 xapirẽ yakã yvyrýrgua omondoropa 'rã,
 ha'e taguato ra'y kuery ho'upa 'rã.
- ¹⁸ Mboapy nunga oiko xevy iporã ete va'e,
 tá, irundy ikuai aikuaa e'ŷ va'e:
- ¹⁹ ha'e va'e ma taguato yvate rupi oveve oikovy va'e,
 mboi ita áry otyryry ovy va'e,
 kanoã guaxu ye'ẽ mbyte rupi oaxa ovy va'e,
 ha'e avakue kunhataigue reve joayvua.
- ²⁰ Po rami ma kunha itavy rei va'e reko.
 Okaru ha'e ojuru oiky'a'opa ma vy
 "Mba'eve py ndatekoavyi", he'i 'rã.*
- ²¹ Mboapy oiko vyv yta mborryriarã,
 tá, irundy jaexa vy jaropo'aka va'erã e'ŷ:
- ²² ha'e va'e ma tembiguai huvixarã oixe va'e,
 hi'arandu e'ŷa rupi tembi'u re hevayatã oikovy va'e,
- ²³ kunha omenda va'eri oayvupy e'ŷ,
 ha'e gui tembiguai kunha herekoa rekovia ha'e ju onhemoingo va'e.
- ²⁴ Irundy regua ikuai vyv re kyri'i va'eri
 hi'arandu va'e kuery gui hi'aranduve va'e:
- ²⁵ ha'e va'e ma tay'i, ha'e kuery ma imbaraeete va'e'ŷ va'eri
 kuaray aku py guembi'urã omoĩ porã va'e;
- ²⁶ ha'e anguja guaxu ipo'aka va'e'ŷ,
 ha'e rami teĩ ita pa'ũ re ae 'rã hoo;
- ²⁷ tuku karu ma huvixa va'e'ŷ va'eri
 oguataa rupi hyxy porã'i 'rã jogueravy;
- ²⁸ ha'e gui ambere'i ma nhandepo py jajopy rive'i va'erã,
 teĩ huvixa ro py ae oiko va'e.
- ²⁹ Mboapy ikuai jaexa rã ojejou porã reia rupi oguata va'e,
 tá, irundy onhemboyvate reia rupi ikuai va'e:
- ³⁰ ha'e va'e ma guary mymba kuery pavẽ gui imbaraeete va'e,
 ha'e neĩ avave gui guakykue katy ojevy va'erã e'ŷ;
- ³¹ ha'e uru ava opexo omopu'ã rei reve oguata va'e,
 ha'e kavara ava,
 ha'e gui huvixave ma hexe nhapu'ã aguã voi nda'evei va'e.
- ³² Ne'arandua rupi e'ŷ renhemboyvate ri vy,
 e'ŷ vy ndepy'a re mba'emo vairã remoĩ ri vy
 ejoko ndejuru ndepo py.
- ³³ Mba'eta kamby nhamomy-momyĩ ramo manteiga ojeapoa rami,
 ha'e oxĩmby rã huguy oẽa rami avi,
 ipoxy aguã rami joapo ramo joguero'apa rei 'rã.

31

Huvixave Lemuel ixy omongetaague

- ¹ Pova'e ayvu ma Massã pygua huvixave Lemuel ixy ombo'e vy ijayvuague regua.
- ² Xepi'a, mba'e pa aipoa'e 'rã ndevy, xepi'a xeryepy pyguare?
 Mba'e pa ndevy aipoa'e 'rã, xepi'a anhemboayvu ma voi va'ekue?
- ³ Emboaxa rive eme nembaraetea kunhague mboae káuxa,
 emboaxa eme reikoa huvixave reitya kuery pe.
- ⁴ Lemuel, nda'evei huvixave ha'e rami oiko aguã,
 nda'evei huvixave vinho oy'u oikovy aguã,
 neĩ iro va'e re rive yvatekueve ikuai aguã,
- ⁵ rey'ua rupi rive lei gui nderexarai vy
 ojexavai rei'i va'e repya gui rejepe'a e'ŷ aguã.
- ⁶ Iro va'e ma omano rai'i va'e pe anho 'rã nhame'ẽ,
 ha'e vinho ma ipy'a raxy va'e kuery pegua anho,
- ⁷ ha'e kuery oy'u vy hexaraipa aguã iporiau reia re,
 ojexavai reia re riaa ima'endu'a e'ŷ aguã.

* 30:20 Apy ma ijayvu itavy reia re.

- ⁸ Ndeayvu ke ijayvu e'ŷ va'e repya rupi,
openamby e'ŷ ikuai va'e ha'e javi repy aguã.
- ⁹ Ha'evea rami ke ndeayvu renhomboayvua py,
reikuaa pota porã aguã iporiaukue'i ha'e oipotapa rei'i va'e pytyvõa rupi.
- Kunhague hi'arandu va'e oguerovy'aa*
- ¹⁰ Mava'e nda'u ojou kuaa 'rã kunha hi'arandu va'e?
Ha'e ramigua ma ita iporãve va'e gui voi ovareve va'e.
- ¹¹ Ha'e va'e re ime ojerovia 'rã okuraxõ py,
ixupe ndoatai 'rã mba'emo repyrã.
- ¹² Ome pe ojapo vai rei 'rãgue py ojapo porã 'rã,
ára nhavõ oikovea pukukue re.
- ¹³ Ogueru 'rã vexa'i rague ha'e nhimbo,
ha'e gui ovy'aa rupi 'rã omba'eapo opo py.
- ¹⁴ Kanoã guaxu mba'emo rerua rami avi
mombry gui 'rã kunha va'e ogueru tembi'u.
- ¹⁵ Pytũ rei teri reve opu'ã 'rã
omongaru aguã ngoo pygua kuery,
ha'e guembiguai kuery kunhague pe mba'emo ojapo uka 'rã.
- ¹⁶ Mba'etyrã re oikuaa pota porã ma vy ojogua 'rã,
uva renhoĩ onhotý 'rã omba'eapogague repykie re ojogua va'ekue.
- ¹⁷ Kyre'ŷ py onhemonde vy
omombaraete 'rã ojyva omba'eapo aguã.
- ¹⁸ Mba'emo repyrã ojouxu ramo
pyávy teĩ hataendy ndoguei.
- ¹⁹ Okuave'ẽ 'rã nhimbo onhemama va'e re,
opo rovai py hi'y re ojopy reve.
- ²⁰ Opo oipe'a 'rã ojexavai va'e
ha'e oipota va'e kuery oipytyvõ aguã.
- ²¹ Ha'e gui ngoo py ikuai va'e re oma'ẽ vy ndoguerokyjei 'rã yro'y vaipa teĩ,
ao raku py peteĩ-teĩ onhemonde ramo.
- ²² Kunha va'e ojapo avi 'rã onheovã aguã,
ha'e onhemonde 'rã ao porã púrpura guigua py anho.
- ²³ Ime ma huvixa kuery omboete pavẽ 'rã,
oyvy re ikuai va'e mongetaa kuery reve uguapy oiny ramo.
- ²⁴ Ta'xy ma nhimbo porãgue gui ojapo 'rã aorã, ovende 'rã guive,
ku'axã ma mba'emo vendea kuery peguarã voi.
- ²⁵ Ojee omoĩ va'e ma ombaraeterã ha'e omboetepy oiko aguã.
Ha'e rami vy ko'ẽ rã guarã re ma ndojapura rei 'rã.
- ²⁶ 'Arandu rupi 'rã ijayvu,
ha'e joayvua rupi nhombo'e kuaa 'rã.
- ²⁷ Opeña porã 'rã ngoo pygua kuery re,
ha'e inhate'ŷ reiague re e'ŷ 'rã omongaru.
- ²⁸ Ha'e ramo imemby kuery opu'ãmba vy oxy pe "Ovy'a ete va'e" he'i 'rã okuapy.
Ime voi oguerovy'a vy aipoe'i 'rã:
- ²⁹ "Kunhague hi'arandu va'e heta ikuai
teĩ ndee ma pavẽ gui ne'aranduve va'e", he'i 'rã.
- ³⁰ Onhemoporãa re ikuai va'e ojekore 'rã, onhemoatyroã voi opa rive 'rã.
Ha'e rã kunhague SENHOR renonde ojererokyjea rupi ikuai va'e ma oguerovy'aa riae 'rã.
- ³¹ Nhanema'endu'a porã 'rã opo py ojapo porãa re,
pavẽ oendua py jarovy'a 'rã oiko porãa.

Eclesiastes ayvu mombe'ua ombopara va'ekue Eclesiastes ayvu mombe'ua ombopara va'ekue

Kova'e kuaxia ma ha'eve jaikuaa porãve aguã Jesus aipoe'iague: "Mba'e 'rã tu avakue ojou, vyv regua ha'e javi ojou va'eri guekove ae omokanhy vy?" he'iague (Marcos 8.36). Mba'eta kova'e kuaxia apoare ma opa marãgua ojeupe guarã ojou teĩ ha'e nunga ha'e javi pe "Opa rive va'erã meme" he'i.

Ojeupe ae "Ayvu mombe'ua" he'i. "Ha'e vy ayvu mombe'ua aipoe'i: 'Opa va'erã rive, opa mba'e ikuai va'e opa rive va'erã meme', he'i" (1.2). Aipoe'i avi: "Xejeupe ajapo vyotyty ha'e vyvraty, ha'e py vyvra hi'a va'erã ha'e javi regua anhotý. Xejeupe yy ajoko vy vyvraty amoaký, vyvra ikuai va'e iporã aguã. Heta guive ajogua xerembiguairã avakue ha'e kunhague. Xero py ae itui'i avi xerembiguairã. Areko avi va'ekue vaka ha'e vexe'i, xee aiko e'y mbove Jerusalém tetã py ikuai va'ekue gui hetave areko. Xejeupe ajou reta avi prata ha'e ouro, mba'emo hepyve va'e ajogua avi amboae vyv re huvixave kuery opena va'e gui. ... Ha'e gui tembiapo xepo py ajapo va'ekue ha'e javi re aikuaa pota, xekane'õ peve amba'eapoa ha'e javi re guive. Ha'e rã ha'e nunga ha'e javi ma opa rive va'erã meme ae ra'e, vyvutu jere'i rakykue amongue onha rivea rami. Ha'e nunga ha'e javi py mba'eve rei ndajou iporã va'e kuaray guýry", he'i (2.5-8a, 11).

Opa py ayvu mombe'ua aipoe'i: "Opa mba'e rendu va'ekue gui ma yvateve va'e po rami: Nhanderuede renonde eiko rejererokya rupi, ha'e emoĩ porã ojapo uka va'ekue, mba'eta ha'e va'e ma avakue pavẽ ojapo aguã va'e. Mba'eta Nhanderuede oikuaa pota 'rã jaikoa ha'e javi re, ojekuaa voi e'y va'ekue guive, iporã va'e, ha'e iporã e'y va'e teĩ" (12.13-14).

"Opa rive va'erã meme", he'iague

¹ Kova'e ma ayvu mombe'ua ijayvuague. Ha'e va'e ma Davi ra'y oiko Jerusalém pygua huvixave.*

² Ha'e vy ayvu mombe'ua aipoe'i: "Opa va'erã rive, opa mba'e ikuai va'e opa rive va'erã meme.

³ Mba'e nda'u avakue ojou 'rã kuaray guýry rupi omba'eapoague ha'e javi rekovia?" he'i.

Mba'emo ikuai va'e ha'ekue rami ae ju ikuai re ijayvuague

⁴ Peteĩ javegua kuery oaxa 'rã, ha'e gui amboae javegua ju 'rã ikuai. Ha'e rã vyv ma itui riae 'rã.

⁵ Kuaray ma oẽ 'rã, ha'e gui oiko ju 'rã. Ha'e gui oĩague katy ju 'rã oo, oẽ ju aguã.

⁶ Vyvutu ma oo 'rã kuaray puku-a katy, ha'e gui ojere vy kuaray ijapu'a'ia katy ju 'rã oipeju. Ojeapa 'rã ovy, ha'e gui ojevvy ju 'rã ojeapaaty rupi.

⁷ Yakã ikuai va'e ma ye'ẽ katy oxyry va'e meme, ha'e rami teĩ ye'ẽ ndatyguaxui 'rã. Yakã oxyry oinyague katy ae ju 'rã oxyry oiny.

⁸ Opa mba'e ma nhanemongueraiarã ae ikuai, avave rei nomombe'u porã kuaai 'rã, guexa py oma'ẽ ha'e oapyxa py ojapyxakave riae tema teĩ.

⁹ Mba'emo oiko va'ekue ramigua ae ju 'rã oiko. Mba'emo ojapo pyre ae ju 'rã ojapoa. Ha'e rami vyv ipyau ete va'e ndoikoi 'rã kuaray guýry rupi.

¹⁰ Oiko ri nda'u mba'emo jaexa vy "Ma'ẽ, kova'e ma ipyau va'e", ja'e aguã? Any! Jaiko e'y mbove ára oiko jave py ma voi oiko va'ekue ae.

¹¹ Avave rei na'ima'endu'ai 'rã mba'emo ymave rupi oiko va'ekue re. Ha'e rami ae mba'emo oiko va'erã re voi ha'e rire ikuai va'erã kuery na'ima'endu'ai avi 'rã.

Ayvu mombe'ua gueko re ae ijayvuague

¹² Xee ayvu mombe'ua ma Israel pygua huvixave aĩ Jerusalém py.

¹³ Ha'e rami vyv xepy'a re amoĩ xe'arandua rupi aikuaa pota aguã mba'emo yva guýry rupi ikuai va'e ha'e javi re. Ha'e va'e tembiapo poyi ma avakue ra'y kuery re Nhanderuede omoĩ imo'aranduarã.

¹⁴ Ha'e rami vyv aikuaa pota tembiapo kuaray guýry rupi ojapoa va'e ha'e javi re. Ha'e nunga ha'e javi ma opa rive va'erã meme, vyvutu jere'i rakykue amongue onha rivea rami.

¹⁵ Ikarẽ va'e ma nomb'o'yviavei 'rã, ha'e mba'emo noĩ va'e ma ndoipapaai 'rã guive.

¹⁶ Xejeupe ae aipoa'e: "Ma'ẽ, xee ma xeyvate, ha'e vyv xee aiko e'y mbove Jerusalém py ikuai va'ekue ha'e javi gui xe'aranduve va'e", ha'e va'ekue, mba'eta anhetẽ ete aikoa ha'e javi rupi xekuraxõ py xe'arandu ha'e mba'emo aikuaa potaa rupi aiko va'e.

¹⁷ Ha'e rami vyv xepy'a re amoĩ aikuaa aguã mba'e pa 'arandu ha'e 'arandu e'yã ovare e'y va'e. Ha'e rami teĩ aikuaa ha'e rami aguã voi vyvutu jere'i rakykue onha rive va'e rami aikoa.

¹⁸ Mba'eta 'arandua retaa py ma heta oĩ avi kueraia. Mba'emo oikuaapave va'ea py ma heta oĩ avi 'rã poriaua.

2

Mba'emo oguereko va'e opa rive aguã re ijayvuague

¹ Aipoa'e xejeupe ae: "Aa ta! Xejee ae aikuaa pota 'rã vy'aa py. Taendu ha'vy vy'aa", ha'e va'ekue ri ha'e va'e voi opa rive va'erã.

² Mba'eta xerorya pe ae "Ovare e'y va'e" ha'e. Avy'aa ma mba'erã tu ovare?

* 1:1 Huvixa Davi ra'y Salomão ma nguũ rekovia oĩ raka'e Jerusalém pygua huvixa. Ha'e va'e ma pavẽ gui hi'aranduve va'e, oguerekopa rei va'e guive (1 Reis 4.29-34, 10.14-29).

³ Ha'e gui xepy'a re amoí vinho ay'ua rupi aiko aguã, teĩ xe'arandua py ajejoko teri reve. Ha'e rami vy anhemboaxa ovare e'ya rupi aiko aguã, aikuaa peve avakue ra'y kuery yva guýry rupi ikuai va'e o'ára mboapy'i oĩ teri jave py ojapo aguã ha'eveve va'e.

⁴ Ajapo avi tembiapo tuvixa va'e. Xejeupe guarã ajapo reta oo, ha'e anhotý uva tyrã.

⁵ Xejeupe ajapo yvotyty ha'e yvyraty, ha'e py vyvra hi'a va'erã ha'e javi regua anhotý.

⁶ Xejeupe vy ajoko vy yvyraty amoaký, vyvra ikuai va'e iporã aguã.

⁷ Heta guive ajogua xerembiguirã avakue ha'e kunhague. Xero py ae itui'i avi xerembiguirã. Areko avi va'ekue vaka ha'e vexa'i, xee aiko e'y mbove Jerusalém tetã py ikuai va'ekue gui hetave areko.

⁸ Xejeupe ajou reta avi prata ha'e ouro, mba'emo hepyve va'e ajogua avi amboae vvy re huvixave kuery opena va'e gui. Xejeupe ajou avakue ra'y kuery ojou porãve va'e: oporaei va'erã avakue ha'e kunhague, ha'e kunhague oata aguã rami e'y guive.*

⁹ Ha'e gui xeyvate ha'e arekopave xee aiko e'y mbove Jerusalém py ikuai va'ekue ha'e javi gui. Xere oĩ tema avi xe'arandua.

¹⁰ Mba'emo aexaxeve va'e rei tema xerexa pe ndaexa uka e'yi, ha'e peteive py nambovy'a e'yi xekuraxõ, mba'eta ha'e nunga py amba'epoague rekovia ajou. Xee arovy'a va'ekue mba'emo ajapo va'e ha'e javi.

¹¹ Ha'e gui tembiapo xepo py ajapo va'ekue ha'e javi re aikuaa pota, xekane'õ peve amba'epoa ha'e javi re guive. Ha'e rã ha'e nunga ha'e javi ma opa rive va'erã meme ae ra'e, vvytu jere'i rakykue amongue onha rivea rami. Ha'e nunga ha'e javi py mba'eve rei ndajoui iporã va'e kuaray guýry.

Hi'arandua voi opa rive 'rãa re ijayvuague

¹² Ha'e gui aikuaa pota 'arandua re, ha'e gui akã porã e'ya ha'e 'arandua e'y reia re guive. Mba'eta huvixave rekovia ju ava mboae oĩ va'e, mba'e tu ojapove 'rã? Mba'eta amboae kuery ojapo va'ekue ramigua ae ju 'rã ojapo.

¹³ Ha'e gui aikuaa rã 'arandua e'y reia gui 'arandua ha'eveve, pytý va'e gui hendy va'e ha'eveve rami.

¹⁴ Hi'arandua va'e ma oakã re guexa oguereko 'rã oexa aguã, ha'e rã hi'arandua e'y rei va'e ma pytúa rupi 'rã oiko. Ha'e rami teĩ aikuaa avi mokoive pe joo ramigua oiko 'rãa.

¹⁵ Ha'e nunga rupi xejeupe ae aipoa'e: "Hi'arandua e'y va'e pe oiko va'e ramigua ma xevy pe voi oiko avi 'rã. Ha'e rami rã mba'erã tu xee aekave ta xe'arandurã?" ha'e. Xejeupe ae aipoa'e avi: "Xe'arandua voi opa rive va'erã", ha'e.

¹⁶ Mba'eta hi'arandua va'e re ha'e hi'arandua e'y va'e re teĩ na'ima'endu'aa riaei 'rã. Mba'eta are'i e'y re opa mba'e re hexaraia 'rã. Mba'eta hi'arandua e'y va'e omano 'rã, ha'e rami ae avi hi'arandua va'e voi omano 'rã.

¹⁷ Ha'e nunga rupi xekuerai xerekove re, mba'eta xee ndajou porãvei ma kuaray guýry rupi amba'epoa. Anhetê ete, ha'e nunga ha'e javi ma opa rive va'erã meme, vvytu jere'i rakykue amongue onha rivea rami.

Omba'epoa regua voi opa rive aguã re ijayvuague

¹⁸ Xekuerai avi kuaray guýry rupi amba'epo poyia ha'e javi re, mba'eta hekovia repykue aejapa 'rã aiko rire ikuai va'erã kuery pe.

¹⁹ Ha'e mava'e tu oikuaa ha'e nunga jopyarã hi'arandua va'e, e'y vy hi'arandua e'y va'e oiko 'rãa? Ha'e rami teĩ ma ha'e va'e ae 'rã ojopypa kuaray guýry xe'arandua rupi amba'epoague repy. Ha'e va'e voi opa rive va'erã.

²⁰ Ha'e rami vy amboae rami aikuaa vy xekuraxõ py xekuerai etea aendu kuaray guýry rupi amba'epo poyia ha'e javi re.

²¹ Mba'eta ikuai avakue o'arandua rupi omba'epo va'e, oikuaa ha'e ikyre'ya rupi. Ha'e rami teĩ ha'e kuery omba'epoague repy oeja 'rã ha'e va'e re nomba'epoi va'ekue peguarã. Ha'e va'e voi opa rive va'erã, ha'e nda'evei ete va'e.

²² Ha'e gui mba'e 'rã tu avakue ojou kuaray guýry rupi opy'a py guive omba'epo poyiague ha'e javi re?

²³ Mba'eta ára nhavõ haxy oendu, ha'e omba'epoa re ikuera 'rã. Pyávy teĩ ipy'a ndopytu'ui ae. Omba'epoa regua voi opa rive va'erã.

²⁴ Avakue pe ha'eveve va'e ma okaru, oy'u ha'e omba'epoa oguero'vy'a aguã. Mba'eta ha'e rami aguã aikuaa Nhanderuete po gui meme oua.

²⁵ Mba'eta ixugui e'y vy mba'exa 'rã tu jakaru, e'y vy javy'a?

²⁶ Mba'eta avakue Nhanderuete mbovy'aa va'e pe ha'e ome'ẽ 'rã hi'arandurã, oikuaa ha'e ovy'a aguã. Ha'e rã ojevavy va'e pe ma ome'ẽ 'rã omba'epo aguã, mba'emo omono'õ ha'e omboaty aguã Nhanderuete mbovy'aa kuery pe ju ome'ẽ va'erã. Ha'e va'e voi opa rive va'erã, vvytu jere'i rakykue amongue onha rivea rami.

3

Opa mba'e oiko aguã ára re ijayvuague

¹ Opa mba'e yva guýry ikuai va'e pe oiko aguã ára oĩ.

² Ovaẽ 'rã nhandetui' aguã ha'e nhamano aguã ára. Ovaẽ 'rã nhama'etý aguã ha'e nhandotý va'ekue nhamondoropa ju aguã ára.

³ Oĩ jujukaa aguã ha'e nhomongueraa aguã ára. Oĩ mba'emo nhambovaipa aguã ha'e jajapo aguã ára.

⁴ Ovaẽ 'rã rajae' o aguã ha'e japuka aguã ára. Ovaẽ 'rã nhandepy'a vai aguã ha'e gui jajero'ky aguã ára.

* 2:8 Huvixa Salomão ma heta oguereko raka'e gua'xyx ha'e gua'xyx jevy kuery. Ha'e va'e kuery ta'angaa re ojerovia va'e káuxa Salomão ojepe'la Nhanderuete pe oikoa gui (1 Reis 11.1-8).

⁵ Oiko 'rā ita nhamoāi aguā ha'e nhamboaty aguā ára. Ovaē 'rā nhandhokuavā aguā ha'e nhandhokuavā ve'ỹ aguā ára.

⁶ Oĩ mba'emo jaeka aguā ha'e nhamokanhy aguā ára. Oĩ mba'emo nhamoĩ porā aguā ha'e nhamombo aguā ára.

⁷ Oĩ mba'emo nhamondoro aguā ha'e nhambovyvy aguā ára. Oĩ nhakyrirĩ aguā ha'e nhandeayvu aguā ára.

⁸ Oĩ jajoayvu aguā ha'e ndajajoayvuvei aguā ára. Oĩ joe nhapu'ā aguā ha'e nhandekuai porāa'ĩ aguā ára.

Ára oa'angaague avakue ndoikuaaia re ijayvuague

⁹ Mba'e tu omba'eapo va'e ojou 'rā omba'eapo poyi oikovyague rekovia?

¹⁰ Mba'eta xee aexa rā avakue ra'y kuery omba'eapo aguā ma imo 'aranduarā Nhanderuete ombou va'ekue.

¹¹ Opa mba'e Nhanderuete ojapo hi'ára py iporā aguā rami. Avakue py'a re omoĩ avi opa e'ỹ va'erā nunga, teĩ ha'e kuery ndoikuaapai 'rā mba'emo Nhanderuete jypy guive opaa peve ojapo va'e ha'e javi.

¹² Aikuaa avakue pe ha'eveve va'e ovy'a ha'e ikuai porā aguā.

¹³ Avakue pe Nhanderuete ome'ē avi okaru, oy'u ha'e omba'eapoague rekovia oguerovy'a aguā.

¹⁴ Xee aikuaa rami Nhanderuete ojapo va'e ha'e javi ndopai va'erā meme. Ha'e va'e re nda'evei mba'eve omoĩave aguā neĩ oi'pe'aa aguā guive. Ha'e rami Nhanderuete ojapo, henonde avakue ojererokyje aguā.

¹⁵ Mba'emo aỹ oĩ va'e ramigua oiko va'ekue ae ma, ha'e oiko va'erā ramigua voi oiko ae ma. Mba'eta Nhanderuete ojapo 'rā mba'emo oaxa va'ekue ramigua oiko jevy-jevy aguā rami.

Mymba rami avi avakue omano aguā re ijayvuague

¹⁶ Peteĩ mba'e ju aexa kuaray guýry. Mba'eta ha'evea rami joguerekoa aguā 'rāgue py ha'eve'ya ramigua oiko, teko porā oĩ 'rāgue py ha'eve'ya ramigua ae tema oiko.

¹⁷ Ha'e ramo aipoa'e xejeupe: "Nhanderuete ma omboayvu 'rā heko porā va'e ha'e heko vai va'e. Mba'eta oĩ ae ha'e oipota va'e ha'e javi oiko aguā ára, ha'e hembia'porā ha'e javi pe", ha'e.

¹⁸ Aipoa'eve ju xejeupe: "Nhanderuete oeko a'ā 'rā avakue ra'y kuery, ha'e kuery oikuaa okuapy aguā mymba kuery rami ikuai", ha'e.

¹⁹ Mba'eta avakue ra'y kuery re oiko va'e ramigua ae oiko avi 'rā mymba kuery re. Peteĩ regua omano rami ae avi 'rā amboae regua omano. Oikove va'e ha'e javi joo rami ipytuē 'rā. Ndoikoi avakue mymba gui oiko areve va'erā, mba'eta ha'e javi ma opa rive va'erā meme.

²⁰ Pavē rei 'rā oo peteĩ henda py anho. Yvy ku'i gui meme oiko rire vyvy ku'i ae ju 'rā opyta.

²¹ Mava'e oikuaa ta avakue ra'y kuery nhe'ē yva re oo 'rāa, ha'e rā mymba nhe'ē ma vyvy katy, vyvy re rive oo 'rāa?

²² Aikuaa rā avakue pe ha'eveve va'e ma omba'eapoa oguerovy'a aguā, mba'eta ha'e kuery peguarā oejaa. Mba'eta ha'e kuery oiko rire mava'e tu ogueru ju 'rā mba'e pa oikoa oexa aguā?

4

Jajexavai jaikovya re ijayvuague

¹ Aexa avi nhomongo axy reia kuaray guýry rupi ikuai va'e ha'e javi. Aexa oguereko axy reipy kuery rexay, avave rei nombopy'a guaxuai rā. Aexa avi joguereko axy reia kuery imbaraeteve okuapy, ha'e ikuai axy va'e pytyvōarā ndoikoi'a.

² Ha'e nunga rupi aikuaa rā okuave va'e kuery gui omano va'ekue ovy'ave va'e ikuai.

³ Ha'e gui ha'e va'e mokoĩ gui ovy'ave va'e ma ndoikoi teri va'e, mba'eta ha'e va'e ma mba'emo vai kuaray guýry rupi ojapoa rā neĩ ndoexai.

⁴ Ha'e ramo aexa avakue omba'eapoa ha'e mba'emo ojapo kuaa ha'e javi ojapo, oirũ kuery gui oguerekopavexe vy rive. Ha'e va'e voi opa rive va'erā, vyty jere'i rakykue amongue onha rivea rami.

⁵ Hi'arandu e'ỹ va'e ma onhekuavā 'rā oiny ngo'o ae ho'upa peve. Mba'eta aipoe'i:

⁶ "Xepo jovaive py amba'eapo vaipa vy vyty jere'i rakykue anha 'rāgue py ha'eveve peteĩ po renyē reve apytu'u ainy aguā", he'i.

⁷ Ha'e ramo kuaray guýry amboae nunga aikuaa avi opa rive va'erā.

⁸ Ha'e va'e ma peteĩ ava ha'e ae'i oiko va'e, ta'y va'e'ỹ neĩ heindy e'ỹ va'e. Ha'e rami teĩ omba'eapoa gui ndopytu'ui va'e, ha'e ndoexaxe ve'ỹi oguerekopaa. Ha'e rami teĩ aipo nde'i: "Mava'e pe tu xee amba'eapo aikovy? Mba'erā pa xehoe mba'emo porā arovy'a aguā guí?" nde'i. Ha'e nunga voi opa rive va'erā, tembiano nhomongueraiarā rive.

⁹ Ha'e ae'i oiko 'rāgue py ha'eveve mokoĩ joguereko, mba'eta omba'eapoa py ojouve 'rā.

¹⁰ Mba'eta xapy'a rei ho'a ramo peteĩ-teĩ omopu'ā ju 'rā oirũ. Ha'e rā ha'e ae'i oiko va'e pe nda'evei ete, mba'eta ho'a ramo ndoikoi 'rā imopu'āarā.

¹¹ Ha'e mokoĩ joyvy okea py ha'e kuery oendu 'rā haku. Ha'e rā peteĩ'ĩ oĩa py ma marā rami 'rā tu haku?

¹² Ha'e rami ae avi peteĩ'i re opu'aa vy ipo'akaa 'rā, ha'e rā mokoĩ ikuai vy ojoko 'rā. Ixā mboapy ombojoyvy pyre rā nomondoa voi 'rā.

¹³ Peteĩ kunumi poriaukue'i hi'arandu va'e ma opena porāve 'rā huvixave tuja'i hi'arandu e'ỹ va'e vy nonhemongeta ukai va'e gui.

¹⁴ Xapy'a rei kunumi va'e huvixave oĩ aguā oguenoēa 'rā nhuā gui, e'ỹ vy ha'e va'e vyvy py ae iporiaukue'i reve itui va'ekue teĩ ae ma.

¹⁵ Mba'eta aexa kuaray guýry ikuai va'e ha'e javi huvixave tuja'i rekovia kunumi oĩ va'ekuea katy anho oje'oi rā.

¹⁶ Ha'e ramo opena 'rā oikovy mbovy rei e'ŷ re. Ha'e rami teĩ ha'e va'e rire ju oĩ va'e na'ima'endu'a porāi 'rā hexe. Anhetē, ha'e nunga voi opa rive va'erā, vyvutu jere'i rakykue amongue onha rivea rami.

5

“Nda'evei jaikuaa pota porā e'ŷ re nghanhemboayvu ma voi mba'emo jajapo aguā re”, he'iaague

¹ Nhanderuete pegua oyo reike ta vy eikuaa pota porā ranhe reiko aguā re. Hi'arandu e'ŷ va'e kuery mba'emo ome'ē va'e rami rejapo vy reike 'rāgue py ha'eveve ayvu rendu aguā, mba'eta ha'e kuery ma gueko vaia re oikuaa pota e'ŷ re ome'ē mba'emo.

² Ejapura eme ndejuru py, neĩ nekuraō py ma voi Nhanderuete renonde renhemboayvu aguā. Mba'eta Nhanderuete oĩ yva re, ha'e rā ndee ma vvy py reiko. Ha'e nunga rupi mbovy'i tandeayvu.

³ Mba'eta nhamba'eapo vaipaa gui ou nhandeke raia, ha'e rami ae avi nhandeayvu retaa py ha'eve'ŷa rami 'rā nhandeayvu.

⁴ Nhanderuete pe mba'emo rejapo aguā re renhemboayvu rire ejapo voi. Mba'eta ha'e ma ndoguerovy'ai 'rā hi'arandu e'ŷ va'e. Ejapo ete ndeayvuague.

⁵ Renhemboayvuague nderejapoa gui ha'eveve 'rāgue nerenhemboayvui ma voi va'e rire.

⁶ Ndeayvuague tojapo eme rejajavy aguā rami, ha'e aipo're eme Nhanderuete ayvu mombe'ua pe: “Ha'e rami e'ŷ xeayvu ta va'ekue ri”, 're eme. Mba'erā tu ndeayvua káuxa rejapo Nhanderuete ivai aguā rami, ndepo py rejapo va'ekue oмбуeipa aguā?

⁷ Mba'e ta, nhandeke raia ha'e nhandeayvu reta reia ma opa rive va'erā. Ha'e nunga rupi Nhanderuete renonde rejererokyjea rupi eiko.

Mba'emo jareko va'e opa rive 'rāa re ijayvuague

⁸ Xapy'a rei vvy re rexa 'rā iporiaukue'i oguereko axya rei rā, ha'e ha'evea rami joguerkoa 'rāgue py imonda va'e rive oĩ rā. Ha'e ramigua rexa vy enhemondyi eme. Mba'eta joe opena va'e kuery áryve ikuai yvatekueve imbopagaarā, ha'e ha'e va'e kuery áryve amboae yvateve ete va'e ju imbopagaarā oĩ.

⁹ Ha'e rā vvy ma pavē oiporu va'erā itui. Huvixave voi okaru 'rā oikovy mba'ety gui.

¹⁰ Peráta re nda'eveive va'e ma ojouvexe tema 'rā. Mba'emo oguerekopa va'e voi ojouvexe avi 'rā. Ha'e ramigua voi opa rive va'erā.

¹¹ Omono'ō mbyre heta ramo heta avi 'rā ikuai okaru va'erā. Ha'e nunga rupi mba'e 'rā nda'u ija kuery ojou, guexa py oexa rive aguā e'ŷ vvy?

¹² Omba'eapo va'e oke porā 'rā, okaru porā e'ŷ vvy ndokaru porāi teĩ. Ha'e rā oguerekopa va'e ma mba'emo oguerekopa va'e káuxa rive ndoke porā kuaai 'rā.

¹³ Amboae nunga ju aexa kuaray guýry nda'evei ete va'e, mba'eta amongue ojouve 'rā omba'e rei-reirā ojeupe ae ojapo vai aguā rive.

¹⁴ Ha'e rami avi xapy'a rei mba'emo oiko rā ija omokanhymba ramo ta'y kuery voi mba'eve ndoguerekoi 'rā opo py.

¹⁵ Guyru'i gui mba'eve reve'ŷ oikoague rami avi, mba'eve reve'ŷ ae ju 'rā oo. Ouague rami ae ju 'rā oo, mba'eta mba'eve ndogueraai 'rā omba'eapoague gui.

¹⁶ Ha'e nunga voi nda'evei ete 'rā, mba'eta ouague rami ae ju 'rā oo. Ha'e gui mba'e 'rā tu ojou vyvutu pe rive omba'eapoague re?

¹⁷ Mba'eta ára nhavō omba'eapopa ma rire okaru 'rā pyávy, ikueraí ha'e imba'eaxy reve vvy ndovy'ai reve.

¹⁸ Ha'e gui xee aexa avi jakaru ha'e jay'u aguā ma ha'eve ha'e iporā va'e meme, ha'e kuaray guýry nhamba'eapo poyi rire nhamba'eapoague petei-teĩ jarovy'a aguā, mbovy'i ára re jaiko aguā Nhanderuete ome'ēa pukukue re. Mba'eta ha'e va'e ma nhandevygu aae.

¹⁹ Ha'e gui amongue avakue pe ma Nhanderuete ome'ē 'rā oguerekopa aguā mba'emo porā anho, ome'ē avi 'rā ha'e nunga gui okaru ha'e hekovia ojoupa aguā, omba'eapoague oguerovy'a aguā guive. Ha'e ramigua voi Nhanderuete ome'ē va'e meme.

²⁰ Ha'e va'e avakue ma ndoikuaa pota vaipai 'rā ha'e kuery ae reko re, mba'eta ipy'a re Nhanderuete omoĩ ovy'a aguā anho.

6

¹ Ha'e gui petei ju aexa kuaray guýry nda'evei ete va'e avakue áry ipoyi va'erā.

² Mba'eta amongue py avakue pe Nhanderuete ome'ē 'rā oguerekopa aguā mba'emo porā anho, ha'e omboeteepy ikuai aguā guive. Ha'e kuery pe mba'eve ndoatai 'rā opy'a py oipota va'e ha'e javi. Ha'e rami teĩ ha'e kuery pe Nhanderuete nome'ēi 'rā ha'e nunga gui okaru aguā. Ha'e rami 'rāgue py oexa va'ety e'ŷ kuery 'rā ho'u okuapy. Ha'e nunga voi opa rive va'erā, ha'e ojexavai etea.

³ Xapy'a rei amongue oguereko 'rā cem gua'y kuery, ha'e vvy heta ma'et'ŷ re 'rā oiko tuja'i ete peve. Ha'e rami teĩ xapy'a rei onhe'ē py mba'emo porā ndoguerovy'ai, neĩ nonhono porāai 'rā guive. Xee aikuaa rā ha'e va'e gui ma hyru'i gui oity pyre ovy'ave.

⁴ Mba'eta hyru'i gui oity pyre ma ou 'rā opa aguā rive, ha'e gui oo ju 'rā pytüa katy. Ha'e rami rire pytü py ma hery noenduai.

⁵ Ha'e va'e ma neĩ ndoexai 'rā kuaray, mba'eve ndoikuaai 'rā guive. Ha'e rami teĩ amboae kuery gui opytu'u porāve 'rā,

⁶ amboae kuery iporā va'e oguerovy'a e'ŷ va'e dois mil ma'et'ŷ re oiko teĩ. Mba'eta mokoíve e'ŷ 'rā teve joa katy oo?

⁷ Avakue omba'e'apo 'rā ojuru py guarā re anho teĩ noendu ve'ỹi 'rā okaruxea.

⁸ Tyrā hi'arandu va'e ma hi'arandu e'ỹ va'e gui ojouve 'rā teve? Mba'e 'rā tu iporiaukue'i ojouve amboae kuery oexaa py oiko kuaa rupi?

⁹ Mba'emo jarekopave 'rāgue py ha'eveve nhanderexa py jaexa va'e jarovy'aa. Ha'e rami e'ỹ rā opa rive va'erā jaiko, vvytu jere'i rakyue amongue onha rivea rami.

¹⁰ Mba'emo oiko va'erā rery ma oikuaa pyre ae. Oikuaa avi marā ramigua pa avakue ikuaia, ha'e imbaraeteve va'e reve joguero'a aguā nda'eveia guive.

¹¹ Anhetē heta ikuai mba'emo ndovarevei va'e. Ha'e rami teĩ mba'erā tu avakue pe ha'e nunga ha'eve?

¹² Mava'e nda'u oikuaa 'rā mba'e nunga pa avakue pe ha'eveve va'ea? Mba'eta ha'e kuery ikuaia ma kuaray'ā rami xapy'a'i 'rā oaxa, mba'emo opa rivea rami. Mava'e nda'u avakue pe omombe'u kuaa 'rā ha'e va'e rire mba'emo kuaray gu'ry oiko va'erā?

7

Arandua ha'e 'arandu e'ỹa re ijayvuague

¹ Heakuā porā va'e hepyve va'e gui ha'eveve nhandere ima'endu'a porā rā. Nhandetuiague ára gui nhamanoa ára ha'eveve avi.

² Ngarua py jaa aguā gui ha'eveve peteĩ oo py ojae'o va'e ikuaia py jaa aguā, mba'eta ha'e py jaikuaa 'rā avakue ha'e javi opa aguā. Ha'e nunga re ma nhande jaikove va'e jaikuaa pota aguā ha'eve.

³ Nhanderorya gui ha'eveve nhandeporiaua, mba'eta nhandeporiaua nhanderova py jaexa uka va'e ma ojapo porāve 'rā nhandekuraxō pe.

⁴ Hi'arandu va'e okuraxō py ima'endu'a 'rā ojae'o va'e ikuaia re, ha'e rā hi'arandu e'ỹ va'e ma okuraxō py ima'endu'a 'rā ovy'a rei va'e ikuaia re rive.

⁵ Hi'arandu e'ỹ va'e oporaia nhaendu 'rāgue py ha'eveve hi'arandu va'e nhandevy ijayvu etea nhaendu.

⁶ Hi'arandu e'ỹ va'e kuery opuka okuapya ma juu'y pirukue oja guy py hendy vy hevovoa ramigua rive. Ha'e nunga voi opa rive va'erā.

⁷ Anhetē hi'arandu va'e voi omoingo axya rā na'inhakā porāvei 'rā, ha'e ome'ēmy ojopy rā ombovaipa 'rā ikuraxō.

⁸ Mba'emo ypya gui ha'eveve 'rā opaa. Onhemboyvate va'e gui ha'eveve oarō are kuaa va'e.

⁹ Ndevai vvyoi eme, mba'eta hi'arandu e'ỹ va'e py'a re ae 'rā oĩ ivai aguā.

¹⁰ Aipo're eme: "Mba'exa tu a'ỹgua ára gui yma guare ha'eveve raka'e?" 're eme, mba'eta ha'e rami oporandu va'e ma nai'arandui.

¹¹ Mba'emo ojou va'e pe ma 'arandua ha'eve. Ojapo porā avi 'rā kuaray rexaa kuery pavē pe.

¹² Peráta rami avi 'arandua nhanderepy 'rā mba'emo vai gui. Hi'arandu va'e pe 'arandu ome'ē avi 'rā tekove.

¹³ Eikuaa pota ke Nhanderuetete rembiapokue re, mba'eta mava'e tu ombo'yvi kuaa 'rā mba'emo ha'e omokarē va'ekue?

¹⁴ Mba'emo rejoupaa ára erovy'a tema iporā va'e. Ha'e rā reiko axya ára ma eikuaa pota pova'e re: Nhanderuetete ae mokoīve ombou, ha'e ramo avakue ndoikuai 'rā ha'e kuery oiko ma rire mba'e pa oiko 'rāa.

Opa mba'e py jaiko kuaa aguā re ijayvuague

¹⁵ Opa rive va'e rami aiko vvy po ramigua avi aexa: Heko porā va'e ikuai guoko porā reve omano va'erā, ha'e heko vai va'e ikuai guoko vai reve oikove pukuve va'erā.

¹⁶ Enhemboeko porā raxa rei eme, enhemo'arandu raxa eme guive. Mba'erā tu ndee ae renhemomba uka ta?

¹⁷ Eiko eme heko vai ete va'e, neĩ inhakā porā e'ỹ va'e. Mba'e re tu remano ta nde'ára ovaē e'ỹ re?

¹⁸ Neĩ peteĩ rupi, neĩ amboae rupi eiko eme. Mba'eta Nhanderuetete renonde ojererokyjea rupi ikuai va'e ma oo jepe 'rā opa mba'e gui.

¹⁹ 'arandu ojapo 'rā hi'arandu va'e dez ipo'akakueve tetā py ikuai va'e gui imbaraeteve aguā rami.

²⁰ Yvy re ndoikoi ava heko porā va'e, ojevavy e'ỹ re iporā va'e anho ojapo va'e.*

²¹ Ndepy'a py erovia eme ayvu omombe'ua va'e ma guive rā, endu rive guive nerembiguai ndere ijayvu vai rā,

²² mba'eta nema'endu'a mbovykue rei e'ỹ ndee voi amboae kuery re ndeayvu vaiague re.

Kunhaque nhombotavya re ijayvuague

²³ Ha'e nunga ha'e javi re aikuaa pota va'ekue xe'arandua rupi. Aipoa'e avi: "Xe'arandu pota 'rā", ha'e va'eri ndaupityi ae 'arandua.

²⁴ Mava'e tu oupity 'rā mba'emo mombyry ha'e haxy ete va'e?

²⁵ Ha'e gui anhea'ā 'arandu aikuaa porā aguā, ha'e gui aikuaa pota ha'e aeka ete aguā opa mba'e ikuai va'e ha'e javi regua aikuaa aguā. Aikuaaxe avi heko vai va'e 'arandu e'ỹa, ha'e hi'arandu e'ỹ va'e akā porā e'ỹa guive.

²⁶ Ha'e rami vvy peteĩ ajou manoa gui nda'eveve va'e: peteĩ kunha opy'a re jojopy ha'e nhombo'a aguā anho omoĩ va'e, ha'e opo py corrente jokuaarā oguereko va'e. Ha'e va'e gui Nhanderuetete renonde heko porā va'e oo jepe 'rā, ha'e rā ojevavy va'ety ma ou vvy onhembo'a uka 'rā iuxupe.

²⁷ Ayvu mombe'ua aipoe'i: "Ma'ê, po ramigua xee ajou va'ekue. Mba'emo amboae ramigua re ambojoja vy aikuaa porã aguã

²⁸ aikuaa pota aikovy teĩ ndaikuaa porã teri: mil avakue mbyte peteĩ'i anho ajou ha'eve va'e, ha'e rã mbovy rei e'ỹ kunha mbyte ma peteĩve ma voi xee ndajoui.

²⁹ Ma'ê, peteĩ anho aikua: Nhanderueete omoingo avakue heko porã va'erã, va'eri ha'e kuery opa marã onhembopy'a okuapy."

8

Huvixave nhanhe'ê rendu aguã re ijayvuague

¹ Mava'e tu oiko hi'arandu va'e rami mba'emo omombe'u porãve kuaa 'rã? Mba'eta avakue 'arandua ma omoexakã 'rã hova, oguerova 'rã ivaia oexa ukaa gui.

² Xee aipoa'e ndevy: Enhe'ê rendu ke huvixave Nhanderueete renonde neuraague rami vy.

³ Ejapura eme huvixave renonde gui rejepe'a aguã, neĩ enhea'ã eme mba'emo vai rejapoa py, mba'eta ha'e ae oikuaa rami 'rã ojapo.

⁴ Mba'eta huvixave ayvu ma ipo'akave va'e. Mava'e tu ixupe "Mba'e tu rejapo?" he'i 'rã?

⁵ Ha'e ojapo uka va'e moĩ porãa ma ndoiko axyi 'rã. Hi'arandu va'e opy'a py oikuaa 'rã raka'e ha'e marã rami pa mba'emo ojapo aguã.

⁶ Mba'eta opa mba'e pe oĩ oiko aguã ára ha'e marã rami pa ojapoa aguã, avakue re mba'emo vai ipoyi ete teĩ.

⁷ Mba'eta ha'e kuery ndoikuai 'rã mba'e pa oiko 'rãa. Marã rami paa guive nomombe'uai 'rã ha'e kuery pe.

⁸ Avave rei ndojoko kuaai 'rã vvytu oipejua, ha'e omano aguã ára re katuve ma nda'ipo'akaai 'rã. Ha'e nunga re nhanhea'ãa py ma noi 'rã japytu'u aguã, heko vai va'e kuery katuve ma ndoo jepi 'rã gueko vaia rupi.

⁹ Ha'e nunga ha'e javi kuaray guýry aexa mba'emo ojapo pyre re aikuaa potaa rupi, mba'eta amongue py avakue joe ipo'aka 'rã omomba aguã rive.

Joo rami e'ỹ-e'ỹ jajopy aguã re ijayvuague

¹⁰ Aexa avi heko vai va'e kuery onhono porãa py opytu'u rã, ha'e rã hendaiky'a e'ỹ va'e py oo jepi va'ekue re ma hexaraijaa, ikuai porãague tetã py voi. Ha'e nunga voi opa rive va'erã.

¹¹ Joapo vaiare nombopagaa voi ramo avakue ra'y kuery opy'a re omoĩ 'rã ojapo vai aguã anho.

¹² Ha'e gui xapy'a rei ojevavy va'ety cem-kue 'rã ojapo vai va'eri hi'ára ipuku teĩ, aikuaa porã Nhanderueete renonde ojererokyjea rupi ikuai va'e ojou 'rãa iporã va'e.

¹³ Ha'e rã heko vai va'e kuery ma iporã va'e ndojoui 'rãe, hi'ára nda'ipukui 'rã guive. Kuaray'ã rami oaxa 'rã, Nhanderueete renonde ojererokyje rupi e'ỹ ikuai rive.

¹⁴ Oĩve teri amboae nunga ju opa rive va'erã vvy re. Mba'eta heko porã va'e ikuai heko vai va'e rami ombopagaa va'e, ha'e heko vai va'e avi ikuai heko porã va'e rami omboekoviaa va'e. Aipoa'e ha'e nunga voi opa rive va'erã.

¹⁵ Ha'e nunga rupi xevy pe ha'eveve va'e ma vvy'aa, mba'eta avakue pe kuaray guýry ha'eveve va'e ma okaru, oy'u ha'e ovy'a aguã. Mba'eta ha'e ramigua ombovy'a 'rã omba'eapo oikovya rupi, kuaray guýry Nhanderueete hi'ára ome'ëa pukukue re.

¹⁶ Anhea'ã avi aikuaa aguã 'arandu, ha'e aexa aguã vvy re omba'eapoa ha'e javi, mba'eta ara py neĩ pyávy voi avakue ndoke kuaai 'rã.

¹⁷ Ha'e rami vvy Nhanderueete rembiapokue ha'e javi re aikuaa pota vvy aikuaa rã avakue ndoikuapaa reguai 'rã mba'emo kuaray guýry ikuai va'e. Avakue oikuaa aguã onhea'ã vaipa teĩ ndoupityi 'rã. Hi'arandu va'e voi "Aikuaa 'rã", he'i teĩ ndoupityi 'rãe.

9

Ha'e javi pe joo rami merami ome'ëa re ijayvuague

¹ Anhea'ã ete ha'e nunga ha'e javi aikuaa aguã, mba'eta Nhanderueete po py ikuai heko porã ha'e hi'arandu va'e kuery, ha'e kuery reko ha'e javi guive. Ha'e rami teĩ avakue ndoikuai guenonderã mboravytu tyrã pa ivaia oĩa. Henonde guarã ha'e javi ma oikuapay e'ỹ.

² Opa mba'e oiko 'rã joo rami ae ha'e kuery ha'e javi re. Joo rami ae 'rã oiko heko porã va'e ha'e heko vai va'e re, mba'emo ome'ë va'e ha'e ome'ë e'ỹ va'e re, ojapo porã va'e ha'e ojevavy va'e re, oura va'e ha'e oura aguã gui okyja va'e re guive.

³ Ha'e ramigua nda'evei va'e oiko kuaray guýry pavẽ ikuai re, mba'eta pavẽ re 'rã oiko joo ramigua ae. Avakue py'a voi tynyẽ mba'emo vai, ha'e kuery re oĩ 'rã akã porã ve'ỹ oikovea ja. Ha'e rive ma manoa katy oje'oi.

⁴ Oikove va'e pe ma oĩ teri oarõ oikovy aguã, mba'eta guary omano va'ekue gui ha'eveve jagua oikove va'e.

⁵ Mba'eta oikove va'e kuery oikuaa omano 'rãa, ha'e rã omanogue ma mba'eve ndoikuavei, oikoague repy ndojouvei 'rã guive, mba'eta ha'e kuery re ima'endu'aa 'rãgue py oĩ hexaraijaa.

⁶ Ha'e kuery joayvua, ndajoayvuia ha'e nda'evei reia opa ma. Ha'e kuery raka'e rã peve mba'eve ndoguerekevei 'rã kuaray guýry omba'eapo teri va'e kuery reve.

⁷ Ha'e nunga rupi tereo, he'u mbojape revy'a reve, ha'e ey'u porã vinho, mba'eta Nhanderueete ndererovy'a ae mba'emo rejapoa py.

⁸ Taxii porã riae renhemondea, ha'e toata eme neakã remoatyrõ porãa.

⁹ Evy'a ke kunha reayvu va'e reve, nde'ára kuaray guýry Nhanderuete ome'ẽ va'e re, reikovea opa voi va'e pukukue re. Ha'e nunga ma Nhanderuete ome'ẽ kuaray guýry remba'eapo poyia rupi nekane'õague rekovia.

¹⁰ Mba'emo ndepo py rejapo aguã rejou va'e ha'e javi ke ejapo nembaraetea rupi, mba'eta ha'e va'e rire reo aguã py noiwei 'rã remba'eapo aguã, mba'emo re renhembopy'a e'ý vy reikuaa pota aguã, neĩ ne'arandu aguã.

Onhea'ã rive va'e re ijayvuague

¹¹ Kuaray guýry aexave ju inhakuã va'e kuery peguarã e'ý oĩ hekovia, ha'e ipy'a guaxukueve pegua e'ý oĩ ipo'aka aguã, hi'arandu va'e peguarã e'ý guive oĩ mbojape ho'u aguã, ha'e oiko kuaa va'e kuery peguarã e'ý oĩ mba'emo oguerokopa aguã, neĩ oikuapa rei va'e kuery peguarã e'ý oĩ oguerovy'aa aguã. Ha'e rami 'rãgue py pavẽ ára oaxa 'rã ovy, ha'e pavẽ re oiko 'rã oexa'ãmyb e'ý.

¹² Mba'eta avakue ndoikuaii o'ára ae. Pira imbo'aa py ho'a xapy'a, ha'e guyra'i nhuũ py ojejura va'e rami ae avi avakue ra'y kuery voi ojejopy uka 'rã mba'emo vai oiko ramo, ha'e kuery re oiko xapy'a rã.

Arandu ovarea kuaa ukua omombe'uague

¹³ Kuaray guýry peteĩ aexa avi 'arandu kuaa ukua, xevy pe rã tuvixa va'e.

¹⁴ Mba'eta oĩ peteĩ tetã kyrĩ'i va'e mbovy'i avakue ikuaiã. Ha'e va'e tetã re ou peteĩ huvixa ipo'akave va'e. Ojokopa ha'e hovai re omopu'ã okuapy tetã kora mbovaipaarã.

¹⁵ Ha'e py oiko peteĩ ave poriaukue hi'arandu va'e. Ha'e va'e ma o'arandua rupi ogueraa jepe guetã. Ha'e rami rire teĩ ha'e va'e iporiaukue re avave rei na'ima'endu'aavei.

¹⁶ Ha'e ramo "Imbaraete va'e gui hi'arandu va'e ha'eveve", ha'e, iporiaukue'i 'arandua ndojou porãai, ha'e ijayvu noenduai teĩ.

¹⁷ Mba'eta hi'arandu e'ý va'e kuery ruvixa ojavukaia gui ha'eveve hi'arandu va'e ijayvu rã nhakyriĩ reve nhaendu.

¹⁸ Tembiporu joe opu'ãa pygua gui voi 'arandua ha'eveve. Ha'e rami avi peteĩ'i ojejavý va'e teĩ mba'emo porã heta 'rã ombovai.

10

Arandu iporãa re ijayvuague

¹ Heakuã porã va'e ryru py mberu omano va'ekue omoeakuã vaikua rami ae avi nhane'arandu e'ýa ruxã'i oĩ teĩ ombovai 'rã nhane'arandua ha'e nhanemboetea.

² Hi'arandu va'e ipy'a 'rã oiporu kuaa katy oo aguã re, ha'e rã hi'arandu e'ý va'e ma oiporu kuaa e'ýa katy oo aguã re ipy'a.

³ Hi'arandu e'ý va'e ma tape rupi oo vy voi ndoiko kuaai 'rã. Ha'e rami vy pavẽ pe oexa uka 'rã o'arandu e'ýa.

⁴ Nderovai huvixa ivai reve opu'ã teĩ ejep'e'a eme reĩa gui, mba'eta ndepy'a guaxua omombytu'u 'rã opa marã ojapo vaixe va'e kuery.

⁵ Peteĩ ju aexa mba'emo vai kuaray guýry, huvixa ha'eve'ýa rami opena va'e.

⁶ Ha'e va'e ma omoĩ 'rã hi'arandu e'ý va'e yvatevea py, ha'e rã oguerokopa va'e kuery ma yvy'i'ia py omoĩ.

⁷ Aexa tembiguai kuery kavaju áry oo va'e, ha'e rã yvatekueve ma yvy rupi uguata oje'oivy tembiguai rami.

⁸ Yvykua ojo'o va'ekue ma ha'e py ae ju 'rã ho'a, ha'e kora ombovo va'e ma mboi oixu'u 'rã.

⁹ Ita omboi va'e ma ha'e va'e py ae 'rã oiko axy, ha'e yxakã ombovo va'e ma oexa 'rã ijavaete va'e.

¹⁰ Tembiporu ferro guigua naĩmbei va'e avave noaĩmbe'eai ramo iporua onhemomburuve 'rã. Ha'e rã hi'arandu va'e omoatyrõ porã kuaa 'rã.

¹¹ Xapy'a rei mboi ombo'e porãa e'ý re ri joxu'u ramo imbo'eare ndojopyi 'rã hepyrã va'ekue.

¹² Hi'arandu va'e oayvu py onhemboete uka 'rã, ha'e rã hi'arandu e'ý va'e ma oayvu py onhemomba uka 'rã.

¹³ Jypy hi'arandu e'ý va'e ijayvu 'rã oikuaa e'ý reia rupi, ha'e rã opaa py ma ijayvu 'rã 'arandu e'ýa ha'e joguerojejavýa rupi anho.

¹⁴ Ava hi'arandu e'ý va'e ijayvu reta 'rã, mba'emo oiko va'erã avave ndoikuaii teĩ. Mava'e 'rã tu oikuaa ha'e rire oiko va'erã?

¹⁵ Hi'arandu e'ý va'e omba'eapoa rupi ikane'õ 'rã, tetã re oo aguã ma voi ndoikuaii.

¹⁶ Yvy huvixave kyrĩ va'e openaa pe nda'evei ete 'rã, yvatekueve ko'ẽmba ramove ngaru ojapo okuapy pe guive.

¹⁷ Ha'e rã yvy yvateve va'e kuery ra'y huvixave openaa pe ma ha'eve 'rã, mba'eta ha'eve jave py yvatekueve oguapy 'rã okuapy mesa py onhemombaraete aguã, oka'u okuapy aguã nda'eĩ.

¹⁸ Hoo va'e inhate'ý ramo oo ao'ia ho'apa 'rã. Opo py nomba'eapoxei ramo otykypa 'rã.

¹⁹ Ngaru ojapoa 'rã ovy'a aguã, vinho nhombovy'a 'rã oikoa'i py, ha'e rã perãta ma opa mba'e repyrã ha'eve.

²⁰ Ndepy'a py voi ndeayvu vai eme huvixave re, neĩ nderopy ja'o ndeayvu eme oguerokopa rei va'e re. Mba'e guyra oveve va'e ogueraa 'rã ndeayvu, ipepo va'e kuery oendu uka 'rã ndeayvuague.

11

- ¹ Yy áry rupi emoāi nerembi'u, mba'eta hare ma rire rejou ju 'rā.*
² Emboja'o sete e'ŷ vy oito pe, mba'eta ndereikuaii mba'emo vai yvy re ou va'erā.
³ Araipa ramo oky xapy'a va'e ho'a 'rā yvy áry. Yvyra kuaray puku-a katy e'ŷ vy ijapu'a'ia katy ho'a rire ha'ekue py ae 'rā itui.
⁴ Yvytu re oma'ê-ma'ê oikovy va'e mba'eve 'rā nonhotŷi, ha'e arai re oma'ê-ma'ê va'e nomono'oi 'rā guive.
⁵ Ndee ndereikuaii marupi pa yvytu rape oia, neĩ kunha hye guaxu'i va'e ryepy kyri'i va'e kágue'i ojeapo tema ovy voi. Ha'e rami ae avi Nhanderueti opa mba'e apoare rembiapokue katuve ma ndereikuaii.
⁶ Aje'ive reve ke enhotŷ ha'yigue, ka'arukue voi emombytu'u eme ndepo, mba'eta ndereikuaii marā ramigua pa oiko porā 'rāa, jypyguia tyrā amboae, tyrā mokoive joo rami oiko porā 'rā pa.
⁷ Hendy va'e ma ha'eve, ha'e kuaray rexakāa jaexa rā iporā.
⁸ Ava heta ma'etŷ oguereko va'e ta'ima'endu'a o'ára oaxa va'ekue ha'e javi re. Ha'e rami teĩ toikuaa pota avi pytŷ agua'ára heta ou va'erā re. Mba'emo oiko va'e ha'e javi ma opa rive va'erā meme.

Kunumi teri va'e pe ijayvuague

- ⁹ Kunumi, erovy'a ke ndepyaua, ha'e nekuraxō py erovy'a nekunumia. Eiko tape nekuraxō ha'e nderexa ovy'a agua'rupi. Ha'e rami teĩ eikuaa pota, mba'eta ha'e nunga ha'e javi re Nhanderueti nemboayvu 'rā.
¹⁰ Ha'e nunga rupi nekuraxō gui eipe'a imongueraiarā ha'e ndero'o moingo axyarā, mba'eta nekunumia ha'e ndepyaua ma opa rive va'erā meme.

12

Tuja'i ma va'e pe ijayvuague

- ¹ Nema'endu'a ke nemoingoare re nekunumi teri reve, ára vai ha'e "Noivei avy'a agua" 'rea ma'etŷa ovaē e'ŷ re.
² Mba'eta ha'e va'e jave py ma kuaray pytŷumba merami 'rā, jaxy ha'e jaxy-tata nderekove rupi nemoexakā va'ekue guive, ha'e oky rire teĩ arai ou ju 'rā.
³ Oo re opena va'e rami ndejyva oryryipa 'rā, ha'e ava imbaraeete va'ekue rami neretyma ikarē rei 'rā. Mba'emo mongu'ia ndejuru py ikuai va'e mbovy'i ma vy nomba'epo porāvei 'rā, ha'e janela rupi hendy va'ekue rami nanderexa pyxovei 'rā.
⁴ Ha'e gui okē tape katyguia rami nerembeta onhemboty 'rā. Renhendu atā agua'nda'evevei 'rā, ha'e guyra'i nhe'ē rendu vyve 'rā revy. Ha'e rami teĩ kunhague oporaei va'e ayvu ma nonhendu atāvei merami 'rā.
⁵ Ha'e rami ae avi rekyje 'rā yvate va'e gui, ha'e tape rupi oo va'e gui rive renhemondyi 'rā. Ha'e gui nde'a xiimba 'rā yvyra ipoty xi'i va'e rami. Tuku rive teĩ ipoyi 'rā ndevy, ha'e rekaruxea nerenduvei 'rā, mba'eta reo 'rā reiny oo opa e'ŷ va'e katy, ha'e ojae'o va'e kuery ikuai 'rā tape rupi.
⁶ Ha'e va'e jave py ixā prata guigua oxo 'rā, ha'e karo ouro guigua ovo 'rā, ha'e ygua py ovo 'rā yryru, ha'e yvu áry yryru renoēa oĩ va'ekue ivaipa 'rā.
⁷ Ha'e rire yvy ku'i reikoague ojevy ju 'rā yvy re, ha'e rā nenhe'ē ma ojevy 'rā Nhanderueti imbouarea py.
⁸ Opa va'erā rive, opa mba'e ikuai va'e opa rive va'erā meme, he'i ayvu mombe'ua.

Opa vy ijayvuague

- ⁹ Ayvu mombe'ua hi'arandu va'e vy ombo'e heta va'e kuery oikuaa agua'rami. Ha'e gui ayvu re ojapyxaka ha'e oikuaa potaa rupi heta omombe'ua ayvu 'arandu regua.
¹⁰ Ayvu mombe'ua onhea'ā ayvu iporāgueve ojou agua, ha'e ha'eveve rami ombopara agua'ayvu anhetē va'e.
¹¹ Hi'arandu va'e kuery ayvu ma yvyra rakua mymba mondyia ha'e karavo ombota porā mbyre rami oĩ, Opena va'e pete'i oiko va'e ome'ē va'ekue meme.
¹² Xera'y, enheangu ke ha'e nunga rovai rupi reiko e'ŷ agua. Mba'eta kuaxia ombopara pyre ma ndoatai 'rāe, ha'e va'e re nhandembo'e riae vy nhandero'o kane'ōmba 'rā.
¹³ Ha'e gui opa mba'e rendu va'ekue gui ma yvateve va'e po rami: Nhanderueti renonde eiko rejererokyjea rupi, ha'e emoĩ porā ojapo uka va'ekue, mba'eta ha'e va'e ma avakue pavē ojapo agua'va'e.
¹⁴ Mba'eta Nhanderueti oikuaa pota 'rā jaikoa ha'e javi re, ojekuaa voi e'ŷ va'ekue guive, iporā va'e, ha'e iporā e'ŷ va'e teĩ.

* 11:1 Apy ma ijayvu mba'emo Nhanderueti ojou uka va'ekue nhamboja'o agua'ra, mba'eta omboekovia ju 'rā nhandevy.

Mboraei iporãve va'e Cântico Salomão ojapo va'ekue Mboraei iporãve va'e cantares Salomão ojapo va'ekue

Kova'e kuaxia para py ma ijayvu peteĩ ava ha'e peteĩ kunha reve joayvua re. “Xee ma xerembiayvu mba'e, ha'e xerembiayvu ma xemba'e”, he'i (6.3). Ha'e ramigua ayvu oĩ va'e ma iporã va'e meme.

Jypy'i Nhanderuete omenda va'e kuery oguero vy'aa rupi ijayvu vy aipoe'i va'ekue: “Avakue oēja 'rã nguú ha'e oxy, gua'yxy reve joguereko aguã, mokoĩ gui peteĩ'i to'o oiko aguã”, he'i va'ekue (Gênesis 2.24). Ha'e va'e ayvu Jesus omombe'u porãve vy aipoe'i: “Yvy itui ypy'i guive ma Nhanderuete omoingo ava ha'e kunha. Ha'e nunga rupi ava oēja 'rã nguú ha'e oxy, gua'yxy reve onhemoirũ aguã. Ha'e gua'yxy reve mokoĩ 'rãgue py peteĩ to'o ma ikuai. Ha'e rami vy mokoĩ ve'y'ĩ ikuai, peteĩ'i to'o ma. Ha'e nunga rupi Nhanderuete omoirũ rive avave rei tomboja'o eme”, he'i (Marcos 10.6-9).

1 Kova'e mboraei iporãve va'e Salomão ojapo va'ekue.

Ta'yxy ijayvuague

2 Xerayvu ndejuru py,

mba'eta vinho gui ha'eveve ndee xerayvua.

3 Nereakuã porãa aetũ rã iporã,

nderery voi heakuã va'e onhoẽ mbyre rami ha'eve va'e.

Ha'e ramo kunhataĩgue ha'e javi 'rã nderayvu.

4 Xereraa ndereve! Jaa pojava!

Xeruvixave xereraa ndero py.

Irũ kuery ijayvuague

Ndee ae roguero vy'a rovy'a etea rupi.

Rejoayvua re orema'endu'a porã 'rã, vinho gui ha'eveve ramo.

Ha'eveve rami ha'e kuery nderayvu.

Ta'yxy ijayvuague

5 Kunhague Jerusalém pygua, xeũ va'eri xeporã.

Xepire ma Quedar rupi oo pirekue guigua rami huũ va'e,

ha'e ajukue Salomão ro py oĩ va'e rami.

6 Pema'ẽ ngatu eme xepire huũa re,

mba'eta kuaray ae ma xemotũmba.

Xekyvy kuery xemotare'y'ĩ rei vy

xemondouka karamboae uvaty re apena aguã.

Ha'e rami rã xemba'e uvaty re ma xee napenai.*

7 Ha'e gui ndee xerekovea rembiayvu, emombe'u xe vy:

Mamo tu remongaru 'rã herekovy nerymba kuery?

Mamo tu remombytu'u 'rã kuaray mbyte jave?

Emombe'u ke, xee roekaa rupi avaẽ e'y'ĩ aguã

neirũ kuery guymba re openaa py.

Ime ijayvuague

8 Kunhague pavẽ gui neporãve va'e, ha'e nunga ndereikuai ri vy

tereõ ha'vy mymba kuery pypo rupi,

ha'e emongaru nerymba kavara kuery vexa'i re opena va'e kuery ikuai rupi.

9 Xerembiayvu, neporã vaipa

kavaju kunha Faraõ mba'e karóxa regua rami.

10 Nderova ma iporã nenamixã mbyte,

ndeaju'y voi mbo'y oĩ reve.

11 Ndejeguarã rojapo 'rã ouro gui,

prata py ijeguapa va'e gui voi.

Ta'yxy ijayvuague

12 Xeruvixave okaruaty py oĩa py

oetũ 'rã oiny xereakuã porãa.

13 Xevy pe ma xerembiayvu iporã

heakuã porã va'e rryu xekã mbyte oĩ va'e rami.

14 Yvoty En-Gedi katy uvaty ikuai va'e rupi henhoĩ va'e rami,

xe vy pe xerembiayvu ha'e rami ae ha'eve.

Ime ijayvuague

15 Ma'ẽ xerembiayvu, ndee ma neporã.

Nderexa voi apyaxu rexa rami iporã.

*

1:6 “Xemba'e uvaty re napenai” he'ia ma ojee ae ijayvu vy, ipire kuaray omoũmba ramo.

Ta'yxy ijayvuague

- ¹⁶ Xerembiayvu, ndee voi neporã, roayvu.
Nhanderupa ma jai rogue pyau guigua.
¹⁷ Nhandero yta rami guarã yary ikuai,
ha'e rã vvyra ijao'ia ma cipreste guigua.

2

- ¹ Xee ma rosa poty Sarom rupigua rami,
ha'e yvoty vvyugua rupi ikuai va'e rami.

Ime ijayvuague

- ² Yvoty juu mbyte oĩ va'e rami ae avi
kunhataigue mbyte xerembiayvu iporã.

Ta'yxy ijayvuague

- ³ Ha'e gui vvyra ikuai va'e mbyte maçã'y hi'aĩ va'e rami
kunumigue mbyte xerembiayvu iporã.
Ikuaray'ã py aguapyxe vai,
ha'e hi'a voi he'ẽ porã xevy.
⁴ Xereraa opy ja'o okaruaty py,
ha'e xe'áry rupi omopu'ã bandeira xerayvua kuaa ukaarã.
⁵ Anhemombaraete 'rã uva pirekue py,
anhenhandu porã 'rã maçã ha'u vy.
Mba'eta ayvu vaipa vy naxepytuẽ kuaavei.
⁶ Ijaxua regua toĩ xeakã guýry,
ha'e rã oiporu kuaa regua ma taxekuavã.
⁷ Jerusalém memby kuery, pendeivy pe ajerure
guaxu ha'e guaxu kunha ka'aguy rupi ikuai va'e rupi:
Pemomyĩ eme rojoayvua, tove toke ranhe,
ha'e ae ovyxe e'ýa ja.
⁸ Aendu xerembiayvu ijayvu rã.
Ma'ẽ, ha'e ou pojava yvyty áry rupi,
yvy'ã ikuai va'e rupi opo-opo ovy.
⁹ Xerembiayvu ma guaxu e'ý vy guaxu ra'y'i rami inhakuã va'e.
Ne'exa, orero mbotya kupe py hi'aĩ,
janela rupi oma'ẽ ho'amy,
oexa pota ho'amy janela jokoa pa'ũ gui.
¹⁰ Ha'e gui xerembiayvu ijayvu vy aipoe'i xeivy:

Ime ijayvuague

Xerembiayvu, epu'ã ke.

Xemba'e porã, eju.

- ¹¹ Mba'eta yro'y oaxa ma,
oky voi oaxapa ma.
¹² Yvoty henhoĩmba ma vvy re,
ovaẽ ma guyra kuery onhe'ẽ aguã ára.
Pyku'i voi onhe'ẽ nhendu ma nhandevvy rupi.
¹³ Figo'y voi ijypy ma hi'a aguã,
uva poty reakuã voi nhaetũ ma.
Epu'ã na xerembiayvu.
Xemba'e porã, eju ke.
¹⁴ Xerymba apykaxu,
íta pa'ũ ha'e itaova yvateve renhemia rupi reiko va'e,
exa uka na nderova,
ha'e taendu ndeayvu.
Mba'eta ndeayvua he'ẽ,
ha'e nderova ma aexaxe vai va'e.

Ta'yxy ijayvuague

- ¹⁵ Pejopy na mbyku ha'e mbyku'i uvaty ombovaipa va'e,
mba'eta oremba'e uvaty rupi ipotypa ma.
¹⁶ Xerembiayvu ma xemba'e, ha'e xee ma imba'e aiko.
Ha'e ma omongaru 'rã guymba kuery yvoty ikuai rupi.
¹⁷ Xerembiayvu, ára yro'y rei'i ha'e pytũ e'ý teria ja ejevy ju.
Enha ejuvy guaxu e'ý vy guaxu ra'y'i rami, yvyty itatya rupi.

3

- ¹ Pyávy xerupa py xetui jave
aeka xerekovea rembiayvu.
Aeka-eka teĩ ndajoui.
- ² Ha'e gui apu'ã avy vy tetã rupi ajere aikovy.
Tetã mbyte ha'e tape ikuai va'e rupi aa vy
aeka xerekovea rembiayvu, aeka teĩ ndajoui.
- ³ Ha'e gui tetã rarõa kuery xerovaexĩ tetã rupi onhangarekoa rupi.
Ha'e rã ha'e kuery pe xee aporandu: "Pexa pa xerembiayvu?" ha'e.
- ⁴ Ha'e gui ma ajepe'a'i avy vy mae ma aovaexĩ xerembiayvu.
Aikuavã vy namondoukavei.
Ha'e gui aroike ha'i xemokambuare ro py.
- ⁵ Jerusalém memby kuery, pendeivy pe ajerure
guaxu ha'e guaxu kunha ka'aguy rupi ikuai va'e rupi:
Pemomyĩ eme rojoyvua, tove toke ranhe,
ha'e ae ovyxe e'ỹa ja.
- Irũ kuery ijayvuague*
- ⁶ Mba'e tu peva'e tekoa e'ỹa gui jogueru jekuaa nhoguenoiny va'e?
Tata rataxĩ opu'ã va'e ramigua ou,
ha'e heakuãmba ouvy mirra ha'e heakuã porã va'e okaia py,
opa marãgua heakuã porã va'e vendeaty kuery ogueru va'ekue py.
- ⁷ Ne'exa, huvixa Salomão karóxa ae ou jekuaa.
Ijyke jovaive rupi sessenta avakue ogueru,
Israel regua ipy'a guaxukueve.
- ⁸ Ha'e kuery ha'e javi ma kyxe oiporu kuaa,
joe opu'ã kuaa va'e vy.
Peteĩ-teĩ oku'a re kyxe oguereko,
pytũ rupigua gui joepy aguã.
- ⁹ Karóxa ma huvixa Salomão ojeupe guarã ae ojapo uka va'ekue
yvya Líbano regua gui.
- ¹⁰ Ijytará ma ojapo prata gui,
hendarã ma ojapo ouro gui,
ha'e rã oguapya aguã ma púrpura gui ojapo.
Opy ha'e javi rupi Jerusalém pygua kunhague
ombojegua porã'i oayvua rupi.
- ¹¹ Ha'e gui Sião memby kuery, peju, pema'ẽ
huvixa Salomão akã re coroa oĩ va'e re.
Ha'e va'e ma ixy ae ome'ẽ va'ekue
omendaa ára py, opy'a py oguerovy'a vy.

4

Ime ijayvuague

- ¹ Ma'ẽ xerembiayvu, ndee neporã vaipa!
Neporã ete!
Nderexa ma apyaxu rexa rami iporã,
nderova mo'ãa rovai teĩ nderexa pyxo porã.
Nde'a ma kavara kuery Gileade regua vvyty áry gui ogejy jogueruvy va'e rami huũ.
- ² Neraĩ ma vexa'i kuery hague ojayapaa ramo'i va'ekue
ombojauague gui oẽ jogueravy va'e rami xiĩ.
Ha'e kuery peteĩ-teĩ oguereko mokoĩ'i ma voi va'e,
ha'e neĩ peteĩve ma voi ndata'y e'ỹi va'e rami.
- ³ Nerembe ma nhimbo pytã iporã va'e rami.
Ndejuru ma iporã ete.
Nderova ma romã'a omboja'o pyre rami xiĩ porã rei,
nderova mo'ãa rovai teĩ iporã jekuaa.
- ⁴ Ndejuru ma Davi torre tembiporu moĩ porã atyrã ojapo va'ekue rami.
Ha'e va'e re mil hu'y jokoia ikuai xondaro ipy'a guaxukueve oupi imoiny va'ekue rami.
- ⁵ Nekã mokoĩve ma guaxu ta'y'iague meme
yvoty ikuai va'e rupi okaru okuapy va'e rami.
- Ta'xy ijayvuague*
- ⁶ Ára yro'y rei'i ha'e pytũ e'ỹ teria ja
aa 'rã vvy'ã mirra ha'e heakuã porã va'e oĩa py.

Ime ijayvuague

- ⁷ Xerembiayvu, ndee ma neporã.
Ndere jipoi ndevaikuea.
- ⁸ Xerembireko, eju xereve Líbano gui,
eguejy xereve vyty Líbano regua gui.
Ema'ê Amana vyty apyte gui,
Senir ha'e Hermom vyty gui,
guary kua ha'e vyty xivi ikuai gui.
- ⁹ Xereindy xerembireko, reipe'a ma xekuraxõ.
Reipe'a ma xekuraxõ rema'êa py rive'i,
ha'e pete'i apu'a'i ndepo'y re oĩ va'e py.
- ¹⁰ Ndee xerayvua ha'eve vaipa, xereindy xerembireko.
Vinho gui xeayvua ha'eveve,
ha'e nereakuãa ma pavê heakuã va'e gui iporãve va'e.
- ¹¹ Xerembireko, ndejuru gui ei rami he'ê va'e otyky,
neapekũ guy py ma ei ha'e kamby oĩ.
Ndetupyja ma Líbano vyv regua rami heakuã porã.
- ¹² Xereindy xerembireko, ndee ma yvotyty ikorapa va'e rami reiko,
peteĩ yvu ojao'i pyre rami.
- ¹³ Nderegua ma romã'y ty ikuai va'e rami,
hi'a porã va'e meme.
Ha'e py ikuai hena ha'e nardo'y,
- ¹⁴ nardo ha'e açafraõ'y, cálamõ ha'e canela'y.
Opa marãgua vyvra ikuai avi heakuã porã va'e:
mirra ha'e aloés, ha'e heakuã porãgueve ha'e javi ikuai.
- ¹⁵ Ndee ma yvu yvotyty moakã rami,
yguã yv oxyry va'e oĩa,
yakã Líbano regua vyty gui oxyry atã va'e rami!
- Ta'yxy ijayvuague*
- ¹⁶ Yvytu kuaray apu'a'ia katygua, eju na.
Eju, ndee vyty kuaray puku-a katygua.
Eipeju xe yvotyty rupi,
eraa heakuã porã va'e oetia aguã katy.
Ha'e gui ma xerembiayvu tou omba'e yvotyty py,
to'u vyvra'a iporãve va'e!

5

Ime ijayvuague

- ¹ Xereindy xerembireko, xee aike ma xeyvotyty py.
Xee amono'õ ma mirra heakuã porã va'e reve.
Ha'u ma ei hetã revegua,
ha'e ay'u ma vinho kamby reve.
Xeirũ kuery, pekaru ha'e pey'u.
Pey'u ndapey'uxevei peve, xerembiayvu kuery.
- Ta'yxy ijayvuague*
- ² Xee ake teĩ xekuraxõ ma ndokei.
Aendu xerembiayvu okê re ombota nhendu reve aipoe'i rã:
- Ime ijayvuague*
- “Xereindy xerembiayvu, eipe'a na.
Xerymba apykaxu, ndevaikuea oĩ e'y va'e.
Mba'eta xeakã inhakỹmba vyvxi rayvi gui,
xe'a yxapya ma”, he'i.
- Ta'yxy ijayvuague*
- ³ Ha'e gui xee ma amboipa ma xeaõ puku.
Amoĩ ju 'rã nda'u?
Ha'e xepy voi ajoipa ma,
teĩ amongy'a ju 'rã nda'u?
- ⁴ Peteĩ vyvra pa'ũ oĩ va'e rupi xerembiayvu opoko rã
xekuraxõ omyĩmba ayvu vaipa rã.
- ⁵ Ha'e rami vy avy okê aipe'a aguã xerembiayvu pe.
Xepo gui mirra amoeakuãague otyky rei oiny,
xekuã gui voi okê pe'aa áry otyky ajopy rã.
- ⁶ Xerembiayvu pe aipe'a va'eri ojepe'a ju ma, oo ma ra'e.

- Ha'e rami rã xenhe'ê py xekangypa ijayvu rire.
Aeka avy teĩ ndajoui, ha'e aenoĩ aikovy teĩ naxembovai.
- 7 Tetã rarõa kuery xerovaexĩ tetã re onhangarekoa rupi.
Ha'e rami vy xepetepa vy xembojexavai.
Ha'e gui tetã kora rarõa kuery ju omboi xeao puku.
- 8 Jerusalém memby kuery, ajerure pëvy.
Xerembiayvu pexa vy mba'e pa pendeayvu 'rã ixupe?
Pemombe'u xee amano ta maa ayvu vaipa vy.
- Irũ kuery ijayvuague*
- 9 Ha'e gui ndee pavê kunhague gui neporãve va'e,
mba'e py tu nerembiayvu amboae kuery gui ha'eveve?
Mba'e tu nerembiayvu amboae kuery gui iporãve va'e oguereko,
ha'e rami aguã re orevy rejerure aguã?
- Ta'yxy ijayvuague*
- 10 Xerembiayvu ma xii pytã rei,
ha'e ma dez mil ikuai va'e gui teĩ omboetevepy.
- 11 Inhakã ma ouro oiky'a'o porã mbyre rami.
Hi'a ma guapytã xã ha'e xapirê rague rami huũ va'e.
- 12 Hexa ma apykaxu yakã rembe re ikuai va'e rexa rami.
Kamby py omoxii ha'e ombojegua pyre rami hexa.
- 13 Hova ma vyvra bãlsamo ty rami heakuã va'e,
ha'e vyvra rogue heakuã porã va'e omboaty pyre rami.
Hembe ma yvoty gui mirra iporãve va'e otykya rami.
- 14 Ijyva ma ouro guigua aygue ita porãgueve oia rami.
Iku'a ma marfim xii va'e ita safira py ombojegua pyre rami.
- 15 Hetyma ma ita mármore guigua yta ouro ete áry omo'ã mbyre rami.
Yvate ma Líbano yvyty rami, vyvra yvate va'e rami ete.
- 16 Ijayvua ma he'ê porã va'e rami.
Ha'e ma opa mba'e py xembovy'a.
Ha'e rami rima xerembiayvu oiko.
Ha'e rami xeme, Jerusalém memby kuery.

6

- Irũ kuery ijayvuague*
- 1 Kunhague pavê gui neporãve va'e,
marã katy tu oo ra'e nerembiayvu?
Mava'e tape rupi tu nerembiayvu oo ra'e?
Ore roipytyvõ 'rã reka aguã.
- Ta'yxy ijayvuague*
- 2 Xerembiayvu ma ojeupegua yvotyty ha'e bãlsamo ty katy oguejy,
guymba kuery omongaru aguã yvotyty rupi, ha'e yvoty ikuai va'e oiporavo aguã.
- 3 Xee ma xerembiayvu mba'e, ha'e xerembiayvu ma xemba'e.
Yvotyty rupi omongaru oikovy guymba kuery.
- Ime ijayvuague*
- 4 Xerembiayvu, Tirza tetã rami neporã,
ha'e xembovy'a Jerusalém rami.
Xondaro kuery bandeira revegua rami omboete reipy reiko.
- 5 Erova nderexa xegui, mba'eta xembopy'a eta rei.
Nde'a ma kavara kuery Gileade yvyty áry gui oguejy jogueruvy va'e rami huũ.
- 6 Neraĩ ma vexa'i kuery ombojauague gui oê jogueravy va'e rami xii.
Ha'e kuery peteĩ-teĩ oguereko mokoĩ'i ma voi va'e,
ha'e neĩ peteĩve ma voi ndata'y e'ỹi va'e rami.
- 7 Nderova ma romã'a omboja'o pyre rami xii porã rei,
nderova mo'ãa oĩ teĩ iporãa ojekuaa.
- 8 Sessenta huvixa ra'yxy ikuai, ha'e oitenta ikuai ta'yxy jevy.
Hembiguai kunhataĩ ma mbovy rei e'ỹ ikuai.
- 9 Ha'e rã ayvu ete va'e ma peteĩ'i ae,
xerymba apykaxu rami ivaikuea oĩ e'ỹ va'e.
Ha'e ma peteĩ'i va'e ixy oguereko vy ikuavãare oayvuve va'e.
Kunhataĩgue oexa vy ijayvu okuapy iporãa rami.
Huvixa ra'yxy ha'e ta'yxy jevy ikuai va'e voi oexa vy oguerovy'a vaipa okuapy.

Irũ kuery ijayvuague

- ¹⁰ Mava'e tu peva'e ko'ê ramo'ia rami ojekuaa va'e?
 Ha'e va'e ma jaxy rami iporã ha'e kuaray rexakã rami iky'a e'y' va'e.
 Xondaro kuery bandeira revegua rami omboete reipy oiko.

Ta'yxy ijayvuague

- ¹¹ Aguejy avy yvotyty ha'e yvyraty katy,
 mba'emo renhoi pyau vvyugua rupi ikuai va'e aexa aguã,
 ha'e uva henhoi paa aexa aguã, ha'e yvyra romã'y ipotyppaa re.

- ¹² Mba'exa vy ete rã
 xeretarã kuery yvatekueve mba'e karóxa py merami aĩ.

Irũ kuery ijayvuague

- ¹³ Sulamita, ejevy ju na.
 Ejevy ju, ore kuery roexaxeve ju.

Ta'yxy ijayvuague

- Mba'e re tu pexaxe sulamita
 Maanaim py ojeroky rã?

7

Ime ijayvuague

- ¹ Huvixa rajy, ndepy regua reve reguataa ma iporã meme.
 Neretyma ku'a ma mbo'y hembiaapo kuaa va'e rembiaapo rami iporã.
² Nepuru'ã ma karo ojere va'e vinho oĩ riaea rami.
 Ndeku'a ma trigo omboaty pyre yvoty ombojerepy rami.
³ Nekã mokoive ma guaxu ta'y'iague meme rami.
⁴ Ndejaju'y ma torre marfim guigua rami iporã.
 Nderexa ma yy omboty pyre Hesbom py, Bete-Rabim rokẽ yvy'iry oĩ va'e rami.
 Nexĩ ma Libano yvy re torre Damasco katy ooa py hi'aĩ va'e rami.
⁵ Neakã ma Carmelo yvyty rami.
 Nde'a ma púrpura rami iporã.
 Huvixave ojejopy uka nde'a reipopẽ va'ekue re.
⁶ Ndee ma neporã ha'e arovy'a vaipa,
 xembovy'a ete xerayvua py.
⁷ Nde'yvia ma pindo rami,
 ha'e rã nekã ma guapytã rami.
⁸ Xee aipoa'e: "Ajeupi rã pindo re,
 ajopy 'rã ixã rapo re", ha'e.
 Nekã toi xevy uva arupý xã rami,
 nepytuẽa taeakuã porã maçã rami.
⁹ Xerayvua ma vinho iporã va'e rami.

Ta'yxy ijayvuague

- Ha'e va'e vinho ma xerembiayvu toy'u tema,
 toxyry ovy ijuru ha'e haĩ rupi.
¹⁰ Xee ma xerembiayvu mba'e,
 ha'e rã ha'e xepota.
¹¹ Eju xerembiayvu, jaa nhuũndy rupi jaiko,
 pytũ jaaxa aguã tekoa'i rupi.
¹² Ko'ẽmba'i ramove javy voi vy jaa uvaty re nhama'ẽ vy.
 Jaexa uva poty ojepe'a ma paa,
 ha'e yvyra hi'a va'e henhoi paa.
 Ha'e py ma xee aexa uka 'rã roayvu etea.
¹³ Mandrãgora reakuã nhaetũ,
 ha'e nhanerokẽ rupi ikuai yvyra'a iporãgueve,
 ipyau ha'e yma guare guive.
 Xerembiayvu, ha'e nunga ha'e javi xee amoĩ porã ndevy peguarã.

8

- ¹ Ndee kekyvy va'e rire, xexy omokambu va'ekue ael
 Ha'e rami va'e rire tape rupi rovaexĩ vy
 xee roayvu 'rãgue avave rei xejou vai e'y' re.
² Xee rogueraa vy rogueroike 'rãgue xexy ropy.
 Ha'e gui ndee xembo'e 'rãgue.
 Ha'e rã ndevy ame'ẽ 'rãgue rey'u aguã vinho iporãve va'e regua,
 ha'e xe yvyra'a rykue.

³ Ndeaxua regua oĩ 'rãgue xeakã guýry,
ha'e rã reiporu kuaa regua ma xekuavã 'rãgue.

⁴ Jerusalém memby kuery, ajerure pëvy:
pemomyĩ eme rojoayvua, tove toke ranhe,
ha'e ae ovyxe e'ýa ja.

Irũ kuery ijayvuague

⁵ Mava'e tu peva'e, tekoa e'ýa katy gui oẽ ouvy vy
guembiayvu reve joe ojeko jogueruvy va'e?

Ime ijayvuague

Maçã'y rembypy gyy py xee romomyĩ.
Ha'e py ae ndexy nderereko'i raka'e.

Ha'e py ae ju nekuavãare oendu raka'e haxy va'e.

⁶ Emoĩ xerery nekuraxõ re imbojaarã rami, ndejyva re guive.
Mba'eta jajoayvua ma manoa rami ipo'aka.

Ha'e rã takãte'ý ma vyvra rupa rami nda'evei ete va'e.

Ha'e va'e regua tapyĩ ma hendy revegua,
tata rami okai oiny va'e.

⁷ Yy tuvixa va'e teĩ nombogueti 'rã jajoayvua,
yakã ikuai va'e ndojao'i 'rã.

Joayvua repyrã amongue oguereko va'e ha'e javi ome'ẽ teĩ mba'everã ndovarei.

Irũ kuery ijayvuague

⁸ Ore kuery orereindy roguereko ikã e'ý teri va'e.

Mba'e tu rojapo 'rã ixupe gua'yxyrã re ojerurea ramo?

⁹ Tetã kora ha'e oiko va'e rire

ixupe rojapo 'rãgue peteĩ torre prata guigua.

Ha'e rã okẽ va'e rire

ronhovã 'rãgue vyvrape yary guigua py.

Ta'yxy ijayvuague

¹⁰ Xee ma tetã kora, ha'e rã xekã ma torre rami oĩ.

Ha'e rami rã xerembiayvu xerexa vy xererovy'a 'rã.

Irũ kuery ijayvuague

¹¹ Baal-Hamom py Salomão oguereko peteĩ uvaty.

Ha'e va'e omboaxa raka'e opena va'erã kuery pe.

Ha'e ramo hi'a rekovia peteĩ-teĩ ogueru ixupe mil hatã'i va'e prata guigua.

Ta'yxy ijayvuague

¹² Ha'e rã xe uvaty ma xereve ae oĩ xee aipotaa rami areko aguã.

Ha'e gui ndee Salomão, eju ejopy mil hatã'i va'e,

ha'e hi'a re opena va'e kuery ju duzentos 'rã ojopy.

Ime ijayvuague

¹³ Ndee yvotyty rupi reiko va'e,

nhaneirũ kuery oenduxe okuapy ndeayvua.

Xee voi taendu.

Ta'yxy ijayvuague

¹⁴ Xerembiayvu, eju pojava!

Enha ejuvy guaxu e'ý vy guaxu ra'y

vyvoty heakuã va'e áry rupi opo-opo ouvy va'e rami.

Isaías ayvu oĩa Isaías ayvu oĩa

“Kova'e ma Amos ra'y Isaías pe oexa uka pyre Judá ha'e Jerusalém pygua kuery reko re, Judá pygua huvixa Uzias oĩ jave, ha'e gui Jotão, Acaz ha'e Ezequiasju. 'Ndee yva, endu ke, ha'e ndee vvy, eikuaa pota ke, mba'eta ijayvu va'e ma Senhor ae. Aipoe'i: “Amongakuaa xera'y kuery, ha'e kuery ambotuvixapa rire teĩ xere opu'ã rei okuapy. Vaka kuery minha oikuaa 'rã oja, ha'e mburika'i voi oikuaa 'rã ija omongaruaty. Ha'e rã Israel kuery ma ndoikuaai mba'eve, xeivygua kuery ndoikuaai mba'eve ete”, he'i' ” (1.1-2). Profeta Isaías ijayvu raka'e Nhanderuete po'akaa ha'e peteĩ'i oikoa re, guembiguai jogueraa jepearã ombou aguã re guive. Ha'e va'e ma Jesus Cristo.

Capítulo 1 guive 39 peve ijayvu Assíria pygua kuery Judá kuery ombojexavaia re. Ha'e rami teĩ profeta pe nda'eveive va'e ma hetarã kuery ojevavy reia, Nhanderuete nonhe'ẽ renduia ha'e hexe ndojerovia okuapy.

Capítulo 40 guive 66 peve omombe'u ha'e kuery vvy mboae rupi ombojexavaia teĩ Nhanderuete omboaxy vvy oguerojevvy ju ha'e ogueraa jepe aguã. “Nhanderuete aipoe'i: ‘Xeivygua kuery pe pendeayvu pembovy'aa rupi, pembovy'a ju ke. Pendeayvu porã'i ke Jerusalém pygua kuery pe. Ha'e vvy aipopeje: “Opa ma pendere opu'ãa ague, mba'eta pendereko vaiague omboguepaa ma. Pejevavyague re pepaga aguã va'ekue mokoigue ma pejopy Senhor po gui”, peje' ” (40.1-2).

Ojevavya va'e kuery pe ijayvuague

¹ Kova'e ma Amoz ra'y Isaías pe oexa uka pyre Judá ha'e Jerusalém pygua kuery reko re, Judá pygua huvixa Uzias oĩ jave, ha'e gui Jotão, Acaz ha'e Ezequias ju.*

² Ndee yva, endu ke, ha'e ndee vvy, eikuaa pota ke, mba'eta ijayvu va'e ma SENHOR ae. Aipoe'i: “Amongakuaa xera'y kuery, ha'e kuery ambotuvixapa rire teĩ xere opu'ã rei okuapy.

³ Vaka kuery minha oikuaa 'rã oja, ha'e mburika'i voi oikuaa 'rã ija omongaruaty. Ha'e rã Israel kuery ma ndoikuaai mba'eve, xeivygua kuery ndoikuaai mba'eve ete”, he'i'.†

⁴ Nda'eveie ete 'rã ha'e rami ete pendeko vai va'e pe. Peẽ kuery pejevavya anho pereko va'e, heko vai va'e regua, ha'e iky'apa va'e ra'y kuery pendekuai. Pepoipa ma SENHOR gui, pendeayvu vai Israel kuery Ruete Iky'a e'ỹ va'e pe, ha'e vvy jypy guare rami ju pendekuai.

⁵ Mba'e re tu pendekuai axy reivexe ri pejevavya vvy? Mba'eta peneakã raxypa, pendepya voi ijaipa ma.

⁶ Pendepy mbyte guive pendeapye peve penderete ivaipa ma, opa marãague ai vaikue oĩ penderete re. Ha'e nunga ndoiky'a'oi 'rã, ndojokuaai 'rã, neĩ azeite py voi noipoanoai 'rã.

⁷ Pendevvy ma ivaipa ma, peneretã ikuai va'e voi omombaa ma tata py. Peẽ kuery pexaa py amboae vvy guigua kuery ho'upa penereminhoty'gue. Ha'e ramo pendevvy rupi tekoague rive opyta, amboae vvy guigua omomba rire.

⁸ Sião memby‡ voi opyta ha'e ae'i, oguy vaikue'i uvaty, e'ỹ vvy pepino-ty mbyte py oĩ va'e rami, ha'e e'ỹ vvy tetã ojokopaa va'e rami.

⁹ Ha'e gui SENHOR ixondaro reta va'e amongue'i jakuave aguã rami ndoejai va'e rire nhakanhymba 'rãgue Sodoma ha'e Gomorra tetã rami.§

Ombojerovia merami rive va'e re ijayvuague

¹⁰ Peẽ Sodoma pygua huvixa kuery, pendu ke SENHOR ayvu! Gomorra tetã py pendekuai va'e, pejapyxaka Nhanderuete guigua lei rupi penembo'ea re.*

¹¹ SENHOR aipoe'i: “Mba'erã tu ha'e rami ete xeivy peme'ẽ mba'emo? Xee ndaipotavei ma vexa'i ava ha'e mymba ikya va'e peapy reve peme'ẽ va'e. Xee ndarovy'avei ma toro ra'y ruguy, xee ndaipotavei ma vexa'i ha'e kavara.

¹² Xerenonde pejexa uka aguã peju vvy mava'e oipotaa rami tu penha-penha xeivygua templo roka rupi?

¹³ Peruve eme xeivy ndovareie va'e regua peme'ẽ va'erã. Heakuã porã va'e xeivy peapy va'e xembojeguara ma, ha'e jaxy pyau'i ára ngaru pejapo va'e, ha'e gui sábado ha'e amboae ára py pendeatya voi, mba'eta ndaropo'akavei ma nhemboaty iky'a e'ỹ va'e oiko aguã py pejevavy pekuapy.

¹⁴ Jaxy pyau'i ára ngaru oikoa py, ha'e amboae ára pendeatya py ma xembopoxy pekuapy, ndaropo'akavei ma. Xekane'õ ma arojexavai vvy.

¹⁵ Ha'e nunga rupi xeivy pe pejapukaia rupi pendepo peupi ramo xee nama'ei 'rã. Mbovykue rei e'ỹ pejerure teĩ xee naendui 'rã, jougty py pendepo ky'a ramo.

¹⁶ Pejevoy ke, pejey'a'o, pendereko vaia peipe'a xerenonde gui! Pejepe'a pejapo vaia gui,

¹⁷ ha'e peikuaa pota iporã va'e rupi ju pendekuai aguã. Pejoguereko pota teko porã rupi. Pejoko nhombojexavaixe va'e, pepy tyre'ỹ kuery ojavyky reia rã, ha'e peipytyvõ imeve'ỹ va'e”, he'i.

* 1:1 Judá kuery kuaray puku-a katy, ha'e gui Israel kuery kuaray apu'a'ia katy ikuai va'e. Judá regua tetã tuvixave va'e ma Jerusalém Isaías rekoa, ha'e rã Israel regua tetã tuvixave va'e ma Samaria. † 1:3 Amongue py “Israel kuery” 'ea 'rã Israel kuery pe ae, ha'e rã amboae henda py ma mokoive regua Judá ha'e Israel pe ijayvu. Apy ma mokoive re ijayvu. ‡ 1:8 “Sião memby” he'ia ma Jerusalém tetã re ae ijayvu vvy.

§ 1:9 Tetã Sodoma ha'e Gomorra ma Nhanderuete omomba vyvoty raka'e tata omboguejy va'e pygua kuery opa marã rei ikuai rire (Gênesis 18.1-19.29). Romanos 9.29 * 1:10 Apy ma guetarã kuery pe ae “Sodoma ha'e Gomorra pygua” he'i.

Imboaxya rupi "Peju ke" he'iaque

¹⁸ SENHOR aipoe'i: "Peju ke toromongeta. Pejejavya pytã rei rire teĩ xee romoxii 'rã yro'y rami. Pytã huũ rei teĩ romoxii 'rã vexa'i rague rami.

¹⁹ Ha'e rami peikoxe, ha'e xenhe'ê rendu ri ramo romongaru 'rã mba'emo porã vvy omoingo va'e re anho.

²⁰ Ha'e rã naxenhe'ê rendui vy pepu'ã rei ramo pendejukapaa 'rã kyxe py." SENHOR ae ha'e rami ijavyu va'ekue.

Jerusalém pygua kuery ombopaga rire oepju aguã re ijavyuague

²¹ Tetã Nhanderuete pe ojeroviapy peiko va'ekue ri kunha itavy rei va'e rami ju pendekuai. Pendea py heta ikuai va'ekue ri iporayvu'i ha'e peteĩ rupi ikuai va'e. Ha'e rã aỹ ma jujukaa rive anho ikuai.

²² Prata pereko va'ekue ma omombo pyrã rive opyta. Pende-vinho iporãve va'ekue ri yy re rive omoirũa.

²³ Pendea py huvixa kuery ikuai va'e voi heko vai va'e anho ikuai, imonda va'e kuery irũ. Ha'e kuery peteĩ-teĩ ojeupe guarã mba'emo ome'ê uka opena aguã, ojoupave aguã re rive 'rã oo. Ha'e rami avi ndoepyvei ma tyre'ỹ kuery, imeve'ỹ va'e re voi nopenavei ma.

²⁴ Ha'e nunga rupi SENHOR ixondaro reta va'e, Israel kuery Ruete ipo'akapa va'e aipoe'i: "Aỹ gui xepoxya aexa uka ta ma xerovaigua kuery pe. Ajepy 'rã ndaxerayvuvei okuapyague re.

²⁵ Penderovai aupi 'rã xepo, roiky'a'o 'rã kavõ py rami, pendea gui aipe'a aguã iky'a va'e ha'e javi.

²⁶ Xee amoĩ ju 'rã joguerekoarã yma guare rami. Amoĩ 'rã penemongetaarã jypy guare rami. Ha'e ramo mae peneretã pe "Teko porã oĩa' ha'e 'Ojeroviapy ikuai' 'ea ju 'rã.

²⁷ "Aepy ju 'rã Sião itekũ ha'evea rami, teko porã rupi araa jepe 'rã ojeko rerova uka va'e ha'e javi.

²⁸ Ha'e rã teko vai rupi ikuai va'e ha'e ojejavypa rei va'e ma amomba vyvõi 'rã. Ha'e ramo SENHOR gui ojepe'a va'ekue okanhymba 'rã.

²⁹ Mba'eta peẽ kuery peximba 'rã vvyra pejou porã reiague re, ha'e nda'veei nho 'rã yvotyty pejou porãveague re.†

³⁰ Ha'e nunga rupi vvyra rogue omanomba rei va'ekue rami 'rã pendekuai, ha'e yvotyty ipirupa va'ekue rami avi.

³¹ Peẽ kuery va'e regua ipo'akave va'ekue ri mba'emo pire rami 'rã ikuai, ha'e ha'e kuery mba'emo ojapo va'ekue ma tata raviju rami 'rã opyta, mba'eta mokoĩve okanhymba 'rã tata py, imboguearã ndoikoĩ 'rã guive", he'i.

2

Miquéias 4.1-5

¹ Pova'e ma Amoz ra'y Isaías pe mba'emo oexa uka reve ayvu ombou va'ekue Judá ha'e Jerusalém re.

² Ha'e gui opaa ára vvyty SENHOR pegua oo oĩa ombo'yvateve 'rã vvyty ikuai va'e áry. Ha'e ramo vvy regua kuery ha'e javi oje'oi 'rã ha'e katy.

³ Heta regua kuery oo vy aipoe'i 'rã joupe-upe: "Peju ke, jajaje'oi SENHOR pegua vvyty re, Jacó kuery Ruete pegua oo oĩa katy. Ha'e ma nhanembo'e 'rã oikoa re, ha'e va'e rupi nhande kuery voi nhandekuai aguã. Mba'eta Sião gui ma oikuaa ukaa 'rã lei, Jerusalém gui onhendu 'rã SENHOR ayvu", he'i 'rã okuapy.

⁴ Ha'e gui ma SENHOR oikuaa pota 'rã vvy regua kuery re, omo'arandu 'rã heta regua. Ha'e ramo ha'e kuery okyxe gui ojapo 'rã vvy karañarã, ha'e hu'y guaxu gui ojapo 'rã kyxe vvyra rakã ayaarã. Mba'eta vvy regua kuery okyxe ndoguerojeroviavei 'rã, neĩ joe opu'ã aguã voi ndoikuaavei ma 'rã.

⁵ Peju ke Jacó ramymino kuery, nhande kuery voi nhandekuai SENHOR rexakãa rupi.

Avakue onhemboyvate va'ekue omo'yvyĩ'i aguã re ijavyuague

⁶ Ha'e gui SENHOR, ndee rejapa va'e ty'y ndevyguã Jacó ramymino kuery. Mba'eta ndevyguã kuery ma kuaray oua katygua gui oikuaa amboae rami onhembo'e aguã, filisteu kuery rami ae 'rã imba'ekuaa, vvy mboae regua ra'y kuery re 'rã irũ okuapy.

⁷ Ijvy re ma heta oĩ prata ha'e ouro. Ndoipapa kuaavei ma opa mba'e porã oguereko va'e. Ha'e py oĩ kavaju anho, ha'e karóxa'i voi mbovy rei e'ỹ ikuai.

⁸ Ha'e kuery vvy re tynyẽ avi mba'emo ra'angaa ombojeroviapy. Ha'e kuery guenapy'ã re oĩ 'rã ha'e kuery ae po py ojapo va'ekue renonde, omboete 'rã ha'e kuery ae rembiapo.

⁹ Ha'e va'e rire ma omo'yvyĩ'imbaa, avakue pavẽ omoxĩmbaa teĩ ndereperdoai ha'e kuery ojejavya.

¹⁰ Tapeo, peike itakua py penhemi! Yvy ku'i py penhemi SENHOR gui pekyje vy, hexakãa ha'e ipo'akaa gui.

¹¹ Mba'eta omomba 'rã avakue ojejou porã reiague, omo'yvyĩ'i 'rã onhemboyvate rei va'ekue. Mba'eta ha'e va'e ára SENHOR anho yvate 'rã.

¹² Mba'eta ovaẽ 'rã ára SENHOR ixondaro reta va'e omo'yvyĩ'imba aguã ojejou porã rei va'ekue, onhemboyvateve va'ekue-ekue ha'e yvateve va'ekue ha'e javi oitypa aguã,

¹³ oity aguã vvyra yary Líbano vvy regua yvatekueve, ha'e carvalho Basã vvy re ikuai va'e ha'e javi,

¹⁴ ha'e gui vvyty yvate va'e ha'e javi, vvy'ã ikuai va'e,

¹⁵ ha'e gui torre yvate va'e ha'e javi, ha'e tetã kora oĩ atã va'ekue meme,

¹⁶ ha'e gui kanoã guaxu Társis katy oo va'e ha'e javi, jaexa rã iporãve va'ekue teĩ.

† 1:29 Ha'e kuery ma vvyra ikuai va'e guýry, ha'e yvotyty rupi onhembo'e va'ekue amboae rami rei. Mba'emo ra'angaa ombojerovíaa rupi opa marã rei ikuai.

¹⁷ Ha'e rami vy omomba 'rã avakue ojejou porãague, omo'yvyĩ'imba 'rã onhemboyvatevea. Mba'eta ha'e va'e ára SENHOR anho yvate 'rã.

¹⁸ Ha'e gui ombovaipa 'rã mba'emo ra'angaa ha'e javi.

¹⁹ Ha'e ramo avakue onhemimba 'rã itakua py ha'e yvykua rupi SENHOR gui okyje vy, hexakãa ha'e ipo'akaa gui, ko yvy regua omomyipa aguã opu'ã ramo.

²⁰ Ha'e va'e ára anguja ha'e mbopi pe rive avakue omombo 'rã mba'emo ra'angaa prata ha'e ouro guigua, ha'e kuery ae omboete va'erã ojapo va'ekue.

²¹ Ha'e rami vy onhemimba 'rã itakua py ha'e itaova guy rupi SENHOR gui okyje vy, hexakãa ha'e ipo'akaa gui, ko yvy regua omomyipa aguã ha'e opu'ã ramo.

²² Ha'e nunga rupi pejeroviave eme avakue oapyĩgua rupi rive ipytuẽ va'e re. Mba'erã tu ha'e kuery ovare?

3

Judá ha'e Jerusalém pygua kuery ikuai re guive SENHOR oikuaa pota aguã re ijayvuague

¹ Mba'eta ma'ẽ, Jerusalém ha'e Judá gui SENHOR ixondaro reta va'e oiipe'a 'rã mbojape, yy ha'e guekoverã oguereko va'ekue ha'e javi,

² ha'e gui ipy'a guaxukueve, xondaro kuery, nhomboayvu va'ety, profeta, imba'ekuaa va'e kuery, ha'e tujakueve,

³ ha'e xondaro ruvixa cinqüenta re opena va'e, ha'e omboetepevy, nhomongetaa kuery, mba'emo ojapo kuaa va'e ha'e imba'evyky va'e kuery ha'e javi 'rã oiipe'apa.

⁴ Ha'e rire huvixa ikuai va'ekue 'rãgue py kunumigüe'i ju 'rã omoĩ. Ha'e ramo kyrĩgue po py oĩ 'rã ha'e kuery re opena aguã.

⁵ Ha'e rire nhomoingo axy 'rãjomeme, peteĩ-teĩ ngoo katy'i ikuai va'e reve. Kunumigüe'i opu'ã 'rã tujakueve re, ha'e opa marã rei ikuai va'e opu'ã 'rã omboetepevy re.

⁶ Ha'e va'e jave ma amongue nguuro py ovaẽ vy guyke'y pe aipoe'i 'rã: “Ndee tu ndeao rima. Ha'eve reiko aguã oreruvixarã. Epena ha'vy kova'e tekoa ivaipa va'ekue re”, he'i 'rã.

⁷ Ha'e rami teĩ ha'e va'e árave tyke'y ombovai vy aipoe'i 'rã: “Xee tu poropoanao e'ỹ, ha'e xero py ndarekoi mbojape, neĩ ao. Nda'evei xee aĩ aguã heta va'e kuery ruvixarã”, he'i 'rã.

⁸ Mba'eta Jerusalém ivaipa, Judá regua voi oitypaa, mba'eta oayvu py ha'e mba'emo ojapoa py ha'e kuery SENHOR re opu'ã okuapy, Hexakãmba va'e ombopoxya rupi rive ikuai.

⁹ Ha'e kuery rova re ojekuaa ojevavypa va'ea. Sodoma pygua kuery rami ete oexa uka 'rã ojevavypa reia onhomĩ e'ỹ re. Nda'evei ete 'rã ha'e kuery pe, ojeupe ae ojapo vai rive.

¹⁰ Ha'e rã heko porã va'e kuery pe ma aipo're: “Pëvy pe iporã va'e oiko 'rã”, 're, mba'eta ha'e kuery ojopy 'rã ikuai porãague repy.

¹¹ Ha'e rã heko vai va'e pe ma nda'evei ete 'rã, opa mba'e py ikuai axy 'rã. Mba'eta ojapo vaiague ae ju 'rã ojeapa ha'e kuery re.

¹² Xeretarã kuery re opena va'e ma kunumigüe meme, ha'e kuery re opena aguã ma kunhague po py oĩ. Xeretarã kuery, pendererekoa kuery ma penembotavypa, mba'eta ombovaipa tape peo aguã va'e.

¹³ Ha'e nunga rupi SENHOR ae 'rã oikuaa pota, oiko katu ma omboayvu aguã yvy regua kuery ha'e javi.

¹⁴ SENHOR omboayvu 'rã ojeupegua kuery mongetaaty ha'e huvixa kuery. Ha'e vy aipoe'i 'rã: “Peẽ kuery ae ma xe'uvaty mombaare peiko. Iporiaukue'i gui peraa rive va'ekue ma pendero py ae oĩ.

¹⁵ Mba'e nunga rupi tu pemoingo axy xeivygua kuery, ha'e pembojexavai iporiaukue'i?” he'i SENHOR ixondaro reta va'e.

Sião pygua kunhague ombopaga aguã re ijayvuague

¹⁶ Ha'e gui SENHOR aipoe'ive ju: “Pexa na Sião pygua kunhague ojejou porã rei okuapy va'e! Oaju'y omoatã reve rei 'rã oguata, oma'ẽ 'rã nda'evei reia rupi, opyrõ py'i'i rei, ha'e opy nhu'ã regua oparã rei reve 'rã oguata”, he'i.

¹⁷ Ha'e nunga rupi Sião pygua memby kuery akã SENHOR omboaiipa 'rã, oexa ukapa 'rã guive ha'e kuery oxĩmba aguã.

¹⁸ Ha'e va'e ára SENHOR oiipe'apa 'rã onhembojeguaa ha'e kuery opy nhu'ã re oguereko va'e, akã regua ha'e ijegua jaxy pëgue ramigua,

¹⁹ ha'e namixã, poapy regua, hova mo'ãa ovava va'e,

²⁰ ajukue akã regua, corrente'i opy nhu'ã re oguereko va'e, ku'axã, heakuã porã va'e ryrũ, mba'ekuaa ryrũ,

²¹ kuã regua, xĩ apy regua,

²² ao iporãve va'e, manto, aju'y regua, voko,

²³ ojexaa, kamixa perirĩ'i, 'a regua ha'e tova mo'ãa ipukuve va'e ha'e javi.

²⁴ Ha'e va'e rire ha'e kuery onhemoeakuãmba rei oikovy 'rãgue py heakuã vaikue rei 'rã oikovy. Iku'axã 'rãgue py oiporu 'rã ixã va'e. Ha'e gui oje'avyky porã rei 'rãgue py inhakã pire rei 'rã. Ao iperirĩ'i va'e 'rãgue py voxa inhana rei va'e guigua 'rã oiporu. Ha'e iporã rei 'rãgue py opyta 'rã ipere okaigüe rupi.

²⁵ Ime kuery ma ojukupaa 'rã kyxe py, ipy'a guaxukueve voi omanomba 'rã joe opu'ãa rupi.

²⁶ Ha'e ramo tetã rokẽ py kunhague opa marã ojape 'rã okuapy ipy'a vai vy. Sião tetã ivaipa ramo yvy py rive oguapy 'rã.

4

¹ Ha'e va'e ára sete kunhague ojopy 'rã pete'i'í ava, ixupe aipoe'i 'rã: "Ore ae rojou 'rã ro'u va'erã ha'e oreoarã, ri tei tove nderery rupi toronhemoery rive, roximba reia rupi ve'ÿ roiko aguã", he'i 'rã okuapy.

SENHOR guigua Yvyra Rapytakue Renho'i re ijyvuague

² Ha'e va'e ára ma SENHOR guigua Yvyra Rapytakue Renho'i oiko vy yvate porã 'rã, ojou porãmbaa 'rã guive. Ijyvy rupi ikuai va'e voi iporã va'erã meme, Israel kuery oo jepe va'ekue oguerovy'apa ha'e ojou porã aguã.

³ Ha'e gui Sião pygua okuave va'e Jerusalém py opyta va'ekue pe ma "Iky'a e'ÿ va'e" 'ea 'rã, oikove aguã Jerusalém py guery ombopara uka va'ekue ha'e javi pe.

⁴ Mba'eta SENHOR oiky'a'opa ju 'rã Sião memby kuery, Jerusalém pygua kuery gui omboguepa 'rã tuguy omoëague ha'e kuery re o'i va'e, Onhe'ë teko porã rexa ukaa ha'e joky'a'o va'e rupi ae.

⁵ Ha'e gui Sião yvyty áry, ha'e ha'e py ijatypa okuapy va'e áry SENHOR omo'i 'rã pete'i arai ara py, ha'e gui pyávy ma ombou 'rã tata rendy vuku hataxi reve. Ha'e ramo ha'e javi áry rupi hexakãa oja'o'i 'rã oo ao'ia rami.

⁶ Ha'e nunga ma ara py o'i 'rã kuaray'arã, mba'eta ha'e py onhemi okuapy va'e pe ojoko 'rã kuaray haku, vytyu atã ha'e oky.

5

SENHOR mba'e uvaty re ijyvuague

¹ Aÿ ma aporaei ta xerembiayvu pe, ixupegua uvaty re 'rã aporaei. Mba'eta xerembiayvu ma pete'i uvaty'rã onhotÿ raka'e yvy porãa py.

² Ha'e rami vy ojo'o yvy, oguenoëmba ita ikuai va'ekue, ha'e gui uva yky porãgueve anho onhotÿ. Uvaty mbyte ojapo torre yvate va'e oma'ë jepi atyrã, ojapo avi oja guaxu uva'a oumbiri atyrã. Ha'e gui ma oarõ oikovy onhotÿ va'ekue hi'a porã aguã. Ha'e rami tei ha'e va'e 'rãgue py iro va'e anho oiko hi'a.

³ Ha'e rire aipoe'i: "Aÿ ma Jerusalém ha'e Judá py pendekoa va'e, ajerure pëvy: Peikuaa pota xere ha'e xe'uvaty re.

⁴ Mba'e nunga tu anhotÿ va'ekue re ajapove aguã ha'eve 'rãgue ajapoague áryve? Ha'e mba'e re tu iporã va'e arõ va'e 'rãgue py iro va'e anho oiko?

⁵ Aÿ ma xee amombe'u ta pëvy xe'uvaty re ajapo aguã. Aipe'apa 'rã ikorarã juu anhotÿ va'ekue, xe'uvaty opyta aguã mymba okaru atyrã rive. Aity 'rã ikora mymba kuery opyrõmba aguã.

⁶ Ajapo 'rã opyta rive aguã rami. Ha'e ramo uva rembypy nomoatyrõavei 'rã, ne'i yvy voi nomboa'eveavei 'rã. Ha'e rami 'rãgue py juu ha'e juu rakuandy rive 'rã ikuai. Ha'e arai pe xeayvu 'rã hi'áry nda'okyvei aguã re", he'i.

⁷ Mba'eta uvaty ojeupe guarã SENHOR onhotÿ va'ekue ma Israel kuery ae, uva rembypy oguerovy'a va'ekue ma Judá kuery. Ha'e oarõ oikovy tei ha'e kuery teko porã rupi ikuai aguã oexaxe vy. Ha'e rami tei lei rovai rupi rive ikuai ra'e. Teko porã 'rãgue py haxê reia rupi anho ikuai.

"Heko vai va'e pe nda'evei ete 'rã" he'iaque

⁸ Nda'evei ete 'rã peë kuery penderorã pejapo-japove va'e ha'e pendeyvy'rã pejou-jouve va'e pe, amboae kuery o'i aguã nda'evevei peve. Ha'e rami vy peë kuery anho peiko pendeyvy mbyte rupi.

⁹ Ha'e gui SENHOR ixondaro reta va'e aipoe'i xeivy: "Anhetê heta oo opyta rei 'rã, tuvixakueve ha'e iporãgueve voi, avave rei no'avei rã.

¹⁰ Ha'e va'e jave pete'i alqueire uvaty rape ome'ë 'rã vinte litro ete'i, ha'e dez voxa trigo ra'yigue gui ma tei dez quilo ete'i 'rã ome'ë", he'i.

¹¹ Nda'evei ete 'rã oka'u va'e kuery pe. Ha'e va'e kuery ma ko'ë'i ramove vinho oy'u aguã omboypy vy pytũ mbyte raxa peve 'rã oo, vinho py onhemboakupa peve!

¹² Ha'e kuery ngaru ojapo py ogueru 'rã mbaraka, mba'epu ixã reta va'e, pandeiro ha'e mimby. Vinho heta avi 'rã o'i oy'u va'erã. Ha'e 'rã SENHOR ojapo va'e re ma ha'e kuery ndoikuaa potai, na'ima'endu'ai guive opo py mba'emo ojapo va'ekue re.

¹³ Ha'e nunga rupi xevygua kuery ogueraapaa 'rã escravo-rã, mba'eve re ndoikuaa potaiague re rive. Ha'e kuery va'e regua yvatekueve tei oendu 'rã karuai, ha'e heta va'e kuery ojexavai 'rã okuapy ijy'uvei gui.

¹⁴ Ha'e nunga rupi yvykua omokõveve vy oipe'a vaipa 'rã ojuru, ha'e py Jerusalém pygua omboeteve pyre kuery oguejypa aguã, ovy'a vy hevovo reia rupi ikuai va'ekue, ha'e rami ikuaia rupi oguerovy'a rei va'ekue voi.

¹⁵ Ha'e rami vy heta va'e kuery opa 'rã oje'oivy, avakue omo'yvy'i'mbaa 'rã. Ojejou porã rei va'ekue voi yvy katy rive 'rã oma'ë okuapy.

¹⁶ Ha'e rã SENHOR ixondaro reta va'e ma yvate 'rã joe oikuaa potaa py. Nhanderuete iky'a e'ÿ va'e gueko porã rupi vy oexa uka 'rã iky'a e'ÿ va'ea.

¹⁷ Ha'e py ma vexa'i kuery okaru 'rã okuapy ha'e kuery ae okaruaty py rami, ha'e hoo va'e'ÿ ju 'rã ojou okuapy guembi'urã oguerokopa rei va'ekue ovyv oejague rupi.

¹⁸ Nda'evei ete 'rã teko vai rupi onhea'ã va'e kuery pe, mba'emo ixã py oguerua rami nhombotavypa vy! Ha'e kuery ma karõxa omoatãa rami omoatã 'rã heravy gueko vaia.

¹⁹ Ha'e rami teĩ ha'e kuery aipoe'i 'rã: "Tove Nhanderuete tojapura, tojapopa vyvoi ojaxope va'e, nhande kuery jaexa aguã. Tove Israel kuery ruete icky'a e'ÿ va'e onhembody'aa toiko pojava jaikuaa aguã mba'e nunga paa", he'i 'rã okuapy.

²⁰ Nda'evei ete 'rã iporã va'e pe "Mba'emo vai" he'i va'e kuery pe, ha'e rã mba'emo vai pe ma "Iporã" he'i va'e kuery pe. Ha'e kuery ma "Hexakãa" he'i 'rã pytũ va'e pe rive, ha'e rã hexakãa pe ma "Pytũa" he'i 'rã. He'ẽ va'e pe "Iro va'e" he'i 'rã, ha'e rã iro va'e pe ma "He'ẽ va'e" he'i 'rã.

²¹ Nda'evei ete 'rã ojeupe ae "Hi'arandupa va'e" he'i va'e pe, mba'eta ha'e kuery anho oikuaapa va'e ea rami oexa'ã teĩ.

²² Nda'evei ete 'rã vinho oy'u aguã anho ipy'a guaxuve va'e pe, ha'e iro va'e joo ramigua e'ÿ-e'ÿ omoirũa rupi ojerovia ete va'e kuery pe.

²³ Ha'e kuery ma ome'ẽmby ojopy 'rã omboeko porã aguã otekoavypa va'e, ha'e heko porã va'e omboeko vai aguã.

²⁴ Ha'e nunga rupi ha'e kuery opa 'rã tata mba'emo pire oapya rami, tataendy nhuũ pirukue omombaa rami. Ha'e rami ae avi ha'e kuery voi okanhymba 'rã, mba'emo rapo hu'ũmbaa rami avi, ha'e ipotykuue yvytu ogueraapaa rami, vvy ku'i rami rive, mba'eta ha'e kuery nda'ikuaixei rire SENHOR ixondaro reta va'e guigua lei rupi, noenduxeĩ Israel kuery ruete icky'a e'ÿ va'e ayvu.

²⁵ Ha'e nunga rupi ae SENHOR poxya hendy ojeupegua kuery pe. Ha'e kuery rovai opo oupi reve ombopaga ramo yvyty ikuai va'e voi oryrypa. Ha'e ramo ha'e kuery re'ogue ma yty rami rive opyta tape rupi. Ha'e rami ete teĩ ipoxya ndoaxai teri. Opo oupi ae tema.

²⁶ Ha'e gui ma SENHOR oupi 'rã peteĩ bandeira oenõ aguã mombyry ikuai va'e. Ha'e pygua xondaro kuery pe otuvy nhe'ẽ 'rã vvy apy re ikuaiã gui ou aguã. Ha'e ramo ha'e kuery onha 'rã jogueruvy.

²⁷ Ha'e kuery va'e regua oua rupi neĩ peteĩve na'ikane'õi 'rã, nonhepyxangai 'rã guive. Neĩ peteĩve ma ndopytu'ui 'rã, neĩ ndokei 'rã. Ha'e kuery ku'akuaa voi oĩ atã porã 'rã, ixapatu xã voi ndoxo rivei 'rã.

²⁸ Hu'y voi hakua porã 'rã, guyrapa oguereko va'e xã voi oĩ atã porã va'e meme. Hymba kavaju pyapẽ voi ita rami hatã 'rã, ha'e karõxa joe opu'ãa rupi oiporu va'e ruera ma yvytu jere rami ojere pojava 'rã.

²⁹ Ha'e kuery ma reõ rami 'rã okororõ okuapy, reõ ra'y kuery rami ete. Ha'e kuery onhendu reve guembia ombotyryry 'rã heravy mombyry, ipo gui avave rei ojoguaa e'ÿ aguã.

³⁰ Ha'e va'e ára ha'e va'e kuery ye'ẽ rami 'rã onhendu Israel kuery rovai. Ha'e ramo amongue vvy re oma'ẽ va'e oexa 'rã pytũa ha'e jexavai anho. Mba'eta arai pytũ va'e ojao'ipa ramo kuaray rexakãa ndojekuaavei 'rã.

6

Isaías pe mba'emo oexa ukaa ha'e ojapo ukaa ague

¹ Huvixave Uzias omanoa ma'et'ÿ re ma xee aexa SENHOR. Peteĩ tenda openaaty yvate ha'e iporã ete va'e áry oguapy oiny rã aexa. Ijao ma templo ha'e javi rupi ojepyto oiny.

² Hi'áry rupi anjo kuery hexakãmba va'e ojekuaa. Ha'e kuery peteĩ-teĩ oguereko mboapy meme opepo: mokoĩ py ojao'i ngova, mokoĩ py ma ojao'i opy, ha'e gui amboae mokoĩ py ma oveve 'rã oikovy.

³ Ha'e kuery ijayvu atã reve joupe-upe aipoe'i:

— SENHOR ixondaro reta va'e ma icky'a e'ÿ, icky'a e'ÿ, icky'a e'ÿ va'e ae. Hexakãa ma vvy jave rupi omony'el — he'i okuapy.*

⁴ Ha'e kuery ayvu revovo gui templo yta ikuai va'e omyĩmba, ha'e opy rupi hataxĩ omony'ẽmba ovy.

⁵ Ha'e rami rã xee aipoa'e:

— Nda'evei ete 'rã xevy! Akanhy ta ma rima aÿ! Mba'eta xejuru ky'a va'e vy, ha'e ijuru ky'a va'e kuery mbyte rupi guive aiko vy ae xerexa py aexa Huvixave SENHOR ixondaro reta va'e! — ha'e.

⁶ Ha'e gui ma xea katy peteĩ anjo hexakãmba va'e oveve ouvy. Opo py ogueru peteĩ tapyĩ altar áry gui tapyĩ araa py oguenoẽ va'ekue.

⁷ Ha'e vy ma tapyĩ omboja xejuru re. Ha'e vvy aipoe'i:

— Aÿ kova'e ma ndejuru re oja ma rire retekoavyague oi'pe'apaa ma, rejejavayague omboguepaa ma — he'i.

⁸ Ha'e rire'ive aendu SENHOR ayvu aipoe'i ramo:

— Mava'e nda'u amoundouka ta? Mava'e nda'u oo 'rã oreavyu mombe'uarã?

Ha'e ramo xee ambovai vy

— Xee ma apy aĩ. Xee ri xemoundouka — ha'e.

⁹ Ha'e ramo SENHOR aipoe'i:

— Tereo ha'vy, aipo're heta va'e kuery pe: "Peẽ kuery pejapxyaka porã teĩ napendui 'rã mba'eve. Pexa porã nhea'ã teĩ ndapexai 'rã mba'eve rei", 're.

¹⁰ Ha'e rami vy emoakã ratã kova'e kuery. Ejapo nda'ijapxyakavei ha'e hexa pytũmba aguã rami, guexa py oexa e'ÿ aguã, oapxya py oendu e'ÿ aguã, ha'e opy'a py oikuaa e'ÿ aguã, ha'e kuery xea py ojeyvpa ju vy ojereraa jepe uka e'ÿ aguã rami — he'i.*

¹¹ Ha'e ramo xee aporandu:

— SENHOR, raka'e peve nda'u ha'e rami tema rereko 'rã?

Ombovai:

* 6:3 Apocalipse 4.8

* 6:10 Mateus 13.14-15, Marcos 4.12, Lucas 8.10, João 12.40, Atos 28.26-27

— Ha'e kuery retã ombovaipaa peve, ha'e pygua va'ekue jipoavei peve, ha'e oo ikuai va'e voi opyta rivepa agua, ijyvy voi omombaa peve,

¹² xee SENHOR mombyry amondoukapa peve, ha'e ijyvy py hepyarã ndoikoi ramo.

¹³ Xapy'a rei dez ikuaiague py petei'i opyta teĩ ha'e va'e voi ojukaa 'rã. Ha'e rami avi yvyra terebinto ha'e carvalho oake'oa rã hapytakue opytaa rami avi xeveygua kuery icy'a e'ỹ va'e voi opyta 'rã hapytakue re, ha'yĩgue re rami ae — he'i.

7

Israel ha'e Síria pygua kuery rovai ijayvuague

¹ Ha'e gui Jotão ra'y Acaz, Uzias ramymino va'e Judá pygua huvixa oĩ jave ma Jerusalém tetã re ou okuapy Síria pygua huvixa Rezim ha'e Israel pygua huvixa Remalias ra'y Peca. Tetã re ha'e kuery opu'ã okuapy teĩ nda'ipo'akai.

² Ha'e jave Davi ramymino kuery oendu okuapy “Israel kuery reve Síria kuery onhemoirũ okuapy nhanderovai”, 'ea rã.* Ha'e rami vy Acaz ha'e heta va'e kuery ha'e javi opy'a py okyjepa ete, yvyra ka'aguy re ikuai va'e vytytu atã omomyĩmbaa rami oryryipa okuapy.

³ Ha'e ramo SENHOR aipoe'i Isaías pe:

— Aỹ tereo, ha'e eraa ndera'y hery “Okuave va'e ojevye va'erã” 'ea va'e, huvixa Acaz reve penhovaexĩ agua. Ha'e va'e ma oĩ 'rã tape ajukue joiaty via rupi yupa yvy'ã katyve oĩ va'e py, yy rape apy py ae.

⁴ Ixupe ma aipo'ere: “Enhearõ kuaa ke, enhemondyĩ eme guive huvixa Rezim poxya gui, Síria pygua kuery ha'e huvixa Peca gui. Ekyje eme, ndepy'a py ndekuerai rei eme guive. Ha'e kuery ma mokoĩ tata'y hataxĩ oupy va'e rami rive ikuai.

⁵ Anhetẽ Síria kuery jogueroayvu okuapy va'ekue ndere ojapo vai agua re, Efraim kuery ha'e Remalias ra'y reve. Ha'e vy aipoe'i okuapy:

⁶ 'Nhapu'ã ke Judá vvy re. Nhamondyipa vy nhandepo'aka 'rã nhanemba'erã. Ha'e vy ha'e kuery mbyte nhamoĩ 'rã Tabeal ra'y huvixaverã, he'i va'ekue.

⁷ Ha'e rã SENHOR Nhanderuete ma aipoe'i: 'Ha'e nunga ndoikoi 'rã.

⁸ Mba'eta Síria re petei'i anho oĩ tetã yvateve va'e. Ha'e va'e ma Damasco. Ha'e Damasco tetã py opena va'e ma Rezim anho. Ha'e rami ae avi Efraim kuery voi sessenta e cinco ma'et'ya py omombaa 'rã, ha'e rire nda'ikuaivei 'rã.

⁹ Efraim re tetã yvateve va'e ma Samaria, ha'e Samaria py opena va'e ma Remalias ra'y anho. Ha'e gui peẽ kuery voi ndapejeroviai ri vy ndapekuavei avi 'rã, he'i.”

Emanuel rekorã re ijayvu ma voiaque

¹⁰ Ha'e Acaz pe SENHOR oayvu omombe'u ukave ju:

¹¹ — Ejerure SENHOR nderuete pe hexa pyrã reikuaa agua, vvy katy ooa katy e'ỹ vy yvatea katy ojekuaa agua teĩ — he'i.

¹² Ha'e ramo Acaz aipoe'i:

— Xee ma ndajerurei 'rã, ndaeko a'ãi 'rã SENHOR — he'i.

¹³ Ha'e ramo profeta aipoe'i:

— Davi ramymino kuery, pendu ha'vy! Ha'e rami avi nda'evei teri teve avakue pemomboriaua? Ha'e gui aỹ ma Nhanderuete eteve voi pemomboriauxe.

¹⁴ Ha'e rami teĩ SENHOR ae 'rã oexa uka peikuaa agua. Ha'e gui petei'ĩ kunhataĩ oguereko'i 'rã kyrĩ va'e, oikuavã'i 'rã opi'a'i. Ha'e vy omboery 'rã Emanuel.†

¹⁵ Ha'e va'e ma teko vai 'rãgue py iporã va'e ojapo kuaa jave kamby kekue ha'e ei rive 'rã ho'u oikovy.

¹⁶ Mba'eta ava'i mba'emo vai 'rãgue py iporã va'e ojapo kuaa e'ỹ mbove voi mokoĩ huvixave gui rekyje reia va'e vvy ombovaipaa 'rã — he'i.

Jerusalém re mba'emo vai ou agua re ijayvuague

¹⁷ — Ha'e gui ma nde'ary SENHOR ombou 'rã ha'e rami ete agua ára, ndevyguu kuery ha'e nderu ro pygua kuery ary guive. Ha'e rami agua ma Judá gui Efraim kuery ojepe'aguge guive ndoikoi teri va'e ramigua. Assíria pygua huvixave rupi vy ombou 'rã.

¹⁸ Mba'eta ha'e va'e ára SENHOR otuvy nhe'ẽ 'rã mberu yakã mombyry Egito re ikuai va'e pe, ha'e eiru Assíria vvy re ikuai va'e pe.

¹⁹ Ha'e rã ha'e va'e kuery oupa 'rã, oguejypa 'rã vytytu pa'ũ ha'e javi re, itakua rupi, juu'y ha'e mymba oy'uaty ha'e javi re.

²⁰ — Ha'e va'e ára ma SENHOR onhopĩmba 'rã peneakã, ha'e hi'a penderete regua. Omboipa avi 'rã penderendyva. Tendyva ayaa rami oiporu 'rã yakã rovai guigua, Assíria pygua huvixa ae.

²¹ Ha'e va'e ára ma avakue oguerekove 'rã petei'i vaka ta'y'i ramo va'e ha'e mokoĩ vexe'i anho.

²² Ha'e rami teĩ ha'e va'e ae ikamby porã ete 'rã ha'e kuery ho'u agua kamby kekue. Oyvy re okuave va'e ha'e javi ho'u 'rã kamby kekue ha'e ei.

²³ Ha'e va'e ára ma mil uva rembypy mil hatã'i va'e prata guigua re hepy 'rã va'ekue ikuaiague py opyta 'rã juu ha'e juu rakuandy tyrã rive.

* 7:2 Judá vvy re Síria kuery opu'ã okuapy Israel kuery rupive, Judá pygua ruvixave ma Acaz oĩ tamoi Davi oiague py. † 7:14 Tery Emanuel ma “Nhanderive Senhor oi” 'ea, Mateus 1.23 py oĩa rami avi.

²⁴ Ha'e py ma hu'y ha'e guyrapa reve 'rã avakue oike, mba'eta juu'y ha'e juu rakuandy ojao'i 'rã vvy ha'e javi.

²⁵ Ha'e gui vvyty avakue enxada reve oo jepiaty ha'e javi rupi ndoovei ma 'rã, juu ha'e juu rakuandy gui okyje vy. Ha'e py ma vaka anho 'rã ha'eve okaru aguã, ha'e vexa'opyrõmba aguã.

8

Assíria pygua kuery ou aguã re ijayvuague

¹ SENHOR aipoe'i avi xevy:

— Ejopy petei kuaxia tuvixa va'e, ha'e embopara porã'i pavẽ oexa kuaa aguã rami: “Eipe'a pojava ndejeupe guarã, ejopy ratã!” he'ia va'e.

² Ha'e nunga kuaa ukaarã ojeroviapy va'e xee ajou sacerdote Urias ha'e Jeberequias ra'y Zacarias.

³ Ha'e ramo xee ma profeta kunhaa py aa. Ha'e ramo oguereko'i kyrĩ va'e, ha'e vy oikuvã'i ava'i. Ha'e ramo SENHOR aipoe'i xevy:

— Heryrã emoĩ “Eipe'a pojava ndejeupe guarã, ejopy ratã”'ea.

⁴ Mba'eta ava'i “Xeru” e'ỹ vy “Xexy” he'i kuaa e'ỹ mbove voi Damasco ha'e Samaria tetã pygua kuery mba'e rei-rei ogueraapaa 'rã Assíria pygua huvixave renonde guarã — he'i.

⁵ Ha'e gui SENHOR ijayvuvu tema. Ha'e vy aipoe'i xevy:

⁶ — Kova'e kuery ma Siloé yakã oxyry mbegue'i va'e ndojou porã'i ramo, ha'e Rezim renonde ha'e Remalias ra'y oua gui okyje ete okuapy rire,

⁷ ha'e rami rire ha'e kuery áry SENHOR ombou 'rã Eufrates yakã guigua, imbaraeete ha'e oxyry atã va'e. Ha'e va'e ma Assíria pygua huvixave ae ou va'erã, mba'emo porã oguereko va'e ha'e javi reve. Ha'e nunga yy ma omonyẽ 'rã yakã rugua ha'e javi rupi, ha'e oẽ-oẽ rei 'rã ovy vvy'ã rupi peve.

⁸ Ha'e vy Judá vvy re ae oo vy omonyẽmba 'rã. Ha'e va'e rupi oaxa vy ijaju'y peve 'rã ovaẽ. Mba'eta xondaro kuery jova-jovai gui oua rupi ojao'ipa 'rã ndeyvy, Emanuel.

SENHOR anho nharõ aguã re ijayvuague

⁹ Peẽ vvy regua kuery, pendexopya teĩ penembo'ipaa 'rã. Vvy mombyrygua re pendekuai va'e, pendu ke. Peiko katu teĩ penembo'ipaa 'rã, peiko katu teĩ penembo'ipaa 'rã.

¹⁰ Pejogueroayvu 'rã mba'emo pejapo aguã re, ha'e rami teĩ nda'evei 'rã pejapo ete aguã. Mba'emo pejapo uka teĩ ha'e nungakue ndojapoi 'rã, Nhanderuete oreve oiko ramo.

¹¹ Mba'eta xevy SENHOR ijayvu opo imbaraeete va'e xere omoĩ reve. Ha'e vy ijayvu kova'e kuery ikuai rupi xee aiko e'ỹ aguã. Ha'e vy aipoe'i:

¹² — Amongue pe kova'e kuery “Opu'ã nhemimba ra'e” he'i okuapy teĩ peẽ kuery ma nda'evei “Opu'ã nhemimba” peje aguã. Pekyje eme ha'e kuery mba'emo okyjea va'e gui, nda'evei ha'e nunga pe “Nhanemondyipaara” peje aguã.

¹³ Ha'e rami 'rãgue py SENHOR ixondaro reta va'e pe ae “Iky'a e'ỹ va'e” peje. Henonde pejererokyje, ixugui anho peryryi.*

¹⁴ Ha'e ramo ha'e oĩ 'rã penhemi atyrã. Ha'e rã Israel kuery mokoivi regua pe ma oĩ 'rã ita onhepyxanga aguã ha'e kuery ho'apa aguã. Jerusalém py ikuai va'e pe oĩ 'rã nhuã xã ha'e nhuã.*

¹⁵ Ha'e kuery regua heta 'rã onhepyxanga vy ho'a. Ha'e rami vy ha'e kuery opẽmba 'rã, ojurapaa ha'e ombo'apaa 'rã.

¹⁶ Ha'e nunga rupi emoĩ porã aikuaa uka va'ekue, emboty lei xeremimbo'e kuery py'a re — he'i.

¹⁷ Ha'e rami rã xee arõ 'rã SENHOR, Jacó ramymino kuery gui ngova omo'ã ranhe teĩ. Hexe ae xee ama'ena 'rã.

¹⁸ Apy ma aĩ, xera'y kuery SENHOR xevy ome'ẽ va'ekue reve.* Ore kuery ma hexa pyrã, ha'e Israel kuery mondyipaara. Ha'e rami aguã SENHOR ixondaro reta va'e Sião vvyty re oĩ va'e oremoingo.*

¹⁹ Ha'e gui pendeivy aipo'ea 'rã: “Peporandu ke omanogue mboayvua kuery pe, ha'e imba'ekuaa va'e, ojapukai rei ha'e ijayvu mbegue rei va'e kuery pe”,'ea 'rã. Ha'e rami teĩ nhande kuery nda'u nanhaporandui 'rã Nhanderuete pe? Jaikove va'e nhanhepytyvõ uka 'rã nda'u omano va'ekue pe?

²⁰ Ha'e rami 'rãgue py lei ha'e ayvu oikuaa uka pyre re tapeo! Mba'eta ha'e va'e ayvu rupi e'ỹ ri ha'e kuery ijayvu vy ndoexai 'rã hexakã va'e.

²¹ Ha'e rami vy vvy ha'e javi rupi ha'e kuery oguata rei vy ojexavai ha'e okaruxe reve 'rã ikuai. Ha'e gui okaruxe vy ipoxypa vy ijayvu vai 'rã nguixave ha'e Nguuete re, yvate katy oma'ẽ vy.

²² Ha'e gui vvy re ju oma'ẽ vy oexa 'rã jexavai, pytũ vaikue ha'e kuaray'ã reia mboriau anho. Ha'e gui ma omombopaa 'rã pytũ vaikuea katy.

9

Huvixa Nhomoingo porãa oiko ha'e ipo'aka aguã re ijayvuague

¹ Ha'e rami teĩ vvy re ojexavai va'ekue ma pytũ vaikuea rupi riae e'ỹ 'rã ikuai. Mba'eta jypy'i ma Nhanderuete omo'vyvĩ'i raka'e Zebulom ha'e Naftali vvy re ikuai va'e. Ha'e rã opaa py ma ojapo 'rã Galilíia

* 8:13 1 Pedro 3.14-15 * 8:14 Romanos 9.32-33, 1 Pedro 2.8 * 8:18 “Xera'y kuery SENHOR xevy ome'ẽ va'ekue” Isaías he'ia ma guemimbo'e kuery re ijayvu vy. * 8:18 Hebreus 2.13

judeu e'ý va'e kuery rekoa ojou porãmbaa aguã rami, tape ye'ê rembe rupi oaxa va'e guive Jordão yakã kyvõ rami peve.

² Ha'e kuery pytũ reia rupi ikuai va'ekue ri oexa okuapy peteĩ hendy guaxu va'e. Hendy va'e ma hexakãmba kuaray'ã reia manoa rupi ikuai va'ekue ikuai rupi.*

³ Ha'e kuery va'e regua ndee remboetave ju vy rembovy'ave ete. Ha'e ramo nerenonde ovy'a 'rã okuapy, mba'emo omono'õa rupi ovy'aa rami, ha'e rami e'ý vy mba'emo porã ojou va'ekue omboja'o-ja'oa py rami.

⁴ Mba'eta ndee remopê ma canga ha'e kuery aju'y rupi ipoyi oiny va'ekue, yvyra ikupe rupi oinupãaty, ha'e herereko axya po'akaa, midianita kuery remomba jave guare rami.

⁵ Mba'eta oapypaa 'rã xondaro kuery xapatu ikuai va'e, ijao tuguy py iky'apa rei va'ekue voi okaipa 'rã mba'emo pirekue rami rive.

⁶ Mba'eta peteĩ ava'i oiko nhandevy, peteĩ gua'y ome'ëa nhandevy. Ha'e gui ijaxy'ý áry ma oĩ 'rã ipo'aka aguã. Hery ma po rami 'rã 'ea va'e: Nhomongeta Porã va'e, Nhanderuetete Imbaraete va'e, Nhanderu Imarã e'ý va'e, ha'e Huvixa Nhomongo porãa.

⁷ Ipo'akave 'rã ovy, mby'a porã voi opa e'ý va'e 'rã ou. Tenda Davi openaaty áry 'rã oĩ vy opena 'rã oikovy Davi ipo'akaague re ae. Ha'e rami vy anhetê va'e ha'e teko porã rupi vy ipo'akaa oĩ atã 'rã, aý guive raka'e rã peve guarã. SENHOR ixondaro reta va'e ae 'rã ojapo, nhanderayvu etea rupi.

Israel kuery ikuai axy aguã re ijayvuague

⁸ Ha'e gui ma peteĩ ayvu SENHOR ombou Jacó kuery rovai guarã, ha'e ramo Israel kuery re ou.

⁹ Ha'e va'e ma heta va'e kuery ha'e javi oikuaapa 'rã okuapy, Efraim ha'e Samaria pygua kuery, ojejou porã ha'e opy'a py onhembovate reia rupi aipoe'i va'e kuery:

¹⁰ "Vvy jykuie ombojo'a pyre yvy py oitypaa teĩ oo jajapo ju 'rã ity ombope pyre gui. Yvyra sicômoro oitypaa ramo yary guigua py ju 'rã jajapo oĩague py", he'i va'e kuery.

¹¹ Ha'e rami teĩ ha'e kuery rovai guarã SENHOR omopu'ã 'rã Rezim rovaigua kuery, omboupa 'rã hovaigua kuery.*

¹² Kuaray oua katy gui ou 'rã Síría pygua kuery, ha'e kuaray oikua katy gui ma filisteu kuery ou 'rã. Ha'e ijuru jai vy omokõmba 'rã Israel kuery. Ha'e rami ete teĩ SENHOR poxya ndoaxai 'rã, opo oupi ae tema 'rã.

¹³ Ha'e rami ete teĩ kova'e kuery ndojevuy okuapy Imoingo axyare pe, ndoekai okuapy SENHOR ixondaro reta va'e.

¹⁴ Ha'e nunga rupi peteĩ ára pyve SENHOR ojayapa 'rã Israel regua akã ha'e huguai, pindo ha'e nhuũ'y.

¹⁵ Inhakã ma nhomongeta va'ety kuery omboetevepy, ha'e rã huguai ma profeta ramigua kuery ijapu va'e.

¹⁶ Mba'eta kova'e kuery rerekoa ma nhombotavypa rei va'e meme. Ha'e ramo ha'e kuery oguereko va'e kuery voi omombaa.

¹⁷ Ha'e nunga rupi SENHOR ndoguerovy'avei ha'e kuery va'e regua ipyaukue, nomboaxyvei 'rã guive tyre'ý neĩ imeve'ý va'e kuery, mba'eta ha'e kuery ha'e javi heko vai va'e ikuai, joapo vai ha'e ijayvu vaikue-ikue va'e meme. Ha'e rami ete teĩ ndoaxai 'rã ipoxya, opo oupi teri 'rã imoiny.

¹⁸ Mba'eta teko vai omomba 'rã heravy tata rami, omokanh'y 'rã juu'y ha'e juu rakuandy. Yvyra ka'aguy re ikuai va'e okaipa 'rã, hataxí arai huũ vaikue rami opu'ã ovy reve.

¹⁹ SENHOR ixondaro reta va'e ipoxy ramo yvy opyta tapy'ý rami, ha'e rã heta va'e kuery ma nhuũ oapy pyrã rami ikuai. Avave rei nomboaxyvei ma 'rã guyyvy kuery.

²⁰ Mba'emo oiporu kuaa re oĩ va'e omokõmba ma teĩ okaruxeve 'rã. Oiporu kuaa e'ýa re oĩ va'e ju omokõmba teĩ nonhandui 'rã. Ha'e vy peteĩ-teĩ ho'u 'rã oirũ kuery ro'okue.

²¹ Manassés kuery omokõ 'rã Efraim regua, ha'e rã Efraim regua ma Manassés regua ju 'rã omokõ. Ha'e gui ha'e kuery mokoive ma opu'ã 'rã Judá kuery re. Ha'e rami ete teĩ ndoaxai 'rã SENHOR poxya, opo oupi teri 'rã imoiny.

10

¹ Ha'e kuery va'e regua ojapo 'rã lei ha'eve e'ýa ramigua nhombojexavai aguã rive. Nda'evei ete 'rã ha'e kuery pe,

² mba'eta opa marã oguereko 'rã iporiaukue'i, neĩ noipytyvõ ukai 'rã xeveygua kuery ojexavai rei va'e, oimpe'apa 'rã imeve'ý va'e kuery gui, imondapa 'rã tyre'ý kuery gui.

³ Ha'e rami rire teĩ ma mba'e nda'u peẽ kuery pejapo 'rã nhombopagaa ára py jexavaia momybyrui ou jave py? Mava'e pe tu pejapukai 'rã penderepy aguã? Mamo tu ha'eve 'rã mba'emo pejou porã va'e penhomi aguã?

⁴ Po rami anho 'rã ha'eve pendekuai aguã: pejero'a 'rã ombo'a pyre mbyte, e'ý vy pe'a 'rã omanogue mbyte. Ha'e rami ete teĩ SENHOR poxya ndoaxai 'rã, opo oupi teri 'rã imoiny.

Assíria pygua kuery rovai ijayvuague

⁵ — Nda'evei ete 'rã Assíria pygua kuery pe, xepoxya rupi nhombopaga aguã amoundouka va'ekue ri. Mba'eta yvyra ha'e kuery opo py oguereko va'e ma xepoxya aexa uka aguã ae.

⁶ Xee amoundouka ma heko vai va'e ha'e xembopoxya kuery rovai. Ha'e vy aipoa'e ha'e kuery gui imba'e rei-rei oipe'apa vy opyrõmba aguã, tape rupi yapo oĩ va'e re rami.

* 9:2 Mateus 4.15-16

* 9:11 "Rezim rovaigua kuery" he'ia ma Israel kuery re Assíria pygua kuery opu'ã aguã re ijayvu vy.

⁷ Ha'e rami teĩ ha'e kuery ma ha'e rami e'ÿ oexa'ã, opy'a py ha'e rami e'ÿ oikuaa. Ha'e rami 'rãgue py opy'a re omoĩ heta regua omokanhymba ha'e omomba ete agua.

⁸ Mba'eta aipoe'i: "Xeivygua yvatekueve nda'u huvixave meme e'ÿ teve?"

⁹ Calno tetã namombai ri ty'y Carquemis rami? Hamate tetã Arpade rami e'ÿ ri ty'y opyta? Ha'e Samaria tetã Damasco rami e'ÿ ri ty'y opyta?

¹⁰ Xepo'aka ma tetã mba'emo ra'angaa oĩa re, Jerusalém ha'e Samaria py ikuai va'e gui ipo'akave va'ekue teĩ.

¹¹ Ha'e gui Samaria ha'e mba'emo ra'angaa hexe ikuai va'e re ambovaipaague rami ae ju ndajapoi 'rã teve Jerusalém ha'e hexe ikuai va'e re?" he'i va'ekue.

¹² Ha'e nunga rupi Sião yvyty ha'e Jerusalém re SENHOR oipotaa rami nhombopagapa ma vy Assíria pygua huvixa ju 'rã ombopaga, opy'a py onhemboyvateve ha'e ojejou porã reiague re.

¹³ Mba'eta aipoe'i rire: "Ha'e nunga ha'e javi xee ae po'akaa py ajapo, xe'arandu ha'e aikuaapa va'e vy. Ha'e rami vy amarka pyau amboae regua kuery vvy, ha'e aipe'apa imba'e rei-rei va'ekue ha'e javi. Ipy'a guaxuve va'e rami aipoka ha'e huvixa kuery henda py oiague gui.

¹⁴ Aipe'apa amboae regua kuery mba'emo oguereko va'ekue. Guyra'i rupi'a ojea pyre pe'aa rami xee voi xemba'erã ajopy vvy jave rupi. Mava'eve nomboguyi opepo, neĩ naxë'i'i guive", he'i va'ekue.

¹⁵ Ha'e rami avi haxa nda'u ha'eve ri ava iporua gui ojejou porãve agua? Vyvra kyxĩa nda'u ha'eve ri oiporu oiny va'e gui oikuaave agua? Ha'e rami va'e rire ma vyvra rovi ha'e ae porua oinupã 'rãgue, ha'e vyvra rive opu'ã 'rãgue ava vyvra guigua e'ÿ va'e re.

¹⁶ Ha'e nunga rupi SENHOR ixondaro reta va'e ombou 'rã mba'eaxy ha'e va'e regua avakue mbaraetea mombaarã, ikyrakueve meme teĩ. Ha'e kuery mba'emo ojou porã va'e omoendy 'rã, tata rami oapypa va'erã py.

¹⁷ Mba'eta Israel kuery moexakãa ma omomba 'rã tata rami, peteĩ ára pyve Nhanderuete lky'a e'ÿ va'e oapypa 'rã juu'y ha'e juu rakuendy Assíria vvy re ikuai va'e.

¹⁸ Oapypa 'rã ha'e va'e regua ka'aguy ha'e mba'ety oiko porãve va'e teĩ. Omomba 'rã ha'e kuery nhe'ẽ ha'e hete, imba'eaxy vy ikangyve ovy va'e rami opyta peve.

¹⁹ Ha'e va'e rire ma ha'e py ka'aguy re vyvra ho'ame va'e mbovy'i ete 'rã opyta, kyrĩgue teĩ oipapa vy ombopara kuaa 'rã mbovy paa.

²⁰ Ha'e va'e ára Israel kuery Jacó ramymino okuave va'e ma ijukaare kuery re ndojeroviavei ma 'rã. Ha'e rami 'rãgue py ojerovia 'rã okuapy SENHOR Israel kuery ruete lky'a e'ÿ va'e re anho.

²¹ Ha'e rami vy Jacó ramymino kuery rembyrekue ojevju ju 'rã Nhanderuete imbaraeete va'e pe.

²² Mba'eta peẽ Israel kuery, peẽ kuery aÿ peve ita ku'i ye'ẽ rembe rupigua rami pendereta teri teĩ amongue ete'i 'rã ojevju. Mba'eta oiko 'rãe nhomombaarã teko porã rupigua, yy tyguaxua rami 'rã ou.

²³ Mba'eta SENHOR ixondaro reta va'e nhomomba agua re onhembovy'a ma viague rami omoingo 'rã ha'e va'e vvy ha'e javi rupi.*

²⁴ Ha'e nunga rupi ae SENHOR ixondaro reta va'e aipoe'i:

— Xeivygua kuery Sião re penderekoa va'e, pekyje eme Assíria pygua kuery gui vyvra rovi py penemoingo axy teĩ, ha'e Egito pygua kuery pendererekoague rami vyvra py pendeavyky rei teĩ.

²⁵ Mba'eta are'i e'ÿ re opa 'rã peẽ kuery rombopagaa. Ha'e rami vy ha'e kuery ju amomba 'rã xepoxya rupi.

²⁶ Ha'e rami vy SENHOR ixondaro reta va'e oinupã 'rã midianita kuery re ojukapaague rami, itaova Orebe py hi'ai va'e katy'i. Ye'ẽ áry rupi oupi ju 'rã opopoka Egito vvy re ojapogaue rami.*

²⁷ Ha'e va'e ára pendekupe áry gui aipe'a 'rã ipoyi va'e, pendeaju'y gui aipe'a 'rã canga omoĩ mbyre. Ha'e nunga ma opẽ 'rã pendekyraa gui rive — he'i.

²⁸ Ha'e gui ma Assíria pygua kuery ou 'rã Aiate py, ha'e oaxa 'rã Migrom rupi. Ha'e gui Micmãs py ovaẽ vy omboguejy 'rã ovoyi.

²⁹ Ha'e gui oaxa 'rã oje'oivy vvyty pa'ũ rupi, ha'e oke 'rã okuapy Geba py. Ha'e ramo Ramá pygua kuery oryryipa rei 'rã okyje vvy, ha'e Saul rekoague Gibeá pygua kuery ojavapa 'rã.

³⁰ Galim re penderekoa va'e, pejapukai atã ke! Láis pygua kuery, pendu ke! Nda'evei ete 'rã peẽ Anatote pygua kuery pe!

³¹ Ha'e gui Madmena re hekoa va'e kuery voi ojavapa 'rã oje'oivy, ha'e Gebim pygua kuery voi ojavapa 'rã oo jepe agua.

³² Ha'e va'e árave Assíria pygua kuery opytu'u 'rã okuapy Nobe rekoa py. Ha'e gui ma opo oupi 'rã, Sião yvyty memby kuery Jerusalém py ikuai va'e omongyje agua.

³³ Ha'e rami teĩ SENHOR ixondaro reta va'e ojaya 'rã vyvra rakã ikuai va'e. Ha'e rami vy oitypa 'rã vyvra yvatekueve, ha'e omo'vvyt'imba 'rã onhemboyvateve va'ekue.

³⁴ Haxa py oitypa 'rã vyvra ka'aguy regua. Ha'e ramo Líbano re vyvra ikuai va'e ho'apa 'rã imbaraeete va'e oake'oa rami.

11

Jessé ramymino opena porã va'e rekorã re ijavyvuaque

¹ Ha'e gui Jessé rembypykue gui oiko 'rã peteĩ hoky, hapytakue rapo gui oiko 'rã henhoĩ pyau jevy va'e.

* 10:23 Romanos 9.27-28 * 10:26 Orebe py Nhanderuete omomba raka'e midianita ruxiva kuery (Juizes 7.25). Ha'e gui Egito py ma Egito pygua kuery ju omomba ye'ẽ mbyte py (Êxodo 14.26-28).

² Ha'e va'e re ma oĩ 'rã SENHOR Nhe'ê. Ha'e va'e Nhe'ê ma imo'aranduarã ha'e oikuaa ukapa va'e, imongetaa ha'e imbopo'akaarã, ha'e gui SENHOR kuaa ukaa ha'e henonde ojererokyje aguã re imbo'ea.

³ Ha'e ramo ov'y'a reve 'rã oiko SENHOR renonde ojererokyje rupi. Mba'emo oexa vy rive e'ỹ 'rã oikuaa pota, ha'e mba'emo oendu vy rive e'ỹ nhomongeta 'rã.

⁴ Ha'e rami 'rãgue py teko porã rupi ete 'rã oikuaa pota iporiaukue'i re, ha'evea rami oepy 'rã iporiaukue'i yvy re ikuai va'e. Oayvu py rive 'rã ombopaga yvy re ikuai va'e yvyra rovi py rami, opytuẽ py rive ojuka 'rã heko vai va'e.

⁵ Ku'akuaa rami ojee omoĩ 'rã teko porã, ha'e joguereko 'rã ojeroviapy oikoa rupi.

⁶ Ha'e rami ramo vexe'i kuery reve aguarã i ikuai porã 'rã, ha'e xivi ipara va'e teĩ kavara ra'y'i reve opytu'u 'rã okuapy joa py. Reõ reve vaka ra'y' ikuai 'rã peteĩ rami, kyri'i va'e rive oguerekopa 'rã.

⁷ Urso reve vaka kuery okaru 'rã joa py, ha'e ta'y'i kuery opytu'u 'rã joa py. Reõ voi nhuũ re okaru 'rã vaka rami.

⁸ Kyri'gue okambu'i va'e teĩ onhemboarai 'rã mboi ituia rupi, ha'e nokambuvei va'e ikua py opo'ẽ teĩ mba'eve ndoikoi 'rã.

⁹ Mba'eta xeivygua yvyty iky'a e'ỹ va'e py ma ndoikovei ma 'rã mba'emo vai neĩ joapo vai va'e, mba'eta yvy jave re tynyẽ 'rã SENHOR oikuaa va'e, ye'ẽ renda ha'e javi rupi yvy tynyẽa rami avi.

¹⁰ Ha'e va'e ára ma Jessé rapokue gui oiko 'rã peteĩ henhoĩ pyau jevy va'e. Ha'e va'e ma opu'ã 'rã bandeira oupi imo'amy mbyre rami, oĩa katy ha'e javi regua kuery oexa vy oo aguã. Guexakãa re ae 'rã hekoa.*

Israel kuery moexakãa oiko pyau va'erã re ijayvuague

¹¹ Ha'e va'e ára SENHOR opo omokuave'ẽ 'rã oguerupa ju aguã ojeupegua kuery rembyrekue oejague gui: Assíria yvy gui, Egito, Patros, Etiópia, Elão, Babilônia, Hamate ha'e ye'ẽ yvúry rupi yvy ikuai va'e gui.

¹² Peteĩ bandeira oupi 'rã yvy regua mbyte rupi ikuai va'e oexa aguã. Ha'e rami vy omboatypa 'rã Israel kuery yvy mboae re ikuaigague gui, ha'e Judá kuery oguerupa ju 'rã yvy apy jovaive irundy henda katy omoaña ague gui.

¹³ Ha'e ramo Efraim kuery noenduvei ma 'rã ndajoayvuia, ha'e Judá kuery rovaigua kuery ha'e javi 'rã ndojouavei. Efraim kuery ndoayvu e'ỹvei 'rã Judá regua, ha'e Judá kuery voi nomoingo axyvei 'rã Efraim regua.

¹⁴ Ha'e rami 'rãgue py jogueraa 'rã kuaray oikua katy filisteu kuery rovai opu'ã aguã. Jovai 'rã ipo'aka kuaray oua katy ikuai va'e re. Ha'e vy ojopy 'rã amboae kuery oguereko va'ekue-'ekue ha'e javi. Edom ha'e Moabe pygua kuery re voi ipo'aka 'rã. Amom pygua kuery voi ikuai 'rã hembiguairã.

¹⁵ SENHOR omboypa 'rã ye'ẽ rakã Egito yvúry oĩ va'ekue. Yvytu atã ombou vy ipo'aka 'rã Eufrates yakã re voi. Ha'e rami vy omboja'o 'rã sete yakã raperã, ipy regua va'e teĩ oaxa aguã ha'eve va'e.

¹⁶ Ha'e ixupegua kuery Assíria re opyta teri va'ekue pe oĩ 'rã peteĩ tape porã ojevye aguã, Egito yvy gui Israel kuery oẽmba jave guare rami.

12

Israel kuery oguerupa jevy rã oporaei okuapy aguã re ijayvuague

¹ Ha'e va'e ára ma aipopeje 'rã: "SENHOR, xee rogueroporaei, mba'eta xeivy ndepoxy va'ekue ri aỹ oaxapa ma ndepoxyague. Ha'e gui aỹ ma xembovy'a ju ma.

² Nhanderuete ma xereraa jepea oiko. Hexe ajerovia 'rã akyje e'ỹ re, mba'eta SENHOR Nhanderuete xemombaraeitea ha'e aroporaei va'e. Ha'e gui aỹ ma xereraa jepea ju oiko.

³ Peju nhandereraa jepea re javy'a, yvu gui yvy porã nhãoẽ vy javy'aa rami avi", peje 'rã.

⁴ Ha'e va'e ára aipo pejeve ju 'rã: "Peroporaei ke SENHOR! Pejapukai hery rupi, ha'e javi regua pe peikuaa uka hembiapokue. Hery yvate ete ramo penhogueroma'endu'a.

⁵ Peroporaei ke SENHOR, mba'emo porã ete ojapo rire. Yvy jave rupi toikuaapa ha'e nunga!

⁶ Ha'e peẽ Sião pygua kuery voi pevy'a peporaei reve, mba'eta Israel kuery ruete iky'a e'ỹ va'e penembyte oĩ va'e yvate ete ramo", peje.

13

Babilônia pygua kuery rovai ijayvuague

¹ Kova'e ma Isaías mba'emo oexa reve Babilônia pygua kuery rovai ayvu oendu va'ekue.

² "Eupi peteĩ bandeira yvyty ikatu rei va'e áry, ha'e ejapukai xondaro kuery pe oo aguã. Enoĩ ndepo py ha'e kuery oikẽ aguã nhomongeo axya kuery retã rokẽ rupi.

³ Mba'eta po rami xeayvu pygua kuery pe, aenoĩmba xeivygua xondaro kuery ipy'a guaxukueve, ha'e kuery nhombopaga aguã xepoxya rupi. Ha'e kuery ma xepo'akaa re anho 'rã ov'y'a.

⁴ Ha'e ramo yvyty áry onhendu 'rã heta va'e ojapukaia! Heta regua joe opu'ã aguã py nhomboaty okuapy. SENHOR ixondaro reta va'e oexa pota 'rã oxondaro kuery joe opu'ã aguã katy oo ta va'e re.

⁵ "Mba'eta ha'e kuery ou 'rã yvy mombyrygua gui, yva apy guive 'rã ou SENHOR guembiporu opoxya oexa uka va'e reve, omomba aguã ha'e va'e yvy ha'e javi.

⁶ Pejae'o ke, mba'eta ovaẽ ta ma SENHOR ára. Ipo'akapa va'e ombou 'rã nhomombaarã.

⁷ Ha'e ramo pavẽ jyva na'imbaraetevei 'rã, avakue nda'ipy'a guaxuveipa 'rã.

* 11:10 Romanos 15.12

⁸ Onhemondyipa rei 'rā okuapy, ha'e kuery oendu 'rā haxy ogueroaxê peve. Kunha imemby raxy va'e rami 'rā ojejoka-poka. Joe-joe oma'ê 'rā okyje rei reve, ha'e hova pytâmba rei 'rā oxîmba vy.

⁹ "Ema'ê, ovaê ma ouvy SENHOR ára. Ha'e va'e ma nanhomboaxyvei aguã ára, poxya rexa ukaarã, yvy omomba ha'e ojejavypa va'ekue omokanhymba aguã vvy gui.

¹⁰ Jaxy-tata ijaty va'e yva re ikuai va'e naendyvei 'rā. Kuaray oê ouvy vvy pytûmba 'rā, jaxy voi naexakâvei 'rā.*

¹¹ Xee ambopaga 'rā vvy re ikuai va'e heko vaiague re, ha'e opa marã rei ikuai va'e ojevavyague re. Amomba 'rā ojejoj porã rei va'e kuery onhemboyvate, ha'e amo'vvy'i'mba 'rā ojerovia rei va'e.

¹² Ajapo 'rā avakue ouro porãgueve gui ndaetaive aguã rami, ouro ete Ofir regua gui.

¹³ Ajapo 'rā yva oryryipa aguã rami, ha'e vvy voi oryryi ete vvy guenda gui ojepe'a aguã rami, SENHOR ixondaro reta va'e poxya gui, nhombopagapa ete aguã ára ovaê rã.

¹⁴ Ha'e kuery peteî-teî onha 'rā oje'oivy guaxu ijukaarã gui onha va'e rami, ha'e vexa'i kuery ija e'ÿ va'e rami. Peteî-teî ojevy 'rā guetarã kuery rekoa katy, ojava 'rā oje'oivy ovyv katy ae.

¹⁵ Ha'e gui ojou pyre-pyre ma oixyvômbaa 'rã, ojopy pyre ma ojukupaa 'rã kyxe py.

¹⁶ Ha'e kuery oexaa py ta'y kuery omou'timbaa 'rã. Hoo gui oipe'apaa 'rã, ha'e ta'lyx kuery voi oguero'aa 'rã.

¹⁷ "Mba'eta Babilônia pygua kuery rovai xee ambou 'rã Média pygua kuery. Ha'e va'e kuery ma prata re nda'evei rei va'e'ÿ, neî ojuro re voi ndoikuaa potai va'e.

¹⁸ Ha'e kuery guapa py ojukupaa 'rã kunumigue. Neî kyrigüe'i itui ramo'i va'e voi nomboaxyi 'rã, kyrî'i va'e oexa vvy ndojuka e'ÿi 'rã.

¹⁹ Babilônia ma vvy regua ojou porãve ha'e caldeu kuery oguero'v'ave va'ekue ri Nhanderuete omomba rã opyta 'rã Sodoma ha'e Gomorra rami.

²⁰ Ha'e py ma avave ndopytaavei ma 'rã, noîavei 'rã ha'e py. Neî árabe voi ha'e py ndoupivei 'rã ngoorã, ha'e vexa'i re opena va'e ndogueraavei 'rã guymba kuery ha'e py omongaru aguã.

²¹ Ha'e rami 'rãgue py vixo ka'aguy regua rive 'rã ikuai ha'e py, ha'e oogue ikuai va'e rupi urukure'a anho 'rã ikuai. Guyra nhandu rive avi 'rã hekoa ha'e py. Ha'e kavara ka'aguy regua opo-opo 'rã okuapy ha'e rupi.

²² Oo tuvixakueve rendakue rupi ma aguarã'i ha'e jagua-tuvy nhe'ê tema onhe'ê 'rã. Ha'e nunga oiko aguã ovaê ma ouvy, oa'angaague ára ndarei 'rã."

14

Babilônia tetã opa rã oguero'v'a okuapy aguã re ijayvua

¹ Mba'eta teîgue ju SENHOR omboaxy 'rã Jacó kuery, oiporavo nho 'rã Israel kuery. Ha'e rami vy oguero ju 'rã ijyvy re ae. Ha'e kuery reve amboae vvy regua kuery voi ikuai 'rã, onhemoirû 'rã okuapy Jacó kuery re.

² Heta regua ma Israel kuery ogueraa vy oguerojeyv 'rã ijyvy re. Ha'e gui SENHOR pegua vvy re ma Israel kuery ju oguereko 'rã vvy regua kuery guembiguirã. Yma rupi hexe hembigui ha'e ipo'aka va'ekue re ha'e kuery ju 'rã ipo'aka.

³ Mba'eta ovaê 'rã Nhanderuete ou vy pembra'eapo poyiague gui penemombytu'u aguã ára, pejexavai reiaque ha'e ipoyi 'rã vvy amboae regua escravo rami pembra'eapoague gui.

⁴ Ha'e va'e ára pevy'a rei 'rã Babilônia pygua huvixave re. Ha'e vvy aipopeje 'rã:

"Pexa ke nhanemoingo axyare okanhy ra'eal! Opa ra'e nhanderereko axy reiaque!

⁵ Mba'eta SENHOR omopê ma heko vai va'e yvyra, omomba ma nhanemoingo axya po'akaa.

⁶ Ha'e kuery ma ipoxy vvy amboae kuery oguereko axy va'ekue, jujukaa gui ndopytu'ui va'ekue guive. Opoxya rupi ipo'aka va'ekue vvy regua kuery re, opytu'u e'ÿ re oakykue monha jepi va'ekue.

⁷ Ha'e gui aÿ ma vvy jave rupi opytu'u, mby'a porã oî. Ha'e rami vvy pavê oporaei okuapy ovy'a vvy.

⁸ Yvyra cipreste ha'e yary Líbano re ikuai va'e voi ovy'a rei 'rã ndere. Ha'e vvy aipoe'i 'rã okuapy: 'Ndee ndereitya ma rire avave rei ndouavei orerake'oarã', he'i okuapy.

⁹ "Pe vvy guy py manogue vvy re ma omyîmba okuapy revaê taa oendu vy. Ha'e rami vvy oëmba 'rã jogueravy nerovaexi aguã. Nemovaê aguã opu'amba 'rã jogueruvy yvatekueve ha'e huvixave vvy re ikuai va'ekue 'ague. Vvy regua ruvixa ikuai va'ekue opu'ã 'rã okuapy guenda py oia gui.

¹⁰ Ha'e vvy ha'e kuery ha'e javi ijayvu vvy aipoe'i 'rã ndevy: 'Ndee voi nanembaraetevei teve ra'e! Aÿ ndee voi ore rami ae ma repyta!' he'i 'rã okuapy.

¹¹ Vvykua py ndereitya ma rejeyo porãveague gui, ha'e ixã reta va'e pu renduxe vaiague gui. Ha'e gui ndeguÿry nderuparã oî va'e ma mberu ra'y anho, ha'e hevo'i anho 'rã neovãarã ikuai.

¹² "Jaxy-tata ko'ê mbija rami reï va'ekue ri re'a ma yvate reiaque gui. Vvy re ju ndereitya, vvy regua kuery re ndepo'aka va'ekue ri.

¹³ Ndepy'a py ndee aipo're va'ekue: 'Xee ajeupi 'rã yva re peve. Ha'e vvy aguapy 'rã apena aguã Nhanderuete pegua jaxy-tata áryve. Xepo'aka 'rã ainy vvyty nhomboaty aty oî va'e áry, pe kuaray ijapu'a'ia apy katy.

¹⁴ Ajeupi 'rã arai yvateve va'e áry, ha'e vvy Nhanderuete yvateve va'e rami ete 'rã aiko', 're va'ekue.

¹⁵ Ha'e rami teî omanogue ikuai py nemomboa 'rã, vvykua pukuvea py.

* 13:10 Mateus 24.29, Marcos 13.24-25

¹⁶ “Ha'e ramo omanogue nderexa vy onhemondyipa rei reve oma'ē ngatu 'rā ndere. Ha'e vy ndere ijavyu vy aipoe'i 'rā okuapy: ‘Kova'e ava e'ŷ teve vyvy omboryrypa va'ekue, ha'e vyvy jave re ikuai va'e oryryi aguā rami ojapo va'ekue?”

¹⁷ Ha'e e'ŷ ri nda'u vyvy jave re ojapo raka'e tekoa ve'ŷ opyta aguā rami, ha'e tetā mbovaipaare? Ha'e gui guembiguairā ogueraa va'ekue voi ndopoi raka'e ngoo katy ojevy aguā', he'i 'rā okuapy.

¹⁸ Ha'e gui amboae vyvy regua huvixave ikuai va'ekue onhono porāa raka'e omboeteta rupi, petei-tei huparā va'ekue py ae.

¹⁹ Ha'e rā ndee ma nembojeguaria vy nenhono porāa aguā ojo'o pyre gui mombyry nemomboa va'ekue vyvra rakā ojaya pyre rami rive. Ha'e gui nde'áry omomboa 'rā kyxe py ojuka pyre retekue, vyvya py ita reve opyrōa rive.

²⁰ Ndee ma amboae kuery rami e'ŷ nanenhono porāai va'ekue, mba'eta vyvy remomba ha'e ndevygu kuery ae rejukapa rive. Tove heko vai va'e ramymino kuery rery re ta'ima'endu'aave eme.

²¹ Ta'y kuery voi tojukapaa tuu kuery heko vaiague re, ha'e kuery ju opu'ā vyvy re ipo'aka e'ŷ aguā, ha'e vyvy omonyē e'ŷ aguā ha'e kuery retā", peje 'rā pekuapy.

²² Ha'e gui SENHOR ixondaro reta va'e aipoe'i:

— Xee apu'ā 'rā ha'e kuery re, Babilônia vyvy gui ambogue 'rā hery. Amomba 'rā okuave va'ekue, ta'y kuery ha'e hamymino kuery ha'e javi guive.

²³ Ha'e gui hetā ikuaigave ajapo 'rā yapo opyta aguā rami, ku'i rive ikuai aguā. Ha'e xee aipei 'rā yty peia nhomokanhymbaa va'e py — he'i SENHOR ixondaro reta va'e.

Assíria pygua kuery rovai ijavyuague

²⁴ SENHOR ixondaro reta va'e oura vyvy aipoe'i:

— Xee anhembody'aa oiko 'rāe. Xee ajapo ukaa rami ae 'rā ojapoa.

²⁵ Ha'e rami vyvy amomba 'rā Assíria pygua kuery xevyvy re ou va'ekue. Xevygu vyvty re apyrō 'rā, Israel kuery re ha'e kuery po'akaague opa aguā, ha'e kuery voyi aipe'a aguā ijaxi'y áry gui.

²⁶ Ha'e rami ae xee anhembody'a vyvy jave re oiko aguā. Kova'e ma xepo vyvy regua ha'e javi áry rupi amokuave'ē va'e — he'i.

²⁷ Mba'eta SENHOR ixondaro reta va'e ha'e rami aguā rami onhembody'a ma rive mava'e tu omboaxa rive ta? Opo omokuave'ē imoiny rive mava'e tu ojapo 'rā omboapu'a ju aguā rami?

Filístia pygua kuery rovai ijavyuague

²⁸ Ha'e gui huvixave Acáz omanoa ma'etý re ma pova'e avyu aendu omombe'ua rā.

²⁹ — Peē filistey kuery, nda'vei pevy'a aguā penenupāaty vyvra opēague pendu vy rive. Mba'eta mboi omano va'ekue gui oiko 'rā amboae nda'veive va'e, hupi'a gui ma oiko 'rā mboi opo va'e.

³⁰ Ha'e gui iporiaukue'i ra'y jypygu kuery re ma apena porā 'rā, oipotapa rei'i va'e kuery ma opyту'u porā 'rā okuapy. Ha'e rā pendera'y kuery re ma ajapo 'rā karuai gui omanomba aguā rami, ha'e pekuave va'ekue voi penemomboa 'rā.

³¹ Ndee tetā rokē, neraxē ke. Ha'e ndee tetā, ejaupukai. Peē filistey kuery ha'e javi, peryryipa ke. Mba'eta kuaray ijapu'a'ia katy gui ou 'rā hataxi rami, ha'e jipoi hyxy va'e gui ojepe'a va'erā — he'i.

³² Marā rami nda'u pembovai 'rā judeu e'ŷ va'e regua avyu mombe'ua pe oporandu rā? Aipopeje 'rā: “ SENHOR Sião tetā ojapo rive ha'e py ae 'rā ixupegua kuery ojexavai rei'i va'e ojou onhemi aguā”, peje 'rā.

15

Moabe pygua kuery rovai ijavyuague

¹ Po rami ma Moabe pygua kuery rovai avyu ou va'ekue.

² “Anhetē ete petei pytū pyve omomboa 'rā Ar tetā Moabe vyvy re oī va'e. Quir tetā voi petei pytū pyve avi 'rā omomboa.

³ Ha'e gui Dibom tetā gui ha'e pygua kuery oē 'rā jogueravy ta'angaa pegua templo katy ojae'o aguā. Moabe pygua kuery ojae'o 'rā okuapy Nebo ha'e Medeba vyvty áry. Ha'e kuery ha'e javi 'rā oakā onhopī ha'e guendyva ojayapa reve oo.

⁴ Ao vaikue voxa guigua py onhemonde reve 'rā ikuai tape rupi. Ngoo áry ha'e tetā mbyte rupi haxē 'rā okuapy ojae'o vaipa reve.

⁵ Hesbom ha'e Eleale pygua kuery voi ojaupukai avi 'rā. Jaza tetā peve 'rā onhendu. Ha'e nunga rupi Moabe pygua xondaro kuery voi ojaupukai 'rā okuapy, ipy'a tytypa 'rā”, he'i.

⁶ Xepy'a py xee voi ajapukai Moabe re nda'vei vy. Mba'eta ha'e kuery ojava 'rā Zoar tetā “Vaka ra'y mboapy ma'etý va'e” 'ea va'e peve. Ojae'o reve oē 'rā jogueravy Luíte vyvty re, ha'e tape Horonaim katy oo va'e rupi ojaupukai nhendu 'rā nda'vei ete vy.

⁷ Mba'eta Ninrim re yy oī va'e tya ma. Ipirupa ma nhuū mymba rembi'urā, ha'e jai rogue nda'ipovei.

⁸ Ha'e gui ha'e kuery mba'emo omōi porā va'ekue, ojou ma vy omboyrupa va'ekue ha'e kuery ae ju 'rā ogueroaxa Salgueiros yakā rovai re.

⁹ Mba'eta ha'e kuery raxē ma Moabe vyvy ha'e javi rupi onhendu. Eglaim peve ete onhendu 'rā ojaupukaia, ha'e Beer-Elim peve 'rā ojae'oa onhendu.

¹⁰ Mba'eta Dimom vyvy rupi yakā ikuai va'e ma tynyēmba tuguy. Ha'e rami tei amoive ju 'rā Dimom mbopagaarā. Ha'e ramo Moabe gui oo jepe va'ekue ha'e vyvy re okuave va'e ha'e javi re ou 'rā reō.

16

¹ Peraa uka ke vexa'i vyv re ipo'aka va'e peguarã. Sela gui peraa uka tekoa e'ÿa rupi Sião vyvty áry oĩ va'e pe.

² Moabe memby kuery ma guyrã'i haity gui omomboa rã onhemondy'i ovy va'e rami ikuai Arnorn yakã rugua rupi. Ha'e vy aipoe'i okuapy:

³ “Oremongeta ke, peikuaa pota orekuaiã re, penhemoĩ oremokuaray'äärã, kuaray mbyte javegua rami. Oreyvy gui orepe'apaa ramo orenhomĩ ke, orerexa uka eme guive ronhemi va'ekue.

⁴ Tove penembyte ta'ikuai Moabe vyv gui oipe'a pyre, pendea py tonhemi imombaxea kuery gui”, he'i okuapy. Ha'e gui ava ojerovia rei va'e okanhy ma ramo, nhomombaare noĩvei ha'e nhombojexavai va'ety vyv gui oo ju ma ramo

⁵ tenda openaaty py oĩ 'rã peteĩ teko porã rupi opena va'e. Davi ro openaaty py oĩ 'rã oikuaa potaa py ojeroviapy. Ha'e ma opena 'rã teko porã rupi, oikuaa pota voi 'rã joe.

⁶ Nhande kuery ma nhaendu Moabe pygua kuery onhemboyvate rei okuapya. Ha'e kuery ma amboae kuery gui onhemboyvateve ojejou porã rei vy, ipoxy rei guive. Ha'e rami teĩ ha'e kuery onhemboyvate opa rive 'rã.

⁷ “Ha'e nunga rupi Moabe pygua kuery haxẽmba 'rã peteĩ-teĩ Moabe re ipy'a vai vy. Mby'a vai rupi ipoaẽ 'rã okuapy, Quir-Haresete py uva pirukue ikuai jave ho'u va'ekue re ima'endu'a vy.

⁸ Mba'eta Hesbom re mba'ety oĩ va'e ipirupa ma. Ha'e amboae regua huvixa kuery omomba uva rakã iporãve va'e Sibma pygua, Jazer ha'e tekoa e'ÿa peve oo va'ekue, ha'e gui oove vy ye'ẽ rovai re oaxa va'ekue.

⁹ Ha'e nunga rupi xee voi ajae'o 'rã Jazer tetã pygua kuery Sibma re uvaty oĩ va'ekue re ojae'o okuapya rami. Peẽ Hesbom ha'e Eleale pygua, romoakỹ 'rã xerexay py. Mba'eta pendea py kuaray puku py uva'a oiko va'e ombiri va'e kuery ovy'a okuapy 'rãgue py onhendu nderovaigua kuery opu'ã vy ojapukaia.

¹⁰ Opa ma vy'aa ha'e poraeia uvaty rupi onhendu va'ekue. Uvaty rupi avave rei ndoporaieivi ma, ndovy'a nhenduavei ma. Neĩ uva'a ma voi noumbirivei oumbiriaty py. Mba'eta xee ajapo 'rã ombiri va'e kuery ovy'aa nonhenduvei aguã rami.

¹¹ Ha'e nunga rupi xee voi Moabe re nda'evevi vy xekuraxõ oryryi ixã reta va'e rami, Quir-Heres re voi xepy'a vai.

¹² Pexa 'rã Moabe pygua kuery vyvty ikuai va'e áry rupi ombojeroviaa py ikane'õmba rive rã, mba'eta ta'angaa oĩaty py oike vy onhembo'e rã noenduai”, he'i.

¹³ Ha'e va'e ayvu ma SENHOR yma ma voi Moabe rovai omombe'u uka va'ekue.

¹⁴ Ha'e rã aÿ ma ijavyv jevy vy aipoe'i:

— Mboapy ma'etÿa py omba'eapo va'e oipapaa rami Moabe pygua kuery mba'emo oguerovy'a va'ekue ndojou porãavei 'rã, tetã pygua kuery mbovy e'ÿ va'ekue ha'e javi guive. Ha'e gui oo jepe va'ekue ma mboapy'i ete 'rã ikuai, ndaetavei neĩ na'imbaraetavei 'rã — he'i.

17

Damasco ha'e Efraim pygua kuery rovai ijavyvague

¹ Kova'e ma Damasco pygua kuery rovai ayvu ou va'ekue.

“Damasco tetã opyta 'rã tekoa ve'ÿ ha'e ombovaipa pyre rive.

² Aroer regua tetã ikuai va'e voi oejapaa 'rã. Ha'e py ma vexa'i kuery rive 'rã onheno, imondyiarã ndoikoi rã.

³ Efraim py voi okanhymba 'rã oo ikorapa va'ekue, Damasco pygua huvixa openaa ha'e javi rupi avi. Ha'e gui Assíria pygua kuery okuave va'e ndaetavei 'rã, Israel kuery mba'emo oguerovy'ave va'ekue rami avi”, he'i SENHOR ixondaro reta va'e.

⁴ “Ha'e va'e ára ma Jacó kuery mba'emo oguerovy'a va'ekue okanhy 'rã, ikyrãa voi okanhymba 'rã.

⁵ Ha'e kuery oipe'apaa 'rã, trigo mono'õa kuery hi'ygue ojopy vy hi'a omono'õa rami avi, Refaim yakã rugua rupi trigo omono'õague rami.

⁶ Ha'e rami teĩ amongue henda py ete'i opyta 'rã hembyrekue'i, azeitona omono'õa ma rire rami: mokoĩ, mboapy azeitona opyta 'rã hovapy yvatevea re, irundy, e'ÿ vy peteĩ nhiruã hakã mbyte pyve oĩ va'e yvyra hi'a va'e re opyta va'e rami”, he'i SENHOR Israel kuery ruete.

⁷ “Ha'e va'e ára ma avakue oma'ẽ ju 'rã Imoingoare re, ima'endu'a 'rã Israel kuery Ruete iky'a e'ÿ va'e re anho.

⁸ Ha'e kuery noma'ëvei 'rã altar opo py ae ojapo va'ekue re, ndoexaxevei 'rã okuã py ojapo va'ekue, mba'emo ra'angaa, neĩ altar mba'emo heakuã porã va'e oapyaty.

⁹ Ha'e va'e ára ma Israel kuery gui ha'e kuery oejapa 'rã guetã ikorapa va'ekue. Ha'e ramo opyta 'rã peteĩ oguy ka'aguy re e'ÿ vy vyvty áry oja pyre rami. Oĩ 'rã ombovaipa pyre rive,

¹⁰ mba'eta Nhanderuete pendereraa jepea gui penderexaraipa vy napenema'endu'avei Itaova imbarate va'e penhemiaty re. Ha'e nunga rupi mba'ety porãve va'erã pejapo vy mba'emo renhoĩ mombyry guigua penhotÿ teĩ,

¹¹ penhotÿã árave yvate aguã, ha'e ko'ẽ ju ipotypa aguã rami pejapo teĩ hi'a opa rive 'rã jexavaia ára py, teko axy okueraa ve'ÿ va'e oiko jave.

¹² “Nda'evevi etea gui vyv regua kuery hevovo rei 'rã, onhendu 'rã ye'ẽ onhendua rami, vyv regua kuery opoxya rupi onhendu 'rã ye'ẽ revovo rami.

¹³ Ha'e kuery hevovo rei 'rã yai revovo rami, teĩ ha'e kuery pe Nhanderuete ijayvu ete 'rã, ha'e ramo ojavapa 'rã mombyry. Okanhymba 'rã mba'emo pirekue yvy'ã re oĩ va'e vvytu ogueroveve heravya rami, ha'e yvy rataxĩ vvytu hatã va'e oupi heravy va'e rami.

¹⁴ Mba'eta pyttũ ovaẽ ramo ha'e kuery oendu 'rã okyjea. Ha'e gui ko'ẽ e'ỹ mbove ndokuavei 'rã. Ha'e rami ae 'rã oiko nhandegui mba'emo oipe'apa ha'e imonda va'e kuery re."

18

Etiópia pygua kuery rovai ijayvuague

¹ Nda'vei ete 'rã Etiópia vvy pe. Ha'e va'e vvy ma yakã rovai re vixo ipepo nhe'ẽ rei va'e ikuaiia.

² Ha'e pygua kuery omondouka 'rã oayvu mombe'uarã ye'ẽ rovai katy peve, jai rogue guigua kanoã py. Ha'e ramo ha'e kuery pe aipo're: "Peẽ ayvu mombe'ua kuery, tapeo pojava ke peteĩ regua yvateve ha'e ipire vera rei va'e ikuaiia py. Ha'e va'e kuery gui okyje 'rã mombyrygua kuery ha'e'i rupi ikuai va'e. Ha'e kuery ma ipo'akapa ha'e nhomou'ũmba va'e, ijyvyry rupi yakã oxyrya va'e.

³ Ha'e gui peẽ kuery vvy jave re pendekuai va'e, vvy re pendekoa va'e ha'e javi, pexa 'rã vvyty áry bandeira oupia rã, ha'e pendu 'rã mimby guaxu omonhe'ẽa rã.

⁴ Mba'eta SENHOR xevy aipoe'i: 'Xee ma xerenda aĩa gui ama'ẽ vy akyriri 'rã ainy ranhe kuaray hexakãa rupi haku nonhendu reia rami, ha'e mba'emo omono'õa ára kuaray aku-a rupi arai yxapy revegua oaxa oinya rami', he'i.

⁵ Mba'eta uva omono'õa e'ỹ mbove ipoty ho'a vy hi'a ijaju ma ramo, ha'e gui mae ma imoatyroã kyxe py ojaya 'rã hakã mombyry-mbyry oo va'e.

⁶ Ha'e rami ae avi ha'e kuery oejapaa 'rã vvyty rupi guyra ha'e mymba vvy regua ho'upa aguã rive. Ha'e kuery retekue re uruvu okaru 'rã okuapy kuaray aku-a pukukue re, ha'e gui yro'ya pukukue re ma mymba vvy regua ju okaru 'rã hetekue re.

⁷ "Ha'e va'e jave py ma SENHOR ixondaro reta va'e pe peteĩ regua yvateve ha'e ipire overa rei va'e ogueraa 'rã mba'emo ome'ẽ va'erã. Ha'e kuery gui ma mombyry ha'e'i rupi ikuai va'e okyjea, ipo'akapa ha'e nhomou'ũmba va'e, ijyvyry rupi yakã oxyrya va'e. Ha'e kuery voi mba'emo ogueraa avi 'rã SENHOR ixondaro reta va'e pe, Sião vvyty re hery oĩa py ae", he'i.

19

Egito pygua kuery rovai ijayvuague

¹ Kova'e ayvu ma Egito pygua kuery rovai ou va'ekue.

"Ma'ẽ, SENHOR ma arai inhakã va'e áry rupi oiko vy ou oiny Egito vvy katy. Ha'e ramo henonde Egito re mba'emo ra'angaa ikuai va'e oryryipa 'rã. Egito pygua kuery voi nda'ipy'a guaxuveipa 'rã.

² Ha'e gui xee ajapo 'rã Egito pygua kuery joe-joe opu'ã aguã rami, peteĩ-teĩ opu'ã 'rã okuapy guyvvy ha'e oirũ re. Peteĩ-teĩ tetã pygua kuery opu'ã 'rã amboae tetã pygua re, ha'e peteĩ-teĩ vvy guigua amboae vvy guigua re 'rã opu'ã.

³ Ha'e ramo Egito pygua kuery nda'ipy'a guaxuvei 'rã onhe'ẽ py, nhomongetaa amboaxa rivepa ramo. Ha'e ramo ha'e kuery oporandu 'rã mba'emo ra'angaa pe, imba'ekuaa va'e, omanogue mboayvua ha'e imba'evyky va'e pe.

⁴ Ha'e gui Egito pygua kuery amboaxa 'rã peteĩ huvixa nhomboaxy e'ỹ va'e po py, huvixave nda'vei ete va'e ha'e kuery re opena poyi va'erã pe", he'i SENHOR ixondaro reta va'e.

⁵ "Ha'e gui ma yy noĩvei rã Nilo yakã typa 'rã, yakã ikuai va'e typa avi 'rã.

⁶ Yy rape ikuai va'e heakuã vaikue rei 'rã, ha'e Nilo py yakã'i ho'a va'e voi typave ovy 'rã opa peve. Ha'e ramo takua ha'e jai rogue ipirupa 'rã.

⁷ Ha'e gui Nilo yakã vvyry rupi nhuũ ikuai va'e ipirupa 'rã, ha'e py yakã'i ho'a va'e rembe rupi, ha'e ijyvyry rupi mba'emo onhotỹ mbyre ha'e javi. Vvytu ogueraapa ramo okanhymba 'rã.

⁸ Ha'e nunga rupi pira mbo'aa rupi ikuai va'ekue ipoãe 'rã okuapy, ipytuẽ atã 'rã. Yy py pinda ha'e pira mbo'aa omombo va'e ikuerai rei rive 'rã okuapy.

⁹ Ha'e gui ajukue periri'i apoa kuery ojexavai 'rã, mandyju gui ajukue apoa kuery voi.

¹⁰ Yvatekueve ikangypa 'rã, hembiguai kuery voi iporiaupa 'rã okuapy.

¹¹ "Anhetẽ ete ae Zoã tetã pygua yvatekueve nai'aranduvei. Faraó mongetaaty kuery hi'arandukueve teĩ ha'eve'ỹ rami rei omongeta 'rã. Mba'exa tu peẽ kuery Faraó pe aipopeje ta: 'Xee ma hi'arandu va'e ra'y, yma ete huvixave oiko va'ekue ramymino aiko', peje ta?

¹² Mamo tu ha'vy oĩ nemongetaa kuery hi'arandu va'ekue? Tove ha'vy ndevy ha'e kuery tomombe'u, toikuaa ukapa Egito pygua kuery rovai SENHOR ixondaro reta va'e ojapo taa.

¹³ Zoã pygua huvixa kuery ma hi'arandu e'ỹ va'e ikuai, Mênfis pygua yvatekueve teĩ ojekorepa okuapy. Mba'eta Egito regua joguerekoa kuery ojapo ojeupegua kuery ojavy aguã rami.

¹⁴ Mba'eta ha'e kuery py'a re SENHOR omoĩ na'inhakã porãvei aguã. Ha'e ramo ha'e kuery ju ojapo Egito pygua kuery ha'eve'ỹa rami ikuai aguã mba'emo ojapoa ha'e javi py, oka'u va'e ha'e ae ombojevuyague py rive ho'a va'e rami avi.

¹⁵ Ha'e rami vy nda'evei 'rã Egito py mba'eve avave rei ojapoa aguã, inhakã neĩ huguai, pindo neĩ jai rogue voi.*

¹⁶ “Ha'e va'e ára ma Egito pygua kuery kunha rami rive 'rã ikangypa. Ngyje gui oryryipa 'rã okuapy SENHOR ixondaro reta va'e gui, ha'e kuery rovai opo oupi reve omongyje ramo.

¹⁷ Ha'e gui Egito pygua kuery onhemondyipa 'rã okuapy, Judá vvy gui mba'emo omombe'ua rã oendu vy rive. Ha'e nunga re oikuaa pota vy nda'evei ete 'rã, okyje reia oendu 'rã SENHOR ixondaro reta va'e ha'e kuery rovai ojapo taa oikuaa vy.

¹⁸ “Ha'e va'e ára ma oĩ avi 'rã peteĩ nhiruĩ tetã Egito vvy re, Canaã pygua avvu py ijayvu ha'e SENHOR ixondaro reta va'e rery rupi oura va'e kuery ikuaiã.† Ha'e va'e regua peteĩ ma Tetã Kuaray hery va'erã.

¹⁹ “Ha'e va'e ára ma SENHOR peguarã ojapoa 'rã peteĩ altar Egito vvy mbyte py, vvy ja'oa rupi voi ita omopu'ã 'rã imo'amy SENHOR pe.

²⁰ Ha'e va'e nunga oĩ 'rã Egito vvy regua kuery SENHOR ixondaro reta va'e re ima'endu'a aguã. Ha'e ramo SENHOR pe ha'e kuery ojapukai 'rã omoingo axy reia rã, ha'e ramo ombou 'rã heraa jepearã ha'e hepyarã.

²¹ Ha'e rami py SENHOR ojekuaa uka 'rã Egito pygua kuery pe. Ha'e ramo ha'e va'e ára Egito pygua kuery oikuaa nho vy omboete 'rã okuapy, ixupe ogueru 'rã guive mymba ha'e mba'emo aju ome'ẽ va'erã. Ha'e rami vy SENHOR pe anho 'rã onhemboavvu, ijayvuague ojapo ete 'rã guive.

²² SENHOR ombojexavai 'rã Egito pygua kuery, ha'e gui ombojexavai rire omoingo porã ju 'rã, mba'eta SENHOR pe ha'e kuery ojeko rerova 'rã. Ha'e ramo ha'e kuery ojapukaia re oikuaa pota vy omonguerapa 'rã.

²³ “Ha'e va'e ára oĩ 'rã peteĩ tape Egito vvy gui Assíria peve oo va'e. Ha'e va'e rupi ma Assíria pygua kuery ou 'rã Egito py, ha'e Egito pygua kuery ma Assíria katy 'rã oo. SENHOR pe Egito pygua kuery oporai 'rã okuapy Assíria pygua kuery reve.

²⁴ Ha'e va'e ára ma Israel kuery mboapya 'rã ikuai Egito ha'e Assíria pygua kuery reve. Vvy mbyte nhomoiingo porãarã 'rã ikuai.

²⁵ Mba'eta SENHOR ixondaro reta va'e ogueroavvu porã vy aipoe'i 'rã ha'e kuery pe: ‘Ima'endu'a porãmby ta'ikuai xeivygua Egito pygua kuery, Assíria pygua kuery xepo py amoiingo va'ekue, ha'e Israel kuery xeivy guarã aiporavo va'ekue', he'i 'rã.”

20

Egito ha'e Etiópia pygua kuery escravo-rã heraaapa aguã re ijayvuague

¹ Ha'e gui Assíria pygua huvixave Sargão ma Asdode tetã katy omoudouka guembigui Tartã, joe opu'ã vy oipe'a aguã.

² Ha'e va'e ma'et'ya re ae SENHOR oavvu omombe'u uka Amoz ra'y Isaías pe. Ha'e vy aipoe'i:

— Tereo, ndexai'y áry gui emboi ajukue puku inhana rei va'e profeta pegua reiporu va'e. Emboi avi ndepy regua — he'i. Ha'e rami ojapo vy omboipa, ha'e ipy rei oikovy.*

³ Ha'e gui SENHOR aipoe'i:

— Guí rami xerembigui Isaías mboapy ma'et'y re ipire rei ha'e ipy rei oikovyague rami avi oiko 'rã Egito ha'e Etiópia pygua kuery re, mba'eta ikuaa ukaarã Isaías oiko.

⁴ Mba'eta Assíria pygua huvixave ogueraapa 'rã Egito ha'e Etiópia pygua kuery escravo-rã. Kunumigüe ha'e tujakue'i voi oje'oi 'rã ipire rei, ipy rei ha'e ho'oa ojekuaa rei reve, Egito pygua kuery oximba aguã rami.

⁵ Ha'e ramo Israel kuery ha'e nunga oexa vy onhemondyipa rei, oximba rei 'rã okuapy Etiópia pygua kuery re ojerovia rire, ha'e Egito pygua kuery pe voi “Ipo'akapave va'e” he'i rire.

⁶ Ha'e va'e ára ha'e va'e vvy re hekoa va'e kuery aipoe'i 'rã okuapy: “Pexa, evoko rami ete va'e ty'y oiko nhande kuery nharõ jakuapy va'ekue rei, mba'eta ha'e katy ae jajava Assíria pygua huvixa gui, ha'e kuery nhandereraa jepe aguã teĩ Mba'exa 'rã'vy jaa jepe?” he'i 'rã okuapy.

21

Babilônia pygua kuery rovai ijayvuague

¹ Kova'e avvu ma ye'ẽ vvy'ry tekoa e'yã oĩ va'e pygua kuery rovai ou va'ekue.* Mba'eta kuaray puku-a katy gui vvytu vaikue ou va'e rami avi peteĩ ou 'rã vai tekoa e'yã gui, nhomongyjea kuery ikuaiã gui ae.

² Ipoyi ete va'e xeivy oexa ukaa po rami amombe'u va'erã: “Anhetẽ rupi e'y ikuai va'e anhetẽ rupi e'yve 'rã ikuai, ha'e mba'emo mombaa rupi ikuai va'e nhomombave 'rã heravy. Elão pygua kuery, pepu'ã ke ha'e kuery re. Média pygua kuery, pejoko ke. Mba'eta xee amombytu'upa ma ha'e kuery ipoãã”, he'i.

³ Ha'e nunga aendu vy xerye rupi haxy va'e anho aendu, xere tekoaxy ipo'aka ma imemby raxy va'e rami. Haxy rã ajepoka-poka vy naendu kuaavei rei, xekangya gui ndaexa kuaavei ma guive.

⁴ Teko vai gui anhemondy'i vy xepy'a tytypa. Pytũ xee arõ teĩ xemongyjaarã rive ju oĩ.

⁵ Ha'e kuery omoĩ ma mesa, pyrõa rupi popẽ mbyre guive omoĩ, okaru ha'e oy'u okuapy aguã. Yvatekueve, pepu'ã ke, pereko katu hu'y jokoa.

⁶ Mba'eta po rami SENHOR ijayvu xeivy: “Tereo, emoĩ peteĩ oikuaa pota va'erã, ha'e tomombe'u ou va'e-va'e oexa vy.

* 19:15 “Inhakã ha'e pindo” he'ia ma Egito pygua kuery va'e regua yvatekueve re ijayvu vvy, ha'e rã “Huguai ha'e jai rogue” he'ia ma vvy'igüeve re (9.14-15). † 19:18 Canaã ma judeu kuery ikuaiã. * 20:2 Isaías pe ijayvu escravo rami onhemonde aguã kaxõ py rive, ha'e kuery oikuaa aguã Egito ha'e Etiópia pygua kuery voi escravo ikuai 'rãã.

* 21:1 Apy ma Babilônia tetã rovai ijayvu.

7 Ha'e gui kavaju árygua mokō-mokoī ou ramo, e'ŷ vy mburika, camelo árygua kuery ou ramo oexa vy ke tojapaxaka porã, he'i.

8 Ha'e ramo oikuaa pota va'e ojapukai 'rã guary rami: “ SENHOR, torre oikuaa potaaty áry ára pukukue re ma apu'ã ha'amy, pytũ mbukukue re guive ha'ã anhangarekoa rupi.

9 Pee ma avakue ou reta, kavaju árygua kuery mokō-mokoī jogueru jekuaa”, he'i. Ha'e gui teĩgue ju ojapukai vy aipoe'i: “Oitya ma, oitypaa ma Babilônia tetã! Ha'e rami vy ha'e kuery ruete ra'angaa ha'ypa oupy vyv rupi”, he'i.

10 Ma'ẽ, xeretarã kuery! Ojyky ha'e oinupã mbyre penemoingoa, mba'emo moa'yĩaty rupi oĩ va'e rami rive! Ha'e ramigua SENHOR ixondaro reta va'e Israel kuery ruete gui aendu va'ekue ae amombe'u pëvy.

Dumã pygua kuery rovai ijayvuague

11 Kova'e ma Dumã pygua kuery rovai ayvu ou va'ekue. Seir vyv gui ojapukaia xevy: “Nhoarõa, mbovy hora ma tu nhaĩ pytũ py? Nhoarõa, mbovy hora ma tu?”

12 Ha'e ramo nhoarõa ombovai 'rã: “Ovaẽ ma ouvy ko'ẽ, ha'e gui pytũ ju 'rã ou. Reporanduvexe vy ke eporandu. Any vy ejevvy, ha'e gui eju ju”, he'i 'rã.

Arábia pygua kuery rovai ijayvuague

13 Kova'e ayvu ma Arábia pygua kuery rovai ou va'ekue.

“Peẽ Dedã pygua kuery peguataa rupi Arábia ka'aguy re peaxa 'rã pekuapy pytũ.†

14 Peraa ke yy oy'uxe va'e kuery pe. Ha'e peẽ Tema vyv re pendekoa va'e, peraa ke mbojape ojava oje'oiivy va'e pe.

15 Mba'eta ha'e kuery ma ojukupaa ta rã ojava, kyxe oekyia ha'e guyrapa omoatãa va'e gui ojava va'e, ha'e opoxya rupi ha'e kuery re opu'ã va'e gui.

16 Mba'eta xevy pe SENHOR aipoe'iaque rami: “Peteĩ ma'et'ya'i pyve omba'eapo va'e oipapaa rami okanhymba 'rã Quedar vyv re mba'emo porã oĩ va'ekue.

17 Hapa va'e kuery opave ovy 'rã, Quedar pygua ipy'a guaxukueve voi mbovy'i ete 'rã ikuai”, ha'e rami ae SENHOR Israel kuery Ruete ijayvu rire.

22

Jerusalém pygua kuery rovai ijayvuague

1 Kova'e ayvu ma yvyugua mba'emo oexa ukaaty peguarã ou va'ekue. Mba'e tu oĩ ndea pygua kuery ha'e javi ngoo áry ojeupi okuapy aguã?

2 Ndee tetã renhendu porã riae va'ety, tetã oguerovy'a ha'e ovy'a rei va'e anho ikuaiaty reiko va'ekue ril Ndea py manogue ikuai va'erã ma kyxe py ojuka pyre'ŷ, neĩ jope opu'ãa py e'ŷ ojukaa va'ekue.

3 Ndea pygua yvatekueve ojapava vyvoty teĩ ombo'apaa guyrapa e'ŷ re. Ndea pygua ovaexĩa ma guive rã ombo'apaa, mombyry ma oo teĩ.

4 Ha'e nunga rupi aipoe'a: “Xere e'ŷ ke pema'ẽ, nda'evei etea rupi ajae'ove aguã. Nda'evei xembovy'a ju pekuapy aguã, xeretarã raju kuery omombaa rire”, ha'e.

5 Mba'eta kova'e ára ma hevovo, joguero'apa rei ha'e ndoikuuaa reipa aguã ára SENHOR ixondaro reta va'e oa'anga va'ekue. Yvyugua mba'emo oexa ukaaty py ha'e nunga oiko 'rã. Ha'e ramo tetã kora oitya rã ojapukaia onhendu 'rã vyvoty áry peve.

6 Mba'eta Elão pygua kuery hu'y ryrurave ou ma okuapy, karõxa ha'e kavaju árygua kuery reve. Quir pygua kuery voi hu'y jokoa moĩ porãaty oiye'a vy ojopypa heruvy.

7 Ha'e rami py peneretã vyvoty rupi yvyugua iporãve va'e-va'e tynyẽ 'rã oiny karõxa anho, penerokẽ py kavaju árygua kuery voi opytapa ma okuapy.

8 Mba'eta oiye'apaa ma Judã pygua kuery repyará va'ekue. Ha'e va'e ára penema'endu'a 'rã penembiporu oo vyvrya gui ojapo pyre py pemoĩ porã va'ekue re.

9 Ha'e gui Davi rekoague tetã kora pexa pota vy ipa'ũ pejuo reta 'rã. Ha'e vy pemboyru 'rã yy omboty pyre gui peru va'e.*

10 Peipapa 'rã Jerusalém tetã py oo ikuai va'e, ha'e va'e regua peity 'rã tetã kora pemoatyrõ aguã.

11 Ha'e gui mokoĩ kora oĩ va'e mbyte pemboty 'rã ygua ymague gui yy ou va'e. Ha'e rami teĩ napenema'endu'ai 'rã yva pygua re, ha'e nunga ha'e javi ombou aguã re onhembopy'a va'ekue teĩ.

12 SENHOR ixondaro reta va'e ijayvu ha'e va'e ára pejae'õ aguã re, ha'e pendepy'a vai vy peneakã penhopimba, ha'e ajukue vaikue py penhemonde aguã re.

13 Ha'e rami teĩ peẽ kuery pevy'a rei ha'e penderory rive anho teri pekuapy. Ha'e rami vy pejuka 'rã vaka, pejyryvi kyxĩ 'rã vexa'i. Pe'u 'rã xo'o, ha'e pey'u 'rã vinho. Ha'e rami vy aipopeje 'rã: “Jakaru ha'e jay'u, mba'eta ko'ẽ rã nhamanomba 'rã”, peje pekuapy.*

14 Ha'e ramo xee aendua py SENHOR ixondaro reta va'e ijayvu. Ha'e vy aipoe'i: “Anhetẽ ae, guĩ rami ete pendeko vaia nambogueti 'rã pamanomba peve”, he'i SENHOR ixondaro reta va'e.

Sebna omo'yvy'i aguã, ha'e rã Eliaquim ma omboyvateve aguã re ijayvuague

15 Ha'e gui SENHOR ixondaro reta va'e aipoe'i:

† 21:13 Dedã (versículo 13), Tema (versículo 14) ha'e Quedar (versículos 16-17) ma Arábia vyv regua meme. * 22:9 Ha'e kuery omboyru yy hovaigua kuery ou rã guarã, yy oata e'ŷ aguã. * 22:13 1 Coríntios 15.32

- Epu'á ke, tereo huvixave ro re opena va'ety Sebna oia py. Ha'e rami vy eporandu iuxep:
¹⁶ "Mba'e tu apy oi? Mava'e tu ndevy upe va'e ojapo uka, apy ndevyguia vyvra ruparã rejo'o aguã? Mba'eta apy vyvty áry rejapo ndevyguia vyvra ruparã, itaova re ndetui aguã.[†]
¹⁷ Ha'e rami avi SENHOR nemokanhy 'rã petei ava imbarae vaipa va'e rami. Ndejopy ratã vy
¹⁸ nenhovã 'rã petei nhevãã py. Ha'e vy bola rami nembojere 'rã heravy petei vyv tuvixaa katy. Ha'e py ma remano 'rã. Ha'e py ae avi opa 'rã karõxa'i rejou porãve va'ekue. Ha'e ramo ndekãuxa nderuvixa ro pygua kuery oxĩmba 'rã okuapy.
¹⁹ Xee romombo 'rã reiaty gui mombyry. Roipe'a 'rã mba'emo rejapo aguã rami reikoague gui.
²⁰ "Ha'e va'e ára ma aenõ 'rã xerembigui Eliaquim, Hilquias ra'y.
²¹ Ha'e va'e ju amonhemonde 'rã ao puku remõ va'ekue py, ha'e neku'axãgue py amoku'axã 'rã. Ipo py ju amboaxa 'rã ndepo'akaague. Ha'e ramo oiko 'rã Jerusalém ha'e Judã pygua kuery rurã.
²² Jjaxy'y áry xee amõ 'rã Davi ro pe'aa. Ha'e rami rire amongue henda py oi'pe'a ramo avave rei nombotyavei 'rã. Ha'e gui omboty ri ramo avave avi ndoipe'aai ju 'rã.
²³ Amõ atã 'rã vyvra rakua petei henda oi atã aguã py rami. Ha'e ramo opyta 'rã nguu ro pygua kuery omboetepa aguã rami.
²⁴ Hexe oi 'rã tuu ro py ikuai va'e ha'e javi re opena aguã, guetarã kuery, guamymino kuery, ha'e gui tembiporu kyrĩgueve, hy'a'i ha'e hy'a kua ikuai va'e re voi", he'i.
²⁵ Ha'e gui SENHOR ixondaro reta va'e aipoe'i: "Ha'e va'e ára vyvra rakua oekyia ju 'rã oi atãague gui. Oipe'aa ramo ho'a 'rã. Ha'e ramo hexe oupi pyre voi ho'apa avi 'rã", he'i. Po rami ae SENHOR ijayvu, 're 'rã.

23

Tiro pygua kuery rovai ijayvuague

- ¹ Kova'e ayvu ma Tiro pygua kuery rovai ou va'ekue.
 "Kanoã guaxu Társis guigua py peguata va'e, pendepy'a vai ke, mba'eta peneretã ombovaipaa 'rã. Oo ikuai va'e noivei 'rã, neĩ kanoã onhembojaaty ma voi.* Chipre vyv gui ha'e nunga omombe'ua.
² Ye'ẽ vyvry rupi pendekoa va'e, pekyriřimba ke. Peẽ kuery ma Sidom tetã gui mba'emo pejogua vy perekopa rei, ye'ẽ rupi riaa pendekuai vy.
³ Paraguaxu rupi ndevy guarã oguerua va'ekue mba'emo ra'yĩgue yy rape Egito re ikuai va'e ha'e Nilo yakã vyvry omono'õ va'ekue. Tiro tetã, ndea py ma vyv regua kuery mba'emo vendeaty oi va'ekue.
⁴ Peẽ Sidom pygua kuery ye'ẽ vyvry tetã ikorapaa py penderekoa va'e, pexĩmba ke, mba'eta ye'ẽ ijayvu vy aipoe'i: 'Xee naendui kyrĩ va'e raxy, neĩ kyrĩ va'e voi naikuavã. Xee nambotujai avakue'i, neĩ kunhataĩgue voi nambo'e'i', he'i.[†]
⁵ Ha'e gui Tiro pygua kuery re oiko va'ekue Egito py omombe'ua ramo ha'e pygua kuery voi oendu 'rã nda'eveie etea.
⁶ Ye'ẽ vyvry rupi pendekoa va'e, tapeo ke Társis katy pejae'o reve.
⁷ Ha'e rami ete ri ty'y oiko xapy'a peneretã pejou porã rei va'ekue re, yma pejapo va'ekue teĩ, ha'e mombyry katy ju peo pendekoa aguã?
⁸ "Ha'e gui mava'e nda'u Tiro pygua kuery re ha'e rami ete oiko aguã re onhembopy'a va'ekue? Mba'eta ha'e va'e tetã pygua ma heta regua pe ovende va'ekue akã pyxia. Ha'e pygua mba'emo joguaa rupi ikuai va'e ma yvatekueve meme, ha'e mba'emo vendea rupi ikuai va'e vyv jave rupi omboetepevy ikuai va'ekue.
⁹ SENHOR ixondaro reta va'e ae onhembopy'a ha'e rami, omomba aguã pavẽ gui ojejou porãve va'e, ha'e omo'vyvĩimba aguã vyv jave rupi omboetepevy.
¹⁰ Társis pygua memby kuery, peguata ke peovy peguataxea katy rei pendepyvry rupi, Nilo yakã oxryra rami. Ndoikovei 'rã pendekoarã.
¹¹ Mba'eta ye'ẽ áry rupi SENHOR opo oupi vy omoingo axy tetã ikuai va'e. Ha'e rami vy ijayvu Canã re voi oo ikorapa va'e ombovaipaa aguã re.
¹² Ha'e vy aipoe'i: 'Aĩ ma Sidom pygua memby, nemoingo axya rire nerenduvi ma 'rã rejeyou porã reia. Epu'á ke, tereo Chipre katy. Ha'e rami teĩ neĩ ha'e py voi nderejoui 'rã repytu'u aguã', he'i.
¹³ "Peikuaa pota ke caldeu kuery vyv re oiko va'ekue re. Ha'e pygua kuery ma kue'i peve petei regua neĩ nda'ikuaivei va'ekue, ha'e ijyvy Assíria kuery ombovaipa va'ekue vixo tekoa e'ĩa rupigua rive ikuai aguã. Ha'e rami teĩ ha'e kuery ae torre ojapo vy ombovaipa raka'e Tiro pygua huvixave ro, ha'e vy omomba ete.
¹⁴ Kanoã guaxu Társis guigua py peguata va'e, pejae'o ke, mba'eta omombaa ma penhemiaty ikorapa va'ekue.
¹⁵ "Ha'e va'e ára rire ma Tiro tetã re hexaraia 'rã setenta ma'etỹ re, huvixave oiko puku-a ára peve. Ha'e gui setenta ma'etỹ opaa py ma Tiro re oiko ju 'rã kunha itavy rei va'e regua mboraei py oi va'e rami, po rami:
¹⁶ 'Kunha itavy rei va'e hexaraipy, ejopy ju ke mba'epu ixã reta va'e, ha'e tereo tetã rupi. Eporaei porã ke, rembopu vy ke jovaive-ive tema eovy, ndere ima'endu'aa nho aguã', 'ea va'e rami.

[†] 22:16 Ha'e va'e jave py ojeyou porã rei va'e ha'e ae ruparã ojapo ma voi 'rã iporãve py, hexe ima'endu'a porã aguã. * 23:1 Tiro tetã ma ye'ẽ vyvry oi kanoã guaxu onhembojaaty. Sidom voi ha'e kuery va'e regua retã. [†] 23:4 Tiro ha'e Sidom pygua kuery pe "Ye'ẽ ra'y kuery" 'ea va'ekue teĩ ha'e kuery okanhymba rire ye'ẽ "Xera'y kuery ndokuavei" he'i.

¹⁷ Mba'eta setenta ma'etÿ ojeupity maa py ma SENHOR omoingo porã ju 'rã Tiro tetã. Ha'e ramo ha'e kuery gueko vaia rupi ju ojuve 'rã oje'oiivy. Ha'e rami vy yvy jave rupi itavy 'rã huvixave ikuai va'e reve.

¹⁸ Ha'e rami teĩ gueko vaia rupi ojou va'ekue SENHOR pe ae 'rã omboaxaa. Hepykue nomoĩ 'rã hyru py, neĩ nomoĩ porã 'rã. Ha'e rami 'rãgue py hepykue opyta 'rã SENHOR renonde ikuai va'e pe, ha'e kuery ojou reta aguã ho'u va'erã, ha'e iporã va'e py anho onhemonde aguã."

24

¹ Ma'ẽ, SENHOR omomba 'rã yvy, ombovaipa ete 'rã. Amboae rami ojapo 'rã hi'áry rupi, ha'e omoaĩmba 'rã ha'e py hekoa va'ekue.

² Ha'e rami vy heta va'e kuery re mba'emo oiko va'e ma sacerdote kuery re avi 'rã oiko. Tembiguaĩ kuery re oiko va'e ma ipatõ re avi 'rã oiko. Tembiguaĩ kunha re oiko va'e ma herekoa re avi 'rã oiko. Mba'emo joguaa re oiko va'e ma mba'emo vendea re avi 'rã oiko. Mba'emo oiporuka va'e re oiko va'e ma iporua re avi 'rã oiko. Nhomboreve va'e re oiko va'e ma oreve va'e re avi 'rã oiko.

³ Mba'eta yvy ha'e javi rupi omombaa 'rã, hexe ikuai va'ekue oipe'apaa 'rã guive, SENHOR ae ha'e rami aguã re ijayvu rire.

⁴ Ha'e gui yvy jave rupi ipirupa vy overepa 'rã. Na'iporãve ha'e ipirupa 'rã, yvy regua yvatekueve voi nda'eveive ovy 'rã.

⁵ Anhetẽ ae yvy iky'apa va'e itui hekoa va'e kuery káuxa, lei ha'e hekorã ome'ẽ mbyre rovai ikuai ramo, ha'e ombovaipa rive rire Nhanderuetẽ guexeve guarã imarã e'ÿ va'e ojapo va'ekue.

⁶ Ha'e nunga rupi ayvu vai omokanhy heravy yvy, hexe ikuai va'e voi iky'a va'e meme ikuai. Ha'e nunga rupi yvy regua kuery oapypaa 'rã, mbovy'i ete 'rã okuave.

⁷ Vinho opa ovy, uva'y ikuai va'e voi ipirupa ma. Ha'e ramo opy'a py ovy'a va'ekue ipoaẽmba.

⁸ Opytu'upa pandeiro pu rupi ovy'a va'ekue, opa ovy'a nhendu ha'e ixã reta va'e pu rupi ovy'a va'ekue.

⁹ Ndoporaieivei 'rã vinho oy'u reve. Iro va'e oy'u va'e kuery pe ma iro raxa 'rã.

¹⁰ Ha'e rire tetã ojea rive pyre ma ombovaipaa ete. Oo ombotypaa ramo avave rei nda'eveive ma oike aguã.

¹¹ Ha'e kuery ojapukai okuapy tape rupi vinho re ojerure vy. Vy'a oĩ aguã va'ekue py pytũ vaikue rive oĩ, ovy'a va'ekue oipe'apaa ma rive yvy gui.

¹² Tetã rupi ma omomba pyre anho oĩ, tetã rokẽ voi ombovaipaa ma.

¹³ Mba'eta ko yvy regua kuery ma mbovy'i ete okuave 'rã yvy re, azeitona'y gui hi'a oi'opaaague rami, ha'e uva ono'õa ma rire nomono'õmbai va'ekue oeka jevya rami.

Heko porã va'e kuery ovy'a aguã re ijayvuague

¹⁴ Ha'e gui okuave va'e kuery ma oporaie nhendu 'rã ovy'a vy. Ye'ẽ guive SENHOR rexakã oguerovy'a 'rã okuapy.*

¹⁵ Ha'e nunga rupi peẽ kuaray oua katy pendekuai va'e peroporaie ke SENHOR, ye'ẽ vy'ry penderekoa va'e voi peporaie SENHOR Israel kuery ruete rery rupi.

¹⁶ Ha'e ramo yvy apy gui nhaendu "Toguerovy'aa Heko porã ete va'e pe" oporaieia rã.

Heko vai va'e kuery okanhymba aguã re ijayvuague

Ha'e rami teĩ xee aipoa'e: "Xee ma ndavy'aia anho aendu, nda'eveie ete xevy. Mba'eta anhetẽ rupi e'ÿ ikuai va'e ma nhombotavya rupi ae 'rã ikuai", ha'e.

¹⁷ Ha'e nunga rupi yvy re penderekoa va'e, pendere ou 'rã ngyje, vyvkua ha'e nhuã.

¹⁸ Mba'eta ngyjea gui ojava va'e ho'a 'rã vyvkua py, ha'e vyvkua gui oẽ ramo nhuã ju 'rã ojura. Mba'eta yvy yvate rupi ojoko pyre onhoẽmba 'rã, ha'e yvy yta ikuai va'e omyĩmba 'rã.

¹⁹ Ha'e vy yvy opẽmba rei 'rã oiny, ha'ypa ha'e oryryi atã ete 'rã.

²⁰ Yvy ho'apa rei 'rã ovy oka'u va'e rami, ovava 'rã kya okeaty rami. Yvy re hekoa va'e kuery reko vaia ma ipoyi ete ma oiny yvy re. Ha'e nunga rupi ho'a vy nopy'ãve ma 'rã.

²¹ Ha'e va'e ára SENHOR yva re ranhe ombopaga 'rã yva re ikuai va'e, ha'e gui yvy re ju ombopaga 'rã huvixave kuery yvy regua.

²² Ha'e kuery omono'õmba 'rã monde py ho'a va'ekue rami. Ha'e vy ombotypa 'rã nhuã py. Mbovy ára re rei ve'ÿ ma rire teĩ ombopagapa 'rã.

²³ Jaxy oxĩmba vy naendyvei 'rã, kuaray voi okanhy 'rã SENHOR ixondaro reta va'e ou ramo Sião vyvty áry opena aguã Jerusalém tetã py. Ha'e rami vy ojeuegua ruvixa kuery oexaa py oexa uka 'rã guexakãa.

25

SENHOR nhomboaxya ogueroporaieague

¹ SENHOR, ndee ma Xeruetẽ. Xee romboete ha'e aroporaie 'rã nderery, nerembiapokue iporã ete ramo. Yma rupi ndeayvuague anhetẽ ete ha'e ojeroviapy va'e meme rupi reiko.

² Mba'eta tetã ikuai va'e rembovaipa rire itaty rive opyta, tetã imbaraete va'e teĩ tekoague rejapo. Yvy mboae regua tetã voi tetã ve'ÿ meme opyta, nomoatyrõavei ma 'rã.

³ Ha'e nunga rupi yvy regua imbaraetekueve nembroete 'rã okuapy, ha'e tetã pygua nhomoingo axy reia rupi ikuai va'ekue okyjepa 'rã ndegui.

* 24:14 Apy ma ijayvu heko porã va'e kuery oo jepe vy ovy'aa re.

⁴ Mba'eta renhemoi iporiaukue'i onhemi aguã, oipotapa rei'i va'e onhemi atyrã reiko ikuai axy rã, vvytu atã gui renhomi aguã, ha'e kuaray aku gui kuaray'ã rami. Mba'eta joguereko axy va'e poxya ma tetã kora re vvytu atã oipejua rami ou,

⁵ ipiru reia rupi kuaray ojope raxya rami avi. Ha'e rã ndee ma remomba 'rã vvy mboae regua poxya. Mba'eta arai huũ va'e kuaray aku ojokoa rami avi ndee remokyriři 'rã joguereko axy va'e kuery ovy'a reia rupi oporaieia.

⁶ Ha'e gui kova'e vvyty re SENHOR ixondaro reta va'e ojapo 'rã petei ngaru guaxu vvy regua kuery ha'e javive pe, ngaru vinho ymague oia, ha'e hy'a xo'o kyra ha'e vinho xii porã va'e ikuai.

⁷ Kova'e vvyty re ombovaipa 'rã ajukue heta va'e kuery ojao'iague, ha'e vvy regua kuery ha'e javi rexa mbotyarã omoia va'ekue.*

⁸ Ha'e rami vvy omomba 'rã manoa po'akaa raka'e rã peve. SENHOR Nhanderue texay omombirupa 'rã pavẽ rova gui, ha'e ojapo 'rã ixupegua kuery oxĩague noenduvei aguã rami vvy jave rupi, SENHOR ae ha'e rami ijayvu rire.*

⁹ Ha'e va'e ára aipo'ea 'rã: "Upe ma Nhanderue nharõ jakuapy va'ekue. Ha'e ae ma nhanderepy 'rã. Upe va'e ma SENHOR nharõ jakuapy va'ekue. Ha'e nhandereraa jepe ramo jaroporaie ha'e jarovy'a 'rã", 'ea 'rã.

¹⁰ Mba'eta kova'e vvyty re SENHOR omoi 'rã opo. Ha'e rã Moabe vvy re ma opyrõmba 'rã, mba'emo pire mba'emo repoxi re nhapyrõmbaa rami.

¹¹ Ha'e nunga mbyte gui ma ha'e kuery okuave'ẽ 'rã, o'yta va'e o'ytaa rupi okuave'ẽ-ve'ẽa rami. Ha'e rami teĩ SENHOR omomba 'rã onhemboyvate reia, okuave'ẽ teĩ.

¹² Oitypa 'rã tetã kora yvate ha'e imbaraete va'ekue. Ombovaipa 'rã, oitypa 'rã vvy rupi vvy ku'i opyta peve.

26

SENHOR opena ramo ojerovia etea rupi oporaieague

¹ Ha'e va'e ára ma Judá vvy rupi oporaieia 'rã po rami:

"Nhaneretã ma imbaraete ete. Ikora ha'e torre nhanhemi aguã ma Nhanderue ae omoi nhandereraa jepearã.

² Peipe'a ke okẽ vvy regua kuery heko porã ha'e ojeroviaa rupi ikuai va'e oike aguã.

³ Ndee SENHOR, rembopy'a porã riae 'rã ndere ojerovia aguã omoi atã va'e.

⁴ Pejeroivia riae ke SENHOR re, mba'eta Nhanderue ma itaova imarã e'ỹ va'e oiko.

⁵ Ha'e oitypa 'rã vvy'ã áry tetã oĩ va'e pygua kuery. Oity vvy omo'vvy'i 'rã vvy re, vvy ku'i opyta peve.

⁶ Ha'e ramo opyrõa 'rã opy py. Oiko axy rei'i va'e ha'e iporiaukue'i ae 'rã opyrõmba.

⁷ "Heko porã va'e uguataa ma ijoja porã rei va'e meme. Ndee ndereko porã va'e ae rembojoja porã 'rã heko porã va'e oiko aguã.

⁸ SENHOR, roarõ rokuapy reipotaa oiko aguã. Oreyu'a re oĩ nderery re orema'endu'a riae aguã.

⁹ Xenhe'ẽ py pyávy xepytuẽ atã ndere. Xenhe'ẽ ha'e xepy'a py roeka riae aikovy. Mba'eta vvy re reipotaa oiko ramo ma ma vvy regua kuery oikuaa 'rã teko porã rupi ikuai aguã.

¹⁰ Mba'eta heko vai va'e remboaxya rexa uka teĩ ha'e kuery ndoikuai 'rãe teko porã rupi ikuai aguã. Ha'e kuery ma heko porã va'e ikuai rupi teĩ gueko vaia rupi tema ikuai, ndoikuai potai 'rã SENHOR yvatea re.

¹¹ SENHOR, ndepo reupi reiny teĩ ha'e kuery ndoexai. Ha'e rami teĩ ndevyguia kuery repy ramo ha'e kuery oexa vy oxĩmba 'rã. Ndepoxya rupi emokanhymba nderovaigua kuery.

¹² Ha'e rã oreyv pe ma SENHOR, eme'ẽ ke mby'a porã, mba'eta mba'emo rojapo va'e ha'e javi ma ndee ae rejapo oreyv.

¹³ SENHOR Oreyvete, huvixa kuery mboae orere ipo'aka va'ekue, teĩ nderery anho 'rã ore rogueroporaie.

¹⁴ Ha'e kuery omanomba ma, ndoikove jevyi 'rã guive, hi'ague rive nonhemboetevei 'rã. Ha'e rami aguã ae rembopaga vvy remomba ete. Rejapo ha'e kuery re na'ima'endu'aavei aguã rami.

¹⁵ Ha'e rã ndevyguia kuery ma remboetave 'rã. SENHOR, ndevyguia kuery remboetave ramo nembroetepa. Ijyvy voi rembotuvixave heravy.

¹⁶ Ha'e kuery ojexavai vvy ndereka 'rã. SENHOR, ha'e kuery remo'arandu ramo onhembo'ea re 'rã ikuai.

¹⁷ Kunha hye guaxu'i va'e oikuavã'i aguã ova'ẽ rai'i ma ramo ojepoka-poka ha'e haxy rã haxẽ 'rã, ha'e rami ae avi ore voi orekuai va'ekue nerenonde, SENHOR.

¹⁸ Mba'eta ore voi roguereko'i ma, rojepoka-poka haxy ramo oiko aguã, ha'e rã roguereko'i va'ekue ma vvytu rive. Ha'e rami vvy ore ma vvy re ndoroguerui jogueraa jepearã, ndorojapo kuaai vvy re oikoave aguã rami.

¹⁹ Ha'e rami teĩ penderegua omano va'ekue oikove ju 'rã, onhemboetepa ju 'rã, xeretekue voi. Vvy ku'i guýry pendekuai va'e, pemyi ke, ha'e pevy'a. Oreyvete, ndeguigua ae nhomoingovearã rembou, ko'ẽ rai'i jave yxapy remboua rami avi. Ha'e ramo vvy gui oikove ju 'rã omano va'ekue."

²⁰ Ha'e nunga rupi xeretarã kuery, tapeo ranhe, peike opy ja'o'i py, ha'e pemboty okẽ peike rire. Penhemi ranhe xapy'a'i, ipoxya oaxa peve.

²¹ Mba'eta SENHOR oẽ 'rã ouvy oĩaty gui, vvy regua kuery ombopaga aguã heko vaiague re. Ha'e gui vvy re ojekuapa 'rã tuguy omoẽ mbyre, ndojao'ivei ma 'rã omano va'ekue.

* 25:7 Apy ma ijayvu manoa po'akaa SENHOR ombovaipa aguã re (1 Coríntios 15.54-58).

* 25:8 1 Coríntios 15.54, Apocalipse 7.17, 21.4

27

Nhanderuete ojeupegua kuery oayvu vy ogueraa jepe aguã re ijayvuague

¹ Ha'e va'e ára SENHOR ombopaga 'rã teju-jagua mboi inhakuã va'e, teju-jagua mboi ikarê-karê va'e. Okyxe hatã va'e, tuvixa ha'e imbaraete va'e py 'rã ojuka. Ojuka avi 'rã vixo tuvixa va'e ye'ê rupigua.

² Ha'e va'e ára SENHOR aipoe'i 'rã: "Peroporaie uva he'ê va'e 'y.

³ Xee SENHOR ma ha'e va'e re apena riae amoaký vy, avave rei ojapo vaia e'ý aguã apena aikovy, ara py ha'e pyávy.

⁴ Xere ma noí ha'e nunga pe xepoxya. Ha'e gui juu e'ý vy juu rakuauendy xerenonde hi'ái va'e rire ma apu'á 'rãgue hovai, apypa vyvoi 'rãgue.

⁵ Ha'e rami e'ý vy tove ha'e kuery tojepy uka xevy xepo'akapa va'e ramo. Xereve peteí rami ta'ikuai. Tá, tojapo xereve peteí rami orekuai aguã", he'i 'rã.

⁶ Ha'e gui raka'eve rã Jacó kuery hapo porã 'rã, Israel kuery hoky vy ipoty 'rã. Ha'e rami vy yvy jave re tynyê 'rã hi'a.

⁷ Xapy'a rei nda'u SENHOR ju omoingo axy ri Israel kuery imoingo axyare omoingo axyague rami? Xapy'a rei nda'u ha'e kuery va'e e regua ojuka ri ijukaare ojukaague rami?

⁸ Any teve! Ha'e rami 'rãgue py escravo-rã ogueraa ukaa py rive omoingo axy. Oipeju ratã reve omondouka yvytu kuaray oua katy guigua oipejua rami.

⁹ Ha'e gui po rami ojao'i 'rã Jacó kuery heko vaiague, po rami oikuaa uka 'rã ojejavuague omboguepa maague: Mba'eta ita ha'e kuery altar re oí va'e ha'e javi SENHOR ombo'a ypa 'rã ita cal ha'ykué- 'ykué'i rami. Ha'e ramo nomopu'ávei ma 'rã ta'angaarã yvyra gui ojapo va'ekue, neí altar heakuã porã va'e oapy atyrã voi.*

¹⁰ Mba'eta tetã ikorapa va'ekue ma ha'e ae'i opyta, omboyke ha'e oejapa pyre, tekoa e'ýa rami. Ha'e py ma vaka ra'y kuery rive 'rã okaru, onhenho ha'e ho'upa hoky.

¹¹ Ha'e py hakã ikuai va'e ipirupa ramo omopẽmbaa 'rã. Ha'e ramo kunhague ou vy omoí 'rã tata py. Ha'e rami oiko 'rã kova'e kuery o'arandua rupi e'ý ikuai rire. Ha'e nunga rupi ijapoare noenduvei 'rã omboaxya, imoingoare ndoperdoavei 'rã.

¹² Ha'e va'e ára SENHOR ojpo'o 'rã mba'emo ra'yí Eufates yakã guive Egito katy'i yakã'i oí va'e yvýry peve. Ha'e rami vy peẽ Israel kuery pendeporavo 'rã peteí-teí.

¹³ Ha'e va'e ára ma omonhe'êa 'rã peteí mimby guaxu. Ha'e ramo Assíria yvy rupi okanhygue rami ikuai va'e, ha'e Egito yvy katu omondoukapa pyre voi ojevypa ju 'rã. Ha'e vy omboete 'rã okuapy SENHOR Jerusalém py, vvyty iky'a e'ý va'e áry.

28

Efraim kuery ombopaga aguã re ijayvuague

¹ Nda'evei ete 'rã Efraim kuery retã oka'u va'e kuery ikuai "Coroa" 'ea va'e pe. Ha'e nunga ma yvoty iporã va'ekue teí ipirupa 'rã, yvy'ã re oí yvyugua vinho gui oka'u rei va'e ikuai áry.*

² Mba'eta SENHOR oíporavo peteí ava ipy'a guaxuve ha'e ipo'akapa va'e. Ha'e va'e ma amandau ho'a xapy'a va'e rami 'rã ou, yvytu vaikue omomba va'e rami, oky yvytu reve yy omonyê vyvoi va'e rami oitypa 'rã yvy py.

³ Ha'e va'e ma opyrõ 'rã Efraim kuery oka'u va'e coroa oguerovy'a va'ekue re.

⁴ Ipoty ipiru va'ekue ma ha'e kuery ojou porã va'e yvy'ã re yvyugua opa mba'e oiko porã áry oí va'e, ha'e va'e ma figo ijajua ára py e'ý ijaju va'e rami opyta, mba'eta amongue oexa vai-vai'i vyve oipo'o vy ho'upa vyvoi 'rã.

⁵ Ha'e va'e ára ma SENHOR ixondaro reta va'e ae 'rã oiko ojeupegua okuave va'e kuery coroa oguerovy'a va'e, ipotyva ha'e iporã ete va'e.

⁶ Inhe'ê oí 'rã joe opena oiny va'ety mo'aranduarã anhetê rupi oikuaa pota kuaa aguã, ha'e ngovaigua kuery tetã rokê gui omoanha va'e mombaraetearã.

Jerusalém pygua kuery rovai ijayvuague

⁷ Ha'e rami teí kova'e kuery voi ho'a-o'a 'rã okuapy vinho gui, nopu'ã ho'amy kuaavei 'rã iro va'e gui. Sacerdote ha'e profeta kuery voi ho'a-o'a 'rã iro va'e gui, vinho pe 'rã ojeity uka. Neí opu'ã ho'amy aguã voi nda'evei 'rã iro va'e gui. Ha'e nunga rupi ha'e kuery ojavy 'rã mba'emo oexa ukaa rã ndoexa kuaa porãí vy, ha'e onhepyxanga 'rã joe oikuaa potaa py.

⁸ Mba'eta ha'e kuery mesa ha'e javi rupi ombojevuyague anho oí, iky'a e'ýa noí.

⁹ Ha'e ramo xevy oporandu rive vy "Mava'e tu rembo'e ta 'arandu re?" he'i okuapy. "Mava'e pe tu reikuaa uka ta rendu va'ekue? Xapy'a rei nda'u nokambuvei va'e icy kã gui omboia ramo'i pyre pe ri reikuaa uka?"

¹⁰ Mba'eta orembo'eague áryve orembo'e riae 'rã, orembo'e-mbo'eve tema. Reikuaa ukaague áryve reikuaa uka riae 'rã, reikuaa ukaague rembo'eve reikuaa ukave tema. Mbovy'i 'rã apy ndeayvu, ha'e mbovy'i avi 'rã upe py ndeayvu", he'i okuapy xevy.

* 27:9 Romanos 11.27 * 28:1 Efraim kuery retã ma Samaria. Peteí yvyugua yvýry oí yvy'ã re, ikorapa va'e guive. Ha'e nunga rupi jaexa rã coroa rami ojekuaa, e'ý vy yvoty rami. Ha'e pygua kuery ma oka'u rupi anho ikuai. Ha'e kuery judeu regua ikuai teí Nhanderuete nomboetevei okuapy. Ha'e ramo ha'e kuery rovai Nhanderuete ombou Assíria pygua kuery omomba aguã.

¹¹ Ha'e nunga rupi xeretarā kuery pe SENHOR ijayvu 'rā ijayvu kuaa porā e'ŷ va'e rami, ayvu mboae rupi guive.

¹² Ha'e kuery pe aipoe'iva va'ekue: “Kova'e ma aikuaa uka pepytu'u aguā, ikane'ō va'e pe ame'ē 'rā opytu'u aguā. Kova'e ae ma pepytu'u aguā ame'ē va'e”, he'i rire te'i ha'e kuery noendu potai.*

¹³ Ha'e rami rire ha'e kuery pe SENHOR ayvu ou 'rā po rami: “Penembo'eague áryve 'rā penembo'e, penembo'ea ramive penembo'eve tema. Oikuaa ukaague áryve oikuaa uka 'rā, oikuaa ukaague oikuaa ukave tema 'rā. Mbovy'i 'rā apy ijayvu, ha'e mbovy'i avi 'rā upe py ijayvu”, he'i 'rā. Ha'e rami vy ha'e kuery oje'oia rupi ho'apa aguā guakykue katy, opēmba ha'e ojejurapa vy onhemoi vai aguā.

¹⁴ Ha'e gui peē avakue penhombojaru reia rupi Jerusalém pygua kuery re pendepo'aka va'e, pendu ke SENHOR ayvu.

¹⁵ Mba'eta aipopeje: “Ore ma manoa ha'e yvyra rupa reve rojapo orepe'a e'ŷ aguā. Ha'e rami rire yy oxyry atā va'e rami orenupāarā ou te'i ndorerupityi 'rā, mba'eta ronhemi aguā ma roguereko apu, ronhombotavya py ae 'rā ronhemi”, peje.

¹⁶ Ha'e nunga rupi SENHOR Nhanderuete aipoe'i: “Ha'e gui xee ma pete'i ita amo'i Sião py, ita oiporavo pyre, oware ete va'e, iporāvea py amo'i atā va'e. Ha'e va'e re ojerovia va'e ma ndojapurai 'rā.†

¹⁷ Ha'e gui xee amo'i 'rā ha'evea rami oikuaa pota va'erā metro rami, ha'e teko porā ma prumo rami 'rā aikuaa uka penera'āarā. Ha'e rā apu penhemiague ma amandau ombovaipa 'rā, yy ogueroxyrypa 'rā penhemiaty”, he'i.

¹⁸ Ha'e ramo manoa reve pejogueroayvuague oaxapa rive 'rā, yvyra rupa reve pendeayvuague ndoikovei 'rā. Ha'e gui yy rami penenupāarā ou vy penemou'ūmba 'rā.

¹⁹ Ha'e nunga oaxa nhavō pendereraa 'rā. Ko'ē nhavō oaxa 'rā, pytū nhavō guive. Ha'e nunga oendu va'e okyjepa rei 'rā.

²⁰ Mba'eta ha'e nunga tupa ma ijapu'a'i ete ramo nda'evei 'rā hi'áry avave rei onheno aguā. Nheovāa voi ipo'i'i ete ramo avave rei nda'evei 'rā onheovā aguā.

²¹ Mba'eta SENHOR opu'ā 'rā Perazim yvyty áry rami, opoxya oexa uka 'rā Gibeão yvyugua py rami,‡ ojapo aguā guemiapo ojapo va'ety e'ŷ, ha'e nhaendu va'ety e'ŷ teri.

²² Ha'e nunga rupi aŷ pendeayvu vaikue-ikueve eme, corrente pendepokua ratāve heravy e'ŷ aguā. Mba'eta SENHOR Nhanderuete ixondaro reta va'e gui aendu penemombaarā ou aguā re ijayvu rā. Ha'e nunga ma pendeyvy ha'e javi re oiko 'rāe.

Nhanderuete opa mba'e py hi'arandua re ijayvuague

²³ Peipe'a ke pendeapyxa, ha'e pendu xeayvua. Peikuaa pota porā xeayvua pendu kuaa aguā.

²⁴ Xapy'a rei nda'u yvy oikara'i va'e ko'ē nhavō 'rā ri ovyv oikara'i riae mba'emo ra'yī omoa'i aguā? Ko'ē nhavō 'rā ri ty'y ovyv ojo'o ha'e oikaraia rupi ikuai?

²⁵ Ha'e rami 'rāgue py yvy ombojojapa ma rire omoa'i 'rā endro ha'e cominho ra'yīgue. Omoa'i 'rā trigo hi'a aguā rupi, ha'e e'ŷ vy cevada mba'e omoa'i 'rāgue py, e'ŷ vy amboae nunga ra'yīgue voi omoa'i 'rā ijyvyry rupi.

²⁶ Mba'eta ha'e kuery Ruete ma ha'e rami aguā rami ae omo'arandua, ha'evea rami meme 'rā ombo'e.

²⁷ Mba'eta endro ma nanhamoa'yī 'rā mba'emo moa'yīguea py, ne'i cominho ra'yīgue áry voi namboaxai 'rā karóxa ruéra. Ha'e rami 'rāgue py endro ma nhainupā'i 'rā yvyra rovi'i py, cominho ra'yī guive.

²⁸ Xapy'a rei nda'u nhamboa'ypa ete 'rā ri mba'emo ra'yī? Any. Oma'etý va'e ma riae e'ŷ 'rā ojyky mba'emo ra'yī, riae e'ŷ 'rā guive omboaxa karóxa ruéra hi'áry rupi guymba kavaju reve.

²⁹ Ha'e nunga ha'e javi ma SENHOR ixondaro reta va'e gui meme jaikuaa. Ha'e nhamemongeta rā jarovy'a ete, opa mba'e py hi'arandua va'e ramo.

29

Jerusalém tetā ha'e hovaigua kuery re ijayvuague

¹ Nda'evei ete 'rā tetā “Nhanderuete peguarā oapyty” 'epy va'e pe! Ha'e va'e tetā ma Nhanderuete peguarā oapyty ae, Davi rekoague guive. Toi-toive ma'etýa nhavō, ha'e tojeupity-pityve tema ngarua ma'etýa pukukue re ha'e py oiko va'e.

² Ha'e rami te'i xee amo'i vai 'rā “Nhanderuete peguarā oapyty” 'epy va'e. Ha'e ramo ha'e kuery ojae'o ha'e hexay 'rā okuapy. Ha'e gui ma opyta 'rā xevy guarā oapyty ete rami.

³ Mba'eta pendekuaia jovaive rupi rombojere uka 'rā, rojoko uka 'rā torre py, ha'e penderovai rupi amopu'ā 'rā pendejokoarā.

⁴ Ha'e gui yvy rupi romombo rire yvy gui ju pendeayvu 'rā. Yvy ku'i gui onhendu vai-vai'i 'rā pendeayvua. Yvy gui oē 'rā pendeayvu 'āgue rami, ayvu mbegue rami 'rā pendeayvua onhendu yvy ku'i gui.

⁵ Ha'e rā penderovaigua kuery heta ete va'eri yvy ku'i'i rami 'rā amoiingo, ojerovia reia rupi ikuai va'e ma mba'emo pire yvytu omboveve heravy va'e rami 'rā okanhymba. Ha'e nunga ma oiko xapy'a 'rā, xapy'a'i pyve.

⁶ Mba'eta SENHOR ixondaro reta va'e gui ou 'rā imbopagaarā yapu reve, yvy ryryi, opororo hatā va'e, yvytu apu'a, yvytu vaikue ha'e tataendy nhomombaarā reve.

* 28:12 1 Corintios 14.21 † 28:16 Ha'e va'e ita omombe'u porāve Romanos 9.33-10.11 ha'e 1 Pedro 2.4-8 py, Jesus reko re ijayvu yy.

‡ 28:21 Perazim yvyty áry ha'e Gibeão yvyugua py ma SENHOR opu'ā raka'e ojeuegua kuery repy vy (2 Samuel 5.17-25).

⁷ Pyávy jaexa ra'ua rami yvy regua kuery heta 'rã ou Nhanderuete peguarã oapyaty re opu'ã aguã. Ha'e rami vy pavẽ 'rã opu'ã tetã ha'e torre imbaraeete va'e re. Ha'e vy omoĩ vai 'rã.

⁸ Ha'e gui ha'e kuery re oiko 'rã jakaruxe vaipa vy jakaru nhainy taa rami jaexa ra'u rire teĩ javy vy nhanenhembyayia ju nhaendua rami avi, ha'e rami e'y vy nhandey'uvei vy jay'u taa rami jaexa ra'u rire teĩ javy vy nhandey'uvei ae tema nhainya rami. Ha'e rami ae avi 'rã yvy regua kuery re oiko, Sião vyvty re opu'ã jave.

Israel kuery onhe'ẽ py oexa e'yã ha'e anhetẽ rupi e'y ikuaiia re ijayvuague

⁹ Peguejy ke, ha'e pendepukupa tema pejupy. Pejexa mboguepa ke, ára revegua ve'y riae pendekuai. Oka'upa rei va'e rami pendekuai teĩ vinho gui e'y ta'vy. Pe'a-pe'a rei teĩ iro va'e gui e'y.

¹⁰ Mba'eta pendere SENHOR ombou nhe'ẽ penembopeyiarã. Ha'e rami vy omboty penderexa (ha'e va'e ma profeta kuery), ha'e onhovã peneakã (ha'e va'e ma oexa ukapy oexa va'e kuery).*

¹¹ Ha'e nunga rupi pendevy pe oexa ukapy ha'e javi ma kuaxia para imbojaa py omboty pyre rami rive opyta. Ha'e nunga ma ogueroayvu kuaa va'e pe ome'ẽa vy "Ajerure, eroayvu kova'e", he'i ramo "Nda'evei, mba'eta imbojaa py omboty rire", he'i 'rã.

¹² Ha'e gui ogueroayvu kuaa e'y va'e pe ju ome'ẽa vy "Eroayvu kova'e, ajerure", he'i ramo "Xee tu ndaroayvu kuaai rima", he'i 'rã.

¹³ Ha'e ramo SENHOR aipoe'i: "Kova'e kuery xere onhemboja teĩ ojuru py, oayvu py rive xemboete, ha'e rã opy'a py ma xegui mombryru ikuai. Xerenonde ojererokyje merami teĩ avakue ojapo ukaa rupi rive ikuai.*"

¹⁴ Kova'e kuery mbyte rupi ajapo riae 'rã tembiapo porã, tembiapo porã ete imondyipaara. Ha'e nunga rupi ha'e kuery regua hi'arandukueve 'arandua voi opa aguã, ha'e ikuai kuaakue ikuaiia voi okanhymba aguã", he'i.*

¹⁵ Nda'evei ete 'rã opy'a re oĩ va'e SENHOR gui onhomi va'e pe, ha'e pytũ rupi mba'emo ojapo oikovy va'e pe. Ha'e kuery ma joupe-upe "Mava'e tu nhanderexa? Mava'e tu nhandekuaia oikuaa ta?" he'i teĩ.

¹⁶ Teko vai rupi ete rima pendekuai! Mba'eta nhae'ũ re omba'eapo va'e rovai nhae'ũ onhemboyvate va'e rami pendekuai, ha'e tembiapokue ijapoare pe "Ha'e e'y ae ma xeapo", he'i va'e rami, tembiapokue ijapoare pe "Ha'e tu ndoikuaai rima", he'i va'e rami avi.*

Israel kuery ogueraa jepea aguã re ijayvuague

¹⁷ Ha'e rami teĩ ma are e'y'i re Líbano yvy ha'e javi rupi ojeapo 'rã yvyra'a tyrã, ha'e yvyra'a ty ikuai va'e ma ka'aguy regua rami ete 'rã oiko porã.

¹⁸ Ha'e va'e ára ma ijapyxa e'y va'ekue oendu 'rã ayvu kuaxia para re oĩ va'e, ára revegua e'y va'ekue voi oexa 'rã, pytũa gui oo jepe ma rire.

¹⁹ Yvyĩgueve'i va'e ovy'a 'rã SENHOR re, iporiaukue'i ovy'a 'rã Israel kuery Ruete Iky'a e'y va'e re.

²⁰ Ha'e rã joguereko axy va'e ma omombaa 'rã, ijayvu vaikue-ikue va'e nda'ikuaivei 'rã, mba'eta teko vai re anho ipy'a va'e opa 'rã.

²¹ Ha'e kuery ma peteĩ ayvu'i py rive nhomboeko vai 'rã, ha'e ombotavy 'rã huvixa kuery okẽ py oikuaa pota oiny va'e, ha'e gui mba'eve py e'y onhemboapu vy nomboeko porã heko porã va'e.

²² Ha'e nunga rupi SENHOR Abraão reraa jepeare aipoe'i Jacó ramymino kuery pe: "Jacó pe ma ndoikovei ma 'rã oxĩmba aguã rami, ndaova mboae revei ma 'rã.

²³ Ha'e rami 'rãgue py ha'e kuery, ha'e ta'y kuery hexeve ikuai va'e xepo py mba'emo ajapo ramo oexa vy omboete 'rã okuapy xerery. Tá, Jacó ruete Iky'a e'y va'e pe 'Iky'a e'y va'e' he'i avi 'rã, Israel kuery ruete renonde ikuai 'rã ojererokyjea rupi.

²⁴ Ha'e gui onhe'ẽ py ojavy va'ekue ma oikuaa nho 'rã, ha'e joe ijayvu rei va'ety voi onhembo'e uka 'rã", he'i.

30

Egito pygua kuery pe ha'e kuery ojereraa jepe uka e'y aguã re ijayvuague

¹ SENHOR aipoe'i: "Nda'evei ete 'rã xera'y kuery xenhe'ẽ rendu e'y va'e pe. Ha'e kuery ma xee ajapo uka va'e rupi e'y ikuai. Mba'eta amboae regua pe ojereraa jepe uka 'rã xee aipota ramo e'y, ojevavya áryve ojevavyve rive.

² Mba'eta xevy pe oporandu e'y re oje'oi 'rã Egito yvy katy, ha'e Faraó pe rive 'rã ojereraa jepe uka, Egito re kuaray'ã oĩ va'e py onhemi.

³ Ha'e rami teĩ pendereraa jepea Faraó ma penemoxĩmbaarã rive 'rã oiko, ha'e Egito re kuaray'ã py penhemia py ma penemoĩ vaia 'rã.

⁴ Mba'eta Judá pygua huvixa kuery ma Zoã tetã py ikuai, ayvu reraa kuery ma Hanes py ova'ẽ.*

⁵ Ha'e ramive ma ha'e kuery ha'e javi oxĩmba 'rã peteĩ regua mba'everã ndovarei va'e gui, mba'eta Egito pygua kuery ma nda'evei 'rã oipytyvõ neĩ omoingo porã aguã, ha'e rã omoxĩmba aguã rive, omboete uka aguã e'y", he'i.

⁶ Ha'e gui kova'e ayvu ma vixo kuery kuaray puku-a katygua re ou va'ekue.

* 29:10 Romanos 11.8 * 29:13 Kova'e ayvu rupi Jesus ijayvu heta va'e kuery pe, hexe ndojeroviai ramo (Mateus 15.8-9, Marcos 7.6-7).

* 29:14 1 Corintios 1.19 * 29:16 Romanos 9.20 * 30:4 Judá kuery re Assíria pygua kuery opu'ã okuapy ramo onhepytyvõ uka okuapy Egito pygua huvixa Faraó pe. Egito regua tetã Zoã ha'e Hanes py ha'e kuery ou raka'e onhepytyvõ uka vy, Nhanderuete re ojerovia 'rãgue py (31.1).

“Petei vvy ma jexavai ha'e ngyje oia, guary ha'e guary kunha, ha'e gui mboi ha'e mboi opo va'e ikuai. Ha'e va'e vvy rupi mburika'i áry ogueraa 'rã mba'emo ovareve va'e, camelo kupe áry mba'emo porã ogueraa 'rã petei regua noipytyvõi va'erã pe ome'ẽ va'erã.

⁷ Mba'eta Egito pygua kuery oipytyvõa ma mba'everã ndovarei 'rã. Ha'e nunga rupi ha'e kuery pe 'Mba'evê ojapo vy e'ỹ ijayvu rive rei va'e', ha'e.

⁸ “Tereo, embopara vyvrape'i re ha'e kuery oexaa py, embopara kuaxia re oĩ riae aguã raka'e rã peve guarã.

⁹ Mba'eta kova'e kuery ma xenhe'ẽ raxave va'e, ta'y kuery ijapu ha'e SENHOR guigua lei noendu potai va'e.

¹⁰ Ha'e kuery aipoe'i 'rã oexa ukapy oexa va'e kuery pe: 'Pexave eme oexa ukapy', he'i 'rã. Ha'e gui profeta kuery pe aipoe'i: 'Pemombe'uve eme orevy anhetẽ va'e. Ha'e rami 'rãgue py roenduxe vai va'e anho ke pemombe'u orembotavya rupi rive.

¹¹ Pejepekuavo ke tape gui, pejepe'a ke roiko aguã gui. Orevy pendeayvuve eme Israel kuery Ruete Iky'a e'ỹ va'e re', he'i 'rã okuapy.”

¹² Ha'e nunga rupi Israel kuery ruete Iky'a e'ỹ va'e aipoe'i: “Pova'e avvu napendu potai, ha'e rami 'rãgue py joavyky rei va'e re anho pejerovia, teko vai re guive. Ha'e nunga re rive pejeko va'e.

¹³ Ha'e rami ete pendeko vaia pendeavy opyta 'rã tetã kora yvate va'e re ipa'ũ oĩ va'e rami, mba'eta tye rami ojeapo vy ho'a xapy'a 'rã pexa'ã e'ỹ jave.

¹⁴ SENHOR ae ombovo 'rã, nhae'ũ guigua hy'a ombovo vy omboa'ypa katui'ia rami. Ha'e nungakue mbyte py ma ndojouai 'rã ipẽgue neĩ tatapy gui tapyi ojopy aguã, neĩ yy renda gui ojaraa aguã voi.”

¹⁵ Mba'eta SENHOR Nhanderuete, Israel kuery Ruete Iky'a e'ỹ va'e aipoe'i: “Pejeko rerova ha'e pejerovia vy 'rãe peo jepe. Pejapura rei e'ỹ re pejerovia ete vy 'rãe penembaraete. Ha'e rami teĩ peẽ kuery ma ndapeikuaaxeĩ ha'e rami.

¹⁶ Ha'e rami 'rãgue py aipopeje: 'Any, kavaju áry rojavapa 'rã', peje rire ha'e rami ae 'rã pejava. Ha'e 'Kavaju inhakuã va'e áry roguata 'rã', peje rire penderakykue monhaa kuery inhakuãve 'rã.

¹⁷ Peẽ va'e regua mil onha 'rã petei'i gui rive. Peteĩ nhirui'i gui rive peẽ kuery ha'e javi penhamba 'rã, mba'emo'y e'ỹ vy bandeira vvy'ã re ha'e ae'i ojea pyre rami penderejaa peve”, he'i.

Sião pygua kuery ombopy'a guaxua rupi ijayvuague

¹⁸ Po ramigua ae SENHOR oarõ penemboaxy aguã. SENHOR Nhanderuete ma oiko katu ma penderepy aguã, teko porã rupi joguerekoa va'e vy. Ha'e ramo hexe ojerovia va'e ovy'a ete va'erã meme.

¹⁹ Mba'eta ha'e kuery ikuai nho 'rã Sião ha'e Jerusalém tetã py. Ndapejae'ovei 'rã, mba'eta anhetẽ ae pejapukaia oendu vy penemboaxy 'rã. Ha'e rami pendeayvu rã oendu vy penembovai 'rãe.

²⁰ Ha'e gui SENHOR penembojexavai vy mbojape ha'e yy rive ojou uka teĩ nonhomivei ma 'rã penembo'ea kuery, penderexa py ae pexa 'rã.

²¹ Ha'e gui peiporu kuaa regua katy pejavy ta vy, e'ỹ vy peiporu kuaa e'ỹa katy mba'e, ha'e rami vy pendeapxya py pendu 'rã penderakykue katy gui ijayvu vy “Kova'e ae ma tape, kova'e rupi 'rã peiko”, he'i va'e.

²² Ha'e ramo prata mba'emo ra'angaa penhovãague pe ma “Ojeguarupy” peje 'rã, ouro mba'emo ra'angaa penhovãague pe guive. Ha'e nunga pemombopa 'rã mba'emo ovare e'ỹ va'e rami. Ha'e vy petei-teĩ aipopeje 'rã: “Topa vvyoi apy gui.”

²³ Ha'e gui mae ma SENHOR ombou 'rã oky vvy mba'emo ra'yĩ pemoaiague áry. Ha'e ramo mbojape heta ju 'rã oiko vvy gui, penembaraeatarã. Ha'e va'e ára penerymba vaka kuery voi okaru 'rã nhuũndy tuvixa va'e rupi.

²⁴ Ha'e gui penerymba vaka ha'e mburika vvy oikarã va'e ma ho'u 'rã mba'emo kure juky reve, pá ha'e vvyra rakãmby py hemb'iurã pemono'õ va'ekue.

²⁵ Ha'e gui vvyty yvate va'e, vvy'ã tuvixave va'e ha'e javi rupi ikuai 'rã yy oxyry'i va'e, jojukapa etea ára torre oitypaa jave py guive.

²⁶ Ha'e jaxy voi kuaray rami ete 'rã ojope, ha'e kuaray ma sete-kue ojope ratãve 'rã, sete ára pukukue ojope vyvoia rami 'rã hexakã. Ha'e va'e ára py ma SENHOR ojokuapa 'rã ojepegua kuery ai, omonguera ju 'rã ha'e ae oikyxiague.

Assíria pygua kuery ombopaga aguã re ijayvuague

²⁷ Ha'e gui SENHOR guery oendu uka reve 'rã ou mombyry gui. Ipoxya hendy reve 'rã ou, arai huĩ rei va'e mbyte rupi. Ijuru py ma ipoxya anho 'rã oĩ, ha'e inhapekũ ma tata nomombaarã rami ojekuaa.

²⁸ Ipytuã ma nhomomba 'rã yy oxyry atã va'e nhandejyryvi peve ova rami avi, mba'eta omomba 'rã yy regua kuery yrupẽ py rami. Ha'e gui vvy regua kuery juru re omoi 'rã ijuru xãrã ojavy uka aguã.

²⁹ Ha'e rã peẽ kuery mbyte ma onhendu 'rã petei mboraei, pyávy ngaru iky'a e'ỹ va'e oikoa py ovy'a va'e kuery onhendua rami. Pendepy'a py pevy'a 'rã pekuapy, mimby omonhe'ẽ reve SENHOR pegua yvyty katy oẽ ovy va'e rami, Israel kuery pegua ityva oia katy.

³⁰ Ha'e gui SENHOR oendu uka 'rã oayvu ipo'akapa va'e, oexa uka 'rã opo jojúka va'e opoxya rupi omboguejy vy tataendy nhomombaarã mbyte, oky vaipa, vvyty vaikue ha'e amandau reve.

³¹ Mba'eta SENHOR avvu gui Assíria pygua kuery onhemondyipa 'rã okuapy, vvyra rovi'i py ombopi ramo.

³² Ha'e gui SENHOR ombopaga vvy vvyra rovi py ombopi nhavõ pandeiro ha'e ixã reta va'e ombopua reve 'rã ombopi. Ha'e kuery re opu'ã vy 'rã ipo'aka.

³³ Mba'eta yma ete guive ma oguereko katu tata guaxu ha'e kuery ruvixave rapyarã. Oapy aguã ma yvate ha'e ipyve va'e oĩ, tata ha'e yxakã reve. Ha'e gui SENHOR oipejua py omoendy 'rã enxofre rami.

31

“Egito pygua kuery avakue rive ikuai, Nhanderueté e'ỹ”, he'iaague

¹ Nda'evei ete 'rã Egito yvy katy ojereraa jepe uka vy oje'oi va'e pe, nej kavaju re rive ojerovia va'e kuery pe. Ha'e kuery ma karóxa re ojerovia 'rã heta ramo, kavaju árygua re ojerovia imbaraeete rã. Ha'e rã Israel kuery Ruete lky'a e'ỹ va'e re ma na'ima'endu'ai, SENHOR pe ndojapukai.

² Ha'e ma hi'arandu va'e ha'e nhomombaarã mboua, ijayvuague gui ojepe'a e'ỹ va'e. Ha'e ma opu'ã 'rã joapo vai va'e ha'e teko vai apoa rupi nhomoirũ va'e kuery re.

³ Mba'eta Egito pygua kuery ma avakue rive ikuai, Nhanderueté e'ỹ. Hymba kavaju kuery voi ho'o va'e, nhe'ẽ e'ỹ. Ha'e gui Nhanderueté okuave'ẽ ramo yvy re ho'apa 'rã nhopytyvõa ha'e onhepytyvõ uka va'e ha'e javi. Ha'e rami vy mokoĩve okanhymba vyvoi 'rã.

⁴ Mba'eta po rami SENHOR ijayvu xevy: “Guary gua'y kuery reve guembia re okororõ oiny rã hovai vexe'i re opena va'e heta ete ou teĩ nonhemondy'i 'rã ha'e kuery ijayvua gui, nonhai 'rã guive heta ikuai teĩ, ha'e rami ae avi SENHOR ixondaro reta va'e ou 'rã Sião ojeupegua vvyty áry joe opu'ã aguã.

⁵ Guyra'i yvate rupi oveve-vevea rami avi SENHOR ixondaro reta va'e voi oarõ 'rã Jerusalém. Onhangareko vy ogueraa jepe 'rã, omboaxy vy oepy 'rã.

⁶ “Ha'e nunga rupi Israel kuery, pejeko rerova ju opa marã rei pendekuai vy penderexarai va'ekue re.

⁷ Ha'e va'e ára ma peteĩ-teĩ pemombo 'rã mba'emo ra'angaa pereko va'ekue prata ha'e ouro guigua, pejejavy aguã pendepo py ae pejapo va'ekue.

⁸ Ha'e gui Assíria pygua kuery oiko vai 'rã avakue kyxe gui e'ỹ. Avakue kyxe py e'ỹ 'rã omombaa. Onhamba 'rã kyxe gui ramo ha'e kuery va'e regua kunumigüe omomba'eapo nhea'ãa 'rã imbokuapy.

⁹ Okyje vy rive ha'e kuery oēja 'rã itaova onhemiaty. Huvixa kuery voi onhemondyipa rei vy onhamba 'rã oje'oivy bandeira omopu'ãa rã oexa vy”, he'i SENHOR Sião py hatapy va'e, Jerusalém py hata rupa va'e.

32

Huvixave teko porã rupi opena va'erã re ijayvuague

¹ Ha'e gui oĩ 'rã peteĩ huvixave teko porã rupi opena va'e, anhetẽ rupi 'rã oguereko yvatekueve.

² Ha'e ramo ha'e kuery peteĩ-teĩ oĩ 'rã vvyty ha'e vvyty vaikue gui onhemia aguã, yvy piru reia rupi vy oxery va'e rami, ha'e itaova tuvixa va'e 'ã vvy piru reia py oĩ va'e rami.

³ Ha'e jave py ma oma'ẽ oiny va'e ndoexa e'ỹvei ma 'rã, ojapyxaka oiny va'e voi oendu potapa 'rã.

⁴ Inhakã porã e'ỹ va'ekue ma opy'a py oikuaa nho 'rã, ijayvu e'ỹ va'ekue apekũ ma ijayvu kuava vy ha'eve rei ju 'rã.

⁵ Ha'e rã hi'arandu e'ỹ va'e pe ma “Hi'arandu va'e” nda'eavei ma 'rã, jokorepa rei va'e pe “Iporayvu'i va'e” nda'eavei ma 'rã.

⁶ Mba'eta hi'arandu e'ỹ va'e ma o'arandu e'ỹa rupi ae 'rã ijayvu, ha'e mba'emo vai re anho 'rã ipy'a opa marã rei ikuai aguã, SENHOR rovai eteve voi onhemboapu aguã, okaruxe'i va'e pe ojou uka e'ỹ aguã ho'u va'erã, ha'e gui oiy'uxe rei va'e pe ojou uka e'ỹ aguã oy'u aguã.

⁷ Jokorepa rei va'e guembiporu oguereko va'e ma nda'evei va'e meme. Mba'eta nhombotavypaa rupi anho 'rã onhembopy'a, ojexavai va'e ojavyky aguã apu rupi ijayvu vy, iporiaukue'i ha'evea rami ae ikuai teĩ.

⁸ Ha'e rã heko porã va'e ma teko porã rupi oiko aguã re anho 'rã onhembopy'a, teko porã re ae 'rã guive oĩ atã.

Jerusalém pygua kunhague pe ijayvuague

⁹ Kunhague mba'eve re peikuaa pota e'ỹ va'e, pepu'ã ke ha'e pendu xeayvu. Tajy kuery pevy'a rive va'e, pejapyxaka porã ke xeayvua re.

¹⁰ Kunhague mba'eve re peikuaa pota e'ỹ va'e, peteĩ ma'etỹa py ovaẽ 'rã peryryipa aguã, mba'eta uva opa 'rã, ndai'avei 'rã.

¹¹ Peryryipa ke, kunhague mba'eve re peikuaa pota e'ỹ va'e, tajy kuery pevy'a rive va'e. Pemboi ke penhemondea pendepire rei aguã, ha'e gui voxa guigua py ju penhemonde.

¹² Pendepexo re peipete-pete mba'ety oiko porã va'ekue ha'e uva hi'a porã va'ekue re pendepy'a vai vy.

¹³ Mba'eta xeretarã kuery yvy re oiko 'rã juu ha'e juu rakuauendy rive, oo ovy'a okuapy va'e ikuaiague ha'e javi rupi, tetã ovy'apa okuapyaty rupi guive.

¹⁴ Huvixave ro voi oejaa 'rã, mba'eta tetã heta va'e kuery ikuaiague opyta rive 'rã. Torre ha'e oikuaa potaaty ma itakua rami rive 'rã opyta raka'e rã peve, mburika ka'aguy rupigua opytu'u aguã ha'e vexe'i okaru atyrã rive.

¹⁵ Ha'e rami 'rã oiko pe yvate gui Nhe'ẽ ombou peve nhandere. Ha'e ramo tekoa e'ỹague ojeapo 'rã vyvra'a tyrã, ha'e gui vyvra'a ty ikuai va'e ma ka'aguy regua rami 'rã oiko porã.

¹⁶ Ha'e vy tekoa e'ỹaty rupi anhetẽ rupi jogueroko va'e ju 'rã ikuai, ha'e vyvra'a ty rupi ma heko porã va'e ikuai 'rã.

¹⁷ Ha'e rami vy teko porã rupi ikuai vy ikuai porã 'rã okuapy. Teko porã gui ma ojerovaa ha'e oĩ atãa 'rã oiko raka'e rã peve.

¹⁸ Ha'e rami vy xeretarā kuery rekoa py oī 'rā mby'a porā anho. Hekoa oī atā 'rā, mba'eve ndoikoa ha'e mba'eve rei jipoia meme.

¹⁹ Xapy'a rei amandau vaikue gui ka'aguy ho'apa ha'e tetā ha'e javi rupi ombovaipa teī,

²⁰ peē ma pevy'a ete reve 'rā mba'emo ra'yī pemoaī yy ikuai va'e vyvry, ha'e penerymba vaka, mburika pepoi okaruxea rupi rei okaru aguā.

33

Jerusalém pygua kuery ojexavaiaque gui ogueraa jepea aguā re ijavyuague

¹ Nda'eveite ete 'rā peē kuery penhomomba va'ety ri napenemombaai teri va'e, ha'e anhetē rupi e'y pejoguereko va'eri anhetē rupi e'y napendererekoai teri va'e pe. Mba'eta penhomomba ma rire peē ju 'rā penemombaa, ha'e anhetē rupi e'y pejoguereko rire peē ju 'rā anhetē rupi e'y pendererekoa.*

² SENHOR, endu ke oremboaxya. Ndee ae roarō rokuapy va'e. Ko'ē nhavō ke eiko oremombaraeatēarā, rojexavaia ara py orereraa jeparā eiko.

³ Mba'eta ndeguigua hevovo va'e vyvry regua kuery oendu vy onhamba 'rā. Joe repu'ā ramo vyvry regua kuery oaimba 'rā.

⁴ Ha'e kuery mba'e rei-rei oipe'apaa 'rā tuku ono'ō va'e rami. Tuku opo-opoa rami avi avakue opo 'rā ha'e nunga áry.

⁵ Ha'e rā SENHOR ma yvate ete 'rā, yvate etea py ae oī va'e. Sião py omonyē 'rā anhetē rupi joguerekoa ha'e teko porā.

⁶ Ha'e ramo Sião pygua kuery, peikovea ja oī 'rā peī atā aguā. Opa rupi oiko 'rā oo jepe va'e, hi'arandu ha'e oikuaa va'e. SENHOR renonde pejererokyjea rupi peiko ramo ha'e nunga ha'e javi 'rā oī pendevy guarā.

⁷ Ha'e rā nhande kuery va'e regua ipy'a guaxukueve ma ojae'o 'rā okuapy oka rupi. Peteī rami ikuai aguā re ojerure oje'oivy va'ekue ojae'o 'rā ipy'a vaia rupi.

⁸ Tape ikuai va'e opyta rivepa, ha'e rupi uguata va'ekue opytu'upa rā. Mba'eta ombovaipaa ma peteī rami ikuai aguā re ijavyuague. Tetā ikuai va'e voi oejapaa ma, ha'e jipovei ma nhomboete va'e.

⁹ Yvy voi ipoae vy opa ma ovy. Lfbanu rupi oximba vy ipirupa. Sarom ma tekoa e'yā rami opyta. Basā ha'e Carmelo gui oipe'apaa ma mba'emo rogue.

¹⁰ SENHOR aipoe'i: "A'y ma xee apu'ā 'rā. Xee ae apu'ā 'rā, xemboyvatea 'rā guive.

¹¹ Mba'emo pirukue pereko va'ekue gui mba'emo 'ygue rive pejou. Ha'e gui pendepoxya rupi pendekuaiaque ma tata rami 'rā penemomba.

¹² Ha'e ramo heta va'e kuery oapypaa 'rā tata rugue rami opyta peve, juu'y ojaya pyre tata py okaipa vyvoia rami.

¹³ Peē mombyry pendekuai va'e, pendu ke ajapo va'ekue omombe'ua rā. Ha'e peē ha'e'i py pendekuai va'e ma peikuaa pota xepo'akaa re", he'i.

¹⁴ Ha'e gui penderexa py ae pexa 'rā huvixave guexakāa rupi opena rā vyvry mombyry peve oo va'e re. Pendepy'a py mba'emo vai ete oiko va'ekue re penema'endu'a vy "Mamo tu opyta tery mboparaa, mamo tu opyta imposto-rā opejaa kuery? Ha'e mamo tu opyta torre ikuai va'e papaaty?" peje 'rā.†

¹⁵ Teko porā rupi ikuai va'e anho 'rā ha'eve, ha'e anhetē rupi ijavyu va'e, nhomoingo axya rupi ojoupa va'e'y. Mba'eta ha'e kuery ma opo py "Any" he'i reve ndojopyi 'rā teko vai repyrā. Oapxya omboty 'rā oendu e'y aguā jojuka aguā re ijavyu rā, ha'e guexa omboty 'rā teko vai oexa e'y aguā.

¹⁶ Ha'e kuery anho 'rā ikuai yvatevea py. Itaova yvatevea oī 'rā onhemi atyrā. Ho'u va'erā ome'ēa kuerei 'rā, oy'u aguā guive ojou ukaa 'rā.

¹⁷ Ha'e gui penderexa py ae pexa 'rā huvixave guexakāa rupi opena rā vyvry mombyry peve oo va'e re.

¹⁸ Pendepy'a py mba'emo vai ete oiko va'ekue re penema'endu'a vy "Mamo tu opyta tery mboparaa, mamo tu opyta imposto-rā opejaa kuery? Ha'e mamo tu opyta torre ikuai va'e papaaty?" peje 'rā.†

¹⁹ Mba'eta ha'e kuery ojejou porā rei va'ekue teī ndapexavei ma 'rā, neī amboae rami ijavyu va'e napendu kuaai rei va'ekue, amboae ayvu jaikuaa e'y va'e py ijavyu va'ekue.

²⁰ Pema'ē ke Sião tetā re. Ha'e py ma nhemboaty iky'a e'y va'e jajapoaty. Ha'e vy penderexa py pexa 'rā Jerusalém ha'evepa reia, oguy oguerova pyrā ve'y rami avi oī atā, vyvry rakua omo'ā mbyre ndoekyiaveia, ha'e ixā ikuai va'e nomondoa riveia rami.

²¹ Ha'e py ma SENHOR jaexa rā yvate ete 'rā. Ojapo 'rā yakā ipyve va'e oxyry aguā rami. Ha'e rami teī peteīve kanoā oipykui va'e ma voi novaēi 'rā ha'e rupi, neī kanoā tuvixa va'e voi ha'e rupi ndoui 'rā.

²² Mba'eta SENHOR ae 'rā oī nhandere oikuaa pota va'e, nhanderekorā rejaa ha'e nhanderuvixave. Ha'e ae 'rā nhandereraa jepe.

²³ Ha'e rā a'y ma ixā ikuai va'e ma ipyupa, hi'y nai'aī atāvei, ha'e ajukue oipyvo aguā voi nda'evevei. Ha'e ramo ha'e kuery mba'emo oguerekopa va'ekue omboja'opaa 'rā. Ha'e nungakue uguata e'y va'e kuery voi oipe'a 'rā heravy.

²⁴ Ha'e gui raka'eve rā Jerusalém py hekoa va'e kuery neī peteīve "Xemba'eaxy" nde'i 'rā, ha'e kuery ojevavyague ombogupaa 'rā guive.

* 33:1 Apy ma ijavyu Israel kuery rovaigua kuery re.

† 33:18 Hovaigua kuery imbojexavaiare ha'e tetā re opena va'ekue re ima'endu'a,

34

Yvy regua kuery pe Nhanderuete ipoxya re ijavyuague

¹ Yvy regua kuery, penhemboja ke pendu aguã. Heta va'e kuery, pejapypxaka pekuapy. Pendu ke yvy ha'e opa mba'e hexe oĩ va'e, hexe ikuai va'e ha'e javi.

² Mba'eta yvy regua ha'e javi pe SENHOR ipoxy, opoxya oexa uka ha'e kuery regua xondaro kuery ha'e javi pe. Ha'e rami vy imombaará ha'e ijukapaará pe omboaxapa.

³ Ha'e kuery va'e regua ojukaa ma rire omombopaa 'rã mombry. Hetekue heakuã vaikue 'rã, ha'e huguy ma ojaol'ipa 'rã vvyty ikuai va'e.

⁴ Ha'e gui yva re ikuai va'e okanhymba 'rã, ha'e yva oĩ va'e onhemama 'rã ovy mba'emo pirekue rami. Yva regua ha'e javi ho'apa 'rã, uva ha'e figo'y rogue ho'apaa rami avi.*

⁵ Mba'eta xekyxe oka'u va'e rami ogejy 'rã yva gui. Edom yvy re 'rã ogejy nhombopaga aguã, ha'e kuery opa aguã rami amboaxa rire.

⁶ SENHOR kyxe re ma tuguy anho oĩ, vexa'i ha'e kavara ava ruguy, vexa'i pyky raxí kyra anho oĩ. Mba'eta SENHOR oa'anga Bozra tetã py jojuka aguã, ojukapa ete 'rã Edom yvy re.

⁷ Toro ka'aguy regua voi oity 'rã ha'e kuery reve, vaka ra'y ho'a avi 'rã toro reve. Ha'e ramo ijyvy tynyẽ 'rã huguy, ha'e yvy ku'i 'rãgue py vvy porã opyta 'rã ikyrakue gui.

⁸ Mba'eta ha'e va'e ára ma SENHOR nhombopaga aguã ára, ha'e va'e ma'etỹ ma Sião pygua kuery oepy aguã oa'anga.

⁹ Ha'e ramo yakã'i Edom yvy re ikuai va'e ojeapo 'rã piche rami, yvy ku'i ma enxofre rami 'rã opyta. Ha'e va'e yvy ma opyta 'rã piche hendy va'e rami.*

¹⁰ Ha'e va'e ndoguei 'rã ara py neĩ pyávy. Hataxí opu'ã 'rã raka'e rã peve. Ha'e ramo ijyvy opyta rivepa 'rã ta'y kuery ra'y kuery ikuai jevy-jevy peve. Ha'e vy raka'e rã peve ha'e va'e rupi ndoaxavei 'rã.

¹¹ Ha'e rami 'rãgue py pelicano ha'e ku'i rive ha'e py ikuai 'rã. Ju'i ha'e xapirẽ ikuai 'rã ha'e py. Ha'e va'e áry rupi omoatã 'rã ixã nhomombaará, ha'e prumo nhomokanhymbaará.

¹² Ha'e rami vy ndoikove ma 'rã yvatekueve nguixaverã omoĩ va'erã, huvixa kuery voi nda'ikuavei 'rã.

¹³ Ha'e gui huvixave rogue py voi juu rive 'rã henhoĩ, pyno guive. Oo ikorapa va'e py ha'e kuery onhemiaty va'ekue voi jaipa 'rã. Ha'e py ma jagua-tuvy nhe'ẽ rive 'rã ikuai, ha'e guyra nhandu onhemboaity 'rã.

¹⁴ Vixo vaikue tekoa e'ya regua anho 'rã ikuai aguara para reve, ha'e sãtiro kuery rive 'rã onhe'ẽ okuapy joupe-upe. Ha'e py ma pyavygua voi ojou 'rã opytu'u aguã.

¹⁵ Urukure'a onhemboaity 'rã ha'e py. Ombo'a ha'e omboaku 'rã guive, kuaray'ã py oguereko 'rã gua'y kuery. Xapirẽ voi ha'e py ae avi 'rã ijaty, peteĩ-teĩ oirũ reve.

¹⁶ Peikuaa pota ke SENHOR guigua kuaxia re, ha'e peroayvu. Mba'eta ha'e va'e regua temimoingo neĩ peteĩve ndoiko e'yi 'rã, peteĩve irũ ndoatai 'rã, ha'e rami ae SENHOR ijavyu rire. Inhe'ẽ ae omboatypa 'rã.

¹⁷ Mba'eta oexa ma ixorteá ha'e kuery ikuai aguã oa'anga vy, ope py ijyvyrã omboja'o ixã py. Ha'e py ae ha'e kuery ikuai 'rã raka'e rã peve, ta'y kuery jevy-jevy peve ikuai 'rã ha'e py.

35

Sião pygua kuery ovy'a okuapy aguã re ijavyuague

¹ Tekoa e'ya rupi ovy'aa 'rã, yvy ha'e javi rupi guive. Yvy joja reia voi ovy'a vy ipoty 'rã vvyoty rami.

² Ipoty reta rã oporaeia 'rã oguerovy'a ete vy. Ha'e py ma omoporã 'rã Lfbano rami. Carmelo ha'e Sarom rami ete 'rã iporã. Ha'e gui ha'e pygua kuery oexa 'rã SENHOR rexakãa, Nhanderuete po'akaa.

³ Penhemombarate ju ke nependepo mbarateveia gui, ha'e penerenapy'ã rryryipaa gui.

⁴ Aipojepe ipy'a kangy va'e pe: "Penembaraete ke, pekyje eme. Upe ma Nhanderuete ou. Nhanderepya ou ma oiny, Nhanderuete nhombopagaa va'e. Ha'e ou vy nhandereraa jepe 'rã", peje.

⁵ Ha'e rami rã ára revegua e'y rexa ojepe'a 'rã, ojepe'a avi 'rã ijapyxa e'y va'e apyxa.

⁶ Oguata e'y va'ekue opo 'rã guaxu rami, ha'e ijavyu e'y va'ekue ma oporaei 'rã. Mba'eta tekoa e'ya rupi oxyry xapy'a 'rã yy, yakã'i oxyry 'rã yvy joja reia rupi.

⁷ Ha'e ramo ita ku'i xii reia va'ekue ojeapo 'rã yuparã, yvy yy jipoi reiaque voi yvupa 'rã. Ymave rupi jagua-tuvy nhe'ẽ oikoague rupi henhoĩmba 'rã yvyra, takua ha'e jai rogue.

⁸ Ha'e va'e rupi ma oĩ 'rã peteĩ tape porã. Ha'e va'e tape pe ma "Tapeiky'a e'y va'e" 'ea 'rã. Ha'e va'e rupi ma ndojeky'a'o ukai va'e kuery ndoguatai 'rã, ixupegua kuery anho. Ha'e va'e rupi uguata va'e ma ndojavyi 'rã, ndoiko kuaai teĩ.

⁹ Ha'e rupi ndoikoi 'rã guary, peteĩve mymba inharõ va'e ndoexaai 'rã ha'e rupi. Mba'eta ha'e rupi uguata va'e ma ogueraa jepe pyre anho.

¹⁰ Ha'e rami vy SENHOR ogueraa jepe va'ekue ojevypa 'rã, Sião py oupa 'rã ovy'aa rupi oporaei reve. Ha'e kuery re oĩ 'rã vy'a opa e'y va'e, inhakã re coroa oĩa rami. Ha'e kuery oupyty va'erã va'e ma mby'a porã ha'e vy'a anho. Ha'e rã mboriau ha'e mby'a vai ma okanhymba 'rã.

36

2 Reis 18.13-18; 2 Crônicas 32.1-8

* 34:4 Mateus 24.29, Marcos 13.24-25 * 34:9 Piche ha'e enxofre ma hendy vuku va'e meme, mba'emo moendya guive.

¹ Ha'e gui catorze ma'etÿ re ma huvixave Ezequias oÿ jave py Assíria pygua huvixa Senaqueribe ou Judá vvy re tetã ikorapa va'e ha'e javi re opu'ã aguã. Ha'e vy oipe'apa ha'e kuery oguereko va'ekue ha'e javi.

² Ha'e gui huvixa Ezequias-a katy Assíria pygua huvixave omondouka guembiguai Rabsaqué. Laquis tetã gui omondouka Jerusalém katy xondaro kuery heta ikuai va'e reve. Ha'e vy ha'e kuery ijatypa okuapy yv omboty pyre vvy'ã re oÿ va'e gui yy rape ou va'e rovai katy, tape ao joiaty kuery vvy via vvy'ry.

³ Ha'e ramo Rabsaqué reve nhovaexÿ vy oje'oi Hilquias ra'y Eliaquim huvixa ro re opena va'ety, kuaxia mboparaa Sebna ha'e Asafe ra'y mba'emo oiko va'ekue mboparaaty Joá.

2 Reis 18.19-37; 2 Crônicas 32.9-19

⁴ Ha'e ramo ha'e kuery pe Rabsaqué aipoe'i:

— Aipopeje ke Ezequias pe: “Po rami Assíria pygua huvixa yvateve va'e ijayvu: ‘Mba'eta nunga re tu rejeroivia?’

⁵ Ndevy pe ae xee xayvu: Ndee ore kuery re repu'ã aguã re renhembopy'aa ma ayvu rive'i. Marã ramigua kuery re tu rejeroivia reikovy, xerovai repu'ã aguã?

⁶ Egito pygua kuery re ri rejeroivia, ha'e rami teÿ ha'e kuery ma popoka takua ovopa va'e ramigua rive, mba'eta ha'e va'e re amongue ojeko rã ipo py oixu'upa 'rã. Ha'e ramigua ae 'rã oiko Egito pygua huvixa Faraó ha'e hexe ojerovia va'e kuery ha'e javi re.

⁷ Ha'e rã xapy'a rei xe'vy aipo're 'rã: “Ore ma SENHOR Oruete re ae rojerovia va'e”, 're teÿ ha'e va'e peguare e'ÿ teve ombojeroviaaty vvyty rupi ikuai va'e ha'e altar Ezequias oitypa va'ekue? Mba'eta ha'e ma Judá ha'e Jerusalém pygua kuery pe aipoe'i va'ekue: “Kova'e altar Jerusalém py oÿ va'e katy anho 'rã pembojerovia pekuapy”, he'i va'ekue pendevy.”

⁸ Ha'e nunga rupi ejerure na xeruvixa Assíria pygua pe, ha'e gui xee ma ndevy ame'ê 'rã dois mil kavaju, xapy'a rei avakue hi'áry guarã rejou ri ramo.

⁹ Ha'e gui mba'e re tu rejeroivia Egito pygua karóxa ha'e kavaju árygua kuery re? Mba'eta xeruvixa rembiguai vvy'gueve re teÿ napendepo'aka kuaai ri.

¹⁰ Ha'e gui xapy'a rei xee nda'u SENHOR reve'ÿ ri aju peneretã amomba aguã? Any, mba'eta SENHOR ae xe'vy aipoe'i: “Tereo ke, epu'ã ha'e kuery vvy re, ha'e emomba”, he'i xe'vy.”

¹¹ Ha'e ramo Rabsaqué pe Hilquias ra'y Eliaquim, Sebna ha'e Joá ombovai vy aipoe'i okuapy:

— Rojerure ndevy: Ndeayvu ke aramaico ayvu py anho ore nerembiguai kuery pe, mba'eta ore roendu kuaa rã. Ndeayvuve eme judeu kuery ayvu py, heta va'e kuery tetã kora áry rupi ikuai va'e oendu kuaa e'ÿ aguã — he'i.

¹² Ha'e rami teÿ Rabsaqué ombovai:

— Ha'e gui pëvy ha'e penderuvixa remiendurã anho teve xeruvixa xembou xayvu aguã? Avakue tetã kora áry rupi ikuai va'e pe guive e'ÿ teve xayvu, mba'eta peë kuery rami avi ha'e kuery voi ikuai guepoxi ho'u, otyrai ae oy'u okuapy aguã rami — he'i.*

¹³ Ha'e rami vy Rabsaqué opu'ã vy ijayvu atã ho'amy judeu kuery ayvu py. Ha'e vy aipoe'i:

— Pejapxaka ke Assíria pygua huvixa yvateve va'e ayvu re.

¹⁴ Po rami xeruvixa ijayvu: “Penhembotavy uka eme Ezequias pe, mba'eta ha'e ma napendereraa jepei 'rã. ¹⁵ Neÿ Ezequias tapendeapo eme SENHOR re pejerovia aguã rami, mba'eta aipoe'i: ‘SENHOR nhandereraa jepe 'rã, ha'e vy kova'e tetã nomboaxai 'rã Assíria pygua huvixa po py', he'i 'rã.

¹⁶ Pejapxaka eme Ezequias ayvu re. Mba'eta po rami Assíria pygua huvixa ijayvu: ‘Pejapo ke xereve peteÿ rami nhandekuai aguã, ha'e vy peju xea katy. Ha'e rami vy peteÿ-teÿ pekaru 'rã penemba'e vinho ha'e figo'a re, ha'e penemba'e ygua gui ae 'rã pey'u pekuapy,

¹⁷ xee pendea py aju peve. Ha'e gui xee rogueraa 'rã peteÿ vvy pendevy rami ae itui va'e katy. Ha'e va'e vvy ma mba'emo aju ha'e uva rykue oÿa, mbojape ha'e uva oata e'ÿa.

¹⁸ Penhembotavy uka eme Ezequias pe “ SENHOR nhandereraa jepe 'rã”, he'i ramo. Mba'eta vvy regua kuery ruete ra'angaa ikuai va'e nda'u ogueraa jepe ri vvy Assíria pygua huvixa po gui?

¹⁹ Mba'eta mamo tu ikuai Hamate ha'e Arpade pygua kuery ruete? Mamo tu ikuai Sefarvaim pygua kuery ruete ra'angaa? Ha'e kuery nda'u xepo gui ogueraa jepe raka'e Samaria tetã?†

²⁰ Ha'e va'e vvy re ikuai va'e ruete ra'angaa regua mava'e tu ogueraa jepe oyvy xepo gui? Mba'exa 'rã tu ha'vy SENHOR ogueraa jepe Jerusalém xepo gui? he'i.”

²¹ Ha'e ramo heta va'e kuery okyiririmba okuapy, peteÿve ma voi nombovai, huvixa “Pembovai eme” he'i rive.

²² Ha'e ramo Hilquias ra'y mba'emo re opena va'ety Eliaquim, kuaxia re opena va'ety Sebna ha'e Asafe ra'y mba'emo oiko va'ekue ombopara va'ety Joá jogueraa ju Ezequias oÿa py. Oao omondoropa va'ekue reve ovaë vy ixupe omombe'u okuapy Rabsaqué ijayvuague ha'e javi.

37

2 Reis 19.1-7

¹ Ha'e nunga huvixa Ezequias oendu vy omondoro oao, ha'e ajukue voxa guígua py rive onheovãmba vy oïke SENHOR pega oo py.

* 36:12 Ha'e rami ijayvu, mba'eta tetã ojokopa ramo ha'e pygua kuery ndojou 'rã ho'u va'erã neÿ yy oy'u aguã.

† 36:19 Hamate, Arpade,

Sefarvaim ha'e Samaria.

² Ha'e rami vy Amoz ra'y profeta Isaías oia katy omondouka ngoo re opena va'ety Eliaquim, kuaxia re opena va'ety Sebna ha'e sacerdote yvatekueve va'e. Ha'e ramo ha'e kuery ajukue voxa guigua py onheová va'ekue reve jogueraa

³ Isaías pe aipoe'i aguã:

— Po rami Ezequias aipoe'i: “Kova'e ára ma jajexavai aguã ha'e nhanembopagaa rá nhaximba aguã ára, kunha oikuavã'i ta teĩ ogueroko ete aguã na'imbaraetevei va'e rami nhandekuai.

⁴ Mba'eta Assíria pygua huvixa remimbou Rabsaqué ijavyu va'ekue Nhanderueite oikove va'e rovai. Ijavyu SENHOR Nderuete oendu vy ijavyu ete 'rãgue ixupe. Ha'e nunga rupi ejapukai ke ixupe jakuave'i teri va'e re”, he'i aguã.

⁵ Ha'e ramo Isaías oia py huvixa Ezequias rembiguai kuery ovaẽ ramo

⁶ Isaías aipoe'i ha'e kuery pe:

— Aipojepe ke penderuvixa pe: “Po rami SENHOR ijavyu: Ekyje eme ayvu rendu va'ekue káuxa. Ha'e va'e ayvu rupi ma Assíria pygua huvixa rembiguai kuery xerovai ae ijavyu okuapy.

⁷ Ha'e rami teĩ hexe ambou 'rã peteĩ nhe'ẽ imongyjarã. Ha'e ramo ixupe mba'emo omombe'ua rá oendu vy ojepe'a ju 'rã ovvy ovvy katy ae. Ha'e gui ma ha'e py ajapo 'rã kyxe py ojukaa aguã rami”, he'i.

2 Reis 19.8-13

⁸ Ha'e gui ma Rabsaqué oo ju vy oikuaa Assíria pygua huvixa kuery Libna tetã re opu'ã okuapya, mba'eta oendu ma voi huvixa Laquis tetã re opu'ãa gui ojepe'a ma ovyague.

⁹ Assíria pygua huvixa oendu avi “Etiópia pygua huvixa Tiraca ma je ou oiny nderovai opu'ã vy”, 'ea ramo. Ha'e rami oendu vyve peteĩgue ju omondouka guembigui kuery Ezequias oia katy. Ha'e vy aipoe'i uka ha'e kuery pe:

¹⁰ — Po rami pendeayvu 'rã Judá pygua huvixa Ezequias pe: “Enhembotavy uka eme nderuete re rejerovíaa py. Mba'eta aipo're: 'Jerusalém tetã ma nomboaxai 'rã Assíria pygua huvixa po py', 're.

¹¹ Ndee nerendui teve Assíria pygua huvixa kuery vyvave re ojapo va'ekue? Mba'eta omomba ete. Ha'e nunga rupi ndee rexa'ã ri ty'y reo jepe aguã?

¹² Mba'eta vyvave regua ruete ra'angaa ikuai va'e nda'u ogueraa jepe ri raka'e xeramoi kuery omomba aguã gui? Ha'e va'e kuery ma Gozã, Harã ha'e Rezefe pygua, ha'e Éden ramymino kuery Telassar py ikuai va'ekue.

¹³ Ha'e mamu tu oiko aỹ Hamate pygua huvixa, ha'e Arpade, Sefarvaim tetã, Hena ha'e Iva pygua huvixa kuery?” — he'i uka.

2 Reis 19.14-19

¹⁴ Ha'e gui ma tembiguai kuery po gui kuaxia para Ezequias ojopy vy ogueroayvu. Ha'e rami vy SENHOR pegua oo py oike vy oexa uka imoiny nonde.

¹⁵ Ha'e rami vy SENHOR renonde ojapukai vy aipoe'i:

¹⁶ — SENHOR Israel kuery ruete, anjo kuery pepo áry rupi reguapy reiny va'e repenaa py, ndee anho'i reiko vyvave regua kuery ruete. Ndee ma yva ha'e vyvave apoare.

¹⁷ SENHOR, ejapyxaka rendu pota aguã. Eipe'a ke nderexa, rexa pota aguã. Ha'e vyvave pota Senaqueribe ijavyuague ha'e javi re, mba'eta ndee Oreruete reikove va'e, nderovai ae ijavyu.

¹⁸ Ha'e gui SENHOR, anhetẽ ete ae Assíria pygua huvixa kuery omomba raka'e vyvave regua ikuai va'e, ha'e kuery vyvave guive.

¹⁹ Ha'e gui oapypa guive ha'e kuery ruete ra'angaa ogueroko va'ekue. Ha'e rami avi ha'e nunga ma tuuete e'ỹ ae, avakue rembiapo, vyvave ita guigua rive. Ha'e nunga rupi ae omomba.

²⁰ Ha'e ramo SENHOR Oreruete, orereraa jepe ke ipo gui, vyvave regua ha'e javi oikuaa aguã ndee anho SENHOR reikoa — he'i.

2 Reis 19.20-34

²¹ Ha'e gui Amoz ra'y Isaías oayvu ogueraa uka Ezequias pe:

— Po rami SENHOR Israel kuery ruete ijavyu: Assíria pygua huvixa Senaqueribe káuxa xevy rejerure ramo

²² po rami xee SENHOR xevyvu hexe. Ndere ma kunhataĩgue'i Siãõ pygua rajy kuery opuka rei okuapy. Nderakykue Jerusalém pygua rajy kuery ogueroa-rova oakã.

²³ Mba'eta mava'e re tu ndeayvu vai? Mava'e tu rejajai? Mava'e rovai rupi tu ndeayvu ha'e nderexa py rema'ẽ vaikue rei? Xee Israel kuery ruete xeky'a e'ỹ va'e rovai ae.

²⁴ Mba'eta nerembiguai kuery rembo'e SENHOR rovai ijavyu aguã re. Ha'e vyvave aipo're: “Xekaróxa reta va'e vyvave ajeupi 'rã vyvave áry peve, Líbano vyvave re mombryvea rupi teĩ. Xee aitypa 'rã ha'e pyvave yvatekueve ha'e cipreste iporãgueve ikuai va'e, avaẽ 'rã mombryvea pyvave apyta aguã, ka'aguy inhanavea pyvave.

²⁵ Ha'e gui vyvave ajo'o vyvave ay'u amboae regua kuery pegua vyvave gui, ha'e Egito vyvave apyrõ vyvave amboimirupa yakã ikuai va'e”, 're va'ekue.

²⁶ — Ha'e rami teĩ nerendui teve yma rupi ma voi xee ae amoi ha'e va'e nunga oiko aguã, ymave guive anhembopy'a ae ma ha'e rami aguã re? Ha'e rami vyvave aỹ ma amoiingo ete ma ha'e nungakue. Xee ae aipotaa rami vyvave ndee rembovaipa karamboae tetã ikorapa va'ekue.

²⁷ Ha'e nunga rupi ae ha'e pygua kuery ikangypa, okyjepa ha'e oximba rei raka'e. Ha'e rami vyvave okanhymba vyvave nhuũ rami rive, e'ỹ vyvave jai rogue pyvave, nhuũ oo ao'ia áry henhoĩ rive va'e rami, e'ỹ vyvave mba'emo onhotỹ mbyre ijaju e'ỹ re okaipa va'e rami rive.

²⁸ Ha'e rá xee ma aikuaa porã reguapy reiny rá, repu'ã reovy ha'e reike ju rejyvu nhavõ, ha'e gui xerovai repu'ã reia guive.

²⁹ Ha'e ramo xerovai repu'ã reia ha'e renhemboyvate reia aendupa ma vy aÿ ma nexi re amoí 'rã ty'ai ndereruarã, ndejuru re amoí avi 'rã juru xã, ha'e rami vy ajapo 'rã rejuague rupi ae ju rejevy aguã rami.

³⁰ — Ha'e gui ndee Ezequias reikuaa aguã ma pova'e 'rã oiko: Aÿ kova'e ma'etÿ ma peẽ kuery pekaru 'rã mba'emo ha'e ae gui henhoi va'ekue re, ha'e gui amboae ma'etÿ ma ha'e va'ekue gui ikuai va'ekue re ju 'rã pekaru. Ha'e 'rã mboapy ma'etÿa py ma penhotÿ ju 'rã mba'emo, ha'e gui pemono'õ 'rã. Penhotÿ 'rã uva, hi'a pe'u aguã.

³¹ Ha'e gui Judã regua rembyre oo jepe va'ekue ma hapo ju 'rã vvy katy, ha'e vy hi'árykue ma hi'a ju 'rã.

³² Mba'eta Jerusalém tetã py ikuai 'rã okuave va'e, Sião yvvytÿ re ikuai 'rã oo jepe va'ekue. SENHOR ixondaro reta va'e ae 'rã ojapo, nhanderayvu etea rupi.

³³ — Mba'eta po rami SENHOR ijayvu Assíria pygua huvixa rekorã re: “Ha'e ma kova'e tetã py ndoikei 'rãe, neĩ peteive hu'y nomomboi 'rã tetã katy, hu'y jokia reve nonhembojai 'rã ouvvy, neĩ vvy nombovyvatei 'rã guive tetã kora áry rupi ojeupi aguã.

³⁴ Ha'e rami 'rãgue py tape ouague rupi ae ju 'rã ojevy. Kova'e tetã py ndoikei 'rãe”, he'i SENHOR.

³⁵ “Mba'eta xee ae ajoko 'rã tetã araa jepe vy, xejee ha'e xerembiguai Davi re ama'ẽ vy”, he'i.

2 Reis 19.35-37, 2 Crônicas 32.21,22

³⁶ Ha'e gui ma anjo SENHOR-a guigua ou vy Assíria pygua kuery ijatya rupi ojuka cento e oitenta e cinco mil. Ko'êgue okuave'i va'e ovy vy oexa rã hetekue rive ikuai.

³⁷ Ha'e ramo Assíria pygua huvixa Senaqueribe ojepe'a ju ovy. Ojevy vy guetã ae Nínive py ju opyta.

³⁸ Ha'e gui ma nguete ra'angaa Nisroque pegua opy omboetea py oĩ jave ta'y kuery ae Adrameleque ha'e Sazezer ojuka kyxe py. Ha'e vy onhamba jogueravy Ararate vvy katy. Ha'e ramo ta'y Esar-Hadom ju oĩ nguu rekovia.

38

2 Reis 20.1-11, 2 Crônicas 32.24-31

¹ Ha'e va'e jave py huvixa Ezequias imba'eaxy vy omano ta ma oupy. Ha'e ramo oia py ou Amoz ra'y profeta Isaías. Ha'e vy aipoe'i ixupe:

— Po rami SENHOR ijayvu: “Emoatyrõ mba'emo ndero py ikuai va'e, mba'eta remano 'rã, ndereikovevei ta ma”, he'i.

² Ha'e ramo Ezequias ojere vy ngoo mbotya re ngova omboja oupy. Ha'e vy SENHOR pe ojerure vy ³ aipoe'i:

— SENHOR, ajerure ndevy. Nema'endu'a ke nerenonde rupi ha'evea rami aikoague re, xepy'a ha'e javi py. Ha'evea ramigua ajapo aikovy va'ekue nerenonde rupi — he'i. Ha'e vy ojae'o vaipa oupy.

⁴ Ha'e gui Isaías pe SENHOR ombou ju oayvu. Ha'e vy aipoe'i:

⁵ — Ejevy ke, ha'e vy aipo're Ezequias pe: Po rami SENHOR neramoí Davi ruete va'e ijayvu: “Xee aendu ma renhembo'ea, nderexay aexa guive. Ha'e vy amoive 'rã nde'ára quinze ma'etÿ peve ju.

⁶ Ha'e vy rogueraa jepe 'rã Assíria pygua huvixa po gui, kova'e tetã guive. Aepy 'rã kova'e tetã”, he'i.

⁷ Pova'e nunga SENHOR oexa uka 'rã ndevy, reikuaa aguã oayvuague ojapo 'rãa.

⁸ “Tape pyrõ-pyrõarã Acaz ojapo va'ekue re ajapo 'rã kuaray'ã dez pyrõa hakykue katy ju ojevy aguã rami”, he'i. Ha'e gui ha'ekue rami ae ojapo kuaray'ã dez pyrõa peve hakykue katy ju ojevy aguã rami.

Ezequias oporaeiague

⁹ Ha'e ramo Judã pygua huvixa Ezequias imba'eaxy vaipa oupyague gui opu'ã ju ma rire po rami oporaei:

¹⁰ — Xee aipoa'e va'ekue:

“Xembaraete rei reve aikovea py teĩ

aÿ aike ta vvyra rupa rokẽ rupi.

Mba'eta xegui oipe'aa ta ma aikovea ma'etÿ”, ha'e va'ekue.

¹¹ Aipoa'eve ju va'ekue:

“Okuave va'e vvy re xee ndaexavei ma 'rã SENHOR.

Neĩ peteive ava ma voi ndaexavei ma 'rã vvy re hekoa va'e.

¹² Mba'eta xegui aikovea'i oipe'aa ta heravy mombyry,

vexa'i re opena va'e okeaty ombovaipaa rami.

Ajukue apoa rami rejaya ta xerekovea nhimbo rami.

Ára oaxa rã pytúa rami rejapo xerekovea opa aguã rami.

¹³ Xee arõ are ma ainy ko'ẽ rai peve,

ha'e rã ha'e ma guary rami omopẽmba xekãgue.

Ára oaxa rã pytúa rami rejapo xerekovea opa aguã rami”, ha'e va'ekue.

¹⁴ — Mbyju'i e'ÿ vy jeruxi rami avi anhe'ẽ aikovy va'ekue,

apykaxu rami xepoaẽ rei va'ekue.

Xerexa voi ikangypa ma yvate katy ama'ẽ riaa ete rã.

“ SENHOR, ajexavai rei aikovy, xembovai ke”, ha'e va'ekue.

¹⁵ — Ha'e gui aÿ ma marã rami nda'u xeayvu 'rã?

Ndee ndeayvuague rami ae xerereko.

Ha'e nunga rupi aikovea pukukue re ha'evepa rei'i 'rã aikovy,

xerekovea ojexavai vaipa rire.

¹⁶ SENHOR, ha'e rami ndee orereko ramo ore avakue roikove,

- xenhe'ê voi ha'e nunga re ae 'rã õi.
Mba'eta xemoexai vy xemoingove ju.
- 17 Xembopy'a porã ju aguã ae xembojexavai va'ekue.
Mba'eta ndee ma xerekovea reayvu vy
xereraa jepe vyvukua py xevaipa aguã gui,
mba'eta nderakykue katy remombopa ma ajevavyague ha'e javi.
- 18 Ha'e gui vyvra rupa py ma avave nandererovy'aai 'rã,
manoa py nanemboeteai 'rã.
Vyv kua katy ogeuejy va'ekue ma noarõvei 'rã okuapy anhetê ete va'e rupi reikoa.
- 19 Okuave va'e anho 'rã ndereroporaiei,
kova'e ára xee rogueroporaieia rami.
Ha'e tuu kuery omombe'u 'rã gua'y kuery pe anhetê ete va'e rupi reikoa.
- 20 Mba'eta SENHOR ou vy xereraa jepe.
Ha'e nunga rupi mba'epu ixã va'e nhambojoguy reve
jaroporaiei 'rã ára nhavõ jaikovea pukukue re,
SENHOR pegua oo py — he'i.
- 21 Mba'eta Isaías aipoe'i ae va'ekue: “Peru figo'a oumbiri pyre, ha'e pemboja ijai re. Ha'e ramo okuera 'rã imba'eaxyã gui”, he'i va'ekue.
- 22 Ezequias voi aipoe'i va'ekue: “Mba'e nunga tu oiko 'rã aikuaa aguã SENHOR ro py ju aa 'rãa?” he'i va'ekue.

39

2 Reis 20.12-19

- 1 Ha'e va'e jave py Babilônia pygua huvixa Baladã ra'y Merodaque-Baladã va'e ma “Huvixa Ezequias haxy opy” 'ea rã oendu vy oia katy ombou kuaxia para, mba'emo ome'ê va'erã reve.
- 2 Ha'e ramo herua kuery ovaê rã Ezequias oguerovy'a vy ha'e kuery pe oexa uka mba'emo omoï porãaty py ogueroko va'e ha'e javi: prata, ouro, temb'u irurã, azeite iporãve va'e ha'e tempiporu joe opu'ãa pygua. Omoï porãaty py ikuai va'e ha'e javi oexa uka. Neï pete'i voi Ezequias ndoexa ukai ha'e kuery pe, ngoo py ae, neï openaa ha'e javi rupi ogueroko va'e.
- 3 Ha'e ramo huvixa Ezequias oia py profeta Isaías ou vy oporandu ixupe:
— Mba'e nunga re tu avakue ou va'ekue ijayvu okuapy ra'e? Magui tu ou okuapy ndea py?
Ezequias ombovai:
— Peteï vyv momyryvea gui ou, Babilônia gui ae — he'i.
- 4 Ha'e ramo oporanduve ju:
— Mba'e tu ha'e kuery oexa okuapy ndero py?
Ezequias ombovai:
— Xero py oexa okuapy mba'emo ikuai va'e ha'e javi. Xemba'e amoï porãaty py oi va'e regua neï peteive ndaexa ukai ha'e kuery pe — he'i.
- 5 Ha'e gui ma Isaías aipoe'i Ezequias pe:
— Endu ha'vy SENHOR ayvu.
- 6 “Ovaê 'rã ára ndero py ikuai va'e ha'e javi Babilônia vyv katy ogueraapaa aguã, ymave guive neramoï kuery omoï porã va'ekue kova'e ára peve. Ndoejaai 'rã neï peteï regua ma voi”, he'i SENHOR.
- 7 Ndera'y kuery rereko va'ekue ae voi ogueraapaa avi 'rã okuapy, Babilônia pygua huvixa ro py oa'yijo pyre meme ikuai aguã — he'i.*
- 8 Ha'e ramo Ezequias aipoe'i Isaías pe:
— Pova'e ayvu SENHOR guigua remombe'u va'e ma ha'eve va'e — he'i, ojeupe ae “Xee aikuaa rã aikovea ja mby'a porã anho ha'e ha'evepa rei'i ta merami”, he'i vy.

40

SENHOR ou aguã re ijayvuague

- 1 Nhanderueite aipoe'i: “Xevygua kuery pe pendeayvu pembovy'aa rupi, pembovy'a ju ke.
- 2 Pendeayvu porã'i ke Jerusalém pygua kuery pe. Ha'e vy aipopeje: ‘Opa ma pendere opu'ãa ague, mba'eta pendereko vaiague omboguepaa ma. Pejevavyague re pepaga aguã va'ekue mokoigue ma pejopy SENHOR po gui', peje.”
- 3 Ha'e gui ma onhendu 'rã tekoa e'ÿa rupi ojapukai va'e po rami: “Pereko katu ke SENHOR raperã. Pembo'yvi ke tape tekoa e'ÿa rupi oo va'e Nhanderueite ou aguã.
- 4 Mba'eta vyvugua ha'e javi omonyẽmba 'rã. Ha'e gui vyvty ha'e vvy'ã ikuai va'e ombojojapa 'rã. Ikarê rei va'ekue-'ekue ombo'yvipa 'rã, ha'e vvy'ã guy rei va'ekue ijajopa 'rã.
- 5 Ha'e gui ma ojekuaa 'rã SENHOR rexakãa. Avakue ha'e javi 'rã oexa, SENHOR ojuru py ae ijayvu rire.”*
- 6 Ha'e gui peteï ayvu onhendu vy “Ejapukai”, he'i.
Ha'e gui amongue oporandu: “Mba'e tu arojapukai ta?”

* 39:7 Ha'e va'e jave ma huvixave kuery oa'yijo uka 'rã guembiguai kuery ngoo rupi guarã.

* 40:5 Kova'e ayvu rupi João Batista ijayvu

“Aipo'ere: 'Avakue ha'e javi ma jai rogue, ha'e ha'e kuery oguerovy'ave va'e ha'e javi ma ipoty rami rive oĩ.

⁷ Mba'eta jai rogue ipiru 'rã, ha'e ipoty okuipa 'rã, ha'e va'e re SENHOR oipeju ramo rive. Anhetê avakue ma jai rogue rami meme ikuai.

⁸ Jai ipiru ramo ipoty okuipa 'rã. Ha'e rã Nhanderuete ayvu ma oĩ riae 'rã raka'e rã peve guarã', 'ere.’”*

⁹ Ha'e gui ndee Sião pygua, eê ke vvyty yvateve va'e áry mba'emo pyau remombe'u aguã. Remombe'u 'rã mba'emo pyau Jerusalém pygua kuery pe, ayvu atã reve 'rã ndeayvu. Epu'ã ke, ekyje eme, emombe'u porã Judá tetã pygua kuery pe: “Pee ma ou oiny Nhanderuete!” 'ere.

¹⁰ Mba'eta SENHOR Nhanderuete ma opo'akaa reve ou 'rã, ojyva py ipo'aka aguã. Ha'e ogueru 'rã jaikoague repy, guenonde ombou 'rã nhandevy ome'ẽ va'erã.

¹¹ Ha'e rami vvy onhangareko 'rã ojeupegua kuery re vexa'i re opena va'e rami. Ojyva áry ogueru 'rã vexa'i ra'y, oikuavã 'rã heruvy. Ha'e ta'y'i va'e ma mbegue'i 'rã ogueroko.

SENHOR yvateve va'ea re ijavyuague

¹² Ha'e gui mava'e nda'u opo ruguaa py yy oa'anga, ha'e okuã py yva oa'ã raka'e? Mava'e nda'u vvy ku'i ojopy ajaka py rami, ha'e gui vvyty ha'e vvy'ã ikuai va'e mba'emo opejaa py oa'ã raka'e?

¹³ Mava'e nda'u ombo'e raka'e SENHOR Nhe'ẽ? Mava'e nda'u imongetaarã oiko raka'e ombo'e aguã?*

¹⁴ Mava'e pe nda'u onhemongeta uka raka'e oikuapa aguã rami? Mava'e nda'u ombo'e raka'e tape teko porã rupi oo aguã re, e'y vvy ombo'e 'arandu re, ha'e rami e'y vvy ixupe oikuaa uka tape oikuaa aguã katy oo va'e?

¹⁵ Mba'eta ixupe rã vvy regua ikuai va'e ma yryru gui pete'i otyky va'e rami ikuai, ha'e e'y vvy mba'emo opejaa py pete'i ku'i ap'i oĩ va'e rami. Ixupe rã yy pa'ũ ikuai va'e voi vvy ku'i opu'ã va'e rami ikuai.

¹⁶ Ixupe guarã japy aguã neĩ Libano vvy re vvyra ikuai va'e ha'e javi nda'evei, ha'e py mymba ikuai va'e voi nda'evei japy reve nhame'ẽ aguã.

¹⁷ Ha'e oexa rã vvy regua ha'e javi mba'everã ndovarei va'e rami ikuai. Ha'e oikuaa rã mba'eve gui ma voi ndovareive va'e, mba'eve oĩ e'y va'e rami.

¹⁸ Mava'e nda'u Nhanderuete reve joo rami ete 'rã heko va'e? Mba'e nunga nda'u hexe nhamboja 'rã?

¹⁹ Mba'eta mba'emo apoa ma ojapo 'rã mba'emo ra'angaa. Ha'e gui ouro re omba'eapo va'e ju 'rã onhovãmba ouro py, ha'e gui ixãrã ma prata gui ojapo 'rã.

²⁰ Ha'e rã iporiaukue'i ma vvyra ovo rive va'erã e'y 'rã oiporavo 'rã. Ha'e vvy ojou 'rã ojapo kuaapa va'e ojapo aguã ta'angaa omyi aguã rami e'y.

²¹ Xapy'a rei nda'u ha'e nunga ndapeikuaa ri? Napendui teve? Pëvy nda'u nomombe'uai ri jypy guive ma voi? Tyrã pa ndapeikuaa potai ae vvy omboytaa ára guive?

²² Mba'eta Nhanderuete ma vvy apy jerekue áryve oguapy oiny va'e, ha'e oexa rã ha'e py hekoa va'e kuery tuku rami avi kyr'i. Ha'e ae avi oipyo raka'e yva ajukue puku rami, oo'i ajukue guigua rami ojora vvy oupi ha'e py oĩ aguã.

²³ Ha'e ae avi omovyv'i 'rã huvixa kuery ikuai va'e, omokanhymba 'rã vvy regua joe oikuaa pota va'e.

²⁴ Ha'e kuery ma mba'emo ra'yígue rami onhotyã e'y vvy omoaia ramo vvy re hapo vvy hi'y ypyi 'rã, ha'e rami teĩ ha'e va'e rupi vvyty oipeju ovy ramo ipirupa vvyoi 'rã, ha'e gui ma vvytu vaikue ogueraapa 'rã mba'emo pirekue rami avi.

²⁵ Ha'e nunga rupi iky'a e'y va'e aipoe'i: “Mava'e re nda'u peẽ kuery xemboja 'rã? Mava'e tu xee ramigua oiko?” he'i.

²⁶ Penderova yva, ha'e pema'ẽ. Mava'e tu ha'e nunga ha'e javi ojapo raka'e? Ha'e ma jaxy-tata oipapa porãmba rire oxondaro kueryrã rami oguenoẽ 'rã heravy, pete'i-teĩ rery rupi oenoĩ vvy. Mba'eta imbaraete ha'e ipo'akapa va'e ramo peteive ma voi ndoatai 'rã.

²⁷ Ha'e nunga rupi mba'e re tu peẽ Jacó ha'e Israel kuery pendeayvu vvy aipopeje: “Xee aikoa re ma SENHOR ndoexa potai, Nhanderuete ndoikuaa potai anhepytyvõ uka teĩ”, peje.

²⁸ Ha'e rami teĩ ndapeikuaa, napendui ri ty'y Nhanderuete Imarã e'y va'e, SENHOR vvy apy apoare na'ikane'õi ha'e ndaxypai 'rãa? Hi'arandua re ma nhande ndajaikuaa pota kuaai 'rã.

²⁹ Ha'e rami 'rãgue py ha'e ae omombarate ju 'rã ikane'õ va'e, omombarateve 'rã na'imbaratevei va'ekue.

³⁰ Mba'eta ipyaukue voi ikane'õ ha'e haxypa 'rã. Kunumigue ikangypa vvy ho'apa 'rã.

³¹ Ha'e rã SENHOR oarõ oikovy va'e kuery ma ojouve ju 'rã ombaraterã. Ha'e rami vvy opu'ã ju 'rã taguato oveve ovy va'e rami. Onha teĩ na'ikane'õi 'rã, oguata teĩ ndaxypai 'rã.

41

Nhanderuete re ojerovia e'y va'e kuery oenoĩ vvy omboayvuague

¹ “Peẽ kuery yy pa'ũ re pendekoa va'e, pekyriri ke xerenonde. Ha'e pygua pendekuai va'e, penhemombaraete ke, ha'e gui mae ma penhemboja xere, xee romboayvu rã pembovai aguã. Peju, jajogueroyvu.

² Ha'e gui mava'e tu kuaray oua katy gui ombou oguataa rupi rei joe ipo'aka va'erã? Mava'e tu ojapo heta va'e kuery onhe'ẽ rendu aguã rami, ha'e huvixave kuery ikuai va'e re opyrõ oiny aguã, okyxe py vvy ku'i rami omboa'ypa aguã, ha'e guapa py omoaimba aguã vvytu mba'emo pirekue ombovevepa heravya rami?

* 40:8 1 Pedro 1.24-25 * 40:13 Romanos 11.34, 1 Corintios 2.16

³ Mba'eta ha'e ma oakykue monhamba ma vy henonderã oove 'rã mba'eve oiko e'ÿ re, oguataaty rupi e'ÿ teĩ.

⁴ Mava'e tu ojapo ha'e nunga ha'e javi oiko aguã rami? Jypy'i guive oayvu py rive heta va'e kuery omoingo va'ekue ae. Xee ae SENHOR jypy'i guive ha'e opaa py guarã aiko", he'i.

⁵ Ha'e nunga ye'ẽ yvyry hekoa va'e kuery ha'e nunga oexa vy onhemondyipa 'rã. Yvy apy gui voi oryryipa reve 'rã onhemboja jogueruvy.

⁶ Peteĩ-teĩ nhomombaraete 'rã. Ha'e vy oirũ kuery pe "Nembaraete ke", he'i 'rã.

⁷ Ha'e rami vy mba'emo ra'angaa apoa omokyre'ÿ 'rã ouro re omba'eapo va'e, ha'e gui karavo mbotaa py ombojoja va'e ju aipoe'i 'rã ferro áry ombopo va'e pe: "Rejapo porã rima ra'e", he'i 'rã. Ha'e rami vy karavo py mba'emo ra'angaa re ombota 'rã ho'a e'ÿ aguã.

⁸ "Ha'e rã ndee Israel ma xerembiguai reiko. Ndee Jacó ma xerembiporavo, xeirũ Abraão ramymino.

⁹ Ndee ma yvy apy gui rogueru va'ekue, roenoĩ mombryryvea py reia gui. Ha'e vy aipoa'e: "Ndee ma xerembiguai. Xee roiporavo rire ndorozejai 'rã.

¹⁰ Ekyje eme, mba'eta xee aiko ndereve. Enhemondy eme, mba'eta xee ma Nderuete. Xee romombaraete 'rã, roipytyvõ ha'e teko porã rupi roguereko 'rã aiporu kuaa regua py.

¹¹ Ha'e rã nderovai ipoxypa va'e kuery ma oximba rei ha'e nda'evei nho 'rã okuapy. Ha'e va'e kuery ma omomba rivea 'rã ovare'ÿ va'e rami. Ha'e rami vy ndere ija'e e'ÿ va'e kuery okanhymba 'rã.

¹² Ha'e va'e rire ndere opu'ã va'ekue reka teĩ nderejouvei 'rã. Nderovai opu'ã va'ekue omombytaa 'rã ovare'ÿ va'e.

¹³ Mba'eta xee SENHOR Nderuete ma rojopy 'rã ndepo reiporu kuaa regua re. Ha'e vy aipoa'e 'rã: "Ekyje eme ke, xee roipytyvõ 'rã", ha'e.

¹⁴ " 'Ekyje eme Jacó ha'e Israel kuery, taxo'i rami mbovy'i ete pendekuai teĩ. Xee roipytyvõ 'rã, he'i SENHOR penderepya, Israel kuery ruete lky'a e'ÿ va'e.

¹⁵ Ha'e gui peẽ rojapo 'rã mba'emo moa'yia haimbe ha'e ipyau va'e, haĩ jovai va'e rami. Ha'e ramo yvyty ikuai va'e pemboa'y 'rã pemongu'ipa peve, yvy'ã ikuai va'e voi pemombytapa 'rã mba'emo pirekue aty rami.

¹⁶ Pembovevepa ramo yvyty ogueraapa 'rã, yvytu jere omoa' 'rã. Ha'e rã peẽ ma perovy'a 'rã SENHOR, pemboete 'rã Israel kuery ruete lky'a e'ÿ va'e.

¹⁷ "Ha'e gui ojexavai ha'e oipota rei'i va'e kuery ma yy oeka teĩ ndojou'i 'rã. Inhapekũ ipirupa 'rã yuvei gui. Ha'e rami teĩ xee SENHOR aendu 'rã. Xee Israel kuery Ruete vy ndaeja rivei 'rã.

¹⁸ Ha'e rami vy yvy'ã ipiru reia gui teĩ xee amboxyry 'rã yy, ajapo 'rã yvygua mbyte rupi yvu oiko aguã. Tekoa e'ÿa rupi voi ajapo 'rã yupa oĩ aguã, ha'e yvy piru reia va'ekue ajapo 'rã yypa aguã rami.

¹⁹ Tekoa e'ÿa py anhoty 'rã yary, acácia, murta ha'e oliveira. Ha'e joyvy-yvy tekoa e'ÿa py amoenho' 'rã cipreste, olmeiro ha'e buxo,

²⁰ pavẽ oexa vy oikuaa aguã, oikuaa pota ha'e oikuaa porã aguã SENHOR po ae ha'e nunga ojapogaue, Israel kuery ruete lky'a e'ÿ va'e omoingoague."

Amboae regua kuery ruete ramigua kuery pe SENHOR ijayvuague

²¹ SENHOR aipoe'i: "Pemombe'u porã ke peikuaa va'e. Pendeayvu anhetẽ rupi peikoa re", he'i Jacó kuery Ruvixave.†

²² "Peru ke peikuaa va'e, pemombe'u mba'emo oiko va'erã. Pemombe'u ke ayvu yma guare, ha'e nunga re jaikuaa pota aguã, jaikuaa aguã ojeupity ete ma paa. Ha'e rami e'ÿ vy raka'eve rã guarã pemombe'u roendu aguã.

²³ Peikuaa uka ke raka'eve rã guarã, peẽ kuery ete pa tuuete peikoa roikuaa aguã. Pemoingo ke mba'emo porã, e'ÿ vy mba'emo vai teĩ, ha'e rami vy rokyjepa aguã, ha'e jaexa pavẽ aguã.

²⁴ Ha'e rami avi peẽ kuery ma mba'everã ndapevarei, penerembiapokue voi ndovareive va'e meme. Pendeporavo kuery voi ojeguarpupy ikuai.

²⁵ "Ha'e gui xee ma kuaray apu'a'ia katy gui peteĩ ambou ramo ou 'rã. Kuaray oẽa katy oiko teri reve aenoĩ ramo ojapukai xerery rupi. Ha'e va'e ma opyrõ 'rã huvixa kuery re yapo rami, nhae'ũ re omba'eapo va'e yapo omou'ia rami avi.

²⁶ Mava'e nda'u jypy'i guive ha'e nunga omombe'u, oiko e'ÿ mbove ma voi jaikuaa vy 'Ha'e rami ae ri', ja'e aguã? Ha'e rami avi jipoi avave rei imombe'uarã, ikuaa ukaarã ndoikoi, pendeayvu oendu va'ekue voi ndoikoi.

²⁷ Xee ae ma jypy Sião pe amombe'u vy 'Ma'ẽ, upe ma oi!' ha'e va'ekue. Mba'eta Jerusalém pygua kuery pe ambou ayvu porã mombe'uarã.

²⁸ Xee ama'ẽ vy ndaexai peteĩve, peẽ kuery va'e regua ndoikoi nhomongeta kuaa va'e, ha'e va'e pe nhaporandu rã ombovai va'erã.

²⁹ Peẽ kuery ha'e javi ma mba'everã ndapevarei. Penerembiapo voi mba'e e'ÿ meme. Mba'eta mba'emo ra'angaa ojapo pyre ma yvytu rive, hyrukue rei va'e ae."

* 41:15 Apy ma ijayvu ngovaigua kuery omomba aguã re.

† 41:21 Apy ma tuuete ramigua kuery pe Nhanderuete ijayvu.

¹ “Apy ma oĩ xerembiguaí ambopo'aka va'e. Xerembiporavo oiko, xenhe'ê py arov'y'a va'e. Hexe amoĩ Xenhe'ê. Ha'e ramo amboae regua kuery pe oikuaa uka 'rã teko porã regua.

² Ha'e rami avi ha'e ma nanhomotare'y'i 'rã, ndojapukai atã 'rã, neĩ tetã mbyte rupi voi noendu ukai 'rã oayvu.

³ Takua omopê mbyre nomou'ũ 'rã, neĩ nombogueti 'rã tataendy ra'y hataxy rive'i va'e voi. Ha'e rami 'rãgue py anhetê va'e rupi 'rã oikuaa uka teko porã regua.

⁴ Ha'e ma ndopai 'rã, nokanhyi 'rã guive, yvy jave re teko porã regua oikuaa ukapa e'yã ja. Ha'e gui ye'ê yvyry ikuai va'e voi oarõ 'rã okuapy oeko mbo'e agua.”*

⁵ Po rami ijayvu SENHOR Nhanderuetete yva ojapo ha'e oipyo va'ekue, ko yvy onhono vy opa mba'e hi'a agua rami ojapo va'ekue. Ha'e ae yvy regua kuery pe ome'ê raka'e ipytuêrã oikove agua, ha'e kuery re omoĩ avi inhe'erã. Ha'e vy aipoe'i:

⁶ “Xee SENHOR ma roenoĩ va'ekue teko porã rupi. Ha'e rami rire ajopy 'rã ndepo re. Ndere anhangareko reve romoĩ 'rã neretarã kuery pe xereve guarã ajapo va'ekue reikuaa uka agua, ha'e amboae regua kuery voi remoexakã agua rami.

⁷ Ha'e rami vy reipe'a agua oma'ê e'y va'e rexa, ha'e nhuã gui reipe'a agua omboty pyre, nhuã pytũ py oĩ va'ekue voi.

⁸ Xee ma SENHOR, po rami ae xerery. Ha'e rami vy xerexakã ma name'êi 'rã amboae pe, xerekovia namboete ukai 'rã mba'emo ra'angaa ojapo pyre.

⁹ Ma'ê, jypy amombe'u va'ekue-ekue ma ojeupitypa ma, ha'e gui mba'emo ipyau va'e ju aikuaa uka pëvy. Ha'e nunga oiko e'y mbove xee ajapo 'rã pendu agua rami.”

Nhandereraa jepea re japoraei agua

¹⁰ Pemonhendy ke SENHOR pe mboraeti pyau. Peê kuery ye'ê rupi peguata va'e, pendu uka peporaeti yvy apy peve, ye'ê rupigua ha'e javi reve, ha'e ye'ê yvyry rupi pendekoa va'e ha'e javi.

¹¹ Pemonhendy ke pendeayvua tekoa e'yã rupi, tetã ha'e tekoa Quedar regua py pendekuai va'e voi. Itaova rupi pendekoa va'e, pevy'a ke, pejapukai vyty apyte áry pendekuaia gui.

¹² Pemboete SENHOR. Pemombe'u hexakã ye'ê yvyry rupi ikuai va'e pe.

¹³ Mba'eta SENHOR ma ipy'a guaxuve va'e rami avi oẽ ovvy vy kyre'y re 'rã oo joe opu'ã va'e rami. Ojapukai atã 'rã joe opu'ã agua katu oo va'e rami. Ha'e rami vy ngovaigua kuery pe oexa uka 'rã opo'akaa.

¹⁴ Ha'e gui Nhanderuetete aipoe'i: “Xee ma yma ete guive akyriri va'ekue, ajejoko vy mba'eve nda'ei va'ekue. Ha'e rã aỹ ma ajapukai 'rã imemby raxy va'e rami, anhea'ã 'rã ipytuê atã va'e rami.

¹⁵ Mba'eta amomba 'rã vyty ha'e yvy'ã ikuai va'e, ha'e amombirupa 'rã hai ha'e rupi ikuai va'e ha'e javi. Yakã ikuai va'ekue ajapo 'rã yvy piru rei oĩ aguã rami, ha'e yupa ikuai va'ekue amombirupa 'rã.

¹⁶ Ha'e gui ára revegua e'y va'e kuery ma areko 'rã heravy tape ndoikuaa va'e rupi, araguata 'rã oikuaa e'yã rupi. Ha'e kuery renonde amoexakãmba 'rã pytũ rei oĩ va'ekue rupi, tape vaikue rei va'ekue voi ambojojapa 'rã. Ha'e nunga ajapo 'rã ha'e kuery pe, ndaejai 'rãe.

¹⁷ Ha'e rã mba'emo ra'angaa ojapo pyre re ojerovia va'e kuery ma ojevy rivepa 'rã. Ha'e rami vy oximba 'rã okuapy ndoikuaa rei vy, mba'emo ra'angaa ojapo pyre pe rive 'Oreruetete', he'i rire.”

Israel kuery ára revegua e'y rami ikuai re ijayvuague

¹⁸ Pendeapxya e'y va'ekue, pendu ke. Ha'e peê ára revegua e'y va'e, pema'ê pexa agua.

¹⁹ Mava'e nda'u oiko ára revegua e'y, xerembiguaí e'y vy? Mava'e nda'u xeyvy mombe'uarã amondouka va'e rami nda'ijapyxai va'e oiko? Mava'e nda'u xerevegua “ SENHOR rembiguai” ha'ea va'e rami ára revegua e'y oiko?†

²⁰ Mba'eta peê kuery ma opa mba'e pexa teĩ peteĩve ndapexa kuaa. Pendeapxya ojepe'a porã va'eri napendy 'rã mba'eve.

²¹ SENHOR gueko porãa oikuaa uka vy ojeuguigua lei ombovate ha'e omoexakãmba raka'e, oipotaa rami vy.

²² Ha'e rã kova'e kuery ma oipe'apaa rã okanhygue rami avi ikuai. Ha'e kuery ha'e javi ma itakua py ojokuapaa reve omboty, nhuã py omboty pyre ikuai. Ho'u pyrã rami rive omboty, heraa jepearã ndoikoi guive. Heraapa pyre ikuai, ha'e avave rei aipo nde'i 'rã: “Tapeo porã ju.”

²³ Ha'e gui peê kuery va'e regua mava'e tu oendu kuaa 'rã ha'e nunga? Mava'e nda'u oikuaa pota reve oendu kuaa 'rã ha'e va'e rire mba'emo oiko va'erã?

²⁴ Mava'e tu Jacó regua kuery omboaxa raka'e heraapa pyrã, ha'e Israel kuery omboaxa ipe'aaar pe? SENHOR e'y ri nda'u omboaxa raka'e, hovai ha'e kuery ojevavy rive? Mba'eta ixuguigua tape rupi ha'e kuery nda'ikuaxeĩ, ixuguigua lei re ndojapyxakaxei guive.

²⁵ Ha'e nunga rupi ae ha'e kuery re ombou opoxy etea, joe opu'ã py ho'apa agua. Ha'e rami py tata omboja ijvyry rupi. Ha'e rami ete teĩ ha'e kuery ndoikuaa. Oapypaa teĩ ha'e nunga re ndoikuaa potai.

43

Nhanderuetete anho Israel kuery reraa jepea oikoa re ijayvuague

¹ Ha'e gui aỹ ma po rami ijayvu SENHOR nemoingoare, Jacó ha'e Israel kuery apoare. Aipoe'i: “Pekyge eme ke, mba'eta xee ma roepy. Penderery rupi roenoĩ rire xemba'e pendekuai.

* 42:4 Apy ma ijayvu ikangy va'e ha'e iporiaukue'i Jesus Cristo nomombai 'rãa re, ha'e rami 'rãgue py ogueraa jepe 'rã (Mateus 12.15-21).

† 42:19 Apy “Xerembiguaí” he'ia ma ojeupe guarã oiporavo va'ekue re ijayvu vy.

² Ha'e rami rire yy rupi peaxa ramo xee aiko 'rã pendereve. Yakã rupi peaxa teĩ napendeao'i 'rã. Tata rupi peaxa ramo napenderapyi 'rã, hendy va'e voi napendeoverei 'rã.

³ Mba'eta xee ma SENHOR Penderuete, Israel kuery ruete Iky'a e'ÿ va'e ha'e pendereraa jepea aiko. Ha'e rami vy penderekovia ame'ê 'rã Egito pygua kuery. Etiópia ha'e Sebá pygua voi ame'ê 'rã pendere.

⁴ Mba'eta xevy 'rã ovare ete va'e ha'e omboeteve pyrã pendekuai, xee roayvu guive. Ha'e nunga rupi ae penderekovia ame'ê 'rã amboae regua kuery, penderekovia aepey vy.

⁵ Ha'e nunga rupi pekyje eme, pendereve xee aiko ramo. Ha'e rami vy peneramymino kuery arupa ju 'rã kuaray oêa ha'e oieka katy gui amono'ômba vy.

⁶ Kuaray ijapu'a'ia katygua pe aipoa'e 'rã: 'Eme'êmba ju ke.' Ha'e kuaray puku-a katygua pe avi 'Ejoko eme', ha'e 'rã. Peru ke xera'y kuery mombyry gui, peru xerajy kuery yvy apy gui,

⁷ xerery rupi aenoĩ va'ekue ha'e javi, xee ae anhemboete uka vy amoingo ha'e ajapo va'ekue.

⁸ "Peru ke hexa oĩ va'eri ndoexai va'e kuery, ha'e ijapyxa oĩ va'eri ndojapyxakaxei va'e guive.

⁹ Tou avi yvy regua kuery ha'e javi, ta'ijatyta opa marãgua kuery ikuai va'e. Ha'e kuery va'e regua mava'e tu omombe'u kuaa 'rã ha'e nunga, ha'e nhandevy oikuaa uka yma rupi amombe'u uka va'ekue-'ekue? Ha'e rami vy toexa uka imombe'uarã ogueroko ri vy, heko porãa kuaa ukaarã, nhaendu vy 'Anhetê ete ae' ja'e aguã.

¹⁰ "Ha'e rã peê ae ma xereko mombe'uarã pendekuai", he'i SENHOR. "Peê ma xerembiguairã aiporavo va'ekue xeayvua pendu vy perovia aguã, ha'e rami vy xee anho aikoa peikuaa aguã, mba'eta xee aiko e'ÿ mbove peteĩve tuuete ndoikoi raka'e, ha'e xee aiko rire voi amboae ndoikoi 'rã.

¹¹ Xee, xee ae ma SENHOR. Xee e'ÿ vy ndoikoi jogueraa jepearã.

¹² Xee ma amombe'u uka ma voi ajogueraa jepe aguã. Ha'e va'e ambou ma vy aikuaa uka ju. Penembyte ndoikoi amboae ramigua tuuete, ha'e rã peê kuery ma xekuaa ukaarã pendekuai", he'i SENHOR. "Xee ae ma Penderuete.

¹³ Ára oiko e'ÿ mbove ma voi xee ae aiko raka'e. Ndoikoi guive xepo gui jope'aaarã. Mba'eta xee mba'emo ajapo ta ramo mava'e tu xejoko ta?" he'i.

Babilônia pygua po'akaa gui ogueraa jepe aguã re ijayvuague

¹⁴ SENHOR pendereraa jepea, Israel kuery ruete Iky'a e'ÿ va'e ma po rami ijayvu: "Peê kuery roayvu vy Babilônia yvy re amondouka 'rã hovaigua kuery tetã re opu'ã okuapy va'erã. Ha'e rã ha'e pygua caldeu kuery ma ajapo 'rã onhamba aguã rami. Kanoã ha'e kuery oguerovy'a rei va'ekue py ae 'rã ojava.

¹⁵ Xee ma SENHOR Penderuete Iky'a e'ÿ va'e, Israel kuery moingoare, penderuvixave", he'i.

¹⁶ Po rami SENHOR ijayvu. Ha'e ma ymave ye'ê rupi ojapo va'ekue peteĩ tape, yy oxyry atã va'ekue mbyte rupi ixupegua kuery oaxa aguã.*

¹⁷ Ha'e gui ha'e kuery rakykue ojapo va'ekue karóxa ha'e kavaju oje'oi avi aguã rami, xondaro kuery imbaraetekueve guive. Ha'e py ae ha'e kuery ho'apa, nopu'ãvei, neĩ ndoikovei 'rã guive, tataendy ogue va'ekue rami avi. Ha'e vy SENHOR aipoe'i:

¹⁸ "Aÿ gui ma penema'endu'ave eme mba'emo oiko va'ekue re rive, yma guare-guare re anho pendepy'a eme.

¹⁹ Mba'eta xee ajapo 'rã mba'emo pyau aÿ'i ma voi ojekuaa oiny aguã rami. Xapy'a rei nda'u ndapexai ri? Mba'eta tekoe e'ÿa rupi ju 'rã xee aexa uka tape, ha'e yvy piru reiague rupi ajapo 'rã yakã oxyry aguã rami.

²⁰ Ha'e ramo mymba ka'aguy regua voi xemboete 'rã okuapy, jagua-tuvy nhe'ê ha'e guyra nhandu'ra'y, tekoe e'ÿa rupi yy amoi ramo, ha'e yakã yvy piru reiague rupi. Xevy guarã aiporavo va'ekue oy'u aguã rami ajapo,

²¹ peteĩ regua xejeupe guarã ae amoingo va'ekue pe, xere ima'endu'aa rupi xereroporaei aguã.*

SENHOR nhanemboaxya rupi nhandererekoa re ijayvuague

²² "Ha'e rami teĩ Jacó kuery, xevy pe ma peê kuery ndapejapukai. Ha'e rami 'rãgue py Israel kuery, penekane'ômba rive xevy pe pendekuaia gui.

²³ Mba'eta xevy pe ete ndaperui vexe'i ra'y peapy reve peme'ê va'erã, naxemboetei guive mba'emo pejukaa py. Xee ma norombovoyi mba'emo aju xejeupe guarã ame'ê uka vy, noromokane'oi guive heakuã va'e aapy uka vy.

²⁴ Xevy peguarã ndapejoguai takua heakuã porã va'e pendeperãta re, naxembovy'ai guive mba'emo peapy aguã pejuka va'ekue kyra peme'ê vy. Ha'e rami 'rãgue py pejevavya py rive xembovoyi, xemokane'ô guive pendeko vaia py.

²⁵ Ha'e ramive ma xee, xee ae pendereko vaiaty ambogue va'e, xejee ae ama'ê vy. Ha'e rami vy naxema'endu'avei ma pejevavyague re.

²⁶ Xemoma'endu'a ke, jaa ke romboayvu aguã py. Penhemombe'u porã ke romboeko porã kuaa aguã.

²⁷ Mba'eta penderu ypy ma heko vai, ha'e gui nhandembyte guarã amoi va'ekue ju ojevavy okuapy xerovai.

²⁸ Ha'e nunga rupi ae amboyke 'rã pembojeroviaaty rupigua yvatekueve. Jacó kuery ma amboaxa 'rã imombaarã pe, Israel kuery amboaxa 'rã ijojaiarã pe."

SENHOR anho Nhanderuete oikoa re ijayvuague

¹ "Aÿ ma peê Jacó kuery xerembiguai, ha'e Israel kuery xerembiporavo pendekuai va'e, pendu ke.

* 43:16 Apy ma ijayvu Ye'ê Pytã mbyte rupi Israel kuery oaxapaague re (Êxodo 14-15). * 43:21 1 Pedro 2,9

² Po rami ijayvu SENHOR penemoingoare, penderyrui py ma voi pendeapo va'ekue, ha'e penepytyvõa: Jacó kuery xerembiguai, xerembiayvu kuery roiporavo va'ekue, pekyje eme.

³ Mba'eta oy'uxe rei va'e kuery pe anhoê 'rã yy, amboxyry 'rã vvy piru reiague rupi. Ha'e rami ae avi Xenhe'ê voi anhoê 'rã neramymino kuery áry, ha'e kuery áry anhoê 'rã amoingo porã aguã.

⁴ Ha'e ramo ha'e kuery ma jai ipotyva va'e rami avi ikuai porã 'rã, ha'e yakã vvyry vyvra hi'ái va'e rami.

⁵ Ha'e kuery va'e regua ma 'Xee ma SENHOR pegua', he'i 'rã. Ha'e rã amboae ma Jacó rery rupi onhemboery uka 'rã. Ha'e rã amboae ju opo re ae ombopara 'rã: 'Xee ma SENHOR pegua' he'ia va'e, ha'e guery apyrã omoí 'rã Israel rery py."

⁶ Po rami ijayvu SENHOR Israel kuery ruvixave, heraa jepea, SENHOR ixondaro reta va'e: "Xee ma jypy'i guive ha'e oopa py guarã aiko. Xee e'y vvy ndoikoi tuuete mboae.

⁷ Mava'e nda'u xee ramigua oiko ymave rupi mba'emo oiko va'erã momba'ua, ymavegua kuery amoingo guive? Ha'e rami ri ramo tove tokuaa uka, tomombe'u porã ha'vy xerenonde. Tomombe'u mba'emo oiko va'erã, mba'emo ndojeupityi toi va'e.

⁸ Penhemondyí eme, pekyje eme guive. Ha'e va'e ára guive namombe'ui teve ha'e nunga pëvy? Ndaikuaa ukai ri ty'y? Peê kuery ma xekuaa ukaarã pendekuai. Oiko avi 'rã nda'u amboae tuuete xee ramigua? Any, amboae itaova ndoikoi xee aikuaa va'e."

Mba'emo ra'angaa mbojerovia rupi ikuai va'e nai'arandua re ijayvuague

⁹ Mba'emo ra'angaa apoa ikuai va'e ha'e javi ma mba'everã ndovarei, ta'angaa ha'e kuery ojou porãve va'e voi. Ha'e kuery ae oikuaa uka mba'eve ndoexai ha'e ndoikuaaia, nda'evai nho aguã rami.

¹⁰ Mava'e nda'u tuueterã ojapo, e'y vvy mba'emo ryku gui mba'emo ra'angaarã ojapo 'rã, mba'everã ndovarei va'erã rive?

¹¹ Mba'eta ha'e nunga mboetea ma guive 'rã nda'evai nho 'rã, ijapoare ava meme ramo. Ha'e kuery toupá xerenonde ojexa uka aguã. Ha'e gui ma tonhemondyipa ju oje'oiivy oxímba vy.

¹² Ha'e gui ferro re omba'eapo va'e ma ojapo 'rã petei haxa. Ha'e gui ma tata py omba'eapo vvy mba'emo ra'angaa ju 'rã ojapo ombota-mbota vy. Ojapo 'rã heravy ojyva mbaraetea py. Ha'e rami teí okaruxe vy ikane'õ 'rã, yy ndoy'ui vvy na'imbaraetevei 'rã.

¹³ Ha'e gui vvyra gui mba'emo ra'angaa ojapo kuaa va'e voi ixã omoatã vvy lãpis py oa'ã 'rã heravy mba'emo ra'angaarã. Ha'e rami vvy vvyra nhopía py ju 'rã onhopí-nhopí, ha'e oa'ã ju 'rã imarkaa py. Ha'e vvy ojapo 'rã ava rami ete iporã rei va'e, oo'i oí atyrã py oí aguã.

¹⁴ Ha'e rami aguã ma avakue oak'e'o 'rã yary, ha'e e'y vvy cipreste, carvalho, vvyra ka'aguy re ikuai va'e gui oiporavo vy. Xapy'a rei onhoty' 'rã pinho yky, oky ramo yvate ovy va'erã.

¹⁵ Ha'e nunga vvyra ma avakue oapy aguã ikuai. Amongue vvyra pëgue omoendy vvy ojape'e 'rã oiny, mbojape ombojy 'rã guive. Ha'e va'e vvyra gui ae avi ojapo 'rã nguete ra'angaarã. Ha'e rami vvy henonde oí 'rã guenapy'ã re. Mba'emo ra'angaarã ojapo va'ekue renonde oí 'rã guenapy'ã re ombojerovia vy.

¹⁶ Petei ijaygue ma oapy 'rã tata py. Ha'e va'e py ma ombojy 'rã xo'o ho'u aguã. Oexy ma vy hev yatã 'rã, ha'e ojape'e vvy aipoe'i 'rã oiny: "Ha'eve ajape'e ma, ha'e aexa hexakãa", he'i 'rã.

¹⁷ Ha'e gui ijaygue mboae gui ma ojapo 'rã ngueterã, mba'emo ra'angaa rive. Ha'e va'e renonde ma oí 'rã guenapy'ã re. Ngova vvy re omovaê reve ojerure 'rã oiny ha'e nunga pe. Ha'e vvy aipoe'i 'rã: "Xereraa jepe ke, mba'eta ndee ma xeruete", he'i 'rã.

¹⁸ Ha'e kuery ma mba'eve ndoikuaai, o'arandurã nomoi, hexa ojapa ma oexa e'y aguã, ikuraxõ py voi ndoikuaavei ma.

¹⁹ Neí peteíve ma ndoikuaa pota porã 'rã, nai'arandui ha'e mba'eve ndoikuaai aipoe'i aguã: "Peteí ijaygue ma apy tata py, ha'e tapyí áry aexy mbojape. Hi'áry ma xo'o aexy ma vvy ha'u. Ha'e ijaygue mboae gui nda'u ajapo 'rã ri ojeguaru pyrã? Xerenapy'ã re 'rã ri nda'u ai vvyra pëgue renonde?" nde'i 'rã.

²⁰ Ha'e nunga avakue ma tanhimbu rive ho'u oiny va'e rami ikuai, okuraxõ py onhembotavy uka vvy ojekore va'e. Ha'e va'e ma ndogueraa jepe kuaai guekove, neí aipo nde'i kuaai: "Apu re e'y ri nda'u ajerovia?" nde'i.

Ogueraa jepe aguã re ijayvuague

²¹ "Jacó ha'e Israel kuery, penema'endu'a ke pova'e nungakue re, mba'eta peê ma xerembiguai kuery! Xee ae rojapo va'ekue xerembiguirã. Israel kuery, xee ndaxerexarai 'rã pendegui.

²² Ha'e rami 'rãgue py pejejavyaty amokanhymba 'rã vvyxí rami, ha'e pendereko vaiaty amomba 'rã rai rami. Pejevvy ju ha'vy xea katy, xee rogueraa jepe rire."

²³ Ha'e nunga SENHOR ojapo rire peporai ke, yva regua pendekuai va'e. Ha'e peê vvy guyrygua kuery, peroporaevi ai ke. Peê vvyty ha'e ka'aguy pendekuai va'e, ha'e vvyra pendekuai va'e ha'e javi, penhundu ke mboraevi rupi, mba'eta SENHOR oepy Jacó kuery, ha'e Israel kuery ogueraa jepe vvy onhemboete uka rive.

²⁴ Po rami ijayvu SENHOR pendereraa jepea, penderyrui py ma voi penemboete'i va'ekue: "Xee ma SENHOR opa mba'e apoa. Xee ae'i aipy va'ekue yva, ha'e anhono va'ekue vvy.

²⁵ Xee ajapo profeta ramigua rive apu rupi ijayvua ojeupity e'y aguã rami, ha'e namo'aranduveipa 'rã imba'ekuaa va'e. Mba'eta hi'arandui va'ekue ajapo 'rã ndoikuaavei aguã rami, hi'aranduaque mba'emo vairã opytapa aguã.

²⁶ Ha'e rã xerembiguai ijayvuague ma xee amoingo 'rã, ajapo 'rã xeayvu momba'ua kuery ijayvua ojeupity aguã rami. Ha'e rami vvy Jerusalém tetã pe aipoe'a: 'Ha'e py ma ikuaiã ju 'rã.' Ha'e Judá vvy re tetã ikuai va'ekue pe ma 'Ojapoa ju 'rã', ha'e. Ha'e py oogue ho'apa va'ekue pe ma 'Xee amoatyromba ju 'rã', ha'e.

²⁷ Yy tyguaxu va'e pe aipoe'a: 'Ndepiru ke, ha'e nderegua yakã ikuai va'e voi xee amombirupa 'rã.'

²⁸ Ha'e gui Ciro pe ma aipoa'e: 'Ha'e ma xerymba vexe'i kuery re opena va'e vy ojapopa 'rã xee aipotaa ha'e javi', ha'e.* Jerusalém tetã pe avi aipoa'e: 'Omoatyrõa ju 'rã.' Templo pe voi 'Omboytãa ju 'rã', ha'e."

45

Huvixa Ciro Israel kuery omondoukapa ju aguã re ijayvuague

¹ Po rami SENHOR ijayvu guembiporavo huvixave Ciro reko re: "Ipo oiporu kuua regua re ajopy herekovy, ha'e henonde gui aipe'apa 'rã yvy regua kuery. Hexe ama'ẽ vy amokangy 'rã huvixave ikuai va'e, henonde rupi okẽ ikuai va'e aipe'apa 'rã nombotyavei aguã rami.

² Ha'e rami vy xee aa 'rã nerenonde rupi. Ndevy ambo'yvi 'rã tape ikarẽ-karẽ va'e, amopẽmba 'rã okẽ overa va'e guigua, ha'e ambovopa 'rã ijokoa ferro guigua oĩ va'e.

³ Ndevy pe amboaxapa 'rã mba'emo porã onhomi mbyre, ha'e hepykueve oja'o'i pyre, reikuaa aguã xee ae SENHOR aikoa, Israel kuery ruete nderery rupi roenoĩ va'e.

⁴ Xerembiguai Jacó kuery, xerembiporavo Israel kuery ayvu vy ae xee roenoĩ nderery rupi, ha'e ndere amoĩ nderery apyrã, ndee ndaxekuaai teĩ.

⁵ Xee ma SENHOR, ndoikoi amboae. Xee e'y vy ndoikoi tuuete. Xee ma romombaraete 'rã ndaxekuaai teĩ.

⁶ Ha'e ramo kuaray oua ha'e oikoa katy peve oikuaa pavẽ aguã xee e'y vy amboae ndoikoa. Xee ae SENHOR, ndoikoi amboae.

⁷ Xee ma hendy va'e rexa ukua aiko, ha'e pytũ moĩa guive. Ha'e rami ae avi ambou 'rã mby'a porã ha'e mba'emo vai. Xee SENHOR ae ha'e nunga ha'e javi moingoa aiko."

SENHOR opa mba'e apoare oikoa re ijayvuague

⁸ "Toguejy teko porã yva yvatevea gui, ta'oky arai gui. Ha'e yvy re ma teko porã toike jogueraa jepea oiko aguã, toiko avi teko porã. Xee SENHOR ae ha'e nunga amoingo va'e", he'i.

⁹ Nda'evai ete 'rã imoingoare re opu'ã rei va'e kuery pe, mba'eta nhae'ũ pẽgue ramigua rive ikuai. Tyrã nhae'ũ guigua aipoe'i 'rã teve ijapoa pe: "Mba'e tu rejapo?" ha'e rami e'y vy "Nerembiape tu oata rima ixãrã", he'i 'rã teve?*

¹⁰ Nda'evai ete avi 'rã nguue pe "Mba'erã tu xemoingo?" he'i va'e, e'y vy oxy pe "Mba'e re tu xerereko'i raka'e?" he'i va'e pe.

¹¹ Po rami ijayvu SENHOR Israel kuery ruete lky'a e'y va'e, ha'e kuery moingoa: "Peikuaaxe ri ty'y raka'eva rã guarã? Xapy'a rei nda'u peẽ xembo'exe ri xera'y kuery ha'e xepo py ae ajapo va'ekue areko aguã re?"

¹² Mba'eta xee ma ajapo yvy, ha'e hexe guarã amoingo va'ekue avakue. Xepo py ae aipyo yva, ha'e hexe ikuai va'e ha'e javi 'rã ajokuai.

¹³ Ha'e gui xereko porã rupi vy amoĩ Ciro huvixaverã, ha'e ambo'yvi uguata aguã ha'e javi'i rupi. Ha'e ramo ha'e omoatyrõ uka ju 'rã xevygua tetã, ha'e omboupa ju 'rã xevygua kuery mombyry ogueraa pyre. hepy re e'y 'rã ojapo, mba'emo ome'ẽ rivepy re e'y guive", he'i SENHOR ixondaro reta va'e.

¹⁴ Po rami ijayvu SENHOR: "Ndepo py amboaxapa 'rã mba'emo porã Egito ha'e Etiópia yvy re ikuai va'e, avakue Sabeu regua tuvixakueve guive. Ha'e va'e kuery ma nderakyue 'rã oje'oi oipokuapaa reve, ha'e vy nerenonde ju 'rã ikuai guenapy'ã re mba'emo re ojerurea py. Ha'e vy aipoe'i 'rã: 'Ndereve anho Nhanderuete oiko, ha'e Nhanderuete mboae ndoikoi ha'e e'y vy', he'i 'rã okuapy."

¹⁵ Anhetẽ ete ndee ma Oruete ndereko roikuaapa 'rã e'y, Israel kuery ruete orereraa jepea.

¹⁶ Ha'e gui ta'angaa ojapo va'e kuery ma oximba ha'e nda'evai nho 'rã okuapy. Ho'apa 'rã oximba py.

¹⁷ Ha'e rã Israel kuery ma SENHOR ogueraa jepe 'rã raka'e rã guarã. Ha'e kuery ma noxĩmbai 'rã, nda'eva e'y'i nho 'rã raka'e rã peve.

¹⁸ Mba'eta po rami ijayvu SENHOR yva moingoa, Nhanderuete yvy nhono porãrea, ha'e yvy oĩ atã aguã rami ojapo va'ekue. Opyta rive aguã e'y onhono, nhanderekoarã ae ojapo va'ekue: "Xee ae SENHOR, ndoikoi amboae", he'i.

SENHOR ha'e mba'emo ra'angaa re ijayvuague

¹⁹ "Xee ma nhemi rupi e'y xeayvu, neĩ yvy pytũa py e'y guive. Jacó ramymino kuery pe aipo nda'ei: 'Xereka rive rima', nda'ei. Xee SENHOR ma anhetẽ rupi xeayvu, anhetẽ ete va'e anho aikuaa uka.

²⁰ Ha'e nunga rupi peẽ kuery yvy regua ikuaiã gui peo jepe va'ekue, penhemboaty ke pejuvy. Jovavi pevaẽmba, mba'eta yvyra gui mba'emo ra'angaa ojapo va'ekue ojaxe heravy va'e kuery ma mba'eva ndoikuaai, oiapukai 'rã okuapy nguete ndogueraa jepei va'erã pe rive.

²¹ Penhemombe'u ke, pemombe'u peikuaa va'e. Penhomongeta porã ranhe pekuapy. Mava'e tu ha'e nunga ymave guive oikuaa uka? Mava'e tu ha'e va'e ára guive omombe'u uka? Xee SENHOR aiko va'e e'y'i ri ty'y? Mba'eta ndoikoi tuuete mboae xee e'y vy. Tuuete heko porã va'e jogueraa jepea ndoikoi, xee e'y vy.

²² Peẽ yvy regua kuery ha'e javi, xere ae ke pema'ẽ peo jepe aguã. Mba'eta xee ae ma Penderuete, ndoikoi amboae.

²³ Xejeae ae aura va'ekue, xejuru gui anhetẽ ete va'e oẽ, ha'e xeayvuague ndopyta rivei 'rã. Ha'e vy aipoa'e: 'Xerenonde ma pavẽ guenapy'ã re oĩ 'rã, pavẽ oapekũ py oura 'rã xerery rupi', ha'e.*

* 44:28 Ciro ma Pérsia pygua huvixave. Babilônia re ipo'aka ma vy Israel kuery omondoukapa ju ijyvy katy (Esdras 1-3).

* 45:9 Romanos

²⁴ Ha'e ramo xevy pe aipo'ea 'ra: 'SENHOR re anho oĩ teko porã ha'e mbaraete. Ha'e oĩa py oxĩmba reve oupa 'rã hexe nda'ija'ei va'ekue ha'e javi', 'ea 'rã."

²⁵ Ha'e rã Israel ramymino kuery ma SENHOR re vy omboeko porãmbaa 'rã, hexe anho ovy'a 'rã okuapy.

46

Babilônia py mba'emo ra'angaa ikuai va'ekue okanhymba aguã re ijayvuague

¹ Bel ha'e Nebo ra'angaa ma ojero'a-ro'a rei 'rã oiny, mba'eta ta'angaa omoĩa 'rã mymba áry. Nguete ra'angaa ma ogueraa 'rã guymba kuery áry. Hymba kuery ikane'õ ma teĩ omokane'õve 'rã heravy ta'angaa ogueraa uka vy.*

² Ha'e rami vy tuuete ra'angaa ojero'a rei 'rã oiny. Ha'e nunga ma ndogueraa jepei 'rã hexe ojerovia va'e. Ha'e rami 'rãgue py ha'e nunga ae heraa 'rã amboae yvy re oguereko aguã katy.

³ "Jacó ha'e Israel kuery pekuave va'e, pendu ke xeyvuu. Peẽ kuery ma peiko'i guive xee roguereko, penderyru'i py peĩ reve rogueraa va'e xejyva áry.

⁴ Ha'e gui pendetuja'ipa peve xee ha'ekue ae 'rã aiko, pende'a xiĩmba peve xee roguereko 'rã. Ha'e rami vy 'rãe xee rogueraa, romombaraete ha'e rogueraa jepe.

⁵ Mava'e nda'u xere pembojoja 'rã joo rami ete roikoa rami? Mba'e nunga xee ramigua nda'u pemombe'u kuaa?

⁶ Amongue ma ovoko gui ouro oguenoẽ 'rã, e'ỹ vy mba'emo opejaa py prata oa'ã vy opaga 'rã ouro re omba'eapo va'e pe nguueterã ojapo uka vy. Ha'e rami vy henonde oĩ 'rã guenapy'ã re yvy re ngova omovaẽ reve.

⁷ Ha'e gui oaxi'ỹ áry ogueraa 'rã hendarã py omoĩ aguã. Ha'e rã ha'e py ae 'rã oĩ. Guenda gui ndovai 'rã. Ha'e nunga pe ojapukai teĩ nombovai 'rã, neĩ peteĩve ndogueraa jepei 'rã guive ojexavaia gui.

⁸ "Penema'endu'a ke pova'e re, pendepy'a guaxu aguã. Pejejavu va'ety kuery, pemoĩ pendepy'a re.

⁹ Penema'endu'a ke ymave rupi oiko va'ekue re, mba'eta xee ae Penderuete, ndoikoi amboae xee ramigua.

¹⁰ Mba'eta jypy'i guive aikuaa uka va'ekue mba'emo oiko va'erã, yma voi mba'emo ndoikoi teri va'e aikuaa uka. Ha'e vy aipoa'e: 'Xeayvua oiko ae 'rã, ajapo 'rã aipota va'e ha'e javi', ha'e.

¹¹ Ha'e rami vy kuaray oua katy gui aenoĩ peteĩ xapirẽ, yvy mombyrya gui peteĩ ava aenoĩ xee amongetaa rupi oiko va'erã. Ha'e rami aguã re xeyvuu rire amoiingopa avi 'rã. Ha'e nunga xepy'a re amoĩ rire ha'e rami ae ju 'rã ajapo.

¹² "Pendu ke xeyvua, mba'eta peneakã ratã va'e vy teko porã gui mombyry peiko.

¹³ Ajapo 'rã xeguigua teko porã ovaẽ aguã rami, namombyryvei ma ouvy, ajogueraa jepe aguã voi ndarei 'rã. Ha'e rami vy aexa uka 'rã ajogueraa jepea Sião py, Israel kuery mbyte py aexa uka 'rã xerexakã."

47

Babilônia tetã okanhymba aguã re ijayvuague

¹ "Kunhataĩ Babilônia pygua rajy, eguejy ke reĩa gui, ha'e yvy ku'i py ju eguapy.* Caldeu rajy, eguapy ke yvy py ae, mba'eta jipovei ma tenda repenaaty, ha'e ndevy pe 'Kunhataĩ porã ojou porãvepy' nda'eavei ma 'rã.

² Ejopy ke mba'exoa, ha'e emongu'i mba'emo ra'yĩ. Eipe'a nderova mo'ãa reiporu va'ety, eupi ndeao apy, ha'e neretya rei reve eaxa eovy yakã.

³ Mba'eta ndepire reia oexa pavẽ 'rã, oexa 'rã rexĩmba rei rã. Mba'eta xee ajoepy vy namboaxyi 'rã avakue ma guive rã", he'i.

⁴ Mba'eta nhande kuery repya ma SENHOR ixondaro reta va'e, Israel kuery ruete Iky'a e'ỹ va'e hery.

⁵ "Caldeu rajy, eguapy ke rekyriri reve, ha'e gui tereo pytũa katy, mba'eta ndevy pe 'Tetã ikuai va'e re ipo'aka va'e' nda'eavei 'rã.

⁶ Anhea'ã ete ma xevyguia kuery re, ambovaipa uka xemba'erã va'ekue. Ha'e rami vy amboaxa ndepo py, teĩ ndee ma remboaxya rupi e'ỹ rereko, tujakue'i voi rereko axy.

⁷ Ndee ma 'Xee ma xepo'aka 'rã raka'e rã peve!' 're va'ekue teĩ aỹ peve xeguigua neremoĩ ndepy'a re, neĩ repa aguã re voi nderekuua potai.

⁸ "Ha'e nunga rupi reipotaa rupi rei reiko va'e, endu pova'e nunga. Reĩ atã teri vy ndejeupe ae aipo're: 'Xee anho aiko, xee e'ỹ vy ndoikoi amboae. Xee ma imeve'ỹ va'e ndaikoi 'rã, neĩ xememby kuery ndoatai 'rã guive', 're.

⁹ Ha'e rami teĩ ha'e nunga mokoĩve ma ou xapy'a 'rã ndere, mba'eta peteĩ ára pyve nememby kuery omanomba 'rã, ha'e imeve'ỹ va'e reiko 'rã. Ha'e nunga ha'e javi oiko xapy'a 'rã ndere, ndevyguia imba'evyky ha'e imba'ekuaa va'e heta ete teĩ.

¹⁰ Mba'eta ndereko vaia re rive rejeroivia vy 'Jipoi avave rei xerexa va'erã', 're. Ha'e rami teĩ ne'arandua ha'e reikuapa py ae rejekore 'rã, ndejeupe ae: 'Xee anho aiko, xee e'ỹ vy ndoikoi amboae', 're teĩ.

¹¹ Ha'e nunga rupi ndere ou 'rã mba'emo vai. Ha'e va'e ma ndevyguia kuery mba'ekuaa rupi ikuai va'e ndojoko kuaai 'rã. Ha'e rami ete jexavai oiko 'rã ndere, ha'e va'e gui ndereo jepei 'rã ndereko rekovia mba'emo reme'ỹ teĩ. Mba'eta ndere oiko xapy'a 'rã ha'e ramigua ete teko vai nerexa'ãi va'ekue.

* 46:1 Bel ha'e Nebo ma Babilônia pygua kuery ruete ramigua oguereko va'ekue. Ha'e gui apy ma omombe'u ha'e kuery ojava vy mymba áry ta'angaa omoĩ ro'ojero'a-ro'ave 'rã oje'oi. * 47:1 "Babilônia pygua rajy" he'ia ma tetã Babilônia pygua kuery ha'e javi re ijayvu vy. Ha'e gui apy omombe'u ha'e kuery ikuai axy 'rã.

¹² “Tereove tema mba'evyky ha'e mba'ekuaa rupi nekunhataĩ guive reikoague rami. Xapy'a rei ma mba'emo rejou nho 'rã ha'e nunga py, xapy'a rei renhomongyje 'rã.

¹³ Ndekuera ma ha'e rami ete rejekuaa pota ukaague gui! Toupa aỹ yva regua re oikuaa pota va'e, jaxy-tata re oma'ẽ oiny va'e, jaxy pyau'i nhavõ mba'emo ndere oiko va'erã mombe'ua kuery.

¹⁴ Ha'e rami teĩ ha'e kuery re oiko 'rã mba'emo piremue tata oapypaa ramigua. Ha'e vy ndojereraa jepe kuaai 'rã tata gui. Ha'e va'e rire neĩ peteĩ tapyĩ ma ndopytai 'rã ojape'ea agua, neĩ tatapy pyvry oguapya agua ma voi.

¹⁵ Ha'e rami py ndovareveipa 'rã ndevy omba'eapo vaipa va'ekue, nekunhataĩ guive ha'e kuery reve mba'emo rejapoa va'ety. Ha'e kuery ma oka'u va'e rami oaĩmba 'rã peteĩ-teĩ guape rupi ae. Ha'e gui avave rei nandereraa jepe 'rã.

48

Israel kuery anhetẽ rupi e'ỹ ikuiaa re ijayvuague

¹ “Peẽ Jacó kuery, pendu ke pova'e nunga. Israel rery rupi penderery va'e, ha'e Judá ramymino kuery pendekuai, ha'e SENHOR rery rupi peura va'e. Nhanderuete Israel kuery Ruete pe jejapukai va'eri anhetẽ rupi e'ỹ, teko porã rupi e'ỹ pendekuai.

² Pendejeupe ‘Tetã iky'a e'ỹ va'e pygua’ peje, ha'e ‘Ore roĩ atã Israel kuery ruete SENHOR ixondaro reta va'e hery va'e re’, peje teĩ.

³ Ha'e gui xee ma jypy mba'emo amombe'u yma guive. Xejuru rupi ae amombe'u, aendu uka porã guive. Ha'e gui ma amoingo xapy'a ramo ojeupitypa.

⁴ Mba'eta xee aikuaa peneakã ratãa ha'e pendeaju'y kãgue ferro rami hatã va'ea, penderova voi overa va'e gui ojapo pyre rami ete hatã va'e.

⁵ Ha'e nunga rupi ae amombe'u ha'e va'e ára guive, ha'e nunga oiko e'ỹ mbove voi aikuaa uka pẽvy, peẽ kuery aipopeje e'ỹ agua: ‘Ha'e nunga ma oreruete ra'angaa omoingo’, e'ỹ vy ‘Ta'angaa mba'emo ryku guigua omoingo’, peje e'ỹ agua.

⁶ Ha'e nunga pendu ae ma rire aỹ peikuaa pota ke ha'e nunga ha'e javi re. Ha'e nunga pe ‘Anhetẽ ete va'e’ ndapejei 'rã teve? Ha'e gui aỹ ma mba'emo pyau ju aendu uka 'rã pendeivy, mba'emo ndaikuaa ukai teri ha'e ndapeikuaai va'ekue.

⁷ Ha'e nunga ma aỹ mae amoingo, ymave rupi e'ỹ. Kova'e ára e'ỹ mbove napendui, ‘Aikuaa ae ma’ peje e'ỹ agua.

⁸ Mba'eta ha'e nunga peẽ napendui, ndapeikuaai teri, neĩ napendui guive pendeapya py, mba'eta xee aikuaa anhetẽ rupi e'ỹ pendekuaia, penderyrui'gui peiko'i guive ‘Heko vai va'e’ 'ea pendeivy.

⁹ Ha'e rami ete teĩ xerery amboete ukaa rupi vy ndaexa uka voi 'rã xepoxya, xee anhemboete ukaa re ae ajejoko 'rã romomba vyvoi e'ỹ agua.

¹⁰ Ha'e rami avi xee roiky'a'opa teĩ prata rami ndapejekuaai, tata kua jexavaia py roa'anga teĩ.

¹¹ Ha'e rami ete teĩ xee ae vy aiko ha'e rami. Mba'exa tu xee roguereko ta xerery nomboteai agua rami? Xee ma xerexakã namboaxai 'rã amboae pe.

¹² “Jacó ha'e Israel kuery roenoĩ va'ekue, jejapyxaka ke. Xee ma ha'ekue ae aiko. Xee ma jypy'i guive ha'e opaa pyguarã.

¹³ Xepo py ae yvy anhono va'ekue, ha'e aiporu kuaa regua py ae aipyo yva. Ha'e nunga xee aenoĩ ramo ojekuaapa raka'e.

¹⁴ Penhemboatypa ke, ha'e pendu: Mava'e ta'angaa ikuai va'e regua nda'u ha'e nunga oikuaa uka ma voi? Mba'eta xee SENHOR ma Ciro ayvu vy aity uka 'rã Babilônia tetã aipotaa rami, caldeu kuery rovai xejyva aupi vy.

¹⁵ Xee amombe'u ae ma, ha'e gui xee ae ju aenoĩ xerembiguairã. Xee aru vy ajapo 'rã oikoa ha'e javi rupi ojapopa agua rami.

¹⁶ Penhemboja ke xere, pendu pova'e nunga: Nhemi rupi e'ỹ xeyvy jypy guive. Ha'e nunga oiko ppy'i guive xee aiko ha'e py”, he'i. Ha'e gui aỹ ma SENHOR Nhanderuete xembou, Onhe'ẽ reve.

¹⁷ Po rami SENHOR ndereraa jepea ijayvu, Israel kuery ruete Iky'a e'ỹ va'e: “Xee ma SENHOR Nderuete. Rombo'e iporã va'e re, ha'e tape reiko agua rupi roguereko va'e.

¹⁸ Ha'e rami avi xeyvuague rendu va'e rire reiko porã 'rãgue yakã rami, ha'e ndereko porã opa rupi ojekuaa 'rãgue ye'ẽ re yai ikuai va'e rami.

¹⁹ Neramymino kuery ma ita ku'i ha'e mba'emo ra'yĩ rami 'rãgue heta. Hery voi xerenonde gui nomokanhyai ha'e ndoipe'aai 'rãgue guive.

²⁰ “Ha'e nunga rupi tapeopa Babilônia tetã gui, pejava caldeu kuery mbyte gui. Ha'e gui pova'e nunga peikuaa uka ke peporaeia rupi. Perojapukai ke, yvy apy peve peikuaa uka. Ha'e vy aipopeje: ‘SENHOR ogueraa jepe ma guembiguai Jacó kuery’, peje.

²¹ Mba'eta peneramoĩ kuery ma tekoa e'ỹa rupi SENHOR ogueraa teĩ noendui raka'e yuvei. Ha'e kuery pe ojapo avi itaova gui yv oẽ agua rami. Itaova ombovo rã yv onhe'ẽ raka'e.

²² Ha'e rã heko vai va'e kuery pe ma noĩ 'rã ikuai porã agua”, he'i SENHOR.

49

Judeu e'ỹ va'e ikuiaa rupi avi SENHOR rembiguai omoexakã agua re ijayvuague

¹ “Peẽ ye'ẽ vvyry pendekuai va'e, pendu ke xeayvu. Peẽ mombryrgua kuery, pejapyxaka ke. Mba'eta aiko'i ramove SENHOR xerenoi, xeryru'i pyve ma voi omombe'u xerery.

² Ha'e vy xejuru gui oẽ va'e ojapo kyxe haimbe porã va'e rami, ha'e opo py xemo'a. Xeapo hu'y hyxy'i porã va'e rami, ha'e ngu'y ryrü py xerereko.

³ Ha'e vy aipoe'i xevy: 'Ndee ma xerembiguai, Israel reiko. Ndee reikoa re vy xemboeteara 'rã', he'i.

⁴ “Ha'e ramo xee aipoa'e: 'Ha'e rami avi xee amba'eapo rive, mba'everã ndovarei anhea'ãague. Ha'e rami teĩ SENHOR renonde ma oĩ xemboeko porã aguã, amba'eapo repy oĩ Xerüete po py', ha'e.

⁵ “Ha'e gui aỹ ma SENHOR xeryru'i py guembiguairã xemboeteara va'e ijayvu Jacó regua kuery aru ju aguã, ha'e oĩa py Israel kuery amboatypa aguã, mba'eta SENHOR ae xemboevate, Xerüete xemombaraete.

⁶ Ha'e rami vy aipoe'i xevy: 'Tã, ha'e rami avi Jacó ha'e Israel regua okuave va'e rerupa ju aguã anho e'ỹ romoi xerembiguairã. Amboae regua kuery moexakãarã guive romoi, vvy apy rupi peve jogueraa jepearã', he'i.*

⁷ Po rami SENHOR Israel kuery reraa jepea lky'a e'ỹ va'e ijayvu guembiguai avakue ndoayvui ete va'e pe, mba'eta heta va'e kuery ndoipotai ae, huvixa kuery ojokuai guive. Ha'e vy aipoe'i ixupe: 'Huvixave kuery nderexa vvyvpe opu'amba 'rã, yvatekueve voi. Ha'e kuery nemboete 'rã okuapy xee SENHOR Israel kuery ruete lky'a e'ỹ va'e re vy, ojeroviapy aikoa rupi roiporavo rirẽ', he'i.”

Israel kuery oguerupa ju aguã re ijayvuague

⁸ Ha'e gui SENHOR aipoe'i avi: “Xee romboaxy aguã ára aendu ndeayvua, rogueraa jepe aguã ára roipytyvõ. Ha'e rami vy anhangareko 'rã ndere, ha'e xevyguia kuery pe rome'ẽ 'rã xereve guarã ajapo vy. Ha'e ramo rembopyau ju 'rã ha'e kuery vvy omombyta rive pyre, ha'e pete'i-teĩ pe reme'ẽ ju 'rã.*

⁹ Ha'e rami vy nhuã py omboty pyre pe aipoe'ẽ aguã: 'Peẽ ke', ha'e pytũ rupi ikuai va'e pe 'Peju, pejekuaa ju', 're 'rã. Ha'e ramo ha'e kuery ikuai 'rã vexa'i tape rupi okaru va'e rami, ha'e vvy'ã piru reia rupi teĩ ojou 'rã ho'u va'erã.

¹⁰ Ha'e rami vy ha'e kuery noenduvei 'rã karuai neĩ yuvei. Haku-a neĩ kuaray ojopea voi nomoingo axyvei 'rã. Mba'eta imboaxya ogueroko vvy ogueraa 'rã yy porã oĩa py.*

¹¹ Xevy re vvyty ikuai va'e rupi ajapo 'rã haperã, ha'e amoatyromba ju 'rã tape ikuai va'e.

¹² Ma'ẽ, xevyguia kuery ou 'rã mombry gui, amongue ma kuaray ijapu'a'ia katy gui, amboae kuery ma kuaray oikoa katy gui, ha'e rã amboae kuery ma Sinim vvy gui 'rã ou.”

¹³ Yva, eporaei ke! Yvy, evy'a ke! Ha'e peẽ vvy'ã pendekuai va'e voi pemomhendu mboraei, mba'eta SENHOR ombovy'a ju ojeupegua kuery, ikuai axy va'e omboaxy vy.

¹⁴ Ha'e rami teĩ Sião aipoe'i: “ SENHOR xereja ri, SENHOR hexarai ma xere”, he'i.*

¹⁵ “Ha'e rami teĩ imemby kambu va'e nda'u hexarai 'rã ri omemby'i re, nomboaxyi 'rã ri nda'u ogueroko'i va'ekue? Xapy'a rei omemby re hexaraia teĩ xee ma ndaxerexarai 'rã ndere.

¹⁶ Ema'ẽ, xepo mbyte re ambopara nderery, xejeje riaae amoĩ ndekora re xema'endu'a aguã.

¹⁷ Ha'e ramo nememby kuery ha'e ndepi'a kuery ma ojevvy voi 'rã okuapy. Ha'e rã nemombaare ha'e nderereko axy reia kuery ma ojepe'a 'rã reia gui.

¹⁸ Ema'ẽ ndevvyry rupi reia aguã, mba'eta ndea py ono'õ jogueruvy. Anhetẽ ete xee ae rekove rupi aura vy aipoa'e: 'Ha'e kuery ma ndejeje remoi 'rã renhembojeguaa rami, ha'e kuery re vy neporã 'rã kunhataĩ omenda ta va'e rami' ”, he'i SENHOR.

¹⁹ “Nerenda ma tekoa ve'ỹ ha'e ombovaipa pyre ranhe itui va'ekue. Ndevvy voi ombovaipa pyre itui va'ekue teĩ aỹ ma ndee Sião, nekyri'i vai ete 'rã ndere hekoa va'e kuery ha'e javi oĩmba aguã. Ha'e gui nemombaare kuery ma mombry 'rã ikuai ndea gui.

²⁰ Nememby kuery ha'e ndepi'a kuery ndegui oipe'aa pyre heta ju vy aipoe'i 'rã okuapy ndevy: 'Kova'e henda ma kyri'i vai ete orevy. Embotuvixave ke roĩ aguã', he'i 'rã okuapy.

²¹ Ha'e gui ndejepe ae aipoe'ẽ 'rã: 'Mava'e tu kova'e kuery omoingo va'ekue xememby ha'e xepi'arã? Mba'eta xegui ma xememby kuery ha'e xepi'a kuery oipe'apaa, ha'e na'imembyvei aguã rami aiko va'ekue, amboae vvy katy xereraa, ha'e oayvupy e'ỹ aiko va'ekue. Mava'e tu ha'vy omoingo kova'e kuery xememby ha'e xepi'arã? Xee ma xee'i xerejaa va'ekue ri kova'e kuery magui tu ou? 're 'rã.”

²² Ha'e gui po rami SENHOR ijayvu: “Xee ma aupi 'rã xepo vvy regua kuery oexa pavẽ aguã, heta va'e kuery oexa py aupi 'rã xevyguia bandeira. Ha'e ramo ha'e kuery ojvva áry oguerupa 'rã nememby kuery ha'e ndepi'a kuery, oaxi'y áry guive.

²³ Ha'e ramo huvixave kuery ma onhemomgo 'rã tuvyrã, ha'e huvixa kunha ma omokambu 'rã. Ha'e rami vy nerenonde ha'e kuery guenapy'ã re ikuai 'rã, ha'e vvy re ngova omovaẽ reve onhemomgyvi'i 'rã okuapy ndepy vvyry. Ha'e ramo reikuaa 'rã xee ae SENHOR aikoa, ha'e xere ojerovia va'e kuery noxĩmbai 'rãa”, he'i.

²⁴ Peteĩ ipy'a guaxuve va'e gui nda'u oipe'aa 'rã omba'erã ojou va'ekue? Peteĩ jogueroko axya gui nda'u oo jepe 'rã teve nhuã py ombo'a va'ekue?

²⁵ Ha'e rami teĩ po rami SENHOR ijayvu: “Ha'e rami avi nhuã py ombo'a pyre kuery oo jepe nho 'rã ipy'a guaxuve va'e gui, jogueroko axya gui ombo'a va'ekue ojepe'a 'rãe, mba'eta ndere opu'ã va'e kuery re xee apu'ã vy araa jepe 'rã nememby kuery ha'e ndepi'a kuery.

* 49:6 Atos 13.47 * 49:8 2 Corintios 6.2 * 49:10 Apocalipse 7.16 * 49:14 Apy ma Sião Jerusalém tetã ma peteĩ kunha rami ijayvu, ha'e ramo SENHOR ombovai 'rã tetã pe.

²⁶ Ha'e rami vy ajapo 'rã nderereko axyare kuery ngo'o re ae okaru aguã rami, ha'e nguguy py ae vinho py rami oka'u okuapy aguã rami. Ha'e rami rã avakue ha'e javi oikuapa 'rã xee ae SENHOR aikoa, ndereraa jepea ha'e nderepya, Jacó kuery ruete Ipo'akapa va'e aiko."

50

SENHOR rembiguai ojavykya rei teĩ ojeroviapy oikoa re ijavyuague

¹ Po rami SENHOR ijavyu: "Mamo tu oĩ kuaxia para pendexy re amendaa gui xee ajep'e'a ha'e amondouka aguã regua?*" Ha'e nunga ndoikoi ae. Ha'e rami e'ỹ vy mava'e tu xemborevatey oiko ixupe peẽ kuery rovendeague? Any, pendereko vaia káuxa ae penevendepaa, pejejavyague re pendexy omondoukaa.

² Mba'eta tu ha'vy xeeaju teĩ avave rei ndojekuaai, ha'e xee roenoi teĩ avave rei naxembovai? Xepo nda'u ijapu'a'i vai ete ri rogueraa jepe aguã? Tyrã pa naxembaraetevei ma rogueraa jepe aguã? Mba'eta ye'ẽ pe xeayvu vy rive amombirupa, ha'e yakã 'rague py ajapo tekoa e'ỹa opyta aguã rami, pira ha'e py ikuai va'e inemba peve. Yy jipoi ramo omanomba 'rã yuvei gui.

³ Xee ae ma yva amoũmba va'e, inhovãarã ajukue voxa guigua ramigua amoi vy", he'i.

⁴ "Ha'e gui xevy pe SENHOR Nhanderuete ome'ẽ hi'arandu va'e avyu, ikane'õ va'e pe xeayvu kuaa aguã ambopy'a guaxua rupi. Ko'ẽ nhavõ aje'ive xembovy 'rã, xeapyxa oipe'a 'rã hembigui rami ajapyxaka aguã.

⁵ SENHOR Nhanderuete xeapyxa oipe'a ramo xee nanhe'ẽ rendu e'ỹi, ixugui ndajepe'ai guive.

⁶ Ha'e rami vy xekupe rupi anhenupã ukapa, xerova voi nanhomi xe'a moatãa kuery gui, xerova ndarovai xere ijavyu vaikue-ikue ha'e onyvõmba rei va'e gui.

⁷ Mba'eta Nhanderuete xepytyvõ aximba e'ỹ aguã rami. Ha'e ramo xerova ajapo ita rami hatã aguã, mba'eta aikuaa naxĩmbai 'rãa.

⁸ Xemboeko porã va'e xea katy'i oĩ ramo mava'e tu ijavyu rei ta xere? Jajexa uka ha'vy joa py. Mava'e tu xerovai guarã oiko ta? Penhemboja ke ha'vy nhandomboayvu aguã.

⁹ SENHOR Nhanderuete ae xepytyvõarã oiko ramo mava'e tu xembopaga 'rã? Ha'e rã ha'e kuery ma okanhymba 'rã ajukue vixo'i ho'upaa rami."

¹⁰ Mava'e peẽ kuery regua nda'u SENHOR mboetea rupi ete peiko, ha'e hembigui penhe'ẽ rendu va'e? Pytũ rupi tataendy reve'ỹ oiko va'e ma tojerovia SENHOR rery re, toĩ atã Nhanderuete re.

¹¹ Ha'e rã peẽ kuery tata pemoendy ha'e hu'y endy va'e pereo katu va'e ma tata ha'e hu'y pemoendy va'ekue rexakã rupi tema peiko. Ha'e rami avi xegui ae 'rã ou penembopagaarã, roitypa 'rã pejexavai aguã py.

51

Sião pygua kuery ovy'a ju aguã re ijavyuague

¹ "Teko porã rupi peikoxe ha'e SENHOR peka va'e, pendu ke xeayvu. Penema'endu'a ke itaova ha'e itakua ha'e va'e gui penemoingogae va'e re.

² Penema'endu'a ke penderu Abraão ha'e penekuavãare Sara re ae. Mba'eta Abraão aenoi jave pete'i oiko. Ha'e gui aroyvu porã vy amboetave karamboae.

³ Mba'eta xee SENHOR ma Sião voi amboaxy. Amboaxy avi 'rã tetã rupi tekoague ikuai va'e ha'e javi. Ha'e vy ajapo 'rã ha'e rupi tekoa e'ỹ oĩ va'e Eden pyguare rami iporã ju aguã, ajapo 'rã opyta rei va'ekue-'ekue xeavya vyotyty rami. Ha'e ramo oendua ju 'rã ovy'a va'e ha'e py, oguerovy'aa rupi oporaei va'e mba'epu reve.

⁴ "Peikuaa pota ke, xeavygua kuery. Xeavygua tetã pygua kuery, pendu ke xeayvu. Mba'eta xegui ae ojekuaa 'rã lei, xeguigua teko porã aikuaa uka 'rã vyv regua kuery moexakãmbaarã.

⁵ Mba'eta xeguigua teko porã ma momyby e'ỹ oĩ, ojekuaa ma ajogueraa jepea voi. Ha'e rami vy xepo'akaa rupi areko 'rã vyv regua kuery. Ye'ẽ vvyry ikuai va'e voi xerarõ okuapy, xere ojerovia xepo'aka aguã.

⁶ Pema'ẽ ke yva re, ha'e gui vyv katy ju pema'ẽ. Mba'eta yva okanhymba 'rã hataxĩ rami, ha'e vyv ma inhymamba 'rã ao vaikue rami, hexe hekoa va'e kuery voi omanomba vyvõi 'rã mbarigui rami rive. Ha'e rã ajogueraa jepea ma oĩ riae 'rã, xeguigua teko porã voi nombovaipaai 'rã.

⁷ "Peẽ kuery teko porã peikuaa va'e, pendu ke xeayvu, penekuraxõ re xeguigua lei oia va'e. Pekiye eme avakue pendejojai rei teĩ, penhemondy eme pendere ijavyu rei ramo.

⁸ Mba'eta ha'e kuery ma omombaa 'rã ajukue vaikue rami, vexa'i rague vixo'i ho'upaa rami ae. Ha'e rã xeguigua teko porã ma oĩ riae 'rã, ha'e ajogueraa jepea ma ta'y jevy-jevuy ikuai peve 'rã oĩ."

⁹ Emyĩ ke, SENHOR ndepo'akapa va'e, emyĩ ke. Ndejee emoi nembaraetea rexa uka aguã. Emyĩ ke ymave rupi ymagua kuery ikuai jave guare rami. Ha'e rami vy ndee e'ỹ ri ty'y Egitõ vyv mombaare, ha'e ye'ẽ rupigua jukaare?

¹⁰ Ndee e'ỹ ri ty'y ye'ẽ typya mombiruare? Mba'eta ye'ẽ mbyte taperã rejapo va'ekue, reraa jepe va'e kuery oaxapa aguã.

¹¹ Ha'e rami vy SENHOR oepy va'e kuery ojevypa ju 'rã. Sião tetã py oupa 'rã okuapy oporaei reve. Ha'e kuery akã re ma vy'a opa e'ỹ va'e 'rã oĩ coroa rami. Ha'e kuery oupity va'erã va'e ma mby'a porã ha'e vy'a anho. Ha'e rã mboriau ha'e mby'a vai ma okanhymba 'rã.

* 50:1 Apy ma Israel kuery pe SENHOR ijavyu. Mba'eta SENHOR e'ỹ opoi Israel gui, ha'e rã Israel kuery ae ojevypaa rupi ojepe'a okuapy ixugui.

¹² “Xee, xee ae rombovy'a va'e. Mba'exa tu ha'vy ndee rekyje 'rã avakue omano va'erã gui rive, ha'e avakue ra'y kuery jai rogue rami okanhy va'erã va'e gui?

¹³ Mba'exa 'rã tu ndee nderexarai SENHOR nemoingoare gui? Mba'eta ha'e ae yva pyoare ha'e yvy nhonoare oiko. Mba'e re tu ndee ko'ẽ nhavõ rekyje reikovy joavyky rei va'e nhomomba aguã rami ikuai va'e poxya gui rive? Mamo tu opyta joavyky rei va'e poxya?

¹⁴ Mba'eta escravo-rã heraa pyre oipooa voi 'rã, nomanoi 'rã ha'e py, yvyra rupa py nombogiejyai 'rã ha'e py. Ha'e rami 'rãgue py ho'u va'erã ndoatai 'rã.

¹⁵ Mba'eta xee ma SENHOR Nderuete. Yai revovo onhendu aguã ye'ẽ omomyĩ va'e ma xee ae. SENHOR ixondaro reta va'e xerery.

¹⁶ Amoĩ 'rã xeavyu ndejuru py, ha'e romo'ã 'rã xepo py, yva pyau aipyo ha'e yvy pyau anhono aguã. Ha'e rami vy Sião pygua kuery pe 'Peẽ ma xevygua kuery', ha'e 'rã.”

¹⁷ Emyĩ ke, ndee Jerusalém tetã! Emyĩ ke, ha'e epu'ã ju! SENHOR po gui karo ipoxya oĩa rejopy va'ekue gui rey'u ae ma. Karo nhomoakanhymbaarã oĩa va'e gui rey'upa ma.

¹⁸ Nememby kuery, ndepi'a kuery oipooa voi 'rã, ndepi'a kuery reko'i va'ekue regua neĩ peteĩve ma nanepytvõia rupi oiko. Remongakua'i va'ekue neĩ peteĩve ma ndepo re ndojopy herekovyi.

¹⁹ Mava'e tu nemboaxyarã oĩ? Mba'eta ndere ou va'ekue mokoĩ regua: nembojexavaia ha'e nemombaa, karuai ha'e kyxe. Mba'exa tu ha'vy nembovy'aaarã noĩ?

²⁰ Mba'eta nememby kuery ha'e ndepi'a kuery ho'apa ma inhakanhy vy. Tape oĩ va'e-va'e rupi ma onheno okuapy, nhuã py guaxu ombo'a pyre rami. Mba'eta ha'e kuery re ou SENHOR poxya, Nhanderuete ijayvu eteague.

²¹ Ndee rejexavai ha'e reka'u ri teĩ vinho gui e'ỹ ta'vy. Ha'e nunga rupi endu ke pova'e nunga.

²² SENHOR Nderuete, ojeuegua kuery repya aipoe'i: “Ndepo gui aipe'a ju 'rã karo nemoakanhyarã ha'e xepoxya oĩa. Ha'e va'e gui ma nderey'uvei 'rã.

²³ Ha'e gui nembojexavai reia kuery po py ju 'rã amoĩ, ndevy pe 'Ejero'a ke, nde'áry rupi roaxa aguã', he'i va'ekue po py ae. Mba'eta renheno ramo ndekupe áry rupi ha'e kuery oguata va'ekue, yvy e'ỹ vy tape oĩ va'e rupi oguataa rami.”

52

¹ Emyĩ ke, ndee Sião tetã. Emyĩ ke, emoĩ nembaraete aguã. Ndee Jerusalém tetã iky'a e'ỹ va'e, enhemonde ke ndeao iporãve va'e py. Mba'eta ndea py ma opire omboi uka va'e e'ỹ ndoikeveĩ 'rã, neĩ ndojeky'a'o ukai va'e kuery voi.

² Enhembojaity ke yvy ku'i gui. Evy ke Jerusalém, ha'e eguapy ju einy. Eipe'a ke corrente ndeaju'y jokuaague, Sião memby escravo-rã ndererera va'ekue.

³ Mba'eta po rami SENHOR ijayvu: “Hepy re e'ỹ nevendeague rami peráta re e'ỹ ju 'rã rojogua”, he'i.

⁴ SENHOR Nhanderuete aipoe'ive ju: “Jy'py'i ma xevygua kuery Egitto yvy katy oje'oi raka'e ha'e py ikuai aguã. Ha'e gui ma Assíria pygua kuery ju mba'e py e'ỹ ombojexavai.

⁵ Ha'e gui aỹ teĩgue ju mba'e tu ha'e py oiko? Mba'eta xevygua kuery ogueraapaa rive ju hepy re'ỹ. Ijavyky reia kuery ojapukai atã okuapy. Ha'e nunga rupi xerery re ijayvu vaikue-ikuea ko'ẽ nhavõ”, he'i SENHOR.*

⁶ “Ha'e rami teĩ xevygua kuery oikuaa nho 'rã xerery. Ha'e va'e ára ma oikuaa 'rã okuapy xee 'Apy ma aĩ ha'e va'ea”, he'i SENHOR.

⁷ Iporã ete! Yvyty áry rupi mba'emo pyau mombe'ua ou jekuaa! Ha'e va'e ma omonhendu ouvy nhandekuai porã ju aguã, omombe'u iporã va'e, nhandereraa jepea regua. Ha'e vy Sião pygua kuery pe ma “Penderuete ipo'aka ma”, he'i.*

⁸ Aipo ma, peneretã rarõa kuery ojapukai nhendu. Ha'e kuery ovy'a reve ojapukai atã okuapy, mba'eta oexa Sião tetã katy SENHOR ou jevy rã.

⁹ Peporaie ke pekuapy, peẽ tekoague Jerusalém py pendekuai va'e. Pevy'a pekuapy peteĩ rami, mba'eta SENHOR ombovy'a ju ma ojeuegua kuery, oepy ma Jerusalém tetã.

¹⁰ Yvy regua kuery ha'e javi oexaa py SENHOR oupi ojyva iky'a e'ỹ va'e. Ha'e ramo yvy apy guive oexapa 'rã Nhanderuete nhandereraa jepe rã.

¹¹ Ha'e nunga rupi pejepe'a ke, pejepe'a upe gui, ha'e peju ju. Pejopy eme ha'e've'y' va'e re. Pejepe'a ke ha'e kuery mbyte gui. SENHOR pegua tembiporu peraa va'e kuery, pejeky'a'o ke.*

¹² Pejepe'a pojava rei eme guive, pejava eme, mba'eta SENHOR oo 'rã penerenonde, Israel kuery ruete penderakykue rupi avi 'rã oo penerarõ vy.

Nhanderekovia SENHOR rembiguai oiko axy aguã re ijayvuague

¹³ “Ha'e gui xerembiguai ma oiko kuaa 'rã. Ha'e ramo omboyvatea ha'e omboeteta e'ẽ 'rã, pavẽ árve 'rã oiko.

¹⁴ Ha'e rami avi heta oexa vy onhemondy'i, mba'eta pavẽ gui ombovaikueave, ava rami ve'ỹ omombytaa rã.

¹⁵ Ha'e rami ae avi yvy regua kuery áry rupi omboavy'i 'rã. Ha'e ramo huvixave kuery onhemondy'ipa vy omboty'pa 'rã ojuru, mba'eta oexa 'rã ha'e kuery pe omombe'ua va'ekue'y', ha'e oikuaa nho 'rã oendu va'ekue'y'.”*

53

- ¹ Mava'e tu oguerovia ayvu romombe'u va'ekue? Mava'e pe tu SENHOR oikuaa uka opo'akaa?*
- ² Mba'eta henonde hembiguai yvate-vateve ovy yvyra rapytakue renho'i rami, vvy piru reia py yvyra rapo gui hi'yky hoky va'e rami. Jaexa rã omboete pyrã e'y merami, na'iporã guive. Ne'i petei henda py voi no'i iporãa jarovy'a va'erã.
- ³ Oayvupy e'yve oiko, avakue pavẽ gui oipotapy e'yve ete. Ava oiko axy va'e, tekoaxy oendu jepi va'e guive. Ha'e ma avakue ndoayvuy vi ixugui ngova omo'ã okuapy. Ha'e ramo nhande voi ndajaikuaa potai va'ekue hexe.
- ⁴ Mba'eta anhetẽ ojee ae ogueraa nhandereko axykue, nhanemba'eaxy omoimba ojee. Ha'e rã nhande ma jaikuaa va'ekue ombopaga pyrã rã Nhanderuete omoingo axy ha'e ombojexavaia rami.*
- ⁵ Ha'e rami te'i nhande nhandereko vaiaty py ma oipyxoa, jajejavyague re ae omou'ũa. Hexe o'i tekoaxy nhandemoingo porãrã, ha'e oinupãa ague re vvy nhande jakuera.
- ⁶ Nhande kuery ha'e javi nhakanhymba javy vexa'i rami, petei-te'i jajepe'a va'ekue tape gui. Ha'e ramo hexe ma SENHOR omo'i nhande kuery ha'e javive reko vaiaty.*
- ⁷ Ha'e ma omoingo axya ha'e omo'yvy'i te'i ndoipe'ai ojuru. Vexa'i ojukaa aguã katy ogueraa va'e rami, vexa'i rague ayaa renonde ogueraa rã okyri'ĩ ratã'i va'e rami ogueraa te'i ojuru ndoipe'ai.
- ⁸ Anhetẽ rupi e'y oikuaa potaa reve ogueraa. Ha'e rami rã ta'y kuery re avave rei ne'i noexa'ãi. Mba'eta oikove va'e kuery ikuiaa gui oipe'aa. Xeretarã kuery ojejavyague re ae ojukaa.*
- ⁹ Ha'e hetekue ruparã ma ojoua heko vai va'ekue mbyte py, omano vvy iporiau e'y va'e revegua opyta te'i. Ha'e rami avi teko vai ndojapoi, ne'i petei henda py ma ayvu vai noenduai ijuru gui.*
- ¹⁰ Ha'e rami te'i SENHOR oipotaa rami ae omou'ũa ha'e omoingo axy uka. Ha'e ramo javegua regua ome'ẽ mbyrã guekove ome'ẽ rire oexa nho 'rã gua'y kuery, oiko pukuve 'rã guive. Ha'e ramo ipo py SENHOR oipota va'e oiko porã 'rã.
- ¹¹ Ha'e gui ojexavaiaague gui iporã va'e oiko ramo oexa vvy ovy'a vaipa 'rã. Mba'eta Xerembiguai heko porã va'e oikuaa rupi vvy heta 'rã omboeko porã, ojee ae ha'e kuery ojejavyague ogueraa rire.
- ¹² Ha'e nunga rupi heta 'rã xee ame'ẽ ixupe guarã. Ha'e ramo ipo'akapa va'e kuery mbyte omboja'o 'rã mba'emo porã, omano py guekovea ome'ẽ rire. Heko vai va'e oikoa rami jaikuaa va'ekue te'i ojee ae ogueraa heta ojejavyague, heko vai va'e kuery re ojerure guive.*

54

Sião pygua kuery ikuai porã aguã re ijavyague

- ¹ SENHOR aipoe'i: "Ndee kunha, nememby e'y va'e ae kyrĩ va'e nereikuavã va'ekue, eporaei ke revy'aa rupi. Kyrĩ va'e raxy nerendui teri va'ekue, evy'a ke reporaei reve, erojapukai. Mba'eta kunha opoi pyre rami reiko va'ekue ri nememby kuery hetave 'rã ome reve riae oiko va'e memby kuery gui.*
- ² Ha'e nunga rupi embopyve ke ndero reia renda, emoatãve ke ndero ao'ia pe'i aguã. Embotuvixa e'y eme, embopukuve ikuarã, ha'e emo'ã ratãve ke yvyra rakua ijytarã.
- ³ Mba'eta peẽ kuery penderetave 'rã peovy reiporu kuaa regua ha'e reiporu kuaa e'yã katy. Ha'e gui neremiarirõ kuery ipo'aka 'rã vvy regua kuery re, ha'e hekoa ju 'rã tetã opyta rei va'ekue py.
- ⁴ "Ekyje eme, mba'eta nanemoximbaavei 'rã. Eximba rei eme, nanemo'yvy'i'iavei 'rã. Mba'eta nderexaraipa 'rã nekunhatai jave reximba reia rupi reikoague re, imeve'y va'e rami reikoague re guive.
- ⁵ Mba'eta nemoingoare ae oiko neme, SENHOR ixondaro reta va'e ma hery. Israel kuery ruete Iky'a e'y va'e ma nderepya, 'Yvy jave regua ruete' 'epy va'e ae."
- ⁶ Nderuete aipoe'i: "Kunha opoi pyre iporiau rei va'e, ha'e kunhatai ojea pyre rami reiko va'ekue ri SENHOR nerenõ ju.
- ⁷ Xapy'a rai'i xee roeja va'ekue ri romboaxy etea rupi ju 'rã rogueru.
- ⁸ Xepoxy etea rupi ndegui xerova amo'ã xapy'a'i va'ekue ri romboaxya opa e'y va'e ju aendu", he'i SENHOR nderepya.
- ⁹ "Xevy pe rã ha'e nunga Noé oiko jave guare rami, mba'eta aura Noé oiko jave guare rami ve'y py vvy ndajao'ivei aguã re. Ha'ekue rami ae a'y ma ndevy pe ju aura ndaxeivaivei, ne'i ndorojou vaivei aguã re.
- ¹⁰ Mba'eta vvyty ikuai va'e ojepe'apa, ha'e vvy'a voi ovapa 'rã te'i romboaxya ma ndopai 'rã, ha'e ndevy pe xereve guarã ajapo va'ekue nombovaipaai 'rã", he'i SENHOR nemboaxy va'e.
- ¹¹ "Ndee Sião tetã, reiko axy ha'e nanembovy'aavei rã rejexavai rei va'ekue. Ha'e rami te'i ema'ẽ, ndea py ita oity pyre amboja'o ju vvy pytä va'e py 'rã amboja, ha'e ita safira py ju 'rã amboyta.†
- ¹² Ndea py torre ajapo ju 'rã rubi gui, kora rokẽ ma carbúnculo gui, ha'e tetã kora ha'e javi rupi ma itaendy iporãve va'e gui 'rã ajapo.
- ¹³ Nememby kuery ha'e ndepi'a kuery ha'e javi ma xee SENHOR ae 'rã ambo'e. Ha'e ramo ikuai porã 'rã opa mba'e py.*

* 53:1 João 12.38, Romanos 10.16 * 53:4 Mateus 8.17, 1 Pedro 2.24 * 53:6 1 Pedro 2.25 * 53:8 Atos 8.32-33 * 53:9 1 Pedro 2.22 * 53:12 Lucas 22.37 * 54:1 Apy ma Israel kuery ha'e Jerusalém tetã opyta rei va'ekue pe ijavy, petei kunha opoi pyre pe rami (Gálatas 4.27). † 54:11 Safira ma itaendy hovv va'e, rubi ma pytä va'e, ha'e rã carbúnculo ma pytä va'e tuvixave va'e. Ita hepyve va'e meme.

* 54:13 João 6.45

¹⁴ Teko porã rupi 'rã anhangareko ndere nemoingo axyarã va'ekue gui mombyry, ha'e ramo nderekyjevei 'rã. Nemonyiarã va'ekue gui voi mombyry 'rã reiko, ndouvei 'rã ndere.

¹⁵ Xapy'a rei ndere opu'ã va'e oiko teĩ xee ambou va'e e'ÿ 'rã. Ha'e ramo ndere opu'ã va'e oitypaa 'rã nerenonde.

¹⁶ Mba'eta xee ma ferro re omba'eapo va'e moingoare, tata py hatapyri re oipeju vy tembiporurã ojapo va'ety. Amoingo avi nhomombaara mba'emo ombovaipa agua.

¹⁷ Ha'e rã nderovai ma tembiporu revegua ou vy ndojapoi 'rã mba'eve. Ndere ijayvu rei va'e ou teĩ ndee 'rã ndepo'aka. Ha'e ramigua ma xee SENHOR ambou xerembigui kuery peguarã amboeko porã vy", he'i SENHOR.

55

Nhomboaxypa agua re ijayvuague

¹ "Peẽ kuery pendey'uvei va'e, pendu ke, ha'e peju yvu oia py pey'u. Pendeperãta e'ÿ va'eri peju pejogua ha'e pekaru. Tá, peju ke pejogua vinho ha'e kamby, perãta re'ÿ, hepy re'ÿ.

² Mba'e re tu perãta peme'ẽ 'rã temb'i'u re'ÿ? Mba'e re tu pendery'ai 'rã penembovy'aaarã re'ÿ? Pendu ke, pe'u iporã va'e. Ha'e rami vy pevy'a 'rã iporã ete va'e re.

³ Pejapyxaka porã ke, ha'e peju xea py. Pendu, peikove riae agua. Mba'eta pendevy ajapo 'rã xereve guarã raka'e rã peve guarã, ha'e romboaxy 'rã Davi pe xeayvuague rami vy.*

⁴ Mba'eta ha'e va'e ma amoĩ raka'e xepo'akaa kuaa ukaarã vvy regua kuery pe, huvixa yvateve va'e ha'e kuery re opena va'erã.

⁵ Ma'ẽ, peẽ kuery penoĩ 'rã pexa va'ety e'ÿ regua kuery. Ha'e kuery penderexa va'ety e'ÿ teĩ onha 'rã jogueruvy pendea katy. Ha'e kuery ma SENHOR Penderuete, Israel kuery ruete Iky'a e'ÿ va'e re ojerovia etea rupi ou okuapy, penemboete uka ramo."

⁶ Peka ke SENHOR ojejou uka teria ja, pejapukai ixupe ha'e'i py teri oia ja.

⁷ Tove heko vai va'e tojepe'a oikoaty gui, ojevavy rei va'e tojepe'a ha'eve'ÿa rami onhembopy'aa gui. Tojeko rerova SENHOR pe, mba'eta amboaxy 'rã. Tojevvy Nhanderuetea py, opa mba'e py joperdoa va'e ramo.

⁸ "Mba'eta xee anhembopy'aa ma peẽ kuery penhembopy'aa ramigua e'ÿ, ha'e xereko voi peẽ kuery reko ramigua e'ÿ", he'i SENHOR.

⁹ "Mba'eta vvy gui yva yvate etevea rami avi pendereko gui xereko voi yvateve, ha'e peẽ kuery penhembopy'aa gui anhembopy'aa yvateve avi.

¹⁰ Mba'eta oky ha'e yro'y yva gui ho'a vy ha'ekue katy ju ndooi 'rã vvy omoakÿ e'ÿ re, ha'e rami vy ojapo 'rã mba'emo ra'yĩ moaiare ojouve ju agua rami, ha'e mbojape ho'uxe va'e voi ojou agua rami,

¹¹ ha'e rami ae avi xeayvu xejuru gui oẽ va'e voi ndojevvy rivei 'rã xea py. Ha'e rami 'rãgue py ojapo 'rã xee aipota va'e, anhembopy'aaague ojapopa 'rã, ha'e rami agua ae ambou rire.

¹² "Ha'e rami rã peẽ kuery peo 'rã pevy'a reve, pendekuai porã'ia rupi roguereko 'rã heravy. Penerenonde vvyty ha'e vvy'ã ikuai va'e porae onhendu 'rã, vvyra ikuai va'e voi ojekopete 'rã okuapy.

¹³ Ha'e gui juu'y ikuaiague py vvyra tuvixa va'e henhoi 'rã, jai rogue rekovia henhoi 'rã murta.* Ha'e nunga ma SENHOR re ima'endu'a porã ha'e omboetea agua oiko 'rã imarã e'ÿ va'e, raka'e rã peve guarã."

56

Judeu e'ÿ va'e kuery avi oenoĩ agua re ijayvuague

¹ SENHOR aipoe'i: "Teko porã rupi ete ke peiko, anhetẽ rupi pendekuai, mba'eta rogueraa jepea ovaẽ rai'i ma, xeguigua teko porã ojekuaa rai'i ma.

² Ovy'a ete 'rã avakue ha'e rami ikuai va'e, avakue ra'y kuery ha'e nunga re oĩ atã va'e, sãbado ára omongy'a rei e'ÿ agua ojevoko, ha'e opo py mba'emo vai ojapo rei e'ÿ va'e."

³ Amboae vvy guigua SENHOR re onhemboja va'e aipo te'i eme: " SENHOR xepe'a 'rã ojeupegua kuery mbyte gui." Neĩ eunuco voi ojeupe "Yvyra pirukue rami rive aiko", te'i eme.*

⁴ Mba'eta SENHOR aipoe'i: "Eunuco teĩ xeivygua sãbado ára nhavõ xemboetea rupi oiko, xee aipota va'e ojee omoĩ ha'e xereve guarã ajapo va'ekue rupi oiko ramo

⁵ xero py ajapo 'rã ha'e va'e re ima'endu'a porã agua rami, xero korapy py, ha'e ixupe ame'ẽ 'rã peteĩ tery gua'y ha'e guajy kueryrã va'ekue gui oguerovy'ave va'erã. Ha'e kuery peteĩ-teĩ pe ame'ẽ 'rã heryrã imarã e'ÿ va'e, ivaipa va'erã e'ÿ.

⁶ Ha'e gui amboae vvy regua teĩ SENHOR omboete agua onhemboja, ha'e SENHOR rery omboetea rupi hembiguarã ikuai agua, tá, sãbado ára omongy'aa rupi e'ÿ omboete, ha'e xereve guarã ajapo va'ekue rupi ikuai ramo

⁷ ha'e kuery voi xee araa 'rã xeivygua vvyty iky'a e'ÿ va'e py, ambovy'a 'rã xeivygua oo onhembo'eaty py. Ha'e ramo ha'e kuery ome'ẽ 'rã mba'emo ogueru va'e, ha'e xee ajou porã 'rã xeivygua altar áry mba'emo ha'e kuery ome'ẽ va'e. Mba'eta xeivygua oo pe ma 'Yvy regua kuery ha'e javi onhembo'e atyrã oĩ, 'ea 'rã."†

* 55:3 Atos 13.34 * 55:13 Murta ma vvyra tuvixa va'e ovareve va'e. * 56:3 Eunuco ma tembiguai oa'yjy pyro. Ymave rupi eunuco ha'e amboae vvy guigua kuery ma nda'evei va'ekue Nhanderuete pegua kuery mbyte py ikuai agua (Deuteronomio 23.1-3). Aÿ gui ma ha'eve, apy ijayvua rami. † 56:7 Kova'e avyu rupi Jesus ijayvu Mateus 21.13, Marcos 11.17 ha'e Lucas 19.46 py.

⁸ Israel kuery opa rupi oaimba va'ekue SENHOR Nhanderuete omboaty ju vy aipoe'i: "Xee amboatyve ju 'rã, ono'õ ma voi okuapy va'ekue amboetave vy", he'i.

Israel kuery rerekoa kuery ára revegua e'ÿ rami ikuaiã re ijayvuague

⁹ Peẽ mymba jai rupi pendekuai va'e, ha'e ka'aguy rupigua inharõ va'e, peju ke pekaru.

¹⁰ Mba'eta ha'e kuery retã rarõa kuery ma ára revegua e'ÿ rami meme ikuai, mba'eve ndoikuai. Jagua onhe'ẽ e'ÿ va'e ikuai va'e meme, onhe'ẽ aguã nda'evei va'e. Ha'e kuery ma oexa ra'ua re rive 'rã ikuai, inhate'ÿ vy okexe vai va'e.

¹¹ Ha'e kuery regua ma jagua rami ho'upa rei va'e guive, okaru teĩ naevyatã 'rã. Joe opena va'e mba'eve oikuaa va'e'ÿ ikuai. Peteĩ-teĩ oiko 'rã ha'e ae oipotaa rami, peteĩ-teĩ ojoupavexea rupi rive 'rã oiko, ha'e rami ikuai va'e ma guive rã.

¹² Ha'e kuery joupe-upe aipoe'i 'rã: "Peju ke, aru 'rã vinho irove va'e jaka'u aguã. Ha'e gui ko'ẽ rã ange guare rami ae ju 'rã nhandekuai, ha'e rami e'ÿ vy jaka'upave 'rã", he'i okuapy.

57

Mba'emo ra'angaa mboetea rupi Israel kuery ikuaiã re ijayvuague

¹ "Heko porã va'e kuery omano teĩ avave rei ndoiko ha'e nunga re oikuaa pota va'e. Avakue ojeroviapy heraa ramo avave rei noexa'ãi 'rã ha'e nunga re, mba'eta heko porã va'e kuery ranhe 'rã heraa nhomoiingo axyarã ou e'ÿ re,

² Ha'e ramo oike 'rã mby'a porã oendu aguã py. Mba'eta teko porã rupi ikuai va'ekue opytu'u 'rã ngupa rupi.

³ "Ha'e gui peẽ kunha imba'evyky va'e pi'a kuery, peju ke apy, itavy rei rã ojavyky reipy pi'a kuery.

⁴ Mba'exagua tu pembojaru rei pekuapy? Mba'exagua rovai tu peipe'a pendejuru, ha'e pendeayvu rei? Peẽ kuery tu teko vai ha'e apu guigua meme.

⁵ Peẽ kuery ma tavy reia rupi anho pendekuai yvyra hogue ana va'e mbyte rupi. Ha'e py ma pendera'y kuery ae pejuka uka 'rã yvyguga oĩ va'e py, ha'e itaova pa'ũ rupi.

⁶ Ha'e rami vy ita xyĩ rei va'e mbyte rupi pendereko rami ae 'rã pendekuai. Ha'e va'e áry ae avi penhoẽ 'rã heakuã porã va'e, ha'e ta'angaa pe rive peme'ẽ 'rã mba'emoaju. Xee nda'u arovy'a 'rã ri ha'e rami pendekuaia?

⁷ Ha'e gui yvyty yvateve va'e áry remoĩ 'rã nderupa. Ha'e katy ju reẽ 'rã ta'angaa pe mba'emo reme'ẽ aguã.

⁸ Nerokẽ kupe ha'e okenda rupi rembopara 'rã nda'evei ete va'e py. Ha'e gui remoatã 'rã nheovãa, ha'e rejeupi 'rã tupa py, rembopy 'rã ndetavy aguã. Ha'e kuery reve pejogueroayvu 'rã reipota va'e re. Ha'e vy 'Nhandetavy ha'vy' 're vy rema'ẽ 'rã ipire reia re.

⁹ Ha'e gui huvixavea py reo 'rã mba'emo kyra ha'e heakuã porã va'e reme'ẽ va'erã reve. Ha'e gui mombyry katy 'rã remondouka ndeayvu reraarã, yvyra rupa peve.

¹⁰ Mombyry ete reguata vy nekane'õ teĩ 'Ovare va'e'ÿ ma ta'vy ajapo', nderei 'rã. Mba'eta rejou 'rãe reka va'e. Ha'e nunga rupi ae nanekangyi 'rã.

¹¹ "Ha'e gui mava'e gui nda'u rekyje, apu rupi reiko aguã? Mba'eta nanema'endu'ai xere, xereko re ndereikuua potai guive. Yma guive akyrirĩ teve xerenonde nderejererokyjei aguã?

¹² Xee aikuaa ukapa 'rã ha'e rami ete reikoa. Ha'e ramo nerembiapokue ma mba'everã ndovarei 'rã ndevy.

¹³ Rejapukai ramo tove mba'emo ra'angaa rereko va'e ae tandereraa jepe! Ha'e nunga ma yvyty rive 'rã ombovepea heravy, peteĩgüe'i oipeju teĩ ogueraapa vyvoi 'rã. Ha'e rã xere ojerovia va'e kuery pe ma yvy ame'ẽ 'rã imba'erã, ha'e ramo hekoa 'rã xevygua yvyty iky'a e'ÿ va'e áry."

Ojeko rerova va'e kuery ikuai porã aguã re ijayvuague

¹⁴ Aipo'ea 'rã: "Pembojoja ke taperã, pembojoja ha'e pereko katu, xevygua kuery renonde gui peipe'apa onhepyxanga aguã oĩ va'ekue."

¹⁵ Mba'eta po rami ijayvu Yvate ete va'e, Ipo'akapa va'e, Hi'amba marã e'ÿ va'e, Iky'a e'ÿ va'e hery va'e. Ha'e vy aipoe'i: "Xee ma yvate ete iky'a e'ÿ py aiko va'e. Aiko avi iporiau rei ha'e ikangy va'e reve, ambopy'a guaxu aguã ikangy va'e, ha'e ambovy'a ju aguã iporiau rei va'e.

¹⁶ Mba'eta riaa e'ÿ 'rã xee ajojou vai, ndaxepoxy riaei 'rã guive. Mba'eta ha'e rami aiko va'e rive ha'e kuery nhe'ẽ ikangy va'e ho'apa 'rãgue xerenonde, ha'e xee amoingo va'ekue pytueã opa 'rãgue.

¹⁷ Heta va'e kuery mba'emo oipotapa reia rupi ikuai ramo ma xepoxy vy amoingo axy va'ekue. Ha'e rami vy xerova amo'ã, xepoxy teĩ xenhe'ẽ rendu e'ÿ va'e ma ha'e kuery ae oipotaa rami rive ikuai.

¹⁸ Ha'e kuery ikuaiã aexa teĩ amonguera 'rã. Ha'e vy areko ha'e ambovy'a ju 'rã ojae'o okuapy va'e.

¹⁹ Ha'e kuery xeroporai ramo ame'ẽ 'rã mby'a porã. Mby'a porã ame'ẽ 'rã mombyry ikuai va'e pe, ha'e'i py ikuai va'e pe guive. Ha'e rami vy xee amongerapa 'rã", he'i SENHOR.

²⁰ "Ha'e rã heko vai va'e ma ye'ẽ omyĩ va'e rami ikuai. Mba'eta ha'e nunga ndopytu'ui 'rã, yy ojegui ae omombo 'rã yapo ha'e iky'akue.

²¹ Ha'e rami vy heko vai va'e re ma noĩ 'rãe mby'a porã", he'i Nhanderuete.

58

Ha'eeva rami okaru e'ÿ re ikuai aguã re ijayvuague

¹ "Ejapukai atã, ejejoko eme, ejapukai mimby guaxu rami. Xevygua kuery pe eikuaa uka heko vaia, Jacó kuery pe emombe'u ojevava.

² Ha'e rami ete ikuai teĩ xereka merami 'rà ko'ê nhavõ. Ovy'a merami xeivygua tape oikuaa vy teko porã rupi ikuai va'e rami teĩ, ha'e nguete reko gui ndojepe'ai va'e rami. Ha'e rami vy xevy oporandu 'rà teko porã re, onhemboja merami xee Nguete va'e re.

³ Ha'e rami vy aipoe'i 'rà: 'Mba'e re tu rokaru e'ÿ re orekuai teĩ ndee ndereikuaa potai? Mba'e re tu orenhe'ê py rojexavai ramo ndee ndexera potai ri?' he'i okuapy. Mba'eta peẽ kuery pekaru e'ÿ re pendekuaia ára peẽ ae peipota va'e re rive 'rà pepeña, ha'e pejapopa 'rà penerembiaporã oĩ va'e.

⁴ Ha'e rami vy pejoguero'aa rupi rive 'rà pendekuai pekaru e'ÿ re, penhomotare'ÿ, ha'e pendepo iky'a va'e py pejojuka agua. Aÿ ha'e rami ete pekaru e'ÿ re pendekuai ramo pendea'yvua noenduai 'rà yva re.

⁵ Ha'e rami ete ri nda'u pekaru e'ÿ re pendekuai agua xee aeja raka'e? Mba'eta petei'i ára re avakue ojexavai 'rà onhe'ê py, oakã oity 'rà jai rogue rami, ha'e oguýry rupi oipyo 'rà ajukue voxa guigua tanhimbu reve. Ha'e ramia pe ri nda'u 'Jakaru e'ÿ re nhandekuaia ára SENHOR nhandejou porã 'rà', peje?

⁶ "Ha'e rami 'ràgue py po rami agua e'ÿ teve pekaru e'ÿ re pendekuai agua aeja raka'e? Teko vai py ojokua pyre pepoi agua e'ÿ teve, ha'e tembiguai jokuaa pejora agua, ombojexavaipy peraa jepe, ha'e petei-teĩ oguereko axya pemomba agua e'ÿ teve?

⁷ Okaruxe va'e pe mbojape pemboja'o agua e'ÿ teve, ha'e pendero py iporiaukue hoo e'ÿ va'e pemovaẽ agua, ipire rei va'e pexa vy penomhemonde, ha'e peẽ ramigua gui napenhemi agua e'ÿ teve?

⁸ Ha'e rami ri pekaru e'ÿ re pendekuai ramo penerexakãa ojekuaa porã 'rà ko'ê rami, ha'e are e'ÿ re pekuera agua avi 'rà ojekuaa. Penderoko porãa ojekuaa 'rà penerenonde, ha'e penderakykue ma SENHOR guexakãa rupi onhangareko 'rà pendere.

⁹ Ha'e ramo pejapukai ramo SENHOR ombovai 'rà. Pendereraa jepe agua re pejapukai ramo 'Apy ma aĩ', he'i 'rà. Xapy'a rei penembyte gui peipe'a ramo pejoguereko axya, penhomongyie reia ha'e ayvu rei guive,

¹⁰ xapy'a rei okaruxe va'e pe mba'emo pemboja'o agua pendepy'a re pemoĩ, ha'e ojexavai rei va'e pemoevyatãmba agua, ha'e ramo ma penerexakãa ojekuaa 'rà pytũa py, pendea py pytũa oĩ va'ekue ma kuaray mbyte rami 'rà hexakã.

¹¹ Ha'e ramo SENHOR penderereko riae 'rà, penemoevyatã 'rà tekoa e'ÿa py teĩ, ha'e omombaraetepa 'rà penekãgue. Peiko porã 'rà vyotyty omoaký riaeipy rami, ha'e yvu peteigieve ma ipiru e'ÿ va'e rami avi.

¹² Ha'e gui penda'y kuery ju omoatyrõ 'rà tekoa ivaipa va'ekue. Pemboyta pyau ju 'rà oo ymague. Pendevy aipoe'ea 'rà 'Kora pa ñũ moatyrõa', ha'e 'Tekoa ha'e tape ymague mbopyaua', 'ea 'rà.

¹³ "Xapy'a rei sãbado ára penhomongy'aa gui pejejoko, ha'e mba'emo peẽ ae pejapoxe va'e pejapoa gui xeivygua ára iky'a e'ÿ va'e py, ha'e rami 'ràgue py sãbado ára pe 'Iporã ete SENHOR ára iky'a e'ÿ va'e nhamboete agua' peje ramo, ha'e pendekuaiaty rami ve'ÿ xemboete ramo, peẽ ae peipotaa rami ve'ÿ pendekuai agua, neĩ ayvu reko rei py voi pendea'yvu e'ÿ agua,

¹⁴ ha'e rami 'rà xee SENHOR re ae 'rà pevy'a. Ha'e ramo xee ajapo 'rà vyvity yvate va'e re peẽ peovy agua rami, ha'e romombaraete 'rà peneramoĩ Jacõ peguarã ame'ê va'ekue re", he'i. SENHOR ojuru py ae ijavyu.

59

Israel kuery reko vaia re ijavyuague

¹ SENHOR po ma ijapu'a'i va'e'ÿ pendereraa jepe e'ÿ agua, nda'ijapyxa ve'ÿi guive pendea'yvua oendu e'ÿ agua.

² Ha'e rami 'ràgue py pejejavya rima penemboja'o Nhanderuete gui, pendereko vaia ae ojapo pendegui ngova omo'ã agua rami, pendea'yvua oendu e'ÿ agua.

³ Mba'eta pendepo huguypa riae, ha'e penekua re ma pejejavya anho oĩ. Pendejuru ma apu rupi 'rà ijavyu, ha'e peneapekũ re ma teko vai anho 'rà oĩ.

⁴ Mba'eta avave rei ndoikoi teko porã re ojapukai va'erã, ndoikoi anhetẽa rupi ojexa uka va'erã huvixa kuery renonde. Ha'e rami 'ràgue py ovare e'ÿ va'e re rive ojerovia, ijapu rei 'rà okuapy. Ojejavy agua tema oguereko'i 'rà, ha'e teko vai ju oikuavã.

⁵ Omboaku 'rà mboi rupi'a, ojapo 'rà nhandu kya. Hupi'a ho'u va'e omano 'rà, ha'e hupi'a re opyrõa ramo oiko 'rà mboi.

⁶ Ha'e gui iky'a ojapo va'ekue ma ndovarei 'rà aorã, mba'eta ha'e kuery rembiapo py avave rei nonheovãai 'rà. Ha'e rami 'ràgue py ha'e kuery rembiapo ma teko vai anho, ha'e ipo re ma jojukaague oĩ.

⁷ Ipy ma onha 'rà ojejavy agua katy, ojapura 'rà heko porã'i va'e ruguyo omoẽ agua. Ha'e kuery ma teko vairã re rive 'rà ipy'a. Ha'e kuery ikuai rupi ma nhomombaague ha'e jojukaague anho oĩ.

⁸ Ndoikuaavei ma tape petei rami ikuai agua katy oo va'e, teko porã noĩ avi 'rà ikuai re. Ha'e kuery ma teko vai rupi rive ikuai. Ha'e va'e rupi ikuai va'e ma ndoikuaai 'rà mby'a porã.*

⁹ Ha'e nunga rupi rima nhandegui momybyry oĩ anhetẽ rupi jajoguerekoa, teko porã voi nanhanderovyi. Nharõ tema hexakãa, ha'e rami teĩ pytũ anho oĩ. Hexakãa rupi 'ràgue py pytũa rupi nhandekuai.

¹⁰ Oo mbotya rupi japovyvya rupi jaiko, ára revagua e'ÿ rami avi, hexa e'ÿ va'e rami japovyvy jaikovy. Kuaray mbyte teĩ nghanhepyxanga 'rà javy pytũ rupi rami. Imbaraetekue mbyte rupi teĩ omanogue rami jaiko.

¹¹ Nhande kuery ha'e javi nhakororõ 'rà urso rami, ha'e apyaxu rami 'rà nghanepoaẽ rei. Anhetẽ rupi joguerekoarã nharõ teĩ ndajajoui. Jaa jepe agua jaeka teĩ momybyry oĩ nhandegui.

¹² Mba'eta nerenonde ma rojejavyague heta-etave ovy, orereko vaiaty ma orekuua ukaarã oĩ, mba'eta orere oĩ 'rà orereko vaiaty anho, roikuaa guive rojejavya.

* 59:8 Romanos 3.15-17

¹³ Mba'eta SENHOR rovai jajekore ha'e nhandeapu 'rã. Jajep'e'a Nhanderuete gui, nhandeayvu 'rã nhandombojexavai ha'e nhande'ê raxave aguã re anho. Nhandep'y'a re nhamoia rami apu rupi anho 'rã nhandeayvu.

¹⁴ Ha'e nunga rupi ae anhetê rupi jajoguereko aguã ojep'e'a, teko porã ma mombyry oĩ. Mba'eta anhetê va'e ma onhepyxangapa oikovy nhanderetã mbyte rupi, ha'e teko porã ma nda'evei ovaê aguã.

¹⁵ Tá, anhetê va'e ma okanhy. Ha'e gui teko vai rupi oikoa gui ojep'e'a va'ekue ma ojuka pyrã ikuai. Ha'e ramo SENHOR ma ha'e rami nhandekuaia oexa vy ndojou porã, teko porã noĩ rã.

¹⁶ Joepyrã SENHOR oeka teĩ ndojoui, onhemondyĩ guive nhandere ojerure va'erã ndoikoi rã. Ha'e ramo ha'e ae onhemoi ojyva py nhandereraa jepe aguã, gueko porã rupi ae imbaraete.

¹⁷ Ha'e rami vy pexo regua py rami onhemonde teko porã py, ha'e oakã re ma ngora ratã rami omoi jogueraa jepea. Ha'e vy ao rami omoi joepya rupi oiko aguã, ha'e ajukue puku py rami onhemonde ikyre'ya py.

¹⁸ Ha'e rami vy nhombopaga 'rã petei-teĩ ikuaiague rami. Opoxya oexa uka 'rã hexe ija'e e'y' va'e kuery pe, ngovaigua kuery ombopaga 'rã ha'evea rami. Ye'ê yvýry rupi ikuai va'e voi ombopaga avi 'rã.

¹⁹ Ha'e rami vy kuaray oikoa katygua kuery SENHOR rery oendu vy ojererokyjea rupi 'rã ikuai, ha'e kuaray oua katygua kuery ma oexa 'rã hexakãa. Mba'eta yy oxyry atã xapy'a va'e rami 'rã ou, SENHOR guigua Nhe'ê ombou va'e.

²⁰ SENHOR aipoe'i: "Ha'e gui ma Sião py ou 'rã joepyrã, Jacó regua kuery ojeko rerova va'ekue ikuai py 'rã ou.

²¹ Ha'e gui xee ma po rami 'rã ajapo xereve guarã ha'e kuery pe. Mba'eta xeguigua Nhe'ê pendere oĩ va'e, ha'e xeyvu pendejuru py amoĩ va'ekue ma ndojepe'ai 'rã. Neĩ pendera'y kuery gui, neĩ pendera'y ra'y kuery gui voi ndojepe'ai 'rã, aỹ guive raka'e rã peve", he'i SENHOR.*

60

Jerusalém pyau hexakãmba va'e re ijayvuague

¹ "Epu'ã ke, enhemoexakã uka, mba'eta nemoexakãarã ou ma oiny, SENHOR rexakãa ojekuaa ma nde'áry.*

² Mba'eta ma'ê, yvy re pytũ anho oĩ, yvy regua kuery áry oĩ pytũ reia. Ha'e rã nde'áry rupi ma SENHOR omoexakãmba ma, nde'áry hexakãa ojekuaa.

³ Ha'e ramo nemoexakãa katy yvy regua kuery oupa 'rã, huvixave kuery voi ou 'rã hexakã va'e ndea py ojekuaa va'e katy.

⁴ Ema'ê ke ndeyvýry rupi rexa aguã. Mba'eta kova'e kuery ono'õmba va'e ha'e javi ma ou ndea py. Ndepi'a kuery ou ju 'rã mombyry gui, nememby kuery voi oguerua 'rã ojyva áry.

⁵ "Ha'e nunga rexa vy revy'a ete 'rã. Revy'aa rupi ndepy'a tytypa ha'e ndepy'a guaxu 'rã, mba'eta ye'ê rupi mba'emo porã ikuai va'ekue oguerupaa 'rã ndevy, ha'e yvy regua kuery mba'emo oguerokopa va'ekue oguerupa 'rã ndea py.

⁶ Mymba camelo heta ou vy omonyê 'rã nderekoa rupi, camelo iporãve va'e Midiã ha'e Efa guigua. Sabá pygua kuery voi oupa vy ogueru 'rã ouro ha'e heakuã porã va'e. Ha'e rami vy oguerovy'a 'rã okuapy SENHOR. ⁷ Ndea py oguerua avi 'rã vexe'i kuery Quedar yvy gui. Nerymbarã oguerua 'rã vexe'i ava Nebaiote gui. Ha'e rami vy xemoetea rupi oguerupaa 'rã xevyguia altar peve. Ha'e nunga py amboete ukave 'rã xevyguia oo xerexakãa oia.

⁸ "Mba'exagua nda'u ou arai yvate rupigua rami, e'y' vy apyaxu guaity katy oveve va'e rami?†

⁹ Mba'eta anhetê ye'ê yvýry ikuai va'e kuery xerarõ avi okuapy. Jypy'i ma Társis guigua kanoã ranhe ou ndepi'a kuery ha'e nememby kuery mombyry gui ogueru va'e. Ha'e kuery reve ndea py ogueru avi 'rã ouro ha'e prata ogueroko va'ekue, SENHOR Nhanderuete, Israel kuery ruete Iky'a e'y' va'e rery omboetea rupi, nemoexakãmba rire.

¹⁰ "Ha'e gui amboae regua kuery omoatyrõ 'rã tetã kora ndevy, huvixave voi onhemoingo 'rã nerembiguairã. Mba'eta xepoxya rupi rombopaga va'ekue teĩ roayvua rupi ju romboaxy.

¹¹ Neretã kora rokê ikuai va'e ojep'e'a riae 'rã. Ara py ha'e pyávy teĩ nonhemboty'i 'rã, ndea py yvy regua kuery mba'emo porã ogueru aguã. Ha'e nunga reve ndevy ogueru avi 'rã nguvixave kuery.

¹² Ha'e rã amongue yvy regua, e'y' vy tetã pygua ndevy ndoikoi va'e ma omombaa 'rã. Ha'e va'e tetã ombovaipaa katuí'i 'rã.

¹³ "Lfbano yvy gui yvyra porãgueve oguerua 'rã ndea py: cipreste, olmeiro ha'e buxo oguerua 'rã xevyguia henda iky'a e'y' va'e ombojegua aguã. Ha'e rami py ajapo 'rã xepy renda iporã ete aguã rami.

¹⁴ Ndea py jogueru avi 'rã nembobjexavaiare ra'y kuery. Ndepy yvýry ndere nda'ija'e va'ekue ojero'a reve 'rã onhemboja okuapy, ha'e guenapy'ã re oĩ 'rã ngova yvy re omovaê reve. Ha'e rami vy ndevy pe 'Sião tetã SENHOR pegua, Israel kuery ruete Iky'a e'y' va'e oia', he'i 'rã okuapy.

¹⁵ "Hexarai reipy ha'e oejia reipy reiko va'ekue, ha'e ndea rupi avave rei ndoaxaai va'ekue. Ha'e rã xee ma ndere amoĩ 'rã hexakãa imarã e'y' va'e, neremiarirõ jevy-jevuy ikuai va'erã va'e ndererovy'a okuapy aguã rami.

¹⁶ Rey'u 'rã yvy regua kamby, huvixa kunhague ae 'rã nemokambu. Ha'e ramo reikuaa 'rã xee SENHOR ae ndereraa jepea aikoa, nderepya ha'e Jacó kuery ruete ipo'akapa va'e.

* 59:21 Romanos 11.26-27

* 60:1 Apy ma Jerusalém tetã pe ijayvu petei kunha pe rami, capítulo 54 py oia rami avi.

† 60:8 Apy ma

¹⁷ Ha'e gui ndea py overa va'e oñague py aru ruka 'rã ouro, ferro rekovia ma prata 'rã aru ruka, vyvra rekovia ma overa va'e, ha'e ita rekovia ma ferro 'rã aru ruka. Ha'e gui ndere oikuaa pota va'ekue rekovia ma amoi 'rã mby'a porã, nembopagaare kuery rekovia ma teko porã 'rã oĩ.

¹⁸ Ha'e gui ndevyvy rupi noenduavei 'rã jujukaa, nhombobaa, neĩ ombovaipa pyre. Ha'e rami 'rãgue py neretã kora pe 'Jogueraa jepea' 'ea 'rã, ha'e rã tetã rokẽ pe ma 'Mboraei rokẽ' 'ea 'rã.

¹⁹ Ha'e gui ara py kuaray naexakãvei 'rã nde'áry, jaxy voi nanderexapevei 'rã. Mba'eta SENHOR ae 'rã oĩ nemoexakãrã opa e'ỹ va'e, Nderuete oĩ 'rã nerexakãrã.

²⁰ Ha'e rami vy nde'áry rupi kuaray ndoikevei 'rã, ha'e jaxy ndopave ovyi 'rã. Mba'eta SENHOR ae 'rã oĩ nemoexakãrã opa e'ỹ va'e, ha'e rã ndeporiau reia ára ma opa 'rã.

²¹ Ndea pygua kuery ma heko porã va'erã meme, ha'e hekoa 'rã vvy re. Ha'e kuery ikuai 'rã vyvra renhoĩ xee anhotỹ va'ekue rami xepo py ae amoingo rire, xemboete pavẽ aguã.

²² Ha'e kuery va'e regua mbovyve'i va'ekue hetave 'rã mil ikuai peve, ha'e ikangyve va'ekue oiko 'rã imbaraeteve va'e. Ha'e rami aguã xee SENHOR ajapopa vyvoi 'rã hi'ára py porã."

61

Jogueraa jepea regua ayvu porã rupi ijayvuague

¹ "Xere oĩ SENHOR Nhanderuete Nhe'ẽ, mba'eta SENHOR xemoĩ ojexavai rei va'e pe ayvu porã amombe'u aguã. Xembou ikuraxõ raxy vaikue rei va'e amonguera aguã, nhuã py omboty pyre pe amombe'u aguã oo jepe ju aguã, ha'e oipokua pyre ajorapa ju aguã,*

² SENHOR nhomboaxy aguã va'e ma'etỹ ovaẽ 'rãaa amombe'u avi aguã, Nhanderuete nhombopaga aguã ára ovaẽ 'rãa guive amombe'u aguã, ha'e gui ojae'o va'e kuery ambovy'apa ju aguã,

³ ha'e Sião tetã py iporiaupa rei va'e kuery re tanhimbu 'rãgue py amoi aguã coroa iporãve va'e, texay 'rãgue py azeite imbovy'arã, mby'a vai 'rãgue py xererovy'aa py amonhemonde aguã, ha'e kuery pe 'Yvyra imbaraetekueve va'e teko porã kuaa ukua, SENHOR onhotỹ va'ekue omboete pavẽ aguã, 'ea aguã rami.

⁴ "Ha'e kuery omoatyrõmba ju 'rã tetã ymague ombovaipa pyre, ojapo ju 'rã ymave rupi oity pyre, ha'e omoatyrõmba 'rã tetã ivaipa va'ekue-'ekue, yma guive ombovaipa pyre.

⁵ Pexa va'ety e'ỹ pendevy ojexa uka jogueruvy vy opena 'rã penerymba kuery re. Amboae vvy regua kuery omba'epo 'rã pendevy mba'ety ha'e uvaty rupi.

⁶ Ha'e vvy pendevy 'SENHOR pegua sacerdotẽ kuery' ha'e 'Nhanderuete rembiguai' 'ea 'rã. Pe'u 'rã vvy regua kuery rembi'u iporãve va'e gui, ha'e penhembojegua 'rã mba'emo porãgueve oguereko va'ekue py.

⁷ Pexĩmba 'rãgue py penemboeteave 'rã, ha'e penembojarua rei 'rãgue py pevy'a 'rã pendevy guarã oĩ va'e re. Ha'e nunga rupi pendevyvy re pendekuaia py hetave ete 'rã pereko mba'emo, pevy'a riae 'rã pekuapy guive.

⁸ Mba'eta xee SENHOR ayvu anhetẽ rupi joguereko va'e, ha'e rã imondaa rupi heko vai va'e ma ajou vai. Ha'e rami vvy xevyguã kuery pe ame'ẽ 'rã ixupe guarã, ha'e kuery pe ajapo avi 'rã xereve guarã imarã e'ỹ va'e.

⁹ Hamymino kuery voi omboete pavẽ 'rã vvy regua kuerya rupi, mba'eta hexaa kuery ha'e javi oikuaa 'rã SENHOR ra'y kuery omoingo porã va'ea."

¹⁰ Xee arovy'a vaipa SENHOR, xenhe'ẽ py avy'a ete Nhanderuete re, mba'eta xemonhemonde ao jogueraa jepea regua py, ao puku py rami xemonheovã teko porã py, ava omenda va'erã onhemotyrõ porã va'e rami, ha'e omerã oarõ va'e iporã va'e py anho onhembojegua va'e rami.

¹¹ Mba'eta vvy re mba'emo roky, ha'e vyotyty rupi onhotỹ mbyre henhoĩa rami ae avi SENHOR Nhanderuete omoingo 'rã teko porã ha'e mboraei, vvy regua kuery ha'e javi oexaa py.

62

Jerusalém tetã re SENHOR omenda va'erãa rami ijayvuague

¹ Sião tetã re xea'e vy nakyrirĩ 'rã hexe ajerurea gui, Jerusalém re xea'e vy ndapytu'ui 'rã heko porãa overa va'e rami ojekuaa e'ỹa ja, ha'e oo jepea tataendy rami ojekuaa peve.

² Mba'eta vvy regua kuery oikuaa pavẽ 'rã ndereko porãa, huvixave kuery voi oexa 'rã nerexakãa. Ha'e vy nemboerya 'rã tery pyau SENHOR ae oikuaa uka va'erã py.*

³ SENHOR po py reiko vy coroa hexakãmba va'e rami 'rã reiko, Nderuete po py vy akã pyxia huvixave pegua rami 'rã reĩ.

⁴ Ndevy aipo nda'eavei 'rã "Oejapa reipy", neĩ ndevyvy pe voi "Ombovaipa pyre" nda'eavei 'rã. Ha'e rami 'rãgue py ndevy aipo'ea 'rã "Oguerovy'apy", ha'e ndevyvy pe ma "Omenda va'e" 'ea 'rã, mba'eta SENHOR ovy'a 'rã ndere, ha'e ndevyvy re omenda va'e rami 'rã oiko.

⁵ Mba'eta kunhataĩ re ava omendaa rami avi ndepi'a kuery hekoa 'rã ndere. Gua'yxyrã ava oguerovy'aa rami avi Nderuete ndererovy'a 'rã.

⁶ Jerusalém tetã, ndevyguã kora áry xee amoi 'rã harõarã. Ha'e kuery ma nokyrirĩ 'rã ára pukukue neĩ pytũ mbukukue re. Peẽ SENHOR pemoma'endu'a va'e voi pepytu'u eme ixupe pejapukaia gui,

⁷ pemombytu'u uka eme guive Jerusalém tetã ombopyau e'ỹa ja, vvy regua kuery ogueroporaẽ aguã rami.

* 61:1 Apy ma "Xee" he'ia py SENHOR rembiguai jaikuaa. Ha'e gui kova'e ayvu rupi Jesus ijayvu ojexa ae, Lucas 4.16-21 py.

* 62:2 Apy

"Ndee" he'ia ma Jerusalém tetã re ijayvu vy.

⁸ Po rami SENHOR oura opo oiporu kuaa regua ha'e ojyva ipo'akapa va'e rupi ae. Ha'e vy aipoe'i: "Aÿ gui ma mba'emo ra'yí remono'ô va'ekue namboaxavei 'rã nderovaigua kuery pe ho'u aguã, neĩ amboae vvy regua pe voi nday'u ukavei ma 'rã vinho remba'eapo vvy rejapo va'ekue.

⁹ Ha'e rami 'rãgue py mba'emo ra'yí mono'bare kuery ae 'rã ho'u, SENHOR ogueroporaie reve. Ha'e uva po'oare kuery ae 'rã oy'u tykue, xevygua oo iky'a e'ÿ va'e roka py", he'i.

¹⁰ Tapeo, peẽ ke tetã rokê oĩ va'e rupi, ha'e pereko katu tape heta va'e kuery ou aguã. Pembojojapa ke tape, pemboa'eve ita gui. Ha'e gui pemopu'ã bandeira vvy regua kuery oexa pavẽ aguã.

¹¹ Mba'eta vvy apy peve SENHOR omonhendu 'rã pova'e avyu. Aipopeje ke Sião memby kuery pe: "Upe ma ou pendereraa jepearã. Pendeivy guarã ogueru, henonde oguerua peikoague rekovia", peje.

¹² Ha'e ramo pendeivy "Iky'a e'ÿ va'e regua SENHOR ogueraa jepe va'ekue" 'ea 'rã. Ha'e gui Sião, ndevy pe ma "Oipotapy" ha'e "Tetã tekoague rei e'ÿ", 'ea 'rã.

63

Nhanderuet e ojeuegua kuery oepy aguã re ijayvuaque

¹ Mava'e nda'u peva'e Edom vvy gui guexakãa rupi ou va'e? Mava'e nda'u Bozra tetã gui ou ao omopytãmba pyre py onhemonde reve, ombaraetea rupi uguata va'e?

"Xee ma teko porã rupi xeayvu, ha'e ajogueraa jepe aguã xepo'akapa va'e", he'i.

² Mba'e re tu ha'vy renhemondea pytãmba rei, uva ombiria rupi ikuai va'e rami ndeao pytãmba?

³ "Mba'eta uva aumbiria rupi xee ae'i apyrõ aikovy va'ekue, peteive ava vvy regua xereve ndoikoi ramo. Xepoxya rupi uva re apyrõ, xevaia rupi amou'ũmba va'ekue. Ha'e ramo tykue hayvipa vvy omongy'apa anhemondea ha'e javi.

⁴ Mba'eta ajoepy aguã ára reguarã amoĩ xepy'a re, ajogueraa jepe aguã ma'etÿ ovaẽ ma ramo.

⁵ Ha'e rami avi aexa rã ndoikoi xepytyvõ va'erã. Xereve guarã ndoikoi ramo anhemondyi. Ha'e nunga rupi xee ae jyva py ajogueraa jepe, xepoxya ae xerevegua oiko.

⁶ Ha'e rami vvy vvy regua kuery re apyrõ xepoxya rupi, xevaia rupi ajapo oka'u va'e rami ikuai aguã. Ha'e vy huguy amoẽ heravy vvy rupi", he'i.

Peteĩque ju profeta Isaías ojerueague

⁷ Aroporaie 'rã SENHOR porayvua ha'e hembiapokue iporã ete memea re, mba'eta nhandevy pe SENHOR opa mba'e py ojapo porã, Israel kuery ha'e javi oayvua rupi. Mba'eta ha'e kuery omboaxy ha'e opa mba'e py oayvu vvy ojapo porã ete.

⁸ Mba'eta aipoe'i: "Ha'e kuery ma anhetẽ xevygua ikuai, xera'y kuery ijapu va'erã e'ÿ", he'i vvy onhemoingo raka'e ha'e kuery reraa jepearã.

⁹ Ha'e kuery ikuai axya ha'e javi py ha'e voi oendu oiko axya, ha'e ramo ixuguigua anjo ogueraa jepe. Oayvu ha'e omboaxya rupi oepy. Ha'e rami vvy ogueraa vvy ára nhavõ oguereko raka'e.

¹⁰ Ha'e rami teĩ ha'e kuery onhe'ẽ raxave okuapy, ha'e omomborioa Inhe'ẽ ky'a e'ÿ. Ha'e ramo hovaigua ju onhemoingo vvy ha'e ae opu'ã raka'e ha'e kuery re.

¹¹ Ha'e ramo ma ha'e kuery ima'endu'a ju yma Moisés oiko jave guare re. Ha'e vy aipoe'i: "Mamo tu aÿ oĩ SENHOR ye'ẽ rupi ojeuegua kuery renoẽare, ha'e kuery re opena va'ety reve? Mamo tu oĩ hexe Onhe'ẽ iky'a e'ÿ va'e moĩare?" he'i okuapy.

¹² "Mba'eta opo'akaa hexakãmba va'e ombou raka'e Moisés vvyry guarã. Ha'e kuery renonde rupi omombyta imoiny yy, raka'e rã peve hery re ima'endu'apaa aguã.

¹³ Ha'e gui yy typyague rupi oguerooaxapa raka'e, kavaju onhepyxanga e'ÿ ovy va'e rami ha'e kuery oaxapa peve tekoa e'ÿ", he'i okuapy.

¹⁴ Mba'eta mymba kuery vvy'ã guy katy ikane'õgua aguã oguejy va'e rami avi ojeuegua kuery pe SENHOR Nhe'ẽ ome'ẽ raka'e opytu'u aguã. Ha'e rami ae rereko raka'e ndejeuegua kuery, nderery re ima'endu'a porã pavẽ aguã rami.

¹⁵ Ha'e gui aÿ ma eikuaa pota ke yva reĩa gui, ne'amba iky'a e'ÿ ha'e hexakãmba va'e py reĩa gui ema'ẽ orere. Mamo tu oĩ nekyre'ÿa, ndepo'akaa rupi mba'emo porã rejapoa py rexa uka va'ekue? Mba'eta xee aexa rã ndojekuaavei rejoayvu ha'e renhomboaxya ndepy'a re oĩ va'e.

¹⁶ Ha'e rami teĩ ndee ma Oreruet ae reiko, Abraão ndorekuaavei teĩ. Israel voi ndorerexa kuaavei teĩ ndee ma SENHOR oreru reiko. Nderery ma Orerepya yma ae.

¹⁷ SENHOR, mba'e re tu rejapo ndeguigua tape rupi ve'ÿ roo aguã rami? Mba'e re tu oreapo oreakã ratã aguã rami, ndere rojerovia ve'ÿ aguã? Eju ju ke nerembigua kuery reayvua rupi, ndevyguia kuery re rema'ẽ vvy.

¹⁸ Mba'eta xapy'a rai'i ndevyguia kuery po py oĩ raka'e ndevyguia henda iky'a e'ÿ va'e. Ha'e gui ma oreroaigua kuery ou vvy opyrõmba nemboeteaty re.

¹⁹ Ha'e ramo ore ma ndee nerenepai ae va'ety rami orekuai, ha'e nderery rupi onhemboery uka e'ÿ va'e rami.

64

¹ Ha'e gui yva rembovo vvy reguejy 'rãgue! Ha'e ramo vvyty ikuai va'e oryryipa 'rãgue nerenonde.

² Tata vvyra ra'ykue'i re hendya rami, ha'e yy ombopupu va'e rami ke ndee voi eguejy nderovaigua kuery nderery oikuaa pavẽ aguã rami, nerenonde vvy regua kuery oryryipa aguã.

³ Mba'eta ymave rupi reguejy vy rejapo nda'evei ete va'e noroexa'ãi va'ekue, ha'e ramo vvyty ikuai va'e oryryipa raka'e nerenonde.

⁴ Mba'eta vvy itui ypy'i guive noenduai, apyxa noendui, neĩ texa voi ndoexai tuuete harõa kuery pe mba'emo ojapo va'e, ndee e'ỹ vy.*

⁵ Ndererovy'a reve teko porã rupi ikuai, ha'e ndereko re ima'endu'a va'e kuery ikuai py ndee reo 'rã reovaexĩ vy. Ha'e rami avi rojevavy ramo ndepoxy 'rã guive. Yma ete rojevavya re orekuai rire teĩ roo jepe nho 'rã teve?

⁶ Mba'eta ore kuery ha'e javi ma ha'eve'ỹ va'e orekuai, ha'e ore ae orereko porãa ma ajukue iky'apa rei va'e rami meme opyta. Ore kuery ha'e javive orepe'õguepa 'rã jai rogue ixorĩmbaa rami, ha'e orereko vaia ma vvytu rami 'rã orereraa.

⁷ Mava'eve rei ndoikoĩ nderery rupi ojapukaia rupi, neĩ reikuaa pota aguã re oma'ena rupi. Mba'eta nderova remo'ã oregui, ha'e vy orereko vaia re oremomba heravy.

⁸ Ha'e rami avi aỹ ma SENHOR, ndee ae oreru reiko. Ore kuery ma nhae'ũ rami, ha'e rã ndee ma nhae'ũ re omba'eapo va'e rami reiko. Ore kuery ha'e javi ma ndepo py remoingo va'ekue orekuai.

⁹ SENHOR, ndepoxy ete eme, ha'e nema'endu'a riae eme rojevavyague re. Rojerure, ema'ẽ ju ke orere, mba'eta ore ha'e javive ma ndevyguia orekuai.

¹⁰ Ndevyguia tetã iky'a e'ỹ va'e ikuai va'ekue ma tekoague meme opyta. Siãõ tetã voi tekoa e'ỹa, Jerusalém omombaa.

¹¹ Orevy pegua templo iky'a e'ỹ ha'e hexakãmba va'e oreramoĩ kuery nembroeteague ma oapypaa tata py, ha'e mba'emo porã roguereko va'ekue ma ombovaipa pyre meme opyta.

¹² Ha'e ramigua ete oiko teĩ ndereikuaa potai teri ty'y? Rekyririĩ reve orembojexavaive tema 'rã teve?

65

Nhanderuete ombovai vy "Ambopaga 'rã xenhe'ẽ raxave va'ekue", he'iaague

¹ SENHOR aipoe'i: "Ha'e gui xere oporandu e'ỹ va'e kuery pe ma ajeka uka, xereka e'ỹ va'ekue pe ajejou uka. Xerery rupi omboery e'ỹ pyre kuery pe 'Apy ma aĩ, apy aĩ', ha'e.

² Ko'ẽ nhavõ xepo py 'Peju ke' ha'ea rami ajapo xenhe'ẽ raxave va'e kuery pe. Ha'e kuery ma tape porã rupi e'ỹ ikuai va'e, ha'e kuery ae onhembopy'aa rupi rive ikuaixe vy.*

³ Ha'e kuery ma xembopoxy riae tema okuapy oxĩa py e'ỹ, mba'eta ta'angaa pe mba'emo ojuka 'rã okuapy vyotyty rupi, ha'e heakuã porã va'e oapy 'rã altar vvy jykue gui ojapo va'ekue áry rive.*

⁴ Yvyra rupa rupi ha'e kuery ikuai, ha'e pyávy henda nda'evei reia rupi 'rã oo. Ho'u 'rã poryko ro'okue, ha'e oy'a py ojara 'rã mymba nda'evei va'e ro'o rykue.

⁵ Ha'e kuery joupe-upe aipoe'i 'rã: 'Peĩ ke peĩa py ae, pevaẽ eme xere, mba'eta xee ma pendegui ndaxeiky'aive va'e', he'i rive 'rã. Ha'e nunga ma hataxĩ ko'ẽ nhavõ xeapyĩguia ko'õ va'e rami ikuai.

⁶ Ma'ẽ, ha'e nunga ha'e javi omboparaa imoiny xerenonde. Ha'e ramo xee nakyririĩvei 'rã. Rombopaga 'rãe, romomba 'rã peẽ kuery ha'e javi,

⁷ pendereko vaiaty ha'e peneramoĩ kuery reko vaiague re. Mba'eta ha'e kuery voi heakuã porã va'e oapy rire vvyty ikuai va'e áry rupi, ha'e xembopoxya rupi ikuai vvy'ã ikuai va'e áry. Ha'e nunga rupi ambopagapa 'rã yma guive ojevavyague re", he'i SENHOR.

Nhanderuete "Araa jepe 'rã xere ojerovia va'e", he'iaague

⁸ SENHOR aipoe'i: "Peẽ kuery ma peteĩ xã uva revegua peipo'o vy amongue py hykue iro va'e pejou vy aipopeje 'rã: 'Nhamombo va'erã e'ỹ, mba'eta iporã va'e oĩ ruxã'i teĩ', pejea rami avi xee voi amboaxy 'rã xerembiguai kuery, ha'e vy namombai 'rã.

⁹ Ha'e rami vy amoingo 'rã Jacó ramymino kueryrã, ha'e Judá ramymino kuery va'e regua amoingo avi 'rã xevyguia vvyty re ipo'aka va'erã. Ha'e rami vy xerembiporavo kuery hekoa ju 'rã vvy re, ha'e py ae 'rã xerembiguai kuery hekoa.

¹⁰ Ha'e rami vy Sarom vvy itui 'rã nhuĩndy vexa'i rembi'u tyrã, ha'e Acor vvyugua rupi 'rã vaka kuery opytu'u. Xevyguia kuery xereka va'e pe ae 'rã ajapo.

¹¹ "Ha'e rã peẽ kuery ma SENHOR gui ojepe'a rive va'e pendekuai, xevyguia vvyty iky'a e'ỹ va'e gui penderexarai guive. Pereco katu ngaru pendexyete ramigua Xorteia hery va'e pe, ha'e vinho pemoirũ tuuete ramigua Renonderã hery va'e peguarã.

¹² Ha'e rami rã peẽ kuery xee romboaxa 'rã kyxe revegua pe. Ha'e ramo peẽ kuery ha'e javive penerenapy'ã re peĩ 'rã pendejukaarã renonde. Mba'eta xee roenoĩ ramo napembovai rire, xeavyu teĩ ndapeikuaa potai guive. Ha'e rami 'rãgue py teko vai rupi tema pendekuai xerenonde, ha'e peiporavo xee arovy'a e'ỹ va'e."

¹³ Ha'e nunga rupi SENHOR Nhanderuete aipoe'i: "Xerembiguai kuery okaru 'rã, ha'e rã peẽ kuery ma pendu 'rã karuai. Xerembiguai kuery oy'u 'rã, ha'e rã peẽ kuery ma pendu 'rã yuvei. Xerembiguai kuery ovy'a 'rã, ha'e rã peẽ kuery ma pexĩmba 'rã.

¹⁴ Xerembiguai kuery oporaei 'rã ipy'a py ovy'a vy, ha'e rã peẽ kuery ma peneraxẽ 'rã pendepy'a raxy vy, pejae'o 'rã penenhe'ẽ py peiko axya anho pendu vy.

¹⁵ Penderery peja 'rã xerembiporavo kuery ima'endu'a vai aguã. SENHOR Nhanderuete pendejukapa 'rã, ha'e rã guembiguai kuery ma omboery pyau ju 'rã.

* 64:4 1 Coríntios 2.9 * 65:2 Romanos 10.20-21 * 65:3 Altar-rã ha'e kuery ojapo vy nda'evei vvy jykue oiporu aguã (Êxodo 20.24-25).

¹⁶Ha'e nunga rupi yvy re jogueroayvu porã va'e ma Nhanderuete anhetê ete va'e rupi meme 'rã jogueroayvu porã, ha'e yvy re oura va'e ma Nhanderuete anhetê ete va'e rupi 'rã oura. Mba'eta hexaraipaa 'rã ikuai axya oaxapa va'ekue re, xee voi naxema'endu'avei 'rã.

Yva pyau ha'e yvy pyau re ijayvuague

¹⁷“Ha'e gui ma xee ajapo 'rã yva pyau ha'e yvy pyau. Ha'e rami rire na'ima'endu'aavei ma 'rã mba'emo oaxa va'ekue re, avave rei ndoikuaavei 'rã ha'e nungakue.*

¹⁸Ha'e ramo peê kuery pevy'a ete 'rã pekuapy, raka'e rã peve perovy'a 'rã mba'emo xee amoingo va'e. Mba'eta Jerusalém py amoingo 'rã vy'a oendua va'erã, ha'e pygua kuery ogueroovy'a ete 'rã.

¹⁹Arovy'a 'rã Jerusalém, arovy'a avi 'rã xeivygua kuery. Mba'eta ha'e py ma noenduavei 'rã ojae'o ha'e haxê va'e.

²⁰Ha'e py ma ndoikovei 'rã kyrĩ va'e xapy'a'i peve oiko va'e, neĩ tuja'y voi oikove aguã ára ndoupityi va'e. Mba'eta cem ma'etỹ oguerekoa py omano va'e pe ma 'lpyau reve teri omano' 'ea 'rã, ha'e cem ma'etỹa peve ndoupityi va'e pe ma 'Ojexavy va'e vy ayvu vaipy oiko vy ma 'rã' 'ea 'rã.

²¹Ha'e pygua kuery ngoorã ojapo vy ha'e py ae 'rã ikuai. Uva onhotỹ ma vy ho'u 'rã hi'a.

²²Ngoorã va'ekue ndojapovei 'rã amboae kuery rive oĩ aguã, ha'e mba'emo nonhotỹvei 'rã amboae kuery rive ju ho'u aguã. Mba'eta xeivygua kuery oiko puku 'rã yvyra rami, xerembiporavo kuery oiporu kuerei 'rã opo py ojapo va'ekue-ekue.

²³Ha'e rami vy nomba'eapo rivevei 'rã, neĩ kyrĩgue ndoguereko'i 'rã oiko vai va'erã, mba'eta SENHOR ogueroayvu porã va'e meme ikuai, ta'y kuery voi ikuai 'rã ha'e kuery reve.

²⁴Ha'e kuery ojapukai e'ỹ mbove ma voi xee ambovai 'rã. Ijavyu teri reve xee aendu 'rã.

²⁵Aguara ha'e vexe'i ra'y reve joa py 'rã okaru okuapy, ha'e guary ma vaka rami avi 'rã ho'u oikovy mba'emo pirekue. Mboi ma yvy ku'i re rive 'rã okaru. Mba'eta joupe ndojapo vaiavei 'rã, mba'eve ndoiko'i 'rã guive xeivygua vytyi iky'a e'ỹ va'e áry ha'e javi rupi”, he'i SENHOR.

66

Jerusalém pyau py Nhanderuete pe onhembo'e merami rive va'e kuery oike e'ỹ aguã re ijayvuague

¹SENHOR aipoe'i: “Yva ma xerenda apenaaty, ha'e rã yvy ma xepy rupa itui. Mba'e nunga oo tu xevy pe pejapo ta? Mamo tu apytu'u atyrã oĩ?

²Mba'eta xepo py ae ha'e nunga ha'e javi ajapo raka'e. Ha'e ramo mae opa mba'e oiko”, he'i SENHOR. “Ha'e rami avi xee ma po ramigua re ama'ê 'rã: onhe'ê py ojexavai rei'i ha'e ipy'a raxy rei va'e, ha'e xeayvu oendu vy oryryi va'e.*

³Ha'e rã vaka xevy ojuka va'e ma jojukaa rami 'rã aikuaa, vexe'i ra'y oapy va'e ma jagua aju'y omopê va'e rami rive, ha'e mba'emo aju xeve ome'ê va'e ma poryko ruguy ome'ê va'e rami aikuaa. Ha'e rami ae avi heakuã porã va'e oapy va'e ma mba'emo ra'angaa ogueroayvu porã va'e rami aikuaa. Mba'eta ha'e kuery ae oipotaa rami rive ikuai, onhe'ê py ojegarupy anho ogueroovy'a va'e.

⁴Ha'e ramo xee aipotaa rami vy amoingo axy 'rã, ha'e kuery re ambou 'rã okyje etea va'e. Mba'eta aenoĩ ramo peteive rei nombovai, xeayvu ramo noendu potai guive. Ha'e rami 'rãgue py mba'emo vai anho ojapo okuapy xerenonde, ha'e oipota xee arovy'a e'ỹ va'e”, he'i.

⁵Ha'e rupi peê SENHOR renonde pejererokyjea rupi pendekuai va'e, pendu ke ijavyu: “Penderivy kuery ma xerery omopê pendekuai ramo pendere nda'ija'ei vy penemoxê mombyry. Ha'e vy pendejojai vy 'SENHOR toxa uka guexakãa, pevy'a ri 'rã roexa aguã', he'i okuapy. Ha'e rami teĩ ha'e kuery nda'evei nho 'rã okuapy.

⁶Mba'eta tetã gui onhendu 'rã joe opu'ã ete va'e ayvu ramigua, templo gui ae 'rã onhendu. SENHOR ijavyu 'rã ngoaigua kuery ombopaga vy.

⁷“Peteĩ kunha ma kyrĩ va'e raxy oendu e'ỹ mbove oikuavã'i ma 'rã kyrĩ va'e, haxy e'ỹ mbove oiko'i 'rã ava'i.

⁸Mava'e nda'u ha'e ramigua oendu, e'ỹ vy oexa ma? Ha'eve ri nda'u peteĩ yvy ha'e javi re ikuai va'erã peteĩ ára pyve oiko aguã? Ha'eve ri nda'u peteĩ regua kuery ha'e javi oiko vyvoi aguã? Ha'e rami avi Sião ma haxy oendu e'ỹ mbove oguereko'i 'rã omemby kuery.

⁹Mba'eta kyrĩ va'e ryru'i xee aipe'a teĩ namoingoi 'rã teve? Xee nda'u anhomoiingo va'eri amboty 'rã teve kyrĩ va'e ryru oiko e'ỹ aguã?” he'i SENHOR Nhanderuete.

Sião tetã py raka'e rã peve ovy'aa aguã re ijayvuague

¹⁰“Peê kuery Jerusalém tetã peayvu va'e ha'e javi, pevy'a ke ha'e pygua kuery reve. Perovy'a ke, hexe pejae'o va'ekue ha'e javi.

¹¹Mba'eta ikã penembovy'a va'e re pekambu vy penerevyatã 'rã, penhemongaru vy perovy'a 'rã hexakãa oĩ va'e ha'e javi pexa vy.*

¹²Mba'eta SENHOR aipoe'i: “Peê kuery pe ame'ê 'rã mby'a porã yakã oxyry va'e rami, ha'e yvy regua kuery mba'emo porã oguereko va'ekue ma peê kuery pe ju 'rã amboaxa yakã tyguaxu va'e rami. Ha'e ramo pekambu 'rã peiny. Ojyva áry pendererũ 'rã, ha'e o'u áry pendererovy'a 'rã.

¹³Ixy omemby omombo'o va'e rami avi xee rombovy'a 'rã peê kuery, ha'e pevy'a ju 'rã Jerusalém tetã re.

* 65:17 2 Pedro 3.13 * 66:2 Atos 7.49-50 * 66:11 Apy ma Jerusalém tetã re ijavyu ha'e kuery xy re rami.

¹⁴ Peẽ ae pexa 'rã, pendepy'a py pevy'a 'rã, penekãgue voi ipyau 'rã jai rogue pyau rami. Mba'eta ha'e jave py SENHOR oexa uka 'rã opo'akaa guembiguai kuery pe, ha'e rã ngovaigua kuery pe ma ipoxy 'rã."

¹⁵ Mba'eta SENHOR ou 'rã tata rupi, ikaróxa ma vvytu jere rami 'rã ou, ipoxya oexa uka aguã nhombaa rupi. Ijayvu ete 'rã tataendy rami.

¹⁶ Mba'eta tata ha'e kyxe reve SENHOR ou vy oikuaa pota 'rã avakue ha'e javi re. Ha'e ramo heta ete 'rã SENHOR ojuka.

¹⁷ SENHOR aipoe'i: "Amongue kuery oxyete ramigua oguereko va'e peguarã rive onhemboaxa ha'e ojeky'a'o va'ekue, ha'e rami vy yvotyty mbyte peve oike vy ho'u okuapy poryko ro'o, tembi'u ojegarupy ha'e anguja ro'o rive. Ha'e va'e kuery ma omombaa vyvoi 'rã.

¹⁸ Mba'eta xee aikuaa ae ha'e kuery ikuaiia ha'e onhembopy'aa ha'e javi. Ha'e rami vy aju 'rã amboatyapa aguã yvy regua kuery ha'e amboae ayvu py ijayvu va'e ha'e javi. Ha'e ramo ha'e kuery ou vy oexa 'rã okuapy xerexakãa.

¹⁹ Ha'e kuery mbyte amoĩ 'rã xekuaa ukaarã. Ha'e araa jepe va'ekue regua amongue amondouka 'rã yvy regua kuerya katy, Társis tetã katy, guyrapa oiporu kuaa va'e ikuaiia Pul ha'e Lude yvy katy, ha'e gui Tubal, Javã ha'e ye'ẽ yvýry mombyryvea peve guive. Ha'e pygua kuery ma noendui teri xeregua ayvu, ndoexai teri guive xerexakã. Ha'e va'e yvy regua kuery pe ae 'rã ha'e kuery omombe'u xerexakã.

²⁰ Ha'e gui ma oguerupa 'rã penderivy kuery ha'e javi. Yvy regua kuery mbyte gui ogueru 'rã SENHOR pe ome'ẽ va'erã rami. Kavaju áry 'rã ogueru, karóxa py, mburika ha'e camelo áry ogueru 'rã Jerusalém tetã py xevyguã yvyty iky'a e'ỹ va'e py, hyru iky'a e'ỹ va'e py Israel kuery mba'emo aju ome'ẽ va'erã oguerua rami avi SENHOR pegua oo py", he'i.

²¹ "Ha'e ramo ha'e va'e regua voi amoĩ 'rã sacerdote ha'e levita-rã", he'i SENHOR.

²² "Mba'eta yva pyau ha'e yvy pyau ajapo va'erã va'e ma xerenonde riaie 'rã oĩ. Ha'e rami ae peneramymino kuery ikuai avi 'rã, penderery voi.

²³ Jaxy pyau ha'e sábadu ojeupity nhavõ ma avakue ha'e javi ou 'rã xerenonde xemboete aguã", he'i SENHOR.

²⁴ "Ha'e gui ha'e kuery oo vy oexa 'rã okuapy xere opu'ã rei va'ekue retেকে. Ha'e py ma taxo nomanovei 'rã, hata voi ndoguevei 'rã. Ha'e nunga gui ma avakue ha'e javi ojegarua 'rã."*

Jeremias ayvu oĩa Jeremias ayvu oĩa

Profeta Jeremias ma ijayvu Judá pygua kuery re Babilônia pygua kuery opu'ã vy escravo-rã ogueraapa agua re. Ha'e rami aguã ma Nhanderuete ae ombou ha'e kuery ojevavyague re. Mba'eta Jeremias oikuaa nhandepy'a ky'a va'e memea: “Ha'e gui avakue py'a ma opa mba'e gui nhombotavypave ha'e nda'evei va'e ae. Mava'e nda'u oikuaa 'rã?’ he'i (17.9).

Ha'e rami teĩ Jeremias omombe'u avi Nhanderuete ojeuegua kuery omboaxy vy ogueruju aguã. “Senhor aipoe'i: 'Ne'exa, ou ma oiny ára Israel ha'e Judá kuery reve xereve guarã ajapo pyau aguã, tamoi kuery reve ajapo va'ekue ramigua e'y. Ha'e jave ma ha'e kuery po re ajopy reve anoẽmba va'ekue Egitto vvy gui. Ha'e rami teĩ ha'e kuery ombovaipa xereve guarã ajapo va'ekue, ime rami aiko teĩ. Ha'e gui ha'e va'e ára oxapa ma rire po rami 'rã Israel kuery reve ajapo pyau xereve guarã. Ha'e kuery py'a re 'rã ambopara xeguigua lei, ikuraxõ re ae 'rã ambopara. Xee aiko 'rã Tuuete, ha'e rã ha'e kuery ma ikuai 'rã xevyguia. Ha'e ramo peteĩ-teĩ nombo'evei ma 'rã oirũ nei guyvvy kuery, “Peikuaa na Senhor”, he'ia py, mba'eta ha'e javive xekuaa 'rã, vvyĩgieve ha'e yvatekueve voi. Mba'eta amboguepa 'rã heko vaiague, ojevavyague re naxema'endu'avei 'rã guive', he'i Senhor” (31.31-34). “Ha'e kuery pe ame'ẽ 'rã peteĩ'i rupi ipy'a aguã ha'e peteĩ'i tape, ko'ẽ nhavõ xerenonde ojererokyjea rupi ikuai aguã, ha'e kuery ikuai porã aguã, ha'e gui ta'y kuery voi” (32.39).

Jeremias pe jypy'i SENHOR ijayvuague

¹ Hilquias ra'y Jeremias ayvu oĩa. Ha'e va'e ma Benjamim vvy re Anatote tetã py sacerdote ikuai va'e regua.

² Ixupe ma SENHOR ombou oayvu Amom ra'y Josias Judá pygua huvixa treze ma'etỹ re ma oĩ jave py.

³ Ha'e gui Josias ra'y Jeoaquim Judá pygua huvixa oĩ jave ju ayvu omombe'u Josias ra'y Zedequias treze ma'etỹ re oĩa peve, ha'e gui Jerusalém tetã gui escravo-rã ogueraapaa ma rire peteĩ nhiruĩ jaxy peve ju.

⁴ Ha'e gui xevy pe SENHOR oayvu ombou vy aipoe'i:

⁵ — Nderyrũ'i py xee romoingo e'y mbove xee roikuaa ma voi, ndetui'i e'y mbove roiporavo vy romoi profeta-rã vvy regua kuery pe xeyvu remombe'u aguã — he'i.

⁶ Ha'e ramo xee ambovai:

— Ai SENHOR Xeruetel! Ne'exa, xee ma ndaxeayvu kuaai, mba'eta xekyrĩ teri.

⁷ Va'eri SENHOR aipoe'i xevy:

— Nda'evei “Xekyrĩ teri” re aguã. Mba'eta reo 'rã xee romondoukaa katy rei, ha'e remombe'upa 'rã ndevy xeyvuague ha'e javi.

⁸ Ekyje eme ha'e kuery renonde, mba'eta xee aiko 'rã ndereve rogueraa jepe aguã — he'i SENHOR.

⁹ Ha'e gui SENHOR okuave'ẽ vy opoko xejuru re. Ha'e vvy aipoe'i xevy:

— Ne'exa, ndejuru py amoĩ xeyvu.

¹⁰ Ha'e rami vvy kova'e ára guava ma rombopo'aka vvy regua kuery ha'e huvixa kuery openaa ikuai va'e re, reipe'a ha'e reity aguã, rembovaipa ha'e rembo'a'y aguã, ha'e gui remopu'ã ha'e renhotỹ ju aguã.

Amẽndoa 'y oexa ukaague

¹¹ Teĩgue ju SENHOR ijayvu vy aipoe'i xevy:

— Jeremias, mba'e nunga tu rexa?

Ambovai:

— Aexa peteĩ vyvra'i amẽndoa 'y — ha'e.

¹² Ha'e rami rã SENHOR aipoe'ive ju:

— Ha'evea rami rexa, mba'eta xeyvuague re xee ama'ẽ 'rã ojeupitypa aguã.*

Oja tata áry oĩ va'e oexa ukaague

¹³ Teĩgue ju SENHOR ombou oayvu xevy. Ha'e vvy aipoe'i:

— Mba'e tu rexa?

Ambovai:

— Aexa peteĩ oja tata áry oĩ va'e. Ha'e va'e ma ijuru kuaray ijapu'a'ia katy gui ojero'a oiny — ha'e.

¹⁴ Ha'e ramo SENHOR aipoe'ive ju xevy: “Kuaray ijapu'a'ia katy gui onheẽ 'rã ouvvy mba'emo vai vvy re ikuai va'e ha'e javi áry.

¹⁵ Mba'eta xee aenoimba 'rã kuaray ijapu'a'ia katy ikuai va'e regua. Ha'e ramo ha'e kuery oupa 'rã. Ha'e rami vvy Jerusalém tetã rokẽ katy'i peteĩ-teĩ regua huvixa omoi 'rã guenda opena atyrã, tetã kora vyvry, Judá regua tetã ha'e javi kora vyvry guive”, he'i SENHOR.

¹⁶ “Ha'e va'e tetã pygua kuery rovai xeyvu 'rã heko vaiague re ambopaga aguã. Mba'eta xerejapa vvy amboae ramigua nguete pe oapy okupy heakuã porã va'e, opo py ae ojapo va'ekue rive ombojerovia vy.

¹⁷ Ha'e rã ndee ma eiko katu ke. Ha'e vvy tereo, ha'e kuery pe emombe'u xeyvuague ha'e javi. Enhemondyĩ eme ha'e kuery renonde, ajapo e'y aguã ha'e kuery renonde renhemondyive ete aguã rami.

* 1:12 Ha'e kuery ayvu py ma ayvu “Amẽndoa 'y” nhaendu rã “Ama'ẽ 'rã” nhaendua rami rai'i.

¹⁸ Ne' exa, kova'e ára romoĩ peteĩ tetã ikorapa va'e rami, ha'e ijyta ferro guigua ha'e tetã kora overa va'e guigua rami neretã pygua kuery ha'e javi rovai ndeayvu agua, Judá pygua huvixa kuery, yvatekueve, sacerdote kuery ha'e neretarã kuery rovai.

¹⁹ Ha'e kuery ndere opu'ã teĩ nda'ipo'akai 'rã, xee rogueraa jepe agua ndereve aiko ramo", he'i SENHOR.

2

Nhanderuete oayvu teĩ heta va'e kuery onhe'ẽ raxavea re ijayvuague

¹ Ha'e gui xevy SENHOR oayvu ombou vy aipoe'i:

² "Tereo, ha'e ejapukai Jerusalém pygua kuery oendupa agua: Po rami SENHOR ijayvu: 'Xee ma xema'endu'a nekunhataĩ jave xee aipotaa rami reikoague re, ha'e xere remenda ramo jave xerayvuague re, tekoa e'yã, vyv mba'ety jipoia rupi teĩ xerupive reikoague re.*

³ Mba'eta ha'e va'e jave py ma SENHOR pe ete Israel kuery ikuai, mba'emo ra'yĩgue porãgüeve ixupe guarã omono'õ ypy pyre rami. Ha'e kuery mombaxea kuery ma ipo ky'a va'e meme onhemoingo, hi'áry mba'emo vai ou guive", he'i SENHOR.

⁴ Pendu ke SENHOR ayvu, Jacó ha'e Israel kuery ha'e javi.

⁵ Po rami SENHOR ijayvu: "Mba'e nunga nda'u peneramoĩ kuery oexa xere, xegui ojepe'apa agua? Mba'eta mba'emo ra'angaa ovare e'y va'e re rive ovapa vy ha'e kuery ae ju ovare e'y va'e onhemoingo.

⁶ Ha'e kuery joupe-üpe neĩ noporandui: 'Mamo nda'u oĩ SENHOR Egito vyv gui nhanerenoẽare? Mba'eta tekoa e'yã rupi nhandereraa va'ekue, vyv piru reia ha'e vyvkua anho oĩa, vyv piru ha'e manoa 'ã oĩa rupi, vyv avave rei oguataa e'yã ha'e noĩaia rupi', nde'i.

⁷ Ha'e gui xee rogueru va'ekue vyv porãa re, pekaru agua mba'emo'a ha'e mba'emo porã oiko va'e re. Ha'e rami teĩ ha'e py pevaẽmba ma rire pemongy'apa, vyv xevey guarã va'ekue pejapo ojeguaru pyrã.

⁸ Sacerdote kuery 'Mamo tu oĩ SENHOR?' nde'i, lei re nhombo'e va'ety voi ndaxekuaa potai okuapy. Joe opena va'ety kuery xenhe'ẽ raxave okuapy, ha'e rã profeta kuery ma Baal rery rupi rive ijayvu vy ovare e'y va'e rakykue rupi ikuai."

Ndojeroviai reipa okuapyague re ijayvuague

⁹ SENHOR aipoe'ive ju: "Xeayvuvete tema 'rã peẽ kuery reko re. Pendera'y ra'y kuery pe voi xeayvu.

¹⁰ Peaxa ha'vy ye'ẽ rovai Chipre ha'e ijyvyry vyv ikuai va'e re, ha'e peikuaa pota. Quedar katy guive pemondouka penembiguaĩ kuery, toikuaa pota porãmba, peikuaa agua ha'e ramigua peteĩve henda py ndoikoi paa re.

¹¹ Tyrã pa oiko teve amboae regua nguete kuery omboekovia va'e, nguete e'y guive oguereko teĩ? Ha'e rami teĩ xevygua kuery tu mba'everã ovare e'y va'e re omboekovia Omoexakãa.

¹² Yva regua kuery, penhemondyi ke ha'e nunga gui! Pekiypa, ha'e peryryipa", he'i SENHOR.

¹³ "Mba'eta xevygua kuery ma mokoĩ henda py ojapo vai: jypy ojepe'apa vyv imarã e'y va'e xee ame'ẽ va'e gui, ha'e gui ygua ojeupe guarã ae ojo'o. Ha'e va'e ma ovopa rei vyv ndopytaia guive.

¹⁴ "Israel kuery nda'u escravo ikuai teve? Joo py tembiguairã ha'e kuery itui'i va'ekue teve? Ha'e rami e'y ramo mba'e re tu ombo'a pyrã ikuai?

¹⁵ Ha'e kuery rovai ma guary ra'y kuery okororõ ratã 'rã okuapy, ombovaipa 'rã guive ijyvy.† Ha'e ramo ha'e kuery retã okaipa, jipovei ha'e py oĩ va'erã.

¹⁶ Neakã ma Ménfis ha'e Tafnes pygua kuery voi onhopĩmba.‡

¹⁷ Ha'e nunga ha'e javi oiko ndevy, tape porã rupi SENHOR nderuete nderereko teĩ ixugui rejepe'a rire.

¹⁸ Ha'e gui aỹ mba'erã tu Egito vyv katy reo 'rã Nilo yakã gui rey'u agua? Ha'e rami e'y vyv, mba'erã tu Assíria katy reo 'rã Eufrates yakã gui rey'u agua?

¹⁹ Ndereko vaia ae ndeapo vai 'rã, rejeroivia etea rupi e'y reikoa oikuaa ukaa 'rã ndereko vaia. Ha'e gui ma eikuaa pota pova'e nunga re, mba'eta SENHOR nderuete gui rejepe'a rire rendu 'rã nda'evẽ etea ha'e iro vaikue va'e anho, xerenonde nderejererokyei rire", he'i SENHOR ixondaro reta va'e.

Baal pe rive Israel kuery ikuai re ijayvuague

²⁰ "Yma ma canga ndere oĩ va'e amopẽmba, ha'e ndejokuague amondopa 'rãgue, teĩ ndee ma 'Xee ndaikoxei ndevy', 're xevey. Mba'eta yvy'ã yvate ikuai va'e rupi, ha'e yvyra hovana va'e ha'e javi guy rupi renhenno vyv ndetavy.

²¹ Xee ae ronhoty va'ekue uva rembypy iporã va'e rami, ha'yĩgue iporãve va'e anho regua. Ha'e rami rire teĩ mba'exa tu uva iro va'e anho reme'ẽ xevey?

²² Kavõ py rejau, ha'e iky'akue mboia reikyty vaipa teĩ xerenonde ojekuaa teri ndereko vaia ky'a", he'i SENHOR Nhanderuete.

²³ "Mba'exa tu aipo're: 'Xeky'aa noĩ, xee tu ndaikoi rima Baal ra'angaa kuery re', 're? Ha'e rami teĩ ema'ẽ na yvy'ã guy rupi ndepypo ojekuaa va'e re, eikuaa pota na mba'e pa rejapoague re. Camelo ra'y inhakuã va'e tape rupi ojevyy-jevyy oikovy va'e rami reiko,

* 2:2 Apy ma ojeupegua kuery pe Nhanderuete ijayvu gua'yxy pe rami. † 2:15 Apy guary ra'y kuery re ijayvu py ma ha'e kuery rovaigua kuery re ijayvu (50.7; Salmo 57.4; Isaías 5.29). ‡ 2:16 Ha'e va'e jave py hovagua kuery ojavyky rei 'rã inhakã onhopĩmba py (Isaías 7.20).

²⁴ ha'e mburika ka'aguy regua tekoa e'ya rupi ava oeka vy yvytu rupi oetũ oikovy va'e rami. Avave rei ndojokoi 'rã ojapoxe va'e ojapo aguã gui, hekaa kuery ikane'õ e'y re ojou 'rã guive, ha'e rami aguã jaxy ovaẽ nhavõ.

²⁵ Enheangu ke ndepyi rei re e'y renha aguã, neĩ ndejyryvi remo peve e'y guive. Va'eri ndee aipo're: 'Any, nda'evei teve. Mba'eta amboae regua ruete kuery xee ayvu vy aa 'rãe hakykue', re.

²⁶ "Ha'e gui imonda va'e ojopya rã oxĩmbaa rami avi Israel kuery voi oxĩmba aguã rami ikuai: heta va'e kuery, huvixa kuery, yvatekueve, sacerdote ha'e profeta kuery voi.

²⁷ Mba'eta ha'e kuery ma yvyra guigua pe rive 'rã 'Ndee ma xeruite', he'i, ha'e ita guigua pe 'Ndee ma xemoingoare', he'i 'rã. Mba'eta xea katy ha'e kuery ikupe okuapy, hova e'y. Ha'e rami teĩ ikuai axy vy ma 'Epu'ã ke, orereraa jepe', he'i 'rã xevy.

²⁸ Ha'e gui mamõ tu ikuai penderuete kueryrã peẽ ae pejapo va'ekue? Tove ha'e kuery ae tomyĩ, pendekuai axy rã pendereraa jepe aguã. Mba'eta peẽ Judã pygua kuery, penderuete ramigua heta pereko, peteĩ-teĩ tetã py.

²⁹ Mba'e re tu pendeayvu rei ri xere? Mba'eta peẽ kuery ha'e javi xerovai pejejavu va'e", he'i SENHOR.

³⁰ "Pendera'y kuery ambopaga rive, mba'eta xevy pe nonhemo'arandu ukai. Ha'e peẽ kuery ma pendekyxe py ae pejuka profeta kuery, guary nhomondoropa va'e rami.

³¹ Peẽ aýgua kuery, peikuaa pota na SENHOR ayvu re. Xee nda'u peẽ Israel kuery pe ajapo vai ri teve tekoa e'ya, e'y vy yvy pytũ povivea py rami? Ha'e rami teĩ mba'e re tu xevyguia kuery aipoe'i: 'Ore ma rooxea katy rei 'rã roo! Ndorovejyvei 'rã ndevy!' he'i okuapy?

³² Ha'e rami avi kunhataĩgue nda'u hexarai 'rã ri ojeguaraã re, ha'e rami e'y vy omenda va'erã va'e hexarai 'rã ri oku'akuaa re? Ha'e rami teĩ xevyguia kuery ma hexaraipa xegui, mbovy ára rei e'y.

³³ "Peẽ ma peikuaa porã pemoaruã va'e rakykue rupi peo aguã. Ha'e rami aguã re kunhague itavy rei va'e voi oikuaa 'rã pendegui.

³⁴ Ha'e rami teĩ pendeao apy re ma iporiaukue'i ha'e oiko rive'i va'ekue ruguy oĩ. Ha'e kuery imonnda rupi e'y teĩ pexa vy pejuka va'ekue. Ha'e ramigua ha'e javi pejapo

³⁵ teĩ aipopeje 'rã: 'Xee ma xepo ky'a va'e'y teve. Xere ma ndouĩ 'rã Nhanderuete poxya', peje. Ne'exa, 'Ndajejavyi' peje ramo xee aikuaa pota 'rã pendere.

³⁶ Peikoaty gui pejepe'a merami rive 'rã. Mba'eta Assíria pygua kuery napenepytyvõĩ vy penemoxĩmbaague rami avi Egito pygua kuery voi penemoxĩmba 'rã.

³⁷ Mba'eta ha'e kuerya gui peo ju 'rã peneakã re pepoko reve, mba'eta pejeroviaa va'e kuery ma SENHOR ojea ramo ha'e kuery po py ndapejoui 'rã mba'eva."

3

Heta va'e kuery ojevavy va'ekue ri Nhanderuete omboaxy ju aguã re ijavyvague

¹ "Xapy'a rei peteĩ ava opoi 'rã gua'yxy gui, ha'e rã kunha va'e omeguea gui oo vy omenda ju 'rã ava mboae re. Ha'e gui ha'e va'e kunhaa py nda'u ime ae ojevvy 'rã imerã? Any, ha'e ramigua oiko va'e rire yvy ha'e javi opyta 'rãgue omongy'a pyre.* Ha'e gui peẽ kuery voi mbovy e'y pemoaruã va'e kuery reve pendetavy rei va'ekue. Ha'e rami ete teĩ pejevvy ju xevy", he'i SENHOR.

² "Pema'ẽ na yvyty ita anho reia re, ha'e pexa. Mamõ tu oĩ pendetavy rei e'yague? Mba'eta tape ikuai va'e rupi peguapy pemoaruã va'e kuery pearõ vy, Arábia pygua tekoa e'ya rupi oma'ẽ mbegue oinya rami. Ha'e rami vy pemongy'apa ma pendevvy pendetavy reia ha'e pendereko vaia py.

³ Ha'e nunga rupi ae xee nambo'okyvei, ma'et'ya pyau jave teĩ. Ha'e rami teĩ peẽ ma itavy rei va'e rami penderova re pexa uka napexĩ kuaaveia.

⁴ Anhetẽ aý ma voi xevy pejapukai rive vy aipopeje: 'Xeru, ndee ma xekyri guive xerayvu va'e reiko.

⁵ Raka'e peve 'rã tu ndepoxya rupi reiko? Tyrã pa opa peve ete 'rã teve ndepoxy?' peje. Tá, ha'e rami ae xevy pendeayvu va'eri pejevavyve tema 'rã peẽ ae peipotaa rami rive", he'i SENHOR.

⁶ Ha'e gui huvixa Josias oĩ jave SENHOR aipoe'ive ju xevy: "Rexa teve Israel kuery kunha itavy rei va'e rami anhetẽ rupi e'y ikuai? Mba'eta oopa 'rã yvyty yvate va'e áry, ha'e yvyra hovana va'e ha'e javi guy rupi, opa marã rei 'rã itavy ha'e py.

⁷ Ha'e gui xee aexa'ã teĩ ha'e rami ete oiko ma rire xevy ju ojevvy aguã, va'eri ndovejvy. Ha'e nunga ma ikypy'y itavy rei va'e Judã oexapa.

⁸ Mba'eta Israel kuery itavy reia ha'e javi re xee amondoukapa, ha'e ixupe ame'ẽ imondovy kuaxia romendaague ambovaipa aguã regua. Ha'e rami teĩ ikypy'y Judã nonhemboaxyi aexaa py. Ha'e rami 'rãgue py ha'e voi oo vy itavy reia rupi oiko avi.†

⁹ Ha'e gui itavy reia gui nonhemboaxyi vy omongy'apa ovyvy. Mba'eta ita ha'e yvyra guigua pe rive oikoa py itavy rei tema oikovy.

¹⁰ Ha'e rami ete teĩ ikypy'y Judã anhetẽ rupi e'ygua va'e vy ndovejvy xevy opy'a ha'e javi py, ojevvy merami rive", he'i SENHOR.

¹¹ SENHOR aipoe'i xevy: "Ha'e rami ete Israel kuery itavy rei va'eri Judã kuery gui heko porãve va'e ikuai.

* 3:1 Ha'e kuery pegua lei rami vy itavy reia py ijavyvvy opyta 'rã iky'apa va'e (Levítico 18.24-28). † 3:8 Apy mokoĩ kunha joegua oikoa rami ijavyvvy Israel ha'e Judã kuery re, Israel kuery ojevavyvague rami ae ju Judã kuery ojevavyvvy avi ramo. Ha'e va'e jave py ma Israel kuery ojevavyvague re Nhanderuete escravo-rã omondoukapa ijavyvvy gui mombyry (2 Reis 17.6-20).

¹² Ha'e nunga rupi tereo, pova'e ayvu emombe'u kuaray ijapu'a'ia katy rupi. Ha'e vy aipo're: 'Israel kuery pendetavy rei va'e, pejevy na. Ha'e ramo ma pende'áry xee nambouvei 'rã xepoxya, anhomboaxy va'e vy', he'i SENHOR. 'Ndaxepoxy riaevei 'rã guive.

¹³ Ha'e rami avi peikuaa pota na pendeko vaia re, peikuaa pota SENHOR penderuete rovai pejevavyague re, mba'eta vyvra hovana va'e ha'e javi guy rupi pendetavy rei, xeayvu re ndapejapyxakai guive', he'i SENHOR."

"Pejeko rerova ke", he'iaque

¹⁴ "Xera'y kuery xenhe'ẽ rendu e'y va'e, pejeko rerova ke, mba'eta xee ae ma peneme rami aiko. Ha'e nunga rupi petei-teĩ tetã gui xee rogueru 'rã petei, ha'e petei-teĩ regua gui mokõ-mokõ 'rã rogueru. Ha'e vy rogueraa ju 'rã Sião py", he'i SENHOR.

¹⁵ "Ha'e py amoĩ 'rã peẽ kuery re opena va'erã xee rami ipy'a va'e. Ha'e va'e kuery ma pendere opena 'rã oikuaapa ha'e o'arandu re.

¹⁶ Ha'e rami rire pendereta ju 'rã vyv re, pendera'y kuery reta 'rã guive. Ha'e va'e jave ma napendeayvuvei 'rã SENHOR guexeve guarã ojapo va'ekue ryru re, mba'eta ha'e nunga re na'ima'endu'aavei 'rã, 'Oata' nda'eai 'rã guive. Neĩ hekovia ndojapoi 'rã amboae", he'i SENHOR.

¹⁷ "Ha'e va'e jave ma Jerusalém tetã pe 'SENHOR renda' 'ea 'rã. Ha'e py ma ha'e javi regua ono'õmba 'rã SENHOR rery rupi, ha'e vy inhakã ratã reia rupi ve'y 'rã ikuai.

¹⁸ Ha'e va'e ára ma Judá kuery petei rami 'rã ikuai Israel kuery reve. Ha'e vy kuaray ijapu'a'ia katy vyv itui va'e gui joupive peju 'rã pendejvyvã peneramoĩ kuery pe ame'ẽ va'ekue katy.

¹⁹ "Xejeupe ae aipoa'e va'ekue: 'Xee rogueruxe teĩ xera'y kuery mboae mbyte, ha'e pendejvy ame'ẽxe vyv oipotavepy, amboae regua kuery vyv gui iporãve va'e.' Aipoa'eva ju: 'Xevy pe "Xeru" peje 'rã, xegui ndapejepe'avei 'rã guive', ha'e.

²⁰ Ha'e rami teĩ peẽ Israel kuery, kunha ome gui opoi nhemi va'e rami avi peẽ voi xero py peiko itavy nhemi va'e rami", he'i SENHOR.

²¹ "Vyvyty yvateve va'e-va'e rupi onhendu petei ayvu, Israel kuery ojae'o ha'e ojerure nhendu okuapy ramo. Mba'eta ha'eve e'ya rami rei pendekuai, SENHOR penderuete gui penderexaraipa rive.

²² Pejevy ke, xera'y kuery xenhe'ẽ rendu e'y va'e. Ha'e ramo xee amonguera 'rã xenhe'ẽ rendu e'yague gui", he'i.

Ha'e ramo aipo'ea: "Apy ma orekuai, roju ma ndea py. Mba'eta ndee ma SENHOR oreruete.

²³ Anhetẽ ete ae vyv'ã ikuai va'e áry rupi rojekorea rupi orekuai, vyvyty áry rupi oretavy rei va'ekue. Mba'eta SENHOR Ozeruete re anho õi ore Israel kuery roo jepe aguã.

²⁴ Mba'emo orekyri jave guive oremoxĩmbaarã pe rive orekuai rupi rombovaipa oreramoĩ kuery omba'epoa rupi ojou va'ekue. Ha'e ramo hymba vexe'i kuery, vaka jipovei, ta'y kuery ha'e taju kuery voi.

²⁵ Ro'apa 'rã'vy roxĩmbaa py, mba'eta roiko kuaa e'y reia oreao'ipa. Mba'eta rojevavy SENHOR Ozeruete rovai, ore ha'e oreru kuery, orekyri guive kova'e ára peve. Noroendu potai va'ekue SENHOR Ozeruete ayvu", 'ea.

4

¹ "Ha'e ramo Israel kuery, pejevuxe ri vy ke xevy pe ete pejevvy", he'i SENHOR. "Peipe'apa ojegarupy xerenonde gui, ha'e pejepe'ave eme xegui.

² Anhetẽ rupi, 'arandua ha'e teko porã rupi pendekuai reve peura xee SENHOR aikove va'e rery rupi. Ha'e rami ri pendekuai ramo vyv regua kuery xeroporaei 'rã okuapy, ha'e rã xee amoingo porãmba 'rã", he'i.

³ Mba'eta SENHOR aipoe'i Judá ha'e Jerusalém pygua avakue pe: "Pereko katu pyau penemba'etyrã, ha'e penhotyve eme juu mbyte rupi.

⁴ Avakue Judá ha'e Jerusalém pygua, pendepire pemboiague rami SENHOR peguarã peiky'a'o avi ke penekuraxõ, xepoxya tata rami oẽ vyv penderapy e'y aguã imboguearã oiko e'y re, pendeko vaia rupi pendekuai rive."

Kuaray ijapu'a'ia katy gui mba'emo vai ou aguã re ijayvuague

⁵ "Pendu uka na Judá vyv re, pejapo Jerusalém tetã py oendua aguã rami. Ha'e vy aipojepe: 'Pemonhe'ẽ ke mimby guaxy vyv re! Pejapukai ratã vy aipojepe: 'Peno'õmba ke, nhanha jaikete tetã ikorapa va'e py!' peje.

⁶ Pemopu'ã ke imo'amy bandeira Sião katy peo aguã. Pejava na, pemboare eme. Mba'eta xee ajapo 'rã kuaray ijapu'a'ia katy gui mba'emo vai ou aguã rami nhomomba etearã.

⁷ Mba'eta guary ma ituiaty gui oẽ ma ouvvy vyv regua kuery mombaarã.* Ou ae ma, oĩaty oea ma ouvvy pendejvy ha'e peneretã ikuai va'e ombovaipa aguã, avave rei noiãve aguã rami.

⁸ Ha'e nunga rupi pendejee pemõi ao penhemboaxya regua. Peneraxẽ ha'e pejae'o, mba'eta SENHOR ipoxy etea ndoaxa rivei 'rã nhandegui.

⁹ Ha'e va'e ára ma huvixa kuery nda'ipy'a guaxuvei 'rã, sacerdote kuery onhemondyipa 'rã, ha'e profeta kuery voi okyjepa 'rã", he'i SENHOR.

¹⁰ Ha'e ramo xee aipoa'e: "Ai SENHOR Xeruete! Kore rembotavy uka ra'e kova'e tetã Jerusalém pygua kuery, 'Pendekuai porã 'rã', 're uka vy. Ha'e rami teĩ kyxe ou ma orenhe'ẽ re peve", ha'e.

* 4:7 "Guary" he'ia ma Babilônia pygua kuery ombou aguã re Nhanderuete ijayvu vy, ojeupegua kuery ojevavyague re ombopaga aguã.

¹¹ Ha'e va'e jave py kova'e tetã Jerusalém pygua kuery pe SENHOR aipoe'i 'rã: "Xeivygua kuery re vvytu haku va'e oipeju 'rã vvy'ã ita anho reia gui, mba'emo pirekue omboveve aguã e'y guive, neĩ oiky'a'o aguã e'y.

¹² Ha'e rami aguã gui vvytu xea guigua ou va'e ma hatãve ete 'rã. Ha'e rami vy xayvuu 'rã ha'e kuery opaga aguã re", he'i.

¹³ Ne'exa, pee ma arai rami ou oiny imombaarã, ikaróxa ma vvytu atã va'e rami ou. Hymba kavaju kuery ma taguato gui inhakuãve va'e. Nda'evei ete nhandevy! Nhanemomba ta ma!

¹⁴ "Ha'e gui Jerusalém pygua kuery, peo jepe aguã peiky'a'o ke penekuraxõ mba'emo vai oĩ va'e gui! Raka'e peve tu pendepy'a re pemoĩ 'rã ha'eve'yã rami rei pendekuai aguã?"

¹⁵ Mba'eta Dã tetã guive peteĩ ayvu onhenduu, vvy'ã reia Efraim re oĩ va'e guive omombe'ua mba'emo vai oikoague.

¹⁶ Perojapukai vvy regua ikuai va'e pe, pendu uka Jerusalém tetã re mba'emo oiko va'erã. Ha'e vvy aipo peje: "Peteĩ vvy momybyr ete va'e gui ou tetã jokoarã kuery, oiapukai jogueruvy Judã vvy re tetã ikuai va'e ha'e javi re", peje.

¹⁷ Mba'eta ha'e kuery ojokopa 'rã Jerusalém mba'ety re opena va'e oarõa rami, ha'e pygua kuery xerovai ikuai rire", he'i SENHOR.

¹⁸ "Mba'eta pendereko vai ha'e mba'emo vai pejapoaty ojapo ha'e nunga pendea'ary ou aguã rami. Pendere oiko ta va'e ma iro vaikue va'e, penekuraxõ re peve 'rã oo."

¹⁹ Ai xekuraxõ, xekuraxõ! Xee narombaraetevei ma haxy! Ai xekuraxõ renda! Xekuraxõ otytyra rei oiny! Akyriri aguã nda'evei, mba'eta xenhe'ẽ py aenduu mimby guaxu joe opu'ãa pygua omonhe'ẽa va'e ramigua.

²⁰ Mba'emo vai oiko jepi 'rã omombe'ua, vvy jave re ombovaipaa ramo. Xerekoa voi ombovaipaa vyvoi, xapy'a'i py aiaty ivaipa.

²¹ Raka'e peve nda'u aexa 'rã ha'e kuery bandeira omopu'ã rã, ha'e aenduu 'rã mimby guaxu omonhe'ẽ rã?

²² "Xeivygua kuery ma na'inhakã porãveipa, ndaxekuaavei ma rire. Ta'y kuery hi'aranduu e'y va'e ikuai, oenduu kuaa ve'y va'e. Mba'emo vai ojapo aguã re anho hi'aranduu, ha'e rã iporã va'e ma ndojapo kuaavei."

²³ Vvy re ama'ẽ rã natãĩ, mba'eve noĩ. Yva re ju ama'ẽ rã peteĩve henda py naexakãĩ.

²⁴ Vvyty ikuai va'e re ama'ẽ rã oryryipa, vvy'ã ikuai va'e voi oryryipa avi.

²⁵ Ama'ẽ rã avakue jipoavei, guyra yvate rupi oveve va'e voi ojavapa ra'e.

²⁶ Ama'ẽve ju rã vvy iporã va'ekue opyta ra'e tekoe e'yã, ha'e tetã ikuai va'ekue oitypaa SENHOR renonde, ipoxy ete ramo.

²⁷ Mba'eta po rami SENHOR ijavyu: "Vvy jave rupi ivaipa 'rã. Ha'e rami teĩ pavẽ e'y 'rã amokanhyy.

²⁸ Ha'e nunga rupi vvy re ojae'oa 'rã, yva pytũmba 'rã guive. Mba'eta xayvuu ha'e anhembody'a ae ma rire ndajeko rerovai 'rã, ha'ekue py ndajevy 'rã guive.

²⁹ Kavaju árygua ha'e hu'y revagua kuery revovo gui tetã pygua kuery ojavapa. Ka'aguy re oikepa, vvy'ã ikuai va'e rupi oẽ. Guetã ikuai va'e ha'e javi oeja rive, avave rei noĩavei.

³⁰ "Ha'e gui a'y ma ndee tetã ombovaipa pyre, mba'e re tu guĩ rami rejapo? Mba'eta pytã va'e py renhemonde, ouro guigua remoĩ, nderexa rembojegua, ha'e renhemoporã rive. Ha'e rami teĩ remoarũ va'ekue ndere nda'ija'evei vvy ndejuakxe okuapy.†

³¹ Mba'eta peteĩ ayvu onhenduu rã aenduu kyrĩ va'e oikuavã'i ta va'e rami, jypygua kyrĩ va'e raxy oenduu vvy ojexavai va'e rami haxẽ va'e. Ha'e va'e ma Sião memby raxẽ, ipyтуẽ atã reve opo oupi vvy aipoe'i va'e: 'A'y nda'evei ete xeivy! Mba'eta xenhe'ẽ py xekangy ma xejukaarã kuery gui', he'i va'e."

5

Jerusalém ha'e Judã pygua kuery ojevavya re ijavyvague

¹ "Peiko-iko Jerusalém tetã py tape ikuai va'e rupi. Pexa pota a'y, peikuaa pota, peka tetã mbyte rupi peteĩ'i ri jepe pejuo aguã ava teko porã rupi oiko va'e, anhetẽ va'e rekaa. Mba'eta pejuo ri ramo xee aperdoa 'rã tetã pygua kuery ha'e javi.

² Mba'eta ha'e kuery oura vvy 'Anhetẽ ete SENHOR oikove va'e rery rupi aura' he'i va'eri anhetẽ rupi e'y oura", he'i.

³ Ha'e gui SENHOR, anhetẽ rupi ikuai va'e e'y ri ty'y rexaxe? Ndee rembojexavai teĩ ha'e kuery ma haxy noendui. Remomba teĩ ha'e kuery nonhemo'aranduu ukai. Itaova gui hova ratãve va'e vvy ndojevyxei ae ma ndevy.

⁴ Xejeupe ae aipoa'e: "Iporiaukue'i anho rima nai'arandui, mba'eta ndoikuaai SENHOR guigua tape neĩ nguete oipota va'e.

⁵ Ha'e nunga rupi aa 'rã yvatekueve ikuai py, ha'e kuery reve xayvuu aguã. Mba'eta ha'e kuery nhi'ã oikuaa 'rã SENHOR guigua tape ha'e nguete oipota va'e", ha'e va'ekue. Ha'e rami teĩ ha'e kuery voi peteĩ rami omopẽ okuapy canga, ha'e omondopa ijokuaarã omoĩ mbyre.*

⁶ Ha'e nunga rupi guary ka'aguy regua ojukapa 'rã, aguarã'i guaxu tekoe e'yã regua ombovaipa 'rã, ha'e xivi oma'ẽ mbegue 'rã oiny ha'e kuery retã vvy'ry. Ha'e ramo tetã gui peteĩ va'e rei oẽ ramo ombova'ypa 'rã, mba'eta gueko vaia ha'e itavy nhemia rupi ikuai ve tema oje'oivyy.

† 4:30 Judã kuery ma Nhandeuete gui ojepe'apa vy kunha itavy va'e rami ikuai, amboae regua pe onhepytyvõ ukaxe vvy. Ha'e rami teĩ ha'e kuery nda'ija'e'i vvy noipytyvõĩ. * 5:5 Apy "Canga" he'ia ma Israel kuery reko re ijavy vvy, mba'eta vaka omba'eapo va'eri inharõ teri, imãxo porã e'y va'e rami ikuai (Deuteronomio 32.15; Atos 26.14).

7 “Ha'e rami pendekuaia xee aexa vy mba'exa 'rã tu roperdoa? Mba'eta pendera'y kuery ma xerejapa vy oura 'rã okuapy nguete e'ÿ rery rupi. Ha'e kuery xee amoeyatãmba rire te'i itavy rei okuapy, ono'õ ete okuapy kunhague ro py.

8 Kavaju omongaru porãmbý rami ha'ekue-'ekue'ÿ katy onha va'e rami peteĩ-teĩ opena rei 'rã okuapy oirũ ra'yxy re ae.

9 Xee nda'u aea rive 'rã ri ha'e rami ikuuia ambopaga e'ÿ re? Nambopagai 'rã teve ha'e rami ete ikuai va'e regua?” he'i SENHOR.

10 “Tapeo ke uvaty ikuai va'e rupi, peitypa, va'eri ha'e javi e'ÿ ta'vy. Pemopẽ ke hakã, mba'eta SENHOR pegua e'ÿ ramo.”†

11 Mba'eta anhetẽ rupi e'ÿ Israel ha'e Judá kuery ikuai xerovai”, he'i SENHOR.

12 “Mba'eta SENHOR gui ojepe'apa vy aipoe'i: ‘Ha'e'ÿ rima Nhanderue’, ha'e ‘Mba'emo vai peteĩve henda py ndoiko'i 'rã nhandere. Ndajaexai 'rã kyxe revegua, neĩ karuai’, he'i okuapy.

13 Profeta kuery eteve voi vvytu rami rive ikuai, mba'eta ayvu ndoguereko'i. Ha'e kuery nhomongyjeague ha'e kuery re ae ju 'rã ojeapa.”

14 Ha'e nunga rupi SENHOR Nhanderue ixondaro reta va'e aipoe'i: “Ha'e rami ete ha'e kuery ijavyvũ ramo ndejuru py xeavyvũ amoĩ 'rã tata rami, ha'e rã ha'e kuery ma ajapo 'rã xakã rami huguepa aguã.

15 Ne'exa peẽ Israel kuery, mombyry gui ambou 'rã peteĩ regua pende'áry. Ha'e va'e kuery ma imbaraeete va'e, yma guare ha'e ijavyvũ peikuaa e'ÿ va'e. Ha'e kuery ijavyvũ rã peẽ napendu kuaai 'rã”, he'i SENHOR.

16 “Ha'e kuery ru'y rryru ma vyyra rupa py ikua ojepe'a va'e rami nhomomba va'e. Ha'e va'e regua avakue ma ipy'a guaxuve va'e meme.

17 Ha'e kuery ho'upa 'rã mba'emo pemono'õ ha'e mbojape pejapo va'ekue. Omomba 'rã pendera'y ha'e penderajy kuery. Ho'upa 'rã penerymba vexa'i ha'e vaka kuery. Uva ha'e figo penhotÿ va'ekue voi ho'u 'rã. Okyxe py oitypa 'rã peneretã ikorapa va'e pejeroviaague ha'e javi.

18 Ha'e rami avi ha'e va'e ára teĩ xee noromomba katui'i 'rã”, he'i SENHOR.

19 “Ha'e gui ndevy pe ha'e kuery oporandu 'rã: ‘Mba'e re tu SENHOR Nhanderue ha'e nunga ha'e javi omingo nhandere?’ he'i 'rã ndevy. Ha'e ramo rembovai 'rã: ‘Peẽ kuery xereja, ha'e penderavy re amboae ramigua tuuete pe pendekuai rire amboae regua kuery pe ju 'rã pendekuai penderavy re e'ÿ’, re 'rã.

20 “Po rami emombe'u Jacó ramymino kuery pe, ejapo Judá kuery oendupa aguã rami. Ha'e vy aipo're:

21 ‘Napene'arandui ha'e napendu kuaai va'e kuery, pendu ke aÿ pova'e ayvu, mba'eta penderexa oĩ teĩ ndapexai, ha'e pendeapxya oĩ teĩ napendui va'e.

22 Xerenonde ndapejererokyjei 'rã teve?’ ” he'i SENHOR. “Xerenonde teĩ napekyriri 'rã ri? Mba'eta xee ma ita ku'i reia amoĩ va'ekue ye'ẽ jokoa raka'e rã peve guarã. Ha'e va'e re yai ojeapi-api teĩ ndojapoi 'rã mba'eve, hevovo ratã teĩ ndoaxai 'rã.

23 Ha'e rã kovã'e kuery ma opy'a re omoĩ xe'vy e'ÿ ikuai aguã, inhakã ratãa rupi. Ha'e rami vy xere opu'ã vy xerejapa oje'oivvũ.

24 Mba'eta ha'e kuery aipo nde'i: ‘Aÿ ma nhandekuai 'rã SENHOR Nhanderue gui jajererokyjea rupi, mba'eta ha'e ma ha'evea ára py oky ombou va'e, haku-a py'ya ára ha'e opaa py voi, ha'e mba'emo nhomono'õ aguã ára ojeupity aguã ojapo va'e', nde'i.

25 Ha'e rami 'rãgue py pendereko vaia ojapo mba'emo porã noĩvei aguã, pejejavva ojapo pendekuai porã aguã va'ekue nova'ẽ aguã rami.

26 “Mba'eta xe'vygua kuery mbyte ikuai mba'emo vai ojapo va'e. Peteĩ-teĩ joe oma'ẽ mbegue 'rã okuapy guyra'i ombo'axe va'e rami. Ha'e kuery nhuã ojavyvũ 'rã avakue ombo'a aguã.

27 Guyra'i gaiola tynyẽ va'e rami ha'e kuery ropy tynyẽ 'rã jokoreague repy. Ha'e rami vy ipo'akave ha'e oguererekopave 'rã oje'oivvũ.

28 Ikyrapa 'rã guive, hevvyatãmba riae. Pavẽ gui heko vai raxave 'rã. Noipytyvõ'i 'rã tyre'ÿ kuery mba'emo oguereko'i aguã, iporiaukue'i reko re ndoikuaa potai 'rã guive.

29 Xee nda'u aea rive 'rã ri ha'e rami ikuuia ambopaga e'ÿ re? Nambopagai 'rã teve ha'e rami ete ikuuia re?” he'i SENHOR.

30 “Ha'e gui ma mba'emo nhomondyipaarã ha'e nhomokanhya'ã oiko yvy re.

31 Mba'eta profeta kuery omombe'u merami rive 'rã xeavyvũ, ha'e ha'e kuery re sacerdote kuery onhemoirũ vy joguereko poyi 'rã okuapy. Ha'e nunga ae rima xe'vygua kuery ojou porã okuapy. Ha'e rami teĩ mba'e tu ha'e kuery ojapo 'rã ova'ẽ ramo ha'e nunga opa aguã ára?”

6

Jerusalém tetã ojokopaa aguã re ijavyvuague

1 “Benjamim kuery, penhamba ke Jerusalém tetã mbyte gui. Pemonhe'ẽ mimby guaxu Tecoa tetã py, ha'e Bete-Haquerẽm áry rupi pemoendy tata ikuaa ukaarã, mba'eta kuaray ijapu'a'ia katy gui ou 'rã mba'emo ja'ea ha'eve'ÿ va'e nhomomba etearã.

2 Mba'eta tetã porã Sião memby 'epyre ma xee aea 'rã ombo'ypa pyrã.

3 Ha'e ramo hovaigua kuery ou 'rã guymba kuery reve. Ijyvyry rupi ojapo 'rã oo'i. Ha'e vy peteĩ-teĩ guymba kuery omongaru 'rã ikuai aguã py ae.”*

† 5:10 Apy ma Israel rovaigua kuery pe ijavyvũ.

* 6:3 Apy xondaro kuery Jerusalém jokoarã ou va'e re ijavyvũ. “Guymba kuery reve 'rã ou”

he'ia ma xondaro kuery re ijavyvũ vy.

⁴ “Peiko katu ke tetã re pepu'ã aguã! Pepu'ã ke, jaje'oi kuaray mbyte jave. Ai kore, nda'evei ete 'rã nhandevy! Ka'aru ma, ka'arua omokuaray'ã ma heravy.

⁵ Pepu'ã ke, ha'e kuery rovai jaje'oi pyavyve. Nhambovaipa ha'e kuery ro ikorapa va'e onhemiaty”, he'i 'rã okuapy.†

⁶ Mba'eta SENHOR ixondaro reta va'e aipoe'i: “Pejayapa yvyra, ha'e pemopu'ã Jerusalém pejoko aguã. Ha'e va'e tetã ma ambopaga va'erã ae oĩ. Mba'eta mbyte rupi ma nhomoingo axya anho ikuai.

⁷ Yguarã ojo'o pyre yy oĩ riaea va'e rami avi tetã re oĩ riaea heko vai va'e. Ha'e py ikuai jujukaa ha'e mba'emo mbovaipaara. Xerenonde ma imba'eaxya ha'e ijai oĩ riaea.

⁸ Ndee Jerusalém, enhemo'arandu uka nho ke, ndegui xee ajepe'a e'y aguã, ha'e gui xee rombovaipa vy oĩa ve'y aguã rami rojapo e'y aguã.”

Ha'e kuery ojevavya py hetã ombovaipaa aguã re ijavyvague

⁹ SENHOR ixondaro reta va'e aipoe'i: “Kyre'y rupi oeka-ekaa 'rã Israel kuery okuave'i va'e, uva'a mono'õa hakã ikuai va'e mbyte rupi opovyvya rami”, he'i.

¹⁰ Ha'e rami xeayvu vy ndeayvu amombe'u teĩ mava'e tu oendu 'rã? Ne'exa, ha'e kuery oapyxa ombotypa rire noendu 'rã. Ha'e kuery pe 'rã SENHOR ayvu ma ojeguarupy rami, noenduxe'i ramo.

¹¹ Ha'e rã xere ma oĩ SENHOR poxya amombe'u aguã. Xekane'õ ma aendu riaea vy. Mba'eta aipoe'i: “Anhoẽ 'rã xepoxya kyrĩgue tape rupi ikuai va'e ha'e kunumigue nhomboaty va'e áry. Ha'e ramo ombo'apaa 'rã ime kuery ta'yxy reve, tujakue'i ha'e ikarẽmba rei'i va'e voi.

¹² Ha'e kuery rogue omboaxapaa 'rã amboae kuery pe, imba'ety ha'e ta'yxy oguereko va'ekue voi, kova'e yvy re ikuai va'e rovai xepo aupi ramo”, he'i SENHOR.

¹³ “Mba'eta peteĩ-teĩ ojou reta-retavea rupi ikuai, kyrĩgueve ha'e tujakueve voi. Profeta ha'e sacerdote kuery vojokorepa rei okuapy.

¹⁴ Ha'e kuery ma hi'a'iry rive 'rã omonguera xevygua kuery. Ha'e vy 'Ha'evapa rei, mba'eve ndoikoi 'rã', he'i rive 'rã okuapy, ha'evapa rei ramo e'y.

¹⁵ Ha'e kuery oxĩmba 'rã, mba'eta oxĩ e'yã py ojapo okuapy ojeguarupy, noxĩ kuaavei guive. Ha'e nunga rupi ho'apa 'rã amboae kuery ho'aague rami. Xee ambopaga rã onhepyxangapa 'rã”, he'i SENHOR.

¹⁶ “Po rami SENHOR ijavyu: 'Peypa pe'amy tape joaxaa yvyrũ peexa pota aguã. Peporandu tape porã yma oĩ va'ekue re, ha'e tapeo ha'e va'e rupi ae. Ha'e rami vy pejou 'rã penenhe'ẽ opytu'u aguã', ha'e va'ekue teĩ ha'e kuery ma 'Ore ma ndorooi 'rã' he'i okuapy.

¹⁷ Ha'e rami rã amoĩ peẽ kuery rekoa rarõarã kuery. Ha'e vy aipoa'e: 'Pejapxyaka ke peiny mimby guaxu ipu rã guarã', ha'e teĩ ha'e kuery 'Ore ma noroendui 'rã', he'i okuapy.

¹⁸ Ha'e rami rire yvy regua kuery, pendu ke. Peno'õ va'e kuery, peĩkuua pota ke xevygua kuery mbyte oiko va'erã va'e re.

¹⁹ Yvy regua kuery, pendu ke! Mba'eta ha'e kuery áry xee ambou 'rã mba'emo vai. Ha'e kuery ae ikuaixague repy 'rã ambou, xeayvu re ndojapxyakai ha'e xeguigua lei omboyke okuapy rire.

²⁰ Ha'e nunga rupi mba'erã tu xea py ha'e kuery ogueru Sabã yvy guigua heakuã porã va'e ha'e yvyra aygue'i heakuã porã va'e yvy mombyryve guigua oapy aguã? Mba'eta xevy guarã peapy va'e ma xee ndarovy'ai, xee ndajou porã peme'ẽ va'e.”

²¹ Ha'e nunga rupi SENHOR aipoe'i: “Ne'exa, xee amoĩ 'rã kova'e kuery reityarã. Ha'e ramo ho'apa 'rã okuapy, tuu kuery ha'e ta'y kuery voi. Ha'e katy'i rupi ikuai va'e voi omanomba 'rã, irũ kuery guive.”

Kuaray ijapu'a'ia katy gui hovaigua kuery ou aguã re ijavyvague

²² SENHOR aipoe'i: “Peteĩ regua ou 'rã kuaray ijapu'a'ia katy gui, heta ete va'e regua opu'ã 'rã jogueruvy yvy apy gui.

²³ Guyrapa ha'e hu'y reve 'rã ou. Ha'e kuery ma porayvu va'e'y, nhomboaxy kuaa va'e'y. Ye'ẽ rami 'rã hevovo. Kavaju áry 'rã ou. Ha'e rami vy xondaro kuery hyxyra 'rã jogueruvy peẽ Sião pygua kuery re opu'ã okuapy aguã”, he'i.

²⁴ “Ha'e kuery oua omombe'ua rã nhaendu vy nhandepo hu'ũmba. Nanhandekorãveipa, omemby oikuaã'i ta va'e raxy ramigua nhaendu guive.

²⁵ Tapeo eme mba'ety rupi, neĩ peguata eme tape rupi, mba'eta nhanderoaigua kuery kyxe reve ou. Jovajovai re ikuai nhanemongvjearã.

²⁶ Xeretarã raju kuery, pemoĩ ke ao penhemboaxya regua, ha'e penhembojere pejupy tanhimbu rupi. Pejao' ipi'a peteĩ'i va'e re ojae'o va'e rami, pejexavaia gui ae. Mba'eta nhande'áry ou xapy'a 'rã nhanemombaara.”

Oiky'a'o nhea'ã rivea re ijavyvague

²⁷ “Xevygua kuery mbyte ndee romoĩ prata ky'a'oarã, ha'e oo imbaraete va'e rami, ha'e kuery reko rexa vy reikuaa pota aguã.

²⁸ Mba'eta ha'e kuery ma naxenhe'ẽ renduia rupi tema ikuai, joekokue mombe'u rivea rupi guive. Overa va'e ha'e ferro rami rive ikuai iki'apa va'e vy.

²⁹ Mba'eta tata áry prata ky'a'oa oipeju atã teĩ chumbo anho rei opyta tata opa rire. Aiky'a'o nhea'ã rive, ha'e kuery mbyte gui heko vai va'e ndojepe'ai ramo.

³⁰ Ha'e kuery pe ma 'Prata ky'akue rive' 'ea 'rã, SENHOR omombopa ramo.”

† 6:5 Apy ma xondaro kuery jogueroayvu tetã re opu'ã aguã.

Templo re rive ha'e kuery ojeroviaa re ijayvuague

¹ Po rami SENHOR oayvu ombou Jeremias pe:

² “Ei ke SENHOR pegua oo rokê py xeayvu remombe'u aguã. Ha'e vy aipo'ere: ‘Judá regua kuery kova'e okê rupi SENHOR pemboete aguã peike va'e ha'e javi, pendu ke SENHOR ayvu’, ‘re.’”

³ Mba'eta SENHOR ixondaro reta va'e Israel kuery ruete aipoe'i: “Pejeko rova ke amboae rami pendekuai aguã. Ha'e ramo xee ajapo 'rã kova'e tekoa py pendekuaive aguã rami.

⁴ Pejeroviave eme po ramigua ayvu rive: ‘Apy ma oĩ templo SENHOR pegua, templo SENHOR pegua’, he'i va'e re pejerovia eme.

⁵ Ha'e rami 'rãgue py pejeko rova ke amboae rami pendekuai aguã, ha'e peteĩ-teĩ ha'evea rami pejapo peneirũ kuery reve.

⁶ Pejavyky rive eme amboae vvy regua, tyre'y neĩ imeve'y va'e kuery guive. Kova'e henda py pemoëve eme heko porã va'e ruguy, peiko eme guive amboae ramigua tuuete kuery re, pendejeupe ae pejapo vai e'y aguã.

⁷ Ha'e rami ri pendekuai ramo xee ajapo 'rã kova'e vvy re pendekuaive aguã rami, yma guive peneramoĩ kuery vvy raka'eva rã peve guarã ame'ẽ va'ekue py.

⁸ “Ne'exa, peẽ kuery ma ayvu rive perovia va'e, pendevy mba'everã ovare'y va'eri.

⁹ Mba'e tu pejapo? Penemonda, pejojuka, pendetavy rei ha'e peura merami rive. Heakuã porã va'e peapy 'rã tuuete ramigua Baal pe, ha'e amboae ramigua tuuete peikuaa e'y va'e katy peo.

¹⁰ Ha'e rive teĩ peju vy xerenonde pepu'ã 'rã pekuapy kova'e oo xerery oĩaty py. Ha'e vy aipopeje 'rã: ‘Jaa jepe ma’, peje teĩ mba'emo vai pejapove tema rive.

¹¹ Kova'e oo xerery oĩaty ma imonda va'e kuery onhemiaty rami teve peikuaa? Ne'exa, xee ma ha'e nunga ha'e javi aexapa”, he'i SENHOR.*

¹² “Ha'e gui tapeo opy xevygua Siló tetã py oĩague katy. Ha'e py ma jypy'i xerery amoĩague. Ha'e gui pexa ke ha'e py ajapo va'ekue, xevygua Israel kuery heko vaĩague re ambopagaague.*

¹³ Aỹ ma ha'ekue nunga ae peẽ voi pejapo avi”, he'i SENHOR. “Pendevy xeayvu jepi ko'ẽ rai guive teĩ napendui. Peẽ kuery xee roenoĩ teĩ peẽ naxembovai.

¹⁴ Ha'e ramo Siló tetã re ambovaipaague rami ambovaipa avi 'rã kova'e oo xerery oĩaty re, ha'e va'e re rive pejerovia ramo, ha'e kova'e tekoa re guive, pendevy ha'e peneramoĩ kuery pe ame'ẽ va'ekue ri.

¹⁵ Ha'e rami vy peẽ kuery roipe'apa 'rã xerenonde gui, penderivy kuery Efraim regua aipe'apaague rami ae ju.”

Guetarã kuery re profeta ojerure e'y aguã re ijayvuague

¹⁶ “Ha'e nunga rupi ejerureve eme kova'e kuery re, ejapukaive eme, enhea'ãve eme renhembo'ea py, mba'eta xee naendui 'rã.

¹⁷ Ndee nda'u nderexai teve ha'e kuery ojapo va'e Judá re tetã ikuai va'e ha'e Jerusalém py tape ikuai va'e rupi?

¹⁸ Mba'eta ta'y kuery ogueru 'rã yxakã, ha'e tuu kuery ju omoendy 'rã tata. Ha'e rã kunhague ma omoapomo 'rã trigo mbojape ojapo aguã xyete ramigua yva pygua peguarã.† Tuuete kuery mboae pe voi ome'ẽ 'rã mba'emo rykue, xembopoxy aguã rami rive.

¹⁹ Ha'e rami avi xee ae ri nda'u ha'e kuery ombopoxya? Tyrã pa ha'e kuery ae e'y teve onheroangeko, oximba rei aguã rami?” he'i SENHOR.

²⁰ Ha'e nunga rupi SENHOR Nhanderuete aipoe'i: “Ne'exa, kova'e tekoa áry anhoẽ 'rã xepoxya ha'e ajou vaia, avakue ha'e mymba ikuai va'e áry, yvyra ikuai va'e ha'e mba'emo aju vvy gui oiko va'ekue áry guive. Ha'e gui ha'e nunga okai vy ndogueti 'rãe.”

Mba'emo nhame'ẽ jepia rive mba'everã ndovareia re ijayvuague

²¹ SENHOR ixondaro reta va'e, Israel kuery ruete aipoe'i: “Mymba peapy reve peme'ẽ va'erã peru teĩ pendejeupe ae topyta ho'okue pe'u aguã.

²² Mba'eta jypy'i Egitto vvy gui peneramoĩ kuery anoẽmba jave py ma ndaxeayvui va'ekue mba'emo oapy aguã re, neĩ mba'eva name'ẽ ukai xejeupe.

²³ Ha'e rami 'rãgue py pova'e nunga anho ajapo uka ha'e kuery pe. Aipoa'e: ‘Pejapyxaka ke xeayvu re. Ha'e ramo xee aiko 'rã Penderuete, ha'e rã peẽ ma xevygua kuery 'rã peiko. Peiko ke ajapo uka va'ekue ha'e javi rupi, pendekuai porã aguã’, ha'e va'ekue.‡

²⁴ Ha'e rami teĩ ha'e kuery ndojapyxakai, noendu potai. Ha'e rami vy ha'e kuery ae onhemongetaa rupi ikuai, inhakã ratã reia rupi guive. Ha'e rami vy guakykue katy ojevvy, guenonde katy ndooi.

²⁵ Egitto gui peneramoĩ kuery anoẽmba ára guive aỹ peve pendea py ambou xerembiguaĩ profeta kuery, ko'ẽ nhavõ, ko'ẽ rai guive ambou.

* 7:11 Mateus 21.13, Marcos 11.17, Lucas 19.46

* 7:12 Ha'e kuery tuuete mboae ramigua re ikuai ramo SENHOR ombovaipa raka'e Siló tetã (1

Samuel 4.1-11). † 7:18 Apy “Xyete yva pygua” he'ia ma Babilônia pygua kuery xyete “Rainha” epy va'e re ijayvu vy (44.17-19, 25). ‡ 7:23 Egitto gui Nhanderuete ha'e kuery oguenoẽ jave py ma onhe'ẽ rendu aguã re anho ranhe ijayvu, mba'emo ome'ẽ aguã re'y (Êxodo 19.3-6). Mba'eta mba'emo ixupe nhame'ẽa gui oipotave nhanhe'ẽ rendu (6.20; Salmo 40.6-8; Isaías 1.11-17).

²⁶ Ha'e rami teĩ peẽ kuery ndapejapyxakai xeayvu re, ndapeikuaa potai guive. Ha'e rami 'rãgue py peneakã ratã va'e vy peneramoĩ kuery gui nda'eveive va'e pejapo.

²⁷ "Ha'e nunga rupi ha'e kuery pe xeayvu ha'e javi remombe'u teĩ ha'e kuery ndojapyxakai 'rã ndeayvu re. Renoĩ teĩ nanembovai 'rã okuapy.

²⁸ Aipo'ere ha'e kuery pe: 'Peẽ kuery ma SENHOR Penderuete ayvu re peikuaa pota va'e'ẽy, napen-hemo'arandu ukai guive. Ha'e ramo anhetê va'e nonhenduvei ma, pendejuru py noĩvei ma', 're."

Judá kuery re Nhanderuete nopenavei aguã re ijayvuague

²⁹ Peẽ Jerusalém pygua kuery, pejayapa ke pende'a xevy pe icky'a e'ỹ va'erã pemboaxa va'ekue, ha'e pejae'o peovy vyvty yvateve va'e áry katy. Mba'eta SENHOR nopenavei ma 'rã peẽ aỹgua kuery re, pendejou vai vy napendereraa jepevei ma 'rã guive.

³⁰ Mba'eta SENHOR aipoe'i: "Xerenonde Judá kuery heko vai okuapy. Ha'e rami vy xerery oĩaty py omoĩ okuapy mba'emo ra'angaa ojegarupy, omongy'apa aguã rami rive.

³¹ Hinom ra'y rekoague yvyugua py voi ojapo avi altar Tofete 'epy va'e, ha'e py gua'y kuery ha'e guajy kuery oapy aguã. Ha'e ramigua ma xee ajapo uka va'ekue'ỹ, neĩ nanhembopy'ai guive.

³² Ne'ixa, ou 'rã ára ha'e va'e pe 'Tofete' nda'eavei aguã, neĩ 'Hinom ra'y rekoague yvyugua' nda'eavei voi. Ha'e rami 'rãgue py 'Yvyugua jojukaaty' 'ea 'rã. Mba'eta Tofete py ma ojatya 'rã omano va'ekue retেকে, amboae henda py nda'evei ramo", he'i SENHOR.

³³ "Ha'e ramo ha'e kuery retেকে opyta 'rã guyra yvate rupi oveve va'e ha'e mymba vyvty guypigua ho'u va'erã. Ha'e nunga mondyarã ndoikoi 'rã guive.

³⁴ Mba'eta Judá re tetã ikuai va'e ha'e Jerusalém py tape ikuai va'e rupi amombytu'upa 'rã ovy'a rei va'e ayvu, omenda va'erã avakue ha'e kunhague ayvu guive. Ijyvy ojeapo 'rã ombovaipa pyre."

8

¹ SENHOR aipoe'i: "Ha'e va'e jave ma Judá regua huvixa kuery ha'e yvatekueve kãgue oguenoẽmbaa 'rã onhono porãague gui, sacerdote ha'e profeta kuery, ha'e Jerusalém pygua kuery kãgue ha'e javi.

² Ha'e rami vy omoĩmbaa 'rã kuaray ojopea ha'e jaxy rexakãa rupi, ha'e yva re ikuai va'e ha'e javi guýry rupi, mba'eta ha'e nunga ha'e javi ha'e kuery omboete vy ha'e va'e pe ikuai rire, hakykue rupi mba'emo re oporandua rupi oo, ha'e henonde guenapy'ã re oĩ rire. Ha'e va'e rire ma ikãgue nomono'õave imbokupy 'rã, nonhono porãa jevyvei 'rã guive. Mymba repxoi rami rive 'rã opyta yvy re.

³ Kova'e kuery heko vai va'e okuave va'e amoai 'rã opa rupi. Ha'e ramo ha'e kuery oikovexe 'rãgue py omano voixe 'rã okuapy", he'i SENHOR ixondaro reta va'e.

Nhombopaga aguã re ijayvuague

⁴ Aipo'ereve tema: "Po rami SENHOR ijayvu: Avakue ho'a vy nda'u nopy'ã jevyi 'rã ri? Tape ojavy va'ekue nda'u ndojevyi 'rã ri guape py?"

⁵ Ha'e rami teĩ mba'ixa tu Jerusalém pygua kuery ojeroviaa gui ojope'a ma vy oea riaa ri? Mba'eta ha'e kuery ojokorea rupi ae tema ikuai, ndojevyxei vy.

⁶ Xee ajapxaka, aendu pota ainy teĩ ha'e kuery nda'ijayvui ae ha'evea ramigua re. Avave rei ndoikoi heko vaia gui onhemboaxy vy 'Mba'e tu ajapo?" he'i va'e. Mba'eta peteĩ-teĩ ma guape rupi ae oiko atã 'rã, kavaju joe opu'ãa katy onha atã va'e rami.

⁷ Ha'e rã cegonha yvate rupi oveve va'e ma oikuaa 'rã ojevy aguã ára. Pyku'li, mbyju'li ha'e grou voi oveve ovy aguã ára re oikuaa pota va'erã meme. Ha'e rã xevygua kuery ma ndoikuaa potai xee SENHOR ambopaga ta rã.

⁸ Mba'ixa tu peẽ kuery aipopeje: 'Nhande kuerya py SENHOR guigua lei oĩ ramo nhane'arandupa va'e', peje? Mba'eta lei re nhombo'e va'ety kuery lei oguerova vy penembotavy.

⁹ Ha'e ramo hi'arandupa va'ekue oxĩmba 'rã, ombo'apaa rã ndaekorãvei rei vy. SENHOR ayvu ha'e kuery oea ma ramo mba'e nunga 'arandu tu ha'e kuery re oĩ?

¹⁰ Ha'e nunga rupi ta'yxy kuery amboaxa 'rã amboae kuery pe, imba'ety guive amboaxapa 'rã ija pyaurã pe. Mba'eta peteĩ-teĩ jokorepaa rupi ikuai, vyv'igieve ha'e yvatekueve voi. Profeta ha'e sacerdote kuery ma apu rupi ikuai va'e meme.

¹¹ Ha'e kuery ma hi'a'iry rive 'rã omonguera xevygua kuery. Ha'e vy 'Ha'evapa rei, mba'eve ndoikoi 'rã', he'i rive 'rã okuapy teĩ ha'evapa rei ramo e'ỹ.

¹² Ha'e nunga rupi ha'e kuery omoxĩmbaa 'rã, mba'eta oxĩ e'ỹa py ojapo okuapy ojegarupy, noxĩ kuaavei guive. Ha'e nunga rupi ho'apa 'rã amboae kuery ho'aague rami. Xee ambopaga rã onhepyxangapa 'rã okuapy", he'i SENHOR.

¹³ "Mba'eta xee amokanhymba 'rãe. Noĩvei ma 'rã uva'a hakã re, neĩ figo hi'y re. Hogue voi overepa ma. Xeayvu ae ma ha'e kuery áry ha'e nunga ou aguã re", he'i SENHOR.

¹⁴ Mba'e re tu apy teri jaguapy nhainy? Pendeaty ke tetã ikorapa va'e py jaikepa aguã nhamanomba aguã ha'e py. Mba'eta SENHOR ijayvu ae ma nhanderjuka aguã re, jay'u aguã ome'ẽ ma yy veneno re irũ va'e, SENHOR rovai jajejavy rive.

¹⁵ Mba'emo porã nharõ teĩ iporã va'e jĩpoi, jakuera aguã ára 'rãgue py nhamomongyjepaarã ou.

¹⁶ Dã tetã guive onhendu ma nhanderovaigua kuery renda kavaju pytuẽ. Yvy ha'e javi rupi oryryipa hymba kavaju onhendua gui. Ha'e nunga ou 'rã, ombovaipa 'rã nhanderjuka aguã re, jay'u aguã ome'ẽ ma yy veneno re irũ va'e, SENHOR rovai jajejavy rive.

17 “Mba'eta penembyte ambou 'rā mboi vaikue ha'e popia va'e, imomāxoarā jipoi 'rā guive. Ha'e ramo pendexu'upa 'rā”, he'i SENHOR.

Hetarā kuery ikuai axy rā profeta ndovy'iaigue

18 Ai, xee anhembody'a porā kuaa va'e rire xeporiaua gui! Kekuraxō voi ikangypa ma.

19 Mba'eta xeretarā rajy kuery yvy momybyra py ikuai py ojapukai okuapy: “Sião tetā py nda'u SENHOR noīvei teve? Noīvei teve ha'e py Nhandervixave?” he'i okuapy.

Ha'e ramo aipoe'i: “Ha'e rami avi mba'e re tu xembopoxy pekuapy mba'emo ra'angaa pejapo va'ekue py, ha'e amboae regua kuery pegua ta'angaa pemboetea py?” he'i.

20 Oaxa ma mba'emo nhamono'ō aguā ára, opa ma haku-a teī nhande ma ndajaa jepi teri.

21 Xeretarā kuery ikuai axy rā xee nda'ëvei ete aiko, ajae'o aikovy ha'e kuery re. Anhemondyi reia anho aendu.

22 Gileade yvy re jipovei teve moā? Ha'e py nhandepoanoarā jipovei teve? Mba'exa tu ndoikoi ri xeretarā kuery mongueraarā?

9

1 Xeakā yvu ramigua ojeapo vy xerexay oē riae va'e rire ara py ha'e pyávy xee ajae'o 'rāgue xeretarā kuery regua omanogue re.

2 Ha'e rami e'ŷ vy tekoa e'ŷa py uguata va'e okeaty ramigua areko va'e rire xeretarā kuerya gui momybyri 'rāgue aī, ha'e kuerya gui ajep'e'a 'rāgue. Mba'eta ha'e kuery ma itavy rei ha'e nhombotavy rei va'e meme.

3 SENHOR aipoe'i: “Ha'e kuery ma guyrapa rami oapekū omokarē va'e, ijapu aguā rive. Yvy re imbaraeve 'rā oje'oivy va'eri anhetē rupi e'ŷ. Heko vaive aguā katy oove tema 'rā, ha'e rā xee ma ndaxekuaai okuapy.

4 Penheangu ke peteī-teī peneirū kuery gui, pejerovia eme penderivy ae re teī. Mba'eta penderivy kuery nhombotavya reia rupi anho ikuai, ha'e peneirū kuery omombe'u rive 'rā joekokue ramigua.

5 Peteī-teī ojoi rei 'rā ojea katy'i rupi ikuai va'e, ha'e anhetē va'e rupi e'ŷ 'rā ijayvu. Apu rupi rive onhembo'e 'rā ijayvu aguā re. Ikane'ō 'rā okuapy mba'emo vai ojapoa rupi.

6 Anhetē rupi e'ŷ ikuai, anhetē rupi e'ŷ vy ndaxekuaa potai guive”, he'i SENHOR.

Ha'e kuery operdepa, ha'e escravo-rā ogueraapaa aguā re ijayvuague

7 Ha'e nunga rupi SENHOR ixondaro reta va'e aipoe'i: “Ne'exa, ha'e kuery xee aiky'a'o vy aa'anga 'rā. Tyrā pa marā rami pa areko ta xevyguu kuery?

8 Mba'eta ha'e kuery apekū ma hu'y jokuakarā ramigua oī, nhombotavya rupi rive ijayvu va'e vy. Ojuru py ijayvu 'rā oirū kuery reve ikuai porā aguā re, ha'e rā opy'a py ma omoī 'rā ojuka aguā.

9 Xee nda'u aeja rive 'rā ri ha'e rami ikuai ambopaga e'ŷ re? Nambopagai 'rā teve ha'e rami ete ikuai va'e regua?” he'i SENHOR.

10 Xee ajae'o 'rā yvyty ikuai va'e re, xerexay vaipa 'rā nhuūndy tekoa e'ŷa rupi ikuai va'e re. Mba'eta okaipa ma, ha'e avave rei ndoaxaavei ma ha'e rupi. Vaka voi nonhe'ē nhenduvei ma ha'e py. Guyra yvate rupi oveve va'e ha'e mymba kuery okanhymba ma oje'oivy.

11 Mba'eta aipoe'i: “Xee ajapo 'rā Jerusalém tetā mba'emo ra'ykuerā rive, ha'e jagua-tuyv nhe'ē ikuai atyrā. Ha'e Judā yvy re tetā ikuai va'e ma ajapo 'rā tekoague oī aguā, avave rei noīavei aguā rami”, he'i rire.

12 Ha'e gui mava'e ava nda'u hi'arandu va'e ha'e nunga oendu kuaa aguā, ixupe SENHOR oayvu oikuaa uka rā? Mava'e nda'u omombe'u porāve kuaa 'rā mba'e re pa yvy ivaipa ha'e okai tekoa e'ŷa rami, ha'e rupi avave rei ndoaxaavei aguā rami?

13 Ha'e ramo SENHOR ombovai: “Mba'eta ha'e kuery rekorā xeguigua lei aeja va'ekue gui ojepe'apa rire. Ha'e kuery ndojapxyakai xeyvyua re, neī ha'e va'e rupi nda'ikuai guive.

14 Ha'e rami 'rāgue py inhakā ratā va'e vy ta'angaa Baal ikuai va'e re rive ikuai, tuu kuery ombo'eague rami ae”, he'i.

15 Ha'e nunga rupi SENHOR ixondaro reta va'e, Israel kuery Ruete aipoe'i: “Ne'exa, ha'e kuery xee amongaru 'rā veneno re, ha'e yy veneno re irū va'e ame'ē 'rā oy'u aguā.

16 Amoāimba 'rā yvy regua ha'e kuery tuu kuery oikuaa e'ŷ va'e ikuai rupi. Ha'e gui ha'e kuery rakykue amondouka 'rā kyxe revegua, amomba peve”, he'i.

17 SENHOR ixondaro reta va'e aipoe'i: “Pendu ke! Penoi ke kunhague joguerojoe'o kuaa va'e, peka uka ou aguā”, he'i.

18 Tove ha'e kuery tou pojava, nhande áry rupi tajoguerojoe'o rei nhendu, nhande voi nhandereaxypa ha'e nhanderexa gui yy oē vaipa aguā.

19 Mba'eta Sião tetā gui onhendu peteī ojae'o va'e: “Nhanemoingo axya ha'e nhanemoximbaa ete mal Mba'eta jaeja 'rā nhandeyvy, nhanderoivaigua kuery nhanderekoa ombovaipa rive.

20 Peē kunhague, pendu ke SENHOR ayvu, pejapxyaka ijuru gui onhendu va'e re. Pembo'e penememby kuery ojae'o avi aguā re, peteī-teī pembo'e 'rā peneirū kuery ojae'o ete aguā.

21 Mba'eta manoa oike ma nhande janela ikuai va'e rupi, oo tuvixave va'e rupi guive. Ha'e rami vy omomba ma kyri'gue tape rupi, kunumigue tetā mbyte rupi ikuai va'ekue guive ojuka.”

22 Ndeayvu ke: “ SENHOR aipoe'i: 'Avakue re'ōgue mba'emo repoxi rami 'rā ikuai mba'ety rupi, mba'emo ra'iyi imono'ōa kuery rakykue rupi ho'aa rami. Ha'e rā ndoikoi 'rā avave rei imono'ōarā ”, 'ere.

Nhanderueete jaikuaa rupi anho jarovy'a aguā re ijayvuague

²³ SENHOR aipoe'i: "Tove hi'arandu va'e toguerovy'a rei eme o'arandua, imbaraeete va'e toguerovy'a eme ombaraetea, ha'e oguerekopa rei va'e ma toguerovy'a eme mba'emo oguerekopaa.

²⁴ Ha'e rami 'rãgue py mba'emo rerovy'aa tovy'a xekuaa ha'e SENHOR aikoa oikuaa re anho. Mba'eta xee yvy re aexa uka va'e ma anhombaoxya, anhetê rupi ajoguerekoa ha'e teko porã. Mba'eta xee arovy'a va'e ma ha'e nunga anho", he'i SENHOR.*

²⁵ SENHOR aipoe'ive ju: "Ne'exa, ovaê ta ma ouvy ára ambopaga aguã opire omboi uka va'ekue ha'e omboi uka e'ÿ va'e kuery ha'e javi.

²⁶ Ha'e kuery ma Egito pygua, Judá ha'e Edom pygua kuery, Amom ha'e Moabe pygua kuery, o'a ojaya apu'a'i va'e, ha'e yvy piru reia rupi ikuai va'e ha'e javi. Mba'eta yvy regua ma guive rã opire omboi uka e'ÿ va'e ikuai, Israel kuery voi opire omboi uka e'ÿ va'e rami ikuai opy'a py."

10

Mba'emo ra'angaa rami e'ÿ SENHOR oikoa re ijayvuague

¹ Peê Israel kuery, pendu ke SENHOR pendevy ijayvu rã.

² SENHOR aipoe'i: "Penhembo'eve eme amboae regua kuery reko rami pendekuai aguã re, penhemondy eme guive yva re hexa pyrã oiko va'e gui, ha'e nunga gui amboae regua okyjepa rei tei.

³ Mba'eta yvy regua kuery reko ma mba'everã ndovarei. Mba'eta ha'e kuery ma ka'aguy re oo vy ojaya 'rã pete'i vyvra, ha'e gui hembiaipo kuaa va'e ma omoatyrõ 'rã heravy haxa py.

⁴ Ha'e gui ombojegua 'rã prata ha'e ouro py, ha'e gui martelo py ombota-mbota 'rã karavo re ho'a e'ÿ aguã.

⁵ Ha'e nunga ijayvu va'e'ÿ vy mba'emo ra'angaa ma pepino-ty py guyra mondyiarã omo'ã mbyre rami rive hi'ai. Oguata va'e'ÿ vy amongue ogueraa ramo mae ma 'rã oo. Ha'e nunga gui pekyje eme, mba'eta pendevy ndojapo vai 'rã, hexe no'i guive pendevy ojapo porã aguã", he'i.

⁶ Ha'e rã ndee SENHOR, avave rei ndoikoi 'rã ndee ramigua. Ndee ma ndeyvate, nderery voi ipo'aka ete va'e.

⁷ Ndee ma yvy regua kuery ruxivave. Mava'e tu ndojererokyjei 'rã nerenonde? Mba'eta ha'e rami aguã ma ndevyguaa ae. Ha'e rã yvy regua hi'arandukueve mbyte ndoikoi 'rã ndee ramigua, ha'e kuery openaa ha'e javi rupi tei.

⁸ Ha'e kuery ma nai'aranduvei ha'e na'inhakã porãvei va'e meme. Ha'e kuery mbo'ea ma mba'everã ndovarei, vyvra pëgue oikove va'e'ÿ vy.

⁹ Ha'e nunga peguarã Tãrsis gui ogueru 'rã prata ombope pyre, ha'e Ufaz yvy gui ogueru 'rã ouro. Ta'angaa ikuai va'e ma hembiaipo kuaa va'e rembiapo, ha'e ouro re omba'eapo va'e opo py ojapo va'ekue rive. Omonhemonde 'rã heravy hovy va'e ha'e púrpura guigua py. Ha'e nunga ma avakue hembiaipo kuaa va'e rembiapo meme.

¹⁰ Ha'e rã SENHOR Nhanderueete ma anhetê ete va'e. Nhanderueete oikove va'e oiko, Nhanderuvixave imarã e'ÿ va'e. Ipoxy ramo yvy oryryipa 'rã, yvy regua kuery voi ndogueropo'akai 'rã ipoxya.

¹¹ "Ha'e kuery pe aipo'ere: 'Penderueete kuery ramigua ma yva ha'e yvy apoare e'ÿ vy okanhymba 'rã yvy gui, ha'e yva gu'ÿry gui.'"

¹² Mba'eta yvy ma SENHOR ae ojapo raka'e opo'akaa rupi. O'arandua rupi onhono yvy, ha'e rã yva ma oikuaapaa rupi oipyo.

¹³ Ha'e ma yapu onhendu atã aguã rami ojapo ramo yva re yy o'i va'e omyimba 'rã, ha'e yvy apy gui opu'ã 'rã ouvy vyvxi. Omoingo avi 'rã overa va'e oky aguã, vyvty guive oguenoê 'rã oiaty gui.

¹⁴ Ha'e rã avakue ma nai'arandui ha'e mba'eve ndoikuai va'e meme. Ouro re omba'eapo va'e kuery voi oximba va'erã meme ikuai mba'emo ra'angaarã ojapoague re, mba'eta ta'angaa ikuai va'e avi anhetê va'e'ÿ meme, ipytuê va'e'ÿ guive.

¹⁵ Ha'e nunga ma mba'everã ndovarei va'e, ojojai rei pyrã rive. Nhombopagaa ára py okanhymba 'rã.

¹⁶ Ha'e rã Jacó Ruete ma ha'e rami e'ÿ. Mba'eta ha'e ma opa mba'e moingoare, Israel kuery voi ixupeguia ikuai. Hery ma SENHOR ixondaro reta va'e.

Judá yvy ombovaipaa ague re ijayvuague

¹⁷ Ndee tetã ojokopaa va'e py nderekoo va'e, eupi ke yvy gui nemba'e rei-rei reraa aguã.

¹⁸ Mba'eta SENHOR aipoe'i: "Ne'exa, aÿ ma amoêmba 'rã xeyvy re ikuai va'e, amoingo axypa 'rã jexavaia oendu aguã", he'i.

¹⁹ Nda'evei ete xevy, apave'i avy! Xeai ma haxy vai ete. Ha'e ramo xee aipoa'e: "Kova'e haxy ma ajexavai aguã ou, aropo'aka va'erã", ha'e.

²⁰ Xeroguy ombovaipaa ma, ixã voi omondopaa. Xera'y kuery oopa ma, nda'ikuaivei. Avave rei ndoikoi xeroguy moatyrõ jevyarã, ne'i ijao'iarã omo'i ju va'erã.

²¹ Mba'eta joe opena va'e kuery ma nai'arandui vy ndoekavei okuapy SENHOR. Ha'e rami vy nda'ikuai porãvei, hymba kuery oaimba guive.

²² Ne'exa, omombe'ua pete'i avy! Mba'eta kuaray ijapu'a'ia katy gui ou oiny hevovo rei va'e. Ha'e nunga ma Judá regua tetã mbovaipaara ou, jagua-tuvy nhe'ê ikuai atyrã rive omombyta aguã.

²³ SENHOR, xee aikuaa avave rei ndoiporavo kuaai 'rãa oiko aguã, oguata va'e ndoiporavo kuaai oguata aguã.

²⁴ SENHOR, xembopaga tei ke aropo'aka peve'i, ndepoxya py e'ÿ, ovare va'e'ÿ xee apyta e'ÿ aguã.

*

²⁵ Yvy regua kuery ndekuaa e'ỹ va'e áry enhoë ndepoxya, nderery rupi ojapukai e'ỹ va'e kuery áry. Mba'eta ha'e kuery ma omomba ma Jacó kuery, omokanhymba ha'e hekoague ombovaipa.

11

SENHOR guexeve guarã ojapo va'ekue rupi e'ỹ ikuai re ijayvuague

¹ Jeremias pe SENHOR oayvu ombou vy aipoe'i:

² “Endu ke xereve guarã ajapo va'ekue re ayvu oĩ va'e, ha'e emombe'u porã avakue Judá ha'e Jerusalém py ikuai va'e pe.

³ Ha'e vy aipo're: 'Po rami SENHOR Israel kuery ruete ijayvu: Ayvu vaipy oiko 'rã avakue kova'e ayvu xereve guarã ajapo va'ekue regua noendu potai va'e.

⁴ Ha'e va'e ayvu ma peneramoĩ kuery pe xee aeja va'ekue Egito yvy gui anoẽmba jave, ha'e tatakua ferro guigua gui. Ha'e vy aipoa'e va'ekue: “Pendu ke xeyvu, ha'e pejapopa penderute ajapo uka va'e ha'e javi. Ha'e rami vy 'rã xeyvua kuery pendekuai, ha'e rã xee ma aiko 'rã Penderute.

⁵ Ha'e rami vy 'rã ajapo xeyvuague peneramoĩ kuery yvyrã kamby ha'e ei oata e'ỹa ame'ẽ aguã re, aỹ ojekuaa rami”, ha'e va'ekue”, he'i.

Ha'e ramo xee ambvai vy aipoa'e: “Ha'eve va'e, SENHOR!”

⁶ Ha'e gui SENHOR aipoe'ive ju xevy: “Emombe'u ke pova'e ayvu ha'e javi Judá regua tetã ikuai va'e, ha'e Jerusalém py tape ikuai va'e rupi. Ha'e vy aipo'ere: 'Pendu ke pova'e ayvu Nhanderute guexeve guarã ojapo va'ekue regua, ha'e pejapopa', 'ere.

⁷ Mba'eta Egito yvy gui peneramoĩ kuery anoẽ guive kova'e ára peve xeyvu penderute ko'ẽ nhavõ, ko'ẽ rai guive aipoa'e: 'Pendu na xeyvu', ha'e.

⁸ Ha'e rami teĩ ha'e kuery noendu potai, ndojapyxakai. Ha'e rami 'rãgue py peteĩ-teĩ inhakã ratãa rupi ikuai. Ha'e rami rire ha'e kuery áry ambou ayvu vai xeyvuague ha'e javi, mba'eta ha'e kuery pe ajapo uka teĩ ndojapoi rire.”

⁹ SENHOR aipoe'ive ju xevy: “Judá ha'e Jerusalém pygua avakue ma nhemi rupi jogueroayvu teko vai rupi.

¹⁰ Mba'eta yma tamoi kuery xeyvu re ndojapyxakaxeiague rami ae ju ikuai, ha'e rami vy amboa ramigua tuuete re ju ovapa ixupe ikuai aguã. Ha'e rami py Israel ha'e Judá kuery ma tamoi kuery pe xereve guarã ajapo va'ekue rupi e'ỹ ikuai.”

¹¹ Ha'e nunga rupi SENHOR aipoe'i: “Ne'exa, ha'e kuery áry xee ambou 'rã mba'emo vai, ndoo jepe kuaai aguã rami. Xevy pe ha'e kuery ojapukai teĩ xee naendui 'rã.

¹² Ha'e ramo Judá regua tetã ha'e Jerusalém py ikuai va'e ovapa 'rã tuuete ramigua kuery re, ha'e va'e pe heakuã porã va'e oapy ha'e ojapukai okuapy vy. Ha'e rami teĩ tuuete kuery ma neĩ peteive henda py ndogueraa jepẽ 'rã ikuai axya gui.

¹³ Mba'eta peẽ Judá pygua kuery, penderute ramigua rive heta pereko, peteĩ-teĩ tetã py. Jerusalém tetã py voi peteĩ-teĩ tape py heta pejapo altar ojegarupy Baal peguarã rive heakuã porã va'e peapy aguã.

¹⁴ Ha'e nunga rupi ndee Jeremias, ejerureve eme ha'e kuery re, ejapukaive neĩ enhembo'eve eme, mba'eta xevy pe ha'e kuery ojapukai teĩ xee naendui 'rã heko vaiaty káuxa.

¹⁵ “Xevyguia opy rupi xerembaiyvu oiko teĩ opa marã ojevavya rupi rive. Ndee xerembaiyvu, renhemboayvua ha'e xo'o reapy va'e ndeky'a'o 'rã ri ty'y ndereko vaia oĩ va'e gui? Ha'e rami va'e rire revy'a ete 'rãgue.

¹⁶ Ndevy pe SENHOR 'Oliveira ipyau ha'e hi'a iporãve va'e' he'i va'ekue ri aỹ ma hevovo rei va'e kuery ndevyry omoendy ma tata, ha'e vy oapypa 'rã nerakãgue.

¹⁷ Mba'eta xee SENHOR ixondaro reta va'e nenhotyãre ae xeyvu ndere mba'emo vai ou aguã re. Ha'e nunga ma Israel ha'e Judá kuery o'áry ae ombou uka, Baal ra'angaa pe heakuã porã va'e oapya py xembopoxy vy rive.”

Jeremias ojuka aguã re jogueroayvu nhemi okuapyague

¹⁸ Ha'e kuery nhemi rupi jogueroayvua ma SENHOR xevy oikuaa uka rã aikuaa ma voi.

¹⁹ Xee ma vexa ra'y'i ojukaa aguã katy heraapy rami ha'evopa rei va'ekue, xerovai ojapo vai aguã re jogueroayvu okuapy teĩ xee ndaikuaai va'ekue. Ha'e rami vy aipoe'i okuapy: “Jajayapa ke yvyra hi'a reve. Nhamomba okuave va'e kuery yvy gui, hery re na'ima'endu'aavei aguã rami”, he'i okuapy.

²⁰ Ha'e rã ndee ma SENHOR ixondaro reta va'e ha'evopa rami reikuaa pota, ha'e nhandepy'a re oĩ va'e rexapa va'e. Ha'e nunga rupi taexa ha'e kuery rembopaga rã, mba'eta ndevy pe aikuaa pota uka xereko re.

²¹ Ha'e gui SENHOR ijayvu Anatote pygua avakue xejukaxe va'e re. Mba'eta ha'e kuery aipoe'i: “Ndeayvuve eme SENHOR rery rupi, orepo py ae rojuka e'ỹ aguã”, he'i xevy.

²² Ha'e ramo SENHOR ixondaro reta va'e aipoe'i: “Ne'exa, xee ae 'rã ambopaga ha'e kuery. Ha'e ramo ipyaukue omano 'rã kyxe py, ta'y kuery, tajy kuery ma karuai gui 'rã omanomba.

²³ Ha'e kuery va'e regua neĩ peteive ndoikovevei 'rã, mba'eta Anatote pygua avakue áry ambou 'rã mba'emo vai ambopaga vy.”

12

Nhanderute pe Jeremias oporanduague

¹ SENHOR, ndee ma ha'evea rami meme 'rã xerereko nerenonde xee ajexa uka ramo. Ha'e rami avi ndevy pe aporandu ta rejoguerekoa re. Mba'e re tu heko vai va'e kuery ikuai porã? Mba'eta anhetê rupi e'y rei ikuai va'e pe mba'eve ndoiko.

² Ha'e kuery ma ndee renhoty ramo hapo porã ha'e yvate 'rã, hi'a porãmba 'rã guive. Ndere ima'endu'a 'rã ojuru py rive, ha'e rã opy'a py ma ndegui mombyry 'rã ikuai.

³ Ha'e rã xee ma ndee xekuaa porã. SENHOR, ndee xerexa vy rea'ã 'rã xepy'a py ndere apëxaa oĩ va'e. Ha'e rã ha'e kuery ma eraapa vexe'i ojukaa aguã katy ogueraa va'e rami, emoimba na ojukaa ára pyguarã.

⁴ Araka'e peve tu yvy nda'eve 'rã, ha'e nhuindy rupi jai rogue ipirupa? Mymba ha'e guyra omanomba ha'e pygua kuery reko vaia káuxa. Ha'e rami teĩ ha'e kuery aipoe'i: "Ha'e ma ndoexai 'rã opaa py nhandere oiko va'e", he'i.

Nhanderuete ombovaiague

⁵ "Ha'e rami avi avakue nyry rupi oguata va'e reve renha vy ri nekane'õ vy mba'exa 'rã tu renha kuaa kavaju árygua kuery reve? Peteĩ yvy mba'eve ndoikoia py ri rekyjea rendu vy mba'exagua 'rã tu rendu Jordão yakã yvýry ka'aguy re reo vy?"

⁶ Mba'eta nderyvy ha'e nderu ro pygua kuery eteve voi nembro'a nhemixe okuapy. Ha'e kuery ae 'rã nderakyue monha okuapy ojapukai atã reve. Ha'e kuery re ejerovia eme, ndereve ijayvu porã'i merami teĩ."

Yvy mbovaipaare kuery ombopaga aguã re ijayvuague

⁷ "Xee aeja ma xevygua oo, aeja xevy guarã va'ekue ha'e javi. Xerembiayvu voi amboaxa ma hovaigua kuery po py.

⁸ Mba'eta xevygua kuery ma guarý ka'aguy regua rami onhendu ratã xerovai. Ha'e ramo xee ndaipotavei ma.

⁹ Ha'e rami vy xevy pe rã xevygua kuery ma peteĩ guyra vaikue pytãmba rei va'e rami ikuai, mba'eta amboae guyra te'õgue 'ua ou vy oipyxopa 'rã. Ha'e nunga rupi tapeo tema, peru mymba kuery inharõ va'e nhuindy rupi ikuai va'e ho'upa aguã.

¹⁰ Mba'eta joe opena va'e kuery mbovy e'y ou vy ombovaipa xemba'e uvaty, opyrõmba xemba'ety re. Ha'e rami vy xevygua arovy'a va'ekue ma tekoa e'ya omombyta.

¹¹ Ombovaipa ramo xevy pe ju ojapukai okuapy avave rei noipytyvõavei rã. Yvy ha'e javi rupi noĩavei, ha'e va'e re opena va'erã ndoiko ramo.

¹² Yvyty ita anho reia ha'e tekoa e'y regua áry rupi ou imbovaiparã kuery, mba'eta SENHOR guigua kyxe nhomokanhymba 'rã yvy apy peve, ha'e avave rei pe noivei 'rã ikuai porã aguã.

¹³ Ha'e rami vy trigo pemoaĩ teĩ juu rive ju pemono'õ. Pempa'eapoa rupi penekane'õmba va'eri mba'eve rei ndapejoui. Mba'eve napemono'õi ma vy peximba 'rã, pendere SENHOR poxya ou rire."

Mba'erã pa Nhanderuete nhombopagaa re ijayvua

¹⁴ SENHOR aipoe'i: "Xevygua Israel kuery peguarã aeja va'ekue ma ijyvyry ikuai va'e heko vai va'e oi'pe'apa. Ne'exa, ha'e va'e kuery ma xee aipe'apa 'rã ijyvy gui, ha'e gui ha'e kuery mbyte gui araa jepe 'rã Judá kuery.

¹⁵ Ha'e kuery aipe'apa ma rire amboaxy ju 'rã. Ha'e vy ajapo 'rã peteĩ-teĩ guekoa ha'e ovyv katy ju ojevy aguã rami.

¹⁶ Ha'e gui xapy'a rei xevygua kuery reko rami ha'e kuery voi ikuaxe 'rã, ha'e xerery rupi anho oura vy 'Anhetê ete SENHOR oikove va'e rery rupi aura' he'i 'rã okuapy, ymave rupi xevygua kuery Baal rery rupi oura aguã re ombo'e va'ekue ri. Ha'e rami rã ha'e kuery voi amoĩ 'rã xevygua kuery mbyte ikuai aguã.

¹⁷ Ha'e rã peteĩ va'e regua noendu potai ri ramo xee aipe'a 'rã. Aipe'a vy amokanhymba 'rã", he'i SENHOR.

13

Ku'akuaa ajukue iporãve va'e guigua py mba'emo oikuaa ukaague

¹ SENHOR aipoe'i xevy:

— Tereo, ejogua peteĩ ku'akuaa iporãve va'e. Ha'e gui ejeku'a jokua, yy py emoakỹ eme guive.

² Ha'e ramo SENHOR aipoe'iague rami vy ajogua ku'akuaa, ha'e ajeku'a jokua.

³ Ha'e ramo mokoĩguea ma SENHOR oayvu xevy ombou vy aipoe'i:

4 — Ejopy ju ku'akuaa rejogua ha'e rejeku'a jokuaague. Ha'e gui epu'ã, tereo Eufrates yakã katy, ha'e enhomi ha'e py peteĩ itakua py — he'i.

⁵ Ha'e ramo SENHOR aipoe'iague rami vy aa vy anhomi Eufrates rembe re.

⁶ Ha'e gui kueue ma rire SENHOR aipoe'i ju xevy:

— Epu'ã, tereo ju Eufrates katy, ha'e ejopy ju ku'akuaa ha'e py anhomi uka va'ekue — he'i.

⁷ Ha'e ramo Eufrates py aa vy yvy ajo'o vy anoẽ ju ku'akuaa anhomiague gui. Ha'e rã ku'akuaa hu'ũmba ma, ndovarevei ma mba'everã.

⁸ Ha'e ramo SENHOR oayvu xevy ombou vy aipoe'i:

⁹ "Po rami SENHOR ijayvu: Nami ae avi xee ambovaipa 'rã Judá ha'e Jerusalém pygua kuery onhemboyvate rei okuapy.

* 12:5 Jordão yakã yvýry ka'aguy oĩ va'e re ma mymba inharõ va'e ikuai (49.19, 50.44).

¹⁰ Mba'eta ha'e kuery heko vai va'e vy noenduxeie okuapy xeyavy, inhakā ratāa rupi anho ikuai va'e, ha'e vy amboae ramigua tuuete kuery re ovapa, ixupe rive ikuai ha'e omboete aguā. Ha'e rami vy kova'e ku'akuaa rami 'rā ikuai mba'everā ndovarevei vy.

¹¹ Mba'eta ku'akuaa avakue ku'a re oia rami avi xee voi aipota teī Israel ha'e Judā kuery xere ikuai xevy guarā, xerery oguerovy'a ha'e xemboete pavē aguā, va'eri ha'e kuery ma ndojapyxakai okuapy", he'i SENHOR.

Hyrū omboay'ypaa py mba'emo oikuaa ukaague

¹² "Ha'e kuery pe emombe'u povae'e ayvu. SENHOR Israel kuery Ruete aipoe'i: 'Petei-tei hyru tynyēmba 'rā vinho', 'ere. Ha'e rā ha'e kuery aipoe'i 'rā ndevy: 'Ore kuery ndoroikuaa porā ri ty'y hyru ikuai va'e vinho tynyēmba aguā?' he'i 'rā okuapy.

¹³ Ha'e rā ndee ju aipo're 'rā ha'e kuery pe: 'SENHOR aipoe'i: "Ne'exa, kova'e vy re ikuai va'e ha'e javi xee amonga'upa 'rā, huvixa kuery Davi renda openaaty py oguapy va'e, sacerdote, profeta kuery ha'e Jerusalém py ikuai va'e ha'e javi.

¹⁴ Amboay'ypa 'rā joe-joe amombo vy, tuu ha'e ta'y kuery voi. Ndaraa jepei 'rā, amboaxya naendui 'rā, namboaxyi 'rā guive amokanhy e'y aguā", he'i SENHOR."

Ojeko rerova ha'e ombopagaa aguā re ijayvuague

¹⁵ Pendu ke, ha'e peikuaa pota. Penhemboyvate rei eme, mba'eta SENHOR ae ijayvu.

¹⁶ Pemboete na SENHOR Penderuete, pytū ombou e'y aguā, ha'e yvy'ā vaikue re pejeapi e'y aguā, ha'e hexakāa pearō 'rāgue py manoa 'ā ha'e pytū reia anho ombou e'y aguā.

¹⁷ Mba'eta napendu potai ri ramo xepy'a py ajae'o nhemi 'rā penhemboyvate reia re. Xerexa ojae'o vaipa ete 'rā, xerexay vaipa ete 'rā, peē SENHOR rymba vexe'i kuery escravo-rā pendereraapaa rive.

¹⁸ "Aipo'ere huvixa ha'e ixy pe: 'Penhemo'yvy'i ke, ha'e peī vvy py, mba'eta peneakā gui ho'a ma coroa penemboyvateague.

¹⁹ Mba'eta kuaray puku-a katy tetā ikuai va'e tynyēmba ma mba'emo ra'ykue, ipe'aarā ndoikoi guive. Judā kuery voi escravo-rā ogueraapaa ma, oipokuapaa heravy.

²⁰ Pema'ē kuaray ijapu'a'ia katy pexa aguā ou va'e. Aỹ ma mamō tu ikuai vexe'i kuery ndevy apena uka va'ekue, iporāgue anho rereko va'ekue?

²¹ Mba'e 're 'rā tu neirū kuery ikuai va'ekue ndere ipo'aka va'erā omoīa ramo? Ndere haxy va'e nda'ipo'akai 'rā teve, kunha oikuavā'i ta va'e rami?

²² Ndejeupe ae ndeayvu vy "Mba'e re tu ha'e nunga ou xere?" 're 'rā. Ha'e rami vy reikuaa 'rā rejeyavypaaty re ae ndeao oupia, ha'e rejexavai ete aguā rami reikoa.

²³ Etiópia pygua kuery nda'u omboekovia kuaa 'rā ri opire, e'y vy xivi voi nda'u omboekovia kuaa 'rā ri oparaa?*" Ha'e rami aguā nda'evei ramo ae peē kuery voi mba'emo vai pejapo va'ety vy ndapejapo kuaai 'rā iporā va'e.

²⁴ Ha'e nunga rupi ha'e kuery amoai 'rā mba'emo pirukue vvytu tekoa e'ya guigua ogueraa va'e rami.

²⁵ Ha'e nunga ae oiko 'rā pendere, pendevy guarā amoī 'rā, xegui penderexarai vy apu rive perovia rire', he'i SENHOR.

²⁶ "Ha'e nunga rupi pendeao aupi uka 'rā peneakā áry peve, pexĩmbaa ojekuapaa aguā.

²⁷ Mba'eta aexa ma vvy'ā ikuai va'e ha'e nhuũndy rupi ojegarupy pejapo pekuapya. Ha'e va'e ma pendetavy reia, penhomoaruāa ha'e pendetavyxexa rupi pendekuaia. Nda'evei ete 'rā pendevy, Jerusalém pygua kuery! Raka'e peve teri 'rā tu ndapejeyk'a'oi?' he'i."

14

Judā vvy re nda'okyvei puku-a re ijayvuague

¹ Nda'okyvei puku jave SENHOR ombou ju oayvu Jeremias pe. Ha'e vy aipoe'i:

² "Judā kuery ojae'opa okuapy, ha'e tetā rokē re nopenavei ma. Ojae'o reve oakā omboguejy vvy peve. Jerusalém py voi ojapukai ratāve ovy.

³ Ha'e pygua ipo'akakueve omondouka 'rā guemimongakuaa kuery yy re. Ha'e rā ha'e va'e kuery ygua py oo vy yy ndojouvei vy yryru oguerovejvypa rive ju 'rā. Onhemondyi ha'e ndoikuavaei rei vy onheakā ao'i 'rā jogueruvy.

⁴ Yvy re nda'okyvei ramo ikangypa. Ha'e nunga rupi mba'ety rupi omba'eapo va'e kuery onhemondyi rei reve 'rā onheakā ao'i okuapy.

⁵ Guaxu voi nhuũndy rupi ta'y vy oēja rive 'rā, jai rogue ndojouvei vy.

⁶ Mburika ka'aguy regua voi vvy'ā ita anho reia rupi ipoaē reve oetū-etū 'rā jagua-tuvy nhe'ē rami. Ndaexa pyxovei ma, nhuũ jipovei ramo."

Jeremias jypy ojerure rā "Nda'evei" he'iague

⁷ Ha'e nunga rupi SENHOR, ore kuery orereko vaia anho roexa uka teī orepetyvō ke nderery remboete ukaa rupi vy. Mba'eta ore ma nenhe'ē raxave va'ekue. Nderovai ae rojejavy va'e.

⁸ Ndee ma Israel kuery oarō okuapy va'e, ha'e ikuai axy jave heraa jepea reiko. Mba'e re tu ha'vy vvy mboae regua rami reiko, petei uguata va'e pytū oaxa aguā amboae rupi oo va'e rami reiko?

* 13:23 Etiópia pygua ma kamba va'e. Ha'e gui ha'e kuery opire nomboekovia kuaaia rami avi nhande voi ndajapytu'u kuaai 'rā jajejavya gui.

⁹ Mba'e re tu ava ojopy xapy'a reipy rami reiko, ipy'a guaxuve va'eri jogueraa jepe kuaa e'ÿ va'e rami? Ha'e rã ndee SENHOR ma reĩ ae orembyte, ha'e ore ma nderery rupi oenoĩmby roiko. Orerepy e'ÿ eme.

¹⁰ Ha'e ramo SENHOR ijayvu xeretarã kuery reko re. Ha'e vy aipoe'i: "Ha'e rami avi ha'e kuery ma oguata reixe vai 'rã, ndojekojoi 'rã oo aguã gui. Ha'e nunga rupi SENHOR ndoguerovy'avei vy ima'endu'a 'rã ha'e kuery reko vaiague re, ombopaga 'rãe ojeyavyague re."

¹¹ SENHOR aipoe'ive ju xeivy: "Ejerureve eme ha'e kuery amoingo porã aguã re.

¹² Mba'eta ha'e kuery okaru e'ÿ re ikuai teĩ xee naendui 'rã ojapukaia. Mymba ha'e mba'emo aju guigua oapy reve ome'ẽ va'erã ogueru teĩ xee ndarovy'ai 'rã. Ha'e rami 'rãgue py amomba 'rã kyxe py, karuai ha'e mba'eaxy vaikue py."

Teĩgue ju Jeremias ojerure ramo "Nda'evei" he'iaague

¹³ Ha'e ramo xee aipoa'e:

— Ai SENHOR Xeruetel! Ne'exa, profeta kuery ma aipoe'i va'ekue heta va'e kuery pe: "Ndoui 'rã kyxe revegua neĩ karuai. Ha'e rami 'rãgue py kova'e tekoa py ou 'rã pendekuai porã aguã anho", he'i va'ekue — ha'e.

¹⁴ Ha'e ramo SENHOR aipoe'i xeivy:

— Profeta ramigua kuery ma apu rive omombe'u okuapy xerery rupi. Teĩgueve xee namboui, neĩ namombe'u ukai ha'e kuery pe, ha'e kuery pe ndaxeavyui guive. Ha'e kuery pendevy omombe'u va'e ma oexa ra'u merami rivea, imba'ekuaa ramigua, ovare e'ÿ va'e rupi ikuai, ha'e opy'a py onhembotavy ukaa rive.

¹⁵ Ha'e nunga rupi SENHOR aipoe'i profeta ramigua kuery re: "Xerery rupi omombe'u va'eri xee amombe'u uka ramo e'ÿ. Ha'e kuery ma 'Kyxe revegua ha'e karuai ndoui 'rã kova'e yvy re' he'i okuapy teĩ ha'e va'e profeta kuery ae 'rã kyxe ha'e karuai py opa.

¹⁶ Mba'eta ijayvu renduere kuery karuai ha'e kyxe gui omano va'ekue retekue omombopaa 'rã Jerusalém py tape ikuai va'e rupi. Jipoi 'rã avare rei inhono porãarã: ha'e kuery, ta'yxy, ta'y ha'e tajy kuery reve. Mba'eta ha'e kuery áry ambou 'rã heko vaiague rekovia.

¹⁷ "Ha'e gui ha'e kuery pe remombe'u 'rã po rami: 'Xerexay oẽ 'rã ara py ha'e pyávy. Ndoptyt'ui 'rã, mba'eta xeretarã kuery omoingo axya ramo ai haxy ete va'e py.

¹⁸ Ha'e rami vy mba'ety rupi aa vy aexa kyxe py ojuka pyre. Ha'e rã tetã py ju aike vy aexa 'rã karuai gui omano va'ekue. Profeta ha'e sacerdote kuery oguata rei 'rã yvy re, oo aguã ndoikuavei vy."

Mboapykuea Jeremias ojerure rã "Nda'evei ae ma" he'iaague

¹⁹ Ha'e rami avi rejapa ma teve Judá kuery? Ndepy'a py nderexaxevei teve Sião tetã? Mba'e re tu oremoingo axy oremonguera e'ÿ re? Oremoingo porã ju aguã roarõ rokuapy va'eri iporã va'e ndoikoĩ ae. Rokuera aguã 'rãgue py ndorerekorãveia anho roendu.

²⁰ SENHOR, ore kuery ma roikuaa orereko vaia ha'e orery ojapo vaiague, mba'eta nderovai ae rojejavu va'e.

²¹ Ha'e rami avi nderery remboete ukua rupi vy orereja eme. Mba'emo vai py ejao'i uka eme nerenda iporãve va'e. Nema'endu'a na orevy nderere guarã rejapo va'ekue re, embovaipa eme.

²² Mba'eta oiko 'rã teve mba'emo ra'angaa amboae regua kuery omboete va'e regua ombo'oky kuaa va'e? Ha'e rami e'ÿ vy yva ha'e ae ombou 'rã teve oky? Ha'e nunga moingoa ma ndee SENHOR Oreruetel anho reiko. Ha'e nunga rupi ndegui ae roarõ oky, mba'eta ndee anho ha'e nunga ha'e javi mboua reiko.

15

¹ Ha'e ramo SENHOR aipoe'i xeivy: "Moisés ha'e Samuel xerenonde ojerure va'e rire xepy'a re noi 'rãgue kova'e kuery amboaxy aguã. Toipe'apa ha'e kuery xerenonde gui, toopa.

² Ha'e gui ndevy pe ha'e kuery oporandu vy 'Marã katy 'rã tu roo?' he'i ramo aipo're 'rã ha'e kuery pe: 'Po rami SENHOR ijayvu: Omano va'erã kuery too amano aguã katy, ha'e rã kyxe py ojuka pyrã too kyxe revegua ikuai katy, karuai pyguarã ma too karuaia katy, ha'e gui escravo-rã ogueraa pyrã ma ogueraa katy too.'

³ Mba'eta SENHOR aipoe'i: 'Xee ma irundy rupi 'rã ambopaga ha'e kuery. Kyxe py ojukaa 'rã, jagua kuery omoatã heravy 'rã, ha'e gui guya yvate rupi oveve va'e ha'e mymba inharõ va'e nhuũndy rupi ikuai va'e ma omondoropa vy ho'upa 'rã.

⁴ Amboaxapa 'rã yvy regua kuery oexa vy onhemondyipa aguã, Ezequias ra'y Judá pygua huvixa Manassés Jerusalém tetã py ojapo vaiague ha'e javi káuxa.' "

⁵ "Ha'e gui ndee Jerusalém, mava'e tu oiko 'rã nemboaxyarã? Mava'e tu ojae'o 'rã ndere? Mava'e tu ovaẽ 'rã reiko porã paa re oporandu aguã?

⁶ Mba'eta rejep'e'a xegui, nderakykue katy ju rejeyv vy. Ha'e ramo nderovai aupi 'rã xepo romomba aguã. Xekane'õ ma romboaxya py", he'i SENHOR.

⁷ "Ndeyvy re tetã ikuai va'e rokẽ py ambogua uka yrupẽ py rami, amokanhy ta'y kuery, amomba xeivygua kuery teĩ ikuaiaty gui ndojepe'ai.

⁸ Ha'e pygua imeve'ÿ va'e hetave ye'ẽ rembe rupi ita ku'i ikuai va'e gui. Kuaray mbyte jave teĩ ambou kyrgue'i xy kuery mombaarã. Ha'e kuery áry ambou xapy'a ojexavai ha'e okyje aguã teĩ.

⁹ Sete opi'a kuery oguereko va'ekue ma omano xapy'a inhe'ẽ oata va'e rami, ara py teri teĩ ha'e kuery pe rã pytũmba ma. Oximba, nda'evei noi okuapy. Ha'e gui ha'e pygua okuave'i va'e ma amboaxapa kyxe revegua pe hovaigua kuery renonde", he'i SENHOR.

Ojepeguia profeta SENHOR ombopy'a guaxuve juague

¹⁰ Nda'evei ete xe'vy, ha'e ha'i pe voi xekuavã'i rire, mba'eta ava opu'ãa rei pyrã, pavẽ rei oguero'a rei va'erã oikuavã! Mba'eta xee nanhomborevei mba'emo hi'áryve ajopyve vy, amboae kuery voi naxemborevei ojopyve vy. Ha'e rami teĩ ha'e kuery peteĩ-teĩ ijayvu vai xere.

¹¹ Ha'e ramo SENHOR aipoe'i: "Ha'e gui anhetẽ xee romombaraete 'rã reiko porã aguã. Ha'e rã nderovaigua kuery ma ojexavai ha'e ikuai axya ára ajapo 'rã ndere onhemboja vy ojerure porã'i aguã rami", he'i.

¹² "Ha'e gui amongue nda'u omopẽ kuaa 'rã ri ferro kuaray ijapu'a'ia katy gui ou va'e, e'ỹ vy overa va'e? ¹³ Ha'e rami rã peẽ kuery romoingo axy 'rã pendeyvy jave rupi teko vai pejapoague re. Ha'e rami vy penemba'e rei-rei pemoĩ porã va'ekue hepy re'ỹ amboaxapa 'rã heraarã pe.*

¹⁴ Ha'e rami vy penderovaigua kuery pe xee rogueraa uka 'rã yvy peikuaa e'ỹa katy, mba'eta pende'áry xepoxya hendy ae ma, tata hendy va'e rami okai va'erã."

¹⁵ Ha'e gui SENHOR, ndee ma reikuaa. Ha'e rami avi nema'endu'a ke xere, xepytyvõ ha'e xerepy ke xerakykue monhaa kuery gui. Renhomboaxya rupi vy xereraa uka eme. Reikuaa ma roayvu vy ae ajejojai ukua.

¹⁶ Ndeayvu ajou vy ha'u vyvoi. Mba'eta ndeayvu ma arovy'a va'e xekuraxõ mbovy'aa'arã, mba'eta nderery rupi anherenoĩ uka ramo, SENHOR Xeruetex nexondaro reta va'e.

¹⁷ Ha'e nunga rupi peteĩgueve ma voi aguapy va'e'ỹ teri ovy'a rei va'e kuery reve, ndarovy'ai guive. Ha'e rami 'rãgue py ndepo poyia xe'áry oĩ ramo xee ae'i aguapy ainy, mba'eta xee aendu va'e ma ndepoxya anho.

¹⁸ Mba'e re tu haxy va'e aendu riaa tema? Mba'e re tu xeai haxy riaa oiny ndokuera reguai vy? Ndee nda'u xembotavy 'rã teve yy ramo'i typa vyvoi va'e rami?

¹⁹ Ha'e ramo SENHOR aipoe'i xe'vy: "Ha'e gui rejeko rerova ri ramo xee roguero ju 'rã xerenonde rupi reiko aguã. Ovale e'ỹ va'e 'rãgue py ha'evea ramigua re anho ndeayvu ri vy reiko 'rã xeayvu mombe'uarã. Ha'e kuery regua toje'oi ndea katy, ha'e rã ndee ma ndereaxai 'rã ha'e kuerya katy.

²⁰ Ha'e ramo ha'e kuery rovai xee romombaraete 'rã tetã kora overa va'e guigua rami. Ha'e ramo nderovai ha'e kuery opu'ã teĩ nda'ipo'akai 'rã ndere, mba'eta ndereve xee aiko 'rã ha'e kuery gui rogueraa jepe aguã.

²¹ Ha'e rami vy roipe'a 'rã heko vai va'e kuery po gui, rogueraa jepe 'rã ipy'a ratã va'e kuery po gui", he'i SENHOR.

16

Profeta ha'e ae'i oiko aguã re ijayvuague, heta va'e kuery oikuaa aguã

¹ Ha'e gui SENHOR oayvu ombou ju xe'vy. Ha'e vy aipoe'i:

² "Ejou eme ndera'yxyrã, ndera'y ha'e nderajy e'ỹ aguã kova'e tekoa py", he'i.

³ Mba'eta po rami SENHOR ijayvu kova'e tekoa py ta'y ha'e tajj kuery itui'i va'erã rekorã re, tuu ha'e ixy kuery rekorã re guive. Ha'e vy aipoe'i:

⁴ "Ha'e kuery omano 'rã mba'eaxy gui teĩ ndojae'oai 'rã, nonhono porãai 'rã guive. Yvy irũrã rive 'rã opyta. Kyxe ha'e karuai py 'rã omano, ha'e he'õgue opyta 'rã guya yvate rupi oveve va'e ha'e mymba yvy rupigua rembi'urã."

⁵ Mba'eta po rami SENHOR ijayvu: "Eike eme omanogue re ojae'o okuapya py, ndepy'a vai eme, eronhemboaxy eme guive, mba'eta ha'e kuery gui aipe'a ma mby'a porã, ayvua ha'e amboaxya rupi aiko aguã", he'i SENHOR.

⁶ "Mba'eta kova'e yvy re omano 'rã yvatekueve ha'e yvyĩgueve. Ha'e va'e kuery ma ndojatjai 'rã, ndojae'oai 'rã, ha'e kuery re ipy'a vaia rupi nonhekyximba reiai 'rã, neĩ oakã nonhopiai 'rã guive.*

⁷ Ojae'o va'e kuery pe ma nome'ẽavei 'rã mbojape omanogue re ombopy'a porã ju aguã, neĩ peteĩve karo yy nome'ẽai 'rã opo'o aguã regua, tuu e'ỹ vy ixy omano rire teĩ.

⁸ Eike eme oo ngaru oikoa py, ha'e kuery reve reguapy vy rekaru ha'e rey'u e'ỹ aguã."

⁹ Mba'eta SENHOR ixondaro kota va'e, Israel kuery Ruete aipoe'i: "Ne'exa, peikove teri reve, ha'e pexaa py ae amombytu'u 'rã pevy'aa kova'e tekoa gui, peporaia, ha'e omenda va'erã oguero'vy'aa rupi oporaia guive.

¹⁰ "Neretã kuery pe remombe'u 'rã pova'e ayvu ha'e javi. Ha'e ramo ha'e kuery oporandu 'rã: 'Mba'e re tu SENHOR ha'e rami ete oremongyje nda'evei ete va'e py? Mba'e nunga py tu orereko vai ha'e rojejavu SENHOR Nhanderuete rovai?' he'i 'rã ndevy.

¹¹ Ha'e ramo ndee rembovai 'rã: 'Mba'eta peneramoĩ kuery xerejapa', he'i SENHOR. 'Ha'e rami vy oje'oi amboae ramigua tuuete kuery re rive, ha'e kuery pe ju ikuai vy ombojerovia aguã. Ha'e rã xee ma xerejapa okuapy, xeguigua lei rami voi nda'ikuaixei raka'e.

¹² Ha'e gui peẽ kuery ma peneramoĩ kuery ikuaiague gui pendereko vaive ju, mba'eta peneakã ratãa rupi peteĩ-teĩ pendekuai, xenhe'ẽ rendu e'ỹ vy.

¹³ Ha'e nunga rupi kova'e yvy gui roipe'apa 'rã peteĩ yvy peẽ ha'e peneramoĩ kuery ndapeikuaiaague katy. Xee noromboaxyvei ramo ha'e py ju 'rã pendekuai amboae ramigua tuuete pe, ara py ha'e pyávy.' "

¹⁴ SENHOR aipoe'ive ju: "Ha'e rami teĩ ne'exa, ou ma oiny ára, 'Anhetẽ ete SENHOR oikove va'e Egitto yvy gui Israel kuery oguenoẽ va'ekue rery rupi aura', ndapejeveia ára.

* 15:13 Apy ma judeu kuery pe ijayvu.

* 16:6 Hetarã omano rã amongue onhekyximba rei 'rã, ha'e'ỹ vy oakã onhopĩ 'rã ipy'a vai vy (41:5; Ezequiel 7:18; Miquéias 1:16).

¹⁵ Ha'e rami 'rãgue py po rami 'rã peura: 'Anhetê ete SENHOR oikove va'e kuaray apu'a'ia katy gui ha'e vvy jave rupi omondoukapaague gui Israel kuery ogueru va'ekue rery rupi aura', peje 'rã. Mba'eta xee ajapo 'rã pendevvy katy ae ju pejevypa aguã rami, peneramoí kuery vvyrã ame'ê va'ekue py ae."

¹⁶ SENHOR aipoe'i: "Ne'exa, ambou reta 'rã pira mbo'aa kuery. Ha'e va'e kuery ma Judá regua kuery ae 'rã ombo'a. Ha'e va'e rire ma imba'ejuka va'e kuery ju 'rã ambou reta, pira mbo'aa kuery ojuka aguã vvyty ha'e vvy'ã ikuai va'e áry rupi, ita pa'ũ rupi guive ikuai va'e ojuka aguã.

¹⁷ Mba'eta aexa pota 'rã ha'e kuery ikuai ha'e javi rupi. Avave rei nonhemi 'rã xegui, gueko vai voi nonhomi 'rã aikuaa pota aguã gui.

¹⁸ Jypy'i ma ambopagave ete 'rã heko vaiague ha'e ojevavyague re, mba'eta xeivyguia vvy omongy'apa rire mba'emo ra'angaa ojou vaipy peguare kuery re'õgue py, vvy xevy guarã va'ekue omonyẽmba ojeguarupy rive."

¹⁹ Ha'e gui ndee SENHOR ma xemombaraetea reiko, ajexavaia ára anhemi aguã. Ha'e gui ndea py ou 'rã vvy regua kuery vvy apy guive. Ha'e vvy aipoe'i 'rã okuapy: "Oreramoí kuery ma apu regua anho oguereko va'ekue, mba'emo ra'angaa ovare'y va'e, iporã va'e noia.

²⁰ Ha'e gui avakue ha'e kuery ae nda'u ojapo 'rã ri nguuetãrã? Ha'e rami avi ha'e nunga ma tuuete e'y ae guive", he'i 'rã okuapy.

²¹ "Ne'exa, a'y ha'e kuery pe aexa uka 'rã xembaraetea ha'e xepo'akapaa. Ha'e ramo ma ha'e kuery oikuaa 'rã SENHOR aikoa."

17

Teko vai nhanembotavy ha'e nhanemokanhya re ijayvua

¹ "Ha'e gui Judá kuery ojevavya ma ferro rakua py ipara oiny, diamante omboakua pyre py guive. Ha'e nunga ma ha'e kuery kuraxõ re ae ipara, ha'e altar ojapo va'ekue apy re guive.

² Ha'e va'e altar re ta'y kuery voi ima'endu'a 'rã, ha'e mba'emo ra'angaa vvyra hovana va'e guýry ha'e vvy'ã áry rupi omopu'ã imo'amy va'ekue re.

³ Ha'e gui ndee vvy mbyte vvyty repu'ã va'e, ndere mba'emo porã ha'e hepykueve oí va'ekue. Ha'e nunga ha'e javi ma jevavya káuxa amboaxa 'rã ipe'aarã pe, ombojeroviaaty ndee vvyty áry ikuai va'e guive.

⁴ Ndekáuxa ae oipe'apaa 'rã ndevy guarã ame'ê va'ekue. Ha'e ramo ajapo 'rã nderovaigua kuery pe reiko aguã rami vvy reikuaa e'ya re, xepoxya tata rami raka'e 'rã peve guarã remoendy rire."

⁵ SENHOR aipoe'i: "Avvu vaipy 'rã ikuai avakue re rive ojerovia va'e. Ha'e kuery ma to'o imarã va'erã re rive ojerovia, ha'e opy'a py SENHOR gui mombyry ikuai.

⁶ Ha'e kuery ikuai 'rã jai rogue ha'e ae'i tekoa e'ya py henhoí va'e rami. Iporã va'e teí ndoexai 'rã, mba'eta tekoa e'ya py ae tema 'rã ikuai, vvy piru reia ha'e juky rive oia rupi, avave rei noiãveia rupi.

⁷ Ha'e rá avvu porãmby 'rã ikuai SENHOR re ojerovia ha'e SENHOR oarõ oikovy va'e.

⁸ Mba'eta ha'e kuery ikuai porã 'rã yv'yry vvyra onhoty mbyre rami. Hapo yakã'i peve oo ramo ndokyjei 'rã haku gui. Hogue ma hovv porã riae 'rã. Nda'okyveia ára teí nda'ipirui 'rã, ndai'a e'yi 'rã guive.

⁹ "Ha'e gui avakue py'a ma opa mba'e gui nhombotavypave ha'e nda'evei va'e ae. Mava'e nda'u oikuaa 'rã?

¹⁰ Xee SENHOR ae aikuaa pota 'rã ipy'a re, xee ha'ã 'rã guive onhembopy'aa, oikoague rekovia ame'ê aguã, peteí-teí oikoague rami ae.

¹¹ Inambu pytã ngupi'a ae e'y omboaku-a rami avi ha'evea rami e'y ojoupave va'e. Ha'e kuery oikove teri reve ha'e nunga oipe'apaa xapy'a 'rã, ha'e gui opaa py hi'arandu e'y va'e 'rã ikuai."

Nhanderuete oepy aguã re Jeremias oiapukaiague

¹² Ore rombojerovia atyrã ma hexakãmba ha'e iky'a e'y va'e, jypy'i guive yvate ete va'e oí.

¹³ Ndee SENHOR ma Israel kuery oarõ okuapy va'e reiko. Ha'e rá nderejaare kuery ma oxĩmba va'erã meme. "Tã, xegui ojepe'a va'e rery ma vvy py rive 'rã ipara oiny, SENHOR yy marã e'y me'êa ojea rire", he'i.

¹⁴ SENHOR, xemonguera ke akuera ete aguã. Xereraa jepe ke aa jepe ete aguã. Mba'eta ndee anho rogueroporai.

¹⁵ Ne'exa, xevy pe ha'e kuery aipoe'i 'rã okuapy: "Mamo tu oí SENHOR avvu? Tojeupity vvyoi!" he'i okuapy.

¹⁶ Xee ndajepe'ai ndevyguia kuery re apenaa gui, ikuai axy ára ou rá ndaexaxei teí. Ndee ma reikuaa. Xeavvu xejuru gui oẽ va'e voi reikuapaa.

¹⁷ Enhemoingo eme xemondiyarã, mba'eta nda'eveia ára ma ndere anho 'rã anhemi.

¹⁸ Xeavyky reia kuery toxĩmba, ha'e rá xee ma taxĩmba eme. Ha'e kuery tonhemondyipa, ha'e rá xee ma tanhemondyí eme. Ha'e kuery áry ae embou ára vai, ha'e emokanhymba jevy-jevy.

Sábado ára omboetea aguã re ijayvuague

¹⁹ SENHOR aipoe'i xevy: "Tereo, epu'ã e'amy ha'e kuery retã rokẽ py, Judá pygua huvixa kuery oike ha'e oëaty py, ha'e Jerusalém tetã rokẽ ikuai va'e ha'e javi vvyry.

²⁰ Ha'e vvy aipo'ere 'rã ha'e kuery pe: 'Peẽ Judá pygua huvixa kuery, pendu ke SENHOR avvu, Judá ha'e Jerusalém pygua kuery kova'e okẽ rupi peike va'e ha'e javive.'

²¹ Po rami SENHOR ijayvu: Peẽ kuery peikove pukuxe vy sábado ára pevoyive eme mba'emo, peroike eme guive Jerusalém tetã rokẽ rupi.

²² Sábado ára penoëve eme voyi pendero gui, mba'eve pejapo eme guive. Ha'e rami 'rãgue py pemboete 'rã sábado ára, peneramoí kuery pe ajapo ukaague rami vy.

²³ Ha'e rami teĩ ha'e kuery ma xeavyua re nopenai vy ndojapyxakai raka'e. Ha'e rami 'rãgue py inhakã ratã okuapy xeavyua noendu potai vy, onhemo'arandu uka e'ÿ aguã.

²⁴ “ SENHOR ijayvuve ju: Ha'e rã peẽ kuery ma pendu ke xeavyua, ha'e pemboete sãbado ára, tetã rokẽ rupi voyi peroike ve'ÿ ha'e mba'eve pejapo e'ÿ aguã.

²⁵ Ha'e rami ri ramo kova'e tetã rokẽ rupi oike nho 'rã penderuvixave kuery guembiguai yvatekueve reve, tenda Davi openaaty áry oguapy va'erã. Guembiguai kuery yvatekueve reve 'rã oaxa jogueruvy karõxa py, ha'e kavaju áry, avakue Judá ha'e Jerusalém pygua kuery reve. Ha'e rami rire kova'e tetã py ikuai 'rã raka'e rã peve.

²⁶ Ha'e gui oupaa 'rã Judá regua tetã ha'e Jerusalém vy'ry rupi ikuai gui, Benjamim vvy, vvy reia ha'e vvy'ã reia kuaray puku-a katy gui. Ha'e rami vy ogueru 'rã mymba oapy reve ome'ẽ va'erã, mba'emo aju guigua ha'e hekuã porã va'e, SENHOR oguerovy'aa rupi ome'ẽ aguã ixupegua opy.

²⁷ Ha'e rami avi napendu potai vy sãbado ára napemboetei ramo, xapy'a rei sãbado ára Jerusalém tetã rokẽ rupi voyi peroike ramo tata py apy 'rã okẽ ikuai va'e. Ha'e va'e tata omomba 'rã Jerusalém py huvixa ro ikuai va'e, ndoguevei 'rã guive.”

18

Mba'emo ryrũ nhæ'ũ guigua re ijayvuague

¹ Jeremias pe SENHOR oayvu ombou vy aipoe'i:

² — Epu'ã ke, tereo nhæ'ũ gui mba'emo apoa ro py. Ha'e py ma rendu 'rã xeavyu — he'i.

³ Ha'e ramo aa nhæ'ũ gui mba'emo apoa ro py. Ha'e py ama'ẽ rã ha'e va'e omba'epo oiny ojere va'e áry.

⁴ Ha'e gui mba'emo ryrurã nhæ'ũ gui ojapo va'ekue ivaipa ramo ha'e va'ekue gui amboae ju ojapo ha'e ae oipotaa rami.

⁵ Ha'e ramo SENHOR oayvu ombou xevy.

⁶ Ha'e vy aipoe'i: “Upe va'e nhæ'ũ gui mba'emo apoa ojapoa rami ha'eve xee voi peẽ Israel kuery roguereko aguã. Ne'ixa, ipo py yapo oĩ va'e rami peẽ Israel kuery voi xepo py peĩ.

⁷ Mba'eta petei regua e'ÿ vy petei tetã re mba'e xeavyu 'rã aipe'apa aguã, aity ha'e ambovaipa aguã re.

⁸ Ha'e rami teĩ ha'e kuery gueko vai gui ojeko rerova ri ramo xee voi amboae rami 'rã areko, mba'emo vai ambou aguã re anhembody'aague rami ve'ÿ.

⁹ Ha'e rami avi petei regua e'ÿ vy petei tetã re xeavyu 'rã amombaraete ha'e anhotÿ aguã re.

¹⁰ Ha'e ramo xapy'a rei ha'e kuery ma xerenonde rupi teko vai rupi tema 'rã ikuai xeavyua noendu potai vy. Ha'e ramo xee amboae rami 'rã areko amoingo porã aguã re anhembody'aague rami ve'ÿ.

¹¹ Ha'e nunga rupi aÿ ma ndeayvu ke Judá regua avakue ha'e Jerusalém pygua kuery pe. Ha'e vy aipo're 'rã: 'Po rami SENHOR ijayvu: Ne'ixa, xee ma ambou ta mba'emo vai, peẽ kuery rovai aiko aguã re anhembody'a rire. Ha'e nunga rupi aÿ petei-teĩ pejeko rerova na ha'eve'ÿa rami pendekuaia ha'e mba'emo vai pejapoa gui,' re 'rã.

¹² Ha'e rami teĩ ha'e kuery aipoe'i 'rã: 'Nda'evevei ae ma teve, mba'eta ore kuery ma orekuaive tema 'rã ore ae roipotaa rami. Petei-teĩ roiko 'rã oreakã ratãa rupi, orereko vaia rami ae', he'i 'rã okuapy.

¹³ “Ha'e nunga rupi SENHOR aipoe'i: 'Peporandu na aÿ amboae regua kuery ikuai rupi mava'e pa ha'e nunga oenduague re. Mba'eta ha'e ramigua ete Israel kuery ojapo va'ekue!

¹⁴ Ha'e gui Libano vvyty re itaova oĩ va'e áry yro'y apĩ oiaty gui nda'vu okanhÿ 'rã ri? Tyrã pa tyta 'rã ri yro'y rykukue mombyry guigua?*

¹⁵ Any, teĩ xevygua kuery ma hexaraipa okuapy xegui. Ha'e rami vy mba'emo ra'angaa pe rive oapy 'rã okuapy hekuã porã va'e. Ha'e nunga ma ojapo tape yma guare rupi ikuai vy onhepyxangapa aguã rami, tape joja e'ÿa rupi ju oje'oi aguã,

¹⁶ ha'e kuery vvy nhomondyipaarã opyta aguã rami, ha'e amboae kuery ojoi rei aguã rami. Mba'eta ha'e rupi oaxa va'e kuery onhomondy vy ombovava 'rã oakã.

¹⁷ Mba'eta vvyty kuaray oua katy gui ou va'e py amoaimba 'rã hovaigua kuery renonde rupi. Ha'e kuery ikuai axyã ára aexa uka 'rã xekupe, xerova e'ÿ.”

Ngovaigua kuery rovai profeta ojerureague

¹⁸ Ha'e ramo aipoe'i okuapy: “Peju ke, mba'emo jajapo Jeremias rovai. Mba'eta oiko riae 'rã lei rupi sacerdote ha'e hi'arandu va'e nhanemongetaarã, ha'e profeta ayvu omombe'vu va'erã. Peju na, nhamoĩ vai ayvu py, ijayvu nhaendu ve'ÿ aguã”, he'i okuapy xere.

¹⁹ Ha'e gui SENHOR, ema'ẽ na xere, ha'e endu pota xere ijayvu rei va'e kuery ijayvu.

²⁰ Iporã va'e re omboekovia 'rã teve ha'eve'ÿa ramigua? Mba'eta ha'e kuery ojo'o vvykua xenhe'ẽ ombo'a aguã. Nema'endu'a ke nerenonde xee ajexa ukaague re, mba'eta ha'e kuery remoingo porã aguã re ajerure va'ekue, rejou vai aguã re'ÿ.

²¹ Ha'e nunga rupi ha'e kuery ra'y kuery emboaxa karuai pe, ejapo ke ta'y kuery karuai ha'e kyxe py omano aguã rami. Tove ta'yxy kuery gui toipe'apaa imemby kuery, imeve'ÿ va'e ta'ikuai. Tove ime kuery tomanomba mba'eaxy gui. Ha'e gui kunumigue ma joe opu'ãa py tojukapaa kyxe py.

²² Ha'e kuery re opu'ã va'erã kuery rembou xapy'a ramo tojapukai okuapy ngoo gui. Mba'eta ha'e kuery vvy ojo'o okuapy rire xepoy aguã, xepy rupi ojokua nhuã xembo'axe vy.

* 18:14 Libano rery ma “Yvyty xif va'e” ea, yvate etea py yro'y ojekuaa riae ramo. Ha'e gui yro'y rykukue oxyry ouvy vy oata e'ÿ re omoakÿ 'rã ha'e va'e vvy.

²³ Ha'e rã SENHOR, ndee reikuaa ae ma xejukaxe vy nhomongeta okuapya ha'e javi. Eperdoa eme ha'e kuery reko vaiaque re, embogue eme ojevavyague nerenonde gui. Nerenonde ojexa uka vy to'apa. Ndepoxya ára py embopaga ke.

19

Yryru ombovo aguã re ijavyuague

¹ SENHOR aipoe'i: "Tereo, ejogua petei yryru nhae'ũ gui ojapo pyre. Nderupive eraa avi neretarã kuery regua ha'e sacerdote regua nhomongetaa kuery.

² Tapeo Hinom ra'y rekoague vyvugua py, nhae'ũ gui mba'emo apoa rokê katy. Emombe'u ha'e py ndevy amombe'u uka va'e.

³ Ha'e vy aipo're 'rã: 'Judá pygua huvixa kuery ha'e Jerusalém py pendekuai va'e, pendu ke SENHOR ayvu. Po rami ijavyu SENHOR ixondaro reta va'e, Israel kuery Ruete: Ne'exa, kova'e tekoa áry ambou 'rã mba'emo vai. Ha'e ramo ha'e nunga oendu va'e ha'e javi nhemondyi gui ijapyxa nhe'ẽmba 'rã.

⁴ Mba'eta ha'e kuery xerejapa vy omongy'apa rei kova'e tekoa, nguete mboae pe heakuã porã va'e oapy vy, ha'e nunga peteigueve oexa va'e'ỹ teri, tuu kuery, nei Judá pygua huvixa kuery voi. Ha'e vy kova'e tekoa ha'e javi rupi omoẽ okuapy heko porã va'e ruguy.

⁵ Ha'e vy yvy'ã ikuai va'e áry rupi ojapo okuapy Baal ra'angaa mbojerovia atyrã, tata py gua'y kuery oapy aguã Baal pe ome'ẽ vy. Teigueve ma ha'e ramigua ajapo uka va'e'ỹ, ha'e rami aguã re ndaxeayvui, nei nanhembopy'ai guive.

⁶ Ha'e nunga rupi oo ma oiny ára kova'e tekoa pe nei "Tofete", nei "Hinom ra'y rekoague vyvugua" 'ea ve'ỹ aguã. Ha'e rami 'rãgue py "Yvyvugua jujukapaaty" 'ea 'rã, he'i SENHOR.

⁷ Mba'eta kova'e tekoa py ambovaipa 'rã Judá ha'e Jerusalém pygua kuery nhomongetaague, ajapo 'rã kyxe gui ho'apa aguã rami ngovaigua kuery renonde, ijukaxea kuery po py. Ha'e vy he'õgue amboaxa 'rã guyra yvateke ojatya 'rã Tofete py, amboae henda py ojatya aguã jipoi ramo.

⁸ Kova'e tetã amoi 'rã nhomondyipaara, amboae kuery ojoi rei aguã. Ha'e rupi oaxa va'e ha'e javi onhemondyi vy ojoi rei 'rã, ha'e kuery re ha'e rami ete mba'emo vai oiko rire.

⁹ Hovaigua ijukaxea kuery ojokopa vy omingo axy ramo ajapo 'rã ha'e kuery gua'y kuery ha'e guajy kuery ro'okue ho'u aguã rami, ha'e petei-tei ho'u 'rã oiru ro'okue', re 'rã.

¹⁰ "Ha'e ramo avakue nderupive oo va'ekue oexaa py rembovo 'rã yryru.

¹¹ Ha'e vy aipo're 'rã ha'e kuery pe: 'Po rami SENHOR ixondaro reta va'e aipoe'i: "Guĩ rami xee amomba 'rã kova'e kuery ha'e kova'e tetã, yryru nhae'ũ gui ojapo pyre ombovo rire ndojeapoveia rami avi. Ha'e ramo hetekue ojatya 'rã Tofete py, amboae henda py ojatya aguã jipoi ramo.

¹² Ha'e rami ae ajapo 'rã kova'e tekoa re, ha'e py ikuai va'e kuery re guive", he'i SENHOR. "Kova'e tetã amombyta 'rã Tofete ramigua ete.

¹³ Mba'eta Judá pygua huvixave kuery ha'e Jerusalém pygua kuery ro ha'e javi ma Tofete rami avi 'rã ha'eve'ỹ va'e meme, yva re ikuai va'e pe heakuã porã va'e oapyague ha'e amboae tuete pe vinho onhoẽague guive", he'i."

¹⁴ Ha'e gui Tofete py SENHOR ayvu omombe'u aguã omondoukaague gui Jeremias ojevy vy opu'ã ho'amy SENHOR pegua oo roka py. Ha'e vy aipoe'i heta va'e kuery ha'e javi pe:

¹⁵ "Po rami ijavyu SENHOR ixondaro reta va'e, Israel kuery Ruete: Ne'exa, kova'e tetã ha'e tekoa'i ikuai va'e áry ambou 'rã mba'emo vai xeavyuague ha'e javi, mba'eta xeayvu noenduxe vy inhakã ratãmba rire."

20

Profeta Jeremias jokuare re ijavyuague

¹ Ha'e va'e ayvu Jeremias omombe'u rã sacerdote Imer ra'y Pasur oendu. Ha'e va'e ma SENHOR pegua oo pygua ruvixa oiko.

² Ha'e vy Pasur profeta Jeremias oinupã uka ma vy ipy ojokua uka vyvra re. Ha'e va'e ma oĩ Benjamim regua okê yvatevea py, SENHOR pegua oo vyvry. Ha'e gui ko'ẽgue ma Pasur ojora ju Jeremias vyvra gui.

³ Ha'e ramo ixupe Jeremias aipoe'i:

— SENHOR nanemboeryvei ma 'rã Pasur, ha'e rã "Jovai-ive re nhomongyje reia" he'ia anho.

⁴ Mba'eta po rami SENHOR ijavyu: "Ne'exa, xee rojapo 'rã ndee ae renhemongyje aguã rami, nei'rũ kuery ha'e javi pe guive. Mba'eta rexa py ae hovaigua kuery ojokupa 'rã kyxe py. Judá vyv ha'e javi amboaxa 'rã Babilônia pygua huvixa po py. Ha'e ramo ogueraapa 'rã Babilônia katy escravo-rã, kyxe py ojuka 'rã guive.

⁵ Kova'e tetã py perekopa va'ekue amboaxa avi 'rã, pamba'eapoa gui pejoupa va'ekue ha'e hepykueve ha'e javi. Tã, Judá regua huvixa kuery omoi porã va'ekue ha'e javi amboaxa 'rã hovaigua kuery po py. Ha'e ramo ha'e kuery oi'pe'apa 'rã heravy Babilônia katy.

⁶ Ha'e gui ndee Pasur ndero py ikuai va'e ha'e javi reve penembo'a vy pendereraapa avi 'rã. Ha'e ramo Babilônia tetã katy 'rã peo. Ha'e py ma pamanomba 'rã, pendeatya 'rã guive: ndee ha'e nei'rũ kuery ha'e javi, ha'e va'e kuery pe ayvu porã merami rive remombe'ua va'ekue reve."

Profeta iporiau reia rupi ijavyuague

⁷ SENHOR, guĩ rami aiko aguã re ndeayvu ramo aiko. Xegui nembaraeteve va'e vy ndepo'aka. Ha'e ramo ko'ẽ nhavõ ombojaru reipy aiko. Ha'e kuery va'e regua petei-tei xejojai rei 'rã okuapy.

⁸ Mba'eta ajapukai ha'e xeavyu atã reve anho amombe'u aikovy remokanhy ha'e rembopaga aguã regua. Ha'e rami py ndee SENHOR ayvu káuxa aiko ovare e'y va'e ha'e omoximba pyrã, ko'ë nhavõ.

⁹ Ha'e gui anhemboypy'a vy "Ha'e nunga namombe'uvei, ndaxeavyuvei ma 'rã hery rupi", ha'e teĩ xekuraxõ re ndeavyua hendy 'rã tata rami, xekãgue mbyte tata omboty pyre rami hendy. Ha'e ramo aiko axy vaipaa py xekane'õ ma, narombaraetevei ma 'rã guive.

¹⁰ Mba'eta mbovy rei e'y aendu ijayvu rei rã: "Jovaive-ive re nhomongyjeal Pendeavyu na hexe, nhandeavyu nal" he'i va'e. Xeravyu ete va'ekue eteve voi anhepyxanga aguã oarõ vy aipoe'i 'rã okuapy: "Onhembotavy uka ramo nhandepo'aka 'rã hexe, ha'e vy jajepy 'rã", he'i okuapy.

¹¹ Ha'e rami teĩ SENHOR ma xereve oiko joe opu'ã va'ety ipo'akapa va'e rami. Ha'e ramo xeavyky reia kuery ae 'rã onhepyxangapa, nda'ipo'akai 'rãe. Ha'e kuery oximba ete 'rã. Hi'arandu rupi e'y ikuai rire ha'e kuery re ou 'rã oximba aguã raka'e rã peve guarã, ha'e va'e re ndaexaraivei 'rã.

¹² Ha'e gui ndee SENHOR ixondaro reta va'e, rexa 'rã heko porã va'e, reikuaa pota 'rã jopy'a ha'e nhokuraxõ re oĩ va'e re. Tove xee taexa ha'e kuery re repu'ã rã, ndepo py xerekove amboaxa reie.

¹³ Peporaei ke SENHOR pe, perovy'a SENHOR, mba'eta ojexavai rei va'e nhe'ë ogueraa jepe ojaviky rei va'e kuery po gui.

Jeremias itui'iaque ára re ijayvu vaiague

¹⁴ Ayvu vaipy toiko xetui'iaque ára. Togueroyvu porãa eme ha'i xekuavã'iaque ára.

¹⁵ Ayvu vaipy toiko xeru pe ava ha'e nunga mombe'uare, ovy'a ete reve "Itui ma ndera'y", he'i va'e.

¹⁶ Tove ha'e va'e ava toiko tetã SENHOR omboaxy e'y re ombovaipa va'ekue rami. Ko'ẽmba jave toendu ojapukai va'e, ha'e rã kuaray mbyte jave ma taevovo rei.

¹⁷ Mba'e re tu Nhanderuete ndaxejukai raka'e xeryru'i pyve? Mba'e re tu ha'i ryepy aĩ reve norenhono porãai raka'e? Ha'e'y vy raka'e rã peve ndaye guaxu'i ma voi va'e rire.

¹⁸ Mba'e re tu xeryru'i gui aẽ raka'e amba'eapo ha'e xeporiaua aendu aguã rive, ha'e aikoa ára opa peve aximba aguã?

21

Nabucodonosor Jerusalém tetã ombovaipa aguã re ijayvu ma voiaque

¹ Jeremias pe SENHOR oayvu ombou va'ekue, mba'eta huvixa Zedequias ombou Malquias ra'y Pasur ha'e Maaséias ra'y sacerdote Sofonias aipoe'i aguã:

² "Eporandu na SENHOR pe orere, mba'eta Babilônia pygua huvixa Nabucodonosor ou orere opu'ã aguã. Xapy'a rei SENHOR orepypyvõ 'rã hexa pyrã ojapo vy, orea gui orerovaigua kuery ojepe'a aguã", he'i.

³ Ha'e ramo Jeremias aipoe'i ha'e kuery pe: "Po rami pendeavyu 'rã huvixa Zedequias pe.

⁴ Po rami SENHOR Israel kuery Ruete ombovai: Ne'exa, xee ajapo 'rã tembiporu joe opu'ãa pygua pendepo py pereko va'e penderovai ju oiporua aguã rami. Mba'eta peneretã kora rovai Babilônia pygua huvixa ha'e caldeu kuery re repu'ã aguã py tembiporu peiporu va'ekue xee ajapo 'rã peneretã mbyte ju ombootypaa aguã rami.

⁵ Xee ae apu'ã 'rã peẽ kuery rovai xepo aupi vy xepo'akaa aexa uka reve, xepoxya, rojou vaia ha'e rombopaga etea rupi.

⁶ Ha'e rami vy kova'e tetã pygua kuery ajukapa 'rã, avakue ha'e mymba kuery guive. Mba'eaxy vaikue gui 'rã omanomba."

⁷ SENHOR aipoe'ive ju: "Ha'e va'e rire ma amboaxa 'rã Judã pygua huvixa Zedequias hembiguai kuery reve. Kova'e tetã pygua kuery mba'eaxy gui, kyxe ha'e karuai gui nomanombai va'ekue ha'e javi amboaxa 'rã Babilônia pygua huvixa Nabucodonosor po py, hovaigua ijukaxea kuery po py guive. Ha'e ramo ojukapa 'rã kyxe py. Ndojuka e'y'i 'rã, noendui 'rã nda'evei nhoo neĩ omboaxa.

⁸ "Ha'e gui heta va'e kuery pe ju aipo're rã: 'Po rami SENHOR ijayvu: "Ne'exa, penerenonde amoĩ 'rã tape tekove katy oo va'e, ha'e manoa katy oo va'e guive.

⁹ Kova'e tetã py opyta va'ekue omanomba 'rã kyxe py, karuai e'y vy mba'eaxy gui. Ha'e rã caldeu kuery tetã jokopaa va'e pe ojereraa uka va'e ma oikove 'rã, guekove ogueraa jepe uka 'rã.

¹⁰ Mba'eta kova'e tetã katy xerova ha'amy mba'emo vai ambou aguã, iporã va'e e'y", he'i SENHOR. "Ha'e rami vy amboaxa 'rã Babilônia pygua huvixa po py oapypa aguã", 're 'rã."

¹¹ "Ha'e gui Judã pygua huvixa ro pygua kuery pe ju aipo're rã: 'Pendu ke SENHOR ayvu.

¹² Davi ramymino kuery, po rami SENHOR ijayvu: "Aje'ive reve peikuaa pota na anhetẽ rupi, peraa jepe ikuai axy va'e imoingoa axya po gui, xepoxya tata rami hendy e'y aguã ha'e've'ya rami rei pendekuaia rovai, imboguearã oiko e'y re."

¹³ SENHOR aipoe'i: "Ne'exa, peẽ vyvugua pygua ha'e ita guaxu nhuũndy reia mbyte oĩ va'e rami repu'ã va'e kuery, xee ma pendovaigua aiko. Peẽ kuery aipoeje: 'Mava'e tu ou 'rã nhanderovai?' ha'e 'Mava'e tu oiko 'rã nhanderekoo py?' peje teĩ penderovaigua aiko.

¹⁴ Ha'e rami vy rombopaga 'rã pendekuaiaque re. Peneretã re amoendy 'rã tata, ka'aguy re rami avi. Ha'e va'e ma pendeavyrykue ha'e javi 'rã omomba", he'i SENHOR."

22

Judã pygua huvixa ro pygua kuery rovai ijayvuague

¹ SENHOR aipoe'i: "Tereo ke Judã pygua huvixa ro py, ha'e emombe'u pova'e ayvu ha'e py.

² Ha'e vy aipo're 'rã: 'Ndee Judá pygua huvixa, tenda Davi openaaty py reguapy va'e, endu ke SENHOR ayvu, nerembiguai kuery ha'e ndevyguia kuery kova'e okê rupi oike va'e ha'e javi reve.

³ Po rami SENHOR ijayvu: "Pejoguereko ke anhetê rupi, pepena porã. Ojexavai va'e peraa jepe imbojexavai reia kuery po gui. Pembojexavai rei eme amboae vvy regua, neĩ tyre'y ha'e imeve'y va'e. Emoẽ eme heko porã va'e ruguy kova'e tekoa re.

⁴ Mba'eta pova'e ayvu pejapo ete ramo kova'e okê rupi oike nho 'rã huvixa kuery tenda Davi openaaty py oguapy va'erã, karóxa py ha'e kavaju áry, guembiguai ha'e ojeueguia kuery reve.

⁵ Ha'e rã pova'e ayvu napenduxeĩ ramo xee ae rery rupi 'rã aura kova'e oo ombovaipa pyre rive amombyta agua re", he'i SENHOR."

⁶ Mba'eta po rami SENHOR ijayvu Judá pygua huvixa ro re: "Ndee ma Gileade ha'e Lfano vvyty apyte rami ajou porã va'eri anhetê rojapo 'rã tekoague rive, tetã oĩa ve'y agua rami.*

⁷ Nderovai ambou 'rã nemombaarã. Ha'e ramo peteĩ-teĩ guembiporu reve ou vy ojayapa 'rã yary reiporavo va'ekue, ha'e vy omombo 'rã tata py.

⁸ Ha'e rami rire pavẽ regua kova'e tetã rupi oaxa vy peteĩ-teĩ aipoe'i 'rã oirũ pe: 'Mba'e re tu SENHOR gui rami ete ojapo kova'e tetã guaxu re?' he'i 'rã.

⁹ Ha'e ramo ha'e kuery pe ombovaia 'rã: 'Mba'eta ojepe'apa rire SENHOR nguete guexeve guarã ojapo va'ekue gui, ha'e amboae ramigua tuete ombojerovia, ha'e ixupe rive ikuai rire.' "

Judá pygua huvixa Salum rovai ijayvuague

¹⁰ Pejae'o eme huvixa omano va'ekue re, penhendu eme. Ha'e rami 'rãgue py pejae'o vaipa ete 'rã ta'ykue ogueraa pyre re. Mba'eta ha'e va'e ma ndojevvyvei 'rã, ndoexavei 'rã vvy itui'iaque.†

¹¹ Mba'eta SENHOR ijayvu Josias ra'y Judá pygua huvixa Salum, nguu Josias rekovia oĩ va'ekue re, kova'e tekoa gui oipe'a pyre re guive. Ha'e vy aipoe'i: "Ndojevvyvei ma 'rã apy.

¹² Ha'e rami 'rãgue py escravo-rã ogueraa ague py ae 'rã omano. Ndoexavei 'rã kova'e vvy", he'i.

Judá pygua huvixa Jeoaquim rovai ijayvuague

¹³ "Nda'evei ete 'rã anhetê rupi e'y joguerekoa rupi ngoo ojapo va'e, jokorea rupi ngoorã ojapo agua mba'emo ojou va'e pe. Ha'e va'e ma ojeueguia kuery omomba'epo teĩ ndopagai, omba'epoague repy nome'ei va'e.

¹⁴ Mba'eta aipo're: 'Xerorã ajapo 'rã tuvixa va'e, ha'e opy ja'oa ikuai va'e ambopyve 'rã. Yvate rupi amoĩ 'rã janela-rã, yary guigua py aipyovãmba ha'e amopytã 'rã pytã va'e py', 're.

¹⁵ Ha'e rami teĩ ndee nda'u huvixa kuery mboae rami yary rereko reta vy rive teve huvixa rei? Nderu nda'u ndokarui ha'e ndoy'ui teve raka'e? Ha'e nda'u ha'eva rami ndajoguerekoĩ, ha'e joe ndoikuaa pota porãĩ teve? Ha'e ramo opa mba'e py oiko porã.

¹⁶ Ha'e ma oikuaa pota va'ekue iporiaukue'i ha'e ojexavai va'e kuery re. Ha'e ramo ixupe ha'eva rami meme oiko. Ha'e rami e'y teve xekuaa va'e kuery ikuai?" he'i SENHOR.

¹⁷ "Ha'e rã ndee ma nderexa ha'e ndepy'a py reikuaa pota reikovy ndee ae reipota va'e re anho, heko porã va'e ruguy remoẽ agua, ha'e rejeroivia reia ha'e rejokorea rupi reiko agua re anho."

¹⁸ Ha'e nunga rupi po rami SENHOR ijayvu Josias ra'y Judá pygua huvixa Jeoaquim re: "Pejae'o eme hexe, joupe-upe aipopeje eme guive: 'Ai, xeryvy!' ha'e'y vy 'Ai, xereindy!' peje eme. Neĩ hexe pendepy'a vaia rupi 'Ai, xeruvixa!' ha'e'y vy 'Ai, ipo'akapa va'ekue', peje eme.

¹⁹ Mba'eta mburika re'õgue omomboa rami avi hetekue omomboa 'rã. Ha'e rami vy ombotyryrya 'rã heravy Jerusalém rokê gui mombyry omombo agua.

²⁰ "Ndee Jerusalém, ejeupi na Lfano vvyty áry, ha'e ejaupukai. Enhendu Basã vvy rupi, ha'e ejaupukai Abarim guive, mba'eta neirũ kuery re opyrõmbaa ma.

²¹ Ndeporiaua rupi e'y reiko jave ndevy xeyvu ramo ndee 'Naendui 'rã', 're va'ekue. Ha'e rami ete reiko ndepyau guive, peteĩgueve ma voi nerendui xeyvu.

²² Ha'e nunga rupi vvyty ogueraapa 'rã ndere opena va'ekue, neirũ kuery voi escravo-rã ogueraapaa 'rã. Ha'e ramo ndereko vaiague káuxa rexĩmba ha'e nda'evei nho 'rã.

²³ Ndee Lfano pygua rami yary guigua py ndero va'e! Ha'e rami teĩ rejexavai agua ou ramo nepoaẽ ete 'rã, omemy oikuaã ta va'e rami reiko axy agua."

Judá pygua huvixa Jeconias rovai ijayvuague

²⁴ SENHOR aipoe'i: "Anhetê ete xee ae rekove rupi aura vy aipoa'e: Jeoaquim ra'y Judá pygua huvixa Jeconias ma aiporu kuaa regua re xekuã regua xerery oĩa va'e oĩ va'e rire xee amboi 'rãgue ha'e gui.

²⁵ Ndee huvixa, romboaxa 'rã ndejukaxea ha'e rekyjea va'e kuery po py. Ha'e kuery ma Babilônia pygua huvixa Nabucodonosor ha'e caldeu kuery.

²⁶ Vvy mboae ndetui'iaque katy e'y 'rã romombo, ndexy nekuavã'iare reve. Ha'e py ma pmano 'rã.

²⁷ Ha'e rã vvy pexaxea katy ma ndapejevvyvei 'rã.

* 22:6 Gileade ha'e Lfano vvyty apyte re ikuai vvyra tuvixakueve anho, yary, ha'e nunga. Ha'e gui huvixave ro pe "Oo Lfano regua ka'aguy guigua" 'ea (1 Reis 7.1-7). Ha'e gui versículo 23 py ma huvixave pe ae "Lfano pygua, yary guigua py ndero va'e" 'ea. † 22:10 Huvixave Josias heko porã va'e omano rire Israel kuery ojae'o vaipa okuapy hexe. Ha'e rã ta'y Salum ma Egitto pygua huvixa ogueraa ovy re omano agua py (2 Reis 23.34). Ha'e gui Salum Jeoaçaz hery mboae va'e ogueraa ma rire tyke'y Jeoaquim ju oĩ hekovia.

²⁸ Ha'e gui ndee ava Jeconias nda'u ojou vaipy, omopê rive pyre ha'e oguerovy'a e'ÿpy reiko? Mba'eta ndera'y kuery reve penemomboo oka katy, vvy pexa e'ÿa katy pendereraa", he'i.

²⁹ Ndee vvy, vvy, vvy! Endu na SENHOR avvu.

³⁰ Po rami SENHOR ijayvu: "Jeoaquim rery oïa py pembopara ta'y e'ÿ va'e rami, ha'e ava oikoa pukukue re ndoiko porã va'e, ha'e peteïve ta'y nda'ipo'akai 'rã tenda Davi openaaty py oguapy aguã Judá pygua huvixarã."

23

Ha'eve'ÿa rami opena va'e kuery rovai ijayvuague

¹ "Nda'evei ete 'rã xerymba vexe'i kuery re opena va'erã amoi va'ekue pe, mba'eta omokanhymba ha'e nhuũndy okaruaty gui omoaïmba", he'i SENHOR.

² Ha'e nunga rupi po rami SENHOR Israel kuery Ruete ijayvu ojeupegua kuery re opena va'e re: "Peê kuery ma pemoaïmba xerymba kuery, pemondoukapa, napepenai ha'e kuery re. Ha'e nunga rupi xee ma apena 'rã peê kuery pepaga aguã re pejapo vaiague re", he'i SENHOR.

³ "Ha'e gui ma xee ae 'rã arupa xerymba kuery rembyrekue vvy jave mamã rei okanhymbaague gui. Ajapo 'rã okora py ae ju ojevypa aguã rami. Ha'e ramo ta'y reta ha'e hetave ju 'rã ovy.

⁴ Ha'e gui ha'e kuery re opena va'erã amoi 'rã omongaru porã va'erã kuery. Ha'e ramo xerymba kuery ndokyjeveï neï nonhemondyiveï 'rã. Peteïve ma voi nokanhyvei 'rã", he'i SENHOR.

Jeremias 33.14-16

⁵ SENHOR aipoe'i: "Ne'exa, ou ma oiny ára peteï amoingo 'rã Davi rapytakue renhoï, hamymino heko porã va'erã. Ha'e va'e ma huvixa oï vvy o'arandua rupi 'rã ipo'aka ha'e opena. Ha'evea rami 'rã oikuaa pota ha'e joguereko vvy re.*

⁶ Ha'e oï jave ma Judá kuery oo jepe 'rã, Israel kuery voi mba'eve gui okyjae rupi e'ÿ 'rã ikuai. Pova'e tery rupi 'rã omboerya: 'SENHOR nhandereko porãrã me'ëa', 'ea."

⁷ SENHOR aipoe'ive ju: "Ou ma oiny ára oura va'e aipo nde'iveï aguã: 'Anhetê ete SENHOR oikove va'e Egito vvy gui Israel kuery oguenô va'ekue rery rupi aura", nde'iveï 'rã.

⁸ Ha'e rami 'rãgue py aipo'ea 'rã: 'Anhetê ete SENHOR oikove va'e vvy kuaray ijapu'a'ia katyguha ha'e vvy jave rupi Israel ramymino kuery mamã rei herapaague gui oguerupa va'ekue rery rupi aura', 'ea 'rã. Ha'e ramo ha'e kuery ikuai 'rã ovyv re ae."

Profeta ramigua rive ikuai va'e rovai ijayvuague

⁹ Ha'e gui profeta kuery reko gui xekuraxô opêmba xepy'apy py, xekãgue voi oryryipa. Xee ma ava oka'u va'e rami avi aiko, vinho oy'u vaipa va'e rami, teï SENHOR gui, ha'e ijayvu iky'a e'ÿ va'e amombe'ua kãuxa ae nda'evei aikovy.

¹⁰ Mba'eta vvy tynyê ma tavy reia, ha'e rupi ojae'oa oiny Nhanderuete ijayvu vai rire. Tekoa e'ÿa rupi nhuũndy ikuai va'e ipirupa ma. Mba'eta itavy rei va'e ikuai ma nda'evei, ha'eve'ÿa rami rive 'rã ipo'aka joe.

¹¹ "Mba'eta profeta ha'e sacerdote kuery onhemongy'apa okuapy. Xevyguha oo py eteve voi ajou ha'eve'ÿa rami ikuai", he'i SENHOR.

¹² "Ha'e nunga rupi ha'e kuery ma tape xyxï reia rupi pytũ rupi ooa rami ikuai. Ha'e ramo omoanhamba rã ho'apa 'rã. Mba'eta ha'e kuery áry ambou 'rã mba'emo vai ambopaga vvy", he'i SENHOR.

¹³ "Samaría pygua profeta ramigua kuery re ma xee aexa hi'arandu e'ÿa. Mba'eta Baal rery rupi rive ayvu omombe'u vvy oguerovejavyva xevyguha Israel kuery.

¹⁴ Jerusalém pygua profeta kuery re voi aexa nda'evei ete va'e. Mba'eta ha'e kuery itavy rei 'rã okuapy, anhetê rupi e'ÿ 'rã ikuai, ha'e omombaraete 'rã joapo vaia kuery po, avave rei gueko vai gui ojeko rerova e'ÿ aguã rami. Xevy pe rã Sodoma pygua kuery ikuaiague rami meme, ha'e rã Jerusalém pygua kuery ma Gomorra pyguare rami ikuai."

¹⁵ Ha'e nunga rupi po rami SENHOR ixondaro reta va'e ijayvu profeta ramigua kuery reko re: "Ne'exa, ha'e kuery xee amongaru 'rã veneno re, ha'e yy veneno re irũ va'e ame'ê 'rã oy'u aguã. Mba'eta profeta ramigua kuery Jerusalém pygua ojapo vvy jave rupi ha'eve e'ÿa rami ikuai aguã."

¹⁶ SENHOR ixondaro reta va'e aipoe'i: "Pejapyxaka eme profeta kuery penembyte rupi ayvu omombe'u va'e re, mba'eta ha'e kuery penemonyê 'rã pearô rive aguã anho. Mba'emo ha'e kuery ae oexa va'ekue 'rã omombe'u, SENHOR juru guigua e'ÿ.

¹⁷ Xere ija'e e'ÿ va'e kuery pe ha'e kuery aipoe'i riae 'rã: 'SENHOR ijayvu mba'eve ndoikoi aguã re pendere', he'i 'rã. Inhakã ratãa rupi ikuai va'e pe 'Pendere ndoui 'rã mba'emo vai', he'i.

¹⁸ Ha'e rami avi ha'e kuery va'e regua mava'e tu oï SENHOR reve onhemopy'a oinya py, mba'emo oexa ha'e ijayvu oendu aguã rami? Mava'e tu SENHOR ayvu re ojapyxaka porã vvy oendu ete va'e?

¹⁹ Ne'exa, SENHOR-a gui ou oiny ára vai! Ipoxya ou ma, vvytu jere vaikue 'rã ou heko vai va'e kuery áry.

²⁰ Ha'e rami vvy SENHOR opoxya gui ndojepe'ai 'rã, opy'a re omoi va'ekue ojeupity 'rã oikopa peve. Opaa ára py ma pexa kuua porã 'rã ha'e nunga.

²¹ Xee ma ha'e ramigua profeta kuery namboui teï ha'e kuery onhamba 'rã oje'oivy. Ha'e kuery pe mba'eve namombe'u ukai teï omombe'u 'rã oje'oivy ayvu.

* 23:5 Isafas 4.2; Zacarias 3.8, 6.12

²² Ha'e gui anhetê ri anhembody'a ainya py ha'e kuery ikuai va'e rire ha'e kuery pe aendu uka ete 'râgue xeayvu xeavygua kuery peguarã, ha'e ajapo 'râgue ha'e kuery ha'eve'ÿa rami ikuaiã gui ojepe'a aguã rami, tape porã rupi ju oo aguã.

²³ "Xee nda'u Penderuete ha'e'i rupi anho ri apena? Mombyry rupi guive e'ÿ teve apena?" he'i SENHOR.

²⁴ "Amongue nda'u aexaa gui onhemi kuaa 'rã? Xee nda'u yva ha'e yvy ha'e javi rupi naã 'rã?" he'i SENHOR.

²⁵ "Mba'eta aendu ae ma profeta ramigua kuery ijayvu rã, xerery rupi apu omombe'u vy 'Petei mba'e aexa ra'u, aexa ra'u ae ri' he'i ramo.

²⁶ Raka'e peve nda'u ha'e nunga oï 'rã profeta kuery apu momba'ua py'a re, opy'a re ojekorea oï va'e anho omombe'u va'e?

²⁷ Mba'eta ha'e kuery oexa ra'uague petei-tei oirũ kuery pe omombe'u vy ojapoxe xeavygua kuery xerery gui hexarai aguã rami, Baal ra'angaa pe tuu kuery ikuaiã rupi xerery gui hexaraiague rami avi.

²⁸ Ha'e gui profeta oexa ra'u va'ekue tomombe'u oexa ra'u rive va'ekue rami. Ha'e rã amongue hexe xeayvu oia va'e ma tomombe'u porã xeayvu anhetê rupi. Mba'eta mba'e tu trigo 'ygue rive oguereko hi'a reve?" he'i SENHOR.

²⁹ "Mba'eta xeayvu ma tata oiko, ha'e martelo ita guaxu mbovoa ramigua", he'i SENHOR.

³⁰ "Ha'e nunga rupi xee ma ha'e va'e profeta kuery rovaigua aiko. Mba'eta petei-tei oirũ gui imonda 'rã xeayvu merami rive omombe'u va'e re", he'i SENHOR.

³¹ "Ne'ixa, xee ma ha'e va'e profeta kuery rovaigua aiko", he'i SENHOR. "Mba'eta oayvu ae omombe'u vy 'Po rami SENHOR ijayvu', he'i rive 'rã.

³² Ne'ixa, xee ma apu rupi oexa ra'u va'ekue momba'ua kuery rovaigua aiko", he'i SENHOR. "Mba'eta ha'e nunga anhetê rupi e'ÿ omombe'u vy oguerojejavypa xeavygua kuery, xee namboui, mba'eve namombe'u uka guive tei. Peteive henda py ha'e kuery ndojapoi 'rã heta va'e kuery ikuai porã aguã rami", he'i SENHOR.

³³ "Ha'e gui ma ndevy pe heta va'e kuery, e'ÿ vy profeta, sacerdote mba'e oporandu vy aipoe'i 'rã: 'Mba'ixa tu SENHOR guigua ayvu ipoyi va'e?' he'i 'rã. Ha'e ramo rembovai 'rã: ' "Peê ae ma ipoyi va'e pendekuai, ha'e rã xee ma roipe'apa 'rã", he'i SENHOR, 're 'rã.

³⁴ Mba'eta profeta, e'ÿ vy sacerdote mba'e, ha'e rami e'ÿ vy heta va'e kuery regua 'Pova'e ayvu ma SENHOR guigua ipoyi va'e', he'i va'e ma ambopaga 'rã, hoo pygua kuery ha'e javi reve.

³⁵ Ha'e rami tei petei-tei peneirũ kuery pe aipopeje: 'Mba'e he'i tu SENHOR? Mba'ixa tu SENHOR ijayvu ipoyi va'e?' peje pekuapy.

³⁶ Ha'e rami tei nda'evevei ma 'SENHOR guigua ayvu ipoyi va'e' peje aguã, mba'eta petei-tei re ijayvuague ae 'rã oï ipoyi va'e. Mba'eta peê kuery ma ha'eve'ÿa rami pemombe'u ayvu Nhanderuete oikove va'e, SENHOR ixondaro reta va'e, nhande kuery Ruete guigua.

³⁷ Profeta ikuai va'e pe aipopeje: 'Mba'e he'i tu ndevy SENHOR? Mba'ixa tu SENHOR ayvu ipoyi va'e?' peje.

³⁸ Ha'e rami tei 'SENHOR ayvu ipoyi va'e', peje rire po rami SENHOR ijayvu peê kuery pe: 'Xee aipotaa rami e'ÿ " SENHOR ayvu ipoyi va'e" peje rire

³⁹ xee roipe'apa 'rã xerenonde gui, tetã penderekoarã ha'e peneramoï kuery rekoarã aea va'ekue reve.

⁴⁰ Ha'e rami vy pende'áry ambou 'rã pevare ve'ÿ ha'e peximba aguã opa e'ÿ va'e, hexarai pyrã e'ÿ, he'i."

24

Mokoï varai figo'a oia oexa ukaague

¹ Ha'e gui SENHOR oexa uka xevy mokoï varai figo'a oia, SENHOR pegua templo rexei omoï mbyre. Ha'e nunga oiko Babilônia pygua huvixa Nabucodonosor ha'e pygua kuery escravo-rã ogueraa rire: Jeaquim ra'y Judá pygua huvixa Jeconias, Judá regua yvatekueve, ha'e gui Jerusalém pygua mba'emo apoa ha'e ferro re omba'eapo va'e kuery. Babilônia katy ogueraapa.

² Petei varai py figo'a oï va'e ma iporãgueve, hi'a ypy'i va'ekue. Ha'e rã amboae py ma oï ivaikueve va'e, ja'u aguã nda'evei va'e.

³ Ha'e gui SENHOR oporandu xevy:

— Jeremias, mba'e tu ndee rexa?

Ambovai:

— Xee aexa va'e ma figo iporãgueve, ha'e gui ivaikueve ju, ja'u aguã nda'evei va'e — ha'e.

⁴ Ha'e gui xevy pe ou SENHOR ayvu. Ha'e vy aipoe'i:

⁵ "Po rami SENHOR Israel kuery Ruete ijayvu: Peva'e figo porãgueve aexa vy ajou porãa rami avi Judá regua kuery escravo-rã ogueraa pyre aexa vy ajapo porã 'rã ha'e kuery pe, kova'e yvy gui caldeu kuery yvy katy araa uka va'ekue pe.

⁶ Ha'e kuery re ama'ê 'rã amoiingo porã reve, ha'e vy ajapo 'rã kova'e yvy re ojevypa aguã rami. Amombaraete 'rã, amomba 'rã nda'ei. Anhoty 'rã, ha'e namondoroi 'rã guive.

⁷ Ha'e kuery pe ame'ê 'rã kuraxõ SENHOR aikoa rami xekuaa aguã regua. Ha'e kuery ikuai 'rã xeavygua, ha'e rã xee ma aiko 'rã ha'e kuery Ruete, mba'eta opy'a ha'e javi py ojevy 'rã xere.

⁸ "Ha'e rã figo vaikueve ja'u aguã nda'evei va'e ndajou porãia rami ae amoiingo axy 'rã Judá pygua huvixa Zedequias ha'e hembiguai yvatekueve, Jerusalém pygua kuery mboae, kova'e yvy re opyta va'ekue ha'e Egito yvy re ikuai va'e ha'e javi", he'i SENHOR.

⁹ "Ha'e kuery xee amoiingo 'rã yvy jave regua kuery mondyipaarã ija'e e'ÿ aguã. Oximba aguã, ijayvua rei ha'e ojoiari reipy, ha'e ayvu vaipy 'rã ikuai yvy jave rupi araa ukapaa rupi rei.

¹⁰ Ha'e kuery re ambou 'rã kyxë, karuai ha'e mba'eaxy vaikue, ha'e kuery ha'e tuu kuery vyvrã ame'ë va'ekue gui okanhymba peve."

25

Setenta ma'et'ya peve escravo ikuai aguã re ijayvuague

¹ Ha'e gui Jeremias pe ou ayvu Judã pygua kuery regua. Josias ra'y Judã pygua huvixa Jeaquim irundy ma'et'ý re ma oĩ jave py ou. Ha'e va'e ma'et'ya ma Babilônia pygua huvixa Nabucodonosor peteĩ ma'et'ý re oĩa va'e.

² Ha'e gui ha'e va'e ayvu profeta Jeremias omombe'u Judã ha'e Jerusalém pygua kuery ha'e javi pe. Ha'e vy aipoe'i:

³ "Vinte e três ma'et'ya re ma SENHOR ayvu ou xevy, Amom ra'y Judã pygua huvixa Josias treze ma'et'ý re ma oĩ guive aý peve. Ha'e ramo ko'ë rai guive pendevy xee amombe'u aikovy, ha'e rã peẽ ma napendu potai.

⁴ Ha'e rami ae avi ko'ë rai'i guive pendevy SENHOR ombou guembiguai profeta kuery ha'e javi, ha'e rã peẽ kuery ma ndapejapxakai, neĩ pendepoxya ndaperova-rovai pendu aguã.

⁵ Ha'e kuery aipoe'i: 'Peteĩ-teĩ pejeko reroxa ke ha'eve'ya rami pendekuaiaty ha'e pejapo vai reiaty gui, penderekoa aguã vvy peneramoĩ kuery pe yma ma voi SENHOR ome'ë va'ekue py raka'e rã peve guarã.

⁶ Tapeo eme amboae ramigua tuuete re ixupe peiko ha'e pemboete aguã, xembopoxy eme guive pendepo py mba'emo pejapo va'e py. Ha'e ramo peteĩgueve voi xee ndajapo vai 'rã peẽ kuery re', he'i.

⁷ Ha'e rami xeayvu va'ekue teĩ peẽ kuery ndapejapxakai. Ha'e rami 'rãgue py xembopoxy pekuapy pendepo py mba'emo vai pejapo py, pendejee ae pejapo vai", he'i SENHOR.

⁸ Ha'e nunga rupi SENHOR ixondaro reta va'e aipoe'i: "Xeayvua re ndapejapxakai ramo

⁹ ne'xa, kuaray ijapu'a'ia katy gui ambou 'rã ha'e javi regua", he'i SENHOR. "Ambou avi 'rã xerembiguai Babilônia pygua huvixa Nabucodonosor. Ha'e kuery ambou 'rã kova'e vvy re, apyguã kuery ha'e ha'e'i rupi ikuai va'e kuery rovai. Ha'e vy amomba katu'ĩ 'rã, amoĩ 'rã nhomondyipaarã ha'e ojojai rei pyrã, ivaipa aguã raka'e rã peve.

¹⁰ Ha'e kuery ikuaiã gui xee amombytu'u 'rã ikuai porã reia ha'e ovy'aa, omenda va'erã ijayvua, ha'e mba'emo mongu'ia onhendua, tataendy ikuai va'e voi amboguepa 'rã.

¹¹ Ha'e ramo kova'e vvy ha'e javi opyta 'rã tekoa e'ya ha'e nhomondyipaarã. Ha'e gui ha'e kuery regua ma setenta ma'et'ý re ikuai 'rã huvixa Nabucodonosor rembiguai.

¹² Ha'e gui setenta ma'et'ya ojeupitypa maa py ma ambopaga 'rã Babilônia pygua huvixa ojapo vaiague re, kova'e vvy regua kuery guive", he'i SENHOR. "Caldeu kuery vvy re voi anhombopaga 'rã, raka'e rã peve ivaipa aguã.

¹³ Ha'e va'e vvy ha'e javi re ajapo 'rã xeayvuague ojeupitypa aguã rami, kova'e kuaxia re ipara oĩ va'e ha'e javi, vvy regua ha'e javi rovai Jeremias omombe'u va'ekue.

¹⁴ Mba'eta ha'e kuery voi ikuai 'rã heta regua ha'e huvixa guaxu kuery rembiguai. Ha'e rami vy ha'e kuery ambopaga 'rã ojapo vaiague ha'e opo py mba'emo ojapogae re."

Karo Nhanderuete poxya oĩa re ijayvuague

¹⁵ Ha'e gui SENHOR Israel kuery Ruete aipoe'i xeivy:

— Ejopy ke xepo gui kova'e karo vinho xepoxya regua oĩa. Ha'e vy eme'ë vvy regua ha'e javi pe oy'u aguã, mamõ rã romondoukaa rupi rei,

¹⁶ ha'e kuery oy'u vy oryryipa ha'e na'inhakã porãvei aguã, ha'e kuery mbyte rupi kyxe amondouka va'e gui — he'i.

¹⁷ Ha'e ramo SENHOR po gui xee karo ajopy vy ame'ë vvy regua ha'e javi pe oy'u aguã, mamõ rã SENHOR xemondoukaa rupi rei:*

¹⁸ Jerusalém, Judã regua tetã ikuai va'e, ha'e pygua huvixa kuery ha'e hembiguai yvatekueve pe, ha'e kuery vvy opyta aguã ombovaipa pyre nhomondyipaarã, ojojai reipy ha'e ayvu vaipy opyta aguã, aý jaexaa rami;

¹⁹ ha'e gui Egito pygua huvixa Faraó pe, hembiguai kuery, yvatekueve ha'e heta va'e kuery ha'e javi pe,

²⁰ joegua e'ý-e'ý kuery ha'e javi, Uz vvy regua huvixa kuery, filisteu kuery vvy re huvixa ikuai va'e, Asquelom tetã, Gaza, Ecrom ha'e Asdode pygua okuave va'e,

²¹ Edom, Moabe ha'e Amom ramymino kuery,

²² Tiro ha'e Sidom tetã pygua huvixa kuery, ha'e ye'ë rovai re huvixa ikuai va'e ha'e javi,

²³ Dedã, Tema, Buz ha'e o'a ojaya apu'a'i va'e kuery ha'e javi,

²⁴ Arábia pygua huvixa kuery, ha'e tekoa e'ya re joegua e'ý-e'ý ikuai va'e huvixa kuery,

²⁵ Zimri, Elão ha'e Média pygua huvixa kuery,

²⁶ kuaray ijapu'a'ia katy huvixa ikuai va'e, ha'e'i rupi ha'e mombyry rupi ikuai va'e, ha'e vvy jave rupi tetã ikuai va'e ha'e javi oy'u va'erã joakykue-kykue. Ha'e gui opa vygua ma Babilônia pygua huvixa ju 'rã oy'u.

²⁷ "Ha'e gui ha'e kuery pe aipo're 'rã: 'Po rami SENHOR ixondaro reta va'e, Israel kuery Ruete ijayvu: Pey'u na peka'upa ha'e pembojevypa peve. Pe'a ha'e napepu'avei 'rã, kyxe peẽ kuery mbyte rupi amondouka va'e gui', re.

²⁸ Ha'e gui karo ndepo gui oy'u aguã ha'e kuery ndojopyxei ramo aipo're 'rã ha'e kuery pe: 'Po rami SENHOR ixondaro reta va'e ijayvu: Pey'u 'rãe.

* 25:17 Apy ma karo re ombojaja Nhanderuete ayvu Jeremias omombe'u va'erã vvy regua kuery pe, ha'e kuery ombopaga aguã regua (versículo 16).

²⁹ Mba'eta ne'exa, tetã xerery rupi oĩa gui amboypy 'rã anhombopaga agua. Ha'e rã peẽ peo jepe 'rã teve? Any, ndapeo jepei 'rã, mba'eta yvy jave re ikuai va'e áry ambou 'rã kyxe', he'i SENHOR ixondaro reta va'e.

³⁰ "Ha'e gui ndee remombe'u 'rã pova'e ayvu ha'e javi. Ha'e vy aipo're 'rã ha'e kuery pe: 'SENHOR okororõ 'rã yvate o'amba iky'a e'ỹ va'e gui, ijayvu nhendu 'rã. Guary rami okororõ ratã 'rã ojeupegua kuery rovai. Ijayvu atã 'rã yvy re ikuai va'e ha'e javi rovai, uva onhami okuapy py ojavukaia rami avi.

³¹ Ha'e ramo yvy apy peve 'rã oendua ojavukaia, mba'eta SENHOR oguereko yvy regua kuery pe ijayvu ete agua, to'o ha'e javi omboayvu agua oĩ. Ha'e vy heko vai va'e omboaxapa 'rã kyxe revegua pe', he'i SENHOR."

³² SENHOR ixondaro reta va'e aipoe'i: "Ne'exa, mba'emo vai oaxa 'rã ovy yvy regua ikuai va'e-va'e ha'e javi rupi, yvy apy gui omboypy 'rã ouvy ára vai", he'i.

³³ Ha'e va'e ára ojuka pyrã SENHOR omboaxa va'ekue retekue ma ha'e va'e yvy jave rupi 'rã ikuai. Ha'e rami teĩ ndojae'oai 'rã, nomboatyai 'rã, nonhono porãai 'rã guive. Ha'e rami 'rãgue py mba'emo repxi rami rive 'rã ikuai yvy áry.

³⁴ Joe pepena va'e kuery, penhendu atã na, peneraxẽmba rei. Peẽ mymba ja kuery, penhembojere-jere pejupy tanhimbu rupi, mba'eta ojeupity ma pendejuka ha'e penemoaimbaa ára. Ha'e rami vy peẽ ae pe'apa 'rã yryru hepyve ovopa va'e rami.

³⁵ Ha'e ramo joe opena va'e kuery ndojouvei 'rã onhemi agua, mymba ja kuery ndojoui 'rã oo jepe agua.

³⁶ Ne'exa, onhendu joe opena va'e kuery ojavukaia, kora ja kuery ojae'o ratã rei nhendu rã! Mba'eta SENHOR ombovaipa ma nhuindy ikuaiaty.

³⁷ Kora ikuai porãaty ivaipa 'rã, SENHOR poxya hendy va'e gui.

³⁸ Mba'eta o'amba gui oẽ 'rã ouvy guary ra'y rami. Ha'e rami vy ojerovia rei va'e kyxe py ombovaipa 'rã ha'e kuery yvy, opoxya hendy va'e py guive.

26

Jeremias ojuxaxe okuapyague

¹ Ha'e gui Josias ra'y Jeaquim Judã pygua huvixa oĩ ypy'i jave py ou pova'e ayvu SENHOR gui.

² Ha'e vy SENHOR aipoe'i: "Tereo xeroka py. Ha'e vy Judã regua tetã pygua kuery xeveygua oo py omboete vy ou ramo ha'e kuery pe emombe'u xeayvua ha'e javi. Neĩ peteĩve ayvu emombe'u e'ỹ eme.

³ Ha'e ramo ha'e kuery xeayvu oendu vy ojeko rerova 'rã ha'eve'ỹa rami ikuaiya gui. Ha'e ramo xee voi amboae rami 'rã areko, ha'e kuery ikuaiya re ambovaga agua re xeayvuague rami ve'ỹ.

⁴ Ha'e nunga rupi aipo're ha'e kuery pe: 'Po rami SENHOR ijayvu: Xeayvu re ndapejapyxakai ri ramo xeguigua lei penerenonde amoĩ va'ekue rupi pendekuai agua,

⁵ ha'e xerembiguaĩ profeta kuery ko'ẽ rai guive pendea py ambou va'e ayvu pendu agua, aỹ peve xeayvu napenduxeague rami ae ju,

⁶ ha'e ramo ma kova'e oo ambovaipa 'rã Siló tetã re ambovaipaague rami, ha'e vy kova'e tetã ajapo 'rã ayvu vaipy opyta agua rami, yvy regua kuery ha'e javi pe', 're 'rã.'*

⁷ Ha'e rami SENHOR pegua oo py Jeremias ijayvu ramo sacerdote kuery, profeta ha'e heta va'e kuery ha'e javi oendu okuapy.

⁸ Heta va'e kuery pe SENHOR ijayvuague ha'e javi Jeremias omombe'upa ma ramo sacerdote kuery, profeta ha'e heta va'e kuery pavẽ ojopy okuapy. Ha'e vy aipoe'i Jeremias pe:

— Rojuka 'rã.

⁹ Mba'eta SENHOR rery rupi ndeayvu vy aipo're: "Kova'e oo ombovaipa 'rã Siló tetã rami, ha'e kova'e tetã ivaipa 'rã. Ha'e rã noĩavei 'rã ha'e py", 're rire — he'i okuapy. Ha'e rami vy heta va'e kuery ha'e javi ono'õ Jeremias rovai, SENHOR pegua oo pyve.

¹⁰ Ha'e gui Judã regua yvatekueve ma pova'e ayvu oendu vy huvixa ro gui jogueru SENHOR pegua oo py. Ha'e vy oguapy okuapy SENHOR pegua oo rokẽ ipyau va'e py.

¹¹ Ha'e ramo sacerdote ha'e profeta kuery jogueroayvu yvatekueve ha'e heta va'e kuery ha'e javi reve. Ha'e vy aipoe'i:

— Kova'e ava ma jajuka va'erã kova'e tetã re ijayvu rire, peẽ pendeapxya py ae pendua rami — he'i okuapy.

¹² Ha'e ramo Jeremias ju ijayvu yvatekueve ha'e heta va'e kuery ha'e javi pe. Ha'e vy aipoe'i:

— SENHOR ae ma xembou kova'e oo ha'e kova'e tetã re ayvu pendu va'ekue ha'e javi amombe'u agua.

¹³ Ha'e gui aỹ ma pejeko rerova ke, ha'e pendu SENHOR Penderuete ijayvua. Ha'e ramo SENHOR ndojapovei 'rã peẽ kuery rovai ijayvuague.

¹⁴ Ha'e rã xee ma pendepo py aĩ. Xerereko peẽ ae peipotaa rami.

¹⁵ Ha'e rami avi peikuaa pota porã pova'e re. Xejuka ri vy pendeje ae 'rã pemoĩ heko porã va'e ruguy pemoẽague re pepaga agua, kova'e tetã ha'e apyqua kuery ha'e javi re guive. Mba'eta anhetẽ ete SENHOR xembou peẽ kuerya py, pova'e ayvu amombe'u rã pendu agua — he'i.

¹⁶ Ha'e ramo yvatekueve aipoe'i okuapy sacerdote ha'e profeta kuery pe:

— Kova'e ava ma pejuka agua nda'evei, SENHOR Nhanderuete rery rupi nhandevy ijayvu ramo — he'i.

¹⁷ Ha'e gui opu'ã avi ha'e va'e yvy re nhomongeta va'ety kuery regua. Ha'e vy heta va'e kuery ijaty okuapy va'e pe ijayvu vy aipoe'i:

¹⁸ — Judã pygua huvixa Ezequias oĩ jave Moresete pygua Miquéias ayvu omombe'u oikovy vy ha'e voi ijayvu raka'e Judã pygua kuery ha'e javi pe. Ha'e vy aipoe'i: "Po rami SENHOR ixondaro reta va'e ijayvu:

* 26:6 Siló tetã py SENHOR ojapo va'ekue ma tetã ombovaipa, ha'e kuery tuuete mboae ramigua re ikuai ramo (1 Samuel 4.1-11).

Sião tetā oikaraia 'rā mba'etyrā rami, Jerusalém opyta 'rā mba'emo ra'ykue atyrā, yvy'ā templo oia ma jaipa rive 'rā guive", he'i va'ekue.

¹⁹ Ha'e rami Miquéias ijayvu teĩ Judá pygua huvixa Ezequias ojuka teve Judá pygua kuery reve? Ha'e rami 'rāgue py SENHOR renonde huvixa ojererokyjea rupi oiko raka'e, ha'e rami vy SENHOR pe oĵapukai omboaxy aguā re. Ha'e ramo SENHOR ndoĵapovei ha'e kuery rovai ijayvuague. Ha'e nunga rupi aỹ mba'e re tu jaru 'rā ha'e rami ete nda'evei va'e nhanenhe'ẽ mombaara? — he'i.

Profeta Urias ojukaa ague

²⁰ Oiko avi raka'e amboae ava Quiriate-Jearim pygua, Semaías ra'y Urias. Ha'e va'e voi SENHOR rery rupi ayvu omombe'u va'ety. Ha'e rami vy ha'e va'e tetā ha'e yvy re ijayvu avi, Jeremias ijayvuague ha'e javi rami ae.

²¹ Ha'e ramo ha'e ijayvu ramo huvixa Jeaquim ha'e ixupegua ipy'a guaxukueve ha'e yvatekueve ha'e javi oendu vy ojukaxe. Ha'e rami teĩ Urias ha'e nunga oendu vy okyje vy ojava ovy Egito katy.

²² Ha'e gui Egito katy huvixa Jeaquim omondouka Acbor ra'y Elnatā avakue mboae reve.

²³ Ha'e kuery ma Egito yvy gui Urias oguenoẽ vy huvixa Jeaquim-a py ju ogueru. Ha'e ramo huvixa ojuka uka kyxe py, he'õgue ogueraa uka guive iporiaukue'i pegua yvyra rupa py.

²⁴ Ha'e rā Jeremias ma Safā ra'y Aicāo va'e oepy vy nomboaxa ukai raka'e heta va'e kuery ojukaxe va'e po py.

27

Canga mba'emo kuaa ukaarā omoĩ aguā re ijayvuague

¹ Josias ra'y Judá pygua huvixa Zedequias oĩ ypy'i jave pova'e ayvu SENHOR ombou Jeremias pe.

² “Po rami SENHOR ijayvu xeve: Eĵapo peteĩ canga ixā va'e, ha'e emoĩ ndeaju'y rupi.

³ Ha'e gui emondouka ayvu mombe'uarā Edom ha'e Moabe pygua huvixaa py, Amom ramymino kuery ruvixaa py, Tiro ha'e Sidom tetā pygua huvixaa py guive. Ha'e guigua kuery Jerusalém py Judá pygua huvixa Zedequias pe ayvu reruerae ae ha'eve ndeayvu reraarā.

⁴ Ha'e kuery pe aipo're uka 'rā huvixa kuery pe: “Po rami SENHOR ixondaro reta va'e Israel kuery Ruete ijayvu. Po rami pendeayvu 'rā penderuvixa kuery pe:

⁵ Xee ae kova'e yvy apoare, ha'e gui avakue ha'e mymba yvy re ikuai va'e amoingo va'ekue, xepo'aka etea rupi, ha'e xepo aupi reve. Ha'e rami vy amboaxa 'rā arovy'aa va'e pe rei.

⁶ Aỹ ma yvy ha'e javi amboaxa 'rā xerembiguai Babilônia pygua huvixa Nabucodonosor po py. Ixupe amboaxa avi mymba nhuũndy rupi ikuai va'e, ixupegua ikuai aguā.

⁷ Ixupe ma yvy regua ha'e javi 'rā ikuai, ta'y ha'e hamymino pe guive, ovaẽ peve ijyvy ju amboaxa aguā. Ha'e va'e jave py heta regua ha'e huvixa kuery ipo'aka ete va'e ombo'a 'rā escravo-rā', he'i.

⁸ “Ha'e gui xapy'a rei amongue regua, e'ỹ y amongue tetā pygua nda'ikuaixei 'rā Babilônia pygua huvixa Nabucodonosor pe, ha'e oaju'y rupi nomoĩ ukaxei 'rā ixuguigua canga. Ha'e ramo ha'e va'e regua ambopaga 'rā kyxe py, karuai ha'e mba'eaxy vaikue py, ipo py amomba uka peve', he'i SENHOR.

⁹ 'Ha'e nunga rupi pendea py profeta, imba'ekuaa va'e, oexa ra'u kuaa va'e, oexa'ā va'ety ha'e imba'evyky va'e kuery ou vy ijayvu teĩ peĵapyxaka eme, pendeivy “Ndapeikoi 'rā Babilônia pygua huvixa rembiguai” he'i ramo.

¹⁰ Mba'eta pendeivy ha'e kuery omombe'u 'rā apu rive pendeivy gui mombyry peo aguā. Ha'e ramo xee rogueraa ukapa 'rā pemanomba aguā.

¹¹ Ha'e rā yvy regua oaju'y rupi Babilônia pygua huvixa guigua canga omoĩ uka, ha'e ixupe ikuai va'e ma xee aeja 'rā ijyvy re ae ikuai aguā. Ha'e py ae 'rā oma'etỹ ha'e hekoa 'rā', he'i SENHOR.”

¹² Ha'e ramo ha'e va'e ayvu ha'e javi amombe'u Judá pygua huvixa Zedequias pe. Ha'e vy aipoa'e: “Pendeaju'y rupi ke pemoĩ uka Babilônia pygua huvixa guigua canga, ixupe pendekuai, guembiguai kuery pe guive. Ha'e rami vy peikove 'rā.

¹³ Mba'e re tu remano ta ndevyguia kuery reve, kyxe py, karuai ha'e mba'eaxy vaikue py? Mba'eta ha'e rami aguā SENHOR ijayvu yvy regua Babilônia pygua huvixa pe nda'ikuaixei va'e re.

¹⁴ Peĵapyxaka eme profeta kuery ayvu re, pendeivy 'Ndapeikoi 'rā Babilônia pygua huvixa rembiguai', he'i ramo. Mba'eta pendeivy omombe'u va'e ma apu meme.

¹⁵ Mba'eta SENHOR aipoe'i: 'Ha'e kuery ma xee namboui. Xerery rupi teĩ omombe'u merami rive 'rā ayvu. Mba'eta xee roipe'apa 'rā pemanomba aguā katy, pendeivy ayvu omombe'u merami rive va'e reve', he'i.”

¹⁶ Ha'e ramigua amombe'u sacerdote kuery ha'e heta va'e kuery ha'e javi pe. Ha'e vy aipoa'e: “Po rami SENHOR ijayvu: Pendu pota eme profeta kuery ayvu re, mba'eta pendeivy omombe'u vy aipoe'i 'rā: 'Ne'exa, mba'emo ryrū SENHOR pegua oo pyguare ma are e'ỹ re oguerovejypaa 'rā Babilônia gui', he'i 'rā. Ha'e ramigua ha'e kuery pendeivy omombe'u va'e ma apu.

¹⁷ Peĵapyxaka eme ha'e kuery ayvu re. Pendekuai tema Babilônia pygua huvixa pe. Ha'e rami vy pekuave 'rā. Mba'e re tu kova'e tetā okanhymba ta?

¹⁸ Xapy'a rei ha'e kuery profeta ete ri ikuai rā, ha'e kuery re anhetē ri SENHOR ayvu oĩ ramo tojerure ha'vy SENHOR ixondaro reta va'e pe, Jerusalém py SENHOR pegua oo py ha'e huvixa Judá pygua ropy tembiporu ndogueraapaai va'ekue ogueraa uka e'ỹ aguā Babilônia katy.

¹⁹ Ha'e rami avi po rami SENHOR ixondaro reta va'e ijayvu oo yta hi'ā va'e re, yy mbotya, hy'a yta ha'e tembiporu mboae tetā py opyta va'ekue,

²⁰ Babilônia pygua huvixa Nabucodonosor Babilônia katy ndogueraapai va'ekue Jeaquim ra'y Judá pygua huvixa Jeconias Jerusalém gui ogueraa jave, Judá ha'e Jerusalém pygua yvatekueve ha'e javi reve,
²¹ tá, po rami SENHOR ixondaro reta va'e Israel kuery Ruete ijavyu Jerusalém py SENHOR pega oo py ha'e Judá pygua huvixa ropy mba'emo opyta va'ekue re:
²² "Ha'e nunga ma Babilônia katy ogueraapaa va'erã meme. Ha'e py ma opyta 'rã ha'e kuery re aikuaa pota aguã ára ovaê e'ÿa ja. Ha'e gui mae ma aru rukapa 'rã. Ha'e ramo kova'e tekoo py ae ju 'rã oguerupaa', he'i SENHOR."

28

Profeta ramigua rive Hananias va'e reve Jeremias ayvu py joakaague

¹ Ha'e va'e ma'etÿa py ae, Judá pygua huvixa Zedequias oï ypy jave, irundy ma'etÿ ha'e peteï nhiruï jaxya re, ha'e va'e jave py ma Azur ra'y profeta Hananias Gibeão pygua ijavyu xeve. SENHOR pega oo py, sacerdote kuery ha'e heta va'e kuery ha'e javi oendua py ijavyu xeve. Ha'e vy aipoe'i:

² — Po rami SENHOR ixondaro reta va'e, Israel kuery Ruete ijavyu vy aipoe'i: "Amopê ma Babilônia pygua huvixa guigua canga.

³ Ha'e rami vy mokoï ma'etÿa py apy ju aru rukapa 'rã tembiporu SENHOR pega oo py oï va'ekue ha'e javi, apy gui Babilônia pygua huvixa Nabucodonosor oi-pe'a vy Babilônia katy ogueraa va'ekue.

⁴ Aru avi 'rã Jeaquim ra'y Judá pygua huvixa Jeconias, ha'e Judá regua kuery Babilônia tetã katy escravo-rã ogueraapa pyre. Babilônia pygua huvixa guigua canga amopê ma vy arupa 'rã apy", he'i SENHOR — he'i profeta ramigua rive.

⁵ Ha'e ramo profeta Jeremias ombovai profeta Hananias, sacerdote kuery ha'e SENHOR pega oopy heta va'e kuery oendua py.

⁶ Ha'e vy profeta Jeremias aipoe'i:

— Ha'eve va'e! Tove ha'e rami ae ri SENHOR tojapo. Tove SENHOR tojapopa ndeayvuague remombe'u va'ekue rupi, apy toguerupa ju Babilônia gui tembiporu SENHOR pega oo pyguare, ha'e escravo-rã ogueraapa pyre ha'e javi.

⁷ Ha'e rami avi endu pova'e ayvu ndevy ha'e heta va'e kuery ha'e javi pe amombe'u va'e.

⁸ Profeta kuery yma ma voi xee neï ndee reiko e'ÿ mbove ikuai va'ekue ma omombe'u joe opu'ãa va'erã, mba'emo vai ha'e mba'eaxy vaikue oiko 'rãa heta yvy regua ha'e tetã tuvixa va'e re.

⁹ Ha'e gui peteï profeta mba'eve ndoikoï 'rãa rami omombe'u teï ijavyuague rami ete oiko ramo mae jaikuaa 'rã anhetê SENHOR remimbou oikoa — he'i.

¹⁰ Ha'e ramo profeta Hananias ma canga profeta Jeremias ajuy rupi oï va'e gui omboi vy omopêmba.

¹¹ Ha'e rami vy heta va'e kuery oendua py ijavyu:

— Po rami SENHOR ijavyu: "Gui rami mokoï ma'etÿa py amopê 'rã Babilônia pygua huvixa Nabucodonosor guigua canga yvy regua ha'e javi ajuy rupi oï va'e", he'i. Ha'e rami rã profeta Jeremias ojepe'a ovy tape rupi.

¹² Ha'e gui ma profeta Hananias canga profeta Jeremias ajuy gui omopê rire Jeremias pe SENHOR ombou ju oayvu. Ha'e vy aipoe'i:

¹³ — Tereo, Hananias pe ndeayvu ju. Ha'e vy aipo're: "Canga yvyra guigua remopê teï hekovia ferro guigua ju 'rã ajapo.

¹⁴ Mba'eta po rami SENHOR ixondaro reta va'e Israel kuery Ruete ijavyu: Ha'e va'e regua kuery ha'e javi ajuy rupi amoï 'rã canga ferro guigua, Babilônia pygua huvixa Nabucodonosor rembiguai ikuai aguã. Ha'e ramo oikoï 'rãe ixupe. Ixupe guarã amboaxa avi mymba nhuundy rupi ikuai va'e", he'i.

¹⁵ Ha'e gui profeta Jeremias aipoe'i profeta Hananias pe:

— Hananias, endu ke aÿ. SENHOR nanembou va'eri ndee rejapo heta va'e kuery apu re rive ojerovia aguã rami.

¹⁶ Ha'e nunga rupi po rami SENHOR ijavyu: "Ne'ixa, roipe'a 'rã yvy áry reikoa gui. Kova'e ma'etÿa reve 'rã remano, mba'eta remombe'u SENHOR pe e'ÿ nhandekuai aguã regua", he'i.

¹⁷ Ha'e gui ha'e va'e ma'etÿa reve profeta Hananias omano, sete jaxya py.

29

Babilônia katy ogueraa pyre kuery pe Jeremias kuaxia omboparaague

¹ Pova'e ayvu profeta Jeremias ogueraa uka kuaxia para py. Jerusalém gui ogueraa uka nhomongeta va'ety kuery mboae escravo-rã ogueraa pyre pe, sacerdote ha'e profeta kuery, ha'e heta va'e kuery Jerusalém gui Nabucodonosor Babilônia katy ogueraa va'ekue ha'e javi pe guive.

² Jerusalém gui huvixa Jeconias oo rire, ixu ha'e jopya kuery reve, Judá regua yvatekueve, ha'e Jerusalém pygua oo apoa ha'e ferro re omba'eapo va'e kuery reve ogueraa avi rire ogueraa uka kuaxia.

³ Safã ra'y Elasa ha'e Hilquias ra'y Gemarias pe ae ogueraa uka kuaxia para. Ha'e ramo ha'e kuery Judá pygua huvixa Zedequias omondouka Babilônia katy, Babilônia pygua huvixa Nabucodonosor oexa va'erã. Kuaxia re oï va'e ma po rami:

⁴ "Po rami SENHOR ixondaro reta va'e Israel kuery ruete ijavyu Jerusalém tetã gui Babilônia katy escravo-rã araa uka va'ekue ha'e javi pe.

⁵ Pejapo ke penderorã, penderokoa guive Babilônia py pendekuaia py ae. Penhotÿ yvyra hi'a va'erã, ha'e pe'u hi'a.

⁶ Pejou ke pendera'yxyrã, pendera'y ha'e penderajy aguã. Pejou avi pendera'y kuery ra'yxyrã, penderajy kuery guive pemomenda 'rã imemby ha'e ipi'a aguã. Penderetave peovy ha'e py, pepave peovy eme.

⁷ Penhea'ã ke tetã rogueraa ukaague oĩ porã aguã re, SENHOR pe pejerure guive tetã re, mba'eta ha'e va'e tetã oĩ porã ramo peẽ voi pendekuai porã 'rã.

⁸ Mba'eta po rami SENHOR ixondaro reta va'e Israel kuery Ruete ijayvu: Penhembotavy uka eme profeta ha'e imba'ekuaa va'e kuery penembyte ikuai va'e pe. Pejapyxaka eme oexa ra'u kuaa va'e kuery ayvu re, mba'eta penduxea rami rive oexa ra'u ramo.

⁹ Ha'e kuery ma xerery rupi omombe'u merami rive 'rã. Xee ma namboui", he'i SENHOR.

¹⁰ Po rami ijayvu SENHOR: "Ha'e gui Babilônia tetã ára setenta ma'et'ya ojeupitypa ma ramo aikuaa pota ju 'rã peẽ kuery re. Ha'e rami vy amoingo 'rã rogueroayvu porãague, kova'e tekoo py roguerupa ju aguã.

¹¹ Xee anho'i aikuaa penerenonderã re anhembopy'aa", he'i SENHOR. "Anhembopy'a pendekuai porã aguã re, pendekuai axy aguã nda'ei, opaa py pearõa rami romoingo porã aguã.

¹² Ha'e va'e jave pejapukai 'rã xevy, xevy ju 'rã pejerure. Ha'e ramo xee aendu 'rã pejerurea.

¹³ Peẽ kuery xereka ju 'rã, xejou ete 'rã guive, pendepy'a ha'e javi py xereka vy.

¹⁴ Peẽ kuery xejou 'rãe. Ha'e ramo ambopyau 'rã pendekuaia. Romboatypa ju 'rã ha'e javi regua pendekuaia rogueraa ukaague gui, roguerupa ju 'rã escravo-rã rogueraa ukapaague gui", he'i SENHOR.

¹⁵ "Ha'e rami teĩ peẽ kuery ma aipopeje: 'Babilônia tetã py ae SENHOR omoingo profeta kuery nhandevy', peje."

¹⁶ Ha'e rami avi po rami SENHOR ijayvu tenda huvixa Davi openaaty py oguapy va'e, ha'e Jerusalém tetã pygua kuery ha'e javi re, penderyke'y kuery escravo-rã pendereve ndogueraa va'ekue re.

¹⁷ Po rami SENHOR ixondaro reta va'e ijayvu: "Ne'exa, ha'e kuery rovai ambou 'rã kyxe, karuai ha'e mba'eaxy vaikue. Ha'e kuery re ajapo 'rã figo'a vaikueve ja'u aguã nda'evei va'e re rami.

¹⁸ Mba'eta ha'e kuery rakykue xee amondouka 'rã kyxe revegua, karuai ha'e mba'eaxy vaikue. Ajapo 'rã vvy regua tetã ikuai va'e mongyjarã ikuai aguã rami, amoĩ 'rã nhomondyipaarã ha'e ojojai rei pyrã. Ha'e ramo vvy regua ha'e javi mbyte ikuai 'rã oximba reia rupi mamõ rã amondoukaague py,

¹⁹ xeayvu re ha'e kuery ndojapyxakai rire", he'i SENHOR. "Ha'e va'e ayvu mombe'uarã ma ha'e kuerya py ambou xerembiguaĩ profeta kuery ko'ẽ rai guive. Ha'e rã peẽ kuery napendui", he'i SENHOR.

²⁰ Ha'e nunga rupi pendu na SENHOR ayvu, Jerusalém gui Babilônia katy escravo-rã pendereraa va'ekue ha'e javi.

²¹ SENHOR ixondaro reta va'e, Israel kuery Ruete ma po rami ijayvu hery rupi merami rive ayvu mombe'ua kuery Colaías ra'y Acabe ha'e Maaséias ra'y Zedequias rekorã re: "Ne'exa, ha'e kuery ma xee amboaxa 'rã Babilônia pygua huvixa Nabucodonosor po py. Ha'e ramo ojuka 'rã peẽ kuery pexaa py.

²² Ha'e rami rire Judá gui escravo-rã ogueraa pyre kuery ijayvu vai vy aipoe'i 'rã: 'Tove SENHOR tandeaipo Acabe ha'e Zedequias re ojapoague rami, mba'eta Babilônia pygua huvixa oapy tata py

²³ Israel kuery mbyte ha'eve'ya rami ojapoague re', he'i 'rã. Mba'eta ha'e kuery itavy rei oirũ ra'yxy kuery reve, ha'e xerery rupi merami rive omombe'u ayvu xee amombe'u uka va'ekue'y. Xee aikuaa ha'e aexa ae ha'e nunga", he'i SENHOR.

²⁴ "Ha'e gui ndeayvu ke Neelão pygua Semaías pe. Ha'e vy aipo're:

²⁵ "Po rami SENHOR ixondaro reta va'e, Israel kuery Ruete ijayvu: Ndee ma nderery rupi rive kuaxia para remondouka Jerusalém pygua kuery pe, Maaseías ra'y sacerdote Sofonias ha'e sacerdote kuery ha'e javi pe guive. Ha'e vy aipo're va'ekue:

²⁶ "Sacerdote-rã SENHOR nemoĩ raka'e sacerdote Joiada rekovia, SENHOR pega o re repena aguã. Ha'e ramo ava inhakã porã e'y va'e profeta onhemoingo va'e rei rembo'a aguã, ha'e vvyra re rejokua uka aguã.

²⁷ Ha'e gui aỹ, mba'e re tu nandeaayvu etei profeta Jeremias Anatote pygua ayvu omombe'u va'ety pe?

²⁸ Mba'eta ha'e va'e ma Babilônia katy omondouka po rami ayvu mombe'uarã kuery: 'Are teri 'rã escravo pendekuaia. Ha'e nunga rupi pejapo penderorã, penderekoa ha'e py ae. Penhoty vvyra hi'a va'erã, ha'e pe'u hi'a', he'i va'ekue kuaxia para re.' "

²⁹ Kuaxia para ha'e va'e ayvu oĩa ma sacerdote Sofonias ogueroayvu profeta Jeremias oendua py.

³⁰ Ha'e ramo Jeremias pe SENHOR ombou oayvu. Ha'e vy aipoe'i:

³¹ "Aipo'ere uka ke escravo-rã ogueraa pyre ha'e javi pe: 'Po rami SENHOR ijayvu Neelão pygua Semaías re: "Semaías ma xee namboui va'eri pendevy ayvu omombe'u apu re rive perovia aguã."

³² Ha'e ramo po rami SENHOR ijayvu: "Ne'exa, ambopaga 'rã Neelão pygua Semaías, hamymino kuery reve. Ha'e ramo hamymino ndoikoĩ 'rã kova'e kuery mbyte hekoa va'e, ndoexai 'rã guive mba'emo porã xevygua kuery pe ajapo rã, xerovai ijayvu rire", he'i SENHOR.' "

30

Nhanderuete ojeupegua kuery ogueru ju aguã re ijayvuague

¹ Jeremias pe SENHOR oayvu ombou vy aipoe'i:

² "Po rami SENHOR Israel kuery Ruete ijayvu: Embopara ke peteĩ kuaxia re ayvu xee aipoa'ea ha'e javi.

³ Mba'eta ou ma oiny ára xevygua Israel ha'e Judá kuery ikuai ambopyau aguã. Ha'e vy ajapo 'rã tamoiĩ kuery vvyrã ame'ẽ va'ekue py ju ojevypa aguã rami, ha'e py ae hekoa aguã", he'i SENHOR.

⁴ Ha'e gui Israel ha'e Judá kuery reko re ju SENHOR ijayvu.

⁵ Ha'e vy aipoe'i: "Roendu oryryipaa ha'e okyjea nhendu, ikuai porãa e'y."

⁶ Ha'e gui peporandu, pexa pota na pova'e re: Avakue nda'u oendu 'rã ri kyrí va'e raxy? Ha'e ramigua ndoikoi ramo mba'e re tu ha'vy aexa petei-tei Ava guye rupi opo omoí rã, kyrí va'e oikuavã'i ta va'e rami? Mba'e re tu hova xiigüepa rei okuapy?

⁷ Mba'eta ha'e va'e ára nda'evéi ete 'rã, amboae ndoikoi 'rã guive ha'e ramigua! Jacó ramymino kuery ojexavai aguã ára ae 'rã. Ha'e rami tei ha'e kuery oo jepe 'rã.

⁸ Ha'e va'e ára ma xee amopëmba 'rã pendeaju'y rupi canga oí va'e, amondopa 'rã guive ixã pendejokuaa", he'i SENHOR ixondaro reta va'e. "Ha'e rami rire yvy mboae regua ndogueraavei 'rã xevygua kuery escravo-rã.

⁹ Mba'eta SENHOR nguete pe ae 'rã xevygua kuery ikuai, Davi ha'e kuery ruvixarã amoi va'erã pe guive.

¹⁰ "Ha'e nunga rupi xerembiguai Jacó regua, ekyje eme. Israel regua, enhemondyi eme", he'i SENHOR. "Mba'eta rogueraa jepe 'rã yvy mombyrya escravo-rã ndereraa ague gui, neramymino kuery guive. Ha'e ramo Jacó kuery ojeyvpa ju vy ikuai rive'i 'rã avave rei nomoangekoai rã. Ndoikoi 'rã imongyjarã.

¹¹ Mba'eta xee aiko 'rã ndereve rogueraa jepe aguã", he'i SENHOR. "Ha'e rami aguã rami ae amomba 'rã yvy regua ha'e kuery mbyte rupi romoaigüe va'e. Ha'e rã pende ma noromomba rivei 'rã. Ha'e rami avi rombopaga 'rã ha'evea rami, opa marã pendekuaiague re norombopaga e'yi 'rã."

¹² Mba'eta SENHOR aipoe'i: "Reiko axya ma omonguera pyrã e'ÿ, ndeai ma haxy ete va'e.

¹³ Avave ndoikoi nderepyrã. Ndeai pe ma jipoi moã, neí imbojaarã.

¹⁴ Neirũ kuery hexaraipa ma ndegui, noroporanduvei ma ndere. Ndereko vai ha'e rejeyavy ete rire rojapo vai nderovaigua rami, ipy'a ratã va'e nhombopaga rami.

¹⁵ Mba'e re tu neraxẽ ri reikovy ndeai gui? Haxy rendu va'e ma omonguera pyrã e'ÿ. Ndereko vai ha'e rejeyavy ete ramo ae roguereko ha'e rami.

¹⁶ Ha'e rã nemombaare kuery voi omombaa 'rã, nderovaigua kuery petei-tei oguerapaa 'rã escravo-rã. Nemba'e rei-rei pe'aare rupi mba'e rei-rei ju oi-pe'apaa 'rã, ndegui ha'e kuery oi-pe'apa rive rire amboaxa 'rã oi-pe'apa rive va'erã po py.

¹⁷ Ha'e gui xee ae romoexai ju 'rã", he'i SENHOR. "Xee ae romonguera ju 'rã ndeai, ndevy pe 'Oeja pyre' ha'e 'Sião tetã re noporanduavei ma 'rã", he'i okuapy rire tei."

¹⁸ SENHOR aipoe'i: "Ne'exa, amoi porã ju 'rã Jacó kuery rekoa, amboaxy 'rã ikuai rupi. Guetã ma ojapo ju 'rã mba'emo ra'ykue aty áry, ha'e huvixa oí ju 'rã ngoo py, jypy guare rami ae.

¹⁹ Ha'e kuery oporaei 'rã joguerovy oguerovy'a vy, ovy'a ete vy oguerory 'rã okuapy. Amboetave 'rã, ha'e nomombaavei 'rã. Amboyvateve 'rã, ha'e nomo'yvyi'iavei 'rã.

²⁰ Ta'y kuery ha'e taju kuery ikuai porã 'rã jypy guare rami, ha'e kuery rekoa voi amoi atã 'rã xerenonde. Ha'e rã imoingo axyare kuery ma ambopagapa 'rã.

²¹ Huvixarã ma ha'e kuery regua ae 'rã oí, ha'e kuery mbyte gui oiko 'rã opena va'erã. Ha'e va'e amonhemboja ramo onhemboja 'rã xere. Mba'eta mava'e 'rã tu oakã gui ae ipy'a guaxu xere onhemboja aguã?" he'i SENHOR.

²² "Ha'e ramo peẽ kuery ma xevelygua 'rã pendekuai, ha'e rã xee ma aiko 'rã Penderuete", he'i.

²³ Ne'exa, ou oiny SENHOR-a guigua vyvutu atã! Ipoxya ojekuaa ma ouvy, vyvutu jere rami heko vai va'e kuery akã áry ou aguã.

²⁴ SENHOR poxya raku ma ha'ekue py ndojevyi 'rã guive, opy'a re oipotaa oí va'e ojeupitypa e'ÿa ja. Ha'e nunga ma opaa ára py peikuaa porã 'rã.

31

Iporiaague gui ombovy'a ju aguã re ijayvuague

¹ SENHOR aipoe'i: "Ha'e va'e jave py aiko 'rã Israel regua ha'e javi Ruete, ha'e rã ha'e kuery ma ikuai 'rã xevygua."

² Po rami SENHOR ijayvu: "Xevelygua kuery kyxe gui oo jepe va'ekue amboaxy ju 'rã tekoa e'ÿa rupi ikuai py. Xee anhemboja vy amokane'õgua 'rã Israel kuery."

³ Mombyry gui SENHOR xevy ojexa uka vy aipoe'i: "Mborayvu opa e'ÿ va'e rupi roayvu. Ha'e rami vy roayvua rupi rogueru.

⁴ Peẽ kunhataigüe Israel regua, romopu'ã ramo pepu'ã ju 'rã pe'amy! Teĩgue ju pandeiro reve peo 'rã ojeroky va'e kuery reve peporaia rupi.

⁵ Samaría vyvuty re phenotỹ nho 'rã uva. Inhotỹare kuery hi'a ho'u vy oguerovy'a 'rã okuapy.

⁶ Mba'eta oiko 'rã ára Efraim regua vyvuty rupi tetã re opena va'e kuery 'Pepu'ã ke, jaje'oi Sião tetã py SENHOR Nhanderuete oĩa katy', he'i okuapy aguã."

⁷ Mba'eta po rami SENHOR ijayvu: "Peroporaei ke Jacó kuery pevy'a reve, yvy regua kuery akã ikuai ramo perovy'a. Pejapukai, peporaiei. Ha'e vy aipopeje: 'SEÑHOR, eraa jepe avi ke ndevygua Israel kuery rembyrekue', peje.

⁸ Mba'eta ne'exa, aru 'rã yvy kuaray ijapu'a'ia katy itui va'e gui, amboatyapa 'rã yvy jave rupi gui. Ha'e ramo ha'e kuery oupa 'rã: ára revegua e'ÿ, oguata vaikue'i va'e, imemby ryrũ va'e ha'e oikuavã va'erã tei. Ojevy pavẽ 'rã kyvõ katy.

⁹ Ojae'o reve 'rã ou, xevy pe ojapukai 'rã joguerovy arua rupi. Areko 'rã heruvy yakã'i oxury porã va'e vyvýry rupi, ha'e tape hi'yvi porã va'e onhepyxanga e'ÿ aguã rupi, mba'eta Israel kuery ru aiko, Efraim kuery ma xera'y jypygua", he'i.

¹⁰ Peẽ vvy regua kuery, pendu ke SENHOR ayvu. Pemombe'u ke ye'ẽ vvy'ry mombyry etea rupi. Ha'e vy aipopeje: "Israel kuery moaĩmbaare ae ju omboatypa ta, ha'e kuery re opena 'rã vexa'i re opena va'e rami.

¹¹ Mba'eta SENHOR oepy Jacó kuery, ogueraa jepe ha'e kuery gui imbaraetekueve po gui.

¹² Ha'e ramo ou vy oporaei 'rã okuapy Sião vvyty áry, ha'e kuery pe SENHOR mba'emo ome'ẽ rã oguerovy'a ete 'rã guive, mba'emo aju, vinho, azeite, vexa'i ha'e vaka ra'y. Ha'e kuery nhe'ẽ oiko porã 'rã vvyoty omoakĩmby rami, nda'ipiruvei ma 'rã guive.

¹³ Ha'e va'e jave py kunhataĩgue ovy'a 'rã okuapy ojerokya py, kunumigue ha'e tujakue'i voi. Hexayague xee amombo'opa ramo ovy'a ju 'rã. Ndovy'aiague gui ambovy'a ju 'rã.

¹⁴ Sacerdote kuery guive amongaru 'rã ikyra va'e re, xeivygua kuery hevvyatãmba 'rã mba'emo porã ame'ẽ va'e re", he'i SENHOR.

¹⁵ Po rami SENHOR ijayvu: "Ramá tekoa py onhendu va'ekue hevovo rei va'e, hexay ha'e ipy'a vai ete va'e. Ha'e va'e ma Raquel omemby kuery re ojae'oa. Imemby kuery jipovei ma ramo nonhembovy'a ukai."*

¹⁶ Ha'e rami teĩ po rami SENHOR ijayvu: "Ejae'ove eme, nderexayve eme guive. Mba'eta nememby kuery ojevypa ju 'rã ngovaigua kuery vvy gui.

¹⁷ Raka'eve rã oiko nho 'rã rearõ reikovy va'e, mba'eta nememby kuery ojevypa ju 'rã ovyv re ae", he'i SENHOR.

¹⁸ "Xee aendu Efraim kuery ijayvu vy aipoe'i rã: 'Vaka ra'y imãxo porã e'ỹ va'e rami aiko va'ekue teĩ ndee xemo'arandu. Aỹ gui ma xereko rovera ke teko pyau re ju aiko aguã, mba'eta ndee ma SENHOR Xeruete.

¹⁹ Anhetẽ, ajeko rovera rire anhemboaxy va'ekue, xekunumi jave aikoague re xema'endu'a vy. Xerekombo'e rire xepexo re aipete-pete. Axĩmba ha'e ndaikuaavei rei va'ekue', he'i.

²⁰ Ha'e rami avi Efraim e'ỹ teve xera'y arovy'a ha'e ayvu ete va'e? Mba'eta ixupe xeayvu nhavõ xema'endu'a ju hexe ayvu etea rupi. Hexe vy xepy'a tyty atã amboaxy ete vy", he'i SENHOR.

²¹ "Pemopu'ã ke pemo'amy vvy markaarã, peguataa rupi peja tape kuaa ukaarã, pexa pota ke peovy tape rupi peikoa re. Ha'e gui ma kunhataĩ Israel regua, ejevvy ke, ejevvy ke neretã rejaague katy.

²² Xerajy xenhe'ẽ rendu e'ỹ va'e, raka'e peve 'rã tu ha'eve'ỹa rami rei reiko? Mba'eta vvy re SENHOR omoingo mba'emo pyau: kunha oikuavã 'rã ava."

²³ Po rami ijayvu SENHOR ixondaro reta va'e, Israel kuery Ruete: "Judá kuery ikuaiã amboypau ramo ovyv ha'e guetã ikuai va'e rupi ha'e kuery aipoe'i ju 'rã: 'Ndee vvyty iky'a e'ỹ va'e teko porã oĩa, tove SENHOR tandereroayvu porã', he'i rã okuapy.

²⁴ Mba'eta ha'e va'e vvyty re ju 'rã Judá kuery ikuai, tetã ikuai va'e ha'e javi re guive, mba'ety rupi omba'eapo va'e ha'e vexa'i re opena va'e kuery voi.

²⁵ Mba'eta amombaraete inhe'ẽ kangy va'e, amongaru guive ho'a rai'i va'e", he'i.

²⁶ Ha'e gui amyĩ vy ama'ẽ ju. Akea ma xembovy'a ete va'ekue.

²⁷ Ha'e gui SENHOR aipoe'i: "Ne'exa, ou ma oiny ára Israel ha'e Judá kuery amboetave ju aguã, avakue ha'e mymba kuery guive.

²⁸ Mba'eta ymave rupi ha'e kuery re aikuaa pota va'ekue aipe'a aguã, aity, ambojexavai, ambovaipa ha'e amoingo axy aguã, teĩ aỹ gui ma ha'e kuery re aikuaa pota 'rã amopu'ã ha'e anhotỹ ju aguã", he'i SENHOR.

²⁹ "Ha'e va'e ára ma aipo nda'eavei ma 'rã: 'Tuu kuery uva aky'i ho'u rire ta'y kuery raĩ voi nda'evei', nda'eavei 'rã.

³⁰ Ha'e rami 'rãgue py ma peteĩ-teĩ omano 'rã gueko vaiague re ae. Uva aky'i 'uare kuery raĩ ae ma nda'evei 'rã."

Israel kuery pe Nhanderuete guexeve guarã ojapo pyau aguã re ijayvuague

³¹ SENHOR aipoe'i: "Ne'exa, ou ma oiny ára Israel ha'e Judá kuery reve xereve guarã ajapo pyau aguã, ³² tamoi kuery reve ajapo va'ekue ramigua e'ỹ. Ha'e jave ma ha'e kuery po re ajopy reve anoẽmba va'ekue Egito vvy gui. Ha'e rami teĩ ha'e kuery ombovaipa xereve guarã ajapo va'ekue, ime rami aiko teĩ.

³³ Ha'e gui ha'e va'e ára oaxapa ma rire po rami 'rã Israel kuery reve ajapo pyau xereve guarã. Ha'e kuery py'a re 'rã ambopara xeguigua lei, ikuraxõ re ae 'rã ambopara. Xee aiko 'rã Tuuete, ha'e rã ha'e kuery ma ikuai 'rã xeivygua.

³⁴ Ha'e rami rire peteĩ-teĩ nombõ'evei ma 'rã oirũ neĩ guvyv kuery, 'Peikuaa na SENHOR' he'ia py, mba'eta xekuaa pavẽ 'rã, vvyĩgueve ha'e yvatekueve voi. Mba'eta ambogueva 'rã heko vaiague, ojevavyague re naxema'endu'avei 'rã guive", he'i SENHOR.*

³⁵ Po rami ijayvu SENHOR ara py kuaray ojope aguã rami ojapo va'ekue, ha'e gui jaxy ha'e jaxy-tata pyávy hendy aguã oja va'ekue, ye'ẽ omyĩ aguã ha'e yai opu'ã-pu'ã va'e hevovo-vovo aguã rami. Hery ma SENHOR ixondaro reta va'e. Ha'e vvy aipoe'i:

³⁶ "Ha'e rami aguã aeja va'ekue xerenonde oaxa rive e'ỹa ja Israel kuery voi nokanhymbai 'rã xerenonde gui, peteĩ regua riae 'rã ikuai", he'i SENHOR.

³⁷ SENHOR aipoe'ive ju: "Yvate yva ha'e javi rupi pea'ã kuaapa e'ỹa ja, ha'e kyvõ vvy gu'ry pexa pota kuaapa e'ỹa ja xee ndaejapa rivei 'rã Israel kuery, ha'e rami ete ha'e kuery ikuai rire teĩ", he'i SENHOR.

* 31:15 Raquel ma Jacó ra'y José xy, ha'e Israel kuery jaryi jypy raka'e (Gênesis 30.22-24). Ha'e gui Ramá tekoa ma Babilônia katy escravo-rã ogueraa pyrã kuery ojokupaague (Jeremias 40.1). Aỹ ma Mateus 2.17-18 py kova'e ayvu rupi ijayvu ju, mba'eta Jesus ou jajae'oa gui nhanemombo'o aguã. * 31:34 Hebrews 8.8-12, 10.16-17

³⁸ SENHOR aipoe'ive ju: “Ne'exa, ou ma oiny ára kova'e tetã SENHOR peguarã ojapoa ju aguã, Hananel torre hi'áia guive tetã kora ojerea py okê oia peve.

³⁹ Ha'e gui henondeve katy ju 'rã ixã oa'áaty omoatãa heravy Garebe yvy'ã peve, ha'e gui Goa katy ju 'rã ojere ovy.

⁴⁰ Ha'e gui vvyugua te'ôgue ha'e tanhimbu ikuaiaty, ha'e nhuũndy Cedrom yakã'i peve itui va'e, okê kavaju oiketary kuaray oua katy oĩ va'e peve, ha'e va'e voi omboaxapaa 'rã SENHOR peguarã. Ha'e va'e rire Jerusalém tetã ndoityavei 'rã, nombovaipaavei 'rã guive.”

32

Peteĩ vvy Anatote py itui va'e Jeremias ojoguaague

¹ Jeremias pe SENHOR oayvu ombou ju dez ma'etỹa re ma Judá pygua huvixa Zedequias oĩ jave py, ha'e dezoito ma'etỹ re ma huvixa Nabucodonosor oĩ jave py guive.

² Ha'e va'e jave py Babilônia pygua huvixa xondaro kuery ojokopa Jerusalém tetã, ha'e profeta Jeremias omboty imoiny Judá pygua huvixa roka py harõa xondaro kuery ikuaiaty py.

³ Mba'eta Judá pygua huvixa Zedequias omboty uka vy aipoe'i va'ekue:

— Mba'e re tu ndee remombe'u SENHOR aipoe'ia rami: “Kova'e tetã omboaxa 'rã Babilônia pygua huvixa po py, ha'e rã oipe'apa 'rã”, 're?

⁴ “Ha'e gui Judá pygua huvixa Zedequias ndoo jepoi 'rã caldeu kuery po gui. Ha'e rami 'rãgue py omboaxaa 'rã Babilônia pygua huvixa po py. Ha'e ramo jomeme ijayvu 'rã jova re oma'ẽ reve.

⁵ Ha'e rire ha'e va'e ma Babilônia katy ogueraa 'rã Zedequias, ha'e py opyta aguã SENHOR hexe oikuaa pota ju peve, aipoe'iaque rami vy. Ha'e gui caldeu kuery re pepu'ã teĩ napendepo'akai 'rã”, 're va'ekue — he'i.

⁶ Ha'e ramo Jeremias ombovai:

— SENHOR oayvu xevy pe ombou vy aipoe'i:

⁷ “Ne'exa, nderuvy'i Salum ra'y Hananel ndea py ou vy aipoe'i 'rã: ‘Ejogua na xevvy Anatote py itui va'e, mba'eta ndee anho ha'eve rejogua aguã’, he'i 'rã.”

⁸ Ha'e gui SENHOR ayvu aipoe'iaque rami xea py ou xeruvy'i ra'y Hananel oka harõa xondaro kuery ikuaiaty py. Ha'e vy aipoe'i xevy: “Ejogua na xevvy Anatote py Benjamim regua vvy re itui va'e, mba'eta ndee anho ha'eve rejogua vvy rejopy aguã. Ejogua na ha'vy”, he'i. Ha'e rami aendu vy aikuaa SENHOR ijayvuague rami oikoa.

⁹ Ha'e rami vy xeruvy'i ra'y Hananel gui ajogua vvy Anatote py itui va'e. Hepyã dezessete hatã'i va'e prata guigua aa'ã karamboae.

¹⁰ Kuaxia re xerery amboara rire amboja selo py, ikuaa ukaarã aenoĩ guive. Ha'e vy hepyã aa'ã mba'emo opejaa py.

¹¹ Ha'e rami vy araa ipara va'e ajoguaague regua. Lei re oĩa rami vy amboja va'ekue araa, ha'e oguerova pyre amboja e'ỹ va'ekue guive.

¹² Kuaxia mokoive amboaxa Nerias ra'y Maaséias ramymino Baruque po py. Hananel xeruvy'i ra'y oexaa py amboaxa, ajoguaague regua kuaa ukaarã kuery guery ombopara va'ekue oexaa py, ha'e gui judeu kuery oka py xondaro harõa kuery ikuaiaty py oguapy okuapy va'e ha'e javi oexaa py guive.

¹³ — Ha'e kuery oendua py Baruque pe xevvy vy aipoa'e va'ekue:

¹⁴ “Po rami SENHOR ixondaro reta va'e Israel kuery Ruete ijayvu: ‘Ejopy ke kuaxia para vvy rejoguaague regua. Omboja pyre ha'e omboja pyre'ỹ reraa vy emoĩ porã hyru nhae'ũ guigua py, heta ára re oĩ porã aguã.

¹⁵ Mba'eta po rami SENHOR ixondaro reta va'e Israel kuery Ruete ijayvu: Kova'e vvy re ma pejogua nho 'rã oo, mba'ety ha'e uvaty', he'i”, ha'e va'ekue.

Nhanderue omombe'u porãve aguã re Jeremias ojerueague

¹⁶ Ha'e gui kuaxia para vvy ajoguaague regua ma Nerias ra'y Baruque pe amboaxa ma rire SENHOR pe anhembo'e ainy. Ha'e vy aipoa'e:

¹⁷ — Ai SENHOR Xeruetel! Yva ha'e vvy rejapo va'ekue ndepo'aka etea rupi ha'e ndepo reupi reve. Mba'eve rei nda'ipoi ndevy haxy va'e nemondyiarã.

¹⁸ Ndee ma mbovy e'ỹ pe rexa uka 'rã remboaxya, ha'e oreramoĩ kuery ojevavyague re rembopagaague regua ta'y kuery re remoĩ va'e guive. Ndee ma Orerue yvate ha'e ipo'aka ete va'e. Nderery ma SENHOR ixondaro reta va'e.

¹⁹ Renhomongeta porã ha'e nerembiapo porã ete va'e. Mba'eta nnderexa ojepe'a oiny avakue ra'y kuery ikuaia rexapa aguã, peteĩ-teĩ pe ikuaiaque rekovia reme'ẽ aguã, mba'emo ojapoague rami ae.

²⁰ Ndee ma hexa pyã ha'e nhomondyipaã rejapo va'ekue Egitto vvy re, kova'e ára peve Israel kuery mbyte rupi guive, amboae regua ikuaia rupi teĩ. Ha'e rami rejapo nderery oikuaa pavẽ aguã rami, aỹ peve rejapoa rami.

²¹ Ndevygua Israel kuery Egitto vvy gui renoẽmba va'ekue hexa pyã ha'e nhomondyipaã rexa uka vy, ndepo reupi vy ndepo'akaa rexa uka reve nhomondyipa etea rupi.

²² Ha'e kuery pe kova'e vvy reme'ẽ va'ekue, tamoĩ kuery pe reura reve ndeayvuague ae, kamby ha'e ei oata e'ỹa.

²³ Ha'e ramo ha'e py ha'e kuery ovaẽ vy hekoa okuapy teĩ nanenhe'ẽ rendui raka'e, ndeguigua lei rupi nda'ikuaixei vy. Rejapo uka va'ekue ma peteive voi ha'e kuery ndojapoi. Ha'e nunga rupi ha'e kuery áry rembou guĩ nunga mba'emo vai.

6 Ne'exa, ha'e py ae ambou avi 'rã hexaĩ porãmba ju aguã amonguerapa vy. Mba'eta ha'e kuery pe ambou 'rã opa mba'e py ikuai porã aguã, mba'eve gui okyje ve'ỹ re.

7 Ambopyau 'rã Judá ha'e Israel kuery ikuai. Amoatyřõ ju 'rã jypy guare rami.

8 Aiky a'opa 'rã heko vaia rupi xerovai ojevavyague ha'e javi gui. Amboguepa 'rã heko vaiague, ojevavyague ha'e xerovai ikuaiague guive.

9 Ha'e ramo Jerusalém tetã oĩ 'rã xerery omboetepaa ha'e xererovy'aa aguã, vvy regua kuery ha'e javi oendua py, mba'eta ha'e kuery oendu 'rã omombe'ua rã tetã re iporã va'e ajapoa. Ha'e rami vy onhemondyipa ha'e oryryipa 'rã okuapy peẽ kuery romoingo porã vy iporã va'e ambou rã oendu vy."

10 Po rami SENHOR ijayvu: "Kova'e tekoa pe peẽ kuery 'Tekoa ve'ỹ oĩ, avakue ha'e mymba kuery ikuai e'ỹa', peje, mba'eta Judá regua tetã ha'e Jerusalém py tape ikuai va'e rupi aỹ ombovaipaa, avakue ha'e mymba jipoi guive. Ha'e rami teĩ ha'e py oendua nho 'rã

11 ovy'a ha'e opuka nhendu va'e, omenda va'erã ijayvu ha'e oporaei nhendu vy aipoe'i va'e: 'Perovy'a ke SENHOR ixondaro reta va'e, mba'eta joayvua ha'e nhomboaxya opa va'erã e'ỹ', he'i va'e. Ha'e gui oguerovy'a reve mba'emo ome'ẽ 'rã SENHOR ro py. Mba'eta pendeyvy ambopyau 'rã jypy guare rami", he'i SENHOR.

12 SENHOR ixondaro reta va'e aipoe'ive ju: "Kova'e tekoa aỹ tekoa e'ỹa, avakue ha'e mymba kuery jipoi teĩ tetã vy'ry ha'e javi rupi vexa'i re opena va'e kuery hekoa ju 'rã guymba kuery omombytu'ua rupi.

13 Mba'eta vvy'ã ha'e vvyugua reia rupi tetã ikuai va'e vy'ry rupi mymba kuery omboaxaa ju 'rã ipapaa kuery po guy rupi, kuaray puku-a katy Benjamim vvy re, Jerusalém vy'ry ha'e Judá re tetã ikuai va'e ha'e javi rupi guive", he'i SENHOR.

Jeremias 23.5,6

14 SENHOR aipoe'i: "Ne'exa, ou ma oiny ára Israel ha'e Judá kuery aroyvu porãague ojeupity aguã", he'i SENHOR.

15 "Ha'e va'e ára, ha'e va'e jave py ma peteĩ amoingo 'rã Davi rapytakue renhoĩ, hamymino heko porã va'erã. Ha'e va'e ma ha'evea rami meme 'rã joguereko, ha'e teko porã rupi opena 'rã vvy re.

16 Ha'e va'e ára ma Judá regua kuery oo jepe 'rã, ha'e Jerusalém tetã py hekoa 'rã mba'eve gui okyjea rupi e'ỹ. Ha'e ramo ixupe 'SENHOR nhandereko porãrã me'ẽa' 'ea 'rã."

17 Mba'eta SENHOR aipoe'i: "Davi rekovia ndoatai 'rã ava Israel kuery ruvixa tenda openaaty áry oguapy va'erã.

18 Neĩ sacerdote kuery levita regua voi ndoatai 'rã xerenonde ikuai va'erã, ko'ẽ nhavõ xevy mba'emo aju ha'e mymba oapy reve ome'ẽ aguã", he'i.

19 Ha'e gui Jeremias pe SENHOR oayvu ombou vy aipoe'i:

20 "Po rami SENHOR ijayvu: Ára ha'e pytũ oiko riae aguã re xeayvuague peẽ napembovaipa kuaaia rami avi 21 xee voi nambovaipai 'rã xerembiguai Davi reve xerupive guarã ajapo va'ekue, tenda openaaty áry hamymino oĩ aguã, ha'e gui levita regua sacerdote kuery xevy ikuai riae aguã.

22 Ha'e rami ae avi mba'emo yva re ikuai va'e ndapeipapa kuaai, ha'e ita ku'i reia ye'ẽ rembe rupi oĩ va'e napea'ã kuaaia rami avi ndapeipapa kuaai 'rã xerembiguai Davi ramymino kuery, neĩ levita regua xerenonde omba'eapo va'e kuery guive."

23 Ha'e gui Jeremias pe SENHOR ijayvuve vy aipoe'i:

24 "Endu rive heta va'e kuery ndevy 'Mokoĩ regua SENHOR oiporavo va'ekue ri aỹ ma ndoayvuvei ri?" he'i ramo. Mba'eta ha'e kuery xevygua kuery ovare e'ỹa rami rive ijayvu. Ha'e kuery pe rã xevygua kuery peteĩ regua ve'ỹ ma merami ikuai."

25 Mba'eta SENHOR aipoe'i: "Ára ha'e pytũ oiko aguã re xeayvuague namboaxa riveia rami, ha'e yva ha'e vvy re ikuai va'e xee ndaeja riveia rami

26 xee ndaejai avi 'rã Jacó ramymino kuery neĩ xerembiguai Davi ramymino kuery. Mba'eta hamymino regua amoĩ 'rãe Abraão, Isaque ha'e Jacó ramymino kuery re opena va'erã. Mba'eta ambopyau ju 'rã ha'e kuery ikuai, amboaxya aexa uka vy."

34

Zedequias rekorã re ijayvuague

1 Pova'e ayvu ma Babilônia pygua huvixa Nabucodonosor oĩ teri reve SENHOR ombou Jeremias pe. Mba'eta ha'e va'e jave ha'e va'e ogueru ojepegua xondaro kuery ha'e openaa ha'e javi pygua kuery, Jerusalém tetã re opu'ãmba okuapy aguã, ijy'ry tetã ikuai va'e re guive. Ha'e rami rã SENHOR aipoe'i:

2 "Po rami SENHOR Israel kuery Ruete ijayvu: Tereo ndeayvu Judá pygua huvixa Zedequias pe. Ha'e vvy ixupe aipo're 'rã: 'Po rami SENHOR ijayvu: Ne'exa, kova'e tetã xee amboaxa 'rã Babilônia pygua huvixa po py. Ha'e ramo oapypa 'rã tata py.

3 Ndee voi ndereo jepei 'rã ipo gui. Ha'e rami 'rãgue py nembo'aa vy nemboaxaa 'rã ipo py. Ha'e ramo Babilônia pygua huvixa reve pejugeroayvu 'rã joa'i gui jova re pema'ẽ reve. Ha'e ramo ndereraa 'rã Babilônia tetã py.

4 Ha'e rami teĩ ndee Judá pygua huvixa Zedequias, endu ke SENHOR ayvu. Po rami SENHOR ijayvu nderekorã re: Kyxe py e'ỹ 'rã remano.

5 Ha'e rami 'rãgue py remano porã'i 'rã, ha'e ndere ima'endu'aa rupi hekuã porã va'e oapya 'rã guive, reiko e'ỹ mbove neramoĩ kuery huvixa ikuai va'ekue re ima'endu'aague rami ae. Ojae'o vy "Ai SENHOR!" he'i 'rã okuapy, xee ae ha'e rami aguã re xeayvu rire', he'i SENHOR."

⁶ Pova'e ayvu ha'e javi rupi profeta Jeremias omombe'u Judá pygua huvixa Zedequias pe, Jerusalém py oia py.

⁷ Ha'e va'e jave Babilônia pygua huvixa kuery opu'ã okuapy Jerusalém re, ha'e Judá regua tetã oive teri va'e Laquis ha'e Azeca re guive. Mba'eta ha'e va'e anho'i opyta Judá regua tetã ikorapa va'e ikuai va'ekue gui.

Escravo rerekoa kuery rovai Nhanduete ijayvuague

⁸ Ha'e gui pova'e ayvu ma Jeremias pe SENHOR ombou va'ekue. Ha'e va'e jave py Jerusalém pygua kuery reve huvixa Zedequias ijayvu okuapy escravo oguereko va'e opoipa ju agua re.

⁹ Ha'e ramo petei-tei opoi imondovy escravo hebreu regua avakue ha'e kunhague, guetarã kuery regua ae avave rei oguerekoa ve'ỹ agua escravo.

¹⁰ Ha'e ramo yvatekueve ha'e heta va'e kuery ha'e javi reve ha'e rami agua re ijayvu va'ekue onhe'ẽ rendu, ha'e vy petei-tei escravo avakue e'ỹ vy kunhague opoipa. Onhe'ẽ rendu vy omondoukapa.

¹¹ Ha'e rami tei ha'e va'e rire ma nda'evei nho ju ikuai. Ha'e rami vy ojapo escravo avakue ha'e kunhague omondouka va'ekue ojevypa ju agua rami. Ha'e vy escravo-rã ju omoingopa.

¹² Ha'e gui ma Jeremias pe SENHOR oayvu ombou vy aipoe'i:

¹³ "Po rami SENHOR Israel kuery Ruete ijayvu: Egito yvy peneramoĩ kuery escravo ikuaiague gui anoẽmba vy ha'e kuery reve ajapo va'ekue xereve guarã. Ha'e vy aipoa'e va'ekue:

¹⁴ 'Sete ma'et'ya opa nhavõ petei-tei pepoi 'rã peneretarã hebreu regua pendevy ovende pyre. Mboapy meme ma'et'ya re ndevy ha'e kuery omba'eapo rire pepoi 'rã imondovy escravo ve'ỹ ikuai agua, ha'e va'ekue.* Ha'e rami tei peneramoĩ kuery naxenhe'ẽ rendui, xeayvu re ndojapyxaka potai guive okuapy.

¹⁵ Ha'e gui peẽ kuery ma aỹ rai'i pejogueroayvu xerenonde ha'evea rami pejapo agua re. Ha'e vy petei-tei pendeayvu peneretarã pepoi agua re. Xerery oiaty oo py ae pejogueroayvu ha'e rami agua.

¹⁶ Ha'e rami tei ha'ekue rami e'ỹ pendekuai, xerery pemongy'apaa rupi. Mba'eta petei-tei pende-escravo avakue ha'e kunhague pejapo ojevju agua rami, escravo ve'ỹ ikuai agua rami pemondouka va'ekue ri. Ha'e rami vy avakue ha'e kunhague pemoingo ju escravo-rã."

¹⁷ Ha'e nunga rupi po rami SENHOR ijayvu: "Peẽ kuery ma naxenhe'ẽ rendui, mba'eta ndapepoi etei penderivy ha'e peneretarã kuery escravo rami pereko va'e. Ha'e ramo ne'exa, xee ma peẽ kuery ropoipa ta imondovy kyxe, mba'eaxy vaikue ha'e karuai py pemanomba agua katy. Xee rojapo 'rã yvy regua kuery ha'e javi penderexa vy onhemondyipa agua rami", he'i SENHOR.

¹⁸ "Mba'eta xereve guarã ajapo va'ekue rupi e'ỹ ikuai va'e, xerenonde ijayvuague ndojapoi va'e ma xee ajuka ukapa 'rã vaka ra'y re ha'e kuery ojukaaty rami avi, mba'eta ha'e kuery vaka ra'y ojuka vy mokoĩ rupi ojaya va'ekue mbyte rupi oaxa va'ekue.†

¹⁹ Mba'eta Judá ha'e Jerusalém pygua yvatekueve, huvixa ha'e sacerdote kuery reve oaxa va'ekue vaka ra'y ojaya va'ekue mbyte rupi, ijyvy re ikuai va'e ha'e javi reve.

²⁰ Ha'e rami ae avi xee amboaxa 'rã hovaigua ijukaxea kuery po py. Ha'e ramo hetekue opyta 'rã guyra yvate rupi oveve va'e ha'e mymba yvy rupigua rembi'urã rive.

²¹ Ha'e rami vy Judá pygua huvixa Zedequias ha'e ixupegua yvatekueve amboaxapa 'rã hovaigua kuery Babilônia pygua huvixa ijukaxea xondaro kuery po py, peneretã ojokoague gui ha'e kuery ojepe'a ranhe tei.

²² Mba'eta xeayvu vy rive ajapo 'rã kova'e tetã re ju ha'e kuery ojevypa agua rami. Tetã re opu'ã okuapy vy oi'pe'a ha'e oapypa 'rã. Judá yvy re tetã ikuai va'e guive ambovaipa ukapa 'rã, tekoe ve'yrã", he'i SENHOR.

35

Recabe ramymino kuery gueko rami vy ae ikuai re ijayvuague

¹ Ha'e gui Jeremias pe SENHOR oayvu ombou ju, Josias ra'y Jeaquim Judá pygua huvixa oĩ jave. Ha'e vy aipoe'i:

² — Tereo Recabe ramymino kuerya py, ha'e ndeayvu ha'e kuery reve. Ha'e gui eraapa SENHOR pegua oo py, petei opy ja'o oĩ va'e py. Ha'e py ma ha'e kuery pe reme'ẽ 'rã vinho oy'u agua — he'i.

³ Ha'e ramo araa Recabe ramymino kuery ha'e javi: Jeremias ra'y Jazanas, Habazinas ramymino va'e, tyke'y ha'e ta'y kuery ha'e javi araapa.

⁴ Ha'e rami vy SENHOR pegua oo py araa petei opy ja'o oĩ va'e py, Nhanduete remimbo'e Jigdalias ra'y Hanã ra'y kuery ikuaiaty py. Ha'e va'e opy ja'o ma yvatekueve ikuaiaty oĩ va'e yvy'iry, Salum ra'y oikeyaty rarõa Maasías oiaty áry guive.

⁵ Ha'e gui Recabe ramymino kuery amboguapypa ma vy henonde amoĩ reta hyru vinho oĩa, karo guive. Ha'e vy ha'e kuery pe aipoa'e:

— Pey'u ke vinho.

⁶ Ha'e rã ha'e kuery ombovai:

— Ore kuery ma nda'evei vinho roy'u agua, mba'eta oreramoĩ Recabe ra'y Jonadabe orevy aipoe'i rire: "Pey'u eme vinho, neĩ pendera'y kuery voi.

⁷ Pejapo eme guive penderorã neĩ mba'etyrã. Pema'et'ỹ eme, uvaty pereko eme guive. Ha'e rami 'rãgue py oguy'i py rive 'rã pendekuai peikovea pukukue re, yvy peguata peikovya rupi peikove puku agua", he'i rire.

* 34:14 Ha'e rami agua ma Nhanduete oea Êxodo 21.1 ha'e Deuteronomio 15.12 py. † 34:18 Ha'e kuery reko rami vy ha'e rami ikuai jogueroayvuague omoĩ atã vy (Gênesis 15.9-17).

⁸ Ha'e nunga rupi ore kuery ma ronhe'ê nhendu 'rã oreramoï Recabe ra'y Jonadabe oreyv ijayvuague ha'e javi rupi. Ha'e rami vy ae vinho ndoroy'ui 'rã roikovea pukukue re, orera'yxy kuery, orera'y kuery ha'e orerajy kuery voi.

⁹ Ha'e rami ae ore ndorojapoi orerorã roï aguã. Ndoroguerkoi uvaty, mba'ety, neï mba'emo ra'yïgue ma voi.

¹⁰ Ha'e rami 'rãgue py oguy'i py rive ore kuery orekuai. Ha'e rami py rojapopa rokuapy aguã oreramoï Jonadabe ijayvuague.

¹¹ Ha'e rami avi kova'e yvy re Babilônia pygua huvixa Nabucodonosor ou ramo aiporo'e joupe-upe: "Peju ke, jaje'oi Jerusalém tetã py xondaro kuery Caldéia ha'e Síría pygua gui nghanemi aguã", ro'e va'ekue. Ha'e rami vy ae Jerusalém py ju orekuai — he'i okuapy.

¹² Ha'e gui Jeremias pe SENHOR oayvu ombou vy aipoe'i:

¹³ "Po rami ijayvu SENHOR ixondaro reta va'e Israel kuery Ruete: Tereo, aipo'ere avakue Judá ha'e Jerusalém pygua kuery pe: 'Romo'arandua rupi xeayvu 'rã napendui 'rã teve xenhe'ê rendu aguã?' he'i SENHOR.

¹⁴ 'Mba'eta Recabe ra'y Jonadabe guamymino kuery pe ijayvu vy "Pe'y'u eme vinho", he'iague rami ha'e kuery ikuai pavê. Ha'e rami vy aÿ peve ha'e kuery ndoy'ui 'rã okuapy vinho, guamoï ijayvuague rami ae 'rã ikuai. Ha'e rã peê kuery ma ko'ê rai guive pendevy xeayvu teï naxenhe'ê rendui pekuapy.

¹⁵ Mba'eta ko'ê rai guive peê kuerya py xerembiguai kuery ombou vy aipoa'e uka: "Petẽ-teï pejeko rero va ke aÿ pendeko vaiaty gui, iporã va'e anho pejapo aguã. Tapeove eme guive amboae ramigua tuete kuery re ha'e kuery pe pendekuai aguã. Ha'e rami vy 'rãe pendekuai puku pendevyvrã peneramoï kuery pe ame'ê va'ekue re", ha'e uka. Ha'e rami teï peê kuery ma ndapejapyxakai, naxenhe'ê rendui guive.

¹⁶ Recabe ra'y Jonadabe ramymino kuery minha ojapo ete okuapy guamoï ojapo ukaague rami. Ha'e rã kova'e kuery ma naxenhe'ê rendui ae', he'i.

¹⁷ Ha'e nunga rupi SENHOR ixondaro reta va'e, Israel kuery Ruete aipoe'i: 'Ne'exa, Judá ha'e Jerusalém py ikuai va'e áry xee ambou 'rã xeayvu vaiague ha'e javi. Mba'eta ha'e kuery pe xeayvu teï naxenhe'ê rendui okuapy, ajapuka-pukai teï ha'e kuery naxembovai', he'i."

¹⁸ Ha'e gui ma Recabe ramymino kuery pe ju Jeremias aipoe'i:

— Po rami ijayvu SENHOR ixondaro reta va'e, Israel kuery Ruete: "Peê kuery ma peneramoï Jonadabe ijayvuague rupi ae pendekuai, ojapo uka va'ekue ha'e javi pejapo vy.

¹⁹ Ha'e nunga rupi po rami SENHOR ixondaro reta va'e, Israel kuery Ruete ijayvu: Xerenonde ikuai riae 'rã Recabe ra'y Jonadabe ramymino regua", he'i.

36

Kuaxia Jeremias ayvu oia templo py ogueroayvuague

¹ Ha'e gui Josias ra'y Jeaquim Judá pygua huvixa va'e irundy ma'etÿ re ma oï jave py pova'e ayvu SENHOR ombou Jeremias pe. Ha'e vy aipoe'i:

² — Eju ke peteï kuaxia onhemama va'e. Ha'e va'e re ke embopara Israel kuery rovai xeayvuague ha'e javi, Judá kuery ha'e amboae regua ha'e javi rovai guive, huvixa Josias oia ypya ára xeayvu guive aÿ peve.

³ Mba'eta xapy'a rei Judá kuery ma mba'emo vai ha'e kuery re ambou taa remombe'u rã oendu vy peteï-teï ojeko rero va 'rã ha'eve e'ÿa rami ikuaiia gui. Ha'e rami ri ramo xee ambogue 'rã heko vaia ha'e ojevayvague — he'i.

⁴ Ha'e gui Jeremias oenoï Nerias ra'y Baruque. Ha'e ramo kuaxia onhemama va'e re Baruque ombopara Jeremias ijayvua ha'e javi, ixupe SENHOR ijayvuague ha'e javi rami.

⁵ Baruque pe Jeremias ijayvuve ju vy aipoe'i:

— Xee ma xembotyague py aï vy nda'evei SENHOR pegua oo py xee aa aguã.

⁶ Ha'e rami rã ndee ae ha'e py reo vy heta va'e kuery oendua py reroayvu 'rã SENHOR ayvu amombe'u rã kuaxia onhemama va'e re remopara va'ekue ha'e javi. SENHOR pegua opy ae 'rã reroayvu, ha'e kuery okaru e'ÿ re ikuaiia ára, Judá regua kuery guetã gui ou va'ekue ha'e javi oendua py.

⁷ Xapy'a rei ha'e kuery onhemo'yvy'ia rupi ojapukai ramo SENHOR oendu 'rã, peteï-teï ojeko rero va ramo ha'eve e'ÿa rami ikuaiia gui. Mba'eta kova'e kuery rovai SENHOR oexa uka reta ma ipoxya ha'e nda'evei etea — he'i.

⁸ Ha'e ramo Nerias ra'y Baruque ojapopa profeta Jeremias ijayvuague ha'e javi. Ha'e rami vy SENHOR pegua opy oïke vy ogueroayvu SENHOR ayvu kuaxia re oï va'e.

⁹ Mba'eta peteï nhiruï ma'etÿ ha'e nove jaxyra re ma Josias ra'y Jeaquim Judá pygua huvixa oï jave py oenoimba Jerusalém pygua ha'e Judá regua tetã guigua kuery Jerusalém py ou aguã, SENHOR renonde okaru e'ÿ re ikuai aguã.

¹⁰ Ha'e gui ma Baruque ogueroayvu kuaxia re Jeremias ayvu oia. SENHOR pegua opy ogueroayvu, Safã ra'y Gemarias lei re nhombo'e va'ety oïaty py, oka yvateve oï va'e py, SENHOR pegua oo rokê pyau rexei, heta va'e kuery ha'e javi oendua py.

Yvatekueve oendua py ju kuaxia ogueroayvuague

¹¹ Ha'e va'e kuaxia re SENHOR ayvu oï va'e ha'e javi Gemarias ra'y Micaías, Safã ramymino va'e oendu vy ¹² huvixa ro py oo, opy ja'o kuaxia mboparaaty oïaty py ae. Ha'e py ma yvatekueve ha'e javi oguapy okuapy: kuaxia mboparaaty Elisama, Semaías ra'y Delaías, Acbor ra'y Elnatã, Safã ra'y Gemarias, Hananias ra'y Zedequias ha'e yvatekueve mboae kuery.

¹³ Ha'e va'e kuery pe ju Micaías omombe'upa, heta va'e kuery oendua py kuaxia para Baruque ogueroayvu rá oendu va'ekue ha'e javi.

¹⁴ Ha'e ramo Baruque-a katy yvatekueve omondouka Netanias ra'y Jeudi, Selemias ramymino, Cusi ramymino jevy va'e. Ha'e va'e pe aipoe'i uka Baruque pe: "Eru ke apy kuaxia para heta va'e kuery oendua py roeroayvu va'ekue", he'i uka. Ha'e ramo Nerias ra'y Baruque kuaxia para ogueraa amboae kuerya py.

¹⁵ Ha'e ramo ixupe ha'e kuery aipoe'i:

— Aÿ ma eguapy, orevy ju ke eroayvu — he'i ramo Baruque ogueroayvu ju oiny ha'e kuery oendua py.

¹⁶ Ha'e va'e ayvu ha'e kuery oendupa ma vy joe-joe oma'ê okuapy onhemondyí vy. Ha'e vy aipoe'i Baruque pe:

— Huvixa pe romombe'u mate 'rãe pova'e ayvu ha'e javi — he'i.

¹⁷ Ha'e gui ha'e kuery ijayvuve ju vy oporandu Baruque pe:

— Emombe'u porã ke orevy, mba'ixa tu rembopara ha'e nunga? Profeta e'ÿ teve ndevy omombe'u pova'e ayvu ha'e javi?

¹⁸ Baruque ombovai:

— Ha'e ete ae ri omombe'u pova'e ayvu xevy, ha'e rá xee ju ambopara kuaxia re tinta py — he'i.

¹⁹ Ha'e ramo yvatekueve aipoe'i Baruque pe:

— Tereo, enhemi, Jeremias voi. Avave rei toikuaa eme mamó pa peña.

Tata py huvixa kuaxia oapypaague

²⁰ Ha'e gui yvatekueve ma kuaxia para onhemama va'e omó porã ranhe opy ja'o kuaxia mboparaa Elisama oiaty pyve. Ha'e rire mae jogueraa huvixa oka py oguapy oinya py. Ha'e vy huvixa pe omombe'u okuapy ha'e va'e ayvu ha'e javi.

²¹ Ha'e ramo huvixa omondouka guembiguaí Jeudi kuaxia para ogueru aguã. Ha'e rá Jeudi ma opy ja'o kuaxia mboparaaty Elisama oiaty gui ojou vy ogueru huvixa ha'e hexevgva yvatekueve ikuaia py.

²² Nove jaxya huvixa oguapy oinya py yro'y oendu ramo ijyvíry oí peteí tapý rru hexakãmba oiny va'e.

²³ Ha'e gui kuaxia para mboapy e'ÿ vy irundy henda py Jeudi ogueroayvu nhavó huvixa ojaya 'rá kyxe'i kuaxia mboparaa remboporu oguereko va'e py, ha'e vy omombo 'rá tapý rru tata oia py.

²⁴ Mba'eta huvixa ha'e hembiguaí kuery ikuai va'e ha'e va'e ayvu ha'e javi oendu teí peteíve ma voi nonhemboaxyi, oao nomondoróí guive.

²⁵ Ha'e rami avi Elnatã, Delafías ha'e Gemarias ma kuaxia para oapy e'ÿ aguã re huvixa reve onhea'ã okuapy teí ha'e kuery ayvu re ndojapxakai.

²⁶ Ha'e rami 'rãgue py ijayvu Hameleque ra'y Jerameel pe, ha'e Azriel ra'y Serafías ha'e Abdeel ra'y Selemias pe, ha'e kuery ombo'a aguã kuaxia mboparaare Baruque ha'e profeta Jeremias. Ha'e rami teí SENHOR onhomí voi.

Teígue ju Baruque kuaxia omboparaague

²⁷ Ha'e ramo kuaxia Jeremias ijayvuague Baruque ombopara va'ekue huvixa oapypa ma rire teígue ju SENHOR oayvu ombou Jeremias pe. Ha'e vy aipoe'i:

²⁸ "Ejou kuaxia onhemama va'e mboae, ha'e va'e re ju embopara uka jypygua Judá pygua huvixa Jeaquim oapy va'ekue re oíague ha'e javi rami.

²⁹ Judá pygua huvixa Jeaquim pe aipo're 'rá guive: Po rami ijayvu SENHOR. Ndee ma kuaxia onhemama va'e reapy vy aipo're va'ekue: 'Mba'e re tu rembopara Babilônia pygua huvixa ou vy kova'e yvy ombovaipa, ha'e avakue ha'e mymba kuery omomba 'ráa rami?' re va'ekue.

³⁰ Ha'e nunga rupi po rami SENHOR ijayvu ndee Judá pygua huvixa Jeaquim rekorã re: 'He'ôgue ma omombo 'rá, ara py kuaray ojopea py rive itui aguã, pyávý yro'y ho'aague rupi guive. Ha'e gui ta'y ha'e hamymino kuery neí peteíve ma voi noí 'rá tenda Davi openaaty áry.

³¹ Mba'eta ambopaga 'rá oejavyaty re, hamymino ha'e hembiguaí kuery guive. Ha'e rami vy hi'áry, Jerusalém ha'e Judá pygua avakue áry guive ambou 'rá xeayvu vaiague ha'e javi, noendui potai rire', he'i."

³² Ha'e gui ma Jeremias kuaxia onhemama va'e mboae ojou vy omboaxa Nerias ra'y kuaxia mboparaaty Baruque pe. Ha'e ramo ha'e ju ombopara Jeremias ayvu kuaxia Judá pygua huvixa Jeaquim oapy va'ekue re oíague ha'e javi rami. Omombe'uve ju ayvu mboae jypygua ramigua.

37

Nhuã py Jeremias ombotyá ague

¹ Ha'e gui ma Jeaquim ra'y Conias rekovia Babilônia pygua huvixa Nabucodonosor omó Josias ra'y Zedequias. Ha'e ramo ha'e va'e ju opena Judá yvy re.

² Ha'e rami teí ndojapxakai SENHOR oayvu profeta Jeremias omombe'u va'e re. Hembiguaí kuery ha'e ijyvy re ikuai va'e voi ndojapxakai okuapy.

³ Ha'e rami avi profeta Jeremias oia py huvixa Zedequias ombou Selemias ra'y Jucal ha'e Maaséias ra'y sacerdote Sofonias, ixupe ojerure vy " SENHOR Nhanderuete pe ejaupukai, ha'e eporandu ke orere", he'i aguã.

⁴ Ha'e jave ma Jeremias oiko porã rei heta va'e kuery mbyte, nomb'o'aaí teria ja.

⁵ Ha'e e'ÿ mbove ma Egito yvy gui Faraó pegua xondaro kuery ou. Ha'e nunga omombe'ua rá caldeu kuery oendu vy onheguaêmba Jerusalém tetã ojokoague gui.

⁶ Ha'e ramo profeta Jeremias pe SENHOR oayvu ombou:

⁷ “Po rami ijayvu SENHOR Israel kuery Ruete: Po rami 'rã peê kuery pembovai Judá pygua huvixa pe, xeivy pe ojerure uka aguã penembou rire: ‘Ne'exa, Faraó pegua xondaro kuery penderepyarã ou va'ekue ri ojevypa rive ju 'rã Egito vvy katy.

⁸ Ha'e ramo caldeu kuery ma oupa ju vy opu'ã 'rã okuapy kova'e tetã re. Ha'e rami vy tetã re oipe'a ha'e oapypa 'rã', peje 'rã.

⁹ Mba'eta po rami SENHOR ijayvu: ‘Pejekore eme “Caldeu kuery oopa 'rã ri nhanderekoa gui”, pejea py. Mba'eta ha'e kuery ndojepe'ai 'rãe.

¹⁰ Mba'eta caldeu regua xondaro kuery penderovai opu'ã va'e peitypa teĩ ae ma, ha'e kuery va'e regua mbovy'i ojuka rai'i pyre anho opyta va'e rire peteĩ-teĩ oguy'i py ituiague gui opu'ã vy oapypa 'rãgue kova'e tetã', he'i.”

¹¹ Ha'e gui caldeu regua xondaro kuery ma Faraó kuery oua omombe'ua rã oendu vy onheguaẽmba ranhe Jerusalém tetã gui.

¹² Ha'e va'e rire Jerusalém gui Jeremias oo ta Benjamim vvy katy, peteĩ vvy ojeupe guarã ojopy aguã hetarã kuery rekoa py itui va'e.

¹³ Ha'e vy Benjamim vvy rape rokẽ py ovaẽ jave ha'e py oĩ peteĩ xondaro ruvixa Jerias hery va'e, Selemias ra'y, Hananias ramymino va'e. Ha'e va'e ma profeta Jeremias ojoko vy aipoe'i:

— Ndee tu rejava ta rima reovy caldeu kuerya katy — he'i.

¹⁴ Jeremias ombovai:

— Apua rima, xee ndajavai caldeu kuerya katy — he'i. Ha'e rami teĩ ijayvua re Jerias ndojapyxakai. Ha'e rami vy Jeremias oipokuaa vy ogueraa yvatekueve ikuaiia py.

¹⁵ Ha'e ramo yvatekueve ipoxypa okuapy Jeremias pe. Ha'e vy oinupã ukapa vy omboty nhuã py kuaxia mboparaaty Jônatas ro py, nhuãrã ju oejaa rire.

¹⁶ Opy ja'o'i Jeremias omoinge rire mbovy ára rei e'ỹ oĩ ha'e py.

¹⁷ Ha'e rire ma huvixa Zedequias ogueru ruka ju ngoo py. Ha'e vy nhemi rupi oporandu ixupe:

— Oĩ 'rã pa ayvu SENHOR ombou va'ekue?

Jeremias ombovai vy

— Oĩ rima. Nemboaxaa 'rã Babilônia pygua huvixa po py — he'i.

¹⁸ Jeremias aipoe'ive ju huvixa Zedequias pe:

— Mba'e py tu ajevavy raka'e nderovai, nerembuguai kuery, e'ỹ vy heta va'e kuery rovai, nhuã py xemboty uka aguã?

¹⁹ Mba'eta mamu tu aỹ ikuai profeta ramigua kuery pendevy aipoe'i va'ekue: “Babilônia pygua huvixa ndoui 'rã peê kuery re, neĩ kova'e vvy re opu'ã aguã”, 'eare kuery?

²⁰ Ha'e nunga rupi aỹ xeruvixa, endu ke. Tove ajerurea toiko. Xemondouka eme ju kuaxia mboparaaty Jônatas ro katy, ha'e py amano e'ỹ aguã — he'i.

²¹ Ha'e ramo huvixa Zedequias ogueraa uka Jeremias harõa kuery ikuaiaty roka py ju opyta aguã. Ára nhavõ ixupe ogueru ruka guive peteĩ mbojape, mbojape apoa gui ae, tetã rupi mbojape jipovei peve. Ha'e rami py harõa kuery ikuaiaty roka py Jeremias opyta.

38

Yy kuarã va'ekue gui Jeremias ogueraa jepea ague

¹ Ha'e gui ma Matã ra'y Sefatias, Pasur ra'y Gedalias, Selemias ra'y Jucal ha'e Malquias ra'y Pasur oendu okuapy ayvu Jeremias heta va'e kuery pe omombe'uo oikovy va'e. Mba'eta aipoe'i:

² “Po rami SENHOR ijayvu: Kova'e tetã py opyta va'e kuery omano 'rã ma kyxe py, karuai ha'e mba'eaxy vaikue gui. Ha'e rã caldeu kuerya katy oo va'e ma oikove 'rã. Ha'e rami vy guekove reve 'rã oo jepe, oikove 'rã.

³ Po rami SENHOR ijayvu: Kova'e tetã omboaxaa ma 'rã Babilônia pygua huvixa pegua xondaro kuery po py. Ha'e rã ha'e kuery oipe'apa 'rã”, he'i va'ekue Jeremias.

⁴ Ha'e ramo yvatekueve aipoe'i huvixa pe:

— Peva'e ava tomano, mba'eta ha'e rami ijayvu ramo heta va'e kuery joe opu'ã va'e ha'e kova'e tetã py ikuai va'e ha'e javi oendu vy ipo ikangypa 'rã. Mba'eta peva'e ava ma ndojapo porã 'rã heta va'e kuery pe, ojapo vai 'rã anho.

⁵ Huvixa Zedequias ombovai:

— Ne'exa, pendepo py Jeremias oĩ. Penderuvixave aiko va'eri mba'eve ndajapoi 'rã peê kuery peipotaa rami e'ỹ — he'i.

⁶ Ha'e rami rã ha'e kuery Jeremias ogueraa vy omombo peteĩ yguarã ojo'o pyre, huvixa ra'y Malquias pegua py, harõa kuery ikuaiaty roka py ae. Ha'e va'e py ma omboguejy peteĩ ixã py. Yguarã ojo'o pyre py ma yy jipoi, yapo rive oĩ. Ha'e ramo Jeremias ipija ovy yapo py.

⁷ Huvixa ropy oĩ peteĩ Etiópia pygua Ebede-Meleque hery va'e, eunuco oiko. Ha'e va'e ma oendu Jeremias yguarã ojo'o pyre py omboguejyague omombe'ua rã. Ha'e jave py huvixa oguapy oiny oka py, Benjamim vvy rape rokẽ py.

⁸ Ha'e gui Ebede-Meleque ma huvixa ropy gui oẽ ovy vy aipoe'i ixupe:

— Xeruvixa, profeta Jeremias re avakue ojapo vai ete, yguarã ojo'o pyre py omombo vy. Mba'eta ha'e py oĩa py omano 'rã karuai gui, tetã py mbojape jipovei ramo.

¹⁰ Ha'e ramo huvixa ma Etiópia pygua Ebede-Meleque ombovai vy aipoe'i:

— Tereo, eraa trinta avakue apy gui, ha'e enoê profeta Jeremias vvykua gui, omano e'y aguã — he'i.

¹¹ Ha'e ramo Ebede-Meleque ma avakue ogueraa vy oo ranhe huvixa ropy ja'o mba'emo omoï porãaty guýry oï va'e py. Ha'e vy ao ymague ha'e ajukue ra'ykue-'ykue ojou vy ogueraa ha'e gui. Ha'e rami vy ixã rupi ha'e nunga omboguejy Jeremias oia peve.

¹² Ha'e rami vy Etiópia pygua Ebede-Meleque aipoe'i Jeremias pe:

— Aÿ ma ndejevva guy rupi emoï upe va'e ao ymague ha'e ajukue ra'ykue, ha'e ejavoa ixã ha'e va'e py — he'i ramo Jeremias ojapo ha'e rami.

¹³ Ha'e rami vy ixã re omoatã heruvy vy oguenoê okuapy Jeremias vvykua gui. Ha'e rire xondaro harõa kuery ikuaiaty roka py ju Jeremias oiko.

Profeta pe Zedequias oporanduague

¹⁴ Ha'e gui ma huvixa Zedequias oïa py ogueru ruka profeta Jeremias, mboapya okê SENHOR pegua opy oikea va'e py. Ha'e vy aipoe'i ixupe:

— Peteĩ re ma aporandu ta ndevy. Emombe'u e'y eme mba'eve — he'i.

¹⁵ Jeremias ombovai Zedequias:

— Ha'e gui ndevy pe amombe'u rã ndaxekukai 'rã ri ty'y? Xee romongeta ramo ndee nerendu potai 'rã guive — he'i.

¹⁶ Ha'e ramo Zedequias oura Jeremias pe ha'e kuery ae'ia py. Ha'e vy aipoe'i:

— Ha'e rami avi anhetê ete SENHOR oikove va'e nhanderekoverã me'ëa rery rupi aura vy aipoa'e: Xee ndorokukai 'rã, noromboaxai 'rã guive avakue ndejukaxea kuery po py.

¹⁷ Ha'e gui ma Jeremias aipoe'i Zedequias pe:

— Po rami ijayvu SENHOR xondaro reta va'e, Israel kuery Ruete: Babilônia pygua yvatekueve re reaxa ri vy reikove 'rã, kova'e tetã ndokai 'rã guive. Ndero pygua kuery reve peikovepa 'rã.

¹⁸ Ha'e rã Babilônia pygua huvixave rembiguai yvatekueve re ndereaxai ri ramo kova'e tetã amboaxa 'rã caldeu kuery po py. Ha'e ramo oapypa 'rã, ha'e ndee voi ndereo jepai 'rã ha'e kuery po gui — he'i.

¹⁹ Ha'e ramo huvixa Zedequias aipoe'i Jeremias pe:

— Ha'e rami avi xee akjye nhaneretarã judeu kuery caldeu kuery re oaxa va'ekue gui. Mba'eta ha'e kuery po py Babilônia pygua kuery xemboaxa ramo xavyky rei 'rã okuapy — he'i.

²⁰ Jeremias ombovai:

— Any, nanemboaxai 'rãe. Endu ke SENHOR ijayvua ndevy amombe'u va'e, ajerure. Ha'e rami vy 'rãe reo porã, reikove guive.

²¹ Ha'e rã ha'e kuerya katy ndereo ri ramo pova'e ae ayvu SENHOR xevy oikuaa uka va'ekue:

²² “Ne'ixa, kunhague Judã pygua huvixa ropy opyta va'e ogueraapaa 'rã Babilônia pygua huvixa rembiguai kuery yvatekueve peguarã. Ha'e ramo ha'e va'e kunhague aipoe'i 'rã ndevy: ‘Neirũ kuery ae'i nembotavy vy ipo'aka okuapy ndere. Ha'e gui aÿ ndepy yapo py ipija ma ramo ha'e kuery nderejapa’, he'i 'rã okuapy.

²³ Ha'e rami py ndea pygua kunhague ogueraapaa 'rã caldeu kuery peguarã, ndera'y kuery guive. Ndee voi ndereo jepai 'rã ha'e kuery po gui. Ha'e rami 'rãgue py Babilônia pygua huvixa opo py ae 'rã nembro'a, ha'e ramo ndekãuxa ae kova'e tetã oapypaa 'rã”, he'i.

²⁴ Ha'e ramo Zedequias aipoe'i Jeremias pe:

— Avave rei toikuaa eme jajogueroayvuague. Ha'e rami e'y vy remano 'rã.

²⁵ Ha'e gui xapy'a rei yvatekueve oendu 'rã ndereve xeyvuague, ha'e ndea py ou vy aipoe'i 'rã ndevy: “Emombe'u ke aÿ huvixa reve ndeayvuague, ndereve ijayvuague guive. Mba'eve emombe'u e'y eme orevy. Ha'e rami e'y ramo rojuka 'rã”, he'i okuapy ramo

²⁶ aipo're 'rã ha'e kuery pe: “Xee rima ajerure huvixa pe Jônatas ro py xemondouka ju e'y aguã, ha'e py amano e'y aguã”, re 'rã.

²⁷ Ha'e va'e rire yvatekueve Jeremias-a py ovaẽmba vy oporandu okuapy ixupe. Ha'e ramo ha'e kuery pe ombovai huvixa ijayvuague ha'e javi rupi. Ha'e ramo oaja porã ju, mba'eve ndoikuuai vy.

²⁸ Ha'e gui Jeremias ma xondaro harõa kuery ikuaiaty roka py oiko, Jerusalém tetã oipe'aa ára peve.

39

2 Reis 24.20–25.12; 2 Crônicas 36.17–21; Jeremias 52.1–16

¹ Po rami Jerusalém tetã oipe'aa raka'e. Nove ma'etỹ ha'e dez jaxya re ma Judã pygua huvixa Zedequias oï jave py ou Babilônia pygua huvixa Nabucodonosor oxondaro kuery ha'e javi reve. Jerusalém tetã re ou vy ojokopa okuapy.

² Ha'e gui onze ma'etỹa ha'e irundy jaxya re, nove araa py ma ombokua okuapy tetã kora.

³ Ha'e rami vy Babilônia pygua huvixa rembiguai kuery yvatekueve oikepa vy ougapy okuapy Okê Mbytegua py. Ha'e va'e kuery ma Nergal-Sarezar, Sangar-Nebo, Sarsequim, Rabe-Saris, Nergal-Sarezar, Rabe-Mague ha'e Babilônia pygua huvixa rembiguai yvatekueve ha'e javi.

⁴ Ha'e kuery oike rã Judã pygua huvixa Zedequias oexa vy ojava ojeupegua avakue opu'aa pygua ha'e javi reve. Pyávy oẽmba tetã gui. Huvixa pegua yvotyty via tape rupi oo, mokoï kora mbyte py okê oï va'e rupi. Ha'e rã Zedequias ma vvy joja reia via rupi oo.

⁵ Ha'e ramo caldeu regua xondaro kuery huvixa Zedequias rakykue oje'oi vy oupity Jericó katy'i nhuũndy oï va'e py. Ha'e vy ombo'a vy Ribla tetã py ogueraa, Hamate vvy re. Babilônia pygua huvixa Nabucodonosor oia py ogueraa. Ha'e ramo ha'e va'e ju ijayvu ombopaga aguã re.

⁶ Ha'e rami vy Babilônia pygua huvixa Ribla pyve ju ojuka uka Zedequias ra'y kuery, tuu oexaa py. Ojuka uka avi Judá regua yvatekueve.

⁷ Ha'e gui ma omombu Zedequias rexa jovaive, ha'e mokoï corrente overa va'e guigua py ojokua vy Babilônia katy ogueraa.

⁸ Ha'e gui ma Jerusalém tetã py caldeu kuery oapypa huvixa ro, ha'e pygua kuery ro ha'e javi guive. Oitypa avi tetã kora.

⁹ Ha'e py ikuai amongue tetã py opyta va'ekue, ojejopy uka ha'e heta va'e kuery okuave va'e. Ha'e kuery ma jopya kuery ruvixa Nebuzaradã escravo-rã ogueraapa Babilônia katy.

¹⁰ Ha'e rã Judá yvy re iporiaukue'i, mba'eve ndoguerkeoi va'e ma jopya kuery ruvixa Nebuzaradã oeja ijyvy re ae. Ha'e va'e jave py ha'e kuery pe omboaxa uvaty ha'e mba'ety.

Jeremias re Nabucodonosor opena porã ukaague

¹¹ Ha'e gui Jeremias re ma Babilônia pygua huvixa Nabucodonosor opena uka ma voi va'ekue jopya kuery ruvixa Nebuzaradã pe. Ha'e vy ixupe aipoe'i:

¹² “Eraa Jeremias nderupive, epena porã guive hexe. Mba'eve py ejapo vai eme hexe. Ha'e rami 'rãgue py ereko ha'e ae ijavyua rami”, he'i va'ekue.

¹³ Ha'e rami ae ju jopya ruvixa Nebuzaradã ijavyu guembiguai kuery Nebusazbã, Rabe-Saris, Nergal-Sarezer, Rabe-Mague ha'e Babilônia pygua huvixa rembiguai kuery yvatekueve ha'e javi pe.

¹⁴ Ha'e ramo ogueraa uka Jeremias harõa kuery ikuaiaty roka py oïague gui. Ha'e vy omboaxa Aicão ra'y Gedalias, Safã ramymino va'e pe, hoo py ae ogueraa aguã. Ha'e ramo oiko tema heta va'e kuery mbyte.

¹⁵ Harõa kuery ikuaiaty roka py teri Jeremias oï jave ixupe SENHOR oayvu ombou vy aipoe'i va'ekue:

¹⁶ “Tereo, ndeayvu Etiópia pygua Ebede-Meleque pe. Ha'e vy aipo're 'rã ixupe: 'Po rami ijavyu SENHOR ixondaro reta va'e, Israel kuery Ruete: “Ne'exa, kova'e tetã re xee ambou 'rã xeayvu vaiague, aroyvu porãague nda'ei. Ndee ae rexa py ojeupitypa 'rã ha'e va'e ára.

¹⁷ Ha'e rã ndee ma rogueraa jepe 'rã ha'e va'e ára”, he'i SENHOR. “Avakue rekyjea va'e po py nanemboaxaai 'rã.

¹⁸ Mba'eta rogueraa jepe 'rãe, ndorojuka ukai 'rã kyxe py. Xere rejerovia va'e vy reraa jepe 'rã nderekove”, he'i.”

40

Gedalias openaa py Jeremias ha'e okuave va'e kuery ikuaiague

¹ Ha'e gui ma Jeremias pe SENHOR oayvu ombou Ramá tetã py jopya kuery ruvixa Nebuzaradã opoi ju rire. Mba'eta ha'e va'e jave py Jerusalém ha'e Judá gui Babilônia katy ogueraa pyre kuery mbyte Jeremias avi oï corrente py ojokua reve.

² Ha'e gui jopya kuery ruvixa ma Jeremias ojou vy aipoe'i ixupe:

— SENHOR nderuete ma kova'e tekoa re ha'e rami ete oiko aguã re ijavyu va'ekue.

³ Ha'e nunga ma SENHOR ombou ete, ijavyuague ojapo vy. Peẽ kuery SENHOR rovai pejevavy, ha'e ijavyua napendui rire ha'e nunga ha'e javi oiko pendere.

⁴ Ha'e gui aỹ ma ne'exa, kova'e ára ropoi 'rã ndepo jovaive corrente py ndejokuague gui. Babilônia tetã katy reoxe ri vy ke eju, ha'e ramo xee apena porã 'rã ndere. Ha'e rã xerupive Babilônia katy ndereoxei ri ramo ha'eve avi. Ne'exa, kova'e yvy ha'e javi itui nerenonde. Reoxea katy rei ha'eve reo aguã, tereo ha'e katy ae — he'i.

⁵ Jeremias nombovai voi ramo huvixa aipoe'ive ju:

— Ejevvy ju ha'vy Aicão ra'y Gedalias, Safã ramymino va'e ro py. Ha'e va'e ma Babilônia pygua huvixa omoï Judá regua tetã pygua kuery ruvixarã. Eiko hexeve ae, neretarã kuery mbyte. Ha'e rami e'ỹ vy amboae katy reoxe vy ke ha'e katy tereo — he'i. Ha'e rami vy ixupe jopya kuery ruvixa ome'ẽ rive'i mba'emo, temb'i'u guive. Ha'e rami vy omondouka.

⁶ Ha'e ramo Jeremias ma Mispa tetã py oo Aicão ra'y Gedalias oĩa py. Ha'e va'e oĩa py ju oiko, heta va'e kuery ovyvy re opyta va'ekue mbyte.

⁷ Tetã rovai rupi ikuai teri Judá pygua xondaro kuery huvixa kuery reve. Ha'e kuery oendupa okuapy Babilônia pygua huvixa omoïague Aicão ra'y Gedalias yvy re opena va'erã. Ikuai avi Babilônia katy ndogueraapaai va'ekue avakue, kunhague, kyrĩgue ha'e iporiaukue'i, ovyvy re ae opyta va'ekue. Ha'e kuery ma Gedalias po py pavẽ omboaxaague xondaro kuery oendu vy

⁸ oupa Mispa py Gedalias oĩa py. Po rami ma ou va'ekue rery: Netanias ra'y Ismael, Careá ra'y kuery Joanã ha'e Jônatas, Tanumete ra'y Seraías, Netofã pygua Efai ra'y kuery, Maaca pygua ra'y Jazanias ha'e hexevegua avakue ha'e javi.

⁹ Ha'e va'e kuery ha'e hexevegua avakue pe Aicão ra'y Gedalias, Safã ramymino va'e oura. Ha'e vy aipoe'i ha'e kuery pe:

— Peteive henda py pekyje eme caldeu kuery gui. Pendekuai tema nhandevvy re, pamba'eapo Babilônia pygua huvixa pe. Ha'e rami vy pendekuai porã 'rã.

¹⁰ Ha'e gui xee ma apyta 'rã Mispa py, caldeu kuery nhandea py ou va'ekue ayvu rupi apena aguã. Ha'e rã peẽ ma pemono'õ vinho-rã, ha'e gui kuaray puku jave py ma hi'ha ha'e azeite-rã pemono'õ. Pemboyrũ 'rã hurrurã pereko va'e py. Ha'e rami vy 'rã pendekuai tetã pendekoague py ae — he'i.

¹¹ Ha'e rami ae avi Moabe vvy re judeu kuery ikuai va'e, Amom ramymino kuery mbyte, Edom ha'e vvy ha'e javi rupi ikuai va'e avi oendu okuapy Babilônia pygua huvixa oejague Judá regua okuave va'ekue. Oendu avi Aicão ra'y Gedalias, Safã ramymino va'e ha'e kuery re opena va'erã omoïague.

¹² Ha'e rami oendu vy ojevypa ju opa rupi omoaia ague gui. Judá vvy re ju ou, Mispa tetã py Gedalias oia py. Ha'e rami vy omono'õ reta okuapy uva, kuaray puku jave py hi'a va'e guive.

Gedalias rovai Ismael opu'ãague

¹³ Ha'e gui Careá ra'y Joanã ha'e xondaro ruvixa kuery nhuúndy rupi ikuai va'ekue ou okuapy Mispa tetã py Gedalias oia py.

¹⁴ Ha'e vy ixupe aipoe'i okuapy:

— Reikuaa pa Amom kuery ruvixa Baalis ombouague Netanias ra'y Ismael ndejuka aguã? — he'i teĩ Aicão ra'y Gedalias ndogueroviai.

¹⁵ Ha'e ramo Careá ra'y Joanã ma Mispa pyve ijayvu Gedalias pe ha'e ae'ia py. Ha'e vy aipoe'i:

— Aỹ ma aa 'rã nhemi rupi Netanias ra'y Ismael ajuka aguã. Mba'e re tu ha'e ou 'rã ndejuka aguã? Ha'e rami ri ramo Judá kuery ndereve ikuai va'e ha'e javi oaimba 'rã, Judá regua okuave va'ekue okanhymba 'rã guive — he'i.

¹⁶ Ha'e rami teĩ Aicão ra'y Gedalias ombovai vy aipoe'i Careá ra'y Joanã pe:

— Ejuka eme. Mba'eta Ismael rovai ndeayvua ma anhetê e'ỹ.

41

¹ Ha'e gui sete jaxya py Netanias ra'y Ismael ou. Ha'e va'e ma Elisama ramymino va'e oiko, huvixa ro pyguare. Ngupive ogueru avi dez avakue huvixa rembiguai kuery. Mispa tetã py ovaẽmba Aicão ra'y Gedalias oia py. Ha'e rami vy hexeve okaru okuapy Mispa py.

² Ha'e jave py Netanias ra'y Ismael dez avakue ngupivegua kuery reve opu'ã vy kyxe py ojuka Aicão ra'y Gedalias, Safã ramymino va'e, vvy re opena va'erã Babilônia pygua huvixa omoï va'ekue.

³ Mispa py Ismael ojuka avi judeu kuery Gedalias revegua ikuai va'ekue ha'e javi, caldeu kuery joe opu'ãa pygua ha'e py ikuai va'ekue guive.

⁴ Gedalias ojukaague avave rei ndoikuai ranhe jave ko'ẽ ju

⁵ ha'e py ovaẽ avakue Siquém, Siló ha'e Samaria tetã gui. Oitenta avakue ou guendyva onhopimba reve, oao omondoropa ha'e onhekyximba rei reve guive.* Ha'e va'e kuery ogueru okuapy tembi'u ha'e hekuã porã va'e SENHOR pegua opy ome'ẽ va'erã.

⁶ Ha'e ramo Netanias ra'y Ismael ma ha'e kuery ovaexi vy oẽ Mispa tetã gui. Ojave'o reve oo. Ha'e rami vy ovaexi vy aipoe'i ha'e kuery pe:

— Peju ke Aicão ra'y Gedalias oia py — he'i.

⁷ Ha'e gui tetã mbyte peve ha'e kuery ovaẽ ramo Netanias ra'y Ismael ngupivegua kuery reve ojokapa. Ha'e vy tetekue omombopa vvykua oi va'e py.

⁸ Ha'e rã ha'e kuery va'e regua dez avakue okuave va'e aipoe'i okuapy Ismael pe:

— Orejuka eme, mba'eta roguereko trigo, cevada, azeite ha'e ei romoï porã va'ekue. Peteĩ mba'ety py ma ronhomi — he'i okuapy. Ha'e ramo ojuka e'ỹ re oeja, amboae kuery ojukaague rami e'ỹ.

⁹ Vvykua Gedalias revegua avakue re'õgue Ismael omomboague ma huvixa Asa ojo'o va'ekue, hexe Israel pygua huvixa Baasa opu'ã ramo ojoko aguã. Ha'e va'ekue ae ju Netanias ra'y Ismael omonyẽ te'õgue.

¹⁰ Ha'e gui Mispa tetã py opyta va'ekue Ismael ogueraapa oipokua reve, huvixa rajy kuery ha'e heta va'e kuery Mispa py opyta va'ekue ha'e javi. Ha'e va'e kuery re jopya kuery ruvixa Nebuzaradã opena ukaague Aicão ra'y Gedalias pe. Ha'e kuery ae Netanias ra'y Ismael ogueraapa oipokua reve. Amom ramymino kuery vvy katy oo.

Oipokuaa reve ogueraa pyre kuery Joanã ogueraa jepepaague

¹¹ Ha'e nunga Careá ra'y Joanã oendu, hexevegua xondaro ruvixa kuery ha'e javi voi. Netanias ra'y Ismael ojapo vaiague ha'e kuery oendu vy

¹² ogueraa ojepegua avakue ha'e javi. Ha'e vy oje'oi Netanias ra'y Ismael re opu'ã aguã. Ha'e vy ojeupity yupa tuvixa va'e Gibeão py oi va'e vvyry.

¹³ Ha'e ramo heta va'e kuery Ismael ogueraa va'ekue ma Careá ra'y Joanã ha'e hupivegua xondaro ruvixa kuery ou rã oexa vy ovy'a rei okuapy.

¹⁴ Ha'e rami vy Mispa gui Ismael oipokua reve ogueraa va'ekue ojevvy vy oopa okuapy Careá ra'y Joanã-a katy.

¹⁵ Ha'e rã Netanias ra'y Ismael ma oo jepe Joanã gui. Oito avakue reve oo Amom ramymino kuery vvy re.

¹⁶ Ha'e gui Careá ra'y Joanã ha'e hexevegua xondaro ruvixa kuery ogueru ju heta va'e kuery Netanias ra'y Ismael oipokua reve Mispa gui ogueraa va'ekue, Aicão ra'y Gedalias ojuka ma rire. Ha'e va'e kuery ma avakue ipy'a guaxukueve joe opu'ãa pygua, kunhague, kunumigüe'i ha'e eunuco kuery Gibeão py ojou vy ogueraa va'ekue.

¹⁷ Ha'e kuery ogueraa vy opyta ranhe Gerute-Quimã tekoa Belém katy'i oi va'e py, Egito vvy katy ojavaxe vy

¹⁸ caldeu kuery gui. Mba'eta okyje rei okuapy, mba'eta Aicão ra'y Gedalias vvy re opena va'erã Babilônia pygua huvixa omoï va'ekue ri Netanias ra'y Ismael ojuka rire.

* 41:5 Ha'e rami ha'e kuery ikuai Jerusalém tetã ombovaipaague re ipy'a vai vy.

42

Egito katy heta va'e kuery oo e'ÿ aguã re Jeremias ijayvuague

¹ Ha'e gui Careá ra'y Joanã reve xondaro ruvixa kuery ovaẽmba, Hosaiás ra'y Jezanias ha'e heta va'e kuery ha'e javi, yvatekueve ha'e yvygüeve voi.

² Ha'e rami vy aipoe'i okuapy profeta Jeremias pe:

— Ndevy pe rojerure SENHOR Nderuete pe reporandu aguã orere ha'e kova'e kuery okuave'i va'e ha'e javi re. Mba'eta heta orekuai va'ekue ri mbovy'i aÿ orekuai, nderexa py ae rexaa rami.

³ Eporandu ke SENHOR Nderuete pe orevy oikuaa uka aguã tape marã katy roo aguã, ha'e mba'e pa rojapo aguã re — he'i.

⁴ Ha'e ramo ha'e kuery pe profeta Jeremias aipoe'i:

— Pendeayvua xee roendu ma vy aporandu 'rã SENHOR Penderuete pe pendeayvuague rami. Pendevy guarã SENHOR ijayvua ha'e javi ma amombe'u porã 'rã pendevy. Pendevy namombe'u e'ÿi 'rã mba'eve — he'i.

⁵ Ha'e kuery aipoe'ive ju Jeremias pe:

— Ha'e gui SENHOR Nderuete ayvu orevy guarã ndevy ombou va'e ndorojapopai ri ramo tove SENHOR anhetê rupi ha'e ojeroviapy oikoa rupi topu'ã orerovai.

⁶ Ijayvua iporã e'ÿ vy ipoyi va'e tei ronhe'ẽ rendu 'rã SENHOR Nhanderuete, ixupe ndevy reporandu uka rire. SENHOR Nhanderuete ronhe'ẽ rendu 'rã oremoingo porã aguã — he'i okuapy.

⁷ Ha'e gui ma dez araa py SENHOR oayvu ombou Jeremias pe.

⁸ Ha'e ramo oenoi Careá ra'y Joanã, hexevegua xondaro ruvixa kuery ha'e heta va'e kuery ha'e javi, yvygüeve ha'e yvatekueve voi.

⁹ Ha'e vy aipoe'i ha'e kuery pe:

— Po rami ijayvu SENHOR Israel kuery Ruete, henonde peẽ kuery xevy pejerure uka rire.

¹⁰ “Kova'e yvy re ri pepyta ramo romboyvate 'rã, roity 'rã nda'ei. Xee ronhotÿ 'rã, noromondorovei 'rã guive, mba'eta xee nda'evei aiko mba'emo vai pendere ambouague re.

¹¹ Pekiye eme guive Babilônia pygua huvixa gui, pekyjeague rami e'ÿ. Pekiyeve eme ixugui, mba'eta xee ae aiko 'rã peẽ kuery reve, rogueraa jepe ha'e ipo gui roipe'a aguã”, he'i SENHOR.

¹² “Ha'e rami vy xee roipytyvõ 'rã, romboaxya rupi roguereko 'rã pendeivy re ae penderekoa aguã.

¹³ Ha'e rami avi xapy'a rei 'Orevy re ndoropytai 'rã' peje 'rã, xapy'a rei SENHOR Nhanderuete ayvu napendui vy

¹⁴ aipopeje 'rã: ‘Any, Egito yvy re 'rã roo, mba'eta ha'e py ma ndoroexavei 'rã joe opu'ã va'e, noroenduvei 'rã guive mimby guaxu pu, ha'e mbojape ndoatavei 'rã orevy. Ha'e py ae 'rã orekuai', peje 'rã.

¹⁵ Ha'e rami ri aipopeje ramo aÿ pejapyxaka SENHOR ayvu re, Judá pygua pekuave'i va'e. Po rami ijayvu SENHOR ixondaro reta va'e, Israel kuery Ruete: Egito yvy re penderekoa aguã katy peo aguã pendejee pemoi ete ramo

¹⁶ pova'e nunga oiko 'rã pendere: kyxe revegua pekyjeague penderupity 'rã Egito yvy re, karuai pekyjeague voi penderakyke monha 'rã, ha'e py pemanomba aguã rami.

¹⁷ Ha'e ramigua ae 'rã oiko avakue Egito katy oo aguã ojee omoi va'e ha'e javi re. Ha'e kuery omanomba 'rã kyxe gui, karuai ha'e mba'eaxy vaikue gui. Ha'e kuery va'e regua ndokuavei 'rã peteïve, ndoo jepei 'rã mba'emo vai ha'e kuery áry ambou va'e gui.”

¹⁸ Mba'eta po rami ijayvu SENHOR ixondaro reta va'e, Israel kuery Ruete: “Jerusalém pygua kuery áry xepoxya ha'e ajou vaia ambouague rami avi pende'áry voi ambou 'rã xepoxya, Egito katy peo ramo. Ayvu vaipy 'rã peiko, nhomondyipaarã guive. Pendeavykya rei 'rã, napendejou porãavei 'rã. Ha'e ramo ndapexavei 'rã kova'e tekoa.”

¹⁹ Mba'eta Judá regua pekuave'i va'e, pendeivy pe SENHOR “Tapeo eme Egito katy” he'i rire penderexarai eme kova'e ára pendeivy xeayvuague re.

²⁰ Mba'eta peẽ ma penderekove rekovia ae pejekore, mba'eta SENHOR Penderuete pe aporandu aguã peju vy aipopeje va'ekue: “Eporandu orere SENHOR Nhanderuete pe. Ha'e gui orevy pe emombe'u ju SENHOR ijayvuague ha'e javi. Ha'e ramo ma rojapopa 'rã”, peje va'ekue ri.

²¹ Ha'e rami tei ha'e nunga ha'e javi aÿ peẽ kuery pe amombe'u porã tei ndapejapyxakai pekuapy SENHOR Penderuete peteïve ayvu pendeivy amombe'u va'e re voi.

²² Ha'e nunga rupi aÿ gui ma peikuaa pota porã pova'e re: Pemanomba 'rã kyxe gui, karuai ha'e mba'eaxy vaikue gui, Egito yvy re penderekoa aguã peoxeague py ae.

43

Egito katy heta va'e kuery Jeremias ogueraa okuapyague

¹ Ha'e rami py heta va'e kuery pe Jeremias omombe'upa SENHOR Nguuete ijayvuague ha'e javi, SENHOR Tuuete omombe'u aguã ombou va'ekue.

² Ha'e ramo Jeremias pe ijayvu okuapy Hosaiás ra'y Azarias, Careá ra'y Joanã ha'e avakue onhemboyvate rei va'e. Ha'e vy aipoe'i okuapy:

— Po rami ndeayvua ma apu, mba'eta SENHOR Nhanderuete nanemboui aipo're aguã: “Peo eme Egito katy penderekoa aguã ha'e py”, 're aguã.

³ Nerias ra'y Baruque rima nembro'e ra'e orerovai, caldeu kuery po py oremboaxa aguã, ha'e kuery orejukapa, e'ÿ vy Babilônia katy escravo-rã orereraapa aguã — he'i okuapy.

⁴ Ha'e rami py Careá ra'y Joanã nonhe'ẽ rendui SENHOR Judá vvy re opyta aguã, xondaro ruvixa kuery, neĩ heta va'e kuery voi.

⁵ Ha'e rami 'rãgue py Careá ra'y Joanã ha'e xondaro ruvixa kuery ogueraapa Judá regua kuery okuave'i va'ekue. Ha'e javi regua mbyte rupi ojavapaague gui ojevypa va'ekue Judá vvy re ju ikuai aguã teĩ.

⁶ Ogueraa avakue, kunhague, kunumigue'i, ha'e huvixa rajy kuery. Ogueraa avi heta va'e kuery Aicão ra'y Gedalias, Safã ramymino va'ea py jopya kuery ruvixa Nebuzaradã ojea va'ekue ha'e javi. Ogueraa avi profeta Jeremias, Nerias ra'y Baruque guive.

⁷ Ha'e rami vy ovaẽmba Egito vvy re, SENHOR ayvu noendu potai vy. Tafnes tetã py ovaẽmba okuapy.

Egito vvy re Nabucodonosor ipo'aka aguã re Jeremias ijayvuague

⁸ Ha'e gui ma Tafnes tetã py SENHOR oayvu ombou ju Jeremias pe. Ha'e vy aipoe'i:

⁹ “Eraa ndepo py ita tuvixakueve'i, ha'e emboje'apa pyrõa vvy jykue guigua py, Faraó rokẽ rexei'i Tafnes py oĩ va'e py. Judeu regua avakue oexaa py ejapo.

¹⁰ Ha'e vy aipo're 'rã ha'e kuery pe: 'Po rami ijayvu SENHOR ixondaro reta va'e, Israel kuery Ruete: Ne'exa, apy ae xee ambou 'rã xerembiguai Babilônia pygua huvixa Nabucodonosor. Ha'e vy henda opena atyrã amoĩ uka 'rã kova'e ita amboje'a uka va'ekue áry. Ha'e ramo kova'e ita áry rupi ojapo 'rã oguy'i guenda openaaty ao'iarã.

¹¹ Ha'e va'e ou vy ombovaipa 'rã Egito vvy. Ha'e rami vy ojuka 'rã ojuka pyrã ikuai va'e ha'e javi, escravo-rã heraa pyrã ma ogueraa 'rã escravo-rã, ha'e rã kyxe py ojuka pyrã ma kyxe py ae 'rã ojukapa.

¹² Mba'eta omoendy 'rã oo Egito pygua kuery ruete peguare, oapypa 'rã. Ha'e rã mba'emo ra'angaa opyta va'e ma oipe'apa 'rã heravy. Oipe'apa 'rã heravy mba'emo Egito vvy re ikuai va'ekue, vexa'i re opena va'e kamixa puku py onhemonde ovya rami avi. Ha'e rami vy oo porã ju 'rã ha'e gui.

¹³ Omboa'ypa 'rã ita mba'emo ra'angaarã Egito vvy re omopu'ã mbyre, Bete-Semes py ikuai va'ekue. Oapypa 'rã guive oo Egito pygua kuery ruete peguare.’”

44

Egito vvy re judeu kuery ikuai va'e ojerovia e'ÿa re ijayvuague

¹ Ha'e gui SENHOR oayvu ombou Jeremias pe, judeu kuery Egito vvy re ikuai va'e ha'e javi reko re, Migdol tetã py, Tafnes, Mênfis ha'e Patros vvy re ikuai va'e re guive. Ha'e vy aipoe'i:

² “Po rami SENHOR ixondaro reta va'e, Israel kuery Ruete ijayvu: Pexa ma opa mba'e vai Jerusalém ha'e Judá re tetã ikuai va'e áry ambou va'ekue. Ne'exa, aÿ minha tekoa ve'ÿ ma opyta, ha'e py ikuai va'ekue jipoavei.

³ Ha'e kuery re ha'e nunga oiko mba'emo vai anho ojapoague re. Xembopoxy rive okuapy amboae ramigua tuuete re ovapa vy, ha'e va'e pe heakuã porã va'e oapy aguã. Ha'e nunga ma teĩgueve voi ha'e kuery oikuaa va'ekue'ÿ, neĩ peẽ kuery, peneramoĩ kuery voi oexa kuaa va'ekue'ÿ teĩ.

⁴ Xee ma ko'e' rai'i guive ha'e kuery pe ambou va'ekue xerembiguai profeta kuery, ha'e kuery pe aipoe'i aguã: 'Nda'evei gui nunga ojegerupy xee ajou vai va'e pejapoa rupi pendekuai aguã', he'i aguã.

⁵ Ha'e rami teĩ ha'e kuery noendu potai, neĩ ndojapyxakai gueko vai gui ojeko rerova e'ÿ aguã, amboae ramigua tuuete kuery pe mba'emo oapy okuapya gui guive.

⁶ Ha'e ramo mae ambou xepoxya ha'e namboaxyveia. Judá re tetã ikuai va'e áry ou, Jerusalém py tape ikuai va'e rupi guive. Ha'e ramo ombovaipa pyre, tekoe ve'ÿ opyta, aÿ minha jaexaa rami”, he'i.

⁷ Aÿ ma po rami ju ijayvu SENHOR ixondaro reta va'e, Israel kuery Ruete: “Mba'e re tu pendejeupe ae ri pejapo vaia rupi pendekuai? Mba'eta Judá kuery mbyte gui pemokanhymba avakue, kunhague, kyrĩgue ha'e okambu va'e kuery voi, peẽ kuery va'e regua oikove e'ÿ aguã.

⁸ Mba'e re tu xembopoxy teri pekuapy mba'emo pendepo py pejapoa py rive? Mba'eta mba'emo ra'angaa pe rive 'rã peapy heakuã porã va'e Egito vvy re peoague py. Ha'e rami py peẽ ae penhemokanhhy peovy, ha'e penhemoingo vvy regua kuery ojoi rei ha'e ojou vai va'erã.

⁹ Penderexarai ma teve peneramoĩ kuery reko vaiaque re, ha'e Judá pygua huvixa kuery avakue ha'e kunhague reko vaiaque re? Penderexarai teve pendera'xy kuery reve pendereko vaiaque re, ha'e Judá vvy re ha'e Jerusalém mbyte rupi ae pendekuaiague re?

¹⁰ Mba'eta aÿ peve peẽ kuery napenhemo'vvy'i, xerenonde teĩ pejererokyje rupi e'ÿ pendekuai, mba'eta xeguigua lei rupi e'ÿ pendekuai, pendeivy ha'e peneramoĩ kuery pe xeaivu aeja va'ekue rupi e'ÿ guive.”

¹¹ Ha'e rami vvy SENHOR ixondaro reta va'e Israel kuery Ruete aipoe'i: “Ne'exa, aÿ penderovai arova 'rã xerova pendere ajapo vai aguã, Judá regua kuery amokanhymba aguã.

¹² Ha'e rami vy aipe'apa 'rã Judá regua okuave'i va'e Egito vvy re ikuai aguã onhea'ã rei va'ekue. Ha'e ramo ha'e kuery omanomba 'rã ha'e py ae. Kyxe py ojukaa 'rã, e'ÿ vy karuai gui 'rã ho'a. Kyrĩgue'i ha'e tujakue'i okanhymba 'rã. Kyxe py, e'ÿ vy karuai gui omanomba 'rã. Ayvu vaipy 'rã ikuai, nhomondyipaarã, ojou vaipy ha'e ojoi rei py.

¹³ Mba'eta Jerusalém tetã re ajapoague rami ae xee ambopaga 'rã Egito vvy re ikuai va'e, kyxe, karuai ha'e mba'eaxy vaikue ambou vy.

¹⁴ Ha'e va'e gui ma mava'eve ndoo jepeai 'rã, Judá gui Egito vvy re ikuai aguã oo va'ekue regua. Ndoikoavei 'rã Judá vvy katy ojeyv va'erã, ha'e katy ju ojeyvxe teĩ. Ha'e katy ndojevyavei 'rã, amongue ete'i oo jepe va'ekue e'ÿ vy.”

Jeremias ayvu ombovai atã okuapyague

¹⁵ Ha'e gui Egito yvy re Patros py heta ikuai kunhague tuuete kuery mboae pe rive heakuã porã va'e rapya kuery. Kunhague ha'e rami ikuaia ma ime kuery oikuaa avi. Ha'e rami vy ome kuery reve ijaty okuapy, heta va'e kuery ha'e javi reve. Jeremias pe ha'e kuery ombovai vy aipoe'i okuapy:

¹⁶ — Nhanderuete rery rupi ayvu orevy remombe'u teĩ ore ma ndorojapoi 'rã ndeayvua.

¹⁷ Ha'e rami 'rãgue py oreayvua rami ae 'rã rojapo. Ha'e rami vy mba'emo heakuã porã va'e roapyve tema 'rã yva re orexyete oĩ va'e pe. Ixupe rome'ẽ avi 'rã mba'emo rykue orekuaiaty rami ae, oreramoĩ kuery ikuaiaague rami guive, oreruvixave kuery ha'e yvatekueve Judá regua tetã ikuai va'e rupi ha'e Jerusalém tetã mbyte rupi ikuaiaague rami. Mba'eta ha'e va'e jave ma orevy ndoatã va'ekue mbojape. Roiko porã va'ekue, mba'emo vai ndoikoi guive.

¹⁸ Ha'e gui aỹ ma orexyete yva pygua pe heakuã porã va'e roapyaty gui roipytu'u rire, ha'e ixupe mba'emo rykue norome'ẽvei ma rire opa mba'e oatapa orevy. Kyxe py roiko vaipa, karuai ha'e mba'eaxy vaikue gui guive.

¹⁹ Ha'e rami avi oreme kuery reve e'ỹ ri ty'y orexyete yva pygua pe rome'ẽ heakuã porã va'e ha'e mba'emo rykue roapy? — he'i okuapy.

Ha'e kuery ombopagaa aguã re Jeremias ijayvuague

²⁰ Ha'e ramo Jeremias ombovai heta va'e kuery ha'e javi: avakue, kunhague ha'e pavẽ rei ha'e rami ete ixupe ijayvu va'ekue guive. Ha'e vy aipoe'i:

²¹ — SENHOR nda'u hexarai ha'e ndoikuaa potai 'rã ri ha'e nungakue re, Judá regua tetã ha'e Jerusalém mbyte rupi mba'emo peapy pekuapyague re, peneramoĩ kuery voi, penderuvixa kuery, yvatekueve, ha'e pendeivyv jave rupi ikuai va'e ojapoague re?

²² Any, pendeko vai pekuapya ma SENHOR ndogueropo'akavei ma, ojegarupy anho pejapo ramo. Ha'e nunga rupi ae pendeivyv opyta tekoa ve'ỹ ha'e nhomondyipaarã, ha'e py jipoavei aguã, aỹ jaexaa rami ae.

²³ Mba'eta SENHOR rovai ae pejevavy heakuã porã va'e peapy pekuapya py. Napendu potai guive SENHOR ayvu. Ixuguigua lei ojapo uka va'ekue rupi e'ỹ pendekuai. Ha'e nunga rupi ae ri pendere ou mba'emo vai, aỹ jaexaa rami — he'i.

²⁴ Jeremias aipoe'ive ju heta va'e kuery pe, kunhague pe guive:

— Peẽ kuery Judá regua Egito yvy re pendekuai va'e ha'e javi, pejapyxaka ke SENHOR ijayvua re.

²⁵ Mba'eta SENHOR ixondaro reta va'e, Israel kuery Ruete aipoe'i: “Peẽ ha'e pendera'xy kuery reve ma pendejuru py anho e'ỹ pejevavya pekuapy, pendepo py ae pejapo penhemboayvuague. Mba'eta aipopeje: ‘Orexyete yva pygua pe ronhemboayvu rokuapy mba'emo roapy ha'e mba'emo rykue rome'ẽ aguã re. Ha'e gui oreayvuague rojapopa 'rã', peje va'ekue. Ha'e nunga rupi aỹ pejapopa na pendeayvuague, ojeupitypa ete aguã rami pejapo”, he'i.

²⁶ Ha'e rami avi Judá regua Egito yvy re pendekuai va'e, pendu ke SENHOR ayvu: “Ne'exa, xee ma aura 'rã xerery ipo'akapa va'e rupi ae, raka'e rã teĩ Egito yvy jave rupi Judá kuery juru gui nonhenduvei ma 'rã xerery rupi oura vy 'Anhetẽ ete SENHOR oikove va'e rery rupi aura’, he'i va'e.

²⁷ Mba'eta ne'exa, ha'e kuery re xee aikuaa pota 'rã mba'emo vai ambou aguã, mba'emo porã nda'ei. Ha'e ramo Judá kuery Egito yvy re ikuai va'e ha'e javi oiko vai 'rã kyxe py e'ỹ vy karuai gui, okanhymba peve.

²⁸ Amongue ete'i 'rã kyxe gui oo jepe vy Egito yvy gui ojevuy Judá yvy katy. Ha'e rã Judá kuery Egito yvy re ikuai aguã oo va'ekue mboae ma oikuaapa 'rã xeyvuu pa ojeupity va'ea, tyrã pa ha'e kuery ayvu.

²⁹ Pova'e nunga ajapo 'rã peikuaa aguã kova'e tekoa py rombopaga 'rãa, ha'e anhetẽ xeyvuague ojeupitypa 'rãa peẽ kuery re mba'emo vai ambou aguã regua”, he'i SENHOR.

³⁰ “Ne'exa, po rami 'rã peikuaa. Egito pygua huvixa Faraó Hofra hery va'e ma xee amboaxa 'rã hovaigua ijukaxea kuery po py, Judá pygua huvixa Zedequias minhã hovaigua ijukaxea Babilônia pygua huvixa Nabucodonosor po py amboaxaague rami ae”, he'i SENHOR.

45

Baruque pe Jeremias ayvu omombe'uague

¹ Josias ra'y Joaquim Judá pygua huvixa va'e irundy ma'etỹ re ma oĩ jave profeta Nerias ra'y Baruque ombopara oiny Jeremias ayvu kuaxia re. Ha'e gui ixupe ju Jeremias ijayvu vy aipoe'i:

² — Baruque, po rami SENHOR Israel kuery Ruete ijayvu ndereko re.

³ Ndee ma aipo're va'ekue: “Xee tu nda'ëvei ete aikovy! Mba'eta xee aiko axya áryve SENHOR ombou ndavy'aive aguã. Xekane'õ ma xepoaẽ riaea py, ndajoui apytu'u aguã”, 're va'ekue.

⁴ Ha'e ramo aipoe'i uka ndevy: “Po rami ijayvu SENHOR: Ne'exa, xee ma aitypa ju 'rã amopu'ã va'ekue, ha'e amondoro ju 'rã anhotỹ va'ekue. Ha'e nunga oiko 'rã yvy jave re.

⁵ Ha'e gui ndee ha'vy ndeyvateve nhea'ã teve? Enhea'ãve eme ha'e rami. Mba'eta ne'exa, avakue ha'e javi áry xee ambou 'rã mba'emo vai. Ha'e rã ndee ma rojapo 'rã nderecoverã rejou aguã rami, mamõ rã rei reoa py”, he'i SENHOR.

46

Egito pygua kuery rekorã re ijayvuague

¹ Po rami profeta Jeremias pe SENHOR ombou oayvu yvy regua kuery rovai.

² Egito yvy re ranhe ayvu oĩ, Egito pygua huvixa Faraó Neco xondaro kuery rovai. Mba'e ha'e va'e xondaro kuery re Babilônia pygua huvixa Nabucodonosor opu'ã vy ipo'aka. Carquemis tetã re ipo'aka Eufrates yakã yvýry, irundy ma'etý re ma Josias ra'y Jeaquim Judá pygua huvixa oĩ jave py. Ha'e vy aipoe'i:

³ “Pereko katu ke hu'y jokoarã ha'e nhomo'ãa tuvixa va'e. Ha'e vy tapeo joe pepu'ã aguã katy.

⁴ Pembokupe árygua kavaju, kavaju árygua kuery guive toimba. Ha'e vy ngora hatã va'e reve pejexa uka pavê. Pereko katu ke hu'y, penhemonde guive pexo regua py.

⁵ Ha'e rire teĩ mba'eta tu aexa okyje va'e ojevypa jogueravy rá? Mba'eta ipy'a guaxukueve re ipo'akaa ra'e. Ha'e ramo ha'e kuery ma guakykue re oma'ẽ e'ý re onhamba oje'oivy, jovaive-ive re imongyjaarã ombojere ovuy ramo”, he'i SENHOR.

⁶ “Ha'e kuery onha ratã teĩ nda'evei ojava ete aguã, ipy'a guaxukueve teĩ ndoo jepei. Mba'eta kuaray ijapu'a'ia katy Eufrates yakã yvýry rupi onhepyxanga vy ho'apa joguerupy.

⁷ “Mava'e kuery tu Nilo yakã oxyry atãa rami oẽ jogueruvy va'e, yakã yy omyĩ atã-atã va'e rami?

⁸ Egito pygua kuery ae ri Nilo yakã oxyry atãa rami oẽ jogueruvy va'e. Mba'eta ha'e kuery aipoe'i okuapy: ‘Nhaẽ vy jajao'ipa 'rã yvy jave rupi, nhambovaipa 'rã tetã ikuai va'e, ha'e pygua kuery ha'e javi guive’, he'i teĩ.

⁹ Neĩ ke kavaju árygua kuery, tapeo, pemondy heravy karóxa mboguataa kuery, ipy'a guaxukueve ha'e javi toẽmba avi. Etiópia pygua ha'e Pute pygua kuery voi oo hu'y jokoava reve, Líbia pygua kuery guyrapa oiporu kuaa va'e voi.

¹⁰ Mba'eta ha'e va'e ára ma SENHOR ára, SENHOR ixondaro reta va'e ngovaigua kuery ombopaga aguã. Ha'e nunga rupi omomba 'rã kyxe py. Ha'e ramo nhomomba 'rã inhakanhymba ha'e tuguy py oka'upa peve. Mba'eta SENHOR ixondaro reta va'e ae oa'anga jojuka aguã, kuaray ijapu'a'ia katy Eufrates yakã yvýry.

¹¹ “Ha'e gui Egito pygua rajy kuery, tapeo Gileade katy moã peru aguã. Ha'e rami avi moã pejou reta teĩ nda'evei, mba'eta moã jipoi penemongueraarã.

¹² Yvy regua kuery oendu ma okuapy penemoximbaarã ou rá, yvy jave rupi peneraxẽ rei nhendu ramo. Ha'e vy pendea pygua ipy'a guaxukueve onha jogueravy vy ojeapi 'rã ipy'a guaxukueve mboae re. Ha'e rami vy jojavi 'rã ho'apa.”

¹³ Ha'e gui po rami SENHOR ijavy profeta Jeremias pe. Babilônia pygua huvixa Nabucodonosor ou vy Egito yvy regua kuery re opu'ã aguã re ijavy.

¹⁴ “Pemombe'u ke pova'e ayvu Egito yvy re. Migdol py ke pendu uka, Mênfis ha'e Tafnes tetã py guive. Ha'e vy aipopeje 'rã: ‘Pejexa uka ke, peiko katupa, mba'eta kyxe omomba ma heravy pende'yvýry ikuai va'e ha'e javi', peje 'rã.

¹⁵ Mba'eta tu oitya ma penderuete ra'angaa Toro pejea? Nai'ã ranhei ma voi, SENHOR ae oity ramo.

¹⁶ SENHOR ma heta ete ojapo onhepyxanga vy ho'a aguã rami. Ha'e kuery jo'a-jo'a ho'a ovy vy aipoe'i 'rã: ‘Pevy ke, jajevypa ju nhaneretarã kuerya katy, nhanekyrĩ'iaague py, kyxe py nhanemombaa gui', he'i 'rã.

¹⁷ Ha'e py ma Egito pygua huvixa Faraó ojavykya rei vy ixupe 'Hevovo rei va'e rive', he'i 'rã okuapy, mba'emo ojapoa ára omboaxa rive rire”, he'i.

¹⁸ Ha'e gui ma Huvixa SENHOR ixondaro reta va'e hery va'e aipoe'i: “Anhetẽ ete xee ae rekove rupi aura vy aipoa'e: Ou 'rã peteĩ ipo'akave ete va'e, Tabor vyvty pavê gui yvatevea rami, ha'e Carmelo vyvty ye'ẽ yvýry oĩa rami ojekuaa porã va'e.

¹⁹ Ha'e nunga rupi Egito pygua rajy kuery, pereko katu ke penemba'e rei-rei peraa aguã escravo-rã pendereraa katy. Mba'eta Mênfis tetã ma ombovaipaa ma, omokanhymbaa ma avave rei noĩavei aguã rami.

²⁰ Egito yvy ma vaka ra'y iporãve va'e ramigua teĩ ou ma oiny mbytu kuaray ijapu'a'ia katy gui.

²¹ Ha'e ramo xondaro kuery perãta re ha'e kuery ojou va'ekue voi vaka omongyra pyre rami ikuai teĩ ojekupe rorova vy ojavapa 'rã jogueravy. Joe nupu'ãi 'rãe, mba'eta ha'e pygua kuery re ou imombaarã ha'e ombopagaa aguã ára.

²² Ha'e rami vy Egito pygua kuery ma mboi onha vy hevovo rei ovya rami 'rã onhendu, mba'eta ha'e kuery rovai hovaigua kuery ou ma oiny haxa reve, yvyra rake'oa rami.

²³ Ha'e kuery ojavapa 'rã ka'aguy inhana ete teĩ”, he'i SENHOR. “Ha'e kuery ma tuku-karu gui hetave 'rã, mbovy e'ý 'rã ikuai.

²⁴ Ha'e nunga rupi Egito pygua rajy kuery oximba ma, kuaray ijapu'a'ia katy guigua kuery po py omboaxaa rire.”

²⁵ Ha'e gui ma SENHOR ixondaro reta va'e, Israel kuery Ruete aipoe'i: “Ne'exa, ambopaga 'rã Nô tetã pygua kuery ruete Amom, ha'e gui Faraó, Egito yvy regua kuery, ha'e pygua tuuete ramigua kuery guive. Faraó reve ambopaga avi 'rã hexe ojerovia va'e kuery.

²⁶ Ha'e kuery amboaxapa 'rã ijukaxea kuery po py, Babilônia pygua huvixa Nabucodonosor po py ae, hembiguai kuery po py guive. Ha'e rami teĩ ha'e va'e rire ma ha'e py hekoo ju 'rã yma guare rami ae”, he'i SENHOR.

²⁷ “Ha'e nunga rupi xerembiguai Jacó kuery, pekyje eme. Israel kuery, penhemondy eme. Mba'eta xee rogueraa jepe 'rã yvy peoague gui mombyry teĩ, peneramymino kuery arupa ju 'rã yvy escravo-rã ogueraa ague gui. Ha'e rami Jacó kuery ojevypa ju 'rã, opytu'u ha'e ikuai porã'i 'rã, imongyjaarã jipovei ramo.

²⁸ Ha'e nunga rupi xerembiguai Jacó kuery, pekyje eme, mba'eta xee aiko pendereve. Xee amomba 'rã yvy regua kuery romondoukaague pygua. Ha'e rá peẽ kuery ma noromombai 'rã. Xee rombopaga 'rã teĩ ha'evea peve'i, mba'eta noromboeko porã rivei 'rã”, he'i SENHOR.

47

Filisteu kuery rekorã re ijayvuague

¹ Ha'e gui filisteu kuery regua ayvu ju profeta Jeremias pe SENHOR ombou va'ekue, Gaza tetã re Faraó kuery opu'ã e'ÿ mbove.

² Ha'e vy SENHOR aipoe'i: "Ne'exa, kuaray ijapu'a'ia katy gui yy opu'ã-pu'ã vy oxyry atã 'rã ouvy. Ha'e rami vy ojao'ipa 'rã heravy vvy ha'e ikuai va'e ha'e javi, tetã ha'e ha'e pygua kuery guive.* Ha'e ramo avakue ojapukai pavê 'rã, vvy re ikuai va'e ojae'opa 'rã okuapy,

³ mba'eta oendu 'rã kavaju pyambu ha'e hevovo rei ouvy, karóxa parãa ha'e iruéra nhe'ê reia. Ha'e rami vy tuu kuery noipytyvô kuaavei 'rã gua'y kuery, ipo kangypaa gui rive.

⁴ Mba'eta omombaa aguã ára ovaê ma oiny filisteu kuery, Tiro ha'e Sidom tetã pytyvôarã ikuai va'ekue rembyrekue omokanhymbaa aguã. Ha'e rami vy SENHOR omomba 'rã filisteu kuery, Caftor ye'ê pa'ũ re okuave'i va'ekue guive.

⁵ Ha'e ramo Gaza tetã pygua kuery onhopimba 'rã oakã, Asquelom pygua kuery voi okyririmba 'rã okuapy, vvyugua rupi ikuai va'e ha'e javi reve. Raka'e peve tu penhekyximba rei 'rã?

⁶ "Aipopeje: 'Ai SENHOR guigua kyxe, raka'e peve nda'u repytu'ua rupi e'ÿ 'rã reiko? Ejevy ju ke nderyru py, repytu'u ha'e rei rive ju aguã', peje tei.

⁷ "Ha'e rami avi kyxe, mba'exa tu repytu'u ta SENHOR ndevy mba'emo ojapo uka teri ramo? Mba'eta reo 'rã Asquelom tetã re, ye'ê vyýry ikuai va'e re guive, mamô rã nemondoukaa katy rei."

48

Moabe pygua kuery rekorã re ijayvuague

¹ Ha'e gui Moabe vvy regua ayvu ju SENHOR ixondaro reta va'e, Israel kuery Ruete ombou va'ekue: "Nda'evei ete 'rã Nebo tetã pygua kuery pe, ombovaipaa ma ramo. Quiriataim pygua kuery voi oximba 'rã, ha'e kuery re ipo'akaa rire. Tetã ikorapa va'e py voi oximba ha'e onhemondyipa 'rã okuapy.

² Mba'eta Moabe vvy re ndojouavei ma iporãgueve ikuai va'ekue. Hesbom tetã py jogueroayvua 'rã ha'e kuery rovai opu'ã aguã re. Ha'e vy aipo'ea 'rã: 'Peju ke, nhamomba, pete'i regua ikuai ve'ÿ aguã', 'ea. Ha'e ramo ndee Madmém tetã pygua kuery voi pekyririmba 'rã, ha'e kyxe revegua penderakykue monha 'rã.

³ Horonaim gui voi haxê rei va'e onhendu, ombovaipaa ha'e omombaa ete rire.

⁴ Ha'e rami py Moabe vvy ivaipa ma. Ha'e ramo ha'e pygua ra'y kue'iry ojapukai nhendu 'rã okuapy.

⁵ Luife vvy'ã katy oê ovyã rupi ojae'oa 'rã jogueravy opo'o e'ÿ re. Ha'e gui Horonaim vvy'ã guy katy oguejy ovyã rupi ipy'a vai nhendu 'rã jogueravy omokanhymbaa rã.

⁶ Pejava ke penderekove peraa jepe aguã, vvy piru reia py pete'i vvyra'i ha'e ae'i hi'ai va'e rami tei.

⁷ Ndee ae mba'emo rejapo va'e re ha'e mba'emo rerekopa va'ekue re rive rejerovia rire ndee voi ndepe'aa 'rã. Mba'eta tuete ramigua Quemos voi heraa 'rã, ixupegua sacerdote kuery ha'e yvatekueve guive.

⁸ Mba'eta pete'i-tei tetã re ou 'rã imbovaipaarã, ne'i pete'ive ma ndoo jepei 'rã. Ha'e ramo vvyugua rupi ikuai va'ekue omanomba 'rã, nhuũndy rupi ikuai va'e voi, ha'e rami aguã SENHOR ijayvu rire.

⁹ "Moabe pygua kuery pe tome'êã ipeporã, oveve vy oo jepe aguã. Mba'eta ha'e kuery retã ombovaipaa 'rã, avave rei noiavei ma 'rã ha'e py.

¹⁰ Ayvu vaipy toiko SENHOR pe kyre'ÿã rupi e'ÿ omba'eapo va'e, jouguy moêã py okyxe ndoiporui va'e.

¹¹ Mba'eta Moabe pygua kuery ma jypy'i guive ikuai porã'i va'ekue, vinho hyru py oky'akue reve opyta riae oiny va'e rami, ha'e hyru mboae py te'igüeve ndoguerovaai teri va'e rami, mba'eta ha'e kuery ma pete'igüeve ma voi escravã-rã heraa va'e'ÿ teri. Ha'e rami vy jypy guare rami ae hee ha'e heakuã porã tema va'e rami ikuai tei."

¹² Mba'eta SENHOR aipoe'i: "Ne'exa, ou ma oiny ára ha'e kuery rovai ambou aguã vinho onhoêã rami avi oi'pe'apa va'erã kuery. Ha'e ramo ha'e kuery onhoêmba 'rã hyru gui, hyrukue ombovopa 'rã guive.

¹³ Ha'e ramo Moabe pygua kuery oximba 'rã nguete ramigua Quemos re rive ojeroviaague gui, Israel kuery Betel py mba'emo re ojeroviaague gui oximba okuapyague rami.

¹⁴ Mba'exa vy tu aipopeje: 'Ore kuery ma orep'y'a guaxukueve, ava mbaraetekue joe ropu'ãã pyguarã meme orekuai', peje?

¹⁵ Mba'eta Moabe vvy ombovaipaa ramo ha'e pygua kuery oêmba ma jogueravy guetã gui. Ha'e pygua kunumigüe xondarorã oiporavo pyre voi heraapa ma ojukaa aguã katy", he'i Huvixa guaxuve, SENHOR ixondaro reta va'e hery va'e.

¹⁶ "Ovaê rai'i ma Moabe pygua kuery okanhymba aguã, ovaê rai'i ete ma mba'emo vai.

¹⁷ Ha'e kuery ijyýry pendekuai va'e pemboaxy ke, hery peikuaa va'e ha'e javi. Ha'e vy aipopeje: 'Mba'exa tu vvyra imbaraete, popoka iporã va'ekue opê vvyoi!' peje.

¹⁸ Ha'e gui Dibom pygua rajy kuery, peguejy ma penerenda porã gui, ha'e vvy py rive ju peguapy peiny. Mba'eta penderovai oê ma ouvy Moabe vvy mombaarã, peneretã ikorapa va'ekue guive ombovaipa.

¹⁹ Ha'e gui Aroer pygua kuery voi, pe'i ke tape vyýry, ha'e pexa pota peiny. Ha'e vy peporandu ke ojava ha'e oo jepe va'e kuery pe: 'Mba'e tu oiko?' peje.

²⁰ Ombovai 'rã: 'Moabe pygua kuery oximba ma okuapy, onhemondyipa rei guive. Penhendu ha'e pejapukai, ha'e Arnom yakã peve pemombe'u Moabe vvy ombovaipaa maa', he'i 'rã.

²¹ Nhuũndy ikuai va'e re voi ou imokanhymbaarã, Holom tetã, Jaza ha'e Mefaate áry,

*

47:2 "Yy ou" he'ia ma Babilônia pygua kuery joe opu'ã vy ou aguã re ijayvu vy.

²² ha'e gui Dibom, Nebo ha'e Bete-Diblataim áry,

²³ Quiriataim, Bete-Gamul ha'e Bete-Meom áry,

²⁴ Querieste ha'e Bozra áry, Moabe yvy re tetã ikuai va'e ha'e javi áry, mombyry ha'e ha'e'i rupigua guive.

²⁵ Omombaa ma Moabe pygua kuery po'akaa, ijyva omopẽmbaa ma", he'i SENHOR.

²⁶ "Pemoakanhymba oka'u va'e rami, SENHOR rovai onhemboyvate rei rire. Ha'e ramo Moabe pygua kuery onhembojere-jere 'rã nhoguenoiny ombojevayague rupi ae, ijojai reia kuery oexaa py.

²⁷ Mba'eta peẽ kuery nda'u Israel kuery napendejojai rei avi? Ha'e kuery nda'u imonda va'e kuery reve ri ombo'aa, pejojai reia rupi pendeayvu aguã?

²⁸ Ha'e nunga rupi Moabe pygua kuery, pejapa ke peneretã, itaova guýry rive ju pendekuai aguã. Itakua rupi apykaxu onhemboaitya rami rive pendekuai.

²⁹ Roendu ma Moabe pygua kuery onhemboyvate reia omombe'ua rã. Mba'eta opa mba'e py onhemboyvate ha'e ojejou porã rei okuapy opy'a py. Okuraxõ py ojee anho rei ojerovia."

³⁰ SENHOR aipoe'i: "Xee aikuaa ma ha'e kuery ojerovia reia. Ha'e rami teĩ ha'e rami ikuai ma mba'everã ndovareĩ. Ijapu reia ndoikoi 'rãe.

³¹ Ha'e nunga rupi ae xepoaẽ Moabe yvy re, Moabe py ikuai va'e ha'e javi re ajae'o, ha'e avakue Quir-Heres pygua re xepy'a vai.

³² Jazer kuery ojae'oa gui xee ajae'ove peẽ Sibma tetã pygua kuery uva rembypy hi'aĩ va'e rami pendekuai va'ekue re. Mba'eta jypy ma penderapo oo ye'e rovai peve, ye'e rembe Jazer oĩa peve ete oo va'ekue. Ha'e rami teĩ imokanhyarã ou ma nde'a kuaray puku jave py ikuai va'ekue re.

³³ Ha'e rami vy Moabe yvy gui oipe'apa ma ikuai rive reia ha'e mba'ety porã re ovy'a rei okuapy. Mba'eta ajapo uva ombiriaty gui vinho nonheẽvei aguã rami, ha'e ramo ndoikoavei ma 'rã ovy'a reve vinho ombiri va'erã. Ojapukai va'e ma ovy'aa rupi ve'ỹ 'rã ojapukai.

³⁴ Ha'e rami 'rãgue py oendua 'rã Hesbom pygua kuery haxãe, Eleale ha'e Jaza peve. Zoar guive oendua 'rã Horonaim ha'e Eglate-Selisias peve. Ninrim py yy oĩ va'e typa avi.

³⁵ Mba'eta Moabe gui amokanhymba 'rã yvy'ã rupi nguete ramigua pe mba'emo oapy va'ekue, heakua porã va'e rapyare kuery guive", he'i SENHOR.

³⁶ "Ha'e nunga rupi Moabe pygua kuery re xepy'a py xepoaẽ ratã mimby pu rami. Mimby rami ajae'o Quir-Heres pygua avakue re, ha'e kuery oguerokopa va'ekue okanhymba ramo.

³⁷ Ha'e nunga rupi ha'e kuery ha'e javi ojayapa o'a ha'e guendyva. Opo rupi guive onhekyximba, ha'e voxa vaikue py rive onhemama.*

³⁸ Moabe yvy jave rupi ikuai ojae'o va'e ngoo áry ha'e tetã mbyte rupi, Moabe amboa'ypa rire mba'emo ryrukue nhae'ũ guigua ndoipotaveipy rami. Ha'e nunga rupi ae ombovaipa pyre opyta", he'i SENHOR.

³⁹ "Ha'e ramo ha'e kuery hevovo rei okuapy. Moabe pygua kuery okupe rive oguerova okuapy oximba rei vy. Mba'eta ijyvýry ikuai va'e regua pe Moabe yvy itui ojojai reipy ha'e nhomondyipaarã."

⁴⁰ Mba'eta po rami SENHOR ijayvu: "Ne'exa, Moabe rovaigua kuery ma taguato ovevea rupi opepo oipy va'e rami ou.

⁴¹ Ha'e ramo tetã ikuai va'e oipe'apa, oo ikorapa va'ekue guive. Ha'e va'e ára ma Moabe pygua ipy'a guaxukueve va'ekue ipy'a tytypa rei 'rã kunha imemby raxy va'e rami.

⁴² Ha'e rami Moabe pygua kuery okanhymba 'rã, peteĩ regua ikuai ve'ỹ aguã, SENHOR rovai onhemboyvate rire.

⁴³ Moabe pygua kuery, pende'áry ou oiny tekora ve'ỹ, vvykua ha'e nhuã xã", he'i SENHOR.

⁴⁴ "Ha'e gui tekora ve'ỹ gui onha va'e ho'a 'rã vvykua py, ha'e vvykua gui oẽ ovy va'e ma nhuã xã re ju 'rã ho'a. Mba'eta Moabe pygua kuery áry ambou 'rã ambopaga aguã ma'ety", he'i SENHOR.

⁴⁵ "Ha'e gui oo jepe va'ekue ikangypa vy opyta 'rã okuapy Hesbom tetã yvýry. Ha'e rami teĩ Hesbom gui oẽ 'rã tata, Siom mbyte gui oẽ 'rã hendy vuku-a Moabe pygua kuery apyte rapyarã. Ha'e rami vy oapypa 'rã hevovo rei va'ekue inhakã áry rupi.

⁴⁶ Moabe pygua kuery, nda'evei ete 'rã pendeivy. Pekanhymba ma, Quemos guigua pendekuai va'e. Ha'e ramo pendera'y kuery escravo-rã heraapaa ma, nderajy kuery guive.

⁴⁷ Ha'e rami teĩ opaa ára py ma ambopyau 'rã Moabe pygua kuery ikuai", he'i SENHOR. Apy peve opa ma Moabe rovai ayvu ombou va'ekue.

49

Amom pygua kuery rekorã re ijayvuague

¹ Ha'e gui Amom ramymino kuery re ma po rami SENHOR ijayvu: "Xapy'a rei nda'u Israel kuery ndoikoi ri? Neĩ teive Israel ramymino teve ndoikoi? Ha'e rami ri ramo mba'e re tu tuuete ramigua Milcom pegua kuery ikuai Gade regua yvy re? Ha'e katy'i tetã ikuai va'e rupi voi ixupegua kuery ikuai."*

² Ha'e nunga rupi SENHOR aipoe'i: "Ne'exa, ovaẽ ma ára ajapo aguã Amom regua Rabã tetã pygua kuery mimby guaxu oendupa aguã rami, ha'e kuery re opu'aa ta ouvy rã. Ha'e ramo tetã opyta 'rã mba'emo ra'ykue aty rive, ha'e katy'i tekoa ikuai va'e okaipa 'rã guive. Ha'e gui Israel kuery ju oipe'a 'rã guetã jopyare kuery retã", he'i SENHOR.

* 48:37 Gueko rami vy ha'e rami 'rã ikuai onhemboaxya oendu vy. * 49:1 Milcom ma Amom pygua kuery ruete ramigua. Ha'e gui ixupegua kuery Amom regua ma Israel kuery retã oipe'a vy Gade yvy re hekoa, amboae kuery Israel kuery re opu'ã jave.

3 “Ha'e nunga rupi Hesbom pygua kuery, penhendu rei pekuapy, mba'eta Ai tetã ombovaipaa ma. Ha'e Rabá tetã pygua kuery, pejapukai ke ha'e penhemonde ajukue vaikue voxa guigua py. Pejae'o reve pejere-jere peneretã kora rupi, mba'eta penderuete ramigua Milcom ogueraa avi 'rã, ixupegua sacerdote kuery ha'e yvatekueve re.

4 Ha'e gui tajy onhe'ẽ raxave va'e, mba'e re tu vvyugua mba'emo porã oĩa ndeyvy re ikuai va'e rejou porã rupi anho rei ri ndeayvu? Mba'emo rerekopa va'e re anho rejerovia. Ha'e vy aipo're: ‘Mava'e tu ou 'rã xerovai?' 're.”

5 Ha'e nunga rupi SENHOR ixondaro reta va'e aipoe'i: “Nde'áry ambou 'rã nanderekorãvei rei aguã, ndeyvýry ikuai va'e ha'e javi gui. Ha'e rami vy peẽ kuery peteĩ-teĩ penemoxẽa 'rã heravy hovai katy, ndoikoai 'rã guive penha va'ekue penderuete ju va'erã.

6 Ha'e rami teĩ ha'e va'e rire ma ambopyau 'rã Amom kuery ikuaiã”, he'i SENHOR.

Edom pygua kuery rekorã re ijayvuague

7 Ha'e gui Edom pygua kuery re ma po rami SENHOR ixondaro reta va'e ijayvu: “Temã tetã py nda'u ndoiko ri hi'arandu va'e? Ha'e va'e kuery hexaraipa ma nda'u hi'arandu va'e omongetaague re? Tyrã pa hi'arandua okanhymba ete teve?*

8 Dedã py pendekoa va'e, pejava, pejere peovy, ha'e peike itakua ikuai va'e py. Mba'eta peẽ kuery áry xee ambou 'rã Esaú ramymino kuery penembopagaarã, pepaga aguã ára ovaẽ ma ramo.

9 Ha'e gui uva mono'õa kuery pendea py ou va'e rire ndoejai 'rãgue nda'u amongue uva xã? E'ý vy pyávy imonda va'e ou va'e rire oipota va'e anho'i ri nda'u ogueraa 'rãgue?

10 Ha'e rã xee ma aipe'apa rei 'rã Esaú kuery gui, ha'e onhemiaty ajou ukapa ramo nonhemi kuaavei ma 'rã. Ha'e rami vy hamymino kuery omokanhymbaa 'rã, ta'y kuery, ha'e'i rupigua kuery guive. Ha'e rami rire ndoikovei ma 'rã.

11 Peja ke tyre'ý kuery, ha'e rã xee anhangareko 'rã okuave aguã rami. Pendegua imeve'ý va'e kuery voi tojerovia xere.”

12 Mba'eta po rami SENHOR ijayvu: “Ne'exa, karo gui oy'u aguã rami e'ý ikuai va'ekue oy'upa ma. Ha'e rã ndee nda'u romboeko porã rive 'rã ri? Any, xee noromboeko porã 'rãe, ha'e ramo ndee voi rey'u 'rã.”

13 Mba'eta SENHOR aipoe'i: “Xerery rupi ae aura Bozra tetã opyta aguã re nhomondyipaarã, ojou vaipy, ombovaipa pyre ha'e ayvu vaipy. Ha'e katy'i tetã ikuai va'e voi opyta 'rã tekoa ve'ý meme, raka'e rã peve.”

Edom pygua kuery ojevavyague re ombopagaa aguã re ijayvuague

14 Ha'e gui SENHOR gui ayvu mboae ju aendu ombou va'ekue. Mba'eta vvy regua kuery pe peteĩ ayvu momb'euarã omondouka. Ha'e ramo aipoe'i 'rã: “Penhemboaty ke, tapeo ha'e kuery rovai, peiko katupa ke Edom vvy re pepu'ã aguã”, he'i 'rã.*

15 “Mba'eta ne'exa, vvy regua kuery mbyte rupi xee rojapo 'rã mbovy'i ete pendekuai aguã, ha'e avave rei napenemboeteavei aguã rami.

16 Mba'eta renhomongyjea ha'e renhemboyvate reia ndep'a re remoĩa py ndee ae rejekore. Itakua ha'e vvyty áry rupi reiko, ha'e taguato rami yvate ete rupi renhemboaty teĩ xee roity 'rã ha'e gui”, he'i SENHOR.

17 “Ha'e nunga rupi Edom vvy itui 'rã nhomondyipaarã. Pavẽ rei ha'e rupi oaxa va'e onhemondyipa ha'e ojojai rei 'rã jogueravy, ikuai axy ete rã oexa vy.

18 Mba'eta Sodoma ha'e Gomorra minha, ha'e tetã ha'e katy'i ikuai va'e amokanhymbaague rami avi Edom vvy re voi avave rei ndaekoavei 'rã, avave rei noĩavei 'rã ha'e py”, he'i SENHOR.

19 “Ne'exa, guary minha Jordão yakã vvyry ka'aguy oĩ va'e gui oẽ 'rã ouvy vexa'i nhuũndy hovoy rei va'e rupi okaru okuapy va'e re. Ha'e rami ae xee voi amondyipa vvyoi 'rã imondovy Edom pygua kuery. Ha'e rami vy ha'e py amoĩ 'rã aiporavo va'e rei. Mba'eta mava'e tu oiko xee rami etegua? Mava'e tu oiko xemboavyuarã? Mava'e joe opena va'e tu oiko xejokoarã?”

20 Ha'e nunga rupi pendu Edom rovai SENHOR onhembopy'aa, Temã pygua kuery rovai guive. Mba'eta mymba kuery regua kyrĩve'i va'e teĩ anhetẽ oipe'apaa 'rã, ikuaiaty guive ombovaipa 'rã ha'e kuery káuxa ae.

21 Ha'e kuery ho'apa rã vvy oryryipa rei 'rã tevovo onhendu va'e gui. Ha'e kuery raxẽa ma Ye'ẽ Pytã rupi peve 'rã onhendu.

22 Ne'exa, taguato ovevea rupi opepo oipyo ovya rami avi peteĩ oẽ 'rã ouvy Bozra tetã re. Ha'e va'e ára Edom pygua ipy'a guaxukueve ikuai va'ekue teĩ ipy'a tytypa 'rã okuapy, kunha imemby raxy va'e rami.

Damasco pygua kuery rekorã re ijayvuague

23 Ha'e gui Damasco tetã pygua kuery regua ayvu ma po rami: “Hamate ha'e Arpade pygua kuery oxĩmba rei 'rã okuapy. Mba'emo omombe'ua rã oendu vy onhemondyipa 'rã, ye'ẽ omyĩ reia rami avi ndopytu'u kuaavei 'rã okuapy.

24 Mba'eta Damasco pygua kuery ikangypa. Onhamba aguã ojere va'eri oryryipa rive okuapy. Nhemondyia ha'e haxy va'e anho oendu, kunha imemby raxy va'e rami.

25 Mba'eta tu Damasco tetã oejapaa, pavẽ ojou porã va'ekue ha'e xee voi arovy'a va'ekue ri!

26 Ha'e rami teĩ tetã mbyte rupi ho'apa 'rã kunumigüe. Ha'e va'e ára ha'e pygua avakue joe opu'ã va'ety omokyrirĩmbaa 'rã”, he'i SENHOR ixondaro reta va'e.

27 “Amoendy 'rã tata Damasco tetã kora re, huvixa Ben-Hadade ro guive imombaarã.”

Arábia pygua kuery rekorã re ijayvuague

²⁸ Ha'e gui SENHOR ijayvu Quedar ha'e Hazor yvy re tetã ikuai va'e re Babilônia pygua huvixa Nabucodonosor opu'ã aguã re. Ha'e vy aipoe'i: "Pepu'ã ke, tapeo Quedar yvy re, pemomba kuaray oua katygua kuery.

²⁹ Peipe'apa ha'e kuery rekoa, hymba kuery, ajukue oo ao'ia, imba'e rei-rei, hymba camelo kuery guive paraapa penemba'erã. Ha'e ramo ha'e kuery pe 'Jova-jovai katy gui ou penemongyjarã', 'ea 'rã ojoi rei vy.

³⁰ Ha'e nunga rupi Hazor py penderekoa va'e, pejavapa, tapeo mombyry, itakua rupi ju pendekuai", he'i SENHOR. "Mba'eta Babilônia pygua huvixa Nabucodonosor onhemongeta vy onhembopy'a peẽ kuery rovai opu'ã aguã re.

³¹ Ha'e gui peẽ Babilônia pygua kuery, pepu'ã ke. Tapeo peteĩ yvy regua ikuai porã'i ha'e mba'eve gui okyjea rupi e'ỹ ikuai va'e rovai", he'i SENHOR. "Ha'e va'e kuery retã re ma okẽ noĩ, ijokoa voi jipoi. Ha'e kuery ae'i ikuai va'e.

³² Ha'e kuery rymba camelo ma omoxãmbaa 'rã heravy, hymba vaka voi mbovy e'ỹ ikuai teĩ oipe'apaa 'rã. Ha'e rami vy yvytu oipejua katy rei amoai 'rã imondovy o'a apy ojaya va'e ha'e javi. Jova-jovai gui ambou 'rã imbovaipaarã", he'i SENHOR.

³³ "Ha'e rire ma Hazor tetã opyta 'rã jagua-tuvy nhe'ẽ ikuai atyrã rive, raka'e rã peve 'rã ivaipa. Mava'eve noĩai 'rã ha'e py, peteĩve avakue ma voi noĩavei 'rã."

Elão pygua kuery rekorã re ijayvuague

³⁴ Ha'e gui profeta Jeremias pe ayvu Elão pygua kuery rovai SENHOR ombou, Zedequias Judá pygua huvixa oĩ ypy'i jave py. Ha'e vy aipoe'i:

³⁵ "Po rami ijayvu SENHOR ixondaro reta va'e: Ne'exa, xee amopẽ 'rã Elão pygua kuery rapa, ha'e va'e rupi vy ipo'akapa rei ramo.

³⁶ Mba'eta Elão re ambou 'rã yvytu yva apy irundy oĩ va'e gui oipeju va'e. Ha'e rami vy amoaimba 'rã imondovy yvytu oipejua ha'e javi rupi. Ha'e ramo yvy ha'e javi rupi 'rã Elão guigua ojaya.

³⁷ Mba'eta ajapo 'rã ngoavaigua kuery renonde Elão pygua kuery oryryipa reve ojexa ukapa aguã rami, ijukaxea kuery renonde ae. Elão pygua kuery áry ambou 'rã mba'emo vai, xepoxya hendy va'e", he'i SENHOR. "Ha'e gui hakykue ju ambou 'rã kyxe revegua, omomba peve.

³⁸ Ha'e gui Elão py xerenda apena atyrã amoĩ vy amokanhymba 'rã ha'e pygua huvixa ha'e yvatekueve", he'i SENHOR.

³⁹ "Ha'e rami teĩ opaa ára py ma Elão pygua kuery arupa ju 'rã escravo-rã ogueraa ague gui", he'i SENHOR.

50

Babilônia pygua kuery rekorã re ijayvuague

¹ Ha'e gui pova'e ayvu ma Babilônia ha'e caldeu yvy re SENHOR omombe'u uka va'ekue profeta Jeremias pe.

² "Emombe'u ke pova'e yvy regua ikuaia rupi. Endu ukapa, emopu'ã bandeira-rã, ha'e emombe'u porãve. Eikuaa uka e'ỹ eme. Ha'e vy aipo're 'rã: 'Babilônia yvy ma oipe'aa ma. Ha'e ramo tuuete ramigua Bel nda'leveĩ nho, Merodaque voi ndovy'avei ma oikovy. Ha'e pygua ta'angaa ikuai va'e re ma oxĩmbaa anho oĩ, oryryipa oiny guive okyjepa vy.

³ Mba'eta ha'e kuery rovai jogueru kuaray ijapu'a'ia katy gui peteĩ regua Babilônia tetã mbovaipaarã. Ha'e ramo nda'ipoavei 'rã ha'e py, avakue ha'e mymba kuery onhamba jogueravy rire', 're 'rã."

⁴ Mba'eta SENHOR aipoe'i: "Ha'e va'e ára, ha'e va'e jave ma Israel kuery ojevypa ju 'rã jogueruvy, Judá kuery reve. Ojae'o reve 'rã oguata jogueruvy, SENHOR Nguuete oeka jevy vy.

⁵ Ha'e kuery oporandu 'rã tape Sião katy oo va'e re. Ha'e katy oma'ẽ reve anho 'rã aipoe'i okuapy: 'Peju, nhano'õmba ju SENHOR peguarã. Nhandekuai 'rã guexeve guarã ojapo va'ekue opa e'ỹ va'e, hexaraipy e'ỹ rupi', he'i 'rã okuapy.

⁶ Mba'eta xeivygua kuery ma mymba vexe'i okanhgyue rami ikuai. Ha'e kuery re opena va'erã omoĩ mbyre ojapo okuapy ojavy aguã rami rive, oejapa yvy'ã ikuaia katy rupi oguata rei aguã rami. Ha'e ramo yvy'ã ikuai va'e-va'e rupi oguata rei 'rã, okora ikuaiaty re hexaraipa rive.

⁷ Ha'e ramo ojou va'e rei ojuka 'rã. Ha'e vy hovaigua kuery aipoe'i 'rã: 'Jajukapa teĩ nanhandepo ky'ai 'rã, mba'eta ha'e kuery ae SENHOR rovai ojevavy rive. Hexe anho teko porã oĩ, tamoĩ kuery oarõ okuapy va'ekue', he'i 'rã.

⁸ Ha'e nunga rupi pejava Babilônia mbyte gui, pejepe'a caldeu kuery yvy gui. Mymba kuery renonde rupi kavara ava oo va'e rami peiko.

⁹ Mba'eta ne'exa, Babilônia yvy re xee ambou reta 'rã yvy regua kuery joe onhemoirũ va'e. Kuaray ijapu'a'ia katy oyvy itui va'e gui 'rã ou. Babilônia pygua kuery rovai ou 'rã opu'ã aguã, oipe'apa 'rã guive. Hu'y ma joe opu'ã kuaa porã va'e mba'e rami 'rã omombo, mba'eta ha'e kuery ndojevy rivei 'rã oipe'apa e'ỹ re.

¹⁰ "Ha'e rami py oipe'apa 'rã caldeu kuery yvy gui. Ipe'aa kuery oguerokopa rei 'rã", he'i SENHOR.

¹¹ "Ha'e nunga rupi peẽ kuery xeivygua yvy gui peipe'apa va'ekue pevy'apa rei pekuapy teĩ, vaka ra'y nhuũndy rupi opo-opo va'e rami pevy'a, kavaju ojeupixe va'e rami penhendu teĩ

¹² pendexy oximba ete 'rã, penekuavãare ndovy'ai ete 'rã.* Ha'e rami vy opyta 'rã yvy regua pavê gui nombotei vepy, tekoa ve'y, yvy piru reia ha'e avave rei noíaveia.

¹³ SENHOR ipoxy ramo ae 'rã noíai. Ha'e rami 'rãgue py opa rupi ojeapo 'rã tekoa e'ya. Ha'e rami rire Babilônia yvy rupi oaxa va'e rei tema onhemondyi 'rã, ojojai rei 'rã ovy mba'emo vai oikoague oexa vy.

¹⁴ Ha'e gui penderyxy porã ke Babilônia re pepu'ã aguã, penerembiporu guyrapa reve. Ha'e rami vy pemombo hu'y ha'e kuery re, pemombo e'y eme, SENHOR rovai ha'e kuery ojejavu rive.

¹⁵ Pejapukai tetã katy pembojere vy. Ha'e rami avi ha'e kuery ojejopy uka ma. Oo ikorapa va'ekue ho'apa ma, tetã kora hi'ai va'ekue oitypaa, ha'e rami ete SENHOR opoxya oexa uka ramo. Ha'e nunga rupi pembojagapa, ha'e kuery re ju pejapo joe ojapoague rami.

¹⁶ Babilônia tetã gui pemomba oma'etý va'e ha'e foice py mba'emo omono'õ va'e kuery. Ha'e kuery kyxe py nhomomba rire ha'e gui tojevy pete'i-te'i guetarã kuerya katy, pete'i-te'i tojava ovyvy katy ae.

¹⁷ Mba'eta Israel kuery ma vexe'i kanhygue rami ikuai, guary omonhamba va'ekue rami. Jypy ho'u va'ekue ma Assíria pygua huvixa, ha'e gui opa vygua ma Nabucodonosor ju omokãguepa."

¹⁸ Ha'e ramo po rami SENHOR ixondaro reta va'e, Israel kuery Ruete ijayvu: "Ne'exa, ambopaga 'rã Babilônia pygua huvixa, ijyvy guive, Assíria pygua huvixa ambopagaague rami avi.

¹⁹ Ha'e rã Israel kuery ma ajapo 'rã guekoa katy ae ju ojevypa aguã rami. Ha'e ramo ha'e kuery okaru ju 'rã okuapy nhuũndy Carmelo ha'e Basã regua rupi, Efraim regua vyvity rupi, ha'e Gileade yvy re ju ikuai vy okaru porã 'rã."

²⁰ SENHOR aipoe'i: "Ha'e va'e ára, ha'e va'e jave ma Israel kuery ojejavuague oekaa te'i ndojouavei 'rã. Judã regua ojevavya voi ndojouai 'rã, mba'eta aperdoa 'rã okuave va'erã aeja va'ekue.

²¹ "Ha'e gui ndee kyxe revegua, tereo naxenhe'ẽ rendui ete va'ekue yvy re, tereo ha'e va'e yvy regua opaga aguã rami ikuai va'e kuery rovai. Emokanhymba ete, ha'e gui ha'e kuery rakykue rupi reo vy embovaipave ju heravy. Ejapopa tema ajapo ukaa rami ae", he'i SENHOR.

²² "Yvy re oiko joe opu'ã nhendua ha'e nhomombaarã.

²³ Yvy jave rupi karavo mbotaa nhomboa'ypaare ma omboa'ypaa avi. Ha'e ramo Babilônia tetã opyta yvy regua kuery onhemondyipa aguã.

²⁴ Mba'eta ndee Babilônia pygua, ndere nhuã ajayvy vy rombo'a vyvoty, reikuaa e'y re. Xapy'a py rojopy vy rombo'a, SENHOR rovai reiko rive.

²⁵ SENHOR guembiporu omoí porãaty oipe'a vy ha'e gui oguenoẽ opoxya rupi oiporu va'erã. Mba'eta SENHOR ixondaro reta va'e ma mba'emo oguereko caldeu kuery yvy re ojapo va'erã.

²⁶ Ha'e gui yvy apy re pendekuai va'e, peju, pepu'ã hovai, peipe'a mba'emo omoí porãaty, pemombyta mba'emo ra'ykue aty rive, pembovaipa katuí'i, hembyre aguã rami e'y.

²⁷ Kyxe py pejukapa toro kuery ipy'a guaxukueve. Ha'e kuery toguejyppa ojukapaa aguã katy. Nda'evei ete 'rã ha'e kuery pe, hi'ára ou ma ramo ambopaga aguã.

²⁸ Ha'e gui Babilônia yvy gui onha vy oo jepe va'ekue ma Sião py ovaëa py omombe'u 'rã okuapy SENHOR Nhanderuete pegua templo oepy vy nhombopagaague.

²⁹ "Penoimba guyrapa revegua kuery Babilônia re oupa aguã. Pendeaty ijerea jovaive rupi, mava'eve too jepe eme. Pemboekovia pete'i-te'i ojapo vaiague. Ojapoague ha'e javi rami ae pembojaga, mba'eta SENHOR Israel kuery Ruete lky'a e'y va'e rovai onhemboyvate rei rive.

³⁰ Ha'e nunga rupi ha'e pygua kunumigue ho'apa 'rã tape rupi, avakue joe opu'ãa pyguare voi okyririmba 'rã ha'e va'e ára", he'i SENHOR.

³¹ "Renhemboyvate rei va'e, ne'exa, xee ma nderovai aiko", he'i SENHOR ixondaro reta va'e. "Mba'eta ou ma rombojaga aguã ára.

³² Ha'e ramo onhemboyvate va'ekue onhepyxanga vy ho'apa 'rã, imopu'ãarã ndoikoi 'rã guive. Ha'e rami vy ha'e kuery retã ikuai va'e re amboja 'rã tata jova-jovaive rupi omomba va'erã."

³³ Ha'e gui po rami SENHOR ixondaro reta va'e ijayvu: "Israel ha'e Judã kuery ojexavai okuapy. Heraare kuery oguereko tema guekoa py, nomondoukai ae.

³⁴ Ha'e rami te'i ha'e kuery repyará ma imbaraete, SENHOR ixondaro reta va'e hery va'e. Ha'e ma oikuaa pota 'rãe ha'e kuery re. Ha'e rami vy omombytu'u 'rã ha'e kuery yvy, ha'e rã Babilônia yvy ma nomombytu'u 'rãe.

³⁵ Ha'e rami 'rãgue py caldeu kuery áry ombou 'rã kyxe revegua, Babilônia pygua kuery ha'e yvatekueve áry", he'i SENHOR.

³⁶ "Kyxe ou 'rã ijayvu rive va'e kuery áry, ha'e ramo opyta 'rã inhakã porã e'y va'e meme. Ha'e pygua ipy'a guaxukueve áry guive ou 'rã, ha'e ramo onhemondyipa 'rã.

³⁷ Kyxe ou avi 'rã hymba kavaju kuery, joe opu'ãa pygua karóxa, ha'e joegua e'y-e'y ikuai va'e áry. Ha'e ramo kunhague rami meme 'rã opyta. Kyxe ou avi 'rã mba'emo porã omoí porãaty áry, ha'e ramo oipe'apaa 'rã.

³⁸ Kyxe ou avi 'rã yy itui va'e áry, ha'e ramo typpa 'rã. Mba'eta ha'e va'e yvy ma ta'angaa ojapo pyre pegua, ha'e py ikuai va'e na'inhakã porã okuapy ha'e nunga nda'evei ete va'e rupi vy rive.

³⁹ Ha'e nunga rupi Babilônia opyta 'rã mymba inharõ va'e tekoa e'ya regua ikuaiaty rive, jagua-tuvy nhe'ẽ, ha'e nunga. Guyra-nhandu voi ikuai 'rã ha'e py. Nda'ipoavei riae 'rã, ikuai jevy-jevy peve noíavei 'rã ha'e py.

* 50:12 Apy "Pendexy" he'ia ma ha'e kuery retã Babilônia re ijayvu vy.

⁴⁰ Mba'eta Nhanderuete Sodoma ha'e Gomorra ombovaipaague rami tetã ha'e katy'i rupi ikuai va'e reve, ha'ekue rami ae Babilônia py voi avave noíavei 'rã, nei peteive ava ma voi ndoikoai 'rã", he'i SENHOR.

⁴¹ "Ne'ixa, kuaray ijapu'a'ia katy gui ou ma oiny petei regua. Yvy apy gui yvy regua opu'ã reta 'rã jogueruvy, heta avi 'rã huvixa kuery.

⁴² Guembiporu ogueru 'rã guyrapa ha'e hu'y guaxu. Ha'e kuery ma ipy'a ratã va'e, nanhombaoxy kuaai vy. Ha'e kuery onhendua ma ye'ê revovo ratãa rami 'rã nhaendu. Kavaju áry jogueru, petei-tei hyxy porã'i 'rã pendere opu'ã aguã, Babilônia pygua kuery.

⁴³ Ha'e kuery reko omombe'ua rã Babilônia pygua huvixa oendu avi. Ha'e rami vy ipo kangypa. Tekorã ve'y anho oendu, kunha imemby raxya ramigua.

⁴⁴ Ne'ixa, guary ra'y minha Jordão yakã vyvry ka'aguy oĩ va'e gui ou 'rã vexa'i nhuĩ hovya rupi okaru okuapy va'e rovai, ha'e rami ae avi xee voi aipe'apa vyvoi 'rã Babilônia tetã gui, ha'e hekovia amoi 'rã xee ae amóixe va'e. Mava'e tu xee rami ete oiko? Mava'e tu xere oikuaa pota kuaa 'rã? Mava'e joe opena va'e tu xejoko 'rã?"

⁴⁵ Ha'e nunga rupi pendu pota Babilônia rovai SENHOR onhembopy'aa oikuaa uka va'e, caldeu kuery yvy re ojapo aguã ojee omoi va'ekue re. Mba'eta anhetê mymba kuery regua kyríve'i va'e tei oipe'apaa 'rã, ikuaiaty voi ombovaipa 'rã ha'e pygua kuery káuxa.

⁴⁶ Ha'e gui Babilônia oipe'aa rã onhendu va'e gui oryryipaa 'rã yvy jave rupi. Yvy regua ikuai rupi haxêa onhendu.

51

Babilônia pygua kuery ipo'akapa va'ekue oitypaa aguã re ijayvuague

¹ Ha'e gui SENHOR ijayvu po rami: "Ne'ixa, Babilônia pygua kuery rovai xee ambou 'rã vyvutu tetã mbovaipaará, Lebe-Camai pygua kuery rovai guive.

² Babilônia re ambou 'rã mba'emo pirekue mbovevea kuery. Ha'e va'e kuery ma omboveve vy oipe'apa 'rã ha'e va'e yvy gui. Mba'eta okanhya ára ou 'rã jova-jovai gui imbojexavaiaará.

³ Tove hu'y momboa kuery tomaxã guapa ngovaugua kuery hu'y momboa ha'e hu'y jokoa revegua rovai. Pejuka e'y eme ha'e kuery regua kunumigue, pemokanhymba ixondaro kuery ha'e javi.

⁴ Ha'e kuery omano vy to'apa caldeu kuery yvy re, tape ikuai va'e rupi topyaxapa oupy.

⁵ Mba'eta Israel ha'e Judá kuery ma Nhanderuete SENHOR ixondaro reta va'e ndoejai imeve'y va'e rami ikuai aguã. Ha'e rã caldeu kuery ma ipo ky'apa va'e ikuai Israel kuery ruete lky'a e'y va'e renonde.

⁶ Pejavapa ke Babilônia mbyte gui, petei-tei penderekove reve peo jepe. Penhemokanhy uka eme ha'e kuery reko vaia py. Mba'eta ovaê ma SENHOR ombopaga aguã ára. Ha'e rami vy omboekovia 'rã ha'e kuery ikuaiague.

⁷ "Babilônia ma karo ouro guigua SENHOR po py oĩ va'ekue. Ha'e va'e py ma omonga'upa va'ekue yvy regua kuery ha'e javi. Mba'eta vinho ha'e py oĩ va'e ma yvy regua kuery oy'u vy na'inhakã porãvei va'ekue.

⁸ Ha'e gui ma Babilônia oitya xapy'a ramo ivaiapa. Pejae'o hexe, ha'e peru moã ijai reguarã. Xapy'a rei okuera nho 'rã."

⁹ "Ha'e rami avi nhamongueraxe tei Babilônia va'eri ndokuerai ae. Peja ha'vy, petei-tei tapeo pendeyvy katy ae. Mba'eta yva re peve ovaê ha'e kuery opaga aguã, arai yvateve va'e peve.

¹⁰ SENHOR nhanemboeko porã ju. Peju, nhamombe'u Sião py SENHOR Nhanderuete ojapo va'ekue."

¹¹ "Pemoakua hu'y! Perekó katu hu'y jokoa! Mba'eta SENHOR omokyre'y Média pygua huvixa kuery Babilônia rovai guarã, omombaxe vy. Ha'e rami vy SENHOR joepy 'rã, ojeupegua templo oepya rupi.

¹² Pemopu'ã bandeira Babilônia tetã kora rovai pepu'ã aguã. Pemoi retave jopya kuery, pemoi nhoarõará, pema'ê mbegue joe pepu'ã xapy'a aguã. Mba'eta SENHOR ha'e rami aguã re onhembopy'a, ha'e gui ojapo ete Babilônia pygua kuery re ijayvuague.

¹³ Ndee Babilônia, yy heta rei va'e vyvry rei ha'e mba'emo rerekopa va'e, ovaê ma rekanhy aguã, rejoupaxe reiague reve.

¹⁴ Mba'eta ojee ae SENHOR ixondaro reta va'e oura vy aipoe'i: 'Anhetê ndere ambou 'rã avakue tuku-karu rami heta va'e nemonyëará. Ha'e ramo ha'e kuery ndere ovy'a rei 'rã uva umbiria kuery ovy'a reve ojapukaia rami', he'i.

¹⁵ "Ha'e ae ma ko yvy ojapo va'ekue opo'akaa rupi. Oikuaapaa rupi onhono yvy, ha'e o'arandua rupi oipyo yva.

¹⁶ Ha'e gui yapu onhendu atã aguã rami ojapo ramo yva re yy oĩ va'e omyĩ 'rã, ha'e yvy apy gui opu'ã 'rã ouvy vyvxi. Omoingo avi 'rã overa va'e oky aguã, oguenoê vyvutu guive oiaty gui.

¹⁷ Ha'e rã avakue ma na'arandui ha'e mba'eve ndoikuaai va'e meme. Ouro re omba'eapó va'e kuery voi oximba va'erã meme mba'emo ra'angaarã ojapoague re, mba'eta ta'angaa ikuai va'e ma anhetêgua e'y meme, ipytuê va'e'y guive.

¹⁸ Ha'e nunga ma mba'everã ndovarei va'e, ojoi rei pyrã rive. Nhombopagaa ára py okanhymba 'rã.

¹⁹ Ha'e rã Jacó peguarã Me'ëare ma ha'e rami e'y. Mba'eta ha'e ma opa mba'e moingoare, ha'e Israel kuery ma ixupegua ikuai. Hery SENHOR ma SENHOR ixondaro reta va'e.

²⁰ "Ha'e gui ndee Babilônia ma xerembiporu mba'emo mbotaa rami areko, joe apu'ã rupi aiporu va'ekue. Ndevy pe ambovaipa uka yvy regua, amokanhy uka huvixa kuery guive.

²¹ Ndevy pe amokanhy uka kavajui ha'e hi'árygua kuery. Amokanhy uka karóxa ha'e ija kuery.

²² Ndevy amokanhy uka avakue ha'e kunhague, tujakue ha'e ipyaukue, kunumigue ha'e kunhataigüe.

²³ Ndevy amokanhy uka vexa'i re opena va'e ha'e hymba kuery, vvy oikaraĩ va'e ha'e vaka omba'eapo va'e, vvy re opena va'e kuery ha'e yvatekueve guive.

²⁴ Ha'e rami teĩ pexaa py ae ambopaga 'rã Babilônia ha'e caldeu kuery ha'e javi, Sião tetã py ojapo vaiague re", he'i SENHOR.

²⁵ "Ne'exa, ndee ma vvyty nhomokanhya yvateve va'ekue, vvyty ha'e javi mokanhya reiko va'ekue ri xee ma nderovai aiko", he'i SENHOR. "Nderovai aupi 'rã xepo, itaova áry gui roity 'rã vvy'ã guy katy, ha'e reĩague ajapo 'rã mba'emo ra'ykue aty okai oiny va'e rive.

²⁶ Reĩague gui ma noguenoẽai 'rã ita, neĩ oo ytarã ha'e oo renderã, tekoa ve'ỹ rojapo rire raka'e rã peve guarã", he'i SENHOR.

²⁷ "Pemopu'ã bandeira vvy re, pemonha'ẽ mimby guaxu guive vvy regua kuery ikuai rupi. Penoĩmba vvy regua kuery Babilônia rovai guarã. Penoĩ Ananote, Mini ha'e Asquenaz tetã pygua kuery. Hovai guarã pemoĩ xondaro kuery ruvixa, peru ruka kavaju tuku-karu rami.

²⁸ Hovai guarã penoĩ vvy regua kuery, Média pygua huvixave kuery voi, ha'e pygua opena va'e ha'e huvixa kuery, openaa rupigua kuery ha'e javi guive."

²⁹ Ha'e gui vvy oryryi vy omyĩ rei oiny haxya re, mba'eta Babilônia rovai SENHOR onhembopy'aa oĩ atã va'e meme, Babilônia vvy tekoa ve'ỹ ojapo aguã, ha'e py noĩavei aguã.

³⁰ Ha'e ramo Babilônia pygua ipy'a guaxukueve teĩ nopu'avei 'rã joe, oo ikorapa va'e py tema 'rã onhemi. Na'imbaraetevei ma, kunhague rami ikangy va'e. Ha'e kuery ro okaipa, ha'e tetã kora rokẽ jokoia omopẽmbaa ma.

³¹ Ha'e nunga rupi kuaxia reraa ha'e ayvu mombe'uarã kuery jorire-rire oẽ 'rã oje'oivvy, Babilônia pygua huvixa pe omombe'u aguã jovaive gui hetã oipe'apaague,

³² yakã oaxaaty ikuai va'e re ipo'akapaague, oo ikorapa va'ekue oapypaague, ha'e gui joe opu'ãa pygua kuery ndaekorãveipa okuapya guive.

³³ Mba'eta po rami SENHOR ixondaro reta va'e, Israel kuery Ruete ijavyu: "Babilônia tetã opyta mba'emo moa'yiaty ombojoja pyre, opyrõmba porã'i mbyre rami, mba'eta hare'ỹ re ovaẽ 'rã omono'õa aguã ára", he'i.

³⁴ "Babilônia pygua huvixa Nabucodonosor ma oremokanhymba, oremou'ũmba ha'e oreapo mba'emo ryrukue oiporuve pyrã e'ỹ. Yy rupigua rami rive oremondoropa, ha'e vy guye omonyẽ tembi'u iporãve va'e orerereko va'ekue, ha'e gui ma orembojevypa ju.

³⁵ Ha'e gui ma Sião pygua aipote'i: "Tove Babilônia re toiko xeapo vaiague ha'e xero'o ombovaipaague ramigua." Jerusalém pygua aipote'i: "Tove caldeu kuery re toĩ xeruguy omoẽague re opaga aguã, te'i."

³⁶ Ha'e nunga rupi SENHOR aipoe'i: "Ne'exa, aikuaa pota 'rã pendereko re, ha'e roeepy 'rã pendeaapo vaiague re. Ha'e rami vy amboypa 'rã ha'e kuerya py yy ha'e ygua ikuai va'e.

³⁷ Ha'e ramo Babilônia opyta 'rã mba'emo ra'ykue aty, jagua-tuvy nhe'ẽ ikuai atyrã rive, nhomondyipaarã ha'e ojoi rei pyrã. Ha'e gui nda'ipoai 'rã ha'e py oĩ va'erã.

³⁸ Guary onhendua rami ha'e kuery onhendu teĩ, guary ra'y kuery okororõ reia rami.

³⁹ Ha'e gui ha'e kuery okaruxe ramo ha'e kuery pe ajapo uka 'rã peteĩ ngaru, amonga'upa 'rã guive. Ha'e ramo ha'e kuery ovy'apa rei ma vy okepa 'rã okuapy, raka'eve rã peve 'rã nomyivei", he'i SENHOR.

⁴⁰ "Ajapo 'rã vexa'i ra'y kuery ojukaa aguã katy ogejypaa rami avi ha'e kuery voi okanhymba aguã, vexa'i ha'e kavara rami ete.

⁴¹ "Ha'e rami py ae 'rã Babilônia tetã oitya. Oipe'aa xapy'a 'rã, vvy regua ojou porãmba teĩ. Babilônia opyta 'rã vvy regua kuery onhemondyipa reia va'e rive.

⁴² Babilônia áry rupi ye'ẽ ou ramo yai opu'ã-pu'ã vvy ojao'ipa 'rã.

⁴³ Tetã ikuai va'e ivaiapa, vvy voi ipiru ha'e tekoa ve'ỹ opyta avave rei oĩ e'ỹ aguã, ha'e rupi avakue ndoaxavei 'rã guive.

⁴⁴ Babilônia py ambopaga avi 'rã ta'angaa Bel. Ha'e vy ajapo 'rã mba'emo omokõ va'ekue ombojevypa ju aguã rami. Ha'e rire vvy regua kuery ndoovei 'rã ixupe ikuai aguã. Babilônia tetã kora guive oitypaa 'rã.

⁴⁵ "Ha'e nunga rupi xevyguu kuery, tapeopa ha'e kuery mbyte gui. Peteĩ-teĩ peraa jepe penderekovea SENHOR opoxya tapyĩ rami oexa uka va'e gui.

⁴⁶ Pendeporiau eme pendepy'a py, pekyje eme guive vvy jave rupi ayvu omombe'ua rã pendu vy. Mba'eta peteĩ ma'etã omombe'ua 'rã peteĩ ayvu, ha'e rã ma'etã jevy py amboae rami ju 'rã omombe'ua. Vvy re oiko 'rã ipo'aka va'e kuery meme joe opu'ãa.

⁴⁷ Mba'eta ne'exa, ovaẽ ma oiny ára mba'emo ra'angaa Babilônia pygua kuery ojapo va'ekue ambopagapa aguã. Ha'e ramo ijyvy ha'e javi rupi omoximba 'rã okuapy, ha'e vvy mbyte py ha'e va'e regua oipyxoa rã ho'apa 'rã.

⁴⁸ Ha'e ramo yva ha'e vvy, ha'e hexe ikuai va'e ha'e javi oguero'vya 'rã Babilônia tetã re oiko va'e, kuaray ijapu'a'ia katy gui imbovaipaarã ou ramo", he'i SENHOR.

⁴⁹ "Mba'eta Babilônia pygua kuery Israel kuery oipyxo vy oitypaague rami ae Babilônia py ju vvy jave guigua oipyxo vy oitypa 'rã.

⁵⁰ "Ha'e nunga rupi peẽ kuery kyxe gui peo jepe va'ekue, tapeo na, pepytave eme ha'e py. Mombyry peikoa py penema'endu'a ke SENHOR re, ha'e pemoĩ pendepy'a re Jerusalém katy peguata aguã.

⁵¹ Aitopeje: 'Nhaximba jakuapy, nhanembojaru reia rupi ijavyu va'e nhaendu rire. Nhanderova re ojekuaa nhaximbaa anho rei, mba'eta amboae regua ou vy SENHOR pegua oo iky'a e'ỹ va'e py oikepa ramo', peje.

⁵² Ha'e rami teĩ ou ma oiny ára mba'emo ra'angaa ha'e kuery pegua ambopaga aguã", he'i SENHOR. "Ha'e ramo oipyxoã rá onhendu rei 'rá okuapy ha'e kuery yvy ha'e javi rupi.

⁵³ Mba'eta Babilônia pygua kuery yvate ojeupi, ha'e oo ikorapa va'e yvate rupi omombarateve teĩ xea gui ou 'rá imbovaiparaã", he'i SENHOR.

⁵⁴ "Babilônia gui haxê va'e onhendu, caldeu kuery yvy gui onhendu ratã opa rupi ombovaipaa rá hevovo rei va'e.

⁵⁵ Ha'e gui SENHOR Babilônia ombovaipa vy omokyririmba 'rá onhendu va'e. Ha'e gui ma onhendu 'rá yv heta va'e yai revovo rami avi hovaigua kuery onhendu ratã rei va'e.

⁵⁶ Mba'eta Babilônia pygua kuery rovai ou oiny imbovaiparaã. Ha'e ramo ombo'apaa ma ipy'a guaxukueve, ha'e kuery rapa guive omopêmbaa ma. Mba'eta SENHOR Nhanderuete ombopaga 'rá, omboekovia 'rae.

⁵⁷ "Amonga'upa 'rá ha'e pygua huvixa kuery, hi'arandu va'e, yvy re opena va'e, huvixa irũ kuery ha'e ipy'a guaxukueve teĩ. Ha'e ramo ha'e kuery oke riaa 'rá okuapy, ndovyvei 'rá", he'i Huvixave SENHOR, ixondaro reta va'e hery va'e.

⁵⁸ Po rami SENHOR ixondaro reta va'e ijayvu: "Babilônia tetã kora hi'ai va'e ipo ruxu teĩ oitypaa 'rá. Hokê ikuai va'e voi yvateve teĩ tapyimba 'rá tata gui. Mba'eta yvy regua kuery omomba'emo pyre ojapo rive okuapy, tata peguarã rive ikane'õmba okuapy tetã ojapoa py", he'i.

⁵⁹ Pova'e ayvu ma Babilônia katy profeta Jeremias omondouka va'ekue Nerias ra'y Seraías, Maaséias ramymino va'e po py, Judá pygua huvixa Zedequias reve ogueraa jave, irundy ma'etỹ re ma oĩ jave py. Seraías ma hembiguaĩ opy rupi opena va'ekue.

⁶⁰ Peteĩ kuaxia re Jeremias ombopara vy omombe'u Babilônia áry ha'e rami ete mba'emo vai ou va'erã. Babilônia rovai ayvu ha'e javi ombopara.

⁶¹ Ha'e vy Seraías pe Jeremias aipoe'i: "Babilônia py revaê vy ne'exa, eroayvu ratã ha'e va'e ayvu ha'e javi.

⁶² Aipo're 'rá guive: 'SENHOR, kova'e tekoa re ndeayvu va'ekue remomba ete aguã re, ha'e py mba'eve re nda'ipoavei aguã, avakue neĩ mymba, ha'e raka'e rá peve ivaipa ete va'e opyta aguã re', 're 'rá.

⁶³ Kuaxia reroayvupa ma vy ejokua ju peteĩ ita re, ha'e emombo Eufrates yakã mbyte py.

⁶⁴ Ha'e vy aipo'ere: 'Nami 'rá Babilônia omoingea, noêvei 'rá guive, hexe mba'emo vaia ára ambou rire. Ha'e py ikuai va'e omanomba 'rá', 'ere."

Apy ma Jeremias ayvu oĩa opa ma.

52

2 Reis 24.18–25.22; 2 Crônicas 36.10–21; Jeremias 39.1–10

¹ Zedequias ma vinte e um ma'etỹ ogueroko jave py oĩ yvy huvixa. Ha'e gui onze ma'etỹ re opena Jerusalém py. Ixy rery ma Hamutal, Libna pygua Jeremias rajy.

² Zedequias ma ha'eve'ỹ va'e anho ojapo oikovy SENHOR renonde rupi, guyke'y Jeaquim ojapogue ha'e javi rami.

³ Ha'e nunga oiko Jerusalém ha'e Judá pygua kuery rovai SENHOR ipoxy ramo, guenonde gui oipe'apa aguã. Ha'e gui huvixa Zedequias ju opu'ã Babilônia pygua huvixa rovai.

⁴ Huvixa Zedequias nove ma'etỹ re ma huvixa oĩ jave, dez jaxya ha'e dez araa py ma Babilônia pygua huvixa Nabucodonosor ou Jerusalém py. Oxondaro kuery ha'e javi reve oupa vy ijaty okuapy tetã rovai rupi. Jovaive re omopu'ã imo'amy ijokoarã.

⁵ Onze ma'etỹ re ma huvixa Zedequias oĩ peve ojokopa tetã.

⁶ Ha'e gui irundy jaxya re nove araa py ma tetã ha'e javi rupi karuai oiko rá ha'e pygua kuery ndojouvei ho'u va'erã.

⁷ Ha'e va'e jave py ombokua tetã kora. Ha'e ramo ha'e va'e pygua avakue joe opu'ã pygua onhamba pyávy. Mokoĩ kora pa'ũ okê oĩ va'e rupi oje'oi, huvixa mba'e yvotyty oĩ va'e yvỹry tape oĩ va'e rupi, caldeu kuery tetã jovaive re ikuai teĩ. Ha'e rá huvixa ma yvy joja reia rupi tape oĩ va'e rupi onha.

⁸ Ha'e ramo caldeu regua xondaro kuery huvixa Zedequias rakykue oje'oi vy oupyty Jericó katy'i nhuũndya oĩ va'e py. Ha'e ramo hexevegua xondaro kuery oaĩmba vy oejapa oje'oivy.

⁹ Ha'e ramo ojopy vy ogueraa Ribla py Babilônia pygua huvixa oĩa py, Hamate yvy re. Ha'e ramo ijayvu ombopaga aguã re.

¹⁰ Ha'e rami vy Babilônia pygua huvixa ojukapa Zedequias ra'y kuery tuu oexaa py. Ribla tetã pyve ojukapa avi Judá regua yvatekueve.

¹¹ Ha'e rami vy ombupya Zedequias rexa. Ha'e vy mokoĩ corrente overa va'e guigua py ojokua reve ogueraa Babilônia katy. Ha'e py oĩ tema nhuã py omano peve.

¹² Ha'e gui dezenove ma'etỹ re ma Babilônia pygua huvixa Nabucodonosor oĩ jave py, peteĩ nhiruĩ jaxya re dez araa py ma peteĩ ou Jerusalém py, Babilônia pygua huvixa rembiguai, jopya kuery ruvixa Nebuzaradã hery va'e.

¹³ Ha'e va'e ma oapypa SENHOR pegua oo, huvixa rogue, ha'e Jerusalém tetã rupi oo ikuai va'ekue ha'e javi. Oapypa avi oo iporãgueve ikuai va'ekue.

¹⁴ Ha'e rami vy jopya kuery ruvixa reve caldeu regua xondaro kuery ou va'ekue oitypa okuapy Jerusalém tetã yvỹry rupi kora oĩ va'ekue.

¹⁵ Tetã py iporiaukueve ha'e amboae kuery opyta va'ekue ma jopya kuery ruvixa Nebuzaradã ogueraapa escravo-rã, Babilônia pygua huvixa pe ojejopy uka va'ekue guive.

¹⁶ Ha'e rā yvy re iporiaukueve'i regua ma jopya kuery ruvixa Nebuzaradā ojea ha'e py ae, uva nhotyārā ha'e mba'ety rupi omba'epo va'erā.

¹⁷ Ha'e gui caldeu kuery omopēmba okuapy SENHOR pegua oo ytarā overa va'e guigua hi'āi va'ekue. Ha'e vy overa va'e oī va'ekue ogueraapa Babilônia katy.

¹⁸ Ogueraa avi oja, pá, tapyī araa, heakuā porā va'e ryru, ha'e tembiporurā overa va'e gui ojapo pyre ha'e javi. Ha'e nunga Nhanderuete mboetea rupi oiporu va'ekue meme.

¹⁹ Jopya kuery ruvixa ogueraa avi karo, tapyī ryru, hy'a guaxu, oja, tata renda, heakuā porā va'e ryru, hy'a'i, ha'e gui tembiporu ouro ha'e prata guigua ha'e javi.

²⁰ Ha'e gui mokoī ooyta hi'āi va'ekue, mba'emo ojoiaty ha'e henda SENHOR pegua oo pyguarā Salomão ojapo va'ekue, ha'e nunga ha'e javi re overa va'e oī va'ekue poyia ma noa'ā kuaai.

²¹ Ha'e gui ooyta hi'āi va'ekue yvatea ma oito metros, ha'e rā ojerea rupi ma peteī ixā cinco metros raxa'i va'e oo. Ipo guaxua ma irundy kuā, inhvyvī rei va'e vy.

²² Hi'árygua rupi oī imbojeguarā overa va'e guigua. Peteī-teī yvatea ma mokoī metros raxa'i. Ha'e gui ijegua áry rupi oī kya ha'e yvyra'a ra'angaa overa va'e guigua.

²³ Ha'e rami ae ju amboae ijyta re yvyra'a ra'angaa oī avi. Ijyvýry rupi oī raka'e noventa e seis yvyra'a. Ha'e gui ijyvýry yvyra'a ra'angaa kya áry ikuai va'e ha'e javi vy cem.

²⁴ Jopya kuery ruvixa ogueraa avi sacerdote yvateve va'e Seraías, sacerdote yvyīve va'e Sofonias, ha'e gui okē rarōa kuery mboapy ikuai va'ekue guive.

²⁵ Tetā gui ogueraa avi peteī xondaro kuery ruvixa oī va'ekue, ha'e gui sete avakue huvixa mongetaaty tetā py ojou va'ekue, ha'e xondarorā ha'e py ikuai va'e rery ombopara va'ety, ha'e gui sessenta avakue ha'e pygua tetā rupi ojou va'ekue.

²⁶ Ha'e va'e kuery ma jopya kuery ruvixa Nebuzaradā ojopy vy ogueraapa Babilônia pygua huvixa Ribla py oīa py.

²⁷ Ha'e ramo Babilônia pygua huvixa oipyxo uka vy ojuka ukapa Ribla py, Hamate yvy re.

²⁸ Ha'e rami py Judá kuery escravo-rā ogueraa ijyvy gui. Nabucodonosor escravo-rā ogueraa va'ekue ma po rami: sete ma'etýa re ma três mil e vinte e três judeu kuery ogueraa,

²⁹ ha'e gui dezoito ma'etýa re ma Nabucodonosor oī jave py Jerusalém gui escravo-rā ogueraa avi oitocentos e trinta e dois ju,

³⁰ ha'e gui vinte e três ma'etýa re ma Nabucodonosor oī jave py jopya kuery ruvixa Nebuzaradā escravo-rā ogueraa avi judeu kuery regua setecentos e quarenta e cinco. Ha'e javi vy ogueraa raka'e quatro mil e seiscentos.

2 Reis 25.27-30

³¹ Ha'e gui Judá pygua huvixa Joaquim trinta e sete ma'etý re ma ombo'aa jave, vinte e dois jaxya re vinte e cinco araa py, Babilônia pygua huvixa Evil-Merodaque oī ypy'i vyve opoi uka. Ha'e rami vy omondouka ju nhuā py ombo'aague gui.

³² Hexeve ijayvu ha'eve vai'i reve. Ha'e vy omōi amboae huvixa kuery Babilônia py hexeve ikuai va'e gui omboetevea rupi.

³³ Ha'e ramo Joaquim oao nhuā py oiporu va'ekue omboekovia vy huvixa renonde ae okaru oikovy ko'ē nhavō, oikovea pukukue re.

³⁴ Ko'ē nhavō oikovea ja Babilônia pygua huvixa po gui ixupe ome'êa mba'emo oipota va'e repyrā, omano lpeve.

Jeremias nhogueronhemboaxya rupi ijayvuague
 Jeremias nhogueronhemboaxya lamentações [esta palavra em
 português] rupi ijayvuague

Kova'e kuaxia para re ma Jeremias ipy'a vaia rupi ijayvu Babilônia pygua kuery Jerusalem tetã oitypaague re. Ha'e rami teĩ kuaxia mbyte py ma ojerovia etea rupi ijayvuague avi oi:

“Mba'eta Senhor nhanemboaxy ramo ma nanhanembobaa,

mba'eta nhanemboaxya ma opa va'erã e'y.

Opa mba'e py ojeroviapy reiko vy

rexa uka pyau 'rã ko'ẽ nhavõ.

Xejeupe ae aipoa'e: 'Xevy guarã oĩ va'e ma Senhor ae.

Ha'e nunga rupi arõ tema 'rã hexe', ha'e.

Senhor opena porã 'rã harõa kuery re,

onhe'ẽ py oeka va'e kuery ae.

Ha'eva nharõ Senhor nhandereraa jepe aguã,

nhakyrirĩ reve” (3.22-26).

Jerusalém tetã ombovaipa ha'e oejapaa ague re ndovy'aaiaque

¹ Tetã yma heta riaa ikuaiague teĩ aỹ ma oejapaa ma!*

Aỹ ma kunha imeve'y va'e rami opyta,

yvy regua kuery omboeteve va'ekue ri.

Amboae tetã ikuai va'e gui huvixa rajy rami yvateve va'ekue ri

aỹ joupe rive ha'e kuery omomba'eapo nhea'aa.

² Ojae'o, ojae'o tema okuapy pyávy,

hexay oxyry tema 'rã hetovape rupi.

Ndoikoi imbopy'a porãarã

hembiaiyvu heta ikuai va'ekue ri.

Hembiaiyvu ikuai va'ekue ha'e javi ma anhetẽ rupi e'y oguereko,

ha'e hovai guarã rive ju ikuai.

³ Mba'eta Judá kuery ma escravo-rã ogueraapaa,

oguereko axya ha'e omomba'eapoa poyi anho rei.

Yvy regua kuery mbyte rupi ikuai py

ndojouĩ opytu'u aguã voi.

Ikuai axy reia py

hakykue monhaa kuery oupitypa ma.

⁴ Sião tetã katy tape oo va'e rupi ojae'oa,
mba'eta ndoikovei ma nhemboaty iky'a e'y va'e katy oo va'e.

Tetã kora rokẽ ha'e javi ombovaipaa.

Ha'e pygua sacerdote kuery ipoaẽ rei,

kunhataigue voi iporiaupa okuapy.

Tetã py ojexavaia anho oendu.

⁵ Ha'e rami rã hovaigua kuery ovy'apa rei okuapy,

ija'e'y va'e kuery ikuai porãmba rei,

ha'e pygua kuery anhetẽ rupi e'y riaa ikuai ramo

SENHOR omoingo axy rã oexa vy.

Ta'y kue'iry voi hovaigua kuery

omondyi heravy escravo-rã.

⁶ Sião pygua kuery gui oaxapa ma

iporãa oĩ va'ekue ha'e javi.

Ha'e py yvatekueve ikuai va'ekue voi

guaxu ho'u va'erã ndojouvei va'e rami ma ikuai,

ikangypa rei vy ho'apa rive 'rã okuapy

imonhaa kuery renonde py teĩ.

⁷ Aỹ mombyry ogueraa ague py ombojexavaia rã

Jerusalém guigua kuery ima'endu'a 'rã okuapy

omba'e rei-rei ogueroxy'a va'ekue re,

ymave rupi mba'emo oguereko va'ekue re,

heraa jepearã ndoikoi ramo

ngovaigua kuery po py ho'apaague re guive,

ha'e gui ho'a rã hovaigua kuery oexa vy

* 1: “Tetã” he'ia ma Jerusalém re ae ijayvu vy, Babilônia pygua kuery ombovaipa rive (2 Reis 24-25; 2 Crônicas 36; Jeremias 39, 52).

- ojojai rei okuapyague re.
⁸ Jerusalém pygua kuery ojevavy vaipa ete okuapy.
 Ha'e rami vy ae ojeguaru reipy ikuai.
 Imboeteare kuery ma nonhemoirüvei okuapy
 ipire reia rupi ikuai rã oexa vy.
 Ha'e kuery ae voi ipoae reve
 ojepe'a 'rã okuapy oxĩmba rei vy.
⁹ Ijao re ojekuaa ha'eve'yã,
 noexa'ãi guive va'ekue omombaa aguã re.
 Ha'e rami vy oitya rã onhemondyipa rei okuapy,
 ha'e avave rei ndoikoi imbopy'a porã jevyarã.
 SENHOR, exa ke aiko axya,
 mba'eta hovaigua kuery ijayvu vaive rive tema okuapy.†
¹⁰ Ore kuery mba'e rei-rei roguerovy'ave va'ekue ma
 orerovaigua kuery ojopy vy omba'erã ae ogueraapa.
 Roexa avi yvy regua kuery oike okuapy rã
 rombojeroviaatyiky'a e'y va'e py voi,
 "Nda'evei xevygua kuery ijatya py ha'e kuery ikuai avi aguã" aipo're va'ekue ri.
¹¹ Tetã pygua kuery ha'e javi ipoae 'rã okuapy
 tembi'u'i rekaa rupi ikuai vy.
 Omba'e rei-rei ha'e kuery oguerovy'ave va'ekue ome'ẽmba ma
 tembi'u ho'u va'erã rekovia, imbaraeteve'i ju aguã.
 SENHOR, exa ke, eikuaa pota guive,
 mba'eta xere nda'ija'eavei ma.
¹² Peẽ kuery tape rupi peaxa va'e,
 ha'e nunga pexa vy napendui ri ty'y oremboaxya?
 Pema'ẽ ha'e peikuaa pota.
 Oiko 'rã nda'u haxy va'e xee aendu va'e ramigua,
 xe'áry ou va'ekue ramigua ete?
 Mba'eta SENHOR opoxya oexa ukaa ára xemoingo axy avi.
¹³ Ha'e rami vy yvate gui tata ombou xekãgue ikuai va'e re
 ipo'aka ete vy.
 Ha'e gui xepy rupi ju kya omoĩ va'e py
 xerakykue katy gui xemoatã vy xereity.
 Ha'e rami vy xemomba tema heravy,
 xemomba'eaxy ko'ẽ nhavõ.
¹⁴ Ajevavyague ma opo py ae ojokua vy
 ojapo xe-cangarã rami.
 Ha'e vy oipopẽ va'ekue xeaju'y rupi peve ovaẽ.
 Ha'e rami py SENHOR omomba ma xembaraetea,
 xemoaxa guive xegui ipo'akave va'e kuery po py.
¹⁵ SENHOR omoaĩmba avi ma ipy'a guaxukueve
 xereve ikuai va'ekue.
 Ombou reta xerovai ono'õ va'erã,
 xea pygua kunumigue omou'ũmba avi aguã.‡
 Kunhata'i rami Judã pygua kuery ndojexavai va'ekue ri
 SENHOR opyrõ ukapa uva omou'ũaty py rami.
¹⁶ Ha'e nunga re ae xee ajae'lo,
 xerexay gui xerexa ndoexavei.
 Xegui ojepe'a ma xembopy'a guaxuarã
 xembaraete ombopyau 'rã va'ekue.
 Xera'y kuery voi ojexavai reia rupi ikuai,
 hovaigua ipo'aka ramo.
¹⁷ Sião pygua kuery opo oupi teĩ
 avave rei ndoikoi ipytyvõarã.
 Mba'eta Jacõ regua kuery re SENHOR ijayvu rire
 ha'e katy'i rupi ikuai va'e hovaigua ju ikuai.
 Ha'e ramo Jerusalém tetã pe ha'e kuery
 "Ha'eve'y va'e" he'i okuapy.
¹⁸ Ha'e rami avi SENHOR ma heko porã va'e,
 ha'e rã xee ma nanhe'ẽ renduxei va'ekue.

† 1:9 Jeremias "Aiko axya" he'i mba'eta ha'e ae voi opyta Judã yvy re Babilõnia pygua kuery ndogueraapai va'ekue reve (Jeremias 40.1-6).

‡ 1:15 Apy "Xee" he'ia ma Jerusalém ae ijayvua rami Jeremias ijayvu vy, ojee e'y.

- Peê vvy regua kuery ha'e javive, pendu ke,
pema'ê guive haxy aendu va'e re.
Xea pygua kunhataigue ha'e kunumigue
ogueraapaa ma escravo-rã.
- ¹⁹ Xeirũ kuery aenoĩ
teĩ ha'e kuery xembotavy.
Xea pygua sacerdote ha'e nhomongeta va'ety kuery voi
omanomba tetã rupi,
tembi'u rekaa rupi ikuai vy
imbaraetepa'i ju aguã.
- ²⁰ Ema'ê SENHOR, mba'eta xee ajexavai.
Xenhe'ê py nda'evei ete aikovy,
xekuraxõ py ndaxerekorãvei ma xeryepy rupi,
opa mba'e py noronhe'ê rendui rire.
Oka rupi xera'y kuery ojukapaa kyxe py,
ha'e rã opy rupi ma mano anho oiko.
- ²¹ Xepoaëa onhendu
teĩ avave rei ndoikoi xepytyvõarã.
Mba'emo vai aendua xere ija'e'y va'e kuery oikuaa vy
ovy'a reipa okuapy, ndee xemoingo axy ramo.
Ha'e rami avi ára ndeayvuague ovaë ramo
xee aiko axya rami avi ha'e kuery voi ikuai axy 'rã.
- ²² Tove ha'e kuery ojevavyague tojekuaapa nerenonde.
Ereko ha'e kuery voi xere rejapoague rami,
xee anhetê rupi e'y aikoa py.
Mba'eta xepoaë vaipa ete,
xekuraxõ opa rai'i ma.

2

“ SENHOR gui ae ou Sião pygua ikuai axy aguã”, he'iaque

- ¹ Arai rami SENHOR ojao'i Sião pygua kuery opoxya py.
Yva gui oity Israel kuery po'akaa vvy py,
Opoxya oexa ukaa ára ovaë ramo
na'ima'endu'vei ipy renda oĩ va'ekue re.*
- ² Ha'e rami vy SENHOR omboaxy e'y re
ombovaipa Jacó regua kuery rekoa ha'e javi.
Opoxya rupi oity
Judá kuery ro ikorapa va'ekue.
Yvy rupi oitypa, nombovarevei ae
yvatekueve ha'e openaague.
- ³ Opoxya py omomba Israel kuery po'akaa ha'e javi.
Hovaigua kuery ou teĩ omboapu'a ju oiporu kuaa regua.
Ha'e vy Jacó kuery rovai imoendyarã ombou
tata rendy vuku ijyvyry rupi oapypa va'erã.
- ⁴ Ha'e kuery re oipira guapa hovaigua rami.
Hovaigua rami ete onhemomburu oiporu kuaa regua re.
Ha'e vy omokanhymba iporã va'ekue ha'e javi.
Tata rami opoxya omonhemboja Sião tekoa áry.
- ⁵ Hovaigua rami SENHOR oiko vy
omokanhymba Israel kuery.
Ombovaipa huvixa kuery ro ha'e javi,
oo ikorapa va'ekue oitypa.
Ha'e vy Judá kuery ikuai py omboetave tema
ojae'o ha'e ipy'a vai va'e.
- ⁶ Ojeupegua templo voi ombovaipa vyvoi
mba'emo rogue'i onhoty mbyre rami rive.
Ombovaipa ojeupegua kuery ombojeroviaaty.
SENHOR ojapo orerexaraipa aguã rami
Sião py ngaru rojapo ha'e sábado ára romboeteague re.
Opoxya rupi omboyke avi
huvixa ha'e sacerdote ikuai va'ekue.
- ⁷ SENHOR ndoipotavei ojeupegua altar,

* 2:1 “Ipy renda” he'ia ma Jerusalém py templo oĩ va'ekue re ijayvu vy (Salmo 132.7).

- ojepegua oo icy'a e'ÿ va'e ndojou porãvei vy.
 Hovaigua kuery po py omboaxa
 oo tuvixakueve kora.
 Ha'e ramo SENHOR pegua opy rupi ha'e kuery ojapukai okuapy
 ngaru oikoa ára py rami.
- ⁸ SENHOR ojee omoí avi
 Sião tetã kora ombovaipa uka aguã.
 Ha'e rami vy omoatã uka ixã mba'emo a'äärã,
 ndoipe'ai guive opo ombovaipa e'ÿ ja.
 Ojapo kora ha'e imbotya opurupa rei aguã rami,
 ha'e nunga ha'e javi ikangypave ovy.
- ⁹ Kora rokẽ voi oitypa yvy rupi.
 Okẽ jokoã voi omopẽ, omboa'ypa ete.
 Ha'e pygua huvixa ha'e yvatekueve reve ma
 yvy regua ikuaia rupi rive ikuai,
 lei oikuaa e'ÿ va'e ikuaia rupi,
 ha'e profeta kuery pe ma SENHOR ndoexa ukavei mba'eve.
- ¹⁰ Sião pygua nhomongeta va'ety kuery ma
 okyrirĩmba reve oguapy okuapy yvy py.
 Oakã re omoí okuapy yvy ku'i,
 ajukue vaikue py rive onhemonde reve.
 Jerusalém pygua kunhataigue voi
 oakã oity okuapy yvy peve.
- ¹¹ Xerexay py rive xerexa nda'evevei ma,
 xenhe'ẽ py ndaxerekorãvei aikovy,
 xekuraxõ voi ojero'a oiny aiko axy ramo,
 xevyguã kuery omombaa ague re xepy'a vaia py.
 Mba'eta kyrĩgue okambu'i va'e voi omanomba
 tetã rupi tape ikuai va'e rupi.
- ¹² Oxy kuery pe kyrĩgue aipoe'i:
 “Mamo nda'u jajou 'rã mbojape ha'e vinho?”
 he'i okuapy teĩ tetã rupi tape ikuai va'e rupi,
 ha'e rami teĩ kyxe gui rami ho'apa okuapy,
 ha'e rami e'ÿ vy oxy kuery jyva áry oĩ reve
 onhe'ẽ oeja ovy.
- ¹³ Ndee Jerusalém pygua, marã rami tu xee rombovai ta?
 Ndee Sião pygua, mba'e nunga re tu rombojoja 'rã,
 mava'e re tu romboje'a 'rã rombopy'a porã aguã?
 Mba'eta nemombaarã ou va'e ma ye'ẽ rami tuvixa.
 Mava'e tu nepytyvõ 'rã?
- ¹⁴ Ndea pygua profeta kuery ma ndevy pe omombe'u
 oexa ra'u va'ekue ramigua mba'eve ovare'ÿ va'e.
 Ha'e rã ndereko vaia re ma ha'e kuery nda'ijayvui
 nemoingo porã ju aguã.
 Ha'e rami 'rãgue py oexa ra'u va'ekue ramigua rive omombe'u vy
 ojapo escravo-rã ndereraa aguã rami.
- ¹⁵ Ha'e nunga rupi tape rupi oaxa va'e kuery ma
 ojepopete ha'e oakã ombovava reve oje'oi
 Jerusalém pygua kuery ojoi rei vy.
 “Peva'e tetã pe teve 'Pavẽ gui iporãve va'e,
 yvy jave regua oguerovy'a va'e', 'ea va'ekue?’ he'i oje'oivy.
- ¹⁶ Ndere ija'e'ÿ va'e kuery
 ojuru oipe'a 'rã nderovai,
 ndejojai rei reve haĩ jekyty rei 'rã okuapy.
 Ha'e vy aipoe'i 'rã: “Nhamondoropa ke.
 Anhetẽ ete, kova'e ára ae nharõague.
 Ojeupity rã jaexa ma”, he'i okuapy.
- ¹⁷ Mba'eta SENHOR ae ojapo onhembopy'aague.
 Yma guive nderovai ijayvuague
 ojapo ojeupitypa aguã rami.
 Ha'e rami vy nemboaxy e'ÿ re ndereity.
 Ojapo nderovaigua kuery ndere ovy'apa rei aguã rami,
 ha'e kuery ombopo'akapave vy.
- ¹⁸ Jerusalém pygua kuery okuraxõ py ojapukai okuapy SENHOR pe.

- Ndee Sião tetã kora,
nderexay toxyry yakã'i rami,
ara py ha'e pyávy.
Epytu'u eme, nderexa topytu'u eme ojae'oa gui.
- ¹⁹ Epu'ã ke, eĵapukai pyávy
pytũ ypy'i ramove.
SENHOR renonde enhoẽ yy rami ndepy'a re oĩ va'e.
Ixupei eupi ndepo ndera'y ha'e nderajy kue'iry rekove re.
Mba'eta ha'e kuery ma karuai gui rive ho'apa okuapy
tape ikuai va'e ha'e javi rupi.
- ²⁰ Ema'ẽ SENHOR, ha'e eikuaa pota
marã ramigua kuery ha'e rami ete remoingoa re!
Mba'eta kunhague ho'u 'rã teve oikuavã va'ekue ae,
omemby kuery oayvua'i rupi ogueroko va'ekue?[†]
Ha'e rami e'ỹ vy SENHOR pega oo iky'a e'ỹ va'e py
ojukapaa 'rã teve sacerdote ha'e profeta kuery?
- ²¹ Mba'eta kunumigue ha'e tujakue'i re'õgue
yvy rupi ikuai tape ikuai va'e rupi.
Xea pygua kunhataĩgue ha'e kunumigue
ojukapaa kyxe py.
Ndee ae ma rejuka uka ndepoxya ára py.
Remboaxy e'ỹ re rejuka uka.
- ²² Opa rupi gui rembou xemongyĵearã,
ndevyguá nhemboaty oikoa py rami.
SENHOR opoxya oexa ukaa ára ma
ndoikoi oo jepe va'e nei opyta va'erã.
Mba'eta hovaigua kuery omomba ma
xee ayvua'i rupi amongakuaa va'ekue.

3

Ojexavaia re ĵayvuague

- ¹ Xee ma ava jexavai aendu va'ekue
Nhanderuete opoxya rupi yvyra po'i'i ombou rã.
- ² Mba'eta xereraa vy ojapo karamboae pytũ rupi aiko aguã,
hexakãa rupi e'ỹ.
- ³ Mbovykue rei e'ỹ xerovai omoĩ opo,
ára pukukue re.
- ⁴ Omoxorĩmba xero'o, xepire voi.
Xekãgue omopẽmba guive.
- ⁵ Xerovai omopu'ã xejokoarã kuery.
Veneno ha'e haxy va'e py ae xejoko.
- ⁶ Ojapo pytũa py xerekoa aguã rami,
raka'e rã peve guarã omano va'ekue rami.
- ⁷ Kora py xejoko rã nda'evevei ma aẽ aguã.
Corrente overa va'e guigua py xejokua.
- ⁸ Aĵerure ha'e aĵapukai teĩ
noendui anhembo'ea.
- ⁹ Ita guaxu omoatyrõ mbyre py ojopia xerape,
omokarẽ rei guive.
- ¹⁰ Xerarõ oiny urso oma'ẽ mbegue va'e rami,
ha'e xivi onhemi oiny va'e rami avi.
- ¹¹ Ha'e rami vy xerape gui xepe'a xapy'a vy xemboa'ypa.
Ombovaĩpa pyre rami xereja inony.
- ¹² Guapa oĩpira vy
xemoĩ guembiarã.
- ¹³ Xekuraxõ re oipyxo
ngu'y hyru guigua py.
- ¹⁴ Xeapo xeretarã kuery ha'e javi xejojai aguã rami.
Ára pukukue re xembojaru rei okuapy.
- ¹⁵ Jexavaia re anho xemongaru,
xevy ho'u uka reta haxy va'e.
- ¹⁶ Xeapo ita ra'y re xeraĩ amopẽmba aguã rami.

[†] 2:20 Ha'e nunga ae oiko tetã ojokopaa rã. Tembi'u oata rã ixy kuery ho'u omemby kuery ae (Jeremias 19:9; Levítico 26:29).

- Xeao'i tanhimbu py rive.
¹⁷ Xenhe'ê gui oipe'a aiko porã aguã va'ekue.
 Ha'e ramo xerexarai iporã va'e aexaague re.
¹⁸ Ha'e rami vy "Opa ma xeporãague,
 SENHOR aarõague voi", ha'e.
¹⁹ Nema'endu'a nho ajexavaia ha'e ajae'o aikovya re,
 haxy va'e ha'e veneno ay'u va'e re guive.
²⁰ Xee ma ha'e nunga re xema'endu'a riae aikovy xenhe'ê py.
 Ha'e ramo xeryepy rupi xenhe'ê nda'evei ju.
²¹ Ha'e rami teĩ xema'endu'axe ju
 pova'e nunga arõ aikovy va'e re.
Nhanderuete omboaxya rupi oipytyvõ aguã re ojerureague
²² Mba'eta SENHOR nhanemboaxy ramo nanhanemombaai,
 mba'eta nhanemboaxya ma opa va'erã e'ỹ.
²³ Opa mba'e py ojeroviapy reiko vy
 rexa uka pyau 'rã ko'ê nhavõ.
²⁴ Xejeupe ae aipoa'e: "Xevy guarã oĩ va'e ma SENHOR ae.
 Ha'e nunga rupi arõ tema 'rã hexe", ha'e.
²⁵ SENHOR opena porã 'rã harõ kuery re,
 onhe'ê py oeka va'e kuery ae.
²⁶ Ha'eve nharõ SENHOR nhandereraa jepe aguã,
 nhakyrirĩ reve.
²⁷ Nhandevy pe ha'eve
 nhanekunumi teri reve canga jexavaia regua jaropo'aka kuaa.
²⁸ Ha'e rami vy tajaguapy nhande ae'ia py, tanhakyrirĩ nhainy,
 mba'eta ha'e va'e canga ae nhandere Nhanderuete omoĩ va'e.
²⁹ Tajajero'a nhandero va'yvy ku'i re omovaẽ peve.
 Xapy'a rei ma oiko nho 'rã nharõ jaikovy va'ekue.
³⁰ Tanhaunga uka nhandero va'nhaneungaxe va'e pe.
 Tanhaendu rive opa marã nhandejojai reia teĩ.
³¹ Mba'eta SENHOR ma
 nanhandereja riaei 'rã.
³² Xapy'a rei nhanemomboraiu ranhe teĩ
 nhomboaxy ete va'e vy oexa uka nho 'rã nhanemboaxya.
³³ Mba'eta nhomoingo axyxre reia py e'ỹ
 ombojexavai avakue ra'y kuery.
³⁴ Xapy'a rei amongue opyrõ imoiny 'rã
 nhuã py ikuai va'e re,
³⁵ ha'e rami e'ỹ vy Yvate ete va'e renonde teĩ
 ha'eve'ỹa rami oikuaa pota 'rã joe,
³⁶ ha'e rami e'ỹ vy avakue ojerure rã oendu rive 'rã,
 teĩ SENHOR ndoexai 'rã teve ha'e rami oikoa?
³⁷ Mava'e ayvu rupi rive tu mba'emo oiko 'rã,
 SENHOR omoingo e'ỹ rã?
³⁸ Yvate ete va'e gui nda'undoiko 'rã ri
 mba'emo vai ha'e iporã va'e?
³⁹ Mba'e re tu ha'vy avakue imarã va'e ndojou porãia rupi ijayvu,
 ojevavyague re ombopaga rã?
⁴⁰ Jaikuaa pota ke jaikoa re ae.
 Ha'e gui jaikuaa porã ma vy jajevy ke SENHOR pe.
⁴¹ Nhandepo jaupi reve ke nhanekuraxõ voi jaupi
 Nhanderuete yva re oĩ va'e pe. Ha'e vy aipo ja'e:
⁴² "Rojevavy, noronhe'ê rendui guive ramo
 ndee ma ndoreperdoai teri.
⁴³ Ndee ma ndepoxya py oreao'i reve orerakykue monha.
 Oremboaxy e'ỹ re oremokanhymba.
⁴⁴ Arai py renhemi
 ndea py peve ronhembo'ea onhendu e'ỹ aguã.
⁴⁵ Yty omombo pyrã rami rive oremoingo
 yvy regua kuery ikuai rupi.
⁴⁶ Orerovai orerovaigua kuery ha'e javi
 oipe'a okuapy ojuru.
⁴⁷ Ore'ary ou ndorerekorãvei aguã ha'e yvykua py orembo'arã,
 orereiyarã ha'e oremokanhymbaarã."

- 48 Xeretarā kuery omokanhymbaa rā
xerexay oxyry atā etc.
- 49 Xerexa ojae'o tema.
Ndopo'oi, ndopytu'ui 'rā guive
- 50 SENHOR opena e'ŷa ja,
ha'e yva gui oexa pota peve.
- 51 Mba'emo aexa va'e gui xeporiau xenhe'ē py,
kunhague xeretā rupi ikuai va'e re mba'emo oiko va'ekue káuxa.
- 52 Mba'e re'ŷ xerovaigua kuery
xejukaxe okuapy guyra'i rami rive.
- 53 Xemombaxe vy xemombo vvykua py,
ha'e ita py xeapipa.
- 54 Xeakā áry rupi yy oxyry atā ouvy.
Ha'e ramo "Akanhy ta mal" ha'e.
- 55 Ha'e gui ma SENHOR, vvykua pukuvea py aia gui
ajapukai nderery rupi.
- 56 Ha'e ramo ndee rendu xeayvua.
Emboby eme ndeapyxa ajae'oa ha'e ajapukaia gui.
- 57 Ndevy pe ajapukaia ára ndee ae renhemboja xere.
Ha'e rami vy xevy pe "Ekyje eme" 're.
- 58 SENHOR, xerekove re reikuaa pota vy
xereraa jepe va'ekue aikove aguã rami.
- 59 SENHOR, rexa reiny ha'eve'ŷa rami xerereko okuapyague.
Eikuaa pota 'rāgue xere!
- 60 Rexapa xeapo vai okuapya
ha'e xerovai onhembopy'aa ha'e javi.
- 61 SENHOR, rendu xere ijayvu rei okuapy rā,
xerovai onhembopy'aa nhavō,
- 62 xerovaigua kuery xerekokie ramigua rive omombe'u rā,
ha'e ára pukukue re xere ijayvu mbegue rei okuapy rā.
- 63 Exa pota tema ha'e kuery re, uguapy ha'e opu'ã ju ramo.
Mba'eta xembojaru rei rive okuapy.
- 64 SENHOR, ndee rembopaga 'rā
opo py mba'emo ojapoague re.
- 65 Remopytūmba 'rā ha'e kuery py'a,
ha'e kuery re rembou 'rā ayvu vai.
- 66 Ndepoxya py remonha 'rā heravy.
Ha'e rami vy remokanhymba 'rā ndevyguia yva guy gui.

4

Tetā ojokopaa jave ikuai axya re ijayvuague

- 1 Mba'exa vy nda'u ouro oi va'ekue huūmba?
Mba'exa vy tu ouro ombovera pyre ndoveravei?
Ha'e rami ae avi ooiky'a e'ŷ va'e re ita ikuai va'ekue
omoāmbaa tape joaxa-axaa ha'e javi rupi!
- 2 Mba'eta Sião pygua yvatekueve ma
ouro oiky'a'o pyre rami ikuai va'ekue ri
aŷ ma ha'e kuery pe "Yapo guigua rive" 'ea,
nhae'ū re omba'eapo va'e rembiapo ramigua!
- 3 Jagua-tuvy nhe'ē minha omokambu 'rā gua'y kue'iry.
Ha'e rā xeretarā kuery ma porayvu ve'ŷ ma ikuai
gyra-nhandu tekoa e'ŷa rupigua rami.*
- 4 Ha'e ramo kyrīgue okambu va'e apekū ipirupa ma,
ijy'uvei gui oja ijuru re.
Kyrīgue mbojape re ojerurea rupi ikuai
teī avave rei nome'ēai 'rā.
- 5 Tembi'u porā re okaru va'ekue ma
ho'apa 'rā okuapy tape rupi.
Onhemonde porāa rupi ikuai va'ekue ma
yty rupi rive ikuai.
- 6 Sodoma tetā minha xapy'a'i py omokanhymbaa raka'e
avave po py e'ŷ.

* 4:3 Guyra-nhandu ma ombo'a ma vy nguipi'a oeja rive 'rā (Jó 39.13-18).

- Ha'e rami teĩ Sodoma pygua kuery ojevavyague gui voi
xeretarã kuery ojevavyve va'e ikuai.
- ⁷ Mba'eta yvatekueve ma yro'y ha'e kamby gui xiĩve va'ekue,
ita coral va'e gui ipire pytãve va'ekue,
ha'e ita safira rami iporã va'ekue ri
- ⁸ aỹ ma hova tapyĩ gui ete huũve va'e.
Tape rupi ooa rupi avave rei ndoexa kuaavei.
Ipire ma ojapa ikãgue re,
yvyrã rakã rami ipirupa va'e vy.
- ⁹ Mba'eta karuai gui omano va'e kuery gui
ovy'ave kyxe py ojukapy.
Mba'eta ndokarui va'e ma mbeguei'i opa oje'oivy.
Ho'u va'erã mba'ety rupi ndoikovei ramo omano tema 'rã oje'oivy.
- ¹⁰ Kunhague ymave rupi porayvu va'ekue ri
aỹ ma opo py ae omomimoĩ 'rã omemby kuery.
Ha'e kue'iry re ae 'rã okaru
xeretarã kuery omokanhymbaa ramo.
- ¹¹ SENHOR opoxya rupi oiko vy
ombou opoxya nhomoendyarã.
Sião re tata omonhemboja vy
ijyta peve oapypa.
- ¹² Yvy regua ruvixa kuery ha'e yvy re ikuai va'e ha'e javi
ndogueroviai okuapy omombe'ua rã
Jerusalém rokẽ rupi hovaigua kuery oikepa maague.
- ¹³ Ha'e va'e oiko ha'e pygua profeta kuery ojevavyague re,
sacerdote kuery ojapo vaiague re guive,
mba'eta tetã mbyte rupi
omoẽ okuapy heko porã va'e ruguy.
- ¹⁴ Ha'e kuery ma ára revegua e'ỹ rami oguata rei tape rupi,
tuguy omoẽ va'ekue py iky'apa va'e ikuai,
ha'e ijao re ma voi avave rei ndovyxeai.
- ¹⁵ Ha'e kuery pe ojapukaia: "Ha'eve'ỹ va'e kuery, pejepe'a ke!
Pejepe'a ke, pexyry ke, pepoko eme orerel!" 'ea.
Ha'e ramo ojava oje'oivy, ha'e ovaẽa py rei
ha'e kuery pe yvy regua kuery
"Apy ma nda'evei ae pendekuai aguã."
- ¹⁶ Mba'eta SENHOR ae omoaĩ imondovy opoxya rupi.
Ha'e rami vy nopenavei ma ha'e kuery re.
Hovaigua kuery katuve ma nombotei 'rã sacerdote kuery,
ha'e nhomboaxya rupi e'ỹ 'rã oguereko nhomongeta va'ety kuery.
- ¹⁷ Ha'e gui ma ore kuery rexa ikangypa ma
orepytyvõarã ou va'erã re roma'ena vy teĩ.
Roikuaa potaaty py roarõ reve roma'ẽ tema
peteĩ regua orereraa jepe va'erã re teĩ ndoui ae.
- ¹⁸ Orerovaigua kuery ma orekuai rupi oma'ẽ mbegue okuapy ramo
oreretã mbyte rupi orekuai aguã voi nda'evevei.
Ropa aguã ovaẽ rai'i ma,
ore'ára ojeupity ma,
aỹ ovaẽ ma ropa aguã ára.
- ¹⁹ Oremonhaa kuery ma
guyra yvate rupi oveve va'e gui inhakuãve va'e.
Yvyty ikuai va'e áry rupi ete oremonha,
tekoa e'ỹa rupi voi nhuã omoĩ okuapy orembo'a aguã.
- ²⁰ Ha'e gui oreruvixave orerekombo'earã SENHOR omoĩ va'ekue ae
ombo'a ma okuapy nhuã py.
Ixupe ma ore kuery "Nekuaray'ã py 'rã orekuai
yvy regua kuery mbyte rupi teĩ", ro'e va'ekue ri.
- ²¹ Peẽ Edom pygua kuery Uz yvy re pendekuai va'e,
orejojai tema, pevy'a rei tema 'rã orere.
Ha'e rami avi pendea py voi 'rã omboaxaa kova'e karo.
Ha'e ramo peka'upa vy pendepire reipa 'rã peikovy.
- ²² Ha'e rã peẽ Sião pygua kuery, opa ma pendeko vaiague re penembopagaague.
SENHOR napendereraa ukavei ma 'rã escravo-rã.
Ha'e rã peẽ Edom pygua kuery, araka'eve rã ojekuaapa 'rã

pendeko vaia ha'e pejevavyague.

5

“Oremboaxy ke” he’iague

- ¹ SENHOR, nema'endu'a ke mba'emo vai orere oiko va'ekue re.
Eikuaa pota ha'e ema'ẽ roiko axya re.
- ² Oreyvyrã reme'ẽ va'ekue oaxapa ma amboae regua kuery pe, orerogue voi amboae yvy guigua kuery pe ju oaxa.
- ³ Ore kuery ma tyre'ỹ tuu ve'ỹ va'e rami orekuai.
Ha'e rã orexy kuery ma imeve'ỹ va'e ikuai.
- ⁴ Yy roy'u va'erã ma peráta re rive 'rã rojogua,
yxakã voi peráta re anho 'rã rojou.
- ⁵ Orerakykue monhaa kuery ma oreaju'y re ma ikuai.
Orekane'õ ma teĩ ropytu'u aguã voi noĩ.
- ⁶ Egito ha'e Assíria pygua kuery pe rojejopy uka
ro'u va'erã rojou aguã teĩ.
- ⁷ Oreru kuery ma ojevavya rire jipovei ma.
Ha'e gui ore kuery ju 'rã roiko axy ha'e kuery ojapo vaiague re.
- ⁸ Escravo kuery rive 'rã ipo'aka orere.
Ndoikoi avave rei ha'e kuery po gui orereraa jepe va'erã.
- ⁹ Rojevavy e'ỹkue py 'rã rojou ro'u va'erã,
kyxe tekoa e'ỹa rupi oguereko va'e gui.
- ¹⁰ Karuai roendu vaipa ramo
orepire ma tata kua rami hakupa rei.
- ¹¹ Sião py oguero'apaa kunhague ikuai va'e,
kunhataigue guive, Judá tetã ikuai va'e rupi.
- ¹² Hovaigua kuery ojryvipypa yvatekueve va'ekue,
tujakue'i voi ojou vy ombojaru rei okuapy.
- ¹³ Ha'e rã kunumigue ma ogueraa 'rã mba'emo mongu'ia py omba'eapo aguã,
avakue'i voi yxakã re ombovoyi rã onhepyxanga rive oje'oivy.
- ¹⁴ Ha'e ramo nhomongetaa rupi ikuai va'ekue ma ndoguapyvei ma tetã kora rokẽ py,
kunumigue ndoporaivei ma guive.
- ¹⁵ Rovy'aague okanhymba ma orekuraxõ gui.
Rojeroky 'rãgue py mboriau anho rei roendu.
- ¹⁶ Oreakã gui ho'a ma akã regua oĩ va'ekue.
Nda'evei ete orevy, rojevavy rire!
- ¹⁷ Ha'e nunga rupi ae orekuraxõ py oremba'eaxy,
ndorerexa pyxoveipa guive.
- ¹⁸ Sião yvyty ombovaipaa rire
mbyku anho ikuai ha'e rupi.
- ¹⁹ Ha'e rã ndee SENHOR, ndepo'aka riae 'rã.
Tenda repenaaty oĩ 'rã raka'e rã peve guarã.
- ²⁰ Mba'e re tu riae ta ri nderexarai orere?
Mba'e re tu remboare orepytvõ aguã?
- ²¹ SENHOR, orereko rerova ju ke ndejeupe guarã.
Ha'e ramo 'rãe rojeko rerova.
Embopyau ju ore'ára yma guare rami.
- ²² Mba'e re tu orerejapa ete rí?
Mba'e re tu ndepoxy anho ta ore kuery rovai?

Ezequiel ayvu oña Ezequiel ayvu oña

Profeta Ezequiel ma Babilônia tetã py ae hekoa, ha'e py escravo-rã Israel kuery mboae reve heraa rire. Israel kuery ha'e javi pe ayvu omombe'u raka'e, Babilônia py ikuai va'e pe, Jerusalém pygua kuery pe guive. Nhanderuetete mba'emo oexa uka reve oayvu ombou raka'e Ezequiel pe. Ha'e gui Ezequiel ju mba'emo ojapoa py oikuaa uka guetarã kuery pe, oayvu py anho e'ỹ.

Nhanderuetete rexakãa re ijayvu. "Ha'e gui oky jave arai re karugua ojekuaa va'e rexakãa rami ae avi hexakãa jekuaa ijyvyry rupi. Ha'e va'e ma Senhor rexakãa ae aexa. Ha'e nunga aexa vy xerenapy'ã re aĩ, vyv re xerova amovaẽ reve. Ha'e vy ma aendu ijayvua" (1.28).

Ijayvu avi nhandereco vaia káuxa omano va'ekue rami jaiko teĩ Nhanderuetete opo'akaa rupi nhanemoin-gove ju aguã re. "Ha'e gui xere Senhor opo omoĩ vy xereraa Onhe'ẽ rupi. Ha'e vy xemoĩ peteĩ vyvugua ikãgue anho ikuai mbyte py. ... Aipoe'ive ju xevy: 'Ndeayvu na kova'e ikãgue ikuai va'e pe, ha'e vy aipo're: "Ikãgue ymague, pendu ke Senhor ayvu." ... Ha'e ramo ijayvuague rami ae xeayvu. Xeayvu teri reve hevovo rei nhendu va'e aendu, peteĩ-teĩ kãgue joe onhembota-mbota vy oparãgue rei. Ha'e rami vy peteĩ-teĩ kãgue onhemboje'apa joe. Ha'e ramo ama'ẽ rá ikãgue hajy ha'e ho'opa ma. Ipire voi ojekuaa, ha'e rá inhe'ẽrã ma noĩ teri. Ha'e gui Senhor aipoe'i xevy: 'Ava ra'y, Nhe'ẽ pe ju ndeayvu. Ndeayvu vy aipo'ere iuxpe: "Po rami Senhor Nhanderuetete ijayvu: Ndee Nhe'ẽ, eju irundy henda vyvutu oipejua katy gui. Ha'e vy ke eipeju kova'e omanogue áry rupi, okuave ju aguã rami", 're. Ha'e ramo ijayvuague rami xeayvu ramo ikãgue ikuai va'e re ou Nhe'ẽ. Ha'e ramo oikovepa jevy vy opu'ãmba ju joguerokuapy, xondaro kuery rami mbovy rei e'ỹ ikuai" (37.1, 4, 7-10).

Irundy temimoingo kuery oexaague

¹ Trinta ma'et'ỹ re, irundy jaxya ha'e peteĩ nhiruĩ araa py xee aiko Quebar yakã vyv'ry rupi, xeretarã kuery escravo-rã ogueraapa pyre mbyte.* Ha'e va'e jave py ma yva ojepe'a rá aexa mba'emo Nhanderuetete oexa uka rá.

² Ha'e va'e jave py peteĩ nhiruĩ ma'et'ỹ ma ojapo huvixa Joaquim escravo-rã ogueraa ague. Ha'e gui ha'e va'e jaxy re peteĩ nhiruĩ araa py ae

³ SENHOR ombou oayvu xee Buzi ra'y Ezequiel aiko va'e pe. Sacerdote aiko caldeu kuery vyv re, Quebar yakã vyv'ry rupi. Ha'e py ae xere SENHOR opo omoĩ rá aendu.

⁴ Ha'e gui ma ama'ẽ rá kuaray ijapu'a'ia katy gui ou oiny peteĩ arai tuvixa va'e, tata rami joa py e'ỹ-e'ỹ hexakã va'e. Arai vyv'ry rupi hendy va'e ojekuaa avi. Ha'e va'e mbyte py ma peteĩ aexa overa va'e rykukue ramigua, tata mbyte gui ojekuaa oiny.

⁵ Arai mbyte gui oẽ avi irundy temimoingo kuery. Ha'e va'e kuery jaexa rá ava ramigua meme.

⁶ Peteĩ-teĩ re ma irundy kuerei hova oĩ, ipepo ma irundy-rundy avi.

⁷ Hetyma ma hi'yvi va'e meme. Ha'e rá ipy ma vaka ra'y py rami ojekuaa, overa va'e omoexakã mbyre rami hendy guive.

⁸ Ipepo guy rupi ma avakue po ramigua oĩ, irundy henda jovaive rupi. Irundyve temimoingo ma irundy-rundy ngova ha'e opepo oguereko.

⁹ Ha'e kuery ma ovaẽ okuapy joe, amboae katy ova-ova e'ỹ re oguata guive. Peteĩ-teĩ ma guenonde katy anho oguata oje'oivy.

¹⁰ Ha'e kuery rova ma avakue rova rami. Oiporu kuaa re ma guary rami hova. Ijaxua re ma vaka rova. Irundyve peteĩ-teĩ oguereko avi taguato guaxu rova.*

¹¹ Ha'e rami ae hova ojekuaa. Ipepo ma mokõ-mokõ oupi 'rá o'áry rupi, temimoingo kuery mboae pepo re omovaẽ reve. Ha'e rá opepo mboae mokõ py ma oja'o'i imoiny guete.

¹² Ha'e kuery peteĩ-teĩ guenonde rami anho 'rá oguata oje'oivy. Mamo rá rei Nhe'ẽ ooa katy ha'e kuery voi oje'oi avi. Amboae katy ova-ova e'ỹ re oguata oje'oivy.

¹³ Temimoingo kuery jaexa rá tapyĩ hexakã va'e rami hendy, tataendy rami guive. Ha'e kuery mbyte rupi ma tata rendy vuku oaxa-axa. Ha'e kuery gui oẽ avi overa va'e.

¹⁴ Temimoingo kuery oguata vy overa va'e rami avi ojevy-jevy ha'ekue'ỹ-kue'ỹ katy.

Irundy iruéra oexaague

¹⁵ Ha'e gui temimoingo kuery aexa rá peteĩ-teĩ vyv'ry oĩ avi peteĩ ruéra vyv rupi oo va'e.*

¹⁶ Iruéra ikuai va'e jaexa rá itaendy berilo rami hexakã va'e. Irundyve ma joo rami ae ojekuaa. Peteĩ-teĩ ruéra jaexa rá amboae ruéra mbyte rupi joaxa oiny.

¹⁷ Ha'e va'e ma ooa katy rei 'rá oo. Amboae katy ova-ova e'ỹ re oguata ovy.

¹⁸ Inhapyĩ va'e ma yvate ete nhomongyje aguã rami. Peteĩ-teĩ ruéra apyĩ re ma texa anho tynyẽ ha'e javi rupi.

¹⁹ Temimoingo kuery oguata oje'oivy reve iruéra ijyvyry ikuai va'e oo avi 'rá. Ha'e kuery ojeupi ramo iruéra voi ojeupi avi 'rá hexeve.

* 1:1 Ha'e jave py ma profeta Ezequiel Babilônia vyv re oiko, heta va'e kuery ogueraapa ague py.
Ezequiel 10.9-17

* 1:10 Apocalipse 4.8 * 1:15

²⁰ Nhe'ê ooa katy rei tema ha'e kuery oo avi 'rã, Nhe'ê oguerekoa rupi. Ha'e kuery reve iruéra ikuai va'e oo avi 'rã, mba'eta iruéra ikuai va'e re ae temimoingo kuery nhe'ê oĩ.

²¹ Ha'e kuery oguata oje'oivy ramo iruéra ikuai va'e voi oo avi 'rã. Ha'e kuery opyta ramo iruéra voi opyta avi 'rã. Yvy gui ha'e kuery opu'ã oje'oivy ramo ha'e kuery reve opu'ã avi 'rã iruéra ha'e javi, mba'eta iruéra ikuai va'e re ae oĩ temimoingo kuery nhe'ê.

²² Temimoingo kuery akã áry rupi ma peteĩ ijao'ia oĩ itaendy guigua rami nhomongyja. Ha'e kuery akã áry rupi ojekuaa oiny.

²³ Ijao'ia guýry rupi ae ha'e kuery opepo oupi imoiny, peteĩ-teĩ joa katy. Peteĩ-teĩ ma mokoĩ opepo ju oguereko jovaive rupi ojeao'i agüã.

²⁴ Ha'e kuery oguata oje'oivy ramo aendu ipepo revovo reia yy revovo rami, Ipo'akapa va'e onhendua rami avi. Hevovo aendu rã xondaro kuery pyambu rami onhendu. Ha'e gui ha'e kuery opyta vy opepo voi omboguejypa ju avi 'rã.

²⁵ Ha'e gui ma ha'e kuery akã áry rupi ijao'ia oĩ va'e áry gui aendu peteĩ avvu. Ha'e ramo ha'e kuery opytapa okuapy, opepo guive omboguejypa.

Nhanderuede rexakãa oexaague

²⁶ Ha'e gui ha'e kuery akã áry rupi ijao'ia oĩ va'e áry aexa peteĩ tenda huvixa openaaty ramigua, itaendy safira guigua rami. Ha'e va'e tenda áry ma peteĩ uguapy jekuaa oiny ava ramigua.

²⁷ Ha'e va'e aexa rã iku'a guive yvate katykue ma itaendy rami ojekuaa oiny, ha'e ijyvýry rupi ma tata rami avi hexakã. Ha'e gui rã iku'a guive yvy katykue ma tata ete rami ojekuaa. Ijyvýry ha'e javi rupi tata rami hexakãmba.

²⁸ Ha'e gui oky jave arai re karugua ojekuaa va'e rexakãa rami ae avi hexakã jekuaa ijyvýry rupi. Ha'e va'e ma SENHOR rexakãa ae aexa. Ha'e nunga aexa vy xerenapy'ã re aĩ, yvy re xerova amovaê reve. Ha'e vy ma aendu ijayvua.

2

Ezequiel reve ijayvuague

¹ Ijayvu va'e ma aipoe'i xeivy:

— Ava ra'y, epu'ã ke he'amy, ha'e ramo xeayvu 'rã ndereve — he'i.

² Ha'e ramo xereve ijayvu jave xere Nhe'ê oĩ vy xemopu'ã imo'amy. Ha'e rami vy aendu xeivy ijayvu rã.

³ Ha'e ramo aipoe'i xeivy:

— Ava ra'y, xee romondouka 'rã Israel kuery pe. Ha'e kuery ma peteĩ regua xerovai opu'ã okuapy va'e. Nguu kuery rami avi anhetê rupi e'y ikuai xerovai, a'y peve.

⁴ Mba'eta ta'y kuery voi inhakã ratã okuapy, ipy'a ratã guive. Ha'e kuery pe ae xee romondouka ta. Ha'e vy ha'e kuery pe “Po rami SENHOR Nhanderuede ijayvu” 're 'rã.

⁵ Ha'e ramo ha'e kuery xere opu'ã va'ety ikuai va'e oikuaa 'rã okuapy ha'e kuery mbyte rupi profeta oikoa, oendu pota, e'y vy noendu potai teĩ.

⁶ Ha'e rã ndee ava ra'y, ekyje eme. Ekyje eme guive ha'e kuery ndere ijayvua gui, ha'e nunga juu ha'e juu rakuaendy rami ndekutu teĩ, mba'eta japeuxa ramigua mbyte rupi reiko 'rã. Ekyje eme ndere ha'e kuery ijayvua gui, enhemondyĩ eme guive ha'e kuery rova gui, mba'eta xere opu'ã va'ety ae ikuai.

⁷ Ha'e rã ndee ma ha'e kuery pe remombe'u 'rã xeayvu, oenduxe, e'y vy noenduxeĩ teĩ, mba'eta xere opu'ã rei va'ety ae ikuai.

Kuaxia para onhemama va'e oexaague

⁸ — Ndee ava ra'y, endu ke ndereve xeayvu rã. Epu'ã rei eme xerovai opu'ã rei va'ety kuery rami e'y. Eipe'a ke ndejuru, ha'e vy he'u ame'ê ta va'e — he'i.

⁹ Ha'e ramo ama'ê rã ha'e py peteĩ po xea katy okuave'ê jekuaa va'e. Ha'e va'e py oĩ peteĩ kuaxia para onhemama va'e.

¹⁰ Ha'e va'e ma xerenonde rupi oipyo inony rã hi'áry ha'e iguy rupi ipara oiny ra'e. Ha'e va'e re ipara oiny ojae'oa agüã, ipy'a vaia ha'e nda'evei va'e oiko va'erã regua.

3

¹ Ha'e gui aipoe'ive ju xeivy:

— Ava ra'y, he'u rejou va'e. He'u ke kova'e kuaxia para. Ha'e gui ma tereo Israel kuery pe ndeayvu — he'i.

² Ha'e ramo xejuru aipe'a ramo xeivy pe ome'ê kuaxia para ha'u agüã.

³ Ha'e vy aipoe'i xeivy:

— Ava ra'y, emokõ nderyepy katy peve guarã. Emonyê ete nderye kova'e kuaxia para ndevy ame'ê va'e — he'i. Ha'e ramo xee ha'u ramo xejuru py ei rami he'ê va'e aendu.*

Profeta-rã Ezequiel omoĩague

⁴ Ha'e gui aipoe'ive ju:

— Ava ra'y, tereo a'y Israel kuery ikuai py, ndeayvu ha'e kuery pe xeayvu rupi.

⁵ Mba'eta amboae rami rei ijayvu va'e kuery pe e'y xee romondouka, ha'e rã Israel kuery pe ae.

* 3:3 Apocalipse 10,9-10

⁶ Heta regua pe e'ŷy guive romondouka, amboae rami ijayvu va'e nerendu kuaa aguã katy e'ŷy. Ha'e va'e kuery regua pe xee romondouka va'e rire ma anhetê ojapaxaka 'rãgue okuapy ndeayvua re.

⁷ Ha'e rã Israel kuery ma ndojapaxakai 'rã, xeayvu re eteve voi ndojapaxaxaxei va'e vy. Mba'eta Israel kuery ma inhakã ratã ha'e opy'a py oikuaa axy va'e meme.

⁸ Ha'e nunga rupi nderova ajapo 'rã hatã aguã rami ha'e kuery rova rami avi, ha'e kuery akã ratãa rami ae avi 'rã rojapo ha'e kuery rovai neakã ratã aguã rami.

⁹ Diamante rami hatã va'e ajapo 'rã nderova, itaendy gui hatãve va'e. Ha'e ramo ekyste eme ha'e kuery gui, neñ enhemondy eme guive ha'e kuery ngova re oexa uka va'e gui, mba'eta xere opu'ã rei va'ety ae ikuai — he'i.

¹⁰ Ha'e gui aipoe'ive ju xevy:

— Ava ra'y, endu ke ndeapxya py ndevy pe xeayvu ha'e javi, emoĩ porãmba guive ndepy'a re.

¹¹ Ha'e gui ma tereo, neretarã kuery escravo-rã ogueraa pyre ikuai py. Ha'e kuery oenduxe, e'ŷy vy noenduxeĩ teĩ ndeayvu tema ha'e kuery pe. Ha'e vy “Po rami SENHOR Nhanderuete ijayvu”, 're 'rã — he'i xevy.

¹² Ha'e gui ma Nhe'ẽ xereupi heravy. Ha'e ramo xerakykue katy gui aendu peteĩ hyapu rei va'e. Ha'e va'e ma oĩa gui onhendy vy aipoe'i:

— Ta'ima'endu'a porãa SENHOR rexakãa re — he'i.

¹³ Aendu avi temimoingo kuery opepo jopepo re ombota-mbota rã, iruéra ha'e kuery reve ikuai va'e revovo guive. Aendu avi hyapu ratãve va'e.

¹⁴ Ha'e rami py Nhe'ẽ xereupi heravy. Xenhe'ẽ py nda'evei etea aendu reve aa ainy. Ha'e rami teĩ xere SENHOR opo imbaraete va'e omoĩ xejokoarã.

¹⁵ Ha'e ramo Tel-Abibe tetã katy aa, Quebar yakã yvÿry xeretarã kuery escravo-rã ogueraa pyre ikuai py. Ha'e vy ha'e kuery ikuai py ju aĩ. Ha'e kuery mbyte py sete ára re aguapy ainy nda'evei etea aendu reve.

Tetã rarõa rami Israel kuery pe ijayvu aguã omoĩague

¹⁶ Ha'e gui sete araa py ma xevy pe SENHOR ombou oayvu. Ha'e vy aipoe'i:

¹⁷ — Ava ra'y, xee ma tetã rarõa rami romoĩ Israel kuery pe ayvu remombe'u aguã. Ha'e rami rã xejuru gui ayvu rendu va'e remombe'u 'rã ha'e kuery pe xerekovia.

¹⁸ Ha'e gui ma xapy'a rei heko vai va'e kuery pe “Pemano 'rã” ha'e teĩ ndee ju ha'e kuery pe neremombe'ui ramo tape vai gui ojepe'a vy oo jepe aguã, ha'e rami ri ramo heko vai va'e omano 'rã gueko vaia py, teĩ ndee rombopaga avi 'rã huguy ndepo re oĩ va'e kãuxa.

¹⁹ Ha'e rã xapy'a rei heko vai va'e kuery pe ha'e rami ndeayvu teĩ ha'e kuery ndojeko rorovai 'rã teko vai rupi ikuai gui. Ha'e ramo ha'e kuery omano 'rã gueko vaia py ae, ha'e rã ndee ma reo jepe 'rã.

²⁰ Ha'e gui xapy'a rei heko porã va'ekue ma heko porãague gui ojepe'a 'rã ha'eve'ŷy va'e ojapo vy. Ha'e gui ha'e kuery renonde py xee amoĩ 'rã onhepyxanga aguã, ha'e ramo omano 'rã. Ndee nandeayvui ramo ha'e kuery omano 'rã gueko vaia py, ha'e na'ima'endu'aavei 'rã teko porã rupi oikoague re. Ha'e rami teĩ ndee rombopaga avi 'rã huguy ndepo re oĩ va'e kãuxa.

²¹ Ha'e rami teĩ heko porã va'e pe ojejavy e'ŷy aguã re ndee ndeayvu ramo ndojejavyi vy anhetê oikove 'rã ha'e rami ndeayvu rire. Ndee voi reo jepe 'rã — he'i.

²² Ha'e gui xere SENHOR opo omoĩ vy aipoe'i xevy:

— Epu'ã ke, tereo vyvugua katy, ha'e py ma ndereve xeayvu aguã — he'i.

²³ Ha'e ramove apu'ã vy vyvugua katy aa. Ha'e py ama'ẽ rã SENHOR rexakãa oĩ ra'e, Quebar yakã yvÿry hexakãa axeaague rami. Ha'e vy xerenapy'ã re aĩ xerova vvy re amova'e reve.

²⁴ Ha'e ramo xere Nhe'ẽ oĩ vy xemopu'ã imo'amy. Ha'e rami vy xevy ijayvu vy aipoe'i:

— Tereo ndero katy, ha'e enhemboty ha'e py.

²⁵ Mba'eta ava ra'y, ma'ẽ. Ha'e kuery ma ndea py ixã ogueru vy ndejokua 'rã imoiny, ha'e kuery mbyte katy reo ve'ŷy aguã.

²⁶ Ha'e gui xee ajapo 'rã neapekũ ndejuru re ojapa aguã rami, ha'e kuery pe ndeayvu e'ŷy aguã. Ha'e ramo ijayvu e'ŷy va'e 'rã reiko remonheangu ve'ŷy ranhe aguã, mba'eta xere opu'ã rei va'ety ae ikuai.

²⁷ Ha'e rami teĩ ndereve xeayvu jevy vy aipe'a ju 'rã ndejuru ndeayvu aguã. Ha'e ramo ha'e kuery pe “Po rami SENHOR Nhanderuete ijayvu”, 're 'rã. Ha'e ramo oenduxe va'e toendu, ha'e rã noenduxeĩ va'e ma tove toendu eme, mba'eta xere opu'ã rei va'ety ae ikuai.

4

Jerusalém tetã jokoarã ramigua oexaague

¹ — Ha'e gui aŷy ndee ava ra'y, eru peteĩ vvy jykue, enhono imoiny nerenonde'i py, ha'e vy ha'e va'e re embopara Jerusalém tetã ra'angaarã.

² Ha'e va'e rovai emoĩ ijokoarã ra'angaa jovaive rupi, ejapo oo imbaraete va'e ra'angaarã, tetã kora re emopu'ã vvy ivã va'erã, jova-jovaive re ejapo xondaro kuery nhoarõ aguã, ha'e ijyvÿry rupi emoĩ tetã kora reityarã.

³ Eru avi peteĩ oja ferro guigua, ha'e vy ndee ha'e tetã oĩa mbyte py emopu'ã imo'amy oja ferro guigua kora rami. Ha'e vy ema'ẽ einy tetã katy. Ha'e rami 'rã opyta tetã ojokopy rami, ijokoarã remoĩ ramo. Ha'e va'e ma Israel kuery oikuaa aguã 'rã oĩ.

4 — Ha'e gui ma enheno ejupy reiporu kuaa e'ÿa re, ndejee remoï aguã Israel kuery reko vaia. Renheno rejupya ára ha'e javi re ndere oï 'rã heko vaia.

5 Mba'eta ndee romoï 'rã ha'e kuery reko vaia ma'etÿa kuaa ukaarã, peteï-teï ára renhenoa ma peteï ma'etÿ ovare aguã, ha'e javi vy trezentos e noventa ára peve. Ha'e rami rã ndejee meme 'rã rereko Israel kuery ojevavyague.

6 Ha'e va'e ára opa ma rire reiporu kuaa regua re ju 'rã renheno rejupy, Judá kuery ojevavyague ju ndejee rereko aguã.

7 Ha'e rami vy quarenta ára re ju ajapo 'rã renheno aguã rami, peteï-teï ára peteï ma'etÿ ovare aguã. Ha'e ramo Jerusalém tetã ojokoa katy rema'ẽ reiny 'rã ndejyva pire rei reve. Ha'e rami vy 'rã ndeayvu ete ha'e kuery rovai.

8 Aÿ rojokua uka 'rã ixã py, hovai katy neï kyvõ katy rema'ẽ e'ÿ aguã, tetã ojokoa aguã ára opa e'ÿa ja.

9 — Eru avi trigo ha'e cevada, kumanda ha'e kumanda pe'i. Emoï peteï oja py mbojaperã, trezentos e noventa ára re ndeyke re renheno peve re'u rejupy aguã.

10 Opeja pyre anho 'rã re'u, duzentos e quarenta gramas 'rã ko'ẽ nhavõ. Ha'e've jave-jave 'rã re'u.

11 Ha'e gui yy voi oa'ã mbyre meme 'rã rey'u, peteï karo'i ha'e've jave-jave 'rã rey'u.

12 Re'u va'e ma mbojape cevada guigua rami 'rã. Rexy 'rã avakue repxoi pirukue áry, heta va'e kuery oexaa py.

13 Mba'eta ha'e rami ae 'rã Israel kuery ho'u okuapy tembi'u ha'e've'ÿ va'e, pavẽ regua ikuaia rupi aipe'a ukaague py — he'i SENHOR.

14 Ha'e ramo xee aipoa'e:

— Kore SENHOR Xerute! Ma'ẽ, xekunumi guive aÿ peve xee nanhemongy'ai ae va'eri, mba'eta ha'u va'e'ÿ teri mymba omano rive va'ekue neï ka'aguy rupigua omondoropa pyre, xo'o nda'evei va'e xejuru py amoï e'ÿ aguã — ha'e.*

15 Ha'e ramo aipoe'i xevy:

— Ha'e ramo avakue repxoi 'rãgue py ha'e've 'rã vaka repxoi áry mbojape rembojy aguã — he'i.

16 Aipoe'ive ju xevy:

— Ava ra'y, mba'eta ma'ẽ, Jerusalém tetã py ajapo 'rã tembi'urã ojoua ve'ÿ aguã rami. Ha'e kuery ho'u 'rã tembi'u opeja pyre nda'evei rei etea oendu reve, ha'e yy oa'ã mbyre oy'u 'rã okuapy ndaekorãveia reve.

17 Ha'e kuery pe tembi'u ha'e yy oata ramo joexa vy rive onhemondyipa 'rã, gueko vai reia py opa jogueravy vy.

5

1 — Ha'e gui ava ra'y, eru peteï kyxe haimbe porã va'e nerendyva ayaarã. Ha'e vy enhopimba neakã ha'e nerendyva ha'e javi rupi. Eru avi mba'emo opejaa nde'ague repeja aguã. Repejaa rupi emboja'o mboapy henda py.

2 Peteï henda py oï va'e ma reapy 'rã tetã mbyte py, ojokoa aguã ára opa ma rire. Ha'e rã amboae henda py nde'ague oï va'e ma reikutu 'rã kyxe py tetã yvÿry. Ha'e rã amboae ju ma vytytu omboveva rupi 'rã remoaimba imondovy. Ha'e va'e kuery rakykue rupi aekyi uka 'rã kyxe.

3 Ha'e gui mboapy regua amongue ete'i ma rejokua 'rã ndeao apy'i re.

4 Ha'e va'e regua gui ae ju remombo 'rã tata py okai aguã. Ha'e va'e gui ma tata oẽ 'rã Israel kuery ha'e javi rovai.

Mba'e re pa Jerusalém tetã SENHOR ojoko uka 'rãa re ijayvuague

5 Ha'e gui SENHOR Nhanderuede po rami ijayvu:

— Jerusalém tetã upe py oï va'e ramigua ma vvy regua mbyte py amoï va'ekue, ha'e ijyvÿry rupi ikuai va'e vvy mbyte.

6 Ha'e rami teï ha'e kuery xee aipota va'e rovai opu'ã vy vvy regua kuery gui voi ojapo vaive tema okuapy, ha'e oyvÿry rupi ikuai va'e gui omboykepave xeayvu aeja va'ekue. Hexaraipa okuapy xee aipotaa gui, xeayvu rupi nda'ikuai guive.

7 Ha'e nunga rupi po rami SENHOR Nhanderuede ijayvu:

— Peẽ kuery ma amboae regua pendeyvÿry rupi ikuai va'e gui pepu'ãve xerovai, ndapejapoxei guive xee aipotaa rami, neï amboae kuery pendeyvÿry rupi ikuai va'e reko ndapeupityi.

8 Ha'e nunga rupi xee, xee ae ju 'rã aikõ nderovai guarã — he'i SENHOR Nhanderuede. — Ha'e rami vy penembyte py rombopaga 'rã vvy regua kuery oexaa py.

9 Ojegarupy pejapoa ha'e javi káuxa penembyte py ajapo 'rã peteïgueve ajapo e'ÿ teri va'e, ha'e neï ndajapovei 'rã va'e.

10 Ha'e rami rã penembyte py tuu kuery ho'u 'rã okuapy gua'y kuery ae, ha'e ta'y kuery ho'u 'rã nngu kuery ae. Penembyte py rombopaga 'rã, ha'e gui penderegua hembyre va'ekue ma amoãimba 'rã imondovy vytytu ha'e javi rupi.

11 Ha'e nunga rupi anhetẽ ete xee SENHOR Penderuede xee ae rekove rupi aura vy aipoa'e: Xevyguia ooiky'a e'ÿ va'e pemongy'apa rei rire mba'emo vai pejapo ha'e ojegarupy pembojeroviaa py, ha'e ramo xee nama'ëvei 'rã pendere romboaxya rupi, ndorogueraa jepei 'rã guive.

* 4:14 Ezequiel ma avakue repxoi pirukue áry mbojape oexy aguã re SENHOR ijayvu, mba'eta tetã ojokoa jave heta va'e kuery ndojouï 'rã kakãrã. Ha'e ramo Ezequiel ndojou porã, mba'eta ha'e nunga áry oexy pyre nda'evei sacerdote kuery ho'u aguã, onhemongy'a e'ÿ aguã.

¹² Ha'e ramo pende kuery regua peteī henda py pemano 'rā mba'eaxy vaikue gui, ha'e penembyte py pekanhymba 'rā karuai gui. Ha'e rā amboae henda py ma pendeivy'iry rupi pe'a 'rā pekuapy kyxē gui. Ha'e gui amboae henda py ju romoaiмба 'rā yvytu ha'e javi rupi, ha'e vy penderakykue rupi aekyi uka 'rā kyxē.

¹³ — Ha'e rami vy 'rāe xepoxya oaxa. Ha'e kuery re xepoxya amboupa ma rire “Ha'eve ma” ha'e 'rā apytu'u vy. Ha'e ramo oikuaapa 'rā xekyre'ya rupi xeyvuague, ha'e kuery áry ambou ramo.

¹⁴ Mba'eta ombovaipa pyre rami romoi 'rā yvy regua pendea katy'i rupigua kuery pendejojai aguā, oaxa va'e kuery ha'e javi oexaxa py.

¹⁵ Ha'e rami rā pepyta 'rā ombojaru rei ha'e ojojai pyrā, yvy regua kuery pendea katy'i ikuai va'e oikuaa vy onhemondyipa aguā, mba'eta rombopaga 'rā xepoxya ha'e rojou vaia rupi, opa marā romoingo axya py, po rami xee SENHOR ae xeyvu rire.

¹⁶ Ha'e kuery rovai ma hu'y rami ambou 'rā karuai. Hu'y nhomombaarā ambou 'rā penemomba aguā. Ha'e rami vy karuai amoīve ju 'rā peē kuery re, peē kuery gui mbojape pe'u 'rā va'ekue aipe'apa vy.

¹⁷ Peē kuery re ambou 'rā karuai ha'e mymba nharō pendera'y ha'e penderajy kuery mokanhymbaarā. Pendere ou 'rā mba'eaxy vaikue ha'e tuguy moēarā. Kyxē revegua voi ambou 'rā pendere. Xee SENHOR ae xeyvu.

6

Israel kuery mba'emo ra'angaa re rive ojerovia okuapya re ijayvuague

¹ Ha'e gui ma xevy pe SENHOR ombou ju oayvu. Ha'e vy aipoe'i:

² — Ava ra'y, ema'ē Israel regua yvyty ikuaiā katy, ha'e kuery re ndeayvu aguā. Ha'e vy aipo're:

³ Israel regua yvyty pendekuai va'e, pendu ke SENHOR Nhanderuete ayvu. Po rami SENHOR Nhanderuete ijayvu yvyty, yvy'ā, yakā ha'e yvyugua ikuai va'e pe: * Aỹ xee, xee ae ambou 'rā kyxē peē kuery re, pende'áry ta'angaa ombojeroviaaty ikuai va'e mbovaipaarā.

⁴ Ha'e ramo pende altar ombovaipaa 'rā, ha'e altar heakuā porā va'e rapyaty ikuai va'e voi omopēmbaa 'rā. Kyxē py ajuka uka va'ekue aejapa 'rā imbokuapy ta'angaa ombojeroviaague renonde rupi ae.

⁵ Ta'angaa ikuai va'e renonde rupi aeja 'rā Israel kuery retেকে, ha'e rā ikāgue ma amoaiмба 'rā altar ombojeroviaague renonde rupi.

⁶ Ha'e gui tekoa ha'e tetā pendekuaiague ha'e javi rupi omombaa 'rā, ta'angaa pembojeroviaague ombovaipaa 'rā, altar pembojeroviaague ha'e javi oitya ha'e ombovaipaa aguā, ha'e ta'angaa voi omopēmbaa ha'e omombaa aguā. Altar heakuā porā va'e peapyaty voi oipe'apaa 'rā, penerembiapokue ha'e javi ombovaipaa 'rā.

⁷ Ha'e gui penembyte rupi kyxē py ojuka pyre ho'apa 'rā, xee ae SENHOR aikoa peikuaa aguā.

⁸ — Ha'e rami avi aeja 'rā hemybrykue'i, mba'eta peē kuery regua amongue ete'i 'rā oo jepe kyxē gui yvy regua kuery ikuaiā rupi, ha'e kuery yvy rupi romoai jave.

⁹ Ha'e gui amboae kuery yvy rupi escravo-rā ogueraa ague py oo jepe va'ekue ima'endu'a ju 'rā xere. Mba'eta xee ma nda'evei ete aiko opa marā pendepy'aa rupi xegui pejepe'a ramo, ha'e penderexa ta'angaa anho rive oexaxe rā xegui pejepe'a ramo. Ha'e gui ma ha'e kuery ojeguaru 'rā ojegui ae, opa marā ikuaiā rupi nda'evei ete va'e ojapoague re.

¹⁰ Ha'e rami vy ma ha'e kuery oikuaa 'rā xee ae SENHOR aikoa, mba'eta ha'e kuery re mba'emo vai ambou aguā re ndaxeayvu rivei.

¹¹ Po rami SENHOR Nhanderuete aipoe'i xevy:

— Ejepopete ke, embota-mbota ndepy, ha'e vy aipo're: “Nda'evei teve, mba'eta Israel kuery opa marā ojegarupy ojapoague re ho'apa 'rā kyxē py, karuai ha'e mba'eaxy vaikue gui”, 're.

¹² Mba'eta mombry rupi ikuai va'e omano 'rā mba'eaxy vaikue gui, ha'e rā ha'e'i rupigua ma kyxē py 'rā omano. Ha'e gui amongue hemybrykue ma ojokoa rā omano 'rā karuai gui. Ha'e rami vy 'rāe ha'e kuery pe xepoxyague oaxa.

¹³ Ha'e ramo peikuaa 'rā xee ae SENHOR aikoa, peē kuery regua ta'angaa mbyte rupi kyxē py ojuka pyre ikuai ramo, ha'e altar ikuai va'e yvy'ry rupi, yvy'ā ha'e yvyty apyte ikuai va'e ha'e javi rupi, ha'e yvyra hogue ana ha'e yvyra porāgueve ikuai va'e guy rupi, mba'eta ha'e rupi ae opa marāgua ta'angaa pe heakuā porā va'e peme'eaty ikuai.

¹⁴ Ha'e nunga áry rupi xepo amoī vy ambovaipa 'rā yvy tekoa e'ya guive Ribla peve, tekoa ikuaiague ha'e javi rupi nda'ikuaivei aguā. Ha'e ramo peikuaa 'rā xee ae SENHOR aikoa.

7

“Opa ta ma! Opa ta ma!” he'iaque

¹ Teigūe ju SENHOR oayvu ombou xevy. Ha'e vy aipoe'i:

² — Ava ra'y, po rami SENHOR Penderuete ijayvu Israel kuery yvy re: Opa ta ma! Irundy henda rupi ha'e ijyvy apy rupi ikuaiā peve 'rā ou opa aguā.

³ Ha'e rami vy aỹ ma ou ma pepa aguā ára. Mba'eta pendere ambou 'rā xepoxya, rombopaga 'rā pendekuaiague re, pendere ambou 'rā ojegarupy rupi pendekuaiague rekovia.

* 6:3 Israel regua yvyty, yvy'ā, yakā ha'e yvyugua ikuai va'e pe Nhanderuete ijayvu mba'eta ha'e va'e rupi ma ikuai mba'emo ra'angaa mbojeroviaaty.

⁴ Mba'eta pendere nama'êvei 'rã rogueraa jepea rupi neĩ romboaxya rupi. Ha'e rami 'rãgue py pendere ambou 'rã pendekuaiaque rekovia, ha'e ojegarupy rupi pendekuaiaque ojekuaapa 'rã penembyte. Ha'e ramo peikuaa 'rã xee ae SENHOR aikoa.

⁵ Po rami SENHOR Nhanderuete ijayvu:

— Ma'ê, mba'emo vai ou-ouve tema 'rã.

⁶ Ovaê ta ma opa aguã, ou ma oiny, opu'ã ma penderovai.

⁷ Yvy regua kuery, ou ma pekanhy aguã. Ovaê ma ára, vyvty ikuai va'e áry rupi vy'aa 'rãgue py ovaê ma opa marã ipy'aa aguã.

⁸ Aÿ pende'áry anhoê ta xepoxya, roguereko 'rã xepoxya rupi. Aikuaa pota 'rã pendekuaiaque re, ha'e pende'áry ambou 'rã ojegarupy rupi pendekuaiaque rekovia ha'e javi.

⁹ Ha'e rami vy pendere nama'êvei 'rã rogueraa jepea rupi, neĩ romboaxya rupi. Pendekuaiaque re ae 'rã rombopaga. Ha'e ramo ojegarupy rupi pendekuaiaque ojekuaapa 'rã penembyte. Ha'e ramo peikuaa 'rã xee SENHOR ae ajapoaque.

¹⁰ — Ma'ê, ára ovaê ma ouvy. Ojekuaa ma rombopagapa aguã, mba'eta yvyra rovi'i ipotypa ma, onhemboyvate reia voi hokypa ma.

¹¹ Jujukaa kuery opu'ã ma yvyra rovi'i nhombojexavaiarã. Ha'e ramo mba'eve noĩvei ma ha'e kuery peguare, imba'e rei-reikue, ha'e kuery re ima'endu'aague, neĩ oguerovy'aa ague ma voi.

¹² Mba'eta hi'ára ou ma oiny, ovaê ae ma. Ha'e nunga rupi mba'emo joguaa tovy'a eme, ha'e rã mba'emo vendea ma ta'iporiau eme. Mba'eta ha'e kuery ha'e javi re ou poxya hendy va'e.

¹³ Mba'eta yvy vendeare ma ndojevyvei ma 'rã ovende va'ekue oiporu ju aguã, oikove'i teĩ ae ma. Mba'eta ndoiko e'ÿi 'rã heta va'e kuery regua ayvu omombe'u pyre. Ha'e ramo avave rei ndoiko pukuvei 'rã gueko vaia py onhemombaraeta rupi.

¹⁴ — Omonhe'êa ma mimby guaxu, oguereko katupaa ma teĩ joe opu'ã aguã katy ndooai 'rã, mba'eta ha'e kuery ha'e javi re ou xepoxya hendy va'e.

¹⁵ Oka rupi ma kyxe revegua ikuai, ha'e rã opy ma mba'eaxy vaikue ha'e karuai oĩ. Mba'ety rupi oiko va'ekue ojukaa 'rã kyxe py, ha'e rã tetã pygua kuery ma karuai ha'e mba'eaxy vaikue gui 'rã opa.

¹⁶ Xapy'a rei ha'e kuery regua omongue ojava vy oo jepe 'rã. Ha'e rami vy vyvty áry rupi 'rã ikuai, yvyugua rupigua apyaxu rami peteĩ-teĩ ipoaê rei 'rã ojevavyague gui.

¹⁷ Pavê po ma ikangypa 'rã, ha'e pavê renapy'ã ma yy rami meme 'rã ikangy.

¹⁸ Ajukue voxa guigua py onhemonde 'rã okuapy tekora ve'ÿ anho oendu vy. Ha'e javi rova re ojekuaa 'rã oxã, oakã voi onhopimba 'rã.

¹⁹ Ha'e kuery prata oguereko va'ekue ma omombopa 'rã tape rupi, ouro eteve voi ha'e kuery pe rã iky'apa va'e rami 'rã. Mba'eta SENHOR poxya ára py ma prata neĩ ouro ma voi ndogueraa jepei 'rã. Ha'e nunga py nda'evevei 'rã ha'e kuery okaru neĩ guye omonyê aguã, mba'eta ha'e nunga ma teko vai py ho'a aguã imonhopyxangaarã rive.

²⁰ Ha'e kuery ita porãgueve oguerovy'a rei va'e py ma ta'angaa ojeguaru pyrã ojapo va'ekue, mba'emo vai ra'angaa ombojerovia pyrã guive.

²¹ Ha'e rami teĩ xee ma ha'e nunga ajapo iky'apa va'e rami ha'e kuery pe opyta aguã rami, ha'e gui amboaxe regua kuery po py amboaxapa ogueraa rive va'erã. Yvy regua heko vai rei va'e kuery pe ete amboaxa ogueraa va'erã. Ha'e ramo ojavyky rei 'rã.

²² Ha'e kuery gui xerova arova rã omongy'apaa rive 'rã xembojeroviaaty. Ha'e py imongy'aarã kuery oike vy oipe'apa 'rã mba'emo.

²³ — Tojapoa corrente jojokuaarã, mba'eta kova'e yvy tynyê ma jouguy omoêa va'ekue. Tetã rupi voi opa mba'e vai anho oĩ.

²⁴ Ha'e ramo yvy regua mbyte gui ambou 'rã heko vaive va'e hoogue pe'aarã. Ha'e rami vy amomba 'rã ojerovia rei va'e kuery onhemboyvate. Ha'e ramo ha'e kuery pegua henda iky'a e'ÿ va'ekue omongy'apaa 'rã.

²⁵ Ovaê ma imbovaipaarã. Ha'e ramo ha'e kuery oeka 'rã ikuai porã aguã teĩ noĩvei ae ma.

²⁶ Ou 'rã imbojexavaiarã ha'e ayvuxe áry jevy-jevvygua. Ha'e ramo oporandu 'rã okuapy profeta kuery mba'emo oexaa re, teĩ sacerdote kuery ndoguerekovei lei, ha'e nhomongeta va'ety kuery nanhomongeta kuaavei 'rã.

²⁷ Huvixave ojae'o 'rã oiny, yvatekueve re voi oĩ 'rã tekora ve'ÿ. Yvy re ikuai va'e po ma oryry'ipa 'rã ngyje gui. Mba'eta ambopaga 'rã ha'e kuery ikuaiague rami ae, ha'e aikuaa pota 'rã ha'e kuery re joe oikuaa potaa rami ae avi. Ha'e ramo oikuaa 'rã xee ae SENHOR aikoa.

8

Jerusalém py ojegarupy ikuai va'e oexaaque

¹ Ha'e gui mboapy meme ma'etÿa va'e mboapy meme jaxya py, teĩ nhiruí araa py xero py aguapy ainy. Xerenonde py Judá pygua nhomongeta va'ety kuery oguapy avi okuapy. Ha'e gui aia py SENHOR Nhanderuete omboguejy opo xe'áry.

² Ha'e ramo ama'ê rã oĩ peteĩ ava ramigua tata guigua. Iku'a guive yvy katykue ma tataendy anho oĩ. Ha'e rã iku'a guive yvate katykue ma overa va'e rami hexakã.

³ Opo ramigua oguereko va'e ma omokuave'ê vy ojopy xeakã re xe'a oĩ va'e. Ha'e rami vy yvate katy Nhe'ê xereupi heravy yvy áry rupi. Ha'e vy Nhanderuete guigua aexa rã xereraa Jerusalém tetã re, templo roka

py okē kuaray apu'a'ia katy oī va'e peve. Ha'e py ma oī ra'e ta'angaa Nhanderuete nda'evei etea oendu aguã rami ojapo va'e.

⁴ Ha'e py ojekuaa avi Israel kuery ruete rexakãa, tekoa e'ÿa py hexakãa aexaague rami ae ju.

⁵ Ha'e gui ha'e va'e aipoe'i:

— Ava ra'y, ema'ê ke aÿ kuaray apu'a'ia katy — he'i. Ha'e ramo ha'e katy ama'ê rã altar rokê katy oī ae tema ta'angaa Nhanderuete nda'evei etea oendu aguã rami ojapo va'e, jaikea'i py.

⁶ Aipoe'ive ju xevy:

— Ava ra'y, rexa pa ha'e kuery ojapo okuapy va'e? Ha'e va'e ma ojeguarupy tuvixa va'e Israel kuery apy ojapo va'e, xevelygua oo iky'a e'ÿ va'e gui ajepe'a aguã rami. Ha'e rami avi rexa ju 'rã ojeguarupy nda'eveive va'e — he'i.

⁷ Ha'e gui okê jaikea'i katy ju xereraa. Ha'e py oo mbotyã oī va'e re oī peteĩ kua. Ha'e vy aipoe'i xevy:

— Ava ra'y, ejo'o pova'e imbotya re.

⁸ Ha'e ramo imbotya re ajo'o ma vy ama'ê rã oī peteĩ okê.

⁹ Aipoe'i xevy:

— Eike na, ha'e vy rexa 'rã ojeguarupy tuvixa va'e ha'e py ojapo okuapy va'e — he'i.

¹⁰ Ha'e gui aike vy aexa. Ha'e rã ha'e py imbotya jova-jovaive rupi iparapa ra'e opa marãgua yvy rupi otytyry va'e ha'e mymba ojeguarupy, ha'e gui ta'angaa Israel kuery ombojerovia va'ety ha'e javi.

¹¹ Ha'e va'e ta'angaarã ombopara pyre renonde rupi opu'ã okuapy setenta avakue Israel kuery mongetaa kuery regua. Ha'e kuery mbyte py hi'ã avi Safã ra'y Jazanas. Ha'e kuery peteĩ-teĩ opo py oguereko heakuã porã va'e hy'a'i py okai va'e. Heakuã porã va'e rataxĩ ma ojeupi ovy arai rami.

¹² Ha'e gui aipoe'i xevy:

— Ava ra'y, rexa pa Israel kuery mongetaa kuery pytũ guy rupi ojapo okuapy va'e? Ha'e kuery peteĩ-teĩ ikuai 'rã oo'i ta'angaa kuery oĩaty rupi. Mba'eta ha'e kuery aipoe'i: “ SENHOR ma nanhanderexai 'rã, nopenavei ma kova'e yvy re”, he'i okuapy teĩ.

¹³ Ha'e gui aipoe'ive ju xevy:

— Rexave tema 'rã ojeguarupy nda'eveive va'e ha'e kuery ojapo okuapy va'e — he'i.

¹⁴ Ha'e gui xereraa ju SENHOR pegua oo rokê kuaray apu'a'ia katy oī va'e peve. Ha'e py aexa tuuete ramigua Tamuz omanoague re kunhague uguapy reve ojae'o okuapy va'e.*

¹⁵ Ha'e vy aipoe'i:

— Ava ra'y, rexa pa? Ha'e rami avi ojeguarupy rexave ju 'rã kova'e gui nda'eveive va'e — he'i.

¹⁶ Ha'e gui ma SENHOR pegua oo katy ju xereraa. Ha'e py ikuai SENHOR pegua opy oikea'i okê ha'e altar oī va'e mbyte aexa rã vinte e cinco avakue ikuai. Ha'e kuery ma ikupepa okuapy SENHOR pegua templo katy, ha'e gui kuaray oua katy hova okuapy. Kuaray omboetea rupi ikuai, kuaray oua katy oma'ê okuapy reve.

¹⁷ Ha'e ramo aipoe'i xevy pe:

— Ava ra'y, rexa pa? Ha'e gui Judã kuery ma apy namigua ojeguarupy ojapo va'e pe “Mba'e'ÿ” he'i okuapy, ha'e gui ovyv rupi joguero'a 'rã okuapy xembopoxya rupi. Ma'ê, oxĩ re omovaê okuapy yvyra rakã'i.

¹⁸ Ha'e ramo xepoxya rupi ae 'rã areko. Ha'e kuery re nama'ëvei 'rã araa jepea rupi neĩ amboaxya rupi. Ha'e gui xeapyxa py ha'e kuery ojapukai atã teĩ xee naendu potai 'rã.

9

Jerusalém pygua kuery mbopagaarã re ijayvuague

¹ Ha'e ramo aendu rã ojapukai atã reve aipoe'i:

— Peju ke, peê tetã pygua jukaarã kuery, peteĩ-teĩ pendepo py tembiporu nhomombaarã reve — he'i.

² Ha'e ramo ama'ê rã kuaray apu'a'ia katy okê tuvixa va'e oī va'e gui ou okuapy mboapy meme avakue. Ha'e kuery ma peteĩ-teĩ opo py ogueru tembiporu nhomombaarã. Ha'e kuery mbyte ma ou peteĩ ava ijao xiĩ rei va'e, oku'a re oguereko voko mba'emo mboparaaty ryru. Ha'e gui ha'e kuery oike oje'oivy vy altar overa va'e guigua yvy'iry ovaê nhoguenu'amy.

³ Ha'e gui ma Israel kuery ruete rexakãa opu'ã ovy anjo ipepo va'e ikuai va'e mbyte gui. Ha'e vy oê ovy okê jaikea'i peve ranhe. Ha'e gui ava ijao xiĩ rei va'e pe SENHOR ijayvu, mba'emo mboparaaty ryru oku'a re oguereko va'e pe ae.

⁴ Ha'e vy aipoe'i ixupei:

— Eaxa ke eovy Jerusalém tetã mbyte rupi, ha'e gui emoĩ “x” avakue ha'e kuery mbyte rupi ojeguarupy ojapo okuapya káuxa ojae'o ha'e ipoã rei va'e rova re — he'i.*

⁵ Ha'e gui xee aendua py amboae kuery pe ju aipoe'i avi:

— Peê voi peaxa ke peovy tetã rupi ha'e va'e rakykue rupi. Ha'e rami vy pejojuka 'rã peovy. Ha'e kuery re pema'ê eme peraa jepea rupi neĩ pemboaxya rupi.

⁶ Pejuka 'rã tujakue'i, kunumigue ha'e kunhata'igue'i, kyrigüe'i ha'e kunhague, pemomba peve. Ha'e rã avakue “x” py omarka pyre re ma napevaêi 'rã. Pemboypy 'rã xevelygua oo iky'a e'ÿ va'e gui ranhe — he'i.

⁷ Ha'e ramo ha'e kuery jypy ojuka oo renonde rupi nhomongeta va'ety kuery ikuai va'ekue. Ha'e gui jojukaa kuery pe Nhanderuete aipoe'ive ju:

* 8:14 Tamuz ma amboae regua kuery ruete ramigua. Ha'e kuery oikuaa rã ma'etÿ nhavõ omano 'rã yro'y ypy'i jave, ha'e gui ára pyau py onhemboete kuerei 'rã. Imbojeroviaa kunhague ma ojae'o 'rã okuapy omano rã, ha'e opa marã 'rã itavy rei okuapy onhemboete ju aguã. * 9:4 Apocalipse 7.3

— Pemongy'apa ke oo. Ha'e vy pemonyē oka omanogue anho. Ha'e gui ma peē ju — he'i. Ha'e ramo oēmba vy jokuave jogueravy tetā rupi.

⁸ Ha'e gui ha'e kuery jokuaka rupi oje'oi jave xee ae'i apyta ha'e py. Ha'e rami vy xerenapy'ā re aī, xerova vvy re amovaē reve. Ha'e vy ajapukai reve aipoa'e:

— Ai SENHOR Xeruetel! Remomba ta pa Israel regua kuery rembyrekue ha'e javi, Jerusalém áry ndepoxya renhoēa py?

⁹ Ha'e ramo xembovai:

— Israel ha'e Judá kuery reko vaia ma tuvixa ete. Ijyvy tynyē ma tuguy, ha'e tetā rupi voi ha'eve'yā rami joguerekoa anho ikuai. Ha'e rami teī ha'e kuery aipoe'i: “ SENHOR ma kova'e vvy re nopenavei ma, nanhanderechai ae 'rā”, he'i okuapy.

¹⁰ Ha'e nunga rupi ae ha'e kuery re nama'ēvei 'rā araa jepea rupi neī amboaxya rupi. Ha'e rami 'rāgue py ha'e kuery akā re ae ambojeapa 'rā hembiapokue — he'i.

¹¹ Ha'e gui ava ijao xiī rei va'e ou, oku'a re mba'emo mboparaaty ryrū oguereko va'e. Ha'e rami vy omombe'u vy aipoe'i:

— Ajapopa ma rejapo uka va'ekue — he'i.

10

Tapyī hexakā va'e oexaague

¹ Ha'e gui ama'ē rā anjo ipepo va'e kuery akā áry rupi ojekuaa peteī tenda huvixave openaaty ramigua ita safira gui ojapo pyre.

² Ha'e ramo SENHOR ijayvu ava ijao xiī va'e pe. Ha'e vy aipoe'i:

— Tereo iruéra ikuai va'e mbyte rupi, anjo ipepo va'e ikuai va'e mbyte peve. Ha'e vy emonyē ndepo tapyī hexakā va'e anjo ikuaiia gui. Tetā áry rupi remombopa 'rā — he'i. Ha'e ramo ha'e va'e oike ovy aexaa gui.

³ Ava oike jave ma anjo ipepo va'e templo yke oiporu kuaa regua re ikuai. Ha'e gui peteī arai omonyē opy ja'o mbyte pygua.

⁴ Ha'e ramove anjo ikuai va'e áry gui SENHOR rexakāa opu'ā ovy oo jaikēa'i oī va'e katy. Ha'e ramo oo ha'e javi rupi tynyē jekuua arai. Oka rupi voi hexakāmba oiny SENHOR po'akaa gui.

⁵ Anjo kuery pepo ma hevovo rei nhendu oka apy peve, Nhanderuetel Ipo'akapa va'e ijayvu vy onhendua rami.

⁶ Ha'e gui ma ava ijao xiī rei va'e pe SENHOR ijayvu. Ha'e vy aipoe'i:

— Eru tata iruéra ikuai va'e mbyte gui, anjo kuery ikuaiia gui ae — he'i. Ha'e ramo ha'e oike vy iruéra ikuai va'e mbyte hi'ái.

⁷ Ha'e ramo peteī anjo okuave'ē anjo kuery mbyte tata oī va'e katy. Ha'e va'e oguenoē vy ma ava ijao xiī va'e po py omoī. Ha'e va'e ju ojopy vy oē ovy.

⁸ Anjo ikuai va'e ma avakue po ramigua oguereko opepo guýry.

Irundy iruéra oexaague

⁹ Ha'e gui ama'ē rā anjo ikuai va'e vvyry ikuai irundy ruéra.* Peteī-teī anjo ikuai va'e vvyry ma iruéra ikuai. Iruéra ikuai va'e jaexa rā itaendy berilo rami hexakāmba.

¹⁰ Irundyve jaexa rā joo rami meme ojekuaa. Jaexa rā peteī-teī ruéra amboae ruéra mbyte rupi joaxa oiny.

¹¹ Iruéra oguata vy ha'eve rei irundyve katy rei oo aguā. Amboae katy ova-ova e'y re oguata ovy. Tenondegua ooa rupi tema amboae kuery voi oje'oi 'rā, amboae katy ndovai guive oguata oje'oivya rupi.

¹² Anjo ikuai va'e rete ha'e javi rupi hexa oimba rei, ikupe, ipo ha'e ipepo ikuai va'e re guive, ha'e iruéra irundyve ikuai va'e re voi.

¹³ Iruéra ikuai va'e pe ma xee aendu rā “Opyryryī va'e” 'ea.

¹⁴ Temimoingo kuery peteī-teī ma hova irundy va'e. Jyipygua hova ma anjo rova ae, mokoīa ma ava rova, mboapya ma guary rova, ha'e rā hova irundy ma taguato rova.

¹⁵ Ha'e gui anjo ikuai va'e ojeupive'i. Ha'e va'e kuery ma temimoingo kuery Quebar yakā vvyry jypy aexa va'ekue ae.*

¹⁶ Ha'e gui anjo kuery oguata rā iruéra ikuai va'e voi oje'oi avi 'rā ha'e kuery reve. Anjo kuery ma vvy áry ojeupi aguā opepo oupi okuapy teī ha'e kuerya gui iruéra ikuai va'e ndoi.

¹⁷ Anjo kuery opyta ramo iruéra opyta avi. Ojeupi jogueravy ramo iruéra ojeupi avi 'rā, mba'eta iruéra ikuai va'e re oī temimoingo kuery nhe'ē.

Templo gui Nhanderuetel rexakāa ojepe'aague

¹⁸ Ha'e gui SENHOR rexakāa ma oo jaikēa'i áry oīa gui ova ovy vy anjo kuery áry rupi ju opyta.

¹⁹ Ha'e gui xee aexa rā anjo kuery opepo oupipa okuapy reve ojeupi vvy gui. Ha'e kuery oje'oi rā iruéra ikuai va'e voi oje'oi avi hexeve. Opytapa okuapy SENHOR pegua oo rokē kuaray oua katy oī va'e áry. Ha'e kuery áry rupi ma Israel kuery ruete rexakāa ojekuaa oiny.

²⁰ Ha'e va'e kuery ae temimoingo Israel kuery ruete oīa guy rupi aexa va'ekue, Quebar yakā vvyry. Ha'e ramo mae aikuaa anjo ipepo va'e ikuaiia.

* 10:9 Ezequiel 1.5-25 * 10:15 Capítulo 1 py “Temimoingo kuery aexa” he'ia ma anjo ipepo va'e kuery re ijayvu vy, Nhanderuetel po'akaa kuaa ukaa.

21 Ha'e kuery peteĩ-teĩ ma irundy hova ha'e irundy ipepo va'e. Ha'e rã opepo guýry ma avakue rami ipo va'e.

22 Ha'e kuery rova ma Quebar yakã yvýry aexa va'ekue rova rami. Joo rami ae ojekuaa, temimoingo kuery ae vy. Ha'e peteĩ-teĩ ma guenonde katy anho 'rã oguata oje'oiyv.

11

Nhanderuete yvatekueve ombopaga aguã re ijayvuague

¹ Ha'e gui ma Nhe'ẽ xereupi vy xereraa SENHOR pegua oo rokẽ kuaray oua katy oĩ va'e py. Okẽ jaikea'i py ikuai vinte e cinco avakue. Ha'e kuery mbyte aexa heta va'e kuery regua yvatekueve Azur ra'y Jaazania ha'e Benaia ra'y Pelatias.

² Ha'e vy SENHOR aipoe'i xevy:

— Ava ra'y, kova'e avakue ma mba'emo vairã re rive jogueroayvu, ha'eve'ỹa rupi nhomongeta okuapy kova'e tetã py.

³ Mba'eta ha'e kuery aipoe'i okuapy: “Novaẽi teri ri ty'y oorã jajapo aguã? Mba'eta kova'e tetã ma oja rami oĩ, ha'e rã nhande kuery ma xo'o rami”, he'i okuapy.*

⁴ Ha'e nunga rupi ndeayvu 'rã ha'e kuery rovai. Ndee ava ra'y ae 'rã ndeayvu — he'i.

⁵ Ha'e gui xe'áry peve SENHOR Nhe'ẽ oguejy vy aipoe'i xevy:

— Emombe'u ke: Po rami SENHOR ijayvu: Israel kuery, nami ae pendeayvu pekuapy, mba'eta mba'emo re penhembopy'aa ma xee aikuaapa ae ma.

⁶ Kova'e tetã rupi heta ma pejuka, ha'e tetã regua tape ikuai va'e rupi pemonyẽ ma tetekue.

⁷ Ha'e nunga rupi Nhanderuete aipoe'i: Pejuka ha'e tetã mbyte rupi pemombo va'ekue ae rima xo'o rami, ha'e rã tetã ma oja rami oĩ. Ha'e rã peẽ kuery ma roipe'apa 'rã ha'e gui.

⁸ Kyxe gui pekyje pekuapy va'eri kyxe ae 'rã ambou peẽ kuery re — he'i SENHOR Nhanderuete.

⁹ — Tetã mbyte gui xee roipe'a vy romboaxapa 'rã amboae regua kuery po py. Ha'e rami py 'rã rombopaga.

¹⁰ Ha'e ramo pendereitya 'rã kyxe py. Israel yvy jave rupi 'rã rombopaga. Ha'e ramo peikuaa aguã xee ae SENHOR aikoa.

¹¹ Ha'e gui kova'e tetã ma oja rami e'ỹ 'rã oĩ peẽ kuery pe, ha'e tetã mbyte py xo'o rami e'ỹ 'rã pendekuai. Mba'eta rombopaga 'rã Israel yvy jave rupi.

¹² Ha'e ramo 'rã peikuaa xee ae SENHOR aikoa. Mba'eta xeayvuague rupi e'ỹ pendekuai, xee aipotaa ndapejapoi guive. Ha'e rami 'rãgue py amboae regua kuery pendeyvýry rupi ikuai va'e oipotaa rupi rive pendekuai — he'i.

¹³ Ha'e gui xeayvu teri reve Benaia ra'y Pelatias omano xapy'a. Ha'e ramo xerenapy'ã re aĩ, xerova yvy re amovaẽ reve. Ha'e vy ajapukai atã reve aipoa'e:

— Ai SENHOR Xeruetel! Israel kuery ha'e javi ri ty'y remomba ta? — ha'e.

Israel kuery ogueru ju aguã re ijayvuague

¹⁴ Ha'e gui xevy SENHOR oayvu ombou vy aipoe'i:

¹⁵ — Ava ra'y, nderyvy kuery, neretarã kuery ae'i, ha'e Israel kuery ha'e javi pe Jerusalém pygua kuery aipoe'i okuapy: “Peẽ kuery ma SENHOR gui pejepe'apa mombyrya py. Ha'e rã orevy pe ma kova'e yvy ome'ẽ orekuai aguã”, he'i okuapy.

¹⁶ Ha'e nunga rupi aipo're: Po rami SENHOR Nhanderuete ijayvu: Ha'e kuery ma mombyry aipe'a amboae regua ikuai rupi, ha'e amboae yvy rupi amoã teĩ ha'e kuery pe xee ae aiko 'rã oo iky'a e'ỹ va'erã, yvy mboae rupi oague py xapy'a'i ikuai ja.

¹⁷ Aipo'reve ju: Po rami SENHOR Nhanderuete ijayvu: Xee amono'õmba ju 'rã amboae regua kuery ikuai mbyte gui, arupa ju 'rã yvy araa ukaague gui. Ha'e rami vy ha'e kuery pe ae ju 'rã ame'ẽ Israel yvy.

¹⁸ Ha'e py ojevypa ju ma vy ha'e gui oi'pe'apa 'rã ta'angaa ojou vaipy ha'e ojegarupy ogueroko va'ekue ha'e javi.

¹⁹ Ha'e ramo ha'e kuery pe ame'ẽ 'rã peteĩ'i rami ipy'a aguã, ha'e kuery re amoĩ 'rã nhe'ẽ pyau. Ha'e kuery gui amboi 'rã ikuraxõ ita guigua, ha'e hekovia ame'ẽ 'rã kuraxõ ho'o guigua,

²⁰ xeayvua rupi ju ha'e kuery ikuai aguã, ha'e xee aipotaa omoĩ porã vy ojapo ete aguã. Ha'e kuery ikuai 'rã xeavygua, ha'e rã xee ma aiko 'rã Tuuete.

²¹ Ha'e rã amboae kuery opy'a py ta'angaa ojou vaipy ha'e ojegarupy rive oguerovy'a va'e ma ajapo 'rã inhakã re ae ikuaiague ojeapa aguã rami — he'i SENHOR Nhanderuete.

²² Ha'e gui ma anjo ikuai va'ekue opepo oupi reve ojeupi, iruéra ikuai va'e voi ojeupi avi ovy ha'e kuery reve. Ha'e rã ha'e kuery áry oime Israel kuery ruete rexakãa yvateve rupi.

²³ Ha'e gui tetã mbyte gui SENHOR rexakãa ojeupi ovy vy opyta oiny tetã gui mombyry'i yvyty kuaray oua katy oĩ va'e áry.

²⁴ Ha'e gui ma ra'u rupi Nhanderuete guigua Nhe'ẽ xereupi ju vy xereraa henoiny Caldéia yvy re escravo-rã ogueraapa pyre ikuai katy. Ha'e gui ma xee ndaexavei mba'emo oexa uka pyre.

²⁵ Ha'e gui escravo-rã ogueraa pyre ikuai va'e pe amombe'upa SENHOR xevy oexa uka va'ekue ha'e javi.

* 11:3 Ha'e rami ijayvu okuapy ojee anho ojeroviaa rupi, Nhanderuete omomba ta maa ndogueroviai vy. Tetã pe “Oja” he'i mba'eta oexa'ã teĩ tetã kora mba'emo vai ojoko aguã re.

12

Escravo-rã ogueraa pyre kuery ikuaia re ijayvuague

¹ Ha'e gui ma xeve SENHOR oayvu ombou vy aipoe'i:

² — Ava ra'y, ndee ma xere opu'ã va'e kuery mbyte rupi reiko. Ha'e kuery ma guexa oguereko oma'e'ẽ aguã va'eri ndoexai va'e, oapya oguereko oendu aguã va'eri noendui va'e, mba'eta xere opu'ã rupi ae ikuai.

³ Ha'e rã ndee ava ra'y, ereko katu ke nembra'e rei-rei amboae katy reguata aguã merami. Ha'e gui ára pyve eẽ ha'e kuery oexaa py, amboae vvy katy reo aguã merami. Tereo nderekoa gui amboae katy ha'e kuery oexaa py ju. Xapy'a rei ma ha'e kuery oikuaa 'rã okuapy, xere opu'ã rupi ae ikuai va'eri.*

⁴ Ara py ae eraa tape py ha'e kuery oexaa py pendevoiyirã reguata aguã. Ha'e gui ka'aru'i jave tereo ha'e kuery oexaa py, amboae vvy katy amongue oguata va'e rami.

⁵ Ha'e kuery oexaa py embokua ndero mbotyta, ha'e eẽ eovy ha'ekue rupi.

⁶ Pavẽ oexaa py 'rã rejaxe. Pytũ rai'i reve 'rã reraa. Ejeova mo'ãmba eovy vvy reoa rexa e'y'ã aguã. Mba'eta ndee romoĩ Israel kuery nderexa vy oikuaa aguã — he'i.

⁷ Ha'e rami rã xeve ojapo ukaague rami ae xee ajapo. Ha'e rami vy ara py araa oka py amboae vvy katy araa va'erã merami. Ha'e gui ka'aru'i jave xepo py ae ambokua xero mbotyta. Pytũ ma jave xee aẽ vvy pavẽ oexaa py xekupe re amoimba xevoiyi araa va'erã.

⁸ Ha'e gui ko'ẽgu ju xeve SENHOR oayvu ombou vy aipoe'i:

⁹ — Ava ra'y, Israel kuery xere opu'ã okuapy va'e noporandui teve ndevy: “Mba'e tu ndee rejapo reiny?” nde'i okuapy?

¹⁰ Aipo're ha'e kuery pe: Po rami SENHOR Nhanderuete ijayvu: Kova'e ma Jerusalém pygua huvixa ha'e Israel kuery ha'e javi oikuaa aguã.

¹¹ Aipo're: Xee aikoa ma peẽ kuery peikuaa aguã. Xee ajapoague rami ae peẽ kuery re ojapoa 'rã. Ha'e ramo escravo-rã pendereraa 'rã amboae vvy katy pendekuai aguã.

¹² Peẽ kuery ruvixa peẽ kuery mbyte oiko va'ekue voi ogueraa 'rã ovoyi okupe re ae. Pytũ jave 'rã oẽ. Ha'e va'e oo jepe aguã ma ombokuaa 'rã tetã kora. Ojeova mo'ãmba 'rã ovy vvy ooa oexa e'y'ã aguã.

¹³ Ha'e rami teĩ hi'áry rupi aipyo 'rã xekya, ha'e ramo ho'a 'rã xenhuã py. Araa uka 'rã Babilônia vvy katy, caldeu kuery vvy re ae. Ha'e rami teĩ ha'e va'e vvy ndoexavei 'rã, omano peve ha'e py ae oiko teĩ.†

¹⁴ Ha'e rã hexevegua kuery oipytyvõa rupi ikuai va'ekue ma amoaĩmba 'rã yuytu ikuai va'e oipejua katy, ixupegua xondaro kuery guive. Ha'e kuery rakykue rupi aekyi uka 'rã kyxe.

¹⁵ Ha'e ramo oikuaa pavẽ 'rã xee ae SENHOR aikoa, amboae regua ikuai rupi araa uka vvy amboae vvy rupi amoaĩmba ramo.

¹⁶ Ha'e rami avi amongue ete'i 'rã aeja kyxe gui oo jepe va'ekue, karuai ha'e mba'eaxy vaikue gui guive, amboae regua ikuai rupi ha'e kuery omombe'u aguã ojegarupy ojapoague ha'e javi. Ha'e ramo oikuaa 'rã xee ae SENHOR aikoa — he'i.

¹⁷ Ha'e ramo xea py SENHOR oayvu ombou vy aipoe'i:

¹⁸ — Ava ra'y, rekyje reve 'rã re'u reiny mbojape, ha'e reryryipa ha'e nanderekorãveia py rey'u 'rã yy.

¹⁹ Ha'e rami vy aipo're 'rã vvy re ikuai va'e kuery pe: “Po rami SENHOR Nhanderuete ijayvu Israel vvy re Jerusalém pygua kuery ha'e javi pe: Pe'u 'rã mbojape napenderekorãveia py, ha'e pey'u 'rã yy penhemondyipa reve, mba'eta pendeivy gui oipe'apaa 'rã mba'emo ikuai va'ekue ha'e javi, ha'e pygua kuery ojapo vaiague ha'e javi re.

²⁰ Ha'e rami vvy tetã ikuai va'ekue ho'apa 'rã ivaipa reve, vvy voi ombovaipa pyre 'rã opyta. Ha'e ramo peikuaa 'rã xee ae SENHOR aikoa — he'i.

²¹ Ha'e gui xeve SENHOR oayvu ombou vy aipoe'ive:

²² — Ava ra'y, mba'e nunga ayvu tu nami peẽ kuery pemombe'u va'ety Israel vvy re? Mba'eta aipopeje: “Are teri ha'e va'e ára ovaẽ aguã, ayvu SENHOR ombou va'ekue ndojeupityi 'rãe guive”, peje.

²³ Ha'e nunga rupi aipo're ha'e kuery pe: “Po rami SENHOR Nhanderuete ijayvu: Xee ajapo 'rã ha'e va'e ayvu rupi pendeayvu ve'y'ã aguã rami, Israel kuery rupi nomombe'uavei 'rã. Mba'eta ára ovaẽ ma ouvy xee SENHOR ayvu ha'e javi ojeupitypa aguã”, 're ha'e kuery pe.

²⁴ Mba'eta Israel kuery mbyte rupi ndoikovei ma 'rã anhetẽgua e'y'ã oexa ra'u va'e, neĩ nhombotavya rupi imba'ekuaa va'e.

²⁵ Mba'eta xee SENHOR ae xeayvu 'rã, ha'e ramo ayvu xee amombe'u va'e ma are'i e'y'ã oiko. Mba'eta xere pepu'ã rei va'e kuery, pekuave teri reve xeayvu 'rã, ha'e ayvu amombe'u va'ekue oiko 'rã — he'i SENHOR Nhanderuete.

²⁶ Ha'e gui xeve pe teĩgu ju SENHOR oayvu ombou vy aipoe'i:

²⁷ — Ava ra'y, ma'ẽ, Israel kuery aipoe'i okuapy: “Ezequiel pe oexa ukua va'ekue ma mbovy rei e'y'ã ára reguarã, ayvu omombe'u va'e ma raka'eve rã teri oiko va'erã”, he'i okuapy.

²⁸ Ha'e nunga rupi aipo're ha'e kuery pe: Po rami SENHOR Nhanderuete ijayvu: Xeayvu peteive ma voi ndarei 'rã, ha'e ayvu amombe'u va'e oiko 'rãe — he'i SENHOR Nhanderuete.

* 12:3 Ezequiel ma oguata ete aguã re'y'ã ijayvu, ha'e kuery pe Nhanderuete guigua oikuaa uka aguã rive. † 12:13 Huvixa Zedequias ndoexai raka'e Babilônia vvy, mba'eta ha'e py ovaẽ e'y'ã mbove hexa omombua (2 Reis 25.7).

Profeta kuery ramigua rive rovai ijayvuague

¹ Ha'e gui ma xevy SENHOR oayvu ombou vy aipoe'i:

² — Ava ra'y, ndeayvu Israel pygua profeta kuery rovai, mba'eta ha'e kuery ma oakã gui rive ayvu omombe'u vy “Pendú SENHOR ayvu”, he'i 'rã okuapy.

³ Po rami ijayvu SENHOR Nhanderuete: Nda'evei ete 'rã profeta kuery hi'arandu e'ÿ va'e pe, mba'eta ha'e kuery ma onhe'ë ae gui 'rã ijayvu mba'eve oexa e'ÿ re.

⁴ Israel kuery, penderegua profeta kuery ma aguara'i tetã ivaipaague rupi ikuai va'e rami rive.

⁵ Mba'eta ha'e kuery ma nomoatyrõi Israel kuery retã kora pa'ũ, neĩ kora ndojapo retavei guive peẽ kuery retã rupi, SENHOR poxya ára py peẽ kuery re opu'ã okuapy va'e rovai peĩ atã aguã.

⁶ Ha'e kuery ma anhetẽ rupi e'ÿ oexa ra'u, ha'e nhombotavya rupi imba'ekuaa 'rã okuapy. Mba'eta “ SENHOR ae ijayvu”, he'i 'rã okuapy xee namboui va'eri. Ha'e kuery oarõ okuapy teĩ oayvuague oiko aguã.

⁷ Ha'e kuery anhetẽ rupi e'ÿ oexa ra'u, nhombotavya rupi rive imba'ekuaa guive. Mba'eta “ SENHOR ae ijayvu”, he'i 'rã okuapy xee ndaxeayvui va'eri.

⁸ Ha'e nunga rupi po rami SENHOR Nhanderuete ijayvu:

— Anhetẽ rupi e'ÿ mba'emo pexa ra'u, ha'e penhombotavya rupi penemba'ekuaa ramo xee aiko peẽ kuery rovai, he'i SENHOR Nhanderuete.

⁹ Ha'e gui xepo amokuave'ẽ 'rã profeta kuery anhetẽ rupi e'ÿ oexa ra'u ha'e nhombotavya rupi imba'ekuaa va'e rovai. Ha'e rami rire ha'e kuery nomongetavei 'rã xevygua kuery, hery noĩvei 'rã kuaxia Israel kuery rery oĩa re, neĩ ndoikevei 'rã guive Israel vyv re. Ha'e rami rã peikuaa 'rã xee ae SENHOR Penderuete aikoa.

¹⁰ Mba'eta ha'e kuery ma xevygua kuery mbotavypaa rupi ikuai. Ha'e vy “Mba'eve ndoiko'i 'rã”, he'i 'rã okuapy, opa marãgua oiko ta va'eri. Kora ojapoa nhavõ profeta kuery omoxii rei rive 'rã.

¹¹ Ha'e nunga rupi imoxiia kuery pe “Kora ho'apa ta ma” 're. Mba'eta oiko 'rã oky ja'ea. Peẽ amandau kuery, pe'a ke, ha'e gui ndee vyvutu guaxu, eipeju.

¹² Ha'e gui ne'exa, kora ho'a ma jave “Mamo tu opyta xii va'e ha'e va'e py pemoxiãgue?” 'ea 'rã pendevy.

¹³ Ha'e nunga rupi po rami SENHOR Nhanderuete ijayvu: Xepoxya rupi ambou 'rã vyvutu guaxu, oky ja'ea nhombopagaarã ha'e amandau jojukapaarã, amomba aguã.

¹⁴ Ha'e rami vy aitypa 'rã kora pemoxii va'ekue, ajapo 'rã vyv py rive itui aguã, ha'e aexa uka 'rã ijytarã va'ekue. Kora ho'a ramo pekanhymba 'rã iguy rupi. Ha'e ramo peikuaa 'rã xee ae SENHOR aikoa.

¹⁵ Ha'e rami py aexa ukapa 'rã xepoxya kora rovai, pemoxii rive va'e kuery rovai guive. Ha'e vy aipoe'ẽ 'rã pendevy: “Kora ma noĩvei ma, imoxiãre kuery okanhymba avi.

¹⁶ Ha'e va'e kuery ma Israel pygua profeta kuery, mba'eta Jerusalém tetã re mba'eve ndoiko'i 'rã rami ijayvu, opa marãgua oiko ta va'eri”, he'i SENHOR Nhanderuete.

Kunhague profeta ramigua rive rovai ijayvuague

¹⁷ — Ava ra'y, xevygua kunhague regua ma oakã gui rive omombe'u SENHOR guigua. Eiko ke ha'e kuery rovai, ndeayvu guive ha'e kuery rovai,

¹⁸ ha'e vy aipoe're: Po rami SENHOR Nhanderuete ijayvu: Nda'evei ete 'rã peẽ kunhague opa marãgua poapy kuaa ha'e tova mo'ãa joo rami e'ÿ-e'ÿ pajerã pejapo va'e pe, nhonhe'ẽ pendea katy guarã pejopy aguã rive! Tyrã pa pemokanhxye vi xevygua kuery nhe'ẽ, ha'e rã amboae kuery ma peraaxe pendejeupe guarã?

¹⁹ Peẽ kuery ma xevygua kuery mbyte naxemboetei pekuapy, peteĩ po'i cevada ha'e peteĩ pẽgue mbojape rekovia rive. Ha'e rami vy pejuka 'rã okuave aguã rami ikuai va'ekue, ha'e rã omano aguã rami ikuai va'ekue ma ndapejukai. Xevygua kuery pe pendeapu rive, apu oenduxe vai okuapy ramo.

²⁰ — Ha'e nunga rupi po rami SENHOR Nhanderuete ijayvu: Ma'ẽ, xee ma aiko pajerã pejapo va'e rovai, mba'eta ha'e va'e py nhonhe'ẽ pejopy guyra mbo'aa rami. Ha'e rami vy aipe'apa 'rã pendepo gui, ha'e guyra rami araa jepepa 'rã nhonhe'ẽ pejopy va'ekue.

²¹ Pendegui amondoropa avi 'rã pendeova mo'ãa peiporu va'ety. Ha'e rami vy xevygua kuery araa jepepa 'rã pendepo gui. Ha'e rami rire ha'e kuery nonhembojavei 'rã pendere pejopy ve'ÿ aguã. Ha'e ramo peikuaa 'rã xee ae SENHOR aikoa.

²² Pendeapua rupi pemomboriau heko porã va'e kuery py'a xee namomboriau ukai va'eri, ha'e rã heko vai va'e po ma pemombaraete, ha'e kuery tape vai gui ojepe'a e'ÿ aguã, tekove opuity e'ÿ aguã.

²³ Ha'e nunga rupi ndapexavei 'rã anhetẽ rupi e'ÿgua, napenemba'ekuaavei 'rã guive. Xevygua kuery araa jepepa 'rã pendepo gui. Ha'e ramo peikuaa 'rã xee ae SENHOR aikoa.

Ta'angaa mbojeroviaa kuery ombopaga aguã re ijayvuague

¹ Ha'e va'e rire xea py ovaẽ Israel regua nhomongeta va'ety kuery. Ha'e kuery ovaẽmba ma vy oguapy okuapy xerenonde.

² Ha'e ramo SENHOR oayvu ombou vy aipoe'i xevy:

³ — Ava ra'y, kova'e avakue ma opy'a py ae omopu'ã okuapy ta'angaa ombojeroviaa aguã. Ha'e nunga ma guenonde py oguereko riaa teko vai py ojeity uka aguã. Xapy'a rei nda'u xee aeja 'rã ri ha'e kuery oporandu uka aguã xevy? Any.

⁴ Ha'e nunga rupi ha'e kuery pe ndeayvu vy aipoe're: Po rami SENHOR Nhanderuete ijayvu: Israel kuery va'e regua ma ta'angaa omopu'ã 'rã opy'a py ae, ha'e gui ha'e nunga teko vai py ojeity uka aguã oguereko

teri reve ou 'rã profeta oĩa py oporandu aguã. Ha'e kuery ou ramo xee SENHOR ae ambovai vy xayvuu 'rã ta'angaa mbovy rei e'ÿ oguerekoa re.

⁵ Ha'e rami aiko 'rã xejeupe guarã ajopy ju aguã Israel kuery py'a, ta'angaa re oje'oi vy xegui ojepe'apa rire.

⁶ — Ha'e nunga rupi aipo're Israel kuery pe: Po rami SENHOR Nhanderuete ijayvu: Pejeko rerova ke, ha'e pejepe'a ta'angaa pereko va'e gui. Pendekupe ke ojeuarupy pereko va'e ha'e javi katy.

⁷ Mba'eta Israel kuery va'e regua, e'ÿ vy Israel yvy re amboae regua ikuai va'e teĩ xegui ojepe'a vy opy'a py ae omopu'a 'rã ta'angaa, ha'e gui ma teko vai py ojeity uka aguã oguereko teri reve ou 'rã profeta oĩa py iixupe oporandu uka aguã xevy. Ha'e va'e ma xee SENHOR ae 'rã ambovai.

⁸ Ha'e va'e avakue rovai arova 'rã xerova ajou vaia rupi. Ha'e rami vy ajapo 'rã ojojai ha'e ayvu vai pyrã, xevygua kuery mbyte gui aipe'a 'rã guive. Ha'e ramo peikuaa 'rã xee ae SENHOR aikoa.

⁹ Ha'e gui xapy'a rei peteĩ profeta mba'emo omombe'u 'rã ojekorea rupi, ha'e va'e ma xee SENHOR ae ambotavy uka rã ijayvu. Ha'e rami teĩ hexe xepo amokuave'ẽ vy aipe'a 'rã xevygua Israel kuery mbyte gui.

¹⁰ Ha'e rami rã mokoĩve re 'rã oĩ ojejavyague re opaga aguã: xevy pe oporandu uka rive va'e opaga 'rã, profeta ramigua opagaa rami avi.

¹¹ Ha'e ramo Israel kuery xea gui ojepe'a ve'ÿ aguã, nonhemongy'avei aguã gueko vaia ha'e javi py. Ha'e ramo xevygua 'rã ikuai, ha'e rã xee ma Tuuete 'rã aiko — he'i SENHOR Nhanderuete.

Nhanderuete ha'evea rami nhombopaga aguã re ijayvuague

¹² Ha'e gui teĩgue ju SENHOR oayvu ombou xevy. Ha'e vy aipoe'i:

¹³ — Ava ra'y, xapy'a rei peteĩ yvy regua kuery ojejavy 'rã xerovai nda'evei ete va'e ojapoa py. Ha'e ramo ha'e kuery rovai xepo amokuave'ẽ vy ha'e kuery pe ndajou ukavei 'rã ho'u va'erã. Ha'e rami vy ha'e kuery re ambou 'rã karuai avakue ha'e mymba kuery amomba aguã ha'e va'e yvy gui.

¹⁴ Ha'e va'e yvy re mboapy avakue, Noé, Daniel ha'e Jó ikuai teĩ guekove anho ha'e kuery ogueraa jepe 'rãgue gueko porãa re — he'i SENHOR Nhanderuete.

¹⁵ — Ha'e gui ma xapy'a rei ha'e va'e yvy re xee ambou 'rã mymba inharõ va'e nhomombaara. Ha'e ramo ha'e va'e yvy ombovaipa pyre ae 'rã opyta, ha'e inharõ va'e kuery gui avave rei ndoaxavei 'rã ha'e rupi.

¹⁶ Ha'e gui anhetẽ ete xee ae rekove rupi aura vy aipoa'e: Ha'e va'e yvy re ha'e va'e mboapyve avakue ikuai teĩ ndogueraa jepei 'rãgue gua'y neĩ guajy kuery ma voi. Ha'e kuery anho'i 'rãgue oo jepe, ha'e rã yvy ma ombovaipa pyre 'rãgue opyta — he'i SENHOR Nhanderuete.

¹⁷ — Ha'e rami e'ÿ vy xapy'a rei ha'e va'e yvy re kyxe ambou vy aipoa'e 'rã: “Kyxe, eaxa ke ha'e va'e yvy rupi, avakue ha'e mymba kuery amomba aguã”, ha'e 'rã.

¹⁸ Anhetẽ ete xee ae rekove rupi aura vy aipoa'e: Ha'e va'e yvy re ha'e va'e mboapyve avakue ikuai teĩ ndogueraa jepei 'rãgue neĩ gua'y neĩ guajy kuery ma voi. Ha'e kuery anho'i 'rãgue oo jepe — he'i SENHOR Nhanderuete.

¹⁹ — Ha'e rami e'ÿ vy ha'e va'e yvy rovai xapy'a rei ambou 'rã mba'eaxy vaikue, e'ÿ vy anhoẽ 'rã xepoxya tuguy moẽara ambou vy, ha'e gui amokanhymba aguã avakue va'e mymba kuery.

²⁰ Anhetẽ ete xee ae rekove rupi aura vy aipoa'e: Ha'e va'e yvy re Noé, Daniel ha'e Jó ikuai teĩ ndogueraa jepei 'rãgue gua'y neĩ guajy kuery. Gueko porãa re guekove anho 'rãgue ogueraa jepe — he'i SENHOR Nhanderuete.

²¹ Mba'eta SENHOR Nhanderuete aipoe'i:

— Jerusalém tetã re katuve ma avakue ha'e mymba kuery okanhy 'rã, nhombopagaarã irundyve regua ambou ramo: kyxe, karuai, mymba inharõ va'e ha'e mba'eaxy vaikue.*

²² Ha'e rami teĩ hembyrekue opyta 'rã mbovy'i ete. Ha'e va'e kuery ma ogueraa jepe 'rã gua'y ha'e guajy kuery. Ha'e gui ma peẽ kuerya py ju ovaẽ ramo pexa 'rã ha'e kuery reko mba'emo vai ojapo rã. Ha'e ramo pendepy'a porã ju 'rã mba'emo vai Jerusalém re ambou va'ekue ha'e javi gui.

²³ Ha'e rami py ha'e kuery penembopy'a porã ju 'rã pexa ramo ha'e kuery reko mba'emo vai ojapo rã. Ha'e gui ma peikuaa 'rã rive e'ÿ Jerusalém re mba'emo vai ambouague — he'i SENHOR Nhanderuete.

15

Yxypo 'ygue re Jerusalém tetã ombojojaague

¹ Ha'e gui SENHOR oayvu ombou vy aipoe'i xevy:

² — Ava ra'y, yxypo 'ygue ma amongue henda py nda'u amboae yvyra ka'aguy re ikuai va'e gui ha'eveve va'e?

³ Yxypo 'ygue nda'u pejou 'rã mba'emo pejapo aguã? Tyrã pa oo mbotya re pemo'ã 'rã imoiny, mba'emo peupi imoiny aguã?

⁴ Any, yxypo 'ygue ma tata py pemombo rive 'rã okai aguã. Ha'e gui xapy'a rei ijapy'i jovaive re, ha'e mbyte rupi voi okaipa ma ramo ha'eve 'rã teve peiporu aguã mba'emo pejapo aguã?

⁵ Ha'e nunga rupi ne'exa, okai e'ÿ mbove mba'everã ndovareĩ va'ekue ma tata py okai rire katuve ma ndovareĩ, tapyiũ rive opyta rire. Ha'e nungakue gui nda'eve 'rã mba'emo pejapo aguã.

⁶ Ha'e nunga rupi yxypo 'ygue yvyra ka'aguy rupi ikuai va'e mbyte gui peru va'ekue tata py pemombo rivea rami avi xee voi ajapo 'rã Jerusalém pygua kuery re — he'i SENHOR Nhanderuete.

* 14:21 Apocalipse 6.8

7 — Ha'e rami vy ha'e kuery re aikuaa pota 'rã ambopaga agua. Xapy'a rei tata gui ha'e kuery va'e regua oo jepe teĩ tata omomba nho 'rã. Ha'e rã peikuaa 'rã xee ae SENHOR aikoa, ha'e kuery re aikuaa pota ramo.
 8 Ha'e rami vy ambovaipa 'rã ha'e kuery yvy, teko vai rupi anho ikuai rire — he'i SENHOR Nhanderuete.

16

Jerusalém pygua kuery itavy reia re ijavyvague

¹ Ha'e gui SENHOR oayvu ombou vy aipoe'i xevy:

² — Ava ra'y, ndeayvu ke Jerusalém pygua kuery pe ojegarupy ojapo okuapya re.

³ Ha'e vy aipo're: Po rami SENHOR Nhanderuete ijavyv Jerusalém tetã pe: * Cananeu kuery yvy re neramoĩ kuery ikuai py ae reiko'i raka'e. Nderu ma amorreu, ha'e rã ndexy ma heteu raka'e.

⁴ Ha'e gui ndetui'ia ára py ma nepuru'ã ndojayaai raka'e, yy py nanemoak'yaĩ guive ndeky'a'o agua, juky py nandeky'tyai, neĩ nanenhovãai raka'e ajukue py.

⁵ Avave rei nanemboaxyai vy ndere noma'ëai raka'e ha'e rami opena agua. Ha'e rami 'rãgue py reiko'ia ára py nemomboo raka'e mba'ety rupi rive, ndegui ojegaruaru pavẽ vy.

⁶ — Ha'e nunga rupi ndea'i rupi xee aaxa vy aexa nderuguy re remy-remyĩ rejupy rã. Ha'e vy ndevy pe aipoa'e va'ekue: “Nderuguy re teri ndetui teĩ eikove. Tá, nderuguy re teri ndetui teĩ eikove tema”, ha'e va'ekue.

⁷ Ha'e gui ma xee romboetave mba'ety henhoĩ pyaupaa rami. Ha'e ramo ndevyate, ndetuvixave reovy vy neporã ete. Nekãrã ojeapo, nde'a voi ipuku. Ha'e rami teĩ ndepire rei teri, nerenhemondei vy.

⁸ Ha'e gui ndea katy'i rupi aaxa avy vy roexa rã ovaẽ ma ra'e rejoayvu agua'ára. Ha'e ramo nde'áry aipyo xeaoo puku apy'i, ndepire reia anhovã agua. Ha'e vy ndevy pe aura reve ajapo xereve guarã. Ha'e rire xera'yxyrã reiko — he'i SENHOR Nhanderuete.

⁹ — Ha'e gui ma yy py rombojau vy roiky'a'opa nderuguy gui, ha'e gui roiky'ty azeite py.

¹⁰ Romonhemonde avi ao ombojega pyre py, ndepy reguarã ame'ẽ mba'emo pireku iporãve va'e guigua, romoku'axã ajukue ipereri'i va'e py, romonheovãmba guive ajukue seda guigua py.

¹¹ Rombojeguapa avi poapy regua py voi, ndeaju'y re amoĩ guive mbo'y.

¹² Nexĩ re ma rombojega peteĩ ojere'i va'e py, romonamixã, ha'e neakã re ma akã regua iporã va'e amoĩ.

¹³ Ha'e rami py ouro ha'e prata ndejeaguapa. Ndeao ma ajukue pereri'i, seda guigua ha'e ombojega pyre py. Romongaru trigo iporãve, ei ha'e azeite py. Ha'e ramo neporã ete vy huvixave ra'yxy rami reiko.

¹⁴ Yvy regua ikuai rupi ndereko oendupaa neporã ete rã, mba'eta ndevaikuea noĩ, ndere xerexakã amoĩ rire — he'i SENHOR Nhanderuete.

¹⁵ — Ha'e rami teĩ neporã reia re rive rejerovia vy ndetavy reia rupi reiko, ndereko pavẽ oendu rã. Ha'e rami vy oaxa va'e pe rei renheme'ẽ ixupe guarã rive.

¹⁶ Ha'e rami vy ajukue rereko va'ekue regua reiporu yvy'ã áry ombojerovia atyrã joegua e'y-ẽ e'y pytã va'e py rembojega vy. Ha'e py ma ndetavy rei. Ha'e va'e nunga ma nda'evei ae oiko agua.

¹⁷ Ita porãgueve, ouro ha'e prata ndeje guarã ame'ẽ va'ekue remboi vy ava ra'angaarã rejapo. Ha'e rami vy rejeyavy ha'e nunga re.

¹⁸ Ha'e nunga ndeao ombojega pyre remboi avi vy ta'angaa renhovãmba. Ha'e gui azeite ha'e heakuã porã va'e ame'ẽ va'ekue ma ta'angaa renonde py remoĩ.

¹⁹ Ha'e gui temb'i'u ame'ẽ va'ekue, trigo iporãve va'e, azeite ha'e ei romongaruague voi remoimba ha'e nunga renonde py heakuã porãve va'e reve. Ha'e rami ete rejapo reikovy — he'i SENHOR Nhanderuete.

²⁰ — Ha'e ramigua áryve nememby kuery ha'e ndepi'a kuery xera'yague ae reraa avi vy rejuka uka ta'angaa pe rive oapya py. Ha'e rami ete ndetavy reia nda'u mba'e e'y'i ri?

²¹ Mba'eta xera'y kuery rejuka uka vy ta'angaa pe remboaxapa tata py reapy reve.

²² Ha'e rami ojegarupy rejapoa ha'e ndetavy reia ha'e javi py nderexaraipa nekunhataĩ rã guare re, ndepire rei ha'e nandeaĩ rive nderuguy py remy-remyĩ rejupy jave guare re guive.

²³ SENHOR Nhanderuete aipoe'ive ju:

— Nda'evei, nda'evei ete 'rã ndevy! Mba'eta opa marãgua ha'eve'y va'e rejapo ma rire

²⁴ tetã mbyte ha'e javi rupi ae ju rejapo rembojerovia atyrã, altar-rã heta guive rejapo.

²⁵ Mba'eta ndea py tape ojerea ikuai va'e ha'e javi rupi rejapo altar-rã, neporãague remongy'apa vy. Ha'e rami vy oaxa va'e pe rei tema reipe'a neretya, tavy rei rejapove tema reovy vy.

²⁶ Ndetavy rei avi ndea katygua kuery Egito guigua ra'y kuery hete guaxupa rei va'e reve. Ha'e rami py xembopoxy agua rami remboetave tema ndetavy reia.

²⁷ Ha'e nunga rupi ae nderovai amoĩ xepo ndevyvy namboetaive vy. Romboaxa avi filisteu kuery ndere ija'e'y va'e kuery pe, ha'e kuery oipotaa rami rei nderereko agua, opa marã rei reikoa gui ha'e kuery ojegaruaru rire.

²⁸ Assíria pygua ra'y kuery reve voi ndetavy rei, ha'e rami reiko agua anho tema nda'eveive vy. Ha'e kuery reve ndetavy rei va'eri nderepytu'uxei.

²⁹ Ha'e rami 'rãgue py Canã yvy ha'e javi rupi ndetavy reive tema Caldéia yvy peve. Ha'e rami teĩ nderepytu'uxei ae tema.

³⁰ Ha'e gui ma SENHOR Nhanderuete aipoe'ive ju:

— Ha'e rami reikoa py ndepy'a re nekangya anho oĩ, kunha tavy rei oxĩ kuaa e'y va'e rami reiko vy.

* 16:3 Kova'e capítulo py Jerusalém tetã re Nhanderuete ijavyv, peteĩ kunha re ombojoja vy.

³¹ Ha'e rami vy tetã rupi jaikea'i nhavõ rupi rejapo reikovy ombojerovia atyrã, ha'e rã tetã mbyte rupi ma altar-rã rejapo. Ha'e rami avi kunha tavy rei rami e'y guive reiko, mba'eta perãta re'y ndetavy rei vy.

³² Ta'yxy itavy rei va'e rami ae reiko, ome 'rãgue py avakue mboae omovaẽ va'e rami rive.

³³ Mba'eta kunha tavy rei pe ma mba'emo ome'ẽa 'rã, ha'e rã ndee ma mba'emo reme'ẽ rivepa jepi 'rã repenaa kuery pe, ndea katy opa rupi gui ou aguã ndereve itavy rei aguã.

³⁴ Ha'e nunga rupi ndetavy reia py kunha tavy rei rami e'y reiko, mba'eta itavy rei aguã ndereka okuapy va'e ndevy mba'emo ome'ẽ 'rãgue py ndee ae mba'emo reme'ẽ 'rã ha'e kuery pe — he'i.

³⁵ — Ha'e nunga rupi kunha tavy rei reiko va'e, endu ke SENHOR avvu.

³⁶ Po rami SENHOR Nhanderuete ijavyu: Repenaa kuery reve opa marã ndetavy rei reikovy ndepire reia rupi. Ha'e gui ta'angaa remopu'ã va'ekue pe ojegarupy anho rejapo, mba'eta ha'e nunga pe nememby kuery ha'e ndepi'a kuery rejuka vy remoẽ huguykue.

³⁷ Ha'e nunga rupi ma'ẽ, a'y ma amboatypa 'rã ndere opena va'ekue ha'e repenaa va'ekue ha'e javi, ndere ija'e'y va'e kuery ha'e javi reve. Nderovai ae ambou 'rã opa rupi gui. Ha'e rami vy ha'e kuery renonde py rombopire reipa 'rã ha'e kuery pavẽ nderexa aguã.

³⁸ Ha'e rami vy xee rombopaga 'rã itavy rei va'e ha'e jojukaare ombopagaa rami. Ha'e vy romoingo axy 'rã xepoxy ha'e nda'evei etea rupi.

³⁹ Ha'e rami vy romboaxa 'rã ha'e kuery po py. Ha'e ramo ha'e kuery oitypa 'rã ombojerovia atyrã ha'e altar-rã rejapo va'ekue. Omboipa 'rã ndeao, oipe'apa 'rã guive ita porãgueve ndejeguaague. Ha'e rami vy ndereja 'rã ndepire rei ha'e ndeaaovei reve.

⁴⁰ Ha'e gui ma ha'e kuery heta ombou 'rã nderovai guarã. Ha'e ramo ndeapipa 'rã okuapy ita py, kyxe py ndepyxo 'rã guive.

⁴¹ Oapypa 'rã oo ndea py ikuai va'e, ha'e gui nembopaga 'rã mbovy e'y kunhague oexaa py. Ha'e rami vy amombytu'upa 'rã ndetavy reiaque, ha'e ramo mba'eve nereme'ëvei ma 'rã ndetavy rei aguã.

⁴² Ha'e rami vy mae anhenhandu porã ju 'rã ndevy xepoxyague ha'e nda'evei ete aikoague gui. Apytu'u ete 'rã, ndevy ndaxepoxyvei aguã rami.

⁴³ Mba'eta nekunhatai rã guare re nanema'endu'avei vy ha'e rami ete xembopoxy rive, a'y nde'áry ambou 'rã reikoague rekovia, ojegarupy rejapoague áryve rejapo ve'y aguã ha'e rami ete ha'eve'y va'e — he'i SENHOR Nhanderuete.

⁴⁴ — Ha'e gui a'y gui ma ijavyuxe va'e meme 'rã nderovai aipoe'i: “Oxy rami ae avi 'rã imemby voi oiko”, he'i 'rã.

⁴⁵ Mba'eta ndee ma ndexy ramigua ae ju, mba'eta ndexy ma ome ha'e omemby kuery gui ojegaruaraka'e. Ha'e ndekypy'y kuery rami ae avi reiko, mba'eta ha'e kuery ma ome ha'e omemby kuery gui ojegaruaraka'e. Ndexy ma heteu, ha'e rã nderu ma amorreu raka'e.

⁴⁶ Ha'e gui nderyke ma Samaria tetã, kuaray apu'a'ia katy hekoa omemby kuery reve. Ha'e rã ndekypy'y ma Sodoma tetã, kuaray puku-a katy omemby kuery reve hekoa va'e.

⁴⁷ Ha'e gui ndee ma ha'e kuery rami avi reiko ha'e kuery ojegarupy ojapoa ha'e javi rupi. Ha'e rami anho e'y, ha'e kuery rami ete reikoa áryve ma ha'e kuery gui renhemongy'ave tema reikoa ha'e javi rupi.

⁴⁸ Ha'e nunga rupi anhetẽ ete xee SENHOR Penderuete xee ae rekove rupi aura vy aipoa'e: Sodoma tetã omemby kuery reve ma ndaeko vai raka'e ndee tyke nememby kuery reve pendekoo vaia rami ete.

⁴⁹ Mba'eta po rami ma ndekypy'y Sodoma heko vai: Omemby kuery reve ojereu porã reia rupi temb'i'u ndoatai ha'e ovy'a rei va'eri peteive henda py noipytyvõi iporiaukue'i ha'e ojexavai va'e kuery.

⁵⁰ Ha'e rami vy xerenonde rupi ojegarupy anho ojapo okuapy ojejou porã reia rupi. Ha'e ramo ha'e nunga aexa vy aipe'apa vyvoi ikuaiaque gui.

⁵¹ Ha'e gui Samaria tetã ma ndee rejeyavya ramigua ne'i mbyte rupi peve ndojapoi. Mba'eta ndee ma ndekypy'y kuery áryve rejapove tema heravy ojegarupy, ha'e rami vy ndejegui remboeko porãve ndekypy'y kuery, opa mba'e vai rejapoa py rive.

⁵² Ha'e gui ma ndere oi 'rã ndetavyague gui rexã aguã. Rejapo ndekypy'y kuery nombopagaaive aguã rami, mba'eta ha'e kuery gui ojegaruvepy py rejeyavy rã ndegui ha'e kuery heko porãve. Ha'e nunga rupi rexã voi, ndere toi rexã, ndejegui ndekypy'y kuery nerembopaga ukaive rã.

⁵³ — Ha'e gui amoingo porã ju 'rã ndekypy'y kuery, Sodoma ha'e imemby kuery reve, Samaria imemby kuery reve guive. Ha'e kuery reve ndee voi romoingo porã ju 'rã,

⁵⁴ ha'e rami reikoague ha'e javi gui rexã oi aguã ha'e kuery rembopy'a porã ju aguã rami.

⁵⁵ Ha'e gui ndekypy'y kuery Sodoma ha'e Samaria imemby kuery reve jypy ikuai porãague rami ae ju ikuai ramo ndee ha'e nememby kuery voi pendekuai porã ju 'rã jypy pendekuaiague rami ae.

⁵⁶ Ha'e gui rejeyou porã rei vy ndeayvu rei va'ekue ndekypy'y Sodoma re,

⁵⁷ ndereko vaia ndojekuaai teri jave. Ha'e gui a'y ma ndere voi ha'e kuery re rami avi Síria ha'e Filístia pygua kunhague ijavyu rei okuapy, ijyvyry rupi ikuai va'e ha'e javi voi.

⁵⁸ Mba'eta ndere oi 'rã repaga aguã opa marã reikoague ha'e ojegarupy rejapoague re — he'i SENHOR.

⁵⁹ Mba'eta po rami SENHOR Nhanderuete ijavyu:

— Xee ma ndere ajapo 'rã ndee ae rejapoague rami, mba'eta ndee ma remboyke rive aura vy xereve guarã ajapo va'ekue.

⁶⁰ Ha'e rami te'i xema'endu'a nho 'rã nekunhatai jave py xereve guarã ndevy ajapo va'ekue re. Ha'e rami vy ndevy ajapo ju 'rã xereve guarã raka'e rã peve oi va'erã.

⁶¹ Ha'e va'e ára py reikoague re nema'endu'a vy reximba 'rã ndekypy'y kuery removaë vy. Mba'eta nderyke ha'e ndekypy'y ikuai va'ekue ma ndevy ame'ë 'rã nememby kuery rami, va'eri xereve guarã ajapo va'ekue rami vy e'ÿ ta'vy.

⁶² Mba'eta ndevy pe ajapo 'rã xereve guarã, ha'e peikuaa 'rã xee ae SENHOR aikoa,

⁶³ nema'endu'a ha'e reximba aguã, ha'e romo'yvy'i rire rejjou porã reia rupi ve'ÿ ndeayvu aguã, reikoague ha'e javi gui roperdoapa rire — he'i SENHOR Nhanderuete.

17

Mba'emo re ombojojaa rupi mokoï taguato ha'e uva'y omombe'uague

¹ Ha'e gui xevy SENHOR oayvu ombou vy aipoe'i:

² — Ava ra'y, emombe'u peteï ayvu mba'emo re rembojoja vy Israel kuery oikuaa aguã.

³ Ha'e vy aipo're: Po rami SENHOR Nhanderuete ijayvu: Oiko peteï taguato tuvixa va'e. Ipepo ha'e hague ma ipuku, hague ma joo rami e'ÿ-e'ÿ pytä va'e. Ha'e va'e ma Líbano yvy re ou. Ha'e vy oipe'a heravy yary rovapy.

⁴ Yvyra rovapy omondo heravy vy ogueraa peteï yvy mba'emo vendea ikuai py. Mba'emo vendea kuery retã py ae oeja ovy.

⁵ Ha'e gui henhoïgue pendevy guigua ju ogueraa vy onhotÿ peteï yvy porãa py. Ojopy vy onhotÿ yy reia py, yy rembe rupi yvyra ikuai va'e rami oiko porã aguã.

⁶ Ha'e va'e ma yvate vy uva'y hovana rei va'e oiko. Nda'yvate rei va'eri hakã ma taguato-a katy ova oiny, iguy rupi hapo porã guive. Ha'e rami vy uva'y ete oiko, hakã porã ha'e hoky pyau guive.

⁷ — Ha'e gui oiko taguato tuvixa va'e mboae. Ha'e va'e ma ipepo puku va'e, hague reta guive. Ha'e ramo ha'e katy ju ova uva'y rapo, hakã guive. Hi'yvy py guive oo ha'ea katy, onhemoakÿ uka vy.

⁸ Yvy porãa py, ha'e yy anho oia rupi onhotÿ hakã ha'e hi'a reta aguã, ha'e uva'y iporãve va'e oiko aguã.

⁹ Aipo're: Po rami SENHOR Nhanderuete ijayvu: Ha'e va'e uva'y oiko porã 'rã teve? Taguato jypyguu oo vy nomondoroï 'rã teve hapo, ha'e ndojayai 'rã ri hi'a, hogue ha'e ipyau jevy va'ekue ipirupa aguã? Mba'eta imbarae e'ÿ va'e, avakue mbovy'i ete teï oapo'opa 'rã.

¹⁰ Ha'e gui amboae henda py onhotÿ ramo ha'e py nda'u oiko porã 'rã ri? Any, mba'eta vvytu kuaray oua katy oipeju ramo ipirupa rive 'rã. Hi'yvy py guive 'rã ipirupa ovy.

¹¹ Ha'e ramo xevy pe SENHOR oayvu ombou vy aipoe'i:

¹² — Aÿ ma aipo're xere opu'ã rei va'e kuery pe: Ndapeikuaai teve mba'erã pa kova'e nunga oikoa? Ma'ë, Babilônia pygua huvixa Jerusalém tetã re ou vy oipe'a heravy raka'e huvixave ha'e yvatekueve ikuai va'ekue. Babilônia tetã katy ogueraapa.

¹³ Ha'e vy huvixave ra'y kuery regua peteï ojou vy hexeve ojapo peteï rami ikuai aguã, oura uka guive. Ha'e gui ijyvy gui ogueraapa ipo'aka va'ekue

¹⁴ openaa ha'e javi rupi yvyïve'i aguã nonhemboyvatevei aguã rami. Ha'e rami avi peteï rami ikuai aguã regua ojapo va'ekue rami ikuai va'e rire okuave'i nho 'rãgue.

¹⁵ Ha'e rami teï ha'e va'e huvixa ma Babilônia pygua huvixa rovai opu'ã vy guembigua kuery omoudouka raka'e Egito katy, kavaju ha'e heta avakue ogueru aguã ha'e gui. Ha'e rami ete mba'emo vai apoare nda'u oo jepe 'rã ri? Peteï rami ikuai aguã ojapo pyre ombovaipa rire nda'u oo jepe 'rã teve?

¹⁶ Any, anhetë ete xee SENHOR Penderuete xee ae rekove rupi aura vy aipoa'e: Ha'e va'e omano 'rã Babilônia yvy py, huvixarã moïare yvy py ae, ha'e oia py ae 'rã omano, ouraague ha'e peteï rami ikuai aguã ojapoague ombovaipa rire.

¹⁷ Ha'e rã Egito pygua huvixa Faraó ma ixondaro ha'e hexegua kuery heta teï noipytyvöi 'rã joe opu'ãa py, mba'eta tetã rovai yvy omboaty 'rã kora áry rupi oaxa aguã jojuka retaa rupi.

¹⁸ Mba'eta ouraague omboyke, ha'e peteï rami ikuai aguã jopopyy ratã reve ojapo va'ekue ombovaipa vy ha'e nunga ha'e javi ojapo raka'e. Ha'e nunga rupi ae ndoo jepei 'rã.

¹⁹ Ha'e nunga rupi anhetë ete xee SENHOR Penderuete xerekove rupi aura vy aipoa'e: Xerery rupi ouraague omboykeague ha'e peteï rami ikuai aguã ojapo va'ekue ombovaipaague ma ajapo 'rã inhakã re ae ojeapa aguã rami.

²⁰ Ha'e rami vy hi'áry aipyo 'rã xekya, ha'e vy ambo'a 'rã xenhuã py. Babilônia yvy katy araa uka vy ha'e py aikuaa pota 'rã xerovai opu'ã reiaque re.

²¹ Hexeve ojapa va'ekue, ixondaro kuery ha'e javi reve ojokapaa 'rã kyxe py. Ha'e rã okuave'i va'e ma amoaimba 'rã vvytu ha'e javi oipejua katy. Ha'e ramo peikuaa 'rã xee SENHOR ae xeyvyuague.

²² — Po rami SENHOR Nhanderuete aipoe'i: Xee ma teïgue ju aipe'a 'rã peteï yary rovapy anhotÿ aguã. Hakã iporãvea gui ajaya 'rã ipyauvea oï va'ekue, ha'e gui peteï vvyty yvateve ha'e iporãve va'e áry ju 'rã anhotÿ.

²³ Israel regua vvyty re ae 'rã anhotÿ. Ha'e ramo hakã reta ha'e hi'a porã 'rã. Ha'e rami vy yary iporãve va'e 'rã oiko. Iguýry ma opa marãgua mymba kuery ikuai 'rã. Hakã rupi ma kuaray'ãa py opa marãgua guyra ju 'rã onhemboaity okuapy.

²⁴ Ha'e rami rire yvyra ikuai va'e ha'e javi oikuaa 'rã xee SENHOR ae yvyra yvatekueve reitya aiko, ha'e rã yvyïgueve ma ambo'yvate va'e. Yvyra pyau amombiru va'e, ha'e rã ipirukue ma ambopyau ju va'e. Xee aipoa'eaque xee SENHOR ae ajapo ju.

18

Peteĩ-teĩ gueko re ae oikuaa pota aguã re ijavyuague

¹ Ha'e gui SENHOR oayvu ombou vy aipoe'i xeivy:

² — Mba'eta tu peẽ kuery Israel yvy re mba'emo oiko va'e pexa vy aipopeje: “Tuu kuery uva aky ho'u rire ta'y kuery rañ ju nda'evei”, peje?

³ Anhetẽ ete xee SENHOR Penderuete xerekove rupi aura vy aipoa'e: Pova'e ayvu ma napemombe'tuvei ma 'rã Israel yvy rupi.

⁴ Mba'eta temimoingo nhe'ẽ ha'e javi ma xeivygua meme. Tuu kuery nhe'ẽ ha'e ta'y kuery nhe'ẽ voi xeivygua ae. Ojevavy va'e ae omano 'rã.

⁵ — Ha'e gui xapy'a rei peteĩ ava heko porã va'e vy ojapo 'rã ha'evea ramigua joguerekoa py.

⁶ Ha'e rami vy ndo'ui 'rã xo'o yvyty áry rupi ta'angaa pe ome'ẽ mbyre, neĩ noma'ẽi 'rã guive Israel kuery ta'angaa oguereko va'e re, ndoguerojevavy 'rã oirũ ra'yxy, neĩ nonhembojai 'rã kunha gueko re oĩ va'e re.

⁷ Nombojexavai 'rã avave rei, mba'emo oiporu va'ekue ome'ẽ kuerei 'rã iporukaare pe, na'imondai 'rã, guembi'u omboja'o 'rã okaruxe va'e pe, ha'e omonhemonde 'rã guive ijao e'y va'e kuery.

⁸ Ha'e va'e ma operáta oiporu uka rire nomboekovia retavei 'rã, hi'áryve ndojopyi 'rãe. Ojoko 'rã opo ha'eve'ya rami ojapo e'y aguã, ha'e vy avakue re oikuaa potaa py ha'evea rami meme 'rã joguereko anhetẽ ete rupi.

⁹ Ha'e va'e xeayvu aeja va'ekue rupi vy ojapo 'rã aipota va'e, ha'evea rami meme 'rã oiko. Ha'e gui ma ha'e va'e heko porã va'e oikove 'rã — he'i SENHOR Nhanderuete.

¹⁰ — Ha'e gui xapy'a rei ha'e va'e oguereko 'rã gua'y imonda va'e, jujukaa, e'y vy ha'e nunga va'e rei tema guyvvy kuery pe ojapo va'e.

¹¹ Ha'e va'e ma peteĩve ojapo 'rã va'ekue ndojapoi. Ha'e rami 'rãgue py ho'u 'rã xo'o yvyty áry rupi ta'angaa pe rive ome'ẽ mbyre, oguerojevavy 'rã oirũ ra'yxy,

¹² ombojexavai 'rã iporiaukue'i ha'e oipotapa rei va'e, imondaa rupi 'rã oiko, nome'ẽvei ojerureague, ta'angaa re rive oma'ẽ, ojeguarpuy anho ojapo,

¹³ peráta oiporu uka rire ojopy retavexe 'rã guive. Ha'e gui ma ha'e va'e nda'u oikove 'rã? Ndoikovei 'rãe. Ha'e ramigua ojeguarpuy ha'e javi ojapo rire ojukaa 'rã, ha'e hexe ae 'rã oĩ huguy omoẽague re opaga aguã.

¹⁴ — Ha'e gui aỹ ma, xapy'a rei oiko 'rã peteĩ ta'y nguu ojevavy rã oexapa teĩ ha'ekue ramigua ndojapoi va'e.

¹⁵ Ha'e rami vy ndo'ui 'rã xo'o yvyty áry rupi ta'angaa pe ome'ẽ mbyre, noma'ẽi 'rã ta'angaa Israel kuery oguereko va'e re, oirũ ra'yxy ndoguerojevavy 'rã guive.

¹⁶ Neĩ nanhomomboríau rei 'rã, nome'ẽ e'y 'rã ojerureague, na'imondai 'rã, guembi'u omboja'o 'rã okaruxe va'e pe, omonhemonde 'rã ijao e'y va'e,

¹⁷ opo ndoipe'a e'y 'rã iporiaukue'i pe, peráta oiporu uka rire nomboekovia retavei 'rã, hi'áryve ndojopyi 'rã, ojapo 'rã guive xee aipota va'e xeayvuague rupi oiko vy. Ha'e va'e ma nomanói 'rã nguu ojevavyague re. Oikove 'rãe.

¹⁸ Ha'e rã tuu ma ojukaa 'rã heko vaiague re, jokorea rupi oiko rire, oirũ kuery gui imondaa rupi, ha'e heta va'e kuery mbyte rupi ha'eve'ya ramigua ojapo guive rire.

¹⁹ — Ha'e rami teĩ peporandu 'rã: “Mba'e re tu ta'y ndopagai 'rã nguu ojevavyague re?” peje 'rã. Ha'e rami mba'eta ta'y ma teko porã ha'e ha'evea ramigua ojapo oikovy, ha'e xeayvuague omoĩ porã vy ojapo avi oikovy. Ha'e nunga rupi ae oikove 'rã.

²⁰ Mba'eta ojevavy va'e ae 'rã omano. Ta'y ma ndopagai 'rã nguu ojevavyague re, neĩ tuu ma voi ndopagai 'rã gua'y ojevavyague re. Heko porã va'e re oĩ 'rã teko porã rekovia, ha'e gui heko vai va'e re ma oĩ 'rã gueko vaiague re opaga aguã.

²¹ — Ha'e rami avi xapy'a rei ojevavy va'ekue ojeko rero va 'rã ojevavyague ha'e javi gui, ha'e xeayvuague omoĩ porãmba vy ojapo 'rã teko porã ha'e ha'evea ramigua. Ha'e rami vy oikove 'rã, nomanói 'rãe.

²² Ha'eve'ya ramigua ojapoague re ma na'ima'endu'aavei 'rã. Teko porã rupi oiko rire oikove 'rã.

²³ Mba'eta xee nda'u arovy'a ri heko vai va'e omano rã? Any, xee aipota ojevavyague gui ojeko rero va oikove aguã — he'i SENHOR Nhanderuete.

²⁴ — Ha'e rami teĩ xapy'a rei heko porã va'ekue ma gueko porãague gui ojepe'a vy ojevavy ju 'rã, heko vai va'e ojeguarpuy ojapoa rami avi ojapo oikovy vy. Ha'e va'e nda'u oikove 'rã teve? Any, mba'eta teko porã rupi oikoague ha'e javi re na'ima'endu'aavei 'rã. Ha'e va'e omano 'rã gueko vai ha'e ojevavy reia py.

²⁵ — Ha'e rami teĩ aipopeje 'rã: “ SENHOR reko ma ha'eve'ya ramigua”, peje 'rã. Aỹ ma Israel kuery, pendu ma: Xereko nda'u ha'eve'ya ramigua teve? Peẽ kuery reko e'y teve ikarẽ-karẽ va'e?

²⁶ Ha'e nunga rupi xapy'a rei heko porã va'ekue ma gueko porãague gui ojepe'a vy teko vai rupi anho ri oiko vy omano 'rã ha'e nunga py. Gueko vaia py ae 'rã omano.

²⁷ Ha'e rami teĩ xapy'a rei heko vai va'e ma gueko vaiague gui ojeko rero va vy teko porã ha'e ha'evea ramigua anho ri ojapo vy ojapo 'rã onhe'ẽ oikove aguã rami.

²⁸ Mba'eta ojee ae oikuaa pota vy teko vai rupi oikoague gui ojeko rero va ri vy oikove 'rã, nomanovei 'rãe.

²⁹ Ha'e rami teĩ Israel kuery ma “ SENHOR reko ma ha'eve'ya ramigua”, he'i okuapy. Xereko nda'u ha'eve'ya ramigua teve? Israel kuery, peẽ kuery reko e'y teve ikarẽ-karẽ va'e?

³⁰ — Ha'e nunga rupi Israel kuery, xee roikuaa pota 'rã peteĩ-teĩ reko re — he'i SENHOR Nhanderuete. — Pejeko rero va ha'e pejepe'a ke pendeko vaia ha'e javi gui. Ha'e ramo 'rãe teko vai napendereityvei.

³¹ Ha'e rami vy peipe'a pendejegui pendereko vaia ha'e javi, ha'e gui pendejee pemoi uka penekuraxõ pyaurã ha'e penenhe'ê pyaurã. Mba'eta Israel kuery, mba'e re 'rã tu pemano?

³² Mba'eta xee ma ndarovy'ai peteive pemano rã. Ha'e nunga rupi pejeko rerova peikove aguã — he'i SENHOR Nhanderuete.

19

Guary re Israel kuery ombojojaague

¹ — Ha'e gui ndeayvu ke Israel regua yvatekueve pe omboaxy va'e rami.

² Ha'e vy aipo're 'rã: Marã ramigua tu pendexy raka'e? Petei guary kunha guary kuery mbyte oiko, ha'e gua'y kuery mbyte onheno oupy va'e. Ha'e va'e ma omongakuaa gua'y kuery.

³ Petei gua'y oguereko va'ekue tuja ma vy imba'ejuka kuaa, avakue ho'upa peve.

⁴ Ha'e ramo ha'e nunga omombe'ua rã vvy regua ikuai va'e oendupa okuapy. Ha'e rami vy ombo'a vvykua ha'e kuery ojapo va'ekue py. Ha'e vy ty'aĩ re ogueraa Egito vvy katy.

⁵ Ha'e ramo ixy guary kunha va'e ma gua'y oarõ va'ekue ogueraa rã nda'evei oikovy. Ha'e rami vy gua'y mboae ju omongakuaa.

⁶ Ha'e ramo ha'e va'e ju tuja guary kuery mbyte rupi. Ha'e vy imba'ejuka kuaa, avakue ho'upa peve.

⁷ Avakue ojukaa rupi ojapo reta avi imeve'y aguã, ha'e tetã ikuai va'e omombytapa tekoa ve'y. Ha'e ramo okororõ rã vvy regua kuery oendu vy ndaekorãvei rei okuapy.

⁸ Ha'e rami vy vvy regua kuery ha'ea katy ikuai va'e onhemboatypa okuapy hovai. Ha'e rami vy hi'ary rupi kya omombo vvy ombo'a vvykua ojapo va'ekue py.

⁹ Ty'aĩ py ojopy vvy ombo'a nhuã py. Ha'e rami vy Babilônia pygua huvixaa py ogueraa. Ha'e py ma omboty petei henda ikorapa va'e py, Israel regua vvyty rupi ijayvua noenduavei aguã.

Uva'y re ju ombojojaague

¹⁰ — Ha'e gui pendexy ma uva'y yakã vvyry onhoty mbyre rami oiko. Yy reia py onhotya rire hi'a porã, hakã reta guive.

¹¹ Hakã ma imbaraeete raxa, huvixa po pyguarã. Ha'e vy hakã ha'e hoguepa reve yvateve ovy rã pavẽ rei oexa okuapy yvate etea.

¹² Ha'e rami teĩ opoxy reve omondoroa, ha'e vvy rupi oitya. Ha'e ramo hi'a ma vvyty kuaray oua katy gui oipeju va'e omombirupa. Hakã mbaratekue ma omopẽmbaa rã ipirupa. Ha'e gui tata py ju oapypaa.

¹³ Ha'e gui aỹ ma tekoa e'ya py rive ju onhotya vvy piru reia ha'e yy noia py.

¹⁴ Ha'e gui petei hakã tuvixave'i va'e gui ma tata ou vvy omomba hi'a. Ha'e ramo hexe noivei hakã imbaraeete va'e huvixa po pyguarã — he'i.

— Po rami 'rã reonhemboaxy, ha'e peronhemboaxy pavẽ aguã.

20

Egito vvy gui Israel kuery oo rire ojegarupy rupi ae tema ikuai re ijayvuague

¹ Ha'e gui sete ma'etya ha'e petei nhiruĩ jaxya re, dez araa py ma Israel regua nhomongeta va'ety kuery jogueru xea py, SENHOR pe oporandu uka aguã. Ha'e rami vy oguapypa okuapy xerenonde.

² Ha'e ramo xevy pe SENHOR ombou oayvu. Ha'e vy aipoe'i:

³ — Ava ra'y, ndeayvu ke Israel regua nhomongeta va'ety kuery pe. Ha'e vy aipo're: Po rami SENHOR Nhanderuete ijayvu: Peẽ kuery pa xevy peporandu ukaxe vvy peju? Anhetẽ ete xee SENHOR Penderuete xee ae rekove rupi aura vy aipoa'e: Nda'evei peẽ kuery peporandu uka aguã xevy.

⁴ Ha'e gui ndee ava ra'y, ndeayvu ta pa ha'e kuery reko vaia re? Eikuaa uka ke ha'vy tamoi kuery ojegarupy ojapoague.

⁵ Ha'e vy aipo're: Po rami SENHOR Nhanderuete ijayvu: Israel kuery xejeupe guarã aiporavo vy xepo aupi reve aura va'ekue Jacõ ramymino kuery pe ajekuaa uka reve. Egito vvy re ikuai jave xepo aupi reve ha'e kuery pe aura vy "Xee ma SENHOR Penderuete", ha'e va'ekue.

⁶ Ha'e va'e ára xepo aupi reve ha'e kuery pe aura Egito vvy gui aipe'apa aguã re, petei vvy ha'e kuery peguarã aiporavoague py araa aguã, kamby ha'e ei ndoataia ha'e vvy jave gui iporãvea py.

⁷ Ha'e rami vy aipoa'e ha'e kuery pe: "Petei-teĩ peipe'a 'rã pendejegui mba'emo ojegarupy pexaxe vai va'ekue. Penhemongy'ave eme Egito pygua ta'angaa pembojeroviaa py. Mba'eta xee ae ma SENHOR Penderuete aiko", ha'e va'ekue.

⁸ Ha'e rami teĩ ha'e kuery naxenhe'ẽ renduxeĩ vy opu'ãmba okuapy xerovai. Ha'e rami vy mava'eve rei ojegui ndoipe'ai ojegarupy oexaxe vai va'e, ndojepe'ai guive Egito pygua ta'angaa ombojeroviaa gui.

— Ha'e ramo xee aipoa'e va'ekue ha'e kuery áry xepoxya anhoẽ aguã re, ha'e kuery pe xepoxya aexa ukapa peve Egito vvy re ikuai py.

⁹ Ha'e rami teĩ amboae rami ju ha'e kuery re ajapo xerery amboete ukua rupi vvy, xerery re vvy regua ijayvu rei e'y aguã ha'e kuery vvy re xevelygua kuery ikuai rupi, mba'eta vvy regua kuery oexaa py ae xevelygua kuery pe ajekuaa uka rire Egito vvy gui aipe'apaa py.

¹⁰ Ha'e rami vy aipe'apa Egito vvy gui, ha'e tekoa e'ya katy ju araa.

¹¹ Ha'e kuery pe ame'ẽ xeayvua, aikuaa uka guive aipota va'e. Ha'e va'e ma avakue ojapopa ri vvy okuave 'rã ha'e va'e rupi.

¹² Ha'e kuery rekorā ame'ē avi sábadó ára omboete aguā, xee aeko mbo'e aguā, ha'e gui ha'e kuery oikuaa aguā xee SENHOR ae iký'a'oa aikoa.

¹³ Ha'e rami teĩ Israel kuery ma tekoa e'ýa py araa ague py ju opu'amba okuapy xerovai. Ha'e rami vy nda'ikuaixei xeayvuague ha'e aipotaa aikuaa uka va'ekue rupi, ha'e va'e avakue ojapopa vy okuave 'rā va'eri. Ha'e rami vy opa mba'e py omongy'a okuapy sábadó ára pyguarā aeja va'ekue. Ha'e nunga rupi tekoa e'ý pyve xeayvu ha'e kuery áry xepoxya anhoē aguā re, amokanhymba ete aguā.

¹⁴ Ha'e rami teĩ ha'e kuery re amboae rami ju ajapo xerery amboete ukaa rupi vy, xerery re vvy regua kuery ijayvu rei e'ý aguā, ha'e kuery vvy gui xeavygua kuery aipe'apa rive.

¹⁵ Ha'e rami vy tekoa e'ýa py ju xepo aupi reve ha'e kuery pe aura va'ekue ijyvyrā va'ekue py araa ve'ý aguā re, kamby ha'e ei ndoataia ha'e vvy jave gui iporāvea py.

¹⁶ Mba'eta ha'e kuery ndojapoxei okuapy xeayvuague, aipotaa rami nda'ikuaixei guive, sábadó ára pyguarā amoĩ va'ekue voi omongy'apa, mba'eta okuraxó py ta'angaa kuery re rive oje'oixe.

¹⁷ Ha'e rami teĩ ha'e kuery re ama'ē aperdoaa rupi, amokanhymba 'rāgue py, namomba etei tekoa e'ýa rupi ikuaiia py.

¹⁸ — Ha'e rami teĩ ha'e kuery ra'y kuery pe ma xeayvu tekoa e'ýa py. Ha'e vy aipoa'e va'ekue: “Peiko eme penderu kuery ikuaiague rupi, pejapo eme ha'e kuery oipotaa rami, penhemongy'a eme guive ha'e kuery ta'angaa oguereko va'e rupi rive.

¹⁹ Mba'eta xee ae ma SENHOR Penderuete aiko. Pendekuai ke xeayvuague rupi, ha'e pemoĩ porā xee aipota va'e pejapopa aguā.

²⁰ Pemboete sábadó ára pyguarā aeja va'ekue, mba'eta oĩ 'rā xee roeko mbo'e aguā, xee ae SENHOR Penderuete aikoa peikuaa aguā”, ha'e va'ekue.

²¹ Ha'e rami teĩ ta'y kuery voi opu'amba okuapy xerovai. Ha'e rami vy xeayvuague rupi nda'ikuai, nomoĩ porāi guive aipota va'e, ha'e va'e avakue ojapopa vy okuave 'rā va'eri. Ha'e rami 'rāgue py omongy'apa rei okuapy sábadó ára pyguarā aeja va'ekue.

— Ha'e rami rive xee xeayvu ha'e kuery áry xepoxya anhoē aguā re, tekoa e'ýa py ikuaiia py ha'e kuery pe xepoxya aexa ukapa peve.

²² Ha'e rami teĩ xerery amboete ukaa rupi vy xepo ajoko va'ekue, xerery re vvy regua kuery ijayvu rei e'ý aguā ha'e kuery oexaa py xeavygua kuery aipe'apa rive.

²³ Ha'e rami vy tekoa e'ýa py xepo aupi reve ha'e kuery pe aura vvy regua kuery ikuaiia rupi amoĩmba aguā re, ijyvy ha'e javi rupi.

²⁴ Mba'eta xeavygua kuery ndojapoi karamboae xeayvuague, nda'ikuaixei aipotaa rami, omongy'apa sábadó ára pyguarā aeja va'ekue, ha'e ta'angaa nguu kuery oguereko va'ekue oexa vy oendu avi ombojeroviaxea.

²⁵ Ha'e nunga rupi ha'e kuery pe aeja uka amboae regua ayvu iporā e'ý va'e rupi ikuai aguā, ha'e heko mboerā ha'e va'e rupi ikuai aguā va'ekue'ý.

²⁶ Ha'e rami vy aeja ta'angaa pe mba'emo ome'ēa py onhemongy'apa rei aguā, gua'y kuery oiko ppy'i va'ekue tata py oapya py. Ha'e rami ikuai aguā aeja namboekorāvei aguā, xee ae SENHOR aikoa oikuaa pavē aguā.

²⁷ — Ha'e nunga rupi ndee ava ra'y, ndeayvu ke Israel kuery pe. Ha'e vy aipo're: Po rami SENHOR Nhanderuete ijayvu: Peneramoĩ kuery ma pova'e py ju opu'ā rei okuapy xerovai.

²⁸ Mba'eta vvy ha'e kuery pe ame'ē aguā re xepo aupi reve auraague py araa ma rive teĩ, ha'e kuery peteĩ vvy'ā vyate va'e, e'ý vy peteĩ vvyra hogue ana va'e oexa nhavō ha'e py rive mba'emo ome'ē okuapy ta'angaa pe, heakuā porā va'e omoĩ ha'e mba'emo rykue onhoē okuapy xembopoxy aguā rami rive.

²⁹ Ha'e ramo xee aipoa'e ha'e kuery pe: “Mba'e vvyty tu kova'e, ha'e katy peẽ kuery peo pekuapy aguā?” ha'e va'ekue. Mba'eta hery ma Yvyty Ombojeroviaaty oĩa, kova'e ára peve.

³⁰ Ha'e nunga rupi aý aipo're Israel kuery pe: Po rami SENHOR Nhanderuete ijayvu: Peẽ kuery voi penhemongy'apa pekuapy, peneramoĩ kuery rami ae ju. Mba'eta peẽ kuery ju pendetavy tema ojegarupy ha'e kuery oguereko va'ekue rupi peo vy.

³¹ Mba'eta aý peve penhemongy'apa 'rā ta'angaa pe mba'emo peme'ēa py, pendera'y kuery ae peapy vy guive. Ha'e rami teĩ Israel kuery, peju ri ty'y xevy peporandu uka vy? Anhetē ete xee SENHOR Penderuete xerekove rupi aura vy aipoa'e: Peẽ kuery ma nda'evei ae xevy peporandu uka aguā.

³² Peẽ kuery aipopeje: “Ore ma vvy regua kuery reko rami 'rā orekuai vvyra ha'e ita guigua rive rombojeroviaa rupi, amboae vvy re ikuai va'e reko rami”, peje. Ha'e rami teĩ peneakā gui rive ha'e rami pendekuaixea ndoiko 'rāe.

³³ Mba'eta anhetē ete xee SENHOR Penderuete xerekove rupi aura vy aipoa'e: Peẽ kuery re xepo'aka 'rā xepo aupi vy xepo'akaa aexa uka reve, xepoxya anhoēa rupi.

³⁴ Ha'e rami vy roipe'apa ju 'rā vvy regua kuery ikuaiia mbyte romoĩague gui, romboatyapa ju 'rā vvy pendekuaiaague gui. Xepo aupi vy xepo'akaa aexa uka reve 'rā ajapo, xepoxya anhoēa rupi guive.

³⁵ Ha'e rami vvy vvy regua ikuaiia katy ju rogueraa 'rā tekoa e'ýa katy rami. Ha'e gui ha'e py ma aikuaa pota 'rā peẽ kuery re, jova re nhama'ē reve.

³⁶ Mba'eta Egito regua tekoa e'ýa rupi peneramoĩ kuery re aikuaa potaague rami ae ju peẽ kuery re voi aikuaa pota 'rā — he'i SENHOR Nhanderuete.

³⁷ — Ajapo 'rā xepopoka guýry rupi peaxa aguā rami. Ha'e rami vy romo'arandu 'rā xereve guarā ajapo va'ekue rami vy.

³⁸ Penembyte gui aipe'apa 'rā xere opu'ā ha'e naxenhe'ē rendui va'ekue. Ha'e kuery ikuaiague vvy gui aipe'a teĩ ndooi 'rā Israel vvy re. Ha'e ramo peikuaa 'rā xee ae SENHOR aikoa.

³⁹ — Ha'e rã peẽ Israel kuery pe xee SENHOR Penderuete aipoa'e: Naxenhe'ẽ renduxe'i vy tapeo, peteĩ-teĩ pendekuai ta'angaa pe rive aỹ ha'e raka'ev'e'i peve. Ha'e rami teĩ pemongy'a reive eme xerery iky'a e'ỹ va'e, ta'angaa pe mba'emo peme'ẽa py.

⁴⁰ Mba'eta xeivyguá yvyty iky'a e'ỹ va'e, Israel regua yvyty yvatevea áry ma Israel kuery ha'e javi 'rã xembojerovia okuapy — he'i SENHOR Nhanderuete. — Ha'e va'e yvy re ae 'rã ha'e javive xembojerovia. Ha'e py ma xee arovy'a ju 'rã. Ha'e py ae aipota 'rã mba'emo xeivy peme'ẽ, mba'emo pereko va'e jypygua iporãgueve, mba'emo iky'a e'ỹ va'e guive.

⁴¹ Yvy regua kuery mbyte gui roipe'a vy peaimbaague gui romboaty'pa ju rire xee rojou porã 'rã heakuã porã va'e rami. Ha'e ramo yvy regua kuery oexaa py aikuaa uka 'rã iky'a e'ỹ va'e aikoa, peẽ kuery pendekuaia rupi.*

⁴² Ha'e gui Israel yvy re roguerupa ma ramo peikuapa 'rã xee ae SENHOR aikoa, ha'e va'e yvy xepo aupi reve peneramoĩ kuery pe ame'ẽ aguã re auraague py ae.

⁴³ Ha'e py ma penema'endu'a 'rã mba'emo vai rupi pendekuaia py penhemongy'apaague re. Ha'e rami vy pejeguaru 'rã pekuapy pendejegui ae, pendereko vaia rupi pendekuaiaague re.

⁴⁴ Ha'e gui xerery amboete ukaa rupi vy romboaxy ju ramo peikuaa 'rã xee ae SENHOR aikoa. Mba'eta Israel kuery, pendeko vaiague re norombopagavei 'rã, opa marã pendekuaiaague re'ỹ guive — he'i SENHOR Nhanderuete.

Kuaray puku-a katygua kuery rovai ijayvuague

⁴⁵ Ha'e gui SENHOR oayvu ombou ju vy aipoe'i xeivy:

⁴⁶ — Ava ra'y, ema'ẽ kuaray puku-a katy, ha'e vy ndeayvu ha'e kuery rovai. Emombe'u xeayvu ka'aguy kuaray puku-a katygua rovai.*

⁴⁷ Ha'e vy aipo're ha'e py ikuai va'e pe: Pendu ke SENHOR ayvu. Po rami SENHOR Nhanderuete ijayvu: Aỹ ma amoendy 'rã tata pendea py yvyra pyau ha'e ipirukue ha'e javi mokanhyarã. Ndoguevei 'rã tata rendy. Ha'e rami 'rãgue py penderova okaipa 'rã kuaray puku-a katy guive ijapu'a'ia katy peve.

⁴⁸ Pavẽ avakue oikuaa 'rã xee SENHOR ae imoendyare aikoa. Ndoguevei 'rãe — he'i.

⁴⁹ Ha'e ramo xee aipoa'e:

— Ai SENHOR Xeruetel! Ha'e kuery ijayvu 'rã xere: “Ha'e va'e e'ỹ ri ty'y ayvu rive mombe'uaty oiko?” he'i 'rã okuapy xeivy — ha'e.

21

SENHOR guigua kyxe re ijayvuague

¹ Ha'e gui xeivy SENHOR oayvu ombou vy aipoe'i:

² — Ava ra'y, ema'ẽ Jerusalém katy. Ha'e vy ndeayvu ha'e kuery ombojeroviaaty ikuai va'e rovai. Emombe'u xeayvu Israel yvy ha'e javi rovai.

³ Ha'e vy aipo're: Po rami SENHOR Nhanderuete ijayvu: Ma'ẽ, peẽ kuery rovai aiko. Ha'e rami vy kexyxe aeky'i 'rã hyru gui penembyte gui amomba aguã heko porã ha'e heko vai va'e guive.

⁴ Mba'eta penembyte gui amomba 'rã heko porã ha'e heko vai va'e. Kexyxe aeky'i 'rã hyru gui temimoingo ha'e javi rovai rupi, kuaray puku-a katy guive ijapu'a'ia katy peve.

⁵ Ha'e ramo oikuaa pavẽ aguã xee SENHOR ae hyru gui kexyxe aeky'i va'ea, hyru py noĩ jeyvei 'rã guive.

⁶ — Ha'e nunga rupi ndee ava ra'y, nepoaẽ nhendu ke. Ha'e kuery oendua py nepoaẽ nhendu 'rã ndeyp'a py nda'evei ete reve.

⁷ Ha'e gui ha'e kuery oporandu 'rã ndeivy: “Mba'e re tu ha'e rami ete nepoaẽ ri?” he'i 'rã ndeivy. Ha'e ramo aipo're 'rã: “Mba'emo aendu ramo'i va'ekue re rima xepoaẽ. Mba'eta ha'e nunga oiko rã pavẽ opy'a py onhemondyipa 'rã, pavẽ po ikangypa, pavẽ rei onhe'ẽ py ndaekorãvei 'rã okuapy, pavẽ renapy'ã yv rami rive 'rã opyta na'imbaraetevei vy. Ha'e nunga ou ma oiny, ojeupity 'rãe, he'i SENHOR Nhanderuete”, 're 'rã.

⁸ Ha'e gui teĩgue ju SENHOR oayvu xeivy ombou. Ha'e vy aipoe'i:

⁹ — Ava ra'y, emombe'u ju xeayvu. Ha'e vy aipo're: Po rami SENHOR ijayvu: Kyxe oaĩmbe'epa ha'e omboverapa pyre oĩ.

¹⁰ Jojuka aguã oaĩmbe'ea, ha'e overa va'e rami ete omboveraa.

— Ha'e rami teĩ Israel kuery aipoe'i 'rã: “Javy'a nho 'rã jakuapy! Xera'y po pygua ma yvyra amboae kuery oguereko va'e gui ipo'akapave”, he'i 'rã okuapy.*

¹¹ Ha'e rami teĩ Nhanderuete ombovai:

— Ha'e va'e kyxe ma omboveraa rei mba'eta oiporua 'rãe. Oaĩmbe'e ha'e omboverapaa ma jojukaarã po py amboaxa aguã.

¹² Ha'e nunga rupi ndee ava ra'y, neraxẽ ha'e nepoaẽ rei ke, mba'eta xeivyguá kuery rovai 'rã oiporua, Israel regua yvatekueve ha'e javi rovai guive. Ha'e va'e kuery ma amboaxapa 'rã kyxe revegua pe, xeivyguá kuery ha'e javi reve. Ha'e nunga rupi eĩpete-pete nde'u rupi.

¹³ Mba'eta ou 'rã pendereko a'ãarã. Ha'e gui penderuvixa ipo pygua va'e nhomoiingo axy va'ekue noĩvei ramo mba'exa 'rã tu peiko? — he'i SENHOR Nhanderuete.

* 20:41 2 Corintios 6.17

* 20:46 Apy ma profeta ijayvu Jerusalém tetã ha'e Judéia yvy regua kuery re.

* 21:10 Israel kuery “Xera'y”

¹⁴ — Ha'e gui ndee ava ra'y, emombe'u ke xeayvu, ejepopete-pete guive. Tove kyxe mokoïgue tajopyxo, mboapykue peve tajojuka, jova-jovaive gui tou jujukaa rupi.

¹⁵ Ha'e kuery okuraxô py onhemondy rei aguã, ha'e okê oëaty ha'e javi rupi heta ho'a aguã. Ajapo 'rã kyxe overa va'e rami hexakã aguã. Mba'eta jojuka aguã ae ombovera ha'e oaïmbe'epaa.

¹⁶ Ha'e gui ndee kyxe, tereo reiporu kuaa katy nembraetea ha'e javi reve, ha'e gui reiporu kuaa e'ÿa katy ju tereo, reoa katy rei.

¹⁷ Ha'e ramo xee voi ajepopete avi 'rã xepoxyague gui apytu'u vy. Xee SENHOR ae xeayvu va'e — he'i.

¹⁸ Ha'e gui xevy SENHOR ombou ju oayvu. Ha'e vy aipoe'i:

¹⁹ — Ndee ava ra'y, ejapo ke mokoï tape ra'angaa, ha'e va'e regua peteï rupi Babilônia pygua huvixa okyxe reve ou aguã. Mokoïve ma peteï'i yvy gui ou va'e. Ha'e gui tetã oëaty katy'i emoï avi mokoï yvyrape'i tape rexa ukaa.

²⁰ Embopara imoïny peteï tape Amom kuery rekoa Rabã katy kyxe reve oo aguã, ha'e rã amboae ma Judã ha'e Jerusalém tetã ikorapa va'e katy oo aguã.

²¹ Mba'eta Babilônia pygua huvixa opyta 'rã ho'amy tape rakãmby py, mokoï tape joa katy e'ÿ oïa py, nguu ete kuery pe ranhe imba'ekuaa aguã. Ha'e rami vy hu'y ombovava-vavaa ma ramo peteï oekyi 'rã, ta'angaa ngoo gui ogueru va'ekue pe oporandu 'rã, ha'e mba'emo py'akue rupi avi 'rã imba'ekuaa.

²² Ha'e gui imba'ekuaa rupi oikuaa 'rã oiporu kuaa regua re Jerusalém tetã katy ae oo aguã. Ha'e rami vy oiko katu 'rã tetã rokê omopê aguã, jojuka aguã re ijayvu atã, joe opu'ãa aguã re ojapukai, okê mopêa py tetã rokê re ombota, tetã kora re yvy omboaty vy omovã, ha'e torre ojapo aguã.

²³ Ha'e gui judeu kuery hexeve peteï rami ikuai aguã re oura va'ekue ma ha'e nunga oendu vy "Apu" he'i 'rã okuapy. Ha'e rami teï ha'e kuery reko vaiague re Nhanderuete oikuaa pota 'rã ombo'a ukapa aguã.

²⁴ Ha'e nunga rupi SENHOR Nhanderuete aipoe'i:

— Anhetê ae peê kuery xemoma'endu'a pendereko vaia re aikuaa pota aguã, mba'eta pendereko vaia ojekuaa porã, mba'emo pejapoa ha'e javi py pexa uka pejejavya. Ha'e rami ete xemoma'endu'a rire rombo'apa 'rã ha'e nungakue re.

²⁵ Ha'e gui ndee Israel kuery ruvixa opa marã rei ndereko vai ete va'e, ovaê ma oïny nde'ára opaa py rombopaga aguã.

²⁶ Po rami SENHOR Nhanderuete ijayvu ndevy: Emboi ke neakã regua ha'e coroa, mba'eta ha'ekue rami ve'ÿ 'rã oiko. Mba'eta yvyïgueve'i ombovatea 'rã, ha'e rã yvatekueve ma om'o'yvy'i'ia 'rã.

²⁷ Ivaipa, ivaipa 'rã! Aÿ ma xee ambovaipa 'rã neretã, ha'e ramo noïvei 'rã, opena kuaa va'erã ou e'ÿa ja. Ha'e va'e pe ma amboaxa ju 'rã.

²⁸ — Ha'e gui ndee ava ra'y, emombe'u ke xeayvu. Po rami SENHOR Penderuete ijayvu Amom pygua kuery ijayvu reia re. Ha'e gui aipo're 'rã: Kyxe, kyxe hyru gui oekyia ma, ombovera jojuka aguã, nhomomba ha'e overa va'e rami hexakã aguã.

²⁹ Ha'e va'e ma ojaya 'rã opa marã heko vai va'e kueryaju'y, mba'eta ovaê ma hi'ára opaa py ambopaga aguã, mba'eta peê kuery rekorã oexa'ãa rupi rive omombe'u rire, ha'e kuery ae oexa ra'uague rupi.

³⁰ — Ha'e gui emoï ju ndekyxe hyru py. Mba'eta yvy reikoague py ae ju 'rã rombopaga.†

³¹ Ha'e rami vy nde'áry ambou 'rã xepoxya, nderovai rupi aipeju 'rã tata rami xepoxya regua, ha'e gui romboaxa 'rã avakue nhomboaxya rupi e'ÿ nhomoingo axy raxa va'e kuery po py.

³² Ha'e ramo reiko 'rã mba'emo pirekue oapy pyrã rami. Nderuguy omoëa 'rã ndevy re ae. Ndere na'ima'endu'aavei 'rã, xee SENHOR ae xeayvu rire.

22

Jerusalém pygua kuery ojegarupy ojapo okuapy re ijayvuague

¹ Ha'e gui xevy SENHOR oayvu ombou ju vy aipoe'i:

² — Ha'e gui ndee ava ra'y, ndeayvu ta pa tetã pygua kuery jouguy omoëague re? Ndeayvu ke ha'vy ojegarupy ojapo okuapy ha'e javi re.*

³ Ha'e gui aipo're: Po rami SENHOR Nhanderuete ijayvu: Nda'evei ete 'rã tetã jouguy moëa ikuai va'e pe. Mba'eta ta'angaa pejapo va'ekue rupi penhemongy'a vy penderovairã ae pejapo pekuapy pepagaa ára pyguarã ovaê peve.

⁴ Mba'eta jouguy pemoëa py pendepo ae pemongy'apa. Mba'eta ta'angaa peê ae pejapo va'ekue rupi penhemongy'a vy pejapo pepaga aguã ára ovaê aguã rami. Penema'etÿa opa ta ma. Ha'e nunga rupi ae xee ajapo amboae regua kuery yvy jave rupi ikuai va'e pendejojai rei ha'e penembojaru rei aguã rami.

⁵ Pendea katy'i ha'e mombyry rupi ikuai va'e voi ijayvu vaikue rei 'rã okuapy pendere, mba'eta oikuaa pavê opa marã rei pendekuaia.

⁶ — Ha'e gui Israel regua yvatekueve voi, peteï-teï opo'akaa rupi mba'eve ndojapoi 'rã jouguy omoë e'ÿ vy.

⁷ Ha'e rami vy penembyte rupi ha'e kuery nomboetei 'rã nguu ha'e oxy, okorepa rei 'rã amboae regua, ha'e ha'eve'ÿa rami 'rã oguereko tyre'y ha'e imeve'y va'e kuery.

⁸ Nomboetei mba'emo xevyguaiky'a e'ÿ va'e, omongy'apa guive sábado ára pyguarã aeja va'ekue.

† 21:30 Apy ma Babilônia pygua huvixa pe ju Nhanderuete ijayvu ombopaga aguã re. * 22:2 "Tetã" he'ia ma Jerusalém ae (Mateus 23:37; Lucas 13:34).

- ⁹ Penembyte rupi ikuai avi avakue jouguy omoë ukaxe vy joe ijayvu rei va'erā. Penembyte rupi ae ho'u 'rā okuapy xo'o ta'angaa pe ome'ë mbyre vyvty áry rupi, opa marā rei ikuai vy.
- ¹⁰ Pendekuaia mbyte rupi ojevavy 'rā nguu pe, onhemboja 'rā guive kunhague gueko re oiko va'e re.
- ¹¹ Amongue ma ojevavy 'rā oirū ra'yxy reve, amboae ma omongy'apa rei 'rā gua'y ra'yxy ae, ha'e rā amboae ma onheno 'rā gueindy nguu rajy reve ae.
- ¹² Pendekuaia rupi mba'emo ome'ëa rā ojopy 'rā jouguy omoë aguā. Peráta oiporu uka rire oipe'a retave 'rā okorea rupi. Oirū kuery ombotavypaa py oipe'apa 'rā oguereko va'ekue. Ha'e ramia py na'ima'endu'avei okuapy xere — he'i SENHOR Nhanderuete.
- ¹³ — Aÿ ma pejokore ha'e jouguy pemoëa py pendepo ky'apa ramo ajepopete 'rā xepoxya aexa uka vy. Ha'e ramo penembaraete 'rā ri ty'y pendepo'py?
- ¹⁴ Pendepo imbaraeete avi 'rā ri ty'y rombopaga vy ajua ára pyguarā? Mba'eta xee SENHOR xeyavu rire ajapo 'rāe.
- ¹⁵ Ha'e rami vy romoimba 'rā vvy regua kuery ikuai rupi, ha'e rogueraa ukapa 'rā vvy mboae rupi. Ha'e rami vy 'rāe pendegui aipe'a ha'eve'ya oí va'e.
- ¹⁶ Ha'e gui vvy regua kuery oexaa py penhemongy'apa ma rire peikuaa 'rā xee ae SENHOR aikoa.
- ¹⁷ Ha'e gui SENHOR oayvu ombou vy aipoe'i xevy:
- ¹⁸ — Ava ra'y, xevy pe rā Israel kuery ikuai tata rupa py prata oiky'a'oa rā mba'emo ky'akue opyta va'e rami: overa va'e, estanho, ferro ha'e chumbo ky'akue rami rive.
- ¹⁹ Ha'e nunga rupi po rami SENHOR Nhanderuete ijayvu: Mba'emo ky'akue peë kuery pendekuai ramo aÿ xee romboatypa 'rā Jerusalém mbyte py.
- ²⁰ Mba'eta prata, overa va'e, ferro, chumbo ha'e estanho ma omoimbaa 'rā tata rupa py, oipejua rā tata raku py hykupa aguā. Ha'e rami ae avi xepoxya rupi rojou vai reve romono'õmba vy ha'e py roeja 'rā romboykupa aguā.
- ²¹ Romono'õague py peë kuery áry rupi aipeju 'rā xepoxya reve. Ha'e ramo penderykupa 'rā Jerusalém mbyte py.
- ²² Tata rupa py prata hykupaa rami avi peë kuery penderykupa 'rā ha'e py. Ha'e ramo peikuaa 'rā xee SENHOR ae peë kuery áry xepoxya anhoëague — he'i.
- ²³ Ha'e gui SENHOR oayvu xevy ombou ju. Ha'e vy aipoe'i:
- ²⁴ — Ava ra'y, aipo're ha'e kuery vvy pe: Ndee vvy, nderejky'a'o ukai rire xepoxya aexa ukaa ára nda'okyi 'rā nde'áry.
- ²⁵ Vvy mbyte rupi profeta kuery jogueroayvu 'rā nhonhe'ë mombaxe vy, guary okororõ reve guaí axí re guembia omoatāa rami. Mba'eta oipe'apa 'rā joperáta ha'e nhomba'e rei-rei. Ha'e rami vy vvy mbyte rupi omboetave tema imeve'y va'e kuery.
- ²⁶ Ha'e kuery regua sacerdote kuery voi xeguigua lei rupi nda'ikuai, omongy'apa 'rā guive mba'emo xevyguia iky'a e'y va'e. Ha'e kuery oikuaa rā iky'a e'y va'erā omboaxa pyre ha'e omboaxa pyre'y ma joo ramigua. Ndoikuaai merami ha'eve va'e ha'e ha'eve'y va'e joo ramigua e'ya. Ha'e rami vy sábado ára aeja va'ekue py oiko va'e gui omboty 'rā guexa. Ha'e rami vy omboetepy e'y rami aiko ha'e kuery mbyte.
- ²⁷ Ha'e kuery regua yvatekueve ma aguara'i guaí axí py guembia omoatāa rami avi omoë 'rā jouguy, nhonhe'ë omobaa rupi ojopy aguā jokoreague rive.
- ²⁸ Ha'e gui ha'e kuery regua profeta kuery ma cal py ha'e nunga ha'e javi omoxiimba rive 'rā apu oexa ra'uague omombe'ua py. Mba'eta ijapua rupi rive ayvu omombe'u vy aipoe'i 'rā: “ SENHOR Nhanderuete ma po rami ijayvu”, he'i 'rā SENHOR ijayvuague rupi e'y va'eri.
- ²⁹ Ha'e rami vy vvy re ikuai va'e jokorea rupi ikuai, imonda rupi oguereko axy 'rā ojexavaí va'e ha'e iporiaukue'i, mba'e re'y omoingo axy 'rā guive amboae guigua kuery.
- ³⁰ Ha'e kuery mbyte xee aeka teí peteí ri jepe ava xerenonde py tetā kora omoatyrõ nho aguā, ha'e rami e'y vy ipa'ũ py oí aguā mba'emo jokoarā, kova'e vvy xee amokanhymba e'y aguā. Ha'e rami teí ndajoui peteíve.
- ³¹ Ha'e nunga rupi ae ha'e kuery áry anhoë xepoxya tata rami, amokanhymba aguā ajou vaia rupi. Ha'e rami vy ha'e kuery áry ambou ikuaiague re opaga aguā — he'i SENHOR Nhanderuete.

23

Kunhague itavy rei va'e Oolá ha'e Oolibá hery va'e re ijayvuague

¹ Ha'e gui SENHOR ombou ju oayvu xevy pe. Ha'e vy aipoe'i:

² — Ava ra'y, ikuai karamboae mokoí kunhague, peteí'i re icy va'e.

³ Ha'e va'e kuery ma Egito vvy re ikuai rupi itavy rei okuapy. Kunhataí teri reve itavy rei. Ha'e rami rā okāmbiripaa, kunhataí teri reve okā rupi onhekuavā ukapa.

⁴ Tyke ma Oolá hery va'e, ha'e rā ikypy'y ma Oolibá. Ha'e va'e kuery ma xemba'e ae, ha'e ikuai avi ipi'a ha'e imemby kuery. Ha'e gui hery reikuaa porāve aguā Oolá ma Samaria, ha'e rā Oolibá ma Jerusalém.

⁵ — Ha'e gui Oolá ma xemba'e teri reve teí itavy rei. Ha'e rami vy oendu avakue mboae reve itavyxea, ha'e katy'i Assíria pygua kuery ikuai va'e reve.

⁶ Ha'e va'e kuery ma hovy porā rei va'e py anho onhemonde va'e, huvixa joe opena va'e kuery, avakue pyau omaruāmbi, kavaju árygua meme.

⁷ Ha'e va'e avakue reve ae kunha va'e itavy, Assíria pygua ra'y kuery iporāve va'e ramo. Ha'e kuery ha'e javi reve itavyxea oendu, ha'e ta'angaa oguereko va'e rupi onhemongy'a avi.

⁸ Ha'e rami vy ndoejai ae ojeguarupy Egito gui ogueru va'ekue, mba'eta kunhataĩ teri reve hexeve onhenoa vy okãmbiripaa rire, hexeve itavy reia py.

⁹ Ha'e nunga rupi Assíria pygua ra'y kuery po py amboaxa hexeve itavy rei va'e, ha'e kuery reve itavyxea anho rei oendu ramo.

¹⁰ Ha'e ramo ha'e kuery ombopire reipa okuapy ha'e oipe'apa heravy ipi'a kuery ha'e imemby kuery. Ha'e rã kunha va'e ma ha'e kuery ojuka okuapy kyxe py. Ha'e ramo ixupe "Kunhague pavẽ gui ayvu vaivepy", 'ea, ombopagaa rã.

¹¹ — Ha'e gui ikypy'y Oolibá ma ha'e nunga oexapa teĩ guyke gui oenduve itavy reixea. Ha'e rami vy guyke gui voi itavyve.

¹² Ha'e rami vy itavyxe ha'e katy'i rupi Assíria pygua ra'y kuery ikuai va'e reve, mba'eta huvixa joe opena va'e, ao hepyve va'e py onhemonde va'e, kavaju árygua, ha'e avakue omoaruãmby meme ramo.

¹³ Ha'e gui xee aexa rã onhemongy'apa ma, guyke reve joo rami ae tema heko vai vy.

¹⁴ Ha'e gui ojevavyve tema, mba'eta oo mbotyra re oexa avakue caldeu kuery oo ra'angaa pytã va'e py ombopara pyre.

¹⁵ Ha'e kuery ma iku'akuaa porã ha'e inhakã regua va'e. Ha'e javi oexa rã Babilônia pygua ra'y kuery yvatekueve rami, Caldéia vvy re itui'i va'ekue meme.

¹⁶ Ha'e kuery ra'angaa oexa vy itavy reixea anho oendu. Ha'e rami vy Caldéia vvy katy omondouka oayvu reraa.

¹⁷ Ha'e ramo Babilônia pygua ra'y kuery oupa kunha va'e reve guarã. Avakue reve hupa onhenoa vy onhemboja vy omongy'apa okuapy itavy reia py. Ha'e ramo kunha va'e ma ha'e kuery reve onhemongy'apa ma vy ojeguarupa. Ha'e vy oejapa.

¹⁸ Ha'e va'e ojekuaa uka ha'e ipire reia rupi oiko rire ma xenhe'ẽ py aendu ndaxea'eveia, tyke re ndaxea'eveiaague rami.

¹⁹ Ha'e rã ikypy'y ma heko vaive tema, mba'eta ima'endu'a Egito vvy re kunhataĩ teri reve itavy rei oikovyague re.

²⁰ Ha'e py oendu avakue reve itavyxea, mburika rami hakuaĩ ha'e kavaju rami ity va'e rami ikuai rã.

²¹ Ha'e ramia py ima'endu'a kunhataĩ teri reve ha'eve'ỹ va'e rupi anho oikoague re, Egito pygua kuery okãmbiripa jave guare re.

²² Ha'e nunga rupi po rami SENHOR Nhanderuete ijayvu Oolibá pe:

— Aỹ ma xee ajapo 'rã avakue ndereve guare nderovai opu'amba aguã rami. Ha'e kuery re rejeguaru reve rejapa va'ekue ri nderovai arupa ju 'rã jova-jovai rupi gui.

²³ Ha'e kuery ma Babilônia pygua ra'y kuery, ha'e caldeu kuery Pecode, Soa ha'e Coa guigua, ha'e gui ha'e kuery reve ou avi 'rã Assíria pygua ra'y kuery ha'e javi, avakue pyau omoaruãmby, huvixa joe opena va'e kuery, yvatekueve ha'e omboetevepy, kavaju áry ou va'e meme 'rã.

²⁴ Nderovai kuaray apu'a'ia katy gui jogueru 'rã karóxa, mba'eyru ha'e heta va'e reve. Nderovai 'rã ikuai jova-jovaive rupi hu'y jokoa ha'e imo'ãa tuvixa va'e, ha'e gui ngora ratã reve. Ha'e kuery pe xee rombopaga uka ramo nembopaga 'rã okuapy ha'e kuery ae oikuaa rami vy.

²⁵ Nderovai aiko 'rã nda'eveitea rupi, ha'e ramo ha'e kuery voi ndeavyky rei 'rã opoxya rupi. Ha'e vy ojaya 'rã nexĩ ha'e nenambi, ha'e gui hembyreke ma ojukapa 'rã kyxe py. Ha'e vy nememby kuery ha'e ndepi'a kuery oipe'apa 'rã heravy, ha'e gui hembyreke ma omokanhymba 'rã tata py.

²⁶ Ndeao oipe'apa 'rã, ha'e gui ogueraapa 'rã renhembojegaague.

²⁷ Ha'e rami py amomba 'rã ha'eve'ỹ va'e rupi Egito vvy guive reikoague, ndetavy reia rupi. Ha'e rami rire nerema'evei 'rã Egito pygua kuery re, ijyvy re voi nanema'endu'avei 'rã.

²⁸ Mba'eta po rami SENHOR Nhanderuete ijayvu: Aỹ ma xee romboaxa 'rã ndereayuvei va'e kuery po py, ha'e kuery gui rejeguaru reve reja va'ekue.

²⁹ Ha'e ramo ha'e kuery nderereko axy 'rã opoxya rupi, ndegui oipe'apa 'rã remba'eapoague repy. Ndeao oipe'apa ma vy ndereja 'rã ndepire rei reve, ojekuaapa aguã ndetavy reiaague, ha'eve'ỹ va'e rupi anho reikoague ha'e renhemongy'apa reiaague.

³⁰ Ha'e rami ete nderereko 'rã amboae regua kuery reve ndetavy rei rire, ha'e kuery ta'angaa ogueroko va'e reve renhemongy'apa rei rire guive.

³¹ Nderyke oikoague rami ae reiko rire ndepo py ju ame'ẽ 'rã karo ixupe guare.

³² Po rami SENHOR Nhanderuete ijayvu: Rey'u 'rã nderyke peguare karo tuvixa ha'e iporuxu va'e gui. Ha'e va'e py heta oĩ ojovai reipy ha'e ayvu vaipy anho.

³³ Ha'e va'e ma nemonga'u 'rã, nemoingo axy 'rã guive. Mba'eta karo nderyke Samaria peguare ma nhomondi rei ha'e nhombovaipaara.

³⁴ Ha'e va'e gui ma ndee rey'upa 'rã. Iky'akue voi re'upa 'rã, ha'e nekã rupi reikaraĩmba 'rã. Xee ae ha'e rami xeayvu — he'i SENHOR Nhanderuete.

³⁵ Ha'e nunga rupi po rami ijayvu SENHOR Nhanderuete:

— Xegui nderexarai vy xea katy ndekupe rive rerova rire ndere oĩ 'rã repaga aguã rejou porã reiaague ha'e ndetavy reiaague re — he'i.

³⁶ Ha'e gui SENHOR aipoe'ive ju xeivy:

— Ava ra'y, aỹ ndeayvu ta pa Oolá ha'e Oolibá reko vaia re? Eikuaa uka ha'vy ojeguarupy ha'e kuery ojapoague.

³⁷ Mba'eta ha'e kuery itavy rei, ipo ky'apa ma guive jouguy omoëague re. Ta'angaa oguereko va'e reve avi itavy rei, ha'e omemby kuery xera'y kueryrã oguereko va'ekue ri ta'angaa kuery pe rive ome'ë tata py omombaa py.

³⁸ Ha'e gui ma po ramigua ju ojapo avi xerovai: Ha'e va'e árave ma voi omongy'apa xeveygua oo iky'a e'y va'e, omboyke guive sábado ára pyguarã aeja va'ekue.

³⁹ Mba'eta ta'angaa pe omemby kuery ha'e opi'a kuery oapy okuapy ma rire ha'e va'e árave ju xeveygua oo iky'a e'y va'e re ou okuapy omongy'a rei agua. Ha'e rami ete ojapo okuapy xeveygua opy rupi.

⁴⁰ Ha'e gui oive teri, mba'eta penoi uka avakue mombyry gui. Ha'e vy ha'e kuerya katy pemondouka pendeayvu reraa, ha'e ramo ou okuapy. Ha'e kuery reve pendetavy rei agua ma pejau, penderexa rupi pemopytã, ha'e penhembojegua porã rei.

⁴¹ Ha'e vy tenda iporãve va'e áry peguapy peiny, petei mesa oguereko katupa pyre yvÿry. Ha'e va'e áry pemoi avi heakuã porã va'e ha'e azeite xevey guarã va'ekue.

⁴² Ha'e gui kunhague yvÿry rupi onhendu heta ete ovy'a reia rupi ikuai va'e. Avakue ojou vaipy reve tekoa e'ÿa gui oguerua oka'u va'e regua. Ha'e kuery ma kunhague po re omoi okuapy poapy regua, ha'e gui inhakã re ma akã regua iporãgueve omoi.

⁴³ Ha'e nunga rupi xee aipoa'e ymave guive itavy rei va'e re: "Itavy reia rupi ae ta ri ty'y oiko?" ha'e.

⁴⁴ Ha'e ramo kunha va'e re onhemboja pavẽ, kunha itavy rei va'e reve joguereko va'e rami. Ha'e rami vy joguereko okuapy Oolã ha'e Oolibã reve, kunhague itavy rei va'e ae rã.

⁴⁵ Ha'e gui avakue heko porã va'e ma ombopaga 'rã kunhague tavy rei ha'e jojukaa kuery ombopagaa rami. Mba'eta kunhague itavy rei va'e ikuai, ha'e ipo ky'apa jouguy omoëa py.

⁴⁶ Ha'e nunga rupi SENHOR Nhanderuete aipoe'i:

— Ha'e va'e kunhague rovai ma heta 'rã ambou, mba'eta opa marã oguereko va'erã pe amboaxa 'rã, mba'emo pe'apaarã kuery pe guive.

⁴⁷ Ha'e ramo heta ete va'e ojapipa 'rã ita py, kyxe py oikyximba 'rã guive. Ojukapa 'rã imemby kuery ha'e ipi'a kuery, ha'e oapypa 'rã hoo.

⁴⁸ Ha'e rami vy ha'e kuery yvy gui amomba 'rã ha'eve'y va'e rupi anho ikuaiague, kunhague mboae kuery oexa vy onheangu agua ha'e rami va'e kunhague ojejou porã reiague rami e'y ikuai agua. Mba'eta pende'áry ou 'rã ha'eve'y va'e rupi anho peikoague re pepaga agua, ta'angaa reve pejevayague re voi. Ha'e ramo peikuaa 'rã xee ae SENHOR aikoa.

24

Mba'emo re ombojoja vy oja omombe'uague

¹ Ha'e gui nove ma'etÿa ha'e dez jaxya va'e, dez araa py SENHOR ombou oayvu xevey. Ha'e vy aipoe'i:

² — Ava ra'y, embopara ke kova'e ára rery. Mba'eta kova'e ára ae Babilônia pygua huvixa ou 'rã Jerusalém tetã re.

³ Ha'e nunga rupi kova'e kuery naxenhe'ë rendui va'e rovai emombe'u petei ayvu mba'emo re rembojoja vy. Ha'e vy aipo're ha'e kuery pe: "Po rami SENHOR ijayvu: Pemoi oja tata áry, pemoi ke aÿ, ha'e gui pemoi avi yy.

⁴ Ha'e va'e py pemoi avi xo'o ra'ykue. Iporãgueve anho pemoi, hi'ugue ha'e ijaxi'ykue. Pemonyẽ ikãgue peiporavo va'ekue,

⁵ penerymba kuery vexe'i gui iporãve va'e regua anho. Ha'e gui oja guÿry rupi pemoi reta yxakã. Pemboaku opupu porã agua rami, oja py ojypa porã agua ikãgue", 're.

⁶ Mba'eta po rami SENHOR Nhanderuete ijayvu:

— Nda'evei ete 'rã kova'e tetã jouguy moëa kuery ikuai pe, mba'eta oja iky'apa rei va'e rami opyta, ndojeky'a'o ukai rire! Penoëmba ke xo'o ra'ykue oja gui, peiporavo e'y re.

⁷ Mba'eta tetã mbyte rupi ikuai jouguy omoëague re ipo ky'a va'e. Itaova áry ae omoë, yvy rupi yvy ku'ikue oja'o'i agua rupi e'y.

⁸ Ha'e gui xee ma itaova áry rupi ju amoi tuguy oja'o'ipaa e'y agua py, opoxya rupi nhombopagaarã ambou agua.

⁹ Ha'e nunga rupi po rami SENHOR Nhanderuete ijayvu: Nda'evei ete 'rã kova'e tetã jouguy moëa kuery ikuai pe! Mba'eta xee voi amoi reta 'rã yxakã.

¹⁰ Yxakã amoi reta ma vy amoendy 'rã tata, xo'o ambojy ha'e tykue amoana agua, ikãgue ikuai va'e okaipa peve.

¹¹ Ha'e gui pemoi oja tapyi áry, hexakãmba peve haku agua, ha'e rami vy iky'akue iporã e'yague ha'e javi oipa agua.

¹² Ha'e ramia py xee anhea'ã rive, mba'eta iky'akue heta oi rã ndoipai, tata áry tei.

¹³ Mba'eta pendeky'aa ma ha'eve'y va'e rupi anho pendekuaia. Ha'e gui xee roiky'a'oxe tei peë ma ndapejky'a'o ukaxei. Ha'e nunga rupi napendeky'a'oai 'rãe, pendevy xepoxya aexa ukapa e'ÿa ja.

¹⁴ Xee SENHOR ae aipoa'e: Ha'e rami ae 'rã oiko, xee ajapo 'rãe. Ndajevyi 'rã ha'ekue py, noromboaxyi 'rã, amboae rami ndajapoi 'rã guive. Mba'eta rombopaga 'rã pendekuaiaague ha'e pejapo vaigae re — he'i SENHOR Nhanderuete.

Ezequiel ra'yxy omanoague

¹⁵ Ha'e gui SENHOR oayvu ombou vy aipoe'i xevey:

¹⁶ — Ava ra'y, ma'ē, ndegui aipe'a xapy'a ta reayvuvu va'ekue. Ha'e rami teī ndepy'a vai eme, ejae'o eme, neī nderexay eme guive.

¹⁷ Nepoaē 'rā rekyiriri reve, erojoe'o eme omano va'ekue. Ha'e rami 'rāgue py neakā re emoī akā regua, ndepy re ma py regua emoī, nerendyva voi ta'ipuku eme, ha'e ipy'a vai va'e pegua tembi'u oguerua teī he'u eme — he'i.

¹⁸ Ha'e gui ko'ēgue aje'ive'i reve heta va'e kuery pe xayvu rire ka'arukue xera'yxy omano ma. Ha'e gui ko'ē jevy ma Nhanderuete aipoe'iague rami aiko.

¹⁹ Ha'e rami rā heta va'e kuery aipoe'i xevy:

— Emombe'u ke orevy mba'erā pa nami reikoa.

²⁰ Ha'e rā xee ambovai:

— Xevy pe SENHOR oayvu ombou. Ha'e vy aipoe'i:

²¹ Aipo're Israel kuery pe: Po rami SENHOR Nhanderuete ijayvu: Aŷ ma xee ae ajapo 'rā xevyguua oo iky'a e'ŷ va'e nomboteavei aguā rami, ha'e va'e perovy'ave ha'e pexaxeve va'e, ha'e pejou porā ete va'e teī. Ha'e gui pendera'y kuery ha'e penderajy kuery ha'e py peja va'ekue ojukupaa 'rā kyxe py.

²² Ha'e rire teī peē voi peiko avi 'rā xee aikoa rami. Ha'e vy penerendyva ndapejai 'rā ipuku aguā rami, ha'e ndape'ui 'rā tembi'u ipy'a vai va'e pegua oguerua ramo voi.

²³ Peneakā re pereko 'rā akā regua, ha'e pendepy re oī 'rā py regua. Napendepy'a vai 'rā, ndapejoe'oi 'rā. Ha'e rami avi pepa 'rā peovy pejajavyague re, ha'e vy peteī-teī penepoaē 'rā joa py.

²⁴ Mba'eta Ezequiel ma nami oiko peikuaa aguā, ha'e oikoa rami ae avi peē kuery voi pendekuai 'rā. Ha'e nunga oiko ramo peikuaa 'rā xee ae SENHOR aikoa — he'i.

²⁵ — Ava ra'y, raka'eve rā ha'e kuery gui aipe'a 'rā ojou porāve ha'e oguerovy'ave va'e, oexaxeve ha'e onhe'ē py ogueroporaē va'e. Aipe'a avi 'rā ta'y kuery ha'e taju kuery.

²⁶ Ha'e va'e ára ndea py ou 'rā peteī oo jepe va'ekue, ha'e ae ma voi omombe'u 'rā ndevy.

²⁷ Ha'e va'e ára ma ndeayvu nho 'rā oo jepe va'ekue oia py. Ndeayvu 'rā, nerekyiriri'vei 'rā. Ha'e rami reiko 'rā ha'e kuery oikuaa aguā. Ha'e ramo ha'e kuery oikuaa 'rā xee ae SENHOR aikoa.

25

Amom pygua kuery rovai ijayvuague

¹ Peteīgue ju SENHOR oayvu ombou. Ha'e vy aipoe'i xevy:

² — Ava ra'y, ema'ē e'amym Amom ra'y kuery ikuaiia katy. Ha'e vy xayvu emombe'u ha'e kuery pe.

³ Aipo're Amom ra'y kuery pe: Pendu ke SENHOR Nhanderuete ayvu. Po rami ijayvu: Peē kuery ma xevyguua oo iky'a e'ŷ va'e omongy'apaa rā “Ha'evea rami!” peje va'ekue, Israel yvy ombovaipaa, ha'e Judá kuery escravo-rā ogueraapaa ramo.

⁴ Ha'e nunga rupi aŷ romboaxapa 'rā kuaray oua katygua kuery pe. Ha'e ramo pendevy re ha'e kuery ovaēmba vy hekoa 'rā penembye py. Ha'e vy ha'e kuery ho'u 'rā okuapy mba'emo pemboaju va'ekue, oy'u 'rā guive kamby penoē va'ekue.

⁵ Ha'e gui Rabá tetā ajapo 'rā camelo kuery ikuai atyrā, ha'e Amom kuery rekoague ajapo 'rā vexe'i kuery korarā. Ha'e ramo peikuaa 'rā xee ae SENHOR aikoa.

⁶ — Mba'eta po rami ijayvu SENHOR Nhanderuete: Peē kuery ma Israel yvy re pevy'a reia rupi pejepopete-pete ha'e pendepy pembota-mbota va'ekue penenhe'ē py mba'emo vai pereko va'e ha'e javi rupi.

⁷ Ha'e rami rire penderovai xepo aupi vy rojapo 'rā amboae regua kuery pendep'e'apa aguā rami. Yvy regua mbyte gui roipe'a vy romokanhymba 'rā yvy gui. Romomba ete 'rā. Ha'e ramo peikuaa 'rā xee ae SENHOR aikoa.

Moabe pygua kuery rovai ijayvuague

⁸ Ha'e gui SENHOR Nhanderuete aipoe'i:

— Moabe ha'e Seir pygua kuery aipoe'i: “Ma'ē, Judá kuery ma yvy regua kuery ha'e javi rami opyta ikangy va'e”, he'i okuapy ramo

⁹ aŷ aipe'a 'rā Moabe yvy ja'oa tetā oguerovy'ave va'e Bete-Jesimote, Baal-Meom ha'e Quiriataim guive.

¹⁰ Ha'e va'e tetā amboaxapa 'rā kuaray oua katygua kuery rekoarā, Amom kuery re ajapoague rami avi, ha'e kuery re na'ima'endu'aavei aguā yvy regua ikuaiia rupi.

¹¹ Ha'e rami vy ambou 'rā Moabe pygua kuery mbopagaarā. Ha'e ramo ha'e kuery voi oikuaa 'rā xee ae SENHOR aikoa.

Edom pygua kuery rovai ijayvuague

¹² Po rami SENHOR Nhanderuete ijayvu:

— Edom pygua kuery ma Judá kuery rovai opu'amba vy ipo ky'apa va'ekue ha'e kuery re opu'aa py.

¹³ Ha'e rami rire SENHOR Nhanderuete aipoe'i: Edom pygua kuery rovai voi xepo aupi vy amomba 'rā avakue ha'e hymba kuery, tekoa e'ŷa ju oi aguā. Ha'e vy Temā tetā guive Dedā peve ojukupaa 'rā kyxe py.

¹⁴ Edom pygua kuery ambopaga uka 'rā xevyguua Israel kuery pe. Ha'e ramo ha'e kuery ombopaga 'rā Edom kuery xepoxya ha'e ajou vaia rupi. Ha'e ramo Edom kuery xekuaa avi 'rā ambopaga rā — he'i SENHOR Nhanderuete.

Filisteu kuery rovai ijayvuague

¹⁵ Po rami SENHOR Nhanderuete ijayvu:

— Filisteu kuery ma onhe'ê py Israel kuery jou vai etea rupi opu'ã rei okuapy ha'e kuery re, raka'e rã peve guarã omomba aguã teĩ.

¹⁶ Ha'e ramo SENHOR Nhanderuete aipoe'i: Ma'ê, xepo aupi 'rã filisteu kuery rovai, queretita kuery amomba, aguã, ha'e ye'ê yvýry ikuai va'e voi amokanhymba avi aguã.

¹⁷ Opa marã ambopaga 'rã xepoxya rupi ajou vai reve. Ha'e ramo ha'e kuery ambopaga ma rire oikuaa 'rã xee ae SENHOR aikoa.

26

Tiro pygua kuery rovai ijayvuague

¹ Ha'e gui onze ma'et'ya, jaxya ypy'ia ára py SENHOR ombou ju oayvu xevy. Ha'e vy aipoe'i:

² — Ava ra'y, Jerusalém tetã ombovaipaa rã Tiro pygua huvixa ijayvu: “Ha'ëvea rami! Opêmba ma tetã rokê vvy regua oikeaty. Ha'e vy ojepe'a oiny xevy. Ha'e ramo ajoupa 'rã mba'emo, tetã ombovaipaa rire”, he'i.

³ Ha'e rami teĩ SENHOR Nhanderuete ijayvu po rami: Ha'e gui Tiro pygua kuery, xee ma penderovai aiko. Ha'e rami vy ajapo 'rã peneretã re heta regua opu'ã aguã rami, ye'ê rupi yai opu'ã-pu'ãa rami.

⁴ Ha'e ramo ha'e kuery oitypa 'rã Tiro tetã kora, torre ikuai va'e guive. Tetã gui xee aipe'a ukapa 'rã vvy ku'i peve, ita mbeju rive aejapa aguã.

⁵ Ha'e gui ye'ê pa'ũ peĩague opyta 'rã pira mbo'aa mombiru atyrã, ha'e rami xeayvu ma voi rire — he'i SENHOR Nhanderuete. — Opyta 'rã vvy regua kuery mba'emo oipe'apa aguã rive.

⁶ Ha'e rã peneretarã kuery ye'ê rembe rupi ikuai va'e ma kyxe py meme 'rã ojukapaa. Ha'e ramo peikuaa 'rã xee ae SENHOR aikoa.

⁷ Mba'eta po rami SENHOR Nhanderuete ijayvu:

— Mba'eta Tiro tetã re ambou 'rã Babilônia pygua huvixa Nabucodonosor, huvixa ikuai va'e ruvixave va'e. Ha'e ramo kuaray apu'a'ia katy gui 'rã ou kavaju reve, karóxa, kavaju árygua kuery ha'e heta regua reve.

⁸ Ha'e rami peneretarã kuery ye'ê rembe rupi ikuai va'e ha'e ojukapa 'rã kyxe py. Ha'e gui peneretã rovai'i ojapo 'rã torre, ha'e tetã kora re xondaro kuery omboaty 'rã imoiny vvy, hu'y jokoa tuvixakueve o'áry rupi oguereko reve.

⁹ Ha'e gui tetã kora re ombota-mbota 'rã vvyra aygue py. Torre ikuai va'e voi oitypa 'rã ferro guigua py.

¹⁰ Hymba kuery kavaju ma heta ete vy peneretã py oikepa vy ojaol'ipa 'rã vvy ku'i py. Tetã rokê rupi kavaju árygua kuery, karóxa kyríve ha'e tuvixakueve oike ramo tetã kora omyĩmba 'rã hevovo rei va'e gui rive, tetã kora omopa'ũague rupi oikepa ramo.

¹¹ Hymba kavaju opoapê py ma ombovaipa rive 'rã tetã rape ikuai va'e. Hi'árygua kuery ma kyxe py ojukapa 'rã peneretarã kuery, ha'e ita tuvixa va'e pemopu'ã va'ekue oitypa 'rã vvy rupi.

¹² Ha'e gui ogueraapa 'rã mba'emo porã pereko va'ekue, oipe'a 'rã mba'emo pevende 'rã va'ekue, oitypa 'rã tetã kora ha'e oo porãgueve penderekoa va'ekue. Ha'e gui ita, vvyra ha'e mba'emo ku'ikue pendea py ikuai va'ekue omombopa 'rã ye'ê mbyte rupi.

¹³ Ha'e rami py amombytu'upa 'rã peporaiea revovo. Ha'e rire nonhenduvei 'rã ixã reta va'e pempopua.

¹⁴ Peneretã aeja 'rã ita mbeju rive, pira mbo'aa mombiru atyrã rive opyta aguã. Ndojapoavei 'rã guive, mba'eta xee SENHOR ae ha'e rami xeayvu rire — he'i SENHOR Nhanderuete.

¹⁵ Ha'e gui po rami SENHOR Nhanderuete ijayvu Tiro pygua kuery pe:

— Ye'ê rembe rupi ikuai va'e ma peneretã oitypaa rã hyapu rei va'e gui ndoryryipai 'rã ri ty'y, penepoaê reia ha'e tetã mbyte rupi pendejukapaa rã oendu avi vy?

¹⁶ Ha'e rami vy ye'ê rembe rupigua huvixa ikuai va'e ma oguejypa 'rã guenda openaaty gui, ha'e ojegui omboipa 'rã kamixa puku ha'e oao ombojeguapa pyre. Pendegui onhemondyipa rei vy oryryipa reve 'rã oguapypa vvy py, oryryipa rei anho 'rã oiny.

¹⁷ Ha'e rami vy ijayvu 'rã penererõnhemboaxya rupi. Ha'e vy aipoe'i 'rã okuapy: “Ndee tetã omboetevepy ha'e heta ikuai reiko va'ekue, mba'eta tu rekanhy xapy'a? Mba'eta yy áry rupi ndea pygua kuery oje'oiã rupi pendepo'akapa va'ekue, ha'e ndea katy'i ikuai va'e kuery remongyjepa rei va'ekue!

¹⁸ Ha'e gui aỹ ma ye'ê pa'ũ pygua kuery ha'e javi oryryipa 'rã re'rã oendu vy, nda'evei ete 'rã ikuai nereivei ma ramo”, he'i okuapy.

¹⁹ Mba'eta po rami SENHOR Nhanderuete ijayvu:

— Xee ma rojapo tetã oejapa pyre, tetã avave rei nda'ipoaveia rami, ha'e gui pende'áry rupi ombou yai, yy reta pendeao'ipa aguã.

²⁰ Ajapo avi 'rã peguejypa aguã rami, vvykua py oguejy va'e kuery reve. Ha'e rami vy ymagua kuery ikuai py romoingo 'rã vvy guyvea py, tekoa e'ỹa ymavea py pepyta aguã vvykua py oguejy va'ekue ikuai py, penderekoague py nda'ikuaivei aguã. Ha'e rã temimoingo kuery ikuai rupi ma ajapo 'rã mba'emo porã ete.

²¹ Rojapo 'rã nhomondyipaará, mba'eta napeivei ma 'rã. Penderekaa teĩ napendejouavei 'rã — he'i SENHOR Nhanderuete.

27

Tiro tetã omboaxy vaipaa rupi ijayvuague

¹ Ha'e gui SENHOR oayvu xevy ombou ju. Ha'e vy aipoe'i:

2 — Ha'e gui ndee ava ra'y, ndeayvu ke Tiro tetã pe omboaxy va'e rami.

3 Mba'eta Tiro ma ye'ê pa'ũ re oi, ha'e tetã mboae ye'ê yvýry rupi ikuai va'e katy ha'e kuery oo va'ekue mba'emo vendea rupi. Aipo're Tiro tetã pe: Po rami SENHOR Nhanderueté ijayvu: Ndee Tiro aipo're: "Xee ma kanoã guaxu opa mba'e py iporãve va'e rami aiko", 're.

4 Mba'eta anhetê ye'ê mbyte rupi peve ndepo'aka, ha'e ndeapoa kuery neporã aguã rami ete ndeapo va'ekue.

5 Ha'e rami vy nderegua pyrõa ma vyvira cipreste Senir gui ogueru pyre gui ojapoa va'ekue. Nderegua ajukue 'yrã ma Líbano gui oguerua yary.*

6 Ndepykuiarã ma vyvira carvalho Basã gui ogueru pyre gui ojapo. Tendarã ma ojapo marfim gui, vyvira pinho yy pa'ũ Quitim gui ogueru pyre py ombojegua vy.

7 Ndere ajukue oipyo va'erã ma Egito guigua iperiri'i va'e ha'e ombojeguapa pyre anho omoi, bandeira-rã guive. Ndeao'iarã ma ajukue hovy ha'e púrpura va'e ogueru yy pa'ũ Elisã gui.

8 Ndepykui va'erã ma Sidom ha'e Arvade pygua kuery ojou. Nemboguataarã ma ndee Tiro tetã pygua hi'arandukueve ae ojou.

9 Ndere mba'emo moatyrõarã ma Gebal pygua nhomongeta va'ety ha'e hi'arandukueve ojou. Ha'e gui ndere onhembojapa okuapy kanoã ye'ê rupigua ha'e imboguataa kuery ha'e javi, mba'emo rereko va'e omboekoviaxe vy.

10 — Ha'e gui ndevyguia xondarorã ma Pérsia, Lídia ha'e Pute gui ou va'ekue, ndevyguia ikuai joe opu'ã va'e meme. Ha'e kuery ma omba'e hu'y jokoa ha'e ngora ratã oupipa imoiny tetã kora ha'e javi rupi, ndepo'akaa oikuaa uka aguã.

11 Ha'e gui ndekora áry rupi nerarõa kuery ma ndea pygua ae, Arvade guigua xondaro kuery guive. Ha'e gui torre ikuai va'e py nerarõa kuery ma Gamade pygua. Ha'e kuery voi tetã kora rupi oupipa imoiny hu'y jokoa, nembogujua porãmba aguã.

12 — Opa mba'e rerekopa ramo Társis pygua kuery voi mba'emo omboekovia va'ekue ndereve. Mba'emo rereko va'e re omboekovia prata, ferro, estanho ha'e chumbo.

13 Javã, Tubal ha'e Meseque tetã pygua kuery voi mba'emo omboekovia va'ekue ndereve. Ha'e kuery ma mba'emo rereko va'e re omboekovia va'ekue escravo kuery ha'e tembiporu overa va'e guigua.

14 Ha'e rã Togarma guigua kuery ma mba'emo rereko va'e rekovia ome'ê kavaju, kavaju joe opu'ãa rupigua ha'e mburika.

15 Dedã ramymino kuery voi mba'emo omboekovia va'ekue ndereve. Heta ikuai va'ekue ye'ê yvýry rupigua mba'emo ndea py ojapo pyre joguaarã. Ha'e nunga rekovia ogueru elefante raigue marfim ha'e vyvira Ébano guigua.

16 Síria pygua kuery voi omboekovia va'ekue mba'emo ndea py ojapo pyre re. Ha'e nunga rekovia ome'ê va'ekue ita esmeralda, ajukue púrpura ha'e iperiri'i va'e ombojegua pyre, ha'e gui ita coral, ita hepykueve guive.

17 Judã ha'e Israel vyv regua kuery voi mba'emo ojogua va'ekue ndegui. Mba'emo rereko va'e rekovia ome'ê va'ekue trigo Minute guigua, tembi'u porãgueve, ei, azeite ha'e vyvira bálsamo.

18 Damasco pygua kuery voi mba'emo ojogua reta va'ekue ndea py ojapo pyre. Opa mba'e porã rereko va'e rekovia ome'ê va'ekue Helbom guigua vinho ha'e Saar guigua vexe'i rague.

19 Dã ha'e Javã pygua kuery voi Uzal vyv gui ou vy mba'emo rereko va'e rekovia ome'ê va'ekue ferro guigua, cássia ha'e cálamo. Ha'e ramigua reve ou mba'emo ojogua aguã.

20 Dedã pygua kuery ma ndevy ovende va'ekue kavaju kupe áry guarã.

21 Ha'e gui Arábia ha'e Quedar pygua yvatekueve ikuai va'e voi ojogua va'ekue mba'emo ndea py ojapo pyre. Ha'e rami vy ndevy ome'ê va'ekue vexe'i ra'y, vexe'i ha'e kavara ava. Ha'e nunga re ndereve imba'ejogua va'ekue.

22 Sabá ha'e Ramá pygua kuery voi mba'emo ojogua va'ekue ndegui. Mba'emo rereko va'e re omboekovia va'ekue heakuã porã va'e, ita hepykueve va'e ha'e ouro.

23 Ndereve mba'emo re omboekovia avi va'ekue Harã, Cane ha'e Éden pygua kuery, ha'e gui Seba, Assíria ha'e Quilmade pygua mba'emo ojogua va'ety kuery voi.

24 Ha'e kuery ma ndereve omboekovia va'ekue ajukue púrpura ombojegua pyre, tapete joo rami e'ÿ-e'ÿ pytã va'e, ha'e ixã oipoka pyre ijy ete va'e.

25 Ha'e gui kanoã Társis guigua ma ndea gui mba'emo ogueraa va'ekue. Ha'e ramo opa mba'e rejoupa ramo ye'ê rupigua kuery ha'e javi oendupa va'ekue ndereko.

26 Ha'e ramo ndevyguia kanoã pykuia kuery ma ndereraa yy ja'ea áry rupi, teĩ kuaray oua katy gui vyvitu ou va'e nemopẽmba 'rã yy mbyte py.

27 Ha'e ramo opa mba'e rereko va'ekue oikepa 'rã yy guy py. Hepykueve rereko va'ekue, mba'emo rejoupa ha'e revende va'ekue, ndevyguia ye'ê rupigua kuery, kanoã mboguataa, mba'emo moatyrõaty, mba'emo vendeaty, xondaro kuery, ha'e kanoã py oguata va'ekue ha'e javi. Ndevaipa ramo yy guy py meme 'rã oike.

28 Ha'e gui kanoã mboguataa kuery haxẽmba rei 'rã yy rembe rupi ikuai va'e ha'e javi oendu vy oryryipa 'rã okuapy.

29 Ha'e gui yy rupi ikuai va'ekue ma kanoã gui oguejypa vy vyv reia py ju 'rã ikuai: kanoã pykuia kuery, imboguata ha'e yy rupigua ha'e javi.

* 27:5 Apy ma Tiro tetã ombojoja kanoã guaxu re ajukue oipyo imoinya rami, mba'eta ha'e pygua kuery ma ye'ê áry rupi 'rã oo mba'emo vendea rupi.

³⁰ Ha'e rami vy pavê 'rã ojae'o rei nhendu okuapy ndere. Oakã áry omombo-mombo 'rã vyv ku'i, ha'e tanhimbu rupi onhembojere-jere 'rã okuapy.

³¹ Ndere vy o'a onhopímiba 'rã oakã gui. Onhe'ê py ndere nda'evéia anho oendu vy onhemonde 'rã ajukue vaikue voxa guigua py rive, ojae'o ha'e ipy'a vai reve.

³² Ha'e rami vy ojae'o reve nereronthemboaxy 'rã okuapy nda'evéia etea rupi. Ha'e vy aipoe'i 'rã: “Mava'e kuery tu Tiro pygua kuery rami ikuai, ye'ê mbyte py okyriri aguaã katy ogeuejy va'ekue rami?”*

³³ Mba'eta mba'emo revende va'erã ye'ê rupi ogueraa javé ma heta regua kuery rejapo oguerekopa aguaã rami, mbovy rei e'y rereko va'e revendea rupi rejapo va'ekue vyv regua huvixa kuery ojoupa aguaã.

³⁴ Ha'e rami tei aý ma vyv mbyte py remopêmbaa rã mba'emo revende 'rã va'ekue oiképa ma vyv typyvea py, nderevegua kuery ha'e javi reve”, he'i 'rã okuapy.

³⁵ Ha'e rami ye'ê vyvry rupi ikuai va'e onhemondyipa rei 'rã okuapy ndere. Ha'e kuery regua huvixave kuery voi oryryipa reve ngova re oexa uka 'rã nda'evéia etea.

³⁶ Ha'e kuery regua imba'ejogua va'ety kuery voi ndejojai rei 'rã jogueravy, nhomondyiarã rive repyta rire. Ha'e va'e rire nanemopu'avei 'rã.

28

Tiro pygua huvixave rovai ijayvuague

¹ Ha'e gui SENHOR oayvu xevy ombou ju. Ha'e vy aipoe'i:

² — Ava ra'y, ndeayvu Tiro pygua huvixa pe: Po rami SENHOR Nhanderuete ijayvu: Ndepy'a py renhemboyvate rei, ha'e vy aipo're: “Xee ma tuuete aiko. Ha'e rami vyv tenda tuuete openaaty py ae aguapy ainy ye'ê jova-jovai rupi oí va'e mbyte”, 're va'eri ava rive reiko, tuuete e'y, xee Nderuete rami ndepy'a reikovy va'eri.

³ Tá, Daniel gui renhemo'aranduve, reikuaa e'y va'e jipoi merami.

⁴ Ha'e rami vyv ne'arandua ha'e reikuapaa rupi vyv ndepo'aka ha'e rejoupa va'ekue ouro ha'e prata remoi porã aguaã.

⁵ Mba'eta mba'emo vendea rupi reiko kuaa va'e vyv rejoupave tema reovy va'ekue. Ha'e rami vyv ae renhemboyvate rei ndepy'a py.

⁶ Ha'e nunga rupi SENHOR Nhanderuete aipoe'i:

— Xee Nderuete rami ndepy'a reikovy ramo

⁷ ma'ê, aý ma ndere ambou 'rã amboae regua kuery pavê gui jiavaeteve va'e. Ha'e va'e kuery ma okyxe oekyi 'rã okuapy neporã ha'e ne'arandupa reia rovai. Ha'e vyv ombovai pa 'rã ndepo'akaa ha'e javi.

⁸ Ha'e rami vyv ha'e kuery ndereity 'rã vyvkuia py, ha'e ramo reiko vai 'rã ye'ê mbyte py ojukupy rami.

⁹ Ha'e ramo ndejuka ta va'e pe nda'u “Xee ma tuuete”, 're 'rã ri ty'y? Mba'eta ndejukaarã po py romboaxa ramo ava rive 'rã repyta, tuuete e'y.

¹⁰ Ha'e rami vyv remano 'rã xevyguia kuery omanoa rami, amboae regua po py, ha'e rami ae xeyvu rire — he'i SENHOR Nhanderuete.

Teigue ju Tiro pygua huvixave omboaxy va'e rami ijayvuague

¹¹ Ha'e gui SENHOR oayvu ombou ju xevy. Ha'e vy aipoe'i:

¹² — Ava ra'y, ndeayvu ke Tiro pygua huvixave re omboaxy va'e rami. Ha'e vyv aipo're ixupe: “Po rami SENHOR Nhanderuete ijayvu: Ndee ma pavê gui reiko porãve va'ekue, ne'arandua ha'e neporãa py.

¹³ Nhanderuete pegua vyvotyty Éden pyv ae reiko va'ekue. Ita iporãve va'e anho ndejee remoi va'ekue: sárdio, topázio, diamante, berilo, ônix, jaspe, safira, carbúnculo ha'e esmeralda. Ndejeguuarã ma ouro gui ojapoa. Nemoingoa ára guive ma voi ha'e nunga ojapoa ndevy.

¹⁴ Ndee ma anjo ipepo va'e nhoarõarã roiporavo va'ekue, ha'e rami aguaã rami ae romoi. Ha'e ramo Nderuete pegua vyvoty iky'a e'y va'e rupi reiko va'ekue, itaendy ikuaiia rupi.

¹⁵ Nemoingoa ára guive ha'evéia ramigua meme rejapo va'ekue, ndere teko vai ajou peve.

¹⁶ Ha'e gui ma mba'emo vendea rupi reiko vyv ndepy'a re remoi rejokuaa anho. Ha'e rami vyv rejeyavy. Ha'e rami rã romombo 'rã xevyguia vyvoty gui mombyry, renhemongy'apa rire. Itaendy ikuaiia mbyte gui romokanhy 'rã, anjo ipepo va'e nhoarõarã roiporavo rire tei.

¹⁷ Mba'eta neporã va'e vyv nekuraxõ py renhemboyvate, ha'e nerekakãmba va'e vyv renhemongy'a ne'arandupaa py. Ha'e rami rire huvixa kuery ikuai va'e renonde py romombo 'rã vyv katy, ha'e kuery ndereva okuapy aguaã.

¹⁸ Opa mba'e py rejeyavya py, ha'e mba'emo vendea rupi rejoguereko axya py remongy'apa oo iky'a e'y va'e ndea py ikuai va'ekue. Ha'e nunga rupi ndegui ae xee amoê tata romomba aguaã. Ha'e rami vyv pavê oexaa py ajapo vyv re tanhimbu rive repyta aguaã rami.

¹⁹ Mba'eta vyv regua nderevaaty kuery onhemondyipa ndegui. Nhomondyipaarã repyta, nerepu'avei 'rã guive.”

Sidom tetã pygua kuery rovai ijayvuague

²⁰ Ha'e gui ma xevy SENHOR oayvu ombou ju vyv aipoe'i:

²¹ — Ava ra'y, ema'ê Sidom tetãa katy, ha'e kuery rovai ndeayvu aguaã.

* 27:32 Apocalipse 18.13-19

²² Aipo're 'rā: Po rami SENHOR Nhanderuete ijavyu: Ma'ē, xee aiko peē Sidom pygua kuery rovai, ha'e gui pendekuaia mbyte xemboetea 'rā. Ha'e gui peneretā mbyte py rombopaga, ha'e iky'a e'ỹ va'e aikoa aikuaa uka ramo peikuaa 'rā xee ae SENHOR aikoa.

²³ Mba'eta peē kuery rovai ambou 'rā mba'eaxy vaikue tape rupi tuguy onheē peve. Kyxe revegua jova-jovai gui ou ramo oipyxo pyre kuery ho'a 'rā peneretā mbyte rupi. Ha'e ramo peikuaa 'rā xee ae SENHOR aikoa.

²⁴ Ha'e rā Israel kuery re ma imbojaru reia kuery ijyvyry ikuai va'e regua ndouvei 'rā juu ikutuarā, neĩ juu rakuandy rami. Ha'e ramo ha'e kuery voi oikuaa 'rā xee ae SENHOR Tuuete aikoa.

²⁵ Po rami SENHOR Nhanderuete ijavyu:

— Xee amono'õmba ju 'rā Israel kuery yvy regua ikuai rupi amoaĩague gui, ha'e kuery mbyte rupi aikuaa uka 'rā gui ve iky'a e'ỹ va'e aikoa yvy regua kuery oexaa py. Ha'e ramo ha'e kuery ikuai 'rā ovyvy re ae, xerembigui Jacó pe ame'ē va'ekue py.

²⁶ Ha'e py ma ikuai porā 'rā, ojapo 'rā ngoorā, uva onhotỹ 'rā guive. Tá, ha'e py ikuai porā 'rā, mba'eta ijyvyry rupi ikuai va'e ha'e javi ambopaga 'rā ombojaru reiague re. Ha'e ramo oikuaa 'rā okuapy xee ae SENHOR Tuuete aikoa.

29

Egito pygua kuery rovai ijavyvague

¹ Ha'e gui dez ma'etỹ ha'e dez jaxya re, doze araa py ju SENHOR oavyu ombou xevy. Ha'e vy aipoe'i:

² — Ava ra'y, ema'ē Egito pygua huvixa Faraó-a katy, hovai ndeavyu aguã, Egito pygua kuery ha'e javi rovai guive.

³ Ndeavyu vy aipo're 'rā: Po rami SENHOR Nhanderuete ijavyu: Egito pygua huvixa Faraó, xee aiko nderovai. Ndee ma jakare tuvixa ete va'e y py itui va'e rami reiko, mba'eta aipo're: “Kova'e y ma xemba'e ae, xejeupe guarā ae ajapo”, 're.

⁴ Ha'e rami teĩ neraĩ'ykā re xee amoi rā pinda, ha'e ajapo 'rā ndepekue re pira yakā rupigua ojapa aguã rami. Ha'e rami vy yv reĩa mbyte kuy xee roguenoē 'rā, ndepekue re pira ojapa va'e ha'e javi reve.

⁵ Romombo 'rā tekoa e'ỹ katy, ndee ha'e pira ndere oja va'e ha'e javi reve. Ha'e ramo yvy piru reia py 'rā re'a. Ndereruavei 'rā, nderetekue ndojatyai 'rā guive. Ha'e rami 'rāgue py romboaxa 'rā mymba kuery yvy regua ha'e guyra yva regua rembi'urā.

⁶ Ha'e ramo Egito pygua kuery oikuaapa 'rā xee ae SENHOR aikoa. Ndee ma Israel kuery pe repyta popoka takua'i guigua rive.

⁷ Mba'eta ha'e kuery ma opo py takua ojopy vy ojepytaxo ramove ovo rive vy ijaxi'y peve oixu'upa. Ha'e rami ae avi ndere ha'e kuery ojeko rā ndee nemopēa ramo ha'e kuery oendu 'rā haxy va'e, ha'e guyepy rupi voi oryryipa 'rā okuapy.

⁸ Ha'e nunga rupi po rami SENHOR Nhanderuete ijavyu:

— Ma'ē, ndere ambou 'rā kyxe revegua, ndea gui avakue ha'e mymba kuery mombaara.

⁹ Ha'e ramo Egito yvy opyta 'rā ombovaipa pyre ha'e tekoe ve'ỹ. Ha'e ramo peikuaa 'rā xee ae SENHOR aikoa.

¹⁰ — Mba'eta ndee aipo're va'ekue: “Yakā oi va'e xemba'e ae, xee ae ajapo va'ekue”, 're rire aỹ ma nderovai aiko, ndea py yakā ikuai va'e rovai guive. Ha'e rami vy ajapo 'rā Egito ombovaipa pyre yvy tekoe ve'ỹ opyta aguã rami Migdol guive Sevene peve, ha'e Etiópia yvy apy peve.

¹¹ Ha'e va'e rupi ndoaxavei 'rā avakue neĩ mymba kuery ma voi, quarenta ma'etỹ peve 'rā ndaekoavei 'rā ha'e py.

¹² Mba'eta ajapo 'rā Egito yvy ivaipa va'e gui ivaipave aguã rami. Ha'e va'e re tetā ikuai va'e voi tetā ivaipa va'e gui ivaipave 'rā opyta, quarenta ma'etỹ opa peve. Ha'e rami vy Egito pygua kuery amoaĩmba 'rā yvy regua kuery ikuai rupi, yvy jave rupi 'rā araa ukapa.

¹³ Ha'e rami teĩ SENHOR Nhanderuete ma po rami ijavyu avi:

— Quarenta ma'etỹ opaa py ma Egito pygua kuery arupa ju 'rā yvy regua ikuai rupi amoaĩague gui.

¹⁴ Ha'e rami vy amoingo porā ju 'rā. Patros yvy oje'oiague re ju aru rukapa 'rā. Ha'e py ma peteĩ tetā kyrĩ'ia py 'rā ikuai.

¹⁵ Tetā mboae ikuai va'e gui kyrĩ'ive 'rā opyta, neĩ amboae regua áryve nonhemboyvatevei ma 'rā. Xee amo'yvy'ĩ ma rire nda'ipo'akavei 'rā amboae regua kuery re.

¹⁶ Ha'e rami rire ha'e kuery re Israel kuery ndojeroviavei 'rā. Ha'e rami 'rāgue py Egito kuery re ojerovia ha'e onhepytyvõ ukaague re ha'e kuery ima'endu'a nhavõ oikuaa 'rā ojevavyaague. Ha'e rami vy oikuaa 'rā okuapy xee ae SENHOR aikoa — he'i.

¹⁷ Ha'e gui sete ma'etỹ ha'e jypyguva jaxya, jypy'ia ára py ju SENHOR oavyu ombou xevy. Ha'e vy aipoe'i:

¹⁸ — Ava ra'y, Babilônia pygua huvixa Nabucodonosor ma Tiro tetā re oxondaro kuery omoudoukaa py omba'eapo vaipa va'ekue xevy. Mba'eta peteĩ-teĩ akā rupi ipire rei, ha'e peteĩ-teĩ kupe rupi haxypa. Ha'e rami teĩ ixupe ma Tiro gui ndogueraa porā omba'eapogue repy, neĩ ixondaro kuery pe voi.

¹⁹ Ha'e nunga rupi SENHOR Nhanderuete aipoe'i:

— Aỹ ma Babilônia pygua huvixa Nabucodonosor pe amboaxave ju 'rā Egito yvy. Ha'e ramo ha'e gui ogueraapa 'rā ha'e pygua kuery, oipe'apa 'rā imba'e rei-rei va'ekue ha'e javi, oxondaro kuery peguarā.

²⁰ Tiro tetā re oje'oiá py omba'eapogue repyrā amboaxa 'rā Egito yvy, xevy pe ojapo rire — he'i SENHOR Nhanderuete.

²¹ — Ha'e va'e ára ma ajapo 'rā Israel kuery imbaraeete ju aguã rami. Ndee voi rojapo avi 'rā ha'e kuery mbyte rupi ndeavyu reikovy aguã rami. Ha'e ramo ha'e kuery oikuaa 'rā xee ae SENHOR aikoa.

30

Egito vvy re Babilônia pygua kuery ipo'aka aguã re ijayvuague

¹ Ha'e gui xezy SENHOR oayvu ombou vvy aipoe'i:

² — Ava ra'y, emombe'u ke xeayvu. Ha'e vvy aipo're: Po rami SENHOR Nhanderuete ijayvu: Ha'e va'e ára re peẽ kuery penepoaẽ 'rã.*

³ Mba'eta ha'e va'e ára ovaẽ rai'i ma. Tá, ovaẽ rai'i ma SENHOR ára. Araipa 'rã ha'e va'e ára, mba'eta amboae regua kuery ikuai axy aguã ára.

⁴ Ha'e rami vvy Egito vvy re ou 'rã kyxe revegua. Etiópia rupi voi ikuai axya ete 'rã, Egito rupi oipyxo pyre ho'apa jave. Mba'eta ha'e pygua kuery ogueraapaa 'rã escravo-rã, omombaa 'rã guive imbaraetekueve.

⁵ Ha'e ramo amboae regua kuery Egito reve onhemoirũ va'ekue ho'apa avi 'rã kyxe gui: Etiópia, Pute, Lude, Arábia pygua ha'e javi, ha'e Cube pygua kuery voi.

⁶ Po rami SENHOR ijayvu:

— Egito vvy pygua pytyvõare kuery ho'apa 'rã, opo'akaa re ojejou porã reiaque re omo'vyvĩ'ia rã. Migdol tekoa guive Sevene peve 'rã ho'a kyxe gui — he'i SENHOR Nhanderuete.

⁷ — Ha'e ramo vvy mboae ivaipa va'ekue mbyte ombovaipa pyre 'rã opyta, ha'e tetã mboae opa va'ekue rami avi 'rã omombaa tetã.

⁸ Ha'e ramo Egito vvy re tata amboja, ha'e ipytyvõare kuery amokanhymba ma ramo ha'e kuery oikuaa 'rã xee ae SENHOR aikoa.

⁹ Ha'e va'e ára ma xerenonde rupi ayvu reraa kuery kanoã guaxu py oje'oi 'rã Etiópia katy, ha'e ramo omondyipa 'rã onheangu e'y rei va'ekue. Mba'eta ha'e va'e vvy re voi ou 'rã teko vai, Egito pygua kuery ára py rami avi. Ha'e nunga ou ae ma oiny — he'i.

¹⁰ Po rami SENHOR Nhanderuete ijayvu:

— Babilônia pygua huvixa Nabucodonosor pe xee amomba uka 'rã Egito pygua kuery onhemboyvate reia.

¹¹ Ha'e rami vvy hexevagua kuery reve amondoukapa 'rã Egito vvy mombaarã, mba'eta pavẽ regua gui jjavaeteve va'e. Ha'e ramo okyxe oekyi 'rã okuapy Egito vvy re, ha'e vvy jave rupi omonyẽmba 'rã ojukapa va'ekue.

¹² Xee amboypa 'rã yakã ikuai va'e, ijyvy voi amboaxapa 'rã heko vai va'e kuery po py. Amboae kuery pe ambovaipa ukapa 'rã vvy, hexe ikuai va'e ha'e javi guive. Xee SENHOR ae ma ha'e rami xeayvu va'e.

¹³ Po rami SENHOR Nhanderuete ijayvu:

— Amokanhymba avi 'rã ha'e kuery ruete kuery ra'angaa, ta'angaa Mênfis py ikuai va'ekue voi amomba 'rã. Egito vvy re vvatetekueve nda'ikuaivei 'rã. Ijyvy jave rupi ambou 'rã ndaekorãveia.

¹⁴ Ha'e rami vvy ambovaipa 'rã Patros tetã, Zoã re amboja uka 'rã tata, ha'e anhombopaga 'rã Nô py.

¹⁵ Sim tetã Egito vvy re ikorapave va'e áry anhoẽ 'rã xepoxya, ha'e heta 'rã amomba Nô py.

¹⁶ Egito vvy jave rupi amboja 'rã tata. Ha'e ramo Sim py oendua 'rã ojexavai etea, Nô py okanhymbaa 'rã, ha'e ara py teĩ Mênfis rovaigua kuery ojekuaapa 'rã.

¹⁷ Kunumigue Áven ha'e Pi-Besete pygua ho'apa 'rã kyxe gui. Ha'e va'e tetã gui ma ogueraapaa 'rã escravo-rã.

¹⁸ Tafnes py ma ára pytũmba 'rã, mba'eta ha'e py amopẽmba 'rã Egito pygua po'akaa, amomba avi 'rã opo'akaa re onhemboyvate reia. Petẽ arai oja'o'ipa 'rã, ha'e rã tajj kuery ma escravo-rã meme 'rã ogueraapaa.

¹⁹ Ha'e rami 'rã anhombopaga Egito vvy rupi. Ha'e ramo ha'e kuery oikuaapa 'rã xee ae SENHOR aikoa — he'i.

²⁰ Ha'e gui onze ma'etÿa, jypygua jaxya re, sete araa py ju pe SENHOR ombou oayvu xezy. Ha'e vvy aipoe'i:

²¹ — Ava ra'y, xee amopẽ ma Egito pygua huvixa Faraó jyva. Ha'e rami teĩ ndojokuaai, noipoanoai, neĩ nomboje'aa jevy'i, ha'e rami e'y rã imbaraete ma vvy kyxe oiporu ju aguã.

²² Ha'e nunga rupi po rami ijayvu SENHOR Nhanderuete:

— Ma'ẽ, xee aiko Egito pygua huvixa Faraó rovai. Ha'e rami vvy ijyva rovai imbaraeteveague ju 'rã amopẽ, hovai amopẽ ma voiague rami. Ha'e rami vvy ajapo 'rã ipo gui kyxe ho'a aguã rami.

²³ Ha'e gui Egito pygua kuery amoaĩmba 'rã vvy regua ikuai rupi, araa ukapa 'rã vvy jave rupi.

²⁴ Ha'e rã Babilônia pygua huvixa jyva ma amombarae 'rã, ha'e ipo py amoi 'rã xekyxe. Ha'e rã Faraó jyva ma amopẽ 'rã. Ha'e ramo Babilônia pygua renonde ipoã rei 'rã oipyxo pyre rami.

²⁵ Aupi 'rã Babilônia pygua huvixa jyva, ha'e rã Faraó jyva ma ho'a rive 'rã. Ha'e gui Babilônia pygua huvixa po py xekyxe amoi va'ekue Egito vvy rupi oiporu ramo oikuaapa 'rã xee ae SENHOR aikoa.

²⁶ Mba'eta Egito pygua kuery amoaĩmba 'rã vvy regua ikuai rupi, araa ukapa 'rã vvy jave rupi. Ha'e ramo oikuaa pavẽ 'rã xee ae SENHOR aikoa.

31

Egito vvy re mba'emo oiko aguã re ijayvuague

¹ Ha'e gui onze ma'etÿa, mboapy jaxya re, ijypy'ia ára py ju SENHOR ombou oayvu xezy. Ha'e vvy aipoe'i:

² — Ava ra'y, aipo're Egito pygua huvixa Faraó ha'e ixupegua kuery ha'e javi pe: Mava'e regua tu ndee rami ipo'akapa va'e?

* 30:2 Apy ma Egito pygua kuery pe ijayvu.

³ Eikuaa pota ha'vy Assíria vvy re oiko va'ekue re. Ha'e kuery ma peteĩ yary Líbano py hi'aĩ va'e rami ikuai va'ekue, mba'eta hakã porã va'e vy ka'aguy rupi kuaray'ã porã va'ekue. Yvateve va'e hi'aĩ, hovapy ma vyvra rovapy rogue áryve rupi ovaẽ va'ekue.

⁴ Vvy guy katy gui yvu oĩ va'e omoakỹ vy ojapo va'ekue yvate aguã rami. Ojapo avi ijyvyppa gui yy omboxyry opa rupi, vyvra vvy re ikuai va'e ha'e javi omoakỹ aguã.

⁵ Ha'e nunga rupi ae onhemboyvate va'ekue vyvra vvy re ikuai va'e ha'e javi áryve, hakã retave ha'e ipukue ovy guive, heta yy omoakỹ vy ombotuvixa ramo.

⁶ Hakã'i ikuai va'e rupi guyra ojeaity apo va'ekue, hakã guy rupi ha'e javi mymba ta'y'i okuapy, ha'e ikuaray'ã py ma vvy regua ipo'akakueve oguapypa okuapy va'ekue.

⁷ Ha'e rami vy heta yy rupi hapo va'e vy tuvixaa ha'e hakã retaa py iporã ete va'ekue.

⁸ Yary Nhanderuetepagua yvotyty rupi ikuai va'e gui iporãve va'ekue. Vyvra cipreste voi ha'e va'e rami e'ỹ hakã va'ekue, vyvra plátano voi ha'e va'e rami ndaokyĩ va'e. Mba'eta iporãa rami peteive vyvra Nhanderuetepagua yvotyty py hi'aĩ va'e ndoikoi va'ekue.

⁹ Ha'e rami ajapo va'ekue hakã retava vy iporã rei aguã rami. Vyvra Éden py Nhanderuetepagua yvotyty rupi ikuai va'e ha'e javi ojou porãmba rei okuapy va'ekue.

¹⁰ Ha'e gui SENHOR Nhanderuetepagua ijayvuvu ju:

— Ha'e va'e vyvra yvateve tema ovy vyvra hovana va'e áryve ramo okuraxõ py onhemboyvate rei.

¹¹ Ha'e ramo xee amboaxa 'rã vvy regua ipo'akakueve po py, ha'e kuery omoingo axy aguã heko vaia re. Ha'e rami vy aipe'a 'rã oka katy.

¹² Ha'e ramo amboae regua kuery pavẽ gui ijavaeteve va'e ou vy oake'o 'rã, oeja rive 'rã guive. Ha'e ramo hakãgue ho'apa vvyty ha'e vvyugua ha'e javi rupi. Hoky voi omopẽmbaa 'rã vvy jave rupi yakã ikuai va'e vvyry. Ikuaray'ã py vvy regua ikuai va'ekue ha'e javi ojepe'apa 'rã oje'oivuy.

¹³ Hapytakue re ma ha'e javi regua guyra 'rã ikuai, ha'e rã hakãgue guy rupi ma ha'e javi regua vixo ojeaity apo 'rã okuapy.

¹⁴ Ha'e rami yvate etea rami amboae vyvra yy rembe rupi ikuai va'e onhemboyvate e'ỹ aguã, amboae vyvra ikuai va'e gui yvate ve'ỹ aguã, neĩ yy reta oĩa py yvateve hi'aĩ va'e voi ojee ojerovia rei e'ỹ aguã. Mba'eta ojejou porã reia ha'e javi ma okanhy aguã rami omboaxaa. Ha'e ramo ho'apa 'rã vvykua vaikue py, avakue ra'ỹ kuery vvykua py omboguejy pyre mbyte py opyta aguã.

¹⁵ Po rami ijayvu SENHOR Nhanderuetepagua:

— Ha'e va'e vyvra okanhy jave xee ajapo vvy jave re ipy'a vaia aguã rami. Mba'eta ha'e va'e káuxa vvy guýry yvu ikuai va'e ajao'ipa vy ajokopa vy oxyry va'ekue, yy heta ve'ỹ aguã. Ikáuxa ma Líbano vvy ha'e javi rupi ajao'ipa ajukue huũ rei va'e py, ha'e ramo vvy re vyvra ikuai va'e ipirupa.

¹⁶ Ha'e va'e vyvra ho'a rã hevovo reia gui ajapo vvy regua ha'e javi oendu vy okyjepa aguã, vvykua vaikue py omanogue mbyte amboguejy ramo. Ha'e ramo vyvra ho'a va'ekue ovy'apa ju 'rã okuapy vvy guýry rupi ikuaia py, Éden pyguare, Líbano vvy regua iporãve va'ekue, ha'e yy etaa rupi ikuai va'ekue ha'e javi.

¹⁷ Ha'e gui ma amboae regua kuery ipytyvõare ha'e ikuaray'ã py oguapy okuapy va'ekue voi oopa 'rã hexeve vvykua vaikue py kyxe py ojuka pyre reve opyta aguã.

¹⁸ — Ha'e gui Faraó, ndee voi vyvra Éden py ikuai va'e ha'e javi gui neporãve ha'e ndeyvateve va'e. Ha'e rami teĩ ha'e kuery reve reguejy avi 'rã vvy guy katy. Ha'e rami vy repyta 'rã opire omboi uka e'ỹ va'ekue mbyte, kyxe py ojuka pyre kuery reve guive. Ha'e rami vy Faraó ha'e iporãague ha'e javi okanhymba 'rã — he'i SENHOR Nhanderuetepagua.

32

Egito pygua huvixa Faraó omboaxy va'e rami ijayvuaque

¹ Ha'e gui doze ma'et'ya, doze jaxya re ijy'ya'ia ára py ju SENHOR oayvu ombou. Ha'e vy aipoe'i xevy:

² — Ava ra'y, ndeayvu ke Egito pygua huvixa Faraó pe omboaxy va'e rami. Ha'e vy aipo're 'rã ixupe: Ndey ma "Guary ra'y vvy regua mondoroa", 'ea va'eri peteĩ jakare yakã oĩa py opyrõmba reve yy omongy'apa rei va'e rami rive reiko.*

³ Po rami ijayvu SENHOR Nhanderuetepagua:

— Nde'áry amombo 'rã xekya vvy regua kuery mbyte, ha'e ramo ha'e kuery nemoatã 'rã heravy xekya py.

⁴ Ha'e rami vy xee roeja 'rã imoiny vvy py, romombo 'rã nhuũ reia py. Ha'e vy nde'áry ambou 'rã opa marãgua guyra, mymba vvy regua voi okaru 'rã okuapy ndero'o re.

⁵ Ndero'okue amoai 'rã vvyty áry rupi, ha'e vvyugua ikuai va'e rupi amonyẽ 'rã ndekyrakue.

⁶ Nderuguy onheẽ va'ekue ma omoakỹmba 'rã vvy vvyty áry peve, amonyẽ avi 'rã yakã.

⁷ Xee rojuka ma vy ajao'ipa 'rã yva, jaxy-tata ikuai va'e voi amopytũmba 'rã. Kuaray ma amo'ãmba 'rã arai py, jaxy voi naexakãvei 'rã.

⁸ Ndekáuxa ajapo 'rã yva re hexakã va'ekue pytũmba aguã rami, ha'e nderekoague rupi ambou 'rã pytũ reia — he'i SENHOR Nhanderuetepagua.

⁹ — Ajapo 'rã vvy regua heta rei ipy'a vai aguã rami, mba'eta pavẽ regua oendu 'rã rekanhymba maa omombe'ua rã, vvy reikuaa e'ỹague rupi voi.

¹⁰ Nderoko heta regua oendu vy onhemondyipa rei 'rã, huvixa kuery voi nderovai xekyxe aeky rã oexa vy oryrypa 'rã. Ndee re'a ramo peteĩ-teĩ oryry-ryrypa 'rã, guekove oguerojeyvuy.

* 32:2 Apocalipse 1.15

¹¹ Mba'eta po rami SENHOR Nhanderuete ijayvu:

— Ndea py ou 'rã Babilônia pygua huvixa okyxe reve.

¹² Ndevygua kuery heta va'ekue teĩ ajapo 'rã ipy'a guaxukueve pavẽ regua gui ijavaeteve va'e oitypa aguã rami okyxe py. Ha'e ramo ha'e kuery omomba 'rã Egito vvy re onhemboyvate va'e ikuai va'e, mba'emo porã oĩ va'ekue ha'e javi guive.

¹³ Nerymba kuery ma amokanhymba 'rã yy heta ikuai va'e rupi. Ha'e gui avakue neĩ mymba ma voi nomongy'avei 'rã yy.

¹⁴ Ha'e rami vvy yy ha'e py ikuai va'e ajapo 'rã itui porã ju aguã rami. Yakã ikuai va'e ma ajapo 'rã azeite rami oxyry porã aguã — he'i SENHOR Nhanderuete.

¹⁵ — Mba'eta ambovaipa uka 'rã Egito vvy, opa mba'e ikuai va'ekue noĩvei aguã rami. Ajuka ukapa 'rã ha'e py ikuai va'ekue. Ha'e ramo peikuaa 'rã xee ae SENHOR aïkoa.

¹⁶ Ha'e rami vvy regua kuery ijayvu 'rã Egito vvy ha'e mba'emo porã oĩ va'ekue ha'e javi ogueronhemboaxya rupi — he'i SENHOR Nhanderuete.

Egito pygua kuery amboae regua reve manoa py ikuai aguã re ijayvuague

¹⁷ Ha'e gui doze ma et'ya ha'e jypygua jaxya re, quinze araa py ju SENHOR oayvu ombou vy aipoe'i xevy:

¹⁸ — Ava ra'y, ejae'o ke Egito vvy re heta ikuai va'ekue re, mba'eta ha'e kuery oguejyja 'rã vvy guyve katy, amboae regua kuery omboeteve pyre vvykua katy oguejy va'e kuery reve.

¹⁹ Peẽ nda'u amboae gui peneporãve ri ty'y? Peguejy ke ha'vy, ha'e penheno pejupy opire omboi uka e'y va'ekue reve.

²⁰ Mba'eta peẽ kuery voi pe'a 'rã kyxre py ojuka pyre mbyte. Kyxre omboaxaa ma penderovaigua pe: “Pembovaipa 'rã Egito vvy, ha'e py ikuai va'ekue ha'e javive reve”, 'ea ixupe.

²¹ Ha'e ramo ipy'a guaxukueve regua ipo'akave va'ekue ha'e ipytyvõare kuery reve ma pendeve ojapukai 'rã okuapy manoa py ikuaiã gui. Ha'e py opire omboi uka e'y va'ekue oguejy vvy onhonomba inony kyxre py ojukapa pyre.

²² — Ha'e py ma itui Assíria pygua huvixa ojeupegua kuery ha'e javi reve. Ijyvýry rupi ikuai kyxre py ojukaa rã onhono porãmba pyre, kyxre py ho'apa va'ekue meme.

²³ Mba'eta ha'e kuery rupa ma vvykupy rupi ikuai, ha'e onhono porãague vvyry ikuai ha'e pyguare kuery ha'e javi. Kyxre py oipyxo vvy ojuka pyre meme, okuave teri jave joyvy rupi nhomongyjepa rei va'ekue ri.

²⁴ — Ha'e py oĩ avi Elão pygua ojeupegua kuery ha'e javi reve, onhono porã mbyre vvyry rupi. Ha'e kuery ma kyxre py oipyxo vvy ojuka pyre meme. Ha'e rami vvy opire nombói ukai va'ekue oguejyja vvykua py. Okuave teri jave joyvy rupi nhomongyjepa rei va'ekue ri oxĩmba reve opytapa vvykua py oguejy va'ekue mbyte.

²⁵ Ojuka pyre kuery mbyte rupi ma ojapoa huparã, ojeupegua kuery ha'e javi mbyte. Ha'e kuery rupa ma ijyvýry rupi ikuai. Opire omboi uka e'y va'ekue meme, kyxre py ojukapa pyre. Okuave teri jave joyvy rupi nhomongyjepa rei va'ekue ri oxĩmba reve opytapa vvykua py oguejy va'ekue mbyte, ojuka pyre mbyte rupi onhono porã.

²⁶ — Ha'e gui ha'e py ma ikuai Meseque ha'e Tubal pygua ojeupegua kuery ha'e javi reve. Ha'e kuery rupa ma ijyvýry rupi ikuai. Opire omboi uka e'y va'ekue meme, kyxre py ojukapa pyre, okuave teri jave joyvy rupi nhomongyjepa rei va'ekue ri.

²⁷ Ha'e kuery ma ymave rupigua ipy'a guaxukueve mbyte rupi e'y ikuai, opire nombói ukai va'ekue vvykua py oguejy va'ekue guembiporu joe opu'ãa py oiporu va'ekue inhakã guýry omoĩa reve-reve ikuaiã rupi e'y. Mba'eta ha'e kuery reko vaiague re opaga aguã ma inhakã re ae opyta. Okuave teri jave joyvy rupi ipy'a guaxukueve voi nomboekorãvei va'ekue ri.

²⁸ Ha'e gui peẽ Egito pygua kuery voi penemopẽmbaa avi 'rã opire omboi uka e'y va'e kuery mbyte py, penenhono porãa 'rã guive kyxre py ojuka pyre kuery mboae reve.

²⁹ — Ha'e py ma Edom pygua huvixa kuery ha'e yvatekueve ha'e javi ikuai. Ha'e kuery ipo'akapa va'ekue ri omboguejypaa kyxre py ojuka pyre-pyre reve. Ha'e ramo opire omboi uka e'y va'ekue reve onhonoa vvykua py omboguejy pyre ha'e javi reve.

³⁰ — Ha'e py ikuai avi kuaray apu'a'ia katygua yvatekueve. Ha'e kuery ma Sidom pygua kuery oipyxo pyre reve omboguejya avi, oxĩmba reve ikuai, opo'akaa py nanhombokorãvei va'ekue ri. Ha'e py opire omboi uka e'y va'ekue reve ikuai, kyxre py ojuka pyre kuery oxĩmba rei reve vvykua py omboguejypaa va'ekue mbyte.

³¹ — Faraó ma ha'e kuery ha'e javi oexa vvy ovy'apa 'rã ojeupegua kuery reve. Tá, Faraó ha'e ixondaro kuery ha'e javi 'rã ovy'a, kyxre py ojukaa avi va'ekue mbyte onhono porãa ramo — he'i SENHOR Nhanderuete.

³² — Mba'eta Faraó ha'e ixondaro kuery ha'e javi ma nhomondyipaarã amoĩ va'ekue okuave va'e kuery vvy re. Va'ekue ri ha'e voi onhono porãa 'rã opire omboi uka e'y va'ekue kyxre py ojuka pyre mbyte py — he'i SENHOR Nhanderuete.

Tetã rarõa oikuaa pota porã aguã re ijayvuague

¹ Ha'e gui SENHOR oayvu ombou ju xevy. Ha'e vvy aipoe'i:

² — Ava ra'y, ndeayvu ke neretarã kuery pe. Ha'e vvy aipo're ha'e kuery pe: Peteĩ vvy re kyxre revegua ambou ramo ha'e pygua kuery oiporavo 'rã peteĩ ava ha'e pygua ae, ha'e vvy omoĩ 'rã guetã rarõarã.

³ Ha'e ramo ha'e va'e ma yvy re kyxe revegua ou rã oexa vy mimby guaxu omonhe'ë 'rã guetarã kuery omonheangu aguã.

⁴ Ha'e gui xapy'a rei mimby guaxu nhe'ë amongue oendu teĩ nonheangu rei ramo kyxe revegua ou vy ojuka 'rã. Ha'e rami rã hexe ae 'rã oĩ huguy omoëague re opaga aguã,

⁵ mba'eta mimby guaxu nhe'ë oendu teĩ nonheangu rire. Hexe ae 'rã oĩ huguy omoëague re opaga aguã. Ha'e rã mimby nhe'ë oendu vy onheangu va'e ma ogueraa jepe 'rã guekove.

⁶ Ha'e rami teĩ xapy'a rei tetã rarõarã omoĩ mbyre ma kyxe revegua ou rã oexa teĩ mimby guaxu nomonhe'ëi tetã pygua kuery omonheangu aguã. Ha'e gui kyxe revegua ou vy oipe'apa 'rã tetã pygua rekove. Xapy'a rei ojuka pyre heko vaia reve 'rã ojukaa teĩ huguy omoëague re ambopaga 'rã tetã rarõa.

⁷ — Ha'e gui ma ndee ava ra'y, xee romoĩ Israel kuery rarõarã, ayvu xejuru guigua ndee rendu vy ha'e kuery pe ju remombe'u aguã.

⁸ Xapy'a rei heko vai va'e kuery pe aipoa'e 'rã: “Ndee ndereko vai va'e, anhetë ete remano 'rã”, ha'e teĩ ndee ha'e kuery pe nandeayvui 'rã ikuaiaty gui ojepe'a aguã re. Ha'e rami rã ha'e kuery omano 'rã gueko vaia gue py teĩ huguy onheëague re ndee 'rã rombopaga.

⁹ Ha'e gui xapy'a rei heko vai va'e kuery pe ndeayvu ikuaiaty gui ojepe'a aguã re, va'eri ha'e kuery ndojeko rerovai vy ma omano 'rã gueko vaia py ae. Ha'e rã ndee ma reo jepe 'rã.

¹⁰ — Ha'e gui ndee ava ra'y, ndeayvu ke Israel kuery pe. Ha'e vy aipo're 'rã: Peë kuery aipopeje: “Nhandeapua ha'e jajejavya nhandere oĩ va'e káuxa ae japa javy. Mba'exa 'rã tu ha'vy jaikove?” jepe.

¹¹ Aipo're ha'e kuery pe: Anhetë ete xee SENHOR Penderuete xee ae rekove rupi aura vy aipoa'e: “Xee ndavy'ai heko vai va'e kuery omano rã, ha'e rã gueko vaiaty gui ojeko rerova vy oikove ju ramo anho. Ha'e nunga rupi Israel kuery, pejeko rerova, pejeko rerova ke pendeko vaia gui. Mba'erã tu pemento rive?” ha'e.

¹² — Ha'e nunga rupi ava ra'y, aipo're 'rã neretarã kuery pe: Xapy'a rei heko porã va'ekue heko vai ri ramo ymave rupi teko porã rupi oikoague ndogueraa jepei 'rã. Ha'e rami ae avi heko vai va'ekue ojeko rerova ri ramo ymave rupi teko vai rupi oikoague ma nomokanhyi 'rã. Ha'e rami ae avi heko pora va'ekue ri ojejavya ára py heko porãague rive ndojapoi 'rã oikove aguã rami.

¹³ Ha'e gui xapy'a rei heko porã va'e pe “Anhetë ete reikove riaa 'rã” ha'e teĩ ha'e va'e ma gueko porãa re rive ojeroviaa rupi ojejavvy ramo xee naxema'endu'vei 'rã teko porã rupi oikoague re. Ha'e rami 'rãgue py omano 'rã gueko vaia py ae.

¹⁴ Ha'e rami ae avi xapy'a rei heko vai va'e pe “Anhetë remano 'rã” ha'e teĩ ojejavvyaty gui ojeko rerova vy ha'eva rami ha'e teko porã rupi anho ju 'rã oiko.

¹⁵ Ha'e rami vy ha'e va'e heko vai va'ekue omboekovia ju 'rã mba'emo oiporu uka va'ekue, opaga 'rã ju mba'emo re imondaague repy, ha'e ayvu tekove me'ëa rupi oiko, heko vaia gue rupi 'rãgue py. Ha'e rami ri vy oikove 'rã, nomanovei 'rã.

¹⁶ Mba'eta heko vaia gue re naxema'endu'vei 'rã hovai. Ha'eva rami ha'e teko porã rupi ju oiko vy oikove 'rã.

¹⁷ — Ha'e rami teĩ neretarã kuery aipoe'i: “ SENHOR ma ha'eva'ya rami nhanderereko”, he'i va'eri ha'e kuery ae ha'eva'ya rami ikuai va'e.

¹⁸ Mba'eta heko porã va'ekue ma xapy'a rei teko porã gui ojepe'a vy teko vai rupi ju oiko vy ma omano 'rã gueko vaia káuxa rive.

¹⁹ Ha'e rã heko vai va'ekue ma heko vaiaty gui ojeko rerova vy ha'eva rami ha'e teko porã rupi ju oiko vy ma oikove 'rã.

²⁰ Ha'e ramive ma peë kuery aipopeje: “ SENHOR ma ha'eva'ya rami nhanderereko”, jepe. Ha'e nunga rupi peë Israel kuery, xee aikuaa pota 'rã peteĩ-teĩ peikoa re.

Israel kuery ojee rive ojeroviaa re ijayvuague

²¹ Ha'e gui doze ma'etý re ma escravo-rã nhandereraa ague py nhandekuai jave, dez jaxya ha'e cinco araa py ma peteĩ ava ou xea py Jerusalém gui onha va'ekue. Ha'e vy aipoe'i:

— Tetã oipe'aa ma — he'i.

²² Ne'exa, ha'e va'e ka'aru ma xere SENHOR po oĩ va'ekue, onha va'ekue ovaë e'ý mbove. Ha'e rami vy ko'ëgue ju ha'e va'e ava xea py ou e'ý mbove'i xejuru oipe'a ju. Ha'e ramo xea'yvu ju, nakyiririvei.

²³ Ha'e ramo xevy SENHOR ombou oayvu. Ha'e vy aipoe'i:

²⁴ — Ava ra'y, Israel kuery regua tetã ombovaipa pyre rupi ikuai va'e ijayvu vy aipoe'i okuapy: “Abraão ma ha'e ae'i oiko va'eri ipo py omboaxaa raka'e kova'e yvy. Ne'exa, nhande kuery katuve ma nhandereta ete ramo kova'e yvy ome'ëa ae nhandekuai aguã”, he'i okuapy.

²⁵ Ha'e rami teĩ aipo're ha'e kuery pe: Po rami ijayvu SENHOR Nhanderuete: Peë kuery ma xo'o ha'e huguy revegua pe'u, ha'e tuuete ra'angaa pereko va'e re pema'ë, jouguy pemoë pekuapy guive. Ha'e nunga rupi peë kuery nda'u penderekoa 'rã teve yvy re?

²⁶ Peë kuery ma pendekyxe re rive pejeroviave va'e, ojegarupy pejapo, peneirũ kuery ra'yxy reve guive pejevay. Ha'e nunga rupi nda'u yvy re penderekoa 'rã teve?

²⁷ — Aipo're ha'e kuery pe: Anhetë ete xee SENHOR Penderuete xee ae rekove rupi aura vy aipoa'e: Tetã ombovaipa pyre ikuai va'e ojukaa 'rã kyxe py, ha'e rã tetã rovai rupi ikuai va'e ma amboaxa 'rã mymba nharõ omondoropa ha'e ho'upa aguã. Ha'e gui onhemiaty ha'e itakua rupi onhemi va'e ma mba'eaxy gui 'rã omano.

²⁸ Mba'eta pendevvy xee ambovaipa uka 'rã tekoa ve'ÿ opyta aguã, ha'e ramo pendepo'akaa pejou porã 'rãgue py penemo'yvy'ia 'rã. Israel regua vvyty ikuai va'e rupi voi jipoavei 'rã avave rei, ha'e rupi ndoaxaavei 'rã guive.

²⁹ Ha'e ramo peikuaa 'rã xee ae SENHOR aikoa, pendevvy tekoka ve'ÿ opyta aguã xee ambovaipa uka ramo, ojeuarupy pejapoa rupi pendekuaia re.

³⁰ — Ha'e gui ndee ava ra'y, tetã kora ha'e ngoo rokê rupi neretarã kuery ijayvu okuapy ndere. Joupe-upe 'rã ijayvu peteĩ-teĩ guvyv ha'e guyke'y kuery reve. Ha'e vy aipoe'i 'rã: “Ajerure pëvy, peju ke, jaa nhaendu aguã SENHOR ayvu omombe'ua rã”, he'i okuapy.

³¹ Ha'e rami vy ha'ekue rami ae 'rã ou ndea py, ha'e nerenonde rupi oguapypa 'rã okuapy xeveygua kuery rami. Ha'e vy ndeayvua oendu 'rã teĩ nda'ikuaixei ha'ekue rami. Ojuru py porayvu va'e rami ijayvu, ha'e rã opy'a py ma jokorepaa rupi anho ikuai.

³² Mba'eta ha'e kuery pe rã ndee mborayvu rupi oporai va'e rami reiko, amongue oporai porã ha'e imba'epu kuaa va'e rami rive. Mba'eta ndeayvua oenduxe vai merami teĩ nda'ikuaixei ha'ekue rami.

³³ Ha'e nunga ha'e javi oiko, ojeupitypa ramo ha'e kuery oikuaa 'rã ha'e kuery mbyte rupi profeta oiko ra'eague.

34

Israel kuery re nopena porã va'e kuery rovai ijayvuague

¹ Ha'e gui SENHOR oayvu ombou vy aipoe'i xevy:

² — Ava ra'y, ndeayvu ke Israel kuery re opena va'e kuery rovai. Ha'e vy aipo're: Po rami ijayvu SENHOR Nhanderuete. Nda'evai ete 'rã Israel kuery re opena va'erã omoĩ mbyre va'eri ojee ae rive opena va'e kuery pe! Xeveygua vexe'i kuery re opena va'erã omoĩ mbyre e'ÿ teve?

³ Mba'eta xo'o ikyra-kyrave va'e pe'upa pekuapy, hague py ma penhemonde, ha'e pemongyrapa va'ekue ma pejuka tema pekuapy. Ha'e rami teĩ vexe'i kuery re ma napepenai.

⁴ Mba'eta ikangykue napemombaraetei, imba'eaxy va'e napeipoanoi, opê va'ekue napemboje'ai, ojepe'a va'ekue ndaperu jevyi, ha'e okanhygue ma voi ndapeka jevyi. Ha'e rami 'rãgue py pereko poyi, pemboaxya rupi e'ÿ.

⁵ Xerymba kuery re opena porã va'e ndoikoi ramo oaimba oje'oivy, ha'e mymba inharõ va'e nhuũndy rupigua rembi'urã rive ikuai.

⁶ Ha'e ramo xerymba kuery ma opa rupi ikuai vvyty ha'e vvy'ã ikuai va'e áry rupi. Vvy jave rupi oaimba okuapy, hekaarã ha'e heru jevyarã ndoikoi ramo.

⁷ — Ha'e nunga rupi joe opena va'erã omoĩ mbyre kuery, pendu ke SENHOR ayvu:

⁸ Anhetê ete xee SENHOR Penderuete xee ae rekove rupi aura vy aipoa'e: Xeveygua vexe'i kuery pemboaxapa hi'uarã kuery pe, ha'e ramo mymba inharõ va'e nhuũndy rupigua kuery rembi'urã ikuai, opena va'erã ndoikoi ramo, mba'eta joe opena va'erã omoĩ va'ekue ndoekai okuapy xeveygua kuery, ojee ae rive opena okuapy, xeveygua kuery re'ÿ.

⁹ Ha'e nunga rupi joe opena va'erã romoĩ va'ekue, pejapypxaka ke SENHOR ayvu re.

¹⁰ Po rami ijayvu SENHOR Penderuete: Ne'exa, xee ma aiko joe opena va'e kuery rovai, ha'e rami vy ha'e kuery po py ndaejavei 'rã xeveygua vexe'i kuery. Amomba 'rã joe openaa, ojee ae rive nopenavei aguã. Ha'e kuery juru gui xee araa jepepa 'rã xeveygua vexe'i kuery, ho'u va'erã rive ikuai ve'ÿ aguã.

Ojepegua kuery re SENHOR opena porã aguã re ijayvuague

¹¹ Ha'e nunga rupi po rami SENHOR Nhanderuete ijayvu:

— Ne'exa, xee ae aeka 'rã xeveygua kuery, arupa 'rã guive.

¹² Mba'eta mymba kuery re opena va'e ma ha'e kuery oaimba rã oexa vy oguerupa ju 'rã. Ha'e rami ae avi xee voi aru 'rã xeveygua kuery. Araipa ha'e pytũmbaa ára py ha'e kuery omoãague ha'e javi rupi gui xee araa jepe 'rã.

¹³ Opa rupi vvy regua ikuai gui aipe'a vy amboatypa 'rã, ha'e vy ijyvy re ae ju 'rã aru. Amongaru 'rã Israel regua vvyty ikuai va'e rupi, yakã ikuai va'e vvy'ry, tekoka rupi guive.

¹⁴ Nhuũndy porã rupi 'rã areko, Israel regua vvyty yvateve va'e ikuai rupi. Ha'e ramo onheno 'rã okuapy nhuũndy porã reia rupi Israel regua vvyty re.

¹⁵ Xee ae 'rã apena xeveygua kuery re, amombytu 'rã guive — he'i SENHOR Nhanderuete.

¹⁶ — Ha'e rami vy aeka 'rã okanhygue, ojavy va'ekue ma arupa ju 'rã, opêgue ha'e ikangykue ma amombaraete ju 'rã. Ha'e rã ikyra rei va'e ha'e ipo'akakueve ma amomba 'rã. Mba'eta teko porã rupi 'rã apena.

¹⁷ — Ha'e gui peẽ kuery xeveygua pendekuai va'e re ma po rami SENHOR Penderuete ijayvu: Ne'exa, aikuaa pota 'rã xerymba kuery ha'e javi re, vexe'i ava ha'e kavara ava re guive.

¹⁸ Peẽ kuery peguarã nhuũndy porã reia ame'ê va'e nda'u nda'evai ri? Mba'exa tu ha'vy nhuũndy mboae rupi voi pepyrõmba rei rive? Peẽ kuery pe nda'evai ri ty'y yy porã ame'ê va'ekue? Mba'exa tu ha'vy yy mboae voi pepyrõ vvy pemongy'apa rei?

¹⁹ Mba'eta xerymba kuery ma nhuũ pepyrõmbaague rupi rive okaru, ha'e yy pemongy'apa va'ekue oy'u okuapy.

²⁰ Ha'e nunga rupi po rami SENHOR Nhanderuete ijayvu joguereko axya kuery pe:

— Ne'exa, xee ae aikuaa pota 'rã vexe'i kuery ikyrakueve ha'e iporiaukue re.

²¹ Mba'eta peê kuery ma pendeaxi'y py penhomoanha-anha heravy, ha'e penderakua py peikutu pekuapy ikangykue'i, pemoxêmba peve.

²² Ha'e rã xee ma araa jepepa 'rã xeivyguia kuery ho'upa pyrã rive ikuai e'yã aguã, vexa'i ikuai va'e re aikuaa potaa py.

²³ Ha'e kuery pe pete'i ambou 'rã opena va'erã omongaru porã aguã. Xerembiguai Davi ae 'rã omongaru ha'e opena.

²⁴ Xee aiko 'rã ha'e kuery ruete, ha'e rã xerembiguai Davi ma ha'e kuery mbyte rupi 'rã oiko huvixave. Xee SENHOR ae xeayvu ha'e rami.

²⁵ — Ha'e gui ha'e kuery pe ajapo 'rã xereve ikuai porã aguã. Ha'e rami vy amomba 'rã mymba nharõ vvy re ikuai va'ekue. Ha'e ramo xeivyguia kuery tekoa e'yã rupi ikuai, ha'e ka'aguy rupi oke tei mba'eve ndoikoi 'rã.

²⁶ Mba'eta xee amoingo porã 'rã, xeivyguia vvyty vyvry rupi voi. Ha'e rami vy hi'ára py porã 'rã ambou oky amoingo porã rupi.

²⁷ Ha'e gui vvyra ikuai va'e hi'apa 'rã, ha'e vvy re oiko 'rã mba'emo aju pyau. Ha'e ramo vvy re ha'e kuery ikuai rupi mba'eve ndoikoi 'rã. Ha'e kuery oikuaa 'rã xee ae SENHOR aikoa, mba'eta ha'e kuery re canga omo'i mbyre amopêmba vy aipe'apa 'rã escravo-rã ogueraa va'ekue po gui.

²⁸ Ha'e rami rire ha'e kuery nda'ikuaivei ma 'rã amboae regua kuery omokõ va'erã, mymba vvy re ikuai va'e voi nomondorovei 'rã. Ha'e rami 'rãgue py ikuai porã 'rã, imondyiarã ndoikoi rã.

²⁹ Ha'e kuery pe ajapo 'rã onhoty va'ekue oiko porã ete aguã, ha'e ramo vvy re ikuai teri reve karuai omomba ve'yã aguã. Noenduvei 'rã guive amboae regua kuery ojojai reia.

³⁰ Ha'e ramo oikuaa 'rã ha'e kuery reve xee SENHOR tuete aikoa, ha'e rã Israel kuery ae xeivyguia ikuai — he'i SENHOR Nhanderuete.

³¹ — Peê xerymba vexa'i kuery pendekuai va'e ma avakue peiko, ha'e rã xee ma Penderuete — he'i SENHOR Nhanderuete.

35

Seir vvyty re ikuai va'e kuery rovai ijayvuague

¹ Ha'e gui xevy SENHOR oayvu ombou vy aipoe'i:

² — Ava ra'y, ema'ẽ na Seir vvyty katy, ha'e vvy ndeayvu ke ha'e kuery rovai.*

³ Aipo're ha'e kuery pe: Po rami SENHOR Nhanderuete aipoe'i: Ne'exa Seir vvyty re pendekuai va'e, xee ma penderovai aiko. Ha'e rami vy penderovai xepo aupi vy ajapo 'rã pekanhymba aguã rami nhomondyipaara.

⁴ Peê kuery retã ambovaipa uka 'rã tekoague opyta aguã. Ha'e ramo peikuaa 'rã xee ae SENHOR aikoa.

⁵ Mba'eta Israel kuery re napendea'ei riaa vy pemboaxa kyxe py ojuka va'erã pe, ha'e kuery opaa py omoingo axya ete jave.

⁶ Ha'e nunga rupi anhetẽ ete xee SENHOR Penderuete xee ae rekove rupi aura vy aipoa'e: Peê kuery voi xee romboaxa 'rã penderuguy moëarã pe, penderakykue monha aguã. Jouguy pexaxe vai rire penderuguy moëarã ju 'rã ou penderakykue.

⁷ Mba'eta Seir vvyty ambovaipa ete vy ha'e gui amomba 'rã oaxa ha'e ojevye aguã va'ekue ha'e javi.

⁸ Ha'e va'e vvyty amonyẽ 'rã oipyxo pyre anho. Mba'eta kyxe py oipyxo pyre ho'a 'rã pendeivy rupi vvyty, vvyugua ha'e yakã ikuai va'e vyvry.

⁹ Ha'e rami vy pendekuaia ma raka'eve rã peve ajapo 'rã tekoa ve'yã oĩ aguã rami, peneretã py noĩavei aguã. Ha'e ramo peikuaa 'rã xee ae SENHOR aikoa.

¹⁰ — Mba'eta aipopeje va'ekue: “Mokoĩ regua ha'e mokoĩve vvy opyta 'rã xemba'e ae. Xee ae 'rã aiko ha'e py, SENHOR ha'e py oiko avi teĩ”, peje va'ekue.†

¹¹ Ha'e nunga rupi anhetẽ ete xee SENHOR Penderuete xee ae rekove rupi aura vy aipoa'e: Xee rombopaga 'rã joupe pendepoxy ha'e joe napendea'eia rami ae, mba'eta pendevei rei reve pereko axy va'ekue xeivyguia kuery. Ha'e gui peê kuery re aikuaa pota ramo ha'e kuery voi oikuaa 'rã xereko.

¹² Israel regua vvyty re pendeayvu vai vy aipopeje: “Ombovaipaa ma ramo nhandevy pe ju opyta 'rã nhuũndyrã rive”, peje va'ekue. Ha'e rami pendeayvu rã xee SENHOR aendupa, ha'e peê voi peikuaa 'rã xee aenduague.

¹³ Mba'eta peê kuery ma pendeayvu py penhemboyvate reive va'ekue xerovai, xere pendeayvu rei vaipa. Ha'e ramo xee aendupa.

¹⁴ Ha'e nunga rupi SENHOR Penderuete ijayvu po rami: Vvy jave rupi ovy'a pavẽ jave teĩ peê kuery ma xee romokanhymba 'rã.

¹⁵ Israel kuery omokanhymbaa jave pevy'a riague rami ae 'rã xee ju ajapo pendere. Mba'eta peê Seir vvyty re Edom kuery pendekuai va'e, penemokanhymbaa katui'i 'rã. Ha'e ramo peikuaa 'rã xee ae SENHOR aikoa.

36

Israel regua vvyty ikuai va'e pe ijayvuague

¹ — Ndee ava ra'y, emombe'u ke xeayvu Israel regua vvyty ikuai va'e pe. Ha'e vvy aipo're: Israel regua vvyty pendekuai va'e, pendu ke SENHOR ayvu.

* 35:2 Seir vvyty ma Edom kuery ikuai. Ha'e kuery ma Israel kuery rovaigua ikuai raka'e.

† 35:10 “Mokoĩ regua” he'ia ma Judá ha'e Israel kuery re ijayvu vvy.

² Po rami SENHOR Nhanderuete ijayvu: Penderovaigua kuery pendeivy aipoe'i: "Ha'evea rami! Tekoa imarã e'ÿ va'ekue ma nhandevy meme opyta", he'i okuapy.

³ Ha'e rami rã ndee Ezequiel, emombe'u ke xeayvu, ha'e vy aipo're yvyty ikuai va'e pe: Po rami ijayvu SENHOR Nhanderuete: Amboae regua kuery penemomba ha'e jova-jovai katy gui penemombaxe ojeupe ju penemombyta agua, xeivyguia kuery re ijayvu vai guive ojoi rei rupi.

⁴ Ha'e rami teĩ, peẽ Israel regua yvyty pendekuai va'e, pendu ke SENHOR Nhanderuete ayvu. Po rami SENHOR ijayvu yvyty ha'e yvy'ã ikuai va'e pe, yakã ha'e yvyugua ikuai va'e pe, ha'e tekoa e'ÿa ombovaipa pyre, ha'e tetã ojea pyre ikuai va'e pe, mba'eta ha'e katy'i rupi amboae regua kuery ikuai va'e oipe'apa, ojoi rei okuapy guive.

⁵ Ha'e rami teĩ po rami SENHOR Nhanderuete ijayvu: Anhetẽ xee nda'evei etea hendy va'e rupi xeayvu yvy regua kuery ha'e Edom pygua ha'e javi pe, mba'eta xeivy ha'e kuery ojopy va'ekue omba'erã, okuraxõ py ov'y'a rei ha'e onhe'ẽ py xejojai rei reve. Ha'e rami vy oipe'apa hekoa va'ekue, ogueraapa guive imba'e rei-rei va'ekue.

⁶ Ha'e nunga rupi emombe'u xeayvu Israel yvy re. Ha'e vy aipo're yvyty ha'e yvy'ã, yakã ha'e yvyugua ikuai va'e pe: Po rami ijayvu SENHOR Nhanderuete: Ne'exa, xee ma nda'evei etea ha'e xepoxya rupi xeayvu, mba'eta yvy regua kuery pendejojai rei okuapy.

⁷ Ha'e nunga rupi po rami ijayvu SENHOR Nhanderuete: Xepo aupi reve xee aura yvy regua kuery pendejojai reiague ma pende'yvy rupi ikuai va'e áry ae ju 'rã ojeapa.

⁸ — Ha'e rã peẽ Israel regua yvyty pendekuai va'e, pendere ikuai nho 'rã yvyra hakã ha'e hi'a va'e xeivyguia Israel kuery pe, mba'eta ha'e kuery ou ju aguã rami ikuai.

⁹ Mba'eta ne'exa, xee aiko 'rã pendereve. Ajevy 'rã pendea py. Ha'e ramo pende'áry rupi yvy oikaraia ha'e oma'et'ya ju 'rã.

¹⁰ Pende'áry amboeta ju 'rã avakue, Israel kuery ha'e javi regua, tá, ha'e javi 'rã ikuai. Ha'e ramo ha'e kuery ma guetã rupi ae ju 'rã ikuai, mba'eta ivaipaague py ojapo ju 'rã ngoorã.

¹¹ Pende'áry rupi amboeta 'rã avakue ha'e mymba kuery. Ha'e kuery heta ha'e ta'y reta 'rã ovy. Jypy guare gui xee romoingo porãve 'rã. Ha'e ramo peikuaa 'rã xee ae SENHOR aikoa.

¹² Pende'áry rupi ajapo 'rã xeivyguia Israel kuery oguata ju aguã rami. Pepyta 'rã ha'e kuery pegua, ndapejapovei 'rã guive ta'y kuery okanhy aguã rami.

¹³ Po rami SENHOR Nhanderuete ijayvu ha'e kuery yvy pe:

— Ndevy pe aipo'ea: "Ndee ma yvy avakue mombaa, ha'e ta'y kuery okanhymba aguã rami rejapo va'e", 'ea va'ekue teĩ.

¹⁴ Ha'e nunga rupi ndee nerembobavei ma 'rã avakue, nderejapovei 'rã ndea pygua ra'y kuery okanhymba aguã rami — he'i SENHOR Nhanderuete.

¹⁵ — Xee ma amboae regua kuery pe ndorojojai rei ukavei 'rã rendu aguã, ha'e ramo nerenduvei 'rã yvy regua kuery nembojaru reia, nderejapovei 'rã guive ndea pygua kuery ojevavy aguã rami — he'i SENHOR Nhanderuete.

Israel kuery omoingo porã ju aguã re ijayvuague

¹⁶ SENHOR oayvu ombou vy aipoe'i xeivy:

¹⁷ — Ava ra'y, Israel kuery ovy re ikuai teri reve opa marã ikuai ha'e mba'emo ojapoa py omongy'apa rei va'ekue. Kunha gueko re oiko va'e rami ha'e kuery voi ha'eve'ÿ va'ekue xerenonde.

¹⁸ Ha'e nunga rupi ha'e kuery re ambou xepoxya, ha'e kuery yvy re jouguy omoẽ okuapy ha'e mba'emo ra'angaa py omongy'apaague re.

¹⁹ Ha'e rami vy amoaimba va'ekue yvy regua kuery ikuai rupi, araa ukapa yvy jave rupi. Xee ambopaga opa marã ikuai ha'e mba'emo ojapoaague re.

²⁰ Ha'e rami py yvy regua kuery ikuai py mamo rã ha'e kuery oje'oiia rupi ojapo okuapy xerery iky'a va'ea rami rive oikuaa aguã rami, mba'eta ha'e kuery pe aipo'ea: "Peva'e kuery ma SENHOR pegua va'eri ijyvy gui omoxẽmba va'ekue", 'ea.

²¹ Ha'e rami rã Israel kuery oje'oiia rupi ojapo okuapy yvy regua kuery xerery iky'a e'ÿ va'e nombotei aguã rami. Ha'e rami teĩ xee amboete uka nho.

²² — Ha'e nunga rupi aipo're Israel kuery pe: Po rami SENHOR Nhanderuete ijayvu: Peẽ Israel kuery re ama'ẽ vy e'ÿ ha'e nunga ajapo, ha'e rã xerery iky'a e'ÿ va'e amboete ukua rupi vy, mba'eta pee kuery ma yvy regua kuery mbyte rupi peoa py xerery napemboete ukai ramo.*

²³ Ha'e nunga rupi amboete uka ju 'rã xerery yvate ha'e iky'a e'ÿ va'e, yvy regua kuery mbyte peoa rupi pemongy'a uka va'ekue ri. Ha'e ramo yvy regua kuery oikuaa 'rã xee SENHOR ae aikoa, ha'e kuery renonde iky'a e'ÿ va'e aikoa aexa uka ramo — he'i SENHOR Nhanderuete.

²⁴ — Ha'e rami vy yvy regua kuery mbyte gui xee roguenoẽ 'rã, ha'e yvy jave rupi gui pendeivy py ae ju rogueru vy romboaty 'rã ha'e py.

²⁵ Ha'e vy pende'áry rupi amboayvi 'rã yy iky'a e'ÿ va'e, napendeky'vei aguã. Ha'e rami vy roiky'a'o 'rã ha'eve'ÿa ha'e mba'emo ra'angaa pereko va'ekue ha'e javi gui.

²⁶ Pendeivy ame'ẽ 'rã kuraxõ pyau, pendere amoĩ 'rã nhe'ẽ pyau. Pendegui aipe'a 'rã kuraxõ ita guigua, ha'e vy hekovia amoĩ 'rã pendero'o guigua.

* 36:22 Romanos 2.24

²⁷ Pendere amoī 'rā Xenhe'ē ae, ajapo 'rā guive xeyvuu rupi pendekuai aguā, xee aipota va'e pemoī porā vy pejapopa aguā rami.

²⁸ Ha'e ramo pendekuai 'rā pendeyvyrā peneramoī kuery pe ame'ē va'ekue re. Peiko 'rā xevyguua kuery, ha'e rā xee ma aiko 'rā Penderuete.

²⁹ Rogueraa jepe 'rā ha'eve'ya ha'e javi gui. Trigo voi ambou reta 'rā, ha'e rā karuai ma nambouvei 'rā pendere.

³⁰ Ajapo 'rā vvyra hi'a porā ha'e mba'ety rupi ipyau va'e oiko porā aguā rami, karuai káuxa vvy regua kuery pendejojai rei ve'y aguā.

³¹ Ha'e ramo penema'endu'a 'rā ha'eve'ya rami pendekuaiague ha'e ha'eve'y va'e pejapoague re. Pendejegui ae 'rā pejeguuru pendereko vai ha'e penhemongy'apaague káuxa.

³² Peikuaa porā pota ke: pendere ama'ē vy e'y ha'e nunga ajapo. Israel kuery, peximba ke ha'e perovy'ave eme pendekuaiague — he'i SENHOR Nhanderuete.

³³ Po rami SENHOR Nhanderuete ijayvu:

— Pendereko vaia ha'e javi gui roiky'a'o vy ajapo avi 'rā peneretā rupi pendekuai ju aguā rami. Ha'e ramo penderorā pejapopa ju 'rā tekoa e'yague rupi.

³⁴ Peikarai ju 'rā vvy tekoa e'ya rupi, oaxa va'e kuery oexa vy “Oeja pyre itui” nde'ivei 'rā.

³⁵ Ha'e rami 'rāgue py aipo'ea 'rā: “Kova'e vvy oeja pyre ma Éden vyotyty rami ju iporā. Tetā tekoa e'ya, oeja pyre ha'e ombovaipa pyre voi ikorapa ha'e oimbaa ju”, 'ea 'rā.

³⁶ Ha'e ramo vvy regua kuery pendeyvyrā rupi okuave va'e oikuaa 'rā xee SENHOR ae tetā ombovaipa pyre ajapo juague, ha'e pendeyvy oeja pyre rupi ama'et'y juague. Xee SENHOR ha'e rami aguā re xeyvuu rire ajapopa 'rā.

³⁷ Po rami SENHOR Nhanderuete ijayvu:

— Israel kuery ha'eve ju 'rā xevy ojerure aguā mymba kuery rami amboetave aguā.

³⁸ Ha'e ramo tetā oeja pyre rupi heta ju 'rā xevy guarā omboaxa pyre, Jerusalém tetā py ngaru oiko jave py mymba kuery heta va'ekue rami. Ha'e ramo oikuaapa 'rā xee ae SENHOR aikoa.

37

Vvyugua py ikāgue pirukue ikuai va'e oexaague

¹ Ha'e gui xere SENHOR opo omoī vy xereraa Onhe'ē rupi. Ha'e vy xemoī petei vvyugua ikāgue anho ikuai mbyte py.

² Ha'e vy ojapo ikāgue vyvry rupi aguata aguā rami. Ikāgue heta ete ikuai vvyugua rupi, ipiru ratā guive.

³ Ha'e gui ma oporandu xevy:

— Ava ra'y, kova'e ikāgue nda'u okuave ju 'rā?

Xee ambovai:

— SENHOR Xeruete, ndee ae 'rā reikuaa — ha'e.

⁴ Aipoe'ive ju xevy:

— Ndeayvu na kova'e ikāgue ikuai va'e pe, ha'e vy aipo're: Ikāgue ymague, pendu ke SENHOR ayvu.

⁵ Po rami SENHOR Nhanderuete ijayvu ikāgue ikuai va'e pe: Ne'exa, peē kuery re amoī 'rā Xenhe'ē peikove ju aguā.

⁶ Ha'e gui pendere amoī 'rā hajykuerā, ajapo 'rā guive pendero'o ha'e pendepirepa ju aguā rami. Ha'e gui ma pendere amoī 'rā Nhe'ē. Ha'e ramo peikove ju 'rā, ha'e peikuaa 'rā xee ae SENHOR aikoa — he'i.

⁷ Ha'e ramo ijayvuague rami ae xeyvuu. Xeyvuu teri reve hevovo rei nhendu va'e aendu, petei-tei kāgue joe onhembota-mbota vy oparāgue rei. Ha'e rami vy petei-tei kāgue onhemboje'apa joe.

⁸ Ha'e ramo ama'ē rā ikāgue ikuai va'e hajy ha'e ho'opa ma. Ipire voi ojekuaa, ha'e rā inhe'ērā ma noī teri.

⁹ Ha'e gui SENHOR aipoe'i xevy:

— Ava ra'y, Nhe'ē pe ju ndeayvu. Ndeayvu vy aipo'ere ixupe: “Po rami SENHOR Nhanderuete ijayvu: Ndee Nhe'ē, eju irundy henda vytyt oipejua katy gui. Ha'e vy ke eipeju kova'e omanogue áry rupi, okuave ju aguā rami”, 're — he'i.

¹⁰ Ha'e ramo ijayvuague rami xeyvuu ramo ikāgue ikuai va'e re ou Nhe'ē. Ha'e ramo oikovepa jevy ju opu'amba ju joguerokuapy, xondaro kuery rami mbovy rei e'y ikuai.

¹¹ Ha'e gui ma aipoe'ive ju xevy:

— Ava ra'y, kova'e kāgue ma Israel kuery ikuai. Mba'eta aipoe'i okuapy: “Orekāgue ma ipirupa ma, ha'e vy roarō rokuapya voi opa ma. Noīvei ma orerekovea”, he'i okuapy.

¹² Ha'e nunga rupi ndeayvu ke. Aipo're ha'e kuery pe: “ SENHOR Nhanderuete ma po rami ijayvu: Ne'exa xevyguua kuery, aipe'apa ju 'rā penderupa penhono porāague, ha'e rami vy roguenoēmba ju 'rā ha'e gui, Israel vvy re rogueru aguā.

¹³ Ha'e ramo xevyguua kuery, penderupa gui roguenoēmba ma ramo peikuaa 'rā xee ae SENHOR aikoa.

¹⁴ Ha'e gui ma pendere amoī 'rā Xenhe'ē, ha'e gui peikove ju 'rā. Rogueru 'rā pendeyvy re ae pendekuai aguā. Ha'e ramo peikuaa 'rā xee SENHOR ae ha'e rami aguā re xeyvuu ha'e ajapo ete guive”, he'i SENHOR.

Judá ha'e Israel kuery reve petei'i regua ju ikuai aguā re ijayvuague

¹⁵ Ha'e gui SENHOR oayvu ombou vy aipoe'i xevy:

16 — Ndee ava ra'y, ejou ke pete'i vyvra'i, ha'e va'e re embopara po rami: Judá kuery regua, ha'e gui ha'e kuery reve Israel kuery onhemoirũ va'ekue regua guive. Ha'e gui ma amboae vyvra'i ju ejopy vy ha'e va'e re embopara: José ha'e Efraim regua, ha'e gui ha'e kuery reve Israel kuery onhemoirũ va'ekue regua guive. 17 Ha'e gui emboje'a mokoive, pete'i'vyvra rami ndepo py rereko aguã.

18 Ha'e gui ma neretarã kuery oporandu 'rã ndevy. Ha'e vy aipoe'i 'rã: "Emombe'u ke orevy mba'erã he'ia pa nami rejapo va'e?" he'i 'rã okuapy.

19 Ha'e ramo ndee aipo're 'rã ha'e kuery pe: "Po rami SENHOR Nhanderuete ijayvu: Ne'exa, xee ajopy 'rã José regua vyvra'i Efraim po py o'i va'ekue, ha'e gui ha'e kuery reve Israel kuery onhemoirũ va'ekue regua guive. Ha'e gui ha'e va'e ma amboje'a 'rã vyvra'i Judá regua reve, pete'i'vyvra rami areko aguã, mba'eta pete'i 'rã ojeapo xepo py", 're.

20 Ha'e kuery renonde ndeayvu reve ndepo py rereko 'rã mokoive vyvra'i ipara oia va'e.

21 — Ha'e gui aipo're 'rã ha'e kuery pe: Po rami SENHOR Nhanderuete ijayvu: Ne'exa, xee anoẽmba 'rã Israel kuery vvy regua kuery mbyte ha'e kuery oague gui, opa rupi gui 'rã amboatypa. Ha'e rami vy arupa ju 'rã ijyvy re ae.

22 Ha'e vy ha'e va'e vvy re ajapo 'rã pete'i' regua ikuai aguã, Israel regua vvyty re. Pete'i' 'rã o'i avi ha'e kuery ha'e javi ruvixaverã. Moko'i regua ve'y ma 'rã ikuai. Raka'eva rã te'i ndoja'ovei 'rã moko'i reguarã.

23 Nonhemongy'avei 'rã guive ta'angaa oguereko va'ekue py rive, ne'i ojeguarupy ha'e teko vai rupi ikuai py ma voi. Mba'eta araajepa 'rã xegui ojepe'aa rupi ojevayvague gui, ha'e gui aiky'a'opa ju 'rã. Ha'e rami vy ikuai 'rã xevyguia kuery, ha'e rã xee aiko 'rã Tuuete.

24 — Ha'e kuery re xerembiguai Davi ae 'rã opena. Pete'i' 'rã oiko ha'e kuery re opena va'e. Ha'e ramo xee aipotaa rami anho 'rã ikuai, omo'i porã 'rã okuapy xeyvuy ojapo ete aguã.

25 Ha'e kuery ikuai 'rã vvy xerembiguai Jacó pe ame'ẽague re, tamo'i kuery ikuaiague re ae. Ha'e py ae 'rã hekoa, ta'y kuery ha'e hamymino kuery voi, raka'eva rã peve. Huvixaverã ma xerembiguai Davi ae 'rã oiko raka'e rã peve guarã.

26 Ha'e kuery pe ajapo 'rã xereve ikuai porã aguã regua raka'e rã peve guarã. Amoingo porã, amboetave 'rã guive. Ha'e kuery mbyte amo'i 'rã xevyguia oo iky'a e'y va'e raka'e rã peve guarã.

27 Ha'e kuery mbyte ae 'rã o'i xembojerovia aty. Xee aiko 'rã Tuuete, ha'e rã ha'e kuery ma ikuai 'rã xevyguia. *

28 Vvy regua kuery voi oikuaa 'rã okuapy xee SENHOR ae Israel kuery ky'a'oa aikoa, ha'e kuery mbyte xevyguia oo iky'a e'y va'e o'i ramo raka'eva rã peve.

38

Huvixa Gogue rovai ijayvuaque

1 Ha'e gui ma SENHOR oayvu ombou vy aipoe'i xevy:

2 — Ava ra'y, ema'ẽ Magogue pygua huvixa Gogue oia katy. Ha'e va'e ma Rôs, Meseque ha'e Tubal pygua kuery re opena va'e.* Ndeayvu ke hovai,

3 ha'e vy aipo're: SENHOR Nhanderuete po rami ijayvu: Ndee Gogue, Rôs, Meseque ha'e Tubal pygua kuery ruvixa reiko va'e, xee ma nderovai aiko.

4 Xee rojapo 'rã rejere aguã rami. Ndejuru py pinda amo'i reve rogueraa 'rã mombyry, nexondaro kuery ha'e javi reve. Kavaju ha'e hi'aryguia kuery hembiporupa va'e meme, heta 'rã oje'oi hu'y jokoia ha'e imo'ãa tuvixa va'e reve, opo py kyxe reve guive.

5 Ha'e kuery irurã oje'oi avi 'rã Pérsia, Etiópia ha'e Pute pygua kuery, hu'y jokoia ha'e ngora ratã reveguia meme.

6 Oje'oi avi 'rã Gômer pygua oxondaro kuery ha'e javi reve, ha'e kuaray japu'a'ia katy gui jogueru 'rã Togarma pygua oxondaro kuery ha'e javi reve. Heta ete 'rã oje'oi nderupive.

7 — Ha'e nunga rupi Gogue, eiko katu ke. Epu'ã ke nderupiveguia kuery ha'e javi reve, ha'e vy epena ha'e kuery re.

8 Mba'eta hare ma rire roeno'i 'rã. Ma'et'ya opaa py ma reo 'rã pete'i vvy kyxe gui ndokyjeaveia katy. Ha'e va'e kuery ma vvy regua ikuaiague gui ono'õmba 'rã jogueruvy Israel regua vvyty hare ma ivaipa va'ekue ary. Ha'e kuery ma vvy regua kuery mbyte gui oipe'aa heruvy rire ikuai porãmba ju 'rã mba'eva gui okyje rei e'y re.

9 Ha'e gui ma ha'e kuery rovai peju 'rã vvyty atã rami. Peju 'rã arai vvy ojao'ipa va'e rami, nexondaro kuery ha'e mbovy e'y regua nderupive ou va'e reve.

10 — Po rami ijayvu SENHOR Nhanderuete: Ha'e va'e ára ma ndepy'a re remo'i 'rã mba'emo vai rejapo aguã.

11 Ha'e vy aipo're 'rã: "Aa 'rã pete'i vvy tekoa ikora e'y va'e re apu'ã aguã, aa 'rã opytu'u rei va'e kuery rovai. Ha'e kuery ma ikuai porã rei tekoa ikora e'y va'e rupi, okẽ ne'i okẽ jokoia noia rupi", 're 'rã.

12 Ha'e rami vy reo 'rã imba'e rei-rei reipe'a aguã, mba'emo reraapa ha'e ha'e kuery rovai ndepo reupi aguã, mba'eta vvy oja pyre py ha'e kuery hekoa 'rã vvy regua mbyte gui ono'õ jogueruvy rire. Ha'e kuery ma guymba ha'e omba'e rei-rei oguerekopa, ha'e vvy mbyte py ikuai va'e.

13 Ndevy pe Sabá ha'e Dedã pygua kuery oporandu 'rã okuapy, Társis tetã py mba'emo vendea ha'e huvixa mba'emo pe'aaty kuery voi. Ha'e vy aipoe'i 'rã okuapy ndevy: "Nhomba'e rei-rei peraa aguã pa peju?"

Mba'emo peipe'a aguã pa nderupivegua kuery remboatypa? Peipe'a ta pa prata ha'e ouro, peraa ta pa mymba kuery ha'e mba'e rei-rei? Peipe'apa ete 'rã teve?" he'i 'rã okuapy.

Israel yvy re Gogue kuery ou aguã re ijayvuague

¹⁴ — Ha'e gui ava ra'y, ndeayvu ke Gogue pe, ha'e vy aipo're: Po rami ijayvu SENHOR Nhanderuete: Ha'e va'e ára xeivyua Israel kuery ikuai porã jave ndee Gogue nda'u ndereikuaai 'rã ri ndere oiko va'erã?

¹⁵ Mba'eta kuaray ijapu'a'ia katy nderekoa gui reju 'rã mbovy e'y regua reve. Kavaju árygua meme 'rã peju, xondaro kuery heta rei ha'e imbaraete va'e meme reve.

¹⁶ Ha'e vy peju 'rã xeivyua kuery Israel regua rovai, arai yvy ojao'ipa va'e rami avi. Opaá ára rogueru 'rã xeivy rovai guarã pavẽ regua xekuaa aguã, mba'eta ha'e kuery oexaa py aexa uka 'rã iky'a e'y va'e aikoa, ndee Gogue re mba'emo ajapoa py.

¹⁷ Po rami SENHOR Nhanderuete ijayvu:

— Nderekorã re yma ma voi xeayvu va'ekue, xeremimbo'e kuery Israel regua profeta ikuai va'e rupi, mba'eta ha'e kuery mbovy e'y rei ma'et'y re ijayvu va'ekue xeivyua kuery rovai guarã xee rogueru aguã re — he'i.

¹⁸ SENHOR Nhanderuete aipoe'ive ju:

— Ha'e va'e ára Israel yvy re Gogue ou ramo aexa uka ete 'rã xepoxya.

¹⁹ Mba'eta xee nda'evei ete ha'e xepoxya hendy va'e rupi aipoa'e: Ha'e va'e ára amboryryipa 'rã Israel yvy jave rupi.

²⁰ Ha'e ramia gui xerenonde oryryipa 'rã pira ye'ẽ rupigua, guyra yva regua, mymba yvy regua, yvy rupi otryryy va'e, ha'e avakue yvy re ikuai va'e ha'e javi. Yvyty ikuai va'e ho'apa 'rã yvy'ã guy katy, itaova ha'yypa 'rã, ha'e tetã kora ikuai va'ekue voi ho'apa 'rã yvy py.

²¹ SENHOR Nhanderuete aipoe'i:

— Ha'e gui Gogue kuery rovai ambou 'rã kyxe, yvyty re ha'e kuery ikuai rupi. Ha'e ramo peteĩ-teĩ okyxe oiporu 'rã oirũ kuery rovai.

²² Mba'eta ambopaga 'rã mba'eaxy ha'e huguy moëarã py. Hi'áry ambou 'rã oky ja'ea, amandau tuvixa va'e ha'e tata enxofre revegua. Ha'e nunga ho'a 'rã ixondaro kuery ha'e hexevegua yvy regua kuery heta ikuai va'e áry.

²³ Ha'e rami vy xee anhemboyvate 'rã, aexa uka 'rã guive iky'a e'y va'e aikoa. Pavẽ regua oexaa py 'rã ajekuaa uka. Ha'e ramo pavẽ 'rã oikuaa xee ae SENHOR aikoa.

39

Gogue kuery oitypaa aguã re ijayvuague

¹ — Ha'e nunga rupi ndee ava ra'y, ndeayvuve ju Gogue rovai. Ha'e vy aipo're: Po rami ijayvu SENHOR Nhanderuete: Ne'exa Gogue, xee aiko nderovai, RôS, Meseque ha'e Tubal pygua ruvixa reiko va'e.

² Xee rojapo 'rã rejere aguã rami, kuaray ijapu'a'ia katy gui roguenoë 'rã heruvy Israel regua yvyty ikuai va'e re.

³ Ha'e gui nderapa aipe'a 'rã ndeaxua gui, ha'e hu'y ma aitypa 'rã reiporu kuaa regua gui.

⁴ Ha'e ramo re'a 'rã Israel regua yvyty re nexondaro kuery ha'e yvy regua kuery nderupive ou va'ekue ha'e javi reve. Ha'e ramo romboaxapa 'rã opa marãgua guyra ha'e mymba yvy regua pe pende'u aguã.

⁵ Pe'a 'rã nhuũndy rupi rive, ha'e rami aguã re xeayvu rire — he'i SENHOR Nhanderuete.

⁶ — Amboja 'rã tata Magogue yvy re ha'e ye'ẽ yv'yry okyje e'y re ikuai va'ekue re. Ha'e ramo oikuaa pavẽ 'rã xee ae SENHOR aikoa.

⁷ Xeivyua Israel kuery mbyte rupi aikuaa uka 'rã xerery iky'a e'y va'e, namongy'a ukavei ma 'rã guive. Ha'e ramo yvy regua kuery oikuaapa 'rã Israel kuery mbyte rupi xee SENHOR iky'a e'y va'e aikoa.

⁸ Ne'exa, ha'e nunga ou ma oiny, oiko ta ma. Kova'e ára re ae xeayvuague — he'i SENHOR Nhanderuete.

⁹ — Ha'e gui ma Israel regua tetã pygua kuery oëmba jogueruvy vy oapypa 'rã ngovaigua kuery rembiporukue: hu'y jokoa, imo'ãa tuvixa va'e, guyrapa, hu'y, yvyra raimbe ha'e hu'y guaxu. Sete ma'et'y peve 'rã ogueraa ha'e nunga ha'e javi oapypa aguã.

¹⁰ Ha'e va'e jave ma ndoguerui 'rã yxakã mba'ety gui neĩ ka'aguy gui, mba'eta tembiporukue gui ae 'rã ojapo tata. Ha'e rami vy ogueraapa ju 'rã mba'emo reraa are kuery mba'ekue, oipe'apa ju 'rã mba'emo pe'aare kuery mba'ekue — he'i SENHOR Nhanderuete.

Gogue pegua xondaro kuery re'õgue ojatypaa ague

¹¹ — Ha'e va'e ára Gogue kuery pe ame'ẽ 'rã Israel yvy re he'õgue ruparã rive, yvyugua ye'ẽ regua kuaray oua katy oguataaty rupi. Ha'e py ma ojaty'a 'rã Gogue ixondaro kuery ha'e javi reve. Ha'e rami rire omboerya 'rã yvyugua Gogue kuery ikuai.

¹² Sete jaxy peve 'rã Israel kuery ojaty he'õgue, oyvy oiky'a'opa ju aguã.

¹³ Ha'e va'e yvy regua kuery ha'e javi 'rã ojaty. Ha'e kuery ima'endu'a riae 'rã xee anhemboyvatea ára re — he'i SENHOR Nhanderuete.

¹⁴ — Ha'e gui oiporavo 'rã avakue yvy jave rupi oiko-oiko tema va'erã, oeka vy amboae guigua re'õgue ojaty pyrã, yvy oiky'a'opa ju aguã. Sete jaxy rire mae ma omboypy 'rã te'õgue oeka aguã.

¹⁵ Ha'e kuery ma yvy jave rupi oiko-oiko temaa rupi ava kãgue oexa nhavõ omarka 'rã ijyvyry rupi, ha'e gui ijatyarã ju ou vy ojaty aguã yvyugua Gogue kuery ikuai py.

¹⁶ Ha'e va'e tetã voi omboery 'rã Gogue kuery ikuai. Ha'e rami vy 'rã oiky'a'opa ju oyvy.

SENHOR peguarã ojukapaa aguã re ijayvuague

¹⁷ — Ha'e gui ndee ava ra'y, endu ke. Po rami *SENHOR* Penderuete ijayvu. Aipo're 'rã guyra ikuai va'e ha'e mymba ka'aguy regua pe: Peno'õmba pejogueruvy, opa rupi gui peju ajuka uka va'ekue pe'upa aguã. Pendeivy pe areko katu, Israel regua vyvty ikuai va'e rupi ajuka uka reta. Ha'e ramo pe'u 'rã xo'o ha'e pey'u 'rã tuguy.

¹⁸ Mba'eta pe'u 'rã ipo'akapa va'e ro'okue, ha'e pey'u 'rã vvy regua yvatekueve ruguy, vexa'i ava ha'e ta'y'i, kavara ha'e vaka ra'y Basã vvy re omongyra pyre ro'okue ramigua.

¹⁹ Xee ajuka uka va'ekue, pendeivy pe areko katu va'ekue gui pe'u 'rã ikyrakue penevyatãmba peve, ha'e pey'u 'rã huguy peka'upa peve.

²⁰ Ngaru ajapoa py pe'u 'rã pekuapy kavaju ha'e ija kuery, ipy'a guaxukueve ha'e joe opu'ãa rupigua ro'okue — he'i *SENHOR* Nhanderuete.*

²¹ — Ha'e rami vy aexa uka 'rã xerexakãa vvy regua kuery mbyte, ha'e ramo pavẽ regua 'rã oexa xee aikuaa pota rã, ha'e kuery áry xepo aupi ramo.

²² Ha'e va'e ára guive ma Israel kuery oikuaa 'rã xee ae *SENHOR* Tuuete aikoa.

²³ Vvy regua kuery voi oikuaa 'rã okuapy Israel kuery ojejavyague py ae escravo-rã ogueraapaague, mba'eta xere ndojeroviai rã ha'e kuery gui amo'ã va'ekue xerova. Hovaigua kuery po py amboaxapa ramo ojukapa kyxe py.

²⁴ Ha'e kuery onhemongy'apa rei ha'e heko vai reia py ae areko ha'e rami, xerova amo'ã reve.

²⁵ Ha'e nunga rupi po rami ijayvu *SENHOR* Nhanderuete:

— Ha'e rami teĩ aỹ ma ambopyau ju 'rã Jacó kuery ikuai, amboaxapa ju 'rã Israel kuery, xerery iky'a e'y va'e amboete uka ju vy.

²⁶ Ha'e gui ovyv re ae ju ikuai py imondyiarã ndoikoi ramo ha'e kuery hexaraipa 'rã oximbaague ha'e xere ojerovia e'yã rupi naxenhe'ẽ rendui okuapyague re.

²⁷ Mba'eta arupa ju 'rã vvy regua kuery ikuai mbyte rupi gui, amboatypa ju 'rã heruvy hovaigua kuery vvy gui. Ha'e rami vy ha'e javi regua oexaa py xee aexa uka 'rã iky'a e'y va'e aikoa, ha'e kuery mbyte.

²⁸ Ha'e ramo ha'e kuery oikuaa 'rã xee ae *SENHOR* Tuuete aikoa, oexa vy vvy regua ikuai rupi araa uka rã, ha'e gui ovyv katy ju amono'õ ukapa heruvy rã guive, ha'e kuery va'e regua neĩ peteĩve aeja e'y re.

²⁹ Ha'e kuery pe xee ndajexa uka ve'y'i ma 'rã. Ha'e rami 'rãgue py Israel kuery áry ambou 'rã Xenhe'ẽ — he'i *SENHOR* Nhanderuete.

40

Templo pyau oexaague

¹ Ha'e gui vinte e cinco ma'etỹ re ma amboae vvy re orereraapaa rire, ma'etỹ ypy'i jaxya ha'e dez araa py, catorze ma'etỹ re ma Jerusalém tetã oi'pe'aa rire, ha'e va'e ára py ae xere *SENHOR* opo omoĩ vy xereraa ha'e katy.

² Mba'emo xevy oexa ukua rupi Nhanderuete xereraa Israel vvy katy. Ha'e vy xemopu'ã imo'amy peteĩ vyvty yvateve va'e áry. Ha'e va'e re ma kuaray puku-a katy ojekuaa oo guaxu tetã regua.*

³ Ha'e katy ae ju xereraa rã oĩ peteĩ ava overa va'e rami hexakãmba va'e. Ha'e va'e ma oo kora rokẽ py hi'ãi, ha'e opo py oguereko ixã ipo'i'i va'e, ha'e gui peteĩ vyvra'i mba'emo a'äärã.*

⁴ Ha'e gui ava va'e aipoe'i xevy:

— Ava ra'y, exa mba'emo nderexa py, ha'e endu ndeapya py. Ha'e rami vy ndepy'a re emoimba ke aexa uka ta va'e, mba'eta ha'e rami aguã ae ndererua apy peve. Ha'e gui ma Israel kuery pe ju emombe'u rexa va'ekue ha'e javi — he'i.

⁵ Ha'e gui aexa oo roka ha'e javi rupi peteĩ kora ojere oiny va'e. Ava va'e opo py vyvra'i mba'emo a'äärã oguereko va'e ma mboapy metros ipuku-a, mba'eta mba'emo nhaa'ãaty ipukuve'i. Ha'e gui ma ha'e va'e py oa'ã oiny ikora. Ha'e rã ikora po guaxua ma peteĩ vyvra, ha'e rã yvatea voi peteĩ vyvra avi.

⁶ Ha'e gui ma okẽ kuaray oua katy oĩ va'e py ju ovaẽ vy ojeupi ovy pyrõra oĩ va'e rupi. Ha'e vvy okẽ oĩ va'e oa'ã rã peteĩ vyvra ipya, ha'e amboae voi ha'e rami ae avi peteĩ vyvra ipya va'e.

⁷ Ha'e gui opy ja'o'i ikuai va'e ma peteĩ vyvra ipuku-a ha'e peteĩ vyvra ipya joo rami meme. Ha'e rã opy ja'o'i mboae gui ma mboapy metros. Ha'e rã okẽ oguy puku regua pya ma peteĩ vyvra.

⁸ Ha'e gui oguy puku okẽ opy katy oĩ va'e regua oa'ã avi rã peteĩ vyvra ipya.

⁹ Okẽ rexei opy ja'o'i oĩ va'e oa'ã avi rã irundy metros ipya, ha'e rã ijyta po guaxua ma peteĩ metro meme. Oguy puku ma opy guive okẽ peve oo.

¹⁰ Ha'e gui okẽ kuaray oikoa katy oĩ va'e jova-jovai rupi ikuai mboapy opy ja'o'i joo rami meme tuvixa va'e. Ijyta jovaive rupi ikuai va'e voi joo rami meme tuvixa va'e.

¹¹ Ha'e gui oa'ãve ju okẽ oikeaty. Ha'e va'e pya ma cinco metros, ha'e rã ipuku-a seis metros raxa'i.

¹² Ha'e gui opy ja'o'i ikuai va'e renonde rupi ma meio metro va'e meme. Peteĩ-teĩ opy ja'o'i ma mboapy metros ipya ha'e ipuku-a.

¹³ Ha'e gui opy ja'o'i rokẽ ikuai va'e ma joexei'i meme. Oa'ã rã peteĩ opy ja'o'i rokẽ guive amboae oĩa peve ma doze metros raxa'i ipya.

¹⁴ Oo yta ikuai peve oa'ã rã trinta metros. Opy ja'o mbyte pygua ma oo yta okẽ vyvry hi'ãi va'e peve ovaẽ ovy.

* 39:20 Apocalipse 19,17-21 * 40:2 Apocalipse 21.10 * 40:3 Apocalipse 11.1

¹⁵ Okê oka katygua guive opy oguy puku oĩ va'e peve ma vinte e cinco metros oĩ.

¹⁶ Ikuai avi janela vyvra po'i'i reve oo mbotya re yvate rupi, opy ja'o'i ikuai va'e ha'e opy ja'o okê rexei oĩ va'e mbotya jerea rupi. Ha'e va'e re ma pindo ra'angaa hiny.

¹⁷ Ha'e gui ma oka oĩ va'e py ju xereraa. Ha'e va'e yvýry oĩ opy ja'o'i, ha'e oka ha'e javi rupi ita itui pyrôarã. Ha'e va'e rexei rupi ikuai avi trinta opy ja'o'i.

¹⁸ Ha'e va'e pyrôa ma okê ikuai va'e rupi peve itui, pyrôa yvyive'i va'e itui.

¹⁹ Ha'e gui ipya ju oa'ã okê yvyive va'e guive opy ja'o mbyte pygua peve, kuaray oua katy ha'e ijapu'a'ia katy rupi ma cingüenta metros meme.

²⁰ Ha'e gui okê kuaray ijapu'a'ia katy oĩ va'e, oka katy oĩ va'e ma oa'ã avi ipuku-a ha'e ipya.

²¹ Jovaive re mboapy opy ja'o'i ikuai va'e ma jypygua rami tuvixa va'e, ijyta voi. Ha'e okê rexei opy ja'o oĩ va'e ma jypygua rami avi tuvixa va'e. Ipuku-a ma vinte e cinco metros, ha'e rã ipya ma doze raxa'i.

²² Ha'e gui janela ikuai va'e, oguy puku ha'e pindo ra'angaa ojapo pyre ma kuaray oua katy okê oĩ va'e regua rami tuvixa va'e. Okê rexei ma sete pyrôa oĩ, opy ja'o voi.

²³ Ha'e gui opy ja'o mbyte pygua rokê ma okê kuaray ijapu'a'ia katy ha'e kuaray oua katygua rexei'i oĩ. Mokoĩve okê mbyte rupi oa'ã rã cingüenta metros.

²⁴ Ha'e gui kuaray puku-a katy ju xereraa. Ha'e py ma aexa peteĩ okê kuaray puku-a katy oĩ va'e. Ha'e va'e yta ha'e oguy puku oa'ã rã ha'ekue rami ae tuvixa.

²⁵ Opy ja'o ikuai va'e jerea rupi ikuai avi janela, janela aexa ypy va'ekue ramigua. Opy ja'o puku-a ma vinte e cinco metros, ha'e rã ipya ma doze raxa'i.

²⁶ Okê rexei oĩ sete pyrôa, ha'e henonde ma oguy puku oĩ. Ijyta jovaive re hi'ái va'e re hiny pindo ra'angaa.

²⁷ Ha'e gui kuaray puku-a katy oĩ avi peteĩ okê opy ja'o mbyte pygua re. Ha'e ramo kuaray puku-a katy rupi oa'ã rã cingüenta metros peteĩ okê guive amboae peve.

²⁸ Ha'e gui ma okê kuaray puku-a katy oĩ va'e rupi xereraa ju opy ja'o mbyte pygua py. Okê kuaray puku-a katy oĩ va'e oa'ã rã ha'ekue rami ae tuvixa va'e.

²⁹ Ha'e gui opy ja'o'i, ijyta ha'e oguy puku ikuai va'e ma jypygua reve joo rami meme tuvixa avi. Oka jerea rupi ikuai avi janela. Oka puku-a ma vinte e cinco metros, ha'e rã ipya ma doze raxa'i.

³⁰ Ijyvýry rupi oĩ oguy puku. Ipuku-a ma doze metros raxa'i, ha'e rã ipya ma mokoĩ raxa'i.

³¹ Oguy puku oĩ va'e ma opy ja'o mbyte pygua katy oo, oka katy. Ijyta re hiny pindo ra'angaa, ha'e rã pyrôa oito oĩ va'e.

³² Ha'e gui ma kuaray oua katy ju xereraa opy ja'o mbyte pygua py. Ha'e py ma okê oa'ã rã ha'ekue rami ae tuvixa va'e.

³³ Opy ja'o'i, ijyta ha'e oguy puku ikuai va'e voi ha'ekue rami ae ju tuvixa. Oka jerea rupi ikuai avi janela. Oguy puku-a ma vinte e cinco metros, ha'e rã ipya ma doze raxa'i.

³⁴ Oguy puku ma opy ja'o mbyte pygua katy oo, oka katy ae. Ijyta jovaive re hiny pindo ra'angaa. Okê rexei pyrôa oito oĩ va'e.

³⁵ Ha'e gui ma okê kuaray ijapu'a'ia katy oĩ va'e katy ju xereraa vy oa'ã avi ha'e py. Ha'e rã ha'ekue rami ae tuvixa.

³⁶ Opy ja'o'i, ijyta ha'e oguy puku, ha'e gui ojerea rupi janela ikuai va'e oa'ã avi rã oguy puku-a ma vinte e cinco metros, ha'e rã ipya ma doze raxa'i.

³⁷ Ijyta ikuai va'e ma opy ja'o mbyte pygua katy opyta. Ijyta jovaive re hiny pindo ra'angaa. Okê rexei pyrôa oito oĩ va'e.

³⁸ Ha'e va'e regua opy ja'o'i ha'e oikeaty ma oka py ijyta ikuai va'e rexei'i opyta, mymba oapy reve ome'ẽ mbyrã ojoiaty oia py ae.

³⁹ Okê rexei oguy puku oĩ va'e jovaive re ma mokoĩ mesa oĩ. Ha'e va'e áry ma ojukaa 'rã mymba kuery, oapy vy ome'ẽ mbyrã, ha'e gui jevavya regua ha'e mba'emo omboekovia aguã regua ome'ẽ mbyrã.

⁴⁰ Ha'e gui kuaray ijapu'a'ia katy okê oĩ va'e rexei ma mokoĩ mesa oĩ, oikeaty rexei pyrôa oĩ va'e yvýry. Okê rexei oka oĩ va'e rovai re ma mokoĩ ju mesa oĩ.

⁴¹ Ha'e rami vy jovaive re ma irundy mesa ikuai. Okê rexei ma ha'e javi vy oito mesa ikuai mymba kuery ojuka vy onhono aty.

⁴² Irundy mesa mymba kuery oapy reve ome'ẽ mbyrã ojukaaty ma itape gui ojapo pyre. Ipuku-a ha'e ipya ma meio metro raxa'i, ha'e rã yvatea ma meio metro ete'i. Ha'e va'e áry omoĩa 'rã kyxe mymba oapy reve ome'ẽ mbyrã ojuka aguã.

⁴³ Oo mbotya jerea rupi ikuai ty'ái peteĩ po ipuku va'e. Ha'e rã mesa áry ma omoĩa 'rã xo'o ome'ẽ mbyrã.

⁴⁴ Ha'e gui okê opyve katy oĩ va'e rovai mokoĩ opy ja'o'i opyta oporai va'e ikuai atyrã, opy ja'o mbyte pygua py. Peteĩ ma kuaray ijapu'a'ia katy okê oĩ va'e rexei, ha'e rã amboe ma okê kuaray puku-a katy oĩ va'e rexei.

⁴⁵ Ha'e gui ava va'e aipoe'i hevry:

— Kova'e opy ja'o'i kuaray puku-a katy ojepe'a va'e ma templo rarôa sacerdote kuery pegua.

⁴⁶ Ha'e rã opy ja'o'i kuaray ijapu'a'ia katy ojepe'a va'e ma altar rarôa sacerdote kuery pegua. Ha'e va'e kuery ma Zadoque ramymino ikuai, Levi ramymino kuery regua SENHOR renonde rupi omba'eapo va'erã — he'i.

⁴⁷ Ha'e gui opy ja'o mbyte pygua oa'ã rã ipuku-a ha'e ipya ma cingüenta metros meme. Ha'e rã altar ma templo rexei oĩ.

⁴⁸ Ha'e gui ma templo rupi oguy puku oĩ va'e py ju xereraa vy oa'ã ijyta ikuai va'e. Jovaive re ma mokoĩ metros raxa'i. Ha'e rã okê pya ma mokoĩ metros rai'i jovaive re.

49 Ha'e rā oguy puku-a ma dez metros, ha'e rā ipya ma mboapy meme. Pyrōa oī va'e rupi jaike. Okē yta ikuai va'e yvŷry ma oo yta ikuai jovaive re.

41

1 Ha'e gui ma templo ropy ju xereraa vy oa'ā okē yta, mboapy metros ipya va'e meme, ombojerovia aty pya rami ae.

2 Oikeaty pya ma cinco metros, ha'e rā ijyke jovaive pya ma mokoī metros raxa'i meme. Oikea rupi oa'ā avi rā vinte metros, ha'e rā ipya ma dez.

3 Ha'e gui oike ma vy templo rokē yta ju oa'ā rā peteī metro ipo guaxua. Oikea yvatea ma mboapy metros, ha'e rā ipya ma mboapy raxa'i.

4 Ipuku-a oa'ā avi rā dez metros, ha'e gui ipya ma dez avi templo renonde rupi. Ha'e vy aipoe'i xevy:
— Kova'e ma henda iky'a e'ŷy ete va'e — he'i.

5 Ha'e gui ma templo mbotya po guaxua oa'ā rā mboapy metros. Ha'e gui ijyke rupi opy ja'o'i ikuai va'e ma mokoī metros meme, templo jerea ha'e javi rupi.

6 Ijerea rupi opy ja'o'i ikuai va'e ma mboapy henda rupi yvate ikuai. Peteī-teī pyrōa re ma trinta ikuai. Templo mbotya jerea rupi oī opy ja'o'i pyrōa yta renderā, templo mbotya rupi omoīa e'ŷy aguā.

7 Ha'e gui opy ja'o'i yvateve ikuai va'e ma ipyve 'rā ovy yvŷryve rupigua gui, templo mbotya jerea rupi ipo'i'ive ovyra rami. Ha'e rami py templo ropy ja'o'i ikuai va'e ma yvatevea rupi ipyve va'e 'rā. Ha'e gui opy rupi oī peteī tape pyrō-pyrōa'i vvy guive yvatevea katy peve nhaē aguā.

8 Ha'e gui templo yvŷry rupi aexa pyrōa yvateve va'e. Ha'e va'e ma opy ja'o'i ikuai va'e yta renderā opyta. Yvatea ma peteī vyvra pukukue mboapy metros va'e.

9 Ha'e rā opy ja'o'i ijerea rupi ikuai va'e mbotya oka katygua po guaxua ma mokoī metros raxa'i. Ha'e gui templo ropy ja'o'i ikuai va'e guive

10 opy ja'o'i mboae ikuai peve ma dez metros va'e ipya templo jerea ha'e javi rupi.

11 Ha'e gui opy ja'o'i oikea ma oka katy opyta mokoī, kuaray ijapu'a'ia katy ha'e ipuku-a katy. Opy ma mokoī metros raxa'i ijerea rupi.

12 Ha'e gui oī avi peteī oo ha'e ae'ia py, kuaray oikea katy. Ha'e va'e ma trinta e cinco metros ipya va'e. Oo mbotya po guaxua ma mokoī metros raxa'i ijerea rupi, ha'e rā ipuku-a ma quarenta e cinco metros.

13 Ha'e gui ma oa'ā templo. Ipuku-a ma cinquenta metros, oka ha'e oo mbotya reve joo rami ipuku cinquenta metros meme.

14 Ha'e gui kuaray puku-a katy rupi templo mbotya ma cinquenta metros avi, oka puku-a rami avi, ijapy ikuai va'e mbyte.

15 Ha'e gui templo rovai oo ha'e ae'ia py oī va'e oa'ā rā cinquenta metros avi ipuku, jovaive re oguy ikuai va'e reve.

Templo ropy rupi ete ma ojao'ipaa, henda iky'a e'ŷy ete va'e ha'e opy ja'o mbyte pygua jerea ha'e javi rupi voi.

16 Ha'e va'e mboapyve henda yvŷry rupi ma janela ikuai, vyvra po'i'i reve. Opy ha'e javi rupi ma oo mbotya ojao'ia vyvrape py, pyrōa guive janela ikuai peve. Ikuai avi janela mbotyarā.

17 Okē āry rupi ha'e templo jerea rupi ikuai mba'emo ra'angaa ojapo pyre, oo mbotya ha'e javi rupi, opy katy ha'e oka katy voi,

18 anjo ipepo va'e ha'e pindo ra'angaa hiny. Pindo ra'angaa nhavō ma mokoī anjo ra'angaa mbyte oī. Ha'e rā anjo ma mokoī hova va'e meme.

19 Peteī hova ava rova ramigua ma oma'ē 'rā pindo ra'angaa oyke katy, ha'e 'rā amboae guary ra'y rova ramigua ma pindo mboae katy 'rā oma'ē. Ha'e rami tema ojapoa oo mbotya ha'e javi rupi.

20 Pyrōa guive okē āry peve ojapoa anjo ha'e pindo ra'angaa, templo mbotya ha'e javi rupi.

21 Templo rokē ma ijapy irundy va'e. Henda iky'a e'ŷy ete va'e rokē ma ha'e rami ae avi ojapoa.

22 Ha'e rā altar ma vyvrape gui ojapo pyre. Yvatea ma mokoī metros rai'i, ha'e rā ipuku-a ma peteī'i. Ijapy, henda ha'e imbotya ma vyvra guigua meme. Ha'e vy ava va'e aipoe'i xevy:

— Kova'e mesa ma SENHOR renonde 'rā oī — he'i.

23 Ha'e gui templo ha'e henda iky'a e'ŷy ete va'e rokē re ma mokoī ojepe'aa oī.

24 Peteī-teī okērā ma mokoī vyvrape guigua ojapoa. Mokoive vyvrape ma ojerea oī va'e meme.

25 Templo rokē re ma ojapoa avi anjo ipepo va'e ha'e pindo ra'angaa, oo mbotya rupi ojapogue rami avi. Oī avi okē ao'iarā vyvra guigua, oguy puku oka katy oī va'e re.

26 Ha'e gui oguy puku jovaive rupi, templo ropy ja'o'i ikuai va'e rupi ha'e okē ao'ia rupi ikuai janela, vyvra ipo'i'i va'e ha'e pindo ra'angaa py ombojega pyre.

42

1 Ha'e va'e rire ma kuaray ijapu'a'ia katy oka oī va'e py ju ava va'e xereraa, opy ja'o'i kuaray ijapu'a'ia katy ikuai peve. Ha'e va'e opy ja'o'i ma oo ha'e ae'ia py oī va'e rexei, kuaray ijapu'a'ia katy oo ojepe'a va'e rexei.

2 Ha'e va'e oo kuaray ijapu'a'ia katy ojepe'a va'e ma cinquenta metros ipuku va'e, ha'e rā ipya ma vinte e cinco.

3 Ha'e py ma opy ja'o'i ikuai mboapy henda rupi yvatea py, oka dez metros va'e renonde rupi, ha'e opy ja'o mbyte pygua pyrōa rexei.

⁴ Ha'e gui opy ja'o'i ikuai rupi oĩ peteĩ oguy puku cinco metros ipya va'e opy rexei'i, ha'e cinqüenta metros ipuku, opy katy rupi oo va'e. Opy ja'o'i rokê ikuai va'e ma kuaray ijapu'a'ia katy meme ojepe'a.

⁵ Opy ja'o'i yvatevea py ikuai va'e ma ipo'ive'i va'e, mba'eta oguy puku oĩ va'e ma opy katy oove iguyvea rupi ha'e mbyte rupi oĩ va'e gui.

⁶ Mba'eta ha'e va'e opy ja'o'i ma mboapy henda rupi yvate. Ijytarã ma noĩ, opy ja'o mbyte pygua rami e'ỹ. Ha'e nunga rupi ae yvatevea py oĩ va'e ma mbyte ha'e iguyvea rupi oĩ va'e gui ipo'ive'i.

⁷ Ha'e gui opy ja'o'i ikuai va'e rexei'i oĩ oka kora. Ha'e va'e ma oka yvýry rupi oĩ, opy ja'o'i rexei'i, vinte e cinco metros ipuku va'e.

⁸ Mba'eta opy ja'o'i oka katy ikuai va'e puku-a ma vinte e cinco metros ae. Ha'e rã templo renonde rupi oka oĩ va'e ma cinqüenta metros va'e.

⁹ Ha'e va'e opy ja'o'i ma iguyvea rupi 'rã oikea oĩ, oka katy gui 'rã oike kuaray oua katy gui.

¹⁰ Ha'e gui kuaray oua katy oka oĩ va'e kora rupi ikuai avi opy ja'o'i, oo ha'e ae'ia py oĩ va'e rexei'i.

¹¹ Oĩ avi peteĩ oguy puku. Opy ja'o'i kuaray ijapu'a'ia katy ikuai va'e rami ae avi ojapoa, ipuku-a ha'e ipya ma joo rami ae, oëaty voi joo rami ae, opa mba'e py joo rami ae. Oikeaty voi

¹² opy ja'o'i kuaray puku-a katy hokê ikuai va'e rami ae avi, mba'eta oguy puku kuaray oua katy oĩ va'e apy rupi gui 'rã oikea ha'e va'e opy ja'o'i py.

¹³ Ha'e gui ma ava va'e aipoe'i xeivy:

— Kuaray ijapu'a'ia katy ha'e ipuku-a katy oka ha'e ae'ia py oĩ va'e rexei opy ja'o'i ikuai va'e ma iky'a e'ỹ va'e meme, mba'eta ha'e va'e rupi sacerdotte kuery SENHOR renonde omba'eapo va'e okaru 'rã okuapy, mba'emo iky'a e'ỹ va'e omoĩ porã aguã. Ha'e va'e ma mba'emoaju guigua ome'ẽ mbyre, jejavya regua ha'e mba'emo omboekovia aguã regua ome'ẽ mbyre. Ha'e nunga rupi ha'e va'e henda ma iky'a e'ỹ va'e.

¹⁴ Ha'e va'e py sacerdotte kuery oike vy ma oo iky'a e'ỹ va'e gui noĩ 'rã oka katy oao omba'eapoa py onhemondea oejapa e'ỹ re, iky'a e'ỹ va'e ramo. Amboae regua ao py onhemonde ma vy 'rã oẽ heta va'e kuery ikuai katy — he'i.

¹⁵ Ha'e gui ava va'e templo oa'amba ma rire kuaray oua katy okê oĩ va'e rupi ju xerenoẽ. Ha'e vy oka ju oa'ã ijyvýry rupi.

¹⁶ Kuaray oua katy rupi yvyra py oa'ã rã quinhentos yvyra pukukue.

¹⁷ Kuaray ijapu'a'ia katy rupi ju oa'ã rã quinhentos yvyra pukukue.

¹⁸ Kuaray ipuku-a katy rupi oa'ã rã quinhentos yvyra pukukue.

¹⁹ Ha'e gui kuaray oikea katy ju ojevy vy oa'ã rã quinhentos yvyra pukukue avi.

²⁰ Ha'e rami py irundy henda katy rupi oa'amba. Oka yvýry rupi kora oĩ va'e ma quinhentos yvyra ipuku ha'e ipya, omboja'õ aguã mba'emo iky'a e'ỹ va'erã omboaxa pyre, ha'e omboaxa pyre'ỹ.

43

Templo ropy rupi SENHOR rexakãa omonyẽmbaague

¹ Ha'e gui ma okê kuaray oua katy oĩ va'e py ju ava va'e xereraa.

² Ha'e ramo ama'ẽ rã kuaray oua katy gui tape oo va'e rupi oo jekuua Israel kuery ruete rexakãa. Ijayvua ma heta vy revovo rami, ha'e rã hexakãa ma yvy rupi omoexakãmba.

³ Aexa va'e ma jypy rã Jerusalém tetã ombovaipa aguã ou jave aexa va'ekue ramigua, ha'e Quebar yakã yvýry aexa va'ekue rami avi. Ha'e rami vy ajero'a, yvy re xerova amovaẽ peve.

⁴ Ha'e gui ma SENHOR rexakãa ma templo py oike kuaray oua katy okê oĩ va'e rupi.

⁵ Ha'e gui Nhe'ẽ xereupi heravy opy ja'o mbyte pygua oĩ va'e katy. Ha'e ramo aexa rã SENHOR rexakãa templo ropy rupi omonyẽmba.

⁶ Ha'e ramo peteĩ ayvu aendu templo mbyte gui onhendu va'e. Ha'e ramo ava va'e opu'ã ho'amy xeivyry, ha'e SENHOR aipoe'i xeivy:

⁷ — Ava ra'y, kova'e henda ma xerenda apenaaty oĩa, apyrõ ainyaty guive, Israel kuery mbyte rupi aiko riae aguã. Ha'e gui ma Israel kuery nomongy'avei 'rã xerery iky'a e'ỹ va'e, neĩ huvixa kuery voi, mba'eta itavy reia rupi neĩ ombojeroviaaty py nguvixa kuery re'õgue ojatya rupi ve'ỹ 'rã ikuai.

⁸ Mba'eta ha'e kuery ngoorã ojapo vy ngokê omboje'a va'ekue xevygua oo rokê re rive, ijyta voi omboje'a va'ekue xero yta re, ha'e kuery ha'e xee aĩa mbyte peteĩ oo mbotya rive oĩ aguã. Ha'e rami ojeguarupy anho ojapo okuapy vy xerery omongy'apa rei va'ekue. Ha'e nunga rupi xee amomba va'ekue xepoxya rupi.

⁹ Ha'e gui aỹ ma ha'e kuery tomombopa xea gui mombyry itavy reiaque ha'e nguvixa kuery re'õgue mboetea rupi ikuaiague. Ha'e rami rã ha'e kuery mbyte rupi aiko riae 'rã.

Altar mba'emo oapy reve ome'ẽ atyrã re ijayvuague

¹⁰ — Ha'e gui ndee ava ra'y, Israel kuery pe exa uka ke kova'e templo, gueko vaia gui oxĩmba aguã. Ha'e kuery ju templo ra'angaa aexa uka va'ekue oa'ã vy toikuua pota porã.

¹¹ Ha'e gui xapy'a rei ha'e kuery gueko vaia ha'e javi gui oxĩmba ri ramo ha'e kuery pe eikuua ukapa kova'e oo mba'exa pa oĩa, mamõ pa mba'emo ikuai, oëaty ha'e oikeaty ikuai va'e, mba'emo ikuai va'e ha'e javi, ha'e gui hexegua ayvu, aipota va'e ha'e lei oĩ va'e ha'e javi. Embopara ke ha'e nunga ha'e javi ha'e kuery oexaa py, ayvu oĩ va'e ha'e lei aexa va'ekue re oikuua pota vy ojapopa ete aguã.

¹² Po rami ma templo regua lei. Yvyty templo oĩa áry ha'e ijyvýry rupi ma iky'a e'ỹ ete va'e meme 'rã. Ha'e rami ma lei templo regua.

¹³ — Po rami ma altar oa'āague, mba'emo pea'āaty raxa'i py. Ijyvýry rupi guarã pejo'o 'rã meio metro ipy puku-a, ha'e ipya ma meio metro va'e avi 'rã. Ha'e rã hembe ha'e javi rupi ma petei po 'rã yvatea. Ha'e va'e opyta 'rã altar yvýry rupi.

¹⁴ Ha'e gui yvy guive iguy rupi ita ombojo'aa peve ma petei metro. Ha'e rã ipya ma meio metro. Ita kyrigüeve'i ombojo'aa gui tuvixakueve ombojo'aa peve ma mokoí metros. Ha'e rã ipya ma meio metro.

¹⁵ Tata rendarã oi va'e ma mokoí metros yvatea va'erã. Ha'e gui tata renda áry ma omoí avi 'rã irundy hakua va'e.

¹⁶ Tata renda puku-a ha'e ipya ma seis metros meme, jovaive rupi ijapy irundy va'erã.

¹⁷ Ita ombojo'aa puku-a ha'e ipya ma sete metros meme 'rã, ijapy irundyve oía rupi. Ijyvýry rupi hemberã oi va'e ma petei po pukukue. Altar yvýry rupi ojo'oague ma meio metro ete'i 'rã. Ha'e gui kuaray oua katy 'rã oi pyrõa yvate katy oo va'e.

Altar Nhanderuede pe omboaxaa aguã re ijayvuague

¹⁸ Ha'e gui SENHOR aipoe'i xevy:

— Ava ra'y, po rami SENHOR Penderuede ijayvu: Po rami pejapo va'erã altar pemboaxaa ára, hi'áry mba'emo peapy reve peme'ẽ, ha'e hi'áry rupi tuguy pemboayvi aguã.

¹⁹ Sacerdote kuery levita regua Zadoque ramymino ikuai va'e ma xea katy onhemboja 'rã xevy pe mba'emo ojapo aguã. Ha'e kuery pe reme'ẽ 'rã petei vaka ra'y ha'e kuery ojevavyague regua ome'ẽ va'erã — he'i SENHOR Nhanderuede.

²⁰ — Ha'e gui ma huguy reru vy altar áry 'rã remoi irundy hakua ikuai va'e re, ita ombojo'aa irundyve apy re, ha'e gui hembe ojerea ha'e javi rupi voi. Ha'e rami 'rã reiky'a'o altar pejevavyague rejao'i uka vy.

²¹ Ha'e gui jejavaya regua vaka ra'y ome'ẽ mbyre ma oo iky'a e'ỹ va'e gui mombry'i 'rã reraa petei henda oo oi va'e py oapya aguã.

²² Ha'e gui mokoí araa py ma reme'ẽ 'rã petei kavara ava ivaikue rei e'ỹ va'e jejavaya regua. Ha'e gui altar peiky'a'o ju 'rã vaka ra'y py peiky'a'oague rami ae.

²³ Reiky'a'opa ma vy reme'ẽ 'rã petei vaka ra'y ha'e petei vexa'i ivaikue rei e'ỹ va'e meme.

²⁴ SENHOR renonde py ae 'rã reme'ẽ. Hi'áry ma sacerdote kuery juky omoí vy ome'ẽ 'rã SENHOR pe oapy reve.

²⁵ Ha'e gui sete ára re ma ko'ẽ nhavõ reru 'rã petei kavara ava pejevavya regua peme'ẽ va'erã. Peru avi 'rã petei vaka ra'y ha'e petei vexa'i ivaikue rei e'ỹ va'e.

²⁶ Sete ára re 'rã peiky'a'o altar pejevavya pejao'i uka vy. Ha'e rami py pemboaxa 'rã xevy guarã.

²⁷ Ha'e va'e ára ha'e nunga sacerdote kuery ojapopa ma vy oito araa guive altar áry mba'emo ome'ẽ 'rã oapy reve, ha'e gui Nhanderuede reve petei rami ju ikuaia regua guive. Ha'e ramo xee roguerovy'a 'rã — he'i SENHOR Nhanderuede.

44

Oo iky'a e'ỹ va'e rupi omba'eapo va'erã kuery omoí jevyague

¹ Ha'e gui ma oo iky'a e'ỹ va'e rokẽ py ju ava va'e xereraa kuaray oua katy, oka katy ojepe'a va'e py. Ha'e rami teĩ ha'e va'e okẽ onhemboty ra'e.

² Ha'e gui SENHOR aipoe'i xevy:

— Kova'e okẽ ma onhemboty ae 'rã oiny, ndojepe'aai 'rãe. Avave rei ndoikeai 'rã ha'e rupi, ha'e rupi SENHOR Israel kuery ruete oike rire. Ha'e rami rire onhemboty ae 'rã oiny.

³ Ha'e rã huvixave ma ha'e py oguapy 'rã SENHOR renonde okaru aguã, huvixave ae vy. Okẽ regua oguy puku rupi 'rã oike ha'e oẽ ju 'rã ovy — he'i.

⁴ Ha'e gui ma kuaray ijapu'a'ia katy oo rokẽ oi va'e py ju ava va'e xereraa. Ha'e py ma ama'ẽ rã SENHOR rexakãa omonyẽmba ra'e ixupegua opy rupi. Ha'e ramo ajero'a yvy re xerova amovaẽ peve.

⁵ Ha'e ramo SENHOR aipoe'i xevy:

— Ava ra'y, eikuaa pota porã ke. Exa nderexa py, ha'e endu ndeapypa py SENHOR pegua oo re xeayvu ramo, ha'e va'e regua lei ha'e javi re guive. Eikuaa pota porã ke mava'e pa templo py oike aguã ha'evea re, ha'e oo iky'a e'ỹ va'e py oike aguã nda'eveia re guive.

⁶ Ha'e gui ma aipo're Israel kuery naxenhe'ẽ rendui va'e pe: Po rami ijayvu SENHOR Nhanderuede: Israel kuery, ha'eve ma pendekuai ojeguarupy pejapoa rupi!

⁷ Mba'eta xevyguá oo iky'a e'ỹ va'e py peroike va'ekue amboae regua kuery, ngo'o py ha'e opy'a py opire omboi uka e'ỹ va'ekue. Ha'e rami vy pemongy'apa rei xevyguá oo, xevy pe mbojape, mba'emo kyrakue ha'e tuguy peme'ẽ teĩ. Opa marãgua ojeguarupy pejapo vy xereve guarã ajapo va'ekue rupi e'ỹ pendekuai va'ekue.

⁸ Pendevy mba'emo iky'a e'ỹ va'e xevy omboaxa pyre regua ayvu aeja teĩ ha'e va'e rupi e'ỹ pendekuai va'ekue. Ha'e rami 'rãgue py amboae regua rive pemoi xevyguá oo iky'a e'ỹ va'e re opena va'erã.

⁹ — Po rami SENHOR Nhanderuede ijayvu: Amboae regua Israel kuery mbyte rupi ikuai va'e neĩ petei ma voi ndoikevei 'rã xevyguá oo iky'a e'ỹ va'e py, opy'a py ha'e ngo'o py opire omboi uka va'e'ỹ vy.

¹⁰ Ha'e rã levita kuery ma xegui ojepe'apa va'ekue Israel kuery ha'eve'ỹ rami ikuai vy ta'angaa re oje'oiá rupi xegui mombry ojepe'apa va'e reve. Ha'e rire levita kuery re 'rã oi ojevavyague re opaga aguã.

¹¹ Ha'e rami teĩ ha'e kuery ma ha'eve nho 'rã xevyguá oo iky'a e'ỹ va'e rupi omba'eapo aguã. Ha'e rami vy templo rokẽ rarõa rupi 'rã ikuai, opy rupi voi. Ha'e kuery ojuka 'rã guive mymba oapy reve ome'ẽ va'erã heta va'e kuery rekovia. Heta va'e kuery renonde 'rã ikuai mba'emo ojapoa py.

¹² Mba'eta Israel kuery mba'emo ra'angaa ombojerovia va'e reve ha'e kuery voi ombojerovia avi va'ekue, ha'e rami vy nhomonhepyxangarã ikuai va'ekue mba'emo vai ojapoa py. Ha'e nunga rupi xepo aupi reve aura ha'e kuery re oĩ aguã gueko vaiague re opaga aguã — he'i SENHOR Nhanderuete.

¹³ — Ha'e rami vy sacerdote rami e'ỹ ha'e kuery nonhembojavei 'rã xere, neĩ novaẽi 'rã guive peteĩve ma voi mba'emo xevygua iky'a e'ỹ va'e re. Ha'e rami 'rãgue py ojee ae meme 'rã ogueraa ojegarupy anho ojapogue re oxĩmba aguã.

¹⁴ Ha'e rami teĩ xee amoĩ 'rã templo rarõarã, mba'emo apoa re opena aguã guive.

Sacerdote kuery mba'emo ojapo aguã re ijavyvuaque

¹⁵ — Ha'e gui levita regua sacerdote kuery Zadoque ramymino ikuai va'e, xegui Israel kuery ojepe'apa teĩ ha'e kuery ma xevygua oo iky'a e'ỹ va'e regua ojapopa ete va'ekue. Ha'e rami rire ha'e kuery onhemboja 'rã xere, xevy pe omba'eapo aguã. Ha'e kuery ma xerenonde 'rã ikuai mba'emo kyrakue ha'e tuguy ome'ẽ aguã — he'i SENHOR Nhanderuete.

¹⁶ — Ha'e kuery ma xevygua oo iky'a e'ỹ va'e py oike vy onhemboja 'rã xe-mesa re, xevy pe omba'eapo ha'e ajapo uka va'ekue ojapopa aguã.

¹⁷ Ha'e rami avi opy ja'o mbyte pygua rokẽ rupi ha'e kuery oike vy ma ao iporãve va'e py anho 'rã onhemonde. Vexa'i rague guigua ma ojee nomoĩ 'rã templo ropy rupi opy ja'o mbyte pygua py omba'eapo aguã.

¹⁸ Onheakã jokia 'rã ajukue iporãve va'e py, kaxõ iporãve va'e py 'rã onhemonde guive. Nonheovã'i 'rã imboy'aiparã py.

¹⁹ Ha'e gui opy ja'o mbyte pygua gui ha'e kuery oẽ ju vy heta va'e kuery ikuai katy oka katy, ha'e vy omboipa 'rã ao omba'eapo aguã onhemondeague, ha'e vy omoĩ porã ju 'rã opy ja'o'i iky'a e'ỹ va'e py. Ha'e rami vy amboae ao py ju 'rã onhemonde, jypygua ao py heta va'e kuery iky'a e'ỹ va'e rami rive opyta e'ỹ aguã.

²⁰ Nonhopĩ 'rã o'a oakã regua, neĩ ndai'a vukui 'rã guive. Ha'evea rami anho 'rã ojaya o'a.

²¹ Peteĩve sacerdote ndoy'ui 'rã vinho opy ja'o mbyte pygua py oike ta jave.

²² Nomendai 'rã guive imeve'ỹ va'e re, neĩ opoi pyre re. Ha'e rami 'rãgue py gua'yxyrã ogueraa 'rã Israel regua kunhataĩ'i, e'ỹ vy sacerdote ra'yxykue'i.

²³ Ha'e kuery ombo'e 'rã xevygua kuery mba'emo iky'a e'ỹ va'erã omboaxa pyre ha'e omboaxa pyre'ỹ reve joo rami e'ỹa oikuaa aguã rami, ha'eve va'e ha'e ha'eve'ỹ va'e guive.

²⁴ Ha'e gui jojoko-jokoa ramo ha'e kuery oikuaa potaa rupi 'rã ikuai. Xeguigua teko porã rupi anho 'rã oikuaa pota. Ha'e gui ngaru oiko nhavõ py ojapo uka 'rã xeguigua lei ha'e xeayvu aea va'ekue. Ojapo 'rã guive xevygua sãbado ára iky'a e'ỹ va'ea oikuaa pavẽ aguã rami.

²⁵ Nonhembojai 'rã omanogue re onhemongy'a e'ỹ aguã. Nguu e'ỹ vy oxy ae, gua'y, guajy, guyvy, gueindy imeve'ỹ va'e ae rã tema ha'eve onhemongy'a aguã.

²⁶ Ha'e gui ojeky'a'opa ma rire sete ára peve ranhe 'rã oarõ.

²⁷ Ha'e gui mae ma toike ju henda iky'a e'ỹ va'e py omba'eapo aguã, opy ja'o mbyte pygua py ae. Ha'e rami vy ome'ẽ 'rã jejavya regua — he'i SENHOR Nhanderuete.

Ha'e va'e yvy omboja'oa aguã re ijavyvuaque

²⁸ — Sacerdote kuery pe ma oĩ ae 'rã imba'erã, mba'eta xee ae aiko ha'e kuery mba'e. Ha'e nunga rupi ha'e kuery pe napeme'ẽi 'rã ijyvyrã Israel yvy re. Xee ae aiko ha'e kuery pegua.

²⁹ Ha'e kuery ho'u 'rã mba'emo aju guigua ome'ẽ mbyre gui, jejavya regua ha'e mba'emo rekovia regua guive. Israel kuery iky'a e'ỹ va'erã omboaxa va'ekue ma ha'e kuery mba'e meme 'rã.

³⁰ Ha'e rami vy sacerdote kuery mba'erã opyta 'rã mba'emo aju jypygua ha'e mba'emo ome'ẽ mbyre gui iporãgueve ha'e javi. Sacerdote kuery pe peme'ẽ avi 'rã jypygua trigo guigua, penderopy oĩ aguã penemoingo porãarã.

³¹ Ha'e rã mymba omano rive va'ekue ma sacerdote kuery ndo'ui 'rã, neĩ guyra e'ỹ vy mymba omondoropa va'ekue guive.

45

¹ — Ha'e gui yvy ma xortea rami 'rã pemboja'o peteĩ-teĩ mba'erã peikuaa aguã. Ha'e jave py ma SENHOR pe ranhe pemboaxa 'rã peteĩ henda iky'a e'ỹ va'erã. Ha'e va'e puku-a ma doze quilômetros raxa'i 'rã, ha'e rã ipya ma dez 'rã. Ha'e javi rupi oĩ 'rã iky'a e'ỹ va'e.

² Ha'e rã oo iky'a e'ỹ va'e ma ipuku-a ha'e ipya joo rami, duzentos e cinqüenta metros meme. Ijyvyry rupi oĩ 'rã yvy vinte e cinco metros ipya va'e.

³ Ha'e va'e yvy iky'a e'ỹ va'e puku-a ma doze quilômetros raxa'i 'rã, ha'e rã ipya ma cinco 'rã. Ha'e py ae 'rã oĩ oo iky'a e'ỹ va'e. Ha'e va'e henda ma iky'a e'ỹ ete va'e.

⁴ Ha'e gui yvy iky'a e'ỹ va'e ma sacerdote kuery rekoarã itui, mba'eta oo iky'a e'ỹ va'e re opena va'e, ha'e SENHOR re onhemboja 'rã omba'eapo aguã. Ha'e va'e henda ma ha'e kuery pe peme'ẽ 'rã hoo ikuai aguã, oo iky'a e'ỹ va'e oĩ aguã guive.

⁵ Ha'e rã levita kuery oo re opena va'e pe ma peme'ẽ avi 'rã yvy doze quilômetros raxa'i ipuku-a, ha'e cinco ipya va'e, ha'e kuery rekoarã vinte ikuai aguã.

⁶ Ha'e rã tetã yvyry rupi guarã ma peme'ẽ 'rã yvy dois quilômetros raxa'i ipya, ha'e gui doze quilômetros raxa'i ipuku-a va'e. Ha'e rã tetã ma yvy iky'a e'ỹ va'e rexei'i 'rã oĩ, Israel regua ha'e javi ikuai aguã.

⁷ Ha'e rã huvixave vyvrã ma vvy iky'a e'ÿ va'e ha'e tetã vvyry rupigua jovaive re, kuaray oikea katy ha'e oua katy. Ipuku-a ma petei regua vvy oi va'e reve joo rami 'rã, kuaray oikea katy guive oua katy peve.

⁸ Ha'e va'e vvy ma huvixave mba'e 'rã itui Israel vvy re. Ha'e gui xeivygua yvatekueve ma nombojexavaivei 'rã xeivygua kuery. Ha'e rami 'rãgue py omboja'opa 'rã Israel kuery vyvrã, petei-tei regua ikuai rami vy.

Yvatekueve ikuai va'e pe ijavyuague

⁹ Po rami SENHOR Nhanderuete ijavyu:

— Peẽ Israel kuery yvatekueve, ha'eve ma pejoguereko axy. Pejepe'a pejojukaa ha'e penhombojexavaia gui, ha'e vy pejapo ha'evea ramigua ha'e teko porã. Pekoreve eme ma xeivygua kuery — he'i SENHOR Nhanderuete.

¹⁰ — Ha'evea rami anho ke pejeja mba'emo, ajaka ha'e hy'akua ha'evea'i rami meme 'rã guive peiporu.

¹¹ Ha'e gui ajaka renyẽ ma oja guaxu reve joo rami 'rã. Ha'e rã petei õmer ma dez oja guaxu renyẽ, ha'e dez ajaka renyẽ 'rã oi. Õmer py ae 'rã mba'emo pea'ã kuaa.

¹² Ha'e gui petei hatã'i va'e ma doze gramas 'rã ipoyi. Ha'e rã petei hatã'i va'e owareve va'e ma sessenta hatã'i va'e mboae rami 'rã ipoyia.

¹³ — Po rami 'rã ma peru peme'e va'erã: trigo ma dez oja guaxu nhavõ gui mboapy litros 'rã peru, cevada ma ha'e rami ae avi mboapy litros 'rã peru.

¹⁴ Ha'e gui azeite ma mba'emo pirekue renyẽ nhavõ gui moko'i litros 'rã peru, mba'eta mba'emo pirekue ma petei õmer rami avi 'rã dez oja guaxu renyẽ va'e.

¹⁵ Ha'e gui vexa'i kuery ma petei-tei kora duzentos ikuaia nhavõ gui petei peipe'a 'rã Israel re nhuũndy porãvea rupi pemongaru va'ekue anho. Ha'e nunga ha'e javi peme'ẽ 'rã mba'emo aju guigua, oapy revegua, e'ÿ vy Nhanderuete reve petei rami ju pendekuaia reguarã. Ha'e rami vy 'rã pejao'i uka heta va'e kuery ojevavyague — he'i SENHOR Nhanderuete.

¹⁶ — Pendevvy re ikuai va'e ha'e javive 'rã ome'ẽ mba'emo Israel pygua huvixave pe.

¹⁷ Ha'e rã huvixave ma ogueru 'rã mba'emo oapy reve ome'ẽ mbyrã, mba'emo aju guigua ha'e mba'emo rykue, jaxy pyaua ára py ngaru pyguarã, sãbado ára nhavõ, ha'e ngaru Israel kuery peguarã oa'angapy oiko nhavõ. Ogueru avi 'rã jejavya regua, mba'emo aju guigua, mba'emo oapy revegua mymba ha'e Nhanderuete reve petei rami ju pendekuaia reguarã, Israel kuery ojevavyague ojao'i uka aguã.

Ára pyau py mba'emo ome'ẽa aguã re ijavyuague

¹⁸ Po rami SENHOR Nhanderuete ijavyu:

— Jypygua jaxya ha'e jypy'i araa py ma peru 'rã petei vaka ra'y ivaikue rei e'ÿ va'e, ha'e va'e py oo iky'a e'ÿ va'e peiky'a'o aguã.

¹⁹ Huguykue ma sacerdote ogueru vy templo rokẽ yta ikuai va'e rupi 'rã omoĩ, ha'e gui altar irundy henda py ijapy ikuai va'e py, ha'e opy ja'o mbyte pygua rokẽ yta rupi guive.

²⁰ Ha'ekue rami ju 'rã pejapo sete araa py. Potae vy e'ÿ, peikuaa vy e'ÿ pejevavyague re 'rã pejapo. Ha'e rami py 'rã peiky'a'o templo.

Páscoa ára pyguarã re ijavyuague

²¹ — Ha'e gui jypygua jaxya ha'e catorze araa py ma pejapo 'rã ngaru Páscoa. Sete ára re 'rã pejapo. Mbojape imbovua revegua e'ÿ 'rã pe'u.

²² Ha'e va'e árave ma huvixave ogueru 'rã petei vaka ra'y ha'e ae ojevavyague reguarã, vvy re ikuai va'e ha'e javi pe guive.

²³ Ha'e gui sete ára re ngaru oikoa ja ma ogueru 'rã SENHOR pe oapy reve ome'ẽ mbyrã, sete vaka ra'y ha'e sete vexa'i ra'y ivaikue rei e'ÿ va'e, sete ára pyguarã. Ha'e gui ko'ẽ nhavõ ome'ẽa 'rã petei kavara jejavya re.

²⁴ Ogueroko katu avi 'rã mba'emo aju guigua ome'ẽ mbyrã. Vaka ra'y nhavõ reve guarã ogueru 'rã petei ajaka, vexa'i nhavõ guive, ha'e gui petei galão azeite ju ajaka mba'emo aju oi nhavõ.

²⁵ Ha'e gui sete jaxya ha'e quinze araa guive ha'ekue rami ae tema 'rã ojapo sete ára re ngaru oikoa ja. Jejavya regua 'rã ome'ẽ ha'ekue rami ae, mba'emo oapy revegua, mba'emo aju guigua ha'e azeite guive.

46

Sábado ára ha'e jaxy pyau nhavõ ngaru oiko jave pyguarã re ijavyuague

¹ Po rami ijavyu SENHOR Nhanderuete:

— Opy ja'o mbyte pygua rokẽ kuaray ou katy oi va'e ma onhemboty tema 'rã pemba'eapoa ára mboapy meme va'e re. Sábado ára anho 'rã ojepe'a, ha'e gui jaxy pyau jave ngaru oikoa ára py guive.

² Ha'e gui huvixave ma oka katy gui oike 'rã okẽ regua oguy puku rupi. Okẽ vvyry opyta 'rã ho'amy. Ha'e ramia ja sacerdote kuery ma mba'emo ogueroko katu 'rã oapy reve ome'ẽ va'erã huvixave ogueru va'ekue, Nhanderuete reve petei rami ikuai regua guive. Ha'e ramo huvixave ombojerovia 'rã okẽ py hi'aĩ reve, ha'e gui oẽ ju 'rã. Ka'aru e'ÿ ja okẽ nombotyai 'rã.

³ Ha'e va'e okẽ rexei ae avi vvy re ikuai va'e kuery ombojerovia 'rã okuapy SENHOR renonde, sábado ha'e jaxy pyau ngaru oikoa ára py guive.

⁴ Sábado ára ma huvixave oapy reve ome'ẽ 'rã SENHOR pe mboapy meme vexa'i ra'y ha'e petei vexa'i ava ivaikue rei e'ÿ va'e meme.

⁵ Mba'emo aju guigua ma vexa'i ava ome'ẽ nhavõ ome'ẽ avi 'rã petei ajaka. Ha'e rã vexa'i ra'y ikuai va'e reve guarã ma ome'ẽxa'i py 'rã ome'ẽ. Ha'e gui mba'emo aju petei ajaka ome'ẽ nhavõ ome'ẽ avi 'rã mboapy litros azeite.

⁶ Ha'e rā jaxy pyau jave ngaru oikoa ára py ma peteĩ vaka ra'y 'rā ome'ẽ mboapy meme vexa'i ra'y ha'e peteĩ vexa'i ava reve, ivaikue rei e'ỹ va'e meme.

⁷ Vaka ra'y ha'e vexa'i ava ome'ẽ nhavõ ogueru avi 'rā peteĩ ajaka mba'emoaju guigua. Ha'e rā vexa'i ra'y ikuai va'e reve guarã ma ome'ẽxa'i py 'rā ome'ẽ. Ha'e gui mba'emoaju peteĩ ajaka ome'ẽ nhavõ ome'ẽ avi 'rā mboapy litros azeite.

⁸ Ha'e gui huvixave ma okẽ regua oguy puku rupi 'rā oike, ha'e gui ha'ekue rupi ae ju 'rā oẽ.

Mba'emo ome'ẽmby re ijayvuague

⁹ — Ngaru oikoa py MA yvy re ikuai va'e ou 'rā okuapy SENHOR renonde omboete aguã. Ha'e kuery va'e regua kuaray ijapu'a'ia katy okẽ oĩ va'e rupi oike va'ekue ma kuaray puku-a katy ju 'rā oẽ, ha'e rā kuaray puku-a katy gui oike va'ekue ma kuaray ijapu'a'ia katy 'rā oẽ jogueravy. Okẽ oikeague rupi e'ỹ ju 'rā oẽ, hovai re 'rā oẽ.

¹⁰ Ha'e kuery oike jogueravy jave huvixave voi oike 'rā ha'e kuery mbyte rupi. Ha'e gui ma ha'e kuery oẽ jogueravy jave ma ha'e voi oẽ ju 'rā ovy.

¹¹ Nhemboatyiky'a e'ỹ va'e ha'e ngaru oiko va'e py ma vaka ra'y ha'e vexa'i ava ome'ẽ nhavõ mba'emoaju guigua peteĩ ajaka ome'ẽa avi 'rā. Ha'e rā vexa'i ra'y ikuai va'e reve guarã ma ome'ẽxa'i py 'rā ome'ẽ. Ha'e gui mba'emoaju peteĩ ajaka ome'ẽ nhavõ ome'ẽ avi 'rā mboapy litros azeite.

¹² Xapy'a rei huvixave ome'ẽxa'i py 'rā SENHOR pe ogueru mba'emo oapy reve, e'ỹ vy hexeve peteĩ rami ikuai reguarã. Ha'e ramo ixupe oi'pe'aa 'rā okẽ kuaray oua katy oĩ va'e, mba'emo oapy reve ome'ẽ aguã, hexeve peteĩ rami ikuai regua guive, sábado ára py ojapoaty rami ae. Ha'e gui oẽ ma ramo okẽ ombotyaju 'rā.

¹³ — Ko'ẽ nhavõ SENHOR pe peme'ẽ 'rā peteĩ vexa'i ra'y peteĩ ma'etỹ va'e ivaikue rei e'ỹ va'e peapy reve. Ko'ẽ nhavõ tema 'rā peme'ẽ.

¹⁴ Ha'e va'e reve guarã ma ko'ẽ nhavõ pereko katu avi 'rā mba'emoaju guigua SENHOR pe peme'ẽ va'erã. Mboapy litros 'rā pereko katu, azeite peteĩ litro raxa'i reve, trigo reve omoapomoa aguã. Ha'e va'e ayvu ma ko'ẽ nhavõ 'rā pejapo raka'e rā peve guarã.

¹⁵ Ha'e rami ae ko'ẽ nhavõ jepi 'rā pereko katu vexa'i ra'y, mba'emoaju guigua ha'e azeite, oapy reve ome'ẽ mbyrã.

¹⁶ Po rami ijayvu SENHOR Nhanderute:

— Amongue py huvixave peteĩ yvy oguereko va'e ome'ẽ 'rā gua'y kuery pe. Ha'e ramo ta'y kuery mba'e ae 'rā opyta, raka'e rā peve guarã.

¹⁷ Ha'e rā guembigui kuery pe ri yvy ome'ẽ ramo imba'e opyta 'rā ma'etỹ jubileu 'epy va'e oiko peve'i. Ha'e ramo huvixave pe ae ju 'rā opyta, mba'eta ta'y kuery mba'erã ae.

¹⁸ Huvixave ma neĩ ruxã'i ma voi ndogueraai 'rā guembigui kuery pegua oĩ va'e, ndoipe'ai 'rā guive ijyvy gui. Ovyvy gui ae 'rā ome'ẽ gua'y kuery pe, xevygu kuery peteĩ-teĩ ijyvy gui ndoipe'aa aguã — he'i.

¹⁹ Ha'e va'e rire ava xereraa va'e ma oikaty yke katy okẽ oĩ va'e rupi xereraa. Kuaray ijapu'a'ia katy xereraa sacerdote kuery pegua opy ja'o'i iky'a e'ỹ va'e py. Ha'e vy ijapy kuaray oiketa katy oĩ va'e re oexa uka peteĩ henda.

²⁰ Ha'e vy aipoe'i xevy:

— Kova'e henda py ma sacerdote kuery ombojy 'rā mba'emo omboekovia aguã regua ome'ẽ mbyre, jejavya regua ha'e mba'emoaju guigua guive, oka katy amboae henda py heta va'e kuery ikuai py ogueraa e'ỹ aguã, heta va'e kuery iky'a e'ỹ va'e rami rive opyta e'ỹ aguã — he'i.

²¹ Ha'e gui ma oka katy oguy oĩ va'e py ju xereraa, irundy henda py oguy apy ikuai va'e rupi. Ha'e gui ijapy oĩ va'e py oguy mboae aexa avi.

²² Mba'eta oguy apy ikuai va'e re oguy kyrĩve'i va'e ju oĩ, vinte metros ipuku-a ha'e quinze ipya va'e. Ha'e va'e oguy irundyve va'e ma joo rami ae tuvixa.

²³ Ha'e gui oguy ikuai va'e nhavõ rupi oĩ ikora, irundyve rupi. Kora yvy'iry ha'e javi rupi ikuai tata rupa.

²⁴ Ha'e ramo xevy pe aipoe'i:

— Koropi ma templo re opena va'e kuery ombojy 'rā heta va'e kuery mba'emo ome'ẽ va'ekue.

47

Yy mba'emo ky'a'arã oxyry va'e re ijayvuague

¹ Ha'e va'e rire ma teĩgue ju xereraa templo rokẽ py. Ha'e py aexa templo rokẽ guy rupi yy oẽ oiny rã. Kuaray oua katy oxyry. Mba'eta templo ma kuaray oua katy ae ojepe'a oiny. Ha'e gui yy ma iguy oiporu kuaa regua gui oẽ ouvy, altar regua kuaray puku-a katy gui.*

² Ha'e gui kuaray ijapu'a'ia katy okẽ ojepe'a va'e py ju xereraa, ha'e vy oka katy xererojere heravy, kuaray oua katy okẽ oĩ va'e peve. Aexa rã yy oxyry oiny oiporu kuaa regua rupi.

³ Ha'e gui ava va'e ma kuaray oua katy ju oẽ ovy, opo py ixã mba'emo a'ãarã oguereko reve. Ha'e vy quinhentos metros oa'ãa py xemboaxa yy rupi. Ha'e rã yy ovaẽ ouvy xepy nhu'ã peve.

⁴ Ha'e vy quinhentos metros ju oa'ãeva py ma teĩgue ju xemboaxa yy rupi. Ha'e ramo xerenapy'ã peve yy ovaẽ. Ha'e gui quinhentos metros ju oa'ãa py ma yy rupi xemboaxa rã xeku'a peve ovaẽ.

⁵ Ha'e gui quinhentos metros ju oa'ãa py ma yakã ete ma oxyry, aaxa aguã nda'evei va'e, mba'eta yakã ma tyy raxa ja'yta reve jaaxa aguã ha'eve va'e, avave rei oaxaa va'erã nunga e'ỹ.

* 47:1 Apocalipse 22.1-2

⁶ Ha'e gui aipoe'i xevy:

— Ava ra'y, rexa pa ha'e nunga? — he'i vyve yakā rembe peve ju xereraa.

⁷ Ha'e py avaē ju ma vy yakā rembe rupi heta aexa vvyra, jovaive rupi ikuai va'e.

⁸ Ha'e vy aipoe'i xevy:

— Kova'e yy ma kuaray oua katy oē vy oxyry 'rā ovv yvy joja reia rupi, ha'e gui Ye'ē Manoa 'epy va'e py 'rā ovaē. Ha'e ramo yy ha'e py voi iporā rei ju 'rā.

⁹ Kova'e yakā oxyry oinya rupi rei ma temimoingo kuery omyī va'e heta ete ikuai, pira voi. Mamo rā rei yy ovaēa py ma ye'ē rupi tēi yy porā ete 'rā opyta. Yakā oaxaa rupi ma opa marāgua ikuai.

¹⁰ Hembe rupi ma pira mbo'aa kuery ikuai. En-Gedi guive En-Eglaim peve oī 'rā pira mbo'aa omomboaa aguā. Pira peteī-tēi regua ikuai va'e ma ye'ē tuvixa va'e py rami heta ete.

¹¹ Ha'e rā yapo jaxuru reia rupi ma yy na'iporāi 'rā, jukyrā rive opyta.

¹² Yakā rembe jovaive rupi ma vvyra ikuai. Opa marāgua hi'a va'e ikuai, ja'u va'erā meme. Hogue na'ixorī 'rā, ndai'a e'jī 'rā guive. Jaxy nhavō 'rā hi'a, oo iky'a e'jī va'e gui yy oē rire. Hi'a ma ja'u va'erā, ha'e rā hogue ma moā meme.

Israel vvy apy re ijayvuague

¹³ Ha'e gui po rami SENHOR Nhanderue te ijayvu:

— Po rami 'rā vvy pemboja'o Israel kuery regua doze ikuai va'e peguarā. José kuery ma mokoī henda py 'rā ojopy.*

¹⁴ Peteī-tēi regua pe pemboja'o 'rā joo rami guarā. Mba'eta xepo aupi reve aura ae ma karamboae peneramoī kuery pe ame'ē aguā. Ha'e rami rire pendevy pe ju kova'e vvy ome'ēa 'rā.

¹⁵ — Po rami 'rā oī pendevvy apy. Kuaray ijapu'a'ia katy rupi oo 'rā yakā guaxu guive Hetlom tetā via rupi Zedade py nhavāea peve.

¹⁶ Ha'e gui ma Hamate rupi, Berota, Sibraim tetā (ha'e va'e ma Damasco ha'e Hamate mbyte oī va'e), Hazer-Haticom tetā Haurā vvy apy katy'i oī va'e rupi voi oo.

¹⁷ Ha'e rami py ye'ē guive Hazar-Enom peve 'rā oo, Damasco tetā katy'i peve. Ha'e gui kuaray ijapu'a'ia katyve opyta 'rā Hamate vvy. Ha'e rami 'rā opyta vvy apy kuaray ijapu'a'ia katy rupi oo va'e.

¹⁸ Ha'e gui kuaray oua katy rupi ma Haurā ha'e Damasco guive oo 'rā Gileade ha'e Israel vvy mbyte rupi, Jordāo yakā rupi ae. Ha'e gui kuaray ijapu'a'ia katy oī va'e guive ye'ē kuaray oua katygua peve 'rā pea'ā.

¹⁹ Kuaray puku-a katy rupi ma Tamar guive 'rā oo Meribá-Cades regua yy peve, ha'e yakā Egito katy'i oī va'e guive ye'ē tuvixa va'e peve. Ha'e rami 'rā vvy apy kuaray puku-a katygua oī.

²⁰ Ha'e rā vvy apy kuaray oikea katygua ma ye'ē tuvixa va'e guive Hamate tetā py nhavāea peve. Ha'e rami 'rā kuaray oikea katygua oī.

²¹ — Ha'e rami py pemboja'opa 'rā vvy peē kuery peguarā, Israel regua ikuai va'e peteī-tēi pe.

²² Xortea pexaa rupi 'rā peme'ē peē kuery pe ae ha'e amboae regua penembyte ikuai va'e ta'y va'e kuery pe. Pendevy rā ha'e kuery Israel kuery mbyte ikuai 'rā ha'e pygua ae rami avi. Peē kuery reve avi ojopy 'rā ovyvyrā Israel regua ikuai va'e mbyte rupi.

²³ Amboae regua kuery mamo rā ikuai py ae 'rā peme'ē ijyvyrā — he'i SENHOR Nhanderue te.

48

Sete regua ha'e sacerdote kuery vvyrā re ijayvuague

¹ — Po rami ma Israel regua rery oī. Dā regua vvy apy ma kuaray ijapu'a'ia katy guive oo 'rā Hetlom rupi Hamate vvy re nhavaēa ha'e Hazar-Enom peve, ha'e gui Damasco vvy apy kuaray ijapu'a'ia katygua rupi Hamate peve, kuaray oua katy guive oikea katy peve.

² Ha'e gui Dā vvy re ma Aser vvy ju 'rā oje'a, kuaray oua katy guive oikea katy peve.

³ Ha'e gui Aser vvy re ma Naftali vvy ju 'rā oje'a, kuaray oua katy guive oikea katy peve.

⁴ Ha'e gui Naftali vvy re ma Manassés vvy ju 'rā oje'a, kuaray oua katy guive oikea katy peve.

⁵ Ha'e gui Manassés vvy re ma Efraim vvy ju 'rā oje'a, kuaray oua katy guive oikea katy peve.

⁶ Ha'e gui Efraim vvy re ma Rúben vvy ju 'rā oje'a, kuaray oua katy guive oikea katy peve.

⁷ Ha'e gui Rúben vvy re ma Judá vvy ju 'rā oje'a, kuaray oua katy guive oikea katy peve.

⁸ Ha'e gui Judá vvy re ma oje'a 'rā vvy iky'a e'jī va'e pemboja'o va'erā, kuaray oua katy guive oikea katy peve. Israel regua vvy rami avi 'rā doze quilômetros raxa'i ipya ha'e ipuku-a, kuaray oua katy guive oikea katy peve. Mbyte py oī 'rā oo iky'a e'jī va'e.

⁹ SENHOR peguarā vvy pemboja'o va'erā puku-a ma doze quilômetros raxa'i, ha'e rā ipya ma cinco.

¹⁰ Ha'e va'e vvy sacerdote kuery pegua iky'a e'jī va'e puku-a ma doze quilômetros raxa'i 'rā kuaray ijapu'a'ia ha'e ipuku-a katy rupi, ha'e rā ipya ma cinco quilômetros 'rā kuaray oikea ha'e oua katy rupi. Mbyte py oī 'rā SENHOR pegua oo iky'a e'jī va'e.

¹¹ Ha'e va'e vvy opyta 'rā Zadoque ramymino kuery sacerdote-rā oiky'a'o pyre peguarā, mba'eta ha'e kuery ma ojapo 'rā va'ekue ojapo ete raka'e, Israel kuery mboae opa marā rei ikuai tēi, levita kuery eteve voi.

¹² Ha'e va'e vvy ma vvy iky'a e'jī va'e mbyte py oī 'rā iky'a e'jī ete va'e, ha'e oje'a 'rā levita kuery vvy re.

Levita kuery vvyrā re ijayvuague

* ^{47:13} José ma mokoī ta'y raka'e, Efraim ha'e Manassés, ha'e José pe ome'ēa ta'y jypygua pegua (1 Crônicas 5.1). Ha'e nunga rupi guvyvvy kuery gui ojopyve, mokoī henda py.

¹³ — Ha'e gui levita kuery vvy ma sacerdote kuery vvy re oje'a 'rã. Ipuku-a ma doze quilômetros raxa'i, ha'e rã ipya ma cinco. Ha'e rami 'rãe ipuku-a ha'e ipya.

¹⁴ Ha'e kuery ma neĩ peteĩve henda py novendeĩ 'rã, nomboekoviaí, neĩ vvy porãa nomboaxai 'rã amboae kuery peguarã, SENHOR pe iky'a e'ỹ va'e ramo.

Tetã oĩ aguã re ijayvuague

¹⁵ — Ha'e gui vvy rembyrekue dois quilômetros raxa'i ipya ha'e doze raxa'i ipuku-a va'e ma opyta 'rã tetã pygua kuery ikuai aguã, tetã vvyry rupi guarã. Ha'e rã tetã ma mbyte py 'rã opyta.

¹⁶ Po rami 'rã tuvixaa oĩ: dois quilômetros raxa'i 'rã oo kuaray ijapu'a'ia katy, ipuku-a katy, oua katy ha'e oieka katy.

¹⁷ Ha'e rã tetã vvyry rupigua ma cento e vinte cinco metros 'rã oo kuaray ijapu'a'ia katy, ipuku-a katy, oua katy ha'e oieka katy.

¹⁸ Ha'e gui vvy iky'a e'ỹ va'e re oje'a va'e rembyrekue ma cinco quilômetros peve 'rã oo kuaray oua katy ha'e oieka katy, vvy iky'a e'ỹ va'e apy peve. Ha'e va'e rupi mba'emo aju oiko va'e opyta 'rã tetã py omba'eapo va'e kuery peguarã.

¹⁹ Tetã py omba'eapo va'e kuery ae 'rã oma'etỹ okuapy ha'e py, Israel kuery ha'e javi regua.

²⁰ Ha'e va'e vvy ma doze quilômetros raxa'i jova-jovaive re, vvy iky'a e'ỹ va'e ha'e tetã vvyry rupigua reve.

Huvixave vvy re ijayvuague

²¹ — Vvy iky'a e'ỹ va'e ha'e tetã vvyry rupigua rembyrekue ma huvixave pe 'rã opyta. Huvixave pegua ma vvy iky'a e'ỹ va'e doze quilômetros raxa'i ipya va'e regua kuaray oua katy ha'e oieka katy oo, Israel regua kuery vvy ooa rami avi. Ha'e va'e mbyte py 'rã oĩ vvy iky'a e'ỹ va'e ha'e henda iky'a e'ỹ va'e templo regua.

²² Ha'e rami vy Judá ha'e Benjamim regua vvy mbyte oĩ va'e ma huvixave peguarã 'rã opyta, mbyte py levita kuery pegua ha'e tetã oĩ va'e reve'ỹ vy.

Peteĩ nhiruĩ regua kuery pegua vvy re ju ijayvuague

²³ — Ha'e gui Israel regua kuery mboae pegua vvy ju peikuua aguã, Benjamim kuery vvy ma kuaray oua katy guive oieka katy peve 'rã oo.

²⁴ Ha'e gui Benjamim vvy re ma Simeão vvy ju 'rã oje'a, kuaray oua katy guive oieka katy peve.

²⁵ Ha'e gui Simeão vvy re ma Issacar vvy ju 'rã oje'a, kuaray oua katy guive oieka katy peve.

²⁶ Ha'e gui Issacar vvy re ma Zebulom vvy ju 'rã oje'a, kuaray oua katy guive oieka katy peve.

²⁷ Ha'e gui Zebulom vvy re ma Gade vvy ju 'rã oje'a, kuaray oua katy guive oieka katy peve.

²⁸ Ha'e vy Gade vvy apy ma kuaray puku-a katy rupi oo 'rã Tamar guive Meribá-Cades regua yy ituia peve, ha'e Egitto katy'i yakã oĩ va'e pukukue rupi ye'ẽ tuvixave va'e peve ju.

²⁹ Ha'e rami ae 'rã itui vvy xorteu pexaa rupi Israel regua kuery pe pemboja'o va'erã, peteĩ-teĩ regua ikuai rami vy — he'i SENHOR Nhanderue.

Tetã kora rokẽ re ijayvuague

³⁰ — Ha'e gui tetã kora rokẽ ma po rami 'rã opyta: Kuaray ijapu'a'ia katygua dois quilômetros raxa'i oo va'e re ma

³¹ mboapy okẽ 'rã ikuai: Rúben rokẽ, Judá ha'e Levi rokẽ, mba'eta tetã rokẽ ikuai va'e ma Israel kuery rery rupi 'rã omboerya.

³² Ha'e gui kuaray oua katygua dois quilômetros raxa'i oo va'e re ma mboapy okẽ ju 'rã ikuai, José, Benjamim ha'e Dã rokẽ.

³³ Kuaray puku-a katygua dois quilômetros raxa'i oo va'e re ma mboapy okẽ ju 'rã ikuai, Simeão, Issacar ha'e Zebulom rokẽ.

³⁴ Ha'e gui kuaray oieka katygua dois quilômetros raxa'i oo va'e re ma mboapy okẽ ju 'rã ikuai, Gade, Aser ha'e Naftali rokẽ.

³⁵ Tetã ojerea ha'e javi vy ma nove quilômetros. Ha'e va'e ára guive tetã omboerya 'rã "Ha'e py SENHOR oĩ" 'ea.*

Daniel ayvu oĩa Daniel ayvu oĩa

Daniel ma kunumi teri reve Babilônia katy escravo-rã heraa va'ekue, irũ kuery reve. Ixupe Nhanderueete oexa uka mba'emo, ome'ẽ avi oexa ra'u pyre omombe'u porãve aguã. Ha'e nunga rupi Babilônia pygua huvixa ogueru guembiguairã. Heko vai va'e kuery mbyte Daniel oirũ kuery reve ikuai teĩ Nhanderueete pe ikuai py oĩ atã okuapy. Ha'e ramo opo'akaa oexa uka vy ogueraa jepe tata ha'e guary kora gui voi (capítulos 3 ha'e 6).

Nhanderueete po'akaa re ae Daniel ijayvu. “Mba'eta ixuguigua hexa pyrã ha'e oexa uka va'e ma tuvixa ete. Nhomondyipaarã omoingo va'e py oexa uka imbaraetea. Ipo'akaa ma opa va'erã e'y, openaa ma raka'e rã peve guarã” (4.3).

Peteĩ ava ra'y rami ojekuaa va'e rekorã re avi ijayvu, Nhanderueete ombopo'aka aguã re: “Pyávy aexa va'e re ama'ẽ ajupy vy peteĩ ju aexa arai reve yva gui ou ramo, ava ra'y rami ojekuaa va'e. Ha'e va'e ma Jypy guive guare oĩa py oo ramo omonhemboja. Ombopo'aka ha'e omboyvate ete huvixave oĩ aguã, ixupe heta ikuai aguã, amboae regua kuery ha'e ayvu mboae py ijayvu va'e guive. Ipo'akaa ma opa va'erã e'y, ndoaxai 'rãe, openaa nombovaipaai 'rã guive” (7.13-14). Novo Testamento py ma Jesus Cristo ha'e rami ae ijayvu ojee: “Xee ae ha'e. Ha'e gui pexa 'rã Ipo'akapa va'e oiporu kuaa regua re Ava ra'y ojeapo va'ekue okuapy ha'e yva gui ou ramo arai rupi”, he'i (Marcos 14.62).

Daniel ha'e irũ kuery oeko a'ãa ague

¹ Mboapy ma'etỹ re ma Judá pygua huvixa Jeaquim oĩ jave, Babilônia pygua huvixa Nabucodonosor ou Jerusalém tetã py. Ha'e vy ojokopa tetã.

² Ipo py SENHOR omboaxa Judá pygua huvixa Jeaquim, Nhanderueete pegua opy mba'emo ryrũ ikuai va'ekue guive. Ha'e ramo Sinar yvy re mba'emo ryrũ ogueraapa nguete pegua oo oĩ va'e pyguarã. Ha'e vy omoĩ porãmba nguete pegua va'e py.

³ Ha'e gui huvixa aipoe'i tembiguai kuery rerekoa Aspenaz pe, ogueru avi aguã amongue Israel kuery regua, huvixa ra'y kuery, yvatekue,

⁴ kunumigüe ivaikue reia peteĩ henda py ma voi oĩ e'y va'e, hova porã rei va'e, 'arandua ha'e javi re ombo'e pyre, mba'emo ojapo kuaa va'e guive huvixave ro py omba'eapo aguã, caldeu kuery reko ha'e ijayvu re ombo'e porãa ma ramo.*

⁵ Ha'e va'e kunumigüe pe ma ko'ẽ nhavõ huvixave ome'ẽ uka 'rã tembi'u iporãve va'e anho, huvixave ho'u va'e regua ae. Ome'ẽ uka avi vinho ha'e oy'u va'e regua, mboapy ma'etỹ re ha'e kuery ikuai aguã ha'e nunga re, ha'e va'e ára opaa py huvixave ro py omba'eapo aguã.

⁶ Ha'e kuery regua ma Daniel, Hananias, Misael ha'e Azarias, Judá regua meme ikuai.

⁷ Ha'e kuery rery ma tembiguai kuery rerekoa oguerova ju, po rami: Daniel ma Beltessazar, Hananias ma Sadraque, Misael ma Mesaque, ha'e rã Azarias ma Abede-Nego.†

⁸ Ha'e rami teĩ Daniel opy'a re omoĩ onhemongy'a e'y aguã huvixave ho'u va'e ha'e vinho oy'u va'e regua py. Ha'e vy tembiguai kuery rerekoa pe ojerure onhemongy'a e'y aguã.

⁹ Ha'e ramo Nhanderueete ojapo tembiguai kuery rerekoa Daniel ojou porã ha'e omboaxy aguã rami.

¹⁰ Tembiguai kuery rerekoa ombovai Daniel pe:

— Ha'e rami avi xee ma xeruvixa gui akyje, pe'u ha'e pey'u va'erã ome'ẽ uka rire. Mba'exa 'rã tu peẽ kuery pendejavegua kunumigüe ikuai va'e gui penderova re penekangyve oexa aguã? Ha'e rami vy pendekãuxa huvixave ojaya 'rã xeakã — he'i.

¹¹ Oiko avi peteĩ ava Daniel, Hananias, Misael ha'e Azarias mongaruarã tembiguai kuery rerekoa omoĩ va'ekue. Ha'e va'e pe ju Daniel ojereure vy aipoe'i:

¹² — Xee ajerure ndevy ore nrembiguai kuery orera'anga aguã dez ára peve, ha'e rami vy ro'u va'erã reme'ẽ aguã mba'emo rogue rive, ha'e yy roy'u aguã guive.

¹³ Ha'e gui mae ma reikuaa pota 'rã orerova re, kunumigüe huvixave tembi'u ho'u va'e regua ho'u va'e rova re guive. Ha'e gui rexa kuaa rami 'rã orerereko nrembiguai kuery rami — he'i.

¹⁴ Ha'e rami rã ojou porã vy dez ára re oa'anga.

¹⁵ Dez ára opaa py ma ha'e va'e oexa rã ha'e kuery rova iporãve kunumigüe huvixave rembi'u ho'u va'e kuery gui, imbaraetepave okuapy guive.

¹⁶ Ha'e rami rã tembi'u mbojya ha'e kuery pe nome'ẽvei tembi'u iporã rei va'e regua ho'u va'erã neĩ vinho oy'u va'erã va'ekue. Mba'emo rogue'i anho ome'ẽ ha'e kuery pe ho'u aguã.

* 1:4 Caldeu kuery ma Babilônia pygua ae. Babilônia rery mboae ma Sinar (versículo 2). † 1:7 Nguete ramigua rery rupi omboery oayvu py ae, Israel kuery ayvu py Nhanderueete rery rupi 'rãgue py. Tery Daniel ma “Nhanderueete xerepya” 'ea rekovia omboery Beltessazar “Bel oeko repya” 'ea nguete ramigua Bel rery rupi. Ha'e gui tery Hananias “ SENHOR nhanemboaxy” 'ea rekovia omboery Sadraque “Aku rembiguai” 'ea nguete ramigua Aku rery rupi. Ha'e gui tery Misael “Nhanderueete rami oiko va'e” 'ea rekovia omboery Mesaque “Aku rami oiko va'e” 'ea nguete ramigua Aku rery rupi ae. Ha'e gui Azarias “ SENHOR oipytyvõ va'e” 'ea rekovia ma omboery Abede-Nego “Nego pegua” 'ea nguete ramigua Nego rery rupi.

¹⁷ Ha'e va'e irundy kunumigue pe ma Nhanderuete ome'ẽ oiko kuaa aguã, mba'emo ojapo kuaa aguã guive guekorã ombopara pyre ha'e 'arandua ha'e javi py. Ha'e rã Daniel pe ma omo'aranduve, mba'emo oexa uka pyre ha'e oexa ra'u pyre oikuaa aguã.

¹⁸ Ha'e gui ma huvixave ogueru ruka aguã ára oa'angaague ovaẽ ma ramo tembiguai kuery rerekoa oguerupa Nabucodonosor renonde.

¹⁹ Ha'e kuery reve huvixave ijayvu vy oikuaa pavẽ gui Daniel, Hananias, Misael ha'e Azarias hi'aranduve va'ea. Ha'e rami vy ha'e kuery ma huvixave ro py ikuai mba'emo ojapoa py.

²⁰ Mba'eta opa mba'e py ha'e kuery oikuaa ha'e hi'arandu aguã re huvixave oporandu vy oikuaa ha'e kuery dez-kue hi'aranduvea imba'ekuaa ha'e mba'emo oikuaa va'e kuery openaa rupi ikuai va'e ha'e javi gui.

²¹ Ha'e gui Daniel ma ha'e py ae oiko tema huvixave Ciro peteĩ ma'etý re ma oi peve.

2

Nabucodonosor oexa ra'uague mba'erã paa Daniel omombe'u porãveague

¹ Huvixave Nabucodonosor mokoĩ ma'etý re ma oĩa py peteĩ mba'e oexa ra'u. Ha'e vy onhe'ẽ py onhemondyi rei vy ndoke kuaavei.

² Ha'e rami vy huvixave oenoĩ uka imba'ekuaa va'e kuery, hexa pyrã apoa, imba'evyky va'e ha'e caldeu kuery, huvixa oexa ra'u va'ekue omombe'u porãve aguã. Ha'e kuery oupa ma vy huvixave renonde ojexa uka okuapy.

³ Huvixa aipoe'i ha'e kuery pe:

— Xee aexa ra'u kuri peteĩ. Xenhe'ẽ py nda'eveia aendu guive aikuaaxe vy teĩ.

⁴ Ha'e ramo huvixa pe caldeu kuery aipoe'i okuapy aramaico ayvu py:

— Toikove huvixa raka'e rã peve! Emombe'u ke ha'vy rexa ra'u va'ekue ore nerembiguai kuery pe. Ha'e ramo romombe'u porãve 'rã ndevy — he'i okuapy.

⁵ Huvixa ombovai vy aipoe'i caldeu kuery pe:

— Peteĩ mba'e ma xee po rami aikuaa: Jypy xeve pemombe'u 'rã aexa ra'uague, ha'e gui mba'erã paa guive. Ha'e nunga napemombe'u porã ri ramo pendeayapaa 'rã, pendero voi ombovai paa 'rã.

⁶ Ha'e rã xapy'a rei aexa ra'u va'ekue ranhe pemombe'u porã, ha'e guive mba'erã paa guive pemombe'u ri ramo mba'emo porã ete ame'ẽ 'rã pëvy, romboete uka 'rã guive. Ha'e nunga rupi pemombe'u xeve aexa ra'u va'ekue, ha'e gui mba'erã paa guive — he'i.

⁷ Ha'e gui mokoĩguea ma ombovai vy

— Oreruvixave, ore nerembiguai kuery pe jypy remombe'u 'rãgue rexa ra'u va'ekue. Ha'e ramo ma romombe'u 'rã mba'erã paa — he'i okuapy.

⁸ Ha'e gui ma huvixa ijayvu vy aipoe'i:

— Xee aikuaa pemboare rivea teĩ, mba'eta peikuaa xeayvuague oiko ete 'rãa,

⁹ po rami: Aexa ra'u va'ekue napemombe'ui ri ramo peteĩgue'i pyve rombopagapa 'rã. Mba'eta apu rupi pejogueroayvu ra'e, xerenonde xembotavya rupi pendeayvu teĩ, pemboare xemboexaraixe vy. Nda'evei. Pemombe'u na aexa ra'u va'ekue. Ha'e ramo mae ma aikuaa 'rã mba'erã paa voi pemombe'u porã kuaa — he'i.

¹⁰ Ha'e ramo huvixave renonde caldeu kuery ombovai vy aipoe'i:

— Ha'e rami avi oreruvixave, yvy re jipoi ndee remombe'u uka va'e omombe'u kuaa va'erã. Mba'eta huvixa yvatekueve ha'e ipo'akapave va'e teĩ ae ma, peteive ma voi pova'e ramigua nomombe'u ukaai 'rã guembiguai kuery imba'ekuaa va'e pe, hexa pyrã apoa, neĩ caldeu kuery pe guive.

¹¹ Oreruvixave, ndeayvua ma haxy vai ete va'e. Avave rei jipoi ndevy omombe'u kuaa va'erã, tuete kuery e'ý vy. Ha'e rami avi ha'e va'e kuery ma nhande kuery reve ndoikoi — he'i okuapy.

¹² Ha'e rami rã huvixave ivai vy ipoxy vaipa. Ha'e vy oyavu omondouka imba'ekuaa va'e kuery Babilônia py ikuai va'e ha'e javi ojukapaa aguã.

¹³ Ha'e ramo ijayvuague imba'ekuaa va'e kuery ojukapaa aguã regua oikuaa pavẽ ramo Daniel ha'e irũ kuery voi oekaa avi ojuka aguã.

¹⁴ Babilônia pygua imba'ekuaa va'e kuery jukapaarã oo va'e ma huvixave pegua xondaro ruxixa Arioque hery va'e. Ha'e va'e reve ma Daniel o'arandua ha'e oiko kuaa rupi jogueroayvu.

¹⁵ Ha'e vy huvixave rembiguai Arioque pe Daniel aipoe'i:

— Mba'e re tu po rami ete huvixave ijayvu? — he'i. Ha'e ramo Arioque ombovai vy Daniel pe omombe'u mba'emo oiko va'ekue.

¹⁶ Ha'e ramo huvixavea py Daniel oo vy ixupe ojerure oa'anga pukuve'i ju aguã re, huvixave pe omombe'u porã aguã oexa ra'u va'ekue mba'erã paa.

¹⁷ Ha'e gui ma Daniel ngoo py oo vy oirũ kuery Hananias, Misael ha'e Azarias pe ju omombe'u.

¹⁸ Ha'e kuery reve Nhanderuete yva pygua pe ojerure okuapy, omboaxy vy oikuaa e'ý pyre oikuaa uka aguã re, Babilônia py imba'ekuaa va'e kuery ojukapaa py Daniel ha'e irũ kuery ojukaa avi e'ý aguã.

¹⁹ Ha'e ramo oikuaa e'ý pyre Daniel pe oikuaa uka pyávy mba'emo oexa ukaa py. Ha'e ramo Nhanderuete yva pygua re Daniel ima'endu'a porã.

²⁰ Ha'e vy aipoe'i:

— Tove Nhanderuete rery re ta'ima'endu'a porã raka'e rã peve, mba'eta ixuguigua ae ou 'arandu ha'e po'akaa.

²¹ Ha'e ae ma oguerova 'rā ára, hi'ára py porā mba'emo ojapoa aguā. Oipe'a 'rā huvixa kuery, ha'e gui amboae ju 'rā omo'i huvixarā. Omo'aranduve 'rā hi'arandu va'e, mba'eta oendu kuaa va'e pe oikuaa ukave 'rā mba'emo.

²² Ha'e rami vy oikuaa uka 'rā ndoikuaai pyre ha'e onhomi mbyre voi. Ha'e ma pytūa py mba'emo oī va'e voi oikuaa va'e. Ha'e gui hendy va'e ma hexegua ae.

²³ Xeru kuery ruete, ndee ae roguerovy'a ha'e romboete, mba'eta xe'vy pe reme'ē xe'arandurā ha'e xembaraete aguā. Ange reikuaa uka kuri huvixave oexa ra'u va'ekue xee rojerureague — he'i.

²⁴ Ha'e gui ma Babilônia py imba'ekuaa va'e kuery jukapaarā omo'i mbyre Arioque va'ea py ju Daniel oo. Ha'e py oike vy aipoe'i ixupe:

— Ejuka eme imba'ekuaa va'e kuery Babilônia pygua. Xereroike huvixave renonde, ha'e ramo huvixave pe xee amombe'u 'rā oexa ra'u va'ekue mba'erā paa — he'i.

²⁵ Ha'e rami rā Arioque ma huvixave renonde ogueroike pojava Daniel. Ha'e vy aipoe'i ixupe:

— Petei'ava ajou Judá gui escravo-rā jaru va'ekue regua. Ha'e va'e ma omombe'u 'rā rexa ra'u va'ekue mba'erā paa — he'i.

²⁶ Ha'e ramo huvixave ombovai vy Daniel Beltessazar hery mboae va'e pe aipoe'i:

— Ndee pa remombe'u ta aexa ra'u va'ekue, ha'e gui mba'erā paa?

²⁷ Ha'e ramo huvixave renonde Daniel oīa py ombovai:

— Xeruvixa, oikuaa e'ŷ pyre remombe'u uka tei'avave rei nomombe'u kuaai 'rā ndevy, imba'ekuaa va'e kuery, hexa pyrā apoa, nei'imba'evyky va'e kuery voi.

²⁸ Ha'e rami tei'petei oiko Nhanderuete yva re. Ha'e va'e ae ma oikuaa uka 'rā ndajaikuaai va'e. Ha'e rami vy xeruvixa Nabucodonosor, ndevy pe oikuaa uka opaa ára mba'emo oiko va'erā. Ha'e gui ma nderupa py reke rejupya py ndeke rupi rexa ra'u va'ekue ma po rami:

²⁹ Xeruvixa, nderupa rupi ndetui reve repēxa rejupy va'ekue raka'eve rā mba'emo oiko va'erā re. Ha'e ramo ndajaikuaai va'e kuaa uka ae oikuaa uka ndevy mba'emo oiko va'erā.

³⁰ Ha'e gui ma xe'vy pe ju oikuaa uka, pavē hi'arandu va'e gui xe'aranduve ramo e'ŷ guive, ha'e rā ndee xeruvixa pe amombe'u aguā mba'erā paa, ndee reikuaa porāve aguā ndeke rupi repēxa reiaque.

³¹ — Ha'e gui xeruvixa, ndee rexa rā petei'ava ra'angaa tuvixa va'e ojekuaa. Ha'e va'e ma tuvixa ete, overaa nda'eveite va'e opu'ā ho'amy nerenonde, jaexa rā nhanemongyge rei va'e.

³² Inhakā ma ouro guigua. Ipexo ha'e ijyva ma prata guigua. Hye ha'e hi'u rupi peve ma overa va'e guigua.

³³ Hetyma ma ferro guigua. Ha'e rā ipy ma ferro ha'e yapo guigua.

³⁴ Rema'ē rā petei'ita oi oovy oiaque gui, avave rei omboia ramo e'ŷ. Ha'e va'e ma ipy ferro ha'e yapo guigua áry ho'a vy omongu'ipa.

³⁵ Ha'e rami vy ta'angaa ha'e javi iku'ipa vyvoi: ferro guigua, yapo, overa va'e, prata ha'e ouro guigua. Iku'ipa vy mba'emo pirekue aty ramigua rive ojeapo rā vyvutu oguerovevepa heravy. Oiaque py ha'e nungakue jipovei. Ha'e rā ita ava ra'angaa ombovaipa va'ekue ma vyvutu guaxu ojeapo vy yvy jave re omonyē.

³⁶ — Ha'e ramigua rima rexa ra'u va'ekue. Ha'e gui xeruvixa, mba'erā paa voi romombe'u avi 'rā ndevy.

³⁷ Xeruvixa, ndee ae ma huvixa ikuai va'e ruvixave rei. Ndevy pe Nhanderuete yva pygua ome'ē huvixa rei aguā. Ha'e rami vy nembopo'aka, nemombaraete ha'e nemboyvate.

³⁸ Ndepo py omboaxa guive avakue opa rupigua, mymba nhuūndy rupi ikuai va'e, ha'e guyra oveve va'e, ha'e kuery ha'e javi re ndepo'aka aguā. Ndee ae ma inhakā ouro guigua.

³⁹ Ha'e gui ndee ndereikovei ma ramo nderekovia amboae ju 'rā ipo'aka ndegui iporiauve va'erā. Ha'e gui petei'ju 'rā opu'ā mboapya ipo'aka aguā. Ha'e va'e ma overa va'e guigua, yvy jave re ipo'aka avi va'erā.

⁴⁰ Ha'e va'e gui irundya ipo'aka va'e ma ferro rami ete 'rā imbaraeete, ferro nhomopēmbaa ha'e nhomboa'ypaa rami 'rā joguereko. Ferro opa mba'e omopēmbaa rami ha'e va'e voi nhomopēmba ha'e nhomboa'ypa 'rā.

⁴¹ Ha'e rami avi ipy ha'e ipyxā rexa va'ekue ma amongue henda py yapo guigua, ha'e rā amboae henda py ma ferro guigua 'rā oī, mba'eta ha'e va'e openaa ma oja'o 'rā. Ha'e rami tei'hexe oī 'rā ferro rami oī atā aguā, ferro ha'e yapo re irū va'e rexaague rami.

⁴² Ipyxā ma ferro guigua ha'e yapo guigua reve ikuai rami avi ha'e va'e po'akaa voi amongue henda py imbaraeete 'rā, ha'e rā amboae rupi ma ikangy 'rā.

⁴³ Ha'e gui ferro yapo re irū va'e rexaague rami ha'e va'e kuery voi amboae regua re omenda vy irūmba 'rā okuapy tei'joe nonhembójai 'rā guive, ferro yapo re ndoje'aia rami.

⁴⁴ Ha'e gui ma ha'e va'e huvixave kuery oī jave Nhanderuete yva pygua petei'omoī 'rā ipo'akapa va'e omomba pyrā e'ŷ. Ha'e va'e po'akaa ma amboae regua pe ndoaxai 'rā. Ha'e rami 'rāgue py omboa'ypa ha'e ombovaipa 'rā amboae kuery po'akaa ha'e javi, ha'e vy ha'e ae oī 'rā raka'e rā peve.

⁴⁵ Ha'e rami vy vyvutu gui ita omboia ramo e'ŷ oi oovy va'e rexa va'ekue ma omboa'ypa 'rā: ferro guigua, overa va'e, yapo, prata ha'e ouro guigua ha'e javi. Ha'e rami xeruvixa, ndevy pe Nhanderuete yvate ete va'e oikuaa uka ra'e raka'eve rā oiko va'erā. Pova'e ae rexa ra'u va'ekue, ha'e mba'erā paa voi ha'e rami ae, oguerovia pyrā meme — he'i.

⁴⁶ Ha'e gui ma huvixave Nabucodonosor guenapy'ā re oī Daniel renonde, ngova yvy re omovaē reve. Ha'e vy ijayvu tembi'u ha'e heakuā porā va'e ixupe oguerua aguā re.

⁴⁷ Huvixave aipoe'i Daniel pe:

— Anhetê ete peê kuery ruete ma tuuete ikuai va'e gui yvateve va'e, huvixave ikuai va'e ruvixa, oikuaa e'y pyre kuaa ukuaa guive, mba'eta aikuaa e'y va'ekue reikuaa uka xevy — he'i.

⁴⁸ Ha'e ramo huvixave omboyvate Daniel. Ha'e vy ixupe ome'ê reta iporã ete va'e, omoĩ guive Babilônia katy'i rupi ikuai va'e ha'e javi re opena aguã, Babilônia py imba'ekuaa va'e kuery ha'e javi ruvixarã guive omoĩ.

⁴⁹ Daniel ojerure rã huvixave irũ kuery omoĩ avi Babilônia py mba'emo ikuai va'e re opena aguã: Sadraque, Mesaque ha'e Abede-Nego hery va'e. Ha'e rã Daniel ma huvixave ro py ae oiko.

3

Daniel irũ kuery tata gui oo jepeague

¹ Huvixave Nabucodonosor ojapo uka peteĩ ta'angaa ouro guigua. Yvatea ma trinta metros, ha'e rã ipya ma mboapy metros. Ha'e va'e ma Dura nhuũndy py omopu'ã imo'amy, Babilônia katy'i.

² Ha'e gui huvixave Nabucodonosor omboaty ukapa huvixa kuery mboae, tetã ha'e estado re opena va'e, nhomboayvu va'ety, perãta re opena va'e, joe opena va'e, nhomongeta va'ety, ha'e openaa rupi guembiguai ikuai va'e ha'e javi, ha'e kuery ou vy huvixave Nabucodonosor ta'angaa omopu'ã uka va'ekue omboete ypy aguã.

³ Ha'e ramo huvixa kuery ijatypa okuapy, tetã ha'e estado re opena va'e, nhomboayvu va'ety, perãta re opena va'e, joe opena va'e, nhomongeta va'ety, ha'e openaa rupi hembiguai ikuai va'e ha'e javi. Ha'e kuery ijatypa okuapy huvixave Nabucodonosor ta'angaa omopu'ã uka va'ekue omboete ypy aguã. Ha'e vy opu'amba okuapy ta'angaa Nabucodonosor omopu'ã uka va'ekue renonde rupi.

⁴ Ha'e gui ma huvixa ayvu mombe'ua ijayvu atã vy aipoe'i:

— Peê kuery pe ma po rami huvixa ojapo uka, heta va'e kuery, amboae yvy regua ha'e ayvu mboae py pendeayvu va'e ha'e javi pe:

⁵ Mimby guaxu pendu vy, mimby, ixã reta va'e, mbaraka ixã irundy va'e, mbaraka, gaita ha'e opa marãgua mba'epu ombopua rã pendu vy ma pejero'apa 'rã pekuapy yvy re, ta'angaa ouro guigua huvixave Nabucodonosor omopu'ã uka va'ekue pemboete aguã.

⁶ Ha'e rã peteĩ va'e rei xapy'a rei ndojero'ai ha'e nomboetei va'e ma ha'e ramove omomboia 'rã tata rupa haku ratãvea py — he'i.

⁷ Ha'e rami rã ha'e kuery ha'e javi ma mimby guaxu, mimby, ixã reta va'e, mbaraka ixã irundy va'e, mbaraka, gaita ha'e opa marãgua mba'epu ombopua rã oendu vy ojero'apa okuapy: heta va'e kuery, amboae yvy regua ha'e ayvu mboae py ijayvu va'e ha'e javive. Ha'e vy omboetepa okuapy ta'angaa ouro guigua huvixave Nabucodonosor omopu'ã uka va'ekue.

⁸ Ha'e rami jave amongue avakue caldeu regua ou vy ijayvu okuapy judeu kuery re.

⁹ Ha'e vy huvixave Nabucodonosor pe aipoe'i okuapy:

— Orevixave, terekove riael!

¹⁰ Ha'e gui orevixave, po rami ndeayvu va'ekue: avakue ha'e javive mimby guaxu oendu vy, mimby, ixã reta va'e, mbaraka ixã irundy va'e, mbaraka, gaita ha'e opa marãgua mba'epu ombopua rã oendu vy ojero'apa reve ta'angaa ouro guigua omboete aguã.

¹¹ Ha'e rã peteĩ va'e rei ndojero'ai ha'e nomboetei va'e ma omomboia 'rã tata rupa haku ratãvea py.

¹² Ha'e gui apy ikuai amongue avakue judeu regua Babilônia katy'i rupi ikuai va'e re opena va'erã remoi va'ekue. Ha'e va'e kuery ma Sadraque, Mesaque ha'e Abede-Nego. Orevixave, ha'e va'e avakue ma nanemboetei. Mba'eta ndojerovia i nderuete kuery rereko va'e re, nomboetei guive ta'angaa ouro guigua remopu'ã uka va'ekue — he'i okuapy.

¹³ Ha'e rami Nabucodonosor oendu vy ivai ha'e ipoxy vaipa. Ha'e rami vy oenoĩ uka Sadraque, Mesaque ha'e Abede-Nego. Ha'e rã huvixave renonde oguerua.

¹⁴ Ha'e ramo Nabucodonosor aipoe'i ha'e kuery pe:

— Sadraque, Mesaque ha'e Abede-Nego, anhetê teve peê ndapejerovia i xeruete kuery re, neĩ napemboetei guive ta'angaa ouro guigua amopu'ã uka va'ekue?

¹⁵ Ha'e gui aỹ ma pendu pota 'rãgue mimby guaxu, mimby, ixã reta va'e, mbaraka ixã irundy va'e, mbaraka, gaita ha'e opa marãgua mba'epu ombopua rã, pejero'a vy ta'angaa ajapo uka va'ekue pemboete aguã. Mba'eta napemboetei ramo ha'e ramove'i penemomboia 'rã tata rupa haku ratãvea py. Ha'e va'e rire mava'e tuuete 'rã tu pendereraa jepe xepo gui? — he'i.

¹⁶ Ha'e ramo Sadraque, Mesaque ha'e Abede-Nego ombovai huvixave pe:

— Orevixava Nabucodonosor, ha'e nunga py ma ore kuery rombovai e'y teĩ ha'e've.

¹⁷ Mba'eta orevuete ixupe roikoa va'e ma tata rupa gui orereraa jepe kuaa va'e, ndepo gui guive.

¹⁸ Ha'e rami e'y teĩ orevixave, eikuaa pota ke pova'e re: Ore ma nderuete kuery pe ndoroikoi 'rã, noromboetei 'rã guive ta'angaa ouro guigua remopu'ã uka va'ekue — he'i.

¹⁹ Ha'e ramo Nabucodonosor ipoxy vaipa vy Sadraque, Mesaque ha'e Abede-Nego pe hova vaikuupa. Ha'e rami vy tata rupa py omoendy jepiaty áryve sete-kue omoendy ukave vy

²⁰ ijayvu oxondaro kuery imbaraeteve va'e pe ojokuapa aguã Sadraque, Mesaque ha'e Abede-Nego, ha'e gui tata rupa haku ratãvea py omombopa aguã.

²¹ Ha'e ramo ha'e kuery ijao puku, kamixa, xapeo ha'e ijao mboae reve-reve ojokuapa vy omombo tata mbyte py.

²² Huvixave ojapo uka vyvoi, ha'e tata kua py hendy guaxu oiny ramo hendy vuku va'e ojukapa avakue Sadraque, Mesaque ha'e Abede-Nego momboa kuery.

²³ Ha'e rã mboapy avakue Sadraque, Mesaque ha'e Abede-Nego ma ojokuapaa ague reve meme ho'apa tata mbyte py.

²⁴ Ha'e gui ma huvixave Nabucodonosor oma'ẽ vy onhemondyi, ha'e opu'ã pojava ovy vy aipoe'i ojeupegua nhomongeta va'ety kuery pe:

— Mboapy avakue e'ÿ ri ty'y ojokua pyre tata py nhamombo va'ekue?

Ombovai okuapy huvixave pe:

— Anhetẽ ma oreruvixa — he'i.

²⁵ Ha'e gui ijayvuvu ju vy aipoe'i:

— Mba'ixa tu ha'vy irundy avakue aexa ojokua pyre e'ÿ tata mbyte rupi uguata okuapy rã, mba'eve py ikuai axy e'ÿ re. Irundy ma tuuete kuery ra'y rami ojekuaa — he'i.

²⁶ Nabucodonosor onhembojave ovy tata rupa py hendy oiny va'e rokẽ katyve'i. Ha'e vy ojapukai vy aipoe'i:

— Sadraque, Mesaque ha'e Abede-Nego, tuuete yvateve va'e rembiguai kuery, peẽ ke upe gui, peju! — he'i. Ha'e ramo Sadraque, Mesaque ha'e Abede-Nego ma tata mbyte gui oẽmba jogueruvy.

²⁷ Ha'e ramo ikuai py ono'õmba okuapy huvixa mboae kuery, tetã ha'e estado re opena va'e, ha'e huvixave pegua nhomongeta va'ety kuery. Ha'e kuery oexa okuapy rã mboapy avakue re mba'eve py tata ndojapo vai ra'e, hi'a inhakã áry ndoverei, oao oguereko va'e amboae rami ndopytai, neĩ tata pixe noĩ ra'e ha'e kuery re.

²⁸ Ha'e rami rã Nabucodonosor ijayvu vy aipoe'i:

— Ta'ima'endu'a porãa Sadraque, Mesaque ha'e Abede-Nego ruete re, mba'eta ojeupegua anjo ombou vy ogueraa jepe guembiguai kuery. Ha'e kuery ma hexe ojerovia vy huvixave ayvu rupi e'ÿ ikuai. Amboae ramigua tuuete re ojerovia ha'e omboete 'rãgue py omboaxa guete, nguete pe anho ikuai vy.

²⁹ Ha'e nunga rupi xee ma po rami ajapo uka: Xapy'a rei heta va'e kuery regua, amboae regua ha'e ayvu mboae py ijayvu va'e ma Sadraque, Mesaque ha'e Abede-Nego ruete re ijayvu vai ramo ojayapaa 'rã, hoo ombovaipaa 'rã guive. Mba'eta tuuete mboae jipoi kova'e rami nhandereraa jepe va'erã — he'i.

³⁰ Ha'e rami vy Babilônia vvy re huvixave omoingo porã Sadraque, Mesaque ha'e Abede-Nego.

4

Huvixa Nabucodonosor na'inhakã porãvei ranhe oikovyagua re ijayvua

¹ Ha'e gui huvixave Nabucodonosor oayvu omondouka vvy regua kuery ha'e javive pe, amboae regua ha'e ayvu mboae py ijayvu va'e vvy jave re ikuai va'e pe. Ha'e vy aipoe'i: “Toĩ pendekuai porã ete aguã!

² Peẽ kuery pe xee amombe'uxe hexa pyrã ha'e iporã ete va'e Nhanderuetete yvate ete va'e xere ojapo va'ekue.

³ Mba'eta ixuguigua hexa pyrã ha'e oexa uka va'e ma tuvixa ete. Nhomondyipaarã omoingo va'e py oexa uka ipo'akaa. Ipo'akaa ma opa va'erã e'ÿ, openaa voi raka'e rã peve guarã.

⁴ “Ha'e gui xee Nabucodonosor ma xero py aiko porã va'ekue, xeivygua opy avy'a aikovy va'ekue.

⁵ Ha'e gui ma peteĩ aexa ra'u va'e xemondyi. Xerupa rupi xetui jave apẽxaa ha'e xeke rupi aexa va'e xembopy'a eta rei.

⁶ Ha'e rami vy aenoĩ ukapa imba'ekuaa va'e Babilônia py ikuai va'e ha'e javi, xevy pe omombe'u aguã aexa ra'u va'ekue mba'erã paa.

⁷ Ha'e ramo oike okuapy imba'ekuaa va'e kuery, hexa pyrã apoa, caldeu ha'e imba'evyky va'e kuery ha'e javi. Ha'e kuery pe amombe'u aexa ra'u va'ekue, va'eri ha'e kuery ma nomombe'u kuaai mba'erã paa.

⁸ Opaa py ma ou Daniel. Ha'e va'e ma Beltessazar hery va'e xeruete rery rupi ae. Ha'e rã ha'e va'e re ma oĩ Nhanderuetete iky'a e'ÿ va'e Nhe'ẽ. Ha'e ramo ixupe aexa ra'u va'ekue amombe'u vy aipoa'e:

⁹ Beltessazar, imba'ekuaa va'e kuery ruvixa, xee ma aikuaa ndere oĩa Nhanderuetete iky'a e'ÿ va'e Nhe'ẽ. Ha'e nunga rupi oikuaa e'ÿ pyre teĩ ndevy pe ndaxyi 'rã. Po rami ma xeke rupi aexa ra'u va'ekue. Emombe'u ke mba'erã paa.

¹⁰ Xerupa rupi xetui vy xeke rupi aexa va'ekue ma po rami: Xee ama'ẽ vy peteĩ aexa vvy mbyte vyvra hi'aĩ va'e, yvate ete va'e.

¹¹ Ha'e va'e vyvra ma yvateve ha'e imbaraeteve ovy, yva re ovaẽ peve. Yvy apy rupi gui voi oexaa.

¹² Hogue ma iporã, hi'a reta guive. Hexe oĩ opa marãgua rembi'urã. Hi'yvypy rupi ma mymba nhuũndy rupigua ojou kuaray'ã. Hakã re ma guyra oveve va'e onhemboaity okuapy. Hexe ma temimoingo kuery ha'e javi okaru.

¹³ Xerupa rupi xetui vy aexa ra'u va'e py ma peteĩ ju aexa mba'emo rarõa iky'a e'ÿ va'e. Ha'e va'e ma oguejy ovy yva gui.

¹⁴ Ijayvu atã ete vy aipoe'i: “Peake'o ke vyvra, hakã pejayapa guive. Pemboipa hogue, hi'a voi pemombopa. Pemondyipa mymba iguy gui, ha'e rã hakã gui ma pemondyi imondovy guyra kuery.

¹⁵ Ha'e rã hapytakue ma vvy re topyta hapo reve. Pejokua ke ferro ha'e overa va'e guigua corrente py, nhuũndy mbyte oĩa py ae. Yxapy yva guigua tomoaký, ha'e mymba ikuai va'e rami tokaru oikovy jai rogue vvy re ikuai va'e re.

¹⁶ Amboae rami ta'ikuraxō, avakue regua kuraxō oī ve'ỹ aguā rami. Ha'e rami 'rāgue py ixupe tome'ēa kuraxō mymba regua. Ha'e nunga toī hexe sete ma'etỹ oaxa peve", he'i.*

¹⁷ Ha'e rami ae mba'emo rarōa kuery ijayvugue, iky'a e'ỹ va'e kuery oayvu omondouka va'ekue, ha'e ramo okuave va'e ha'e javi oikuaa aguā avakue ipo'aka va'e gui Yvate ete va'e ipo'akapave va'ea. Ha'e rami vy ombopo'akaxe va'e rei 'rā ombopo'aka, avakue regua yvyĩ'igieve teĩ omoĩ 'rā pavē re opena aguā.

¹⁸ Ha'e nunga ma xee huvixave Nabucodonosor aexa ra'u va'ekue. Ha'e gui ndee Beltessazar, emombe'u ke mba'erā paa, mba'eta imba'ekuaa va'e kuery apenaa rupi ikuai va'e ha'e javi nomomba'u kuaai. Ha'e rā ndee ma remombe'u kuaa 'rā, mba'eta ndere oī Nhanderuete iky'a e'ỹ va'e Nhe'ē', ha'e.

¹⁹ "Ha'e ramo Daniel Beltessazar hery avi va'e onhemondyi rei reve opyta are ranhe, opēxa ha'e ipy'a eta reia py. Ha'e rami rā xee huvixave teĩgue ju xeyvuu vy aipoa'e ixupe: 'Beltessazar, ndepya'eta rei eme aexa ra'uague gui, neĩ mba'erā paa re voi', ha'e.

"Ha'e ramo Beltessazar ombovai vy aipoe'i: 'Xeruvixa, rexa ra'uague ma ndere ija'e e'ỹ va'e kuery re oiko va'e rire, mba'erā paa voi oiko va'e rire nderovaigua kuery re anho.

²⁰ Ha'e gui yvyra rexa va'ekue ma yvateve ha'e imbaraeteve ovy yva re peve, yvy jave gui oexaa guive.

²¹ Hogue porā, hi'a reta guive pavē ho'u va'erā va'e re. Iguy py ma mymba nhuũndy rupigua ojou kuaray'ā, ha'e hakā re ma guyra oveve va'e onhemboaiity okuapy.

²² Ha'e va'e yvyra ma ndee ae, xeruvixa. Mba'eta ndeyvateve reovy, nembaraete guive. Ndeporiau e'ỹa ma yva re peve ojekuaave ovy, ndepo'akapaa yvy apy re peve oendua.

²³ Ha'e gui ndee xeruvixa rexa avi mba'emo rarōa iky'a e'ỹ va'e yva gui ogeuejy ouvy rā. Ha'e va'e aipoe'i: "Peake'o ke yvyra, pembovaipa ete. Ha'e rā hapytakue ma yvy re topyta hapo reve, nhuũndy mbyte oĩa py ae topyta ferro ha'e overa va'e guigua corrente py pejokuaa reve. Yxapy yva guigua tomoakỹ, ha'e tokaru oikovy mymba nhuũndy rupi ikuai va'e okarua rami, sete ma'etỹ oaxa peve", he'i.

²⁴ Xeruvixa, pu rami ma mba'erā paa, pova'e ma Yvate ete va'e oikuaa uka va'ekue. Ha'e nunga ma ndere ae 'rā ou, xeruvixa.

²⁵ Mba'eta nemoxēa 'rā avakue ikuaiia gui. Ha'e ramo mymba nhuũndy rupi ikuai va'e mbyte ju 'rā nderekoa. Ndevygua ma nhuũ vaka ho'ua rami re'u reiny aguā. Neakỹ 'rā yxapy yva guigua py. Ha'e nunga ma sete ma'etỹ re oiko 'rā ndere, avakue ipo'aka va'e gui Yvate ete va'e ipo'akapave va'ea reikuaa peve, mba'eta ombopo'akaxe va'e rei ombopo'aka 'rā.

²⁶ Ha'e gui "Hapytakue peja 'rā hapo reve", he'ia ma ha'ekue rami ae nembopo'aka ju aguā re ijayvu vy, Yva pygua ipo'akapave va'ea reikuaa ma rire.

²⁷ Ha'e nunga rupi xeruvixa, ejapyxaka ke xeyvuu re, ha'e teko porā rupi vy ejep'e'a rejeyavya ha'e ndereko vaia gui, iporiaukue'i remboaxya rupi ju reiko aguā. Ha'e rami ri reiko vy reiko porā pukuve 'rā', he'i Daniel xevy.

²⁸ "Ha'e gui ma ha'e nunga ha'e javi oiko xee huvixave Nabucodonosor re.

²⁹ Doze jaxy opaa py xee huvixave xero Babilōnia tetā py oī va'e py aĩ jave

³⁰ xeyvuu vy aipoa'e: 'Kova'e Babilōnia tetā tuvixa va'e e'ỹ teve xerekoarā ajapo va'ekue, xepo'akaa ha'e xeyvate etea aexa uka aguā?' he'i.

³¹ Ha'e rami xee huvixave xeyvuu teri reve yva gui ogeuejy petēi ayvu aipoe'i va'e: 'Huvixave Nabucodonosor, ndevy aipoe'i: Ndegui oaxa ma ndepo'aka reinyague.

³² Ha'e rami vy nemoxēa 'rā avakue ikuaiia gui, ha'e mymba nhuũndy rupi ikuai va'e reve ju 'rā reiko. Ndere omoĩa 'rā vaka rami nhuũ re'u aguā. Ha'e nunga ma sete ma'etỹ re oiko 'rā ndere, reikuaa peve avakue ipo'aka va'e gui Yvate ete va'e ipo'akapave va'ea, mba'eta ombopo'akaxe va'e pe rei ombopo'aka 'rā', he'i.

³³ Ha'e ramove ojeupity xee Nabucodonosor regua ayvu. Ha'e rami vy xemoxēa avakue ikuaiia gui. Ha'e ramo vaka rami ha'u aikovy nhuũ. Xerete ma yxapy yva guigua py inhakỹ. Xe'a ma taguato rague rami ipuku, ha'e rā xepoapē ma guyra poapē rami opyta.

³⁴ "Ha'e va'e ára opaa py ma xee Nabucodonosor yva re ama'ē ramo oī ju xe'arandua. Ha'e vy Yvate ete va'e re xema'endu'a porā, arovy'a guive raka'e rā peve oikove va'erā, mba'eta ha'e va'e openaa ma opa va'erā e'ỹ, ipo'akaa ma raka'e rā peve guarā.

³⁵ Ixupe rā yvy re ikuai va'e ha'e javi ma mba'everā ndovarei. Ha'e oipotaa rami ae 'rā opena oxondaro kuery yva re ikuai va'e re, yvy regua kuery re guive. Avave rei jipoi hexe opo omoĩ va'erā, neĩ ixupe 'Mba'e tu rejapo?' he'i va'erā.

³⁶ Ha'e gui xe'arandua ou jevy ramove ou avi huvixa rami apena ju aguā, apenaague ha'e javi re. Xeyvate a ha'e xeporāa voi ou xere pavē oikuaa aguā rami. Xeyvygua nhomongetaaty kuery ha'e huvixa kuery xea py oupa ju okuapy. Ha'e rami py xemoĩa ju huvixave aĩ aguā. Ha'e vy xeyvateve ete.

³⁷ Ha'e gui aỹ ma xee Nabucodonosor arovy'a ha'e ambojerovia Huvixave yva pygua. Mba'eta ha'e va'e mba'emo ojapo va'e ma anhetē meme, oikoa voi ha'evea rami meme. Omo'yvyĩ'i kuaa avi 'rā onhemboyvate va'ekue", he'i.

5

Oo mbotya re ipara va'e ojekuaa ague

* 4:16 Apy ma huvixave ojee ae ijayvu vy "Yvyra" he'i. Mba'eta Nhanderuete oipe'a ranhe huvixa oĩague gui, Nhanderuete ipo'akapa va'ea oikuaa peve.

¹ Ha'e gui huvixave Belsazar ojapo peteĩ ngaru tuvixa va'e mil huvixa kuery pe. Ha'e vy mil va'e oexaa py oy'u oiny vinho.*

² Belsazar vinho oy'uxea rupi oy'u tema oiny vy ima'endu'a mba'emo ryru ouro ha'e prata guigua Jerusalém py templo oïague gui tuu Nabucodonosor ogueru va'ekue re. Ha'e va'e ma ogueru ruka huvixave ha'e hexeve huvixa kuery ikuai va'e ha'e va'e py oy'u okuapy aguã, ta'yxy ha'e ta'yxy jevy kuery reve.

³ Ha'e ramo oguerua mba'emo ryru ouro guigua Nhanderuetepagua oo Jerusalém py oïague gui ogueru pyre. Ha'e va'e py ma huvixave ha'e hexeve huvixa ikuai va'e oy'u okuapy, ta'yxy ha'e ta'yxy jevy kuery reve.

⁴ Vinho oy'u reve omboete okuapy nguete kuery ouro guigua, prata, overa va'e, ferro, yvyra ha'e ita guigua rive.

⁵ Ha'e ramove peteĩ ojekuaa ava po. Ha'e va'e ma huvixave ro mbotya xiã re ombopara oiny tataendy rexei. Ha'e rã huvixa oexa oiny ipo ombopara va'e.

⁶ Ha'e ramo huvixave ndaekorãvei vy onhemondy'i rova vyvoi. Ijaxy'y oku'ea, henapy'ã voi onhembotapa rei joe.

⁷ Ha'e gui huvixave ojavukai reve ijavyu oguerupaa aguã hexa pyrã apoa kuery, caldeu ha'e imba'evyky va'e kuery. Oguerua rã huvixave aipoe'i Babilônia pygua imba'ekuaa va'e kuery pe:

— Peteĩ va'e rei kova'e ipara ogueroyvu ha'e mba'erã paa xevy omombe'u porã va'e ma amonhemonde 'rã púrpura py, ha'e ijaju'y reguarã oguerua 'rã mbo'y ouro guigua. Ha'e gui xee reve mboapya 'rã oĩ apenaa re ipo'akaa py — he'i.

⁸ Ha'e ramo huvixave pegua imba'ekuaa va'e kuery oike va'ekue ndogueroyvu kuaai, neĩ mba'erã paa nomombe'u kuaai guive huvixave pe.

⁹ Ha'e ramo huvixave Belsazar onhemondy'i ete vy hova mboaeapa vaipa. Hexeve huvixa kuery ikuai va'e voi onhemondy'ipa okuapy.

¹⁰ Ha'e gui ma huvixave ha'e hexeve ikuai va'e re mba'emo oiko rã ixy oendu vy oike avi okaruaty py. Ha'e vy aipoe'i:

— Xeruvixa, terekove ria! Ndepy'a eta rei eme, nderova mboae rei eme guive.

¹¹ Mba'eta repenaa re ma oiko peteĩ ava. Hexe ma oĩ Nhanderuetepagua e'ỹ va'e Nhe'ẽ. Nderu oĩ jave py ma roikuaa hexe oĩa mba'emo oikuaa aguã, ha'e hi'arandu ha'e imba'ekuaa nguete 'arandua rupi. Ha'e nunga rupi nderu rãgue'i huvixave Nabucodonosor oĩ jave omoĩa imba'ekuaa va'e kuery ruvixarã, hexa pyrã apoa kuery, caldeu ha'e imba'evyky va'e kuery ha'e javi ruvixarã guive.

¹² Mba'eta Daniel re nhe'ẽ oĩ va'e ma omo'arandu porã 'rã mba'emo oikuaa aguã, oexa ra'u pyre omombe'u aguã, ha'e oikuaa e'ỹ pyre haxyve va'e teĩ oikuaa uka aguã. Ha'e va'e reryrã nderu rãgue'i omoĩ va'ekue ma Beltessazar. Ha'e nunga rupi enoĩ uka Daniel. Ha'e ramo ndevy pe omombe'u 'rã mba'erã paa — he'i.

¹³ Ha'e ramo huvixave renonde omoingea Daniel. Huvixa ijavyu vy aipoe'i Daniel pe:

— Ndee pa Daniel, Judã pygua escravo-rã xeru rãgue'i huvixave oĩ jave Judã gui nderu va'ekue?

¹⁴ Ha'e gui xee aendu omombe'ua rã ndere Nhanderuetepagua Nhe'ẽ oĩa, mba'emo reikuaa aguã, ne'arandu ha'e nembra'ekuaa ete aguã guive.

¹⁵ Ange'i xerenonde ogueroikea imba'ekuaa va'e ha'e hexa pyrã apoa kuery, kova'e ipara va'e ha'e kuery ogueroyvu vy xevy pe omombe'u aguã mba'erã paa. Ha'e rami teĩ ha'e kuery ma kova'e ayvu mba'erã paa nomombe'u kuaai.

¹⁶ Ha'e rã ndere ima'endu'aa rã xee aendu remombe'u kuaa va'ea mba'erã paa, ha'e mba'emo haxyve va'e teĩ remombe'u porã va'ea. Aỹ ma, xapy'a rei kova'e ipara va'e roeroyvu vy mba'erã paa xevy remombe'u ramo nemonhemondea 'rã púrpura py, rereko 'rã mbo'y ouro guigua ndeaju'y re, ha'e xee rive mboapya 'rã rei apenaa re ndepo'akaa py — he'i.

¹⁷ Ha'e rami rã Daniel ombovai vy aipoe'i huvixave renonde:

— Mba'emo reme'ẽ aguã ndeayvuague ma ndereve eta topyta, e'ỹ vy eme'ẽ amboae pe. Ha'e rami avi ndevy pe xee aroyvu 'rã ipara va'e, mba'erã paa amombe'u 'rã guive.

¹⁸ Xeruvixa, ne'exa! Nderu rãgue'i Nabucodonosor pe Nhanderuetepagua ete va'e ome'ẽ va'ekue huvixave oĩ aguã, ipo'aka, iporã ha'e yvate aguã guive.

¹⁹ Ipo'aka aguã ome'ẽ rive ma henonde heta regua, amboae yvy regua ha'e ayvu mboae py ijavyu va'e kuery oryry'i reve ojererokyjapa okuapy. Mba'eta ojukaxe va'e rei ojuka raka'e, ha'e rã omoingovexe va'e ma omoingove. Ombovyate ombovyatexe va'e, ha'e rã omo'yvy'i'ixe va'e ma omo'yvy'i' i raka'e.

²⁰ Ha'e rami avi opy'a py onhembovyate teĩ, onhe'ẽ py guive ndoikuaa potavei ha'e ojejou porãve rive. Ha'e rami rã oipe'aa raka'e huvixave oĩa gui, ixupe oaxapa guive mba'emo ogueroyv' aague.

²¹ Omoxãa raka'e avakue mbyte gui. Ikuraxõ ma ojapoa mymba kuraxõ rami, ha'e omboekoaa mburika ka'aguy rupi ikuai va'e reve. Vaka pe rami ome'ẽa nhuũ ho'u aguã, omoakỹ guive yxapy yva guigua py, oikuaa peve Nhanderuetepagua ete va'e avakue po'akaa ha'e javi re ipo'aka va'ea, ha'e ombopo'akaxe va'e rei ombopo'aka 'rã avakue re opena va'erã.

²² Ha'e gui ndee Belsazar ma ta'y reiko vy ha'e nunga ha'e javi reikuaapa teĩ ndepy'a py nerenhemo'yvy'i'i.

²³ Ha'e rami 'rãgue py repu'ã raka'e SENHOR yva pygua rovai. Ha'e rami vy hoo gui nerenonde mba'emo ryru oguerua ramo ha'e va'e py ndee ha'e huvixa kuery ndereve ikuai va'e pey'u pekuapy vinho, pendera'yxy ha'e pendera'yxy jevy kuery reve. Ha'e rami avi remboete tuuete ramigua kuery prata guigua, ouro, overa

* 5:1 Belsazar ma Nabucodonosor ramymino raka'e. Daniel tuja'i ma jave oĩ Babilônia pygua huvixave.

va'e, ferro, vyvra ha'e ita guigua rive, ha'e nunga oma'ẽ e'y' va'e, noendui va'e, neĩ mba'eve ndoikuaai va'e teĩ. Nhanderuete po py reikovea oĩ va'eri neremboetei.

²⁴ — Ha'e rami rire ixugui ae ou ipo kova'e mboparaarã.

²⁵ Pova'e ma ipara oiny va'e: *Mene, mene, tequel ha'e parsim.*

²⁶ Ha'e rã mba'erã paa ma po rami: "*Mene*" he'ia py ma ndepo'akaa Nhanderuete oipapa vy omomba maa, reikuaa aguã.

²⁷ "*Tequel*" he'ia py ma mba'emo opejaa py ndepeja vy ojoua oataa, reikuaa aguã.

²⁸ Ha'e rã "*Peres*" he'ia py ma ndepo'akaa omboja'oa ma, ha'e Média ha'e Pérsia pygua kuery pe ju omboaxa maa, reikuaa aguã — he'i. †

²⁹ Ha'e rami rã Belsazar ijayvu Daniel omonhemondea aguã púrputa py, ha'e ijaju'y re mbo'y ouro guigua omoĩa aguã, ha'e gui omombe'ua aguã ha'e openaa re ipo'akaa py mboapya oĩa rami.

³⁰ Ha'e va'e pyavvyve ojukaa caldeu regua huvixave Belsazar.

³¹ Ha'e rire openaague re Média pygua huvixa Dario ju ipo'aka, sessenta e dois ma'et'y oguereko reve.

6

Yvykua guary ikuaiia py Daniel omomboa ague

¹ Ha'e gui huvixave Dario ma oipotaa rami omoĩ raka'e cento e vinte huvixarã, ha'e kuery opena aguã huvixave openaa ha'e javi rupi.

² Ha'e va'e kuery áry mboapy ju omoĩ huvixa yvatekueverã. Ha'e va'e kuery regua ma Daniel. Ha'e va'e kuery ma huvixa kuery mboae re opena, huvixave pegua nome'ẽa e'y'i aguã.

³ Ha'e rã Daniel ma huvixa yvatekueve ha'e huvixa kuery mboae gui hi'aranduve, mba'eta hexe nhe'ẽ oĩ va'e ma imo'arandu porã etea. Ha'e nunga rupi huvixave onhembopy'a openaa ha'e javi re ombopo'aka aguã.

⁴ Ha'e ramo huvixa yvatekueve ha'e huvixa mboae kuery ma Daniel openaa re oikuaa pota okuapy hexe ijayvu reixe vy. Ha'e rami teĩ hexe ndojouí ha'eve'yã rami oikoa. Daniel ojeroviapy ramo hexe ndojouí ojavya, neĩ ojevavya.

⁵ Ha'e gui ma ha'e va'e avakue joupe-upe aipoe'i okuapy:

— Mba'eve py ndajajouí 'rã Daniel re nhandeayvu aguã, nguete guigua lei rupi oikoa py e'y' vy — he'i okuapy.

⁶ Ha'e ramo huvixa yvatekueve ha'e huvixa mboae kuery ma huvixavea py jogueraa. Ha'e vy aipoe'i ixupe:

— Oreruvixa Dario, terekove raka'e rã peve.

⁷ Repenaa py huvixa orekuai va'e ha'e javi, tetã ha'e estado re ropena va'e, huvixa mboae ha'e ronhomongeta va'ety kuery rojerure ndee oreruvixa remombe'u uka aguã peteĩ ayvu, po ramigua rejapo uka aguã: Avakue ha'e javive ma trinta ára peve ojerure e'y' aguã nguete va'e pe rei, neĩ avakue va'e pe rei, ha'e rã ndevy pe anho. Ha'e rami e'y' rã ndee oreruvixa remombo 'rã vykua guary ikuaiia py.

⁸ Ha'e gui a'y ma ndee oreruvixave, embopara uka ke ndeayvu, nderery emoĩ guive avave rei oguerova e'y' aguã, mba'eta Média ha'e Pérsia pygua kuery pegua lei ma oguerova pyrã e'y' ae — he'i okuapy.

⁹ Ha'e rami rã huvixave Dario ma ha'e va'e ayvu ombopara uka, guery omoĩ guive.

¹⁰ Ha'e gui Daniel ma ombopara ha'e guery omoĩ maa oendu vy ngoo py ranhe oike. Ha'e rami vy opy ja'o yvate oĩ va'e py oo, okẽ'i Jerusalém katy ojepe'a va'e oĩa py. Ha'e py ma ára nhavõ mboapykue kuerei 'rã guenapy'ã re oĩ. Ha'e py ae onhembo'e oiny ha'e oguerovy'a nguete, jepiaty rami ae.

¹¹ Ha'e ramo ha'e va'e avakue jogueraa vy oexa okuapy Daniel nguete pe onhembo'e ha'e ojerure oiny rã.

¹² Ha'e rami vy huvixavea py ju oo vy huvixave omoma'endu'a oayvu omombe'u uka va'ekue re. Ha'e vy aipoe'i ixupe:

— Oreruvixa, nerembopara ukai ri ty'y ha'e javive avakue nguete va'e pe rei e'y' vy avakue pe ojerure ramo vykua guary ikuaiia py omomboa aguã, ha'e rã ndevy pe anho?

Huvixave ombovai:

— Ha'e va'e ayvu ma anhetẽ, Média ha'e Pérsia pygua kuery pegua lei oguerova pyrã e'y' ae — he'i.

¹³ Ha'e ramo ha'e kuery aipoe'i huvixave pe:

— Ha'e gui Oreruvixave, Judá gui escravo-rã heru pyre Daniel ma nanemboetei, neĩ ayvu remopara uka va'ekue guive ndojapoi. Ha'e rami 'rãgue py ára nhavõ mboapykue kuerei 'rã ojerure oikovy — he'i okuapy.

¹⁴ Ha'e nunga huvixave oendu vy onhemboaxy ete vy ha'e ae onhembopy'a Daniel ogueraa jepe aguã re. Ha'e vy kuaray oike peve onhea'ã teĩ oikovy ogueraa jepexe vy.

¹⁵ Ha'e ramo ha'e va'e avakue ma huvixavea py ojevvy vy aipoe'i okuapy ixupe:

— Ha'e rami avi Oreruvixa, ndeayvuague ma Média ha'e Pérsia pygua kuery pegua lei oguerova pyrã e'y' ae. Ha'e nunga rupi nda'evei ae oaxa rive aguã — he'i okuapy.

¹⁶ Ha'e ramo mae ma huvixave ijayvu Daniel heru ha'e omomboa aguã vykua guary ikuaiia py. Huvixa aipoe'i Daniel pe:

— Tove nderuete renhe'ẽ rendu reikovy va'e tandereraa jepe — he'i.

† 5:28 Ayvu *mene, mene, tequel ha'e parsim* he'ia ma "Oipapa, oipapa, opeja ha'e omboja' o'lea. Ha'e gui Média ha'e Pérsia pygua kuery ma Babilônia pygua kuery rovaigua ikuai raka'e.

¹⁷ Ha'e gui ma peteĩ ita oguerua vy omboty guary ikuaiã rokê. Ombojaague py ma huvixave okuã regua py ae hery omoĩ, ixupegua yvatekueve voi ha'e rami ae avi ojapo okuapy, Daniel oguenoëa e'ỹ aguã ha'e gui.

¹⁸ Ha'e gui huvixave ngoo katy oo vy okaru e'ỹ re oaxa pytũ, guenonde mba'epu ndogueru rukai guive. Ndoke kuaavei ae.

¹⁹ Ha'e gui ma ko'ê aje'ive'i reve huvixave ovy vy onha ovy vvykua guary ikuaiã katy.

²⁰ Ha'e py ovaẽ vy Daniel pe ojapukai nda'evei ete reve. Po rami huvixave ijayvu Daniel pe:

— Daniel, Nhanderuetete oikove va'e rembiguai, nderuetete renhe'ê rendu va'e nda'u ndereraa jepe ri ra'e guary kuery gui?

²¹ Ha'e ramo Daniel ombovai huvixave pe:

— Xeruvixa, tereikove riael!

²² Xeruetete ma ojea pygua anjo ombou va'ekue guary kuery juru omboty aguã xere ojapo vai e'ỹ aguã, henonde ojevavy e'ỹ va'e aiko ramo. Ndee xeruvixa rovai voi xee ndajapo vai mba'eve — he'i.

²³ Ha'e ramo huvixave ovy'a ete vy vvykua gui oguenoë uka. Ha'e gui Daniel oguenoëa ramo nei peteĩ henda py ma voi hexe ndojouai guary raigua, nguuetete re ojerovia ramo.

²⁴ Ha'e ramo huvixave ma teĩgue ju ijayvu vy ogueru ruka avakue Daniel re ijayvu rei va'ekue. Ha'e ramo vvykua guary kuery ikuaiã py omombo ukapa, ta'y kuery ha'e ta'yxy kuery reve. Ha'e gui vvy py ovaẽ e'ỹ re guary kuery ojukapa, ikãgue omopẽmba guive.

²⁵ Ha'e ramo huvixave Dario ombopara heta regua kuery pe, amboae regua ha'e ayvu mboae py ijayvu va'e vvy jave re ikuai va'e pe. Ha'e vy aipoe'i: “Toĩ peẽ kuery re pendekuai porã aguã!”

²⁶ Xee ma po rami ajapo uka: Apenaa ha'e javi rupi avakue oryryipa reve tojererokyje Daniel ruete renonde. Mba'eta ha'e va'e tuuete anho ma oikove va'e, raka'e rã peve oiko va'erã guive. Ipo'akaa ma nombovaipaa'i rã, openaa ma ndopai rã.

²⁷ Ha'e ma joepý ha'e jogueraa jepe rã. Yva ha'e vvy re ojapo avi rã hexa pyrã ha'e nhomondyipaara, he'i.

²⁸ Ha'e rire Daniel ma huvixave Dario oĩa pukukue re oiko porã ae tema, ha'e gui Pérsia pygua huvixa Ciro oĩ jave voi.

7

Irundy mymba Daniel oexa ra'uaque

¹ Peteĩ ma'etý re ma Babilônia pygua huvixave Belsazar oĩ jave Daniel ngupa rupi itui vy oexa ra'u peteĩ. Ha'e rami vy oexa ra'u va'ekue ombopara vyvoi, omombe'upa.

² Daniel ijayvu vy aipoe'i:

— Ha'e gui pyávý xevy pe oexa ukaa rã aexa ra'u irundy henda gui vvytu oipeju va'e ye'ê tuvixa va'e omomyimba rã.

³ Ha'e gui ye'ê gui oẽ jogueruvy irundy mymba tuvixa va'e joo ramigua e'ỹ-e'ỹ.*

⁴ Jypygua ma guary rami ojekuaa, taguato pepo rami ipepo va'e guive. Xee ama'ẽ rã ipepo oguereko va'ekue omboipaa. Ha'e vy vvy gui omopu'ã imo'amy ipy moko'i re, ava rami ae. Ixupe ome'ëa avi ava rami hi'arandu aguã.

⁵ Ama'ëve tema. Ha'e vy ma mokoĩa mymba ju aexa, kaguare-jagua ramigua. Ha'e va'e ma opy jovaive re opu'ã ovvy. Ojuru py ma guaĩ re ogueru mboapy inharukãgue. Ha'e rã ixupe aipo'ea: “Epu'ã ke, he'u porã xo'o”, 'ea.

⁶ Ha'e va'e rire ama'ëve tema. Ha'e vy amboae ju aexa xivi pytã ramigua. Ha'e va'e kupe re ma irundy guyra pepo oĩ. Ha'e va'e mymba ma inhakã irundy va'e. Ixupe ome'ëa joe ipo'aka aguã.

⁷ Ha'e va'e rire ama'ëve tema pyávý aexa va'e re. Ha'e vy mymba irundya ju aexa nda'evei ete va'e, nhomondyiarã ha'e imbaraete vaipa va'e. Haĩ ma tuvixa va'e, ferro guigua meme. Nhomondoropa, nhomboa'ypa, ha'e rã hembyrekue re ma opyrõmba rã. Mymba kuery mboae ojekuaa ma va'ekue rami e'ỹ ojekuaa va'e, dez hakua va'e guive.

⁸ — Hakua ikuai va'e re xee aikuaa pota vy aexa mbyte gui hakua kyr'i va'e ju oẽ oiny rã. Ha'e va'e renonde gui ma mboapy hakua jypy guare omboia. Ha'e va'e hakua re ma oĩ hexa ava rexa ramigua, ha'e rã ojuru py ma onhemboyvatea rupi ijayvu.

⁹ — Ama'ëve tema vy aexa tenda omoĩa rã huvixa kuery opena atyrã. Ha'e va'e áry ma Jypy'i guive guare ranhe oguapy oiny. Ijao ma yro'y rami xiĩ va'e. Hi'a inhakã regua ma vexe'i rague rami ete. Henda ma tata rendy, iruéra ikuai va'e voi hendy oiny.†

¹⁰ Henonde gui ma tata oẽ ovvy yakã rami. Henonde ma heta ete ikuai ixupegua kuery, jaipapapa aguã rami e'ỹ. Ha'e gui ma nhomboayvu va'erã kuery ju oguapypa. Oipe'aa avi kuaxia para ikuai va'e.*

¹¹ Ha'e ramo ama'ëve tema vy hakua oẽ va'ekue aendu onhemboyvate etea rupi ijayvu rã. Ama'ẽ vy aexa mymba ojukaa rã. Ha'e gui he'õgue ma ombovaipaa vy tata py omombo okaipa aguã.

¹² Ha'e gui mymba kuery mboae gui ma oipe'aa ipo'akaague. Ha'e rami teĩ ha'e kuery pe ome'ëa avi ikuave ranhe aguã, oa'angaague ára ovaẽ e'ỹa ja.

* 7:3 Apocalipse 13.1 py oĩa rami mymba ye'ê gui oo va'e oexa. Ha'e gui amongue py “Ye'ê” he'ia py Nhanderuetete rovai opu'ã va'e kuery re ijayvu vy (Isaías 57.20-21). † 7:9 Apy ma ijayvu Nhanderuetete renda oexa ukaague re. Karõxa'i tata rendy ramigua ojekuaa, iruéra va'e (Ezequiel 1). * 7:10 Apocalipse 20.12

¹³ — Pyávý oexa ukaa va'e re ama'ê ajupy vy peteî ju aexa arai reve yva gui ou ramo, ava ra'y rami ojekuaa va'e. Ha'e va'e ma Jypy'i guive guare oía py oo ramo omonhemboja. ‡

¹⁴ Ombopo'aka ha'e omboyvate ete huvixave oî aguã, ixupe heta ikuai aguã, amboae regua kuery ha'e ayvu mboae py ijayvu va'e guive. Ipo'akaa ma opa va'erã e'ÿ, ndoaxai 'rãe, openaa nombovaipaai 'rã guive.*

¹⁵ — Ha'e gui xee Daniel ma xepy'a py aendu xenhe'ê onhemondyi rã, xeke rupi aexa va'ekue nda'ëvei rei ramo.

¹⁶ Ha'e gui ma ha'e'î py ikuai va'e regua peteî re anhemboja vy ixupe ajerure ha'e nunga ha'e javi omombe'u porãe aguã re. Ha'e ramo po rami omombe'u xevy, ha'e nunga mba'erã paa omombe'u porãe vy.

¹⁷ Mymba tuvixakue irundy aexa va'ekue ma irundy huvixaverã vvy gui oê ouvy va'erã.

¹⁸ Ha'e rami teî Yvate ete va'e peguaiky'a e'ÿ va'e kuery pe 'rã ome'ê ipo'aka aguã. Ha'e rã ha'e kuery ma ipo'aka riae 'rã raka'e rã peve.

¹⁹ Ha'e gui mymba irundya va'e reko ju aikuaa porãvexe. Ha'e va'e ma amboae kuery ramigua e'ÿ, mba'eta nhomongyje ete va'e, ha'i ferro guigua va'e, ipoapê overa va'e guigua, nhomondoropa, nhomboaypa ha'e hembyrekue re opyrõmba va'e.

²⁰ Ha'e gui ma inhakã re dez hakua oî va'ekue reko aikuaaxe avi, amboae ju oê va'ekue guive, ha'e va'e renonde mboapy oitya va'ekue. Ha'e va'e hakua re ma hexa oî, ha'e ojuru py ojejou porã reia rupi ijayvu, ha'e aexa rã jypy guare kuery gui imbaraeeteve va'e.

²¹ Ama'ê vy aexa rã ha'e va'e hakua maiky'a e'ÿ va'e kuery rovai opu'ã vy ipo'aka ete ha'e kuery re,*

²² Jypy guive guare ou peve. Ha'e va'e ma ou vy oepy 'rã Yvate ete va'e peguaiky'a e'ÿ va'e kuery. Ha'e gui ovaê 'rã ha'e kuery ju ipo'aka aguã rã.

²³ — Ha'e ramo anjo aipoe'î: “Irundya mymba ma irundya ae 'rã ipo'aka vvy re. Ha'e va'e ma amboae po'akaague rami e'ÿ 'rã ipo'aka. Ha'e vy omondoropa 'rã vvy jave re ikuai va'e, opyrõmba ha'e omboaypa 'rã.

²⁴ Ha'e gui dez hakua ikuai va'e ma dez huvixave ikuai va'erã ha'e va'e jave py ae. Ha'e va'e kuery oxapa ma rire amboae ju 'rã oiko. Ha'e va'e ma jypy guare rami e'ÿ va'e vy oity 'rã mboapy huvixa.*

²⁵ Yvate ete va'e re voi ijayvu vai 'rã, ixupeguaiky'a e'ÿ va'e kuery ojavvyky rei 'rã guive. Oguerova 'rã mba'emo ojapoaty ára ha'e lei. Ipo py ma peteî ma'etÿ re omboaxapaa 'rãiky'a e'ÿ va'e kuery, ha'e gui mokoî ma'etÿ re ju, irundya ma'etÿ mbyte peve.§

²⁶ Ha'e rami teî ha'e va'e rire ma nhomboayvu va'erã kuery ou vy oipe'a 'rã ipo'akaague. Ha'e rami vy omomba ha'e omokanhy 'rã raka'e rã peve guarã.

²⁷ Ha'e gui ma Yvate ete va'e peguaiky'a e'ÿ va'e kuery pe ju ome'ê 'rã ipo'aka aguã yva guy ha'e javi rupi ikuai va'e re. Ha'e kuery pe ome'ê avi 'rã opena ha'e yvateve aguã. Mba'eta Yvate ete va'e ma raka'e rã peve 'rã ipo'aka. Ixupe ma ha'e javi regua 'rã ikuai, onhe'ê rendu pavê 'rã okuapy”, he'î.*

²⁸ — Ha'e rami py opa aexa ha'e aendu va'ekue. Ha'e gui xee Daniel ma nda'ëvei rei ete ranhe aiko, xerova voi xiimba rei. Ha'e rami teî ha'e nunga ha'e javi amoî porã herekovy xepy'a re.

8

Vexa'î ava ha'e kavara tuja oexaague

¹ Mboapy ma'etÿ re ma huvixave Belsazar oî jave xee Daniel peteî ju aexa ra'u, jypy'i aexa ra'u va'e rire.

² Ha'e gui aexa ra'u vy Susã tetã ikorapa va'e py merami aiko, Elão vvy re. Ha'e vy ama'ê rã Ulai yakã vvy'iry merami ha'ã.

³ Ha'e gui ama'ê vy peteî vexa'î ava aexa yakã rembe re hi'aí va'e. Ha'e va'e ma mokoî hakua va'e. Ha'e gui mokoî hakua oguereko va'e ma yvate ovy va'eri peteî ma amboae gui yvateve. Ha'e rami vy takykue yvate ovy va'e ma yvateve.

⁴ Aexa rã vexa'î ma guakua py jopyxo oikovy kuaray oikea katy, ijapu'a'ia katy ha'e ipuku-a katy guive. Ha'e va'e re ma peteîve mymba ikuai va'e nda'ipo'akai, ipo'akaa gui ndoo jepe kuaai guive. Ha'e rami vy ha'e ae oipotaa rami ojapo oikovy, imbaraeeteve tema ovy guive.

⁵ Xee aexa pota vy peteî aexa kavara tuja, kuaray oikea katy gui ou oiny rã. Vvy jave áry rupi ou va'eri vvy re opyrõ vy e'ÿ. Ha'e va'e kavara ma peteî guakua oguereko ngova mbyte re.

⁶ Kavara ma vexa'î hakua mokoî va'ea katy oo oiny, yakã rembe re hi'aí rã aexa va'ekuea py. Ha'e vy onha ovy opo'akaa rupi ipoxy reve.

⁷ Aexa rã vexa'ia py ovaê vy ixupe ipoxy etea rupi ombota. Ha'e vy omopê hakua mokoîve. Ha'e rã vexa'î ma na'imbaraeetevei hexe opu'ã aguã. Ha'e ramo kavara oity vvy rupi, opyrõmba hexe. Jipoî avi ipo'akaa gui vexa'î reraa jepearã.

⁸ Kavara ma ipo'akave ete. Ha'e rami teî onhemombaraeeteve pyve hakua tuvixa va'e omopêa. Hakua opêague gui irundy ju oê tuvixa va'e. Ha'e va'e nunga joa katy e'ÿ-e'ÿ oje'oi irundy henda vvytu oipejua katy.

⁹ Hakua ikuai va'e regua peteî oî hakua kyri'î va'e. Ha'e va'e ma imbaraeete ete oiny kuaray puku-a yke katy ha'e kuaray oêa katy, vvy porãa katy guive.

‡ 7:13 Mateus 24.30 ha'e 26.64 py oía rami oexa Jesus Cristo Ava ra'y ojeapo va'ekue ipo'aka aguã ou ramo (Apocalipse 11.15, 14.14). * 7:14

Mateus 24.30, 26.64; Marcos 13.26, 14.62; Lucas 21.27; Apocalipse 1.13, 14.14 * 7:21 Daniel 8.24, 11.33; Apocalipse 13.7 * 7:24 Apocalipse

17.12 § 7:25 Apy ma três anos e meio re ijayvu (Daniel 12.7; Apocalipse 11.2-3, 12.14). * 7:27 Apocalipse 11.15

¹⁰ Yvate ete vy opuity yva pygua kuery po'akaa peve. Ha'e vy oity yva pygua regua vvy rupi, amongue regua jaxy-tata guive. Ha'e vy opyrõmba.

¹¹ Tá, yva pygua ruvixa rami ete onhemboyvate vy omomba ixupe guarã oapy jepiaty va'e. Ixupegua ooiky'a e'ÿ va'e voi oity vvy katy.

¹² Onhe'ẽ raxavea py hakua va'e pe yva pygua kuery omboaxapaa, mba'emo ome'ẽ jepi va'e regua guive. Ha'e ramo oity vvy rupi anhetẽ va'e ae, mba'emo ojapo va'e ha'e javi oiko porã guive.

¹³ Ha'e va'e rire aendu iky'a e'ÿ va'e kuery regua peteĩ ijayvu rã. Ha'e rã amboae iky'a e'ÿ va'e aipoe'i:

— Araka'e peve nda'u oĩ 'rã oexa ra'u pyre ojeupitypa aguã, mba'emo ome'ẽ jepi va'e ha'e onhe'ẽ raxavea py nhomombaarã va'e regua? Mba'eta oexa ra'ua ague rami vy ooiky'a e'ÿ va'e omboaxaa 'rã, yva pygua kuery guive, opyrõmbaa aguã — he'i.

¹⁴ Ha'e ramo xe vy pe ju ombovai:

— Dois mil e trezentos ka'aru ha'e ko'ẽ jevy peve 'rã oo. Ha'e rire ma oo iky'a e'ÿ va'e oiky'a'oa ju 'rã — he'i.

¹⁵ Ha'e ramo xee Daniel aikuaaxe aexa ra'u va'ekue mba'erã paa. Ha'e rã peteĩ ou xea py ava rami hova va'e.

¹⁶ Ha'e gui peteĩ ava aendu Ulai yakã rembe gui ijayvu nhendu rã. Ha'e va'e ma oiapukai vy aipoe'i:

— Gabriel, upe va'e pe eikuaa uka na oexa ra'u va'ekue mba'erã paa — he'i.

¹⁷ Ha'e ramo xee aĩa katy'i ou. Ovaẽ ramo xee akyje. Ha'e vy xerenapy'ã re aĩa, xerova vvy re amovaẽ reve. Ha'e rami teĩ aipoe'i xe vy:

— Ava ra'y, endu kuaa ke, mba'eta rexa ra'u va'ekue ma opaa pyguarã — he'i.

¹⁸ Xereve ijayvu ramo ha'a vy ndaikuaavei ranhe ajupy, xerova vvy re amovaẽ reve. Ha'e ramo xere opoko reve xemopu'ã imo'amy xe'aĩague py.

¹⁹ Ha'e vy aipoe'i:

— Ne'exa, ndevy pe xee aikuaa uka ta poxya opaa ára py mba'emo oiko va'erã. Mba'eta rexa ra'u va'ekue ma opaa pyguarã.

²⁰ Vexa'i ava hakua mokoĩ va'e rexa va'ekue ma Média ha'e Pérsia pygua huvixave.

²¹ Ha'e rã kavara tujá hague vuku va'e ma Grécia pygua huvixave. Hova mbyte re hakua tuvixa va'e oĩ va'e ma jypygua huvixave.

²² Ha'e va'e omopẽa ague gui irundy ju oẽ va'e ma irundy huvixave ha'e va'e regua ae. Ha'e va'e kuery opu'ã avi 'rã teĩ jypygua imbarateague rami ha'e kuery imbarate va'erã e'ÿ ta'vy.

²³ Ha'e rã ha'e va'e huvixave kuery openaa ára opa ramo, ha'e anhetẽ rupi e'ÿ ikuai va'e opa ma ramo peteĩ ju opu'ã 'rã huvixave ipoxy ete reve, nhombotavy kuaapa va'e.

²⁴ Ha'e va'e ma ipo'aka ete 'rã, va'eri ha'e ae opo'akaa rupi e'ÿ guive. Opa rupi ombovaipa 'rã oikovy mba'emo, ha'e imbarateve ovy vy ojapoxea rami rei 'rã ojapo. Ojukapa 'rã ipo'akakueve va'ekue, iky'a e'ÿ va'e kuery guive.

²⁵ Ijapua rupi onhemo'arandu oikovy vy ojapo 'rã apu ipo'akave aguã rami. Opy'a py onhemboyvate 'rã, ha'e mbovy e'ÿ ojuka 'rã ikuai rive'i va'e. Opu'ã 'rã yvatekueve re Ipo'aka va'e rovai. Ha'e rã omopẽa 'rã avakue po'akaa py e'ÿ ta'vy.

²⁶ Ka'aru ha'e ko'ẽ rã guarã rexa va'ekue amombe'u porãvea ma anhetẽ va'e meme. Ha'e rami teĩ emoĩ porã rexa va'ekue, mba'eta heta ete ára guarã teri — he'i.

²⁷ Ha'e gui ma xee Daniel xekangy vy mbovy ára rei e'ÿ xemba'eaxy. Ha'e gui apu'ã ju vy apena aikovy huvixave pegua ikuai va'e re. Aexa ra'u va'ekue gui anhemondy'i rei aikovy, oikuaa ete va'erã jipoi ramo.

9

Guetarã kuery re Daniel ojerureague

¹ Peteĩ ma'etỹ re ma Média pygua Assuero ra'y Dario oĩ jave caldeu kuery ruvixa,

² ha'e va'e ma peteĩ ma'etỹ re ma opena jave xee Daniel aikuaa mbovy ma'etỹ re pa Jerusalém tetã ombovaipa pyre opyta 'rãa, kuaxia para profeta Jeremias pe SENHOR ijayvuague oĩa rami vy. Ha'e rami vy setenta ma'etỹ 'rãa aikuaa.*

³ Ha'e nunga rupi SENHOR Nhanderuetea katy ama'ẽ reve anhembo'e ha'e ajerurea rupi aeka aguã, akaru e'ÿ re, ao voxa gui guare py anhemonde ha'e tanhimbu xejee amongure-ngure reve guive.

⁴ Ha'e rami vy anhembo'e SENHOR xeruete pe. Anhemombe'u vy aipoe'a:

— Xe-SENHOR! Xeruete ndepo'akapa ha'e okyjevpevy va'e, ndereve guarã rejapo va'ekue rupi reiko va'e, renhomboaxya re ndeayvuague re nderexarai e'ÿ va'e.

⁵ Ore kuery ma rojejavy, teko vai rojapo. Orereko vaia rupi orekuai, orekuai vaikue rei nderovai, rejapo uka va'ekue ha'e ndereve guarã rejapo va'ekue gui rojepe'apa vy.

⁶ Nerebiguai profeta kuery re ndorojapyxakai guive, ha'e kuery nderery rupi ijayvu teĩ oreruvixa kuery pe, yvatekueve, oreru kuery ha'e vvy jave re ikuai va'e pe guive.

⁷ SENHOR, ndere ma oĩ teko porã. Ha'e rã orere ma oĩ roxĩmbaa rive oĩ, aỹ ojekuaa rami. Mba'eta ore Judá pygua avakue ha'e javi re oĩ, Jerusalém py orekuai va'ekue re, Israel kuery ha'e javi, ha'e'i rupi ha'e

* 9:2 Apy 70 ma'etỹ re ijayvu (Jeremias 25.11-12, 29.10). Mba'eta Jerusalém pygua kuery SENHOR pe ojevavy ramo ombovaipa uka tetã (2 Crônicas 36.11-21).

momyry orekuai va'e, yvy jave re mamō rā rei oremomboague rupi orekuai va'e re guive oī roxĩmbaa, ha'eve'ya rami nderovai orekuaiague re.

⁸ SENHOR, orere ma roxĩmba reia oī, oreruvixa kuery re, yvatekueve ha'e oreru kuery re, nderovai rojevavyppa rire.

⁹ Ha'e rā SENHOR Oeruete, ndere ma oī oremboaxy ha'e oreperdoa aguã, mba'eta ndere ore kuery ropu'ã rei.

¹⁰ SENHOR Oeruete, ndorojapoi ndeayvua, ndeguigua lei rupi ndorekuai vy, nerembiguai profeta kuery rupi orerekorã reja va'ekue ri.

¹¹ Tá, Israel kuery ha'e javive ma ndeguigua lei ndojapoi okuapy, ojepe'apa guive ndeayvu oendu e'ỹ aguã. Ha'e nunga rupi ae orere ayvu vai ou nderovai rojevavya re. Mba'eta Oeruete, nerembiguai Moisés lei ombopara va'ekue re oĩa rami vy ae oiko mba'emo vai.*

¹² Mba'eta ndee rejapo ndeayvu ojeupitypa aguã rami, orerovai ha'e oreruvixa oremboayvu va'ety kuery rovai ndeayvuague. Ha'e rami vy mba'emo vai ete rembou ore'áry. Mba'eta yva guy jave rupi oiko va'e'ỹ teri Jerusalém tetã re oiko va'ekue ramigua.

¹³ Moisés rupigua lei re oĩa rami vy ha'e ramigua ete ou ore'áry. Ha'e rami teĩ ore ma ndee SENHOR Oeruete pe ndorojerurei rokuapy orepetyvõ aguã, orereko vaia gui rojeko rerova aguã, neĩ ndeguigua anhetẽ va'e rupi orekuai aguã.

¹⁴ Ha'e nunga rupi ae SENHOR, renhembopy'aague rami vy rembou ore'áry. Mba'eta ndee SENHOR Oeruete ma ndereko porã ete va'e opa mba'e rejapoa py. Ha'e rā ore ma noronhe'ẽ rendui.

¹⁵ SENHOR Oeruete, anhetẽ Egito yvy gui ndevyguia kuery renoẽ raka'e ndepo'akaa rexa uka vy, nembote pavẽ aguã rami rejapo aguã guive, aỹ peve ojekuaa rami. Ha'e rā ore ma rojevavy, ha'eve'ya rami ete orekuai.

¹⁶ SENHOR, opa mba'e py ndereko porã rupi eipe'a nho ke ndepoxya ha'e ndevaia ndevyguia tetã Jerusalém ha'e ndevyguia yvyty iky'a e'ỹ va'e re rembou va'ekue. Rojevavy ha'e oreru kuery voi heko vai rire orea katy'i rupi ikuai va'e ojojai okuapy Jerusalém tetã, ore ndevyguia kuery guive.

¹⁷ Ha'e gui aỹ ma Oeruete, xee nerembiguai anhembo'e ha'e ajerure ramo endu. Ha'e vy SENHOR, ndeporayvua rupi vy tove nderova tomoexakã ju ndevyguia oo iky'a e'ỹ va'e ombovaipa pyre áry.

¹⁸ Xeruete, ejapyxaka ke ha'e endu. Eipe'a nderexa, ha'e ema'ẽ orekuai axya re, tetã nderery oĩa re guive, mba'eta ore kuery ma ore ae reko porã rupi e'ỹ rojerure nerenonde ha'e rami, ha'e rā ndee renhomboaxy ete va'e ramo anho.

¹⁹ SENHOR, endu ke. SENHOR, oreperdoa ke. SENHOR, eikuaa pota orere, ha'e orepetyvõ. Xeruete, emboare eme guive, ndee ae renhembote uka aguã. Mba'eta ndevyguia tetã ha'e ndevyguia kuery re ma nderery oī — he'i.

Setenta vezes sete ma'etỹ re ijayvuague

²⁰ Ha'e rami xeyvuu ainy, ha'e anhembo'e vy amombe'u ainy xee ae ajevyvyague, xeretarã Israel kuery ojevavyague guive. Ha'e vy SENHOR Xeruete renonde ajerure ainy Xeruete pegua yvyty iky'a e'ỹ va'e re.

²¹ Xee xeyvuu ha'e anhembo'e teri ainy reve axa rami aexa ra'u yvy va'ekue ou pojava, Gabriel hery va'e. Oeve ouvy vy opoko xere. Ha'e rami oiko ka'arukuegua ome'ẽa jave.

²² Ha'e va'e ma xereve ijayvu xembo'e vy. Ha'e vy aipoe'i:

— Daniel, aỹ ma apy aju, ndevy pe amombe'u porãve aguã ha'e nunga mba'erã paa.

²³ Rejerure pyy ramove xemboua. Ha'e ramo xee aju amombe'u aguã ndevy, hayvupy ete reiko ramo. Ha'e ramo eikuaa pota ha'e nunga re, mba'emo rexa va'ekue reikuaa aguã.

²⁴ — Setenta vezes sete ma'etỹ teri oata neretarã kuery ha'e peneretã iky'a e'ỹ va'e renonderã oa'angaague, teko vai ombombaa aguã, ojevavy opa aguã, ojapo vaiague gui oiky'a'oa aguã, teko porã opa e'ỹ va'e oguerua aguã, oxa ra'u pyre ha'e profeta kuery ijayvuague ojeupitypa aguã, ha'e Iky'a e'ỹ ete va'e huvixarã omoĩa aguã.†

²⁵ Endu ke ha'vy reikuaa porã aguã. Jerusalém tetã omoatyrõa ha'e ojapopaa ju aguã re ijayvua ára guive huvixarã Omoĩ mbyrã oiko peve ma sete vezes sete ma'etỹ oiko 'rã, ha'e gui sessenta e duas vezes sete ju.‡

Tape ikuai va'e ha'e tetã kora ma teĩgue ju 'rã omoatyrõmbaa, ikuai axy ete ma jave ta'vy.

²⁶ Ha'e gui sessenta e duas vezes sete ma'etỹ oaxa ma rire ojukaa 'rã huvixarã Omoĩ mbyre, ha'e ramo noĩvei 'rã ranhe. Ha'e rā huvixa oiko teri va'erã retã pyguia kuery ju ou vy ombomba 'rã Jerusalém tetã, oo iky'a e'ỹ va'e guive. Imombaarã ma yy rami 'rã ou xapy'a. Ha'e gui opaa ára peve oiko 'rã joe opu'ã va'e. Mba'emo mombaarã ou aguã va'ekue avi 'rã ou.

²⁷ Ha'e gui ha'e va'e ma heta va'e kuery reve ojapo 'rã peteĩ rami ogueruko aguã sete ma'etỹ peve guarã. Ha'e rami teĩ ha'e va'e jave mbyte py ma ha'e kuery pe nome'ẽ ukavei 'rã mymba neĩ mba'emo aju guigua.

Mba'emo ojegarupyve re 'rã ou nhombaarã, hexe ju ou peve imombaarã va'ekue.§

* 9:11 Deuteronomio 28.15-68 † 9:24 Apy "setenta vezes sete ma'etỹ" he'i, versículo 2 py setenta ma'etỹ re Daniel oikuaa potaague, ha'e va'e rire raka'eva rã guarã omombe'u vy (Levítico 25.8). Ha'e javi py ma 490 ma'etỹ oa'angaa. ‡ 9:25 Apy ma ijayvu 483 ma'etỹ re (7x7=49 mais 62x7=434). Ha'e gui versículo 27 py omombe'u porãve sete ma'etỹ opaa pyguia ju, ha'e javi vy 490 ma'etỹ ojapo aguã. Ha'e gui "Huvixarã Omoĩ mbyrã" he'ia ma Cristo re ae ijayvu vy, hebraico ayvu py "Messias" 'ea. § 9:27 Daniel 11.36 py oĩa rami ijayvu templo py mba'emo vai nhomokanhyarã ou aguã re (Mateus 24.15, Marcos 13.14).

10

Tigre yakã vyvry Daniel mba'emo oexaague

¹ Mboapy ma'etý re ma Pérsia pygua huvixa Ciro oĩ jave peteĩ ayvu oikuaa ukaa xee Daniel Beltessazar xerery mboae va'e pe. Ha'e va'e ayvu ma anhetê va'e, joe heta opu'ã aguã regua guive. Xee aendu kuaa aguã rami ayvu ou, mba'emo oexa ukaa reve.

² Ha'e va'e ára guive ma xee Daniel nda'vevei ete aiko mboapy semana re.

³ Tembi'u ha'uxe vai va'ety regua nda'uvei, xo'o neĩ vinho namoĩ xejuru py. Neĩ azeite ma voi ndaikytyi xejee, mboapy semana oaxapa peve.

⁴ Ha'e gui jypyguia jaxy vinte e quatro araa py ma Tigre yakã guaxu vyvry xee aiko vy

⁵ xerova yva vy ama'ê. Ha'e vy peteĩ ava aexa ajukue periri'i py onhemonde va'e. Ijaxy'i rupi ma ouro iky'a e'y va'e guigua oĩ, Ufaz gui heru pyre.

⁶ Hete ma itaendy berilo rami hendy. Hova ma overa va'e rami, hexa ma tataendy rami ojekuaa. Ipo ha'e ipy ma overa va'e guigua ombovera pyre rami overa rei. Ha'e rã ijayvu vy mbovy e'y ikuai va'e ayvu rami onhendu.*

⁷ Xee Daniel anho'i aexa ha'e nunga. Ha'e rã avakue xereve ikuai va'e ma mba'eve ndoexai. Ha'e rami avi ha'e kuery okyje ete aguã ou xapy'a rã onhamba, onhemimba okuapy.

⁸ Ha'e gui ma xee ae'i apyta. Ha'e rami vy aexave tema ha'e va'e iporã ete va'e ojekuaa rã. Ha'e vy naxembaraeteveia aendu. Naxembaraeteveĩ vy xerova xiigüepa rei, ha'ekue rami ve'y oĩ.

⁹ Ha'e rami teĩ aendu porã ijayvu nhendu va'e. Aendu vyve ha'a, xerova yvy re amovaẽ reve ndaikuaavei ranhe ajupy.

Daniel omombaraetea juague

¹⁰ Ha'e gui peteĩ ou vy xere opoko. Xemomy-momyĩ vy xerenapy'ã ha'e xepo re xemoĩ.

¹¹ Ha'e va'e ma aipoe'i xeivy:

— Daniel ava oayvupy ete va'e, ejapyxaka ke ayvu re ndevy pe aipoa'e rã. Epu'ã ke he'amy, mba'eta ndea py xemboua — he'i. Po rami xereve ijayvu ramo xee apu'ã ha'amy aryryipa reve.

¹² Ha'e ramo aipoe'ive ju xeivy:

— Daniel, ekyje eme, mba'eta ndepy'a re reikuaaxea remoĩ. Ha'e ramo Nderuete renonde renhemo'yvy'i pypa ára guive oendu ndeayvu. Ha'e gui ndeayvua rupi vy aeaju.

¹³ Ha'e rã Pérsia yvy re ipo'aka va'e ma xejoko ranhe vinte e um ára peve. Ha'e rami teĩ anjo yvateve va'e Miguel ou vy xepytyvõ. Ha'e ramo mae ma xepo'aka Pérsia pygua huvixa kuery re.

¹⁴ Aỹ maaju ndevy pe aikuaa uka aguã neretarã kuery opaa ára py oiko va'erã. Mba'eta mba'emo rexa va'ekue ma raka'e rã ete guarã — he'i.

¹⁵ Ha'e rami xeivy ijayvu ramo xee akyrirĩ vy ama'ê ha'amy yvy re.

¹⁶ Ha'e gui peteĩ ava ra'y ramigua opoko xejuru re. Ha'e ramo xeayvu jevy vy aipoa'e xerenonde hi'aĩ va'e pe:

— Xeruvixa, ange mba'emo aexa rire ou xere haxy va'e. Ha'e ramo naxembaraetevei ete.

¹⁷ Ha'e nunga rupi Xeruvixa, mba'exa 'rã tu ndereve SENHOR rambuguai aiko va'e xeayvu? Mba'eta xere noĩvei ete xembaraetea, neĩ xepytyvõ aguã ma voi noĩvei ma — ha'e.

¹⁸ Ha'e ramo ava ramigua va'e teĩgue ju opoko xere. Ha'e vy xemombaraeteve.

¹⁹ Ha'e vy aipoe'i:

— Ava oayvu etepy, ekyje eme. Evy'a ju. Nembaraete ke, nembaraete.

Po rami ijayvu ramove xembaraete. Ha'e vy aipoa'e:

— Xeruvixa, ndeayvu ke aỹ, xembaraete ju rire — ha'e.

²⁰ Ha'e ramo aipoe'i:

— Reikuaa pa mba'e re paaju ndea py? Mba'eta aa ju ta Pérsia pygua huvixa re apu'ã aguã. Ha'e gui xee aa ma rire Grécia pygua huvixa ju 'rã ou.

²¹ Ha'e rã ndevy amombe'u porãve 'rã ipara re anhetê va'e oĩa rami. Ha'e gui ha'e va'e kuery rovai apu'ãa py jipoi avave rei xereve guarã, peẽ kuery re opena va'e Miguel e'y vy.

11

Huvixa kuery kuaray ijapu'a'ia katy ha'e ipuku-a katyguia re anjo ijayvuague

¹ — Peteĩ ma'etý re ma Média pygua huvixa Dario oĩ jave xee apu'ã amombaraete ha'e amokyre'y aguã.

² — Aỹ ma amombe'u porã ta ndevy anhetê va'e. Ne'exa, mboapy huvixa teri 'rã ikuai Pérsia pygua. Ha'e gui irundya ma pavẽ gui oguerkopave 'rã. Ha'e va'e ma iporiau e'y va'e vy imbaraeteve 'rã ovy. Ha'e rami vy opa mba'e py 'rã opu'ã Grécia pygua huvixa re.*

³ Ha'e va'e rire ma peteĩ huvixa ju oiko 'rã ipo'aka va'e. Ha'e va'e ma ipo'aka etea rupi 'rã joguereko. Ha'e vy oiko 'rã ha'e ae aipotaa rami rei.

⁴ Ha'e rã ipo'akapave ma jave openaa omboja'oa, ha'e omboaxaa 'rã irundy henda vyvry oipejua katy ikuai va'e pe. Va'eri ta'y kuery pe e'y 'rã omboaxaa, ha'e ipo'akaague rami e'y ipo'aka va'e kuery opena 'rã, mba'eta ipo'akaague oipe'aa vy amboae kuery pe ju 'rã omboaxaa, ta'y kuery pe 'rãgue py.

* 10:6 Apocalipse 1.13-15 * 11:2 Apy ma omombe'u porãve ju Pérsia ha'e Grécia pygua huvixa kuery joe opu'ã aguã (capítulo 8 py voi).

⁵ — Ha'e gui kuaray puku-a katygua huvixa ma imbaraeete 'rã, peteĩ hembiguai yvateve va'e voi. Ha'e va'e ma herekoare gui voi imbaraeeteve 'rã. Ha'e vy ha'e ju 'rã oĩ huvixa, openaa tuvixa 'rã guive.

⁶ Ha'e gui oĩa ma'e'ty opaa py ma ha'e kuery onhemoirũ 'rã joe. Ha'e rami vy kuaray ijapu'a'ia katygua huvixa ma omenda 'rã kuaray puku-a katygua huvixa rajy re, peteĩ rami ikuai aguã. Ha'e rami teĩ kunha va'e ma ndajogueroko kuaai 'rã, ime voi nda'ipo'aka puku'i 'rã. Mba'eta kunha va'e ma omboaxaa 'rã jouse, heruare kuery guive, tuu ha'e ojeupe guarã heruare voi.

⁷ Ha'e rã hemiarirõ kuery va'e regua peteĩ oĩ 'rã hekovia. Ha'e va'e ma kuaray ijapu'a'ia katygua huvixa xondaro kuery re opu'ã vy oike 'rã ha'e kuery onhemiaty py. Ha'e kuery re opu'ã vy ipo'aka 'rã.

⁸ Ha'e kuery nguete ramigua ogueroko va'e ha'e javi voi ogueraapa 'rã Egitto yvy katy ojeupe guarã, mbovy e'ỹ ta'angaa mba'emo rykukue gui ojapo pyre, mba'emo hepyve va'e ha'e ouro guigua guive. Ha'e gui ma mbovy ma'e'ty re rei e'ỹ nupu'avei 'rã kuaray ijapu'a'ia katygua huvixa re.

⁹ Ha'e va'e rire mae ma ou vy opu'ã kuaray puku-a katygua huvixa re. Ha'e rami teĩ ojevy rive ju 'rã ovyv katy.

¹⁰ — Ha'e gui ma ta'y kuery ju joe opu'ã rupi 'rã ikuai. Ha'e vy mbovy e'ỹ xondaro kuery omono'õ. Ha'e kuery va'e regua peteĩ ma ou pojava 'rã. Opa marãgua ombovaipa ma vy ooove 'rã guenonde katy. Ha'e vy joe opu'ã ju 'rã ovy kuaray puku-a katygua huvixa onhemiaty oĩa peve.

¹¹ Ha'e ramo ha'e va'e ipoxy reve oo 'rã opu'ã aguã huvixa kuaray ijapu'a'ia katygua re. Ha'e rã ha'e va'e ma heta ete ogueraa 'rã hexe opu'ã aguã py teĩ hexeve oo va'ekue omboaxapaa 'rã ipo py.

¹² Huvixa kuaray puku-a katygua ma heta va'e kuery omomba vy onhemboyvate 'rã opy'a py. Mbovy e'ỹ ojuka 'rã teĩ nda'ipo'akai 'rã.

¹³ Mba'eta hexe kuaray ijapu'a'ia katygua huvixa ou jevy vy jypy guare gui hetave 'rã ogueru joe opu'ã aguã. Ha'e gui mbovy rei e'ỹ ma'e'ty opaa py ma ou pojava 'rã mbovy e'ỹ xondaro kuery ha'e mba'emo oiporu va'e'ty reve.

¹⁴ Ha'e jave ma mbovy e'ỹ 'rã opu'ã huvixa kuaray puku-a katygua re. Neretarã kuery va'e regua ojerovia rei va'e voi hexe opu'ã 'rã profeta ijayvuague ojeupity aguã rami. Ha'e rami teĩ ha'e kuery nda'ipo'akai 'rã.

¹⁵ Ha'e gui huvixa kuaray ijapu'a'ia katygua ou vy omopu'ã 'rã tetã kora áry rupi ojeupi aguã. Ha'e rami vy oipe'a 'rã tetã ikorapa va'e. Ha'e rã kuaray puku-a katygua ipo'akakueve teĩ ndojoko kuaai 'rã. Ha'e kuery va'e regua oiporavo pyre voi nda'ipo'akai 'rã ojoko aguã.

¹⁶ Ha'e nunga rupi hovaigua ou va'e ma oipotaa rami ete 'rã ojapo. Avave rei ndojoko kuaai 'rã. Yvy porãa py ma voi opyta 'rã, ipo py opa mba'e omboaxaa ramo.

¹⁷ Openaa jave rupi ojeupegua ipo'akakueve oenoĩ vy ogueru vy huvixa kuaray puku-a katygua reve ojapo 'rã peteĩ rami ikuai aguã. Ha'e rami vy ixupe ome'ẽ 'rã peteĩ kunhatai omenda aguã, ipo'akaa ombovaipa aguã. Ha'e rami teĩ ha'e nunga oaxa rive 'rã, ixupe ndovarei 'rã mba'everã.

¹⁸ Ha'e va'e rire ma ye'ẽ vy'ry ju 'rã oo joe opu'ã aguã, ha'e vy heta re ipo'aka 'rã. Ha'e rami teĩ peteĩ yvateve va'e omomba 'rã ojerovia reia. Ha'e vy ojapo 'rã ojerovia reiaque hi'áry ae ju ojeapa aguã rami.

¹⁹ Ha'e ramo ojevy rive 'rã ovyv re onhemiaty oĩ va'e katy. Va'eri onhepyxanga vy ho'a 'rã. Ha'e va'e rire ma ndojouavei 'rã.

²⁰ — Ha'e va'e rire ma hekovia oĩ ju 'rã peteĩ. Ha'e va'e ma ovyv iporãeva rupi omondouka 'rã peteĩ guembiguai imposto re rhombopagua rupi oiko aguã. Ha'e rami teĩ are e'ỹ re omomba 'rã, ixupe ivaia py e'ỹ, neĩ hexe opu'ã reia rupi e'ỹ guive.

²¹ Ha'e va'e rive ha'e va'e rekovia oĩ ju 'rã peteĩ ava heko vai ete va'e, huvixarã nomoiaĩ va'eri. Ha'e rami 'rãgue py okyriĩ reve ou vy nhemi rupi 'rã oĩ huvixarã.

²² Henonde ma xondaro kuery heta ou teĩ omokanhymba 'rã. Omomba ete 'rã, guexeve peteĩ rami omoingo va'ekue regua yvateve va'e voi.

²³ Ha'e va'e reve peteĩ rami ikuai aguã ojapoa ramive ma ombotavy 'rã. Ha'e rami vy mbovy'i reve va'eri opu'ãve vy ipo'akave 'rã ovy.

²⁴ Okyriĩ rei reve ovaẽ avi 'rã oguerokopave ete va'e rekoa rupi. Ha'e rami py ojapo vai 'rã tuu kuery ha'e tamoi kuery ojapogue ramigua e'ỹ. Ha'e rami vy mba'emo oipe'a vy omboja'o 'rã ojeupegua kuery pe, imba'e rei-rei va'ekue ha'e javi. Ha'e gui onhembopy'a 'rã oo ikorapa va'e re voi opu'ã aguã, teĩ xapy'a'i guarã rive.

²⁵ Ha'e gui onhemombaraete ha'e onhembopy'a guaxu 'rã huvixa kuaray puku-a katygua re opu'ã aguã, oxondaro kuery imbaraetekueve mbovy e'ỹ ogueraa vy. Ha'e rami teĩ nda'ipo'akai 'rã, hovai opu'ãa nhemi ramo.

²⁶ Ha'e gui ma hembu'i gui okaru va'e kuery omokanh'y 'rã. Oitypa 'rã okuapy ixondaro kuery, ha'e ramo heta ete ho'a 'rã oipyxopa rã.

²⁷ Ha'e va'e huvixa kuery mokoĩve ma mba'emo vai ojapo aguã rami anho 'rã ikuai. Peteĩ'i mesa pyve oguapya py ijapu 'rã oiny jouse. Ha'e rami teĩ ha'e nunga oaxa rive 'rã, mba'eta oa'angaague ára py ou 'rã imombaara.

²⁸ Ha'e ramo ava heko vai ete va'e ojevy 'rã ovyv katy. Oguerekopa vy ovy'a reve 'rã ou. Ha'e gui onhembopy'a 'rã omomba aguã Nhanderuete guexeve guarã ojapo va'ekue iky'a e'ỹ va'e rupi ikuai va'e, ha'e vy ojapoxea rami rei ojapo ranhe 'rã guive. Ha'e gui mae ma ojevy ju 'rã ovyv katy.

²⁹ — Ha'e gui oa'angaague ára ovaẽ ramo oo ju 'rã kuaray puku-a katygua yvy re opu'ã aguã. Ha'e rami teĩ ha'e va'e jave ma jypy guare rami e'ỹ 'rã oiko.

³⁰ Mba'eta hovai heta 'rā oo Quitim gui kanoã guaxu py. Ha'e ramo nda'ipy'a guaxuvei 'rā. Ha'e rami vy ojevy vy ipoxy 'rā Nhanderuete guexeve guarã ojapo va'ekue iky'a e'ÿ va'e rupi ikuai va'e pe. Ha'e ae oipotaa rami 'rā oiko. Ojevy ma ramo Nhanderuete guexeve guarã ojapo va'ekue iky'a e'ÿ va'e gui amongue ojepe'a ramo oguero'vy'a 'rā.

³¹ Ixupegua imbaraetekueve oo vy omongy'a rei 'rā oo iky'a e'ÿ va'e, oo yvate va'e guive. Ha'e vy ko'ê nhavõ omẽ'ê mbyrã va'ekue oipe'a vy omoĩ 'rā ojeguarupy nhomokanhya.†

³² Ombotavy 'rā Nhanderuete guexeve guarã ojapo va'ekue iky'a e'ÿ va'e gui ojepe'a va'e kuery, ijavyu porã'ia rupi rive. Ha'e rã Nguete oikuaa va'e kuery ma imbaraete vy ojapo 'rā okuapy mba'emo.

³³ Ha'e kuery va'e regua hi'arandu va'e ma ombo'e 'rā heta va'e kuery. Ha'e rami teĩ ojukaa 'rā kyxe ha'e tata py, escravo-rã ogueraa rupi, ha'e ogueraa rive-rivea rupi. Are peve 'rā ha'e nunga oiko.

³⁴ Ha'e kuery va'e regua ho'a ramo ma xapy'a'i oipytyvõa 'rā. Ha'e rã ha'e kuery re heta onhemoirũ 'rā anhetẽ rupi e'ÿ.

³⁵ Mba'eta hi'arandu va'e regua ho'a 'rā oeko a'ãa aguã, oiky'a'oa ha'e omoxiã aguã opa rã guarã, mba'eta oa'angaague ára py ha'e nunga oiko 'rãe.

³⁶ — Ha'e gui huvixa ma ha'e ae oipotaa rami 'rā oiko. Ha'e vy opu'ã vy onhemboyvateve 'rã tuuete ramigua ikuai va'e ha'e javi áry. Tuuete ikuai va'e gui Nhanderuete yvateve va'e rovai eteve voi 'rã ijavyu nda'evai etea rupi. Ha'e rami teĩ mba'emo ojapo kuaapa ranhe 'rã, ixupe ipoxya aguã ojeupity peve. Mba'eta hexe ijavyuague oiko 'rãe.‡

³⁷ Ha'e va'e ma nombotei 'rã ngu u kuery ruete, neĩ kunhague ojou porãve va'e, neĩ tuuete ramigua va'e rei guive, pavẽ áry onhemboyvate va'e vy.

³⁸ Tuuete ramigua ikuai va'e omboete 'rãgue py omboete 'rã imbaraete va'e ruete ramigua anho, ha'e nunga tuuete ma tuu kuery ndoikuai va'ekue ri. Ouro py 'rã ombojerovia, prata py, ita hepyve va'e ha'e mba'emo iporãve va'e py guive.

³⁹ Ha'e gui amboae regua ruete pe onhepytyvõ uka vy opu'ã 'rā oo ikorapa va'e re. Ha'e gui amongue omovaẽ porã ramo omboete uka ete 'rã. Ha'e vy omoĩ 'rã mbovy e'ÿ re ipo'aka aguã, ha'e kuery pe omboja'o 'rã guive yvy.

⁴⁰ — Ha'e gui opa aguã ára ovaẽ ramo hexe opu'ã 'rã huvixa kuaray puku-a katygua. Huvixa kuaray ijapu'a'ia katygua voi opu'ã 'rã hexe karóxa ha'e kavaju árygua kuery reve, ha'e mbovy e'ÿ kanoã guaxu py ikuai va'e reve. Heta yvy re ha'e kuery ovaẽ vy omonyẽmba 'rã, ha'e gui amboae katy ju 'rā oo.

⁴¹ Yvy porãa re voi ovaẽ avi vy heta 'rā oity. Ha'e rã ipo'akaa gui amongue oo jepe 'rã, Edom, Moabe ha'e Amom pygua yvatekueve anho.

⁴² Heta yvy áry oupi 'rā opo. Egito yvy re ikuai va'e voi ndoo jepel 'rã.

⁴³ Oipe'apa 'rā ouro ha'e prata guigua, hepykueve Egito yvy re ikuai va'e guive. Líbia ha'e Etiópia pygua kuery voi oje'oi 'rã hembiguairã.

⁴⁴ Ha'e rami teĩ kuaray oua katy ha'e ijapu'a'ia katy gui mba'emo omombe'ua rã oendu vy onhemondyi 'rã. Ha'e vy oo ve ju 'rã ipoxy reve, mba'emo ombovaipa ha'e ojuka reta aguã.

⁴⁵ Ha'e rami vy ye'ẽ pa'ũ py oupi 'rã ngoorã tuvixa ete va'e, yvyty porã iky'a e'ÿ va'e rovai. Ha'e rami teĩ ovaẽ 'rã imombaã, ha'e ndoikoi 'rã heraa jepearã.

12

Opaa ára py guarã re ijavyuague

¹ — Ha'e va'e jave ma anjo yvateve va'e Miguel opu'ã avi 'rã, neretarã kuery repya va'e. Ha'e va'e ára ma ikuai axy ete aguã. Ha'e ramigua oiko va'e'ÿ teri, ha'e kuery va'e regua ikuai ypya ára guive ha'e va'e ára peve. Ha'e rami teĩ ha'e jave py neretarã kuery ogueraa jepe 'rã, kuaxia re hery oĩ va'e ha'e javive.

² Yvy re onhono porã mbyre heta 'rã onhemboete ju okeague gui. Amongue oo 'rã tekove marã e'ÿ oupity aguã katy, ha'e rã amboae kuery ma oximba ha'e raka'e rã peve ikuai axy aguã katy 'rā oo.

³ Arandua rupi ikuai va'ekue ma hexakã 'rã yva re ikuai va'e rami. Teko porã katy jogueraa reta va'ekue ma jaxy-tata rami 'rã hexakã riae, raka'e rã peve.

⁴ Ha'e gui ndee Daniel, emoĩ porã ha'e va'e avvu, emboja guive kuaxia mbojaa py, opaa ára py guarã. Heta oikuaa pota 'rã, ha'e oikuave 'rã oje'oivy — he'i.*

⁵ Ha'e ramo xee Daniel ama'ẽ vy mokoĩ ju aexa hi'ái va'e. Peteĩ ma yakã kyvõgua re, ha'e rã amboae ma hovaigua re hi'ái.

⁶ Ha'e kuery va'e regua peteĩ ma aipoe'i yv áry ava hi'ái va'e ajukue periri'i py onhemonde va'e aexa va'ekue pe.†

— Raka'e tu ojeupity 'rã ha'e va'e nhomondyipaarã? — he'i.

⁷ Ha'e ramo yv áry ava hi'ái va'e ajukue periri'i py onhemonde va'e ombovai rã xee aendu. Mba'eta yva re opo oiporu kuaa ha'e oiporu kuaa e'ÿa regua oupi vy oura raka'e rã peve oiko va'erã va'e rery rupi. Ha'e vy aipoe'i:

† 11:31 Apy ha'e Daniel 9.27 py "Ojeguarupy nhomokanhya" he'ia ma Jesus omombe'u porãve Mateus 24.15 ha'e Marcos 13.14 py. ‡ 11:36 Nhanderuete re ijavyu vaia re Apocalipse 13.6 py voi ijavyu avi. * 12:4 Apocalipse 10.4 py oia rami avi profeta kuery pe nomombe'u ukapaai avvu oendu va'ekue, ára novaẽ teri ramo. † 12:6 "Ava ajukue periri'i py onhemonde va'e" he'ia va'e ma Daniel oexa ma voi va'ekue (10.4).

— Ha'e nunga oiko 'rā peteī ma'etȳ, ha'e gui mokoī ma'etȳ ju, ha'e irundy ma'etȳa mbytea py. Iky'a e'ȳ va'e kuery po'akaa ombovaipaa ma jave mae ojeupity 'rā ha'e nunga ha'e javi — he'i.[‡]

⁸ Ha'e rami xee aendu va'eri naendu kuaai. Ha'e vy xee aporandu:

— Xeruvixa, opaa py ha'e nunga oiko ramo mba'exa tu 'rā oiko orere?

⁹ Ombovai:

— Tereo Daniel, mba'eta pova'e ma nomombe'u porāavei 'rā ranhe. Omoī porāa ma opaa ára peve guarā.

¹⁰ Heta 'rā oiky'a'oa, omoxiia ha'e oeko a'āa guive. Ha'e rā heko vai va'e kuery ma heko vaive tema 'rā, ha'e kuery va'e regua neī peteīve noendu kuaai 'rā. Ha'e rā 'arandua rupi ikuai va'e ma oendu kuaapa 'rā.

¹¹ Ha'e rami avi mymba ko'ē nhavō ome'ē jepiaty omombaa ma rire, ha'e ojeguarupy nhomokanhya'ā omoā ma rire mil duzentos e noventa ára ju 'rā oaxa.

¹² Ovy'a ete 'rā amongue oarō porāa rupi mil trezentos e trinta e cinco ára peve oupity va'e.

¹³ Ha'e rā ndee ma tereo tema tape reikoa va'e rupi ae, opa peve. Mba'eta repytu'u 'rā, ha'e gui opaa ára py repu'ā ju 'rā ndevyguā oī va'e rejopy aguā — he'i.

[‡] 12:7 Apy ma três anos e meio re ijayvu (Daniel 7.25 ha'e Apocalipse 12.14 py oia rami).

Oséias ayvu oĩa

Oséias ayvu oĩa

Profeta Oséias ayvu omombe'u jave ma hetarã kuery Israel regua ipo'akave ha'e heko vaive okuapy, mba'emo ra'angaa rive ombojeroviaa py. Ha'e kuery pe Oséias ijayvu ojeko rerova aguã, Nhanderuete omboypaga e'ÿ aguã. Mba'eta nhandereko vaiaty jaeja vy Nhanderuete pe jajeko me'ë ramo nhanemboaxy vy ojee nhandereru ju 'rãe.

Ayvu py anho e'ÿ Oséias oikuaa uka raka'e Nhanderuete nhomboaxya, ha'e ae oikoa py, Nhanderuete ojapo ukaague rami vy. Mba'eta "Oséias pe oayvu omombe'u uka aguã Senhor ijayvu ypy'i vy aipoe'i: 'Tereo, ndera'yxyrã eraa petei kunha itavy rei va'erã, itavy reia rupi omemy oguereko va'erã, mba'eta pendeyvy re ikuai va'e Senhor gui opoipa vy itavy rei avi okuapy', he'i!" (1.2). Ha'e ramo Oséias ha'e rami ojapo vy omenda rire ta'yxy itavy rei vy opoi ixugui.

Ha'e rami tei "Senhor aipoe'ive ju xevy: 'Teĩgue ju tereo, eayvu ju kunha neirũ oayvu va'ekue itavy rei tei. Senhor Israel kuery oayvua rami eiko, ha'e kuery nguete ramigua pe mbojape uva pirukue revegua ome'ëxe vai va'eri', he'i. Ha'e ramo xee ma xera'yxyrã ju ajogua. ... Ha'e vy ixupe aipoe'ive: 'Ha'e gui ndee ma heta ára re teri 'rã xerarõve. Ndetavy reive eme, amboae ava reve eiko eme guive. Ha'e ramo xee voi roarõ 'rã aikovy', ha'e. Mba'eta Israel kuery voi heta ma'etõ re 'rã ikuai nguvixa e'ÿ re, opena va'e e'ÿ re, Nhanderuete pe mba'emo ome'ë e'ÿ re, ta'angaarã ita omopu'ã mbyre e'ÿ re, sacerdoti pegua manto e'ÿ re, ha'e mba'emo ra'angaa oo rupi oguereko va'ekue e'ÿ re guive. Ha'e va'e rire ma Israel kuery ojevypa vy oeka 'rã okuapy Senhor nguete ha'e Davi nguvixarã. Ha'e rami vy opaa ára ha'e kuery oryryipa reve 'rã onhemboja jogueruvy Senhor re onhemboaxy uka vy" (3.1-2a, 3-5).

Profeta Oséias gua'yxy oayvu jevyague rami ae avi "Nhanderuete ma po rami oexa uka nhandarayvua: jajejavya rupi teri jaiko reve Cristo omano raka'e nhandere" (Romanos 5.8).

Oséias omenda aguã re ijayvuague Israel kuery ndojeroviaia oikuaa uka aguã

¹ Beeri ra'y Oséias pe SENHOR oayvu ombou va'ekue. Ha'e va'e ayvu ma Judá pygua huvixa kuery Uzias, Jotão, Acáz ha'e Ezequias ikuai jave ombou, Israel pygua huvixa Joás ra'y Jeroboão oĩ jave guive.

² Oséias pe oayvu omombe'u uka aguã SENHOR ijayvu ypy'i vy aipoe'ive:

— Tereo, ndera'yxyrã eraa petei kunha itavy rei va'erã, itavy reia rupi omemy oguereko va'erã, mba'eta pendeyvy re ikuai va'e SENHOR gui opoipa vy itavy rei avi okuapy — he'i.

³ Ha'e ramo oo vy gua'yxyrã ojou Diblaim rajy Gômer. Ha'e rã ha'e va'e oguereko'i vy oikuavã petei ava'i.

⁴ Ha'e gui SENHOR aipoe'ive ju Oséias pe:

— Pemboery 'rã Jezreel, mba'eta are e'ÿ re amboypaga 'rã Jeú ramymino kuery Jezreel tetã py jouguy omõague re.* Ha'e rami vy amomba 'rã Israel kuery re ipo'akaa.

⁵ Ha'e va'e ára py amopẽmba 'rã Israel kuery rapa Jezreel katy'i yvugua oĩ va'e py ae — he'i.

⁶ Ha'e gui ta'yxy oguereko'i vy kunha'i ju oikuavã. SENHOR aipoe'ive Oséias pe:

— Ha'e va'e ma pemboery 'rã Omboaxypy e'ÿ, mba'eta xee namboaxyvei 'rã Israel kuery, aperdoaa rupi ve'ÿ 'rã areko.*

⁷ Ha'e rã Judá kuery ma amboaxy 'rã. Ha'e rami vy araa jepe 'rã xee SENHOR Tuuete po'akaa rupi ae. Guyrapa rupi e'ÿ 'rã araa jepe, kyxe rupi e'ÿ, joe opu'ã rupi e'ÿ, kavaju rupi e'ÿ, neĩ kavaju árygua kuery rupi e'ÿ guive — he'i.

⁸ Ha'e gui Omboaxypy e'ÿ nokambuvei ma jave oguereko ju ava'i.

⁹ Ha'e ramo SENHOR aipoe'ive Oséias pe:

— Ha'e va'e ma pemboery 'rã Xevyguia e'ÿ, mba'eta xevyguia e'ÿ peẽ kuery pendekuai, ha'e xee voi Penderuete e'ÿ 'rã aiko.

¹⁰ Ha'e rami avi Israel kuery ma ye'ë rembe rupi ita ku'i oĩa rami 'rã heta, mba'eta ita ku'i oa'ãa va'erã e'ÿ, neĩ oipapa kuaa va'erã e'ÿ guive. Ha'e gui "Peẽ ma xevyguia e'ÿ" 'ea 'rãgue py "Nhanderuete oikove va'e ra'y kuery", 'ea 'rã pẽvy.*

¹¹ Ha'e rami vy Judá ha'e Israel kuery reve ju 'rã nhomoirũmba. Petei'i 'rã omõ okuapy nguvixarã. Ha'e rami vy yvy pendekuaia gui peopa ju 'rã, mba'eta iporã vaipa 'rã Jezreel ára py.†

2

1 — Ha'e gui penderyvy kuery pe "Xevyguia kuery" peje 'rã, ha'e rã penereindy kuery pe ma "Omboaxypy" peje.

Ha'e kuery ndojeroviai tei Nhanderuete ojeroviapy oikoa re ijayvuague

2 — Pendeyvy pendexy pe, pendeyvy ete ixupe, mba'eta xera'yxy ve'ÿ ma oiko, xee voi imeve'ÿ ma. Ha'e rami ajapo ojegu oi'pe'a aguã itavy reia, okã mbyte gui gueko vaia oi'pe'a aguã guive.*

* 1:4 Jezreel tetã py ma Jeú jujoka vy ojopy va'ekue Israel kuery re ipo'akaa aguã (2 Reis 9.14-27). Ha'e gui Jeroboão versículo 1 py ijayvua ma Jeú ramymino. * 1:6 1 Pedro 2.10 * 1:10 Romanos 9.25-26 † 1:11 Tery Jezreel ma "Nhanderuete omõa va'e" 'ea. Jypy ma Nhanderuete omõaĩmba ijyvy gui omoxẽ vy, ha'e gui opaa py ma mba'emo ra'yĩgue nhomõaĩ rami ju omõaĩ 'rã heruvy omboetave aguã (2.22-23). * 2:2 "Pendexy" he'ia py ma Israel kuery re ae ijayvu vy.

³ Ha'e rami e'ý rã xee aeja 'rã ipire rei va'e, oiko ramo'i jave guare rami ae. Ha'e rami tekoa e'ýa rami amoingo 'rã, vvy piru reia rami ete ajapo 'rã yuvei py ajuka vy.

⁴ Neĩ imemby kuery voi xee namboaxyi 'rã, itavy reia rupi ixu oguereko rire.

⁵ Mba'eta ixu ma itavy raka'e, ikuavãare gueko vaia rupi anho oiko. Ha'e rami vy aipoe'i: "Xee aa 'rã apena va'e kuery rakykue. Ha'e ramo ha'e kuery ma xeivy pe ome'ẽ 'rã mbojape, yy, vexa'i rague, ajukue periri'i, azeite ha'e ay'u va'erã", he'i.

⁶ Ha'e rami teĩ xee ajoko 'rã hape rupi juu amoĩ vy. Hovai ajapo 'rã kora, tape oo aguã ojou e'ý aguã.

⁷ Ha'e ramo opena va'ekue rakykue oo teĩ ndoupityi 'rã. Oeka tema teĩ ndojou 'rã. Ha'e rami vy aipoe'i 'rã: "Aa 'rã, xeme ypya py ae ju ajevvy, mba'eta aýgua gui ha'eveve xeivy guare", he'i.

⁸ Mba'eta ndoikuaii xee ae trigo, vinho, azeite ha'e nunga ome'ẽ va'ekuea. Ixupe guarã xee ae amboetave va'ekue prata ha'e ouro. Ha'e rã ha'e ma Baal ra'angaa pe rive ome'ẽ va'ekue.

⁹ Ha'e nunga rupi xee ma trigo omono'õa ára, vinho ojapoa ára aju vy aipe'apa ju 'rã ixugui. Aipe'apa ju 'rã vexa'i rague ha'e ajukue periri'i, ha'e nunga opire reia ojao'i aguã ame'ẽ va'ekue.

¹⁰ Avy ma oxia aexa uka 'rã opena va'ekue oexaa py. Xepo gui aveve rei ndogueraa jeppei 'rã guive.

¹¹ Amomba 'rã ovy'aague ha'e javi, jaxy pyau nhavõ ngaru ojapo jepiague, sãbado nhavõ ijatyague, ha'e ngaru oa'anga va'ekue ha'e javi.

¹² Ambovaipa 'rã ha'e kuery mba'e uvaty ha'e figoty aipoe'ia va'e: "Kova'e ma apena va'e kuery opaga vy xeivy ome'ẽ va'ekue", he'ia. Ha'e nunga ma xee ajapo 'rã ka'aguy rive, ha'e ramo ka'aguy regua mymba nharõ kuery ho'upa 'rã.

¹³ Xee ambopaga 'rã Baal ra'angaa pe heakuã porã va'e oapy okuapyague re. Ha'e va'e jave ojere'i va'e ha'e ita hepykueve py onhembojega vy opena va'e kuery rakykue oo. Ha'e rã xegui ma hexaraipa — he'i SENHOR.

¹⁴ — Ha'e rami teĩ ajapo 'rã xere ju ima'endu'a aguã rami. Ha'e rami vy tekoa e'ýa katy araa vy xeayvu porã'i 'rã opy'a py oendu va'erã re.

¹⁵ Ha'e gui ma ame'ẽ ju 'rã uvaty oguereko va'ekue ramigua. Ixupe Acor yvyugua ajapo 'rã peteĩ okẽ rami, ha'e va'e rupi oaxa vy oendu ju aguã oarõ oikovy aguã.† Ha'e ramo xererovy'a ju 'rã, kunhataĩ jave Egito vvy gui oẽ jave guare rami.

¹⁶ Ha'e va'e ára ju xeivy pe "Xeme" he'i 'rã, xeivy pe "Baal" nde'ivei ma 'rã — he'i SENHOR.

¹⁷ — Mba'eta ha'e kuery juru gui anoẽmba 'rã Baal rery, hery re ima'endu'a ve'ý aguã rami.‡

¹⁸ Ha'e va'e ára ha'e kuery re ama'ẽ vy mymba ka'aguy re ikuai va'e ajapo 'rã ha'e kuery pe inharõ ve'ý aguã rami, guyra vyate rupi oveve va'e ha'e vixo vvy rupi onhembotyryry va'e guive. Ha'e gui ha'e kuery vvy gui ma aipe'a 'rã guyrapa ha'e kyxe oiporu pyre ha'e javi, joe opu'ãa ve'ý aguã. Ha'e rami vy xeivyugua kuery ajapo 'rã opytu'u okuapy aguã rami, mba'eve oiko e'ýa py.

¹⁹ Xejee ae romomenda ju 'rã raka'e rã peve. Teko porã rupi roguereko vy romomenda 'rã xejee, ha'eveve rami aikuaa potaa py, roguereko porã'ia ha'e romboaxya rupi guive.

²⁰ Ojeroviapy aikoa rupi 'rã romomenda xejee. Ha'e rami vy reikuaa 'rã SENHOR aikoa — he'i.

²¹ SENHOR aipoe'i:

— Ha'e va'e ára py ma xee rombovai 'rã roayvu porã vy. Yva voi aroayvu porã rã omoingo porã ju 'rã vvy.

²² Ha'e gui vvy ju omoingo porã 'rã trigo, vinho ha'e azeite. Ha'e ramo ha'e nunga omoingo porã 'rã xeivyugua kuery Jezreel pygua kuery.

²³ Mba'eta Israel kuery vvy jave rupi xee amoã 'rã mba'emo ra'yí rami, xeivy guarã. Amboaxy aguã rupi e'ý ikuai va'ekue pe xee aexa uka ju 'rã amboaxya. "Xeivyugua e'ý" ha'e va'ekue pe aipoa'e 'rã: "Ndee ma xeivyugua ae!" Ha'e ramo ombovai vy "Ndee ma Xeruetel!" he'i 'rã xeivy.*

3

Nhanderuete nhomboaxy aguã re ijayvuague

¹ SENHOR aipoe'ive ju xeivy:

— Teĩgue ju tereo, eayvu ju kunha neirũ oayvu va'ekue itavy rei teĩ. SENHOR Israel kuery oayvua rami eiko, ha'e kuery ma nguete ramigua pe mbojape uva pirukue revegua ome'ẽxe vai va'eri — he'i.*

² Ha'e ramo xee ma xera'yxyrã ju ajogua, quinze hatã'i va'e prata guigua ha'e quinze voxa cevada ame'ẽ vy.

³ Ha'e vy ixupe aipoa'e:

— Ha'e gui ndee ma heta ára re teri 'rã xerarõve. Ndetavy reive eme, amboae ava reve eiko eme guive. Ha'e ramo xee voi roarõ 'rã aikovy — ha'e.

⁴ Mba'eta Israel kuery ma heta ma'etý re 'rã ikuai nguvixa e'ý re, opena va'e e'ý re, Nhanderuete pe mba'emo ome'ẽ e'ý re, ta'angaarã ita omopu'ã va'ekue e'ý re, sacerdote i-manto va'e e'ý re, ha'e mba'emo ra'angaa ngoo rupi oguereko va'ekue e'ý re guive.

† 2:15 Tery Acor ma "Jexavaia" 'ea. Yma Acor yvyugua py Israel kuery Egito gui ovaẽ jave ojevavy ramo ombopagaa raka'e (Josué 7.24-26). Ha'e rami teĩ aý ha'e va'e rupi oaxa jevvy vy ojou 'rã oarõ va'e. ‡ 2:17 Tery Baal ma "Nhandererekoa" 'ea.

Nhanderuete ndoipotavei ha'e va'e rery rupi ojapukai okuapy. * 2:23 Romanos 9.25-26, 1 Pedro 2.10 * 3:1 Apy ma Nhanderuete ijayvu Oséias gua'yxy ogueru ju aguã re, ha'e ae nhandererua rami avi jajevvy va'eri. Gua'yxy escravo oikoague gui Oséias ojogua, nhande voi jevavya pe jaikoague gui Nhanderuete nhandedjoguaague rami.

⁵ Ha'e va'e rire Israel kuery ojevypa vy oeka ju 'rã okuapy SENHOR nguete ha'e Davi nguvixarã. Ha'e rami vy opaa ára ha'e kuery oryryipa reve 'rã onhemboja jogueruvy SENHOR re onhemboxy uka vy.

4

Israel kuery opa mba'e py ojevavya re ijavyague

¹ — Peẽ Israel kuery, pendu ke SENHOR ayvu, mba'eta SENHOR oguereko vyv regua kuery re oikuaa pota aguã, mba'eta ha'e kuery re ma anhetê va'e noĩ, neĩ mborayvu, neĩ Nhanderueete oikuaaxea guive.

² Ha'e kuery oguerovy'ave va'e ma oura rivea, apu, jojukaa, imondaa ha'e tavy reia rive. Ha'e rami vy joo oipe'a rive 'rã, ha'e jojuka vyve jojuka vyvoju ju 'rã.

³ Ha'e nunga rupi ae ijyvy nda'evevei, hexe ikuai va'e voi ikangyapa okuapy, mymba nhuũindy rupi ikuai va'e, guyra yvate rupi oveve va'e guive. Pira ye'ẽ rupi ikuai va'e voi omanomba.

⁴ — Ha'e rami teĩ mava'eve ndoikuaa potai, nanhomongetaai guive. Mba'eta peẽ kuery ma sacerdote kuery ojou vaipy rami pendekuai.

⁵ Mba'eta ara py teĩ penhepyxanga 'rã, pendereve profeta kuery ikuai va'e voi onhepyxanga 'rã pyãvy. Ha'e nunga rupi xee amomba 'rã pendexy.

⁶ Xevyguia kuery ma hi'arandurã va'ekue noĩ ramo omombaa ma heravy. Ndee sacerdote, 'arandua reja rire xee ju roeja 'rã, xerenonde sacerdote reiko ve'y aguã. Nderueete guigua lei gui nderexarai ramo xee voi xerexarai 'rã ndera'y kuery gui.

⁷ Ha'e kuery heta-etave ovy rami va'e xerovai ojevavye tema 'rã oje'oivy. Ha'e nunga rupi ha'e kuery omboetepy ikuai 'rãgue py xee ajapo 'rã oxĩmba aguã rami.

⁸ Ha'e kuery ma xevyguia kuery ojevavya re rive 'rã onhemongaru, opa marã rei ikuai rã oexa vy rive 'rã ovy'a.

⁹ Ha'e nunga rupi heta va'e kuery xee areko 'rã sacerdote kuery arekoa rami avi. Mba'eta mokoive ambopagapa 'rã heko vaiague re, ame'ẽ 'rã ikuaiague repy ae.

¹⁰ Ha'e ramo ha'e kuery okaru teĩ naevyatã 'rã. Itavy reia rupi ikuai va'eri ndaetave ovyi 'rã, SENHOR ombojeroviaa gui ojepe'apa rire.

¹¹ Mba'eta ha'e kuery itavy reia, vinho ha'e vinho pyau re oka'upa reia oipe'apa hi'arandua.

¹² Xevyguia kuery oporandu 'rã yvyra ra'ykuue oguereko va'e pe rive, ha'e ramo yvyra ipo'i'i va'e ju ombovai 'rã. Nhe'ẽ imbotavy reia pe onhembotavy uka vy Nguete gui hexaraipa okuapy itavy reia rupi.

¹³ Yvy'ã yvate va'e-va'e rupi rive 'rã ome'ẽ okuapy mba'emo, heakuã porã va'e voi oapy 'rã yvy'ã-vy'ã'i rupi, yvyra carvalho, choupo ha'e terebinto ikuai va'e guy rupi guive, kuaray'ã porã rei ramo rive. Ha'e nunga rupi ae penderajy kuery itavy rei okuapy, pendera'y ra'yxy kuery voi.

¹⁴ — Ha'e rami teĩ penderajy kuery ma xee nambopagai 'rã itavy reia re, neĩ pendera'y ra'yxy kuery guive. Mba'eta avakue ae oje'oi 'rã kunhague tavy rei reve itavy rei aguã, ha'e kuery regua reve mba'emo ome'ẽ 'rã ta'angaa pe. Ha'e rami vy hi'arandu e'y va'e kuery ma okanhy aguã katu oo.

¹⁵ — Ha'e gui peẽ Israel kuery, pendetavy reia rupi tema peoxe teĩ tove Judã tojevavy eme ha'e nunga py. Too eme Gilgal py, too eme Bete-Áven py, neĩ ouraa rupi “ SENHOR oikove va'e rupi aura” te'i eme.*

¹⁶ Mba'eta vaka oja rovai opu'ã va'e rami Israel kuery opu'ã okuapy xere. Mba'exa 'rã tu ha'vy SENHOR omongaru herekovy nhuũindy tuxixave va'e rupi, vexa'i ra'y'i rami?

¹⁷ Mba'eta Efraim kuery ma ta'angaa pe rive onheme'ẽmba. Tove ta'ikuai.

¹⁸ Ha'e kuery oka'upa rei vy itavy reia rupi ju 'rã ikuai. Yvatekueve voi oxĩmba reia rupi rive ikuaixeve.

¹⁹ Ha'e rami rire vyvutu atã ogueraapa 'rã opepo py. Ha'e ramo oxĩmba 'rã ta'angaa pe mba'emo ome'ẽague re.

5

Sacerdote kuery ha'e yvatekueve pe ijavyvutaague

¹ — Sacerdote kuery, pendu ke. Israel kuery, pejapyxaka. Huvixave ro py pendekuai va'e, pejapyxaka avi. Mba'eta pova'e ayvu ma penderovai ae. Mispa tetã py nhuã pejavyvuta, ha'e Tabor vyvutu áry rupi guyra'i mbo'aa ramigua peipyo.

² Opa marã pendekuaive peovy pavẽ gui. Ha'e rã xee rombopagapa 'rã ha'e nunga ha'e javi re.

³ Aikuaa Efraim kuery reko ha'e javi, Israel kuery nonhemi 'rã xegui. Mba'eta aỹ Efraim kuery, pendetavya py Israel kuery ha'e javi voi onhemony'apa rei.

⁴ Ha'e rami ikuai riaevy nda'evevei Nguete pe ojevavy aguã. Ha'e kuery mbyte nhe'ẽ imbotavyarã oĩ ramo ndoikuaavei okuapy SENHOR.

⁵ — Israel kuery onhemboyvate py ae onhemoĩ vai. Israel ha'e Efraim kuery ma ha'e kuery reko vaia re ae 'rã ho'a, Judã kuery voi ho'a avi 'rã ha'e kuery reve.

⁶ Ha'e va'e kuery ma guymba kuery vexa'i ha'e vaka ome'ẽ va'erã reve 'rã oo SENHOR reka vy merami teĩ ndojou 'rã, ha'e kuery gui ojepe'a ma rive.

⁷ SENHOR pe e'y ha'e kuery ikuai rupi kyriague oguereko va'e omendaa py e'y. Aỹ jaxy pyau re ngaru ojapoa py omokanhymbaa 'rã, ijyvy guive.

* 4:15 Tery Bete-Áven ma "Jevavya ro" 'ea. Ha'e va'e tery py Betel "Nhanderueete ro" 'ea va'e re ijavyvuta, mba'eta ha'e katy'i huvixa omopu'ã rive vaka ra'y ra'angaa ha'e ombojerovia atyãrã (10.5,8). Jaikuaa porãve aguã jaexa avi 'rã 1 Reis 12.28-33 py.

⁸ — Tombopua mimby guaxu Gibeá py, Ramá tetá py voi tonhendu! Tojapukaia Bete-Áven py! Penheangu ke, Benjamim kuery!

⁹ Efraim kuery opaga aguã ára py ivaipe ete 'rã. Israel kuery mbyte rupi aikuaa uka ma mba'emo oiko va'erã.

¹⁰ Judá regua yvatekueve ma yvy markaa oguerova rive va'e rami ikuai. Ha'e nunga rupi ha'e kuery áry anhoë 'rã xepoxya yv rami.

¹¹ Efraim kuery ambopaga rã ikuai axy, iporiaupa rei guive, ovare e'ÿ va'e re nda'veieia rupi ikuai rire.

¹² Ha'e nunga rupi amomba 'rã Efraim kuery vixo'i rami, Judá kuery guive hu'ũgue rami 'rã amomba.

¹³ Efraim kuery oikuaa omba'eaxya, ha'e Judá kuery voi oai vaikue oexa vy Efraim kuery ma Assíria katy oo. Ha'e pygua huvixave pe ojerure oipytyvõ aguã. Ha'e rami teĩ nomonguera kuaa imba'eaxya gui, neĩ ijai gui guive.

¹⁴ Mba'eta Efraim kuery amomba 'rã guary rami, Judá kuery guive amomba 'rã guary ra'y rami. Xee, xee ae amopẽmba, aejapa 'rã guive. Xee aipe'apa heravy ramo nda'ipoai 'rã xegui ogueraa jepea va'erã.

Anhetê rupi e'ÿ ojeko rerova okuapya re ijavyuague

¹⁵ — Ha'e rami vy xee aa ju 'rã aikoaty py ranhe apyta aguã, ha'e kuery ojevavya omombe'u vy xereka peve. Mba'eta ha'e kuery ojexavai vy xereka voi 'rã. Aipoe'i:

6

¹ “Peju, javeju ju SENHOR pe. Mba'eta nhanemopẽmba teĩ nhanemonguera ju 'rã. Nhanemboaipe teĩ nhanepoano ju 'rã.

² Mokoĩ ára rire nhanemombaraete ju 'rã. Mboapy araa py ma nhanemopu'ã 'rã. Ha'e ramo teĩgue ju 'rã nhandekuai henonde rupi.

³ Jaikuaa ke SENHOR, nhanhea'ã tema jaikuaa ete peve. Mba'eta ou 'rã kuaray oua rami. Nhandere oguejy 'rã oky rami, ára pyau jave oky ou vy yvy omoakỹ va'e rami”, he'i okuapy.

⁴ — Efraim kuery, mba'e 'rã tu ajapo pendere? Ha'e vy peẽ Judá kuery, mba'e 'rã tu ajapo pendere? Mba'eta peẽ kuery ma ko'ẽmba'i arai ojekuaa rive ovuy va'e rami xerayvu, ha'e yxapy ko'ẽ rai ramove ipirupa ovuy va'e rami guive.

⁵ Ha'e nunga rupi xee roitypa 'rã profeta kuery ayvu py rive. Xejuru gui ayvu oẽ va'e py ae rojuka, rombopaga aguã ma hexakã va'e rami ojekuaa.

⁶ Mba'eta xee aipota va'e ma penhomboaxya, mba'emo rive xevy pe peme'ẽ nda'ei. Mba'emo peapy reve peme'ẽa gui aipotave Nhanderuete peikuaa ete.*

⁷ — Ha'e rami teĩ ha'e kuery ma Adão rami ae avi nda'ikuaixei xereve guarã ajapo va'ekue rami. Xerovai ha'e kuery ikuai anhetê rupi e'ÿ.

⁸ Mba'eta Gileade tetã ma heko vai va'e anho ikuai, jouguy guiiky'apa guive.

⁹ Sacerdote kuery voi ikuai tape rupi oguata ou va'e ojuxaxe vy oma'ẽ mbegue va'e rami, mba'eta Siquém katy tape oo va'e py jojuka ma. Ha'e rami vy ojapo okuapy ojegarupy.

¹⁰ Peteĩ mba'e aexa nda'evei ete va'e Israel kuery ikuai mbyte. Ha'e py oĩ Efraim kuery itavy rei okuapya. Ha'e va'e gui ma Israel kuery ha'e javi onhemongy'apa.

¹¹ Judá kuery, peẽ voi pendeayapaa 'rã.

7

Huvixa kuery ha'e yvatekueve ojevavy okuapya re ijavyuague

¹ — Xevyguia kuery aipytyvõ ta ha'e Israel kuery amonguera ta nhavõ ojekuaa kuerei Efraim kuery ojevavya ha'e Samaria pygua kuery reko vai, mba'eta anhetê va'e rupi e'ÿ ikuai. Opy rupi imonda va'e anho ikuai, oka rupi voi jojuka va'e kuery imonda 'rã okuapy.

² Ha'e kuery opy'a py aipo nde'i: “Nhandereko vaia re Nhanderuete oikuaa pota 'rã”, nde'i. Ha'e nunga rupi aÿ ha'e kuery ojapo vaia ae ojoko, xerenonde voi ojekuaapa.

³ Ha'e kuery reko vaia anho rive 'rã huvixa oguerovy'a. Yvatekueve voi oguerovy'a rei okuapy ijapua.

⁴ Itavy reia rupi meme ikuai. Mbojape apoa imbojaty py omoendyague rami hakupa. Mba'eta omoendy ma vy omoapomo oiny jave omoendy ve'ÿ ranhe teĩ ha'ave mbojaperã ovu porã peve.

⁵ Huvixave pegua ngaru oikoa ára py yvatekueve imba'eaxy rai okuapy vinho py oka'ua gui. Huvixa eteve voi onhemoirũ nhombojaru rei va'e kuery reve.

⁶ Ha'e rã ha'e kuery opy'a re omoĩ mbojape mbojaty ramigua, joe oma'ẽ mbegue okuapy vy. Pyávy ipoxya opytu'u teĩ ko'ẽgue hendy ju 'rã tataendy rami.

⁷ Ha'e kuery ha'e javi ma tata rami inhakã raku vy omomba nguvixa kuery. Ha'e ramo huvixa ikuai va'ekue omanomba. Ha'e rami teĩ peteive ma xevy pe ndojapukaia.

⁸ — Ha'e gui ma Efraim kuery onhemoirũ 'rã okuapy amboae regua kuery reve. Mbojape ombojere e'ÿ re oexy pyre rami ndovarei.

⁹ Imbaraeta ma amboae regua kuery ombovaipa teĩ ndoikuai rei. Ijapyte rupi hi'a xiimba ma teĩ ndoikuai potai.

¹⁰ Israel kuery onhemboyvatepa rei pavẽ oexaa py. Ha'e rami teĩ SENHOR Nguete pe ndojevyi. Ha'e kuery re ha'e rami ete oiko teĩ ndoeka potai okuapy.

* 6:6 Mateus 9,13, 12,7

¹¹ Mba'eta Efraim kuery ma apyaxu ombotavy pyre rami ndoiko kuaai rei okuapy. Egito kuery pe oenoí 'rã onhepytyvõ uka vy, Assíria vvy katy avi 'rã oo.

¹² Ha'e katy oo ramo ha'e kuery áry rupi xee aipyo 'rã xekya, ambo'apa 'rã guyra yvate rupi oveve va'e rami. Ha'e rami vy ambopaga 'rã, ha'e kuery ijatya py ayvu aendu ukaague rami vy ae.

¹³ Nda'evei ete 'rã ha'e kuery pe, xegui ojepe'a rire! Xere opu'ã rei rire hi'áry ho'a 'rã imombaarã! Xee aepy 'rãgue tei xerovai ijapu okuapy.

¹⁴ Ngupa py onheno oupya py haxê rive okuapy tei opy'a py e'y'j opapukai xevy. Trigo ha'e vinho ojouxu vy onhemboaty, ha'e rã xere ma opu'ã rei 'rã okuapy.

¹⁵ Xee amo'arandu, amombaraete guive tei ijayvu vai 'rã xerovai.

¹⁶ Ha'e kuery ma Yvate ete va'ea katy e'y'j ojevvy. Guyrapa ikarê rive va'e rami ikuai. Ha'e nunga rupi ha'e kuery va'e regua yvatekueve ojukupaa 'rã kyxe py, onhemboyvatea rupi rei ijayvu rive. Egito vvy re oo tei ha'e pygua kuery ojajai rei 'rã okuapy.

8

Opagaa aguã ovaê rai maa re ijayvuague

¹ — Pemoi pendejuru py mimby guaxu! Mba'eta xee SENHOR pegua oo re hovaigua kuery ou oiny taguato rami,* xereve guarã ajapo va'ekue rupi ha'e kuery nda'ikuaixei rive, xeguigua lei rovai rupi rive ikuai.

² Xevy pe opapukai vy “Oreruete! Ore Israel kuery ma ndekuaa va'e roiko”, he'i okuapy

³ tei Israel kuery omboyke ma iporã va'e. Ha'e nunga rupi ae hovaigua kuery ou hakykue.

⁴ Ha'e kuery ma nguvixaverã omoi tei xegui e'y'j ojou. Nguvixa kueryrã omoi tei xee aikuaa ukaa rupi e'y'. Ojeupegua mba'emo ra'angaarã ojapo prata ha'e ouro gui. Ha'e ramia py onhemokanhly uka rive. he'ia

⁵ Samaria pygua kuery vaka ra'y ra'angaa omboete va'e ma xee ndajou porã. Ha'e nunga rupi ha'e kuery rovai xepoxya hendy. Raka'e peve 'rã tu ha'e kuery ndojeky'a'o ukaxe'i okuapy?

⁶ Mba'eta ha'e nunga ma Israel kuery rembiapo ae, hembiaapo kuaa va'e ojapo va'ekue rive, xee e'y'j ai. Ha'e ramo vaka ra'y ra'angaa Samaria py oi va'e omboa'ypaa 'rã.

⁷ — Yvytu ha'e kuery onhoty'j rive vytytu vaikue 'rã omono'õ. Ndoikoi 'rã mba'emoaju omono'õ aguã. Trigo rembypy gui ndoikoi 'rã iku'ikuerã. Ha'e rami e'y'j vy oiko tei amboae guigua kuery ho'upa 'rã.

⁸ Israel kuery eteve voi ho'upaa. Aỹ ma voi amboae regua ikuai rupi ikuai ojou vaipy rami.

⁹ Mba'eta Assíria vvy katy ha'e kuery oo mburika vvy'ã regua ha'e ae'i oiko va'e rami. Efraim kuery opaga okuapy opena va'ety repyrã.

¹⁰ Ha'e rami avi ojereraa jepe ukaxe vy amboae regua ikuai rupi oo tei xee ae amboatypa 'rã. Huvixa ha'e yvatekueve omoingo axy rã mboapy'live ma ovy.

¹¹ Efraim kuery ojevayvague re altar ojapo reta va'ekue ri ojevayvye aguã ae ha'e nunga opyta.

¹² Xapy'a rei xeguigua lei dez mil ayvu py xee ambopara va'e rive ha'e va'e pe “Mba'emo rei rive” he'i 'rãgue.

¹³ Ha'e kuery ojukaxe vai mymba xevy ome'ê aguã. Ha'e rami avi mymba ojuka 'rã xo'o ho'uxe vai vy rive. Ha'e kuery ho'u rã xee SENHOR ndajou porã. Aỹ ma ha'e kuery reko vaia re aikuaa pota vy ambopaga 'rã ojevayva re. Ha'e ramo ha'e kuery ma Egito katy ju 'rã ojevypa.

¹⁴ Mba'eta Israel kuery ma imoingoare gui hexarai vy ngoo tuvixa va'erã rive ojapo. Judá kuery voi heta-etave ojapo heravy guetai ikorapa va'erã. Ha'e rami tei ha'e kuery retã re xee ambou 'rã tata. Ha'e va'e tata ma oapypa 'rã oo guaxu ha'e kuery ojapo va'ekue.

9

Israel kuery ombopagaa maaque re ijayvuague

¹ Israel kuery, pevy'a eme, amboae kuery rami e'y'j pevy'a eme. Mba'eta pendetavya py pejepe'a Penderuete gui. Peipotave va'e ma pendetavya repy mba'emo ra'yigue ojykyaty ha'e javi rupi pejopy va'e.

² Ha'e rami avi nda'evei pekaru riaa aguã mba'emo ra'yigue ha'e vinho re rive. Mba'eta opa 'rã vinho pyau.

³ Napendekuai riaei 'rã SENHOR pegua vvy re. Ha'e rami 'rãgue py Efraim kuery ma Egito katy 'rã ojevvy. Assíria vvy re voi ho'u 'rã okuapy ha'eve'y'j va'e imongy'aa'ra.

⁴ Ha'e py ma SENHOR pe napenho'evei 'rã uva rykue. Mymba kuery ixupe peme'ê va'e voi ndoguerovy'ai 'rã. Mbojape pe'u va'e ma ipy'a vai va'e rembi'u, ha'e va'e re okaru va'e ma ha'eve'y'j va'e 'rã ikuai. Ha'e va'e mbojape ma peê kuery ae 'rã pe'u, mba'eta SENHOR pegua opy peme'ê aguã nda'evei.*

⁵ Mba'eta tu pejapo 'rã SENHOR pegua ngaru ojapoa ára py, ha'e penhemboatya ára ojeupity jave?

⁶ Mba'eta imombaarã ou va'e gui penetarã kuery oopa va'eri Egito pygua kuery ju 'rã ombo'apa. Ha'e rami vy Ménfis tetã py 'rã ojatyppaa. Prata guigua hepykueve ha'e kuery ogueroko va'ekue ma pynondy mbyte rive 'rã opyta. Ha'e kuery rekoague rupi ma juu rive 'rã ikuai.

⁷ Ovaê ma ha'e kuery re oikuaa potaa ha'e opaga aguã ára. Ha'e nunga oiko rã Israel kuery oikuaa 'rã. Israel kuery, pendeko vai riaa ha'e joe napenda'evei ete vy profeta kuery pe “Oikuaa e'y'j rei va'e” peje, ha'e avakue Nhe'ê oia va'e pe “Inhakã porã e'y'a va'e” peje.

⁸ Mba'eta ore profeta kuery ma Efraim kuery reko re ijayvu va'erã oremoia va'ekue, Xeruete rami ae avi. Ha'e rami tei ore kuery roo aguã ha'e javi rupi omoia guyra'i mbo'aa ramigua, Nguuete pegua opy rupi eteve voi ikuai ore kuery re opu'ã rei va'e.

* 8:1 “Taguato rami oo va'e” he'ia ma Assíria pygua kuery re ijayvu vy. ague py jipoi 'rã Nhanderuete pegua oo, ha'e py mba'emo ome'ê aguã.

* 9:4 Ha'e rami ijayvu mba'eta amboae vvy re escravo-rã ogueraa

⁹ Opa mba'e py heta va'e kuery onhemongy'a Gibeá py ojapoague rami ae ju.[†] Ha'e kuery reko vaia re SENHOR oikuaa pota vy ombopaga 'rã ojejavayague re.

¹⁰ SENHOR aipoe'i:

— Israel kuery ajou ypy vy uva rembypy tekoa e'ÿa py ojou va'e rami arovy'a raka'e. Peneramoĩ kuery aexa vy figo'y hi'a ramo'i va'e ojou va'e rami raka'e. Ha'e rami teĩ Baal-Peor ra'angaa katy ha'e kuery oopa vy ta'angaa imoxiã pe rive ikuai. Ha'e rami vy ojegarupy ikuai, ta'angaa omboete va'e rami avi.

¹¹ Mba'eta Efraim kuery mba'emo oguerovy'ave va'e ma guyra oveve va'e rami 'rã okanhymba vyvoi. Ndoikovei ma 'rã imembya, imemby ryrui va'e, neĩ kyri va'e oguereko'i va'e ma voi.

¹² Gua'y kuery omongakuaa teĩ xee aipe'apa 'rã, neĩ peteive ava oikove aguã rami e'ÿ. Ha'e kuery gui ajepe'a ramo nda'evei ete 'rã ha'e kuery pe!

¹³ Xee anhembody'aague rami vy Tiro tetã rami Efraim tetã voi iporãvea py mba'emo renhoĩ onhotỹ mbyre rami oĩ. Ha'e rami teĩ gua'y kuery ae Efraim kuery ogueraa 'rã ojukaa aguã katy — he'i.

¹⁴ Ha'e nunga rupi SENHOR, eme'ê ha'e kuery pe ... mba'e tu ha'evea rami reme'ê 'rã? Ejapo ha'e kuery imemby e'ÿ va'erã, ha'e ikãry e'ÿ va'e ikuai aguã rami.

¹⁵ SENHOR aipoe'i:

— Gilgal py ha'e kuery heko vai okuapy rã ha'e py aendu ndaxea'eveia. Ha'e kuery ojapo vai rei okuapy ramo aipe'apa 'rã xeivyua oo gui, ndayvuvei ma 'rã guive. Ha'e kuery va'e regua yvatekueve ma xenhe'ê rendu e'ÿ va'e meme.

¹⁶ Efraim kuery ma imba'eaxy okuapy, mba'emo renhoĩ hapo guive ipirupa va'e rami ikuai. Ndaivei ma 'rã. Gua'y kuery, guajy kuery oguereko teĩ hyru'i pyve xee ajuka uka 'rã, oayvuve va'e voi — he'i.

¹⁷ Xerueete xeretarã kuery nonhe'ê renduvei ramo oejapa 'rã. Ha'e ramo oguata rei va'e rami 'rã ikuai yvy regua ikuai rupi.

10

Israel kuery mba'emo vai onhotỹ rire imombaarã omono'õ aguã re ijayvuague

¹ — Israel kuery ma uva rembypy porã hi'a riae va'e rami ikuai va'ekue. Ha'e rami teĩ hi'a retaa rami heta avi ojapo altar. Ha'e kuery yvy iporãvea rupi heta-etave tema omopu'ã avi ita ombojerovia aguã.

² Ha'e kuery ma anhetê rupi e'ÿ ipy'a va'e. Ha'e nunga rupi ipo ky'a va'e ikuai. Altar ojapo va'ekue SENHOR omopẽmba 'rã, oitypa avi 'rã ita ombojerovia atyrã ojapo va'ekue.

³ Ha'e rami teĩ aÿ ha'e kuery aipoe'i: “ SENHOR renonde jajererokyjea rupi e'ÿ nhandekuai rire ndajarekovei huvixave. Ha'e gui nhanderuvixa oĩ va'e rire mba'exa ha'vy nhanepytyvõ 'rãgue?” he'i okuapy.

⁴ Ayvu rive rupi ijayvu: oura rive 'rã okuapy, amboae regua reve nhopytyvõ aguã ojapo guive. Ha'e nunga rupi joekokue re oikuaa pota va'e oiko jepi, mba'ety rupi mba'emo rogue jojukaarã oikoa rami avi.

⁵ — Bete-Áven py Samaria pygua kuery vaka ra'y ra'angaa omboete va'ety oipe'aa rokyvete okyjepa rei 'rã okuapy.* Iporã etea okanhy ramo ixupe guare kuery ojae'o 'rã, ta'angaa pegua sacerdotete kuery voi oryryipa 'rã okuapy.

⁶ Vaka ra'y ra'angaa oipe'aa vy heraa 'rã Assíria yvy katy huvixave pe ome'ê va'erã. Ha'e ramo Efraim kuery oendu 'rã oxĩmbaa anho, Israel kuery oxĩmba 'rã ha'e kuery oipotaa rami rive ikuai rire.

⁷ Oipe'aa avi 'rã Samaria pygua huvixa, yy áry yvyra ra'ykue'i ogueroxyry heravy va'e rami.

⁸ Áven tetã katy'i yvy'ã áry ombovaipaa avi 'rã ombojeroviaaty Israel kuery ojevayaty. Ha'e py altar ojapo va'ekue áry ma jaia ha'e juutya anho 'rã ikuai. Ha'e ramo yvyty pe aipoe'i 'rã okuapy: “Oreao'ii!” Ha'e yvy'ã-vy'ã pe ma “Pe'a ore'áry!” he'i avi 'rã okuapy.[†]

⁹ — Israel kuery, Gibeá py pejevayague ára guive pejevaya re ae tema pendekuai. Ha'e rami rire Gibeá pyve e'ÿ 'rã teve penderupity heko vai va'e mbopagaarã?

¹⁰ Mba'eta xee aipotaa rami ae 'rã anhombodya. Mokoĩ rupi ha'e kuery ojevay rire ambopaga ramo yvy regua ha'e javi 'rã ijaty ha'e kuery rovai.

¹¹ Mba'eta Efraim kuery ma vaka ra'y kunha ombo'ea pyre trigo oiipiroa rupi omba'eapoxe vai va'e rami ikuai va'ekue. Ha'e gui aÿ ijaju'y porãa re kanga amoĩ vy karóxa re amoxã 'rã Efraim kuery. Judá kuery voi oikaraĩ 'rã yvy, Jacó guigua kuery ha'e javi oikaraĩ 'rã heravy yvy atãa.

¹² Ha'e gui xee aipoe'a: “Mba'emo ra'yigüe rami pemoaĩ peikovy pendereko porãrã, ha'e rami vy 'rãe pemono'õ penemboaxya. Peikaraĩ yvy pema'etÿague rupi e'ÿ. Mba'eta ova'ê ma SENHOR peka aguã, ha'e ou vy oky rami pendere teko porã omboguejy peve”, ha'e va'ekue.

¹³ Ha'e rami teĩ peẽ ma teko vai rive penhotỹ aguã yvy peikaraĩ rire teko vaia anho pemono'õ. Ha'e rami vy apua'a rive pe'u, mba'eta pendekaróxa re ae pejerovia vy, penderegua ipy'a guaxukueve re guive.

¹⁴ Ha'e rami teĩ pendekuaia py voi onhendu 'rã joe opu'ã va'e. Ha'e rami vy oitypa 'rã peneretã ikorapa va'ekue ha'e javi, joe Salmã opu'ã vy Bete-Arbel tetã oitypaague rami avi. Ha'e jave py ma ixy kuery ojupapaa imemby kuery reve.

¹⁵ Ha'ekue ramigua ae ju 'rã ojapoa peẽ Betel pygua kuery re voi, pendereko vaia tuvixa ramo. Ko'ê rai'i jave hexakãa oaxa ouvya rami avi ojukaa 'rã Israel pygua huvixa.

[†] 9:9 Gibeá py ojapo va'ekue mba'emo vai ete (Juizes 19-21).

* 10:5 Kova'e ayvu omombe'u porãve 4.15 py.

[†] 10:8 Ha'e rami ijayvu

'rã ojevayvua oendu vy (Lucas 23.30; Apocalipse 6.16).

11

Nhanderuete oayvu ete va'eri Israel kuery ndoikuaaxeia re ijayvuague

- ¹ — Israel kyri' teri reve xee ayvu vy Egitu yvy gui aeno'i raka'e xera'y.*
² Ha'e rami aguã aenoivea ramive ma ojepe'ave tema xegui. Ha'e rami vy Baal ra'angaa pe rive ome'ê okuapy mba'emo, hekuã porã va'e guive oapy ta'angaa ojapo pyre pe.
³ Ha'e ramive ma Efraim kuery xee ambo'e raka'e oguata aguã re, xejyva py aikuavã guive tei ndoikuaa potai okuapy xee apena aikovya re.
⁴ Ha'e kuery aru raka'e ixã avakue oendu va'e nunga py, ayvua py ae. Ha'e kueryaju'y gui kanga oi'pe'a va'e rami aiko, ajero'a guive ho'u va'erã ame'ê aguã.
⁵ — Ha'e kuery ndojevyi 'rã Egitu yvy katy. Ha'e rami 'rãgue py Assíria pygua ae 'rã huvixarã, ndojeko rorovaxei rire.
⁶ Ha'e kuery retã re ou 'rã kyxe. Ha'e rami vy omopêmba 'rã okê jokia, omomba ete 'rã, ha'e kuery oipotaa rami ae ikuai rire.
⁷ Mba'eta xevyguá kuery ma xegui ojepe'a aguã rami ae ikuai. Yvate ete va'e pe ojapukai aguã re ombo'ea tei ae ma avave rei ndojapoi.
⁸ — Ha'e rami tei Efraim kuery, mba'exa tu 'rã xee roeja? Israel kuery, mba'exa tu 'rã romboaxa joupe? Mba'exa vy 'rã tu rojapo Admã e'y vy Zeboim tetã re ajapogue rami teve? Xekuraxõ omyi nhendu, xee romboaxa aendu xapy'a hendy va'e rami.
⁹ Ha'e rami vy xepoxya rupi ve'y ma 'rã aiko. Efraim kuery, xee noromombavei ma 'rã, mba'eta xee ma Penderuete, ava e'y aiko, Iky'a e'y va'e aiko penembyte. Xepoxya rupi ndajuvei 'rã pendere.
¹⁰ — Ha'e va'e kuery oguata 'rã SENHOR rakykue rupi. SENHOR onhendu 'rã guary rami. Ha'e rami onhendu rã ta'y kuery oryryipa reve 'rã ou kuaray oikea katy gui.
¹¹ Oryryipa reve 'rã ou Egitu yvy gui, guyra'i rami, apyaxu rami 'rã ou Assíria gui. Ha'e ramo ajapo 'rã ngoo py ae ju ikuai aguã rami — he'i SENHOR.
¹² — Efraim kuery xembojere va'ekue oapua rupi, Israel kuery nhombotavya aendu va'ekue jovaive rupi gui. Ha'e rã Judã ma Nguuete reve vy ipo'aka nho 'rã, ojeroviapy teri 'rã ikuai lky'a e'y va'e reve.

12

Jacó rekokue rupi Israel kuery ombo'eague

- ¹ Efraim kuery ma vvytu re rive onhemongaru, ára pukukue re oo 'rã vvytu kuaray oikea katy guigua rakykue rive. Ijapu ha'e nhomombave tema ovy. Ha'e rami vy Assíria kuery reve ojapo nhopytyvõ aguã, Egitu katy guive ogueraa azeite.
² Judã kuery re voi SENHOR oguereko oikuaa pota aguã. Ombopaga 'rã Jacó kuery heko vaia re. Ojapo vaiague repy ae 'rã omboaxa.
³ Mba'eta guyru'i py Jacó o'i teri jave ojopy oiny gukye'y pya re. Ha'e gui tuja ha'e imbaraeete ma vy Nhanderuete reve ju joguero'a.
⁴ Ha'e rami vy anjo reve joguero'aa py ipo'aka raka'e. Ojae'o reve ojerure omboaxy aguã re. Betel py ma ojou raka'e Nhanderuete. Ha'e ramo nhandereve Nhanderuete ijayvu raka'e ha'e py.*
⁵ SENHOR Nhanderuete ixondaro reta va'e, SENHOR ae hery va'e.
⁶ Ejeko rova Nderuete peguarã reiko aguã. Eiko mborayvu ha'e teko porã rupi. Ha'e vy earõ riae Nderuete.
⁷ Ha'e gui Efraim kuery ma mba'emo vendea rupi ikuai. Opo py oguereko mba'emo opejaa jokorearã. Nhombojexavaia rupi anho ikuaixeve.
⁸ Ha'e rami tei aipoe'i: "Anhetê arekopa, heta ma ajogua rire. Ha'e rami aguã rami anho anhea'ã tei xere ndojouai teko vai, ajejavya noi", he'i.
⁹ — Ha'e rami ndeayvu tei xee ma SENHOR Nderuete, Egitu yvy gui rogueruague ára guive. Te'gue ju ajapo 'rã oo'i py rei aguã rami, ngaru ára javegua rami.
¹⁰ Xeayvu ambou profeta kuery pe, mba'emo aexa uka jepi guive. Mba'emo re ambojooa rupi guive xeayvu amombe'u uka profeta kuery pe.
¹¹ — Gileade py ikuai ojevavy va'e, mba'eta ndovare'i va'e meme ae. Gilgal py ikuai avi vaka ojuka reve ome'ê va'e, tei altar oguereko va'e ma mba'ety rupi ita omboaty pyre rami rive 'rã opyta.
¹² Jacó Israel hery va'e ma Assíria yvy katy ojava vy, petei kunha re omba'eapo oikovy va'ekue. Hexe omenda aguã mymba kuery re opena oikovy va'ekue.
¹³ Ha'e gui SENHOR ma petei profeta pe oguenoê uka raka'e Israel kuery Egitu yvy gui, profeta pe guive opena uka ha'e kuery re.
¹⁴ Ha'e rami tei Efraim kuery ma ombopoxy vaipa. Ha'e nunga rupi ha'e kuery re SENHOR ojea 'rã jougyu omoê va'ekue opaga aguã, ojapo 'rã guive ha'e kuery re ae ju joapo vaiague ojeapa aguã rami.

13

Nhombojaga aguã re ijayvuague

- ¹ — Efraim ijayvu ramo oryryipaa va'ekue, Israel kuery voi omboetepa va'ekue. Ha'e rami tei Baal ra'angaa pe oikoa rupi onhemongy'a vy omano raka'e.

* 11:1 Mateus 2.15

* 12:4 Jacó Israel hery mboae va'e rekokue omombe'u Gênêsis 28-31 py.

² Aÿ ma ha'e kuery ojevavyve tema oje'oivy. Ha'e rami vy prata oguereko va'e ryku gui ojapo 'rã ta'angaa, mba'emo ra'angaa ha'e kuery ojapo oikuaa rami rive. Ha'e nunga ha'e javi ma avakue ojapo kuua va'e rembiapo rive. Ha'e gui ma joupe-upe "Peme'ë mba'emo ha'e nunga pe", he'i 'rã okuapy. Ha'e ramo avakue oova rayvu 'rã okuapy vaka ra'y ra'angaa!

³ Ha'e nunga rupi ha'e kuery okanhy 'rã ovy aje'ive'i arai ojekuaa va'e rami, yxapy ko'ëmba'i ramove ipirupa vyvoi va'e rami, mba'emo pirukue oka gui omombo rive va'ekue, ha'e hataxi janela rupi oë ovy rami.

⁴ Ha'e rã xee ma SENHOR Nderuete, Egito yvy re pendekuaia ára guive. Ha'e nunga rupi amboae tuuete ramigua ndapeikuai 'rã xee e'ÿ vy, mba'eta xee e'ÿ vy pendereraa jepea ndoiko.

⁵ — Xee roikuaa raka'e tekoa e'ÿa py, yvy piru reia py.

⁶ Nhuü ikuai ja ma ha'e kuery hevayatãmba. Ha'e gui hevayatãmba vy onhemboyvate opy'a py. Ha'e rami vy xegui hexaraipa okuapy.

⁷ Ha'e rami rã xee ma guary rami 'rã ajekuaa uka ha'e kuery pe, xivi ipara va'e tape py oma'ë mbegue oiny va'e rami.

⁸ Urso kunha ta'y'i re imonda pyre rami avi xee ha'e kuery aro'a vy amondoropa 'rã ipy'a rryru guive. Guary rami amokõmba 'rã ha'e py, inharõ va'e ka'aguy rupi ikuai va'e omboaypaa rami avi.

⁹ Israel kuery, pekanhy aguã ma pendegui ae ou, ha'e rã peo jepe aguã ma xeguigua anho.

¹⁰ Mamo tu aÿ penderuvixa oï, peneretã ha'e javi rupi pendereraa jepe aguã? Ha'vy penderereko kuery, ha'e kuery pe "Pejou nhanderuvixaverã ha'e yvatekueve va'erã kuery" pejeague va'e?

¹¹ Ha'e ramo penderuvixaverã ma xepoxya rupi ambou raka'e, ha'e gui xepoxya rupi ae ju xee aipe'a.

¹² — Efraim kuery reko vaiague ma ojokuaa ma imoiny, ojevavyague regua oia ma omõ porãmbaa avi.

¹³ Ha'e kuery re ou 'rã kunha kyrĩ va'e oguereko rai'i rã haxya ramigua. Ta'y hi'arandu e'ÿ va'e ikuai, guyrui'gui hexakãa py noë kuaai va'e rami avi, itui'i aguã ovaë ma teĩ.

¹⁴ Xee araa jepe 'rã tata ogue'ÿ va'e po'akaa gui, aepy 'rã manoa gui. Ndee manogue, mamo tu oï renhomingo axy aguã? Ha'vy ndee tata ogue'ÿ va'e, mamo tu oï renhomomba aguã? Teive henda py xee ndaxai anhomboaxy aguã.*

¹⁵ Guvyv kuery gui ha'e kuery imbarateve teĩ kuaray oieka katy gui ou 'rã yvytu SENHOR-a guigua. Tekoa e'ÿa gui ou vy omobirupa 'rã ijyvy re yakã ikuai va'e, omobirupa 'rã yvu ha'e py. Oipe'a ukapa 'rã guive mba'emo porã omõ porãaty py oguereko va'ekue.

¹⁶ Samaria pygua kuery re oï 'rã ojevavyague re opaga aguã, Nguuete rovai opu'ã rire. Ha'e kuery ho'apa 'rã kyxe py, ta'y kuery omboaypaa 'rã, ha'e ta'yxy kuery imemby rryru'i va'e rye oipe'ãa 'rã guive.

14

Joperdoa aguã re ijavyvague

¹ — Israel kuery, pejevy ju Penderuete pe, mba'eta pejevavya ae pendereity.

² Pejeko rerovaa rupi pendeayvu reve pejeko me'ë SENHOR pe. Aipopeje: "Embogue ke rojevavya ha'e javi ha'e oremovaë porã ju, mba'eta vaka ra'y 'rãgue py ayvu orejuru py roguereko va'e rome'ë ndevy.

³ Assíria kuery ma ndorereraa jepei 'rã. Kavaju áry ore ndoroovei 'rã ha'e katy. Orepo py rojapo va'ekue pe 'Ndee ma oreruete' ndoro'evei 'rã guive. Ndere anho tyre'ÿ kuery ojou 'rã imboaxyarã", peje.

⁴ — Ha'e rami rã xee romonguera 'rã pejeroviaa rupi e'ÿ pendekuaiaague gui. Xejegui ae roayvu ju 'rã, mba'eta peë kuery pe xepoxyague oaxapa ma.

⁵ Israel kuery pe xee aiko 'rã yxapy rami. Ha'e rami vy amoingo porã 'rã yvoty lírio rami, ha'e Líbano regua yary rami avi hapove ovy aguã rami.

⁶ Ha'e rami vy hakã ipukupave 'rã ovy, oliva'y rami ete 'rã iporã, ha'e Líbano regua yary rami 'rã heakuã porã.

⁷ Ha'e gui ma Israel kuaray'ã py oguapy va'ekue ojevypa ju 'rã. Mba'emo aju rami 'rã ikuai porã ju, ipotypa ju 'rã uva rakã rami avi. Uva rykue Líbano guigua rami oikuaa pavë 'rã.

⁸ — Ha'e gui Efraim kuery, mba'e tu xee areko mba'emo ra'angaa reve? Pendeayvua xee aendu vy apena 'rã pendere. Yvyra pyau rami xee aiko, mba'eta xere anho oï pendekuai porã aguã.

Opa vy ijavyvague

⁹ — Hi'arandu va'e kuery toikuaa kova'e nunga. Oiko kuua va'e kuery toikuaa avi. Mba'eta SENHOR reko ma tape hi'lyvi porã va'e meme. Ha'e va'e rupi anho 'rã heko porã va'e kuery oo. Ha'e rã heko vai va'e kuery ma ho'apa 'rã ha'e py.

* 13:14 1 Coríntios 15:55

Joel ayvu oĩa Joel ayvu oĩa

Judá yvy re tuku-karu ou vvy nhuũ ha'e ojou va'e tema ho'upa, yakã voi omombirupa ramo mymba kuery omanomba yuvei gui. Profeta Joel oikuaa rã ha'e rami ae 'rã oiko araka'eve rã Nhanderuete ojevavy rei va'e kuery ombopaga ramo. Ha'e va'e ára pe ma "Senhor ára" he'i. "Ha'e va'e ára ma ha'e rami ete 'rãl Mba'eta ovaẽ rai'i ma Senhor ára. Mba'emo mbovaipaa rami 'rã ou Ipo'akapa va'e gui" (1.15). "Ha'e va'e ára ma pytũmba 'rã, arai huũmba rei 'rã. Yvyty áry ko'ẽ jekuaa ouvva rami avi ou 'rã petei regua heta ha'e imbarae ete va'e. Ha'e ramigua ma yma guive oiko e'ỹ va'ekue teri, nei ha'e va'e rire voi ndoikovei 'rã, ikuai jevy-jevvy va'e pe voi. Ha'e kuery renonde oo oiny tata nhomombaarã, ha'e rã hakykue ma tataendy joapy va'e ou. Henonde ma Édén yvotyty rami yvy itui, ha'e rã hakykue ma yvy mbovaipaa. Avave rei ndoo jepeai 'rã" (2.2-3).

Senhor aipoe'i avi: "Araka'eve rã avakue ha'e javi re anhoẽ 'rã imbouvvy Xenhe'ẽ. ... Yva ha'e yvy re aexa uka 'rã nhomondyipaarã: tuguy, tata ha'e hataxĩ. Senhor ára opa mba'e py nda'evei va'e ou ra ramo kuaray pytũmba 'rã, ha'e rã jaxy ma tuguy rami 'rã ojekuaa. Ha'e ramo ha'e javi Senhor rery rupi ojavukai va'e oo jepe 'rã" (2.28a, 30-31a).

Tuku-karu ha'e nda'okyveia pukukue gui ikuai axypaa re ijayvuague

¹ Ayvu SENHOR guigua Petuel ra'y Joel pe ombou va'ekue.

² Peẽ tujakue, pendu pova'e. Nhandeyvy re pendekuai va'e, pejapaxaka pavẽ. Oiko ma pa ha'e ramigua pendekuai jave? Tyrã pa penderu kuery ikuai jave oiko?

³ Pemombe'u ha'e nunga pendera'y kuery pe, ha'e pendera'y kuery ju tomombe'u gua'y kuery pe, ha'e gui ta'y kuery jevy pe guive.

⁴ Mba'eta tuku mba'emo ayaa ndo'upai va'ekue ma tuku uguata va'e ho'u, ha'e tuku uguata va'e ndo'upai va'ekue ma tuku mba'emo 'ua ho'u, ha'e gui tuku mba'emo 'ua ndo'upai va'ekue ma tuku mba'emo mbovaipaa ho'u.*

⁵ Peka'u rei va'e, pemyi ke, ha'e pejae'o. Vinho pey'u peikovy va'e ha'e javi penhendu ratã vinho pyau kãuxa, mba'eta pendejuru pyguarã va'ekue oipe'aa.

⁶ Mba'eta xeyvy rovai guarã oo oiny petei regua imbaraetkue mbovy e'ỹ va'e. Haĩ ma guary raĩ rami, guary kunha rami ete haĩ apĩ va'e.†

⁷ Xeyvy re ha'e kuery ombovaipa uva rembypy onhotỹ mbyre, figo'y guive omomba. Oipirova vy ipirekue rive omombo yvy re, rire hakã ha'e javi ma ojeipirova rei va'e opyta.

⁸ Pejae'o ke kunhata'i voxa vaikue py onhemonde reve omerã va'ekue kunumi re ipy'a vai va'e rami.

⁹ Ha'e gui SENHOR pegua oo py nda'ipovei mba'emo aju ha'e mba'emo rykue peme'ẽ 'rã va'ekue, rire SENHOR rembiguai sacerdotekue ryvy voi iporiaupa rei okuapy.

¹⁰ Mba'ety ikuai va'e ivaipa, yvy ipirupa oiny guive, mba'emo aju ivaipa, uva rembypy ipirupa, ha'e oliveira'a hu'ũmba.

¹¹ Mba'ety rupi peiko va'e, pexĩmba ke. Ha'e uva re pepena va'e, penhendu ratã, trigo ha'e cevada re guive, mba'eta okanhymba ma pemono'õ 'rã va'ekue.

¹² Uva rembypy ikuai va'e ipirupa, figo'y na'iporãvei, romã rogue, pindo ha'e maçã 'y voi. Yvyra yvy re ikuai va'e ha'e javi ipirupa. Ha'e va'e gui noĩvei ma avakue ra'y kuery ovya'aguã.

¹³ Sacerdotekue kuery, penhemonde ke ajukue voxa guigua py, ha'e pejae'o. Penhendu ratã, altar rupi pemba'eapo va'e. Xeruete ropy rupi pendekuai va'e ha'e javi ke peju. Voxa guigua py penhemonde pytũ mbukukue re, mba'eta Nhanderuete pegua oo py mba'emo aju ha'e mba'emo rykue ndoguervavei ramo.

¹⁴ Pavẽ pe pendu ukapa okaru e'ỹ re ikuai aguã, pejapo nhemboaty iky'a e'ỹ va'e, penoĩmba yvatekueve ha'e nhandeyvy re ikuai va'e ha'e javi SENHOR Nhanderuete ropy oupa aguã. Ha'e gui pejapukai SENHOR pe.

¹⁵ Ha'e va'e ára ma ha'e rami ete 'rãl Mba'eta ovaẽ rai'i ma SENHOR ára.‡ Mba'emo mbovaipaa rami 'rã ou Ipo'akapa va'e gui.

¹⁶ Pexaa py e'ỹ ri ty'y pe'u 'rã va'ekue okanhymba? Ha'e Nhanderuete ro gui voi ndoipe'aa'i 'rã ri ty'y javy'aa ha'e mby'a porã?

¹⁷ Mba'eta mba'emo ra'yĩgue ma ipirupa oiny yvy guĩry. Mba'emo moĩ porãaty ivaipa, mba'emo pemono'õ va'ekue moĩ porãaty ho'apa, pemono'õ 'rã va'ekue okanhymba ramo.

¹⁸ Nhuũ nda'ipovei rã vaka kuery iporiaupa okuapy, penerymba kuery ha'e javi nda'evevei rei ikuai. Vexa'i kuery voi okanhymba oje'oivy.

¹⁹ SENHOR, ndevy pe ajapukai, mba'eta nhuũndy ikuai va'e ma tata oapypa, yvyra voi tata omotapyĩmba.

²⁰ Yy ipirupa rã ha'e javi mymba'i nhuũndy rupigua onhe'ẽ rei okuapy ndevy pe ipoã vy, ha'e nhuũndy ikuai va'ekue tata omomba rire guive.

* 1:4 Apy ijayvy irundy regua tuku ha'e py ikuai va'e re. Ha'e nunga ombovaipa ha'e kuery yvy, ho'upa mba'emo rogue, uva rogue, ha'e yvyra pire guive. Nhanderuete ombou ojevavya re, raka'eve rã SENHOR ára py mba'emo vai ombou va'erã rami avi. † 1:6 "Guary rami haĩ va'e" he'ia ma tuku-karu re ijayvy vy, mba'emo 'ua ramo. ‡ 1:15 Apy " SENHOR ára" he'ia py ma raka'eve rã SENHOR nhombopaga aguã re ijayvy vy (Ezequiel 30.1-3; Joel 2.1-2; Amós 5.18-20; Obadías 15-17; Sofonías 1.7-18; 2 Pedro 3.10-13).

2

¹ Pemonhe'ê ke mimby guaxu Sião py, pemonhendu atã xeivygua yvyty áry. SENHOR ára ou oiny ramo toryryipa yvy re ikuai va'e, mba'eta ovaê rai'i ma.

² Ha'e va'e ára ma pytũmba 'rã, arai huũmba rei 'rã. Yvyty áry ko'ê jekuaa ouvya rami avi peteĩ regua ou 'rã heta ha'e imbarae ete va'e. Ha'e ramigua ma yma guive oiko va'ekue'y teri, neĩ ha'e va'e rire voi ndoikovei 'rã guive, ikuai jevy-jevy va'e pe voi.

³ Ha'e kuery renonde oo oiny tata nhomombaará, ha'e rã hakykue ma tataendy joapy va'e ou. Henonde ma Eden yvotyty rami yvy itui, ha'e rã hakykue ma yvy mbovaipaa. Avave rei ndoo jepeai 'rã.

⁴ Ha'e kuery jaexa rã kavaju rami ojekuaa. Kavaju joe opu'ã rupigua rami ete onha oje'oi.

⁵ Omoparãgue rei jogueruvy karóxa kavaju regua rami. Yvyty áry rupi oaxa, ombopororo-roro 'rã jogueravy ka'aguy okai vy opororo-roro rami, avakue heta vaipa ete joe opu'ã aguã katy oje'oi va'e rami avi.

⁶ Henonde ma yvy regua okyjepa, hova xiũgepa rei 'rã guive.

⁷ Ha'e kuery ma ipy'a guaxukueve rami 'rã onha. Avakue joguero'aa py ikuai va'e rami 'rã ojeupi tetã ikuai va'e kora áry. Peteĩ-teĩ oje'oi 'rã guape rupi ae, hxyx jogueravya gui ndojepe'ái 'rã.

⁸ Nanhomoanha-anhai 'rã guive, peteĩ-teĩ ma oo aguã va'ekue rupi ae 'rã oo. Ndopyta rive-rivei 'rã tape rupi.

⁹ Oje'oi pojava 'rã tetã re opu'ã vy. Onha 'rã kora áry rupi, ojeupi 'rã oo ikuai va'e oipe'axe vy, imonda va'e rami 'rã oike janelã rupi.

¹⁰ Ha'e kuery renonde yvy oryryi 'rã, yva omyĩ 'rã guive. Kuaray ha'e jaxy pytũmba 'rã. Jaxy-tata voi naendyvei 'rã.

¹¹ SENHOR ma guembiguai kuery heta raxa ikuai va'e renonde ijayvu ratã 'rã. Mba'eta ijayvua rupi ikuai va'e ma ipo'aka ete. Tá, SENHOR ára ma ipoyi ete 'rã, ivaikue raxa 'rã guive! Mava'e tu ogueropo'aka 'rã?

SENHOR nhomboaxya rupi ijayvuague

¹² Ha'e rami teĩ SENHOR aipoe'i:

— Aỹ'i ma voi pejeko rerova pendepy'a ha'e javi py, xeivygua eterã. Pekaru e'ỹ re pendekuai, pejae'ou ha'e penhemboaxy rei reve.

¹³ Pemondoro pendepy'a, pendeao e'ỹ — he'i. Ha'e rami vy pejeko rerova SENHOR peguarã. Mba'eta nhomboaxy kuaa ha'e poroayvu va'e oiko. Nda'ivai rive-rivei 'rã, nhandarayvu ete ha'e mba'emo vai gui ojejoko va'e.

¹⁴ Xapy'a rei ma nhandere SENHOR ojevy vy ndojapovei 'rã ojapo 'rã va'ekue, ha'e rami 'rãgue py oeja 'rã nhanemoingo porãará, ha'e ramo mba'emo aju ha'e mba'emo rykue teĩgue ju jajou aguã SENHOR Nhanderuetete pe nhame'ê va'erã.

¹⁵ Ha'e nunga rupi mimby guaxu pemonhe'ê Sião py, peikuaa uka aguã pekaru e'ỹ re pendekuai ha'e nhemboaty iky'a e'ỹ va'e pejapo aguã.

¹⁶ Pemboaty ke heta va'e kuery ha'e javi, peiky'a'ou ukapa guive onhemboaty va'e. Pemono'õ tujakueve, pemboaty pendera'y kue'iry, okambu'i va'e guive. Tou ava omenda ramo va'e, ta'yxy voi toẽ ouvy opy ja'ou oĩague gui.

¹⁷ SENHOR rembiguai sacerdote kuery avi tojae'ou templo rokẽ ha'e altar mbyte rupi ikuai py. Tojerure po rami: “ SENHOR, emomba uka eme ndevyguã kuery. Emboaxa eme ndevyguã kuery ija'e e'ỹ va'e pe ojoi rei aguã, amboae regua kuery 'Mamo tu Penderuete oi?' he'i e'ỹ aguã”, te'i.

¹⁸ Ha'e rami rã SENHOR oexa uka ovy re opena porãa, ojeupegua kuery omboaxy ju guive.

¹⁹ Ha'e rami vy ombovai vy aipoe'i ha'e kuery pe:

— Ne'exã, pendevy ambou 'rã mba'emo aju, uva rykue ha'e azeite. Ha'e va'e gui penerevyatã ju 'rã. Peẽ kuery noromboaxavei 'rã amboae regua kuery pe pendejojai rei aguã.

²⁰ Ha'e rã kuaray ijapu'a'ia katy gui xondaro kuery ou va'ekue ma peẽ kuerya gui aipe'apa ju 'rã mombyry. Peteĩ yvy piru reia katy 'rã amondouka, tekoa e'ỹa re. Henondevegua kuery amondouka 'rã kuaray oua katy ye'ê õ va'e re, ha'e rã hakykuegua kuery ma ye'ê kuaray oikua katy 'rã. He'õgue ma heakuã vaikue 'rã, xepo'akaa rupi roepy rire — he'i.

²¹ Ha'e nunga rupi ndee yvy, ekyjeve eme. Evy'a ha'e eĩ porã, SENHOR mba'emo porã ete ojapo ramo.

²² Ha'e mymba nhuũndy rupi pendekuai va'e, pekyjeve eme mba'eta nhuũ iporãmba ju 'rã tekoa e'ỹa rupi, yvyra ikuai va'e voi hi'apa ju 'rã, figo ha'e uva voi hi'a porãmba 'rã.

²³ Peẽ Sião pygua kuery, pevy'a avi ke, perovy'a SENHOR Penderuete, mba'eta ombo'oky ju 'rã ha'evea rupi. Ha'ekue rupi ae ju 'rã ombo'oky pema'etỹ jave, ha'e gui henhoĩmba jave guive.

²⁴ Mba'emo ra'yĩgue ykya ma tynyẽ ju 'rã trigo, ha'e mba'emo ryrũ ikuai va'e tynyẽmba 'rã uva rykue ha'e azeite.

²⁵ — Pendevy amboekovia 'rã ma'etỹ oaxa va'ekue py tuku oguata va'e ho'upa va'ekue, ha'e tuku mba'emo mbovaipaa, tuku mba'emo ayaa ho'u va'ekue guive, mba'eta xeivygua xondaro kuery penderovai ambou va'ekue meme.

²⁶ Ha'e ramo pekaru porã ju 'rã penevyatãmba peve. Ha'e rami vy perovy'a 'rã SENHOR Penderuete rery, penderereko porã ramo. Ha'e va'e rire xeivygua kuery nomoxĩmbaavei ma 'rã.

²⁷ Ha'e gui peikuaa 'rã Israel kuery mbyte aia, ha'e xee SENHOR Penderuete aikoa, mba'eta ndoikoi amboae. Ha'e ramo xeivygua kuery nomoxĩmbaavei ma 'rã raka'e rã peve.

Nhe'ê Ky'a E'ỹ ombou aguã re ijayvuague

²⁸ — Araka'eve rā avakue ha'e javi re anhoē 'rā imbouvy Xenhe'ē. Ha'e ramo pendera'y ha'e penderajy kuery ijayvuu 'rā xegui. Kakuakueve ma oexa ra'u 'rā mba'emo, ipyaukueve pe voi aexa uka 'rā.

²⁹ Tembiguai kuery avakue ha'e kunhague re voi ambou 'rā Xenhe'ē ha'e va'e ára.

³⁰ Yva ha'e yvy re aexa uka 'rā guive nhomondyipaará: tuguy, tata ha'e hataxí.

³¹ SENHOR ára opa mba'e py nda'evei va'e ou ta ramo kuaray pytũmba 'rā, ha'e rā jaxy ma tuguy rami 'rā ojekuaa.

³² Ha'e ramo ha'e javi SENHOR rery rupi ojapukai va'e oo jepe 'rā. Sião yvyty re ha'e Jerusalém tetã py ikuai 'rā oo jepe va'e, SENHOR ijayvuague rami. Okuave va'e ha'e javi 'rā ikuai SENHOR oenoí va'ekue.*

3

Ngovaigua kuery Nhanderue ombopaga aguã re ijayvuague

¹ — Ne'exa, ha'e va'e ára, ha'e va'e jave ma ambopyau ju 'rā Judá ha'e Jerusalém pygua kuery ikuai.

² Amono'õmba avi 'rā ha'e javi regua, ajapo 'rā Josafá yvyugua py ogejyapa aguã rami. Ha'e py ma ambopagapa 'rā xevygua kuery káuxa, mba'eta xevygua Israel kuery ha'e kuery omoaĩmba rire amboae regua ikuai rupi, xeivy guive jomeme omboja'o-ja'o va'ekue.

³ Xevyguá kuery re ha'e kuery oexa okuapy va'ekue oxortea. Avakue'i ha'e kuery omboekovia itavy rei va'e re, ha'e kunhague'i ma vinho oy'u va'erã re rive omboekovia va'ekue.

⁴ Tiro ha'e Sidom pygua, ha'e Filístia pygua ha'e javi, mba'e tu pereko xereve? Pepu'axe ri ty'y xere? Ha'e ramo are'ỹ re xee ajapo 'rā pendeveia peneakã re ae ju ojeapa aguã rami.

⁵ Mba'eta peraa va'ekue xevyguá prata ha'e ouro. Xemba'e iporãgue voi templo pereko va'e rupi pemoí,

⁶ ha'e Judá ha'e Jerusalém pygua kuery ma perãta re pendeveia va'ekue grego kuery pe, ovyv gui mombyry ikuai aguã rami.

⁷ Ne'exa, xee arupa ju 'rā pemboaxaague gui. Ha'e vy pendeveia ajapo 'rã peneakã re ae ju ojeapa aguã rami.

⁸ Pendera'y kuery ha'e penderajy kuery ju amboaxa 'rã Judá regua kuery pe. Ha'e gui ha'e va'e kuery ju ome'ẽ 'rã sabeu kuery mombyry raxa ikuai va'e pe, SENHOR ae ijayvu rire.

⁹ — Peikuaa uka pova'e nunga amboae regua kuery pe: “Pemombe'u joe pepu'ã aguã, penoĩmba ipy'a guaxukueve. Ha'e ramo avakue joe opu'ãa pygua tovaẽmba, ha'e toẽmba ju oje'oivy.

¹⁰ Yvy karaĩa pereko va'e gui pejapo kyxerã, ha'e mba'emo 'lygue gui pejapo hu'yã. Tove ikangy va'e 'Xee ma xembaraete va'e', te'i.

¹¹ Ijyvyry pendekuai va'e ha'e javi, pejapura pejuvy, penhemoatypa”, peje.

Ha'e gui SENHOR, ha'e py embou avi ke ndeguigua ipy'a guaxukueve.

¹² — Topu'ã yvy regua kuery, Josafá yvyugua katy toupa. Mba'eta ha'e py ma xee aguapy 'rã ainy yvy regua kuery ambopaga aguã.

¹³ Pejopy pavẽ ke foice, mba'ety ijajupa ma ramo. Peju, pepyrõ, mba'eta uva rykue ombiriaty py tynyẽ ma hi'a, hyru ikuai va'e tynyẽmba guive, ha'e kuery ojevayague tuvixa ete rire.*

¹⁴ Ha'e gui heta-etave 'rã ou yvyugua ombopagaa aguã katy! Mba'eta SENHOR ára ovaẽ rai'i ma yvyugua nhombopaga aguã py.

¹⁵ Kuaray ha'e jaxy pytũmba, jaxy-tata voi naendyvei.

¹⁶ Ha'e gui SENHOR ijayvu atã 'rã Sião gui, Jerusalém gui oendu uka 'rã. Ha'e ramo yva ha'e yvy oryryipa 'rã. Ha'e rami teĩ SENHOR oiko 'rã iuxepagua kuery onhemi atyrã, Israel kuery pegua oo imbarate va'e 'rã oiko.

¹⁷ — Ha'e ramo mae peikuaa 'rã xee SENHOR Penderuete aikoa, ha'e xevyguá yvyty iky'a e'ỹ va'e Sião py aĩ va'ea. Ha'e gui Jerusalém tetã nda'iky'avei 'rã. Ha'e rupi ndoaxavei ma 'rã amboae regua.

Israel kuery omoingo porã ju aguã re ijayvuague

¹⁸ — Ha'e va'e ára ma yvyty ikuai va'e gui oxyry 'rã oiny uva rykue. Yvy'ã áry gui oxyry avi 'rã kamby. Ha'e ramo Judá regua yakã ha'e javi tyguaxupa 'rã. Ha'e gui SENHOR pegua oo gui yvy oxyry ovyv vy omoakũmba 'rã Sítim yvyugua ha'e javi rupi.

¹⁹ Ha'e rã Egito yvy ma ombovaipaa 'rã, Edom voi yvy piru reia oejapa pyre 'rã opyta, Judá regua kuery jukaa rupi ikuaiague re, ovyv re huguy omoẽ rire mba'e re'ỹ teĩ.

²⁰ Ha'e rã Judá yvy ma hekoa riae 'rã, Jerusalém tetã voi, ta'y jevy-jevy ikuai peve.

²¹ Xee anhombopaga 'rã huguy omoẽague nambopagai teriague re — he'i, mba'eta SENHOR oiko 'rã Sião py.

* 2:32 Kova'e ayvu rupi ijayvua Pentecostes ára py (Atos 2.1-21, 38-40). Ha'e gui “ SENHOR rery rupi ojapukai va'e oo jepe 'rã” he'ia ma Romanos 10.12-13 py omombe'u porãve avi. * 3:13 Ha'e va'e jave py ha'e kuery ombiri 'rã uva oprõ vy. Ha'e rami avi apy ijayvu Nhanderue nhombopaga aguã re (Apocalipse 14.14-20).

Amós ayvu oĩa

Amós ayvu oĩa

Amós ma vexa'i re openaa rupi oiko jave ixupe Nhanderuete oayvu ombou Israel kuery peguarã, mba'eta ha'e va'e kuery heko vai ete ramo Nhanderuete ombopaga aguã rami oiko. Ha'e kuery heko porã merami rive va'e vy ha'eve'ya rami joguereko, nhomboaxy 'rãgue py jokorepa. Ha'e rami nhandekuaia Senhor ndojou porã vy nhanembopaga 'rã. “Senhor onhendu atã 'rã Sião gui, Jerusalém tetã guive oendupaa aguã jayvua. Ha'e ramo nhuũndy vexa'i re openaaty overepa 'rã, Carmelo vyvty apyte peve 'rã ipirupa”, he'i (1.2).

Marã rami tu ha'vy nhandekuai aguã re profeta ijayvu? “Peka ke mba'emo porã peikove aguã, mba'emo vai nda'ei. Ha'e ramo 'rãe Senhor oiko peẽ kuery reve, aipopejeaty rami ae. Pejeguaru ke mba'emo vai gui, perovy'a iporã va'e anho. Ha'evea rami pota ke pejoguereko tetã rokẽ py. Ha'e ramo José ramymino kuery pekuave'i va'e, xapy'a rei Senhor Nhanderuete ixondaro reta va'e penemboaxy nho 'rã” (5.14-15).

Yvy regua kuery rovai ijayvuague

¹ Kova'e ayvu ma Amós pe mba'emo oexa ukaa rupi ombou pyre. Ha'e va'e ma Tecoa tetã pygua, vexa'i re opena va'ety kuery va'e regua. Israel kuery reko re ijayvu Judá pygua huvixa Uzias ha'e Joás ra'y Israel pygua huvixa Jeroboão oĩ jave, mokoĩ ma'et'ỹ teri vyv oryryi aguã oata jave guive.

² Ha'e gui ma aipoe'i: SENHOR onhendu atã 'rã Sião gui, Jerusalém tetã guive oendupaa aguã jayvua. Ha'e ramo nhuũndy vexa'i re openaaty overepa 'rã, Carmelo vyvty apyte peve 'rã ipirupa.

³ Po rami SENHOR ijayvu:

— Mboapykue, irundykue Damasco pygua kuery ojapo vaiague re nambopaga e'ỹvei ma 'rã, mba'eta ferro guigua py ha'e kuery omou'ũmba rire Gileade pygua kuery.

⁴ Ha'e nunga rupi amboja 'rã tata Hazael ro re. Ha'e rami vy oapypa 'rã Ben-Hadade ro tuvixa va'e ha'e javi.*

⁵ Amopẽmba 'rã Damasco kora rokẽ jokia. Amomba avi 'rã Biqueate-Áven ikuai va'e, Bete-Éden re opena va'e guive. Ha'e gui Síria pygua kuery escravo-rã ogueraapaa 'rã Quir katy — he'i SENHOR.

⁶ Po rami SENHOR ijayvu:

— Gaza pygua kuery ju mboapykue, irundykue ojapo vaiague re xee nambopaga e'ỹvei ma 'rã, tetã re ikuai va'e ha'e javi escravo-rã ogueraapa rire Edom pygua kuery po py omboaxapa aguã.

⁷ Ha'e nunga rupi Gaza tetã kora re amboja 'rã tata oo tuvixakueve mbovaipaarã.

⁸ Amomba 'rã Asdode pygua kuery, Asquelom re opena va'e guive. Ha'e gui Ecom rovai ju 'rã apu'ã xepo'akaa rupi. Ha'e ramo filisteu kuery rembyrekue omanomba 'rã — he'i SENHOR.

⁹ Po rami SENHOR ijayvu:

— Tiro tetã pygua kuery ju mboapykue, irundykue ojapo vaiague re xee nambopaga e'ỹvei ma 'rã, ha'e kuery ma nhombo'a vy omboaxapa rire Edom pygua kuery po py. Na'ima'endu'ai okuapy joegua kuery reve ikuai porã aguã ojapo va'ekue re.

¹⁰ Ha'e nunga rupi Tiro tetã kora re amboja 'rã tata oo tuvixakueve ikuai va'e mbovaipaarã.

¹¹ Po rami SENHOR ijayvu:

— Edom pygua kuery voi mboapykue, irundykue ojapo vaiague re xee nambopaga e'ỹvei ma 'rã, ha'e kuery ma guvvy kuery ae kyxe reve omonha rire, omboaxya noendui guive. Ha'e rami 'rãgue py opoxya anho oendu vy nhombo'ypa tema, ha'e nunga anho oendu, raka'e rã peve guarã.

¹² Ha'e nunga rupi Temã tetã re amboja 'rã tata Bozra py oo tuvixakueve ikuai va'e mbovaipaarã.

¹³ Po rami SENHOR ijayvu:

— Amom pygua kuery ju mboapykue, irundykue ojapo vaiague re xee nambopaga e'ỹvei ma 'rã, ha'e kuery ma Gileade pygua kuery memby rryu'i omondoropa rire ovyvã ombotuvixave aguã rive.

¹⁴ Ha'e nunga rupi Rabã tetã kora re amboja 'rã tata oo tuvixakueve ikuai va'e mbovaipaarã, joe opu'ã va'e ojavukaia reve, ára vai py vyvty vaikue ramigua.

¹⁵ Ha'e ramo ha'e pygua huvixa heraa 'rã escravo-rã, hembiguai yvatekueve reve — he'i SENHOR.

2

¹ Po rami SENHOR ijayvu:

— Moabe pygua kuery voi mboapykue, irundykue ojapo vaipaague re xee nambopaga e'ỹvei ma 'rã, ha'e kuery ma Edom pygua huvixa kãgue oapypa rire, iku'ikue rive opyta peve.

² Ha'e nunga rupi Moabe vyv re amboja 'rã tata, Queriote tetã py oo tuvixakueve ikuai va'e mbovaipaarã. Ha'e ramo Moabe pygua kuery omanomba 'rã yapu rei, tevovo rei ha'e mimby guaxu omonhe'ëa mbyte py.

³ Ha'e kuery mbyte gui amomba 'rã joguerekoa, ajuka ukapa avi 'rã ixupegua yvatekueve ha'e javi — he'i SENHOR.

Judá kuery rovai ijayvuague

⁴ Po rami SENHOR ijayvu:

* 1:4 Hazael ha'e Ben-Hadade ma Síria vyv regua huvixa ikuai raka'e. Ha'e kuery retã ma Damasco.

— Ha'e gui Judá kuery ju mboapykue, irundykue ojapo vaiague re nambopaga e'ývei ma 'rã, ha'e kuery ma SENHOR guígua lei rupi nda'ikuaixei vy ovapa rire ojapo uka va'ekue gui. Ha'e gui anhetê va'e rupi e'ý ombojerovíaa rupi ju onhembotavy uka okuapy, guamoí kuery ikuaiaague rami ae.

⁵ Ha'e nunga rupi Judá re amboja 'rã tata, Jerusalém py oo tuvixakueve ikuai va'e mbovaipaará.

Israel kuery rovai ijayvuague

⁶ Po rami SENHOR ijayvu:

— Ha'e gui Israel kuery ju mboapykue, irundykue ojapo vaiague re nambopaga e'ývei ma 'rã, mba'eta joguerekoa kuery ma peráta re rive omoingo axy heko porã va'e, iporiaukue'i ombo'apa 'rã py regua repy re rive.

⁷ Ha'e kuery ombojexavai 'rã iporiaukue'i oakã áry vvy ku'i omombo peve, ha'e oiko rive'i va'e pe omokarê tape. Ta'y petêi kunhataí ogueronheno va'ekue ae tuu ju 'rã ojopy. Ha'e rami vy omongy'a rive okuapy xerery iky'a e'ý va'e.

⁸ Ha'e gui altar oí va'e yvýry onheno 'rã oupy ajukue nhomborevea rupi ojopy va'ekue áry. Nguuete ropy eteve voi oy'u 'rã okuapy vinho jokorepaa rupi oipe'a va'ekue.

⁹ Ha'e rami teí ha'e kuery renonde gui amomba va'ekue amorreu kuery yary rami yvate va'ekue teí, vyvra carvalho rami imbarae va'ekue. Amomba va'ekue vvy guy hapo oía guive hovapy rupi hi'a ikuai peve.

¹⁰ Ha'e rami ae avi Egipto vvy gui xee roguerupa vy quarenta ma'etý re roguereko va'ekue tekoa e'ýa rupi, amorreu kuery vvy re penderekoa aguã.

¹¹ Pendera'y kuery va'e regua amoí va'ekue profeta-rã, ha'e peneramymino kuery ju amoí nazireu regua ikuai va'erã. Ha'e rami e'ý ri ty'ly Israel kuery? — he'i SENHOR.*

¹² — Ha'e rami teí nazireu kuery pe peê kuery pey'u uka vinho, ha'e profeta kuery pe pendeayvu vy “Pemombe'uve eme na ayvu”, peje.

¹³ Ha'e nunga rupi ne'exa, vvy amboryryipa 'rã peê kuery rupi, karóxa mba'emoaju ojokuapaa rã tynyê vy ovava rei ovya rami.

¹⁴ Peneakuãve va'e teí nda'evei 'rã pejava aguã, imbaraetekueve voi nda'evei 'rã ombaraetea rupi ikuai aguã, neí ipy'a guaxukueve ma voi ndoo jepei 'rã.

¹⁵ Hapa va'e ma nopy'ã kuaavei 'rã joe, ipojava va'e voi ndoo jepei 'rã, kavaju árygua eteve voi ndoo jepei 'rã.

¹⁶ Ha'e va'e ára ma ojeroviakue ipy'a guaxukueve ikuai va'ekue ma opire rei reve rive 'rã onhamba — he'i SENHOR.

3

Israel kuery ojapo vaia re ombopaga aguã re ijayvuague

¹ Peê Israel kuery, pendu ke SENHOR penderovai ijayvu rã, Egipto vvy gui pendererupa va'ekue ha'e javi avi. Ha'e vy aipoe'i:

² — Yvy regua kuery ha'e javi gui peê kuery anho'i aiporavo va'ekue ri rombopaga 'rã pejejavypa reia re.

³ Ha'eve 'rã nda'u mokoí joupive uguata aguã jogueroayvu e'ý re?

⁴ Xivi nda'u mba'eve ojou e'ý re ri okororô rei 'rã ka'aguy rupi? Ha'e xivi ra'y nda'u guaity py ikuai py hevovo rei 'rã ri ho'u va'erã oguereko e'ý vy?

⁵ Guyra'i nda'u vvy py rive ho'a 'rã ri nhuã'i ojavyva e'ý re? Nhuã vvy py oí va'e ovy xapy'a 'rã ri mba'emo ho'a e'ý re?

⁶ Tetã rupi mimby guaxu omonhe'êa 'rã nda'u ha'e pygua kuery oryryipa e'ý re? Tetã re oiko 'rã nda'u mba'emo vai ete SENHOR ombou e'ý re?

⁷ Mba'eta jaikuaa porã SENHOR Nhanderuete mba'eve ndojapoi 'rã guembiguai profeta kuery pe ranhe onhembopy'aa oikuaa uka e'ý re.

⁸ Xivi okororô rã nda'u ndokyjeai 'rã? Ha'e SENHOR Nhanderuete oayvu ombou rã mava'e profeta nda'u nomombe'ui 'rã?

⁹ — Pova'e nunga ke pendu uka Asdode py ha'e Egipto vvy re hoo tuvixakueve ikuai rupi. Ha'e vy aipopeje uka 'rã: “Penhemboatyta ke pejogueruvy Samaria regua vytyty ikuai va'e áry. Ha'e vy pexa 'rã ha'e kuery hevovo rei ha'e nhomoingo axya rupi ikuai va'e.”

¹⁰ Mba'eta Israel kuery ma ndoikuaai ha'evea ramigua. Ha'e rami vy ha'e kuery ngoo tuvixa va'e py omoí porã 'rã jokucaa rupi ojou va'ekue, mba'emo mbovaipaa rupi guive — he'i SENHOR.

¹¹ Ha'e nunga rupi po rami SENHOR Nhanderuete ijayvu:

— Penderovaigua kuery petêi regua ojokopa 'rã pendeavy. Ha'e rami vy penhemiaty ikorapa va'ekue oity vy oipe'apa 'rã heravy mba'emo pendero tuvixakueve py oí va'ekue.

¹² Po rami SENHOR ijayvu:

— Xivi juru gui vexa'i re opena va'e ogueraa jepe 'rã ipykue mokoíve, ha'e'ý vy inambi apyrekue'i, ha'e rami ae 'rã Israel kuery Samaria py ikuai va'e voi amongue'i oo jepe ngupa pêgue'i reve, e'ý vy okeaty ra'ykue'i rive.

¹³ Pendu ke, ha'e pendeavyvu Jacó kuery rovai — he'i SENHOR Nhanderuete ixondaro reta va'e.

* ^{2:11} Nazireu ma Nhanderuete pe anho'i oiko aguã rami onhemboayvu va'ekue. Ha'e rami vy ndojayai 'rã o'a, ha'e ndoy'ui 'rã vinho (Números 6.1-12).

¹⁴ — Israel kuery ojevavyague re ambopagaa ára py ma Betel py altar ojapo va'ekue re avi 'rã aikuaa pota. Ha'e ramo altar apy ikuai va'e ojyaa rã ho'apa 'rã yvy rupi.

¹⁵ Aity 'rã oo yro'y jave ikuai aguã, kuaray aku pygua guive. Marfim gui oo ojapo pyre okanhymba 'rã, oo guaux ikuai va'e ivaipa 'rã — he'i SENHOR.

4

Samaria pygua kunhague pe ijayvuague

¹ — Vaka kunha Basã pygua rami Samaria vyvty re pendekuai va'e, pendu ke pova'e ayvu: Pereco axy rei iporiaukue'i, pemokanhy inhembyayi'i va'e, peneme kuery pe “Eruve na vinho jay'u aguã”, peje guive.

² Ha'e nunga rupi SENHOR Nhanderuete oky'a e'ÿa rupi ae oura vy aipoe'i:

— Pendere ovaẽ 'rã ára pinda py rami tetã gui penerenoẽmbaa heravy aguã, ha'e penerembyrekue ma pira renoẽa py 'rã pendereraa.

³ Peteĩ-teĩ peẽ 'rã peje'oivy tetã kora pa'ũ ikuai va'e gui. Ha'e rami teĩ Hermom katy 'rã penemombopaa — he'i SENHOR.

Israel kuery onhe'ẽ py ára revegua e'ÿ rami ikuai re ijayvuague

⁴ — Pejevavyxe vy tapeo ha'vy Betel py, Gilgal py voi peo pejevavyxe aguã py rive. Ko'ẽ nhavõ peru mymba kuery peme'ẽ va'erã, ha'e mboapy ára rire kuerei 'rã peru dízimo.*

⁵ Mbojape mbovua revegua peru perovy'aa rupi peme'ẽ va'erã, pemombe'upa rive 'rã mba'emo peme'ẽxea'i py peme'ẽ va'e, mba'eta ha'e rami anho rive peikoxeve, peẽ Israel kuery — he'i SENHOR Nhanderuete.

⁶ — Ha'e nunga rupi ae peneretã ikuai va'e rupi ajapo tembi'u pejou ve'ÿ aguã rami, penderekoa nhavõ rupi mbojape oata ramo. Ha'e rami teĩ xevy peguarã ndapejeko rerovai — he'i SENHOR.

⁷ — Ha'e rami rã mboapy jaxy re nambo'okyvei pende'áry, mba'emo pemono'õ aguã ára e'ÿ mbove. Amongue tetã rupi ambo'oky, ha'e rã amboae tetã rupi ma nambo'oky. Amongue mba'ety áry oky, ha'e rã amboae áry ma nda'oky rã ipirupa.

⁸ Mokoĩ, mboapy tetã pygua kuery pejogueraa tetã mboae py yy pey'uxe vy, teĩ nda'evei pey'u porã aguã. Ha'e rami ete teĩ ndapejeko rerovai xevy guarã — he'i SENHOR.

⁹ — Xee romoingo axy va'ekue mba'emo rogue verepa ha'e imou'ũmbaarã ambou vy. Mba'emo rogue'i pereco va'e tuku ho'upa, uvaty, figoty ha'e oliveira-ty voi. Ha'e rami teĩ ndapejeko rerovai xevy guarã — he'i SENHOR.

¹⁰ — Pendere ambou mba'eaxy Egito py pendu va'ekue ramigua. Pendera'y kuery avi ajuka uka kyxe py. Penerymba kavaju araa ukapa guive. Ha'e rami ete ajapo pendekuaia rupi heakuã vaikue peetũ aguã rami. Ha'e rami teĩ ndapejeko rerovai xevy guarã — he'i SENHOR.

¹¹ — Penembyte gui amokanhy amongue, Sodoma ha'e Gomorra amokanhyague rami ae. Peẽ kuery ma tata gui tata'y oguenoẽ mbyre rami pepyta va'ekue ri ndapejeko rerovai xevy guarã — he'i SENHOR.

¹² — Ha'e nunga rupi peẽ Israel kuery, po rami 'rã rojapo. Ha'e po rami ete rojapo ta ma ramo peiko katu ke Penderuete pe pejexa uka aguã — he'i.

¹³ Mba'eta Nhanderuete ae vyvty onhono va'ekue, vyvty omoingo, ha'e avakue pe oikuaa uka opy'a re oĩ va'e ha'e javi. Ko'ẽ jave teĩ omopytũmba 'rã, ha'e vyvty áry rupi opyrõ 'rã ovy. SENHOR Nhanderuete ixondaro reta va'e ae hery va'e.

5

“Peka Nhanderuete peikove aguã”, he'iaague

¹ Peẽ Israel kuery, pendu ke pova'e ayvu peẽ kuery re nda'eveia rupi xeyvuy rã.

² Mba'eta ho'a ma Israel kuery kumhataĩgue rami ikuai va'ekue, nopy'ã kuaavei ma guive. Oyvy re ae ho'a oupy, ha'e ndoikoi imbovyarã.

³ Mba'eta po rami SENHOR Nhanderuete ijayvu:

— Tetã gui mil Israel regua joe opu'ãa katy oje'oi teĩ cem ete'i ju 'rã ojevy, ha'e cem oo va'ekue regua ma dez ete'i 'rã ojevy.

⁴ Ha'e gui po rami SENHOR ijayvu Israel kuery pe:

— Xereka ke peikove aguã.

⁵ Peka eme mba'emo Betel py oĩ va'e, neĩ Gilgal ha'e Berseba katy ma voi tapeove eme. Mba'eta Gilgal pygua kuery ma ogueraapaa 'rã escravo-rã, Betel tetã voi ombovaipaa 'rã — he'i.

⁶ Peka ke SENHOR anho peikove aguã. Ha'e rami e'ÿ rã José kuery ikuai py ou 'rã tata rami imokanhymbaarã. Ha'e va'e mbogearã ma ndoikoi 'rã Betel tetã py.

⁷ Peẽ kuery ma ha'evea rami pejoguerekoa gui pejepe'a vy penhombojexavai, vvy py rive peity vy teko porã rupi pejoguereko aguã va'ekue.

⁸ Peka ke jaxy-tata Eixu ha'e Órion apoare, ha'e ko'ẽ ju aguã pytũ reia oguerova va'e, ha'e pytũ aguã ju ára oguerova va'e. Ha'e ma ye'ẽ ogueru vvy vvy áry rupi ju onhoẽ va'e. SENHOR ma hery va'e.

⁹ Ha'e ae ombou 'rã imbaraetekueve mokanhymbaarã, oo ikorapa va'e mbovaipaarã guive.

* 4:4 Betel ha'e Gilgal py ha'e kuery ombojeroviaaty oĩ, teĩ Nhanderuete pe ikuai xevy e'ÿ oo ha'e py, onhemboeko porãxe vvy rive.

10 Ha'e rā peē kuery ma napenduxeit tetā rokē py penemongetaa rā, anhetē rupi ijayvua rā pejou vai guive.*

11 Ha'e nunga rupi iporiaukue'i re pepyrōmba rei vy ha'e kuery pe trigo pendejeupe guarā ae peme'ē uka rire napeivei 'rā penderorā ita gui pejapo va'ekue py, ndapey'uvei 'rā guive vinho uva porāgueve penhoty va'ekue guigua.

12 Mba'eta xee aikuaa mbovykue rei e'y pendeko vai rā, opa marā rei pejejavy ramo guive. Mba'eta pembojexavai heko porā va'e, ha'eve'yā rami guarā pejopy perāta, ha'e tetā rokē py iporiaukue'i ojerure rā peē kuery napepenai.

13 Ha'e nunga rupi oiko kuua va'e kuery okyrirī 'rā, mba'eta kova'e ára nda'evei va'e.

14 Peka ke mba'emo porā peikove aguā, mba'emo vai nda'ei. Ha'e ramo 'rāe SENHOR oiko peē kuery reve, aipopejeaty rami ae.

15 Pejeguaru ke mba'emo vai gui, perovy'a iporā va'e anho. Ha'evea rami pota ke pejoguereko tetā rokē py. Ha'e ramo José ramymino kuery pekuave'i va'e, xapy'a rei SENHOR Nhanderuete ixondaro reta va'e penemboaxy nho 'rā.

16 Mba'eta po rami SENHOR nhandererekoa ijayvu, Nhanderuete ixondaro reta va'e:

— Tetā mbyte ha'e javi rupi onhendu 'rā ojae'o va'e. Tape ikuai va'e rupi "Ai! Ai!" 'ea 'rā. Omba'eapo va'e kuery voi oenoĩmbaa 'rā ojae'o aguā, ojae'o kuua va'e kuery reve.

17 Uvaty ha'e javi rupi ikuai 'rā ojae'o va'e, pendekuaia mbyte rupi aaxa ramo — he'i SENHOR.†

18 Nda'evei ete 'rā SENHOR ára pearō va'e pe! Mba'erā tu pearō pekuapy SENHOR ára? Mba'eta ha'e va'e ára ma pytūmba rive 'rā, hexakā 'rā e'y.

19 Mba'eta oiko 'rā xivi gui ava onha rā urso ju ojoua rami, ha'e'y vy ngoo py oike vy oo mbotya re opoko ho'amy ramo mboi oixu'ua rami.

20 SENHOR ára ma hexakā aguā e'y, pytū vaikue anho 'rā. Ha'e javi ete rupi pytūmba 'rā, hexakā va'e peteive henda py ojekuaa e'y re.

"Nhanderuete oipota mba'emo nhamē 'rāgue py ha'evea rami jajoguereko", he'iaigue

21 SENHOR aipoe'i:

— Xee ndajou porāi, ajou vai ete ngaru pejapo pekuapya, petei henda py ma voi xevy guarā nhemboaty pejapo va'e ndarovy'ai guive.

22 Xevy pe mba'emo peapy va'erā peru, mba'emoaju guigua guive tei ha'e nunga xee ndarovy'ai, xereve petei rami pendekuaia regua mymba iporāgueve peme'ē tei xee nama'ei 'rā ha'e nunga re.

23 Xee naenduxeit peporaeia revovo rive, naendui 'rāe penembaraka pu.

24 Ha'e rami 'rāgue py toī ha'evea rami pejoguerekoa yy oxyry va'e rami, toī pendereko porāa yakā oxyry riae va'e rami.

25 Ha'e gui peē Israel kuery, qarenta ma'et'y re tekoa e'yā rupi pendekuai jave py xevy pe teve peme'ē raka'e mymba ha'e mba'emoaju guigua?

26 Mba'eta Sicute ra'angaa rive peraa va'ekue penderuvixarā, Quium ra'angaa, jaxy-tata ra'angaa guive penderueterā peē ae pejapo va'ekue.

27 Ha'e nunga rupi xee ma Damasco tetā rovai peve rogueraa ukapa 'rā escravo-rā — he'i SENHOR Nhanderuete ixondaro reta va'e hery va'e.*

6

Israel kuery opa marā ikuuia re omokanhymba aguā re ijayvuague

1 Nda'evei ete 'rā Sião py ha'e kuery ae oipotaa rami ikuai va'e pe, Samaria tetā py mba'eve gui okyje e'yā rupi ikuai va'e pe voi. Peē kuery ma omboetepepy pendekuai yvatekueve regua, peē kuerya katy anho 'rā ou Israel kuery!

2 Peaxa ha'vy Calné py pexa aguā. Ha'e gui ma tetā guaxu Hamate py ju tapeo, ha'e gui filisteu kuery rekoa Gate py ju tapeo pexa pota. Ha'e va'e kuery rekoa teve peē kuery rekoa gui iporāve? Ha'e kuery vyv teve pendeivy gui tuvixave?

3 Mba'eta peē kuery ma "Ára vai novaē voi 'rā" peje tei pejapo penembojexavai arā ovaē voi aguā rami.

4 Peke pekuapy tupa marfim guigua áry, peneate'y rei 'rā pejupy hi'áry. Pekarū 'rā vexa'i ha'e vaka ra'y iporāgueve ro'o re anho.

5 Peporaie 'rā guive mbaraka pembojoguy reve. Davi rami ae pejapo mba'epurā pendejeupe ae.

6 Vinho pey'lu 'rā pekuapy karo iporā-porāve va'e py, ha'e pendejee peikyty 'rā azeite iporāve va'e. Ha'e rami tei José regua kuery ojexavai rā pexa vy napemboaxyi.

7 Ha'e nunga rupi ae a'y peneranhe pendereraapaa 'rā escravo-rā ogueraa va'e kuery reve. Ha'e ramo ndoikovei 'rā peneate'yā rupi pekarū guaxua.

8 Mba'eta SENHOR Nhanderuete ixondaro reta va'e guery rupi ae oura vy aipoe'i:

— Ambojeguaru Jacó kuery onhemboyvatepa reia, ajou vai ete ha'e kuery ro tuvixakueve va'e ojapo rā. Ha'e rami vy napenavei 'rā hetā re, nei ha'e py ikuai va'e re guive — he'i.

* 5:10 Ha'e kuery reko rami vy tetā rokē py huvixa kuery nhomongeta ha'e mba'emo re oikuaa pota raka'e. † 5:17 Nhanderuete Egito pygua kuery ombopaga vy ha'e kuery mbyte rupi oaxa ovy va'ekue, ha'e rā ojeupegua kuery áry rupi ma oaxa rive ogueraa jepe vy (Êxodo 12.12-13). Ha'e rā apy ma ijayvu Israel kuery mbyte rupi ombopaga vy oaxa aguā re. * 5:27 Atos 7.42-43

⁹ Pete'i i oo py dez avakue opyta te'i ha'e kuery voi omanomba avi 'rã.

¹⁰ Ha'e gui xapy'a rei ovaê 'rã hetarã ae'i hetekue oapy aguã. Ha'e vy hetekue oka katy ogueraa aguã oupi vy oporandu 'rã opy rupi okuave va'e pe rei: "Oĩa pa ndee reve?" he'i rã ombovai vy "Noĩavei" he'i ramo ixupe ju aipoe'i 'rã: "Ekyri'i ha'vy, ndeayvu eme SENHOR rery rupi", he'i 'rã.

¹¹ Mba'eta ma'ê, SENHOR ojapo ukaague rami vy ombovaipaa 'rã oo guaxu ikuai va'ekue, omboa'ypaa avi 'rã oo kyri'i va'e.

¹² Itaova áry rupi nda'u kavaju kuery onha 'rã? Ha'e rami e'ỹ vy vaka kuery nda'u yvy oikara'i 'rã ri ha'e rupi? Ha'e rami te'i peẽ kuery ma pejoguereko porã 'rãgue py peme'ẽ veneno, ha'e teko porã 'rãgue py penhombojexavai.

¹³ Peẽ kuery ma Lo-Debar tetã peity vy pevy'a rei va'ekue. Aipopeje avi: "Nami ma Carnaim re voi nhandepo'akapa nhande ae mbaraetea py", peje.

¹⁴ Ha'e rami te'i SENHOR Nhanderuete ixondaro reta va'e aipoe'i:

— Peẽ Israel kuery, penderovai xee ambou 'rã pete'i regua penembojexavai arã, Hamá tetã re oikea guive Arabá yakã oĩa peve — he'i.

7

Tuku-karu, tata ha'e ixã oexaague

¹ Ha'e gui pova'e SENHOR oexa uka xeivy. Xee aexa rã omoingo tuku-karu mba'emo roky henhoĩ ngypa'i jave, huvixave pegua omono'õmbaa ma rire henhoĩ jave.

² Ha'e gui tuku-karu ma mba'emo renhoĩ yvy gui oiko va'ekue ha'e javi ho'upa ma ramo xee aexa vy aipoa'e: — SENHOR Oreruete, oreperdoa ke, ajerure. Ha'e rami e'ỹ rã mba'exa 'rã tu ore Jacó kuery rokuave? Mba'eta mbovy'i ete orekuai — ha'e.

³ Ha'e ramo SENHOR ha'e nunga nomboui.

— Ha'e nunga ma ndoikoi 'rã ha'vy — he'i SENHOR.

⁴ Ha'e gui pete'i ju SENHOR Nhanderuete oexa uka xeivy. Aexa rã SENHOR Nhanderuete ombou tata nhombopagaraã. Ha'e va'e ma omboypa yvy gu'ry yv oĩ va'ekue. Omomba avi heravy SENHOR pegua yvy itui va'ekue.

⁵ Ha'e ramo xee aipoa'e:

— SENHOR Oreruete, ha'eve ma. Mba'exa 'rã tu ore Jacó kuery rokuave? Mba'eta mbovy'i ete orekuai — ha'e.

⁶ Ha'e ramo ha'e nunga voi SENHOR Nhanderuete nomboui vy

— Ha'e nunga voi ndoikoi 'rã — he'i.

⁷ Ha'e gui ma pova'e nunga avi oexa uka. Aexa rã SENHOR hi'a'i pete'i ikora hi'yvi porã va'e áry. Opo py omboguejy ho'amy pete'i ixã oo mbotya ra'ãarã.

⁸ SENHOR aipoe'i xeivy:

— Amós, mba'e tu rexa?

Xee ambovai vy

— Pete'i ixã oo mbotya ra'ãa — ha'e.

Ha'e ramo SENHOR aipoe'i ju xeivy:

— Ne'exa, ixã py xee aa'ã 'rã xevygua Israel kuery reko. Ha'e va'e rire xee ndaaxa rivevei ma 'rã ha'e kuery mbyte rupi.

⁹ Mba'eta ambovaipa 'rã Isaque ramymino kuery ombojerovia aty yvy'ã rupi ikuai va'e, Israel kuery pegua henda iky'a e'ỹ va'e voi amomba 'rã. Jeroboão ro pygua kuery rovai avi 'rã apu'ã kyxe reve — he'i.

"Amós ma je huvixa rovai ijayvu", he'iaque

¹⁰ Ha'e gui Betel pygua sacerdote Amazias omombe'u uka Israel pygua huvixa Jeroboão pe:

— Amós ma je nderovai ijayvu vai ra'e Israel kuery mbyte. Ha'e va'e ijayvua ma nda'evei nhandeyvy pe.

¹¹ Mba'eta po rami Amós ijayvu: "Jeroboão oiko vai 'rã kyxe py. Ha'e gui Israel kuery ma escravo-rã ogueraapaa 'rã ovyvy gui mombyry", he'i va'ekue.

¹² Ha'e gui Amós pe ju Amazias aipoe'i:

— Ndee profeta, ejepe'a ke apy gui. Enha Judá yvy katy. Ha'e py ju ekaru ha'e ayvu emombe'u eikovy.

¹³ Ha'e rã apy Betel py ma aỹ guive emombe'uve eme ayvu. Mba'eta apy ma oĩ huvixa pegua oo iky'a e'ỹ va'e ha'e orerekoa pygua templo — he'i.

¹⁴ Ha'e ramo Amós ombovai vy aipoe'i Amazias pe:

— Xee ma profeta e'ỹ aiko va'ekue, neĩ profeta remimbo'e e'ỹ guive. Ha'e rami 'rãgue py mymba re apenaa rupi aiko va'ekue, sicómoro'a mono'õa rupi guive.

¹⁵ Va'eri mymba re apenaa gui SENHOR xepe'a vy aipoe'i xeivy: "Tereo ke xeayvu emombe'u xevygua Israel kuery pe", he'i karamboae.

¹⁶ Ha'e nunga rupi endu ke SENHOR ayvu. Ndee aipo're: "Emombe'uve eme ayvu Israel kuery rovai regua, Isaque ramymino kuery rovai ndeayvu eme guive", 're.

¹⁷ Ha'e rã SENHOR ma aipoe'i ndevy: "Ndera'yxy ma itavy rei 'rã oikovy tetã rupi. Ha'e gui ndera'y kuery ha'e nderajy kuery oiko vai 'rã kyxe py. Ndeyvy rereko va'ekue ma omboja'opaa 'rã ixã py oa'ãa vy. Ha'e vy remano 'rã pete'i yvy ha'eve'ỹ va'e oĩa re. Ha'e gui Israel kuery ma herapaa 'rãe, escravo-rã ogueraapaa 'rã ovyvy gui mombyry", he'i.

8

Ajaka yvyra'a oĩa oexa ukaague

¹ Ha'e gui xeivy pe SENHOR oexa uka avi peteĩ ajaka yvyra'a kuaray aku javegua oĩa.

² Ha'e vy oporandu xeivy:

— Amós, mba'e tu rexa?

Xee ambovai vy

— Peteĩ ajaka yvyra'a kuaray aku javegua oĩa aexa — ha'e.

Ha'e rã SENHOR aipoe'i:

— Ovaẽ ma xeivygua Israel kuery opa aguã ára. Ha'e kuery rupi xee ndaaxa rivevei ma 'rã.

³ Ha'e va'e ára ma templo ha'e kuery oporaieiaty py taxẽmbei 'rã oiko. Mba'eta ha'e kuery re'ogue heta-etave 'rã ovy. Opa rupi omombopaa 'rã oka rupi. Ha'e gui nonhenduavei 'rã mava'eve rei — he'i SENHOR Nhanderueete.

“Israel kuery okanhymba aguã ovaẽ rai'i ma”, he'iague

⁴ Peẽ kuery ma pekore iporiaukue'i, ha'e yvy ha'e javi rupi pemokanhymba ojexavai rei va'e. Ha'e nunga rupi pendu ke pova'e.

⁵ Mba'eta aipopeje: “Topa voi ngaru jaxy pyau regua, jaa vy mba'emo aju nhavende ju aguã. Ha'e sábado ára topa voi avi, trigo omoĩ porãaty jaipse'a aguã. Ha'e rami vy nhaa'ã ajaka kyri'i va'e py hepyrã jajopyve aguã, ha'e mba'emo opejaa ha'eve'ya ramigua py jajokore aguã.

⁶ Ha'e rami vy peráta re rive 'rã jajogua iporiaukue'i, ha'e gui py regua repy re rive 'rã jajogua ojexavai'i va'e kuery, trigo ipire ku'ikue revegua nhavendea py”, peje.

⁷ Ha'e nunga rupi SENHOR Nhanderueete oura guery Jacó oguerovy'a va'ety rupi ae:

— Xee ma raka'ã rã peve teĩ ndaxerexarai 'rã pejapo vaia re!

⁸ Ha'e nunga gui yvy oryryipa 'rã. Ha'e ramo hexe ikuai va'e ipy'a vai 'rã okuapy. Mba'eta yvy ha'e javi omy-omy'i vy opu'ã-pu'ã 'rã Nilo yakã rami, ha'e gui tupa 'rã Egito katy'i yakã oĩ va'e rami.

⁹ Ha'e va'e ára ma ajapo 'rã kuaray mbyte teĩ oike aguã rami. Ha'e rami vy ara py teĩ amopytũmba 'rã yvy jave rupi — he'i SENHOR Nhanderueete.

¹⁰ — Ngaru pejapo va'ety xee amboekovia 'rã pendepy'a vai aguã. Peporaieia amboekovia 'rã pejae'o anho aguã. Romonhemonde 'rã ajukue voxa guigua py, peneakã penhopimba reve. Ha'e rami romoingo 'rã gua'y pete'i va'ekue re ipy'a vai va'e rami. Ha'e gui opaa py ma oiko 'rã py'a vai etea ára.

¹¹ SENHOR Nhanderueete aipoe'i:

— Ne'exa, ovaẽ ovyv ára yvy jave re karuai ambou aguã, tembi'u re okaruxea e'y, neĩ yvy re iyy'uveja e'y guive, ha'e rã SENHOR ayvu oenduxea regua ae.

¹² Ha'e ramo SENHOR ayvu oenduxe va'e oguata 'rã ye'ẽ nhavõ rupi, kuaray ijapu'a'ia katy guive kuaray oua katy peve. Opa rupi 'rã ikuai ayvu rekaa rupi teĩ ndojou'i 'rã.

¹³ Ha'e va'e ára kunhataĩ porãgueve ha'e kunumigue ma ho'apa 'rã yuvei gui.

¹⁴ Samaria py ta'angaa oĩ va'e rupi oura va'ekue voi ho'apa 'rã, “Anhet'ẽ Ete Dã e'y vy Berseba pygua tuuete ramigua rekove rupi aura”, he'i va'ekue. Ha'e kuery ma ho'apa ma vy ndovyvei 'rã — he'i.

9

Nhombopagaarã Nhanderueete ombou aguã re ijayvuague

¹ Ha'e gui aexa altar yvýry SENHOR hi'ã'i rã. Ha'e vy aipoe'i xeivy:

— Emboguai na oo yta ikuai va'e, okẽ pyrõa peve omyĩmba aguã. Emboa'y'pa, opy ikuai va'e akã áry ho'apa aguã rami. Mba'eta ha'e kuery ajukapa katui'i 'rã kyxe py. Peteĩve ndojavai 'rã, peteĩve ma voi ndoo jepel 'rã.

² Yvykua vaikue py ha'e kuery oo teĩ ha'e gui anoẽ 'rã xepo py ae. Yva re peve oo teĩ ha'e gui voi amboguejy ju 'rã.

³ Carmelo yvyty áry onhemi aguã oo teĩ hakykue aa 'rã ha'e gui aru aguã, aipe'apa 'rã ikuai gui. Ye'ẽ guýry xegui onhemi aguã oo teĩ ha'e py ambou 'rã mboi ixu'upaarã.

⁴ Escravo-rã hovaigua kuery ogueraapa ramo ha'e py voi ajuka ukapa 'rã kyxe py. Ha'e kuery re ama'ẽ 'rã amoingo axy aguã, amoingo porã aguã e'y — he'i.

⁵ Mba'eta Nhandererekoa SENHOR ixondaro reta va'e ma yvy re opoko ramo hykupa rive 'rã, yvy re ikuai va'e ha'e javi ojexavai 'rã okuapy. Opu'ã-pu'ã 'rã Nilo yakã rami, ha'e gui tupa 'rã Egito katy'igua yakã rami.

⁶ Nhanderueete ma yva re ojapo oĩ aguã, ha'e rã yvy re ma ijyatarã omoĩ va'ekue. Ha'e gui ye'ẽ gui oĩ va'e oenoĩ vy onhoẽmba 'rã yvy re. SENHOR ae hery va'e.

⁷ SENHOR aipoe'i:

— Peẽ Israel kuery, Etiópia pygua kuery arekoague rami avi e'y ri ty'y xee roguereko? Mba'eta Israel kuery ma Egito yvy gui anoẽ va'ekue, filisteu kuery Caftor yvy gui, ha'e Síria pygua kuery Quir yvy gui anoẽague rami avi.

⁸ Ne'exa, xee SENHOR aiko kova'e kuery ojevavypa va'e rovai. Ha'e rami vy amomba 'rã yvy gui. Ha'e rami teĩ namokanhymbai 'rã Jacó kuery — he'i SENHOR.

⁹ — Mba'eta xeayvu rã ombovavaa 'rã yvy regua mbyte rupi Israel kuery ikuai, yrupẽ py trigo ra'yigue omboguaa rami avi, peteĩve ra'y'i yvy py ho'a e'y re.

¹⁰ Xevyguá Israel kuery va'e regua ojejavý va'ekue ma omanomba 'rã kyxe py, “Mba'emo vai nanhanderupityi 'rã, nhandere ndoikoi 'rãe!” he'i okuapy va'ekue ri.

Nhe'ẽ rupi Israel kuery ikuai va'e omoingo porã ju aguã re ijayvuague

¹¹ — Ha'e va'e ára ma ajapo ju 'rã Davi rogue ho'a va'ekue, amoatyrõmba ju 'rã ovoague. Ho'aague gui amopu'ãmba vy jypy guare rami ju 'rã ajapo,

¹² xevyguá kuery oguereko aguã Edom pygua kuery okuave'i va'e, amboae regua kuery xerery rupi oenoĩmby ha'e javi guive — he'i SENHOR ha'e nunga apoarã va'e.*

¹³ SENHOR aipoe'i:

— Ne'exa, ovaẽ ma ouvý ára yvy karaña kuery oupity aguã mba'emo mono'õa kuery, ha'e uva umbiria kuery oupity aguã ha'yĩgue nhotýa kuery. Yvyty gui uva rykue oxyry 'rã ouvý, yvy'ã ikuai va'e gui oxyrypa 'rã.

¹⁴ Mba'eta ambopyau 'rã xevyguá Israel kuery ikuai. Ha'e ramo ojapo ju 'rã guetã ombovaipa pyre, ha'e gui ikuai ju 'rã ha'e py. Onhotý ju 'rã uva, ha'e oy'u 'rã hykue. Onhotý avi 'rã yvyra hi'a va'erã, ha'e gui ho'u 'rã hi'a.

¹⁵ Mba'eta ha'e kuery voi xee anhotý ju 'rã ijyvy re. Ha'e rami rire ijyvyrã ame'ẽ va'ekue gui ndoipe'aavei 'rã — he'i SENHOR Penderuete.

* ^{9:12} Kova'e ayvu rupi Tiago ijayvu Atos 15.16-18 py. Ha'e gui “Davi rogue ho'a va'ekue” he'ia ma Davi ramymino kuery na'imbaraetey va'e re ijayvu vy, mba'eta Nhanderuete omoatyrõ uka ju 'rã, ha'e amboae regua voi ogueru avi 'rã.

Obadias ayvu oĩa Obadias ayvu oĩa

Babilônia pygua kuery Jerusalém tetã oitypa ramo Edom pygua kuery ovy'a rei okuapy, oipe'apa guive tetã pygua kuery mba'e rei-rei va'ekue. Ha'e nunga rupi profeta Obadias ijayvu Edom pygua kuery ojevavyague káuxa Nhanderüete ombopaga aguã re. Ha'e rã Israel kuery ma omoingo porã ju 'rã. Ha'e rami aguã ma Edom ha'e Israel kuery pegua anho e'ÿ oĩ. “Mba'eta Senhor ára ou ma oiny ha'e javi regua áry. Ha'e rami vy joe pejapoague ramigua pendere ae ju 'rã oiko. Joupe pejapo vaiaque penekã re ae ju 'rã ojeapa” (versículo 15). Ha'e jave py “opo'akaa rupi opena va'e ma Senhor ae 'rã oĩ” (versículo 21b).

*Edom pygua kuery ojevavyague re ombopaga aguã re ijayvuague
Jeremias 49.14-16*

¹ Kova'e ma Obadias pe oexa uka pyre oĩa. Ha'e gui SENHOR Nhanderüete ijayvu Edom vvy re.* Roendu ma SENHOR po rami ijayvu rã:

— Amboae regua kuery pe peteĩ omboua ayvu mombe'uarã, “Pepu'ã ke, Edom vvy re nhapu'ã jajojuka aguã”, he'i va'erã.

² Ne'exa, Edom pygua kuery, peẽ kuery rojapo amboae regua gui pene'vyvĩ'ive aguã rami, ija'epy e'ÿ guive.

³ Mba'eta pendepy'a py penhemboyvate reia oĩ va'e penembotavy. Yvate py itaova pa'ũ rupi penderekoa va'e vy pendepy'a py “Mava'e tu xereity 'rã vvy katy?” peje.

⁴ Ha'e rami avi taguato rami pendeyvate peovy teĩ, ha'e jaxy-tata mbyte peve pejeaity apo va'e rire ha'e gui voi xee roity 'rãgue — he'i SENHOR.

⁵ — Peẽ ma omomba pyrã pendekuai! Mba'eta pyávy imonda va'e kuery oo py ovaẽ vvy nhomba'e rei-rei oiporavopa 'rã iporãgueve anho ogueraa vvy. Uva re imonda va'e voi ou vvy ndoiejai 'rã teve amongue uva'a xã ri jepe?

⁶ Ha'e rami teĩ Esaú kuery, mba'exa'vy tu penemba'e rei-rei ogueraapaã!† Mba'exa'vy perãta penhomi va'ekue ojoupaa?

⁷ Mba'eta peneirũ va'ekue ae pendepa'e penderekoa gui. Pendereve peteĩ rami ikuai va'ekue penembotavy vvy ipo'aka okuapy pendere. Pendereve okaru va'ekue ae omoĩ nhuã pendepy rupi penembo'a aguã. Ha'e rami teĩ Edom vvy re ndoikoi 'rã ha'e nunga oikuaa va'e.

⁸ Ha'e va'e ára amomba 'rã Edom pygua hi'arandukueve, Esaú vvyty re ikuai va'e 'arandua guive — he'i SENHOR.

⁹ — Temã tetã pygua ipy'a guaxukueve okyjepa 'rã, ha'e ramo Esaú vvyty áry peteĩ-teĩ ojukupaa 'rã.

¹⁰ Penderyvy Jacó ramymino kuery rovai pejapo vai raka'e. Ha'e ramo pexĩmba ha'e penemokanhya 'rã raka'eve rã peve.

¹¹ Ha'e va'e jave Israel kuery mba'e rei-rei amboae regua ogueraapa teĩ peẽ kuery ma peĩ rive rei pekuapy. Momybyr guigua kuery Jerusalém rokẽ rupi oike vvy oexa okuapy oxortea mba'emo ogueraa aguã. Ha'e kuery reve peẽ kuery voi penhemoirũ va'ekue.

¹² Ha'e rami avi penderyvy kuery ojexavaia ára ndaperovy'a rei va'e rire, Judá ramymino kuery omombaa ára. Ha'e kuery iporiau reia ára ha'e kuery re ndapendeavvui va'e rire pekaru porã rei reve.

¹³ Xevygu kuery ikuai axya ára ma hetã rokẽ rupi ndapeikei, ha'e perovy'a rei reve ikuai axya re napema'ëi, neĩ imba'e rei-rei ndapeipe'ai heravy raka'e va'e rire.

¹⁴ Tape rakãmy ha'e kuery regua onha va'e pejukaxe vvy napearõi, neĩ joupe okuave'i va'e napemboaxai raka'e va'e rire ha'e kuery ojexavaia ára.

Israel kuery ikuai porã ha'e ovy'apa ju aguã re ijayvuague

¹⁵ Mba'eta SENHOR ára ou ma oiny ha'e javi regua áry. Ha'e rami vy joe pejapoague ramigua pendere ae ju 'rã oiko. Joupe pejapo vaiaque penekã re ae ju 'rã ojeapa,

¹⁶ mba'eta xevygu vvyty iky'a e'ÿ va'e áry peka'u pekuapy raka'e. Ha'e rami ae ju ha'e javi regua oy'upa 'rã okuapy. Ha'e kuery oy'u tema 'rã hevvyatãmba peve.‡ Ha'e rami vvy opyta 'rã ndoikoi ae va'ekue rami.

¹⁷ Ha'e rã Sĩaõ vvyty re ikuai va'e pe ma ojekuaa 'rã oo jepe aguã. Ha'e va'e vvyty ma iky'a va'erã e'ÿ. Ha'e gui Jacó kuery ojopy 'rã ojeupe guarã va'ekue.

¹⁸ Jacó kuery ma tata rami 'rã, ha'e José kuery ma hendy 'rã, ha'e rã Esaú kuery ma mba'emo pirekue rami 'rã ikuai. Ha'e gui ha'e kuery omoendy 'rã Esaú kuery, oapypa 'rã. Ha'e ramo mava'eve ndoikovei 'rã Esaú regua, ha'e rami aguã re SENHOR ijayvu rire.

¹⁹ Ha'e rire Esaú vvyty ma Neguebe pygua kuery pe 'rã itui. Ha'e rã filisteu kuery vvy ma vvy joja reia rupi ikuai va'e pe 'rã itui. Ha'e kuery ipo'aka avi 'rã Efraim ha'e Samaria nhuũndya re, ha'e rã Benjamim kuery ma Gileade regua re 'rã ipo'aka.§

* 1:1 Israel kuery re Babilônia pygua kuery opu'ã jave ma Edom pygua kuery voi ha'e kuery re opu'ã avi, Israel kuery reve joegua'i ae va'eri (versículos 10-14; 2 Crônicas 28.17; Salmo 137.7; Amós 1.11-12). Ha'e nunga rupi Edom pygua kuery re SENHOR ijayvu ombopaga aguã re (Isaías 34.5-15; Jeremias 49.7-22). † 1:6 Edom pe “Esaú” he'i, mba'eta Esaú ma ha'e kuery ramo oiko raka'e (Gênesis 36.9). ‡ 1:16 “Oy'u” he'ia ma ha'e kuery opaga aguã re ijayvu vvy (Isaías 51.17; Habacuque 2.16; Apocalipse 14.10). § 1:19 Apy ma ijayvu Israel kuery hovaigua kuery rekoague re ipo'aka aguã re. Ha'e va'e ma SENHOR ipo'aka ramo 'rã oiko (versículo 21).

²⁰ Israel kuery escravo-rã ogueraa pyre ma cananeu kuery rekoa re ipo'aka 'rã Sarepta peve. Ha'e rã Jerusalém guigua kuery escravo-rã ogueraa pyre Sefarade tetã py ikuai va'e ma tetã kuaray puku-a katy ikuai va'e re 'rã ipo'aka.

²¹ Ha'e rami vy jogueraa jepea kuery oẽ 'rã Sião yvyty áry, Esaú yvyty regua kuery re oikuaa pota aguã. Ha'e gui opo'akaa rupi opena va'e ma SENHOR ae 'rã oĩ.

Jonas rekokie oĩa Jonas rekokie oĩa

Profeta Jonas ma Nhanderuete omondouka Assíria regua Nínive tetã katy ayvu porã omombe'u aguã. Ha'e va'e kuery ma Israel kuery reve joe opu'ã va'e. Jonas ndooxei vy amboae henda katy oo. Yy rupi ooa rupi Nhanderuete ojapo peteĩ pira guaxu omokõ aguã rami. Nhanderuete ogueraa jepe ramo oo nho Nínive tetã py. Ayvu omombe'u ramo ha'e kuery ojeko rerova okuapy. Ha'e ramo Nhanderuete nombopagai raka'e.

Ha'e rami rã Jonas ndojou porã, ha'e pygua kuery nomboaxyi vy. Ha'e rã Nhanderuete ma nhomboaxy va'e ae. Ha'e rami Jonas pe ijayvu vy aipoe'i: "Ha'e gui xee ma ha'evea rami e'ỹ teve tetã guaxu Nínive amboaxy? Ha'e py ma cento e vinte mil raxa ikuai opo oiporu kuaa regua ha'e oiporu kuaa e'ỹa oikuaa e'ỹ va'e. Heta avi ikuai mymba kuery", he'i (4.11). Ha'e ramia py Nhanderuete oexa uka nhanderayvu etea.

Nhanderuete Jonas oenoĩ rã ojava ramo omoingo axyague

¹ SENHOR oayvu ombou Amitai ra'y Jonas pe. Ha'e vy aipoe'i:

² — Eiko katu ke ha'e tereo tetã guaxu Nínive katy.* Ndeayvu ha'e kuery rovai, mba'eta xea py peve heko vaia onhendu — he'i.

³ Ha'e ramo Jonas oiko katu va'eri SENHOR renonde gui oo aguã Társis katy ojava vy. Ha'e rami vy Jope py ovaẽ vy ojou peteĩ kanoã guaxu Társis katy oo va'erã. Oo aguã repy opaga ma vy ha'e va'e py oĩ ha'e kuery reve oje'oi aguã Társis katy, SENHOR renonde gui mombry.

⁴ Ha'e gui ma ye'ẽ áry ha'e kuery ooa rupi SENHOR ombou peteĩ vyvutu atã. Yvytu vaikue omoingo ye'ẽ áry rupi. Ha'e ramo kanoã opẽmba aguã rami ma oo.

⁵ Ha'e ramo kanoã mboguataa kuery onhemondyipa vy peteĩ-teĩ ojapukai nguete ramigua pe. Ha'e rami vy kanoã py mba'emo ipoyikueve oĩ va'ekue omombopa yy py ivevuive aguã. Ha'e rã Jonas ma yapy py ogejy ma vy oke rei oupy.

⁶ Ha'e ramo Jonas ituiã py kanoã ja kuery ruvixa ou vy aipoe'i ixupe:

— Mba'e tu oiko ndereve? Reke porã rei ri ty'y rejupy? Epu'ã ke, ndee voi ejapukai avi nderuete pe. Xapy'a rei nderuete nhandere ima'endu'a nho 'rã nhakanhymba e'ỹ aguã — he'i.

⁷ Ha'e gui ha'e kuery joupe-upe aipoe'i:

— Peju ke, jaexa xorte, mava'e káuxa pa guĩ nunga nda'evei ete va'e oiko jaikuaa aguã — he'i. Ha'e vy oexa okuapy xorte. Xorte oexaa py oikuaa okuapy Jonas re ae.

⁸ Ha'e ramo aipoe'i okuapy ixupe:

— Aỹ ma enhemombe'u porã orevy. Mava'e káuxa tu kova'e nunga ete ou nhande'áry? Mba'e nunga rupi tu ndee reiko? Mamo gui tu reju? Mamo ndevy va'e tu? Mava'e regua tu ndee?

⁹ Ha'e ramo ombovai vy aipoe'i ha'e kuery pe:

— Xee ma hebreu, SENHOR re ae ajerovia va'e. Ha'e va'e ma Nhanderuete yva pygua, ye'ẽ ha'e vyvutu apoare — he'i.

¹⁰ Ha'e rami rã avakue okyje vaipa ete okuapy. Ha'e vy aipoe'i ixupe:

— Mba'e tu ha'vy rejapo? — he'i. Mba'eta oikuaa okuapy SENHOR renonde gui ojava ovyã, ha'e kuery pe omombe'u ae rire.

¹¹ Ha'e gui ye'ẽ opu'ã-pu'ãve tema ovy ramo aipoe'ive ju okuapy ixupe:

— Mba'e ha'vy torojapo ndere ye'ẽ opytu'u aguã?

¹² Ombovai:

— Xejopy ha'e xemombo ye'ẽ py. Ha'e ramo ye'ẽ opytu'upa 'rã. Mba'eta xee aikuaa xekáuxa ae ha'e rami etegua vyvutu vaikue oikoa — he'i.

¹³ Ha'e rami teĩ avakue oipykui atãve tema okuapy, onhea'ãve tema yvy'ã re ovaẽ aguã. Ha'e rami teĩ nda'evei, mba'eta ye'ẽ nda'eveive tema ovy ha'e kuery oove e'ỹ aguã.

¹⁴ Ha'e ramo mae ma ojapukai okuapy SENHOR pe. Ha'e vy aipoe'i:

— Ha'e gui SENHOR, rojerure ndevy kova'e ava káuxa rokanhymba e'ỹ aguã. Orere emoĩ eme kova'e ava ruguy onheẽague re ropaga aguã, mba'eta orevy rã mba'eve py ndojapo vai. Mba'eta ndee SENHOR rejapo reipotaa rami anho oiko aguã rami — he'i.

¹⁵ Ha'e rami vy Jonas ojopy okuapy vy omombo ye'ẽ py. Ha'e ramo ye'ẽ ma porã opu'ã-pu'ã gui opytu'upa porã.

¹⁶ Ha'e rami rã ha'e kuery okyje ete okuapy SENHOR gui. Ha'e vy SENHOR pe mba'emo ome'ẽ okuapy, onhemboayvu guive mba'emo ojapo aguã re.

¹⁷ Ha'e gui Nhanderuete ma peteĩ pira guaxu ombou Jonas omokõ aguã. Ha'e ramo pira rye py ma Jonas oĩ mboapy ára ha'e mboapy pytũ re.*

2

Pira rye py Jonas oĩa gui ojapukaiague

¹ Ha'e gui Jonas ma pira rye py oĩa gui ojerure SENHOR Nguete pe.

* 1:2 Nínive tetã ma Assíria regua tuvixave va'e. Ha'e pygua kuery ma Israel kuery rovaigua ikuai, nhomboaxy kuaa e'ỹ va'e guive.

* 1:17 Mateus 12.40

- ² Ha'e vy aipoe'i:
— Ajexavai vy ajapukai SENHOR pe.
Ha'e ramo xembovai.
Pytū vaikue reia gui ajapukai ramo
ndee rendu xeayvua.
- ³ Mba'eta ndee ae xemombo uka ye'ē typya py,
ye'ē mbyte py.
Ha'e ramo yy oxyry atā vy xejoko.
Ndeguigua yai opu'ā-pu'ā vy oaxa tema xe'áry rupi.
- ⁴ Ha'e ramo xee aipoa'e:
“Xemombo ma rexaá gui mombyry.
Xapy'a rei nda'u aexa ju 'rā ri
ndevyguá templo iky'a e'ỹ va'e?”
- ⁵ Yy xeaol'i xerekovea peve,
yy typya ma xejoko.
Xyypo ikuai va'e onhemama xeakā rupi.
- ⁶ Yvy'ā guy py peve aguejy avy,
yvy peve ete aguejy.
Ha'e nunga raka'e rā peve xe'áry rupi xejokopa ta va'ekue.
Ha'e rami teĩ omanogue ikuaiá gui ndee renoē ju xerekovea,
SENHOR Xeruate.
- ⁷ Xeryepy py xenhe'ē oĩ va'e ikangy ramo
xema'endu'a SENHOR re.
Ha'e vy ajerurea re aroma'endu'a ndea py,
Ndevyguá templo iky'a e'ỹ va'e py ae.
- ⁸ Amongue mba'emo ra'angaa pe rive ojeko me'ē vy
ojepe'a imboaxyarā va'ekue gui.
- ⁹ Ha'e rā xee ma avy'aa amonhendu reve
ame'ē 'rā mba'emo ndevy,
ha'e ajapo 'rā va'ekue ajapopa nho 'rā — he'i.
- ¹⁰ Ha'e gui ma pira pe SENHOR ijayvu ramo ombojevvy Jonas yy rembe re.

3

Nínive tetā py Nhanderuete ayvu Jonas omombe'uague

- ¹ Ha'e gui teĩgue ju SENHOR oayvu ombou Jonas pe. Ha'e vy aipoe'i:
² — Eiko katu ke, ha'e tereo tetā guaxu Nínive katy. Emombe'u ke ha'e kuery pe aipoa'e uka va'e ndevy —
he'i.
- ³ Ha'e ramo Jonas ma SENHOR ijayvuague rami vy opu'ā vy oo Nínive tetā katy. Nínive tetā ma tuvixa ete
itui Nhanderuete renonde. Ha'e javi rupi mboapy ára mae ma jaexapa 'rā.
- ⁴ Ha'e gui Jonas omboypy tetā rupi oiko aguā. Peteĩ ára re oguata oikovy. Ayvu omombe'u oikovy vy
aipoe'i:
— Quarenta araa py Nínive tetā omombaa 'rā — he'i.

Nínive pygua kuery ojeko rerova okuapyague

- ⁵ Ha'e gui ma Nínive pygua kuery ojerovia okuapy Nhanderuete re. Ha'e rami vy ojapo okaru e'ỹ re ikuai
aguā. Onhemonde okuapy ajukue voxá guigua py, yvatekueve, yvyĩgueve guive.*
- ⁶ Ha'e rami ikuaiá Nínive pygua huvixa voi oendu. Ha'e rami vy guenda openaaty gui opu'ā ho'amy vy
omboi oao huvixa pegua, ha'e vy ajukue vaikue voxá guigua py ju onhemonde, tanhimbu py oguapy oiny
guive.
- ⁷ Ha'e rami vy Nínive tetā ha'e javi rupi omondouka po rami omombe'u va'erā: “Huvixa ha'e ixupegua
yvatekueve ojapo ukaa rami vy avakue, mymba kuery vaka ha'e vexa'i kuery voi ndo'ui 'rā mba'eve,
ndaperaai 'rā okaruaty py, neĩ yy ndoy'ui 'rā guive.
- ⁸ Ha'e rami 'rāgue py avakue ha'e javi tonhemonde ajukue voxá guigua py, mymba kuery voi. Pejapukai atā
ke Nhanderuete pe. Peteĩ-teĩ pejeko rerova ke ha'e've e'ỹa rami rei peikoa gui, mba'emo vai pendepo py
pejapoaty gui guive.
- ⁹ Xapy'a rei nhi'ā Nhanderuete amboae rami onhembopy'a vy ojepe'a 'rā ojapo taa gui, ha'e vy nda'ipoxyvei
'rā nhamanomba e'ỹ aguā”, he'i.
- ¹⁰ Ha'e rami ha'e kuery ikuai ramo Nhanderuete oexa, mba'eta ha'e've e'ỹa rami ikuaiá gui ojeko rerova
okuapy. Ha'e ramo Nhanderuete nomoingoi mba'emo vai ombou 'rā va'ekue, ndojapoi oayvuague.

4

Jonas ndovy'aiague

- ¹ Ha'e rā Jonas ma ha'e rami ha'e kuery ikuaiá ndojou porāi ete vy ivai oiny.

* 3:5 Ha'e kuery ma ha'e rami ikuai onhemboaxya rupi.

² Ha'e rami vy onhembo'e Nhanderuete pe. Aipoe'i:

— Ai SENHOR! Po rami e'ỹ teve xeayvu va'ekue xeyvy re teri aiko reve? Ha'e nunga rupi ae aa pojava va'ekue Társis katy ajava vy, mba'eta aikuaa ndee Nhanderuete poroayvu va'e reikoa, renhomboaxy, nandevai voi, ha'e opa mba'e py rejapo porã va'ea. Ha'e rami vy aikuaa mba'emo vai rejapo taa gui rejepe'a 'rãa.

³ Ha'e nunga rupi SENHOR, ndevy pe ajerure, eipe'a na xerekove, mba'eta aikove 'rãgue py ha'eveve amano aguã — he'i.*

⁴ Ha'e ramo SENHOR aipoe'i:

— Ha'evea rami ri ty'y evoko rami ete ndevaia? — he'i.

⁵ Ha'e gui ma tetã gui Jonas ojepe'a vy mombyry'i oguapy oiny kuaray oua katy. Ha'e py ojapo ngoguyrã, iguy py opytu'u aguã kuaray'ã py, mba'emo tetã re oiko va'e oexaxe vy.

SENHOR ombo'eague Jonas

⁶ Ha'e ramo Nhanderuete ojapo mba'emo roky henhoĩ aguã rami. Ha'e va'e ma ojeupi ovy Jonas áry, inhakã áry rupi omokuaray'ã, ome'ê aguã opytu'u aguã. Ha'e ramo Jonas ma mba'emo roky oexa vy ovy'a ete oiny.

⁷ Ko'ê jevy rã kuaray oẽ ovy jave Nhanderuete ombou avi peteĩ mbii. Ha'e va'e ma mba'emo roky ho'u rã ipirupa.

⁸ Kuaray yvateve ovy ramo Nhanderuete ombou avi peteĩ yvytu aku kuaray oẽa katy gui oipeju va'e. Jonas akã re kuaray ojope ratã ramo ikangypaa oendu. Ha'e rami vy omano aguã re ojerure. Ha'e vy aipoe'i:

— Aikove 'rãgue py ha'eveve amano aguã — he'i.

⁹ Ha'e ramo Nhanderuete oporandu Jonas pe:

— Ha'evea rami ri ty'y evoko rami ete ndevai reiny mba'emo roky re rive?

Ombovai:

— Anhetẽa rupi xevai vy amanoxe guive — he'i.

¹⁰ Ha'e ramo SENHOR aipoe'i:

— Ndee ma remboaxy ri mba'emo roky'i remba'eapo ramo e'ỹ henhoĩ va'ekue, ha'e rembo'yvate va'ekue'ỹ teĩ. Ha'e nunga ma peteĩ pytũ re henhoĩ rire amboae pytũ ju okanhy ju va'e.

¹¹ Ha'e gui xee ma ha'evea rami e'ỹ teve tetã guaxu Nínive amboaxy? Ha'e py ma cento e vinte mil raxa ikuai opo oiporu kuaa regua ha'e oiporu kuaa e'ỹa oikuaa e'ỹ va'e. Heta avi ikuai mymba kuery — he'i.

* 4:3 Jonas ndovy'ai mba'eta ndoipotai Nhanderuete omboaxy vy ogueraa jepe Nínive pygua kuery, hovaigua ikuai ramo. Ha'e rã Nhanderuete ma nhomboaxy va'e vy ndoipotai okanhy (Ezequiel 33.11; João 3.16; 2 Pedro 3.9).

Miquéias ayvu oĩa Miquéias ayvu oĩa

Profeta Miquéias ijayvu raka'e Judá ha'e Israel kuery heko vai ramo Nhanderuete ombopaga aguã re. “Ha'e nunga rupi pendekáuxa Sião tetã ombovaipaa 'rã mba'etyrã vvy karaña rami, Jerusalém opyta 'rã mba'emo ra'ykue aty rive. Vyvty templo oĩa voi opyta 'rã vvy'ã'i jaipa va'e rive” (3.12).

Ijayvu avi araka'eve rã Senhor ogueraa jepe vvy omoingo porã ju aguã re. Judeu kuery anho e'y guive, vvy jave re ikuai va'e ixupe anho 'rã ikuai. “Opaa ára py ma vyvty Senhor pegua oo oĩa va'e ombo'yvateve 'rã vyvty ha'e vvy'ã ikuai va'e áry. Ha'e ramo vvy regua kuery oje'oi 'rã ha'e katy. Heta va'e regua kuery oo vvy aipoe'i 'rã joupe-upe: ‘Peju ke, jaje'oi Senhor pegua vyvty re, Jacó kuery Ruete pegua oo oĩa katy. Ha'e ramo nhanembo'e 'rã oikoa re, ha'e va'e rupi nhande kuery voi nhandekuai aguã, he'i 'rã okuapy” (4.1-2a).

Israel ha'e Judá kuery rovai opu'ã okuapy re ijayvuague

¹ Moresete pygua Miquéias pe SENHOR oayvu ombou va'ekue. Judá pygua huvixa Jotã, Acáz ha'e Ezequias ikuai jave ijayvu Samaria ha'e Jerusalém tetã re.

² Vvy regua kuery ha'e javi, pendu ke. Ndee vvy, ejapyxaka avi ke, ha'e vvy re pendekuai va'e ha'e javi. SENHOR Nhanderuete ijayvu ta penderovai, ojeupegua templo icy'a e'y va'e gui ae.

³ Mba'eta ne'ixa, SENHOR ma o'amba gui oguejy ovvy vvy oguata 'rã ovy vyvty yvateve va'e áry rupi.

⁴ Iguýry vyvty ikuai va'e ma hykupa 'rã, vvyugua voi ovopa 'rã tata raku py iraity omo'i mbyre hykua rami, vvy'ã guy katy vvy oxyry atã va'e rami guive.

⁵ Ha'e nunga ha'e javi oiko 'rã Jacó kuery heko vaia re, Israel kuery ojevavya re ae. Ha'e gui mava'e kuery tu ikuai Jacó regua heko vai va'e? Samaria pygua kuery e'y teve? Ha'e mamó tu o'i vyvty áry Judá kuery ta'angaa mbojerovia atyrã ojapo va'ekue? Jerusalém tetã py e'y teve?

⁶ Ha'e nunga rupi SENHOR aipoe'i:

— Samaria tetã ma xee ajapo 'rã mba'ety mbyte ita omboaty pyre rami rive, ha'e uva onhotyã aguã. Mba'eta ha'e py ita ombojoja pyre ambojerepa 'rã heravy vvy'ã guy katy, oo renda ojekuaapa peve.

⁷ Ha'e gui ta'angaa ojapo pyre ma ombo'ypaa 'rã, onhemongy'a reia repy oapypaa 'rã, ha'e ta'angaa oguereko va'e ha'e javi xee ambovaipa 'rã. Mba'eta ha'e kuery itavy reia repyke re rive ojou rire ha'e rami ikuai va'e pe ae ju 'rã ogueraa uka — he'i.

⁸ Ha'e nunga rupi xee ajae'o, anhendu ratã aikovy, xeporiaua rupi aiko xepire rei reve. Jagua-tuvy nhe'ẽ rami ajae'o aikovy, ha'e guyra-nhandu rami xepy'a vai nhendu.

⁹ Mba'eta xeretarã kuery ai ma okuera ve'y ae va'e. Mba'emo vai ete ou Judá re, ovaẽ ma xeretarã kuery rekoa Jerusalém rokẽ peve ete.

¹⁰ — Ha'e nunga pemombe'u eme Gate tetã py, pejae'o eme guive.* Bete-Leafra py penhembojere-jere vvy ku'i rupi.

¹¹ Peẽ Safir pygua kuery, pendepire rei ha'e peximba reve 'rã peo. Zaanã pygua kuery voi ndoo jepoi 'rã. Bete-Ezel pygua kuery ojae'o reia pendu vvy peikuaa 'rã napenepytvõvei 'rãa.

¹² Mba'eta Jerusalém tetã rokẽ peve SENHOR guigua mba'emo vai oo ramo Marote pygua kuery oarõ okuapy mba'emo porã oiko 'rã.

¹³ Ha'e gui Laquis pygua kuery, pemoxãmba kavaju kuery karóxa re. Mba'eta peẽ kuery ranhe pejapo Sião pygua kuery ojevavy aguã rami, pendere oĩ ra'e Israel kuery heko vai aguã.

¹⁴ Ha'e Moresete-Gate pygua kuery pe ma peme'ẽ 'rã mba'emo oxẽ ta ma ramo. Aczibe py oo ikuai va'e ma Israel pygua huvixa kuery ojekore aguã rive opyta.

¹⁵ Ha'e gui Maressa pygua kuery, pendea py voi ambou 'rã pendere ipo'aka va'erã. Adulão peve voi ovaẽ 'rã Israel regua yvatekueve.

¹⁶ Pejayapa pende'a hi'vyvpy'i rupi pendera'y kuery perovy'a va'ekue re pendepy'a vai vvy. Pendeapye rupi penhopimba ke xapirẽ rami, pendegui ha'e kuery oipokuaa reve ogueraapaa ta ma ramo.

2

“Joguereko axya kuery pe nda'evei ete 'rã”, he'iaque

¹ Nda'evei ete 'rã ngupa py oĩa py ojevavy aguã anho opy'a re omo'i va'e kuery pe. Ha'e va'e kuery ma ko'égueve ha'ekue rami ae 'rã ikuai, ha'e rami aguã ipo'aka va'e vvy.

² Ha'e kuery ma nhomba'ety ojopyxea oendu vvy oi'pe'a 'rã, joo voi ojopy 'rã. Ha'e rami vvy omokanhy 'rã avakue ha'e hoo py ikuai va'e guive. Omomba 'rã hoo va'e imba'e rei-rei reve.

³ SENHOR aipoe'i:

— Ha'e nunga rupi ha'e kuery re ambou 'rã mba'emo vai. Ha'e va'e gui ma ndapeo jepevei 'rã. Penhemboyvatea rupi ve'y 'rã pendekuai, mba'emo vai oikoa ára.

⁴ Ha'e va'e ára penderovai omombe'ua 'rã pete'i ayvu peneronhemboaxya rupi merami. Ha'e vvy aipo'ea 'rã: “Nhanemokanhymba ma! Nhanderuete joupe omboaxapa ma xeretarã kuery vvy oguereko va'ekue!

* 1:10 Profeta Miquéias ndoipotai hovaigua kuery Gate py ikuai va'e ha'e nunga oendu, ojoiari rei e'y aguã.

Xegui voi oipe'apa! Nhande kuery mba'ety ikuai va'ekue ma anhetê rupi e'ÿ ikuai va'e pe ju omboaxa", 'ea 'rã.

⁵ Ha'e nunga rupi SENHOR pegua kuery teígue ju jyaty okuapy teí pendeayvyrã oa'ã va'erã ma ndoikoi 'rã, xorte oexaa rupi, neí ixã omoatãa rupi voi.

Profeta ramigua rive re ijayvuague

⁶ Ha'e rã heta va'e kuery ma aipoe'i okuapy xeivy:

— Ndeayvuve eme ha'e rami, ndeayvu riae eme. Mba'eta orere ndoui 'rã roxĩmba aguã.

⁷ Jacó kuery re ma ndoui 'rã remombe'u reikovy va'e. Tyrã pa SENHOR Nhe'ẽ ivai vi nhandevy? Po ramigua ae 'rã teve ojapo? — he'i okuapy.

SENHOR ombovai:

— Tá, teko porã rupi ikuai va'e pe ma xeayvu ojapo porã 'rã.

⁸ Ha'e rã xevygua kuery ma kue'i teri xere opu'ã okuapy xerovaigua rami. Ha'e rami vy pendea rupi oaxa rive'i ovy va'e gui peipe'a 'rã ijao, i-capa voi, pendere opu'ã aguã re onhembopy'a e'ÿ teí.

⁹ Xevygua kunhague gui voi peipe'a ngoo py ovy'a aguã va'ekue. Imemby kuery gui voi peipe'a mba'emo porã raka'e rã peve guarã ame'ẽ aguã va'ekue.

¹⁰ Pepu'ã ma ha'vy, tapeopa, mba'eta peíague py nda'evei pepytu'uve aguã. Tapeo, mba'eta penhemongy'apaague ojapo penemokanhymba aguã rami, penemokanhya 'rã.

¹¹ Ha'e gui penembyte xapy'a rei oiko 'rã vyvutu rami rive ijapu vy aipoe'i va'e: “Xee ma vinho ha'e nga'ua rupigua rive amombe'u va'e”, he'i. Ha'e va'e rive 'rã ha'ave peẽ kuery pegua profeta oiko aguã.

Israel kuery okuave'i va'e SENHOR omono'õ ju aguã re ijayvuague

¹² — Ha'e gui peẽ Jacó regua kuery ma xee romono'õmba ju 'rã. Amboatypa 'rã Israel kuery okuave'i va'e. Joa py meme 'rã romoi, vexa'i kuery ma kora py, e'ÿ vy nhuũndy mbyte py ikuai va'e rami. Ha'e ramo heta ete ju ikuai vy onhendu ratã rei 'rã okuapy.

¹³ Ha'e kuery renonde rupi pete'õ oo 'rã tape apoarã. Ha'e ramo ha'e kuery oẽmba 'rã, okẽ rupi oike ha'e oẽ ju 'rã jogueravy. Ha'e kuery renonde rupi oo 'rã Huvixave ae. Tá, SENHOR ae 'rã oo ha'e kuery renonde rupi — he'i.

3

Huvixa, sacerdote ha'e profeta kuery rovai ijayvuague

¹ Ha'e gui xee aipoa'e:

— Peẽ Jacó akã ha'e Israel kuery ruvixa pendekuai va'e, pendu ke aÿ. Peẽ kuery e'ÿ teve ha'avea rami joguerekoarã penemoingoa pyre?

² Mba'eta peẽ kuery ma ndaperovy'ai 'rã iporã va'e, ha'e rã mba'emo vai rive pejou porã. Ha'e rami vy peipiropa 'rã heta va'e kuery, ho'o voi pemboi 'rã ikãgue gui.

³ Ha'e rami vy pe'u 'rã xevygua kuery ro'okue, ipire pemboipa 'rã, ha'e ikãgue ma pemopẽmba rive 'rã. Ha'e vy pembo'ipa 'rã ho'okue oja py, oja ixã va'e pyguarã guive.

⁴ Ha'e rami rive SENHOR pe pejapukai ramo noendui 'rã pendeayvua. Ha'e rami 'rãgue py ha'e va'e jave peẽ kuery pe ndojexa ukavei 'rã, ha'ave e'ÿa rami pendekuai ramo.

⁵ Ha'e gui profeta ramigua kuery xeretarã kuery oguerorejavy ramo po rami SENHOR ijayvu avi ha'e kuery re.

— Peẽ kuery ma pe'u va'erã ome'ẽa ja “Ha'evopa rei 'rã” peje. Ha'e rã pe'u va'erã nome'ẽi va'e kuery pe ma “Ou 'rã pendere opu'ã va'erã” peje.

⁶ Ha'e nunga rupi peẽ kuery áry ou 'rã pytũ mba'eve ndapexavei aguã, oiko 'rã pytũ reia mba'eve penemba'ekuaa e'ÿ aguã. Profeta kuery pe ma kuaray oike xapy'a 'rã, ha'e kuery pe ara py teí pytũmba 'rã.

⁷ Ha'e ramo mba'emo oexa va'ety kuery oxĩmba 'rã, imba'ekuaa va'e kuery ndoikuaavei rei 'rã. Tá, ha'e kuery ojoko 'rã ojuru, Nhanderuete mba'eve py nombovai ramo — he'i.

⁸ Ha'e rã xere ma SENHOR Nhe'ẽ po'akaa anho oĩ. Ha'e rami vy xere oĩ ha'avea rami ajoguereko aguã ha'e xembaraeterã, Jacó kuery pe amombe'u porã aguã heko vaia, ha'e Israel kuery ojejavya.

⁹ Peẽ Jacó akã ha'e Israel kuery ruvixa peiko va'e, pendu ke aÿ, mba'eta ha'ave'ÿa rami pejoguereko, ha'e ha'avea ramigua pe “Nda'evei va'e” peje.

¹⁰ Peẽ kuery ma tuguy pemoẽa rupi rive pejapove oorã Sião tetã re, mba'emo vai rupi anho pejapo Jerusalém re.

¹¹ Ha'e pygua huvixa pendekuai va'e ma perãta pejopy vy rive 'rã peikuaa pota mba'emo re, sacerdote kuery ma nhombo'e 'rã mba'emo ojouxu vy rive, ha'e profeta kuery ma perãta re rive 'rã imba'ekuaa. Ha'e rami teí SENHOR re pejeroviaa rupi merami pendeayvu vy “Nhanembyte e'ÿ teve SENHOR oĩ? Ha'e ramo nhandere ndoui 'rã mba'emo vai”, peje rive 'rã.

¹² Ha'e nunga rupi pendekáuxa Sião tetã ombovaipaa 'rã mba'etyrã yvy oikaraia rami, Jerusalém opyta 'rã mba'emo ra'ykue aty rive. Yvyty templo oia voi opyta 'rã yvy'ã'i jaipa va'e rive.

4

¹ Ha'e rami teĩ opaa ára py ma vvyty SENHOR pegua oo oĩa va'e ombo'yvateve 'rã vvyty ha'e vvy'ã ikuai va'e áry. Ha'e ramo vvy regua kuery oje'oi 'rã ha'e katy.

² Heta va'e regua kuery oo vy aipoe'i 'rã joupe-upe: "Peju ke, jaje'oi SENHOR pegua vvyty re, Jacó kuery Ruete pegua oo oĩa katy. Ha'e ramo nhanembo'e 'rã oikoa re, ha'e va'e rupi nhande kuery voi nhandekuai aguã", he'i 'rã okuapy. Mba'eta Sião gui ma oikuaa ukaa 'rã lei, Jerusalém gui onhendu 'rã SENHOR ayvu.

³ Ha'e gui ma SENHOR oikuaa pota 'rã vvy regua mbovy e'ỹ ikuai va'e re, omo'arandu 'rã vvy regua ipo'akave va'e ha'e mombyrya rupigua. Ha'e ramo ha'e kuery kyxe gui ojapo 'rã vvy karaĩarã, ha'e hu'y guaxu gui ojapo 'rã kyxe vvyra rakã ayaarã. Mba'eta vvy regua kuery ndoguerogeroviavei 'rã kyxe, neĩ joe opu'ã aguã voy ndoikuavei ma 'rã.

⁴ Ha'e rami 'rãgue py peteĩ-teĩ oguapy 'rã okuapy omba'e uva rembypy, e'ỹ vy figo'y guy rupi, mba'eta ndoikovei 'rã imondyiarã, SENHOR ixondaro reta va'e ojuru py ae ijayvu rire.

⁵ Vvy regua kuery ma nguete ramigua rery rupi peteĩ-teĩ ikuai. Ha'e rã nhande ma SENHOR Nhanderue rery rupi 'rã nhandekuai, raka'e rã peve.

⁶ Ha'e gui SENHOR aipoe'i:

— Ha'e va'e ára ma arupa 'rã oguata vaikue'i va'e kuery, amono'õmba avi 'rã ambopagaa rupi araa uka va'ekue.

⁷ Oguata vaikue'i va'e amoingo 'rã peteĩ regua okuave va'e, ha'e mombyry ogueraa pyre ma amoingo 'rã ipo'akave va'e. Ha'e rami vy ha'e kuery re apena 'rã Sião vvyty áry, aỹ guive raka'e rã peve.

⁸ Ha'e gui ndee torre vexa'i kuery rarõaty, Sião vvyty, tá, ndea py 'rã ou jypy guare rami ipo'aka va'erã, Jerusalém pygua ae ipo'aka ju aguã.

⁹ Ha'e gui aỹ ma, mba'e re tu ha'e rami ete peneraxê? Noĩ teve penderuvixave? Penemongeta va'ety okanhy ae teve? Pendere teve imemby raxy va'e rami haxy va'e ou?

¹⁰ Peẽ Sião pygua kuery, aỹ pejexavai reve penhea'ã peiny imemby raxy va'e rami, mba'eta aỹ peo 'rã peneretã gui hovai rupi rive pendekuai aguã. Babilônia tetã peve 'rã peo. Ha'e rami teĩ penemondoukaa ju 'rã ha'e gui, mba'eta ha'e gui SENHOR pendereraa jepe 'rã penderovaigua kuery po gui.

¹¹ Aỹ ma heta ete ikuai vvy regua kuery pendere opu'ã okuapy va'e. Ha'e kuery aipoe'i: "Sião tetã tomongy'apaa, nhanderexa py ae tajaexa jaiporta va'e, ha'e pygua kuery re oiko rã", he'i okuapy.

¹² Ha'e rami teĩ ha'e kuery ndoikuai SENHOR opy'a re oguereko va'e, ndoikuai onhembopy'aague mba'emo aju jokuaa ojykya aguã py rami omono'õmba aguã.

¹³ Ha'e nunga rupi Sião pygua kuery, pepu'ã ke ha'e pejyky. Ha'e rami aguã ame'ẽ penderakuarã ferro guigua, ha'e penepopẽrã overa va'e guigua. Ha'e ramo heta 'rã pejyky vvy regua kuery.* Ha'e rã ha'e kuery oguereko va'ekue ma pemboaxapa 'rã SENHOR pe, imba'e rei-reikue peme'ẽ 'rã SENHOR vvy jave re ipo'aka va'e pe.

5

¹ Ha'e nunga rupi aỹ pemboatypa ke pendea pygua xondaro kuery. Mba'eta nhandejokoa 'rã okuapy, ha'e vvyra py oinupã 'rã Israel kuery rerekoa rova rupi.

Huvixaverã SENHOR ombou rã itui'i ha'e ipo'aka aguã re ijayvuague

² Ha'e gui ndee Belém tekoa Efrata 'epy va'e, ndee ma kyri'i ete Judã regua ikuai aguã teĩ ndegui ae 'rã ou xevyguia Israel kuery re opena va'erã. Ha'e va'e ma yma guive ijypy va'e, ijypy ete ára guive.*

³ Ha'e rami teĩ ha'e va'e kuery SENHOR omboaxa 'rã ranhe, imemby raxy va'e oikuavã'ia ára peve. Ha'e va'e jave py ma tyvy kuery mboae ojevypa ju 'rã Israel kuery ikuai py.

⁴ Ha'e gui guetarã kuery re opena va'e oĩ atã vy SENHOR po'akaa rupi 'rã opena oikovy, SENHOR nguete rery iporã ete va'e rupi. Ha'e ramo ha'e kuery ikuai porã 'rã, mba'eta ha'e jave py huvixa pe "Yvate ete va'e" 'ea 'rã vvy apy peve.

⁵ Ha'e ae 'rã oiko nhanemoingo porãarã.

Ha'e gui Assíria pygua kuery ma nhandevvy re ou vy huvixa ro ikuai va'e rupi oaxa joguervy ramo nhande kuery va'e regua opu'ã 'rã ha'e kuery rovai, sete joe opena va'e ha'e irundy meme avakue rerekoa 'rã opu'ã.

⁶ Ha'e va'e kuery ma kyxe py ombovaipa 'rã Assíria ha'e Ninrode vvy, ha'e kuery ropy ae. Ha'e rami py nhandereraa jepe 'rã Assíria pygua kuery gui, ha'e kuery nhandevvy re ou vy nhanderekoa re opyrõ ramo.

⁷ Ha'e gui Jacó regua rembyrekue ma vvy regua kuery mbyte rupi 'rã ikuai SENHOR guigua yxapy rami, jai rogue áry oky rayvi ho'a va'e rami guive, mba'eta ha'e nunga ma avakue re'ỹ oarõ va'e, avakue ra'y kuery re'ỹ ojeko va'e.

⁸ Ha'e rami vy Jacó regua kuery rembyrekue ma amboae regua kuery mbyte rupi ikuai 'rã mymba kuery ka'aguy regua mbyte rupi guary oiko va'e rami. Vvy regua kuery ikuai rupi ikuai 'rã vexa'i kuery ikuai rupi guary ra'y oiko va'e rami, mba'eta guary oaxaa rupi joe opyrõ reve ombo'ypa 'rã, heraa jepearã ndoikoi rã guive.

⁹ Ha'e rami ae avi ndepo'aka 'rã nderovaigua kuery re. Ha'e ramo ha'e kuery omokanhymbaa 'rã.

* 4:13 Ha'e jave py ma mba'emo ra'y'i ha'e kuery ojyky 'rã vaka opyrõa rupi. Ha'e gui apy ma Jerusalém pygua kuery pe Nhanderue ijayvu guyma pe rami, vvy regua kuery ombopaga aguã. * 5:2 Belém tekoa ma huvixa Davi itui'iague (Rute 1.2; 1 Samuel 17.12). Ha'e nunga rupi Belém pe "Davi rekoague" 'ea (Lucas 2.4). Ha'e gui kova'e ayvu rupi vy Jesus voi itui'i raka'e Belém py (Mateus 2.3-6).

¹⁰ SENHOR aipoe'i:

— Ha'e va'e ára ma penembyte gui aipe'apa 'rã penerymba kavaju kuery, ha'e ambovaipa 'rã penerenda karóxa joe opu'ãa pygua.[†]

¹¹ Pendevvy re ambovaipa 'rã tetã ikuai va'e, ha'e aitypa 'rã oo ikorapa va'e pejapo va'ekue.

¹² Pendepo gui aipe'apa 'rã mba'evykya, ndapejouvei ma 'rã imba'ekuaa va'erã.

¹³ Peẽ kuery mbyte gui aipe'a 'rã mba'emo ra'angaa pejapo va'ekue, ha'e ita pembojerovia aguã pemopu'a va'ekue. Ha'e rami rire ndapejero'avei 'rã pendepo py ae pejapo va'ekue renonde.

¹⁴ Penembyte gui aipe'apa 'rã ta'angaarã vyvra pemopu'ã va'ekue, ha'e ambovaipa 'rã peneretã ikuai va'e.

¹⁵ Ha'e gui ajou vai ha'e xepoxya rupi ambopaga 'rã vvy regua xenhe'ẽ rendu e'y va'ekue.

6

Ojeuepegua kuery re oikuaa pota aguã re Nhanderuite ijayvuague

¹ Pendu ke a'y SENHOR ayvu. Aipoe'i:

— Pepu'ã ke, vvyty ikuai va'e renonde pemombe'u pendereko, vvy'ã ikuai va'e oendu aguã pendeyvua.*

² Ha'e peẽ vvyty pendekuai va'e voi ke pendu SENHOR oikuaa va'e omombe'u rã, ha'e peẽ vvy yta ymagua peiko va'e reve. Mba'eta SENHOR oguereko ojeuepegua kuery regua omombe'u va'erã, Israel kuery omboayvu aguã.

³ — Ha'e gui xeivygua kuery, mba'e tu ajapo pendere? Mba'e nunga py tu rombovoyi? Xembovai na!

⁴ Mba'eta Egito vvy gui roguenoẽ va'ekue, escravo pendekuaiague gui roepy vy. Ha'e gui peneronderã amondouka raka'e Moisés, Arão ha'e Miriã.

⁵ Xeivygua kuery, penema'endu'a ke a'y Moabe pygua huvixa Balaque penemombaxeague re, ha'e ixupe Beor ra'y Balaão ombovaiaque re. Penema'endu'a avi Sitim guive Gilgal peve pendere oiko va'ekue re, peikuaa aguã SENHOR ha'eva rami meme pendererekoague — he'i.

⁶ Ha'e gui SENHOR pe ajexa ukaxe vy mba'e nunga 'rã tu aru, xerenapy'ã re a'y aguã Nhanderuite yvate ete va'e renonde? Henonde aju vy mba'emo aapy reve ame'ẽ va'erã teve 'rã aru? Vaka ra'y petei ma'et'y va'e aru 'rã teve?

⁷ SENHOR oguerovy'a 'rã teve mbovy e'y vexa'i, ha'e e'y vy dez mil yakã'i azeite anho tynyẽ va'e? Xereko vaiague re ame'ẽ 'rã teve xera'y petei'i va'ekue, xerete guigua ae'i teve ame'ẽ 'rã xepy'a guive ajevyague rekoa?

⁸ Any avakue, mba'eta pendevy pe SENHOR omombe'u ae ma iporã va'e oipota va'e. Ha'e va'e ma ha'eva rami pejuguereko aguã, penhomboaxya rupi pejoayvu aguã, ha'e Penderuite reve penhemboyvate reia rupi e'y peiko aguã.

Ha'eva'ya rami joguerekoa kuery ombopaga aguã re Nhanderuite ijayvuague

⁹ Ha'e gui SENHOR oeno'i 'rã tetã pygua kuery. Ha'e ramo hi'arandu va'e kuery ma hery oendu vy ojererokyjea rupi 'rã ikuai. Ha'e gui ma SENHOR aipoe'i:

— Vvy regua kuery, pendu ke penerenoia.

¹⁰ Heko vai va'e ro py o'i teri teve jokorea rupi ojou va'ekue, ha'e mba'emo ryrũ jokore aguã va'e?

¹¹ Xee amboeko porã 'rã teve mba'emo opejaa ha'eva'e'y ramigua peiporu rã, e'y vy poyia jokore aguã regua hyru gui penoẽ rã?

¹² Mba'eta tetã py oguerekopa rei va'e kuery jojukaa rupi anho ikuai, ha'e pygua kuery ha'e javi ijapu va'e meme, nhombotavya rupi anho ae 'rã ijayvu.

¹³ Ha'e rami rã xee rombojexavai 'rã, pejevavya káuxa aipe'apa 'rã pendegui.

¹⁴ Ha'e ramo mba'emo pe'u teĩ napenhandui 'rã, penderye py pendu riae 'rã penenhembayia. Penemba'e rei-rei pemo'i porãmba teĩ ndapejouvei 'rã. Ha'e rã mba'emo pejou nho va'e ma xee amboaxa 'rã kyxe revegua pe.

¹⁵ Mba'emo penhot'y teĩ napemono'õi 'rã. Azeitona reumbiri teĩ azeite ndapereko'i 'rã pendejee peikyty va'erã. Uva voi peumbiri teĩ ndapey'ui 'rã vinho.

¹⁶ Mba'eta huvixa Onri ojapo uka va'ekue rupi rive pendekuai, Acabe ro pygua kuery ikuaiague ha'e nhomorgetaa rami guive.[†] Ha'e nunga rupi xee romokanhymba 'rã. Peneretã ikuai va'e ajapo 'rã ojoi vai pyrã. Ha'e rami vy ajapo 'rã vvy regua kuery pendejou vai aguã rami.

7

Israel kuery opa marã ikuai re ijayvuague

¹ Nda'evei ete 'rã xeivy, mba'eta xee ma kuaray puku jave mba'emo'a omono'õmbaague rupi ndojouvei va'e rami aiko, ha'e rami e'y vy uva omono'õmbaa ma rire ivaikue anho ojou va'e rami avi, mba'eta nda'ipovei ma hi'a oipyte pyrã, neĩ figo jypygya ja'uxe vai va'e nunga voi.

² Mba'eta vvy gui okanhymba ma porayvu va'ekue. Avakue ikuai va'e regua peteive jipoi heko porã va'erã. Pavẽ rei oma'ẽ mbegue 'rã okuapy jouguy omoẽ aguã. Petei-teĩ ma kya py rami guivy kuery ae ombo'aa rupi 'rã ikuai.

[†] 5:10 Ha'e kuery ma joe opu'ã aguã anho oguereko va'ekue kavaju. * 6:1 Apy ma Nhanderuite ojeuepegua kuery oeno'i guenonde ojexa uka aguã, ha'e kuery omboayvu aguã. Ha'e gui vvyty ha'e vvy'ã ikuai va'e oeno'i avi henduarã rami. [†] 6:16 Huvixave Onri ha'e Acabe ma pavẽ gui heko vaive va'e (1 Reis 16.25, 30).

³ Ha'e kuery opo py ojapo 'rã mba'emo vai anho, onhea'ã 'rã guive ojapo ete peve. Huvixa ma nhombopagaxea rupi anho oiko, joe oikuaa pota va'e kuery ma peráta re anho ojapo, yvatekueve ma ijayvu 'rã okuapy opy'a py ojapo vaixea oĩ va'e re. Ha'e rami vy peteĩ rami ete 'rã ikuai mba'emo vai apoa rupi.

⁴ Ha'e kuery va'e regua heko porãve va'e ma juu rami nhomoingo axy va'e, ha'evevea ramive merami ikuai va'e ma juuty gui nda'eveive va'e. Ha'e nunga rupi ovaẽ ma ára peneretã rarõa kuery omombe'u va'ekue, pejaxavai aguã ára ae. Ovaẽ ma ha'e kuery ndoikuaavei rei aguã.

⁵ Pejerovia eme peneirũ re, pejerovia eme peneirũ kuery re. Pejoko ke pendejuru pendepexo re ojero'a va'e pe eteve voi mba'eve pemombe'u e'ỹ aguã.

⁶ Mba'eta ta'y kuery ndoayvuvei 'rã nguu kuery, tajy kuery voi opu'ã 'rã oxy kuery rovai, ipi'a ra'yxy kuery voi ome xy kuery rovai 'rã opu'ã. Ha'e rami vy peteĩ-teĩ rovaigua kuery ma ngoo pygua ae 'rã ikuai.*

⁷ Ha'e rã xee ma ama'ẽ tema 'rã SENHOR re, arõ 'rã Nhanderuede xereraa jepea. Ha'e ramo Xeruete oendu 'rã xeayvua.

Israel kuery omboaxy aguã re SENHOR ijayvuaque

⁸ Ha'e gui xerovaigua kuery, pevy'a rei eme xere. Xee ha'a rire teĩ apu'ã ju 'rã. Pytũ rupi aiko teĩ SENHOR omoexakã 'rã aikoa'i rupi.

⁹ SENHOR pe ajejavy rire ajexavai 'rã ipoxya gui, teĩ xereko re oikuaa pota vy xemboeko porã peve'i. Ha'e rami vy xerenoẽ ju 'rã guexakãa py, ha'e ramo xee aexa 'rã ha'evea rami xererekoa.

¹⁰ Ha'e nunga xerovaigua okuapy oexa vy oendu 'rã oxĩmbaa, xevy pe "Mamo tu SENHOR Nderuede oĩ?" he'i rire. Ha'e nunga oiko rã aexa 'rã xerexa py ae, tape rupi yapo oĩ va'e rami opyrõa ramo.

¹¹ Ha'e gui peneretã kora omoatyra jevya ára py penembotuvixave 'rã.

¹² Ha'e va'e ára ma pendea py jogueru 'rã Assíria guive Egito peve ikuai va'ekue, ha'e Egito tetã guive Eufrates yakã peve, ye'ẽ guive ye'ẽ mboae peve, ha'e vvyty oia guive vvyty mboae peve ikuai va'ekue.

¹³ Ha'e rami teĩ pendeivy ombovaipaa 'rã ha'e py ikuai va'e káuxa, ojapo vai rei rire.

¹⁴ Epena ke ndevygua kuery re ndepopoka py. Ha'e kuery ma nerymba rami ikuai. Ha'e kuery ae'i ikuai vvyraty reia rupi, vvy porã reia mbyte. Tove yma guare rami tokaru okuapy Basã ha'e Gileade vvy rupi.

¹⁵ — Ha'e ramo peẽ kuery pe xee aexa uka 'rã mba'emo porã, Egito vvy gui roguenoẽ jave guare rami — he'i.

¹⁶ Yvy regua kuery ha'e nunga oexa vy oxĩmba 'rã okuapy ipo'akaa gui. Ojuru ojoko 'rã opo py, ijapyxa voi opyta 'rã oendu ve'ỹ va'e.

¹⁷ Mboi rami oere 'rã nhoguenoiny vvy ku'i. Mboi minha vvy rupi otyryry vy onhemiague gui oryryipa reve oẽ va'e rami avi ha'e kuery voi oryryipa reve 'rã ojexa uka SENHOR Nhanderuede renonde, ixugui okyje vaipa reve.

¹⁸ Oreruete, mava'e tu oiko ndee rami ete? Ndee ma remboguepa 'rã orereko vaiague, nderexaraipa 'rã guive ndevygua kuery rokuave va'e orereko vaiague re. Mba'eta SENHOR nhomboaxyxe vai va'e vy riae e'ỹ 'rã oĩ ivaia.

¹⁹ Ha'e rami vy nhanemboaxy ju 'rã, opyrõmba 'rã nhandereko vaiague re, jajejavyague omombopa 'rã ye'ẽ typyvea py.

²⁰ Ha'e ramo Jacó kuery pe oexa uka 'rã anhetẽ rupi oikoa, Abraão kuery pe oexa uka 'rã omboaxya, yma guive nhaneramoĩ kuery pe ouraague rami vy.

* 7:6 Mateus 10.35, Lucas 12.53

Naum ayvu oĩa Naum ayvu oĩa

Profeta Naum oiko jave ma Assíria pygua kuery omongyje rei okuapy Judá kuery. Ha'e kuery ma nhomboaxy va'e'ỹ ha'e ipo'akapave va'e ikuai, oitypaxe guive Judá kuery. Mava'e 'rã tu ojoko Judá kuery omomba e'ỹ aguã? Naum ombovai: "Senhor Nhanderueete ma nda'evei etea ha'e opoxya oexa uka va'e. Opoxya rupi nhombopaga 'rã opa mba'e py. Ngovaigua kuery pe Senhor ipoxy vy ombopaga 'rã ija'e e'ỹ va'e. ... Senhor ipoxy rã mava'e 'rã tu ogueropo'aka kuaa? Mava'e tu oikoveve 'rã opoxy etea oexa uka va'e renonde? Mba'eta ipoxya ma tata rami 'rã ou, itaova ikuai va'e omboa'ypa 'rã guive" (1.2,6).

Ha'e rã Nhanderueete pegua kuery pe ma aipoe'i: "Senhor ma poroayvu va'e. Jajexavaia ára ma nhanhemi aguã oiko, mba'eta oikuaa hexe onhemi va'e kuery ha'e javi", he'i (1.7). Ha'e nunga rupi mba'emo oiko teĩ jarovy'a 'rã Nhanderueete nhandere openaa.

Nhanderueete poxya ha'e nhomboaxy re ijayvua

¹ Nínive tetã pygua kuery rovai ayvu oĩa.* Kova'e kuaxia para re oĩ Elcos pygua Naum pe oexa uka pyre.

² SENHOR Nhanderueete ma nda'evei etea ha'e opoxya oexa uka va'e. Opoxya rupi nhombopaga 'rã opa mba'e py. Ngovaigua kuery pe SENHOR ipoxy vy ombopaga 'rã ija'e e'ỹ va'e.

³ SENHOR ma nda'ivai ma rei 'rã va'eri ipo'akapa va'e vy nomboko porã 'rã heko vai va'e. Yvytu jere ha'e vyty atãa rupi SENHOR oguata va'e, ha'e arai re opyrõ 'rã yvy ku'i rupi rami.

⁴ Y'e'ẽ pe ijayvu vy omboypa, yakã ikuai va'e voi omboypa kuaa va'e. Ha'e ramo Basã ha'e Carmelo yvy rupi ipirupa. Libano yvy re vyoty ikuai va'e voi ixorimba 'rã.

⁵ Henonde ma vyty ikuai va'e oryryipa, yvy'ã ikuai va'e voi okanhymba. Henonde rupi yvy opu'ã 'rã ho'amy, yvy ha'e javi, ha'e yvy re ikuai va'e voi.

⁶ SENHOR ipoxy rã mava'e 'rã tu ogueropo'aka kuaa? Mava'e tu oikoveve 'rã opoxy etea oexa uka va'e renonde? Mba'eta ipoxya ma tata rami 'rã ou, itaova ikuai va'e omboa'ypa 'rã guive.

⁷ SENHOR ma poroayvu va'e. Jajexavaia ára ma nhanhemi aguã oiko, mba'eta oikuaa hexe onhemi va'e kuery ha'e javi.

⁸ Ha'e rã Nínive tetã ma SENHOR omomba vyvoi 'rã, yy tuvixa va'e oua rami. Ngovaigua kuery oakykue monha 'rã pytũ rupi.

⁹ Mba'exa tu penhembopy'a pekuapy SENHOR rovai? Ha'e ae 'rã penemomba vyvoi. Penembojexavaiarã ou vy peteĩgue'i pyve penemokanhymba 'rã.

¹⁰ Mba'eta peẽ kuery ma juuty mbyte py penhemimba, ha'e oka'u va'e rami vinho pendejee penhoẽmba teĩ penemokanhymba 'rã mba'emo pirekue okaia rami.

¹¹ Nínive tetã pygua kuery, pendea gui peteĩ oo SENHOR rovai onhembopy'a va'e, ha'eve'ỹa rami nhomongeta va'e.

¹² Po rami SENHOR ijayvu:

— Penembaraete ha'e pendereta teĩ penemombaa 'rã. Ha'e rami vy pekanhymba 'rã. Xee ae 'rã rombojexavai, ha'e gui ma norombojexavai 'rã.

¹³ Ha'e gui peẽ Judá kuery, pende'áry gui ma amopẽmba 'rã ha'e kuery canga omoĩ va'ekue. Amondopa 'rã ixã pendejokuaague.

¹⁴ Ha'e rã peẽ Assíria pygua kuery, SENHOR ijayvuague rami vy nda'ipoavei 'rã peneramymino kuery penderery rupi oenoĩ mbyrã. Penderueete ramigua kuery pegua oo gui ma amomba 'rã ta'angaa ikuai va'e, mba'emo ryku guigua guive. Pendereko vai ramo ajapo 'rã yvykua py penenhonoa aguã rami. — he'i.

¹⁵ Ne'exa, vyty áry rupi ou oiny ayvu porã mombe'ua, pendekuai porã aguã regua omombe'u va'erã. Ha'e nunga rupi Judá kuery, pejapo ju ngaru, ha'e pejapo penhemoayvuague, mba'eta pendea py avakue heko vai va'e ndouvei ma 'rã. Ha'e va'e kuery ma omokanhymbaa ae ma.

2

Nínive tetã ojokoa vy ipo'akaa ete aguã re ijayvuague

¹ Nínive tetã pygua kuery, ou ma oiny penemokanhya. Penhangareko oo ikorapa va'e re, pearõ tape, pemombaraete pendekupe, pemono'õmba pendexondaro kuery teĩ.*

² (Ha'e rami avi SENHOR omoimba ju 'rã Jacó kuery po'akaa, Israel kuery po'akaa omoĩ ju 'rãa rami ae avi, imba'e rei-rei ogueroko va'ekue oipe'apaa ha'e uva'y ikuai va'ekue ombovaipaa rire teĩ.)

³ Nínive pygua kuery va'e regua imbaraetekueve ma ogueroko hu'y jokoã pytã va'e, avakue ipy'a guaxukueve ma pytã va'e py 'rã onhemonde, karóxa ogueroko katupa ára py aço oĩ va'e overapa, hu'y guaxu voi overa rei va'e.

⁴ Tape ikuai va'e rupi karóxa oaxa-axa va'e ma oo atã, ha'e tetã mbyte rupi joaxa-axa 'rã inhakuã reve. Tataandy rami 'rã onha, overa va'e rami.

* 1:1 Nínive tetã ma Assíria yvy regua tuvixave va'e. Ha'e katy Nhanderueete omondouka Jonas ojoko rerova aguã regua omombe'u aguã. Ha'e kuery ojoko rerova va'eri ha'ekue rami ae ikuai, nanhomboaxyi vy amboae regua omokanhymbaa rupi. * 2:1 Apy ma Nhanderueete omombe'u uka ma voi Nínive tetã re hovaigua kuery opu'ã okuapy 'rãa.

⁵ Ha'e pygua yvatekueve oenoī ukapaa va'eri ha'e kuery onhepyxangapa 'rā ouvy tape rupi. Tetā kora vy'ryy ovaē aguā oĵapura jogueravy teī nhovaexī 'rā ngovaigua kuery ojerovia rei ha'e hembiporupa va'e reve.

⁶ Yakā jokia ikuai va'e oipe'aa rā ombovaipa huvixa ro.

⁷ Nínive tetā ma huvixa kunha rami opyta va'ekue ri ijayvuague rami vy ixugui oipe'apaa mba'emo, ha'e pygua kuery escravo-rā ogueraapaa guive. Ha'e ramo hembiguai kunhataĩgue apykaxu rami oĵae'o okuapy opexo re oipete-pete reve.

⁸ Nínive tetā ma oiko ppy guive yy omboty pyre rami ae tema oī va'ekue ri aĩ ma okanhymba ma ovy. Oĵapukai reve "Pepytal Pepytal!" 'ea teī mava'eve ndojevyai.

⁹ Ha'e gui "Peipe'a na prata ha'e ouro oī va'e, mba'eta mba'emo omoī porā mbyre ndogueraapaa teri. Oī reta teri opa mba'e oipotapy", 'ea.

¹⁰ Ha'e gui ma "Aikore! Mba'eve noīvei ma, ivaipa va'e anho, ombovaipaa ma!" 'ea. Ha'e rami vy ha'e kuery py'a hykupa, henapy'ā rryryipa rei guive, pavē ryepy rupi ojexavaia anho oendu, ha'e javi rova xiĩguepa rei guive.

¹¹ Mamo tu oī aĩ guary kuery kua ha'e ta'y'i kuery okaruaty? Mba'eta ha'e va'e rupi guary oiko-ikoaty, guary kunha ta'y'i reve mava'eve omondyi e'ỹ re oiko va'ekue.†

¹² Guary ojuka reta va'ekue gua'y kue'iry ho'u va'erā, guaī py ojuka va'ekue guary kunha pe omboja'o va'erā. Itakua oĩaty omonyēmba va'ekue ojuka va'ekue-ekue re'ogue, xo'o anho ikua rupi oī va'ekue.

¹³ SENHOR ixondaro reta va'e aipoe'i:

— Ne'exa, xee ma nderovai aiko. Ha'e rami vy aapypa 'rā ndekaróxa hataxī reta reve, kyxe py ajuka ukapa 'rā ndera'y kue'iry, ha'e ndevvy gui aipe'a ukapa 'rā nerembia. Ha'e ramo noenduavei ma 'rā ndeayvu reraa kuery — he'i.

3

Nínive tetā ombovaipaa aguā re ijayvuague

¹ Nda'evei ete 'rā tetā jouguy moēa anho ikuai va'e pe. Iĵapura ha'e mondaa tynyē va'e, ha'e mba'emo oipe'aague oī riaea!

² Pendu ke: vaka pi revovo, karóxa ruéra ryapu, kavaju ou nhendua, ha'e karóxa oaxa nhendu va'e.

³ Ne'exa, kavaju árygua kuery ogueronha atā, kyxe hexakāmba, hu'y guaxu overapa, oikutu pyre heta ikuai, manogueaty, manogue opa e'ỹ va'e. Omanogue ikuai va'e re onhepyxangapaa rive.

⁴ Ha'e nunga ha'e javi ma kunha tavy reia iporā va'e káuxa. Ha'e va'e ma mba'evyky ja avi. Ovende amboae regua otavya py, oo pygua kuery ovende avi omba'evyky py.*

⁵ SENHOR ixondaro reta va'e aipoe'i:

— Ne'exa, xee aiko nderovai. Aupi 'rā ndetupyja hapy gui nderova áry peve. Ha'e rami vy amboae regua kuery pe aexa uka 'rā ndepire reia, ha'e tetā ikuai va'e pe aexa uka 'rā rexīa.

⁶ Nde'áry amombo 'rā ha'eve'ỹ va'e, rombojaru rei 'rā, ha'e roeja 'rā pavē rembiexarā.

⁷ Ha'e ramo nderexaa kuery onhamba 'rā ndegui. Ha'e vy aipoe'i 'rā: "Nínive tetā ivaipa ma. Mava'e tu omboaxy 'rā? Magui tu ajou 'rā heronhemboaxyarā?" he'i 'rā.

⁸ Nínive tetā, ndee teve Nô-Amom gui ha'eveve va'e? Mba'eta ha'e va'e tetā ma Nilo yakā ha'e yy omboty pyre mbyte py oī va'ekue. Jovaive rupi yy oī. Ha'e rami vy tetā kora 'rāgue py ye'ē oī va'ekue hovaigua jokoarā.†

⁹ Etiópia ha'e Egitto vvy pygua opa mba'e py oipytyvō aguā rami ikuai va'ekue. Pute ha'e Líbia vvy pygua voi ipytyvōarā ikuai avi va'ekue.

¹⁰ Ha'e rami teī ogueraapaa raka'e escravo-rā. Ta'y kuery voi ojukapa tape ojerea ikuai va'e rupi. Yvatekueve re oexaa okuapy xortea, ha'e ipo'akakueve voi ombo'apaa corrente py ojokua reve.

¹¹ Ha'e rami ae avi Nínive tetā, ndee voi neakanhy vvy renhemi 'rā. Ndee reka avi 'rā nderovaigua kuery gui renhemi aguā.

¹² Ndea py oo ikorapa va'e ha'e javi ma ára pyau jave figo'a rami rive opyta. Mba'eta ombovavaa ramo rive ho'apa 'rā hi'uxea kuery juru py.

¹³ Ne'exa, ndea py xondaro kuery ikuai va'e ma kunhague rami meme opyta. Ndevvy rupi tetā kora rokē ikuai va'e ojepe'apa 'rā nderovaigua kuery oikepa aguā, okē jokia okaipa rive.

¹⁴ Penoē yy peneretā ojokoa jave guarā, pemombaraeteve pendero ikorapa va'e. Tapeo yapo py, pepyrō yapo hapomo rei re, vvy jykuie ombojo'aague pemootyrō aguā.

¹⁵ Ha'e rami teī penemombaa 'rā tata py, kyxe py guive pendejúkaa 'rā. Tuku rami 'rā penemokanhymba. Tuku rami pendereta, tuku-karu gui penderetave teī,

¹⁶ jaxy-tata yva re ikuai va'e gui mba'emo vendea kuery pereko va'e hetave teī tuku-karu oike 'rā pendea py, ha'e gui oē ju 'rā oveve reve.

¹⁷ Penderegua yvatekueve ma tuku rami ikuai, ha'e pendea py joe opena va'e kuery ma tuku tuvixakueve rami, mba'eta yro'y jave py onhemi 'rā oo mboty re, va'eri kuaray yvate'i ramo ovevepa 'rā oje'oivy. Ha'e ramo ndoikuaavei 'rā ooague.

† 2:11 Nínive tetā pygua huvixa kuery pe ma "Guary kuery" 'ea raka'e. * 3:4 Nínive tetā pe ae "Kunha tavy reia" he'i profeta. † 3:8 Nô-Amom ma tetā guaxu Egitto vvy re oī va'ekue ri Assíria pygua kuery ombovaipa raka'e.

¹⁸ Ndee Assíria pygua huvixave, ndevyguá joe opena va'e kuery okepa okuapy, yvatekueve voi. Ndevyguá kuery oaĩmba ma yvy'ã ikuai va'e katy, ha'e ndoikoi imono'õ jeyyarã.

¹⁹ Ndeai pegua moã ma ndoikoi, okuera e'y va'erã ae. Nderekokue oendu va'e kuery ojepopetepa 'rã nderovai. Mba'eta ha'e javi regua re rembou va'ekue imoingo axyarã.

Habacuque ayvu oĩa Habacuque ayvu oĩa

Profeta Habacuque ma ngovaigua kuery Babilônia pygua po py hetarã kuery ojexavai taa oikuaa vy oporandu Nhanderue te: “Senhor, raka'e peve 'rã tu ndevy ajapukai teĩ ndee nerendui? Ndevy ajapukai vy 'Joguero'a reia rupi ikuai!' ha'e teĩ ndee ma ndorereraa jepei”, he'i (1.2). Ha'e ramo Nhanderue ombovai vy ijayvu ojeupegua kuery ombopaga aguã re. Ha'e va'e ayvu “ndoaxa rivei 'rã. Hare teĩ earõ tema, mba'eta anhetê ou 'rãe are e'y re. Peikuaa pota ke onhembovyate rei va'e kuery re! Ha'e kuery nhe'ê ma ha'eve e'yã rami oĩ. Ha'e rã heko porã va'e ma ojeroviaa rupi 'rã ikuai” (2.3b-4).

Nhanderue nhombopaga aguã ára ou aguã Habacuque pe omombe'u ramo aipoe'i: “Ha'e nunga aendu vy anhemondyipa. Ndeayvua gui xerembe ryryipa. Xekãgue hu'ũmba rei, xerenapy'ã voi ikangypa. Ha'e rami teĩ akyriri reve 'rã arõ aikovy jexavaia ára ovaê aguã, mba'eta ou 'rãe orere opu'ã rei va'e kuery áry. Xapy'a rei figo'y nda'ipoty porã 'rã, ha'e uva'y re hi'a noi, oliveira ndai'a porã, ha'e mba'ety rupi voi ja'u va'erã ndoikoi, vexa'i kuery oipe'apaa 'rã heravy ikora gui, ha'e vaka voi ikora py nda'ipovei teĩ, xee ma arovy'a riae 'rã Senhor, avy'a 'rã Nhanderue xereraa jepea re”, he'i (3.16-18). Salmo py oĩa rami: “Pearõ ke Senhor. Pendekuerai eme, pendepy'a guaxu ha'e pearõ tema Senhor” (Salmo 27.14).

Judá kuery reko vaia re ijayvuaque

¹ Kova'e ayvu ma profeta Habacuque pe oikuaa uka va'ekue.

² SENHOR, raka'e peve 'rã tu ndevy ajapukai teĩ ndee nerendui? Ndevy ajapukai vy “Joguero'a reia rupi ikuai!” ha'e teĩ ndee ma ndorereraa jepei.

³ Mba'e re tu xevy pe rexa uka heko vaia, ha'e xeapo nhombojexavaia aexa aguã rami? Mba'eta xerenonde oĩ riae mba'emo mbovaipaa ha'e joguero'a reia. Jojoko-joko reia rupi ikuai, nhombojovake kuerei 'rã.

⁴ Ha'e nunga rupi lei rupi ve'y joguerekoa, ha'evea rami joguerekoa ndojekuaavei ma. Heko vai va'e kuery heko porã va'e ojokopa rei ramo ha'e've'yã rami joguereko.

Judá pygua kuery heko vai ramo Nhanderue ombopaga uka aguã re ijayvuaque

⁵ SENHOR aipoe'i:

— Pexa pota ha'vy vyv regua kuery re ajapo taa re. Pema'ê vy penhemondyipa rei 'rã peneakanhymba peve. Mba'eta peikove teri reve voi ajapo 'rã mba'emo, pendevy omombe'ua teĩ perovia va'erã nunga e'y.*

⁶ Mba'eta ambou 'rã caldeu kuery. Ha'e va'e kuery ma nhomoingo axy etea ha'e ivai ja. Vyv ha'e javi rupi oguataa rupi oipe'apa 'rã okuapy amboa kuery rekoa.

⁷ Ha'e kuery ma nhomongyje ha'e ijavaeteve va'e. Ha'e kuery ae guekorã ojea, ha'e onhembovyate rei okuapy.

⁸ Hymba kavaju kuery ma xivi para gui inhakuãve va'e. Kavaju árygua kuery voi guary pytũ rupigua gui inharõve va'e, opa rupi ogueronhaa rupi. Ha'e va'e regua kavaju árygua kuery momybyrui gui ovaê xapy'a vy oveve merami jogueruvy, taguato ho'u va'erã re ho'a xapy'a va'e rami avi.

⁹ Ha'e kuery ma joguero'a reia rupi anho 'rã ou. Ngova re onhea'ã rei 'rã oove tema aguã, ha'e escravo-rã ojou va'ekue ma ita ku'i reia rami heta.

¹⁰ Ha'e kuery ma huvixave kuery mbojaru reia rupi ikuai. Yvatekueve teĩ ojojai rive 'rã okuapy. Ojojai avi 'rã oo ikorapa va'e ha'e javi, mba'eta vyv omboaty vy oipe'a kuaa.

¹¹ Ha'e gui vyvty oipejua rami oopa ju 'rã. Ipo ky'apa va'e meme, ha'e ae po'akaa pe rive “Nhanderue” he'i guive.

Heta va'e kuery re profeta ojerureague

¹² Ha'e gui SENHOR Xerue te iky'a e'y va'e, ndee ma jypy'i guivegua e'y teve reiko? Ha'e ramo ore kuery noromanoi 'rã. SENHOR, ndee reiporavo Babilônia pygua kuery orembopaga aguã ae. Xe'itaova, ndee ae rembou oremo'arandu aguã.

¹³ Nderexa ky'a e'y va'e vy nda'evei mba'emo vai rexa aguã, nhombojexavaia re nda'evei rema'ê rive aguã. Mba'e re 'rã tu ha'vy nerembopagai anhetê rupi e'y ikuai va'e, mba'e re rekyriri 'rã heko vai va'e omokanhy ramo ha'e kuery gui heko porãve va'e?

¹⁴ Mba'e re tu remoingo uka avakue pira ye'ê rupigua rami, ha'e e'y vy vyv rupi onhembotyryry va'e rami? Mba'eta ha'e va'e kuery ma nguvixa ndoguereko.

¹⁵ Mba'eta avakue ha'e javi re hovaigua kuery pinda reve opu'ã ovy vy oguenoê atã 'rã. Pira mbo'aa py omono'õmba 'rã. Ha'e nunga anho ha'e kuery oguero'vy'a vy ovy'a rei 'rã okuapy.

¹⁶ Ha'e nunga rupi omba'e pira mbo'aa pe ae 'rã ha'e kuery ome'ê mba'emo ombojeroviaa rupi, pira renoêa pe rive 'rã oapy okuapy heakuã porã va'e. Mba'eta ha'e va'e rupi ae 'rã ojouve tema ovy. Ha'e rami vy guembi'u mba'emo kyarakue py omoirũ reve 'rã ho'u okuapy.

¹⁷ Ha'e rami ete pira mbo'aa py ha'e kuery nhoguenoê tema 'rã teve? Nhomboaxya rupi e'y ojuka tema 'rã teve vyv regua kuery?

* 1:5 Atos 13.41

2

SENHOR ombovaiaque

¹ Ha'e gui xee ma apu'ã 'rã ha'amý aarõaty torre py. Oo ikorapa va'e áry aiaty py ama'ẽ 'rã aikuaa pota aguã ajerurea Nhanderuete ombovai vy mba'e he'i pa ra'ea re.

² Ha'e gui SENHOR xembovai vy aipoe'i:

— Embopara ndevy aexa uka ta va'e. Yvyrape re emboparapa, onha reve oaxa va'e teĩ oexa kuaa aguã.

³ Mba'eta aexa uka va'e ma raka'e rã teri ojeupity va'erã, hi'ára py porã. Oo pojava guive ojeupitypa aguã, ndoaxa rivei 'rã. Hare teĩ earõ tema, mba'eta anhetẽ ou 'rãe are e'ỹ re.

⁴ Peikuaa pota ke onhembovyate rei va'e kuery re! Ha'e kuery nhe'ẽ ma ha'eva e'ỹa rami oĩ. Ha'e rã heko porã va'e ma ojeroviaa rupi 'rã ikuai.*

⁵ Ha'e gui vinho nhombotavya rami ae avi onhembovyate va'e kuery voi noĩ riaei 'rã. Ha'e kuery ho'upaxe vy ojuru oipe'a yvyra rupa rami, manoa rami ae avi "Ha'eva ma" nde'i kuaai va'e. Ha'e kuery voi ojeupe guarã oguerupa 'rã yvy regua kuery, amboae regua ha'e javi re 'rã ipo'aka.

Caldeu kuery pe "Nda'evei ete 'rã pendekuai" he'iaque

⁶ Ha'e nunga rupi ha'e kuery rovai amboae kuery ijayvu 'rã okuapy porojoi va'e ayvu rupi. Ha'e vy aipoe'i 'rã okuapy:

"Nda'evei ete 'rã imondaague omboaty va'e pe, ha'e oreve va'ekue ombopagua rupi rive oguerekopa va'e pe! Raka'e peve 'rã tu ha'e rami reiko?

⁷ Mba'eta oreve va'e kuery opu'ãmba 'rã ndere. Ha'e kuery omyĩ vy nemondyipa xapy'a 'rã. Ha'e ramo mba'emo rereko va'e opyta 'rã ha'e kuery oipe'apa va'erã.

⁸ Yvy regua heta va'e mba'e rei-rei reipe'apa rive amboae regua kuery ju oipe'apa 'rã ndea gui, avakue ruguy remoẽague ha'e ijyvy rembovaipaague re, tetã ha'e tetã pygua kuery ha'e javi guive.

⁹ "Nda'evei ete 'rã jokorea rupi oipe'a va'ekue ngoo py omboaty va'e pe. Yvatea py renhemixe teĩ mba'emo vai gui reo jepe aguã.

¹⁰ Ndero pygua kuery oximba aguã rami rejapo. Heta regua remombaa py nenhe'ẽ pe ae rejapo vai.

¹¹ Mba'eta ndero mbotya re ita oĩ va'e ae 'rã ijayvu nderovai, ha'e yvyra opyaxa va'e nemombe'u 'rã.

¹² "Nda'evei ete 'rã jouguy moẽa rupi rive guetã ojapo va'e pe, ha'e teko vai rupi omoĩ atã va'e pe.

¹³ Mba'eta SENHOR ixondaro reta va'e gui ae pova'e ou: Yvy re ikuai va'e omba'eapoa rupi mba'emo ojou va'ekue ma tata oapypa va'erã meme. Ha'e nunga rupi ha'e javi regua haxypa rive 'rã.

¹⁴ Mba'eta yvy jave re tynyẽ 'rã SENHOR rexakãa oikuaa va'e, ye'ẽ yv tynyẽa rami avi.

¹⁵ "Nda'evei ete 'rã oirũ kuery omonga'upa va'e pe, ha'e vinho reve nda'evei va'e omoirũ vy oirũ kuery oxĩa oexaxe va'e pe.

¹⁶ Mba'eta nemboetepaa 'rãgue py reximba 'rã. Ndee voi rey'u 'rã ha'e nunga, ha'e rexa uka 'rã ndepire regua remboi uka e'ỹ va'ekue reikoa. Mba'eta ovaẽ 'rã ndee voi rey'u aguã karo SENHOR oiporu kuaa regua py ome'ẽ va'e gui. Ha'e ramo reximbaa ojao'ipa 'rã ndepo'akaague.

¹⁷ Mba'eta Líbano yvy rembovaipaague rekovia ndea'o 'rã, mymba inharõ va'e rejukaague regua voi nemongyje rei 'rã, avakue ruguy remoẽague re, ha'e yvy, tetã ha'e tetã pygua kuery remokanhymbaague re guive.

¹⁸ "Mba'erã tu ovare mba'emo ra'angaa, ijapoa kuery ae ojapo rive? Ta'angaa mba'emo ryku guigua voi apu ja meme. Mba'exa 'rã tu ijapoare ojerovia ha'e ae ojapo va'ekue re, mba'eta ta'angaa ijayvu e'ỹ va'e rive ojapo rive?

¹⁹ "Nda'evei ete 'rã yvyra guigua pe rive 'Evy kel!' he'i va'e kuery pe, ha'e ita ijayvu e'ỹ va'e pe 'Endu kel!' he'i va'e pe guive. Ta'angaa rive nda'u nhanderekombo'e 'rã? Ne'exa, ouro ha'e prata py ojao'ipaa va'eri iguýry ma ipytuẽa noĩ.

²⁰ Ha'e rã SENHOR ma ojeupegua temploiky'a e'ỹ va'e py oĩ. Tove yvy jave re ikuai va'e tokyririmba henonde."

3

Nhanderuete pe Habacuque onhembo'eague

¹ Po rami ma profeta Habacuque onhembo'e mboraei ojapo reve.

² SENHOR, ndeayvua aendu vy

aendu avi anhemondyia.

SENHOR, ore kuery ára py ju ejapo ymave rupi rejapo va'ekue ramigua.

Ore'ára py ju ejapo ha'e nunga oikuaapaa aguã rami.

Ndepoxya ramive ma nema'endu'a avi ke renhomboaxy aguã re.

³ Nhanderuete ma ou oiny Temã gui,

Parã yvyty gui ou lky'a e'ỹ va'e.

Hexakãa omonyẽ yva,

yvy voi tynyẽ ogueroporai va'e.

⁴ Hexakãa ma tataendy rexakã rami,

ipo gui ma nhemboxi ojekuaa,

opo'aka onhomiaque gui.

*

2:4 Romanos 10.17, Gálatas 3.11, Hebreus 10.37-38

- ⁵ Guenonde rupi ombou mba'eaxy vaikue,
guakykue rupi voi nhomoingo axya omoingo.
- ⁶ Ha'e opyta vy rive ojapo vvy oryryipa aguã rami.
Oma'ẽ ho'amy vy rive ombojaity vvy regua kuery.
Ha'e ramo vvy jypygua va'e iku'ipa,
vvy'ã oĩ riae 'rã va'ekue voi ho'apa.
Ha'e rã Nhanderuete oikoa ma imarã e'y' va'e.
- ⁷ Cusã vvy re aexa oguy py ikuai va'e ojexavai rã,
ha'e Midiã vvy re ijaty va'e kuery oryryipa.
- ⁸ SENHOR, yakã pe teve ndepoxy?
Yakã'i ikuai va'e pe teve,
e'y' vy ye'ẽ pe ndevai?
Mba'eta reguata reovy nerymba kavaju áry,
ndekaróxa py reju ndepo'akaa rexa uka vy.
- ⁹ Nderapa renoẽ renhomiague gui,
nderu'y ryrü ma tynyẽ vaipa.
Yvy remboja'o yakã renhono vy.
- ¹⁰ Yvyty ikuai va'e nderexa vy ojero'a okuapy,
ha'e vy ojapo vvy'ã guy katy yy oxyry atã aguã rami.
Ye'ẽ voi tpyvea guive hevovo nhendu,
ha'e yvate katy oupi opo.
- ¹¹ Kuaray ha'e jaxy ma oia py ae opyta
nderu'y onhe'ẽ ovy va'e hexakãmba rã,
ha'e nderu'y guaxu hexakã va'e overa gui.
- ¹² Rejou vaia rupi reguata reovy vvy jave rupi,
ndepoxya rupi repyrõmba vvy regua kuery re.
- ¹³ Ndejeupegua kuery reraa jepe vy ae reo,
huvixarã remoĩ va'ekue reraa jepe aguã.
Ha'e rami vy rembovaipa heko vai va'e kuery ro ao'ia,
hoo yta voi remboipa.
- ¹⁴ Nderovaigua xondaro kuery ru'y py ae reikutu inhakã rupi,
ha'e kuery vvyty atã rami xemokanhy aguã ou jave.
Ovy'a reve ou va'ekue nhemi rupi iporiaukue'i omokanhymbaa rami.
- ¹⁵ Ha'e gui ndee ma ye'ẽ áry rupi reguata rejuvy nerymba kavaju kuery reve,
yy oje'apa va'e rupi ae.
- ¹⁶ Ha'e nunga aendu vy anhemondyipa.
Ndeayvua gui xerembe rryryipa.
Xekãgue hu'ũmba rei,
xerenapy'ã voi ikangypa.
Ha'e rami teĩ akyrirĩ reve 'rã arõ aikovy jexavaia ára ovaẽ aguã,
mba'eta ou 'rãe orere opu'ã rei va'e kuery áry.
- ¹⁷ Xapy'a rei figo'y nda'ipoty porã'i 'rã,
ha'e uva'y re hi'a noĩ,
oliveira nda'a porã'i,
ha'e mba'ety rupi voi ja'u va'erã ndoikoi,
vexa'i kuery oi'pe'apaa 'rã heravy ikora gui,
ha'e vaka voi ikora py nda'ipovei teĩ,
- ¹⁸ xee ma arovy'a riae 'rã SENHOR,
avy'a 'rã Nhanderuete xereraa jepea re.
- ¹⁹ SENHOR Nhanderuete ma anhemiaty oĩ.
Ha'e ojapo xepy oĩ atã aguã rami guaxu rami ae,
yvate rupi aiko aguã.
Jogueroporaẽ va'e pe ombopara pyre, mbaraka ixã va'e py ombojoguy reve guarã.

Sofonias ayvu oĩa

Sofonias ayvu oĩa

Profeta Sofonias omombe'u Nhanderuete ombopaga ete aguã Judá ha'e Jerusalém py ikuai va'e, mba'eta aipoe'i: "Aupi 'rã xepo Judá kuery ha'e Jerusalém pygua kuery rovai. Ha'e va'e gui amomba 'rã Baal pegua ra'angaa pegua ha'e javi, ta'angaa pe mba'emo ome'ê va'e rery, ta'angaa pegua sacerdote ikuai va'ekue guive", he'i (1.4). Ha'e pygua kuery anho e'ỹ ombopaga 'rã. "Ha'e nunga rupi Senhor aipoe'i: 'Xerarõ ke pekuapy, anhomokanhymba aguã apu'ãa ára peve. Ha'e rami vy amboatypa 'rã peteĩ-teĩ regua, ha'e kuery re xayvu vaiague amoiingo aguã, xepoxya ha'e javi guive. Mba'eta tata py amomba 'rã kova'e yvy ha'e javi, nda'evei etea uka vy' ", he'i (3.8).

Ha'e rã hexe ojerovia va'e kuery pe ma aipoe'i: "Sião pygua kuery, peporaei ke. Israel pygua kuery, pevy'a vaipa ke. Jerusalém pygua kuery, pevy'a ke pendepy'a ha'e javi py, pevy'a. Mba'eta Senhor omboguepa ae ma pepaga aguã va'ekue, omoxê ma guive penderovaigua kuery. Penembyte oĩ Senhor Israel kuery ruvixa va'e. Ha'e ramo mba'emo vai ndouvei ma 'rã pexa aguã", he'i (3.14-15).

Judá ha'e Jerusalém pygua kuery rovai ijayvuague

¹ SENHOR oayvu Sofonias pe ombou va'ekue. Ha'e va'e ma Cusi ra'y, Cusi ma Gedalias ra'y, Gedalias ma Amarias ra'y, ha'e Amarias ma Ezequias ra'y. Amom ra'y Josias Judá pygua huvixa oĩ jave py oayvu ombou.

² Ha'e vy SENHOR aipoe'i:

— Anhetê ete, amomba 'rã yvy re ikuai va'e ha'e javi.

³ Amomba 'rã avakue ha'e mymba, guyra yvate rupi oveve va'e ha'e pira ye'ê rupigua. Amomba avi 'rã nhomboeko ky'aa rupi ikuai va'e, heko vai reve. Yvy gui amokanhymba 'rã avakue — he'i SENHOR.

⁴ — Aupi 'rã xepo Judá kuery ha'e Jerusalém pygua kuery rovai. Ha'e va'e gui amomba 'rã Baal ra'angaa pegua ha'e javi, ta'angaa pe mba'emo me'êa kuery rery, ta'angaa pegua sacerdote ikuai va'ekue guive.

⁵ Amomba avi 'rã oo áry yva re ikuai va'e mbojeroviaa kuery, ha'e SENHOR ombojerovia vy hexe oura reve tuuete ramigua Milcom re voi oura avi va'e.

⁶ Amomba avi 'rã SENHOR gui ojepe'a va'e, ha'e SENHOR oeka e'ỹ, neĩ ixupe noporandui va'e kuery guive — he'i.

SENHOR opoxya oexa uka aguã ára re ijayvuague

⁷ Pekyrirĩ SENHOR Nhanderuete renonde, mba'eta ovaê rai'i ma SENHOR ára. Mba'eta SENHOR oguereko katu mba'emo ojuka vy ixupe ome'êa aguã, oiky'a'opa ma guive ha'e py ou aguã oenoĩ va'ekue.

⁸ SENHOR aipoe'i:

— Ha'e va'e ára ma ambopaga 'rã joe opena va'e, huvixave ra'y kuery, ha'e amboae regua ao py onhemonde va'e ha'e javi.

⁹ Ha'e va'e ára ambopaga avi 'rã ta'angaa pegua opy oike va'e ha'e javi, ha'e opatõ kuery ro py jojukaa ha'e jokorea rupi rive ikuai va'e.

¹⁰ Ha'e va'e ára peteĩ haxê va'e onhendu 'rã Pira vendeaty rokê oĩa guive, ojae'o nhendu 'rã tetã yvy'ã guyve rupi guive, hevovo rei nhendu 'rã yvy'ã'i ikuai va'e guive — he'i SENHOR.

¹¹ — Mactês tetã pygua kuery, peneraxê avi, mba'eta Canaã yvy pygua kuery ha'e javi omokanhymbaa ma, prata opeja va'e kuery guive omombaa.

¹² Ha'e va'e jave ma Jerusalém tetã ha'e javi rupi aikuaa pota 'rã aikovy tataendy reve, ambopaga aguã avakue vinho gui oka'upa rei vy opy'a py " SENHOR ma iporã va'e moingoa e'ỹ, neĩ mba'emo vai omoiingo va'e'ỹ guive", he'i va'e kuery.

¹³ Ha'e nunga rupi ha'e kuery mba'e rei-rei oipe'apaa 'rã, hoo ombovaipaa 'rã guive. Ha'e kuery ngoorã ojapo ju teĩ noĩ 'rã ha'e py, uva onhotý teĩ ndoy'ui 'rã vinho.

¹⁴ Ovaê rai'i ma SENHOR ára ijavaete va'e. Ovaê rai'i ma, ou atã oiny. Pejapyxaka ke! SENHOR ára ma nhomoiingo axy aguã, avakue ipo'akapa va'e voi haxêmba rei aguã guive.

¹⁵ Ha'e va'e ára ma opoxya oexa uka rã ojexavaia aguã ára, nda'ikuai kuaavei rei ha'e okanhymbaa aguã ára, pytũ vaikue rei ete 'rã, arai ha'e pytũ vaipaa ára,

¹⁶ mimby guaxu omonhe'êa aguã, ha'e gui tetã ikorapa va'e ha'e torre yvateve va'e re opu'ã va'e kuery ojapukai aguã ára.

¹⁷ SENHOR aipoe'i:

— Avakue ikuai va'e re ambou 'rã imbojexavaiarã. SENHOR rovai ha'e kuery ojejavy rire ára revegua e'ỹ rami 'rã ikuai. Ha'e kuery ruguy onhoêa 'rã yvy ku'i rami, ha'e rã ho'okue ma mba'emo repxoi rami 'rã omomboa — he'i.

¹⁸ Ha'e kuery prata ha'e ouro oguereko va'ekue ma SENHOR opoxya oexa ukuaa ára ndogueraa jepel 'rã. Mba'eta nda'evei etea rupi yvy ombovaipa 'rã tata nhombopagaarã py. Anhetê ete omokanhymba vyvoi 'rã yvy re ikuai va'e ha'e javi.

Filisteu kuery rovai ijayvuague

¹ Peê pexĩ kuaa e'ỹ va'e, penhemboaty ke ha'e peikuaa pota porã pendereko re,

² oa'angaague ára ovaê e'ý mbove, mba'eta ha'e va'e ára ou ma oiny mba'emo pirekue oveve ovyá rami. Pende'áry SENHOR opoxya oexa uka aguã ou e'ý mbove peikuaa pota pendejee, tá, pendere ou e'ý mbove SENHOR opoxya oexa uka aguã ára.

³ Ha'e gui peê vvy re peiko rive'ia rupi SENHOR avyu pejapopa va'e, peka pota ke SENHOR. Teko porã rupi pota ke pendekuai, peiko rive'ia rupi reve. Ha'e rami rá SENHOR poxya ára py xapy'a rei penenhomi 'rá.

⁴ Mba'eta Gaza tetã ma oejaa 'rá, Asquelom voi opyta 'rá tekoo e'ýa. Asdode gui ma kuaray mbyte jave py omoëmbaa 'rá, ha'e Ecom gui ma oipe'apaa 'rá.

⁵ Nda'evei ete 'rá Quere pygua kuery ye'ê vvyry ikuai va'e pe. Ha'e gui ndee Canaã vvy filisteu kuery ikuai, nderovai SENHOR ijavyu vy "Xee romomba 'rá, hekoa va'ekue ndoikoavei peve", he'i 'rá.

⁶ Ye'ê vvyry ma opyta 'rá nhuũndy vexe'i okaru atyrã rive, vexe'i re opena va'e rekoarã, ha'e vexe'i kuery kora oĩ aguã.

⁷ Ye'ê vvyrygua ma Judá kuery mba'erã opyta 'rá. Ha'e py omongaru 'rá guymba kuery, ha'e ka'aru nhavõ onhenomba 'rá Asquelom tetã py oo ikuai va'e py, mba'eta ha'e kuery re SENHOR Tuuete oikuaa pota vy ombopyau 'rá ikuai.

Moabe ha'e Amom pygua kuery rovai ijavyuague

⁸ — Xee aendu ma Moabe pygua kuery nhombojaru reia rupi ijavyu va'e, Amom pygua kuery jojojai reia guive. Xevyguá kuery rovai ijavyu rei okuapy, ijyvy re guive.

⁹ Ha'e nunga rupi anhetê ete xee ae rekove rupi aura vy aipoa'e: Moabe opyta 'rá Sodoma tetã rami, ha'e Amom pygua kuery ma Gomorra pygua rami 'rá opyta, pynondyrã, ygua juky rei va'erã ha'e ombovaipa pyre raka'e rá peve guarã. Ha'e rá xevyguá kuery rembyrekue ma mba'emo oipe'apa 'rá ha'e gui, xevyguá kuery okuave va'e ojopy 'rá omba'erã — he'i SENHOR ixondaro reta va'e, Israel kuery Ruete.

¹⁰ Ha'e kuery re ha'e nunga oiko 'rá onhemboyvate reiaque re, mba'eta ojojai reia rupi onhemboyvate rei okuapy SENHOR ixondaro reta va'e pegua kuery rovai.

¹¹ Ha'e ramo ha'e kuery rovai SENHOR oexa uka 'rá oavaetea, vvy gui tuuete ramigua ikuai va'e omokanhymba vy. Ha'e rami rire vy pa'ũ rupi ikuai va'e kuery ombojerovia 'rá okuapy, peteĩ-teĩ guekoa py ae.

Etiópia ha'e Assíria pygua kuery rovai ijavyuague

¹² Ha'e gui peê Etiópia pygua kuery ma pendejukapaa 'rá SENHOR guigua kyxe py.

¹³ Kuaray ijapu'a'ia katy opo oupi vy ombovaipa avi 'rá Assíria vvy. Ha'e rami vy Nínive tetã ombovaipa ramo vvy piru reia 'rá opyta mba'eve jipovei rá.

¹⁴ Ha'e va'e tetã mbyte py vexe'i kuery opytu'u 'rá okuapy, mymba kuery mboae ijaty avi 'rá. Oo ytakue ikuai va'e áry ma oko guaxu ha'e kui'i onhemboaity 'rá. Janela ikuaiague rupi onhendu 'rá guyra nhendua, ha'e rá okê py ma yty rive 'rá opyta, vvyvrate yary guigua oipe'apaa rive.

¹⁵ Ha'e va'e tetã py ma ovy'a rei ha'e okyjea rupi e'ý ikuai va'ekue. Ha'e pygua kuery ojeupe ae "Xee ma peteĩ va'e aiko, xee rami etegua jipoi avave", he'i va'ekue. Ha'e rami teĩ tetã ombovaipa pyre opyta, ka'aguy rupigua opytu'u atyrã rive! Oaxa va'e kuery ojojai reia rupi otuvy nhe'ê ha'e okuave'ê 'rá jogueravy.

3

Jerusalém pygua kuery re ijavyuague

¹ Ha'e gui nda'evei ete 'rá nhomoingo axya kuery retã pe, mba'eta nonhe'ê rendui ha'e icy'apa va'e ikuai.

² Ha'e kuery ma nombotei avave rei, onhemo'arandu ukaxe e'ý va'e, SENHOR re ojerovia e'ý va'e, neĩ Nguuete re onhembojaxe e'ý va'e.

³ Ha'e pygua yvatekueve ma guary okororõ va'e rami joguereko. Nhomboayvua kuery ma aguarai pytũ guýry joguero'aa rami ikuai, ikãgue rive'i ma voi ko'ëgue jevy guarã ndoejai va'e rami.

⁴ Ha'e pygua profeta kuery voi hi'arandu e'ý va'e, anhetê rupi e'ý ikuai va'e meme. Ha'e pygua sacerdote kuery ma omongy'apa 'rá oo icy'a e'ý va'e, lei rupi e'ý ikuai vy.

⁵ Ha'e rá SENHOR ma heko porã ete va'e oiko ha'e kuery mbyte, teko vai ojapo va'e'ý. Ko'ê nhavõ 'rá oexa uka teko porã rupi oikoa. Ha'e ma ndojapo e'ýi oayvuague. Ha'e rá heko vai va'e kuery ma noxi'kuai.

⁶ Ha'e nunga rupi SENHOR aipoe'i:

— Amokanhymba vvy regua, ha'e kuery pegua torre ikuai va'ekue voi ombovaipa ma. Hetã mbyte rupi ajapo noíavei aguã rami, ha'e rupi oaxa va'erã jipoi ramo. Ha'e kuery retã ikuai va'ekue ombovaipa ma, mava'eve ete noíavei aguã.

⁷ Ha'e rire xee aipoa'e: "Aý ma ri nhi'ã peê kuery xerenonde pejererokyjea rupi 'rá pendekuai, xevy pe penhemo'arandu uka 'rá guive, penderekoa ombovaipaa e'ý aguã, ombovaipa aguã re xeyvy teĩ", ha'e. Ha'e rami teĩ ha'e kuery ko'ê rai reve ovy vy onhemongy'apa reive okuapy.

Jerusalém pygua kuery ogueraa jepe aguã re ijavyuague

⁸ Ha'e nunga rupi SENHOR aipoe'i:

— Xerarõ ke pekuapy, anhomokanhymba aguã apu'ã ára peve. Mba'eta xepy'a re amoi vvy regua kuery amono'õmba aguã. Ha'e rami vy amboatypa 'rá peteĩ-teĩ regua, ha'e kuery re xeyvy vaiaague amoingo aguã, xepoxya ha'e javi guive. Mba'eta tata py amomba 'rá kova'e vvy ha'e javi, nda'evei etea aexa uka vy.

⁹ Ha'e gui ma vvy regua kuery pe ame'ê ju 'rá ijuru icy'a e'ý va'erã, SENHOR rery rupi ojapukai ha'e hexeve peteĩ rami ikuai aguã.

¹⁰ Ha'e ramo Etiópia vvy regua yakã ikuai va'e rovai rupi ikuai avi xemboetea kuery, amoaĩmba va'ekue ramymino kuery. Ha'e va'e kuery voi xevy pe ogueru 'rá ome'ê va'erã.

¹¹ Ha'e va'e ára xee noromoxĩmbai 'rã mba'emo pejapoague gui, naxenhe'ẽ rendui rire teĩ. Mba'eta penembyte gui aipe'apa 'rã onhemboyvatea rupi ovy'a rei va'e. Ha'e rami rire napenhemboyvatevei ma 'rã xevygua yvyty iky'a e'ỹ va'e áry.

¹² Ha'e rami 'rãgue py penembyte aeja 'rã ikuai rive'i ha'e onhemo'yvyĩ'i kuaa va'e, xee SENHOR rery rupi ojerovia va'erã.

¹³ Ha'e ramo Israel kuery rembyrekue ndojejavyyvei ma 'rã, neĩ nda'ijapuvei ma 'rã. Ha'e kuery juru py noĩvei 'rã apekũ nhombotavya rupi ijayvu va'e, mba'eta arupa 'rã mymba kuery nhuũndy rupi onhenomba va'e rami ikuai aguã, ha'e jipoavei 'rã imondyiarã.

¹⁴ Sião pygua kuery, peporaei ke. Israel pygua kuery, pevy'a vaipa ke. Jerusalém pygua kuery, pevy'a ke pendeppy'a ha'e javi py, pevy'a.

¹⁵ Mba'eta SENHOR omboguepa ae ma pepaga aguã va'ekue, omoxẽ ma guive penderovaigua kuery. Penembyte oĩ SENHOR Israel kuery ruvixa va'e. Ha'e ramo mba'emo vai ndouvei ma 'rã pexa aguã.

¹⁶ Ha'e va'e ára py Jerusalém pe aipo'ea 'rã: “Sião pygua kuery, pekyje eme. Pemoe'õgue eme pendejyva.

¹⁷ Mba'eta penembyte rupi oiko SENHOR Penderuete. Ha'e ma ipo'akapa va'e pendereraa jepe aguã, pendererovy'a ete 'rã guive. Penderayvua rupi vy penembopyau 'rã, pendererovy'a 'rã oporaeia rupi”, 'ea 'rã.

¹⁸ SENHOR aipoe'i:

— Xevygua ngaru oiko aguã py ndoo reguai vy iporiaupa va'ekue ma xee arupa ju 'rã. Ha'e va'e kuery ma penderega ae teĩ ojojai poyi pyrã ikuai va'ekue.

¹⁹ Ne'exa, ha'e va'e jave py ambopagapa 'rã penembojexavaiare kuery. Ha'e rã oguata vaikue'i va'e ma xee araa jepe 'rã, omoxẽ mbyre arupa ju 'rã. Ha'e rami vy ha'e kuery ajapo 'rã omboetepaa ha'e hery re ima'endu'aa aguã rami, yvy ha'e javi oxĩmba rei okuapyague nhavõ rupi ae.

²⁰ Ha'e va'e jave py xee roguerupa vy romono'õmba ju 'rã. Ha'e rami vy anhetẽ ete ajapo 'rã yvy regua kuery ha'e javi gui penderery re ima'endu'a porãave ha'e penemboeteave aguã rami, pexaa py pendekuaia ambopyau ramo — he'i SENHOR.

Ageu ayvu oĩa Ageu ayvu oĩa

Israel kuery Babilônia py escravo-rã herapaague gui Jerusalém tetã py ju ojevty teĩ nomoatyrõĩ ranhe Nhanderuete pegua templo. Ha'e ramo "Po rami ijayvu Senhor ixondaro reta va'e: Kova'e kuery aipoe'i: 'Novaẽĩ teri Senhor pegua oo jajapo ju aguã', he'i okuapy. Ha'e nunga rupi profeta Ageu pe Senhor oayvu ombou vy aipoe'i: 'Ha'evea rami teve xeivygua oo ivaipa oiny teri reve peẽ kuery ro vyvrape py penhovã porãmba va'ekue py peĩ aguã? Ne'exa ha'vy. Po rami ijayvu Senhor ixondaro reta va'e: Peikuaa pota nho ke pendere mba'emo oiko va'e-va'e re. Mba'eta mba'emo penhotỹ vaipa va'eri mbovy'i rive pemono'õ. Pekaru va'eri napenhandu kuaai. Pey'u va'eri pendu teri y'uvei. Penhemonde va'eri peteĩve henda py napenderete rakui. Peráta'i pejou va'eri pendevoko opukue py merami pemboyru", he'i (1.2-6). Mba'eta Nhanderuete oipota raka'e ha'e kuery omoatyrõ ixupegua templo, peteĩ-teĩ ngoo anho e'ỹ.

Nhanderuete re nhanema'endu'a e'ỹ re nhandejeupe guarã re anho nhanhea'ã aguã nda'evei, Nhanderuete nanhanemoingo porãĩ 'rã guive. "Ha'e rami 'rãgue py jypy'i peka 'rã ipo'akaa ha'e ixuguigua teko porã. Ha'e ramo 'rãe peikotevẽ va'e ha'e javi ome'ẽ avi pëvy" (Mateus 6.33).

Guetarã kuery pe Ageu ijayvuague templo ojapo ju aguã re

¹ Mokoĩ ma'etỹ re ma huvixa Dario oĩ jave, mboapy meme jaxya, ijypy'ia ára py ma SENHOR ombou oayvu. Profeta Ageu rupi ombou Salatiel ra'y Judá pygua huvixa Zorobabel pe, Jozadaque ra'y sacerdote yvateve va'e Josué pe guive. Ha'e vy aipoe'i:

² — Po rami ijayvu SENHOR ixondaro reta va'e: Kova'e kuery aipoe'i: "Novaẽĩ teri SENHOR pegua oo jajapo ju aguã", he'i okuapy.*

³ Ha'e nunga rupi profeta Ageu pe SENHOR oayvu ombou vy aipoe'i:

⁴ — Ha'evea rami teve xeivygua oo ivaipa oiny teri reve peẽ kuery ro vyvrape py penhovã porãmba va'ekue py peĩ aguã?

⁵ Ne'exa ha'vy. Po rami ijayvu SENHOR ixondaro reta va'e: Peikuaa pota nho ke pendere mba'emo oiko va'e-va'e re.

⁶ Mba'eta mba'emo penhotỹ vaipa va'eri mbovy'i rive pemono'õ. Pekaru va'eri napenhandu kuaai. Pey'u va'eri pendu teri y'uvei. Penhemonde va'eri peteĩve henda py napenderete rakui. Perata'i pejou va'eri pendevoko opukue py merami pemboyru.

⁷ Po rami ijayvu SENHOR ixondaro reta va'e:

— Peikuaa pota ke pendere mba'emo oiko va'e-va'e re.

⁸ Aỹ ma tapeo, vyvty gui peru vyvra xeivygua oorã pejapo aguã. Ha'e va'e ma arovy'a 'rã, xemboyvatea 'rã guive — he'i.

⁹ SENHOR ixondaro reta va'e aipoe'ive ju:

— Mba'emo pemono'õ va'erã pearõ reta teĩ mbovy'i ete oiko. Ha'e gui mbovy'i va'ekue pendero py peraa ramo ma xee aipeju vy rive amoaimba imondovy. Mba'e re tu oiko ha'e rami? Mba'eta xeivygua oo ivaipa teri oiny, ha'e rã peẽ kuery peteĩ-teĩ pendero re anho nda'eveive peovy.

¹⁰ Ha'e nunga rupi ae yva gui nda'okyvei pende'áry, ha'e vyvty gui voi mba'eve ndoikoĩ.

¹¹ Pendeyvy ha'e vyvty ikuai va'e rupi amombirupa. Mba'emo aju ikuai va'e re, vinho, azeite, ha'e vyvty gui mba'emo oiko 'rã va'ekue ha'e javi re ambou ipirupa aguã, avakue re guive, mymba kuery ha'e pendepo py pejapo va'e ha'e javi re guive.

Heta va'e kuery SENHOR onhe'ẽ rendu okuapyague

¹² Ha'e ramo Salatiel ra'y Zorobabel ha'e Jozadaque ra'y sacerdote yvateve va'e Josué onhe'ẽ rendu okuapy SENHOR Nguuete heta va'e kuery ha'e javi reve, profeta Ageu pe SENHOR oayvu omombe'u uka va'ekue ojapopa vy. Ha'e rami vy ha'e kuery ojererokyjea rupi ikuai SENHOR renonde.

¹³ Ha'e gui SENHOR remimbou Ageu ijayvu heta va'e kuery pe. SENHOR ijayvuague omombe'u vy aipoe'i: — SENHOR aipoe'i: "Xee aiko peẽ kuery reve", he'i.

¹⁴ Ha'e rami vy SENHOR omokyre'y Salatiel ra'y Judá pygua huvixa Zorobabel ha'e Jozadaque ra'y sacerdote yvateve va'e Josué, heta va'e kuery ha'e javi guive. Ha'e ramo ha'e kuery oupa vy onhemõĩ ju okuapy oo ojapopa rupi Nguuete SENHOR ixondaro reta va'e peguarã.

¹⁵ Mboapy meme jaxya ha'e vinte e quatro araa py ma ha'e rami ikuai.

2

Mokoĩa templo omoexakã aguã re Nhanderuete ijayvuague

¹ Ha'e gui mokoĩ ma'etỹ re ma huvixa Dario oĩ jave py, sete jaxya ha'e vinte e um araa py profeta Ageu pe SENHOR ombou ju oayvu. Ha'e vy aipoe'i:

² — Ndeayvu ke aỹ Salatiel ra'y Judá pygua huvixa Zorobabel pe, Jozadaque ra'y sacerdote yvateve va'e Josué pe, ha'e heta va'e kuery ha'e javi pe guive. Ha'e vy aipo're:

* 1:2 Ha'e va'e e'ỹ mbove ma Nhanderuete pegua oo ha'e kuery ojapo aguã omboypy teĩ hovaigua kuery omombytu'u ojapopa ete aguã gui (Esdras 3.8-4.5, 24). Ha'e gui apy ma Ageu rupi Nhanderuete ijayvu ojapopa ete aguã re.

³ “Mava'e peē kuery aŷ peve pekuave va'e regua pa pexa raka'e kova'e oo jypy guare iporāmba teri jave? Ha'e gui aŷ ma mba'eta tu pexa? Mba'everā ndovarevei va'e rami e'ŷ teve opyta aŷ?”

⁴ Ha'e rami teī po rami aŷ SENHOR ijayvu: “Zorobabel, ndepy'a guaxu ke. Jozadaque ra'y sacerdote yvateve va'e Josué, ndee voi ke ndepy'a guaxu. Ha'e heta va'e kuery pendeyvy re pendekuai va'e voi ke pendepy'a guaxu pema'epao aguā, mba'eta peē kuery reve xee aiko”, he'i SENHOR ixondaro reta va'e.

⁵ “Egito yvy gui pejupa jave xereve guarā ajapo va'ekue rami vy Xenhe'e'oiko 'rā penembyte rupi. Pekyje eme ha'vy.”

⁶ Mba'eta po rami ijayvu SENHOR ixondaro reta va'e: “Teĩgue ju amboryryipa 'rā yva ha'e yvy, ye'ē ha'e yvy yy e'ŷa guive.*

⁷ Amboryryi 'rā yvy regua ha'e javi. Ha'e ramo yvy regua ha'e javi oguerupa 'rā mba'emo ojou porāve va'e. Ha'e rā kova'e oo xee amonyēmba 'rā hexakā va'e”, he'i SENHOR ixondaro reta va'e.

⁸ “Prata ha'e ouro oī va'e ma xemba'e meme”, he'i SENHOR ixondaro reta va'e.

⁹ “Kova'e oo ma jypy guare gui hexakāmbave 'rā. Ha'e rami vy kova'e henda re ambou 'rā pendekuai porā aguā”, he'i SENHOR ixondaro reta va'e.

Heta va'e kuery ndojeroviai ramo ijayvu eteague

¹⁰ Ha'e gui mokoī ma'etŷ re ma huvixa Dario oī jave py, nove jaxya ha'e vinte e quatro araa py SENHOR peteĩgue ju oayvu ombou profeta Ageu pe. Ha'e vy aipoe'i:

¹¹ — Po rami ijayvu SENHOR ixondaro reta va'e: Eporandu ke sacerdote kuery ikuai va'e pe lei re oī va'e re. Ha'e vy aipo're:

¹² “Xapy'a rei amongue xo'o iky'a e'ŷ va'erā omboaxa pyre onhovāa 'rā heravy oao py. Ha'e gui xapy'a rei xo'o ombovya rive 'rā mbojape, tembi'u ombojy pyre, vinho ryru, azeite ryru, ha'e'ŷ vy tembi'u oī va'e re rei. Ha'e rami rā ha'e va'e tembi'u voi nda'u opyta 'rā iky'a e'ŷ va'e?” re.

Ha'e rami sacerdote kuery pe aporandu rā ombovai:

— Any — he'i okuapy.

¹³ Ha'e ramo Ageu oporanduve ju:

— Ha'e gui xapy'a rei amongue mba'emo re'ōgue re opoko vy ha'eve'ŷ va'e opyta rire ma kova'e nunga iky'a e'ŷ va'e re ju ojopy 'rā. Ha'e rami rā kova'e nunga ju nda'u opyta 'rā ha'eve'ŷ va'e?

Sacerdote kuery ombovai:

— Tá, opyta 'rā ri ha'eve'ŷ va'e — he'i.

¹⁴ Ha'e ramo Ageu aipoe'ive ju:

— SENHOR aipoe'i: “Ha'e rami ae avi kova'e kuery ikuai, mba'eta kova'e regua ma ha'eve'ŷ va'e meme ikuai xerenonde. Ha'e rami ae ju opyta opo py mba'emo ojapo va'e, xevy pe ome'ē va'e voi. Iky'a va'e meme opyta.*

¹⁵ Aŷ ma peikuaa porā pota ha'e va'e ára jave guive pendere oiko va'ekue ha'e javi re. Mba'eta templo SENHOR peguarā pejapo aguā ita pembojoja ypy e'ŷ mbove,

¹⁶ ha'e va'e jave e'ŷ mbove ma vinte ryru mba'emo pemoī porāague py peo vy dez ete'i 'rā pejou va'ekue. Vinho voi cinquenta ryru pemboyrugue py peo peraa aguā vy ma vinte ete'i 'rā pejou va'ekue.

¹⁷ Ha'e rami avi peē kuery re xee ambou yvytu raku, mba'emo ru'ū ha'e amandau, pendepo py pejapo va'e ha'e javi áry. Ha'e ramive ma peē kuery neī peteĩve ndapejeko rerovai xevy guarā”, he'i SENHOR.

¹⁸ “Xee xeyvu ju: Aŷ guive peikuaa porā pota, nove jaxya ha'e vinte e quatro ára guive, SENHOR pegua templo pejapo aguā pemboypya ára guive, peikuaa pota ha'e nunga ha'e javi pendere oiko va'ekue re.

¹⁹ Mba'eta jipovei ma mba'emo ra'yĩgue pemoī porāague py. Uva'y nda'avei avi, figo voi, romā, neī oliva voi. Ha'e rami teī kova'e ára guive xee romoingo porā 'rā”, he'i.

Zorobabel pe SENHOR ojapo porā aguā re ijayvuague

²⁰ Ha'e gui nove jaxya ha'e vinte e quatro araa pyve SENHOR teĩgue ju ombou oayvu Ageu pe. Ha'e vy aipoe'i:

²¹ — Aipo're ke Judá pygua huvixa Zorobabel pe: “Amboryryipa 'rā yva ha'e yvy.

²² Aity 'rā huvixa ikuai va'e po'akaague, ambovaipa 'rā yvy regua kuery imbaraeteague. Ambovaipa 'rā karóxa, ogueroguata va'e kuery guive. Ha'e ramo kavaju ha'e hi'árygua kuery ho'apa 'rā kyxe py peteĩ-teĩ jokutu vy.”

²³ — SENHOR aipoe'ive ju: “Ha'e gui ndee Salatiel ra'y Zorobabel xerembiguai reiko va'e, ha'e va'e ára py rogueru vy roguereko 'rā xekuā regua xerery oīa va'e rami, xee ae roiporavo rire”, he'i SENHOR ixondaro reta va'e.

* 2:6 Hebreus 12.26-27 * 2:14 Ha'e kuery reko rami vy mba'emo iky'a va'e amboae regua re ombovy rive teĩ ha'e va'e voi opyta 'rā iky'a va'e. Ha'e kuery voi Nhanderuete nonhe'ē renduia rupi ikuai vy ixupe iky'a va'e opyta.

Zacarias ayvu oĩa

“Pejeko rerova ke”, he'iaque

¹ Mokoĩ ma'etỹa ha'e oito jaxya re ma huvixave Dario oĩ jave py SENHOR ombou oayvu Berequias ra'y profeta Zacarias, Ido ramymino va'e pe. Ha'e vy aipoe'i:

² — Peneramoĩ kuery pe SENHOR ipoxy ete va'ekue.

³ Ha'e nunga rupi aipo're neretarã kuery pe: Po rami SENHOR ixondaro reta va'e ijayvu: Pejeyu ju ke xe'vy. Ha'e ramo xee voi aiko ju 'rã peẽ kuery reve.

⁴ Pendekuaive eme peneramoĩ kuery ikuaiaque rami. Mba'eta ha'e kuery pe ma profeta kuery yma guare ijayvu vy aipoe'i va'ekue: “Po rami ijayvu SENHOR ixondaro reta va'e: Pejeko rerova ke aỹ opa marã rei pendekuaia ha'e mba'emo vai pejapoã gui”, he'i va'ekue ri ha'e kuery noendui, naxenhe'ẽ rendui guive — he'i SENHOR.

⁵ — Mamo tu aỹ peneramoĩ kuery ikuai? Profeta kuery voi ndokuave riaei avi.

⁶ Ha'e rã xeayvu ha'e aipota va'e xerembiguaĩ profeta kuery pe aikuaa uka va'ekue ma ojeupitypa ma peneramoĩ kuery ambojexavaia py. Ha'e gui ma ha'e kuery ojeko rerova vy aipoe'i: “ SENHOR ixondaro reta va'e ma nhanembopaga agua'e onhembopy'a raka'e nhandereko vaiague ha'e mba'emo vai jajapoague re. Ha'e rami vy ojapoã ae ma”, he'i okuapy.

Jy'py kavaju kuery oexaague

⁷ Ha'e gui mokoĩ ma'etỹa ha'e onze jaxya sebate 'epy va'e, vinte e quatro araa py, huvixa Dario mokoĩ ma'etỹa re ma oĩ jave py SENHOR oayvu ombou ju Berequias ra'y profeta Zacarias, Ido ramymino va'e pe.

⁸ Ha'e ramo peteĩ pytũ aexa ra'u rã ojekuaa peteĩ ava kavaju pytã va'e árygua. Ha'e va'e ma peteĩ vvyugua puku py oĩ, yvra murteira ikuai va'e mbyte. Hakykue re ojekuaave ju kavaju pytã va'e, xii rai'i va'e ha'e xii va'e guive.

⁹ Ha'e ramo xee aporandu:

— Xeruvixa, marã ramigua tu peva'e?

Ha'e ramo anjo xereve ijayvu va'e ombovai:

— Xee aikuaa uka 'rã marã ramigua paa — he'i.

¹⁰ Ha'e ramo yvra ikuai va'e mbyte ava oĩ va'e ju ombovai. Ha'e vy aipoe'i:

— Ha'e va'e kuery ma vvy jave rupi uguata va'erã SENHOR ombou va'ekue — he'i.

¹¹ Ha'e gui ha'e va'e kuery ju ijayvu SENHOR pegua anjo yvra ikuai va'e mbyte oĩ va'e pe. Ha'e vy aipoe'i: — Ore ma vvy jave rupi roikopa ma. Ha'e ramo ha'e pygua kuery opytu'upa, vvy ha'e javi rupi ikuai porãmba guive — he'i okuapy.

¹² Ha'e ramo anjo SENHOR pegua ombovai:

— SENHOR nexondaro reta va'e, raka'e peve 'rã tu remboaxya nderexa ukavei Jerusalém tetã pygua kuery pe, neĩ Judá regua tetã ikuai va'e pygua kuery pe? Mba'eta ha'e kuery re setenta ma'etỹ re ma ndepoxya oĩ — he'i.

¹³ Ha'e gui anjo xereve ijayvu va'e pe SENHOR ijayvu porã'i nhombopy'a porãã rupi.

¹⁴ Ha'e ramo ha'e va'e ju ijayvu xe'vy:

— Emombe'u atã ke: Po rami SENHOR ixondaro reta va'e ijayvu: Xee ma nda'evei etea aendu Jerusalém ha'e Sião pygua kuery re.

¹⁵ Ha'e rã amboae regua kuery pe ma xepoxy ete, mba'eve gui okyje e'ỹ re ikuai va'e pe. Mba'eta ha'e kuery pe amongue py ete'i xepoxy va'ekue ri aỹ ma ha'e kuery xembopoxye ete.

¹⁶ Ha'e nunga rupi po rami SENHOR ijayvu: Xee ma Jerusalém tetã re ajevy ju 'rã anhomboaxya rupi. Ha'e gui xe'vygua oo ma ojapoã ju 'rã ha'e py. Teĩgue ju ixã mba'emo a'ã omoatã 'rã Jerusalém tetã rupi — he'i SENHOR ixondaro reta va'e.

¹⁷ — Ha'e gui teĩgue ju remombe'u atã vy aipo're 'rã: Po rami ijayvu SENHOR ixondaro reta va'e: “Xe'vygua tetã ikuai va'e tynyẽ nho 'rã mba'emo porã”, he'i. Mba'eta SENHOR ombopy'a guaxu nho 'rã Sião pygua kuery, Jerusalém tetã oiporavo ju 'rã guive.

Irundy vaka rakuã oexaague

¹⁸ Ha'e gui teĩgue ju ama'ẽ vy aexa irundy vaka rakuakue.

¹⁹ Ha'e rami vy aporandu anjo xereve ijayvu va'e pe:

— Mba'e nunga tu peva'e?

Ha'e rã xembovai:

— Peva'e vaka rakuakue ma Judá, Israel ha'e Jerusalém pygua kuery moaĩmbaare — he'i.

²⁰ Ha'e rire ma SENHOR oexa uka avi irundy ferro re omba'eapo va'e kuery.

²¹ Ha'e rã xee aporandu:

— Ha'vy peva'e kuery, mba'erã tu ou?

Ombovai:

— Vaka rakuakue ma vvy regua kuery Judá kuery rovai opu'ã vy opo'akaa rupi omoaĩmba va'ekue, neĩ avave rei oakã nomopu'ã kuaavei agua' rami. Ha'e gui kova'e ferro re omba'eapo va'e kuery ma vaka rakuakue mongyjaarã ha'e heitypaarã ou — he'i.

2

Jerusalém tetã rupi mba'emo a'ãarã oexaague

¹ Ha'e gui ama'ẽ vy petei'ava hi'ã va'e ju aexa. Ha'e va'e ma opo py oguereko petei'ixã mba'emo a'ãa.

² Ha'e ramo aporandu ixupei:

— Marã katy reo?

Ombovai:

— Jerusalém tetã ra'ã vy aa, ipya ha'e ipuku-a aikuaa aguã — he'i.

³ Ha'e gui anjo xereve ijayvu va'e oo ta ma ramo amboae anjo ou vy ovaexĩ.

⁴ Ha'e vy aipoe'i ixupei:

— Tereo pojava ke, ha'e emombe'u peva'e kunumi va'e pe: “Jerusalém tetã re heta ete avakue ha'e mymba kuery ikuai ramo tekoa'i rami 'rã opyta ikora ve'ỹ va'e”, 're.

⁵ Mba'eta SENHOR aipoe'i: “Xee ae 'rã aĩ tetã korarã tata guigua rami. Xee aiko 'rã ha'e kuery mbyte rupi imoexakãarã”, he'i.

Sião tetã katy ju Israel kuery ojevy aguã re ijayvuaque

⁶ Ha'e gui SENHOR aipoe'i:

— Pendu ke! Pendu ke! Pevapa ke peovy aỹ kuaray ijapu'a'ia katy vvy oĩ va'e gui, irundy henda katy yvytu yva rupi oipejua katy xee romoaimba rire teĩ.

⁷ Pendu ke! Peẽ Sião pygua kuery Babilônia kuerya py pendekuai va'e, tapeo jepe ke.

⁸ Mba'eta SENHOR ixondaro reta va'e po rami SENHOR ijayvu: “ SENHOR onhemboete ukaa rupi xembou vvy regua penemba'e rei-rei pe'apaare kuery rovai, mba'eta ixupei rã penderovai opo oupity va'e ma hexa ra'yĩ re opoko va'e reve nda'eveia rami.

⁹ Ma'ẽ, ha'e kuery rovai xee xepo aupi ramo hembigui a ikuai va'ekue ae ju 'rã oipe'apa imba'e rei-rei. Ha'e ramo peikuaa 'rã SENHOR ixondaro reta va'e ae xembouague”, he'i.*

¹⁰ SENHOR aipoe'i:

— Sião pygua kuery, peporai ke pevy'a reve, mba'eta aju 'rã penembyte aiko aguã.

¹¹ Mba'eta ha'e va'e ára ma heta regua 'rã onhemboaty xee SENHOR re, xevy guarã. Ha'e gui penembyte aiko ramo peikuaa 'rã SENHOR ixondaro reta va'e ae pendea py xembouague.

¹² Ha'e va'e jave py SENHOR ojeupe guarã ogueru 'rã Judá kuery. Yvy iky'a e'ỹ va'e re jevy 'rã ogueru, ha'e teigüe ju oiporavo 'rã Jerusalém tetã.

¹³ Ha'e nunga rupi peẽ avakue ha'e javi, pekyririimba ke SENHOR renonde, mba'eta o'amba iky'a e'ỹ va'e gui opu'ã ma ouvy.

3

Sacerdote yvateve va'e Josué oexaague

¹ Ha'e gui xevy pe Nhanderue te oexa uka sacerdote yvateve va'e Josué, SENHOR guigua anjo renonde hi'ãĩ rã. Ha'e va'e oiporu kuaa regua re Satanás hi'ãĩ avi hovai ijayvu aguã.

² Ha'e rã SENHOR ma aipoe'i Satanás pe:

— Satanás, SENHOR ta'ijayvu ete ndevy. Tá, SENHOR Jerusalém tetã poravoare ta'ijayvu ete ndevy. Mba'eta peva'e ava ma tata'y tata py okaia gui oipe'a pyre rami — he'i.

³ Josué ma anjo renonde hi'ãĩ reve ao iky'apa va'e py onhemonde ho'amý.

⁴ Ha'e gui ma anjo ju ijayvu. Ha'e vy aipoe'i guenonde ikuai va'e pe:

— Pemboi ijao iky'apa rei va'e — he'i.

Josué pe aipoe'i avi:

— Ne'exa, ndegui aipe'apa ma ndereko vaiague, ha'e gui ao porãgue py ju 'rã romonhemonde — he'i.

⁵ Ha'e ramo xee ju aipoa'e:

— Inhakã re ma pemoĩ avi akã regua iky'a e'ỹ va'e — ha'e. Ha'e ramo inhakã re omoĩ akã regua iky'a e'ỹ va'e, ao ha'evea ramigua py omohemonde guive.*

Ha'e gui ma SENHOR guigua anjo hi'ãĩ va'e ju

⁶ aipoe'i Josué mongetaa rupi:

⁷ — Po rami ijayvu SENHOR ixondaro reta va'e: Xee aikoa rupi ndee reiko, ha'e ajapo uka va'e rejapopa ri vy ndee repena 'rã xevygua oo re, xevygua oguy ikuai va'e re avi 'rã renhangareko. Ha'e gui ajapo 'rã apy ikuai va'e rami avi ndee voi xere renhemboja aguã rami.

⁸ Ha'e gui sacerdote yvateve va'e Josué, endu ke, neirũ kuery nerenonde oguapy va'e ha'e javi reve, mba'eta peẽ avakue ma raka'eve rã guarã kuaa ukaarã peiko. Mba'eta ne'exa, ambou 'rã xerembigui Yvyra Rapytakue Renhoĩ 'epy va'e.

* 2:9 Apy ma SENHOR ae ijayvu vy “ SENHOR xembou”, he'i. Mba'eta SENHOR remimbou hexeve joo rami ete, Marcos 12.35-37 py Jesus ojee ae ijayvua rami. * 3:5 Sacerdote yvateve va'e Josué ma anjo renonde hi'ãĩ guetarã kuery rekovia ojevava ombogue uka aguã, teĩ ha'e voi

iky'a va'e py onhemonde ho'amý ojevavy va'e vy. Satanás ha'e py hi'ãĩ avi Josué ojevavy rami ijayvu aguã. Ha'e rami teĩ anjo SENHOR rery rupi oĩ va'e ma ojevavyague ombogue vy ao porã py ju omohemonde, Nhanderue te oiko aguã sacerdote-rã (Êxodo 39.1-31). Kova'e Josué ma Moisés irũ e'ỹ, amboae ava Jesua hery avi va'e, Esdras ha'e Neemias javagua sacerdote yvateve va'e (Esdras 2.2; Neemias 7.7).

⁹ Mba'eta ma'ê, apy Josué renonde itui peteĩ ita aea va'ekue. Kova'e ita peteĩ'i va'e re ma sete texa oĩ. Ha'e va'e ita re ambopara 'rã, mba'eta peteĩ ára pyve aipe'apa 'rã kova'e yvy regua kuery reko vaia — he'i SENHOR ixondaro reta va'e.

¹⁰ — Ha'e va'e ára ma peẽ kuery peteĩ-teĩ pendea katy'i ikuai va'e penoĩ 'rã pendereve oguapy aguã uva'y ha'e figo'y gup py — he'i SENHOR ixondaro reta va'e.

4

Mokoĩ oliveira rembypy mbyte py tataendy'y hi'aĩ va'e oexaague

¹ Ha'e gui teĩgue ju anjo xereve ijayvu va'ekue ou vy xemomyĩ imo'amy, avakue okeague gui omomyĩa rami.

² Ha'e rami vy oporandu xeivy:

— Mba'e nunga tu rexa?

Ambovai:

— Xee aexa peteĩ tataendy'y ouro guigua hi'aĩ va'e, ha'e gui hi'áry oĩ peteĩ azeite ryru. Tataendy'y re ma sete tataendy renda ikuai, ha'e sete ikuai avi tataendy rykue raperã, peteĩ-teĩ tataendy peve azeite ovaẽ aguã.*

³ Ha'e nunga yvýry ma mokoĩ oliveira rembypy hi'aĩ. Peteĩ ma azeite ryru oiporu kuaa regua re, ha'e rã amboae ma oiporu kuaa e'ỹa re hi'aĩ — ha'e.*

⁴ Ha'e gui xee aporandu ju anjo xereve ijayvu va'e pe:

— Xeruvixa, mba'erã tu peva'e?

⁵ Ha'e ramo anjo xereve ijayvu va'e ombovai:

— Ndee ndereikuaai teri va'e ty'y peva'e nunga mba'erã paa?

Xee ambovai vy — Any, xeruvixa — ha'e.

⁶ Ha'e ramo ijayvuve vy aipoe'i xeivy:

— Peva'e ma Zorobabel pe SENHOR ixondaro reta va'e aipoe'iague: “Ndee ae mbaraetea rupi e'ỹ 'rã mba'emo rejapo, ndee ae po'akaa rupi e'ỹ guive, ha'e rã Xenhe'ẽ rupi ae 'rã rejapo”, he'iague.†

⁷ Ha'e gui ndee yvyty tuvixa va'e, marã ramigua tu ndee? Mba'eta Zorobabel renonde ma yvy joja reia rive 'rã repyta. Mba'eta ita opa vy guarã Zorobabel omoĩ ramo pavẽ oguerovy'a vy “Tomoiingo porã! Tomoiingo porã!” he'i 'rã okuapy.

⁸ Teĩgue ju xeivy pe SENHOR ombou oayvu. Ha'e vy aipoe'i:

⁹ — Zorobabel ma opo py ae kova'e oo omboypy rire ha'e ae ju 'rã omomba, ha'e rami peikuaa aguã SENHOR ixondaro reta va'e pendea py xembouague.

¹⁰ Ha'e gui mba'emo kyrĩ'i va'e anho ojapoa rã amongue oexa vy nombovareĩ teĩ ha'e kuery ae ju 'rã oguerovy'a oexa vy Zorobabel opo py peteĩ ixã oo mbotya ra'ãa oiporu ramo — he'i. Ha'e gui sete texa ikuai va'e ma SENHOR rexa yvy jave rupi oexa pota oikovy va'e.‡

¹¹ Ha'e gui xee aporanduve ju ixupe:

— Mba'erã tu mokoĩ oliveira rembypy oiporu kuaa ha'e oiporu kuaa e'ỹa re tataendy'y jovaive re hi'aĩ va'e?

¹² Teĩgue ju xeayvu vy aporandu avi:

— Ha'vy mba'erã tu mokoĩ oliveira rakãgue yvy'iry azeite iju porã rei va'e rape ouro guigua oĩ va'e?

¹³ Aipoe'i:

— Ndereikuaai teri va'e ty'y?

Xee ambovai vy

— Any, xeruvixa — he'i.

¹⁴ Ha'e ramo aipoe'i:

— Peva'e mokoĩ ma SENHOR yvy jave re ipo'aka va'e pe omba'epao va'erã omoĩ mbyre — he'i.

5

Kuaxia oveve va'e oexaague

¹ Ha'e gui teĩgue ju ama'ẽ vy aexa peteĩ kuaxia oveve-veve rã.

² Ha'e ramo anjo oporandu xeivy:

— Mba'e nunga tu rexa?

Xee ambovai:

— Peteĩ kuaxia oveve va'e rima aexa — ha'e. Ha'e va'e puku-a ma dez metros, ha'e rã ipya ma irundy raxa'i.

³ Ha'e ramo xeivy pe anjo aipoe'i:

* 4:2 Judas 9 * 4:3 Apocalipse 11.3-4 py oĩa rami mokoĩ oliveira rembypy ma mokoĩ ava Nhanderuetepagua, Nhe'ẽ rupi vy mba'emo ojapo kuaa va'e. Apy ma Josué ha'e Zorobabel 'rã jaikuaa (versículos 13-14 py). † 4:6 Ha'e va'e jave ma Zorobabel oĩ Israel kuery ruvixa Jerusalém py. Sacerdote yvateve va'e Josué reve Zorobabel ojapo ju Nhanderuetepagua templo oity pyre, amboae regua kuery ndojapo ukaxeĩ teĩ (Esdras 3-6). ‡ 4:10 Templo omboytava jave py hetarã kuery amongue ojao'oi rei templo yma guare tuvixave ete va'ekue re ima'endu'a vy (Esdras 3.10-12). Sete texa ikuai va'e re ma ijayvu ju 'rã Apocalipse 5.6 py.

— Peva'e ma ayvu vai mbouarã vvy jave rupi oo va'e. Mba'eta peva'e ayvu vai rami vvy imonda va'e ha'e oura rive va'e omoxêmbaa 'rã.

⁴ Mba'eta SENHOR ixondaro reta va'e aipoe'i: “Xee ha'e nunga ambou vvy ajapo 'rã imonda va'e kuery ro py oike aguã rami, xerery rupi oura rive va'e ro py guive. Ha'e va'e ma opy pytũ oaxa vvy ombovaipa 'rã oo regua vvyra ha'e ita”, he'i.

Ajaka py kunha oĩ va'e oexaaague

⁵ Ha'e gui anjo xee reve ijayvu va'e ou jevy vvy aipoe'i xevy:

— Aỹ ma yvate katy ju ema'ẽ rexa aguã mba'emo ou oiny va'e.

⁶ Xee aporandu:

— Mba'e tu peva'e nunga?

Xembovai:

— Ha'e va'e ou jekuua va'e ma peteĩ ajaka. Ha'e va'e py ma oĩ vvy jave rupigua kuery reko vaia — he'i.

⁷ Ha'e gui ajaka juru mbotya chumbo guigua oipe'aa ramo peteĩ kunha va'e oguapy oiny ra'e ajaka py.

⁸ Ha'e gui anjo aipoe'ive ju:

— Peva'e ma teko vai — he'i vyve ajakapy py ju kunha va'e omoanha vvy omboty ju chumbo guigua ipoyi ete va'e py.

⁹ Ha'e gui teĩgue ju ama'ẽ vvy aexa mokoĩ kunhague jogueru nhoguenoiny rã. Guyra guaxu rami ipepo va'e vvy ipepo rupi vvytu oipeju reve ou. Ha'e va'e kuery ma ajaka oupi heravy vvy gui yvatevea peve.

¹⁰ Ha'e gui xee aporandu anjo xereve ijayvu va'e pe:

— Marã katy tu ha'e kuery ogueraa 'rã ajaka?

¹¹ Ombovai:

— Sinar vvy katy rima ogueraa, kunha va'e rorã ojapo aguã py. Ha'e gui oiapopa ma vvy omoĩ 'rã ha'e py, henda py ae — he'i.*

6

Irundy karóxa oexaaague

¹ Teĩgue ju ama'ẽ vvy aexa mokoĩ vvyty overa va'e guigua. Ha'e va'e vvyty mbyte gui ma irundy karóxa joe opu'ãa pygua omoatã heruvy.

² Jypygua karóxa re kavaju ikuai va'e ma pytã va'e anho. Ha'e rã mokoĩa re kavaju ikuai va'e ma huũ va'e anho.

³ Mboapya re ma xiĩ va'e, ha'e rã irundya re kavaju ikuai va'e ma xiĩ rai'i va'e. Ha'e va'e kuery ma imbaraete va'e meme.*

⁴ Ha'e ramo anjo xereve ijayvu va'e pe xee aporandu:

— Xeruvixa, mba'e nunga tu peva'e?

⁵ Anjo ombovai:

— Peva'e kuery ma yva rupi irundy henda gui vvytu oipeju va'e, SENHOR vvy jave re ipo'aka va'e renonde ikuaiague gui ou.

⁶ Ha'e gui karóxa kavaju huũ va'e omoatã va'e oo 'rã kuaray ijapu'a'ia katy vvy itui va'e re. Ha'e va'e rakykue rupi ma xiĩ va'e ju 'rã oo. Ha'e rã xiĩ rai'i va'e ma kuaray puku-a katy 'rã oo vvy itui va'e re — he'i.

⁷ Ha'e gui ma kavaju kuery pe SENHOR ijayvu vvy “Tapeo, vvy jave rupi peiko”, he'i. Ha'e ramo imbaraetea rupi oje'oi vvy onhea'ã jogueravy vvy jave rupi oguata aguã. Ha'e rami py vvy jave rupi ete oje'oi.

⁸ Ha'e gui SENHOR xerenoi vvy aipoe'i xevy:

— Kuaray ijapu'a'ia katy vvy itui va'e re kavaju oo vvy ojapo 'rã ha'e py Xenhe'ẽ opytu'u aguã rami — he'i.†

Josué akã re coroa omoĩ, ha'e Yvyra Rapytakue Renhoĩ omombe'u porãveague

⁹ Ha'e gui teĩgue ju SENHOR oayvu ombou xevy. Ha'e vvy aipoe'i:

¹⁰ — Ndevy pe neretarã kuery escravo-rã ogueraa pyre regua ome'ẽ 'rã mba'emo. Ha'e va'e kuery ma Heldai, Tobias ha'e Jedaías, Babilônia tetã gui ou va'ekue meme. Ha'e nunga rejopy vvy ha'e va'e árave eraa, ha'e eike Sofonias ra'y Josias ro py.

¹¹ Prata ha'e ouro ha'e kuery ome'ẽ va'ekue rejopy va'ekue gui ejapo coroa. Ha'e va'e ma emoĩ Jozadaque ra'y sacerdote yvateve va'e Josué akã re.

¹² Ha'e rami vvy aipo're 'rã ixupe: “Po rami SENHOR ixondaro reta va'e ijayvu: Ne'exa, apy ava oĩ va'e pe ma ‘Yvyra Rapytakue Renhoĩ’ ea 'rã. Mba'eta ha'e va'e ma oĩague gui henhoĩ jevy vvy ojapo 'rã templo SENHOR peguarã.

¹³ Ha'e ae 'rã oiko SENHOR pegua templo apoa rupi. Hexakãa py onhemonde reve oguapy 'rã oiny guenda openaaty áry. Joe opena 'rã oikovy, ha'e guenda py joe opena oiny reve oiko avi 'rã sacerdote. Mokoĩ rupi 'rã oiko va'eri ha'evea rupi meme”, 're 'rã.

* 5:11 Sinar ma Babilônia rery mboae. Babilônia tetã ma teko vai renda ae raka'e (Apocalipse 17). * 6:3 Apocalipse 6.2-8 py oĩa rami oexa irundy kavaju joo rami e'ỹ-e'ỹ ojekuua va'e, mba'eta joo rami e'ỹ-e'ỹ 'rã oo nhomoingo axyarã. † 6:8 Kuaray ijapu'a'ia katy oĩ Babilônia ha'e amboae regua Israel kuery rovai opu'ã va'ekue, Nhanderuete pe e'ỹ ikuai va'e meme. Ha'e gui kavaju oo 'rã ha'e kuery ombopaga aguã heko vaia re. Ha'e ramo ma Nhanderuete Nhe'ẽ opytu'u 'rã.

¹⁴ Ha'e gui coroa ma remoĩ porã uka ju 'rã Helém, Tobias, Jedaías ha'e Sofonias ra'y Hem pe. SENHOR pegua templo py ae 'rã omoĩ porã penema'endu'a pavẽ agua.

¹⁵ Mba'eta mombyry guigua kuery voi ou 'rã penepytyvõ agua SENHOR pegua templo pejapoa rupi, ha'e rami peikuaa agua SENHOR ixondaro reta va'e ae pendea py xembouague. SENHOR Penderuete ayvu pejapopa ete ramo ha'e nunga ha'e javi 'rã oiko.

7

Okaru e'ỹ re ikuai teĩ Nhanderuete ndoguerovy'aia re ijayvuague

¹ Ha'e gui irundy ma'etỹ re ma huvixave Dario oĩ jave py SENHOR ombou oayvu Zacarias pe, nove jaxya quisleu 'epy va'e ha'e irundy araa py.

² Mba'eta Betel pygua kuery ombou va'ekue Sarezzer ha'e Regén-Meleque hexevegua avakue reve, SENHOR pe ojavukai vy oporandu uka agua.

³ Ha'e ramo ha'e kuery ma SENHOR ixondaro reta va'e pegua ropy sacerdote kuery ikuai va'e pe oporandu, profeta kuery py guive: "Ha'evea rami pa peteĩ nhiruĩ jaxya py rokaru e'ỹ re rojae'ove ju agua mbovy ma'etỹ re'ỹ ma okuuaigave rami?" he'i okuapy.

⁴ Ha'e ramo SENHOR ixondaro reta va'e ombou oayvu xeve. Ha'e vy aipoe'i:

⁵ — Rembovai 'rã sacerdote kuery ha'e kova'e vvy re ikuai va'e ha'e javi pe. Ha'e vy aipo're: "Setenta ma'etỹ oaxa va'ekue re ma peteĩ nhiruĩ jaxya ha'e sete jaxya py ju pekaru e'ỹ re pendekuai va'ekue pejae'o reve, ha'e rami teĩ xeve pe ete ri nda'u pekaru e'ỹ re pendekuai? Xeve pe ete nda'u pejapo?"

⁶ Ha'e rami ae avi pekaru ha'e pey'ua ára py ma pendejeupe ae e'ỹ ri ty'y pekaru ha'e pey'u?"

⁷ Mba'eta ymave rupi Jerusalém tetã py nhande kuery ikuai porã'i jave, ijyvýry rupi tekoa ikuai va'e py guive, kuaray puku-a katy ha'e vvy joja reia ha'e javi rupi tekoa ikuai jave ma profeta kuery pe SENHOR omombe'u uka ae ma raka'e oayvu. Peẽ kuery napendui ri ty'y ha'e nunga?" 're 'rã.

Ha'e kuery Nhanderuete nonhe'ẽ rendui rire ogueraa ukapaague re ijayvu

⁸ Ha'e gui Zacarias pe SENHOR oayvu ombou vy aipoe'i:

⁹ — Po rami SENHOR ixondaro reta va'e ijayvu va'ekue: "Pejogueroko ke ha'evea rami, anhetẽ rupi ete. Peteĩ-teĩ ke pexa uka mborayvu ha'e penderivy kuery pemboaxa.

¹⁰ Pembojexavai eme imeve'ỹ va'e kuery, tyre'ỹ, mombyry guigua kuery, neĩ iporiaukue'i ma voi. Ha'e peteĩ-teĩ pendepe'va re pemoive eme peneirũ kuery pe pejapo vai agua", he'i va'ekue.

¹¹ Ha'e rami teĩ ha'e kuery noendu potai okuapy. Ha'e rami vy ivai rei reve okupe rive oguerova xea katy, oapxya omboty guive, noenduxeĩ vy.

¹² Ha'e rami py ha'e kuery diamante rami onhemoakã ratã okuapy, lei aeja va'ekue oendu e'ỹ agua, neĩ SENHOR ixondaro reta va'e oayvu Onhe'ẽ rupi ae ombou va'ekue, neĩ profeta kuery ymave rupigua omombe'u va'ekue guive. Ha'e nunga rupi ae ou SENHOR ixondaro reta va'e poxya.

¹³ Xee aenoĩ ramo ha'e kuery noendu potai rire ha'e kuery xeve ojavukai rã xee voi naendu potai va'ekue — he'i SENHOR ixondaro reta va'e.

¹⁴ — Ha'e rami vy yvytu guaxu rami amoaimba vvy regua ikuia rupi, ha'e kuery ndoexai teri va'e rupi ae. Ha'e oyvy oejaague voi ombovaipaa avi, ha'e va'e rupi avave rei ndoaxaavei neĩ ndojevyavei agua rami. Mba'eta vvy porã rei va'ekue ojapoa na'iporãvei agua rami.

8

Sião tetã ojapo ju agua re ijayvuague

¹ Ha'e gui teĩgue ju SENHOR ixondaro reta va'e ombou oayvu xeve. Ha'e vy aipoe'i:

² — Po rami SENHOR ixondaro reta va'e ijayvu: Xee aendu Sião pygua kuery re nda'evei etea. Ndajou porã'i etea ha'e nda'eveia aendu ha'e kuery ikuai axya re.

³ Po rami ijayvu SENHOR: Aju ju 'rã Sião tetã py, aiko ju 'rã Jerusalém tetã mbyte rupi. Ha'e ramo Jerusalém pe "Tetã anhetẽ rupi ikuia" 'ea 'rã, ha'e SENHOR ixondaro reta va'e pegua vvyty pe ma "Yvyty ky'a e'ỹ" 'ea 'rã.

⁴ Po rami ijayvu SENHOR ixondaro reta va'e: Teĩgue ju Jerusalém tetã mbyte rupi tujakue'i ha'e guaimigue'i oguapy 'rã okuapy. Okakua'i ete ma vy peteĩ-teĩ opo py ogueroko 'rã popoka.

⁵ Tetã mbyte rupi avakue'i ha'e kunhague'i ono'õ avi 'rã okuapy onhevanga rupi ikuai va'e.

⁶ Po rami ijayvu SENHOR ixondaro reta va'e: Ha'e nunga kova'e kuery rembyrekue oexa vy onhemondyipa rei teĩ xee voi teve 'rã anhemondy'i? Any — he'i SENHOR.

⁷ — Po rami ijayvu SENHOR ixondaro reta va'e: Ne'exa, mba'eta xee araa jepe 'rã xevelygua kuery. Ha'e rami vy aipe'a 'rã kuaray oua katy ha'e oieka katy vvy itui va'e gui.

⁸ Xee aru ramo Jerusalém tetã py ju 'rã ikuai. Ha'e gui ha'e kuery ikuai 'rã xevelygua, ha'e rã xee ma tuuete 'rã aiko. Anhetẽ rupi ha'e teko porã rupi 'rã areko.

⁹ — Po rami ijayvu SENHOR ixondaro reta va'e: Aỹ ma peẽ kuery pendu pekuapy kova'e ayvu profeta kuery yma guare omombe'u va'ekue SENHOR pegua oo ojapo ppy'i jave. Ha'e nunga rupi aỹ ma pemombaraete pendepe xevelygua templo pejapopa ju agua.

¹⁰ Mba'eta ha'e va'e jave e'ỹ mbove ma avakue neĩ mymba kuery mba'eve ndojoui omba'epoague gui. Ngovaigua kuery káuxa oẽ va'e neĩ ovaẽ va'e kuery ma voi ndojoui ikuai porã agua, mba'eta xee ajapo avakue peteĩ-teĩ oirũ kuery re opu'ã agua rami.

11 Ha'e rami teĩ aỹ gui ma kova'e kuery okuave'i va'e jypy arekoague rami ve'y 'rã areko — he'i SENHOR ixondaro reta va'e.

12 — Mba'eta mba'emo ra'yigüe onhotỹ ramo oiko porã 'rã. Uva'y hi'a porã 'rã guive, yvy gui mba'emo pyau henhoĩ 'rã, ha'e yva gui ho'a 'rã oky rayvi. Mba'eta kova'e kuery rembyrekue pe ajapo 'rã ha'e nunga ha'e javi oiko aguã rami.

13 Ha'e gui peẽ Judá ha'e Israel kuery, amboae regua kuery ikuai rupi ayvu vaipy pendekuai va'ekue ri aỹ ma rogueraa jepe rire ayvu porãmby ju 'rã peiko. Ha'e nunga rupi pekyjeve eme, ha'e vy pemombaraete ke pendepo.

14 Mba'eta po rami SENHOR ixondaro reta va'e ijayvu: Peneramoĩ kuery xembopoxya rupi ikuai jave py penderovai anhembopy'a mba'emo vai ajapo aguã re, ndajapo e'ỹi guive.

15 Ha'e rami teĩ aỹ gui ma anhembopy'a Jerusalém ha'e Judá pygua kuery pe ajapo porã ju aguã re. Pekiyeve eme ha'vy.

16 Po rami 'rã pendekuai: Peteĩ-teĩ anhetẽ rupi 'rã pendeayvu peneirũ kuery pe, ha'evea rami 'rã pejoguereko peneretã kora rokẽ py, anhetẽ rupi ha'e peteĩ rami penhomoingoa rupi.*

17 Peteĩve opa marã penhembopy'a eme peneirũ kuery rovai, pendejee pemoĩ eme guive peura rivea rupi pendekuai aguã, mba'eta ha'e nunga ha'e javi xee ajou vai ete — he'i SENHOR.

18 Ha'e gui SENHOR ixondaro reta va'e oayvu ombou ju xevy. Ha'e vy aipoe'i:

19 — SENHOR ixondaro reta va'e po rami ijayvu: Peẽ Judá kuery, irundy jaxya py pekaru e'ỹ re pendekuai va'ekue, ha'e gui peteĩ nhiruĩ jaxya, sete ha'e dez jaxya py voi pekaru e'ỹ re pendekuai va'ekue. Ha'e rami teĩ aỹ gui ma ha'e va'e jave opyta 'rã pevy'a aguã. Pevy'a reve 'rã pejapo ngaru iky'a e'ỹ va'e, pendejee pemoĩ avi ke anhetẽ rupi ha'e peteĩ rami penhomoingoa aguã.

20 Po rami ijayvu SENHOR ixondaro reta va'e: Pova'e nunga oiko avi 'rã: heta regua, heta tetã pygua kuery jogueru 'rã okuapy.

21 Ha'e rami vy peteĩ-teĩ tetã pygua kuery amboae tetã katy oo vy ha'e kuery pe aipoe'i 'rã: “Pejapura ke, jaje'oi SENHOR pe jajapukai aguã. Jaeka SENHOR ixondaro reta va'e. Xee avi aa 'rã”, he'i 'rã okuapy.

22 Jerusalém tetã py heta regua ipo'akakueve va'e jogueru 'rã SENHOR ixondaro reta va'e reka vy, ixupe ojapukai aguã.

23 Po rami ijayvu SENHOR ixondaro reta va'e: Ha'e va'e ára ma dez avakue ou vy peteĩ judeu reve onhemoirũ 'rã okuapy. Joo rami e'ỹ-e'ỹ ijayvu va'e, ha'e javi regua ou 'rã peteĩ judeu oikuavã vy ijao apy rupi ojopy reve. Ha'e vy aipoe'i 'rã ixupe: “Ore avi toroo nderupive, mba'eta omombe'ua rã roendu pende kuery reve Nhanderuete oikoa”, he'i 'rã.

9

Yvy regua kuery ombopaga aguã re ijayvuague

1 — Kova'e ayvu ma Hadrake yvy regua kuery rovai SENHOR omombe'u uka va'ekue, Damasco tetã re guive ombou. Mba'eta SENHOR ma avakue ha'e javive re oma'ẽ 'rã oikovy, Israel regua ikuai va'e re guive.

2 Ha'e rami vy oayvu ombou Hamate yvy re voi. Ha'e va'e ma Hadrake yvy katy'i itui. Ha'e gui Tiro ha'e Sidom tetã pygua kuery re voi ombou, ha'e kuery hi'arandupa va'eri teĩ.

3 Mba'eta Tiro pygua kuery ma heta ojapo oo ikorapa va'e onhemi aguã. Prata heta avi omoĩ porã yvy ku'i rami, ouro guive omoĩ porã yapo tape rupi oĩ va'e rami rive.

4 Ha'e rami teĩ ne'exa, ha'e kuery mbaraetea SENHOR oipe'apa vy omombopa 'rã ye'ẽ mbyte py. Ha'e rã hetã ma tata py 'rã ombovaipa.

5 Ha'e nunga Asquelom pygua kuery oexa vy okyjepa 'rã okuapy. Gaza pygua kuery voi ikuai axy 'rã. Ecom pygua kuery ha'e rami ae avi 'rã ikuai, guenonderã rupi oarõ va'e ndoikovei rã. Gaza pygua huvixave omano 'rã, ha'e Asquelom py voi noĩavei 'rã.

6 Asdode py ma peteĩ regua joegua e'ỹ-e'ỹ hekoa 'rã. Ha'e rami py xee amomba 'rã filisteu kuery onhembovyate reia.

7 Ha'e kuery juru gui anoẽ 'rã ta'angaa pe mymba ome'ẽ va'ekue ruguykue nomokõmbai va'ekue, ha'e haĩ ma'ũ gui ma amboi 'rã xo'o ra'ykue'i. Ha'e rire okuave'i va'e ma peteĩ regua 'rã ikuai Nhanderuete peguarã. Judá pygua kuery va'e regua 'rã ikuai. Ecom pygua kuery voi jebuseu kuery rami avi 'rã okuave.

8 Ha'e gui xee ma xevyguã oo aarõ 'rã aikovy ijyvyry rupi, xondaro kuery hexe opu'ã va'e ajoko aguã, ha'e va'e rupi ndoaxavei neĩ ndoikeavei aguã, ha'e pygua kuery re imbojexavaiaã ndouvei aguã, mba'eta aỹ gui ma aexa pota 'rã xerexa py ae.

Sião gui Huvixave ou aguã re ijayvuague

9 — Peẽ Sião pygua kuery, pevy'a ete ke. Jerusalém pygua kuery, pevy'a avi ke. Mba'eta ne'exa, ou ma oiny Penderuvixaverã. Ha'e va'e ma heko porã va'e ha'e jogueraa jepea. Onhemojyvy'i va'e vy ou 'rã mburika áry, mburika ombovoyipy ra'y áry.*

10 Mba'eta Efraim gui ambovaipa 'rã karóxa joe opu'ãa pygua, ha'e Jerusalém gui ma amokanhymba 'rã kavaju kuery. Guyrapa joe opu'ãa pygua guive ambovaipa 'rã. Mba'eta Huvixave ma yvy regua kuery pe omombe'u 'rã peteĩ rami ikuai aguã. Ipo'akaa oo 'rã ye'ẽ nhavõ rupi, Eufrates yakã guive 'rã oo yvy apy peve.

* 8:16 Efésios 4.25 * 9:9 Kova'e ayvu rami ae oiko Jesus re (Mateus 21.1-5; João 12.14-16).

¹¹ — Ha'e gui peê Sião pygua kuery, tuguy amoê uka reve xereve guarã ajapo va'ekue rami vy roguenoê 'rã yvykua py yy noía py penembo'aague gui.

¹² Escravo-rã pendereraa teĩ pearõ nho peikovy va'e, pejey ju ke peneretã ikorapa va'e katy. Aỹ guive pende'vy amombe'u mba'emo ame'ê retave ete aguã, pereko ae ma va'ekue áryve.

¹³ Ha'e gui Judá kuery aiporu 'rã guyrapa oipiraxa va'e rami, ha'e hu'yrã amoĩ 'rã Efraim kuery. Mba'eta peê Sião pygua kuery, pendera'y kuery ajapo 'rã Grécia pygua ra'y kuery rovai opu'ã aguã rami. Xee roiporu 'rã ojerovia rei va'e kyxe rami.

¹⁴ Ha'e gui Sião ra'y kuery ikuiaa áry rupi ojekuaa 'rã SENHOR, ha'e oĩa gui hu'y hendy va'e omombo 'rã overa va'e rami. SENHOR Nhanduete mimby guaxu omonhe'ê uka reve oo 'rã kuaray puku-a katygya vvytu jere áry rupi.

¹⁵ Ha'e rami vy SENHOR ixondaro reta va'e oepy 'rã ojeuegua kuery. Ha'e ramo ha'e kuery omokanhymba 'rã inhývõare kuery, opyrõmba 'rã guive. Vinho rami oy'upa 'rã huguy, ome'ê mbyre hy'a tynyê va'e rami 'rã hevayatãmba, opyta 'rã altar vyvry mba'emo ruguykue onhoêague rami.

¹⁶ Ha'e va'e ára ma Tuuete SENHOR ogueraa jepe 'rã ojeuegua kuery guymba kuery rami. Mba'eta ixupe rã ha'e kuery coroa re ita porãgueve oĩ va'e rami ikuai, ixuegua vvy re overa 'rã okuapy.

¹⁷ Mba'eta ha'e kuery ma opa mba'e py porayvu ha'e iporã va'e 'rã ikuai! Kunumigüe hexaĩmba 'rã mba'emo aju gui, ha'e kunhataĩgüe ma hexaĩ avi 'rã vinho gui.

10

Judá ha'e Israel kuery omingo porã aguã re Nhanduete ijayvuague

¹ Ára pyau jave pejerure ke oky re SENHOR pe, mba'eta SENHOR ae 'rã ojapo arai oky aguã. Ha'e rami vy avakue pe ombou oky porã, ha'e nhuũndy rupi omingo nhuũ roky.

² Ha'e rã ta'angaa oo pygua ma nhombotavya rupi 'rã ijayvu. Imba'ekuaa va'e voi ijapua meme oikuaa. Nhombotavya rupi meme 'rã omombe'u oexa ra'uague, ijayvu porã merami rive 'rã guive, anhetê rupi e'ỹ. Ha'e nunga rupi ae heta va'e kuery ojexavai rei 'rã vexe'i kuery re opena va'e ndoikoia rami.

³ Ha'e nunga rupi xepoxya hendy joe opena va'e kuery rovai. Ha'e rami vy amompaga 'rã kavara joguerekoarã omoĩ mbyre. Ha'e gui SENHOR ixondaro reta va'e ae 'rã opena guymba kuery Judá regua ikuai va'e re, oguerovy'a 'rã guive, kavaju joe opu'ã aguã katy oo va'e rami.

⁴ Mba'eta Judá gui ma oiko 'rã ita omboeteve pyrã, ha'e kuery gui oiko avi 'rã oguy ytarã, guyrapa joe opu'ãa pygua ha'e huvixarã ha'e javi.

⁵ Ha'e kuery ikuai 'rã ipy'a guaxukueve, joe opu'ãa py ngovaigua kuery re opyrõmba va'e rami. Ha'e vy opyrõmba 'rã tape rupi yapo oĩ va'e re rami. Ha'e kuery reve SENHOR oiko ramo opu'ã kuaa 'rã. Ha'e rami vy ojapo 'rã hovaigua kuery kavaju áry ou va'ekue voi oxĩmba aguã rami.

⁶ SENHOR aipoe'i:

— Xee amombaraete 'rã Judá kuery, araa jepe avi 'rã José kuery. Amboaxy ete vy ajapo 'rã ojevypa ju aguã rami. Ha'e ramo ha'e kuery ikuai 'rã namoxêi va'ekue rami, mba'eta xee SENHOR Tuuete aendu 'rã ijayvua.

⁷ Ha'e ramo Efraim kuery ikuai porã 'rã ipy'a guaxukueve rami. Opy'a py ov'y'a 'rã okuapy vinho gui rami. Ta'y kuery voi oexa vy ov'y'a vaipa avi 'rã, ha'e opy'a py xee SENHOR xerero'vy'a 'rã.

⁸ Mba'eta ha'e kuery aepy rire aenoĩ vy amono'õmba ju 'rã. Ha'e gui amboeta ju 'rã ymave rupi hetaague rami.

⁹ Vvy regua kuery mbyte rupi amoaĩmba teĩ mombyry ikuiaa py ima'endu'a 'rã okuapy xere. Gua'y kuery reve okuave ha'e ojevypa ju 'rã.

¹⁰ Mba'eta xee ae ajapo 'rã Egito vvy gui ojevypa aguã rami, Assíria gui voi amono'õmba 'rã heruvy. Gileade ha'e Líbano vvy gui 'rã aru, hoo rendarã noĩvei peve.

¹¹ Ye'ê rupi rami ha'e kuery oaxa 'rã ojexavaia rupi. Ha'e rami teĩ yai ainupã rã typa 'rã, Nilo yakã typyveague rupi voi ipirupa 'rã. Ha'e rami py amomba 'rã Assíria pygua kuery onhemboyvate reia. Egito pygua kuery po'akaa voi omokanhymbaa 'rã.

¹² Ha'e gui ajapo 'rã xee SENHOR re vy imbaraetepa aguã rami. Ha'e rami vy xerery rupi ae 'rã ikuai — he'i SENHOR.

11

¹ Ha'e gui Líbano pygua kuery, peipe'a ke peneretã rokê, tata oapypa aguã yary pende'vy re ikuai va'e.

² Ha'e ndee voi vvyra cipreste ne'ai va'e, ejae'o avi yary oitypaa ma rire. Yvyra iporãgueve ikuai va'ekue ombovaipaa ma. Peê voi vvyra carvalho Basã vvy re pendekuai va'e, pejae'o, ka'aguy re vvyra heta ikuai va'ekue oake'opaa ma rire.

³ Pendu ke vexe'i re opena va'e raxêmbi reia, mba'eta ha'e kuery ojou porãve va'ekue ombovaipaa ma ramo. Pendu ke guary ra'y kuery hevovo reia, Jordão yakã vyvry rupi ka'aguy iporãve va'ekue ombovaipaa ma ramo.

Vexa'i re ha'evea rami opena va'e re mba'emo ombojoja vy ijayvuague

⁴ Po rami ijayvu SENHOR Xeruete:

— Epena ke vexa'i kuery ojuka pyrã ikuai va'e re.

⁵ Mba'eta ijoguare kuery ojuka rive 'rã, ombopagaa e'ỹ re. Ha'e gui ivendeare kuery ma aipoe'i 'rã okuapy: "Tomboeteta SENHOR, mba'eta aỹ arekopa 'rã", he'i. Vexa'i re opena aguã omoĩ mbyre voi noendui okuapy omboaxya.

⁶ Ha'e rami ae avi xee voi namboaxyvei ma 'rã kova'e yvy re ikuai va'e — he'i SENHOR. — Ha'e rami vy peteĩ-teĩ amboaxapa 'rã irũ kuery ha'e huvixave po py. Ha'e ramo ha'e va'e kuery ma kova'e yvy regua omoingo axy teĩ xee ndaraa jepei 'rã ipo'akaa gui.

⁷ Epena ha'vy vexa'i kuery ojuka pyrã ikuai va'e, vexa'i mboae gui iporiaukueve'i va'e re — he'i.

Ha'e ramo xee araa moko'i vyvra'i. Peteĩ ma amboery "Nhomboaxy aguã", ha'e rã amboae ma "Peteĩ rami nhomoingo aguã." Ha'e rami py apena aikovy vexa'i kuery re.

⁸ Ha'e gui peteĩ jaxy pyve amoxẽ mboapy avakue opena va'erã omoĩ mbyre. Ha'e rami teĩ ndaropo'akavei ma vexa'i kuery. Ha'e kuery voi ndaxerayvuvei.

⁹ Ha'e ramo xee aipoa'e ha'e kuery pe:

— Napenavei ma 'rã peẽ kuery re. Pemanoxe va'e pemano tema. Pekaanhyxe va'e ma pekanhy tema. Ha'e gui penerembyrekue ma peteĩ-teĩ 'rã pe'u peneirũ kuery ro'okue ae — ha'e.

¹⁰ Ha'e rami vy vyvra'i "Nhomboaxy aguã" amboery va'ekue ajopy vy amopẽ, ambovaipa aguã vyvy regua ha'e javi areko aguã ajapo va'ekue.

¹¹ Ha'e va'e árave ambovaipa. Ha'e rã vexa'i poriaukue'i xerexa vy oikuaa okuapy SENHOR ayvu rupi ae ri ty ajapo ra'ea.

¹² Ha'e gui xee aipoa'e vexa'i kuery pe:

— Peẽ kuery pe ha'eve ri ramo peme'ẽ ha'vy amba'eapoague repy. Ha'e rami e'ỹ vy tove ri — ha'e. Ha'e ramo xevy pe opeja okuapy trinta hatã'i va'e prata guigua amba'eapoague repyrã.

¹³ Ha'e ramo SENHOR aipoe'i xevy:

— Hatã'i va'e emombopa ke nhae'ũ re omba'eapo va'e pe, remba'eapoague repyrã mbovy rei e'ỹ ome'ẽ rire — he'i. Ha'e ramo trinta hatã'i va'e prata guigua ajopy vy araa SENHOR pegua oo py, nhae'ũ re omba'eapo va'e oĩ va'e peguarã.*

¹⁴ Ha'e gui vyvra'i mboae ju amopẽ avi, "Peteĩ rami nhomoingo aguã" 'epy va'e, Judá ha'e Israel kuery joegua rami ve'ỹ ikuai aguã.

Vexa'i re o'arandua rupi e'ỹ opena va'e re ijayvuague

¹⁵ Ha'e gui SENHOR aipoe'ive ju xevy:

— Aỹ ma ndejeupe guarã eru vexa'i re o'arandua rupi e'ỹ opena va'e rembiporu,

¹⁶ mba'eta ne'xa, ijyvy re peteĩ amoi 'rã joe opena va'erã teĩ ha'e va'e ma ndoikuaa potai 'rã omano rai'i ma okuapy va'e re, okanhygue ndoekai 'rã, ijaipa va'e noipoanoi 'rã, neĩ hexaĩ va'e nomongarui 'rã guive. Ha'e rami 'rãgue py ho'u 'rã oikovy ikyrakueve ro'o, ipypã voi omboi 'rã.

¹⁷ Nda'evei ete 'rã o'arandua rupi e'ỹ opena, ha'e mymba kuery oejapa ovy va'ekue pe. Mba'eta ha'e va'e jyva ma oikyxĩa 'rã kyxe py, hexa oiporu kuaa regua rupi avi oikyxĩa 'rã. Ha'e ramo ijyva ipirupa 'rã, hexa oiporu kuaa regua voi oguepa 'rã.

12

Jerusalém pygua kuery SENHOR ogueraa jepe aguã re ijayvuague

¹ Po rami SENHOR ijayvu Israel kuery rovai. SENHOR yva pyoare, yvy nhonoare ha'e avakue re inhe'erã omoĩ va'ekue aipoe'i:

² — Ne'xa, Jerusalém tetã ma xee ajapo 'rã peteĩ karo ha'e javi regua ijyvýry ikuai va'e oy'u aguã, ha'e rami vy inhakanhymba aguã, ha'e kuery Jerusalém tetã ojokopa rire, Judá yvy guive.

³ Ha'e va'e ára ma Jerusalém tetã ajapo 'rã peteĩ ita ipoyi ete va'e, ha'e javi regua kuery pe. Ha'e ramo ha'e va'e oupi va'e rei oiko axy ete 'rã. Mba'eta yvy jave regua ha'e javi 'rã ono'õmba okuapy Jerusalém re opu'ã aguã.

⁴ SENHOR aipoe'i:

— Ha'e va'e ára ma amoingo axy 'rã kavaju kuery nhemondy gui rive, ha'e rã hi'árygua kuery ma akã porã ve'ỹ rupi 'rã amoingo axy. Aipe'a 'rã Judá kuery rexa, ha'e yvy regua kuery rymba kavaju rexa voi amboguepa avi 'rã.

⁵ Ha'e ramo Judá pygua huvixa kuery ma oexa'ã 'rã: "Aỹ ma Jerusalém pygua kuery ha'e javi ma SENHOR ixondaro reta va'e nguete re vy imbaraete 'rã okuapy", he'i 'rã.

⁶ Mba'eta ha'e va'e ára ajapo 'rã Judá pygua huvixa kuery tapyĩ yxakã guýry hendy va'e rami. Ajapo 'rã takua ryxa mba'emo 'ygue hendy va'e rami ikuai aguã rami. Mba'eta oiporu kuaa regua ha'e oiporu kuaa e'ỹa rupi ha'e kuery omokanhymba 'rã ijyvýry ikuai va'e regua ha'e javi. Ha'e ramo Jerusalém pygua kuery ma Jerusalém tetã py oikoague py ae ju 'rã hekoa.

⁷ Judá regua rekoa ikuai va'e ranhe 'rã SENHOR ogueraa jepe, Judá kuery áry gui Davi ramymino kuery ha'e Jerusalém pygua kuery onhemboyvate e'ỹ aguã.

⁸ Ha'e va'e ára SENHOR opena 'rã Jerusalém pygua kuery re. Ha'e ramo ha'e pygua ikangykueve va'ekue ma Davi rami 'rã imbaraete, ha'e rã Davi ramymino kuery ma Nhanderuete rami 'rã imbaraete, mba'eta ha'e kuery renonde SENHOR guigua anjo oo 'rã.

⁹ Ha'e va'e ára guive amboypy 'rã amomba aguã ha'e javi regua Jerusalém tetã re opu'ã aguã ou va'ekue.

Jerusalém pygua kuery ojeko rerovapa aguã re ijayvuague

* 11:13 Profeta hetarã kuery nombovarei vy trinta hatã'i va'e ete'i ome'ẽ okuapy ixupe, escravo repy rami rive (Êxodo 21.32). Ha'e gui Jesus oiko jave hemimbo'e Judas ombo'a uka ramo ixupe ha'e rami ae avi opagaa (Mateus 26.14-16, 27.3-10).

¹⁰ — Ha'e gui Davi ramymino kuery ha'e Jerusalém pygua kuery re ambou 'rā Nhe'ē amboaxya rexa ukaarā, xevy pe ju ha'e kuery ojavukai aguā rami ojapo va'erā. Ha'e ramo ha'e kuery oexa ju 'rā oipyxo va'ekue. Ha'e va'e re ipy'a vai 'rā okuapy gua'y pete'i va'e re ipy'a vai va'e rami, hexe ojae'o 'rā gua'y jypy guare re ojae'o raxa va'e rami.*

¹¹ Ha'e va'e ára Jerusalém tetā py heta ete 'rā ikuai ojae'o va'e, Megido vvyugua re Hadade-Rimom py ojae'ogague rami.

¹² Ha'e rami vvy ovvy ha'e javi rupi ojae'o 'rā okuapy, pete'i-te'i oo pygua kuery ikuai py ae. Ha'e rami vvy Davi ramymino kuery ma ha'e kuery ae'ia py 'rā ojae'o, ta'yxy kuery voi ha'e kuery ae'ia py ae, Natā ramymino kuery ma ha'e kuery ae'ia py ae, ha'e gui ta'yxy kuery voi ha'e kuery ae'ia py ae ju 'rā ojae'o okuapy,

¹³ ha'e gui Levi ramymino kuery ma ha'e kuery ae'ia py ae, ta'yxy kuery ma ha'e kuery ae'ia py ae, Simei ramymino kuery ma ha'e kuery ae'ia py ae, ta'yxy kuery voi ha'e kuery ae'ia py ae 'rā ojae'o.

¹⁴ Ha'e gui amboae oo pygua kuery voi ha'e rami ae tema 'rā ikuai. Pete'i-te'i oo pygua kuery ha'e kuery ae'ia py ae ojae'o, ta'yxy kuery voi ha'e kuery ae'ia py ae ju 'rā ojae'o okuapy.

13

Mba'emo ra'angaa ha'e profeta kuery ramigua rive oipe'apaa aguā re ijavyuague

¹ Ha'e va'e ára ma ojekuaa 'rā pete'i yvu Davi ramymino kuery ha'e Jerusalém pygua kuery ha'e javi pe, ojevavyague ha'e iky'apaa gui oiky'a'o va'erā.

² Mba'eta SENHOR ixondaro reta va'e aipoe'i: — Ha'e va'e ára ma ijyvy gui amokanhymba 'rā mba'emo ra'angaa rery ha'e javi, ha'e va'e re rive na'ima'endu'aavei aguā. Ijyvy gui aipe'a avi 'rā profeta ramigua kuery, nhe'ē vai guive.

³ Ha'e gui xapy'a rei amongue onhemoingo 'rā profeta ramigua. Ha'e ramo ha'e va'e pe tuu ha'e ixy imbotujaare kuery ae aipoe'i 'rā: “Nda'evei reikoveve aguā, SENHOR ayvu rupi merami rive ndeapu rire”, he'i 'rā okuapy. Ha'e rami vvy tuu ha'e ixy imbotujaare kuery ae 'rā ojuka profeta ramigua rive onhemoingo rive.

⁴ Ha'e va'e ára ma profeta kuery pete'i-te'i oximba rei 'rā oexa ra'uague rive omombe'uague re. Ha'e rami vvy nhombotavya rupi nonhemondevei ma 'rā mba'emo rague py.

⁵ Ha'e rami 'rāgue py aipoe'i 'rā: “Xee ma profeta e'y aiko, ama'et'ya rupi rive xee aiko va'e. Mba'eta xekunumi guive escravo-rā xejoguaa va'ekue”, he'i 'rā.

⁶ Ha'e gui xapy'a rei ixupe amongue oporandu 'rā: “Mba'exa'vy tu ndepo re kyxīague oī?” he'i ramo ombovai vvy “Kyxīague xere oī va'e ma xeirū kuery ro py ai jave xekyxīa rive”, he'i rive 'rā.*

Nhanderuete remimbou joe opena va'e ojukaa aguā re ijavyuague

⁷ Ha'e gui SENHOR ixondaro reta va'e aipoe'i:

— Ha'e gui ndee kyxe, epu'ā ke xeremimbou xea katygua ete joe opena va'e rovai. Ejuka ke joe opena va'e. Ha'e ramo hymba vexe'i kuery ma oaimba 'rā.[†] Mba'eta xepo aupi 'rā vvyīgueve'i rovai — he'i.

⁸ SENHOR aipoe'i:

— Ijyvy ha'e javi rupi mboapy ikuai nhavō py mokō-mokōi ojukaa kuerei 'rā, okanhy ete 'rā. Ha'e rā mboapya va'e regua ma oikoveve 'rā.

⁹ Mba'eta mboapya va'e regua ma ajapo 'rā tata rupi oaxa aguā rami. Ha'e rami vvy aiky'a'o 'rā prata oiky'a'o oami, aa'anga 'rā ouro oa'angaa rami. Ha'e ramo mae ma ha'e kuery ojavukai 'rā xerery rupi, ha'e ramo xee aendu 'rā. Ha'e kuery pe “Xevyguā” ha'e 'rā. Ha'e rā ha'e kuery ma “ SENHOR ae ma Xeruete” he'i 'rā okuapy.

14

Jerusalém tetā pygua kuery ha'e imbojexavaia kuery moingo axyarā ou aguā re ijavyuague

¹ Ne'exa, ovaē ma ouvvy SENHOR ára, mba'emo pereko va'ekue omboja'opaa aguā pendekuaia mbyte gui.

² Mba'eta vvy regua ha'e javi amono'ōmba 'rā imbouvy Jerusalém tetā re opu'ā aguā. Ha'e ramo ha'e kuery ipo'aka ete 'rā tetā re. Ha'e rami vvy mba'emo oipe'apa 'rā oo ikuai va'e gui, kunhague ikuai va'e ma oguero'apaa rive 'rā guive. Tetā pygua kuery mbytekue peve 'rā ogueraa escravo-rā, ha'e rā hembyrekue ma tetā gui ndoipe'aa'i 'rā.

³ Ha'e gui ma SENHOR oē 'rā ouvvy vvy regua kuery rovai opu'ā aguā, joe opu'ā va'e rami ae.

⁴ Ha'e va'e ára ma SENHOR hi'āi 'rā Jerusalém regua kuaray oua katy Oliveiras vvyty oī va'e áry. Ha'e ramo ha'e va'e vvyty ma xapy'a 'rā ovo mbyte rupi, kuaray oua katy gui oika katy peve. Ha'e rami vvy mbyte rupi ojekuaa 'rā pete'i vvy'ā ugua, mba'eta vvyty mbytekue oja'o 'rā kuaray ijapu'a'ia katy, ha'e rā hovaikue ma kuaray puku-a katy 'rā oo.

⁵ Ha'e ramo peē kuery pejava 'rā peovy xevyguā vvy'ā ugua rupi, mba'eta Azal peve 'rā oo vvy'ā ugua. Tá, pejava 'rā Judā pygua huvixa Uzias oī jave py vvy rryri oiko va'e gui ojavapaague rami. Ha'e gui mae ma ou 'rā SENHOR Xeruete, ha'e hupive iky'a e'y va'e kuery ha'e javi voi.

* 12:10 Kova'e ayvu rupi ma João 19.37 py Jesus reko re ijavyu. Ha'e gui raka'eve rā judeu kuery hexe vvy ojeko rerovapa 'rā (Romanos 11.25-27; Apocalipse 1.7). * 13:6 Amongue py profeta ramigua rive gueko rami vvy onhekyximba 'rā nguete ramigua pe ojavukai reve (1 Reis 18.27-28). Mba'emo rague py onhemonde 'rā guive, profeta Elias rami avi (2 Reis 1.7-8). † 13:7 Kova'e ayvu rami ae oiko avi Jesus re (Mateus 26.31 ha'e Marcos 14.27).

⁶ Ha'e va'e ára ma ndoikoi 'rã hexakãa, yro'y atã anho 'rã itui.

⁷ Ha'e va'e ára ma peteĩ'i 'rã, SENHOR anho oikuaa va'e regua. Ndoikoi 'rã ára, neĩ pytũ ma voi noĩ 'rã. Ha'e rami teĩ ka'aru peve ojekuaa 'rã hexakãa.

⁸ Ha'e va'e ára ma Jerusalém tetã guive oxyry 'rã ovy yy imarã e'ỹ va'e. Ha'e gui yy oja'o vy amongue oxyry 'rã ovy kuaray oua katy ye'ẽ oĩ va'e katy, ha'e rã amboae ma kuaray oikua katy ye'ẽ oĩ va'e katy 'rã oxyry ovy. Oxyry riaa 'rã, kuaray puku jave e'ỹ vy yro'y jave teĩ.

⁹ Ha'e gui SENHOR ae 'rã oĩ huvixave yvy jave rupi opena va'e. Ha'e va'e ára ma peteĩ'i anho 'rã oiko SENHOR, ha'e peteĩ'i avi 'rã hery oĩ.

¹⁰ Ha'e gui ma yvy ha'e javi rupi opyta 'rã yvy joja reia Jerusalém regua kuaray oua katy Geba ha'e Rimom yvýry rami. Ha'e rã Jerusalém tetã ma yvateve 'rã oiny, oia py ae 'rã ikuaia guive, Benjamim rokẽ oia guive jypygua okẽ peve, ha'e okẽ kora ojerea rupi oĩ va'e peve, ha'e gui Hananel regua torre oia guive huvixa pegua uva onhamiaty peve ju.

¹¹ Ikuaiia 'rã ha'e py ae. Nduveĩ 'rã ayvu vai imbovaiparaã. Oĩ porãmba 'rã Jerusalém tetã.

¹² Ha'e rã yvy regua kuery Jerusalém tetã re opu'ã va'ekue ma po rami 'rã SENHOR omoingo axy. Ho'okue hu'ũmba 'rã, opu'ã teri ho'amy reve teĩ. Hexa voi hu'ũmba 'rã okua py oĩ reve, ha'e inhapekũ hu'ũmba avi 'rã ijuru py oĩ reve.

¹³ Ha'e kuery ikuaia py SENHOR ombou avi 'rã opa marãgua imondyipa reiarã. Ha'e rami vy peteĩ-teĩ oirũ kuery po re ojopy vy oguero'a 'rã, peteĩ-teĩ opu'ã 'rã oirũ kuery re ae.

¹⁴ Judá kuery voi Jerusalém tetã oepy vy opu'ã 'rã okuapy joe. Ha'e rami vy omboatypa 'rã ha'e'i rupi yvy regua ikuai va'e mba'emo oguereko va'ekue, ouro ha'e prata guigua, ao mbovy e'ỹ ete guive.

¹⁵ Ha'e rami ae omoingo axy avi 'rã hymba kuery kavaju, mburika, camelo, mburika'i, ha'e ikuaia rupi guymba oguereko va'ekue ha'e javi.

“Nhanderute pegua tetã py iky'a e'ỹ va'e anho 'rã oĩ” he'iague

¹⁶ Ha'e gui ma yvy regua kuery Jerusalém tetã re opu'ã va'ekue rembyrekue ma ma'etãa nhavõ 'rã ojevuy jogueruvy omboete aguã huvixave SENHOR ixondaro reta va'e, ha'e ngaru oguy'i pygua ára ikuai aguã guive.

¹⁷ Ha'e gui xapy'a rei amongue regua ndooi 'rã Jerusalém py huvixave SENHOR ixondaro reta va'e omboete aguã. Ha'e rami rã ha'e kuery yvy re nda'okyĩ 'rã.

¹⁸ Xapy'a rei Egito pygua kuery mba'e ngaru oguy'i pygua py ndooi ramo ha'e kuery yvy re nda'okyĩ 'rã. Ha'e kuery arí ou 'rã imoingo axyarã, yvy regua ndooi va'ekue arí SENHOR ombou va'e ramigua ae.

¹⁹ Ha'e rami ae 'rã omoingo axy Egito pygua kuery ha'e yvy regua ha'e javi, ngaru oguy'i pygua py ndooi va'ekue.

²⁰ Ha'e gui ha'e va'e ára ma kavaju xã mbojeguaa oĩ va'e re voi omboparaa 'rã imoiny “ SENHOR pegua iky'a e'ỹ va'e” he'ia. SENHOR pegua opy oja oiporua va'e rei iky'a e'ỹ va'e avi 'rã, altar yvýry hy'a guaxu oiporua va'e rami ae.

²¹ Tá, Jerusalém tetã rupi ha'e Judá yvy re oja ikuai va'e ma iky'a e'ỹ va'e meme 'rã ikuai SENHOR ixondaro reta va'e pegua. Ha'e ramo mba'emo ome'ẽ va'erã ogueru va'e kuery ha'e javi ma oja oĩ va'e rive ojou vy ha'e va'e py ae 'rã ombojy SENHOR pegua xo'o. Ha'e va'e ára ma SENHOR ixondaro reta va'e pegua oo py noĩvei 'rã mba'emo vendea rupi rive ikuai va'e.

Malaquias ayvu oĩa Malaquias ayvu oĩa

Israel kuery Jerusalém tetã py ikuai va'e templo omoatyrõ ju teĩ Nhanderue te ojapo uka va'ekue rupi e'y teri ikuai. Ha'e kuery pe profeta Malaquias ijayvu ojeko rerova aguã, mba'eta Senhor ára ou oiny ramo. "Senhor ixondaro reta va'e aipoe'i: 'Ou ma oiny ára tatakua rami haku raxa va'erã. Onhembovyate rei ha'e teko vai rupi ikuai va'ekue okaipa 'rã mba'emo pirukue rami rive, mba'eta ára ou ramo okaipa 'rãe. Ha'e rami vy ndopytai 'rã hapokue neĩ hi'ygue. Ha'e rã peẽ kuery xerery pendu vy xerenonde pejererokyjea rupi pendekuai va'e pe ma kuaray rami 'rã ojekuaa teko porã. Hexakã rupi 'rã ou nhomoingo porãarã. Ha'e ramo pepo-pepo reve 'rã peẽmba, vaka ra'y kuery kora gui oẽ va'e rami avi. ... Ha'e gui Senhor ára tuvixa ha'e ijavaete va'e ovaẽ ta ramo pendea py ambou ju 'rã profeta Elias. Ha'e va'e ma oguerova 'rã tuu kuery py'a re oĩ va'e, gua'y kuery oayvu ju aguã rami, ha'e ta'y kuery py'a oguerova avi 'rã nguu kuery oayvu ju aguã. Ha'e rami e'y ramo aju jevy vy yvy amomba 'rã ayvu vai py' ", he'i (4.1-2, 5-6).

Ha'e rami py Antigo Testamento ijapy. Ha'e va'e rire 400 ma'etỹ rivvyvia py ma Jesus Cristo ou.

Jacó oayvua rami SENHOR ijayvuague

¹ Kova'e ayvu ma Malaquias pe SENHOR omombe'u uka va'ekue Israel kuery rovai.

² — Xee ma roayvu va'e — he'i SENHOR.

Ha'e rã peẽ kuery ma peporandu:

— Mba'exa vy tu ndee orerayvu?

SENHOR ombovai:

— Esaú ma Jacó ryke'y e'y teve raka'e? Ha'e rami teĩ Jacó ae ayvu,

³ ha'e rã Esaú re ma ndaxea'ei, ha'e rami vy ha'e kuery rekoarã vvyty ome'ẽ mbyre ambovaipa vy amboaxa raka'e jagua-tuvy nhe'ẽ tekoa e'ỹa rupigua pe rive — he'i.*

⁴ Ha'e gui ma xapy'a rei Edom pygua kuery* aipoe'i 'rã: "Kore nhanderekoa SENHOR ombovaipa teĩ oityague py ae ju 'rã jajapopa", he'i 'rã okuapy.

Ha'e rã SENHOR ixondaro reta va'e ma aipoe'i: "Ha'e kuery ojavopa teĩ xee aitypa ju 'rã. Ha'e rami rire Edom vvy omboerya 'rã: 'Yvy teko vai renda', ha'e 'Ha'e kuery pe SENHOR ipoxy raka'e rã peve' 'ea 'rã.

⁵ Ha'e nunga penderexa py ae 'rã pexa. Ha'e vy 'SENHOR tu ipo'akapa va'e rima ra'e, Israel kuery ikuai rupi anho e'y', peje 'rã", he'i.

Sacerdote kuery pe SENHOR ijayvu eteague

⁶ SENHOR ixondaro reta va'e aipoe'i:

— Ta'y kuery ikuai va'e omboete 'rã nguu, ha'e tembiguai kuery voi omboete 'rã herekoa. Ha'e rami teĩ xee ri Penderu aiko teĩ mamu tu oĩ xemboetea? Xee ri Pendererekoa ae avi aiko teĩ mamu tu ha'vy oĩ xemboetea? Mba'eta peẽ sacerdote kuery pendekuai va'eri xerery napemboetei va'e.

— Ha'e rã peẽ kuery ma peporandu 'rã: "Mba'e nunga py tu noromboetei ri nderery?" peje 'rã.

⁷ — Ambovai: "Mba'eta mbojape ha'eve'y va'e rive peme'ẽ xeivygua altar áry", ha'e.

— Ha'e gui peporanduve tema: "Mba'e nunga py tu ndee noromboetei?"

— Ambovai: "Mba'eta aipopeje: 'SENHOR pegua mesa ma ojou vaipy' pejea py.

⁸ Mba'eta xeivy pe peme'ẽ 'rã mymba oma'ẽ e'y va'e. Ha'e nunga rive peru ramo nda'evei e'y teve? Ha'e rami e'y vy hetyma rovai va'e, e'y vy imba'eaxykue peru ramo nda'evei e'y avi teve? Xapy'a rei penderuvixa pe ha'e ramigua peme'ẽ va'e rire ha'e va'e nda'u pendejou porã vy pendererovy'a 'rãgue? Any", he'i SENHOR ixondaro reta va'e.

⁹ — Aỹ ma pejapukai ke Penderuete pe penemboaxy nho aguã. Ha'e rami avi namigua pendepo py peme'ẽ va'erã peru ramo xee rojou porã 'rã teve? — he'i SENHOR ixondaro reta va'e.

¹⁰ — Ha'eveve 'rãgue peẽ kuery va'e regua xero rokẽ pembotypa va'e rire, xeivygua altar áry tata napemoendy rivevei aguã. Mba'eta xee ma ndoroguerovy'ai ruxã'i ma voi. Ha'e rami vy ndajopyi 'rã guive peme'ẽ va'erã pendepo py peru va'e — he'i SENHOR ixondaro reta va'e.

¹¹ — Ha'e rã vvy regua ikuai rupi ma xerery omboete 'rã okuapy, kuaray oẽa katy guive oikea katy peve. Opa rupi xeivy oapy 'rã heaku porã va'e, ha'e iky'a e'y va'e anho 'rã ogueru ome'ẽ va'erã. Mba'eta xerery omboetea 'rãe vvy regua kuery ikuai rupi — he'i SENHOR ixondaro reta va'e.

¹² — Ha'e rã peẽ kuery ma pemongy'apa xerery, mba'eta aipopeje: " SENHOR pegua mesa ma ha'eve'y va'e, ha'e hi'áry tembi'u nhamẽ'ẽ va'e voi ojou vaipy", peje.

¹³ Aipopeje avi: "Ai nhanekane'õ rive ma!" peje vy xemboetea rupi e'y pendekuai. Mba'eta oixu'upa pyre peme'ẽ, hetyma rovaikue, ha'e imba'eaxykue guive. Namigua rive peme'ẽ ramo xee ajopy 'rã ri ty'y pendepo gui? Any — he'i SENHOR ixondaro reta va'e.

¹⁴ — Ijayvu vaipy toiko xembotavypaxe va'e, guymba hexaĩmba va'e ogueroko vy ha'e va'e ae SENHOR pe ome'ẽ aguã re ijayvu teĩ hekovia ivaikue'i rive ome'ẽ va'e. Mba'eta xee ma huvixave yvate ete va'e aiko.

* 1:3 Romanos 9.13

* 1:4 Edom ma Esaú rery mboae (Gênesis 25.30). Ha'e rami vy Edom pygua kuery ma Esaú ramymino ikuai. Ha'e rã

Israel kuery ma Jacó ramymino ikuai.

Ha'e ramo vvy regua kuery ma xerery oendu vy oikuaa pavê 'rã ijavaete va'e aikoa — he'i SENHOR ixondaro reta va'e.

2

Sacerdote kuery ombopaga aguã re ijayvuague

¹ SENHOR ixondaro reta va'e aipoe'i:

— Aÿ peê sacerdote kuery, pendevy pe xeayvu mba'emo ajapo uka vy.

² Ha'e gui napendu potai, ha'e pendepy'a re xerery pemboete aguã napemoi ramo pende'ary ambou 'rã ayvu vai. Rogueroayvu porã 'rãgue py xeayvu vai 'rã pendevy. Xeayvu vai ae ma guive, ha'e rami aguã pendepy'a re napemoi rive.

³ Ne'exa, peneramymino kuery pe voi xeayvu 'rã, ha'e penderova re amombo 'rã mymba peme'ê va'erã peru va'ekue repoxi, ha'e nunga reve pendereraapaa avi aguã.*

⁴ Ha'e ramo peikuaa 'rã Levi ramymino kuery pe xereve guarã ajapo va'ekue oi riae aguã ajapo uka po rami — he'i SENHOR ixondaro reta va'e.

⁵ — Mba'eta Levi ramymino kuery pe xereve guarã ajapo va'ekue ma tekove ha'e ikuai porã aguã regua. Ha'e va'e mokoïve ame'ê xerenonde ojererokyjea rupi ikuai aguã. Ha'e ramo ha'e kuery ma xerenonde ojererokyjea rupi oryryi ete karamboae xerery oendu vy.

⁶ Ijuru py oi va'ekue anhetê ete rupi nhombo'ea, ha'e rã ha'eve e'ÿa rami joguereko aguã ma noi va'ekue ijuru py. Xereve petei rami ikuai va'ekue teko porã rupi. Ha'e rami vy heta va'e kuery ombo'e ojevavya gui ojepe'a aguã rami.

⁷ Mba'eta sacerdote kuery ma ojuru py 'arandu re ijayvu aguã rami ikuai, ha'e kuery juru gui avakue oendu aguã o'arandurã, mba'eta SENHOR ixondaro reta va'e ayvu reraa ikuai.

⁸ Ha'e rã peê kuery ma ha'e va'e tape gui pepepe'a vy penhomb'o'ea rupi heta ma pejapo ojevavy aguã rami. Pepepe'a rive Levi ramymino kuery pe xereve guarã ajapo va'ekue gui — he'i SENHOR ixondaro reta va'e.

⁹ — Ha'e nunga rupi ae xee rojapo ojou vaipy ha'e omboetepy e'ÿ pendekuai aguã rami heta va'e kuery renonde, tape aea va'ekue rupi napendekuai, ha'e lei rupi e'ÿ, ha'eve'ÿa rami anho pejoguereko rive — he'i.

Nhanderaxy kuery pe jajevy e'ÿ aguã re ijayvuague

¹⁰ Nhanderu ma petei'i va'e'ÿ ri ty'y oiko? Nhanderuete e'ÿ teve nhanemoingo pavê raka'e? Mba'e re tu ha'vy anhetê rupi e'ÿ jaguereko? Ha'e rami vy nhambovaipa nhaneramoï kuery pe Nhanderuete guexeve guarã ojapo va'ekue.

¹¹ Mba'eta Judá kuery ma ojeroviapy rupi e'ÿ ikuai vy ojegarupy ojapo Israel vvy re, Jerusalém tetã py guive. Mba'eta SENHOR pegua ooiky'a e'ÿ va'e oguerovy'a ete va'e ma Judá kuery omongy'apa vy omenda tuuete ramigua mboae mboetea kuery re.

¹² Ha'e gui avakue ha'e rami ete ojapo va'e rei SENHOR omokanhymba 'rã Jacó kuery ikuaiia gui, SENHOR ixondaro reta va'e pe mba'emo ome'ê va'eri.

¹³ Pova'e nunga pejapo avi va'e. Mba'emo peme'ê va'e re ha'e noma'ëvei, pendepo gui ndojopyvei ndoguerovy'avei vy. Ha'e ramo SENHOR pegua altar peja'o 'rã pendexay py. Peja'o reve penepoaê rei pekuapy.

¹⁴ Ha'e rami vy peporandu guive vy “Mba'e re tu nanhandererovy'avei?” peje. Mba'eta SENHOR oikuaa porã nekunumi vy ndera'yxyrã reraa va'ekue reve petei rami pejoguereko aguã pejapoague. Pendera'yxy kuery ma peneirũ oiko, petei rami pendekuai aguã pejapoague regua tei ha'e kuery pe pejevavy.

¹⁵ SENHOR petei rami e'ÿ teve ava ha'e kunha omoingo raka'e, petei'i nhe'ê omoi reve? Mba'erã tu petei rami omoingo raka'e? Mba'eta oipota ta'y kuery ha'e hamymino kuery ixupe ete ikuai. Ha'e nunga rupi peikuaa pota pendejee ae. Avave rei tojajevy eme gua'yxyrã kunumi jave ogueraa va'ekue pe.

¹⁶ Mba'eta SENHOR Israel kuery Ruete aipoe'i: “Xee ndajou porã joegui opoi va'e, nei joguero'aa rupi onhemongy'apa rei va'e”, he'i SENHOR ixondaro reta va'e. Ha'e nunga rupi peikuaa pota pendejee ae, joupe pejevavy e'ÿ aguã.

SENHOR ou jevy e'ÿ mbove ixupegua Anjo ojekuaa aguã re ijayvuague

¹⁷ Peê kuery pemomboriau SENHOR pendeayvu py. Ha'e ramo aipopeje: “Mba'e nunga py tu romomboriau?” peje. Mba'eta pendejeupe ae aipopeje: “ SENHOR omboeko porã 'rã teko vai apoa kuery, oguerovy'a guive”, peje. Ha'e rami e'ÿ vy “Mba'exa tu oiko Nhanderuete nhombopaga aguã?” peje rive.

3

¹ SENHOR ixondaro reta va'e aipoe'i:

— Xerenonde rupi amondouka 'rã xeayvu reraarã tape oguereko katu aguã. Ha'e gui ma Senhor pearõ pekuapy va'e ou xapy'a 'rã ojepeguia templo py. Ha'e va'e ma xeremimbou, xereve guarã ajapo va'ekue kuaa ukaarã ambou va'e, peipota va'e ae. Ne'exa, ou ma oiny.*

² Ha'e rami avi mava'e tu oguero'op'aka 'rã oua ára? Ha'e ojekuaa ramo mava'e tu opyta 'rã ho'amy? Mba'eta tata ouro ky'a'oa rami oiko, kavõ ao joia rami guive.

* 2:3 Ha'e kuery iky'apa va'e ikuaiia rami ijayvu, mba'eta mymba repoxi ma oapya aguã py 'rã heraa (Levítico 16.27).

* 3:1 Mateus 11.10, Marcos 1.2, Lucas 7.27

³ Mba'eta openaaty py oguapy 'rã joky'a'o aguã prata omboyku reve oiky'a'oa rami. Ha'e vy oiky'a'o 'rã Levi ramymino kuery, ouro ha'e prata rami ete 'rã oiky'a'o. Ha'e ramo mae SENHOR pe ha'e kuery ogueru 'rã ha'evea ramigua ome'ê va'erã.

⁴ Ha'e ramo SENHOR oguerovy'a 'rã mba'emo Judã ha'e Jerusalém pygua kuery ome'ê va'e, yma guare rami, ára jypy guare rami.

⁵ — Pendere aikuaa pota vy 'rã aju pendea py. Ha'e rami vy are'y'i re xeayvu 'rã imba'evyky va'e kuery rovai, itavy rei va'e, oura rive-rive va'e, omba'eapo va'e pe ha'eve'yã rami opaga va'e kuery, imeve'y va'e ha'e tyre'y moingo axya, amboae yvy guigua rereko axya, ha'e xerenonde ojererokyje rupi e'y ikuai va'e ha'e javi rovai — he'i SENHOR ixondaro reta va'e.

Dízimo ha'e mymba nome'ê porã okuapya py imonda rã ijayvuague

⁶ — Mba'eta xee SENHOR ma ojeko rero va'e'y'aiko. Ha'e nunga rupi peẽ Jacó ramymino kuery, napekanhyi.

⁷ Mba'eta peneramoĩ kuery ikuai guive ma voi pejepe'a xeayvu aea va'ekue gui, ndapejapoi ete. Pejevy ju ha'vy xea py, ha'e ramo xee voi ajevy ju 'rã peẽa katy — he'i SENHOR ixondaro reta va'e.

— Ha'e rami teĩ peẽ kuery aipopeje: “Mba'eta tu rojevy aguã rami roiko?” peje.

⁸ Ha'e rami avi peẽ avakue penemonda 'rã ri ty'y Penderuete gui? Mba'eta peẽ kuery penemonda xegui. Ha'e ramo aipopeje: “Mba'e nunga py tu oremonda ndegui?” peje ramo xee ambovai: “Dízimo ha'e mymba napeme'ê porãia py”, ha'e.

⁹ Xegui penemonda rire ayvu vaipy peiko, peẽ kuery ha'e javi.

¹⁰ Peru ke ha'vy dízimo ha'e javi mba'emo omoĩ porãaty py, xeveygua opy oĩ aguã tembi'u. Xera'ã ke ha'e nunga py — he'i SENHOR ixondaro reta va'e. — Ha'e rami rã yva re janela oĩ va'e aipe'a vy peẽ kuery áry anhoẽ 'rã penemoingo porãarã, oĩmba aguã nda'evei peve.

¹¹ Peẽ kuery re ama'ê vy xeayvu ete 'rã mba'emo aju 'upaa pe, pendeivy gui mba'emo aju oiko rã omomba e'y aguã, uva penhoty va'ekue voi ndai'a ve'y'i aguã — he'i SENHOR ixondaro reta va'e.

¹² — Ha'e gui pendeivy iporã ete ramo pendeivy ha'e javi regua “Ovy'a ete va'e” he'i 'rã okuapy — he'i SENHOR ixondaro reta va'e.

Heko porã va'e ha'e heko vai va'e joo ramigua e'y ikuai re ijayvuague

¹³ SENHOR aipoe'i:

— Pendeayvua ma nda'evei ete xevy. Ha'e rami teĩ peẽ ma aipopeje: “Mba'eta tu oreayvu ndere?” peje.

¹⁴ Mba'eta aipopeje: “Nda'eve ranhei Nhanderuete pe nhandekuaia. Mba'e 'rã tu jajou ijayvua jajapo vy, ha'e SENHOR ixondaro reta va'e renonde rupi jajae'o reve nhandekuai vy?

¹⁵ Mba'eta nhande jaikuaa onhembovyate rei va'e kuery ovya' reia. Ha'e kuery opa marã rei ikuai teĩ ma ikuai porã. SENHOR re voi opu'ã va'eri oo jepe”, peje rive.

¹⁶ Ha'e rã SENHOR renonde ojererokyje rupi ikuai va'e ma jomeme ijayvu okuapy. Ha'e ramo SENHOR oendu pota. Ha'e rami vy SENHOR renonde peteĩ kuaxia omboparaa, henonde ojererokyje ha'e hery re ima'endu'aa rupi ikuai va'e rery oia, ha'e kuery re avi ima'endu'aa riaa aguã.

¹⁷ SENHOR ixondaro reta va'e aipoe'i:

— Aikuaa pota aguã ára ovaẽ ramo ha'e kuery ma xeveygua arovy'a ete va'e ikuai 'rã. Ha'e kuery re apena 'rã peteĩ ava gua'y iuxpe ae oiko va'e re openaa rami avi.

¹⁸ Ha'e gui teĩgye ju peikuaa 'rã heko porã va'e ha'e heko vai va'e joo ramigua e'y ikuai, mba'eta Nhanderuete ma ojeupegua kuery ha'e ojeupegua e'y joo rami e'y 'rã ogueroko.

4

Kuaray rami teko porã ojekuaa aguã re ijayvuague

¹ SENHOR ixondaro reta va'e aipoe'i:

— Ou ma oiny ára tatakua rami haku raxa va'erã. Onhembovyate rei ha'e teko vai rupi ikuai va'ekue ma okaipa 'rã mba'emo pirukue rami rive, mba'eta ára ou ramo okaipa 'rãe. Ha'e rami vy ndopytai 'rã hapokue neĩ hi'ygue.

² Ha'e rã peẽ kuery xerery pendu vy xerenonde pejererokyje rupi pendekuai va'e pe ma kuaray rami 'rã ojekuaa teko porã. Hexakã rupi 'rã ou nhomoingo porãarã. Ha'e ramo pepo-pepo reve 'rã peẽmba, vaka ra'y kuery kora gui oẽ va'e rami avi.

³ Ha'e rami vy peypyrõmba 'rã heko vai va'e re, pendeipy guýry tanhimbu rami 'rã ha'e kuery opyta, aikuaa pota aguã ára ovaẽ ramo — he'i SENHOR ixondaro reta va'e.

⁴ — Penema'endu'a ke lei xerembiguai Moisés ombopara va'ekue re. Mba'eta Israel kuery ha'e javi pe aea va'ekue Horebe vyty áry, xeayvua ha'e aipota va'e reve.

⁵ — Ha'e gui xee SENHOR ára tuvixa ha'e ijavaete va'e ovaẽ ta ramo pendea py ambou ju 'rã profeta Elias.*

⁶ Ha'e va'e ma oguerova 'rã tuu kuery py'a re oĩ va'e, gua'y kuery oayvu ju aguã rami, ha'e ta'y kuery py'a oguerova avi 'rã nguu kuery oayvu ju aguã. Ha'e rami e'y ramo aju jevy vy yvy amomba 'rã ayvu vai py.

* 4:5 João Batista ou jave heta va'e kuery onhe'ê rendu va'e rire ma ha'e ae oiko 'rãgue Elias ou ju 'rã va'ekue. Ha'e rami teĩ heta va'e kuery nonhe'ê rendui ramo Elias ou teri aguã rami oiko (Mateus 11.13-14, 17.10-13; Lucas 1.17).

Mateus ayvu porã ombopara va'ekue Mateus ayvu porã ombopara va'ekue

Kova'e kuaxia para rupi Jesus remimbo'e Mateus omboaxa nhandevy arandu iporã va'e, Jesus rekokie omombe'u vy. Yma rupi Jesus ramoĩ kuery ikuai jave, ha'e kuery pe Nhanderueete omombe'u ma voi Jesus ou vy teko vai gui nhandererova aguã. Ha'e rami aguã ma Antigo Testamento py oĩ. Mateus omombe'u Jesus oikoa rupi Nhanderueete ijayvu ma voiague oiko va'ekue. Yma guive Nhanderueete omombe'u uka ma voi nhandereraa jepearã omoĩ vy ombou aguã. Ha'e va'e pe hebreu kuery ayvu py "Messias" 'ea, ha'e rã grego ayvu py ma "Cristo" 'ea. Tery Jesus voi "Jogueraa jepea" 'ea. Ha'e nunga rupi Jesus itui'iaque Mateus omombe'u vy aipoe'i: "Remboery 'rã Jesus, mba'eta ojeupegua kuery ogueraa jepe 'rã heko vaia gui" (1.21b).

Peteĩ regua anho ogueraa jepe aguã e'ỹ Jesus ou, ha'e rã yvy jave re ha'e javi regua. Ha'e rami vy omombe'u ko yvy re Nhanderueete po'akaa ou aguã. Ha'e vy aipoe'i: "Pejeko rerova ke, mba'eta namombyryveĩ ma yva pygua po'akaa ojekuaa aguã" (4.17b). Nhanderueete po'akaa ojekuaa raka'e Jesus ojapo porãa ha'e nhombo'ea rupi ae.

Heta Mateus omombe'u Jesus nhombo'eaque, ha'e mba'emo re ombojoja vy Nhanderueete po'akaa omombe'u porãveague guive. Porombo'ea ikuai va'e gui nhombo'e porã kuaave. Ha'e anho'i ha'eve jaikoa omoexakã aguã Nhanderueete oipotaa rami, Nhanderueete Ra'y ae vy.

Jesus Cristo ramoĩ kuery rery oĩa

Lucas 3.23-38

¹ Kova'e kuaxia re ma oĩ Jesus Cristo ramoĩ ypy kuery rery. Jesus ma Davi ramymino oiko, ha'e Davi ma Abraão ramymino raka'e.

² Abraão ra'y ma Isaque, Isaque ra'y ma Jacó, Jacó ra'y ma Judá ha'e tyvy kuery.

³ Judá Tamar re ta'ya ma Perez ha'e Zerá. Perez ra'y ma Esrom, Esrom ra'y ma Arão,

⁴ Arão ra'y ma Aminadabe, Aminadabe ra'y ma Naassom, Naassom ra'y ma Salmom,

⁵ Salmom ra'y Raabe guigua ma Boaz. Boaz ra'y Rute guigua ma Obede, ha'e Obede ra'y ma Jessé.

⁶ Jessé ra'y ma huvixave Davi, ha'e huvixa Davi ra'y ma Salomão, Urias ra'yxykue pi'a va'e.

⁷ Salomão ra'y ma Roboão, Roboão ra'y ma Abias, Abias ra'y ma Asa,

⁸ Asa ra'y ma Josafá, Josafá ra'y ma Jorão, Jorão ra'y ma Uzias,

⁹ Uzias ra'y ma Jotão, Jotão ra'y ma Acáz, Acáz ra'y ma Ezequias,

¹⁰ Ezequias ra'y ma Manassés, Manassés ra'y ma Amom, Amom ra'y ma Josias,

¹¹ Josias ra'y ma Jeconias ha'e tyvy kuery. Babilônia katy ogueraapaa jave py oiko va'ekue.

¹² Ha'e gui Babilônia katy escravo-rã ogueraapaa ma rirre oiko Jeconias ra'y Salatiel, Salatiel ra'y ma Zorobabel,

¹³ Zorobabel ra'y ma Abiúde, Abiúde ra'y ma Eliaquim, Eliaquim ra'y ma Azor,

¹⁴ Azor ra'y ma Sadoque, Sadoque ra'y ma Aquim, Aquim ra'y ma Eliúde,

¹⁵ Eliúde ra'y ma Eleazar, Eleazar ra'y ma Matã, Matã ra'y ma Jacó.

¹⁶ Ha'e gui Jacó ra'y ma Maria me José. Maria pi'a ma Jesus, Cristo 'epy va'e.

¹⁷ Ha'e rami vy Abraão oiko guive Davi oiko peve ma catorze-kue hamymino ikuai. Ha'e Davi oiko guive Babilônia katy escravo-rã ogueraapaa peve catorze-kue ju ikuai. Ha'e gui Babilônia katy ogueraapaa guive Cristo oiko peve ma catorze-kue ju ikuai.

Lucas 2.1-7

¹⁸ Ha'e gui Jesus itui'iaque ma po rami: José re ixyrã Maria omenda va'erã oikovy jave, joupe ojekuaa uka e'ỹ mbove oguereko'i kyrĩ va'e Nhe'ẽ Ky'a E'ỹ gui.

¹⁹ Ha'e rã imerã José heko porã va'e vy ndoikuaa ukaxei. Ha'e rami vy onhembopy'a ojea aguã avave rei oikuaa e'ỹ re.

²⁰ Ha'e nunga re onhembopy'a oikovy. Ha'e gui oexa ra'u rã ixupe ojexa uka peteĩ anjo Senhor-a guigua. Ha'e vy aipoe'i:

— Davi ramymino José, ekyje eme Maria reraa aguã ndera'yxyrã, mba'eta kyrĩ va'e oguereko'i va'e ma Nhe'ẽ Ky'a E'ỹ guigua.

²¹ Ha'e ramo oikuavã 'rã peteĩ ava'i. Remboery 'rã Jesus, mba'eta ojeupegua kuery ogueraa jepe 'rã heko vaia gui.

²² Ha'e nunga ha'e javi ma ojeupity aguã profeta pe Senhor aipoe'i ukaague:

²³ "Peteĩ kunhataĩ ete'i oiko va'e oguereko'i 'rã kyrĩ va'e, oikuavã 'rã ava'i. Ha'e va'e pe ma 'Emanuel' 'ea 'rã." (Ha'e va'e tery ma "Nhanderueete nhandereve oiko" 'ea).*

²⁴ Ha'e rami rã José okeague gui ovy vy oiko Senhor-a guigua anjo aipoe'iaque rami. Ha'e vy ogueraa gua'yxyrã.

²⁵ Ha'e rami avi oguereko rive ranhe, ava'i oikuavã e'ỹ ja. Ha'e va'e ma omboery Jesus.

¹ Huvixave Herodes oĩ jave, Judéia regua Belém tekoa py Jesus itui'i rire ou amongue imba'ekuaa va'e kuery. Kuaray oua katy gui ou Jerusalém tetã py.

² Ha'e kuery oporandu jogueruvy:

— Mamo tu itui judeu kuery ruvixaverã oiko ramo'i va'ekue? Mba'eta kuaray oua katy roexa karamboae ikuaa ukua jaxy-tata. Ha'e rami vy apy roju romboete aguã — he'i.

³ Ha'e nunga omombe'ua rã huvixa Herodes oendu vy onhemondyi, Jerusalém py ikuai va'e ha'e javive reve.

⁴ Ha'e rami vy oenoĩmba judeu kuery regua sacerdote yvatekueve va'e ha'e kuaxia re nhombo'e va'ety kuery. Ha'e va'e kuery pe oporandu mamo pa Cristo itui'i 'rãa re.

⁵ Ha'e kuery ombovai:

— Judéia regua Belém tekoa py 'rã itui'i, mba'eta po rami oĩ profeta ombopara va'ekue:

⁶ “Ndee Judá yvy regua Belém tekoa, Judá regua tetã tuvixakueve ikuai va'e gui mba'eva py nane'vyvivei, mba'eta ndea gui ae 'rã oiko Joguerokoarã, xevyguia Israel kuery re opena va'erã”, he'i va'ekue.*

⁷ Ha'e nunga Herodes oendu vy imba'ekuaa va'e kuery ju oenoĩ uka ha'e ae'ia py. Ha'e kuery pe oporandu vy oikuaa pota raka'e ete pa jaxy-tata ojekuaa ague re.

⁸ Ha'e gui Belém katy omondouka vy aipoe'i ha'e kuery pe:

— Tapeo, peikuaa pota porã ava'i reko re. Pejou vy ke pemombe'u uka xevy, xee voi aa aguã amboete vy — he'i.

⁹ Ha'e ramo huvixa ayvu ha'e kuery oendupa vy oje'oi. Ha'e gui jaxy-tata kuaray oua katy ikuai teri reve oexa va'ekue ma ha'e kuery renonde ju oaxa ovy, ava'i ituia áry ovaẽ peve. Ha'e py ma opyta.

¹⁰ Ha'e kuery jaxy-tata oexa vy ovy'a ete.

¹¹ Oo py oike vy oexa ava'i, ixy Maria reve. Ha'e rami vy guenapy'ã re oĩ vy omboete okuapy, ha'e mba'emo porã oguenoẽ vy ixupe ome'ẽ ogueru va'ekue: ouro, heakuã porã va'e ha'e mirra.

¹² Ha'e gui oexa ra'u rã Nhanduerete oikuaa uka huvixa Herodes-a rupi ve'y'j ojevuy aguã. Ha'e ramo tape mboae rupi ojevuy ovyv katy.

Egito yvy katy oguerojava heravyague

¹³ Ha'e kuery oje'oi'pa rire José oexa ra'u jevy rã ixupe ojexa uka peteĩ anjo Senhor-a guigua. Ha'e vy aipoe'i ixupe:

— Epu'ã ke, eraa ava'i ha'e ixy. Pejava Egito yvy katy. Ha'e py ma peiko xeyvuy jevy e'ya ja, mba'eta Herodes oeka ta ava'i ojuxaxe vy — he'i.

¹⁴ Ha'e ramo opu'ã pyavyve. Ava'i ha'e ixy ogueraa vy Egito katy oje'oi.*

¹⁵ Ha'e py opyta Herodes omano e'ya ja, profeta pe Senhor aipoe'i ukaague ojeupity aguã: “Egito gui aenoi Xera'y”, he'iaague.*

Avakue'i ojukapaague

¹⁶ Herodes ma imba'ekuaa va'e kuery ombotavyague oikuaa vy ipoxy vaipa. Ha'e rami vy ojuka ukapa avakue'i Belém tekoa, ha'e ha'e katy'i rupi ikuai va'e ha'e javi. Mokoĩ ma'et'y ete'y-te'y'j ogueroko va'e guive ojuka ukapa, imba'ekuaa va'e kuery gui raka'e pa oikoague omombe'uague rami vy.*

¹⁷ Ha'e rami oiko raka'e profeta Jeremias pe aipoe'i ukaague ojeupity aguã:

¹⁸ “Ramã tekoa py onhendu hevovo rei va'e. Hexay [ha'e ojae'o va'e], ipoaẽ rei va'e guive, Raquel opi'a kuery re ojae'o okuapy vy. Imemby kuery jipovei ma ramo nonhembovy'a ukai.”*

Egito gui ojevuyague

¹⁹ Ha'e gui Herodes omano ma rire Egito yvy re José oikoa py ra'u rupi ojexa uka peteĩ anjo Senhor-a guigua. Ha'e vy aipoe'i:

²⁰ — Epu'ã ke, eraa ava'i ha'e ixy. Tapeo ju Israel yvy re, mba'eta ava'i jukaxeare kuery omanomba ma — he'i.

²¹ Ha'e ramo opu'ã. Ava'i ha'e ixy ogueraa vy ojevuy ju Israel yvy re.

²² Ha'e gui Judéia pygua huvixa Herodes rekovia ta'ykue Arquelau ju oĩa oendu vy okyke ha'e katy ju oo aguã. Ha'e gui oexa ra'u rã Nhanduerete oikuaa uka jevyague rami oiko vy Galiléia yvy katy ojepe'a ovy,

²³ peteĩ tetã Nazaré hery va'e py ikuai aguã. Ha'e rami oiko ojeupity aguã profeta kuery pe aipoe'i ukaague: “Ixupe 'Nazaré pygua' 'ea 'rã”, he'iaague.

3

Marcos 1.2-6; Lucas 3.1-9

¹ Ha'e va'e jave py ojekuaa João Batista. Ha'e va'e ma Judéia katy'i tekoa e'ya rupi omombe'u oikovy ayvu.* Ha'e vy aipoe'i:

² — Pejeko rerova ke, mba'eta namomybryvei ma yva pygua po'akaa ojekuaa aguã — he'i.

³ Ha'e va'e rekorã ma profeta Isaías pe omombe'u ukua va'ekue: “Tekoa e'ya rupi onhendu 'rã 'Pereko katy Senhor raperã, pembo'yvi ou aguã', he'i oikovy va'e.”*

⁴ João ao ma camelo rague guigua, ha'e rã iku'axã ma ipire guigua. Ho'u va'e ma tuku ha'e ei ka'aguy regua.

* 2:6 Miquéias 5.2 * 2:14 Apocalipse 12.1-6 * 2:15 Oséias 11.1 * 2:16 Apocalipse 12.13-18 * 2:18 Jeremias 31.15 * 3:1

⁵ Ha'e ramo ha'e oia py oje'oi Jerusalém tetã pygua kuery, Judéia ha'e Jordão yakã yvýry ikuai va'e kuery ha'e javi reve.

⁶ Ixupe onhemongarai ukapa Jordão yakã py, ojevavyague omombe'upa vy.

⁷ Nhomongaraia py heta avi ou fariseu ha'e saduceu kuery. Ha'e rá oexa vy aipoe'i ha'e kuery pe:

— Peẽ mboi ramigua, mava'e tu aipoe'i poxya ou va'erã gui peo jepe 'rãa rami?*

⁸ Pendekuai ha'vy vyvra hi'a porã va'e rami, pejeko roervaague pexa uka aguã.

⁹ Ha'e jomepe pemboypy eme “Nhande ma Abraão ramymino jaiko” peje aguã. Mba'eta xee aipoa'e pëvy: Kova'e ita ikuai va'e gui voi Nhanderuede omoingo kuaa Abraão ramyminoã.

¹⁰ Ha'e gui haxa py omboguai ta ma vyvra rapo re. Vyvra hi'a porã e'y va'e ha'e javi ojaya vy omombo 'rã tata py.†

Marcos 1.7,8; Lucas 3.15-17; João 1.19-28

¹¹ — Xee ma pejeko rerova ramo yy py rive romongarai va'e. Ha'e rá xerakykue ou va'e ma xegui yvateve va'e. Ha'e va'e gui xe'yvyive ete va'e vy neĩ ipy regua araa aguã voi nda'evei. Ha'e ma Nhe'ẽ Ky'a E'y reve 'rã penemongarai, tata py guive.

¹² Mba'eta opo py oguereko ma trigo mbovevea, ha'e vy ombovevepa 'rã ha'yí oĩ va'e. Trigo ra'yí ete omoĩ porã 'rã omoĩ porãaty py, ha'e rá ipirekue ma oapy 'rã tata ogue e'y va'e py.

Marcos 1.9-11; Lucas 3.21,22; João 1.32-34

¹³ Ha'e jave py Galiléia yvy gui Jesus oo Jordão yakã katy, João pe onhemongarai uka aguã.

¹⁴ Ha'e rami teĩ João nomongaraixei ranhe vy aipoe'i:

— Xee ma ha'eve ndevy pe anhemongarai uka aguã. Ndee ri ty'y xea py reju?

¹⁵ Ha'e rá Jesus ombovai:

— Tove ha'e rami teĩ, mba'eta ha'e rami vy 'rãe teko porã ha'e javi jajapo — he'i. Ha'e ramo omongarai.

¹⁶ Jesus onhemongarai ma vy yy gui oẽ ju ramove yva ojepe'a jekuaa ramo oexa Nhanderuede guigua Nhe'ẽ oguejy ouvry rá peteĩ apyaxu'i rami. Ha'e va'e ou vy hexe oĩ.

¹⁷ Ha'e gui onhendu peteĩ ayvu yva gui:

— Peva'e ma Xera'y ayvu ete ha'e arovy'a va'e — he'i va'e.

4

Marcos 1.12,13; Lucas 4.1-13

¹ Ha'e rire tekoa e'yã py ju Nhe'ẽ ogueraa Jesus, anha oeko a'ã aguã py.*

² Ha'e ramo quarenta ára, quarenta pytũ re oiko okaru e'y re. Ha'e rire okaruxe ma.

³ Ha'e ramo oia py poroeko a'ãa onhemboja vy aipoe'i:

— Nhanderuede Ra'y ri reiko vy ndeayvu kova'e ita oĩ va'e pe tejeapo mbojape.

⁴ Ha'e ramo Jesus ombovai:

— Ipara oiny: “Mbojape re anho e'y 'rã avakue oikove, ha'e rá ayvu Nhanderuede juru gui oẽ va'e ha'e javi re” — he'i.*

⁵ Ha'e gui anha ogueraa tetã iky'a e'y va'e py, templo apyte áry omoĩ.

⁶ Ha'e vy aipoe'i:

— Nhanderuede Ra'y ri reiko vy enhemombo apy gui yvy katy, mba'eta ipara oiny: “Ombou 'rã ojeupegua anjo kuery ndere opena aguã.” Ha'e rá “Ha'e kuery ndejoko 'rã opo py, ita re renhepyxanga e'y aguã” — he'i.*

⁷ Jesus ombovai:

— Ipara avi oiny: “Eko a'ã eme Senhor Nderuede” — he'i.*

⁸ Ha'e gui yvyty yvateve va'e áry ju anha ogueraa vy ixupe oexa uka ko yvy re tetã ikuai va'e, mba'emo porã oĩ va'e ha'e javi guive.

⁹ Ha'e vy aipoe'i ixupe:

— Peva'e nunga ha'e javi ame'ẽmba 'rã ndevy, xapy'a rei nerenapy'ã re reĩ reve xemboete ramo.

¹⁰ Ha'e ramo Jesus aipoe'i ixupe:

— Satanás, ejepe'a ke apy gui, mba'eta ipara oiny: “Senhor Nderuede anho 'rã remboete ha'e rembojerovia” — he'i.*

¹¹ Ha'e rami rá anha oēja ovy, ha'e rá anjo kuery ju ou vy opena hexe.

Marcos 1.14,15; Lucas 4.14,15

¹² João nhuã py ombotya ague omombe'ua rá Jesus oendu vy ojepe'a ovy Galiléia katy.

¹³ Nazaré tetã oēja vy Cafarnaum py ju oo oiko aguã, ye'ẽ yvýry, Zebulom ha'e Naftali yvy katy'i,

¹⁴ profeta Isaías pe aipoe'i ukaague ojeupity aguã:

¹⁵ “Zebulom ha'e Naftali yvy, ye'ẽ katy tape oo va'e yvýry, Jordão yakã rovaigua re, judeu e'y va'e kuery ikuai Galiléia rupi,

¹⁶ ha'e pygua kuery ma pytũ rupi ikuai va'ekue ri oexa hendy tuvixa va'e. Ha'e rá hendy va'e omoexakã manoa gyy pytũ reia rupi ikuai va'ekue” he'i ukaague rami.*

* 3:7 Ha'e kuery pe “Mboi ramigua” he'i mba'eta mboi yma guare rami ha'e kuery voi nhombotavya rupi ikuai, ndojeko rorovaxei guive.

† 3:10 “Haxa py vyvra ojaya 'rã” he'ia py Nhanderuede pe ndojeko rorovai va'e ombopagapa 'rãa re ijavy vy. * 4:1 Hebreus 2.18; 4.15

* 4:4 Deuteronomio 8.3 * 4:6 Salmo 91.11-12 * 4:7 Deuteronomio 6.16 * 4:10 Deuteronomio 6.13 * 4:16 Isaías 9.1-2

¹⁷ Ha'e va'e guive Jesus omboyppy avvu omombe'u aguã. Ha'e vy aipoe'i:
— Pejeko roerova ke, mba'eta namombyryvei ma yva pygua po'akaa ojekuaa aguã.

Marcos 1.16-20; Lucas 5.1-11

¹⁸ Galiléia regua yupa vyvry oikoa rupi oexa mokoï joegua: Simão Pedro hery va'e ha'e André. Yy py pira mbo'aa omombo okuapy rã oexa, pira mbo'aa rupi ikuai ramo.

¹⁹ Ha'e rami vy aipoe'i ha'e kuery pe:

— Peju ke xerakykue. Xee ma avakue jouarã ju 'rã romoingo — he'i.

²⁰ Ha'e ramo ha'e kuery ma pira mbo'aa oejapa vyvoi vy oje'oi hupive.

²¹ Oovea py mokoï joegua ju oexa: Zebedeu ra'y kuery Tiago ha'e tyvy João. Ha'e va'e kuery ma nguu reve kanoã py pira mbo'aa omoatyrõ okuapy rã oexa. Ha'e vy oenoï.

²² Ha'e ramove ha'e kuery kanoã ha'e nguu ojea vy oje'oi hakykue.

Lucas 6.17-19

²³ Galiléia vyv ha'e javi rupi Jesus oiko. Onhembo'eaty ikuai va'e rupi nhombo'e vy omombe'u avvu porã Nhanderuete po'akaa regua. Heta va'e kuery omonguera guive opa marãgua gui imba'eaxy va'e.

²⁴ Ha'e ramo mba'emo ojapo oikovya omombe'ua rã oendu pavẽ Síria vyv ha'e javi rupi. Ha'e ramo oia py oguerua imba'eaxy va'e opa marãgua mba'eaxy oendu va'e gui omonguera aguã: anha onhemondea va'e, he'oiã va'e ha'e oguata e'ÿ va'e guive. Ha'e ramo omonguerapa.

²⁵ Ha'e rive heta ju Galiléia gui ou, ha'e Decápolis, Jerusalém, Judéia ha'e Jordão rovaigua gui. Ou vy oje'oi hakykue.

5

Lucas 6.20-23

¹ Heta va'e kuery ou rã Jesus oexa vy oẽ vyv'ã re, ha'e uguapy. Ha'e ramo hemimbo'e kuery ma ijyvy'iry ou.

² Ha'e ramo ombo'e vy aipoe'i:

³ — Ovy'a ete 'rã onhe'ẽ py iporiaukue'i va'e, mba'eta ha'e kuery peguarã yva pygua po'akaa oï.

⁴ — Ovy'a ete 'rã ojae'o va'e, mba'eta ombovy'aa ju 'rã.

⁵ — Ovy'a ete 'rã ivai rei e'ÿ va'e, mba'eta ha'e kuery peguarã vyv itui.

⁶ — Ovy'a ete 'rã teko porã re okaruxe ha'e ijy'uvei va'e, mba'eta ojoupa 'rã.

⁷ — Ovy'a ete 'rã nhomboaxy va'e, mba'eta ha'e kuery voi omboaxy 'rã.

⁸ — Ovy'a ete 'rã ipy'a ky'a e'ÿ va'e, mba'eta ha'e kuery oexa 'rã Nhanderuete.

⁹ — Ovy'a ete 'rã petei rami nhomoingo va'e, mba'eta ha'e kuery pe "Nhanderuete ra'y kuery" 'ea 'rã.

¹⁰ — Ovy'a ete 'rã heko porã ramo rive oguereko axy reia va'e, mba'eta ha'e kuery peguarã yva pygua po'akaa oï.

¹¹ — Pevy'a ete 'rã xekãuxa pendere ijayvu rei ha'e penderereko axya rei ramo, ha'e ijapu vyv opa marã pendere ijayvu vai rã guive.

¹² Pevy'a ha'e peporai, mba'eta heta oï yva re pendevy guarã. Mba'eta ha'e rami ae oguereko axya raka'e profeta kuery peiko e'ÿ mbove ikuai va'ekue.

Marcos 9.49,50; Lucas 14.34,35

¹³ — Peẽ kuery ma juky rami peiko vyv regua moe'earã. Ha'e rã xapy'a rei juky nae'ëvei ramo mba'ixa 'rã tu he'ẽ ju? Ndovarevei 'rã mba'everã. Ha'e ramo oka py rive 'rã nhamombo, avakue opyrõmba aguã py.

Guemimbo'e kuery hendy va'e re ombojojaague

¹⁴ — Peẽ kuery ma hendy va'e peiko vyv regua moexakãarã. Yvyty áry tetã ojapo pyre ma ndojekuaa e'ÿi 'rã.

¹⁵ Tataendy voi avave rei omoendy vyv nomoiai 'rã ajaka guýry. Oiaty py ae 'rã omoia, opy ikuai va'e ha'e javi omoexakã aguã.

¹⁶ Ha'e rami ae hendy va'e pereko va'e voi taexakã avakue renonde, pendereko porã ha'e kuery oexa vyv oguerovy'a avi aguã Penderu yva pygua.

Lei ojeupitypa aguã Jesus oua re ijayvuague

¹⁷ — Pexa'ã eme lei ha'e profeta kuery ombopara va'ekue ambovaipa aguã ajua re. Ambovaipa aguã e'ÿ aju, ojeupity aguã.

¹⁸ Mba'eta anhetẽ aipoa'e pëvy: Yva ha'e vyv okanhy e'ÿ ja neï petei ipara'i, neï petei ikarẽ'i va'e nokanhyi 'rã lei gui, ha'e javi ojeupity e'ÿ ja.*

¹⁹ — Ha'e gui ijayvua vyv'ive va'e teï ha'e va'e rami e'ÿ ikuai ha'e nhombo'e va'e pe ma "Yvy'ive'i va'e" 'ea 'rã yva pygua po'akaa py. Ha'e rã ha'e rami ete ikuai ha'e nhombo'e va'e pe ma "Yvateve va'e" 'ea 'rã yva pygua po'akaa py.

²⁰ Mba'eta xee aipoa'e pëvy: Kuaxia re nhombo'e va'ety ha'e fariseu kuery reko gui peẽ kuery napendeko porãvei vyv yva pygua po'akaa py ndapeikei 'rãe.

Ymagua kuery pe aipo'ea aque Jesus omombe'u porãveague

Jojukaa re ijayvua

* 5:18 Lucas 16.16,17

21 — Pendu ma ymagua kuery pe aipo'ea ague: “Pejojuka eme.” Ha'e rã “Amongue jojuka ramo ombopagaa 'rã”, 'ea ague.*

22 Ha'e rã xee ma aipoa'e pëvy: Ha'e javive [mba'e re'ÿ] guvyvy kuery pe ivai va'e ombopagaa 'rã. Guvvy pe “Mba'e vare'ÿ” he'i va'e ma heraa 'rã nhomongeta va'ety ikuai py. Ha'e rã guvyvy pe “Inhakã porã ve'ÿ va'e” he'i va'e ma tata ogue e'ÿ va'e py 'rã opaga.

23 — Altar oia py mba'emo reme'ë va'erã reru vy ha'e py xapy'a rei nema'endu'a 'rã nderyvy nderovai mba'emo oguerekoa re.

24 Ha'e rami vy eja ranhe altar yvy'iry mba'emo reme'ë va'erã, tereo ha'e pete'i rami ju pejogueroayvu nderyvy reve. Ha'e gui mae ma ejevuy ju eme'ë reme'ëxe va'ekue.

25 — Pejogueroayvu porã voi 'rã nderovaigua reve tape rupi peo reve, huvixa po py nderovaigua nemboaxa e'ÿ aguã, ha'e gui jopya pe ju huvixa nemboaxa e'ÿ aguã, ha'e nhuã py nembo'a e'ÿ aguã.

26 Anhetë aipoa'e ndevy: Nereëi 'rã ha'e gui repagapa katui'i e'ÿa ja.

Tavy reia re ijayvua

27 — Pendu aipo'ea ague: “Ndetavy rei eme.”*

28 Ha'e rã xee ma aipoa'e pëvy: Kunhague re itavyxea rupi oma'ë va'e voi hexeve itavy ae ma opy'a py.

29 Xapy'a rei nderexa reiporu kuaa regua ri nderesity ramo enoë, emombo ndejegui. Mba'eta nderete ha'e javi reve reiko axy aguã py nemombo 'rãgue py ha'eveve pete'i nderete regua remokanhy.

30 Xapy'a rei ndepo reiporu kuaa regua ri nderesity ramo ejaya, eipe'a ndejegui. Mba'eta nderete ha'e javi reve reiko axy aguã py reo 'rãgue py ha'eveve pete'i nderete regua remokanhy.

31 Aipo'ea avi va'ekue: “Gua'xyx gui opoixe va'e tome'ë ixupe kuaxia para omendaague ombovaipa aguã”, 'ea va'ekue.*

32 Ha'e rã xee ma aipoa'e pëvy: Gua'xyx itavy rei ramo e'ÿ opoi va'e ma ojapo 'rã itavy rei va'e oiko aguã rami, ha'e opoi pyre re omenda va'e voi itavy rei avi.

Ouraa re ijayvua

33 — Pendu avi ymagua kuery pe aipo'ea ague: “Peura rive eme. Senhor pe pejapo ete 'rã peuraague” 'ea ague.

34 Ha'e rã xee ma aipoa'e pëvy: Nda'evei mba'eve re peura aguã, ne'i yva re, mba'eta Nhanderuete openaaty;

35 ne'i yvy re, mba'eta opyrõa; ne'i Jerusalém tetã re, mba'eta Huvixa yvateve va'e pegua.

36 Ne'i peura eme peneakã re, mba'eta pete'ive pende'a napemoxii kuaai, ne'i napemoi kuaai guive.*

37 Ha'e rami 'rãgue py po rami 'rã pendeayvu: “Tã, tã”, e'ÿ vy “Any, any”, peje 'rã. Ha'e ramia gui pendeayvuve aguã ma poromboeko vaia guigua.

Jepya re ijayvua

Lucas 6.27-30

38 — Pendu ma aipo'ea ague: “Joexa mombuare rexa ju 'rã omombua, ha'e nhoa'i mopëare ra'i ju 'rã omopëa” 'ea ague.*

39 Ha'e rã xee ma aipoa'e pëvy: Pëvy amongue ojapo vai ta ramo pejoko eme. Ha'e rami 'rãgue py penderova peiporu kuaa regua oipete rã perova hovai re ju oipete aguã.*

40 Huvixa kuerya py pendereraa vy pendeparito oipe'aa rã pendecapa avi peipe'a uka.

41 Xapy'a rei pete'i quilômetro amongue pendereraa nhea'ã ramo mokoia peve tapeo hupive.

42 Peme'ë 'rã pëvy ojerure va'e pe rei, ha'e pendekupe rei eme mba'emo oiporuxe va'e katy.

Mborayvu re ijayvua

Lucas 6.32-36

43 — Pendu aipo'ea ague: “Peayvu 'rã peneirũ kuery, ha'e rã penderovaigua kuery re ma pendea'e eme” 'ea ague.*

44 Ha'e rã xee ma aipoa'e pëvy: Peayvu 'rã pendovaigua kuery voi, ha'e Nhanderuete pe pejerure 'rã penderereko axy va'e re,

45 Penderu yva pygua ra'y kuery pendekuai aguã. Mba'eta ha'e ma kuaray ombou vy omoexakã 'rã heko vai va'e ha'e heko porã va'e áry. Oky voi ombou 'rã heko porã va'e ha'e heko vai va'e pe.

46 Ha'e gui penderayvu va'e kuery anho ri peayvu vy mba'e 'rã tu pejopy ha'e nunga repy? Mba'eta imposto re nhombopaga va'ety kuery voi ha'e rami ikuai.

47 Penderegua kuery pe anho ri pexarura vy mba'e nunga py tu amboae kuery gui pendekuai porãve? Mba'eta amboae regua kuery voi ha'e rami ikuai.

48 Ha'e rã peë ma heko porã va'e 'rã peiko opa mba'e py, Penderu yva pygua opa mba'e py heko porã rami avi.

6

Nhanderuete pe mba'emo jajapoa re ijayvua

* 5:21 Êxodo 20.13, Deuteronomio 5.17 * 5:27 Êxodo 20.14, Deuteronomio 5.18 * 5:31 Deuteronomio 24.1 * 5:36 Tiago 5.12

* 5:38 Êxodo 21.24, Levítico 24.20 * 5:39 Romanos 12.14 * 5:43 Levítico 19.18

1 — Peiko kuaa pota avakue renonde e'ÿ mba'emo pejapo aguã Nhanderuete pe, ha'e kuery oexa aguã rive. Ha'e rami ri vy Penderu yva pygua gui mba'eve ndapejopyi 'rã hekovia.*

Mba'emo nhame'êa re ijayvua

2 — Ha'e rami vy iporiaukue'i pe mba'emo peme'ê vy penerenonde rupi pemonha'ê uka eme mimby guaxu. Ha'e rami heko porã merami rive va'e ojapo 'rã okuapy onhembo'eaty py ha'e tape rupi, avakue pe onhemboete ukaxe vy rive. Anhetê aipoa'e pëvy: Ha'e kuery ojopy ae ma hekovia.

3 Ha'e rã peẽ ma mba'emo peme'ê vy pendeaxua regua pe voi peikuaa uka eme pendeaxu e'ÿa ojapo va'e, 4 jouse mba'emo peme'ê rã avave oikuaa e'ÿ aguã. Ha'e gui peikuaa uka e'ÿ va'e Penderu oexa vy ome'ê 'rã hekovia.*

Nhanhembo'e aguã re ijayvua

5 — Ha'e gui penhembo'e vy heko porã merami rive va'e rami e'ÿ pendekuai, mba'eta ha'e kuery ma onhembo'eaty py ha'e tetã mbyte rupi onhembo'exe vai 'rã ho'amý avakue oexa aguã rive. Anhetê aipoa'e pëvy: Ha'e kuery ojopy ae ma hekovia.

6 Ha'e rã peẽ ma penhembo'exe vy peike 'rã penderopy, okê pemboty 'rã guive. Ha'e gui mae ma 'rã penhembo'e Penderu pexa e'ÿ va'e pe. Ha'e ramo peikuaa uka e'ÿ va'e Penderu oexa vy ome'ê 'rã hekovia.*

7 — Penhembo'ea py ha'ekue-'ekue'i rupi pendeayvu eme amboae regua kuery rami, mba'eta ha'e kuery oexa'ã teĩ ijayvu reta rã oendua aguã re.

8 Ha'e rã peẽ ma peiko eme ha'e kuery rami, mba'eta Penderu oikuaa ma voi peipota va'e, pejerure e'ÿ mbove.

Lucas 11.2-4

9 — Ha'e vy po rami 'rã penhembo'e: "Oreru yva pygua, tove nderery toamboetea.

10 Tovaê ndepo'akaa ojekuaa aguã. Reipota va'e tojapoa yvy re, yva re ojapoa rami avi.

11 Ko'ê nhavõ ejou uka ro'u va'erã.

12 Ha'e emboguepa ke ndevy roveva, ore voi orevy oreve va'e roperdoaa rami avi.

13 Orerety uka eme poromoangekoa pe, orereraa jepe ke mba'emo vai gui. [Mba'eta ndepo'akaa, nembraetea ha'e nerekakã oĩ riae 'rã raka'e rã peve guarã. Amém,]" peje 'rã.

14 — Mba'eta amboae kuery otekoavyague peperdoa ramo Penderu yva pygua voi ombogue 'rã peje-javyague.

15 Ha'e rã amboae kuery [otekoavyague] ndapeperdoai ri ramo Penderu voi nomboguei 'rã pejejavyague.

Nhanderuete pe jakaru e'ÿ re jaikoa re ijayvua

16 — Ha'e gui pekaru e'ÿ re peiko vy pexa uka eme pendeporiau reia heko porã merami rive va'e rami, mba'eta ha'e kuery ma iporiaua oexa uka 'rã amboae kuery oikuaa aguã okaru e'ÿ re ikuiaia. Anhetê aipoa'e pëvy: Ha'e kuery ojopy ae ma hekovia.

17 Ha'e rã peẽ ma pekaru e'ÿ re peiko vy pemoatyřo pende'a, ha'e pejeovai guive,

18 pekaru e'ÿ re peikoa amboae kuery oikuaa e'ÿ aguã, Penderu pexa e'ÿ va'e anho. Ha'e ramo peikuaa uka e'ÿ va'e Penderu oexa vy ome'ê 'rã hekovia.

Yva re nhandejeupe guarã nhamoĩ porã aguã re ijayvua

19 — Ko yvy re pemoĩ porã eme mba'emo pendejeupe guarã, mba'eta vixo'i ho'upa ha'e iky'a ombovaipa 'rã, ha'e imonda va'e oipe'a ha'e ougeraapa 'rã.

20 Yva re ae pemoĩ porã uka 'rãgue pendejeupe guarã. Ha'e py ma jipoi 'rã vixo'i ho'upa va'erã, iky'a nombovaipai 'rã, neĩ imonda va'e ndoipe'a heravyi 'rã guive.*

21 Mba'eta pende vy guarã pemoĩ porãa py ma penekuraxõ avi 'rã oĩ.

Lucas 11.33-36

22 — Penderexa ma penderete moexakãarã oĩ. Xapy'a rei penderexa iporã ramo penderete ha'e javi 'rã hexakãmba.

23 Ha'e rã penderexa na'iporã ri ramo penderete pytũmba 'rã. Ha'e penemoexakãarã oĩ va'e pytũ ramo pytũ ete 'rã pëvy.

Mokoĩ patõ re ijayvua

24 — Avave rei nomba'eapoi 'rã mokoĩ patõ pe. Mba'eta peteĩ re nda'ija'eive 'rã amboae oayvuve vy, ha'e'ÿ vy peteĩ ojou porãve vy amboae ma ndojou porãive 'rã. Nda'eveĩ Nhanderuete pe peiko aguã, mba'emo perekopaa rupi nda'eveĩ reve.*

Lucas 12.22-31

25 — Ha'e nunga rupi ae xee aipoa'e pëvy: Pendepy'a eta rei eme pendekove re, neĩ pe'u ha'e pey'u va'erã pejou aguã re guive, penderete re pemoĩ va'erã re voi. Mba'eta penderekove nda'u temb'i'u gui ndovareive teve? Ha'e penderete nda'u ao gui ndovareive teve?*

26 Peikuaa pota guyra kuery oveve va'e reko re. Ha'e kuery ma mba'eve nonhotyĩ, nomono'õi, neĩ omoĩ porãaty py nomboatyĩ guive. Ha'e rami teĩ ha'e kuery pe Penderu yva pygua ojou uka 'rã ho'u va'erã. Peẽ kuery nda'u guyra'ĩ gui ndapevareive ri?

* 6:1 Mateus 23.1-5 * 6:4 Lucas 21.1-4 * 6:6 Lucas 18.9-14 * 6:20 Lucas 12.33,34; 2 Timóteo 4.8; 1 Pedro 1.3,4 * 6:24 Lucas

²⁷ Mava'e nda'u pendepya eta rei vy pembopukuve kuaa 'rã ruxã'i peikove aguã?

²⁸ Mba'e re tu pendeaorã re ri nda'eveive pendekuai? Peikuaa pota ha'vy yvoty nhuũndy rupi ikuai va'e re. Ha'e va'e ma omba'eapo va'e'ÿ, neĩ oipopê va'e'ÿ.

²⁹ Ha'e rami teĩ xee aipoa'e pëvy: Huvixa Salomão minha opa marãgua oguerekopa va'eri kova'e yvoty rami nonhemondeĩ raka'e.

³⁰ Nhanderuete omohemonde porã 'rã jai rogue aÿ nhuũndy re ikuai va'e, ha'e gui ko'ê tata py omombo va'erã va'eri. Ha'e gui peẽ ndapejerovia porãĩ va'e, peẽ kuery re katuve ma opena porãve 'rã.

³¹ Ha'e nunga rupi pendepya eta rei eme, ha'e aipopeje eme: "Mba'e tu ja'u 'rã, ha'e jay'u 'rã? Ha'e mba'e py tu nhanhemonde 'rã?" peje eme.

³² Mba'eta ha'e nunga jouxea rupi amboae regua kuery ikuai, ha'e Penderu yva pygua oikuaa ae ha'e nunga peikotevê va'ea.

³³ Ha'e rami 'rãgue py jyp'y'i peka 'rã ipo'akaa ha'e ixuguigua teko porã. Ha'e ramo 'rãe peikotevê va'e ha'e javi ome'ê avi pëvy.

³⁴ — Ha'e nunga rupi pendepya eta rei eme ko'ê rã guarã re, peja ko'ê ramo guarã ae. Mba'eta ára nhavõ oiko 'rãe mba'emo vai ha'e jave guarã.

7

Lucas 6.37,38,41,42

¹ — Penhombopagaxe rei eme, penembopagaa e'ÿ aguã.*

² Mba'eta penhombopagaague rami ae 'rã peẽ ju penembopagaa, ha'e joe pejapoaague rami pendere ju ojapoa 'rã.

³ Mba'e re tu nderyvy rexa py icky'a oĩ va'e re rexa pota, ha'e rã nderexa py ae yvyra oĩ va'e re ma nderaikuaa potai?

⁴ Mba'e re tu aipo're nderyvy pe: "Tove tanoê icky'a nderexa gui", 're, nderexa py ae yvyra oĩ teri reve?

⁵ Heko porã merami rive va'e, enoê ndee ranhe yvyra nderexa gui. Ha'e vy 'rãe rexa porã nderyvy rexa gui icky'a renoê aguã.

Jagua pe iporã va'e nhame'ê e'ÿ aguã re ijayvua

⁶ — Jagua kuery pe peme'ê eme mba'emo icky'a e'ÿ va'e, ha'e poryko ikuai katy pemombo eme ovarave va'e, ha'e kuery opyrõmba rive'ÿ aguã, ha'e gui ojere vy penemondropa avi e'ÿ aguã.*

Lucas 11.9-13

⁷ — Pejerure, ha'e ramo ome'êa 'rã. Peka, ha'e vy pejou 'rã. Penhendu uka, ha'e ramo okê oi'pe'aa 'rã pëvy.*

⁸ Mba'eta ha'e javive ojerure va'e ojopy 'rã, oeka va'e ojou 'rã, ha'e onhendu uka va'e pe oi'pe'aa 'rã.

⁹ Mava'e peẽ avakue nda'u pendera'y kuery mbojape re ojerure rã peme'ê 'rã ita?

¹⁰ Ha'e rami e'ÿ vy pira re ojerure rã mboi ri nda'u peme'ê 'rã?

¹¹ Ha'e nunga rupi peẽ pendereko vai va'eri pendera'y kuery pe mba'emo porã peme'ê kuaa va'e. Ha'e gui Penderu yva pygua katuve nda'u nome'êi 'rã ri mba'emo porã ojerure va'e pe?

¹² — Pëvy avakue ojapo aguã peipotaa rami ae avi peẽ voi pejapo ha'e kuery pe, mba'eta ha'e rami ae oĩ lei ha'e profeta kuery omboparaague re.

Lucas 13.24

¹³ — Peike okê ipo'i'i va'e rupi. (Mba'eta okê ha'e tape okanhy aguã katy oo va'e ma ipy vaipa ramo heta 'rã ikuai ha'e va'e rupi oo va'e.)

¹⁴ Ha'e rã tekove katy okê ha'e tape oo va'e ma ipo'i'i ramo mbovy'i ete 'rã ojou.

Lucas 13.25-27; 2 Coríntios 13.5

¹⁵ — Penheangu ke profeta ramigua kuery gui. Ha'e kuery ma vexa'i pirekue py onhemonde va'e, ha'e rã iguýry ma guary nhomondropa va'e ikuai.*

¹⁶ Mba'emo rembypy'a re pendekua pota vy peikuaa 'rã mba'e nunga paa. Tyrã uva nda'u nhamondo 'rã ri juu'y gui? Ha'e rami e'ÿ vy juu rakua endy gui nda'u nhamondo 'rã ri figo?

¹⁷ Ha'e rami avi yvyra porã ma hi'a porã avi 'rã. Ha'e rã yvyra iporã e'ÿ va'e ma ndai'a porãĩ 'rã.

¹⁸ Yvyra porã ma ndai'a vaikuei 'rã, ha'e yvyra iporã e'ÿ va'e voi ndai'a porãĩ 'rã.

¹⁹ Yvyra hi'a iporã e'ÿ va'e ojayapaa vy omombo 'rã tata py.

²⁰ Ha'e nunga rupi ha'e kuery reko re peikuaa pota vy peikuaa 'rã marã ramigua paa.*

²¹ — Pavê e'ÿ xevy "Senhor, Senhor" he'i va'e oike 'rã yva pygua po'akaa py, ha'e rã Xeru yva pygua oipotaa rami ikuai va'e anho.

²² Ha'e va'e ára heta 'rã aipoe'i xevy: "Senhor, Senhor, nderery rupi e'ÿ ri ty'y ore romombe'u raka'e Nhe'ê guigua? Ha'e nderery rupi e'ÿ ri ty'y roipe'a anha, ha'e heta rojapo ndepo'akaa rupigua?" he'i 'rã.

²³ — Ha'e ramo ha'e kuery pe xee ambovai 'rã: "Peẽ kuery ma xee roikuaa va'e'ÿ. Pendeko vai va'e, pejepe'a ke xea gui!" ha'e 'rã.

Lucas 6.46-49

* 7:1 Romanos 2.1-3; 1 Coríntios 4.5; Tiago 4.11,12 * 7:6 Lucas 9.5 * 7:7 João 14.13,14; 1 João 5.14,15 * 7:15 2 Pedro 2.1-3 * 7:20

²⁴ — Ha'e javive ha'e rami xeayvu rā oendu vy ha'ekue rami ikuai va'e ma ava hi'arandu va'e ngoorā ita áry ojapo va'e rami ikuai.

²⁵ Mba'eta oky ou rā yy tyguaxu vy oxyry atā 'rā. Yvytu oipeju atā vy ha'e va'e oo re ojeapi-api teĩ ndoityi 'rā, ita áry omboyta porā rive.

²⁶ — Ha'e rā xeayvua oendu teĩ ha'ekue rami ndoikoi va'e kuery ma ava hi'arandu e'ỹ va'e ngoorā ita ku'i reia áry rive ojapo va'e rami ikuai.

²⁷ Ha'e gui oky ou rā yy tyguaxu 'rā. Yvytu oipeju vy ha'e va'e oo re ojeapi vy oity, ombovaipa ete 'rā — he'i.*

Opa vy ma yvyty áry ijayvuague

²⁸ Jesus pova'e ayvu omombe'upa rā heta va'e kuery onhemondyipa ombo'ea gui,

²⁹ mba'eta ipo'akapa va'e rami ombo'e, kuaxia re nhombo'e va'ety kuery rami e'ỹ.*

8

Marcos 1.40-44; Lucas 5.12-14

¹ Yvy'ā gui Jesus oguejy rā heta ete oje'oi hakykue.

² Ha'e gui ma peteĩ lepra revegua onhemboja hexe. Omboete vy aipoe'i:
— Senhor, lepra gui xeky'a'oxe vy ke xeky'a'o — he'i.

³ Ha'e ramo Jesus okuave'ẽ vy opoko hexe. Ha'e vy aipoe'i:

— Xee ma roiky'a'oxe ae, ekuera ke — he'i. Ha'e ramove lepra okanhymba.

⁴ Ha'e ramo Jesus aipoe'i ixupe:

— Ma'ẽ, emombe'u eme avave rei pe. Ha'e rami 'rāgue py tereo sacerdote pe anho ejexa uka, ha'e eme'ẽ mymba Moisés omboparaague rami, heta va'e kuery oikuaa aguā.

Lucas 7.1-10

⁵ Cafarnaum tetā py Jesus ovaẽ ma ramo hexe onhemboja peteĩ xondaro ruvixa. Ha'e vy ojerure ixupe:

⁶ — Senhor, xero py amongakuaa va'ekue itui tupa py. Ndoguatavei, ojexavai guive — he'i.

⁷ Jesus ombovai:

— Xee aa 'rā amonguera — he'i.

⁸ Ha'e rā xondaro ruvixa aipoe'ive ju:

— Xee ma xe'yvy'i ete xero py revaẽ aguā. Peteĩ ayvu rive ri eraa uka. Ha'e ramo xerembigui kunumi va'e okuera 'rā.

⁹ Mba'eta xee voi huvixa oipotaa rami aiko va'e. Ikuai avi xondaro kuery xeayvu rami ikuai va'e. Peteĩ pe “Tereo”, ha'e ramo oo 'rā. Ha'e rā amboae pe ma “Eju”, ha'e rā ou 'rā. Xerembigui pe “Ejapo ha'e nunga”, ha'e ramo ojapo 'rā — he'i.

¹⁰ Ha'e nunga Jesus oendu vy onhemondy. Ha'e vy aipoe'i hakykue oje'oi va'e pe:

— Anhetẽ aipoa'e pëvy: Neĩ Israel kuerya rupi voi ndajoui teri kova'e rami ojerovia ete va'e.

¹¹ Aipoa'e pëvy: Heta ou 'rā kuaray oua katy ha'e oikea katy gui, yva pygua po'akaa py ikuai 'rā mesa py Abraão, Isaque ha'e Jacó reve.

¹² Ha'e rā Nhanderueté po'akaa pyguarā va'ekue ma oka py 'rā omombova pytūa py. Ha'e py ojae'opa ha'e opa marā onhendu 'rā okuapy — he'i.

¹³ Ha'e gui xondaro ruvixa pe ju Jesus aipoe'i:

— Tereo ju. Ndee rejeroviaa rami toiko — he'i. Ha'e va'e hora-ve hembigui okuera.

Marcos 1.29-31; Lucas 4.38,39

¹⁴ Ha'e gui ma Pedro ro py ju Jesus ovaẽ. Ha'e vy haixo oexa ipire raku vaipa vy tupa py itui ramo.

¹⁵ Ipo re Jesus ojopy rā ipire raku oaxa. Ha'e ramo opu'ā vy mba'emo ojapo ha'e kuery pe.

Marcos 1.32-34; Lucas 4.40,41

¹⁶ Ka'aru'i jave oĩa py heta oguerua anha onhemondea va'e. Ha'e ramo ayvu py rive oipe'a nhe'ẽ icky'a va'e, omonguera avi imba'eaxy va'e ha'e javi.

¹⁷ Ha'e nunga oiko profeta Isafas pe aipoe'i ukaague ojeupity aguā: “Ha'e ae oipe'a jaiko axya, ogueraapa nhanemba'eaxy”, he'iaague.*

Lucas 9.57-62

¹⁸ Jesus oyyýry heta ikuai va'e oexa vy ijayvu yy rovaigua re oaxa aguā.

¹⁹ Ha'e va'e jave py hexe peteĩ kuaxia re nhombo'e va'ety onhemboja vy aipoe'i:

— Porombo'ea, xee aa ta nderupive reoa katy rei.

²⁰ Ha'e rā Jesus ombovai:

— Aguara'i oguereko 'rā okua, guyra oveve va'e voi oguereko guaity. Ha'e rā Ava ra'y ojeapo va'ekue ma neĩ oakā omboguejyaty ndoguerekoĩ — he'i.

²¹ Amboae hemimbo'e ju aipoe'i ixupe:

— Senhor, taa ranhe xeru tanhono porā.

²² Jesus ombovai:

— Eju xerupive, tove omanogue ae tonhono porā omano va'ekue.

Marcos 4.35-41; Lucas 8.22-25

* 7:27 Tiago 1.22-25; 1 João 2.3-6

* 7:29 Marcos 1.22; João 7.46

* 8:17 Isafas 53.4

- ²³ Ha'e gui kanoã py Jesus oĩ ramo hemimbo'e kuery oje'oi hupive.
- ²⁴ Yy rupi oaxa jave ou vvytu vaikue. Yai ojeapi-api kanoã re. Ha'e ramia ja Jesus oke oupy.
- ²⁵ Ha'e ramo hemimbo'e kuery ou vy omomyĩ. Ha'e vy ojavukai reve aipoe'i:
— Senhor, orereraa jepe ke! Nhamanomba ta ma — he'i okuapy.
- ²⁶ Ha'e ramo Jesus aipoe'i ha'e kuery pe:
— Pejeroviaa kyrĩ'i va'e, mba'e re tu pekyje ri? — he'i. Ha'e rami vy opu'ã vy vvytu ha'e ye'ẽ pe ijayvu atã. Ha'e ramove opyту'upa.
- ²⁷ Ha'e ramo ha'e kuery onhemondyipa vy aipoe'i:
— Marã ramigua tu peva'e ava, vvytu ha'e yai voi onhe'ẽ rendu aguã?
Marcos 5.1-20; Lucas 8.26-39
- ²⁸ Yupa rovaigua Gadara pygua kuery vvy re ovaẽ ramo ovaexĩ jogueruvy mokoĩ ava anha onhemondea va'e. Yvyra rupa oĩ va'e gui ou. Ivai vaikue rei rã avave rei ndoguataavei ha'e va'e tape rupi.
- ²⁹ Ha'e gui ha'e kuery ou vy ojavukai:
— Nhanderuete Ra'y, mba'e re xee areko ndereve? Oremoingo axy aguã teve reju oa'angaague ára ovaẽ e'ỹ mbove? — he'i.
- ³⁰ Ha'e katy'i heta ikuai poryko okaru py.
- ³¹ Ha'e ramo anha kuery ojerure Jesus pe:
— Orepe'a vy ta'vy oremondouka poryko kuerya katy.
- ³² Ha'e rã — Tapeo ha'vy — he'i Jesus. Ha'e gui ha'e kuery ojepe'a vy poryko re ova. Ha'e rã poryko kuery ma vvy'ã guy katy onhamba. Ho'apa ye'ẽ py, yy py omanomba.
- ³³ Ha'e ramo poryko re opena va'e kuery onhamba oje'oiivy. Tetã py ovaẽ vy omombe'u oiko va'ekue ha'e javi, anha onhemondea va'e re oiko va'ekue guive.
- ³⁴ Ha'e ramo tetã pygua kuery oupa Jesus oexa aguã. Oexa vy ojerure ijyvy gui oo ju aguã re.

9

Marcos 2.1-12; Lucas 5.17-26

- ¹ Kanoã py Jesus oĩ vy yy rovaigua re oaxa. Ha'e vy guetã katy oo.
- ² Ha'e oĩa py oguerua peteĩ uguata e'ỹ va'e hupa reve. Ha'e kuery ojerovia etea Jesus oexa vy aipoe'i uguata e'ỹ va'e pe:
— Xera'y, ndepy'a guaxu ke. Rejevavyague omboguepaa ma — he'i.
- ³ Ha'e ramo kuaxia re nhombo'e va'ety ikuai va'e aipoe'i ojeupe ae:
— Peva'e re tu ijayvu vai — he'i okuapy.
- ⁴ Ha'e rã Jesus ma ha'e kuery ojeupe ae ijyvua oikuaa vy aipoe'i:
— Mba'e re tu po rami ri pendeyvu pendepy'a py?
- ⁵ Mba'e ayvu rupi tu ndaxyive xeyvu aguã: “Rejevavyague omboguepaa ma”, tyrã pa “Epu'ã, ha'e uguata” ha'e aguã?
- ⁶ Ha'e rami teĩ peikuaa aguã Ava ra'y ojeapo va'ekue ko vvy re oiko teĩ joeko vaiague ombogue aguã voi ipo'aka va'ea —
Oguata e'ỹ va'e pe ju aipoe'i:
— Epu'ã ha'vy, eupi nderupa, ha'e tereo ndero py — he'i.*
- ⁷ Ha'e ramo opu'ã vy ngoo katy oo.
⁸ Ha'e nunga heta va'e kuery oexa vy okyjepa reve ombojerovia okuapy Nhanderuete, ha'e rami aguã avakue ombopo'aka ramo.
Marcos 2.13,14; Lucas 5.27,28
- ⁹ Jesus ha'e gui oo vy oexa peteĩ ava Mateus hery va'e, imposto opagaaty py uguapy oiny ramo. Ha'e va'e pe ijayvu vy
— Eju xerupive — he'i. Ha'e ramo opu'ã vy oo hupive.
Marcos 2.15-17; Lucas 5.29-32
- ¹⁰ Ha'e gui oo py mesa py Jesus oĩ ramo heta ou imposto re nhombopaga va'ety ha'e heko vai va'e. Ha'e va'e kuery ma Jesus ha'e hemimbo'e kuery reve onhemboja avi okuapy.
- ¹¹ Ha'e nunga fariseu kuery oexa vy oporandu hemimbo'e kuery pe:
— Mba'e re tu penembo'ea okaru ri imposto re nhombopaga va'ety ha'e ojevavya va'e kuery reve?
- ¹² Ha'e ramo Jesus oendu vy ombovai:
— Hexaĩ va'e kuery ma ndoipotai 'rã poropoanoa, imba'eaxy va'e anho 'rã oipota.
- ¹³ Tapeo, peikuaa pota pova'e ayvu mba'e he'ia paa re: “Xevy pe mymba peme'ẽ 'rãgue py aipota teĩ penhomboxy.” Mba'eta xee ma heko porã va'e aenoĩ aguã e'ỹ aju, ha'e rã heko vai va'e aenoĩ aguã [ojeko rerova aguã].*
- Marcos 2.18-22; Lucas 5.33-39*
- ¹⁴ Ha'e rire João Batista remimbo'e kuery ou. Ha'e vy oporandu iuxupe:
— Mba'e re tu ore kuery [mbovykue rei e'ỹ] rokaru e'ỹ re orekuai, fariseu kuery voi, ha'e rã neremimbo'e kuery ma ha'e rami e'ỹ ikuai?
- ¹⁵ Jesus ombovai:

* 9:6 João 10.37,38 * 9:13 Oséias 6.6

— Omendaa py ha'eve nda'u oenoĩ mbyre kuery iporiau aguã, ha'e kuery reve omenda va'e oĩ teria ja? Ha'e rami avi ovaẽ 'rã ha'e kuerya gui omenda va'e oipe'aa aguã ára. Ha'e va'e ára mae ma ha'e kuery ikuai 'rã okaru e'ỹ re.

¹⁶ — Avave rei ao ymague re nombojai 'rã ajukue pyau ra'ykue, mba'eta ombojaague omboi 'rã ao gui. Ha'e ramo oxorou tuvixave 'rã.

¹⁷ Ha'e avave rei hyru ymague py nomboyruí 'rã vinho pyau, mba'eta ombovaipa 'rã hyru. Vinho onheẽmba 'rã, ha'e hyru voi ivaiapa avi 'rã. Ha'e rami 'rãgue py vinho pyau rã hyru pyau py 'rã omoĩ, mokoĩve oĩ porã aguã.

Marcos 5.21-24a; Lucas 8.40-42a

¹⁸ Ha'e nunga re ijayvu teri reve ou peteĩ huvixa. Onhemboja vy omboete. Ha'e vy aipoe'i:

— Xerajy omano ange'i. Ha'e rami teĩ eju, emoĩ ndepo hexe oikove ju aguã — he'i.

Marcos 5.24b-34; Lucas 8.42b-48

¹⁹ Ha'e ramo Jesus opu'ã vy oo hexeve, hemimbo'e kuery voi.

²⁰ Oiko avi peteĩ kunha, doze ma'te'ỹ re ma gueko re riae oiko va'e. Ha'e va'e ma hakykue gui ou vy opoko ijao apy re,

²¹ mba'eta ojeupe ae “Ijao apy re rive apoko teĩ akuera 'rã” he'i.

²² Ha'e ramo Jesus ojere vy oexa. Ha'e vy aipoe'i:

— Xerajy, ndepy'a guaxu ke. Rejeroviaa ndereraja jepe — he'i. Ha'e ramove kunha va'e okuera.

Marcos 5.35-43; Lucas 8.49-56

²³ Huvixa ro py Jesus ovaẽ vy oexa mimby monhe'ẽa ha'e heta va'e kuery ojae'o rã. Ha'e vy aipoe'i:

²⁴ — Pejepe'a ke, mba'eta kunha'i nomanoi, oke rima — he'i. Ha'e ramo ojoiari okuapy.

²⁵ Ha'e gui Jesus omoẽmba vy oike. Kunha'i va'e po re ojopy ramo opu'ã.

²⁶ Ha'e nungakue oendupaa ha'e va'e yvy ha'e javi rupi.

Mokoĩ ára revegua e'ỹ omongueraague

²⁷ Ha'e gui Jesus oo rã hakykue rupi ou mokoĩ ára revegua e'ỹ. Ojapukai jogueruvy:

— Davi ramymino, oremboaxy ke — he'i.

²⁸ Ha'e gui oo py Jesus oike jave hexe onhemboja jogueruvy ára revegua e'ỹ. Ha'e ramo oporandu ha'e kuery pe:

— Perovia pa pejerurea rami ajapo aguã xepo'aka va'ea?

Ha'e kuery ombovai:

— Tá, Senhor — he'i.

²⁹ Ha'e ramo ha'e kuery rexa re opoko vy aipoe'i:

— Toiko ha'vy pejeroviaa rami — he'i.

³⁰ Ha'e ramove hexa ojepe'a.

Ha'e gui Jesus aipoe'ive ju:

— Pejejoko ke avave rei pe pemombe'u e'ỹ aguã — he'i.

³¹ Ha'e rami teĩ ha'e kuery oo vy ha'e va'e yvy ha'e javi rupi omombe'upa.

Peteĩ ava ijayvu e'ỹ va'e omonguera ramo fariseu kuery ijayvu riague

³² Ha'e kuery oje'oi rire oĩa py oguerua peteĩ ava anha onhemonde ramo nda'ijayvui va'e.

³³ Anha oipe'a rã ijayvu e'ỹ va'ekue ijayvu. Ha'e ramo heta va'e kuery onhemondyipa vy aipoe'i:

— Peva'e nunga jaexa va'e'ỹ teri Israel kuerya rupi — he'i.

³⁴ Ha'e rã fariseu kuery ma ijayvu rei okuapy:

— Anha ruxiva po'akaa rupi rima oipe'a anha.*

Opa rupi Jesus ojapo porã, ha'e omba'eapo va'e kuery re ombojojaague

³⁵ Ha'e gui Jesus ma tetã ha'e tekoa ikuai va'e rupi oguata oikovy, onhembo'eaty oĩ va'e rupi guive. Nhombo'e vy omombe'u oikovy Nhanderuete po'akaa, nhomonguera guive opa marãgua mba'eaxy gui.

³⁶ Heta va'e kuery oexa vy omboaxy, mba'eta vexa'i ija e'ỹ va'e rami ojexavai ha'e ikangy okuapy ramo.*

³⁷ Ha'e rami vy guemimbo'e kuery pe aipoe'i:

— Anhetẽ heta oĩ omono'õa aguã, ha'e rã omba'eapo va'e kuery ma mbovy'i.*

³⁸ Ha'e nunga rupi pejerure Senhor mba'ety ja va'e pe ombouve aguã imba'ety rupi omba'eapo va'erã.

10

Marcos 3.13-19; Lucas 6.12-16

¹ Ha'e gui guemimbo'e kuery doze-ve Jesus oenoĩ vy ombopo'aka nhe'ẽ vai oipe'a, ha'e opa marãgua mba'eaxy gui nhomonguera aguã.

² Doze apóstolo kuery rery ma po rami: Jypygua ma Simão Pedro hery va'e, ha'e gui tyvy André, Zebedu ra'y kuery Tiago ha'e tyvy João,

³ Filipe ha'e Bartolomeu, Tomé ha'e imposto re nhombopaga va'ekue Mateus, Alfeu ra'y Tiago ha'e Tadeu,

⁴ Simão Zelote hery va'e ha'e ijopy uka nhemiarã Judas Iscariotes avi.

Marcos 6.7-11; Lucas 9.1-5

⁵ Ha'e gui doze guemimbo'e kuery Jesus omondouka ta vy po rami ijayvu:

* 9:34 Lucas 11.14-18 * 9:36 Marcos 6.34 * 9:37 Lucas 10.2

— Tapeo eme judeu e'y va'e ikuai rupi, neĩ Samaria pygua kuery retã py voi pevaẽ eme.

⁶ Ha'e rã tapeo vexa'i kuery Israel regua okanhy va'e peka.

⁷ Peoa rupi pemombe'u yva pygua po'akaa ojekuaa aguã namomybryvei maa.

⁸ Pemonguera imba'eaxy va'e, pemboete ju omano va'ekue, peiky'a'o lepra revegua, ha'e peipe'a anha. Mba'emo pejopy rive rire peme'ẽ rive ju 'rã joupe.

⁹ Pendeku'a re peraa eme perãta, ouro, prata neĩ overa va'e guigua,

¹⁰ neĩ voko peraa eme tape rupi, neĩ mokoĩ kamixa, pendepy regua, neĩ pendepopoka guive, mba'eta omba'eapo va'e rei ha'ev'e ojopy aguã ho'u va'erã.

¹¹ Ha'e tetã py e'y vy tekoa oĩ va'e rupi pevaẽa py peporandu 'rã heko porã va'e oiko va'ea re. Ha'e va'e kuery ro py ae 'rã pepyta, peove aguã ára peve.

¹² Oo py pevaẽ vy pexarura 'rã ha'e pygua kuery pe.

¹³ Ha'e ramo oo pygua kuery heko porã ri ramo ha'e kuery re oĩ 'rã peroayvu porãague. Ha'e rã heko vai ramo pendere ae ju tojeyv peroayvu porãague.

¹⁴ Ha'e kuery napenemovaẽi, neĩ pendeyv noenduxeĩ ramo ha'e va'e oo e'y vy tetã gui peo ju vy pendepy regua gui peity-ity 'rã yvy ku'i.*

¹⁵ Anhetẽ aipoa'e pẽvy: Nhombopagaa ára py ha'e va'e tetã pygua kuery gui omboaxyve 'rã Sodoma ha'e Gomorra pygua kuery.*

Mba'emo gui omonheanguague

¹⁶ — Ma'ẽ, xee ma vexa'i rami romondouka aguara mbyte rupi. Ha'e nunga rupi peiko kuaa 'rã mboi rami, ha'e rã apyaxu'i rami 'rã pendekuai rive.

¹⁷ Penheangu ke avakue gui, mba'eta penemboaxa 'rã huvixa kuery po py, ha'e penenupã 'rã onhembo'eaty oĩ va'e rupi.

¹⁸ Xekáuxa pendereraa 'rã huvixa kuery ha'e huvixave renonde. Ha'e ramigua oiko 'rã ha'e kuery ha'e judeu e'y va'e kuery pe xeregua ayvu pemombe'u aguã.

¹⁹ Ha'e rami avi penemboaxaa ramo pepẽxa rei eme marã rami e'y vy mba'e nunga re pa pendeyv aguã re, mba'eta ha'e va'e hora-ve pendeyvurã oikuaa ukaa 'rã pẽvy.

²⁰ Mba'eta pendejegui ae e'y 'rã pendeyv, ha'e rã Penderu Nhe'ẽ ijayvu 'rã pẽgui.*

²¹ Amongue ojopy uka 'rã guyyv ae ojuka uka aguã, ha'e tuu kuery ojopy uka 'rã gua'y kuery ae. Ta'y kuery opu'ã 'rã ngu kuery re ojuka uka avi aguã.

²² Xerery káuxa pavẽ nda'ija'ei 'rã pendere. Ha'e rami teĩ opa peve ogueropo'aka va'e oo jepe 'rã.

²³ Ha'e gui tetã py pendere opu'ã reia ramo amboae henda katy ju penha, mba'eta anhetẽ aipoa'e pẽvy: Ava ra'y ojeapo va'ekue ou peve napevaẽmba jepei 'rã Israel regua tetã ikuai va'e rupi.

Omokyre'ỹa rupi ijayvuague

²⁴ — Temimbo'e kuery ma imbo'ea gui yvateve va'e'e'y, tembiguai kuery voi opatõ gui yvateve va'e'e'y guive.

²⁵ Ha'ev'e temimbo'e kuery ikuai aguã imbo'ea reko rami, ha'e tembiguai kuery ikuai aguã opatõ oikoa rami. Hoo va'e pe “Anha huvixa Belzebu” 'ea ramo hoo pygua kuery pe katuve 'rã teve.*

²⁶ Ha'e rami teĩ pekyje eme ha'e kuery gui, mba'eta mba'emo onhomi mbyre oexa ukapaa 'rã, ha'e oikuaa e'y pyre voi oikuaapaa 'rã.

²⁷ Pytũa py xee rombo'eague ma hexakãa py ju 'rã pemombe'u, pendeapyxa'i py xeayvuague ma oo apyte áry gui ju 'rã pemombe'u.

²⁸ Pestyje eme penderete jukaa kuery gui, mba'eta penenhe'ẽ ma ha'e kuery ndojuka kuaai 'rã. Pejererokyje 'rã nhonhe'ẽ ha'e joete tata ogue e'y va'e py omokanhy aguã ipo'aka va'e renonde anho.

²⁹ — Mokoĩ guyra'i nda'u peteĩ'i hatã'i va'e repy e'y ri? Ha'e rami teĩ vvy py neĩ peteĩve ndo'ai 'rã Penderu oipota e'y rã.

³⁰ Peẽ kuery re katuve ma opena, mba'eta pende'a peneakã re oĩ va'e voi oipapapa.

³¹ Ha'e nunga rupi pekyje eme, mba'eta heta guyra'i gui peẽ pevareve.

³² Ha'e nunga rupi avakue renonde xevy pe oikoa omombe'u va'ekue ha'e javi ma xee voi ha'e rami 'rã amombe'u Xeru yva pygua renonde.

³³ Ha'e rã avakue renonde naxemombe'uxeĩ va'ekue ma xee voi namombe'ui 'rã Xeru yva pygua renonde.*

Haxy va'e re ijayvuague

³⁴ — Pexa'ã eme ko vvy re aju peteĩ rami nhomoingoarã aru aguã. Peteĩ rami nhomoingoarã aru aguã e'y aju, ha'e rã kyxe.

³⁵ Mba'eta aju rire avakue joo rami e'y 'rã ikuai ngu reve, ha'e imemby kuery ha'e rami ae 'rã ikuai oxy reve, ha'e ipi'a ra'yxy kuery avi ome xy reve 'rã ikuai.

³⁶ Ha'e rami vy avakue rovaigua ma hoo pygua kuery ae 'rã ikuai.*

³⁷ Amongue xegui ngu, e'y vy oxy ri oayvuve vy nda'ev'eĩ xerupivegua oiko aguã. Ha'e rami ae avi gua'y e'y vy guajy ri xegui oayvuve vy nda'ev'eĩ xerupivegua oiko aguã.

³⁸ Ha'e ojeupegua kuruxu ndogueraaxei, ha'e xerupive ndooxeĩ va'e ma nda'ev'eĩ xeremimbo'erã.

* 10:14 Atos 13.50,51; 18.6 * 10:15 Lucas 10.1-12 * 10:20 Lucas 12.11,12; 1 Pedro 3.13-17; 4.12-19 * 10:25 Lucas 6.40; João 15.20
* 10:33 Lucas 12.29-31 * 10:36 Miquéias 7.6, Lucas 12.51-53, 14.26,27

³⁹ Nomanoxei va'ekue omokanhy 'rã guekove. Ha'e rã xekáuxa omano va'e ma ojou ju 'rã guekove.*

Mba'emo rekovia re ijayvuague

⁴⁰ — Amongue penemovaẽ ramo xee avi ha'e kuery xemovaẽ, ha'e xemovaẽ va'e ma xembouare avi omovaẽ.

⁴¹ Profeta kuery pe “Profeta” he'i vy omovaẽ va'ekue ma hekovia ojopy 'rã profeta pegua rami. Ha'e heko porã va'e kuery pe “Heko porã va'e” he'i vy omovaẽ va'ekue ma hekovia ojopy 'rã heko porã va'e pegua rami.

⁴² Ha'e rami ae avi anhetê aipoa'e pëvy, amongue kova'e kyrĩ va'e rami ikuai va'e pe “Jesus remimbo'e” he'i vy petei karo yro'yxã ome'ẽ va'ekue voi ndojopy e'yi 'rã hekovia.*

11

Tetã ikuai va'e rupi Jesus qyvu omombe'uague

¹ Ha'e rami guemimbo'e kuery doze-ve Jesus ombo'epa ma vy ojepe'a ha'e gui. Nhombo'e ha'e ayvu omombe'u oikovy ha'e katy'i tetã ikuai va'e rupi.

Lucas 7.18-23

² Nhuã py João Batista oĩa py Cristo mba'emo ojapo oikovya omombe'ua rã oendu vy ixupe ombou guemimbo'e kuery po rami oporandu aguã:

³ “Ndee ae teve reju 'rã va'ekue, tyrã pa roarõve 'rã amboaẽ?” he'i aguã.

⁴ Ha'e rã Jesus ombovai vy aipoe'i ha'e kuery pe:

— Tapeo ju João pe pemombe'u mba'emo pendu ha'e pexa va'ekue,

⁵ mba'eta ára revegua e'ỹ oma'ẽ ju, oguata e'ỹ va'ekue oguata ju, lepra revegua ojeky'a'o ju, ijapyxa e'ỹ va'ekue oendu ju, omano va'ekue onhemoete ju, ha'e iporiaukue'i pe omombe'ua ayvu porã.*

⁶ Ovy'a ete 'rã xere ojeroviaa gui ndojepe'ai va'e.

Lucas 7.24-35

⁷ Ha'e kuery oopa ma rire heta va'e kuery pe ju Jesus ijayvu João Batista reko re. Aipoe'i:

— Marã ramigua pexa aguã tu peo raka'e tekoa e'ỹa py? Takua'i yvytu omomy-momyĩ va'e ramigua rive ri ty'y?

⁸ Ha'e rami e'ỹ rã marã ramigua pexa aguã tu peo? Petei ava ao porã py onhemonde va'e ri ty'y? Ha'e rami avi onhemonde porã va'e ma huvixa ro py ikuai va'e anho.

⁹ Marã ramigua tu ha'vy peo pexa? Profeta? Tá, xee aipoa'e pëvy: João Batista ma profeta ikuai va'e gui voi yvateve va'e.

¹⁰ Mba'eta hekorã re ae ipara oiny: “Nerenonderã xee amondouka 'rã petei xerembiguai, nderaperã oguereko katu aguã.”*

¹¹ Anhetê aipoa'e pëvy: Kunhague gui oiko va'ekue jipoi João Batista gui yvateve va'e. Ha'e rami avi yva pygua po'akaa py yvyĩgueve'i va'e ma ixugui yvateve.

¹² Mba'eta João Batista oikoa ára guive aỹ peve ma onhea'ãa 'rã oupity aguã yva pygua po'akaa, onhea'ã va'e kuery anho 'rã oupity.

¹³ Mba'eta profeta kuery ha'e lei ma João oikoa ára peve'i omombe'ua.

¹⁴ Ha'e gui peẽ perovia ri ramo ha'e ae Elias ou 'rã va'ekue oiko.

¹⁵ Ijapyxa [oendu aguã] oĩ va'e toendu.

¹⁶ — Mba'e nunga re nda'u ambojoja 'rã aỹgua kuery reko? Ha'e va'e kuery ma ikuai kyrĩgue tetã mbyete rupi oguapy vy oirũ kuery pe ojapukai va'e rami:

¹⁷ “Mimby romonhe'ẽ ramo peẽ ndapejeroxyei, ha'e rã omanoa pygua ju romonhendu teĩ ndapejae'oxei”, he'i va'e kuery rami.

¹⁸ Mba'eta João Batista ou vy okaru ha'e oy'u e'ỹ re oiko. Ha'e rami rã ixupe “Anha reve rima oiko” 'ea.

¹⁹ Ha'e rã Ava ra'y ojeapo va'ekue ma ou vy okaru ha'e oy'u ramo ixupe “Peva'e ma okaru guaxu, vinho oy'u, ha'e imposto re nhombopaga va'ety ha'e heko vai va'e kuery re irũ va'e”, 'ea. Ha'e rã hi'arandu va'e ma mba'emo ojapoa py oexa uka 'rã o'arandu.

Lucas 10.13-15

²⁰ Ha'e gui Jesus omboypy tetã ikuai va'e pygua kuery re ijayvu aguã, mba'eta ha'e va'e rupi mba'emo porã heta ojapo teĩ ndojeko rerovai rire. Ha'e vy aipoe'i:

²¹ — Peẽ Corazim ha'e Betsaida pygua kuery pe nda'evei ete 'rã. Mba'eta pendea py hexa pyrã ajapo va'e ramigua Tiro ha'e Sidom py ojapoa va'e rire, ha'e pygua kuery ojeko rerova voi 'rãgue. Ha'e rami vy ajukue vaikue py onhemonde 'rãgue tanhimbu py oguapy reve.

²² Ha'e nunga rupi aipoa'e pëvy: Nhombopagaa ára py peẽ kuery gui omboaxyave 'rã Tiro ha'e Sidom pygua kuery.

²³ Ha'vy peẽ Cafarnaum pygua kuery, peo 'rã teve yva peve? Any, tata ogue e'ỹ va'e py 'rã pe'a. Mba'eta mba'emo porã pendea py ajapo va'e ramigua Sodoma py ojapoa va'e rire ma kova'e ára peve oĩ 'rãgue.

²⁴ Pëvy aipoa'e: Nhombopagaa ára py pendegui omboaxyave 'rã Sodoma yvy regua kuery.

Lucas 10.21,22

²⁵ Ha'e jave py Jesus ijayvu atã:

* 10:39 Marcos 8.34,35; Lucas 9.24; Apocalipse 12.11

* 10:42 Mateus 25.34-40; Marcos 9.41; João 13.20

* 11:5 Lucas 4.16-21

* 11:10

— Xeru yva ha'e yvy re ndepo'aka va'e, xee roguerovy'a, mba'eta ha'e nunga ma hi'arandukue pe e'ỹ reikuaa uka, neĩ ombo'e pyre pe e'ỹ guive. Yvyigüeve'i pe anho reikuaa uka.

²⁶ Tá, Xeru, ha'e rami ae reipota.

²⁷ — Opa mba'e Xeru omboaxapa xevy. Avave rei ndoikuai Ta'y, Tuu e'ỹ vy. Ha'e avave rei ndoikuai Tuu, Ta'y e'ỹ vy, ha'e amongue pe Ta'y oikuaa ukaxea va'e ete'i.

“Peju ke xea py”, he'iague

²⁸ — Peju ke xea py penekane'õ ha'e pevoyi va'e ha'e javi. Ha'e rá xee romokane'õgua 'rá.*

²⁹ Pendejee pemõi xeregua canga, peikuaa xegui, mba'eta xepy'a re xevai reia noĩ, ha'eva rei'ia anho. Ha'e rami vy peju 'rá penenhe'ẽ opytu'u aguã.

³⁰ Mba'eta xeregua canga ma ndaxyi, ha'e xevoyi nda'ipoyi guive.*

12

Marcos 2.23-28; Lucas 6.1-5

¹ Ha'e jave py sábado ára Jesus oaxa trigoty rupi. Ha'e gui hemimbo'e kuery okaruxe vy omboypy hi'a oipo'o vy ho'u heravy aguã.

² Ha'e nunga fariseu kuery oexa vy aipoe'i ixupe:

— Ma'ẽ, neremimbo'e kuery ojapo sábado ára py nda'evei va'e — he'i okuapy.

³ Ha'e ramo Jesus aipoe'i ha'e kuery pe:

— Ndaperoayvui teve Davi okaruxe vy oirũ kuery reve ojapo va'ekue?

⁴ Mba'eta Nhanderuete ro py Davi oike vy ho'u raka'e mbojape Senhor renonde pe omoĩ mbyre, ha'e kuery ho'u aguã nda'evei va'eri, neĩ hupive ikuai va'e, sacerdote kuery pe anho ha'eva.

⁵ Ha'e ndaperoayvui teve lei re oĩ va'e? Mba'eta sábado py sacerdote kuery maiky'a va'e opyta e'ỹ re ojapo 'rá mba'emo templo ropy rupi sábado py amboae kuery ojapo aguã nda'evei va'e. Ha'e rami avi xee aipoa'e pëvy:

⁶ Apy oĩ va'e templo gui yvateve va'e.

⁷ Ha'e nunga rupi pova'e ayvu: “Mba'emo peapy reve xevy peme'ẽ 'rãgue py aipotave penhomboaxy”, he'iague peikuaa va'e rire ndapejou vai 'rãgue ojevavy e'ỹ va'e.*

⁸ Mba'eta Ava ra'y ojeapo va'ekue ma sábado ára re voi ipo'aka va'e.

Marcos 3.1-6; Lucas 6.6-11

⁹ Jesus ha'e gui oo vy oike ha'e kuery onhembo'eaty py.

¹⁰ Ha'e py oĩ pete'ĩ ava ipo rovai piru va'e. Ha'e ramo Jesus re ha'e kuery ijavy reixe vy oporandu okuapy Jesus pe:

— Ha'eva rami ri nda'u sábado ára py nghanomongueraa? — he'i okuapy.

¹¹ Ha'e ramo ombovai:

— Mava'e peẽ kuery regua nda'u sábado py penerymba vexe'i vyvkua py ho'a rá napenhea'ãi 'rá ha'e gui penoẽ aguã?

¹² Vexa'i gui nhande va'e ovareve ramo ha'eva sábado py joupe jajapo porã aguã — he'i.

¹³ Ha'e gui ava pe ju Jesus aipoe'i:

— Embo'yvi ndepo — he'i. Ipo ombo'yvi rá iporã ju ipo rovai rami.

¹⁴ Ha'e rá fariseu kuery ma ojepe'a vy jogueroayvu hovai, ojuka uka aguã re.

Jesus ojepe'aague

¹⁵ Jesus ha'e nunga oikuaa vy ojepe'a ha'e gui. Heta avi oje'oi hakykue. Ha'e ramo omongueraa.

¹⁶ Ha'e vy omongeta avave rei pe ha'e kuery omombe'u e'ỹ aguã,*

¹⁷ profeta Isaías pe aipoe'i ukaague ojeupity aguã:

¹⁸ “Ma'ẽ, pee ma oĩ xerebiguairã aiporavo va'ekue, xerebiayvu Xenhe'ẽ py arovy'a va'e. Hexe amoĩ 'rá Xenhe'ẽ. Ha'e ramo amboae regua kuery pe voi omombe'u 'rá ha'eva rami joguerekoa.

¹⁹ Nanhomotare'ỹi 'rá, nda'ijayvu atã 'rá, neĩ tetã mbyte rupi nda'ijayvui 'rá guive.

²⁰ Nomondoĩ 'rá takua opẽ va'e, neĩ nombogüei 'rá tataendy ogue rai'i va'e, ha'eva rami joguerekoa ipo'aka aguã rami ojapo e'ỹa ja.

²¹ Ha'e ramo hery rupi amboae regua kuery voi oarõ 'rá okuapy.”*

Marcos 3.20-30; Lucas 11.14-23

²² Jesus oĩa py oguerua pete'ĩ ava hexe anha onhemonde rá ndoexai neĩ nda'ijayvui va'e. Omonguera ramo ijavy e'ỹ va'ekue ijavy ha'e oexa ju.

²³ Ha'e ramo heta va'e kuery oexa vy onhemondyipa. Ha'e vy

— Peva'e e'ỹ nda'u Davi ramymino? — he'i okuapy.

²⁴ Ha'e rá fariseu kuery ma ha'e nunga oendu vy ijavy rei okuapy:

— Peva'e tu anha ruvixa Belzebu po'akaa rupi rima oipe'a oikovy anha kuery — he'i.

²⁵ Ha'e ramo ha'e kuery py'a py ijavyva Jesus oikuaa vy aipoe'i:

— Tetã pygua kuery minha jomeme ri opu'ã vy nhomomba 'rá. Tetã, ha'e e'ỹ vy oo pygua jomeme opu'ã vy okanhymba 'rá.

* 11:28 João 7.37 * 11:30 Filipenses 2.5-8 * 12:7 Oséias 6.6 * 12:16 Marcos 3.7-12 * 12:21 Isaías 42.1-4

²⁶ Ha'e rami ae avi Satanás kuery meme ri jope'a va'e rire ojee ae opu'ã 'rāgue. Mba'exa tu ha'vy ipo'akave ta?

²⁷ Anhetê ri Belzebu po'akaa rupi xee anha aipe'a ramo, mba'exagua po'akaa rupi tu ha'vy pendera'y kuery oi'pe'a? Ha'e nunga rupi ha'e kuery ae oikuaa uka 'rã pendeayvu rivea.

²⁸ Ha'e rã Nhanderuete guigua Nhe'ê po'akaa rupi ae xee anha aipe'a ramo anhetê ete Nhanderuete po'akaa ojekuaa ra'e peê kuery pe.

²⁹ Ha'e rami ae avi mba'exa 'rã tu ojerovia vaipa va'e ro py amongue oike vy ojokua ranhe e'ÿ re imba'e rei-rei re imonda? Mba'eta ojokua vy 'rãe ogueraapa hoo gui.

³⁰ Xerevegua e'ÿ va'e ma xerovaigua ikuai, ha'e xea py ndajoguerui va'e ma xegui nhomonheguaẽmba 'rã.

³¹ Ha'e nunga rupi aipoa'e pëvy: Avakue ojejayvague ha'e ijayvu vaiguae ha'e javi omboguaa 'rã. Ha'e rã Nhe'ê re ijayvu vaiguae ma nombogueai 'rã.

³² Ava ra'y ojeapo va'ekue re teĩ amongue ijayvu vai ramo ha'e nungakue omboguaa 'rã. Ha'e rã Nhe'ê Ky'a E'ÿ re ri ijayvu vaia ramo nombogueai 'rã kova'e vvy re, neĩ vvy pyau re voi.

Lucas 6.43-45

³³ — Peiko ke vvyra porã ha'e hi'a porã va'e rami, ha'e rami e'ÿ vy vvyra porã e'ÿ ha'e hi'a iporã e'ÿ va'e rami peiko. Mba'eta vvyra ikuai va'e ma hi'a re jaikuaa pota vy 'rãe jaikuaa.

³⁴ Mboi rami pendekuai va'e, mba'exa tu pendeko vai va'erĩ pendeayvu ta mba'emo porã re? Mba'eta nhandejuru py nhandeayvu 'rã mba'emo nhandepy'a re tynyê va'e re.

³⁵ Heko porã va'e ma mba'emo porã omoĩ porã va'ekue gui oguenoê 'rã mba'emo porã anho. Ha'e rã heko vai va'e ma mba'emo vai omoĩ porã va'ekue gui oguenoê 'rã mba'emo vai.

³⁶ Aipoa'e pëvy: Avakue ijayvuague ndovarei va'e ha'e javi re 'rã opaga nhomboayvua ára py.

³⁷ Mba'eta pendeayvuague re ae penemboeko porã, ha'e rami e'ÿ vy pendeayvuague re penembopegaa 'rã.

Lucas 11.29-32

³⁸ Ha'e ramo kuaxia re nhombo'e va'ety ha'e fariseu kuery regua aipoe'i:

— Porombo'ea, ore roexaxe hexa pyrã rejapo rã — he'i.*

³⁹ Ha'e ramo ombovai:

— Heko vai ha'e itavy rei va'e kuery ae 'rã ojerure hexa pyrã ajapo aguã. Ha'e rami teĩ ha'e kuery pe peteive ndojapoai 'rã, profeta Jonas re oiko va'ekue ramigua e'ÿ vy.

⁴⁰ Mba'eta Jonas mboapy ára ha'e mboapy pytũ re pira guaux rye py oĩague rami avi Ava ra'y ojeapo va'ekue voi mboapy ára ha'e mboapy pytũ re oĩ 'rã vvy guýry.*

⁴¹ Ha'e nunga rupi nhomboayvua ára py Nínive pygua kuery opu'ã vy ijayvu 'rã okuapy aýgua kuery re, mba'eta Jonas ayvu omombe'u rã ha'e kuery oendu vy ojeko rerovapa rire. Ha'e rã apy oĩ va'e ma Jonas gui yvateve va'e.

⁴² Nhomboayvua ára py kuaray puku-a katygua huvixave kunha voi opu'ã vy ijayvu 'rã aýgua kuery re, mba'eta vvy apy gui ou raka'e Salomão arandua oendu aguã. Ha'e rã apy oĩ va'e ma Salomão gui yvateve va'e.

Lucas 11.24-26

⁴³ — Ha'e rami avi avakue gui nhe'ê vai oê vy tekoa e'ÿa rupi ju 'rã oiko, ikane'õgua aguã oeka vy. Ha'e gui ndojoui vy

⁴⁴ ojeupe aipoe'i 'rã: “Aa ju ta xero ajepa'aaague py”, he'i 'rã. Ha'e rami vy ou ju vy ojou 'rã oo avave rei noĩai va'e, oi'peipa ha'e omoatyrõmba pyre.

⁴⁵ Ha'e gui oo ranhe vy sete nhe'ê ju ogueru 'rã ixugui nda'eveive va'e, ha'e py oike vy ikuai va'erã. Ha'e rami rire opaa py jypy guare gui nda'eveive 'rã ava va'e pe. Ha'e ramigua ae 'rã oiko kova'e kuery heko vai va'e re.

Marcos 3.31-35; Lucas 8.19-21

⁴⁶ Heta va'e kuery pe Jesus ijayvu teri jave ixu ha'e tyvy kuery ovaẽ oka py, hexeve ijayvuxe vy.

⁴⁷ Ha'e ramo amongue aipoe'i ixupe:

— Ndexy ha'e nderyvy kuery, pee oka py ikuai. Ndereve ijayvuxe okuapy — he'i.

⁴⁸ Ha'e ramo imombe'uare pe ombovai:

— Marã ramigua tu ha'i ha'e xeryvy kuery ikuai? — he'i.

⁴⁹ Ha'e gui guemimbo'e kuerya katy okuave'ẽ vy aipoe'i:

— Peva'e ae ma ha'i ha'e xeryvy kuery.

⁵⁰ Mba'eta Xeru yva pygua oipotaa rami ojapo va'e ma ha'i, xeryvy ha'e xereindy kuery ikuai.*

13

Marcos 4.1-9; Lucas 8.4-8

¹ Ha'e va'e árave oo gui Jesus oo vy oguapy ye'ẽ yvýry.

² Heta ijyvýry ono'õ ramo peteĩ kanoã py ju oĩ vy oguapy oiny ha'e py. Ha'e rã heta va'e kuery ma ita ku'i reia rupi opu'ã okuapy.

³ Ha'e gui ha'e kuery pe opa mba'e re ijayvu mba'emo re ombojoja vy. Ha'e vy aipoe'i:

— Peteĩ ava oo mba'emo ra'yĩ moaĩ vy.

⁴ Ha'e va'e omoaĩ ramo amongue ha'yígue ho'a tape yvýry rupi. Ha'e nunga ma guyra'y ou vy ho'upa.

⁵ Amboae ma itaty vvy mbovy'i reia rupi ho'a. Ha'e nungakue ma vvy re ndoike pukui rire henhoĩ voi'i.

⁶ Ha'e rami teĩ kuaray oẽ vvy omombirupa, ndapoi rã.

⁷ Amboae ma juu mbyte rupi ho'a. Ha'e gui juu yvate vvy ojukapa.

⁸ Ha'e rã amboae ma vvy porãa rupi ho'a. Ha'e nungakue ma hi'a, cem, sessenta, trinta ra'yĩ oiko peteĩ-teĩ gui.

⁹ Ijapyxa [oendu aguã] oĩ va'e toendu.

Marcos 4.10-20; Lucas 8.9-15

¹⁰ Ha'e gui hemimbo'e kuery onhemboja vvy oporandu ixupe:

— Mba'e re tu mba'emo re rembojoja vvy anho ndeayvu ha'e kuery pe?

¹¹ Ha'e ramo ombovai:

— Pendeivy pe yva pygua oikuaa uka opo'akaa py mba'emo oiko va'e ndoikuaa ukai teri va'ekue. Ha'e rã ha'e kuery pe ma ndoikuaa ukai.

¹² Mba'eta mba'emo oguereko va'e pe ome'ẽave 'rã, oguereko retave aguã. Ha'e rã oguereko e'y va'e gui ma oguereko'i va'e voi oi'pe'aa 'rã.

¹³ Ha'e nunga rupi ae mba'emo re ambojoja vvy xeayvu ha'e kuery pe. Mba'eta ha'e kuery oma'ẽ teĩ ndoexai, ha'e oendu teĩ noendu kuaai, neĩ ndoikuaai guive,

¹⁴ Isaías aipoe'iague ojeupity aguã: “Pendeapyxa py pendu teĩ mba'eve napendu kuaai 'rã. Penderexa py pexa teĩ mba'eve ndapexa kuaai 'rã.

¹⁵ Mba'eta kova'e kuery ma inhakã ratã va'e. Oapyxa py noenduxeĩ okuapy, ha'e guexa omboty oexa e'y aguã, oapyxa py oendu e'y aguã, ha'e opy'a py mba'eve oikuaa e'y aguã, ha'e rami vvy ojeko rerova e'y aguã, xevy pe onhemonguera uka e'y aguã”, he'iague.*

¹⁶ Ha'e rã peẽ kuery ma pevy'a 'rã, mba'eta penderexa oexa, ha'e pendeapyxa oendu.

¹⁷ Mba'eta anhetẽ aipoa'e pëvy: Heta ikuai raka'e profeta kuery ha'e heko porã va'e peẽ kuery pexa va'e oexaxe va'eri ndoexai, ha'e pendu va'e oenduxe va'eri noendui.

¹⁸ — Pejapyxaka ke ha'vvy mba'emo ra'yĩ moaia re ambojojaague amombe'u porãve rã.

¹⁹ Amongue Nhanderuete po'akaa regua ayvu oendu teĩ noendu kuaai ramo ha'e kuery ha'e javia py ou 'rã poromboeko vaia, ha'e ipy'a gui oi'pe'a 'rã ha'yĩ omoaĩ mbyre. Ha'e va'e ma tape yv'yry omoaĩ mbyre rami ikuai.

²⁰ Ha'e gui vvy itaty reia rupi omoaĩ mbyre rami ikuai va'e ma ayvu oendu vvy ojopy voi 'rã ovy'a reve.

²¹ Ha'e rami teĩ ndapo pukui va'e rami avi ikuai vvy opa voi 'rã. Ayvu káuxa oguereko axya, e'y vvy opu'ãa rei ramo ndarei re ojepe'a 'rã.

²² Ha'e gui juu mbyte rupi omoaĩ mbyre rami ikuai va'e ma ayvu oendu teĩ ko vvy re mba'emo ikuai va'e re openavea ha'e omba'e rei-rei re nda'eveivea oja'o'ipa 'rã ayvu, hi'a e'y aguã rami.

²³ Ha'e rã vvy porãa rupi omoaĩ mbyre rami ikuai va'e ma ayvu oendu vvy oikuaa porã va'e. Ha'e va'e ma hi'a 'rã cem, sessenta, trinta peteĩ-teĩ gui.

Trigo ramigua re ombojojaague

²⁴ Amboae ayvu ju ha'e kuery pe omombe'u mba'emo re ombojoja vvy. Ha'e vvy aipoe'i:

— Yva pygua po'akaa py oiko 'rã peteĩ ava omba'ety rupi trigo ra'yĩ iporãve va'e omoaĩ va'e rami.

²⁵ Ha'e gui pavẽ oke jave hovaigua ou vvy trigo mbyte rupi omoaĩ trigo ramigua rive, ha'e vvy ojepe'a ju.

²⁶ Ha'e gui onhotỹ mbyre yvate ha'e hi'a ramo trigo ramigua avi ojekuaa ra'e.

²⁷ Ha'e ramo ija rembiguai kuery ou vvy aipoe'i ixupe: “Senhor, trigo ra'yĩ iporã va'e e'y ri ty'y remoaĩ nembra'ety py? Magui nda'u oiko trigo ramigua?”

²⁸ Ombovai: “Nhanderovaigua rima ojapo ra'e”, he'i.

— Ha'e gui hembiguai kuery oporanduve ju: “Reipota pa roo romondoro trigo ramigua?”

²⁹ Ombovai: “Any, trigo ramigua pemondoro vvy trigo avi pemondoro e'y aguã.

³⁰ Tove ranhe, ta'yvate jovavi omono'õa ára peve. Ha'e gui mae ma aipoa'e 'rã imono'õa kuery pe: “Trigo ramigua ranhe pemono'õ, pejukua oapypaa aguã. Ha'e rã trigo ma pemoĩ porã xeroguy py.”*

Marcos 4.30-32; Lucas 13.18,19

³¹ Amboae ayvu ju ha'e kuery pe omombe'u mba'emo re ombojoja vvy. Ha'e vvy aipoe'i:

— Yva pygua po'akaa py oiko 'rã peteĩ mostarda ra'yĩ peteĩ ava ojopy vvy omba'ety re onhotỹ va'e rami.

³² Ha'e nunga ma anhetẽ ha'yĩ ikuai va'e gui ruxãve'i va'e. Ha'e rami teĩ yvate vvy mba'emo nhanhotỹ va'e ha'e javi gui tuvixave 'rã. Yvyra ete oiko ramo guyra oveve va'e ou vvy hakã re ojapo 'rã guaityrã.

Lucas 13.20,21

³³ Amboae ayvu ju omombe'u ha'e kuery pe mba'emo re ombojoja vvy:

— Yva pygua po'akaa py oiko 'rã trigo mbovua rami, mba'eta peteĩ kunha ogueraa vvy omoirũ 'rã trigo re irũmba peve.

Marcos 4.33,34

³⁴ Pova'e nunga ha'e javi Jesus omombe'u heta va'e kuery pe mba'emo re ombojoja vvy. Mba'emo re ombojoja e'y re nda'ijayvui ha'e kuery pe,

³⁵ profeta pe aipoe'a ukaague ojeupity aguã: “Xeayvu 'rã mba'emo re ambojoja vvy. Aikuaa uka 'rã mba'emo [vvy] itui ypy'i guive ndoikuaa ukai pyre”, he'iague.*

Trigo ramigua re ombojoja va'ekue omombe'u porãveague

³⁶ Ha'e gui Jesus heta va'e kuery omondoukapa ma vy oo avi oo oĩaty katy. Ha'e ramo hemimbo'e kuery hexe onhemboja vy aipoe'i:

— Emombe'u porãve ju trigo ramigua mba'ety rupi onhotỹ mbyre re ndeayvuague.

³⁷ Ha'e ramo ombovai:

— Mba'emo ra'yĩ iporãve va'e moaĩa ma Ava ra'y ojeapo va'ekue ae.

³⁸ Mba'ety ma kova'e yvy, mba'emo ra'yĩ iporãve va'e ma Nhanderuetete po'akaa pygua kuery, ha'e rã trigo ramigua ma poromboeko vaia ra'y kuery.

³⁹ Ha'e nunga moaĩa ma nhanderovaigua anha. Ha'e gui omono'õa aguã ma opaa ára, ha'e rã imono'õarã ma anjo kuery.

⁴⁰ Mba'eta trigo ramigua omono'õ vy tata py omomboia rami avi 'rã oiko opaa ára py.

⁴¹ Ava ra'y ojeapo va'ekue omondouka 'rã ojeupegua anjo kuery, openaa gui oipe'apa aguã nhombojevavya ha'e mba'emo vai apoa kuery ha'e javi.

⁴² Ha'e vy omombopa 'rã tata hendy va'e py. Ha'e ramo ojae'opa ha'e opa marã onhendu 'rã okuapy ha'e py.*

⁴³ Ha'e rã heko porã va'e kuery ma kuaray rami hexakã 'rã okuapy Nguuete po'akaa py. Ijapyxa [oendu aguã] oĩ va'e toendu.

Mba'emo ovareve va'e onhomi mbyre re ijayvua

⁴⁴ — Yva pygua po'akaa py oiko 'rã mba'emo ovareve ete va'e peteĩ mba'ety py onhomi mbyre rami. Ha'e va'e ma peteĩ ava ojou vy onhomive ju ranhe. Ha'e gui ovy'a vaipa reve oo vy opa mba'e oguereko va'e ovendepa. Ha'e vy ojeupe ae ojogua ha'e va'e mba'ety.*

Pérola re ijayvua

⁴⁵ — Yva pygua po'akaa py oiko 'rã peteĩ ava pérola porãgueve ojoguaxe vy oekaa rupi oiko va'e rami.

⁴⁶ Ha'e gui peteĩ pérola ovareve ete va'e ojou vy opa mba'e oguereko va'e ovendepa 'rã ojogua aguã.*

Pira mbo'aa re ijayvua

⁴⁷ — Yva pygua po'akaa py oiko 'rã pira mbo'aa ye'ẽ py omomboia rami avi. Opa marãgua ombo'a 'rã pira.

⁴⁸ Ha'e gui tynyẽ ma ramo pira jopioia kuery omoatã 'rã heruvy yvy'ã re, ha'e oguapy vy oiporavo 'rã ombo'a va'ekue. Iporãgueve omboyru 'rã ajaka py, ha'e rã iporã e'y va'e ma omombopa ju 'rã.

⁴⁹ Ha'e rami ae 'rã oiko opaa ára py. Anjo kuery ou vy heko vai va'e kuery oipe'apa 'rã heko porã va'e kuery mbyte gui,

⁵⁰ ha'e vy omombo 'rã tata hendy va'e py. Ha'e py ma ojae'opa ha'e opa marã onhendu 'rã okuapy.*

Mba'emo pyau ha'e inhymague re ijayvua

⁵¹ Ha'e vy oporandu guemimbo'e kuery pe: — Pendu kuaa pa pova'e nunga?

— Tá — he'i okuapy.

⁵² Ha'e ramo aipoe'i ha'e kuery pe:

— Ha'e rami vy yva pygua po'akaa py mba'emo oiko va'e re ma kuaxia re nhombo'e va'ety ombo'ea porã ramo hoo va'e kuery rami avi 'rã oiko, mba'eta omoĩ porãague gui oguenoẽ 'rã mba'emo pyau ha'e mba'emo ymague.*

Marcos 6.1-6; Lucas 4.16-30

⁵³ Pova'e nunga ayvu Jesus mba'emo re ombojoja vy omombe'upa ma vy ojepe'a ha'e gui.

⁵⁴ Guekoa py ae ovaẽ vy nhombo'e oikovy onhembo'eaty py. Ha'e ramo ijayvua ha'e kuery oendu vy onhemondyipa. Ha'e vy aipoe'i okuapy:

— Magui nda'u peva'e ava oikuaa o'arandurã ha'e opo'akaa rupi mba'emo ojapo aguã?

⁵⁵ Peva'e nda'u oo apoa ra'y e'y ri? Maria nda'u ixy e'y ri? Tiago, José, Simão ha'e Judas e'y ri ty'y tyvy kuery ikuai?

⁵⁶ Heindy kuery nda'u nhanembyte rupi e'y ri ikuai? Magui ha'vy oikuaa ha'e nunga ha'e javi? — he'i okuapy.

⁵⁷ Ha'e rami vy ndojeroviai okuapy hexe.

Ha'e ramo Jesus ombovai:

— Profeta ikuai va'e ma hekoa pygua ha'e hoo pygua kuery anho nomboetei — he'i.

⁵⁸ Ha'e rami vy mba'emo porã ndojapo retai ha'e py, ha'e kuery ndojeroviai ramo.*

14

Marcos 6.14-29; Lucas 9.7-9

¹ Ha'e jave py huvixave Herodes oendu omombe'ua rã Jesus mba'emo ojapo oikovy.

² Ha'e vy aipoe'i guembiguai kuery pe:

— Ha'e va'e ma João Batista omanoague gui onhemboete ju va'ekue. Ha'e rami vy 'rãe ipo'aka mba'emo porã ojapo aguã — he'i.

³ Mba'eta Herodes ojopy ae va'ekue João, ha'e ojokua vy nhuã py ombo'a tyvy Filipe ra'yxy Herodias káuxa.

* 13:42 Mateus 13.47-50 * 13:44 Provérbios 2.4,5; Filipenses 3.7,8 * 13:46 Provérbios 8.11 * 13:50 Mateus 13.24-30,36-43

* 13:52 Romanos 1.1-4; 2 Coríntios 1.20 * 13:58 João 1.11

4 Mba'eta João “Nda'evei ndera'yxyrã rereko aguã” he'i ramo.

5 Huvixa ojukaxe teĩ okyje heta va'e kuery gui, profeta oikoa rami oikuaa okuapy ramo.

6 Ha'e gui Herodes ituiague ára ovaẽ ramo pavẽ ikuai va'e renonde Herodias memby ojeroky ramo huvixa oguerovy'a.

7 Ha'e rami vy oura vy ijayvu ojerure va'e rei tema ome'ẽ aguã re.

8 Ha'e ramo kunhataĩ ma ixy ombo'eague rami vy aipoe'i:

— Eme'ẽ xeivy peteĩ hy'a py João Batista akãgue — he'i.

9 Ha'e ramo huvixa ndovy'avei. Ha'e rami teĩ hexeve mesa py ikuai va'e oendua py oura rire ojapo uka nho.

10 Ha'e vy ijayvu João akã ojayaa aguã nhuã py.

11 Ha'e gui inhakãgue peteĩ hy'a py oguerua vy kunha'i va'e pe ome'ẽa ramo oxy pe ju ogueraa.

12 Ha'e ramo João remimbo'e kuery ou. Hetekue ogueraa vy onhono porã. Ha'e rire oje'oi, Jesus pe omombe'u.

Marcos 6.30-44; Lucas 9.10-17; João 6.1-14

13 Jesus ha'e nunga oendu vy ojepe'a ha'e gui. Peteĩ kanoã py oo tekoa e'ỹa py ha'e kuery ae'i oĩ aguã katy. Ha'e rami teĩ heta va'e kuery oikuaa avi vy tetã ikuai va'e gui oupa, hakykue oje'oi yvy rupi.

14 Ha'e ramo kanoã gui Jesus oguejy vy oexa heta ikuai va'e. Ha'e vy omboaxy vy omonguera imba'eaxy gui.

15 Ka'aru'i jave hemimbo'e kuery ou Jesus oĩa py. Ha'e vy aipoe'i ixupe:

— Apy ma tekoa e'ỹa py nhandekuai, pytũ ta ma guive. Ha'e nunga rupi emondoukapa heta va'e kuery, tekoa rupi oo vy ho'u va'erã ojogua aguã — he'i okuapy.

16 Ha'e rã Jesus aipoe'i ha'e kuery pe:

— Oje'oi e'ỹ teĩ ha'eva. Peẽ ae peme'ẽ ho'u va'erã — he'i.

17 Ha'e rã ha'e kuery ombovai:

— Mba'eve ndoroguerkeoi apy peteĩ nhiruĩ mbojape ha'e mokoĩ pira'i e'ỹ vy.

18 Ha'e ramo aipoe'i:

— Peru ha'vy apy — he'i.

19 Ha'e gui Jesus heta va'e kuery nhuũ áry omboguapypa vy ojopy peteĩ nhiruive mbojape ha'e mokoive pira. Yva re oma'ẽ reve oguerovy'a Nhanderuete. Ha'e rire mbojape oipe'ã-pe'ã'i vy ome'ẽ guemimbo'e kuery pe, ha'e kuery ju ome'ẽ-me'ẽ aguã heta va'e kuery pe.

20 Ha'e javive okaru vy hevayatãmba. Ha'e gui hembyrekue omono'õ vy doze varai omonyẽ.

21 Okaru va'ekue ma cinco mil avakue, kunhague ha'e kyrigüe reve e'ỹ vy.

Marcos 6.45-52; João 6.15-21

22 Ha'e rire'ive guemimbo'e kuery pe aipoe'i kanoã py oĩmba vy oje'oi aguã henonderã hovaigua re, heta va'e kuery ha'e ae omondoukapaa ja.

23 Ha'e gui heta va'e kuery omondoukapa ma vy yvyty áry katy oẽ ovy, ha'e ae'ia py onhembo'e aguã. Ka'aru ete peve ha'e py oiko ha'e ae'i.

24 Ha'e ramia ja kanoã mombyry ma oo yy rembe gui. Yai ojeapi-api, ha'eve e'ỹa katy gui yvytu ramo.

25 Ko'ẽ rai jave Jesus ou ha'e kuerya katy, ye'ẽ áry oguata ouvy.

26 Yy áry oguata rã hemimbo'e kuery oexa vy onhemondyipa. Ha'e vy aipoe'i:

— Ægue rima! — he'i. Okyje vy haxẽmba okuapy.

27 Ha'e ramo Jesus ijayvu ha'e kuery pe:

— Pendepya guaxu ke. Xee rima, pekyje eme — he'i.

28 Ha'e gui Pedro ijayvu vy aipoe'i:

— Senhor, ndee ri vy aipo're ndea py xee aa aguã yy áry rupi.

29 Ha'e ramo

— Eju ha'vy — he'i.

Ha'e rã Pedro kanoã gui oguejy vy oguata yy áry, Jesus-a katy.

30 Ha'e gui yvytu atãa re oma'ẽ vy oendu okyjea. Ha'e oike ovy vy ojapukai:

— Senhor, xereraa jepe ke!

31 Ha'e ramove Jesus okuave'ẽ vy ojopy. Ha'e vy aipoe'i ixupe:

— Ava rejeroviaa kyrĩ'i va'e, mba'e re tu nderejeroviaĩ ri? — he'i.

32 Ha'e gui ma kanoã py mokoive oĩ ramove yvytu opytu'u.

33 Ha'e rã kanoã py opyta va'ekue omboete vy aipoe'i:

— Anhetẽ ete ra'e ndee Nhanderuete Ra'y!

Marcos 6.53-56

34 Ha'e gui hovaigua re ovaẽ vy Genesaré yvy re ikuai.

35 Ha'e va'e yvy regua avakue oexa kuaa vy omombe'u uka ha'e'i rupi ikuai va'e ha'e javi pe. Ha'e ramo oĩa py ogueru imba'eaxy va'e.

36 Ixupe ojerure avi ijao apy re ri jepe opoko aguã. Ha'e gui opoko va'e rei okuerapa.

Marcos 7.1-23

1 Ha'e gui Jesus-a py onhemboaty fariseu ha'e kuaxia re nhombo'e va'ety kuery Jerusalém gui ou va'ekue. Ha'e vy oporandu:

2 — Mba'e re tu neremimbo'e kuery nda'ikuai ri ymagua kuery nhombo'eague rami? Mba'eta ojepoei e'ÿ re okaru.

3 Ha'e ramo ombovai:

— Ha'vy peẽ kuery mba'e re tu ndapejapoi Nhanderuete ojapo uka va'e, ymagua kuery nhombo'eague pejou porãve vy?

4 Mba'eta Nhanderuete ma ojapo uka “Emboete nderu ha'e ndexy. Ha'e rã amongue nguue re, oxy re ijayvu vai va'e ma topaga ojukaa py” he'iaague.*

5 Ha'e rã peẽ kuery ma aipopeje: “Nguu e'ÿ vy oxy pe amongue aipoe'i 'rã: 'Pëvy peguarã areko va'ekue ma Senhor pe ju amboaxa’,

6 he'i teĩ ha'eva”, peje. Ha'e rami vy tuu ha'e ixy napeipytyvõ ukai. Ha'e rami py pemboyke Nhanderuete ayvu, ymagua kuery penembo'eague pejou porãve vy.

7 Heko porã merami rive va'e, ha'eva rami peẽ kuery reko re Isaías ijayvu vy aipoe'i:

8 “Kova'e kuery ma ojuru py rive xemboete, ha'e rã ipy'a ma mombyry xegui.

9 Avakue ijayvuague rupi rive nhombo'e vy xemboete merami rive okuapy”, he'i va'ekue.*

10 Ha'e gui heta va'e kuery ju oenoimba vy aipoe'i ha'e kuery pe:

— Pejapyxaka porã peikuaa aguã:

11 Pendejuru rupi oike va'e'ÿ penemboeko ky'a, pendejuru gui oẽ va'e anho 'rã penemboeko ky'a — he'i.

12 Ha'e ramo hemimbo'e kuery hexe onhemboja vy aipoe'i:

— Reikuaa teve fariseu kuery ndeayvu oendu vy ojou vaia?

13 Ombovai:

— Mba'emo renhoĩ Xeru onhotÿ va'ekue e'ÿ ma omondoropaa 'rã.

14 Tove ta'ikuai. Ha'e kuery ma ára revegua e'ÿ va'eri ára revegua e'ÿ rerekoa rupi ikuai. Ha'e gui ára revegua e'ÿ ri oirũ oguereko vy mokoĩve 'rã ho'a hugua katy — he'i.

15 Ha'e ramo Pedro aipoe'i ixupe:

— Emombe'u porãve orevy pova'e ayvu mba'emo re rembojoja vy remombe'u va'ekue — he'i.

16 Jesus ombovai:

— Peẽ voi napendu kuaai teri teve?

17 Napendu kuaai ri ty'y opa mba'e pendejuru rupi oike va'e penderypy katy rive 'rã oguejy, ha'e penderete gui ju oaxapa 'rã?

18 Ha'e rã avakue juru gui oẽ va'e ma ipy'a gui ou. Ha'e nunga ae oĩ imboeko ky'aa.

19 Mba'eta avakue py'a gui ae 'rã ou opa marã rei oikoxea: jujukaxea, itavy reixea, kunhague mboae re opena reixea, imondaxea, joe ijayvu reixea ha'e gui ijayvu vaikue reixea.

20 Ha'e nunga anho imboeko ky'aarã oĩ. Ha'e rã ojepoei e'ÿ re okaru ma nomboeko ky'ai 'rã.

Marcos 7.24-30

21 Ha'e gui Jesus ojepe'a ovy Tiro ha'e Sidom katy.

22 Ha'e rami jave ou peteĩ kunha Canaã pygua ha'e katy'i gui. Ha'e va'e ojapuka-pukai:

— Senhor, Davi ramymino, xemboaxy ke. Xememby re anha onhemonde ramo nda'evei ete itui — he'i.

23 Ha'e rami teĩ Jesus nombovai ranhe.

Ha'e ramo hemimbo'e kuery onhemboja vy aipoe'i ixupe:

— Emondouka na, mba'eta ojapukai ouvy nhanderakykue.

24 Ha'e rã Jesus ombovai:

— Israel kuery regua vexe'i okanhy va'ekue anho aeka aguã xemboua — he'i.

25 Ha'e gui kunha va'e ou vy omboete. Ha'e vy aipoe'i:

— Senhor, xepytyvõ ke.

26 Jesus ombovai vy aipoe'i:

— Nda'evei ta'y kuery po gui mbojape jajogua vy jagua'i ikuai va'e pe nhamombo aguã — he'i.*

27 Ha'e ramo kunha va'e aipoe'i:

— Tá, Senhor. Ha'e rami avi jagua'i teĩ ho'u 'rã oja mesa gui tembi'u kure ho'a va'ekue.

28 Ha'e rami rã Jesus aipoe'i:

— Kunha rejeroivia ete va'e, toiko reipota va'e — he'i. Ha'e va'e jave py ma imemby okuera ma.

Galiléia ye'ẽ rembe katy Jesus ojeyvy vy heta ju omongueraague

29 Jesus ha'e gui oo vy Galiléia ye'ẽ rembe rupi ranhe oo. Ha'e gui yvyty re oẽ vy oguapy ha'e py.

30 Oĩa py heta ou. Heta ogueru hetyma rovai piru va'e, ikarêgue'i, ára revegua e'ÿ, ijayvu e'ÿ va'e ha'e amboae rami imba'eaxy va'e. Jesus py yvÿry onhonomba. Ha'e ramo omonguerapa.

31 Heta va'e kuery onhemondyipa oexa vy ijayvu e'ÿ va'ekue ijayvu rã, ikarêgue'i va'ekue oiko porã, hetyma pirupa va'ekue oguata, ha'e ára revegua e'ÿ va'ekue voi oxepa ju ramo. Ha'e rami vy omboete okuapy Israel kuery Ruete.

Marcos 8.1-10

32 Ha'e gui Jesus guemimbo'e kuery oenoĩ vy aipoe'i:

* 15:4 Êxodo 20.12, 21.17; Levítico 20.9; Deuteronomio 5.16 * 15:9 Isaías 29.13 * 15:26 Jesus “Ta'y kuery” he'ia ma guetarã kuery pe ijayvu vy, ha'e rã “Jagua'i” he'ia ma amboae regua pe. Kunha va'e ma amboae regua va'eri Jesus re ojerovia ete.

— Amboaxy kova'e kuery, mba'eta mboapy ára ma xerupive ikuai rire mba'eve ndoguerekoï ho'u va'erã. Namondoukaxeï guive okaru e'y re, tape rupi ho'apa e'y agua — he'i.

³³ Ha'e rã hemimbo'e kuery aipoe'i:

— Mamo nda'u kova'e tekoa e'yã py oï 'rã mbojape heta va'e kuery nhamongarupa agua?

³⁴ Jesus oporandu ha'e kuery pe:

— Mbovy ha'vy pereko mbojape?

Ombovai:

— Sete, ha'e mbovy'i pira'i guive — he'i.

³⁵ Ha'e ramo Jesus heta va'e kuery omboguapy ukapa yvy py.

³⁶ Ha'e vy ojopy sete-ve mbojape ha'e pira. Nhanderuete ogueovy'a rire oi-pe'ã-pe'ã'i vy ome'ẽ guemimbo'e kuery pe, ha'e kuery ju heta va'e kuery pe ombojoja agua.

³⁷ Ha'e javive okarupa vy hev yatãmba. Ha'e gui hembyrekue ma sete ajaka renyẽ omboyru.

³⁸ Okaru va'e ma quatro mil avakue, kunhague ha'e kyrigue reve e'y vy.

³⁹ Ha'e gui Jesus heta va'e kuery omondoukapa ma rire kanoã py oï. Ha'e vy Magadã regua katy oo.

16

Marcos 8.11-13

¹ Ha'e gui fariseu ha'e saduceu kuery ju onhemboja hexe. Oeko a'ã vy ojerure hexa pyrã yva guigua ojapo agua re.

² Ha'e ramo ombovai:

— Peẽ kuery ma ka'aru ramo aipopeje 'rã: “Ára porã 'rã, mba'eta yva re pytãmba.”

³ Ha'e rã ko'ẽmba jave ma “Kova'e ára oiko 'rã ára vai, mba'eta yva pytã rei”, peje 'rã. Ha'e rami yva re pema'ẽ vy mba'emo peikuaa va'eri ndapexa kuaai va'e ty'y a'y oiko va'e?

⁴ Heko vai ha'e itavy rei va'e kuery anho 'rã ojerure hexa pyrã re. Ha'e rami teĩ ha'e kuery pe neĩ peteĩ hexa pyrã ndojapoi 'rã, Jonas re oiko va'ekue ramigua e'y vy — he'i. Ha'e rami vy ojepe'a ovy ha'e kuerya gui.*

Marcos 8.14-21

⁵ Ha'e gui yupa rovaigua katy oo vy hemimbo'e kuery oikuaa pota rã hexarai ra'e mbojape ogueraa agua re.

⁶ Ha'e ramo Jesus aipoe'i ha'e kuery pe:

— Ma'ẽ, penheangu ke fariseu ha'e saduceu kuery regua trigo mbovua gui — he'i.

⁷ Ha'e ramo ha'e kuery jomeme ijayvu vy aipoe'i:

— Ha'e rami ijayvu mbojape ndajarui rire — he'i okuapy.

⁸ Jesus ha'e nunga oikuaa vy aipoe'i:

— Avakue pejeroviaa kyri'i va'e, mba'e re tu mbojape ndaperekoia re pendeayvu?

⁹ Ndapeikuaai teri, neĩ napenema'endu'ai teve cinco mil avakue peguarã peteĩ nhiruĩ mbojape ha'eveague re, neĩ mbovy varai pa hembyrekue pemboyruague re?

¹⁰ Neĩ quatro mil avakue peguarã sete mbojape ha'eveague re napenema'endu'ai teve, neĩ mbovy ajaka pa hembyrekue pemboyruague re guive?

¹¹ Mba'eta tu napendu kuaai mbojape re ete'y xeayvua, ha'e rã trigo mbovua rami fariseu ha'e saduceu kuery nhombo'ea gui penheangu agua re — he'i.

¹² Ha'e ramo mae ma ha'e kuery oikuaa mbojape mbovua gui ete'y omonheangu-a, ha'e rã fariseu ha'e saduceu kuery nhombo'ea gui.

Marcos 8.27-30; Lucas 9.18-21

¹³ Cesaría Filipe pegua tetã katy Jesus ooa rupi oporandu guemimbo'e kuery pe:

— Marã ramigua Ava ra'y ojeapo va'ekue oikoa rami tu heta va'e kuery oikuaa?

¹⁴ Ha'e kuery ombovai:

— Amongue ma “João Batista” he'i. Amboae ma “Elias” he'i. Ha'e rã amboae kuery ma “Jeremias” e'y vy “Profeta mboae” he'i.

¹⁵ Oporanduve ju:

— Ha'vy peẽ kuery, marã ramigua aikoa pa peikuaa?

¹⁶ Simão Pedro ombovai vy

— Ndee ma Cristo Nhanderuete oikove va'e Ra'y — he'i.

¹⁷ Ha'e ramo ixupe Jesus aipoe'i:

— Simão, João ra'y, revy'a ete 'rã, mba'eta ho'o ha'e huguy va'e e'y ha'e nunga oikuaa uka ndevy, ha'e rã Xeru yva pygua ae.

¹⁸ Aipoa'e avi ndevy: Ndee ma Pedro, ha'e kova'e ita áry ajapo 'rã xevygua igreja. Ha'e gui xevygua igreja re ma manoa rokẽ rupi nhomoingea voi nda'ipo'akai 'rã.

¹⁹ Ndevy pe ma yva pygua po'akaa rokẽ pe'aa ame'ẽ 'rã. Mba'emo yvy re rejokua va'e ma yva re voi ojokua pyre 'rã oiko. Ha'e rã yvy re rejora va'e ma yva re voi ojora pyre 'rã oiko — he'i.

²⁰ Ha'e gui ma guemimbo'e kuery pe aipoe'i avave rei pe omombe'u e'y agua Cristo oikoa.

Marcos 8.31-33; Lucas 9.22

* 16:4 Mateus 12.38-42; Lucas 12.54-56

²¹ Ha'e va'e ára guive Jesus Cristo omboypy guemimbo'e kuery pe omombe'u aguã Jerusalém katy oo 'rãa, ha'e nhomongeta va'ety kuery po py oiko axy 'rãa opa mba'e py, sacerdote yvatekuevê ha'e kuaxia re nhombo'e va'ety kuery po py guive. Ojukaa 'rã, ha'e gui mboapy araa py onhemboete ju 'rãa voi omombe'u.

²² Ha'e ramo Pedro oenói ha'e ae'ia py. Ha'e vy ndojou porãia rami ijavyv vy aipoe'i ixupe:

— Senhor, enhemboaxy na ha'e nunga ndere oiko e'ÿ aguã.

²³ Ha'e rã Jesus ojere vy ombovai Pedro pe:

— Satanás, ejep'e'a ke xea gui. Ndee ma ita xereityxea reiko, mba'eta Nhanderueete guigua e'ÿ reikuaa, ha'e rã avakue guigua rive.

Marcos 8.34-9.1; Lucas 9.23-27

²⁴ Ha'e ramo Jesus aipoe'i guemimbo'e kuery pe:

— Xerupive oikoxe va'e taexarai ojogui ae, togueraa ojeupegua kuruxu, ha'e tou xerakykue.

²⁵ Mba'eta nomanoxei ete va'e kuery omokanhÿ 'rã guekove. Ha'e rã xekáua omano va'e ma ojou ju 'rã guekove.*

²⁶ Mba'e 'rã tu avakue ojou, mba'emo yvy regua oguerékopa va'eri guekove ae omokanhÿ vy? Mba'e nunga 'rã tu ome'ê onhe'ê rekovia?

²⁷ Mba'eta Ava ra'y ojeapo va'ekue ou 'rã Nguu rexakãa rupi, ojeupegua anjo kuery reve. Ha'e rami vy pete'i-te'i pe ombojoja 'rã ojapo va'ekue rekovia.*

²⁸ Anhetê aipoa'e pëvy: Apy pe'i va'e regua amongue napemanoi 'rã Ava ra'y ojeapo va'ekue opo'akaa reve ou rã pexa e'ÿa ja.

17

Marcos 9.2-8; Lucas 9.28-36

¹ Oito araa py Jesus ngupive ogueraa Pedro, tyvy Tiago ha'e João ha'e kuery ae'i ikuai aguã py pete'i vyvty yvate va'e áry.

² Ha'e py ha'e kuery oexaa py ma guexakã py ojekuaa. Hova hexakã kuaray rami, ha'e rã ijao ma xiimba rei hendy va'e rami ojekuaa.*

³ Hexeve ojekuaa avi Moisés ha'e Elias. Ha'e va'e kuery ma hexeve ijavyv okuapy.

⁴ Ha'e ramo Pedro aipoe'i Jesus pe:

— Senhor, ha'eve apy nhaíve aguã. Ha'e ramo reipota rã ajapo 'rã mboapy oo'i: pete'i ma ndevy guarã, amboae ma Moisés pe, ha'e gui amboae ju ma Elias peguarã — he'i.

⁵ Pedro ijavyv teria ja pete'i arai hexakã va'e ou vy ojao'ipa. Arai gui onhendy pete'i avyu aipoe'i va'e:

— Peva'e ma Xera'y avyu ete ha'e arovy'a va'e. Pejapyxaka ijavyvua re ae — he'i.

⁶ Ha'e nunga hemimbo'e kuery oendu vy ho'apa okyje vy, vyv re ngova omovaê reve.

⁷ Ha'e kuery re Jesus onhemboja vy opoko. Ha'e vy aipoe'i:

— Pevy ke, pekyje eme — he'i.

⁸ Ha'e kuery guexa oipe'a vy avave rei ndoexavei, Jesus e'ÿ vy.

Marcos 9.9-13

⁹ Yvyty áry gui ha'e kuery oguejÿ rã Jesus aipoe'i:

— Avave rei pe ke pemombe'u eme pexa va'ekue, Ava ra'y ojeapo va'ekue omanoague gui onhemboete ju e'ÿa ja — he'i.

¹⁰ Ha'e gui hemimbo'e kuery oporandu:

— Mba'e re tu ha'vy kuaxia re nhombo'e va'ety kuery ijavyv okuapy Elias ranhe ou 'rãa re?

¹¹ Jesus ombovai:

— Anhetê ae Elias ou vy opa mba'e omoimba porã ju 'rã.*

¹² Ha'e rami avi xee aipoa'e porãve pëvy: Elias ma ou ae ma te'i heta va'e kuery ndoikuai okuapy. Ha'e rami vy ha'e kuery oipotaa rami ae ojapo okuapy hexe. Ha'e rami ae avi ha'e kuery po py Ava ra'y ojeapo va'ekue voi oiko axy 'rã — he'i.

¹³ Ha'e ramo hemimbo'e kuery oikuaa João Batista reko re ijavyvua rami.

Marcos 9.14-29; Lucas 9.37-43a

¹⁴ Ha'e gui heta va'e kuery ikuai py ha'e kuery ovaê rã pete'i ava onhemboja hexe. Ha'e va'e guenapy'ã re oi vy aipoe'i:

¹⁵ — Senhor, emboaxy xera'y, mba'eta he'o'ã vy oiko axy. Mbovykue rei e'ÿ ho'a tata py ha'e yy py.

¹⁶ Neremimbo'e kuerya py aru kuri te'i ha'e kuery nomonguera kuaai — he'i.

¹⁷ Jesus aipoe'i:

— Peê pejerovia e'ÿ ha'e pendeko vai va'e, raka'e peve 'rã tu aiko pendereve, rogueropo'aka aguã? Eru ha'vy ava'i apy — he'i.

¹⁸ Ha'e gui anha pe Jesus ijavyv atã ramo ojepe'a ava'i gui. Ha'e va'e hora-ve ava'i okuera.

¹⁹ Ha'e ramo hemimbo'e kuery Jesus re onhemboja vy oporandu ha'e ae'ia py:

— Mba'e re tu ore ndoroipe'a kuaai ra'e anha?

²⁰ Ombovai ha'e kuery pe:

* 16:25 João 12.24-26; Apocalipse 2.10; 12.11 * 16:27 Provérbios 24.12 * 17:2 2 Pedro 1.16-18 * 17:11 Malaquias 4.5-6

— Mba'eta pejeroviaa kyrĩ ri rã. Anhetê aipoa'e pëvy: Peteĩ mostarda ra'yĩ'ri rami ri jepe pejeroviaa oĩ va'e rire kova'e yvyty pe "Ejepe'a ke apy gui, ki katy tereo", jepe ramo ojepe'a 'rãgue. Mba'eve rei ndaxyi 'rãgue pëvy.

²¹ [Ha'e gui ha'e va'e nunga anha ma nhanhembo'e ha'e jakaru e'ỹ re jaiko vy 'rãe jaipe'a.]

Marcos 9.30-32; Lucas 9.43b-45

²² Ha'e gui Galiléia yvy re hemimbo'e kuery ijatypa ju ma ramo Jesus aipoe'i ha'e kuery pe:
— Ava ra'y ojeapo va'ekue omboaxaa 'rã avakue po py.

²³ Ha'e kuery ojuka 'rã. Ha'e gui mboapy araa py onhemboete ju 'rã — he'i. Ha'e rã hemimbo'e kuery oendu vy iporiaupa.

Jesus imposto opaga ukaague

²⁴ Cafarnaum py ha'e kuery ovaẽ jave Pedro oĩa py ou imposto re nhombopaga va'ety kuery. Ha'e rami vy oporandu okuapy mokoĩ hatã'i va'e opaga aguã re:

— Penembo'ea ndopagai 'rã teve mokoĩ hatã'i va'e? — he'i okuapy.

²⁵ — Tá, opaga ri — he'i ombovai vy.

Ha'e gui opy Pedro ovaẽ ramove ixupe Jesus oporandu vy aipoe'i:

— Simão, mba'eta tu reikuaa? Mava'e kuery tu kova'e yvy regua huvixa kuery ombopaga 'rã imposto re: gua'y kuery tyrã pa amboae regua?

²⁶ Pedro ombovai:

— Amboae regua ri — he'i.

Jesus aipoe'i ixupe:

— Ha'e rami rã ta'y kuery opaga e'ỹ teĩ ha'eve.

²⁷ Ha'e rami avi ha'e kuery ivai e'ỹ aguã tereo, eity pinda yy py, ha'e enoẽ pira ogueraa ppy va'e. Ha'e va'e juru reipe'a vy rejou 'rã peteĩ perãta hatã'i va'e ovarave'i va'e. Eraa, ha'e kuery pe eme'ẽ xegui ha'e ndeguigua.*

18

Marcos 9.33-37; Lucas 9.46-48

¹ Ha'e jave hemimbo'e kuery Jesus re onhemboja vy oporandu:

— Mava'e nda'y yvateve va'e oiko 'rã yva pygua po'akaa py?

² Ha'e ramo Jesus peteĩ kyrĩ va'e oenõ vy omo'ã ha'e kuery mbyte.

³ Ha'e vy aipoe'i:

— Anhetê aipoa'e pëvy: Ndapejeko rerovai, ha'e kyrĩ va'e rami ndapeikoi ri vy ndapeikei 'rã yva pygua po'akaa py.

⁴ Ha'e nunga rupi kova'e kyrĩ va'e rami onhemo'yvyi'i va'e anho 'rã yvateve yva pygua po'akaa py.*

⁵ Ha'e xerery rupi peteĩ kyrĩ va'e kova'e ramigua omovaẽ va'e ma xee avi xemovaẽ.

Marcos 9.42-48; Lucas 17.1,2

⁶ — Ha'e rã kova'e kyrĩgue va'e ramigua xere ojeroviaa gui amongue oity 'rãgue py ha'eveve oityxe va'e ajuy re ita guaxu mba'emo mongu'ia ojokua pyre reve ye'ẽ tpyyvea py oy'upa va'e rire.

⁷ — Nda'evei ete 'rã yvy regua kuery pe heityarã oiko ramo. Mba'eta oiko 'rãe joityarã, teĩ joityare pe ma nda'evei 'rã.

⁸ Ha'e nunga rupi ndepo, e'ỹ vy ndepy ri ndereity ramo ejaya, emombo ndejegui. Mba'eta ndepo e'ỹ vy ndepy jovaive reve tata ogue'ỹ va'e py nemomboa 'rãgue py ha'eveve ndepo, ndepy rovaikue'i reve reikove aguã py reike aguã.

⁹ Ha'e peteĩ nderexa ri ndereity ramo enoẽ, ha'e emombo ndejegui. Mba'eta mokoĩve nderexa reve tata py reiko axy aguã py nemomboa 'rãgue py ha'eveve peteĩ'i nderexa reve reikove aguã py reike aguã.

Lucas 15.3-7

¹⁰ — Ma'ẽ, nda'evei kova'e kyrĩ va'e rami oiko va'e pe rei "Mba'e vare'ỹ" jepe aguã. Mba'eta aipoa'e pëvy: Ha'e kuery rarõa anjo kuery ikuai riaa Xeru yva pygua renonde.

¹¹ [Mba'eta Ava ra'y ojeapo va'ekue ou okanhygue ogueraa jepe aguã.]

¹² — Mba'eta tu peẽ peikuaa? Xapy'a rei peteĩ ava ogueroko 'rã cem vexa'i. Ha'e gui ha'e va'e regua peteĩ okanhy ramo noventa e nove ikuai va'e oejapa 'rã yvyty áry, okanhy va'ekue oeka vy oo aguã.

¹³ Ha'e gui anhetê aipoa'e pëvy: Ojou ma vy noventa e nove okanhy e'ỹ va'e gui oguero'vy'ave 'rã.

¹⁴ Ha'e rami ae avi Penderu yva pygua voi ndoipotai neĩ peteĩ kova'e kyrĩgue va'e regua okanhy.

Irmão otekoavy va'ekue nhamongeta aguã re ijayvua

¹⁵ — Xapy'a rei nde-irmão [ndevy] otekoavy ramo tereo ha'e ae'ia py ndeayvu ixupe. Ha'e gui ndeayvu re ojapxaka ramo peteĩ rami ju 'rã peiko nde-irmão reve.*

¹⁶ Ha'e rã ndeayvu re ndojapxakaxei ramo peteĩ, mokoĩ ju eraa nderupive, mokoĩ e'ỹ vy mboapy pendu rire ayvu oiko va'e oikuaa porã aguã.*

¹⁷ Ha'e gui xapy'a rei noendu potai ae ramo remombe'u 'rã igreja kuery pe. Ha'e rã igreja kuery ayvu re voi ndojapxakai ramo amboae regua rami 'rã pereko, imposto re nhombopaga va'ety rami.

* 17:27 Romanos 13.5-7; 1 Coríntios 10.32-11.1

* 18:4 Filipenses 2.3-7; 1 Pedro 5.5,6

* 18:15 Gálatas 6.1,2; 2 Tessalonicenses 3.14,15;

¹⁸ Anhetê aipoa'e pêvy: Yvy re pejokua va'e rei yva re voi oiko 'rã ojokua pyre. Ha'e rã yvy re pejora va'e rei ma yva re voi oiko 'rã ojora pyre.

¹⁹ Anhetê aipoa'e avi pêvy: Peê kuery va'e regua mokoĩ teĩ mba'emo re pejerure vy joo rami peikuaa ramo Xeru yva pygua ojapo 'rã pêvy.

²⁰ Mba'eta mokoĩ e'ỹ vy mboapy teĩ xerery rupi pendeatya py xee voi aĩ 'rã peê kuery mbyte.

Lucas 17,3,4

²¹ Jesus oĩa py Pedro ou vy oporandu:

— Senhor, xevy pe xe-irmão otekoavy ramo mbovykue peve 'rã tu aperdoa? Sete-kue peve ri nda'u?

²² Ombovai:

— Sete-kue peve'i nda'ei, ha'e rã setenta vezes sete-kue peve 'rã peperdoa.*

Nhomborevare nhomboaxy e'ỹ va'e re ijayvua

²³ — Ha'e nunga rupi yva pygua po'akaa py oiko 'rã peteĩ huvixave guembiguai kuery orevea ombopaga uka va'e rami.

²⁴ Jypy'i ha'e oĩa py peteĩ oguerua dez mil poyikue prata guigua oreve va'e.

²⁵ Ha'e va'e ma opaga aguã ndoguerekoĩ ramo ipatõ aipoe'i ovendea aguã escravo-rã, ta'yxy, ta'y kuery ha'e oguereko va'e ha'e javi guive, orevea omboekoviapa aguã.

²⁶ Ha'e ramo hembiguai guenapy'ã re oĩ reve ojerure: “Xerarõve'i ranhe, apagapa 'rã”, he'i.

²⁷ Ha'e ramo ipatõ omboaxy vy omondouka rive, oreveague omboguepa.

²⁸ — Ha'e gui ha'e va'e tembiguai oo vy peteĩ oirũ ojou cem ára repy ete'i ixupe oreve va'e. Ha'e vy oguero'a vy ojyryvipy. Ha'e vy aipoe'i: “Epagapa ke rerevea.”

²⁹ Ha'e ramo irũ ipy yvy'iry oĩ vy aipoe'i ixupe: “Xerarõve'i ranhe, apagapa 'rã”, he'i.

³⁰ Ha'e rami teĩ noendu potai. Ha'e rami 'rãgue py oo vy omboty uka nhuã py orevea opagapa peve.

³¹ — Ha'e rami joguereko axy rã irũ kuery oexa vy iporiaupa okuapy. Opatõa py jogueraa vy omombe'u oiko va'ekue ha'e javi.

³² Ha'e ramo ipatõ guembiguai oenoĩ uka ju vy aipoe'i ixupe: “Tembiguai heko vai va'e, ndee rejerurea rami xee amboguepa rereveague ha'e javi.

³³ Ha'vy ndee nda'evi ri ty'y xee romboaxyague rami neirũ remboaxy aguã?” he'i.

³⁴ Ha'e vy ipoxy vy omboaxa hereko axyarã kuery pe, orevea opagapa peve.

³⁵ Ha'e rami ae avi Xeru yva pygua penderereko 'rã, pendepy'a py peteĩ-teĩ pende-irmão peperdoa e'ỹ ramo.*

19

Marcos 10.1

¹ Ha'e rami Jesus ijayvupa ma vy ojepe'a Galiléia gui, Judéia katy'i oo Jordão yakã rovaigua re.

² Heta ete oje'oi hakykue. Ha'e ramo omonguerapa ha'e py.

Marcos 10.2-12; Lucas 16.18

³ Jesus oĩa py ou amongue fariseu kuery. Oeko a'ã vy oporandu okuapy:

— Ha'eve nda'u mba'emokue py rive ime kuery opoi aguã gua'yxy gui?

⁴ Ha'e ramo ombovai:

— Ndaperoayvui teve Penemoingoare jypy'i guive ava ha'e kunha ojapogue?*

⁵ Ha'e vy aipoe'i: “Ha'e nunga rupi ava oeja 'rã nguũ ha'e oxy, onhemoirũ 'rã gua'yxy re, mokoĩ 'rãgue py peteĩ'i to'o ikuai aguã” he'iaque?*

⁶ Ha'e rami vy mokoĩ ve'ỹ ma ikuai, peteĩ'i to'o ma. Ha'e nunga rupi Nhanduete omoirũ rire avave rei tomboja'o eme — he'i.*

⁷ Ha'e gui oporanduve ju ixupe:

— Mba'e re ha'vy Moisés ome'ẽ uka raka'e kuaxia para omendaague mbovaipaarã, omenda va'e opoi aguã?

⁸ Jesus ombovai:

— Peneakã ratã ramo Moisés penemomboi uka raka'e pendera'yxy gui. Ha'e rami teĩ jypy'i guive e'ỹ oejaa ha'e ramigua.

⁹ Ha'e rã xee ma aipoa'e pêvy: Itavy reiague re'ỹ ri gua'yxy gui ava opoi vy amboae re omenda va'e ma itavy, [ha'e opoi pyre re omenda va'e voi itavy avi] — he'i.

¹⁰ Ha'e gui ma hemimbo'e kuery ju aipoe'i ixupe:

— Ha'e rami ri avakue gua'yxy kuery reve joguereko ramo ha'eveve omenda e'ỹ re ae ikuai aguã.

¹¹ Jesus ombovai:

— Ha'e ramigua ayvu ma pavẽ pegua e'ỹ, amongue pe ete'i, ha'e rami aguã ome'ẽa va'e pe anho.

¹² Mba'eta ikuai itui'i guive omenda e'ỹ va'erãe. Ikuai avi ha'e rami aguã rami avakue ojapo va'ekue. Ha'e amboae ju ikuai avi yva pygua po'akaa rupi vy omenda e'ỹ va'e. Ha'e va'e ayvu rami oiko aguã ha'ave va'e toiko ha'e rami.

Marcos 10.13-16; Lucas 18.15-17

* 18:22 Efésios 4.32; Colossenses 3.13 * 18:35 Mateus 6.14,15 * 19:4 Gênesis 1.27, 5.2 * 19:5 Gênesis 2.24 * 19:6 Mateus 5.31,32; 1 Coríntios 7.10-16

¹³ Ha'e gui Jesus oia py oguerua kyrigüe, ha'e kuery re opo omoĩ reve onhembo'e aguã. Ha'e ramo herua kuery pe hemimbo'e kuery ijayvu ete.

¹⁴ Ha'e rami rã Jesus aipoe'i:

— Tove tou kyrigüe'i xea py, pejoko eme, mba'eta kova'e ramigua'i peguarã ae yva pygua po'akaa — he'i.

¹⁵ Ha'e vy kyrigüe re opo omoĩ ma rire ojepe'a ha'e gui.

Marcos 10.17-22; Lucas 18.18-23

¹⁶ Ha'e jave Jesus oia py peteĩ ou vy oporandu:

— Porombo'ea, mba'e nda'u ajapo 'rã iporã va'e, tekove marã e'ỹ aupity aguã?

¹⁷ Jesus ombovai:

— Mba'e re tu iporã va'e rejapoa re reporandu ri? Heko porã va'e ma peteĩ anho oiko. Ha'e gui tekove reupityxe vy ejapo ha'vy ojapo uka pyre — he'i.

¹⁸ Ha'e ramo oporanduve ju ixupe:

— Marã ramigua ojapo uka pyre ha'vy?

Jesus ombovai:

— Ejojuka eme, ndetavy eme, nemonda eme, ndeapu eme,

¹⁹ emboete nderu ha'e ndexy, ha'e gui eayvu neirũ ndee ae rejeayvua rami — he'i.*

²⁰ Kunumi va'e aipoe'i:

— Ha'e nunga ha'e javi ajapopa ae ma. Mba'e tu xevy oata teri?

²¹ Jesus ombovai:

— Opa mba'e py ndereko porãxe vy tereo, evendepa rereko va'e ha'e javi, ha'e gui hepykue ma eme'ẽmba iporiaukue'i pe. Ha'e rami vy 'rã rereko ovarave va'e yva re. Ha'e gui mae ma eju xerupive — he'i.*

²² Ha'e rami ijayvu rã kunumi va'e oendu vy iporiau reve ojepe'a, oguerekopa va'e vy.

Marcos 10.23-31; Lucas 18.24-30

²³ Ha'e ramo Jesus aipoe'i guemimbo'e kuery pe:

— Anhetẽ aipoa'e pëvy: Haxy ete oguerekopa va'e kuery yva pygua po'akaa py oike aguã.*

²⁴ Aipoa'e avi pëvy: Nhanderuete po'akaa py oguerekopa va'e oieka gui ndaxyive juu nambi kua rupi mymba camelo oaxa aguã — he'i.

²⁵ Hemimbo'e kuery ha'e nunga oendu vy onhemondyipa. Ha'e vy aipoe'i okuapy:

— Ha'e rami vy mba'e xagua 'rã tu oo jepe?

²⁶ Ha'e kuery re Jesus oma'ẽ vy ombovai:

— Ha'e nunga ma avakue pe haxy ete, ha'e rã Nhanderuete pe ma mba'eve ndaxyi — he'i.

²⁷ Ha'e ramo Pedro aipoe'i ixupe:

— Ore kuery ma opa mba'e roejapa va'ekue nderupive orekuai aguã. Mba'e 'rã tu ha'vy ore rojopy?

²⁸ Jesus ombovai:

— Anhetẽ aipoa'e pëvy: Peẽ kuery xerupive peo va'e, opa mba'e ipyapaa ára py Ava ra'y ojeapo va'ekue tenda openaaty hexakamba va'e áry oguapy ramo peẽ voi peguapy 'rã doze tenda áry, Israel kuery doze regua ikuai va'e re pepena vy.

²⁹ Ha'e gui ha'e javi xerery káuxa ngoo oaja va'e, guvy, gueindy, nguú, oxy, [gua'yxy,] gua'y e'ỹ vy oyvy, ha'e kuery ma ojou retave 'rã, ha'e gui tekove marã e'ỹ avi 'rã oupity.

³⁰ Ha'e rami teĩ tenonde pyguare ma heta 'rã opyta takykue py, ha'e rã takykue pyguare ma tenonde py 'rã ikuai.

20

Uvaty py omba'epo va'e kuery omombe'uaque

¹ — Mba'eta yva pygua po'akaa py oiko 'rã peteĩ hoo va'e oikoa rami. Ha'e va'e ma ko'ẽ rai ramove oo omba'e uvaty rupi omba'epo va'erã reka vy.

² Ha'e gui omba'epo va'erã kuery reve jogueroayvu peteĩ-teĩ pe peteĩ ára repy ome'ẽ aguã re. Ha'e rami vy omondouka uvaty katy.

³ Kuaray mbyte e'ỹ mbove oo vy tetã mbyte py ojou ikuai rive va'e.

⁴ Ha'e vy aipoe'i: “Tapeo peẽ voi uvaty py. Ha'e rã xee ma ha'evea rami 'rã apaga”, he'i. Ha'e ramo ha'e kuery avi oo.

⁵ — Kuaray mbyte jave teĩgue ju oo, ha'e gui kuaray ojero'a jave guive oo vy ha'ekue rami ae ju jogueroayvu.

⁶ Ha'e gui ka'aru rai'i jave ju oo vy amboae kuery ojou ikuai rive va'e. Ha'e vy oporandu ha'e kuery pe: “Mba'e re tu ára pukukue re peĩ rive apy?”

⁷ Ombovai: “Mba'eta avave rei noremomba'epoai”, he'i okuapy. Ha'e ramo aipoe'i: “Peẽ voi ke tapeo ha'vy uvaty py.”

⁸ — Ha'e gui ka'aru jave uvaty ja aipoe'i kapata pe: “Enoĩmba omba'epo va'e kuery, ha'e epaga. Takykue py oo va'ekue gui remboopy 'rã oo ypy va'ekue peve”, he'i.

⁹ Ha'e ramo ka'aru rai'i jave omba'epo va'ekue ou ramo peteĩ-teĩ pe ome'ẽ peteĩ ára repy.

¹⁰ Ha'e gui tenonde py oo va'ekue ju ovaẽ vy oexa'ã ojopy retave aguã re. Ha'e rami teĩ ha'e kuery pe voi peteĩ ára repy ae ome'ẽ.

* 19:19 Levítico 19.18 * 19:21 Romanos 3.19,20; Tiago 2.10 * 19:23 1 Timóteo 6.6-10

¹¹ Ha'e va'e ojopy rire ija re ijayvu rei okuapy.

¹² Ha'e vy aipoe'i: "Peva'e kuery takykue py ou va'ekue tu peteí hora ete'i omba'eapo va'eri ore rami ae repaga, ore ára pukukue re kuaray aku rogueropo'aka va'ekue ri", he'i okuapy.

¹³ — Ha'e ramo ha'e kuery va'e regua pe ija ombovai vy aipoe'i: "Xeirü, xee ma ha'eve e'ÿa rami ndoroguerekali. Ndereve ndorogueroyvui ri ty ra'e peteí ára repy re?"

¹⁴ Ejopy ha'vy ndeperáta, tereo, mba'eta takykue py ou va'ekue pe avi ame'êxe pëvy ame'êa rami.

¹⁵ Nda'evei ri nda'u xee aipotaa rami mba'emo areko va'e aiporu aguã? Tyrã pa rejou vai teve xeporayvua?" he'i.*

¹⁶ Ha'e rami vy takykue pyguare ma opyta 'rã tenonde py. Ha'e rã tenonde pyguare ma takykue py 'rã opyta. [Mba'eta heta 'rã oenoía, ha'e rã mbovy'i 'rã oiporavoa.]

Marcos 10.32-34; Lucas 18.31-33

¹⁷ Jerusalém tetã katy Jesus oo vy doze guemimbo'e kuery oenoí ha'e kuery ae'i. Tape rupi oje'oi rupi aipoe'i ha'e kuery pe:

¹⁸ — Pendu ke. Aÿ ma jaje'oi nhainy Jerusalém katy. Ha'e py ma Ava ra'y ojeapo va'ekue omboaxaa 'rã sacerdote yvatekueve va'e ha'e kuaxia re nhombo'e va'ety kuery pe. Ha'e rã ha'e kuery ma ojuka uka 'rã.

¹⁹ Ha'e gui amboae regua kuery pe ju 'rã omboaxa ojavyky rei, oinupã ha'e kuruxu re omoí aguã. Ha'e gui ma mboapy araa py onhemboete ju 'rã.

Marcos 10.35-45

²⁰ Ha'e gui Jesus oía py Zebedu ra'yxy ou opi'a kuery reve. Omboete vy ojerure oipytyvõ aguã re.

²¹ Ha'e ramo Jesus oporandu ixupe:

— Mba'e tu reipota?

Kunha va'e ombovai:

— Ndepo'akaa py ma kova'e mokoí xepi'a toguapy peteí reiporu kuaa regua re, ha'e amboae ma ndeaxua re — he'i.

²² Ha'e ramo Jesus ombovai:

— Peẽ ndapeikuuaa mba'e nunga re pa pejerurea. Ha'eve 'rã ri ty'y karo xee ay'u aguã va'e gui peẽ voi pey'u aguã?

Ombovai:

— Ha'eve 'rã — he'i okuapy.

²³ Ha'e ramo aipoe'i ha'e kuery pe:

— Pey'u 'rãe xekaro gui. Ha'e rã aiporu kuaa regua re ha'e xeaxua re oguapy va'erã ma xee e'ÿ 'rã aiporavo. Ha'e rami aguã ma Xeru oiporavo va'ekue pe anho — he'i.

²⁴ Ha'e rã hemimbo'e kuery mboae dez ikuai va'e ma ha'e nunga oendu vy ivai okuapy mokoí joegua pe.

²⁵ Ha'e ramo Jesus oenoímbo vy aipoe'i:

— Yvy jave regua huvixa kuery ma joguereko atã 'rã, ha'e kuery va'e regua yvatekueve ipo'aka 'rãe joe.

²⁶ Ha'e rã pende kuery ma ha'e rami e'ÿ 'rã pendekuai. Ha'e rami 'rãgue py peẽ kuery va'e regua joegui yvatevexe va'e toiko pavẽ rembiguai rami.*

²⁷ Tenondexe va'e ma nhoembiguai rami toiko,

²⁸ Ava ra'y ojeapo va'ekue rami avi, mba'eta ha'e ma jojokuai aguã e'ÿ ou, ha'e rã tembiguai rami ou guekove ome'ê aguã heta rekovia, ogueraa jepe aguã.

Marcos 10.46-52; Lucas 18.35-43

²⁹ Ha'e kuery Jericó tetã gui oo jave heta ete oje'oi hupive.

³⁰ Ha'e jave tape vÿvÿy mokoí ára revegua e'ÿ oguapy oiny va'e ma Jesus oaxa ovya oendu vy ojapukai:

— Senhor, Davi ramymino, oremboaxy ke! — he'i.

³¹ Ha'e ramo heta va'e kuery ijayvu okyrirí aguã. Ha'e rami teí ha'e kuery ojapukaive tema:

— Senhor, Davi ramymino, oremboaxy ke!

³² Ha'e ramo Jesus opyta ho'amy vy oenoí. Oporandu ha'e kuery pe:

— Mba'e tu peípota ajapo pëvy?

³³ Ombovai:

— Senhor, ore ma roexaxe — he'i.

³⁴ Ha'e ramo Jesus omboaxy vy opoko ha'e kuery rexa re. Ha'e ramove oexa ju, ha'e vy oje'oi hakykue.

21

Marcos 11.1-11; Lucas 19.28-40; João 12.12-15

¹ Ha'e gui ma Jerusalém py Jesus ovaẽ rai'i ma vy Betfagé tekoa py ranhe ovaẽ, Oliveiras vyty katy'i. Ha'e gui omondouka mokoí guemimbo'e. Ha'e vy aipoe'i:

² — Tapeo peẽ ranhe peva'e tekoa oí va'e py. Ha'e py pejou 'rã peteí mburika ixã re hi'ái va'e. Ha'e va'e reve peteí ta'y'i avi hi'ái. Pejora vy ke peru.

³ Ha'e gui xapy'a rei amongue pendevy ijayvu ramo ha'e kuery pe "Senhor ma oipota" peje 'rã. Ha'e ramo ogueru ruka 'rã pëvy — he'i.

⁴ Ha'e nunga oiko ojeupity aguã profeta pe aipoe'i ukaague:

* 20:15 Romanos 9.14-16 * 20:26 Romanos 12.3,10,16; Filipenses 2.3-8; 1 Pedro 5.3

5 “Aipo'ere Sião pygua kuery pe: ‘Pee ma ou oiny penderuvixaverã. Ha'e ma onhemboyvate va'e'ÿ vy mburika áry ou, mburika'i ombovoyipy ra'y áry', 're.’”*

6 Ha'e ramo hemimbo'e kuery oo vy Jesus aipoe'iague rami ojapo.

7 Ha'e vy ogueru mburika ta'y'i reve. Hi'áry omoĩ oao. Ha'e ramo Jesus oĩ hi'áry.

8 Ha'e gui heta va'e kuery tape rupi oipyo okuapy oao, ha'e amboae kuery ma vyvra rogue ojaya vy onhono avi tape rupi.

9 Ha'e gui heta va'e kuery tenonde ha'e hakykue oje'oi va'e ojapukai vy aipoe'i:

— Toguerovy'aa Davi ramymino! Ta'ima'endu'a porãa Senhor rery rupi ou va'e re! Toguerovy'aa

vyvatevea py! — he'i oje'oivy.*

10 Jerusalém tetã py ovaẽ ma ramo tetã pygua kuery mava'e paa ndoikuai vy oporandu okuapy:

— Mava'e tu peva'e?

11 Ha'e ramo heta va'e kuery ojapukai:

— Peva'e ma profeta Jesus, Galiléia regua Nazaré pygua.

Marcos 11.15-17; Lucas 19.45,46

12 Templo py Jesus oike vy oipe'apa mba'emo vendea ha'e mba'emo joguaa kuery ha'e py ikuai va'ekue. Oitypa guive peráta mboekoviaa kuery mesa, ha'e apyaxu vendea kuery renda.

13 Ha'e vy aipoe'i ha'e kuery pe:

— Ipara oiny “Xero ma onhembo'e atyrã oĩ” 'ea va'eri peẽ ma pejapo imonda va'e onhemiaty rami.*

Templo py nhombo'eague

14 Templo py Jesus oĩa py ou ára revegua e'ÿ ha'e oguata e'ÿ va'e kuery. Ha'e ramo omonguerapa.

15 Ha'e rã sacerdote yvatekueve va'e ha'e kuaxia re nhombo'e va'ety kuery ma Jesus mba'emo porã ojapo rã oexa vy ndojou porã okuapy, ha'e kyrĩgue “Toguerovy'aa Davi ramymino” he'i okuapy rã oendu vy guive.*

Ha'e rami vy oporandu okuapy iuxue:

16 — Rendu ma'ã peva'e kuery aipoe'ia?

Jesus ombovai:

— Xee aendu ma. Ha'vy peẽ ndaperoavyri ri ty'y po ramigua: “Kyrĩgue'i ha'e okambu'i va'e pe ma mboraie iporã ete va'e py rejererovy'a uka”, he'iague?*

17 Ha'e rami vy tetã gui ojepe'a vy Betânia katy ju. Ha'e py ma oke.

Marcos 11.12-14,20-24

18 Ko'ẽ aje'ive'i reve tetã katy ojevya rupi inhembyayi.

19 Tape vyvry peteĩ figo'y hi'aĩ va'e oexa vy ovaẽ ha'e py, teĩ mba'eve ndojoui hogue e'ÿ vy. Ha'e rami vy ha'e va'e pe aipoe'i: “Toikove eme nde'a”, he'i ramove figo'y ipirupa vyvoyi.

20 Hemimbo'e kuery ha'e nunga oexa vy onhemondyipa. Ha'e vy aipoe'i:

— Ipiru vyvoyi nda figo'y.

21 Ha'e gui Jesus aipoe'i ha'e kuery pe:

— Anhetẽ aipoa'e pëvy: Pexa'ã rei 'rãgue py pejerovia ete ramo figo'y re oiko va'ekue ramigua anho e'ÿ 'rã oiko. Kova'e vyvry pe “Ejepe'a, enhemombo ye'ẽ py”, peje ramo voi oiko 'rã.

22 Pejeroviaa rupi ri penhembo'e vy pejopy 'rã pejerurea.

Marcos 11.27-33; Lucas 20.1-8

23 Templo py Jesus ovaẽ vy nhombo'e oiny. Ha'e ramo sacerdote yvatekueve va'e ha'e heta va'e mongetaaty kuery ombojere rei vy oporandu okuapy:

— Mava'e po'akaa rupi tu ha'e nunga rejapo reikovy? Mava'e tu nembopo'aka?

24 Jesus ombovai:

— Xee voi aporandu ta pëvy. Xevy pe pembovai ramo xee voi amombe'u 'rã mava'e po'akaa rupi pa ha'e nunga ajápoa.

25 Maguigua nda'u João Batista nhomongaraia? Yva guigua tyrã pa avakue guigua raka'e? — he'i.

Ha'e ramo ha'e kuery joo meme ranhe ijayvu okuapy:

— Xapy'a rei “Yva gui”, ja'e ramo ha'e ombovai ju 'rã: “Mba'e re ha'vy ndapejeroviai hexe?” he'i 'rã nhandevy.

26 Ha'e rã “Ava gui”, ja'e aguã nda'evei avi, heta va'e kuery gui jakyje vy, mba'eta oikuaa pavẽ João Batista profeta oikoa — he'i okuapy.

27 Ha'e rami vy aipoe'i Jesus pe:

— Ore ma ndoroikuai.

Ha'e rã ha'e ju ombovai:

— Xee voi namombe'ui 'rã pëvy mava'e po'akaa rupi pa ha'e nunga ajapo aikovyva.

Mokoĩ ta'y re ombojojaague

28 — Mba'exa tu peikuaa? Oiko peteĩ ava mokoĩ ta'y va'e. Tyke'y oĩa py oo vy aipoe'i: “Xera'y, tereo aÿ, emba'eapo xemba'e uvaty py.”

29 Ha'e ramo “Ha'eve senhor”, he'i va'eri ndooi.

* 21:5 Zacarias 9.9

* 21:9 Salmo 118.26

* 21:13 Isaías 56.7, Jeremias 7.11

* 21:15 Marcos 11.18,19; Lucas 19.47,48

* 21:16

³⁰ — Ha'e gui tyvy oia py ju tuu oo vy ha'ekue rami ae ijayvu. Ha'e rā ha'e va'e ma aipoe'i: "Xee ndaa reguai" he'i rire nda'evei nho vy oo.

³¹ Mava'e ete nda'u mokoī va'e gui ojapo nguu oipotaa rami?

Ombovai:

— Tyvy rima — he'i okuapy.

Jesus omombe'u porāve ha'e kuery pe:

— Anhetē aipoa'e pēvy: Peē kuery gui imposto re nhombopaga va'ety kuery ha'e kunhague itavy rei va'ekue ranhe 'rā oike Nhanderuete po'akaa py.

³² Mba'eta João Batista ou vy peē kuery pe oikuaa uka raka'e tape porā, teī peē ma ijayvua ndapejeroviai. Ha'e rā imposto re nhombopaga va'ety kuery ha'e kunhague itavy rei va'e ma oguerovia. Peē ma ha'e nunga pexa va'eri ndapejeko rerovai ijayvua, neī ndaperoviai.*

Marcos 12.1-12; Lucas 20.9-19

³³ — Pejapyxaka ke mba'emo re ambojoja vy ayvu mboae amombe'u rā. Oiko peteī ava hoo va'e. Ha'e va'e onhoty uva, ha'e rire ijyvyry rupi ojapo kora. Ojapo uva ombiri atyrā ha'e torre. Ha'e rami vy omboaxa opena va'erā kuery po py. Ha'e rire oo guekoa gui.

³⁴ — Hi'a omono'ōa āra ovaē ramo opena va'e kuerya py ija ombou guembiguaī kuery, ojopy aguā uva'a ixupegua.

³⁵ Ha'e ramo opena va'e kuery hembiguaī kuery ojopy vy amongue oinupāmba, amboae ojuka, ha'e rā amboae ma ojapipa ita py.

³⁶ Ha'e gui ma ija hetave ju ombou guembiguaī. Ha'e rā ha'ekue rami ae ju ogueroko.

³⁷ Opa vygua ombou gua'y ae. Ha'e vy aipoe'i: "Xera'y ete ramo omboete 'rā ko", he'i.

³⁸ — Ha'e rami teī omba'eapo va'e kuery ta'y oexa vy aipoe'i joupe-upe: "Peva'e ma uvaty jarā ete. Jajuka teve, uvaty nhandevy ju opyta aguā", he'i okuapy.

³⁹ Ha'e gui ojopy vy uvaty gui ogueraa vy ojuka.

⁴⁰ — Ha'e gui uvaty ja ou vy mba'e nda'u ojapo 'rā opena va'e kuery re?

⁴¹ Ha'e ramo ombovai okuapy:

— Ojuka ukapa 'rā heko vai va'e kuery, ha'e vy amboae kuery pe ju 'rā omboaxa uvaty, hi'a āra py ixupegua ome'ē va'erā pe — he'i okuapy.

⁴² Ha'e ramo Jesus oporandu ha'e kuery pe:

— Ha'vy peē ndaperoayvui teve ipara oī va'e: "Oo apoa kuery ita ndoipotai va'ekue opyta omboeteve pyrā, tenonde pyguarā. Ha'e nunga ma Senhor gui ae oiko, ha'e jaexa rā iporā ete va'e", he'iague?*

⁴³ Ha'e nunga rupi aipoa'e pēvy: Pendegui Nhanderuete oipe'a 'rā opo'akaa, amboae regua pe ju 'rā omboaxa, ixupegua ome'ē va'erā kuery pe.

⁴⁴ Ha'e va'e ita re ho'a va'e opēmba 'rā. Ha'e rā amongue áry ita ho'a ramo iku'lipa 'rā — he'i.

⁴⁵ Pova'e ayvu omombe'u rā sacerdote vyatekueve va'e ha'e fariseu kuery oendu vy oikuaa ha'e kuery re ae ri Jesus ijayvua.

⁴⁶ Ha'e vy ojopyxe teī okyje heta va'e kuery gui, profeta oikoa rami oikuaa pavē ramo.

22

Omendaa py okaru okuapy va'e re ombojojaague

¹ Teigue ju Jesus mba'emo re ombojoja vy ijayvu. Ha'e vy aipoe'i ha'e kuery pe:

² — Yva pygua po'akaa py oiko 'rā peteī huvixave ta'y omendaa py ngaru ojapo va'e rami avi.*

³ Ha'e gui guembiguaī kuery omoudouka omombe'u aguā omendaa py ou va'erā va'e pe ou aguā, teī ha'e kuery ndouei.

⁴ Amboae guembiguaī ju omoudouka po rami ijayvu reve: "Aipo're ke aenoī va'e kuery pe: 'Areko katupa ma ngaru. Xerymba vaka ha'e vaka ra'y ikyra va'e ajuka, ha'e javi oimba ma. Peju ke ngaru oia py', 're 'rā."

⁵ — Ha'e rami teī ha'e kuery ndoikuaa potai vy oje'oipa. Peteī oo omba'ety katy, ha'e rā amboae ma vendeaty katy oo.

⁶ Amboae kuery ma tembiguaī kuery ojopy vy ojavyky rei, ojuka guive.

⁷ Ha'e ramo huvixave ipoxy. Ha'e vy xondaro kuery ju omoudouka vy ojuka ukapa jojukaare kuery, ha'e omoendy uka ha'e kuery retā.

⁸ — Ha'e rire guembiguaī kuery pe ju aipoe'i: "Areko katupa ma ngaru teī aenoī uka va'ekue ma nda'evei amovaē aguā.

⁹ Ha'e rami ri rā tapeo tape pia ikuai va'e rupi, peovaexī va'e rei penoī omendaa py ou aguā", he'i imondovy.

¹⁰ Ha'e ramo tembiguaī kuery tape rupi oje'oi vy omboaty ojou va'e ha'e javi, heko porā ha'e heko vai va'e guive. Ha'e rā opy okaru aguā py tynyē oenoī va'ekue.

¹¹ — Ha'e gui huvixave oike vy mesa py ikuai va'e oexapa. Oexa avi peteī ava omendaa pygua ao py e'y onhemonde va'e.*

¹² Ha'e vy oporandu ixupe: "Xeirū, mba'exa tu apy reike omendaa pygua ao remoī e'y re?" he'i ramo ha'e va'e nombovai.

* 21:32 Mateus 7.21 * 21:42 Salmo 118.22-23 * 22:2 Lucas 14.15-24 * 22:11 1 Coríntios 6.9-11; Efésios 5.5,6; Apocalipse 19.7,8

13 — Ha'e ramo huvixave aipoe'i guembiguai kuery pe: “Pejokua ipo ha'e ipy, ha'e pemomboa oka katy pytúa py”, he'i. Ha'e py ma ojae'opaa ha'e opa marã onhendua 'rã.

14 Mba'eta heta 'rã oenoia, ha'e rã mbovy'i 'rã oiporavao.

Marcos 12.13-17; Lucas 20.20-26

15 Ha'e ramo fariseu kuery ojepe'a vy joo meme oikuaa pota okuapy marã rami vy pa omoĩ vai aguã re ayvu py.

16 Ha'e rami vy guemimbo'e kuery ombou Herodes-a katygua kuery reve, Jesus pe aipoe'i aguã:

— Porombo'ea, ore roikuaa ndee anhetê va'ea, ha'e anhetê rupi renhombo'e Nhanderueite oipota va'e re. Neĩ joegui peteĩve ndereayvuvei, mba'eta nderekuaa potai avakue yvatea re.

17 Ha'e gui aipo'ere ke orevy: Mba'exa tu ndee reikuaa? Ha'veea rami ri nda'u César pe nhame'ẽ imposto repy, tyrã pa any?

18 Jesus ha'e kuery ija'e e'ỹa oikuaa vy aipoe'i:

— Pendeko porã merami rive va'e, mba'e re tu xereko a'axe ri?

19 Pexa uka ha'vy xevy peteĩ hatã'i va'e imposto peguarã — he'i. Ha'e ramo ixupe ogueru peteĩ hatã'i va'e.

20 Ha'e rã oporandu ha'e kuery pe:

— Kova'e re ma mava'e ra'angaa ha'e mava'e rery tu oĩ?

21 Ombovai okuapy:

— César mba'e rima.

Ha'e ramo aipoe'i ha'e kuery pe:

— César mba'e ri rã peme'ẽ ha'vy César pe. Ha'e rã Nhanderueite pegua ma Nhanderueite pe ae 'rã peme'ẽ — he'i.*

22 Ha'e nunga ha'e kuery oendu vy onhemondyipa reve oejapa oje'oivy.

Marcos 12.18-27; Lucas 20.27-40

23 Ha'e va'e árave oia py ou saduceu kuery va'e regua. Ha'e va'e kuery ma ndogueroviai nhanhemboete ju 'rãa. Ha'e gui oporandu okuapy ixupe:

24 — Porombo'ea, Moisés aipoe'i: “Amongue ta'y e'y re omano ramo tyvy ju omenda 'rã imeve'y va'e re, omano va'e ra'yrã va'ekue oguereko aguã”, he'i raka'e.*

25 Ha'e gui ikuai raka'e sete joegua. Tujave va'e ma omenda va'ekue ri ta'y e'y re omano vy gua'yxykue ojea guvy py.

26 Ha'ekue rami ae ju oiko tyvy re, mboapya, ha'e gui sete ikuai va'e ha'e javive re.

27 Ha'e kuery ha'e javi omanomba rire kunha va'e avi omano.

28 Ha'e gui onhemboete jevya ára nda'u sete joegua ikuai va'e gui mava'e ete'i 'rã oiko kunha va'e me? Mba'eta kunha va'e re sete-ve omenda rire.

29 Jesus aipoe'i ha'e kuery pe:

— Pejavy, mba'eta ndapeikuaai ipara re oia, neĩ Nhanderueite po'akaa.

30 Mba'eta onhemboetepe ju va'ekue ma nomendaavei, neĩ nanhomomendaavei ma 'rã guive. Ha'e rami 'rãgue py anjo kuery rami 'rã ikuai yva re.

31 Ha'e gui omanoague gui onhemboetepe ju 'rãa re ndaperoayvui teve Nhanderueite pendeivy aipoe'iague.*

32 “Xee ma Abraão, Isaque ha'e Jacó Ruete aiko?” he'iague? Ha'e ramo ma omanogue Ruete e'y oiko, ha'e rã oikove va'e Ruete — he'i.*

33 Ha'e rami ombo'e rã heta va'e kuery oendu vy onhemondyipa.

Marcos 12.28-34

34 Ha'e gui Jesus saduceu kuery omokyririague fariseu kuery oendu vy ha'e kuery ju nhomboaty jogueroayvu aguã.

35 Ha'e gui peteĩ ha'e kuery regua lei re nhombo'e va'ety ou oeko a'ã vy. Ha'e vy oporandu ixupe:

36 — Porombo'ea, mba'e nunga lei re ojapo uka pyre tu pavẽ gui yvateve va'e?

37 Jesus ombovai:

— “Reayvu 'rã Senhor Nderueite ndepy'a ha'e javi py, ndereko ha'e ne'arandua ha'e javi py guive”, he'i va'e.*

38 Ha'e va'e ojapo uka pyre ma iporãve ha'e yvateve va'e oĩ.

39 Ha'e va'e rire ma po rami ju: “Reayvu 'rã neirũ kuery ndee ae rejeayvua rami”, he'i va'e.*

40 Pova'e mokoĩ ojapo uka pyre guigua ma lei ha'e profeta kuery nhombo'eaque ha'e javi — he'i.

Marcos 12.35-37; Lucas 20.41-44

41 Fariseu kuery ijatypa rã Jesus oporandu ha'e kuery pe:

42 — Mba'exa tu peikuaa Cristo oikoa? Mava'e ramymino tu oiko?

Ha'e kuery ombovai:

— Davi ramymino rima — he'i okuapy.

43 Jesus aipoe'i:

— Mba'exa tu ha'vy ixupe Davi “Senhor” he'i Nhe'ẽ gui? Mba'eta aipoe'i:

* 22:21 Romanos 13.7 * 22:24 Deuteronomio 25.5 * 22:31 1 Corintios 6.14, 15.12-28; 1 Tesselonicenses 4.13-18 * 22:32 Êxodo 3.6

* 22:37 Deuteronomio 6.5 * 22:39 Salmo 118.26

44 “Senhor aipoe'i xe-Senhor pe: ‘Eguapy ke aiporu kuaa regua re, ndepy guýry nderovaigua kuery amoí e'ya ja', he'i raka'e.”

45 Ha'e rami vy Davi voi “Senhor” he'i ixupe. Mba'eta tu ha'vy hamymino avi ri oiko? — he'i.*

46 Ha'e rá peteíve nombovai kuaai. Ha'e va'e ára guive neí peteíve nda'ipy'a guaxuvei ixupe oporandu aguã mba'emo re.

23

Marcos 12.38-40; Lucas 11.37-52; 20.45-47

1 Ha'e ramo heta va'e kuery pe ju Jesus aipoe'i, guemimbo'e kuery guive:

2 — Kuaxia re nhombo'e va'ety ha'e fariseu kuery oguapy 'rá okuapy Moisés renda py.

3 Ha'e nunga rupi pejapo ha'e pemoí porã 'rá ha'e kuery ojapo uka va'e ha'e javi. Ha'e rami teí peiko eme ha'e kuery ikuai rami, mba'eta ha'e kuery nhombo'e teí ndojapoi 'rá oayvua ae.

4 Ha'e kuery ma nhombovovi raxa 'rá [ndogueropo'akai va'erã py], ijaxi'y áry oupi va'e rami. Ha'e rami teí ha'e kuery ma neí okuã py voi nanhopytyvõi 'rá.

5 Ha'e kuery ikuai ha'e javi ma amboae kuery oexa aguã rive. Ha'e rami vy lei ryru'i ipyve va'e anho ojee ojokua, ha'e oao apy voi ombopotypa 'rá ipukuve va'e py.*

6 Okarua py ha'e onhembo'eaty py oguapy 'rá tenda tenondeve oí va'e py anho.

7 Tetã mbyte rupi ikuai vy oipota 'rá avakue oxarura vy “Xembo'ea” he'i aguã.

8 — Ha'e rá peẽ ma pendejeupe “Xembo'ea” peje uka aguã nda'evei, mba'eta peteí'i anho oiko penembo'ea, ha'e rá peẽ ma joegua'i meme pendekuai.

9 Ha'e apy vyv re avave rei pe “Oreru” peje eme, mba'eta Penderu peteí'i oiko yva pygua.

10 Neí joupe “Xererekoa” peje aguã nda'evei, mba'eta peteí'i oiko pendererekoa. Ha'e va'e ma Cristo.

11 Ha'e rá peẽ kuery regua yvatekueve va'e ma pavẽ rembiguai rami 'rá pendekuai.

12 Ha'e javive onhemboyvateve va'ekue ma omo'yvyi'ave 'rá. Ha'e rá onhemo'yvyi'i va'ekue ma omboyvateave 'rá.

Jesus “Nda'evei ete 'rá”, he'iaque

13 — Peẽ kuery kuaxia re nhombo'e va'ety ha'e fariseu kuery pe nda'evei ete 'rá. Heko porã merami rive va'e pendekuai, mba'eta yva pygua po'akaa rokẽ pemboty amboae kuery oíke e'ý aguã. Mba'eta peẽ ndapeikei 'rá, ha'e oikexe va'e pejokopa.

14 [— Peẽ kuaxia re nhombo'e va'ety ha'e fariseu kuery pe nda'evei ete 'rá. Heko porã merami rive va'e pendekuai, mba'eta peipe'a rivepa 'rá imeve'ý va'e kuery ro gui. Ha'e penhemboeko porã ukaxe vy penhembo'e are 'rá. Ha'e nunga rupi pepaga raxa ete 'rá.]

15 — Peẽ kuaxia re nhombo'e va'ety ha'e fariseu kuery pe nda'evei ete 'rá. Heko porã merami rive va'e pendekuai, mba'eta ye'ẽ ha'e vyv rupi peo 'rá peteí'i ri jepe pejou aguã penemimbo'erã. Ha'e gui pejou vy tata ogue'ý va'e pyguarã pemoingo pendegui heko vaive va'e.

16 — Peẽ kuery pe nda'evei ete 'rá, joguerekoa ára revegua e'ý rami pendekuai ramo. Aipopeje 'rá: “Hendaiky'a e'ý va'e ropy mba'emo oí va'e re jaura teí ovare va'e'ý. Ha'e rá hendaiky'a e'ý va'e ropy ouro oí va'e re ri jaura rire jajapo 'ráe jauraague”, peje.

17 Hi'arandu e'ý ha'e ára revegua e'ý pendekuai va'e, mava'e tu joegui omboetepevy: ouro rive, tyrã pa hendaiky'a e'ý va'e? Mba'eta hendaiky'a e'ý va'e ma ojapo ouro avi ik'y'a e'ý va'e opyta aguã.

18 — Peẽ kuery aipopeje avi: “Altar re jaura teí ovare va'e'ý. Ha'e rá altar áry omoí mbyre re ri jaura rire jajapo 'ráe jauraague”, peje.

19 Ára revegua e'ý pendekuai va'e, mba'e tu joegui omboetepevy: mba'emo ome'ẽ mbyre, tyrã pa altar? Mba'eta altar ma ojapo hi'áry oí va'e avi ik'y'a e'ý va'e opyta aguã.

20 Mba'eta altar re amongue oura va'e ma ha'e va'e re anho e'ý, altar áry oí va'e ha'e javi re avi oura.

21 Ha'e hendaiky'a e'ý va'e ropy re amongue oura va'e ma ha'e va'e re oura, ha'e ha'e py oiko va'e re avi.

22 Ha'e yva re amongue oura va'e ma Nhanderuete renda openaaty re oura, guenda py oguapy oiny va'e re avi.

23 — Peẽ kuaxia re nhombo'e va'ety ha'e fariseu kuery pe nda'evei ete 'rá. Heko porã merami rive va'e pendekuai, mba'eta dízimo peme'ẽ hortelã, endro ha'e cominho regua gui, ha'e rá lei regua ojapo uka pyre yvateve va'e rupi ma ndapeikoxei: ha'e va'e ma pendeko porã aguã, penhomboaxy ha'e pejerovia aguã. Ha'e va'e rupi voi pendekuai 'rágue, amboae nunga pejapoa rami avi.

24 Ára revegua e'ý joguerekoa pendekuai va'e, karo gui nhexi pemoẽ va'eri pemokõ camelo oí va'e.

25 — Peẽ kuaxia re nhombo'e va'ety ha'e fariseu kuery pe nda'evei ete 'rá. Heko porã merami rive va'e pendekuai, mba'eta hi'árykue rupi rive pejoí karo ha'e hy'a. Ha'e rá pendepy'apy py ma oí pejokorea ha'e pejejoko e'ya anho.†

26 Fariseu kuery ára revegua e'ý, karo ryepy rupi oí va'e ranhe peiky'a'o. Ha'e ramo ma hi'árykue rupi avi 'rá nda'iky'ai.

* 22:45 Romanos 1.3,4 * 23:5 Judeu kuery gueko rami vy ngova ha'e ojyva re ojokua 'rá hyru'i lei regua avyu oia. † 23:25 Lei re nhombo'e va'ety ha'e fariseu kuery opa marãgua ojoi va'erã okaru e'ý mbove, nonhemongy'a ukaxeí vy (Marcos 7.3,4). Ha'e rá apy ma Jesus ijayvu ha'e kuery py'a re ik'y'a va'e oia re.

²⁷ — Peë kuaxia re nhombo'e va'ety ha'e fariseu kuery pe nda'evei ete 'rã. Heko porã merami rive va'e pendekuai, mba'eta omano va'ekue ryrü omoxĩmba pyre rami pendekuai. Ha'e nunga ma hi'árykue rupi iporã rei, ha'e rã ipy rupi ma omano va'ekue kãgue ha'e opa marãgua ky'akue oĩ.

²⁸ Ha'e rami ae avi peë kuery voi avakue penderexa rã heko porã va'e merami peiko, ha'e rã pendepy'a re ma pendeko porã merami rivea ha'e pendeko vaia anho oĩ.

²⁹ — Peë kuaxia re nhombo'e va'ety ha'e fariseu kuery pe nda'evei ete 'rã. Heko porã merami rive va'e pendekuai, mba'eta profeta kuery rupa áry guarã pejapo oo ra'angaa'i, ha'e pemoatyrõmba 'rã guive heko porã va'e onhono porãague.

³⁰ Ha'e vy aipopeje: “Nhaneramoĩ kuery ikuai jave ma voi jaiko va'e rire ha'e kuery rami profeta jukaa rupi nhande ndajaikoi 'rãgue”, peje.

³¹ Ha'e rami vy pendejee ae pendeayvu profeta jukaare ramymino kuery peikoa rami.

³² Pejapopa ha'vy penamoĩ kuery omboypy va'ekue.

³³ Peë mboi joxu'u va'e regua, mba'exa 'rã tu peo jepe tata ogue e'ỹ va'e py pepaga aguã gui?

³⁴ Ha'e nunga rupi peë kuery pe xee ambou 'rã profeta ha'e hi'arandu va'e kuery penembo'earã. Ha'e va'e kuery regua amongue pejuka 'rã kuruxu re pemoĩ vy. Ha'e rã amboae kuery ma peĩnupã 'rã penhembo'eaty py, ha'e tetã nhavõ gui pemoxê 'rã,

³⁵ peë kuery ae pepaga aguã heko porã va'e ruguy omoëague ha'e javi re, heko porã va'e Abel ruguy omoëague guive'i Baraquias ra'y Zacarias ruguy omoëa peve. Ha'e va'e ma pejuka va'ekue henda iky'a e'ỹ va'e ha'e altar mbyte.

³⁶ Anhetê aipoa'e pëvy: Aỹgua kuery re ha'e nunga rekovia ha'e javi 'rã ou.

Lucas 13.34,35

³⁷ — Jerusalém, Jerusalém, profeta kuery jukaaty, ha'e ndea py ombou pyre kuery ita py rejapipa va'ety. Mbovykue rei e'ỹ xee aikuavãmbaxe teĩ nememby kuery, uru gua'y kue'iry opepo py oja'o'ipaa rami. Ha'e rami teĩ peë kuery ndapeipotai.

³⁸ Ha'e rami rire pendero opyta rivepa 'rã.

³⁹ Aipoa'e porã pëvy: Peë kuery ndaxerexavei ma 'rã, ovaê e'ỹ ja “Ta'ima'endu'a porãa Senhor rery rupi reju va'e re” peje aguã ára.*

24

Marcos 13.1,2; Lucas 21.5,6

¹ Templo gui Jesus oê ovy jave hemimbo'e kuery hexe onhemboja vy ixupe oexa uka templo mba'emo porã gui anho ojapoague.

² Ha'e ramo aipoe'i ha'e kuery pe:

— Peexa pa peva'e nunga ha'e javi? Anhetê aipoa'e pëvy: Oitypaa ramo peteĩve ita ndopytai 'rã amboae ita áry.

Marcos 13.3-13; Lucas 21.7-19

³ Oliveiras vyty py Jesus oguapy oiny jave hemimbo'e kuery onhemboja ju hexe. Ha'e vy oporandu okuapy:

— Emombe'u na orevy: Araka'e 'rã tu ha'e nunga oiko? Mba'e nunga tu oiko 'rã roikuaa aguã reju jevy taa, ha'e ára opa ta maa?

⁴ Ombovai:

— Penheangu ke ha'vy penhembotavy uka e'ỹ aguã avave rei pe.

⁵ Mba'eta heta 'rã ou xerery rupi “Xee ae ma Cristo” he'i rive va'e. Ha'e rami vy heta 'rã ombotavy.

⁶ Pendu avi 'rã “Joe opu'ã ma”, e'ỹ vy “Joe opu'ã 'rã” ea rã. Peikuaa pota ke penhemondy'i e'ỹ aguã, mba'eta ha'e nunga ranhe 'rãe oiko teĩ opa aguã e'ỹ teri.

⁷ Peteĩ-teĩ tetã pygua kuery opu'ã 'rã amboae tetã pygua kuery re, ha'e peteĩ-teĩ regua amboae regua re 'rã opu'ã. Opa rupi oiko 'rã karuai ha'e vy rryri.

⁸ Pova'e nunga ha'e javi ma ikuai axya ypy'i aguã.

⁹ — Ha'e va'e jave penembojexavai ha'e pendejukaa 'rã. Xerery káuxa pavê nda'ija'ei 'rã pendere.

¹⁰ Ha'e va'e jave heta 'rã ojeity uka vy jojopy uka ndajoayvuvei vy.

¹¹ Heta 'rã ikuai profeta ramigua rive, heta 'rã ombotavy.

¹² Ha'e gui heta-etave heko vai ramo pavê rai ojepe'a 'rã porayvua gui.*

¹³ Ha'e rã opa peve oĩ atã va'e ma oo jepe 'rã.

¹⁴ Nhanderueete po'akaa regua ayvu porã omombe'ua 'rã rvy jave re, ha'e javi regua oikuaa aguã. Ha'e gui mae ma opa ete 'rã.

Marcos 13.14-23; Lucas 21.20-24

¹⁵ — Ha'e gui henda iky'a e'ỹ va'e py pexa 'rã ojoguarupy nhomokanhyarã oĩ rã, profeta Daniel omombe'u ma voi va'ekue. (Tove ogueroayvu va'e toikuaa.)*

¹⁶ Ha'e ramo Judéia pygua kuery tonhamba vyty re.

¹⁷ Ngoo áry oĩ va'e toguejy eme ngopy gui mba'emo oguenoê aguã,

¹⁸ ha'e mba'ety rupi ikuai va'e tojevye eme guive oparito ogueraa aguã.

¹⁹ Ha'e va'e ára nda'evei 'rã imemby rryri'i ha'e imemby kambu va'e pe.

* 23:39 Romanos 11.25-27 * 24:12 Apocalipse 6.1-17; 2 Timóteo 3.1-9 * 24:15 Daniel 9.27; 11.31; 12.11

²⁰ Pejerure ke yro'y py e'y penha aguã, neĩ sábado ára py voi,

²¹ mba'eta ha'e va'e ára py ma ojexavaia ete 'rã. Jypy'i guive aỹ peve ndoikoi teri ha'e ramigua ete, neĩ ndoikovei ma 'rã guive ha'e rami.

²² Ha'e va'e ára Nhanderuetete nomomba voi va'e rire avave rei ndoo jepeti 'rãgue. Va'eri ojeupe guarã oiporavo va'ekue re oma'ẽ vy omomba voi 'rã.

²³ — Ha'e gui amongue pëvy aipoe'i 'rã: “Ma'ẽ, apy ma Cristo”, e'y vy “Pee py ma hiny”, he'i ramo perovia eme,

²⁴ mba'eta oiko 'rãe Cristo ramigua ha'e profeta ramigua rive. Ha'e kuery voi ojapo 'rã hexa pyrã ha'e nhomondyipaarã oiporavo pyre kuery voi ombotavy aguã teĩ, ha'eve va'e rive.

²⁵ Peiko kuaa pota ke, xee romonheangu ma voi.

²⁶ Ha'e nunga rupi xapy'a rei pëvy “Tekoa e'ya py Cristo oĩ”, 'ea ramo tapeo eme. Xapy'a rei “Pee oopy ma hiny”, 'ea ramo perovia eme.

²⁷ Mba'eta overa va'e minha kuaray oua katy gui oẽ vy oikea peve ojekuaa va'e rami avi ojekuaa 'rã Ava ra'y ojeapo va'ekue ou rã.

²⁸ Mamo rã te'ogue ituia py xapirẽ onhemboaty 'rã okuapy.

Marcos 13.24-27; Lucas 21.25-28

²⁹ — Ha'e va'e ára ojexavaia rire'ive kuaray pytũmba 'rã, jaxy voi naendyvei 'rã. Jaxy-tata ho'apa 'rã yva gui, ha'e yva re ipo'akakueve ikuai va'e voi oitypaa 'rã.*

³⁰ Ha'e gui yva re ojekuaa 'rã hexa pyrã Ava ra'y ojeapo va'ekue guigua. Ha'e ramo ha'e javi regua yvy re ikuai va'e ojae'o 'rã okuapy oexa vy Ava ra'y ojeapo va'ekue yva gui ou rã arai rupi, opo'aka ha'e guexakãmba reve.*

³¹ Ha'e vy mimby guaxu onhe'ẽ atã reve omondouka 'rã guembiguai anjo kuery. Ha'e kuery omboatypa 'rã heruvy hembiporavo kuery irundy henda vytytu oipejua gui, yva guy jovaive gui.

Marcos 13.28-37; Lucas 21.29-36

³² — Peikuaa pota ke figo'y re mba'emo ambojoja vy amombe'u rã. Mba'eta hakã ipyaupa ha'e hogue hokypa rã pexa vy peikuaa 'rã ára pyau ovaẽ rai'i maa.

³³ Ha'e rami ae avi peẽ kuery voi xeyvuague ha'e javi oiko rã pexa vy peikuaa 'rã xe'ára ovaẽ rai'i maa, okẽ py ae.

³⁴ Anhetẽ aipoa'e pëvy: Aỹgua kuery opa e'y re ha'e nunga ha'e javi oiko 'rã.

³⁵ Opa 'rã yva ha'e yvy. Ha'e rã xeyvuague ma ndoaxa rivei 'rã.

³⁶ — Ha'e rami teĩ ha'e va'e ára ha'e hora raka'e paa avave rei ndoikuaai, neĩ anjo kuery yva pygua, neĩ xee Ta'y voi ndaikuaai. Xeru anho'i oikuaa.

³⁷ Ava ra'y ojeapo va'ekue oua ára ma Noé oiko jave py oikoague rami avi 'rã oiko.

³⁸ Mba'eta yy ou e'ya ja okaru ha'e oy'ua okuapy, omendaa ha'e nhomomendaa guive, kanoã py Noé oikea ára peve.

³⁹ Noexa'ãi rei okuapy raka'e, yy ou vy ogueroxyrypa heravya ára peve. Ava ra'y ojeapo va'ekue ou jave voi ha'ekue rami ae 'rã oiko.

⁴⁰ Ha'e va'e jave py mokoĩ 'rã ikuai mba'ety py. Peteĩ heraa 'rã, ha'e rã amboae ma oejaa 'rã.

⁴¹ Mokoĩ kunhague omba'eapo 'rã omongu'ia py. Peteĩ heraa 'rã, ha'e rã amboae ma oejaa 'rã.

⁴² Ha'e nunga rupi peiko kuaa pota, mba'eta ndapeikuaai mba'e ára pa pende-Senhon ou 'rãa.

⁴³ Peikuaa pota ke pova'e nunga re: Hoo va'e ma mba'e hora pa imonda va'e ovaẽ 'rãa oikuaa va'e rire oikuaa pota 'rãgue ngopy gui ogueraa ukapa e'y aguã.

⁴⁴ Ha'e nunga rupi peẽ voi peiko kuaa pota, mba'eta napexa'ãi rei jave Ava ra'y ojeapo va'ekue ou 'rã.*

Lucas 12.42-46

⁴⁵ — Ha'e gui mava'e nda'u peiko tembiguai ojeroviapy ha'e joe opena kuaa va'e? Ha'e ramigua ma ipatõ omoĩ 'rã oirũ kuery okaru aguã hora py omongaru aguã.

⁴⁶ Ovy'a ete 'rã tembiguai ipatõ ou rã ha'e rami ojapo va'e.

⁴⁷ Anhetẽ aipoa'e pëvy: Ha'e va'e pe opena uka 'rã opa mba'e oguereko va'e re.

⁴⁸ Ha'e rã xapy'a rei ha'e va'e tembiguai heko vai vy ojeupe ae “Xepatõ ndou voi 'rã teve”, he'i 'rã.

⁴⁹ Ha'e rami vy oinupãmba 'rã oirũ kuery. Ha'e rã oka'u va'e kuery reve ma okaru ha'e oy'u 'rã.

⁵⁰ Ha'e rami vy tembiguai noexa'ãi reia ára ha'e ndoikuaai reia hora 'rã ipatõ ou.

⁵¹ Ha'e rami rire ombopaga vy oguereko axy 'rã heko porã merami rive va'e kuery reve. Ha'e ramo ojae'o ha'e opa marã 'rã onhendu.

25

Dez kunhataĩgue re ombojojaague

¹ — Ha'e va'e jave yva pygua po'akaa py oiko 'rã dez kunhataĩgue guataendy ogueraa vy omenda va'e ovaexĩ aguã oje'oi va'e rami avi.

² Ha'e kuery regua peteĩ nhiruĩ hi'arandu e'y va'e, ha'e rã peteĩ nhiruĩ ma hi'arandu va'e.

³ Hi'arandu e'y va'e kuery ma guataendy ogueraa, ha'e rã tykue ma ndogueraai.

⁴ Ha'e rã hi'arandu va'e kuery ma tataendy reve tykue avi ogueraa hyru py.

* 24:29 Isaias 13.10, 34.4 * 24:30 Daniel 7.13-14 * 24:44 Lucas 12.35-40; 17.20-37, 1 Tessalonicenses 5.1-3

⁵ Ha'e gui ma omenda va'erā ndou voi ramo kunhataĩgue hopeyipa. Ha'e vy okepa.

⁶ — Pytũ mbyte jave onhendu peteĩ ojapukai va'e: "Ou ma oiny omenda va'erā. Peẽ ke peovaexĩ", he'i va'e.

⁷ Ha'e ramo kunhataĩgue ha'e javive opu'ã vy omoatyro guataendy.

⁸ Ha'e ramo hi'arandu e'ỹ va'e kuery aipoe'i oirũ kuery hi'arandu va'e pe: "Pemboja'o na orevy penderataendy rykue, mba'eta orerataendy ma ogue ta ma", he'i okuapy.

⁹ — Ha'e ramo hi'arandu va'e kuery ombovai: "Nda'evei teve, orevy oata e'ỹ aguã, ha'e pẽvy voi. Tapeo ivendeaty py pejogua aguã", he'i.

¹⁰ Ha'e gui ha'e kuery ojogua aguã oje'oi jave ovaẽ ma omenda va'erā. Ha'e ramo ngarua py oiko katu va'ekue oike oje'oivy hupive. Ha'e gui okẽ ombotyã.

¹¹ — Are ma jave kunhataĩgue hi'arandu e'ỹ va'e ovaẽ vy ojapukai: "Senhor, Senhor, eipe'a ke okẽ orevy", he'i okuapy.

¹² — Ha'e ramo ombovai: "Anhetẽ aipoa'e pẽvy: Peẽ ma xee aikuaa va'e'ỹ", he'i.

¹³ Ha'e nunga rupi peiko kuaa pota, mba'eta ndapeikuaai ára, neĩ hora.*

Peráta oiporuka pyre re ombojoaague

¹⁴ — Ha'e nunga oiko 'rã peteĩ ava ovyv gui oo ta ma vy guembiguai kuery oenoĩ va'e rami avi. Ha'e va'e ma guembiguai kuery pe oiporuka mba'emo oguereko va'e.

¹⁵ Ha'e vy jypygua pe ome'ẽ peteĩ nhiruĩ poiyukue prata guigua, amboae pe ma mokoĩ, ha'e rã opa vygua pe ma peteĩ'ĩ poiyukue ome'ẽ. Peteĩ-teĩ oiporu kuaa-a rami ome'ẽ. Ha'e gui mae ma oo.

¹⁶ — Peteĩ nhiruĩ poiyukue jopyare oo voi mba'emo ojogua aguã. Ha'e vy teĩ nhiruĩ mboae ju onganave.

¹⁷ Ha'e rami ae mokoĩ poiyukue jopyare voi mokoĩ ju ongana.

¹⁸ Ha'e rã peteĩ'ĩ jopyare ma oo vy ojo'o yvy, ha'e ojaty opatõ peráta.

¹⁹ — Yma ete ma rire tembiguai kuery patõ ojevy. Ha'e vy oikuaa pota ha'e kuery ojapogaue re.

²⁰ Ha'e ramo teĩ nhiruĩ poiyukue jopyare oo vy teĩ nhiruĩ mboae ju ogueru. Ha'e vy aipoe'i: "Senhor, xevy pe reiporuka va'ekue peteĩ nhiruĩ poiyukue prata guigua. Koo, aru peteĩ nhiruĩ mboae ju angana va'ekue."

²¹ — Ixupe ipatõ aipoe'i: "Ha'evea rami, tembiguai porã ha'e ojeroviapy reiko va'e. Mbovy'i va'e re repena kuaa rire romoĩ 'rã heta va'e re ju repena aguã. Eike ke xee nepatõ reve javy'a aguã py", he'i.

²² — Ha'e gui mokoĩ poiyukue jopyare ou vy aipoe'i: "Senhor, mokoĩ poiyukue xevy reiporuka. Apy mokoĩ ju aru angana va'ekue."

²³ — Ixupe ipatõ aipoe'i: "Ha'evea rami, tembiguai porã ha'e ojeroviapy reiko va'e. Mbovy'i re repena kuaa rire romoĩ 'rã heta va'e re ju repena aguã. Eike ke xee nepatõ reve javy'a aguã py", he'i.

²⁴ — Opa vygua ovaẽ peteĩ'ĩ poiyukue jopyare. Ha'e vy aipoe'i: "Senhor, xee aikuaa rã ndee porayvu va'e'ỹ. Mba'eta renhotyague gui e'ỹ 'rã remono'õ, ha'e remoaĩague gui e'ỹ 'rã remoa'yigue, xee aikuaa rã.

²⁵ Ha'e rami vy akýje vy peráta reiporuka va'ekue anhomĩ karamboae yvy guy py. Koo, aru ju nembra'e peráta", he'i.

²⁶ — Ha'e rami rã ipatõ ombovai: "Tembiguai porã e'ỹ ha'e inhate'ỹ va'e, reikuaa va'e ri ty'y anhotyague gui e'ỹ amono'õa ha'e amoaĩague gui e'ỹ amoa'yigue?"

²⁷ Ha'e rami vy xeperáta reiporu uka va'e rire peráta porua kuery pe, xee ajevy vy hetave ju ajopy aguã."

²⁸ Ha'e gui amboae kuery pe ju aipoe'i: "Peipe'a ixugui prata guigua, ha'e dez oguereko va'e pe ju peme'ẽ.

²⁹ Mba'eta mba'emo oguereko va'e pe ome'ẽave 'rã, oguereko retave aguã. Ha'e rã oguereko e'ỹ va'e gui ma oguereko'i va'e voi oipe'aa 'rã.

³⁰ Ha'e gui tembiguai ovare'ỹ va'e ma pemombo oka py, pytũa py. Ha'e py ma ojave'opaa vy opa marã 'rã onhendu okuapy."

Nhomboayvu aguã ára re ijayvua

³¹ — Mba'eta Ava ra'y ojeapo va'ekue ou 'rã guexakã ha'e anjo kuery ha'e javive reve. Ha'e rami vy guexakã py uguapy 'rã oiny tenda openaaty áry.

³² Ha'e gui henonde omboatypaa 'rã yvy regua kuery ha'e javi. Ha'e ramo peteĩ-teĩ omboja'o 'rã joa gui, vexa'i re opena va'e kavara mbyte gui guymba kuery omboja'oa rami avi.

³³ Mba'eta omoĩ 'rã vexa'i kuery oaxu e'ỹa re, ha'e rã kavara kuery ma oaxua re 'rã omoĩ.

³⁴ Ha'e gui oaxu e'ỹa re ikuai va'e pe huvixave aipoe'i 'rã: "Xeru penembovy'a va'e, peju ke. Peike ke ipo'akaa py yvy itui ypy'i guive pendeivy oguereko katu va'ekue pejopy aguã.

³⁵ Mba'eta akaruxe ramo peme'ẽ ha'u va'erā. Xey'uvei ramo peme'ẽ ay'u aguã. Peẽa rupigua e'ỹ aiko ramo xemovaẽ.

³⁶ Ndaxeaovei ramo xemonhemonde. Xemba'eaxy rã xepou. Nhuã py xembotyã rã peju xerexa aguã", he'i.

³⁷ — Ha'e ramo heko porã va'e kuery oporandu 'rã: "Senhor, araka'e tu rekaruxe rã roexa vy rome'ẽ re'u va'erā, ha'e ndey'uvei rã roexa vy rome'ẽ rey'u aguã?"

³⁸ Araka'e tu orea rupigua e'ỹ reiko rã roexa vy romovaẽ, ha'e nandeaovei rã romonhemonde?"

³⁹ Araka'e tu nembra'eaxy, e'ỹ vy nhuã py rei rã roexa vy roo roipou?" he'i okuapy.

⁴⁰ — Ha'e ramo huvixa ombovai vy aipoe'i 'rã ha'e kuery pe: "Anhetẽ aipoa'e pẽvy: Kova'e xe-irmão kuery yvyjyve'i va'e pe ha'e nunga pejapo nhavõ xevy pe avi pejapo", he'i.

⁴¹ — Ha'e gui oaxua re ikuai va'e pe ju huvixa ijayvu vy aipoe'i 'rã: "Ayvu vaipy pendekuai va'e, pejepe'a ke xea gui. Tapeo tata ogue e'ỹ va'e anha ha'e hembiguai kuery pe oguereko katu pyre katy.

⁴² Mba'eta akaruxe teĩ napeme'ei ha'u va'erã. Xey'uvei teĩ napeme'ei ay'u aguã.

⁴³ Peẽa rupigua e'ỹ aiko ramo naxemovaẽi. N daxeaovei teĩ naxemomhemondei. Xemba'eaxy, ha'e nhuã py aĩ ramo ndapeoi xerexa aguã", he'i.

⁴⁴ — Ha'e ramo ha'e kuery oporandu 'rã ixupe: “Senhor, araka'e tu rekaruxe rã roexa, e'ỹ vy ndey'uvei rã, orea rupigua e'ỹ reiko, e'ỹ vy nandeaovei rã, nemba'eaxy, ha'e e'ỹ vy nhuã py rei rã roexa teĩ noroipytyvõï?”

⁴⁵ — Ha'e ramo ombovai 'rã: “Anhetẽ aipoa'e pẽvy: Kova'e kuery yvygieve'i ikuai va'e pe ha'e nunga ndapejapoi nhavõ, xevy pe avi ndapejapoi”, he'i.

⁴⁶ Ha'e gui ha'e va'e kuery oo 'rã ikuai axy riaẽ aguã katy. Ha'e rã heko porã va'e kuery ma tekove marã e'ỹ katy 'rã oo.*

26

Marcos 14.1,2; Lucas 22.1,2; João 11.45-53

¹ Ha'e nunga re Jesus nhombo'epa vy aipoe'i guemimbo'e kuery pe:

² — Mokoĩ araa py oiko 'rã ngaru Páscoa regua, peikuaa. Ha'e gui Ava ra'y ojeapo va'ekue omboaxaa 'rã kuruxu re omoĩa aguã — he'i.

³ Ha'e gui ma sacerdotẽ yvatekueve va'e ha'e heta va'e mongetaaty kuery nhomboaty okuapy sacerdotẽ yvateve va'e Caifás hery va'e ro py.

⁴ Ha'e py jogueroayvu Jesus ojopy nhemi vy ojuka aguã re.

⁵ Ha'e vy aipoe'i okuapy:

— Ngaru oiko jave ma nda'evei, heta va'e kuery opu'ãmba e'ỹ aguã.

Marcos 14.3-9; João 12.1-8

⁶ Ha'e gui Betânia tetã py Simão lepra oguereko va'ekue ro py Jesus oĩ jave

⁷ hexe onhemboja peteĩ kunha. Peteĩ hyru ogueru ita xiĩ va'e guigua, heakuã porã va'e hepyve va'e tynyẽ va'e. Ha'e va'e ma mesa py Jesus oĩ jave onhoẽ inhakã re.

⁸ Ha'e nunga hemimbo'e kuery oexa vy ndojou porãi. Ha'e vy joupe-upe aipoe'i:

— Mba'erã tu guĩ rami ojavyky rei?

⁹ Mba'eta peva'e heakuã porã va'e ma heta peráta re ovende va'e rire, iporiaukue'i pe ome'ẽ aguã — he'i.

¹⁰ Ha'e rami ijayvua Jesus oikuaa vy aipoe'i ha'e kuery pe:

— Mba'e re tu pendeyvu rei kova'e kunha va'e re? Mba'eta mba'emo porã ete ojapo xevy.

¹¹ Ha'e rami avi iporiaukue'i ikuai riaẽ 'rã pendereve. Ha'e rã xee ma ndaxerexa riaei 'rã.

¹² Kova'e kunha ma xerete re heakuã porã va'e onhoẽ xenhono porãã rã guarã.

¹³ Anhetẽ aipoa'e pẽvy: Mamo rã jvy jave re kova'e ayvu porã omombe'ua py omombe'ua avi 'rã kunha va'e ojapo va'ekue, hexe ima'endu'aa vy.

Marcos 14.10,11; Lucas 22.3-6

¹⁴ Ha'e gui hemimbo'e kuery doze ikuai va'e regua Judas Iscariotes hery va'e oo sacerdotẽ yvatekueve va'e ikuai py. Ha'e vy aipoe'i ha'e kuery pe:

¹⁵ — Mba'e tu peme'ẽ ta xevy, pendepo py amboaxa aguã? — he'i ramo ixupe opaga trinta hatã'i va'e prata guigua.

¹⁶ Ha'e va'e ára guive oikuaa pota oikovy ha'eve jave ojopy uka aguã re.

Marcos 14.12-16; Lucas 22.7-13

¹⁷ Ngaru mbojape imbovua revegua e'ỹ ijyppya ára ma hemimbo'e kuery ou Jesus-a py. Ha'e vy oporandu okuapy:

— Mamo tu reipota roguereko katu Páscoa ára py jakaru aguã?

¹⁸ Ombovai:

— Tapeo ha'vy tetã py peteĩ ava oĩa py. Ixupe aipopeje: “Orembo'ea aipoe'i uka kuri: ‘Xe'ára ovaẽ rai'i ma. Páscoa ára py rokaru 'rã ndero py xeremimbo'e kuery reve', he'i uka”, peje.

¹⁹ Ha'e ramo Jesus ijayvuague rami ha'e kuery ojapo vy oguereko katu Páscoa py okaru okuapy aguã.

Marcos 14.17-21; Lucas 22.21-23; João 13.21-30

²⁰ Ka'aru'i ma jave doze guemimbo'e kuery reve ikuai mesa py.

²¹ Okaru okuapy jave Jesus aipoe'i:

— Anhetẽ aipoa'e pẽvy: Peẽ kuery regua peteĩ va'e xejopy uka nhemi 'rã — he'i.

²² Ha'e ramo ha'e kuery iporiaupa vy omboypy peteĩ-teĩ ixupe oporandu aguã:

— Senhor, xee teve?

²³ Ombovai:

— Xereve hy'a py opo'ẽ va'e ae 'rã xejopy uka nhemi.

²⁴ Mba'eta Ava ra'y ojeapo va'ekue ma hekorã ipara oĩa rami ae 'rã oo. Ha'e rã ijopy uka nhemiare pe ma nda'evei ete 'rã. Ixupe ha'eveve 'rãgue ndoikoi ma voi va'e rire — he'i.

²⁵ Ha'e ramo ijopy uka nhemiarã Judas oporandu:

— Xembo'ea, xee teve?

Jesus ombovai:

— Ndee ae aipo're — he'i.

Marcos 14.22-26; Lucas 22.14-20; 1 Coríntios 11.22-25

* 25:46 Apocalipse 20.11-15

26 Okaru okuapy jave Jesus ojopy peteĩ mbojape. Nhanderuete oguero vy'a ma vy oipe'ã-pe'ã'i, ha'e guemimbo'e kuery pe ome'ẽ vy aipoe'i:

— Pejopy, pe'u. Kova'e ma xerete — he'i.

27 Ha'e rire karo ju ojopy. Oguero vy'a ma vy ombojoja guemimbo'e kuery pe. Ha'e vy aipoe'i:

— Pey'u ha'e javive.

28 Mba'eta kova'e ma xereve guarã [ipyau va'e] ajapo va'e regua, heta re vy xeruguy amoẽ uka ta va'e rupi ojevavyague omboguepaa aguã.

29 Aipoa'e pëvy: Aỹ gui ma kova'e regua uva rykue xee nday'uvei ranhe 'rã, peẽ kuery reve Xeru po'akaa py ipyau va'e ju ay'u e'ỹa ja — he'i.

30 Ha'e gui peteĩ mboraei oporaei rire oje'oi Oliveiras vyvity katy.

Marcos 14.27-31; Lucas 22.31-34; João 13.36-38

31 Ha'e ramo Jesus aipoe'i ha'e kuery pe:

— Kova'e pytũ ma peẽ kuery ha'e javive pejeity ukapa 'rã xekáua. Mba'eta ipara oiny: “Ajuka uka 'rã vexa'i re opena va'e. Ha'e ramo vexa'i kuery oaimba 'rã”, he'i va'ekue.*

32 Ha'e gui anhemoete ju ma rire penerenonde xee aa 'rã Galiléia katy — he'i.

33 Pedro aipoe'i ixupe:

— Ndekáua ha'e javive ojeity ukapa teĩ xee any 'rã.

34 Jesus ombovai:

— Anhetẽ aipoa'e ndevy: Kova'e pyavyve uru ojapukai e'ỹ mbove, mboapykue renhemombe'u 'rã xekuaa e'ỹ va'e rami.

35 Pedro aipoe'i:

— Nderve xejukaa 'rã teĩ ae ma peteĩve henda py ndaxeavyui 'rã roikuaa e'ỹa rami — he'i. Hemimbo'e kuery ha'e javive ha'e rami meme ijayvu.

Marcos 14.32-42; Lucas 22.40-46

36 Ha'e rire'ive Jesus oo guemimbo'e kuery reve peteĩ henda Getsêmani 'epy va'e py. Ha'e vy aipoe'i ha'e kuery pe:

— Peguapy ke apy, pe'i py xee anhemo'e ainya ja — he'i.

37 Ngupive ogueraa Pedro ha'e Zebedeu ra'y kuery mokoĩve. Ha'e vy iporiaua ha'e nda'veiva oendu.

38 Ha'e vy aipoe'i ha'e kuery pe:

— Xepy'a re aendu nda'veivi etea xejuka ta va'e rami. Pepyta apy, peikuaa pota xereve — he'i.

39 Ojepe'ave'i ovy vy ngova omovaẽ vvy re. Onhembo'e vy aipoe'i:

— Xeru, ha'eve rã xegui oaxa 'rãgue kova'e karo. Ha'e rami avi xee aipota va'e ma toiko eme, ndee reipota va'e ae toiko — he'i.

40 Ha'e gui guemimbo'e kuerya py ojevvy vy oexa rã okepa ra'e. Ha'e ramo aipoe'i Pedro pe:

— Neĩ peteĩ hora voi teve nda'veivi xereve peikuaa pota aguã?

41 Peikuaa pota, ha'e penhembo'e penderoko a'ãa py pejeity ukapa e'ỹ aguã. Penneh'eẽ ma anhetẽ ikyre'ỹ, ha'e rã pendero'o re ma penekangy — he'i.

42 Ha'e gui ojepe'a ju. Onhembo'e jevvy vy aipoe'i:

— Xeru, kova'e karo gui ay'u e'ỹ re oaxa aguã nda'veivi ri ramo toiko ndee reipota va'e — he'i.

43 Ha'e gui ojevvy vy oexa rã okepa ju ra'e, hopeyi vaipa vvy.

44 Ha'e gui ojejapa ju vvy mboapykuaa ma oo onhembo'e. Ha'ekue'i rupi ae ju ijayvu.

45 Ha'e vy guemimbo'e kuerya py ojevvy vy aipoe'i ha'e kuery pe:

— Pekepa teri va'e ty'y pejupy? Ovaẽ ma hora heko vai va'e kuery po py Ava ra'y ojeapo va'ekue omboaxaa aguã.

46 Pepu'ã, jaje'oi. Pee ma ou oiny xejopy ukaarã.

Marcos 14.43-50; Lucas 22.47-53; João 18.2-11

47 Jesus ijayvu teri jave ovaẽ ma ouvy hemimbo'e kuery doze va'e regua Judas. Hexeve heta ete ou kyxe ha'e vvyra revagua, sacerdotete yvatekueve va'e ha'e heta va'e mongetaaty kuerya gui.

48 Mba'eta ha'e kuery pe ijopy uka nhemia aipoe'i va'ekue: “Hova py avvu va'e ae 'rã pejopy”, he'i va'ekue.

49 Ha'e gui ma Jesus re onhemboja ouvy vy aipoe'i:

— Xembo'ea, ha'eve vai pa? — he'i vvyve oayvu hova py.

50 Ha'e ramo Jesus aipoe'i ixupe:

— Xeirũ, mba'e re tu reju? — he'i. Ha'e ramove ha'e kuery oupa vy Jesus re opoko, ojopy okuapy.

51 Ha'e jave Jesus revagua kuery va'e regua peteĩ oeky'i xapy'a kyxe. Omboguai sacerdotete yvateve va'e rembuguai nambi rupi, ha'e vy omboi.

52 Ha'e ramo Jesus aipoe'i ixupe:

— Emboyru ke ndekyxe, mba'eta kyxe oiporu va'ekue ma kyxe py ae ju 'rã omano.

53 Nderikuai ri ty'y xepo'akaa Xeru pe ajerure ramo a'ỹ'i ma voi doze aty anjo kuery ombou aguã?

54 Ha'e rami avi namigua ajapo va'e rire mba'exa tu ojeupity 'rãgue ipara re xerekorã oia? — he'i.

55 Ha'e gui ma heta va'e kuery pe ju Jesus aipoe'i:

— Peẽ kuery kyxe ha'e vvyra reve ri ty'y peju jojuka rive va'ety rami xejopy aguã? Ko'ẽ nhavõ templo py [peẽ kuery pendekuaia rupi] aiko vy xee anhombo'e teĩ ndaxejopy va'ekue.

56 Ha'e rami avi guĩ nunga oiko profeta kuery ombopara va'ekue ha'e javi ojeupitypa aguã — he'i.

*

Ha'e ramo hemimbo'e kuery ha'e javive oeja onhamba vy.

Marcos 14.53-65; Lucas 22.63-71; João 18.12-14,19-24

⁵⁷ Ha'e gui Jesus jopyare kuery ogueraa sacerdote yvateve va'e Caifás ro py. Ha'e py ma ijaty ma kuaxia re nhombo'e va'ety ha'e nhomboayvu va'ety kuery.

⁵⁸ Ha'e rã Pedro ma hakykue mombry'i rupi oo sacerdote roka peve. Ha'e py ovaë vy oguapy oiny tembiguai kuery mbyte, opa peve oexa aguã.

⁵⁹ Ha'e gui sacerdote yvatekueve va'e ha'e nhomongeta va'ety kuery Jesus ojuka ukaxe vy ojouxu okuapy hekokué ramigua mombe'uarã.

⁶⁰ Ha'e rami teĩ ndojoui, mbovy e'ỹ hekokué ramigua mombe'uarã ikuai va'eri.

Ha'e gui are rire mokoĩ ava ou vy aipoe'i:

⁶¹ — Peva'e ma aipoe'i: “Xepo'aka Nhanderuete pegua templo ambovaipa aguã, ha'e gui mboapy araa py ajapo ju aguã guive”, he'i va'ekue.

⁶² Ha'e gui sacerdote yvateve va'e opu'ã vy oporandu Jesus pe:

— Nereभवोवै va'e ty'y po rami ndere ijayvu va'e?

⁶³ Ha'e rami teĩ Jesus okyrirĩ.

Ha'e gui sacerdote yvateve va'e aipoe'i ixupe:

— Xee aipoa'e ndevy Nhanderuete oikove va'e rery rupi: Emombe'u orevy ndee pa Cristo Nhanderuete Ra'y reikoa — he'i.

⁶⁴ Jesus ombovai:

— Ndee ae ri tu aipo're. Ha'e gui xee amombe'u porãve ta pëvy: Aỹ gui ma pexa 'rã Ava ra'y ojeapo va'ekue Ipo'akapa va'e oiporu kuaxia regua re oguapy oiny rã, ha'e yva gui arai rupi ou ramo guive — he'i.*

⁶⁵ Ha'e ramo sacerdote yvateve va'e oao omondoro vy aipoe'i:

— Ijayvu vai rima! Mba'erã tu jaipotave hekokué mombe'uarã? Pendu ae ma ange'i ijayvu vai rã.

⁶⁶ Mba'exa tu peikuaa?

Ha'e kuery ombovai:

— Jajuka aguã rami ijayvu — he'i okuapy.

⁶⁷ Ha'e ramo amongue onyvõ hova re, oungapa guive. Amboae kuery ma oipete vy aipoe'i:

⁶⁸ — Cristo, emombe'u ke orevy, mava'e ete pa nembota ra'e?

Marcos 14.66-72; Lucas 22.55-62; João 18.15-18,25-27

⁶⁹ Ha'e ramia ja Pedro oguapy oiny oka py. Ha'e gui hexe peteĩ kunha'i omongakuaapy onhemboja vy aipoe'i ixupe:

— Ndee voi teve Galiléia pygua Jesus reve reiko va'ety.

⁷⁰ Ha'e rã Pedro ma ha'e javive oendua py onhenhomi. Ha'e vy aipoe'i:

— Xee ndaikuaai rima mba'e nunga re pa ndeayvua — he'i.

⁷¹ Ha'e gui oka katy oë ovy rã amboae kunha'i omongakuaapy ju oexa. Ha'e va'e ma aipoe'i ha'e py ikuai va'e pe:

— Peva'e ma oiko avi kuri Nazaré pygua Jesus reve.

⁷² Ha'e rã Pedro oendu vy oura reve onhenhomi ju:

— Xee tu rima ha'e va'e ava — he'i.

⁷³ Ha'e ririve'i ha'e py ikuai va'e onhemboja vy aipoe'i Pedro pe:

— Anhetẽ ndee voi ha'e kuery regua reiko, mba'eta ha'e kuery rami ae ndeayvu va'e.

⁷⁴ Ha'e ramo ijayvu vaikue ha'e oura reve aipoe'i:

— Xee tu ndaikuaai ha'e va'e ava! — he'i. Ha'e ramove uru ojavukai nhendu.

⁷⁵ Ha'e ramo Pedro ima'endu'a Jesus ixupe aipoe'iague re: “Kuri uru ojavukai e'ỹ mbove ndee mboapykue 'rã renhemombe'u xekuaa e'ỹ va'e rami”, he'iague re. Ha'e rami vy ojepe'a vy ojae'o vaipa.

27

Marcos 15.1; Lucas 23.1,2; João 18.28-32

¹ Ko'ëgue aje'ive reve sacerdote yvatekueve va'e ha'e heta va'e mongetaaty kuery ha'e javi jogueroayvu okuapy Jesus ojuka uka aguã re.

² Ha'e rami vy oipokua vy ogueraa uka, huvixa Pilatos pe ju omboaxa.

Judas ojevukaague

³ Ha'e gui ijopy uka nhemiare Judas ma Jesus ojuka ta ma okuapy rã oexa vy onhemboaxy. Ha'e vy trinta hatã'i va'e prata guigua ome'ẽ ju sacerdote yvatekueve va'e ha'e nhomongeta va'ety kuery pe. Ha'e vy aipoe'i:

⁴ — Ojevavy e'ỹ va'e ruguy amoë ukaa py xee ajevavy — he'i.

Ha'e kuery ombovai:

— Mba'e tu ore roguereko guí nunga reve? Ndereve ae topyta — he'i okuapy.

⁵ Ha'e ramo Judas ma templo ropy katy hatã'i va'e omombopa vy ojepe'a. Oo vy ojevryrvipy.*

⁶ Ha'e gui hatã'i va'e ma sacerdote yvatekueve va'e omono'õ vy aipoe'i:

— Nda'evei ome'ẽmby ryruru py nhamoĩ aguã, mba'eta tuguy repykue — he'i.

* 26:64 Daniel 7.13-14 * 27:5 Atos 1.16-19

- ⁷ Ha'e gui jogueroayvuvu rire ojogua peteĩ yvy nhae'ũ re omba'eapo va'ety gui, amboae regua omano ramo onhono porãa aguã.
- ⁸ Ha'e rami vy ha'e va'e yvy aỹ peve hery Yvy-Tuguy.
- ⁹ Ha'e rami oiko vy ojeupity profeta Jeremias pe aipoe'i ukaague: “Trinta hatã'i va'e prata guigua hepyrã Israel kuery regua oikuaa va'ekue ogueraa vy.
- ¹⁰ Ha'e vy opaga nhae'ũ re omba'eapo va'ety yvy re. Ha'e rami ae Senhor aipoe'i uka xevy”, he'iague.*
Marcos 15.2-15; Lucas 23.1-5,13-25; João 18.33-19.16
- ¹¹ Huvixave renonde Jesus hi'ãĩ ramo oporandu vy aipoe'i:
 — Ndee ma nhi'ã judeu kuery pegua huvixave?
 Jesus ombovai:
 — Ndee ae ma aipo're — he'i.
- ¹² Ha'e gui sacerdote yvatekueve va'e ha'e nhomongeta va'ety kuery hexe ijayvu rei ramo mba'eve nde'i.
- ¹³ Ha'e ramo Pilatos oporandu ixupe:
 — Nerendui ri ty'y mbovy e'ỹ ndere ijayvua rã?
- ¹⁴ Ha'e rami teĩ Jesus neĩ peteĩ ayvu py nombovai. Ha'e ramo huvixave onhemondy vaipa.
¹⁵ Ngaru oikoa ára nhavõ huvixa opoi jepi 'rã peteĩ nhuã py oĩ va'e, heta va'e kuery oipota va'e rei.
- ¹⁶ Ha'e va'e jave py ma peteĩ oĩ nhuã py pavẽ oikuaa va'ety Barrabás hery va'e.
- ¹⁷ Ha'e gui heta va'e kuery ijatypa rã Pilatos oporandu ha'e kuery pe:
 — Mava'e tu peipota apoi pëvy: Barrabás tyrã pa Jesus, Cristo hery va'e? — he'i,
- ¹⁸ mba'eta oikuaa ha'e kuery ija'e e'ỹ vy rive ipo py omboaxaague.
¹⁹ Ha'e gui nhomboayvuaty py huvixa oĩ jave ta'xy aipoe'i uka ixupe:
 — Mba'eve ejapo eme peva'e ava heko porã va'e re, mba'eta ange ajexavai vaipa ra'u ikãuxa — he'i.
- ²⁰ Ha'e rami teĩ sacerdote yvatekueve va'e ha'e nhomongeta va'ety kuery ombo'e heta va'e kuery Barrabás re ojerure okuapy aguã, ha'e rã ojuka uka aguã Jesus.
²¹ Teĩgue ju ha'e kuery pe huvixave oporandu:
 — Mava'e tu mokoive gui peipota apoi?
 Ha'e kuery ombovai:
 — Barrabás — he'i okuapy.
- ²² Pilatos oporanduve ju ha'e kuery pe:
 — Mba'e 'rã tu ha'vy ajapo Jesus, Cristo hery va'e re?
 — Emoĩ kuruxu re! — he'i pavẽ.
- ²³ — Mba'e nunga py tu ojapo vai raka'e? — he'i Pilatos oporandu vy.
 Ha'e rã ojapukaive tema:
 — Emoĩ kuruxu re! — he'i okuapy.
- ²⁴ Pilatos mba'eve rei ndojapo kuaa reguai vy, ha'e pavẽ nda'eveive oje'oivy rã oexa vy ogueru ruka yy, ha'e vy heta va'e kuery oexaa py ojepoei. Ha'e vy aipoe'i:
 — Xee ma mba'eve ndarekoi kova'e [heko porã va'e] ruguy pemoẽ ukaxea reve. Pendereve ae topyta ha'e nunga!
- ²⁵ Ha'e ramo heta va'e kuery aipoe'i:
 — Orere ae toĩ huguy romoẽ ukaague re ropaga aguã, orera'y kuery re guive — he'i.
- ²⁶ Ha'e rami rã Pilatos ha'e kuery ayvu oendu vy opoi Barrabás. Ha'e rã Jesus ma oinupã ukapa rire omboaxa kuruxu re omoĩa aguã.
Marcos 15.16-20; João 19.2,3
- ²⁷ Ha'e rire'ive huvixavea pegua xondaro kuery ma opy Jesus ogueroike vy omboaty xondaro kuery ha'e javi.
- ²⁸ Ijao omboipa vy omonehonde peteĩ ao pytã va'e py,
²⁹ ha'e juu gui peteĩ coroa ramigua ojapo vy omoĩ inhakã re, ha'e ipo oiporu kuaa regua re peteĩ takua ojopy uka. Ha'e vy henonde guenapy'ã re oĩ vy ojoi rei reve aipoe'i:
 — Iporã ete judeu kuery pegua huvixave! — he'i okuapy.
- ³⁰ Ha'e gui hexe onyvõ reve takua ojopy vy oinupã inhakã rupi.
- ³¹ Ha'e gui ojoi rei reipa rire ao omboi vy ijao ae py ju omonehonde. Ha'e gui ma ogueraa kuruxu re omoĩ aguã katy.
Marcos 15.21; Lucas 23.26
- ³² Ha'e kuery oje'oi vy ovaexĩ peteĩ Cirene pygua Simão hery va'e. Ha'e va'e pe ogueraa uka okuapy kuruxu.
Marcos 15.22-32; Lucas 23.32-43; João 19.17-24
- ³³ Ha'e gui ovaẽ peteĩ henda Gólgota “Akãgue renda” 'epy va'e py.
- ³⁴ Ha'e vy ixupe ome'ẽ vinho iro va'e re omoirũ va'ekue. Ha'e rami teĩ oa'anga vy ndoy'uxei.
³⁵ Kuruxu re omoĩ rire oexa okuapy xorte ijao jomeme omboja'o aguã.*
- ³⁶ Ha'e gui oguapypa ha'e py oarõ vy.
- ³⁷ Inhakã a'iry oupi imoiny ipara va'e hexe ijayvua: “Kova'e ma Jesus, judeu kuery pegua huvixave” he'ia.

* 27:10 Zacarias 11.13 * 27:35 Salmo 22.18

³⁸ Kuruxu mboae re hexeve omoī avi mokoī imonda va'e: ijaxu e'ŷa re peteī omoī, ha'e rā amboae ma ijaxua re.

³⁹ Ha'e rupi oaxa ovy va'e ijayvu vai oje'oiivy hexe. Oakā ombovava reve aipoe'i:

⁴⁰ — Ndee ma templo rembovaipa rire mboapy araa pyve ju rejapo 'rā va'ekue, ejereraa jepe ha'vy ndee ae, Nhanderuete Ra'y ri vy. Eguejy kuruxu gui — he'i oje'oiivy.

⁴¹ Ha'e rami ae avi sacerdote yvatekueve va'e, kuaxia re nhombo'e va'ety ha'e nhomongeta va'ety kuery ojojai rei vy aipoe'i:

⁴² — Amboae kuery ogueraa jepe va'eri ha'e ae ndojereraa jepe kuaai. Israel kuery pegua huvixave ri oiko vy toguejy kuruxu gui. Ha'e ramo jajerovia 'rā hexe.

⁴³ Nhanderuete re ojerovia rire tou ha'vy togueraa jepe, anhetē ri oayvu vy. Mba'eta “Xee ma Nhanderuete Ra'y” he'i.

⁴⁴ Imonda va'e kuery hexeve kuruxu re omoī mbyre voi ojojai rei.

Marcos 15.33-41; Lucas 23.44-49; João 19.28-30

⁴⁵ Kuaray mbyte jave pytūmba vvy jave re, kuaray ojero'a puku peve.

⁴⁶ Ha'e gui kuaray ojero'a jave Jesus ojavukai atā reve aipoe'i:

— Eli, Eli, lamá sabactāni — he'i, “Xeru, Xeru, mba'e re tu xereja?” he'ia.*

⁴⁷ Ha'e py ikuai va'e regua oendu vy aipoe'i:

— Elias rima oenoī — he'i okuapy.

⁴⁸ Ha'e ramo ha'e kuery regua peteī va'e onha pojava ovy, peteī esponja ogueru. Vinagre py omoakŷ, ha'e takua apy re omoī vy omovaē oy'u aguā.

⁴⁹ Ha'e rā amboae kuery aipoe'i:

— Tove, Elias ou vy ogueraa jepe rā jaexa aguā — he'i.

⁵⁰ Ha'e gui ma Jesus teĩgue ju ojavukai atā reve omoudouka onhe'e.

⁵¹ Ha'e ramove henda iky'a e'ŷ va'e ropy ajukue okē regua oī va'e oxoro mbyte rupi. Yvate gui oxoro vvy peve. Yvy oryryi, ha'e itaova ovopa guive.

⁵² Ha'e gui yvyra rupa ikuai va'e oipe'aa ramo heta onhemboete ju iky'a e'ŷ va'e oke va'ekue,

⁵³ ha'e vy onhono porāague gui oēmba. Jesus onhemboete ju rire ha'e kuery voi tetā iky'a e'ŷ va'e py ovaē vy heta pe ojexa uka.

⁵⁴ Ha'e gui ma xondaro ruvixa ha'e oirū kuery Jesus rarōa ikuai va'e ma vvy oryryi ha'e opa mba'e oiko rā oexa vy okyjepa okuapy. Ha'e vy aipoe'i:

— Anhetē ae ra'e peva'e ava Nhanderuete Ra'y — he'i.

⁵⁵ Ha'e py heta avi ikuai kunhague mombyry'i gui oma'ē okuapy va'e. Ha'e va'e kuery ma Galiléia guive Jesus rakykue ou vy oipytyvō va'ekue.

⁵⁶ Ha'e kuery regua ma Maria Magdalena, Tiago ha'e José xy Maria, ha'e gui Zebedeu ra'yxy.

Marcos 15.42-47; Lucas 23.50-56; João 19.38-42

⁵⁷ Ka'aru'i jave ou peteī ava Arimatéia pygua oguerékopa va'e, José hery va'e. Jesus remimbo'e oiko.

⁵⁸ Ha'e va'e ma Pilatos-a py oo vy ojerule Jesus retেকে re. Ha'e ramo Pilatos ogueraa uka.

⁵⁹ Ha'e ramo José ma hetekue ogueraa vy onhovā peteī ajukue puku xii porā va'e iky'a e'ŷ va'e py.

⁶⁰ Ha'e vy onhono porā ngupará itaova re ojo'o uka va'ekue py. Ha'e gui peteī ita tuvixa va'e ombojere itakua rokē omboty aguā. Ha'e vy oo ju.

⁶¹ Ha'e ramia ja onhono porāague rexei oguapy okuapy Maria Magdalena ha'e Maria mboae.

Onhono porāague huvixa oarō ukaague

⁶² Ko'ēgue mba'emo oguereko katupaa ára rire ma sacerdote yvatekueve va'e ha'e fariseu kuery nhomboaty. Ha'e gui Pilatos-a py jogueraa vy

⁶³ aipoe'i okuapy ixupe:

— Oreruvixa, orema'endu'a ha'e va'e ijapu va'e oikove teri reve aipoe'iague re: “Mboapy ára rire anhemboete ju 'rā”, he'iague re.

⁶⁴ Ha'e nunga rupi mboapy ára peve rearō uka 'rāgue onhono porāague, hemimbo'e kuery ou vy hetekue re imonda e'ŷ aguā, ha'e gui heta va'e kuery pe omanoague gui onhemboete jevyague rami omombe'u e'ŷ aguā. Mba'eta ha'e rami ri ijapu rire jypy guare gui nda'ëveive 'rā — he'i okuapy.

⁶⁵ Pilatos ombovai:

— Apy ma xondaro kuery ikuai. Peraa, pearō uka onhono porāague peikuaa rami — he'i.

⁶⁶ Ha'e ramo ha'e kuery oje'oi vy oarō uka onhono porāague. Omboja ita imbotyarā oī va'e, ha'e oeja imbokuapy xondaro kuery ha'e py.

28

Marcos 16.1-8; Lucas 24.1-12; João 20.1-10

¹ Sábado oaxa rire semana ijyppya ára ko'ē rai'i jave ma Maria Magdalena ha'e amboae Maria jogueraa itakua re oma'ē aguā.

² Ha'e gui vvy oryryi atā xapy'a, mba'eta peteī anjo Senhor-a guigua yva gui oguejy rā. Oguejy vy ombojere ita, ha'e vy oguapy hi'áry.

³ Ha'e va'e ma overa va'e rami ojekuaa, yro'y rami onhemondea xiimba va'e.

* 27:46 Salmo 22.1

⁴ Ha'e rã itakua rarõa kuery okyje vy oryrypa okuapy, omanogue rami ikuai.

⁵ Ha'e gui kunhague pe anjo aipoe'i:

— Pekyje eme, mba'eta aikuaa peẽ kuery kuruxu re omoĩ mbyre Jesus pekaa.

⁶ Ha'e va'e ma apy noĩvei, onhemboete ju ma aipoe'iague rami vy. Peju pexa onhono porãague.

⁷ Ha'e gui tapeo pojava, pemombe'u hemimbo'e kuery pe omanoague gui onhemboete jevy maa, ha'e vy penerenonderã oo 'rãa Galiléia katy. Ha'e py ma pexa ju 'rã. Ha'e va'e anho areko pendevy amombe'u va'erã — he'i.

⁸ Ha'e ramo itakua gui ha'e kuery ojepe'a vy oo pojava. Okyje ha'e ovy'a reve onha jogueravy hemimbo'e kuery pe omombe'u aguã.

⁹ Ha'e gui ma Jesus ae ovaexĩ ouvy. Ha'e vy aipoe'i:

— Tapeiko porã — he'i.

Ha'e rã ha'e kuery onhemboja vy oikuavã ipy rupi, omboete.

¹⁰ Ha'e ramo Jesus aipoe'i ha'e kuery pe:

— Pekyjeve eme. Tapeo pemombe'u xe-irmão kuery pe Galiléia katy oje'oi aguã. Ha'e py ma ha'e kuery xerexera 'rã.

Xondaro kuery ijapu aguã judeu kuery opagaague

¹¹ Ha'e gui kunhague oo ma ramo onhono porãague rarõa kuery regua tetã re oo vy sacerdote yvatekueve va'e pe omombe'u oiko va'ekue ha'e javi.

¹² Ha'e ramo nhomongeta va'ety kuery reve ha'e kuery nhomboaty vy heta ome'ẽ perãta xondaro kuery pe.

¹³ Ha'e vy aipoe'i:

— Aipopeje 'rã: “Pyávy roke jave hemimbo'e kuery ou vy imonda hetekue re”, peje 'rã.

¹⁴ Ha'e gui xapy'a rei huvixave ha'e nungakue oendu ramo oreayvu 'rã hexeve, pendere mba'eve oiko e'ỹ aguã — he'i okuapy.*

¹⁵ Ha'e ramo xondaro kuery perãta ogueraa vy aipoe'i ukaague rami ijapu. Ha'e rami rire ha'e nungakue aỹ peve omombe'ua judeu kuery ikuai rupi.

Galiléia yvy re quemimbo'e kuery pe Jesus ojexa ukaague

¹⁶ Ha'e rã hemimbo'e kuery onze-ve ma Galiléia katy oje'oi, vvyty Jesus oikuaa uka va'ekue py.*

¹⁷ Ha'e py ma oexa vy omboete. Ha'e rã amongue ma ndoguerovia porãi.

Marcos 16.15-18; Lucas 24.44-49

¹⁸ Ha'e kuery re Jesus onhemboja vy aipoe'i:

— Opa mba'e py xembopo'akaa yva ha'e yvy re ikuai va'e ha'e javi re.

¹⁹ Ha'e nunga rupi tapeo, penhomoingo xeremimbo'erã ha'e javi regua gui.* Ha'e vy pemongarai 'rã Tuu, Ta'y ha'e Nhe'ẽ Ky'a E'ỹ rery rupi.

²⁰ Pembo'e 'rã pëvy ajapo uka va'ekue ha'e javi rupi ikuai aguã. Ha'e rã xee ma ko'ẽ nhavõ aiko 'rã peẽ kuery reve, opaa ára peve.

* 28:14 Lucas 16.31

* 28:16 Mateus 28.7,10; Marcos 14.27,28

* 28:19 João 20.21; Atos 1.6-8

Marcos ayvu porã ombopara va'ekue

Marcos ayvu porã ombopara va'ekue

Jesus rekokue Marcos omombe'u vy ijavyu Mateus ha'e Lucas omombe'ua rupi avi. Jypy guive Marcos omombe'u Jesus nhandereraa jepe aguã ipo'aka va'ea, mba'eta ipo'aka nhe'ẽ vai gui oipe'a aguã (1.21-27), nhomonguera aguã (1.32-34), jajejavyague ombogue aguã (2.1-12), vyvutu atã omombytu'u aguã (4.35-41) ha'e omano va'ekue omboete jevy aguã (5.22-42).

Jesus ipo'akapa va'eri ndou raka'e joguereko poyi aguã, ha'e rã nhanderekovia guekove ome'ẽ aguã, ha'e ae aipoe'iague rami vy: “Ava ra'y ojeapo va'ekue eteve voi jojokuai aguã e'ỹ ou, ha'e rã tembiguai rami oiko aguã, ha'e guekove ome'ẽ aguã heta rekovia, ogueraa jepe aguã” (10.45). Ojeupe ae “Ava ra'y ojeapo va'ekue” he'i, mba'eta Nguuetea gui ko vvy re ou vy ava ojeapo vy onhemo'yvy'i ete raka'e, kuruxu re omano guive. Ha'e rami teĩ omanoague gui onhembote ju, ha'e guemimbo'e kuery pe ojexa uka guive. Ha'e kuery pe aipoe'i: “Tapeo opa rupi, vvy jave re ikuai va'e ha'e javive pe pemombe'u ayvu porã” (16.15). Ha'e nunga rupi nhandevy pe voi omombe'ua ayvu porã Jesus nhandereraa jepe regua.

¹ Nhanderuete Ra'y Jesus Cristo reko regua ayvu porã ijyppa.

Mateus 3.1-6; Lucas 3.1-6

² Profeta Isaías ombopara vy aipoe'iague rami oiko: “Ne'exa, nerenonderã ambou 'rã xerembiguai. Ha'e va'e oguereko katu 'rã nderaperã.*

³ Ha'e rami vy tekoa e'ya py ijavyu atã 'rã: 'Pereko katu Senhor raperã, pembo'yvi ou aguã, he'i 'rã.”*

⁴ Ha'ekue rami ae João Batista ojekuaa raka'e tekoa e'ya py. Omombe'u oikovy pavẽ ojeko rerova vy onhemongarai uka aguã, ojejavague omboguepaa aguã.*

⁵ Ha'e va'e oikoa py jogueru Judéa katy'i ikuai va'e ha'e Jerusalém pygua kuery ha'e javi. Ojejavague omombe'upa ramo omongarai Jordão yakã py.

⁶ João ao ma camelo rague guigua, ha'e rã iku'a xã ma ipirekue guigua. Tuku ha'e ei ka'aguy regua ho'u oikovy.

Mateus 3.11; Lucas 3.15,16; João 1.19-28

⁷ João ayvu omombe'u vy aipoe'i:

— Xerakykue ou 'rã pete'i xegui yvateve va'e. Ha'e va'e gui xe'yvyive va'e vy nda'evei ajero'a vy ipy regua xã ajora aguã voi.

⁸ Xee ma romongarai py py. Ha'e rã ha'e ma Nhe'ẽ Ky'a E'ỹ reve 'rã penemongarai.*

Mateus 3.13-17; Lucas 3.21,22; João 1.32-34

⁹ Ha'e va'e jave Galiléa regua Nazaré tetã gui Jesus ou. Ha'e vy João pe onhemongarai uka Jordão yakã py.

¹⁰ Yy gui oẽ vyve oexa yva ojepe'a, ha'e apyaxu'i rami hexe Nhe'ẽ ogejy ouvvy rã.

¹¹ Ha'e ramo onhendu pete'i ayvu yva gui:

— Ndee ma Xera'y roayvu ete ha'e roguerovy'a va'e — he'i va'e.

Mateus 4.1-11; Lucas 4.1-13

¹² Ha'e rire'ive tekoa e'ya katy Nhe'ẽ ogueraa.

¹³ Ha'e py ma quarenta ára oĩ Satanás oeko a'ã rã. Mymba inharõ va'e mbyte py oĩ teĩ anjo kuery opena.*

Mateus 4.12-17; Lucas 4.14,15

¹⁴ Nhuã py João ombotya ma rire Jesus ojevvy ju Galiléa katy, Nhanderuete guigua ayvu porã omombe'u vy.

¹⁵ Ha'e vy aipoe'i:

— Ára ojeupity ma, namombyryvei ma Nhanderuete po'akaa ojekuaa aguã. Pejeko rerova, ha'e perovia ayvu porã.

Mateus 4.18-22; Lucas 5.1-11

¹⁶ Galiléa yupa yvyry rupi oiko vy oexa mokoĩ joegua Simão ha'e André. Ha'e kuery ma pira mbo'aa rupi ikuai vy py pira mbo'aa omombo okuapy.

¹⁷ Ha'e va'e kuery pe Jesus aipoe'i:

— Peju ke xerakykue. Xee ma avakue jouarã ju 'rã romoingo — he'i.

¹⁸ Ha'e ramove ha'e kuery oejapa vyvoi pira mbo'aa, ha'e oje'oi hupive.

¹⁹ Oove'ia py oexa Zebedeu ra'y Tiago ha'e tyvy João, kanoã py pira mbo'aa omoatyrõ okuapy rã.

²⁰ Ha'e vyve oenoĩ. Ha'e rã ha'e kuery ma nguu Zebedeu ha'e hembigui kuery kanoã py ojea vy oo Jesus rakykue.

Lucas 4.31-37

²¹ Ha'e rire ovaẽ Cafarnaum tetã py. Sábado ára py onhemo'eaty oĩ va'e py oo nhombo'e vy.

²² Nhombo'e rã pavẽ oendu vy onhemondy okuapy, mba'eta opo'akaa rupi ijavyu, kuaxia re nhombo'e va'ety kuery rami e'ỹ.

* 1:2 Malaquias 3.1 * 1:3 João Batista ma Jesus raperã oguereko katua rupi ijavyu raka'e, mba'eta heta va'e kuery pe omombe'u oikovy opa marã rei ikuaiã gui ojepe'a vy Jesus re ojerovia aguã (Isaías 40.3). * 1:4 João 1.6-8,19-23 * 1:8 Atos 19.4 * 1:13 Hebreus 2.18, 4.15

- ²³ Are'ŷ'i re onhembo'eaty py ou peteĩ ava nhe'ẽ vai onhemondea va'e. Ha'e va'e ma ojapukai atã:
- ²⁴ — Jesus Nazaré pygua va'e, mba'e tu ndee rereko orereve? Oremokanhy aguãa teve reju? Xee ma aikuaa ndee Nhanderuete guigua iky'a e'ŷ va'e reikoa — he'i.
- ²⁵ Ha'e ramo ixupe Jesus ijayvu atã vy aipoe'i:
— Ekyrirĩ, ha'e ejepe'a upe va'e ava gui — he'i.
- ²⁶ Ha'e ramo nhe'ẽ vai omboryryipa ha'e ojapukai atã reve ojepe'a ixugui.
- ²⁷ Ikuai va'e kuery ha'e javi onhemondyipa vy oporandu joupe-upe:
— Mba'erã 'rã nda'u gui ramigua oiko? Mba'emo pyau re nhombo'earã teve? Mba'eta opo'akaa rupi ijayvu rã nhe'ẽ vai voi onhe'ẽ rendu — he'i okuapy.
- ²⁸ Ha'e rire Galiléia yvy katy ha'e javi rupi onhendu Jesus mba'emo porã ojapoaque.
Mateus 8.14,15; Lucas 4.38,39
- ²⁹ Onhembo'eaty gui Jesus oẽ vy Tiago ha'e João reve jogueraa Simão ha'e André ro py.
- ³⁰ Oo py ma Simão raixo ipire raku oupy. Ha'e ramo Jesus pe omombe'ua imba'eaxy.
- ³¹ Ha'e ramo onhemboja vy ipo re ojopy ramove ipire raku oaxa. Ha'e ramo opu'ã vy mba'emo ojapo ha'e kuery pe.
Mateus 8.16,17; Lucas 4.40,41
- ³² Ka'aru kuaray oike ta ma jave Jesus-a py oguerua imba'eaxy va'e ha'e anha gui oiko axy va'e ha'e javi.
- ³³ Tetã pygua kuery ha'e javi onhemboaty avi okẽ py.
- ³⁴ Ha'e ramo heta omonguera opa marãgua mba'eaxy gui oiko axy va'e, heta avi anha oipe'a omboayvu e'ŷ re, mba'eta ha'e kuery oikuaa mava'e paa.
Lucas 4.42-44
- ³⁵ Ko'ẽ rai ramove Jesus opu'ã vy oo peteĩ henda tekoa e'ŷa oĩ va'e katy. Ha'e py ma onhembo'e oiny Nhanderuete pe.
- ³⁶ Ha'e ramo Simão ma ou oeka vy, hupive ikuai va'e reve.
- ³⁷ Ojou vy aipoe'i:
— Pavẽ rei ndereka.
- ³⁸ Ha'e ramo Jesus aipoe'i:
— Amboae henda katy jaa kii rai'i tekoa ikuai va'e ha'e javi rupi, ha'e py voi ayvu amombe'ua aguãa, mba'eta ha'e rami aguãa ae aju — he'i.
- ³⁹ Ha'e rami vy Galiléia yvy ha'e javi rupi oiko. Ha'e pygua onhembo'eaty ikuai va'e rupi omombe'ua ayvu, oipe'a guive anha kuery.
Mateus 8.1-4; Lucas 5.12-16
- ⁴⁰ Hexe onhemboja ouvy peteĩ lepra revegua. Ha'e vy guenapy'ã re oĩ reve ojerure:
— Lepra gui xeky'a'oxe vy xeky'a'o 'rãgue — he'i.
- ⁴¹ Jesus omboaxy vy okuave'ẽ, ha'e hexe opoko vy aipoe'i:
— Xee ma roiky'a'oxe ae, ekuera ke — he'i.
- ⁴² Ha'e ramove lepra okanhymba ramo okuera.
- ⁴³ Ha'e gui ixupe ijayvuve imondovy
- ⁴⁴ vy aipoe'i:
— Emombe'ua eme avave rei pe. Va'eri tereo sacerdote pe ejexa uka, ha'e rekueraague re eme'ẽ mymba Moisés omboparaague rami, heta va'e kuery oikuaa aguãa — he'i.
- ⁴⁵ Ha'e rami teĩ ava va'e oo vy opa rupi omombe'u. Ha'e rami rire tetã ikuai va'e rupi nda'evevei Jesus ovaẽ aguãa. Tekoa e'ŷa rupi rive oiko mombyry. Ha'e ramo opa rupi gui jogueru oĩa py.

2

Mateus 9.1-8; Lucas 5.17-26

- ¹ Kueve ma rire Jesus ovaẽ ju Cafarnaum py. Ha'e ramove opa rupi omombe'upaa oo py oĩa.
- ² Heta ete oo ramo okẽ rexe'i oĩ aguãa voi nda'evei. Ha'e rã ha'e kuery pe ayvu omombe'u.
- ³ Oĩa py peteĩ oguata e'ŷ va'e oguerua. Irundy avakue ogueru teĩ
- ⁴ heta va'e kuery gui nda'evei hexe onhemboja aguãa. Ha'e ramo oĩa áry oo ao'ia oipe'a vy oipe'aaque rupi omboguejy imba'eaxy va'e hupa reve.
- ⁵ Ha'e kuery ojeroviaa Jesus oexa vy aipoe'i oguata e'ŷ va'e pe:
— Xera'y, rejejavyague omboguepaa ma — he'i.
- ⁶ Ha'e gui kuaxia re nhombo'e va'ety kuery ha'e py oguapy okuapy va'e opy'a py aipoe'i:
⁷ — Mba'e re tu po rami ijayvu? Po ramigua ma ayvu vai. Mava'e tu ombogue kuaa joeko vaiague, peteĩ'i e'ŷ y? Ha'e va'e ma Nhanderuete — he'i okuapy.
- ⁸ Ha'e kuery opẽxaa Jesus oikuaa vy aipoe'i:
— Mba'e re tu po rami ri pendeayvu pendepe'a py?
- ⁹ Mba'exa nda'u ndaxyive xeayvu aguãa oguata e'ŷ va'e pe: “Rejejavyague omboguepaa ma” tyrã pa “Epu'ã, eupi nderupa, ha'e tereo”, ha'e aguãa?
- ¹⁰ Ha'e rami avi peikuaa aguãa Ava ra'y ojeapo va'ekue ko yvy re joeko vaiague ombogue aguãa voi ipo'aka va'ea —
Oguata e'ŷ va'e pe ju aipoe'i:

- 11 — Xee aipoa'e ndevy: Epu'ã, eupi nderupa, ha'e tereo ndero katy — he'i.*
- 12 Ha'e ramove opu'ã vy oupi ngupa ituiaty, ha'e oë ovy pavê oexaa gui.
Ha'e kuery onhemondyipa vy ombojerovia Nhanderuete. Ha'e vy aipoe'i okuapy:
— Gui ramigua jaexa va'e'y teri a'y peve.
Mateus 9,9; Lucas 5.27,28
- 13 Teigüe ju Jesus oo yupa katy. Heta va'e kuery ha'e javi ou ovaexi aguã. Ha'e ramo ombo'e.
- 14 Oovea py oexa Alfeu ra'y Levi imposto opagaaty py uguapy oiny rä. Ha'e vy aipoe'i:
— Eju xerupive — he'i. Ha'e ramove opu'ã vy oo hupive.
Mateus 9.10-13; Lucas 5.29-32
- 15 Ha'e gui Levi ro py Jesus oĩ mesa py. Hexeve ha'e hemimbo'e kuery reve heta ikuai imposto re nhombopaga va'ety ha'e heko vai va'ekue, mba'eta ha'e kuery ma Jesus rupive ikuai va'ety meme.
- 16 Ha'e rä fariseu kuery regua kuaxia re nhombo'e va'ety ikuai va'e ma oexa okuapy Jesus okaru rä heko vai va'ekue ha'e imposto re nhombopaga va'ety kuery reve. Ha'e rami vy oporandu hemimbo'e kuery pe:
— Mba'e re tu Jesus okaru [ha'e oy'u] ri imposto re nhombopaga va'ety ha'e ojevayypa va'e kuery reve?
- 17 Ha'e nunga Jesus oendu vy ombovai ha'e kuery pe:
— Hexa'i va'e kuery ma ndoipotai 'rä poropoanoa, imba'eaxy va'e anho 'rä oipota. Ha'e rami vy xee ma heko porã va'e aeno'i aguã e'y aju, ha'e rä heko vai va'e anho.
Mateus 9.14-17; Lucas 5.33-39
- 18 João remimbo'e ha'e fariseu kuery okaru e'y re jepi 'rä ikuai. Ha'e ramo amongue ou vy oporandu Jesus pe:
— Mba'e nunga rupi tu João remimbo'e ha'e fariseu remimbo'e kuery okaru e'y re jepi ikuai, ha'e rä neremimbo'e kuery ma ha'e rami nda'ikuai?
- 19 Jesus ombovai:
— Omendaa py ha'eve nda'u oeno'i mbyre kuery okaru e'y re ikuai aguã, ha'e kuery reve omenda va'e oĩ teria ja? Any, omenda va'e oĩ teria ja ha'e kuery nda'ikuai 'räe okaru e'y re.
- 20 Ha'e rami avi ovaë 'rä ha'e kuerya gui omenda va'e oipe'aa aguã ára. Ha'e va'e jave mae 'rä ha'e kuery okaru e'y re ikuai.
- 21 — Avave rei ao ymague re nombojai 'rä ajukue pyau ra'ykue, mba'eta ombojaague omboi 'rä ao ymague gui. Ha'e ramo oxoroa tuvixave 'rä.
- 22 Ha'e avave rei hyru ymague py nomboyru'i 'rä vinho pyau. Ha'e rami e'y rä ombovaipa 'rä hyru. Vinho ha'e hyru ivaipa 'rä. Ha'e rami 'rãgue py vinho pyau rä hyru pyau py 'rä omoi.
Mateus 12.1-8; Lucas 6.1-5
- 23 Pete'i sábado ára py Jesus guemimbo'e kuery reve oaxa ovy trigoty rupi. Hemimbo'e kuery ma ooa rupi oipo'o heravy hi'a.
- 24 Ha'e ramo fariseu kuery ha'e nunga oexa vy aipoe'i ixupe:
— Ma'ë, mba'e re tu neremimbo'e kuery ojapo sábado py nda'evei va'eri?
- 25 Ombovai:
— Ndaperoayvui teve Davi ojexavai ha'e okaruxe vy oirũ kuery reve ojapo va'ekue?
- 26 Mba'eta Nhanderuete ro py oike raka'e sacerdote yvateve va'e Abiatar oĩ jave py, ha'e vy ho'u mbojape Senhor renonde omoi mbyre, ha'e kuery ho'u aguã nda'evei va'eri, sacerdote pe anho ha'eve. Ngupive ikuai va'e pe voi ome'ë avi — he'i.
- 27 Ha'e vy aipoe'ive ju:
— Sábado ára ma avakue pe oejaa raka'e, ha'e rä sábado pe avakue oejaa nda'ei.
- 28 Ha'e nunga rupi Ava ra'y ojeapo va'ekue ma sábado ára re voi ipo'aka va'e.

3

Mateus 12.9-14; Lucas 6.6-11

- 1 Teigüe ju Jesus ovaë onhembo'eaty py. Ha'e py oĩ Pete'i ava ipo rovai piru va'e.
- 2 Ha'e py ikuai va'e ma Jesus re oexa pota okuapy, sábado py rä pa nhomonguera ra'ea oexa aguã, ijayvu reixe vy.
- 3 Ha'e rä Jesus ma ava ipo piru va'e pe aipoe'i:
— Eju mbyte katy.
- 4 Ha'e gui ha'e kuery pe ranhe oporandu:
— Ha'eve ri nda'u sábado ára py jajapo porã tyrã pa jajapo vai? Ha'eve ri nda'u joekove jaraa jepe, tyrã pa tove tomano? — he'i. Ha'e rami te'i okyrimba okuapy.
- 5 Ha'e ramo ipoxy ha'e iporiau rei reve oma'ë ijyvyry ikuai va'e re, ha'e kuery inhakã ratã ramo. Ha'e vy aipoe'i ava pe:
— Embo'yvi ndepo.
Ha'e ramo opo ombo'yvi vyve okuera.
- 6 Ha'e rä fariseu kuery ma ojepe'a vy hovai jogueroayvu Herodes-a katygua kuery reve. Marã rami pa ojuka uka aguã re ijayvu okuapy.

Ye'ë rembe re heta omongueraague

7 Ha'e gui Jesus guemimbo'e kuery reve oje'oi yupa katy. Heta ete ou Galiléia gui, Judéia,

* 2:11 João 10.37,38

⁸ Jerusalém, Iduméia, Jordão yakā rovaigua, Tiro ha'e Sidom gui avi heta ete ou. Jesus mba'emo ojapoague omombe'ua rā oendu vy jogueru oia py.

⁹ Ha'e ramo guemimbo'e kuery pe Jesus aipoe'i peteī kanoā ogueru aguā ha'e oī aguā, heta va'e kuery omboty rei e'ŷy aguā.

¹⁰ Mba'eta heta omonguera ramo imba'eaxy va'e kuery nhomoanha-anha jogueruvy hexe opokoxe vy.*

¹¹ Nhe'ē vai revegua vy oexa vy henonde guenapy'ā re oī vy ojapukai reve aipoe'i:

— Ndee ma Nhanderuete Ra'y.

¹² Ha'e ramo ha'e kuery pe Jesus ijayvu atā oikuaa uka e'ŷy aguā re.

Mateus 10.1-4; Lucas 6.12-16

¹³ Ha'e rire vyvty oī va'e áry oē vy oenoī ha'e ae oipota va'e kuery. Ha'e ramo oia py ha'e kuery ou.

¹⁴ Ha'e ramo doze oiporavo hexeve ikuai va'erā, ha'e gui ayvu omombe'ua aguā katy omondouka aguā,

¹⁵ ha'e ipo'akaa rupi anha kuery oipe'a aguā guive.

¹⁶ Doze oiporavo va'ekue ma pova'e: Simão hery mboærã Pedro omoī va'ekue,

¹⁷ ha'e gui Zebedu ra'y kuery Tiago ha'e tyvy João. Ha'e va'e kuery reryrã omoī Boanerges, “Yapu va'e ra'y kuery” he'ia.

¹⁸ Ha'e gui André, Filipe, Bartolomeu, Mateus, Tomé, Alfeu ra'y Tiago, Tadeu, Simão Zelote,

¹⁹ ha'e ijopy uka nhemiã Judas Iscariotes avi.

Mateus 12.22-32; Lucas 11.14-23

²⁰ Ha'e ramo ngoo katy ju oo. Ha'e ramive ma heta ete ju onhemboaty ramo neī okaru aguā ma voi nda'evei.

²¹ Jesus retarã kuery ha'e nunga oendu vy ou ogueraa aguā, mba'eta omombe'ua rā oendu ma'inhakā porãveia rami.

²² Ha'e py ikuai avi kuaxia re nhombo'e va'ety kuery Jerusalém gui ou va'ekue. Ha'e va'e kuery aipoe'i:

— Hexe tu anha ruvixa Belzebu rima onhemonde. Anha po'akaa rupi ae rima oipe'a oikovy anha kuery — he'i.*

²³ Ha'e ramo Jesus oenoimba vy ha'e kuery pe ijayvu mba'emo re ombojoja reve. Ha'e vy aipoe'i:

— Mba'ixa 'rā tu anha ha'e ae onhemoxē?

²⁴ Mba'eta joa pygua meme joe opu'ā vy nhomomba 'rā.

²⁵ Peteī oo pygua meme joe opu'ā vy nhomomba avi 'rā.

²⁶ Ha'e rami ae avi anha kuery jomeme opu'ā vy joo rami e'ŷy ikuai va'e rire nda'ikuaivei 'rãgue, okanhymba 'rā guive.

²⁷ — Avave rei ma ndoikei 'rā ava ojeroviave va'e ro py imba'e rei-rei re imonda aguā, oipokua ranhe e'ŷy re. Oipokua rire vy 'rãe oipe'apa.

²⁸ — Anhetē aipoa'e pendeivy: Avakue ojevavyague ha'e ijayvu vaiague ombogueva aguā ma ha'eve meme.

²⁹ Ha'e rā Nhe'ē Ky'a E'ŷy re ijayvu vaia ague ma nombogueai 'rā, ha'e nunga jejavya ma ombogueva va'erā e'ŷy — he'i.

³⁰ Po rami ijayvu mba'eta “Hexe anha onhemonde” he'i okuapy ramo.

Mateus 12.46-50; Lucas 8.19-21

³¹ Ha'e rami jave ovaē ixy, tyvy ha'e heindy kuery. Oka py ikuai py oenoī uka.

³² Ha'e ramo heta ijyvýry uguapy okuapy va'e aipoe'i iuxepe:

— Pee oka py ma ndexy, nderyvy ha'e nereindy kuery ikuai. Ndereka vy je ou — he'i.

³³ Ha'e ramo ombovai:

— Marã ramigua tu ha'i ha'e xeryvy kuery?

³⁴ Ha'e oyvýry uguapy va'e kuery re oma'ē vy aipoe'i:

— Peva'e ae ma ha'i ha'e xeryvy kuery.

³⁵ Mba'eta Nhanderuete oipotaa rami ojapo va'e ma ha'i, xeryvy ha'e xereindy kuery ikuai.*

4

Mateus 13.1-9; Lucas 8.4-8

¹ Teĩgue ju Jesus nhombo'e oiny yupa yvýry. Ha'e py heta ikuai ramo peteī kanoā py oī. Yy rembe re heta va'e kuery ikuai gvy mombyry'i uguapy oiny. Ha'e rā heta va'e kuery ye'ē rembe re ikuai, ita ku'i reia py.

² Ha'e gui opa mba'e re ombo'e mba'emo re ombojoja vy. Ha'e vy aipoe'i:

³ — Pejapyxaka ke. Peteī ava oo mba'emo ra'yí moaī vy.

⁴ Ha'e va'e omoaī rã amongue ha'yĩgue ho'a tape yvýry. Ha'e nunga ma guyra'i ou vy ho'upa.

⁵ Amboae ma itaty yvy mbovy'i reia rupi ho'a. Ha'e nungakue ma yvy re ndoike pukui rire henhoī voi'i.

⁶ Ha'e rami teĩ kuaray oē vy omombiru, ndapoi rã.

⁷ Amboae ma juu mbyte rupi ho'a rire juu yvate vy ojukapa. Ha'e ramo ndai'ai.

⁸ Ha'e rã amboae ma yvy porãa rupi ho'a. Ha'e nungakue ma henhoī porã, yvate ha'e hi'a porã guive. Trinta, sessenta, cem ha'yí peve oiko peteī-teĩ gui — he'i.

⁹ Ha'e vy aipoe'ive ju:

— Ijapyxa oendu aguā oī va'e toendu.

Mateus 13.10-23; Lucas 8.9-15

* 3:10 Mateus 4.23-25; Lucas 6.17-19

* 3:22 Lucas 12.10

* 3:35 Hebreus 2.11,12

¹⁰ Jesus-a gui ojepe'apaa ma ramo hupive ikuai va'e hemimbo'e kuery doze va'e reve ou vy oporandu okuapy mba'emo re ombojoja vy ayvu omombe'u va'ekue re.

¹¹ Ha'e ramo ombovai:

— Pendeivy pe Nhanderuete oikuaa uka ipo'akaa py mba'emo oiko va'e ndoikuaa ukai va'ekue. Ha'e rã amboae kuery ma mba'emo re ambojojaa rupi anho 'rã ambo'e,

¹² ha'e kuery oma'ë teĩ ndoexa kuaai aguã, ha'e oendu teĩ noendu kuaai aguã, ojeko rerova e'ỹ aguã ndoperdoaa aguã — he'i.*

¹³ Ha'e gui ma ha'e kuery pe oporandu:

— Napendu kuaai teve mba'e nunga re ambojoja vy pa pova'e ayvu amombe'uague? Mba'exa tu ha'vy pendu kuaa ta ayvu amombe'u va'e ha'e javi?

¹⁴ Ha'e gui mba'emo moaia ma omoaĩ ayvu.

¹⁵ Po rami ikuai tape vy'vy omoaĩ mbyre rami: Ayvu oendu vy ojapyxaka teĩ Satanás ou vy ayvu oipe'a 'rã ha'e kuery re oĩ va'ekue.

¹⁶ Ha'e gui po rami ma itaty reia rupi omoaĩ mbyre rami ikuai: Ayvu oendu vy ojopy vyvoi 'rã ovy'a reve.

¹⁷ Ha'e rami teĩ ndapo pukui va'e rami avi ikuai. Are'ỹ'i re ovaë 'rã imoingo axyarã, ha'e ayvu porã káuxa ijavyky reiarã. Ha'e nunga oiko rã ayvu porã rupi ikuaiague gui ojepe'apa 'rã.

¹⁸ Ha'e gui juu mbyte rupi omoaĩ mbyre rami ikuai va'e ma ayvu oendu avi,

¹⁹ teĩ ko vvy re mba'emo ikuai va'e re openave vy, peráta, opa marãgua ojou porãve vy noendu potavei 'rã ayvu. Ha'e rami vy ndai'ai.

²⁰ Ha'e rã vvy porãa rupi omoaĩ mbyre rami ikuai va'e ma ayvu oendu vy ojopy 'rã, hi'a porã 'rã guive trinta, sessenta, cem peteĩ-teĩ gui.

Lucas 8.16-18

²¹ Ha'e gui aipoe'i avi:

— Tataendy nda'u nhamoendy vy jajao'i 'rã ri ajaka py, ha'e e'ỹ vy tupa gu'ry 'rã ri nhamoĩ? Any, imoiny oĩaty py ae 'rã jaupi imoiny.

²² Mba'eta ndoexa ukai pyre ojekuaapa 'rã, ha'e onhomi mbyre oikuaa ukapaa 'rã.

²³ Ijapyya oendu aguã oĩ va'e toendu — he'i.

²⁴ Ha'e kuery pe aipoe'ive ju:

— Peikuaa pota porã ayvu pendu va'e re. Mba'eta joupe pejapoague rami ae 'rã ojapoa pendeivy, ojapoave 'rã guive.

²⁵ Mba'eta mba'emo oguereko va'e pe ome'ëave 'rã. Ha'e rã oguereko e'ỹ va'e gui ma oipe'apaa 'rã oguereko rei'i merami va'ekue.*

Mba'emo ra'yi re ombojojaague

²⁶ Aipoe'i avi:

— Nhanderuete po'akaa py oiko 'rã vvy re ava mba'emo ra'yigue onhot'ỹ va'e rami.

²⁷ Mba'eta oke 'rã pyávy, ha'e rã ára py ovy 'rã. Ha'e ramia ja ha'yigue henhoĩ ha'e yvate 'rã marã rami paa oikuaa e'ỹ re.

²⁸ Yvy ae ojapo 'rã hi'a aguã rami. Jypy'i ma henhoĩ, ha'e gui ipoty, ha'e gui ma ha'yĩ omonyë 'rã hi'a.

²⁹ Hi'a ijajupa ma ramo ojayaa 'rã kyxe py, mba'eta ovaë ma omono'õ aguã.

Mateus 13.31,32, Lucas 13.18,19

³⁰ Aipoe'ive ju:

— Marã ramigua nda'u Nhanderuete po'akaa py oiko va'e reve joo ramigua? Mba'e nunga re nda'u ha'eve ambojoja aguã?

³¹ Mostarda ra'yĩ re ha'eve, mba'eta ha'yigue ikuai va'e gui ruxãve'i va'e 'rã nhanhot'ỹ.

³² Ha'e gui nhanhot'ỹ ma rire yvate 'rã, mba'emo nhanhot'ỹ va'e ha'e javi gui tuvixave 'rã guive. Hakã voi tuvixa ramo guyra'i oveve va'e ou vy kuaray'ã py ojapo 'rã guaityrã.

Mateus 13.34,35

³³ Heta ayvu ha'ekue ramigua omombe'u ha'e kuery pe mba'emo re ombojoja vy, ojapyxaka va'e kuery oendu kuaa peve.

³⁴ Ha'e rami avi mba'emo re ombojoja e'ỹ re nda'ijayvui ha'e kuery pe. Ha'e rã guemimbo'e kuery pe ma omombe'u porãve kuerei 'rã ha'e kuery ae'ia py.

Mateus 8.23-27; Lucas 8.22-25

³⁵ Ha'e va'e ára ka'aru'i Jesus aipoe'i ha'e kuery pe:

— Jaaxa yupa rovaigua re — he'i.

³⁶ Ha'e ramo heta va'e kuery omondoukapa ma vy ogueraa Jesus kanoã py oĩague reve ae. Ha'e rã amboae kuery ma kanoã mboae py oo hakykue.

³⁷ Ha'e gui ou vvytu atã ramo kanoã re yai ojeapi-api. Ha'e ramo kanoã py py tynyë ta ma.

³⁸ Ha'e rã Jesus ma kanoã revy katy oke oupy akãngyta áry. Ha'e ramo omomyĩ vy aipoe'i:

— Orembo'ea, ndee nerepenai va'e ty'y nhamanomba taa re?

³⁹ Ha'e ramo ovy vy ijayvu atã vvytu ha'e yai pe. Ha'e vy aipoe'i:

— Epytu'u, ekyriři ke — he'i. Ha'e ramove vvytu opytu'u, yai okyriřimba guive.

⁴⁰ Ha'e gui ma aipoe'i:

* 4:12 Isafías 6.9-10 * 4:25 Mateus 13.10-15; Lucas 8.18; Tiago 1.22-25

- Mba'e re tu guí rami pekyjepa? Mba'e re tu noĩ pejeroviaa? — he'i.
⁴¹ Ha'e ramo ha'e kuery onhemondyipa vy joupe-upe ju aipoe'i:
 — Marã ramigua tu peva'e ava, yvytu ha'e ye'ẽ voi onhe'ẽ rendu aguã?

5

Mateus 8.28-33; Lucas 8.26-34

- ¹ Ha'e rire yupa rovaigua re ovaẽ Gerasa pygua kuery yvy re.
² Oguejy ramove yvyra rupa oĩ va'e gui ovaexĩ ouvy peteĩ ava nhe'ẽ vai onhemondea va'e.
³ Ha'e va'e ma itakua rupi tema oiko. Neĩ corrente py teĩ avave rei nomombytaai.
⁴ Mba'eta ojopya vy ipy rupi corrente py ojokuaa teĩ omondo kuerei 'rã, ipy jokia ferro guigua voi omondopa. Avave rei nda'ipo'akaai hexe.
⁵ Pytũ nhavõ ha'e ára pukukue re ojapukai oikovy itakua rupi, yvyty áry guive. Onheungapa rei oikovy ita re.
⁶ Ha'e gui ma mombyry gui oexa Jesus. Ha'e vy onha ouvy vy omboete.
⁷ Ojapukai reve aipoe'i:
 — Nhanderuetete Yvate ete va'e Ra'y Jesus, mba'e tu ndee rereko xereve? Nhanderuetete rery rupi ajerure xemoingo axy e'y aguã — he'i,
⁸ mba'eta nhe'ẽ vai pe Jesus aipoe'i ae ma: “Ejepe'a ke upe va'e ava gui.”
⁹ Ha'e gui Jesus oporandu:
 — Marã rami tu nderery?
 Ombovai:
 — Xerery ma Heta va'e, mba'eta heta orekuai — he'i.
¹⁰ Ha'e vy ojerure ha'e va'e yvy gui oipe'a e'y aguã.
¹¹ Ha'e'i py heta ikuai poryko yvyty áry okaruaty py.
¹² Ha'e ramo nhe'ẽ vai kuery aipoe'i Jesus pe:
 — Oremondouka 'rãgue poryko kuerya katy ha'e kuery re ju roĩ aguã — he'i.
¹³ Ha'e ramo Jesus omondouka. Ha'e gui nhe'ẽ vai kuery ojepe'a vy poryko re ju onhemonde. Dois mil poryko rãnda'u ikuai. Ha'e gui poryko kuery onhemondyipa vy yvy'ã guy katy onha oje'oivy, ha'e yy py ho'apa vy oy'upa.
¹⁴ Poryko re opena va'e kuery onhamba jogueravy tetã katy, ha'e mba'ety rupi ikuai va'e kuery pe guive omombe'u aguã.

Mateus 8.34; Lucas 8.35-39

- Ha'e ramo ha'e pygua kuery oupa oexa aguã oiko va'ekue.
¹⁵ Jesus oĩa py ha'e kuery ovaẽ vy oexa ava anha kuery onhemondeague va'e onhemonde ha'e hi'arandua oĩ porã ju ramo. Ha'e rami vy ndaekorãvei rei okuapy.
¹⁶ Ha'e nunga hexaare kuery omombe'upa ava anha onhemondea va'e re oiko va'ekue, ha'e poryko re guive.
¹⁷ Ha'e rami vy Jesus pe ojerure okuapy ha'e kuery rekoa gui ojepe'a aguã.
¹⁸ Ha'e ramo kanoã py Jesus oĩ ramo ava anha onhemondeague va'e ojerure hupive oo aguã.
¹⁹ Ha'e rami teĩ Jesus ndogueraai. Ha'e vy aipoe'i:
 — Tereo ndero katy, ha'e neretarã kuery pe emombe'u Senhor nemboaxya rupi ojapo va'ekue ha'e javi — he'i.
²⁰ Ha'e ramo oo vy Decápolis tetã rupi omboypy omombe'u aguã ixupe Jesus ojapo va'ekue ha'e javi. Ha'e ramo onhemondyĩ pavẽ.

Mateus 9.18,19; Lucas 8.40-42

- ²¹ Yy rovaigua re kanoã py Jesus oo ju ramo heta ete oje'oi avi ye'ẽ rembe re oĩa katy.
²² Ovaẽ avi peteĩ ava Jairo hery va'e, onhembo'eaty pygua ruvixa. Ha'e va'e ma oexa Jesus vyve guenapy'ã re oĩ henonde.
²³ Ha'e vy ojerure ete:
 — Xerajy'i omano rai'i ma oupy. Eju ke hexe epoko, okuera vy oikove nho aguã — he'i.
²⁴ Ha'e ramo Jesus oo hexeve.

Mateus 9.20-22; Lucas 8.43-48

- Heta va'e kuery omboty rei oje'oivy hupive.
²⁵ Oiko avi peteĩ kunha doze ma'etý re ma gueko re riae oiko va'e.
²⁶ Poropoanoa kuery opa marã oguereko va'ekue, ha'e kuery pe kunha va'e mba'emo oguereko va'ekue ha'e javi ma ome'ẽ teĩ ndokuerai. Ha'e rami 'rãgue py nda'eveive tema ovy.
²⁷ Jesus mba'emo ojapo oikovya omombe'ua rã kunha va'e oendu vy hakykue gui ou. Heta va'e mbyte gui opoko ijao re,
²⁸ mba'eta aipoe'i vy: “Ijao re rive apoko teĩ akuera 'rã” he'i.
²⁹ Ha'e ramove imba'eaxy opytu'u vyvoi, guete re oendu omba'eaxy gui okuera ma ra'ea.
³⁰ Ha'e gui Jesus oikuaa vyvoi ixugui ipo'akaa oẽ rã. Ha'e vy heta mbyte pyve ojere vy oporandu:
 — Mava'e tu xere opoko?
³¹ Ha'e ramo hemimbo'e kuery ombovai:
 — Mba'e re tu teta nemboty rei va'eri “Mava'e tu xere opoko?” 're?
³² Ha'e gui Jesus ovyry rupi oma'ẽ ho'amy, mava'e pa hexe opoko va'ekue oexa aguã.

³³ Ha'e ramo kunha va'e ma okueraague oikuaa vy okyje va'eri oryryipa reve ou. Henonde guenapy'ã re oĩ vy omombe'u oiko va'ekue.

³⁴ Ha'e ramo aipoe'i:

— Xerajy, rejeroiviaa ndereraa jepe. Tereo porã ke, tanemba'eaxyve eme.

Mateus 9.23-26; Lucas 8.49-56

³⁵ Jesus ijayvu teri ho'amý reve amongue ou onhembo'eaty pygua ruvixa ro gui. Ha'e vy tuu pe aipoe'i okuapy:

— Nderajy omano ma. Mba'erã tu remoangoke teri porombo'ea?

³⁶ Ha'e rã Jesus ma ha'e nunga avyu re nopenai. Ha'e vy onhembo'eaty pygua ruvixa pe aipoe'i:

— Enhemondyi eme, ejerovia tema — he'i.

³⁷ Avave rei ndogueraai ngupive, Pedro, Tiago ha'e tyvy João e'ỹ vy.

³⁸ Onhembo'eaty pygua ruvixa ro py Jesus ovaẽ vy oendu opa marã onhendu va'e, ojae'o ha'e haxẽ-axẽ va'e guive.

³⁹ Ha'e oike vy aipoe'i:

— Mba'e re tu opa marã penhendu pejae'o vy? Kunha'i nomanoi, oke rima — he'i.

⁴⁰ Ha'e ramo ojoi rei okuapy. Ha'e gui omoẽ ukapa ma rire kunha'i va'e ituia py ogueroike tuu, ixy ha'e ngupive ogueraa va'ekue.

⁴¹ Ipo re ojopy vy aipoe'i:

— Talitã cumi — he'i, "Kunha'i, evy ke", he'ia.

⁴² Ha'e ramove kunha'i va'e opu'ã vy uguata. Doze ma'etỹ ma uguereko. Ha'e ramo onhemondyi pavẽ.

⁴³ Ha'e rã Jesus aipoe'i avave rei pe omombe'u e'ỹ aguã. Ha'e gui omongaru uka kunha'i va'e.

6

Mateus 13.53-58; Lucas 4.16-30

¹ Ha'e gui Jesus guekoa katy oo guemimbo'e kuery reve.

² Sábado ovaẽ ramo nhombo'e onhembo'eaty py.

Nhombo'e rã heta oendu vy onhemondyipa, ha'e vy aipoe'i:

— Magui nda'u ha'e rami oikuaa? Mba'ixa tu ha'e ramigua 'arandu ixupe ome'ëa? Mba'ixa nda'u mba'emo porã ojapo opo py?

³ Peva'e e'ỹ ri nda'u oo apoa, ha'e Maria memby, Tiago ryke'y, José, Judas ha'e Simão ryke'y? Ha'e apy nhanembyte rupi e'ỹ teve ikuai heindy kuery? — he'i okuapy. Ha'e vy ndojou porã.*

⁴ Ha'e ramo Jesus aipoe'i:

— Neĩ peteive profeta nda'ipoi hekoa pygua kuery ae omovaẽ porã va'erã — he'i.

⁵ Ha'e rami rã ha'e py nda'evei mba'eve ojapo aguã opo'akaa rupi. Mbovy'i re opo omoĩ vy omonguera mba'eaxy gui.

⁶ Ha'e kuery ndojeroivia oexa vy onhemondyi. Ha'e rami vy tekoa ha'e katy rai-rai'i oĩ va'e rupi oo nhombo'e aguã.

Mateus 10.5-15; Lucas 9.1-6

⁷ Doze guemimbo'e kuery Jesus oenoĩ vy ombopo'aka nhe'ẽ vai re. Ha'e vy mokõ-mokoĩ omondouka.

⁸ Ha'e kuery pe aipoe'i:

— Mba'eve peraa eme tape rupi peguataa rupi, peteĩ popoka e'ỹ vy, neĩ mbojape, voko, neĩ perãta nda'evei.

⁹ Pendepy regua pemoĩ aguã ha'eve teĩ peraa eme mokoĩ kamixa.

¹⁰ Ha'e gui peteĩ oo py pevaẽa py ae 'rã pepyta ha'e va'e tekoa gui peove peve.

¹¹ Ha'e rã tekoa py napenemovaẽai ha'e pendeayvua noendu potaai ramo pejepe'a 'rã ha'e gui. Ha'e pendepy regua gui peity-ity 'rã yvy ku'i, ha'e kuery pe peikuaa uka aguã peja peovya — he'i.*

¹² Ha'e gui ma hemimbo'e kuery oje'oi vy heta va'e kuery pe omombe'u ojeko rerova aguã.

¹³ Oipe'a reta anha kuery, ha'e heta avi imba'eaxy va'e omonguera azeite oikyty reve.

Mateus 14.1-12; Lucas 9.7-9

¹⁴ Jesus re opa rupi ima'endu'aa ramo huvixave Herodes avi oendu. Ha'e va'e pe amongue aipoe'i avi:

— João Batista rima omanoague gui onhemboete ju. Ha'e vy 'rãe mba'emo ojapo oikovy opo'akaa rupi.

¹⁵ Amboae ju aipoe'i ixupe:

— Elias rima — he'i.

Ha'e gui amboae ju aipoe'i:

— Peteĩ profeta oiko, yma oiko va'ekue ramigua rima — he'i.

¹⁶ Ha'e rã Herodes ma ha'e nunga oendu vy aipoe'i:

— João akã xee ae ajaya uka va'ekue ri nhi'ã onhemboete ju — he'i.

¹⁷ Mba'eta Herodes ae João ojopy vy nhuã py ojokua uka va'ekue guivy Filipe ra'yxy Herodias káuxa, hexe omenda rire.

¹⁸ Mba'eta ixupe João "Nda'evei nderyvy ra'yxy rereko aguã" he'i ramo.

¹⁹ Ha'e nunga rupi Herodias ndoayvui vy ojokaxe teĩ nda'evei,

* 6:3 João 1.11 * 6:11 Atos 13.50,51; 18.6

²⁰ mba'eta João pe Herodes “Heko porã ha'e iky'a e'y' va'e” he'i vy okyje. Ha'e rami vy opena porã. Ijayvua oendu vy ndoikuaai rei teĩ ojapyxaka porã.

²¹ Peteĩ ára ta'yxy oipotaa rami oiko. Herodes ituiague ára py ngaru ojapo guembiguai kuery yvatekueve reve, xondaro ruvixa ha'e Galiléia pygua huvixa kuery pe guive.

²² Ha'e kuery ikuai py Herodias memby oike vy ojeroky ramo Herodes ha'e oenoĩ uka va'ekue oexa vy ojou porã okuapy. Ha'e ramo kunhataĩ pe huvixa aipoe'i:

— Ejerure reipota va'e re, xee ame'ẽ 'rã.

²³ Oura guive:

— Mba'emo areko va'e mbyte rupi peve rejerure teĩ ame'ẽ 'rã — he'i.

²⁴ Ha'e ramo kunhataĩ oo vy oxy pe ranhe oporandu:

— Mba'e nunga re tu tajerure?

Ixy ombovai:

— João Batista akãgue re — he'i.

²⁵ Ha'e ramove huvixa oĩa py ju ou pojava vy aipoe'i:

— Aipota a'y'i ma voi xeve reme'ẽ João Batista akãgue peteĩ hy'a py — he'i.

²⁶ Ha'e ramo huvixa iporiau vaipa, teĩ mesa py hexeve ikuai va'e oendua py oura rire nda'vei ndojapoi aguã.

²⁷ Ha'e rami vy ijukaarã omondouka vy ijayvu João akãgue ogueru aguã. Ha'e ramo nhuã py oo vy ojaya inhakã,

²⁸ ha'e peteĩ hy'a py ogueru. Kunhataĩ pe ome'ẽ rã oxy pe ju ogueraa.

²⁹ João remimbo'e kuery ha'e nunga oendu vy ou. Hetekue ogueraa vy onhono porã huparã ojapo pyre py.

Mateus 14.13-21; Lucas 9.10-17; João 6.1-14

³⁰ Ha'e gui Jesus oĩa py apóstolo kuery ojeyvpa ju vy ixupe omombe'u ojapo va'ekue ha'e nhombo'eague ha'e javi.

³¹ Ha'e ramo aipoe'i ha'e kuery pe:

— Jaje'oi nhande kuery ae'i japytu'u ranhe peteĩ henda tekoa e'yã py — he'i, mba'eta heta oo ha'e ou va'e gui ha'e kuery okaru aguã ma voi nda'vei.

³² Ha'e rami vy ha'e kuery ae'i kanoã py oje'oi tekoa e'yã katy.

³³ Ha'e kuery oje'oi rã heta oexa. Oexa kuaa vy tetã ikuai va'e ha'e javi gui onha jogueravy ha'e katy. Yvy rupi oo vy ha'e kuery ranhe ovaẽmba.

³⁴ Ha'e ramo kanoã gui Jesus oguejy vyve heta ikuai va'e oexa. Ha'e vy omboaxy, mba'eta vexe'i ija e'y va'e rami ikuai. Ha'e vy opa mba'e re ombo'e oiny.

³⁵ Ha'aru'i jave Jesus-a py hemimbo'e kuery ou vy aipoe'i:

— Apy ma tekoa e'yã py nhandekuai, ka'aru ete ma guive.

³⁶ Emondoukapa ha'vy imba'ety ha'e kii rai'i tekoa ikuai va'e rupi, ho'u va'erã ojogua aguã — he'i okuapy.

³⁷ Ha'e ramo aipoe'i ha'e kuery pe:

— Peẽ ae peme'ẽ ho'u va'erã.

Ha'e rami rã ha'e kuery ombovai:

— Ore kuery pa toroo duzentos ára repy re torojogua mbojape ha'e kuery ho'u aguã? — he'i.

³⁸ Ha'e ramo aipoe'i:

— Mbovy mbojape ha'vy pereko? Tapeo pexa.

Ha'e kuery oikuaa vy ombovai:

— Peteĩ nhiruĩ mbojape roguereko, mokoĩ pira'i guive — he'i.

³⁹ Ha'e ramo nhuũ hovy reia oĩ va'e py Jesus omboguapy ukapa peteĩ henda-enda py.

⁴⁰ Ha'ekue rami omboja'o peteĩ-teĩ henda py cem, ha'e rã amboae py ma cinqüenta ikuai aguã rami.

⁴¹ Ha'e gui Jesus ma peteĩ nhiruive mbojape ha'e mokoive pira ojopy vy yva re oma'ẽ reve oguerovy'a Nhanderuede. Oipe'ã-pe'ã'i vy ome'ẽ guemimbo'e kuery pe ombojoja aguã, mokoive pira'i guive omboja'o heta va'e kuery pe.

⁴² Ha'e javive okaru ma vy hevayatãmba.

⁴³ Ha'e gui doze varai ju omono'õ mbojape ra'ykue ha'e pira rembyrekue.

⁴⁴ Mbojape re avakue okaru va'ekue ma cinco mil.

Mateus 14.22-33; João 6.16-21

⁴⁵ Ha'e rire'ive Jesus omondouka guemimbo'e kuery kanoã py ha'e kuery ranhe oaxa aguã yupa rovaigua re Betsaida katy, heta va'e kuery ha'e omondoukapa peve.

⁴⁶ Omondoukapa ma vy vvyty áry oẽ ovy onhembo'e aguã.

⁴⁷ Pytũ'i jave yy mbyte rupi kanoã oo oiny jave Jesus ma vvyty áry ha'e ae'i oĩ.

⁴⁸ Hemimbo'e kuery renonde katy gui vvyty oipeju ramo ndopykui porãvei rã Jesus oexa. Ha'e gui ko'ẽ rai jave mae ha'e kuerya katy oo. Yy áry rupi oguata ovy, ha'e kuery renonde oaxa ta merami.

⁴⁹ Yy áry rupi oguata ovy rã ha'e kuery oexa vy “Águe po” he'i vy ojapukai okuapy.

⁵⁰ Mba'eta ha'e kuery Jesus oexa vy ndaekorãveipa.

Ha'e ramo ha'e kuery pe ijayvu vy aipoe'i:

— Pendepy'a guaxu ke, xee rima. Pekyje eme — he'i.

⁵¹ Ha'e vy ha'e kuery reve kanoã py oĩ ramove vvyty opytu'u. Ha'e ramo onhemondyipa okuapy,

⁵² mba'eta inhakã ratã vy ndoikuaii teri nei opo'akaa rupi mbojape omboetaveague.

Mateus 14.34-36

⁵³ Yy rovaigua re oaxa vy Genesaré vyv re ovaẽ. Ha'e py ma kanoã omboja.

⁵⁴ Kanoã gui ha'e kuery oẽmba ramove heta va'e kuery oexa kuaa okuapy Jesus.

⁵⁵ Ha'e rami vy tekoa oĩkuai va'e ha'e javi rupi onha-onha vy ogueru imba'eaxy va'e kuery. Hupa reve ogueru Jesus oĩa oendua katy.

⁵⁶ Ha'e gui ma tekoa py Jesus ovaẽa py rei, tetã e'ỹ vy imba'ety va'e kuerya py, e'ỹ vy tetã mbyte py mba'e ovaẽ rã oguerua 'rã imba'eaxy va'e kuery. Ovaẽ aguã py omoĩ vy ixupe ojerure ijao apy'i re ri jepe opoko aguã. Ha'e ramo opoko va'e ha'e javi okuera.

7

Mateus 15.1-20

¹ Jesus-a py onhemboaty fariseu ha'e kuaxia re nhombo'e va'ety kuery Jerusalém gui ou va'ekue.

² Ha'e vy oexa rã hemimbo'e kuery regua ojepoei e'ỹ re okaru.

³ (Ha'e rã fariseu ha'e judeu kuery ha'e javi ma ymagua kuery nhombo'eague rami vy ojepoei ma vy mae 'rã okaru.

⁴ Tetã mbyte gui ovaẽ vy voi onhemoakỹ ranhe 'rã okaru aguã. Ha'e rami vy hekorã oea pyre heta oguereko mba'emo ojoi aguã: karo, yryru, oja overa va'e guigua, [ha'e tupa guive].)

⁵ Ha'e nunga rupi fariseu ha'e kuaxia re nhombo'e va'ety kuery oporandu Jesus pe:

— Mba'e re tu neremimbo'e kuery ma ymagua kuery nhombo'eague rami nda'ikuai? Mba'eta ojepoei e'ỹ re okaru.

⁶ Ha'e ramo ombovai:

— Pendeko porã merami rive va'e, peẽ kuery reko re profeta Isaías ha'evea rami ijayvu raka'e. Ha'e vy ombopara imoiny: “Kova'e kuery ma ojuru py rive xemboete, ha'e rã ipy'a ma mombury xegui.

⁷ Avakue ojapo uka va'e re nhombo'e vy xembojerovia merami rive”, he'i va'ekue.*

⁸ Ha'e rami vy peẽ kuery Nhanderuete ojapo uka va'ekue ndapejapoi pekuapy, avakue ojapo uka va'e rive pejapoxeve vy — he'i.

⁹ Aipoe'ive ju:

— Peẽ kuery opa marã pemboyke Nhanderuete ojapo uka va'ekue, pende ae reko rami rive pendekuai aguã.

¹⁰ Mba'eta Moisés aipoe'i: “Remboete 'rã nderu ha'e ndexy. Ha'e rã nguú ha'e oxy re ijayvu vai va'e pejuka 'rã”, he'i va'ekue.*

¹¹ Ha'e rã peẽ ma aipopeje: “Nguú e'ỹ vy oxy pe amongue aipoe'i 'rã: ‘Mba'emo pëvy peguarã areko va'ekue ma Nhanderuete pe ju amboaxa’, he'i teĩ ha'eve”, peje.

¹² Ha'e rami vy tuu ha'e icy napeipytyvõ ukai.

¹³ Ha'e rami py pemboyke Nhanderuete ayvu, pendereko rami rive penhomoingo vy. Peẽ kuery ha'e rami anho penhombó'e. Oĩ retave ju ha'e va'e ramigua pejapo va'e — he'i.

¹⁴ Teĩgue ju heta va'e kuery oenoĩ vy aipoe'i:

— Pejapyxaka pavẽ peikuua aguã.

¹⁵ Avakue ryepy py mba'emo oike va'e'ỹ omboeko ky'a. Avakue gui oẽ va'e anho 'rã omboeko ky'a.

¹⁶ [Ijapyxa oendu aguã oĩ va'e toendu] — he'i.

¹⁷ Ha'e gui heta va'e kuery oea vy oike opy. Ha'e ramo hemimbo'e kuery ou vy ojerure mba'emo re ombojojaague omombe'u porãve aguã re.

¹⁸ Ha'e ramo ombovai:

— Peẽ voi teve napendu kuaai, ha'e ndapeikuai? Avakue ryepy py oike va'e'ỹ 'rã omboeko ky'a,

¹⁹ mba'eta ndoikei 'rã ikuraxõ re. Hye rupi oaxa vy oẽ ju 'rã hete gui — he'i. Ha'e rami vy tembí'u ma guive rã nanhanemboeko ky'ai 'rãa re ijayvu.

²⁰ Aipoe'i avi:

— Mba'emo avakue gui oẽ va'e anho 'rã omboeko ky'a.

²¹ Avakue py'a gui ae 'rã oẽ imboeko ky'aarã: opa marã rei oikoxea, imondaxea, jojukaxea, itavy reixea,

²² nhomba'e re hakãte'ya, ojapo vaixea, nhombotavypaxea, ndojejokoia, joapo vaixea, ijayvu vaixea, onhemboyvate reixea ha'e na'inhakã porãveia rupi oikoa.

²³ Ikuraxõ gui ha'e va'e nunga oẽ va'e anho 'rã imboeko ky'aarã oĩ.

Mateus 15.21-28

²⁴ Jesus opu'ã vy oo ha'e gui Tiro [ha'e Sidom] vyv katy. Peteĩ oo py ovaẽ vy oĩa ndoikuua ukaxeĩ avave rei pe teĩ nda'evei onhemi aguã.

²⁵ Mba'eta peteĩ kunha ou imemby re nhe'ẽ vai onhemondea va'e. Jesus re ima'endu'aa rã oendu vy ou, ha'e vy guenapy'ã re oĩ ipy vy'ry.

²⁶ Ha'e va'e kunha ma Siro-fenícia pygua, ha'e grego ayvu py ijayvu va'eri ojerure oiny imemby gui anha oipe'a aguã.

²⁷ Ha'e ramo Jesus aipoe'i:

* 7:7 Isaías 29.13 * 7:10 Êxodo 20.12, 21.17; Levítico 20.9; Deuterônimo 5.16

— Tove ta'y kuery ranhe tokarupa. Nda'evei mbojape jajopy aguã ta'y kuery po gui, jagua'i ikuai va'e pe nhamombo aguã.*

²⁸ Kunha va'e ombovai:

— Tá, Senhor. Ha'e rami avi jagua'i teĩ mesa guýry ho'u 'rã kyrĩ va'e rembi'u kure — he'i.

²⁹ Ha'e ramo Jesus aipoe'i:

— Po rami ri rembovai rire tereo ju. Nememby gui anha ojepe'a ma — he'i.

³⁰ Ha'e ramo ngoo py ovaẽ vy ojou kunha'i va'e tupa rupi itui porã rã, ixugui anha ojepe'a ma ra'e.

Noendui ha'e nda'ijayvui va'e omongueraague

³¹ Tiro yvy gui ojepe'a vy oaxa ovy Sidom rupi. Galiléia yupa peve oo Decápolis yvy rupi.

³² Ha'e ramo oĩa py peteĩ oguerua noendui ha'e nda'ijayvui va'e. Ha'e vy ojerure hexe opoko aguã.*

³³ Ha'e ramo heta va'e mbyte gui Jesus ogueraa ranhe mombryry'i ha'e ae'ia py. Ha'e vy ijapyxa py opo'ẽ, inhapekũ re opoko guive guendyry reve.

³⁴ Yva re oma'ẽ vy ipytuẽ atã. Ha'e vy aipoe'i:

— Efatá — he'i, “Ejepe'a ke” he'ia.

³⁵ Ha'e ramo oendu xapy'a, na'inhapekũ ratãvei vyvoi guive. Ha'e vy ijayvu porã.

³⁶ Ha'e gui ha'e kuery pe aipoe'i avave rei pe omombe'u e'ỹ aguã. Ha'e rami teĩ omongetavea ramive ma omombe'uve tema oje'oivy.

³⁷ Mba'eta onhemondyipa vy aipoe'i okuapy:

— Ha'evea rami meme ojapo. Mba'eta ojapo nda'ijayvui va'ekue ijayvu, ha'e noendui va'ekue oendu ju aguã rami.

8

Mateus 15.32-39

¹ Ha'e jave heta va'e kuery ono'õa py teĩgue ju ndoguerekoĩ ho'u va'erã. Ha'e ramo Jesus guemimbo'e kuery oenoĩ vy aipoe'i:

² — Xee amboaxy kova'e kuery, mba'eta mboapy ára ma xerupive ikuai rire mba'eve ndoguerekovei ho'u va'erã.

³ Okaru e'ỹ re hoo katy amondouka ramo ho'apa 'rã tape rupi, mombryry gui ou rire — he'i.

⁴ Ha'e rã hemimbo'e kuery aipoe'i:

— Apy tekoo e'ỹa py magui 'rã tu jajou mbojape kova'e kuery peguarã?

⁵ Jesus oporandu:

— Mbovy tu mbojape pereko?

Ha'e kuery ombovai:

— Sete — he'i.

⁶ Ha'e gui Jesus aipoe'i heta va'e kuery oguapy aguã yvy py, ha'e vy ojopy sete-ve mbojape. Nhanderute oguerovy'a vy oi'pe'ã-pe'ã'i, ha'e guemimbo'e kuery pe ome'ẽ heta va'e kuery pe ju omboja'o-ja'o aguã.

⁷ Oguereko avi amongue pira'i. Ha'e gui oguerovy'a vy aipoe'i ha'e va'e voi ombojoja aguã.

⁸ Ha'e kuery okaru ma vy hevya'ãmba. Ho'u va'ekue rembyre ma sete ajaka py omboyru.

⁹ Quatro mil avakue rãnda'u ikuai. Ha'e gui mae ma Jesus omondoukapa.

¹⁰ Ha'e rire'ive guemimbo'e kuery reve kanoã py oĩ vy Dalmanuta yvy katy ju oje'oi.

Mateus 16.1-4

¹¹ Jesus oĩa py fariseu kuery jogueru vy hexeve ijayvu ete okuapy. Ha'e rami vy oeko a'ã vy ojerure yva guigua hexa pyrã ojapo aguã re.

¹² Ha'e ramo Jesus opy'apy guive ipytuẽ atã vy aipoe'i:

— Mba'e re tu peẽ kuery pejerure yva guigua hexa pyrã re? Anhetẽ aipoa'e pëvy: Aỹgua kuery pe ndojapoi 'rã peteĩve — he'i.

¹³ Ha'e gui ojepe'a vy oĩ ju kanoã py, ha'e yy rovaigua re oo.

Mateus 16.5-12

¹⁴ Hupive hemimbo'e kuery oo vy hexarai mbojape ogueraa aguã. Peteĩ'i mbojape anho oguereko kanoã py.

¹⁵ Jesus aipoe'i:

— Ma'ẽ, penheangu ke fariseu kuery ha'e Herodes regua trigo mbovua gui — he'i.

¹⁶ Ha'e ramo ha'e kuery aipoe'i jomeme:

— Po rami ijayvu mbojape ndoroguerui rã — he'i.

¹⁷ Ha'e nunga Jesus oikuaa vy oporandu:

— Mba'e re tu pendeayvu mbojape ndaperekoia re? Peneakã ratã vy napendu kuaai, neĩ ndapeikuaai teri teve?

¹⁸ Penderexa oĩ va'eri ndapexai teve, pendeapyxa voi oĩ va'eri napendui teve? Napenema'endu'ai teve

¹⁹ cinco mil pe peteĩ nhiruĩ mbojape aipe'ã-pe'ã'i jave mbovy varai renyẽ tu ha'ykuie pemono'õ raka'e?

Ha'e kuery ombovai:

— Doze — he'i okuapy.

* ^{7:27} Judeu e'ỹ va'e kuery pe judeu kuery “Jagua kuery” he'i. Ha'e rami Jesus ijayvu ojerovia ete paa oexaxe vy. * ^{7:32} Mateus 15.29-31

- 20 — Ha'vy quatro mil pe sete mbojape aipe'ã-pe'ã'i jave mbovy ajaka renyê tu ha'ykue pemono'õ?
Ha'e kuery
— Sete — he'i okuapy.
- 21 Ha'e ramo Jesus aipoe'i:
— Ndapeikuaai teri teve?
Betsaida py ára revegua e'ÿ omongueraague
- 22 Ha'e gui ma Betsaida py ovaê. Ha'e ramo ixupe peteĩ ára revegua e'ÿ herua vy ojerurea opoko aguã re.
- 23 Ha'e ramo ára revegua e'ÿ po re Jesus ojopy vy oguerojepe'a tekoa gui. Ha'e gui hexa re oikyty guendry, ha'e hexe opoko vy oporandu:
— Rexa ma pa mba'emo?
24 Ha'e rã oma'ê vy ombovai:
— Aexa avakue va'eri vyvra merami uguata rã — he'i.
25 Ha'e ramo opoko ju. Ha'e ramo okuera vy opa mba'e oexa porã.
- 26 Ha'e vy Jesus aipoe'i imondovy:
— Tereo ke ndero py tekoa py revaê e'ÿ re.
Mateus 16.13-20; Lucas 9.18-21
- 27 Ha'e rire Jesus guemimbo'e kuery ogueraa Cesaréia de Filipe regua tekoa ikuai va'e katy. Tape rupi ooa rupi oporandu ha'e kuery pe:
— Marã ramigua aikoa rami tu heta va'e kuery oikuaa?
28 Ha'e kuery ombovai:
— João Batista. Ha'e rã amboae kuery ma “Elias” he'i. Ha'e rã amboae kuery ju ma “Peteĩ profeta” he'i rã ndevy — he'i okuapy.
- 29 Ha'e ramo oporanduve ju:
— Ha'vy peê kuery, marã ramigua aikoa pa peê peikuaa?
Pedro ombovai:
— Ndee ma Cristo — he'i.
- 30 Ha'e ramo Jesus aipoe'i avave rei pe nomombe'ui ranhe aguã.
Mateus 16.21-23; Lucas 9.22
- 31 Ha'e gui omboypy po rami ombo'e aguã:
— Ava ra'y ojeapo va'ekue oiko axy 'rãe opa mba'e py. Hexe opu'ã rei 'rã nhomongeta va'ety, sacerdote yvatekueve va'e ha'e kuaxia re nhombo'e va'ety kuery. Ojukaa 'rã. Ha'e rire mboapy araa py onhemboete ju 'rã.
- 32 Ha'e rami Jesus ijavyv vy onhemombe'u porã. Ha'e ramo Pedro ha'e ae'ia py oenoĩ vy ndojou porãia rami ijavyv.
- 33 Ha'e ramo Jesus ojere vy guemimbo'e kuery ikuai katy ju oma'ê. Ha'e vy Pedro pe ijavyv vy aipoe'i:
— Satanás, ejepe'a ke xea gui, mba'eta ndee ma Nhanderuede guigua nderekuaai, avakue guigua anho.
Mateus 16.24-28; Lucas 9.23-27
- 34 Ha'e gui ma guemimbo'e kuery oenoĩmba, heta va'e kuery guive. Ha'e kuery pe aipoe'i:
— Xerupive oikoxe va'e taexarai ojegui ae, togueraa ojeuepegua kuruxu, ha'e gui tou xerakykue.
- 35 Mba'eta nomanoxei ete va'e ma omokanh'y 'rã guekove. Ha'e rã xekáuxa ha'e ayvu porã káuxa omano va'e ma ogueraa jepe uka 'rã guekove.*
- 36 Mba'e 'rã tu avakue ojou, mba'emo yvy regua ha'e javi oguerekopa va'eri guekove ae omokanh'y vy?
- 37 Mba'e nunga 'rã tu ome'ê onhe'ê rekovia?
- 38 Mba'eta aÿgua kuery itavy rei ha'e ojevavyva rei va'e mbyte amongue ikuai vy xereroxĩ 'rã, ha'e xeavyva guive. Ha'e rami rire ha'e kuery ma Ava ra'y ojeapo va'ekue voi ogueroxĩ 'rã Nguu rexakã rupi ou vy, anjo iky'a e'ÿ va'e kuery reve.

9

- 1 Aipoe'ive ju:
— Anhetê aipoa'e pëvy: Apy peĩ va'e regua amongue napemanoi 'rã Nhanderuede po'akaa ojekuaa ouvy rã pexa e'ÿa ja, opo'akaa oexa uka jave.
Mateus 17.1-8; Lucas 9.28-36
- 2 Mboapy meme araa py Jesus ngupive ogueraa Pedro, Tiago ha'e João ha'e kuery ae'i. Peteĩ vyvty yvate va'e áry oo. Ha'e py ma guexakã py ojekuaa ha'e kuery renonde.
- 3 Ijao voi hexakãmba ha'e xiĩmba rei. Ao joia jipoi ha'e rami ojoi kuaa va'e.
- 4 Hexeve ojekuaa avi ho'amy Elias ha'e Moisés. Ha'e vy ijavyv okuapy Jesus reve.
5 Ha'e ramo Pedro aipoe'i:
— Orembo'ea, ha'eve apy nhaive aguã. Ha'e rami vy rojapo 'rã mboapy oo'i: peteĩ ma ndevy guarã, amboae ma Moisés pe, ha'e gui amboae ju ma Elias peguarã — he'i.
- 6 Oikuaa vy e'ÿ ijavyv, mba'eta ha'e kuery onhemondyipa.
7 Ha'e ramove peteĩ arai ou vy ojao'ipa. Ha'e va'e mbyte gui peteĩ ayvu onhendu:
— Peva'e ma Xera'y ayvu ete va'e. Pejapyxaka ijavyva re ae — he'i va'e.*

* 8:35 João 12.24-26; Apocalipse 2.10; 12.11

* 9:7 2 Pedro 1.16-18

⁸ Ha'e ramo ha'e kuery ovyvry rupi oma'ẽmba teĩ peteĩve ndoexavei hexeve. Oexa va'e Jesus anho.

Mateus 17.9-13

⁹ Yvyty áry gui ha'e kuery oguejy jogueruvy rã Jesus aipoe'i:

— Avave rei pe pemombe'u eme pexa va'ekue, Ava ra'y ojeapo va'ekue omanoague gui onhemboete ju e'ỹa ja — he'i.

¹⁰ Ha'e rami ijayvuague ha'e kuery omoĩ porã. Ha'e rami avi jomeme oporandu okuapy omanoague gui onhemboete ju 'rãa oikuaaxe vy.

¹¹ Oporandu avi okuapy Jesus pe:

— Mba'e re tu ha'vy kuaxia re nhombo'e va'ety kuery ijayvu okuapy Elias ranhe ou 'rãa re?

¹² Ombovai:

— Anhetẽ ae Elias ha'e ranhe ou vy opa mba'e omoĩmba porã ju 'rã. Ha'e rami avi Ava ra'y ojeapo va'ekue rekorã re ipara oinya py, mba'exa tu oĩ oiko axy ha'e ombojaru reia 'rãa rami?

¹³ Xee aipoa'e pëvy: Elias ou ae ma teĩ hekorã re ipara oinya rami vy hexe ha'e kuery ojapo okuapy oipotaa rami ae.*

Mateus 17.14-21; Lucas 9.37-43

¹⁴ Hemimbo'e kuery mboae ikuaiã py ovaẽ jogueruvy ramo heta avi ou ha'e py. Ha'e rã kuaxia re nhombo'e va'ety kuery ijayvu okuapy ha'e kuery reve.

¹⁵ Heta va'e kuery Jesus oexa vy onhemondyipa okuapy. Ha'e vy onhamba jogueruvy oxarura agua.

¹⁶ Ha'e ramo kuaxia re nhombo'e va'ety kuery pe Jesus oporandu:

— Mba'e nunga re tu pendeayvu ra'e ha'e kuery reve?

¹⁷ Ha'e gui heta va'e mbyte gui peteĩ aipoe'i:

— Porombo'ea, ndea py aru xera'y nhe'ẽ vai nomboayvui rã.

¹⁸ Mba'eta oikoa rupi oity xapy'a jepi 'rã. Ijuru ryjui ha'e haĩ jekyty, inhangai ma ovy. Ajerure teĩ neremimbo'e kuery oipe'a agua, ha'e kuery ndoipe'a kuaai — he'i.

¹⁹ Ha'e ramo Jesus aipoe'i:

— Peẽ pejerovia e'ỹ va'e, raka'e peve 'rã tu aiko pendereve? Raka'e peve 'rã tu rogueropo'aka? Eru ha'vy ava'i apy — he'i.

²⁰ Ha'e ramo ogueru. Ha'e gui ava'i Jesus oexa ramove nhe'ẽ ombovava ratã vyvoi. Ha'e vy vvy rupi ho'a vy ojere-jere oupy, ijuru ryjuipa guive.

²¹ Jesus oporandu kyrĩ va'e ru pe:

— Araka'e ma tu gui nunga oiko hexe?

Tuu ombovai:

— Kyrĩ'i guive.

²² Mbovykue rei e'ỹ ma tata py ha'e yy py oity ojokaxe vy. Ndevy pe ha'eve ri rã oremboaxy 'rãgue, orepytyvõ.

²³ Jesus ombovai:

— “Ha'eve ri rã” re va'e ty'y? Opa mba'e ndaxyi ajerovia va'e pe — he'i.

²⁴ Ha'e ramo kyrĩ va'e ru [hexay reve] oiapukai:

— Xee ajerovia. Xepytyvõ avi ajeroviave agua — he'i.

²⁵ Heta va'e kuery oupa rã Jesus oexa vy ijayvu atã nhe'ẽ vai pe:

— Nhe'ẽ nanhombayvui ha'e nanhombopyxai va'e, ejepe'a ke kyrĩ va'e gui, ejuve eme hexe — he'i.

²⁶ Ha'e ramo nhe'ẽ vai oiapukai reve ombovava ratã vy ojepe'a, ojea ovy he'õgue rami. Pavẽ rei “Omano” he'i okuapy.

²⁷ Ha'e rã Jesus ma ipo re ojopy vy ombovy ramo opu'ã ho'amy.

²⁸ Ha'e gui ma opy oike ma ramo hemimbo'e kuery oporandu ha'e kuery ae'ia py:

— Mba'e re tu ore ndoroipe'a kuaai ra'e anha?

²⁹ Ombovai:

— Ha'e va'e nunga ma nhanhembo'e [ha'e jakaru e'ỹ re nhandekuai] vy 'rãe jaip'e'a.

Mateus 17.22,23; Lucas 9.43b-45

³⁰ Ha'e kuery oje'oi vy oaxa Galiléia rupi. Jesus ndoipotai avave rei oikuaa oĩa,

³¹ mba'eta guemimbo'e kuery ombo'e vy aipoe'ia rami:

— Ava ra'y ojeapo va'ekue omboaxaa 'rã avakue po py, ha'e rã ha'e kuery ojuka 'rã. Ha'e gui mboapy araa py onhemboete ju 'rã omanoague gui — he'i.

³² Ha'e rã ha'e kuery ndoikuaai teĩ nda'ipy'a guaxui vy noporandui guive ha'e nunga re.

Mateus 18.1-5; Lucas 9.46-48

³³ Ha'e gui Cafarnaum katy ju ha'e kuery oje'oi. Opy Jesus oike vy oporandu guemimbo'e kuery pe:

— Mba'e nunga re tu pendeayvu ra'e tape rupi?

³⁴ Ha'e ramo ha'e kuery okyryĩ okuapy, mba'eta mava'e pa joegui yvateve 'rãa re tape rupi ijayvu rire.

³⁵ Ha'e ramo oguapy oiny vy oenoĩ doze-ve guemimbo'e kuery. Ha'e vy aipoe'i:

— Ha'e ranhexe va'e ma opyta 'rã takykue pavẽ rembiguairã — he'i.

³⁶ Ha'e gui peteĩ kyrĩ va'e ogueru vy omopu'ã heno'amy ha'e kuery mbyte. Oikuavã vy aipoe'i ha'e kuery pe:

* 9:13 Elias re ijayvu João Batista re ijayvu vy. Mateus 17.11-13

³⁷ — Amongue xerery rupi peteĩ kyrĩ va'e kova'e ramigua omovaẽ vy xee avi xemovaẽ. Ha'e xemovaẽ va'e ma xee anho e'ỹ xemovaẽ, xembouare avi omovaẽ.

Lucas 9.49,50

³⁸ Ha'e gui João aipoe'i:

— Orembo'ea, roexa kuri peteĩ ava nderery rupi anha oipe'a rã, nhanderupive e'ỹ oiko va'e. Ha'e ramo ndoroipe'a ukavei, nhanderupivegua e'ỹ ramo — he'i.

³⁹ Ha'e ramo Jesus ombovai:

— Nda'evei ndapeipe'a ukai aguã, mba'eta xerery rupi tembiapo porã ojapo va'e nda'ijavy vai 'rã xere.
⁴⁰ Mba'eta nhanderovaigua e'ỹ va'e ma nhanderupivegua ae.

⁴¹ Anhetẽ aipoa'e pëvy: Cristo pegua peiko ramo xerery rupi amongue peteĩ karo yy ri jepe pendeivy ome'ẽ rire ndojopy e'ỹi 'rã ojapogue repy.

Mateus 18.6-9; Lucas 17.1,2

⁴² — Ha'e rã kova'e kyrĩgue va'e regua ojeroviaa gui amongue oity 'rãgue py ha'eveve oityxe va'e ajuy re ita guaxu mba'emo mongu'ia ojokua pyre reve ye'ẽ mbyte py omombo va'e rire.

⁴³ Xapy'a rei rã ndepo ri ndererojevavy ramo ejaya, mba'eta ha'eveve ndepo rovaikue'i reve reikove aguã py reike aguã, ndepo jovaive reve tata ogue e'ỹ va'e py reo 'rãgue py.

⁴⁴ [Mba'eta ha'e py ma yxo nomanovei ma 'rã, neĩ tata voi ndoguevei ma 'rã.]

⁴⁵ Ha'e rami e'ỹ vy ndepy ri ndererojevavy ramo ejaya. Mba'eta ha'eveve ndepy rovaikue'i reve reikove aguã py reike aguã, ndepo jovaive reve tata ogue e'ỹ va'e py nemombo 'rãgue py.

⁴⁶ [Ha'e py ma nomanovei ma 'rã yxo, neĩ tata voi ndoguevei ma 'rã.]

⁴⁷ Xapy'a rei nderexa ri ndererojevavy ramo enoẽ. Mba'eta ha'eveve Nhanderue te po'akaa py peteĩ'i nderexa reve reike aguã, mokoĩve nderexa reve tata ogue e'ỹ va'e py nemombo 'rãgue py.

⁴⁸ Ha'e py ma nomanovei ma 'rã yxo, neĩ tata voi ndoguevei ma 'rã.*

Mateus 5.13; Lucas 14.34,35

⁴⁹ — Mba'eta peteĩ-teĩ tata rupi peaxa vy omoe'ẽ mbyre 'rã pendekuai.

⁵⁰ Juky ma iporã vaipa. Ha'e rã xapy'a rei nae'ëvei rire mba'exa 'rã tu he'ẽ ju? Peẽ kuery voi pendejee ae pereko 'rãgue juky, jomeme pendekuai porã aguã.

10

Mateus 19.1,2

¹ Jesus opu'ã vy oo ha'e gui Judéia rupi Jordão yakã rovaigua re. Teĩgue ju oĩa py heta va'e kuery ono'õ okuapy. Ha'e ramo ojapoaty rami vy ombo'e ju.

Mateus 19.3-9; Lucas 16.18

² Ha'e jave py fariseu kuery regua onhemboja jogueruvy vy oeko a'ã. Ha'e vyoporandu okuapy:

— Ha'eve ri nda'u ime kuery opoi aguã gua'yxy gui?

³ Ha'e ramo ha'e ju oporandu ha'e kuery pe:

— Mba'e tu Moisés ojapo uka pendeivy?

⁴ Ha'e kuery ombovai:

— Moisés ojapo uka raka'e kuaxia omendaague regua ombovaipa aguã, ha'e gui ma opoi aguã — he'i.

⁵ Ha'e ramo Jesus aipoe'i:

— Peneakã ratã ramo ha'e rami oea ipara va'e pejapo aguã.

⁶ Ha'e rã yvy itui ypy'i guive ma Nhanderue te omoingo ava ha'e kunha.*

⁷ Ha'e nunga rupi ava oea 'rã nguú ha'e oxy, [gua'yxy reve onhemoirũ aguã].*

⁸ Ha'e gui gua'yxy reve mokoĩ 'rãgue py peteĩ'i to'o ma ikuai. Ha'e rami vy mokoĩ ve'ỹ ikuai, peteĩ'i to'o ma.

⁹ Ha'e nunga rupi Nhanderue te omoirũ rire avave rei tomboja'o eme — he'i.*

¹⁰ Opy ikuai jave ixupe hemimbo'e kuery oporandu ju ha'e nunga re.

¹¹ Ha'e ramo aipoe'i:

— Gua'yxy gui ava opoi vy amboae re omenda va'e ma itavy gua'yxy ae pe.

¹² Ha'e rami ae ome gui kunha va'e opoi vy amboae re omenda va'e voi itavy avi.

Mateus 19.13-15; Lucas 18.15-17

¹³ Ha'e gui oĩa py oguerua kyrĩgue ha'e kuery re opo omoĩ aguã. Ha'e rã hemimbo'e kuery ma herua kuery pe ijavyv e te.

¹⁴ Jesus ha'e nunga oexa vy ndojou porã. Ha'e vy aipoe'i:

— Tove tou kyrĩgue'i xea py, pejoko eme, mba'eta peva'e ramigua'i peguarã ae Nhanderue te po'akaa.

¹⁵ Anhetẽ aipoa'e pëvy: Amongue kyrĩgue rami e'ỹ Nhanderue te po'akaa nomovaẽxei vy ndoikei 'rãe ha'e py — he'i.

¹⁶ Ha'e gui kyrĩgue oikuavã vy ha'e kuery re opo omoĩ ogueroayvu porã reve.

Mateus 19.16-22; Lucas 18.18-23

¹⁷ Ha'e gui tape rupi Jesus oo ju ma oiny rã onha ouvvy peteĩ ava ovaexĩ aguã. Guenapy'ã re oĩ vy oporandu:

— Porombo'ea ndereko porã va'e, mba'e nda'u ajapo 'rã tekove marã e'ỹ aupity aguã?

¹⁸ Jesus ombovai:

* 9:48 Isafás 66.24 * 10:6 Gênesis 1.27 * 10:7 Gênesis 2.24 * 10:9 1 Coríntios 7.10-16

— Mba'e re tu “Ndereko porã va'e”, 're xeivy? Avave rei ndaeko porãi peteĩ'i e'ỹ vy. Ha'e va'e ma Nhanderuete.

¹⁹ Reikuaa ae ma ojapo uka va'ekue: Ejojuka eme, ndetavy eme, nemonda eme, ndeapu eme, ejokore eme, emboete nderu ha'e ndexy — he'i.

²⁰ Ha'e ramo ava va'e ombovai:

— Porombo'ea, ha'e nunga ha'e javi ajapopa ae ma, xekyrĩ guive.

²¹ Ha'e rã Jesus hexe oma'ẽ vy oavyu. Ha'e vy aipoe'i:

— Peteĩ mba'e ma oata teri ndevy. Tereo evendepa rereko va'e ha'e javi, ha'e hepykue eme'ẽmba iporiaukue'i pe. Ha'e vy 'rãe rereko ovarave va'e yva re. Ha'e gui mae eju xerupive — he'i.*

²² Ha'e rami ijavyuague ava va'e ndojou porãi vy iporiau ovy, oguerokopa va'e vy.

Mateus 19.23-30; Lucas 18.24-30

²³ Ha'e gui Jesus ovy'ryrã oma'ẽ vy aipoe'i guemimbo'e kuery pe:

— Haxy ete oguerokopa va'e kuery Nhanderuete po'akaa py oike aguã — he'i.

²⁴ Ha'e rami ijavyu rã hemimbo'e kuery oendu vy onhemondyipa. Ha'e ramo Jesus aipoe'ive ju:

— Xera'y kuery, haxy ete mba'emo ogueroko va'e re rive ojerovia va'e oike aguã Nhanderuete po'akaa py.

²⁵ Nhanderuete po'akaa py oguerokopa va'e oikea gui ndaxyive camelo oaxa aguã juu nambi kua rupi — he'i.*

²⁶ Ha'e ramo ha'e kuery onhemondyipave vy aipoe'i jomeme:

— Marã ramigua 'rã tu ha'vy oo jepe?

²⁷ Ha'e kuery re Jesus oma'ẽ vy aipoe'i:

— Ha'e nunga ma avakue pe haxy ete, ha'e rã Nhanderuete pe ma any, mba'eta Nhanderuete pe mba'eve ndaxyi — he'i.

²⁸ Ha'e ramo Pedro aipoe'i:

— Ore kuery ma opa mba'e roejapa va'ekue nderupive orekuai aguã.

²⁹ Jesus ombovai ju:

— Anhetẽ aipoa'e pëvy: Ha'e javi xekáuxa ha'e avyu porã káuxa ngoo oeja va'e, gyyvy, gueindy, oxy, nguu, gua'y e'ỹ vy omba'ety,

³⁰ ha'e kuery ma a'ỹ voi ojou retave 'rã: gyyvyrã, gueindyrã, oxyrã, gua'y'rã ha'e omba'etyrã ojou 'rã oiko axy reve, ha'e gui yvy pyau re ju oupity 'rã tekove marã e'ỹ.

³¹ Ha'e rami avi tenonde pyguare heta opyta 'rã takykue py, ha'e rã takykue pyguare ma opyta 'rã tenonde py.

Mateus 20.17-19; Lucas 18.31-33

³² Ha'e gui ma Jerusalém katy oguata oje'oivy. Jesus ma guemimbo'e kuery renonde oo oiny. Ha'e rã ha'e kuery ma onhemondyi ha'e okyje rei reve hakykue oje'oi. Ha'e gui ma ha'e kuery ae'i ikuai aguã py Jesus ogueraa doze guemimbo'e kuery. Ha'e vy ha'e kuery pe omombe'u porãve hexe oiko va'erã. Ha'e vy aipoe'i:

³³ — Pendu ke. A'ỹ ma jaj'e'oi nhainy Jerusalém katy. Ha'e py ma Ava ra'y ojeapo va'ekue ojopy ukua 'rã sacerdote yvatekueve va'e ha'e kuaxia re nhombo'e va'ety kuery pe. Ha'e kuery ojuka uka vy omboaxa 'rã amboae regua kuery pe.

³⁴ Ha'e kuery ojavyky rei ha'e onyvõmba 'rã hexe, ha'e gui oinupãmba ma rire ojuka 'rã. Ha'e gui mboapy araa py onhemboete ju 'rã.

Mateus 20.20-28

³⁵ Ha'e ramo Jesus re onhemboja Zebedeu ra'y kuery Tiago ha'e João. Ha'e vy aipoe'i:

— Orembo'ea, ejapo orevy rojerure taa.

³⁶ Ha'e ramo oporandu ha'e kuery pe:

— Mba'e tu peipota ajapo pëvy?

³⁷ Ha'e kuery ombovai:

— Nerexakã reve reju vy oremoĩ 'rãgue peteĩ ndeaxu e'ỹa re, ha'e rã amboae ma ndeaxua re — he'i.

³⁸ Jesus ombovai:

— Ndapeikuaai mba'e nunga re pa pejerurea. Peẽ nda'u pey'u 'rã ri karo xee ay'u aguã va'e gui? Penhemongarai uka 'rã ri xee anhemongarai ukua rami?*

³⁹ Ha'e kuery aipoe'i:

— Ha'e've.

Jesus aipoe'i ju:

— Pey'u 'rãe karo xee ay'u aguã gui, ha'e penhemongarai uka avi 'rã xee anhemongarai ukua rami.

⁴⁰ Ha'e rã xeaxu e'ỹa re ha'e xeaxua re oguapy va'erã ma xee e'ỹ 'rã aiporavo. Ha'e rami aguã ma ogueroko katu pyre pe anho — he'i.*

⁴¹ Ha'e nunga hemimbo'e kuery mboae dez ikuai va'e ma ha'e nunga oendu vy ijavyu rei okuapy Tiago ha'e João re.

⁴² Ha'e ramo Jesus ojea py oenoĩmba vy aipoe'i:

* 10:21 Romanos 3.19,20; Tiago 2.10 * 10:25 1 Timóteo 6.6-10 * 10:38 “Anhemongarai” ha'e “Karo gui ay'u” he'ia ma oiko axy aguã re ijavyu vy. * 10:40 Lucas 22.24-30; Filipenses 2.3-8; 1 Pedro 5.3

— Yvy jave regua huvixa kuery ma joguereko atã 'rã, ha'e kuery va'e regua yvatekueve ipo'aka 'rã joe, peikuaa rami

⁴³ Ha'e rã pende kuery ma ha'e rami e'ÿ 'rã pendekuai. Ha'e rami 'rãgue py peẽ kuery va'e regua joegui yvatevexe va'e ma penerembiguai rami toiko.

⁴⁴ Peneranhexe va'e ma peiko 'rã pavẽ rembiguai.

⁴⁵ Mba'eta Ava ra'y ojeapo va'ekue eteve voi jojokuai aguã e'ÿ ou, ha'e rã tembiguai rami oiko aguã, ha'e guekove ome'ẽ aguã heta rekovia, ogueraa jepe aguã.

Mateus 20.29-34; Lucas 18.35-43

⁴⁶ Ha'e vy Jericó tetã py ranhe ovaẽ. Ha'e gui tetã gui guemimbo'e kuery ha'e heta va'e kuery reve oje'oi jave peteĩ ava ára revegua e'ÿ oguapy oiny tape yvýry. Timeu ra'y Bartimeu hery va'e mba'emo re ojerurea py oĩ.

⁴⁷ Ha'e va'e ma Jesus Nazaré pygua va'e ou oinya oendu vy ojapukai reve aipoe'i:

— Davi ramymino Jesus, xemboaxy ke — he'i.

⁴⁸ Ha'e ramo heta ijayvu okyriri aguã. Ha'e rami teĩ ojapukaive tema. Ha'e vy aipoe'i:

— Davi ramymino, xemboaxy ke.

⁴⁹ Ha'e ramo Jesus opyta vy aipoe'i:

— Penoĩ.

Ha'e ramo oenoĩa ára revegua e'ÿ. Ha'e vy aipoe'i:

— Ndepy'a guaxu, epu'ã ke, mba'eta nerenoĩ.

⁵⁰ Ha'e ramo capa omboi vy opo reve opu'ã ovy Jesus-a katy.

⁵¹ Jesus oporandu:

— Mba'e tu reipota ajapo ndevy?

Ára revegua e'ÿ ombovai:

— Xee ma aexaxe — he'i.

⁵² Ha'e ramo Jesus aipoe'i:

— Tereo, rejeroviaa ndereraa jepe ma.

Ha'e ramove ava va'e oexa ju vy Jesus rakykue oo tape rupi.

11

Mateus 21.1-17; Lucas 19.28-40; João 12.12-19

¹ Jerusalém py ha'e kuery ovaẽ rai'i ma. Ha'e vy Oliveiras vyvity re Betfagé ha'e Betânia tekoe rupi oaxa vy Jesus omondouka mokoĩ guemimbo'e.

² Ha'e vy aipoe'i:

— Tapeo tenonde peva'e tekoe oĩ va'e py. Ha'e py pevaẽ vyve pejou 'rã peteĩ mburika'i ixã va'e, hi'áry avave rei noĩai teri va'e. Pejora vy ke peru.

³ Xapy'a rei amongue oporandu 'rã mba'e re pa pejoraa re. Ha'e rami rã aipopeje: “Senhor ma oipota, ha'e gui ogueru ruka voi ju 'rã apy”, peje 'rã.

⁴ Ha'e ramo oje'oi vy tape py ojou mburika'i ixã va'e peteĩ kora rokẽ rexei. Ha'e vy ojora.

⁵ Ha'e py ikuai va'e regua ijayvu:

— Mba'erã tu pejora mburika'i'?

⁶ Ha'e rã hemimbo'e kuery ma Jesus aipoe'iague rami ombovai. Ha'e ramo ogueraa uka.

⁷ Ha'e gui mburika'i ogueru ma vy hi'áry omoĩ oao. Ha'e ramo Jesus oĩ hi'áry.

⁸ Tape rupi heta oipyo okuapy oao, ha'e rã amboae kuery ma jai rogue mba'ety yvýry gui ojaya va'ekue onhono.

⁹ Ha'e gui henonde ha'e hakykue oo va'e kuery ojapukai vy aipoe'i:

— Iporã ete! Ta'ima'endu'a porãa Senhor rery rupi ou va'e re!*

¹⁰ Ima'endu'a porãmby toiko opo'akaa rupi ovaẽ ouvy va'e, nhaneramoĩ Davi rami ipo'aka va'e. Toguerovy'aa yvatevea py! — he'i oje'oivy.

¹¹ Ha'e gui Jerusalém py ovaẽ ma vy templo py oike. Ha'e vy oma'ẽmba ma rire ka'aru ma ramo Betânia katy ju oo doze guemimbo'e kuery reve.

Mateus 21.18-22

¹² Ko'ẽ jevy Betânia gui oo vy inhembyayi.

¹³ Mombyry gui oexa peteĩ figo'y hogue va'e. Ha'e gui oo oexa aguã mba'emo ojou rivyvyi gui. Ha'e rami teĩ yvyra hi'áia py ovaẽ vy mba'eva ndojouĩ hogue e'ÿ vy, mba'eta figo oikoa ára e'ÿ rã.

¹⁴ Ha'e ramo Jesus aipoe'i:

— Aÿ gui ma to'uave eme nde'a — he'i. Ha'e ramo hemimbo'e kuery oendu.*

Mateus 21.12-17; Lucas 19.45-48

¹⁵ Ha'e gui Jerusalém tetã py ovaẽ. Templo py oike vy omoẽmba mba'emo vendea ha'e mba'emo joguaa kuery ha'e py ikuai va'ekue. Oity peráta mboekoviaa kuery mesa, ha'e apyaxu vendea kuery renda guive.

¹⁶ Templo rupi avave rei pe ndogueraa ukai mba'emo ryrú.

¹⁷ Ha'e vy nhomongeta vy aipoe'i:

* 11:9 Salmo 118.25-26 * 11:14 Figo'y pe Jesus ijayvu vai oikuaa uka aguã judeu kuery ndojeroviaa re Nhandueruete ombopaga taa (Lucas 13.5-9).

— Ipara oiny “Xero ma onhembo'e atyrã oĩ” 'ea va'eri peẽ ma pejapo imonda va'e onhemiaty rami — he'i.*

¹⁸ Ha'e nunga ma sacerdote yvatekueve va'e ha'e kuaxia re nhombo'e va'ety kuery oendu. Ha'e vy oikuaa pota okuapy marã rami vy pa ojuka aguã. Ha'e rami teĩ okyje guive, mba'eta ombo'e rã heta va'e kuery ha'e javi ojou porã.

¹⁹ Ha'e gui ka'aru ma ramo Jesus ha'e hemimbo'e kuery oje'oi ju tetã gui.

Ojerovia va'e po'akaa re ijayvua

²⁰ Ha'e gui ko'ẽgue aje'ive'i reve ha'e kuery ojevy jogueruvy vy oexa rã figo'y ipiru ma ra'e hapo ha'e javi. ²¹ Ha'e ramo Pedro ima'endu'a vy aipoe'i:

— Orembo'ea, ema'ẽ. Figo'y ndeayvu vaiague nda ipiru ra'e — he'i.

²² Ha'e ramo Jesus ombovai:

— Pejerovia tema Nhanderuede re.

²³ Mba'eta anhetẽ aipoa'e pẽvy: Amongue peva'e vvyty pe “Epu'ã ke, enhemombo ye'ẽ py”, he'i vy opy'a py oexa'ã rei 'rãgue py ijayvuague oiko 'rãa oguerovia ete ramo ha'ekue rami ae 'rã oiko ixupe.

²⁴ Ha'e nunga rupi aipoa'e pẽvy: Penhembo'e vy pejerurea pejopy maa re pejerovia ramo ha'ekue rami ae 'rã oiko pẽvy.

²⁵ Ha'e gui penhembo'e vy xapy'a rei amongue reve mba'emo pereko vy peperdoa ranhe, Penderu yva pygua pejavyague avi operdoa aguã.

²⁶ [Ha'e rã ndapejoperdoai ramo Penderu yva pygua voi ndoperdoai 'rã pejavyague.]*

Mateus 21.23-27; Lucas 20.1-8

²⁷ Ha'e gui Jerusalém katy ojevy ju jogueravy. Ha'e vy templo rupi oiko jave oĩa py ou sacerdote yvatekueve va'e, kuaxia re nhombo'e va'ety ha'e nhomongetaa kuery.

²⁸ Ha'e vy oporandu ixupe:

— Mba'e nunga po'akaa rupi tu rejapo ha'e nunga? Mava'e tu nembopo'aka guĩ rami rejapo aguã?

²⁹ Jesus ombovai:

— Xee voi aporandu ta pẽvy. Pemombe'u ke. Ha'e ramo xee voi amombe'u 'rã pẽvy mba'e nunga po'akaa rupi pa ha'e nunga ajapoa.

³⁰ João nhomongaraia pa yva guigua tyrã avakue guigua raka'e? Pembovai ke — he'i.

³¹ Ha'e ramo ha'e kuery jomeme ranhe ijayvu okuapy:

— Xapy'a rei “Yva gui”, ja'e ramo ha'e ombovai ju 'rã: “Mba'e re tu ha'vy ndapejeroviai hexe?” he'i 'rã nhandevy.

³² Ha'e rã “Avakue gui”, ja'e aguã nda'evei avi — he'i okuapy, mba'eta ha'e kuery okyje heta va'e kuery gui, João anhetẽ profeta oikoa pavẽ oikuaa ramo.

³³ Ha'e rami vy aipoe'i Jesus pe:

— Ore ma ndoroikuaii.

Ha'e ramo Jesus ju ombovai:

— Xee voi namombe'ui 'rã pẽvy mava'e po'akaa rupi pa ha'e nunga ajapo aikovyva.

12

Mateus 21.33-46; Lucas 20.9-19

¹ Ha'e rire ha'e kuery pe Jesus omombe'u peteĩ ayvu mba'emo re ombojoja vy.

— Peteĩ ava onhotỹ uva. Ojapo ikora yvate va'erã, ojapo guive uva oumbiri atyrã ha'e torre, ha'e gui ma opena va'erã kuery po py omboaxa. Ha'e vy oo guekoa gui.

² — Omono'õa ára ovaẽ ramo opena va'e kuerya py ombou peteĩ guembiguai, ixupegua uva'a ome'ẽ okuapy aguã.

³ Ha'e rami teĩ ha'e kuery ojopy vy oinupã ha'e ojavyky rei ma rire omondouka rive ju.

⁴ — Amboae guembiguai ju ombou. Ha'e ramo ha'e va'e voi oinupãba inhakã rupi, ojavyky rei.

⁵ — Amboae ju ombou. Ha'e va'e ma ojuka. Amboae kuery heta ombou avi. Ha'e kuery oinupãba amongue, ha'e rã amboae kuery ma ojuka.

⁶ — Peteĩ'i ma oguereko teri, gua'y oayvuve va'e anho. Ha'e va'e ma ija ombou vy “Xera'y ramo omboete 'rã ko”, he'i.

⁷ — Ha'e ramo omba'eapo va'e kuery aipoe'i joupe-upe: “Peva'e ma uvaty jarã ete. Jajuka na, uvaty nhandevy ju opyta aguã”, he'i okuapy.

⁸ Ha'e rami vy ojopy vy ojuka, ha'e gui uvaty gui omombo mombyry'i.

⁹ — Mba'e nda'u uvaty ja ojapo 'rã? Ha'e va'e ou vy omomba 'rã opena va'ekue, ha'e rã amboae kuery pe ju 'rã omboaxa uvaty.

¹⁰ Ha'vy peẽ ndaperoayvui teri teve po rami ipara va'e: “Oo apoa kuery ita ndoipotai va'ekue opyta omboeteve pyrã, tenonde pyguarã.

¹¹ Ha'e nunga ma Senhor gui ae oiko, ha'e jaexa rã iporã ete va'e”, he'iague?*

* 11:17 Isaiás 56.7, Jeremias 7.11 * 11:26 Tiago 1.6; Mateus 6.14,15 * 12:11 Salmo 118.22-23

¹² Ha'e rami rā ha'e kuery ojopyxe teĩ heta va'e kuery gui okyje, mba'eta ha'e kuery re ae ri ijayvua oikuaa. Ha'e rami vy ojepe'apa jogueravy.

Mateus 22.15-22; Lucas 20.20-26

¹³ Ha'e ramo Jesus oĩa py omboua fariseu regua ha'e Herodes-a katygua kuery, ayvu py ojopy aguã.

¹⁴ Ha'e va'e kuery ovaẽmba vy aipoe'i ixupe:

— Porombo'ea, ore roikuaa ndee anhetẽ va'ea, ha'e ndereikuaa potai 'rā mava'e paa re, mba'eta nerema'ẽi avakue yvatea re, ha'e anhetẽ rupi renhombo'e Nhanderueite oipota va'e re. Ha'evea rami ri nda'u César pe nhamẽẽ imposto repy, tyrã pa any? Ha'eve tyrã pa nda'evei nhamẽẽ aguã?

¹⁵ Jesus oikuaa ha'e kuery ijayvu rivea. Ha'e vy ombovai:

— Mba'e re tu xereko a'ãxe ri? Peru ha'vy peteĩ hatã'i va'e, taexa — he'i.

¹⁶ Ha'e ramo ha'e kuery ogueru ramo ha'e ju oporandu:

— Mava'e ra'angaa ha'e mava'e rery tu kova'e re oĩ?

Ha'e kuery ombovai:

— César mba'e rima.

¹⁷ Ha'e ramo Jesus aipoe'i:

— César mba'e ri rā peme'ẽ ha'vy César pe. Ha'e rā Nhanderueite pegua ma Nhanderueite pe ae 'rā peme'ẽ — he'i. Ha'e ramo onhemondyipa ijayvua gui.

Mateus 22.23-33; Lucas 20.27-38

¹⁸ Jesus oĩa py ou saduceu kuery va'e regua. Ha'e va'e kuery ma ndogueroviai nhandemboete ju 'rãa. Ha'e gui oporandu okuapy ixupe:

¹⁹ — Porombo'ea, Moisés oejá raka'e po rami ipara va'e: “Ta'y e'ỹ re tyke'y omano ramo tyvy ju 'rã omenda imeve'ỹ va'e re, omano va'ekue ra'yra' va'ekue oguereko aguã”, he'i va'ekue.*

²⁰ Ha'e gui ikuai raka'e sete joegua. Tujave va'e ma omenda va'ekue ri ta'y e'ỹ re omano.

²¹ Ha'e ramo tyvy ju omenda imeve'ỹ va'e re teĩ ha'e va'e voi omano ta'y e'ỹ re. Ha'e gui mboapya ma ha'ekue rami ae ju.

²² Ha'e rami py sete-ve ndata'yi. Ha'e gui mae ma kunha va'e avi omano.

²³ Ha'e gui onhemboetepa jevya ára ha'e kuery onhemboete ju rā mava'e ete'i 'rã oiko kunha va'e me? Mba'eta kunha va'e re sete-ve omenda rire — he'i.

²⁴ Ha'e ramo Jesus ombovai:

— Pejavy, mba'eta ipara re oĩa neĩ Nhanderueite po'akaa peikuaa e'ỹ vy.

²⁵ Mba'eta omanoague gui onhemboete ju va'ekue ma nomendavei 'rã, neĩ nanhomomendavei 'rã. Anjo kuery yva pygua rami 'rã ikuai.

²⁶ Ha'e gui omano va'ekue onhemboetepa ju 'rãa re ndaperoayvui teri teve Moisés ombopara va'ekue? Mba'eta yvyrá yky hendy va'e mbyte gui Nhanderueite aipoe'i ixupe: “Xee ma Abraão, Isaque ha'e Jacó Ruete aiko”, he'i raka'e.*

²⁷ Ha'e ma omanogue Ruete e'ỹ oiko, ha'e rã oikove va'e Ruete. Ha'e nunga rupi pejavy vaipa.*

Mateus 22.34-40; Lucas 10.25-28

²⁸ Ou avi peteĩ kuaxia re nhombo'e va'ety. Ha'e va'e ma amboae kuery reve Jesus ijayvu ha'e ombovai porã rã oendu ma vy oporandu:

— Mba'e nunga ojapo uka pyre tu pavẽ gui yvateve va'e?

²⁹ Jesus ombovai:

— Yvateve va'e ma pova'e: “Israel kuery, pendu ke: Senhor Penderueite ma peteĩ'i.*

³⁰ Reayvu 'rã Nderueite ndepy'a ha'e javi py, ndereko, ne'arandua ha'e nembaraetea ha'e javi py guive” he'iague.*

³¹ Ha'e va'e rire ma po rami ju oĩ: “Reayvu 'rã neirũ kuery ndee ae rejeayvua rami” he'iague. Amboae ojapo uka pyre pova'e gui yvateve va'e ma jipoi — he'i.*

³² Ha'e ramo kuaxia re nhombo'e va'ety aipoe'i:

— Porombo'ea, ha'evea rami ndeayvu anhetẽ rupi meme. Mba'eta Nhanderueite ma peteĩ'i, amboae jipoi ha'e e'ỹ vy.*

³³ Ha'e gui Nhanderueite jayvu 'rã nhandepy'a, nhane'arandua ha'e nhandembaraetea ha'e javi py. Ha'e nhaneirũ kuery ma nhande ae jajeayvua rami 'rã jayvu. Ha'e nunga jajapo aguã ma ixupe mymba nhamẽ'ẽa gui ha'eveve — he'i.

³⁴ Ha'e rami o'arandua rupi ombovai rã Jesus oendu vy aipoe'i:

— Ndee ma mombyry e'ỹ reiko Nhanderueite po'akaa gui — he'i.

Ha'e va'e rire avave rei nda'ipy'a guaxuavei ixupe oporandu aguã mba'eve re.

Mateus 22.41-46; Lucas 20.41-44

³⁵ Ha'e gui templo py Jesus nhombo'e vy oporandu:

— Mba'exa nda'u kuaxia re nhombo'e va'ety kuery Cristo reko re ijayvu vy aipoe'i Davi ramymino oikoa rami?

* 12:19 Deuteronomio 25.5 * 12:26 Êxodo 3.6 * 12:27 1 Coríntios 6.14; 15.12-28; 1 Tessalonicenses 4.13-18 * 12:29 Deuteronomio 6.4 * 12:30 Deuteronomio 6.5 * 12:31 Levítico 19.18 * 12:32 Deuteronomio 4.35

³⁶ Mba'eta Davi eteve voi Nhe'ê Ky'a E'y'gui aipoe'i: "Senhor aipoe'i xe-Senhor pe: 'Eguapy ke aiporu kuaa regua re, ndepy guýry nderovaigua kuery amoï e'ýa ja', he'i va'ekue."*

³⁷ Ha'e rami vy Davi voi "Senhor" he'i iuxupe. Mba'exa tu ha'vy hamymino avi ri oiko? — he'i.*

Ha'e rami ijayvu rã heta va'e kuery oenduxe vai.

Mateus 23.1-7,14; Lucas 20.45-47

³⁸ Ha'e gui nhombo'e vy aipoe'i ju:

— Penheangu ke lei re nhombo'e va'ety kuery gui, mba'eta ha'e kuery ma ao puku py 'rã onhemonde, ha'e tetã mbyte rupi ikuai vy oipota 'rã oxarura porãa.

³⁹ Onhembo'eaty py ha'e ngaru oia py ha'e kuery oguapy 'rã tenda tenondeve oï va'e py anho.

⁴⁰ Ha'e rami avi ha'e kuery ogueraa rivepa 'rã imeve'y' va'e kuery ro gui oipota va'e, ha'e onhemboeko porãxe vy onhembo'e are 'rã. Ha'e nunga rupi ha'e kuery opaga raxa ete 'rã.

Lucas 21.1-4

⁴¹ Ha'e gui templo py Jesus oguapy oiny hyru perãta omoïaty oï va'e rexei'i. Ha'e vy oexa heta va'e kuery perãta ome'ê vy hyru py omoï rã. Oguerekopa va'e kuery ome'ê retave.

⁴² Peteï imeve'y' va'e iporiaukue'i oexa avi mokoï hatã'i va'e ndovareive'i va'e omoï rã.

⁴³ Ha'e rami vy guemimbo'e kuery oenoïmba vy aipoe'i:

— Anhetê aipoa'e pëvy: Peva'e imeve'y' va'e ma iporiaukue'ia ramive ma perãta me'êa kuery ha'e javi gui omoï retave hyru py.

⁴⁴ Mba'eta amboae kuery ma hembyrekue gui rive ome'ê. Ha'e rã peva'e ma iporiaukue'ia ramive mba'emo'i ojogua aguã oguereko va'ekue ha'e javi'i omoï.

13

Mateus 24.1,2; Lucas 21.5-9

¹ Templo gui Jesus oë ovy jave Peteï hemimbo'e aipoe'i:

— Orembo'ea, ne'ema'ê ave ita tuvixakue gui anho nda ojapo raka'e!

² Jesus ombovai:

— Aý pexa pa kova'e oo tuvixa va'e? Oitypaa ramo Peteïve ita ndopytai 'rã amboae ita áry.

Mateus 24.3-14; Lucas 21.7-19

³ Ha'e gui templo rexei Oliveiras vyvty py Jesus oguapy oiny jave Pedro, Tiago, João ha'e André oporandu ha'e kuery ae'ia py:

⁴ — Emombe'u na orevy: Araka'e 'rã tu ha'e nunga oiko? Mba'e nunga tu oiko 'rã roikuaa aguã ha'e nunga ha'e javi ojeupity rai'i maa?

⁵ Jesus ombovai:

— Penheangu ke ha'vy penhembotavy uka e'y'aguã avave rei pe.

⁶ Mba'eta heta 'rã ou xerery rupi "Xee ae ma Cristo" he'i rive va'e. Ha'e rami vy heta 'rã ombotavy.

⁷ Penhemondyi eme guive "Joe opu'ã", 'ea rã pendu vy, neï "Joe opu'ã 'rã", 'ea teï. Ha'e nunga ranhe 'rãe oiko teï opa aguã e'y'teri.

Mba'eta Peteï-teï tetã pygua kuery opu'ã 'rã amboae tetã pygua kuery re, ha'e Peteï-teï regua amboae regua re 'rã opu'ã. Amongue henda py oiko 'rã vvy ryryi ha'e karuai. Ha'e nunga ma jypy'i ojexavaia aguã.

⁹ — Peiko kuaa pota ke, mba'eta pendejopy ukua 'rã, ha'e pendereraa 'rã nhomboavyua kuery ha'e onhembo'eaty pygua ruvixa pe penemboavyu uka aguã. Xekáuxa penenupãa ha'e pendereraa 'rã pejexa uka aguã huvixa ha'e huvixave renonde. Ha'e ramo ha'e kuery pe pemombe'u 'rã avyu.

¹⁰ Mba'eta jypy'i ha'e javi regua pe avyu porã omombe'ua 'rãe.

¹¹ Ha'e nunga rupi pendereraa ha'e pendejopy ukua teï pendejopy'a eta rei eme pendeayvurã re. Ha'e va'e hora avyu py ae pendeayvurã ome'êa va'e rupi 'rã pendeayvu. Mba'eta pendejegui ae e'y' 'rã pendeayvu, ha'e rã Nhe'ê Ky'a E'y'gui.

¹² — Tyke'y kuery ojopy uka 'rã guvyv ojukaa aguã, ha'e tuu kuery ojopy uka 'rã gua'y kuery. Ta'y kuery ngu kuery re opu'ã vy ojuka uka avi 'rã.

¹³ Xerery káuxa pavê nda'ija'evei 'rã pendere. Ha'e rã opa peve oï atã va'e ma oo jepe 'rã.

Mateus 24.15-28; Lucas 21.20-24

¹⁴ — Ha'e gui pexa 'rã ojegarupy nhomokanhyarã ha'eve e'ýa py oï rã. (Tove ogueroavyu va'e toikuaa.) Ha'e ramo Judéia pygua kuery tonhamba vyvty re.*

¹⁵ Ngoo áry ikuai va'e toguejy eme, toike eme ngopy gui mba'emo oguenoë aguã,

¹⁶ ha'e mba'ety rupi ikuai va'e voi tojevy eme oparito re.

¹⁷ Ha'e va'e ára nda'evei 'rã imemby ryru'i ha'e imemby kambu va'e pe.

¹⁸ Pejerure ke ha'e nunga oiko e'y'aguã yro'y py.

¹⁹ Mba'eta ha'e va'e ára ojexavaia ete 'rã. Ha'e rami ete ndoikoi teri jypy'i Nhanderuete vvy onhono guive aý peve, ha'e gui ha'e va'e rire ndoikovei 'rã ha'ekue rami.

²⁰ Senhor ha'e va'e ára nomomba voi va'e rire avave rei ndoo jepei 'rãgue. Va'eri ojeupe guarã oiporavo va'ekue re oma'ê vy omomba voi 'rã ha'e va'e ára.

²¹ — Ha'e gui pëvy amongue aipoe'i 'rã: "Ma'ê, apy ma Cristo", ha'e e'y' vvy "Pe py ma hiny", he'i ramo perovia eme,

* 12:36 Salmo 110.1 * 12:37 Romanos 1.3,4 * 13:14 Daniel 9.27, 11.31

²² mba'eta oiko 'rãe Cristo ramigua ha'e profeta ramigua kuery rive. Ha'e kuery voi ojapo 'rã hexa pyrã ha'e nhomondyipaarã ombotavy aguã Nhanderuete rembiporavo kuery, ha'eve va'e rire.

²³ Peiko kuaa pota ke, opa mba'e gui xee romonheangu ma voi.

Mateus 24.29-31; Lucas 21.25-28

²⁴ — Ha'e va'e ára ojexavaia rire'ive kuaray pytũmba 'rã, jaxy voi naendyvei 'rã.

²⁵ Jaxy-tata ho'apa 'rã yva gui, ha'e yva re ipo'akakueve ikuai va'e voi oitypaa 'rã.*

²⁶ Ha'e gui oexa pavẽ 'rã Ava ra'y ojeapo va'ekue arai rupi ou rã opo'aka ha'e guexakãmba reve.*

²⁷ Ha'e vy ojeupegua anjo kuery omondouka 'rã irundy henda yvytu oipejua rupi hambiporavo kuery omboaty heruvy aguã, yvy apy guive yva apy peve.

Mateus 24.32-44; Lucas 21.29-36

²⁸ — Peikuua pota ke figo'y re mba'emo ambojoja vy amombe'u rã. Mba'eta hakã ipyaupa ha'e hokypa rã pexa vy peikuua 'rã ára pyau ovaẽ rai'i maa.

²⁹ Ha'e rami ae avi peẽ kuery voi xeayvuague oiko rã pexa vy peikuua 'rã xe'ára ovaẽ rai'i maa, okẽ py ae.

³⁰ Anhetẽ aipoa'e pẽvy: Aỹgua kuery opa e'ỹ re ha'e nunga ha'e javi oiko 'rã.

³¹ Opa 'rã yva ha'e yvy. Ha'e rã xeayvuague ma ndoaxa rivei 'rã.

³² Ha'e va'e ára ha'e hora raka'e paa avave rei ndoikuai, neĩ anjo kuery yva pygua, neĩ xee Ta'y voi ndaikuai. Xeru anho'i oikuua.

³³ — Peiko kuaa pota, peiko katu [ha'e penhembo'e] guive, mba'eta ndapeikuai raka'e pa ha'e va'e ára ovaẽ 'rãa.

³⁴ Ha'e nunga oiko 'rã peteĩ ava guetõa gui oo va'e rami. Ngoo oea vy guembiguai kuery pe opena uka 'rã. Peteĩ-teĩ pe ojapo uka 'rã mba'emo. Ha'e rã okẽ rarõa pe ma oikuua pota uka 'rã.

³⁵ Peẽ voi peiko kuaa pota 'rãgue, mba'eta ndapeikuai raka'e pa hoo va'e ou 'rãa. Ka'aru tyrã pa pytũ mbyte jave, uru ojapukai jave tyrã pa ko'ẽmba'i jave paa voi ndapeikuai,

³⁶ mba'eta ovaẽ xapy'a vy peke reve pendejou ramo nda'evei 'rã.

³⁷ Pendevy aipoa'ea rami ma aipoa'e pavẽ pe: Peiko kuaa pota ke.

14

Mateus 26.1-5; Lucas 22.1,2

¹ Mokoĩ ára'i ma oata ovaẽ aguã Páscoa ha'e ngaru mbojape imbovua revegua e'ỹ va'e ára. Ha'e gui sacerdot yvatekueve va'e ha'e lei re nhombo'e va'ety kuery oikuua pota okuapy nhemi rupi ojopy vy ojuka aguã.

² Mba'eta aipoe'i okuapy: “Ngaru oiko jave ma nda'evei, heta va'e kuery opu'ãmba e'ỹ aguã.”

Mateus 26.6-13; João 12.1-8

³ Betânia tetã py Jesus oĩ mesa py, Simão lepra ogueroko va'ekue ro py. Oĩa py ou peteĩ kunha heakuã porã va'e ryrũ ita xii va'e guĩgua ogueru va'e. Heakuã va'e ma hepyve va'e, nardo anho'i tynyẽ. Ha'e gui ma hyru oipe'a vy Jesus akã re onhoẽ heakuã porã va'e.

⁴ Amongue ikuai va'e ojou vai vy jomeme aipoe'i:

— Mba'erã tu ojavyky heakuã porã va'e?

⁵ Mba'eta ha'e nunga ma trezentos raxa ára repy re ovende va'e rire, iporiaukue'i pe ome'ẽ aguã — he'i. Ha'e vy ijayvu rei okuapy hexe.

⁶ Ha'e ramo Jesus aipoe'i:

— Tove ri. Mba'e re tu pendeayvu rei kunha va'e re? Mba'emo porã ete ojapo xevy.

⁷ Mba'eta iporiaukue'i ma pendereve riae 'rã ikuai. Peipytyvõxea hora rei ha'eve peipytyvõ aguã. Ha'e rã xee ma ndaiko riaei 'rã pendereve.

⁸ Kunha va'e ma ha'eve va'e ojapo. Amano e'ỹ mbove voi omoeakuã xerete xenhono porã rã guarã.

⁹ Anhetẽ aipoa'e pẽvy: Mamo rã rã yvy jave re ayvu porã omombe'ua py omombe'ua avi 'rã kunha va'e ojapo va'ekue, hexe ima'endu'aa vy.

Mateus 26.14-16; Lucas 22.3-6

¹⁰ Hemimbo'e kuery doze va'e regua Judas Iscariotes hery va'e ma sacerdot yvatekueve va'ea py oo, Jesus ojopy uka aguã.

¹¹ Ha'e kuery ha'e nunga oendu vy oguerovy'a rei, ha'e vy ixupe ijayvu perãta ome'ẽ aguã re. Ha'e ramo Judas oikuua pota ha'eve jave ojopy uka aguã re.

Mateus 26.17-19; Lucas 22.7-13

¹² Ha'e gui ovaẽ ngaru mbojape imbovua revegua e'ỹ ijypya ára, Páscoa pyguarã vexa'i ojuka aguã. Ha'e ramo hemimbo'e kuery oporandu Jesus pe:

— Mamo tu reipotã roo roguereko katu Páscoa ára py jakaru aguã?

¹³ Ha'e ramo mokoĩ guemimbo'e omondouka vy aipoe'i:

— Tapeo ha'vy tetã re. Ha'e py penerovaexĩ 'rã peteĩ ava yryru ogueraa va'e.

¹⁴ Tapeo hupive, ha'e mamo rã oikẽa py hoo va'e pe aipopeje: “Orembo'ea oporandu uka kuri: ‘Mamo pa opy ja'o oĩ Páscoa ára xeremimbo'e kuery reve rokaru aguã?’ he'i uka”, peje.

¹⁵ Ha'e ramo pendevy pe oexa uka 'rã peteĩ opy ja'o tuvixa va'e opa mba'e oĩmba ma voia. Ha'e py 'rãe pereko katu — he'i.

¹⁶ Ha'e ramo hemimbo'e kuery tetã re oo vy Jesus aipoe'iague rami ae ojou. Ha'e rami vy oguereko katu Páscoa py okaru okuapy aguã.

Mateus 26.20-25

¹⁷ Ka'aru'i ma jave oo doze guemimbo'e kuery reve.

¹⁸ Ha'e gui mesa py okaru okuapy jave Jesus aipoe'i:

— Anhetê aipoa'e pëvy: Peê kuery xereve pekaru va'e regua peteĩ xejopy uka nhemi 'rã — he'i.

¹⁹ Ha'e ramo ha'e kuery iporiaupa vy jorire-rire aipoe'i:

— Xee teve?

²⁰ Ha'e ramo ombovai:

— Xeremimbo'e kuery doze pendekuai va'e regua peteĩ, xereve hy'a py opo'ê oiny va'e ae.

²¹ Mba'eta Ava ra'y ojeapo va'ekue ma hekorã ipara oĩa rami ae 'rã oo. Ha'e rã ijopy uka nhemiare pe ma nda'evei ete 'rã. Ixupe ma ha'eveve 'rãgue ndoikoi ma voi va'e rire.

Mateus 26.26-30; Lucas 22.16-20,39

²² Ha'e kuery okaru teri reve Jesus ojopy peteĩ mbojape. Nhanderuete oguerovy'a ma vy oi'pe'ã-pe'ã vy ome'ê ha'e kuery pe. Ha'e vy aipoe'i:

— Pejopy, kova'e ma xerete — he'i.

²³ Ha'e rire karo ju ojopy. Oguerovy'a ma vy ombojoja guemimbo'e kuery pe. Ha'e rã ha'e javive oy'u.

²⁴ Ha'e gui aipoe'i:

— Kova'e ma xereve guarã [ipyau va'e] ajapo va'e regua, heta re vy xeruguy amoë uka ta va'e rupi.

²⁵ Anhetê aipoa'e pëvy: Uva rykue xee nday'uvei ranhe 'rã, Nhanderuete po'akaa py ipyau va'e ju ay'u e'ÿa ja — he'i.*

²⁶ Ha'e gui peteĩ mboraei oporaei rire Oliveiras vyvity katy oje'oi.

Mateus 26.31-35; Lucas 22.31-34; João 13.36-38

²⁷ Ha'e gui Jesus aipoe'i:

— Peê kuery ha'e javive xerejapa 'rã, mba'eta ipara oiny: “Ajuka uka 'rã vexa'i re opena va'e. Ha'e ramo vexa'i kuery oaĩmba 'rã”, he'iague.*

²⁸ Ha'e gui anhemboete ju ma rire peneronderã aa 'rã Galiléia katy — he'i.

²⁹ Pedro aipoe'i:

— Ha'e kuery ha'e javive nderejapa teĩ xee any 'rã.

³⁰ Jesus ombovai:

— Anhetê aipoa'e ndevy: Kova'e pyavyve uru mokoĩgue oja'pukai e'ÿ mbove, mboapykue 'rã renhemombe'u xekuaa e'ÿ va'e rami — he'i.

³¹ Ha'e rami teĩ Pedro aipoe'i:

— Ndereve xejukaa ta teĩ ae ma peteĩve henda py ndaxeayvui 'rã roikuaa e'ÿa rami — he'i. Hemimbo'e kuery ha'e javive ha'e rami meme ijayvu.

Mateus 26.36-46; Lucas 22.39-46

³² Ha'e gui Jesus oo peteĩ henda Getsêmani 'epy va'e py. Ha'e py ovaë vy aipoe'i guemimbo'e kuery pe:

— Peguapy apy, xee anhembo'e ainya ja — he'i.

³³ Ngupive ogueraa Pedro, Tiago ha'e João. Ha'e vy oendu nda'eveia ha'e ojexavai etea.

³⁴ Ha'e vy aipoe'i:

— Xepy'a re aendu nda'evei etea xejuka ta va'e rami. Pepyta apy peikuaa pota aguã — he'i.

³⁵ Ojepe'ave'ia py ngova omovaë yvy re. Ha'e vy ojerure ha'eve ramo ha'e va'e hora oaxa aguã.

³⁶ Ha'e vy aipoe'i:

— Xeru, xeru, opa mba'e ndevy ha'eve. Xegui oaxa 'rãgue kova'e karo. Ha'e rami avi xee aipota va'e ma toiko eme, ndee reipota va'e ae toiko — he'i.

³⁷ Ha'e gui ojey vy oexa rã okepa okuapy. Ha'e rã aipoe'i Pedro pe:

— Simão, reke ri ty'y? Neĩ peteĩ hora voi teve nda'evei reikuaa pota aguã?

³⁸ Peikuaa pota, ha'e penhembo'e pendereko a'ãa py pejeity ukapa e'ÿ aguã. Penenhe'ê ma anhetê ikyre'ÿ, ha'e rã pendero'o re ma penekangy — he'i.

³⁹ Ha'e gui ojepe'a ju vy onhembo'e. Ha'ekue'i rupi ae ju ijayvu.

⁴⁰ Ojey vy oexa rã okepa ju, hopeyí vaipa vy. Ha'e vy ha'e kuery pe ijayvu rã nombovai kuaai.

⁴¹ Ha'e gui ma mboapykuaa ma ou vy aipoe'i:

— Peke teri va'e ty'y pejupy? Ha'eve ma. Ovaë ma hora heko vai va'e kuery po py Ava ra'y ojeapo va'ekue omboaxaa aguã.

⁴² Pepu'ã ke, jaje'oi. Pee ma ou oiny xejopy ukaarã.

Mateus 26.47-56; Lucas 22.47-53; João 18.1-11

⁴³ Are'ÿ'i re Jesus ijayvu teri reve ovaë peteĩ hemimbo'e kuery doze ikuai va'e regua, Judas hery va'e. Hexeve heta avi ou kyxe ha'e yvyra revegua kuery. Sacerdote yvatekueve va'e, lei re nhombo'e va'ety ha'e nhomongetaa kuerya gui ou va'ekue.

⁴⁴ Mba'eta ha'e kuery pe ijopy ukaa aipoe'i va'ekue: “Hova py avyu va'e ae 'rã pejopy, ha'e gui peipokuaa reve peraa”, he'i va'ekue.

⁴⁵ Ha'ekue rami vy ovaë vyve Jesus re onhemboja. Ha'e vy

* 14:25 1 Corintios 11.23-26 * 14:27 Zacarias 13.7

— Xembo'ea — he'i vy oavyu.

⁴⁶ Ha'e ramo ojopy vy ojokua okuapy.

⁴⁷ Ha'e rami rã ha'e py petei hi'ã va'e regua okyxe oekyi vy omboguai sacerdote yvateve va'e rembiguai nambi rupi, ha'e vy omboi.

⁴⁸ Ha'e gui Jesus aipoe'i ha'e kuery pe:

— Peë kuery kyxe ha'e yvyra reve ri ty'y peju jojuka rive va'ety rami xejopy aguã?

⁴⁹ Ko'ë nhavõ templo py peë kuery pendekuaia rupi aiko vy anhomb'o'e teĩ ndaxepopy va'ekue. Ha'e rami avi guĩ nunga oiko ipara oiny va'e ojeupitypa aguã — he'i.

⁵⁰ Ha'e rami rã hemimbo'e kuery ha'e javive ojepe'apa ojava vy.

Kunumi Jesus rakykue ooague

⁵¹ Hakykue oo petei kunumi ajukue puku py onheovã va'e. Ha'e rã ojopya ta ramo

⁵² ajukue puku gui ojepe'a vy ojava avi ovy ipire rei reve.

Mateus 26.57-68; Lucas 22.63-71

⁵³ Ha'e gui ma sacerdote yvateve va'ea py ogueraa Jesus. Ha'e py ijatypa sacerdote yvatekueve va'e, nhomongetaa ha'e kuaxia re nhomb'o'e va'ety kuery ha'e javive.*

⁵⁴ Ha'e ramia ja hakykue Pedro oo avi mombry'i rupi, sacerdote yvateve va'e roka peve. Ha'e vy tembiguai kuery reve ojape'e oiny tata yvÿry.

⁵⁵ Ha'e gui sacerdote yvatekueve va'e ha'e nhomboavyu va'ety kuery Jesus ojuka ukaxe vy ojouxu hekokue momb'e'uarã, teĩ ndojou.

⁵⁶ Mba'eta Jesus re heta ijavyu rive va'eri ha'ekue rami e'y'-e'y' guive.

⁵⁷ Ha'e rami vy amongue opu'ã vy hekokue ramigua omombe'u vy aipoe'i:

⁵⁸ — Ore roendu aipoe'i rã: “Xee ambovaipa 'rã kova'e templo avakue ojapo va'ekue, ha'e mboapy araa py amboae ju 'rã ajapo avakue rembiapo e'y'”, he'i va'ekue.

⁵⁹ Ha'e rami teĩ ijavyuague rami e'y' ae tema ijavyu.

⁶⁰ Ha'e gui ha'e kuery mbyte py sacerdote yvateve va'e opu'ã vy oporandu Jesus pe:

— Nerebovai va'e ty'y ndere avyua ramo?

⁶¹ Ha'e rã Jesus okyrirĩ, mba'eve nde'i.

Ha'e gui sacerdote yvateve va'e oporandu ve ju:

— Ndee ma nhi'ã Nhanderuete ijavyu porãmby Ra'y Cristo?

⁶² Ha'e ramo Jesus ombovai:

— Xee ae ha'e. Ha'e gui pexa 'rã Ipo'akapa va'e oiporu kuaa regua re Ava ra'y ojeapo va'ekue oguapy ha'e

yva gui ou ramo arai rupi — he'i.*

⁶³ Ha'e ramo sacerdote yvateve va'e omondoro oao reve aipoe'i:

— Mba'erã tu jaipotave hekokue momb'e'uarã?

⁶⁴ Pendu ae ma ijavyu vai rã. Mba'exa tu peikuaa?

Ha'e javive ombovai:

— Jajuka aguã rami ijavyu — he'i okuapy.

⁶⁵ Ha'e gui hexe amongue onyvõ, ha'e hova onhovã vy ounga guive. Ha'e vy aipoe'i:

— Emombe'u ke mava'e pa neunga ra'e — he'i. Xondaro kuery voi oipetepa okuapy.

Mateus 26.69-75; Lucas 22.55-62; João 18.15-18,25-27

⁶⁶ Ha'e ramia ja oka yvy reia py Pedro oia py ou petei kunha'i sacerdote yvateve va'e omongakuaa va'ekue.

⁶⁷ Pedro ojape'e oiny rã oexa vy oma'ë porã, ha'e vy aipoe'i:

— Ndee voi teve reiko Jesus Nazaré pygua va'e reve.

⁶⁸ Ha'e ramo onhenhomi vy aipoe'i:

— Xee ndaikuaai, neĩ ndeayvua voi naendu kuaai — he'i. Ha'e vy oëve oka katy. [Ha'e jave uru ojavukai nhendu.]

⁶⁹ Ha'e gui teĩgue ju omongakuaa pyre oexa vy amboae kuery pe

— Peva'e voi ha'e kuery regua — he'i.

⁷⁰ Ha'e ramo onhenhomi ju.

Ha'e ririve ha'e py ikuai va'e aipoe'i Pedro pe:

— Anhetë teve ndee ha'e kuery regua, mba'eta ndee voi Galiléia pygua.

⁷¹ Ha'e ramo ijavyu vaikue, oura guive:

— Xee tu ndaikuaai rima ava pendeayvua! — he'i.

⁷² Ha'e ramove mokoĩguea ma uru ojavukai nhendu.

Ha'e ramo Pedro ima'endu'a Jesus aipoe'iaque re: “Kuri mokoĩgue uru ojavukai e'y' mbove ndee mboapykue 'rã renhemombe'u xekuaa e'y'a rami”, he'iaque re. Ha'e rã onhemboaxy vy ojae'o vaipa.

15

Mateus 27.1,2,11-26; Lucas 23.1-7,13-25; João 18.28-19.16

¹ Ko'ë aje'ive'i reve sacerdote yvatekueve va'e jogueroavyu, nhomongetaa kuery, kuaxia re nhomb'o'e va'ety ha'e nhomboavyua kuery ha'e javi reve. Ha'e vy Jesus ojokua uka vy Pilatos-a py ju ogueraa.

² Ha'e gui ma Pilatos oporandu iuxpe:

* 14:53 João 18.12-14,19-24 * 14:62 Daniel 7.13-14

- Ndee ma nhi'ã judeu kuery pegua huvixave?
Jesus ombovai:
— Ndee ae ma aipo're — he'i.
- ³ Ha'e ramo sacerdote yvatekueve va'e opa marã ijavyu hexe.
⁴ Ha'e gui teĩgue ju Pilatos oporandu:
— Nereombovai 'rã ri ty'y? Ne'endu po rami ete ndere ayvu ou.
- ⁵ Ha'e rami teĩ Jesus nombovai ae. Ha'e ramo Pilatos onhemondy vaipa.
⁶ Ha'e gui ngaru oikoa ára nhavõ huvixa opoi jepi 'rã petei nhuã py oĩ va'e regua, heta va'e kuery ojerurea va'e rei.
⁷ Peteĩ õi nhuã py Barrabás hery va'e, oirũ kuery reve joe opu'ã vy jojukaague py.
⁸ Ha'e gui heta va'e kuery ou vy huvixa pe ojerure okuapy jepiaty rami ojapo aguã.
⁹ Ha'e ramo Pilatos oporandu:
— Peipota pa apoi judeu kuery pegua huvixave? — he'i,
¹⁰ mba'eta oikuaa sacerdote yvatekueve va'e ija'e e'y vy rive ipo py omboxaague.
¹¹ Ha'e ramo ha'e kuery ombo'e heta va'e kuery Barrabás re ojerure okuapy aguã.
¹² Ha'e rami rã Pilatos oporandu:
— Mba'e 'rã tu ha'vy ajapo “Judeu kuery pegua huvixave” pejea re?
¹³ Ha'e ramo ha'e kuery ojapukai vy
— Emoĩ kuruxu re! — he'i okuapy.
¹⁴ Ha'e rã Pilatos aipoe'i:
— Mba'e nunga py tu ojapo vai raka'e?
Ha'e rã ha'e kuery ojapukaive rei:
— Emoĩ kuruxu re! — he'i okuapy.
¹⁵ Ha'e rami rã Pilatos heta va'e kuery ombovy'axe vy opoi Barrabás, ha'e rã Jesus ma oinupã uka rire omboxa kuruxu re omoĩ aguã.
Mateus 27.27-31
¹⁶ Ha'e gui ma huvixa ro guaxu py ju xondaro kuery ogueraa. Ha'e py ijatypa xondaro kuery ha'e javi.
¹⁷ Ha'e rami vy ajukue púrpura guigua py omonhemonde, ha'e juu gui petei coroa ramigua ojapo vy omoĩ inhakã re.
¹⁸ Ha'e vy aipoe'i:
— Iporã ete judeu kuery pegua huvixave! — he'i okuapy.
¹⁹ Takua py oinupã inhakã rupi, hexe onyvõ, ha'e guenapy'ã re oĩ vy omboete.*
²⁰ Ojavyky rei ma rire ajukue púrpura guigua omboi vy ijao py ae ju omonhemonde. Ha'e gui oka katy ogueraa kuruxu re omoĩ aguã.
Mateus 27.32; Lucas 23.26
²¹ Ha'e va'e jave petei oaxa ovy mba'ety gui ou va'ekue, Cirene pygua Simão hery va'e, Alexandre ha'e Ruffo ru. Ha'e va'e pe ma ogueraa uka okuapy kuruxu.
Mateus 27.33-44; Lucas 23.33-43; João 19.17-24
²² Ha'e gui ma Gólgota, “Akãgue renda” 'epy va'e katy ogueraa Jesus.
²³ Ixupe ome'ẽ vinho mirra revegua teĩ ndoy'ui.
²⁴ Ha'e gui omoĩ kuruxu re, ha'e ijao omboja 'o-ja' o jomeme. Oexa okuapy xortea mba'e pa petei-teĩ ogueraa 'rãa oikuaaxe vy.
²⁵ Nove hora jave kuruxu re omoĩa.
²⁶ Hi'áry oupi imoiny ipara va'e hexe ijavyua: “Judeu kuery pegua huvixave”, he'ia.
²⁷ Kuruxu mboae re hexeve omoĩ avi mokoĩ imonda va'e: ijaxu e'yã re petei omoĩ, ha'e rã amboae ma ijaxua re.
²⁸ [Ha'e rami ojeupity ipara “Heko vai va'e kuery reve oguerkoa” he'iague.]
²⁹ Oaxa oje'oivy va'e ijavyu rei hexe. Oakã ombovava-vava vy aipoe'i:
— Ndee templo rembovaipa rire mboapy araa pyve ju rejapo 'rã va'ekue,
³⁰ ejereraa jepe ha'vy ndee ae kuruxu gui reguejy vy — he'i okuapy.
³¹ Ha'e rami ae avi kuaxia re nhombo'e va'ety kuery reve sacerdote yvatekueve va'e ojojai rei vy aipoe'i:
— Amboae kuery ogueraa jepe va'eri ha'e ae ndojereraa jepe kuaai.
³² Tove Israel kuery pegua huvixave Cristo toguejy kuruxu gui, jaexa vy jajerovia aguã — he'i okuapy. Hexeve kuruxu re omoĩ mbyre kuery voi ojojai rei.
Mateus 27.45-56; Lucas 23.44-49; João 19.25-30
³³ Kuaray mbyte jave pytũmba yvy jave re, kuaray ojero'a puku peve.
³⁴ Ha'e gui kuaray ojero'a puku jave Jesus ojapukai atã:
— Eloí, Eloí, lámá sabactãni? — he'i, “Xeruete, Xeruete, mba'e re tu xereja?” he'ia.*
³⁵ Ha'e py ikuai va'e regua ha'e nunga oendu vy aipoe'i:
— Ne'endu, Elias rima oenoĩ — he'i okuapy.
³⁶ Ha'e rami vy petei ha'e kuery va'e regua onha vy vinagre py petei esponja omoaký, ha'e takua apy re omovaẽ oy'u aguã. Ha'e vy aipoe'i:

* 15:19 João 19.2,3 * 15:34 Salmo 22.1

— Tove, tajaexa Elias pa ou ra'e omboguejy aguã — he'i.

³⁷ Ha'e gui ma Jesus onhendu atã vy omano.

³⁸ Ha'e ramo henda iky'a e'ÿ va'e ropy ajukue okê regua oĩ va'e oxoro mbyte rupi, yvate gui yvy peve.

³⁹ Ha'e rami omano ramo kuruxu rexe'i xondaro ruvixa hi'ãi va'e oexa vy aipoe'i:

— Anhetê ae ra'e peva'e ava ma Nhanderueté Ra'y — he'i.

⁴⁰ Ha'e py ikuai avi amongue kunhague mombyr'i gui oma'ê okuapy va'e. Ha'e kuery regua ma Maria Madalena, Tiago kyríve va'e ha'e José xy Maria, ha'e gui Salomé.

⁴¹ Ha'e kuery ma Galiléia rupi Jesus oiko jave hupive ikuai va'ekue oipytyvõa rupi. Ha'e kuery reve hetave ju hupive oje'oi va'ekue Jerusalém katy.

Mateus 27.57-61; Lucas 23.50-55; João 19.38-42

⁴² Ha'e va'e ára ma sábado pyguarã mba'emo oguereko katupaa aguã ára. Ha'e nunga rupi ka'aru jave ⁴³ ou peteĩ Arimatéia pygua José hery va'e, nhomongeta va'ety kuery regua omboetevepy, Nhanderueté po'akaa ojekuaa aguã oarõ oikovy va'e. Ha'e va'e ma Pilatos-a py oo vy ojerure Jesus retekue re.

⁴⁴ Ha'e ramo Pilatos ma Jesus omano ma ra'ea omombe'u rã oendu vy onhemondyĩ. Ha'e rami vy xondaro ruvixa oenõ vy ixupe oporandu aje'i ma pa omano ra'ea re.

⁴⁵ Xondaro ruvixa omombe'u rã oikuaa porã rire hetekue ogueraa uka José pe.

⁴⁶ Ha'e ramo José ma kuruxu gui hetekue omboguejy vy onhovã peteĩ ajukue puku xiĩ porã va'e ojogua va'ekue py. Ha'e vy onhono porã peteĩ tuparã itaova re ojo'o pyre py, ha'e peteĩ ita ju ombojere hokê omboty aguã.

⁴⁷ Ha'e ramia ja Maria Madalena ha'e Maria José xy oexa pota ho'amy oikuaa aguã mamõ pa onhono porã ra'ea.

16

Mateus 28.1-8; Lucas 24.1-10; João 20.1-10

¹ Sábado ára oaxa rire Maria Madalena, Tiago xy Maria ha'e Salomé ojogua heakuã porã va'e, oje'oi vy hetekue omoeakuã aguã.

² Ha'e gui ko'ẽmba'i jave semana ijypya ára kuaray oẽ ouvy jave oje'oi hupa katy.

³ Joupe-upe aipoe'i jogueravy:

— Mava'e nda'u hupa rokê gui oipe'a 'rã ita jaike aguã? — he'i.

⁴ Ha'e gui ha'e kuery oma'ẽ vy oexa ita tuvixa va'eri ombojerea ma ra'ea.

⁵ Ha'e rami vy ikuia py oike vy peteĩ kunumi va'e oexa onhemondea xiĩmba va'e, oiporu kuaa regua re oguapy oiny rã. Ha'e va'e ma ha'e kuery oexa xapy'a vy okyje okuapy.

⁶ Ha'e ramo ava va'e aipoe'i:

— Pekyje eme. Peka pekuapy kuruxu re omoĩ mbyre Jesus Nazaré pygua va'e. Ha'e va'e ma onhemboete ju ma, noĩvei ma apy. Pema'ẽ ha'vy ituiague py.

⁷ Ha'e gui ma tapeo hemimbo'e kuery ha'e Pedro pe aipopeje: “Galiléia katy Jesus oo 'rã penerenonderã. Ha'e py ma pexa 'rã aipoe'iaague rami”, peje.

⁸ Ha'e gui itakua gui oẽ vy onhamba jogueravy onhemondyipa ha'e okyje reve. Okyje vy avave rei pe nomombe'ui ranhe.

João 20.11-18

⁹ Semana ijypy'ia ára aje'ive Jesus onhemboete ju rire Maria Madalena pe ranhe ojexa uka, ixugui sete anha oipe'aague va'e pe.

¹⁰ Ha'e ramo kunha va'e oo vy Jesus irũ kuery pe omombe'u. Ha'e kuery ma ojae'o ha'e iporiaupa teri vy

¹¹ ndoguerovia ranhe oikove jevya, kunha pe ojexa ukaague omombe'u rã oendu va'eri.

Lucas 24.13-35

¹² Ha'e rire Jesus amboae rami ojexa uka mokoĩ ha'e kuery regua tetã rovai katy oo va'e pe.

¹³ Ha'e rami rire ha'e kuery ojeyvy vy amboae kuery pe omombe'u teĩ ha'e kuery ndoguerovia.

Ayvu porã omombe'ua aguã re ijayvua

¹⁴ Ha'e rire guemimbo'e kuery onze-ve pe ju Jesus ojexa uka, mesa py ikuai jave. Ha'e vy ha'e kuery pe ijayvu ndogueroviaague ha'e inhakã ratãa re, mba'eta hexaare kuery “Onhemboete ju ma”, he'i rã oendu teĩ ndoguerovia rire.

¹⁵ Ha'e gui aipoe'i avi:

— Tapeo opa rupi, yvy jave re ikuai va'e ha'e javive pe pemombe'u ayvu porã.*

¹⁶ Ha'e ramo oguerovia vy onhemongarai uka va'e oo jepe 'rã. Ha'e rã ndoguerovia va'e ma ombopagaa 'rã.

¹⁷ Ojerovia va'e kuery ombopo'akaa 'rã po ramigua hexa pyrã ojapo aguã. Xerery rupi oipe'a 'rã anha, ha'e ayvu mboae py ijayvu 'rã.

¹⁸ Ojopy 'rã mboi, ha'e veneno oy'u teĩ mba'eve ndoikoi 'rã. Imba'eaxy va'e kuery re opoko ramo okuera 'rã guive.

Lucas 24.50,51; Atos 1.6-11

¹⁹ Ha'e kuery reve Senhor Jesus ijayvupa ma rire heraa yva re. Ha'e gui ma Nhanderueté oiporu kuaa regua re oguapy oiny.

* 16:15 Mateus 28.18-20; Lucas 24.44-49; João 20.21; Atos 1.6-8

²⁰ Ha'e ramo hemimbo'e kuery oje'oi vy opa rupi omombe'u ayvu. Senhor voi oipytyvõ hexa pyrã ojapoa py, ha'e kuery ayvu omombe'ua rupi anhetẽ memea oikuaa uka aguã.

Lucas ayvu porã ombopara va'ekue Lucas ayvu porã ombopara va'ekue

Lucas ma poropoanoa ha'e apóstolo Paulo hirũ raka'e. Jesus Cristo yva re ju oo rire Lucas mokoĩ kuaxia ombopara raka'e. Jypygua ma kova'e, Jesus rekoke oĩa. Ha'e gui amboae ma apóstolo kuery rembiapokue oĩa Atos 'epy va'e ju. Atos omboypya py Lucas aipoe'i: "Jypygua kuaxia ndevy Teófilo ambopara va'ekue ma amombe'u aguã Jesus ojapo va'ekue ha'e nhombo'eague ha'e javi, yvate heraa ára peve" he'i va'ekue (Atos 1.1-2a).

Lucas ma heta ombopara Jesus mba'emo re ombojoja reve nhombo'eague. "Ava ra'y ojeapo va'ekue ou ojou ha'e ogueraa jepe aguã okanhy va'ekue" (19.10). "Okany va'ekue" he'ia py ma nhande kuery re ae ijayvu vy, amboae henda py ipara oinya rami: "Nhande kuery ha'e javi nhakanhymba javy vexa'i rami, peteĩ-teĩ jajepe'a va'ekue tape gui. Ha'e ramo hexe ma Senhor omoĩ nhande kuery ha'e javive reko vaiaty" (Isaías 53.6). Ha'e nunga rupi nhande kuery re ae Jesus ombojoja vy omombe'u raka'e vexa'i okanhy va'e, peráta hatã'i va'e okanhy va'e ha'e ta'y okanhy va'e (capítulo 15). Nhande kuery rekaa rupi Jesus ou raka'e, nhandereko vaiaty gui nhandereraa jepe aguã. Nhanderue nhandemboaxy ete vy Gua'y Jesus ombou raka'e nhandereraa jepe aguã, mba'eta Gua'y re nhandereko vaiaty ha'e javi omoĩ raka'e nhanderekovia opaga aguã.

Ijayvu ypyague

¹ Heta ma ikuai ore kuery mbyte rupi mba'emo oiko va'ekue mboparaare.

² Ha'e kuery ombopara jypy'i guive hexaare ha'e ayvu mombe'ua kuery orevy ijayvuague rami vy.

³ Ha'e rami ae avi xeruvixa Teófilo, xee voi jypy'i guive ha'e nunga ha'e javi aikuaa porã rire a'y ambopara porãve ndevy jorire-rire opyta porã aguã,

⁴ nembo'eague reikuaa aguã anhetẽ etea.*

Zacarias ha'e Isabel re ijayvua

⁵ Ha'e gui Judéa pygua huvixave Herodes oĩ jave oiko peteĩ sacerdote Zacarias hery va'e, Abias ramymino kuery regua. Ta'yxy ma Arão ramymino Isabel hery va'e.

⁶ Ha'e kuery ma Nhanderue renonde heko porã va'e ikuai, Senhor ijayvua ha'e ojapo uka va'e ha'e javi ojapo vy.

⁷ Ta'y va'e'y guive, mba'eta Isabel imemby va'erã e'y, ha'e mokoive ikakuaakue meme.

João Batista itui'aguã omombe'ua ma voiague

⁸ Ha'e gui Zacarias ma Nhanderue renonde rupi omba'eapo oikovy sacerdote reko rami vy, xortea oexaa rupi oiporavao rire.

⁹ Ha'e vy sacerdote kuery reko rami vy oiko Senhor pegua henda iky'a e'y va'e py heakuã porã va'e oapy aguã.

¹⁰ Ha'e ramia ja heta va'e kuery ma oka py ikuai onhembo'e okuapya py.

¹¹ Ha'e gui ixupe ojexa uka peteĩ anjo Senhor-a guigua, altar heakuã va'e rapyaty oiporu kuaa regua re.

¹² Zacarias oexa vy onhemondy vaipa, okyje guive.

¹³ Ha'e rã anjo aipoe'i ixupe:

— Zacarias, ekyje eme. Oendua ma rejerurea. Ha'e nunga rupi a'y ndera'yxy Isabel oikuavã'i 'rã ndera'y, ha'e rã remboery 'rã João.

¹⁴ Ha'e va'e ma rerovy'a vaipa 'rã, ha'e heta 'rã ovy'a oiko'iague oendu vy.

¹⁵ Ha'e ma ombovatapy 'rã oiko Senhor renonde, ndoy'ui 'rã vinho, neĩ iro va'e. Hexe Nhe'ẽ Ky'a E'y anho 'rã oĩ, ixy oguereko'ia ára guive.

¹⁶ Ha'e ojapo 'rã Israel kuery heta ojeko rerova aguã rami Senhor Nguete re.

¹⁷ Ha'e oo 'rã Senhor renonderã, Elías rami inhe'ẽ ha'e ipo'aka va'e vy, ojapo aguã tuu kuery opy'a py gua'y kuery oayvu, ha'e onhe'ẽ rendu e'y va'ekue heko porã va'e ju ikuai aguã rami, ha'e rami vy peteĩ regua oguereko katu aguã Senhor peguarã — he'i.

¹⁸ Ha'e gui Zacarias oporandu anjo pe:

— Mba'exa tu aikuaa ta ha'e nunga? Mba'eta xee ma xetuja'i ma, ha'e xera'yxy voi guaimi'i ma.

¹⁹ Anjo ombovai:

— Xee ma Gabriel, Nhanderue renonde aiko va'e. Ha'e ae xembou ndevy mba'emo porã amombe'ua aguã.

²⁰ Ha'e rami teĩ xeayvua ndererovia rire nandeyvuẽvei 'rã, nda'evevei 'rã ndeayvu aguã ha'e nunga ojeupity e'ya ja, mba'eta ojeupity 'rã oa'angaague py ae — he'i.

²¹ Ha'e ramia ja heta va'e kuery oarõ okuapy Zacarias. Ha'e kuery onhemondyipa, henda iky'a e'y va'e py oiko are rã.

²² Ha'e gui ha'e oẽ vy nda'evevei ijayvu aguã. Ha'e ramo aikuaa okuapy henda iky'a e'y va'e py mba'emo oexa ra'eague. Okuã py rive omombe'u, nda'ijayvuẽvei vy.

²³ Ha'e gui guembiaporã va'ekue ojapopa ma vy oo ju ngoo katy.

* 1:4 Atos 1.1,2

Isabel ovy'a vaipa oikovyague

²⁴ Ha'e rire ma ta'yxy Isabel oguereko'i ma vy ndojexa ukavei petei nhirui jaxy re. Ha'e vy aipoe'i:

²⁵ — Ha'e rami Senhor ojapo xezy, xere oma'ê vy, amboae kuery ndaxejou vaivei aguã.

Jesus oiko aguã omombe'u ma voiague

²⁶ Mboapy meme jaxya py ma Galiléia vvy re Nhanderuete ombou anjo Gabriel Nazaré tetã py.

²⁷ Ha'e py oiko petei kunhatai omenda va'erã petei ava Davi ramymino José hery va'e re. Kunhatai rery ma Maria.*

²⁸ Ha'e va'e oia py anjo oike vy aipoe'i:

— Temimboaxy ete evy'a ke, ndereve Senhor oi ramo — he'i.

²⁹ Pova'e ayvu Maria oendu vy onhemondyi vy opêxa rei: “Mba'e he'i vy nda'u po rami oxarura xezy?” he'i.

³⁰ Ha'e rã anjo aipoe'i:

— Maria, ekyje eme, mba'eta Nhanderuete nemboaxy.

³¹ Ha'e rã rereko'i 'rã, reikuavã 'rã petei ava'i. Remboery 'rã Jesus.

³² Ha'e va'e ma yvate 'rã, ha'e ixupe “Yvate ete va'e Ra'y”, 'ea 'rã. Senhor Nhanderuete omoi 'rã huvixarã, tamoi Davi rekovia.

³³ Jacó ramymino kuery re opena riae 'rã, ipo'akaa ndopai 'rã guive — he'i.

³⁴ Ha'e ramo Maria aipoe'i anjo pe:

— Mba'exa 'rã tu ha'e nunga oiko? Mba'eta xee peteigüeve ma avakue pe ndajekuaa ukai teri va'eri.

³⁵ Anjo ombovai:

— Ndere oguejy 'rã Nhe'ê Ky'a E'ÿ, ha'e Yvate ete va'e po'akaa ndeao'i 'rã okuaray'ã py. Ha'e nunga rupi iky'a e'ÿ va'e oiko ramo ixupe “Nhanderuete Ra'y” 'ea 'rã.

³⁶ Neretarã Isabel voi oguereko'i ma oikovy, guaimi'i ma tei. Kova'e re mboapy meme jaxya ma oguereko'iague, imemby 'rã e'ÿ va'ekue ri.

³⁷ Mba'eta Nhanderuete pe ma nda'ipoi haxy va'e jayvuague ha'e javi py — he'i.

³⁸ Ha'e ramo Maria aipoe'i:

— Apy ma ai Senhor rembiguai. Tove toiko xezy ndeayvuague — he'i. Ha'e gui anjo ojepe'a ju oia gui.

Maria oipouague Isabel

³⁹ Ha'e va'e jave ma Maria oiko katu vy oo pojava vvy'ã ikuai va'e katy, petei tetã Judá regua py.

⁴⁰ Zacarias ro py oike vy oxarura Isabel pe.

⁴¹ Maria oxaruraa ha'e oendu rã kyrí va'e omyi guyrui py. Ha'e ramo Isabel re Nhe'ê Ky'a E'ÿ anho oi ramo

⁴² ijayvu atã:

— Kunhague ikuai va'e gui ndere ima'endu'a porãave, ha'e rereko'i va'e voi ima'endu'a porãmby ete 'rã.

⁴³ Marã ramigua nda'u aiko ndee xe-Senhor xy xepou vy reju aguã?

⁴⁴ Mba'eta rexaruraa aendu ramove kyrí va'e ovy'a vy omyi guyrui py.

⁴⁵ Revy'a ete 'rã reroivia rire, mba'eta ojeupity 'rã Senhor ndevy ijayvuague — he'i.

Maria oporaeciague

⁴⁶ Ha'e ramo Maria aipoe'i:

— Xepy'a py amboete Senhor,

⁴⁷ ha'e xenhe'ê ovy'a Nhanderuete xereraa jepeare re.

⁴⁸ Mba'eta oma'ê xee hembigui vvy'i va'e aikoa re.

Ha'e ramo aÿ guive xezy “Ovy'a ete” he'i pavê 'rã,

⁴⁹ mba'eta Ipo'akapa va'e ojapo porã xezy,

Iky'a e'ÿ va'e hery va'e.

⁵⁰ Ha'e ma omboaxy 'rã henonde ojererokyjea rupi ikuai va'e,

raka'eve rã ikuai jevy-jevvy va'e kuery voi.

⁵¹ Ipo'akapaa rupi oiko vy omoaimba opy'a py onhemboyvate rei va'e kuery.

⁵² Oipe'a ipo'akakueve, ha'e rã vvyigüeve'i ma omboyvateve.

⁵³ Omoevyatãmba inhemyayyi va'ekue,

ha'e rã iporiau e'ÿ va'e kuery ma omondoukapa rive.

⁵⁴ Omboaxya rupi vy oepy guembigui Israel kuery ijayvuague re ima'endu'a vy,

⁵⁵ Abraão ha'e hamymino kuery pe ojapo porã riae aguã re,

nhaneramoi kuery pe ijayvuague rami vy — he'i.

⁵⁶ Ha'e gui Maria ma mboapy jaxy re opyta Isabel ro py. Ha'e va'e rire oo ju ngoo katy.

João Batista itui'iaque

⁵⁷ Ha'e gui Isabel oguereko'i aguã ára ovaê ramo oikuavã ava'i.

⁵⁸ Ha'e ramo Senhor omboaxya ha'e katy'i ikuai va'e ha'e heta va'e kuery oikuaa vy ovy'a avi okuapy hexeve.

⁵⁹ Oito araa py jogueraapa ava'i pire omboi uka aguã. Ha'e rami vy omboeryxe okuapy tuu Zacarias rery rupi.

⁶⁰ Ha'e ramo ixu aipoe'i:

*

1:27 Mateus 1.18-21

— Any teve. Ha'e rami 'rãgue py João 'rã hery — he'i.

⁶¹ Ha'e ramo hetarã kuery aipoe'i:

— Ha'e gui ha'e rami peneretarã kuery hery va'e ndoikoi va'eri — he'i okuapy.

⁶² Ha'e rami vy tuu pe ju opo py oporandu marã rami pa omboeryxea re.

⁶³ Ha'e gui tuu ojerure petei vyvra pe'i re, ha'e vy ha'e va'e re ombopara: “Hery ma João” he'ia. Ha'e ramo ha'e javive onhemondyipa okuapy.

⁶⁴ Ha'e ramove ijuru oipe'aa rã ijayvuê ju. Ha'e vy omboete Nhanderuete.

⁶⁵ Ha'e py ikuai va'e ha'e javi onhemondyipa, ha'e Judéia katy'i jyv'ã reia rupi ikuai va'e kuery pe voi omombe'upaa.

⁶⁶ Ha'e javive ha'e nunga oendu vy opy'a re omoi okuapy. Ha'e vy aipoe'i:

— Mba'eta nungarã nda'u ha'e va'e ava'i oiko? — he'i okuapy. Mba'eta hexe Senhor po oĩ.

Zacarias oporaeiague

⁶⁷ Ha'e gui tuu Zacarias re Nhe'ê Ky'a E'ÿ anho oĩ ramo omombe'u avvu. Ha'e vy aipoe'i:

⁶⁸ — Ta'ima'endu'a porãa Senhor Israel kuery Ruete re, mba'eta oikuaa pota ma guembiporavo ikuai va'e re oepy aguã.

⁶⁹ Ha'e vy ombou petei nhandereraa jepearã ipo'akapa va'e guembiguai Davi ramymino.

⁷⁰ Ha'e rami ojapo aguã yma guive omombe'u uka

profeta icy'a e'ÿ va'e kuery ijayvua rupi,

⁷¹ nhanderoaigua kuery gui nhandereraa jepe aguã,

ha'e nhandere ija'e e'ÿ va'e ha'e javi po gui.

⁷² Ha'e rami vy nhaneramoĩ kuery omboaxyague rami ju oiko aguã,

guexeve guarã icy'a e'ÿ va'e ojapo va'ekue re ima'endu'a vy,

⁷³ nhaneramoĩ Abraão pe ouraague re guive.

⁷⁴ Mba'eta ijayvu raka'e nhanderoaigua kuery po gui nhandereraa jepe aguã re,

jakyje e'ÿ re nhambojerovia aguã,

⁷⁵ ha'e jaikoa pukukue re henonde

iky'a e'ÿ va'e jaiko aguã teko porã rupi.

⁷⁶ — Ha'e gui ma ndee ava'i, ndevy pe “Yvate ete va'e pegua profeta” 'ea 'rã.

Mba'eta Senhor renonde rupi reiko 'rã haperã rereko katu aguã.

⁷⁷ Ha'e rami vy ixupegua kuery pe reikuaa uka 'rã

ojejavayague gui oo jepe aguã,

⁷⁸ Nhanderuete nhanemboaxy etea rupi.

Mba'eta kuaray oê ouvya rami avi ojekuaa uka 'rã yva gui

⁷⁹ omoexakã aguã manoa guy pytũ reia rupi ikuai va'e,

nhanderereko aguã tape jaiko porã aguã rupi — he'i.

⁸⁰ Ha'e gui ava'i ma tuja pojava ha'e imbaraeteve tema ovy onhe'ê re guive. Tekoa e'ÿa rupi oiko Israel kuery pe ojekuaa uka aguã ára peve.

2

Mateus 1.18-25

¹ Ha'e va'e jave py ma César Augusto omombe'u uka pavê oje'oi aguã guery ombopara uka vy.

² Ha'e va'e ma tery mbopara uka ypy'ia, Síria pygua huvixa Quirino oĩ jave py oiko va'e.

³ Ha'e rami rã ha'e javive oo guery ombopara uka vy, petei-teĩ guekoa py ae.

⁴ Ha'e rami vy José voi oo. Davi ramymino oiko vy oguata Galiléia regua Nazaré tetã gui, Judéia regua tetã Davi rekoague Belém tetã katy oo vy.

⁵ Guery ombopara uka vy oo gua'yxy Maria hye guaxu'i va'e reve.

⁶ Ha'e gui Belém py ikuai jave py ma ovaê oikuavã aguã ára.

⁷ Ha'e ramo oikuavã omemy ppy'i, ava'i. Ha'e vy onhovãmba vy onhono inony mymba karua'i py, mba'eta okeaty py jipovei ma ha'e kuery avi oke aguã.

Vexa'i re opena va'e kuery pe anjo kuery ojexa ukaague

⁸ Ha'e katy rai ikuai vexa'i re opena va'e kuery. Pyávy nhuũndy re ikuai guymba kuery re openaa rupi.

⁹ Ha'e gui ha'e kuery ikuai py ogeujy petei anjo Senhor-a guigua. Ha'e kuery yv'ry rupi Senhor omoexakãmba xapy'a. Ha'e ramo onhemondyipa okuapy.

¹⁰ Ha'e kuery pe anjo aipoe'i:

— Penhemondy eme, mba'eta xee aju pëvy amombe'u aguã mba'emo porã nhombovy'a ete va'erã, heta va'e kuery ha'e javi peguarã.

¹¹ Mba'eta ange Davi rekoague py itui'i ma pendereraa jepearã Cristo Senhor.

¹² Po rami oiko peê kuery peikuaa aguã: Ava'i pejou 'rã mymba karua'i py, ajukue py onhovã ha'e onhonoa inony va'e — he'i.

¹³ Ha'e gui anjo reve heta ju ojexa uka xapy'a irũ yva pygua xondaro kuery. Ha'e kuery ma Nhanderuete oguerovy'aa rupi aipoe'i okuapy:

¹⁴ — Yvate etea py toporaeia Nhanderuete pe, ha'e yvy re voi toĩ avakue hemimboaxy ikuai porã aguã — he'i okuapy.

- 15 Ha'e gui ma vexa'i re opena va'e kuerya gui anjo kuerya yva re ojepe'apa ramove aipoe'i joupe-upe:
 — Jaje'oi Belém tetã katy jaexa aguã nhandevy Senhor oikuaa uka va'ekue — he'i okuapy.
- 16 Ha'e rami vy ha'e kuery oje'oi pojava, ha'e vy ojou Maria ha'e José, kyrĩ'i va'e guive ojou mymba karua'i py itui'i rã.
- 17 Ha'e kuery oexa vy omombe'u ava'i oikoa ha'e kuery pe oikuaa ukaa ague.
- 18 Ha'e rami vexa'i re opena va'e kuery omombe'u rã oendu va'e kuery ha'e javi onhemondyipa.
- 19 Ha'e rã Maria ma pova'e ayvu ha'e javi opy'a re omo'i porã ima'endu'a riae aguã.
- 20 Ha'e gui vexa'i re opena va'e kuery ojevypa ju. Oporaei jogueravy Nhanderuetete oguerovy'aa rupi, omombe'uague rami ae oendu ha'e oexa rire.

Jesus pire omboiaague

- 21 Oito araa py ovaẽ ava'i pire omboia aguã. Ha'e gui ma omboerya Jesus, oguereko'i e'y mbove ma voi anjo omboery ukaague rami vy.*

Templo py Jesus oexa ukaague

- 22 Ha'e gui Moisés lei omboparaague rami vy ha'e kuery ojeky'a'o uka aguã ára oaxapa ma ramo ogueraa ju Jerusalém tetã py Senhor pe oexa uka aguã,
- 23 Senhor guigua lei re ipara oĩa rami vy: "Ava jypy'i oiko va'e ha'e javi 'rã pemboaxa Senhor peguarã."*
- 24 Ha'e kuery ogueraa avi "mokoĩ jeruxi, e'y vy mokoĩ apyaxu'i" Nhanderuetete pe ojuka uka aguã, ha'e kuery lei re ipara oĩa rami vy.*

Simeão oporaeciague

- 25 Jerusalém tetã py oiko peteĩ ava Simeão hery va'e. Ha'e va'e ma heko porã ha'e ojerovia ete va'e, Israel kuery repyará oarõ oikovy va'e. Nhe'ẽ Ky'a E'y hexe oĩ.
- 26 Ixupe Nhe'ẽ Ky'a E'y oikuaa uka ma voi omano e'y mbove Senhor remimbou Cristo oexa 'rãa.
- 27 Ha'e rami vy Nhe'ẽ ogueraa rã templo py oo. Ha'e va'e jave py tuu kuery ogueru ava'i Jesus ha'e kuery lei re oĩa rami ojapo aguã.
- 28 Ha'e ramo Simeão ojopy ava'i ojyva áry, ha'e Nhanderuetete oguerovy'aa rupi aipoe'i:
 — A'y ma Senhor, ha'eve xee nerembiguai xemondouka porã aguã ndeayvuague rami vy,
 30 mba'eta aexa ma orereraa jepearã rembou va'ekue.
- 31 Ha'e va'e ma ha'e javi regua renonde py rereko katu va'ekue
- 32 imoexakãarã, judeu e'y va'e kuery oikuaapa aguã, ha'e nerembiporavo Israel kuery voi oguerovy'a aguã — he'i.
- 33 Ha'e rami ijayvu ma ramo tuu ha'e ava'i xy onhemondy.
- 34 Simeão ma ha'e kuery ogueruoyvu porã vy ixy Maria pe ju aipoe'i:
 — Kova'e ava'i oiko ramo heta okanh'y 'rã, ha'e heta avi oo jepe 'rã Israel kuery va'e regua. Ikuai avi 'rã hexe ijayvu rei va'e,
- 35 heta py'a re oĩ va'e ojekuaa aguã. Ndepy'a re voi rendu 'rã kyxe py oikutu imoiny va'e rami — he'i.

Profeta kunha Ana ovaẽ aviague

- 36 Oiko avi peteĩ profeta kunha Fanuel rajy, Ana hery va'e, Aser ramymino kuery regua. Kakuaa vaipa ma oiko, omenda rire sete ma'et'y ete'i ime oiko,
- 37 ha'e gui oitentã e quatro ma'et'y re ma oiko imeve'y va'e. Ha'e va'e ma templo gui ndooi 'rãe. Ara py ha'e pyáv'y omboetea rupi oiko. Okaru e'y re jepi 'rã oiko onhembo'ea rupi.
- 38 Ha'e va'e jave ete'i kunha va'e ovaẽ vy oguerovy'a Nhanderuetete. Ha'e vy Jerusalém pygua kuery guepyará oarõ okuapy va'e ha'e javi pe omombe'u oikovy ava'i oikoa.

Nazaré tetã py ava'i Jesus oiko jave guare

- 39 Senhor guigua lei re oĩa rami ha'e kuery ojapopa ma vy ojev'y ju Galiléia regua guekoa Nazaré katy.
- 40 Ava'i ma tuja ha'e imbaraeteve pojava, hi'aranduve guive ovy, Nhanderuetete omboaxy ramo.

Porombo'ea kuery mbyte py ava'i Jesus oiaague

- 41 Ha'e gui ma'et'ya nhavõ tuu kuery jogueraa 'rã Jerusalém py Páscoa ára ngaru oiko aguã py.
- 42 Doze ma'et'y ava'i oguereko jave ha'e kuery gueko rami vy oje'oi ju Jerusalém katy ngaru oiko aguã py.
- 43 Ngaru opa jave ha'e kuery ojev'y ju ngoo katy. Ha'e rã ava'i Jesus ma Jerusalém py teri opyta, tuu kuery oikuaa e'y re.
- 44 Tuu kuery ma oirũ kuery reve ha'e oua rami oexa'ã vy peteĩ ára re ranhe oguata. Ha'e gui mae ma oeka oje'oi vy hetarã ha'e hexaaty kuery mbyte rupi.
- 45 Ndojoui vy Jerusalém tetã katy ju ojev'y oeka aguã.
- 46 Mboapy araa py ojou templo py oguapy oiny rã, porombo'ea kuery reve ijayvua re ojapyxaka ha'e oporandu oinya py.
- 47 Ijayvu rã oendu va'e kuery ha'e javi onhemondyipa okuapy o'arandua rupi ombovai rã.
- 48 Ha'e gui tuu kuery oexa vy onhemondy. Ha'e vy ixy aipoe'i:
 — Xepi'a, mba'e re tu evoko rami rejapo orevy? Nderu reve nda'evei vaipa roiko va'ekue roekaa rupi.

* 2:21 Mateus 1:21 * 2:23 Êxodo 13:2,12 * 2:24 Iporiaukue'i Senhor peguarã vexa'i ndojoui vy ome'ẽ 'rã mokoĩ jeruxi e'y vy mokoĩ apyaxu'i (Levítico 5.11, 12.1-8).

⁴⁹ Ombovai nguu kuery pe:

— Mba'e re tu xereka ri? Ndapeikuaai va'e ty'y Xeru ro py 'rãe aikoa? — he'i.

⁵⁰ Ha'e rami teĩ ha'e kuery ndoikuaai mba'e he'ia paa.

⁵¹ Ha'e gui ma nguu kuery reve oo ju guekoa Nazaré py. Ojapo oikovy ha'e kuery oipota va'e ha'e javi. Ha'e rã icy ma ha'e nunga ha'e javi omõ porã opy'a re.

⁵² Ha'e gui Jesus ma tuja pojava vy hi'aranduve ovy. Ha'e ramo Nhanderuete ha'e avakue renonde rupi oguerovy'aa.

3

Mateus 3.1-10; Marcos 1.2-5

¹ Quinze ma'etý re ma Tibério César huvixave oĩ jave py, ha'e Judéia pygua huvixa Pôncio Pilatos oĩ jave, Galiléia pygua huvixa Herodes, ha'e gui Ituréia ha'e Traconites pygua huvixa tyvy Filipe oĩ jave, Abilene pygua huvixa Lisâniás oĩ,

² ha'e gui sacerdote yvateve va'e Anás ha'e Caifás ikuai, ha'e va'e jave py ma Nhanderuete ombou oayvu Zacarias ra'y João pe, tekoa e'ỹa rupi oikoa py.

³ Ha'e ramo João ma Jordão yakã yv'yry ha'e javi rupi oiko. Omombe'u oikovy pavẽ ojeko rerova vy onhemongarai uka aguã, ojejavague omboguepaa aguã.

⁴ Mba'eta profeta Isaías kuaxia ompopara vy aipoe'iaque rami: “Tekoa e'ỹa py onhendu 'rã aipoe'i va'e: Pereko katu Senhor raperã, pembo'yvi ou aguã.

⁵ Yvyugua ha'e javi ijojapa 'rã, vvyty ha'e vvy'ã'i ha'e javi guive. Tape ikarẽ va'ekue hi'yvipa 'rã, ha'e ijoja e'ỹague voi ijojapa 'rã.

⁶ Ha'e gui avakue ha'e javi 'rã oexa Nhanderuete guigua jogueraa jepea”, he'iaque rami.*

⁷ Ha'e gui heta va'e kuery onhemongarai uka vy ou va'e pe João aipoe'i:

— Peẽ mboi ramigua, mava'e tu aipoe'i poxya ou va'erã gui peo jepe 'rãa rami?

⁸ Peiko ha'vy vvyra hi'a porã va'e rami, pejeko roerovaague pexa uka aguã. Ha'e pemboypy eme jomeme “Nhande kuery ma Abraão ramymino jaiko” peje aguã. Mba'eta xee aipoa'e pëvy: Kova'e ita gui voi Nhanderuete omoingo kuaa Abraão ramyminoã.

⁹ Ha'e gui haxa py omboguai ta ma vvyra rapo re. Yvyra hi'a porã e'ỹ va'e ma ojayapa 'rã tata py omombo aguã — he'i.

¹⁰ Ha'e ramo heta va'e kuery oporandu ixupe:

— Mba'e 'rã tu ha'vy rojapo?

¹¹ Ombovai:

— Mokoĩ kamixa ogueroko va'e tome'ẽ ogueroko e'ỹ va'e pe. Tembi'u ogueroko va'e ha'e rami ae tomboja'o — he'i.

¹² Imposto re nhombopagaaty kuery voi jogueru onhemongarai uka aguã. Ha'e vy oporandu:

— Porombo'ea, mba'e tu ore rojapo 'rã?

¹³ Ombovai ha'e kuery pe:

— Nda'evei penhombopaga aguã opaga aguã va'ekue áryve — he'i.

¹⁴ Xondaro kuery voi oporandu ixupe:

— Ha'vy ore, mba'e 'rã tu rojapo?

Aipoe'i ha'e kuery pe:

— Pejoavyky rei eme, joekokie ramigua pemombe'uve eme, neĩ peipotave eme pemba'epoague repy áryve — he'i.

Mateus 3.11,12; Marcos 1.7,8; João 1.19-27

¹⁵ Ha'e jave ma pavẽ rei oarõ okuapy jogueraa jepearã. Ha'e rami vy João re oexa'ã okuapy opy'a py. Ha'e vy aipoe'i:

— Ha'e'ỹ ri nda'u Cristo oiko?

¹⁶ Ha'e ramo João aipoe'i ha'e javive pe:

— Xee anhetẽ yy py rive romongarai va'e. Ha'e rami teĩ ou 'rã peteĩ xegui yvateve va'e. Ha'e va'e gui ma xe'yvyive ete va'e vy nda'evei ipy regua xã ajora aguã voi. Ha'e ma penemongarai 'rã Nhe'ẽ Ky'a E'ỹ reve, tata py guive.

¹⁷ Ojopy ae ma trigo mbovevea oiky'a'o ha'e omboyrupa aguã omõ porãaty py. Ha'e rã ipirekue ma oapy 'rã tata ogue e'ỹ va'e py — he'i.*

¹⁸ Ha'e rami vy ayvu porã ombombe'u oikovy heta va'e kuery pe, opa mba'e ayvu py omongeta reve.

¹⁹ Huvixa Herodes pe voi ijayvu tyvy ra'yxy Herodias káuxa, ha'e Herodes ae ojapo vaiague re.

²⁰ Ha'e ramo huvixa ojapo vaive ju, nhuã py João ombo'a vy.

Mateus 3.13-17; Marcos 1.9-11; João 1.32-34

²¹ Pavẽ onhemongarai uka jave py Jesus voi oo onhemongarai uka vy. Ha'e ramo onhembo'e oiny jave yva ojepe'a ramo

²² hexe Nhe'ẽ Ky'a E'ỹ oguejy ouvy apyaxu'i rami. Ha'e gui onhendu peteĩ ayvu yva gui:

— Ndee ma Xera'y roayvu ete ha'e roguerovy'a va'e — he'i va'e.

Mateus 1.1-17

* 3:6 Isafas 40.3-5 * 3:17 Atos 19.4

²³ Jesus ma trinta ma'et'y rivvyvi oguereko reve omboypy nhombo'e aguã. Ixupe ma "José ra'y" 'ea.* Ha'e rã José ma Heli ra'y,

²⁴ Heli ma Matã ra'y, Matã ma Levi ra'y, Levi ma Malqui ra'y, Malqui ma Janai ra'y, Janai ma José ra'y,

²⁵ José ma Matatias ra'y, Matatias ma Amós ra'y, Amós ma Naum ra'y, Naum ma Esli ra'y, Esli ma Nagai ra'y,

²⁶ Nagai ma Maate ra'y, Maate ma Matatias ra'y, Matatias ma Semei ra'y, Semei ma José ra'y, José ma Judá ra'y,

²⁷ Judá ma Joanã ra'y, Joanã ma Resa ra'y, Resa ma Zorobabel ra'y, Zorobabel ma Salatiel ra'y, Salatiel ma Neri ra'y,

²⁸ Neri ma Melqui ra'y, Melqui ma Adi ra'y, Adi ma Cosã ra'y, Cosã ma Elmadã ra'y, Elmadã ma Er ra'y,

²⁹ Er ma Josué ra'y, Josué ma Eliézer ra'y, Eliézer ma Jorim ra'y, Jorim ma Matã ra'y, Matã ma Levi ra'y,

³⁰ Levi ma Simeão ra'y, Simeão ma Judá ra'y, Judá ma José ra'y, José ma Jonã ra'y, Jonã ma Eliaquim ra'y,

³¹ Eliaquim ma Meleá ra'y, Meleá ma Mená ra'y, Mená ma Matatã ra'y, Matatã ma Natã ra'y, Natã ma Davi ra'y,

³² Davi ma Jessé ra'y, Jessé ma Obede ra'y, Obede ma Boaz ra'y, Boaz ma Salá ra'y, Salá ma Naassom ra'y,

³³ Naassom ma Aminadabe ra'y, Aminadabe ma Admim ra'y, Admim ma Arni ra'y, Arni ma Esrom ra'y, Esrom ma Peres ra'y, Peres ma Judá ra'y,

³⁴ Judá ma Jacó ra'y, Jacó ma Isaque ra'y, Isaque ma Abraão ra'y, Abraão ma Terá ra'y, Terá ma Naor ra'y,

³⁵ Naor ma Serugue ra'y, Serugue ma Ragaú ra'y, Ragaú ma Faleque ra'y, Faleque ma Éber ra'y, Éber ma Salá ra'y,

³⁶ Salá ma Cainã ra'y, Cainã ma Arfaxade ra'y, Arfaxade ma Sem ra'y, Sem ma Noé ra'y, Noé ma Lameque ra'y,

³⁷ Lameque ma Metusalém ra'y, Metusalém ma Enoque ra'y, Enoque ma Jaredé ra'y, Jaredé ma Maalalel ra'y, Maalalel ma Cainã ra'y,

³⁸ Cainã ma Enos ra'y, Enos ma Sete ra'y, Sete ma Adão ra'y, ha'e rã Adão ma Nhanderuete ra'y raka'e.

4

Mateus 4.1-11; Marcos 1.12,13

¹ Jesus re Nhe'ë Ky'a E'l'y anho oĩ ramo ojevuy ju Jordão yakã gui, ha'e tekoa e'yã py ju Nhe'ë ae ogueraa.

² Quarenta ára re anha oeko a'ã herekovy. Ha'e jave ma mba'eve ndo'ui. Ha'e rire okaruxe ma.

³ Ha'e ramo ixupe anha aipoe'i:

— Nhanderuete Ra'y ri reiko vy ndeayvu kova'e ita oĩ va'e pe tojeapo mbojape.

⁴ Jesus ombovai:

— Ipara oiny: "Mbojape re anho e'y 'rã avakue oikove" — he'i.*

⁵ Ha'e gui yvatevea py anha ogueraa vy ixupe oexa ukapa vyvoi ko vvy re tetã ikuai va'e.

⁶ Ha'e vy aipoe'i ixupe:

— Kova'e tetã ame'ëmba 'rã ndevy, ha'e mba'emo porã ko vvy regua ha'e javi, mba'eta xeivy ome'ëmbaa rire ame'ë 'rã ame'ëxea va'e pe.

⁷ Xapy'a rei nerenapy'ã re reĩ reve xemboete ramo ha'e javi 'rã nembra'e.

⁸ Ha'e ramo Jesus ombovai:

— Ipara oiny: "Senhor Nderuete anho 'rã remboete ha'e rembojerovia" — he'i.*

⁹ Ha'e gui anha ma Jerusalém py ju ogueraa, templo apyte áry omoĩ. Ha'e vy aipoe'i:

— Nhanderuete Ra'y ri reiko vy enhemombo apy gui vvy katy.

¹⁰ Mba'eta ipara oiny: "Ombou 'rã anjo kuery ndere opena aguã."

¹¹ Ha'e rã "Ha'e kuery ndejoko 'rã opo py, ita re renhopyxanga e'y aguã" — he'i.*

¹² Jesus ombovai:

— Aipoe'i avi: "Eko a'ã eme Senhor Nderuete" — he'i.*

¹³ Opa mba'e py anha oeko a'ãmba ma vy ojepe'a ixugui, ha'eve aguã ára ovaẽ peve.*

Mateus 4.12-17; Marcos 4.14,15

¹⁴ Ha'e gui Nhe'ë po'akaa rupi Jesus oo ju Galiléia vvy katy. Ha'e ramo ha'e katy rai-rai ikuai va'e oendupa mba'emo ojapo oikovya.

¹⁵ Onhembo'eaty ikuai va'e rupi nhombo'e oikovy ramo omboete pavẽ.

Mateus 13.54-58; Marcos 6.1-4

¹⁶ Nazaré tetã py ombokakuaague py oo vy sábado ára py oike onhembo'eaty py gueko rami vy. Ha'e vy opu'ã ho'amy kuaxia ogueroayvu aguã.

¹⁷ Ha'e ramo ixupe ome'ëa profeta Isaías ombopara va'ekue. Kuaxia oipe'a vy ojou po rami ipara va'e:

¹⁸ "Senhor-a guigua Nhe'ë xere oĩ vy xemoĩ iporiaukue'i pe amombe'u aguã ayvu porã. Xembou nhuã py ikuai va'e pe amombe'u aguã oẽmba ju aguã, ára revegua e'y'i ikuai va'e pe amombe'u aguã oma'ëmba ju aguã, ha'e omoingo axy reipy apoi ju aguã,

¹⁹ ha'e gui amombe'u aguã Senhor nhomboaxy aguã ma'et'ya" — he'i.*

* 3:23 Jesus ma José ra'y ete'y'ã raka'e, amboae kuery José ra'y rami rive oikuaa. Jesus ma Nhanderuete ra'y ae oiko, Nhe'ë Ky'a E'l'y po'akaa rupi Maria oguereko'i va'ekue ava reve'y, Mateus 1.18 ha'e Lucas 1.30-35 py oĩa rami. * 4:4 Deuteronomio 8.3 * 4:8 Deuteronomio 6.13 * 4:11 Salmo 91.11-12 * 4:12 Deuteronomio 6.16 * 4:13

²⁰ Ha'e gui kuaxia omboty vy ome'ẽ ju kuaxia re opena va'ety pe. Ha'e vy oguapy. Ha'e ramo ha'e py ikuai va'e ha'e javive hexe anho oma'ẽ okuapy.

²¹ Ha'e ramo Jesus aipoe'i:

— Kova'e ára ojeupity ma kuaxia para re oĩ va'e penduague — he'i.

²² Ha'e rami rã ha'e javive hexe ima'endu'a porã, mba'eta ayvu porã rupi ijayvu rã oendu vy onhemondyi.

Ha'e vy oporandu okuapy:

— Peva'e nda'u José ra'y e'ỹ ri?

²³ Ha'e ramo Jesus aipoe'i ha'e kuery pe:

— Xevy pe aipopeje 'rã: “Poropoanoa, enhemonguera ndee ae. Apy nderekoa py ae ejapo avi roendu rã Cafarnaum py rejapo va'ekue ramigua ha'e javi”, peje 'rã xevy.

²⁴ Aipoe'ive ju:

— Anhetẽ aipoa'e pendevy: Neĩ peteĩve profeta nda'ipoi hekoa pygua kuery ae omovaẽ porã va'erã.

²⁵ Anhetẽ aipoa'e pëvy: Elias oiko jave heta ikuai raka'e Israel kuery regua imeve'ỹ va'e. Ha'e va'e jave mboapy ma'et'ỹ rire mboapy meme jaxy re nda'okyvei ramo yvy jave re karuai oiko.

²⁶ Ha'e rami teĩ ha'e pygua kuery neĩ peteĩvea py ma Elias nombouai, peteĩ imeve'ỹ va'e Sidom katy'i Sarepta tetã pyguaa py e'ỹ vy.

²⁷ Ha'e gui profeta Eliseu ju oiko jave ma heta avi ikuai raka'e Israel kuery regua lepra revegua. Ha'e rami avi neĩ peteĩve ma ixupe ndoiky'a' o ukaai, Síria pygua Naamã e'ỹ vy — he'i.*

²⁸ Ha'e ramo ha'e javive onhembo'eaty py ikuai va'e pova'e ayvu oendu vy ipoxypa.*

²⁹ Ha'e vyve opu'ãmba vy tetã gui oguenoẽ vy ogueraa peteĩ itaova áry peve, mba'eta ha'e va'e áry tetã oĩ ramo, ha'e gui yvy'ã guy katy oity aguã.

³⁰ Ha'e rami teĩ ha'e kuery mbyte rupi Jesus oaxa vy ojepe'a ovy.

Marcos 1.21-28

³¹ Ha'e gui ma Galiléia regua Cafarnaum tetã py ju oo. Sábado ára py nhombo'e oiny.

³² Ha'e nhombo'e rã oendu va'e onhemondyipa okuapy, opo'akaa rupi ijayvu ramo.

³³ Onhembo'eaty py oĩ avi peteĩ ava hexe anha iky'a va'e onhemondea va'e. Ha'e va'e ma ojapukai atã:

³⁴ — Jesus Nazaré pygua va'e, mba'e tu orereve ndee rereko? Oremomba aguã teve reju? Xee ma aikuaa ndee Nhanderuete guigua iky'a e'ỹ va'e reikoa — he'i.

³⁵ Ha'e ramo ixupe Jesus ijayvu atã vy aipoe'i:

— Ekyriri, ha'e ejepe'a peva'e ava gui — he'i. Ha'e ramo pavẽ renonde yvy rupi anha oity ma vy ojepe'a ava gui, ojapo vai e'ỹ re.

³⁶ Ha'e javive onhemondyipa vy aipoe'i joupe-upe:

— Mba'e nunga ayvu tu pova'e? Mba'eta opo'akaa rupi ijayvu rã nhe'ẽ vai kuery voi ojepe'a 'rã — he'i okuapy.

³⁷ Ha'e ramo ha'e nungakue ha'e katy rai-rai'i rupi ikuai va'e oendupa.

Mateus 8.14,15; Marcos 1.29-31

³⁸ Onhembo'eaty gui Jesus oẽ vy Simão ro py ju ovaẽ. Simão raixo ma imba'eaxy oupy, ipire raku vaipa vy. Ha'e ramo Jesus pe ojerure okuapy kunha va'e re.

³⁹ Ha'e ramo ituaia katy ojeru'a vy ipire raku pe ijayvu atã ramove oaxapa vyvoi. Ha'e rire'ive opu'ã vy ojapo mba'emo ha'e kuery pe.

Mateus 8.16,17; Marcos 1.32-34

⁴⁰ Kuaray oike jave ma oĩa py ogueru okuapy opa marãgua mba'eaxy gui imba'eaxy va'e. Ha'e ramo peteĩ-teĩ re opoko vy omonguerapa.

⁴¹ Heta gui anha kuery oiapukai reve ojepe'a vy aipoe'i:

— Ndee ma Nhanderuete Ra'y — he'i ramo ha'e kuery pe ijayvu atã okyriri aguã re, Cristo oikoa oikuaa ramo.

Marcos 1.35-39

⁴² Ko'ẽmba'i ramove ojepe'a vy oo tekoa e'ỹa katy. Ha'e rã heta va'e kuery oeka vy jogueraa oĩa peve. Ha'e vy ixupe ojerure okuapy ojea e'ỹ aguã.

⁴³ Ha'e ramo aipoe'i ha'e kuery pe:

— Xee ma amboae tetã rupi voi ayvu porã Nhanderuete po'akaa regua amombe'u aguã rami aiko, ha'e rami aguã ae xemboua rire — he'i.

⁴⁴ Ha'e rami vy ayvu omombe'u oikovy Judéia regua onhembo'eaty ikuai va'e rupi.

5

Pira ombo'a retaague

¹ Ha'e gui ma Genesaré yupa yv'ýry rupi ju oiko. Ha'e jave heta va'e kuery omboty rei okuapy Nhanderuete ayvu oenduxe vy.

² Ha'e rã oexa mokoĩ kanoã yy rembe re oĩ va'e. Pira mbo'aa kuery ma oẽmba ra'e pira mbo'aa ojoj aguã.

³ Peteĩ kanoã Simão mba'e py oike vy ojerure yy rembe gui ogueraave'i aguã. Ha'e gui kanoã py oguapy vy ombo'e oiny heta va'e kuery.

* 4:27 Profeta kuery pe Nhanderuete oipytyvõ uka raka'e amboae yvy pygua kuery, hekoa py ae nomboteai ramo.

* 4:28 João 1.11

- ⁴ Ijayvupa ma vy aipoe'i Simão pe:
— Eraa kanoã tpyyvea py, ha'e pemombo pira mbo'aa pembo'a aguã.
- ⁵ Simão ombovai:
— Orembo'ea, pytũ mbukukue re romba'eapo teĩ norombo'ai mba'eve. Teĩ ndeayvua rupi vy amombo ju 'rã pira mbo'aa — he'i.
- ⁶ Ha'e rami ojapo vy ombo'a reta pira, pira mbo'aa voi oxopa rai.
- ⁷ Ha'e ramo opo py oenoĩ oirũ kuery kanoã mboae py ikuai va'e ou aguã oipytyvõ vy. Ha'e vy mokoĩve kanoã omonyẽ pira ramo yy py ogueroike rai-rai'i heravy.
- ⁸ Ha'e nunga Simão Pedro oexa vy guenapy'ã re oĩ Jesus renonde. Aipoe'i:
— Senhor, ejepe'a ke xea gui, mba'eta xee ma ajevavya va'e — he'i.
- ⁹ Mba'eta heta ete pira ho'a rã oexa vy onhemondyi, irũ kuery ha'e javive reve.
- ¹⁰ Irũ kuery Zebedeu ra'y Tiago ha'e João vai onhemondyi.
Jesus aipoe'i Simão pe:
— Enhemondyi eme, aỹ gui ma avakue jouarã 'rã reiko — he'i.
- ¹¹ Ha'e ramo ha'e kuery yy rembe re kanoã omboja vy oejapa oje'oivy hupive.
Mateus 8.1-4; Marcos 1.40-45
- ¹² Peteĩ tetã py Jesus oiko jave ou peteĩ ava hete ha'e javi rupi lepra oĩ va'e. Ha'e va'e ma oexa Jesus vy guenapy'ã re oĩ henonde, ngova yvy re omovaẽ. Ha'e vy ojerure ixupe:
— Senhor, lepra gui xeky'a'oxe vy ke xeky'a'o — he'i.
- ¹³ Ha'e ramo okuave'ẽ vy opoko hexe. Ha'e vy aipoe'i:
— Xee ma roiky'a'oxe ae, ekuera ke — he'i. Ha'e ramove lepra okanhymba.
- ¹⁴ Ixupe Jesus aipoe'ive ju avave rei pe omombe'u e'ỹ aguã.
— Va'eri tereo, sacerdote pe ejexa uka, ha'e rekueraague re eme'ẽ mymba Moisés omboparaague rami vy, heta va'e kuery oikuaa avi aguã — he'i.
- ¹⁵ Jesus aipoe'iague rami e'ỹ ava va'e oo vyve omombe'upa. Ha'e ramo heta-etave ma ou Jesus oĩa py ijayvua oendu aguã, omba'eaxy gui okueraxe vy guive.
- ¹⁶ Ha'e rã Jesus ma ojepe'a jepi 'rã ha'e ae'ia py onhembo'e aguã.
Mateus 9.1-8; Marcos 2.1-12
- ¹⁷ Peteĩ ára Jesus nhombo'e oiny jave fariseu ha'e lei re nhombo'e va'ety kuery oguapy okuapy ha'e py, opa rupi gui ou va'ekue, Galiléia, Judéia ha'e Jerusalém gui. Senhor po'akaa hexe oĩ nhomonguera aguã.
- ¹⁸ Ha'e gui ou avi amongue avakue peteĩ uguata e'ỹ va'e hupa reve ogueru va'e. Ogueroikexe teĩ Jesus renonde py onhono aguã.
- ¹⁹ Heta va'e kuery gui nda'evei ogueroike aguã. Ha'e ramo oguerojeupi oo áry, ha'e oipe'aague rupi hupa reve omboguejy ikuai va'e mbyte py, Jesus renonde.
- ²⁰ Avakue ojerovia etea Jesus oikuaa vy aipoe'i uguata e'ỹ va'e pe:
— Ava, rejeyavyague omboguepaa ma — he'i.
- ²¹ Ha'e rami rã lei re nhombo'e va'ety ha'e fariseu kuery ndojou porã'i vy aipoe'i:
— Marã ramigua tu po rami ijayvu vai va'e? Avave rei nombogue kuaai 'rã joeko vaiague, Nhanderuete e'ỹ vy — he'i okuapy.
- ²² Ha'e kuery opẽxaa Jesus oikuaa vy aipoe'i:
— Mba'e re tu po rami ri pendeayvu pendepy'a py?
- ²³ Mba'e ayvu rupi tu ndaxyive xeyayvu aguã: “Rejeyavyague omboguepaa ma”, tyrã pa “Epu'ã, ha'e uguata” ha'e 'rã?
- ²⁴ Va'eri peikuaa aguã Ava ra'y ojeapo va'ekue ko yvy re oiko vy joeko vaiague ombogue aguã voi ipo'aka va'ea —
Oguata e'ỹ va'e pe ju aipoe'i:
— Xee aipoa'e ndevy: Epu'ã, eupi nderupa, ha'e tereo ndero katy — he'i.*
- ²⁵ Ha'e ramove opu'ã pavẽ oexaa gui, upi ngupa ituiaty, ha'e oo ngoo katy. Nhanderuete pe oporaei ovy.
- ²⁶ Ha'e javive onhemondyipa vy ombojerovia Nhanderuete. Okyjepa reve aipoe'i:
— Ange ma jaexa mba'emo porã — he'i okuapy.
Mateus 9.9; Marcos 2.13,14
- ²⁷ Ha'e va'e rire Jesus oo jevy vy oexa peteĩ imposto re nhombopaga va'ety Levi hery va'e, imposto opagaaty py oguapy oiny rã. Ha'e vy aipoe'i ixupe:
— Eju ke xerupive — he'i.
- ²⁸ Ha'e ramo opu'ã vy oejapa ovy hupive oo aguã.
Mateus 9.10-13; Marcos 2.15-17
- ²⁹ Ha'e rire Jesus pe Levi ojapo peteĩ ngaru tuvixa va'e ngoo py. Heta avi ikuai ha'e py, imposto re nhombopaga va'ety ha'e amboae kuery hexeve okaru aguã.
- ³⁰ Fariseu ha'e irũ kuery lei re nhombo'e va'ety ijayvu okuapy Jesus remimbo'e kuery re. Ha'e vy oporandu:
— Mba'e re tu pekaru ri imposto re nhombopaga va'ety ha'e ojevavya va'e kuery reve?
- ³¹ Jesus ombovai:
— Hexaĩ va'e kuery ndoipotai 'rã poropoanao, imba'eaxy va'e kuery anho 'rã oipota.

* 5:24 João 10.37,38

³² Ha'e rami vy xee ma heko porã va'e aenoĩ aguã e'ỹ aju, ha'e rã heko vai va'e aenoĩ aguã ojeko rerova aguã — he'i.

Mateus 9.14-17; Marcos 2.18-22

³³ Ha'e kuery aipoe'i ixupe:

— João remimbo'e ha'e fariseu remimbo'e kuery ma okaru e'ỹ re ikuai jepi 'rã onhembo'e vy. Ha'e rã neremimbo'e kuery ma any, okaru ha'e oy'u 'rã.

³⁴ Ha'e ramo Jesus aipoe'i ha'e kuery pe:

— Omendaa py pejapo 'rã ri ty'y oenoĩ mbyre kuery okaru e'ỹ re ikuai aguã rami, ha'e kuery reve omenda va'e oĩ teria ja?

³⁵ Ha'e rami avi ovaẽ 'rã ha'e kuerya gui omenda va'e oipe'aa aguã ára. Ha'e va'e ára mae 'rã ha'e kuery ikuai okaru e'ỹ re — he'i.

³⁶ Ha'e kuery pe omombe'u avi peteĩ ayvu mba'emo re ombojoja vy:

— Avave rei ao pyau gui nomboi 'rã ha'ykué ao ymague re omboja aguã. Ha'e rami vy omondoro 'rã ipyau, ha'e ipyau ra'ykué voi ndoja parãi 'rã inhymague re.

³⁷ Ha'e avave rei hyru ymague py nomboyru'i 'rã vinho pyau, mba'eta vinho pyau ombovaipa 'rã hyru. Vinho onheẽmba 'rã, hyru voi ivaipa 'rã.

³⁸ Ha'e rami 'rãgue py vinho pyau ma hyru pyau py 'rã omboyru. [Ha'e ramo 'rãe mokoĩve oĩ porã.]

³⁹ — Ha'e rami avi avave rei vinho ymague oy'u rire ndoy'uxei 'rã ipyau va'e, mba'eta aipoe'i 'rã: “Inhymague ma iporãve.”

6

Mateus 12.1-8; Marcos 2.23-28

¹ Peteĩ sábadó py trigoty rupi Jesus kuery oaxa jogueravy jave hemimbo'e kuery hi'a oipo'o vy ho'u heravy oipokyty va'ekue.

² Ha'e ramo amongue fariseu kuery aipoe'i:

— Mba'e re tu evoko rami pejapo sábadó ára py nda'evei va'eri?

³ Jesus ombovai:

— Ndaperoavyui teve Davi okuruxe vy oirũ kuery reve ojapo va'ekue?

⁴ Ha'e ma Nhanderuete ro py oike vy ojou mbojape Senhor renonde omoĩ mbyre, ha'e ho'u. Ome'ẽ avi ngupive ikuai va'e pe, ha'e kuery ho'u aguã nda'evei va'eri, sacerdote kuery pe anho ha'eve — he'i.*

⁵ Ha'e aipoe'ive ju ha'e kuery pe:

— Ava ra'y ojeapo va'ekue ma sábadó ára re voi ipo'aka va'e.

Mateus 12.9-14; Marcos 3.1-6

⁶ Sábado jevy py onhembo'eaty py ju oike vy nhombo'e oiny. Ha'e py oĩ avi peteĩ ava ipo oiporu kuaa regua re ipiru va'e.

⁷ Lei re nhombo'e va'ety ha'e fariseu kuery ikuai va'e oexa pota okuapy sábadó ára py pa nhomonguera 'rãa re, hexe ijavyu reixe vy.

⁸ Ha'e rã ha'e kuery opẽxaa Jesus oikuaa vy aipoe'i ava ipo piru va'e pe:

— Epu'ã ejuvy mbyte katy — he'i ramo opu'ã ovy.

⁹ Ha'e ramo Jesus aipoe'i amboae kuery pe:

— Mba'eta tu peikuaa? Ha'eve ri nda'u sábadó ára py jajapo porã, tyrã pa jajapo vai? Ha'eve ri nda'u joekove jaraa jepe, tyrã pa tove tomano? — he'i.

¹⁰ Ha'e gui ovyry ikuai va'e ha'e javive re oma'ẽ reve aipoe'i ava va'e pe:

— Embo'yvi ndepo.

Ha'e rami opo ombo'yvi ramo okuera.

¹¹ Ha'e rami rã amboae kuery ma ipoxypa, ha'e joupe-upe oporandu mba'e pa Jesus re ojapo aguã re.

Mateus 10.1-4; Marcos 3.13-19

¹² Ha'e va'e jave py oo yvyty áry onhembo'e aguã. Ha'e vy pytũ mbukukue re onhembo'e oiny Nhanderuete pe.

¹³ Ko'ẽmba jave ojea py oenoĩ guemimbo'e kuery ha'e javi, ha'e vy oiporavo doze. Ha'e va'e kuery pe ma “Apóstolo” he'i:*

¹⁴ Simão hery mboeaerã Pedro omoĩ va'ekue ha'e tyvy André, Tiago ha'e João, Filipe ha'e Bartolomeu,

¹⁵ Mateus ha'e Tomé, Alfeu ra'y Tiago ha'e Simão “Zelote” 'ea va'e,

¹⁶ Tiago ra'y Judas ha'e Judas Iscariotes Jesus jopy uka nhemiarã va'e avi.

Mateus 4.23-25

¹⁷ Ha'e kuery reve oguejy vy yvy joja reia py ju ovaẽ, hemimbo'e kuery mboae ha'e heta rei va'e ikuai py. Judéia ha'e javi gui, Jerusalém, Tiro ha'e Sídom ha'e ye'ẽ rembe katy gui ou va'ekue.

¹⁸ Ha'e kuery ma ayvu onduxe vy ou va'ekue, omba'eaxy gui okueraxe vy guive. Nhe'ẽ vai omoangeko va'e guive ou rã omonguerapa.

¹⁹ Heta va'e kuery ha'e javive opokoxe hexe, mba'eta ixugui ipo'akaa oẽ va'e py nhomonguerapa ramo.

Mateus 5.1-12

²⁰ Ha'e gui guemimbo'e kuery re oma'ẽ vy aipoe'i ha'e kuery pe:

* 6:4 1 Samuel 21.1-6 * 6:13 “Apóstolo” 'ea ma Cristo rembiporavo guery rupi omondouka va'e ayvu omombe'u ha'e nhomonguera aguã.

— Iporiaukue'i pendekuai va'e, pevy'a ete 'rã, mba'eta Nhanderuete po'akaa pendevy guarã oĩ.

²¹ — Pevy'a ete 'rã aỹ pekaruxe va'e, mba'eta perekopa 'rã.

— Aỹ pejae'o va'e, pevy'a ete 'rã, mba'eta penderory riaie 'rã.

²² — Pevy'a ete 'rã Ava ra'y ojeapo va'ekue káuxa avakue pendere nda'ija'ei vy penemoxê, pendere ijayvu rei ha'e penderory vaikue va'e rami oikuaa ramo.

²³ Ha'e nunga oiko rá pevy'a ha'e peporaei, mba'eta heta mba'e yva re oĩ pendevy guarã. Mba'eta yma rupi ha'e rami ae tamoi kuery ogueroko axy raka'e profeta kuery.

Nda'evei ete 'rã re ijayvuague

²⁴ — Ha'e rá aỹ perekopa va'e pe ma nda'evei ete 'rã, mba'eta perekopa ma penembovy'aaarã.

²⁵ — Nda'evei ete 'rã pekaru porã va'e pe, mba'eta pendu 'rã karuai.

— Nda'evei ete 'rã pevy'a rei va'e pe, mba'eta pendepy'a vai ha'e pejae'o 'rã.

²⁶ — Nda'evei ete 'rã pendejou porã va'e ha'e javi pe, mba'eta ha'e rami ae peneramoi kuery ojou porã rei raka'e profeta ramigua kuery.

Mateus 5.38-42

²⁷ — Ha'e rá xeayvua re pejapxaka va'e pe ma aipoa'e: Peayvu 'rã pendovaigua kuery, pejapo porã 'rã pendere ija'e e'ỹ va'e pe.

²⁸ Peroayvu porã 'rã pendere inhe'ê vai va'e, ha'e pejerure 'rã pendere ijayvu rei va'e re.*

²⁹ Amongue pendova pete rá perova hovai re ju oipete aguã. Amongue penderparito oipe'a rá penekamixa avi 'rã peraa uka.

³⁰ Peme'ê 'rã pëvy ojerure va'e ha'e javi pe. Amongue penemba'e ogueraa ramo nda'evei "Eme'ê ju" peje aguã.

³¹ Pëvy avakue ojapo aguã peipotaa rami ae avi peê voi pejapo ha'e kuery pe.

Mateus 5.43-48

³² — Xapy'a rei penderayvu va'e anho ri peayvu vy mba'e 'rã tu pejopy ha'e nunga repy? Mba'eta heko vai va'e kuery voi oayvu 'rã guayvua kuery.

³³ Pendevy ojapo porã va'e pe anho ri pejapo porã vy mba'e 'rã tu pejopy ha'e nunga repy? Mba'eta heko vai va'e kuery voi ha'e rami ikuai.

³⁴ Pendevy omboekovia va'erã pe anho ri mba'emo peiporuka vy mba'e 'rã tu pejopy ha'e nunga repy? Mba'eta heko vai va'e kuery voi joupe oiporuka 'rã mba'emo ha'ekue rami ju ojopy aguã.

³⁵ — Ha'e rá peê ma peayvu 'rã pendovaigua kuery voi, ha'e pejapo porã joupe, mba'emo peiporuka 'rã hekovia re'ỹ. Ha'e rami rá 'rãe heta omoi porãa pendevy guarã, ha'e Yvate ete va'e ra'y pendekuai. Mba'eta ha'e ma ojapo porã 'rã hexe ima'endu'a e'ỹ va'e ha'e heko vai va'e kuery pe voi.

³⁶ Penhomboaxy kuaa 'rã Penderu nhomboaxya rami.

Mateus 7.1-5

³⁷ — Peikuaa pota rei eme joe, pendere oikuaa potaa e'ỹ aguã. Penhombopaga eme penembopagaa e'ỹ aguã. Pejoperdoa 'rã penderperdoaa aguã.*

³⁸ Joupe mba'emo peme'ê ri ramo pendevy ju ome'êa 'rã mba'emo. Omboyru porã'i, omomy-momyĩ, ojabatete ramo tynyê vaipa vy onheêmba rei va'e 'rã ome'êa pendevy. Mba'eta joupe pejapoa rami avi pendevy ju ojapoa 'rã.

Ára revegua e'ỹ meme jogueraa va'e re ijayvuague

³⁹ Ha'e kuery pe omombe'u avi petei ayvu mba'emo re ombojoja vy:

— Ha'eve ri nda'u ára revegua e'ỹ ogueraa aguã amboae ára revegua e'ỹ? Ha'e rami vy nda'u mokoive ndo'ai 'rã ri hugua katy?

⁴⁰ Temimbo'e kuery ma imbo'ea gui yvateve va'e'ỹ. Imbo'e porã mbyre ma imbo'eare rami avi 'rã ikuai.*

⁴¹ — Mba'e re tu nderyvy rexa py iky'a oĩ va'e re rexa pota, ha'e rá yvyra nderexa py oĩ va'e re ma nderekuaa potai?

⁴² Mba'e re tu nderyvy pe "Xeryvy, tove tanoê iky'a nderexa gui" 're va'eri nderexa py yvyra oĩ va'e re ma nderekuaa potai? Heko porã merami rive va'e, enoê ndee ranhe yvyra nderexa gui. Ha'e vy 'rãe rexa porã nderyvy rexa gui iky'a renoê aguã.

Mateus 12.33-37

⁴³ — Jipoi yvyra porã hi'a iporã e'ỹ va'e, nei yvyra iporã e'ỹ va'e voi jipoi hi'a porã va'e.

⁴⁴ Mba'eta yvyra ikuai va'e jaikuaa 'rã hi'a re vy. Figo ma nanhamondoi 'rã juu'y gui, ha'e uva ma nanhamondoi 'rã juu rakuandy gui.

⁴⁵ Heko porã va'e oexa uka 'rã opy'a re mba'emo porã omoi va'ekue, ha'e rá heko vai va'e ma mba'emo vai omoi va'ekue 'rã oexa uka. Mba'eta nhandepy'a re oĩ va'e re ae 'rã nhandeayvu.

Mateus 7.24-27

⁴⁶ — Mba'e re tu xevy "Senhor, Senhor" peje va'eri ndapejapoi ajapo uka va'e?

⁴⁷ Ha'e javive xea py ou, xeayvu oendu ha'e ha'ekue rami ikuai va'e ma xee amombe'u ta marã rami pa ikuai.

⁴⁸ Ha'e kuery ma ikuai petei ava oorã ojapo vy ijyta kuarã vvy ojo'o puku vy ita áry omo'ã va'e rami. Ha'e gui yy tyguaxy vy oo re ojeapi-api teĩ ndoityi, omboyta porã rire.

* 6:28 Lucas 23.34; Romanos 12.14 * 6:37 Romanos 2.1-3; 1 Coríntios 4.5; Tiago 4.11.12 * 6:40 Mateus 10.24; João 13.16

49 Ha'e rã xeayvu oendu teĩ ha'ekue rami nda'ikuai va'e ma ava oorã ojapo vy omboyta vai-vai va'e rami. Ha'e gui oo re yy ojeapi-api vy oitypa vyvoi, ombovaipa katui'.

7

Mateus 8.5-13

- 1 Ha'e va'e ayvu heta va'e kuery pe Jesus omombe'upa ma vy oo Cafarnaum tetã py.
 2 Ha'e py ma peteĩ xondaro ruvixa rembiguai oayvu ete va'e imba'eaxy vy omano rai'i oupy.
 3 Jesus re ima'endu'aa ramo huvixa oendu vy oĩa katy omondouka amongue judeu mongetaaty kuery, ha'e kuery ojerure rã ou vy omonguera aguã hembiguai.
 4 Ha'e kuery ma Jesus-a py ovaẽ vy ojerure ete okuapy. Ha'e vy aipoe'i:
 — Huvixa ma ha'eve reipytyvõ aguã,
 5 mba'eta nhande kuery irũ oiko vy ojapo karamboae ronhembo'e atyrã — he'i okuapy.
 6 Ha'e ramo Jesus oo ha'e kuery reve.
 Oo py ovaẽ rai'i ma ovy jave xondaro ruvixa omondouka ju oirũ kuery regua aipoe'i aguã:
 — Senhor, xero py revaẽ e'ỹ teĩ ha'eve, mba'eta xee xe'yvy'i' ete xero py romovaẽ aguã.
 7 Ha'e nunga rupi ndaxepy'a guaxui xee aju aguã ndea py. Peteĩ ayvu ri eruruka xerembiguai tokuera.
 8 Mba'eta xee voi xeruvixa oĩ va'e oipotaa rami aiko va'e. Ikuai avi xondaro kuery xeayvua rami ikuai va'e. Peteĩ pe “Tereo” ha'e ramo oo 'rã. Ha'e rã amboae pe ma “Eju” ha'e rã ou 'rã. Xerembiguai kuery pe “Ejapo ha'e nunga” ha'e ramo ojapo 'rã — he'i.
 9 Pova'e ayvu Jesus oendu vy onhemondyĩ. Ha'e rami vy hupive ou va'e kuerya katy ojere vy aipoe'i:
 — Xee ma aipoa'e pëvy: Neĩ Israel kuerya rupi voi ndajoui teri ha'e rami ojerovia ete va'e — he'i.
 10 Ha'e gui omondouka pyre oo katy ojevuy vy oexa rã tembiguai okuera ma ra'e.

Naim tetã py kunha imeve'ỹ va'e pi'a omboete jevyague

- 11 Ha'e va'e rire'i Jesus oo peteĩ tetã Naim hery va'e katy. Hupive hemimbo'e kuery ha'e heta va'e kuery oje'oi.
 12 Tetã kora rokẽ py ovaẽ rai ovy jave oẽ jekuaa mba'e guaxu reraa kuery. Ha'e va'e kuery ma peteĩ kunha imeve'ỹ va'e pi'a peteĩ'i va'ekue ogueraa. Ixykue'i reve heta avi oje'oi tetã pygua kuery.
 13 Ha'e nunga Senhor oexa vy omboaxy kunha va'e. Ha'e vy aipoe'i:
 — Ejae'o eme.
 14 Ha'e rami vy onhemboja vy opoko omano va'e rupa re. Heraa kuery omombyta vy aipoe'i:
 — Kunumi, xee aipoa'e ndevy: Epu'ã ke — he'i.
 15 Ha'e ramo omano va'ekue oguapy oiny vy ijayvu. Ha'e rã ixy pe ju Jesus omboaxa.
 16 Ha'e javive onhemondyipa vy Nhanderuete omboetea rupi aipoe'i:
 — Profeta ipo'akapa va'e oiko nhande kuery mbyte, Nhanderuete ojekuaa uka ra'e ojeupegua kuery pe — he'i okuapy.
 17 Ha'e va'e omombe'ua rã oendupaa Judéia ha'e javi rupi, ha'e gui ha'e katy'i rupi ikuai va'e ha'e javi.

Mateus 11.2-6

- 18 Ha'e nungakue ha'e javi João Batista pe hemimbo'e kuery omombe'u. Ha'e rã ha'e kuery regua kokoĩ João oenoĩ vy
 19 omondouka Senhor-a katy oporandu aguã: “Ndee teve reju 'rã va'ekue, tyrã pa roarõve 'rã amboae?” he'i aguã.
 20 Jesus oĩa py avakue ovaẽ vy aipoe'i ixupe:
 — João Batista orembou apy ndevy roporandu aguã: Ndee ae pa reju 'rã va'ekue, tyrã pa roarõve 'rã amboae? — he'i.
 21 Ha'e va'e jave Jesus heta omonguera imba'eaxy va'e oiko axyague gui, anha onhemondea va'e guive. Heta avi omoma'ẽ ára revegua e'ỹ.
 22 Ha'e gui mae ma Jesus ombovai ha'e kuery pe:
 — Tapeo pemombe'u João pe pexa ha'e pendu va'ekue: ára revegua e'ỹ oma'ẽ ju, uguata e'ỹ va'ekue uguata, lepra revegua ojeky'a'o, ijapyxa e'ỹ va'ekue oendu, omano va'ekue onhemboete, ha'e iporiaukue'i pe omombe'ua ayvu porã.
 23 Ovy'a ete 'rã xere ojeroviaa gui ndojepe'ai va'e — he'i.

Mateus 11.7-19

- 24 Oporandu aguã ombou pyre kuery oje'oi ju rire João reko re Jesus ijayvu heta va'e kuery pe: Ha'e vy aipoe'i:
 — Marã ramigua pexa aguã tu peo tekoa e'ỹa py? Takua'i yvytu omomy-momyĩ va'e ramigua ri ty'y?
 25 Marã ramigua pexa aguã tu peo raka'e? Peteĩ ava ao porã py onhemonde va'e? Ha'e rami avi onhemonde porã ha'e oguerekoa va'e ma huvixa ro py ikuai va'e anho.
 26 Marã ramigua tu ha'vy peo pexa? Profeta? Tá, xee aipoa'e pëvy: João Batista ma profeta ikuai va'e gui voi yvateve va'e.
 27 Mba'eta hekorã re ae ipara oiny: “Xee amondouka 'rã peteĩ xerembiguai nerenonderã, nderaperã oguereko katu aguã”, he'i va'ekue.*

* 6:49 Tiago 1.22-25; 1 João 2.3-6 * 7:27 Malaquias 3.1

²⁸Xee aipoa'e pëvy: Kunha gui oiko va'ekue jipoi João Batista gui yvateve va'e. Ha'e rã Nhanderueete po'akaa py yvygüeve'i va'e ma ixugui yvateve — he'i.

²⁹Ha'e javive oendu va'e ha'e imposto re nhombopaga va'ety kuery voi Nhanderueete guigua teko porã João omombe'u rã oendu vy ixupe onhemongarai uka va'ekue.

³⁰Ha'e rã fariseu ha'e lei re nhombo'e va'ety kuery ma Nhanderueete oipotaa rami nda'ikuaixei vy João pe nonhemongarai ukai va'ekue. Ha'e gui aipoe'ive ju:

³¹— Mba'e nunga re nda'u ambojoja 'rã aÿgua kuery reko? Marã rami nda'u ha'e kuery ikuai?

³²Ha'e kuery ma ikuai kyrigüete tetã mbyte rupi oguapy vy joupe-upe ojavukai va'e rami: "Mimby romonhe'ë ramo peë ndapejerokyi, ha'e gui omanoa pygua romonhendu ramo ma ndapejae'oi", he'i va'e kuery rami.

³³Mba'eta João Batista ou vy mbojape ho'u e'ÿ re oiko, vinho ndoy'ui guive. Ha'e rami rã ixupe peë kuery "Anha reve rima oiko", peje.

³⁴Ha'e rã Ava ra'y ojeapo va'ekue ma ou vy okaru ha'e oy'u ramo ixupe "Peva'e ma okaru guaxu, vinho oy'u, ha'e imposto re nhombopaga va'ety heko vai va'e kuery re onhemoirũ va'e", peje.

³⁵Ha'e rã hi'arandu va'e kuery ha'e javi ma ojou porã 'rã 'arandu rupi ikuai va'e — he'i.

Kunha heko vai va'ekue Jesus py re heakuã porã va'e oikytyague

³⁶Peteĩ fariseu oenoĩ Jesus hexeve oo vy okaru aguã. Ha'e rã fariseu ro py Jesus ovaë ma vy mesa py oĩ.

³⁷Peteĩ kunha heko vai va'ekue ha'e va'e tetã pygua ae oikuaa fariseu ro py okaru oinya. Ha'e rami vy oĩa py peteĩ heakuã porã va'e rryu ogueru, ita xĩ va'e guigua.

³⁸Hakykue gui onhemboja vy ojae'o reve omoakÿ ipy guexay py, ha'e o'a py ju omombiru. Ipy rupi oayvu reve oikyty heakuã porã va'e.

³⁹Ha'e nunga fariseu henoĩare oexa vy aipoe'i ojeupe ae:

— Peva'e ma profeta ete va'e rire oikuaa 'rãgue mba'e nunga kunha pa hexe opoko va'ea, mba'eta heko vai va'e — he'i.

⁴⁰Ha'e ramo Jesus aipoe'i fariseu pe:

— Simão, peteĩ mba'e areko amombe'u va'erã ndevy.

Ombovai:

— Emombe'u ha'vy, porombo'ea — he'i.

⁴¹Aipoe'i:

— Oiko peteĩ nhomboreve va'ety. Ha'e va'e pe mokoĩ oreve. Peteĩ oreve quinhentos ára repy, ha'e rã amboae ma cingüenta oreve.

⁴²Neĩ peteive ma ndoguerekoĩ omboekovia aguã. Ha'e ramo imboreveare omboguepa mokoive orevea. Mokoive gui mava'e nda'u oayvuve?

⁴³Simão ombovai:

— Xee aikuaa rã oreve retave va'ekue — he'i.

Ha'e ramo aipoe'i ixupe:

— Ha'evea rami rembovai — he'i.

⁴⁴Ha'e gui kunha va'e re ranhe oma'ë vy aipoe'ive ju Simão pe:

— Rexa pa kova'e kunha? Ndero py xee avaë ramo ndee ndererui yy xepy ajoi aguã. Ha'e rã peva'e kunha ma guexay py ae ojoi xepy, ha'e gui o'a py ju omombiru.*

⁴⁵Ndee ma xerova rupi ndereayvui. Ha'e rã peva'e ma avaë guive xepy rupi oayvupa.

⁴⁶Ndee ma xezeite ndereikytyi xeaã re. Ha'e rã peva'e ma xepy re oikyty oiny heakuã porã va'e.

⁴⁷Ha'e nunga rupi aipoa'e ndevy: Peva'e ojevavy eteague omboguepaa ma, mba'eta xerayvu ete. Ha'e rã ojevavyague nombogueaive va'e ma ndaxerayvuive 'rã — he'i.

⁴⁸Ha'e gui ma kunha va'e pe aipoe'i:

— Rejevavyague omboguepaa ma.

⁴⁹Ha'e ramo hexeve okaru va'e kuery joupe-upe aipoe'i:

— Mava'e nda'u peva'e ava jeyavya voi ombogue va'e? — he'i okuapy.

⁵⁰Ha'e ramo Jesus aipoe'i kunha va'e pe:

— Rejeroviaa ndereraa jepe ma. Tereo porã ke.

8

Kunhague Jesus pytyvõa kuery rery oĩa

¹Ha'e rire Jesus oguata oikovy tetã ha'e tekoa ikuai va'e rupi. Omombe'u ovy ayvu porã Nhanderueete po'akaa regua. Hupive hemimbo'e kuery doze va'e oje'oi,

²ha'e amongue kunhague anha gui ha'e mba'eaxy gui ogueraa jepe va'ekue avi: Maria Madalena hery va'e sete anha gui oepy va'ekue,

³huvixa Herodes rembiguai Cuza ra'yxy Joana, ha'e gui Suzana. Heta avi kunhague mboae oje'oi mba'emo py oipytyvõ va'ety kuery.

Mateus 13.1-9; Marcos 4.1-9

* ^{7:44} Ha'e kuery reko rami vy oo py ovaë ramo hoo va'e omovaë vy ogueru ruka 'rã yy ipoua kuery ojepeyei aguã, tape rupi yvy ku'i heta va'e gui (Gênesis 19.2, 24.32, 43.24, Juízes 19.21, João 13.1-14).

⁴ Jesus oia py heta ou opa rupi tetã ikuai va'e gui. Ha'e ramo omombe'u peteĩ ayvu mba'emo re ombojoja vy:

⁵ — Peteĩ ava oo mba'emo ra'yĩ moaĩ vy. Ha'e va'e omoaĩ ramo amongue ha'yĩgue ho'a tape vyryry. Ha'e nunga re opyrõmbaa, guyra'i ho'upa guive.

⁶ Amboae ma itaty reia rupi ho'a. Ha'e nungakue yvate'i vyve ipiru, na'inhakỹi ramo.

⁷ Amboae ma juu mbyte rupi ho'a. Ha'e nungakue jojavi yvate vy ojukupaa.

⁸ Ha'e rã amboae ma vvy porãa rupi ho'a. Ha'e nungakue ma yvate ha'e hi'a porã. Cem ra'yĩ peteĩ-teĩ gui oiko.

Ha'e rami ijayvupa ma vy aipoe'i:

— Ijapyxa oendu aguã oĩ va'e toendu.

Mateus 13.10-23; Marcos 4.10-20

⁹ Hemimbo'e kuery oikuaa porãvexe vy oporandu ixupe:

— Mba'e nunga re tu pova'e rembojoja?

¹⁰ Jesus ombovai:

— Pendevy ma Nhanderuete oikuaa uka opo'akaa py mba'emo oiko va'e ndoikuaa ukai va'ekue. Ha'e rã amboae kuery pe ma mba'emo re ambojojaa rupi rive amombe'u ayvu, ha'e kuery oexa teĩ ndoexa kuaai aguã, ha'e oendu teĩ noendu kuaai aguã.*

¹¹ — Pova'e nunga re ma ambojoja kuri. Ha'yĩgue'i ma Nhanderuete ayvu.

¹² Tape vyryry ho'a va'ekue rami ikuai va'e ma ayvu oendu teĩ anha ou vy ipy'a gui oipe'a rã, oguerovia e'y ha'e oo jepe e'y aguã.

¹³ Itaty reia rupi ho'a va'ekue rami ikuai ayvu oendu vy ojou porã ha'e oguerovy'a va'e. Ndapo pukui va'e rami avi ikuai vy xapy'a'i anho rã ojerovia. Ha'e gui mba'emo oiko rã ojepe'a rã.

¹⁴ Juu mbyte rupi ho'a va'ekue rami ikuai va'e ma ayvu oendu teĩ mba'emo vvy regua re, omba'e rei-reirã ha'e mba'emo imbovy'aarã re openave vy hexaraipa. Ha'e rami vy ndai'ai.

¹⁵ Ha'e rã vvy porãa rupi ho'a va'ekue rami ikuai va'e ma ayvu oendu vy opy'a re omoĩ. Ha'e kuery ma ojepe'a e'y vy hi'a porã.

Mateus 4.21-25

¹⁶ — Avave rei tataendy nhamoendy vy ndajajao'i rã mba'emo ryru py, neĩ tupa guýry nanhamoĩ. Ha'e rami 'rãgue py imoivy oiaty py ae rã jaupi, oike va'e kuery oexa aguã hendy va'e.

¹⁷ Ndoexa ukai pyre ojekuaapa rã, ha'e onhomi mbyre oikuaa ukapaa rã.

¹⁸ Ha'e nunga rupi peikuaa pota ke marã rami pa pendua re. Mba'eta mba'emo oguereko va'e pe ome'ëave rã. Ha'e rã oguereko e'y va'e gui ma oipe'apaa rã oguereko rei'i merami va'ekue — he'i.*

Mateus 12.46-50; Marcos 3.31-35

¹⁹ Jesus oia py ixu ha'e tyvy kuery ovaẽxe teĩ heta va'e kuery ikuai va'e gui nda'evei ovaẽ ete aguã.

²⁰ Ha'e ramo omombe'ua ixupe:

— Ndexy ha'e nderyvy kuery, pee oka py ikuai nderexaxe vy — he'i.

²¹ Ombovai:

— Ha'i ha'e xeryvy kuery ma Nhanderuete ayvu oendu vy ha'ekue rami ae ikuai va'e.*

Mateus 8.23-27; Marcos 4.35-41

²² Peteĩ ára oĩ kanoã py guemimbo'e kuery reve. Ha'e vy ha'e kuery pe

— Jaaxa yupa rovai re — he'i. Ha'e vy oje'oi.

²³ Yy rupi ooa ja ha'e oke oupy.

Ha'e gui yupa áry rupi ou vvytu atã. Ha'e ramo kanoã oike rai-rai'i yy py.

²⁴ Ha'e ramo ha'e kuery ovaẽ Jesus ituia py. Omomyĩ vy aipoe'i:

— Orembo'ea, orembo'ea, nhamanomba ta rima! — he'i okuapy. Ha'e ramo Jesus omyĩ vy ijayvu atã vvytu ha'e yai pe. Ha'e ramove opyту'upa, nda'vvytuvei.

²⁵ Ha'e ramo aipoe'i ha'e kuery pe:

— Mamo tu oĩ pejeroviaa?

Ha'e ramo ha'e kuery onhemondyipa, okyje guive. Ha'e vy aipoe'i joupe-upe:

— Marã ramigua tu peva'e, vvytu ha'e yai pe ijayvu ramo voi onhe'ẽ rendu aguã?

Mateus 8.28-33; Marcos 5.1-14

²⁶ Ha'e gui geraseno kuery vvy katy ju oje'oi Galilía yupa rovaigua re.

²⁷ Kanoã gui ogejyppa ramove ou peteĩ ava tetã gui. Ha'e va'e re ma anha onhemonde ramo yma rei ma ao nomoĩvei, neĩ ngoo rupi ndopytavei va'e. Vvyra rupa rupi rive tema oiko.

²⁸ Ha'e va'e oexa Jesus vyve guenapy'ã re oĩ henonde. Ha'e vy aipoe'i ojapukai atã reve:

— Jesus Nhanderuete Yvate ete va'e Ra'y, mba'e tu xee areko ndereve? Xee ajerure xemoingo axy e'y aguã — he'i.

²⁹ Mba'eta anha pe Jesus ijayvu ae ma ava gui oẽmba aguã, mba'eta mbovykue rei e'y ma oguereko axy. Ipy ha'e ipo corrente py ojokuapaa teĩ omondopa kuerei. Ha'e ramo anha kuery ogueraa rã tekoea e'ya rupi.

³⁰ Ha'e gui ma Jesus oporandu ixupe:

— Mba'exa tu nderery?

Ombovai vy

* 8:10 Isafas 6.9-10

* 8:18 Marcos 4.24, Tiago 1.22-25

* 8:21 Hebreus 2.11,12

— Heta va'e — he'i, hexe heta anha onhemonde ramo.

³¹ Ha'e vy ojerure yvykua vaikue py omoudouka e'ȳ aguā.

³² Ha'e katy'i ma heta ikuai poryko okarua py yvyty re. Anha kuery ojerure omoudouka aguā poryko re ju onhemonde aguā. Ha'e ramo Jesus omoudouka.

³³ Ha'e ramo ava gui anha kuery oẽmba vy poryko re ju onhemonde. Ha'e ramo yvy'ã guy katy onhamba jogueravy. Yy py ho'apa vy oy'upa.

³⁴ Ha'e gui ma poryko re opena va'e kuery mba'emo oiko va'e oexa vy onhamba jogueravy, omombe'u tetã ha'e tekoa ikuai va'e rupi.

Mateus 8.34; Marcos 5.14-20

³⁵ Ha'e pygua kuery ou oiko va'ekue oexaxe vy. Jesus oĩa py ovaẽ vy oexa ava anha kuery oẽmbaague va'e. Ha'e va'e ma onhemonde ha'e hi'arandua oĩ porã ju ma. Jesus yvy'iry uguapy oiny. Ha'e rã ha'e kuery ndaekorãvei rei okuapy.

³⁶ Ha'e kuery pe hexaare regua omombe'u marã rami vy pa anha gui oepyaague.

³⁷ Geraseno kuery opa rupi gui ou va'ekue okyje vy ixupe ojerure ha'e kuery rekoea gui ojepe'a aguā. Ha'e ramo kanoã py Jesus ojeupi vy oo ju.

³⁸ Ha'e rã ava anha kuery oẽmbaague va'e ma ojerure hupive oo aguā. Ha'e rami teĩ Jesus omoudouka vy aipoe'i:

³⁹ — Tereo ndero pygua kuery pe emombe'u Nhanderuete ndevy ojapo va'ekue — he'i. Ha'e ramo tetã jave rupi oo vy omombe'u hexe Jesus ojapo va'ekue ha'e javi.

Mateus 9.18,19; Marcos 5.21-24

⁴⁰ Ha'e gui Jesus ojevy ramo heta va'e kuery oarõ okuapy va'e omovaẽ porã ovy'a reve.

⁴¹ Ha'e jave py ma ou peteĩ ava Jairo hery va'e, onhembo'eaty pygua huvixa. Ha'e va'e ma Jesus renonde guenapy'ã re oĩ vy ojerure hoo py ovaẽ aguā,

⁴² mba'eta tajy peteĩ va'e doze ma'etỹ oguereko va'e omano rai'ou opy ramo.

Mateus 9.20-22; Marcos 5.24-34

Jesus ooa rupi heta va'e kuery omboty rei oje'oivy.

⁴³ Oiko avi peteĩ kunha doze ma'etỹ re ma gueko re riae oiko va'e. Avave rei nomongueravei ma, [ha'e oguereko va'ekue ha'e javi ome'ẽ ma poropoanoa kuery pe.]

⁴⁴ Ha'e va'e ma Jesus rakykue gui ovaẽ vy opoko ijao apy re. Ha'e ramove opytu'u vyvoi hekoaxy.

⁴⁵ Ha'e ramo Jesus aipoe'i:

— Mava'e tu xere opoko?

Ha'e javive nomombe'uxei ramo Pedro [oirũ kuery reve] aipoe'i:

— Orembo'ea, heta nderakykue ou va'e ndejoyy rei heravy nemboty rei vy, [va'eri ndee “Mava'e tu xere opoko?” 're.]

⁴⁶ Ha'e rami teĩ Jesus aipoe'ive tema:

— Amongue ta'vy xere opoko teve, mba'eta aendu xegui xepo'akaa oẽ rã — he'i.

⁴⁷ Ha'e ramo kunha va'e onhenhomi aguā nda'evei ramo ou oryryipa reve, guenapy'ã re oĩ henonde. Ha'e vy pavẽ oendua py onhemombe'u mba'e re pa hexe opokoa, ha'e opoko vyve okueraague.

⁴⁸ Ha'e ramo ixupe aipoe'i:

— Xerajy, rejeroiviaa ndereraa jepe. Tereo porã ke.

Mateus 9.23-26; Marcos 5.35-43

⁴⁹ Jesus ijavyvũ teri ho'amy reve peteĩ ou onhembo'eaty pygua ruvixa ro gui. Ha'e vy aipoe'i ixupe:

— Nderajy omano ma. Nda'evevei ma porombo'ea remoangekove aguā — he'i.

⁵⁰ Ha'e nunga Jesus oendu vy aipoe'i tuu pe:

— Enhemondyĩ eme, ejerovia tema. Ha'e ramo oo jepe 'rã — he'i.

⁵¹ Ha'e gui oo py ovaẽ vy avave rei ndogueroikeyi, Pedro, João, Tiago, ha'e kunha'i ru ha'e ixu e'ȳ vy.

⁵² Ha'e javive ipy'a vai vy ojae'o okuapy rã oexa vy aipoe'i:

— Pejae'o eme. Kunha'i va'e nomanoi, oke rima — he'i.

⁵³ Ha'e ramo ojoi rei okuapy, omano maa oikuaa vy.

⁵⁴ Ha'e rã kunha'i va'e po re Jesus ojopy vy ijavyvũ atã reve aipoe'i ixupe:

— Kunha'i, evy ke.

⁵⁵ Ha'e ramove hexe inhe'ẽ ojevy ramo opu'ã. Ha'e ramo omongaru ka.

⁵⁶ Tuu kuery onhemondyipa. Ha'e ramo ha'e kuery pe aipoe'i avave rei pe omombe'u e'ȳ aguā oiko va'ekue.

9

Mateus 10.1,5-15; Marcos 6.7-13

¹ Doze guemimbo'e kuery Jesus oenõ vy ombopo'aka anha kuery ha'e javi re, ha'e nhomonguera aguā re.

² Ha'e vy omoudouka Nhanderuete po'akaa regua omombe'u ha'e imba'eaxy va'e omonguera aguā.

³ Ha'e vy aipoe'i ha'e kuery pe:

— Mba'eve rei peraa eme peoa rupi, neĩ popoka, voko, mbojape, peráta ha'e kamixa voi peraa eme mokoĩ.

⁴ Oo py pevaẽa py ae pepyta peove peve.

⁵ Ha'e gui tetã re napenemovaëai ramo pendepy regua gui peity-ity 'rã peovy vyv ku'i, ha'e kuery pe peikuaa uka aguã peja peovya — he'i.*

⁶ Ha'e ramo hemimbo'e kuery ma tekoa ha'e javi rupi oje'oi vy avvu porã omombe'u ha'e nhomonguera opa rupi.

Mateus 14.1-12; Marcos 6.14-29

⁷ Ha'e gui huvixa Herodes oendu omombe'u rã Jesus mba'emo ojapo oikovya. Ha'e vy ndoikuaai rei, mba'eta amongue aipoe'i:

— João omanoague gui onhemboete ju va'ekue.

⁸ Amboae ma — Elias rima oiko — he'i.

Ha'e rã amboae ma — Peteĩ profeta yma oiko va'ekue rima oiko — he'i.

⁹ Ha'e rã Herodes ma aipoe'i:

— João akã ma xee ae ajaya uka va'ekue. Marã ramigua tu ha'vy oiko ha'e nunga apoa omombe'ua rã aendu? — he'i. Ha'e rami vy onhea'ã oexa aguã.

Mateus 14.13-21; Marcos 6.30-44; João 6.1-14

¹⁰ Apóstolo kuery ojevypa ma vy Jesus pe omombe'upa ojapo va'ekue ha'e javi. Ha'e ramo ogueraa Betsaida tetã py ha'e kuery ae'i ikuai aguã.

¹¹ Ha'e rami teĩ heta va'e kuery oikuaa vy oje'oi hakykue. Ha'e ramo omovaëmba vy ijayvu Nhanderuede po'akaa re, imba'eaxy va'e voi omonguera.

¹² Ka'aru rai jave hemimbo'e kuery doze va'e ou vvy aipoe'i ixupe:

— Emondoukapa ju heta va'e kuery, tetã ha'e tekoka kii rai'i ikuai va'e rupi oje'oi vy oke ha'e ho'u va'erã ojou aguã, mba'eta apy ma tekoka e'ya py nhandekuai — he'i okuapy.

¹³ Ha'e rã aipoe'i ha'e kuery pe:

— Peẽ ae peme'ẽ ho'u va'erã.

Ha'e kuery ombovai:

— Mba'eve ndoroguerkoi, peteĩ nhiruĩ mbojape ha'e mokoĩ pira'i e'ỹ vy. Tyrã pa ore ae toroo tembi'u rojogua aguã ha'e javive peguarã? — he'i.

¹⁴ Ha'e py rãnda'u ikuai cinco mil avakue.

Ha'e gui ma aipoe'i guemimbo'e kuery pe:

— Pemboguapy peteĩ-teĩ henda py cingüenta ikuai aguã rami — he'i.

¹⁵ Ha'e ramo ha'e kuery ha'e rami ojapo vvy omboguapypa.

¹⁶ Ha'e gui Jesus ma peteĩ nhiruĩ mbojape ha'e mokoĩ pira ojopy vy yva re oma'ẽ reve oguerovy'a Nguuete.

Ha'e vy oipe'ãmba'i vy ome'ẽ guemimbo'e kuery pe, ha'e kuery ju ome'ẽ-me'ẽ aguã heta va'e kuery pe.

¹⁷ Ha'e javive okaru vy hev yatãmba. Ha'e ramo hembyrekue omono'õ vy doze varai ju omonyẽ.

Mateus 16.13-21; Marcos 8.27-31

¹⁸ Ha'e ae'i onhembo'e oinya py hemimbo'e kuery ou ramo oporandu ha'e kuery pe:

— Marã ramigua aikoa rami tu heta va'e kuery oikuaa?

¹⁹ Ha'e kuery ombovai:

— João Batista. Amboae kuery ma "Elias" he'i. Ha'e rã amboae kuery ma peteĩ profeta ymave guare renhemboete ju va'ekue reikoa rami oikuaa — he'i.

²⁰ Ha'e gui ma oporanduve ju:

— Ha'vy peẽ kuery, marã ramigua aikoa pa peikuaa?

Ha'e ramo Pedro ijayvu vvy aipoe'i:

— Ndee ma Cristo Nhanderuede remimbou — he'i.

²¹ Ha'e rami rã aipoe'i omombe'u e'ỹ aguã avave rei pe.

²² Ha'e vvy aipoe'i:

— Ava ra'y ojeapo va'ekue ma oiko axy 'rãe. Mba'eta nhomongeta va'ety, sacerdote yvatekueve va'e ha'e lei re nhombo'e va'ety kuery nda'ija'ei 'rã hexe. Ha'e gui ojukaa rire mboapy araa py onhemboete ju 'rã.

Mateus 16.24-28; Marcos 8.34-9.1

²³ Ha'e gui ma aipoe'i pavẽ pe:

— Xerupive oikoxe va'e taexarai ojegui ae, ko'ẽ nhavõ togueraa ojeupegua kuruxu, ha'e tou xerakykue.

²⁴ Mba'eta amongue xee ha'e taexarai ojegui ae, ko'ẽ nhavõ togueraa ojeupegua kuruxu, ha'e tou xerakykue.

²⁵ Mba'e 'rã tu avakue ojou, mba'emo vvy regua ha'e javi oguerokopa va'eri guekove ae omokanhy vy, e'ỹ vy ha'e ae onhemoingo axy uka rire?

²⁶ Mba'eta amongue xee ha'e xeayvua ogueroxi rire, ha'e kuery ma Ava ra'y ojeapo va'ekue voi ogueroxi 'rã guexakã rupi ou jevy ma vy, Nguu rexakã ha'e anjo iky'a e'ỹ va'e kuery rexakã rupi.

²⁷ Anhetẽ aipoa'e pëvy: Apy peĩ va'e regua amongue napemanoi 'rã Nhanderuede po'akaa ojekuaa ovvy rã pexa e'ỹ ja.

Mateus 17.1-8; Marcos 9.2-8

²⁸ Ha'e rami ijayvu rire oito araa py ma ngupive Pedro, João ha'e Tiago ogueraa vy peteĩ vyvty áry oẽ onhembo'e aguã.

²⁹ Onhembo'e oiny jave hova guexakã py ojekuaa, ha'e ijao ma xiimba rei hexakãmba vy.

* 9:5 Atos 13.50,51; 18.6 * 9:24 João 12.24-26; Apocalipse 2.10, 12.11

³⁰ Ha'e jave mokoī avakue ijayvu jekuaa hexeve, Moisés ha'e Elias.

³¹ Ha'e va'e kuery ma hexakā rupi ojekuaa vy hexeve ijayvu okuapy Jerusalém tetā py Jesus oo vy ojexavai ranhe aguā oiko va'erāa re.

³² Ha'e rā Pedro ha'e oirū kuery ma hopeyi vaipa okuapya ramive ndoke etei'i vy oexa hexakā ha'e mokoī avakue hexeve hi'aī va'e.

³³ Jesus-a gui ha'e kuery ojepe'a ta ma ramo Pedro aipoe'i ixupe:

— Orembo'ea, ha'eve apy nhaive aguā. Ha'e ramo rojapo 'rā mboapy oo'i: petei ma ndevy guarā, amboae ma Moisés pe, ha'e gui amboae ju ma Elias peguarā — he'i. Oikuaa vy e'y ha'e rami ijayvu.

³⁴ Ha'e rami ijayvu teria ja petei arai ou vy ojao'ipa. Arai ojao'i rā ha'e kuery okyjepa.

³⁵ Ha'e va'e mbyte gui ou nhendu petei ayvu aipoe'i va'e:

— Peva'e ma Xera'y xerembiporavo. Pejapyxaka ijayvua re — he'i.*

³⁶ Ha'e va'e nonhenduvei rire Jesus ha'e ae'i ju hi'aī. Ha'e va'e rire ma hemimbo'e kuery okyriri okuapy, ha'e va'e jave avave rei pe nomombe'ui oexa va'ekue.

Mateus 17.14-18; Marcos 9.14-27

³⁷ Ko'ē jevy vyvty gui ogejy jogueruvy ramo heta ou Jesus ovaexī vy.

³⁸ Teta mbyte gui petei ava oiapukai nhendu vy aipoe'i:

— Porombo'ea, ajerure rema'ē aguā xera'y re, petei'i va'e ramo.

³⁹ Hexe ma nhe'ē vai onhemonde ramo oiapukai xapy'a vy ho'a 'rā vvy rupi. Anha oguereko axy rei vy ombojuru ryjuipa ha'e ombojejukapa ma vy mae ma 'rā ojea.

⁴⁰ Ajerure tei neremimbo'e kuery oipe'a aguā, ha'e kuery ndoipe'a kuaai — he'i.

⁴¹ Ha'e ramo Jesus ombovai:

— Peē pejerovia e'y ha'e pendeko vai va'e, raka'e peve 'rā nda'u xee aiko pendereve, rogueropo'aka aguā? Eru ha'vy ndera'y — he'i.

⁴² Oguerovaē heruvy rā anha oity ju vvy rupi. Opa marā rei oguereko ramo Jesus ijayvu atā anha pe. Ha'e rami vy kunumi va'e omonguera vy omboaxa ju tuu pe.

⁴³ Ha'e ramo pavē rei onhemondyipa Nhanderuete po'akaa oexa uka rā oexa vy.

Mateus 17.22,23; Marcos 9.30-32

Jesus ojapo va'e pavē oexa vy onhemondyipa ramo aipoe'i guemimbo'e kuery pe:

⁴⁴ — Penema'endu'a riae ke pova'e ayvu re: Ava ra'y ojeapo va'ekue omboaxaa 'rā avakue po py — he'i.

⁴⁵ Ha'e rami tei ha'e kuery noendu kuaai, ndoikuaa uka porāvei ramo. Nda'ipy'a guaxui vy noporandui guive ha'e nunga re.

Mateus 18.1-5; Marcos 9.33-37

⁴⁶ Ha'e kuery jouse-upe ijayvu mava'e ete pa joegui yvateve va'e omoīa 'rāa re.

⁴⁷ Ha'e rā Jesus ma ha'e kuery py'a re oī va'e oikuaa vy ojee omonhemboja petei kyri va'e, ha'e omoī ovvy'iry.

⁴⁸ Ha'e vy aipoe'i guemimbo'e kuery pe:

— Amongue xerery rupi kova'e kyri va'e omovaē vy xee avi xemovaē. Ha'e xemovaē va'e ma xembouare avi omovaē. Mba'eta peē kuery va'e regua pavē gui vyvīve va'e ma yvateve va'e oiko.

Marcos 9.38-40

⁴⁹ João aipoe'i:

— Orembo'ea, petei ava roexa kuri nderery rupi anha oipe'a rā. Ha'e ramo ndoroipe'a ukavei, mba'eta nhanderupivegua e'y ramo — he'i.

⁵⁰ Ha'e ramo Jesus ombovai:

— Nda'evei ndapeipe'a ukai aguā, mba'eta penderovaigua e'y va'e ma penderupivegua ae.

Samaria pygua kuery Jesus nomovaēiague

⁵¹ Yva re ju heraa aguā ovaē rai'i ma ramo, hova re ojekuaa Jerusalém katy oo aguā opy'a re omoī va'ekue.

⁵² Ha'e vy guenonderā omoudouka imombe'uarā. Ha'e ramo ha'e kuery oo vy petei Samaria pygua kuery rekoa py ovaē oguereko katu aguā oke aguā.

⁵³ Ha'e rā ha'e pygua kuery ma nomovaēxei, Jerusalém katy ooa oikuaa vy.*

⁵⁴ Ha'e nunga hemimbo'e kuery Tiago ha'e João oexa vy oporandu ixupe:

— Senhor, reipota pa rombou uka tata yva gui ha'e kuery omomba aguā?

⁵⁵ Ha'e ramo Jesus oje re vy ijayvu atā ha'e kuery pe. [Ha'e vy aipoe'i:

— Peē kuery ndapeikuaai mba'e nunga nhe'ē gui pa peikoa.

⁵⁶ Mba'eta Ava ra'y ojeapo va'ekue ma avakue nhe'ē omomba aguā e'y ou, ha'e rā ogueraa jepe aguā — he'i.] Ha'e gui amboae tekoa katy ju oje'oi.

Mateus 8.18-22

⁵⁷ Ha'e kuery oje'oi rupi amongue aipoe'i:

— Xee aa ta nderupive reoa katy rei.

⁵⁸ Ha'e rā Jesus ombovai:

— Aguara'i oguereko 'rā okua, guyra'i oveve va'e voi oguereko guaity. Ha'e rā Ava ra'y ojeapo va'ekue ma neī oakā omboguejyaty ndoguerekoī — he'i.

⁵⁹ Amboae pe Jesus aipoe'i:

* 9:35 2 Pedro 1.16-18 * 9:53 Samaria pygua kuery nomovaēxei, mba'eta judeu kuery reve joe ija'e e'y va'e vy (João 4.9).

- Eju katu xerupive.
 Ha'e va'e ombovai:
 — Taa ranhe xeru tanhono porã.
⁶⁰ Ha'e ramo Jesus aipoe'ive ju:
 — Tove omanogue ae tonhono porã omano va'ekue. Ha'e rã ndee ma tereo emombe'u Nhanderuete po'akaa — he'i.
⁶¹ Amboae ju aipoe'i ixupe:
 — Senhor, xee aa ta nderupive. Ha'e rami teĩ taa ranhe tamombe'u xero pygua kuery pe.
⁶² Ha'e rã Jesus ombovai:
 — Avave rei yvy karaia re ojopy heravy reve guakykue re oma'ẽ va'e nda'evei Nhanderuete po'akaa pyguarã — he'i.

10

Setenta guemimbo'e kuery omondoukaague

- ¹ Ha'e va'e rire Senhor ma setenta ju oiporavo, ha'e vy guenonderã mokõ-mokoĩ omondouka tetã ha'e tekoa nhavõ ha'e oo aguã rupi.
² Ha'e kuery pe aipoe'i imondovy:
 — Mba'ety ma tuvixa, ha'e rã omba'eapo va'e kuery ma mbovy'i. Ha'e nunga rupi pejerure Senhor mba'ety ja pe ombou retave aguã imba'ety rupi omba'eapo va'erã.
³ Tapeo. Xee romondouka vexa'i rami aguara mbyte rupi.
⁴ Peraa eme voko, popoka, neĩ py regua. Tape rupi pexarura eme guive avave pe.
⁵ Joo py pevaẽ vy aipopeje 'rã: "Kova'e oo pygua kuery ta'ikuai porã", peje.
⁶ Xapy'a rei ha'e py oiko porãxe va'e oĩ ramo hexe oiko 'rã peroayvu porãague. Ha'e rã jipoi ramo pendere ae 'rã ojeapa peroayvu porãague.
⁷ Oo pevaẽague py ae 'rã pepyta. Pe'u ha'e pey'u 'rã ha'e kuery ome'ẽ va'e rei. Mba'eta omba'eapo va'e kuery ma ha'e eve ojopy aguã omba'eapogue repy. Peva eme oo mboae-ae rupi.
⁸ Tetã pevaẽa py penemovae porã ri ramo pe'u 'rã ome'ẽ va'e rei.
⁹ Ha'e py pemonguera 'rã imba'eaxy va'e, ha'e aipopeje ha'e kuery pe: "Pende'vy namombyryvei ma Nhanderuete po'akaa ojekuaa aguã", peje.
¹⁰ Ha'e rã tetã pevaẽa py napenemhemojaai ramo tape rupi peo vy aipopeje 'rã:
¹¹ "Peneretã guigua yvy ku'i orepy re oja va'ekue voi roitypa, penderovai roikuaa uka aguã roeja ma rovya. Ha'e rami teĩ peikuaa pota pova'e re: Namombyryvei ma Nhanderuete po'akaa ojekuaa aguã", peje.*
¹² Aipoa'e peẽ kuery pe: Opaá ára ha'e va'e tetã pygua kuery gui Sodoma pygua kuery nombopagaave 'rã.
Mateus 11.20-24
¹³ — Peẽ Corazim ha'e Betsaida pygua kuery pe nda'evei ete 'rã.* Mba'eta pendea py hexa pyrã ajapo va'e ramigua Tiro ha'e Sidom tetã py ajapo va'e rire, ha'e kuery ojeko rerova voi 'rãgue. Ha'e rami vy ajukue vaikue py onhemonde vy uguapy 'rãgue tanhumbu py.
¹⁴ Ha'e nunga rupi nhombopagaa ára peẽ kuery gui omboaxyave 'rã Tiro ha'e Sidom pygua kuery.
¹⁵ Ha'y peẽ Cafarnaum pygua kuery, peo 'rã teve yva peve? Any, pe'a 'rã tata ogue e'y va'e py.
¹⁶ — Pendeayvu oendu va'e ma xeayvu avi oendu, ha'e rã napenenhe'ẽ rendui va'e ma xee avi naxenhe'ẽ rendui. Ha'e rã naxenhe'ẽ rendui va'e ma xembouare avi nonhe'ẽ rendui.

Setenta oo va'ekue ojevypaague

- ¹⁷ Ha'e gui setenta omondouka va'ekue ovy'a reve ojevy vy aipoe'i okuapy:
 — Senhor, nderery rupi oreayvu ramo anha kuery voi orenhe'ẽ rendu karamboae! — he'i okuapy.
¹⁸ Ha'e rã ombovai:
 — Xee ma Satanás aexa karamboae overa va'e rami yva gui ho'a rã.
¹⁹ Ha'e gui peẽ kuery rombopo'aka mboi ha'e japeuxa re pepyrõ aguã, nhanderoivaigua po'akaa ha'e javi re guive, pendere mba'eve rei oiko e'y re.
²⁰ Ha'e rami teĩ perovy'a eme anha kuery re pendepo'akaa rive, ha'e rã yva re penderery omboparaa ma imoinyague.*
Mateus 11.25-27
²¹ Ha'e va'e jave ae Jesus ovy'a Nhe'ẽ Ky'a E'y gui. Ha'e vy aipoe'i:
 — Xeru yva ha'e yvy re ndepo'aka va'e, xee roguerovy'a, mba'eta ha'e nunga ma hi'arandukue pe ndereikuaa ukai, neĩ ombo'e pyre pe'y guive. Yvy'igveve'i pe anho reikuaa uka. Tá, Xeru, ha'e rami ae reipota.
²² — Opa mba'e Xeru ome'ẽmba xevy. Avave rei ndoikuaai Ta'y, Tuu e'y vy. Ha'e avave rei ndoikuaai Tuu, Ta'y e'y vy, ha'e amongue pe Ta'y oikuaa ukaxea va'e ete'i — he'i.
²³ Ha'e gui ma guemimbo'e kuery pe ju aipoe'i ha'e kuery ae'ia py:
 — Ovy'a ete 'rã mba'emo peẽ kuery pexa va'e rexa kuery.
²⁴ Mba'eta xee aipoa'e porãve pẽvy: Heta ikuai raka'e profeta ha'e huvixave peẽ kuery pexa va'e oexaxe teĩ ndoexai, ha'e pendu va'e oenduxe avi teĩ noendui raka'e.

* 10:11 Lucas 9.5

* 10:13 Tiro ha'e Sidom tetã ma yma heko vai ete va'e ikuaiague (Isaías 23.1-18).

* 10:20 Apocalipse 3.5

Samaria pygua porayvu va'e omombe'uague

- ²⁵ Peteĩ ava lei re nhombo'e va'ety opu'ã ho'amy Jesus oeko a'ã vy. Ha'e vy aipoe'i:
— Porombo'ea, mba'e nda'u ajapo 'rã tekove marã e'ỹ aupity aguã?
- ²⁶ Ha'e ramo ixupe ju Jesus oporandu:
— Mba'e tu ipara oiny lei re? Mba'exa tu reikuaa?
- ²⁷ Ava va'e ombovai:
— “Reayvu 'rã Senhor Nderuete ndepy'a ha'e javi py, ndereko, nembaraetea ha'e ne'arandua ha'e javi py guive.” Ha'e “Reayvu 'rã neirũ kuery ndee ae rejeayvua rami” — he'i.*
- ²⁸ Ha'e rami rã Jesus aipoe'i:
— Ha'evea rami rembovai. Ha'e rami rejapo vy reupity 'rã tekove — he'i.
- ²⁹ Ha'e rami teĩ ava va'e onhemboeko porãxe vy oporandu Jesus pe:
— Marã ramigua tu xeirũ kuery?
- ³⁰ Ha'e rã Jesus ombovai:
— Peteĩ ava ma Jerusalém tetã gui ojeuejy ovy Jericó katy oo vy. Ha'e gui ha'e va'e ma jojuka va'ety kuery po py oĩ vai ramo ixugui oipe'apa, oinupãmba guive. Ha'e vy oea oje'oivvy omano rai'i va'e.
- ³¹ — Ha'e jave py tape rupi ou peteĩ sacerdote. Ha'e va'e oexa teĩ ojepekuavo ovy.
- ³² — Ha'e rami ae avi peteĩ levita ha'e rupi ou vy oexa teĩ ojepekuavo avi ovy.
- ³³ — Ha'e gui ma peteĩ Samaria pygua oguata ovy vy oaxa avi ha'e rupi. Ha'e va'e ma oexa vy omboaxy.
- ³⁴ Ha'e vy onhemboja vy ojokuapa ijai, azeite ha'e vinho oikyty reve. Guymba áry ae oupi vy ogueraa peteĩ okea aty py opena aguã.
- ³⁵ — Ko'ẽ ju mokoĩ ára repy oguenoẽ vy ome'ẽ hoo va'e pe. Ha'e vy aipoe'i: “Epena porã tema kova'e ava re. Ha'e gui xapy'a rei repenaa rupi regatave ri ramo ajevvy va'amboekovia 'rã”, he'i.
- ³⁶ — Ha'e va'e mboapy va'e regua, ndee reikuaa rã mava'e nda'u jojuka va'ety kuery po py oĩ vai va'ekue irũ oiko?
- ³⁷ Ha'e rã lei re nhombo'e va'ety ombovai:
— Omboaxy va'ekue rima.
Ha'e ramo Jesus aipoe'i ixupe:
— Tereo ha'vy, ndee voi ha'ekue rami eiko.*

Maria ha'e Marta ro py oĩ jave guare

- ³⁸ Ha'e kuery oovea rupi Jesus ovaẽ peteĩ tetã'i py. Ha'e ramo peteĩ kunha Marta hery va'e omovaẽ ngoo py.
- ³⁹ Ha'e py oiko avi ikypy'y Maria hery va'e. Ha'e va'e ma oguapy oiny Senhor yv'ýry ombo'e rã oendu aguã.
- ⁴⁰ Marta ma ha'e ramia ja opy rupi mba'emo ojapo vy ojapura rei oikovy. Ha'e vy Jesus-a py ou vy aipoe'i:
— Senhor, rexa rive va'e ty'y xekypy'y xee ae'i mba'emo ajapo aguã oea rã? Aipo'ere na tou taxepytyvõ.
- ⁴¹ Ha'e rã Senhor ombovai:
— Marta, Marta, ndereguapyi rei ndepy'a eta reia rupi.
- ⁴² Mbovy'i jajapo teĩ ha'eve va'e, ha'e rami e'ỹ vy peteĩ'i anho. Ha'e rã Maria ma oiporavo iporãve va'e. Ha'e ramo ha'e nunga ndoipe'aa'i 'rã ixugui.

11

Mateus 6.9-13

- ¹ Peteĩ ára Jesus onhembo'e oiny peteĩ henda py. Ijayvupa ma jave peteĩ hemimbo'e ojerure ixupe:
— Senhor, orembo'e na ronhembo'e kuaa aguã re, João guemimbo'e kuery ombo'eague rami avi.
- ² Ha'e ramo ombo'e. Ha'e vy aipoe'i:
— Penhembo'e vy aipopeje 'rã: “Xeruete, tove nderery toamboetea. Tovaẽ ndepo'akaa ojekuaa aguã.
- ³ Ha'e ko'ẽ nhavõ ejou uka ro'u va'erã.
- ⁴ Emboguepa rojevavyague, ore voi orevy oreve va'e roperdoaa rami avi. Orereity uka eme guive poromoangekoa pe”, peje 'rã.

Irũ mba'emo re ojerure anho rei va'e omombe'uague

- ⁵ Jesus aipoe'i avi:
— Amongue peẽ kuery va'e regua pyty mbyte jave peneirũ ovaẽ 'rã pendero py. Ha'e vy aipoe'i 'rã pëvy: “Xeirũ, eiporuka xevy mboapy mbojape.
- ⁶ Mba'eta peteĩ xeirũ oguataague gui ovaẽ teĩ mba'eve ndarekoi ixupe ame'ẽ va'erã”, he'i 'rã.
- ⁷ Ha'e rã penderopy gui pembovai 'rã: “Xemoangeko eme, mba'eta okẽ onhemboty ma, ha'e xera'y kuery onhenomba ma xereve. Ndavy reguavei ame'ẽ aguã ndevy”, peje 'rã.
- ⁸ Ha'e rami teĩ xee aipoa'e pëvy: Peneirũ ae teĩ xapy'a rei napepu'ãxei 'rã mba'emo peme'ẽ aguã. Ha'e ramia gui onhea'ãve tema ramo peme'ẽ nho 'rã oikotevẽ va'e ha'e javi.*

Mateus 7.7-11

- ⁹ — Ha'e nunga rupi aipoa'e pëvy: Pejerure, ha'e ramo ome'ëa 'rã. Peka, ha'e vy pejou 'rã. Penhendu uka, ha'e ramo okẽ oipe'aa 'rã pëvy.
- ¹⁰ Mba'eta ha'e javive ojerure va'e ojopy 'rã, oeka va'e ojou 'rã, ha'e onhendu uka va'e pe oipe'aa 'rã.

* 10:27 Levítico 19.18, Deuteronomio 6.5 * 10:37 1 João 3.17,18 * 11:8 Lucas 18.1; Efésios 6.18

¹¹ Mava'e peê avakue nda'u pendera'y [mbojape re ojerure rã peme'ê 'rã ita? Xapy'a rei rã] pira re ojerure rã mboi ri nda'u peme'ê 'rã pira rekovia?

¹² Ha'e rami e'ÿ vy uru rupi'a re ojerure rã japeuxa ri nda'u peme'ê 'rã?

¹³ Pendu ke, peê kuery pendereko vai va'eri mba'emo porã peme'ê kuua va'e pendera'y kuery pe. Ha'e gui Nhanderu yva pygua katuve nda'u nome'êi 'rã ri Nhe'ê Ky'a E'ÿ ojerure va'e pe?

Mateus 12.22-30; Marcos 3.20-27

¹⁴ Amboae py Jesus oi'pe'a anha nhomboayvu e'ÿ va'e. Anha ojepe'a rire ijayvu e'ÿ va'ekue ijayvu ju ma. Ha'e ramo heta va'e kuery onhemondyipa.

¹⁵ Ha'e rami tei ha'e kuery va'e regua amongue aipoe'i:

— Peva'e tu anha ruvixa Belzebu po'akaa rupi rima oi'pe'a oikovy anha kuery — he'i.

¹⁶ Ha'e ramo amboae kuery oeko a'ã vy ixupe ojerure yva guigua hexa pyrã ojapo aguã re.

¹⁷ Ha'e rami rã ha'e kuery py'a re oĩ va'e ha'e oikuaapa vy aipoe'i:

— Tetã pygua kuery minha jomeme ri opu'ã vy nhomomba 'rã, ha'e peteĩ-teĩ oo pygua kuery joguero'a 'rã.

¹⁸ Ha'e rami ae avi Satanás kuery meme ri joe opu'ã va'e rire mba'exa tu ipo'akave ta? Po rami xeayvu mba'eta aipopeje Belzebu po'akaa rupi anha kuery aipe'aa rami.

¹⁹ Anhetê ri xee Belzebu po'akaa rupi anha aipe'a ramo, mba'e xagua po'akaa rupi tu ha'vy pendera'y kuery oi'pe'a? Ha'e nunga rupi ha'e kuery ae oikuaa uka 'rã pendeayvu rivea.

²⁰ Ha'e rã Nhanderuete po rupi ae xee anha aipe'a ramo anhetê ete Nhanderuete po'akaa ojekuaa ra'e peê kuery pe.

²¹ — Ha'e gui peteĩ ava ojerovia vaipa va'e ngoo oarõ oikovy ramo opa mba'e oguereko va'e oĩ porã 'rã.

²² Ha'e gui ma peteĩ ixugui ojeroviave va'e ou vy oity 'rã. Ha'e vy hembiporu ojeroviaague oi'pe'apa vy joupe omboja'opa 'rã oguereko va'ekue.

²³ — Xerevegua e'ÿ va'e ma xerovaigua ikuai, ha'e xea py ndajoguerui va'e ma xegui nhomnhaguaẽmba 'rã.

Mateus 12.43-45

²⁴ — Ha'e rami avi peteĩ ava gui nhe'ê vai ojepe'a vy oo 'rã tekoa e'ÿa rupi oiko, ikane'õgua aguã oeka vy. Ha'e gui ndojoui vy ojeupe aipoe'i 'rã: "Aa ju ta xero ajepe'aguge py", he'i 'rã.

²⁵ Ha'e rami vy ou ju vy ojou 'rã ngopy oi'peipa ha'e omoatyromba pyre.

²⁶ Ha'e gui ma oo vy sete irürã ju ogueru 'rã nhe'ê ixugui nda'ëveive va'e, ha'e py ovaê vy ikuai va'erã. Ha'e rami rire ava va'e pe ma opaa py jypy guare gui nda'ëveive 'rã.

Peteĩ kunha ijayvu nhenduague

²⁷ Ha'e rami Jesus ijayvupa ma ramo teta mbyte gui peteĩ kunha ijayvu nhendu. Ha'e vy aipoe'i ixupe:

— Ovy'a ete 'rã nekuavãare, nemokambuare.

²⁸ Ha'e rã ombovai:

— Ha'e rami 'rãgue py ovy'a ete 'rã Nhanderuete ayvu oendu vy ha'ekue rami ikuai va'e — he'i.*

Mateus 12.38-42

²⁹ Heta va'e kuery ijatypa ramo Jesus aipoe'i:

— Kova'e kuery ma heko vai va'e vy ojerure mba'emo kuua ukaarã ajapo aguã. Ha'e rami tei ha'e kuery pe peteĩve ndojapoai 'rã, Jonas re oiko va'ekue ramigua e'ÿ vy.

³⁰ Mba'eta Nínive pygua kuery oikuaa aguã Jonas oikoague rami avi Ava ra'y ojeapo va'ekue voi oiko 'rã aÿgua kuery oikuaa aguã.

³¹ Nhomboayvu ára py huvixave kunha kuaray puku-a katygua opu'ã ho'amy vy ijayvu 'rã aÿgua kuery re, mba'eta yvy apy gui kunha va'e ou rire Salomão 'arandua oendu aguã. Ha'e rã apy oĩ va'e ma Salomão gui yvateve va'e.

³² Nhomboayvu ára py Nínive pygua kuery voi opu'ã vy ijayvu 'rã okuapy aÿgua kuery re, mba'eta Jonas ayvu omombe'u rã ha'e kuery oendu vy ojeko rerovapa rire. Ha'e rã apy oĩ va'e ma Jonas gui yvateve va'e.

Mateus 6.22,23

³³ — Avave rei tataendy omoendy vy nomoĩ 'rã hi'ã py, neĩ ajaka guýry guive. Oĩaty py ae 'rã omõia, oike va'e kuery hendy va'e oexa porã aguã.

³⁴ Ha'e rami ae avi nhandereka ma nhanderete moexakäärã oĩ. Xapy'a rei nderexa iporã vy omoexakã 'rã nderete ha'e javi rupi. Ha'e rã nderexa na'iporãi ramo ma nderete ha'e javi pytũmba 'rã.

³⁵ Ha'e nunga rupi eikuaa pota ke nemoexakäärã oĩ va'e pytũ e'ÿ aguã.

³⁶ Ha'e rã xapy'a rei nderete ha'e javi omoexakã, neĩ peteĩ henda py pytũa noĩ ri ramo tataendy rami 'rã omoexakã opa rupi.

Fariseu kuery pe Jesus ijayvu eteague

³⁷ Opa ma Jesus mba'emo re ombojoja vy ijayvupa ramo peteĩ fariseu aipoe'i hupive oo aguã okaru vy. Ha'e ramo hoo py ovaê vy oguapy okaru aguã py.

³⁸ Ha'e gui fariseu ma Jesus ojepoei e'ÿ re okaru ta ramo oexa vy onhemondy.

³⁹ Ha'e ramo ixupe Senhor aipoe'i:

— Peê fariseu kuery ma karo ha'e hy'a pejoi 'rã hi'árykue rupi rive. Ha'e rã pendepy'apy rupi ma pejokore ha'e pejejoko e'ÿa anho oĩ.*

* 11:28 Lucas 8.19-21 * 11:39 Mateus 23.5-7,23-28; Marcos 7.1-5

40 Pene'arandu e'ÿ va'e, penderete apoare e'ÿ ri nda'u pendep'y'a apoare avi oiko?

41 Ha'e rami 'râgue py iporiaukue'i pe mba'emo pereko va'e peme'ê vy 'râe opa marâgua gui ha'eve va'e ju 'râ peiko.

42 — Peê fariseu kuery pe nda'evei ete 'râ, mba'eta dízimo peme'ê 'râ hortelã, arruda ha'e mba'emo rogue'i ha'e javi regua gui. Ha'e rã ha'evea rami pejoguereko ha'e Nhanderuetete peayvua rupi ma napendekuaixei. Ha'e nunga voi pejapo 'râgue amboae ramigua pejapoa rami avi.

43 — Peê fariseu kuery pe nda'evei ete 'rã, mba'eta penhemo'eaty py peixe 'rã tenda tenondeve oĩ va'e py anho. Tetã mbyte rupi voi peipota 'rã pendevy oxaruraa porã'i.

44 — Nda'evei ete 'rã pêvy. Yvyra rupa ndojekuaavei va'e rami pendekuai, mba'eta ha'e va'e áry rupi avakue oaxa 'rã oikuaa e'ÿ vy.*

Lei re nhombo'e va'ety pe nda'evei ete 'rã re ijayvuague

45 Ha'e ramo petei lei re nhombo'e va'ety ombovai vy aipoe'i Jesus pe:

— Porombo'ea, ha'e rami ndeayvu vy ore kuery re voi rima ndeayvu ra'e.

46 Ha'e ramo ombovai:

— Peê kuery lei re penhomb'o'e va'ety pe voi nda'evei ete 'rã, mba'eta avakue pembovoyi 'rã ndogueropo'akai va'erã py. Ha'e rã peê ma neĩ penekuã py voi napeipytyvõi 'rã.*

47 — Peê kuery pe nda'evei ete 'rã, mba'eta pejapo 'rã oo ra'angaa'i penamoĩ kuery profeta kuery jukaare rupa áry guarã.

48 Ha'e nunga rupi peikuaa uka penamoĩ kuery jokuakague peju porãa, mba'eta ha'e kuery ma profeta kuery ojuka rire peê ju pejapo hupa áry guarã.

49 Ha'e nunga rupi Nhanderuetete o'arandua rupi aipoe'i va'ekue: "Ha'e kuerya py xee ambou 'rã profeta ha'e apóstolo kuery. Ha'e va'e kuery regua amongue ojuka 'rã, ha'e rã amboae kuery ma oguereko axy 'rã", he'i va'ekue.

50 Ha'e rami aÿgua kuery ikuai yvy itui ypy guive profeta ruguy omoêague re opaga aguã rami,

51 Abel ruguy omoêague guive'i Zacarias ruguy omoêa peve. Ha'e va'e ma Nhanderuetete ropy altar oĩ va'e yvýry ojukaa va'ekue. Ha'e nunga rupi xee aipoa'e porãve pêvy: Aÿgua kuery ae 'rã opaga ha'e nungakue re.

52 — Peê kuery lei re penhomb'o'e va'ety pe nda'evei ete 'rã, mba'eta peipe'a mba'emo kuaa ukaarã oĩ va'e. Peê ae voi ndapeikuaa pota etei, ha'e oikuaaxe va'e kuery pe ma ndapeikuaa ukai guive.

Jesus ojuka aguã re onhembopy'a okuapyague

53 Jesus ojepe'a ta ma ovy rã lei re nhombo'e va'ety ha'e fariseu kuery ipoxypa vy ijayvu ete okuapy ixupe. Opa mba'e re oporandu omoĩ vaixe vy,

54 ijayvuague py ae ojopy vaixe vy.

12

Trigo mbovua re fariseu kuery reko ombojoja reve nhomongetaague

1 Heta va'e kuery ono'õmba vy joe ojeapi-api rei okuapy ramo Jesus aipoe'i guemimbo'e kuery pe anho'i:

— Penheangu ke fariseu kuery regua trigo mbovua gui. Ha'e va'e ma heko porã merami rivea.

2 Mba'eta onhomi mbyre oexa ukapaa 'rã, ha'e oikuaa uka e'ÿ pyre oikuaapaa 'rã.

3 Ha'e rami vy opa mba'e pytũ py pemombe'u va'ekue hexakãa py ju oendupaa 'rã, ha'e opy joapxya py pendeyvuague oo apyte áry gui ju omombe'ua 'rã.

4 — Xeirũ kuery, xee aipoa'e porãve pêvy: Pekiye eme penderete jukaarã kuery gui, mba'eta ha'e va'e rire mba'eve ndojapo kuaavei ma 'rã pendere.

5 Xee omombe'u ta mava'e renonde pa ha'eve pejererokyje aguã: Pejererokyje 'rã jokuva rire tata ogue e'ÿ va'e py nhomombo aguã ipo'aka va'e renonde. Tá, aipoa'e pêvy, ha'e va'e renonde ae ha'eve pejererokyje aguã.*

6 Peteĩ nhiruĩ guyra'i nda'u mokoĩ hatã'i va'e repy rive e'ÿ ri? Ha'e rami va'eri neĩ peteive re Nhanderuetete ndaexarai.

7 Pend'e'a peneakã re oĩ va'e voi oipapapa ma. Ha'e nunga rupi pekiye eme, mba'eta heta guyra'i gui voi peê pepareve.

8 — Aipoa'e avi: Avakue renonde xevy pe oikoa omombe'u porã va'ekue ha'e javi ma Ava ra'y ojeapo va'ekue voi omombe'u 'rã Nhanderuetete pegua anjo kuery renonde.

9 Ha'e rã avakue renonde naxemombe'uxeĩ va'ekue ma xee voi namombe'ui 'rã Nhanderuetete pegua anjo kuery renonde.

10 Mba'eta Ava ra'y ojeapo va'ekue re teĩ amongue ijayvu vai ramo ha'e nungakue ombogepaa 'rã. Ha'e rã Nhe'ê Ky'a E'ÿ re ijayvu vaia ague ma nombogeei 'rã.*

11 — Onhembo'eaty py pendereraa ramo, ha'e rami e'ÿ vy huvixa ha'e nhomboayvu va'ety kuery renonde teĩ pendep'y'a eta rei eme pembovai ha'e pendeyvu aguã re.

12 Mba'eta ha'e jave py Nhe'ê Ky'a E'ÿ oikuaa uka 'rã pendeyvu aguã.

* 11:44 Ha'e kuery reko rami vy yvyra rupa áry rupi oaxa vy onhemongy'a 'rã. Ha'e nunga rupi omoxiĩ 'rã pavẽ oexa vy oikuaa aguã (Mateus 23.27). * 11:46 Mateus 23.1-4,13,29-36 * 12:5 Mateus 10.26-33 * 12:10 Mateus 12.31,32; Marcos 3.28-30

Mba'e rakâte'ya re ijayvuague

¹³ Ha'e va'e jave peteĩ ava teta mbyte gui aipoe'i ixupe:

— Porombo'ea, aipo're ke'y pe tomboja'o orevy peguare xe'vy.

¹⁴ Ha'e ramo Jesus aipoe'i ixupe:

— Ava, mava'e tu xemoĩ penderuvixarã, penemba'e amboja'o uka aguã? — he'i.

¹⁵ Ha'e vy aipoe'i ha'e kuery pe:

— Peiko kuaa ke, penheangu opa mba'e re penerakâte'ya gui, mba'eta avakue rekove ma mba'emo oguerekopaa re'y.*

¹⁶ Ha'e gui ma ha'e kuery pe omombe'u peteĩ ayvu mba'emo re ombojoja vy. Ha'e vy aipoe'i:

— Peteĩ ava iporiau e'y va'e onhoty va'ekue oiko porã.

¹⁷ Ha'e rami vy ojeupe ae aipoe'i: “Mba'e nda'u ajapo 'rã, mba'eta ndarekovei amono'õ va'ekue amoĩ porã aguã.”

¹⁸ Aipoe'ive ju: “Po rami ajapo ta: Ambovaipa ta mba'emo amoĩ porãaty, ha'e gui tuvixave va'e ju 'rã ajapo, ha'e va'e py amoĩ porã aguã amono'õ va'ekue ha'e areko va'e ha'e javi.

¹⁹ Ha'e gui ma aipoa'e 'rã xejeupe: ‘Heta mba'e porã areko heta ma'et'ya reguarã. Aỹ ma apytu'u 'rã, akaru, ay'u ha'e avy'a 'rã aikovy', ha'e 'rã”, he'i.

²⁰ — Ha'e rã ixupe Nhanderuede aipoe'i: “Mba'e 'arandu e'y, kova'e pyavyve oipe'aa 'rã nenhe'ẽ. Ha'vy mba'emo remoĩ porã va'ekue, mava'e pe 'rã tu opyta?” he'i.

²¹ — Ha'e rami ae 'rã oiko ojeupe guarã mba'emo omoĩ porã teĩ Nhanderuetea py ma mba'eva ndoguereko va'e re.

Mateus 6.25-34

²² Ha'e gui Jesus aipoe'i guemimbo'e kuery pe:

— Ha'e nunga rupi xee aipoa'e pëvy: Pendepy'a eta rei eme pendekove re, neĩ pe'u va'erã ha'e penderete re pemoĩ va'erã re guive.

²³ Mba'eta penderekove ma tembi'u gui ovareve, ha'e penderete ma ao gui ovareve.

²⁴ Peikuaa pota na uruvu kuery re. Ha'e kuery ma mba'eva nonhoty'i, nomono'õi, nomoĩ porã, neĩ oguy ma voi ndoguerekoĩ guive. Ha'e rami teĩ Nhanderuede omongaru herekovy. Peẽ kuery ma guyra'i gui voi pevareve.

²⁵ Mava'e nda'u pendepy'a eta rei vy pembopukuve kuaa 'rã ruxã'i peikove aguã?

²⁶ Mba'emo ruxã'i va'e ndapejapo kuaa va'eri mba'e re tu mba'emo mboae re rive nda'evaive pendekuai?

²⁷ — Peikuaa pota na yvoty ikuai va'e re. Ha'e va'e ma mba'emo oipopë va'e'y, ombovy'i kuaa va'e'y guive. Ha'e rami teĩ xee aipoa'e pëvy: Salomão minha opa marãgua oguerekopa va'eri kova'e yvoty rami nonhemondei raka'e.

²⁸ Ha'e gui Nhanderuede ha'e rami omonhemonde 'rã jai rogue aỹ nhuũndy re ikuai, ha'e gui ko'ẽ tata py omombo va'erã va'eri. Peẽ kuery re katuve opena porãve 'rã, ndaperovia porã va'eri.

²⁹ Ha'e nunga rupi pendekuai eme pe'u ha'e pey'u va'erã pejouxea rupi rive, neĩ pejapura rei eme,

³⁰ mba'eta ha'e nunga jouxea rupi amboae regua kuery ikuai yvy jave re. Penderu ma oikuaa ae ha'e nunga peikotevê va'ea.

³¹ Ha'e nunga rupi jypy'i peka 'rã ipo'akaa. Ha'e ramo 'rãe opa mba'e ome'ẽ avi pendevy.

³² — Xerymba kuery mbovy'i pendekuai teĩ pekyje eme, mba'eta Penderu pendererovy'a vy pendevy ome'ẽ 'rã opo'akaa.

³³ Ha'e nunga rupi pevendepa ke pereko va'e, ha'e hekoviakue peme'ẽ iporiaukue'i pe. Ha'e rami vy 'rã yva re rejou voko ivaipa e'y va'erã ha'e mba'emo imarã e'y va'e, mba'eta ha'e py ma imonda va'e novaẽ 'rã, neĩ vixo'i ma voi ndo'upa rei 'rã guive.*

³⁴ Mba'eta penembovy'a va'e oĩa py penekuraxõ py peẽ voi peĩxe avi 'rã.

Tembiguai opatõ oarõ kuaa va'e omombe'uague

³⁵ — Pejeku'a jokua ke, tataendy pembogue uka eme guive.

³⁶ Pendekuai ke avakue opatõ omendaa gui ojevvy rã guarã oarõ va'e rami, mba'eta okẽ re ombota xapy'a ramo ha'e kuery oipe'a vyvoi aguã.*

³⁷ Ha'e rami vy hembiguai kuery ovy'a ete 'rã ipatõ ou vy oexa rã oarõ okuapy va'e. Anhetẽ aipoa'e pëvy, ha'e ae oiko katu vy omboguapypa 'rã mesa py, ha'e vy ou vy ojara 'rã ha'e kuery pe.

³⁸ Pytũ mbyte e'y vy pytũ mbyte raxa'i jave ovaẽ xapy'a teĩ oarõ okuapy va'e ovy'a ete 'rã ha'e rami ikuaiia py ojou ramo.

³⁹ — Ha'e rami avi peikuaa pota ke pova'e re: Peteĩ hoo va'e oikuaa va'e rire mba'e hora pa imonda va'e ovaẽ 'rãa, [oarõ vy] ndogueraa ukapai 'rãgue ngopy gui.

⁴⁰ Pendekuai kuaa pota ke peẽ voi, mba'eta ndapeikuaa potavei rei jave 'rã Ava ra'y ojeapo va'ekue ou — he'i.

⁴¹ Ha'e ramo Pedro oporandu:

— Senhor, pova'e ayvu pa ore kuery pe anho, tyrã pa amboae kuery pe avi remombe'u?

⁴² Senhor ombovai:

* 12:15 1 Timóteo 6.9-10 * 12:33 1 Pedro 1.3-5 * 12:36 Mateus 24.42-44; Marcos 13.32-37; Lucas 21.34-36

— Ha'vy mava'e nda'u peiko tembiguai ojeroviapy ha'e joe opena kuaa va'e? Ha'e ramigua ma ipatō omoī 'rā oirū kuery okaru aguā hora py omongaru va'erā.

⁴³ Ovy'a ete 'rā tembiguai kuery ipatō ou ramo ha'e rami ojapo va'e.

⁴⁴ Anhetē aipoa'e pēvy: Ha'e va'e pe opena uka 'rā opa mba'e oguereko va'e re.

⁴⁵ Ha'e rā xapy'a rei ha'e va'e tembiguai ojeupe “Xepatō ndou voi 'rā teve”, he'i vy oinupāmba 'rā avakue ha'e kunhague hexeve ikuai va'e. Okaru ha'e oy'u 'rā oka'u peve.

⁴⁶ Ha'e gui ma ha'e va'e tembiguai noarōvei vy ndoikuaa potavei rei oikovy jave ipatō ovaē 'rā. Ha'e rami vy ombopaga 'rā heko vai va'e kuery reve.

⁴⁷ — Ha'e gui tembiguai ipatō oipota va'e ojapo aguā oikuaa va'eri ndoiko katui, neī oipotaa rami ndojapoi va'ekue ma oinupāa vaipa 'rā.

⁴⁸ Ha'e rā opatō oipota va'e ndoikuaai vy ri ha'eve e'ŷa rami ojapo oikovy va'ekue ma noinupāa vaipai 'rā. Mba'eta amongue pe ome'ē retaave rire ixugui oipotaave 'rā. Ha'e rami ae avi amongue pe opena uka retaave rire ixupe ojerureave 'rā.

Mateus 10.34-36

⁴⁹ — Xee aju tata amboja aguā ko vvy re. Xevy pe ha'eve 'rāgue hendy ma va'e rire.*

⁵⁰ Ha'e rā xevy peguarā oī avi peteī nhemongarai ha'e va'e py anhemongarai uka aguā. Ha'e nunga oiko e'ŷa ja xee nda'evei aiko.

⁵¹ Tyrā pa peē kuery pexa'ā aju vvy re ikuai va'e peteī rami ikuai aguā? Any, xee ma aipoa'e pēvy: Joo rami e'ŷ-e'ŷ ikuai aguā aju.

⁵² Mba'eta aŷ gui ma peteī oo py peteī nhiruī ikuai va'e oja'o 'rā: mboapy ikuai 'rā mokoī rovai, ha'e mokoī ikuai 'rā mboapy rovai.

⁵³ Tuu opu'ā 'rā gua'y re, ha'e ta'y opu'ā 'rā ngu re. Ixy opu'ā 'rā omemby re, ha'e imemby opu'ā 'rā oxy re. Ime xy opu'ā 'rā opi'a ra'yxy re, ha'e ipi'a ra'yxy opu'ā 'rā ome xy re.*

Mba'emo kuaa ukaarā oī va'e re ijayvuague

⁵⁴ Heta va'e kuery pe aipoe'i avi:

— Ka'arua katy arai ojekuaa rā pexa vy aipopeje 'rā: “Oky ta.” Ha'e gui ma ha'ekue rami ae 'rā oky.

⁵⁵ Ha'e kuaray puku-a katy gui vvytu oipeju ramo “Kuaray haku ta” peje 'rā. Ha'ekue rami ae avi kuaray haku 'rā.

⁵⁶ Pendeko porā merami rive va'e, vvy ha'e yva re pema'ē vy peikuaa 'rā mba'emo. Ha'e rami va'eri ndapexa kuaai aŷ oiko va'e.*

⁵⁷ Mba'e re tu ndapeikuaa potai pendejegui ae, ha'evea rami peiko aguā?

⁵⁸ Ha'e rami vy pendovaigua reve huvixaa py peo vy tape rupi ma voi peikuaa pota ipo gui peo jepe aguā. Ha'e rami e'ŷ ramo penemboaxa 'rā penemboayvuārā pe, ha'e penemboayvua ma jopya pe ju 'rā penemboaxa, ha'e gui jopya ma penembo'a 'rā nhuā py.

⁵⁹ Xee aipoa'e pēvy: Napeēi 'rā ha'e gui pepagapa e'ŷa ja.

13

Galiléia pygua kuery omanoague, ha'e Siloé py torre ho'aaque re ijayvuague

¹ Ha'e va'e jave py amongue ovaē vy Jesus pe omombe'u Galiléia pygua kuery mymba ojuka reve ome'ē jave py ha'e kuery ruguy avi huvixa Pilatos omoē ukaague, mymba ruguy onheēague pyve.*

² Ha'e ramo ha'e aipoe'i:

— Peē kuery pexa'ā teve Galiléia pygua kuery mboae gui ha'e va'e kuery heko vaivea, ha'e rami oiko vai aguā?

³ Any, xee aipoa'e porāve pēvy: Peē voi ndapejeko rerovai vy pekanhymba avi 'rā ha'e kuery rami.

⁴ Ha'e gui Siloé py dezoito ikuai va'ekue árý torre ho'a vy ojukapa raka'e. Ha'e kuery nda'u amboae kuery Jerusalém py ikuai va'e gui ojevavypave ri?

⁵ Any, xee aipoa'e porāve pēvy: Peē voi ndapejeko rerovai vy pekanhymba avi 'rā ha'e kuery rami.*

Figo'y hi'a e'ŷ va'e omombe'uague

⁶ Ha'e gui Jesus omombe'u pova'e ayvu mba'emo re ombojoja reve:

— Peteī ava oguereko peteī figo'y, uvaty mbyte onhotŷ va'ekue. Hi'a re ija ou teī ndojoui.

⁷ Ha'e vy aipoe'i uvaty re opena va'e pe: “Mboapy ma'etŷ re ma apy hi'a re aju teī mba'eve ndajoui. Ejaya na. Mba'erā tu hi'a vy e'ŷ vvy re hi'ā riae?”

⁸ Ha'e rā ombovai: “Senhor, tove ranhe kova'e ma'etŷ re. Ajo'o 'rā hembypy rupi, yty ru'ūgue amoī 'rā guive.

⁹ Ha'e gui hi'a ramo ha'eve ete 'rā. Ha'e rami e'ŷ rā rejaya uka 'rā”, he'i.*

Peteī kunha oiko axy va'e omongueraague

¹⁰ Peteī sábadu py Jesus nhombo'e oiny onhembo'eaty oī va'e py.

* 12:49 Mateus 10.34-36 * 12:53 Miquéias 7.6 * 12:56 Mateus 16.1-4 * 13:1 Apy ijayvu templo py huvixa Pilatos jokuakaague re.

Ha'e va'e jave py Galiléia gui ha'e kuery ou va'ekue Nhanduete pe mymba ojuka uka vy ome'ē aguā. Ha'e rā Pilatos ojuka ha'e py.

* 13:5 Ezequiel 33.11 * 13:9 Romanos 2.4; 2 Pedro 3.9

¹¹ Ha'e py ou petei kunha dezoito ma'etÿ re ma nhe'ẽ vai omoingo axy va'e. Ojero'a rei oikovy, onhembo'yvi aguã nda'evei ramo.

¹² Ha'e gui Jesus oexa vy oenoĩ. Ha'e vy aipoe'i:

— Kunha, rekuera ma nemba'eaxya gui — he'i.

¹³ Hexe opoko ramove hi'yvi vyvoi. Ha'e vy oguerovy'a Nhanderuete.

¹⁴ Ha'e gui ma onhembo'eaty pygua huvixa ma sábadu ára py Jesus nhomonguera rã oexa vy ndojou porãi ete. Ha'e vy aipoe'i heta va'e kuery pe:

— Mboapy meme ára oĩ nhamba'eapo aguã. Ha'e va'e ára py 'rã peju pekuera aguã, sábadu py e'y — he'i.

¹⁵ Ha'e ramo ixupe Senhor aipoe'i:

— Heko porã merami rive va'e kuery, petei-tei nda'u sábadu ára py tei ndapejorai 'rã ri penerymba vaka e'y vy mburika okaruaty gui pemboy'u vy peraa aguã?

¹⁶ Mba'e re nda'u nda'evei sábadu py jaraa jepe aguã kova'e kunha Abraão ramymino va'e dezoito ma'etÿ re ma Satanás omoingo axy va'ekue? — he'i.

¹⁷ Ha'e rami ijayvu rã hexe ija'e e'y va'e kuery oendu vy oxĩmba. Ha'e rã heta va'e kuery ma ovy'a okuapy opa mba'e porã Jesus ojapo rã oexa vy.

Mateus 13.31,32; Marcos 4.30-32

¹⁸ Ha'e gui ma aipoe'i avi:

— Mba'e nunga nda'u Nhanderuete po'akaa reve joo ramigua? Mba'e nunga re nda'u ha'eve ambojoja aguã?

¹⁹ Mostarda ra'yĩ petei ava ngoka py onhotÿ va'e rami ae. Mba'eta yvate vy vyvra rami 'rã hi'ai, ha'e hakã re ma guyra'i oveve va'e ojapo 'rã guive guaityrã.

Mateus 13.33

²⁰ Aipoe'ive ju:

— Mba'e nunga re nda'u Nhanderuete po'akaa ambojoja 'rã?

²¹ Trigo mbovua rami avi ha'eve, mba'eta kunhague ojopy vy mboapy ryrú re omoirũ 'rã irũmba peve.

Okẽ ipo'i'i va'e re ijayvuague

²² Jesus oaxa ovy tetã ha'e tekoa ikuai va'e rupi. Nhombo'e ovy Jerusalém katy oo vy.

²³ Ha'e gui ma amongue ou vy oporandu ixupe:

— Senhor, mbovy'i teve ikuai oo jepe va'erã?

²⁴ Jesus ombovai:

— Penhea'ã ha'vy okẽ ipo'i'i va'e rupi peike aguã. Mba'eta xee aipoa'e pëvy: Mbovy e'y oikexe tei ndoikei 'rã.*

²⁵ Ha'e gui hoo va'e opu'ã vy omboty 'rã ngokẽ. Peẽ kuery ma okẽ re pembota-mbota 'rã oka katy gui. Ha'e vy “Senhor, eipe'a na okẽ orevy” peje 'rã guive.

— Ha'e ramo ombovai vy “Xee ndaikuaai maguigua pa peẽ kuery peikoa”, he'i 'rã.

²⁶ — Ha'e ramo aipopejeve ju 'rã: “Ore ma ndereve rokaru ha'e roy'u va'ekue, orerekoa rupi renhombo'e va'ekue guive.”

²⁷ — Ha'e ramo aipoe'i 'rã pëvy: “Xee ndaikuaai maguigua pa peẽ kuery peikoa. Pendeko vai va'e, pejepe'apa ke xea gui”, he'i 'rã.

²⁸ — Ha'e py ma pejae'opa ha'e opa marã 'rã penhendu, pexa vy Nhanderuete po'akaa py Abraão, Isaque, Jacó ha'e profeta kuery ha'e javive ikuai ramo, ha'e rã peẽ kuery ma oka py penemombopaa rire.

²⁹ Heta 'rã ou kuaray oua katy gui, oikea katy gui, ijapu'a'ia katy gui ha'e ipuku-a katy gui, ha'e vy mesa py oguapypa 'rã okuapy Nhanderuete po'akaa py.

³⁰ Ha'e rami tei takykue pyguare ma tenonde pyguarã, ha'e tenonde pyguare ma takykue pyguarã ikuai.

Mateus 23.37-39

³¹ Ha'e va'e jave py fariseu kuery ou vy aipoe'i ixupe:

— Ejepe'a na, tereo apy gui, huvixa Herodes ndejukaxe ramo — he'i okuapy.

³² Ombovai:

— Tapeo aipopeje ha'e va'e mbyku pe: “Ko'ẽ rã aipe'a 'rã anha, anhomonguera 'rã guive aikovy. Ko'ẽ mboae ramo mae ma ajapopa 'rã”, peje.†

³³ Mba'eta xee ma aÿ, ko'ẽ rã ha'e ko'ẽ mboae rã peve aguata aguã rami aiko, mba'eta Jerusalém py e'y ndojukaai 'rã profeta.

³⁴ — Jerusalém, Jerusalém, profeta kuery jukaaty, ndevy ombou pyre ita py rejapipa va'ety! Mbovykue rei e'y xee aikuavãmbaxe tei nememby kuery, opepo py uru gua'y kuery ojao'ipaa rami. Ha'e rami tei peẽ kuery ndapeipotai.

³⁵ Ha'e rami rire pendo pyta rivepa 'rã. Anhetẽ ae aipoa'e pëvy: Peẽ kuery ndaxerexavei 'rã ovaẽ e'ya ja aipopeje aguã: “Ta'ima'endu'a porãa Senhor rery rupi reju va'e re.”*

14

Peteĩ ava ijyke rurupa va'e omongueraaque

* 13:24 Mateus 7.13,14; João 10.7-10

† 13:32 Ha'e kuery “Mbyku” he'i 'rã nhombotavypa rei va'e pe.

* 13:35 Salmo 118.26, Romanos

¹ Peteĩ sábadó ára py Jesus oo peteĩ fariseu ruvixa ro py okaru aguã. Ha'e ramo hexe ha'e kuery oma'ẽ ngatu okuapy.

² Oĩ avi peteĩ ava ijyke rurupa va'e.

³ Ha'e ramo Jesus oporandu lei re nhombo'e va'ety ha'e fariseu kuery ikuai va'e pe:

— Ha'eve pa sábadó ára py nhandhomonguera aguã, tyrã pa any? — he'i.

⁴ Ha'e rã ha'e kuery ma mba'eve nde'i. Ha'e ramo ava va'e po re ojopy vy omonguera, ha'e gui omoudouka ju.

⁵ Ha'e rire oporandu ikuai va'e pe:

— Peẽ kuery nda'ũ pendera'y e'ỹ vy penerymba vaka yvykua py ho'a ramo napenoẽ potai 'rã ri, sábadó ára py teĩ? — he'i.

⁶ Ha'e ramo ha'e kuery nombovai kuaai.

Tenondeve py ikuai va'e re ijayvuague

⁷ Ha'e gui Jesus oma'ẽ vy oexa oenoĩ mbyre kuery tenda tenondeve oĩ va'e anho oiporavo rã oĩ aguã. Ha'e rami vy ha'e kuery pe omombe'u peteĩ avyu mba'emo re ombojoja vy:

⁸ — Amongue omendaa py penerenoĩ ramo nda'evei tenda tenondeve oĩ va'e py peĩ aguã. Mba'eta xapy'a rei pendegui yvateve va'e oenoĩ mbyre ou ramo

⁹ penerenoĩare ou vy “Eme'ẽ peva'e pe tenda py oguapy aguã”, he'i 'rã pëvy. Ha'e ramo peximba reve 'rã peva tenda ijapy'i py oĩ va'e py.

¹⁰ Ha'e rami 'rãgue py amongue penerenoĩ ramo ha'eveve tenda ijapy'i py oĩ va'e py peĩ. Ha'e ramo penerenoĩare ou vy “Xeirũ, kyvõve ke eguapy”, he'i 'rã pëvy. Ha'e ramo oenoĩ mbyre kuery ha'e javi oikuaa 'rã penemboetevea.

¹¹ Mba'eta ha'e javive onhemboyvate va'ekue omo'yvyĩ'ave 'rã. Ha'e rã onhemo'yvyĩ' va'ekue ma omboyvateave 'rã — he'i.*

¹² Ha'e gui ma henoĩare pe ju aipoe'i:

— Ngaru rejapo vy nda'evei renoĩ aguã neirũ kuery anho, nderyvy kuery, neretarã kuery, neĩ ndea katy'i iporiau e'ỹ va'e kuery, ndevy pe ha'e kuery ju ha'ekue rami ojapo e'ỹ aguã omboekovia vy.

¹³ Ha'e rami 'rãgue py ngaru rejapo vy renoĩ 'rã iporiaukue'i, hetyma rovaikue va'e, uguata e'ỹ va'e ha'e ára revegua e'ỹ ikuai va'e.

¹⁴ Ha'e rami vy nemoingo porã 'rã, mba'eta ha'e kuery ndojou 'rã omboekovia aguã. Ha'e nungakue rekovia rejopy 'rã heko porã va'e kuery omboete jeyva ára py.*

Ngaru re ombojojaague

¹⁵ Ha'e rami ijayvu rã mesa py hexeve uguapy oiny va'e regua peteĩ oendu vy aipoe'i:

— Ovy'a ete 'rã Nhanderuete po'akaa py okaru okuapy va'e.

¹⁶ Ha'e rã ombovai vy aipoe'i:

— Peteĩ ava ojapo ngaru tuvixa va'e, heta oenoĩ uka guive.

¹⁷ Okaru aguã ovaẽ ma ramo omoudouka guembiguaĩ oenoĩ uka va'ekue pe “Peju, uguereko katupa ma”, he'i aguã.

¹⁸ Ha'e rami teĩ ha'e javive omombe'u oo aguã nda'eveia rami. Peteĩ ma aipoe'i: “Xee ma ajogua xeyvyrã, ha'e py ranhe aa ta ama'ẽ vy. Ha'e rami vy ajerure remombe'u aguã ndaa reguaia”, he'i.

¹⁹ Amboae aipoe'i avi: “Xee ma peteĩ nhiruĩ meme vaka ajogua rire aa ta ha'anga. Ha'e rami vy ajerure remombe'u aguã ndaa reguaia”, he'i.

²⁰ Amboae ma “Xee ma amenda ramo vy ndaa reguai”, he'i.

²¹ — Ha'e gui ma tembiguai ojevvy vy omombe'upa opatõ pe. Ha'e ramo hoo va'e ivai reve aipoe'i guembiguaĩ pe: “Tereo pojava tetã rupi tape ikuai va'e rupi. Eru apy iporiaukue'i, uguata e'ỹ va'e, ára revegua e'ỹ ha'e ijyva rovaikue va'e”, he'i.

²² — Ha'e va'e rire hembiguaĩ ou vy aipoe'i: “Xepatõ, ajapopa ma rejapo uka va'ekue. Ha'e rami teĩ oĩve teri tenda.”

²³ — Ha'e ramo ipatõ ombovai: “Tereo ju tape ikuai va'e rupi, ejapo ha'e javive ou vy xeropy omonyẽ aguã.

²⁴ Xee aipoa'e avi pëvy: Avakue aenoĩ uka ypy va'ekue ma neĩ peteĩve ndokaru 'rã ngaru ajapoa py.”

Cristo rupive jaikoxe vy jaejapa aguã re ijayvuague

²⁵ Heta ete va'e hupive oje'oi ramo ojere vy aipoe'i ha'e kuery pe:

²⁶ — Amongue xea py ouxe teĩ nguu, oxy, gua'yxy, gua'y kuery, guyvvy kuery, gueindy kuery ha'e guekove ae oayvuve va'e nda'evei xeremimbo'erã.*

²⁷ Amongue xerupive oikoxe teĩ ojeupegua kuruxu ndoguerai va'e ma nda'evei avi xeremimbo'erã.

²⁸ Mba'eta peẽ kuery va'e regua ma torre pejapo ta vy peguapy ranhe 'rã peikuaa pota aguã ha'eve paa pejapopa aguã.

²⁹ Ha'e rami e'ỹ vy pemboypy rire ndapejapapai rã pavẽ oexa vy pendejojai rei 'rã,

³⁰ ha'e vy aipoe'i 'rã: “Peva'e ava omboypy rive, ndojapopai”, he'i 'rã okuapy.

* 14:11 Mateus 23.6,12; Provérbios 25.6,7 * 14:14 Provérbios 19.17 * 14:26 Mateus 10.37-39; Lucas 9.57-62

³¹ — Huvixa oiko va'e amboae huvixa re opu'a'ã aguã oo ta vy ha'e rami ae avi 'rã oiko, oguapy 'rã ranhe oikuaa pota aguã dez mil xondaro reve vy pa vinte mil hovaigua ou va'e re ipo'aka 'rãa re.

³² Ha'e rami aguã nda'evei ramo amboae kuery mombyry teri ou reve ombou 'rã peteĩ guembiguai amboae kuery reve ikuai porã ju aguã re ojerure aguã.

³³ Ha'e rami avi peẽ kuery voi mba'emo pereko va'e pejapa e'ỹ vy nda'evei xeremimbo'e peiko aguã.

Mateus 5.13; Marcos 9.50

³⁴ — Juky ma iporã vaipa. Ha'e rã xapy'a rei nae'ẽvei rire mba'exa 'rã tu he'ẽ ju?

³⁵ Nda'evei 'rã vvy, neĩ yty reguarã guive. Nhamombo rive 'rã oka py. Ijapyxa oendu aguã oĩ va'e toendu.

15

Jesus omovaẽague heko vai va'e kuery

¹ Ha'e javive imposto re nhombopaga va'ety ha'e heko vai va'e kuery ma Jesus ayvu oenduxe vy onhemboja okuapy hexe.

² Ha'e rã fariseu ha'e lei re nhombo'e va'ety kuery ma ha'e nunga oexa vy ijayvu rei vy aipoe'i:

— Peva'e tu omovaẽ rima ojevavy va'e kuery, ha'e kuery reve okaru guive — he'i okuapy.*

Mateus 18.10-14

³ Ha'e ramo Jesus omombe'u pova'e ayvu mba'emo re ombojoja vy:

⁴ — Mava'e nda'u pereko 'rã cem vexa'i, ha'e gui peteĩ pemokanhy vy noventa e nove ikuai va'e ndapejai 'rã teve tekoa e'ya py, ha'e vy pa ndapeoi 'rã teve okanhy va'ekue pejou peve peka aguã?

⁵ Pejou ma vy pejaxeĩ 'rã heruvy pevy'a vy.

⁶ Pendo py pevaẽ ma vy pemboatypa 'rã peneirũ ha'e penetarã kuery. Ha'e vy aipopeje 'rã: "Javy'a ke xereve, mba'eta ajou ju ma xerymba amokanhy va'ekue", peje 'rã.

⁷ — Xee aipoa'e pëvy: Ha'ekue rami avi yva re oguerovy'aa ete 'rã peteĩ heko vaiague gui ojeko rerova ramo, noventa e nove heko porã va'e vy ndojeko rerovai va'e gui oguerovy'ave 'rã.

Hatã'i va'e omokanhy mbyre omombe'uague

⁸ — Mava'e kunha dez hatã'i va'e ogueroko va'e nda'u peteĩ omokanhy vy nomoendyi 'rã tataendy, ha'e ngoguy rupi ndoipeĩ 'rã ri omokanhy va'ekue ojou peve?

⁹ Ojou ma vy omboatypa 'rã oirũ ha'e guetarã kuery. Ha'e vy aipoe'i 'rã: "Javy'a ke xereve, mba'eta ajou ju ma perãta amokanhy va'ekue", he'i 'rã.

¹⁰ — Xee aipoa'e pëvy: Ha'e rami ae avi Nhanderuete pegua anjo kuery oguerovy'a 'rã okuapy peteĩ heko vaiague gui ojeko rerova ramo.

Ta'y okanhy ranhe va'ekue omombe'uague

¹¹ Aipoe'ive ju:

— Peteĩ ava ogueroko mokoĩ gua'py.

¹² Kunumive va'e aipoe'i nguu pe: "Xeru, eme'ẽ xemba'erã va'ekue rereko va'e", he'i. Ha'e ramo omboja'o ogueroko va'e.

¹³ — Kueve'i ma rire ta'y kunumive va'e omono'õmba ogueroko va'e, ha'e oo mombyry amboae vvy re. Ha'e py omokanhymba ogueroko va'e, opa marã rei oikoa rupi.

¹⁴ Ogueroko va'ekue omomba rire ha'e va'e vvy re oiko karuai. Ha'e ramo oiko axy.

¹⁵ Ha'e rami vy oo omba'eapo peteĩ ava ha'e va'e vvy regua pe. Ha'e va'e omoudouka poryko kuery ikuai rupi opena aguã.

¹⁶ Ha'e rami oiko vy alfarroba rope poryko ho'u va'e ha'e voi ho'uxe teĩ ixupe avave rei nome'ẽi mba'eve.

¹⁷ — Ha'e gui ma onhemboaxy vy ojeupe ae aipoe'i: "Mbovy pa ikuai xerua py omba'eapo vy okaru porã va'e, ha'e rã xee ma apy amano ta ma karuai gui.

¹⁸ Apu'ã ta, ha'e vy aa 'rã xerua py. Ha'e vy aipoa'e 'rã ixupe: 'Xeru, xee ajevavy yva pygua rovai, nderovai guive.

¹⁹ Nda'evevei ma ndera'y aiko aguã. Xerereko omba'eapo va'e rami rive'i', ha'e 'rã."

²⁰ Ha'e rami vy opu'ã vy oo ju nguua katy.

— Mombyry teri ou jekuaa reve tuu oexa vy omboaxy. Ha'e vy onha ovy, oikuavã reve oayvu.

²¹ Ha'e ramo ta'y aipoe'i: "Xeru, xee ajevavy yva pygua rovai, nderovai voi. Nda'evevei ndera'y aiko aguã", he'i.

²² — Ha'e rami teĩ tuu aipoe'i guembiguai kuery pe: "Peru pojava ao iporãve va'e, pemonhemonde. Ikuã re ma pemoĩ kuã regua, ha'e gui ipy re ma pemoĩ py regua.

²³ Peru avi vaka ra'y ikyra va'e, ha'e pejuka. Jakaru ha'e javy'a,

²⁴ mba'eta kova'e xera'y omano va'ekue ri oikove ju. Okanhy va'ekue ojoua ju", he'i. Ha'e rami vy ovy'a okuapy.

²⁵ — Ha'e ramia ja ta'y tujave va'e mba'ety rupi oiko. Ha'e gui ojevvy, oo py ovaẽ rai'i ouvvy vy oendu mba'epu ha'e ojeroky va'e.

²⁶ Ha'e vy peteĩ tembiguai oenoĩ vy oporandu mba'e pa oikoa re.

²⁷ Ombovai: "Nderyvy ou ramo rima nderu ojuka uka kuri vaka ra'y ikyra va'e, hexaĩ reve ou ramo", he'i.

²⁸ — Ha'e ramo tyke'y ipoxy vy ndoikexei. Ha'e ramo tuu oẽ ombopy'a porã aguã.

²⁹ Ha'e ramo aipoe'i nguu pe: "Mbovy ma'etÿ re ma pa mba'emo ajapo aikovy ndevy? Peteïgueve ma voi noronhe'ê apo e'ÿi. Ha'e rami teï neï peteïgueve ma kavara'i nereme'êi xeirü kuery reve avy'a aguã.

³⁰ Ha'e rã ndera'y kunhague re nembra'e rei-rei omokanhymba va'ekue ou ramo ma je rejuka uka vaka ra'y ikyra va'e", he'i.

³¹ — Ha'e rã tuu ombovai: "Xera'y, ndee ma xea py riae reiko va'e, ha'e mba'emo areko va'e ma nembra'e meme.

³² Ha'e rami avi jarovy'a 'rãe, javy'a 'rã, mba'eta nderyvy omano va'ekue ri oikove ju, okanhy va'ekue ojoua ju."*

16

Tembiguaï ojeroviapy e'ÿ va'e omombe'uague

¹ Guemimbo'e kuery pe Jesus aipoe'i avi:

— Oiko peteï ava iporiau e'ÿ va'e. Ha'e va'e ma peteï ava omopena omba'e rei-rei re. Ha'e va'e re ayvu oiko imba'e rei-rei re nopena porãia rami.

² — Ha'e ramo ija oenoï vy aipoe'i ixupe: "Anhetê pa ndere ayvu oiko va'e? Emombe'u rejapo va'ekue ha'e javi, mba'eta nda'evevei ma xevy pe remba'eapove aguã", he'i.

³ — Ha'e ramo mba'e rei-rei re opena va'ety aipoe'i ojeupe: "Mba'e nda'u ajapo 'rã? Mba'eta xepatô xepe'a ta ma amba'eapoa gui. Mba'ety rupi amba'eapoa aguã ma nanhanimai, ha'e rã ajerurea rupi aiko aguã ma axi.

⁴ Aikuaa ma mba'e pa ajapo 'rãa, amba'eapoa gui xepe'a ramo ngoo py xemovaêa aguã", he'i.

⁵ — Ha'e rami vy oenoïmba ipatô pe oreve va'e kuery peteï-teï. Jypygua pe aipoe'i: "Mbovy tu rereve xepatô pe?"

⁶ Ombovai: "Cem rryru azeite." Ha'e ramo aipoe'i: "Ejopy ke rereveague oïa, eguapy, ha'e embopara cinqüenta rryru ete'i", he'i.

⁷ — Amboae pe ju oporandu: "Ha'vy ndee, mbovy tu rereve?" Ha'e ombovai: "Cem rryru trigo." Ixupe aipoe'i: "Ejopy ke rereveague oïa, ha'e embopara oitenta ete'i", he'i.

⁸ — Ha'e rami rã ipatô oguero'vy'a guembiguaï ojeroviapy e'ÿ teï oiko kuaa ramo, mba'eta hendy va'e ra'y kuery gui ma ko yvy regua kuery ikuai kuaave 'rã joguerekoa py.

⁹ Ha'e nunga rupi xee aipoa'e pëvy: Perekö kuaa pota ke mba'emo ko yvy regua peneirürã pejoue aguã rami, ha'e nunga opa ramo ha'e kuery ju penemovaê aguã oo imarã e'ÿ va'e py.*

¹⁰ Mba'eta mbovy'i oguereko kuaa va'e ma heta va'e voi oguereko kuaa 'rã. Ha'e rã mbovy'i va'e ndoguereko kuaa va'e ma heta va'e voi ndoguereko kuaa 'rã.

¹¹ Ha'e nunga rupi mba'emo ko yvy regua ndaperekö kuaa rire mava'e tu pendepo py omboaxa ta mba'emo iporã ete va'e?

¹² Nhomba'e re napepena porã rire mava'e tu ome'ê ta pendevy guarã va'ekue?

¹³ — Avave rei nomba'eapoi 'rã mokoï patô pe. Mba'eta peteï re nda'ija'eive 'rã amboae oyvuvu vy. Ha'e rami e'ÿ vy peteï ojou porãve vy amboae ma ndojou porãive 'rã. Nda'evei Nhanderuete pe peiko aguã, perãta re nda'evei reve.

Fariseu kuery pe Jesus ijayvu eteague

¹⁴ Fariseu kuery ha'e nunga oendu vy ojoi rei okuapy, perãta re nda'eveive va'e vy.

¹⁵ Ha'e ramo Jesus aipoe'i ha'e kuery pe:

— Peê kuery ma penhemboeko porã amboae kuery oexaa rupi. Ha'e rã Nhanderuete ma oikuaapa pendepy'a re oï va'e. Mba'eta avakue ojou porãve va'e ma Nhanderuete pe ha'eve'ÿ va'e.

¹⁶ — Lei ha'e profeta ombopara va'ekue ma João Batista oikoa ára peve'i guarã va'ekue. Ha'e va'e rire ma ayvu porã Nhanderuete po'akaa regua omombe'ua ramo pavê onhea'ã oupity aguã.

¹⁷ Ha'e rami avi yva ha'e yvy okanhymbaa gui haxyve peteï ipara'i lei re oï va'ekue oaxa rive.*

Mateus 19,9; Marcos 10.10-12

¹⁸ — Gua'lyx gui opoi vy amboae re omenda va'e ma itavy, ha'e kunha oea pyre re omenda va'e itavy avi.

Oguerekopa va'e ha'e Lázaro omombe'uague

¹⁹ — Oiko peteï ava iporiau e'ÿ va'e, púrpura ha'e ajukue iporãve va'e py anho onhemonde va'e, ko'ê nhavõ ngaru ojapo va'e.

²⁰ Oiko avi peteï ava poriaukue'i Lázaro hery va'e, ijaipa'i va'e. Iporiau e'ÿ va'e rokê yvy'iry omoïa.

²¹ Ha'e va'e ma ho'uxe iporiau e'ÿ va'e mesa gui ikure-kure'i ho'a va'ekue. Ijai re ma jagua kuery ou vy oere guive.

²² — Iporiaukue'i omano ma ramo anjo kuery ogueraa Abraão yvÿry opytu'u aguã py. Ha'e rã iporiau e'ÿ va'ekue omano ramo ma onhono porã.

²³ — Haku vaikuea py iporiau e'ÿ va'ekue oiko axy reve oma'ê vy oexa mombyry Abraão ha'e Lázaro ijvÿry oï rã.

²⁴ Ha'e ramo ojapukai vy aipoe'i: "Xeru Abraão, xemboaxy ke, ha'e vy embou Lázaro tomoakÿ okuã py py xeapekü omboaku ro'y aguã, mba'eta tataendy raku py aiko axy", he'i.

* 15:32 Efésios 2.1-10; Tiago 4.8-10 * 16:9 1 Timóteo 6.17-19 * 16:17 Mateus 11.12,13; 5.17,18

²⁵ — Ha'e rā Abraão aipoe'i: “Xera'y, nema'endu'a ke reiko teri vy opa mba'e porā rerekoague re. Ha'e rā Lázaro ma oiko axy rei va'ekue. Aý ma apy oiko opytu'ua py, ha'e rā ndee ma reiko axya py rei.*

²⁶ Oí avi nhandekuaia mbyte peteí vvykua tuvixa va'e. Ha'e va'e gui nda'evei kyvō katy gui upe katy oaxaa aguā, neí upe katy gui kyvō katy nda'evei avi”, he'i.

²⁷ — Ha'e gui ma aipoe'ive ju: “Xeru, xee ajerure xeru ro py Lázaro remondouka aguā

²⁸ xeryvy kuery peteí nhiruá areko va'e ikuiaia py, ha'e kuery omonheangu aguā, ha'e kuery ou e'ý aguā oiko axy aguā py.”

²⁹ — Abraão ombovai: “Ha'e rami avi ha'e kuery oguereko ae ma Moisés ha'e profeta kuery ombopara va'ekue. Toendu ha'e nunga”, he'i.

³⁰ — Ha'e rā ojerureve: “Any xeru Abraão, amongue omanoague gui onhemboete vy ha'e kuerya py oo ramo 'rāe ojeko rerova.”

³¹ — Ha'e rami rā Abraão ombovai: “Moisés ha'e profeta kuery ombopara va'ekue re noendu potai ri vy ndogueroviaí 'rā amongue omanoague gui onhemboete ramo voi.”*

17

Mateus 18.6,7; Marcos 9.42

¹ Jesus aipoe'i guemimbo'e kuery pe:

— Oiko riae 'rā joityarā. Ha'e rami teí nda'evei ete 'rā joityare kuery pe.

² Mba'eta kova'e kyrigüe va'e regua amongue oity 'rāgue py, ha'eveve oityxe va'e ajuly re ita mba'emo mongu'ia ojokua pyre reve ye'ë py omombo va'e rire.

Mateus 18.21,22

³ — Peiko kuua pota ke. Ndevy pe nderegua otekoavy ri ramo ndeayvu 'rā ixupe. Ha'e rā ojeko rerova ramo reperdoa 'rā.

⁴ Peteí ára pyve sete-kue ndevy otekoavy teí sete-kue ae ndea py ou vy “Nda'eveia aendu”, he'i ramo eperdoa ju — he'i.*

⁵ Ha'e ramo apóstolo kuery aipoe'i Senhor pe:

— Emoíve ke rojeroviaa.

⁶ Senhor ombovai:

— Pejerviaa ma peteí mostarda ra'yí'i rami ri jepe oí va'e rire kova'e amora rembypy pe “Ejeapo'o ha'e enhenhotý ye'ë py” peje teí pendeayvua oiko 'rāgue.

⁷ — Peë kuery ma pereko 'rā penembiguaí mba'ety rupi e'ý vy vaka re openaa rupi omba'eapo va'e. Ha'e va'e ma omba'eapoa gui ou ramo “Eju ke ekaru” peje 'rā teve?

⁸ Ha'e rami 'rāgue py aipopeje 'rā: “Ejapo ranhe ke xee ha'u va'erā. Enhemboekovia vy ejara xevy akaru ha'e ay'u peve. Ha'e rire ma ndee ju 'rā rekaru ha'e rey'u”, peje 'rā.

⁹ Penembiguaí kuery pendeayvua ojapo teí ha'e kuery pe “Ha'eve ete ko” ndapeje riaeí 'rā.

¹⁰ Peë kuery voi ha'e rami avi, pendevy pe ojapo uka pyre pejapopa ma vy ha'eve aipopeje aguā: “Ore ma tembiguai oguerovy'a pyrā e'ý, mba'eta rojapo 'rā va'ekue anho rojapo.”

Dez lepra revegua omongueraague

¹¹ Jerusalém tetā katy Jesus oo vy oaxa Samaria ha'e Galiléia mbyte rupi.

¹² Peteí tekoa py ovaë ramove dez lepra revegua ovaexí jogueruvy.

¹³ Mombyry jogueropytaa py ixupe ojapukai reve aipoe'i:

— Jesus, Porombo'ea, oremboaxy ke.

¹⁴ Jesus oexa vy ombovai:

— Tapeo ha'vy pejexa uka sacerdote kuery pe — he'i. Ha'e ramo ha'e kuery ooa rupive okuerapa.

¹⁵ Ha'e kuery dez va'e regua peteí ma okuerapaa oexa vy ojevuy ju oía py. Ijavyv atā reve Nhanderuete pe oporaei ouvuy,

¹⁶ ha'e Jesus nonde guenapy'ā re oí, vvy re ngova omovaë oguerovy'aa rupi. Ha'e va'e ma Samaria pygua.

¹⁷ Ha'e rami rā Jesus oporandu ixupe:

— Dez e'ý teve pekuera ra'e? Mamo tu amboae kuery nove ikuai?

¹⁸ Jípoi ri nda'u Nhanderuete pe oporaei vy ojevuy va'erā, kova'e amboae regua e'ý vy? — he'i.

¹⁹ Ha'e vy aipoe'ive ju:

— Epu'ā katu, tereo. Rejeroviaa ndereraa jepe.

Nhanderuete po'akaa ojekuaa 'rāa re ijayvuague

²⁰ Fariseu kuery oporandu raka'e pa Nhanderuete po'akaa ojekuaa 'rāa re. Ha'e ramo ha'e kuery pe Jesus ombovai:

— Nhanderuete po'akaa ma jaexa va'erā rami e'ý ojekuaa va'e.

²¹ Ha'e nunga pe aipo nda'eai 'rā: “Apy rima”, neí “Pe py rima oí” nda'eai 'rā, mba'eta Nhanderuete po'akaa ma penembyte ae oí — he'i.

²² Ha'e gui ma guemimbo'e kuery pe ju aipoe'i:

— Ovaë 'rā Ava ra'y ojeapo va'ekue ojekuaa rā pexaxe rei aguā ára, teí ndapexai ranhe 'rā.

²³ Pendeivy pe “Apy rima” e'ý vy “Pe py rima oí” 'ea teí tapeo eme ha'e kuery rupive.

* 16:25 Lucas 6.20-26 * 16:31 Mateus 28.11-15 * 17:4 Efésios 4.32; Colossenses 3.13

²⁴ Mba'eta overa vy yva jave re hexakā ouvya rami avi ojekuaa 'rā Ava ra'y ojeapo va'ekue ára.

²⁵ Ha'e rami teĩ ha'e va'e'y mbove hexe aýgua kuery nda'ija'ei rā oiko axy 'rāe.

²⁶ — Noé oiko jave py oikoague rami avi oiko 'rā Ava ra'y ojeapo va'ekue ára.

²⁷ Mba'eta okaru ha'e oy'u okuapy, omenda ha'e nhomomenda raka'e Noé kanoã py oikea ára peve. Ha'e gui ma yy ou vy omomba ha'e javive.*

²⁸ Ha'ekue rami avi oiko Ló oiko jave py. Okaru, oy'u, mba'emo ojogua, ovende, onhotý ha'e ojapo okuapy.

²⁹ Ha'e gui ma Sodoma tetã gui Ló ojepe'a ramove yva gui ho'a raka'e tata enxofre revegua, omomba ha'e javive.

³⁰ Ha'ekue rami avi oiko 'rā Ava ra'y ojeapo va'ekue ojekuaa uka aguã ára.

³¹ Ha'e va'e ára ma amongue ngoo áry oĩ va'e togeuy eme ngopy oguereko va'e oguenoẽ aguã. Ha'e rami ae omba'eapoa rupi ikuai va'e tojevy eme guakykue.

³² Penema'endu'a ke Ló ra'yxy re oiko va'ekue re.*

³³ Mba'eta nomanoxei va'ekue omokanhy 'rā guekove. Ha'e rā ojuka uka va'e ma ogueraa jepe uka 'rā guekove.

³⁴ Aipoa'e pëvy: Ha'e va'e pytũ mokoĩ oke 'rā oupy peteĩ tupa py. Peteĩ heraa 'rā, ha'e rā amboae ma oejaa 'rā.

³⁵ Mokoĩ kunhague ikuai 'rā omba'exoa py. Peteĩ heraa 'rā, ha'e rā amboae oejaa 'rā.

³⁶ [Mokoĩ ikuai 'rā mba'ety py. Peteĩ heraa 'rā, ha'e rā amboae oejaa 'rā] — he'i.

³⁷ Ha'e ramo ixupe oporandu okuapy:

— Senhor, mamo 'rā tu ha'e nunga oiko?

Ombovai ha'e kuery pe:

— Mamo rā te'õgue ituaia py xapirẽ voi onhemboaty 'rā okuapy — he'i.

18

Nhomboayvu va'ety porayvu e'y va'e omombe'uague

¹ Ha'e gui Jesus omombe'u peteĩ ayvu mba'emo re ombojoja vy, nhandekuerai e'y re nhandembo'e riaie aguã.*

² — Peteĩ tetã py oiko peteĩ nhomboayvu va'ety Nhanderuetete renonde ojererokyjea rupi e'y oiko va'e, neĩ avakue omboete e'y va'e guive.

³ Ha'e va'e tetã py oiko avi peteĩ imeve'y va'e. Ha'e va'e ma huvixa oĩa py ou vy aipoa'e: “Eikuaa pota na xerovaigua kuery xemoangeko reia re”, he'i.

⁴ — Ha'e rā ha'e ma ndoikuaa potaxei ranhe ha'e nunga re. Ha'e rire mae ma aipoa'e ojeupe: “Anhetẽ ae ndajerovia Nhanderuetete re, ha'e neĩ avakue namboetei.

⁵ Ha'e gui imeve'y va'e ojerure riaie ete ma ramo aikuaa pota nho 'rā, xemoangeko reia rie e'y aguã”, he'i.

⁶ Ha'e ramo Senhor aipoa'e:

— Peikuaa pota ke huvixa porayvu e'y va'e ijayvuague re.

⁷ Ha'e gui Nhanderuetete nda'u ndoikuaa pota voi 'rā ri hembiporavo kuery ára pukukue re ha'e pytũ mbukukue re ixupe ojapukai va'e re? Oikuaa pota aguã are merami teĩ

⁸ xee aipoa'e: Oikuaa pota voi 'rā pendere. Ha'e rami teĩ Ava ra'y ojeapo va'ekue ou ju vy nda'u ojou 'rā ri ojerovia va'e ko yvy re?

Fariseu ha'e imposto re nhombopaga va'ety omombe'uague

⁹ Omombe'u avi pova'e ayvu mba'emo re ombojoja vy, amongue ojee ae ojerovia ha'e onhemboeko porãxe vy jojou vai va'e re ijayvu vy.

¹⁰ — Mokoĩ ava oo templo py onhembo'e aguã. Peteĩ ma fariseu, ha'e rā amboae ma imposto re nhombopaga va'ety.

¹¹ Fariseu va'e opu'ã ho'amy vy ojeupe ae onhembo'e po rami: “Xeruetete, xee roguerovy'a, mba'eta avakue mboae rami rami e'y aiko, imonda va'e, jokorepa rei, itavy rei va'e, peva'e imposto re nhombopaga va'ety rami e'y guive.

¹² Semana nhavõ re mokoigue kuerei 'rā aiko akaru e'y re. Ha'e opa mba'e ajou va'ekue gui ame'ẽ aikovy dízimo”, he'i.

¹³ — Ha'e rā imposto re nhombopaga va'ety ma mombyry'i hi'aĩ, neĩ yva re oma'ẽ aguã voi nda'ipy'a guaxui. Opexo re oipete-pete reve aipoa'e: “Xeruetete, xemoaxy ke, xee ajevavya va'e aiko”, he'i.

¹⁴ — Xee aipoa'e pëvy: Ha'e va'e anho omboeko porã mbyre oo ngoo katy, fariseu ma any. Mba'eta ha'e javive ha'e ae onhemboyvate va'e omo'yvy'i'iaive 'rā. Ha'e rā onhembo'yvy'i' va'ekue ma omboyvateave 'rā.*

Mateus 19.13-15; Marcos 10.13-16

¹⁵ Ha'e oĩa py oguerua kyrigüe ha'e kuery re opo omo'õ aguã. Ha'e rā hemimbo'e kuery oexa vy ijayvu ete okuapy herua kuery pe.

¹⁶ Ha'e rā Jesus ma ojea py kyrigüe oenoĩ vy aipoa'e:

— Tove tou kyrigüe, pejoko eme, mba'eta peva'e ramigua'i peguarã ae Nhanderuetete po'akaa.

* 17:27 Mateus 24.37-44 * 17:32 Ló ra'yxy ma Sodoma tetã gui oo jepe vy guakykue re oma'ẽ ramo Nhanderuetete ojuka raka'e, ha'e ramo juky rive opyta (Gênesis 19.26). * 18:1 Lucas 11.5-10; 1 Tessalonicenses 5.17 * 18:14 Mateus 6.5-8; João 9.41;

- ¹⁷ Anhetē aipoa'e pēvy: Kyrīgūe'i rami e'ŷ Nhanderuete po'akaa nomovaēi va'e ma ndoikei 'rāe ha'e py.
Mateus 19.16-22; Marcos 10.17-22
- ¹⁸ Peteī ava omboetepevy oī va'e oporandu ixupe:
 — Porombo'ea ndereko porā va'e, mba'e nda'u ajapo 'rā tekove marā e'ŷ aupity aguā?
- ¹⁹ Jesus ombovai:
 — Mba'e re tu "Ndereko porā va'e", 're xe'vy? Avave rei ndaeko porāi Nhanderuete e'ŷ vy.
- ²⁰ Reikuaa ae ma ojapo uka pyre: "Ndetavy eme, ejojuka eme, nemonda eme, ndeayvu rive eme joe, emboete nderu ha'e ndexy", he'i.
- ²¹ Ava va'e aipoe'ive ju:
 — Ha'e nunga ha'e javi ajapopa ae ma, xekyrī guive.*
- ²² Jesus oendu vy aipoe'i:
 — Peteī mba'e ma oata teri ndevy. Evendepa rereko va'e ha'e javi, ha'e hepykue eme'ēmba iporiaukue'i pe. Ha'e vy 'rāe rereko ovarave va'e yva re. Ha'e gui mae ma eju xerupive — he'i.
- ²³ Ha'e ramo ha'e va'e ayvu oendu vy ndovy'ai ete, oguerokopa va'e vy.
Mateus 19.23-30; Marcos 10.23-31
- ²⁴ Jesus ma ava va'e ndovy'aveia oexa vy aipoe'i:
 — Haxy ete oguerokopa va'e kuery Nhanderuete po'akaa py oike aguā — he'i.*
- ²⁵ Nhanderuete po'akaa py oguerokopa va'e oikea gui ndaxyive juu nambi kua rupi camelo oaxa aguā — he'i.
- ²⁶ Ha'e ramo oendu va'e kuery aipoe'i:
 — Mba'e xagua 'rā tu ha'vy oo jepe?
- ²⁷ Ombovai:
 — Avakue pe haxy va'e ma Nhanderuete pe ndaxyi — he'i.
- ²⁸ Ha'e ramo Pedro aipoe'i:
 — Ore kuery ma orero roejapa va'ekue nderupive orekuai aguā.
- ²⁹ Ha'e ramo Jesus ombovai ha'e kuery pe:
 — Anhetē aipoa'e pēvy: Ha'e javi Nhanderuete po'akaa rupi oiko aguā ngoo oeja va'e, gua'yxy, guyyvy kuery, nguu e'ŷ vy gua'y kuery,
- ³⁰ ha'e kuery ma aŷ voi ojou retave ete 'rā, ha'e gui raka'eve rā oupity 'rā tekove marā e'ŷ.
Mateus 20.17-19; Marcos 10.32-34
- ³¹ Ngupive doze guemimbo'e kuery Jesus ogueraa vy aipoe'i ha'e kuery pe:
 — Ma'ē, aŷ ma jaje'oi nhainy Jerusalém katy. Ha'e py ma ojeupity 'rā Ava ra'y ojeapo va'ekue rekorā profeta kuery omboparaague ha'e javi.
- ³² Mba'eta omboaxaa 'rā amboa'e regua kuery pe, ha'e ramo ojavyky rei, ojojai rei ha'e onyvōmba 'rā okuapy.
- ³³ Oinupāmba ma rire ojukaa 'rā. Ha'e gui mboapy araa py onhemboete ju 'rā — he'i.
- ³⁴ Ha'e rami teī ha'e kuery neī peteī henda py noendu kuaai pova'e ayvu, mba'e he'ia paa ndoikuaa ukai ramo. Ha'e kuery ndoikuaai ae ijayvua.
Mateus 20.29-34; Marcos 10.46-52
- ³⁵ Jericó tetā py ovaē rai'i ovy py peteī ára revegua e'ŷ oguapy oiny tape yvŷry mba'emo re ojerurea py.
- ³⁶ Ha'e va'e ma heta va'e kuery oaxa nhendua oendu vy oporandu mba'e pa oikoa re.
- ³⁷ Ha'e ramo ixupe omombe'ua Nazarē pygua Jesus oaxaa.
- ³⁸ Ha'e ramo ojapukai:
 — Jesus Davi ramymino, xemboaxy ke — he'i.
- ³⁹ Ha'e ramo tenonde oje'oi va'e aipoe'i okyrirī aguā. Ha'e rami teī ojapukaive tema:
 — Jesus Davi ramymino, xemboaxy ke.
- ⁴⁰ Ha'e ramo Jesus opyta vy ogueru ruka. Ha'e ovaē ramo oporandu ixupe:
- ⁴¹ — Mba'e tu reipota ndevy ajapo?
 Ombovai:
 — Senhor, xee ma aexaxe — he'i.
- ⁴² Ha'e ramo Jesus aipoe'i:
 — Exa ha'vy. Rejeroviaa ndereraa jepe ma.
- ⁴³ Ha'e ramove oexa, ha'e Nhanderuete pe oporaei ovy hupive. Heta va'e kuery ha'e javive ha'e nunga oexa vy oporaei avi jogueravy Nhanderuete pe.

19

Imposto re nhombopaga va'ety Zaquēu oo jepeague

- ¹ Jericó py Jesus oike vy oaxa ovy tetā rupi.
- ² Ha'e py oiko peteī ava Zaquēu hery va'e, imposto re nhombopaga va'ety ruvixa oguerokopa va'e.
- ³ Ha'e va'e oexaxe mava'e pa Jesus, teī nda'evei heta va'e kuery gui, ikarape'i va'e vy.
- ⁴ Ha'e vy onha ovy henonderā, ojeupi peteī sicōmoro rakā re oexa aguā, ha'e rupi 'rāe oaxa ramo.
⁵ Ha'e py Jesus ovaē vy yvate oma'ē reve aipoe'i ixupe:
 — Zaquēu, eguejy pojava ke, kova'e ára ma apyta 'rā ndero py — he'i.
- ⁶ Ha'e ramo oguejy pojava, ovy'a reve oguerovaē.

* 18:21 Romanos 3.10,19,20; Tiago 2.10

* 18:24 1 Timóteo 6.9,10

⁷ Ha'e javive ha'e nunga oexa va'e ijayvu rei okuapy, heko vai va'e ro py ovaẽ ramo.

⁸ Ha'e gui ma Zaquieu opu'ã vy aipoe'i Senhor pe:

— Senhor, xee anhenhandu iporiaukue'i pe mba'emo areko va'e ame'ẽ aguã, mbyte rupi peve. Ha'e xapy'a rei amongue mba'emo py akore rire irundykue ju 'rã ame'ẽ hekovia — he'i.*

⁹ Ha'e ramo Jesus aipoe'i ixupe:

— Kova'e ára ma oĩ kova'e oo py oo jepe va'e, mba'eta kova'e ava voi Abraão ramymino oiko.*

¹⁰ Mba'eta Ava ra'y ojearo va'ekue ou ojou ha'e ogueraa jepe aguã okanhy va'ekue.

Dez hatã'i va'e ouro guigua omombe'uaque

¹¹ Ha'e nunga ha'e kuery oendu ramo Jesus peteĩ ayvu ju omombe'u mba'emo re ombojoja vy, mba'eta Jerusalém py ovaẽ rai'i ma ramo oexa'ã teĩ okuapy Nhanderuete po'akaa ojekuaa ta ma aguã re.

¹² Ha'e ramo aipoe'i:

— Peteĩ ava yvatekueve regua oo amboae yvy re onhembopo'aka uka, ha'e gui ojevvy ju aguã.

¹³ Ha'e vy dez guembiguai oenoĩ vy ha'e kuery pe oiporuka dez hatã'i va'e outro guigua ovarave va'e. Ha'e vy aipoe'i: “Kova'e peráta pemboetave ke ajevvy peve”, he'i.

¹⁴ — Ha'e rã hetarã kuery mboae nda'ija'eĩ vy hakykue omondouka huvixave oĩ va'e pe aipoe'i va'erã: “Ore kuery ma ndoroipotai ha'e va'e oreruvixarã”, he'i va'erã.

¹⁵ — Ha'e rami teĩ ombopo'aka ma ramo ou ju, ha'e vy oenoĩ uka guembiguai kuery peráta jopyare, marã rami pa peteĩ-teĩ oguerekoague oikuaa aguã.

¹⁶ — Tenonde ou va'e aipoe'i: “Xeruvixa, ndeperáta gui ma dez ju ajouve.”

¹⁷ — Ha'e ramo ombovai: “Ha'eve ete ma tembiguai porã. Mbovy'i va'e re repena kuaa rire dez tetã re ju ndepo'aka 'rã”, he'i.

¹⁸ — Amboae ju ou vy aipoe'i: “Xeruvixa, ndeperáta gui ajouve ju peteĩ nhiruĩ.”

¹⁹ — Ha'e va'e pe ma aipoe'i: “Ndee ma peteĩ nhiruĩ tetã re 'rã ndepo'aka”, he'i.

²⁰ — Ha'e gui amboae ju ou vy aipoe'i: “Xeruvixa, apy ma aru ju ndeperáta ajukue py anhovã vy amoĩ porã va'ekue.

²¹ Mba'eta ndegui xee akyje, ivai rei va'e reiko ramo. Remoĩ porãaty gui e'ỹ renoẽ, ha'e renhotyague gui e'ỹ 'rã remono'õ va'e”, he'i.

²² — Ha'e ramo ombovai: “Tembiguai heko vai va'e, ndeayvuague rupi ae 'rã rombopaga. Reikuaa ri ty'y xevai rei va'ea, amoĩ porãaty gui e'ỹ teĩ anoẽ, ha'e anhotyague gui e'ỹ amono'õ 'rãa?”

²³ Ha'e rami vy mba'e re tu xeperáta ma peráta renda py neremoĩ, ajevvy vy ajopy retave aguã?” he'i.

²⁴ — Ha'e gui ha'e py ikuai va'e pe ju aipoe'i: “Peipe'a na peráta ixugui, ha'e peme'ẽ dez oguereko va'e pe.”

²⁵ — Ha'e rã ha'e kuery aipoe'i: “Xeruvixa, ha'e tu oguereko ae ma dez.”

²⁶ — Ombovai: “Xee aipoa'e pëvy: Mba'emo oguereko va'e ha'e javi pe ome'ëave 'rã. Ha'e rã ndoguerekoĩ va'e gui ma oguereko'i va'e voi oi pe'aa 'rã.

²⁷ Ha'e gui xerovaigua kuery nguvixarã ndaxepotai va'ekue ma peru, pejukapa aexaa py.”

Mateus 21.1-11; Marcos 11.1-11; João 12.12-19

²⁸ Po rami ijayvupa rire Jesus oove ju Jerusalém katy.

²⁹ Betfagé ha'e Betânia py ovaẽ rai'i ma ovy vy yvyty Oliveiras katy'i, omondouka mokoĩ guemimbo'e.

³⁰ Ha'e kuery pe aipoe'i imondovy:

— Tapeo tenonde peva'e tekoo oĩ va'e py. Ha'e py pevaẽ vy pejou 'rã peteĩ mburika'i ixã re hi'aĩ va'e, hi'áry avave rei noiaĩ teri va'e. Pejora vy ke peru.

³¹ Ha'e gui xapy'a rei pëvy amongue oporandu 'rã mba'e re pa pejoraa re. Ha'e ramo pembovai vy “Senhor ma oipota”, peje 'rã.

³² Ha'e ramo omondouka va'ekue oje'oi vy Jesus aipoe'iaque rami meme ojou.

³³ Mburika'i ojora jave ija aipoe'i:

— Mba'e re tu pejora?

³⁴ Ha'e kuery ombovai:

— Senhor ma oipota — he'i.

³⁵ Ha'e vy mymba ogueru vy hi'áry oipyo oao, ha'e oupi Jesus hi'áry.

³⁶ Hi'áry oo oiny ramo tape rupi oipyo okuapy oao.

³⁷ Ha'e gui yvyty Oliveiras gui oguejy ova py ovaẽ rai'i ma jave hemimbo'e kuery ha'e javi oguero vy'a vy Nhanderuete pe oporaei atã oje'oivy mba'emo porã ojapo rã oexa va'ekue ha'e javi re.

³⁸ — Ta'ima'endu'a porãa Huvixave Senhor rery rupi ou va'e re. Ta'ikuai porãa yva re, toporaeia yvatevea py! — he'i oje'oivy.*

³⁹ Ha'e rã amongue fariseu kuery heta va'e kuery mbyte ikuai avi va'e ma aipoe'i ixupe:

— Porombo'ea, ndeayvu na neremimbo'e kuery pe.

⁴⁰ Ha'e rã ha'e kuery pe ombovai:

— Xee aipoa'e pëvy: Ha'e kuery okyrirĩ va'e rire ita eteve voi oporaei 'rãgue — he'i.

Jerusalém tetã Jesus oexa vy ojae'oaque

* 19:8 Lucas 3.8,12,13 * 19:9 Gálatas 3.7,29 py oia rami, “ojerovia va'e ae Abraão ramymino kuery ikuai”, ha'e “Cristo pegua peiko vy peẽ kuery voi Abraão ramymino kuery pendekuai.” * 19:38 Salmo 118.26

⁴¹ Jesus ovaē ovy vy tetā oexa vy ojae'o.

⁴² Ha'e vy aipoe'i:

— Kova'e ára rexa kuua va'e rire nemoingo porāarā ou va'e. Teĩ aỹ ha'e nunga ndoikuaa ukaai ndevy.†

⁴³ Mba'eta ovaē 'rā nderovaigua kuery ndejokopa aguā ára, jova-jovai katy gui nemboty heravy aguā.

⁴⁴ Nerenda ombovaipa vy ojukapa 'rā nememby kuery. Neĩ peteĩ ita ma ndoejai 'rā amboae ita áry, ndea py aju teĩ ndaxerexa kuai rire.

Mateus 21.12,13; Marcos 11.15-17

⁴⁵ Ha'e gui templo py oike vy oipe'apa mba'emo vendea kuery ha'e py ikuai va'ekue.

⁴⁶ Ha'e vy aipoe'i ha'e kuery pe:

— Ipara oiny “Xero ma onhembo'e atyrā oĩ” 'ea va'eri peē ma pejapo imonda va'e onhemiaty rami.*

Templo py nhombo'eague

⁴⁷ Ko'ē nhavō Jesus nhombo'e oikovy templo py. Ha'e rā sacerdote yvatekueve va'e, lei re nhombo'e va'ety ha'e heta va'e ruvixa kuery ma ojukaxe okuapy,*

⁴⁸ teĩ ndojuka uka kuai teri, heta va'e kuery ha'e javi ojapyxaka vy ojou porā okuapy ramo.

20

Mateus 21.23-27; Marcos 11.27-33

¹ Peteĩ ára templo py Jesus ombo'e oiny heta va'e kuery. Ayvu porā omombe'u jave oĩa py jogueru sacerdote yvatekueve va'e, lei re nhombo'e va'ety ha'e nhomongeta va'ety kuery.

² Ha'e vy aipoe'i okuapy ixupe:

— Emombe'u orevy mava'e po'akaa rupi pa ha'e nunga rejapo reikovy. Mava'e tu nembopo'aka?

³ Ha'e ramo ombovai:

— Xee voi aporandu ta pēvy. Pemombe'u ke:

⁴ João nhomongaraia pa yva guigua tyrā avakue guigua raka'e? — he'i.

⁵ Ha'e ramo ha'e kuery joupe-upe ranhe aipoe'i okuapy:

— “Yva gui”, ja'e ramo “Mba'e re tu ha'vy ndapejeroviai hexe?” he'i 'rā nhandevy.

⁶ Ha'e rā “Avakue gui”, ja'e ramo ma heta va'e kuery nhandeapipa 'rā ita py, mba'eta ha'e kuery oikuaa João profeta oikoa — he'i okuapy.

⁷ Ha'e rami vy ombovai:

— Ore ma ndoroikuaai.

⁸ Ha'e rā Jesus ju ombovai:

— Xee voi peē kuery pe namombe'ui 'rā mava'e po'akaa rupi pa ha'e nunga ajapo aikovy.

Mateus 21.33-44; Marcos 12.1-11

⁹ Ha'e rire pova'e ayvu ju Jesus omombe'u heta va'e kuery pe, mba'emo re ombojoja vy:

— Peteĩ ava onhotỹ uva, ha'e vy omboaxa opena va'erā kuery po py. Ha'e gui ma guekoa gui oguata oiko are aguā katy.

¹⁰ Omono'ōa ára ovaē ramo opena va'e kuerya py ombou peteĩ guembiguai, ixupe uva'a ome'ē okuapy aguā. Ha'e ramo ha'e kuery oinupā ha'e ojavyky rei ma rire ombojevny rive ju.

¹¹ — Amboae guembiguai ju ombou. Ha'e ramo ha'e va'e voi oinupāmba. Ojavyky rei rire ombojevny rive ju.

¹² — Ha'e gui mboapya ma ombou. Ha'e va'e re voi ojeaipa ma rire omoxē ju avi.

¹³ — Ha'e ramo uvaty ja aipoe'i ojeupe: “Mba'e nda'u ajapo 'rā? Amondouka 'rā xera'y ayvu ete va'e. Xapy'a rei rā ko omboetea 'rā”, he'i.

¹⁴ — Ha'e rami teĩ opena va'e kuery ta'y oexa vy aipoe'i joupe-upe: “Peva'e ma uvaty jarā ete. Jajuka na, uvaty nhandevy ju opyta aguā”, he'i okuapy.

¹⁵ Ha'e vy uvaty gui oguenoē vy ojuka.

— Mba'e nda'u uvaty ja ojapo 'rā ha'e kuery re?

¹⁶ Ha'e ou vy omomba 'rā opena va'ekue, ha'e amboae kuery pe ju omboaxa 'rā uvaty — he'i.

Ha'e rā ha'e va'e ayvu oendu va'e kuery aipoe'i:

— Ha'e nunga ete ta'vy toiko eme.

¹⁷ Ha'e rā Jesus ha'e kuery re oma'ē vaipa vy aipoe'i:

— Mba'e he'ia tu ha'vy ipara: “Oo apoa kuery ita ndoipotai va'ekue opyta omboeteve pyrā, tenonde pyguarā”, he'ia.*

¹⁸ Ha'e va'e ita re ho'a va'e ha'e javi opēmba 'rā. Ha'e amongue áry ita ho'a ramo iku'ipa 'rā.

Mateus 22.15-22; Marcos 12.13-17

¹⁹ Ha'e jave ae lei re nhombo'e va'ety ha'e sacerdote yvatekueve va'e ojopyxe teĩ, ha'e kuery re ri ty ra'e ijayvua oikuaa vy. Ha'e rami teĩ heta va'e kuery gui okyje guive.

²⁰ Ha'e rami vy oikuaa pota okuapy hexe, amongue pe peráta ome'ē guive, heko porā va'e rami onhemoingo vy ayvu py omoi vai vy huvixa po py omboaxa aguā.

²¹ Ha'e vy ixupe oporandu vy aipoe'i:

† 19:42 “Ndee” he'ia py ma peteĩ pe rami ijayvu teĩ tetā pygua kuery ha'e javive pe. * 19:46 Isaías 56.7, Jeremias 7.11 * 19:47 Mateus 21.14-17 * 20:17 Salmo 118.22-23

— Porombo'ea, ore roikuaa ndee ndeayvu ha'e renhombo'e porãa. Ndereikuaa pota rei avave re, ha'e anhetê rupi renhombo'e Nhanderuete oipota va'e re.

²² Ha'evea rami ri nda'u César pe nhame'ê imposto repy, tyrã pa any?

²³ Ha'e rã Jesus ma ha'e kuery omoï vaixea oikuaa vy ombovai:

²⁴ — Pexa uka ha'vy xevy peteî hatã'i va'e. Mava'e ra'angaa ha'e mava'e rery ha'vy oï?

Aipoe'i okuapy:

— César mba'e ri.

Ha'e ramo Jesus aipoe'i ha'e kuery pe:

²⁵ — César mba'e ri rã peme'ê ha'vy César pe. Ha'e rã Nhanderuete pegua ma Nhanderuete pe ae 'rã peme'ê — he'i.*

²⁶ Ha'e rami rã heta va'e kuery oendua py ha'e kuery ndojopy reguai avvu py. Ombovai kuaa rã oendu vy okyriřimba guive onhemondyipa vy.

Mateus 22.23-33; Marcos 12.18-27

²⁷ Ovaê avi amongue saduceu kuery. Ha'e kuery ma nhanhemboete ju 'rãa ndogueroviai va'e.

²⁸ Ha'e vy oporandu okuapy ixupe:

— Porombo'ea, Moisés oejã raka'e po rami ipara va'e: “Amongue ta'y e'ÿ re omano ramo tyvy ju omenda 'rã imeve'ÿ va'e re, omano va'ekue ra'yrã va'ekue oguereko aguã”, he'iague.*

²⁹ Ha'e gui ikuai raka'e sete joegua. Tujave va'e ma omenda va'ekue ri omano ta'y e'ÿ re.

³⁰ Ha'e ramo tyvy mokoia va'e, ha'e gui mboapya va'e ju omenda ranhe imeve'ÿ va'e re.

³¹ Ha'e rami py sete-ve omano ta'y e'ÿ re meme.

³² Ha'e gui mae ma kunha va'e avi omano.

³³ Ha'e gui onhemboete jevya ára nda'u mava'e ete'i 'rã oiko kunha va'e me, kunha va'e re sete-ve omenda rire? — he'i.

³⁴ Ha'e rã Jesus ombovai ha'e kuery pe:

— Ko yvy re ikuai va'e ma omenda ha'e nhomomenda 'rã.

³⁵ Ha'e rã ára pyau onhemboete aguã ára oupity aguã oiporavo pyre ma nomendavei, neĩ nanhomomendavei ma 'rã.

³⁶ Nomanovei ma 'rã guive, mba'eta omboete ju rire anjo kuery rami ma 'rã ikuai Nhanderuete ra'y kuery ikuai vy.

³⁷ Ha'e gui omano va'ekue onhemboete ju aguã regua ma Moisés ae ombopara. Mba'eta yvyra rogue okai va'e omombe'ua py Senhor pe “Abraão, Isaque ha'e Jacó Ruete”, he'i va'ekue.*

³⁸ Ha'e nunga rupi Nhanderuete ma omanogue Ruete e'ÿ oiko, ha'e rã oikove va'e Ruete, ixupe pavê oikove ramo — he'i.*

³⁹ Ha'e ramo lei re nhombo'e va'ety regua aipoe'i:

— Porombo'ea, rembovai porã — he'i.

⁴⁰ Ha'e va'e rire avave rei nda'ipy'a guaxuvei ixupe oporandu aguã.

Mateus 22.41-45; Marcos 12.35-37

⁴¹ Ha'e gui ma ha'e kuery pe ju Jesus oporandu:

— Mba'exa nda'u Cristo reko re pendeayvu vy aipopeje Davi ramymino oikoa rami?

⁴² Mba'eta Davi eteve voi aipoe'i Salmo py: “Senhor aipoe'i xe-Senhor pe: ‘Eguapy ke aiporu kuaa regua re,

⁴³ ndepy guÿry nderovaigua kuery amoï e'ÿa ja', he'i va'ekue.”*

⁴⁴ Ha'e rami vy Davi voi “Senhor” he'i ixupe. Mba'exa tu ha'vy hamymino avi ri oiko?*

Mateus 23.1-7; Marcos 12.38-40

⁴⁵ Heta va'e kuery ha'e javi oendua py Jesus aipoe'i guemimbo'e kuery pe:

⁴⁶ — Penheangu ke lei re nhombo'e va'ety kuery gui, mba'eta ha'e kuery onhemonde 'rã ao puku py, ha'e tetã mbyte rupi oipota 'rã oxaruraa porã. Onhembo'eaty py ha'e ngaru oia py oguapy 'rã tenda tenondeve oï va'e py anho.

⁴⁷ Ha'e rami avi ha'e kuery ogueraa rivepa 'rã imeve'ÿ va'e kuery ro gui oipota va'e, ha'e onhemboeko porãxe vy onhembo'e are 'rã. Ha'e nunga rupi ha'e kuery opaga raxa ete 'rã.

21

Marcos 12.41-44

¹ Jesus templo py oma'ê oiny vy oexa oguerekopa va'e kuery peráta ome'ê vy hyru py omoï rã.

² Oexa avi peteî imeve'ÿ va'e omoï rã mokoï hatã'i va'e ndovareive'i va'e.

³ Ha'e vy aipoe'i:

— Anhetê aipoa'e pëvy: Peva'e imeve'ÿ va'e iporiaukue'ia ramive pavê gui ome'ê retave.

⁴ Mba'eta amboae kuery ma hembyrekue gui rive ome'ê. Ha'e rã peva'e ma iporiaukue'ia ramive mba'emo'i ojogua aguã oguereko va'ekue ha'e javi'i omoï.

Mateus 24.1,2; Marcos 13.1,2

⁵ Amongue ijayvu templo ojou porãa rupi, mba'eta ita porã ha'e ome'ê mbyre py ombojeguaa rire.

⁶ Ha'e ramo Jesus ombovai:

* 20:25 Romanos 13.7 * 20:28 Deuteronomio 25.5 * 20:37 Êxodo 3.6 * 20:38 1 Coríntios 6.14 * 20:43 Salmo 110.1 * 20:44 Romanos 1.3,4

— Aÿ pexa pa peva'e nunga? Ovaë 'rã oitypaa ára, neĩ peteĩ ita amboae ita áry ndopytai aguã.

Mateus 24.3-13; Marcos 13.3-13

⁷ Oporandu okuapy iuxupe:

— Orembo'ea, araka'e 'rã tu ha'e nunga oiko? Mba'eta tu roikuaa 'rã ovaë rai'i maa?

⁸ Ombovai:

— Penheangu ke ha'vy penhembotavy uka e'ÿ aguã. Mba'eta heta 'rã ou xerery rupi “Xee ae ri”, e'ÿ yv “Ovaë ma hora”, he'i rive va'e. Tapeo eme hupive.

⁹ Penhemondyĩ eme “Joe opu'ã” 'ea rã pendu vy, neĩ “Huvixa kuery re opu'ã”, 'ea teĩ. Ha'e nunga ranhe 'rãe oiko teĩ opa aguã e'ÿ teri — he'i.

¹⁰ Aipoe'i avi ha'e kuery pe:

— Peteĩ-teĩ tetã pygua kuery opu'ã 'rã amboae tetã pygua re, ha'e peteĩ-teĩ regua amboae regua re 'rã opu'ã.

¹¹ Yvy oryryi 'rã, oiko 'rã mba'eaxy vaikue ha'e karuai. Oiko 'rã nhomondyĩpaa, yva re hexa pyrã tuvixa va'e voi.

¹² Ha'e nunga oiko e'ÿ mbove pendejopya ha'e penemoingo axya 'rã. Xerery rupi pendekuai ramo pendereraa 'rã onhembo'eaty py, nhuã py ha'e huvixa kuerya py.

¹³ Ha'e nunga pendere oiko 'rã ayvu pemombe'u aguã.

¹⁴ Ha'e nunga rupi pendepy'a eta rei eme pembovai aguã re.

¹⁵ Mba'eta xee ae 'rã ame'ẽ pendeayvurã ha'e pene'arandu aguã, pendere ija'e e'ÿ va'e kuery nda'ipo'akai, neĩ nombovai kuaai aguã rami.

¹⁶ Penderu kuery voi penembo'a uka 'rã, penderregua, penetarã ha'e peneirũ kuery voi, amongue pendejuka 'rã guive.

¹⁷ Xerery káuxa pavẽ nda'ija'evei 'rã pendere.

¹⁸ Ha'e rami teĩ neĩ peteĩ pende'a nokanhyi 'rã peneakã guigua.

¹⁹ Peĩ atãa py pereko riaa 'rã penenhe'ẽ.

Mateus 24.15-22; Marcos 13.14-20

²⁰ — Ha'e gui xondaro kuery Jerusalém tetã ojokopa rã pexa vy peikuaa 'rã ombovaipa ta maa.

²¹ Ha'e ramo Judéia pygua kuery tonhamba yvyty re. Tetã py ikuai va'e voi toopa, mba'ety rupi ikuai va'e voi toike eme tetã py.

²² Ha'e va'e ára ma nhombopagapaa ára, ipara oinya ha'e javi ojeupity aguã.

²³ — Ha'e va'e ára ma nda'evei 'rã imemby ryru'i ha'e imemby kambu va'e pe. Mba'eta yvy re oiko 'rã teko axy kova'e kuery mbopagaarã.

²⁴ Ojukaa 'rã kyxe py, ha'e escravo-rã ogueraapaa 'rã yvy jave rupi. Judeu e'ÿ va'e kuery po'akaa ára opa e'ÿ ja ha'e kuery opyrõmba 'rã Jerusalém tetã re.

Mateus 24.29-31; Marcos 13.24-27

²⁵ — Kuaray, jaxy ha'e jaxy-tata re ojekuaa 'rã hexa pyrã. Ye'ẽ revovo ha'e yai opu'ã-pu'ã va'e gui yvy regua ikuai va'e nda'evei ha'e ndoikuai rei 'rã okuapy.

²⁶ Yvy re mba'emo vai oiko ta va'e gui avakue onhemondyĩ vy ho'apa 'rã. Mba'eta yva re ipo'akakueve ikuai va'e voi oitypaa 'rã.

²⁷ Ha'e gui ma oexaa 'rã Ava ra'y ojeapo va'ekue arai rupi ou rã opo'aka ha'e guexakãmba reve.*

²⁸ Ha'e nunga oiko aguã ijyppy ramo pevy'a, pemopu'ã peneakã, mba'eta ovaë ta ma pendereraa jepea.

Mateus 24.32-44; Marcos 13.28-37

²⁹ Peteĩ ayvu omombe'u avi mba'emo re ombojoja vy. Ha'e vy aipoe'i ha'e kuery pe:

— Peikuaa pota figo'y ha'e yvyra ikuai va'e re.

³⁰ Mba'eta hokypa rã pexa vy peikuaa 'rã ára pyau ovaë rai'i maa.

³¹ Ha'e rami ae xeayvuague oiko rã pexa vy peikuaa 'rã Nhanderuete po'akaa ojekuaa aguã ovaë rai'i maa.

³² Anhetẽ aipoa'e pëvy: Aÿgua kuery opa e'ÿ re ha'e nunga ha'e javi oiko 'rã.

³³ Yva ha'e yvy opa 'rã. Ha'e rã xeayvuague ma ndoaxa rivei 'rã.

³⁴ — Ha'e nunga rupi peiko kuaa pota pendepy'a pemonyẽ e'ÿ aguã opa marã rei pendekuia, peka'ua, neĩ mba'emo ko yvy re ikuai va'e re pepenaa guive, pendere ha'e va'e ára ou xapy'a e'ÿ aguã nhuã rami.

³⁵ Mba'eta ko yvy re ikuai va'e ha'e javi re ou 'rãe.

³⁶ Peikuaa pota ha'e pejerure riaa mba'emo oiko va'erã gui peo jepe aguã, ha'e Ava ra'y ojeapo va'ekue renonde pene'aĩ aguã.*

Jesus ijayvu rã heta va'e kuery ojapyxaka okuapyague

³⁷ Ko'ẽ nhavõ Jesus nhombo'e oikovy templo py. Ha'e gui pyávy ma oo 'rã Oliveiras yvyty re oke aguã.

³⁸ Ha'e rã heta va'e kuery ha'e javi ma aje'ive reve 'rã jogueraa templo py ijayvu rã ojapyxaka aguã.

22

Mateus 26.1-5; Marcos 14.1,2

¹ Ovaë rai ma ngaru mbojape imbovua revegua e'ÿ “Páscoa” 'epy va'e ára.

* 21:27 Daniel 7.13-14 * 21:36 Lucas 12.35-48

² Sacerdote yvatekueve va'e ha'e lei re nhombo'e va'ety kuery oikuaa pota okuapy marã rami vy pa Jesus ojuka aguã, mba'eta heta va'e kuery gui okyje.*

Mateus 26.14-16; Marcos 14.10,11

³ Ha'e gui ma Satanás ipo'aka peteĩ hemimbo'e kuery doze ikuai va'e regua Judas Iscariotes hery va'e py'a re.

⁴ Ha'e ramo oo jogueroayvu aguã sacerdote yvatekueve va'e ha'e jopya ruvixa kuery reve, ha'e kuery pe Jesus ojopy uka aguã re.

⁵ Ha'e ramo ha'e kuery oguero'vy'a vy ixupe ijayvu peráta ome'ẽ aguã re.

⁶ Judas ojou porã vy oikuaa pota ha'e kuery pe ojopy uka aguã pavẽ opu'ã e'y re.

Mateus 26.17-19; Marcos 14.12-16

⁷ Ovaẽ ma ngaru mbojape imbovia revegua e'y Páscoa ára okaru aguã.

⁸ Ha'e ramo Jesus omondouka Pedro ha'e João. Ha'e vy aipoe'i:

— Tapeo, pereko katu Páscoa ára jakaru aguã.

⁹ Ha'e rá oporandu ixupe:

— Mamo tu reipota roguereko katu?

¹⁰ Jesus ombovai:

— Tetã py pevaẽ vy peovaexĩ 'rã peteĩ ava yryru revegua. Tapeo hupive opy oikea peve.

¹¹ Hoo va'e pe ke aipopeje: “Orembo'ea oporandu uka kuri ndevy: Mamo pa oĩ opy ja'o Páscoa ára xeremimbo'e kuery reve rokaru aguã?” he'i uka.

¹² Ha'e ramo oexa uka 'rã pêvy peteĩ opy ja'o tuvixa va'e opa mba'e oĩa. Ha'e py ae 'rã pereko katu — he'i.

¹³ Ha'e rami rá jogueraa vy ojoupa Jesus aipoe'iague rami. Ha'e vy oguereko katu Páscoa ára okaru okuapy aguã.

Guemimbo'e kuery reve Páscoa ára opa vygua okaru okuapyague

¹⁴ Ha'e gui hora ovaẽ ramo mesa py Jesus oĩ apóstolo kuery reve.*

¹⁵ Ha'e vy aipoe'i ha'e kuery pe:

— Xee ma kova'e Páscoa ára akaruxe ete pendereve, aiko axy e'y mbove'i.

¹⁶ Mba'eta aipoa'e pêvy: Nda'uvei ma 'rã kova'e nunga Nhanderuete po'akaa py ojeupity e'y ja — he'i.

¹⁷ Ha'e gui ojopy karo. Oguero'vy'a vy aipoe'i:

— Pejopy, pemboja'o jomeme.

¹⁸ Xee aipoa'e pêvy: A'y gui ma nday'uvei ma 'rã uva rykue, Nhanderuete po'akaa ovaẽ e'y ja.

Mateus 26.26-29; Marcos 14.17-26

¹⁹ Peteĩ mbojape ju ojopy. Ha'e vy oguero'vy'a ma vy oi'pe'ã-pe'ã'i vy ome'ẽ. Aipoe'i:

— Kova'e ma xerete peẽ kuery re vy ame'ẽ va'erã regua. Guĩ nunga pejapo 'rã xere penema'endu'aa rupi — he'i.

²⁰ Ha'ekue rami ju okarupa ma rire karo ojopy vy aipoe'i:

— Kova'e karo ma xereve guarã ipyau va'e ajapo va'e regua, peẽ kuery re vy xeruguy amoẽ uka ta va'e rupi.

²¹ Ha'e rami teĩ xejopy uka nhemiarã oĩ avi xereve mesa py.

²² Mba'eta Ava ra'y ojeapo va'ekue ma hekorã ipara oĩa rami ae 'rã oo. Ha'e rá ijopy uka nhemiare pe ma nda'ëvei ete 'rã — he'i.

²³ Ha'e ramo joupe-upe oporandu okuapy mava'e ete'i pa ha'e kuery regua ojopy uka 'rãa re.

Yvatekueve va'e yvyvĩe va'e rami ikuai aguã re ijayvuague

²⁴ Hemimbo'e kuery joo rami e'y-e'y ijayvu okuapy mava'e ete'i pa joegui yvateve va'ea oikuaaxe vy.

²⁵ Ha'e rami rá Jesus aipoe'i ha'e kuery pe:

— Yvy regua huvixa kuery ipo'aka 'rã ha'e kuery re, ha'e ipo'akakue pe “Ojapo porã va'e”, 'ea 'rã.

²⁶ Ha'e rá pende kuery ma ha'e rami e'y 'rã. Ha'e rami 'rãgue py peẽ kuery va'e regua joegui yvatekueve va'e ma yvyĩgueve rami 'rã ikuai. Joguerekoa ma nhoembiguai rami 'rã ikuai.*

²⁷ Mba'eta mava'e nda'u joegui yvateve: mesa py oĩ va'e tyrã pa joupe ojara va'e? Mesa py oĩ va'e'y teve? Ha'e rami teĩ xee ma peẽ kuery mbyte aiko joupe ojara va'e rami.

²⁸ — Peẽ kuery ma xereve pendekuai riaa va'ekue xereko a'ãa ha'e javi rupi.

²⁹ Ha'e rami rire xee rombopo'aka Xeru xembopo'akaague rami avi,

³⁰ xepo'akaa py peẽ kuery avi pekaru ha'e pey'u aguã xe-mesa py, ha'e tenda pepenaaty py peguapy vy Israel kuery doze regua ikuai va'e re pepena aguã.

Mateus 26.31-35; Marcos 14.27-31; João 13.36-38

³¹ — Simão, Simão, ma'ẽ, Satanás ojerure penderereko aguã trigo ombogua va'e rami.

³² Ha'e rá xee ma ajerure ndere, rejeroviaa gui rejepe'a e'y aguã. Ha'e rire rejeko rerova ju ma vy emombaraete nde-irmão kuery — he'i.

³³ Simão Pedro ombovai:

— Senhor, xevy pe ha'eve ndereve nhuã py aa, ha'e amano aguã voi.

³⁴ Ha'e rá Jesus aipoe'ive ju ixupe:

* 22:2 João 11.47-57 * 22:14 Mateus 26.20,27-29 * 22:26 Mateus 20.20-28; Marcos 10.35-45; 1 Pedro 5.3

— Pedro, xee aipoa'e ndevy: Kuri uru ava ojavukai e'ÿ mbove mboapykue renhemombe'u 'rã xekuaa e'ÿ va'e rami.

Kyxe re ijayvuague

³⁵ Ha'e gui Jesus oporandu ha'e kuery pe:

— Xee romondouka jave peráta ryrú reve'ÿ, voko, ha'e pendepý regua reve'ÿ jave pendevy oata teve raka'e mba'emo?

— Any, mba'eve rei — he'i okuapy.

³⁶ Ha'e ramo aipoe'i:

— Ha'e gui aÿ gui ma peráta ryrú pereko va'e peraa, voko guive. Ha'e kyxe ndaperekoi va'e ma pendecapa pevende 'rã pejogua agüã.

³⁷ Mba'eta xerekorã ipara oiny va'e ojeupity 'rãe: “Jojuka rive va'ety rami 'rã oguerekoa”, he'iague rami. Xerekorã ipara oiny va'e ojeupity ta ma — he'i.*

³⁸ Ha'e rami rã ha'e kuery aipoe'i:

— Senhor, apy ma mokoï kyxe roguereko.

Ombovai:

— Ha'eve ma!

Mateus 26.36-41; Marcos 14.32-38

³⁹ Oliveiras yvyty katy ju oo oikoaty rami vy. Hupive hemimbo'e kuery oje'oi avi.

⁴⁰ Ooxeague py Jesus ovaë ma vy aipoe'i ha'e kuery pe:

— Penhembo'e ke pendereko a'ãa py pejeity uka e'ÿ agüã — he'i.

⁴¹ Ha'e rã ha'e ma momybry'i ojepe'a ovy, ha'e guenapy'ã re oï vy onhembo'e.

⁴² Ha'e vy aipoe'i:

— Xeru, reipota ramo xegui oaxa 'rãgue kova'e karo. Ha'e rami avi xee aipota va'e ma toiko eme, ndee reipota va'e ae toiko — he'i.

⁴³ [Ha'e jave ou peteï anjo yva pygua omombaraete vy.

⁴⁴ Ha'e rã ojexavai vy hatãve tema onhembo'e ramo hy'ai voi huguy rami otyky vvy py.]

⁴⁵ Ha'e gui onhembo'ea gui opu'ã ju vy guemimbo'e kuery ikuai py oo. Ha'e vy oexa rã okepa okuapy ra'e iporiau vy.

⁴⁶ Ha'e ramo aipoe'i ha'e kuery pe:

— Mba'e re tu pekepa ri? Pepu'ã katu, penhembo'e pendereko a'ãa py pejeity uka e'ÿ agüã.

Mateus 26.47-56; Marcos 14.43-50; João 18.1-11

⁴⁷ Ha'e gui ijayvu teri ho'amy reve ovaë ma jogueruvy heta va'e. Ha'e kuery renonde ou oiny peteï hembigui kuery doze ikuai va'e regua Judas hery va'e. Ha'e vy Jesus re onhemboja oova rayvu agüã.

⁴⁸ Ha'e rã Jesus aipoe'i ixuete:

— Judas, reayvu vy 'rãe ty'y rejopy uka Ava ra'y ojeapo va'ekue?

⁴⁹ Ha'e ramo hexevegua kuery ma oiko ta va'e oexa vy aipoe'i:

— Senhor, ha'eve pa orekyxe roiporu agüã? — he'i.

⁵⁰ Ha'e vy ha'e kuery va'e regua peteï omboguai sacerdote yvateve va'e rembiguai nambi oiporu kuaa regua rupi, ha'e vy omboi.

⁵¹ Ha'e ramo Jesus aipoe'i:

— Tove, ha'eve ma! — he'i vyve inambi re opoko vy omonguera.

⁵² Ha'e gui Jesus ijayvu sacerdote yvatekueve va'e pe, templo rarãa ruvixa ha'e nhomongeta va'ety kuery ijopyarã ou va'e kuery pe guive. Ha'e vy aipoe'i:

— Peë kuery ma kyxe ha'e yvyra reve ri ty'y peju jojuka rive va'ety rami xejopy agüã?

⁵³ Mba'eta ko'ë nhavõ templo py peë kuery pendekuaia rupi aiko teï ndaxejopyi va'ekue. Ha'e rami avi aÿ ma peë kuery hora ovaë, pytũ ipo'aka agüã.

Mateus 26.69-75; Marcos 14.66-72; João 18.15-18,25-27

⁵⁴ Ha'e kuery ojopy vy sacerdote yvateve va'e ro py ogueraa. Hakykue Pedro oo avi mombry'i rupi.

⁵⁵ Oka mbyte py ojape'e okuapy agüã ojatapy ramo Pedro voi oguapy ha'e kuery reve.

⁵⁶ Ha'e gui peteï tembiguai kunhataï ma Pedro tata yvÿry oguapy oiny rã oexa vy oma'ë ngatu hexe. Ha'e vy aipoe'i:

— Peva'e voi hexeve oiko va'ety.

⁵⁷ Ha'e ramo Pedro onhemboapu vy aipoe'i:

— Kunha, xee tu aexa va'e'ÿ rima — he'i.

⁵⁸ Ha'e va'e rire amboae ju oexa vy aipoe'i:

— Ndee voi ta'vy ha'e kuery regua teve.

Ha'e ramo Pedro ombovai:

— Ava, xee tu ha'e kuery regua e'ÿ rima — he'i.

⁵⁹ Aje'i ma rire amboae ju aipoe'i:

— Peva'e tu anhetë rima ha'e kuery regua, mba'eta ha'e voi Galiléia pygua.

⁶⁰ Ha'e ramo Pedro aipoe'ive ju:

— Ava, xee tu ndaikuaai rima ndeayvua — he'i. Ha'e ijayvu teri reve uru ava ojavukai nhendu.

⁶¹ Ha'e ramove Senhor ojere vy oma'ẽ Pedro re. Ha'e ramo mae ma Pedro ima'endu'a ma Senhor aipoe'iague re: "Kuri uru ava oja'apukai e'y mbove mboapykue 'rã renhemombe'u xekuaa e'y va'e rami", he'iague re.

⁶² Ha'e rami vy Pedro ojepe'a vy ojae'lo vaipa.

Jesus rarõa kuery ojavyky rei okuapyague

⁶³ Jesus rerekoa kuery ojavyky rei, oungapa guive.*

⁶⁴ Hexa omo'ã vy aipoe'i okuapy:

— Emombe'u ke mava'e ete pa nembota ra'e — he'i.

⁶⁵ Ha'e vy opa marã hexe ijayvuvu tema ayvu vai rupi.

Mateus 26.57-68; Marcos 14.53-65

⁶⁶ Ko'ẽ aje'live'i reve nhomongeta va'ety kuery, sacerdote yvatekueve va'e ha'e lei re nhombo'e va'ety kuery onhemboatypa okuapy.* Ha'e vy ogueru ruka omboayvu aguã. Ha'e vy aipoe'i ixupe:

⁶⁷ — Ndee ma Cristo ri vy emombe'u orevy.

Jesus ombovai:

— Xee anhemombe'u ri ramo peẽ kuery ndaperoviai 'rã.

⁶⁸ Ha'e gui xee aporandu ramo peẽ kuery voi naxembovai 'rã.

⁶⁹ Aỹ gui ma voi Ava ra'y ojeapo va'ekue oguapy 'rã Nhanderuete Ipo'akapa va'e oiporu kuaa regua re — he'i.

⁷⁰ Ha'e ramo ha'e javive aipoe'i:

— Ndee ae ma nhi'ã Nhanderuete Ra'y?

Ombovai:

— Peẽ ae ri tu aipopeje ha'e aikoa rami — he'i.

⁷¹ Ha'e ramo ha'e kuery joupe-upe aipoe'i:

— Mba'erã tu jaiopotave hekokue mombe'uarã? Mba'eta nhande kuery ae nhaendu ijuru gui.

23

Mateus 27.1,2,11-14; Marcos 15.1-5; João 18.28-38

¹ Ha'e gui ijaty okuapy va'ekue opu'amba vy ogueraa Jesus huvixa Pilatos-a py.

² Ha'e py ju hexe ijayvu vy aipoe'i okuapy:

— Kova'e ava ma rojou heta va'e kuery ombo'e va'ekue rei rã, mba'eta aipoe'i huvixa César pegua imposto repy rome'ẽ ve'y aguã. Aipoe'i avi Cristo huvixave oikoa rami — he'i okuapy.

³ Ha'e rami rã Pilatos oporandu ixupe:

— Ndee ma nhi'ã judeu kuery pegua huvixave?

Jesus ombovai:

— Ndee ae ma aipo're — he'i.

⁴ Pilatos aipoe'i sacerdote yvatekueve va'e ha'e heta va'e kuery ijaty va'e pe:

— Xee ma mba'eve py ndajoui kova'e ava otekoavyague.

⁵ Ha'e ramo ha'e kuery aipoe'ive tema:

— Ha'e rami avi ojapo heta va'e kuery opa marã rei ikuai aguã rami, Judéia ha'e javi rupi ombo'e vy, Galiléia py omboypya gui apy peve — he'i okuapy.

⁶ Ha'e rami Pilatos oendu vy oporandu Galiléia pygua paa re.

⁷ Ha'e vy huvixa Herodes openaa pygua oikoa oikuaa vy ha'e va'e pe ju omboaxa, mba'eta ha'e jave py Jerusalém py oĩ avi ramo.*

Herodes renonde ju Jesus ojexa ukaague

⁸ Herodes ma Jesus oexa vy ovy'a vaipa, mba'eta yma ma oexaxe, hekokue oendu rire. Oexaxe avi hexa pyrã ojapo rã.

⁹ Ha'e rami vy opa marã re oporandu teĩ Jesus mba'eve py nombovai.

¹⁰ Sacerdote yvatekueve va'e ha'e lei re nhombo'e va'ety kuery ha'e py ikuai avi va'e ma hekokue ramigua omombe'u okuapy ijayvu rei vy.

¹¹ Ha'e rami rã Herodes ogueroko va'ekue rei oxondaro kuery reve. Ha'e vy peteĩ ao iporãve va'e py omonhemonde vy Pilatos-a katy ju omondouka.

¹² Ha'e va'e ára guive Herodes ha'e Pilatos joayvu, joe nda'ija'ei ete va'ekue ri.

Mateus 27.15-26; Marcos 15.6-15; João 18.39-19.16

¹³ Ha'e gui ma Pilatos omboatypa sacerdote yvatekueve va'e ha'e huvixa kuery heta va'e kuery reve.

¹⁴ Ha'e vy aipoe'i:

— Kova'e ava ma peẽ kuery peru kuri penetarã kuery opa marã rei ombo'ea rami peikuaa vy. Ha'e gui ma pendua py xee amboayvu teĩ mba'eve rei ndaikuaai pendeayvuague ramigua.

¹⁵ Neĩ huvixa Herodes vno'ikuuaa kuri. Ha'e rami vy ae xea py ju ombou. Ha'e nunga rupi xee aikuaa rã mba'eve ndojapo vai omano aguã.

¹⁶ Ha'e rami vy ainupã uka ta, ha'e gui ma apoi uka ju 'rã — he'i.

* 22:63 Mateus 26.67,68; Marcos 14.65 * 22:66 João 18.19-24 * 23:7 Huvixa Herodes ma Galiléia vyve re opena va'e (Lucas 9.7-9). Ha'e nunga rupi ixupe ju Pilatos omboaxa Jesus.

17 [Mba'eta ngaru oikoa ára nhavõ opoi jepi 'rã petei nhuã py oĩ va'e.]

18 Ha'e rami rã heta va'e kuery ha'e javi ojapukai vy
— Eraa upe va'e, ha'e vy epoi Barrabás orevy — he'i okuapy.

19 Barrabás ma nhuã py oĩ, tetã rupi nhomopu'ãmba rei ha'e jojukaague re.*

20 Ha'e gui ma Pilatos ma teĩgue ju aipoe'i Jesus opoixea rami.

21 Ha'e rami teĩ ha'e kuery ma hatãve tema ojapukai okuapy:

— Emoĩ kuruxu re, emoĩ kuruxu re! — he'i okuapy.

22 Ha'e ramo mboapykuea ma Pilatos oporandu ha'e kuery pe:

— Mba'e nunga py tu ojapo vai raka'e? Xee ma hexe mba'eve ndaikuaai ajuka uka aguã. Ha'e nunga rupi ainupã ukapa rire apoi ju 'rã — he'i.

23 Ha'e rami rã katuve ma hatãve tema ojapukai okuapy kuruxu re omoĩ aguã re. Ha'e kuery ojapukaia ipo'aka.

24 Ha'e ramo Pilatos ojapo nho ha'e kuery ojerurea.

25 Ha'e rami vy opoi nhomopu'ãmba rei va'ety jojukaague py nhuã py oĩ va'e. Ha'e rã Jesus ma omboaxa ha'e kuery oipotaa rami oguereko aguã.

Mateus 27.32; Marcos 15.21

26 Ha'e gui ma Jesus reraa kuery ovaexĩ petei ava Cirene pygua Simão hery va'e, mba'ety gui ou va'ekue. Ha'e vy ha'e va'e axi'y áry ju omoĩ kuruxu, Jesus rakykue ogueraa aguã.

Jesus ojuka aguã katy ogueraa ague

27 Hakykue heta oje'oi, amongue kunhague voi ipy'a vai vy opexo re oipete-pete oje'oiivy.

28 Ha'e rami rã Jesus ojere vy aipoe'i ha'e kuery pe:

— Jerusalém memby kuery, pejae'o eme xere, ha'e rã pendejee ha'e penememby kuery re 'rã pejae'o.

29 Mba'eta ovaẽ 'rã aipopeje aguã ára: “Ovy'a ete 'rã imemby e'y va'e, noikuavã, neĩ nomokambui va'e”, peje aguã.

30 Ha'e va'e ára aipopeje 'rã vyvyt pe: “Pe'a ke ore'áry”, ha'e yvy'ã'i pe “Oreao'i ke” peje 'rã.*

31 Mba'eta vyvry pyau re ha'e rami ojapoa rire, mba'e tu ojapoa 'rã ipirukue re? — he'i.†

32 Mokoĩ avi ogueraa joapo vai va'ety hexeve ojuka aguã katy.

Mateus 27.33-44; Marcos 15.22-32; João 19.17-27

33 Ha'e gui ma petei henda py ovaẽ Calvário 'epy va'e py. Ha'e py omoĩ kuruxu re, joapo vai va'ety kuery guive: petei ijaxu e'yã re, ha'e rã amboae ma ijaxua re.

34 Ha'e ramo Jesus aipoe'i:

— Xeru, eperdoa ke, mba'eta ha'e kuery ndoikuaai mba'e pa ojapoa — he'i.

Ha'e gui ma ijao omboja'o-ja'o xortea oexa vy.

35 Heta va'e kuery ha'e py ikuai va'e oexa okuapy oiko va'e. Huvixa kuery voi ojoi rei vy aipoe'i:

— Amboae kuery ogueraa jepe rire ha'e ae ju tojereraa jepe, anhetẽ ri Cristo Nhanderuete rembiporavo oiko vy — he'i okuapy.

36 Xondaro kuery voi ha'e rami ojoi rei reve onhemboja vy vinagre ogueru oy'u aguã. Ha'e vy aipoe'i:

37 — Judeu kuery pegua huvixave ri reiko vy ejereraa jepe ha'vy ndee ae — he'i.

38 Inhakã áry omoĩa avi ipara [grego, romano ha'e hebraico ayvu py]: “Kova'e ma judeu kuery pegua huvixave” he'ia.

Mokoĩ joapo vai va'ety ijayvuaque

39 Petei joapo vai va'ety kuruxu re oĩ va'e ojoi rei vy aipoe'i ixupe:

— Ndee Cristo e'y ri ty'y? Ejereraa jepe na ndee ae, ore avi.

40 Ha'e rã amboae ma oirũ ombovai vy ijayvu ete ixupe. Ha'e vy aipoe'i:

— Nhanderuete renonde teĩ ndee neremoĩ va'e ty'y rejerekyje aguã? Mba'eta peva'e rami nhanem-bopagaa.

41 Ha'e gui nhande ma ha'evea rami jajexavai, jajapoague py japaga aguã. Ha'e rã peva'e ma mba'eve ndojapo vai — he'i.

42 Ha'e vy aipoe'ive ju:

— Jesus, nema'endu'a ke xere ndepo'akaa rupi reju jevy ma vy.

43 Jesus ombovai:

— Anhetẽ aipoa'e ndevy: Kova'e árave reĩ 'rã xereve 'amba marã e'y py — he'i.

Mateus 27.45-56; Marcos 15.33-41; João 19.28-30

44 Kuaray mbyte rai'i jave kuaray naexakãvei. Yvy jave re pytũmba kuaray ojero'a puku peve.

45 Ha'e gui henda iky'a e'y va'e ropy ajukue okẽ regua oĩ va'e oxoro mbyte rupi.

46 Ha'e gui ma Jesus ojapukai atã:

— Xeru, ndepo py amboaxa xenhe'ẽ — he'i. Po rami ijayvu vyve omano.*

47 Ha'e nunga xondaro ruvixa oexa vy omboete Nhanderuete. Ha'e vy aipoe'i:

— Anhetẽ ae ra'e kova'e ava heko porã va'ekue — he'i.

* 23:19 Atos 3.13,14 * 23:30 Osías 10.8, Lucas 21.20-24; Apocalipse 6.15-17 † 23:31 “Yvyra pyau oapya aguã rami e'y opyta va'e” he'ia ma heko porã va'e re ijayvu vy, ha'e rã “ipirukue” he'ia ma opaga aguã rami ikuai va'e re ijayvu vy (Ezequiel 20.47, 21.3). * 23:46 Salmo 31.5

⁴⁸ Heta va'e kuery ha'e py mba'emo oiko va'e oexa aguã ijatypa va'ekue ojepe'apa ju, ipy'a vai vy opexo re oipete-pete reve.

⁴⁹ Ha'e rã Jesus rexaaty kuery ha'e kunhague Galiléia guive hupive oje'oi va'ekue ma mombyry'i opytapa okuapy oma'ê aguã.

Mateus 27.57-61; Marcos 15.42-47; João 19.38-42

⁵⁰ Peteĩ ava oiko avi José hery va'e, nhomogeta va'ety kuery regua heko porã va'e.

⁵¹ Ha'e va'e ma ndojou porã oirũ kuery ojapoague. Ha'e ma judeu kuery rekoa Arimatéia pygua, Nhanderuete po'akaa oarõ oikovy va'e.

⁵² Ha'e va'e ma Pilatos-a py oo vy ojerure Jesus retekue re.

⁵³ Ha'e rami vy yvyra gui omboguejy vy onhovã ajukue xiĩ porã va'e py, ha'e Peteĩ itaova re ojo'o pyre py onhono porã, avave rei nonhono porãai teria py.

⁵⁴ Ha'e va'e ára ma mba'emo oguereko katupaa ára, ha'e sábado ovaẽ rai'i ma.

⁵⁵ Galiléia gui kunhague Jesus rupive ou va'ekue oje'oi avi oexa aguã itakua hetekue onhono porãague.

⁵⁶ Ha'e vy ojeyv ju heakuã porã va'e oguereko katu aguã imoakuãarã.

Ha'e gui sábado ára ma opytu'u ranhe okuapy ojapo uka pyre rami vy.

24

Mateus 28.1-8; Marcos 16.1-8; João 20.1-13

¹ Semana ijyypa ára aje'ive reve kunhague ma hupa katy ju oje'oi, heakuã porã va'e oguereko katu va'ekue ogueraa vy.

² Ha'e kuery oexa rã ita ombojerea ma ra'e itakua rokẽ gui.

³ Ha'e kuery oike teĩ Senhor Jesus retekue ma ndojoui.

⁴ Ha'e gui ma ha'e kuery ndoikuai rei okuapy jave mokoĩ avakue ojexa uka ijao hexakãmba va'e.

⁵ Ha'e ramo kunhague okyje vy yvy re anho oma'ê joguerokuapy. Ha'e ramo ha'e kuery pe avakue aipoe'i:
— Mba'e re tu peka oikove va'e omanogue rupa rupi?

⁶ Ha'e va'e ma apy noivei ma, onhemboete ju ma. Penema'endu'a ke Galiléia py teri oiko vy ijayvuague re:
⁷ “Ava ra'y ojeapo va'ekue ma omboaxaa 'rã heko vai va'e kuery po py. Kuruxu re omoĩ rire mboapy araa py onhemboete ju 'rã”, he'iaague re.

⁸ Ha'e ramo mae kunhague ima'endu'a ijayvuague re.

⁹ Ha'e rami vy hupa gui ojeyv vy omombe'upa hemimbo'e kuery onze-ve va'e ha'e hexevegua kuery ha'e javi pe.

¹⁰ Apóstolo kuery pe omombe'u va'e ma Maria Madalena, Joana ha'e Maria Tiago xy va'e. Ha'e kuery reve oo va'ekue voi omombe'u.

¹¹ Ha'e rami teĩ apóstolo kuery pe rã ha'e va'e ayvu omombe'u rive merami. Ha'e vy ndogueroviai.

¹² Ha'e rã Pedro ma opu'ã vy onha ovy hupa katy. Ha'e gui ojeyvy reve oma'ê vy mba'eve ndoexai, ajukue inhovãague e'ỹ vy. Ha'e vy ngoo katy ju oo, mba'emo oiko va'ekue gui onhemondyĩ reve.

Marcos 16.12,13

¹³ Ha'e va'e árave ha'e kuery va'e regua mokoĩ jogueraa Peteĩ tekoa Emaús 'epy va'e katy, Jerusalém tetã gui dez quilômetro rivyvyia katy.

¹⁴ Ha'e va'e kuery ma mba'emo oiko va'ekue ha'e javi re ijayvu jogueravy.

¹⁵ Ijayvu tema jogueravy jave Jesus oupity vy oo avi ha'e kuery reve.

¹⁶ Ha'e rami teĩ ha'e kuery ndoexa kuaai ranhe, hexa mo'ãa va'e rami.

¹⁷ Ha'e ramo Jesus oporandu:

— Mba'e nunga re tu pendeayvu peovy peguataa rupi?

Ha'e ramo ha'e kuery opyta iporiau reve.

¹⁸ Ha'e kuery regua Peteĩ ombovai, Cleopas hery va'e. Ha'e vy aipoe'i:

— Jerusalém tetã py reiko avi va'eri ndereikuai teve kuee rupi mba'emo oiko va'ekue? Ndee anho rima ndereikuai teri ra'e — he'i.

¹⁹ Ha'e ramo oporandu:

— Mba'e nunga tu?

Ombovai:

— Jesus Nazaré pygua va'e re oiko va'ekue. Ha'e va'e ma Nhanderuete renonde profeta ipo'akapa va'e oiko va'ekue ayvu py ha'e mba'emo ojapoa py, heta va'e kuery ha'e javi oexaa rupi guive.

²⁰ Sacerdote yvatekueve va'e ha'e nhanderuvixa kuery omboaxa imbopagaarã po py, kuruxu re ojuka uka aguã.

²¹ Ore kuery ma roexa'ã teĩ Israel kuery reraa jeparã oikoa re. Ha'e rami avi kova'e ára reve vy mboapy ára ma ojapo ha'e nunga oikoague.

²² Anhetẽ avi amongue ore kuery revegua kunhague ange oremondyipave ju, mba'eta ko'ẽ e'ỹ re onhono porãague py oje'oi

²³ teĩ ndojouvei Jesus retekue. Ha'e vy ojeyv vy aipoe'i anjo oexaague rami oikove jevy maa omombe'u va'e.

²⁴ Oreirũ kuery regua mboae ma onhono porãague py oo avi oikuaaxe vy kunhague omombe'ua anhetẽ paa. Ha'e rami teĩ ndoexai ae — he'i.

²⁵ Ha'e rami rã Jesus aipoe'i ha'e kuery pe:

— Napene'arandui ha'e peneakã ratã va'e perovia aguã profeta kuery omombe'u va'ekue.

²⁶ Cristo nda'u ndoiko vai 'rã ri guexakãa py oike aguã? — he'i.

²⁷ Ha'e rami vy Moisés avvukue gui omboypy vy profeta kuery ha'e javi avvukue re ijavyvu, guekorã re ipara oĩ va'e omombe'u porãve py.

²⁸ Ha'e gui ma ha'e kuery tekoa ovaẽxague py ovaẽ ramo Jesus oove aguã re ijavyvu.

²⁹ Ha'e rã ha'e kuery ma ogueroavaẽxe vy aipoe'i:

— Evaẽ na orea py, mba'eta ka'aru ma, pytũ ma — he'i. Ha'e ramo ha'e kuery reve ovaẽ opyta aguã.

³⁰ Ha'e gui mesa py ovaẽmba ma ramo Jesus ma mbojape ojopy vy oguero'va. Ha'e vy oipe'ã vy ome'ẽ ha'e kuery pe.

³¹ Ha'e ramove ha'e kuery rexa ojepe'a rã oexa kuaa ju. Ha'e rã okanhy xapy'a ha'e kuerya gui.

³² Ha'e rami rã joupe aipoe'i:

— Anhetẽ ae rãke tape rupi jaguataa rupi nhandepy'a re nhaendu kuri javy'aa nhandevy kuaxia para omombe'u porãve rã — he'i.

³³ Ha'e vyve opu'ã vy Jerusalém katy ju ojevvy jogueravy onze hemimbo'e kuery ijatypa okuapya py amboae kuery reve.

³⁴ Ha'e ramo ha'e va'e kuery ranhe aipoe'i:

— Senhor onhemboete ju vy ojexa uka ma kuri Simão pe — he'i okuapy.

³⁵ Ha'e gui mokoĩve ju omombe'u tape rupi oiko va'ekue, ha'e mbojape oipe'ã rã oexa kuaa ague.

João 20.19,20

³⁶ Ha'e nungakue re ha'e kuery ijavyvu teri reve Jesus ae ojekuaa ho'amy ha'e kuery mbyte.* Ha'e vy aipoe'i:

— Toĩ peẽ kuery re mby'a porã.

³⁷ Ha'e kuery onhemondyipa vy “‘Ăgue po ojexa uka” he'i.

³⁸ Ha'e ramo aipoe'ive ju:

— Mba'e re tu penhemondyipa, ha'e pendepy'a re oĩ ri ndaperovia aguã?

³⁹ Pema'ẽ ha'vy xepo ha'e xepy re, xee ae aikoa peikuaa aguã. Pepoko na xere perovia aguã, mba'eta ġgue ma ndao'oi, neĩ na'ikãguei xee rami e'ỹ — he'i.

⁴⁰ Po rami ijavyvu vy oexa uka opo ha'e opy.

⁴¹ Ha'e kuery ovy'a ha'e onhemondyipa vy ndoguero'via teri rã Jesus aipoe'i:

— Mba'eve ndaperekoi pa ha'u va'erã?

⁴² Ha'e ramo ixupe ome'ẽ peteĩ pira mbixy pẽgue'i [ha'e ei hetãgue'i reve].

⁴³ Ha'e ramo ha'e kuery oexaa py ho'u.

Kuaxia para Jesus omombe'u porãveague

⁴⁴ Ha'e gui ma Jesus aipoe'i ha'e kuery pe:

— Pendereve aiko teri vy aipoa'e va'ekue: “Ojeupity 'rãe xerekorã Moisés lei oeja va'ekue, profeta kuery avvukue ha'e Salmo re oĩa rami”, he'iague.

⁴⁵ Ha'e rami vy ha'e kuery pe omombe'u porãve ipara oiny va'e.

⁴⁶ Ha'e vy aipoe'i:

— Po rami ipara oiny: Cristo omano, ha'e gui mboapy araa py onhemboete ju 'rã va'ekue ae.

⁴⁷ Ha'e gui hery rupi yvy jave re ikuai va'e pe omombe'ua 'rã ojeko rerova aguã, ojevavyague omboguepaa aguã. Jerusalém tetã gui ijyppy 'rã.

⁴⁸ Ha'e gui peẽ kuery ae ha'e nunga mombe'uarã pendekuai.*

⁴⁹ Ha'e ramo pendevy ambou 'rã Xeru ome'ẽ 'rã va'ekue. Ha'e nunga rupi pepyta ranhe tetã py, yvate gui penembopo'akaarã pendere onhemonde e'ỹa ja.*

Marcos 16.19,20

⁵⁰ Ha'e gui ma Betânia tekoa peve guemimbo'e kuery ogueraa vy opo oupi reve ogueroayvu porã.

⁵¹ Ogueroayvu teri reve ojepe'a ovy ha'e kuerya gui, yva re oupia heravy ramo.*

⁵² Ha'e ramo ha'e kuery omboete vy Jerusalém katy ojevypa jogueravy ovy'a reve.

⁵³ Ha'e vy templo py tema ikuai Nhanderuete omboetea py.

* 24:36 Mateus 28.16-17; Marcos 16.14

* 24:48 Mateus 28.18-20; Marcos 16.15-18

* 24:49 Atos 1.6-8

* 24:51 Atos 1.9-14

João ayvu porã ombopara va'ekue João ayvu porã ombopara va'ekue

Kova'e kuaxia Jesus rekokue oia ma hemimbo'e João ombopara va'ekue. Jypy'i João Jesus pe "Nhanderuete Ayvu" he'i ombojoja vy, mba'eta nhandeayvu ma nhandepy'a re oi va'e kuua ukua. Ha'e rã Jesus oo raka'e oexa uka agua Nhanderuete nhandeayvu etea. "Mba'eta Nhanderuete vyv re ikuai va'e oayvu vy ome'ê Gua'y pete'i va'e, hexe ojerovia va'e okanhy e'y agua, ha'e rã tekove marã e'y oupity agua. Mba'eta ko vyv re Nhanderuete Gua'y ombou vyv regua kuery ombopaga agua e'y, ha'e rã hexeve vy vyv re ikuai va'e oo jepe agua" (3.16-17). "Avave rei ndoexai Nhanderuete, tei Nhanderuete Ra'y pete'i va'e Nguu revegua ae oikuaa uka" (1.18).

Mba'eta rã tu "Nhanderuete Ra'y pete'i va'e" he'ia py jaikuaa? Mba'eta Jesus ae "Xee ha'e Xeru reve ma pete'i ae roiko", he'i (10.30). Nguu reve pete'i inhe'ê va'e oiko Nguu oipotaa rami anho, ha'e Nguu ipy'aa oexa uka guive raka'e. Nguu rami ae avi ojevavy e'y va'e oiko.

Kova'e kuaxia para py Jesus onhemombe'u porã: "Xee ma mbojape tekove me'êa. Xere ou va'e kuery noenduvei rã okaruxea, xere ojerovia va'e ma noenduvei rã yuvei" (6.35); "Xee ma hendy va'e vyv regua kuery moexakãarã. Xerupive ikuai va'e ma pytũ rupi ve'y rã oiko, mba'eta ha'e kuery re oi rã hendy va'e nhomoingovea" (8.12); "Xee ma okê ai. Xea rupi oike va'e kuery oo jepe rã" (10.9); "Xee ma vexa'i re opena porã va'ety rami aiko. Mba'eta opena porã va'ety ma guymba kuery re ome'ê rã guekove ae" (10.11-12); "Xee ae ma anhomboete ha'e anhomoiingove va'e. Xere ojerovia va'e omano tei oikove jevy rã. Ha'e rami avi ha'e javive xere oiko ha'e ojerovia va'e ma nomanoi rã raka'eve rã peve guarã" (11.25-26); "Xee ae ma tape, anhetê va'e ha'e tekove. Avave rei ndooi rã Xerua py xereve'y vy" (14.6).

Kova'e kuaxia João ombopara vy oito henda py omombe'u hexa pyrã Jesus ojapoague Nguuete reko oikuaa uka vy. Aipoe'i: "Jesus hexa pyrã heta ojapo raka'e guemimbo'e kuery oexaa rupi. Ha'e nungakue ha'e javi e'y ipara oiny kova'e kuaxia re. Ha'e rã kova'e re ipara oinya ma peê kuery perovia agua Jesus ae Cristo Nhanderuete Ra'y oikoa, pejerovia vy tekove peupity agua hery rupi" (20.30-31).

Jypy'i guive Ayvu oiko va'ekue ava ju ojeapoague re ijayvua

¹ Jypy'i guive Ayvu oiko. Ayvu ma Nhanderuete reve oiko raka'e, ha'e Ayvu ma Nhanderuete ae.*

² Ha'e ma jypy'i guive oiko raka'e Nhanderuete reve.

³ Ha'e va'e rupi ae opa mba'e ojapo raka'e. Ne'i peteive ma ndoikoi ha'e ojapo va'ekue'y.*

⁴ Hexe oi tekove, ha'e hekove ma avakue moexakãarã oi.

⁵ Hendy va'e ma pytũ rupi hexakã, pytũ ma hexe nda'ipo'akai.

⁶ Oiko raka'e pete'i ava Nhanderuete ombou va'ekue João hery va'e.*

⁷ Ha'e va'e ma imombe'uarã ou, hendy va'e rekorã kuua ukaarã, hendy va'e ou rã hexe pavê ojerovia agua.

⁸ João ma hendy va'e ete e'y, hendy va'e momba'uarã rive ou.

⁹ Hendy va'e ete ma vyv re ou vyv omoexakã rã avakue ha'e javi.

¹⁰ Ha'e gui Ayvu ma vyv ixupe ojapo ukua va'ekue re ae ou tei vyv regua kuery ndoexa kuaai.

¹¹ Guetarã kuery py ae ou tei hetarã kuery nomova'i.

¹² Ha'e rã ojee omovaê va'e ha'e javi pe ma ome'ê Nhanderuete ra'y kuery ikuai agua, hery rupi ojerovia va'e kuery pe ae.

¹³ Ha'e va'e kuery ma avakue gui rive'y oiko, to'o oipotaa rami e'y, ne'i nguue kuery gui rive'y guive. Ha'e kuery ma Nhanderuete gui ae oiko va'e.

¹⁴ Ha'e gui Ayvu ma ava ojeapo vyv oiko va'ekue ore kuery mbyte rupi. Hexe oi va'e ma nhomboaxya ha'e anhetê va'e anho. Hexakãmbaa avi roexa karamboae, Nhanderuete Ra'y pete'i va'e ramo.

João Batista Jesus rekorã omombe'u porãveague

¹⁵ Hekorã ma João omombe'u ma voi. Ha'e vy aipoe'i:

— Hekorã re ae xeyvu va'ekue. Aipoa'e: "Xee aju rire ojekuaa rã pete'i xegui yvateve ete va'e, mba'eta xee aiko e'y mbove ha'e oiko ae ma", ha'e va'ekue — he'i.

¹⁶ Mba'eta ojee mba'emo porã oi va'e ome'ê nhande kuery ha'e javi pe, nhandemboaxya oexa uka jepi.

¹⁷ Mba'eta lei ma Moisés pe oikuaa ukua raka'e. Ha'e rã nhomboaxya ha'e anhetê va'e ma Jesus Cristo rupi ae ojekuaa.

¹⁸ Avave rei ndoexai Nhanderuete, tei Nhanderuete Ra'y pete'i va'e Nguu revegua ae oikuaa uka.

Mateus 3.1-12; Marcos 1.2-8; Lucas 3.1-18

¹⁹ Po rami ae João omombe'u hekorã. Mba'eta Jerusalém tetã gui judeu ruvixa kuery omondouka oirũ sacerdote ha'e levita kuery ixupe oporandu agua. Ha'e ramo aipoe'i:

— Marã ramigua tu ndee reiko? — he'i okuapy.

²⁰ Ha'e ramo João onhemombe'u porã, nda'ijapui. Ha'e vy aipoe'i:

— Xee ma Cristo e'y — he'i.

* 1:1 Ayvu py ma jaikuaa uka rã nhandepy'a re oi va'e. Ha'e gui Jesus Cristo ma Nhanderuete py'a re oi va'e kuua ukaarã ou (versículo 18; Colossenses 1.15). * 1:3 Colossenses 1.16,17; Hebreus 1.1-4; 1 João 1.1-4 * 1:6 João 1.15-37; Marcos 1.2-8; Atos 19.4

21 Ha'e ramo ha'e kuery oporanduve ju:
— Marã ramigua ha'vy ndee? Tyrã pa profeta Elias?

Ombovai:

— Xee ma ha'e'y — he'i.

Ha'e kuery oporandu ju:

— Tyrã pa ndee profeta ou va'erã va'e reiko?

— Any — he'i ombovai vy.[†]

22 Ha'e ramo ha'e kuery aipoe'i:

— Emombe'u porã orevy marã ramigua pa reikoa, orembouare kuery pe ju romombe'u aguã.

23 Ombovai:

— Xee ma tekoe e'ÿa rupi ajapukai aikovy vy “Pembu'yvi ke tape Senhor ou aguã”, ha'e va'e, profeta Isaías ijayvuague rami vy — he'i.*

24 João-a py omondouka pyre kuery ma fariseu regua meme.

25 Ha'e gui ha'e kuery aipoe'i:

— Mba'e re tu ha'vy renhomongarai reikovy, Cristo e'y, Elias e'y neĩ profeta e'y va'erã?

26 Ha'e ramo João ombovai:

— Xee ma yy py rive anhomongarai va'e. Ha'e rã peẽ kuery mbyte rupi peteĩ oiko ndapeikuaai va'e,

27 xerakykue ou va'e. Ixugui ma xe'vyv'i'ive ete vy nda'evei ipy regua amboi aguã voi — he'i.

28 Ha'e rami João ijayvu Jordão yakã rovai re, Betânia katy'i nhomongarai oikovya py.

João Batista peteĩgue ju Jesus rekorã omombe'u porãveague

29 Ko'ẽ jevy João oexa Jesus ha'e katy ou oiny rã. Ha'e vy aipoe'i:

— Pee ma ou oiny Nhanderuetea guigua vexa'i, yvy re ikuai va'e reko vaiaty pe'aaar.[‡]

30 Hekorã re ae xeayvu vy “Raka'eve rã ou 'rã peteĩ ava xegui yvateve ete va'e, mba'eta xee aiko e'y mbove ha'e oiko ae ma”, ha'e va'ekue.

31 Xee eteve voi ndaikuaai va'ekue mava'e pa ha'e oikoa. Ha'e rami avi Israel kuery oikuaa aguã xemboua karamboae yy py anhomongarai aguã — he'i.

Matheus 3.13-17; Marcos 1.9-11; Lucas 3.21,22

32 João aipoe'i:

— Xee ma aexa karamboae Nhe'ẽ apyaxu'i rami yva gui oguejy ovy vy hexe oĩ rã.

33 Xee voi ndaikuaai teri va'ekue ha'e oikoa. Ha'e ramo yy py anhomongarai aguã xembou va'ekue aipoe'i: “Rexa 'rã Nhe'ẽ oguejy ovy vy peteĩ ava re oĩ rã. Ha'e va'e ae ma Nhe'ẽ Ky'a E'y reve nhomongarai va'erã”, he'i va'ekue xe'vy.

34 Ha'e gui ha'e va'ekue ma xee aexa ete karamboae. Ha'e rami vy ae pëvy aikuaa uka Nhanderuetea Ra'y oikoa.

Jesus rupive João Batista remimbo'e kuery mokoĩ oje'oiague

35 Ko'ẽ jevy João oiko mokoĩ guemimbo'e reve.

36 Oexa Jesus oaxa rã. Ha'e vy aipoe'i:

— Peva'e ma Nhanderuetea guigua vexa'i — he'i.

37 Po rami ijayvu rã hemimbo'e mokoĩve oendu vy oje'oi Jesus rupive.

38 Ha'e gui Jesus guakykue re oma'ẽ vy oexa ha'e kuery ou rã. Ha'e vy aipoe'i:

— Mba'e re tu peju?

Ha'e kuery aipoe'i:

— Rabi, mamo tu ndee rekeaty? — he'i. “Rabi” ma “Porombo'ea” 'ea.

39 Ha'e ramo aipoe'i ha'e kuery pe:

— Peju ha'vy pexa peikuaa aguã — he'i. Ha'e ramo ha'e kuery oje'oi vy oexa okeaty, ha'e ka'aru ma ramo opyta hexeve.

40 Ha'e gui João ijayvu rã hemimbo'e kuery oendu vy Jesus rupive oje'oi va'ekue regua peteĩ ma Simão Pedro ryvy André.

41 Ha'e va'e ma guyke'y Simão-a py ranhe oo. Ha'e vy aipoe'i guyke'y pe:

— Ore rojou ma Messias — he'i. “Messias” ma “Cristo” 'ea.[§]

42 Ha'e rami vy guyke'y ogueraa Jesus-a py.

Ha'e gui ha'e va'e re Jesus oma'ẽ vy aipoe'i:

— Ndee ma Simão, João ra'y reiko. A'y gui ma nderery 'rã Cefas — he'i. “Cefas” ma “Pedro” 'ea.

Jesus guemimbo'erã Filipe ha'e Natanael oenoiague

43 Ko'ẽ jevy Jesus onhembopy'a Galiléia katy oo aguã. Ha'e ramia ja oexa Filipe. Ha'e vy aipoe'i ixupe:

— Jaa ke xerupive — he'i.

[†] 1:21 Judeu kuery oikuaa rã Cristo ou e'y mbove Nhanderuetea ombou jevy 'rã profeta Elias imombe'uarã (Malaquias 4.5-6). Ha'e rã “Profeta ou va'erã va'e” he'ia ma Deuteronomio 18.15-18 py oĩa gui oikuaa. * 1:23 Isaías 40.3

[‡] 1:29 Jesus pe “Nhanderuetea guigua vexa'i” he'i, mba'eta omano py opaga raka'e nhandereko vaiaty re (Êxodo 12.3-13, Isaías 53.7-11, 1 Pedro 1.18,19, Apocalipse 5.6). [§] 1:41 Tery Messias ma hebraico ayvu pygua, ha'e rã tery Cristo ma grego pygua. Mokoĩve joo rami he'ia va'e, “Nhandereraa jepearã Nhanderuetea ombou va'e” he'ia.

44 Filipe ma Betsaida tetã pygua, André ha'e Pedro reve ha'e py hekoa va'e.

45 Ha'e gui Filipe ma oo oeka Natanael. Ojou vy aipoe'i:

— Roexa ma Moisés lei re omboparaague, ha'e profeta kuery voi omombe'u va'ekue. Ha'e va'e ma José ra'y Jesus Nazaré pygua va'e — he'i.

46 Ha'e ramo Natanael oporandu:

— Nazaré gui nda'u oiko 'rã ri mba'emo porã?

Filipe ombovai:

— Jaa ha'vy exa — he'i.

47 Ha'e gui Natanael ovaê ouvry rã Jesus oexa vy aipoe'i:

— Pee ma ou pete'i Israel regua anhetê rupi ete oiko va'e — he'i.

48 Ha'e ramo Natanael oporandu:

— Mamo ha'vy ndee xerexa ra'e?

Jesus ombovai:

— Ndevy pe Filipe xemombe'u e'ỹ mbove ma voi xee roexa kuri figo'y vyvpy py reĩ rã — he'i.

49 Ha'e rami rã Natanael aipoe'i:

— Porombo'ea, ndee ma Nhanderuete Ra'y, Israel kuery pegua huvixave ae — he'i.

50 Ha'e gui Jesus aipoe'i:

— Ndee ma ha'e rami aikoa rerovia mba'eta “Figo'y vyvpy py reĩ rã roexa”, ha'e ramo rive. Ha'e gui raka'eve rã mba'emo ndevy aikuaa uka 'rã pova'e gui iporãve va'e.

51 Mba'eta anhetê aipoa'e pëvy: Raka'eve rã pexa 'rã yva ojepe'a rã, ha'e Nhanderuetea guigua anjo kuery ojeupi ha'e oguejy ramo Ava ra'y ojeapo va'ekue re.

2

Omendaa py Jesus avi oague

1 Ha'e gui mboapy araa py omendaa ta Caná tetã Galiléia regua py. Ha'e py ma Jesus xy oo.

2 Jesus voi hemimbo'e kuery reve oenoía avi omendaa aguã py oo aguã.

3 Ha'e gui vinho opa ramo ixy omombe'u Jesus pe. Ha'e vy aipoe'i:

— Ha'e kuery ndoguerekovei ma vinho.

4 Jesus ombovai:

— Kunha, mba'e tu ndee rereko xereve? Mba'eta xe'ára novaẽi teri — he'i.

5 Ha'e ramo tembiguai ikuai va'e pe ju ixy ijayvu:

— Pejapo tema ha'e ojapo uka va'e rei — he'i.

6 Ha'e py ma mboapy meme yryru tuvixakue ikuai, ita ku'i gui ojapo pyre, oitenta, cem litro ogueraa va'e meme. Ha'e va'e yryru py yy oĩ va'e ma judeu kuery gueko rami vy oiporu 'rã mba'emo oiky'a'o aguã.*

7 Ha'e gui Jesus aipoe'i tembiguai kuery pe:

— Pemonyẽmba yryru ikuai va'e — he'i. Ha'e ramo ha'e kuery omonyẽmba.

8 Ha'e gui ma Jesus aipoe'ive ju:

— Aỹ ma penoëve ju, ha'e peraa ngaru re opena va'e toa'anga — he'i. Ha'e ramo ha'e kuery ojapo.

9 Ha'e gui ngaru re opena va'e oa'anga vy ojou porã, mba'eta yy gui vinho ojeapo rire. Ha'e rami avi ndoikuaai magui pa vinho oguerua ra'e. Tembiguai kuery yy haraare anho oikuaa.

Ha'e gui ngaru re opena va'e ndoikuaai rei teri reve oenoĩ omenda va'e.

10 Ha'e vy aipoe'i iuxpe:

— Ngaru py ikuai va'e pe ma vinho iporãve va'e ranhe 'rã ome'ëa. Oy'uxea rami oy'u pa ma rire iporã e'ỹve va'e ju 'rã ome'ëa. Ha'e rã ndee ma ha'e rami e'ỹ rejapo, vinho iporãve va'e remoĩ porã ra'e aỹ guarã — he'i ndoikuaai vy.

11 Ha'e nunga Jesus ojapo va'e ma jypy'i hexa pyrã ojapo, Caná tetã Galiléia regua py. Opo'akaa oexa uka ramo hemimbo'e kuery ojerovia hexe.

12 Ha'e va'e rire ma Cafarnaum katy oo oxy, guyvy kuery ha'e guemimbo'e kuery reve. Ha'e py ma nda'ikuai arei'i.

Templo gui Jesus oipe'apaague

13 Ovaẽ rai ma judeu kuery ngaru Páscoa ojapo aguã ára. Ha'e rami rã Jesus oo avi Jerusalém katy.

14 Templo py ovaẽ vy oexa vaka, vexa'i ha'e apykaxu vendea kuery ikuai rã, peráta mboekoviaa kuery guive.

15 Ha'e rami vy mba'emo ryvikue ojopy vy oipoka. Ha'e va'e py ma omomyipa templo ropy gui. Vexa'i ha'e vaka omomyipa, ha'e mesa ikuai va'e oity vy peráta onhoẽmba.*

16 Apykaxu vendea kuery pe ma aipoe'i:

— Peipe'apa apy gui kova'e nunga. Pejapo eme Xeru pegua oo mba'emo vendeaty — he'i.

17 Ha'e rami ojapo rã hemimbo'e kuery oexa vy ima'endu'a ipara oĩ va'e re: “Ndevyguia oo avyu etea xemombaa 'rã” he'igague re.*

18 Templo gui Jesus oipe'apa rã judeu ruvixa kuery oexa vy oporandu iuxpe:

— Mba'e nunga 'rã tu rejapo ha'e nunga rejapo aguã re ndepo'akaa kuaa ukaarã?

19 Ha'e ramo Jesus ombovai:

* 2:6 Marcos 7,3,4

* 2:15 Mateus 21.12,13; Marcos 11.15-19; Lucas 19.45,46

* 2:17 Salmo 69,9

— Pembovaipa ha'vy kova'e templo, ha'e gui mboapy araa py ajapopa ju 'rã — he'i.

²⁰ Ha'e ramo judeu ruvixa kuery aipoe'i:

— Kova'e templo ma quarenta e seis ma'et'ya re ojapopa. Mba'eta tu ha'vy ndee mboapy araa pyve ri rejapopa ju ta? — he'i okuapy.

²¹ Ha'e rami avi Jesus “Templo” he'ia ma guete re ae ijayvu vy.

²² Omanoague gui onhemboete ju ma rire mae ma hemimbo'e kuery ima'endu'a aipoe'iaague re. Ha'e rami vy oguerovia ipara oi va'e ha'e Jesus ijayvuague.

Jesus re heta ojerovia merami teĩ okuapyague

²³ Páscoa ára Jerusalém py Jesus oiko jave heta oexa okuapy hexa pyrã ojapo oikovy rã. Ha'e rami vy ojerovia hexe.

²⁴ Ha'e rã Jesus ma ha'e kuery re ndojeroviai, ha'e javive py'a oikuaapa vy.

²⁵ Avakue reko ixupe nomombe'uai teĩ ha'e ae oikuaa ha'e kuery py'a re oi va'e.

3

Nicodemos reve Jesus ijayvuague

¹ Oiko peteĩ ava fariseu regua Nicodemos hery va'e, judeu kuery ruvixa.

² Peteĩ pytũ ha'e va'e oo Jesus oia py. Ha'e vy aipoe'i ixupe:

— Porombo'ea, ore kuery roikuaa ndee Nhanderuetea gui ae rejuague nhombo'earã, mba'eta hexa pyrã ndee rejapo reikovy va'e nunga avave rei ndojapo kuaai 'rã, hexeve Nhanderuete oiko e'ỹ re — he'i.

³ Jesus ombovai:

— Anhetê ete aipoa'e ndevy: Avave rei ndoexai 'rã Nhanderuete po'akaa, oiko jevy e'ỹ vy — he'i.*

⁴ Ha'e ramo Nicodemos oporandu:

— Mba'eta 'rã tu jaiko jevy nhandetuja ma va'eri? Nhanderyru'i py ju jajevy 'rã ri nda'u jaiko jevy aguã?

⁵ Jesus ombovai:

— Anhetê aipoa'e: Yy ha'e Nhe'ẽ gui ndapeikoi vy ma ndapeikei 'rãe Nhanderuete po'akaa py.*

⁶ To'o gui oiko va'ekue ma to'o, ha'e rã Nhe'ẽ gui oiko va'ekue ma nhe'ẽ.

⁷ Penhemondy eme peiko jevy aguã re xeyvu rã pendu vy.

⁸ Yvytu minha oipejua rupi rei 'rã oipeju. Pendu teĩ ndapeikuaai magui pa oua, neĩ marã katy pa ooa. Nhe'ẽ gui oiko va'ekue voi ha'e rami ae avi ikuai — he'i.

⁹ Ha'e ramo Nicodemos oporandu ju:

— Mba'eta 'rã tu ha'eve ha'e rami aguã?

Jesus ombovai:

¹⁰ — Ndee ma Israel kuery mbo'ea reiko va'eri mba'eta tu ndereikuaai xeyvua?

¹¹ Anhetê aipoa'e: Ore kuery ma mba'emo roikuaa ha'e roexa va'ekue anho romombe'u. Ha'e rami teĩ peẽ kuery ma ndaperoviai.

¹² Kova'e vvy re mba'emo oiko va'e re xeyvu rã ndaperoviai pekuapy. Mba'eta 'rã tu ha'vy yva re ikuai va'e re xeyvu rã perovia?

¹³ Mba'eta avave rei ndooi yva re, Ava ra'y ojeapo va'ekue [ha'e pyguae] e'ỹ vy.

¹⁴ Tekoa e'ỹa py Moisés oupi imoiny raka'e mboi ra'angaa.* Ha'ekue rami avi Ava ra'y ojeapo va'ekue voi oupia 'rã imoiny,

¹⁵ hexe ojerovia va'e ha'e javi oupity aguã tekove marã e'ỹ.

Ojerovia va'e ha'e ojerovia e'ỹ va'e kuery re ijayvuague

¹⁶ Mba'eta Nhanderuete vvy re ikuai va'e oayvu vy ome'ẽ Gua'y peteĩ'i va'e, hexe ojerovia va'e okanhy e'ỹ aguã, ha'e rã tekove marã e'ỹ oupity aguã.*

¹⁷ Mba'eta ko vvy re Nhanderuete Gua'y ombou vvy regua kuery ombopaga aguã e'ỹ, ha'e rã hexeve vvy re ikuai va'e oo jepe aguã.

¹⁸ Ha'e ramo hexe ojerovia va'e kuery ndopagai 'rã. Ha'e rã ndojeroviai va'e ma opaga aguã rami ae ikuai, Nhanderuete Ra'y peteĩ'i va'e rery rupi ndojeroviai vy.

¹⁹ Ha'e kuery opaga 'rã mba'eta vvy re hendy va'e ou teĩ ha'e kuery teko vai rupi ikuai va'e vvy pytũ rive ojou porãve.

²⁰ Mba'eta teko vai rupi ikuai va'e ndojou porã hexakãa, hendy va'e re nonhembojaxei ae, heko vaiaty ojekuaa e'ỹ aguã.

²¹ Ha'e rã anhetê va'e rupi ikuai va'e ma onhemboja 'rã hendy va'e re heko ojekuaa porã aguã rami, mba'eta Nhanderuete re ae ikuai.*

Jesus reko re teĩgue ju João Batista ijayvuague

²² Ha'e va'e rire guemimbo'e kuery reve oje'oi Judéia katy. Ha'e py ikuai ranhe ha'e kuery reve nhomongarai vy.

* 3:3 João 1.12,13; 1 Pedro 1.23 * 3:5 Ezequiel 36.25-28 * 3:14 Moisés mboi ra'angaa oupi raka'e peteĩ vvyra apy re, ha'e va'e re mboi oixu'u va'ekue oma'ẽ vy okuera aguã (Números 21.9, João 12.32). * 3:16 Romanos 5.8,9; 1 João 5.11,12 * 3:21 Efésios 5.8-14

²³ João avi nhomongarai oikovy Enom re Salim katy'i, ha'e va'e rupi yy ikuai rei ramo. Ha'e oia py heta oje'oi onhemongarai uka vy.

²⁴ Ha'e va'e jave ma João nombo'aai teri.

²⁵ Ha'e gui João remimbo'e kuery ijayvu okuapy petei judeu reve, marã rami vy pa ojeky'a'o aguã re oikuaaxe vy.

²⁶ Ha'e ramo hemimbo'e kuery oje'oi João pe omombe'u. Ha'e vy aipoe'i okuapy:

— Orembo'ea, kueve Jordão rovai re ndea py ava ou va'ekue, hekorã remombe'ua va'ekue ma nhomongarai avi oikovy. Ha'e ramo pavê rei 'rã oje'oi oia py — he'i okuapy.

²⁷ Ha'e ramo João aipoe'i:

— Nhanderuete mba'emo ome'ẽ ramo 'rãe jareko.

²⁸ Peê kuery voi peikuaa porã aipoe'ague: “Xee ma Cristo e'y aiko, ha'e rã henonderã xemboua va'ekue”, ha'e va'ekue.

²⁹ Ha'e rã Jesus ma omenda va'e rami oiko, ha'e omenda va'e anho 'rã ogueraa kunha. Ha'e rã omenda va'e iriũ ma ov'y'a 'rã omenda va'e ayvu oendu vy. Ha'e nunga rupi xee voi avy'a aikovy.

³⁰ Tove heta-etave too hexe, ha'e rã xere ma mbovyve'i tou — he'i.

Jesus pavê gui yvatevea re ijayvua

³¹ Yva gui ou va'ekue ma pavê gui yvateve. Ha'e rã vvy re ikuai va'e ma vvy regua meme ikuai, ha'e rami vy mba'emo vvy re oiko va'e re 'rã ijayvu. Ha'e rã yva gui ou va'ekue ma yvateve pavê gui.

³² Ha'e va'e ma mba'emo oendu ha'e oexa va'ekue re ijayvu teĩ avave rei ndogueroviaai ijayvua.

³³ Ha'e rã oguerovia va'e ma Nhanderuete pe voi “Anhetê va'e” he'i.

³⁴ Mba'eta Nhanderuete remimbou ma ijayvua anho 'rã omombe'u, hexe Onhe'ẽ omoĩ ramo amongue'i py e'y.

³⁵ Tuu ma Gua'y oayvu ete vy opa mba'e omboaxa ipo py.

³⁶ Ha'e nunga rupi Ta'y re ojerovia va'e kuery re oĩ tekove marã e'y. Ha'e rã Ta'y nonhe'ẽ rendui va'e re ma tekove noĩ. Ha'e kuery re oĩ va'e ma Nhanderuete poxya anho.*

4

Samaria pygua kunha reve Jesus ijayvuague

¹ Ha'e gui fariseu kuery oendu aipo'ea rã João gui Jesus omongarai retavea guemimbo'erã. Senhor Jesus voi oikuaa ha'e kuery oendua.

² Ha'e rami avi nhomongarai va'e ma Jesus e'y, hemimbo'e kuery rima nhomongarai.

³ Ha'e ramo Judéia vvy gui ha'e kuery oje'oi ju Galiléia katy.

⁴ Ha'e rami vvy Samaria vvy rupi 'rãe oaxa.

⁵ Ha'e gui ha'e kuery ovaẽ petei tetã Samaria kuery rekoa py. Ha'e va'e tetã ma Sicar hery va'e, Jacó gua'y José pe vvy ome'ẽ va'ekue katy'i.

⁶ Ha'e py ma oĩ Jacó yguakue. Kuaray mbyte jave Jesus oguapy ygua rexei'ikane'õgua aguã.

⁷ Ha'e jave py petei kunha Samaria pygua ou yy re. Ha'e ramo kunha va'e pe Jesus aipoe'i:

— Eru na tay'u — he'i.

⁸ Mba'eta hemimbo'e kuery oopa ra'e tetã py tembi'u jogua vy.

⁹ Ha'e ramo kunha Samaria pygua aipoe'i:

— Mba'e re tu ndee judeu va'eri xee Samaria pygua pe rejerure yy re? — he'i, mba'eta Samaria pygua kuery reve judeu kuery ndajoayvui.*

¹⁰ Jesus ombovai:

— Mba'emo Nhanderuete ndevy ome'ẽ va'e, ha'e mava'e pa ndevy yy re ojerure va'e reikuaa va'e rire ndee ma xevy pe rejerure 'rãgue, ha'e ramo ndevy pe xee ame'ẽ 'rãgue yy imarã e'y va'e — he'i.

¹¹ Ha'e gui kunha va'e aipoe'i:

— Ndee ndererekoĩ yy rejara aguã, ha'e kova'e ygua ikua puku. Magui 'rã tu yy imarã e'y va'e rejou?

¹² Ndee nda'u nhaneramoĩ Jacó gui ndepo'akave ri? Mba'eta Jacó ma nhandevy oeja raka'e kova'e ygua ha'e ae oy'uaty, ta'y kuery ha'e hymba kuery guive.

¹³ Jesus ombovai:

— Kova'e yy gui oy'u va'e ma ijy'uvei kuerei 'rã.

¹⁴ Ha'e rã xee yy ame'ẽ va'e oy'u va'e ma nda'ijy'uvei riaevei ma 'rã, mba'eta xee yy ame'ẽ va'e ma yvu rami 'rã oĩ ipy'a re imoingo riaearã — he'i.*

¹⁵ Ha'e ramo kunha va'e aipoe'i:

— Xevy pe ha'vy eme'ẽ ha'e va'e regua yy xey'uvei riae e'y, ha'e yy re aju riae e'y aguã.

¹⁶ Jesus ombovai:

— Tereo ha'vy enoĩ neme, ha'e gui peju ju apy.

¹⁷ Kunha va'e ju

— Xee ma xeme va'e'e'y — he'i.

Jesus ombovai:

— Anhetê ae “Xeme va'e'e'y” 'rea,

* 3:36 1 João 5.11,12 * 4:9 Samaria pygua kuery ma judeu e'y, amboae regua ikuai. * 4:14 João 7.37-39; Apocalipse 22.17

¹⁸ mba'eta petei nhirui avakue ma rereko raka'e. Ha'e gui aỹ ndereve oiko va'e ma neme e'ỹ ae. Anhetê ae ri aipo'rea — he'i.

Nhanderuete nhamboete aguã anhetê va'e re Jesus ijayvuague

¹⁹ Ha'e gui kunha va'e aipoe'i:

— Senhor, xee aikuaa rã ndee profeta reiko.

²⁰ Oreramoi kuery ma yma Nhanderuete omboete raka'e peva'e vyvty áry. Ha'e rã peê kuery ma aipopeje Nhanderuete nhamboete aguã Jerusalém py anho oia rami.

²¹ Jesus ombovai:

— Ha'e gui kunha, erovia xeayvu, mba'eta ovaê 'rã kova'e vyvty áry avave rei Nhanderuete nomboeteavei aguã ára, neĩ Jerusalém py voi.

²² Ha'e gui peê kuery ma ndapeikuaai marã ramigua pa pemboetea.* Ha'e rã ore judeu kuery ma roikuaa, mba'eta jogueraa jeparã judeu regua ae oiko.

²³ Ovaê 'rã ára, ha'e ovaê ae ma guive Xeru omboete ete va'e kuery nhe'ê re ha'e anhetêa rupi omboete aguã. Mba'eta ha'e ramigua imboetea'ã ae Xeru oeka.

²⁴ Nhanderuete ma nhe'ê. Ha'e nunga rupi imboetea kuery voi nhe'ê re 'rã omboete, ha'e anhetêa rupi — he'i.*

²⁵ Ha'e ramo kunha va'e aipoe'i:

— Xee aikuaa ramo raka'eve rã ou 'rã Messias Cristo 'epy va'e. Ha'e ou vy ma nhandevy omombe'u porãve 'rã ha'e ramigua.

²⁶ Jesus ombovai:

— Xee ndereve xeayvu va'e ae ha'e — he'i.

²⁷ Ha'e rami jave hemimbo'e kuery ovaêmba ju. Ha'e kuery kunha reve Jesus jogueroayvu rã oexa vy onhemondyipa, teĩ peteive ma noporandui mba'e nunga re pa jogueroayvua, neĩ mba'e re pa kunha reve ijayvua re.

²⁸ Ha'e ramove kunha va'e oexa ovy yryru tetã katy oo vy. Ha'e rami vy aipoe'i tetã pygua kuery pe:

²⁹ — Peju ke jaje'oi pexa aguã petei ava xerekokue ha'e javi mombe'uare. Ha'e nda'u Cristo e'ỹ ri? — he'i.

³⁰ Ha'e ramo ha'e kuery tetã gui jogueru Jesus oia katy.

Mba'emo mono'õa kuery re ijayvuague

³¹ Ha'e rami jave hemimbo'e kuery aipoe'i:

— Orembo'ea, ekaru ma'vy.

³² Jesus ombovai:

— Xee ma tembi'u areko peê kuery peikuaa e'ỹ va'e — he'i.

³³ Ha'e ramo hemimbo'e kuery joupe-upe aipoe'i:

— Amongue ta'vy ogueru ma teve ra'e ho'u va'erã?

³⁴ Jesus ombovai:

— Xee tembi'u areko va'e ma Xembouare oipotaa rami ajapo aguã ae, ajapopa peve.

³⁵ Peê kuery aipopeje: “Irundy jaxy teri oata ovaê aguã onhotỹ mbyre nhamono'õ aguã”, peje. Ha'e rã xee ma aipoa'e: Pema'ê pexa aguã onhotỹ mbyre ijajupa ma oupya.

³⁶ Ha'e nunga mono'õa rupi ikuai va'e ma aỹ guive 'rã ojopy omba'eapoague repy, tekove marã e'ỹ reguarã omono'õ va'e vy. Ha'e rami vy mba'emo nhotyare ha'e imono'õare kuery jovaive re 'rã ovy'a okuapy.

³⁷ Anhetê ete “Petei onhotỹ 'rã, ha'e amboae ju 'rã omono'õ”, 'ea.

³⁸ Mba'eta xee romondouka penhotỹ e'ỹague gui pemono'õ aguã. Amboae kuery ranhe ma omboopy, ha'e gui peê kuery ju 'rã pemono'õ ha'e kuery omba'eapoague rupi.*

Jesus re Samaria pygua kuery heta ete ojeroviaague

³⁹ Ha'e va'e tetã Samaria pygua kuery heta ete ojerovia Jesus re, kunha va'e “Opa mba'e ajapo va'ekue ha'e omombe'upa” he'i rire.

⁴⁰ Ha'e rami vy Samaria pygua kuery Jesus oia py ou vy “Epytave apy ore kuery reve”, he'i ramo Jesus mokoĩ ára re opyta ha'e py.

⁴¹ Ha'e ramo amboae kuery voi heta ete ojerovia Jesus re, ijayvua ae oendu vy.

⁴² Ha'e rami vy ha'e kuery aipoe'i kunha va'e pe:

— Aỹ ma ore kuery rojerovia mba'eta ore ae roendu ijayvua, ndee remombe'u ramo e'ỹ. Aỹ ore kuery roikuaa ma Jesus anhetê yvy re ikuai va'e reraa jepea oikoa — he'i okuapy.

Galiléia yvy katy Jesus peteĩgue ju oaague

⁴³ Mokoĩ ára rire Galiléia yvy katy ju ojevvy.

⁴⁴ Mba'eta Jesus ae aipoe'i:

— Profeta ikuai va'e ma nomboeteai 'rã hekoa py ae — he'i.*

⁴⁵ Ha'e gui Galiléia re ovaê ramo ha'e pygua kuery oguero'vy'a okuapy, ngaru Jerusalém py oiko jave mba'emo porã ojapo rã oexa rire.

Huvixave revegua ra'y Jesus omongueraague

⁴⁶ Ha'e gui ojevuy ju Caná tetã Galiléia regua py yy gui vinho ojapogave py. Ha'e py oiko peteĩ huvixave rembiguai yvateve va'e. Ha'e va'e ra'y ma Cafarnaum tetã py imba'eaxy oupy.

⁴⁷ Ha'e va'e oendu “Judéia gui Jesus ou ju ma Galiléia re” 'ea rã. Ha'e rami vy Jesus oĩa py oo ojerure gua'y omonguera aguã, mba'eta ta'y omano rai'i oupy.

⁴⁸ Tuu va'e pe Jesus aipoe'i:

— Peẽ kuery ma hexa pyrã ajapo rã pexa vy 'rãe pejerovia — he'i.

⁴⁹ Ha'e ramo ava va'e ojerure:

— Senhor, jaa ete ma xera'y omano e'y mbove.

⁵⁰ Jesus ombovai:

— Tereo katu, ndera'y oikove ju ma — he'i. Ha'e ramo ijayvua tuu oguerovia vy oo ju.

⁵¹ Tuu ooa rupi ovaexĩ guembiguaĩ kuery. Ha'e ramo ha'e kuery aipoe'i:

— Ndera'y okuera ju ma — he'i okuapy.

⁵² Ha'e ramo tuu oporandu:

— Mba'e hora py xera'y okuera ra'e?

Hembiguaĩ kuery ju

— Kuee kuaray mbyte rire'i ipire raku-a oaxa — he'i okuapy.

⁵³ Ha'e ramo ma tuu ima'endu'a ha'e va'e hora py ae Jesus “Ndera'y oikove ju ma” he'iaogue re. Ha'e rami vy ojerovia hexe, hoo py ikuai va'e ha'e javive guive.

⁵⁴ Ha'e va'e reve mokoĩguea ma Jesus hexa pyrã ojapo, Judéia gui Galiléia re ou rire.

5

Peteĩ ava oguata ve'ỹ va'e Jesus omongueraague

¹ Ha'e va'e rire oiko ngaru judeu kuery pegua. Ha'e ramo Jesus oo Jerusalém katu.

² Ha'e py vexa'i rokẽ 'epy va'e rexei'i oĩ peteĩ yy omboty pyre, hebraico ayvu py Betesda hery va'e. Ha'e va'e vy'vyry oĩ peteĩ nhirũ oguy.

³ Ha'e va'e oguy py ma imba'eaxy va'e anho ikuai: ára revegua e'y, oguata e'y va'e ha'e ipirupa va'e.

⁴ [Ha'e kuery ma oarõ okuapy yy omyĩ rã guarã, mba'eta ou jepi 'rã anjo yy omomyĩ aguã. Ha'e gui peteĩ imba'eaxy va'e ha'e ranhe yy py ogeuejy vy okuera 'rã imba'eaxy gui.]

⁵ Ha'e py oĩ peteĩ ava trinta e oito ma'etỹ re ma imba'eaxy oupy va'e.

⁶ Ha'e va'e onheno oupy rã Jesus oexa vy oikuaa yma ma imba'eaxy oupya. Ha'e vy oporandu:

— Ndee pa rekueraxe?

⁷ Imba'eaxy va'e ombovai:

— Senhor, nda'ipoai avave rei yy omyĩ rã xemboguejy va'erã. Yy omyĩ nhavõ amboae ranhe kuerei 'rã ogeuejy xegui — he'i.

⁸ Ha'e ramo Jesus aipoe'i iuxupe:

— Epu'ã ha'vy, ejopy nderupa, ha'e tereo — he'i.

⁹ Ha'e ramove ava okuera vy ngupa ojopy ha'e oguata ovy. Ha'e va'e ára ma sábado.

¹⁰ Ha'e nunga rupi judeu ruvixa kuery ijayvu okuapy okuera va'ekue pe:

— Kova'e ára sábado ramo nda'evei nderupa re revoyi aguã — he'i iuxupe.*

¹¹ Ombovai:

— Ha'e rami avi ava xemonguerare ma “Ejopy nderupa ha'e tereo” he'i xevy.

¹² Ha'e ramo ha'e kuery oporanduve ju:

— Mava'e ava tu ndevy “Ejopy nderupa ha'e tereo?” 'eare?

¹³ Ha'e ramo ma okuera va'ekue ndoikuai mava'e ete pa imongueraare, mba'eta Jesus ha'e gui ojepe'a vyvoi rire, heta vaipa ikuai rã.

¹⁴ Ha'e gui ka'aruve ma Jesus oexa ju templo rupi oikoa py. Ha'e vy aipoe'i:

— Aỹ ma rekuera ma. Ejevavyve eme nda'eveive va'e oiko e'y aguã ndevy — he'i.

¹⁵ Ha'e gui ava ojepe'a vy oo judeu ruvixa kuery pe omombe'u Jesus ae omongueraague.

¹⁶ Ha'e ramo ha'e kuery onhea'ã okuapy Jesus omoĩ vai aguã sábado ára py voi nhomongueraaty re.

¹⁷ Ha'e ramo Jesus aipoe'i ha'e kuery pe:

— Xeru ma aỹ voi omba'eapo. Ha'e rami ae avi xee voi amba'eapo tema aikovy — he'i.

¹⁸ Ha'e nunga rupi judeu ruvixa kuery ojukaxe sábado ára py voi nhomongueraaty re, ha'e Nhanderuede Tuu oikoa rami omombe'u vy Nhanderuede rami avi onhemoingo ramo guive.*

Jesus gueko omombe'u porãveague

¹⁹ Ha'e gui Jesus ombovai vy aipoe'i:

— Anhetẽ aipoa'e pëvy: Ta'y ma mba'eve ndojapoi 'rã ojegui ae, Tuu mba'emo ojapo rã oexa e'y vy. Mba'eta Tuu ojapo va'e ramigua ae avi 'rã Ta'y ojapo oikovy.*

²⁰ Tuu ma Gua'y oayvu vy iuxupe oikuaa ukapa mba'emo ojapo oikovya. Raka'eve rã iuxupe ojapo uka 'rã mba'emo tuvixave ete va'e, peẽ kuery penhemondyipa aguã.

²¹ Mba'eta Tuu ma omano va'ekue omboete ha'e omoingove jevya rami avi Ta'y voi 'rã omoingove omoingovexe va'e.

* 5:10 João 7.23 * 5:18 João 10.30,33 * 5:19 João 14.10,11

²² Tuu ma nanhombopagai 'rã. Gua'y rima omoĩ pavê oikoague repy me'ëarã,

²³ Ta'y omboete pavê aguã Tuu omboetea rami. Ha'e rã Ta'y nomboetei va'e ma Tuu imbouare voi nomboetei.

²⁴ — Anhetê aipoa'e: Amongue xeayvu oendu vy Xembouare re ojerovia va'e, ha'e va'e kuery re oĩ tekove marã e'ÿ. Ha'e kuery ndopagavei 'rã, mba'eta manoa gui oaxa ma tekove oupity aguã re.

²⁵ Anhetê aipoa'e pëvy: Ovaê 'rã hora, ha'e ovaê ae ma guive omano va'ekue oendu aguã Nhanderuete Ra'y ijayvua. Ha'e gui hendua kuery oikove ju 'rã.

²⁶ Mba'eta Tuu re tekove ome'ê aguã oĩa rami avi Gua'y voi ombopo'aka tekove ome'ê aguã,

²⁷ ha'e pavê oikoague repy ome'ê aguã voi ombopo'aka, Ava ra'y ojeapo va'ekue ramo.

²⁸ Penhemondyí eme ha'e rami xeayvu rã pendu vy, mba'eta ovaê ma ouvvy hora yvyra rupa py ikuai va'e Ta'y ijayvua oendu vy opu'amba aguã.

²⁹ Heko porã va'ekue opu'amba 'rã oikove riae aguã. Ha'e rã teko vai rupi ikuai va'ekue ma opu'ã 'rã opaga aguã.

³⁰ Xee ma mba'eve ndajapoi xejegui ae. Mba'emo ajapo va'e ma aenduague rami meme ajapo. Ha'e pavê oikoague repy ame'ê vy voi ha'evea rami 'rã ajapo, mba'eta xee ae aipota va'e'ÿ ajapoxe, ha'e rã Xembouare oipota va'e anho.

³¹ — Ha'e gui xee anho rive xereko amombe'u va'e rire ndovarei 'rãgue xeayvua.

³² Ha'e oiko avi amboae xereko kuaa ukaarã. Ha'e va'e xekuaa ukaa ma anhetê va'e meme, xee aikuaa.

³³ João Batista pe peê kuery peporandu uka ramo anhetê va'e meme xemombe'u raka'e.

³⁴ Ha'e rami teĩ xee naikotevêi xekuaa ukaa ko yvy regua. Ha'e rami avi João rekokue re xeayvu pendu vy peo jepe aguã.

³⁵ Mba'eta ijayvuague ma tataendy opa rupi omoexakãa rami. Ha'e ramo peê kuery pendu vy pevy'a ranhe raka'e penemoexakãa rupi.

³⁶ Oiko avi peteĩ xereko kuaa ukaa João gui yvateve va'e, mba'eta xerembiaporã Xeru ome'ê va'ekue ae 'rã oikuaa uka Xeru xembouague.

³⁷ — Ha'e gui Xeru Xembouare voi ijayvu raka'e xerekorã re. Teĩ peê kuery ma neĩ peteĩgue napendui ijayvua, ndapexai guive,

³⁸ neĩ pendejee napemoĩ ijayvu, mba'eta ndapejeroviai pekuapy hemimbou re.

³⁹ Peikuaa pota 'rã kuaxia para re tekove marã e'ÿ peupity aguã. Ha'e va'e re ma xerekorã momba'ua oĩ,

⁴⁰ ha'e rami teĩ xere ma ndapejuxei tekove peupity aguã.

⁴¹ — Xee ma avakue pe rive nanhemboyvate ukai.

⁴² Ha'e rã peê kuery reko ma xee aikuaa porã, mba'eta pendere noĩ Nhanderuete peayvua.

⁴³ Xeru rery rupi aju teĩ peê kuery naxemovaêi. Ha'e rã amongue guery rupi rive ou ramo ma pemovaê 'rã.

⁴⁴ Mba'eta ta pejerovia ta xere? Mba'eta joupe rive penhemboeko porã uka, ha'e rã Nhanderuete peteĩ'i va'e pe ma napenhemboeko porã uka potai.

⁴⁵ — Pexa'ã eme Nhanderuete renonde xee pendere xeayvu aguã re. Moisés pemboete va'e ae 'rã ijayvu pendere.

⁴⁶ Ha'e rami avi anhetê ri Moisés ombopara va'ekue perovia va'e rire xere voi pejerovia 'rãgue, xerekorã re ae ombopara rire.

⁴⁷ Ha'e gui Moisés ombopara va'ekue ndaperoviai vy ma mba'eta tu perovia ta xeayvu?

6

Mateus 14.13-21; Marcos 6.30-44; Lucas 9.10-17

¹ Ha'e va'e rire Jesus oaxa ovy Galiléia yupa Tiberiades 'epy va'e rupi.

² Heta avi oo hupive, mba'eta oexa rire hexa pyrã ojapo rã imba'eaxy va'e omongueraa py.

³ Ha'e gui peteĩ yvyty re Jesus oê vy guemimbo'e kuery reve oguapypa.

⁴ Ha'e jave ovaê rai'i ma judeu kuery pegua ngaru Páscoa oikoa ára.

⁵ Ha'e gui Jesus oma'ê vy heta ou rã oexa vy aipoe'i guemimbo'e Filipe pe:

— Magui nda'u jajogua 'rã mbojape apy ikuai va'e kuery peguarã? — he'i.

⁶ Jesus po rami ijayvu ombovai rã oenduxe vy, mba'eta oikuaa ae ma ojapo va'erã.

⁷ Ha'e ramo Filipe aipoe'i:

— Peteĩ-teĩ mbojape ho'u aguã ma neĩ duzentos ára repy re mbojape jajogua ramo voi 'rã nda'evei — he'i.

⁸ Ha'e gui hemimbo'e mboae Símao Pedro ryvy André aipoe'i Jesus pe:

⁹ — Ha'e rami avi pe py ma oĩ peteĩ kunumi peteĩ nhiruĩ mbojape cevada guigua ha'e mokoĩ pira'i oguereko va'e. Ha'e rami teĩ nda'evei 'rã ko heta ete ikuai va'e peguarã — he'i.

¹⁰ Jesus ombovai:

— Aipopeje ha'e javive oguapypa aguã — he'i. Ha'e py ma nhuũndy porã ramo ha'e javi oguapypa. Ha'e py rã nda'u cinco mil avakue ikuai.

¹¹ Ha'e gui peteĩ nhiruive mbojape Jesus ojopy vy oguerovy'a Nhanderuete. Ha'e gui mae ma ombojoja uka pavê pe. Pira'i voi ha'ekue rami ju ombojoja uka.

¹² Ha'e gui ha'e javive hevayatãmba ma ramo Jesus aipoe'i guemimbo'e kuery pe:

— Pemono'õmba ju hembyrekue ojeavyky rei e'ÿ aguã — he'i.

¹³ Ha'ekue rami ha'e kuery ojapo vy ha'e javi vy doze varai omonyê peteĩ nhiruĩ mbojape gui hembyre va'ekue.

- 14 Ha'e gui ha'e py ikuai va'e ma hexa pyrã Jesus ojapo rã oexa vy aipoe'i joupe-upe:
— Anhetê ae peva'e oiko ra'e profeta ko vvy re ou 'rã va'ekue — he'i okuapy.
- 15 Ha'e rami vy ogueraaxe okuapy nguvixaverã. Ha'e rami teĩ Jesus oikuaa vy ojepe'a vy oëve ovy vvyty re.
Mateus 14.22-33; Marcos 6.45-51
- 16 Pytũ'i jave hemimbo'e kuery oguejy oje'oivy yupa peve.
- 17 Ha'e py ma ojou petei kanoã hovaigua re oaxa aguã Cafarnaum tetã katy. Pytũ are ma va'eri Jesus ndoui teri ha'e kuerya py.
- 18 Ha'e gui ha'e kuery oo jave yai opu'ã-pu'ã, vvytu oipeju atã ramo.
- 19 Yy rembe gui cinco, seis quilômetro rãnda'u ha'e kuery oo ma jave kanoã katy Jesus ou jekuaa yy áry rupi uguata vy. Ha'e nunga hemimbo'e kuery oexa vy onhemondyipa.
- 20 Ha'e ramo Jesus aipoe'i:
— Penhemondyi eme, xee rima — he'i.
- 21 Ha'e ramo hemimbo'e kuery ovy'a vaipa reve oupi kanoã py. Ha'e rire'ive ovaẽmba ma ooaxeague py.
Jesus ae mbojape nhomoingo riaearã oikoa re ijavyuague
- 22 Ha'e gui ko'ê jevy heta va'e kuery yupa rembe re opyta va'ekue ima'endu'a petei kanoã kyrĩ'i va'e anho ha'e py ituiague re, ha'e va'e py guemimbo'e kuery reve Jesus ndooiague re, mba'eta hemimbo'e kuery ha'e kuery ae'i oje'oi rire.
- 23 Ha'e rami jave ma amboae kanoã ju Tiberíades tetã gui ou vy Senhor mbojape oguerovy'a rire ho'u okuapyague katy'i ombojaa.
- 24 Jesus guemimbo'e kuery reve ha'e py ndoikovei maa heta va'e kuery oikuaa vy ojopy kanoã, ha'e oje'oi Cafarnaum katy oeka vy.
- 25 Ha'e gui yupa rovaigua re oexa vy oporandu:
— Orembo'ea, araka'e ma tu revaẽ apy?
- 26 Jesus ombovai:
— Anhetê aipoa'e pêvy: Peẽ kuery ma mbojape pe'u ha'e penevyatãmba rire rive xereka, hexa pyrã ajapo rã pexa kuaa porã vy e'ỹ.
- 27 Penhea'ã eme tembi'u opa va'erã re rive, ha'e rã imarã e'ỹ va'e nhomoingo riaearã re. Ha'e va'e regua ma Ava ra'y ojeapo va'ekue anho 'rã ome'ẽ, mba'eta Tuu oikuaa uka hemimbou oikoa — he'i.
- 28 Ha'e kuery oporandu ixupe:
— Mba'e nunga nda'u rojapo 'rã Nhanderuete oipota va'e rojapo aguã?
- 29 Jesus ombovai:
— Nhanderuete oipota va'e ma hemimbou re pejeroviaa — he'i.
- 30 Ha'e ramo ha'e kuery aipoe'ive ju:
— Mba'e nunga hexa pyrã tu rejapo 'rã ha'vy roexa vy ndere rojerovia aguã? Mba'e nunga tu ndee rejapo kuaa?
- 31 Mba'eta nhaneramoĩ kuery ma tekoe e'ỹa rupi ikuai vy ho'u raka'e maná, ipara oĩa “Yva gui mbojape ombou ha'e kuery ho'u aguã”, he'ia rami vy.*
- 32 Ha'e ramo Jesus ombovai:
— Anhetê aipoa'e pêvy: Mbojape yva guigua Moisés e'ỹ ombou, Xeru ae pêvy ombou mbojape anhetê va'e yva gui.
- 33 Mba'eta mbojape Nhanderuetea guigua ma yva gui ou vy vvy re ikuai va'e pe ome'ẽ tekove — he'i.
- 34 Ha'e ramo ha'e kuery aipoe'i:
— Senhor, eme'ẽ riae orevy ha'e va'e regua mbojape.
- 35 Jesus ombovai:
— Xee ae ma mbojape tekove me'ẽa. Xere ou va'e kuery noenduvei 'rã okaruxea, xere ojerovia va'e ma noenduvei 'rã yuvei.*
- 36 Xee aipoa'eague rami ae peẽ kuery xerexa teĩ ndapejeroviaa.
- 37 Xevy guarã Xeru ome'ẽ va'ekue-ekue ma oupa 'rã xere. Ha'e xere ou va'ekue ma ndaibe'vei 'rã xejegui.
- 38 Mba'eta xee ma yva gui aju Xembouare oipota va'e ajapo aguã, xee aipota va'e'ỹ.
- 39 Ha'e gui Xembouare oipota va'e ma pova'e, xevy guarã ome'ẽ va'ekue peteive namokanhyy aguã, ha'e rã opaa ára amboetepa ju aguã.
- 40 Mba'eta Xeru oipota ha'e javive Ta'y oexa kuaa vy hexe ojerovia va'e kuery oupity tekove marã e'ỹ. Ha'e ramo ma xee amboetepa ju 'rã opaa ára.
- Yva guigua mbojape omombe'u porãveague*
- 41 Ha'e gui Jesus “Yva guigua mbojape aiko” he'i rã judeu kuery oendu vy ijavyu rei okuapy hexe.
- 42 Ha'e rami vy aipoe'i joupe-upe:
— Peva'e Jesus nda'u José ra'y e'ỹ ri? Tuu ha'e ixy ndajaikuaa ri ty'y? Mba'exa tu ha'vy “Yva gui aju va'ekue” he'i kuri?
- 43 Ha'e ramo ma Jesus ombovai:
— Ha'e rami ete jomeme pendeayvu aguã ma nda'everi.
- 44 Mba'eta avave rei ndoui 'rã xere, Xeru Xembouare ndoguerui rã. Ha'e gui opaa ára amboetepa ju 'rã.

⁴⁵ Mba'eta profeta kuery regua ombopara vy “Nhanderuete oeko mbo'e 'rã ha'e kuery ha'e javi”, he'iague rami vy Xeru ayvu oendu ha'e oikuaa va'e kuery ma ou 'rã xere.*

⁴⁶ Ha'e rã rami avi avave rei ndoexai Xeru. Pete'i anho oiko hexaare, oia gui aju va'ekue ae.

⁴⁷ Anhetê aipoa'e pëvy: Xere ojerovia va'e re ma tekove marã e'ÿ oï.

⁴⁸ — Xee ae mbojape nhomoingove riaea aiko.

⁴⁹ Peneramoi kuery ma tekoa e'ÿa rupi ikuai vy maná ho'u tei ha'e javive omanomba raka'e.

⁵⁰ Ha'e rã kova'e mbojape yva gui ou va'ekue ho'u va'e ma nomanoi 'rã.

⁵¹ Xee ae mbojape oikove va'e yva gui ou va'ekue. Ha'e va'e regua ho'u va'e ma oiko riaa 'rã. Mbojape ko vvy re ikuai va'e moingovearã xee ame'ê va'erã ma xerete ae — he'i.

⁵² Ha'e ramo judeu kuery joo rami e'ÿ-e'ÿ ijayvu. Ha'e vy aipoe'i:

— Mba'exa 'rã tu peva'e ngo'o ome'ê ja'u aguã?

⁵³ Jesus ombovai:

— Anhetê aipoa'e: Ava ra'y ojeapo va'ekue ro'o gui ndape'ui, ha'e huguy gui ndapey'ui ri ramo pendere noi 'rã tekove.

⁵⁴ Mba'eta xero'o gui ho'u, ha'e xeruguy gui oy'u va'e re ma oi tekove marã e'ÿ, ha'e amboetepa ju 'rã opaa ára.

⁵⁵ Mba'eta xero'o ma tembi'u anhetê va'e, ha'e xeruguy ma oy'u pyrã anhetê va'e.

⁵⁶ Xero'o gui ho'u ha'e xeruguy gui oy'u va'e ma ikuai 'rã xere, ha'e xee ai 'rã ha'e kuery re.

⁵⁷ Xeru xembouare oikove, ha'e hexe xee aikovea rami avi xere okaru va'e oikove 'rã xere.

⁵⁸ Kova'e mbojape yva gui ou va'ekue ma penamoi kuery ho'u va'ekue ramigua e'ÿ, mba'eta ha'e kuery omanomba raka'e. Ha'e rã kova'e mbojape ho'u va'e ma oikove riaa 'rã — he'i.

⁵⁹ Ha'e rami Jesus ijayvu Cafarnaum tetã py judeu kuery onhembo'eaty py nhombo'ea py.

Jesus oayvua omombe'u porãveague

⁶⁰ Po rami ijayvu rã hemimbo'e kuery oendu vy heta aipoe'i okuapy:

— Haxy ete rima ijayvua. Mava'e tu oikuaa ta?*

⁶¹ Ha'e gui Jesus ma ha'e kuery ndojou porãia oikuaa ae vy aipoe'i:

— Peê kuery napendu kuaai va'e ty'y nami xeyvu rã?

⁶² Ha'e rami avi mba'exa 'rã tu peikuaa Ava ra'y ojeapo va'ekue ouague katy ju ojeupi ovy rã pexa vy?

⁶³ Mba'eta Nhe'ê ae rima nhomoingovearã oi, ha'e rã nhandero'o ma ha'e rami aguã ndovarei. Nami xeyvu vy Nhe'ê ha'e tekove re rima xeyvu kuri.

⁶⁴ Ha'e rami avi peê kuery regua amongue ndapejeroviai — he'i. Po rami Jesus ijayvu mba'eta oikuaa ae mava'e kuery pa hexe ndojeroviai, ha'e mava'e pa ijopy uka nhemiarã oikoa.

⁶⁵ Ha'e rami vy aipoe'ive ju:

— Ha'e nunga rupi xee aipoa'e kuri pëvy: “Avave rei ndoui 'rã xere, ha'e rami aguã Xeru ome'ê e'ÿ ramo.”

Jesus-a gui heta ojepe'aague

⁶⁶ Ha'e rami rã hemimbo'e kuery heta ojepe'a, hexeve nda'ikuaixevi vy.

⁶⁷ Ha'e ramo guemimbo'e kuery doze ikuai va'e pe ju Jesus oporandu:

— Ha'vy peê kuery voi teve pejepe'axe avi xegui?

⁶⁸ Simão Pedro ombovai:

— Senhor, mava'e rupive 'rã tu roo? Mba'eta ndee ndeayvua anho tekove marã e'ÿ me'êa.*

⁶⁹ Ha'e gui ore kuery roguerovia, roikuaa porã ete ndee Nhanderuete remimbou lky'a e'ÿ va'e reikoa — he'i.

⁷⁰ Ha'e ramo Jesus ombovai:

— Ha'e rami avi peê kuery doze aiporavo va'ekue regua petei re ma anha oi — he'i.

⁷¹ Po rami ijayvu Simão Iscariotes ra'y Judas reko re, mba'eta ha'e va'e ma doze ikuai va'e regua va'eri ijopy uka nhemiarã oiko.

7

Jesus re tyvy kuery ndojeroviai okuapyague

¹ Ha'e va'e rire ma Jesus oiko Galiléia vvy rupi. Judéia vvy katy ranhe ndoovei, judeu ruvixa kuery ojukaxe rã.

² Ha'e gui ovaê rai'i ma judeu kuery pegua ngaru oguy'i py ikuai aguã regua ára.

³ Ha'e ramo oia py tyvy kuery ou vy aipoe'i ixupe:

— Tereo ju kova'e tekoa gui judéia katy, neremimbo'e kuery ha'e pygua voi mba'emo rejapo va'e oexa aguã.

⁴ Mba'eta avave rei ojekuaa ukaxe vy nhemi rupi ndojapoi 'rã mba'eve. Tove vvy jave rupi toikuaa mba'emo rejapo reikovy va'e — he'i okuapy.

⁵ Ha'e rami tyvy kuery ijayvu mba'eta ha'e kuery ae ndojeroviai hexe.*

⁶ Ha'e ramo Jesus aipoe'i ha'e kuery pe:

— Nda'evei, xe'ára novaêi teri. Ha'e rã peê kuery pe ma ára nhavô ha'evopa rei.

⁷ Peê kuery re vvy regua kuery nda'ija'e e'ÿi 'rã. Ha'e rã xere ma nda'ija'ei okuapy, teko vai rupi ikuai amombe'u ramo.

* 6:45 Isafás 54.13 * 6:60 Mateus 13.10-17 * 6:68 Atos 4.12 * 7:5 Mateus 10.36; Mateus 10.36

⁸ Tapeo peê ae ngarua py. Xee ma ndaa reguai ranhe, mba'eta novaêi teri xe'ára — he'i.

⁹ Ha'e rami Jesus ijayvu vy opytave ranhe Galiléia py.

Ngarua py Jesus ooague

¹⁰ Tyvy kuery ngarua py oje'oiapa ma rire mae Jesus voi oo. Ha'e rami teĩ avave rei pe ndojekuaa ukai guive.

¹¹ Ngarua py ma judeu ruvixa kuery oeka okuapy, oporandu guive mamó pa oia re.

¹² Heta va'e kuery joo rami e'ÿ-e'ÿ ijayvu okuapy heko re, mba'eta amongue ma aipoe'i:

— Ha'e tu porayvu va'e rima.

Ha'e rá amboae kuery ma

— Xevy pe rá nhombotavypa rei oikovy — he'i.

¹³ Avave rei nomombe'u poráai guive mará rami pa oikoa, mba'eta judeu ruvixa kuery gui okyje vy.

Jesus guetarã kuery ojerovia e'ÿ va'e reve jogueroayvu okuapyague

¹⁴ Ha'e gui ngaru oikoa mbyte py mae ma Jesus oo templo py nhombo'e vy.

¹⁵ Ha'e ramo judeu ruvixa kuery ma nhombo'e rá oendu vy onhemondyipa. Ha'e vy aipoe'i:

— Mba'exa tu kuaxia para re oĩ va'e oikuaapa, nonhembo'ei va'ekue ri?

¹⁶ Jesus ombovai:

— Xee ma xejegui ae e'ÿ anhombo'e, ha'e rá Xembouare gui aikuaa.

¹⁷ Ha'e gui Nhanderuete oipotaa rami ikuaixe va'e ma oikuaa 'rá Nhanderuete gui pa anhombo'e kuaa, tyrã pa xejegui ae.

¹⁸ Mba'eta ojegui ae nhombo'e va'e ma onhemboyvate ukua rupi rive 'rá oiko. Ha'e rá imbouare yvatea oikuaa ukua rupi nhombo'e va'e ma anhetê va'e, ha'e hexe noi 'rá teko vai.

¹⁹ Moisés e'ÿ teve peê kuery pegua lei ombopara raka'e? Ha'e ramive ma peê kuery nei peteive ndapejapoi. Mba'e re tu xejukaxe ri?

²⁰ Ha'e ramo heta va'e kuery aipoe'i:

— Anha teve rima ndere onhemonde. Mava'e tu ndejukaxe?*

²¹ Jesus ombovai:

— Xee ma peteĩ mba'e ajapo ramo rive peê kuery penhemondyipa.

²² Moisés ma ojea raka'e jopire pemboi aguã. Ha'e rami aguã ma Moisés guigua ete e'ÿ guive, ha'e rá nhaneramoĩ kuery gui ijyppy raka'e. Ha'e rami rire sábado ára py teĩ pemboi 'rá avakue'i pire.

²³ Moisés lei ombopara va'ekue rami vy sábado ára py voi avakue'i pire pemboi va'eri mba'e re tu xejou vai ri pekuapy sábado ára py anhomongueraague re?

²⁴ Nda'evei joe peikuaa pota aguã mba'emo pexaa rupi rive, ha'e rá anhetê va'e ha'e teko porã rupi anho 'rá ha'eve.

Judeu ruvixa kuery joo rami e'ÿ-e'ÿ ijayvuague

²⁵ Amongue Jerusalém pygua kuery aipoe'i:

— Peva'e e'ÿ nda'u huvixa kuery ojukaxe va'e?

²⁶ Mba'exa tu ha'vy pavê oendua py nhombo'e teĩ avave rei nomokyri? Tyrã pa huvixa kuery voi teve oikuaa Cristo oikoa rami?

²⁷ Nhande kuery ma jaikuaa magui pa ha'e oua. Ha'e gui Cristo ou ramo ma avave rei ndoikuaai 'rá magui pa oua — he'i okuapy.

²⁸ Ha'e gui Jesus ma templo py nhombo'e vy aipoe'i:

— Peê kuery nda'u xekuaa, ha'e magui pa ajua peikuaa avi ri ty'y? Ha'e gui xee ma xee ae aipotaa rami rive'ÿ aju. Peê kuery ma ndapeikuaai ae Xembouare ma anhetê va'eri.

²⁹ Ha'e rá xee ma aikuaa, mba'eta ixugui aju, ha'e ae xembou ramo — he'i.

³⁰ Ha'e ramo ha'e kuery ojopyxe teĩ avave rei opo nomoi hexe, hi'ára novaêi teri ramo.

³¹ Ha'e pygua kuery regua heta ojerovia hexe. Ha'e vy aipoe'i:

— Cristo ou vy nda'u ojapo 'rá ri hexa pyrã peva'e ava ojapo va'e gui iporãve va'e? — he'i okuapy.

³² Ha'e gui fariseu kuery ma heta va'e kuery Jesus ojou porã okuapy oikuaa vy sacerdote yvatekueve va'e reve omondouka xondaro kuery ojopy aguã.

³³ Ha'e ramo Jesus aipoe'i ha'e kuery pe:

— Aÿ'i tema aiko teri peê kuery reve. Ha'e gui aa ju ta ma Xembouarea py.

³⁴ Ha'e va'e rire peê kuery xereka teĩ ndaxejoui 'rá, mba'eta xee aa ague py peê kuery peo aguã nda'evei — he'i.

³⁵ Ha'e ramo judeu ruvixa kuery joupe-upe ju aipoe'i:

— Marã katy nda'u ha'e oo 'rá ndajajoui aguã? Tyrã pa grego kuery retã nhande kuery ikuaia rupi teve oo ta ombo'e vy?

³⁶ Mba'e he'i vy nda'u po rami ijayvu: “Xereka teĩ ndaxejoui 'rá”, ha'e “Xee aa ague py peo aguã nda'evei”, he'i kuri?

Yy imarã e'ÿ va'e re Jesus ijayvuague

³⁷ Ngaru opaa ára ma omboeteave ára. Ha'e va'e ára Jesus opu'ã vy aipoe'i:

— Pendey'uvei va'e peju xea py pey'u.

*

³⁸ Mba'eta xere ojerovia va'e kuery re oiko 'rã kuaxia para re oĩ va'e: "Ipy'a gui oxyry 'rã yy imarã e'ỹ va'e" he'ia rami.*

³⁹ Ha'e rami ijayvu Nhe'ẽ re, mba'eta Jesus re ojerovia va'e kuery re Nhe'ẽ oĩ 'rã. Ha'e rã ha'e va'e jave ma Nhe'ẽ nombouai teri, mba'eta Jesus nombouateai teri.

⁴⁰ Ha'e gui po rami Jesus ijayvu rã heta va'e kuery oendu vy aipoe'i:

— Ha'e tu anhetê ae profeta oiko — he'i okuapy.

⁴¹ Amongue aipoe'i:

— Ha'e tu Cristo ete rima oiko.

Ha'e rã amboae kuery ma oporandu:

— Cristo nda'u Galiléia gui 'rã ri ou?

⁴² Mba'eta kuaxia re ipara oiny: "Cristo ma Davi ramymino 'rã oiko, ha'e Belém tetã Davi rekoague py ae 'rã itui'i", he'iague.

⁴³ Ha'e rami vy joo rami e'ỹ-e'ỹ oikuaa Jesus reko re ijayvu vy.

⁴⁴ Amongue ma ojopyxe teĩ avave rei opo nomoĩ hexe.

Xondaro kuery ojevypa riveague

⁴⁵ Ha'e gui xondaro kuery ojevypa rive ju sacerdote yvatekueve va'e ha'e fariseu kuerya py. Ha'e ramo xondaro kuery ha'e kuery oporandu:

— Mba'e re tu ndaperui?

⁴⁶ Xondaro kuery ombovai:

— Mba'eta ha'e va'e ava ijayvua rami avave rei nda'ijayvui teri — he'i okuapy.*

⁴⁷ Ha'e ramo fariseu kuery aipoe'i:

— Peẽ kuery voi teve penembotavy ra'e?

⁴⁸ Ha'e gui nhandervixa kuery e'ỹ vy fariseu kuery regua voi teve ojerovia hexe?

⁴⁹ Ha'e rã heta va'e kuery ma nhandevygualei oikuaa va'e'ỹ, ayvu vaipy meme ikuai — he'i okuapy.

⁵⁰ Peteĩ ha'e kuery va'e regua ma Nicodemos, Jesus reve jogueroayvu vy oo va'ekue. Ha'e va'e ma oirũ kuery pe oporandu:

⁵¹ — Nhande kuery pegua lei rami vy nda'u ha'eve 'rã ri amongue nhamboayvu porã e'ỹ re nghanhom-bopaga aguã, e'ỹ vy mba'emo ojapo oikovya re jaikuaa pota porã e'ỹ re?

⁵² Irũ kuery ombovai:

— Ndee voi teve Galiléia pygua reiko? Eikuaa porã pota reikuaa aguã Galiléia gui neĩ peteĩ profeta ndoui 'rãa — he'i okuapy.

⁵³ [Ha'e gui ma peteĩ-teĩ oje'oi ngoo katy.

8

Kunha itavy rei va'e ogueru okuapyague

¹ Ha'e rã Jesus ma Oliveira vvyty katy oo.

² Ko'ẽ rai ramove ma templo katy ju ou. Oĩa py heta va'e kuery voi joguerupa. Ha'e ramo oguapy vy ombo'epa oiny.

³ Ha'e gui Jesus oĩa py lei re nhombo'e va'ety ha'e fariseu kuery ogueru peteĩ kunha itavy reia py ojou pyre. Ha'e rami vy omopu'ã imo'amy teta mbyte py.

⁴ Ha'e vy aipoe'i Jesus pe:

— Porombo'ea, kova'e kunha ma itavya py ojoua ra'e.

⁵ Ha'e gui Moisés nhandevygualei ombopara vy aipoe'i raka'e kunha itavy rei va'e ita py jajapipa aguã. Ha'vy ndee, mba'e 're? — he'i okuapy

⁶ oeko a'ã vy hexe ijayvu rei aguã.

Ha'e ramo Jesus vvy re oma'ẽ reve okuã py ombopara oiny vvy re.

⁷ Ha'e kuery oporandu riaa ma okuapy ramo mae ma Jesus oma'ẽ. Ha'e vy aipoe'i:

— Pejevavy va'e'ỹ ete peiko va'e ranhe pejapi ita py — he'i.

⁸ Ha'e gui vvy re ju oma'ẽ reve omboparave ju oiny.

⁹ Ha'e rami ijayvu rã ha'e kuery oendu vy opy'apy py oikuaa ha'e kuery ae ojevavy va'ea. Ha'e rami vy peteĩ-teĩ ojepe'a oje'oivy. Tujakueve ranhe oo, ha'e rami py oje'oipa. Opyta va'e ma Jesus anho, ha'e kunha va'e guive, ha'e kuery mbyte py hi'ãague py ae.

¹⁰ Ha'e gui Jesus oma'ẽ vy avave rei ndoexavei. Kunha va'e anho ho'ame rã oexa vy aipoe'i ixupe:

— Kunha, mamu tu oopa ra'e ndere ijayvu va'ekue? Mava'eve rei teve nanembopagai?

¹¹ Kunha va'e ombovai vy

— Mava'eve rei, Senhor — he'i.

Ha'e ramo Jesus aipoe'i:

— Xee voi norombopagai 'rã. Tereo ju, ejevavyve eme.]

Jesús gueko omombe'u porãveague

¹² Teĩgue ju Jesus aipoe'i:

* 7:38 João 4.13,14; Apocalipse 22.1,17

* 7:46 Mateus 7.28,29

— Xee ma hendy va'e vvy regua kuery moexakäärã. Xerupive ikuai va'e ma pytũ rupi ve'ỹ 'rã oiko, mba'eta ha'e kuery re oĩ 'rã hendy va'e nhomoiingovea — he'i.*

¹³ Ha'e gui fariseu kuery aipoe'i:

— Ndee tu ndereko re ae rima ndeayvu ra'e. Ha'e nunga rupi ndeayvua ndovarei.

¹⁴ Jesus ombovai vvy aipoe'i ha'e kuery pe:

— Xee ae xereko re xeayvu teĩ xeayvua anhetê meme. Mba'eta xee aikuaa magui pa ajuague, ha'e marã katy pa aa 'rãa. Ha'e rã peẽ kuery ma ndapeikuaai magui pa aju, neĩ marã katy pa aa 'rãa voi.

¹⁵ Peẽ kuery ma peikuaa rami rive penhombopagaxe, ha'e rã xee ma avave rei nambopagai.

¹⁶ Ha'e anhombopaga vvy voi anhetê rupi meme 'rã anhombopaga, mba'eta xee ma xee ae'ỹ aiko. Xee ha'e Xembouare roiko.

¹⁷ Pendevygua lei re ma ipara oiny: “Mokoĩ joo rami meme ijayvu ramo 'rãe jaikuaa anhetêa”, he'iague.

¹⁸ Xee aikuaa uka porã aikovy xereko, ha'e Xeru Xembouare voi xekuaa uka — he'i.

¹⁹ Ha'e ramo oporandu okuapy:

— Mamo ha'vy oĩ Nderu?

Jesus ombovai:

— Peẽ ndaxekuaaia rami avi neĩ Xeru voi ndapeikuaai. Xee xekuaa va'e rire ma peikuaa avi 'rãgue Xeru — he'i.

²⁰ Ha'e rami ijayvu templo py, peráta ryrũ oĩ va'e yv'ỹry oĩa py. Ha'e rami teĩ avave rei ndojopyai, hi'ára novaẽi teri ramo.

Heta va'e kuery pe Jesus onhemombe'u teĩ ndogueroviai okuapyague

²¹ Peteĩgue ju aipoe'i:

— Xee ma ajepe'a 'rã apy gui. Ha'e ramo peẽ kuery xereka teĩ ndapeoi 'rã xee aa ague py. Ha'e rami 'rãgue py pekanhymba 'rã pejejavyague re — he'i.

²² Ha'e ramo judeu ruvixa kuery aipoe'i:

— Peva'e teve ojejukaxe? Ha'e vvy ae ma “Ndapeoi 'rã aa ague py”, he'i ri kuri.

²³ Jesus aipoe'ive ju:

— Peẽ kuery ma ko vvy rupigua, ha'e rã xee ma pe yvategua. Peẽ ma kova'e vvy regua, ha'e rã xee ma vvy regua e'ỹ.

²⁴ Ha'e nunga rupi ae xee aipoa'e kuri pekanhymba 'rã pejejavyague re. Mba'eta xee ae aikoa ndaperoviai vvy pejejavyague re pekanhymba 'rãe — he'i.

²⁵ Ha'e ramo oporandu okuapy:

— Marã ramigua tu ndee?

Jesus ombovai:

— Mba'e tu jypy'i guive pendevy amombe'u raka'e?

²⁶ Heta mba'e areko peẽ kuery reko re xeayvu aguã peikoague repy ame'ẽ vvy guarã. Ha'e rami teĩ aỹ ma ko vvy re ikuai va'e pe amombe'u aikovy Xembouare anhetê va'e gui aendu va'e anho — he'i.

²⁷ Ha'e rami ijayvu teĩ ha'e kuery ndoikuaai Nguu re ae ijayvua.

²⁸ Ha'e gui Jesus aipoe'ive ju:

— Ava ra'y ojeapo va'ekue peupi ma pekuapy vvy peikuaa 'rã marã ramigua pa aikoa, ha'e xejegui ae mba'eve ndajapoia, mba'eta Xeru xembo'ea rami anho xeayvu aikovy.

²⁹ Xembouare ma oiko riae xereve. Ndxaxerejai 'rã xee ae'i, ha'e oipotaa rami anho ajapo ramo — he'i.

³⁰ Ha'e rami ijayvu ramo heta ojerovia hexe.

³¹ Ha'e gui judeu kuery hexe ojerovia va'e pe Jesus aipoe'i:

— Xeayvua rupi riae ri peiko vvy anhetê ete 'rã xeremimbo'e peiko.

³² Ha'e rami vvy peikuaa 'rã anhetê va'e, ha'e anhetê va'e pendejora 'rã escravo pendekuaia gui — he'i.

³³ Ha'e ramo ha'e kuery aipoe'i:

— Ore ma Abraão ramymino orekuai vvy neĩ peteĩgueve ma escravo orekuai va'e'ỹ. Mba'e re tu escravo ve'ỹ orekuai aguã re ri ndeayvu?

³⁴ Jesus ombovai:

— Anhetê aipoa'e: Teko vai rupi ikuai va'e ma teko vai pegua escravo meme ikuai.

³⁵ Ha'e escravo ikuai va'e ma ndoiko riaei 'rã herekoa ro py, ha'e rã ta'y anho.

³⁶ Ha'e rami avi Ta'y pendejora ramo ojora pyre ete 'rã pendekuai.

³⁷ Ha'e gui xee ma aikuaa ae peẽ kuery Abraão ramymino pendekuaia. Ha'e rami teĩ pendere xeayvu noĩ ramo xejukaxe pekuapy.

³⁸ Xee ma xeayvu mba'emo Xerua py aexa va'ekue re anho. Ha'e rã peẽ kuery ma penderu mba'emo ojapo rã pexa va'ekue ae pejapo — he'i.

³⁹ Ha'e ramo ha'e kuery

— Oreru ma Abraão ae — he'i okuapy.

Jesus ombovai:

— Anhetê ete ri Abraão ra'y kuery pendekuai va'e rire pejapo 'rãgue Abraão ojapoague rami.

⁴⁰ Ha'e rami 'rãgue py peẽ kuery xejukaxe pekuapy, anhetê va'e Nhanderuete gui aendu va'e amombe'u ramo rive. Ha'e rã Abraão ma ha'e ramigua e'ỹ ojapo raka'e.

* 8:12 João 1.4; Salmo 36.9

⁴¹ Peẽ kuery ma penderu ojapo va'e ramigua ae pejapo va'e — he'i.

Ha'e kuery aipoe'i:

— Ore kuery ma tuu heta rei va'e'ỹ orekuai. Peteĩ'i oreru oiko. Ha'e va'e ma Nhanderuete ae.

⁴² Jesus ombovai:

— Anhetẽ ri Nhanderuete re penderu va'e rire ma xerayvu 'rãgue pekuapy, mba'eta xee ma Xeruetea gui aju vy apy ju aiko. Xee ae aipotaa rami e'ỹ aju va'ekue, ha'e rã Xeru xembou ramo ma aju.

⁴³ Mba'e re tu peẽ kuery ndapeikuaai ri xeyyvua? Ndapeikuaai mba'eta xeyyvua pendu kuaa va'erã e'ỹ ae.

⁴⁴ Peẽ kuery ma anha guigua pendekuai, hexe ae penderu va'e vy. Ha'e rami vy ae anha oipotaa rami pendekuai. Mba'eta anha ma jypy'i guive jojukaa rupi tema oiko, anhetẽ va'e rupi ndoikoi, hexe anhetẽ va'e noĩ ae ramo. Ha'e vy ijapu 'rã oikovy gueko rami vy, mba'eta ijapu va'e ae, ha'e ijapu va'e ru oiko.*

⁴⁵ Ha'e nunga rupi ae anhetẽ va'e re xeyyvua ramo peẽ kuery ndaperoviai.

⁴⁶ Mava'e nda'u peẽ kuery regua peikuaa ajevavyague? Anhetẽ meme aipoa'e teĩ mba'e re tu ndaperoviai?

⁴⁷ Nhanderuete guigua kuery anho 'rã onhe'ẽ rendu. Ha'e nunga rupi ae peẽ kuery naxenhe'ẽ rendui, mba'eta Nhanderuete guigua e'ỹ pendekuai — he'i.

⁴⁸ Judeu kuery aipoe'i:

— Anhetẽ'ỹ ri nda'u aiporo'ea Samaria pygua ha'e anha revegua reikoa?

⁴⁹ Jesus ombovai:

— Xee ma anha revegua e'ỹ aiko, ha'e rã Xeru amboete va'e. Ha'e rã peẽ kuery ma naxemboetei.

⁵⁰ Ha'e rami avi xee ma avave rei pe nanhemboyvate ukai. Peteĩ oiko xemboyvatearã, ha'eveva rami joe oikuaa pota va'e ae.

⁵¹ Anhetẽ aipoa'e: Xeyyvua rupi ikuai va'e ma nomanoi 'rã raka'eve rã peve guarã — he'i.

⁵² Ha'e ramo judeu kuery aipoe'i:

— Aỹ ma anhetẽ ete roikuaa ma anha revegua reikoa. Mba'eta Abraão ha'e profeta kuery ha'e javive omano raka'e. Ha'e rã ndee ma “Xeyyvua rupi ikuai va'e nomanoi 'rã raka'e rã peve guarã” 're.

⁵³ Ndee nda'u nhaneramoĩ Abraão omano va'ekue gui ndeyvateve ri? Profeta kuery voi omanomba raka'e. Marã ramigua tu ndee renhemoingo?

⁵⁴ Jesus ombovai:

— Xee ae anhemboyvate uka va'e rire ma xeyvate mba'everã ndovarei 'rãgue. Ha'e rã xemboyvatearã ma Xeru ae oiko. Ixupe ma peẽ kuery “Nhanderuete” peje

⁵⁵ va'eri peikuaa va'e'ỹ. Ha'e rã xee ma aikuaa. Xee “Ndaikuaai” ha'e va'e rire peẽ kuery rami avi 'rãgue xepu. Xee ma aikuaa, ha'e ijayvua ajapo aikovy guive.

⁵⁶ Ha'e gui peneramoĩ Abraão ma ovy'a raka'e xerekorã ixupe oikuaa ukua rã oikuaa vy. Ha'e ma oikuaa vy xererovy'a ma voi raka'e — he'i.

⁵⁷ Judeu kuery aipoe'i:

— Ndee tu neĩ cinqüenta ma'etỹ teri ndererekoi va'eri rexa ma va'e ty'y Abraão?

⁵⁸ Jesus ombovai:

— Anhetẽ aipoa'e: Abraão oiko e'ỹ mbove voi xee aiko ae ma — he'i.

⁵⁹ Ha'e ramo ha'e kuery ojopy ita ojapi aguã, teĩ Jesus ojepe'a ovy templo gui.

9

Peteĩ ava ára revegua e'ỹ va'e Jesus omoma'ẽ jevyague

¹ Ha'e gui Jesus oo vy oexa peteĩ ava ára revegua e'ỹ ma voi oiko va'ekue.

² Ha'e ramo hemimbo'e kuery oporandu:

— Orembo'ea, mava'e nda'u ojevavy raka'e peva'e ára revegua e'ỹ ma voi itui'i aguã: ha'e ae, tyrã pa tuu kuery ojevavy?

³ Jesus ombovai:

— Ha'e va'e ojevavyague gui e'ỹ oiko, neĩ tuu kuery gui e'ỹ guive. Hexe Nhanderuete rembiapo ojekuaa aguã rima oiko.

⁴ Ha'e gui nhande kuery ma ára oĩ teri reve 'rã jajapo Xembouare ojapo uka va'e, mba'eta pytũ ou ma oiny, avave rei nomba'eapoavei aguã.

⁵ Kova'e yvy re aiko teria ja yvy regua moexakãa aiko — he'i.

⁶ Ha'e rami ijayvu ma vy onyvõ yvy re. Ha'e rami vy guendry py yvy omoakỹ va'ekue oikyty ára revegua e'ỹ rexa re.

⁷ Ha'e vy aipoe'i:

— Tereo ejeovai vy omboty pyre Siloé hery va'e py — he'i. Ha'e va'e tery ma “Omondouka pyre” 'ea. Ha'e gui ava oo vy ojevovai, ha'e gui oma'ẽ porã ju ma ouvy.

⁸ Ha'e gui oo katy'i ikuai va'e ha'e mba'emo ojerure oiny rã oexa va'ety kuery oexa okuapy. Oexa vy oporandu joupe-upe:

— Peva'e e'ỹ teve mba'emo re ojerureaty py oĩ va'ekue?

⁹ Amongue ma

— Ha'e rima — he'i.

Ha'e rã amboae kuery ma

— Any teve, ha'e ae merami rive ta'vy — he'i.

Ha'e ramo ha'e ae aipoe'i:

— Xee ae ri — he'i.

¹⁰ Ha'e ramo oporandu okuapy:

— Mba'eta tu aỹ rexa ri reikovy?

¹¹ Ava va'e ombovai:

— Peteĩ ava Jesus hery va'e ma vvy omoakỹ vvy oikyty kuri xerexa re. Ha'e vvy aipoe'i xevy: “Tereo ejeovai Siloé yy omboty pyre py”, he'i. Ha'e ramo aa ajeovai, ha'e gui aỹ reve aexa porã ju — he'i.

¹² Oporandu ju okuapy:

— Mamo tu ha'e oĩ?

Ombovai:

— Xee ndaikuaai — he'i.

Fariseu kuery omboavyuague ára revegua e'ỹ va'ekue

¹³ Ha'e gui fariseu kuerya py ju ha'e kuery ogueraa ára revegua e'ỹ ma voi itui'i va'ekue, ¹⁴ mba'eta Jesus vvy omoakỹ vvy omoma'ëa ára ma sábado.

¹⁵ Ha'e gui fariseu kuery ju oporandu marã rami vvy pa oma'ëa re.

Ha'e ramo ava va'e ombovai:

— Xerexa re yapo oikyty ha'e ajeovaipa rire ma ama'ë kuri — he'i.

¹⁶ Ha'e ramo fariseu kuery va'e regua amongue aipoe'i:

— Ha'e nunga apoare ta'vy Nhanderuete guigua e'ỹ teve, mba'eta sábado ára pyguarã ojea pyre rami e'ỹ oiko.

Ha'e rã amboae kuery ma aipoe'i:

— Mba'eta 'rã tu heko vai va'e ojapo kuaa guĩ ramigua hexa pyrã? — he'i okuapy. Ha'e rami vvy joo rami e'ỹ-e'ỹ ijayvu okuapy.

¹⁷ Teĩgue ju ha'e kuery oporandu ára revegua e'ỹ va'ekue pe:

— Nemoma'ëare tu marã ramigua oikoa ndee reikuaa?

— Profeta — he'i.

¹⁸ Judeu ruxixa kuery ndogueroviai okuapy ára revegua e'ỹ ae itui'i raka'eague. Ha'e rami vvy oenoĩ uka tuu kuery.

¹⁹ Tuu kuery pe oporandu okuapy:

— Peva'e ma nhi'ã pendera'y “Ára revegua e'ỹ ma voi itui'i” pejeague? Marã rami vvy tu aỹ oma'ë?

²⁰ Ha'e ramo tuu kuery ombovai:

— Ore ma roikuaa orera'y oikoa, ha'e ára revegua e'ỹ ma voi itui'iague.

²¹ Ha'e rã marã rami vvy pa oma'ë jevya ma ore kuery ndoroikuaai, neĩ mava'e pa imoma'ëare voi ndoroikuaa. Orera'y ma tuja ma ramo ixupe ae 'rã peporandu. Ha'e ae vvy 'rãe ma onhemombe'u kuaa — he'i okuapy.

²² Tuu kuery ma judeu ruxixa kuery gui okyje vvy ha'e rami ijayvu, mba'eta huvixa kuery ijayvu ma voi onhembo'eaty gui omoxë aguã amongue Jesus ae Cristo oikoa rami ombombe'u va'e.

²³ Ha'e nunga rupi ae tuu kuery “Ha'e ma tuja ma, ixupe ae peporandu” he'i.

²⁴ Ha'e gui teĩgue ju huvixa kuery oenoĩ ava ára revegua e'ỹ va'ekue. Ha'e vvy aipoe'i:

— Nhanderuete rembojerovia va'e rupi emombe'u porã, mba'eta ore ma roikuaa ha'e va'e ava heko vai va'ea — he'i.

²⁵ Ha'e ramo ombovai:

— Xee ma ndaikuaai heko vai va'ea. Peteĩ mba'e tema aikuaa, mba'eta ára revegua e'ỹ aiko va'ekue ri aỹ ma ama'ë — he'i.

²⁶ Ha'e kuery oporanduve ju:

— Mba'e tu ojapo ndevy? Marã rami vvy tu nemoma'ë?

²⁷ Ombovai:

— Xee ma amombe'u ae ma kuri teĩ peẽ kuery ndaperoviai. Mba'e re tu peẽ kuery penduxe vai ri ha'ekue-ekue'i amombe'u rã? Tyrã pa peẽ kuery voi hemimbo'e pendekuaixe? — he'i.

²⁸ Ha'e rami rã ijayvu rei okuapy hexe. Ha'e vvy aipoe'i:

— Ndee rima hemimbo'e, ha'e rã ore kuery ma Moisés remimbo'e orekuai.

²⁹ Mba'eta Moisés reve Nhanderuete ijayvu raka'e, roikuaa porã. Ha'e rã ha'e va'e ava ma neĩ maguigua pa oikoa voi ndoroikuaai — he'i okuapy.

³⁰ Ava va'e ombovai:

— Peẽ kuery tu “Maguigua pa oikoa ndoroikuaai” peje, xemoma'ë va'eri.

³¹ Mba'eta jaikuaa ae ma Nhanderuete noendui 'rãa heko vai va'e ojerurea. Ha'e rã Nhanderuete renonde ojererokyjea rupi ha'e oipotaa rami oiko va'e ojerurea ma oendu 'rã.

³² Vvy itui'ỹ'i guive nanhaendui teri ára revegua e'ỹ ma voi itui'i va'ekue moma'ëa omombe'ua rã.

³³ Ha'e nunga rupi ha'e va'e ava ma Nhanderuete guigua e'ỹ va'e rire mba'eve rei ndojapo kuaai 'rãgue — he'i.

³⁴ Ha'e rã ha'e kuery ombovai:

— Ndee tu ndetui'i guive rejeyavya ma voi va'ekue ri aỹ ma orembo'e ta? — he'i okuapy. Ha'e rami vvy omoxë.

Ára revegua e'ÿ va'ekue pe Jesus ojekuaa ukaague

³⁵ Jesus oendu ára revegua e'ÿ va'ekue omoxê okuapyague. Ha'e rami vy ovaexĩ vy oporandu:

— Ndee tu rejerovia ri Ava ra'y ojeapo va'ekue re?

³⁶ Ava va'e ombovai:

— Senhor, mava'e tu oiko, hexe ajerovia aguã?

³⁷ Jesus aipoe'i:

— Ndee ma rexa ma re'amy, xee ndereve xeayvu va'e ae ha'e — he'i.

³⁸ Ombovai:

— Senhor, xee ajerovia — he'i vyve omboete.

³⁹ Ha'e gui Jesus aipoe'i:

— Xee ma kova'e vyv re aju peteĩ-teĩ oikoague repy ojopy aguã, ha'e rami vy ára revegua e'ÿ ikuai va'ekue oma'ẽmba ju, ha'e oma'ẽ porã va'ekue ndoexavei aguã — he'i.

⁴⁰ Ha'e ramo fariseu kuery regua ijyvyry ikuai va'e oporandu ixupe:

— Ha'e rami vy ore kuery voi teve ára revegua e'ÿ orekuai?

⁴¹ Jesus ombovai:

— Ára revegua e'ÿ ete pendekuai va'e rire pendereko vaia noĩ 'rãgue. Ha'e rã "Ore roma'ẽ porã" peje vy ma pendereko vaia oĩ tema.*

10

Vexa'i re opena porã va'e oikoa re Jesus ijayvuague

¹ — Anhetẽ aipoa'e pëvy: Amongue vexa'i kora rokẽ rupi e'ÿ, amboae rupi oike va'e ma imonda ha'e jojuka rive-rixe va'e anho.

² Ha'e rã okẽ rupi oike va'e ma vexa'i kuery re opena va'e ete.

³ Ha'e va'e pe ma okẽ rarõa oipe'a 'rã, ha'e vexa'i kuery voi oendu kuaa 'rã okuapy ijayvua. Ha'e ramo guymba kuery hery rupi meme oenoĩ reve oguenoẽmba 'rã heravy oka py.

⁴ Guymba kuery oguenoẽmba ma vy henonde 'rã oo, ha'e rã hymba kuery ma ijayvua oendu kuaa vy oo 'rã hakykue.

⁵ Ha'e rã opena va'ety e'ÿ ou ramo ma vexa'i kuery ndooi 'rã hakykue, onhamba 'rã ixugui, ijayvua noendu kuaa vy — he'i.

⁶ Ha'e rami Jesus ijayvu mba'emo re ombojoja vy. Ha'e rami teĩ hendua kuery noendu kuaa.

⁷ Ha'e ramo Jesus omombe'u porãve ju:

— Anhetẽ aipoa'e pëvy: Xee ae vexa'i kora rokẽ aĩ.

⁸ Xee aiko e'ÿ mbove ma imonda ha'e jojuka rive va'e kuery anho ou raka'e. Ha'e va'e kuery ayvu ma vexa'i kuery noendu.

⁹ Ha'e rã xee ma okẽ aĩ. Xea rupi oike va'e kuery oo jepe 'rã. Oike 'rã, ha'e gui oẽ ju vy ojou 'rã ho'u va'erã.

¹⁰ Imonda va'e ou 'rã mymba kuery oipe'a, ojuka ha'e omomba aguã rive. Ha'e rã xee ma aju ha'e kuery oupyty aguã tekove, ha'e opa mba'e py ikuai porã aguã.

¹¹ — Xee ma vexa'i re opena porã va'ety rami aiko. Mba'eta opena porã va'ety ma guymba kuery re ome'ẽ 'rã guekove ae.

¹² Ha'e rã peráta re rive omba'eapo va'e ma vexa'i re opena ete va'ety e'ÿ, neĩ vexa'i ja e'ÿ guive. Ha'e rami vy aguara'i guaxu ou rã ha'e oexa vy onha rive 'rã vexa'i kuery oejapa vy. Ha'e ramo aguara'i guaxu mymba kuery oguero'a vy omondyipa 'rã imondovy opa rupi.

¹³ Peráta re rive omba'eapo va'e ma onha 'rã vexa'i kuery re'ÿ ae openave vy.

¹⁴ Ha'e rã xee ma vexa'i re opena porã va'ety aiko. Aikuaa xerymba kuery, ha'e rã ha'e kuery voi xekuaa,

¹⁵ Xeru xekuaa, ha'e xee Xeru aikuaa rami ae avi. Ha'e rami vy xerymba kuery re ame'ẽ 'rã xerekove.

¹⁶ — Ha'e gui xerymba kuery areko avi kora mboae py, kova'e py e'ÿ. Ha'e va'e kuery avi 'rã aru, xeayvu oendu avi ramo. Ha'e rami vy peteĩ kora py 'rã ha'e javive ikuai, ha'e peteĩ'i avi 'rã oiko opena va'ety.

¹⁷ — Ha'e nunga rupi ae Xeru xerayvu, mba'eta ame'ẽ 'rã xerekove, ha'e gui ajopy jevy aguã.

¹⁸ Xegui avave rei ndoipe'aa'i 'rã xerekove. Xee ame'ẽxea'i py ae 'rã ame'ẽ. Mba'eta xepo'aka xerekove ame'ẽ, ha'e gui ajopy ju aguã, ha'e rami Xeru ojapo uka rive.

Joo rami e'ÿ-e'ÿ judeu kuery ijayvu okuapyague

¹⁹ Ha'e rami Jesus ijayvu rã judeu kuery oendu vy joo rami e'ÿ-e'ÿ ijayvu okuapy.

²⁰ Ha'e kuery va'e regua heta aipoe'i:

— Evoko va'e re tu anha rima onhemonde ra'e na'inhakã porãvei aguã rami. Mba'e re tu pejapaxaka ri ijayvua re?

²¹ Ha'e rã amongue ma aipoe'i:

— Ha'e rami avi anha revegua ma nda'ijayvui 'rã ha'e rami. Tyrã pa anha omoma'ẽ kuaa ri ty'y oma'ẽ e'ÿ va'ekue?

Jesus pe oporandu ju okuapyague

²² Yro'y py oiko ngaru Jerusalém py, templo ojapopaague re ima'endu'aa aguã regua.

²³ Ha'e gui Jesus oiko templo roka rupi oguy puku Salomão 'epy va'e py.

²⁴ Ha'e jave judeu kuery ijyvyry oupa vy oporandu ixupe:

* 9:41 Lucas 18.9-14; Apocalipse 3.17

- Raka'e peve tu ropêxa rei aguã rami oreminoing ta? Cristo ete ri reiko vy enhemombe'u porã.
- ²⁵ Jesus ombovai:
— Xee ma anhemombe'u porã teĩ peẽ kuery ndaperovia. Mba'emo porã Xeru rery rupi ajapo aikovy va'e voi oikuaa uka marã ramigua pa aikoa.
- ²⁶ Peẽ kuery ndapejerovia mba'eta xerymba vexe'i regua e'y pendekuai vy.
- ²⁷ Mba'eta xerymba vexe'i kuery ma oendu 'rã reayvu, ha'e rã xee ma peteĩ-teĩ aexa kuaa. Ha'e kuery oo 'rã xerakykue.
- ²⁸ Ha'e kuery pe ame'ẽ tekove marã e'y. Ha'e ramo ha'e kuery nomanovei ma 'rã, ha'e avave rei ndoipe'aa'i 'rã xepo gui.
- ²⁹ Xevy pe Xeru omboaxa va'ekue ma pavẽ gui ipo'akave. Ha'e Xeru po gui ma avave rei ndoipe'aa'i 'rã.
- ³⁰ Xee ha'e Xeru reve ma pete'i'i ae roiko — he'i.
- ³¹ Ha'e gui teĩgue ju judeu kuery ojopy ita ojapi aguã.
- ³² Ha'e ramo Jesus aipoe'i:
— Pexaa rupi mba'emo porã ajapo reta ma, Xeru ojapo uka va'e meme. Ha'e nungakue regua mava'e re tu xeapipaxe ita py?
- ³³ Judeu kuery ombovai:
— Mba'emo porã rejapo va'ekue re'y ri rojapipaxe ita py, ha'e rã Nhanderuete re ndeayvu vaiague re, mba'eta ndee ava rive reiko va'eri Nhanderuete rami renhemoing ramo — he'i okuapy.
- ³⁴ Ha'e ramo Jesus aipoe'i:
— Pëvygua lei re aipo nde'i ri ty'y: “Xee aipoa'e tuuete regua pendekuaia rami”?*
³⁵ Nhanderuete ombopara uka va'ekue ndoaxa rivei 'rã. Ha'e nunga rupi ha'e va'e kuery pe ijayvu vy “Tuuete” he'i rire
³⁶ mba'e re tu ha'vy “Ndeayvu vai” peje xevy Nhanderuete Ra'y aikoa rami anhemombe'u ramo? Mba'eta xee ma Xeru guemimbourã xemoi va'ekue, ko yvy re xembou aguã.
- ³⁷ Ha'e gui mba'emo Xeru ojapo uka va'e xee ndajapoi va'e rire ha'avea rami 'rãgue xere ndapejeroviaia.
- ³⁸ Ha'e rami avi ha'e nunga ajapo ramo ha'e nunga oikoa ri jepe perovia 'rãgue, xere ae ndapejerovia teĩ. Ha'e rami vy peikuaa aguã xere Xeru oia, ha'e Xeru re xee aia — he'i.
- ³⁹ Ha'e rami ijayvu ramo ha'e kuery ojopyxe teĩ oo jepe ju ha'e kuery po gui.
- ⁴⁰ Peteĩgue ju Jordão yakã rovaigua re Jesus oo João nhomongara'i ypy'i oikovyague py. Ha'e py ranhe oiko.
- ⁴¹ Ha'e ramo heta ju oje'oi oia py. Ha'e rami vy joupe-upe aipoe'i okuapy:
— João ma neĩ peteĩgueve hexa pyrã ndojapoi va'ekue. Ha'e rã kova'e rekorã re ijayvuague ma anhetẽ meme raka'e — he'i okuapy.
- ⁴² Ha'e rami vy ha'e py heta ete ojerovia hexe.

11

Jesus omboete jevyague Lázaro

- ¹ Ha'e gui Maria ha'e tyke Marta rekoa Betânia py ma ikivy Lázaro imba'eaxy oupy.
- ² Maria ma Senhor py re heakuã porã va'e oikyty vy o'a py ae omombiru va'erã.
- ³ Ha'e gui Lázaro reindy kuery aipoe'i uka Jesus pe:
— Senhor, orekyvy reayvu ete va'e imba'eaxy oupy — he'i uka.
- ⁴ Ha'e nunga Jesus oendu vy aipoe'i:
— Ha'e va'e teko axy ma ijukaarã e'y oiko, ha'e rã Nhanderuete yvatea ha'e Ta'y yvatea avi ojekuaa aguã — he'i.
- ⁵ Jesus oayvu ete Marta, ikypy'y ha'e ikivy Lázaro.
- ⁶ Ha'e rami vy Lázaro imba'eaxy oupya oikuaa teĩ mokoĩ ára ranhe opytave oia py.
- ⁷ Ha'e gui mae ma
— Jaje'oi ju Judéia yvy katy — he'i guemimbo'e kuery pe.
- ⁸ Ha'e ramo hemimbo'e kuery oporandu:
— Orembo'ea, kue'e'i judeu kuery ita py ndeapipaxe va'ekue ri ha'ekue katy ju va'e ty'y rejeyv ta?
- ⁹ Jesus ombovai:
— Doze hora e'y ri ty'y peteĩ ára oi? Ha'e ara py teri amongue oguata vy nonhepyxangai 'rã, hexakãa ko yvy regua oexa vy.
- ¹⁰ Ha'e rã pyávy ma oguata vy onhepyxanga 'rãe, mba'eta hexe noĩ hexakãa — he'i.
- ¹¹ Ha'e rami ijayvu ma vy aipoe'ive ju:
— Nhaneirũ Lázaro ma oke oupy. Ha'e ramo xee aa ta amomyĩ — he'i.
- ¹² Ha'e ramo hemimbo'e kuery aipoe'i:
— Senhor, oke vy 'rã okuera — he'i okuapy.
- ¹³ Ha'e rami Jesus ijayvu va'eri Lázaro omano maa re ijayvu vy. Ha'e rã hemimbo'e kuery ma okea re rive ijayvua rami oikuaa.
- ¹⁴ Ha'e ramo ma Jesus omombe'u porãve:
— Lázaro omano ma.

* 10:34 “Tuuete” he'ia ma joe oikuaa pota va'e kuery re ijayvu vy (Salmo 82.6).

¹⁵ Ha'e pendere ama'ê vy avy'a ha'e py ndaikoiaque re, mba'eta ha'e rami rã 'rãe pejerovia. Jaje'oi ma'vy ituia py — he'i.

¹⁶ Tomé Dídimó hery va'e aipoe'i oirũ kuery pe:

— Jaje'oi ha'vy nhande kuery voi hexeve nhamano aguã — he'i.

¹⁷ Ha'e gui Jesus ovaê rã irundy ára ma ojapo Lázaro onhono porãa ague.

¹⁸ Betânia tekoa ma Jerusalém gui três quilômetro rãnda'u opyta.

¹⁹ Marta ha'e Maria okyvy re ipy'a vai ramo heta ou judeu kuery ombopy'a guaxu aguã.

²⁰ Marta ma Jesus ou oinya oikuaa vy oo ovaexĩ aguã. Ha'e rã ikypy'y Maria ma ngoo py ranhe opyta.

²¹ Ha'e gui Marta aipoe'i Jesus pe:

— Senhor, apy reiko va'e rirẽ xekyvy nomano jepei 'rãgue.

²² Ha'e rami avi xee aikuaa opa mba'e re Nhanderue te pe rejerure ramo ha'e ojapo 'rãa ndevy — he'i.

²³ Jesus aipoe'i:

— Ndekyvy ma onhemboete ju 'rã.

²⁴ Ha'e ramo Marta ma

— Tá, xee aikuaa ma opaa ára onhemboete ju 'rãa, omboetepaa jevy jave — he'i.

²⁵ Ha'e gui Jesus aipoe'i:

— Xee ae ma anhombote ha'e anhomoiingove va'e. Xere ojerovia va'e omano teĩ oikove jevy 'rã.

²⁶ Ha'e rami avi ha'e javive xere oiko ha'e ojerovia va'e ma nomanoi 'rã raka'evẽ rã peve guarã. Rerovia pa xeayvua?*

²⁷ Kunha va'e ombovai:

— Tá Senhor, xee arovia ndee Nhanderue te Ra'y Cristo ko yvy re reju 'rã va'ekue reikoa — he'i.

²⁸ Ha'e rami ijayvupa vy ojepe'a ranhe, ha'e oenoĩ okypy'y Maria. Ha'e vy ixupe anho'i aipoe'i:

— Nhanembo'ea ovaê ma, ha'e nerenoi — he'i.

²⁹ Ikypy'y oendu vyve opu'ã ha'e oo oĩa katy.

³⁰ Mba'eta Jesus ma tekoa py ete'i novaê teri, Marta oexaague py teri oĩ.

³¹ Ha'e gui judeu kuery Maria mbopy'a guaxuarã hoo py ou va'ekue oexa okuapy Maria ojavura reve opu'ã ovy rã. Ha'e rami vy ha'e kuery voi oje'oi hupive, "Ikivy ituia katy po oo ojae'o aguã" he'i vy.

³² Ha'e gui Jesus oĩa py Maria ovaê vy oexa vyve guenapy'ã re oĩ henonde. Ha'e vy aipoe'i:

— Senhor, apy reiko va'e rirẽ xekyvy nomano jepei 'rãgue — he'i.

³³ Ha'e ojae'o rã, ha'e judeu kuery hupive ou va'ekue ha'e javi ojae'o avi ramo Jesus oexa vy oendu opy'a re omboaxya, ndovy'ai guive.

³⁴ Ha'e rami vy oporandu:

— Mamo tu penhono porã raka'e?

Ha'e kuery ombovai:

— Senhor, eju ha'vy exa — he'i.

³⁵ Jesus voi ojae'o.

³⁶ Ha'e ramo judeu kuery oexa vy

— Ha'e oayvu ete va'e ty'y — he'i okuapy.

³⁷ Ha'e rã amongue ma aipoe'i:

— Ha'e ma ára revegua e'ỹ omoma'ê va'ekue nda'evẽ ri ty'y kova'e voi omano aguã gui ogueraa jepe aguã? — he'i.

³⁸ Jesus teĩgue ju opy'a re oendu omboaxya. Ha'e vy oo onhono porãa ague peve. Peteĩ itakua py onhono porãa, ha'e imbotyarã omoĩa ita tuvixa va'e.

³⁹ Ha'e ramo Jesus aipoe'i:

— Peipe'a ita — he'i.

Ha'e ramo omano va'ekue reindy Marta aipoe'i:

— Senhor, heakuã ma rima, irundy ára ma rirẽ.

⁴⁰ Jesus ombovai:

— Xee aipo nda'ei ri ty ra'e, rejerovia vy Nhanderue te po'akaa rexa 'rãa? — he'i.

⁴¹ Ha'e rami rã oi'pe'aa ita. Jesus yva re oma'ê vy aipoe'i:

— Xeru, xee roguerovy'a, mba'eta rendu xeayvua.

⁴² Xee ma aikuaa ae xeayvua rendu riaea. Ha'e rami avi nami xeayvu heta va'e kuery oikuaa aguã ndee ae xembouague — he'i.

⁴³ Ha'e rami ijayvu ma rirẽ ojavukai reve aipoe'i:

— Lázaro, eê ke oka py — he'i.

⁴⁴ Ha'e ramove omano va'ekue oẽ ovvy ipy ha'e ipo ojokuaague reve, ha'e hova panhero py onhovãa va'ekue reve.

Ha'e ramo Jesus aipoe'i:

— Pejora, tove too — he'i.

⁴⁵ Ha'e gui judeu kuery Maria-a py ou va'ekue ma ha'e rami Jesus ojapo rã oexa vy heta ojerovia hexe.

⁴⁶ Ha'e rã amboae kuery ma oje'oi vy fariseu kuery pe omombe'upa Jesus ojapo va'ekue.

Huvixa kuery Jesus ojuka aguã re jogueroayvuaque

* 11:26 João 5:21-29, 6:40

⁴⁷ Ha'e nunga sacerdote yvatekueve va'e ha'e fariseu kuery oendu vy nhomboatypa nhomboayvu va'ety kuery reve. Ha'e vy aipoe'i:

— Mba'e tu nhande kuery jajapo jakuapy? Mba'eta ha'e va'e ava ma hexa pyrã anho ojapo oikovy.

⁴⁸ Xapy'a rei nanhapenai ramo ma ojerovia pavê 'rã hexe. Ha'e ramo Roma pygua kuery ha'e nunga oendu vy ou vy omomba 'rã nhambojeroviaaty ha'e nhande kuery voi — he'i okuapy.

⁴⁹ Ha'e kuery regua petei ma Caifás hery va'e, ha'e va'e ma'etÿ re sacerdote yvateve va'e oï. Ha'e va'e aipoe'i:

— Peê kuery ma mba'eve ndapeikuaai,

⁵⁰ neï ndapeikuaa potai guive, mba'eta nhande kuery nhamanombaa 'rãgue py ha'eveve petei ava omano aguã heta va'e kuery rekovia — he'i.

⁵¹ Ojee ae gui e'ÿ ha'e rami ijayvu. Ha'e rã ha'e va'e ma'etÿ re sacerdote yvateve va'e oï vy Nhanderuede gui ae ijayvu Jesus heta va'e kuery rekovia omano aguã re.

⁵² Ha'e guetarã kuery rekovia anho e'ÿ guive omano, ha'e rã Nhanderuede ra'y kuery vvy jave re ikuai va'e ha'e javi omoingo aguã petei'i tete rami.

⁵³ Ha'e gui ha'e va'e ára guive ha'e kuery onhembopy'a okuapy ojuka aguã.*

⁵⁴ Ha'e nunga Jesus oikuaa vy judeu kuery ikuai rupi ve'ÿ oiko, ha'e rã tekoa e'ÿa katy'i petei tetã Efraim hery va'e oï va'e py oo. Ha'e py ranhe opyta guemimbo'e kuery reve.

⁵⁵ Ha'e gui judeu kuery pegua ngaru Páscoa ára ovaê rai'i ma ramo Jerusalém katy heta oje'oi tekoa ikuai va'e gui, Páscoa oiko rã guarã ojeky'a'o aguã.

⁵⁶ Ha'e py ma oeka okuapy Jesus. Ha'e rami vy templo py ikuai vy aipoe'i joupe-upe:

— Mba'exa ndee reikuaa? Jesus nda'u ndoui 'rã ngarua py? — he'i.

⁵⁷ Sacerdote yvatekueve va'e ha'e fariseu kuery aipoe'i amongue mamó pa Jesus oikoa oikuaa vy omombe'u aguã, ha'e kuery ojopy aguã.

12

Mateus 26.6-12; Marcos 14.6-8

¹ Mboapy meme ára teri oata Páscoa ára ovaê aguã jave ma Betânia katy ju Jesus oo, Lázaro omanoague gui omboete ju va'ekue rekóa py.

² Ha'e rã Jesus pe ojapo okuapy petei ngaru. Marta ojara oikovy tembi'u. Ha'e rã Lázaro voi ha'e kuery reve oï okarua py.

³ Ha'e gui Maria ogueru meio quilo heakuã porã va'e nardo gui anho ojapo pyre, hepyve ete va'e. Ha'e rami vy Jesus py re oikyty heakuã porã va'e, ha'e o'a py ju omombiru. Opy ha'e javi rupi omoeakuãmba.

⁴ Ha'e rami rã hemimbo'e kuery regua Judas Iscariotes ijopy uka nhemiarã va'e aipoe'i:

⁵ — Mba'e re tu heakuã porã va'e novendei ra'e trezentos ára repy re, iporiaukue'i pe hepykue ome'ê aguã? — he'i.

⁶ Ha'e rami ijayvu iporiaukue'i oipytyvõxe vy e'ÿ, mba'eta imonda va'e oiko, ha'e oirü kuery peráta ryrü re opena va'e vy ojeupe guarã oipe'a kuerei 'rã peráta omoï mbyre.

⁷ Ha'e ramo ixupe Jesus aipoe'i:

— Tove ri, mba'eta gui rami xerete omoeakuã ma voi xenhono porã rã guarã.

⁸ Iporiaukue'i ma ikuai riae 'rã peê kuery reve. Ha'e rã xee ma pendereve ndaiko riaei 'rã.

Lázaro avi ojukaxe okuapyague

⁹ Heta judeu kuery ma Jesus ha'e py oia oikuaa vy jogueru há'e katy. Jesus oexaxe vy anho e'ÿ oo, oexaxe avi Lázaro omanoague gui omboete ju va'ekue.

¹⁰ Ha'e rã sacerdote yvatekueve va'e ma Lázaro voi ojukaxe okuapy,

¹¹ mba'eta judeu kuery Lázaro oexa vy oje'oi va'ekue heta ma ojevvy Jesus re ojerovia reve.*

Mateus 21.1-9; Marcos 11.1-10; Lucas 19.28-38

¹² Ko'ê jevvy ngaru oia py ou va'ekue heta oendu okuapy Jerusalém katy Jesus ou oinya.

¹³ Ha'e rami vy pindo rogue ojaya reta jogueravy ovaexi aguã oje'oi vy. Ojapukai reve aipoe'i:

— Iporã ete! Ima'endu'a porãmby Israel kuery ruvixaverã Senhor rery rupi ou va'e — he'i oje'oivy.*

¹⁴ Ha'e gui Jesus ma mburika'i ojou uka va'ekue áry ou, kuaxia para re oia rami vy:

¹⁵ “Sjão pygua kuery, pekyje eme, mba'eta mburika ra'y áry ou ma oiny penderuvixaverã”, he'iague rami.*

¹⁶ Hemimbo'e kuery ha'e nunga oexa teï ndoikuaai ranhe. Jesus omboyvateu ju rire mae ma oikuaa, mba'eta ima'endu'a okuapy kuaxia para re hekorã re ijayvuague re, omovaê porã okuapy rã oexa rire.

¹⁷ Mba'eta heta ikuai va'ekue Lázaro omanoague gui Jesus omopu'ã ju ha'e onhono porãague gui oenoïague py. Ha'e kuery ha'e nungakue omombe'u ramo ae

¹⁸ heta va'e kuery oje'oi ovaexi aguã, ha'e nunga hexa pyrã ojapoague oendu rire.

¹⁹ Ha'e ramo fariseu kuery ma aipoe'i okuapy joupe-upe:

— Opa mba'e jajapo va'e mba'everã ndovarei, mba'eta hakykue oje'oi pavê.

Amongue grego kuery Jesus oexaxe okuapyague

* 11:53 Mateus 26.1-5; Marcos 14.1,2; Lucas 22.1,2 * 12:11 Lucas 16.27-31 * 12:13 Salmo 118.26 * 12:15 Zacarias 9.9-10 py oia rami vy pindo rogue heta va'e kuery ogueru vy oexa uka nguvixa po'akaa oguerovy'aa, ha'e rã kavaju áry 'rãgue py mburika'i áry huvixa ou vy oexa uka onhemo'yvy'i ha'e ha'evepa rei'ia.

²⁰ Amongue grego kuery ngarua py ombojerovia aguã jogueru avi va'ekue.

²¹ Ha'e gui ha'e va'e kuery oje'oi hemimbo'e Filipe oia py, Galiléia regua Betsaida pygua ramo. Ha'e vy aipoe'i okuapy ixupe:

— Orevuxa, ore kuery voi roexaxe Jesus — he'i.

²² Ha'e ramo Filipe oo vy André pe ranhe omombe'u. Ha'e rami vy André reve Jesus pe ju omombe'u.

²³ Ha'e ramo Jesus ombovai:

— Aÿ ovaë ma Ava ra'y ojeapo va'ekue omboyvatea ju aguã ára.

²⁴ Anhetê aipoa'e pêvy, trigo ra'yí vvy py ndo'ai ha'e nomanoi vy peteĩ ha'yí'i ae 'rã opyta. Ha'e rã omano vy ma hi'a retave 'rã.

²⁵ Guekove oayvu va'e kuery ma omokanhy 'rã. Ha'e rã ko vvy re ikuai reve guekove ndoayvui va'ekue ma ojou 'rã tekove marã e'ÿ.*

²⁶ Xerembiguaí ikuaixe va'e toje'oi xerakykue, mamo rã xee aikoa py xerembiguaí avi ikuai aguã. Ha'e gui xerembiguaí rami ikuai va'e ma Xeru omboyvate 'rã.

²⁷ — Aÿ ma xepy'a py aendu ndavy'aia. Ha'e rami vy mba'e ha'e nda'u xee? “Xeru, xereraa jepe ke kova'e hora gui” ha'e 'rã nda'u? Any, mba'eta kova'e hora pyguarã ae xee aju rire.

²⁸ Ha'e rami 'rãgue py “Xeru, eikuaa uka ke nderery yvatea” ha'e — he'i.

Ha'e ramo onhendu peteĩ ayvu yva gui:

— Xee aikuaa uka ae ma xerery yvatea, ha'e aikuaa ukave ju 'rã guive — he'i va'e.

²⁹ Ha'e va'e ayvu ma heta va'e kuery ikuai va'e oendu vy aipoe'i:

— Yapu.

Ha'e rã amboae kuery ma

— Anjo rima ijayvu ra'e — he'i.

³⁰ Ha'e gui Jesus ma aipoe'i:

— Pova'e ayvu ma xee anho aendu aguã e'ÿ onhendu, ha'e rã peẽ kuery peguarã.

³¹ Aÿ ovaë ma ko vvy regua kuery opaga aguã oikuaa ukua ára, ha'e ko vvy regua kuery rerekoa avi 'rã oitya.

³² Mba'eta ko vvy gui xereupia ramo ha'e javi regua 'rã aru xejee — he'i.

³³ Ha'e rami ijayvu, marã rami pa omano 'rãa re ijayvu vy.

³⁴ Ha'e ramo heta va'e kuery oporandu:

— Ore kuery ma roikuaa lei re oia rami vy Cristo ou vy oiko riae 'rãa. Mba'exa tu ha'vy ndee aipo're Ava ra'y ojeapo va'ekue vvy gui oupia 'rãa rami? Mava'e tu “Ava ra'y ojeapo va'ekue” 'rea? — he'i okuapy.

³⁵ Jesus aipoe'i:

— Aÿ'i ma hendy va'e oiko teri pendereve. Peiko kuaa ke pendereve hendy va'e oia ja, pytũ penderupity e'ÿ aguã, mba'eta pytũ rupi ikuai va'e ma ndoikuuaí marã katy pa ooa.

³⁶ Hendy va'e pendereve oiko teri reve pejerovia hexe, hendy va'e ra'y kuery peiko aguã — he'i. Ha'e rami Jesus ijayvupa ma vvy ojepe'a ovy, ha'e ndojexa ukavei ha'e kuery pe.

Jesus re judeu kuery ndojeroviai okuapya re ijayvua

³⁷ Ha'e kuery oexaa rupi hexa pyrã ojapo reta teĩ ndojeroviai okuapy hexe,*

³⁸ profeta Isaías aipoe'iague ojeupity aguã: “Senhor, mava'e tu oguerovia 'rã oreayvua? Mava'e kuery pe tu reikuaa ukua 'rã ndepo'akaa?” he'iague rami.*

³⁹ Mba'eta ha'e kuery ndojeroviai ae, Isaías aipoe'ia rami vy:

⁴⁰ “Ha'e kuery rexa amboguepa, amoakã ratã guive, ha'e kuery guexa py mba'eve oexa e'ÿ aguã, ha'e opy'a py mba'eve oendu e'ÿ aguã, ojeko rerova rã araa jepe aguã.”*

⁴¹ Ha'e rami Isaías ijayvu Jesus ipo'aka aguã oikuaa ma voi vy. Ha'e vy ae hekorã re ijayvu.

⁴² Ha'e rami avi huvixa kuery heta ojerovia hexe teĩ okyje vy onhenhomi guive, onhembo'eaty gui fariseu kuery omoxẽ gui.

⁴³ Ha'e kuery ma avakue pe rive ojejou porã uka, Nhanderuete pe 'rãgue py.

Gueko re peteigue ju Jesus ijayvuague

⁴⁴ Ha'e gui Jesus ijayvu atã reve aipoe'i:

— Xere ojerovia va'e ma xere anho e'ÿ ojerovia, ha'e rã Xembouare re avi.

⁴⁵ Xerexa va'e kuery ma Xembouare avi oexa.

⁴⁶ Mba'eta xee ma ko vvy regua moexakãarã aju, xere ojerovia va'e pytũ rupi ve'ÿ ikuai aguã.

⁴⁷ Ha'e gui amongue xeayvu oendu teĩ ndojapoi va'e ma xee nambopagai 'rã. Mba'eta xee aju ko vvy re ikuai va'e araa jepe aguã, ambopaga aguã e'ÿ.

⁴⁸ Ha'e rami avi oiko ae ma xere ndojeroviai ha'e xeayvua ndojapoi va'e mbopagaarã. Xeayvu amombe'u va'ekue ae 'rã ojapo opaa ára opaga aguã rami.

⁴⁹ Mba'eta xee ma xejegui e'ÿ xeayvu. Xeru Xembouare ae oikuaa uka xeayvu aguã, ha'e amombe'u va'erã.

⁵⁰ Ha'e ijayvua ma tekove marã e'ÿ me'ëa, xee aikuaa. Ha'e rami ae xee xeayvua voi, mba'eta Xeru xembo'ea rami anho xeayvu.

* 12:25 Mateus 16.24-28; Apocalipse 2.10, 12.11 * 12:37 João 1.10,11 * 12:38 Isaías 53.1 * 12:40 Isaías 6.10

13

Guemimbo'e kuery py Jesus ojoiaque

¹ Páscoa ára py ngaru oiko e'ỹ mbove Jesus oikuaa ovaẽ ta maa ko yvy gui nguua katy ju oo aguã ára. Ojeupegua kuery yvy re teri opytave va'erã oayvu etea rupi oexa uka oayvua opa peve.

² Ha'e kuery okaru teri okuapy reve, Simão Iscariotes ra'y Judas py'a re anha omoĩ Jesus ojopy uka nhemi aguã.

³ Ha'e rã Jesus ma oikuaa Tuu opa mba'e ipo py omboaxapaa. Oikuaa avi Nhanderuetea gui ou rire ha'ea py ju oo 'rãa.

⁴ Ha'e rami vy okaru oinya gui opu'ã vy omboi okamixa puku, ha'e peteĩ ajukue ojopy vy ojokua oku'a rupi.

⁵ Ha'e rami vy hy'a py yvy omoĩ vy ojoi oiny guemimbo'e kuery py, ha'e gui omombiru ju ajukue oku'a rupi ojokua va'ekue py.*

⁶ Ha'e gui Simão Pedro oĩa py ovaẽ ramo aipoe'i:

— Senhor, ndee rejoi ta va'e ty'y xepy?

⁷ Jesus ombovai:

— Mba'emo aỹ ajapo va'e ndereikuai rire teĩ raka'eve rã reikuaa 'rã — he'i.

⁸ Ha'e ramo Pedro aipoe'i:

— Ndee nderejoi 'rã xepy.

Jesus ombovai:

— Xee ndepy ndajoi ri ramo mba'eve nderereko 'rã xereve — he'i.

⁹ Ha'e ramo Pedro aipoe'i:

— Senhor, xepy anho'i e'ỹ ejoi, ha'e rã xepo ha'e xeakã ha'e javi rupi guive.

¹⁰ Jesus aipoe'i ixupe:

— Ha'e rami avi amongue ojaupa ma va'ekue opy anho ojoi uka teĩ ha'eve, nda'iky'avei vy. Peẽ kuery voi napendepy'a ky'avei ma aỹ, va'eri ha'e javive e'ỹ ta'vy — he'i.

¹¹ Mba'eta ha'e oikuaa ae mava'e pa ijopy uka nhemiarã oikoa. Ha'e vy ae “Ha'e javi e'ỹ napendepy'a ky'ai” he'i.

Mba'e re pa guemimbo'e kuery py ojoiaque Jesus omombe'u porãveague

¹² Ha'e kuery py ojoi pa ma rire omoĩ ju okamixa, ha'e mesa py ju oĩ. Ha'e vy oporandu:

— Peikuaa pa guĩ rami ajapoaque?

¹³ Mba'eta peẽ kuery ma xevy “Orembo'ea” ha'e “Senhor” peje. Anhetẽ ae aipopeje, mba'eta ha'e ae aiko.

¹⁴ Ha'e gui xee penembo'ea ha'e Senhor aiko va'eri pendepy ajoi rire ma peẽ voi 'rã pejoi peteĩ-teĩ py.*

¹⁵ Mba'eta guĩ rami ajapo rombo'e aguã ha'ekue rami avi peẽ kuery voi peteĩ-teĩ pe pejapo aguã re.

¹⁶ Anhetẽ aipoa'e pëvy: Tembiguai kuery ma opatõ gui yvateve va'e'ỹ, ha'e imbou pyre voi imbouare gui yvateve va'e'ỹ.

¹⁷ Ha'e nunga peikuaa vy ha'e rami ri pendekuai vy pevy'a ete 'rã.

¹⁸ — Peẽ kuery ha'e javive reko re'ỹ guive xeayvu, mba'eta aikuaa xerembiporavo peteĩ-teĩ reko. Ha'e rami avi ojeupity 'rãe kuaxia re oĩ va'e: “Xereve okaru oiny va'ekue regua peteĩ opu'ã xerovai”, he'iague.*

¹⁹ Ha'e nunga oiko e'ỹ mbove xee amombe'u ma voi pëvy, ojeupity ramo xee ae aikoa perovia aguã.

²⁰ Anhetẽ aipoa'e pëvy: Xeremimbou kuery amongue omovaẽ vy ma xee avi xemovaẽ. Ha'e xemovaẽa ma Xembouare avi omovaẽ.

Peteĩque ju ijopy uka nhemiarã Jesus omombe'uague

²¹ Pova'e nunga re Jesus ijayvu vy oendu nda'evei etea. Ha'e vy omombe'u porãve:

— Anhetẽ aipoa'e pëvy: Peẽ kuery va'e regua peteĩ xejopy uka nhemi 'rã — he'i.*

²² Ha'e ramo hemimbo'e kuery joe-joe rive oma'ẽ, mava'e re pa ijayvua oikuaa e'ỹ vy.

²³ Jesus yv'ýry oĩ hemimbo'e kuery regua oayvuvu va'e.

²⁴ Ha'e va'e pe ma Simão Pedro okuã py ojapo “Eporandu mava'e ete pa” he'ia rami.

²⁵ Ha'e ramo ha'e va'e hemimbo'e ma Jesus pexo re ojekove'i reve oporandu:

— Senhor, mava'e tu?

²⁶ Jesus ombovai:

— Mbojape ra'ykue hy'a py amoakỹ va'ekue ame'ëa va'e ae 'rã — he'i. Ha'e rire'ive mbojape ra'ykue ojopy vy omoakỹ, ha'e ome'ë Simão Iscariotes ra'y Judas pe.

²⁷ Ha'e va'e ma mbojape ho'u ramove ipy'a re onhemonde Satanás.

Ha'e ramo ixupe Jesus aipoe'i:

— Mba'emo rejapoxe va'e ke emboare eme — he'i.

²⁸ Ha'e rami ijayvu rã okaru py amboae kuery ikuai va'e oendu va'eri ndoikuai okuapy mba'erã pa ijayvua.

²⁹ Judas ma ha'e kuery peráta re opena va'e ramo amboae kuery “Ngaru pyguarã ojogua aguã re po ijayvu” he'i, ha'e e'ỹ vy “Iporiakue'i pe mba'emo ome'ë aguã po omondouka” he'i tei.

*
^{13:5} Ha'e kuery reko rami vy oo py ipoua kuery ovaẽ ramo hoo va'e omovaẽ vy ogueru ruka 'rã vy ojepyvei aguã, tape rupi yvy ku'i rupi ou rire. Amongue py peteĩ tembiguai ojoi 'rã ipy (Gênesis 18.4, 19.2, 24.32, 43.24, Juízes 19.21, Lucas 7.44). * ^{13:14} Lucas 22.24-27; Filipenses 2.5-8 * ^{13:18} Salmo 41.9 * ^{13:21} Mateus 26.20-25; Marcos 14.17-21;

³⁰ Ha'e ramo Judas mbojape ho'upa vyve opu'ã ovy. Ha'e jave ma pytũ ma.

Jajoayvu aguã re ijayvuague

³¹ Judas ojepe'a ramove Jesus aipoe'i:

— Aỹ ma ovaẽ ma Ava ra'y ojeapo va'ekue omboyvatea aguã, ha'e xere vy Nhanderuete yvatea ojekuaa avi aguã.

³² Ha'e gui xere vy Nhanderuete yvatea ojekuaa ramo ma xee voi xemboyvate 'rã ojea py ae, xemboyvate voi 'rã guive.

³³ — Xera'y kue'iry, aỹ'i ma aiko teri pendereve. Araka'eve'i rã peẽ kuery xereka 'rã pekuapy. Aỹ pẽvy aipoa'e avi judeu ruvixa kuery pe aipoa'eague rami: “Peẽ kuery voi ndapeoi 'rã aa ague py” ha'e.

³⁴ Ha'e gui mba'emo pyau ajapo uka pẽvy: Pejoayvu peteĩ-teĩ, xee roayvua rami ae avi peẽ kuery voi pejoayvu aguã.

³⁵ Pejoayvua pavẽ oexa vy 'rãe oikuaa xeremimbo'e kuery pendekuaia.*

Mateus 26.31-35; Marcos 14.27-31; Lucas 22.31-34

³⁶ Ha'e ramo Simão Pedro oporandu:

— Senhor, mamõ tu reo ta?

Jesus ombovai:

— Xee aa ague py ma ndee ndereoi ranhe 'rã. Raka'eve ramo mae 'rã reo xerakykue — he'i.

³⁷ Ha'e ramo Pedro oporanduve ju:

— Mba'e re tu nda'evei aỹve aa aguã nderupive? Xevy pe ha'evepa rei nderekovia ajekuka uka aguã voi.

³⁸ Jesus ombovai:

— Anhetẽ ri nda'u rejekuka uka 'rã xerekovia? Anhetẽ aipoa'e ndevy, mboapykue uru ava ojavukai e'ỹ mbove renhemombe'u 'rã xekuaa e'ỹa rami — he'i.

14

Hebreus 10.19,20

¹ — Pendepy'a re toĩ eme nda'evieia. Pejerovia tema Nhanderuete re, xere avi tema pejerovia.

² Mba'eta xeru ro py ma heta oĩ tekoarã, ha'e aa ta areko katu pendekuai aguã. Ha'e rami e'ỹ va'e rire xee amombe'u ma voi 'rãgue pẽvy.

³ Ha'e gui aa vy pendekoarã areko katupa rire aju ju 'rã rogueraa aguã xea py, xee aiko py peẽ voi pendekuai aguã.*

⁴ Ha'e peẽ kuery peikuaa ae ma aa aguã katy tape oo va'e — he'i.

⁵ Ha'e ramo Tomé aipoe'i:

— Senhor, ore ma ndoroikuaai mamõ pa reo taa. Marã rami vy 'rã tu roikuaa tape?

⁶ Jesus ombovai:

— Xee ae ma tape, anhetẽ va'e ha'e tekove. Avave rei ndooi 'rã Xerua py xereve'ỹ vy.

⁷ Peẽ kuery anhetẽ ri xekuaa vy Xeru voi 'rã peikuaa. Ha'e rami avi aỹ gui voi peikuaa, ha'e pexa ma guive — he'i.

⁸ Ha'e ramo Filipe aipoe'i:

— Senhor, exa uka na Nderu. Ha'e rami rã ha'eva ma 'rã orevy.

⁹ Jesus ombovai:

— Filipe, yma ma ri tu ojapo peẽ kuery reve aikoague va'eri ndaxekuaai teri va'e ty'y? Xerexa va'e ma Xeru avi oexa.* Mba'e re tu aipo're ri ndee: “Exa uka na Nderu orevy” re?

¹⁰ Ndereroviai va'e ty'y Xeru re xee aĩa, ha'e Xeru xere oĩa? Ha'e ayvu amombe'u va'e voi ma xejeguigua e'ỹ, ha'e rã Xeru xere oĩ va'e ae ojapo oikovy mba'emo.

¹¹ Perovia na Xeru re aĩa, ha'e Xeru xere oĩa. Ha'e rami e'ỹ vy mba'emo ajapo va'e ri jepe perovia.

¹² — Anhetẽ aipoa'e pẽvy: Xere ojerovia va'e kuery ma mba'emo ajapo va'ekue ramigua ju 'rã ojapo. Iporãve va'e voi 'rã ojapo, Xerua py xee aa ma rire.

¹³ Ha'e xerery rupi mba'emo re pejerure ramo ajapopa 'rã, Ta'y re vy Tuu yvatea ojekuaa aguã.

¹⁴ Xerery rupi mba'emo re pejerure ramo xee ajapo 'rã.

¹⁵ Peẽ xerayvu vy pejapo 'rã ajapo uka va'ekue.

Nhanembopy'a guaxuarã ombou aguã re ijayvuague

¹⁶ — Ha'e xee ajerure 'rã Xeru pe ombou aguã Penembojovyarã mboae, peẽ kuery reve oiko riaa va'erã.

¹⁷ Ha'e va'e ma Nhe'ẽ anhetẽ va'e kuaa ukua.* Ha'e va'e ma ko yvy regua kuery ojee nomoĩ kuaai 'rã, mba'eta ndoexai neĩ ndoikuaai guive. Ha'e rã peẽ kuery ma peikuaa ma, mba'eta pendereve oiko, ha'e pendere oĩ 'rã guive.

¹⁸ Xee ma ndoroaja rivei 'rã, aju ju 'rã pendereve aiko aguã.

¹⁹ Yvy regua kuery ma ndaxerexavei ranhe 'rã. Ha'e rã peẽ kuery ma xerexa 'rã. Xee aikove ramo peẽ kuery voi peikove 'rã.

²⁰ — Ha'e va'e ára peikuaa ete 'rã Xeru re aĩa, ha'e peẽ kuery xere peĩa, ha'e gui xee peẽ kuery re aĩa guive.

* 13:35 1 João 3.11-18 * 14:3 1 Tessalonicenses 4.16,17; Hebreus 11.16 * 14:9 João 10.30; Colossenses 2.9 * 14:17 João 7.37-39, 16.7-14; Atos 2.1-4; 1 João 2.27

²¹ Ajapo uka va'ekue ojee omoī ha'e ojapo ete va'e kuery ma xerayvu. Ha'e xerayvua kuery ma Xeru rembiayvu ikuai, ha'e xee voi ayvu vy ajekuaa uka 'rā ha'e kuery pe — he'i.

²² Ha'e ramo Judas mboae Iscariotes e'ŷ va'e aipoe'i:

— Senhor, mba'exa tu orevy anho rejekuaa uka ta, vvy regua kuery pe any va'erī?

²³ Jesus ombovai:

— Xerayvua kuery ma ikuai 'rā xerayvua rupi. Ha'e ramo ma Xeru oayvu 'rā, ha'e roju 'rā ha'e kuery re roī aguā.

²⁴ Ha'e rā ndaxerayvui va'e ma xerayvua rupi e'ŷ 'rā ikuai. Ha'e rami avi xerayvu pendu va'e ma xee ae guigua e'ŷ guive, ha'e rā Xeru Xembouare ayvu.

²⁵ — Po ramigua re xerayvu pendereve teri aiko reve.

²⁶ Ha'e rā Nhe'ē Ky'a E'ŷ Penembojovyarā xerery rupi Xeru ombou va'erā ma opa mba'e re 'rā penembo'e, ha'e penemoma'endu'a 'rā xerayvuague ha'e javi re.

²⁷ Pendevy pe aeja ta mby'a porā, xeguigua mby'a porā ae 'rā amboaxa pendevy. Ha'e nunga mby'a porā ma vvy re ikuai va'e nome'ē kuaai. Ha'e nunga rupi pendepy'a re toī eme nda'eveia, pekyje eme guive.

²⁸ — Pendu ma pēvy “Aa ta, ha'e gui aju ju 'rā pendea py” ha'e ramo. Ha'e gui peē kuery anhetē xerayvu va'e rire pevy'a 'rāgue “Xerua py xee aa ta” ha'e rā pendu vy, mba'eta Xeru ma xegui yvateve.

²⁹ Ha'e nunga ma xee amombe'u ma voi oiko e'ŷ mbove, ojeupity rā pejerovia aguā.

³⁰ — Nda'evevei ranhe xerayvuvu aguā pēvy, mba'eta ou ma ko vvy regua kuery rerekoa. Ha'e ma mba'eve ndoguerekoī xereve,

³¹ teī ha'e rami aiko 'rā ko vvy re ikuai va'e oikuaa aguā Xeru ayvua, ha'e ajapo aikovya ha'e ojapo uka va'e. Pepu'ā ma ha'vy, jaje'oi apy gui.

15

Uva'y ha'e hakā re ombojoaague

¹ — Xee ma uva'y anhetē va'e, ha'e rā Xeru ma ity re opena va'e.

² Ha'e gui hakā xere oī va'erī ndai'ai va'e ma ha'e ojayapa 'rā. Ha'e rā hi'a va'e ma ojaya pa'ū-pa'ū 'rā hi'a retave aguā.

³ Peē kuery ma hakā omoatyrō mbyre rami ma pendekuai, ayvu pēvy amombe'ua py ha'eve va'e romoingo rire.

⁴ Peī atā xere, ha'e rā xee ma aī 'rā pendere. Mba'eta hakāgue rive ndai'ai 'rā ojegui ae, hi'y re oī e'ŷ vy. Ha'e rami ae avi peē kuery voi xere e'ŷ vy hakā hi'a e'ŷ va'e rami 'rā pendekuai.

⁵ Mba'eta xee ma uva'y, ha'e rā peē kuery ma hakā. Amongue xere oī, ha'e ha'e kuery re xee aī ramo hi'a porā 'rā, ha'e rā xere'ŷ vy ma mba'eve ndapejapoi 'rā.*

⁶ Xere noī va'e kuery ma hakāgue rami 'rā omombo ipirupa aguā. Ha'e rire amongue ojopy vy tata py ju 'rā omombo okaipa aguā.

⁷ Xapy'a rei xere peī atā, ha'e pendere xerayvuague oī ramo ma peipota va'e re pejerure ramo ojapoa 'rā.

⁸ Hakā hi'a reta va'e rami pendekuai ramo 'rāe ojekuaa Xeru yvatea, ha'e xeremimbo'e ete pendekuai.

⁹ — Xeru xerayvua rami avi xee voi roayvu peē kuery. Xee roayvua rupi tema pendekuai.

¹⁰ Xerayvua rupi pendekuai vy roayvua rupi avi 'rā pendekuai, Xeru ijayvua rupi xee aiko vy xerayvua rupi aikoa rami avi.

¹¹ Ha'e rami xerayvu xeguigua vy'a peē kuery re oī aguā, opa mba'e py pevy'a aguā.

¹² — Pova'e ae xee aeja pendevy: Peteī-teī pejoayvu 'rā xee roayvua rami.

¹³ Mba'eta guembiayvu kuery rekovia ojejuka uka va'e gui ma avave rei ndajoayvuavei.

¹⁴ Peē kuery ae xerembiayvu pendekuai, ajapo uka va'e pejapo vy.

¹⁵ Xee ma “Escravo” nda'ei pēvy, mba'eta escravo kuery ndoikuaai mba'e pa herekoa ojapo oikovya. Ha'e rami 'rāgue py “Xerembiayvu” ha'e pēvy, mba'eta pendevy pe aikuaa uka Xeru gui aendu va'e ha'e javi.

¹⁶ — Mba'eta peē ranhe'ŷ xeporavo va'ekue. Xee ae peē kuery roiporavo, ha'e romoī guive peoa rupi heta pemoingo aguā hi'a opa e'ŷ va'erā. Ha'e ramo 'rāe pēvy Xeru ojapo xerery rupi pejerurea ha'e javi.

¹⁷ Pova'e ae ajapo uka pēvy, peteī-teī pejoayvu aguā.

¹⁸ — Ha'e gui vvy regua kuery napenderayvui ramo peikuaa pota tema pova'e re: Peē kuery gui xee ranhe ndaxerayvui okuapy.

¹⁹ Ha'e rā vvy regua peē pendekuai va'e rire ma vvy regua kuery penderayvu 'rāgue, ha'e kuery regua ae pendekuai rā. Ha'e rami avi vvy regua e'ŷ peē kuery pendekuai, ha'e kuery mbyte gui xee roiporavo rire. Ha'e nunga rupi ae vvy regua napendayvui.

²⁰ Penema'endu'a ke “Tembiguaī kuery opatō gui yvateve va'e'ŷ” ha'eague re. Ha'e nunga rupi xere opu'ā rei okuapyague rami avi peē kuery re voi opu'ā rei 'rā. Ha'e rā xerayvua oendua ramo ma pendeayvua voi oendua 'rā.

²¹ Ha'e nunga ha'e javi 'rā pendere ha'e kuery ojapo xerery rupi pendekuai ramo, mba'eta Xembouare voi ndoikuaai vy.

²² — Ha'e gui xee ndajui ha'e ha'e kuery pe ndaxerayvui va'e rire ma ha'e kuery reko vaia noī 'rāgue. Va'erī aŷ gui ma nda'evei ha'e kuery “Aikuaa vy e'ŷ ajejavy” he'i aguā.

²³ Ndaxerayvui va'e kuery ma ndoayvui avi Xeru.

* 15:5 1 João 2.28; Gálatas 2.20; Filipenses 4.13

²⁴ Ha'e kuerya rupi xee ndajapoi va'e rire mba'emo avave rei ojapo kuaa e'y va'e regua, ha'e kuery reko vaia noi 'rãgue. Ha'e rami avi a'y ma ha'e kuery xerexa te'i ndaxerayvui, ha'e Xeru voi ndoayvui okuapy.

²⁵ Ha'e nunga oiko ojeupity aguã ha'e kuery pegua lei re "Mba'e py e'y ndaxerayvui okuapy" he'iague.*

²⁶ — Ha'e gui Xerua gui ambou 'rã Penembojoyvyarã, anhetê va'e kuaa ukaarã. Ha'e va'e ou ma vy oikuaa uka 'rã xereko.

²⁷ Peê kuery avi 'rã pemombe'u, jypy'i guive xerupive pendekuai rire.

16

Nhanembojoyvyarã ou va'erã re ijayvuague

¹ — Ha'e nunga xee amombe'u ma voi, pejeroviaa gui pejepe'a e'y aguã.

² Mba'eta ha'e kuery penemoxê 'rã onhembo'eaty ikuai va'e gui. Ovaê 'rã pendejukaa kuery "Nhanderuete pe vy ajojuka" he'ia ára.

³ Ha'e nunga ha'e kuery ojapo 'rã mba'eta ne'i Xeru, ne'i xee voi xekuaa e'y vy.

⁴ Pova'e nunga xee amombe'u pende'vy ha'e nunga ojeupity rã pexa vy xeyayvuague re penema'endu'a aguã. Po rami ma jypy'i guive e'y amombe'u pëvy, mba'eta peê kuery reve teri 'rã aiko.

⁵ — Ha'e gui a'y ma aa ta ma Xembouarea py. Ha'e rami te'i pete'ive voi "Mamo tu reo ta?" ndapejevei xevy.

⁶ Ha'e nunga amombe'u rire ndapevy'aia anho pendu pende'py'a re.

⁷ Anhetê aipoa'e pëvy: Xee aa 'rãe, mba'eta xee ndaai ramo ndoui 'rã Penembojoyvyarã. Ha'e rami avi xee aa vy ambou 'rã pëvy.*

⁸ — Ha'e va'e ou vy yvy re ikuai va'e pe oikuaa uka 'rã heko vaia, teko porã ha'e opagapa aguã.

⁹ Heko vaia oikuaa uka 'rã mba'eta xere ha'e kuery ndoajeroviai rire.

¹⁰ Teko porã oikuaa uka 'rã, mba'eta Xerua py aa ramo ndaxerexavei 'rã.

¹¹ Ha'e kuery opaga aguã avi 'rã oikuaa uka, mba'eta ko vvy regua kuery rerekoa voi opaga aguã rami oiko.

¹² — Heta teri areko pëvy amombe'u va'erã, te'i a'y ma napendu kuaapai 'rã.

¹³ Ha'e gui Nhe'ê anhetê va'e kuaa ukaarã ou ma vy penembo'e 'rã anhetê va'e ha'e javi re. Ojegui ae e'y 'rã ijayvu, mba'eta oikuaa uka 'rã oendu va'ekue anho, mba'emo oiko va'erã-'erã voi.

¹⁴ Ha'e ma xemboyvate 'rã, xeguigua pende'vy oikuaa uka vy.

¹⁵ Opa mba'e Xeru oguereko va'e xemba'e meme. Ha'e nunga rupi aipoa'e: "Ojopy 'rã mba'emo xegui, ha'e oikuaa uka 'rã pende'vy" ha'e va'ekue.

¹⁶ Peê kuery ndaxerexavei rai'i ma. Ha'e gui areve'i rã xerexa ju 'rã — he'i.

¹⁷ Ha'e ramo hemimbo'e kuery regua joupe-upe aipoe'i:

— Mba'e he'i vy nda'u po rami ijayvu, "Ndaxerexavei rai'i ma, ha'e gui areve'i rã xerexa ju 'rã", ha'e "Aa ta Xerua py" he'iague?

¹⁸ Mba'e he'ia nda'u "Areve'i rã" he'ia? Mba'e he'i vy paa ndajaiakuai — he'i.

¹⁹ Ha'e kuery oporanduxea Jesus oikuaa vy aipoe'i:

— Mba'e re tu joupe-upe ri peporandu "Ndaxerexavei rai'i ma. Ha'e gui areve'i rã xerexa ju 'rã" ha'eague re?

²⁰ Anhetê aipoa'e pëvy: Peê kuery pejae'opa ha'e ndapevy'avei 'rã. Ha'e rã vvy regua kuery ma ovy'a rei 'rã okuapy. Ha'e rire ma pevy'apa ju 'rã ndapevy'aiague gui.

²¹ Kunhague imemby raxy va'e iporiau 'rã, ojexavai aguã hora ovaê ma ramo. Ha'e gui imemby ma rire na'ima'endu'avei 'rã ojexavaiague re, kyrí va'e itui'i ma ramo ovy'a vy.

²² Ha'e rami ae avi peê kuery a'y pendu ndapevy'aveia. Ha'e gui jajoexa jevy ramo ma pende'py'a py pendu 'rã pevy'aa avave rei ndoipe'a kuaai va'e.

²³ — Ha'e va'e ára ma mba'eve re napeporanduvei 'rã xevy. Anhetê aipoa'e pëvy: Peipota va'e re rei Xeru pe pejerure ramo ome'ê 'rã xerery rupi.

²⁴ A'y peve xerery rupi ndapejerurei teri mba'eve re. Pejerure, ha'e pejopy 'rã pevy'a ete aguã.

Oo rai'i ma vy ijayvuague

²⁵ — A'y peve mba'emo re ambojojaa rupi xeyvui. Ha'e gui raka'eve rã mba'emo re ambojojaa rupi ve'y 'rã xeyvui, ha'e amombe'u porã 'rã Xeru reko.

²⁶ Ha'e va'e ára ixupe pejerure 'rã xerery rupi. Aipo nda'ei Xeru pe xee ajerure aguã pendere,

²⁷ mba'eta Xeru ae penderayvui, peê kuery xerayvu ha'e Xerua gui ajague perovia rire.

²⁸ Mba'eta Xerua gui aju karamboae vvy re. A'y ma vvy gui aa ju ta Xerua py — he'i.

²⁹ Ha'e ramo hemimbo'e kuery aipoe'i:

— A'y ma roikuaa aguã rami ma ndeayvui, ayvu haxy va'e py ve'y ma.

³⁰ A'y roikuaa ndee opa mba'e reikuapa va'e reikoa, ndevy roporandu e'y te'i reikuaa roporanduxea. Ha'e nunga rupi roguerovia Nhanderuete remimbou reikoa — he'i okuapy.

³¹ Jesus ombovai:

— Perovia ete pa a'y?

³² Mba'eta ou oiny hora, ha'e ovaê ae ma, peê kuery joa katy e'y-e'y peo aguã pete'i-te'i ro katy. Peo vy xerejapa 'rã xee ae'i.* Ha'e rami te'i xee ae'i ete e'y 'rã guive, mba'eta Xeru oiko 'rãe xereve.

³³ Ha'e nunga ha'e javi re xeayvu, xere vy pendepy'a guaxu aguã. Ko vvy re ma peiko axy 'rã. Ha'e rami teĩ pendepy'a guaxu ke, mba'eta xee xepo'aka ma vvy re.

17

Ojepegua kuery re Jesus ojerure oinyague

¹ Jesus ijayvupa ma vvy yva re ju oma'ẽ. Ha'e vy aipoe'i:

— Xeru, aỹ ovaẽ ma hora. Emboyvate ke Ndera'y, Ndera'y ju ndeyvatea oikuaa uka aguã,

² avakue ha'e javi re ndee xembopo'akaague rami, xee ju tekove marã e'ỹ ame'ẽ aguã xevy guarã reme'ẽ va'ekue ha'e javi pe.

³ Tekove marã e'ỹ ma po rami 'rã oupity: Ndee Tuuete peteĩ'i ha'e anhetẽ va'e ndekuaa vy, ha'e xee neremimbou Jesus Cristo xekuaa avi vy 'rã oupity.

⁴ — Xee ma vvy re aiko jave aikuaa uka ma ndeyvatea, rejapo uka va'ekue ajapopa vy.

⁵ Ha'e gui Xeru, aỹ ma ndea py ju xemboyvate, vvy itui e'ỹ mbove vvy ndereve aĩ jave xe yvateague py ae.

⁶ — Mba'eta vvy regua kuery mbyte vvy amongue reiporavo vvy xevy guarã ju reme'ẽ va'ekue pe ma xee aikuaa uka ma nderery po'akaa. Ndepo py ae ikuai va'ekue ri xevy guarã ju remboaxa. Ha'e ramo ha'e kuery ma ndeayvua rupi meme ikuai.

⁷ Ha'e rami vy aỹ ma ha'e kuery oikuaa mba'emo xevy reme'ẽ va'ekue ndeguigua memea.

⁸ Ha'e kuery pe xee amombe'u ma ayvu remombe'u uka va'ekue. Ha'e ramo ha'e kuery oguerovia, oikuaa guive anhetẽ ete ndea gui ajuague, ndee xembou rã.

⁹ — Ha'e kuery re ma xee ajerure, vvy regua kuery re'ỹ, ha'e rã xevy guarã reme'ẽ va'ekue re anho, mba'eta ndevygua meme ikuai.

¹⁰ Xevygua kuery ha'e javi ma ndevygua avi, ha'e ndevygua ikuai va'e ma xe vygua avi, ha'e ha'e kuery ikuai rupi xe yvateague ojekuaa 'rã.

¹¹ — Xee ma ndaikovei ma 'rã vvy re. Ha'e rã ha'e kuery ma vvy re ikuai teri. Xee ma ndea py ta aa. Xeru ndeky'a e'ỹ va'e, epena ke ha'e kuery re nderery po'akaa xere ju remoĩ va'ekue rupi, ha'e kuery voi peteĩ rami ikuai aguã nhande rami avi.

¹² Ha'e gui xee ma ha'e kuery reve aiko teri jave xee ae ranhe apena aikovy nderery po'akaa xere remoĩ va'ekue rupi. Xee aepy ramo neĩ peteĩve nokanhyi, okanhy 'rã va'ekue e'ỹ vy, kuaxia para re oĩa ojeupity aguã.

¹³ Aỹ ma xee aa ta ma ndea py. Ha'e rami xeayvu ko vvy re aiko teri reve, ha'e kuery re xeguigua vy'a oĩ aguã opa mba'e py.

¹⁴ — Ha'e kuery pe ndeayvu aikuaa uka ramo vvy regua kuery ndoayvui, mba'eta vvy regua e'ỹ ikuai, xee rami avi.

¹⁵ Ha'e kuery ko vvy gui reipe'a aguã re'ỹ ajerure, ha'e rã teko vai gui repena aguã.

¹⁶ Mba'eta xee rami avi ha'e kuery voi vvy regua ve'ỹ ma ikuai.

¹⁷ Eiky'a'o ke ha'e kuery anhetẽ va'e rupi. Ndeayvu ae ma anhetẽ va'e.

¹⁸ — Ndee vvy re xembouague rami avi xee voi amondouka vvy jave rupi.

¹⁹ Ha'e kuery re ama'ẽ vy xee ae anhemboaxa ndevy, ha'e kuery voi ndevyguaiky'a e'ỹ va'e ikuai aguã, anhetẽ va'e rupi.

²⁰ — Ha'e kuery re anho e'ỹ ajerure, ha'e rã amboae kuery ha'e kuery ijayvua oendu vy xere ojerovia va'erã re guive,*

²¹ ha'e javive peteĩ rami meme ikuai aguã. Xeru, xee ndere aĩ, ha'e ndee xere reĩa rami avi ha'e kuery voi nhandere toĩ. Ha'e ramo 'rãe ko vvy re ikuai va'e oguerovia ndee xembouague.

²² Ndeyvatea xe vy reme'ẽ va'ekue ma ha'e kuery pe ju ame'ẽ, peteĩ rami meme ikuai aguã nhande rami avi.

²³ Xee ha'e kuery re aĩ, ha'e ndee xere reĩ ramo ha'e kuery voi peteĩ rami ete ikuai aguã, ko vvy re ikuai va'e oikuaa aguã ndee xembouague ha'e ha'e kuery reayvua, xerayvua rami avi.

²⁴ — Xeru, xee aipota mamã rã aia py xe vy guarã reme'ẽ va'ekue avi xereve ikuai, ha'e kuery oexa aguã xe yvatearã reme'ẽ va'ekue, mba'eta ko vvy renhono e'ỹ mbove ma voi xerayvu.

²⁵ — Xeru ndereko porã va'e, ko vvy regua kuery ma nandekuaai. Ha'e rã xee ma roikuaa, ha'e kova'e kuery kuery voi oikuaa ndee xembouague.

²⁶ Ha'e kuery pe aikuaa uka ma nderery po'akaa, ha'e aikuaa ukave ju 'rã guive, ha'e kuery re oĩa aguã reayvua ndee xerayvua ramigua ae, ha'e gui ha'e kuery re xee voi aĩ aguã.

18

Mateus 26.47-54; Marcos 14.43-47; Lucas 22.47-51

¹ Ha'e rami Jesus ijayvupa ma vvy guemimbo'e kuery reve oje'oi Cedrom yakã'i rovaigua re, ha'e peteĩ yvyotyty oĩ va'e py oike ha'e kuery reve.

² Jesus jopy uka nhemiarã Judas hery va'e voi oikuaa ha'e va'e yvyotyty, mba'eta mbovykue rei e'ỹ ha'e py Jesus guemimbo'e kuery reve ikuai jepi rire.

³ Ha'e rami vy ha'e katy Judas ogueraa xondaro kuery, sacerdote yvatekueve va'e ha'e fariseu kuery pegua jopya kuery. Ha'e kuery vyvra reve-reve, ha'e takua ryxa rendy reve ova'ẽ ha'e py.

⁴ Ha'e gui Jesus mba'emo hexe oiko va'erã oikuaa vy ovaexi. Ha'e vy oporandu ha'e kuery pe:

— Mava'e tu peka?

* 17:20 Romanos 8.34; Hebreus 7.25

⁵ Ombovai vy

— Nazaré pygua Jesus — he'i okuapy.

Ha'e ramo Jesus aipoe'i:

— Xee ae ha'e — he'i. Ijopy uka nhemia Judas voi oiko ha'e kuery reve.

⁶ Ha'e gui Jesus “Xee ae ha'e” he'i ramove ha'e kuery oguevipa vy ho'apa vvy rupi.

⁷ Teĩgue ju Jesus oporandu:

— Mava'e tu peka?

— Nazaré pygua Jesus — he'i okuapy.

⁸ Ha'e ramo Jesus ombovai:

— “Xee ae” ha'e ma kuri. Xee ri xereka ramo tove kova'e kuery toje'oipa — he'i,

⁹ ipara re oĩ va'e ojeupity aguã: “Xevy guarã reme'ẽ va'ekue regua neĩ peteĩve ma xee namokanhyi.”

¹⁰ Ha'e ramo Simão Pedro kyxe ogueru va'ekue oekyi vy omboguai sacerdote yvateve va'e rembiguai nambi oiporu kuaa regua re. Ha'e va'e ma Malco hery va'e.

¹¹ Ha'e ramo Jesus aipoe'i Pedro pe:

— Emoĩ ju kyxe hyru py. Nda'evei ri ty'y karo Xeru ome'ẽ va'e gui ay'u aguã?

Anás ro py ogueraa ague

¹² Ha'e gui xondaro kuery, huvixa ha'e judeu regua jopya kuery ojopy okuapy Jesus, ha'e ojokuapa.

¹³ Ha'e rami vy Anás ro py ranhe ogueraa. Ha'e va'e ma ha'e va'e ma'et'y re sacerdote yvateve va'e Caifás oĩ va'e ratyua.*

¹⁴ Caifás ae judeu ruxixa kuery pe “Ha'eveve peteĩ ava omano heta va'e kuery rekovia” he'i va'ekue.

Mateus 26.69-75; Marcos 14.66-72; Lucas 22.55-62

¹⁵ Simão Pedro ha'e amboae hemimbo'e reve jogueraa Jesus rakykue. Ha'e va'e hemimbo'e ma sacerdote yvateve va'e rexaaty ae vy hoka py oike avi Jesus ogueriokea jave.

¹⁶ Ha'e rá Pedro ma oka py ranhe opyta okẽ oĩ va'e rexei'i. Ha'e gui hemimbo'e mboae sacerdote yvateve va'e rexaaty va'e ou vy ijavyu kunhataĩ okẽ rarõa reve. Ha'e vy mae ma oguerioke avi Pedro.

¹⁷ Ha'e gui kunhataĩ okẽ rarõa oporandu Pedro pe:

— Ndee voi peva'e ava remimbo'e e'ỹ teve?

— Any — he'i.

¹⁸ Tembiguai ha'e jopya kuery ma tata omoendyague py ikuai ojape'ea py, yro'y ramo. Pedro voi ojape'e ho'amy ha'e kuery mbyte.

Sacerdote yvateve va'e Jesus omboavyague

¹⁹ Ha'e ramia ja sacerdote yvateve va'e oporandu Jesus pe hemimbo'e kuery ikuai ha'e nhombo'ea re.

²⁰ Jesus omombe'u vy aipoe'i:

— Xee ma vvy re ikuai va'e pe amombe'u porã ma. Anhombo'e riaa judeu kuery ono'õa rupi, templo py ha'e py onhembo'eaty ikuai va'e rupi. Mba'eve namombe'ui nhemi rupi.

²¹ Mba'e re tu xevy pe reporandu? Eporandu xeavyu renduare kuery pe. Ha'e kuery ma oikuaa xeavyuague — he'i.

²² Ha'e rami Jesus ijavyu ramo peteĩ jopya ha'e py hi'aĩ va'e oipete. Ha'e vy aipoe'i:

— Po rami va'e ty'y ndeavyu sacerdote yvateve va'e pe?

²³ Jesus ombovai:

— Xeavyu vai ri ra'e ramo emombe'u xeavyu vaiague. Ha'e rami avi xeavyu porã va'eri mba'e re tu xepete? — he'i.

²⁴ Ha'e gui Anás ojokua uka reve omondouka sacerdote yvateve va'e Caifás-a py.*

Pedro peteĩgue ju onhenhomiaque

²⁵ Simão Pedro ha'e py teri ojape'e ho'amy. Ixupe oporandu okuapy:

— Ha'e rami vy ndee voi hemimbo'e kuery regua teve?

Pedro onhenhomi vy

— Xee any — he'i.

²⁶ Ha'e py oĩ avi sacerdote yvateve va'e rembiguai regua peteĩ, Pedro nambi omboiague va'e retarã. Ha'e va'e ju aipoe'i:

— Xee ndoroexai ri ty ra'e hexeve yvotyty py?

²⁷ Teĩgue ju Pedro onhenhomi. Ha'e ramove uru ojakukai.

Mateus 27.1,2; Marcos 15.1; Lucas 23.1

²⁸ Ha'e rire aje'ive'i reve ma Caifás ro gui Jesus ogueraa okuapy huvixa ro katy. Ha'e rá judeu kuery ma nhomboavyaty py ndoikexei, ojeko mongy'a e'ỹ aguã Páscoa ára py okaru aguã.

²⁹ Ha'e ramo ha'e kuery ikuai py huvixa Pilatos oẽ ijavyu aguã. Ha'e vy aipoe'i:

— Mba'ekue py tu peru kova'e ava?

³⁰ Ombovai vy

— Kova'e ava ma mba'eve rei py ndotekoavyi va'e rire ndoroguerui 'rãgue ndea py — he'i okuapy.

³¹ Ha'e gui Pilatos aipoe'i ha'e kuery pe:

— Peẽ ae peraa, pendevygua lei rami ae pereko.

* 18:13 Marcos 14.53,54 * 18:24 Mateus 26.59-66; Marcos 14.55-64; Lucas 22.66-71

Judeu ruvixa kuery ombovai:

— Ha'e rami avi orevy pe nda'evei rojojuka aguã — he'i okuapy.

³² Ha'e rami oiko ojeupity aguã Jesus marã rami pa omano aguã re ijayvuague.

Mateus 27.11-26; Marcos 15.1-15; Lucas 23.1-5,13-25

³³ Opy ju Pilatos oike vy oenoĩ Jesus. Ha'e vy aipoe'i ixupe:

— Ndee ma nhi'ã judeu kuery pegua huvixave?

³⁴ Jesus ombovai:

— Ndee ae pa po rami reporandu tyrã amongue ndevy omombe'u xereko?

³⁵ Ha'e ramo Pilatos aipoe'i:

— Xee ma nhi'ã judeu aiko? Neretarã kuery ha'e sacerdote yvatekueve va'e ae ndereru kuri xea py. Mba'e py tu rejapo vai?

³⁶ Jesus ombovai:

— Xee apenaa ma ko yvy regua e'ỹ. Ko yvy regua va'e rire xerembiguai kuery opu'ãmba 'rãgue judeu ruvixa kuery re, xejopy uka e'ỹ aguã. Aỹ ma apenaa ko yvy regua e'ỹ — he'i.

³⁷ Ha'e ramo Pilatos oporandu:

— Ndee ma huvixave ri ty'y?

Jesus ombovai:

— Ndee ae aipo're huvixave aikoa rami. Xee ma ha'e nungarã ae aiko, ha'e rami aguã aju ko yvy re, anhetẽ va'e amombe'u aguã. Ha'e ramo anhetẽ va'e rupi ikuai va'e ma oendu 'rã xeayvua — he'i.

³⁸ Ha'e ramo Pilatos aipoe'i:

— Mba'e nunga tu "Anhetẽ va'e" 'rea? — he'i.

Po rami ijayvu rire oẽ ju judeu kuery ono'õa py. Ha'e vy aipoe'i ha'e kuery pe:

— Xee ma ndaikuaai mba'eve rei ojapo vaiague.

³⁹ Pendereko rami vy ma Páscoa ára nhavõ pepoi uka 'rã amongue. Peẽ kuery nda'u peipota ri apoi judeu kuery pegua huvixave?

⁴⁰ Ha'e javive ojavukai reve ombovai:

— Peva'e'ỹ, epoi Barrabás — he'i okuapy. Barrabás ma jojuka rive va'ety.

19

¹ Ha'e rami rã Pilatos ogueraa uka ju Jesus, ha'e oinupã uka.

² Xondaro kuery ojapo peteĩ ngora juu gui, ha'e omoĩ inhakã re. Omonhemonde peteĩ ao puku púrpura guigua py.

³ Jesus re onhemboja vy

— Iporã ete judeu kuery pegua huvixave — he'i reve oipete-pete.

⁴ Teĩgue ju Pilatos oẽ vy aipoe'i judeu kuery pe:

— Peva'e ava ambou ju ta apy peẽ ae peikuaa pota aguã ojapo vaiague re, mba'eta xee ma ndaikuaai — he'i.

Ha'e gui Jesus oguenoẽa heruvy ngora juu gui ojapo pyre ha'e ao púrpura guigua py onhemonde reve. Ha'e ramo Pilatos aipoe'i:

— Apy ma ava hi'ã.

⁶ Ha'e ramo sacerdote yvatekueve va'e ha'e jopya kuery oexa vy ojavukai:

— Emoĩ kuruxu re, emoĩ kuruxu re.

Ha'e ramo Pilatos aipoe'i:

— Peẽ kuery ae peraa kuruxu re pemoĩ, mba'eta xee ndaikuaai ojapo vaiague — he'i.

⁷ Judeu kuery ombovai:

— Ore kuery lei roguereko va'e rami vy ojukaa aguã rami oiko, Nhanderuede Ra'y rami onhemoingo ramo — he'i okuapy.

⁸ Ha'e rami ijayvu rã Pilatos oendu vy okyjeve.

⁹ Ha'e rami vy ngopy ju ogueroike vy oporandu Jesus pe:

— Maguigua tu ndee? — he'i teĩ Jesus nombovai.

¹⁰ Ha'e ramo Pilatos aipoe'i:

— Naxembovai va'e ty'y? Ndereikuaai ri ty'y xepo'akaa ropoi e'ỹ vy kuruxu re romoĩ aguã?

¹¹ Jesus ombovai:

— Ndee ma mba'eve rei py xere nandepo'akai 'rãgue yvate gui nanembopo'akaa ukai va'e rire. Ha'e nunga rupi ndea py xereruare kuery heko vaive — he'i.

¹² Ha'e rami rã Pilatos teĩgue ju onhea'ã teĩ opoi aguã. Ha'e rã judeu kuery ma aipoe'i:

— Peva'e ndee repoi ri vy huvixave César irũ e'ỹ reiko. Mba'eta huvixave onhemoingo va'e ma César rovaigua meme — he'i okuapy.

¹³ Ha'e rami ijayvu rã Pilatos oendu vy oka py ju oguenoẽ uka Jesus, ha'e tenda nhomboayvuaty py oguapy oiny ita ombojopeague py. Ha'e va'e henda ma hebraico ayvu py Gabatã hery va'e.

¹⁴ Kuaray mbyte rai'i ma, ha'e sexta-feira Páscoa ára ovaẽ rai'i ma guive.

Ha'e gui Pilatos aipoe'i ha'e kuery pe:

— Apy ma peẽ kuery ruvixave hi'ã.

¹⁵ Ha'e rã ha'e kuery ma ojavukaive:

— Eraa, eraa, eupi kuruxu re — he'i okuapy.

Ha'e ramo Pilatos aipoe'i:

— Peipota va'e ty'y peê kuery ruvixave kuruxu re aupi uka?

Sacerdote yvatekueve va'e ombovai:

— Ore kuery ma oreruvixave ndoroguerkoi, César e'ÿ vy — he'i okuapy.

¹⁶ Ha'e rami rã Pilatos ogueraa uka kuruxu re omoïa aguã.

Mateus 27.33-38; Marcos 15.22-28; Lucas 23.33-38

¹⁷ Ha'e ramo ha'e kuery ogueraa Jesus. Ha'e ae kuruxu ogueraa reve oo peteï henda Calvário 'epy va'e katy. Ha'e rã hebraico ayvu py ma ha'e va'e henda Gólgota hery va'e.

¹⁸ Ha'e py ma oupia imoiny kuruxu re, ha'e mokoï ju oupi avi ijyvy jovaive, ha'e Jesus mbyte py.

¹⁹ Pilatos ombopara uka avi peteï ayvu, ha'e kuruxu re omoï uka. Po rami ipara oiny: “Nazaré pygua Jesus judeu kuery pegua huvixave.”

²⁰ Ha'e va'e ipara heta judeu kuery ogueroayvu, mba'eta Jesus kuruxu re oupi imoinya ma tetã katy'i. Hebraico, latim ha'e grego ayvu py ipara oiny.

²¹ Ha'e ramo sacerdote yvatekueve va'e aipoe'i Pilatos pe:

— Embopara uka eme “Judeu kuery pegua huvixave.” Ha'e rã embopara uka “Ha'e onhemombe'u judeu kuery pegua huvixave oikoa rami.”

²² Ha'e ramo Pilatos ombovai:

— Xee ambopara uka va'ekue ma ipara ae ma oiny — he'i.

Jesus ao omboja'o okuapyague

²³ Xondaro kuery Jesus kuruxu re oupi ma rire ojopy ijao, ha'e omboja'o irundy henda rupi, peteï-teï xondaro ojeupe guarã ojopy aguã. Ikamixa puku avi ojopy. Ha'e rã ikamixa puku ma ombovyvy pyre'ÿ, yvate katy gui ipy katy peve ojapo pyre.

²⁴ Ha'e ramo joupe-upe aipoe'i:

— Nhamondoro eme teve kamixa puku. Ha'eve jaexa nhandexortea, mava'e ete'i pe pa kova'e opytaa jaikuaa aguã — he'i okuapy. Ha'e rami oiko kuaxia para re oï va'e ojeupity aguã: “Omboja'o-ja'o xea, ha'e rã xekamixa re ma oexa okuapy oxortea” he'iague. Xondaro kuery ha'ekue rami ae ikuai.*

²⁵ Kuruxu yvy'iry hi'ái Jesus xy, ikypy'y, ha'e gui Cleopas ra'yxy Maria ha'e Maria Madalena.

²⁶ Oxy, ha'e ijyvyry guemimbo'e oayvuve va'e hi'ái rã Jesus oexa vy aipoe'i:

— Kunha, pee ma ndepi'arã hi'ái — he'i.

²⁷ Ha'e gui guemimbo'e pe ju aipoe'i:

— Pee ma ndexyrã hi'ái — he'i. Ha'e rire hemimbo'e ogueraa ngoo py.

Mateus 27.45-56; Marcos 15.33-37; Lucas 23.44-46

²⁸ Ha'e rire Jesus oikuaa mba'emo oiko 'rã va'ekue ojeupitypa maa. Ha'e rami vy kuaxia re ipara oiny va'e ojeupity aguã aipoe'i avi:

— Xey'uvei — he'i.

²⁹ Ha'e py oï peteï hy'a vinagre tynyê va'e. Ha'e va'e py peteï esponja omoakya vy peteï takua apy re omoï, ha'e omovaê Jesus juru re.

³⁰ Jesus vinagre oy'u ma rire aipoe'i:

— Aÿ ma ojeupitypa ma oiko 'rã va'ekue — he'i. Ha'e gui ma oity oakã, ha'e omondouka onhe'ê.

1 João 5.6-8

³¹ Ha'e va'e ára ma judeu kuery mba'emo oguereko katua ára, mba'eta ha'e va'e sábado ma ára omboetevepy. Ha'e rami vy sábado peve kuruxu re hetekue oï e'ÿ aguã Pilatos pe judeu ruvixa kuery ojerure hetyma omopê uka vy omboguejy uka aguã.

³² Ha'e ramo xondaro kuery oje'oi vy omopê jypy oï va'e retyma, ha'e amboae hexeve kuruxu re oï va'e retyma ju.

³³ Ha'e rã Jesus oïa re ma ovaê vy oma'ê rã omano ma ra'e. Ha'e ramo ma nomopêi hetyma.

³⁴ Ha'e rami avi inharukã py peteï xondaro oipyxo nho hu'y guaxu py. Ha'e rã onheê huguy ha'e yy.

³⁵ Ha'e nunga rexaare omombe'upa, anhetê guare meme omombe'u. Ha'e oikuaa guive anhetê meme omombe'ua, peê kuery voi perovia aguã.

³⁶ Ha'e rami oiko va'e kuaxia re ipara oinya ojeupity aguã: “Neï peteïve ikãgue nomopêai 'rã” he'iague.*

³⁷ Oï avi kuaxia para re “Ha'e kuery oexa ju 'rã oipyxo va'ekue” he'iague.*

Mateus 27.57-60; Marcos 15.42-46; Lucas 23.50-54

³⁸ Ha'e va'e rire peteï ava Arimatéia pygua José hery va'e ma Pilatos-a py oo vy ojerure Jesus retekue omboguejy aguã. Ha'e ramo omboguejy uka rã José omboguejy Jesus retekue. Ha'e va'e ma judeu ruvixa kuery gui okyje vy nhemi rupi Jesus remimbo'e oiko va'e.

³⁹ Nicodemos pyávy Jesus reve ijayvu aguã oo va'ekue voi trinta quilo heakuã porã va'e ogueraa mirra ha'e aloé guigua.

⁴⁰ Ha'e kuery Jesus retekue ojopy vy ajukue py onhovã heakuã porã va'e reve. Judeu kuery reko rami vy ojapo ha'e rami, onhono porã aguã.

* 19:24 Salmo 22.18, Mateus 27.35,36,55,56; Marcos 15.24

* 19:36 Êxodo 12.46, Salmo 34.20

* 19:37 Zacarias 12.10

⁴¹ Jesus kuruxu re oupi imoinyague katy'i ma peteĩ vyotyty oĩ. Ha'e py ma oĩ peteĩ tuparã oguereko katu ramo'i va'ekue. Ha'e va'e py avave rei nonhono porãai teri.

⁴² Judeu kuery mba'emo oguereko katua ára ovaẽ ma, ha'e tuparã oguereko katu pyre ha'e katy rai'i oĩ ramo ma ha'e py ae onhono porã Jesus retekue.

20

Mateus 28.1-8; Marcos 16.1-8; Lucas 24.1-12

¹ Semana ijypya ára ko'ẽ rai, pytũ-pytũ'i teri reve Maria Magdalena oo Jesus onhono porãague katy. Ha'e vy oexa rã ita imbotyarã omoĩ mbyre ombojerea ma ra'e.

² Ha'e gui onha ovy Simão Pedro ha'e hemimbo'e mboae Jesus oayvuve va'e oĩa katy. Ha'e vy aipoe'i ha'e kuery pe:

— Senhor retekue tu oguenoẽa rima ra'e hupa gui, ha'e ndoroikuaai marã katy pa ogueroavaague — he'i.

³ Ha'e gui Pedro ha'e hemimbo'e mboae jogueraa onhono porãague katy.

⁴ Mokoĩve onha reve oje'oi. Amboae hemimbo'e ma Pedro gui onha ratãve vy ha'e ranhe ovaẽ hupa py.

⁵ Ha'e rami vy ojevvy vy oexa ajukue xii va'e anho. Ha'e rami teĩ ndoikei.

⁶ Ha'e gui Simão Pedro ma takykueve'i ovaẽ vy oike. Ha'e rami vy oexa avi ajukue

⁷ ha'e panhero Jesus akã re omoĩ mbyre. Ha'e va'e ma ajukue mboae reve'ỹ itui, amboae henda py ombojo'a porã'i ra'e.

⁸ Ha'e gui amboae hemimbo'e ha'e ranhe ovaẽ va'ekue avi oike, ha'e oexa vy oguerovia.

⁹ Ha'e kuery ndoikuaai teri kuaxia para re oĩa rami vy omanoague gui onhemoete jevy aguã.

¹⁰ Ha'e gui hemimbo'e kuery mokoĩve ojevvy ju jogueravy ngoo katy.

Marcos 16.9-11

¹¹ Ha'e ramia ja Maria ma hupa rokẽ vyryra ojae'o ho'amy. Ojae'oa ramive ojevvy ikua katy oma'ẽ aguã.

¹² Ha'e rami vy oexa mokoĩ anjo onhemondea xii va'e Jesus retekue ituiague py oguapy rã. Peteĩ ma inhakã katy, ha'e rã amboae ma ipy katy oĩ.

¹³ Ha'e ramo ha'e kuery aipoe'i:

— Kunha, mba'e re tu rejae'o?

Kunha va'e ombovai:

— Mba'eta ogueraa ra'e xe-Senhor, ha'e ndaikuaai marã katy pa ogueroavaague — he'i.

¹⁴ Ha'e rami ijayvu rire ojere vy oexa Jesus hi'aĩ rã, teĩ ndoikuaai teri Jesus ae hi'aĩa.

¹⁵ Ha'e ramo Jesus oporandu:

— Kunha, mba'e re tu rejae'o? Mava'e tu reka?

Maria ma “Vyotyty re opena va'e po” he'i vy ombovai:

— Senhor, ndee ri apy gui hetekue rerova rire ke emombe'u marã katy pa rerovaague, xee aa araa aguã — he'i.

¹⁶ Ha'e ramo Jesus aipoe'i:

— Maria.

Ha'e rã ha'e va'e ojere vy aipoe'i hebraico ayvu py:

— Raboni — he'i, “Xembo'ea” he'ia.

¹⁷ Ha'e ramo Jesus aipoe'i:

— Xejoko eme, mba'eta ndaai teri Xerua py. Ha'e rami 'rãgue py tereo xeryvy kuery pe emombe'u aa taa Xeru ha'e Penderua py, Xeruete ha'e Penderuetea py — he'i.

¹⁸ Ha'e rami rã Maria Magdalena oo hemimbo'e kuery pe omombe'u:

— Aexa ma kuri Senhor — he'i. Omombe'u avi Jesus ijayvuaague ha'e javi.

Lucas 24.36-40

¹⁹ Ha'e va'e semana ijypya ára ka'aru hemimbo'e kuery ono'õmba peteĩ oo py, ha'e okẽ ojokopa judeu ruxia kuery gui okyje vy. Ha'e jave Jesus ojexa uka xapy'a ha'e kuery mbyte. Ha'e vy aipoe'i:

— Toi pendere mby'a porã — he'i.

²⁰ Ha'e vyve oexa uka opo ha'e oarukã. Ha'e ramo hemimbo'e kuery Senhor oexa vy ovy'a okuapy.

²¹ Ha'e gui Jesus aipoe'ive ju:

— Toĩ pendere mby'a porã. Xeru xembouague rami avi xee voi romondouka 'rã — he'i.

²² Ha'e rami ijayvupa vyve ipytuẽ. Ha'e vy aipoe'i:

— Pemoaẽ Nhe'ẽ Ky'a E'ỹ pendejee.

²³ Ha'e gui amongue ojevavyague peperdoa ramo ombogue pyre 'rã oiko. Ha'e rã ndapeperdoai ramo ma ombogue pyre'ỹ 'rã oiko — he'i.

Tomé ndogueroviai ranheague

²⁴ Peteĩ hemimbo'e doze va'e regua Tomé Dídimó hery va'e ma Jesus ojekuaa jave noĩ va'ekue oirũ kuery reve.

²⁵ Ha'e gui ixupe hemimbo'e kuery mboae

— Roexa ma kuri Senhor — he'i okuapy.

Ha'e ramo ombovai:

— Xee ma ipo re karavo kuare ndaxai, ha'e xekuã py ae ndapokoi vy, ha'e gui inharukã re voi apoko e'ÿ re xee ndaroviaí 'rã — he'i.*

Guemimbo'e kuery pe teĩgue ju Jesus ojexa ukaague

²⁶ Oito ára rire hemimbo'e kuery ha'ekue py ju onhembootypa, ha'e Tomé avi oĩ ha'e kuery reve. Ha'e vy ojokopa okê. Ha'e gui Jesus ou vy ha'e kuery mbyte hi'aĩ xapy'a. Ha'e vy aipoe'i:

— Toi pendere mby'a porã.

²⁷ Ha'e vyve aipoe'i Tomé pe:

— Emoĩ apy nekuã, ha'e exa xepo. Epoko avi xearukã re. Ejerovia e'ÿve eme, aÿ ma erovia ma — he'i.

²⁸ Tomé ombovai:

— Xe-Senhor ha'e Xeruetel! — he'i.

²⁹ Ha'e ramo Jesus aipoe'i:

— Ndee xerexa vy rive teve rerovia? Ha'e rã ovy'a ete 'rã xerexa e'ÿ teĩ ojerovia va'e kuery — he'i.*

Jajerovia aguã re jayvuague

³⁰ Jesus hexa pyrã heta ojapo raka'e guemimbo'e kuery oexaa rupi. Ha'e nungakue ha'e javi e'ÿ ipara oiny kova'e kuaxia re.

³¹ Ha'e rã kova'e re ipara oinya ma peẽ kuery perovia aguã Jesus ae Cristo Nhanderuetel Ra'y oikoa, pejerovia vy tekove peupity aguã hery rupi.

21

Sete guemimbo'e kuery pe ju Jesus ojexa ukaague

¹ Ha'e va'e rire, teĩgue ju Jesus ojexa uka guemimbo'e kuery pe, Tiberíades yupa py. Ha'e rami py ojexa uka tema.

² Ha'e py ma oĩ Simão Pedro, Tomé Dídimó hery va'e, Galiléia regua Canã pygua Natanael, ha'e Zebedeu ra'y mokoĩve. Oĩve avi mokoĩ hemimbo'e mboae.

³ Ha'e gui Simão Pedro aipoe'i:

— Xee aa ta pira mbo'a vy.

Ha'e ramo amboae kuery ombovai:

— Ore voi roo ta nderupive — he'i okuapy. Ha'e rami vy oje'oipa, kanoã py ikuai pira mbo'aa rupi. Pytũ mbukukue re teĩ neĩ pete'i nombo'ai.

⁴ Ko'ẽ aje'ive'i reve yy rembe re Jesus ojekuaa ho'amy ita ku'i reia py. Ha'e rami teĩ hemimbo'e kuery ndoexa kuaai ha'e ri hi'aĩa.

⁵ Ha'e gui Jesus oporandu:

— Xera'y kuery, pereko pa upe py ja'u va'erã?

— Any — he'i okuapy.

⁶ Ha'e kuery pe aipoe'ive ju:

— Pemombo ha'vy pira mbo'aa kanoã yke peiporu kuaa regua re. Ha'e rami vy 'rãe pembo'a — he'i. Ha'e rami ha'e kuery ojapo vy haxy py omoatã pira mbo'aa, heta ho'a ramo.

⁷ Ha'e rami rã hemimbo'e Jesus oayvuve va'e aipoe'i Pedro pe:

— Senhor rima ra'e — he'i.

Ha'e ramo Simão Pedro ma Senhor-a oendu vy onhemonde pojava onhemboipa rire. Ha'e rami vy oguejy yy py.

⁸ Ha'e rã hemimbo'e kuery mboae ma kanoã py ae ou, pira mbo'aa omoatã heruvy, mba'eta yy rembe gui namombyryi ikuai, cem metros rivvyvia py.

⁹ Yvy'ã re ha'e kuery oẽ vy oexa tapyĩ, ha'e hi'áry piky oexy inony va'e, mbojape guive.

¹⁰ Ha'e gui Jesus ha'e kuery pe

— Peru avi pira peẽ pembo'a va'ekue — he'i.

¹¹ Ha'e ramo Simão Pedro kanoã py oike vy omoatã pira mbo'aa yvy'ã re. Cento e cinqüenta e três pira tuvixakueve anho tynyẽ. Ha'e rami teĩ pira mbo'aa neĩ peteĩ henda py ma ndoxoi.

¹² Ha'e gui Jesus

— Peju jakaru — he'i. Ha'e neĩ peteive hemimbo'e kuery noporandui mava'e pa oikoa re, mba'eta Senhor ae oikoa oikuaa vy.

¹³ Ha'e gui Jesus onhemboja vy ojopy mbojape, ha'e omboja'o. Pira voi ha'ekue rami omboja'o.

¹⁴ Kova'e re mboapykuea ma Jesus guemimbo'e kuery pe ojexa uka raka'e, omanoague gui onhemboete rire.

Pedro pe mboapykue oporanduague

¹⁵ Ha'e kuery okarupa ma rire Jesus oporandu Simão Pedro pe. Ha'e vy aipoe'i:

— Simão João ra'y, ndee nda'u xerayvuve ri amboae kuery gui?

Pedro ombovai:

— Tá Senhor, xee roayvu. Ndee ma reikuaa roayvua — he'i.

Ha'e ramo aipoe'i:

— Emongaru ha'vy xerymba vexa'i kuery — he'i.*

* 20:25 Mateus 28.17 * 20:29 2 Coríntios 5.7; 1 Pedro 1.8,9 * 21:15 1 Pedro 5.1-4

¹⁶ Teĩgue ju Jesus oporandu:

— Simão João ra'y, ndee pa xerayvu?

Ombovai:

— Tá Senhor, xee roayvu. Ndee reikuaa roayvua — he'i.

Ha'e ramo Jesus aipoe'i:

— Epena ha'vy xerymba vexa'i kuery re — he'i.

¹⁷ Ha'e gui mboapykuea ma Jesus oporandu:

— Simão João ra'y, ndee pa xerayvu?

Ha'e ramo Pedro iporiau, mboapykue ma “Ndee pa xerayvu?” he'i ramo. Ha'e vy ombovai:

— Tá Senhor, ndee ma opa mba'e reikuaa, ha'e reikuaa avi xee roayvua — he'i.

Ha'e ramo Jesus aipoe'i:

— Emongaru ha'vy xerymba vexa'i kuery.

¹⁸ Anhetê aipoa'e ndevy: Nekunumive jave py ma ndee ae renhemonde ha'e reo va'ekue reoxea katy rei. Ha'e rá ndetuja'i ma rire reupi 'rá ndejyva jovaive, ha'e amboa kuery nemoxá vy ndereraa 'rá ndee reoxeague katy e'ý — he'i.

¹⁹ Ha'e rami ijayvu vy oikuaa uka marã rami pa Pedro omano aguã Nhanderute mboetea rupi.* Ha'e rami ijayvupa rire aipoe'ive ju:

— Eju ke xerakykue — he'i.

²⁰ Ha'e gui Pedro ojere vy oexa hakykue'i hemimbo'e Jesus oayvuve va'e ou oiny ramo. Ha'e va'e ma okaru okuapy jave Jesus yvy'iry oguapy oiny, ha'e ijopy uka nhemiarã mava'e pa oikoa re oporandu va'ekue.

²¹ Ha'e gui Pedro ha'e va'e oexa vy oporandu Jesus pe:

— Ha'vy peva'e?

²² Jesus ombovai:

— Xapy'a rei xee aipota ramo peva'e oikove 'rá aju jevy peve. Mba'e re tu ndee ha'e nunga reikuaaxe? Ndee tema eju xerakykue — he'i.

²³ Ha'e va'e rire irmão kuery oikuaa “Ha'e va'e hemimbo'e nomanoi 'rá” he'igague rami. Ha'e rami teĩ Jesus ma “Nomanoi 'rá” nde'i. Ha'e rá “Xapy'a rei xee aipota ramo ha'e oikove 'rá aju jevy peve. Mba'e re tu reikuaaxe ha'e nunga?” he'i raka'e.

João omombe'u va'ekue re ijayvuague

²⁴ Ha'e va'e hemimbo'e ae ha'e nunga omombe'u ha'e imboparaare. Ha'e ore kuery roikuaa ha'e omombe'u va'ekue anhetê memea.

²⁵ Heta teri oĩ Jesus ojapo va'ekue. Ha'e nunga ha'e javi omboparapaa va'e rire xee aikuaa rá neĩ vyv jave re voi noĩmbai 'rãgue kuaxia ombopara pyre.

* 21:19 2 Pedro 1.13,14

Apóstolo kuery rembiapokue atos 'epy va'e oĩa

Apóstolo kuery ojapo va'ekue atos 'epy va'e oĩa

Jesus Cristo omanoague gui onhemboete ju, ha'e yva re oo ta ma jave ijayvu Nhe'ë Ky'a E'ÿ hemimbo'e kuery re oguejy vy omombaraete agua. Aipoe'i: "Ha'e ramo xeregua ayvu pemombe'ua rupi 'rã pendekuai. Jerusalém py 'rã pemombe'ua, Judéia ha'e Samaria rupi, ha'e gui yvy apy ha'e javi rupi peve", he'i (1.8b). Quarenta araa py ha'e kuery re Nhe'ë ou. "Ha'e ramo hemimbo'e kuery oje'oi vy opa rupi omombe'ua ayvu. Senhor voi oipytyvõ hexa pyrã ojapoa py, ha'e kuery ayvu omombe'ua rupi anhetê memea oikuaa uka agua" (Marcos 16.20). Kova'e kuaxia py ha'e nunga oĩ. Lucas ombopara va'ekue.

Jesus po'akaa rupi ha'e Nhe'ë Ky'a E'ÿ rupi hemimbo'e kuery omombe'ua Jesus Cristo re jajerovia agua regua ha'e hexa pyrã ojapo. Jerusalém tetã gui omboypy, Judéia ha'e Samaria ha'e javi rupi ju oje'oi, ha'e gui judeu e'ÿ va'e ikuaiia rupi. Apóstolo Pedro onhea'ãve raka'e judeu kuery pe ayvu omombe'ua agua, ha'e rã apóstolo Paulo ma judeu e'ÿ va'e kuery pe omombe'ua. Ha'e ramia py opa rupi oikuaa uka ayvu Jesus nhandereraa jepea regua. Aÿ peve ha'e va'e ayvu omombe'ua teri peteĩ-teĩ regua ikuaiia rupi, Jesus aipoe'ia gue rami vy. Ko yvy re Jesus ojevny e'ÿ ja ha'e rami 'rã omombe'ua, pavẽ oendu agua.

Ijayvu ypyague

¹ Jypygua kuaxia ndevy Teófilo ambopara va'ekue ma amombe'ua agua Jesus ojapo va'ekue ha'e nhombo'eague ha'e javi,*

² yvate heraa ára peve. Ha'e va'e e'ÿ mbove ma apóstolo kueryrã oiporavo va'ekue pe ojapo uka mba'emo Nhe'ë Ky'a E'ÿ rupi.

³ Mba'eta omano rire ha'e va'e kuery pe ojexa uka ju oikove va'e. Mbovykue rei e'ÿ oikuaa uka anhetê ete oikovea. Quarenta ára re ha'e kuery pe ojexa uka vy ombo'e oikovy mba'emo Nhanderuete po'akaa rupi oiko va'erã re.

⁴ Ha'e kuery reve okaru vy aipoe'i avi:

— Jerusalém gui pejepe'a e'ÿ re pearõ ranhe Xeru Onhe'ë ombou agua re ijayvuague. Ha'e va'e xee amombe'ua rã pendu ae ma va'ekue.*

⁵ Mba'eta João ma anhetê yy py nhomongarai va'ekue. Ha'e rã peẽ ma Nhe'ë Ky'a E'ÿ reve 'rã penemongaraia, are vaipa e'ÿ re — he'i.

Yva re Jesus ooague

⁶ Ha'e rami rã ijaty va'e kuery oporandu:

— Senhor, aÿ ma nhi'ã rejapo ta Israel kuery ipo'aka ju agua rami?

⁷ Ha'e ramo ombovai ha'e kuery pe:

— Mba'emo oiko agua ára araka'e paa ma Xeru opo'akaa rupi ae oa'anga va'ekue. Ha'e rã peẽ kuery ma nda'evei peikuaa agua.

⁸ Ha'e rami avi pendere Nhe'ë Ky'a E'ÿ oguejy rã penembopo'akaa ae 'rã. Ha'e ramo xeregua ayvu pemombe'ua rupi 'rã pendekuai. Jerusalém py 'rã pemombe'ua, Judéia ha'e Samaria rupi, ha'e gui yvy apy ha'e javi rupi peve — he'i.

⁹ Ha'e rami Jesus ijayvupa ma rire yvate heraa ha'e kuery oexaa gui. Ha'e gui peteĩ arai ou vy oja'o'i ramo ndoexavei.*

¹⁰ Yva re Jesus oo ma ramo ha'e kuery oma'ẽ teri okuapy jave ha'e kuery yvýry mokoĩ ava hi'aĩ xapy'a ijao xiĩmba rei va'e.

¹¹ Ha'e va'e kuery oporandu:

— Avakue Galiléia pygua, mba'e re tu pema'ẽ teri yvate? Mba'eta penembyte gui Jesus yva re oo va'ekue ma ha'ekue rami ae ju 'rã ou, oo rã pexaague rami ae.

Jerusalém tetã py temimbo'e kuery ikuaiague

¹² Ha'e ramo Olival vyty 'epy va'e gui ma Jerusalém tetã katy ju ojevypa, sábado ára py oguata agua ha'eeva peve.†

¹³ Tetã re ovaẽ ma vy ojeupi jogueravy yvate opy oĩ va'e py. Ha'e py ma nhomboaty: Pedro, João, Tiago, André, Filipe, Tomé, Bartolomeu, Mateus, Alfeu ra'y Tiago, Simão Zelote ha'e Tiago ra'y Judas.

¹⁴ Ha'e va'e kuery ha'e javi ma peteĩ rami meme ikuai onhembo'ea py. Kunhague avi ikuai. Ha'e kuery reve oĩ avi Jesus xy Maria, tyvy kuery guive.

Apóstolo-rã Matias oiporavoague

¹⁵ Ha'e va'e jave py ma irmão kuery cento e vinte ikuai va'e mbyte py Pedro opu'ã ho'amy. Ha'e vy aipoe'i:

¹⁶ — Irmão kuery, ojeupity 'rãe raka'e Davi juru rupi Nhe'ë Ky'a E'ÿ omombe'ua va'ekue Judas rekorã. Ha'e va'e ma ogueraa raka'e Jesus jopyarã kuery.

* 1:1 Lucas "Jypygua kuaxia" he'ia ma Jesus Cristo reko ombopara va'ekue re ijayvu vy (Lucas 1.1-4), mba'eta ha'e va'e ombopara rire apóstolo kuery ojapo va'ekue ju ombopara, kova'e ae. * 1:4 Lucas 24.36-49 * 1:9 Mateus 28.16-20; Marcos 16.15,19; Lucas 24.50,51 † 1:12 Judeu kuery gueko rami vy sábado ára oguata agua ha'eeva ma namombyry'i, peteĩ quilómetro rai'i peve anho (Lucas 24.52,53.)

¹⁷ Mba'eta ha'e va'e ma ore kuery regua vy kova'e tembiapo ojapo aguã rami oiko avi va'ekue.

¹⁸ (Ha'e gui ha'e va'e ava ma ojejavague repy re ojoguua peteĩ yvy. Ha'e py oo ma vy ho'a vy oxoropa, hyekue onheẽmba raka'e.

¹⁹ Ha'e nunga ha'e javi Jerusalém py ikuai va'e oikuaapa. Ha'e rami vy oayvu py ae omboery Aceldama, “Yvy tuguy” he'ia.)^{*}

²⁰ Mba'eta kuaxia Salmo oĩa re ipara oiny: “Hogue topyta tekoa oĩ e'ya. Toĩ eme avave rei ha'e va'e py”, ha'e “Tove amboae tojopy hembiaporã va'ekue” he'iague.^{*}

²¹ Ha'ekue rami vy jajou 'rã peteĩ ava Senhor Jesus oikoa pukukue re nhandereve ikuai va'ekue regua,

²² João nhomongaraia ára guive, ore mbyte gui yvate Jesus heraa-á ra peve. Ha'e va'e regua peteĩ toiko nhandereve onhemboete jevyague momb'euarã — he'i.^{*}

²³ Ha'e ramo mokoĩ ranhe ojou okuapy: José Barsabás Justo 'epy va'e, ha'e Matias guive.

²⁴ Ha'e rami vy onhembo'e vy aipoe'i okuapy:

— Ndee Senhor ha'e javive py'a re oĩa reikuaa va'e vy eikuaa uka orevy mava'e pa kova'e mokoĩ gui reiporavo ra'e,

²⁵ apóstolo rembiapo ojapo oikovy aguã. Mba'eta Judas ma ha'e rami aguã gui ojepe'a raka'e, ha'e ae oĩ aguã katy oo vy — he'i okuapy.

²⁶ Ha'e gui ma xortea oexa vy oikuaa okuapy Matias ri ty ra'ea. Ha'e rami vy omoĩ onze apóstolo ikuai va'e irurã.

2

Nhe'ẽ Ky'a E'ỹ oguejyague

¹ Pentecostes ára ojeupity jave ha'ekue py ae ono'õmba okuapy.

² Ha'e gui yva gui ou nhendu xapy'a vvytu atã ramigua. Opy jave re oguapy okuapy rupi onhendu.

³ Ha'e kuerya rupi tata rendy vuku ramigua ojekuaa avi, apekũ ramigua merami. Ha'e vy peteĩ-teĩ áry oĩ.

⁴ Ha'e javive re Nhe'ẽ Ky'a E'ỹ anho oĩ ramo ijayvu okuapy ayvu mboae py, Nhe'ẽ ombo'ea rami meme.

Amboae ayvu py omboayvuague

⁵ Jerusalém py ikuai avi judeu regua avakue Nhanderuete pegua, yva guýry ha'e javi gui ou va'ekue.

⁶ Ha'e kuery ma hemimbo'e kuery ha'e rami ijayvu rã oendu vy heta ijatypa. Ndoikuai rei okuapy, mba'eta ijayvu rã oendu okuapy peteĩ-teĩ oayvu ae py.

⁷ Onhemondyipa ha'e ndoikuai rei vy aipoe'i okuapy:

— Ne'endu, Galiléia pygua meme e'ỹ ri nda'u peva'e kuery ijayvu okuapy va'e?

⁸ Mba'exa vy tu ijayvu rã peteĩ-teĩ nhandeayvu ae py nhaendu?

⁹ Mba'eta Pártia guigua nhandekuai, Média guigua, Elão, Mesopotâmia, Judéia ha'e Capadócia guigua, Ponto ha'e Ásia guigua,

¹⁰ Frígia, Panfília, Egito, Líbia, Cirene katy'i ha'e Roma guigua guive apy nhandekuai,

¹¹ judeu ha'e judeu reko rami nhandekuai va'e, Creta ha'e Arábía guigua kuery. Ha'e rami teĩ mba'exa vy tu nhandeayvu ae py nhaendu ha'e kuery ijayvu rã Nhanderuete mba'emo porã ojapoa re? — he'i okuapy.

¹² Ha'e javive ndoikuai rei ha'e onhemondyipa vy oporandu okuapy joupe-upe:

— Mba'erã nda'u po rami ijayvu? — he'i okuapy.

¹³ Ha'e rã amboae kuery ma ojoi rei vy

— Oka'upa rima ra'e — he'i okuapy.

Pedro ijayvuague

¹⁴ Ha'e ramo Pedro opu'ã ho'amy apóstolo kuery mboae onze va'e reve. Ijayvu atã vy aipoe'i:

— Avakue judeu regua ha'e Jerusalém py pendekuai va'e ha'e javive, pejapyxaka xeayvua re peikuaa porã aguã.

¹⁵ Kova'e avakue ma ndoka'ui pexa'ã rami e'ỹ, mba'eta kuaray yvatepa ramo'i.

¹⁶ Ha'e rami 'rãgue py oiko va'e ma profeta Joel pe aipoe'i ukaague rami:

¹⁷ “Senhor aipoe'i: ‘Opaa ára py po rami 'rã oiko. Avakue ha'e javi re ambou 'rã Xenhe'ẽ. Ha'e ramo pendera'y ha'e penderajy kuery ijayvu 'rã xegui. Ipyaukueve oexa 'rã hexa pyrã, kakuaukueve voi oexa ra'u 'rã.

¹⁸ Ha'e va'e ára Xenhe'ẽ ambou 'rã xerembiguai avakue ha'e kunhague re. Ha'e ramo ha'e kuery mba'emo omombe'u 'rã Nhe'ẽ rupi.

¹⁹ Yva re aexa uka 'rã nhomondyipaarã, vvy re voi hexa pyrã aexa uka 'rã tuguy, tata ha'e hataxĩ.

²⁰ Ha'e ramo kuaray pytũmba 'rã, jaxy voi tuguy rami 'rã opyta, Senhor ára yvate ete ha'e hexakãmba va'e ovaẽ e'ỹ mbove.

²¹ Ha'e po rami 'rã oiko: Ha'e javive Senhor rery rupi oiapukai va'e oo jepe 'rã', he'iague.”^{*}

²² — Avakue Israel regua, pejapyxaka xeayvua re. Penerononde rupi Nhanderuete oikuaa uka va'ekue Nazaré pygua Jesus po'akaa. Ha'e ramo opo'akaa rupi ojapo oikovy penemondyiarã ha'e hexa pyrã. Ipo rupi Nhanderuete ojapo raka'e penembyte rupi. Peẽ kuery voi peikuaa.

²³ Ha'e gui Jesus ma Nhanderuete ha'e ae oipotaa rami vy ojopy uka, onhembopy'a voiaague rami vy ae. Ha'e ramo peẽ kuery pejuka. Ha'e vy kuruxu re pemoĩ uka heko vai va'e kuery pe.

* 1:19 Mateus 27.3-10 * 1:20 Salmo 69.25, 109.8 * 1:22 João 15.27 * 2:21 Joel 2.28-32

²⁴ Ha'e gui Nhanderuete ma manoa po'akaa ombovaipa vy omboete ju, mba'eta hexe ma manoa nda'ipo'akai 'rãe.

²⁵ Mba'eta hekorã re ae Davi ijavyu raka'e: "Xerenonde aexa riae Senhor aiporu kuaa regua re oĩ rã, xereity uka e'ÿ aguã.

²⁶ Ha'e rami rã xepy'a py avy'a vaipa, xeyvy py roguerovy'a guive. Xero'o eteve voi ojeroviaa rupi 'rã opytu'u.

²⁷ Mba'eta nderejai 'rã xenhe'ẽ omano aguã py, xerete voi nerembovaipa ukai 'rã, neremimbo'e iky'a e'ÿ va'e aiko rã.

²⁸ Ha'e rami 'rãgue py xevy pe reikuaa uka tape tekove katy oo va'e, nerenonde xembovy'a 'rã guive opa mba'e py", he'i va'ekue.*

²⁹ — Ke'y ha'e xeryvy kuery, tamombe'u porãve nhaneramoĩ Davi rekokue. Ha'e va'e ma omano raka'e, onhono porãa guive. Onhono porãague ma aÿ peve oĩ nhanembyte.

³⁰ Ha'e rami avi profeta oiko, oikuaa guive Nhanderuete oura volague, hekovia peteĩ hamymino huvixaverã oĩ aguã re.

³¹ Ha'e nunga oikuaa vy ae ijavyu raka'e Cristo onhemboete jevy 'rãa re, omano py ndoejai, neĩ hetekue ombovaipa uka e'ÿ aguã re.

³² Ha'e rami vy Nhanderuete omboete ju Jesus. Ha'e nungakue mombe'ua ma ore kuery ha'e javive orekuai.

³³ Ha'e gui Nhanderuete oiporu kuaa regua re omboyvateve ma ramo Nguu gui ojopy Nhe'ẽ Ky'a E'ÿ ombou 'rã va'ekue. Ha'e va'e ae ombou kuri pexa ha'e pendu va'e.

³⁴ Mba'eta Davi ma yva re ndooi va'eri ha'e ae aipoe'i: "Senhor ma aipoe'i xe-Senhor pe: 'Eguapy aiporu kuaa regua re,

³⁵ nderovaigua kuery ndepy gu'ÿry guarã amoĩ e'ÿa ja', he'i va'ekue."*

³⁶ Ha'e nunga rupi peẽ Israel kuery ha'e javi, peikuaa porã pota pova'e re: Jesus kuruxu re pemoi va'ekue ae ma Nhanderuete oikuaa uka Senhor ha'e Cristo oikoa — he'i.

Três mil onhemongarai ukaague

³⁷ Ha'e nunga ha'e kuery oendu vy opy'a re oendu okuapy ojeayvua. Ha'e vy oporandu Pedro ha'e apóstolo kuery mboae pe:

— Ke'y kuery, mba'e tu rojapo ta?

³⁸ Pedro ombovai:

— Pejeko rerova, ha'e peteĩ-teĩ penhemongarai uka Jesus Cristo rery rupi, pejevayague omboguepa aguã. Ha'e rami vy pendeivy voi ome'ẽa 'rã Nhe'ẽ Ky'a E'ÿ.

³⁹ Mba'eta peẽ kuery pe voi ijavyu ombou aguã re, penda'y ha'e pendajy kuery pe, ha'e mombyry teri ikuai va'e Senhor Nhanderuete oenoĩ va'erã ha'e javive pe guive — he'i.

⁴⁰ Opa marãgua ayvu py omongetave ju. Ha'e vy aipoe'i:

— Pejereraa jepe uka kova'e kuery heko vai va'e mbyte gui — he'i.

⁴¹ Ha'e gui onhe'ẽ rendu va'e kuery onhemongarai uka. Ha'e rami vy ha'e va'e ára hetave três mil rai'i.

Ojeko me'ẽ va'ekue ikuai re ijavyuague

⁴² Ha'e kuery ikuai tema apóstolo kuery ombo'ea rami peteĩ'i rami meme, mbojape oipe'ã-pe'ã'ia rupi, ha'e onhembo'ea py.

⁴³ Peteĩ-teĩ oendu ojererokyjea. Ha'e rã apóstolo kuery ma opo py heta ojapo nhomondyipaarã ha'e hexa pyrã.

⁴⁴ Ha'e javive oguerovia va'e joupive ikuai, ha'e opa mba'e ogueroko va'e joupe guarã meme.*

⁴⁵ Ha'e rami vy ovyv ha'e mba'emo ogueroko va'ekue ovende vy hepykue omboja'o-ja'o amongue oikotevẽa rami.

⁴⁶ Ko'ẽ nhavõ peteĩ rami ikuai templo py, ha'e ngoo rupi mbojape ho'u okuapy. Ovy'a reve okaru peteĩ rami ipy'a reve.

⁴⁷ Nhanderuete pe oporaeia rupi tema ikuai. Ha'e rami rã heta va'e kuery ha'e javi ojou porã, ha'e ko'ẽ nhavõ Senhor omboetave heravy oo jepe va'e.

3

Peteĩ oquata e'ÿ va'ekue omopu'ã jevyague

¹ Kuaray ojero'a jave Pedro ha'e João templo katy oo onhembo'e vy.

² Ha'e jave py ma heraa avi peteĩ ava itui'i guive ndoguatai va'e. Ha'e va'e ma ko'ẽ nhavõ omoĩa 'rã templo rokẽ Iporã 'epy va'e py, oike va'e kuery pe mba'emo re ojerure aguã.

³ Pedro ha'e João templo py oike jogueravy rã ava va'e oexa vy ha'e kuery pe voi ojerure mba'emo ome'ẽ aguã.

⁴ Ha'e gui hexe Pedro ha'e João oma'ẽ porã ranhe. Ha'e vy

— Ema'ẽ orere — he'i.

⁵ Ha'e ramo ha'e kuery re oma'ẽ oiny mba'emo ojopy aguã oarõ vy.

⁶ Ha'e gui Pedro aipoe'i:

* 2:28 Salmo 16.8-11 * 2:35 Salmo 110.1 * 2:44 Atos 4.32-35

— Xee ma prata neĩ ouro ndarekoi. Ha'e rã areko va'e ma ame'ẽ 'rã. Ha'e rami vy Jesus Cristo Nazaré pygua va'e rery rupi aipoa'e: Eguata — he'i.*

⁷ Ha'e rami vy ipo oiporu kuaa regua re ojopy vy omopu'ã. Ha'e ramove ipy ha'e ipy nhu'ã imbaraetepa.

⁸ Opo reve opu'ã vy templo py oike ha'e kuery reve. Opo-opo oikovy Nhanduerete pe oporaei reve.

⁹ Ava va'e oguata ha'e Nhanduerete pe oporaei rã pavẽ rei oexa okuapy vy

¹⁰ oikuapa ha'e ae ri ty ra'e mba'emo re ojerurea rupi templo roké Iporã 'epy va'e py uguapy va'ety. Ha'e rami vy onhemondyipa, okyje guive ha'e nunga ri ty ra'e oiko rã.

Templo ropy Pedro ijavyuague

¹¹ Pedro ha'e João reve tema ava va'e onhemoirũ rã heta va'e kuery ha'e javi oexa vy onhemondyipa reve onhamba jogueruvy ha'e kuerya katy, Salomão roguy puku 'epy va'e py.*

¹² Heta va'e kuery ou rã Pedro oexa vy aipoe'i ha'e kuery pe:

— Israel kuery, mba'e re tu penhemondyipa ri kova'e nunga gui? Mba'e re tu orere anho ri pema'ẽ? Pexa'ã teve ore ae po'akaa py, e'ỹ vy orereko porãa py romboguaata jevyague?

¹³ Mba'eta Abraão, Isaque ha'e Jacó Ruete, nhaneramoĩ kuery Ruete ae ojapo, guembiguai Jesus po'akaa oikuaa uka aguã. Ha'e va'e ma pejopy uka nhemi, ha'e huvixa Pilatos opoi ta ramo henonde pendeayvu va'ekue ndapeipotaiia rupi.

¹⁴ Iky'a e'ỹ va'e, Heko porã ete va'e peẽ kuery ndapeipotai vy hekovia pejerure jojuka rive va'ety opoi aguã.

¹⁵ Ha'e rami py pejuka uka Tekove me'ẽa. Ha'e rã Nhanduerete ma omboete ju omanoague gui. Ore kuery ma ha'e nungakue momba'ua orekuai.

¹⁶ Jesus rery re ore rojerovia ramo guery rupi ae omombaraete kova'e ava, aỹ pexa vy peikuaa va'e. Tá, Jesus re rojerovia ramo ae omonguera porã ju peẽ kuery ha'e javive renonde.

¹⁷ — Ha'e gui aỹ ke'y ha'e xeryvy kuery, xee aikuaa peikuaa e'ỹ vy pejuka ukaague, penduvixa kuery reve.

¹⁸ Ha'e rami avi Nhanduerete ae ojapo Cristo oiko axy aguã rami, profeta kuery pe omomba'u uka va'ekue ha'e javi ojeupity aguã.

¹⁹ Ha'e nunga rupi penhemboaxy ha'e pejeko rerova ke pejejavyague omboguepa aguã,*

²⁰ Senhor gui ou aguã javy'a aguã ára, ha'e pendereraa jepearã omoĩ va'ekue Cristo ombou jevy aguã. Ha'e va'e ma Jesus ae.

²¹ Mba'eta yva re opyta ranhe 'rã mba'emo ombopyaupa aguã ára ovaẽ e'ỹa ja. Ha'e va'e ára ma yma ma voi Nhanduerete omomba'u uka profeta kuery iky'a e'ỹ va'e pe.

²² Mba'eta anhetẽ ae Moisés aipoe'i: “Senhor Nhanduerete ma pendeivy kuery regua va'e ae omoingo 'rã peteĩ profeta xee rami guarã. Ha'e va'e ayvu re anho pejapyxaka 'rã opa mba'e omomba'u rã.

²³ Ha'e rã ha'e va'e profeta ayvu re ndojapyxakai va'e ma oipe'apaa 'rã heta va'e kuery mbyte gui”, he'i va'ekue.*

²⁴ Ha'e gui Samuel oiko guive profeta ikuai va'e ha'e javi omomba'u ma voi kova'e ára guarã.

²⁵ Peẽ ma profeta ramymino kuery pendekuai, ha'e nhaneramoĩ kuery pe Nhanduerete guexeve guarã ojapo va'ekue ma pendeivy pegua voi, mba'eta Abraão pe “Neramymino kuery re vy yvy regua ha'e javi ikuai porã 'rã”, he'iague rami.*

²⁶ Ha'e nunga rupi Nhanduerete Guembiguai omboete ju vy pendeivy pe ranhe ombou, peteĩ-teĩ pendeko vaia gui pendepe'a vy penemoingo porã aguã.

4

Pedro ha'e João nhuã py ombotyaguae

¹ Heta va'e kuery pe apóstolo kuery ijavyvu teri reve ou sacerdote kuery, templo rarõa ruvixa ha'e saduceu kuery.

² Ha'e va'e kuery ma ndojou porã heta va'e kuery ombo'ea, mba'eta omomba'u Jesus re vy omano va'ekue onhemboete jevy 'rãa.

³ Ha'e rami vy ka'aru ma ramo ojopy vy nhuã py omboty ko'ẽ jevy oikuaa pota aguã.

⁴ Ha'e rã ijavyvu oendu va'e kuery ma heta oguerovia. Avakue oguerovia va'e ma cinco mil rai'i ikuai.

Pedro ha'e João omboayvu okuapyague

⁵ Ko'ẽ jevy Jerusalém tetã py huvixa kuery nhomboaty okuapy nhomongeta va'ety kuery reve, lei re nhombo'e va'ety kuery,

⁶ sacerdote yvateve va'e Anás, Caifás, João, Alexandre ha'e gui sacerdote yvateve va'e ro pygua kuery ha'e javi reve.

⁷ Ha'e gui ojea py apóstolo kuery ogueru ruka vy oporandu ha'e kuery pe:

— Mba'e nunga po'akaa rupi tu, ha'e mava'e rery rupi pejapo gui nunga?

⁸ Ha'e ramo Pedro re Nhe'ẽ Ky'a E'ỹ anho oĩ ramo aipoe'i:*

— Oreruvixa ha'e nhomongeta va'ety kuery,

⁹ aỹ ma oremboayvu peteĩ ava imba'eaxy va'e pe mba'emo porã oiko va'ekue re, ha'e marã rami vy pa okueraague re.

* 3:6 João 14.13,14 * 3:11 Salomão roguy puku 'epy va'e ma templo roka py oĩ. * 3:19 Lucas 24.46,47 * 3:23 Deuteronomio 18.15,18-19 * 3:25 Gênesis 22.18, 26.4 * 4:8 Lucas 21.12-15

¹⁰ Peikuaa pota ha'vy pova'e re, peē ha'e Israel kuery ha'e javi reve: Nazaré pygua Jesus Cristo kuruxu re pemoi uka va'ekue, ha'e omanoague gui Nhanderuete omboete ju va'ekue rery rupi ae kova'e ava okuera reve hi'ā penerenonde.

¹¹ Jesus ae ita peē oo apoa kuery ndapeipotai va'ekue ri ita omboeteve pyrā rami opyta.*

¹² Mba'eta jipoi nhandereraa jeparā mboae, mba'eta yva guýry nda'ipoi amboae tery nhandevy pe ome'ē mbyre, ha'e va'e rupi jaa jepe agüā — he'i.

¹³ Ha'e rami rā Pedro ha'e João ipy'a guaxua oexa vy onhemondyipa okuapy, mba'eta kuaxia para oexa kuaa va'e e'ý, imbo'e pyre'ý ikuai'a oikuaa vy. Ha'e rami vy oikuaa Jesus reve ikuai va'ekuea.

¹⁴ Ha'e kuery mbyte py ava omonguera pyre oí avi rā oexa vy nda'ijavy kuaavei ha'e kuery rovai.

¹⁵ Ha'e gui ma omboavyague gui omoēmba vy jomeme ju ijavy vy
¹⁶ aipoe'i:

— Mba'e tu jajapo 'rā peva'e avakue re? Mba'eta anhetē ae Jerusalém pygua kuery oikuaapa ha'e kuery mba'emo porā ete ojapoague. Ha'e nunga rupi “Any” ja'e agüā nda'evei.

¹⁷ Ha'e rami avi heta va'e kuery pe ha'e kuery omombe'u ve'ý agüā nhamongyje 'rā. “Ha'e va'e rery rupi pendeavyvve eme avave rei pe”, ja'e 'rā — he'i okuapy.

¹⁸ Ha'e rami vy oenoi jevy vy ijavy ha'e kuery pe Jesus rery rupi nda'ijavyvei neí nanhomb'o'evei agüā.

¹⁹ Ha'e ramo Pedro ha'e João ombovai:

— Peikuaa pota ke Nhanderuete renonde: Ha'eve ri nda'u peē kuery, tyrā pa Nhanderuete ronhe'ē rendu agüā?

²⁰ Mba'eta ore ma ndorojepe'ai 'rā mba'emo roexa ha'e roendu va'ekue re oreavyuaa gui — he'i.

²¹ Ha'e rami rā omongyjeve rire opoipa, mba'e nunga re pa ombopaga agüā oikuaa e'ý vy, heta va'e kuery gui okyje guive. Mba'eta pavē rei ma mba'emo porā oikoague re ima'endu'a vy oguerovy'a okuapy Nhanderuete,

²² mba'eta Nhanderuete opo'akaa py omonguera va'ekue ma quarenta ma'etý raxa oguereko.

Igreja kuery onhembo'e okuapyague

²³ Pedro ha'e João opoia ma ramo ojou irmão kuery. Ha'e vy ha'e kuery pe omombe'u sacerdote vyatekueve va'e ha'e nhomongeta va'ety kuery ijavyvague ha'e javi.

²⁴ Omombe'u rā ha'e kuery oendu vy ha'e javive ojapukai okuapy Nhanderuete pe. Ha'e vy aipoe'i:

— Ndee Senhor Ndepo'akapa va'e ma yva, yvy, ye'ē ha'e opa mba'e hexe ikuai va'e apoare reiko.*

²⁵ Nhe'ē Ky'a E'ý rupi aipo'ere uka va'ekue nerembiguai oreramoí Davi pe: “Mba'e re nda'u judeu e'ý va'e kuery ipoxypa, ha'e heta va'e kuery voi mba'emo ovare'ý va'e ojapo agüā onhembopy'a okuapy?

²⁶ Mba'eta yvy regua huvixave kuery opu'ā, huvixa kuery petē rami nhomboaty okuapy Senhor ha'e huvixaverā omoi va'ekue rovai”, 're uka va'ekue.*

²⁷ Mba'eta anhetē ae kova'e tetā py nhomboaty okuapy Nerembiguai iky'a e'ý va'e Jesus nhandereraa jeparā remoi va'ekue rovai. Herodes ha'e Pôncio Pilatos, judeu e'ý va'e ha'e oreretarā Israel kuery reve nhomboaty raka'e

²⁸ ojapo agüā ndepo'akaa rupi ndee ae renhembopy'a ma voiague ha'e javi.

²⁹ Aý ma Senhor, eikuaa pota oremongyje okuapy re, ha'e ore nerembiguai kuery orembopy'a guaxu ndeavyvu romombe'u agüā.

³⁰ Ha'e ramia ja ndepo'akaa rupi enhomonguera. Nerembiguai iky'a e'ý va'e Jesus rery rupi ejapo hexa pyrā ha'e nhomondyipaará — he'i okuapy.

³¹ Ha'e kuery onhembo'epa ramove oo ono'ō okuapy oryryipa. Ha'e javive re Nhe'ē Ky'a E'ý anho oí. Ha'e ramo okyje py e'ý omombe'u Nhanderuete ayvu.*

Igreja kuery reko re ijavyvague

³² Ojerovia va'e kuery ma petē rami meme ipy'a ha'e inhe'ē. Avave rei “Xevy anho” nde'i neí petēive oguereko va'e regua pe ma voi. Mba'emo oguereko va'e ma joupe-upe omboja'o va'erā meme oguereko.

³³ Apóstolo kuery ma ipo'akapa reve omombe'u Senhor Jesus onhemboete jevyague, ha'e pavē re oí omboaxya.

³⁴ Mba'eta ha'e kuery mbyte neí petēive iporiau'i va'e ndoikoi, mba'eta yvy, e'ý vy oo oguereko va'e ovendepa vy ogueru 'rā hepykue,

³⁵ ha'e apóstolo kuery py vy'ýry omoi. Ha'e ramo petē-teí pe omboja'o-ja'o 'rā mba'emo oikotevêa rami.*

Barnabé mba'emo ome'ēague

³⁶ Petē levita Chipre guigua José hery va'e avi ojapo, apóstolo kuery omboery va'ekue Barnabé, “Nhombopy'a guaxua” 'ea.

³⁷ Ha'e va'e ma oyvy oguereko va'ekue ovende, ha'e hepykue ogueru vy omoi apóstolo kuery py vy'ýry.

5

Ananias ha'e Safira reko re ijavyvague

¹ Oiko avi petēi ava Ananias hery va'e. Gua'yxy Safira reve ovende avi oyvy,

* 4:11 Salmo 118.22 * 4:24 Êxodo 20.11 * 4:26 Salmo 2.1-2 * 4:31 Mateus 18.19,20 * 4:35 Atos 2.42-47

² va'eri gua'yxy reve jogueroanyvua rami vy ojeupe guarã ae omboja'o hepykue. Hembyrekue rive ogueraa vy omoí apóstolo kuery py yvýry.

³ Ha'e ramo Pedro aipoe'i:

— Ananias, mba'e re tu ndepý'a remonhemonde uka Satanás pe, Nhe'ẽ Ky'a E'ÿ pe ndeapu aguã, ndeyvy repykue regua ndejeupe guarã ae remoí porã vy?

⁴ Ndeyvy revende e'ÿ mbove nembra'e'ÿ ri ty'ÿ itui? Ha'e revende rire voi hepykue ndepo py e'ÿ ri ty'ÿ oí? Mba'e re tu guí rami rejapo aguã ri oí ndepý'a re? Avakue pe'ÿ ndeapu, ha'e rá Nhanderuete pe — he'i.*

⁵ Ha'e rami ijayvu rá Ananias oendu vyve ho'a, omano. Ha'e ramo pavẽ oendu vy onhemondyipa.

⁶ Ha'e gui kunumigüe ikuai va'e ovaẽ vy onhovãmba hetekue, ha'e onhono porã aguã py ogueraa.

⁷ Ha'e gui três hora ma oaxa rire Ananias ra'yxy ju ovaẽ mba'e pa oikoague ndoikuai vy.

⁸ Ha'e ramo ixupe ju Pedro oporandu:

— Emombe'u xevy: Kova'e'i re ae ma nhi'ã pevende ra'e pendeyvy?

Kunha va'e ombovai:

— Tá, evoko va'e'i re ae ri — he'i.

⁹ Pedro aipoe'i:

— Mba'e re tu penhembopy'a ri Senhor Nhe'ẽ peko a'ã aguã? Aipo, okẽ py onhendu neme nhono porãare kuery pyambu. Ha'e ndee voi ndereraa avi 'rã — he'i.

¹⁰ Ha'e ramove kunha va'e ho'a Pedro py rupi, ha'e vy omano. Kunumigüe oike vy omano ma oupy rá ojou. Ha'e rami vy ogueraa vy ime yvýry onhono porã.

¹¹ Ha'e rami rá igreja ikuai va'e oendu okyjae, oiko va'ekue renduare kuery ha'e javive guive.

Apóstolo kuery opa mba'e porã ojapoague

¹² Apóstolo kuery po py hexa pyrã ha'e nhomondyipaará heta ojapo ukaa heta va'e kuery mbyte rupi.* Ijatyta jepi 'rã Salomão roguy puku 'epy va'e py.

¹³ Ha'e rá amboae kuery ma peteíve na'irũxei ha'e kuery re. Ha'e rami avi heta va'e kuery ojou porã.

¹⁴ Ha'e rami vy avakue ha'e kunhague ma heta-etave tema oje'oivý Senhor re ojerovia va'e.

¹⁵ Ha'e ramo tape rupi imba'eaxy va'e heraa vy onhonoa inony hupa reve ha'e ajukue áry, Pedro oaxa ramo hi'ã ri jepe ojao'i aguã.

¹⁶ Jerusalém katy'i tetã ikuai va'e gui heta ou avi. Imba'eaxy ha'e nhe'ẽ vai gui oiko axy va'e herua ramo omonguerapaa.

Apóstolo kuery nhuã py ombo'aa ague

¹⁷ Ha'e gui ma sacerdote yvateve va'e ha'e irũ kuery saduceu regua ha'e javive nda'ija'ei vy opu'ã okuapy.

¹⁸ Ha'e rami vy apóstolo kuery ojopy vy omboty nhuã py.

¹⁹ Ha'e rami teí pyávy peteí anjo Senhor-a guigua oipe'a nhuã rokẽ. Ha'e vy oka katy ogueraa vy aipoe'i:

²⁰ — Tapeo, templo py ju pene'aí, ha'e heta va'e kuery pe pemombe'u tekove regua ayvu ha'e javi — he'i.

²¹ Ha'e nunga ha'e kuery oendu vy ko'ẽmba'i ramove templo py oike vy nhombo'e.

Ha'e gui sacerdote yvateve va'e ha'e irũ kuery ma nhomboayvuaty py oupa vy omboatypa avi Israel ruvixa kuery ha'e javi. Ha'e vy omoundouka nhuã gui apóstolo kuery ogueru aguã.

²² Ha'e rá xondaro kuery nhuã py oo vy ndojoui. Ha'e rami vy ojevy ju vy omombe'u.

²³ Ha'e vy aipoe'i:

— Roexa rá nhuã onhemboty porã oiny, ha'e okẽ py ma nhuã rarõa kuery ikuai. Ha'e rami teí roipe'a vy peteíve ndorojoui opy — he'i okuapy.

²⁴ Ha'e rami ijayvu rá templo rarõa ruvixa ha'e sacerdote yvatekueve va'e oendu vy ndoikuai rei okuapy mba'e pa apóstolo kuery re oikoague, nei mba'e pa oiko 'rãa voi ndoikuai.

²⁵ Ha'e rami jave ete'i amongue ovaẽ vy omombe'u ha'e kuery pe:

— Nhuã py avakue pemboty va'ekue tu templo py rima ombo'e okuapy heta va'e kuery — he'i.

²⁶ Ha'e ramo templo rarõa kuery ruvixa ixondaro kuery reve oo vy ogueru porã'i, mba'eta okyje heta va'e kuery ita py ojapipa gui.

²⁷ Omboayvu aguã ogueru ma ramo sacerdote yvateve va'e oporandu ha'e kuery pe.

²⁸ Ha'e vy aipoe'i:

— Ha'e gui aiporo'e va'ekue napenhombo'evei aguã ha'e va'e rery rupi. Ha'e ramive ma pejapo Jerusalém ha'e javi rupi penhombó'ea oikuapaa aguã rami. Orere pemoixe avi ha'e va'e ava ruguy omoẽague re ropaga aguã — he'i.

²⁹ Ha'e ramo Pedro ha'e apóstolo kuery mboae ombovai:

— Avakue ronhe'ẽ rendu 'rãgüe py ha'eveve Nhanderuete ronhe'ẽ rendu.

³⁰ Mba'eta nhaneramoí kuery Ruete omboete ju Jesus, peẽ kuery yvyra re pemóí uka vy pejuka va'ekue.

³¹ Ha'e rá Nhanderuete ma opo'akaa oexa uka vy ombovyate Huvixava ha'e Jogueraa jepearã, Israel kuery onhemboaxya oendu nho ramo ojejavayague ombogüepa aguã.

³² Ha'e gui ore kuery ma ha'e nungakue kuaa ukaarã orekuai, Nhe'ẽ Ky'a E'ÿ voi, mba'eta Nhanderuete ombou onhe'ẽ rendu va'e kuery pe.

Gamaliel ijayvuague

³³ Ha'e rami apóstolo kuery ijayvu rá ha'e kuery oendu vy ipoxypave okuapy, ojukaxe guive.

* 5:4 Gálatas 6.7 * 5:12 Marcos 16.17-20

³⁴ Ha'e rami teĩ nhomongeta va'ety kuery mbyte peteĩ fariseu opu'ã Gamaliel hery va'e, lei re nhombo'e va'ety, ha'e heta va'e kuery ha'e javi omboeteve va'e.* Ha'e va'e ma opu'ã vy apóstolo kuery omoẽ uka ranhe xapy'a'i.

³⁵ Ha'e vy oirũ kuery pe aipoe'i:

— Israel kuery regua, peikuaa pota ranhe, peva'e avakue pembopaga rive e'ỹ aguã.

³⁶ Mba'eta ymave opu'ã raka'e Teudas. Ha'e va'e ma onhemboyvate rei ramo hexeve quatrocentos avakue rãnda'u onhemoirũ. Ha'e gui ma ojukaa rire hexe ojapyxaka va'ekue-'ekue oaĩmba, mba'eve rei ojapo e'ỹ re.

³⁷ Ha'e va'e rire tery ombopara ukaa jave py Galiléia pygua Judas ju opu'ã vy heta ete ogueraa ngupive. Ha'e va'e voi omano, ha'e rã onhe'ẽ rendu va'ekue oaĩmba rive.

³⁸ Aỹ ma aipoa'e kova'e avakue re pejapo vai ve'ỹ aguã, tove ta'ikuai. Mba'eta ha'e kuery ayvu ha'e hembiaipo ma avakue guigua ri vy opa rive 'rã.

³⁹ Ha'e rã Nhanderuete guigua ri ramo napembovaipa kuaai 'rã, Nhanderuete rovaigua pendekuai e'ỹ aguã — he'i. Ha'e rami ijayvua rã pavẽ rei ojou porã.

⁴⁰ Ha'e gui ma apóstolo kuery oenoi'ju vy oinupãmba. Ha'e vy ha'e kuery pe ijayvu ijayvu ve'ỹ aguã Jesus rery rupi. Ha'e gui oipoipa ju.

⁴¹ Ha'e rã ha'e kuery omboayvuague gui ojepe'a vy ovy'a jogueravy, Jesus rery káuxa ikuai axy aguã oiporavo rive.

⁴² Ha'e gui ko'ẽ nhavõ templo py, ha'e oo ha'e javi rupi ndojepe'ai Jesus ae Cristo oikoa re nhombo'ea gui.*

6

Nhopytyvõarã kuery omoĩa ague

¹ Ha'e va'e jave temimbo'e kuery heta-etave oje'oivy ramo grego kuery regua ijayvu rei okuapy hebreu regua re, mba'eta ko'ẽ nhavõ tembi'u omboja'oa py grego kuery regua imeve'ỹ va'e kuery re hexarai ra'e.

² Ha'e ramo apóstolo kuery doze va'e omboatypa temimbo'e kuery ha'e javi. Ha'e vy aipoe'i:

— Nda'evei Nhanderuete ayvu romombe'ua gui ore kuery rojepe'a aguã tembi'u romboja'oa rupi roiko aguã.

³ Ha'e nunga rupi irmão kuery, peiporavo peẽ kuery regua sete avakue heko porã va'e, Nhe'ẽ Ky'a E'ỹ anho oĩa, ha'e hi'arandu va'e. Ha'e va'e kuery ma romoĩ 'rã ha'e nunga rupi omba'eapo va'erã.*

⁴ Ha'e rã ore kuery ma ronhembo'ea ha'e ayvu romombe'ua rupi anho 'rã orekuai — he'i okuapy.

⁵ Ha'e rami ijayvu rã pavẽ oendu vy ojou porã. Ha'e rami vy jypy ojou Estêvão, peteĩ ava ojerovia ete ha'e Nhe'ẽ Ky'a E'ỹ anho oĩa va'e, ha'e gui ma Filipe, Prócoro, Timão, Pármenas ha'e Nicolau. Ha'e va'e ma Antioquia guigua judeu kuery reko rami oiko va'e.

⁶ Ha'e va'e kuery ma apóstolo kuery renonde ogueru ramo onhembo'e reve ha'e kuery áry omoĩ okuapy opo.

⁷ Ha'e gui ma Nhanderuete ayvu oendupaave. Jerusalém tetã py temimbo'e kuery heta-etave ma oje'oivy. Sacerdote kuery voi heta ikuai ojeroviaa rupi.

Estêvão omboayvua ague

⁸ Ha'e gui Estêvão ma Nhanderuete omboaxya ha'e ipo'akaa rupi oiko vy heta va'e kuery mbyte rupi ojapo oikovy nhomondyipaarã ha'e hexa pyrã.

⁹ Ha'e ramo hexe opu'ã okuapy judeu kuery va'e regua escravo ve'ỹ onhembo'eaty pygua, Cirene, Alexandria, Cilícia ha'e Ásia guigua. Ha'e va'e kuery ma Estêvão reve ijayvu ete okuapy.

¹⁰ Va'eri hexe nda'ipo'akai, Nhe'ẽ guigua 'arandua rupi ijayvu ramo.*

¹¹ Ha'e rami vy opaga amongue avakue aipoe'i aguã: “Roendu peva'e ava ijayvu vaikue rã Moisés ha'e Nhanderuete rovai”, he'i aguã.

¹² Ha'e rami py omopu'ãmba rei heta va'e kuery, nhomongeta va'ety ha'e lei re nhombo'e va'ety kuery guive. Ha'e rami vy oje'oi vy ojopy, nhomongeta va'ety kuerya py ogueraa.

¹³ Ha'e py ma ogueru avi hekokue ramigua mombe'uarã. Ha'e va'e kuery aipoe'i:

— Peva'e ava ma ijayvu vai riae oikovy templo iky'a e'ỹ va'e ha'e lei re.

¹⁴ Mba'eta roendu aipoe'i rã Nazaré pygua Jesus templo omomba 'rãa rami, ha'e nhanderekorã Moisés oea va'ekue oguerova 'rãa rami guive — he'i.

¹⁵ Ha'e javive omboayvua py uguapy va'e ma Estêvão re anho oma'ẽ okuapy. Oma'ẽ okuapy rã anjo rami hova.

7

Estêvão ijayvuague

¹ Ha'e ramo sacerdote yvateve va'e oporandu vy aipoe'i:

— Ha'e rami ae teve?

² Estêvão ombovai:

— Ke'y kuery ha'e xeru kuery, pendu ke. Nhaneramoĩ Abraão ma Mesopotâmia yvy re teri oiko jave, Harã py oiko e'ỹ mbove ixupe Nhanderuete hexakãmba va'e ojexa uka raka'e.

* 5:34 Atos 22.3

* 5:42 Mateus 5.10-12; 1 Pedro 4.16,19

* 6:3 1 Timóteo 3.8-10

* 6:10 Lucas 21.14,15

- ³ Ha'e vy aipoe'i ixupe: "Ejepe'a ndeyvy neretarā kuerya gui, ha'e tereo yvy aexa uka aguā katy", he'i va'ekue.*
- ⁴ Ha'e ramo caldeu kuery yvy gui oo Harā py ju oiko aguā. Tuu omano ma rire apy ju Nhanderueete ombou yvy aỹ peẽ pendekuaia py.
- ⁵ Ha'e rami avi apy voi ixupe guarā nome'êi neĩ peteĩgue'i opy oguerova aguā voi, teĩ ijayvu yvy ome'ê aguā, ha'e hamymino kuery pe voi. Ha'e jave ma ndata'yi teri.
- ⁶ Ha'e gui Nhanderueete ijayvu hamymino kuery ovyv re'ỹ, yvy mboae re ikuai 'rāa re. Ha'e py ma escravo kuery 'rā ikuai, quatrocentos ma'et'ỹ re 'rā ikuai axy.
- ⁷ Ha'e gui Nhanderueete aipoe'ive ju: "Xee ma ambopaga 'rā escravo penemoingoare kuery. Ha'e va'e rire ha'e gui pexê 'rā kova'e yvy re ju xerembigua pendekuai aguā", he'i va'ekue.*
- ⁸ — Ha'e gui ma ipire omboi uka vy hexeve ojapo guexeve guarā. Ha'e rami vy Isaque itui rire oito araa py Abraão omboi ipire. Isaque gui oiko Jacó, ha'e gui ha'e va'e gui nhaneramoĩ kuery doze ikuai va'ekue oiko.
- ⁹ Ha'e gui José re nhaneramoĩ kuery nda'ija'ei vy ovende raka'e Egito yvy katy heraarā pe. Ha'e rami teĩ Nhanderueete ma hexeve oiko vy
- ¹⁰ ogueraa jepe opa mba'e vai oiko va'e gui. Omboaxya rupi omo'arandu Egito pygua huvixave Faraó renonde. Ha'e ramo Faraó omoĩ ha'e pygua kuery re opena aguā, ha'e hoo pygua ha'e javi re guive.
- ¹¹ Ha'e gui ma karuai oiko Egito yvy ha'e javi rupi. Canaã yvy re voi ikuai axy ramo nhaneramoĩ kuery ndojouvei tembi'u.
- ¹² Ha'e rā Egito yvy re ma trigo oguerekoa omombe'ua rā Jacó oendu vy jypy omondouka raka'e nhaneramoĩ kuery.
- ¹³ Ha'e kuery teĩgue ju ovaẽ ramo José ojekuaa uka guyke'y kuery pe, ha'e Faraó voi oexa José regua kuery.
- ¹⁴ Ha'e vy José oenoĩ uka nguú Jacó ha'e guetarā kuery ha'e javive setenta e cinco ikuai va'e.
- ¹⁵ Ha'e rami py Egito yvy re Jacó oo raka'e. Ha'e py ma omano, nhaneramoĩ kuery ha'e javive voi.
- ¹⁶ Hetekue ma Siquém katy heraa vy onhono porāa Hamor ra'y kuery gui Abraão tupařa peráta re ojogua va'ekue py.
- ¹⁷ — Ha'e gui ovaẽ rai'i ma Abraão pe Nhanderueete ouraague ojeupity aguā ára. Ha'e jave ma nhaneramoĩ kuery hetave oje'oivy Egito yvy re,
- ¹⁸ amboae huvixave José oikuaa va'e'ỹ oiko peve.*
- ¹⁹ Ha'e va'e huvixa ma nhaneramoĩ kuery ombotavypa vy ojavyky rei, ojapo guive gua'y kuery re ae nopenavei rā omanomba aguā rami.
- ²⁰ Ha'e va'e jave py oiko Moisés. Ha'e va'e ma Nhanderueete renonde voi ojou porāa ramo mboapy jaxy re ranhe onhomi tuu ro py.
- ²¹ Ha'e gui oejaa ramo Faraó rajy ju ogueraa vy omemby ae'i rami omongakuaa.
- ²² Moisés ma Egito pygua 'arandua ha'e javi re ombo'ea ramo ipo'aka ayvu py ha'e mba'emo ojapoa py.
- ²³ — Quarenta ma'et'ỹ ma oguerekoa py oendu guyke'y kuery Israel regua oexaxea.
- ²⁴ Ha'e rami vy pete'eva ojavykya rei rā oexa vy oi'pe'a, ha'e oepy vy ojuka Egito pygua.
- ²⁵ Mba'eta Moisés oexa'a hetarā kuery "Ixupe Nhanderueete nhandereraa jepe uka 'rā" he'i aguā, teĩ ha'e kuery ha'e rami ndoikuai.
- ²⁶ — Ha'e gui ko'ẽgue onhemboja ju guetarā kuery joguero'a va'e re. Ha'e kuery ikuai porā aguā omboja'oxe vy aipoe'i: "Avakue, peẽ kuery tu joegua'i rima pendekuai. Mba'e re tu pejuguero'a rei?" he'i.
- ²⁷ Ha'e ramo oirũ re ojeaive va'e omoanha vy aipoe'i: "Mava'e tu nemoĩ oreruvixarā, orere repena aguā?"
- ²⁸ Xee voi teve xejukaxe avi kueue Egito pygua rejukaague rami?" he'i.*
- ²⁹ Ha'e rami ijayvu rā Moisés oendu vy okanhy ovy, ha'e Midiã yvy re ju oiko guekoa py e'ỹ. Ha'e py ma oiko mokoĩ ta'y.
- ³⁰ — Quarenta ma'et'ỹ rire tekoa e'ỹa py Sinai vyvty re ixupe ojexa uka peteĩ anjo. Yvyra rogue hendy va'e mbyte gui ojexa uka.
- ³¹ Moisés ha'e nunga oexa vy onhemondy'i va'eri onhembojave ovy oexa porāve aguā. Ha'e vy oendu Senhor aipoe'i rā:
- ³² "Xee ma neramoĩ kuery Abraão, Isaque ha'e Jacó Ruete aiko", he'i. Ha'e rami rā Moisés okyje vy oryryipa, oma'ëve aguā nda'ipy'a guaxui guive.
- ³³ — Ha'e ramo Senhor aipoe'ive ju: "Emboi ndepy regua, mba'eta repyrōa ma yvy ky'a e'ỹ.
- ³⁴ Xee aexa ma Egito yvy re xevygoma kuery ikuai axya, ha'e kuery ipoaẽ rā aendu guive. Ha'e rami vy aguejy araa jepe aguā. Ejuve ke aỹ, xee romondouka 'rā Egito katy", he'i.*
- ³⁵ — Ha'e rami teĩ ha'e kuery nonhe'ẽ rendui Moisés. Ha'e vy aipoe'i: "Mava'e tu nemoĩ huvixa orere repena va'erā?" he'i okuapy, huvixarā ha'e heraa jeparā Nhanderueete ombou va'ekue ri, anjo vyvra rogue hendy va'e mbyte gui ojexa uka va'ekue ipytyvōarā oiko guive.
- ³⁶ Ha'e gui Egito yvy re nhomondyipaarā ha'e hexa pyrā Moisés ae ojapo vy oguenoẽ nhaneramoĩ kuery. Ye'ê Pytā re voi ojapo, ha'e quarenta ma'et'ỹa pukukue re tekoa e'ỹa rupi ikuai jave guive.
- ³⁷ Moisés ae Israel kuery pe aipoe'i: "Peẽ kuery regua Nhanderueete omoingo 'rā peteĩ profeta xee rami guarā", he'i va'ekue.*

* 7:3 Gênesis 12.1 * 7:7 Gênesis 15.13-14 * 7:18 Êxodo 1.8 * 7:28 Êxodo 2.14 * 7:34 Êxodo 3.5-8,10 * 7:37 Deuteronomio 18.15

³⁸ Ha'e Moisés ae oī va'ekue tekoa e'ŷa py ono'ōmba va'e kuery reve, Sinai vvyty re ixupe anjo ijayvu va'ekue ha'e nhaneramoī kuery reve. Ojopy avi ayvu imarā e'ŷ va'e nhandevy ju oikuaa uka aguā.

³⁹ — Ha'e rami teī nhaneramoī kuery ma nonhe'ē rendui raka'e. Ha'e kuery ndoipotai vy opy'a re omoī okuapy Egito katy ju ojevyyxa.

⁴⁰ Ha'e vy aipoe'i Arão pe: “Ejapo orevy nhanderueterā nhanerenonde re oo va'erā. Mba'eta Egito vvy gui nhanerenoēare Moisés re ma ndajaukuai mba'e pa oikoa”, he'i okuapy.*

⁴¹ Ha'e va'e jave ojapo vaka ra'y ra'angaa, ha'e ha'angaa pe mymba kuery ojuka guive. Oguerovy'a rei okuapy opo py ojapo va'ekue rive.

⁴² — Ha'e ramo ha'e kuery gui Nhanderuete ojepe'a vy omboaxa yva re ikuai va'e rive ombojerovia aguā, profeta kuaxia ombopara vy aipoe'iague rami: “Israel kuery, tekoa e'ŷa rupi quarenta ma'etŷ re pendekuai vy xevy pe teve mymba pejuka vy peme'ē raka'e?”

⁴³ Tuuete ramigua Moloque pe e'ŷ ri ty'y pejapo pembojerovia atyrā? Ha'e tuuete ramigua Renfā jaxy-tata ra'angaa pejapo va'ekue pembojerovia aguā. Ha'e nungakue re ma xee rogueraa ukapa 'rā Babilônia rovai katy”, he'iague.*

⁴⁴ — Ha'e gui ombojeroviaaty Nhanderuete ayvu oīa va'e ma nhaneramoī kuery oguereko raka'e tekoa e'ŷa re, Moisés pe ojapo ukaague rami ae ojapo va'ekue.

⁴⁵ Ha'e nunga ma nhaneramoī kuery Josué oiko javegua ju ojopy vy amboae katy ogueraa, mba'eta ha'e kuery renonde gui Nhanderuete vvy regua kuery omoxē ramo ha'e py ju ikuai. Davi oikoa ára peve ogueroko va'ekue.

⁴⁶ Ha'e gui Davi ma Nhanderuete ojou porā ramo ojerure peteī oo Jacó Ruete peguarā ojapo aguā.

⁴⁷ Ha'e rā ixupe guarā oo apoare ete ma Salomão raka'e.

⁴⁸ Ha'e rami teī Yvate ete va'e ma avakue opo py oo ojapo va'ekue py noī, profeta aipoe'iague rami:

⁴⁹ “Yva ma xerenda, ha'e rā vvy ma xepy rendarā itui. Mba'e nunga oo 'rā tu pejapo xevy? Mamo 'rā tu xee apyту'u atyrā oī aguā ha've?”

⁵⁰ Mba'eta xepo py e'ŷ ri ty'y ha'e nunga ha'e javi ajapo va'ekue?” he'i Senhor.*

⁵¹ — Avakue peneakā ratā va'e, pendepy'a ratā ha'e pendeapyxa e'ŷ va'e, Nhe'ē Ky'a E'ŷ ijayvu teī ndapejapyxakaxei kuerei. Peneramoī kuery ikuaiague rami ae ju peē voi pendekuai.*

⁵² Mba'eta mava'e profeta re nda'u peneramoī kuery nopu'ā rei raka'e? Mba'eta ojuka okuapy raka'e Heko porā ete va'e ou 'rāa mombe'ua kuery. Ha'e va'e gui aŷ ma peē ju ijopy nhemiare ha'e ijuka riveare pendekuai.

⁵³ Pende kuery ma anjo po gui lei pejopy va'eri ndapejapoi — he'i.

Estêvão omanoague

⁵⁴ Ha'e rami ijayvu rā ha'e kuery oendu vy ipoxy okuapy opy'a py, ha'e hexe opu'ā vy haī jekyty guive okuapy.

⁵⁵ Ha'e rā Estêvão re ma Nhe'ē Ky'a E'ŷ anho oī ramo yva re oma'ē vy oexa Nhanderuete rexakāa, ha'e oiporu kuaa regua re Jesus hi'aī rā.

⁵⁶ Ha'e rami vy aipoe'i:

— Aipo aŷ, xee aexa yva ojepe'a rā, ha'e Nhanderuete oiporu kuaa regua re Ava ra'y ojeapo va'ekue hi'aī rā — he'i.

⁵⁷ Ha'e ramo ha'e kuery ojapukai atā vy omboty oapyxa, joo rami meme oguero'a okuapy.

⁵⁸ Tetā gui mombry'i ogueraa py ojapipa okuapy ita py. Hekokue ramigua mombe'ua re kuery ma oao puku omboi vy oēja imoiny peteī kunumi Saulo hery va'e hi'aia py.*

⁵⁹ Ha'e rami vy ita py Estêvão ojapipaa ramo ojapukai vy aipoe'i:

— Senhor Jesus, eraa ke xenhe'ē — he'i.

⁶⁰ Ha'e gui guenapy'ā re oī vy ijayvu atā:

— Senhor, embopaga eme kova'e kuery ojevavyague re — he'i. Po rami ijayvu reve oke.*

8

¹ Ha'e kuery ojuka okuapy ma Saulo ojou porā.

Atos 26.9-11

Ha'e va'e árave Jerusalém pygua igreja kuery omoingo axya vaipa. Ha'e ramo ha'e kuery ha'e javive apóstolo e'ŷ vy oaimba Judéia ha'e Samaria vvy rupi.

² Estêvão retেকে ma Nhanderuete pegua avakue onhono porā, hexe ojae'o vaipa guive.

³ Ha'e rā Saulo ma omombaxe ete heravy igreja kuery. Oo rupi oike vy ogueraa avakue ha'e kunhague nhuā py omboty aguā.

Samaria tetā py Filipe oo vy ayvu omombe'uague

⁴ Ha'e gui opa rupi oaimba jogueravya rupi ayvu omombe'u.

⁵ Filipe ma Samaria tetā py oo vy ha'e kuery pe omombe'u Cristo.*

* 7:40 Êxodo 32.1,23 * 7:43 Amós 5.25-27 * 7:50 Isaías 66.1-2, Atos 17.24 * 7:51 Mateus 23.30-32 * 7:58 Saulo ma Jesus pe ojeko me'ē va'erā va'e (Atos 2.20). Guery oguerova rire ixupe “Apóstolo Paulo” 'ea (Atos 9.1-9, 13.9). * 7:60 Lucas 21.16-19, 23.46,34 * 8:5 Atos 1.8; João 12.24

⁶ Filipe ijavyu rã heta va'e kuery peteĩ rami meme ojapyxaka okuapy. Oendu, oexa guive hexa pyrã ojapo rã.

⁷ Mba'eta heta gui nhe'ê vai ojapukai reve-reve ojepe'a, ha'e heta uguata e'ỹ ha'e hetyma pirupa va'e voi okuerapa.

⁸ Ha'e ramo ovy'a ete okuapy ha'e va'e tetã py.

Onhembo'e vaikue va'e Simão re ijavyuague

⁹ Ha'e py ma oiko peteĩ ava Simão hery va'e, onhembo'e vaikuea rupi oiko. Samaria pygua kuery ombotavypa oikovy, ipo'akapa va'e rami rive onhemoingo vy.

¹⁰ Hexe ojapyxaka pavê, yvyĩgüeve ha'e yvatekueve guive. Ha'e vy aipoe'i:

— Kova'e ava re ma Nhanderuete po'akaa oĩ. Ha'e ramo Ipo'akapa va'e hery — he'i okuapy.

¹¹ Hexe anho ojapyxaka, mba'eta are ma omba'evykya py ombotavypa ramo.

¹² Ha'e gui ha'e pygua kuery pe Filipe omombe'u oikovy ayvu porã Nhanderuete po'akaa ha'e Jesus Cristo regua. Ha'e ramo avakue ha'e kunhague oguerovia ramo omongaraipa.

¹³ Simão eteve voi ojerovia avi, ha'e omongarai ma rire Filipe re onhemoirũ oikovy, mba'eta hexa pyrã ha'e mba'emo porã ojapo rã oexa vy onhemondyipa.

Samaria py Pedro ha'e João ikuai jave guare

¹⁴ Samaria pygua kuery Nhanderuete ayvu ogueroviaa omombe'ua rã Jerusalém py apóstolo kuery ikuai va'e oendu okuapy. Ha'e rami vy ha'e katy omondouka Pedro ha'e João.

¹⁵ Ha'e py ha'e kuery ovaẽ vy ha'e pygua kuery re onhembo'e Nhe'ê Ky'a E'ỹ oĩ aguã,

¹⁶ mba'eta neĩ peteĩve re Nhe'ê Ky'a E'ỹ ndoguejy teri, Senhor Jesus rery rupi omongaraia rive.

¹⁷ Ha'e gui ha'e kuery áry apóstolo kuery opo omoĩ ramo ha'e kuery re Nhe'ê Ky'a E'ỹ ou.

¹⁸ Apóstolo kuery joe opo omoĩ rã Nhe'ê [Ky'a E'ỹ] oua Simão oexa vy apóstolo kuery pe ijavyu peráta ome'ê aguã re.

¹⁹ Ha'e vy aipoe'i:

— Xee voi ke xembopo'aka joe xepo amoĩ rã Nhe'ê Ky'a E'ỹ ou aguã — he'i.

²⁰ Ha'e rã Pedro ombovai:

— Ndeperáta too ndereve rekanhy aguã py, mba'eta rexa'ã peráta re ndejeupe rejogua aguã Nhanderuete ome'ê rive va'e.

²¹ Ndee ma mba'eve ndererekoĩ ore rami reiko aguã, neĩ rojapo va'e rejapo aguã voi, mba'eta ndepy'a py ha'eve e'ỹa rami reiko Nhanderuete renonde.

²² Ha'e nunga rupi ejeko rerova ndereko vaia gui, ha'e ejapukai Senhor pe. Xapy'a rei ombogue 'rã ndepy'a re remoi va'ekue.

²³ Mba'eta xee aexa rã opa marã rei teri reiko, nhuã py rami teko vai nembo'a ramo — he'i.

²⁴ Ha'e ramo Simão ombovai vy aipoe'i:

— Pejerure ha'vy Senhor pe pendeayvuague oiko e'ỹ aguã — he'i.

²⁵ Ha'e kuery Senhor ayvu omombe'u ha'e nhombo'epa ma vy Jerusalém tetã katy ju ojevy. Samaria pygua kuery rekoa ikuai va'e rupi omombe'u oje'oivy ayvu porã.

Eunuco reve Filipe onhemoirũague

²⁶ Ha'e gui Filipe pe peteĩ anjo Senhor-a guigua ijavyu. Ha'e vy aipoe'i:

— Epu'ã ke, tereo kuaray puku-a yke katy. Jerusalém gui Gaza katy tape oo va'e rupi tereo, tekoa e'ỹa rupi — he'i. Ha'e ramo opu'ã vy oo.

²⁷ Oo vy peteĩ ava oexa Etiópia pygua eunuco, huvixa kunha Candace mba'e peráta ha'e javi re opena va'ety. Ha'e va'e ma Jerusalém py ombojerovia aguã oague gui

²⁸ ojevya rupi uguapy oiny karóxa py. Ogueroayvu heravy profeta Isaías ombopara va'ekue.

²⁹ Ha'e ramo Nhe'ê aipoe'i Filipe pe:

— Enhemboja peva'e karóxa re, tereo ijyvy'iry — he'i.

³⁰ Ha'e ramo Filipe onha ovy vy oendu ogueroayvu rã profeta Isaías ombopara va'ekue. Ha'e vy aipoe'i:

— Reikuaa ma'ã roeroayvu heravy va'e?

³¹ Ombovai:

— Mba'exa vy tu aikuaa ta avave rei omombe'u porãve e'ỹ rã? — he'i. Ha'e rami vy oenoĩ Filipe karóxa py ojeupi vy hexeve oĩ aguã.

³² Ipara ogueroayvu oiny va'e po rami: “Vexa'i rami heraa ojuka aguã py. Ijukaarã renonde vexa'i okyrirĩa rami avi ha'e voi ndoipe'ai ojuru.

³³ Omo'yvy'i vy ha'eve e'ỹa rami uguerekoa. Mava'e nda'u omombe'u 'rã hamymino kuery? Mba'eta yvy gui hekove oi-pe'aa rire”, he'iague.*

³⁴ Ha'e ramo eunuco oporandu Filipe pe:

— Ajerure remombe'u aguã mava'e reko re pa profeta ijavyu, ojee ae tyrã pa amboae reko re? — he'i.

³⁵ Ha'e ramo Filipe omombe'u porãve. Po rami ipara oĩ va'e guive ombopy vy ixupe omombe'u oiny Jesus.

³⁶ Ha'e kuery oo tema tape rupi. Yy oĩa py ovaẽ vy eunuco aipoe'i:

— Apy ma yy oĩ. Nda'evei 'rã ri nda'u anhemongarai uka aguã?

³⁷ [Filipe ombovai:

* 8:33 Isaías 53.7,8

— Ndepy'a ha'e javi py rejerovia ramo ha'e've 'rã — he'i.

Ha'e ramo ombovai vy aipoe'i:

— Xee arovia Jesus Cristo Nhanderuete Ra'y oikoa — he'i.]

³⁸ Ha'e rami vy omombyta uka karóxa. Mokoive oguejy ovy yy py, ha'e Filipe omongarai.

³⁹ Yy gui oë jogueravy jave Senhor Nhe'ë oi'pe'a heravy Filipe. Ha'e ramo eunuco ndoexavei va'eri ovy'a reve oo oiny tape rupi.

⁴⁰ Ha'e va'e ririve Filipe ma Azoto tekoa py ra'e oikoa oikuaa vy oove ha'e gui. Ayvu porã omombe'u heravy tetã ha'e javi rupi, Cesaréia py ovaë peve.

9

Atos 22.4-11; 26.9-18

¹ Ha'e ramia ja Saulo ma Senhor remimbo'e kuery ojukapa aguã re ijayvu. Ha'e rami vy sacerdote yvateve va'ea py oo vy

² ojerure kuaxia para re Damasco tetã py oo aguã judeu kuery onhembo'eaty ikuai va'e rupi, Senhor reko rami avakue ha'e kunhague ikuai va'e ojou vy oipokua ha'e Jerusalém katy oguerupa aguã.

³ Ha'e rami vy oo tape rupi. Damasco py ovaë rai'i ovy py yva gui hendy va'e hexakamba xapy'a ijyvíry.

⁴ Ha'e rã yvy rupi ho'a vy peteĩ ayvu oendu:

— Saulo, Saulo, mba'e re tu xerereko axyxe rí? — he'i va'e.

⁵ Ha'e ramo oporandu:

— Mava'e tu ndee, Senhor?

Ombovai:

— Xee ma Jesus rereko axy rei va'e.

⁶ Epu'ã ke, eike tetã py. Ha'e py ma omombe'ua 'rã rejapo va'erã — he'i.

⁷ Ha'e gui irũ kuery hupive oo va'e ma okyriri reve opytapa. Ijayvu va'e oendu teĩ avave rei ndoexai okuapy.

⁸ Ha'e rã Saulo ma yvy gui opu'ã vy guexa oi'pe'a teĩ mba'e've rei ndoexavei. Ha'e gui ijyva re ogueraa Damasco katy.

⁹ Mboapy ára re oĩ oexa e'ỹ re. Ha'e ramia pukukue re ndokarui neĩ ndoy'ui.

Atos 22.12-16

¹⁰ Damasco tetã py oiko peteĩ temimbo'e Ananias hery va'e. Ha'e va'e pe Senhor ojexa uka vy aipoe'i:

— Ananias.

Ombovai:

— Senhor, apy ma aĩ — he'i.

¹¹ Senhor aipoe'i:

— Epu'ã ke, tereo tape hi'yvi va'e 'epy va'e rupi. Judas ro py revaë vy ke eka Tarso guigua Saulo. Mba'eta ha'e va'e ma onhembo'e oiny jave

¹² oexa kuri peteĩ ava Ananias hery va'e ovaë ouvy rã, hi'áry opo omoĩ oexa ju aguã — he'i.

¹³ Ananias ombovai:

— Ha'e rami avi Senhor, heta gui ma aendu ha'e va'e ava reko. Mbovykue rei ve'ỹ ma ojapo vai va'ekue Jerusalém py ikuai va'e re,

¹⁴ ha'e apy guarã ju kuaxia para ogueru sacerdote yvatekueve va'ea gui, nderery rupi ojapukai va'e kuery ojopypa heravy aguã — he'i.

¹⁵ Ha'e ramo Senhor aipoe'i:

— Tereo nho, mba'eta ha'e va'e ma xerembiguairã aiporavo va'ekue judeu e'ỹ va'e kuery pe xerery ogueraa aguã, huvixa kuery ha'e Israel kuery renonde guive.

¹⁶ Ixupe xee ae aikuaa uka 'rã xerery rupi oiko ramo omoingo axya 'rãa — he'i.

¹⁷ Ha'e ramo Ananias oo vy ovaë oo oĩa py. Hi'áry opo omoĩ reve aipoe'i:

— Irmão Saulo, Senhor Jesus tape rupi rejua rupi ojekuaa uka va'ekue xembou kuri rexa ju aguã, ha'e ndere Nhe'ë Ky'a E'ỹ anho oĩ aguã — he'i.

¹⁸ Ha'e ramove hexa gui pira pekue ramigua ho'a ramo oexa ju. Ha'e gui opu'ã vy onhemongarai uka.

¹⁹ Okarupa ma vy oendu imbaraetea. Ha'e vy Damasco py are'i opyta Jesus remimbo'e kuery reve.

Damasco py ayvu Saulo omombe'u oikovyague

²⁰ Ha'e ririve judeu kuery onhembo'eaty ikuai va'e rupi Saulo omombe'u oikovy Jesus ae Nhanderuete Ra'y oikoa.

²¹ Ha'e javive oendu va'e onhemondyipa. Ha'e vy aipoe'i okuapy:

— Peva'e e'ỹ ri ty'y Jerusalém py Jesus rery rupi ojapukai va'e ojukupaxe va'ety? Ha'e gui apy ju ou oipokuapa heravy aguã sacerdote yvatekueve va'ea katy — he'i okuapy.

²² Ha'e rã Saulo ma imbaraeteve oikovy. Ha'e vy Jesus ae Cristo oikoa omombe'u vy omokyrirĩmba judeu kuery Damasco py ikuai va'e.

²³ Kueve ma ririve judeu kuery jogueroayvu ojuka aguã.

²⁴ Ha'e rami teĩ ha'e kuery ojapoxe va'e Saulo oikuaa. Ha'e kuery ojuka vy ara py ha'e pyávy tetã kora rokẽ py oarõ okuapy.

²⁵ Ha'e rã temimbo'e kuery ma pyávy ogueraa vy peteĩ ajaka py omoĩ vy omboguejy tetã kora rovai.

Jerusalém ha'e Tarso py Saulo ovaëague

²⁶ Jerusálém py ovaë vy onhemoirũxe temimbo'e kuery mboae reve, teĩ ha'e kuery ha'e javive Jesus remimbo'e oikoa ndogueroviai vy okyje okuapy.

²⁷ Ha'e rã Barnabé ma apóstolo kuerya py ogueraa vy omombe'u porãmba tape rupi Senhor ojekuaa uka vy hexeve ijayvuague, ha'e ramo Damasco tetã py okyjea py e'ỹ Jesus rery rupi ijayvuague.

²⁸ Ha'e rami rire Jerusálém py oiko ha'e kuery reve. Okyje reve'ỹ ijayvu oikovy Senhor rery rupi.

²⁹ Grego ayvu py ijayvu va'e kuery pe ayvu omombe'u ha'e ijayvu ete oikovy ramo ha'e kuery ojukaxe ete.

³⁰ Ha'e nunga irmão kuery oikuaa vy Cesaréia peve ogueraa, ha'e gui Tarso katy ju omondouka.*

Igreja pygua heta-etave ovyague

³¹ Ha'e rami rire Judéia ha'e javi rupi igreja kuery ikuai porã, Galiléia ha'e Samaria rupi guive. Imbaraeteve oje'oivy Senhor renonde ojererokyjea rupi. Nhe'ẽ Ky'a E'ỹ ombopy'a guaxu ramo heta-etave ovy.

Enéias omongueraa ague

³² Ha'e gui Pedro ma opa rupi oaxa ovy vy Lida tetã py ovaë iky'a e'ỹ va'e kuerya py.

³³ Ha'e py ma peteĩ ava oexa Enéias hery va'e. Ha'e va'e ma oguata va'e'ỹ vy oito ma'etỹ re ma tupa py itui.

³⁴ Ixupe Pedro aipoe'i:

— Enéias, Jesus Cristo nemonguera. Epu'ã ke ha'vy, emoĩ porã ju nderupa — he'i ramove opu'ã.

³⁵ Ha'e ramo Lida ha'e Saronã pygua kuery ha'e javi oexa vy ojeko reroa Senhor re.

Dorcax omboetea jevyague

³⁶ Jope tetã py ma oiko peteĩ temimbo'e kunha Tabita hery va'e, Dorcax he'ia. Ha'e va'e ma pavẽ oikuaa mba'emo porã anho ojapo ha'e mba'emo ome'ẽ va'ety oikoa.

³⁷ Ha'e va'e jave imba'eaxy vy omano. Ha'e gui hetekue ombojaupa ma rire ombouve ju inony opy ja'o'i yvate oĩ va'e py.

³⁸ Jope gui ma Lida py Pedro oĩa namomyry'i. Ha'e ramo ha'e py oĩa temimbo'e kuery oendu vy mokoĩ avakue omondouka "Jaa vyvoi ke orereve" he'i aguã.

³⁹ Ha'e nunga Pedro oendu vy oo ha'e kuery reve. Oo py ovaë ramo opy ja'o'i yvate oĩ va'e py ogueraa. Imeve'ỹ va'e kuery ha'e javi ombojere rei, ojae'o reve oexa uka ao puku ha'e tupyja Dorcax oikove teri reve ojapo va'ekue.

⁴⁰ Ha'e gui ma Pedro omoẽmba vy guenapy'ã re oĩ, ha'e vy onhembo'e. Ha'e gui ojere vy hetekue ituia katy ju oma'ẽ. Ha'e vy aipoe'i:

— Tabita, epu'ã ke — he'i. Ha'e ramo guexa oipe'a vy oexa Pedro, ha'e vy ovy oiny.

⁴¹ Ha'e ramo ipo re ojopy vy omopu'ã. Ha'e gui iky'a e'ỹ va'e ha'e imeve'ỹ va'e kuery oenoĩmba vy oexa uka oikove va'e.

⁴² Ha'e nunga Jope pygua kuery ha'e javi oikuaa vy heta ojerovia Senhor re.

⁴³ Jope py ma Pedro opyta are, ipirekue re omba'eapo va'e Simão hery va'e ro py.

10

Xondaro ruvixa Cornélio reko re ijayvuague

¹ Cesaréia tetã py peteĩ ava oiko Cornélio hery va'e, xondaro kuery Itália pygua ruvixa.

² Ha'e va'e ma Nhanduete pe oiko ojererokyjea rupi, ngoo pygua kuery ha'e javi reve. Mba'emo ome'ẽ jepi ha'e py judeu kuery ikuai va'e pe, Nhanduete pe onhembo'e riae guive.

³ Ha'e gui ma kuaray ojero'a'i jave peteĩ anjo Nhanduetea guigua ojexa uka ixupe. Hexe onhemboja vy aipoe'i:

⁴ — Cornélio.

Ha'e ramo onhemondy'i reve anjo re oma'ẽ vy oporandu:

— Mba'e tu, Senhor?

Anjo ombovai:

— Nhanduete renonde ima'endu'aa renhembo'ea ha'e mba'emo reme'ẽ reikovya re.

⁵ Aỹ ma emondouka Jope tetã katy Simão Pedro hery va'e renoĩarã.

⁶ Ha'e va'e ma ye'ẽ yv'ry oiko, ipirekue re omba'eapo va'e Simão ro py — he'i.

⁷ Hexeve anjo ijayvu va'ekue ojepe'a ramove oenoĩ mokoĩ guembiguai ha'e peteĩ xondaro Nhanduete pe oiko va'e ixupe omba'eapo va'e regua.

⁸ Ha'e va'e kuery pe ha'e nungakue omombe'upa vy Jope tetã katy omondouka.

Pedro pe mba'emo ojexa ukaague

⁹ Ko'ẽ jevy tape rupi ha'e kuery oo vy tetã py ovaë rai'i ma oje'oivy jave, Pedro ma kuaray mbyte rire'i oo áry ojeupi onhembo'e aguã.

¹⁰ Inhembayyi vy okaruxea oendu. Ha'e gui temb'i'u ojapoa rã oarõ jave ixupe ojexa uka peteĩ.

¹¹ Ha'e vy oexa yva ojepe'a rã, ha'e oguejy ovy peteĩ ajukue ramigua tuvixa va'e, yvy rami omboguejya ijapy irundyve re.

¹² Ha'e va'e áry ma opa marãgua mymba ikuai irundy ipy va'e, yvy rupi otryryr ha'e guyra oveve va'e.

¹³ Ha'e gui ixupe peteĩ ijayvu va'e aipoe'i:

— Pedro, epu'ã ke, ejuka ha'e he'u.

¹⁴ Pedro ombovai:

— Any teve Senhor, mba'eta ha'u va'e'y' teri ha'eve'y' va'e nhomongy'aarā — he'i.

¹⁵ Mokoïguea ma ijayvu va'e aipoe'i:

— Nhanderuete oiky'a'o va'ekue pe “Ha'eve'y' va'e” 're eme — he'i.

¹⁶ Ha'e nunga mboapykue oiko rire ajukue ogueraa ju yva re.

Cornélio remimbou kuery Jope py ovaëague

¹⁷ Pedro mba'emo ojexa uka va'ekue mba'erā paa ndoikuaai rei oiny jave avakue ovaë ma Cornélio ombou va'ekue. Simão ro re oporandu jogueruvy rire okë py opyta.

¹⁸ Onhenduka vy oporandu:

— Simão Pedro hery va'e pa oï? — he'i.

¹⁹ Ha'e rā Pedro ma mba'emo oexa va'ekue re teri oikuaa pota oiny reve Nhe'ë aipoe'i iuxpe:

— Pe'i py mokoï ava ndereka va'e ikuai.

²⁰ Epu'ā ha'vy, eguejy ha'e tereo ha'e kuery reve. Erovia e'y' eme, mba'eta xee ae ambou uka — he'i.

²¹ Ha'e gui avakue ikuai py Pedro oguejy ma vy aipoe'i:

— Xee apy aï va'e ae pa xereka? Mba'e re tu peju?

²² Ha'e kuery ombovai:

— Xondaro ruvixa Cornélio ma ava heko porā ha'e Nhanderuete renonde ojererokyjea rupi oiko va'e, judeu kuery ha'e javi ima'endu'a porāa va'e guive. Ha'e va'e ae nerenoi uka, ngoo py revaë rā ndeayvu oendu aguā, anjo iky'a e'y' va'e aipoe'iague rami vy — he'i okuapy.

Pedro ijayvuague

²³ Ha'e rami rā Pedro ma ha'e kuery omoaë ranhe, omoinge opy. Ko'ë jevy opu'ā vy oo ha'e kuery reve. Jope pygua irmão kuery regua oo avi hupive.

²⁴ Ko'ë jevy Cesaréia py ovaëmba. Cornélio oarō vy omboatypa ma ra'e guetarā ha'e oirū kuery oayvuve va'e.

²⁵ Pedro ovaë ouvvy rā Cornélio oë ovaex' aguā. Guenapy'ā re oï vy ombojerovia.

²⁶ Ha'e ramo Pedro omopu'ā vy aipoe'i:

— Epu'ā katu, xee voi ma ava avi aiko — he'i.

²⁷ Hexeve ijayvu reve oike vy heta oexa ono'ō okuapy va'e.

²⁸ Ha'e vy ha'e kuery pe aipoe'i:

— Peë ma peikuaa porā rā ore judeu kuery amboaë regua re ronhemoirū aguā nda'evei, neï ronhemboja aguā voi. Ha'e rami teï xevy pe Nhanderuete oikuaa uka avave pe “Nda'evei va'e” neï “Ha'eve'y' va'e” ro'e aguā nda'evaia.

²⁹ Ha'e nunga rupi xerenoi uka ramoaju “Nda'evei” ha'e e'y' re. Aÿ ma aporandu: Mba'erā pa xerenoi uka?

³⁰ Cornélio ombovai:

— Kova'e ára reve vy irundy ára ma ojapo guï rami jave xero py anhembo'e ainyague, kuaray ojero'a jave.

Ha'e gui xerenonde ojexa uka petei ava ijao rexakamba va'e.

³¹ Ha'e va'e ma aipoe'i: “Cornélio, Nhanderuete renonde ma oendua renhembo'ea, ha'e mba'emo reme'ë reikovya re ima'endu'aa guive.

³² Emondouka ke Jope katy Simão Pedro hery va'e renoiarā. Ha'e va'e ma ye'ë yv'ry oiko, ipirekue re omba'eapo va'e Simão ro py”, he'i va'ekue.

³³ Ha'e ramo roenoï uka voi. Ha'eve vaipa rejuague. Aÿ ma apy roimba Nhanderuete renonde, ndevy Senhor omombe'u uka va'e ha'e javi roendu aguā — he'i.

³⁴ Ha'e ramo Pedro ijayvu vy aipoe'i:

— Aÿ ma aikuaa ma anhetë ae ra'e Nhanderuete petei regua rive joegui oayvuve va'e e'y'a.

³⁵ Ha'e rami 'rãgue py ha'e javive regua omonhemboja 'rã henonde ojererokyjea rupi ha'e ha'evea rami ikuai va'e.*

³⁶ Pova'e ayvu Nhanderuete ombou raka'e Israel kuery pe, Jesus Cristo re vy petei rami nhanemoingo porā aguā. Mba'eta ha'e javi regua Senhor oiko.

³⁷ Peë avi peikuaa ayvu Judéia ha'e javi rupi oendua va'ekue, Galiléia gui ijyvy va'ekue, nhomongaraia regua João omombe'u ma rire.

³⁸ Oendua Nhanderuete Jesus Nazaré pygua va'e ombopo'aka vy hexe Nhe'ë Ky'a E'y' omoïague. Ha'e ramo hexeve Nhanderuete oiko ramo opa rupi oiko vy mba'emo porā ojapo, nhomonguera guive anha kuery omoingo axya gui.

³⁹ Judeu vyv re ha'e Jerusalém tetā py mba'emo porā ojapo va'ekue ha'e javi ma ore roexapa. Ha'e gui ma vyvra re omoï vy ojukaa.

⁴⁰ Ha'e gui mboapy araa py Nhanderuete omboete ju, ha'e joupe oexa uka guive.

⁴¹ Heta va'e kuery ha'e javive pe'y' oexa uka, ha'e rā imombe'uarā Nhanderuete oiporavo va'ekue pe anho, ore kuery omanoague gui onhemboete ju ma rire hexeve rokaru ha'e roy'u va'ekue pe ae.

⁴² Orevy pe ma ayvu omombe'u uka heta va'e kuery pe, roikuaa uka aguā Nhanderuete omoïague oikove va'e ha'e omano va'ekue re oikuaa pota va'erā.

⁴³ Hekorā re ae profeta kuery ha'e javi ijayvu raka'e. Ha'e vy omombe'u hery rupi omboguepaa 'rāa hexe ojerovia va'e ha'e javi ojevavyague.

* 10:35 Romanos 2.11; 1 Timóteo 2.4-6

Judeu e'ÿ va'e kuery re Nhe'ê Ky'a E'ÿ oguejyague

⁴⁴ Ha'e nunga re Pedro ijayvu teri oiny jave ayvu re ojapxaka okuapy va'e ha'e javive re Nhe'ê Ky'a E'ÿ oguejy.

⁴⁵ Judeu e'ÿ va'e kuery pe voi Nhe'ê Ky'a E'ÿ ome'êa ramo judeu regua ojerovia va'e Pedro rupive ou va'ekue onhemondyipa,

⁴⁶ mba'eta oendu okuapy ayvu mboae py ijayvu rã Nhanderuete omboetea rupi.

Ha'e ramo Pedro oporandu:

⁴⁷ — Amongue nda'u ojoko 'rã yy py kova'e kuery romongarai agua? Mba'eta nhande rami avi kova'e kuery voi ojopy ra'e Nhe'ê Ky'a E'ÿ — he'i.

⁴⁸ Ha'e rami vy Jesus Cristo rery rupi omongarai uka. Ha'e ramo ojerure ha'e kuery reve opytave ranhe agua.

11

Pedro guekokue re ijayvuague

¹ Ha'e gui Judéia py apóstolo ha'e irmão kuery ikuai va'e oendu okuapy judeu e'ÿ va'e kuery voi Nhanderuete ayvu ogueroviaague.

² Ha'e gui Jerusalém py Pedro ovaê ramo jopire omboi ukaxe va'e regua ndojou porã vy aipoe'i:

³ — Kore revaê va'e ty'ÿ avakue opire omboi uka e'ÿ va'e ro py, ha'e kuery reve rekaru guive — he'i okuapy.

⁴ Ha'e ramo Pedro omombe'upa jypy'i guive jorire-rire oiko va'ekue. Ha'e vy aipoe'i:

⁵ — Xee ma Jope tetã py anhembo'e ainy jave, xeakanhy vy aexa pete'i ajukue tuvixa va'e ramigua oguejy ovy rã. Ijapy irundyve re omboguejya yva gui. Ha'e vy xea'i py peve ou.

⁶ Ipy katy ama'ê vy aexa ipy irundy va'e vvy re ikuai va'e, mymba inharô va'e, vvy rupi otyryry ha'e guyra oveve va'e.

⁷ Aendu avi pete'i ayvu "Pedro, epu'ã ke, ejuka ha'e he'u", he'i va'e xeivy.

⁸ Ha'e ramo xee aipoa'e: "Any teve Senhor, mba'eta xejuru py oike va'e'ÿ teri ha'eve'ÿ va'e nhomongy'ara", ha'e.

⁹ Te'ÿgue ju yva gui onhendu: "Nhanderuete oiky'a'o va'ekue pe 'Ha'eve'ÿ va'e' re eme", he'i va'e.

¹⁰ Ha'e nunga ma mboapykue oiko, ha'e gui ha'e nunga ha'e javi ma yva re ju heraa.

¹¹ — Ha'e va'e jave ete'i oo roia py ovaê mboapy avakue. Ha'e va'e kuery ma Cesaréia gui omondouka pyre xerenoiã.

¹² Ha'e ramo xeivy pe Nhe'ê ijayvu ha'e kuery reve aa agua akyje e'ÿ re. Xerupive oo avi kova'e irmão kuery mboapy meme ikuai va'e. Ha'e gui ma ha'e va'e ava ro py rovaê.

¹³ Ha'e ramo orevy pe omombe'u ngoo py anjo hi'ai rã oexaague, ha'e ixupe aipoe'iague: "Emondouka amongue Jope katy, ha'e eno'i uka Simão Pedro hery va'e.

¹⁴ Ha'e va'e ma ndevy omombe'u 'rã reo jepe agua regua ayvu, ndee ha'e ndero pygua kuery ha'e javive reve", he'iague.

¹⁵ Ha'e gui ma xeayvu ypy'i ramove Nhe'ê Ky'a E'ÿ oguejy ha'e kuery re, jypy nhandere oguejyague rami ae.

¹⁶ Ha'e ramo xema'endu'a Senhor aipoe'iague re: "João ma anhetê yy py nhomongarai. Ha'e rã peê ma penemongaraia 'rã Nhe'ê Ky'a E'ÿ reve", he'iague re.

¹⁷ Ha'e rami py ha'e kuery pe avi Nhanderuete ombou Senhor Jesus re jajerovia ramo nhandevy ombouague rami. Ha'e rami rire mava'e tu xee aiko Nhanderuete pe "Nda'evi" ha'e agua? — he'i.

¹⁸ Ha'e rami ijayvu rã ha'e kuery oendu vy nda'ivaivei. Ha'e vy Nhanderuete oguerovy'a vy aipoe'i:

— Ha'e rami vy ta'vy judeu e'ÿ va'e kuery pe voi teve Nhanderuete ome'ê ojeko rerova vy tekove ojopy agua — he'i okuapy.

Antioquia py temimbo'e kuery pe "Cristo pegua" 'eaague

¹⁹ Estêvão ojukaa rire oaimba va'ekue ma opa rupi oje'oi, Fenícia, Chipre ha'e Antioquia peve. Judeu kuery regua pe anho ranhe omombe'u ayvu.

²⁰ Ha'e gui ha'e kuery regua Chipre ha'e Cirene guigua ma Antioquia tetã py ovaê vy grego kuery pe voi omombe'u ayvu porã Senhor Jesus regua.

²¹ Ha'e kuery re Senhor po'akaa oĩ ramo heta ojerovia vy ojeko rerova Senhor re.

²² Ha'e nunga ma Jerusalém py igreja kuery ikuai va'e pe omombe'ua. Ha'e rami rã Antioquia katy omondouka Barnabé.

²³ Ha'e va'e ma ha'e py ovaê vy Nhanderuete omboaxya rupi ikuai oexa vy ovy'a, ha'e kuery ha'e javi omongeta guive ipy'a mbaraete reve Senhor re ikuai agua.

²⁴ Mba'eta hexe Nhe'ê Ky'a E'ÿ ha'e ojerovia etea anho oĩ ramo ava porayvu va'e oiko.* Ha'e ramo heta onhemboja Senhor re.

²⁵ Ha'e gui Tarso katy ju Barnabé oo Saulo reka vy.

²⁶ Ojou vy Antioquia py ogueru. Pete'i ma'etÿ pukukue re ha'e pygua igreja kuery reve ikuai vy heta ombo'e. Antioquia py temimbo'e kuery ikuai va'e jypy'i oenoia Cristo pegua.

Karuai oiko va'erã re Ágabo ijayvuague

²⁷ Ha'e va'e jave py Antioquia py profeta kuery regua ou Jerusalém gui.

* 11:24 Atos 4.36,37

²⁸ Peteĩ ha'e kuery regua Ágabo hery va'e opu'ã vy Nhe'ẽ gui omombe'u yvy jave re karuai oiko 'rãa. Ha'e nunga oiko ae ma huvixave Cláudio oĩ jave py.

²⁹ Ha'e ramo temimbo'e kuery jogueroayvu okuapy mba'emo omondouka aguã Judéia py irmão kuery ikuai va'e pe. Peteĩ-teĩ ojoua'i rami 'rã omondouka oipytyvõ vy.

³⁰ Ha'ekue rami ae ha'e kuery ojapo. Ha'e vy Barnabé ha'e Saulo po py ogueraa uka igreja re opena va'e kuery pe.

12

Huvixa Herodes apóstolo Tiago ha'e Pedro oguereko axyague

¹ Ha'e va'e jave py huvixave Herodes ojopy uka igreja kuery ikuai va'e regua oguereko axy aguã.

² Ha'e rami vy kyxe py ojuka uka João ryke'y Tiago.

³ Ha'e nunga judeu kuery ojou porã rei okuapya oikuaa vy oguereko axyve ju. Ha'e vy Pedro voi ojopy uka, ngaru mbojape imbovuva revegua e'ỹ va'ea ára.

⁴ Ojopy uka vy ombo'a uka nhuã py. Xondaro kuery po py omboaxa opena aguã. Irundy aty ikuai xondaro kuery, peteĩ-teĩ aty irundy xondaro oguereko harõarã, Páscoa ára rire heta va'e kuery oendua py omboayvua aguã.

⁵ Ha'e rami py Pedro nhuã py oĩ, teĩ hexe igreja kuery ikuai va'e onhembo'e tema Nhanderuete pe.*

⁶ Pyávy huvixa Herodes omboayvu e'ỹ mbove'i, Pedro oke oupy mokoĩ xondaro mbyte, mokoĩ corrente py ojokuague reve. Xondaro kuery mboae ma okẽ py ikuai nhuã oarõa py.

⁷ Ha'e gui peteĩ anjo Senhor-a guigua ou xapy'a ramo peteĩ hendy va'e omoexakãmba nhuã ropy rupi. Pedro re opoko vy omomyĩ. Ha'e vy aipoe'i:

— Epu'ã pojava — he'i ramove ojokuague ho'apa ipo gui.

⁸ Anjo aipoe'i:

— Ejeku'a jokua ke, ha'e emoĩ ndepy regua. — Ha'ekue rami ojapo ramo aipoe'ive ju: — Emoĩ ndeao puku, ha'e eju xerakykue — he'i.

Nhuã gui Pedro oguenoẽa ague

⁹ Ha'e gui Pedro oẽ vy hakykue oo. Ndoikuaai ovy anhetẽ paa anjo opo py ojapo va'e, “Aexa ra'u rive po” he'i vy.

¹⁰ Xondaro ikuai va'e jypy ha'e mokoĩa ma oaxa vy ovaẽ jogueravy okẽ ferro guigua tetã katy oĩ va'e py. Ha'e va'e ma ha'e ae ojepe'a. Ha'e gui oẽ vy peteĩ tape rupi jogueraa. Oove'ia py anjo ojepe'a ixugui.

¹¹ Ha'e ramo mae ma Pedro oikuaa xapy'a vy aipoe'i:

— Aỹ ma aikuaa anhetẽ Senhor ombou ra'e ojea pygua anjo, Herodes po gui xereraa jepe aguã, ha'e judeu kuery ojapoxe va'e ha'e javi gui guive — he'i.

¹² Hexe oiko va'e re oikuaa pota vy onhembopy'a oo aguã João Marcos hery va'e xy Maria ro py. Ha'e py ma heta ikuai onhembo'e vy.

¹³ Kora rokẽ re ombota ramo ou peteĩ tembiguai kunha'i Rode hery va'e, mava'e paa oexa aguã.

¹⁴ Pedro ayvu oendu kuaa vy ovy'a vaipa vy hexarai omoinge aguã. Onha reve opy ojevye Pedro okẽ py hi'aĩa omombe'u aguã.

¹⁵ Ha'e ramo ha'e kuery aipoe'i ixupe:

— Naneakã porãvei teve — he'i okuapy. Ha'e rami teĩ omombe'uve ha'e etea.

Ha'e ramo aipoe'i ju:

— Inhe'ẽ rive ri nhi'ã — he'i okuapy.

¹⁶ Ha'e ramia ja Pedro ombotave tema ho'amy. Ha'e ramo mae ma ha'e kuery oipe'a vy ha'e ri ty ra'ea oexa vy ndoikuaai rei okuapy.

¹⁷ Ha'e ramo opo py “Pekyrirĩ” he'ia rami ojapo vy omombe'u marã rami pa nhuã gui Senhor oguenoẽ ukaague. Ha'e vy aipoe'i:

— Pemombe'u ke Tiago pe, irmão kuery pe guive — he'i. Ha'e gui oẽ ju vy amboae katy oo.

¹⁸ Ko'ẽmba rã xondaro kuery nda'vevei rei ikuai, mba'e pa Pedro re oikoague ndoikuaai vy.

¹⁹ Herodes oeka uka teĩ ndojoui. Ha'e rami vy nhuã rarõa kuery omboayvu ma vy ojuka ukapa. Ha'e vy Judéia gui ma Cesaréia katy ju oo. Ha'e py oiko are.

Herodes omanoague

²⁰ Ha'e va'e jave Herodes joo rami e'ỹ ijayvu Tiro ha'e Sidom pygua kuery reve. Ha'e ramo oĩa py ha'e kuery oupa peteĩ rami ojexa uka aguã. Ha'e rami vy huvixa rembiguai Blasto pe onhepytyvõ uka rire ojerure okuapy peteĩ rami ju ikuai aguã re, mba'eta huvixa yvy rupi ho'u va'erã ojou vy.

²¹ Ha'e gui oa'angaague ára py Herodes omoĩ ao iporãve va'e. Tenda openaaty áry oguapy vy ijayvu ha'e kuery pe.

²² Ha'e ramo ha'e kuery ojapukai:

— Nhanderuete ae teve ijayvu, ava e'ỹ — he'i okuapy.

²³ Ha'e ramove anjo Senhor-a guigua omomba'eaxy huvixa, Nhanderuete nomboetei ramo. Haxo ho'upa rã omano.

²⁴ Ha'e gui Nhanderuete ayvu oenduave tema opa rupi, ha'e ojerovia va'e kuery hetave ovy.*

* 12:5 Mateus 18.19,20

* 12:24 1 Pedro 1.24,25

²⁵ Barnabé ha'e Saulo ma ojapo 'rã va'ekue ojapopa ma vy ojevye ju Jerusalém gui. Ngupive ogueraa avi João Marcos hery va'e.

13

Jypy'i Barnabé ha'e Saulo ayvu momba'ua rupi oguataague

¹ Antioquia pygua igreja kuery regua ikuai profeta ha'e nhombo'ea kuery: Barnabé, Simeão Níger hery va'e, Cirene pygua Lúcio, huvixave Herodes ryvy ranga Manaém ha'e Saulo.

² Ha'e kuery ma Senhor pe okaru e'ÿ re ikuai ramo Nhe'ê Ky'a E'ÿ aipoe'i:

— Peiporavo xeve Barnabé ha'e Saulo, xee aenoíague rami ha'e kuery omba'eapo agüã — he'i.*

³ Ha'e ramo okaru e'ÿ re onhembo'e okuapy ranhe. Ha'e gui ha'e kuery áry opo omoi reve omondouka.

Onhembo'e vaikue va'e Elimas reko re ijayvua

⁴ Nhe'ê Ky'a E'ÿ omondouka ramo Selúcia peve ranhe oo. Ha'e gui yy rupi oje'oi Chipre katy.

⁵ Salamina py ovaë vy Nhanderue te ayvu omombe'u judeu kuery onhembo'eaty ikuai va'e rupi. Ipytyvõarã ogueraa avi João.*

⁶ Ypa'ü oaxapa vy Pafos tetã peve oo. Ha'e py oexa peteí judeu onhembo'e vaikue va'e profeta ramigua, Barjesus hery va'e.

⁷ Ha'e va'e ma huvixa Sérgio Paulo irü oiko. Ha'e rã huvixa ma ava hi'arandu va'e. Ha'e rami vy Barnabé ha'e Saulo oenoí vy oendu porã pota Nhanderue te ayvu omombe'u rã.

⁸ Ha'e rami teí onhembo'e vaikue va'e Elimas hery va'e ojokoxe huvixa ojerovia e'ÿ agüã.

⁹ Ha'e gui Saulo Paulo avi hery va'e re ma Nhe'ê Ky'a E'ÿ anho oi ramo oma'ê porã ranhe Elimas re. Ha'e vy aipoe'i:

¹⁰ — Anha ra'y, ndere ma renhombotavyva ha'e opa marã rei reiko agüã anho oi. Heko porã va'e re repu'ã rei. Nderepyty'ui ta ri ty'y Senhor reko amboae rami rei reikuaa ukaa gui?

¹¹ Aÿ ma ndere Senhor omoi 'rã opo nderexavei agüã. Ha'e ramo mbovy ára rei ve'ÿ nderexavei 'rã kuaray — he'i. Ha'e ramove hexe ho'a yvyxi ramigua pytü va'e. Ha'e ramo ojere-jere oikovy, oipota ijyva re imboguataarã.

¹² Mba'emo oiko va'e huvixa oexa vy oguerovia ayvu, Senhor re ombo'e rã oguerovy'a guive.

Jerusalém katy ju João Marcos ojevyaague

¹³ Pafos gui ma Paulo yy rupi oo. Oirü kuery reve oje'oi Panfilia regua Perge tetã re. Ha'e rã João ma ha'e kuery gui oja'o vy Jerusalém katy ju ojevye.

¹⁴ Ha'e rã ha'e kuery ma Perge gui oove Pisídia regua Antioquia tetã peve, ha'e sábado ára py judeu kuery onhembo'eaty py oo vy uguapy.

¹⁵ Lei ha'e profeta ombopara va'ekue ogueroayvupaa ma rire onhembo'eaty pygua ruvixa aipoe'i uka ha'e kuery pe:

— Xeryvy kuery, heta va'e kuery pemombaraete agüã regua ayvy pereko ri vy ke pemombe'u.

Antioquia py Paulo ayvu omombe'uaque

¹⁶ Ha'e ramo Paulo opu'ã vy opo py ojapo “Pekyriri” he'ia rami. Ha'e vy aipoe'i:

— Avakue Israel regua ha'e Nhanderue te renonde pejererokyjea rupi pendekuai avi va'e, pejapyxaka ke.

¹⁷ Nhande Israel kuery Ruete ma oiporavo raka'e nhaneramoí kuery, ha'e gui ovyv re'ÿ ikuai pukukue re omboetave, Egito vvy re. Ha'e gui opo'akaa rupi oguenoemba vy

¹⁸ quarenta ma'etÿ re tekoa e'ÿa py ikuai jave ogueropo'aka ha'e kuery reko vai.

¹⁹ Ha'e gui sete regua Canaã vvy re ikuai va'ekue omomba vy ijyvykue ome'ê ha'e kuery vvyrã,

²⁰ quatrocentos e cinqüenta ma'etÿ rai'i rire. Ha'e va'e rire omoi herekoarã kuery, profeta Samuel oikoa ára peve.

²¹ Ha'e gui nguvixaverã re ha'e kuery ojerure okuapy ramo Nhanderue te omoi uka Benjamim regua Quis ra'y Saul. Ha'e va'e ma quarenta ma'etÿ re oi.

²² Ha'e gui ma oipe'a vy hekovia Davi ju oiporavo huvixaverã. Ha'e va'e reko re ijayvu vy aipoe'i: “Jessé ra'y Davi ma ava xee ae rami ipy'a va'e ajou, xee aipota va'e ojapopa va'erã”, he'i va'ekue.

²³ Ha'e va'e ramymino kuery regua Nhanderue te ijayvuague rami vy omoingo Israel kuery reraa jepearã. Ha'e va'e ma Jesus.

²⁴ Ha'e va'e ojekuaa uka e'ÿ mbove João ranhe Israel kuery ha'e javive pe omombe'u oikovy jajeko rerova vy nhandemongarai uka agüã regua.

²⁵ Ha'e gui João ojapo 'rã va'ekue ojapopa ma vy aipoe'i: “Xee ma pexa'ãa ramigua e'ÿ. Ha'e rã xerakykue rima ou oiny peteí. Ha'e va'e gui ma xe'yvyti ete vy nei ipy regua amboi agüã voi nda'evei”, he'i va'ekue.

²⁶ — Ke'y kuery Abraão ramymino kuery ha'e Nhanderue te renonde pejererokyjea rupi pendekuai va'e, nhandevy pe ae oikuaa uka ayvu jaa jepe agüã regua.

²⁷ Mba'eta Jerusalém pygua kuery nguvixa kuery reve ndoikuaai okuapy Jesus, nei profeta kuery nhombo'ea noendu kuaai guive, sábado ára nhavõ ogueroayvu teí, mba'eta ojuka uka raka'e Jesus, profeta kuery ijayvuague ojeupity agüã rami.

* 13:2 Atos 9.15,16; Romanos 1.1

* 13:5 Apy João hery va'e ma Apóstolo João e'ÿ, ha'e rã João Marcos, Jesus rekokuie ombopara va'erã va'e (versículos 13-15).

²⁸ Neĩ peteĩ henda py ojapo vaiague ha'e kuery ndoikuaai va'eri huvixa Pilatos pe ojerure okuapy ojuka aguã re.

²⁹ Hekorã ipara oiny va'e ojeupity aguã rami ogueroko rire omboguejya vyvra gui, ha'e vy tuparã ojapo pyre py onhono porãa.

³⁰ Ha'e rami teĩ omanoague gui Nhanderuete omboete ju.

³¹ Ha'e ramo mbovy ára re rei e'ỹ ojexa uka oikovy, Galiléia guive Jerusalém katy hexeve oje'oi va'ekue pe. Ha'e va'e kuery ma imombe'uarã ikuai heta va'e kuery pe.

³² Ha'e gui ore ju pëvy romombe'u ayvu porã Nhanderuete nhaneramoĩ kuery omoingo porã aguã re ijayvuague regua.

³³ Ha'e kuery ramymino nhandekuai va'e pe Nhanderuete ojapo ha'e nungakue ha'e javi ojeupity aguã rami, Jesus omboete jevya py, mba'eta mokoña Salmo re ipara oña rami vy: “Ndee ma Xera'y, ange xee romoingo”, he'iaque.*

³⁴ Ha'e rami vy ae omanoague gui Nhanderuete omboete ju ivaiipa e'ỹ aguã, aipoe'iaque rami: “Pendeivy pe ajapo 'rã Davi pe xeyvuague iky'a e'ỹ ha'e oguerovia pyrã ojeupity aguã rami.”*

³⁵ Ha'e rami vy amboae Salmo py aipoe'i avi: “Nderejai 'rã neremimbo'e retekue iky'a e'ỹ va'e ivaiipa aguã”, he'i va'ekue.*

³⁶ Mba'eta anhetẽ Nhanderuete oipotaa rami vy heta va'e kuery re Davi opena ma rire oke vy oo nguu kuery ooague py, ha'e ramo hetekue ivaiipa.

³⁷ Ha'e rã Nhanderuete omboete ju va'e retekue ma nda'ivaipai.

³⁸ — Ha'e nunga rupi ke'y kuery, peikuaa pota, mba'eta pëvy pe romombe'u hexe vy jejavya ombogueepaa aguã regua.

³⁹ Hexe vy ma ha'e javive ojerovia va'e omboeko porãa 'rã opa mba'e vai gui. Ha'e rã Moisés lei oea va'ekue rupi ma nanhanemboeko porãai 'rã.

⁴⁰ Peikuaa pota ha'vy profeta kuery aipoe'iaque pendere oiko e'ỹ aguã:

⁴¹ “Ma'ẽ ke, peẽ pejojoi rei va'e. Penhemondyi ha'e pekanhy, mba'eta pende'ára py xee ajapo 'rã mba'emo ndaperoviai va'erã, pëvy omombe'ua teĩ”, he'iaque.*

Sábado jevy py ayvu omombe'u aguã re ojerure okuapyague

⁴² Paulo ha'e Barnabé oẽ rã ojerure okuapy sábado jevy py ha'ekue rami ae ju ijayvu aguã.

⁴³ Onhembo'eaty gui ono'õ va'ekue oopa rã judeu kuery ha'e judeu reko rami Nhanderuete pe ikuai va'e heta oje'oi Paulo ha'e Barnabé rakykue. Ha'e ramo omongeta Nhanderuete porayvua re riaa ikuai aguã.

Judeu e'ỹ va'e kuery pe ju Paulo ha'e Barnabé ayvu omombe'uague

⁴⁴ Sábado jevy py tetã pygua ha'e javi rai ou Nhanderuete ayvu oendu aguã.

⁴⁵ Ha'e rã judeu kuery ma heta ijaty va'e oexa vy ndojou porãi. Ha'e rami vy ijayvu vaikue, Paulo ayvu re ijayvu rei guive.

⁴⁶ Ha'e ramo Paulo ha'e Barnabé okyjea py e'ỹ ijayvu vy aipoe'i:

— Peẽ kuery pe ranhe ma romombe'u Nhanderuete ayvu. Ha'e rã napenduxei vy pexa uka tekove marã e'ỹ pejopy aguã nda'eveia. Ha'e rami rã judeu e'ỹ va'e kuery ikuai py ju 'rã roo.

⁴⁷ Mba'eta ha'e rami aguã rami ae Senhor oremoĩ. Ha'e vy aipoe'i: “Xee romoĩ judeu e'ỹ va'e kuery moexakãarã, yvy jave re ikuai va'e oo jepe aguã”, he'i va'ekue.*

⁴⁸ Ha'e rami ijayvu rã judeu e'ỹ va'e kuery oendu vy ovy'a okuapy, Senhor ayvu oguerovy'a guive. Tekove marã e'ỹ jopyarã oiporavo pyre ha'e javive oguerovia.

⁴⁹ Ha'e rami rã ha'e va'e yvy ha'e javi rupi oendupaa Senhor ayvu.

⁵⁰ Ha'e rami teĩ judeu kuery ombopoxy kunhague judeu reko rami ikuai va'e yvatekueve, tetã pygua ruvixa kuery guive. Ha'e rami vy omoingo axy Paulo ha'e Barnabé vy omoxẽ ovyv gui.

⁵¹ Ha'e ramo ha'e kuery opy regua gui yvy ku'i oity-ity oikuaa uka aguã ha'e kuery oea ma ovyva. Ha'e gui Icônio katy ju oje'oi.*

⁵² Ha'e rã temimbo'e kuery ikuai va'e ma opa mba'e py ovy'a tema okuapy Nhe'ẽ Ky'a E'ỹ reve vy.

14

Icônio py Paulo ha'e Barnabé ovaëague

¹ Icônio tetã py ma Paulo ha'e Barnabé ma judeu kuery onhembo'eaty py ovaẽ vy nhombo'e. Ha'e ramo heta ikuai va'e oguerovia, judeu ha'e grego kuery guive.

² Ha'e rã judeu kuery oguerovia e'ỹ va'e ma omopu'ã rei judeu e'ỹ va'e kuery, ombopoxypa irmão kuery pe.

³ Ha'e ramive ma ikuai are ha'e py, okyjea py e'ỹ ijayvu Senhor gui. Ha'e rã Senhor ma ha'e kuery po py hexa pyrã ha'e nhomondyipaarã ojapo vy oikuaa uka ayvu nhomboaxya regua anhetã.

⁴ Ha'e rami rire tetã pygua kuery oja'opa. Peteĩ regua oo judeu kuery re, ha'e rã amboae kuery ma apóstolo kuery re oje'oi.

⁵ Ha'e rami vy judeu e'ỹ va'e ha'e judeu kuery nguvixa kuery reve opu'amba rei okuapy ojojai reixe ha'e ita py ojapipa aguã.

* 13:33 Salmo 2.7 * 13:34 Isaías 55.3 * 13:35 Salmo 16.10 * 13:41 Habacuque 1.5 * 13:47 Isaías 49.6 * 13:51 Lucas 10.10,11

⁶ Ha'e nunga ha'e kuery oikuaa vy ojava Licaônia regua Listra ha'e Derbe tetã katy, ha'e katy rai-rai'i ikuai va'e rupi voi.

⁷ Ha'e py ju omombe'u ayvu porã.

Listra py peteĩ uguata e'ỹ va'e omongueraague

⁸ Listra py uguapy oiny peteĩ ava ipy pirupa va'e, itui'i guive ndoguatai va'e, neĩ peteĩgue ma uguata va'e e'ỹ.

⁹ Ha'e va'e ava ma Paulo ayvu re ojapaxaka oiny ramo hexe oma'ẽ vy oexa okuera aguã ojerovia etea.

¹⁰ Ha'e rami vy ijayvu atã reve aipoe'i ixupe:

— Epu'ã ke ndepy re — he'i ramove opo reve opu'ã vy uguata.

¹¹ Heta va'e kuery Paulo ojapo va'e oexa vy ojapukai Licaônia ayvu py, aipoe'i:

— Nhanderuete kuery teve avakue rami ojeapo vy ogeuejy ra'e nhandea peve — he'i okuapy.

¹² Ha'e rami vy Barnabé pe “Júpiter”, ha'e rã Paulo pe ma “Mercúrio” he'i okuapy, mba'eta ijayvuvu ramo.*

¹³ Ha'e Júpiter pegua sacerdote oĩ va'e ma ixupegua templo tetã kyvõ katy oĩ va'e gui ou vy tetã rokẽ katy ogeru vaka ha'e ngora yvyoty guigua. Heta va'e kuery reve mymba ojukaxe ha'e kuery pe.

¹⁴ Ha'e nunga apóstolo kuery Barnabé ha'e Paulo oendu vy oao omondoro reve opo heta va'e kuery mbyte py. Ha'e vy ojapukai:

¹⁵ — Avakue, mba'e re tu guĩ ramigua pejapo ta? Ore voi ma ava peẽ ramigua. Pendua rami ae avi roendu. Ha'e rami vy pëvy romombe'u ayvu porã guĩ ramigua ovare'ỹ va'e pejapoa gui pejeko rerova aguã Nhanderuete oikove va'e re. Ha'e va'e ae yva, yvy, ye'ẽ ha'e opa mba'e ikuai va'e apoare oiko.*

¹⁶ Ymagua kuery pe oea raka'e peteĩ-teĩ regua ha'e kuery ae reko rami ikuai aguã.

¹⁷ Ha'e rami teĩ ikuua ukaarã ndoeja e'ỹi guive, mba'eta pendeivy pe ojapo porã vy yva gui ombou oky ha'e mba'emo hi'a aguã ára. Pekarú ha'e pendeivy'a py pevy'a aguã nomboatai — he'i.

¹⁸ Po rami ijayvu teĩ haxy ete py ojoko heta va'e kuery ha'e kuery pe mymba ojuka taa.

Paulo ita py ojapipaaague

¹⁹ Ha'e rami jave Antioquia ha'e Icônio gui judeu kuery ou vy ombopoxpa heta va'e kuery. Ha'e rami vy Paulo ojapipa okuapy ita py. Ombotyriry heravy tetã gui mombyry'i, “Omano ma po” he'i vy.

²⁰ Ha'e gui temimbo'e kuery ombojeje rei ramo opu'ã, ojevuy ju tetã py.

Ko'ẽ jevy Barnabé reve Derbe katy oo.

²¹ Ha'e va'e tetã py ayvu porã omombe'u vy heta ojou temimbo'erã. Ha'e gui ma Listra, Icônio ha'e Antioquia katy ju ojevuy.

²² Temimbo'e ikuai va'e ombopy'a guaxu ovy vy omongeta ojerovíaa rupi riaa ikuai aguã.

— Jaiko axy vy 'rãe jaika Nhanderuete pegua po'akaa py — he'i.*

²³ Peteĩ-teĩ igreja rupi okaru e'ỹ re onhembo'e rire oiporavo igreja re opena va'erã. Ha'e Senhor re ojerovia va'e kuery ma omboaxa ovy ipo py.

²⁴ Pisídia yvy oaxa vy Panfília katy ju jogueraa.

²⁵ Perge py ayvu porã omombe'u rire ogeuejy jogueravy Atália katy.

²⁶ Ha'e gui yy rupi oo Antioquia katy, mba'eta ha'e py Nhanderuete po py jypy'i omboaxa va'ekue mba'emo ojapo 'rã va'ekue ojapo aguã.†

²⁷ Ha'e py ovaẽ vy omboatyra igreja kuery, ha'e omombe'u uguataa rupi Nhanderuete ojapo va'ekue ha'e javi, ha'e okẽ judeu e'ỹ va'e kuery ojerovia aguã regua oipe'aague guive.

²⁸ Mbovy ára rei e'ỹ ikuai ha'e py temimbo'e kuery reve.

15

Judeu e'ỹ va'e kuery joo rami e'ỹ-e'ỹ ijayvu okuapyague

¹ Ha'e gui ma Judéia gui amongue ou vy ombo'e po rami irmão kuery:

— Orerekorã Moisés oejague rami vy pendeire napemboi ukai ri vy ndapeo jepei 'rã — he'i okuapy.

² Ha'e rami rã ha'e kuery reve Paulo ha'e Barnabé joo rami e'ỹ-e'ỹ ijayvu ramo jogueroayvu Jerusalém katy ha'e va'e mokoĩ oo aguã amboae kuery ha'e pygua reve, apóstolo ha'e igreja re opena va'e kuery pe oikuaa pota uka aguã ha'e nunga re.*

³ Ha'e rami vy igreja kuery omoudouka vy mombyry'i peve omoirũ heravy. Ha'e ramo Fenícia ha'e Samaria rupi oaxa vy judeu e'ỹ va'e ojeko rerovaague omombe'u oje'oivy. Ha'e rami rã irmão kuery ha'e javive oendu vy ovy'a vaipa.

⁴ Jerusalém py ovaẽ ramo igreja kuery omovaẽ porã'i, apóstolo ha'e opena va'e kuery reve. Ha'e ramo omombe'upa uguataa rupi Nhanderuete ojapo va'ekue.

⁵ Ha'e rã amongue fariseu regua Jesus re ojerovia va'e ma opu'ã vy aipoe'i:

— Ojerovia va'e kuery ma opire omboi uka ramo 'rãe ha'eve, ha'e nhambo'e avi 'rã lei Moisés oea va'ekue rami ikuai aguã — he'i okuapy.

* 14:12 Júpiter ma ha'e kuery ruete ramigua yvateve va'e, ha'e rã Mercúrio ma tuuete ramigua ijayvu kuaave va'e. * 14:15 Êxodo 20.11, Salmo 146.6 * 14:22 2 Timóteo 3.10-12; 1 Pedro 4.12-14 † 14:26 Mokoĩ henda py oĩ raka'e tetã Antioquia hery va'e. Apy omombe'u va'e ma Síria regua, igreja kuery ikuai. Ha'e rã capítulo 13, ha'e 14.21 py ijayvua ma Pisídia regua. * 15:2 Gálatas 2.1-5; 5.1-6

Jerusalém py opena va'e kuery nhomboatyague

⁶ Ha'e ramo apóstolo ha'e igreja re opena va'e kuery nhomboaty okuapy ha'e nunga re oikuaa pota aguã.

⁷ Joo rami e'ÿ-e'ÿ ijayvu ramo Pedro opu'ã vy aipoe'i:

— Irmão kuery, peẽ peikuaa yma Nhanderuete xeporavoague penembyte gui, judeu e'ÿ va'e kuery pe ayvu porã amombe'u rã oendu vy ojerovia aguã.*

⁸ Ha'e gui Nhanderuete nhande kuery pavẽ py'a re oĩa oikuaapa va'e vy ha'e kuery pe voi oikuaa uka ojou porãa, mba'eta ha'e kuery pe Nhe'ẽ Ky'a E'ÿ ombou, nhandevy ombouague rami avi.

⁹ Nhande, neĩ ha'e kuery regua nanhanderayvuvei joegui, mba'eta ha'e kuery ojerovia rã oiky'a'opa avi ipy'a.

¹⁰ Ha'vy aÿ, mba'e re tu Nhanderuete pe “Nda'evei” peje ri? Mba'eta temimbo'e kuery pembovoyixe pekuapy nhaneramoĩ kuery ndogueropo'akai va'ekue py, neĩ nhande voi ndajaropo'aka kuaai.*

¹¹ Ha'e rami 'rãgue py jarovia nhande voi Senhor Jesus nhanemboaxy ramo ae jaa jepea, ha'e kuery rami avi — he'i.

Tiago ijayvuague

¹² Ha'e gui ma heta va'e kuery ha'e javive okyiriri okuapy ojapyxaka aguã Barnabé ha'e Paulo omombe'u rã hexa pyrã ha'e nhomondyipaarã ipy Nhanderuete ojapo va'ekue, judeu e'ÿ va'e kuery tekoa rupi oguataa rupi.*

¹³ Ha'e kuery ijayvupa ma rire Tiago ju ijayvu. Ha'e vy aipoe'i:

— Irmão kuery, pejapyxaka xeayvu re.

¹⁴ Simão ranhe omombe'u kuri judeu e'ÿ va'e pe jypy'i Nhanderuete ojekuaa ukaague, ha'e kuery regua gui oiporavo aguã hery rupi ikuai va'erã.

¹⁵ Ha'e rami ae avi profeta kuery ayvu ipara oinya. Mba'eta aipoe'i:

¹⁶ “Ha'e nunga oiko ma rire ajevy vy ajapo ju 'rã Davi ro ho'apa va'ekue. Ho'aague gui ajapo jevy vy amoatyromba 'rã,†

¹⁷ amboae kuery voi oeka aguã Senhor, judeu e'ÿ va'e kuery xerery rupi aenoĩ va'e ha'e javi voi”,

¹⁸ he'i Senhor yma voi ha'e nunga kuaa ukaare.*

¹⁹ Ha'e nunga rupi xee aikuaa ramo nda'evei nhamoango rei aguã judeu e'ÿ va'e kuery Nhanderuete re ojeko rerova va'ekue.

²⁰ Ha'e kuery pe nhambopara 'rã onhemongy'a e'ÿ aguã mba'emo ra'angaa py, neĩ itavy reia py, ha'e ho'u e'ÿ aguã xo'o ojyryvipy vy ojuka pyre ro'okue neĩ huguykue.

²¹ Mba'eta yma guive Moisés ombopara va'ekue rupi ijayvu va'e ikuai ae tetã nhavõ rupi. Judeu kuery onhembo'eaty py voi sábado ára nhavõ ogueroayvua 'rã.*

Antioquia katy ayvu ogueraa ukaa ague

²² Ha'e ramo apóstolo ha'e opena va'e kuery igreja ha'e javi reve ojou porã ha'e kuery regua avakue oiporavo ha'e omoudouka aguã Antioquia tetã katy, Paulo ha'e Barnabé reve. Ha'e rami vy oiporavo Judas Barsabás 'epy va'e ha'e Silas, irmão kuery omboeteve va'e meme.

²³ Ha'e va'e kuery po py ogueraa uka po rami ombopara va'ekue: “Irmão kuery apóstolo ha'e igreja re opena va'e orekuai va'e, kova'e kuaxia rombopara irmão kuery judeu e'ÿ va'e regua, Antioquia, Síria ha'e Cilícia py pendekuai va'e pe. Pendevy roxarua.

²⁴ Roikuaa karamboae amongue romoudouka ramo e'ÿ orembyte gui [oje'oi va'ekue] penemoingo eta reiaque, ayvu py penemoango rei vy.

²⁵ Ha'e nunga rupi peteĩ rami roikuaa porã ma vy rojou porã amongue avakue roiporavo vy peẽ kuerya py rombou aguã orembiayvu Barnabé ha'e Paulo reve.

²⁶ Ha'e va'e avakue ma nhande-Senhor Jesus Cristo rery káuxa ndojeayvuvei va'e.

²⁷ Ha'e rami vy Judas ha'e Silas rombou, peẽ kuery pe ha'e kuery ae omombe'u aguã ha'e nunga.

²⁸ Mba'eta Nhe'ẽ Ky'a E'ÿ reve rojou porã amboae ramigua pëvy ndorojapo ukai aguã, pova'e nunga anho:

²⁹ Penhemongy'a eme mba'emo ra'angaa pe ome'ẽ mbyre pe'ua py, neĩ huguykue, ha'e mymba ojyryvipy vy ojuka pyre ro'okue, ha'e pendetavy rei eme guive. Ha'e nunga gui pejejoko vy peiko porã 'rã. Tove tapendekuai porã.”

Kuaxia para ogueroayvu okuapyague

³⁰ Are'ÿ re omoudouka pyre kuery ma Antioquia tetã py ovaẽ ma vy ha'e py ikuai va'e omboatypa vy ha'e kuery pe omboaxa kuaxia para.

³¹ Ha'e pygua kuery ogueroayvu vy ovy'a vaipa ombopy'a guaxu rã.

³² Judas ha'e Silas profeta ikuai va'e voi irmão kuery ombopy'a guaxu vy heta ayvu py omombaraete.

³³ Ha'e py ikuai are rire irmão kuery ombojevy uka porã'i ju imoudoukaare kuerya katy.

³⁴ [Ha'e rã Silas ma ojou porã ha'e py ae opytave aguã.]

³⁵ Paulo ha'e Barnabé ma Antioquia py ikuai are vy nhombo'e ha'e omombe'u Senhor ayvu, heta ikuai va'e reve.

* 15:7 Atos 10.1-48 * 15:10 Ha'e kuery ombovoyixe temimbo'e kuery amboae regua, mba'eta oipota ha'e kuery voi ikuai judeu kuery rekorã oea pyre rami. * 15:12 Gálatas 1.18,19 † 15:16 “Ajapo ju 'rã Davi ro ho'apa va'ekue”, he'ia ma Davi ramymino Jesus nhandereraa jepearã ombou aguã re ijayvu vy. * 15:18 Amós 9.11-12 * 15:21 1 Coríntios 9.19-22, 10.31-33

Barnabé gui Paulo oja'o rire mokoïguea ma ayvu omombe'ua rupi oguataague

³⁶ Are'i ma rire Paulo aipoe'i Barnabé pe:

— Aỹ ma javejy ke jaexa ju irmão kuery tetã ha'e javi rupi Senhor ayvu nhamombe'uague rupi, jaikuaa aguã marã rami pa ikuai — he'i.

³⁷ Ha'e vy Barnabé ogueraaxe João Marcos hery va'e.

³⁸ Ha'e rã Paulo ma ndojou porã ogueraa aguã, Panfília py oĩa gui ojepe'a vy omba'eapoa rupi noipytyvõvei rire.*

³⁹ Ha'e rami py joo rami e'ỹ ijayvu vy oja'o joegui. Barnabé ma Marcos ogueraa vy yy rupi oo Chipre katy.

⁴⁰ Ha'e rã Paulo ma oirürã Silas oiporavo vy oo avi, Senhor po py irmão kuery omboaxa rire.

⁴¹ Ha'e vy Síria ha'e Cilícia rupi oaxa, omombaraete ovy igreja ikuai va'e ha'e javi.

16

Paulo Timóteo ngupive ogueraa ague

¹ Ha'e gui Derbe py ovaẽ avi, ha'e gui Listra py ju. Ha'e py ma peteĩ temimbo'e oiko Timóteo hery va'e, judeu regua oguerovia va'e pi'a. Ha'e rã tuu ma grego.

² Ha'e va'e re ma Listra ha'e Icônio pygua irmão kuery ima'endu'a porã.

³ Paulo oipota oo hupive. Ha'e vy ipire omboi ha'e katy'i rupi judeu kuery ikuai va'e re vy, mba'eta pavẽ oikuaa tuu grego oikoa.

⁴ Ha'e gui tetã ikuai va'e rupi oaxa vy irmão kuery pe omombe'u hekorã apóstolo ha'e opena va'e kuery Jerusalém py ikuai va'e ijayvuague.

⁵ Ha'e rami vy igreja kuery ikuai va'e imbaraeteve oje'oivy ojeroviaa py. Hetave ovy ko'ẽ nhavõ.

Trôade py peteĩ ava oexa ukaa ague

⁶ Ha'e gui ma Ásia py ma Nhe'ẽ Ky'a E'ỹ ayvu nomombe'u ukai ramo Frígia-Galácia yvy rupi oje'oi.

⁷ Mísia py ovaẽ rai'i vy onhea'ã Bitínia katy oo aguã. Ha'e rami teĩ Jesus Nhe'ẽ nomondoukai.

⁸ Ha'e ramo Mísia rupi oaxa vy Trôade tetã py oguejy.

⁹ Pyávuy Paulo pe peteĩ oexa ukaa, Macedônia pygua ava opu'ã ho'amy va'e. Ha'e va'e ma ojerure vy

— Tereo ke Macedônia kate orepytyvõ aguã — he'i.

¹⁰ Ha'e rami oexa ukaa rery roje'oi voi pota ha'e katy, mba'eta roikuaa ha'e kuery pe ayvu porã romombe'u aguã orerenoĩare Nhanderuete ae oikoa.*

Filipos py Paulo oiko jave Lídia ojeko me'ẽague

¹¹ Trôade gui yy rupi roo yvi Samotrácia katy. Ko'ẽ jevy ma Neápolis katy,

¹² ha'e gui ma Filipos katy ju roo.* Ha'e va'e tetã ma Macedônia regua pavẽ gui omboetevepy, ha'e Roma tetã gui ae openaa va'e. Ha'e py ma roiko are.

¹³ Sábado ára py tetã gui mombyry'i roo vy yakã rembe peve roguejy, ha'e py onhembo'eaty oĩa roikuaa vy. Ha'e vy roguapypa vy oreayvu roiny kunhague ijaty va'e reve.

¹⁴ Peteĩ kunha Lídia hery va'e ma ojapyxaka porã oiny oreayvua re. Ha'e va'e ma Tiatira guigua, ajukue púrpara guigua vendea, ha'e Nhanderuete renonde ojererokyjea rupi oiko va'e. Ha'e va'e py'a re Senhor ae omõi Paulo ijayvua re ojapyxaka pota aguã.

¹⁵ Ha'e rami vy onhemongarai uka ngoo pygua kuery ha'e javi reve. Ha'e rami vy oreyv pe ojerure vy aipoe'i: — Senhor re ajeroviaa perovia vy ke pevaẽ ke xero py, ha'e py ae pepyta — he'i. Ha'e rami ijayvua ha'eve oreyv.

Peteĩ kunha'i imba'ekuaa va'e gui nhe'ẽ vai oipe'aague

¹⁶ Onhembo'eaty katy roo jave peteĩ kunha'i ou orerovaexĩ nhe'ẽ vai gui imba'ekuaa va'e. Ha'e va'e ma omba'ekuaa rupi ongana vaipa oikovy opatõ kuery pe.

¹⁷ Ha'e va'e ma Paulo ha'e ore kuery rakykue oo vy ojapukai reve aipoe'i 'rã:

— Peva'e avakue ma Nhanderuete Yvate ete va'e rembiguai, ha'e pëvy omombe'u tape peo jepe aguã — he'i.

¹⁸ Ha'e ramigua mbovy ára rei e'ỹ oiko. Ha'e ramo Paulo noenduxevei vy ojere, ha'e aipoe'i nhe'ẽ vai pe:

— Jesus Cristo rery rupi aipoa'e: Ejepe'a ixugui — he'i ramove ojepe'a.

Paulo ha'e Silas oinupãmbaa rire nhuã py ombo'aa ague

¹⁹ Kunha'i patõ kuery ma nonganaveia oexa vy ojopy Paulo ha'e Silas, ha'e vy tetã mbyte py ogueraa huvixa kuery renonde.

²⁰ Huvixa kuerya py ogueraa vy aipoe'i:

— Peva'e avakue ma judeu ikuai vy opa marã omoingo nhaneretã pygua kuery.

²¹ Mba'eta teko mboae re nhombo'e 'rã. Ha'e va'e rupi ma nhandekuai aguã nda'evei, mba'eta nhande ma Roma pygua regua — he'i.

²² Ha'e gui heta va'e kuery peteĩ rami opu'ãmba ha'e kuery re. Huvixa kuery voi ijao omondoropa vy oinupã uka yvyra po'i'i py.

²³ Ha'e gui oinupãmba rire omboty nhuã py, ha'e nhuã rarõa pe opena uka oẽ e'ỹ aguã.

* 15:38 Atos 13.13 * 16:10 "Oje'oi" he'i 'rãgue py "Roje'oi" he'i, mba'eta ha'e kuery rupive kova'e kuaxia mboparaa Lucas voi oo raka'e.

* 16:12 Filipenses 1.1

²⁴ Ha'e va'e ma ha'e rami ijayvu rã oendu vy nhuã ropy apy py ogueraa, ha'e ipy voi omboty yvyra py.

²⁵ Pytũ mbyte jave ma Paulo ha'e Silas onhembo'e ha'e oporaei oiny Nhanderuete pe omboete vy.* Ha'e rã amboae kuery nhuã py ikuai avi va'e ma ojapyxaka okuapy.

²⁶ Ha'e rami jave vvy oryryi xapy'a vy omongu'epa nhuã yta. Ha'e ramo okê ikuai va'e ojepe'apa, ha'e javive gui oipa ojokuaague.

Nhuã rarõa ojeko me'ëague

²⁷ Nhuã rarõa omyĩ vy nhuã rokê ojepe'a rã oexa vy oeky kyxe ojajuka aguã, “Nhuã py ikuai va'ekue oẽmba ra'e ma po” he'i vy.

²⁸ Ha'e ramo Paulo ojapukai vy aipoe'i:

— Mba'eve ejapo eme ndejee, apy roĩ pavẽ — he'i.

²⁹ Ha'e ramo nhuã rarõa tataendy re ojerure vy oike pojava ovy. Oryryipa reve Paulo ha'e Silas renonde oĩ guenapy'ã re.

³⁰ Ha'e gui oka py ogueru vy aipoe'i:

— Avakue, mba'e tu ajapo 'rã aa jepe aguã?

³¹ Ombovai:

— Ejerovia Senhor Jesus re. Ha'e vy 'rã reo jepe, ndee ha'e ndero pygua kuery — he'i.

³² Ixupe omombe'u Nhanderuete ayvu, hoo pygua kuery ha'e javive pe guive.

³³ Ha'e va'e hora-ve pyávy ha'e kuery re opena porã vy ojoj oinupãague. Ha'e rire'ive onhemongarai uka, ha'e hoo pygua kuery ha'e javive reve.

³⁴ Ha'e gui ma ngoo py ae ogueraa vy omongaru. Ngoo pygua kuery ha'e javi reve ovy'a ete okuapy Nhanderuete re ojerovia vy.

Nhuã gui Paulo ha'e Silas opoia aague

³⁵ Ko'ẽmba jave huvixa kuery ombou guembiguai “Pepoi peva'e avakue” he'i aguã.

³⁶ Ha'e ramo nhuã rarõa omboaxa pova'e ayvu Paulo pe:

— Huvixa kuery pendepoi uka kuri. Ha'e rã peẽmba aỹ, tapeo porã — he'i.

³⁷ Ha'e ramo Paulo aipoe'i ha'e kuery pe:

— Ha'e rami avi mba'eve rojapo vaiague re'ỹ orenupãmba pavẽ oexaa py, nhuã py orembo'a uka guive, Roma pygua regua roiko va'eri. Aỹ ma nhemi rupi ju orepoi uka ta? Ha'e rami nda'evei. Ha'e rami 'rãgue py tou ha'e kuery ae torepoi — he'i.

³⁸ Ha'e nunga tembiguai kuery oendu vy oo omombe'u huvixa kuery pe. Ha'e va'e kuery ma Roma pygua regua oikoa oikuaa vy okyjepa.*

³⁹ Ha'e rami vy Paulo kuerya py jogueru vy ijayvu porã'i. Nhuã gui oguenoẽ vy ojerure tetã gui ojepe'a aguã.

⁴⁰ Ha'e ramo nhuã gui oẽ ma vy Lídia ro py ranhe ovaẽ. Irmão kuery oexa vy omombaraetepa. Ha'e gui ma oje'oi.

17

Tessalônica py Paulo ha'e Silas ovaẽague

¹ Anfípolis ha'e Apolônia rupi oaxa vy ovaẽ Tessalônica tetã py.* Ha'e py ma oĩ judeu kuery onhembo'eaty.

² Paulo gueko rami vy oo ha'e kuery nhomboaty py. Mboapy sábado re ha'e kuery reve ijayvu oikovy ipara re oĩa re.

³ Nhombo'e vy omombe'u porã. Ha'e vy aipoe'i:

— Cristo omanoague gui onhemboete jevy aguã rami oiko va'ekue. Jesus pẽvy amombe'u va'e ae ma Cristo — he'i.

⁴ Ha'e va'e kuery regua amongue oguerovia vy onhemoirũ Paulo ha'e Silas re. Grego kuery heta avi Nhanderuete pe ikuai, kunhague omboetevepy voi.

⁵ Ha'e rã judeu kuery ma nda'ija'eĩ vy ojou avakue heko vai va'e. Ha'e vy omono'õ reta vy opa marã rei nhomoingo tetã rupi. Jasom ropy oikepa, teta mbyte katy Paulo kuery ogueraaxe vy.

⁶ Ha'e rami teĩ ndojouĩ vy huvixa kuerya py ogueraa Jasom ae, amongue irmão kuery reve. Ha'e vy aipoe'i:

— Kova'e kuery ma vvy jave re ikuai va'e moingo eta reia, ha'e gui apy ju rima ovaẽ ra'e.

⁷ Ha'e gui Jasom ma ngoo py omovaẽ. Ha'e va'e kuery ha'e javive César ayvu rami e'ỹ ikuai, Jesus pe anho “Huvixave” he'i okuapy.

⁸ Ha'e nunga ayvu heta va'e ha'e huvixa kuery oendu vy ipoxypa.

⁹ Ha'e rami teĩ Jasom ha'e amboae kuery gui perãta ojopy rire opoi ju.

Beréia py Paulo ha'e Silas ovaẽague

¹⁰ Ha'e rire'i pyavyve irmão kuery ma Beréia tetã katy ju omondouka Paulo ha'e Silas. Ha'e py ovaẽ ma vy judeu kuery onhembo'eaty oĩ va'e katy jogueraa.

¹¹ Ha'e gui Beréia pygua kuery ma Tessalônica pygua gui hi'aranduve va'e vy ojapyxaka porã ayvu re oenduxe vy. Ko'ẽ nhavõ ipara oĩa re oikuaa pota guive, oikuaa aguã oendu va'ekue anhetẽ paa.

¹² Ha'e rami vy heta ojerovia, grego regua kunhague omboetevepy, ha'e avakue mbovy e'ỹ avi.

* 16:25 1 Tessalonicenses 5.16-18; Tiago 1.2-4 * 16:38 Atos 22.25-29 * 17:1 1 Tessalonicenses 1.1; 2.13,14

¹³ Ha'e rami rã judeu kuery Tessalônica pygua ma Beréia py avi ri ty ra'e Nhanderuete ayvu Paulo omombe'ua oikuaa vy ha'e py ju oje'oi nhombopoxy ha'e nhomopu'amba rei agua.

¹⁴ Ha'e ramo irmão kuery ojou porã Paulo omondouka voi agua ye'ê rembe peve. Ha'e rã Silas ha'e Timóteo ma opytave ranhe ha'e py.

¹⁵ Paulo re opena va'e kuery ma Atenas peve ogueraa. Ha'e kuery ojevvy vy Paulo ijavyuague ogueraa Silas ha'e Timóteo pe, oia py ha'e kuery ou voi agua.

Atenas tetã py Paulo ijavyuague

¹⁶ Atenas tetã py Paulo oirũ kuery oarõ jave tetã rupi mba'emo ra'angaa anho oĩ rã oexa vy ndojou porã vaipa.

¹⁷ Ha'e nunga rupi ijavyu oikovy judeu kuery onhembo'eaty py, judeu ha'e judeu e'ỹ va'e Nhanderuete mboetea rupi ikuai va'e kuery reve. Ha'e rami avi ko'ẽ nhavõ tetã mbyte rupi ijavyu ha'e py ikuai va'e reve.

¹⁸ Ha'e gui amongue onhemo'arandu va'e epicureu ha'e estóico regua ijavyu hexeve. Joupe-upe oporandu:

— Mba'e he'i vy tu po rami ijavyu katu rei va'e? Tuuete mboae re teve ijavyu — he'i okuapy, mba'eta Jesus reko omombe'u, onhemboete jevyague guive.

¹⁹ Ha'e rami vy ngupive ogueraa peteĩ henda Areópago hery va'e py. Ha'e vy aipoe'i:

— Aỹ ma roikuaaxe mba'e nunga pyau re pa renhombo'ea.

²⁰ Mba'eta remombe'u va'e ma ore kuery ndoroikuaai teri. Roikuaaxe mba'e 'rea pa ha'e nunga — he'i okuapy.

²¹ Mba'eta Atenas pygua kuery ha'e amboae regua ha'e py ikuai va'e voi amboae ramigua re ndoikuaa potai, mba'emo ipyauve va'e re rive ijavyu ha'e ojapyxaka okuapy.

²² Ha'e ramo Areópago mbyte py Paulo opu'ã vy aipoe'i:

— Atenas pygua avakue, xee aexa rã peẽ kuery pembojerovia etea rupi anho pendekuai.

²³ Mba'eta tetã rupi aaxa avy vy aexa mba'emo pembojerovia va'ety ikuai va'e. Peteĩ aexa avi pembojeroviaaty re ipara oiny “Kova'e ma Nhanderuete jaikuaa e'ỹ va'e pegua” he'ia va'e. Ha'e gui peikuaa vy e'ỹ pembojerovia va'e ae xee amombe'u porãve pëvy.

²⁴ — Mba'eta Nhanderuete vyv ha'e yvy re opa mba'e ikuai va'e moingoare ma yva ha'e yvy re ipo'aka va'e vy oo avakue opo py ojapo va'ekue py noĩ,

²⁵ neĩ nhande kuery po py nanhaiptyvõĩ 'rã mba'eve py. Nhandegui mba'eve oipota va'e'ỹ, mba'eta nhande kuery ha'e javive pe ha'e ae ome'ẽ nhanderecoverã, nhandepytuẽrã ha'e opa mba'e jareko va'e.

²⁶ Peteĩ gui nhanemoingo raka'e opa marãgua vyv re nhandekuai va'erã. Yma voi oa'anga raka'e pa, ha'e mamõ ete pa peteĩ-teĩ regua ikuai agua,

²⁷ Nhanderuete jaeka agua, ha'e jaeka ete vy jajou agua. Ha'e rami avi nhandegui mombyry e'ỹ oiko,

²⁸ mba'eta hexe vy jaiko, nhamyĩ ha'e nhandekuai, peẽ kuery regua ijavyu kuaa va'e “Mba'eta ixuguigua meme jaiko”, he'ia rami.

²⁹ Ha'e gui Nhanderuete gui meme jaikoague jaikuaa vy jaikuaa avi mba'emo ouro guigua rami e'ỹ oikoa, neĩ prata ha'e ita gui avakue o'arandua rupi ha'e oikuaa rami ojapo va'ekue rami e'ỹ guive.

³⁰ — Ha'e gui ymave rupi jaikuaa vy e'ỹ mba'emo vai jajapogue re Nhanderuete nanhanembopagai. Ha'e rami tetã aỹ ma oikuaa uka avakue opa rupi ikuai va'e ojeko rerova agua.

³¹ Mba'eta oa'anga ma yvy re ikuai va'e ombopagapa agua ára. Ha'evea rami 'rã ombopaga uka peteĩ ava omõĩ va'ekue pe. Ha'e va'e ma jaikuaa pavẽ agua omanoague gui omboete ju — he'i.

Amongue ojõjai rei, ha'e rã amboae kuery ma ogueroviaague

³² Omanoague gui Jesus onhemboeteague re Paulo ijavyu rã ha'e kuery oendu vy amongue ojõjai rei. Ha'e rã amboae kuery ma

— Amboae ára ma emombe'uve ju pova'e nunga roenduve agua — he'i okuapy.

³³ Ha'e ramo Paulo ojepe'a ha'e kuery mbyte gui.

³⁴ Ikuai avi amongue avakue oguerovia vy hexe onhemoirũ va'e. Ha'e kuery regua ma Areópago pygua Dionísio, ha'e peteĩ kunha Dâmaris hery va'e. Ha'e va'e kuery reve ikuaive amboae kuery.

18

Corinto tetã py Paulo ovaẽague

¹ Ha'e va'e rire Atenas tetã gui Paulo oẽ vy Corinto katy ju oo.

² Ha'e py ma peteĩ judeu Ponto guigua oexa Áqüila hery va'e. Roma tetã gui huvixa Cláudio judeu kuery omoxẽmba ramo Itália gui oẽ vy Corinto py ovaẽ ramo'i va'ekue gua'yxy Priscila reve. Ha'e va'e kuery re Paulo onhemboja.*

³ Oo'i ipirekue guigua apoa rupi ikuai va'e meme ramo ha'e kuery reve Paulo opyta omba'eapoa py.

⁴ Ha'e gui sãbado nhavõ ijavyu oikovy judeu kuery onhembo'eaty py. Judeu ha'e grego kuery pe omombe'u oikovy ayvu.

Jesus reko Paulo omombe'uague

⁵ Macedônia gui Silas ha'e Timóteo ovaẽ ma ramo Paulo nomba'eapove, ayvu mombe'ua rupi anho oiko. Ha'e rami vy judeu kuery pe omombe'u oikovy Jesus ae Cristo oikoa.*

*

18:2 1 Coríntios 1.1-3; Romanos 16.3,4

*

18:5 2 Coríntios 11.9

⁶ Ha'e rami teĩ ha'e kuery ijayvu vaikue reve opu'amba ramo Paulo oao ombojaity vy aipoe'i:

— Peneakã re ae toĩ penderuguy pemoẽ ukaague re pepaga aguã.* Xee ma ha'e nunga py ndaxepo ky'ai. Aỹ gui ma amboae regua kuery pe ju 'rã aa amombe'u — he'i.

⁷ Ha'e gui ojepe'a vy peteĩ ava Tício Justo hery va'e ro py ovaẽ, judeu kuery onhembo'eaty vvy'iry oĩ va'ea py. Ha'e va'e ava ma Nhanderuetete renonde ojererokyjea rupi oiko.

⁸ Ha'e gui onhembo'eaty pygua ruvixa Crispo hery va'e ma Senhor re ojerovia okuapy ngoo pygua kuery ha'e javi reve. Corinto pygua kuery voi ayvu oendu vy heta oguerovia vy onhemongarai uka.

⁹ Ha'e gui pyávuy Senhor ojexa uka Paulo pe. Ha'e vy aipoe'i:

— Ekyje eme. Ha'e rami 'rãgue py ndeayvuvete tema rekyriri e'ỹ re,

¹⁰ mba'eta xee aiko ndereve. Avave rei ndere nupu'ãi 'rã mba'emo vai ojapo aguã, mba'eta kova'e tetã py heta areko xejeupe guarã — he'i.

¹¹ Ha'e ramo ha'e py ma peteĩ ma'etỹ ha'e mboapy meme jaxy re oiko. Nhombo'ea rupi oiko Nhanderuetete ayvu re.

Huvixa Gálio renonde Paulo ojexa ukaague

¹² Acaia pygua huvixa Gálio oĩ jave py ma judeu kuery peteĩ rami opu'ã okuapy Paulo re. Nhomboayvuaty py ogueraa vy

¹³ aipoe'i:

— Kova'e ava ma nhombo'e oikovy lei re oĩa rami e'ỹ Nhanderuetete omboetea aguã re — he'i okuapy.

¹⁴ Ha'e ramo Paulo ombovai ta jave huvixa Gálio aipoe'i judeu kuery pe:

— Judeu kuery, mba'emo vai ete, e'ỹ vy jojukaague, mba'emo nda'evei ete va'e re pendeayvu va'e rire ha'eve 'rãgue xee aikuaa pota aguã.

¹⁵ Ha'e rã ayvukue, tery ha'e pëvygua lei re ri pendeayvu ta vy peikuaa pota peẽ ae ha'e nunga re. Xee ma ha'e nunga re ndaikuaa potai 'rã — he'i.

¹⁶ Ha'e rami vy nhomboayvuaty gui omoẽmba ju.

¹⁷ Ha'e ramo ha'e kuery ha'e javi ma judeu kuery onhembo'eaty pygua ruvixa Sóstenes ojopy vy oinupãmba nhomboayvua kuery renonde. Ha'e rami teĩ Gálio ma ha'e nunga re voi ndoikuaa potai.

Mokoĩguea ayvu momba'u vy ooaque gui Paulo ojevvyague

¹⁸ Ha'e py ma Paulo opytave ranhe heta ára. Ha'e va'e rire irmão kuerya gui oo vy Síria katy ju oguata. Ngupive ogueraa Priscila ha'e Áqüila. Ha'e rami e'ỹ mbove Cencreía py onhopi uka oakã, mba'emo ojapo aguã re onhemboayvuaque ojapopa ma rire.

¹⁹ Ha'e gui ma Éfeso tetã py ovaẽ oirũ kuery ojea aguã py. Ha'e rã ha'e ma judeu kuery onhembo'eaty py oike vy ha'e kuery pe omomba'u ayvu.

²⁰ Ha'e kuery ojerure opytave aguã ha'e py, teĩ nda'evei.

²¹ Ha'e rã ha'e kuerya gui oo ta vy aipoe'i:

— Nhanderuetete oipotã ramo ajevvy ju 'rã peẽ kuerya py — he'i. Ha'e gui kanoã py ojeupi vy oove Éfeso gui.

²² Cesaréia py ovaẽ vy ogejy vy Jerusalém tetã re oo. Ha'e pygua igreja pe oxarurapa ma vy Antioquia katy ju ogejy ovy.

²³ Ha'e py ma oiko are rire oo ju. Galácia ha'e Frígia vvy rupi oaxa vy omombaraeteve ovy temimbo'e kuery ha'e javive.

Mboapykuea ayvu momba'ua rupi Paulo oguata, ha'e Éfeso py Apolo ovaẽague

²⁴ Ha'e va'e jave py Éfeso py ma peteĩ judeu ovaẽ, Alexandria tetã guigua Apolo hery va'e. Ha'e va'e ma ijayvu kuaa, ha'e ipara oikuaapa va'e,

²⁵ Senhor reko re ombo'e pyre. Ikyre'ỹ vy ijayvu Jesus reko re, ha'evea rami nhombo'e oikovy guive, João nhomongarai jave guare anho oikuaa va'eri.

²⁶ Ha'e rami ranhe okyjea py e'ỹ ijayvu judeu kuery onhembo'eaty py. Ha'e ijayvu rã Priscila ha'e Áqüila oendu vy ogueraa, ha'e vy ixupe omomba'u porãve Nhanderuetete reko.*

²⁷ Acaia katy Apolo ooxe ramo irmão kuery omonhanima, temimbo'e kuery pe ombopara guive omovaẽ aguã. Ha'e py ovaẽ ma vy opa mba'e py oipytyvõ Nhanderuetete omboaxy rã ojerovia va'e kuery,

²⁸ mba'eta ijayvu kuaa ete vy pavẽ oendua py ipo'aka judeu kuery re, mba'eta ipara oĩ va'e gui omomba'u vy oikuaa uka Jesus ae Cristo oikoa.

19

Éfeso py Paulo ovaẽague

¹ Corinto tetã py Apolo oiko jave Paulo ma vvy rupi oguata vy Éfeso tetã py ovaẽ. Ha'e py ma amongue temimbo'e kuery ojou vy

² oporandu ha'e kuery pe:

— Peẽ kuery pa pejerovia ramo pendere ou Nhe'ẽ Ky'a E'jy?

Ha'e kuery ombovai:

* 18:6 "Peneakã re ae toĩ penderuguy pemoẽ ukaague re pepaga aguã" he'ia ma ha'e kuery ae ndojereraa jepe ukaxei rire opaga aguã re ijayvu vy. * 18:26 Efésios 1.1,2; 1 Coríntios 3.6-9

— Any, ore kuery ma noroendui ae Nhe'ë Ky'a E'ÿ oiko va'ea — he'i okuapy.

³ Ha'e ramo Paulo oporandu ju:

— Marā rami ha'vy penhemongarai uka?

Ha'e kuery ombovai:

— João Batista nhomongarai rami rima — he'i okuapy.

⁴ Paulo aipoe'i ha'e kuery pe:

— João ma ojeko rerova va'ekue omongarai vy heta va'e kuery pe ijayvu va'ekue araka'eve rā ou va'erā re ju ojerovia okuapy aguā. Ha'e va'e ma Jesus — he'i.*

⁵ Ha'e nunga ha'e kuery oendu vy onhemongarai ukapa Senhor Jesus rery rupi.

⁶ Ha'e kuery áry Paulo opo omoi ramo ha'e kuery re ou Nhe'ë Ky'a E'ÿ. Ha'e ramo ayvu mboae py ijayvu, Nhe'ë guigua omombe'u guive.

⁷ Ha'e javi vy doze avakue ikuai.

Tirano nhombo'eaty py Paulo nhombo'eague

⁸ Ha'e gui ma judeu kuery onhembo'eaty py Paulo oo vy nhombo'e. Mboapy jaxy re okyjea py e'ÿ nhombo'e vy omombe'u oikovy Nhanderuete po'akaa.

⁹ Ha'e rā amongue ma ndogueroviai ha'e noenduxe'i vy heta va'e kuery oendua py ijayvu vai okuapy Senhor reko re. Ha'e ramo ha'e kuerya gui Paulo oguerojepe'a temimbo'e kuery. Ha'e gui ma Tirano hery va'e nhombo'eaty py ju ombo'e oikovy ko'ë nhavō.

¹⁰ Mokoī ma'et'ÿ re nhombo'ea rami oiko ramo Ásia pygua kuery ha'e javi oendu Senhor ayvu, judeu ha'e grego kuery voi.

¹¹ Paulo po py Nhanderuete mba'emo porā ete ojapo oikovy opo'akaa rupi.

¹² Panhero ha'e avental Paulo oiporu va'ety ma imba'eaxy va'e ikuai rupi heraa ramo okuerapa 'rā imba'eaxy gui, nhe'ë vai ikuai va'ekue voi ojepe'apa 'rā.

¹³ Ha'e gui amongue judeu kuery nhe'ë vai pe'aa rupi ikuai va'e ma onhea'anga Senhor Jesus rery rupi nhe'ë vai oipe'a aguā. Ha'e vy aipoe'i:

— Xee aipoa'e pejepe'a aguā Jesus rery Paulo omombe'u va'e rupi — he'i.

¹⁴ Ha'e rami ojapo va'e ma peteī judeu sacerdote yvateve va'e Ceva hery va'e ra'y kuery, ha'e javi vy sete ikuai.

¹⁵ Ha'e rami rā ha'e kuery pe nhe'ë vai ombovai:

— Jesus ma xee aikuaa, Paulo guive. Ha'vy peē, mava'e tu peē? — he'i.

¹⁶ Ha'e rami vy ha'e kuery re nhe'ë vai onhemondea va'e opo vy ipo'aka ha'e kuery ha'e javive re. Opa marā ogueroko axy ramo ipire rei ha'e ijaipa rei reve onhamba oo oīa gui.

¹⁷ Ha'e nungakue Éfeso py ikuai va'e oendupa, judeu ha'e grego kuery. Ha'e rami vy ha'e javive ojererokyje vy omboete okuapy Senhor Jesus rery.

¹⁸ Oguerovia va'e kuery heta ou vy onhemombe'u. Mba'emo vai ojapoague omombe'upa.

¹⁹ Heta avi onhembo'e vaikue va'ekue okuaxia oguerupa vy oapypa pavē renonde. Kuaxia para repykie re oikuaa pota vy cinquenta mil ára repy oikuaa.

²⁰ Ha'e rami vy Senhor ayvu oenduave ha'e ipo'akave ovy.

Macedônia katy Paulo oirū kuery omondoukaague

²¹ Ha'e nunga ha'e javi oiko rire Paulo onhembopy'a Macedônia ha'e Acaia rupi oaxa ma vy Jerusalém katy oo aguā. Mba'eta aipoe'i:

— Ha'e py aiko rire aexaxe avi Roma tetā pygua kuery — he'i.*

²² Mokoī opytvōaty Timóteo ha'e Erasto omondouka Macedônia katy. Ha'e rā ha'e ma Ásia py ranhe opytave.

Demétrio nhomopu'amba reiaque

²³ Ha'e va'e jave py heta opu'ā okuapy Senhor reko rami ikuai va'e re.

²⁴ Mba'eta peteī ava oiko ouro re omba'eapo va'ety Demétrio hery va'e, prata gui xyete ramigua Diana ra'angaa ojapo va'e. Ha'e nunga repykie gui hexeve omba'eapo va'e kuery oguerekopa.

²⁵ Ha'e gui guexeve omba'eapo va'e kuery omboatypa vy aipoe'i ha'e kuery pe:

— Avakue, peikuaa kova'e nunga gui jajoupaa.

²⁶ Pendu ha'e pexaa rami Éfeso tetā py ha'e Ásia yvy ha'e javi rupi rai'i Paulo nhombo'e vy heta ojapo mba'emo ra'angaa nomboetevei aguā rami, mba'eta ijayvu avakue opo py ta'angaa ojapo va'ekue tuute e'ÿ oikoa rami.

²⁷ Ha'e nunga rupi nphanerembiapo re ndojeroviaavei. Ha'e rami anho e'ÿ, nhandexyete Diana ipo'akapa va'e pegua templo eteve voi nomboetevei. Ha'e rami vy ombovai 'rā Ásia ha'e yvy jave re ikuai va'e omboete va'e yvate — he'i.

²⁸ Ha'e nunga ha'e kuery oendu vy ipoxypa, ha'e vy ojapuka-pukai:

— Éfeso pygua xyete Diana ma yvate ete — he'i okuapy.

²⁹ Tetā ha'e javi rupi opa marā ojapura okuapy vy ono'ōaty oī va'e katy oje'oi pavē. Ngupive ogueraa Paulo irū kuery Gaio ha'e Aristarco, Macedônia gui ou va'ekue.

³⁰ Paulo voi heta va'e kuery pe ojexa ukaxe teī temimbo'e kuery nomondoukai.

* 19:4 Lucas 3.15,16 * 19:21 Romanos 1.13-15; 15.22-29

³¹ Ásia pygua huvixa kuery Paulo irũ ikuai vy ixupe ojerure uka avi ono'odaty py oo e'ỹ aguã.

³² Ono'õ va'e regua amongue oiapukai peteĩ rami, ha'e rã amboae kuery ma amboae rami oiapukai. Jo o rami e'ỹ-e'ỹ ijaty va'e ikuai. Heta va'e kuery neĩ mba'erã pa ono'õmba okuapya ma ndoikuaai.

³³ Ha'e ramo teta mbyte gui judeu kuery ogueru Alexandre, ha'e vy pavẽ renonde katy omoanha. Ha'e va'e ma ojapo opo py heta va'e kuery pe ijayvuxea rami.

³⁴ Ha'e rami teĩ judeu oiko ra'ea ha'e kuery oikuaa vy peteĩ rami oiapukai okuapy mokoĩ hora re rãnda'u:

— Éfeso pygua xyete Diana ma yvate ete — he'i okuapy.

³⁵ Ha'e va'e tetã py oiko kuaxia mboparaaty. Ha'e va'e ma opu'ã vy omokyriĩ heta va'e kuery. Ha'e vy aipoe'i:

— Avakue Éfeso pygua, pavẽ oikuaa ae ma Diana ipo'akapa va'e ra'angaa pegua templo re nhande Éfeso tetã pygua kuery nhapena va'ea, ha'e Júpiter-a gui ta'angaa ho'a va'ekue re guive.

³⁶ Ha'e nunga avave rei amboae rami ndoikuaai 'rã. Ha'e nunga rupi pekyriĩ 'rãgue, mba'eve pejapo eme peikuaa pota porã e'ỹ re.

³⁷ Mba'eta pevave avakue apy peru va'ekue ma templo mbovaipaa rupi e'ỹ ikuai, neĩ nhandexyete re voi nda'ijayvu vai guive.

³⁸ Xapy'a rei Demétrio ha'e hexeve omba'eapo va'e kuery ri amongue re ijayvu aguã oguereko ramo oa'angaa ae ma huvixa nhomboayvua kuery oikuaa pota aguã ára, joe pendeayvu aguã.

³⁹ Ha'e rã amboae ramigua re ri peikuaa potaxe ramo ma nhanhombaaty aguã ára oa'anga pyre py 'rã jaikuaa pota.

⁴⁰ Mba'eta nhandevy pe voi nda'vei ange oiko va'ekue re ijayvua gui, nhapu'ãmba reiaque rami omombe'ua rã. Mba'eta ha'e rami rã peteĩ henda py ma voi nanhamombe'u porã kuaai 'rã mba'erã pa nhanhombaatyague — he'i. Ha'e rami ijayvu ma vy ijaty va'ekue omondoukapa ju.

20

Teĩque ju Macedônia ha'e Grécia rupi Paulo oguataague

¹ Ha'e kuery opa marã ikuaiã gui opytu'upa ma ramo Paulo oenoĩ uka temimbo'e kuery. Omombaraetea rupi ijayvu ma vy oipopyypa, ha'e gui oo Macedônia katy.

² Tekoa ikuai va'e rupi oaxa vy nhomongeta ha'e nhomombaraete ovy. Ha'e gui Grécia katy ju oo.

³ Ha'e py ma mboapy jaxy re oiko. Síria katy oo ta oikovy vy oendu judeu kuery hexe opu'ãmbaxea. Ha'e rami vy Macedônia rupi ju ojevy.

⁴ [Ásia peve] omoirũ va'e kuery ma pova'e: Beréia pygua Pirro ra'y Sópatro, Aristarco, Tessalônica pygua Secundo, Derbe pygua Gaio, ha'e gui Timóteo, Tíquico ha'e Ásia pygua Trófimo.

⁵ Ha'e va'e kuery ma orerenonde oje'oi, Trôade tetã py orerarõ aguã.

⁶ Ha'e gui ngaru mbojape imbovua revegua e'ỹa ára oaxa ma rire Filipos gui roo yy rupi. Ha'e gui peteĩ nhiruĩ araa py ma Trôade py rovaẽ ha'e kuery ikuaiã py. Ha'e py ma peteĩ semana ropyta.

Trôade py Paulo nhombo'eague

⁷ Semana ijypya ára py mbojape roipe'ã-pe'ã'i aguã ronhombaaty rã Paulo nhomongeta. Ko'ẽ jevy oove ta vy pytũ mbyte peve ijayvu.

⁸ Opy ronhombaaty py heta õi taenda.

⁹ Ha'e py peteĩ kunumi õi Éutico hery va'e janela py oguapy oinya py. Ha'e va'e ma Paulo nda'ijayvupai ete ramo oke. Oke ete vy janela yvateve va'e gui ho'a vvy py. Ha'e gui he'õgue ojopya.

¹⁰ Ha'e ramo Paulo oguejy vy ojero'a hi'áry. Oikuavã vy aipoe'i:

— Penhemondyĩ eme, hekove oime teri — he'i.

¹¹ Ojeupi ju vy oipe'ã mbojape, ha'e ho'u. Nhomongetave ju ko'ẽmba peve. Ha'e gui mae ma oo.

¹² Ha'e rã kunumi va'e okuera jevy rã pavẽ oexa vy oguero'va'ete okuapy. Ha'e vy ogueraa ju okuapy oikove va'e.

Assôs gui Paulo oo vy Mileto py ovaẽague

¹³ Ore roove vy kanoã py roĩ, ha'e Assôs katy roo. Ha'e py roarõ Paulo vvy rupi ooa ja, ha'e rami aguã orevy ijayvu rire.

¹⁴ Assôs py orea py ju ovaẽ ma ramo orereve õi avi kanoã py, ha'e vy Mitilene katy ju roo.

¹⁵ Ha'e gui roove vy ko'ẽ jevy roaxa Quios ypa'ti katy'i rupi. Are'ỹ'i re rovaẽ Samos py, ha'e ko'ẽ jevy Mileto py ju rovaẽ.

¹⁶ Mba'eta Paulo ijayvu ma voi Ásia vvy re ndopyta arexei vy Éfeso tetã py ovaẽ e'ỹ aguã re, mba'eta oiapura Pentecostes ára Jerusalém py oiko aguã, ha'eve ramo.

Mileto py Éfeso pygua igreja re opena va'e kuery omongetaague

¹⁷ Mileto tetã gui Paulo oenoĩ uka Éfeso pygua igreja re opena va'e kuery.

¹⁸ Oia py ovaẽmba ma ramo aipoe'i ha'e kuery pe:

— Peẽ peikuaa porã marã rami pa peẽ kuery reve aikoague Ásia py avaẽ ypya ára guive.

¹⁹ Mba'eta anhemboyvatevea rupi e'ỹ Senhor pe ete aiko xerexay ha'e aiko axya py, mba'eta judeu kuery xereko a'ã vy xemoingo axy ramo.

²⁰ Ha'e rami teĩ xee ndajepe'ai romombaraetea rupi xea'yvua gui. Ha'e nunga re rombo'e aikovy pavẽ oendua rupi, ha'e peteĩ-teĩ ro rupi guive.

²¹ Judeu ha'e grego kuery pe amombe'u aikovy Nhanderuete re ojeko rerova vy nhande-Senhor Jesus [Cristo] re ojerovia aguã.

²² — Aÿ ma xepy'a re aendu Jerusalém katy aaxea, ha'e py xere oiko va'erã ndaikuaai teĩ.

²³ Mba'eta tetã nhavõ rupi xee aa rupi Nhe'ẽ Ky'a E'ÿ oikuaa uka nhuã py xembotyã ha'e xemoingo axya 'rãa.

²⁴ Ha'e rami teĩ mba'eve py xee naendui ajeayvua, ajapo 'rã va'ekue ajapopaxea anho. Ha'e va'e ma xerembiaporã Senhor Jesus gui ae ajopy va'ekue, Nhanderuete nhandemboaxya regua ayvu porã amombe'u aguã.

²⁵ — Peẽ kuery mbyte Nhanderuete po'akaa re rombo'e aikovy rire teĩ aÿ ma aikuaa xerova ndapexavei ma 'rãa.

²⁶ Ha'e nunga rupi kova'e ára xee anhemombe'u porã pëvy: Xee ndaxepo ky'ai peẽ mava'eve ruguy py,

²⁷ mba'eta peteigieve ndajep'e'ai Nhanderuete oipota va'e ha'e javi amombe'ua gui.

²⁸ Pepena pendejee ae ha'e vexa'i kuery ha'e javi re, ha'e va'e kuery re opena va'erã Nhe'ẽ Ky'a E'ÿ penemoi rire. Ha'e va'e ma Nhanderuete pegua igreja kuery nguguy py ae ojogua va'ekue.*

²⁹ Xee aikuaa rã aa ma rire penembyte oiko 'rã guary kuery nhomondoropaarã, vexa'i kuery omboaxya rupi e'ÿ.

³⁰ Peẽ kuery regua voi opu'ã 'rã avakue ha'eve e'ÿã rami nhombo'e va'e, ojee ae temimbo'e kuery oguerova aguã.

³¹ Ha'e nunga rupi peikuaa pota. Penema'endu'a mboapy ma'etÿ re xeyvu aikovyague re. Ara py ha'e pyávy ndapytu'ui xerexay reve peteĩ-teĩ romongetaa gui.

³² — Ha'e gui aÿ ma Senhor po py romboaxa, ayvu nhandemboaxya regua rupi vy penembaraete aguã, mba'eta ijayvu ma ipo'aka penembaraete vy pendeivy guarã om'e'ẽ aguã iky'a e'ÿ va'e kuery ha'e javi reve.

³³ Xee ma napenai va'ekue avave mba'e prata, ouro, neĩ ao re.

³⁴ Peẽ voi peikuaa xepo py ae ajouague xee ha'e xerevegua kuery roipota va'e.

³⁵ Opa mba'e py pëvy aexa uka nhamba'eapo vy iporiaukue'i nhaipytyvõ aguã. Penema'endu'a Senhor Jesus ae aipoe'iaque re: “Joupe mba'emo nhame'ẽ vy javy'ave 'rã jajopya gui”, he'iaque re.

Ha'e kuery reve Paulo onhembo'eaque

³⁶ Ha'e rami Paulo ijayvupa ma vy guenapy'ã re oĩ, ha'e onhembo'e oiny ha'e kuery ha'e javi reve.

³⁷ Ha'e ramo ojae'o pavẽ. Oikuavã vy oayvupa.

³⁸ Ndovy'avei okuapy, “Xerova ndapexavei 'rã”, he'i rire. Ha'e vy omoirũ heravy kanoã ituia py peve.

21

Tiro tetã py Paulo ovaẽague

¹ Ha'e kuerya gui rojepe'a rire kanoã ajukue regua py roo. Roje'oi yvi vy Cós py rovaẽ. Ko'ẽ jevy Rodes py, ha'e gui ma Pátara py ju rovaẽ.

² Peteĩ kanoã Fenícia katy oo va'e rojou vy ha'e va'e py ju roĩ. Ha'e vy roove.

³ Chipe're ypa'u'õ oreaxua regua ojekuaa maa gui roeja vy Síria yvy katy ju roo. Ha'e gui ma Tiro tetã py rovaẽ, mba'eta ha'e py mba'emo omboguejya 'rã kanoã gui.

⁴ Ha'e py temimbo'e kuery rojou vy sete ára ropyta ha'e py. Ha'e va'e kuery ma Nhe'ẽ gui oikuaa vy Paulo pe ijayvu Jerusalém katy oo e'ÿ aguã.

⁵ Ha'e rami teĩ are'ÿ'i re rojepe'a vy roove ju. Ha'e kuery ha'e javive oremoirũ imondovy gua'yxy ha'e gua'y kuery reve. Tetã rovai roo vy ita ku'i reia py orenenapy'ã re roĩ vy ronhembo'e rokuapy ha'e py.

⁶ Ha'e gui peteĩ-teĩ rojopopy ma vy roĩ ju kanoã py. Ha'e rã ha'e kuery ma ngoo katy ju ojeyvpa.

Cesaréia py Paulo ovaẽague

⁷ Ha'e gui Tiro tetã gui roove vy Ptolemaida py rovaẽ. Ha'e py ma roxarura irmão kuery ikuai va'e pe. Peteĩ ára orekuai ha'e kuery reve.

⁸ Ko'ẽ jevy rojepe'a vy Cesaréia katy roo. Ha'e py ma Filipe ro py rovaẽ vy ropyta hexeve. Ha'e va'e ma ayvu porã momb'e'uarã sete omoĩ mbyre regua.

⁹ Ha'e ma irundy guajy omenda e'ÿ va'e oguereko, profeta meme ikuai.

¹⁰ Ha'e py orekuai are ma rire Judéia gui ou peteĩ profeta Ágabo hery va'e.

¹¹ Ha'e va'e ma orea py ovaẽ vy ojora Paulo ku'akuaa. Ha'e va'e py ma opy ha'e opo ojokuaa reve aipoe'i:

— Po rami Nhe'ẽ Ky'a E'ÿ oikuaa uka: Nami judeu kuery Jerusalém pygua ojapo 'rã kova'e ku'akuaa ja re, mba'eta omboaxa 'rã judeu e'ÿ va'e kuery po py — he'i.

¹² Ha'e va'e ayvu roendu vy ha'e py ikuai va'e ha'e javi reve Paulo pe rojerure rokuapy Jerusalém katy oo ve'ÿ aguã.

¹³ Ha'e ramo ombovai:

— Mba'e tu pejapo pejae'o ha'e xemokangy vy? Mba'eta xevy pe ma ha'evepa rei Senhor Jesus rery káuxa Jerusalém tetã py nhuã py aa ha'e amano aguã voi — he'i.

¹⁴ Ha'e rami rã ndorojokoi vy ropytu'u, ha'e vy

— Tove toiko Senhor oipota va'e — ro'e.

¹⁵ Ha'e va'e rire roiko katupa ma vy Jerusalém katy roje'oi.

* 20:28 João 21.15-17; 1 Pedro 5.1-4

¹⁶ Temimbo'e kuery Cesaréia gui ou va'ekue regua oo avi orerupive. Ha'e va'e kuery ma peteĩ temimbo'e yma ogueraa avi Chipre py itui'i va'ekue Mnasom hery va'e, mba'eta ha'e va'e ma ngoo py oremovaẽ va'erã.

Jerusalém py Paulo ovaẽague

¹⁷ Jerusalém py rovaẽ ma ramo irmão kuery ovy'a reve oremovaẽ.

¹⁸ Ko'ẽ jevy oreveve Tiago-a py Paulo oo oexa aguã. Igreja re opena va'e kuery ha'e javi ijaty ra'e.

¹⁹ Ha'e ramo Paulo oxarurapa ma vy omombe'u judeu e'ỹ va'e ikuai rupi omba'eapo rã mba'emo Nhanderuete ojapoague ha'e javi.

²⁰ Ha'e nunga ha'e kuery oendu vy oguerovy'a okuapy Nhanderuete. Ha'e gui ma Paulo pe aipoe'i:

— Ha'e rami avi irmão, apy rexa nhi'ã heta ikuai judeu kuery regua ojerovia va'e. Ha'e va'e kuery ha'e javi ma lei re oĩa rami anho ikuai.

²¹ Ha'e kuery pe ma omombe'ua ma ndereko ramigua. Ha'e vy aipo'ea: “Amboae regua ikuai rupi Paulo ombo'e judeu kuery Moisés ojapo uka va'ekue gui ojepe'a aguã re, gua'y kuery pire omboi e'ỹ, neĩ lei re oĩa rami ve'ỹ ikuai aguã”, 'ea ndereko ramigua rive omombe'u vy.

²² Ha'e rami rã mba'eva rã tu jajapo? Mba'eta ndee revaẽague oikuaa pavẽ 'rã.

²³ Ha'e nunga rupi ejapo oreayvu taa. Apy ore kuery regua ikuai irundy avakue onhemboayvuague ojapo aguã rami ikuai va'e.

²⁴ Ha'e va'e kuery reve tereo, ha'e ndee voi ejeky'a'ou uka ha'e kuery reve, ha'e eme'ẽ ha'e kuery oakã onhopi uka aguã regua. Ha'e ramo 'rãe oikuaa pavẽ ndereko re ijayvuague anhetẽ e'ỹa, ha'e ndee voi lei re oĩa rami reiko avia.

²⁵ Ha'e rã judeu e'ỹ va'e regua ojerovia va'e pe ma oreayvu romondouka ae ma, ha'e kuery ho'u e'ỹ aguã mba'emo ra'angaa pe ojuka pyre, huguykue, neĩ mymba ojyryvipy pyre ro'okue, ha'e gui itavy rei e'ỹ aguã — he'i.

²⁶ Ha'e ramo Paulo ma ko'ẽ jevy avakue ogueraa vy ha'e kuery reve ojeky'a'ou uka. Ha'e vy templo py oike vy omombe'u ojeky'a'ou ara raka'e pa opa 'rãa, ha'e peteĩ-teĩ rekovia mymba ome'ẽ aguã.*

Paulo ojopy okuapyague

²⁷ Sete araa opa ta ma jave judeu kuery Ásia gui ou va'ekue regua ma Paulo templo py oĩ rã oexa vy ombopoxy heta va'e kuery ha'e javi. Ha'e rami vy ojopy vy

²⁸ ojapukai:

— Avakue Israel regua, orepytyvõ ke! Kova'e ava ma opa rupi nhombo'e oikovy nhande kuery rovai guarã, lei ha'e kova'e oo rovai guive. Aỹ katuve ma grego kuery ogueroike kuri templo py. Ha'e rami py omongy'apa kova'e oo icy'a e'ỹ va'ekue — he'i okuapy.

²⁹ Ha'e rami ijayvu mba'eta oexa va'ekue Éfeso pygua Tróximo hexeve tetã py oĩ rã. Ha'e rami vy oexa'ã teĩ Paulo templo py ogueroikea re.

³⁰ Ha'e ramo tetã ha'e javi rupi heta va'e kuery opu'ãmba vy onhamba jogueruvy. Ha'e vy Paulo ojopy vy ombotyryry heravy templo ropy gui. Ha'e ramove ombotyry vyvoi okẽ.

³¹ Ha'e kuery ojokaxe ete ramo xondaro ruvixa pe omombe'ua Jerusalém pygua kuery opu'ãmba okuapy.

³² Ha'e ramo ha'e va'e oguerovy vyvoi xondaro kuery, huvixa yvyĩve va'e reve. Onhamba jogueruvy heta va'e kuery mbyte katy. Ha'e ramo huvixa ha'e xondaro kuery ovaẽ rã heta va'e kuery oexa vy opytu'lupa Paulo oinupãa gui.

³³ Xondaro ruvixa ovaẽ vy ojopy Paulo, ha'e mokoĩ corrente py ojokua uka. Ha'e vy oporandu mava'e paa, ha'e mba'e pa ojapoague re.

³⁴ Heta va'e kuery regua amongue ojapukai peteĩ rami, ha'e rã amboae kuery ma amboae rami ojapukai. Joo rami e'ỹ-e'ỹ ojapukai rã anhetãa huvixa ndoikuaai vy xondaro kuery okeaty katy ju ogueraa uka Paulo.

³⁵ Tape pyrõ-pyrõa'i py ovaẽ vy xondaro kuery oupi heravy, heta va'e kuery jo'a rei ramo.

³⁶ Mba'eta heta va'e kuery hakykue katy gui ou vy ojapukai:

— Pejuka — he'i okuapy.

³⁷ Ha'e gui Paulo ogueroike ta ma jave aipoe'i huvixa pe:

— Ha'eve pa ndereve xeayvu aguã mba'emo re?

Ombovai:

— Ndee ri ty'y grego ayvu py ndeayvu kuaa va'e?

³⁸ Ndee e'ỹ teve Egito pygua yma renhomopu'ãmba va'ekue, ha'e tekoa e'ỹa katy quatro mil porojukaa reraa va'ekue? — he'i.

³⁹ Ha'e ramo Paulo ombovai:

— Xee ma judeu regua, Tarso tetã omboetevepy va'e pygua aiko Cilícia vvy re. Ha'e gui ndevy pe ajerure heta va'e kuery pe xeayvu aguã — he'i.

⁴⁰ — Ha'eve — he'i ma ramo Paulo opu'ã ho'amy tape pyrõ-pyrõa'i py. Opo py ojapo heta va'e kuery pe okyryrĩ aguã. Ha'e kuery okyryrĩmba rã hebraico ayvu py ijayvu vy aipoe'i:

* 21:26 Ha'e rami Paulo ojapo judeu kuery reko rami vy, pavẽ oikuaa aguã hekokue ramigua omombe'ua va'e anhetẽ e'ỹa (versículo 24), amongue ayvu porã oguerovia vy oo jepe aguã (1 Coríntios 9.19-22, 10.32,33).

1 — Ke'y kuery ha'e xeryvy kuery, pendu ke aÿ xerekokue amombe'u rā — he'i.

2 Ha'e ramo hebraico ayvu py ijayvu rā ha'e kuery oendu vy okyrirī ete okuapy. Ha'e rā ijayvuve tema:

3 — Xee ma judeu, Cilícia regua Tarso tetā py xetui'i va'ekue. Ha'e gui kova'e tetā py ju xetuja. Apy Gamaliel remimbo'e aiko vy lei nhaneramoī kuery reko oīa rami ete anhembo'e va'ekue. Nhanderue te pe aiko aguā re anho anhea'ā aikovy, aÿ peē kuery pendekuaia rami avi.

4 Amoingo axy va'ekue Senhor reko rupi ikuai va'e, ajuka guive. Ajopy vy nhuā py amboty va'ekue, avakue ha'e kunhague.*

5 Ha'e nungakue sacerdote yvateve va'e ha'e nhomongeta va'ety ha'e javi oikuaa anhetēa, mba'eta ha'e kuery gui ae kuaxia para araa karamboae nhanderyke'y kuery peguarā. Ha'e rami vy Damasco tetā katy ju aa, ha'e py ikuai va'e voi aipokuapa reve Jerusalém py aru aguā omoingo axya aguā.*

6 — Ha'e gui ma tape rupi aa ainy jave, Damasco py avaē rai'i avya py, kuaray mbyte rai'i jave, peteī hendy hatā va'e yva gui hexakā xapy'a xeyvry rupi.

7 Ha'e ramo ha'a yvy rupi. Ha'e gui peteī ayvu aendu xevy aipoe'i va'e: “Saulo, Saulo, mba'e re tu xerereko axye ri?”

8 — Xee aporandu: “Mava'e tu ndee, Senhor?”

“Xee ma Jesus Nazaré pygua, ndee rereko axy rei va'e”, he'i xevy.

9 Xerevegua kuery ma hendy va'e oexa teī noendu kuaai xevy ijayvu va'e ayvu.

10 — Ha'e ramo xee aporandu: “Mba'e rā tu ajapo, Senhor?”

Ombovai: “Epu'ā ke, evaē Damasco py, mba'eta ha'e py ma omombe'ua rā ndevy ajapo uka va'e ha'e javi”, he'i.

11 Ha'e va'e hendy va'e rexakā gui ndaexavei rā xerupive ikuai va'e xejyva re xereraa ramo avaē Damasco py.

12 — Ha'e py oiko peteī ava Ananias hery va'e. Nhanderue te pe oiko lei re oīa rami, ha'e ha'e pygua judeu kuery ha'e javi ima'endu'a porāa va'e.

13 Ha'e va'e ma ou xereka. Xeyvry ovaē ma vy aipoe'i: “Irmão Saulo, exa ju ke”, he'i. Ha'e ramove aexa jeyvy vya ma'ē hexe.

14 — Ha'e ramo aipoe'ive ju: “Nhaneramoī kuery Ruete yma voi ndeporavo ha'e oipota va'e reikuaa aguā, Heko porā ete va'e rexa aguā, ha'e ayvu ijuru guigua ae rendu aguā.

15 Mba'eta ixupe reiko vy ha'e javi regua renonde remombe'u rā rexa ha'e rendu va'ekue.

16 Ha'e vy aÿ mba'e re tu remboare ta? Epu'ā ke, enhemongarai uka, ha'e ejeky'a'o uka rejejavayague gui, hery rupi rejapukai vy”, he'i.

17 — Ha'e gui ma Jerusalém katy ajevvy ma rire templo py anhembo'e ainy jave aexa xapy'a karamboae peteī ojexa uka va'e.

18 Ha'e rami vy aexa xereve aipoe'i va'e: “Ndepojava ke, tereo voi Jerusalém gui, mba'eta ha'e kuery noenduxeī rā xereko re ndeayvua”, he'i.

19 — Xee aipoe'e: “Ha'e rami teī Senhor, judeu kuery oikuaa porā xee nhuā py amboty va'ekue ndere ojerovia va'e kuery, ha'e ha'e kuery onhembo'eaty ikuai va'e rupi voi ainupāmbaague.

20 Ha'e gui xee voi ai karamboae ndeayvu mombe'ua Estêvão ruguy moēa kuery reve. Ha'e nunga ajou porā vy ijukaa kuery ao aarō va'ekue”, ha'e.

21 — Ha'e rami teī aipoe'i xevy: “Tereo, mba'eta xee romondouka rā mombyry, judeu e'ÿ va'e ikuai rupi”, he'i.

Roma pygua regua Paulo oiko ramo noinupāaiague

22 Pova'e ayvu omombe'u peve'i ha'e kuery ojapyxaka. Ha'e gui ma ojapukai vy aipoe'i okuapy:

— Peipe'a peva'e ava ko yvy gui, nda'evei oikove aguā — he'i okuapy.

23 Ha'e kuery ojapukai reve ojegui capa omboipa, ha'e yvy ku'i omombo-mombo yvate katy.

24 Ha'e ramo xondaro ruvixa aipoe'i Paulo ogueroikea aguā xondaro kuery okeaty py, ha'e oinupā reve omboayvu aguā, mba'e re pa hexe ijayvu okuapya oikuaa aguā.

25 Ha'e gui ma ipire ra'ykue py ojokuaa rā Paulo aipoe'i huvixa yvyive va'e pe:

— Ha'evea rami ri ty'y peinupā Roma pygua regua peikuaa pota porā e'ÿ re? — he'i.

26 Ha'e nunga huvixa oendu vy xondaro ruvixa yvateve va'ea py ju oo. Ha'e vy aipoe'i ixupe:

— Mba'e tu rejapo ta? Mba'eta peva'e ava ma je Roma pygua regua — he'i.

27 Ha'e rami rā xondaro ruvixa ou vy oporandu Paulo pe:

— Emombe'u xevy, ndee ma nhi'ā Roma pygua regua?

Ombovai:

— Xee ha'e aiko — he'i.

28 Huvixa aipoe'i ixupe:

— Xee ma heta perāta apaga karamboae Roma pygua regua anhemoingo uka aguā.

Paulo ombovai:

— Ha'e rā xee ma ha'e pygua regua ae aiko — he'i.

29 Ha'e ramove inupārā ikuai va'ekue ojepe'apa. Huvixa eteve voi okyje Roma pygua regua ojokua uka rire.*

* 22:4 Atos 8.3 * 22:5 Atos 9.1-19 * 22:29 Atos 16.35-39

³⁰ Ko'ê jevy mba'e re pa judeu kuery hexe ijayvu rei okuapyague huvixa oikuaa porâvexe vy ojora uka. Ha'e gui omboaty ukapa sacerdote yvatekueve va'e ha'e nhomongeta va'ety kuery. Paulo ogueru ruka vy oexa uka ha'e kuery renonde.

23

Nhomongeta va'ety kuery renonde Paulo ojexa ukaague

¹ Ha'e gui nhomongeta va'ety kuery re Paulo oma'ê vy aipoe'i:

— Ke'y kuery, xee ma Nhanderuete renonde xepy'a ky'a e'ÿa rupi aiko opa mba'e py, aÿ peve — he'i.

² Ha'e ramo sacerdote yvateve va'e Ananias ma ijyvýry ikuai va'e pe oipete uka ijuru rupi.

³ Ha'e ramo Paulo aipoe'i ixupe:

— Nhanderuete nenupã avi 'rã, oo mbotya omoxii mbyre rami rive reiko va'e.* Ndee ma upe py reguapy reiny lei re oia rami xemboayvu aguã, teĩ lei re oia rami e'ÿ ri ty'y xepete uka?

⁴ Ha'e ramo ijyvýry ikuai va'e aipoe'i:

— Ndeayvu vai ri ty'y sacerdote yvateve va'e Nhanderuete omoĩ va'ekue re?

⁵ Paulo ombovai:

— Ke'y kuery, xee ndaikuaai kuri sacerdote yvateve va'e oikoa. Mba'eta ipara oiny: “Pendeayvu vai eme heta va'e kuery ruvixa re” — he'i.*

⁶ Ha'e gui ma Paulo oikuaa nhomongeta va'ety kuery regua amongue saduceu, ha'e rã amboae ma fariseu regua ikuai. Ha'e rami vy ojapukai:

— Ke'y kuery, xee ma fariseu regua, ha'e fariseu ra'y aiko. Omano va'ekue omboetepa jevy rã guarã aarõ aikovy ramo ae xemboayvu — he'i.

⁷ Ha'e rami ijayvu ramo fariseu ha'e saduceu kuery joo rami e'ÿ-e'ÿ ijayvu. Mba'eta ijaty va'e kuery ma joo rami e'ÿ-e'ÿ oikuaa.

⁸ Mba'eta saduceu kuery ma oikuaa nonhemboete jevyavei 'rãa rami. Neĩ anjo, neĩ nhe'ê oikoa ha'e kuery ndoguerovia.* Ha'e rã fariseu kuery ma ha'e nunga ha'e javi oikoa oguerovia.

⁹ Ha'e rami py joo rami e'ÿ-e'ÿ ijayvu. Ha'e gui lei re nhombo'e va'ety fariseu regua opu'ã vy ijayvu atã:

— Ore ma mba'eve ndoroikuaai kova'e ava ojapo vaiague. Xapy'a rei nhe'ê e'ÿ vy anjo ri ty'y ixupe oikuaa uka ha'e nunga — he'i okuapy.

¹⁰ Ha'e kuery joguero'apa ramo huvixa okyje Paulo omopẽmba gui. Ha'e vy aipoe'i uka xondaro kuery ou vy oipe'a ha'e gui, okeaty py ju ogueraa aguã.

Paulo pe Senhor ojexa ukaague

¹¹ Pytũ jevy Paulo yvýry Senhor ojekuaa ho'amy. Ha'e vy aipoe'i:

— Ndepy'a guaxu ke, mba'eta Jerusalém py xereko remombe'uague rami avi Roma tetã py ju 'rã remombe'u.

Paulo ojuka aguã re judeu kuery jogueroayvuague

¹² Ko'ẽmba rã judeu kuery nhomboaty vy oura okuapy Paulo ojuka e'ÿa ja ndokarui neĩ ndoy'ui aguã re, ayvu vaipy ikuai e'ÿ aguã.

¹³ Ha'e rami aguã re jogueroayvu va'e ma quarenta raxa'i ikuai.

¹⁴ Jogueroayvu va'e kuery ma sacerdote yvatekueve va'e ha'e nhomongeta va'ety kuerya py oo vy aipoe'i:

— Roura kuri Paulo rojuka e'ÿa ja ndorokarui ha'e ndoroy'ui aguã re, ayvu vaipy orekuai e'ÿ aguã.

¹⁵ Aÿ ma nhomongeta va'ety kuery po py pendeayvu pemondouka xondaro ruvixa pe, penerenonde oexa uka ju aguã. Hekokue re peikuaa pota porâvexea rami pemombe'u. Ha'e rã ore ma roarõ 'rã ovaẽ e'ÿ re rojuka aguã — he'i okuapy.

¹⁶ Ha'e rami ijayvu okuapy rã Paulo ri'y oendu. Ha'e rami vy ha'e va'e ma oo vy xondaro kuery okeaty py oike, ha'e vy Paulo pe omombe'u.

¹⁷ Ha'e rami rã Paulo xondaro ruvixa oenoĩ vy aipoe'i:

— Eraa kova'e kunumi va'e nderuvixaa py, mba'eta oguereko ixupe omombe'u va'erã — he'i.

¹⁸ Ha'e ramo nguvixaa py ogueraa vy aipoe'i:

— Nhuã py omboty pyre Paulo xerenõ vy ojerure kuri ndea py aru aguã kova'e kunumi va'e, mba'eta oguereko ndevy omombe'u va'erã — he'i.

¹⁹ Ha'e ramo huvixa ipo re ojopy vy mombyry'i oguerojepe'a heravy. Ha'e vy oporandu ixupe:

— Mba'e tu rereko xevy remombe'u va'erã?

²⁰ Ombovai:

— Judeu kuery ijayvu kuri ndevy pe ojerure aguã ko'ê rã Paulo rexa uka aguã re nhomongeta va'ety kuerya py, hekokue re oikuaa pota porâvexea rami.

²¹ Ha'e rã ndee enhembotavy uka eme, mba'eta ha'e kuery regua quarenta raxa oura okuapy Paulo ojuka e'ÿa ja ndokarui neĩ ndoy'ui aguã re, ayvu vaipy ikuai e'ÿ aguã. Aÿ ma oiko katupa ma okuapy ndeayvu oarõ vy — he'i.

²² Ha'e rami rã huvixa ma kunumi va'e omondouka ju vy ijayvu avave rei pe omombe'u e'ÿ aguã ixupe oikuaa ukaague.

²³ Ha'e gui mokoĩ xondaro ruvixa ju oenoĩ vy aipoe'i:

* 23:3 Mateus 23.27,28 * 23:5 Êxodo 22.28 * 23:8 Lucas 20.27

— Pytū are jave guarā pemboaty duzentos xondaro kuery, sententa kavaju árygua, ha'e duzentos hu'y guaxu revegua Cesaréia peve peo aguā.

²⁴ Pejou avi kavaju Paulo oī aguā, mba'eve oiko e'ỹ re ovaē aguā huvixave Félix-a py — he'i.

²⁵ Ha'e gui kuaxia huvixave peguarā ombopara uka po rami ijayvua:

Félix pe huvixa Cláudio kuaxia ombopara uka va'ekue oīa

²⁶ “Xee Cláudio Lísias ma kova'e ambopara uka ndee huvixave omboetevepy Félix pe. Tereiko porā.

²⁷ Kova'e ava ma judeu kuery ojopy vy ojuka rai ramo xee xondaro kuery reve aju vy araa jepe, Roma pygua regua oikoa aikuaa vy.*

²⁸ Ha'e gui hexe ijayvu okuapya aikuaa porāveve vy araa uka ha'e kuery regua mongetaaty ikuai py.

²⁹ Ha'e rami vy aikuaa ha'e kuery rekorā lei oea pyre re oīa re rive ijayvu okuapya. Mba'eve rei ndojapo vai jajuka aguā, neī nhuā py nhamboty aguā voi.

³⁰ Ha'e rami vy ava va'e ojuka ta okuapya xevy omombe'ua rā aendu vy amondouka voi ndea katy. Hexe ijayvu rei va'e kuery pe voi xeayvu, ha'e kuery avi ou vy nerenonde omombe'u aguā hexeve oguereko va'e. [Tereiko porā.]”

Huvixave Félix-a py Paulo ovaēague

³¹ Ha'e gui xondaro kuery ma huvixa ijayvuague rami ikuai. Ha'e rami vy pyavyve Paulo ogueraa vy Antipátride peve ogueroaē.

³² Kō'ē jevy ha'e kuery ojevypa ju okeaty katy, ha'e rā kavaju árygua kuery pe ma ogueraa ukave Paulo.

³³ Ha'e va'e kuery ma Cesaréia py ovaē vy huvixave pe omboaxa kuaxia para, ha'e Paulo voi oexa uka.

³⁴ Ha'e ramo huvixave ma kuaxia para ogueroavupa ma vy oporandu maguigua pa oikoa re. Cílicia pygua oikoa oikuaa vy

³⁵ aipoe'i:

— Nderekokie mombe'ua kuery ovaēmba ma ramo xee romboayvu 'rā — he'i. Ha'e rami vy omboty uka ranhe Herodes oo guaxu ojapo va'ekue py.

24

Félix renonde Paulo rekokie ramigua omombe'ua ague

¹ Peteī nhiruí ára rire ovaē sacerdote yvateve va'e Ananias, nhomongeta va'ety kuery ha'e peteī ava ijayvu va'erā Tértulo hery va'e. Ha'e va'e kuery ma huvixa renonde ojexa uka okuapy Paulo rekokie re ijayvu aguā.

² Ha'e gui Tértulo ma oenoīa rā omombe'u hekokie ramigua. Ha'e vy aipoe'i:

— Orevuxa omboetevepy Félix, ndegui vy orekuai porā riae opa mba'e py. Ndee repena porā ramo mba'emo porā anho oiko ore judeu kuery pe.

³ Ha'e nunga roikuaa vy opa mba'e py roguero'v'a riae.

⁴ Ha'e rami avi xeayvu are e'ỹ aguā ajerure rejapxaka porā aguā xapy'a'i.

⁵ Mba'eta ore roikuaa pota rā peva'e ava ma mba'eaxy vaikue rami. Judeu kuery yvy jave re ikuai va'e omopu'amba rei oikovy, ha'e amboae rami nhombo'e Nazaré pygua peguarā rive.

⁶ Ha'e gui templo omongy'a ta ramo ore rojopy karamboae [rombopaga aguā ore kuery lei re oīa rami vy.

⁷ Ha'e rami teī xondaro ruvixa Lísias ou vy ivai vaipa reve orepo gui oipe'a heravy,

⁸ ha'e aipoe'i hexe oreayvu va'e apy ju roju aguā nerenonde.] Ha'e gui ndee voi hekokie re reikuaa pota vy reikuaa avi 'rā oreayvua anhetē memea — he'i.

⁹ Ha'e rami ijayvu rā judeu kuery ikuai va'e ojou porāmba. Ha'e vy

— Anhetē va'e meme — he'i okuapy.

Paulo guekokue omombe'uaague

¹⁰ Ha'e gui Paulo pe ju huvixave opo py “Emombe'u ke” he'ia rami ojapo. Ha'e ramo aipoe'i:

— Heta ma'et'ỹ re ma ore kuery ruvixa reīa aikuaa vy xee voi ta xeayvu.

¹¹ Mba'eta ndee voi reikuaa doze ára ete'i ojapoa Jerusalém katy amboete aguā aa ague.

¹² Ha'e gui templo py ha'e kuery xejou okuapy jave avave reve ndaxeayvu vai, neī nanhomopu'ái ha'e kuery onhembo'eaty rupi, neī tetā rupi voi.

¹³ Ha'e kuery nomombe'u porā kuaai guive xere ijayvu rei okuapyague.

¹⁴ Ha'e rā peteī amombe'u ta ndevy: Xee ma Senhor reko rupi aiko, ha'e kuery “Amboae rami onhembo'e va'e”, he'ia rupi. Ha'e rami vy xee voi aiko oreramoī kuery Ruete pe. Lei re ipara oinya ha'e profeta kuery ombopara va'ekue rami vy mba'emo oiko va'e ha'e javi arovia.

¹⁵ Ha'e rami vy Nhanderuete gui aarō aikovy ha'e kuery voi oarō okuapy va'e, heko porā ha'e heko porā e'ỹ va'ekue omboetepaa ju aguā.

¹⁶ Ha'e nunga rupi anhea'ā aikovy Nhanderuete ha'e avakue renonde xepy'a ky'a e'ỹa rupi aiko aguā.

¹⁷ — Ha'e gui mbovy ma'et'ỹ rei e'ỹ aikoa gui aa karamboae ore kuery pe ome'ē mbyre araa vy, ha'e Nhanderuete pe mba'emo ame'ē aguā guive.

¹⁸ Ha'e nunga ajapo aikovya rupi ae judeu kuery Ásia pygua xejou templo py. Ajeky'a'o ukapa ma rire xejou xeirū heta reve'ỹ, ha'e anhombopoxy reia py e'ỹ guive.

¹⁹ Ha'e va'e kuery ae ou 'rāgue nerenonde xere ijayvu aguā, oguereko va'e rire.

* 23:27 Atos 21.27-39; 22.24-30

²⁰ Ha'e rami e'ŷ vy apy ikuai va'e ae oikuaa ri vy tomombe'u nhomongeta va'ety kuery renonde ha'ã jave ajapo vaiague ojou va'ekue.

²¹ Mba'eta po rami anho ha'e kuery mbyte ha'ã vy xeyvuu atã: “Kova'e ára xemboayvu omano va'ekue omboetepaa ju 'rãa arovia ramo”, ha'e va'ekue.

Félix ha'e Drusila renonde Paulo ojexa ukaague

²² Ha'e ramo Félix ma Senhor reko oikuaa ae vy nopena voicei. Aipoe'i:

— Xondaro ruvixa Lísias ou jave mae ma aikuaa pota porã 'rã pendeayvua re — he'i.

²³ Ha'e rami vy xondaro ruvixa vvyíve va'e pe aipoe'i Paulo oarõ vy hexe opena porã'i aguã, ha'e irũ kuery oipytyvõxe rã ojoko e'ŷ aguã guive.

²⁴ Kueve'i ma rire Félix ou ju gua'yxy judeu va'e Drusila reve. Ha'e vy Paulo oenoĩ uka vy ojapyxaka oiny Cristo Jesus re jajerovia aguã re ijayvu rã.

²⁵ Teko porã, jejokoa ha'e nhomboayvupaa aguã re ijayvu ramo Félix oendu vy okyje. Ha'e vy aipoe'i:

— Ha'e rami vy aĩ tereo ju. Ha'eve jave roenoĩ uka ju 'rã — he'i.

²⁶ Ha'e rami avi oipotã teĩ Paulo ome'ẽ perãta ixupe. Ha'e rami vy mbovykue rei e'ŷ oenoĩ uka vy ijayvu hexeve.

²⁷ Mokoĩ ma'e'tỹ rire huvixa Félix rekovia oĩ Pórcio Festo. Ha'e jave Félix ma judeu kuery pe ojejou porã ukaxe vy oeja ovy Paulo nhuã py.

25

Festo renonde Paulo oĩ vy César renonde ju ijayvu aguã re ojerureague

¹ Festo ha'e pygua kuery ruvixarã oĩ vy mboapy ára rire Cesaréia tetã gui oo Jerusalém katy.

² Are'ỹ re ixupe sacerdote yvatekueve va'e ha'e judeu ruvixa kuery omombe'u Paulo rekokie ramigua. Ha'e rami vy peteĩ re ojerure

³ oipytyvõ aguã. Paulo re nda'ija'ei vy ojerure Jerusalém katy ju ogueru ruka aguã, ha'e kuery tape py oarõ vy ojuka aguã.

⁴ Ha'e rã Festo ombovai:

— Paulo ma Cesaréia py ae oĩ nhuã py, ha'e gui xee voi are'ỹ'i re aa 'rã ha'e katy.

⁵ Peẽ kuery regua hi'arandukueve tapeo avi xerupive, ava va'e ojapo vaiague peikuaa vy pemombe'u aguã — he'i.

⁶ Ha'e kuery ikuai py ndoiko arei. Oito, dez araa py ogejy ju Cesaréia katy. Ha'e gui ko'ẽ jevy nhomboayvuaty py oguapy vy ogueru ruka Paulo.

⁷ Paulo ovaẽ ramo judeu kuery Jerusalém gui ou va'ekue ombojere rei okuapy. Opa marã rei hekokie ramigua omombe'u. Ha'e rami teĩ ha'e kuery nomombe'u porã kuaai guive.

⁸ Ha'e rã Paulo ma guekokue omombe'u vy aipoe'i:

— Peteĩve henda py ma xee ndajevayi judeu kuery pegua lei rovai, templo, neĩ César rovai — he'i.

⁹ Ha'e rã Festo ma judeu kuery pe ojejou porã ukaxe vy aipoe'i Paulo pe:

— Ndevy pe ha'eve pa Jerusalém katy reo aguã, ha'e py ju xee romboayvu aguã ha'e nungakue re?

¹⁰ Paulo ombovai:

— Xee ma César nhomboayvu atyrã omoĩ va'ekue py aĩ ae ma. Apy ae ha'eve xemboayvu aguã. Neĩ mba'eve ndajapo vai judeu kuery pe. Ndee reikuaa porã.

¹¹ Mba'emo ajapo vai, e'ŷ vy ajojuka va'e rire amano teĩ ha'evapa rei 'rãgue. Ha'e rami 'rãgue py xerekokie ramigua omombe'u okuapy anhetẽ e'ŷ ramo nda'evei ha'e kuery po py avave rei xemboaxa rive aguã. Xee ma ajerure César renonde ju xeyvuu aguã — he'i.

¹² Ha'e gui Festo ma imongetaa kuery reve jogueroayvu ma rire aipoe'i ixupe:

— César renonde ndeayvu aguã re rejerure rire ma ha'e katy 'rã reo.

Agripa pe Festo omombe'uaague Paulo reko

¹³ Kueve ma rire Cesaréia py huvixave Agripa gua'yxy Berenice reve ovaẽ huvixa Festo pe oxarura aguã.

¹⁴ Ha'e py ikuai are ramo huvixave pe Festo omombe'u Paulo reko. Ha'e vy aipoe'i:

— Apy Félix oeja ovy peteĩ ava nhuã py.

¹⁵ Ha'e va'e reko re ma Jerusalém py ai jave sacerdote yvatekueve va'e ha'e judeu mongetaaty kuery ijayvu. Ajuka uka aguã re ojerure okuapy.

¹⁶ Ha'e kuery pe aipoa'e Roma pygua kuery reko rami vy nda'evei peteĩ va'e rei ajuka uka aguã hexe ijayvu va'e kuery joa py ikuai e'ŷ re, ayvu oiko va'e ombovai aguã.

¹⁷ Ha'e gui ma apy ju ha'e kuery ovaẽmba ma ramo xee namboarei. Ko'ẽ jevy nhomboayvuaty py oguapy vy aru ruka ava.

¹⁸ Ha'e rã hexe ijayvu va'e kuery opu'ã vy peteĩve nda'ijayvui ojapo vaiague re xee aexa'ãague rami.

¹⁹ Ha'e rami 'rãgue py hexe ijayvu okuapy guekorã oeja pyre re rive, ha'e peteĩ ava omano va'ekue Jesus hery va'e re guive. Ha'e va'e pe ma Paulo “Oikove” he'i.

²⁰ Ha'e nunga re xee ndaikuaa pota kuaai vy aporandu Jerusalém katy oo aguã ha'eve paa re, ha'e py ju amboayvu aguã ha'e nungakue re.

²¹ Ha'e rami teĩ Paulo ojerure nhuã py opyta aguã re César renonde ju ijayvu aguã. Ha'e ramo xeyvuu apy ae opytave aguã, César-a katy amondouka peve — he'i.

²² Ha'e ramo Agripa aipoe'i Festo pe:

— Ha'e va'e ava ayvu ma xee voi aenduxe.

Ombovai:

— Ko'ẽ ramo rendu 'rã — he'i.

Teĩque ju Agripa reve Festo ijayvuague

²³ Ko'ẽ jevy Agripa ha'e Berenice opa marã omboetea reve ou vy nhomboayvu aguã py ovaẽ, huvixa kuery ha'e tetã pygua yvatekueve reve. Ha'e gui Festo ogueru ruka Paulo.

²⁴ Ha'e rami vy aipoe'i:

— Huvixave Agripa, ha'e apy pendekuai va'e ha'e javi, kova'e ava pexa va'e káuxa ae judeu kuery ha'e javi ijayvu karamboae xerenonde. Jerusalém tetã py, ha'e apy voi ojavukai okuapy ndoikove riaevei aguã rami.

²⁵ Ha'e rã xee ma ndaikuaai ojapo vaiague omano aguã. Ha'e rami vy nhandervixa guaxuve renonde ijayvu aguã re ojerure ramo xeayvu ha'e katy ju amondouka aguã.

²⁶ Ha'e rami avi hekokue mba'eve ndaikuaai anhetẽ va'e nhandervixa pe ambopara aguã. Ha'e nunga rupi penerenonde ju aru ruka. Huvixave Agripa, nerenonde ae aru ruka aikuaaxe vy, ndee remboayvu ramo aikuaa aguã ambopara va'erã.

²⁷ Mba'eta xevy pe nda'evei nhuã py omboty pyre amondouka aguã hexe ayvu oiko va'e amombe'u porã e'ỹ re.

26

Huvixave Agripa renonde Paulo ijayvuague

¹ Ha'e rire huvixave Agripa aipoe'i Paulo pe:

— Ha'eve ndeayvu ndereko re.

Ha'e ramo Paulo opo oupi vy omombe'u gueko. Aipoe'i:

² — Huvixave Agripa, kova'e ára avy'a nerenonde xereko re xeayvu vy, judeu kuery xere ijayvuague ha'e javi ambovai aguã.

³ Mba'eta ndee ma judeu kuery reko ha'e ayvu oiko va'e ha'e javi reikuaa porãve va'e. Ha'e nunga rupi ajerure rejapyxaka porã aguã re.

⁴ Ha'e gui judeu regua huvixa kuery oikuaapa xekyrĩ guive aikoague, ha'e jypy guive ore kuery ikuai rupi ha'e Jerusalém tetã py aikoague guive.

⁵ Anhetẽ ae ha'e kuery jypy'i guive xekuaa, ha'e rami omombe'uxe rã. Mba'eta orereko rupi onhea'ãve va'e fariseu kuery regua xee voi aiko va'ekue.

⁶ Oramoĩ kuery pe Nhanderue te ijayvuague ojeupity aguã re ajerovia ramo rive xemboayvua aỹ.

⁷ Ha'e nunga ae ore kuery doze regua orekuai va'e roupity aguã ronhea'ã rokuapy ara py ha'e pyávy, Nhanderue te pe orekuai vy. Xeruvixa, ha'e nunga re ajerovia ramo ae judeu kuery xemboayvu.

⁸ Mba'e re tu peẽ kuery ndaperovia Nhanderue te omano va'ekue omboete ju 'rã?

⁹ — Anhetẽ xevy rã voi ha'eve rei va'ekue opa marãgua ajapo aguã Nazaré pygua Jesus rery amboetea rupi e'ỹ.*

¹⁰ Ha'e rami ae aiko va'ekue Jerusalém py. Kuaxia para sacerrote yvatekueve va'e gui araa vy icky'a e'ỹ va'e kuery heta amboty va'ekue nhuã py. Ojukaa ta ramo xee voi ojuka aguã re xeayvu va'ekue.

¹¹ Mbovykue rei e'ỹ ainupã va'ekue judeu kuery onhembo'eaty ikuai va'e rupi, ijayvu vai aguã rami guive ajapo. Ha'e kuery pe xevai vy yvy mboae re tetã ikuai va'e rupi voi amoingo axy va'ekue.

¹² — Ha'e rami aguã ae aa karamboae Damasco tetã katy. Sacerrote yvatekueve va'ea gui kuaxia para araa, ha'e kuery xemoĩague kuaa ukaarã.

¹³ Xeruvixa, kuaray mbyte jave tape rupi aa vy peteĩ hendy va'e aexa yva re, kuaray gui hendy ratãve va'e. Ha'e va'e ma xeyvry rupi omoexakãmba, ha'e xerupive oo va'e kuery yvry guive.

¹⁴ Ha'e ramo yvy rupi ro'a pavẽ. Ha'e gui peteĩ ayvu aendu hebraico ayvu py aipoe'i va'e: “Saulo, Saulo, mba'e re tu xerereko axyxe ri? Ndee ae renhemoingo axy, ferro rakua re opyvoi va'e rami reiko vy”, he'i.

¹⁵ — Ha'e ramo xee aporandu: “Mava'e tu ndee, Senhor?” Ombovai: “Xee ma Jesus rereko axy va'e.

¹⁶ Ha'e gui epu'ã he'amy ndepy re, mba'eta po rami aguã ajexa uka ndevy, xerembiguairã romoĩ reikuaa uka aguã mba'emo xexa va'ekue, ha'e raka'e rã aexa uka va'erã guive.

¹⁷ Neretarã kuery ha'e judeu e'ỹ va'e kuery ikuai rupi xee romondouka vy rogueraa jepe 'rã ha'e kuery po gui.

¹⁸ Hexa reipe'a 'rã ojeko rerova aguã pytũa rupi ikuai rupi hendy va'e peguarã, ha'e Satanás po'akaa rupi ikuai rupi Nhanderue te peguarã. Ha'e rami vy 'rã ombogue ukapa ojevayvague, oupity aguã xere ojerovia vy ojeyku'a'o uka va'ekue pegua”, he'i.

¹⁹ — Ha'e rami rã huvixa Agripa, xee nanhe'ẽ rendu e'ỹi yva guigua aexa va'ekue.

²⁰ Ha'e rami vy Damasco tetã py ranhe ayvu amombe'u, ha'e gui Jerusalém py ju, Judéia regua ha'e javi rupi, ha'e judeu e'ỹ va'e kuerya rupi amombe'u aikovy ikuai rupi ojepe'a vy Nhanderue te ojeko rerova aguã, ha'e iporã va'e ojapoa py oexa uka aguã ojeko rerovaague.

²¹ Ha'e rami aikoa re rima amongue judeu kuery xejukaxe vy xejopy karamboae templo py aiko jave.

²² Ha'e rami teĩ Nhanderue te xepytyvõ ramo kova'e ára peve aiko. Yvyĩgueve ha'e yvatekueve pe amombe'u ayvu. Xee amombe'u aikovy va'e ma profeta kuery ha'e Moisés ijayvuague rami vy oiko va'erã anho.

* 26:9 Atos 8.3, 9.1-19

²³ Ha'e nunga ma Cristo oiko axy aguã, ha'e gui ha'e ranhe omanoague gui onhemboete ju vy judeu ha'e judeu e'ÿ va'e kuery pe oikuaa uka aguã hendy va'e.

Paulo ijayvupa e'ÿ re Festo ijayvuague

²⁴ Paulo gueko omombe'upa e'ÿ re Festo ojavukai reve aipoe'i:

— Paulo, naneakã porãvei ma teve. Ipara re renhembo'e vai ete vy nane'aranduvei — he'i.

²⁵ Paulo ombovai:

— Xeruvixa Festo, xee naxeakã porã e'ÿi ri. Ha'e rami 'rãgue py xe'arandua rupi xeayvu anhetê va'e re anho.

²⁶ Mba'eta ha'e nunga ha'e javi huvixave oikuaa. Ixupe ae amombe'u akyjea py e'ÿ. Xee aikuaa rã ha'e nungakue ha'e javi oikuaapaa, mba'eta neĩ peteĩve ndoikoi nhemi rupi.

²⁷ Ha'vy ndee huvixave Agripa, rerovia pa profeta kuery ayvu? Xee aikuaa porã reroviaa — he'i.

²⁸ Ha'e ramo Agripa aipoe'i Paulo pe:

— Rexa'ã rã ndaxyi Cristo pegua xeapo aguã?

²⁹ Paulo ombovai:

— Xeruvixa, tove ndaxyi e'ÿ vy haxy py teĩ Nhanderueto tojapo ndee anho e'ÿ, kova'e ára xeayvu re ojapyxaka va'e kuery ha'e javive tojapo xee rami, va'eri aÿ'i xejokuaa rami e'ÿ ta'vy.

“Ha'eva'e 'rãgue teĩ Paulo japoĩ aguã”, he'iaague

³⁰ Ha'e rami rã huvixave opu'ã ju, ha'e gui huvixa mboae kuery, Berenice, ha'e ha'e kuery reve oquapy okuapy va'ekue ha'e javi voi.

³¹ Ha'e kuery ojepe'apa vy peteĩ-teĩ joupe ijayvu vy aipoe'i:

— Peva'e ava mba'eva rei ndojapoĩ ra'e ojukaa aguã, neĩ nhuã py ombotyã aguã — he'i.

³² Ha'e ramo Agripa aipoe'i Festo pe:

— Peva'e ava ma ha'eva'e 'rãgue japoĩ aguã, César renonde ijayvu aguã re ndojerurei va'e rire.

27

Itália katy Paulo omondoukaague

¹ Ha'e gui huvixa kuery ijayvu Itália katy oremondouka aguã. Ha'e rami vy Paulo ha'e nhuã py ikuai va'e regua omboaxa peteĩ xondaro ruvixa heraarã po py. Ha'e va'e ma César oĩa pygua, Júlio hery va'e.

² Ha'e ramo roimba peteĩ kanoã guaxu Adramitio guigua py. Ha'e va'e ma Ásia yke rupi oo va'erã. Ha'e rami vy yy rupi roje'oi. Orerupive oo avi Macedônia regua Tessalônica pygua Aristarco.

³ Ko'ẽ jevy rovaẽ Sidom py. Paulo re Júlio opena porã ivai reia py e'ÿ. Ha'e rami vy omondouka oirũ kuery oexa aguã, ha'e mba'emo oipota va'e ojou aguã.

⁴ Ha'e gui ma roje'oi ju yy rupi. Ha'eva'e 'ÿa katy gui yvytu oipeju ramo Chipre ypa'ũ katy'i rupi roo ijyke yvytu e'ÿa rupi.*

⁵ Cilícia ha'e Panfília yke rupi ye'ẽ roaxa ma vy Lícia regua Mirra tetã py rovaẽ.

⁶ Ha'e py ma xondaro ruvixa peteĩ kanoã Alexandria guigua ojou Itália katy oo ta va'e. Ha'e va'e py ju oremoĩ.

⁷ Ha'e gui ma roove mbeguei'i. Mbovy ára rei e'ÿ haxy py Cnido tetã katy'i rovaẽ. Yvytu ha'eva'e 'ÿa katy gui oipeju rã nda'eva'i rooxea katy roove aguã. Ha'e ramo Creta ypa'ũ yke rupi roo yvytu e'ÿa rupi, Salmona gui mombyry'i rupi.

⁸ Ijyke rupi anho roo vy haxy py rovaẽ peteĩ henda Porto Porã 'epy va'e py. Ha'e katy rai oĩ Laséia tetã.

Ára vai rupi oguataague

⁹ Are ma rire ha'e kuery oove aguã ijavaete, mba'eta okaru e'ÿ re ikuaiã ára oaxa ma rire. Ha'e ramo Paulo ha'e kuery omongeta vy

¹⁰ aipoe'i:

— Avakue, xee aikuaa rã jaguataa rupi jaiko axy vaipa 'rã. Mba'emo jajavyky rei 'rã, ha'e nhamokanhymba 'rã kanoã ha'e ivoyi guive, nhanderekove voi — he'i.

¹¹ Ha'e rã xondaro ruvixa ma Paulo ayvu gui ogueroviave kanoã mboguataa ha'e ija ayvu.

¹² Ha'e py yro'y jave kanoã omboja aguã nda'eva'i ramo ha'e kuery oovexe ha'e gui, Fenice py ovaẽ jepe rivyvyi gui, ha'e py mae ma oaxa aguã yro'y. Mba'eta ha'e py kanoã mbojaaty Creta ypa'ũ re oĩ va'e ma kuaray oua katy ijapy jovaive opyta.

¹³ Ha'e gui kuaray ijapu'a'ia katy gui mbeguei'i yvytu oiny ramo ha'e kuery oexa'ã teĩ ooxeague py ovaẽ jepe aguã re. Ha'e rami vy kanoã mombytaa oupi ju rã Creta ypa'ũ yke rupi roo.

¹⁴ Ha'e rami teĩ are'ÿ'i re ypa'ũ katy gui ou yvytu atã, Euroaquilão 'epy va'e.

¹⁵ Yvytu kanoã ogueraa rami rei ogueraa. Roguerova nhea'ã teĩ yvytu re ndorepo'akai vy ropoipa. Ha'e vy noropenavei ogueraa tema aguã.

¹⁶ Peteĩ ypa'ũ'i Cauda 'epy va'e yke yvytu e'ÿa rupi roaxa jave haxy py roupĩ imoiny kanoã'i.

¹⁷ Ha'e va'e oupi ma vy opa mba'emo oiporu kanoã ojokua aguã, ita ku'i reia re ojeapi gui okyje vy. Ajukue oupi pyre omboguejy ju vy nopenavei ogueraa aguã.

¹⁸ Yvytu atã gui rojexavai vy ko'ẽ jevy ombovevuia kanoã mba'emo oĩ va'e omombo va.

¹⁹ Ha'e gui mboapy araa py ore ae po py romombo mba'emo kanoã regua ye'ẽ py.

* 27:4 Yvytu po'akaa re ha'e kuery oo kanoã guaxu re ajukue oipyoa va'e py.

²⁰ Ha'e gui ára vai orere ou va'ekue gui mbovy ára rei e'y kuaray neĩ jaxy-tata ndojekuaavei ramo noroexa ávei ma roo jepe aguã.

²¹ Are ma ore kuery ha'e javive ndorokaruvei ramo Paulo opu'ã ho'amý ore kuery mbyte. Ha'e vy aipoe'i:

— Avakue, anhetê pejapxykaka va'e rire xeavyu re, ha'e Creta gui ndajajui va'e rire, guĩ rami ete jajexavai ha'e nhamokanhymba e'y aguã.

²² Ha'e rami teĩ aý ma po rami xee romongeta: Pendepy'a guaxu ke, mba'eta peẽ kuery regua peteive nomokanhyi 'rã guekove, kanoã anho 'rã okanhyi.

²³ Mba'eta angegua pyávy xea py peteĩ anjo ojekuaa Nhanderuete ixupe aiko ha'e amba'eapoa va'ea guigua.

²⁴ Ha'e va'e ma xevy pe aipoe'i: “Paulo, ekyje eme. César renonde rejexa uka 'rãe. Ha'e gui Nhanderuete nhomboaxya rupi ndere oma'ẽ vy ogueraa jepe 'rã ndereve oguata va'e kuery ha'e javi”, he'i va'ekue xevy.†

²⁵ Ha'e nunga rupi avakue, pendepy'a guaxu ke, mba'eta xee ajerovia Nhanderuete re, xevy ijayvuague oiko aguã.

²⁶ Ha'e rami teĩ nhandereraa 'rãe peteĩ ypa'ũ re — he'i.

Kanoã ivaipaague

²⁷ Mokoĩ semana re ha'ekue'y-kue'y katy yvytu orereraa ye'ẽ Adriático rupi. Ha'e gui ma pyávy pytũ mbyte jave kanoã mboguataa kuery oendu yvy re ovaẽ rai'i maa.

²⁸ Ha'e rami vy ixã ipoyi va'e oity vy oikuaa vinte braça typya. Oove'ia py ixã oity ju vy quinze braça ete'i oikuaa.

²⁹ Ha'e vy ita re ojeapi gui okyje vy kanoã reví gui irundy henda py omboguejy kanoã mombytaarã. Ha'e rami vy onhembo'e okuapy ko'ẽ voi aguã.

³⁰ Kanoã mboguataa kuery oẽxe vy kanoã xĩ gui kanoã'i omboguejy nhemi yv py, kanoã mombytaarã mboae omboguejy aguã merami.

³¹ Ha'e ramo Paulo aipoe'i xondaro ruxiva ha'e xondaro kuery pe:

— Peva'e kuery kanoã py ndopytai ramo peẽ voi ndapeje rã — he'i.

³² Ha'e ramo xondaro kuery kanoã'i xã ojaya vy opoi ogueroxyry heravy aguã.

³³ Ko'ẽ rai'i jave pavẽ pe Paulo ijayvu okaru aguã. Ha'e vy aipoe'i:

— Kova'e ára reve vy mokoĩ semana ma ojapo pekaru e'y re pendekuai, mba'eve ndape'ui.

³⁴ Ha'e ramo xee xeavyu pekaru aguã. Ha'e rami vy 'rãe penembaraete peo jepe aguã. Mba'eta napemokanhyi 'rã neĩ peteĩ pende'a ma voi — he'i.

³⁵ Po rami ijayvu ma vy peteĩ mbojape oupi, ha'e pavẽ oexaa py ogueroxyry'a Nhanderuete. Ha'e gui oipe'a'ã vy omboypy ho'u aguã.

³⁶ Pavẽ oexa vy oendu ipy'a guaxua, ha'e vy ha'e kuery voi okaru avi.

³⁷ Kanoã py ikuai duzentos e setenta e seis ha'e javi vy.

³⁸ Okaru porãmba ma vy ombovevuive ju kanoã, trigo ryru ye'ẽ py omombopa vy.

³⁹ Ko'ẽmba rã vvy oexa teĩ ndoexa kuaai. Ha'e gui ma peteĩ yv oikkea oexa. Ha'e va'e rembe re ma ita ku'i reia oĩ. Ha'e ramo nhomongeta okuapy ha'e va'e re kanoã omboja aguã.

⁴⁰ Ha'e rami vy kanoã mombytaa xã ojaya vy opoi yv py. Ojora avi imbojeapaa ojokuaague. Kanoã xĩ katy oupi imoiny ajukue, yv rembe katy yvytu ogueraa aguã.

⁴¹ Ha'e gui ma mokoĩ henda katy gui oxyrya py kanoã ovaẽ vy ipija. Ixĩ ipija vy noẽvei. Ha'e rã hevi ma yai ojeapi-api vaipa ramo opẽmba.

⁴² Ha'e ramo xondaro kuery ijayvu nhuã py omboty pyre kuery ojukapa aguã, peteive ho'yta vy oo jepe e'y aguã.

⁴³ Ha'e rã xondaro ruxiva ma Paulo ogueraa jepexe vy ndojuka ukai omboty pyre kuery. Ha'e vy aipoe'i ho'yta kuaa va'e ranhe yy py opo aguã, yv rembe re ovaẽ aguã.

⁴⁴ Ha'e gui amboae kuery pe ma aipoe'i yvyrape ha'e kanoã pẽgye áry oo jepe aguã. Ha'e rami py ha'e javive oo jepe, yvy'ã re oẽmba.

28

Malta ypa'ũ py ikuaiague

¹ Yvy'ã re orekuai vy roikuaa ha'e va'e ypa'ũ Malta herya.

² Ha'e pygua kuery opena porã'i orere. Tata ojapo vy oremovaẽmba oky ha'e yro'y gui.

³ Paulo ma yxakã ra'ykue omono'õ vy tata py onhono ramo haku gui peteĩ mboi oẽ vy oixu'u oiny ipo re.

⁴ Ipo re mboi ovava oiny rã ha'e pygua kuery oexa vy joupe-upe aipoe'i:

— Peva'e ava ta'vy jojuka rive va'ety teve, mba'eta ye'ẽ gui oo jepe va'ekue ri Nhandererekoa ndoejai oikove aguã — he'i.

⁵ Ha'e rã Paulo ma tata py mboi omombo ramo mba'eve rei ndoikoi.*

⁶ Ha'e ramo ha'e kuery oexa pota iruru rivyvyi, e'y vy ho'a vy omano vyvoi gui. Ha'e rami teĩ aje'i ma oarõ rire mba'eve rei ndoikoi rã oexa vy amboae rami ju oexa'ã okuapy. Ha'e vy

— Peva'e ta'vy tuuete kuery regua teve — he'i okuapy.

Huvixa Públio ngoo py Paulo omovaẽague

⁷ Ha'e katy rai oĩ ypa'ũ pygua ruvixa pegua yvy, Públío hery va'e. Ha'e va'e ma ngoo py oremovaẽ porã mboapy ára peve.

⁸ Públío ru ma imba'eaxy oupy tye raxy gui, ipire raku vaipa guive. Ha'e ramo Paulo oo oipou vy, ha'e onhembo'e reve hexe omoĩ opo. Ha'e rami vy omonguera.

⁹ Ha'e nunga ypa'ũ pygua kuery oikuaa vy imba'eaxy va'e kuery mboae ou vy okuerapa.

¹⁰ Ha'e pygua kuery opa mba'e ome'ẽ orevy. Roo ju ta ma ramo voi kanoã py omboyrũ opa marãgua roikotevẽ va'e.

Oguatave jevyague

¹¹ Mboapy jaxy oaxa rire roĩ peteĩ kanoã Alexandria guigua py, yro'y jave ypa'ũ re onhemboja oupy va'ekue, Dióscuros ra'angaa oĩa va'e py.

¹² Siracusa tetã py rovaẽ vy mboapy ára re ropyta ha'e py.

¹³ Ha'e gui roove vy Régio py rovaẽ. Ko'ẽ jevy kuaray puku-a katy gui yvytu oipeju ramo mokoĩ araa py rovaẽ Putéoli py.

¹⁴ Ha'e py rojou amongue irmão kuery. Ha'e va'e kuery ojerure ha'e kuery reve ropyta aguã sete ára peve. Ha'e rami py roje'oi Roma katy.

¹⁵ Roju roinya omombe'ua rã oendu vy Roma pygua irmão kuery ju ou oreroxaĩ aguã. Praça de Ápio ha'e Mboapy Vendeaty 'epy va'e peve ou. Ha'e va'e kuery ou rã Paulo oexa vy oguerovy'a Nhanderue, ipy'a guaxuve guive.*

Roma py Paulo ovaẽague

¹⁶ Roma tetã py rovaẽ ma ramo Paulo ha'e ae oĩxexa py omoĩa. Hexeve oiko avi peteĩ xondaro harõarã.

¹⁷ Mboapy araa py oenoĩ uka judeu ruvixa kuery. Ha'e ramo ha'e kuery jogueru vy ono'õmba ramo aipoe'i: — Ke'y kuery, xee ma mba'eve rei ndajapoi nhande kuery rovai, neĩ nhanderekorã nhaneramoĩ kuery pe oea pyre rovai guive. Ha'e rami teĩ Jerusalém tetã guive xejokuaa reve aju, Roma pygua regua po py xemboaxaa rire.

¹⁸ Ha'e va'e kuery ma xemboayvu vy ndoikuaai mba'eve rei ajapo vaiague xejuka aguã. Ha'e rami vy xepoixe teĩ

¹⁹ judeu kuery ma xere opu'ã rei rã ajerure César renonde ju xeayvu aguã re. Ha'e rami avi mba'eve ndarekoi nhande kuery va'e regua re xeayvu aguã.

²⁰ Ha'e nunga rupi peẽ kuery roenoĩ uka roexa ha'e peẽ kuery reve xeayvu aguã, mba'eta Israel kuery ojerovia okuapya re xee voi ajerovia ramo rima xejokuaa imoiny kova'e corrente py — he'i.

²¹ Ha'e ramo ha'e kuery aipoe'i ixupe:

— Ore ma Judéia guigua kuaxia para noroexai ndereko re ijayvu va'e, neĩ peteĩve nhanderyke'y kuery regua ndouai guive ndereko omombe'ua, e'y vy ndere ijayvu aguã.

²² Ha'e rami avi roenduxe reikuaa va'e, mba'eta anhetẽ amboae rami penhembo'ea re opa rupi ijayvu reia rã roendu.

Roma py Paulo ayvu omombe'uague

²³ Ha'e kuery oa'angaague ára py heta ete ou Paulo oĩa py, okeaty py ae. Ha'e rã ko'ẽmba guive ka'aru peve ha'e kuery pe ayvu omombe'ua porãve Nhanderue po'akaa regua. Moisés lei ombopara va'ekue ha'e profeta kuery ombopara va'ekue rupi ijayvu vy onhea'ã Jesus re ha'e kuery ojerovia aguã.

²⁴ Ha'e ramo amongue ete'i oguerovia ijayvua. Ha'e rã amboae kuery ma ndoguerovia ae tema.

²⁵ Ha'e kuery joo rami e'y-e'y oikuaa vy oje'oipa ta ma ramo Paulo aipoe'i:

— Ha'evea rami Nhe'ẽ Ky'a E'y ijayvu raka'e penamoĩ kuery pe, mba'eta profeta Isaías pe aipoe'i uka:

²⁶ “Tereo heta va'e kuerya py, ha'e aipo'ere ha'e kuery pe: ‘Pendeapya py pendu teĩ napendu kuaai 'rã. Pexa pota teĩ ndapexa kuaai 'rã’, 're.

²⁷ Mba'eta ha'e kuery ma inhakã ratãmba. Oapya py oendu vai, guexa guive omboty, ndoexai aguã guexa py, neĩ noenduĩ aguã oapya py, opy'a py oikuaa e'y aguã, mba'eta ndojeko rerovaxei ae, xevy pe nonhemoingo porã ukaxei guive”, he'i va'ekue.*

²⁸ — Ha'e nunga rupi peikuaa pota, mba'eta judeu e'y va'e kuery pe voi Nhanderue oikuaa uka nhandereraa jepe aguã regua. Ha'e rã ha'e kuery ma oendu 'rã — he'i.*

²⁹ [Pova'e ayvu rupi ijayvu rã judeu kuery oendu vy nhomotare'y mba reve oje'oipa.]

Mokoĩ ma'etỹ re Paulo omboty imoinyague

³⁰ Mokoĩ ma'etỹ re Paulo oĩ oke atyrã oiporuka va'e py. Ha'e py ma omovaẽ oexaxe vy ou va'e ha'e javi.

³¹ Omombe'ua oikovy Nhanderue po'akaa, ha'e nhombo'e oiny Senhor Jesus Cristo re. Okyjea py e'y ijayvu, avave rei omokyriĩ e'y re.

* 28:15 Romanos 1.10-12 * 28:27 Isaías 6.9-10 * 28:28 Atos 13.44-47

Roma pygua kuery pe Paulo ombopara va'ekue Roma pygua kuery pe Paulo ombopara va'ekue

Kova'e kuaxia ma Roma tetã py Jesus remimbo'e kuery ikuai va'e peguarã apóstolo Paulo ombopara va'ekue. Paulo ma opa rupi oo raka'e ayvu porã omombe'u vy. Ha'e rã Roma tetã py ma ndooi ranhe. Ha'e py ma amboae kuery omboypy raka'e igreja. Ha'e py Paulo ovaêxe avi vy ha'e pygua kuery pe ombopara kova'e kuaxia. Aipoe'i: "Mba'eta roexaxe ete, peê kuery pe voi aikuaa uka agua Nhe'ê guigua penembaraeeteve agua. Ha'e rami avi peê kuery reve joo meme nhandomombaraete agua jajeroviaa rupi, peê ha'e xee. ... Mba'eta xee naxĩ ayvu porã amombe'u agua, mba'eta ha'e va'e rupi Nhanderuete oexa uka opo'akaa ogueraa jepe vy hexe ojerovia va'e ha'e javive, jypy'i judeu regua, ha'e gui grego regua guive. Mba'eta ayvu porã rupi Nhanderuete oikuaa uka ojeuguigua teko porã. Ha'e va'e ma jajerovia rã ome'ê 'rã', he'i (1.11-12,16-17a).

Mba'eta rã tu nhande kuery nhandereko vai va'e meme teĩ Nhanderuete nhandemboeko porã? Mba'eta Paulo aipoe'ia rami: "Mba'eta nhande ha'e javive jajevy vy ndajaupity kuaai Nhanderuete rexakãa. Ha'e rami teĩ Nhanderuete nhandemboexa rupi rive nhandemboeko porã 'rã Cristo Jesus nhandejogua rive. Mba'eta Jesus ma Nhanderuete ombou vy oikuaa uka raka'e jejavya pe'aa, jajerovia rã huguy py ombogue agua jajevyague" (3.23-25a).

"Ha'e gui ma jajerovia re Nhanderuete nhandemboeko porã rive hexeve peteĩ rami ju jaiko, nhande-Senhor Jesus Cristo re" (5.1). Ha'e nunga rupi nhande ae nhande'aa rupi e'ỹ Nhanderuete nhandemboeko porã, ha'e rã Jesus re jajerovia ramo nhandemboexy vy rive ombogue 'rã nhandereko vaiaty, ha'e nhandevy ome'ê 'rã ojeuguigua teko porã.

Oxarura reve ijayvu vy omboypyague

¹ Xee Paulo ma Jesus Cristo rembiguai aiko. Apóstolo-rã xerenoi ha'e Nhanderuete guigua ayvu porã amombe'u va'erã xeporavo.

² Ha'e va'e ayvu ma yma ma voi Nhanderuete oikuaa uka agua re ijayvu ojeupegua profeta kuery omboparaa rupi,

³ Gua'y rekorã re ijayvu vy. Ha'e va'e ma ngo'o re oiko Davi ramymino,

⁴ ha'e rã Nhe'ê Ky'a E'ỹ re ma omanoague gui onhemboete jevy vy ojekuaa uka Nhanderuete Ra'y ipo'akapa va'ea. Ha'e va'e ma Jesus Cristo nhande-Senhor.

⁵ Hexe vy oremboaxy vy oremoi apóstolo-rã guery omboete ukaa rupi vy, judeu e'ỹ va'e ha'e javi regua hexe ojerovia vy onhe'ê rendu agua.

⁶ Ha'e kuery regua ma peê voi pendekuai, Jesus Cristo peguarã penerenoĩ rive.

⁷ Peê kuery Roma tetã pygua Nhanderuete rembiayvu ha'e iky'a e'ỹ va'erã penerenoĩ va'ekue ha'e javive pe ombopara. Tove peê kuery tapendu penemboexya ha'e mby'a porã Nhanderuete ha'e Senhor Jesus Cristo guigua.

Cristo pegua kuery Roma py ikuai va'e Paulo oexaxe re ijayvuaque

⁸ Jypy ma peê kuery ha'e javi re arovy'a Xeruete Jesus Cristo rery rupi, mba'eta vvy jave re pejerovia etea oendupaa.

⁹ Mba'eta Nhanderuete oikuaa peê kuery re xema'endu'a riaea. Ixupe ae nenhe'ê py guive amba'eapo aikovy Ta'y regua ayvu porã amombe'ua rupi.

¹⁰ Ixupe anhembo'e nhavõ ajerure ha'evea ára, Nhanderuete oipotaa rami peê kuery roipou agua re.

¹¹ Mba'eta roexaxe ete, peê kuery pe voi aikuaa uka agua Nhe'ê guigua penembaraeeteve agua.

¹² Ha'e rami avi peê kuery reve joo meme nhandomombaraete agua jajeroviaa rupi, peê ha'e xee.*

¹³ Mba'eta irmão kuery, aipota peikuaa peê kuerya py mbovykue rei e'ỹ aaxea teĩ, peê kuery mbyte rupi voi ajou agua Jesus peguarã, judeu e'ỹ va'e mboae ikuai rupi ajapoa rami avi. Ha'e rami teĩ aỹ peve nda'evei.

¹⁴ Mba'eta grego kuery ha'e amboae regua pe voi xee areve teri ayvu porã amombe'u agua, ombo'epa pyre ha'e kuaxia ndoexa kuaai teri va'e pe guive.

¹⁵ Ha'e nunga rupi Roma tetã py pendekuai va'e pe voi ayvu porã amombe'u agua rami aiko.

Jesus Cristo re jajerovia ramo teko porã ome'êa agua re ijayvua

¹⁶ Mba'eta xee naxĩ ayvu porã amombe'u agua, mba'eta ha'e va'e rupi Nhanderuete oexa uka opo'akaa ogueraa jepe vy hexe ojerovia va'e ha'e javive, jypy'i judeu regua, ha'e gui grego regua guive.*

¹⁷ Mba'eta ayvu porã rupi Nhanderuete oikuaa uka ojeuguigua teko porã. Ha'e va'e ma jajerovia rã ome'ê 'rã, mba'eta ojerovia va'e pegua ae, ipara re oĩa rami: "Heko porã va'e ma ojeroviaa rupi 'rã ikuai", he'iaque rami.*

Avakue mba'emo rive ombojeroviaa ha'e opa marã rei ikuai re ijayvua

¹⁸ Mba'eta Nhanderuete ma opoxya avi oikuaa uka yva gui, ojevavy ha'e heko vai va'e ha'e javive rovai, mba'eta ha'e kuery gueko vaia rupi vy ndoikuaaxei anhetê va'e.

¹⁹ Mba'eta ha'e kuery oikuaa ae Nhanderuete reko oikuaa pyrã oĩ va'e, ha'e kuery pe ha'e ae oikuaa uka ramo.

* 1:12 Romanos 15.22-29; Atos 28.15

* 1:16 2 Timóteo 1.6-12; Romanos 3.21-24

* 1:17 Habacuque 2.4

²⁰ Mba'eta Nhanderuete reko ma ndajaxai va'eri vvy itui ppy'i guive jaikuaa porã 'rã guive hembiapokue re jaikuaa pota vvy. Ha'e nunga rupi jaikuaa porã 'rã ipo'akaa opa va'erã e'ỹ ha'e imarã e'ỹa. Ha'e rami vvy heko vai va'e kuery "Aikuaa vvy e'ỹ rima ajejavy" he'i aguã nda'evei.

²¹ Mba'eta ha'e kuery Nhanderuete reko oikuaa teĩ nombotexei vvy ixupe "Xeruete" nde'i, ndoguerovy'ai guive. Ha'e rami 'rãgue py opëxaa py ovare e'ỹ va'e opyta, ha'e opy'a py mba'eve noenduvei ramo pytũmba. ²² Ojeupe ae "Hi'arandu va'e" he'i va'eri inhakã porã ve'ỹ va'e opyta.

²³ Ha'e rami vvy Nhanderuete imarã e'ỹ ha'e hexakãmba va'e ombojerovia 'rãgue py avakue imarã va'e ra'angaa rive ombojerovia, ha'e gui guyra, mymba ha'e vvy rupi otyryry va'e ra'angaa guive.

²⁴ Ha'e nunga rupi Nhanderuete omboaxa ha'e kuery ae onhemboko ky'a aguã, opy'a re opa marã rei ikuaixea oĩa rami rive ikuai aguã, guete voi joo meme omongy'a aguã.

²⁵ Mba'eta Nhanderuete guigua anhetẽ va'e 'rãgue py apu rive ha'e kuery oguerovia. Ha'e rami vvy imoin-goare 'rãgue py ombojerovia hemimoingo kuery rive. Ha'e rã Nhanderuete anho ha'eve nhambojerovia aguã, raka'e rã peve. Amém.

²⁶ Ha'e nunga rupi ae Nhanderuete omboaxa itavy reixea rupi rive ikuai aguã. Kunhague voi guekorã va'ekue omboekovia vvy ha'eve'ỹa rami ikuai.

²⁷ Avakue voi ha'e rami ae avi ojepe'a gua'yxy reve joguerekoa gui. Ha'e vvy jomeme itavy reixe vvy avakue meme joavyky rei. Ha'e rami rire ojee ae oendu ojevavyague re ha'evea rami opagaa.

Amboae regua kuery opa marã rei ikuai aguã Nhanderuete omboaxa re ijavyua

²⁸ Nhanderuete reko ha'e kuery oikuaa va'eri oikuaa ete aguã ndojou porãĩ ramo omboaxa opëxaa py ojou vaipy ikuai, ha'e ha'eve'ỹ va'e anho ojapo aguã.

²⁹ Ha'e kuery re ma teko vai anho oĩ, tavy reia, hakãte'ỹa ha'e porayvu e'ỹa. Joe ija'e e'ỹa rupi anho ikuai, jujukaa ha'e joguero'aa rupi guive. Nhombotavypa rei ha'e porayvu e'ỹ rei va'e ikuai. Joe ijavyvu rei,

³⁰ ijavyvuxe, neĩ Nhanderuete re voi nda'ija'ei, ojee anho ojerovia ha'e ima'endu'a va'e, mba'emo vai re anho onhembopy'a, nguu kuery nonhe'ẽ rendui,

³¹ iporã va'e noenduvei, oayvuague ndojapoi, porayvu e'ỹ ae va'e, ha'e nanhomboxy kuaavei va'e guive.

³² Ha'e kuery oikuaa ae Nhanderuete ha'evea rami omokanhymba 'rãa ha'e rami ikuai va'e. Ha'e ramive ma ojapove tema okuapy, ha'e amboae kuery ha'e rami ikuai rã oexa vvy ojou porã guive.

2

Judeu ha'e judeu e'ỹ regua ombopaga pyrã ikuai re ijavyua

¹ Ha'e nunga rupi ndee renhombopagaxe vai va'e, ndee voi nda'evei "Aikuaa vvy e'ỹ rima ajejavy" 're aguã, mba'eta amboae kuery rembopagaxea py ndee ae renhombopaga uka, mba'eta rejou vai va'e ramigua ndee voi rejapo.*

² Ha'e rã Nhanderuete ma ha'evea rami 'rã ombopaga ha'e rami ikuai va'e, jaikuaa pavẽ.

³ Ha'e rami teĩ ndee renhombopaga ukaxe va'eri ha'e rami ae reiko va'e, rexa'ã ri ty'y reo jepe aguã re Nhanderuete nembopaga aguã gui?

⁴ Ndereikuai ri ty'y rejeko rerova aguã ae Nhanderuete oexa ukaa nderayvua? Tyrã pa nerembovarei ri ty'y oexa uka rã opa mba'e py nderayvua, nanembopaga voi ha'e nerarõ area?

⁵ Ha'e rami py neakã ratã ha'e ndepy'a py nderejeko rerovaxei vvy ndejee ae remoĩ ukave Nhanderuete poxya. Ha'e va'e ma ha'evea rami nhombopagaa ára py oexa uka 'rã.

⁶ Mba'eta peteĩ-teĩ pe ombojoja 'rã oikoague repy.*

⁷ Ha'e rami vvy tekove marã e'ỹ ome'ẽ 'rã iporã va'e rupi anho ikuai vvy hexakãmbaa, omboetea aguã ha'e imarã e'ỹ aguã re onhea'ã va'e kuery pe.

⁸ Ha'e rã joapo vaia rupi ikuai va'e pe ma oexa uka 'rã ivaiia ha'e opoxya, anhetẽ va'e rupi e'ỹ, teko vaia rupi anho ikuai va'e pe.

⁹ Mba'eta heko vai va'e kuery áry ou 'rã ojexavai ha'e ikuai axy aguã, judeu kuery pe ranhe, ha'e gui grego kuery pe avi.

¹⁰ Ha'e rã iporã va'e rupi ikuai va'e pe ma ome'ẽ 'rã guexakã, imboetea ha'e imoingo porãrã, judeu kuery pe ranhe, ha'e gui grego kuery pe avi,

¹¹ mba'eta Nhanderuete ma peteĩ regua rive joegui oayvuve va'e'ỹ.

¹² Ha'e nunga rupi lei revegua e'ỹ ojevavy va'e ha'e javi ma lei re'ỹ avi 'rã okanhly. Ha'e rã lei revegua ojevavy va'e ma lei re oĩa rami ae 'rã ombopagaa.

¹³ Mba'eta Nhanderuete renonde ma lei oendu rive va'e'ỹ 'rã heko porã, lei re oĩa rami ikuai va'e anho 'rã omboeko porã.

¹⁴ Ha'e nunga rupi xapy'a rei amboae regua kuery, lei revegua e'ỹ teĩ lei re oĩa rami ikuai 'rã oikuaa rami ae. Ha'e va'e kuery ma lei ndojopyi teĩ ha'e kuery ae oikuaa 'rã lei regua.

¹⁵ Ha'e rami vvy ha'e kuery oexa uka 'rã opy'a re lei regua oĩa, o'arandu gui ae oikuaa guekorã. Ha'e rami vvy amongue py oikuaa 'rã ojevavya, ha'e rã amongue py ma oikuaa 'rã ha'evea rami ikuai.

¹⁶ Ha'e nunga ha'e javi ojekuaa porã 'rã avakue nhemi rupi ikuaiague re Nhanderuete oikuaa potaa ára. Avvu porã amombe'u aikovya rami vvy Cristo Jesus pe ae 'rã oikuaa pota uka.

Judeu kuery "Aikuaa vvy e'ỹ rima ajejavy" he'i aguã nda'eveia re ijavyua

* 2:1 Mateus 7.1,2 * 2:6 Salmo 62.12, Provérbios 24.12

¹⁷ Ha'e gui ndee ma "Judeu" 'epy va'e reiko. Rejerovia reikovy lei re oia rami reikoa re, ha'e "Nhanderue te rembiayvu aiko" 're vy revy'a.

¹⁸ Lei re oia rami nembo'ea ra reikuaa ae Nhanderue te oipota va'e ha'e rejapo kuaa ipora va'e.

¹⁹ Ndee rexa'ã ra ndee ae reiko ara revegua e'y mboguataa, pytia rupi ikuai va'e moexakãa,

²⁰ hi'arandu e'y va'e rerekoa ha'e kyrigüe mbo'ea, mba'eta lei rupi vy 'arandua ha'e anhetëgua reikuaapa merami.

²¹ Ha'e rami avi nhombo'ea reiko va'eri mba'e re tu nerenhembo'ei ndee ae? Imonda e'y aguã renhomon-geta va'eri ndee ae ri ty'y nemonda va'ety?

²² Joupe "Pendetavy eme", 're va'eri ndee ae ri ty'y ndetavy? Mba'emo ra'angaa rejou vai va'eri ta'angaa pegua templo gui nemonda va'e ty'y?

²³ Lei rejou porã va'eri lei rovai reikoa py Nhanderue te neremboete ukai.*

²⁴ Mba'eta ipara re oia rami: "Peë kuery kãua amboae regua kuery ijayvu vai 'ra Nhanderue te rery re", he'ia rami ae pendekuai.*

Judeu regua anhetë ete va'e re ijayvua

²⁵ Mba'eta ndepire remboi ukaague ma lei re oia rami ete ri reiko ramo ovare. Ha'e ra lei re oia rami e'y ri reiko ramo opire omboi uka e'y va'e rami repyta.

²⁶ Ha'e rami avi amongue opire omboi uka e'y va'eri lei re oia rami ikuai ramo ha'e kuery pe "Opire omboi uka va'ekue rami ikuai", he'i pavê 'ra.

²⁷ Ha'e rami vy opire omboi uka e'y va'eri lei re oia rami ikuai va'e kuery ijayvu 'ra okuapy ndere, mba'eta ipara re oi va'e reikuaa vy ndepire remboi uka va'eri lei re oia rami e'y reiko.

²⁸ Mba'eta judeu ete ma guete re rive'y oexa uka judeu oikoa, mba'eta opire omboi uka aguã ojea pyre ma ngo'o re rive'y 'ra ojapo aguã.

²⁹ Ha'e rami 'rãgue py judeu ete ma opy'a py 'ra ha'e rami ikuai, ha'e opire omboi uka aguã ojea pyre ma ipy'a reguarã, nhe'ê re ae, ipara regua rive'y. Ha'e rami ikuai va'e ma avakue rive'y 'ra oguerovy'a, Nhanderue te ae 'ra oguerovy'a.*

3

Paulo mbovaia ayvu oia

¹ Ha'e gui mba'e nunga py tu amboae regua reko gui judeu kuery reko ha'eeve? Mba'erã nda'u ovare ha'e kuery opire omboi ukaa?

² Mba'eta heta ogueroko ipora va'e, opa mba'e py. Jypy'i ma judeu kuery pe Nhanderue te ombou raka'e oayvu.*

³ Ha'e gui? Judeu regua amongue ndoguerovia rire nda'u Nhanderue te ndoikovei 'ra ri ojeroviapy?

⁴ Any teve. Avakue ijapu va'e meme tei Nhanderue te ma anhetë va'e ae, ipara oia rami vy: "Oikuaa pavê 'ra ndeayvua anhetë memea. Ha'e ramo ndereko re oikuaa potaa ra ndepo'aka 'ra", he'ia rami.*

⁵ Ha'e gui amongue aipoe'i 'ra: "Nhandereko vaia ojapo 'ra Nhanderue te reko porãa ojekuaa porãve aguã rami", he'i 'ra. Mba'exa 'ra tu nhambovai? Nda'ëvei ri nda'u Nhanderue te nhandereko vaia re nhanembopaga aguã? (Nami avakue rami rive xeyvuu.)

⁶ Any. Ha'e rami va'e rire mba'exa 'ra tu ha'eve Nhanderue te vvy re ikuai va'e re oikuaa pota aguã?

⁷ Ha'e gui aipo'ea avi: "Xeapua ojapo 'ra Nhanderue te anhetë va'ea ojekuaa porãve aguã rami, ha'e omboeteave 'ra guive. Ha'e rami ra mba'e re tu xevy pe 'Ojejavu va'e' he'i vy xembopaga 'ra?' 'ea.

⁸ Any, ha'e rami va'e rire ha'eve avi tei 'rãgue "Teko vai rupi tema nhandekuai mba'emo porã oiko aguã" ja'e aguã. Amongue ijapu vy omombe'u 'ra ha'e rami ae areayvua rami. Ha'e kuery ma ha'eeva rami 'ra ombopagaa.

Jajevy va'e memea re ijayvua

⁹ Ha'e gui mba'exa tu jaikuaa? Ore judeu kuery teve amboae regua gui orereko porãve va'e? Any, ne'i pete'i henda py. Mba'eta amombe'u ae ma judeu ha'e grego kuery jejavya guy py ikuai va'e memea,

¹⁰ ipara oikuaa rami: "Jipoi heko porã va'e, ne'i pete'ive.*

¹¹ Jipoi oikuaa ete va'e, jipoi Nhanderue te oeka va'e.

¹² Mba'eta ojepe'a pavê, joo rami meme ovare'y va'e ikuai. Jipoi ipora va'e ojapo va'e, ne'i pete'ive."

¹³ "Ha'e kuery jryvi ma omanogue rupa ojepe'a va'e rami. Oapekũ py nhombotavypa." "Ha'e kuery juru re ma mboi guigua veneno ramigua oi."

¹⁴ "Ijuru tynyê oiny ayvu vai ha'e py'a vaikue reia anho."

¹⁵ "Ha'e kuery py ma tuguy omoe aguã katy oo vy inhakuã.

¹⁶ Ikuaiã rupi ma nhomokanhyarã ha'e nhomomboriaruarã oi."

¹⁷ Ha'e ra tape ikuai porã aguã ma ndoikuaai."

¹⁸ "Ha'e kuery re noi ae Nhanderue te renonde ojererokyje aguã."*

Judeu kuery amboae regua rami avi ojevavy va'ea re ijayvua

* 2:23 Romanos 3.19,20 * 2:24 Isaías 52.5; Ezequiel 36.22 * 2:29 Tery "Judeu" ma "Oguerovy'apy" he'ia. * 3:2 Romanos 9.4,5

* 3:4 Salmo 51.4, Romanos 9.6-8; 11.1-5, 25-27 * 3:10 Gálatas 3.11,22 * 3:18 Salmo 5.9, 10.7, 14.1-3, 36.1, 53.1-3, 140.3; Eclesiastes

7.20; Isaías 59.7-8

¹⁹ Ha'e gui lei re oĩ va'e ha'e javi ma lei rupi ikuai va'e pegua ae, jaikuaa. Ha'e ramo Nhanderuede renonde vvy javé re ikuai va'e okyiririmba ha'e opaga aguã rami ikuai aguã.

²⁰ Mba'eta lei re onhea'aa rupi ma avave rei nomboeko porãai 'rã henonde, mba'eta lei gui ma jaikuaa 'rã jajevy va'e memea.*

Jesus Cristo re jajerovia ramo nhanemboeko porãa aguã re ijayvu

²¹ Ha'e gui aỹ ma lei rupi e'ỹ Nhanderuede oikuaa uka ojeuguigua teko porã, lei ha'e profeta kuery omombe'u ma voi va'ekue.

²² Mba'eta Nhanderuede guigua teko porã ma Jesus Cristo re jajerovia ramo ome'ẽ. Ojerovia va'e ha'e javive pegua oĩ, [ha'e javi regua peguarã ombou,] mba'eta joo ramigua meme nhandekuai,

²³ mba'eta nhande ha'e javive jajevy vvy ndajaupity kuaai Nhanderuede rexakãa.*

²⁴ Ha'e rami teĩ Nhanderuede nhanemboaxya rupi rive nhanemboeko porã 'rã Cristo Jesus nhandereraa jepe rive.

²⁵ Mba'eta Jesus ma Nhanderuede ombou vvy oikuaa uka raka'e jejavya pe'aarã, jajerovia rã huguy py omboguepa aguã jajevyague. Ha'e rami py Nhanderuede oexa uka ha'evea rami joguereko va'ea, mba'eta oarõ are kuaa va'e vvy ymagua kuery ojevavyague re nombopaga potai ranhe raka'e.*

²⁶ Ha'e gui aỹ ma oexa uka ha'evea rami joguereko va'ea, mba'eta heko porã va'e oiko, ha'e Jesus re ojerovia va'e kuery mboeko porãa guive.

²⁷ Ha'e rami rive nda'u ha'eve nghanemboyvate aguã? Peteĩve henda py nda'evei. Mba'e re tu nda'evei? Mba'eta nhande ae nghanhea'ã rupi e'ỹ jaa jepe, hexe jajerovia vvy rive.

²⁸ Ha'e nunga rupi jaikuaa jajerovia ramo 'rãe nghanemboeko porã, lei rupi nghanhea'aa rupi e'ỹ.

²⁹ Tyrã pa Nhanderuede nda'u ore judeu kuery Ruete anho ri oiko? Amboae kuery Ruete guive e'ỹ ri ty'y? Tá, amboae kuery Ruete guive oiko,

³⁰ mba'eta Nhanderuede ma peteĩ'i. Ha'e rami vvy judeu kuery ojerovia rã omboeko porã 'rã, ha'e amboae kuery voi ojerovia rã omboeko porã avi 'rã.

³¹ Ha'e gui jajeroviaa rupi jaa jepea py nda'u jajapo ri lei mba'erã ovare ve'ỹa rami? Any, peteĩve henda py. Ha'e rami 'rãgue py lei re oĩ va'e jaikuaa uka anhetẽ memea.

4

Abraão ojerovia ramo omboeko porãague re ijayvu

¹ Ha'e gui mba'e tu Abraão oupity raka'e? Mba'eta ha'e va'e ma ngo'o re oiko ore judeu kuery ramoĩ vvy.*

² Ha'e gui Abraão ha'e ae onhea'aa rupi onhemboeko porã va'e rive oguereko 'rãgue onhemboyvate aguã. Ha'e rami avi Nhanderuede renonde ndoguereko,

³ mba'eta mba'e he'i tu ipara? "Abraão ojerovia Nhanderuede re. Ha'e ramo ojeroviaa re ome'ẽ teko porã", he'iague.*

⁴ Ha'e gui omba'eapo va'e pe omba'eapogue repy ma ome'ẽa va'e rive e'ỹ, ixupe guarã ae oĩ.

⁵ Ha'e rã amongue ha'e ae onhea'ã 'rãgue py heko vai va'e mboeko porãa re ojerovia ramo ma ixupe ome'ẽ 'rã teko porã, ojeroviaa re rive.

⁶ Ha'e rami ae Davi voi ijayvu raka'e, mba'eta omombe'u amongue onhea'ã e'ỹ re ixupe Nhanderuede teko porã ome'ẽ ramo ovy'a ete 'rãa. Ha'e vvy aipoe'i:

⁷ "Ovy'a ete 'rã heko vaiague omboguepa va'e, ojevavyague ojao'ipaa ramo.

⁸ Ovy'a ete 'rã avakue ha'e kuery pe Senhor 'Heko vai va'e' nde'i ramo", he'i raka'e.*

⁹ Ha'e gui opire omboi uka va'ekue pegua anho 'rã nda'u ovy'a ete aguã oĩ, tyrã pa opire omboi uka e'ỹ va'e pegua avi? Mba'eta "Abraão ojeroviaa re rive ixupe ome'ẽ teko porã", ha'eague rami.

¹⁰ Mba'e tu ojapo ramo teko porã ome'ẽ raka'e? Opire omboi uka rive ri nda'u ome'ẽ, tyrã pa opire omboi uka e'ỹ re? Opire omboi uka rive'ỹ, omboi uka e'ỹ mbove ma voi teko porã ome'ẽ raka'e Abraão pe.

¹¹ Mba'eta opire omboi uka aguã ma hekorã Nhanderuede oexa raka'e oikuaa uka aguã ojeroviaa re teko porã ixupe ome'ẽague, opire omboi uka e'ỹ teri reve. Ha'e rami rive ojerovia va'e ha'e javi ru opyta, opire omboi uka e'ỹ va'e kuery pe guive, mba'eta ha'e kuery voi ojerovia ramo ome'ẽ 'rã teko porã.

¹² Ha'e gui ore opire omboi uka va'e ru avi oiko. Mba'eta ore ma opire omboi uka va'e rive e'ỹ orekuai, nhanderua Abraão opire omboi uka e'ỹ re ojeroviaague ramo va'e avi.

¹³ Ha'e rami ae avi lei rupi e'ỹ Abraão ha'e hamimino kuery pe Nhanderuede ijayvu raka'e ko vvy ome'ẽ aguã re, ha'e rã ojeroviaa re teko porã ojopy rive.

¹⁴ Ha'e rã lei re ikuai va'e pe vvy ome'ẽ aguã re ijayvu va'e rive Abraão ojeroviaa ndovarei 'rãgue, ha'e ixupe ijayvague voi oaxa rive 'rãgue.

¹⁵ Mba'eta lei gui ou Nhanderuede ipoxy aguã, ha'e rã lei ndoikuuaa py ma jipoi avi lei rovai ojevavy va'e.

¹⁶ Ha'e nunga rupi ae jajeroviaa re Nhanderuede ome'ẽ teko porã, nghanemboaxya ramo rive jaupity aguã. Ha'e ramo Abraão ramimino kuery ha'e javive pe ijayvague ofi atã 'rã, lei rupi ikuai va'e pe anho e'ỹ, Abraão rami ojerovia va'e kuery ha'e javive pe, (mba'eta nhande kuery pavẽ ru oiko,

* 3:20 Romanos 7.7,8; Gálatas 2.16

* 3:23 Romanos 1.17; 2 Coríntios 5.21; Gálatas 2.15-21; Filipenses 3.9

* 3:25 Atos 17.30,31

* 4:1

Gálatas 3.6-18

* 4:3 Génesis 15.6

* 4:8 Salmo 32.1-2

¹⁷ ipara re “Heta regua rurã romoi” he'iaague rami vy), mba'eta Nhanderuete renonde hexe ojerovia. Mba'eta Nhanderuete ma omano va'ekue moingovea, ha'e ndoikoi teri va'e pe “Oiko ae” he'i va'e guive.*

¹⁸ Abraão oarõ aguã noĩ merami teĩ oarõ nho vy ojerovia rirã heta regua ru opyta, ixupe “Heta 'rã neramymino kuery ikuai” he'iaague rami vy.*

¹⁹ Ikangy e'ÿ re ojerovia nho vy oikuaa pota guete omanogue rami oĩa re, mba'eta cem ma'etÿ ma oguereko, ha'e Sara voi guaimi'i ete ma.

²⁰ Ha'e rami teĩ ndoguerovia e'ÿi Nhanderuete ijayvuague, oexa'ã reia noĩ. Ha'e rami 'rãgue py ojeroviaa py imbaraeteve ovy, ogueroxy'a guive Nhanderuete,

²¹ mba'eta oikuaa porã oayvuague ojapo aguã ipo'aka va'ea.

²² Ha'e nunga rupi ae “Ojeroviaa re ome'ẽ teko porã” he'i.*

²³ Ixupe anho e'ÿ guive ipara oiny ome'ẽa rami,

²⁴ nhande kuery pe guive, mba'eta nhandevy pe avi ome'ẽ 'rã teko porã, nhande-Senhor Jesus omanoague gui omboete ju va'ekue re jajerovia ramo.

²⁵ Ha'e va'e ma omboaxaa raka'e nhandereko vaia re omano aguã, ha'e gui onhemboete ju nhanemboeko porã aguã.

5

Jajeroviaa re Nhanderuete nhanemboeko porã rirã hexeve jaiko porã aguã re ijayvua

¹ Ha'e gui ma jajeroviaa re Nhanderuete nhanemboeko porã rirã hexeve peteĩ rami ju jaiko, nhande-Senhor Jesus Cristo re vy.

² Hexe jajeroviaa vy Nhanderuete nhanemboaxya rupi nhandekuai, ha'e Nhanderuete rexakãa ojekuaa aguã nharõ vy javy'a jaikovy guive.

³ Ha'e rami anho e'ÿ, jajexavaia py voi javy'a, mba'eta jaikuaa jajexavaia ojapo jaropo'akave aguã rami.

⁴ Ha'e gui mba'emo jaropo'aka vy jaikuaa Nhanderuete nhandereroxy'aa. Ha'e nhandereroxy'a ramo jareko iporã va'e nharõ aguã.*

⁵ Nharõa py ndajajekorei guive, mba'eta nhandepy'a re Nhanderuete oendu uka ae nhandarayvua. Nhe'ẽ Ky'a E'ÿ nhandere ombou va'ekue gui nhaendu.

⁶ Mba'eta nhanekangy teri reve Cristo omano raka'e nhandereko vai va'e re, oa'angaague ára py ete.

⁷ Heko porã va'e re vy haxy amongue omano aguã, ha'e rã porayvu va'e re ma amongue nhi'ã omano 'rã.

⁸ Ha'e rã Nhanderuete ma po rami oexa uka nhandarayvua: jajevyva rupi teri jaiko reve Cristo omano raka'e nhandere.

⁹ Ha'e rami rirã, aÿ katuve ma huguy rupi nhanemboeko porã rirã nhandereraa jepe 'rã nhombopaga aguã gui.

¹⁰ Mba'eta Nhanderuete rovaigua teri jaiko reve Ta'y omano vy hexeve peteĩ rami ju nhanemoingo rirã aÿ katuve ma hexeve peteĩ rami nhanemoingo vy nhandereraa jepe 'rã, oikove ju rirã.

¹¹ Ha'e nunga anho e'ÿ, Nhanderuete re ae javy'a, nhande-Senhor Jesus Cristo re vy. Mba'eta hexe vy aÿ peteĩ rami nhandekuai Nhanderuete reve.

Adão re Cristo ombojojaague

¹² Mba'eta peteĩ'i ava gui jejavya oiko ppy raka'e vvy jave re, ha'e jejavya gui oiko avi nhamano aguã. Ha'e rami py nhande pavẽ nhamano aguã rami nhandekuai, pavẽ jajevy rirã.

¹³ Mba'eta lei oejaa e'ÿ mbove ma voi jejavya oĩ ae ma raka'e vvy re, lei ndoikuaa ukaai teri jave avave pe “Lei rovai ojevavy” nda'eai tei.

¹⁴ Ha'e rami avi Adão guive Moisés oiko peve manoa ipo'aka raka'e, avyu rovai Adão ojevavyague rami ete ndojevavy va'e kuery re voi. Adão ma nhaneramoĩ ppy raka'e, ou va'erã va'e kuaa ukaarã.

¹⁵ Ha'e rami avi Adão ojevavy jave guare rami e'ÿ oiko tekove me'ẽ rivea ou rã, mba'eta peteĩ'i ojevavy rirã heta omano. Ha'e gui ma heta pe avi Nhanderuete oexa uka omboaxya, amboae ava Jesus Cristo ombou vy.

¹⁶ Ha'e rami avi tekove ome'ẽmby ma peteĩ anho ojevavy jave guare rami e'ÿ guive, mba'eta peteĩ'i ojevavyague gui oiko raka'e nhombopagapa aguã. Ha'e gui heta jajevyague gui Nhanderuete nhanemboaxya oexa uka vy nhanemboeko porã.

¹⁷ Peteĩ'i ojevavyague gui ae manoa ipo'aka rirã teĩ Nhanderuete nhanemboaxya ha'e teko porã ome'ẽ rã jaupity va'e katuve ma nhandepo'aka 'rã peteĩ'i re vy. Ha'e va'e ma Jesus Cristo.*

¹⁸ Mba'eta peteĩgue'i ojevavya ague gui nhande kuery pavẽ re oiko raka'e japaga aguã. Ha'e rã peteĩgue'i joapo porãague gui nhande kuery pavẽ pe oiko avi nhanemboeko porã rã tekove jaupity aguã.

¹⁹ Mba'eta peteĩ'i ava nonhe'ẽ renduague gui heta ikuai raka'e ojevavy va'e. Ha'e gui ma peteĩ'i onhe'ẽ renduague gui ju heta ikuai 'rã heko porã va'e.

²⁰ Ha'e gui ma lei oejaa avi raka'e jejavya ojekuaa porãve aguã, va'eri jejavya hetave ramo nhanemboaxya voi hetave avi oexa uka raka'e.

²¹ Ha'e rami avi jejavya ipo'aka raka'e pavẽ nhamano aguã rami. Ha'e gui nhanemboaxya ju nhanemboeko porã vy ipo'aka tekove marã e'ÿ jaupity aguã, nhande-Senhor Jesus Cristo re vy.

* 4:17 Gênesis 17.5 * 4:18 Gênesis 15.5 * 4:22 Gênesis 15.6 * 5:4 Tiago 1.2-4 * 5:17 1 Coríntios 15.20-22,45-49

6

Nhanderuete nhanemboaxy ramo jejavya po'akaa gui jaa jepea re ijayvua

- ¹ Ha'e rami rā mba'e ja'e 'rā tu? Jajejavya rupi riae 'rā teve jaiko Nhanderuete nhanemboaxyve aguā?
- ² Any. Mba'eta tu jajejavy riaeve ta, ha'e nunga pe nhamano rire?
- ³ Tyrā pa ndapeikuaa'i teri teve Cristo Jesus peguarā nhandemongarai vy ha'e omanoague py avi nhandemongaraiague?
- ⁴ Mba'eta nhandemongarai vy hexeve nhande voi jajeaty uka avi nhamanoa py, Nguu po'akaa rupi Cristo omanoague gui onhemboete jevyague rami avi nhande voi nhandereko pyau reve nhandekuai aguā.*
- ⁵ Mba'eta Cristo omanoague rami nhande voi hexeve nhamano rire ha'e onhemboete jevyague rami avi 'rā jaiko.
- ⁶ Mba'eta jaikuaa nhandereko ymague kuruxu re hexeve omano aviague, to'o nhanembojejavy ve'y aguā, jejavya rembiguai rami ve'y jaiko aguā.
- ⁷ Mba'eta omano va'ekue ha'e javi oiko porā ju 'rā ojejavyague gui.
- ⁸ Ha'e gui nhande voi Cristo reve nhamano rire jarovia hexeve avi jaiko aguā.
- ⁹ Mba'eta jaikuaa Cristo omanoague gui onhemboete ju rire nomanovei ma 'rāa. Hexe ma manoa nda'ipo'akavei.
- ¹⁰ Pete'igue'i omano raka'e jejavya pe. Ha'e gui oikove vy Nhanderuete pe ju oiko.
- ¹¹ Ha'e rami ae avi po rami peē voi peikuaa: peē voi jejavya pe pemano ma avi, ha'e gui Cristo Jesus re vy Nhanderuete pe ju peiko.
- ¹² Ha'e nunga rupi jejavya ta'ipo'akave eme penderete imarā va'e re, to'o oipota va'e rupi ve'y pendekuai aguā.
- ¹³ Penderete regua voi pemboaxave eme jejavya pe, nhomboeko vaia rembiguirā. Ha'e rami 'rāgue py omanoague gui oikove ju va'ekue rami pejeko me'ē Nhanderuete pe. Ixupe anho pemboaxa penderete regua, teko porā rembiguirā.
- ¹⁴ Mba'eta jejavya nda'ipo'akavei 'rā pendere, mba'eta lei guy py ve'y pendekuai, ha'e rā Nhanderuete penemboaxya rupi anho.

Lei, tembiguai ha'e nhanemboaxya re ijayvua

- ¹⁵ Ha'e gui? Lei guy py ve'y, Nhanderuete nhanemboaxya rupi anho nhandekuai vy nda'u jajejavy riaeve ta? Any.
- ¹⁶ Ndapeikuaa'i ri ty'y nhoembiguirā pejeko me'ē rire pendererekoa anho 'rā penhe'ē rendu? Jejavya rembiguai ma omano aguā rami ikuai, ha'e rā Nhanderuete nhande'ē rendu va'e ma teko porā rupi nhandekuai.*
- ¹⁷ Xee arovy'a Nhanderuete, mba'eta yma rupi jejavya rembiguai pendekuaiague gui jepeje'a vy pendepy'a ha'e javi py penhe'ē rendu penembo'eague rami.
- ¹⁸ Ha'e gui jejavya gui peo jepe vy teko porā rembiguai ju pendekuai.
- ¹⁹ Avakue reko re ambojoja, mba'eta pendero'o reve teri peiko vy ndapeikuaa porāi ramo. Yma rupi penderete regua pemboaxa va'ekue imongy'aarā rembiguirā, pendereko ky'ave ha'e pendereko vai reive peovy aguā rami. Ha'e gui a'y ma teko porā rembiguirā ju pemboaxa penderete regua, iky'a e'y va'e pendekuai aguā.
- ²⁰ Mba'eta jejavya rembiguai teri pendekuai jave teko porā rupi e'y pendekuai va'ekue.
- ²¹ Ha'e va'e jave mba'e tu pejou raka'e ha'e nunga repy? Mba'emo a'y penemoximba va'e anho, ha'e opaa py ma ha'e nunga nhandejuka 'rā.
- ²² Ha'e gui a'y ma jejavya rembiguai pendekuaiague gui Nhanderuete pendereraa jepe vy guembiguai ae ju penemoingo rire pejou iky'a e'y va'e penemoingoarā, ha'e opaa py ma tekove marā e'y.
- ²³ Mba'eta jejavyague repy ma manoa. Ha'e rā Nhanderuete ome'ē rive va'e ma tekove marā e'y, nhande-Senhor Cristo Jesus re oī va'e.

7

Omenda va'e reko re ombojojaague

- ¹ Irmão kuery, lei peikuaa va'e pe ju ta xeyvua a'y. Ndapeikuaa'i ri ty'y jaikovea pukukue re anho lei ovare 'rāa?
- ² Mba'eta lei re oīa rami vy kunha omenda va'e minha ime oikovea ja anho oiko 'rā ixupe. Ha'e gui ime omano ma ramo lei re oīa rami vy ndoikovei ma 'rā ixupe.
- ³ Xapy'a rei ime oikove teri reve amboae ava re onhemoirū ramo jaikuaa 'rā itavy reia. Ha'e rā ime omano ma ramo ha'e va'e lei rami ve'y ma 'rā oiko. Omenda jevy te'i itavy rei va'e'y 'rā oiko.
- ⁴ Ha'e rami ae avi xe-irmão kuery, peē voi lei pe pemano va'ekue Cristo rete reve vy, amboae pe ju peiko aguā, omanoague gui onhemboete ju va'ekue pe ae, ha'e rami vy Nhanderuete oipotaa rami pendekuai aguā.*
- ⁵ Mba'eta to'o oipotaa rami teri nhandekuai jave lei ojapo raka'e jajejavypa reixea anho nhaendu aguā rami, ha'e ramo opa marā oguereko nhanderete regua nhandejuka ete aguā.

* 6:4 2 Corintios 5.17; Gálatas 2.19,20; 5.24; 6.14; Efésios 4.22-24; Colossenses 3.1-11; 1 Pedro 4.1-3

* 6:16 João 8.34

* 7:4 Romanos

⁶ Ha'e gui aỹ ma lei gui nhandereraa jepe rire nhandere ipo'aka va'ekue pe nhamano ma, Nhe'ẽ guigua teko pyau rupi ju nhandekuai aguã rami, teko ymague ipara re oĩa rupi ve'ỹ.

Lei ha'e jejavya re ijayvua

⁷ Mba'e ja'e 'rã tu ha'vy? Lei teve nhanembojejavyarã oĩ? Any. Ha'e rami avi lei gui e'ỹ va'e rire xee ndaikuaai 'rãgue jejavya. Mba'eta lei aipo nde'i va'e rire: "Emoarũ eme", xee naendui 'rãgue amoarũa.*

⁸ Ha'e gui ojapo uka pyre rupi vy jejavya ojapo opa marãgua amoarũa aendu aguã rami, mba'eta lei ndoikuaa py ma omano va'ekue rami avi jejavya nda'ipo'akai.

⁹ Ymave rupi lei aikuaa e'ỹ mbove, aiko porã merami. Ha'e gui ma ojapo uka pyre aikuaa ramo jejavya oikove ju, ha'e rã xee ma omano va'ekue rami apyta.

¹⁰ Ha'e rami vy ojapo uka pyre nhomoiingovearã oĩ va'ekue ri xemoingo karamboae omano va'ekue rami.*

¹¹ Mba'eta ojapo uka pyre rupi jejavya ipo'akave vy xembotavy ojapo uka pyre aikuaa py ae, ha'e vy omano va'ekue rami xemoingo.

¹² Ha'e gui lei ha'e ojapo uka pyre maiky'a e'ỹ va'e meme, teko porã kuaa ukaarã ha'e iporã va'e.

¹³ Ha'e gui iporã va'e ae teve xemoingo omano va'ekue rami? Any, jejavya ae ha'e rami xemoingo iporã va'e rupi. Mba'eta ojapo uka pyre rupi jejavya ojekuaa porãve, jejavya etea jaikuaa aguã rami. Ha'e rami vy ae omano va'ekue rami xemoingo.

¹⁴ Mba'eta jaikuaa lei re oĩ va'e ma Nhe'ẽ guigua memea. Ha'e rã xee ma to'o re aiko, jejavya rembiguirã omboxa pyre rami.

¹⁵ Mba'eta xee ae voi ndaikuaai aiko, mba'eta xee aikoxea rupi ndaikoi, aikoxe e'ỹa rupi rive aiko.

¹⁶ Ha'e gui aikoxe e'ỹa rupi aiko vy lei pe "Iporã va'e" ha'e.

¹⁷ Ha'e rami xemoingoa ma xee ae e'ỹ, ha'e rã jejavya xere oĩ va'e.

¹⁸ Mba'eta aikuaa xere, xerete re ma iporã va'e noĩa. Ha'evea rami aikoxea ma xere oĩ anhetẽ. Ha'e rã ha'e rami aiko kuaa etea ma noĩ.

¹⁹ Mba'eta ha'evea rami aikoxea rupi ndaikoi. Ha'e rami 'rãgue py mba'emo vai ajapoxe e'ỹ va'e anho ajapo.

²⁰ Ha'e nunga rupi ajapoxe e'ỹ va'e ajapo ramo ha'e rami xemoingoa ma xee ae e'ỹ, ha'e rã jejavya xere oĩ va'e.

²¹ Mba'eta ha'evea rami aikoxe teĩ xere aendu avi mba'emo vai rupi xemoingoarã.

²² Mba'eta xepy'a re ma Nhanderuete guigua lei arovy'a,

²³ ha'e rã xero'o re ma amboae rami xemoingoarã aendu. Ha'e va'e ma xepy'a re lei oĩ va'e re opu'ã 'rã xemoingo aguã xerete re jejavya oĩ va'e rembiguirã.

²⁴ Ava ovy'a e'ỹ ete va'e xee aiko! Mava'e tu xereraa jepe 'rã kova'e tete xejukaxe va'e gui?

²⁵ Arovy'a Nhanderuete, Jesus Cristo nhande-Senhor rupi. Mba'eta xejegui ae xepy'a re oĩa rami vy aiko Nhanderuete guigua lei rembiguai, ha'e rã to'o oipotaa rami aiko vy ma lei jejavya rembiguai aiko.

8

Nhe'ẽ re nhandekuai va'e ndajapagavei aguã re ijayvua

¹ Ha'e gui aỹ Cristo Jesus re jaiko va'e ma japaga aguã rami ve'ỹ jaiko,

² mba'eta Nhe'ẽ guigua tekove me'ẽa Cristo Jesus re oĩ va'e ma nhandereraa jepe ma jejavya nhandejukaa gui.*

³ Mba'eta lei rupi nhanhea'ã teri jave nda'evei va'ekue jajapopa aguã, nhandero'o re nhandekangy vy. Ha'e ramo Nhanderuete ae ojapo nhandevy, mba'eta Gua'y ombou raka'e nhandero'o re jajevy va'e regua rami teĩ, jajevyva oipe'a aguã. Ha'e rami py Nhanderuete oipe'a raka'e to'o re jejavya oĩ va'e po'aka,

⁴ lei re ojapo uka pyre oĩ va'e jajapo nho aguã, to'o re ve'ỹ jaiko vy guive, ha'e rã Nhe'ẽ re anho.

⁵ Mba'eta to'o re ikuai va'e ma to'o guigua re anho 'rã ipy'a, ha'e rã Nhe'ẽ re ikuai va'e ma Nhe'ẽ guigua re 'rã ipy'a.

⁶ Mba'eta to'o re ikuai va'e omano aguã rami ikuai. Ha'e rã Nhe'ẽ re ikuai va'e ma tekove ha'e mby'a porã 'rã oupity.

⁷ Mba'eta to'o re ikuai va'e ma Nhanderuete rovaigua meme ikuai. Ha'e kuery nonhe'ẽ rendui 'rã Nhanderuete guigua lei rupi, mba'eta nda'evei ae ha'e va'e rupi ikuai aguã.

⁸ Ha'e nunga rupi to'o re ikuai va'e nombovy'ai 'rã Nhanderuete.

⁹ Ha'e rã peẽ ma to'o re'ỹ pendekuai, ha'e rã Nhe'ẽ re, anhetẽ ri pendere Nhanderuete Nhe'ẽ oĩ ramo. Ha'e rã amongue re Cristo Nhe'ẽ noĩ ramo ixupegua e'ỹ oiko.

¹⁰ Ha'e rã pendere Cristo oĩ ramo penderete anhetẽ omano aguã rami oĩ jejavya káuxa, teĩ pendere teko porã oĩ avi rã Nhe'ẽ ome'ẽ tekove.

¹¹ Mba'eta Cristo Jesus omanoague gui omboete va'ekue Nhe'ẽ pendere oĩ vy penderete imarã va'e voi omoiingove avi 'rã, Onhe'ẽ pendere oĩ va'e py ae.

Ta'y kuery ha'e mba'emo jopyarã jaikoa re ijayvua

¹² Ha'e nunga rupi irmão kuery, Nhanderuete pe jaiko aguã rami nhandekuai, to'o pe'ỹ, to'o oipotaa rami nhandekuai ve'ỹ aguã.

¹³ Mba'eta to'o oipotaa rami ri pendekuai vy pemano aguã rami peiko. Ha'e rã Nhe'ẽ re vy to'o oipotaa va'e pemomba ri vy anhetẽ peikove 'rã.

* 7:7 Êxodo 20.17, Deuteronômio 5.21

* 7:10 Romanos 3.20; Gálatas 3.23,24

* 8:2 Gálatas 5.16-26

¹⁴ Mba'eta Nhanderuete Nhe'ê pe ojerereko uka va'e ma Nhanderuete ra'y kuery meme ikuai.*

¹⁵ Mba'eta Nhe'ê pendere oĩ va'e ma escravo penemoingoarã e'ÿ oĩ, pekyjea rupi peiko ve'ÿ aguã. Pendere Nhe'ê oĩ va'e ma Nhanderuete ra'y kuery peikoa kuaa ukaarã oĩ. Ha'e va'e rupi vy "Xeru, Xeru" ja'e 'rã jajapukai vy,

¹⁶ mba'eta nhanenhe'ê reve Inhe'ê avi oikuaa uka Nhanderuete ra'y kuery jaikoa.

¹⁷ Ha'e ta'y kuery jaiko vy raka'eve rã jajopy 'rã nhandevy guarã omoĩ porã mbyre. Cristo reve vy jajopy 'rã Nhanderuete gui, mba'eta hexeve jaiko axy rire hexeve avi 'rã nhanemoingo imarã ve'ÿ va'e.

Aÿ jaiko axy rire raka'eve rã iporã ete va'e jaupity aguã re ijayvua

¹⁸ Mba'eta po rami xee aikuaa porã: raka'eve rã imarã ve'ÿ va'e nhanemoingoa ma ramo aÿ jaiko axyague pe "Mba'e'ÿ va'ekue" ja'e 'rã.*

¹⁹ Mba'eta mba'emo omoingo pyre ha'e javi oarõ avi Nhanderuete ra'y kuery ojekuaa ára pyguarã.

²⁰ Mba'eta opa mba'e omoingo pyre omomytaa raka'e ha'eve'ÿa rami ranhe, ha'e ae oipotaa rami e'ÿ, imoingoare oipotaa rami.

²¹ Ha'e rami rire mba'emo omoingo pyre voi oarõ imarã aguã gui oo jepe aguã, Nhanderuete ra'y kuery oo jepea rami avi ha'e nunga voi imarã ve'ÿ va'e opyta aguã.

²² Mba'eta jaikuaa mba'emo omoingo pyre ha'e javi aÿ peve ikuai axy vy ipoaẽ oinya.

²³ Ha'e nunga anho e'ÿ, nhande kuery jypy Nhanderuete Onhe'ê ome'ê rã jajopy va'ekue voi nhanepoaẽ avi nhandepy'a py, gua'y kuery eterã nhandererova aguã nharõ vy, nhandere voi ogueraa jepe avi jave.

²⁴ Mba'eta ha'e rami aguã nharõ reve ae jaa jepe raka'e. Ha'e gui nharõ va'e ojekuaa ma va'e rire nharõa noĩvei 'rãgue, mba'eta mba'emo ojekuaa ma va'ekue nanharõvei 'rã.

²⁵ Ha'e rami avi ndojekuaai teri va'e nharõ vy nhandekuerai e'ÿ re 'rã nharõ.

Nhandere Nhe'ê ojerurea re ijayvua

²⁶ Ha'e rami ae avi nhandekangya py Nhe'ê nhandepytyvõ 'rã, mba'eta nhande ndajakuai neĩ nhandembo'e aguã. Ha'e rã Nhe'ê ma nhandere ojerure 'rã opoaẽa nanhaendu kuaai va'e rupi.

²⁷ Nhe'ê py'a re oĩ va'e ma pavẽ py'a re oikuaa pota va'e oikuaapa 'rã, mba'eta Nhanderuete oipotaa rami ae ojerure oikovy icy'a e'ÿ va'e kuery re.

²⁸ Jaikuaa mba'emo oiko va'e ha'e javi ojapo porã 'rãa Nhanderuete jayvu va'e kuery pe, ha'e ae oipotaa rami vy nhanerenõ rire.

²⁹ Mba'eta yma ma voi nhandekuaa vy nhandeporavo avi Gua'y reko rami nhanemoingo aguã, guyvy kuery oguereko reta aguã.

³⁰ Ha'e gui nhandeporavo rire nhanerenõ avi, ha'e gui nhanerenõ rire nhandemboeko porã avi. Ha'e gui nhandemboeko porã rire imarã ve'ÿ va'e avi nhanemoingo.*

Nhanderuete nhanderayvua jaikuaa porã aguã re ijayvua

³¹ Ha'e rami rire mba'e ja'e 'rã tu? Nhandereve Nhanderuete oiko ramo mava'e 'rã tu nhanderovaigua oiko?

³² Mba'eta nhande kuery ha'e javi re Gua'y nome'ê e'ÿi rire hexeve opa mba'e ome'ê avi 'rã nhandevy.

³³ Mava'e tu ijayvu kuaa Nhanderuete rembiporavo kuery rovai? Mba'eta nhandemboeko porã ma Nhanderuete ae.*

³⁴ Mava'e tu nhandembopaga 'rã? Mba'eta Cristo Jesus omano ha'e onhemboete ju va'ekue ae nhandere ojerure oiny Nhanderuete oĩporu kuaa regua re.

³⁵ Mava'e 'rã tu ha'vy nhandepe'a Cristo nhanderayvua gui? Jajexavaia teve 'rã nhandepe'a, tyrã pa haxy va'e, nhandere opu'ã rei va'e, karuai, nhandeao e'ÿa, ijavaete va'e, tyrã kyxe revegua teve?

³⁶ Mba'eta ipara oĩa rami: "Ndevyguia orekuai ramo ko'ê nhavõ oremboaxaa orejukaarã pe. Vexa'i ojukaa aguã katy heraa va'e rami orekuai", he'iague rami.*

³⁷ Ha'e nunga ha'e javi nhandere oiko teĩ opa mba'e py Nhanderayvua nhandembopo'aka.

³⁸ Mba'eta xee aikuaa porã Nhanderuete nhanderayvua gui nhandepe'arã ndoikoa: neĩ manoa, tekove, anjo kuery, huvixa kuery, mba'emo aÿ oiko va'e, araka'eve rã guarã, ipo'akakueve,

³⁹ yvategua, yvy guarygua, neĩ amboae nunga voi nanhandepe'ai 'rã Nhanderuete nhanderayvua nhande-Senhor Cristo Jesus re oĩ va'e gui.

9

Judeu kuery ogueraa jepexea re Paulo ijayvuaque

¹ Cristo rery rupi anhetẽ va'e amombe'u po rami, ndaxeapui. Nhe'ê Ky'a E'ÿ re vy xepy'apy py aikuaa anhetẽa.

² Mba'eta xeporiau ete, xekuraxõ raxy ndoaxai ae,

³ mba'eta xeryyvy kuery, xeretarã kuery ng'o'o re ikuai va'e araa jepe aguã ha'eve va'e rire ayvu vaipy ha'e Cristo gui okanhygue 'rãgue xee aiko.

⁴ Ha'e kuery ma Israel regua ikuai. Ha'e kuery peguarã va'ekue ma Nhanderuete ra'y kuery ikuai aguã, hexakã, guexeve guarã ojapo va'ekue, lei, Nhanderuete ombojerovia aguã, ha'e mba'emo ome'ê aguã re ijayvuaque.

* 8:14 Gálatas 4.1-7

* 8:18 2 Coríntios 4.16-18; 1 Pedro 1.3-5

* 8:30 Efésios 1.3-5

* 8:33 Romanos 5.1

* 8:36 Salmo 44.22

⁵ Ha'e kuery regua ma oreramoi kuery ikuai raka'e, ha'e Cristo voi ngo'o re ha'e kuery regua avi oiko. Ha'e va'e ma pavē gui yvateve va'e oiko raka'e rā peve, Nhanderuete ima'endu'a porāmbý. Amém.*

Israel kuery pavē e'ý Nhanderuete oiporavo ramo ijayvuague ndoaxa riveia re ijayvua

⁶ Ha'e rami avi jaikuaa Nhanderuete ijayvuague ndoaxa riveia, mba'eta Israel ramymino kuery pavē e'ý ikuai Israel regua ete.*

⁷ Ha'e Abraão ramymino kuery ha'e javi e'ý guive ikuai ta'y kuery rami. Mba'eta "Isaque ramymino kuery pe anho 'rā 'Neramymino kuery' 'ea 'rā", he'i va'ekue.*

⁸ Ha'e nunga rupi ho'o gui rive oiko va'ekue'ý 'rā Nhanderuete ra'y kuery ikuai. Ijayvuague rami oiko va'ekue anho 'rā ta'y kuery jaikuaa.

⁹ Mba'eta Abraão pe aipoe'i raka'e: "Kova'e ára ojeupity jevy jave aju ramo Sara oguereko'i ma 'rā ava'i", he'i va'ekue.*

¹⁰ Ha'e va'e anho e'ý, Rebeca pi'a kuery voi pete'i ngu u oguereko raka'e, oreramoi Isaque ae,

¹¹ ha'e rami teĩ mokoive itui e'ý re ma voi pete'i Nhanderuete oiporavo raka'e, mba'emo porā neĩ mba'emo vai ha'e kuery ojapo e'ý re. (Mba'eta Nhanderuete ha'e ae oipotaa rami vy nhandeporavo, nhande ae nhanhea'āa rupi e'ý, ha'e rā Nhanerenoiā oipotaa rami vy anho.)

¹² Ha'e nunga rupi ixy pe aipoe'i raka'e: "Tyke'y oiko 'rā guvyv rembiguai", he'i,*

¹³ ipara oia rami: "Xee ayvu va'ekue Jacó, ha'e rā Esaú ma ayvu va'ekue'ý ae."*

Israel kuery amongue Nhanderuete ndoiporavo teĩ ha'eeva rami nhanderereko va'ea re ijayvua

¹⁴ Ha'e rami rā mba'e ja'e 'rā tu? Nhanderuete ha'eva e'ýa rami teve nhanderereko? Any teve.*

¹⁵ Mba'eta Moisés pe aipoe'i: "Xee amboaxy 'rā amboaxyxe va'e, xemboaxya rami areko 'rā amboaxy va'e ete'i", he'i va'ekue.*

¹⁶ Ha'e nunga rupi nhande ae jaipotaa rami e'ý 'rā nhandeporavo, nhande nhanhea'āa re'ý guive, ha'e rā Nhanderuete ha'e ae nhandemboaxya rupi.

¹⁷ Mba'eta ipara oia py aipoe'i Faraó pe: "Po rami aguā ae romoi, ndee reikoa rupi xepo'akaa aexa uka aguā, vvy jave re xerery oikuaapaa aguā", he'i raka'e.*

¹⁸ Ha'e rami vy Nhanderuete omboaxy 'rā omboaxyxe va'e, ha'e rā amboae kuery ma omoakā ratā 'rā, ha'e ae oipotaa rami oiko vy.

Nhanderuete opa mba'e re ipo'aka va'ea re ijayvua

¹⁹ Ha'e gui xapy'a rei ndee aipo're 'rā xevy: "Mba'e re tu ha'vy Nhanderuete jojou vai? Mava'e tu oiko 'rā ha'e oipotaa rami e'ý?" 're 'rā.

²⁰ Ha'e rami teĩ ndee ava, marā ramigua tu reiko Nhanderuete rembovai ete aguā? Mba'emo ryrurā ojapo pyre nda'u ijapoare pe: "Mba'e re tu gui rami ri xepo?" he'i 'rā ri?*

²¹ Mba'eta nhae'ũ gui mba'emo apoa ipo'aka 'rā yapo re, peteĩ apu'a gui mokoĩ rryru ojapo aguā: iporā va'e ryrurā, ha'e gui mba'emo rive ryrurā avi.

²² Mba'e ja'e 'rā tu ha'vy? Mba'eta xapy'a rei Nhanderuete opoxya ha'e opo'akaa oexa ukaxe vy ogueropo'aka are 'rā mba'emo rryru ojou vai pyrā, okanhy aguā rive oguereko pyre,

²³ ha'e rā mba'emo rryru hemimboaxy ikuai va'e re ma oexa uka 'rā guexakāa, yma ma voi guexakāa pyguarā oguereko katu rire.

²⁴ Ha'e va'e kuery ma nhande ae, mba'eta judeu regua anho e'ý, amboae regua voi nhanerenoi raka'e.

²⁵ Mba'eta Oséias ombopara va'ekue re aipoe'ia rami: "Xevyguia e'ý va'ekue pe 'Xevyguia ae' ha'e 'rā, ha'e xerembiayvu e'ý va'ekue pe 'Xerembiayvu ae' ha'e 'rā.

²⁶ Ha'e gui pendeivy pe 'Xevyguia e'ý 'ea 'rāgue py 'Nhanderuete oikove va'e ra'y kuery 'ea 'rā", he'i raka'e.*

²⁷ Ha'e rā Israel kuery re ma Isafas ijayvu vy aipoe'i: "Israel kuery ma ye'ẽ rembe re ita ku'i ikuai va'e rami heta teĩ mbovy'i ete 'rā oo jepe.

²⁸ Mba'eta Senhor ojapopa vyvoi 'rā oayvuague vvy re",

²⁹ Isafas aipoe'i ma voiaque rami: "Senhor Ixondaro reta va'e nhanderamymenorā nomoingovei va'e rire Sodoma ha'e Gomorra pygua kuery rami avi 'rāgue nhakanhymba."*

Israel kuery ndojeroviaia re ijayvua

³⁰ Mba'e ja'e 'rā tu ha'vy? Amboae regua kuery nonhemboeko porā uka potai va'ekue ri ojeroviaa rupi oupity nho teko porā.

³¹ Ha'e rā Israel kuery ma lei rupi teko porā re onhea'ā va'ekue ri ndoupityi.

³² Mba'e re nda'u ha'e kuery ndoupityi? Mba'eta ojeroviaa rupi e'ý oupityxe, ha'e kuery ae onhea'āa rupi rive. Ha'e rami vy onhepyxanga okuapy ita nhomonhepyxangaarā oĩ va'e re,

³³ ipara oia rami: "Pendú ke, São py amoĩ 'rā peteĩ ita nhomonhepyxangaarā, joityarā. Ha'e rā hexe ojerovia va'e ma nda'eva e'ýi nho 'rā."*

* 9:5 Romanos 3.1,2 * 9:6 Romanos 2.25-29 * 9:7 Gênesis 21.12 * 9:9 Gênesis 18.10,14 * 9:12 Gênesis 25.23 * 9:13 Malaquias 1.2-3 * 9:14 Romanos 3.5-8; Mateus 20.1-16 * 9:15 Êxodo 33.19 * 9:17 Êxodo 9.16 * 9:20 Isafas 29.16, 45.9 * 9:26 Oséias 1.10, 2.23 * 9:29 Isafas 1.9, 10.22-23 * 9:33 Isafas 8.14, 28.16

10

Nhanderuate guigua teko porã judeu kuery ojee nomôixeia re ijayvua

¹ Irmão kuery, xepy'a py aipota va'e, ha'e Nhanderuate pe judeu kuery re ajerure aikovya ma ha'e kuery oo jepe aguã.

² Mba'eta xee aikuaa rã ha'e kuery anhetê ete onhea'ã okuapy Nhanderuate pe ojererovy'a ukaxe vy, teĩ oikuaa rupi e'ỹ onhea'ã.

³ Mba'eta ndoikuaai okuapy Nhanderuate guigua teko porã, ha'e rami vy ha'e kuery ae reko porãa rive oexa ukaxe vy nonhemo'vyvixei Nhanderuate guigua ojee omoĩ aguã.

⁴ Mba'eta Cristo ma lei opaa, mba'eta hexe ojerovia va'e ma teko porã ogueroko va'e meme.*

⁵ Ha'e gui Moisés ombopara raka'e: "Lei re teko porã oĩ va'e rupi amongue oiko ri vy oikove 'rã ha'e va'e re", he'i.*

⁶ Ha'e rã ojerovia re teko porã oupity va'e re ma aipoe'i: "Eporandu eme ndepy'a py: 'Mava'e tu oo 'rã yva re?' 're eme." (Pova'e ma "Yva gui Cristo ogueru aguã", he'ia.)

⁷ "Neĩ 'Mava'e tu oguejy 'rã yvykua vaikue py?' 're eme guive." (Pova'e ma "Cristo omanoague gui ogueru ju aguã", he'ia.)

⁸ Ha'e rami 'rãgue py mba'e he'i tu? "Ndeyvy'iry ae ayvu oĩ, ndejuru py ha'e ndepy'a re", he'i.* Ha'e va'e ayvu ma jajerovia aguã regua romombe'u va'e, po rami:

⁹ Ndejuru py Jesus Senhor oikoa rami ri remombe'u, ha'e ndepy'a py omanoague gui Nhanderuate omboete jevyague rovia vy reo jepe 'rã.

¹⁰ Mba'eta nhandepy'a py jajerovia 'rã teko porã jaupity aguã, ha'e nhandejuru py ma nhandemombe'u 'rã jaa jepe aguã.

¹¹ Ha'e nunga rupi ae ipara oiny: "Ha'e javive hexe ojerovia va'e nda'eve e'ỹi nho 'rã.'"*

¹² Mba'eta judeu ha'e grego kuery joo rami ikuai, mba'eta peteĩ'i oiko pavẽ regua Senhor, ha'e opa mba'e py omboaxy 'rã ixupe ojapukai va'e ma guive rã,

¹³ "Ha'e javive Senhor rery rupi ojapukai va'e oo jepe 'rã" he'iaque rami.*

¹⁴ Ha'e rami avi mba'eta 'rã tu ixupe amongue ojapukai, hexe ojerovia e'ỹ re? Ha'e mba'eta 'rã tu hexe ojerovia, ayvu oendu e'ỹ re? Ha'e mba'eta 'rã tu oendu, imombe'uarã ndoikoi rã?

¹⁵ Ha'e mba'eta 'rã tu amongue omombe'u, omondoukaa e'ỹ ramo? Mba'eta ipara oĩa rami: "Iporã ete ayvu porã momba'ua kuery ou rã."*

Israel kuery "Noroendui rima", he'i aguã nda'eveia re ijayvua

¹⁶ Ha'e rami teĩ Israel kuery pavẽ e'ỹ onhe'ẽ rendu ayvu porã. Mba'eta Isaías aipoe'i: "Senhor, mava'e tu oguerovia oreayvu?" he'i va'ekue.*

¹⁷ Ha'e nunga rupi ayvu omomba'ua ramo mae 'rã jajerovia, ha'e ayvu omombe'u pyrã ma Cristo regua ae.

¹⁸ Ha'e rami teĩ aporandu ta: Israel kuery nda'u noendui ri? Ha'e kuery oendu ae, mba'eta anhetê "Yvy jave rupi ojapo ayvu oendupaa aguã rami. Ijayvua ma yvy apy rupi peve oenduka", he'iaque rami.*

¹⁹ Aporanduve ju ta: Israel kuery pe ri nda'u ndoikuaa ukai teri ayvu? Jypy'i Moisés pe aipoe'i uka raka'e: "Penderegua e'ỹ va'e kuery amboaxy vy ajapo 'rã penerakâte'ỹ aguã rami. Hi'arandu e'ỹ va'ekue araa jepe vy peẽ kuery rojapo 'rã penerakâte'ỹa pendu aguã rami", he'i.*

²⁰ Ha'e gui Isaías ju okyje e'ỹa py aipoe'i: "Ajejou uka xereka e'ỹ va'ekue pe, xere oporandu e'ỹ va'ekue pe ajekuaa uka", he'i.

²¹ Ha'e rã Israel kuery pe ma aipoe'i: "Ára pukukue re akuave'ẽ teĩ xenhe'ẽ rendu e'ỹ ha'e xerovai ikuai va'e kuery aenoĩ vy."*

11

Israel kuery reko re ijayvua

¹ Ha'e gui aporandu jevy ta: Nhanderuate nda'u oejapa ri guembiporavo kuery? Any, mba'eta xee voi Israel regua aiko, Abraão ramymino ha'e Benjamim kuery regua.

² Nhanderuate ma ndoeja rivei guembiporavo kuery yma ma voi oikuaa va'ekue. Tyrã ndapeikuaai teve ipara Elias ayvu oĩa? Ha'e va'e ma Nhanderuate renonde Israel kuery re ijayvu vy aipoe'i:

³ "Senhor, ha'e kuery ojuka ndevyguia profeta kuery, ombovaipa guive ndevyguia altar ikuai va'ekue. Xee ae'i aikove, ha'e xerekeve avi oipe'axe okuapy", he'i raka'e.

⁴ Ha'e gui mba'e he'i tu ombovai vy? "Ha'e rami avi xejeupegua areko teri sete mil avakue Baal renonde guenapy'ã re oĩ e'ỹ va'e", he'i.*

⁵ Ha'ekue rami avi aỹ voi ikuai amongue ete'i omboaxya rupi oiporavo va'ekue.

⁶ Ha'e gui omboaxya rupi oiporavo vy ma ha'e kuery onhea'ã rupi e'ỹ Nhanderuate oiporavo. Ha'e rami e'ỹ va'e rire omboaxya rupi e'ỹ oiporavo 'rãgue.

* 10:4 Gálatas 3.24-27 * 10:5 Levítico 18.5 * 10:8 Deuteronomio 30.12-14 * 10:11 Isaías 28.16 * 10:13 Joel 2.32, Romanos 1.16,17; Marcos 16.15,16 * 10:15 Isaías 52.7 * 10:16 Isaías 53.1 * 10:18 Salmo 19.4, Romanos 1.19,20 * 10:19 Deuteronomio 32.21 * 10:21 Isaías 65.1-2 * 11:4 1 Reis 19.10,14,18

⁷ Ha'e gui mba'e ja'e 'rã tu ha'vy? Israel kuery onhea'ãa rupi teko porã oupityxe teĩ ndoupityi, oiporavo va'ekue anho oupity. Ha'e rã amboae kuery ma inhakã ratãmba,*

⁸ ipara oĩa rami: "Ha'e kuery py'a re Nhanderuete omõi ndoikuaa potavei, hexa ma ojapo oexa e'ÿ aguã rami, ha'e ijapyxa ojapo oendu e'ÿ aguã rami aÿ peve", he'i.*

⁹ Davi aipoe'i avi: "Tove mesa py ha'e kuery ikuiaia pyve toiko monde pi ha'e nhuã rami, ha'e kuery onhepyxanga ha'e opaga aguã.

¹⁰ Ha'e kuery rexa tapytũmba oexa ve'ÿ aguã, ha'e ta'ikupe karẽ riae", he'i va'ekue.*

Atos 13.46, 28.23-28; Efésios 2.11-22; Hebreus 3.14

¹¹ Ha'e gui aporandu ta: Israel kuery ho'a aguã ri nda'u onhepyxanga? Any. Ha'e rami avi ha'e kuery heko vai ramo amboae regua kuery oo jepe, Israel kuery ju hakãte'ÿa oendu aguã.

¹² Mba'eta Israel kuery heko vai ramo vvy regua kuery oupity okuapy iporã va'e, Israel kuery re iporã va'e noĩ ramo amboae regua opa mba'e porã oupity. Ha'e gui ma Israel kuery oo jepe ramo katuve ma ikuai porã 'rã.

¹³ Aÿ peẽ amboae regua kuery pe ju xeayvu ta. Xee amboae regua kuery pegua apóstolo aiko vvy arovya xerembiaporã va'e,

¹⁴ mba'eta ajapoxe xeretarã kuery voi ikuai avi aguã pendekuaia rami, ha'e kuery regua avi araa jepe uka aguã.

¹⁵ Mba'eta ha'e kuery ma Nhanderuete rembiayvu e'ÿ ikuai ramo vvy regua kuery peteĩ rami ju ikuai hexeve. Ha'e rami rire mba'e tu oiko 'rã guembiayvurã ju ogueramo? Omanoague gui oikove ju va'e 'rã ikuai.

¹⁶ Mba'eta jypy'i mbojape oexy pyre iky'a e'ÿ va'e oĩ rire ma mbojape ha'e javi 'rã iky'a e'ÿ va'e avi opyta. Yvyra rapo iky'a e'ÿ va'e oĩ rire hakãgue voi ha'e rami 'rã opyta.*

¹⁷ Ha'e gui hakãgue ojyaa raka'e, ha'e pende kuery ju oliveira iro va'e rami teĩ ha'e kuery mbyte penemboja, hapo ha'e oliveira rykue re peiko aguã.

¹⁸ Ha'e rami teĩ nda'evi hakãgue ae gui pejejou porãve aguã. Pejejou porãve ri vvy peikuaa pota pova'e re: peẽ e'ÿ hapo moingo porãa peiko, ha'e rã hapo rima penemoingo porãa oĩ.

¹⁹ Xapy'a rei aipopeje 'rã: "Hakã ae ojyaa raka'e ha'ekue py ore roi aguã", peje.

²⁰ Ha'e rami teĩ ha'e kuery ndojeroviaia re ojyaa, ha'e peẽ ma pejerovia ramo penemboja. Pejejou porã eme, ha'e rami 'rãgue py pemõi pejererokyje aguã,

²¹ mba'eta hakãgue ae Nhanderuete ombopaga rire peẽ voi napenembojaga e'ÿi 'rã.

²² Peikuaa pota ke Nhanderuete porayvu ha'e nhombopaga va'ea re. Ho'a va'e kuery ma Nhanderuete ombopaga 'rã. Ha'e rã pende vvy pe ma oexa uka 'rã oporayvua, hexe peĩ riae ramo. Ha'e rami e'ÿ ramo peẽ voi pendepe'a 'rã.

²³ Ha'e gui Israel kuery voi ojerovia e'ÿa gui ojeko rerova ramo omboja nho 'rã, mba'eta Nhanderuete ipo'aka omõi ju aguã.

²⁴ Mba'eta oliveira iro va'e gui pendeaya vvy pendereko ae rovai oliveira iporã va'e re penemboja rire hakãgue ae katuve ju 'rã omboja hi'y re.

Opa py Nhanderuete nhomboaxypa aguã re ijayvua

²⁵ Mba'eta irmão kuery, aipotã peikuaa pova'e oikuaa pyre e'ÿ teri, peẽ ae rive penhemo'arandu e'ÿ aguã. Mba'eta Israel kuery re ma amongue henda py oiko imoakã ratãarã, peẽ amboae regua kuery pejerovia va'erã va'e ha'e javi pejeroviapa peve.*

²⁶ Ha'e va'e rire ma Israel kuery ha'e javive 'rã oo jepe, ipara oĩa rami: "Sião gui ou 'rã Jacó regua reraa jepearã, ha'e kuery reko vaia oi'pe'apa 'rã.

²⁷ Po rami 'rã ha'e kuery pe ajapo xereve guarã, ojevavyague aipe'a vvy", he'i.*

²⁸ Ayvu porã ha'e kuery ndogueroviaia vvy Nhanderuete rovaigua ranhe ikuai, peẽ kuery peo jepe aguã. Ha'e rami avi Nhanderuete oiporavoague rami vvy hembiayvu guive ikuai, oreramõi kuery pe ijayvuaque rami vvy.

²⁹ Mba'eta Nhanderuete joupe mba'emo ome'ẽa ha'e oenoĩague ma oaxa rive va'erã e'ÿ.

³⁰ Mba'eta peẽ kuery minha ymave Nhanderuete napenhe'ẽ rendui va'ekue ri aÿ ma ha'e kuery nonhe'ẽ rendui ramo peupity Nhanderuete penemboaxya.

³¹ Ha'e gui aÿ ma ha'e kuery ju nonhe'ẽ rendui, ha'e kuery voi Nhanderuete penemboaxya oexa vvy omboaxya oupity avi aguã.

³² Mba'eta Nhanderuete nhanembotypa ranhe nhanhe'ẽ rendu e'ÿa py, ha'e gui nhanemboaxypa ju aguã.

Nhanderuete 'arandua re ijayvua

³³ Opa mba'e py Nhanderuete 'arandua ha'e oikuaapaa ma opa va'erã e'ÿ. Mba'eta ipy'aa ma ndajaikuai ai, heko re voi ndajaikuai pota kuaai.*

³⁴ Mba'eta mava'e tu oikuaa Senhor ipy'aa? Mava'e tu imongetaarã oiko?*

³⁵ Mava'e ranhe tu mba'emo ome'ẽ ixupe, hekovia ojopy aguã?*

³⁶ Mba'eta ixugui ae opa mba'e oiko raka'e, ipo guigua ha'e ixupe guarã meme ikuai. Tove ha'e anho toguevovy'aa raka'e rã peve opa e'ÿ re. Amém.

* 11:7 Mateus 13.10-17 * 11:8 Deuteronômio 29.4, Isaías 29.10 * 11:10 Salmo 69.22-23 * 11:16 "Jypy'i mbojape oexy pyre" ha'e

"Yvyra rapo" he'ia ma judeu ppy kuery re ijayvu. * 11:25 Lucas 21.24; João 10.16; Mateus 23.37-39 * 11:27 Isaías 27.9 * 11:33

1 Coríntios 2.9,16 * 11:34 Isaías 40.13 * 11:35 Jô 41.11

12

Teko pyau re ijayvua

¹ Ha'e nunga rupi irmão kuery, Nhanderue nhamemboaxy ramo aipoa'e: Mymba pejuka 'rãgue py penderete ae peme'ê iuxpe, ome'êmby oikove ha'e iky'a e'ÿ va'e Nhanderue ojou porã va'erã. Ha'e rami vy 'rã pendepe'ya py pembojerovia.

² Ha'e rami vy penhemoingo ukave eme vvy regua kuery reko rami. Ha'e rami 'rãgue py pejeko rorova pendepe'ya pemboapyau uka vy, Nhanderue oipota va'e pejapo kuaa aguã. Ha'e va'e ma iporã ha'e ha'evea ramigua meme. Ha'e rami pendekuai ramo pendejou porã 'rã.*

Nhe'ê guigua ome'êmby rupi jaikoa re ijayvua

³ Mba'eta Nhanderue xemboaxyague rupi aipoa'e peê kuery peteĩ-teĩ pe: Pejejou porã rei eme, ha'evea rami meme peikuaa pota pendereko re, mba'eta jajeroivia rupi joo rami e'ÿ-e'ÿ nhamba'eapo aguã Nhanderue ome'ê peteĩ-teĩ pe.

⁴ Mba'eta peteĩ'i tete re minha mbovy rei e'ÿ hexegua ikuai, ha'e joo ramigua e'ÿ-e'ÿ ogueroko guembiaporã.

⁵ Ha'e rami ae avi nhande kuery voi, mbovy e'ÿ nhandekuai va'eri Cristo re vy peteĩ'i tete jaiko, ha'e peteĩ-teĩ joupegua nhandekuai.

⁶ Ha'e rami avi nhanderembiaporã joo ramigua e'ÿ-e'ÿ jareko nhamemboaxy rupi ome'ê va'ekue.* Xapy'a rei Nhe'ê guigua nhamombe'u aguã ri jajopy vy jajeroivia rupi 'rã nhamombe'u.

⁷ Ha'e rami e'ÿ vy nhandopytyvõ aguã ri jajopy vy nhandopytyvõa rupi nhamhea'ã ete 'rã. Nhombo'e va'e ma tonhea'ã ha'e rami aguã.

⁸ Nhombopy'a guaxu va'e ma tonhea'ã nhombopy'a guaxua rupi. Joupe mba'emo ome'ê va'e ma hakãte'ÿ rei ve'ÿ re tome'ê. Joe opena va'e ma oikuaa pota porã reve topena. Nhomboaxya rupi nhopytyvõa ma ovy'a reve tojapo.

Ha'evea ramigua anho jajapo aguã re ijayvua

⁹ Pejoayvu merami rive eme. Pejepe'a ha'eve'ÿ va'e gui, ha'evea ramigua anho pejapo.*

¹⁰ Pejoayvu ete ke peteĩ-teĩ, joegua meme'i joayvua rami. Peteĩ-teĩ penhombotea rupi pendekuai.

¹¹ Peneate'ÿ eme pemba'eapoa py. Senhor pe pendekuia py penekyre'ÿ penenhe'ê ha'e javi py.

¹² Pevy'a ke pearõa py. Pendekuerai eme peiko axya py. Pejepe'a eme pejerurea gui.

¹³ Pemboja'o ke mba'emo iky'a e'ÿ va'e iporiaukue'i pe. Penhomovã kuaa ke.

¹⁴ Peroayvu porã pendere opu'ã rei va'e kuery. Pendeayvu vai eme, peroayvu porã anho.

¹⁵ Pevy'a ke ovy'a va'e kuery reve, ha'e rã ojae'o va'e reve ma pejae'o.

¹⁶ Peteĩ rami meme pendekuai. Penhemboyate rei 'rãgue py penhemoirũ vvyigüeve'i re. Pendejeupe ae "Xe'arandu" peje eme.

¹⁷ Pendevy ojapo vaia rã peê pejapo vai eme. Penhea'ã pavẽ oexaa py ha'evea ramigua anho pejapo aguã re.

¹⁸ Ha'evea ja pendekuai porã'i 'rã ha'e javive reve.

¹⁹ Xerembiayvu kuery, pejepe eme. Ha'e rami 'rãgue py pemboaxa nhombopagaarã pe. Mba'eta ipara oiny: "Xee anhomboaga 'rã, xee amboekovia 'rã", he'i Senhor.*

²⁰ Ha'e rami 'rãgue py pendere ija'e e'ÿ va'e okaruxe ramo peme'ê ho'u va'erã. Ijy'uvei ramo peme'ê oy'u aguã. Mba'eta ha'e rami vy 'rã rejapo inhakã áry tapyĩ hexakã va'e ramigua oendu aguã rami.

²¹ Pejeity uka eme teko vai pe. Ha'e rami 'rãgue py peê ma teko vai re pendepo'aka 'rã iporã va'e pejapo vy.*

13

Huvixa kuery nhamhe'ê rendu aguã re ijayvua

¹ Ha'e javive penhe'ê rendu huvixa kuery, mba'eta joe opena va'e kuery ma Nhanderue ombopo'aka ramo opena. Huvixa ikuai va'e ma Nhanderue omoĩ uka va'ekue meme.*

² Ha'e rami vy huvixa kuery re opu'ã rei va'e ma Nhanderue omoĩ va'ekue re ae opu'ã. Ha'e nunga rupi joe opu'ã rei va'e ma ha'e kuery ae opaga aguã rami ojapo.

³ Mba'eta huvixa kuery ma heko porã va'e okyje aguã e'ÿ oĩ, ha'e rã heko vai va'e okyje aguã. Pendekuaixe pa huvixa kuery gui pekyje reia rupi e'ÿ? Pendereko porã ha'vy. Ha'e rami rã pendejou porã 'rã.

⁴ Mba'eta huvixa kuery ma Nhanderue guembiguairã omoĩ va'ekue nhandere opena porã aguã. Xapy'a rei pejapo vai vy pekyje 'rãe, mba'eta huvixa kuery rive'ÿ ogueroko kyxe. Nhanderue rembiguai ikuai joepyarã, ha'e ojapo vai va'e mbopagaarã.

⁵ Ha'e rami vy penhe'ê rendu 'rãe, penembopaga aguã gui pekyje vy anho e'ÿ, ha'evea rami pendekuai aguã guive.

⁶ Ha'e nunga rupi ae imposto re pepaga, mba'eta huvixa kuery Nhanderue rembiguai ikuai ha'e nunga re opena va'ety.

⁷ Pavẽ pe pemboekovia perevea: huvixa pe ri pepaga aguã oĩ ramo pepaga, imposto re ri pereve vy peme'ê, pemboete va'erã ma pemboete 'rã, ha'e pembojerovia va'erã ma pembojerovia 'rã.

Porayvu va'e lei ojapopaa re ijayvua

* 12:2 1 Coríntios 6.20; Filipenses 4.8,9 * 12:6 1 Coríntios 12.1-11; Efésios 4.11-16; 1 Pedro 4.10,11 * 12:9 Efésios 4.25-5.2; 1 Pedro 3.8-12 * 12:19 Deuteronomio 32.35 * 12:21 Provérbios 25.21-22 * 13:1 Mateus 22.21; Tito 3.1; 1 Pedro 2.13-17

⁸ Avave rei pe pereve riae eme mba'emo re, pejoyvuu aguã re anho. Mba'eta joayvu va'e ma lei re oia ha'e javi ojapopa.*

⁹ Mba'eta po rami oi: "Ndetavy rei eme, ejojuka eme, nemonda eme, emoaruã eme." Ha'e nunga ha'e javi, ojapo uka pyre mboave ikuai va'e avi ma pova'e ayvu re oi: "Reayvu 'rã neirũ ndee ae rejeayvua rami."*

¹⁰ Porayvu va'e ma ndojapo vai 'rã oirũ pe. Ha'e nunga rupi porayvu va'e ojapopa 'rã lei re oi va'e ae.

"Ára ovaẽ rai'i ma", he'iague

¹¹ Aỹ peẽ kuery mba'emo oiko va'e re peikuaa pota kuaa va'e pe xeayvu: Ovaẽ ma pekeague gui pemyĩ aguã, mba'eta aỹ ma jaa jepe aguã ára ovaẽ rai'ive ma jajerovia ypyague gui.

¹² Pytũ oaxapa rai'i ma, ovaẽ ma ouvỹ ára.* Ha'e nunga rupi jajepe'a 'rã pytũ rupi jaikoague gui, ha'e jaraa hendy va'e rembiporu.

¹³ Ha'evea rami pota 'rã nhandekuai ara py rami. Nda'evei opa marã rei ikuai ha'e oka'u va'e rami nhandekuai aguã, itavy rei ha'e ha'eve e'ỹa rami, neĩ joguero'a rei ha'e omoaruã reia rupi nda'evei.

¹⁴ Ha'e rami 'rãgue py penhemonde Senhor Jesus Cristo py, ha'e peteĩve henda py pemoĩ eme to'o oipota va'e.

14

Ojeroviaa py ikangy va'e jaropo'aka aguã re ijayvua

¹ Pemovaẽ ojeroviaa py teri ikangy va'e, ha'e kuery oikuaa va'e re pejoguero'a e'ỹ re.

² Mba'eta amongue oikuaa rã opa mba'e nunga ja'u aguã ha'eve. Ha'e rã ikangy va'e ma mba'emo aju anho 'rã ho'u.

³ Ho'upa rei va'e ma tojou vai eme ho'upa rei e'ỹ va'e, ha'e ho'upa rei e'ỹ va'e avi tojou vai eme ho'upa rei va'e, mba'eta Nhanderuete omovaẽ ma mokoĩve.*

⁴ Tyrã marã ramigua tu ndee reiko nhoembuguai re reikuaa pota rei aguã? Mba'eta guerekoa pe ae oiko, ojou porã, e'ỹ vy ndojou porãia rupi. Ha'e rami avi Senhor ojou porã 'rã, mba'eta ipo'aka omombaraete aguã.

⁵ Amongue omboeteve 'rã amongue ára amboae gui, ha'e rã amboae ma joo ramigua memea oikuaa ára nhavõ. Peteĩ-teĩ toikuaa porã ha'e kuery ae o'arandua rupi.

⁶ Amongue ára omboeteve va'e ma Senhor pe ae omboete, ha'e ho'upa rei va'e voi Senhor pe ae ho'u, mba'eta Nhanderuete oguerovy'a reve okaru. Ha'e ho'upa rei e'ỹ va'e voi Senhor pe avi ndo'upa rei, mba'eta ha'e voi oguerovy'a 'rã Nhanderuete.

⁷ Mba'eta peteĩve nhandejeupe ae e'ỹ jaiko, ha'e nhandejeupe ae e'ỹ guive nhamano.

⁸ Mba'eta jaikove vy ma Senhor pe jaiko, ha'e nhamano vy Senhor pe ae ju 'rã nhamano. Jaikove e'ỹ vy nhamano teĩ Senhor pegua meme nhandekuai.

⁹ Ha'e rami aguã ae Cristo omano ha'e onhemboete ju raka'e, omano va'ekue ha'e okuave va'e ha'e javi Senhor oiko aguã.

¹⁰ Ha'e nunga rupi ndee, mba'e re tu reikuaa pota rei ri nde-irmão re? Ha'vy ndee, mba'e re tu rejou vai nde-irmão? Mba'eta Nhanderuete nhomboayvu aguã py ha'e javive 'rã jajexa uka henonde,

¹¹ ipara oia rami: "Senhor aipoe'i: 'Xee ae rekove rupi aura vy aipoa'e: Xerenonde pavẽ 'rã oi guenapy'ã re, pavẽ 'rã ojuru py omboete Nhanderuete', he'i."*

¹² Ha'e rami vy peteĩ-teĩ nhanhemombe'u 'rã Nhanderuete pe.

Peteĩ-teĩ jaikuaa rami jaiko teĩ jajoayvu aguã re ijayvua

¹³ Ha'e nunga rupi jajojou vai reive eme. Ha'e rami 'rãgue py penhea'ã pende-irmão kuery pemonhepyxanga ha'e peity e'ỹ aguã.*

¹⁴ Xee ma Senhor Jesus gui aikuaa porã: Mba'eve jipoi ha'e nunga ae nhanemboeko ky'a va'erã. Ha'e rami avi mba'emo pe amongue "Xemboeko ky'aaarã" he'i ramo ha'e kuery pe ma imboeko ky'aaarã ae oi.

¹⁵ Ha'e nunga rupi mba'emo re'u va'e káuxa nde-irmão kuery remomboriau vy mborayvu rupi e'ỹ reiko. Ha'e kuery re Cristo omano rive nda'evei tembi'u káuxa rive rejoapo aguã okanhy aguã rami.

¹⁶ Ha'e rami avi ndejeupe ae rã ha'evea rami reiko teĩ nda'evei amboae kuery ndejou vai aguã rami reiko aguã.

¹⁷ Mba'eta Nhanderuete po'akaa py ma ja'u ha'e jay'u va'e re rive'ỹ nhanhea'ã, ha'e rã Nhe'ẽ Ky'a E'ỹ guigua teko porã, mby'a porã ha'e javy'aa re.

¹⁸ Mba'eta ha'e va'e rupi Cristo pe ikuai va'e ma ombovy'a 'rã Nhanderuete, ha'e avakue voi ojou porã 'rã.

¹⁹ Ha'e nunga rupi peteĩ rami pota 'rã nhandekuai nghanhomombaraetea rupi.

²⁰ Tembi'u káuxa rive pembovaipa eme Nhanderuete rembiapo. Opa marãgua tembi'u anhetẽ nanhanemboeko ky'ai va'erã meme. Ha'e rami teĩ tembi'u pe "Xemboeko ky'aaarã" he'i reve ho'u va'e pe ma nda'evei.

²¹ Ha'eveve xo'o ja'u e'ỹ, vinhõ jay'u e'ỹ, ha'e mba'eve rei jajapo e'ỹ aguã nhande-irmão kuery reityarã regua, [e'ỹ vy imomboriauarã, e'ỹ vy imokangyarã regua.]

²² Ha'e nunga ha'evea rami roviaa ma ndepy'a py ae ereko Nhanderuete renonde. Ovy'a ete 'rã gueko ae ojou vai e'ỹ va'e.

* 13:8 Mateus 22.39,40; Gálatas 5.13-15; 1 João 3.11-18

* 13:9 Êxodo 20.13-17, Levítico 19.18, Deuteronômio 5.17-21

* 13:12 Efésios

5.14-18 * 14:3 Mateus 7.1-5; 1 Coríntios 10.23-33

* 14:11 Isaiás 45.23

* 14:13 1 Coríntios 8.9-13

²³ Ha'e rā amongue ojerovíaa rupi e'ÿ mba'emo ho'u va'e ma ojou vai pyrã ikuai, ojerovíaa rupi e'ÿ ikuai vy. Mba'eta jajerovíaa rupi e'ÿ ri nhandekuai vy jajejavy.

15

Cristo rami mborayvu rupi jaiko aguã re ijayvua

¹ Ha'e gui nhande nhandembaraetekueve va'e ma jaropo'aka 'rã ikangy teri va'e ikuai, nhande ae jaiporta va'e rive jajapo 'rãgue py.

² Petei-tei nhandekuai amboae kuery oipota va'e rupi, iporã va'e anho jajapo nhomombaraetearã.*

³ Mba'eta Cristo voi ha'e ae oipota va'e rupi e'ÿ oiko raka'e. Ha'e rami 'rãgue py hexe oiko ipara oia rami:

“Ndere ijayvu rei okuapya ma xere ae ou”, he'ia gue rami.*

⁴ Mba'eta yma ombopara pyre ma Nhanderuete nhandembo'e aguã meme ombopara uka, ipara oia re nhaí atã ha'e nhandepy'a guaxu vy jajerovíaa rupi nharõ jaikovy aguã.

⁵ Ha'e gui Nhanderuete nhandemoí atã ha'e nhandembo'py'a guaxua va'e ma peẽ voi tapendeapo petei rami meme peikuaa aguã rami, Cristo Jesus rami ete,

⁶ ha'e rami vy petei rami pendepy'a, ha'e petei'i rami ae pepora'e aguã Nhanderuete, nhande-Senhor Jesus Cristo Ru va'e pe.

⁷ Ha'e nunga rupi nhandemovaẽ petei-tei, Cristo nhandemovaẽmbaague rami ae, Nhanderuete oguerovy'aa aguã rami.

⁸ Mba'eta aipoa'e pendevy: Nhanderuete omoí Cristo judeu kuery pe oikuaa uka aguã anhetẽ rupi meme oikoa, ojapo aguã oreramoí kuery pe ijayvua gue ojeupitya aguã rami,

⁹ ha'e gui amboae regua kuery voi Nhanderuete oguerovy'a okuapy aguã omboaxya re, ipara oia rami: “Ha'e nunga rupi amboae regua kuery mbyte xee roguerovy'a vy apora'e 'rã nderery amboetea rupi.”*

¹⁰ Aipoe'i avi: “Peẽ amboae regua kuery, pevy'a avi ke ixupegua kuery reve.”*

¹¹ Aipoe'ive ju: “Peẽ amboae regua kuery ha'e javi, pemboete ke Senhor. Ha'e javi regua tomboete okuapy.”*

¹² Isaías aipoe'i avi: “Petei henho'i 'rã Jessé rapokue gui, amboae regua kuery re opena va'erã. Ha'e va'e re vy ha'e kuery ogueroko 'rã oarõ aguã.”*

¹³ Nharõ jaikovy aguã Nhanderuete ome'ẽ va'e vy tove pendere tomoí pevy'aa ha'e mby'a porã anho, Nhe'ẽ Ky'a E'ÿ po'akaa rupi pearõ peikovy aguã opa mba'e py.

Paulo gueko omombe'u porãveague

¹⁴ Ha'e gui irmão kuery, xee aikuaa ae peẽ kuery re mborayvu ha'e 'arandua ha'e javi oia, joo meme penhomongeta kuaa aguã rami.

¹⁵ Ha'e rami avi mba'emo amombe'u porã rupi kova'e kuaxia ambopara pendevy, peteigue ju ha'e nunga re romoma'endu'a aguã, Nhanderuete xemboaxy vy xemoíague rami vy.

¹⁶ Mba'eta xemoí karamboae amboae regua kuery ikuai rupi Cristo Jesus pe amba'eapo aguã, mba'eta sacerdote rami amba'eapo Nhanderuete guigua ayvu porã amombe'ua rupi. Ha'e rami rã Nhe'ẽ Ky'a E'ÿ ha'e kuery oiky'a'o rire Nhanderuete pe ome'ẽmby rami amboaxa aguã, oguerovy'a va'erã.*

¹⁷ Ha'e nunga rupi xee voi Nhanderuete pe amba'eapo aikovya rupi areko Cristo Jesus re vy arovy'a aguã.

¹⁸ Ha'e rami avi mba'eve ndarovy'ai 'rã xepo rupi Cristo ae ojapo va'ekue e'ÿ vy. Mba'eta xeyavu ha'e mba'emo ajapoa py Cristo ojapo amboae regua kuery onhe'ẽ rendu aguã rami,

¹⁹ Nhe'ẽ Ky'a E'ÿ po'akaa rupi hexa pyrã ha'e nhomondyipaarã ajapoa py. Ha'e rami vy Jerusalém katy'i rupi guive Ilírico vvy peve amombe'u ma Cristo regua ayvu porã.

²⁰ Ha'e rami avi xee anhea'ã aikovy Cristo regua ayvu ndoikuai teria rupi ju amombe'u aguã, amboae kuery omboopy ma voiague rupi e'ÿ amba'eapo aguã.

²¹ Mba'eta ipara oia rami: “Ha'e kuery pe omombe'u pyre e'ÿ 'rã oexa okuapy, ha'e oendu va'ekue'ÿ 'rã oikuaapa guive”, he'ia rami aiko.*

Paulo uguata aguã re ijayvua gue

²² Ha'e nunga rupi ae mbovykue rei e'ÿ xee roipouxte tei nda'evei teri.

²³ Ha'e rã aÿ ma ha'ekue rupi amba'eapo aguã jipovei ramo, ha'e peẽ kuery roexaxe ete vy

²⁴ xepy'a Espanha katy aguata vy roipou aguã re. Ha'e rami vy aguata avya rupi avaẽ 'rã peẽ kuerya py, pendekuaia gui peẽ kuery ju xemondoukave aguã aaxea katy, peẽ kuery reve xapy'a'i ri jepe aiko ranhe rire.

²⁵ Ha'e gui aÿ ma Jerusalém katy aa iky'a e'ÿ va'e kuery aipytyvõ aguã.

²⁶ Mba'eta Macedônia ha'e Acaia pygua kuery ma omboaxya rupi perãta omono'õ Jerusalém pygua kuery iky'a e'ÿ va'e iporiaukue'i oipytyvõ aguã.*

²⁷ Ha'e rami ha'e kuery ojapoxe ete okuapy, “Judeu kuery pe jareve” he'i vy. Mba'eta judeu kuery gui amboae regua kuery Nhe'ẽ guigua ojopy rire ha'evea rami oipytyvõ mba'emo py.

²⁸ Ha'e gui ha'e kuery pe ha'e nungakue araapa ma rire peẽ kuerya py ju 'rã avaẽ Espanha katy aguata avy vy.

* 15:2 1 Coríntios 10.24; Filipenses 2.3-5 * 15:3 Salmo 69.9 * 15:9 2 Samuel 22.50, Salmo 18.49 * 15:10 Deuteronomio 32.43

* 15:11 Salmo 117.1 * 15:12 “Jessé rapo guigua” he'ia ma Jesus Cristo re ijayvu vy (Isaías 11.10). * 15:16 Efésios 3.1-9 * 15:21

Isaías 52.15 * 15:26 1 Coríntios 16.1-4

²⁹ Xee aikuaa porã peẽ kuerya py aru 'rãa Cristo guigua opa mba'e py penemoingo porãarã.

Ha'e kuery onhembo'e aguã re Paulo ojerureague

³⁰ Ha'e gui irmão kuery, po rami ajerure nhande-Senhor rery rupi, Nhe'ẽ guigua mborayvu rupi guive: Penhea'ã xereve Nhanderuete xepytyvõ aguã re pejerure vy,

³¹ aa jepe aguã Judéia pygua kuery onhe'ẽ rendu e'ỹ va'ea gui, ha'e Jerusalém pygua iky'a e'ỹ va'e kuery pegua araa rã ha'e kuery ojou porã aguã,

³² ha'e gui Nhanderuete oipotaa rami roipou vy avy'a reve avaẽ aguã peẽ kuerya py, jovavi japytu'u vy javy'a aguã.*

³³ Nhanderuete peteĩ rami nhanemoingo va'e toiko peẽ kuery ha'e javi reve. Amém.

16

Paulo Febe omovaẽ ukaague

¹ Tamombe'u nhanereindyo Febe, mba'eta Cencreia pygua igreja kuery oipytyvõ va'ety oiko.

² Ha'e nunga rupi pemovaẽ porã Senhor rery rupi, iky'a e'ỹ va'e kuery nhamovaẽa rami ae. Peipytyvõ ke oipota va'e ha'e javi py, mba'eta heta re ma opena porã'i va'ekue, xere voi.

Oirũ kuery pe oxaruraague

³ Pemombe'u ke xema'endu'aa Priscila ha'e Áqüila pe, mba'eta Cristo Jesus pe amba'eapo rupi xepytyvõ va'ety ikuai.

⁴ Ha'e va'e kuery ma ndojeayvuveikue py ikuai karamboae xere. Ha'e nungakue re arovy'a, ha'e xee anho e'ỹ guive, amboae regua igreja kuery ha'e javi avi.*

⁵ Pemombe'u avi xema'endu'aa ha'e kuery ro py igreja kuery onhemboaty va'e pe. Pemombe'u avi xerembiayvu Epêneto pe. Ha'e va'e ma jypy'i Ásia pygua ojeko me'ẽ raka'e Cristo pe.

⁶ Pemombe'u avi Maria peẽ kuery re vy omba'eapo vaipa va'ety pe.

⁷ Pemombe'u avi xeretarã kuery Andrônico ha'e Júnias nhuã py aĩ rã xemoirũ va'ekue pe. Ha'e va'e kuery ma apóstolo regua ima'endu'a porãmbý ikuai. Xegui ha'e kuery ranhe Cristo pe ikuai raka'e.

⁸ Pemombe'u Ampliãto pe voi, Senhor re vy ayvu va'e rã.

⁹ Pemombe'u xereve Cristo pe omba'eapo oikovy va'e Urbano pe, ha'e xerembiayvu Estáquis pe guive.

¹⁰ Pemombe'u Cristo pegua ojou porãmbý Apeles pe. Pemombe'u avi Aristóbulo ro pygua kuery pe.

¹¹ Pemombe'u xeretarã Herodião pe. Pemombe'u avi Narciso ro pygua kuery Senhor re ikuai va'e pe.

¹² Pemombe'u Trifena ha'e Trifosa pe. Ha'e va'e kuery ma Senhor pe omba'eapo va'ety. Pemombe'u xerembiayvu Pérsida Senhor pe omba'eapo vaipa avi va'ety pe.

¹³ Pemombe'u Senhor ojeupe guarã oiporavo va'ekue Rufo pe, ixy pe guive, mba'eta ha'i rami ae xere voi opena karamboae.

¹⁴ Pemombe'u Asíncrito, Flegonte, Hermes, Pátrobas ha'e Hermas pe, ha'e gui irmão kuery ha'e kuerya py onhemboaty va'e pe.

¹⁵ Pemombe'u Filólogo ha'e Júlia pe, Nereu ha'e heindy pe, Olimpas, ha'e iky'a e'ỹ va'e kuery ha'e kuerya py onhemboaty va'e ha'e javi pe.

¹⁶ Pexarura joupe-upe iky'a e'ỹ va'e kuery joayvua rami. Cristo pegua igreja ikuai va'e ha'e javi pygua omombe'u uka okuapy pendeivy oxaruraa.

Nhomongetaague

¹⁷ Ha'e gui irmão kuery, ajerure peikuaa pota porã aguã amongue penembo'eague rami e'ỹ, peteĩ rami e'ỹ penemoingoxe vy pendereityxe va'e kuery re. Pejepe'a ha'e kuerya gui,

¹⁸ mba'eta nhande-Senhor Cristo pe'ỹ omba'eapo va'e, ojeupe guarã re anho onhea'ã. Ha'e rami vy ijayvu porã'i ha'e jogueroy merami rive vy ombotavy 'rã onheangu e'ỹ va'e kuery kuraxõ.*

¹⁹ Ha'e rã peẽ kuery penhe'ẽ rendua ma pavẽ oikuaa. Xee voi roguerovy'a avi ha'e rami pendekuaia re. Ha'e rami avi aipota pene'arandu iporã va'e peikuaa aguã, ha'e rã mba'emo vai re ma peikuaa pota eme.

²⁰ Ha'e ramo Nhanderuete mby'a porã me'ẽa va'e ma are'ỹ re 'rã omoĩ Satanás pendepy gu'ỹry. Pendere toĩ riae nhande-Senhor Jesus nhanemboaxya.

Irũ kuery oxarura ukaague

²¹ Xepytyvõa Timóteo oxarura uka pendeivy, ha'e gui xeretarã kuery Lúcio, Jasom ha'e Sosípatro guive.

²² Xee Tércio kova'e kuaxia ambopara va'e voi pendeivy axarura avi Senhor rery rupi.

²³ Xemovaẽ porã va'ety Gaio oxarura uka avi pendeivy. Ha'e va'e ma igreja kuery ha'e javi omovaẽ va'ety. Tetã pygua perãta re opena va'ety Erasto ha'e irmão Quarto oxarura uka avi pendeivy.

²⁴ [Peẽ kuery ha'e javive re toĩ riae nhande-Senhor Jesus Cristo nhanemboaxya. Amém.]

Opa py ijayvuague

²⁵ Nhanderuete opo'akaa rupi penemombaraete 'rã Jesus Cristo regua ayvu porã amombe'u aikovy va'e rami vy, Ha'e va'e ayvu ma oikuaa e'ỹ pyre, yma voi ndoikuaa ukai va'ekue.

²⁶ Ha'e gui aỹ ma oikuaa uka vy profeta kuery pe ombopara uka, Nhanderuete imarã e'ỹ va'e ojapo ukaague rami vy, ha'e javi regua ojerovia vy onhe'ẽ rendu aguã.

* 15:32 Atos 28.15 * 16:4 Atos 18.1-3,18,26 * 16:18 Mateus 7.15-20; 1 João 3.10, 4.1-6; Efésios 5.6,7

²⁷ Nhanderuete petē'i oiko ha'e hi'arandupa va'e tomboetepaa Jesus Cristo rupi, raka'e rā peve ete. Amém.

Jyppy'i Corinto pygua kuery pe Paulo ombopara va'ekue

Jyppy'i Corinto pygua kuery pe Paulo ombopara va'ekue

Corinto ma tetã guaxu, aỹ Grécia vvy re oĩ va'e. Ha'e py Jesus Cristo pegua igreja oĩ va'e ma apóstolo Paulo ae omboypy va'ekue. Ha'e va'e rire ndovy'ai ha'e kuery joo rami e'ỹ-e'ỹ ikuai omombe'ua rã oendu vy. Ha'e rami vy ombopara vy aipoe'i: "Irmão kuery, nhande-Senhor Jesus Cristo rery rupi ajerure joo rami pendeayvu aguã. Joo rami e'ỹ-e'ỹ pendekuai eme. Joo'i rami meme pendekuai, joo rami peikuaa ha'e joo rami meme pene'arandu" (1.10).

Ha'e kuery mbyte py oiko avi itavy rei va'e. Ha'e va'e reko apóstolo Paulo ndojou porã vy nomovaẽ ukavei rangeta. Omongeta avi omenda va'e kuery reko re. Ombo'e Nhe'ẽ po'akaa rupi peteĩ-teĩ nhandopytyvõa re, ha'e Jesus omanoague gui onhemoete ju rire nhande voi jaikove jevy aguã re. "Ha'e nunga rupi xerembiayvu irmão kuery, peĩ atã tema, pejeity uka eme, Senhor pe pemba'eapoa rupi penekyre'ỹ riae guive, mba'eta jaikuaa Senhor re vy nhamba'eapoa ndoaxa rivei "rãa" (15.58).

Oxarura reve ijayvu vy omboypyague

¹ Xee Paulo ma Jesus Cristo pegua apóstolo-rã Nhanderuete oipotaa rami vy xerenoĩ va'ekue. Irmão Sóstenes reve

² roxarura Nhanderuete pegua igreja kuery Corinto tetã py pendekuai va'e pe.* Peẽ kuery voi Cristo Jesus re vy pendeky'a'oa ha'e iky'a e'ỹ va'erã penerenoĩa, nhande-Senhor Jesus Cristo rery rupi opa rupi ojapukai va'e ha'e javi reve. Mba'eta ha'e kuery pegua Senhor avi oiko, nhande-Senhor oikoa rami.

³ Tove pendere toĩ penemboaxya ha'e mby'a porã Nhanderuete ha'e Senhor Jesus Cristo guigua.

Oguerovy'aague

⁴ Peẽ kuery re arovy'a riae [Xe]ruete, mba'eta Cristo Jesus re penemoĩ vy penemboaxy ramo.

⁵ Mba'eta ha'e va'e re vy mba'emo porã opa marãgua ome'ẽ pëvy, pendeayvurã ha'e pene'arandurã ha'e javi guive,

⁶ mba'eta pendekuaia re Cristo regua ayvu ojekuaa anhetẽ va'e.

⁷ Mba'eta nhande-Senhor Jesus Cristo ojekuaa aguã pearõ rã pendevy pe opa marãgua Nhe'ẽ guigua ome'ẽ rã ndoatai peteĩve henda py.

⁸ Opa peve penemombaraete 'rã guive, nhande-Senhor Jesus Cristo ára py opa mba'e py heko porã va'e pejexa uka aguã.

⁹ Nhanderuete penerenoĩ gua'y Jesus Cristo nhande-Senhor reve peteĩ rami pendekuai aguã. Ha'e rire ojeroviapy 'rã oiko.

Peteĩ rami ikuai aguã re ijayvua

¹⁰ Irmão kuery, nhande-Senhor Jesus Cristo rery rupi ajerure joo rami pendeayvu aguã. Joo rami e'ỹ-e'ỹ pendekuai eme. Joo'i rami meme pendekuai, joo rami peikuaa ha'e joo rami meme pene'arandu.*

¹¹ Mba'eta irmão kuery, Cloe ro pygua kuery omombe'u rã aendu karamboae joo rami e'ỹ-e'ỹ peikuaa.

¹² Mba'eta peteĩ-teĩ aipopeje: "Xee ma Paulo pegua" e'ỹ vy "Xee ma Apolo pegua", "Xee ma Cefas pegua" e'ỹ vy "Xee ma Cristo pegua", peje.

¹³ Cristo nda'u onhemoja'opa ri? Xee Paulo nda'u penderekovia kuruxu re xemoĩa va'ekue? Tyrã pa xerery rupi penhemongarai? Any.

¹⁴ Arovy'a [Nhanderuete] mba'eta peẽ kuery regua peteĩve xee namongarai, Crispo ha'e Gaio e'ỹ vy,

¹⁵ avave rei xerery rupi penhemongaraiague rami penhemombe'u e'ỹ aguã.

¹⁶ Amongarai avi Estéfanos ro pygua kuery. Ha'e va'e kuery e'ỹ vy amboae kuery amongaraiague re naxema'endu'ai.

¹⁷ Mba'eta anhomongarai aguã e'ỹ Cristo xembou, ha'e rã ayvu porã amombe'u aikovy aguã. Xee ae 'arandua rupi e'ỹ guive ayvu amombe'u, kuruxu re Cristo omanoague regua ayvu amboyke rive e'ỹ aguã.

Ayvu kuruxu regua re ijayvua

¹⁸ Anhetẽ kuruxu ayvu regua ma okanhy aguã rami ikuai va'e pe ovare'ỹ va'e merami. Ha'e rã nhande jaa jepe va'e pe ma Nhanderuete po'akaa oĩa.

¹⁹ Mba'eta ipara oiny: "Ambovaipa 'rã hi'arandu va'e kuery 'arandua, amomba 'rã oikuaapa va'e kuery oikuaa va'e", he'i.*

²⁰ Mamo tu opyta hi'arandu va'e ha'e lei re nhombo'e va'ety kuery? Mamo tu opyta ko vvy regua ijayvu kuaa va'e? Mba'eta kova'e vvy regua 'arandua ma Nhanderuete oikuaa uka mba'everã ndovareia.

²¹ Mba'eta Nhanderuete 'arandua rami vy vvy regua kuery ojee ae 'arandua rupi ikuai vy ndoikuai okuapy. Ha'e ramo Nhanderuete oiporavo ayvu "Ovare'ỹ va'e" 'ea va'e omombe'u uka vy ogueraa jepe aguã hexe ojerovia va'e.*

²² Mba'eta judeu kuery ojerure 'rã hexa pyrã re, ha'e rã grego kuery ma 'arandurã oeka okuapy.

²³ Ha'e rã ore ma kuruxu re Cristo omoĩa ague regua romombe'u. Ha'e va'e ma judeu kuery pe rã ojou vaipy, ha'e amboae regua kuery pe ovare'ỹ va'e.

* 1:2 Atos 18.1-17

* 1:10 Romanos 15.5,6; Efésios 4.1-6; Filipenses 2.1-4

* 1:19 Isaías 29.14

* 1:21 Mateus 11.25,26

²⁴ Ha'e rã oenoĩ mbyre judeu ha'e grego ikuai va'e pe ma romombe'u Cristo Nhanderue te po'aka ha'e hi'arandu kuaa ukua.

²⁵ Mba'eta Nhanderue ayvu "Ovare'ỹ va'e" 'ea teĩ avakue gui hi'aranduve, ha'e ixuguigua "Ikangya" 'ea teĩ avakue gui imbaraeve.

Ikya'e e'ỹ va'erã oenoĩ mbyre re ijayvua

²⁶ Irmão kuery, peikuaa pota ke penerenoĩ mbyre marã ramigua pa pendekuaia re. Mba'eta heta e'ỹ pendekuai avakue oikuaa rã hi'arandupa va'e, ipo'akapa va'e, neĩ omboetevepy.

²⁷ Ha'e rami 'rãgue py ko yvy regua "Ovare'ỹ va'e" he'ia ma Nhanderue oiporavo omoxĩmba aguã hi'arandu va'e kuery, kova'e yvy regua "Ikangy" he'ia ma oiporavo omoxĩmba aguã ipo'aka va'e kuery.*

²⁸ Ko yvy regua "Yvyĩgueve'i", "Ojou vaipy" ha'e "Mba'e'ỹ" he'ia ma Nhanderue oiporavo omo'yvyĩ'i aguã onhemboyvate rei va'e,

²⁹ Nhanderue renonde avave rei onhemboyvate e'ỹ aguã.

Cristo ovare etea re ijayvua

³⁰ Ha'e rã peẽ ma Nhanderue ae penemoĩ Cristo Jesus re. Ha'e va'e ma nhandevy pe ojeapo Nhanderue guigua 'aranduarã, teko porã, nhandeky'a'oarã ha'e nhandejoguarã,

³¹ ipara oĩa rami: "Mba'emo oguerovy'a va'e ma Senhor ae toguerovy'a" he'ia rami jaiko aguã.*

2

Nhe'ẽ guigua po'akaa rupi Paulo ayvu omombe'uague re ijayvuague

¹ Irmão kuery, xee ma peẽ kuerya py Nhanderue ayvu amombe'u vy aju jave ijayvu kuaa va'e rami e'ỹ xeayvu karamboae, hi'arandu va'e rami e'ỹ guive.

² Mba'eta peẽ kuerya py aiko jave xejee amoĩ mba'eve rei aikuaa e'ỹ aguã Jesus Cristo regua e'ỹ vy, ha'e kuruxu re omanoague guive.

³ Xekangy, ajererokyje ha'e aryryipa reve aiko va'ekue peẽ kuery mbyte.

⁴ Xeayvua ma xee ae 'arandua rupi e'ỹ, xeayvu kuaa rupi e'ỹ guive amombe'u. Ha'e rami 'rãgue py Nhe'ẽ guigua po'akaa aexa uka,

⁵ avakue 'arandu re rive'ỹ pejerovia aguã, ha'e rã Nhanderue po'akaa re anho.

'Arandua anhetẽ va'e re Nhe'ẽ Ky'a E'ỹ nhanembo'ea re ijayvua

⁶ Ha'e rã hi'arandu va'e kuerya rupi ma 'arandua re guive oreayvu, va'eri yvy regua 'arandu re'ỹ, neĩ yvy regua ipo'akakueve va'e 'arandu re e'ỹ guive, mba'eta ha'e va'e kuery ma okanhy va'erã meme.

⁷ Nhanderue 'arandu ndoikuaa ukai va'ekue re ae oreayvu. Ymave rupi Nhanderue ndoikuaa ukai teĩ jypy'i guive ogueroko katu nhanemoexakãmba aguã.

⁸ Ha'e va'e 'arandu ma yvy regua ipo'akakueve va'e peteĩve ndoikuai, mba'eta ha'e kuery oikuaa va'e rire kuruxu re ndojukai 'rãgue Senhor hexakãmba va'e.

⁹ Ha'e rami teĩ ipara oĩa rami: "Avakue oexa py ndoexai, oapya py noendui, neĩ opy'a py voi noexa'ãi Nhanderue guembiayvu kuery peguarã ogueroko katu va'ekue re."*

¹⁰ Ha'e rã nhandevy pe ma Nhanderue oikuaa uka Nhe'ẽ rupi. Mba'eta Nhe'ẽ ma opa mba'e oikuaa uka, Nhanderue py'apy re oĩ va'e voi.

¹¹ Mba'eta mava'e nda'u jaikuaa ta jopy'a re oĩ va'e? Inhe'ẽ hexe oĩ va'e anho oikuaa 'rã. Ha'e rami ae avi Nhanderue py'a re oĩ va'e voi avave rei ndoikuai 'rã, Nhanderue Nhe'ẽ anho oikuaa.

¹² Ha'e gui nhandere ma ko yvy regua nhe'ẽ e'ỹ omoĩ va'ekue, ha'e rã Nhanderue Nhe'ẽ, nhandevy Nhanderue ome'ẽ va'e jaikuaa aguã.*

¹³ Ha'e nunga re ae oreayvu, avakue o'arandua rupi orembo'ea rami e'ỹ, ha'e rã Nhe'ẽ orembo'ea rami, Nhe'ẽ guigua ayvu py Nhe'ẽ guigua romombe'u vy.

¹⁴ Ha'e rã avakue Nhe'ẽ revegua e'ỹ ma ojee nomoĩxei Nhanderue Nhe'ẽ guigua. Ha'e kuery pe rã ovare'ỹ va'e merami, noendu kuai 'rãe, mba'eta Nhe'ẽ gui anho 'rã jaikuaa.

¹⁵ Ha'e rã Nhe'ẽ revegua ma opa mba'e re oikuaa pota teĩ ha'e kuery re avave rei ndoikuaa pota kuai 'rã.

¹⁶ Mba'eta ipara oĩa rami "Mava'e tu oikuaa 'rã Senhor 'arandu ombo'e aguã?" Ha'e rã nhandere ma Cristo guigua 'arandu oĩ.*

3

Nhe'ẽ re'ỹ vy ha'e kuery joguero'a reia re ijayvuague

¹ Ha'e gui irmão kuery, xee ma nda'evei karamboae peẽ kuery rombo'e aguã Nhe'ẽ revegua ambo'ea rami. To'o re ikuai va'e ambo'ea rami rive rombo'e va'ekue, mba'eta Cristo pega kyrĩgue rami teri pendekuai ramo.

² Ha'e rami vy kamby py anho romongaru va'ekue, tembi'u ete name'ei, mba'eta napendu kuai teri va'ekue. Neĩ aỹ voi napendu kuai teri, to'o re rive pendekuai vy.

³ Mba'eta penembyte ikuai hakãte'ỹ ha'e joo rami e'ỹ-e'ỹ oikuaa va'e. Ha'e rami vy nda'u to'o re e'ỹ ri pendekuai, yvy regua ikuai rami?*

* 1:27 2 Coríntios 12.7-10

* 1:31 Jeremias 9.24, Gálatas 6.14; 2 Coríntios 5.21

* 2:9 Isaías 64.4

* 2:12 João 14.26; 16.13-15

* 2:16

⁴ Mba'eta peê kuery regua amongue aipopeje 'rã: "Xee ma Paulo pegua", e'y vy "Xee ma Apolo pegua", peje. Ha'e rami vy nda'u vvy regua rami e'y ri pendekuai?

⁵ Mba'e ta marã ramigua tu Apolo oiko? Ha'e marã ramigua tu xee Paulo? Tembiguaí rive orekuai, ha'e ayvu romombe'u rã pejerovia raka'e. Petei-tei roiko Senhor orerembiaporã ome'êague rupi.

⁶ Xee ma anhoty' ha'yígue, ha'e gui Apolo ju omoaký. Ha'e rã imbo'yvatea ma Nhanderuete ae.

⁷ Ha'e rami vvy inhoty'a ma mba'e'y, imoakýa voi mba'e'y avi, ha'e rã Nhanderuete imbo'yvatea va'e anho.

⁸ Ha'e gui ha'yígue nhoty'a ha'e imoakýa roiko va'e ma joo rami romba'eapo, ha'e petei-tei rojopy 'rã romba'eapoague repy.

⁹ Mba'eta ore ma Nhanderuete pe omba'eapo va'e meme, ha'e rã peê kuery ma Nhanderuete mba'ety, ha'e ixupegua oo guive.

Nhomb'o'ea kuery omba'eapoague re oikuaa potaa 'rã re ijayvua

¹⁰ Nhanderuete xemboaxy vvy xerembiaporã ome'êague rami vvy oo apoa hi'arandu va'e rami avi hoo ytarã amoí karamboae. Ha'e gui amboytaague áry ma amboae ju ojapove heravy. Petei-tei toikuaa pota porã ha'e ae omba'eapoa re.

¹¹ Mba'eta oo ytarã amboae ramigua ju nda'vei nhamoí aguã, omoía ae ma va'ekue e'y vvy. Ha'e va'e ma Jesus Cristo.*

¹² Ha'e gui xapy'a rei ha'e va'e áry amongue ojapove 'rã ouro guigua, prata, ita iporãgueve va'e py, ha'e rami e'y vvy vyvra, mba'emo rogue pírukue ha'e mba'emo 'ygue rive py.

¹³ Petei-tei omba'eapoague ojekuaa porãmba 'rã. Hi'ára py 'rã ojekuaa tata rupi, mba'eta petei-tei omba'eapoague tata py ae 'rã oa'angaa.

¹⁴ Ha'e gui oo yta áry amongue ojapoveague ndokai ramo ojopy 'rã hekovia.

¹⁵ Ha'e rã amongue omba'eapoague okai ramo ma omokanhymba 'rã. Ha'e ae oo jepe 'rã tata rupi oaxa va'e rami rive.

¹⁶ Ndapeikuaai ri ty'y Nhanderuete mbojerovia atyrã pendekuaia, ha'e pendere Nhanderuete Nhe'ê oía?

¹⁷ Xapy'a rei Nhanderuete mbojeroviaaty amongue ombovaipa ramo Nhanderuete ju ombovaipa 'rã. Mba'eta Nhanderuete mbojeroviaaty ma iký'a e'y va'e. Ha'e va'e ma pendekuai.

Avakue 'arandu ovara e'ya re ijayvua

¹⁸ Avare rei tapejekore eme: Xapy'a rei peê kuery regua amongue ikuai vvy regua kuery "Hi'arandu va'e" he'ia va'e. Ha'e va'e ma "Hi'arandu e'y va'e" he'ia va'e ju tojeapo, hi'arandu ete aguã.

¹⁹ Mba'eta kova'e vvy regua 'arandu ma Nhanderuete pe rã ovara'y va'e.* Ha'e nunga rupi ipara oiny: "Nhanderuete oitypa 'rã hi'arandu va'e ha'e kuery ae 'arandua py."

²⁰ Oí avi: "Senhor oikuaa hi'arandu va'e kuery py'a re oí va'e ovara'y va'e memea."*

²¹ Ha'e nunga rupi perovy'a rei eme avakue pegua peikoa, mba'eta opa marãgua ikuai va'e pendevelygua meme:

²² Paulo, Apolo, Cefas, kova'e vvy, tekove ha'e manoa, mba'emo a'y oiko va'e ha'e araka'e rã guarã, ha'e nunga ha'e javi ma pendevelygua meme.

²³ Ha'e rã peê ma Cristo pegua, ha'e gui Cristo ma Nhanderuete pegua.

4

Ayvu mombe'ua kuery Nhanderuete rembiguai ikuai re ijayvua

¹ Toikuaa pavê Cristo rembiguai orekuai, Nhanderuete ayvu ndoikuaa ukai va'ekue romombe'u porãve aguã.

² Ha'e rami avi tembiguaí ikuai va'e re herekoa oikuaa pota 'rã ixupe anho pa ikuai re.

³ Ha'e rã peê e'y vvy amboae kuery xere oikuaa pota ramo xee napenai. Neí xee ae voi xejee ndaikuaa potai.

⁴ Petei-tei henda py noí xepy'a ky'aa teí ha'e nunga py ma xee ae nanhemboeko porã. Xere oikuaa pota va'e ma Senhor ae oiko.

⁵ Ha'e nunga rupi peikuaa pota rei eme avave re, Senhor oua ára ovaê e'y mbove. Ha'e gui ma Senhor omoxakãmba 'rã avakue hi'ã py ikuaiague, ha'e oikuaa ukapa 'rã ipy'a re oí va'e ha'e javi. Ha'e ramo Nhanderuete gui ae 'rã petei-tei oendu oguerovy'aa.

Ijayvu eteague

⁶ Irmão kuery, ha'e rami ma xee ae reko re, ha'e Apolo reko re guive xeayvu peê kuery re ama'ê vvy, orereko re vvy pene'arandu aguã. Ha'e rami vvy peikuaave eme ipara oí va'e gui, amongue joegui pejopy porãve vvy penhembovyate rei e'y aguã.

⁷ Mba'eta mava'e re joegui penembovyate? Mba'emo pereko va'e nda'u joegui pejopy va'ekue'y ri? Ha'e joegui pejopy ri mba'e re tu penhembovyate ri, joegui mba'emo ndojopy va'ekue rami?

⁸ Peê kuery a'y voi perekopa merami, nependeporiauvé ma. Peê ranhe oregui peí huvixa rami. Ha'e rami avi huvixa peí ete ma 'rãgue, ore voi peê kuery reve huvixa roí avi aguã.*

⁹ Xee aikuaa rã ore apóstolo kuery ma pavê rakykue py Nhanderuete oremoí, ojuka pyrã rami. Mba'eta ore ma ko vvy regua kuery rembiexarã rami orekuai, anjo kuery ha'e avakue oexaa rupi.

* 3:11 Efésios 2.19-22 * 3:19 1 Coríntios 1.10-25; Jó 5.13 * 3:20 Salmo 94.11 * 4:8 Araka'eve rã Jesus ou jivy vvy guexeve nghanemoí avi 'rã huvixa rami mba'emo re nhapena va'erã (1 Coríntios 6.2-3; 2 Timóteo 2.12; Apocalipse 5.10).

¹⁰ Cristo káuxa orevy pe “Inhakā porā e'ŷ va'e” 'ea, ha'e rā peē ma Cristo re vy pene'arandu. Ore ma orekangy merami, ha'e rā peē ma penembaraete. Peē ma omboetevepy, ha'e rā ore ma ojou vaipy orekuai.

¹¹ Mba'eta aŷ peve karuai ha'e yuvei gui rojexavai, neī oreaorā ndoroguereki guiive. Orenupāmbaa, neī orero roke atyrā ndoroguereki,

¹² ronhea'ā roikovy orepo py ae romba'eapoa py. Orere ijayvu vaia rā rogueroayvu porā'i, oremoingo axya rei rā rogueropo'aka,

¹³ orere ijayvu vaikuea ramo rombovai porā'i. Aŷ peve orevy pe “Yvy regua yty” ha'e “Opa mba'e ky'akue” 'ea.*

Tuu rami Paulo omongetaague

¹⁴ Romoximba aguā e'ŷ ha'e rami ambopara, ha'e rā xera'y kuery rami roayvu vy romongeta porā'i aguā.

¹⁵ Mba'eta Cristo re penderekombo'ea kuery ma mbovy e'ŷ ikuai teī heta e'ŷ guiive penderu ikuai. Ha'e gui xee ma ayvu porā amombe'ua rupi penderu rami aiko karamboae Cristo Jesus re.

¹⁶ Ha'e nunga rupi aipota xee rupi pendekuai.

¹⁷ Ha'e rami aguā ae pendea katy ambou xera'y ayvu va'e Timóteo, Senhor re vy ojeroviapy oiko va'e. Ha'e va'e ma penemoma'endu'a 'rā Cristo Jesus pe aikoa re, opa rupi petēi-teī igreja ikuai rupi anhomo'ea rami vy.

¹⁸ Ha'e rā peē kuery regua amongue ma je onhembovyate rei, pendea py navaēvei aguā re oexa'ā vy.

¹⁹ Ha'e rami avi Senhor oipota rā xee aju voi 'rā peē kuery roexa vy. Ha'e rami vy aikuaa 'rā onhembovyate rei va'e kuery anhetē pa ipo'aka va'ea, tyrā ijayvu anho rei rive va'ea.

²⁰ Mba'eta Nhanderuete po'akaa py ma ayvu anho e'ŷ oī, ha'e rā ipo'akaa.

²¹ Mba'exa tu peipotave? Peē kuerya py yvyra rovi'i reve teve taju, tyrā pa mborayvu ha'e xevai reve'ŷ?

5

Itavy rei va'e re ijayvuague

¹ Opa rupi omombe'ua rā oendua peē kuerya rupi itavy rei va'e oikoa, nngu ra'yxy reve joguereko va'e. Amboae regua kuery ikuai rupi voi ha'e rami ete itavy rei va'e ndoikoī.

² Ha'e rami teī peē kuery ma pendeporiau 'rāgue py pejejou porā rei tema. Penembyte gui ha'e rami ete ojapo vai va'e pemoxē va'e rirē!

³ Xee ma anhetē peēa py nai teī nhe'ē re pendereve aiko vy peē kuerya py oī va'e rami xeayvu ha'e nunga apoare pembopaga aguā.

⁴ Ha'e rami aguā penhemboaty ke Senhor Jesus rery rupi, xenhe'ē ha'e nhande-Senhor Jesus po'akaa reve.

⁵ Ha'e rami vy Satanás po py pemboaxa ho'o ombovaipa aguā, ha'e rā inhe'ē oojepe nho aguā Senhor [Jesus] ára py.*

⁶ Mba'eta pejejou porā reia ma na'iporāi. Ndapeikuaai ri ty'y trigo mbovua ruxā'i oī teī mesa ha'e javi rupi omoeakuāmba 'rāa?

⁷ Ha'e nunga rupi penembyte gui pemombo ke trigo mbovua ymague oī va'e, mbojape iky'a e'ŷ va'e ju pendekuai aguā, mba'eta trigo mbovua revegua e'ŷ anhetē peiko. Mba'eta nhandere vy ojukaa ma ngaru Páscoa pyguarā vexe'i. Ha'e va'e ma Cristo.

⁸ Ha'e nunga rupi ngaru jajapo 'rā trigo mbovua yma guare nhandeboeko vai ha'e nhandeapo vaiarā reve'ŷ, ha'e rā mbojape irū e'ŷ va'e reve. Ha'e va'e ma anhetē ha'e teko porā rupi ete jaikoa.

⁹ Kuaxia mboae ambopara va'ekue py xeayvu karamboae heko vai va'e re penhemoirū ve'ŷ aguā.

¹⁰ Ha'e rami avi ko yvy regua heko vai va'e ha'e javi gui pejepe'a aguā re'ŷ xeayvu, perāta re nda'eveive va'e gui, neī imonda va'e ha'e mba'emo ra'angaa ombojerovia va'e gui. Mba'eta kova'e yvy gui jaa vy mae ma 'rā ha'e kuery gui jajepe'a.

¹¹ Ha'e rami 'rāgue py aŷ ma amongue ojeupe “Irmão” he'i rive va'e re ambopara. Ha'e kuery reve penhemoirū ve'ŷ aguā re xeayvu, neī heko vai va'e, perāta re nda'eveive va'e, mba'emo ra'angaa ombojerovia va'e, ijayvu vaikue rei va'e, oka'u va'ety, ha'e imonda va'e. Ha'e nunga reve nda'evei pekaru aguā voi.

¹² Mba'exa tu jaikuaa pota igreja pygua e'ŷ re? Peikuaa pota 'rāgue igreja pygua kuery re ae.

¹³ Mba'eta igreja pygua e'ŷ re ma Nhanderuete ae 'rā oikuaa pota. Ha'e rā peē ma penembyte gui pemoxē 'rā mba'emo vai apoa oiko va'e.*

6

Irmão kuery jomeme oikuaa pota uka e'ŷ aguā re Paulo ijayvuague

¹ Ha'e gui peē kuery jomeme pendeayvu aguā pereko vy mba'exa tu heko vai va'e kuery renonde py pejogueraa peikuaa pota uka aguā, iky'a e'ŷ va'e kuery renonde 'rāgue py?

² Ndapeikuaai teve raka'eve rā iky'a e'ŷ va'e kuery ko yvy regua re oikuaa pota 'rāa? Ha'e gui ko yvy regua re peikuaa pota aguā rami pendekuai vy aŷ mba'e'ŷ'i re peikuaa pota 'rāgue.

³ Ndapeikuaai ri ty'y anjo kuery re eteve voi jaikuaa pota 'rāa? Ha'e gui aŷgua kuery re katuve ma 'rā jaikuaa pota.

* 4:13 2 Coríntios 4.8-11 * 5:5 2 Coríntios 2.5-11 * 5:13 Deuteronomio 17.7

⁴ Ha'e rã peẽ ma mba'emo ko vvy regua re peikuaa pota uka aguã pereko vy igreja kuery ndojou porã va'e renonde py ri peikuaa pota uka!

⁵ Ha'e rami ma xeayvu pexĩmba aguã. Penembyte ndoikoi ri ty'y peteĩ ri jepe hi'arandu va'e irmão kuery re oikuaa pota kuaa va'erã?

⁶ Ha'e rami 'rãgue py ojerovia e'ỹ va'e kuery renonde ri irmão kuery meme jogueraa 'rã oikuaa pota uka aguã!

⁷ Peẽ kuery regua jomeme peikuaa pota ukaa py pejeity uka ma. Mba'e re tu ha'e rami 'rãgue py ndapejekore ukai ri? Mba'e re tu mba'emo pereko va'e ndapeipe'a ukapai?*

⁸ Ha'e rã peẽ ae pejoapo vai vy nhomba'e rei-rei peipe'a uka. Pende-irmão kuery re ae pejapo ha'e rami.

⁹ Ndapeikuaai ri ty'y heko vai va'e kuery e'ỹ Nhanderueete po'akaa pyguarã ikuai? Pejekore eme, mba'eta heko ky'apa rei va'e ma nda'ikua'i 'rã Nhanderueete po'akaa py, neĩ mba'emo ra'angaa ombojorovia va'e, itavy rei va'e, kunha rami rei oiko va'e, avakue meme joguereko va'e,

¹⁰ imonda va'e, perãta re nda'evei rei va'e, oka'u va'e'ety, ijayvu vaikue va'e, neĩ jokorepa va'e voi Nhanderueete po'akaa py nda'ikua'i 'rã.

¹¹ Ha'e rami ae peẽ kuery regua pendekuai va'ekue ri pejeioi uka, pejeky'a'o uka ha'e penhemboeko porã uka ma Senhor Jesus Cristo rery rupi, ha'e Nhanderueete Nhe'ẽ re vy.

Nhandetavy rei e'ỹ aguã re ijayvua

¹² “Opa mba'e ha'eve jajapo aguã”, 'ea teĩ opa mba'e e'ỹ 'rã nhanemoingo porã. “Opa mba'e ha'eve jajapo aguã”, 'ea teĩ xere ma mba'eve ipo'aka aguã nda'evei.

¹³ “Tembi'u ma nhanderyepy pyguarã oĩ, ha'e nhanderyepy ma tembi'u oĩ aguã”, 'ea teĩ Nhanderueete omomba 'rã mokoive. Ha'e rami avi nhanderete ma itavy rei aguã e'ỹ oĩ, Senhor peguarã anho.* Ha'e Senhor ma nhanderete peguarã ojou uka,

¹⁴ mba'eta Nhanderueete omboete ju rire nhande voi nhanemboete ju avi 'rã opo'akaa py.

¹⁵ Ndapeikuaai ri ty'y penderete Cristo rete regua oikoa? Ha'e gui Cristo rete regua nda'u araa 'rã ri kunha itavy rei va'e re amboja aguã? Any teve.

¹⁶ Ndapeikuaai ri ty'y kunha itavy rei va'e reve ava joguereko vy hexeve peteĩ'i tete opytaa? Mba'eta “Mokoĩ 'rãgue py peteĩ'i to'o ikuai 'rã”, he'iague rami.*

¹⁷ Ha'e rã Senhor re onhemboja va'e ma hexeve peteĩ'i nhe'ẽ oguereko.

¹⁸ Penhemombyry ha'vy tavy reia gui. Jeyavya mboae py ma nhande ae rete rovai e'ỹ jajeyavy. Ha'e rã itavy rei va'e ma guete rovai ae ojejavu.

¹⁹ Ndapeikuaai ri ty'y penderete Nhe'ẽ Ky'a E'ỹ mbojerovia atyrã oĩa? Mba'eta Nhe'ẽ penderete oĩ va'e ma Nhanderueete gui pejopy rire pendejepegua ve'ỹ peiko.

²⁰ Mba'eta hepy re pendejogua. Ha'e rami rire aỹ pemboete 'rã Nhanderueete penderete py.

7

Omenda va'e reko re ijayvua

¹ Ha'e gui xeivy pe pemboparaague re ju ta xeayvu. Ha'eve ava kunha reve joguereko e'ỹ ramo.

² Ha'e rami teĩ tavy rei gui peteĩ-teĩ toguereko gua'yxy ae, ha'e peteĩ-teĩ kunha toguereko ome ae.

³ Ava ma gua'yxy pe tojapo ojapo 'rã va'ekue, ha'e ta'yxy voi ha'e rami ae tojapo ome pe.

⁴ Mba'eta kunha ma guete re ae nda'ipo'akai va'e, ha'e rã ime. Ha'e rami ae ime ma guete re ae nda'ipo'akai avi, ha'e rã ta'yxy.

⁵ Peteĩ-teĩ joupe peikoxe e'ỹ eme, xapy'a'i pejoguereko rive ranhe aguã e'ỹ vy, pejerurea rupi anho pendekuai aguã. Ha'e va'e rire ma pejoguereko ju, pejekoko e'ỹa py Satanás penemoangeko e'ỹ aguã.

⁶ Ha'e rami xeayvu vy “Pejapo rã ha'eve” ha'e, “Pejapo 'rãe” nda'ei.

⁷ Mba'eta aipota teĩ pavẽ xee aikoa rami ikuai. Ha'e rami teĩ peteĩ-teĩ guekorã ojopy Nhanderueete gui. Amongue ma anhetẽ peteĩ rami 'rã ikuai, ha'e rã amboae ma amboae rami ikuai aguã ojopy.*

⁸ Ha'e rã omenda e'ỹ ha'e imeve'ỹ va'e kuery pe ma aipoa'e: Xee aikoa rami ikuai rã ha'eve 'rãgue.

⁹ Ha'e rami teĩ amongue ndojejoko kuaai vy tomenda, mba'eta omendaxea oendu riae 'rãgue py ha'eveve omenda aguã.

Omenda va'e joegui opoi rive e'ỹ aguã re ijayvua

¹⁰ Ha'e gui omenda va'e kuery pe ju xeayvu ta. Xee anho e'ỹ guive xeayvu, Senhor ae ijayvu raka'e ome gui kunhague opoi e'ỹ aguã re.

¹¹ (Ha'e gui opoi ri vy tomendave eme. Ha'e rami e'ỹ vy ome reve ae ju toiko.) Ha'e ime kuery voi topoi eme gua'yxy gui.*

¹² Ha'e rã amboae kuery pe ma xee ae aipoa'e, Senhor e'ỹ: Xapy'a rei amongue irmão gua'yxy ojerovia e'ỹ va'e oguereko rã hexeve oikoxe ramo ma topoi eme gua'yxy gui.

¹³ Ha'e rami ae avi amongue kunha ome ojerovia e'ỹ va'e oguereko rã hexeve oikoxe ramo topoi eme ome gui.

* 6:7 Mateus 5.38-40 * 6:13 Romanos 12.1,2; 1 Tessalonicenses 4.1-8

* 6:16 Gênesis 2.24

* 7:7 Mateus 19.10-12

* 7:11

¹⁴ Mba'eta ime ojerovia e'ÿ va'e teĩ gua'yxy reve vy iky'a e'ÿ va'e rami 'rã oiko, ha'e ta'yxy ojerovia e'ÿ va'e voi iky'a e'ÿ va'e rami 'rã oiko ome ojerovia va'e reve vy. Ha'e rami e'ÿ va'e rire penda'y kuery heko ky'a va'e 'rãgue ikuai, va'eri aÿ ma iky'a e'ÿ va'e ikuai.

¹⁵ Ha'e rã ojerovia e'ÿ va'e ma opoixe ri vy topoi. Ha'e rami rã irmão ojegui opoi uka teĩ ha'eve, ha'e irmã ha'e rami ae avi. Mba'eta Nhanderuete penerenoĩ peteĩ rami pendekuai aguã.

¹⁶ Mba'eta ndee ta'yxy, mba'eta tu reikuaa ndereve vy neme oo jepe 'rãa rami? Ha'e ndee ime, mba'eta tu reikuaa ndereve vy ndera'yxy oo jepe 'rãa?

¹⁷ Peteĩ-teĩ tapeiko penderekorã Senhor oejaague rami, Nhanderuete penerenoĩague rami ae. Ha'e rami ae ajapo uka aikovy igreja ikuai va'e ha'e javi rupi.

¹⁸ Amongue Nhanderuete oenoĩ jave opire omboi uka va'ekue teve oiko? Tombovaipa eme ha'vy opire omboi ukaague. Amongue oenoĩ jave opire omboi uka e'ÿ va'e teve oiko? Tomboi uka eme ha'vy opire.

¹⁹ Mba'eta opire omboi ukaague ma mba'e'ÿ, ha'e opire omboi uka e'ÿa voi mba'e'ÿ avi. Ovare va'e ma Nhanderuete ojapo uka va'e rupi nhandekuaia anho.

²⁰ Ha'e nunga rupi peteĩ-teĩ toiko oenoĩ jave oikoague rupi ae.

²¹ Escravo teve reiko nerenoi jave? Ndepy'a eta rei eme ha'e nunga re. Ha'e rami avi escravo reikoa gui repoi aguã ha'eve ramo epoi ha'vy.

²² Mba'eta escravo Senhor oenoĩ va'ekue ma Senhor pegua escravo-ve'ÿ ikuai. Ha'e escravo e'ÿ oenoĩ va'ekue ma Cristo pegua escravo ikuai.

²³ Hepy re pendejogua rire pendekuaive eme avakue pegua escravo rami.

²⁴ Irmão kuery, peteĩ-teĩ Nhanderuete renonde peiko tema penerenoĩ jave peikoague rupi ae.

Ikuai axya ára pyguraõ omenda ha'e omenda e'ÿ va'e re ijayvua

²⁵ Ha'e gui kunhataĩgue omenda e'ÿ teri va'e peguarã ma xee ndaikuaai Senhor ojapo uka va'ekue. Ha'e nunga rupi xee ae aikuaa va'e amombe'u ta, mba'eta Senhor xemboaxy vy ojeroviapy xemoingo.

²⁶ Xee aikuaa rã aÿ teko axy oiko ramo ha'eve 'rãgue peikoa rami ae tema peiko aguã.

²⁷ Remenda ri vy epoi eme, ha'e rã kunha reve'ÿ reiko vy emenda eme.

²⁸ Remenda ri vy nderejevavi 'rã. Kunhataĩ voi omenda vy ndojejavvi avi 'rã. Ha'e rami teĩ guete reve oikoa ja ikuai axy 'rã, ha'e ramo xee ajapoxe ha'e nunga pendu e'ÿ aguã rami.

²⁹ Ha'e gui irmão kuery, tamombe'u porãve: Ára ovaẽ rai'i ma. Aÿ guive omenda va'e ta'ikuai omenda e'ÿ va'e rami,

³⁰ ojae'o va'e ta'ikuai ojae'o e'ÿ va'e rami, ovy'a va'e ta'ikuai ovy'a e'ÿ va'e rami, mba'emo ojogua va'e ta'ikuai mba'eve oguereko e'ÿ va'e rami,

³¹ ha'e mba'emo ko vvy regua oiporu va'e ta'ikuai oiporu e'ÿ va'e rami, mba'eta kova'e vvy jaexa va'e okanhy ma ovy.

³² Xee opa mba'e py aipota va'e ma pendereko eta reia gui peo jepea. Mba'eta omenda e'ÿ va'e kuery ma Senhor pe oiko aguã re anho 'rã opena, Senhor ombovy'a aguã.

³³ Ha'e rã omenda va'e ma mba'emo ko vvy regua re opena rupi avi 'rã ikuai, gua'yxy ombovy'axe vy.

³⁴ Ha'e rami vy pete'i re'ÿ 'rã opena. Kunhague ma ha'e rami ae avi. Imeve'ÿ va'e ha'e omenda e'ÿ teri va'e ma Senhor pe oiko aguã re anho 'rã opena, guete py ha'e onhe'ẽ re iky'a e'ÿa rupi oiko aguã. Ha'e rã omenda vy ma mba'emo ko vvy regua re voi 'rã opena, ome ombovy'a aguã.

³⁵ Ha'e rami xeayvu peẽ kuery pevy'a aguã, romoingo eta reixe vy e'ÿ. Ha'e rami 'rãgue py aipota ha'evea rami pendekuai, ajapoxe Senhor pe ete iky'a e'ÿ va'e pendekuai aguã.

³⁶ Ha'e gui xapy'a rei peteĩ tuu ojeupe ae “Xee ndareko kuaavei ma xerajy” he'i 'rã. Xapy'a rei tajy iporãa oaxa ta, ha'e omenda aguã ha'eveve ramo kunha va'e oipotaa rami ae tuu toguereko. Omomenda ri vy ndojejavvi 'rã.

³⁷ Ha'e rã tuu mboae ma opy'a py omoi porã 'rã ngoo py ae guajy oguereko tema aguã, xapy'a rei amboae rami imoingoarã jipoi, ha'e ipo'aka ha'e ae oipotaa rami oguereko aguã. Ha'e gui ipy'a re ha'e rami aguã oi atã ramo guajy omomenda e'ÿa py ha'evea rami ojapo.

³⁸ Mba'eta guajy omomenda va'e ma ha'evea rami ojapo, ha'e rã omomenda e'ÿ va'e ma ha'eveve va'e ojapo.

³⁹ Ha'e gui ta'yxy kuery ma ime oikovea ja hexeve anho 'rã ikuai. Ha'e gui ime omano ma ramo ha'eve omendaxea va'e re omenda ju aguã, va'eri Senhor pegua re anho.

⁴⁰ Ha'e rami avi imeve'ÿ va'e ma xee aikuaa rã ha'ekue rami ae oiko vy ovy'ave 'rã. Aikuaa avi xere voi Nhanderuete Nhe'ẽ oĩa.

8

Mba'emo ra'angaa pe tembi'u ome'ẽ mbyre re ijayvua

¹ Aÿ ma xeayvu ta mba'emo ra'angaa pe tembi'u ome'ẽ mbyre re. Nhande kuery ha'e javive ha'e nunga jaikuaa. Ha'e gui mba'emo oikuaa va'e ma ha'e kuery ae onhemboyvate rei 'rã, ha'e rã mborayvu re ikuai va'e ma nhomombaraete 'rã.

² Mba'eta “Mba'emo aikuaapa” he'i va'e ma ndoikuaai teri mba'emo oikuaa ete aguã.

³ Ha'e rã Nhanderuete oayvua rupi ikuai va'e ma Nhanderuete rembikuaa ikuai.

⁴ Ha'e nunga rupi mba'emo ra'angaa pe tembi'u ome'ẽ mbyre ma po rami jaikuaa: Kova'e vvy re mba'emo ra'angaa ikuai va'e ha'e javi ma mba'e'ÿ, mba'eta Nhanderuete ndoikoi, pete'i e'ÿ vy.

⁵ Ha'e ikuai avi “Nhanderuete” he'i va'e yva re e'ÿ vy vvy re mba'emo oi va'e pe. Heta ikuai “Nhanderuete” 'ea, ha'e heta avi “Senhor” 'ea va'e.

⁶ Ha'e rami teĩ nhandevy pe ma peteĩ'i oiko Nhanderuete. Ixugui ma opa mba'e oiko raka'e, ha'e ixupe meme jaiko. Ha'e rami ae avi peteĩ'i oiko Senhor. Ha'e va'e ma Jesus Cristo. Mba'eta ipo gui ma opa mba'e ikuai raka'e, nhande kuery voi ixugui jaiko.

⁷ Ha'e rami teĩ pavê e'ỹ ha'e rami oikuaa. Mba'eta mba'emo ra'angaa mboetea rupi ikuai va'ekue amongue ma aỹ peve ta'angaa pe ome'ẽ mbyre ho'u vy "Xemboeko ky'aaarã ha'u" he'i 'rã, o'arandua py ikangy teri vy.

⁸ Ha'e rami avi tembi'u e'ỹ 'rã nhandemboeko porã Nhanderuete renonde, mba'eta mba'emo ndaja'ui vy mba'eve ndoatai 'rã nhandevy, ha'e mba'emo ja'u teĩ mba'eve ndajarekovei 'rã.

⁹ Ha'e rami teĩ peikuaa pota pova'e re: Mba'emo pe'ua py peity e'ỹ aguã irmão kuery ikangykueve.*

¹⁰ Mba'eta xapy'a rei ndee "Aikuaapa" 're reve reo 'rã mba'emo ra'angaa pegua templo py rekaru aguã. Ha'e gui ha'e py ikangy teri va'e nderexa vy ha'e kuery voi oendu 'rã tembi'u mba'emo ra'angaa pe ome'ẽ mbyre ho'uxe avia.

¹¹ Ha'e rami vy ndee reikuaa va'e káuxa nde-irmão ikangyve va'e okanhy 'rã, hexe Cristo omano rire teĩ.

¹² Ha'e ramia py rejeyavy irmão kuery pe, mba'eta ha'e kuery 'arandua ikangy teri va'e rembovaipa vy Cristo pe voi rejeyavy.

¹³ Ha'e nunga rupi xee ma tembi'u ha'ua py xe-irmão kuery aity 'rãgue py nda'uvei 'rã xo'o, aity rive'ỹ aguã.

9

Apóstolo Paulo gueko re ijavyvague

¹ Ha'e rami avi nda'evei ri ty'y xee aikuaa rami aiko aguã? Xee apóstolo e'ỹ ri ty'y? Ndaexai ri ty'y Jesus nhande-Senhor? Peẽ kuery e'ỹ teve Senhor pe amba'epoague rupi pejerovia va'ekue?

² Xapy'a rei amboae kuery oikuaa rã xee apóstolo e'ỹ, ha'e rã pendevy pe ma anhetê apóstolo aiko, mba'eta Senhor pegua apóstolo aikoa kuaa ukua ma peẽ ae peiko.

³ Xere oikuaa pota rei va'e kuery pe ma po rami ambovai:

⁴ Ore kuery ma nda'evei ri ty'y ronhemongaru uka aguã?

⁵ Nda'evei ri ty'y orerupive irmã orera'yxy rogueraa aguã, amboae apóstolo kuery, Senhor ryvy kuery ha'e Cefas rami avi?

⁶ Tyrã pa xee ha'e Barnabé anho vi nda'evei romba'eapoa rupi e'ỹ roiko aguã?

⁷ Mava'e xondaro tu ha'e ae operãta re oo 'rã joe opu'ã aguã? Mava'e uva nhotyãre tu hi'a ho'u va'erã e'ỹ?

Ha'e mava'e mymba re opena va'e tu guymba kamby gui oy'u va'erã e'ỹ?*

⁸ Ha'e rami xeayvu vy avakue oikuaa rami rive teve xeayvu, tyrã pa lei re oĩ va'e voi aipo nde'i?

⁹ Mba'eta lei Moisés ombopara va'ekue re ma ipara oiny: "Pejokua eme vaka mba'emo ojyky va'e juru rupi", he'ia py vaka re anho teve Nhanderuete ijavyv?*

¹⁰ Nhande kuery re avi e'ỹ ri ty'y ijavyv? Nhandereko re ae ipara oiny anhetê, mba'eta vvy karaia rupi omba'eapo va'e ma mba'emo oarõ reve 'rã ovyvy karaĩ. Ha'e mba'emo ojyky va'e voi ojeuepegua oarõ reve 'rãe omba'eapo.

¹¹ Xapy'a rei peẽ kuerya py Nhe'ẽ guigua ronhoty rire ipoyi vaipa teve mba'emo pereko va'e gui rojopy'i aguã?

¹² Amboae kuery mba'emo pereko va'e ojopy aguã ha'eve ramo oreyv pe katuve ma nda'evei ri ty'y rojopy aguã?

Ha'e rami teĩ ore kuery ma ha'e nunga ndorojopyxei. Ha'e rami 'rãgue py opa marãgua rogueropo'aka neĩ peteĩ henda py rojou vai uka e'ỹ aguã Cristo regua ayvu porã.*

¹³ Tyrã pa ndapeikuaai teve templo re opena va'e kuery voi templo py ogeru pyre gui okaru 'rãa? Altar rupi omba'eapo va'e kuery voi altar áry ome'ẽ mbyre gui ae 'ra ho'u.

¹⁴ Ha'e rami ae avi Senhor ijavyv raka'e ayvu porã mombe'ua kuery onhemongaru uka aguã ayvu porã omombe'ua re.

¹⁵ Ha'e rã xee ma peteĩgueve nanhemongaru ukai joupe, neĩ xemongarua aguã re e'ỹ guive pendevy pe ambopara aỹ. Mba'eta joupe anhemongaru uka aikovy 'rãgue py ha'eveve amano aguã. Avave rei ndoipe'ai 'rã xegui ha'e rami aiko vy avy'aa.

¹⁶ Mba'eta ayvu porã amombe'u teĩ ha'e rami aikoa rive e'ỹ arovy'a, mba'eta amombe'u aguã rami aikoa aendu riaa. Xevy pe ndavy'ai ete 'rãgue ayvu porã amombe'u e'ỹ va'e rire.

¹⁷ Xee ae amombe'uxea rupi rive amombe'u vy ajopy 'rã hekovia. Ha'e rã ayvu mombe'uarã xemoia rire amombe'ua aguã rami ae aiko.

¹⁸ Mba'eta tu ha'vy oĩ 'rã amba'eapoague repyrã? Po ramigua ae oĩ: Ayvu porã amombe'ua rupi nanhemongaru ukai, ha'e rami ajapo va'e rire ha'eve 'rãgue teĩ.

¹⁹ Mba'eta avave pegua escravo e'ỹ aiko teĩ pavê escravo rami ajeapo, heta araa jepe aguã, ha'eveve peve.

²⁰ Ha'e rami vy judeu kuerya rupi judeu rami aiko, judeu kuery regua araa jepe aguã. Lei re oia rami ikuai va'ea rupi xee voi ha'e kuery rami aiko, lei guy py ikuai va'e araa jepe aguã, lei guy py ete'ỹ xee aiko teĩ.

²¹ Ha'e rã lei oikuaa e'ỹ va'ea rupi xee voi ha'e kuery rami aiko, araa jepe aguã lei oikuaa e'ỹ va'e regua. Ha'e rami avi Nhanderuete pe vy lei rupi ndaiko e'ỹi, Cristo guigua lei rupi aiko ae.

* 8:9 1 Coríntios 10.14-22; Romanos 14.13-23 * 9:7 Paulo ma apóstolo oiko vy nhombo'ea rupi oikoa py ha'eve 'rãgue guemimbo'e kuery pe onhemongaru uka va'e rire, teĩ ha'e rami ndoipotai (versículo 18). * 9:9 Deuteronomio 25.4 * 9:12 Atos 20.33-35; 2 Coríntios 11.7-9

²² Ikangykueve ikuai rupi ikangy va'e rami aiko, ikangy va'e regua araa jepe aguã. Peteĩ-teĩ regua ikuai rupi opa marãgua rami aiko, marã rami vy py araã jepe aguã amongue.

²³ Ha'e nunga ha'e javi ajapo ayvu porã oendua aguã, xee voi ixuguigua ajopy avi aguã.

²⁴ Ndapeikuai teve ougaa py onha va'e ha'e javive anhetẽ onha teĩ peteĩ'i anho ojopy 'rãa ome'ẽ mbyrã? Peẽ voi ke penhea'ã ome'ẽ mbyrã pejopy aguã re.

²⁵ Mba'eta ouga va'e kuery ha'e javi ojejoko 'rã opa mba'e py. Ha'e va'e kuery ma akã regua imarã va'e ojopy aguã ojejoko, ha'e rã nhande kuery ma imarã e'ỹ va'e jajopy aguã.

²⁶ Xee voi aiko ha'e rami, aa aguã katy ama'ẽ reve tema anha. Ha'e rami anhea'ã, ngovaigua oinupã ta vy ojavyra rive va'e rami e'ỹ.

²⁷ Areko axy xerete, xeýgua escravo rami areko, amboae kuery pe ayvu amombe'u rire teĩ xee ae ougaa gui omoxẽ mbyre rami apyta e'ỹ aguã.

10

Israel regua ikuaiague re ijayvua

¹ Mba'eta irmão kuery, ndaipotai penderexarai nhaneramoĩ kuery ikuai jave guare re. Mba'eta ha'e kuery ma arai guy rupi uguata vy ye'ẽ mbyte rupi oaxa pavẽ raka'e.*

² Moisés peguarã onhemongaraia rami ha'e javive arai guy rupi uguata, ha'e ye'ẽ rupi oaxapa raka'e.

³ Ha'e javive peteĩ'i regua tembi'u ho'u raka'e, Nhe'ẽ guigua,

⁴ ha'e oy'u avi Nhe'ẽ guigua yvu gui, mba'eta peteĩ ita Nhe'ẽ guigua ha'e kuery uguata rupi ojou kuerei va'e gui oy'u. Ha'e va'e ita ma Cristo.

⁵ Ha'e rami teĩ ha'e kuery regua hetave ma Nhanderuede ndoguerovy'ai vy tekoa e'ỹa pyve oitypa.

⁶ Ma'ẽ, ha'e nunga oiko raka'e nhande voi nhandeangu aguã, ha'e kuery ikuaiague rami ovare'ỹ va'e nhamoaruã avi e'ỹ aguã.*

⁷ Ha'e nunga rupi pembojerovia eme mba'emo ra'angaa ha'e kuery regua ojapoague rami, ipara oĩa rami: "Ha'e kuery uguapy okuapy okaru ha'e oy'u aguã. Ha'e gui ma opu'ã ju ovy'a aguã", he'iaague rami.*

⁸ Ha'e nhandetavy rei eme guive ha'e kuery regua ojapoague rami, ha'e ramo peteĩ ára pyve vinte e três mil oitya.

⁹ Nda'evei Senhor jaeko a'ã aguã ha'e kuery regua ojapoague rami, ha'e gui mboi oixu'u rã omanomba.

¹⁰ Pendeyvy rei eme Senhor re ha'e kuery regua ijayvuague rami, ha'e ramo poromokanhya omomba.

¹¹ Ha'e nunga ma ha'e kuery re oiko raka'e jaikuaa aguã, omboparaa guive nhandeangu aguã, mba'eta nhande ma ára opa pygua nhandekuai.

¹² Ha'e nunga rupi "Xe'ai atã" he'i va'e ma tonheangu ho'a e'ỹ aguã.

¹³ Mba'eta penemoangekoa pendu va'e ma nhande ha'e javi nhaendu va'e ramigua. Ha'e Nhanderuede ojeroviapy vy napenemoangeko ukai 'rã penembaraetea áryve. Ha'e rami 'rãgue py penemoangekoarã ou ramo oikuaa uka kuerei 'rã peo jepe aguã, ha'e va'e rupi vy peropo'aka aguã.

Mba'emo ra'angaa nhambojerovia e'ỹ aguã re ijayvua

¹⁴ Ha'e nunga rupi xerembiaiyvu kuery, penhemomyry ke mba'emo ra'angaa pembojerovia aguã gui.

¹⁵ Pene'arandu va'e pe xeayvu, peẽ ae peikuaa porã pota xeayvua re.

¹⁶ Mba'eta karo nhanemoingo porãarã gui jarovy'a reve jay'u ramo Cristo ruguy rupi e'ỹ ri ty'y hexe nhanemonhembojapa? Ha'e mbojape nhaipe'ã reve ja'u ramo Cristo rete rupi e'ỹ ri ty'y hexe nhanemonhembojapa?

¹⁷ Mba'eta heta nhandekuai teĩ peteĩ'i mbojape, peteĩ tete anho jaiko, mba'eta peteĩ'i mbojape gui ja'u pavẽ.

¹⁸ Peikuaa pota ke Israel kuery ngo'o re ikuai va'e reko re, mba'eta altar áry tembi'u ome'ẽ mbyre gui ha'e javi ho'u.

¹⁹ Ha'e gui mba'e ha'e 'rã tu? Mba'emo ra'angaa pe tembi'u ome'ẽ mbyre, e'ỹ vy mba'emo ra'angaa ae ojapo 'rã teve mba'emo?

²⁰ Any, teĩ aipoa'e: Ta'angaa pe mba'emo ha'e kuery ome'ẽ va'e ma anha pe ae ome'ẽ, Nhanderuede pe'ỹ. Ha'e rami rã xee ndaipotai anha kuery re penhemboja.*

²¹ Nda'evei Senhor karo gui ha'e anha karo gui avi pey'u aguã. Nda'evei Senhor pegua mesa py ha'e gui anha pegua mesa py avi peĩ aguã.

²² Tyrã pa pejapoxe ri Senhor nda'evei etea oendu aguã rami? Peẽ nda'u ixugui pendepo'akave ri?

Cristo re vy jajoitya rupi e'ỹ nhandekuai aguã re ijayvua

²³ "Opa mba'e ha'eve jajapo aguã" 'ea teĩ opa mba'e e'ỹ 'rã nhanemoingo porã. "Opa mba'e ha'eve jajapo aguã" 'ea teĩ opa mba'e e'ỹ 'rã nhanemombaraete.

²⁴ Avave rei ojeupe anho rive tojapo porã eme, ha'e rã amboae kuery pe.*

²⁵ Ha'eve pe'u aguã mba'emo vendea py ovende va'e rei, maguigua paa re peporandu e'ỹ re peikuaa potaxe vy.

²⁶ Mba'eta Senhor pegua ae itui vyv ha'e opa mba'e hexe ikuai va'e.*

* 10:1 Apy ma Egitto vyv gui Moisés Israel kuery ogueraapaague re ijayvua. * 10:6 Hebreus 3.7-4.11 * 10:7 Êxodo 32.6 * 10:20 1 Coríntios 8.1-13 * 10:24 Romanos 14.1-15.7; Filipenses 2.1-4 * 10:26 Salmo 24.1

²⁷ Ha'e rami vy ojerovia e'ý va'e regua ngoo py pekaru aguã penerenoĩ ramo peoxe vy tapeo, ha'e pe'u tema penerononde omoĩ va'e rei, mba'eve re peporandu e'ý re peikuaa potaxe vy.

²⁸ Ha'e rami avi pendevy amongue aipoe'i: "Kova'e tembi'u ma mba'emo ra'angaa pe ome'ẽ mbyre", he'i ramo pe'u eme imombe'uaere opy'a ky'aa oendu e'ý aguã.

²⁹ "Peẽ ae pendepy'a ky'aa gui pe'u eme" nda'ei, "Amboae kuery opy'a ky'aa oendu e'ý aguã" ha'e.

Ha'e rami avi mba'exa tu mba'emo kuery opy'a ky'aa oendu e'ý aguã nda'evei xee aikuaa rami aiko aguã?

³⁰ Nhanderuete arovy'a reve mba'emo ha'u ramo mba'exa tu xere ayvua 'rã mba'emo arovy'a va'e káuxa?

³¹ Ha'e nunga rupi pekaru ha'e pey'u, e'ý vy opa mba'e pejapo va'e rei Nhanderuete omboetea aguã rami pejapo.

³² Peity eme judeu kuery, neĩ amboae regua, ha'e neĩ Nhanderuete pegua igreja kuery,

³³ xee voi opa mba'e py pavẽ pe ajapo porãxea rami avi. Mba'eta xejeupe ae e'ý ajapo porãxe, ha'e rã pavẽ pe, ha'e kuery voi oo jepe aguã.

11

¹ Xee rami avi ke pendekuai, xee voi Cristo rami aikoa rami.

Igreja py kunhague akã ao'ia oiporu aguã re ijayvuague

² Anhetẽ xee roguerovy'a peẽ kuery, mba'eta opa mba'e py xereko re penema'endu'a, ha'e pendekorã amombe'u va'ekue guive pemoĩ porã.

³ Ha'e rami avi aipota peikuaa Cristo avakue ha'e javi akã oikoa, ha'e avakue ma kunhague akã, ha'e gui Cristo akã ma Nhanderuete ae oiko.

⁴ Ha'e nunga rupi avakue onheakã ao'ri reve ri Nhanderuete pe onhembo'e, e'ý vy Nhe'ẽ guigua omombe'u vy oakã mboetea rupi e'ý oiko.

⁵ Ha'e rã kunhague ma onheakã ao'ri e'ý re ri ojerure, e'ý vy Nhe'ẽ guigua omombe'u vy oakã nomboetei, inhakã onhopĩ mbyre revegua rami ikuai.

⁶ Ha'e nunga rupi kunhague akã ao'ia ndoiporui ri vy tojayapa o'a. Ha'e rã o'a ndojayaxei, e'ý vy oakã onhopĩ aguã oxĩ ri vy toiporu akã ao'ia.

⁷ Mba'eta anhetẽ avakue onheakã ao'ri aguã nda'evei, Nhanderuete ojee rami omoingo rire ipo'akaa oexa uka aguã. Ha'e rã kunhague ma ava po'akaa oexa uka aguã ikuai.

⁸ Mba'eta ava va'e ma kunha gui e'ý omoingo raka'e, ha'e rã kunha va'e ma ava gui omoingo.

⁹ Ha'e kunha pytyvõarã e'ý ava oiko raka'e, ha'e rã ava pytyvõarã kunha oiko.

¹⁰ Ha'e nunga rupi kunhague omoĩ 'rã akã ao'ia, anjo kuery pe voi ipo'akaa oexa uka aguã.

¹¹ Ha'e rami teĩ Senhor re vy kunhague ndoikoi 'rã avakue e'ý re, ha'e avakue voi ndoikoi 'rã kunhague e'ý re.

¹² Mba'eta ava va'e gui kunha omoingoa raka'e teĩ kunhague gui avakue itui'i guive, ha'e opa mba'e oiko Nhanderuete gui.

¹³ Peẽ kuery ae peikuaa pota: Ha'evea rami ri nda'u kunhague akã ao'ia omoĩ e'ý re onhembo'e aguã Nhanderuete pe?

¹⁴ Nhanderekorã ojea pyre gui ndapeikuai ri ty'y avakue hi'a vuku aguã nda'eveia?

¹⁵ Ha'e rã kunhague ma hi'a vuku ramo jajou porã, mba'eta hi'a ma inhakã ao'iarã ome'ẽa.

¹⁶ Ha'e amboae rami amongue oikuaa vy toikuaa pota pova'e re: Ore ma amboae rami ndorekuai, neĩ Nhanderuete pegua igreja kuery mboae voi.

Senhor pegua ngaru marã rami pa jajapo aguã re ijayvua

¹⁷ Ha'e gui po ramigua ma roguerovy'aa rupi e'ý amboara, mba'eta pendekuai porãve aguã rami e'ý ri penhemboaty, ha'e rã napendekuai porãive aguã rami.

¹⁸ Mba'eta jypy'igua omombe'ua rã aendu joo rami e'ý-e'ý pendekuaia igreja penhemboaty py. Xee ma amongue henda py arovia guive.

¹⁹ Mba'eta peẽ kuery joo rami e'ý-e'ý 'rãe pendekuai, penembyte py ha'evea rami ikuai va'e ojekuaa porã aguã.

²⁰ Ha'e gui ngaru oiko aguã py penhemboaty vy Senhor pegua ngaru e'ý pe'u.

²¹ Mba'eta pekarua py peteĩ-teĩ ha'e ranhe 'rã ojopy ho'u va'erã. Oĩ 'rã inhemyayi va'e, oĩ avi 'rã oka'u va'e.

²² Pendero ndaperekoi ri ty'y pekaru ha'e pey'u aguã? Tyrã pa Nhanderuete pegua igreja napembovarei mba'eve ogueroko e'ý va'e kuery pemoximaa py? Mba'e ha'e 'rã tu pëvy? "Roguerovy'a" ha'e 'rã teve? Ha'e rami pendekuaia anhetẽ xee ndarovy'ai.

²³ Mba'eta xee Senhor gui aikuaa va'ekue pendevy pe ju amombe'u: Senhor Jesus ojopy uka nhemia pytũ ma ojopy raka'e mbojape,

²⁴ ha'e oguerovy'a rire oipe'ã. Ha'e vy aipoe'i: "Kova'e ma xerete pendere ame'ẽ va'e. Guĩ nunga pejapo 'rã xere penema'endu'a vy", he'i.

²⁵ Ha'ekue rami ae ju okarupa rire ojopy karo. Ha'e vy aipoe'i: "Kova'e karo ma xereve guarã ipyau va'e xeruguy rupi ajapo va'e. Guĩ nunga pey'u nhavõ xere penema'endu'a aguã pejapo", he'i raka'e.

²⁶ Mba'eta ha'e va'e regua mbojape pe'u, ha'e karo gui pey'u nhavõ Senhor ou jevy peve peikuaa uka 'rã omanoague.*

* 11:26 Mateus 26.26-30; Marcos 14.22-26; Lucas 22.14-20

²⁷ Ha'e nunga rupi amongue ha'e've'ÿa rami oiko reve mbojape ho'u, ha'e Senhor karo gui oy'u va'e ma Senhor rete ha'e huguy py onhemboeko ky'a.

²⁸ Ha'e nunga rupi peteĩ-teĩ toikuaa pota gueko re ae. Ha'e rire mae ma to'u mbojape, ha'e toy'u karo gui.

²⁹ Mba'eta amongue Senhor rete mboetea rupi e'ÿ ho'u ha'e oy'u vy ha'e ae onhembopaga uka ho'u ha'e oy'uague re.

³⁰ Ha'e nunga rupi ae peẽ kuery va'e regua heta ikuai ikangy ha'e imba'eaxy va'e, ha'e mbovy e'ÿ ma guive oke.*

³¹ Ha'e rã nhandere ae jaikuaa pota ramo nanhanembopagaai 'rã.

³² Ha'e rami avi Senhor nhanembopaga vy nhanemo'arandu, vyv regua reve japaga ve'ÿ aguã.

³³ Ha'e nunga rupi xe-irmão kuery, pekaru aguã py penhemboaty vy penhoarõ ke jomeme.

³⁴ Xapy'a rei amongue okaruxea rive oendu vy ngoo py ae tokaru, penhemboaty py penhembopaga uka e'ÿ aguã. Ha'e gui amboae nunga re peẽ kuerya py avaẽ ma rire mae ma xeavyu 'rã.

12

Nhe'ẽ ojapo kuaa ukaa re ijayvua

¹ Irmão kuery, xee aipota peikuaa porã Nhe'ẽ guigua ome'ẽmby ikuai va'e.

² Mba'eta ymave rupi ndapejeroviai teri jave opa marã rei pejerereko uka va'ekue mba'emo ra'angaa ijayvu e'ÿ va'e pe rive pendekuai aguã, peikuaa rami.

³ Ha'e nunga rupi po rami xeavyu pendeivy: Nhanderuete Nhe'ẽ gui amongue ijayvu vy "Jesus ayvu vaipy toiko" nde'i 'rã. Ha'e rami ae avi Nhe'ẽ Ky'a E'ÿ gui anho 'rã "Jesus ma Senhor" 'lea.*

⁴ Ha'e gui nhanerembiaporã Nhanderuete ome'ẽ va'e ma joo ramigua e'ÿ-e'ÿ, ha'e rã Inhe'ẽ ma peteĩ'.

⁵ Joo ramigua e'ÿ-e'ÿ 'rã nhanerembiaporã oi, ha'e rã Senhor ma peteĩ'.

⁶ Joo rami e'ÿ-e'ÿ nhamba'eapo, va'eri ha'e nunga ha'e javi ma Nhanderuete ojapo kuaa uka pavẽ pe.

⁷ Mba'eta peteĩ-teĩ pe oikuaa uka 'rã Nhe'ẽ guigua pavẽ pe ojapo porã aguã.

⁸ Mba'eta amongue pe Nhe'ẽ guigua ome'ẽ 'rã o'arandua rupi ijayvu aguã. Amboae pe ma Nhe'ẽ guigua ome'ẽ 'rã ayvu mba'emo kuaa ukaarã.

⁹ Amboae pe ma Nhe'ẽ guigua ome'ẽ 'rã ojerovia ete aguã. Ha'e rã amboae pe ma Nhe'ẽ guigua ome'ẽ 'rã nhomonguera aguã.

¹⁰ Amboae pe ma ome'ẽ 'rã hexa pyrã ojapo aguã. Amboae pe ju ome'ẽ 'rã Nhe'ẽ guigua ayvu omombe'u aguã. Amboae pe ma ome'ẽ 'rã nhe'ẽ ikuai va'e re oikuaa pota aguã. Amongue pe ma ome'ẽ 'rã opa marãgua ayvu py ijayvu aguã. Ha'e rã amboae pe ma ome'ẽ 'rã ha'e rami ijayvua rã mba'e he'i paa omombe'u porãve aguã.

¹¹ Ha'e rami avi peteĩ' ae Nhe'ẽ ojapo kuaa uka 'rã ha'e nunga ha'e javi. Peteĩ-teĩ pe ombojoja 'rã ha'e ae oipotaa rami.

Nhanderete re igreja ombojojaague

¹² Mba'eta nhanderete minha peteĩ' oi va'eri heta oi hexegua, ha'e hexegua ikuai va'e ma heta teĩ ha'e javi vy peteĩ tete ojapo. Ha'e rami ae Cristo pegua nhandekuai.*

¹³ Mba'eta peteĩ' Nhe'ẽ reve nhande kuery ha'e javive nhanemongarai raka'e peteĩ teterã, judeu, grego, escravo, escravo e'ÿ regua voi. Mba'eta nhande kuery ha'e javive pe ome'ẽ peteĩ' Nhe'ẽ gui jay'u aguã.

¹⁴ Mba'eta nhanderete re minha peteĩ' regua e'ÿ oi, heta.

¹⁵ Xapy'a rei nhandepy aipoe'i rã: "Xee ma ipo e'ÿ vy tete regua e'ÿ aiko", he'i teĩ ha'e nunga rupi voi ndoiko e'ÿi 'rã nhanderete regua.

¹⁶ Xapy'a rei nhandeapxya aipoe'i rã: "Xee texa e'ÿ vy tete regua e'ÿ aiko", he'i teĩ ha'e nunga rupi voi ndoiko e'ÿi 'rã tete regua.

¹⁷ Mba'eta nhanderete re texa anho oi va'e rire mba'exa 'rãgue tu jajapyxaka? Apyxa anho oi va'e rire mba'exa 'rãgue tu nhaetũ?

¹⁸ Ha'e rami 'rãgue py nhanderete re ma Nhanderuete ae tete regua ha'e javi omoĩ, ha'e ae omoĩxea rami.

¹⁹ Mba'eta ha'e javive joo ramigua anho oi va'e rire mba'e nunga tete 'rãgue tu oiko?

²⁰ Ha'evea rami tete regua heta oi, peteĩ' tete ojapo aguã.

²¹ Nda'evei nhandepo pe nhanderexa "Ndee noroikotevẽi" he'i aguã. Neĩ nhaneakõ voi nda'evei nhandepy pe "Peẽ noroikotevẽi" he'i aguã.

²² Ha'e rami 'rãgue py nhanderete regua ikangykueve va'e teĩ nhaikotevẽ ete 'rã.

²³ Nhanderete regua ovare e'ÿve va'e teĩ nhamboeteve 'rã. Na'iporãive va'e re nhapena porãve 'rã.

²⁴ Ha'e rã nhanderete regua jaexa ukave va'e ma nhamboete e'ÿ teĩ ha'eve 'rã. Mba'eta Nhanderuete tete regua omoĩ vy ombovare ukave ovare e'ÿve va'e,

²⁵ nhanderete regua joe opu'ã okuapy e'ÿ aguã, tete regua peteĩ rami meme oi aguã jomeme opena porãa rupi.

²⁶ Mba'eta peteĩ tete regua ojexavai ramo ha'e javive 'rã ojexavai hexeve. Peteĩ omboetea rã ha'e javive avi 'rã ovy'a hexeve.

²⁷ Ha'e rami ae peẽ kuery ma Cristo rete pendekuai, peteĩ-teĩ hete regua peĩ.

* 11:30 "Oke" he'ia ma Cristo pegua omano va'ekue re ijayvu vy (15.20). * 12:3 1 João 4.1-3 * 12:4 Romanos 12.6-8; 1 Coríntios 14.29;

²⁸ Ha'e gui igreja mbyte py Nhanderuete omoĩ va'e jypy rã apóstolo-rã, mokoĩa ma profeta-rã, mboapya ma porombo'earã, ha'e va'e rire ma hexa pyrã apoarã, ome'ẽ avi nhomonguera aguã, nhopytyvõ aguã, joe opena aguã, ha'e opa marãgua ayvu py ijayvu aguã.

²⁹ Ha'e javive teve apóstolo ikuai? Tyrã pa ha'e javive 'rã profeta? Ha'e javive teve porombo'ea ikuai, tyrã pa hexa pyrã apoarã?

³⁰ Ha'e javive pe teve ome'ẽ nhomonguera aguã? Ha'e javive teve ijayvu kuaa 'rã amboae ayvu py? Ha'e javive teve omombe'u porãve kuaa 'rã amboae regua ayvu?

³¹ Any teĩ penhea'ã tema ome'ẽmby iporãgueve pejopy aguã.

Mborayvu iporãve va'ea re ijayvua

Ha'e gui peteĩ tape pavẽ gui iporãve va'e ju amombe'u ta pendeivy.

13

¹ Avakue ha'e anjo kuery ayvu py xeayvu kuaa va'e rire xeporayvu e'ỹ ri vy itapu onhendu va'e rami rive 'rãgue aiko, e'ỹ vy hy'a pu rami rive.

² Ha'e rami e'ỹ vy Nhe'ẽ guigua amombe'u kuaa va'e rire, mba'emo ndoikuaa ukai pyre ha'e 'arandua ha'e javi aikuaapa, ha'e yvyty voi arova kuaa aguã rami ajeroviaa oĩ teĩ xeporayvu e'ỹ ri vy mba'everã ndavarei 'rãgue.

³ Iporiaukue'ĩ pe xemba'e rei-rei ame'ẽmba va'e rire, ha'e xerete rapyarã pe amboaxa teĩ xeporayvu e'ỹ ri vy ha'e nungakue gui ndajoui 'rãgue mba'eve.

⁴ Ha'e rami 'rãgue py nhandeporayvua rupi nhandekuai vy ma nanhanhogueroango rei 'rã, jajapo porã 'rã joupe. Nhandeporayvua rupi vy joe nanhanerakãte'ỹi 'rã, nanhanhemboyvatei 'rã, neĩ ndajajejou porã rei 'rã guive.

⁵ Ha'eve'ỹa rami rei ndajaioui 'rã, nhande ae jaiporta va'e anho ndajajapoi 'rã, nanhandevai rei 'rã, nhandevy otekoavya rã nanhanhenhandu vaikue rei 'rã,

⁶ ndajarovy'ai 'rã teko vai, ha'e anhetẽ va'e anho 'rã jarovy'a.

⁷ Opa mba'e py nanhandekuerai 'rã, opa mba'e jarovia 'rã, opa mba'e nharõ kuaa 'rã, opa mba'e jaropo'aka 'rã guive.

⁸ Mborayvu ma opa va'erã e'ỹ. Ha'e rã Nhe'ẽ guigua nhamombe'ua ma opa 'rã, amboae ayvu py nhandeayvua opa 'rã, mba'emo jaikuaa aguã voi opa avi 'rã.

⁹ Mba'eta amongue henda py ete'ĩ jaikuaa mba'emo, ha'e amongue henda py ete'ĩ guive nhamombe'u kuaa 'rã Nhe'ẽ guigua.

¹⁰ Ha'e gui ma opa mba'e py iporã va'e ou jave ma amongue henda py ete'ĩ jajapo kuaa ague omombaa 'rã.

¹¹ Xee minha xekyrĩ jave py kyrĩ va'e rami xeayvu, mba'emo aendu, ha'e xepy'a va'ekue. Ha'e gui xetuja ma vy xekyrĩ jave aikoaue rami ve'ỹ ma aiko.

¹² Mba'eta aỹ ma mba'emo jaexa epéko oje'opa va'e re ojexa vai-vai va'e rami. Ha'e rã ha'e va'e jave py ma hova re nhama'ẽ reve 'rã jaexa. Aỹ ma amongue henda py ete'ĩ aikuaa mba'emo. Ha'e rã ha'e va'e jave py ma aikuaa porãmba 'rã Nhanderuete xekuaa-a rami avi.

¹³ Ha'e gui aỹ mboapy oiko: jajeroviaa, nharõa ha'e mborayvu. Ha'e va'e gui yvateve va'e ma mborayvu.*

14

Amboae ayvu py nhandeayvua gui Nhe'ẽ guigua nhamombe'ua yvatevea re ijayvua

¹ Peiko ke mborayvu re, ha'e penhea'ã Nhe'ẽ guigua ome'ẽmby pejopy avi aguã. Penhea'ãve Nhe'ẽ guigua ayvu pemombe'u aguã.

² Mba'eta amboae ayvu py ijayvu va'e ma amboae kuery oendu aguã e'ỹ ijayvu, Nhanderuete anho, mba'eta avave rei noendu kuaa 'rã, mba'eta jaikuaa e'ỹ va'e re ijayvu onhe'ẽ py ae.*

³ Ha'e rã Nhe'ẽ guigua ayvu mombe'ua ma nhaendu kuaa aguã ijayvu, nhanemombaraete, nhanemongeta ha'e nhanembopy'a porã aguã guive.

⁴ Amboae ayvu py ijayvu va'e ma ha'e ae onhemombaraete. Ha'e rã Nhe'ẽ guigua mombe'ua ma omombaraete 'rã igreja kuery ha'e javi.

⁵ Xee aipota teĩ peẽ kuery ha'e javive pendeayvu amboae ayvu py. Ha'e rami avi aipotave va'e ma Nhe'ẽ guigua ayvu pemombe'u, mba'eta Nhe'ẽ guigua mombe'ua ma amboae ayvu py ijayvu va'e gui yvateve, oayvua ae omombe'u porãve e'ỹ re igreja kuery omombaraeteve aguã.

⁶ Aỹ ma irmãõ kuery, amboae ayvu py xeayvu reve peẽ kuerya py avaẽ va'e rire mba'eta tu roipytyvõ 'rãgue? Peteĩve henda py noroipytyvõ 'rãgue. Ha'e rã Nhanderuete oikuaa uka va'ekue amombe'u ramo ha'eve, e'ỹ vy mba'emo aikuaa va'e, Nhe'ẽ guigua, e'ỹ vy rombo'ea rupi xeayvu ramo ha'eve avi.

⁷ Mba'eta mba'epu omỹĩ e'ỹ va'e voi, mimby, mbaraka mba'e nhaendu porã aguã rami e'ỹ ri ombopua ramo mba'eta tu nhaendu kuaa ta mba'epu ombopua rã?

⁸ Ha'e rami avi mimby guaxu nonhendu porãri ri ramo mava'e tu oiko katu ta joe opu'ã aguã?

⁹ Ha'e rami ae avi peẽ voi amboae ayvu py amboae kuery oikuaa aguã rami e'ỹ ri pendeayvu ramo mba'eta tu oendu kuaa ta aipopejea? Mba'eta yvate rupi rive ijayvu va'e rami 'rãgue pendeayvu.

¹⁰ Anhetẽ opa marãgua ayvu ikuai ko yvy re, ha'e rã ayvu oendu kuaa aguã ramigua e'ỹ ma jipoi.

* 13:13 João 13.31-35; Gálatas 5.13,14; Colossenses 3.12-14

* 14:2 1 Coríntios 12.7-11,27-31

¹¹ Ha'e rami teĩ amongue ijayvu rã mba'e he'ia pa xee aikuaa e'ỹ va'e rire ixupe amboae regua rami xee aiko 'rãgue, ha'e va'e voi amboae regua 'rãgue oiko xe'vy.

¹² Ha'e rami ae avi peẽ voi Nhe'ẽ guigua ome'ẽmby pejopyxe vy penhea'ãve igreja kuery mombaraetearã pejopy aguã.

¹³ Ha'e nunga rupi amboae ayvu py ijayvu va'e tojerure oayvua omombe'u porãve kuaa avi aguã re.

¹⁴ Mba'eta amboae ayvu py ri Nhanderuete pe anhembo'e ramo xenhe'ẽ anhetẽ onhembo'e 'rã, ha'e rã xe'arandua ma oĩ rive 'rã.

¹⁵ Mba'eta tu aiko 'rã ha'vy? Xenhe'ẽ py anhembo'e 'rã, ha'e xe'arandua py guive. Xenhe'ẽ py aporaei 'rã, ha'e xe'arandua py guive.

¹⁶ Mba'eta penenhe'ẽ py anho ri Nhanderuete perovy'a ramo mba'eta tu oikuaa e'ỹ va'e "Amém" he'i ta perovy'apa ma ramo? Mba'eta ndoikuaa 'rã mba'e pejea paa.

¹⁷ Peẽ anhetẽ Nhanderuete perovy'a porã'i, ha'e rã pendeayvua oendu va'e ma napemombaraetei 'rã.

¹⁸ Xee arovy'a Nhanderuete mba'eta peẽ kuery ha'e javive gui xeayvue amboae ayvu py.

¹⁹ Ha'e rami teĩ amboae ayvu py dez mil-kue xeayvu 'rãgue py igreja kuery ikuai py ajou porãve xe'arandua reve peteĩ nhiruĩ ayvu py ete'i xeayvu aguã, anhombo'e porã aguã.

Igreja kuerya py ipoua kuery ikuai jave ome'ẽmby jaiporu kuaa aguã re ijayvua

²⁰ Irmão kuery, kyrígue rami peiko eme pene'arandua py. Teko vai py ma kyrígue rami peiko teĩ ha'eve. Ha'e rã pene'arandua py ma kakuaakue oiko kuaa va'e rami peiko.

²¹ Lei re ipara oiny: "Kova'e kuery pe xeayvu 'rã amboae ayvu py, amboae regua ayvu rupi 'rã xeayvu teĩ naxenhe'ẽ rendui 'rã", he'i Senhor.*

²² Ha'e nunga rupi ayvu mboae py ijayvua ma mba'emo kuaa ukaarã oiko, teĩ ojerovia va'e kuery pe'ỹ, ojerovia e'ỹ va'e kuery pe anho. Ha'e rã Nhe'ẽ guigua ayvu omombe'ua ma ojerovia e'ỹ va'e kuery pegua e'ỹ, ojerovia va'e kuery pegua.

²³ Ha'e gui igreja kuery ha'e javi joa py onhemboaty vy amboae ayvu py ha'e javive ijayvu ramo amongue oikuaa e'ỹ rei va'e, ojerovia e'ỹ va'e oike vy oendu vy "Na'inhakã porãveipa", nde'i 'rã ri ty'ly?

²⁴ Ha'e rã Nhe'ẽ guigua ayvu ri ha'e javive omombe'u rã amongue ojerovia e'ỹ va'e, oikuaa e'ỹ va'e oike vy oendu vy onhemboaxy 'rã, mba'eta ha'e javi ijayvu rã oendu 'rã gueko regua meme, ojeupe guarã ae.

²⁵ Ha'e va'e opy'apy py mba'emo onhomi va'ekue teĩ oikuaapaa 'rã. Ha'e ramo guenapy'ã re oĩ vy ngova vvy re omovaẽ reve omboete 'rã Nhanderuete. Ha'e vy "Nhanderuete anhetẽ ete ri penembyte oĩ", he'i 'rã.

Nhanhemboaty py ha'evea rami meme nhandekuai aguã re ijayvua

²⁶ Ha'e gui irmão kuery, mba'eta tu ha'vy pendekuai 'rã? Mba'eta penhemboaty py amongue ogueru 'rã jogueroporaie aguã, ha'e rã amboae ma nhombo'e aguã 'rã ogueru, amongue ma ogueru 'rã mba'emo oikuaa uka aguã, ha'e rã amboae ma ayvu mboae py ijayvu aguã rami 'rã oiko, ha'e amboae ju omombe'u porãve 'rã ijayvuague. Ha'e nunga ha'e javi ma nhomombaraete aguã rami meme tojeapo.

²⁷ Ha'e gui amboae ayvu py ri amongue ijayvu vy mokoĩ e'ỹ vy mboapy anho ta'ijayvu jorire. Toĩ avi ijayvuague omombe'u porãve va'erã.

²⁸ Ha'e rami avi imombe'u porãvearã noĩ ramo pekyriri 'rã peiny igreja kuerya py. Pendejeupe ae, ha'e Nhanderuete reve anho 'rã pendeayvu.

²⁹ Profeta kuery voi mokoĩ e'ỹ vy mboapy ta'ijayvu, ha'e rã amboae kuery ma toikuaa pota ijayvua re.

³⁰ Ha'e gui xapy'a rei peteĩ uguapy oiny va'e pe Nhe'ẽ mba'emo oikuaa uka ramo jypy'igua tokyriri ranhe.

³¹ Ha'e rami vy Nhe'ẽ guigua ayvu jorire peteĩ-teĩ omombe'u teĩ ha'eve 'rã, pavẽ oikuaa vy ipy'a guaxuve aguã.

³² Mba'eta profeta kuery ikuai va'e ma ojoko kuaa 'rã onhe'ẽ ae.

³³ Mba'eta Nhanderuete ma nanhanemboeko eta rei, peteĩ rami 'rã nhanemoingo.

Ha'e javi igreja ikuai va'e rupi iky'a e'ỹ va'e kuery ikuai py

³⁴ kunhague okyriri 'rã okuapy pavẽ onhemboaty py, nda'evei ijayvu aguã. Ha'e rami 'rãgue py ome kuery po'akaa re ta'ikuai, lei re oĩa rami vy.

³⁵ Xapy'a rei kunhague mba'emo oikuaa porãvexe vy ome pe toporandu ngoo py ae. Mba'eta pavẽ onhemboaty py ri kunhague ijayvu vy oximba rei aguã rami ikuai.

³⁶ Tyrã pa peẽ kuerya gui ranhe ri ty'ly Nhanderuete ayvu ou raka'e? Ha'e rami e'ỹ vy pende'vy pe anho ri ty'ly oikuaa uka raka'e?

³⁷ Amongue ojeupe ae "Profeta" e'ỹ vy "Nhe'ẽ revegua" he'i va'e toikuaa pota pova'e re: Pende'vy pe xee amboparaa ma Senhor ae ojapo uka va'e meme.

³⁸ Pova'e nunga re amongue ndojapxakaxei ramo ijayvua re ju tojapxakaa eme.

³⁹ Ha'e gui xe-irmão kuery, penhea'ãve tema Nhe'ẽ guigua ayvu pemombe'u kuaa aguã. Pejoko eme guive amboae ayvu py amongue ijayvu rã.

⁴⁰ Ha'e nunga ha'e javi ma ha'evea rami meme tojeapo jorire-rire.

15

Cristo onhemboete ju rire nhanhemboete ju avi aguã re ijayvua

¹ Irmão kuery, aỹ romoma'endu'a ta ayvu porã amombe'u aikovy va'e re. Ha'e va'e ma perovia rire hexe peĩ atã teri.

* 14:21 Isaias 28.11-12

² Ha'e va'e rupi peo jepe guive, xapy'a rei pendeivy ayvu amombe'u va'ekue pendejee pemoĩ riae vy. Ha'e rami e'ỹ ri vy peroviaague mba'everã ndovarei 'rã.

³ Mba'eta xeivy pe ranhe ayvu oikuaa uka pyre pendeivy ju amombe'u va'ekue: Jajevyague re Cristo omano raka'e ipara oĩa rami vy.

⁴ Ha'e gui onhono porãa, ha'e mboapy araa py onhemboete ju, ipara oĩa rami vy ae ju.*

⁵ Ha'e gui jypy'i ojexa uka Cefas pe, ha'e va'e rire ma doze-ve pe.

⁶ Ha'e va'e rire ma peteigue pyve ojexa uka quinhentos raxa irmão kuery pe. Ha'e va'e kuery regua heta okuave aỹ peve, ha'e rã amongue ma oke ma.

⁷ Ha'e va'e rire ma Tiago pe ju ojexa uka, ha'e gui apóstolo kuery ha'e javive pe.

⁸ Ha'e gui opaa py xeivy pe avi ojexa uka, are rire itui'i va'ekue pe rami.

⁹ Mba'eta xee ma apóstolo kuery mboae gui xe'vyvive va'e aiko, ha'e Nhanderueete pegua igreja kuery re apu'ã rei rire nda'evei va'ekue apóstolo-rã xerenõia aguã.

¹⁰ Ha'e rami teĩ Nhanderueete xemboaxy ramo apóstolo xee aiko. Xemboaxya ndoaxa rivei guive, mba'eta apóstolo kuery ha'e javive gui amba'eapove va'e. Xee ae e'ỹ guive, Nhanderueete xemboaxya xere oĩ va'e ojapo.

¹¹ Ha'e rami teĩ xee, e'ỹ vy ha'e kuery teĩ ha'e rami ae romombe'u va'e, ha'e gui ha'e rami ae ju perovia raka'e.

¹² Ha'e gui Cristo omanoague gui onhemboete jevyague romombe'u ramo mba'eta tu peẽ kuery regua amongue ijayvu ri omano va'ekue nonhemboete jevyi 'rãa rami?

¹³ Mba'eta anhetẽ ri omanoague gui nonhemboete jevyai va'e rire Cristo voi nonhemboete jevyi 'rãgue raka'e.

¹⁴ Ha'e Cristo nonhemboete jevyi va'e rire mba'everã ndovarei 'rãgue ayvu romombe'ua ha'e pejeroviaa.

¹⁵ Ha'e Nhanderueete ayvu romombe'u merami rive 'rãgue, Nhanderueete rovai oreapu va'e rami roiko 'rãgue, mba'eta Cristo omboete jevyague romombe'u. Mba'eta Cristo nomboete jevyi va'e rire omano va'ekue nonhemboete jevyi ae 'rãgue.

¹⁶ Mba'eta omano va'ekue nonhemboete jevyi ri ramo Cristo voi nonhemboete jevyi 'rãgue raka'e.

¹⁷ Ha'e Cristo nonhemboete jevyi va'e rire pejeroviaa mba'everã ndovarei 'rãgue, ha'e pejevayva rupi teri peiko 'rãgue.

¹⁸ Ha'e rami anho e'ỹ, Cristo pegua oke va'ekue voi okanhymba ae 'rãgue.

¹⁹ Xapy'a rei aỹ jaikovea peve'i Cristo guigua nharõa ovare va'e rire pavẽ gui ovy'a e'ỹve va'e jaiko 'rãgue.

Oke va'e kuery gui Cristo ranhe oikove jevyague re ijayvua

²⁰ Ha'e rami avi anhetẽ ete omano va'ekue mbyte gui Cristo onhemboete ju raka'e, oke va'e kuery gui ha'e ranhe oikove ju aguã.

²¹ Mba'eta peteĩ'i ava gui nhamano aguã ouague rami peteĩ'ava gui avi ou nhamanoague gui nhamhemboete ju aguã.

²² Mba'eta Adão re vy nhamano aguã rami japyta pavẽ. Ha'ekue rami avi Cristo re vy pavẽ jaikove ju 'rã.

²³ Ha'e rami avi peteĩ-teĩ hi'ãra py porã 'rã oikove ju. Cristo ma jypygua ete raka'e. Ha'e va'e rire Cristo ou jave ma ixupegua kuery ju 'rã okuave.

²⁴ Ha'e va'e rire mae ovaẽ 'rã opaa ára. Ha'e jave py yvatekueve ha'e ipo'akakueve ha'e javi Cristo omokanhymba ma rire Nguuete pe ju 'rã omboaxa opo'akaa.

²⁵ Mba'eta ipo'aka 'rã ngovaigua kuery ha'e javive opy guýry omo'vyvymba peve.

²⁶ Hovaigua opa vygua omomba va'erã ma manoa,

²⁷ "Opa mba'e omoĩ 'rã ipy guýry", he'iague rami. Ha'e rami avi "Opa mba'e ipo'aka guy py omoĩ", he'ia py ma ipo'aka guy py opa mba'e moĩare re ae e'ỹ guive ijayvu.*

²⁸ Ha'e gui ipo'aka guy py Tuu opa mba'e omoĩ ma rire mae ma Ta'y voi ha'e ae onhemoĩ 'rã opa mba'e moĩare po'aka guy py, Nhanderueete opa mba'e re ipo'aka aguã.

Nhanhemboete ju va'erã vy marã rami pa jaiko aguã re ijayvua

²⁹ Ha'e rami e'ỹ ramo mba'eta 'rã tu ikuai omano va'ekue re vy onhemongarai va'e? Anhetẽ ri omano va'ekue nonhemboete jevyi va'e rire mba'e re tu ha'e kuery onhemongarai 'rã omano va'ekue re?

³⁰ Ha'e mba'e re tu ore voi ndorojeayvuveikue py orekuai ára nhavõ?

³¹ Mba'eta ko'ẽ nhavõ xee ajeyuka uka. Irmão kuery, ha'e rami xeayvu mba'eta Cristo Jesus nhande-Senhor re vy peẽ kuery roguerovy'a vy.

³² Xapy'a rei avakue oikuaa rami rive ri Éfesote tetã py mymba inharõ va'e reve anhea'ã va'e rire mba'e 'rãgue tu ajopy ha'e nunga rekovia? Mba'eta omano va'ekue nonhemboete jevyvei ri ramo "Jakaru ha'e jay'u tema, mba'eta ko'ẽ rã nhamanomba 'rã", ja'e 'rãgue.*

³³ Pejekore eme, mba'eta heko vai va'e re penhemoirũ ramo ombovaipa 'rã pendereko porãa.

³⁴ Pendekuai porã pota nho ke, pejevayv ve'ỹ aguã. Mba'eta peẽ kuery regua amongue ikuai Nhanderueete ndoikuai teri va'e. Ha'e rami xeayvu pexĩmba aguã.

Onhemboete jevy vy guete oguereko va'erã re ijayvua

³⁵ Ha'e gui amongue aipopeje 'rã: "Marã rami 'rã tu ha'vy omano va'ekue onhemboete ju? Marã ramigua tete 'rã tu ha'e kuery ogueroko?" peje 'rã.

³⁶ Pene'arandu e'y va'e, mba'emo ra'yígue omoa'i mbyre rami 'rã ikuai, mba'eta ha'yígue ma omano e'y re naenhoi 'rã.

³⁷ Mba'emo ra'yí nhamoa'i va'e minha heterã reve'y 'rã nhamoa'i, ha'yígue anho, trigo e'y vy amboae ra'yí rei.

³⁸ Nhanderueete ae heterã ome'ë 'rã ome'ëxa rami, peteĩ-teĩ ha'yígue pe heterã ae ome'ë.

³⁹ Ha'e javi ho'o va'e voi joo ramigua e'y-e'y: Peteĩ ma avakue ro'o, amboae ma mymba ro'o, amboae ma guyra, ha'e amboae ma pira ro'o.

⁴⁰ Ikuai avi yva regua ha'e yvy regua. Anhetë yva regua jaexa rã yvy regua reve joo rami e'y-e'y iporã va'e.

⁴¹ Kuaray rexakã ma ha'e rami 'rã iporã, jaxy rexakã ma amboae rami 'rã, ha'e jaxy-tata rendy ma amboae rami ju 'rã iporã. Jaxy-tata ikuai va'e voi joo rami e'y-e'y 'rã hendy.

⁴² Ha'e rami ae avi 'rã omano va'ekue onhemboete ju jave. Nhanderetekue ivaipa aguã rami onhono porãa va'ekue ri onhemboete ju 'rã ivaipa ve'y aguã rami. Nda'evei va'ekue onhono porãa va'ekue ri onhemboete ju 'rã imarã ve'y aguã.*

⁴³ Ikangy va'e onhono porãa va'ekue ri onhemboete ju 'rã ipo'aka reve.

⁴⁴ Nhande regua tete onhono porãa va'ekue ri onhemboete jevy vy Nhe'ë guigua ju 'rã oiko. Mba'eta oiko nhande regua tete, ha'e Nhe'ë guigua tete avi oiko.

⁴⁵ Mba'eta ipara oiny: "Ava jypyguia Adão ma omoingo raka'e oikove va'erã, ha'e rã opa vyguia Adão ma nhe'ë nhomoingovearã oiko."*

⁴⁶ Ha'e rami avi nhande regua ranhe oiko raka'e, Nhe'ë guigua e'y. Ha'e rire mae ma Nhe'ë guigua oiko.

⁴⁷ Jypyguia ava yvy gui ojapo rire yvy regua ae oiko. Ha'e rã mokoia ava ma yva guigua.*

⁴⁸ Jypyguia ava yvy regua oiko rire avakue mboae yvy regua meme ikuai. Ha'e gui yva guigua ava oikoague rami avi yva guigua 'rã ikuai.

⁴⁹ Yvy regua rami jaiko rire yva guigua rami ju 'rã jaiko.

Okuave va'e voi ombopyaupaa aguã re ijayvua

⁵⁰ Irmão kuery, po rami amombe'u porã: Ho'o ha'e huguy va'e ma nda'evei Nhanderueete po'akaa pyguarã, mba'eta imarã va'e nda'evei imarã e'yã py ikuai aguã.

⁵¹ Ma'ë, pendeivy amombe'u ta ndoikuua ukai pyre: Pavë e'y 'rã jake, teĩ pavë 'rã nhanembopyaua,

⁵² nhaxapyymi xapy'a'ia rami 'rã, opa vyguia mimby guaxu onhendu jave. Mba'eta mimby guaxu onhendu rã omano va'ekue onhemboete jevypa 'rã imarã ve'y aguã, ha'e nhande nhanembopyaupaa 'rã.*

⁵³ Mba'eta nhanderete imarã va'e onhemonde 'rã imarã e'y aguã py. Nhanderete omano va'erã va'e onhemonde 'rã omano ve'y aguã py.

⁵⁴ Ha'e gui nhanderete imarã va'e imarã e'y aguã py ju onhemonde jave, omano va'erã va'e omano ve'y aguã py onhemonde ma jave py mae ma ojeupity 'rã ayvu ipara oinya: "Ipo'akapave va'e ombovaipa ma manoa."*

⁵⁵ Ha'e nunga rupi manoa, mamu tu opyta ndepo'akaague? Mamu tu opyta orepiarã reiporu va'ekue?*

⁵⁶ Mba'eta manoa popia ma jejavya, ha'e jejavya po'akaa ma lei re oĩ.

⁵⁷ Ha'e rami teĩ jarovy'a Nhanderueete, mba'eta nhande-Senhor Jesus Cristo re vy nhanembopo'aka.

⁵⁸ Ha'e nunga rupi xerembiayvu irmão kuery, peĩ atã tema, pejeity uka eme, Senhor pe pemba'eapoa rupi penekyre'y riae guive, mba'eta jaikuaa Senhor re vy nhamba'eapoa ndoaxa rivei 'rãa.

16

Judéia pygua kuery iporiaukue'i peguarã mba'emo omono'õ aguã re ijayvuague

¹ Ha'e gui iky'a e'y va'e kuery pe peme'ë va'erã pemono'õ aguã re xeayvu po rami: Peë voi ke pejapo Galácia pygua igreja kuery pe ajapo ukague rami avi.

² Ha'e rami vy semana ijypya ára nhavõ peteĩ-teĩ pendero rupi pemoi porã 'rã pejoura rami. Pemono'õ-no'õve tema, xee avaë rã pemono'õ ve'y teĩ ha'eve aguã.

³ Ha'e gui avaë ma rire peë peiporavo va'e rei amondouka 'rã Jerusalém katy kuaxia para reve. Ha'e rami rã ha'e kuery ogueraa 'rã peme'ë va'ekue.

⁴ Xee voi aa avi aguã ha'eve ramo ha'e kuery oo 'rã xerupive.*

Paulo oguataxeta re ijayvuague

⁵ Macedônia yvy rupi aaxa rire peë kuerya py ju 'rã avaë, mba'eta ha'e rupi aaxa aguã rami ranhe aiko.*

⁶ Xapy'a rei peë kuery reve aiko are vy aaxa 'rã yro'y jave, ha'e peë kuery xepytyvõ 'rã aaxa katy aguatave aguã.

⁷ Mba'eta aaxa avy vy rive roexa aguã nda'evei, Senhor oipota rã peë kuery reve aiko arexe.

⁸ Ha'e rami avi Pentecostes ára peve apyta 'rã Éfeso tetã py,

⁹ mba'eta ha'e py peteĩ okë tuvixa va'e ojepe'a xeivy amba'eapo aguã, xejokoxe va'e heta ikuai teĩ.

* 15:42 Filipenses 3.20,21; 1 João 3.2 * 15:45 Génesis 2.7 * 15:47 "Opa vyguia Adão" ha'e "Mokoia ava" he'ia ma Cristo re ae ijayvu vy.

* 15:52 1 Tessalonicenses 4.13-18 * 15:54 Isaiás 25.8 * 15:55 Oséias 13.14 * 16:4 Atos 11.27-30; Romanos 15.25-27; 2 Coríntios

Timóteo ha'e Apolo rekorã re ijayvuague

¹⁰ Peê kuerya py Timóteo ovaẽ ramo ke pepena porã okyje reia oendu e'ỹ aguã rami, mba'eta xee rami avi Senhor pe omba'eapo va'e.

¹¹ Ha'e nunga rupi pemboete e'ỹ eme. Ha'e rami 'rãgue py pemondouka porã'i ju xea katy, mba'eta irmão kuery reve roarõ 'rã rokuapy.

¹² Ha'e gui irmão Apolo pe ma mbovykue rei e'ỹ ajerure pendea katy irmão kuery reve oo aguã, teĩ aỹ peve noendui ooxea. Ha'e rami avi ha'eve jave ma ou 'rã.

Opaa py omongetaague

¹³ Peiko kuaa pota ke, peĩ atã pejeroviaa re, pendepy'a guaxu avakue rami, penembaraete tema guive.*

¹⁴ Mba'emo pejapo va'e mborayvu rupi meme pejapo.

Estéfnas, Fortunato ha'e Acaico reko re ijayvua

¹⁵ Ha'e gui aỹ irmão kuery, po rami ajerure pendevy. (Mba'eta peikuaa ae ma Estéfnas ro pygua kuery jypygua Acaia py ojeroviaague, ha'e iky'a e'ỹ va'e kuery pytyvõarã ojeko me'ëague.)

¹⁶ Ha'e gui aipotã peẽ voi ha'e kuery regua oipotã rami pendekuai, ha'e hexeve omba'eapo va'e ha'e javi oipotã rami guive.

¹⁷ Ha'e gui xea py Estéfnas, Fortunato ha'e Acaico ovaẽ ramo avy'a karamboae, mba'eta xevy pe ha'e kuery ojapopa peẽ ndapejapopa reguai va'ekue.

¹⁸ Ha'e rami vy xembopy'a guaxu, penembopy'a guaxua rami avi. Ha'e nunga rupi pemboete ha'e kuery ramigua.

Oxarura ha'e ogueroayvu porãague

¹⁹ Ásia pygua igreja kuery oxarura ukapa pendevy. Senhor re ikuai va'e pendevy oxarura uka ete okuapy, Áqüila, Priscila ha'e hoo py igreja onhemoaty va'e voi.

²⁰ Irmão kuery ha'e javive oxarura uka pendevy. Pexarura joupe-upe iky'a e'ỹ va'e joayvua rami.

²¹ Xee Paulo xepo py ae ambopara axarura avia.

²² Ha'e rã Senhor oayvua rupi e'ỹ ikuai va'e ma ayvu vaipy topyta. Ore-Senhor, eju voi ke.

²³ Tove peẽ kuery tapendu Senhor Jesus penemboaxya.

²⁴ Cristo Jesus re vy xee roayvua toiko avi peẽ kuery ha'e javi reve.

* 16:13 Efésios 6.10-12; 1 Pedro 5.8-9

Mokoïguea Corinto pygua kuery pe Paulo ombopara va'ekue

Mokoïguea Corinto pygua kuery pe Paulo ombopara va'ekue

Kova'e kuaxia ma Corinto tetã pygua kuery pe apóstolo Paulo ombopara hexe opu'ã rei va'e ikuai omombe'ua rã oendu vy. Ha'e va'e kuery ma ojeupe "Apóstolo" he'i teĩ ha'eve'ỹa rami nhombo'e, apóstolo Paulo re ijayvu rei, ha'e opa marã rei ikuai aguã rami ojapo guive. Ha'e nunga apóstolo Paulo oendu vy gueko omombe'u porãve ha'e kuery oikuaa porãmba aguã rami. "Mba'eta ore ma Nhanderueete ayvu romombe'ua rupi ndorojokorei. Ha'e rami 'rãgue py Cristo re vy Nhanderueete guigua anhetêa rupi oreayvu roikovy, Nhanderueete renonde rupi ae" (2.17). Amongue henda py Paulo ndovy'ai vy ijayvu poyi ha'e kuery pe.

Paulo gueko re ijayvu vy ima'endu'a haxy va'e oendu oikovy va'e re. "Ha'e nunga rupi mboapykue Senhor pe ajerure xegui oipe'a aguã re. Ha'e rami teĩ ha'e aipoe'i xevy: 'Xee romboaxya ha'eve ma ndevy, mba'eta ikangy va'e re xepo'akaa ojekuaa porãve 'rã', he'i va'ekue. Ha'e nunga rupi avy'a reve 'rã xeayvu xekangy re, xere Cristo po'akaa o'aguã", he'i (12.8-9). Ha'e nunga ma ha'eve nhande kuery pavê pe.

Opaa py Paulo ijayvu ha'e kuery mba'emo ome'ẽ aguã Jerusalém tetã py Jesus remimbo'e kuery ikuai va'e pe, karuai oiko va'e gui ojexavai okuapy rã.

Oxarura reve ijayvu vy omboypyague

¹ Xee Paulo ma Cristo Jesus pegua apóstolo-rã Nhanderueete oipotaa rami xemoi va'ekue. Irmão Timóteo reve roxarura Nhanderueete pegua igreja kuery Corinto py pendekuai va'e pe, ha'e iky'a e'ỹ va'e kuery Acaia vvy re pendekuai va'e ha'e javi pe guive.

² Tove peẽ kuery tapendu penemboaxya ha'e mby'a porã Nhanderueete ha'e Senhor Jesus Cristo guigua.

Nhanderueete ombopy'a guaxua re Paulo oguerovy'aague

³ Ta'ima'endu'a porã Nhanderueete nhande-Senhor Jesus Cristo Ru va'e re. Mba'eta Nhanderu ma nhandemboaxy ha'e opa mba'e py nhandemboapy'a guaxu va'e.

⁴ Ha'e rami vy ore voi opa mba'e py rojexavai rã oremboapy'a guaxu 'rã, ore ju romboapy'a guaxu aguã opa mba'e gui ojexavai va'e, Nhanderueete oremboapy'a guaxua py ae.

⁵ Mba'eta Cristo káuxa opa mba'e py rojexavaia rami avi Cristo oremboapy'a guaxua voi roendu avi opa mba'e py.

⁶ Ha'e nunga rupi rojexavaia oiko va'e ma peẽ kuery pendepy'a guaxu ha'e peo jepe aguã oiko. Oremboapy'a guaxua voi pendepy'a guaxu aguã oi, mba'eta peẽ voi pendekuerei e'ỹ re peropo'aka pekuapy ore roiko axya ramigua.

⁷ Peẽ kuery re rojerovia, mba'eta roikuaa ore rami pendekuai axya rami orereve avi 'rã penemboapy'a guaxua.

⁸ Mba'eta irmão kuery, aipota peikuaa Ásia vvy re roiko jave rojexavaiaague. Mba'eta ha'e nunga ndorogueropo'aka kuaavei peve ipoyi ramo noroexa'ãvei ma va'ekue roikove aguã re.*

⁹ Ha'e rami vy orepy'a re romano taa roendu karamboae orejee ae rojerovia e'ỹ aguã, ha'e rã Nhanderueete omano va'ekue omboete jevy va'e re anho.

¹⁰ Mba'eta ha'e ae orereraa jepe karamboae ha'e rami ete romano aguã va'ekue gui. Hexe vy roarõ orereraa jepe riaeve aguã,

¹¹ peẽ kuery voi orepytyvõ ramo pejerurea py. Ha'e rami rã heta 'rã Nhanderueete oguerovy'a orere, heta ojerurea rupi orereraa jepe rire.

Paulo anhetêa rupi oikoa re ijayvuague

¹² Mba'eta pova'e nunga re ae roguerovy'a: Peteive henda py orepy'a ky'aa noroendui, mba'eta Nhanderueete guigua iky'a e'ỹa ha'e anhetêa rupi orekuai kova'e vvy re, peẽ kuerya py guive. Avakue 'arandua rupi e'ỹ roiko, ha'e rã Nhanderueete oremboaxya rupi.

¹³ Mba'eta pendevy romboaraague re ma peroayvu vy pendu kuaa va'erã anho oi. Ha'e ajerovia pendu kuaa porãmba aguã,

¹⁴ amongue henda py orepy'a re oi va'e peikuaa maa rami, nhande-Senhor Jesus oua ára py peẽ kuery orererovy'a aguã, ore roguerovy'aa rami avi.

Paulo mba'e re pa Corinto py ndooi teria omombe'u porãveague

¹⁵ Ha'e rami peẽ kuery orekuua aguã re ajerovia vy anhemboapy'a teĩ peẽ kuerya py ranhe avaẽ vy jajoexa aguã, peteigue ju pejopy aguã penemoingo porãrã,

¹⁶ ha'e gui peẽ kuery xepytyvõ ramo aave aguã Macedônia vvy katy, ha'e Macedônia gui ajevvy vy peẽ kuerya py ju avaẽ aguã, Judéia vvy katy ju aa rã xepytyvõ aguã.

¹⁷ Ha'e rami aguã re xeayvu vy nda'u rombotavypa reia rupi ri aiko raka'e? To'o revegua rami ri ty'y xeayvu? Xee teve "Ha'eve" ha'e vyve "Nda'evei" ha'e avi va'e?

¹⁸ Ha'e rami 'rãgue py Nhanderueete ojeroviapy oikoa rami avi ore voi peẽ kuery pe "Ha'eve" ha'e "Nda'evei" ndoro'ei va'e,

¹⁹ Nhanderueete Ra'y Cristo Jesus peẽ kuery mbyte rupi ore kuery — xee, Silvano ha'e Timóteo — romombe'ua va'ekue rami avi, mba'eta Jesus ma "Ha'eve" ha'e "Nda'evei" he'i avi va'e'ỹ. Hexe ma ha'eve va'e anho oi.

* 1:8 Atos 19.23-40

²⁰ Mba'eta Cristo re vy Nhanderuete ijayvuague ojeupity aguã ha'eve va'e meme. Ha'e rami ae hexe vy Nhanderuete nhamboete vy "Amém" ja'e avi 'rã.

²¹ Mba'eta Nhanderuete ae peẽ kuery reve nhanemoĩ atã Cristo re, ha'e ojeupe guarã nhanemoĩ.

²² Nhandere ha'e nunga kuaa ukaarã omoĩ vy Onhe'ẽ ae omoĩ nhanekuraxõ re.

²³ Ha'e gui xerekove rupi ae aipoa'e, Nhanderuete voi oikuaa xeayvu anhetêa: Peẽ kuery romomboríau e'ỹ aguã rima ndajuvei teri apy Corinto py.

²⁴ "Pejeroviaa re orepo'aka va'e" nda'ei. Ha'e rami avi peẽ kuery pevy'ave aguã re ronhea'ã. Mba'eta pejeroviaa rupi ae 'rã penembaraeteve.

2

¹ Ha'e rami vy xejeupe ae xeayvu karamboae peẽ kuery romomboríaua rupi aju ve'ỹ aguã re.

² Mba'eta xee romomboríau va'e rire mava'e 'rãgue tu oiko xembovy'a ju aguã, peẽ romomboríau va'ekue e'ỹ vy?

³ Ha'e nunga rupi ae ambopara va'ekue, peẽ kuerya py avaẽ vy peẽ xembovy'aarã pendekuai va'e re xeporíau e'ỹ aguã. Mba'eta peẽ kuery ha'e javi re ajerovia mba'emo xembovy'a va'e peẽ voi penembovy'a avi aguã.

⁴ Mba'eta xepy'a py aiko axya ha'e ajexavaia aendu reve ae ambopara va'ekue pêvy, xerexay ete reve guive. Pendeporíau rei aguã e'ỹ guive ambopara, ha'e rã roayvu etea peikuaa aguã.

Ojejavy va'ekue ojeke roerova rã igreja kuery omovaẽ ju aguã re ijayvua

⁵ Ha'e gui penembyte py nhomomboríaua oiko va'ekue ma xee anho e'ỹ xemomboríau, peẽ kuery ha'e javi penemomboríau amongue henda py. Ha'e rami xeayvu ajou vai etea rupi e'ỹ.*

⁶ Ha'eve ma aỹ peẽ kuery regua hetave va'e pembopagaague.

⁷ Ha'e gui aỹ ma ha'eve peperdoa ha'e pembopy'a guaxu ju aguã, mboríau gui okanhy ete e'ỹ aguã.

⁸ Ha'e rami vy pêvy ajerure ixupe pexa uka ju aguã peayvua.

⁹ Ha'e nunga rupi ae ambopara va'ekue pêvy, peẽ kuery anhetê opa mba'e py pa xenhe'ẽ rendu va'ea aexaxe vy.

¹⁰ Mba'eta mba'emokue re pejoperdoa ri ramo xee voi aperdoa. Anhetê peẽ kuery re ama'ẽ vy aperdoa ae ma Cristo renonde,

¹¹ nhandere Satanás ipo'aka e'ỹ aguã, mba'eta jaikuaa porã ae nhanembotavyxea.

Tito ndojoui vy Paulo ndovy'aia re ijayvuague

¹² Ha'e gui Trôade tetã py Cristo regua ayvu porã amombe'u aguã avaẽ jave py peteĩ okê ojepe'a xevy Senhor pe amba'eapo aguã.

¹³ Ha'e rami teĩ xe-irmão Tito ndajoui vy xepy'a py ma avy'aa naendui. Ha'e nunga rupi ha'e kuerya gui ajepe'a vy Macedônia katy ju aa.

Apóstolo kuery omba'eapoa rupi Cristo po'akaa ojekuaa 'rãa re ijayvua

¹⁴ Ha'e rami avi arovy'a Nhanderuete, mba'eta Cristo re vy opo'akaa rupi riaa orereraa, ha'e ore kuery orekuia re opa rupi oikuaa uka Cristo regua heakuã porã va'e ramigua.

¹⁵ Mba'eta ore kuery ma Cristo guigua heakuã va'e rami orekuai Nhanderuete pegua, oo jepe va'e ha'e okanhy va'e kuerya rupi.

¹⁶ Okanhy oje'oivy va'e pe ma manoa reakuã rami orekuai, mba'eta ha'e kuery oikuaa omano aguã regua romombe'ua. Ha'e rã oo jepe va'e kuery pe ma tekove reakuã rami orekuai, mba'eta oikuaa tekove regua romombe'ua. Ha'e ramo mava'e tu ha'eve 'rã ha'e rami aguã?

¹⁷ Mba'eta ore ma Nhanderuete ayvu romombe'ua rupi ndorojokorei, amboae kuery rami e'ỹ. Ha'e rami 'rãgue py Cristo re vy Nhanderuete guigua anhetêa rupi oreayvu roikovy, Nhanderuete renonde rupi ae.

3

Guexeve guarã ojapo pyau pyre inhymague gui iporãvea re ijayvua

¹ Po rami vy ri ndã'u oreayvu rojejou porã uka reivea rupi? Amboae kuery rami avi ore voi ri ty'y roipotã kuaxia oremombe'uarã pendevy pe rogueraa aguã, ha'e'ỹ vy pende guigua kuaxia romba'eapoa kuaa ukaarã amboae rupi rogueraa aguã?

² Any, mba'eta kuaxia para rami oremombe'uarã ma peẽ kuery ae pendekuai. Ha'e nunga ma orepy'a re ipara oiny ramo ogueroayvu pavê, oikuaapa 'rã.

³ Mba'eta peẽ ae pexa uka Cristo guigua kuaxia para pendekuaia, ore kuery romba'eapoa kuaa ukaarã. Ha'e rami avi tinta py e'ỹ ipara, ha'e rã Nhanderuete oikove va'e Nhe'ẽ py. Itape re'ỹ guive ipara, avakue ro'o re, orekuraxõ re ae.*

⁴ Cristo re vy ha'e rami ae rojerovia Nhanderuete re.

⁵ Orejegui ae e'ỹ guive mba'emo rojapo kuaa, oreGui e'ỹ mba'emo oiko. Mba'eta rojapo kuaa aguã ma Nhanderuete gui ae ou.

⁶ Ha'e ae oremo'arandu guexeve guarã ipyau va'e ojapo va'ekue roikuaa uka aguã. Ha'e va'e ma ipara regua e'ỹ, ha'e rã Nhe'ẽ guigua. Mba'eta ipara regua nhandejuka 'rã. Ha'e rã Nhe'ẽ ma nhanemoingove 'rã.

* 2:5 Ha'e kuery va'e regua otekoavy va'ekue re ijayvu, xapy'a rei itavy rei va'e 1 Coríntios 5 py omombe'ua va'ekue re. Apy ma Paulo ijayvu operdoa ju aguã re (Lucas 17.3,4; Gálatas 6.1,2). * 3:3 "Itape re ipara va'e" he'ia ma lei Moisés ombopara va'ekue re ijayvu vy, teko yma guare kuaa ukaarã.

7 Ipara nhandejukaarã ma itape re omboparaa vy omoexakã reve oejaa raka'e. Ha'e nunga gui Moisés rova hexakã raxy ramo hova katy Israel kuery noma'ê kuaai raka'e, ogue ovy tei.

8 Ha'e va'ekue gui nda'u Nhe'ê guigua naexakã ratãive 'rã?

9 Mba'eta nhandembopagaarã omoexakã reve oejaa rire teko porã me'êa katuve ma hexakã ratãive 'rã.

10 Ha'e nunga rupi aỹ hexakã ratãive va'e ou ma rire ymagua omoexakã mbyre rexakãa ndojekuaavei ma.

11 Mba'eta ogue ovy va'e omoexakã reve oeja pyre gui ogue va'erã e'ỹ katuve ma hexakã ratãive.

“Senhor Nhe'ê oia py jaiko porã 'rã”, he'ia

12 Ha'e nunga roarõ roikovy vy orepy'a guaxua rupi ete oreayvu.

13 Ore ma Moisés ngova omo'ãague rami e'ỹ orekuai. Mba'eta ha'e va'e ma ngova omo'ã raka'e Israel kuery oexa e'ỹ aguã ogue ovy va'e opa rã.*

14 Ha'e rami tei ha'e kuery 'arandua omopytũmbaa. Mba'eta aỹ peve yma guare guexeve guarã ojapo pyre ogueroayvu rã hova mo'ãa oime teri. Imo'ãa ma ndoipe'aa teri, mba'eta Cristo re vy mae ma oipe'aa 'rã.

15 Aỹ peve Moisés ombopara va'ekue ogueroayvu rã imo'ãa oime teri ha'e kuery py'a re.*

16 Ha'e rã amongue Senhor pe ojeko me'ê ramo oipe'aa 'rã imo'ãa.

17 Ha'e gui “Senhor” he'ia ma Nhe'ê, ha'e mamã rã Senhor Nhe'ê oia py jaiko porã 'rã opa mba'e gui.

18 Mba'eta nhande kuery ha'e javive nhanderova mo'ãa oipe'aa rire Senhor rexakã re nhamã'ê porã jaikovy epéko re rami. Ha'e ramo nhandembopyau 'rã nhanderexakãve javy aguã rami, Senhor rami ete nhandekuai aguã. Ha'e rami aguã ma Senhor, Nhe'ê gui ae ou.

4

Paulo ojapo 'rã va'ekue ojapo porãa re ijavyvague

1 Ha'e nunga rupi Nhanderuete oremboaxy vy ha'e ramigua orerembiaporã ome'ê rire norekangyi,

2 neĩ nhemi rupi ndorekuai mba'emo nharoxĩ va'erãa rupi. Ronhombotavya rupi e'ỹ orekuai, neĩ Nhanderuete ayvu ramigua rive noromombe'ui. Ha'e rami 'rãgue py Nhanderuete renonde orekuai anhetê va'e roikuaa ukaa rupi, ha'evea rami orekuai oikuaa pavê aguã.

3 Ha'e gui xapy'a rei ayvu porã romombe'u va'e ndojekuaai teri vy ma okanhy aguã rami ikuai va'e pe anho ndoikuaa ukaai.

4 Mba'eta ha'e kuery ndojeroviai ramo kova'e vvy regua ruete omopytũmba hi'arandua, ha'e kuery pe Cristo rexakãa regua ayvu porã ojekuaa e'ỹ aguã. Ha'e va'e ma Nhanderuete rami ete heko va'e.

5 Mba'eta ore ma ore ae e'ỹ rojekuaa uka, ha'e rã Cristo Jesus Senhor oikoa. Ha'e rã ore ma Jesus re vy peê kuery rembiguai rami roiko.

6 Mba'eta Nhanderuete “Pytũa gui taexakã hendy va'e”, he'i va'ekue ae oremoexakã avi orepy'a rupi, Cristo rova re hexakã ojekuaa va'e roexa uka aguã.*

Nhanderuete gui imbarateea re Paulo ijavyvague

7 Ha'e nunga ma iporã ete va'eri hyru yapo gui ojapo pyre ramigua py rive roguereko, pavê oikuaa aguã ipo'aka etea Nhanderuete gui ae oua, oregui e'ỹ.*

8 Mba'eta ore ma opa mba'e py oremoingo axya teĩ ndorejokoa etei. Ndooroikuaai rei teĩ ndorekueraí.

9 Orere opu'ãa rei teĩ oeja pyre'ỹ orekuai. Orenupãa teĩ noremombai.

10 Orerete re Cristo ojukaa ague ramigua roendu riae, orerete re hekove voi ojekuaa avi aguã.

11 Mba'eta Jesus kãuxa nhande jaikove va'e jajejuka uka riae, Jesus rekove ojekuaa avi aguã nhanderete imarã va'e re.

12 Ha'e rami vy orere oĩ orejukaa aguã, peê kuery re ma tekove oĩ aguã.

13 Ha'e rami teĩ rojeroviaa oĩ avi, ipara oĩa rami: “Xee arovia, ha'e rami vy xeayvu.”* Ore voi roguerovia vy oreayvu,

14 mba'eta roikuaa Senhor Jesus mboete jevyare ma Jesus re vy ore voi oremboete ju avi 'rã, ha'e peê kuery reve nhandererupa 'rã guive.

15 Mba'eta orere oiko va'e he'e javi ma peê kuery penemoingo porãarã oiko. Ha'e rami vy Nhanderuete penemboaxy heta-etave oikuaa vy oguerovy'a ha'e omboete 'rã okuapy.

Mba'erã pa jaiko axya re ijavyvua

16 Ha'e nunga rupi nanhandekueraí 'rã. Ha'e rami 'rãgue py nhanderete ivaipave ovy teĩ nhandepy'a rupi nhandembopyaua 'rã ko'ê nhavõ.

17 Mba'eta xapy'a'i jajexavaia ipoyi e'ỹ va'e ojapo 'rã mba'emo porã opa e'ỹ va'e, opa mba'e gui ovareve va'e jajopy aguã rami.*

18 Ha'e nunga rupi mba'emo jaexa va'e re'ỹ jaikuaa pota, ha'e rã mba'emo jaexa e'ỹ va'e re. Mba'eta jaexa va'e ma opa 'rã, ha'e rã jaexa e'ỹ va'e ma opa va'erã e'ỹ.

5

Nhanderete jaeja vy Senhor oia py jaiko 'rãa re ijavyvua

* 3:13 Êxodo 34.33,35 * 3:15 Romanos 11.7-10 * 4:6 Gênesis 1.3 * 4:7 1 Coríntios 2.4,5; 2 Coríntios 12.9 * 4:13 Salmo 116.10

* 4:17 Romanos 8.18-25; 1 Pedro 1.3-5

¹ Mba'eta jaikuaa nhandero yvy regua ivaipa ramo yva re jajopy 'rã nhanderorã Nhanderuete guigua, avakue opo py ojapo va'ekue e'ÿ, opa va'erã e'ÿ.*

² Ha'e gui kova'e oo py nhaï teria ja nhanepoaë jaikovy, nhanderorã yva regua nharõ vy ha'e va'e py ju nhaï aguã.

³ Mba'eta ha'e va'e py ma nhaï vy hete e'ÿ va'e rami ve'ÿ 'rã jaiko.

⁴ Mba'eta anhetë kova'e oo py nhaï teri vy nhanepoaë jaikovy jajexavai vy. Ha'e rami avi hete e'ÿ va'e ndajakoxei guive, ha'e rã hete pyau va'e, imarã va'e 'rãgue py tekove jareko vy.

⁵ Ha'e rami aguã rami Nhanderuete ae nhanemoingo, ha'e nhandevy Onhe'ë guive ome'ë ikuaa ukaarã.

⁶ Ha'e nunga rupi nhandepy'a guaxu ria. Nhanderete re jaikoa ja jaikuaa Senhor oïa py ndajaikoï teria, 7 mba'eta jajeroviaa re jaiko, mba'emo jaexa va'e re'ÿ.

⁸ Ha'e gui nhandepy'a guaxu vy nhanderete jaejaxe, Senhor oïa py ju jaiko aguã.

⁹ Ha'e nunga rupi Senhor oïa py, e'ÿ vy apy jaiko teï nhandea'ã jaikovy nhambovy'a aguã.

¹⁰ Mba'eta Cristo oikuaa potaaty renonde jajexa uka pavë 'rã, peteï-teï jajopy aguã nhanderete re teri jaikoa ja ha'evea rami, e'ÿ vy ha'eve'ÿa rami jaikoaque rekovia.

Gueko re apóstolo Paulo ijayvuague

¹¹ Senhor renonde rojererokyjea ore roendu vy amboae kuery pe voi oreayvu ojeko rerova aguã. Nhanderuete orekuaa porã, ha'e ajerovia peë voi pene'arandua py orekuaa porã avi aguã.

¹² Ha'e rami peteïgue ju oreayvua rojejou porã ukaa rupi e'ÿ. Ha'e rami 'rãgue py pendeivy roikuaa uka orekuaia, amongue orere ijayvu rã peë kuery orejou porãa rupi pembovai aguã. Ha'e kuery ma oexa va'e rive oguerovy'ave, opy'a re oï va'e'ÿ.

¹³ Ha'e rami na'inhakã porãvei va'e rami oreayvua ma Nhanderuete peguarã anho. Ha'e rã 'arandua rupi oreayvua ma pendeivy guarã.

¹⁴ Mba'eta Cristo orerayvu rire ixupe anho roiko. Mba'eta pavë re peteï omano rire jaikuaa ha'e javive omanoague.

¹⁵ Anhetë ete Cristo omano raka'e pavë re, jaikove va'e nhandejeupe ae jaiko ve'ÿ aguã, ha'e rã nhandere omano ha'e onhemboete ju va'ekue pe anho.

¹⁶ Ha'e ramo aÿ gui ma ndajaikuaa potavei avave rei ngo'o re oikoa re. Yma rupi Cristo ngo'o re oikoa re jaikuaa pota va'ekue ri aÿ ma ha'ekue rami ve'ÿ ma jaikuaa.

¹⁷ Mba'eta Cristo re ikuai va'e ma hemimoingo pyau ma. Heko ymague oxaxapa ma, ipyau va'e ju oï.*

Nhanderuete reve peteï rami ju nhandekuai aguã re ijayvua

¹⁸ Ma'ë, ha'e nunga ha'e javi Nhanderuete guigua meme. Mba'eta Cristo re vy ngupive nhanemoingo peteï rami, ha'e nhanemoï guive hexeve peteï rami ju nhandekuai aguã regua mombë'uarã,

¹⁹ po rami: Cristo re vy Nhanderuete ma ko yvy regua kuery reko vaiague re oikuaa pota 'rãgue py ojapo raka'e hexeve peteï rami ikuai aguã. Ha'e nhandevy omombe'u uka guive hexeve peteï rami nhandekuai aguã regua ayvu.

²⁰ Ha'e rã ore kuery ma Cristo rery rupi oreayvu va'e, ore oreayvua rupi Nhanderuete voi ijayvu avi. Ha'e rami vy Cristo rery rupi rojerure: Nhanderuete reve peteï rami penhemoingo uka.*

²¹ Mba'eta Cristo ojejavy e'ÿ va'eri nhandere vy hexe omoïa raka'e jajejavya, hexe vy nhandere Nhanderuete omoï aguã ojeguigua teko porã.

6

¹ Ha'e rami rire ore hexeve romba'eapo va'e ma peë kuery pe oreayvu avi Nhanderuete penemboaxya pepopy rive'ÿ aguã re.

² (Mba'eta aipoe'i: "Ha'evea ára aendu pendeayvua, ha'e rami vy rogueraa jepe aguã ára roepy", he'i va'ekue.* Ma'ë, aÿ ma ha'evea ára, aÿ ae peo jepe aguã ára.)

³ Ore ma mba'eve py rojoitya rupi e'ÿ orekuai, romba'eapoa ndojou vaiia aguã.

Paulo onhemoingo axy ukaa re ijayvuague

⁴ Ha'e rami 'rãgue py opa mba'e py roexa uka Nhanderuete rembiguai roikoa: orekuerai e'ÿa py, orekuai axya py, rojexavaia py, rojerereko axy ukaa py,

⁵ ronhenupã ukaa py, nhuã py roïa py, orere opu'ãmbaa reia py, romba'eapoa py, roke e'ÿa py, rokaru e'ÿ re roikoa py,

⁶ orereko ky'a e'ÿa py, mba'emo roikuaa-a py, orevai rive-rive'ÿa py, ha'eve vai'i orekuia py, Nhe'ë Ky'a E'ÿ po'akaa py, oreporayvu merami rive e'ÿa py,

⁷ anhetë ete rupi oreayvua py, Nhanderuete po'akaa rupi orekuia py, orepo jovaive py heko porã va'e rembiporu roiporua py;

⁸ oremboetea rupi, ha'e oremboete e'ÿa rupi orererereko rã; orere ijayvu rei, ha'e ijayvua porã rã; mba'eta nhombotavypa va'e rami orererereko, anhetë va'e roiko teï;

⁹ oexapy e'ÿ rami orererereko, oexa riaepy roiko teï; omano ta va'e rami orekuaa teï oikove va'e roiko; ombopagapy rami orererereko teï ndorejukaai;

* 5:1 "Nhandero yvy regua" he'ia ma nhanderete re ijayvu vy (4.16; 2 Pedro 1.13,14).

* 5:17 Romanos 6.4-6; Efésios 4.22-24; Colossenses

¹⁰ orepy'a vai va'eri rovy'a riae; oreporiaukue'i va'eri heta rojapo iporiau e'ÿ aguã rami; mba'eve ndoroguerkoi merami te'i opa mba'e roguereko.

Paulo oayvua rami ha'e kuery voi oayvu aguã re ijayvuague

¹¹ Peẽ Corinto pygua kuery pe ronhemombe'u porã, noronhomi orepy'a re oĩ va'e.

¹² Peẽ kuery pe ore noronhemoakãte'ÿi, peẽ kuery ae rima penhemoakãte'ÿ orevy.

¹³ Ore rami avi ke pendekuai. (Xera'y kuery pe rami xeyvuu pende'ÿy.) Peẽ voi ke pendepy'a peipe'a avi orevy.

Ojerovia e'ÿ va'e kuery ikuai rami nhandekuai e'ÿ aguã re ijayvua

¹⁴ Canga py peĩ eme amboae kuery ojerovia e'ÿ va'e reve. Mba'eta mba'eta tu heko porã va'e nhomoirũ ta heko vai va'e reve? Mba'eta tu hendy va'e nhomoirũ ta pytũ reve?

¹⁵ Mba'eta tu Cristo oguereko ta Poromboeko vaia reve? Mba'e tu ojerovia va'e oguereko ta ojerovia e'ÿ va'e reve?*

¹⁶ Mba'e 'rã tu Nhanderuet pegua templo oguereko mba'emo ra'angaa reve? Mba'eta nhande ae Nhanderuet oikove va'e pegua templo jaiko, aipoe'iague rami: "Aĩ 'rã, aiko 'rã ha'e kuery mbyte. Aiko 'rã ha'e kuery Ruete, ha'e 'rã ha'e kuery ma xevyguã 'rã ikuai."*

¹⁷ "Ha'e nunga rupi pejepe'a ha'e kuery mbyte gui, penhemoirũve eme", he'i Senhor. "Pepokove eme icky'a va'e re. Ha'e ramo xee romovã 'rã,

¹⁸ aiko 'rã Penderu, ha'e 'rã peẽ ma xera'y ha'e xerajy kuery 'rã pendekuai", he'i Senhor Ipo'akapa va'e.*

7

¹ Ha'e nunga rupi xerembaiyvu kuery, ha'e rami nhandereroayvu porã rire jajeky'a'o ukapa 'rã nhandeboeko ky'arã, nhandero'o ha'e nhandenhe'ẽ mongy'arã va'ekue ha'e javi gui. Iky'a e'ÿ ete va'e nhandekuai, Nhanderuet renonde jajererokyjea rupi.

Corinto pygua kuery oayvua rupi Paulo ijayvuague

² Oremovã ke penekuraxõ py. Avave rei ndoroguerkoi ha'eve e'ÿa rami, noronhomboeko vai ha'e ndorokorei guive.

³ Ha'e rami avi rojov vaia rupi e'ÿ xeyvuu, mba'eta aipoa'e ae ma peẽ kuery orekuraxõ re roguerekoa, joupive nhamano e'ÿ vy jaikove aguã.

⁴ Opa mba'e py anhemombe'u porã pëvy, opa mba'e py roguerovy'a guive. Ha'e nunga rupi aendu xepy'a guaxuvea ha'e avy'a etea, opa mba'e py rojexavai teĩ.

Tito ovaẽague re ijayvuague

⁵ Mba'eta Macedônia yvy re rovaẽ vy peteĩve henda py noroendui karamboae mby'a porã. Ha'e rami 'rãgue py opa mba'e py rojexavai. Amboae kuery opu'ã okuapy orere, ha'e orepy'a py roendu rokyjea.

⁶ Ha'e rami teĩ Tito ovaẽ ramo Nhanderuete ikuerai va'e mbopy'a guaxua va'e vy orembopy'a guaxu ju.

⁷ Ha'e va'e ovaẽ ramo anho e'ÿ, peẽ kuery pembopy'a guaxuague omombe'u rã roendu vy voi orepy'a guaxu. Mba'eta orepye pe omombe'u peẽ kuery xerexaxea, penhemboaxya ha'e xenhe'ẽ rendu pekuapya. Ha'e rami vy xembovy'ave.

⁸ Mba'eta peẽ kuery pe kuaxia ambopara va'ekue pexa vy pendeporiau rei teĩ xee ma nda'evei nho ndaikoi, ymave nda'evei nho aiko va'ekue teĩ (mba'eta aikuaa ha'e va'e kuaxia para xapy'a'i penemboribiau).

⁹ Ha'e gui aÿ ma avy'a ju, pendeporiaupa reiaque re rive'ÿ, ha'e rã pejeko roerova aguã rami pendeporiauague re, mba'eta Nhanderuet gui ae pendu pendeporiau, ha'e rã oregui ma peteĩve henda py pendeporiau e'ÿ aguã.

¹⁰ Mba'eta Nhanderuet gui ma nhandeporiau vy jajeko roerova 'rã jaa jepe aguã. Ha'e rami aguã gui ju avave rei ndojeko roerovavei 'rã. Ha'e rã yvy guigua mboriaua reia ma nhamano aguã rami 'rã ojapo.

¹¹ Mba'eta Nhanderuet guigua mboriaua ma opa mba'e py penemoingo porã: penhemboeko porã uka, teko vai pejov vai ete, pejererokyje, xerexaxe ete ju, xenhe'ẽ rendu, ha'e penhombopagaxe guive. Opa mba'e py pexa uka pejejavya rupi ve'ÿ pendekuia ha'e nungakue py.

¹² Ha'e nunga rupi pëvy ambopara va'ekue teĩ otekoavy va'ekue re vy e'ÿ ambopara, neĩ omomboribiau va'ekue re vy e'ÿ guive, ha'e rã Nhanderuet renonde peẽ kuery pexa uka ju aguã orenhe'ẽ rendua.

¹³ Ha'e nunga rupi ae roendu ju karamboae orepy'a guaxua. Ha'e orepy'a guaxua gui rovy'ave ete, mba'eta roendu avi Tito pembopy'a porã ramo ovy'aa.

¹⁴ Mba'eta ixupe xeyvuu va'ekue peẽ kuery roguerovy'aa rami, ha'e gui nda'evei nho ndaikoi. Mba'eta opa mba'e py pendereve oreayvua anhetẽ memea rami avi Tito oendua py roguerovy'aague voi anhetẽ ojeupitypa.

¹⁵ Tito voi penderayvua oenduve mba'eta penhe'ẽ renduague ha'e javi re ima'endu'a vy, ha'e gui pejeayvuu ha'e peryryipa reve pemovaẽague re guive.

¹⁶ Xee avy'a mba'eta opa mba'e py peẽ kuery re ajeroviaa ojeupitypa.

8

Judéia py iporiaukue'i ikuai va'e pe Macedônia py igreja ikuai va'e peráta ome'ẽague re ijayvuague

* 6:15 1 Coríntios 10.20-22; 15.33; Tiago 4.4,5

* 6:16 Levítico 26.11-12, Ezequiel 37.27, Jeremias 32.38

* 6:18 Ezequiel 20.41, Isaías

¹ Ha'e rami avi irmão kuery, peẽ kuery pe romombe'u va'ekue Macedônia yvy re igreja kuery ikuai va'e Nhanderuete omboaxy vy marã rami pa omoingoague,

² mba'eta ha'e kuery ma opa marã omoingo axya teĩ oexa uka tema ovy'a etea, mba'eta iporiaupa va'eri heta ojou irmão kuery pe ome'ẽ va'erã.*

³ Mba'eta xee aipoa'e: Ha'e kuery oexa uka mba'emo oguereko va'ekue áryve ome'ẽxea.

⁴ Ha'e rami vy orevy pe ju ojerure jepi iky'a e'ỹ va'e kuery oipytyvõ agua re, amboa kuery rami avi.

⁵ Ha'e gui ore roexa'áague rami anho e'ỹ ikuai, mba'eta Senhor pe ranhe ojeko me'ẽ okuapy, ha'e rire Nhanderuete oipotaa rami orevy pe ju ikuai.

⁶ Ha'e nunga rupi ae Tito pe rojerure penepytyvõ agua peráta peme'ẽ 'rã va'ekue pemono'õmba agua, ha'e rami agua omboypy rire.

⁷ Ha'e nunga rupi pejapopa ke, opa mba'e py pendekuai porã etea pexa ukaa rami avi: pejeroviaa py, ayvu py, mba'emo peikuaa-a py, opa mba'e py penekyre'ỹa py, ha'e roayvua py guive.

⁸ Pëvy ajapo uka nhea'ãa rupi e'ỹ guive xeayvu. Ha'e rami avi amboa kuery nhopytyvõxea pëvy amombe'u vy aexaxe anhetẽ pa peẽ kuery voi pendeporayvua.

⁹ Mba'eta peikuaa ma Senhor Jesus Cristo nhanemboaxya, mba'eta iporiau e'ỹ va'eri penderayvu vy iporiau va'e ojeapo raka'e, iporiau va'e oiko ramo peẽ kuery iporiau e'ỹ va'e peiko agua.

¹⁰ Amombe'u porãve ta aikuaa va'e: Peẽ kuery ma ma'et'ya oaxa va'e py peẽ ranhe pemboypy va'ekue mba'emo pemono'õ agua, mba'eta peẽ ranhe pendepy'a re ha'e rami agua pemoi va'ekue. Ha'e rami vy po rami 'rã ha'eve:

¹¹ Aỹ pejapopa ke pemboypy va'ekue. Peme'ẽxea peikuaa ukaague rami pemono'õmba ke peme'ẽ va'erã, pejoua'i rami.

¹² Mba'eta nham'e'ẽxea oĩ ramo jajoua rami nhame'ẽ rã ojou porã pavẽ 'rã, ruxã'i anho jajou vy nanham'e'ẽve teĩ.

¹³ Mba'eta "Amboa kuery nome'ẽve, ha'e rã peẽ peme'ẽve agua" nda'ei. Ha'e rami 'rãgue py aipota joo rami meme pereko'i mba'emo.

¹⁴ Ha'e rami vy perekopa va'e gui pemboja'o ramo ha'e kuery pe ndoatavei 'rã, araka'eve rã ha'e kuery ju oguerekopa va'e gui omboja'o rã pendevy pe ju ndoatavei agua. Ha'e rami vy joo rami meme 'rã pereko,

¹⁵ ipara oĩa rami: "Omono'õ reta va'ekue pe naembyrei. Ha'e rã mbovy'i omono'õ va'ekue pe ma ndoatai."*

Tito pe ajapo uka pyau jevyague re ijayvua

¹⁶ Ha'e gui arovy'a Nhanderuete mba'eta Tito py'a re omoĩ xee rami penepytyvõxea.

¹⁷ Ha'e ramo ojapyxaka karamboa rojerurea re. Ha'e rami vy ikyre'ỹve ete vy ha'e ae penepytyvõxea rupi oguata peẽ kuerya katy.

¹⁸ Hupive romondouka avi irmão mboa. Ha'e va'e ma ayvu porã omombe'ua rupi oiko va'e, opa rupi igreja kuery oikuaa.

¹⁹ Ha'e rami anho e'ỹ, igreja kuery oiporavo va'ekue oreirũrã, peráta mono'õa rupi orepytyvõ agua. Ha'e nunga rojapo Senhor omboetea agua, ha'e ronhopytyvõxe etea roexa uka agua.

²⁰ Mba'eta ronhea'ã avave rei orere ijayvu rei e'ỹ agua peráta ome'ẽa reta pyre rogueraa rã.

²¹ Mba'eta ronhea'ã ha'evea rami orekuai agua Senhor renonde, ha'e avakue oexa py guive.

²² Ha'e va'e irmão kuery reve romondouka avi nhande-irmão mboa. Ha'e va'e ma opa mba'e py nhopytyvõxea roexa jepi va'e, mbovykue rei e'ỹ. Ha'e gui aỹ ma peẽ kuery re ojeroviaa rupi vy oexa ukave ju nhopytyvõvexea.

²³ Ha'e gui xeirũ Tito ma peẽ kuerya rupi xepytyvõ va'ety. Ha'e gui irmão kuery mboa ma igreja kuery remimondouka meme, ha'e Cristo mboetea guive.

²⁴ Ha'e ramo igreja kuery pavẽ renonde peẽ voi ke pexa uka pendeporayvua, ha'e va'e avakue oendua py ore roguerovy'a rire.

9

Ha'e kuery ome'ẽmba voi agua re Paulo ijayvuague

¹ Ha'e gui iky'a e'ỹ va'e kuery pe mba'emo pemboja'o agua re ambopara ve'ỹ teĩ ha'eve,

² mba'eta aikuaa porã peipytyvõxea. Ha'e nunga py roguerovy'a Macedônia pygua kuery ikuai rupi. Mba'eta ha'e kuery pe aipoa'e pendereko re: "Acaia pygua kuery ma ma'et'ya oaxa va'e guive mba'emo omboja'o agua rami ikuai", ha'e va'ekue. Ha'e rami vy peẽ ranhe peme'ẽxe rire heta ju ma ikuai ome'ẽxe avi va'e.

³ Ha'e rami avi pëa py ambou irmão kuery, peẽ kuery roguerovy'aa oaxa rive'ỹ agua, ha'e rami 'rãgue py pemono'õmba agua, xee aipoa'eague rami.

⁴ Ha'e rami vy Macedônia pygua kuery xerupive ou va'e oexa e'ỹ agua ndapejapo porã ra'ea, roximba e'ỹ agua. (Ha'e rami avi "Peẽ peximba 'rã" nda'ei,) mba'eta peẽ kuery re ajerovia ae ha'e nunga py.

⁵ Ha'e rami avi ajou porã xegui irmão kuery ranhe peẽ kuerya py ambou agua, oguereko katu ma voi agua mba'emo peme'ẽ agua va'ekue. Ha'e rami vy pemono'õmba 'rã penhopytyvõxea rupi ete, penerakãte'ỹ reia rupi e'ỹ.

Mba'emo moaia ha'e imono'õa re ombojojaague

* 8:2 Atos 11.27-30; Romanos 15.25-27; 1 Coríntios 16.1-4

* 8:15 Êxodo 16.18

⁶ Aipoa'e: Mbovy'i ri amongue omoa'i rire mbovy'i avi 'rã omono'õ. Ha'e rã omoa'i reta va'ekue ma omono'õ reta avi 'rã.

⁷ Petei-te'i tapeme'ẽ pendevy'a re pemoiague rami, penerakãte'ỹa rupi e'ỹ, nei ame'ẽ uka nhea'a ramo e'ỹ guive, mba'eta Nhanderuete oayvu ovy'a reve ome'ẽ va'e.

⁸ Ha'e ramo Nhanderuete penemboaxy vy opa mba'e 'rã ojou uka pëvy. Ha'e rami vy opa mba'e pejou riae 'rã, opa mba'e py penhopytyvõ aguã,

⁹ ipara oĩa rami: "Mba'emo omboja'o vy iporiaukue'i pe ome'ẽ ramo heko porãa ojekuaa riae 'rã", he'iague rami.*

¹⁰ Mba'eta Nhanderuete ae ome'ẽ mba'emo ra'yigüe inhotyãrã pe, mbojape guive ome'ẽ ho'u va'erã pe. Ha'e pendevy pe voi ome'ẽ porãmba 'rã pemoa'i va'erã, omboetave avi 'rã pendereko porãa.

¹¹ Opa mba'e ome'ẽmba 'rã pendevy, opa mba'e py joupe pemboja'o aguã. Ha'e gui ha'e joupe rogueraa ramo heta 'rã oguerovy'a Nhanderuete.

¹² Mba'eta ha'e rami penhopytyvõ ramo iky'a e'ỹ va'e kuery oguerokopa 'rã. Ha'e rami anho e'ỹ, heta oguerovy'a 'rã Nhanderuete guive.

¹³ Mba'eta Nhanderuete omboete 'rã okuapy, peipytyvõa py Cristo regua ayvu porã peroviaa rupi penhe'ẽ rendua pexa uka ramo, mba'eta peme'ẽxexa py ha'e kuery pe pemboja'o, pavê rei pe guive.

¹⁴ Ha'e ramo ha'e kuery ma pendererovy'aa rupi ojerure 'rã pendere, opa mba'e py Nhanderuete penemboaxya oikuaa vy.

¹⁵ Nhandevy Nhanderuete ome'ẽ opa mba'e gui iporãve va'e. Ha'e ramo jarovy'a.

10

Apóstolo po'akaa rupi Paulo ijayvuague

¹ Cristo ivai rei e'ỹ ha'e porayvu va'e rery rupi xee Paulo ae pëvy ajerure. Xee ma anhetê peê kuerya py aiko jave xe'yvy'i va'eri pendekuaia rupi e'ỹ aiko jave "Ijayvu ete va'e" 'ea xevy.

² Tá, xee ajerure pëvy peê kuerya py avaê ju jave ijayvu ete va'e rami e'ỹ xeapo aguã, mba'eta anhetê xeayvu ete 'rã amongue to'o re roikoa rami ijayvu va'e ikuai rã.

³ Mba'eta orero'o re roiko tei to'o oikuaa rami e'ỹ guive roptu'ã roikovy orerovaigua kuery re.

⁴ Mba'eta ore ronhea'ãa rupi tembiporu roiporu va'e ma to'o guigua e'ỹ, ha'e rã Nhanderuete guigua ipo'akaa va'e, oo imbarae ete va'e mbovaipaarã.* Ha'e rami vy rombovaipa 'rã nhombotavypa reia rupi ayvua,

⁵ ha'e opa marãgua onhemboyvatevexea guive, Nhanderuete oikuaaxe va'e rovai opu'ã va'e. Ha'e rami vy roity avakue 'arandu ha'e javi, ha'e kuery voi Cristo onhe'ẽ rendu aguã rami.

⁶ Ha'e gui opa mba'e py penhe'ẽ rendu ma ri ramo rombopaga 'rã inhe'ẽ rendu e'ỹ va'e ha'e javi.

⁷ Peikuaa pota ke mba'emo ojekuaa porã va'e re. Amongue ojejou porãa rupi ojeupe "Cristo pegua" he'i vy peteigüe ju toikuaa pota ojee. Mba'eta Cristo pegua ha'e kuery oikoa rami avi ore voi Cristo pegua roiko.

⁸ Orepo'akaa re peteigüe ju xeayvu tei naxi, mba'eta peê kuery romombaraeteve aguã Senhor orembopo'akaa, penembaraetea rombovaipa aguã e'ỹ.

⁹ Ha'e rami xeayvu, kuaxia ambopara vy romongyjexea rami pexa'ã e'ỹ aguã.

¹⁰ Mba'eta amongue ndaxejou porãi vy aipoe'i: "Paulo kuaxia ambopara va'ekue ma ipoyi, ha'e ipo'akaa kuaa ukaa guive, va'eri nhandea py oi vy ikangy, ha'e ijayvu ndovarei", he'i.

¹¹ Ha'e rami ijayvu va'e toikuaa pota pova'e nunga re: Ha'e kuerya py e'ỹ ro'i jave kuaxia para romboparaa rami ae ju 'rã oreayvu ha'e kuerya py rovaê vy.

¹² Mba'eta ore ma noronhembovyatexei va'ekue, ojejou porã rei va'e kuery rami e'ỹ. Ha'e kuery ma ojee ae rive ovy'a, ha'e ojegui ae mba'emo ombojoja vy oexa uka o'arandu e'ỹa.

Mamo pa Paulo omba'eapo aguã oikuaa ukaague re ijayvua

¹³ Ha'e rã ore ma orejee ae ndoreayvui 'rã ha'evea ramigua áryve, Nhanderuete orerembiaporã ome'ẽ va'ekue re anho oreayvu. Mba'eta peê kuerya rupi voi romba'eapo aguã ome'ẽ.

¹⁴ Mba'eta peê kuerya rupi noremomba'eapoi va'e rire pendekuaia re oreayvu aguã nda'evei 'rãgüe. Ha'e rami avi Cristo regua ayvu porã romombe'u vy peê kuerya rupi romba'eapo ae ma.

¹⁵ Ha'e rami avi ha'evea ramigua áryve e'ỹ 'rã oreayvu, amboae kuery omba'eapo re oreayvu e'ỹ aguã. Ha'e peê kuery re rojerovia, pejeroviaa oíve ramo peê kuerya rupi romba'eapove aguã, orerembiaporã ome'ẽ mbyre rami vy,

¹⁶ ha'e pendekuaia rovai rupi voi ayvu porã romombe'u aguã, mba'eta ore ndoreayvui 'rã amboae kuery omba'eapoague rupi ore ju romba'eapoa roguerovy'aa rupi.*

¹⁷ Ha'e rami 'rãgüe py "Mba'emo oguerovy'a va'e ma Senhor ae toguerovy'a" he'ia rami orekuai.*

¹⁸ Mba'eta amongue ha'e ae rive ojererovy'a va'e'ỹ 'rã ojou porã mbyrã oiko, ha'e rã Senhor oguerovy'a va'e anho.

11

Paulo gueko re ijayvuve jevyague

¹ Inhakã porã e'ỹ va'e rami xeayvuve ju ta ramo aipota xerero'akave. Ha'e rami vy xerero'akave'i ju ke.

* 9:9 Salmo 112.9

* 10:4 Efésios 6.10-18; 1 Tessalonicenses 5.8

* 10:16 Romanos 15.18-21

* 10:17 Jeremias 9.24

² Mba'eta peê kuery re xee nda'evei etea ma Nhanderuete guigua ae. Mba'eta omerã pete'i va'e pe kunhatai ete'i ojexa uka va'e rami avi xee ma roguereko katu pete'i pe roexa uka aguã. Ha'e va'e ma Cristo.

³ Ha'e rami te'i xee akyje, mboi ijapua rupi Eva ombotavyague rami avi pene'arandua voi ombovaipa avi gui, pete'i rami anho pendepy'aa ha'e Cristo pe pendeko ky'a e'ÿa rupi pendekuaia gui pejepe'a gui.

⁴ Mba'eta anhetê pëa py amongue ovaê vy Jesus regua ore romombe'u va'ekue ramigua e'ÿ 'rã omombe'u, ha'e rami e'ÿ vy Nhe'ê e'ÿ vy ayvu porã pejopy va'ekue ramigua e'ÿ 'rã omombe'u. Ha'e ramo ha'e va'e regua pe te'i penhembo'e uka 'rã, pevy'a reve.

⁵ Ha'e kuery ojeupe ae "Apóstolo" he'ia va'e gui xee ma ne'i pete'i henda py naxe'vyv'i've.

⁶ Ayvu py xe'vyv'i te'i mba'emo aikuaa-a py any. Ha'e nunga ha'e javi roikuaa uka ae ma pëvy, opa mba'e py.

Joupe nonhemongaru ukaiague re Paulo ijayvuague

⁷ Tyrã pa peê kuery romboyvateve vy xee ae anhemovvyv'e vy ajevavy va'ekue ri ty'y? Mba'eta peê kuery rupi aiko jave hepy e'ÿ re amombe'u va'ekue Nhanderuete guigua ayvu porã.

⁸ Mba'eta igreja rupi mboae gui mba'emo aipe'a heruvy peê kuery roipytyvõ rive aguã, ha'e amba'eapoague repy ajopy guive.

⁹ Peê kuerya py aiko jave mba'emo py xeporiau te'i peê kuery pete'ive pe nanhemongaru ukai. Mba'eta Macedônia gui irmão kuery ovaê vy ome'êmba aikotevê va'ekue. Opa mba'e py anhea'ã va'ekue peê kuery pe anhemongaru uka e'ÿ aguã, ha'e anhea'ã riaeve 'rã guive ha'e rami.*

¹⁰ Cristo regua ayvu anhetê ete va'e xere o'i va'e rupi aipoa'e: Xegui ndoipe'aa'i 'rã apy Acaia yvy re ha'e rami aiko vy avy'aa.

¹¹ Mba'e re nda'u nanhemongaru ukai va'ekue pendevy? Peê kuery roayvu e'ÿ vy teve ha'e rami aiko? Nhanderuete ma oikuaa roayvu.

¹² Ha'e rami 'rãgue py "Paulo kuery rami orekuai" he'i rive va'e kuery amokyriri aguã nanhemongaru ukai va'ekue pendevy, ha'e kuery ojejou porã ve'ÿ aguã. Ha'ekue rami aiko riaeve 'rã guive,

¹³ mba'eta ha'e kuery ma apóstolo ramigua rive, anhetê rupi e'ÿ omba'eapo, Cristo pegua apóstolo ramigua rive onhemoiño va'e.

¹⁴ Ha'e ramigua jaexa te'i nanhanhemondy'i, mba'eta Satanás ae voi anjo hexakãmba va'e rami onhemoiño.

¹⁵ Ha'e nunga rupi hembiguai kuery voi heko porã va'e merami rive onhemoiño rã jaexa vy nanhemondy'i 'rã. Ha'e gui opaa py ha'e kuery ha'evea rami 'rã opaga ojapo vaiaque re.

Ayvu porã káuxa ojexavaia re Paulo ijayvuague

¹⁶ Teígue ju xeayvu: Avave rei xe'vy pe "Inhakã porã e'ÿ va'e" ta'ea eme. Ha'e rami te'i ha'e rami sekuaa va'e ikuai vy taxerero'akave'i ju, inhakã porã e'ÿ va'e rami xejee xeayvuve rã.

¹⁷ Mba'eta xeayvu ta Senhor gui e'ÿ ijayvu va'e rami, 'arandu rupi e'ÿ, ojejou porã rei va'e rami rive.

¹⁸ Heta ikuai to'o re vy ojererovy'aa rupi rive ijayvu va'e. Ha'e gui xee voi xeayvu ta ranhe ajererovy'aa rupi.

¹⁹ Mba'eta peê kuery pendejeupe "Hi'arandu va'e" peje te'i pevy'a reve penhembo'e uka hi'arandu e'ÿ va'e pe.

²⁰ Ha'e kuery pe pejejokuai uka escravo rami, penhemomba uka, pejekore ukapa, mba'eta pendegui onhemboyvateve vy penderova petepa.

²¹ Xee axi reve xema'endu'a ha'e kuery rami orekuai aguã ndorepy'a guaxuiague re. Ha'e rami avi amongue ipy'a guaxua rupi ijayvu ramo xee voi xepy'a guaxu 'rã. Inhakã porã e'ÿ va'e rami teri xeayvu.

²² Ha'e kuery hebreu regua teve? Xee voi hebreu aiko. Ha'e kuery Israel regua teve? Xee voi. Ha'e kuery Abraão ramymino teve ikuai? Xee voi.

²³ Cristo rembiguai teve ikuai? (Inhakã porã e'ÿ va'e rami teri xeayvu.) Xee katuve ma ha'e aiko. Mba'eta pavê gui amba'eapove, nhuã py hetakueve ai, mbovykue rei e'ÿ anhenupã uka, mbovykue rei e'ÿ amano aguã rupi aiko va'ekue.

²⁴ Pete'i nhiruigüe ma judeu kuery xenupã trinta e nove-kue,

²⁵ mboapykue xenupãa yvyra rovi py, peteigüe ita py xeapipaa, mboapykue kanoã ai va'e oike, pete'i pytũ ha'e pete'i ára ye'ê mbyte py ai va'ekue.

²⁶ Aguataa rupi aiko vy mbovykue rei e'ÿ ajexavai. Yy oxyry atã va'e rupi aaxa, jojuka rive-rive va'e ikuaiia rupi, xeretarã kuery ha'e amboae regua xejukaxe ramo, tetã ha'e tekoa e'ÿa rupi aikoa py, ye'ê rupi aa vy, ha'e irmão ramigua rive xejukaxe ramo.

²⁷ Amba'eapoa py aiko vy xekane'õ va'ekue, mbovykue rei e'ÿ ake e'ÿ re aiko. Xenhembyayi ha'e xey'uvei va'ekue. Mbovykue rei e'ÿ akaru e'ÿ re aiko va'ekue, ha'e xea e'ÿ vy yro'y aendu guive.

²⁸ Ha'e nunga xerete re oiko va'e ramigua anho e'ÿ aendu, ko'ê nhavõ xere o'i ipoyive va'e, igreja kuery ha'e javi re nda'evei aikoa.

²⁹ Ha'e kuery va'e regua ikangy rã xee voi xekangya aendu. Ho'a ramo xee voi xepy'a vai 'rã.

³⁰ Ha'e rami avi mba'emo arovy'aa rupi xeayvu vy xeayvu ta avi xekangya rupi aikoa re.

³¹ Nhanderuete, Senhor Jesus Ru va'e raka'e rã peve ima'endu'a porãmbu oiko va'e ma oikuaa ndaxeapua.

³² Damasco tetã py aiko jave tetã re opena va'erã huvixave Aretas omo'i va'ekue omboaty jopya kuery xejopy aguã.

³³ Ha'e rami te'i tetã kora re janela o'i va'e gui xemboguejya yvy katy pete'i ajaka tuvixa va'e py. Ha'e rami vy aa jepe karamboae ha'e kuery po gui.*

* 11:9 1 Coríntios 9.1-27

* 11:33 Atos 9.23-25

12

Senhor mba'emo oexa uka ha'e oikuaa ukaague re ijayvuague

¹ Ajererovy'aa rupi xeayvue aguã nda'eveitei teĩ amombe'u ta Senhor mba'emo oexa ha'e oikuaa ukaague.
² Peteĩ ava aikuaa Cristo pegua. Ha'e va'e ma catorze ma'etỹ ma ojapo yva mboapya peve oupiague. Hete reve pa tyrã hete reve'ỹ oupia xee ndaikuaai, Nhanderuete ma oikuaa.*
³ Ha'e gui ha'e va'e ava hete reve pa tyrã hete reve'ỹa ndaikuaai, Nhanderuete ma oikuaa teĩ xee aikuaa
⁴ yvy marã e'ỹ re oupia. Ha'e ramo ayvu oendu avave rei omombe'ua aguã nda'eveitei va'e.
⁵ Ha'e ramigua oikoague re xee xeayvu 'rã, ha'e rã xereko re ae ndaxeayvui 'rã, xekangya re e'ỹ vy.
⁶ Ha'e rami ajererovy'aa rupi xeayvu va'e rire inhakã porã e'ỹ va'e ndaikoi 'rãgue, mba'eta anhetẽ va'e meme. Ha'e rami teĩ ha'e rami ndaxeayvuxei, avave rei xejou porã rei e'ỹ aguã. Ha'e rã xere mba'emo oĩ rã oexa, e'ỹ vy xegui ayvu oendu va'ekue anho ha'e'eve.

Ho'o re juu oĩ va'e re Paulo ijayvuague

⁷ Ha'e ramigua iporã ete va'e xevey oikuaa ukaague re ajejou porã rei e'ỹ aguã, peteĩ juu omoĩa xero'o re. Ha'e va'e ma Satanás ombou va'ekue xerereko axy aguã, anhemboyvate rei e'ỹ aguã.
⁸ Ha'e nunga rupi mboapykue Senhor pe ajerure xegui oipe'a aguã re.
⁹ Ha'e rami teĩ aipo'e'i xevy: "Xee romboaxya ha'e'eva ma ndevy, mba'eta ikangy va'e re xepo'akaa ojekuaa porãve 'rã", he'i va'ekue. Ha'e nunga rupi avy'a reve 'rã xeayvu xekangya re, xere Cristo po'akaa oĩ aguã.*
¹⁰ Ha'e rami vy arovy'a 'rã xekangya, xere ayvua reia, ajexavaia, xere opu'ãa reia, ha'e nda'eveitei aikoa Cristo kãxa aendu va'e. Mba'eta xekangya py xembaraeteve 'rã.

Apóstolo oikoa kuaa ukaa re Paulo ijayvuague

¹¹ Inhakã porã e'ỹ va'e rami xeayvu va'ekue, ha'e rami aguã rami peẽ ae xemoingo ramo. Peẽ ae pendeayvu 'rãgue xererovy'aa rupi, mba'eta xee ma mba'eve py ojeupe "Apóstolo" he'i rive va'e kuerya gui naxe'yvyĩ'ive, mba'e'ỹ aiko va'eri.
¹² Mba'eta peẽ kuerya mbyte rupi aexa uka ae ma apóstolo aikoa kuaa ukaarã, opa mba'e aropo'akaa py, ha'e gui hexa pyrã, nhomondyipaarã ha'e po'akaa kuaa ukaarã ajapoa py guive.
¹³ Mba'e nunga py tu igreja kuerya mboae gui peẽ kuerya pe ajapo vaive, xee anho pëvy nanhepytyvõ ukaija py e'ỹ vy? Xeperdoa ke ha'e nunga py ri ajapo vai rã.

Oipouxea rupi Paulo ijayvuague

¹⁴ Mboapykuea ma peẽ kuerya py aa aguã rami aiko, ha'e teĩgue ju nanhepytyvõ ukai 'rã guive pëvy. Mba'eta xee ndaipotai mba'emo pereco va'e, peẽ kuerya ae roipota. Mba'eta ta'y kuerya minha mba'eve nomoĩ porã 'rã ngu kuerya peguarã, ha'e rã tuu kuerya ma gua'y kuerya peguarã omoĩ porã 'rã mba'emo.
¹⁵ Ha'e nunga rupi xee avy'a reve mba'emo ame'ẽ, ha'e penenhe'ẽ re vy xee ae anhemomba uka 'rã guive. Pavẽ gui xee roayvuvẽ rã peẽ kuerya ndaxerayvuive teve?
¹⁶ Mba'eve py pëvy nanhepytyvõ ukai ramo xapy'a rei peẽ kuerya va'e regua "Paulo ijapu vy nhandekorea rupi oiko" he'i 'rã.
¹⁷ Ha'e rami avi pëa py amongue ambou va'ekue pe teve rokore uka?
¹⁸ Mba'eta Tito ou aguã re ajerure, ha'e hexeve ambou avi karamboae irmão mboae. Tito teve pendekore raka'e? Hexeve peteĩ nhe'ẽ rupi ae e'ỹ ri ty'y roiko? Peteĩ tape rupi e'ỹ ri ty'y roo?

Ha'e kuerya oipou aguã okyja rupi Paulo ijayvuague

¹⁹ Are ma guive rã peẽ kuerya pexa'ã tei ore rojejou porã ukaxe vy rive oreayvua rami. Ha'e rami 'rãgue py xerembiayvu kuerya, Cristo re vy Nhanderuete renonde romombaraeteve aguã oreayvu ha'e nunga ha'e javi re.*
²⁰ Ha'e rami teĩ akjje, peẽ kuerya py avaẽ vy aipotaa rami e'ỹ pendekuai rã roexa gui, ha'e peẽ voi pexa'ãague rami e'ỹ xerexa gui. Akjje peẽ kuerya mbyte aexa gui joguero'a rei va'e, joe ija'e'ỹ, ivai rei, ha'e ranhexe va'e, ijayvu vaikue, ijayvuxe, onhemboyvate ha'e nhombopoxypa rei va'e.
²¹ Akjje peteĩgue ju avaẽ ramo peẽ kuerya mbyte Xeruetẽ xemo'yvyĩ rivyvyi gui, ha'e yma rupi pejejavuague gui ndapejeko rerovai rã xee ajae'o rivyvyi gui, heko ky'a rei va'e, itavy rei ha'e opa marã ikuai va'e aexa vy.

13

Oikuaa pota ha'e ijayvu ete aguã re Paulo ijayvuague

¹ Kova'e re mboapykuea ma 'rã avaẽ peẽ kuerya py. "Mokoĩ e'ỹ vy mboapy mba'emo omombe'u rã jaikuaa porãve 'rã", 'ea ague rami.*
² Mba'eta mokoĩgue pëa py aĩ jave aipoa'eague rami ae ju 'rã xeayvu. Aỹ peẽ kuerya py naĩ vy aipoa'e ymave rupi ojevavy va'ekue pe, ha'e amboae kuerya ha'e javive pe guive: Peteĩgue ju avaẽ vy xee noromboaxyvei ma 'rã.
³ Mba'eta peikuaxa anhetẽ pa Cristo gui ae xeayvua. Ha'e va'e rima na'ikangy 'rã peẽ kuerya mbyte, ha'e rã pendeivy pe oexa uka 'rã opo'akaa.

* 12:2 Apy "Peteĩ ava" he'ia ma ojee ae ijayvu vy (versículo 7).

* 12:9 1 Coríntios 1.26-29

* 12:19 2 Coríntios 3.1-3

* 13:1

⁴ Mba'eta anhetê ikangy va'e rami kuruxu re onhemoĩ uka va'ekue ri oikove ju raka'e Nhanderuete po'akaa rupi. Ha'e rami ae hexe vy ore voi orekangy va'eri peê kuery mbyte Nhanderuete po'akaa rupi avi 'rã orekuai hexeve.

⁵ Peikuaa pota ke pendejee ae, pexa aguã anhetê pa pejeroviaa oĩa. Penhea'anga ke pendejee ae. Ndapeikuaai ri ty'y Jesus Cristo pendere oĩa? Ha'e rami e'ỹ ri ramo ojou vaipy peiko.*

⁶ Ha'e rami teĩ xee ajerovia peikuaa aguã ore kuery ojou vaipy e'ỹ roikoa.

⁷ Nhanderuete pe rojerure mba'eve py pejejavy e'ỹ aguã, pavê orejou porã aguã e'ỹ guive. Roipota va'e ma teko porã rupi peê pendekuai, ojou vaipy ore roikoa rami amongue oikuaa teĩ.

⁸ Mba'eta peteĩve henda py ndorepo'akai 'rã anhetê va'e rojoko aguã, ha'e rã anhetê va'e ojekuaa porãve aguã anho.

⁹ Ha'e rami vy rovy'a 'rã peê penembaraete ramo, ore orekangy teĩ. Ha'e rami vy rojerure peê kuery opa mba'e py pendekuai porã aguã.

¹⁰ Ha'e nunga rupi pëa py e'ỹ teri aiko vy ambopara ha'e rami, peê kuerya py aiko jave Senhor xembopo'akaague rami vy rombopaga e'ỹ aguã, mba'eta anhomomba aguã e'ỹ xembopo'aka, ha'e rã anhomombaraeteve aguã.

Oxaruraa rupi ijayvuague

¹¹ Aỹ ma irmão kuery, pevy'a ke. Opa mba'e py pendekuai porã pota, joo meme penhombopy'a guaxu, peteĩ rami peikuaa, ha'e peteĩ rami pendekuai guive. Ha'e ramo Nhanderuete mborayvu me'ëa ha'e peteĩ rami nhanemoingoa va'e oiko 'rã pendereve.

¹² Pexarura joupe-upe iky'a e'ỹ va'e joayvua rami. Iky'a e'ỹ va'e kuery ha'e javi oxarura uka pëvy.

Ogueroayvu porãague

¹³ Tove peê kuery ha'e javive tapendu Senhor Jesus Cristo nhanemboaxya, Nhanderuete nhandarayvua ha'e Nhe'ẽ Ky'a E'ỹ peteĩ rami nhanemoingoa.

Galácia pygua kuery pe Paulo ombopara va'ekue Galácia pygua kuery pe Paulo ombopara va'ekue

Kova'e kuaxia ma Galácia yvy re Jesus remimbo'e kuery ikuai va'e pe apóstolo Paulo ombopara va'ekue. Ha'e ae omboypy va'ekue igreja ha'e py. Ha'e gui Galácia yvy gui Paulo oo ma rire ha'e py ovaẽ amboae rami rei nhombo'e va'e, judeu regua. Ha'e va'e kuery ma nhombo'e yvy aipoe'i: "Moisés lei oea va'ekue rupi nhandekuai ramo 'rãe Nhanderuetete nghanemboeko porã, nhandepire nhamboi uka aguã regua rupi guive", he'i nhombo'e vy.

Ha'e rã Paulo ma ha'e rami e'ỹ nhombo'e, avakue oikuaa rami rive'ỹ. Aipoe'i: "Ayyu porã pendevy xee amombe'u va'ekue ma avakue guigua e'ỹ. Mba'eta xee ma avakue gui naendui neĩ ndaikuaai karamboae. Jesus Cristo ae oikuaa uka xevy" (1.11b-12). "Nhanderuetete renonde avave rei lei re onhea'ãa rupi nomboeko porãai 'rã, mba'eta 'Heko porã va'e ma ojeroviaa rupi 'rã ikuai', he'i" (3.11). "Mba'eta peẽ kuery voi Cristo Jesus re pejerovia vy Nhanderuetete ra'y kuery pendekuai", he'i (3.26).

Ha'e gui ára nhavõ Nhanderuetete renonde jaiko aguã ma ha'e rami ae avi, mba'eta nhande ae nghanhea'ãa rupi rive'ỹ 'rã jaupity teko porã, ha'e rã Jesus re jajeroiviaa re, ha'e Nhe'ẽ po'akaa rupi anho. "Ha'e nunga rupi aipoa'e: Pendekuai Nhe'ẽ re. Ha'e vy 'rãe ndapejapoi to'o oipota va'e", he'i (5.16).

Oxarura reve ijayvu vy omboypyague

¹ Xee Paulo ma apóstolo aiko. Avakue e'ỹ xemoĩ, neĩ avakue pe e'ỹ guive xemoĩ ukua. Ha'e rã Jesus Cristo ae xemoĩ va'ekue, ha'e omanoague gui Nhanderuetete imboete jevyare va'e voi.

² Irmão kuery xeirũ ikuai va'e ha'e javi reve roxarura Galácia py igreja kuery pendekuai va'e pe.*

³ Tove peẽ kuery tapendu Nhanderuetete ha'e [nhande] Senhor Jesus Cristo penemboaxya ha'e mby'a porã.

⁴ Mba'eta ha'e ae ojejuka uka raka'e jajejavyague re, Nhanderuetete oipotaa rami vy ko yvy vai regua reko gui nhandereraa jepe aguã.

⁵ Tove ha'e anho toamboetea aỹ, ha'e raka'eve rã peve. Amém.

Galácia pygua kuery ojeroviaa gui ojepe'aa re ijayvuague

⁶ Ha'e rami avi anhemondyi mba'eta omombe'ua rã aendu Cristo rupi Nhanderuetete penemboaxy vy penerenõ va'ekue ri ixugui pejepe'apa vyvoia, ayyu porã ramigua re rive pevapaxe vy.

⁷ Ha'e va'e ma amboae ayyu porã e'ỹ guive. Ha'e rami avi amongue rãnda'u Cristo regua ayyu porã oguerovaxe vy penemboeko eta rei.*

⁸ Ha'e gui ayyu porã romombe'u va'ekue rami e'ỹ ri omombe'u va'e rei tove tokanh, ore e'ỹ vy anjo yva pygua omombe'u teĩ.

⁹ Aipoa'e ae ma va'ekue ri teĩgue ju aipoa'e: Ayyu porã oregui pendu va'ekue rami e'ỹ ri omombe'u vy tokanh.

Ayyu porã oendu ha'e omombe'ua re Paulo ijayvuague

¹⁰ Ha'e rami xeayvu vy nda'u aỹ avakue pe ri ajejou porã uka, tyrã pa Nhanderuetete pe? Avakue rive ri nda'u ambovy'axe? Mba'eta avakue ambovy'aa rupi rive aiko va'e rire ndaikoi 'rãgue Cristo rembiguai.

¹¹ Irmão kuery, po ramigua aipota peikuaa porã: Ayyu porã pendevy xee amombe'u va'ekue ma avakue guigua e'ỹ.

¹² Mba'eta xee ma avakue gui naendui neĩ ndaikuaai karamboae. Jesus Cristo ae oikuaa uka xevy.

¹³ Mba'eta pendu ae ma judeu kuery reko rami aikoague. Mba'eta Nhanderuetete pegua igreja kuery amoingo axy rei va'ekue, amombaxe ete vy.

¹⁴ Ha'e rami aikoa rupi xeretarã judeu kuery xejavegua gui voi anhea'ãve va'ekue, oreramoĩ kuery orembo'eague rami ete aikoxe vy.*

¹⁵ Ha'e gui ma xetui'i e'ỹ mbove ma voi Nhanderuetete xemboaxya rupi xeporavo rire xerenõ, ha'e oipotaa rami vy

¹⁶ xevy pe oikuaa uka Gua'y regua, judeu e'ỹ va'e kuery ikuai rupi amombe'u aguã. Ha'e ramo amboae kuery pe xee naporandui karamboae aiko aguã re,

¹⁷ neĩ Jerusalém tetã katy ma voi ndaai ha'e kuery ranhe xegui apóstolo ikuai va'ea py. Ha'e rã Arábia yvy katy ranhe aa, ha'e gui Damasco tetã py ju ajevy.

Jerusalém py, Síria ha'e Cilícia katy Paulo ooague

¹⁸ Ha'e gui mboapy ma'et'ya py mae ma Jerusalém katy aa Cefas aexa aguã. Quinze ára re aiko hexeve.

¹⁹ Ha'e rã apóstolo kuery mboae ma ndaexai karamboae, Senhor ryvy Tiago e'ỹ vy.*

²⁰ Nhanderuetete renonde aipoa'e: Po rami pëvy amopara vy ndaxeapui.

²¹ Ha'e gui ma Síria ha'e Cilícia yvy katy ju aa.

²² Ha'e rã Judéia yvy re Cristo pegua igreja kuery ikuai va'e ma ndaxerexai teri.

²³ Xereko omombe'ua ramo rive ha'e kuery oendu, "Nhanemoingo axy reiare aỹ ma omombe'u oikovy jajeroivia aguã regua yma rupi ombovaipaxe va'ekue", 'ea rã.

* 1:2 Atos 16.6, 18.23

* 1:7 Romanos 16.17; 2 Coríntios 11.3,4; Colossenses 2.8; 2 Pedro 2.1-3

* 1:14 Atos 26.9-20

* 1:19 Atos

²⁴ Ha'e rami xereko oendu vy okueryov'y'a okuapy Nhanderuete.

2

Judeu ha'e judeu e'ŷ va'e ikuai rupi apóstolo kuery omba'eaipoa re ijayvuague

¹ Ha'e gui catorze ma'e'tēy rire ma Jerusalém katy ju aa karamboae Barnabé reve. Tito avi araa.

² Aa aguã Nhanderuete oikuaa ukaague rami vy aa. Ha'e py ma opena va'e kuery pe amombe'u ayvu porã judeu e'ŷ va'e kuerya rupi amombe'u aikovy va'e. Pavē pe'ŷy guive amombe'u, irmão kuery yvatekueve va'e pe anho, ha'e kuery ombovaipa e'ŷ aguã anhombo'ea ha'e anhombo'eague.*

³ Ha'e rami teĩ neĩ Tito xerupive oo va'ekue pe voi ha'e kuery nda'ijayvui opire omboi uka aguã, grego va'eri.

⁴ Omboi uka aguã ijayvu va'e ma irmão ramigua kuery rive, irmão kuery reve onhemoirũ va'ekue. Ha'e kuery ma oikuaa pota reixe raka'e opa mba'e gui Cristo Jesus nhandereraa jepe ramo nhandekuaia re, escravo rami ju nhanemoingoxe vy.*

⁵ Ha'e rami teĩ ha'e kuery oipota va'e ma neĩ peteĩ henda py ma voi ndorojapoi, ayvu porã anhetê va'e peẽ kuery peguarã opyta aguã.

⁶ Ha'e gui omboetepevy kuery re ma xee napenai, mba'eta Nhanderuete voi amongue rive joegui oayvuve va'e'ŷ. Ha'e kuery yvatekueve ikuai va'e voi neĩ peteĩ henda py naxembo'ei mba'emo pyau re.

⁷ Ha'e rami 'rãgue py xejou porã, mba'eta oikuaa amboae regua kuery pe ayvu porã amombe'u aguã Nhanderuete xemoĩague, judeu kuery pe Pedro omombe'u aguã omoĩague rami avi.

⁸ Mba'eta apóstolo Pedro judeu kuery pe ayvu omombe'ua rupi Nhanderuete oipytyvõa rami avi xee voi xepytyvõ amboae regua ikuai rupi amba'eaipoa rupi.

⁹ Ha'e gui ha'e rami amba'eaipo aguã Nhanderuete xemboaxy vy xemoĩague omboetepevy kuery Tiago, Cefas ha'e João oikuaa vy orerorovy'a, orepoppy guive, xee ha'e Barnabé reve. Mba'eta ojou porã amboae regua kuery mbo'ea rupi ore orekuai, ha'e kuery judeu kuery mbo'ea rupi ikuai rami avi.

¹⁰ Peteĩ'i re anho tema ha'e kuery ojerure, iporiaukue'i roipytyvõ aguã re orema'endu'a aguã. Ha'e gui xee ma ha'e nunga re anhea'ã ae ma aikovy.

Pedro pe Paulo ijayvuague, ha'e Cristo Jesus re jajerovia ramo nhanemboeko porã re ijayvu

¹¹ Ha'e gui ma Antioquia tetã py Cefas ovaẽ ma vy ha'eva e'ŷa rami oiko ramo xeayvu ete ixupe.

¹² Mba'eta Tiago remimbou avakue novaẽi teria ja Cefas okaru oikovy va'ekue judeu e'ŷ va'e kuery reve. Ha'e rami teĩ avakue ovaẽ ma ramo opytu'u, judeu kuery gui okyje vy ojepe'a.

¹³ Hexeve judeu kuery mboae heta avi onhenhomi. Barnabé eteve voi ha'e kuery onhenhomia rami onhemingo uka.

¹⁴ Ha'e gui ma ha'e kuery ha'eva e'ŷa rami, ayvu porã anhetê va'e rami e'ŷy ikuai xee aexa vy pavē oendua py aipoa'e Cefas pe: "Ndee ma judeu va'eri amboae regua reko rami reiko va'ekue, judeu reko rami e'ŷ. Ha'e gui aỹ ma mba'e re tu amboae regua kuery ri remoingoxe judeu reko rami?" ha'e va'ekue.

¹⁵ Mba'eta ore ma judeu ae ma voi orekuai, "Amboae regua ojejavypa rei va'e" 'ea va'e e'ŷy.

¹⁶ Jaikuaa guive lei re nhanhea'ãa rupi e'ŷy nhanemboeko porãa, ha'e rã Cristo Jesus re jajeroviaa re. Ha'e rami vy ore voi Cristo Jesus re rojerovia, ha'e rami vy rojeroviaa re oremboeko porãa aguã, lei re ronhea'ãa rupi e'ŷy. Mba'eta lei re onhea'ãa rupi ma avave rei nomboko porãai 'rã.†

¹⁷ Ha'e rami avi xapy'a rei Cristo re vy nhanemboeko porã uka teĩ amongue ojou 'rã jajejavya. Ha'e rami vy nda'u Cristo ae ri nhandeapo jajejavy aguã rami? Any teve.

¹⁸ Mba'eta mba'emo nhambovaipa va'ekue jajapo ju va'e rire mae japyta 'rãgue ojejavypa riae va'e.

¹⁹ Ha'e rami 'rãgue py lei re oia aikuaa porã rire xee amano ae ma lei pe, Nhanderuete pe ju aiko aguã. Xee voi kuruxu re xemoĩa avi Cristo reve.*

²⁰ Ha'e rami rire xee ve'ŷy ma aiko, Cristo oiko xere. Aỹ xero'o re aiko teri reve Nhanderuete Ra'y re ajeroviaa rupi aiko, xerayvu vy xere ojejuka uka rire.

²¹ Xee ma Nhanderuete xemboaxya nambovare e'ŷy. Mba'eta lei re nhanhea'ãa rupi nhanemboeko porãa va'e rire Cristo omanoague ndovare'i 'rãgue.

3

Galácia pygua kuery pe Paulo oporanduague

¹ Peẽ Galácia pygua kuery pene'arandu e'ŷy va'e, mava'e tu penembotavy ra'e? Mba'eta pendua py amombe'u porã va'ekue Jesus Cristo kuruxu re ojejuka ukaague.

² Po rami anho aikuaaxe pëgui: Lei re penhea'ã rupi ri nda'u Nhe'ẽ pejopy, tyrã pa ayvu porã pendu vy pejeroviaa py?

³ Pene'arandu e'ŷy va'e, Nhe'ẽ reve pemboypy va'ekue ri aỹ to'o re rive ju ta ri ty'y opa mba'e py pendekuai porã?*

⁴ Pendekuai axy reiaque ndovare'i ri ty'y mba'everã? Ha'e nungakue ndovare e'ŷy 'rãgue.

* 2:2 Atos 15.1-11 * 2:4 Irmão ramigua kuery ma nhamoingoxe judeu kuery pegua lei rupi anho, escravo rami ae. † 2:16 "Ore" he'ia ma judeu kuery re ijayvu vy. Galácia pygua kuery ma judeu e'ŷy ikuai. Ha'e gui ha'e javi regua ma Jesus Cristo re ojerovia vy 'rãe oo jepe (Romanos 3.21-30). * 2:19 Romanos 6.1-4 * 3:3 Gálatas 5.16-23; Efésios 2.8-10

⁵ Ha'e gui Nhe'ê mbouare nda'u lei re penhea'ã ramo ri mba'emo porã ojapo penembyte, tyrã pa ayvu porã pendu va'e re pejerovia ramo?

Abraão rekokue re ijayvua

⁶ Ha'e ramigua ae Abraão ojou raka'e, mba'eta “Nhanderuede re ojerovia ramo ojerovíaa re ome'ê teko porã”, he'iague rami.*

⁷ Ha'e nunga rupi jaikuaa ojerovia va'e ae Abraão ramymino kuery ikuai.*

⁸ Mba'eta Abraão pe ranhe omombe'u ayvu porã vy “Ndegui vy amoingo porã 'rã yvy regua ha'e javi”, he'i va'ekue. Ha'e ramia py ipara re Nhanderuede oikuaa uka ma voi amboae regua kuery ojerovia ramo omboeko porã 'rã.*

⁹ Ha'ekue rami vy Abraão ojerovia ete va'e reve omoingo porã avi 'rã ojerovia va'e kuery ha'e javi.

¹⁰ Ha'e rã lei re onhea'ã va'e ma ayvu vaipy meme, mba'eta ipara oiny: “Lei re ikuai va'e ndojapopai ri vy ayvu vaipy opyta.”*

¹¹ Ha'e nunga rupi Nhanderuede renonde avave rei lei re onhea'ã rupi nomboeko porãai 'rã, mba'eta “Heko porã va'e ma ojerovíaa rupi 'rã ikuai”, he'i.*

¹² Ha'e gui lei re nhanhea'ã vy ma jajerovíaa rupi e'y' nhandekuai. Ha'e rami 'rãgue py “Lei re oia amongue ojapopa ri vy oikove 'rã hexe vy”, he'iague rami.*

¹³ Ha'e gui ma Cristo nhandejogua raka'e lei re ayvu vai oia gui, nhanderekovia ayvu vaipy ojeapo vy. Mba'eta ipara oiny: “Yvyra re oupia imoiny va'ekue ma ayvu vaipy meme” he'ia rami.*

¹⁴ Ha'e rami vy Jesus Cristo ojapo Abraão pe Nhanderuede “Ndegui vy anhomoiungo porã 'rã” he'iague amboae regua kuery voi oupiy aguã. Ha'e rami rã jajerovia vy jajopy 'rã Nhe'ê ombou va'erã va'ekue.

Nhanderuede ayvu mbovaiparã e'y' lei oejaague re ijayvua

¹⁵ Irmão kuery, nhande ae reko re ambojoja ta aỹ. Mba'eta mba'emo jajapo aguã re jajogueroayvu rire nda'evi avave rei ombovaipa, neĩ omoiave aguã ha'e va'ekue áry.

¹⁶ Ha'e gui Abraão ha'e hamymino pe Nhanderuede ijayvu raka'e omoingo porã aguã re. Ha'e ramia py “Hamymino kuery pe” nde'i, mba'eta heta pe rami e'y' ijayvu, pete'i'i pe anho, “Neramymino” he'ia py. Ha'e va'e ma Cristo.*

¹⁷ Ha'e gui aipoa'eve ju: Nhanderuede yma ma voi guexeve guarã ojapo ma rire quatrocentos e trinta ma'et'ya py lei oeja avi vy nomboaxa rivei, neĩ nombovaipai ijayvu ma voiague.*

¹⁸ Mba'eta lei re nhanhea'ã rupi ri Nhanderuede gui mba'emo jajopy va'e rire ijayvuague rupi ve'y' jajopy 'rãgue. Ha'e rami teĩ ijayvuague rupi rive Nhanderuede mba'emo ome'ê raka'e Abraão pe.

¹⁹ Ha'e gui ma mba'erã nda'u oeja avi lei? Lei ma jējavya kuaa ukaarã oeja raka'e, ovare aguã hamymino ijayvu ma voiague va'e oiko peve'i.* Anjo kuery po rupi lei ome'ê uka raka'e, ha'e gui amboae po rupi ju.

²⁰ “Amboae po rupi ome'ê uka” he'ia py ma pete'i'i re e'y' ijayvu vy, moko'i re. Ha'e rã Nhanderuede ma pete'i'i.

²¹ Ha'e gui Nhanderuede nda'u ijayvu ma voiague rovai guarã ri lei oeja raka'e? Any teve. Mba'eta tekove me'earã ri lei oeja va'e rire anhetê lei re nhanhea'ã rupi 'rãgue teko porã jaupity.

²² Ha'e gui ipara oinya oikuaa uka jējavya guy py meme nhandekuaia, Jesus Cristo re jajerovia vy ome'ê 'rã va'ekue jajopy aguã.

Cristo-a py lei nhanderovaēague rami ijayvua

²³ Ha'e gui hexe jajerovia aguã regua oikuaa uka e'y' mbove ma lei rupi ranhe nhandemoingo vy omboty pyre rami nhanderereko raka'e, jajerovia aguã regua oikuaa uka peve.

²⁴ Ha'e rami vy lei ma nhandere opena va'e rami ranhe nhanderereko raka'e, Cristo-a py nhanderovaē aguã, hexe jajerovia ramo nhandemboeko porã aguã.*

²⁵ Ha'e gui jajerovia aguã regua oikuaa uka ma rire nhandererekoare rupi ve'y' nhandekuai.

²⁶ Mba'eta peē kuery voi Cristo Jesus re pejerovia vy Nhanderuede ra'y kuery pendekuai.

²⁷ Mba'eta Cristo re penhemongarai uka va'ekue ha'e javi ma Cristo py avi penhemonde.

²⁸ Ha'e nunga rupi jipovei 'rã judeu ha'e grego, escravo ha'e escravo e'y', avakue ha'e kunhague, mba'eta Jesus Cristo re vy ha'e javive pete'i regua anho nhandekuai.

²⁹ Ha'e rami vy Cristo pegua peiko vy peē kuery voi Abraão ramymino kuery pendekuai, ha'e ijayvuague peupity avi aguã rami guive pendekuai.

4

Cristo re vy Nhanderuede ra'y kuery jaikoa re ijayvua

¹ Aipoa'e: nguui gui ta'y kuery mba'emo ojopy aguã rami ikuai va'e ma kyrigüe teri ikuai ja escravo rami ete 'rã ikuai, opa mba'e ha'e kuery pe guarã oi tei.

² Ha'e rami vy imbo'ea ha'e hexe opena va'e kuery oipotaa rami 'rã ikuai, tuu oa'angaague ára novaēi teria ja.

* 3:6 Gênesis 15.6 * 3:7 Romanos 4.1-25 * 3:8 Gênesis 12.3, 18.18 * 3:10 Deuteronomio 27.26 * 3:11 Habacuque 2.4 * 3:12 Levítico 18.5 * 3:13 Deuteronomio 21.23 * 3:16 Gênesis 13.15, 24.7 * 3:17 Hebreus 6.13-18 * 3:19 Romanos 5.20,21 * 3:24 Romanos 10.4

³ Nhande kuery voi ha'e rami avi nhandekuai va'ekue. Kyrĩgue rami teri nhandekuai jave escravo rami nhandemoingoa va'ekue ko vvy regua oikuaa rami rive.

⁴ Ha'e gui oa'angaague ára ovaẽ ramo Nhanderuete ombou Gua'y ae kunha gui oiko aguã, lei rupi guarã,

⁵ lei rupi nhandekuaiague gui nhandereraa jepe vy ta'y kuery ete nhandemoingoa aguã.

⁶ Ha'e gui ta'y kuery jaiko ramo nhandepy'a re Nhanderuete ombou Gua'y Nhe'ẽ, ojpukai vy "Xeru, Xeru" he'li va'erã.

⁷ Ha'e nunga rupi escravo ve'ỹ, ta'y kuery ma peiko. Gua'y kuery Nhanderuete penemoingoa rire ixugui mba'emo porã pejopy aguã rami pendekuai.*

Gueko ymaque ae rupi ju ojevvyxea re ijayvuague

⁸ Ymave rupi Nhanderuete peikuaa e'ỹ mbove escravo rami pendekuai teri va'ekue Nhanderuete ramigua kuery pe rive.

⁹ Aỹ ma peikuaa ma Nhanderuete, ha'e ranhe pendekuaa rire. Mba'e re tu ha'vy pejevvyxe ju mba'emo ipo'aka e'ỹ ha'e ovare'ỹ va'e re, ha'e nunga pegua escravo ju pendekuaixe vy?

¹⁰ Mba'eta amongue ára pemboeteve 'rã joegui, amongue jaxy, mba'emo oiko aguã ára ha'e amongue ma'etỹ guive.

¹¹ Ha'e ramo xee akyje peẽ kuerya rupi amba'eapoaque ndovarevei gui.*

Paulo ndoikuaai reia re ijayvuague

¹² Xee rami avi pendekuai 'rãgue, mba'eta xee voi peẽ rami aiko.* Irmão kuery, po rami anho ajerure, mba'eta xevy pe mba'eve py ndapejapo vai.

¹³ Jypy'i pëvy ayvu porã amombe'u jave xemba'eaxy ete va'ekue, peẽ peikuaa porã.

¹⁴ Xee aiko axya peẽ kuery pe voi haxy ete va'ekue peropo'aka aguã. Ha'e ramive ma peẽ kuery ndaxerexaxe e'ỹi, ndaxerayvu e'ỹi guive. Ha'e rami 'rãgue py xemovaẽ porã va'ekue Nhanderuetea guigua anjo rami, Jesus Cristo rami ete.

¹⁵ Ha'e gui aỹ ma mba'eta tu noĩvei ri pendekuai porãague? Xee aipoa'e porã: Ha'eve va'e rire penderexa ae penoẽ 'rãgue raka'e xevy peme'ẽ aguã.

¹⁶ Ha'e gui aỹ ma anhetẽ va'e rupi xee romongeta vy nda'u penderovaigua ju ri aiko?

¹⁷ Ha'e rã amboa'e kuery ma pendererory merami rive xegui pendererovapaxe vy, ha'e kuery re ju peo aguã.

¹⁸ Ha'eve avi iporã va'e re peo aguã, pendereve xee aiko jave anho e'ỹ.

¹⁹ Xera'y kuery, peẽ kuery re nda'evei aiko imemby raxy va'e rami, pendere Cristo reko ojekuaa porã e'ỹa ja.

²⁰ Ha'eve va'e rire aỹ voi xee avaẽ 'rãgue peẽ kuerya py amboa'e rami ju xayvu aguã, mba'eta ndaikuaai rei peẽ kuery reko.

Sara ha'e Agar rekokuere ombujojaague

²¹ Lei rupi rive pendekuaixe va'e, pemombe'u xevy: Ndapeikuaai ri ty'ly lei re oĩ va'e?

²² Mba'eta ipara oiny: "Abraão oguereko mokoĩ gua'y. Peteĩ ma kunha escrava pi'a, ha'e rã amboa'e ma escrava e'ỹ pi'a raka'e."†

²³ Escrava pi'a ma to'o gui rive itui'i. Ha'e rã escrava e'ỹ pi'a ma Nhanderuete ijayvuague rami vy itui'i.

²⁴ Ha'e nunga oiko raka'e jaikuaa pota aguã, mba'eta ha'e va'e kunhague ma mokoĩ ayvu nhandekorã oeja pyre rami. Peteĩ ayvu ma Sinai yvyty re oejaa, escravo rami nhandemoingoa va'e. Ha'e va'e ma Agar.‡

²⁵ Mba'eta Agar ma Arábia regua Sinai yvyty rami, ha'e Jerusalém tetã aỹgua rami guive oiko, mba'eta ha'e pygua kuery escravo rami meme teri ikuai.

²⁶ Ha'e rã Jerusalém yvategua pygua kuery ma escravo e'ỹ ikuai. Ha'e va'e ae ma nhandexy.

²⁷ Mba'eta ipara oiny: "Nememby e'ỹ va'e, kyrĩ va'e reikuavã e'ỹ teri va'e, evy'a ke. Kyrĩ va'e raxy rendu e'ỹ teri va'e, enhendu atã ke revy'a vy, mba'eta ome reve oiko va'e memby kuery gui hetave 'rã ikuai kunha oeja pyre memby kuery.*"

²⁸ Ha'e gui irmão kuery, peẽ ma Isaque itui'iague rami avi Nhanderuete ijayvuague rami vy peiko.

²⁹ Yma guare rami to'o gui itui'i va'ekue ma opu'ã rei raka'e Nhe'ẽ gui itui'i va'ekue re. Ha'ekue ramigua ae aỹ voi oiko.

³⁰ Ha'e rami teĩ ipara re oĩ: "Eipe'a ke escrava ipi'a reve, mba'eta nda'evei escrava e'ỹ pi'a rami avi escrava pi'a ojopy aguã mba'emo.*"

³¹ Ha'e rami vy irmão kuery, nhande ma escrava memby kuery e'ỹ, ha'e rã escrava e'ỹ memby kuery nhandekuai.

5

Lei rupi nhandekuai 'rãgue py Cristo re anho jajerovia aguã re ijayvua

* 4:7 Romanos 8.14-17 * 4:11 Colossenses 2.16,17 * 4:12 Paulo ma judeu va'eri judeu e'ỹ va'e reko rami oiko ombo'ea rupi (1 Coríntios 9.21,22). † 4:22 Abraão ma mokoĩ kunha re omenda raka'e, gua'xy ae'i Sara re, ha'e gui escrava Agar re guive, Nhanderuete oipotaa rami e'ỹ teĩ. Sara pi'a ma Isaque, ha'e rã Agar pi'a ma Ismael (Gênesis 16 ha'e 21). ‡ 4:24 Sinai yvyty re ma lei judeu kuery rekorã oejaa raka'e. Ha'e va'e rupi onhea'a va'e ma escravo rami meme ikuai (Êxodo 20; Hebreus 12.18-29).

* 4:27 Isaías 54.1 * 4:30 Gênesis 21.10

¹ Escravo ve'ÿ nhandekuai aguã ae Cristo nhandereraa jepe. Peĩ atã ke ha'vy escravo penhemoingo uka jevy e'ÿ aguã.*

² Mba'eta xee Paulo aipoa'e pëvy: Pendepire pemboi uka ramo Cristo pendereraa jepeague ndovarei 'rã.

³ Teĩgue ju aipoa'e pavê pe: Opire omboi uka va'ekue ma lei re oĩ va'e ha'e javi ojapo aguã rami ikuai.

⁴ Peê kuery lei re penhea'aa rupi penhemboeko porã ukaxe va'e, pejepe'a ma Cristo gui, ha'e penem-boaxyague peja guive.

⁵ Mba'eta ore ma Nhe'ẽ rupi vy rojerovia reve roarõ roikovy teko porã ome'ẽ mbyrã.

⁶ Mba'eta Cristo Jesus re nhandekuai ramo mba'everã ndovarei nhandepire nhamboi ukaague, neĩ nhamboi uka e'ÿa voi. Ovare va'e ma jajeroiviaa nhandeporayvua rupi jaexa uka va'e anho.

⁷ Peê kuery pendekuai porã va'ekue. Mava'e tu pendejoko ra'e anhetê va'e rupi pendekuai ve'ÿ aguã?

⁸ Mba'eta ha'e rami aguã ma penerenoĩare gui e'ÿ ou.

⁹ Trigo mbovua minha ruxã'i teĩ mesa ha'e javi 'rã omoeakuãmba.

¹⁰ Ha'e rami teĩ xee ma Senhor rupi vy ajerovia amboae rami rei peikuaa e'ÿ aguã. Ha'e rã penemoangeko reia mava'e rã rei opaga 'rã.

¹¹ Ha'e gui irmão kuery, xee ma nhandepire nhamboi uka aguã re teri anhomb'o'e va'e rire mba'exa 'rãgue tu ha'vy xembojexavai reia? Ha'e rami anhomb'o'e va'e rire ha'e kuery ndojou vaivei 'rãgue kuruxu re Cristo ojuka ukaague amombe'u rã.

¹² Ha'eveve 'rãgue penemoangeko reia kuery ha'e kuery ae onhekyximba va'e rire.

Escravo ve'ÿ ma jaiko vy nhandeporayvu aguã re ijayvua

¹³ Mba'eta peê irmão kuery, escravo ve'ÿ pendekuai aguã Nhanderuede penerenoĩ. Ha'e rami avi escravo ve'ÿ pendekuaia rupi nda'evei to'o oipotaa rami pendekuai aguã, ha'e rã pejoayvua rupi 'rã pendekuai peteĩ-teĩ rembiguai rami.*

¹⁴ Mba'eta lei re oĩ va'e ha'e javi 'rã jajapo peteĩ'i ayvu rupi nhandekuai vy: "Peayvu peneirũ peê ae pejeayvua rami" he'iaque.*

¹⁵ Ha'e rami teĩ jomeme pejoxu'u ha'e penhomboi-mboi ri vy penheangu ke peê ae penhomomba e'ÿ aguã.

To'o rembiapo ha'e Nhe'ẽ guigua re ijayvua

¹⁶ Ha'e nunga rupi aipoa'e: Pendekuai Nhe'ẽ re. Ha'e vy 'rãe ndapejapoi to'o oipota va'e.

¹⁷ Mba'eta to'o oipota va'e ma Nhe'ẽ ndoipotai, ha'e Nhe'ẽ oipota va'e ma to'o ndoipotai, joo ramigua e'ÿ vy. Ha'e nunga rupi ae ndapejapo kuaai peipota va'e.

¹⁸ Ha'e rã Nhe'ẽ ri penderereko ramo lei guy py ve'ÿ pendekuai.*

¹⁹ Ha'e gui to'o guigua ma jaikuaa pavê: tavy reia, teko ky'a, jajejoko e'ÿa,

²⁰ mba'emo ra'angaa re jajeroiviaa, mba'evyky, joe nanhandea'eia, joe nhapu'ã reia, takâte'y, joupe nhandevai reia, nhandevvate reixea, joegui jaja'oa, joo rami e'ÿ-e'ÿ nhandekuaia,

²¹ jajojou vai reia, jaka'u reia, jakaru guaxua rupi nhandekuaia, ha'e ramigua anho. Ha'e nunga re pëvy xeayvu ae ma va'ekue, ha'e aÿ ma amombe'u porãve ju: Ha'e rami ikuai va'e ma Nhanderuede po'akaa pyguarã e'ÿ.

²² Ha'e rã Nhe'ẽ guigua ma povae: mborayvu, vy'a, mby'a porã, jajogueropo'akaa, joupe jajapo porã, nhandepotyvõa, ojeroviapy jaikoa,

²³ nhandevai rive e'ÿa ha'e jajejoko. Ha'e ramigua jokoarã lei jipoi.

²⁴ Ha'e Jesus Cristo pegua ikuai va'e ma kuruxu re ojuka avi ma to'o opa marã rei oipota va'e.

²⁵ Nhe'ẽ re vy jaikove rire Nhe'ẽ reve ae tema nhandekuai.

²⁶ Nda'evei jajejou porã rei aguã, nhandhombopoxy ha'e jajojou vaia rupi.

6

Nhandepotyvõ ha'e nhandejeae jaikuaa pota aguã re ijayvua

¹ Irmão kuery, amongue ha'eve e'ÿa rami oiko rã oexaa ramo peê Nhe'ẽ reve pendekuai va'e pemongeta 'rã, nhandevai e'ÿ re. Penheangu ke guive peê voi penhembotavy uka e'ÿ aguã.

² Peraa ke peteĩ-teĩ voyi. Ha'e rami vy 'rãe Cristo guigua lei rupi pendekuai.*

³ Ha'e rã amongue heko porãve e'ÿ teĩ ojeupe "Xereko porã" he'i vy ha'e kuery ae ojekore.

⁴ Peteĩ-teĩ peikuaa pota peê ae pendereko re. Ha'e rami vy 'rãe pejererovy'a aguã ha'eve, amboae kuery reko re peikuaa pota rei nda'ei.

⁵ Mba'eta peteĩ-teĩ ogueraa 'rã ovoyi ae.

Mba'emo nhandhotyague gui nhamono'õ ju 'rãa re ijayvua

⁶ Ayvu porã re penembo'ea rã opa mba'e porã pemboja'o 'rã penembo'ea kuery pe.

⁷ Pejekore eme povae nunga re, mba'eta Nhanderuede ndojejojai ukai 'rã, mba'eta nhandhotyague gui ae ju 'rã nhamono'õ.

⁸ To'o guigua onhoty rire to'o gui ju 'rã omono'õ imombaarã. Ha'e rã Nhe'ẽ guigua ri onhoty rire ma Nhe'ẽ gui ae ju 'rã omono'õ tekove marã e'ÿ.

* 5:1 João 8.32,36 * 5:13 Romanos 6.18,19; 1 Pedro 2.16,17 * 5:14 Levítico 19.18 * 5:18 Romanos 8.1-9 * 6:2 Mateus 18.15;

⁹ Japytu'u rive eme joupe jajapo porãa gui, mba'eta oa'angaague ára nhamono'õ 'rã hekovia, ndajajep'e' ai rire.

¹⁰ Ha'e nunga rupi ha'eve jave jajapo porã 'rã pavẽ pe, nhanderevegua ojerovia va'e kuery pe katuve ma.*

Cristo kuruxu regua anho Paulo oguerovy'aa re ijayvuague

¹¹ Pexa ke ipara tuvixa rei va'e xepo py ae ambopara va'ekue.

¹² Ha'e gui to'o re onhemboyvatevexe va'e kuery onhea'ã 'rã pendepire pemboi uka aguã re. Ha'e ramigua oipota onhembojexavai uka e'ỹ aguã, mba'eta Cristo kuruxu regua omombe'u va'e rire ombojexavaia ae 'rãgue.

¹³ Ha'e rami avi opire omboi uka va'ekue voi ndojapopai 'rã lei re oĩa, ha'e rami teĩ ha'e kuery onhea'ã pendepire pemboi uka aguã re, ha'e nunga re ojererovy'a rei aguã.

¹⁴ Ha'e rã xee ma mba'eve rei ndarovy'ai kuruxu re nhande-Senhor Jesus Cristo omanoague e'ỹ vy.* Mba'eta kuruxu re ma yvy regua reko omano ae ma xevy, ha'e xee voi amano avi yvy regua reko pe.

¹⁵ Mba'eta nhandepire nhamboi ukaa, ha'e nhamboi uka e'ỹa voi mba'e'ỹ, hemimoingo pyau jaikoa anho ovare.

¹⁶ Tove ha'e rami ikuai va'e ha'e javi toendu mby'a porã ha'e omboaxya, Nhanderuete pegua kuery Israel regua voi.

¹⁷ Ha'e rami avi ndaipotavei ma avave rei xemoangeko, mba'eta xerete rupi iperepa ma Jesus káuxa.

Ogueroayvu porãague

¹⁸ Irmão kuery, tove penenhe'ẽ py tapendu nhande-Senhor Jesus Cristo penemboaxya. Amém.

* 6:10 2 Coríntios 9.6-15 * 6:14 1 Coríntios 1.22-24; 2.1,2

Éfeso pygua kuery pe Paulo ombopara va'ekue Éfeso pygua kuery pe Paulo ombopara va'ekue

Kova'e kuaxia ma Jesus remimbo'e kuery Éfeso tetã pygua pe apóstolo Paulo ombopara va'ekue. Ha'e kuery pe omombe'u porãve nhandevy peguarã Nhanderuete oguereko va'e, araka'eve rã guarã guive, Ta'y Jesus re nhaĩ rã. Aipoe'i: "Tove Nhanderuete nhande-Senhor Jesus Cristo Ru va'e re ta'ima'endu'a porãa, mba'eta Cristo re nhanemoĩ vy yva re opa mba'e porã Nhe'ẽ guigua ome'ẽ nhandevy. Mba'eta yvy onhono e'y' mbove ma voi Cristo re nhanemoĩ vy ojeupe guarã nhandeporavo raka'e, henonde rupi iky'a e'y' ha'e otekoavy e'y' va'e nhandekuai aguã" (1.3-4). Jesus re jajerovia va'e ma iky'a e'y' va'erã ojogua pyre nhandekuai, Nhanderuete pegua templo rami, ha'e Jesus rete rami guive.

Paulo ijayvu avi Nhanderuete nhanderyvu etea re. Aipoe'i: "Mba'eta jajerovia rã nhanemboaxya py ae nhandereraa jepe. Ha'e nunga ma nhandegui ae e'y' ou, Nhanderuete ome'ẽ rive. Nhande ae nhanhea'aa rupi e'y' guive ou, avave rei ojejou porã rei e'y' aguã" (2.8-9). Ha'e rami rire amboae kuery reve peteĩ rami nhandekuai aguã, Nhe'ẽ po'akaa rupi peteĩ-teĩ nhanhomombaraetea rupi ae.

Opaa py Paulo aipoe'i: "Penembaraete tema Senhor re, ipo'akaa rupi ae. Pendejee pemoĩ Nhanderuete guigua tembiporu ha'e javi, pendere anha opu'ã rã peĩ atã aguã" (6.10-11).

Oxarura reve ijayvu vy omboypyague

¹ Xee Paulo ma Nhanderuete oipotaa rami vy Cristo Jesus pegua apóstolo aiko. Kova'e kuaxia ambou Éfeso tetã py iky'a e'y' va'e ha'e Cristo Jesus pegua ojeroviapy pendekuai va'e pe:*

² Tove peẽ kuery tapendu Nhanderuete ha'e Senhor Jesus Cristo guigua penemboaxya ha'e mby'a porã.

Cristo nhandereraa jepe rã Nhanderuete nhanemoingo porãague re ijayvu

³ Tove Nhanderuete nhande-Senhor Jesus Cristo Ruete va'e re ta'ima'endu'a porãa, mba'eta Cristo re nhanemoĩ vy yva re opa mba'e porã Nhe'ẽ guigua ome'ẽ nhandevy.

⁴ Mba'eta yvy onhono e'y' mbove ma voi Cristo re nhanemoĩ vy ojeupe guarã nhandeporavo raka'e, henonde rupi iky'a e'y' ha'e otekoavy e'y' va'e nhandekuai aguã. Nhanderyvu vy

⁵ nhandeporavo ma voi va'ekue gua'y kuery ae nhanemoingo aguã. Ha'e ae oipotaa rami vy nhanemboaxy Jesus Cristo rupi,*

⁶ nhanemboaxy ramo pavẽ oguero'y' aguã. Ha'e rami nhandekuai aguã ome'ẽ rive, gua'y oayvu va'e re nhanemoĩ vy.

⁷ Hexe nhanemoĩ vy nhandejogua raka'e jajejavyague gui, mba'eta nhanemboaxy ete vy huguy py omboguipa.

⁸ Ha'e nunga Nhanderuete ombou nhandere opa marãgua 'arandu reve, jaiko kuaa aguã.

⁹ Nhandevy oikuaa uka avi ha'e ae oipotaa rami mba'emo ojapo aguã ndoikuaa ukai va'ekue. Ha'e va'e ma nhanemboaxya rupi ojapo uka 'rã Cristo pe,

¹⁰ oa'angaague ára ovaẽ rã ojapo aguã opa mba'e re Cristo ipo'aka aguã rami, yva ha'e yvy re ikuai va'e ha'e javi re.

¹¹ Cristo re nhanemoĩ vy nhandeporavo raka'e ojeupe guarã. Ha'e ae oipotaa rami vy opa mba'e omoingoague rami avi ha'e rami nhandeapo onhembopy'a ma voiague rami,

¹² ha'e rami nhandekuaia pavẽ oikuaa vy oguero'y' aguã hexakãmbaa, yma guive ore kuery Cristo roarõa rupi orekuaia re guive.*

¹³ Ha'e gui peẽ kuery voi penemoĩ avi Cristo re. Mba'eta pendereraa jepea regua ayvu porã anhetẽ va'e pendu vy hexe pejerovia ramo pendere omoĩ ikuaa ukaarã, Nhe'ẽ Ky'a E'y' ombou 'rã va'ekue ae.*

¹⁴ Mba'eta nhandere Onhe'ẽ omoĩ rire jaikuaa nhandevy guarã oguereko va'e ha'e javi jajopy 'rãa. Ojeupegua eterã nhandereraa jepea ára ome'ẽ 'rã nhandevy, hexakãmbaa oguero'y'aa pavẽ aguã.

Ojerovia va'e kuery re Paulo ojerureague

¹⁵ Ha'e nunga rupi xee voi arovy'a, omombe'ua rã aendu vy Senhor Jesus re pejeroviaa ha'e iky'a e'y' va'e kuery ha'e javi peayvua.

¹⁶ Ha'e rami vy anhembo'e nhavõ pendere xema'endu'a vy arovy'a Nhanderuete.

¹⁷ Ha'e rami vy ixupe ajerupe pendere omoive aguã pene'arandurã peikuaa ete aguã Nhanderuete nhande-Senhor Jesus Cristo Ru hexakãmba va'e.

¹⁸ Tove pendepy'a py tapenemoexakã peikuaa aguã mba'e pearõ aguã pa penerenoĩague, iky'a e'y' va'e kuery mboae reve opa mba'e porã pejopy avi va'erã,

¹⁹ ha'e opa mba'e re ipo'akaa, hexe jajerovia va'e pe oexa uka rã peikuaa avi aguã.

²⁰ Mba'eta opo'akaa oexa uka raka'e Cristo omanoague gui omboete jevy vy. Ha'e gui yva re ju omboguapy imoiny oiporu kuaa regua re,

²¹ huvixa ikuai va'e áryve oĩ aguã, joguerekoa kuery, mba'emo re ombopo'aka ha'e opena uka pyre kuery áryve, aýgua ha'e raka'eve rã ikuai va'e áryve guive.*

* 1:1 Atos 19.1-40, 20.17-35 * 1:5 Romanos 8.28-30; 1 Pedro 1.2 * 1:12 Apy ma "Ore" he'ia ma judeu kuery re ijayvu vy. * 1:13 2 Coríntios 1.21,22 * 1:21 Filipenses 2.9-11; Colossenses 2.9,10

22 Mba'eta ipy guýry opa mba'e omoĩ, ha'e opa mba'e akārã omoĩ vy igreja kuery pe ome'ẽ.*

23 Mba'eta igreja kuery ma hete.* Igreja kuery reve anho 'rã Cristo regua oĩmba, hexeve anho opa mba'e oĩmbaa rami avi.

2

Nhanemboaxy vy nhandereraa jepeague re ijayvua

1 Pendevy pe voi ome'ẽ tekove, pendeko vai ha'e pejevavya rupi vy omanogue rami pendekuai va'ekue ri.

2 Mba'eta ha'e rami anho pendekuai va'ekue yvy regua reko rami, arai guy rupi nhe'ẽ vai ipo'aka va'e, Nhanderuete onhe'ẽ rendu e'ỹ va'e kuery rerekoa va'e oipotaa rami rive.

3 Ha'e rami nhande kuery pavẽ nhandekuai va'ekue to'o oipotaa rami ha'e nhande ae nhandepy'aa rupi rive nhandekuai va'ekue. Amboae kuery rami avi japaga aguã rami nhandekuai va'ekue, ha'e rami ete nhandereko va'e vy.

4 Ha'e rã Nhanderuete opa ma mba'e py nhanemboaxy ha'e nhanderayvu ete vy omanogue rami nhanderoko vaiague py teri nhandekuai va'ekue ri nhande avi nhanemoingove ju Cristo reve, mba'eta nhanemboaxy ramo ae jaa jepe.

6 Cristo Jesus reve nhanemoingove ju vy hexe vy nhanemboguapy avi yva re,

7 raka'eve rã oexa uka aguã Cristo Jesus re vy nhanemboaxy etea ha'e nhanderayvua.

8 Mba'eta jajerovia rã nhanemboaxy py ae nhandereraa jepe. Ha'e nunga ma nhandegui ae e'ỹ ou, Nhanderuete ome'ẽ rive.

9 Nhande ae nhanhea'ãa rupi e'ỹ guive ou, avave rei ojejou porã rei e'ỹ aguã.*

10 Mba'eta nhande ma Nhanderuete rembiapo jaiko. Cristo Jesus re nhanemoingove ju iporã va'e jajapo jajovy aguã, ha'e rupi nhandekuai aguã yma ma voi omoĩ rive.

Cristo kuruxu gui judeu kuery ha'e amboae regua joegua meme ikuiaa re ijayvua

11 Ha'e nunga rupi peẽ judeu e'ỹ va'e ke penema'endu'a yma rupi pendero'o re pendekuaiague re. Pendevy pe judeu kuery "Opire omboi uka e'ỹ va'e" he'i, ha'e kuery ojeupe ma "Opire omboi uka va'e" he'i okuapy teĩ avakue po py rive omboi uka.

12 Ha'e va'e jave ma Cristo reve'ỹ pendekuai va'ekue, Israel regua e'ỹ guive. Neĩ ndapeikuuai va'ekue Nhanderuete mba'emo porã ome'ẽ aguã re ijayvu vy guexeve guarã ojapoague. Mba'eve ndaperekoĩ va'ekue pearõ aguã, mba'eta Nhanderuete revegua e'ỹ pendekuai va'ekue yvy re.*

13 Yma Nhanderuetea gui mombyry pendekuai va'ekue ri aỹ ma Cristo Jesus re vy penemohemboja ma, Cristo ruguy rupi ae.

14 Mba'eta ha'e va'e ae ma peteĩ rami nhanemoingoa, mba'eta mokoĩ regua gui peteĩ'i nhanemoingo.* Ha'e vy oity nhanembyte kora nhanemboja'oarã hi'aĩ va'ekue. Ha'e va'e ma joe nanhandea'eiague.

15 Ngo'o reve vy ombovaipa raka'e lei re ojapo uka pyre ha'e ndojapo ukai pyre oĩa. Mokoĩ regua gui peteĩ regua pyau omoingo, ojee ae nhanemoingo vy. Ha'e rami vy peteĩ rami nhanemoingo.

16 Mokoĩve regua nhandereru ju Nhanderuete re, peteĩ'i tete nhandekuai aguã. Kuruxu re omano vy oipe'apa raka'e ndajajoavyui reiaague.

17 Ha'e gui ou vy oikuaa uka peteĩ rami ju nhanemoingopa aguã, peẽ ixugui mombyry pendekuai va'ekue, ha'e'i rupi orekuai va'ekue guive.

18 Mba'eta hexe vy mokoĩve regua ha'eve Nhanderuete re nhanemboja aguã, peteĩ'i Nhe'ẽ rupi.

19 Ha'e nunga rupi amboae regua ve'ỹ, amboae guigua ve'ỹ ma pendekuai. Ha'e rami 'rãgue py iky'a e'ỹ va'e kuery reve joegua, Nhanderuete ro pygua kuery ae pendekuai.

20 Ha'e va'e oo ytarã ma apóstolo ha'e profeta kuery ranhe omoĩ raka'e, ha'e gui peẽ kuery ju penemoĩ vy ojapove heravy. Cristo Jesus ae ita omboeteve pyrã oĩ.

21 Hexe vy oo ha'e javi joo'i rami oĩ vy yvateve ovy, templo Senhor peguarã.*

22 Cristo re vy peẽ kuery voi joo'i rami penemoĩ ramo Nhanderuete Onhe'ẽ rupi oĩ atyrã pepyta.

3

Amboae regua kuery oo jepea re ijayvua

1 Ha'e nunga rupi aỹ xee Paulo ma Cristo Jesus káuxa aĩ nhuã py, peẽ judeu e'ỹ va'e kuery ayvu vy.

2 Mba'eta peẽ kuery pendu ma nhi'ã Nhanderuete xemboaxy vy xemoĩague pendevy pe ayvu amombe'u aguã.*

3 Mba'eta xevy pe oikuaa uka karamboae ndoikuaa ukai va'ekue. Ha'e va'e ma mboapy ayvu'i py pëvy amboparaague.

4 Ha'e gui ambopara va'ekue peroayvu vy peikuaa avi 'rã Cristo regua oikuaa uka e'ỹ pyre xevy pe ranhe oikuaa uka va'ekue.

5 Ymagua kuery pe ma ha'e nunga ndoikuaa ukai va'ekue. Ha'e gui aỹ ma Onhe'ẽ rupi ae oikuaa uka iky'a e'ỹ va'e apóstolo ha'e profeta kuery pe.

* 1:22 Salmo 8.6 * 1:23 Efésios 4.11-16; Romanos 12.4,5; 1 Coríntios 12.12-27 * 2:9 Romanos 3.19-24; 5.6-8; Tito 2.11-3.7 * 2:12 Colossenses 1.21,22 * 2:14 "Mokoĩ regua" he'ia py ma judeu kuery ha'e amboae regua re ijayvu vy, mba'eta Jesus pegua joegua e'ỹ-e'ỹ nhandekuai teĩ peteĩ'i regua nhanemoingo (Gálatas 3.26-28). * 2:21 1 Coríntios 3.16,17; 1 Pedro 2.4,5 * 3:2 Romanos 15.15,16; Colossenses 1.25-27

⁶ Ha'e va'e ma pova'e: peë kuery judeu regua e'y voi ore judeu kuery reve nhandevy pavê pe Nhanderuete ome'ê 'rã mba'emo porã, ha'e gui pete'i tete nhanemoingo pavê, ha'e ijayvuague jajopy pavê aguã rami nhanemoingo guive, Cristo Jesus regua ayvu porã oĩa rami vy.

⁷ Ha'e va'e momb'e'uarã ae Nhanderuete xemoi. Xemoaxya rupi xemoi opo'akaa oexa uka vy.

⁸ Xee ma iky'a e'y va'e kuery pavê gui xe'yvive va'eri Nhanderuete xemoaxy vy xemoi karamboae amboae regua kuery pe ayvu porã amombe'u aguã. Ha'e va'e oĩa rami vy opa mba'e porã jaikuaa e'y va'e regua Cristo re anho oĩ.

⁹ Xemoi karamboae amombe'ua aguã mba'emo oiko va'erã, Nhanderuete opa mba'e apoare va'e yma rupi onhembopy'aague ndoikuaa ukai teri va'ekue ojeupity rã.

¹⁰ Mba'eta aỹ gui ma igreja kuery ikuai rupi Nhanderuete ha'ekue-'ekue'i rami e'y oexa uka 'rã o'arandua. Yva pygua huvixa kuery ha'e ipo'akakueve ikuai va'e pe voi oikuaa uka 'rã,

¹¹ mba'eta jypy guive oipotaa rami ae onhembopy'a ojapo aguã Cristo Jesus nhande-Senhor rupi.

¹² Ha'e rami rire hexe vy nhandepy'a guaxu Nhanderuete re nhanhemboja aguã, mba'eta aỹ jaikuaa ete hexe jajerovia ramo nhanemboaxya.

¹³ Ha'e nunga rupi pendere vy aiko axya omombe'ua rã pendu teĩ ndaipotai pendekuerai, mba'eta pevy'ave aguã ae aiko axy.

Peteĩgue ju Paulo onhembo'eague

¹⁴ Ha'e nunga rupi Nhanderuete renonde xerenapy'ã re aĩ.

¹⁵ Hery rupi ae yva ha'e yvy re ha'e javi regua ikuai va'e omboerya.

¹⁶ Opa mba'e porã oguereko va'e vy ixupe ajerure pendepy'a re Inhe'ê oĩ va'e rupi penemombaraete aguã,

¹⁷ ha'e rami py pejerovia rã pendepy'a re Cristo oiko aguã. Ha'e gui mborayvu re penemombaraete ha'e peĩ atã vy

¹⁸ iky'a e'y va'e kuery ha'e javi reve peikuaa aguã Cristo nhandarayvua tuvixa etea, mba'eta ipy ete, ipuku, yvate ha'e yvy katy oo.

¹⁹ Ha'e rami vy peikuaa aguã nhandarayvua, ndajaikuaapai va'e teĩ, Nhanderuete re oĩ va'e ha'e javi pendere voi oĩ aguã.

²⁰ Nhanderuete ma opa mba'e py ipo'akapa va'e vy ojapo jajerurea ha'e nhaexa'ãa áryve voi, nhandere opo'akaa oĩ va'e rupi ae.

²¹ Tove igreja kuery ikuai rupi ixupe toporaeia, ha'e Cristo Jesus re vy guive, aỹ ha'e araka'e rã peve. Amém.

4

Peteĩ rami jajerovia aguã re ijayvua

¹ Senhor káuxa nhuã py aĩa py po rami xee romongeta: Nhanderuete ojeupe guarã penerenoĩ rire ha'ekue rami ae ke pendekuai.

² Pendekuai rive'i, ha'eve vai'i. Pendevai rei eme. Mborayvu re pejoguerop'aka peteĩ-teĩ.

³ Penhea'ã pembovaipa e'y aguã peteĩ rami Nhe'ê penemoingoa, jomeme pendekuai porã vy.*

⁴ Mba'eta peteĩ tete nhandekuai, peteĩ Nhe'ê oiko ha'e peteĩ guive pearõ pekuapy va'e, ha'e rami aguã penerenoĩ rire.*

⁵ Oiko peteĩ Senhor, peteĩ rami jajerovia aguã, peteĩ nhanhemongarai aguã,

⁶ peteĩ Nhanderuete nhande kuery ha'e javi Ru va'e. Ha'e ma ha'e javi re ipo'aka, ha'e javi omba'eapo, ha'e javi re oĩ.

Iky'a e'y va'e kuery mba'emo ojapo aguã re ijayvua

⁷ Ha'e rami avi nhanemboaxya rupi peteĩ-teĩ pe ome'ê nhanerembiaporã. Cristo ae ome'êxa rami ome'ê.*

⁸ Ha'e nunga rupi ipara re oĩa py "Yvate ojeupi vy heta ogueraa guembiguairã ojopy va'ekue, ha'e avakue pe ome'ê hembiaporã", he'i va'ekue.*

⁹ Ha'e gui "Ojeupi" he'ia py jaikuaa yvy guýry peve oguejy ranheague,

¹⁰ mba'eta oguejy va'ekue ae ma ojeupi ju yva ha'e javi áry, opa mba'e re oĩ aguã.

¹¹ Ha'e gui amongue pe ome'ê apóstolo ikuai aguã, amboae pe ma profeta ikuai aguã, amboae kuery pe ma ayvu porã momb'e'ua rupi ikuai aguã, amboae kuery pe ma igreja re opena, e'y vy nhombo'ea rupi ikuai aguã.

¹² Ha'e rami vy ombo'e uka porãmba iky'a e'y va'e kuery peteĩ-teĩ guembiapo ojapo kuaa aguã rami. Ha'e rami vy Cristo rete omombaraeteve aguã,

¹³ peteĩ rami meme jajerovia ha'e Nhanderuete Ra'y jaikuaa ete peve. Ha'e rami vy 'rãe kakuakue rami nhandekuai, Cristo rami ete nhandekuai peve opa mba'e py,

¹⁴ kyrígue rami ve'y nhandekuai aguã, opa marã rei nhanembo'e va'e yvytu rami nhandereraa rã ha'ekue'y-kue'y katy rive jaa e'y aguã. Mba'eta ha'e kuery ma avakue 'arandua rami rive 'rã nhanembo'e, ijayvu kuaa vy nhanembotavypa 'rã guive.

¹⁵ Ha'e rami 'rãgue py anhetê va'e rupi ha'e mborayvu re nhandekuai vy opa mba'e py nhandeyvateve 'rã javy Cristo rami ete nhandekuaia jaupity peve, mba'eta ha'e anho nhaneakã oiko.

* 4:3 Filipenses 2.1-4; Colossenses 3.12-15

* 4:4 Romanos 12.4,5; 1 Coríntios 12.12,13

* 4:7 Romanos 12.4-8; 1 Coríntios 12.4-11; 1

¹⁶ Hexe vy tete ha'e javi oimba porã 'rã, joo rami ikuai py. Peteĩ-teĩ regua joo rami meme ha'e mborayvu re nhomombaraete vy ha'e javi 'rã yvateve ovy.

Jajeko rerova aguã re ijayvua

¹⁷ Ha'e nunga rupi aipoa'e Senhor rery rupi: Pendekuaive eme amboae regua kuery reko rami, mba'eta ha'e kuery ma ipy'aa ovare e'y va'e rupi rive ikuai.

¹⁸ Ha'e kuery 'arandua ma pytũmba. Mombyry ikuai Nhanderuete reko gui, inhakã ratãa rupi ae.

¹⁹ Ha'e kuery oxĩa noendu kuaavei vy opa marã rei ikuai rupi ndojejokovei ma, ha'e rami anho ikuaixe vy.

²⁰ Ha'e rã peẽ kuery ma ha'e rami e'y peikuaa raka'e Cristo reko.

²¹ Mba'eta anhetẽ ae Jesus regua anhetẽ va'e pendu, ha'e ha'e rupi ete penembo'ea.

²² Penembo'ea pendereko ymague peja aguã re, mba'eta nhandereko ymague rupi vy nhandereko ky'ave javy nhanhemoaruãa py jajekorepa vy.

²³ Ha'e gui penembo'ea penhembopyau uka aguã pendepy'a ha'e peikuaa-a py,

²⁴ ha'e pendeko pyau py ju penhemonde aguã. Ha'e va'e ma Nhanderuete omoingo ha'e rami ete pendekuai aguã, anhetẽ guigua teko porã ha'e pendeky'a e'yã rupi.*

Nhanderuete pe ete nhandekuai aguã re ijayvua

²⁵ Ha'e nunga rupi pendeapugue peja vy peteĩ-teĩ anhetẽ rupi anho pendeayvu jomeme, mba'eta peteĩ'i tete nhandekuai.*

²⁶ Pendeavaia py teĩ pejejavu eme. Pendeavaia gui pejepe'a kuerei 'rã kuaray oike e'y re,*

²⁷ peteĩve henda py anha pe penhembotavy uka e'y aguã.

²⁸ Imonda va'ekue ta'imondave eme. Ha'e rami 'rãgue py tomba'eaipo, opo py tojapo iporã va'e, iporiaukue'i oipytyvõ aguã ojou aguã.

²⁹ Pendejuru gui toẽ eme ayvu vai, ha'e rã ayvu porã anho, peteĩ-teĩ oikotevẽa rami penhomombaraete aguã. Ha'e rami vy 'rã hendua kuery pe pendeayvua ojapo porã.

³⁰ Pemomboriau eme Nhanderuete Nhe'ẽ, mba'eta opa mba'e gui pendereraa jepe aguã ára peve guarã pendere omoĩ, ojepeguva kuery peikoa kuaa ukaarã.*

³¹ Jejepe'a ke pendeavaia reiaty gui, ha'e gui penhenhandu vaikue reia, pendepoxy reia, penhomotare'yã, pendeayvu vaikue reia ha'e opa mba'e vai gui.

³² Ha'e rami 'rãgue py joo rami meme pendekuai pejoayvu ha'e penhomboaxya rupi. Pejoperdoa ke, Cristo re vy Nhanderuete penderperdoague rami avi.

5

¹ Ha'e nunga rupi Nhanderuete rami ete ke pendekuai, ta'y kuery hembiayvu va'e vy.

² Mborayvu re pendekuai Cristo penderayvua rami, mba'eta nhandere ojejuka uka raka'e, Nhanderuete pe guekove ae ome'ẽ heakuã porã va'e ome'ẽmby rami.

Hendy va'e ha'e pytũ rupi ikuai va'e re ijayvua

³ Iky'a e'y va'e pendekuai vy nda'evei neĩ pendeayvu aguã mba'emo vai re: tavy reia, nhemboeko ky'aa, nhomba'e re pena reia, ha'e nunga re.

⁴ Nda'evei pendeayvu vaikue aguã, pene'arandua rupi e'y pendeayvu aguã, neĩ penderoryai rei aguã. Ha'e ramigua ma nda'evei va'e meme. Ha'e rami 'rãgue py perovy'a tema Nhanderuete.

⁵ Peikuaa pota ke pova'e nunga re: Cristo ha'e Nhanderuete po'akaa ojekuaa jave peteĩve ndojejokoi rei va'e mba'eve ndojopyi 'rã, neĩ onhemboeko ky'a rei va'e, nhomba'e re opena rei va'e, mba'eta ha'e ramigua ma ta'angaa ombojerovia va'e rami meme.

⁶ Avave rei pe penhembotavy uka eme ayvu ovare'y va'e py, mba'eta Nhanderuete ombopaga 'rã nonhe'ẽ rendui va'e kuery ha'e rami ikuaiague re.

⁷ Ha'e nunga rupi mba'eve pereko eme ha'e kuery reve.*

⁸ Mba'eta yma rupi, pytũ rupi pendekuai va'ekue ri aỹ ma Senhor re vy hexakã va'e peiko. Pendekuai ha'vy hendy va'e ra'y kuery rami ete,

⁹ mba'eta hendy va'e guigua ma mborayvu, teko porã ha'e anhetẽ va'e rupi nhandekuai.*

¹⁰ Peikuaa pota ha'vy Senhor pembovy'aa rupi pendekuai aguã.

¹¹ Mba'eve pereko eme pytũ rupigua mba'emo vai apoa kuery reve, mba'eta ovare'y va'e meme. Ha'e rami 'rãgue py peikuaa uka nda'evei va'ea.

¹² Mba'eta ha'e kuery nhemi rupi ojapo va'e re nhandeayvu vy voi nhaximba 'rã.

¹³ Mba'eta hendya py mba'emo jaikuaa uka ramo ojekuaapa 'rã marã ramigua ete paa. Hendya py ojekuaa va'e ma hexakã va'e meme opyta,

¹⁴ aipoe'ia rami vy: "Reke va'e, emy'ã omano va'ekue mbyte gui, ha'e gui Cristo nemoexakã 'rã."

¹⁵ Ha'e nunga rupi peiko kuaa pota. Pendekuaive eme hi'arandu e'y va'e rami, ha'e rã hi'arandu va'e rami anho.

¹⁶ Peiporu kuaa ke ára nhavõ, mba'eta ara vai meme.

¹⁷ Ha'e nunga rupi pepyta eme hi'arandu e'y va'e, va'eri peikuaa pota Senhor oipotava'e re.

* 4:24 Colossenses 3.5-10 * 4:25 Zacarias 8.16 * 4:26 Salmo 4.4 * 4:30 Gênesis 6.5,6; Salmo 78.40,41; Isaías 63.9,10 * 5:7 2 Coríntios 6.14-7.1 * 5:9 1 João 1.5-10

¹⁸ Peka'u eme guive vinho py, mba'eta opa marā rei nhanemoingo. Ha'e rami 'rāgue py pendere Nhe'ē anho toi.*

¹⁹ Ha'e rami vy jomeme pendeayvu salmos peporaei vy. Pendepy'a py Senhor pemboetea rupi peporaei hinos ha'e Nhe'ē guigua mboraei.

²⁰ Opa mba'e re Nhanderuete perovy'a riae, Senhor Jesus Cristo rery rupi.*

²¹ Peteī-teī oipotaa rami peiko Cristo pemboetea rupi.

Omenda va'e kuery reko re ijayvua

²² Ha'e rami vy kunhague ma ome oipotaa rami ta'ikuai, Senhor pe rami ete.

²³ Mba'eta ime kuery ma gua'yxy akā ikuai, igreja kuery akā Cristo oikoa rami avi, heraa jepea guive oiko. Ha'e va'e ma hete.

²⁴ Ha'e gui igreja kuery Cristo oipotaa rami ikuai rami avi kunhague voi opa mba'e py ta'ikuai ome kuery oipotaa rami.

²⁵ Peē ime kuery voi peayvu ke penda'yxy, Cristo igreja kuery oayvua rami avi, mba'eta igreja kuery re vy guekove ae ome'ē raka'e,

²⁶ Iky'a e'y' va'erā omoingo aguā yy py ojoi vy, ayvu omombe'ua reve,

²⁷ guenonde ae igreja kuery oexa uka aguā hexakāmba va'e, ipere ha'e ixorimba rei e'y' va'e, ha'e kuery re ivaikue reia, nei ha'e va'e regua oī e'y' aguā, ha'e rā iky'a e'y'a anho.

²⁸ Ha'e rami avi ime kuery ma guete ae'i rami toayvu gua'yxy. Gua'yxy oayvu va'e ma ha'e ae ojeayvu.

²⁹ Mba'eta guete ae ndoayvui va'e jipoi. Ha'e rami 'rāgue py nhamongaru ha'e nhapena 'rā nhanderete re. Ha'e rami ae avi Cristo opena igreja re,

³⁰ hete regua nhandekuai ramo.

³¹ "Ha'e nunga rupi avakue oja'ra nūgu ha'e oxy, gua'yxy reve joguereko aguā, mokoī 'rāgue py peteī'i to'o ikuai aguā", he'iague rami.*

³² Pova'e ma ndoikuaa ukai pyre iporā ete va'e, mba'eta Cristo ha'e igreja re xeayvu.

³³ Ha'e rami avi peē kuery voi peteī-teī peayvu 'rā penda'yxy peē ae pejeayvua rami, ha'e kunhague voi tomboete ome.*

6

Tuu ha'e ta'y kuery reko re ijayvua

¹ Peē ta'y ha'e taji kuery voi Senhor re vy penhe'ē rendu 'rā penderu ha'e pendexy, mba'eta ha'e rami vy 'rā ha'eva rami pendekuai,

² "Pemboete 'rā penderu ha'e pendexy", he'iague rami. Ha'e va'e ojapo uka pyre ma jypy'igua nhanemoingo porā aguā regua ayvu reve ou, po rami:

³ "Kova'e yvy re peiko porā ha'e peikove puku aguā", he'i va'ekue.*

⁴ Ha'e gui peē tuu kuery ma pembopoxy rei eme penda'y ha'e penderajy kuery. Ha'e rami 'rāgue py Senhor guigua 'arandu rupi 'rā pemo'arandu ha'e pemongeta.*

Escravo ha'e joguerekoa kuery reko re ijayvua

⁵ Ha'e gui peē escravo kuery ma penhe'ē rendu ke pendererekoa ngo'o re ikuai va'e. Pemboetea rupi pejererokyje pendepy'a ha'e javi py, Cristo pemboetea rami avi.

⁶ Nda'evei pendererekoa oexaa py rive pemba'eapo porā aguā, avakue rive pendererovy'a e'y' aguā. Ha'e rami 'rāgue py Cristo rembiguai peiko vy pendepy'a py guive pejapo Nhanderuete oipota va'e.

⁷ Penekyre'yā py pemba'eapo, Senhor pe rami, avakue pe rive'y.

⁸ Mba'eta jaikuaa iporā va'e rupi nhandekuai rire peteī-teī rekovia jajopy 'rāa Senhor po gui, escravo ha'e escravo e'y' teī.

⁹ Ha'e gui peē joguerekoa kuery voi, ha'e rami ae pereko porā penembiguai kuery. Pemongyje rei eme, mba'eta peikuaa ha'e kuery Senhor ha'e pende-Senhor yva re oikoa. Ha'e va'e ma peteī regua rive joegui oayvuvu va'e'y'.

Nhanderuete guigua tembiporu re ijayvua

¹⁰ Ha'e gui ma penembaraete tema Senhor re, ipo'akaa rupi ae.

¹¹ Pendejee pemoī Nhanderuete guigua tembiporu ha'e javi, pendere anha opu'ā rā peī atā aguā.*

¹² Mba'eta nhande kuery re avakue e'y' opu'ā, ha'e rā yva regua huvixa kuery, ipo'akakueve, ko yvy pytū guypupigua rerekoa kuery, ha'e nhe'ē vai arai guy rupigua.

¹³ Ha'e nunga rupi peraa ke Nhanderuete guigua tembiporu ha'e javi, ara vai ovaē rā peī atā aguā, ha'e gui opa pendepo'akapa ma rire pejeity uka e'y' re pene'aī aguā.

¹⁴ Ha'e gui peī atā aguā ma ku'akuaa rami pemoī 'rā anhetē va'e, ha'e teko porā voi pemoī pexo regua rami.

¹⁵ Pendepy regua rami pemoī penekyre'yā, peiko katu aguā ayvu porā Nhanderuete reve peteī rami nhanemoingoa regua pemombe'u aguā.

* 5:18 Gálatas 5.16-25 * 5:20 Colossenses 3.16,17 * 5:31 Gênesis 2.24 * 5:33 Colossenses 3.18,19; 1 Pedro 3.1-7 * 6:3 Êxodo 20.12, Deuteronômio 5.16 * 6:4 Colossenses 3.20,21 * 6:9 Colossenses 3.22-4.1; 1 Timóteo 6.1,2; Tito 2.9,10; 1 Pedro 2.18-21 * 6:11 2 Coríntios 10.3,4; 1 Tessalonicenses 5.8,9; 1 Pedro 5.8-10

¹⁶ Hu'y jokoarã pereko riae ke pejeroviaa, poromboeko vaia hu'y hendy va'e omombo rã pemboguepa aguã.

¹⁷ Ngora ratãrã ma peraa peo jepea, ha'e Nhe'ê guigua kyxe guive. Ha'e va'e ma Nhanderuete ayvu.

¹⁸ Nhanderuete pe penhembo'e pavê re, Nhe'ê re vy pejerure riae. Ha'e rami aguã peiko kuaa pota tema, peĩ atã guive iky'a e'ỹ va'e kuery ha'e javi re pejerurea py.

¹⁹ Xere voi ke pejerure, xeayvu ta rã xeayvurã ome'êa aguã, akyjea py e'ỹ amombe'u aguã ayvu porã ndoikuaa ukai pyre.

²⁰ Mba'eta ha'e rami aguã ae aĩ nhuã py, Jesus rery rupi ayvu mombe'uarã. Tove Cristo re vy akyjea py e'ỹ tamombe'u, amombe'u aguã rami ae rire.

Tíquico omondouka aguã re ijayvuague

²¹ Ha'e gui aikoa ha'e mba'emo ajapo aikovya peikuaa aguã ma xerembiayvu irmão Tíquico omombe'upa 'rã pendevy. Ha'e va'e ma Senhor pe omba'eapoa rupi ojeroviapy oiko.*

²² Ha'e rami aguã ae xee ambou aỹ, marã rami pa roikoa peikuaa aguã, peẽ voi pendepy'a guaxu aguã.

Ogueroayvu porãague

²³ Irmão kuery, tapendu mby'a porã, mborayvu ha'e pejeroviavea guive, Nhanderuete ha'e Senhor Jesus Cristo guigua meme.

²⁴ Tove nhande-Senhor Jesus Cristo oayvu ete va'e kuery ha'e javi toendu nhanemboaxya.

* 6:21 Colossenses 4.7,8

Filipos pygua kuery pe Paulo ombopara va'ekue Filipos pygua kuery pe Paulo ombopara va'ekue

Filipos tetã re ma Roma pygua huvixave opena raka'e, Macedônia yvy re oĩ, aỹ Grécia re. Ha'e pygua igreja ma Europa pygua jypy'i apóstolo Paulo omboyvy va'ekue (Atos 16.12-40).

Filipos tetã gui Paulo oo ma rire ombotya nhuã py. Ha'e gui Filipos pygua kuery nhuã py Paulo oĩa omombe'ua rã oendu vy iuxupe guarã ogueru ruka jepi oipytyvõ vy. Ha'e ramo apóstolo Paulo nhuã py oĩ reve ae kova'e kuaxia ombopara raka'e ha'e kuery pe oguerovy'a vy.

Mba'eta nhuã py Paulo oĩ va'eri nda'ikuerai, ovy'a tema oikovy, ha'e ijayvu ha'e kuery voi ovy'a avi aguã re. Aipoe'i: "Peẽ kuery re xema'endu'a nhavõ arovy'a Xerueete. Anhembo'e nhavõ peẽ kuery ha'e javive re ajerure riaa avy'a reve" (1.3-4). "Ha'e gui xapy'a rei xeruguy omoẽa 'rã Nhanderueete pe mymba ome'ẽmby rami, pejerovia peme'ẽ va'e irirã. Ha'e rami teĩ ae ma xee avy'a 'rã, ha'e peẽ kuery ha'e javi reve 'rã arovy'a. Ha'e rami rã peẽ voi ke pevy'a, ha'e xerorovy'a guive" (2.17-18). "Pevy'a riaa ke Senhor re. Peteĩgue ju aipoa'e: Pevy'a riaa ke", he'i (4.4).

Paulo ijayvu avi ha'e kuery peteĩ rami ikuai aguã. "Peẽ voi ke pendejee pemoĩ Cristo Jesus py'a re oĩ va'e ramigua, mba'eta ha'e va'e ma Nhanderueete rami ete oiko va'eri nonhea'ãi raka'e Nhanderueete rami riaa yvate aguã. Ha'e rami 'rãgue py ojegui ha'e ae yvate oipe'a vy tembigua rami ju oiko, ova ojeapo vy. Ha'e rami vy ava rami ojekuaa vy onhemo'yvy'ive ete. Ha'e vy onhe'ẽ rendu kuruxa re eteve voi ojekuka uka peve. Ha'e rami rire Nhanderueete omboyvate ju pavẽ aryve, ha'e heryrã ome'ẽ tery ikuai va'e gui yvateve va'e, Jesus rery pavẽ omboete vyi guenapy'ã re oĩ aguã, yva re, yvy re ha'e yvy gu'yry ikuai va'e guive, ha'e gui ha'e javive 'Jesus Cristo ae Senhor oiko' he'i okuapy aguã, Nhanderueete omboetea rupi," he'i (2.5-11).

Oxarura reve ijayvu vy omboyvyague

¹ Paulo ha'e Timóteo, Cristo Jesus rembiguai roiko va'e roxarura Filipos tetã py Cristo Jesus re vy iky'a e'ỹ va'e pendekuai va'e ha'e javive pe, joe opena va'e ha'e nhopytyvõa kuery pe guive.*

² Tove peẽ kuery tapendu penemboaxya ha'e mby'a porã Nhanderueete, Senhor Jesus Cristo Ru va'e guigua.

Filipos pygua kuery re oguerovy'a ha'e ojerureague

³ Peẽ kuery re xema'endu'a nhavõ arovy'a Xerueete.

⁴ Anhembo'e nhavõ peẽ kuery ha'e javive re ajerure riaa avy'a reve.

⁵ Xema'endu'a jypy'i guive aỹ peve ayvu porã mombe'ua rupi xereve penhea'ã pekuapy re.

⁶ Mba'eta xee aikuaa porã Cristo Jesus oua ára peve peẽ kuery re mba'emo porã moĩ pypare omoĩmba 'rãa.

⁷ Ha'eve peẽ kuery re xema'endu'a riaa aguã, mba'eta xepy'a re aendu roayvua. Mba'eta Nhanderueete xemboaxy vy iuxupe amba'eapo aguã xemoĩ rire peẽ kuery xepytyvõ pekuapy nhuã py aĩ rã, ha'e ayvu porã anhetẽ va'e amombe'ua rupi guive.

⁸ Nhanderueete oikuaa peẽ kuery ha'e javive roexaxea. Ha'e rami aguã ma Cristo Jesus gui ae aendu.

⁹ Po rami ajerure iuxupe: Pendere tomoive heravy mborayvu, mba'emo peikuaa porãve ha'e opa mba'e py pene'arandua reve,

¹⁰ iporã va'e anho pendejee guarã peiporavo aguã, iky'a e'ỹ va'e ha'e ojou vaipy e'ỹ pendekuai aguã Cristo ára pyguarã,

¹¹ Jesus Cristo guigua teko porã anho pexa uka rã Nhanderueete oguerovy'aa ha'e omboetea aguã.

Apóstolo Paulo re mba'emo oiko ramo hetave ayvu porã oendua re ijayvuague

¹² Ha'e gui irmão kuery, aipota peikuaa mba'emo xere oiko rire ayvu porã oenduave ague.

¹³ Mba'eta huvixave pegua jopya kuery oikuaapa Cristo káuxa nhuã py aĩa, ha'e amboae kuery ha'e javi voi.*

¹⁴ Ha'e ramo irmão kuery voi Senhor káuxa nhuã py aĩa heta oikuaa vy ipy'a guaxu vy ndokyjevei okuapy Nhanderueete ayvu omombe'u aguã.

¹⁵ Ikuai avi amongue ete'i xere ija'e e'ỹa rupi Cristo regua ayvu omombe'u va'e, xegui onhemboyvateveve vy rive. Ha'e rã amboae kuery ma anhetẽ rupi omombe'u.

¹⁶ Ha'e va'e kuery ma porayvua rupi ayvu omombe'u, mba'eta oikuaa ayvu porã mombe'uarã xemoĩague.

¹⁷ Ha'e rã amboae kuery ma onhemboyvate reixe vy rive omombe'u Cristo regua, anhetẽ rupi e'ỹ, mba'eta ha'e kuery ojapoxe nhuã py aĩa py ajexavaive aguã rami.

¹⁸ Ha'e rami teĩ xee ma ndaikuaa potai. Mba'eta anhetẽ rupi, ha'e'ỹ vy anhetẽ rupi e'ỹ teĩ Cristo omombe'u amo avy'a, ha'e avy'a tema 'rã guive.

¹⁹ Mba'eta po rami aikuaa porã: Xere pejerure ramo Jesus Cristo Nhe'ẽ xepytyvõ 'rã opa mba'e gui aa jepe aguã.

²⁰ Xee aipota ete va'e, ha'e ajeroviaa ma mba'eve py axĩmba e'ỹ aguã. Ha'e rami 'rãgue py xepy'a guaxu aguã, aiko jepiaty rami aỹ voi xee aikoa rupi Cristo omboetea aguã, aikove e'ỹ vy amano teĩ.

²¹ Mba'eta xepy pe ma aikovea Cristo pe aiko aguã, ha'e rã amano aguã ma ajoupave aguã.

²² Ha'e rami teĩ, xero'o re aikove teri reve amba'eapoa rupi iporã va'e oiko ramo xee ndaiporavo kuaai,

²³ mba'eta mokoĩ rami aendu. Mba'eta aaxe Cristo reve aiko aguã. Ha'e va'e ma opa mba'e gui ha'eveve va'e.

* 1:1 Atos 16.12-40 * 1:13 Atos 28.16,30,31; Efésios 6.19,20

²⁴ Ha'e rami avi xero'o re ranhe aikove vy 'rãe peẽ kuery roipytyvõve.

²⁵ Ha'e nunga rupi aikuaa porã peẽ kuery ha'e javi reve apytave ranhe 'rãa, pevy'a ha'e pejeroviave aguã,

²⁶ mba'eta peẽ kuerya py ju avaẽ rã xerexa vy perovy'ave 'rã Cristo Jesus.

Cristo reve vy peteĩ rami nhanhea'ã aguã re ijayvua

²⁷ Opa mba'e gui ha'eeve va'e ma Cristo regua ayvu porã omboetea aguã rami pendekuai aguã. Ha'e rami rã peẽ kuery roexa vy aa, ha'e'ỹ vy ndaai teĩ pendekuaia omombe'ua rã arendu vy aikuaa 'rã peteĩ Nhe'ẽ re peĩ atãa, ha'e peteĩ'ĩ rami penhea'ã pekuapy ayvu porã rupi jajeroviaa re,

²⁸ mba'eve py nhanderoaigua kuery gui pekyje e'ỹ re. Ha'e kuery ma ha'e rami pendekuaia oexa vy oikuaa okanhy aguã rami ikuai, ha'e rã peẽ kuery ma peikuaa Nhanderuede re vy peo jepe 'rãa.

²⁹ Mba'eta pendeivy pe ome'ẽ Cristo káuxa pendekuai axy aguã, hexe pejerovia aguã anho e'ỹ,

³⁰ mba'eta peẽ voi penhea'ã pekuapy ymave rupi pexa rã xee anhea'ãague rami, ha'e aỹ pendu rã anhea'ãa rami avi.*

2

Jajoayvu ha'e joegui nhanhemo'yvyĩ'ive aguã re ijayvua

¹ Ha'e nunga rupi Cristo re vy penembaraetea pendu vy, penderayvua py pendeivy'a guaxu, Nhe'ẽ reve peteĩ rami pendekuai, ha'e pendeprayvua rupi penhomboaxya pendu vy,

² ha'e rami vy xembovy'a ke opa mba'e py, peteĩ rami peikuaa vy, jomeme pejoayvu, peteĩ rami anho pendeivy'a, ha'e pendeivy'a py peteĩ'ĩ ramigua anho pendu vy.*

³ Mba'eve pejapo eme penhemboyvatea rupi, neĩ pejejou porã reia rupi guive. Ha'e rami 'rãgue py penhemo'yvyĩ'ĩ vy peteĩ-teĩ penhomboyvateve 'rã pendejégui.

⁴ Pemoĩ peteĩ-teĩ peẽ ae peipotaa rami rive'ỹ pendekuai aguã, ha'e rã amboae kuery oipotaa rami.

Cristo onhemo'yvyĩ'iaague rami avi nhande voi nhandekuai aguã re ijayvua

⁵ Peẽ voi pendejee pemoĩ Cristo Jesus py'a re oĩ va'e ramigua,

⁶ mba'eta ha'e va'e ma Nhanderuede rami ete oiko va'eri nonhea'ãi raka'e Nhanderuede rami riae yvate aguã.

⁷ Ha'e rami 'rãgue py ojégui ha'e ae yvatea oipe'a vy tembiguai rami ju oiko, ava ojeapo vy.* Ha'e rami vy ava rami ojekuaa vy

⁸ onhemo'yvyĩ'ive ete. Ha'e vy onhe'ẽ rendu kuruxu re eteve voi ojejuka uka peve.

⁹ Ha'e rami rire Nhanderuede ombovyate ju pavẽ áryve, ha'e heryrã ome'ẽ tery ikuai va'e gui yvateve va'e,

¹⁰ Jesus rery pavẽ omboete vy guenapy'ã re oĩ aguã, yva re, vyv re ha'e vyv guýry ikuai va'e guive,

¹¹ ha'e gui ha'e javive "Jesus Cristo ae Senhor oiko" he'i okuapy aguã, Nhanderuede omboetea rupi.*

Jaa jepea jaexa uka aguã re ijayvua

¹² Ha'e ramo xerembiaayvu kuery, peẽ kuery xenhe'ẽ rendu riae pekuapy xerexaa rupi anho e'ỹ, aỹ peẽ kuerya py naĩ jave katuve ma. Ha'e rami vy peo jepea pexa uka-ukave tema pejererokyje ha'e peryryipaa rupi,

¹³ mba'eta Nhanderuede ae pendere ojapo 'rã ha'e oipotaa rami pendekuaixe ha'e pendekuai ete aguã rami.

¹⁴ Opa mba'e pejapoa py pendeayvu rei eme, ha'e pejoguero'a rei eme guive,

¹⁵ ojou vaipy e'ỹ ha'e anhetẽ rupigua pendekuai aguã. Ha'e rami vy heko vai ha'e opa marã rei ikuai va'e mbyte pendekuaia rupi pexa uka 'rã Nhanderuede ra'ỹ kuery iky'a e'ỹ va'e peikoa. Mba'eta ha'e kuery mbyte rupi tataendy rami penerexakã peikovy kova'e yvy re,*

¹⁶ tekove regua ayvu re peĩ atã vy. Ha'e rami rire Cristo oua ára py xee roguerovy'a 'rã nanhea'ã rivei neĩ namba'eapo rivei rire.

¹⁷ Ha'e gui xapy'a rei xeruguy omoẽa 'rã Nhanderuede pe mymba ome'ẽmby rami, pejeroviaa peme'ẽ va'e irürã. Ha'e rami teĩ ae ma xee avy'a 'rã, ha'e peẽ kuery ha'e javi reve 'rã arovy'a.

¹⁸ Ha'e rami rã peẽ voi ke pevy'a, ha'e xererovy'a guive.

Paulo oirũ kuery Timóteo ha'e Epafrodito omombe'uague

¹⁹ Ha'e gui Senhor Jesus re ajerovia peẽ kuerya py ambou voi aguã Timóteo, pendekuaia aikuaa vy xee voi avy'a aguã.

²⁰ Mba'eta xeirũ mboae ndarekoi xee rami oendu va'erã anhetẽ rupi peẽ kuery re opena aguã.

²¹ Mba'eta amboae kuery ma ha'e kuery ae oipotaa rami ikuai, Cristo oipotaa rami e'ỹ.

²² Ha'e rã Timóteo ma peẽ voi peikuaa ae heko porã va'e oikoa, mba'eta ayvu porã mombe'ua rupi xerupive omba'eapo nguu pe rami.

²³ Amondouka voi aguã rami aiko, xere mba'emo oiko va'e aikuaa vyve.

²⁴ Senhor re ajerovia aikovy hare'ỹ re xee voi aju aguã.

²⁵ Ha'e rami teĩ ajou porã peẽ kuerya py ambou ranhe aguã Epafrodito. Ha'e va'e ma xe-irmão, xereve omba'eapo ha'e onhea'ã va'ety. Ha'e va'e ma peẽ kuery pemondouka avi raka'e, aiko axy rã xepytyvõ aguã.

²⁶ Ha'e ramo peẽ kuery ha'e javive penderexaxe ete oikovy, ha'e ipy'a eta rei guive, mba'eta imba'eaxy penguague ixupe omombe'ua rã oendu rire.

* 1:30 Atos 5.41; 1 Pedro 4.12,13 * 2:2 Romanos 15.5,6; Efésios 4.1-3 * 2:7 João 13.12-17; 2 Coríntios 8.9 * 2:11 Efésios 1.20-23;

²⁷ Anhetē imba'eaxy vy omano rai'i va'ekue, teĩ Nhanderuete omboaxy. Ha'e anho e'ỹ, xee voi xemboaxy avi, xeporiauve ju e'ỹ aguã.

²⁸ Ha'e nunga rupi ajapurave tema ambou aguã, pexa ju vy perovy'a aguã, ha'e xee voi ndaxeporiau vaipavei aguã.

²⁹ Ha'e ramo Senhor re vy pemovaē ke perovy'a ete reve, ha'e pemboete tema ha'e ramigua avakue ha'e javi.

³⁰ Mba'eta Cristo pe omba'eapoa rupi omano rai'i va'ekue ndojeayvuveikue py, peē kuery naxepytyvō reguavei rã xepytyvō aguã.

3

Cristo re javy'a aguã re ijayvua

¹ Ha'e gui xe-irmão kuery, pevy'a tema Senhor re. Ambopara ma voiague ramigua peteĩgue ju ambopara. Ha'e rami teĩ ndajou porã e'yi, mba'eta penemombaraeteve 'rã.*

Anhetē rupi e'ỹ nhombo'e va'e kuery gui nhanheangu aguã re ijayvua

² Penheangu ke jagua rami heko vai va'e kuery gui, mba'eta ha'eva'ya rami omba'eapo, ha'e anhetē rupi e'ỹ jopire omboi uka va'e.*

³ Ha'e rã nhande kuery ma opire omboi uka va'e ete nhandekuai, mba'eta Nhe'ẽ rupi nhamboete Nhanderuete, jarovy'a Cristo Jesus, ha'e rã to'o re ma ndajajerovia va'e.

⁴ Ha'eva' rãgue teĩ xee to'o re ajerovia aguã. Amongue va'e to'o re ojerovia aguã ha'eva' va'e rire xee katuve 'rãgue,

⁵ mba'eta oito ára arekoa py xepire omboia va'ekue, Israel ramymino aiko, Benjamim kuery regua, hebreu kuery gui xetui'i va'ekue hebreu eterã. Fariseu regua aiko vy lei rupi anhea'ã va'ekue.

⁶ Anhea'ãve ete vy igreja kuery re apu'ã rei va'ekue. Lei guigua teko porã rupi aiko ramo xejou porã pavē karamboae.

⁷ Ha'e rami teĩ mba'emo xembovarearã areko va'ekue pe ma aỹ Cristo re vy "Ovare'ỹ va'e" ha'e.

⁸ Anhetē opa mba'e pe "Ovare'ỹ va'e" ha'e aỹ, mba'eta Cristo Jesus xe-Senhor aikuaa aguã ma pavē gui iporãve va'e. Hexe vy amokanhy ha'e nungakue ha'e javi, ha'e "Omombo pyrã" ha'e guive, hekovia Cristo aupity aguã,

⁹ ha'e hexe aĩ aguã. Ha'e rami vy teko porã aupity aguã, xee ae reko porã e'ỹ, neĩ lei guigua e'ỹ guive, ha'e rã Cristo re jajerovia vy jaupity va'erã. Ha'e nunga teko porã ma jajerovia ramo Nhanderuete ome'ẽ 'rã nhandevy.*

¹⁰ Ha'e rami vy Cristo aikuaa ete aguã, ha'e omanoague gui imboete jevyare po'akaa guive. Hexeve aiko axyxave avi, omanoague py guive aikoxe ha'e rami,

¹¹ marã rami vy pa aupity avi aguã amanoague gui anhemboete ju aguã.

Yvate katy nhanerenoia re ijayvua

¹² Xee ma "Aupitypa ma" nda'ei, neĩ "Opa mba'e py xereko porã" nda'ei guive. Ha'e rami teĩ anhea'ãve tema aupity aguã Cristo Jesus ojeupe guarã xejogua vy xerenonderã omoĩ va'ekue.

¹³ Irmão kuery, xee ma "Aupitypa ma" nda'ei, teĩ peteĩ'i rupi ma anhea'ã aikovy: Mba'emo xerakykue opyta va'e gui xerexarai vy anhea'ã tema xerenonderã oi va'e re anho.*

¹⁴ Anhea'ã tema xerenonderã oi va'e re, aupity aguã iporã va'e Nhanderuete ome'ẽ va'erã. Ha'e va'e ajopy aguã ae Cristo Jesus re vy yvate katy xerenoi.

¹⁵ Jajerovia rupi nhanembaraete va'e ma ha'e rami ae 'rã jaikuaa. Ha'e gui amboae rami ri peikuaa ramo ha'e nunga avi Nhanderuete oikuaa uka 'rã pēvy.

¹⁶ Ha'e rami vy peteĩ-teĩ jaupity maague rupi tema nhandekuai.

Cristo kuruxu regua ayvu rovaigua kuery re ijayvua

¹⁷ Irmão kuery, peē avi ke xee aikoa rami tema pendekuai, ha'e ore rami ikuai va'e reko re guive peikuaa porã pota.

¹⁸ Mba'eta nhanembyte rupi heta ikuai Cristo kuruxu rovaigua kuery. Ha'e va'e kuery reko gui mbovykue rei e'ỹ xee romonheangu, ha'e aỹ xerexay reve ju xeyvu ha'e rami.

¹⁹ Ha'e kuery ma okanhy aguã rami ikuai, ombojerovia guypy ae rive, ha'e oguerovy'a ogueroxĩ 'rã va'ekue, mba'emo kova'e yvy regua re anho nda'evave vy.

²⁰ Ha'e rã nhande kuery retã ma yva re oi, ha'e nharõ jaikovy nhandereraa jepea Senhor Jesus Cristo ha'e gui ou rã guarã.

²¹ Mba'eta ou vy ombopyaupã 'rã nhanderete ikangy va'e, guete hexakãmba va'e rami avi nhanemboete jevy vy. Opo'akaa rupi 'rã ha'e rami nhanemoingo, opa mba'e re ipo'aka va'e vy.

4

¹ Ha'e nunga rupi irmão kuery xerembiayvu va'e, ha'e rami ae tema penembaraete Senhor re. Pendere xema'endu'a riae, mba'eta arovy'a va'e ha'e xembovy'arã peiko.

* 3:1 Filipenses 2.18, 4.4 * 3:2 "Jagua rami heko vai va'e" he'ia kuery ma nhombo'ea rupi "Judeu reko rami pendekuai ramo anho 'rã Nhanderuete pendereraa jepe" he'i rive va'e. * 3:9 Romanos 3.21-26; Efésios 2.8,9 * 3:13 Hebreus 12.1-3

Evódia ha'e Síntique pe ojerure, ha'e gui javy'a ha'e nhandembo'e aguã re ijayvua

² Evódia ha'e Síntique pe ajerure Senhor re vy petei rami ju oikuaa aguã.

³ Ha'e gui ndee xeirū anhetê va'e pe ma ajerure avi ha'e va'e kunhague reipytyvõ aguã, mba'eta xereve mokoive onhea'ã va'ekue ayvu porã momba'ua rupi, Clemente ha'e xepytyvõa kuery mboae reve guive. Ha'e kuery rery oĩ ma kuaxia tekove ogueroko va'e kuery rery oĩa re.

⁴ Pevy'a riae ke Senhor re. Peteigüe ju aipoa'e: Pevy'a riae ke.

⁵ Pavê pe pexa uka ha'eve vai'i peikoa. Senhor mombyry e'ÿ oĩ.

⁶ Pendepy'a eta rei eme mba'eve re. Ha'e rami 'rãgue py, opa mba'e py Nhanderue te pejerure peikotevê va'e re. Penhembo'e ha'e pejerure tema perovy'a reve.

⁷ Ha'e ramo mby'a porã opa mba'e jaikuaa va'e gui iporãve va'e rupi Nhanderue opena 'rã penekuraxõ ha'e pendepy'a re, Cristo Jesus re vy.

Nhandepy'a re mba'emo nhamoĩ aguã re ijayvua

⁸ Ha'e nunga rupi irmão kuery, pendepy'a re pemoĩ anhetê va'e ha'e javi, iporã va'e, ha'evea ramigua, iky'a e'ÿ va'e regua, nhombovy'a va'e ha'e ojou porãmby ha'e javi. Ha'e gui ojou porãmby, e'ÿ vy oguerovy'apy mboae oiko rã ha'e nunga re anho peikuaa pota.*

⁹ Ha'e gui pejapo mba'emo xegui peikuaa, pejopy, pendu ha'e pexa va'ekue ramigua. Ha'e ramo Nhanderue mby'a porã me'ëa oiko 'rã pendereve.

Filipos pygua kuery re Paulo oguerovy'aague

¹⁰ Arovy'a ete Senhor, mba'eta peteigüe ju pexa uka xepytyvõxea. Ha'e rami aguã pendu ae ma va'ekue, teĩ pexa uka aguã novaẽi teri va'ekue.

¹¹ Xevy pe mba'emo oata ramo e'ÿ ha'e rami xeayvu, mba'eta oiko va'e py rei aikuaa avy'a aguã.

¹² Aikuaa omo'yvyĩ'imby ha'e omboetevepy aiko aguã. Opa mba'e py, opa marãgua oiko va'e py avy'a kuaa, arekopaa py ha'e anhembyayia py, ajoupa py ha'e xeporiaua py.

¹³ Opa mba'e aropo'aka 'rã xemombaraetea re vy.

¹⁴ Ha'e rami avi aiko axy rã peẽ kuery ha'evea rami xemoirũ uka.

¹⁵ Filipos pygua kuery, jypy'i ayvu porã pendu jave pendeyvy Macedônia gui aa ramo jipoi raka'e igreja mboae mba'emo ome'ëa py xepytyvõ va'e, peẽ kuery anho'i e'ÿ vy. Ha'e rami peikuaa porã.

¹⁶ Mba'eta Tessalônica tetã py aĩa peve peteigüe'i e'ÿ, mokoigüe peraa uka raka'e aipota va'e oata e'ÿ aguã.

¹⁷ Ha'e rami vy "Peme'ëve ke xevy" nda'ei, mba'eta xee aipota va'e ma peẽ ae pendejeupe guarã pejoupave aguã.

¹⁸ Mba'eta xee ajopypa ma, arekopa ramo mba'eve ndoatavei, mba'emo peẽ kuerya gui Epafrodito ogueru va'ekue xepo py omboaxapa rire. Ha'e nunga ma heakuã porã va'e rami oĩ Nhanderue te pe ome'ëmby ojou porã va'erã, imbovy'aaã.

¹⁹ Ha'e nunga rupi Cristo Jesus re vy Xerue te ojou ukapa 'rã peikotevê va'e, guexakã py oguerokopa ete va'e vy.

²⁰ Nhanderue toamboetea araka'eve rã peve. Amém.

Oxarura reve opaa py ijayvuague

²¹ Pemomba'u ke axaruraa iky'a e'ÿ va'e kuery Cristo Jesus re ikuai va'e ha'e javi pe. Irmão kuery xerevegua oxarura uka pëvy.

²² Iky'a e'ÿ va'e kuery ha'e javi avi oxarura uka pëvy, César ro pygua kuery voi.

²³ Tove penhenh'ê py tapendu Senhor Jesus Cristo penemboaxya.

* 4:8 Romanos 12.1,2

Colossos pygua kuery pe Paulo ombopara va'ekue Colossos pygua kuery pe Paulo ombopara va'ekue

Colossos tetã ma Ásia yvy 'epy va'e re, aỹ Turquia py oĩ. Ha'e pygua igreja re opena va'ety ma Epafra hery va'e. Ha'e gui Paulo ma nhuã py oĩ reve omombe'ua rã oendu ha'e py ha'ev'e'ya rami nhombo'ea kuery ova'ëague. Ha'e rami vy kova'e kuaxia ombopara ha'e pygua kuery omombaraete ha'e ombo'e porãve aguã.

Jy py ma ijayvu Jesus Cristo pavê gui yvatevea re. Aipoe'i: "Ha'e ma Nhanderueete jaexa e'ỹ va'e rami ete oiko, temimoingo ha'e javi renondegua guive. Mba'eta hexe vy omoingo raka'e yva ha'e yvy re ikuai va'e ha'e javi, jaexa va'e ha'e jaexa e'ỹ va'e guive, ha'e gui huvixa kuery, yvatekueve, imbaratekueve ha'e ipo'akakueve va'e teĩ. Opa mba'e Jesus rupi ae omoingo raka'e, ha'e ixupe guarã meme ikuai. Opa mba'e oiko e'ỹ mbove oiko ae ma guive, ha'e hexe vy opa mba'e oĩmba porã. Igreja nhandekuai va'e ma hete, ha'e rã ha'e ma nhaneakã. Jy py'igua oiko, omanoague gui ha'e ranhe onhemboete ju va'ekue, pavê gui yvateve va'e oiko aguã opa mba'e py" (1.15-18). "Mba'eta hexe ae oĩ 'arandu ha'e oikuaa pyrã ndoikuaa ukai va'ekue ha'e javi. Ha'e rami xeayvu avave rei pe penhembotavy uka e'ỹ aguã, ijayvu porã merami rive va'e kuery pe" (2.3-4).

Paulo ijayvu avi jajojou vai e'ỹ aguã, ha'e rami 'rãgue py aipoe'i: "Pendejee pemoĩ penhomboaxy aguã, pendeprayvu, penhemo'yvy'i, ivai rei e'ỹ va'e ha'e ivai rive-rive'ỹ va'e pendekuai aguã. Pejogueropo'aka peteĩ-teĩ, ha'e pendeapo vaia rã pejoperdoa guive. Senhor penderperdoague rami avi peẽ voi pejoperdoa 'rã" (3.12b-13).

Oxarura reve ijayvu vy omboygyague

¹ Xee Paulo ma Nhanderueete oipotaa rami vy Jesus Cristo pegua apóstolo aiko. Irmão Timóteo reve ² roxarura peẽ irmão kuery Colossos py pendekuai va'e pe. Iky'a e'ỹ va'e peiko, ha'e Cristo re pejerovia ete va'e. Tove peẽ kuery tapendu Nhanderueete penemboaxya ha'e mby'a porã.

Oguerovy'aague

³ Peẽ kuery re ronhembo'e vy roguerovy'a ria Nhanderueete nhande-Senhor Jesus Cristo Ru va'e, ⁴ mba'eta omombe'ua rã roendu Cristo Jesus re pejerovia, ha'e iky'a e'ỹ va'e kuery ha'e javi peayvu pekuapya.

⁵ Ha'e rami pendekuai pearõ vy yva re pende vy guarã omoĩ porã mbyre. Ha'e nunga ma yma voi pendu va'ekue ayvu porã anhetê va'e

⁶ peẽ kuery rupi omombe'ua rã. Yvy jave re heta-etave ayvu porã oguerovia vy ojoke rerovaa. Peẽ kuery voi ayvu anhetê va'e Nhanderueete nhanemboaxya regua pendu vy peikuaa ára guive ha'e rami ae avi pendekuai,

⁷ Epafra penembo'e ramo. Ha'e va'e ma orerembia yvu, ore reve Cristo rembiguai avi oiko, ha'e peẽ kuery pytyvõa rupi Cristo pe omba'eapo va'e ojeroviapy.

⁸ Ha'e va'e ma orey ju omombe'u Nhe'ẽ reve vy mborayvu re pendekuaia.

Colossos pygua kuery re Paulo ojerureague

⁹ Ha'e rami pendekuaia roendu guive ndoropytu'ui peẽ kuery re ronhembo'ea gui. Rojerure Nhanderueete oipota va'e peikuaa porã ete aguã, opa mba'e py Nhe'ẽ gui pene'arandu ha'e peikuaapa aguã guive.

¹⁰ Ha'e rami vy Senhor pegua ete pendekuai aguã, opa mba'e py pembovy'a, joupe pejapo porã, ha'e Nhanderueete peikuaa porãve peovy aguã.

¹¹ Ajerure avi opa mba'e py penemombaraete aguã opo'akaa hexakãmba va'e py, opa mba'e py peĩ atã ha'e peropo'akapa aguã rami, ha'e gui pevy'a reve

¹² Penderu perovy'a aguã opa mba'e py, mba'eta ha'e ae penemoingo hexakã py iky'a e'ỹ va'e kuery peguarã peupity avi aguã rami.

Cristo reko ha'e mba'emo ojapo va'e iporã etea re ijayvua

¹³ Mba'eta nhandereraa jepe raka'e pytũ po'akaa gui, ha'e Gua'y oayvu va'e po'akaa py ju nhanderuru.

¹⁴ Mba'eta hexe vy ae jaupity jaa jepe aguã, jajejavyague omboguepa ramo.

¹⁵ Ha'e ma Nhanderueete jaexa e'ỹ va'e rami ete oiko, temimoingo ha'e javi renondegua guive.

¹⁶ Mba'eta hexe vy omoingo raka'e yva ha'e yvy re ikuai va'e ha'e javi, jaexa va'e ha'e jaexa e'ỹ va'e guive, ha'e gui huvixa kuery, yvatekueve, imbaratekueve ha'e ipo'akakueve va'e teĩ. Opa mba'e Jesus rupi ae omoingo raka'e, ha'e ixupe guarã meme ikuai.

¹⁷ Opa mba'e oiko e'ỹ mbove oiko ae ma guive, ha'e hexe vy opa mba'e oĩmba porã.*

¹⁸ Igreja nhandekuai va'e ma hete, ha'e rã ha'e ma nhaneakã. Jy py'igua oiko, omanoague gui ha'e ranhe onhemboete ju va'ekue, pavê gui yvateve va'e oiko aguã opa mba'e py.

¹⁹ Mba'eta Nhanderueete oipotaa rami vy ojapo guexegua ha'e javi Cristo re avi oĩmba aguã.

²⁰ Ha'e gui kuruxu re huguy omoẽ uka vy peteĩ rami ju guexeve nhanemoingo, Cristo rupi opa mba'e ogueru ju aguã ojee, yvy ha'e yva re ikuai va'e ha'e javi.

* 1:17 João 1.1-5, 10-14; Hebreus 1.1-14

²¹ Peẽ kuery voi ojee pendereru, ymave rupi teco vai rupi anho pendekuai vy pendepy'a py hexevegua e'ÿ, hovaigua pendekuai va'ekue ri.*

²² Ha'e gui aÿ ma pendereru ju ojee, Cristo guete ha'e ng'o'o reve omanoa py, guenonde penderexa uka aguã iky'a e'ÿ va'e, jejavya oĩa e'ÿ va'e, ha'e ojou vaipy e'ÿ.

²³ Pejeroviaa re peĩ atã ri ha'e rami 'rã pendekuai, pendepy'apy guive penembaraete reve, ha'e ayvu porã regua pearõa gui ndapejepe'ai vy. Ha'e va'e ayvu pendu va'ekue ma yva guÿry ikuai va'e ha'e javi pe omombe'ua. Xee Paulo voi imombe'uarã xemoia.

Ayvu porã oikuaa uka pyre re Paulo ijayvuague

²⁴ Aÿ peẽ kuery re vy aiko axya rupi avy'a, mba'eta xero'o re aiko axyve Cristo oiko axyague rami. Hete re vy aiko axy. Ha'e va'e ma igreja.

²⁵ Mba'eta Nhanderuete xemoĩ karamboae igreja kuery rembiguairã, peẽ kuerya rupi voi Nhanderuete ayvu amombe'upa aguã.

²⁶ Ha'e va'e ayvu ma ndoikuaa ukai va'ekue ymave rupi ikuai va'e pe. Ha'e rã aÿ ma iky'a e'ÿ va'e kuery pe oikuaa uka.

²⁷ Mba'eta nhande kuery pe Nhanderuete oipotaa rami vy po rami oikuaa uka: peẽ judeu e'ÿ va'e kuery peguarã voi oguereko iporã ete va'e ndoikuaa ukai va'ekue, peẽ kuery re voi Cristo oĩ aguã.* Ha'e rami rã peẽ voi peãrõ pekuapy hexakã ojekuaa rã guarã.

²⁸ Cristo regua ae romombe'u. Romongeta pavẽ, ha'e 'arandua ha'e javi rupi rombo'e guive, henonde ha'e javive roexa uka aguã Cristo re vy opa mba'e py ojerovia porã va'e.

²⁹ Ha'e rami aguã ae xee amba'eapo, anhea'ã ete aikovy, ipo'akaa xere oĩ va'e xemombaraete rã.

2

Colossos pygua kuery oipytyvõxea re Paulo ijayvuague

¹ Mba'eta aipota peikuaa peẽ kuery re vy anhea'ã ete aikovya, Laodicía re ikuai va'e ha'e xerexa e'ÿ teri va'e ha'e javi re vy guive.

² Ha'e rami rã pendepy'a py penembaraete ha'e mborayvu re peteĩ rami pendekuai aguã, peikuaa porãmba aguã Nhanderuete guigua ndoikuaa ukai va'ekue. Ha'e va'e ma Cristo.

³ Mba'eta hexe ae oĩ 'arandu ha'e oikuaa pyrã ndoikuaa ukai va'ekue ha'e javi.

⁴ Ha'e rami xeayvu avave rei pe penhembotavy uka e'ÿ aguã, ijayvu porã merami rive va'e kuery pe.

⁵ Mba'eta aÿ peẽ kuerya py xerete re ndaikoi teĩ xenhe'ẽ re aiko ae peẽ kuery reve. Ha'e rami vy roguerovy'a pendekuai porã ha'e Cristo re pejerovia etea omombe'ua rã aendu vy.

Ha'e kuery ojeroviaa re imbaraete aguã re Paulo ijayvuague

⁶ Ha'e gui Senhor Jesus Cristo pemovaẽague rami avi hexe tema pendekuai.

⁷ Hexe vy peĩ atã yvyra hapo porã va'e, ha'e oo omboyta porã mbyre rami avi. Pejeroviaa re penembaraete penembo'eague rami, ha'e perovy'a riaeve tema Nhanderuete.

Ha'eve'ÿa rami nhombo'ea, ha'e Cristo reko re ijayvua

⁸ Penheangu ke avave rei pe penhembotavy uka e'ÿ aguã ijayvu kuaa ha'e ijayvu porã meramia py. Ha'e rami ijayvu va'e ma mba'emo ko yvy regua re rive penembo'e, avakue oikuaa rami rive, Cristo gui e'ÿ.

⁹ Mba'eta hexe anho oĩ Nhanderuete py'a re oĩ va'e ha'e javi, hete re ae.

¹⁰ Ha'e hexe vy pendere voi Nhanderuete omoĩ ha'e nunga ha'e javi, mba'eta Cristo ma yvatekueve ha'e ipo'akakueve ha'e javi áryvegua oiko.

¹¹ Hexe vy opire omboi uka va'ekue ramigua avi peiko, teĩ avakue opo py ojapoa rami e'ÿ. Pendegui omboi pyre ma to'o oipotaa. Ha'e nunga ae Cristo omboi nhandegui.

¹² Mba'eta penhemongaraia py penenhono porã avi raka'e hexeve. Penhemongaraia rupi penemboete ju avi, mba'eta Cristo omanoague gui Nhanderuete omboete ju va'ekue po'akaa re peẽ voi pejerovia.

¹³ Mba'eta peẽ kuery voi omanogve pendekuai va'ekue pejejavya rupi, to'o guigua napemboi kuaai vy. Ha'e rami teĩ pendevy pe voi tekove ome'ẽ avi Cristo reve.* Mba'eta jajapo vaiaque omboguepa raka'e

¹⁴ ipara japaga aguã oiague ombovaipa vy. Ha'e nunga ma nhanembopagaarã oĩ va'ekue, ojapo uka pyre nhanderovai oĩ va'ekue. Ha'e nunga ma oipe'apa raka'e, kuruxu re ombokaravo avi vy.

¹⁵ Ha'e gui oipe'a avi yvatekueve ha'e ipo'aka va'e kuery po'akaa, ha'e pavẽ pe oikuaa uka mba'everã ndovareia. Kuruxu re oĩ vy ipo'aka raka'e ha'e kuery ha'e javi re.

Mba'emo nhamboetea Cristo 'ã rami rive oikoa re ijayvua

¹⁶ Ha'e rami rive avave rei toikuaa pota rei eme mba'emo pe'u ha'e pey'ua re, neĩ ngaru oikoa ára, jaxy pyau, e'ÿ vy sábado ára napemboeteia re,

¹⁷ mba'eta ha'e nunga ha'e javi ma ou oiny va'e 'ã ramigua rive. Ha'e rã ou va'e ete ma Cristo.*

¹⁸ Avave rei pe pejekore uka eme pendevy guarã omoĩ porã mbyre re, mba'eta onhemo'yvy'i merami rive va'e ikuai, ha'e anjo kuery ombojeroviaa rupi guive. Ha'e kuery ma mba'emo oexa ra'uague gui rive oikuaa, ha'e ojee rive ojeroviaa reve to'o oipotaa rami anho ipy'a va'e.

¹⁹ Ha'e kuery ojepe'a ma igreja kuery Akã gui. Mba'eta hexe vy tete nhandekuai va'e ha'e javi oiko porã ha'e oĩmba porã, mba'eta Nhanderuete ae ojapo iku'ea ha'e hexegua ikuai va'e yvateve ovy aguã rami.

* 1:21 Efésios 2.11-22 * 1:27 Efésios 3.1-6 * 2:13 Efésios 2.1-7 * 2:17 Gálatas 4.8-11

Avakue reko rupi rive nhandekuai vy jajejavya gui ndajajekoi 'rãa re ijayvua

²⁰ Cristo reve ko vyv regua 'arandua pe pemano ma avi rire, mba'e re tu ha'vy ko vyv regua rami teri pendekuai ha'e kuery oipotaa rami?

²¹ Mba'eta po rami ijayvu: "Pejopy eme ha'e nunga", "Pe'u eme ha'e nunga", ha'e "Pepoko eme ha'e nunga re" he'i.

²² Ha'e ramigua ma avakue ojapo uka va'e ha'e nhombo'ea rive. Ha'e ramigua rupi nhandekuaia ma opa va'erã meme.*

²³ Ha'e ramigua ojapo uka pyre re ma 'arandua oĩ merami teĩ, mba'eta nhandejegui ae nhambojerovia kuaa aguã, nhandemo'yvyĩ'i merami rive, ha'e nhanderete jareko axy aguã re ijayvu. Ha'e rami teĩ peteive henda py ndovarei to'o oipotaa jajoko aguã.

3

Cristo reve hexakãa py jajekuaa avi 'rãa re ijayvua

¹ Ha'e nunga rupi Cristo reve penhemboete ju avi rire penhea'ã yvate, Nhanderueete oiporu kuaa regua re Cristo oguapy oinya py mba'emo oĩ va'e re.

² Pendepy'a re pemoĩ yvate guigua, apy vyv regua rive e'ỹ.

³ Mba'eta pemano ma, ha'e ramo penderekove pyau ma Nhanderueeta py oĩ, Cristo reve ndojekuaai teri va'e.*

⁴ Ha'e gui Cristo nhanderekove reruarã ojekuaa ramo peẽ voi peĩ avi 'rã hexeve, hexakãa py.

Cristo reve nhandekuai vy teko vai jaipe'apa aguã re ijayvua

⁵ Ha'e nunga rupi pemomba ke pendereko ko vyv regua oĩ teri va'e: tavy reia, nhemongy'apa reia, opa marã pendekuaixea, moaruã reia ha'e peipotapa reia. Ha'e nunga ma ta'angaa pembojerovia rami.

⁶ Ha'e rami ae [onhe'ẽ rendu e'ỹ va'e kuery ikuai ramo ha'e kuery áry] ou 'rã Nhanderueete poxya.

⁷ Peẽ kuery voi ha'e rami pendekuai va'ekue ymave rupi, ha'e kuery reko rupi ae.

⁸ Ha'e rã aỹ ma pendejegui pemboi ke ha'ekue ramigua ha'e javi: pendevaia, pendepoxy reia, pejoapo vai reia, joe pendeayvu reia ha'e ha'eve'ỹ rei va'e rupi pendeayvua.

⁹ Pendeapuve eme joupe, mba'eta pendereko yma guare pemboia ma,

¹⁰ ha'e teko pyau ju pendejee pemoĩ rire. Mba'eta teko pyau moingoare ma penembopyauve avi 'rã heravy opa mba'e oikuaa kuaa py, ojee rami ete penemoingo aguã.

¹¹ Ha'e ramia py jipovei grego neĩ judeu regua, opire omboi uka va'ekue neĩ opire omboi uka e'ỹ va'e, amboae ramigua neĩ nhanderegua e'ỹ va'e, escravo neĩ escravo e'ỹ va'e. Ha'e rã Cristo anho jaikuaa, nhande ha'e javive re oĩ guive.*

Teko porã rupi nhandekuai aguã re ijayvua

¹² Ha'e nunga rupi iky'a e'ỹ va'e ha'e guembiayvurã Nhanderueete pendeporavo rire ke pendejee pemoĩ penhomboaxy aguã, pendeporayvu, penhemo'yvyĩ'i, ivai rei e'ỹ va'e ha'e ivai rive-rive'ỹ va'e pendekuai aguã.

¹³ Pejogueropo'aka peteĩ-teĩ, ha'e pendeapo vaia rã pejoperdoa guive. Senhor pendeporavaague rami avi peẽ voi pejoperdoa 'rã.

¹⁴ Ha'e nunga ha'e javi áryve pemoĩ mborayvu, opa mba'e py nhandemoingo porãarã.

¹⁵ Tove Cristo peteĩ rami nhandemoingoa tapenderereko pendepy'a py, mba'eta ha'e rami aguã ae penerenoĩ, peteĩ'i tete pendekuai aguã. Ha'e Nhanderueete perovy'aa rupi guive pendekuai.

¹⁶ Tove Cristo ayvu peẽ kuery re toĩ opa mba'e py penemoingo porãarã. Penhombo'e ha'e penhomongeta 'arandua ha'e javi rupi. Nhanderueete pe peporaẽ salmos, hinos ha'e Nhe'ẽ guigua mboraei, pendepy'a py perovy'a reve.

¹⁷ Ha'e gui pendeayvua py, e'ỹ vyv mba'emo pejapoa py, Senhor Jesus rery rupi meme pejapo, hery rupi Nhanderueete perovy'a reve.*

Oo pygua kuery reko re ijayvua

¹⁸ Ta'yxy kuery, pendekuai peneme oipotaa rupi, mba'eta Senhor re vy ha'e rami aguã ha'eve.

¹⁹ Ime kuery, peayvu pendera'yxy, ha'e pereko eme pendevai rei reve.

²⁰ Ta'y kuery, penhe'ẽ rendu penderu ha'e pendexy opa mba'e py, mba'eta ha'e rami rã Senhor voi pendererovy'a 'rã.

²¹ Tuu kuery, pembopoxy rei eme pendera'y ha'e penderajy kuery, ha'e kuery ikueraĩ rei e'ỹ aguã.*

²² Tembiguaĩ kuery, opa mba'e py penhe'ẽ rendu pendererekoa ko vyv regua. Ha'e kuery oexaa py anho e'ỹ pemba'eapo porã, avakue pe ojejou porã ukaxe va'e rami rive. Ha'e rami 'rãgue py Senhor renonde pejererokyjea rupi peteĩ rupi anho pendekuai pendepy'a py.

²³ Opa mba'e pejapoa py pendepy'a ha'e javi py pejapo Senhor pe ae, avakue pe'ỹ,

²⁴ mba'eta peikuaa Senhor gui pejopy 'rãa hekovia omoĩ porã va'ekue. Senhor Jesus Cristo pe ae pemba'eapo.

²⁵ Ha'e rã heko vai va'e ma mba'emo vai anho 'rã ojopy, mba'eta Nhanduete oikuaa potaa py peteĩ regua rive ndoayvuvei joegui.

4

¹ Joguerekoa kuery, pepena porã ke penerembiguai kuery re. Ha'evea rami pereko, mba'eta peikuaa pendererekoa Senhor avi oikoa yva re.

“Pejureru orere, ha'e 'arandu rupi pendekuai”, he'iaque

² Peĩ atã tema pejerurea py, peiko kuaa pota ha'e perovy'a reve.

³ Ha'e rami nhavõ orere guive pejerure, peteĩ okẽ Nhanduete oipe'a aguã, Cristo regua ayvu ndoikuaa ukaai teria rupi romombe'u aguã. Ha'e rami aikoa re ae aĩ nhuã py.

⁴ Pejureru amombe'u porãve aguã re, xevy ojapo ukaague rami ae.

⁵ 'Arandu rupi pendekuai nhande revegua e'ỹ va'e kuerya rupi. Peiporu kuaa ke ára nhavõ.*

⁶ Pendeayvu porã kuaa riae ke, juky py anho he'ẽ porã va'e rami, peteĩ-teĩ pe pembovai kuaa aguã.

Tíquico ha'e Onésimo ombou aguã re ijayvuague

⁷ Ha'e gui xere mba'emo oiko va'ekue ma irmão Tíquico omombe'upa 'rã pëvy. Ha'e va'e ma xerembiayvu ha'e ojeroviapy, xereve Senhor pe omba'eapo va'ety.*

⁸ Pëa py ambou, orere oiko va'ekue omombe'u ramo pendepy'a guaxu aguã.

⁹ Hupive amoundouka avi 'rã irmão Onésimo, ojeroviapy ha'e nhanerembiayvu, peẽ kuerya pygua ae. Ha'e va'e kuery ma omombe'upa 'rã orea py oiko va'ekue.

Opa py oxaruraague

¹⁰ Peẽ kuery pe oxarura uka va'e ma nhuã py xereve oĩ va'e Aristarco, ha'e Barnabé ryvy Marcos guive. (Ha'e va'e reko ma pëvy omombe'ua ae ma. Peẽ kuerya py ha'e ovaẽ rã ke pemovaẽ.)

¹¹ Jesus Justo 'epy va'e voi oxarura uka pëvy. Ha'e va'e kuery anho ikuai judeu regua xereve Nhanduete po'akaa amombe'ua rupi omba'eapo va'e, xembopy'a guaxu va'e meme.

¹² Ha'e gui peẽ kuery regua, Cristo Jesus rembiguai Epafras voi oxarura uka avi pëvy. Ha'e va'e ma onhea'ã ete oikovy peẽ kuery re ojerurea py, opa mba'e py pendekuai porã ha'e Nhanduete oipota va'e peikuaapa porã aguã.

¹³ Ha'e va'e ma peẽ kuery re nda'evei oiko, Laodicéia ha'e Hierápolis pygua kuery re guive.

¹⁴ Peẽ kuery pe oxarura uka avi xerembiayvu poropoanoa Lucas, ha'e gui Demas.

¹⁵ Pexarura ke irmão kuery Laodicéia py ikuai va'e pe, Ninfa ha'e hoo py igreja kuery onhemboaty va'e pe guive.

¹⁶ Kova'e kuaxia para ma peẽ kuerya py peroayvu ma rire Laodicéia katy ju pemoundouka, ha'e pygua igreja kuery voi ogueroayvu aguã. Ha'e gui kuaxia para Laodicéia pegua voi peẽ kuerya py ju peru peroayvu aguã.*

¹⁷ Arquipo pe aipopeje: “Enhea'ã tema nerembiaporã Senhor ome'ẽ va'ekue rupi, rejapopa peve.”

Oxarura reve ogueroayvu porãague

¹⁸ Xee Paulo xepo py ae ambopara pëvy axaruraa. Penema'endu'a ke nhuã py aĩ rã xere pejerure aguã. Tove peẽ kuery tapendu Nhanduete penemboaxya.

* 4:5 Efésios 5.15,16; 1 Pedro 3.13-17 * 4:7 Efésios 6.21,22 * 4:16 Colossenses 2.1

Tessalônica pygua kuery pe jypy'i Paulo ombopara va'ekue Tessalônica pygua kuery pe jypy'i Paulo ombopara va'ekue

Tessalônica tetã ma aÿ Grécia vvy re oĩ. Ha'e va'e pygua igreja apóstolo Paulo omboypy va'ekue (Atos 17.1-10). Ha'e pygua kuery Jesus remimbo'e ikuai va'e re amboae kuery opu'ã rei teĩ ojeroviave tema Jesus re.

Ha'e nunga omombe'ua rã Paulo oendu vy kova'e kuaxia ombopara Tessalônica pygua kuery ombopy'a guaxu aguã. Oguerovy'a reve jayvu ha'e kuery ojeroviaa py oĩ atã riae aguã re, mba'emo oiko teĩ. Aipoe'i: "Pevy'a riae ke. Pejerure riae tema pejepe'a e'ÿ re. Opa mba'e py perovy'a Nhanderuete. Ha'e rami ae oipota pendekuai Cristo Jesus re vvy" (5.16-18). Omombe'u porãve guive Jesus remimbo'e kuery omano teĩ onhemboete jevy aguã, Jesus ou jevy jave.

Oxarura reve ijayvu vy omboypyague

¹ Xee Paulo ma Silvano ha'e Timóteo reve roxarura peẽ kuery Tessalônica tetã py Nhanderuete ha'e Senhor Jesus Cristo pegua igreja pendekuai va'e pe. Tove peẽ kuery tapendu penemboaxya ha'e mby'a porã.

Tessalônica pygua igreja kuery re oguerovy'aague

² Peẽ kuery ha'e javive re roguerovy'a riae Nhanderuete, ronhembo'e nhavõ orema'endu'a pendere. Nhanderuete renonde orema'endu'a riae avi

³ pejeroviaa rupi pemba'eapoa re, pejoayvua rupi penhea'ãa, ha'e nhande-Senhor Jesus Cristo ou jevy rã guarã pearõ pekuapy py peĩ atãa re.

⁴ Ha'e rami vy irmão kuery Nhanderuete rembiayvu pendekuai va'e, roikuaa pendeporavoague.

⁵ Mba'eta pendea py ayvu porã romombe'u ramo ayvu anho e'ÿ ombou raka'e, ombou avi opo'akaa, Nhe'ẽ Ky'a E'ÿ ha'e anhetẽ va'e peikuaa porã aguã. Mba'eta peikuaa ma penembyte rupi orekuaiague, roayvua rupi.

⁶ Ha'e rami vy ore orekuai rami avi peẽ voi pendekuai raka'e, Senhor rami ete. Ha'e rami vy ayvu pendu vy pevy'a pekuapy Nhe'ẽ Ky'a E'ÿ gui, opa mba'e py pejexavai teĩ.

⁷ Ha'e rami py ojerovia va'e kuery Macedônia ha'e Acaia pygua ikuai va'e ha'e javi pe pexa uka pekuapy teko porã.

⁸ Ha'e rami rã peẽ kuerya gui Senhor ayvu onhendu opa rupi. Macedônia ha'e Acaia rupi anho e'ÿ, opa rupi oendua Nhanderuete re pejeroviaa pekuapy. Ha'e rami rive ore romombe'u porãve e'ÿ teĩ ha'eve.

⁹ Mba'eta ha'e kuery ae omombe'u peẽ kuerya py orekuai jave guare. Mba'eta Nhanderuete re pejeko rerova vy mba'emo ra'angaa pembojeroviaa gui pejepe'apa raka'e, Nhanderuete oikove ha'e anhetẽ va'e pe anho pendekuai aguã,

¹⁰ ha'e pearõ pekuapy aguã ta'y Jesus omanogue mbyte gui omboete va'ekue yva gui ou jevy rã guarã. Ha'e va'e ma nhandereraa jepe 'rã poxya ou oiny va'e gui.

2

Tessalônica py Paulo kuery ayvu porã omombe'ua rupi ikuai jave guare re ijayvuague

¹ Mba'eta irmão kuery, peikuaa porã peẽ kuerya py orekuaiague ndovare e'ÿia.

² Jypy Filipos tetã py ranhe oremoingo axy ha'e orejojai rei teĩ Nhanderuete re rojerovia vy peẽ kuery pe ju romombe'u ayvu porã, orere opu'ã reia teĩ. Ha'e nungakue peẽ kuery peikuaapa.

³ Mba'eta ore ma ronhombotavya rupi e'ÿ ronhomongeta, orereko ky'aa rupi e'ÿ, neĩ rojokore reia rupi e'ÿ guive oreayvu.

⁴ Mba'eta Nhanderuete anhetẽ rupi orekuai oikuaa vy oremoĩ ayvu porã momba'uarã. Ha'e ramo ha'e rami ae oreayvu, avakue rive orejou porã aguã e'ÿ, ha'e rã Nhanderuete nhandepy'a re oĩ va'e re oikuaa pota va'e anho.*

⁵ Mba'eta anhetẽ neĩ peteĩgueve ndoreayvui rojejou porã ukaa rupi rive, neĩ mba'emo rojopyxea rupi e'ÿ guive, peẽ voi peikuaa, Nhanderuete oikuaa avi.

⁶ Ndorekuai guive avakue orererovy'aa rupi, peẽ kuery, neĩ amboae kuery.

⁷ Cristo remimbou roiko vy ha'eve 'rãgue teĩ pëvy ronhemongaru uka aguã. Ha'e rami 'rãgue py penembyte rupi mborayvu rupi orekuai, kunha omemby kuery oayvua rami.

⁸ Roayvu ete vy Nhanderuete guigua ayvu porã anho e'ÿ ha'eve pendevy romboaxa aguã, ore ae rekove voi, orerembiayvu ete peiko ramo.

⁹ Mba'eta irmão kuery, penema'endu'a romba'eapoa rupi rojexavaiague re. Nhanderuete guigua ayvu porã romombe'ua rupi orekuai jave ara py ha'e pyávy ronhea'ã va'ekue peẽ kuery pe ronhemongaru uka e'ÿ aguã.

¹⁰ Mba'eta peẽ pejerovia va'e kuerya rupi iky'a e'ÿ va'e orekuai, heko porã va'e ha'e ojou vaipy e'ÿ guive. Peẽ kuery peikuaa, ha'e Nhanderuete voi.

¹¹ Peikuaa avi tuu gua'y kuery omongeta porã'ia rami avi peẽ kuery peteĩ-teĩ

* 2:4 2 Corintios 1.12; 4.1,2

¹² romongetaague, rombopy'a guaxu ha'e romokyre'yague guive, Nhanderuete oipotaa rami pendekuai aguã, opo'akaa ha'e guexakãa pyguarã penereno'i rire.

Tessalônica pygua kuery ojexavai teĩ ojeroviave temaa re ijayvuague

¹³ Amboae nunga re avi roguerovy'a riaa Nhanderuete, mba'eta ixuguigua ayvu romombe'u rã pendu vy pejopy raka'e avakue ayvu rami rive'y, ha'e rã Nhanderuete ayvu anhetê va'e rami ae. Ha'e va'e rupi oexa uka opo'akaa pejerovia va'e pendekuaia rupi.*

¹⁴ Ha'e rami vy irmão kuery, Cristo Jesus re vy peê voi pendekuai Judéia pygua igreja kuery Nhanderuete pe ikuai rami. Mba'eta judeu kuery po py ha'e kuery ikuai axyague rami avi peê voi pendekuai axy raka'e peneretã pygua kuery po py.

¹⁵ Judeu kuery ma Senhor Jesus ha'e profeta kuery ojuka rire ore kuery ju orembojexavai rei. Nhanderuete oguerovy'aa rupi e'y ikuai, ha'e avakue pavê re opu'ã rei okuapy guive.

¹⁶ Mba'eta amboae regua kuery pe ayvu romombe'u ta ramo ha'e kuery orejoko karamboae, amboae regua oo jepe e'y aguã. Ha'e rami ojevavyvave ovy rire ha'e kuery áry poxya ou ae ma.

Tessalônica pygua kuery Paulo oexaxea re ijayvuague

¹⁷ Irmão kuery, ore ma xapy'a rai'i orepe'aa karamboae peê kuerya gui mombyry, ha'e rã orekuraxõ py ma peêa gui mombyry e'y orekuai. Ha'e rami vy ronhea'ã ete roexa ju vy roo aguã.*

¹⁸ Ha'e nunga rupi peê kuerya py rojuxe jepi teĩ. Xee Paulo ri jepe, peteĩgue'i anho e'y, mokoĩgue ma aaxe. Ha'e rami teĩ Satanás orejoko.

¹⁹ Mba'eta mava'e tu roarõ ha'e orembovy'a va'e ikuai? Nhande-Senhor Jesus ou rã mava'e kuery tu coroa roguerovy'a va'e 'rã ikuai henonde, peê e'y vy?

²⁰ Tá, peê kuery ae rojou porã ha'e roguerovy'a va'e pendekuai.

3

Ha'e kuerya py oirũ Timóteo ombou jave guare re Paulo ijayvuague

¹ Ha'e nunga rupi peê kuery re nda'eveia ndorogueropo'akavei vy ronhembopy'a karamboae Atenas py ore ae'i ropyta,

² ha'e vy pendea katy romondouka aguã irmão Timóteo.* Ha'e va'e ma Nhanderuete rembiguai ha'e Cristo regua ayvu porã mombe'ua oiko. Penemombaraete ha'e penembopy'a guaxu aguã rombou karamboae pejeroviave aguã,

³ pendekuai axy teĩ mava'eve rei pejepe'a e'y aguã. Mba'eta peê voi peikuaa jajexavai aguã rami nhandekuaia.

⁴ Mba'eta peê kuerya py teri orekuai reve aiporo'e ae ma nhandekuai axy 'rãa. Ha'e ramo ha'ekue rami ae oiko, peê peikuaa rami.

⁵ Ha'e nunga rupi xee nda'evevei vy ambou Timóteo pejerovia teri paa aikuaa aguã, mba'eta akyje poromoangekoa penemoangeko ramo peêa py romba'epoague mba'everã ndovarei va'e opyta gui.

⁶ Ha'e gui aỹ ma peê kuerya py Timóteo ou ju vy omombe'u pejerovia riaea, pendeporavy ha'e oreere penema'endu'a riaea guive. Omombe'u avi orerexaxe pekuapya, ore roexaxea rami avi.

⁷ Anhetê irmão kuery, peê kuery pejerovia riaea roikuaa vy orepy'a porã ju, opa mba'e py orekuai axy ha'e rojexavai teĩ.

⁸ Aỹ ma Senhor re vy penembaraete riaea roendu vy orepy'a porã ju.

⁹ Mba'exa nda'u ha'eve Nhanderuete roguerovy'a aguã pendere? Mba'eta opa mba'e py peê kuery re rovy'a Nhanderuete renonde.

¹⁰ Ara py ha'e pyávy rojerure orepy'a ha'e javi py roexa ju aguã, pejeroviave aguã re norombo'epai teri va'ekue re rombo'eve ju aguã.

Tessalônica pygua kuery re Paulo ojerureague

¹¹ Ha'e nunga rupi tove Nhanderuete ha'e nhande-Senhor Jesus torembou peê kuerya py.

¹² Senhor tojapo avi penembaraeteve ha'e pejoayvuve aguã rami jomeme ha'e pavê reve, peê kuery roayvua rami avi.

¹³ Ha'e rami vy pendepy'a py penembaraeteve aguã, Nhanderuete renonde iky'a e'y va'e ha'e ojou vaipy e'y pendekuai aguã, nhande-Senhor Jesus ojeuepuga iky'a e'y va'e kuery reve ou rã guarã.

4

Iky'a e'y va'e nhandekuai aguã re ijayvua

¹ Aỹ ma irmão kuery, Senhor Jesus re vy rojerure ha'e romongeta oreayvua pendu va'ekue rupi pendekuaive tema aguã, Nhanderuete pendererovy'a aguã rami. Pendekuaia rami ae tema pejapove peovy.

² Mba'eta peikuaa porã ae ma Senhor Jesus ayvu re rombo'eague.

³ Po rami ae Nhanderuete oipota: iky'a e'y va'e pendekuai, pendetavy rei eme,

⁴ ha'e peteĩ-teĩ pereko kuaa penderete regua, iky'a e'y va'e ha'e omboetepy pendekuai aguã,

⁵ amboae regua kuery Nhanderuete ndoikuaai va'e itavy reixea rupi ikuai rami e'y.

* 2:13 Atos 17.1-9 * 2:17 Atos 17.10-13 * 3:2 Atos 17.14,15, 18.5

⁶ Ha'e nunga py avave rei petekoavy eme, neĩ pekore eme pende-irmão, mba'eta Senhor nhombopaga 'rã ha'e nunga ha'e javi re. Ha'e nunga re oreayvu ha'e romombe'u porã ae ma.

⁷ Mba'eta Nhanderuete ma nhanhemongy'apa rei aguã e'ỹ nhanerenoĩ, ha'e rã iky'a e'ỹ va'e nhandekuai aguã.*

⁸ Ha'e nunga rupi ha'e va'e ayvu noenduxeĩ va'e ma avakue ayvu rive'ỹ noenduxeĩ, ha'e rã Nhanderuete pendeivy Nhe'ẽ Ky'a E'ỹ ome'ẽ va'ekue ayvu ae.

Irmão kuery jayvu aguã re ijayvua

⁹ Irmão kuery peayvu aguã re ambopara e'ỹ teĩ ha'eve, mba'eta Nhanderuete ae penembo'e peteĩ-teĩ pejoayvu aguã re.

¹⁰ Anhetẽ peayvu ae ma Macedônia py irmão kuery ikuai va'e ha'e javi. Ha'e rami teĩ irmão kuery, ajerure mborayvu re pendekuaive tema aguã.

¹¹ Penhea'ã ke pendekuai porãa rupi, peikuaa pota pendereko re ae, ha'e pempa'eapo pendepo py, aiporo'eague rami ae.

¹² Ha'e rami vy 'rã nhanderevegua e'ỹ kuery voi penemboete, ha'e mba'eve ndoatai pëvy.*

Senhor oua ára ixupegua kuery omano va'ekue onhemboete ju aguã re ijayvua

¹³ Irmão kuery, roipota peikuaa avi Cristo pegua oke va'ekue reko, ha'e kuery re pendeporiau riae e'ỹ aguã, amboae kuery mba'eve noarõi va'e rami e'ỹ.

¹⁴ Mba'eta jarovia Jesus omanoague gui onhemboete jevyague. Ha'ekue rami avi ixupegua kuery oke ma va'ekue voi Nhanderuete ogueru rukapa ju 'rã Jesus pe.

¹⁵ Mba'eta Senhor ayvu rupi romombe'u porãve ju: Senhor ou peve nhande jaikove teri va'e ma nhande ranhe e'ỹ 'rã hexeve nhaĩ oke va'e kuery gui.

¹⁶ Mba'eta Senhor ijayvu atã reve oguejy 'rã yva gui, anjo yvateve va'e ayvu ha'e Nhanderuete mimby guaxu onhendu reve. Ha'e gui Cristo pegua omano va'ekue ranhe 'rã onhemboete.

¹⁷ Ha'e gui ma nhande jaikove teri va'e ju ha'e kuery reve nhandereraapaa avi 'rã arai rupi, Senhor nhaovaexĩ aguã yvate. Ha'e rami vy Senhor reve riae 'rã nhandekuai.

¹⁸ Ha'e va'e ayvu py penhombopy'a guaxu ke peteĩ-teĩ.*

5

Senhor ou xapy'a 'rãa re ijayvua

¹ Irmão kuery, ha'e va'e ára ha'e araka'e paa amombe'u porã ve'ỹ teĩ ha'eve,

² mba'eta peikuaa ae Senhor ára ou xapy'a 'rãa, imonda va'e pyávy oua rami.

³ Amboae kuery "Javy'a tema, mba'eve rei ndoikoĩ 'rã" he'i okuapy jave ou xapy'a 'rã imombaará, imemby ta va'e haxy oendua rami. Ha'e rami vy ndoo jepei 'rã.*

Nhama'ena aguã re ijayvua

⁴ Ha'e rã irmão kuery, peẽ ma pytũ rupi e'ỹ pendekuai, ha'e va'e ára penemondyiarã e'ỹ ovaẽ aguã imonda va'e rami.

⁵ Nhande ma ára pygua hendy va'e ra'y meme. Pyavygua e'ỹ, pytũ guy rupigua e'ỹ nhandekuai.

⁶ Ha'e rami vy nda'evei amboae kuery rami jake aguã. Ha'e rami 'rãgue py nhama'ena tema 'rã jaiko kuaa pota reve.*

⁷ Mba'eta oke va'e kuery ma pyávy 'rã oke, oka'u va'e voi oka'u 'rã okuapy pyávy.

⁸ Ha'e rã nhande ma ara pygua vy jaiko kuaa pota 'rã. Nhandejee pexo reguarã nhamoĩ 'rã jajerovia aguã ha'e mborayvu. Ngora ratārã ma nhamoĩ 'rã nhandereraa jepea nharõ jaikovya.

⁹ Mba'eta Nhanderuete ipoxy rã guarã e'ỹ nhanemoingo, ha'e rã jaupity aguã nhande-Senhor Jesus Cristo nhandereraa jepe aguã.

¹⁰ Mba'eta nhande omano raka'e, nharõ jaikovy e'ỹ vy jake ma teĩ hexeve nhandekuai aguã.

¹¹ Ha'e nunga rupi penhombopy'a guaxu ha'e penhomombaraete peteĩ-teĩ, pejapoa rami ae.

Mba'exa pa nhandekuai aguã re ijayvua

¹² Aỹ ma irmão kuery, rojerure pemboete aguã penembyte rupi omba'eapo va'e kuery, Senhor re vy penderereko ha'e penemongeta rã.

¹³ Senhor pe omba'eapo ramo peayvu ha'e pemboyvate guive.* Pendekuai porã ke jomeme.

¹⁴ Ha'e gui irmão kuery, oreayvu avi po rami: pemongeta ke nhonhe'ẽ rendu e'ỹ va'e, na'ikyre'ỹi va'e ma pembopy'a porã, ha'e rã ikangy va'e ma pemombaraete. Pavẽ reve pendekuai peteĩ rami.

¹⁵ Peja eme avave rei ojepey-jepey aguã. Ha'e rami 'rãgue py iporã va'e rupi meme pendekuai jomeme ha'e pavẽ reve.

¹⁶ Pevy'a riae ke.

¹⁷ Pejerure riae tema pejepe'a e'ỹ re.

¹⁸ Opa mba'e py perovy'a Nhanderuete. Ha'e rami ae oipota pendekuai Cristo Jesus re vy.

¹⁹ Pejoko eme Nhe'ẽ.

* 4:7 Romanos 13.11-14; Efésios 5.3-14 * 4:12 2 Tessalonicenses 3.6-13 * 4:18 Mateus 24.29-31; 1 Coríntios 15.51-58 * 5:3 Mateus 24.36-25.13; 2 Pedro 3.10-13 * 5:6 Lucas 12.35-48 * 5:13 1 Timóteo 5.17-19

²⁰ Pembrovare e'ÿ eme profeta kuery ijayvu rã.

²¹ Peikuaa pota opa mba'e re. Pendejee pemõ ha'eve va'e,

²² ha'e rã ha'eve'ÿa ramigua ha'e javi gui ma pejepe'a.

Apóstolo ojerureague

²³ Tove Nhanderuete nhanemoingo porãa va'e tapendeky'a'o opa mba'e py. Tove topena penenhe'ẽ, peikovea ha'e penderete re, pete'i rupi iky'a e'ÿ va'e pendekuai aguã nhande-Senhor Jesus Cristo ou jevy rã guarã.

²⁴ Penerenoĩare ma ojeroviapy vy ojapo 'rãe ha'e rami.

Oxarura reve opaa py ogueroayvu porãague

²⁵ Irmão kuery, pejerure ke orere.

²⁶ Pexarura irmão kuery ha'e javi pe iky'a e'ÿ va'e kuery joayvua rami.

²⁷ Senhor rery rupi ajerure kova'e kuaxia irmão kuery ha'e javi pe ogueroayvua aguã.

²⁸ Tove peẽ kuery tapendu nhande-Senhor Jesus Cristo penemboaxya.

Tessalônica pygua kuery pe mokoïguea Paulo ombopara va'ekue Tessalônica pygua kuery pe mokoïguea Paulo ombopara va'ekue

Kova'e kuaxia mokoïguea ma Tessalônica tetã pygua Jesus remimbo'e kuery pe apóstolo Paulo ombopara va'ekue. Kuaxia jypy ombopara va'ekue ha'e kuery oexa teĩ ndoikuai rei teri okuapy Senhor Jesus ou jevy aguã ára. Ha'e kuery va'e regua amongue "Ha'e va'e ára ovaẽ ma", he'i, ha'e rã amboae kuery ma "Any va'eri ha'e va'e ára ovaẽ rai'i ma ramo aỹ gui ma nanhamba'eapovei "rã" he'i okuapy, ndoikuai rei vy.

Ha'e nunga rupi kova'e kuaxia ju apóstolo Paulo ombopara omombe'u porãve aguã Senhor ou jevy rã guarã. Aipoe'i: "Avave rei pe penhembotavy uka eme, mba'eta heta ojepe'a ma ramo mae ma 'rã hi'ára ovaẽ, ha'e ava heko vai ete va'e nhomokanhya ra'y ojekuaa ma ramo" (2.3). Paulo omombaraetea rupi guive ijayvu Jesus re ojeroviave aguã.

Oxarura reve ijayvu vy omboypyague

¹ Xee Paulo ma Silvano ha'e Timóteo reve roxarura Tessalônica py Nhanderuete ha'e Senhor Jesus Cristo pegua igreja kuery pendekuai va'e pe.

² Tove peẽ kuery tapendu penemboaxya ha'e mby'a porã Nhanderuete ha'e Senhor Jesus Cristo guigua.

Tessalônica pygua kuery re oguero vy'aague

³ Irmão kuery, peẽ kuery re roguero vy'a riae Nhanderuete. Ha'evea rami guive roguero vy'a, mba'eta opa mba'e py pejeroviave, ha'e petei-teĩ pejoayvuve peovy.

⁴ Ha'e rami rã Nhanderuete pegua igreja kuery ikuai rupi orema'endu'a porã peẽ kuery re, mba'eta roikuai pejeroviaa py peĩ atãa, opa mba'e py pendekuai axy ha'e pejexavai teĩ.

⁵ Ha'e rami pendekuai ramo pavẽ oikuaa Nhanderuete ha'evea rami joguerekoa. Ha'e gui pende vy pe Nhanderuete "Xepo'akaa pyguarã roiporavo" he'i 'rã, ikáuxa ae pendekuai axy ramo.

⁶ Mba'eta anhetẽ ha'evea rami Nhanderuete omoingo axy 'rã penemoingo axyare kuery,

⁷ ha'e rã aỹ pendekuai axy va'e ma penemombytu'u avi 'rã orereve, yva gui Senhor Jesus opo'akaa oexa uka vy ojekuaa jave, ojepegua anjo kuery reve.

⁸ Ha'e rami vy tata py ombopagapa 'rã Nhanderuete ndoikuaxei ha'e Senhor Jesus regua ayvu porã rupi nda'ikuaxei va'ekue.

⁹ Ha'e kuery ikuai axy riae 'rã Senhor renonde ha'e ipo'akaa rexakãa gui mombyry oi pe'aague py.

¹⁰ Ha'e va'e ára Jesus ou rã iky'a e'ỹ va'e kuery omboete 'rã, hexe ojerovia va'e ha'e javi 'rã oguero vy'a okuapy, peẽ kuery voi, mba'eta ayvu porã romombe'u rã perovia avi re.

¹¹ Ha'e nunga rupi ropytu'u e'ỹ re rojerure pendere, Nhanderuete ojeupe guarã ete penemoingo aguã, penerenoïague rami ae. Tove opo'akaa rupi tomoingo joupe pejapo porãxea, ha'e pejeroviaa rupi mba'emo pejapoxea ha'e javi guive.

¹² Ha'e rami rã peẽ kuery pendekuaia re Senhor Jesus Cristo rery omboetea aguã, ha'e hexe penemboetea avi aguã, Nhanderuete ha'e Senhor Jesus Cristo penemboaxya oexa uka rire.

2

Senhor ou ju aguã, ha'e ava heko vai ete va'e re ijayvua

¹ Ha'e gui irmão kuery, xeyvu ta nhande-Senhor Jesus Cristo ou jevy ramo oĩa py nhano'õmba aguã re. Ha'e rami rã guarã romongeta.

² Xapy'a rei amongue ijayvu vy "Senhor ára ovaẽ ma" he'i rã pendu teĩ penhemondy eme, neĩ pepẽxa rei eme guive, "Nhe'ẽ guigua ayvu aendu" ea teĩ, ha'e'ỹ vy "Paulo kuery kuaxia para ombopara vy omombe'u" 'ea rã pendu teĩ ae ma.

³ Avave rei pe penhembotavy uka eme, mba'eta heta ojepe'a ma ramo mae 'rã hi'ára ovaẽ, ha'e ava heko vai ete va'e nhomokanhya ra'y ojekuaa ma ramo.

⁴ Ha'e va'e ma ivai ete reve opu'ã 'rã "Nhanderuete" 'epy va'e ha'e javi rovai, mba'emo ombojeroviapy ikuai va'e re. Ha'e rami vy Nhanderuete ramigua rive onhemoingo vy ixupegua henda iky'a e'ỹ va'e ropy ae 'rã oguapy.*

⁵ Napenema'endu'ai teve pendea py teri aiko vy amombe'u jepiague re?

⁶ Ha'e gui aỹ peikuai avi mba'e pa ijokoarã oĩa, hi'ára py mae ma ojekuaa aguã.

Ava heko vai ete va'e rekorã re ijayvua

⁷ Ha'e rami avi aỹ guive voi heko vaia nhemi rupi ojapo oiny mba'emo. Ha'e rami teĩ ndojekuaa porã rei teri, ijokoarã oĩ va'e oi pe'aa e'ỹa ja.

⁸ Ha'e gui mae ma 'rã heko vai ete va'e ojekuaa. Ha'e va'e ma Senhor Jesus ou vy ojuka 'rã ojuru py oi peju rive. Opo'akaa oexa ukay py omokanh vyvoi 'rã.

⁹ Heko vai ete va'e ma Satanãs po'akaa rupi ojekuaa vy ojapo 'rã opa marãgua hexa pyrã ha'e nhomondyipaarã, nhombotavyxe vy.

¹⁰ Opa marãgua teko vai py ombotavy 'rã okanh vy va'e kuery, ha'e kuery ojee nomoĩ rire anhetẽ va'e oendu pota aguã oo jepe aguã.*

* 2:4 1 João 2.18,19 * 2:10 Mateus 24.23-25; Apocalipse 13.1-10

¹¹ Ha'e ramo Nhanderuete ombou 'rã imbotavyarã, apu rive oguerovia aguã.

¹² Ha'e kuery ha'e javi 'rã ombopaga, anhetê va'e oguerovia 'rãgue py teko vai anho oguero'v'a rire.

Jarovy'a reve nhanembaraete aguã re ijayvua

¹³ Ha'e nunga rupi irmão kuery Senhor rembiayvu pendekuai va'e, ha'evea rami peê kuery re roguero'v'a riae Nhanderuete, mba'eta jypy'i guive pendepravo raka'e Nhe'ê pendeky'a'o, ha'e ayvu anhetê va'e re pejerovia ramo peo jepe aguã.

¹⁴ Ha'e rami aguã ae ayvu porã romombe'u rã penereno'i raka'e, nhande-Senhor Jesus Cristo rexakãa peupity aguã.*

¹⁵ Ha'e nunga rupi irmão kuery, pei atã ha'e pemoi porã oreayvu py ha'e kuaxia romboparaague py rombo'eague.

¹⁶ Ha'e nunga rupi peê kuery re rojerure nhande-Senhor Jesus Cristo ha'e Nhanderuete pe, mba'eta nhanderayvu vy nhanemboaxya rupi ome'ê mby'a guaxu marã e'y ha'e iporã ete va'e nharõ aguã.

¹⁷ Tove tapenembopy'a guaxuve ha'e tapenemombaraeteve, iporã va'e pejapo ha'e iporã va'e re pendeayvua ha'e javi py.

3

Tessalônica pygua kuery Paulo re ojerure aguã re ijayvuague

¹ Ha'e gui irmão kuery, pejerure avi orere, Senhor ayvu romombe'u rã oenduave ha'e oguero'v'aave tema aguã, peê kuerya rupi oikoa rami avi.

² Pejerure roo jepe aguã avakue heko vai ha'e porayvu e'y va'e gui, mba'eta pavê e'y ojerovia.

³ Ha'e rami tei Senhor ma ojeroviapy. Ha'e vy penemombaraete ha'e pendere opena 'rã poromboeko vaia gui.

⁴ Ha'e rami avi Senhor re vy ore rojerovia peê kuery re, mba'eta roikuaa rojapo uka va'ekue pejapopa pekuapya, ha'e pejapo riaeve 'rã guive.

⁵ Tove Senhor pendepy'a re topena ixuguigua mborayvu ha'e Cristo re pei atãa rupi pendekuai aguã rami.

Ha'evea ramigua jajapo aguã re ijayvua

⁶ Irmão kuery, Senhor Jesus Cristo rery rupi aiporo'e: Penhemoirüve eme irmão ha'eve e'yã rami rei, rombo'eague rami e'y ikuai va'e re.

⁷ Mba'eta peê ae voi peikuaa orekuaiague rami pendekuai aguã, mba'eta nei petei henda py ndoroiko vaikue rei va'ekue peê kuerya rupi,

⁸ ndorokaru rivei guive. Ha'e rami 'rãgue py romba'eapoa rupi ronhea'ã ete va'ekue. Ara py ha'e pyávy romba'eapo va'ekue avave rei pe ronhemongaru uka rive e'y aguã.

⁹ Ha'e rami avi ronhemongaru uka aguã nda'eve e'y'i tei ha'e rami ndoroikoi va'ekue ore rami avi pendekuai aguã.

¹⁰ Mba'eta pendereve teri roiko vy aiporo'eague rami: "Nomba'eapoxei va'e tokaru eme."

¹¹ Mba'eta omombe'ua rã roendu peê kuerya rupi amongue omba'eapo e'y vy ha'eve e'yã rami rei ikuai. Joeko re rive tema oikuaa pota.

¹² Ha'e rami ikuai va'e pe oreayvu, ha'e Senhor Jesus Cristo rery rupi romongeta ikuai porã'ia rupi omba'eapo vy okaru aguã ha'e kuery ae po py ojou va'ekue re.*

¹³ Ha'e rã peê irmão kuery, pejepe'a eme iporã va'e pejapoa gui.

¹⁴ Xapy'a rei kova'e kuaxia re oreayvu oi va'e amongue noendu potai 'rã. Ha'e ramo peikuaa pota porã ke ha'e kuery re. Penhemoirüve eme oximba aguã.

¹⁵ Ha'e rami tei ha'e kuery pe "Xerovaigua" peje eme, ha'e rã irmão pe rami 'rã pendeayvu.*

¹⁶ Tove Senhor nhanemoingo porãa va'e ae tapenemoingo porã opa mba'e py. Senhor toiko peê kuery ha'e javi reve.

Oxarura reve opaa py ogueroayvu porãague

¹⁷ Axaruraa ma xee Paulo po py ae ambopara. Guí rami ae xekuaa 'rã ambopara va'e nhavõ re. Guí rami ae xee ambopara xerery.

¹⁸ Tove peê kuery ha'e javi tapendu nhande-Senhor Jesus Cristo penemboaxya.

Timóteo pe jypy'i Paulo ombopara va'ekue Timóteo pe jypy'i Paulo ombopara va'ekue

Timóteo ma apóstolo Paulo irũ kunumi va'e raka'e. Paulo oirũrã ogueraa vy jypy ombo'e, ha'e gui Éfeso tetã katy omondouka, igreja ikuai va'e re opena agua.

Kova'e kuaxia ma Timóteo pe Paulo ombopara mba'eta oendu vy omombe'ua rã Cristo remimbo'e kuery mbyte ha'eve'ya rami nhombo'e va'e ikuai. Ha'e rami rã apóstolo Paulo ombopara ha'evea rami ju ombo'e vy. Aipoe'i: "Mba'eta petei'i oiko Nhanduete. Ha'e rami ae avi petei'i oiko Nhanduete reve petei rami nhanemoingoa. Ha'e va'e ma Cristo Jesus ava ojeapo va'ekue. Pavẽ reraa jepearã ojejuka uka raka'e" (2.5-6a).

Paulo omongeta igreja re opena va'e kuery. Timóteo pe guive aipoe'i: "Iporã va'e re anho enhea'ã rejeroviaa rupi. Eupity ete tekove marã e'ỹ" (6.12a).

Oxarura reve ijayvu vy omboypyague

¹ Xee Paulo ma Cristo Jesus pegua apóstolo aiko, Nhanduete nhandereraa jepea ha'e Cristo Jesus nharõ jaikovy va'e ojapo ukaague rami vy.

² Ndee Timóteo pe axarura. Rejeroviaa py xera'y ete rami reiko. Tove terendu Nhanduete ha'e nhande-Senhor Jesus Cristo guigua mborayvu, nemboaxya ha'e mby'a porã.*

Éfeso tetã py Timóteo nhombo'e ha'e nhomongetaa rupi oiko aguã re ijayvuague

³ Macedônia yvy katy aa vy aipoa'e va'ekue ndee Éfeso tetã py ranhe repyta aguã, ha'e rami vy amongue remongeta aguã, amboae rami rei nhombo'e ve'ỹ aguã,

⁴ ha'e ayvu rive ha'e ymagua kuery rery oĩa ndopa kuaai va'e re oikuaa pota ve'ỹ aguã, mba'eta ha'e nunga ojapo 'rã joo rami e'ỹ-e'ỹ oikuaa aguã rami, ojeroviaa rupi Nhanduete pe ikuai 'rãgue py.

⁵ Ha'e rami xeyvu ha'e kuery porayvu re ikuai aguã ipy'a ky'a e'ya ha'e hi'arandua rupi anho, ojerovia merami rivea rupi e'ỹ.

⁶ Mba'eta ha'e rami ikuai gui amongue ojepe'a vy okanhymba ma ovare e'ỹ va'e re rive ijayvua rupi.

⁷ Ha'e kuery ma lei re nhombo'e va'ety ramigua onhemoingo va'eri ha'e kuery ae oayvua oikuaa vy e'ỹ, neĩ mba'e nunga re pa nhombo'ea voi, oikuaapa merami teĩ.

Lei mba'erã pa ojeaague re ijayvua

⁸ Ha'e rami avi lei ma ha'evea rami amongue oiporu ramo ha'evea, jaikuaa pavẽ.

⁹ Mba'eta heko porã va'e peguarã e'ỹ lei oejaa raka'e, ha'e rã heko vai ha'e nhonhe'ẽ rendu e'ỹ va'e kuery pe, Nhanduete nomboetei ha'e ojejavypa rei va'e pe, ndojeroviai ha'e iky'a e'ỹ va'ea rupi e'ỹ ikuai va'e pe, nguu ha'e oxy ae ojuka, ha'e amboae kuery voi ojuka va'e pe,

¹⁰ heko ky'a ha'e avakue meme joe opena va'e pe, jogueraa rive va'e pe, ijapu ha'e ijayvuxe va'e pe, ha'e nhombo'e porã rupi e'ỹ ikuai va'e mboae pe lei oejaa raka'e.

¹¹ Mba'eta ayvu porã Nhanduete hexakãmba ha'e ima'endu'a porãmbi va'e xevy pe omombe'u uka va'ekue re anho oĩ nhanhomb'o'e porã aguã.*

Nhanduete omboaxyague re apóstolo Paulo ijayvuague

¹² Aroy'a ete nhande-Senhor Cristo Jesus xemombaraetea va'e, mba'eta ojeroviapy aikoa oikuaa vy xemoĩ ixupe amba'eapo aguã.

¹³ Xee ma yma hexe xeyvu vai ha'e ajoavyky rei va'ekue xevai vy. Ha'e rami ete teĩ xemboaxy, mba'eta aikuaa e'ỹ vy, ajerovia e'ỹ vy ha'e ramigua ajapo.*

¹⁴ Ha'e gui nhande-Senhor xemboaxy etea oexa uka vy omoĩ ajerovia aguã, mborayvu Cristo Jesus re oĩ va'e reve.

¹⁵ Pova'e ayvu ma ogueroviaa ha'e petei-teĩ ojee omoĩmbaa aguã ha'eve va'e: Cristo Jesus ou yvy re ojevay va'e kuery ogueraa jepe aguã. Ha'e gui xee ma pavẽ gui ajeyavyve va'ekue,

¹⁶ va'eri xemboaxy karamboae po rami aguã, xee ajeyavyve va'ekue aikoa rupi Jesus Cristo oexa uka aguã nhomboaxy etea, amboae kuery xereko oendu vy xee rami avi hexe ojerovia vy tekove marã e'ỹ oupity aguã.

¹⁷ Ha'e nunga rupi Huvixave imarã e'ỹ, omano e'ỹ ha'e jaexa e'ỹ va'e, Nhanduete petei'i oiko va'e ae toamboetea ha'e toguerovy'aa aỹ ha'e araka'e rã peve. Amém.

Iporã va'e re Timóteo onhea'ã aguã re ijayvuague

¹⁸ Xera'y Timóteo, pova'e ae aeja rejapo aguã, Nhe'ẽ gui nderekorã omombe'ua ague rami vy. Ha'e nunga re nembaraete vy enhea'ãve tema iporã va'e re.

¹⁹ Ejepe'a eme rejeroviaa gui, neĩ ndepy'a ky'a e'ya rupi reikoa gui, mba'eta amongue ma ipy'a ky'a e'ya rupi ikuai gui ojepe'a vy ha'e kuery ae ojeroviaa ombovaipa uka.

²⁰ Ha'e va'e kuery regua ma Himeneu ha'e Alexandre. Ha'e ramo Satanás po py ranhe xee amboaxa uka oguereko axy aguã, ha'e kuery ijayvu vai ve'ỹ aguã.*

* 1:2 Atos 16.1-5; 1 Corintios 4.17, 16.10,11

* 1:11 Gálatas 3.19-25

* 1:13 Atos 26.9-18

* 1:20 1 Corintios 5.4,5

2

Pavê re jajerure aguã, ha'e Nhanderuete reve peteĩ rami nhanemoingoa re ijayvua

¹ Opa mba'e gui aipotave va'e ma peẽ kuery pejerure aguã Nhanderuete pe. Penhembo'e, pejerure, perovy'a guive pavê re penema'endu'a vy,

² huvixave ha'e joe opena aguã ombopo'aka pyre ha'e javi re guive, ha'eve vai'i reve nhandekuai porã aguã, opa mba'e py Nhanderuete pe nhandekuai ha'e nhandomboetea rupi.

³ Ha'e rami pejerurea ma Nhanderuete nhandereraa jepe renonde iporã, oguerovy'a 'rã guive.

⁴ Mba'eta oipota anhetê ete va'e pavê oikuaa vy oo jepe.

⁵ Mba'eta peteĩ'i oiko Nhanderuete. Ha'e rami ae avi peteĩ'i oiko Nhanderuete reve peteĩ rami nhanemoin-goa. Ha'e va'e ma Cristo Jesus ava ojeapo va'ekue.*

⁶ Pavê reraa jepearã ojejuka uka va'ekue. Ha'e va'e ayvu ma ha'evea ára oikuaa uka.

⁷ Ha'e rami aguã ae xemoĩ karamboae ayvu mombe'uarã, apóstolo ha'e amboae regua mbo'earã, anhetê va'e re ha'e kuery ojerovia aguã. Ha'e rami xeayvua ma anhetê, xeapua e'ỹ.

Nhandeatya py marã rami pa nhandekuai aguã re ijayvua

⁸ Ha'e nunga rupi aipota avakue opa rupi ikuai va'e onhembo'e opo icy'a e'ỹ va'e oupi reve. Ivai e'ỹ re, ha'e nda'ija'e'i rei e'ỹ re tonhembo'e.

⁹ Kunhague voi ha'e rami ae avi tonhemonde ha'eve va'e py anho. Oikoaty'i rami ae toiko onhemoatyroã py. Nda'evei opa marã oje'a popê aguã, o'a re ouro ha'e ita hepyve va'e omoĩ aguã, neĩ ao hepyve va'e py onhemonde aguã.

¹⁰ Ha'e rami 'rãgue py ojee tomoĩ joupe ojapo porã aguã, kunhague Nhanderuete pegua reko rami vy.

¹¹ Kunhague ombo'ea rã tokyriri, opa mba'e py nhomboetea oexa uka aguã.

¹² Kunhague pe xee nanhembo'e ukai, neĩ ime re nambopo'aka ukai guive. Ha'e rami 'rãgue py tokyriri toiny.

¹³ Mba'eta Adão ranhe Nhanderuete omoingo rire mae ma Eva ju omoingo raka'e.

¹⁴ Ha'e gui Adão e'ỹ guive onhembotavy uka, ta'yxy ranhe onhembotavy uka vy ojejavy raka'e.

¹⁵ Ha'e rami teĩ kunhague omemby oikuavãa py ogueraa jepea nho 'rã, o'arandua rupi ojeroviaa, porayvua ha'e icy'a e'ỹ va'e ikuaiã gui ndojepe'ai vy.

3

Igreja re openaa ha'e nhopytyvõa rupi ikuai va'e reko re ijayvua

¹ Pova'e ayvu ma ogueroviaa aguã ha'eve va'e: Igreja kuery re openaa rupi oikoxe va'e ma tembiapo iporã ete va'e ojapoxe.

² Ha'e nunga rupi igreja re opena va'e ma pavê ojou porã aguã rami ta'ikuai, peteĩ'i kunha re omenda va'e, hi'arandu ha'e ojejoko kuua va'e, omboetepy, nhomovaẽ ha'e nhombo'e kuua va'e,

³ vinho oy'ua rupi e'ỹ oiko va'e, ojerovia rei e'ỹ va'e, ha'e rã ha'eve vai'i, joguero'a rei e'ỹ va'e ha'e perãta re nda'evei rei e'ỹ va'e,

⁴ ha'e ngoo pygua kuery re opena porã va'e, gua'y ha'e guajy kuery onhe'ẽ rendu ha'e omboete porã aguã rami oguereko va'e.

⁵ Mba'eta ngoo pygua kuery re ae nopena kuaai vy mba'exa 'rã tu opena Nhanderuete pegua igreja kuery re?

⁶ Joe opena va'erã ma ojeko me'ẽ ramo va'e'ỹ 'rã, ojee rive ojerovia ramo anha opagaa py ombopagaa e'ỹ aguã.

⁷ Ha'e rami 'rãgue py nhande revegua e'ỹ kuery voi omboete aguã rami oiko va'e, ojou vaia e'ỹ ha'e anha pe onhembo'a uka e'ỹ aguã.*

⁸ Ha'e rami ae avi nhopytyvõa kuery ma omboetea aguã rami 'rã ikuai, peteĩ'i rupi ijayvu va'e, vinho oy'ua rupi rei e'ỹ oiko va'e, perãta re nda'evei rei e'ỹ va'e,

⁹ ha'e ipy'a ky'a e'ỹa rupi jajerovia aguã regua oikuaa uka pyre re opena va'e.

¹⁰ Nhopytyvõarã reko re jaikuaa pota ranhe 'rã. Ha'e kuery re nda'ijayvu vaiia ramo ma ha'eve 'rã nhopytyvõa ikuai aguã.

¹¹ Ha'e rami ae avi kunhague voi omboetea aguã rami ta'ikuai. Ijayvu vaikue rei e'ỹ, oiko kuua va'e, ha'e opa mba'e py ojeroviapy ta'ikuai.

¹² Nhopytyvõa oiko va'erã ma peteĩ'i kunha re omenda va'e, ha'e gui gua'y ha'e guajy kuery, ngoo pygua kuery ha'e javi re opena kuua va'e.

¹³ Mba'eta nhopytyvõ porã va'e ma ha'evea rami nhamboete, ha'e okyjae py e'ỹ 'rã omombe'u Cristo Jesus re jajerovia aguã.

Nhanderuete pegua igreja reko omombe'u porãveague

¹⁴ Po rami ambopara ndevy, roexa aguã aa voi aguã rami aiko va'eri.

¹⁵ Ha'e rami avi ndaa voi ramo kova'e kuaxia gui reikuaa 'rã Nhanderuete ro pygua kuery marã rami pa ikuai aguã. Ha'e va'e oo ma Nhanderuete oikove va'e pegua igreja, anhetê va'e yta ha'e hendarã oĩ va'e.*

¹⁶ Mba'eta anhetê Nhanderuete pe nhandekuai aguã kuua ukua ma yvate ete:

* 2:5 João 3.36; 14.6; Atos 4.12; 1 João 5.11,12 * 3:7 Tito 1.5-9 * 3:15 Efésios 2.19-22

Ngo'o re ojekuaa va'ekue ma
 Nhe'ê ju oikuaa uka heko ky'a e'ÿa.
 Anjo kuery oexa pota,
 hexegua ma amboae regua ikuai rupi voi omombe'ua.
 Ha'e ramo hexe ojeroviaa yvy re.
 Ha'e gui hexakaa py ju heraa.

4

Opaá ára py heta ojepe'a 'rã re ijayvua

¹ Nhe'ê oikuaa uka porã avi opaá ára py nhe'ê nhombotavya ha'e anha nhombo'e rã amongue ojapyxaka vy ojepe'a 'rãa ojeroviaa gui.*

² Nhombo'e vaikue va'e kuery ma heko porã merami rive ha'e ijapu rei va'e, ipy'a ky'aa noenduvei aguã rami ha'e kuery ae ojeapo rire.

³ Ha'e kuery nanhomomenda ukai 'rã, ha'e ndo'u ukai 'rã guive amongue regua tembi'u, jajerovia ha'e anhetê va'e jaikuaa va'e jarovy'a reve ja'u aguã Nhanderuete omoingo va'eri.

⁴ Mba'eta Nhanderuete omoingo va'ekue ma ha'eve va'e meme. Jarovy'a reve jajopy vy ndaja'u e'ÿi 'rã,

⁵ Nhanderuete ayvu ha'e jarovy'aa py nda'iky'avei ramo.

Heko porã ha'e nhombo'e porãa rupi Timóteo onhea'ã aguã re ijayvuague

⁶ Ha'e nunga re irmão kuery rembo'e vy reiko 'rã Cristo Jesus rembiguai porã, jajerovia aguã regua ayvu re nembaraete ha'e nembro'e porãague rupi reiko vy.

⁷ Ha'e rã ayvu reko rei guaimigüe'i hi'arandu e'ÿ va'e omombe'u va'e nunga ma endu rive. Enhea'ã tema Nhanderuete pe ete reiko aguã re.

⁸ Mba'eta jauga kuaa aguã re nhanhembo'ea ma xapy'a'i guarã rive ovare. Ha'e rã Nhanderuete pe jaikoa ma opa mba'e py ovare, mba'eta tekove ome'ê aÿ ha'e araka'e rã peve guarã.

⁹ Pova'e ayvu ma pavê ojerovia ha'e ojee omoï aguã ha'eve va'e.

¹⁰ Ha'e va'e rupi nhanhea'ã 'rã guive opa mba'e py, Nhanderuete oikove va'e pavê reraa jepea va'e re jajerovia rire. Jajerovia va'e katuve ma nhandereraa jepe.

¹¹ Ejapo uka ha'e enhombo'e ke ha'e nunga re.

¹² Nekunumi teri va'eri eiko eme avave rei nembojaru rei aguã rami. Ha'e rami 'rãgue py ndee rami ojerovia va'e kuery ikuai aguã rami eiko, ndeayvu py, ndereko porãa, ndeporayvua, rejeroviaa ha'e ndereko ky'a e'ÿa py guive.*

¹³ Xee aju e'ÿa ja eiko kuaxia reroayvua rupi pavê pe, renhomongetaa ha'e renhombo'ea rupi.

¹⁴ Ejapo e'ÿ eme nerembiaporã ome'ê mbyre. Ha'e rami aguã ae Nhe'ê oikuaa uka raka'e, igreja re opena va'e kuery ndeaptye re opo omoï jave.

¹⁵ Eikuaa pota ke ha'e nunga re, ejapo porã pota guive, pavê oikuaa aguã rejapo porãve reovya.

¹⁶ Eikuaa pota ke ndee ae reko re, renhombo'ea re guive. Enhea'ã tema ha'e nunga re, mba'eta ha'e rami vy 'rã rejapo ndee ae reo jepe aguã rami, ha'e ndeayvu re ojapyxaka va'e kuery guive.

5

Petei-tei regua omongeta kuaa aguã re ijayvua

¹ Ndeayvu vaipa eme tujakueve pe. Ha'e rami 'rãgue py nderu rami emongeta. Kunumigüe pe ma nderyvy pe rami 'rã ndeayvu,

² guaimigüe pe ma ndexy pe rami, ha'e kunhataigüe pe nereindy pe rami 'rã ndeayvu, ndereko ky'a e'ÿa rupi.

Imeve'ÿ va'e kuery oipytyvô aguã re ijayvua

³ Eipytyvô uka imeve'ÿ va'e kuery, imeve'ÿ va'e ete ri ikuai ramo.*

⁴ Ha'e rã omemby, e'ÿ vy guemiarirô kuery oguereko ramo topena pota ngoo pygua re, oxy e'ÿ vy ojaryi openaague rekovia. Mba'eta ha'e rami ikuai ramo Nhanderuete oguero'vy'a 'rã.

⁵ Ha'e rã imeve'ÿ ete va'e, ipytyvôarã ndoguerekoi va'e kuery ma Nhanderuete gui anho 'rã oarô oikovy mba'emo. Ara py ha'e pyávy ojerure ha'e onhembo'ea rupi 'rã ikuai.

⁶ Ha'e rã ndojejoko kuaai va'e ma oikove merami tei omanogue ikuai.

⁷ Ha'e rami ae emongeta ha'e kuery, ojou vaipy ikuai e'ÿ aguã.

⁸ Ha'e rã guetarã ha'e ngoo pygua kuery re nopenai va'e ma ojeroviaa rupi ve'ÿ ikuai, ojerovia e'ÿ va'e kuery gui nda'eveve.

⁹ Imeve'ÿ va'e kuery sessenta ma'etÿ ma oguereko ramo mae ma 'rã remoï uka hery. Petei'i re omenda va'ekue rery anho 'rã remoï uka,

¹⁰ ojapo porãague oikuaa pavê va'e, omemby kuery omongakuaapa ma va'ekue, nhomovã porã va'ety, ha'e iky'a e'ÿ va'e kuery py ojoi va'ety, iporiaukue'i oipytyvô va'ety, ha'e ojapo porãa rupi onhea'ã va'ekue.

¹¹ Ha'e rã imeve'ÿ va'e ipyaukueve rery ma emoï uka eme. Mba'eta ha'e kuery ma Cristo pe anho ndoikoxevei vy oendu 'rã omenda jevyxea.

* 4:1 Mateus 24.10-13; 2 Timóteo 3.1-5; 2 Pedro 2.1-3; Judas 3-21 * 4:12 2 Timóteo 1.6-8; Tito 2.1-8 * 5:3 Tiago 1.27

¹² Ha'e rami jypy ouraague omboaxa rive vy opaga aguã rami 'rã ikuai.

¹³ Omboopy 'rã guive inhate'ỹ aguã, petei-tei oo rupi ikuai vy. Inhate'ỹ vy anho e'ỹ, ijavyu katu vai ete 'rã, ha'e joeko re oikuaa pota rei 'rã ha'eve'ỹ va'e re ijavyu vy.

¹⁴ Ha'e nunga rupi aipota ipyaukueve omenda, omemby oguereko, ha'e ngoo re opena porã aguã. Ha'e ramo 'rãe nhanderoivaigua ndojoui nhandere ijavyu rei aguã.

¹⁵ Mba'eta amongue ma Satanás re ova vy anhetê ojepe'a ma ojeroviaa gui.

¹⁶ Ha'e gui ojerovia va'e kuery guetarã imeve'ỹ va'e oguereko ri vy toipytyvõ. Nda'evei igreja pygua kuery pe oipytyvõ uka aguã, igreja kuery ma imeve'ỹ ete va'e anho oipytyvõ aguã.

Igreja re opena va'e kuery mba'emo ojapo aguã re ijavyu

¹⁷ Igreja re opena porã va'e kuery ma mba'emo onganave tei ha'eve, mba'eta ayvu momba'ua rupi ha'e nhombo'ea rupi onhea'ã va'e vy.

¹⁸ Mba'eta ipara re oia rami: "Vaka mba'emo ra'ỹi ojykya rupi omba'eapo ramo nda'evei ijuru pejokua aguã." Oĩ avi: "Omba'eapo va'e ha'eve ojopy aguã omba'eapogue repy", he'iaague rami.*

¹⁹ Ha'e gui igreja re opena va'e re ayvua ramo ejapyxaka eme, mokoĩ e'ỹ vy mboapy gui rendu e'ỹ vy.

²⁰ Xapy'a rei ojejavu ramo pavê oendua py 'rã remongeta, amboae kuery voi ojererokyje aguã.

²¹ Nhanderuete, Cristo Jesus ha'e anjo kuery oiporavo va'ekue renonde aipoa'e ndevy: Ha'e va'e ayvu rami eiko rejepe'a e'ỹ re. Mba'eve ejapo eme joe gui petei reayvuvea rupi.

²² Avave apyte re ndepo emoi eme heko re reikuaa pota porã e'ỹ re, amboae kuery ojevavya py renhemongy'a e'ỹ aguã. Eiko kuaa pota ke ndee ae ndereko ky'a e'ỹ aguã.

²³ Nda'evei yy anho riae rey'u aguã, ey'u avi kyri'i vinho ndepy'a raxya ha'e namba'eaxya rendu jepi vy.

²⁴ Amongue ojevavya oikuaapaa voi 'rã, ombopagaa aguã py ovaê e'ỹ mbove ma voi. Ha'e rã amboae kuery ojevavyague ma raka'eve ramo mae 'rã ojekuaa.

²⁵ Ha'e rami ae avi ha'evea rami nhandekuaia voi ojekuaa voi 'rã. Ha'e rami e'ỹ va'ekue voi ndojekuaa e'ỹ riaei 'rã.

6

Escravo ha'e herekoa kuery reko re ijavyu

¹ Ha'e gui escravo kuery jopo'aka guýry ikuai va'e ma opa mba'e py tomboete guerekoa, Nhanderuete rery ha'e nhanembo'ea re ijavyu vaia e'ỹ aguã.*

² Ha'e gui herekoa ma irmão ojerovia avi va'e ramo tomboete e'ỹ eme. Ha'e rami 'rãgue py tomba'eapo porãve tema ixupe, mba'eta ojerovia va'e vy hembiaiyvu oiko, ha'e ixupe omba'eapo porã ramo mba'emo ojouve 'rã. Embo'e, ha'e ejapo uka ha'e nunga.

Amboae rami rei nhombo'e ha'e peráta re nda'evei va'e re ijavyu

³ Ha'e gui amongue amboae rami rei 'rã nhombo'e, nhande-Senhor Jesus Cristo regua ayvu porã rami e'ỹ, Nhanderuete pe jaiko aguã regua rami e'ỹ.

⁴ Ha'e va'e kuery ma ojee ae rive ojerovia vy ndoikuaai mba'eve. Ha'e rami vy joo rami e'ỹ-e'ỹ 'rã ijavyuxe rei, ha'e ayvu py rive juguero'a rei 'rã. Ha'e nunga gui oiko 'rã joe ija'e'ỹ va'e, nhomoangeko rei va'e, joe ijavyu rei va'e, oexa'ã vaikue rei va'e,

⁵ ha'e joo rami e'ỹ-e'ỹ ijavyu ndopa kuaai va'e guive. Hi'arandu ve'ỹ ramo ha'e kuery re noĩvei anhetê va'e, oĩ va'e ma Nhanderuete pe merami rive oikoa rupi mba'emo ojoupave aguã.

⁶ Ha'e rami avi anhetê Nhanderuete pe jaiko vy opa mba'e porã 'rã jajou, javy'a 'rã guive.

⁷ Mba'eta mba'eve ndajarui ko yvy re, ha'e apy gui jaa vy mba'eve ndajaraai 'rã guive.

⁸ Ja'u va'erã ha'e nhandemonde aguã jareko vy ma tajavy'a.

⁹ Ha'e rã opa mba'e ojouxu va'e ma anha omoangeko rã onhembo'a uka 'rã nhuã py. Hi'arandu ve'ỹ vy opa marã oipotaa rupi rive 'rã ikuai, ojexavai 'rã guive. Ha'e rami vy ikuai axy 'rã okanhy peve.

¹⁰ Mba'eta peráta re nda'eveivea gui ma opa marãgua teko vai oiko. Ha'e nunga re anho amongue nda'evei vy ojepe'a ma 'rã ojeroviaa gui, ha'e kuery ae onhemoingo axy uka 'rã guive opa mba'e py.

Timóteo omongetaague

¹¹ Ha'e rã ndee Nhanderuete remimbo'e, eiko eme ha'e rami, onhea'ã teko porã reupity aguã anho, ha'e gui Nhanderuete pe ete reikoa, rejeroviaa, ndeporayvua, opa mba'e reropo'akaa ha'e ndevai e'ỹa guive.

¹² Iporã va'e re anho onhea'ã rejeroviaa rupi. Eupity ete tekove marã e'ỹ, ha'e rami aguã nerenóia, ha'e heta oendua py renhemombe'u porã rive.

¹³ Xee romongeta Nhanderuete opa mba'e moingoare va'e renonde, ha'e Pôncio Pilatos renonde re Cristo Jesus onhemombe'u porã va'ekue renonde guive:

¹⁴ Senhor Jesus Cristo ojekuaa rã guarã onhea'ã ojapo uka pyreiky'a e'ỹ va'e ha'e ojou vaipy e'ỹ oikuaa pavê aguã.*

¹⁵ Ha'e va'e ma Nhanderuete Ima'endu'a porãmbi petei'i oiko ha'e Ipo'akapa va'e oexa uka 'rã oa'angaague ára py ae. Ha'e ma huvixave ikuai va'e Ruvixave, ha'e senhor ikuai va'e Senhor oiko.

¹⁶ Ha'e anho ma hekove marã e'ỹ va'e oiko. Hexakãa ma avave rei ndouputy kuaai. Oexaa e'ỹ va'e, ha'e oexa pyrã e'ỹ oiko. Tomboeta ha'e ta'ipo'akaa riae. Amém.

* 5:18 Deuteronomio 25.4, Atos 14.23; 1 Coríntios 9.7-14; 1 Pedro 5.1-4

* 6:1 Efésios 6.5-9; Colossenses 3.22-24; Tito 2.9,10; 1 Pedro 2.18-21

* 6:14 2 Timóteo 2.1-7

Oguerekopa rei va'e kuery re ijayvua

¹⁷ Emongeta oguerekopa rei va'e kuery ojee e'ỹ ojerovia aguã, neĩ mba'emo imarã va'erã re rive'ỹ guive, ha'e rã Nhanderujete re anho, mba'eta ome'ẽ oikovy nhanembovy'aarã ha'e javi.

¹⁸ Ha'e kuery ma joupe ojapo porãa rupi ta'ikuai, tanhopytyvõ opa mba'e py. Ome'ẽxea'i py tome'ẽ reta, hakãte'ỹa rupi e'ỹ tomboja'o.

¹⁹ Ha'e rami vy 'rãe mba'emo porã ojeupe guarã omoĩ porã uka araka'e rã peve imarã e'ỹ va'erã, ha'e rami vy oupity aguã tekove anhetẽ ete va'e.*

Omongeta reve opaa py ogueroayvu porãague

²⁰ Ha'e gui ndee Timóteo, epena ke ndepo py opena uka pyre re. Ejapyxaka eme ayvu rive iporã e'ỹ va'e re, neĩ "Aikuaapa" he'i rive vy joo rami e'ỹ-e'ỹ ijayvua re guive.

²¹ Mba'eta ha'e nunga re amongue ojapyxaka vy ojepe'a ma ojeroviaa gui.

Tove peẽ kuery tapendu penemboaxya.

* 6:19 Lucas 12.15-21

Timóteo pe mokoïguea Paulo ombopara va'ekue Timóteo pe mokoïguea Paulo ombopara va'ekue

Kova'e kuaxia mokoïguea ma Timóteo peguarã apóstolo Paulo ogueraa uka va'ekue. Ixupe Paulo aipoe'i Jesus regua omombe'ua rupi okyje e'ÿ aguã, ojepe'a e'ÿ aguã guive.

Paulo guekorã re ae oexa'ã ojukaa voi aguã Jesus re ojeroviaa py. Ha'e rami teĩ ipy'a guaxu reve ojerovia tema. Ha'e vy aipoe'i: "Ovaê ma ouvy aa aguã ára. Iporã va'e re xee anhea'ã va'ekue, ajapopa ma xerembiaporã va'ekue, ha'e amombe'u porã jajerovia aguã regua. Aÿ ma heko porã va'e pegua coroa oĩ xevy pe oguereko katu pyre. Ha'e va'e ma Senhor ha'evea rami oikuaa pota va'e opaa ára ome'ê 'rã xevy. Xevy pe anho e'ÿ guive, oua ára peve oarõ ha'e oayvu okuapy va'e ha'e javi pe 'rã ome'ê", he'i (4.6b-8).

Timóteo pe ijayvu omokyre'ÿa rupi, oiko axy teĩ nhombo'ea rupi tema oiko aguã gueko porãa oexa uka reve.

Oxarura reve ijayvu vy omboypyague

¹ Xee Paulo ma Nhanderuete oipotaa rami vy apóstolo-rã Cristo Jesus xemoĩ va'ekue. Cristo Jesus re tekove oĩ va'e oikuaa uka aguã re ijayvuague rami xemoĩ.

² Timóteo xera'y roayvu ete va'e, taxarura ndevy. Tove terendu Nhanderuete ha'e nhande-Senhor Jesus Cristo nguia mborayvu, nemoaxya ha'e mby'a porã guive.

Timóteo ojeroviaa re Paulo oguerovy'aague

³ Xeramoĩ kuery rami avi xee voi ambojerovia Nhanderuete xepy'a ky'a e'ÿa rupi, arovy'a guive, mba'eta ara py ha'e pyávy anhembo'e vy xema'endu'a riae ndere.

⁴ Nderexaya re xema'endu'a vy roexaxe ete ju, opa mba'e py avy'a aguã.

⁵ Xema'endu'a avi rejerovia etea re, mba'eta ndejaryi Lóide ranhe ha'e ramigua oĩ, ha'e gui ndexy Eunice ju. Ha'ekue rami avi xee aikuaa ndere voi oia.*

Nhanhea'ã, nhanembaraete ha'e jajerovia ete aguã re ijayvua

⁶ Ha'e nunga rupi romongeta nerembiaporã ome'ê mbyre rupi renhea'ãve ju aguã re. Ha'e va'e ma ndeapyte re xepo amoĩ jave Nhanderuete ome'ê va'ekue.

⁷ Mba'eta nhanemongyjaarã e'ÿ nhandere Nhanderuete omoĩ Onhe'ê, ha'e rã nhanembaraete, nhandeporayvu ha'e jajejokoa rupi nhandekuai aguã.*

⁸ Ha'e nunga rupi exĩ eme Senhor regua remombe'u aguã, ikáuxa nhuã py xee aĩ teĩ. Ha'e rami 'rãgue py Nhanderuete po'akaa rupi enhemoingo axy uka avi xereve ayvu porã remombe'ua py.

⁹ Mba'eta nhandereraa jepe vy iky'a e'ÿ va'e ojeupe guarã nhanerenoĩ raka'e. Nhande ae nhanhea'ãa re e'ÿ guive. Ha'e rami 'rãgue py ha'e ae oipotaa rami vy nhanemboaxy raka'e ára ijypy e'ÿ mbove voi, ha'e onhemboxy'aague rami vy nhanemoĩ Cristo Jesus re.

¹⁰ Ha'e gui aÿ mae ma oikuaa uka nhanemboaxya, Cristo Jesus Nhandereraa jepearã ojekuaa py. Mba'eta ha'e va'e ma manoa ombovaipa vy tekove marã e'ÿ oikuaa uka ayvu porã rupi.

¹¹ Ha'e va'e amombe'u aikovy aguã xemoĩ apóstolo ha'e nhombo'earã.

¹² Ha'e nunga rupi ae nami aiko axy. Ha'e rami teĩ xee naxĩ, mba'eta aikuaa mava'e re pa ajeroviaa, aikuaa porã guive ipo'akapa va'e vy ipo py xerekove amboaxa va'ekue re opena 'rãa, opaa ára peve guarã.

¹³ Enhombo'e tema ayvu amombe'u rã rendu va'ekue rupi, exa uka guive rejeroviaa ha'e mborayvu Cristo Jesus re oĩ va'e.

¹⁴ Nhe'ê Ky'a E'ÿ nhandere oĩ va'e po'akaa rupi epena tema iporã va'e ndepo py opena uka pyre re.

Apóstolo Paulo nhuã py oĩa, ha'e irũ kuery ikuai re ijayvuague

¹⁵ Xeirũ kuery Ásia pygua ojepe'apa xegui, ndee reikuaa ma. Ha'e va'e kuery regua ma Fígelo ha'e Hermógenes.*

¹⁶ Ha'e rã Onesíforo ha'e hoo pygua kuery ma Senhor tomboaxy, mba'eta mboapykue rei e'ÿ xembopy'a guaxu, ha'e nhuã py aĩa oendu teĩ peteïgueve ma naxerexoĩ.

¹⁷ Ha'e rami 'rãgue py Roma tetã py ovaê vy xereka raka'e xejou peve.

¹⁸ Ha'e ramo tove opaa ára py Senhor tomboaxy. Xegui ndee reikuaa porãve ha'e kuery xepytyvõ jepiague Éfeso tetã py.

2

Cristo re jajeroviaa rupi vy nhandemoingo axy uka aguã re ijayvua

¹ Ha'e gui ndee xera'y, nembaraeteve tema Nhanderuete nemboaxya Cristo Jesus re oĩ va'e re.

² Heta oendua py xee anhombo'e rã renduague rami avi ndee ju embo'e ojeroviapy kuery, amboae kuery mbo'earã.

³ Cristo Jesus pegua xondaro ojeroviapy va'e reiko vy enhemoingo axy uka avi ke xereve.

⁴ Ha'e gui peteïve xondaro ndoikoi 'rã amboae nunga re openaa rupi, nguvixa hery moĩare ombovy'a aguã.

⁵ Ha'e rami ae avi ouga va'e kuery voi ha'evea rami ouga e'ÿ rã peteïve ndoguerovy'aai 'rã.

⁶ Oma'etÿa rupi onhea'ã va'ekue voi ha'eve ha'e ranhe ijaju va'e ho'u aguã.

⁷ Eikuaa pota ke xeayvua re, mba'eta Senhor oikuaa uka porãmba 'rã ndevy.

⁸ Nema'endu'a tema Jesus Cristo rekokue re, mba'eta Davi ramymino oiko, ha'e omanoague gui onhemboete ju raka'e, ayvu porã amombe'u aikovyva rami vy.

⁹ Ha'e va'e káuxa ae xemoingo axya nhuã py heko vai va'e rami. Ha'e rã Nhanderuete ayvu ma ndojoko kuaai.

¹⁰ Ha'e nunga rupi opa marãgua aropo'aka oiporavo pyre kuery re vy, ha'e kuery voi oupity aguã Cristo Jesus nhandererã jepea ha'e hexakãa imarã e'ÿ va'e.

¹¹ Pova'e ayvu ma jarovia ete va'erã:

Hexeve nhamano rire hexeve avi 'rã jaikove ju.

¹² Mba'emo jaropo'akapa rire

hexeve avi 'rã nhaï huvixarã.

Ha'e rã ixupegua rami e'ÿ ri nhandemombe'u rire

ha'e ju 'rã nanhanemombe'ui.*

¹³ Ojeroviapy e'ÿ jaiko ramo

ha'e ma ojeroviapy ae 'rã oiko,

mba'eta ndaexarai 'rã ojegui ae.

Amboae rami rei nhombo'e ha'e ojerovia merami rive va'e omongeta aguã re ijayvuague

¹⁴ Enhomoma'endu'a ke ha'e nunga re. Nhanderuete renonde ke ndeayvu pavê pe, ha'e kuery joguero'a rei e'ÿ aguã ayvu mba'everã ovare'ÿ va'e py, mba'eta ha'e nunga ma opa marã 'rã omoingo hendua kuery.

¹⁵ Enhea'ã tema reximba rei e'ÿ re Nhanderuete pe rejexa uka aguã omba'eapo va'e ojou porã va'erã, ayvu anhetê ete va'e ha'evea rami remombe'u rire.

¹⁶ Ha'e rã ayvuxe iporã e'ÿ va'e ma endu rive, mba'eta ha'e rami ijayvu va'e heko vaive 'rã oje'oivuy.

¹⁷ Ha'e kuery ijayvua ma nhomokanhy tema 'rã heravy, mba'eaxy vaikue nhandero'o omou'ũ va'e rami avi. Ha'e va'e kuery regua ma Himeneu ha'e Fileto.

¹⁸ Ha'e va'e kuery ojepe'a ma anhetê va'e gui, mba'eta nhombo'e teï nanhanhemboete jevyvei 'rãa rami. Ha'e rami vy joapo ndojeroviavei aguã rami.

¹⁹ Ha'e rami teï oo ytarã Nhanderuete omoï va'ekue ma oï atã. Ha'e va'e re ma po rami oï ikuaa ukaarã: "Senhor oikuaa ae ojepegua kuery" he'ia va'e. Ha'e gui amboae ju "Senhor rery rupi ikuai va'e tojepe'a teko vai gui", he'i avi.

²⁰ Ha'e rami avi oo tuvixakueve ikuai va'e py oï 'rã mba'emo rryru ouro ha'e prata guigua anho e'ÿ, oï avi 'rã yvyra ha'e yapo guigua. Iporãgueve ma mba'emo porã ryrurã oï, ha'e rã amboae ma oiporu rive pyrã oï.

²¹ Ha'e rami ae avi nhande voi opa marã rei nhandekuaiaague gui jajeky'a'o vy mba'emo porã ryrurã rami 'rã jaiko, iky'a e'ÿ va'erã omboaxa pyre ija oiporu va'erã rami, iporã va'e ha'e javi jajapo aguã rami nhandeapo rire.

²² Ha'e nunga rupi eiko eme kunumigue opa marã ikuaixea rami. Teko porã rupi enhea'ã, rejeroviaa, ndeporayvu, ha'e petei rami pendekuaia rupi, ipy'a ky'a e'ÿ re Senhor pe oiapukai va'e kuery re.

²³ Endu rive amongue ijayvuxe rã ovare'ÿ va'e re hi'arandu e'ÿa rupi, mba'eta ha'e nunga gui joguero'apa rei 'rã, reikuaa ma avi.

²⁴ Mba'eta Senhor rembiguai kuery ma nda'evei joguero'a rei aguã. Ha'e rami 'rãgue py ijayvu porã'i 'rã pavê reve, ha'e ivai rei e'ÿ re nhombo'e kuaa 'rã guive.

²⁵ Ha'e kuery re amongue opu'ã rei ramo omongeta porã'i 'rã, mba'eta xapy'a rei ha'e kuery pe voi Nhanderuete ome'ê 'rã ojeko roerva vy anhetê va'e oikuaa nho aguã,

²⁶ ha'e rami vy hi'arandu ju vy anha pe onhembo'a ukaague gui oo jepe aguã, ixupe ojerereko uka rire teï oipotaa rami ikuai aguã.*

3

Opaa ára opa marã rei ikuai 'rãa re ijayvua

¹ Eikuaa pota ke pova'e re: Opaa ára py ou 'rã ikuai axya ete aguã.*

² Mba'eta avakue ikuai va'e ojejou porã rei 'rã, peráta re anho 'rã nda'eveive, ojee rive 'rã ojerovia, onhemboevate rei 'rã, ijayvu vaikue-ikue 'rã, nguu kuery nonhe'ê renduvei 'rã, ndajoguerovy'axevei 'rã, Nhanderuete nomboetevei 'rã,

³ nda'iporayvuvei 'rã, nanhomboaxy kuaavei 'rã, joe ijayvu rei 'rã, ndojekoko kuaavei 'rã, ojerovia rei 'rã, iporã va'e rovai 'rã ikuai,

⁴ nhombo'a uka rive 'rã, o'arandu rupi e'ÿ 'rã ikuai, onhembotuvixa rei 'rã, ha'e kuery ae oipotaa rami 'rã ikuaixe, Nhanderuete pe ikuai 'rãgue py,

⁵ Nhanderuete pe merami ikuai va'erã ixupe "Ipo'aka va'e'ÿ" he'i rive 'rã. Ejepe'a ke ha'e kuery gui voi.

⁶ Ha'e kuery va'e regua ma joo rupi ovaê vy ombotavy 'rã kunhague ikangykueve ojevavyva va'e, opa marã rei oikoxea rami rive ikuai va'e.

⁷ Ha'e kuery ma mba'emo re onhembo'e uka riae teï ndoupity 'rã anhetê va'e oikuaa ete aguã.

* 2:12 Mateus 10.32,33 * 2:26 1 Pedro 3.14-16 * 3:1 Mateus 24.9-13; 1 Timóteo 4.1-5; 2 Pedro 2.1-3; Judas 3-21

⁸ Moisés re Janes ha'e Jambres opu'ã reiaque rami avi ha'e kuery voi anhetê va'e re opu'ã rei teĩ. Ha'e kuery opa marã rei nai'arandui, ha'e ndojeroviavei vy ojou vai pyrã ikuai.

⁹ Ha'e rami teĩ ha'e kuery nda'ikuai riaei 'rã ha'e rami, mba'eta pavê oikuaa 'rã hi'arandu e'ÿa, Moisés rovaigua kuery re oikoague rami avi.

Timóteo anhetê va'e re oĩ atã aguã re Paulo ijayvuague

¹⁰ Ha'e rã ndee ma reikuaa ae ma anhomb'o'e aikovya, xereke, anhembopy'aa, ajeroviaa, mba'emo aropo'akapaa, xeporayvua, aĩ atãa,

¹¹ xemoingo axya ha'e ajexavaia guive, mba'eta ha'e ramigua ma Antioquia, Icônio ha'e Lистра tetã py oiko xere. Opa marãgua teko axy aropo'aka va'ekue. Ha'e rami teĩ ha'e nunga ha'e javi gui Senhor xereraa jepe.*

¹² Ha'e gui Cristo Jesus pe oikoxe va'e ha'e javi 'rã omoingo axya rei.

¹³ Ha'e rã heko vai ha'e heko porã merami rive va'e ma heko vaive 'rã oje'oivy, nhombotavy ha'e onhombotavy ukaa rupi anho.

Nhanderuete ayvu anhetê ete ha'e ha'evea re ijayvua

¹⁴ Ha'e rã ndee ma eĩ atã tema mba'emo reikuaa ha'e rerovia va'e re. Nema'endu'a ke ha'e nunga re mava'e pa nembo'eague re.

¹⁵ Mba'eta nekyrĩ reve reikuaa ae ma ipara icky'a e'ÿ va'e. Ha'e va'e rupi vy reupity ne'arandurã Cristo Jesus re rejerovia vy reo jepe aguã.

¹⁶ Ha'e va'e ipara va'e ma Nhanderuete guigua meme, ha'e rami vy ha'eve nhandombo'e aguã, nhandomon-geta, nhandomo'arandu, ha'e teko porã rupi nhandomoingo aguã,

¹⁷ Nhanderuete remimbo'e kuery opa mba'e py hi'arandu vy iporã va'e ha'e javi ojapo kuaa aguã.*

4

Ayvu porã nhamombe'ua rupi nhanhea'ã aguã re ijayvua

¹ Nhanderuete ha'e Cristo Jesus renonde xee romongeta. Ha'e va'e ma ojekuaa ju vy oikuaa pota 'rã oikove va'e ha'e omano va'ekue ikuaiague re.

² Emombe'u tema ayvu porã. Ha'e va'e rupi enhea'ã katu ha'eve jave, e'ÿ vy haxy teĩ. Joupe ndeayvu, enhomo'arandu ha'e enhomongeta ndevai rei e'ÿ re renhomb'o'ea ha'e javi py.*

³ Mba'eta ovaê 'rã ha'evea rami nhandombo'e teĩ ndojapyxakaavei aguã ára. Ha'e rami 'rãgue py ojou 'rã ha'e kuery ae oipotaa rami ombo'e va'erã, oapyxa remo rive oikarã va'e rami.

⁴ Ha'e rami vy noenduxevei 'rã anhetê va'e, ayvu rive re anho ojapyxakave vy.

⁵ Ha'e rã ndee ma eiko kuaa pota opa mba'e py. Nemoingo axya rã eropo'aka, ayvu porã remombe'ua rupi tema eiko, ejapopa ete nerembiaporã va'e.

Apóstolo Paulo omano taa re ijayvuague

⁶ Ha'e gui xee ma xeruguy omoêa ta ma mymba ome'ëmby rami. Ovaê ma ouvya aa aguã ára.

⁷ Iporã va'e re xee anhea'ã va'ekue, ajapopa ma xerembiaporã va'ekue, ha'e amombe'u porã jajerovia aguã regua.*

⁸ Aÿ ma heko porã va'e pegua coroa oĩ xeivy pe oguereko katu pyre. Ha'e va'e ma Senhor ha'evea rami oikuaa pota va'e opaa ára ome'ê 'rã xeivy. Xeivy pe anho e'ÿ guive, oua ára peve oarõ ha'e oayvu okuapy va'e ha'e javi pe 'rã ome'ê.*

Avakue apóstolo oejapaague, ha'e rã Nhanderuete ndoejaia re ijayvuague

⁹ Eju voi pota ke xea py.

¹⁰ Mba'eta Demas ma aÿ mba'emo oĩ va'e re nda'eveive vy xereja. Tessalônica tetã katy ojepe'a ovy. Crescente ma Galácia katy, ha'e rã Tito ma Dalmácia katy oo.

¹¹ Lucas anho oiko teri xereve. Ejou ke Marcos, ha'e vy eru, mba'eta ha'e ma xepytyvõ 'rã amba'eapoa rupi.

¹² Ha'e gui Tíquico ma Éfeso tetã katy amondouka va'ekue.

¹³ Reju vy ke eru avi Trôade py capa aeja va'ekue, Carpo ro py. Eru avi kuaxia para, aipotave va'e ma ipire guigua.

¹⁴ Ferro re omba'eapo va'ety Alexandre ma ojapo vai ete xeivy. Ha'e ramo Senhor ombopaga 'rã ojapoague re.

¹⁵ Ndee voi enheangu avi ixugui, mba'eta oreayvu rã orere opu'ã rei va'ekue.

¹⁶ Jypy'i xemboayvua jave avave rei naxepytyvõai. Ha'e rami 'rãgue py pavê rei xereja karamboae. Ha'e ramiague re tombopagua eme.

¹⁷ Ha'e rã Senhor ma xereve oiko vy xemombaraete, ayvu amombe'uve ju rã amboae regua kuery oendupa aguã. Ha'e rami aguã xereraa jepe karamboae guary juru gui.

¹⁸ Ha'e rami ae avi Senhor xereraa jepe 'rã xeivy ojapo vaixe va'e ha'e javi gui, ha'e opo'akaa py xereraa jepe 'rã yva re. Ixupe toporaieia aÿ ha'e araka'e rã peve. Amém.

Oxarura reve opaa py ogueroayvu porãague

¹⁹ Emombe'u ke xema'endu'aa Prisca ha'e Áqüila pe, Onesíforo ro pygua kuery pe guive.

* 3:11 Atos 13.14-14.22 * 3:17 Romanos 15.4; 2 Pedro 1.20,21 * 4:2 Colossenses 4.5,6 * 4:7 Atos 20.17-24 * 4:8 1 Coríntios 9.25; Tiago 1.12; 1 Pedro 5.4; Apocalipse 2.10

²⁰ Erasto ma Corinto tetā py opyta. Ha'e rā Trófimo ma Mileto py aeja karamboae imba'eaxy rā.

²¹ Eju voi ke yro'y ovaē e'ỹ mbove. Ndevy oxarura uka va'e ma Ēbulo, Lino, Cláudia ha'e irmão kuery ha'e javive.

²² Tove Senhor toiko nenhe'ẽ reve. Tove peẽ kuery tapendu penemboaxya.

Tito pe Paulo ombopara va'ekue Tito pe Paulo ombopara va'ekue

Tito ma Timóteo rami avi apóstolo Paulo irū oiko raka'e igreja kuery re openaa rupi. Ha'e va'e ma Creta vy pa'ū py Paulo oea raka'e Jesus remimbo'e kuery ha'e py ikuai va'e ombo'e porāve aguā, ha'eve'ya rami nhombo'e va'e kuery ikuai avi rā.

Ha'e rami vy omombe'u porāve Jesus Cristo regua, ijayvu guive hemimbo'e kuery marā rami pa ikuai aguā re. “Mba'eta pavē pe Nhanderuete oikuaa uka omboaxya ogueraa jepe aguā. Ha'e rami vy nhanemo'arandu nhandereko vaiaty ha'e vvy regua reko gui jajep'e'a aguā, ha'e aỹ gui voi jaiko kuaa pota ha'e teko porā rupi nhandekuai aguā Nhanderuete pe ete” (2.11-12).

Oxarura reve ijayvu vy omboypyague

¹ Xee Paulo ma Nhanderuete rembiguai ha'e apóstolo-rā Jesus Cristo xemoi va'ekue, Nhanderuete rembiporavo kuery ambo'e rā ojerovia, ha'e ixupe ikuai vy oikuaa porāmba aguā anhetē ete va'e,

² ha'e tekove marā e'ỹ oarō okuapy aguā guive. Ha'e va'e ma Nhanderuete ijapu e'ỹ va'e ome'ē aguā re ijayvu raka'e, ára ijypy e'ỹ mbove ma voi.

³ Ha'e gui aỹ oa'angaague ára py ma Nhanderuete Nhandereraa jepea va'e oayvu oikuaa uka vy oipotaa rami vy xemoi karamboae imombe'uarā.

⁴ Ndee Tito rejeroviaa py xera'y ete reiko va'e pe axarura. Tove terendu Nhanderuete ha'e Nhandereraa jepea Cristo Jesus guigua nemboaxya ha'e mby'a porā.*

Igreja re opena va'e kuery reko re ijayvua

⁵ Ha'e nunga rupi ae roeja karamboae Creta ypa'ū py py, mba'emo ndajapapai va'ekue rejapopa aguā, ha'e rami vy petēi-tei tetā py remoi aguā igreja re opena va'erā, ndevy ajapo ukaague rami vy.

⁶ Ha'eve remoi aguā ojou vaia rei aguā rami e'ỹ ikuai va'e, ha'e petēi'i ta'yxy va'e. Ta'y kuery ojerovia va'e, ha'e kuery opa marā rei e'ỹ, inhe'ē rendua rupi anho ikuaia oikuaa pavē va'e.

⁷ Mba'eta igreja re opena va'e ma nda'evei ojou vaia rei aguā rami ikuai aguā, ha'e kuery pe Nhanderuete ae opena uka rire. Ha'e kuery ojee ae rive'ỹ ojerovia va'e, ivai ja e'ỹ, ha'e vinho oy'ua rupi e'ỹ ikuai va'e, ojerovia rei e'ỹ va'e, neĩ perāta re nda'evei rei e'ỹ va'e ha'eve.

⁸ Ha'e rami 'rāgue py nhomovaē kuaa va'e, iporā va'e anho oguerovy'a va'e, oiko kuaa pota ha'e ha'evea rami joguereko va'e, iky'a e'ya rupi oiko ha'e ojejoko kuaa va'e,

⁹ ha'e ayvu anhetē ete va'e ojee omoi ete va'e ombo'eague rami ae. Ha'e rami vy 'rāe nhombo'e porā ha'e nhombopy'a guaxu kuaa, ha'e ombovai kuaa 'rā guive hexe opu'ā reia rā.

Nhombo'e porā merami rive va'e kuery re ijayvua

¹⁰ Mba'eta heta ikuai nhonhe'ē rendu e'ỹ va'e, ijayvuxe ha'e nhombotavya rei va'e. Judeu regua ma hetave ikuai ha'e rami.

¹¹ Ha'e va'e kuery nhamokyriri 'rāe, mba'eta oo pygua ha'e javi-javi 'rā ombotavy ombo'e vaikuea rupi, perāta re rive nda'eveive vy.

¹² Ha'e kuery reguae profeta rami aipoe'i va'ekue: “Creta pygua kuery ma ijapu va'e ae, mymba inharō va'e rami okaru guaxu ha'e inhate'ỹ va'e”, he'iague rami.

¹³ Ha'e rami ijayvua ma anhetē. Ha'e nunga rupi ha'e kuery pe ndeayvu ete 'rā ojeroviaa rupi imbaraete aguā,

¹⁴ ha'e ojapxaka ve'ỹ aguā judeu kuery ijayvu rivea re, neĩ anhetē va'e gui ojep'e'a va'ekue ayvu re.

¹⁵ Mba'eta heko ky'a e'ỹ va'e kuery pe mba'eve rei nomongy'ai 'rā. Ha'e rā heko ky'a ha'e ojerovia e'ỹ va'e kuery ma opa mba'e py 'rā onhomongy'a, mba'eta o'arandua ha'e opy'aa rupi iky'apa rā.

¹⁶ Ha'e kuery ma “Xee aikuaa Nhanderuete” he'i teĩ gueko vaia py oexa uka anhetē e'ya. Ojeguarpuy ha'e nanhonhe'ē rendui va'e vy iporā va'e ojapo aguā nda'evei.

2

Ojerovia va'e kuery reko re ijayvua

¹ Ha'e rā ndee ma ndeayvu ke ha'evea rami renhombotea rupi.

² Tujakueve embo'e ojejoko aguā re, omboetea aguā. Toiko kuaa pota, ha'e ojeroviaa py ta'imbaraete, iporayvua ha'e oĩ atāa py guive.

³ Ha'e rami ae avi guaimigieve ma nhombotea rupi ta'ikuai. Ta'ijayvuxe rei eme, ha'e vinho oy'ua rupi ta'ikuai eme. Tanhombotea iporā va'e re,

⁴ ombo'e aguā kunhague ipyauve va'e ome ha'e omemby kuery oayvu ete aguā re,

⁵ oiko porā pota ha'e heko ky'a e'ỹ aguā, ngoo rupi opena porā aguā, ha'eve vai'i ha'e ome oipotaa rami oiko aguā, ha'e rami rā Nhanderuete ayvu re ijayvu vaia e'ỹ aguā.

⁶ Kunumigie ha'e rami ae avi emongeta opa mba'e py oiko kuaa pota aguā.

⁷ Ndee ae voi iporā va'e rupi eiko, amboae kuery ndee rami ikuai aguā. Renhombotea rupi exa uka anhetē rupi anho reikoa ha'e renhombotea.

* 1:4 2 Coríntios 8:23; Gálatas 2.1-3

⁸ Iporã va'e re anho ndeayvu ndejou vaia aguã rami e'ÿ, nhanderoivaigua kuery oxĩmba aguã, mba'eve py nhandere nda'ijayvu vai kuaai vy.

⁹ Escravo kuery ma guerekoa kuery nhe'ẽ rendua rupi ta'ikuai opa mba'e py, ha'e ramo oguerovy'a aguã. Ta'inhe'ẽngi rei eme,

¹⁰ ha'e ta'imonda eme guive. Ha'e rami 'rãgue py toexa uka opa mba'e py ojeroviapy oikoa. Ha'e rami vy opa mba'e py ojapo 'rã Nhanderuete Nhandereraa jepea va'e regua ayvu ojou porãa aguã rami.

Cristo nhandereraa jepe vy nhanemoingo porãague re ijayvua

¹¹ Mba'eta pavẽ pe Nhanderuete oikuaa uka omboaxya ogueraa jepe aguã.

¹² Ha'e rami vy nhanemo'arandu nhandereko vaiaty ha'e yvy regua reko gui jajepa'ea aguã, ha'e aÿ gui voi jaiko kuaa pota ha'e teko porã rupi nhandekuai aguã Nhanderuete pe ete,

¹³ ima'endu'a porãmy ou aguã nharõ jaikovya ja. Ha'e va'e ma Nhanderuete Ipo'akapa va'e ha'e Nhandereraa jepea Cristo Jesus rexakãa ojekuaa rã guarã.

¹⁴ Mba'eta nhandere ojejuka uka raka'e, opa mba'e vai gui nhandejogua vy ojeupe guarã ae nhandeky'a'o aguã, iporã va'e re anho nhandea'ãa rupi nhandekuai aguã.*

¹⁵ Ha'e nunga re tema ndeayvu. Enhomombaraete ha'e enhomongeta ipo'akaa ha'e javi rupi, avave rei nembojaru rei e'ÿ aguã.

3

Huvixa kuery nhande'ẽ rendu, ha'e iporã va'e rupi nhandekuai aguã re ijayvua

¹ Enhomoma'endu'a ke joe opena va'e ha'e huvixa kuery oipotaa rami ikuai aguã. Tonhe'ẽ rendu, ha'e ta'ikyre'ÿ opa mba'e porã ojapo aguã.

² Avave rei re ta'ijayvu rei eme, neĩ ta'ijayvu rive eme joupe. Ha'e rami 'rãgue py ha'eve vai'i ta'ikuai, pavẽ reve ta'ijayvu porã'i opa mba'e py.*

³ Mba'eta nhande voi yma rupi hi'arandu e'ÿ va'e nhandekuai va'ekue, nhonhe'ẽ rendu e'ÿ va'e ha'e okanhgyue rami, to'o pegua escravo rami nhandekuai va'ekue nhamoaruã rei ha'e opa marã nhandekuaixea rupi. Jaiko vaikue rei, nanhandea'ei rei joe, nanhandeporayvui, ha'e ndajajoayvui rei va'ekue.

⁴ Ha'e gui Nhanderuete Nhandereraa jepea va'e oexa uka nhanderayvua, nhandemboaxypaa guive.

⁵ Ha'e rami vy nhandemboaxy vy rive nhandereraa jepe, teko porã re nhandea'ãa rupi e'ÿ. Nhe'ẽ Ky'a E'ÿ nhandeky'a'o vy nhandemoingove ju, ha'e nhandembopyau.

⁶ Ha'e va'e ma Nhandereraa jepea Jesus Cristo rupi nhandere Nhanderuete ombou vy opa mba'e py nhandemoingo porã.

⁷ Ha'e ramo nhandemboaxy vy nhandemboeko porã ma rire tekove marã e'ÿ nharõa rupi mba'emo porã jopyarã ju jaiko.

⁸ Ha'e va'e ayvu ma jarovia va'erã, aipota remombe'u porãve guive, Nhanderuete re ojerovia va'e kuery iporã va'e ojapoa rupi onhea'ã aguã. Ha'e nunga ma iporã, ha'e omoingo porã pavẽ 'rã.*

⁹ Ha'e rã ayvu ovare'ÿ va'e ma endu rive, ymagua kuery rery oĩa re ijayvua rã, ha'e lei re joo rami e'ÿ-e'ÿ ijayvu vy joguero'a rei ramo, mba'eta ha'e nunga ma nhomoingo porãarã e'ÿ, mba'everã ndovarei.

¹⁰ Joo rami e'ÿ-e'ÿ nhomoingoa kuery pe mokoĩgue ma ndeayvu rire ejepe'a ke ha'e kuery gui.

¹¹ Mba'eta reikuaa ma heko vai ha'e ojejavya va'e ae ikuaia. Ha'e kuery ae onhembopaga uka.

Oxarura reve opaa py ogueroayvu porãague

¹² Ndea py ambou 'rã Artemas, e'ÿ vy Tíquico. Ha'e va'e ovaẽ ma ramo eju pojava Nicópolis tetã py xerovaexĩ aguã. Anhembopy'a ha'e py ae yro'y aaxa aguã.

¹³ Eipytyvõ porã pota lei re nhombo'e va'ety Zenas oguatave ta ramo, Apolo guive, ha'e kuery pe mba'eve oata e'ÿ aguã.

¹⁴ Ha'e gui nhanderevegua kuery tonhea'ã iporiaukue'i pytyvõa rupi, vyvra hi'a e'ÿ va'e rami ikuai e'ÿ aguã.

¹⁵ Ha'e gui xereve ikuai va'e ha'e javi oxarura uka ndevy. Emombe'u ke orema'endu'aa ojeroviaa py orerayvu va'e kuery ha'e javive pe.

Tove peẽ kuery ha'e javi tapendu penemboaxya.

* 2:14 Efésios 2.8-10; Filipenses 3.20,21

* 3:2 Romanos 13.1-6

* 3:8 Efésios 2.1-10

Filemom pe Paulo ombopara va'ekue Filemom pe Paulo ombopara va'ekue

Nhuã py apóstolo Paulo oĩ javé peteĩ ava oexa escravo oikoague gui ojava va'ekue, hery va'e Onésimo. Paulo oexa vy Jesus regua omombe'u ramo ojerovia, ojeko me'ẽ guive Jesus pe. Ha'e rami vy Paulo pytyvõa rupi oiko.

Onésimo rerekoa Filemom hery va'e ma amboae tetã Colossos pygua oiko Paulo oexa va'ety, igreja re opena va'e, ha'e Jesus regua Paulo omombe'u rã ojeko me'ẽ avi va'ekue. Ha'e nunga rupi Paulo onhembovy'a ija Filemom pe ju Onésimo omondouka aguã.

Kova'e kuaxia ogueraa uka Onésimo po py, Filemom pe omombe'u porãve ha'e ojerure aguã operdoa vy omovaẽ porã ju aguã guembiguai onha va'ekue. Mborayvu rupi ojerure porã'i vy aipoe'i: "Ha'e rami vy ajerure xera'y Onésimo removaẽ porã ju aguã, ... ndevyguá escravo-rã ju e'y guive removaẽ aguã, ha'e rã nde-irmão reayvu ete va'e rami, nde-escravo rami rive'y. Mba'eta Onésimo ma xe-irmão oiko rire nde-irmão katuve ma oiko, ngo'o re escravo rami rive'y, ha'e rã Senhor re vy irmão oiko" (versículos 10a, 16).

Oxarura reve ijayvu vy omboypyague

¹ Xee Paulo ma Cristo Jesus pegua aikoa re nhuã py aĩ. Xe-irmão Timóteo reve roxarura ndevy, xerembiayvu Filemom. Ore rami avi remba'eapo va'e reiko.

² Irmã Áfia pe voi axarura, ore rami onhea'ã va'ety Arquipo, ha'e igreja kuery ndero py onhemboaty va'e pe guive.

³ Tove peẽ kuery tapendu penemboaxya ha'e mby'a porã Nhanderueté ha'e Senhor Jesus Cristo guigua.

Filemom nhopytyvõa re oquerovy'aague

⁴ Ndere xema'endu'a riae vy Xerueté pe anhembo'e nhavõ arovy'a,

⁵ mba'eta aendu omombe'ua rã iky'a e'y va'e kuery ha'e javi reayvua, ha'e Senhor Jesus re rejeroviaa rupi reikoa guive.

⁶ Ajerure ore rami rejerovia reve Cristo re vy mba'emo porã jareko va'e reikuaapa avi aguã.

⁷ Mba'eta irmão, ndeporayvua omombe'ua rã aendu vy avy'a ete ha'e xepy'a guaxuve, iky'a e'y va'e kuery rembovy'a ramo ipy'a py.

Onésimo re apóstolo Paulo ojerureague

⁸ Ha'e gui Cristo re vy aendu ndevy pe mba'emo ajapo uka va'e rire ha'eve 'rãguea,

⁹ ha'e rami teĩ roayvua rupi ajerure porã'i ha'e nunga re. Xee Paulo xetuja'i ma, ha'e aỹ Jesus káuxa nhuã py aĩ.

¹⁰ Ha'e rami vy ajerure xera'y Onésimo removaẽ porã ju aguã, mba'eta xejokuua imoinya py xera'y rami amoiingo va'ekue.*

¹¹ Ha'e va'e ma anhetẽ yma ndovare'i va'ekue ndevy, teĩ aỹ ma ovare ete ndevy, xe'vy pe voi.

¹² Ha'e rami vy ndea py ambou ju xekuraxõ ae reve.

¹³ Xee ma nderekovia amombytavexe teĩ xea py, ayvu porã káuxa xejokuua imoinya py xepytyvõ aguã.

¹⁴ Ha'e rami avi mba'eve rei ndajapoxei ndevy pe ranhe aporandu e'y re. Ha'e ramo 'rã xepytyvõxea'i py xepytyvõ uka, xee ajapo uka ramo rive'y.

¹⁵ Mba'eta xee aikuaa rã xapy'a'i rive ojepe'a raka'e ndea gui, raka'e rã peve guarã removaẽ ju aguã,

¹⁶ ndevyguá escravo-rã ju e'y guive removaẽ aguã, ha'e rã nde-irmão reayvu ete va'e rami, nde-escravo rami rive'y. Mba'eta Onésimo ma xe-irmão oiko rire nde-irmão katuve ma oiko, ngo'o re escravo rami rive'y, ha'e rã Senhor re vy irmão oiko.

¹⁷ Ha'e nunga rupi xe'vy pe "Xerevegua" 're vy xee xemovaãa rami ae ha'e voi emovaẽ.

¹⁸ Ha'e gui xapy'a rei nempa'e rei-rei omokanh'y rire ndevy pe orevea oĩ ramo eja ranhe xee ae amboekoviapa aguã.

¹⁹ Xee Paulo xepo py ae ambopara amboekovia aguã re. Ha'e "Nderekove re ae xe'vy pe rereve" ha'e e'y teĩ reikuaa.

²⁰ Ha'e nunga rupi irmão, Senhor re vy ejapo ha'e nunga xe'vy. Xembovy'a ke Cristo re.

Oxarura reve opaa py ogueroayvu porãague

²¹ Ha'e rami ambopara ri teĩ aikuaa xenhe'ẽ rendu 'rãa, ha'e ajerurea gui rejapove 'rã guive.

²² Ajerure avi rereko katu aguã ake aguã, mba'eta xee aikuaa rã xere pejerurea rupi peã py xemboua ju 'rã.

²³ Epafras ma Cristo re vy xereve oĩ avi nhuã py. Ha'e va'e ma oxarura avi ndevy,

²⁴ ha'e gui Marcos, Aristarco, Demas ha'e Lucas xepytyvõ va'ety kuery voi.

²⁵ Tove penenhe'ẽ py tapendu Senhor Jesus Cristo penemboaxya.

Hebreu kuery pe ombopara pyre

Hebreu kuery pe ombopara pyre

Kova'e kuaxia para ma hebreu kuery Jesus re ojerovia va'e pe omboparaa. Imboparaare rery ma noĩ.

Jesus re ha'e kuery ojerovia ramo hetarã kuery opu'ã rei ha'e kuery re, nhandere oikoa rami ae avi. Ha'e rami rã ha'e kuery va'e regua amongue ojeroviaa gui ojepe'axe gueko ymague rami ju ikuai aguã. Ha'e nunga rupi kova'e kuaxia omboparaa ha'e kuery pe ipy'a guaxu reve onhea'ãve aguã, mba'eta Jesus regua ha'e kuery ojeroviaa ma pavê gui ha'eveve va'e, yma guare teko gui voi. Mymba kuery Nhanderuete pe ome'ëa 'rãgue py Jesus ojejuka ukaague anho ovare nhandereraa jepe aguã. Jesus ma nhandereraa jepea pete'i va'e Nhanderuete ombou va'ekue.

Aipoe'i: "Ha'e rami rire mba'exa 'rã tu nhande jaa jepe, nhandereraa jepe aguã regua iporãve va'e nhaendu rive vy? Mba'eta jypy'i Senhor ae omombe'u, ha'e gui henduare kuery ju omboaxa, anhetê etea jaikuaa porãve aguã rami" (2.3). Ha'e nunga rupi "nhanekangy e'y re nhai atã tema nharô va'e nhamombe'u jaikovy va'e re" (10.23), "nhama'ê porã tema Jesus re anho, mba'eta ixugui ae ou jypy guive opa peve jajerovia aguã" (12.2). Mba'eta "Jesus voi tetã rokê gui mombyry'i oiko axy raka'e, nguguy py ae ojeupegua kuery oiky'a'o aguã. Ha'e nunga rupi oia py jaje'oi nhande voi, amboae kuery ikuaia gui mombyrya py teĩ, Jesus káuxa nhanembojaru reia rã jaropo'aka vy. Mba'eta anhetê apy ndajarekoi tetã oi riae va'erã, raka'evê rã ojekuaa va'erã va'e re nhanhea'ã" (13.12-14).

Nhanderuete ojekuaa ukaague re ijayvua

¹ Ymave rupi Nhanderuete mbovykue rei e'y, ha'e ha'ekue-'ekue'i rami e'y ijayvu raka'e nhaneramoĩ kuery pe profeta kuery rupi.

² Ha'e gui a'y opa vygua ára ma Gua'y rupi ae ijayvu nhandevy. Ha'e va'e ma opa mba'e ikuai va'e jopyarã omoĩ, ipo rupi opa mba'e ojapo rire.*

³ Nhanderuete rexakãa rexa ukaa oiko, Nguu rami ete heko va'e vy. Mba'emo ikuai va'e ogueroko porãmba oayvu ipo'akapa va'e py rive. Ha'e gui jajejavyague gui nhandeky'a'opa ma vy oguapy oiny yvate. Ipo'akapa va'e oiporu kuaa regua re oĩ

⁴ anjo kuery gui omboyvateve rire, mba'eta hery oenoia va'e ma anjo kuery oenoia gui iporãve.

Cristo Ta'y oikoa, ha'e rã anjo kuery ma tembiguai ikuaia re ijayvua

⁵ Mba'eta anjo kuery pe ma aipo nde'i: "Ndee ma Xera'y, ange ma romoingo", nde'i. Ha'e gui teĩgue ju aipoe'i: "Xee aiko 'rã Tuu, ha'e rã ha'e ma Xera'y 'rã oiko."*

⁶ Ha'e gui kova'e yvy re Gua'y Jypygua ombou vy teĩgue ju aipoe'i: "Nhanderuete pegua anjo kuery tomboete pavê", he'i.*

⁷ Ha'e rã anjo kuery pe ma aipo'ea: "Ojeupegua anjo kuery ojapo yvytu rami, guembiguai kuery ojapo tata rami", 'ea.*

⁸ Ha'e rã Ta'y pe ma aipo'ea: "Oreruete, ndepo'akaa ma raka'e rã peve guarã. Ha'e ndepo'akaa py rejogueroko 'rã ha'evea rami.*

⁹ Rerovy'a teko porã, ha'e rã teko vai ma nderejou porã. Ha'e nunga rupi Nderu Nhanderuete ndererovy'a rupi nemoĩ neirũ kuery áry guarã, ndere azeite omoĩ uka vy", 'ea.

¹⁰ Ixupe aipo'ea avi: "Senhor, jypy'i renhono va'ekue yvy. Yva regua voi ndepo py rejapo va'ekue meme.

¹¹ Ha'e nunga ma opa va'erã. Ha'e rã ndee ma reiko riae 'rã. Ha'e nunga ha'e javi 'rã inhyma ovy ao rami,

¹² ha'e ramo ao pukukue rami 'rã rembojo'a imoiny, ao rami ae avi 'rã remboekovia. Ha'e rã ndee ma ha'ekue ae reiko. Nderekove opa va'erã e'y", 'ea.*

¹³ Ha'e gui peteive anjo pe aipo nde'i: "Eguapy ke aiporu kuaa regua re, nderovaigua kuery ndepy guýry amoĩ peve", nde'i.*

¹⁴ Mba'eta anjo kuery ma nhe'ê hembiguai ikuai, oo jepe aguã rami ikuai va'e pytyvõarã ombou va'e.

2

Ayvu porã nhaendu rive'y aguã re ijayvua

¹ Ha'e nunga rupi anhetê ete va'e nhaendu vy nhamoĩ porã pota 'rã nhandeje, ha'e va'e rupi nhandekuaia gui jajepe'a e'y aguã.*

² Mba'eta ymave rupi Nhanderuete ayvu anjo kuery omombe'u va'ekue ndoaxa rivei raka'e, mba'eta ha'e va'e rupi heko vai ha'e nonhe'ê rendui va'e kuery ombopagapa.

³ Ha'e rami rire mba'exa 'rã tu nhande jaa jepe, nhandereraa jepe aguã regua iporãve va'e nhaendu rive vy? Mba'eta jypy'i Senhor ae omombe'u, ha'e gui henduare kuery ju omboaxa, anhetê etea jaikuaa porãve aguã rami.

* 1:2 João 1.1-5; Colossenses 1.15-18 * 1:5 Salmo 2.7; 2 Samuel 7.14, 1 Crônicas 17.13 * 1:6 Deuterônimo 32.43 * 1:7 Salmo 104.4 * 1:8 Salmo 45.6-7 * 1:12 Salmo 102.25-27 * 1:13 Salmo 110.1 * 2:1 Marcos 4.14-25

⁴ Ha'e kuery ijayvua rupi Nhanderuete oikuaa uka anhetê etea, hexa pyrã, nhomondyipaarã ha'e opa marãgua opo'akaa rupi ojapo vy. Ha'e gui petei-teĩ rupi oexa uka avi Nhe'ê Ky'a E'ÿ guigua, ha'e ae oipotaa rami vy.

Sacerdote yvateve va'e ojeroviapy ha'e nhomboaxy kuaa va'e Jesus oikoa re ijayvua

⁵ Mba'eta anjo kuery pe'ÿ Nhanderuete opena uka raka'e vvy pyau oreayvua va'e re.

⁶ Ha'e rami 'rãgue py amongue henda py omombe'u porã vvy aipoe'i: "Marã ramigua tu avakue, ha'e kuery re nema'endu'a aguã? Marã ramigua tu avakue ra'y kuery, ha'e kuery re reikuaa pota aguã?"

⁷ Ha'e rami teĩ hare'i anjo kuery gui remo'yvyĩ'ive rire remboyvate, remboete uka [ha'e rembopo'aka ndepo py rejapo va'ekue ha'e javi re].

⁸ Opa mba'e re rembopo'aka, ipy guýry remoi vy", he'i va'ekue. Opa mba'e re nhanembopo'aka rire ma mba'eve jipoi nhandepo'aka e'ÿa. Ha'e rami teĩ aÿ peve ndajaexai teri opa mba'e re nhandepo'akaa.*

⁹ Ha'e rã Jesus ma jaexa omano rire Nhanderuete ombopo'aka ha'e omboete ukaague. Mba'eta Nhanderuete nhanemboaxy vy anjo kuery gui xapy'a'i omo'yvyĩ'ive raka'e Jesus, nhande kuery ha'e javi re omano aguã.*

¹⁰ Mba'eta Nhanderuete peguarã opa mba'e oiko, ha'e ae omoingopa rire. Ha'e rami vvy guexakãa katy gua'y kueryrã nhandereru aguã ma opa mba'e py oguereko katu raka'e Nhandererua jepearã, oiko axya py guive.

¹¹ Mba'eta Nhandeky'a'oarã ou va'ekue ha'e nhande kuery oiky'a'o va'ekue voi petei'ĩ gui ae jaiko. Ha'e nunga rupi noxĩ nhandevy "Xeryvy kuery" he'i aguã,

¹² mba'eta aipoe'i: "Xeryvy kuery pe aikuaa uka 'rã nderery, ha'e onhemboaty okuapya py aporaei 'rã ndevy."*

¹³ Aipoe'ive ju: "Xee ajerovia 'rã hexe." Teĩgue ju aipoe'i: "Apy ma xee aĩ, ha'e xera'y kuery Nhanderuete ome'ê va'ekue reve", he'i.*

¹⁴ Ha'e gui ta'y kuery he'ia ho'o ha'e huguy va'e ikuai rami avi ha'e voi oiko ha'e rami, omanoa py ombovaipa aguã porojukaa po'akaa. Ha'e va'e ma anha.

¹⁵ Ha'e gui nhandereraa jepe aguã, mba'eta jaikoa pukukue re nhamano aguã gui jakyje vy manoa pegua escravo rami nhandekuai va'ekue.

¹⁶ Mba'eta anhetê anjo kuery reraa jepearã e'ÿ ou, ha'e rã Abraão ramymino kuery reraa jepearã anho.

¹⁷ Ha'e nunga rupi opa mba'e py guvyvy kuery rami 'rãe ojeapo, nhanemboaxy kuaa ha'e ojeroviapy oikoa oexa uka aguã, ha'e Nhanderuete pegua sacerdote yvateve va'e oiko aguã guive, ojeupegua kuery ojejavvyague re opaga aguã.

¹⁸ Mba'eta anha omoangekoa py oiko axy rire aÿ ipo'aka nhanderepy aguã nhande voi nhanemoangeko rã.

3

Moisés gui Cristo yvateve ramo jajeroviaa gui jajepe'a e'ÿ aguã re ijayvua

¹ Ha'e nunga rupi irmão kuery iky'a e'ÿ va'erã Yva pygua penerenoĩ avi va'ekue, peikuaa pota porã Jesus re, mba'eta Nhanderuete ombou raka'e Sacerdote Yvateve va'erã, nhamombe'ua rami ae.*

² Ha'e va'e pe ma Nhanderuete ngoo pygua kuery re opena uka ramo henonde rupi ojeroviapy oiko, Moisés oikoague rami avi.

³ Ha'e rami avi Moisés gui ma Jesus omboetevepy, oo gui ijapoare omboeteavea rami avi.*

⁴ Mba'eta oo ikuai va'e ma ojapo pyre meme, ha'e rã opa mba'e apoare ma Nhanderuete anho.

⁵ Ha'e gui Moisés ma Nhanderuete rembiguai rami oiko raka'e hoo pygua ha'e javi re openaa rupi. Ha'e ramia py ojeroviapy oiko, omombe'u ma voi guive raka'eve rã Nhanderuete omombe'u porãve va'erã regua.

⁶ Ha'e rã Cristo ma hoo pygua kuery re opena vy Ta'y ae oiko. Ha'e gui "Hoo pygua kuery" he'ia ma nhande ae jaiko, opa peve ete ri nhaĩ atã vy nhandepy'a guaxu ha'e jarovy'a reve nharõ jaikovya re.

⁷ Mba'eta Nhe'ê Ky'a E'ÿ aipoe'iague rami: "Kova'e ára ijayvua pendu vy

⁸ peneakã ratã eme, tekoo e'ÿa rupi ymagua kuery ikuai jave oeko a'ã rei ha'e nonhe'ê renduiague rami e'ÿ.

⁹ Mba'eta ha'e py ma peneramoi kuery xereko a'ã vy xemoangeko rei va'ekue, quarenta ma'etÿ re mba'emo porã ajapo rã oexa okuapy teĩ.*

¹⁰ Ha'e nunga rupi ha'e javegua kuery pe xevai vy aipoa'e: 'Ha'e kuery ojevavy riaa opy'a py, ndoikuaaxei guive xereko', ha'e va'ekue.

¹¹ Ha'e rami vy xepoxy reve aura va'ekue ha'e kuery oupity e'ÿ aguã opytu'u aguã areko katu va'ekue", he'i.*

¹² Ha'e nunga rupi irmão kuery, penheangu ke peẽ kuery regua neĩ petei'ive py'a re oĩ e'ÿ aguã pejerovia e'ÿa, Nhanderuete oikove va'e penhe'ê rendua gui pendepe'aaarã.

¹³ Ha'e rami 'rãgue py ko'ê nhavõ penhomombaraete petei-teĩ, "Kova'e ára" he'iague oĩ teria ja, jejavya petei'ive penembotavy e'ÿ aguã peneakã ratã aguã rami.

¹⁴ Mba'eta Cristo revegua ete jaiko, anhetê ri jypy guive jajeroviaa re opa peve nhaĩ atã vy.

¹⁵ Mba'eta "Kova'e ára ijayvua pendu vy peneakã ratã eme, oeko a'ã rei va'e kuery rami e'ÿ", he'iague rami.

¹⁶ Ha'e gui mava'e kuery tu ijayvua oendu teĩ nonhe'ê rendui raka'e? Moisés reve Egitto gui oẽmba va'ekue ha'e javi.

* 2:8 Salmo 8.4-6 * 2:9 Filipenses 2.6-11 * 2:12 Salmo 22.2 * 2:13 Isaías 8.17-18 * 3:1 Números 12.17 * 3:3 João 1.17,18
* 3:9 "Peneramoi kuery" he'ia ma Moisés reve Egitto vvy gui oẽ va'ekue re ijayvuy vy. * 3:11 Salmo 95.7-11

¹⁷ Ha'e mava'e kuery pe tu quarenta ma'et'ë re ipoxy raka'e? Ojeyavy va'ekue pe ae, mba'eta ha'e va'e kuery ma tekoo e'ÿa pyve ho'apa rã hetekue opyta raka'e.

¹⁸ Ha'e gui mava'e rovai tu oura raka'e opytu'u aguã oguereko katu va'ekue oupity e'ÿ aguã? Nonhe'ë rendui va'ekue rovai ae.

¹⁹ Ha'e rami vy po rami jaikuaa: Ha'e kuery ndojeroviaague re ae nda'evei raka'e oupity aguã.

4

Japytu'u aguã py Nhanderuete re jajeroviaa rupi jaike aguã re ijayvua

¹ Ha'e nunga rupi nhanheangu, japytu'u aguã Nhanderuete oguereko katu va'ekue jaupity aguã re ijayvu rire te'ÿ peë kuery regua amongue ndapeupity gui.

² Mba'eta nhandevy pe voi ayvu porã omombe'ua, ymagua kuery pe rami avi. Mba'eta ha'e kuery ayvu oendu te'ÿ ndojeroviai ramo ha'e kuery pe mba'everã ndovarei.

³ Ha'e rã nhande jajerovia va'e ma jaupity 'rã japytu'u aguã, Nhanderuete aipoe'iague rami vy: "Xepoxy reve aura va'ekue ha'e kuery oupity e'ÿ aguã opytu'u aguã areko katu va'ekue" he'i, ko yvy onhono ypy jave mba'emo ojaopoa rire te'ÿ.

⁴ Mba'eta amongue henda py sete araa re ijayvu vy aipoe'i: "Sete araa py Nhanderuete opytu'u raka'e mba'emo ojaopoa gui", he'i.*

⁵ Ha'e pyve ju aipoe'i: "Ha'e kuery ma ndoupity 'rã opytu'u aguã areko katu va'ekue", he'i.

⁶ Ha'e nunga rupi o'ÿ teri opytu'u aguã amongue oupity aguã, ha'e rã ymagua kuery pe ma ayvu porã omombe'ua rã nonhe'ë rendui vy ndoupity raka'e.

⁷ Ha'e gui yma ete rire peteigue ju Nhanderuete oa'angaa ára, mba'eta "Kova'e ára" he'i uka Davi pe, "Kova'e ára ijayvua pendu vy peneakã ratã eme", he'iague romombe'u ma voiaque rami.

⁸ Mba'eta ha'e kuery opytu'u aguã ete py Josué ogueraa va'e rire ma yma rire noa'anga jeyvi 'rãgue ára mboae.

⁹ Ha'e nunga rupi o'ÿ teri Nhanderuete pegua kuery opytu'u aguã.

¹⁰ Mba'eta japytu'u aguã Nhanderuete oguereko katu va'ekue jaupity vy japytu'u 'rã mba'emo re nhanhea'ã jaikovya gui, Nhanderuete oikoague rami avi.

¹¹ Ha'e nunga rupi nhanhea'ã ke japytu'u aguã oguereko katu va'ekue jaupity aguã, avave rei ho'a e'ÿ aguã inhe'ë rendu e'ÿ rei va'e kuery ho'apaague rami.

¹² Mba'eta Nhanderuete ayvu ma oikove ha'e ipo'akapa va'e. Kyxe ha'imbe jovai va'e gui ha'imbeve va'e, mba'eta oike 'rã jaikovea ha'e nhanenhe'ë omboja'o aguã peve, jaku'ea ha'e nhanderajy ojayaa rami avi. Ha'e rami vy oikuaa uka 'rã nhapëxaa ha'e nhandepy'aa ha'e javi.

¹³ Ha'e ramo hemimoingo jipoi henonde onhenhomi kuaa va'erã. Ha'e rami 'rãgue py oikuaa pota va'e renonde jajexa uka rã opa mba'e ojekuaa porãmba 'rã.*

Sacerdote yvateve va'e Jesus nhanemboaxya oikoa re ijayvua

¹⁴ Ha'e nunga rupi Nhanderuete Ra'y Jesus, Sacerdote yvateve va'e rami nhanderepy vy yva re oo rire nha' atã tema jajeroviaa re.

¹⁵ Mba'eta nhande-Sacerdote ma nhanekangy rã nanhanemboaxy e'ÿi 'rã. Ha'e rami 'rãgue py nhande rami avi onhemoango uka raka'e opa mba'e py, te'ÿ ojejavvy e'ÿ re.

¹⁶ Ha'e nunga rupi jakyjea py e'ÿ 'rã nhanhemboja Nhanemboaxya guenda openaaty py oguapy oinya re, nhanekangya ára jaupity aguã nhanemboaxy vy nhanepytyvõa.*

5

Sacerdote ymagua kuery gui Cristo yvatevea re ijayvua

¹ Mba'eta sacerdote yvatekueve ikuai va'e ma avakue mbyte gui oiporavoa ha'e omo'ia rire Nhanderuete pe omba'eapo 'rã avakue rekovia, mymba ojuka ha'e mba'emo ome'ë aguã ojejavvyague re.

² Ha'e omboaxy kuaa 'rã oikuaa e'ÿ vy ojejavvy va'e kuery, mba'eta ha'e kuery rami avi ikangy va'e vy.

³ Ha'e nunga rupi ae mba'emo ome'ë 'rã ha'e ae ojejavvyague re, heta va'e kuery ojejavvyague re anho e'ÿ.

⁴ Ha'e gui avave rei ha'e ae nonhemboyvatei 'rã ha'e rami oiko aguã. Nhanderuete oeno'ÿ ramo mae ha'eve, Arão oeno'ÿague rami.

⁵ Ha'e rami ae avi Cristo voi ha'e ae e'ÿ onhemboyvatei sacerdote yvateve va'e o'ÿ aguã. Ha'e rã ixupe "Ndee ma Xera'y, kova'e ára romoingo" he'i va'e ae*.

⁶ amboae henda py "Ndee ma sacerdote rei riae 'rã, Melquisedeque reko rami ndereko va'e vy" he'i.*

⁷ Ha'e gui Jesus ma ngo'o re oiko jave ojaopukai atã ha'e hexay reve onhembo'e vy ojerure raka'e omanoa gui ogueraa jepe aguã ipo'aka va'e pe. Ha'e ramo oendu ete, mba'eta Nguu pe ete oiko ramo.

⁸ Ta'y ae oiko va'erã oiko axya py voi oikuaa raka'e onhe'ë rendua.

⁹ Ha'e gui ha'e nunga ha'e javi oaxapa ma rire ogueraa jepe inhe'ë rendua kuery ha'e javi, raka'e rã peve guarã,

¹⁰ Melquisedeque rami sacerdote yvateve va'erã Nhanderuete omo'ÿ rire.*

* 4:4 Gênesis 2.2 * 4:13 Efésios 6.17; Apocalipse 1.16 * 4:16 Hebreus 10.19-25; 1 João 2.1,2 * 5:5 Salmo 2.7 * 5:6 Salmo 110.4

* 5:10 Mateus 26.36-46

Ha'e kuery ndoikuaa porāi teria re ijayvua

¹¹ Ha'e va'e rekokue re ma heta roguereko oreayvu aguā, teĩ aỹ ma napendu kuaa porāi ramo haxy 'rā romombe'u porāve aguā.*

¹² Mba'eta yma ma pejerovia teĩ penhombo'e kuaa 'rāgue py peikotevẽ teri Nhanderuete ayvu jypy guare, haxy e'ỹve va'e re penembo'e va'erā. Ha'e rami vy kyrĩgue'ĩ okambu va'e rami teri pendekuai, tembi'u tykue'ỹ va'e ho'u va'e rami e'ỹ.

¹³ Mba'eta okambu va'e rami ikuai va'e ma noendu kuaai 'rā teko porā regua, kyrĩ'i va'e rami teri ikuai vy.

¹⁴ Ha'e rā tembi'u tykue'ỹ va'e ma kakuakueve peguarā, mba'eta o'arandua re onhea'āa rupi vy oikuaa 'rā ha'eve va'e ha'e ha'eve'ỹ va'e.*

6

Jajeroviaa regua jaikuaa porāve pota aguā re ijayvua

¹ Ha'e nunga rupi jaikuaa porāve pota ke jypy'i Cristo regua re nhanembo'eague, ha'e opa mba'e py nhanemoingo porāarā re ju jaikuaa pota. Nda'evei jypy'i nhaendu va'ekue re rive rombo'eve ju aguā. Ha'e va'e ma nhamano aguā rami nhandekuaiaague gui jajeko rerova aguā, Nhanderuete re jajerovia aguā,

² nghanhemongarai aguā, nhandeapyte re opo omoĩa aguā, nhamanoague gui nghanhemboete ju aguā, ha'e raka'e rā peve guarā nghanemboayvua aguā.

³ Ha'e rami 'rāgue py amboae nunga re ju 'rā jaikuaa pota, Nhanderuete oipota rā.

Ojeroviaa gui ojepe'a va'ekue re ijayvua

⁴ Ha'e rā anhetẽ va'e oikuaa va'ekue gui amongue ojepe'a ramo ma nda'evei nhamboeko rerova ju aguā. Ha'e va'e kuery ojopy ae ma yva guigua, Nhe'ẽ Ky'a E'ỹ

⁵ ha'e Nhanderuete guigua ayvu porā, ha'e oendu ma guive Nhanderuete po'akaa raka'eve rā peve guarā, ⁶ ha'e rami teĩ ha'e kuery ho'a ramo nda'evei nhamo'arandu ju aguā ojeko rerova aguā rami, mba'eta ha'e kuery ae ojapo Nhanderuete Ra'y pavẽ ojoi rei aguā rami, teĩgue ju kuruxu re omoĩa rami.

⁷ Mba'eta vvy minha oky jepi rā inhak'ỹ vy hi'a porā 'rā oma'etỹ va'e kuery peguarā. Ha'e va'e vvy ma Nhanderuete ogueroayvu porā 'rā.

⁸ Ha'e rā juu ha'e juu rakua endy rive moingoa vvy ma ndojou porāi 'rā, ayvu vai pyrā rive oiko. Ha'e va'e ma opaa py oapypaa 'rā.*

Jaa jepea kuaa ukaarā re ijayvua

⁹ Ha'e rā peẽ orembiayvu kuery, ha'e rami oreayvu teĩ roikuaa rā pendere oĩ iporāve va'e nunga, peo jepea kuaa ukaarā.*

¹⁰ Mba'eta Nhanderuete ndaexarai 'rā pema'epoague ha'e hery rupi pejoayvua pexa ukaague re, mba'eta iky'a e'ỹ va'e kuery peipytyvõ va'ekue, ha'e peipytyvõve teri guive.

¹¹ Ha'e rami avi roipota opa peve peteĩ-teĩ pexa uka ha'ekue rami penhea'āa, peupity aguā pearõ peikovy va'e.

¹² Pendekuai eme inhate'ỹ va'e rami, ha'e rā ojeroviaa ha'e oĩ atāa rupi Nhanderuete ijayvuague oupity va'erā kuery rami anho.

Nhanderuete ijayvuague ndoaxa rivei 'rāa re ijayvua

¹³ Mba'eta Abraão pe Nhanderuete mba'emo ome'ẽ aguā re ijayvu vy guery rupi ae oura raka'e, mba'eta ixugui yvateve va'e jipoi hery rupi oura aguā.

¹⁴ Ha'e vy aipoe'i: "Anhetẽ romoingo porā 'rā, neramymino kuery amoingo reta 'rā guive", he'i.*

¹⁵ Ha'e ramo Abraão oĩ atāa rupi oarõ rive oupity raka'e ijayvuague.

¹⁶ Ha'e gui avakue minha ha'e kuery gui yvateve va'e rery rupi 'rā oura. Ha'e rami rire jomeme joguero'a teĩ ouraague ojapo 'rā peteĩ rami ju oikuaa aguā rami.

¹⁷ Ha'e nunga rupi Nhanderuete voi oura reve ijayvu raka'e, ijayvuague oupity va'erā kuery pe oikuaa uka aguā ndoaxa rivei 'rāa.

¹⁸ Ha'e rami vy mokoĩ mba'e oaxa rive e'ỹ va'erā py Nhanderuete oikuaa uka raka'e nda'ijapuia.*

Ha'e rami rire jajereraa jepe uka rive nhandepy'a guaxu ete 'rā, ha'e rami vy nharõ jaikovya nhanerenonderā omoĩ mbyre jaupity aguā.

¹⁹ Nharõ va'e ma kanoã mombytaa rami oĩ nhanenhe'ẽ moĩ atāarā. Mba'eta mba'eve py nanhanemokanhy ukai 'rā, nhanemoĩ atā 'rā, templo mbotya ajukue guigua rovai oike rire.†

²⁰ Mba'eta ha'e py ma Jesus nhandegui ha'e ranhe oike raka'e. Nhandere vy oike, Melquisedeque rami sacerdote yvateve va'e omoĩa rive raka'eve rā peve guarā.

* 5:11 Melquisedeque rekokue ma capítulo 7 py omombe'u porāve. * 5:14 1 Coríntios 3.1,2, 14.20; Efésios 4.11-16 * 6:8 Hebreus 10.26-31 * 6:9 1 Tessalonicenses 1.2-4; 2 Pedro 1.5-10 * 6:14 Génesis 22.17 * 6:18 "Mokoĩ mba'e oaxa rive e'ỹ va'erā" he'i, mba'eta Nhanderuete guery rupi ae ijayvu, ha'e oura guive. † 6:19 "Templo mbotya ajukue guigua" he'ia ma ombojeroviaaty ropy oĩ va'e re ijayvu vy, Henda iky'a e'ỹ ete va'e jaikea. Ha'e nunga omombe'u porāve capítulo 9 py. Ha'e rami avi apy ma ombojeroviaaty yva re oĩ va'e re ijayvu, 8.12 ha'e 9.11-12 py oĩa rami.

Cristo rami Melquisedeque oikoague re ijayvua

¹ Mba'eta Melquisedeque ma Salém tetã pygua huvixave oiko raka'e, ha'e sacerdote Nhanderuete Yvate ete va'e pegua guive. Ha'e va'e ma Abraão ovaexí vy oo raka'e. Abraão ma huvixa kuery juka vy ooague gui ojevvy jave Melquisedeque ovaexí vy ogueroayvu porã.

² Ha'e ramo iuxpe Abraão ome'ê raka'e mba'emo ojou va'ekue ha'e javi guigua dízimo. (Jypy Melquisedeque rery ma "Huvixave heko porã va'e" he'ia, ha'e rire ma Salém pygua huvixa avi oiko vy "Huvixave nhomoingo porã" he'ia.

³ Tuu e'y va'e, ixy e'y va'e, tamoi e'y va'e, hekove ijypy va'ekue'y, nei opa e'y va'e guive oiko raka'e, Nhanderuete Ra'y rami omoingo pyre.) Ha'e ma sacerdote raka'e rã peve guarã oiko.*

Levi ramymino kuery sacerdote ikuai va'e gui Melquisedeque yvatevea re ijayvua

⁴ Peikuaa pota ke ha'vy Melquisedeque yvatevea re, mba'eta iuxpe nhandepyvvy Abraão ome'ê raka'e dízimo huvixa kuery mba'e rei-reikue iporãve va'e guigua.

⁵ Ha'e gui Levi ramymino kuery regua sacerdote ikuai va'e ma lei re oia rami vy heta va'e kuery gui ojopy 'rã dízimo, guyvvy kuery gui ae, Abraão ramymino ikuai avi va'eri.

⁶ Ha'e rã Melquisedeque ma ha'e kuery regua e'y vy Abraão gui eteve voi ojopy raka'e dízimo, ha'e ogueroayvu porã guive Nhanderuete ijayvuague renduare.

⁷ Ha'e rami avi joegui yvateve va'e ogueroayvu porã 'rã vvyive va'e, jaikuaa pavê.

⁸ Ko yvy re Levi ramymino kuery regua dízimo jopya ikuai va'e ma avakue omano va'erã meme. Ha'e rã Melquisedeque pe ma "Oikove va'e" 'ea.

⁹ Ha'e gui jaikuaa rã Levi voi dízimo ome'ê avi raka'e Abraão ome'êa py, a'y hamymino kuery dízimo jopya ikuai va'eri,

¹⁰ mba'eta tamoi Abraão ma Melquisedeque rovaexí vy oo jave hete re Levi voi oi ae ma raka'e.

Levi ramymino kuery sacerdote ikuai aguã opa va'erã, ha'e rã Cristo ma opa va'erã e'ya re ijayvua

¹¹ Levi ramymino kuery sacerdote ikuai aguã ma heta va'e kuery lei ojopy va'ekue re oi. Ha'e rami avi Levi ramymino kuery opa mba'e gui nhandeky'a'opa va'e rire amboae regua sacerdote oi e'y tei ha'eva 'rãgue. Ha'e va'e ma Arão ramymino e'y, ha'e rã Melquisedeque reko rami heko va'e.

¹² Lei omboekoviaa ramo mae ma ha'eva amboae regua sacerdote oi aguã.

¹³ Mba'eta sacerdote ro'ea va'e ma amboae regua. Ha'e va'e regua ma avave rei altar rupi omba'eapo va'e'y.

¹⁴ Mba'eta jaikuaa nhande-Senhor ma Judá ramymino oikoague. Ha'e va'e regua pe ma Moisés "Sacerdote oi va'erã" nde'i.

¹⁵ Ha'e rami tei jaikuaa porãve 'rã, mba'eta amboae regua Melquisedeque reko rami heko va'e sacerdote oi aguã ma ha'eva.

¹⁶ Ha'e va'e ma avakue pegua lei re oia rami e'y omoia raka'e, ha'e rã hekove imarã e'y va'e vy ipo'akapa va'e ramo.

¹⁷ Mba'eta Jesus pe "Ndee ma Melquisedeque reko rami sacerdote rei raka'e rã peve guarã", he'i.*

¹⁸ Ha'e ramia py omboyke yma ojapo uka pyre, mba'eta ha'e va'e ma ipo'aka e'y ha'e mba'everã ovare'y ramo.

¹⁹ (Mba'eta lei ma peteive henda py nhandeky'a'o va'e'y.) Ha'e gui oikuaa uka iporãve va'e nharõ aguã, ha'e va'e rupi Nhanderuete re nhanhemboja ete aguã.

Cristo anho'i sacerdote heko porã ete va'e oikoa re ijayvua

²⁰ Ha'e gui Nhanderuete ma sacerdote-rã Jesus omoi vy ndoura e'yi guive. (Amboae regua sacerdote kuery ma oura re'y 'rã omoia.

²¹ Ha'e rã Jesus ma oura reve omoi, mba'eta iuxpe "Senhor ouraague ndoaxa rivei 'rã, 'Ndee ma sacerdote raka'e rã peve guarã, he'ia py.")

²² Ha'e nunga rupi Jesus ma Nhanderuete reve guarã iporãve va'e oikuaa uka.

²³ Ymave rupigua sacerdote kuery ma heta ikuai raka'e, mba'eta peteï-teï omano vy noiwei 'rã.

²⁴ Ha'e rã Jesus ma raka'e rã peve guarã vy sacerdote opa e'y re oi.

²⁵ Ha'e nunga rupi hexeve vy Nhanderuete re nhanhemboja va'e nhandereraa jepe 'rã opa mba'e gui, mba'eta oikove riae nhandere ojerure aguã.

²⁶ Anhetê ha'e va'e regua sacerdote yvateve va'e anho ha'eva nhandevy, iky'a e'y va'e, heko vaia oi e'y va'e, heko ky'a e'y va'e, ojevvy va'e kuerya gui oi'pe'a pyre, ha'e yva áryve omboyvate va'e.

²⁷ Sacerdote yvateve va'e mboae ikuai va'e rami e'y Jesus noikotevêi ára nhavõ ha'e ae ojevvyague re ranhe mymba ome'ê aguã, ha'e gui mae ma amboae kuery ojevvyague re ju. Mba'eta peteigue'i ha'e ae ojevvyuka uka vy ombogue raka'e jevavya.

²⁸ Mba'eta lei re oia rami vy sacerdote kuery yvatekueve va'e ma ikangy va'e meme. Ha'e gui Nhanderuete lei oja ma rire Gua'y ae omoi, oura reve ijayvuague rami vy. Ha'e rã Ta'y ma opa mba'e py heko porã va'e, raka'e rã peve guarã.

* 7:3 Apy Melquisedeque pe "Cristo rami oiko va'ekue" he'i, mba'eta Antigo Testamento py nomombe'uai tuu, ixy, tamoi kuery, ituiague nei omanoague (Gênesis 14.17-20). * 7:17 Salmo 110.4

8

Jyppygua guexeve guarã ojapo pyre gui Cristo rupi ou va'ekue iporãvea re ijayvua

¹ Ha'e gui aiporo'eague ma po rami: Nhandevyguua sacerdote yvateve va'e ma yva re oguapy raka'e Ipo'akapa va'e renda oiporu kuua regua re.

² Ha'e py ma ojeupeguua kuery re ojerure oiny ombojeroviaaty iky'a e'y ha'e anhetê ete va'e py, Senhor ae ojapo va'ekue py, avakue ojapo va'ekue py e'y.

³ Mba'eta sacerdote yvateve va'e kuery ma mba'emo ome'ê aguã omoã, mymba ojuka aguã guive. Ha'e nunga rupi nhandevyguua sacerdote yvateve va'e voi oguereko avi ome'ê va'erã.*

⁴ Ha'e rami avi ko yvy re oiko teri va'e rire neĩ sacerdote voi ndoikoĩ 'rãgue, mba'eta ikuai 'rãe lei re oĩa rami vy mba'emo me'ëarã.

⁵ Ha'e va'e kuery omba'eapo aguã ma yva re mba'emo oĩ va'e 'ã rami rive, Moisés ombojerovia atyrã ojapo aguã re Nhanderuete ijayvu vy aipoe'iaague rami vy: "Ma'ê, ejaopapa ke yvyty áry ndevy ha'angaa aexa uka va'ekue rami", he'iaague rami.*

⁶ Ha'e nungakue gui a'y Jesus mba'emo ojapo va'e ma ha'eveve, Nhanderuete reve guarã ogueru va'ekue voi ha'eveve, ayvu iporãve va'e rupi ogueru guive.*

⁷ Mba'eta hexevagua jypy guare opa mba'e py ha'eve ete va'e rire ma amboae ju ogueru e'y teĩ ha'eve 'rãgue.

⁸ Ha'e rami avi Senhor ndoguerovy'ai raka'e ymagua kuery. Ha'e vy aipoe'i: "Ma'ê, ou ma oiny ára xereve guarã ipyau va'e ju ajapo aguã Israel ha'e Judá kuery pe.

⁹ Peneramoĩ kuery pe ajapo va'ekue ramigua e'y 'rã ajapo, ha'e kuery po re ajopy vy Egitto yvy gui anoẽmba jave guare rami e'y, mba'eta ha'e kuery ojepe'apa ma xereve guarã ajapo va'ekue gui. Ha'e rire ha'e kuery re xee napenavei ma 'rã", he'i Senhor.

¹⁰ "Ha'e gui raka'eva rã po rami 'rã ajapo xereve guarã pyau Israel kuery pe. Xee aipota va'e amoĩ 'rã ha'e kuery 'arandua re, ipy'a re ae 'rã ambopara. Xee aiko 'rã Tuuete, ha'e rã ha'e kuery ma xevyguua kuery 'rã ikuai", he'i Senhor.

¹¹ "Ha'e rami rire mava'eva nombo'evei 'rã oirũ neĩ guvyvy kuery Senhor oikuaa aguã re, mba'eta pavẽ 'rã xekuaa, vyvĩgueve'i ha'e yvatekueve voi.

¹² Mba'eta amboaxy vy amboguepa 'rã heko vaiague, naxema'endu'avei ma 'rã ojevavyague re", he'i.*

¹³ "Ipyau va'e" he'ia py oikuaa uka jypy guare inhyma maa. Ha'e gui yma guare inhymamba va'e vy oaxa ta ma ovy.

9

Ymave rupi mba'emo ome'ëmby mba'everã ndovareiaague re ijayvua

¹ Ha'e gui Nhanderuete jypy guexeve guarã ojapo va'ekue re oĩ heta va'e kuery ombojerovia aguã, ha'e ko yvy regua oo iky'a e'y va'erã ojapo aguã guive.*

² Ha'e rami rã ojaopapa raka'e ombojerovia atyrã. Ha'e gui opy jaikea py ma oĩ va'ekue tataendy 'y, mesa ha'e Senhor renonde mbojape omoĩ mbyre. Ha'e va'e henda pe ma "Henda iky'a e'y va'e" 'eaague.

³ Ha'e gui ma peteĩ okẽ re ajukue mokoĩ oĩ va'e rovai ma ombojeroviaaty ropy ete oĩ, "Henda iky'a e'y ete va'e" 'eaague.

⁴ Ha'e va'e pegua oĩ va'ekue ma peteĩ altar ouro guigua heakuã porã va'e rapyaty. Oĩ avi guexeve guarã Senhor ojapo va'ekue ryru, ouro py onhovãmba pyre. Ha'e va'e ryepy py oĩ va'ekue manã ryru ouro guigua, Arão popoka ipoty va'ekue, ha'e itape ayvu oēja va'ekue oĩa guive.

⁵ Hi'áry ma omopu'ã anjo ipepo va'e ra'angaa hexakãmba va'e. Ha'e kuery omo'ã hyru mbotya teko vai mbotygue atyrã oĩ va'e. Ha'e nungakue ma a'y nda'evei romombe'u porãve aguã.

⁶ Ha'e nunga ha'e javi oguereko katupa ma rire sacerdote kuery ma opy ja'o oike ypya'i pyve oĩ va'e py oike jepi 'rã Nhanderuete pe mba'emo ome'ê aguã.*

⁷ Ha'e rã opyve ma sacerdote yvateve va'e ha'e ae'i 'rã oike, peteĩgue-ĩgue'i ma'etã nhavõ. Mba'emo ruguy reve 'rã oike ha'e ae ojevavyague re ome'ê va'erã, ha'e gui heta va'e kuery oikuaa vy e'y ojevavyague re ju.

⁸ Ha'e nunga py Nhe'ẽ Ky'a E'y po rami oikuaa uka: Ombojeroviaaty jypy guare ho'ame teria ja Henda iky'a e'y va'e py jaike aguã nda'evei, mba'eta nhandemboja aguã ndoikuaa ukai teri.

⁹ Ha'e nunga oejaa raka'e nhande aýgua kuery jaikuaa aguã, mba'eta ymagua kuery ombojerovia vy mymba ojuka ha'e mba'emo ome'ê teĩ ha'e nunga ma ipy'apy rupi ndoiky'a'oi raka'e opa mba'e vai gui.

¹⁰ Ha'e ramigua ojapo uka pyre ma ha'e kuery ro'o reguarã rive. Okaru, oy'u ha'e ojepeoi aguã rive oēja, opa mba'e ombopyau aguã ára peve guarã.

Tuguy omoã re ijayvua

¹¹ Ha'e gui ma Cristo ou vy sacerdote yvateve va'e rami ogueru mba'emo porã a'y ojekuaa va'e. Ha'e rami vy ombojeroviaaty tuvixave ha'e iporãve va'e py oike, avakue opo py ojapo va'ekue py e'y, mba'eta ko yvy regua e'y ae.

¹² Kavara ha'e vaka ra'y ruguy e'y guive ogueroike raka'e Henda iky'a e'y ete va'e py, ha'e rã nguguy ae. Peteĩgue'i oike raka'e, araka'e rã peve guarã nhandereraa jepe ma rire.*

* 8:3 Jesus ome'ê va'ekue ma nguguy ae (Hebreus 9.12). * 8:5 Êxodo 25.40 * 8:6 Lucas 22.20; 2 Coríntios 3.6-11 * 8:12

¹³ Mba'eta ymave rupi kavara ha'e vaka ruguy, ha'e gui vaka ra'y oapy pyre rugue ma onhemongy'a va'ekue áry omboayvi vy oiky'a'oa 'rã hi'árykue rupi rive.

¹⁴ Ha'e gui Cristo ruguy katuve ma nhandeky'a'o 'rã, mba'eta Nhe'ẽ imarã e'ỹ va'e po'akaa rupi iky'a e'ỹ va'e vy ha'e ae ojejuka uka raka'e Nhanderuete pe ome'ẽ mbyrã. Ha'e rami vy nhandepy'apy rupi peve 'rã nhandeky'a'o, jajapo ve'ỹ aguã manoa katy nhanderera arã nunga, Nhanderuete oikove va'e pe anho nhandekuai aguã.

¹⁵ Ha'e rami py Nhanderuete reve guarã ipyau va'e ogueru. Omano vy omboguepa raka'e jypy guare ayvu rupigua kuery ojejavyague, Nhanderuete remienoi kuery ha'e javi oupity aguã mba'emo imarã e'ỹ va'e ijayvuague.

¹⁶ Mba'eta amongue omano ta vy joupe mba'emo oēja aguã re ijayvuague ma ijayvu va'ekue omano ramo anho 'rã ovare,

¹⁷ omano ma ramo mae ma ijayvuague oiko 'rã. Ijayvu va'ekue oikove teria ja peteĩve henda py ndoikoi 'rã.

¹⁸ Ha'e nunga rupi Nhanderuete jypy guare guexeve guarã ojapo vy omoẽ uka raka'e mba'emo ruguy.

¹⁹ Ha'e ramo Moisés ma heta va'e kuery pe lei regua ojapo uka pyre omombe'upa ma vy ogueru raka'e vaka ra'y ha'e kavara ruguy yy reve. Ha'e rami vy hissopo rogue ha'e vexe'i rague omopytã mbyre omoakỹ vy omboayvi raka'e kuaxia para oĩ va'e ha'e heta va'e kuery ha'e javi re.

²⁰ Ha'e vy aipoe'i: "Kova'e tuguy py Nhanderuete ojapo guexeve guarã, ha'e va'e rupi pendekuai aguã", he'i raka'e.

²¹ Ha'ekue rami ae huguy py omboayvi avi ombojeroviaaty ha'e tembiporu opy rupi oiporu va'erã ha'e javi re.

²² Mba'eta lei re oĩa rami vy opa mba'e rai oiky'a'oa 'rã tuguy py, mba'eta tuguy omoẽa e'ỹ re nda'evei jejavya omboguea aguã.

Cristo omanoague araka'e rã peve guarã ovarea re ijayvua

²³ Ha'e va'e nunga ma yva re mba'emo oĩ va'e kuaa ukaarã rive ome'ẽa, ha'e rami vy mymba ojukaa py 'rã oiky'a'oa. Ha'e rã yva re ete mba'emo oĩ va'e ma yvateve va'e ojukaa py 'rã oiky'a'oa.

²⁴ Mba'eta Cristo ma henda iky'a e'ỹ va'erã avakue opo py ojapo va'ekue py e'ỹ oike raka'e, mba'eta ha'e nunga ma anhetẽ va'e kuaa ukaarã rive ome'ẽa. Ha'e rami 'rãgue py yva re ete oike raka'e, aỹ peve Nhanderuete renonde ojexa uka vy nhandere ojerure aguã.

²⁵ Ojejuka uka jepi e'ỹ teĩ ha'eve guive, sacerdote yvatekueve va'e ma'etỹa nhavõ henda iky'a e'ỹ ete va'e py mba'emo ruguy reve oike va'e rami e'ỹ.

²⁶ Mba'eta ha'e rami va'e rire yvy itui ypy'i guive mbovykue rei e'ỹ Cristo omano 'rãgue. Ha'e rami 'rãgue py aỹ ára ojeupity ramo peteĩgue'i ojekuaa, ha'e ae ojejuka uka vy jejavya ha'e javi oipe'apa vyvoi aguã.

²⁷ Mba'eta avakue renonderã omoĩa peteĩgue'i omano aguã, ha'e va'e rire imboayvuarã pe ojexa uka aguã.

²⁸ Ha'e rami ae avi Cristo voi peteĩgue'i ojekuka uka raka'e heta ojejavyague oipe'a aguã, ha'e va'e rire jejavya reve'ỹ ju 'rã ojekuaa, oo jepe aguã oarõ va'e kuery pe.

10

Mymba ojukaa aque rami e'ỹ Cristo omanoague re ijayvua

¹ Lei regua ma henonde re mba'emo porã ou oiny va'e 'ã rami rive, ou va'e ete e'ỹ.* Ha'e nunga rupi nda'evei 'rã opa mba'e gui oiky'a'oa aguã mba'emo me'ẽa kuery, ma'etỹa nhavõ mymba ome'ẽ jepi teĩ.

² Ha'e rami e'ỹ va'e rire ombojerovia va'e kuery nome'ẽvei 'rãgue, mba'eta peteĩgue'i oiky'a'opaa va'e rire ipy'a ky'aa noenduvei ma 'rãgue.

³ Ha'e rami avi ma'etỹa nhavõ mymba ome'ẽ aguã ma ojevavya re ima'endu'a jepi aguã rive,

⁴ mba'eta vaka ha'e kavara ruguy omoẽ mbyre ma ndoipe'ai 'rãe jajejavya.

⁵ Ha'e nunga rupi kova'e yvy re Cristo ou vy aipoe'i: "Mymba ojukaa pyre ha'e mba'emo ome'ẽmby ma ndereipotai. Ha'e rami 'rãgue py xereterã rereko katu.

⁶ Jejavya regua oapy reve ome'ẽa rã nndererovy'ai.

⁷ Ha'e nunga rupi aipoe'a: 'Ma'ẽ Xeruete, apy ma aĩ ndee reipotai va'e ajapo aguã, (mba'eta kuaxia onhemama va'e re oĩ xerekorã), ha'e", he'i.

⁸ Jypy aipoe'i: "Mymba ojuka pyre ha'e mba'emo ome'ẽmby ndereipotai, mba'eta jejavya regua oapy reve ome'ẽa rã nndererovy'ai", he'i raka'e, lei re oĩa rami vy ome'ẽa va'e meme teĩ. Ha'e va'e rire

⁹ aipoe'ive ju: "Ma'ẽ Xeruete, apy ma aĩ ndee reipotai va'e ajapo aguã", he'i. Ha'e rami vy jypy guare omomba raka'e, hekovia amboae ju omoĩ aguã.

¹⁰ Ha'e rami vy "Nhanderuete oipotai va'e" he'ia rami vy nhandeky'a'o, Jesus Cristo guete reve peteĩgue'i ojekuka uka rive.

¹¹ Ha'e gui sacerdote kuery ikuai va'e ma ko'ẽ nhavõ ojexa uka 'rã Nhanderuete pe omba'eapo aguã, ha'ekue'i rami ae mymba ojukaa py, ha'e nunga neĩ peteĩgueve jejavya ndoipe'ai teĩ.

¹² Ha'e rã Jesus ma raka'e rã peve guarã peteĩgue'i ojekuka uka jejavya re, ha'e rire Nhanderuete oiporu kuaa regua re oguapy oiny.

¹³ Ha'e va'e rire oarõ oiny hovaigua kuery ipy gu'ry omoĩmba peve guarã.

¹⁴ Mba'eta peteĩgue'i ojekuka uka vy opa mba'e gui oiky'a'oa raka'e ojeky'a'oa uka va'e ha'e javi, raka'e rã peve guarã.

* 10:1 Colossenses 2.16,17

15 Ha'e ramigua Nhe'ê Ky'a E'ÿ voi oikuaa uka, mba'eta jypy'i Senhor aipoe'i:

16 "Ha'e va'e ára rire ha'e kuery pe ajapo 'rã xereve guarã, po rami: Ha'e kuery py'a re amoí 'rã aipota va'e, hi'arandua re ae 'rã ambopara", he'i rire

17 aipoe'ive ju: "Ha'e kuery ojejavyague ha'e heko vaiague re peteíve henda py naxema'endu'avei ma 'rã raka'e rã peve", he'i.

18 Ha'e nungakue omboguepa ma rire mba'eva nanhame'êvei ma 'rã jajejavyague re.

Nhanderue te re nhandemboja, nhaí atã ha'e nhandopytyvô aguã re ijayvua

19 Ha'e nunga rupi irmão kuery, Jesus ruguy gui vy nhandepy'a guaxu Henda icy'a e'ÿ ete va'e py jaíke aguã,

20 mba'eta nhandevy pe ojapo tape pyau imarã e'ÿ va'e, ajukue okê regua rovai katy oo va'e. Ha'e va'e ma hete ae.

21 Nhandevy pegua sacerdote yvateve ete va'e oiko Nhanderue pegua oo re opena va'e.

22 Ha'e ramo nhandemboja tema peteí rupi nhandepy'a ha'e jajerovia ete reve, nhandepy'a oiky'a'opaa rire icy'aa oí va'ekue gui, ha'e nhanderete voi yy icy'a e'ÿ va'e py ojoi porãmbaa rire.*

23 Nhandekangy e'ÿ re nhaí atã tema nharô va'e nhamombe'u jaikovy va'e re, mba'eta nhandemboaxy aguã re ijayvu va'ekue ma ojeroviapy.

24 Peteí-teí nhandopytyvô pota guive nhandeporayvu ha'e jajapo porã rupi nhandekuai aguã.

25 Japytu'u eme nhandemboaty gui, amboae kuery ikuai rami e'ÿ. Ha'e rami 'rãgue py nhandembopy'a guaxu, hi'ára ovaê rai'ive ma ouvvy rã jaexa vy katuve ma jajapove tema.

Ojejavy potae rei va'ekue ombopagaa 'rã re ijayvua

26 Mba'eta anhetê va'e jaikuaa porã rire teí jajejavy potae reia rupi ri nhandekuai ramo jipovei ma 'rã jajajejavyague re ome'ê mbyrã.

27 Ha'e rami 'rãgue py jakyje reve 'rã nharô nhandemboayvuarã ha'e tata nhombopagaarã, hovaigua kuery mokanhyarã.*

28 Mba'eta Moisés lei ombopara va'ekue amongue noenduxeí ramo omboaxy e'ÿ re ojukaa 'rã raka'e, mokoí e'ÿ vy mboapy hekokue omombe'u rire.*

29 Ha'e gui mba'exa tu peikuaa? Ha'e nungakue gui nombopaga vaipaave 'rã teve amongue Nhanderue Ra'y re opyrômba rei va'ekue? Mba'eta nombovarei Cristo ruguy, ha'e va'e py Nhanderue guexeve guarã ojapogue rami vy oiky'a'o rire teí, ha'e ombojaru rei guive Nhe'ê nhandemboaxya kuaa ukaa.

30 Mba'eta jaikuaa ae "Xee ae ajoepy ha'e anhombopaga 'rã" he'i va'ekue. Teígue ju aipo'ea: "Senhor omboayvu 'rã ojepegua kuery.*"

31 Nhanderue oikove va'e po py amongue ho'a rã nda'evei ete 'rã.

Yma guare re nhanema'endu'a, ha'e jaikoague repy jaupity aguã re ijayvua

32 Ha'e rami aví penema'endu'a ke yma guare re, mba'eta ayvu porã peikuaa rire pendere opu'ãa rei rã pejexavai teí peí atã pekuapy raka'e.

33 Amongue py pavê rembiexarã penemoíã penembojaru rei ha'e penderereko axy rei vy. Ha'e amongue py amboae kuery oguereko axya rã ojexavai va'e kuery re penhemoirũ va'ekue,

34 nhua py ikuai rã pemboaxy vy. Ha'e nunga anho e'ÿ, peê ae penemba'e rei-rei peipe'a ukapa va'ekue pevy'a reve, mba'eta mba'emo iporãve ha'e opa e'ÿ va'e perekoa peikuaa.

35 Ha'e nunga rupi pejepe'a eme pejerovíã rupi pendekuaia gui, mba'eta ha'e nungakue repy iporã va'e oi.*

36 Peí atã tema, Nhanderue oipota va'e pejapopa ma rire peupity aguã ijayvuague.

37 "Mba'eta are'ÿ'i re ou va'erã va'e ovaê 'rã, ndarei 'rã ou aguã.

38 Ha'e rami aví xevygua heko porã va'e ma ojerovíã rupi 'rã ikuai. Ha'e rã ha'ekue py ojevvy ramo xee ndarovy'avei 'rã", he'i va'ekue.*

39 Ha'e rã nhande kuery ma okanhy aguã katy ojevvy va'e regua e'ÿ. Ojerovíã rupi ikuai va'e regua nhandekuai, onhe'ê omokanhy va'e'ÿ.

11

Jajerovíã re ijayvua

1 Ha'e gui jajerovíã rupi vy jaikuaa porã 'rã mba'emo nharô va'e anhetê ete oikoa, mba'emo jaexa e'ÿ va'e oikoa jaikuaa.

2 Mba'eta ymagua kuery voi ojerovíã rupi vy oexa uka raka'e heko porã va'ea.

3 Jajerovíã rupi vy jaikuaa Nhanderue oayvu py rive opa mba'e omoingo raka'eague. Ha'e rami vy mba'emo jaexa va'e ma jaexa e'ÿ va'e gui oiko va'ekue meme.*

Jypy ombopara pyre re jaikuaa pota aguã re ijayvua

Abel, Enoque ha'e Noé rekokie oíã

* 10:22 Romanos 5.1,2; Efésios 3.12; Hebreus 4.14-16 * 10:27 Hebreus 6.4-8 * 10:28 Deuteronomio 17.6 * 10:30 Deuteronomio 32.35-36, Salmo 135.14 * 10:35 Tiago 1.2-4, 12 * 10:38 Habacuque 2.3-4 * 11:3 Gênesis 1.1; 2 Pedro 3.5

⁴ Abel ma ojerovíaa rupi oiko vy ome'ê raka'e guyk'e'y Caim ome'ê va'e gui iporãve va'e. Mba'emo ome'ê va'e Nhanderuete ojou porã ramo jaikuaa heko porã va'ea. Ha'e nunga rupi omano ma rire teĩ aỹ voi ijayvu teri.*

⁵ Enoque ma ojerovíaa rupi oiko ramo heraa raka'e omano e'ỹ aguã rami. Nhanderuete ogueraa rire ndojouavei, mba'eta ogueraa e'ỹ mbove voi oexa uka Nhanderuete ombovy'a va'ea.

⁶ Ha'e rã jajerovia e'ỹ re ma nda'evei Nhanderuete nhambovy'a aguã, mba'eta Nhanderuete oikoa jarovia vy 'rãe nhandemboja hexe, ha'e oeka va'e kuery pe mba'emo porã ome'ê 'rãa jarovia vy guive.*

⁷ Noé voi ojerovíaa rupi vy Nhanderuete gui oikuaa raka'e mba'emo ojekuaa e'ỹ teri va'e oiko 'rãa. Nhanderuete renonde ojererokyjea rupi vy ojapo raka'e peteĩ kanoã guaxu ngoo pygua kuery ogueraa jepe aguã. Ha'e rami vy oikuaa uka ko vvy regua kuery ombopagaa 'rãa, ha'e ojerovíaa rupi teko porã oupity aguã rami oiko.*

Abraão, Sara, Isaque, Jacó ha'e José rekokie oĩa

⁸ Ha'e gui Abraão ma ojerovíaa rupi oiko vy Nhanderuete oenõĩ rã onhe'ê rendu, ha'e rami vy oo peteĩ henda oyvyrã ojopy aguã katy. Marã katy pa ooa oikuaa vy e'ỹ oo.

⁹ Ojerovíaa rupi oiko vvy ome'ê va'erã va'e rupi, oyvy re'ỹ rami. Oo'i py oiko raka'e Isaque ha'e Jacó reve. Ha'e va'e kuery voi hexeve ojopy avi 'rã oyvyrã ijayvuague.

¹⁰ Mba'eta oarõ oikovy tetã ijyta porã va'e ojekuaa aguã. Ha'e va'e re onhembopy'a va'ekue ha'e ijapoare ma Nhanderuete ae.*

¹¹ Ta'xy Sara voi ojerovíaa rupi oiko vy imemby nho raka'e, guaimi'i ete ma va'eri. Mba'eta oikuaa imemby aguã re ijayvu va'ekue ojeroviapy oikoa.*

¹² Ha'e nunga rupi peteĩ ava omanogue rami oiko va'e gui heta ikuai raka'e, yva re jaxy-tata ikuai va'e ha'e ye'ê yv'ry ita ku'i ikuai va'e rami avi mbovy rei e'ỹ ikuai.

¹³ Ha'e va'e kuery ha'e javive ojerovíaa rupi ikuai reve omano raka'e, ome'ê va'erã va'ekue ojopy e'ỹ re. Ha'e nunga ma mombyry gui mba'emo oexaa rami rive oguerovy'a. Ha'e rami vy vvy mboae regua ikuai rami onhemombe'u, ha'e rã ko vvy rupi ma oguata rei va'e ikuai.

¹⁴ Ha'e rami ijayvu va'e kuery ma guekoarã oeka teria oikuaa uka.

¹⁵ Tekoa oxãgue re ima'endu'a riae va'e rire anhetẽ ojevy 'rãgue ha'e katy.

¹⁶ Ha'e rami 'rãgue py oeka oikovy guekoa iporãve va'erã, yva regua. Ha'e nunga rupi Nhanderuete noxi "Ha'e kuery Ruete" he'i aguã ojeupe, ha'e rami vy ogueroko katu ha'e kuery retãrã.

¹⁷ Abraão ma Nhanderuete oeko a'ã ramo ojerovíaa rupi oiko vy ome'ê gua'y Isaque. Nhanderuete omoingo aguã re ijayvu rã oendu vy oguerovy'a va'ekue ri gua'y peteĩ'i va'e ojuka aguã rami oiko.

¹⁸ Mba'eta ixupe Nhanderuete "Isaque ra'y kuery pe 'Neramymino kuery' 'ea 'rã", he'i va'ekue.*

¹⁹ Ha'e rami Abraão oiko mba'eta oikuaa ta'y omanoague gui Nhanderuete omboete ju aguã voi ipo'aka va'ea. Ha'e rire omanoague gui oikove ju va'e rami ete avi ogueraa gua'y.*

²⁰ Ha'ekue rami ju Isaque voi ojerovíaa rupi oiko vy ogueroyvu porã gua'y kuery Jacó ha'e Esaú, ha'e rami vy omombe'u mba'emo oiko va'erã.*

²¹ Jacó ma ojerovíaa rupi vy omano ta ma vy ogueroyvu porã José ra'y kuery peteĩ-teĩ. Ha'e rami vy opopoka apy re onhemomburu reve opu'ã vy omboete Nhanderuete.*

²² José ma ojerovíaa rupi vy omano rai'i ma vy omombe'u Israel kuery oopa ju 'rãa, ha'e okãgue guive ogueraa uka.*

²³ Ha'e gui Moisés itui'i ramove tuu kuery ojerovíaa rupi ikuai vy mboapy jaxy re onhomi raka'e, mba'eta oexa rã kyrĩ va'e iporã. Ha'e rami vy ndokyjei huvixave ayvu rovai rupi ikuai aguã.*

Moisés rekokie oĩa

²⁴ Moisés tuja ma rire ojerovíaa rupi vy ndoikoxevei Faraó raxy pi'a rami.

²⁵ Mba'eta ojevavy reia py xapy'a'i ovy'a 'rãgue py ojou porãve Nhanderuete pegua kuery reve ojerereko axy uka aguã.

²⁶ Mba'eta Cristo káuxa onhemoingo axy uka vy Egito pygua kuery oguerokopaa gui oguerokopave 'rãa oikuaa, mba'eta oarõ oikovy hekoviarã.

²⁷ Ojerovíaa rupi vy oeja ovy Egito vvy, neĩ huvixa ipoxy ramo voi ndokyjei guive. Ha'e rami 'rãgue py oĩ atã, jaexa e'ỹ va'e oexa va'e rami.

²⁸ Ojerovíaa rupi vy ojapo raka'e ngaru Páscoa ára pygua, ha'e rami vy vexa'i ruguy omoẽ uka porojukaa oupity e'ỹ aguã Israel regua ra'y kuery tujakueve.*

²⁹ Ha'e kuery ojerovíaa rupi ikuai vy oaxa raka'e Ye'ê Pytã rupi, vvy pirua rupi ooa rami. Ha'e rã Egito pygua kuery ma oaxa aguã onhea'anga vy oy'upa.

Canaã vvy re Israel kuery ikuai jave guare re ijayvua

³⁰ Ha'e kuery ojerovíaa rupi ikuai ramo Jericó tetã kora ho'apa raka'e, sete ára re ombojere rire.

* 11:4 Gênesis 4.1-8 * 11:6 Gênesis 5.21-24 * 11:7 Gênesis 6.8-22 * 11:10 Gênesis 12.1-4 * 11:11 Gênesis 17.15-22 * 11:18 Gênesis 21.12 * 11:19 Gênesis 22.1-18 * 11:20 Gênesis 27.1-40 * 11:21 Gênesis 48.10-16 * 11:22 Gênesis 50.22-26 * 11:23 Êxodo 2.1-15 * 11:28 Êxodo 12.1-28; 14.15-31

³¹ Ha'e gui Raabe voi kunha itavy rei va'ekue ri ojeroviaa rupi oiko vy omovaë porã raka'e avakue oikuaa pota vy oje'oi va'ekue. Ha'e rami vy nokanhyi nhonhe'ê rendu e'y va'e kuery reve.*

³² Ha'e gui nda'evei amombe'upave aguã. Mba'eta oata 'rãgue amombe'u aguã Gideão rekokie, Baraque, Sansão, Jefté, Davi, Samuel ha'e profeta kuery rekokie ha'e javi.

³³ Ha'e va'e kuery ma ojeroviaa rupi ikuai vy ipo'aka raka'e tetã ikuai va'e re, teko porã rupi joguereko, oupity mba'emo ome'ê 'rã va'ekue, omboty uka guary juru,

³⁴ ombogue uka tata guaxu, kyxe gui oo jepe, ikangya gui imbarate ju, joe opu'ãa py ipo'aka, ha'e amboae guigua xondaro kuery omonhamba.

³⁵ Kunhague ma hoo pygua omano va'ekue omboetea jevy ramo ogueraa ju oikove va'e. Ha'e rã amboae kuery ma nonhemoë ukaxei vy onhemoingo axy uka raka'e, onhemoete ju aguã iporãve va'e oupity aguã.

³⁶ Ha'e gui amboae kuery ju ombojarua rei rã ikuai axy rei, oinupãa, oipokuaa, ha'e nhuã py omboty ramo.

³⁷ Ita py ojapipaa, omboayvua, vyvra kyxã py mbyte rupi ojayaa, kyxe py ojukaa guive. Hoo e'y va'e ikuai, vexa'i ha'e kavara pire py onhemonde, iporiau rei, ojexavai rei ha'e ojavykyra rei.

³⁸ (Ha'e va'e kuery rekoarã kova'e vyv nda'evei.) Tekoa e'yã rupi ikuai, vyvty, itakua ha'e vyvtya oĩ va'e rupi.

³⁹ Ha'e va'e kuery ha'e javive ma ojeroviaa rupi ikuai vy oexa uka raka'e heko porã va'ea. Ha'e rami teĩ ndoupityi guive ome'ê 'rã va'ekue,

⁴⁰ mba'eta nhande kuery peguarã Nhanderuete oguereko katu mba'emo iporãve va'e, nhande kuery reve vy anho ha'e kuery oupitya aguã ijavyvague.

12

Cristo rami avi nhande voi nhaĩ atã aguã re ijavyvua

¹ Ymagua kuery heta ojeroviaa oexa uka va'ekue ma arai tuvixa va'e rami nhandembojere okuapy. Ha'e ramo nhande voi ke nhandejegui nhamboipa ipoyikue oĩ va'e ha'e javi, nhandere jejavya oja ratã va'e guive.

Ha'e rami vy nhaĩ atã reve nhanha tema nhanderenonderã omoĩ mbyre katy.*

² Nhamã'ê porã tema Jesus re anho, mba'eta ixugui ae ou jypy guive opa peve jajerovia aguã. Mba'eta ha'e ma henonderã imbovy'arã omoĩ mbyre ojopy voi 'rãgue py oxĩ e'y re ogueropo'aka raka'e kuruxu re oiko axya. Ha'e rire oguapy oiny Nhanderuete renda openaaty oiporu kuua regua re.

³ Peikuaa pota porã ke ha'e rami ete heko vai va'ety kuery hexe opu'ã rei rã ogueropo'akaague re, penekangy e'y aguã, neĩ pendepya py pendekuerai e'y aguã.

Nhanemõ'arandua py Nhanderuete nhanderayvua oexa ukaa re ijavyvua

⁴ Mba'eta peẽ ma teko vai rovai penhea'ãa rupi penderuguy nomoẽai teri.

⁵ Ha'e penderexarai guive gua'y pe rami penemongetaa re: "Xera'y kuery, pembovare'y eme Senhor penemo'arandu rã, pendekuerai eme guive pẽvy ijavyvua ramo.

⁶ Mba'eta Senhor omongeta 'rã guembiayvu kuery, ha'e oinupã 'rã gua'yãrã ogueru va'e ha'e javive", he'iague re.*

⁷ Ha'e nunga rupi penemoingo axya ma Nhanderuete penemo'arandu aguã oiko, gua'y kuery rami ae penderereko vy. Mba'eta jipoi ta'y kuery tuu omõ'arandu e'y va'e.

⁸ Napenemo'arandui ri ramo penderu peikuaa e'y va'e peiko, ta'y e'y, mba'eta Nhanderuete omõ'arandu 'rã gua'y kuery ha'e javi.

⁹ Nhanderu kuery ngo'o re ikuai va'e ma nhanemõ'arandu rã nhanhe'ê rendu 'rã. Nhandenhe'ê Ruete katuve ma nhanhe'ê rendu 'rãgue, jaikove aguã.

¹⁰ Mba'eta nhanderu kuery nhanemõ'arandu 'rã xapy'a'i guarã, ha'e kuery oikuaa rami. Ha'e rã Nhanderuete ma nhanemõingo porã aguã nhanemõ'arandu, iky'a e'yã rami nhande voi nhandekuai aguã.

¹¹ Nhandemõ'arandua nhavõ ha'e ramove'i nanhanembovy'ai 'rã merami, nhandemõboriaurã ranhe. Ha'e rami teĩ nhanemõ'arandupaa ma rire ojapo 'rã nhandekuai porã ha'e nhandereko porã aguã rami.*

¹² Ha'e nunga rupi pemõbaraete ju ipo ho'a va'ekue ha'e henapy'a kangy va'e kuery.

¹³ Pembo'yvi porã tape oguata aguã, okarau va'ekue okanhy 'rãgue py okuera aguã.*

Peteĩ rami nhandekuai, ha'e nhandereko ky'a e'y aguã re ijavyvua

¹⁴ Peteĩ rami pendekuai pavẽ reve, ha'e penhea'ã pendeko ky'a e'yã rupi, mba'eta ha'e rami e'y vy avave rei ndoexai 'rã Senhor.

¹⁵ Peikuaa pota porã ke Nhanderuete omboaxya avave rei oupity e'y re ojepe'a e'y aguã. Toĩ eme guive iro va'e rapo rami ikuai va'e, mba'eta ha'e va'e henhoĩ vy penemoingo eta rei ha'e heta 'rã penemboeko ky'a.*

¹⁶ Penembyte rupi ta'ikuai eme heko ky'a va'e, neĩ ha'eve'yã rami ikuai va'e Esaú ramigua. Mba'eta ha'e va'e ma peteĩgue'i okaru aguã re rive ovende raka'e ta'y jypygua oikoa peguarã va'ekue.

¹⁷ Ha'e va'e rire ma nguu pe ojereroayvu porã ukaxe teĩ nda'evei ae. Hexay reve onhea'ã teĩ ndojouvei ha'ekue py ojevyy aguã.

Yvyty Sinai ha'e Sião re ijavyvua

* 11:31 Josué 6.1-25 * 12:1 Apy ma corrida re ombojoja Senhor pe nhandekuaia (Filipenses 3.12-14). * 12:6 Jó 5.17; Provérbios 3.11-12

* 12:11 João 15.1,2; Tiago 1.2-4; 1 Pedro 4.1,2 * 12:13 Provérbios 4.26 * 12:15 Deuteronomio 29.18

¹⁸ Ha'e gui peẽ ma vvyty tata haku raxy hendya py e'y pevaẽ.† Pyávy rami pytũa py e'y pevaẽ, neĩ ara vai oikoa py,

¹⁹ mimby guaxu onhendu ratã va'e oĩa py, neĩ avyu atãa py e'y pevaẽ. Ha'e va'e gui hendua kuery ojerure raka'e onhendu ve'y aguã re,

²⁰ mba'eta ha'e kuery ndogueropo'akavei ma ijayvuague: “Mymba teĩ ae ma vvyty re onhemboja ramo tojapipaa ita py”, he'iague.*

²¹ Anhetẽ ha'e nunga nhomondyipa ete ramo Moisés eteve voi “Akyje ha'e aryryipa reia aendul” he'i raka'e.*

²² Ha'e rami 'rãgue py peẽ ma Sião vvyty re pevaẽ, Nhanderuete oikove va'e pegua tetã, yva re Jerusalém oĩ va'e py. Pevaẽ anjo kuery mbovy e'y ikuaiia py, ha'e nhemboaty iky'a e'y va'ea py,

²³ igreja kuery jypyguata y ha'e taju kuery yva re hery ipara va'e ijatya py. Pevaẽ Nhanderuete pavẽ re oikuaa pota va'erã oĩa py, ha'e penhemoirũ ma guive heko porã va'e kuery imoingo porãarã oupitypa ma va'ekue nhe'ẽ reve.

²⁴ Pevaẽ avi Nhanderuete reve guarã ipyau va'e Reruare Jesus oĩa py, ha'e huguy nhandeky'a o'arã omboayvi pyre oĩa py guive. Ha'e va'e ma Abel ruguy gui mba'emo iporãve va'e oikuaa uka va'e.

²⁵ Ha'e nunga rupi pejapyxaka porã pota, ijayvua pendu rive'y aguã. Mba'eta vvy re Nhanderuete ijayvu rã noenduxeĩ va'ekue ndoo jepeĩ rire nhande kuery katuve ma ndajaa jepeĩ 'rã, yva gui nhandevy ijayvua gui jajepa'a ri vy.

²⁶ Ha'ekue py Nhanderuete ijayvu vy omomyĩ raka'e ko vvy. Ha'e gui aỹ ma ijayvu jevy vy aipoe'i: “Peteĩgue ju, teĩgue'i pyve amomyĩ 'rã vvy anho e'y, yva guive”, he'i.*

²⁷ Ha'e gui “Peteĩgue ju, teĩgue'i pyve” he'ia py jaikuaa Nhanderuete oipe'apa 'rãa guembiapo omomyĩ mbyrã oĩ va'e, omomyĩ mbyrã e'y anho opyta aguã.

²⁸ Ha'e nunga rupi nhande ma nhaneretã omomyĩ mbyrã e'y jareko vy nhaĩ atã tema nhanemboaxya re, mba'eta nhanemboaxya rupi Nhanderuete pe nhandekuai ramo nhandererovy'a 'rã. Henonde nhamboete ha'e jajererokyjea iky'a e'y va'e rupi tema nhandekuai,

²⁹ mba'eta Nhanderuete ma tata nhomombarã oiko.*

13

Jomeme nhandekuai porã aguã re ijayvua

¹ Pendekuai riae tema mboravvu re, joegua meme'i joayvua rami ae.

² Penhomovaẽ e'y eme, mba'eta amongue ma oikuaa vy e'y anjo kuery ete omovaẽ raka'e.

³ Penema'endu'a tema nhuã py omboty pyre re, ha'e kuery reve peẽ voi peĩ avia rami. Penema'endu'a avi ogueroko axya va'e re, peẽ voi ojavyky reipy peikoa rami.

⁴ Tomboete pavẽ omenda va'e kuery, ha'e iky'a e'yã rupi tajogueroko. Mba'eta Nhanderuete ombopaga 'rã heko ky'a ha'e itavy rei va'e ha'e javi.

⁵ Pendekuai eme perãta re nda'eveiva rupi. Mba'emo pereko'i vy pevy'a, mba'eta Nhanderuete aipoe'i: “Peteive henda py xee ndorojai 'rã, neĩ peteĩgueve ndoroayvu e'y'i 'rã”, he'i.*

⁶ Ha'e rami rire jakyjea py e'y 'rã aipoja'e: “Senhor xepytyvõarã oiko ramo xee ndakyjei 'rã. Mba'e tu avakue ojapo 'rã xere?”*

Nhanderuete pe jaiko aguã re ijayvua

⁷ Penema'endu'a tema pendererekoare kuery Nhanderuete avyu mombe'uaire rekoue re. Peikuaa pota porã ha'e kuery omano peve ikuaiague re. Ha'e kuery ojeroviaague rami ke peẽ voi pendekuai.*

⁸ Jesus Cristo ma jypy guive aỹ peve ha'ekue ae oiko, ha'e raka'e rã peve guarã.

⁹ Opa marã ha'e amboae rami rei penembo'ea rã pendu rive. Mba'eta pavẽ gui ovareve va'e ma Nhanderuete nhanemboaxya re nhanhemombaraete aguã nhandepy'a py, tembi'u re rive'y, mba'eta ha'e nunga re nda'eveiva va'e kuery peteive henda py ndoupity'i 'rã imoingo porãarã.

¹⁰ Ha'e rã nhande kuery ma amboae regua altar jareko. Ha'e va'e gui ma ombojeroviaaty pygua kuery ho'ua aguã nda'evei.

¹¹ Ha'e gui Henda iky'a e'y ete va'e py sacerdote kuery yvatekueve va'e ogueroike 'rã mymba ruguy jejavya re, ha'e rã ho'okue ma tekoa gui mombyry'i 'rã oapy.

¹² Ha'e rami ae Jesus voi tetã rokẽ gui mombyry'i oiko axy raka'e, nguguy py ae ojeupegua kuery oiky'a'o aguã.

¹³ Ha'e nunga rupi oĩa py jaje'oi nhande voi, amboae kuery ikuaiia gui mombyrya py teĩ, Jesus káuxa nhanembojaru reia rã jaropo'aka vy.

¹⁴ Mba'eta anhetẽ apy ndajarekoi tetã oĩ riae va'erã, raka'eve rã ojekuaa va'erã va'e re nhanhea'ã.

¹⁵ Ha'e rami vy Jesus rery rupi Nhanderuete pe nham'e'ẽ riae 'rã jarovy'aa, nhandejuru py jaroporai hery.

¹⁶ Ha'e rami ae avi pejepe'a eme joupe pejapo porãa ha'e peteĩ-teĩ penhopytyvõa gui, mba'eta ha'e nunga ome'ẽmby ma Nhanderuete oguerovy'a.

† 12:18 Apy ma ijayvu judeu kuery yma guare Sinai vvyty katy'i ikuaiia py lei ojopy jave okyje rei oikupyague re. Ha'e va'e jave py Nhanderuete ma nhomondyipa rei va'e rami ojekuaa (Êxodo 19.9-25; 20.18-21; Deuteronomio 4.9-12).

* 12:20 Êxodo 19.12-13 * 12:21 Deuteronomio

9.19 * 12:26 Ageu 2.6 * 12:29 Deuteronomio 4.24 * 13:5 Deuteronomio 31.6 * 13:6 Salmo 118.6-7 * 13:7 1 Tessalonicenses

5.12,13

¹⁷ Penhe'ē rendu pendererekoa kuery, pendekuai ha'e kuery oipotaa rami, mba'eta penenhe'ē re opena, ha'e raka'eve rā oikuaa potaa 'rā openaague re. Ha'e rami rā ha'e kuery ovy'aa rupi 'rā opena pendere, iporiaua rupi e'ỹ, mba'eta iporiaua ma mba'everā ndovarei 'rāgue pēvy.

Opa py mba'emo re ojerureague

¹⁸ Pejerure tema orere, mba'eta ore roikuaa rā orep'y'a ky'a e'ỹa rupi orekuaia, opa mba'e py ha'evea rami roikoxe vy.

¹⁹ Aipota pejerure ete pēa py xee aju voive aguā re.

²⁰ Ha'e gui Nhanderuete petēi rami nhanemoingo aguā nhande-Senhor Jesus omanoague gui omboete ju raka'e, ha'e huguy rupi ojapo guexeve guarā opa va'erā e'ỹ, ha'e omoĩ guive vexa'i kuery re opena va'erā yvateve va'e.

²¹ Tove tapenemoingo porā opa mba'e py, ha'e oipota va'e pejapo aguā rami. Tove peē kuery re tomoĩ imbovy'arā pejapo aguā, Jesus Cristo rupi ae. Jesus toguerovy'aa raka'e rā peve. Amém.

²² Irmão kuery, ajerure pendu porā aguā kova'e ayvu ipuku e'ỹ'i va'e romongetaa rupi ambopara va'ekue.

²³ Pēvy amombe'u irmão Timóteo nhuā gui opoia jevy maa. Xapy'a rei ha'e va'e xea py ovaē voi ramo hexeve roo 'rā roexa vy.

²⁴ Pemombe'u ke pendererekoa kuery ha'e javive pe roxaruraa, iky'a e'ỹ va'e kuery ha'e javi pe guive. Itália pygua kuery oxarura uka avi pendevy.

²⁵ Tove peē kuery ha'e javive tapendu penemboaxya.

Tiago ombopara va'ekue Tiago ombopara va'ekue

Kova'e kuaxia rupi Jesus ryvy Tiago omongeta hemimbo'e kuery. Ha'e rami vy ijayvu Jesus re jajeroviaa jaexa uka aguã mba'emo jajapoa py.

Mba'eta "Irmão kuery, nhande-Senhor Jesus Cristo hexakãmba va'e re pejerovia vy peteĩ regua rive joegui peayvuve eme" (2.1), "nda'evei pejejou porã rei aguã, neĩ anhetê va'e rovai pendeapu aguã guive" (3.14). Ha'e rami 'rãgue py Nhanderuetea gui arandu ou va'e re 'rã nhandekuai. Mba'eta "yvate guigua 'arandua ma jypy'i nhandeapo 'rã nhandereko ky'a e'ỹ aguã rami, ha'e gui nanhandevai rive-rivei 'rã, mborayvu re nhandekuai, ha'eve vai'i va'e 'rã jaiko, ha'e opa mba'e py nhomboaxy ha'e nhopytyvõ va'e, peteĩ regua joegui ndajayvuvei 'rã, nanhandereko porã merami rivei 'rã guive" (3.17). Ha'e rami vy 'rãe jaexa uka Jesus re jajeroviaa.

Oxarura reve ijayvu aguã omboypyague

¹ Xee Tiago ma Nhanderuetea ha'e Senhor Jesus Cristo rembiguai aiko.* Axarura doze regua opa rupi pendekuai va'e pe.

Nhandereko a'ãa rire iporã va'e oiko va'erã re ijayvua

² Irmão kuery, opa marã pendereko a'ãa rã pevy'a ete ke,
³ mba'eta peikuaa pejeroviaa a'ãarã oiko va'e peaxapa ma rire peĩ atãve 'rãa.

⁴ Ha'e gui peĩ atãa tojapopa ojapo 'rã va'ekue, peẽ kuery opa mba'e py pendereko porã aguã, peteĩve henda py iporã va'e oata e'ỹ re.*

Nhane'arandurã re jajerure aguã re ijayvua

⁵ Ha'e gui amongue 'arandurã oata ramo tojerure Nhanderuetea pe. Ha'e ramo ome'ẽ 'rã, mba'eta ivai e'ỹ re 'rã mba'emo ome'ẽ pavê pe.

⁶ Ha'e rami avi ojeroviaa rupi tojerure, peteĩve henda py toĩ eme oexa'ã reia.* Mba'eta ndojerovia porã va'e ma yai vyvutu ogueraa rupi rei omomy-momyi va'e rami ikuai.

⁷ Ha'e ramigua avakue toexa'ã eme Senhor gui mba'emo ojopy aguã re,

⁸ mba'eta mokoĩ rami rei oikuaa va'e vy mamo rã oikoa rupi nai'arandui rei 'rã.

Mba'emo ko yvy regua okanhymba 'rã re ijayvua

⁹ Irmão kuery yvy'ĩgueve va'e ma toguerovy'a Nhanderuetea omboyvatea re.

¹⁰ Ha'e rã oguerokopa va'e ma omo'yvy'ĩa re toguerovy'a, mba'eta jai poty rami rive 'rã okanhy.*

¹¹ Mba'eta kuaray ojope ratã reve ou ramo jai ipiru rã ipoty okuipa 'rã. Jaexa rã iporãague ndojekuaavei 'rã. Ha'e rami ae oguerokopa va'e oi okanhy 'rã mba'emo re opena rupive.

Jejavya re ijayvua

¹² Ovy'a ete 'rã avakue oeko a'ãa rã oĩ atã reve ogueropo'aka va'e, mba'eta oaxapa rire coroa-rã oupity 'rã tekove. Ha'e va'e ma guembiayvu kuery pe Senhor ome'ẽ aguã re ijayvu.

¹³ Ha'e rami teĩ avave rei omoangekoa rã "Nhanderuetea xemoangeko" te'i eme. Mba'eta Nhanderuetea ma mba'emo vai pe onhemioangeko uka va'e'ỹ, neĩ nanhanemoangekoi 'rã mava'eve rei.

¹⁴ Ha'e rami 'rãgue py peteĩ-teĩ nhande ae jaiopotapa reia py nhandemoangeko uka. Ha'e nunga py ae nhandembotavy uka ha'e jajeity uka.

¹⁵ Mba'eta jaiopotapa reia ma nhandejee nhamoĩ rire nhandemoingo 'rã jajejavu aguã rami. Ha'e gui jajejavya ma opaa py ojapo 'rã nhamano aguã rami.

Iporã va'e me'ẽa re ijayvua

¹⁶ Irmão kuery xerembiayvu, pejekore eme.

¹⁷ Mba'eta yvate gui meme ou mba'emo porã iky'a e'ỹ va'e, Nhanderuetea hendy va'e moingoare va'e ae ombou.* Ixupe ma jipoi amboae rami rei imoingoarã, neĩ kuaray'ã rami rive herovaarã.

¹⁸ Mba'eta ha'e ae oipotaa rami vy gua'y kueryrã nhandemoingo raka'e ayvu anhetê va'e rupi, hemimoingo kuery ha'e javi gui nhande ranhe ixupegua nhandekuai aguã.

Nhanderuetea ayvu rupi nhandekuai ete aguã re ijayvua

¹⁹ Irmão kuery xerembiayvu, ha'e nunga peikuaapa ae ma. Ha'e rami avi peteĩ-teĩ penhea'ã penembo'ea rã pejapaxaka porã aguã. Ha'e rã pendeayvu voi eme, neĩ pendevei voi eme guive.

²⁰ Mba'eta avakue ivaiia py ndoexa ukai 'rã Nhanderuetea guigua teko porã.*

²¹ Ha'e nunga rupi pendejegui pemboi nda'evei va'e ha'e teko vai pendere oĩ va'e ha'e javi. Ha'e penhemo'yvy'ĩi reve pendu ete ayvu porã pendere omoĩ mbyre, mba'eta pendereraa jepe aguã ipo'aka va'e.

²² Ha'e rami vy ayvu ojapo ete va'e peiko, oendu rive va'e'ỹ, peẽ ae pejekore e'ỹ aguã.*

²³ Mba'eta ayvu oendu rive vy ha'e rupi ndoikoi va'e ma epêko re peteĩ ava ojexa rive va'e rami,

* 1:1 Atos 15.13; Gálatas 1.19, 2.9,12 * 1:4 Romanos 5.3,4; 1 Pedro 4.12-14 * 1:6 Mateus 21.22 * 1:10 1 Pedro 1.24,25 * 1:17 2 Pedro 1.3,4 * 1:20 Romanos 12.17-21; Efésios 4.26-32 * 1:22 Mateus 7.24-27; 1 João 2.3-6

²⁴ mba'eta ojexa ma vy ojepe'a vyve marā rami pa ojekuaa ague re hexaraipa vyvoi 'rā.

²⁵ Ha'e rā lei opa mba'e gui nhanemoingo porā va'e re amongue oikuaa pota ete ha'e ojapoa rupi oī atā va'e ma omoingo porāa ete 'rā mba'emo ojapoa rupi rei, mba'eta oendu rive va'e'ỹ, ojapo ete va'e oiko rā.

²⁶ Ha'e rā amongue ojeupe “Nhanderuetepagua” he'i tei oayvu py ndojekokoi va'e ma opy'a py ae ojekore, ha'e Nhanderuetepa merami rive oiko.

²⁷ Ha'e gui Nhanderuetepa renonde nhandereko ky'a e'ỹa ha'e anhetē rupi nhandekuai vy jaiupu 'rā tyre'ỹ ha'e imeve'ỹ va'e kuery ojexavai rā, ha'e jajekoko 'rā vyv regua reko rupi nhandereko ky'a gui.

2

Peteĩ regua rive joegui jayvu ve'ỹ aguã re ijayvua

¹ Irmão kuery, nhande-Senhor Jesus Cristo hexakāmba va'e re pejerovia vy peteĩ regua rive joegui peayvuve eme.*

² Xapy'a rei penhembo'eaty py peteĩ ava oike 'rā kuã regua ouro guigua ha'e onhemonde porā reve. Ha'e gui amboae ju oike avi 'rā iporiaukue'i, ao ymague py rive onhemonde va'e.

³ Xapy'a rei onhemonde porā va'e peroryxe vy “Apy ke eguapy tenda iporāve va'e py” peje 'rā. Ha'e rā iporiaukue'i pe ma “Ndee, epu'ã he'amy upe py, ha'e'ỹ vy eguapy apy xepy renda yv'ỹry” peje 'rā.

⁴ Ha'e ramia py peteĩ regua rive'ỹ ri ty'y joegui peayvuve? Ha'eve'ỹa rami e'ỹ ri ty'y joeko re peikuaa pota?

⁵ Irmão kuery xerembiayvu, pendu ke. Ko vyv regua kuery “Iporiaukue'i” he'ia va'e regua e'ỹ teve Nhanderuetepa oiporavo ojerovia ete aguã? Ha'e kuery va'e regua pe e'ỹ teve oupity uka opo'akaa? Mba'eta guembiayvu kuery ha'e javi peguarã oguereko.

⁶ Ha'e rā peẽ kuery ma napemboeti pekuapy iporiaukue'i. Ha'e rami avi oguerekopa rei va'e kuery e'ỹ ri ty'y penemoingo axy rei? Ha'e kuery e'ỹ ri ty'y penemboayvua aguã katy pendereraa va'e?

⁷ Ha'e kuery e'ỹ ri ty'y tery porā pendere omoĩ mbyre re ijayvu rei va'e?

⁸ Lei re ipara oĩ va'e “Reayvu 'rā neirũ ndee ae rejayvua rami” he'ia pejapopa ri vy ha'evea rami pendekuai.*

⁹ Ha'e rā peteĩ regua rive joegui peayvuve ri vy pejejavy. Lei rupi e'ỹ pendekuai vy heko vai va'e pepyta.

¹⁰ Mba'eta lei re oĩ va'e ha'e javi amongue ojapopa teĩ peteĩ henda'i py mba'e ho'a vy ha'e javi py onhemboeko ky'a.

¹¹ Mba'eta “Ndetavy eme” he'i va'ekue ae “Ejojuka eme” he'i avi. Ha'e ramo nandetavy rei va'eri rejojuka vy lei rovai rupi reiko.*

¹² Ha'e nunga rupi pendeayvu ha'e pendekuai ke jaa jepe aguã regua lei rupi, mba'eta ha'e va'e rupi ae 'rā nhandere oikuaa potaa.

¹³ Mba'eta nanhanhomboxyi rire nhanemboaxy re'ỹ ju 'rā nhanembopaga. Ha'e rā nhomboaxy va'ekue ma nhombopaga aguã ára py ipo'aka 'rā.

Jajerovia jaexa uka aguã re ijayvua

¹⁴ Irmão kuery, mba'erã tu ovare amongue “Xee ajerovia” he'i tei ojeroviaa mba'eve py ndoexa ukai ramo? Ha'e rami ojeroviaa rupi nda'u oo jepe 'rā?

¹⁵ Xapy'a rei peteĩ irmão e'ỹ vy irmã nda'ijaoi ha'e tembi'u ndoguereko'i rā

¹⁶ peẽ kuery regua pexa vy onheovã aguã napeme'ẽi e'ỹ re “Peiko porã ke, penhemonde ha'e pekaru”, peje 'rā. Mba'erã tu ovare 'rā ha'e rami pendeayvua?

¹⁷ Ha'e rami ae avi jajeroviaa voi mba'eve py ndajaexa ukai ri ramo omanogue rami rive opyta, hexa ukaarã noĩ avi rã.*

¹⁸ Xapy'a rei amongue aipoe'i 'rā: “Peteĩ ojerovia 'rā, ha'e rā amboae ma onhea'ã 'rā mba'emo ojapoa rupi”, he'i 'rā. Exa uka ha'vy rejeroviaa mba'emo rejapo e'ỹ re. Ha'e rā xee ma aexa uka 'rā ajeroviaa mba'emo ajapoa py.

¹⁹ Ndee roviaa teve Nhanderuetepa teĩ oikoa? Ha'evea rami reikuaa teĩ anha kuery voi ha'e rami oguerovia oryrypa reve.

²⁰ Ha'e gui ava hi'arandu e'ỹ va'e, reikuaa porãxe teve jajeroviaa ndajaexa ukai ramo mba'everã ndovareia?

²¹ Nhaneramoĩ Abraão nda'u ojeroviaa etea oexa uka e'ỹ re ri omboeko porãa raka'e? Mba'eta altar áry gua'y Isaque ome'ẽ aguã rami oiko.

²² Ma'ẽ, ojerovia ete ha'e oexa uka guive, mba'eta mba'emo ojapoa py oexa uka ojerovia etea.

²³ Ha'e rami vy ae ojeupity ipara re oĩ va'e: “Abraão ojerovia Nhanderuetepa re. Ha'e ramo ojeroviaa re omoĩ teko porã” he'iague. Ipara avi oiny: “Ixupe Nhanderuetepa irũ” ea.*

²⁴ Ha'e rami rire jajeroviaa jaexa uka ramo mae 'rā nhanemboeko porãa, jajeroviaa re rive'ỹ.

²⁵ Raabe itavy rei va'ekue voi ojeroviaa oexa uka ramo omboeko porãa raka'e. Mba'eta ha'e va'e ma oikuaa pota aguã ombou pyre kuery omovã raka'e, ha'e gui amboae tape rupi ju omondouka guive.

²⁶ Mba'eta nhanenhe'ẽ reve'ỹ vy nhanderete omanogue itui. Ha'e rami ae avi jajeroviaa voi xapy'a rei mba'eve py jaexa uka e'ỹ ramo omanogue ae avi opyta.

* 2:1 1 Timóteo 5.21 * 2:8 Levítico 19.18 * 2:11 Êxodo 20.13-14, Deuteronomio 5.17-18 * 2:17 Lucas 3.8-14; Atos 26.20 * 2:23 Génesis 15.6

3

Nhaneapekū nhanemboeko vaia re ijayvua

¹ Irmão kuery, nda'evei peẽ kuery heta peiko aguã porombo'ea, mba'eta jaikuaa porombo'ea kuery rekokue re oikuaa potaa poyive 'rãa.

² Mba'eta nhande kuery ha'e javive 'rã jajeity uka opa mba'e py. Oayvu py ndojejavivi va'e ma opa mba'e py 'rã heko porã, ha'e guete regua ha'e javi guive ojoko kuaa.

³ Kavaju re minha ijuru xã nhamoĩ 'rã jaipotaa rami jareko aguã. Ha'e rami vy hete ha'e javi 'rã jaaxea rupi jaraa.

⁴ Peikuaa pota avi kanoã guaxu ikuai va'e re. Ha'e nunga ma tuvixa ete, ha'e hexe yvytu oipeju atã teĩ imbojepaa kyrĩ'i va'e py imbogataa kuery ogueraaxea katy rei 'rã ogueraa.

⁵ Ha'e rami ae avi nhaneapekū, mba'eta nhanderete regua kyrĩ'i va'eri onhemboyvate reia rupi 'rã ijayvu, peteĩ tata ravijukue'i ka'aguy tuvixa va'e omoendypaa rami avi.

⁶ Mba'eta nhaneapekū voi tata ramigua, ha'e nhanderete regua ikuai va'e mbyte py oĩ opa marãgua teko vai rexa ukaarã. Nhanemboeko ky'apa 'rã. Tata ogue'ỹ va'e omoendy rire oapy avi 'rã jaikoa ha'e javi.

⁷ Mba'eta mymba ikuai va'e minha nhamomãxo kuaa 'rã: guyra, vvy rupi otyryry va'e ha'e yy rupigua ha'e javive regua ma nhamomãxo va'e neme.

⁸ Ha'e rã nhaneapekū ma avave rei ndojoko kuaai 'rã. Teko vai moingoa ojoko pyrã e'ỹ oĩ, ha'e veneno rami jojuka 'rã guive.

⁹ Nhaneapekū py jaroayvu porã 'rã Senhor Nhanderuete. Ha'e va'e py ae ju 'rã nhandeayvu vai avakue Nhanderuete ojee rami omoingo va'ekue re.

¹⁰ Nhandejuru peteĩ'i va'eri ayvu porã ha'e ayvu vai rupi ijayvu. Irmão kuery, ha'e nunga ma nda'evei.*

¹¹ Yvu peteĩ'i oĩ va'e gui nda'u oẽ 'rã yy porã ha'e iro va'e avi?

¹² Irmão kuery, figo rembypy gui nda'u oiko 'rã azeitona? Ha'e rami e'ỹ vy uva'y gui nda'u oiko 'rã figo? Ha'e rami ae avi peteĩ yvu gui noẽi 'rã yy he'ẽ ro ha'e iporã va'e.

'Arandua yvate guigua re ijayvua

¹³ Peẽ kuery va'e regua mava'e nda'u hi'arandua ha'e oikuaapa va'e pendekuai? Pene'arandua pexa uka ha'vy pendevei reia rupi e'ỹ, ha'evea rami anho pendekuaia py.

¹⁴ Ha'e rã xapy'a rei pendepy'a re joe napendea'ei reia ha'e peẽ ranhexea oĩ ramo nda'evei pejeju porã rei aguã, neĩ anhetẽ va'e rovai pendeapu aguã guive.

¹⁵ Ha'e ramigua pexa uka va'e ma yvate guigua 'arandua e'ỹ. Ha'e ramigua ma vvy regua, mymba kuery oendu va'e ramigua rive, anha guigua ae.

¹⁶ Mba'eta joe nda'ija'ei ha'e ha'e ranhexe va'e ikuai py oĩ avi 'rã joo rami e'ỹ-e'ỹ ikuai va'e ha'e opa marãgua teko vai.

¹⁷ Ha'e rã yvate guigua 'arandua ma jypy'i nhandeapo 'rã nhandereko ky'a e'ỹ aguã rami, ha'e gui nanhandevaĩ rive-rivei 'rã, mborayvu re 'rã nhandekuai, ha'eve vai'i va'e 'rã jaiko, ha'e opa mba'e py nhomboaxy ha'e nhopytyvõ va'e, peteĩ regua joegui ndajayvuvei 'rã, nanhandereko porã merami rivei 'rã guive.*

¹⁸ Mba'eta peteĩ rami nhomoingoa kuery ma oma'etỹ va'e rami avi peteĩ rami nhomoingogue rupi ojou 'rã heko porã va'e.

4

Joguero'a reia re ijayvua

¹ Magui tu ou joe pepu'ã ha'e pejoguero'a reixea? Pendepy'apy py mba'emo re nda'eveivea pendu va'e gui e'ỹ teve ou?*

² Mba'eta mba'emo peipota teĩ ndapejoui vy pejojukaxe. Mba'emo re nda'eveive peiko teĩ ndapejoui vy pejoguero'a rei ha'e joe pepu'ã rupi pendekuai. Mba'eve ndapejoui mba'eta ndapejerurei.

³ Pejerure vy voi ndapejopyi, mba'eta ha'eve'ỹa ramigua re pejerure, peẽ ae peipotaa rami pendekuaixe vy.

⁴ Nhanderuete pe merami rive pendekuai va'e, ndapeikuaai ri ty'y ko vvy regua re pei vy Nhanderuete rovaigua pepytaa? Mba'eta ko vvy regua re ooxe va'e rei Nhanderuete rovaigua oiko.

⁵ Tyrã pa pexa'ã ipara re oĩa oaxa rive 'rãa re? Mba'eta "Nhandere Nhanderuete Onhe'ẽ omoĩ va'ekue oipota hexe anho jaa", he'i va'ekue.

⁶ Ha'e rami teĩ nhanemboaxyve ju 'rã, mba'eta aipoe'i avi: "Nhanderuete opu'ã 'rã onhemboyvate rei va'e re, ha'e rã onhembo'vyvĩ'i va'e ma omboaxy 'rã."*

⁷ Ha'e nunga rupi penhemo'vyvĩ'i ke Nhanderuete oipotaa rami. Ha'e rã anha pe ma pejeity uka eme. Ha'e ramo ojava 'rã pendegui.

⁸ Penhemboja ke Nhanderuete re. Ha'e ramo ha'e ju onhemboja 'rã peẽ kuery re. Pejejavypa va'e, peiky'a'o uka ke pendepo. Mokoĩ rupi rei pendepy'a va'e, peiky'a'o uka pendepy'a.

⁹ Pendu ke penhemboaxya, ha'e rami vy peneraxẽ ha'e pejae'o. Penderory rei 'rãgue py pendepy'a vai, pevy'a rei 'rãgue py pendeporiau.

¹⁰ Penhemo'vyvĩ'i ke Senhor renonde. Ha'e ramo penemboyvate ju 'rã.

Joe nhandeayvu rei e'y agua re ijayvua

¹¹ Irmão kuery, pendeayvu rei eme joe. Mba'eta irmão kuery re ijayvu rei, e'y vy oikuaa pota rei va'e ma lei re voi ijayvu ha'e oikuaa pota rei. Ha'e gui lei re peikuaa pota rei vy lei rupi ve'y pendekuai, ha'e rã lei re peikuaa pota reia rupi rive.

¹² Mba'eta petei'i oiko lei mbouare ha'e joe oikuaa pota va'erã. Ha'e va'e ma jogueraa jepe ha'e nhomokanhy agua ipo'aka va'e. Ha'e rã ndee, marã ramigua tu reiko, neirũ kuery re reikuaa pota rei agua?*

Tenonde oiko va'erã ndajaikuuaia re ijayvua

¹³ Peẽ kuery va'e regua "Kova'e ára, e'y vy ko'ẽ rã roo 'rã tetã re. Petei'ma'et'y re 'rã roiko ha'e py. Mba'emo romboekoviaa rupi rojounpa 'rã", peje. Ha'e ramo pejapaxaka porã pota ke a'y.

¹⁴ Mba'eta peẽ ndapeikuaai neĩ ko'ẽ rã mba'e pa oiko 'rãa voi.* Marã ramigua tu peikovea? Mba'eta yvyxĩ xapy'a'i ojekuaa, ha'e gui are'y'i re okanhy va'e rami peiko.

¹⁵ Ha'e rami 'rãgue py "Senhor oipota ramo roikove, ha'e rojapo 'rã ha'e nunga", peje agua ha'eveve.

¹⁶ Ha'e rami teĩ a'y ma mba'emo tuvixa va'e pejapo agua re pendeayvua rupi penhemboyvate rei. Ha'e rami nhanhemboyvate ha'e javi ma teko vai.

¹⁷ Ha'e nunga rupi iporã va'e ojapo agua oikuaa teĩ ndojapoi va'e ma ojejavy.

5

Ojeupe guarã rive ojou pyre Nhanderuete omomba agua re ijayvua

¹ Perekopa rei va'e kuery, pejapaxaka ke a'y. Pejae'o ha'e pendepy'a vai ke, mba'eta penembojexavaiarã ou.*

² Mba'emo pereko va'e ma hu'ũmba 'rã, vixo ho'upa 'rã pendeao,

³ ha'e ouro, prata pereko va'e voi opa 'rã iky'apa vy. Iky'akue pavẽ oexa vy oikuaa 'rã napene'arandua. Ha'e nunga ma tata rami 'rã ombovaipa pendero'o. Opaá ára py teĩ penemba'e rei-reirã rive pemono'õ.

⁴ Ma'ẽ, omba'eapo va'e kuery pe napeme'ẽi penhot'y va'ekue omono'õague repy, pekorepa rei rire ojapukai okuapy. Ha'e kuery ojapukaia ma Senhor Ixondaro reta va'e oendua peve onhendu.

⁵ Perekopa va'ekue ko yvy re, pevy'aa rupi rive pendekuai. Penemombaa ára py teĩ penekuraxõ py voi penhemongyra rive.

⁶ Heko porã va'e kuery ma pendere ha'e kuery nopu'ãi teĩ pembopaga uka, ha'e pejuka uka guive.

Jajapura rei e'y agua re ijayvua

⁷ Ha'e nunga rupi irmão kuery, Senhor ndoui teria ja pejapura rei eme. Omba'eapo va'e voi ojapura e'y re oarõ 'rã okuapy oky jypy'igua ha'e opa vygua ho'a ramo onhot'y va'ekue hi'a porã agua.

⁸ Peẽ voi pejapura rei eme. Penembaraete ke penekuraxõ py, mba'eta namombyryvei ma Senhor ou agua.

⁹ Irmão kuery, pendeayvu eme joe, penembopagaa e'y agua. Ma'ẽ, nhandere oikuaa pota va'erã ovaẽ ma okẽ py.

¹⁰ Irmão kuery, peiko axy teĩ pejapura eme, profeta kuery Senhor rery rupi ijayvu va'ekue ikuaiaague rami avi.

¹¹ Amongue ojapura e'y re mba'emo ogueropo'aka ramo jaikuaa ovy'a 'rãa. Mba'eta pendu ma Jó teko axy ogueropo'akaague, peikuaa avi opa py Senhor omoingo porãague, opa mba'e py nhanemboaxy ha'e nhanderayvu va'e vy.*

Jaura e'y agua, ha'e jajerure agua re ijayvua

¹² Ha'e gui irmão kuery, opa mba'e gui yvateve va'e ma po rami: Peura eme yva re, yvy re, neĩ amboae nunga re rei. Ha'e rami 'rãgue py "Tá" peje agua py "Tá" peje, ha'e "Any" peje agua py "Any" peje, penembopagaa e'y agua.*

¹³ Peẽ kuery mbyte ikuai teve ojexavai va'e? Tojerure ha'vy Nhanderuete pe. Ikuai teve ovy'a va'e? Toporaei ha'vy.*

¹⁴ Penembyte ikuai teve imba'eaxy va'e? Toenoĩ ha'vy igreja re opena va'e kuery, ha'e va'e kuery Senhor rery rupi azeite oikyty reve ojerure agua.

¹⁵ Ha'e gui ojerovaa rupi ojerure ramo imba'eaxy va'e okuera 'rã, Senhor ae omopu'ã ju 'rã. Ojejavyague õ ramo ombogue 'rã guive.

¹⁶ Ha'e nunga rupi petei-teĩ pe pemombe'u pejajavyague, ha'e jomeme pejerure pekuera agua. Heko porã va'e ojerurea ma ipo'aka vaipa 'rã.

¹⁷ Elias ma nhande ramigua ae oiko raka'e, nhande rami guive onhenhandu va'e. Ha'e va'e ma onhea'ãa rupi ojerure raka'e yvy áry oky e'y agua. Ha'e ramo mboapy ma'et'y raxa peve nda'oky.

¹⁸ Ha'e gui ojerure ju ramo oky ou yva gui, ha'e ramo yvy gui oiko mba'emo aju.

¹⁹ Irmão kuery, xapy'a rei peẽ kuery regua anhetẽ va'e gui ojepe'a rã amongue ogeru jevy ramo

²⁰ peikuaa pota pova'e re: Ojejavy va'e teko vai rupi oikoague gui amongue ogeru ju vy inhe'ẽ ogeruaa jepe omano agua gui, ojejavyague heta teĩ ombogue uka vy.*

* 4:12 Mateus 7.1-5; Lucas 6.37; Romanos 2.1-3; 1 Coríntios 4.5

* 4:14 Lucas 12.15-21

* 5:1 1 Timóteo 6.9,10

* 5:11 Jó 2.10;

42.10-17 * 5:12 Mateus 5.33-37

* 5:13 Romanos 12.15

* 5:20 Mateus 18.15; Gálatas 6.1,2;

1 Pedro 4.8; Judas 22,23

Jypy'i kuaxia Pedro ombopara va'ekue Jypy'i kuaxia Pedro ombopara va'ekue

Kova'e kuaxia para apóstolo Pedro ogueraa uka Jesus Cristo remimbo'e kuery peguarã. Ha'e va'e kuery ma Jesus re ojerovia rã ha'e kuery re opu'ãa rei. Ha'e nunga rupi Pedro ijayvu omokyre'y ha'e omombaraetesa rupi, nhandereraa jepea re ima'endu'a riae aguã: "Yva re pendeivy guarã omoĩ porã mbyre ma ivaipa e'y va'e, iky'a e'y ha'e imarã e'y va'e. Peẽ kuery re Nhanderuete opena opo'akaa rupi, pejerovia vy opaa ára py peo jepe aguã. Ha'e va'e ojekuaa aguã ma namombyryvei ma guive. Ha'e rami aguã pearõ vy pevy'a, aỹ pendekuai axy aguã rami pendekuai vy are'y'i re pendeportiau pekuapy ranhe teĩ, mba'eta ha'e nunga peaxapa ma ramo pejeroviaa ojekuaa aguã ovare ete va'e. Ouro tata py oiky'a'o pyre gui ovareve va'e, mba'eta ha'e nunga ivaipa va'erã. Ha'e rã peẽ ma Jesus Cristo ojekuaa jave pendererovy'aa 'rã, penembovyate ha'e penemboetesa 'rã guive", he'i (1.4-7).

Oxarura reve ijayvu vy omboypyague

¹ Xee Pedro ma Jesus Cristo pegua apóstolo aiko.* Axarura Nhanderuete rembiporavo opa rupi pendeivy re'y pendekuai va'e pe. Ponto re, Galácia, Capadócia, Ásia ha'e Bitínia re pendekuai.

² Nhanderuete onhemboypy'a ma voiaque rami vy pendeportavo. Ha'e rami vy ixupe guarã Inhe'ẽ penemoingo rire penhe'ẽ rendu Jesus Cristo, huguy py pejey'a'o uka vy.* Tove peẽ kuery tapendu penemboaxya ha'e mby'a porã opa mba'e py.

Nhandereraa jepea re jarovy'a aguã re ijayvua

³ Ta'ima'endu'a porãa Nhanderuete nhande-Senhor Jesus Cristo Ru va'e re, mba'eta nhanemboaxy ete vy nhanemoingove ju raka'e. Ha'e ramo nharõ jakuapy oikove va'e ou aguã, Jesus Cristo omanoague gui omboete ju rire.

⁴ Ha'e gui yva re pendeivy guarã omoĩ porã mbyre ma ivaipa e'y va'e, iky'a e'y ha'e imarã e'y va'e.

⁵ Peẽ kuery re Nhanderuete opena opo'akaa rupi, pejerovia vy opaa ára py peo jepe aguã. Ha'e va'e ojekuaa aguã ma namombyryvei ma guive.

⁶ Ha'e rami aguã pearõ vy pevy'a, aỹ pendekuai axy aguã rami pendekuai vy are'y'i re pendeportiau pekuapy ranhe teĩ,

⁷ mba'eta ha'e nunga peaxapa ma ramo pejeroviaa ojekuaa aguã ovare ete va'e. Ouro tata py oiky'a'o pyre gui ovareve va'e, mba'eta ha'e nunga ivaipa va'erã. Ha'e rã peẽ ma Jesus Cristo ojekuaa jave pendererovy'aa 'rã, penembovyate ha'e penemboetesa 'rã guive.

⁸ Cristo ma peẽ ndapexai teri va'eri peayvu. Aỹ pexa e'y re hexe pejerovia vy perovy'a ete. Pendere vy'aa oĩ va'e ma iporã ete va'e nhamombe'u kuaa va'e'y,

⁹ mba'eta pejopy ma pejeroviaa rekovia. Ha'e va'e ma penenhe'ẽ oo jepea.

¹⁰ Ha'e rami jaa jepe aguã re ma profeta kuery yma guare oporandu ha'e oikuaa pota raka'e, nhanemboaxya ombou pyrã omombe'u ma voi va'ekue ri.

¹¹ Mba'eta ha'e kuery re Cristo Nhe'ẽ oĩ vy yma ma voi oikuaa uka Cristo omano 'rãa, ha'e va'e rire mba'emo iporã ete va'e oiko 'rãa guive. Ha'e kuery oikuaaxe teĩ araka'e ete ha'e marã rami pa ha'e nunga ojeupity 'rãa.

¹² Ha'e ramo ha'e kuery pe oikuaa uka ojeupe guarã e'y ayvu omombe'ua, ha'e rã peẽ kuery peguarã, mba'eta omombe'u ma voi raka'e mba'emo aỹ peẽ kuery pe oikuaa ukua va'e. Mba'eta pendeivy pe ae ayvu porã mombe'ua kuery omombe'u, yva gui Nhe'ẽ Ky'a E'y ombou pyre rupi. Ha'e ramigua ma anjo kuery eteve voi oikuaa porãvexe teĩ okuapy.

Iky'a e'y va'e jaiko aguã re ijayvua

¹³ Ha'e nunga rupi pendejee pemoĩ pene'arandurã, peiko kuaa pota ha'e pearõ aguã, mba'eta Jesus Cristo ojekuaa ára oexa uka 'rã penemboaxy etea.

¹⁴ Ta'y kuery inhe'ẽ rendu va'e peiko vy pendekuaive eme yma ndapeikuaai teri jave peipotaague rupi rive.

¹⁵ Ha'e rami 'rãgue py penerenoĩare iky'a e'y va'e oikoa rami avi peẽ voi ke iky'a e'y va'e pendekuai, peikoa ha'e javi rupi,

¹⁶ mba'eta ipara oĩ va'e "Iky'a e'y va'e ke pendekuai, mba'eta xee ma iky'a e'y va'e" he'ia rami.*

¹⁷ Nhanderuete ma peteĩ regua joegui oayvuvu e'y re oikuaa pota 'rã peteĩ-teĩ jaikoague re. Ha'e nunga rupi kova'e yvy re peikoa pukukue re pejererokyjea rupi tema pendekuai.

¹⁸ Mba'eta po rami peikuaa ae: Pendejoguaa raka'e pendereko yma guare ovare'y va'e rupi pendekuaiaague gui, mba'eta eneramoi kuery gui ha'e ramigua rive peikuaa va'ekue. Prata, ouro, mba'emo opa va'erã re rive'y guive pendejoguaa,

¹⁹ ha'e rã Cristo ruguy ovarepave va'e re. Ha'e va'e ma vexa'i ivaikue rei e'y, iky'a e'y va'e rami ojukaa raka'e.

²⁰ Hekorã ma kova'e yvy itui e'y mbove ma voi Nhanderuete omoĩ raka'e. Ha'e gui aỹ opaa ára py mae ma oikuaa uka penderayvu vy.

²¹ Cristo gui vy ae pejerovia Nhanderuete omanoague gui omboete ha'e omboyvate ju va'ekue re. Ha'e rami py Nhanderuete re pejerovia ha'e pearõ pekuapy.

Mborayvu re nhandekuai aguã re ijayvua

²² Anhetê va'e rupi penhe'ê rendu vy peiky'a'o uka ma pendepy'a. Aỹ ma joegua meme'io joayvua rami pejoayvu, merami rive'ỹ. Ha'e rami vy pendepy'a ha'e javi py pejoayvu peteĩ-teĩ.*

²³ Mba'eta mba'emo ra'yĩ ivaipa va'erã gui e'ỹ penemoingove ju, ha'e rã imarã e'ỹ va'e gui, Nhanderuete ayvu oikove ha'e ndopai va'erã gui ae.

²⁴ Mba'eta "Avakue ma jai rami meme 'rã opa. Iporãa ha'e javi ma jai poty ramigua rive oĩ. Mba'eta jai ipiru rã ipoty okuipa 'rã.

²⁵ Ha'e rã Senhor ayvu ma oĩ riae 'rã", he'i.* Ha'e va'e ayvu porã ma pëvy omombe'u pyre ae.

2

Cristo re jajerovia va'e Nhe'ê rorã nhanemoingogue re ijayvua

¹ Ha'e nunga rupi pendejegi pemboi opa mba'e vai, pendeapua, pendeko porã merami rivea, mba'emo peipota reia ha'e joe pendeayvu reia ha'e javi.

² Ha'e rami 'rãgue py kyrĩ'i va'e itui ramo'i va'e rami avi penhea'ã ke kamby Nhe'ê guigua iky'a e'ỹ va'e re, ha'e va'e re pende'yvate vy oo jepe ete va'e peiko aguã,

³ Senhor penderayvua pendu ma rire.

⁴ Cristo ma ita oikove va'e avakue omombo va'ekue rami oiko, teĩ Nhanderuete pe ovare ete va'e rã oiporavo. Ha'e nunga rupi hexe penhemboja ramo

⁵ peẽ voi ita oikove va'e rami Nhanderuete penemoi Nhe'ê rorã.* Ha'e pygua sacerdote iky'a e'ỹ va'erã avi penemoi, ixupe peme'ê aguã Nhe'ê guigua. Jesus Cristo rupi peme'ê ramo oguerovy'a 'rã.

⁶ Mba'eta ipara re oĩ: "Sião py amoĩ 'rã peteĩ ita oo ytarã aiporavo va'ekue, ovare ete va'e. Ha'e va'e re ojerovia va'e kuery ma peteĩve henda py nda'eve e'ỹi nho 'rã", he'i.*

⁷ Peẽ kuery hexe pejerovia va'e pe ma anhetê ovare ete va'e oiko. Ha'e rã ojerovia e'ỹ va'e kuery pe ma "Oo apoa kuery ita omombo va'ekue ma omboeteve pyrã opyta, tenondeve pyguarã",*

⁸ ha'e "Nhomonhepyxangaarã, joityrã opyta", he'ia rami. Mba'eta ha'e kuery ojeity uka 'rã ayvu porã oendu teĩ nonhe'ê renduia py, ha'e rami ae hekorã omoĩa rire.*

⁹ Ha'e rã peẽ kuery ma peteĩ regua oiporavo pyre, huvixave pegua sacerdote, iky'a e'ỹ va'e, Nhanderuete ojeupe guarã ae ojogua va'ekue, peikuaa uka aguã pytũa gui guexakãa pyguarã penerenoĩ va'ekue po'akaa.*

¹⁰ Mba'eta yma rupi peteĩ regua e'ỹ pendekuai va'ekue. Ha'e rã aỹ ma Nhanderuete pegua pendekuai. Yma ndapeupityi penemboaxya, ha'e rã aỹ ma peupity ma.*

Ojerovia e'ỹ va'e ha'e huvixa kuery pe Cristo pegua kuery iporã va'e anho oexa uka aguã re ijayvua

¹¹ Xerembiayvu kuery, ovvy re'ỹ ikuai va'e pendekuai ramo ajerure pejejoko aguã to'io oipota va'e gui, mba'eta penenhe'ê re opu'ã rei va'e.

¹² Amboae regua mbyte pendekuaia rupi pexa uka tema penderoko porãa. Ha'e ramo heko vai va'e re rami pendere amongue ijayvu rei teĩ, pendekuai porãa oexa vy ha'e kuery voi ombojerovia aguã Nhanderuete, ojekuaa ára.

¹³ Senhor re vy penhe'ê rendu ke joe opena va'e kuery ha'e javi: huvixave yvateve ikuai va'e

¹⁴ ha'e hembiguai kuery huvixa vvyĩgueve va'e, mba'eta ha'e kuery omoĩa heko vai va'e ombopaga aguã, ha'e rã heko porã va'e ma oguerory aguã.

¹⁵ Mba'eta Nhanderuete oipota pendekuai porãa py pejapo hi'arandu e'ỹ va'e kuery oikuaa vy e'ỹ ijayvua gui okyrirĩ aguã rami.

¹⁶ Opa mba'e gui peo jepe teĩ nda'evei "Jaa jepe" peje vy ha'eve'ỹ va'e pejapo aguã. Ha'e rami 'rãgue py Nhanderuete rembiguai rami pendekuai.

¹⁷ Pemboete pavê ke. Peayvu irmão kuery. Nhanderuete renonde pendekuai pejererokyjea rupi. Pemboete avi huvixave.*

Tembiguai kuery omba'epo porã aguã re ijayvua

¹⁸ Tembiguai kuery, penhe'ê rendu tema pendererekoa, opa mba'e py pemboete reve. Pendererekoa porayvu ha'e hi'arandu va'e anho e'ỹ 'rã penhe'ê rendu, ha'e rã heko vai va'e voi.*

¹⁹ Mba'eta xapy'a rei Nhanderuete renonde pendepy'a ky'a e'ỹa rupi pendekuaia teĩ mba'e re'ỹ penemoingo axya 'rã. Ha'e ramigua penderoriau reia peropo'aka porã vy ojou porãmby 'rã peiko.

²⁰ Ha'e gui xapy'a rei pejejavyague re ri penembopagaa ramo mba'ixa 'rã tu pendererovy'a? Ha'e rami avi xapy'a rei ha'evea rami pendekuai teĩ penemoingo axya rã pendevai e'ỹ re peropo'aka ramo Nhanderuete pendejou porã 'rã.

²¹ Mba'eta ha'e rami aguã ae penerenoĩ, mba'eta Cristo voi pendere oiko axy raka'e, oikoague rami avi peẽ voi pendekuai aguã.

* 1:22 1 João 5.1 * 1:25 Isaías 40.6-9 * 2:5 1 Coríntios 3.16; Efésios 2.19-22 * 2:6 Isaías 28.16 * 2:7 Salmo 118.22-23 * 2:8 Isaías 8.14 * 2:9 Isaías 43.21 * 2:10 Oséias 1.6,9, 2.23 * 2:17 Mateus 22.21; Romanos 13.1-7 * 2:18 Efésios 6.5-8; Colossenses 3.22-25

²² Ha'e ma ndojejavuyi, peteive henda py nda'ijayvui nhombotavy reia rupi.

²³ Ixupe ijayvu vaikuea rã nombovai ayvu vai py. Oguereko axya rei ramo nanhomongyjei. Ha'e rami 'rãgue py onhemboaxa ha'evea rami joe oikuaa pota va'e po py.*

²⁴ Yvyra re ojukaa py guete re ae ogueraa raka'e jajejavyague, nhande voi jejavya pe nhamano avi, ha'e teko porã re ju jaiko aguã. Ijai gui vy jakuera.*

²⁵ Mba'eta vexe'i okanhygue rami pendekuai va'ekue ri aỹ ma penenhe'ẽ re Opena ha'e Onhangareko va'e oĩa py ju pendereru.*

3

Omenda va'e kuery joguereko kuaa aguã re ijayvua

¹ Kunhague, peẽ voi peneme oipotaa rami avi peiko. Ha'e rami avi ayvu porã rupi ha'e kuery nda'ikuai teri teĩ peẽ ta'yxy kuery pendekuai porãa oexa vy rive ha'e kuery voi ojerovia 'rã pendeayvu re'ỹ.

² Mba'eta opa mba'e py pejererokyjea rupi peiko ramo oexa 'rã pendekuai porãa.

³ Peẽ ta'yxy kuery, penhemoatyrõ eme hi'árykue rive, peje'a vykypa reia py, ouro guigua py pejeguaa py, neĩ ao hepyve va'e py penhemonde vy.

⁴ Ha'e rami 'rãgue py pendepy'a re oĩ va'e ae toexa uka peneporãa, ha'eve vai'ia ha'e pejapura e'ỹa. Ha'e ramigua ma Nhanderuete pe owareve ete va'e.

⁵ Mba'eta ymave rupi kunhague iky'a e'ỹa rupi Nhanderuete re ojerovia va'e ma ha'e ramigua py ae onhemonde raka'e, ome oipotaa rami ikuiaia py.

⁶ Abraão ra'yxy Sara voi ha'e rami oiko raka'e, mba'eta ome onhe'ẽ rendua rupi ixupe "Senhor" he'i. Peẽ voi iporã va'e pejapo ha'e mba'eve rei gui ndapekyjei vy imemby kuery 'rã peiko.

⁷ Ha'e peẽ ime kuery voi ha'e rami. Pene'arandua rupi pejoguereko pendera'yxy reve. Ha'e kuery ikangyve ramo pemboetea rupi pereko, mba'eta peẽ reve ha'e kuery peguarã voi tekove oĩ. Ha'e rami vy 'rãe mba'eve napendekojoki pejerurea gui.*

Irmão kuery joayvu aguã re ijayvua

⁸ Opa py aipota jojo'i rami peikuaa. Penhomboaxy, joegua meme rami pejoayvu, joegui penhemo'yvyi'ive guive.

⁹ Pendevy otekoavya rã pejepy-jepy eme ha'ekue rami, ha'e pendere ijayvu vaia rã pembovai eme ayvu vai rupi. Ha'e rami 'rãgue py pejogueroayvu porã, mba'eta ha'e rami aguã ae Nhanderuete penerenoĩ, pendereroayvu porãa peupity aguã.*

¹⁰ Mba'eta "Oiko pukuvexe ha'e ovy'aa aguã va'e ára oupityxe va'e ma tojoko oapekũ mba'emo vai rupi ijayvu e'ỹ aguã, tojoko ojuru ijapu rei e'ỹ aguã.

¹¹ Tojepe'a mba'emo vai gui, iporã va'e anho tojapo. Tonhea'ã pavẽ reve ikuai porã aguã. Tonhea'ã ete, oupity peve.

¹² Mba'eta heko porã va'e re Senhor oma'ẽ oikovy, ojapyxaka oiny guive ha'e kuery ojerurea re. Ha'e rã mba'emo vai apoa kuery pe ma Senhor oexa uka 'rã opoxya", he'i.*

Iporã va'e jajapoa rupi nhaĩ atã aguã re ijayvua

¹³ Ha'e gui iporã va'e pejapoa rupi penhea'ã ramo mava'e tu penemoingo axy ta?

¹⁴ Ha'e rami avi pendereko porãa rupi pejexavai teĩ ovy'a ete va'e 'rã peiko. Penemongyjea rupi ijayvua teĩ pekyje eme, pejapura eme guive.

¹⁵ Ha'e rami 'rãgue py pendepy'a py Cristo pemboetea rupi "Xe-Senhor iky'a e'ỹ va'e" peje vy peiko katu riaa oporandu va'e-va'e pe pemombe'u porãve aguã pearõ peikovya.

¹⁶ Ha'e rami avi pendevai reia rupi pendeayvu eme, ha'e rã pejererokyjea ha'e pendepy'a ky'a e'ỹa rupi anho. Ha'e rami penderovai ijayvu va'e oximba 'rã Cristo re vy pendereko porãa re ijayvu vaiague re.*

¹⁷ Mba'eta pendekuai axy Nhanderuete oipotaa ri ramo ha'eveve pendeko porãa re pendekuai axy, pendeko vaia re 'rãgue py.

¹⁸ Mba'eta Cristo voi omano raka'e jajejavyague re, peteĩgue'i. Heko porã ete va'e ojejuka uka nhandereko vai va'e re, nhandereru aguã Nhanderuete pe. Ngo'o re omano teĩ Nhe'ẽ omoingove ju raka'e.

¹⁹ Ha'e gui onhe'ẽ rupi oo vy ayvu omombe'u nhe'ẽ nhuã py omboty pyre kuery pe.

²⁰ Ha'e va'e kuery ma yma rupi Noé oiko jave Nhanderuete nonhe'ẽ rendui okuapy teĩ Nhanderuete oarõ are ranhe kanoã guaxu ojapoa ja. Ha'e rami teĩ mbovy'i oo jepe raka'e yy rupi, oito ete'i.

²¹ Ha'ekue rami ae ju aỹ ma peẽ voi penhemongaraia rupi peo jepe. Pendero'o peiky'a'o vy rive peo jepe nda'ei, ha'e rã Nhanderuete pe pejapukaia rupi, pendepy'a peiky'a'o uka vy. Jesus Cristo onhemboete ju rire pendeky'a'o.

²² Ha'e gui yva re oo ma vy Nhanderuete oipora kuaa regua re oĩ. Ha'e ramo ha'e oipotaa rami ikuai anjo kuery, yvatekueve ha'e mba'emo re ombopo'aka pyre ha'e javi.

* 2:23 Isaiás 53.9, Mateus 27.11-14, 39-44; Lucas 23.39-41 * 2:24 Isaiás 53.4 * 2:25 Isaiás 53.6 * 3:7 Efésios 5.22-25; 1 Timóteo 2.9-11 * 3:9 Lucas 6.27,28; Romanos 12.9-21 * 3:12 Salmo 34.12-16 * 3:16 Isaiás 8.12-13, Mateus 10.16-20; 2 Timóteo 2.24-26

4

Jejavya pe nhamano ha'e iky'a e'y' va'e jaiko aguã re ijayvua

¹ Ha'e gui Cristo ngo'o re oiko axy rire peẽ voi pendepy'a re pemoi ha'ekue rami penhemoingo axy uka avi aguã, mba'eta ngo'o re oiko axy va'ekue ma mba'eve ndoguerekovei ma jejavya reve.*

² Ha'e rami rire pendero'o re peikove teria ja avakue oipotaa rami ve'y' pendekuai aguã, ha'e rã Nhanderuede oipotaa rami anho.

³ Mba'eta ha'eve ma amboae regua oipotaa rami pendekuaiague. Opa marã rei pendekuai va'ekue to'o oipotaa va'e rupi, peka'ua rupi, opa marã vy'aa rupi, iro va'e pey'ua rupi, ha'e mba'emo ra'angaa ojeugarupy pembojerovíaa rupi guive.

⁴ Ha'e gui amboae kuery opa marã ikuai rupi peẽ kuery napenhemoirúvei ramo onhemondyípa rei okuapy, ha'e peẽ kuery re ijayvu vai guive.

⁵ Ha'e rami teĩ ha'e kuery onhemombe'upa 'rã oikove va'e ha'e omano va'ekue re oikuaa pota va'e renonde.

⁶ Mba'eta ha'e rami aguã ae omano va'ekue pe voi ayvu porã omombe'ua raka'e, avakue rami ha'e kuery ngo'o re opaga teĩ nhe'ẽ re oikove ju aguã Nhanderuede rami.

Peteĩ-teĩ nhanhopytyvõ aguã re ijayvua

⁷ Namomyryvei ma opa mba'e opa aguã ára. Ha'e nunga rupi pejejoko ha'e peiko kuaa pota ke penhembo'e kuaa aguã.*

⁸ Opa mba'e gui yvateve va'e ma peteĩ-teĩ pejoayvu ete aguã, mba'eta porayvu va'e ombogue uka reta 'rã amboae kuery ojejavvyague.*

⁹ Penhomovã peteĩ-teĩ pendeayvu rei e'y' re.

¹⁰ Peteĩ-teĩ penerembiaporã pejopyague rami vy penhopytyvõ, mba'eta peteĩ-teĩ pe Nhanderuede ome'ẽ joo rami e'y' e'y' nhopytyvõ aguã. Ha'e rami rã pejapo ete.

¹¹ Ayvu omombe'u aguã ojopy va'ekue ma tomombe'u porã, Nhanderuede ayvu ramo. Nhopytyvõ aguã ojopy va'ekue ma Nhanderuede omombaraetea rupi tojapo, opa mba'e py Nhanderuede omboetea aguã Jesus Cristo rery rupi. Ha'e va'e ma hexakãmba ha'e ipo'akapa araka'e rã peve guarã. Amém.

Cristo káuxa nhanemoingo axya teĩ javy'a aguã re ijayvua

¹² Xerembiayvu kuery, penembyte tata hendy va'e rami pendeko a'áarã ou teĩ penhemondyí eme, mba'eta penemondyipaarã e'y' ou.

¹³ Ha'e rami vy Cristo oiko axyague rami peẽ voi pendekuai axy vy pevy'a, hexakãa ojekuaa jave pevy'ave ete aguã.*

¹⁴ Cristo rery káuxa pendere ijayvua rei ramo ovy'a ete va'e peiko, mba'eta pendere oĩ 'rã Nhanderuede Nhe'ẽ hexakãmba va'e.

¹⁵ Ha'e gui peẽ kuery va'e regua nda'evei mava'eve rei pejojukaague py peiko axy aguã, e'y' vy penemondaague re, pejapo vai reiague re, neĩ joe pepena reiague re guive.

¹⁶ Ha'e rã Cristo pegua peiko re ri penemoingo axya rã pexĩ eme. Ha'e rami 'rãgue py perovy'a Nhanderuede, pendere Cristo rery oĩa re.

¹⁷ Mba'eta ovaẽ ma ára Nhanderuede joe oikuaa pota aguã. Ojepegua kuery re ranhe 'rã oikuaa pota. Ha'e ramo nhande kuery re ranhe oikuaa pota rire mba'ixa 'rã tu ikuai Nhanderuede guíguia ayvu porã rupi nonhe'ẽ rendui va'ekue?

¹⁸ Mba'eta "Heko porã va'e ojexavaia py anho 'rã oo jepe, rire mba'ixa 'rã tu ikuai Nhanderuede re ima'endu'a e'y' ha'e heko vai va'e kuery?" he'iaque rami.*

¹⁹ Ha'e nunga rupi Nhanderuede oipotaa rami vy ikuai axy va'e guekove re topena uka imoingoare ojeroiviapy va'e pe, ha'e iporã va'e rupi tema ta'ikuai guive.

5

Igreja re opena va'e kuery omongetaague

¹ Ha'e gui peẽ kuery regua igreja re pepena va'e kuery ju xee romongeta, mba'eta xee voi peẽ kuery rami avi aiko igreja kuery re apena va'e, ha'e Cristo oiko axyague amombe'u va'e, ha'e gui peẽ kuery reve aĩ avi 'rã hexakãa ojekuaa jave.

² Pepena porã ke Nhanderuede rymba kuery pëvy opena uka va'ekue re.* Ojapo uka ramo rive'y' pejapo, ha'e rã pejapoxea'i py, Nhanderuede oipotaa rami ae. Peráta re rive'y' guive pejapo, ha'e rã penekyre'y'a rupi.

³ Pejokuai poyi eme pëvy opena uka va'ekue. Ha'e rami 'rãgue py peiko ha'e kuery voi peẽ rami ikuai aguã.

⁴ Ha'e ramo Opena va'ety Yvateve ete va'e ojekuaa ramo pejopy 'rã coroa hexakãmba va'e opa va'erã e'y'.

Omongeta ha'e oxarura reve opaa py ogueroayvu porãague

⁵ Ha'e rami ae avi peẽ kunumigieve, pendekuai 'rã tjakueve oipotaa rami. Ha'e peẽ kuery ha'e javi, pendekuai rupi pendejee pemoi joegui penhemo'yvyi'ive aguã. Mba'eta Nhanderuede opu'ã 'rã onhemboyvate rei va'e re, ha'e rã onhemo'yvyi'i va'e pe ma oexa uka 'rã omboaxya.*

⁶ Ha'e nunga rupi penhemo'yvyi'i Nhanderuede po'akaa guy py, ha'evea ára py penemboyvate ju aguã.

* 4:1 Romanos 6.1-4; Colossenses 3.1-10 * 4:7 Mateus 24.42-44; Apocalipse 16.15 * 4:8 Provérbios 10.12 * 4:13 João 16.1-4; Tiago 1.2-4 * 4:18 Provérbios 11.31 * 5:2 João 10.11-13, 21.15; Atos 20.28 * 5:5 Provérbios 3.34, Lucas 18.9-14

⁷ Ipo py meme ke pemboaxa pendevoiyi pereko va'e, mba'eta penemboaxya rupi 'rã opena pendere.

⁸ Peiko kuaa pota ke, penheangu guive. Mba'eta penderovaigua anha ma pendeývýry rupi oiko guary guembiarã oeka vy okororõ oikovy va'e rami avi.

⁹ Pejeity uka eme ixupe, pejeroviaa re peĩ atã vy. Mba'eta peikuaa pende-irmão kuery vyv jave re ikuai va'e voi oendu avi okuapya peẽ pendekuai axya ramigua.

¹⁰ Ha'e gui xapy'a'i pendekuai axy ma rire Nhanderuete penemoingo porã ju 'rã, penemoĩ atã, penemombaraete ha'e penemombyta porã ju 'rã, mba'eta opa mba'e py nhanemboaxy va'e, ha'e Cristo re vy guexakãa imarã e'ỹ va'e pyguarã nhanerenõ va'ekue.

¹¹ Ha'e ae ta'ipo'akapa araka'e rã peve guarã. Amém.

¹² Irmão Silvano pe ma kova'e kuaxia ambopara uka pëvy. Ha'e va'e ma xee aikuaa rami ojeroviapy oiko, peẽ kuery pe avi. Ayvu mbovy'i py ambopara uka. Romongetaa rupi teĩgue ju aipoa'e: Ha'e rami ae Nhanderuete nhanemboaxya anhetê va'e. Ha'e va'e re anho tema peĩ atã.

¹³ Babilônia py oiporavo pyre ikuai va'e avi oxarura uka peẽ kuery pe, xera'y Marcos voi.*

¹⁴ Pexarura peteĩ-teĩ pe pejoayvua rupi.

Tove Cristo re pendekuai va'e ha'e javive tapendu mby'a porã.

* 5:13 Amongue py Roma tetã pe "Babilônia" 'ea 'rã.

Mokoïguea kuaxia Pedro ombopara va'ekue Mokoïguea kuaxia Pedro ombopara va'ekue

Kova'e kuaxia py apóstolo Pedro ojapo Jesus Cristo remimbo'e kuery onheangu aguã. Mba'eta Jesus Cristo pegua igreja mbyte py ikuai nhombotavya rupi nhombo'e va'e. Mba'eta yma heta va'e kuery mbyte rupi profeta ramigua rive ikuaiague rami avi "peẽ kuery mbyte voi ikuai 'rã porombo'ea anhetẽ rupigua e'ỹ. Ha'e va'e kuery ma nhemi rupi 'rã omombe'u apu nhomombaara. Senhor Ijoguaree Ipo'akapa va'e rovai eteve voi 'rã ijayvu. Ha'e ramia py o'áry ae ombou uka imomba vyvoiarã" (2.1b).

Ijayvu avi Jesus Cristo re jajeroviaa rupi nhaĩ atãve aguã, ha'e Jesus ou ju jave guarã nharõ jaikovy aguã. Mba'eta "Senhor ára ma imonda va'e rami 'rã ou xapy'a. Ha'e va'e jave py yapu ratã reve yva okanhymba 'rã, ha'e mba'emo jaexa va'e okai vy vaipa 'rã. Ko yvy ha'e mba'emo ojapo pyre ha'e javi 'rã okaipa. Ha'e nunga ha'e javi ha'e rami ete okanhymba aguã rami opyta ramo peẽ kuery pendeky'a e'ỹa rupi pota ke pendekuai Nhanderue te ete" (3.10-11).

Oxarura reve ijayvu vy omboypyague

¹ Xee Simão Pedro ma Jesus Cristo rembiguai ha'e apóstolo-rã xemoĩ va'ekue. Axarura pẽvy, mba'eta peẽ kuery voi peupity pejerovia aguã, Nhanderue te ha'e Nhandereraa jepea Jesus Cristo guigua teko porã rupi ome'ẽ va'ekue. Ha'e va'e ma ovare ete va'e.

² Tove opa mba'e py tapendu penemboaxya ha'e mby'a porã, Nhanderue te ha'e nhande-Senhor Jesus Cristo peikuaa porãvea rupi.

Cristo guigua jaexa uka aguã re ijayvua

³ Mba'eta Nhanderue te ma guexakã ha'e gueko porãa jaupity aguã nhanerenoĩ ma vy opo'akaa rupi ome'ẽ avi nhanemoingo porãrã ha'e ixupe nhanemoingoarã regua ha'e javi. Nhanerenoĩare jaikuaa porãvea rupi jajopya 'rã.

⁴ Ha'e rami vy mba'emo ovare ha'e iporã ete va'e nhandevy ome'ẽ aguã re ijayvu, kova'e yvy re to'o oipota va'e nhanemongy'arã oĩ va'e gui jaa jepe aguã, nhandere voi Nhanderue te py'a re oĩ va'e oĩ avi aguã.

⁵ Ha'e nunga rupi ae penhea'ã pejeroviaa re pemoirũ aguã pendereko porã aguã, ha'e pendereko porãa re pemoirũ pene'arandua rupi pendekuai aguã,

⁶ ha'e pene'arandua re pemoirũ pejejoko aguã, ha'e pejejokoa re pemoirũ peĩ atã aguã, ha'e peĩ atãa re pemoirũ Nhanderue te ete peiko aguã,

⁷ ha'e ixupe peikoa re pemoirũ irmão kuery pexaxe aguã, ha'e irmão kuery pexaxea re pemoirũ mborayvu re pendekuai aguã.

⁸ Mba'eta pendere ha'e nunga oĩ, ha'e oĩve ovy ri ramo nhande-Senhor Jesus Cristo peikuaa porãvea rupi pexa uka 'rã penekyre'ỹ ha'e iporã va'e anho.*

⁹ Ha'e rã amongue re ha'e nunga noĩ ri ramo ára revegua e'ỹ, ha'e'i py oĩ va'e anho'i oexa va'e rami teri oiko, mba'eta hexarai ma ojevavyague gui oiky'a'oaague re.

¹⁰ Ha'e nunga rupi irmão kuery, penhea'ãve tema penerenoĩague ha'e penderoavoague pexa ukaa rupi. Ha'e rami vy 'rã neĩ peteĩve henda py voi ndapejyty ukaĩ.

¹¹ Ha'e rami rã nhande-Senhor Nhandereraa jepea Jesus Cristo po'akaa imarã e'ỹ va'e peupity rã penemovaẽ porã 'rã.

Apóstolo Pedro nhanemoma'endu'aa rupi ijayvuague

¹² Ha'e nunga rupi pendere anhetẽ va'e oĩ va'e peikuaa porã, ha'e nunga re peĩ atã guive teĩ ha'e nunga re romoma'endu'a aguã rami riae aiko.

¹³ Mba'eta kova'e oo'i re aikove teria ja ha'e nunga re romoma'endu'aa rupi xeayvu vy romokyre'ỹvexe.†

¹⁴ Mba'eta xee aikuaa rã kova'e oo'i areko va'e are'ỹ'i re aeja 'rã, nhande-Senhor Jesus Cristo oikuaa ukaague rami vy.

¹⁵ Ha'e nunga rupi xee anhea'ãve 'rã aa ma rire ha'e nunga ha'e javi re penema'endu'a aguã rami.

Nhanderue te ayvu anhetẽ etea re ijayvua

¹⁶ Mba'eta ore ma avakue akã gui rive'ỹ pẽvy romombe'u va'ekue nhande-Senhor Jesus Cristo po'akaa, ha'e ou jevy aguã regua guive. Ha'e rami 'rãgue py ipo'akaa ma ore ae rexa py roexa va'ekue.

¹⁷ Mba'eta Nguete gui ae ou raka'e omboetepaa aguã ha'e hexakã. Mba'eta ixupe Hexakãmba va'e oayvu ombou vy "Kova'e ma Xera'y ayvu va'e, arovy'a va'e", he'i va'ekue.

¹⁸ Ha'e va'e ayvu yva gui onhendũ rã ore voi roendu karamboae vytyty iky'a e'ỹ va'e áry hexeve orekuaia py.*

¹⁹ Ha'e rami rire jaikuaa porãve profeta kuery ayvu anhetẽ va'e memea, ha'e nhandejeje nhamoĩ atãve 'rã guive, mba'eta pytya py tataendy rami nhanemoexakã 'rã ko'ẽmba peve, nhandepy'a re jaxy-tata ko'ẽ mbija ojekuaa peve.

²⁰ Po ramigua jypy'i jaikuaa: Ipara iky'a e'ỹ va'e re ayvu ikuai va'e ma avakue akã gui rive'ỹ ou,

* 1:8 Filipenses 2.12,13 † 1:13 "Oo'i" he'ia ma guete'i re ae ijayvu vy (2 Corintios 5.1-4). * 1:18 Marcos 9.1-8

²¹ mba'eta peteive ayvu ndojekuaai raka'e profeta kuery ae oipotaa gui. Ha'e rami 'rãgue py Nhanderueete gui ae avakue [iky'a e'y va'e] ijayvu raka'e, Nhe'ê Ky'a E'y omo'arandu heravy rã.*

2

Porombo'ea kuery anhetê rupigua e'y opaga 'rãa re ijayvua

¹ Heta va'e kuery mbyte rupi ikuai avi raka'e profeta ramigua rive. Peê kuery mbyte voi ikuai 'rã porombo'ea anhetê rupigua e'y. Ha'e va'e kuery ma nhemi rupi 'rã omombe'u apu nhomombaara. Senhor Jjoguare Ipo'akapa va'e rovai eteve voi 'rã ijayvu. Ha'e ramia py o'áry ae ombou uka imomba vyvoiarã.*

² Heta 'rã ikuai avi ha'e kuery opa marã rei ikuaia rupi. Ha'e ramo ha'e kuery káuxa ijayvu vaia 'rã tape anhetê va'e re.

³ Ha'e kuery ma peráta re nda'eveive vy pendekore 'rã ijapua py. Ha'e rami teĩ ha'e kuery mbopagaarã yma guive omoĩ mbyre ndarei 'rã. Imombaara ma ndokei ae.

⁴ Mba'eta anjo kuery eteve voi ojevavy ramo Nhanderueete nomboaxyi raka'e. Ha'e rami 'rãgue py vyvuy py nhuã oĩ va'e py omombo, vyvukua pytũ reia py omboty ompopaga aguã ára pyguarã.

⁵ Ymagua kuery voi nomboaxyi vy Noé teko porã mombe'ua va'e anho ogueraa jepe raka'e, ha'e hexeve sete ju. Ha'e rã ko vyvuy regua heko vai va'e kuery áry ma yy ombou.

⁶ Ha'e gui Sodoma ha'e Gomorra tetã ma tanhimbu rive omombyta. Ombovaipa ete raka'e, raka'eve rã heko vai va'e ikuai va'erã oikuaa vy onheangu aguã.

⁷ Ló anho ogueraa jepe. Ha'e va'e heko porã va'e ma nhonhe'ê rendu e'y va'e kuery opa marã rei ikuaia oexa vy nda'evei etea oendu raka'e.

⁸ (Mba'eta ha'e kuery opa marã rei ikuaia mbyte heko porã va'e oiko vy ko'ê nhavõ oexa ha'e oendu vy opy'a heko porã va'e py ojexavai.)

⁹ Ha'e nunga rupi Senhor ogueraa jepe kuaa heko porã va'e ikuai axya gui, ha'e rã heko vai va'e kuery ma ikuai axy aguã py omboty 'rã oikuaa pota aguã ára pyguarã.

¹⁰ Ompopagave 'rã to'o oipotaa rami opa marã rei ikuai va'ekue, huvixa kuery onhe'ê rendua rupi e'y guive. Ha'e kuery ma nhombojaru ha'e onhembovate rei va'e vy neĩ ipo'akakueve re ijayvu aguã voi ndokyjei.

¹¹ Ha'e rã anjo kuery ma imbarateve ha'e ipo'akave va'eri huvixa kuery re nda'ijayvu vai 'rã Senhor renonde.

¹² Ha'e rã nhombojaru rei va'e kuery ma mymba inharõ va'e ombo'a ha'e ojuka pyrã rami rive ikuai, mba'eta ijayvu vai 'rã oikuaa e'y va'e re voi. Ha'e ramo mymba opaa rami avi ha'e kuery voi omombaa 'rã.

¹³ Ha'e kuery ojexavai 'rã nhombojexavaiague py ae. Ha'e kuery ma ara py teĩ opa marã rei 'rã ovy'a okuapy to'o oipotaa rupi. Mba'emo iky'apa ha'e ivaikue rei va'e rami ikuai. Ha'e kuery ae 'rã onhemongy'a ojekorea py, peê kuery reve okaru okuapya pyve.

¹⁴ Joe oma'ê 'rã itavy reixea rupi anho, ndopytu'ui 'rã guive ojevavya gui. Ombotavy 'rã ikangy va'e, peráta re nda'eveive ha'e ayvu vaipy ra'y ikuai vy.

¹⁵ Tape hi'yvi porã va'e gui ojepe'a vy Beor ra'y Balaão oikoague rupi oo vy okanhymba, mba'eta ha'e va'e ma teko vai rupi mba'emo ojoupa va'erã re anho nda'eveive raka'e.

¹⁶ (Ha'e rami avi opaga raka'e ojevavyague re. Profeta oiko va'eri hymba ovoyi va'ety avakue ayvu py ijayvu ixupe, o'arandua rupi e'y oiko ta ramo ojokoxe vy.)

¹⁷ Ha'e kuery ma ygua ipirupa va'e rami ikuai, vyvixĩ vyvutu ogueraapa rive va'e rami guive. Pytũia rupi guarã rive ikuai.

¹⁸ Mba'eta onhembovate reia rupi ijayvu, ha'e to'o oipotaa rami ikuai vy ombotavy 'rã gueko vaiaty gui oo jepexe va'e.

¹⁹ "Escravo ve'y ma peiko", he'i teĩ ha'e kuery ae imongy'apaa pegua escravo ikuai. Mba'eta jajeity uka vy nhandereityare pegua escravo japyta.

²⁰ Mba'eta amongue ma Senhor Nhandereraa jepea Jesus Cristo oikuaa, ha'e ko vyvuy regua nhomongy'apa reia gui oo jepe teĩ ha'e nunga pyve ju 'rã ojekore ha'e ojeity uka. Ha'e rami rire jypy guare gui nda'eveive 'rã opaa py.

²¹ Ha'e kuery pe ha'eveve 'rãgue teko porã katygua tape ndoikuaai ma voi va'e rire. Mba'eta oikuaa teĩ ojapo uka pyre iky'a e'y va'e gui ojepe'a vy ha'ekue py ju ojevy.

²² Ha'e kuery re oiko ayvu "Jagua ojevy 'rã ha'e ae ombojevvyague py, ha'e poryko ojoia porã teĩ ojevy ju 'rã yapo py onhemou'ũ aguã rive", he'i va'e.*

3

Senhor ou jevy aguã ára re ijayvua

¹ Xerembiayvu kuery, kova'e kuaxia ma mokoigüea ma pëvy ambopara. Mokoive ma mba'emo re romoma'endu'a aguã rupi ambopara, pene'arandu ae teĩ.

² Ha'e rami rã penema'endu'a aguã profeta iky'a e'y va'e kuery yma ijayvuague re, ha'e Senhor Nhandereraa jepea ojapo uka va'ekue re guive, peê kuerya rupi apóstolo kuery penembo'eague rami ae.

³ Jypy'i peikuaa pota pov'a'e nunga re: Opaa ára py ikuai 'rã porojoi rei va'e. Nhandejoi reia rupi 'rã ikuai, ha'e kuery ae oipotaa rami rive.

* 1:21 2 Timóteo 3.16,17

* 2:1 1 Timóteo 4.1,2; Judas 3-23

* 2:22 Provérbios 26.11

⁴ Ha'e rami vy aipoe'i 'rã: "Mba'eta tu oiko Cristo ou jevy aguã re ijayvuague? Mba'eta nhaneramoĩ kuery omano guive ha'ekue rami ae tema opa mba'e ikuai, ko yvy onhonoa guive", he'i 'rã.

⁵ Ha'e rami teĩ ha'e kuery hexarai potae pova'e nunga gui, mba'eta yma Nhanderuete oayvu gui rive omoingo raka'e yva ha'e yvy. Yvy ma ojapo raka'e yv gui ojekuaa aguã rami, yv mbyte rupi gui ae.

⁶ Ha'e va'e rupi ae ju ha'e va'e javegua yvy omomba, yv ombou vy.

⁷ Ha'e gui aỹ yva ha'e yvy itui va'e ma Nhanderuete oayvu rupi ae ju omombyta tata py okaipa aguã. Joe oikuaa pota ha'e heko vai va'e kuery ombopaga aguã ára pyguarã omombyta.

⁸ Ha'e rami avi xerembiayvu kuery, peteĩ mba'e oĩ penderexarai e'ỹ aguã: Senhor pe rã peteĩ ára mil ma'et'ya rami, ha'e rã mil ma'et'ya ma peteĩ ára rami rive oaxa.

⁹ Ha'e nunga rupi Senhor ndarei ijayvuague ojapo aguã, amongue "Are ete ma" he'i teĩ. Ha'e rami 'rãgue py nhanerarõ are oikovy. Ndoipotai peteĩve nhakanhy, ha'e rã nhande ha'e javive jajeko rerova.*

¹⁰ Ha'e gui Senhor ára ma imonda va'e rami 'rã ou xapy'a. Ha'e va'e jave py yapu ratã reve yva okanhymba 'rã, ha'e mba'emo jaexa va'e okai vy ivaipa 'rã. Ko yvy ha'e mba'emo ojapo pyre ha'e javi 'rã okaipa.*

¹¹ Ha'e nunga ha'e javi ha'e rami ete okanhymba aguã rami opyta ramo peẽ kuery pendeky'a e'ỹa rupi pota ke pendekuai Nhanderuete pe ete.

¹² Nhanderuete ára pearõa rupi pejapo ovaẽ voive aguã rami. Ha'e va'e jave py yva voi hendy vy ivaipa 'rã, ha'e mba'emo jaexa va'e okai vy hykupa 'rã.

¹³ Ha'e rã nhande kuery ma ijayvuague rami vy yva pyau ha'e yvy pyau nharõ jakuapy, teko porã rendarã.*

Senhor nharõ vy ipara re nhanhembo'e aguã re ijayvua

¹⁴ Ha'e nunga rupi xerembiayvu kuery, ha'e nunga pearõ vy penhea'a tema pejexa uka aguã peteĩ rami ikuai va'e, iky'a e'ỹ va'e ha'e ojou vai pyrã e'ỹ.*

¹⁵ Penema'endu'a nhande-Senhor jogueraa jepexe vy nhoarõ area re. Ha'e nunga re nhanerembiayvu irmão Paulo voi omo'aranduague rami vy ombopara pëvy.

¹⁶ Ha'e va'e ijayvu ha'e kuaxia ombopara va'e ha'e javi re ma ha'e ramigua oĩ. Ha'e rami avi amongue henda py oĩ jaikuaa aguã haxyve va'e. Ha'e ramo oikuaa e'ỹ rei ha'e ikangy va'e kuery ma ha'e nunga oexa vy ha'eve'ỹa rami 'rã oikuaa, ipara iky'a e'ỹ va'e mboae re oĩ va'e voi ha'e kuery ndoikuai reia rami avi. Ha'e ramia py ha'e kuery okanhy aguã katy oo.

¹⁷ Ha'e rã peẽ xerembiayvu kuery, ha'e nunga peikuaa ma voi vy penheangu. Penhembotavy uka eme Senhor nhe'ẽ rendu e'ỹa kuery pe, penembaraetea rupi pendekuaia gui pejeity uka e'ỹ aguã.

¹⁸ Ha'e rami 'rãgue py penembaraeteve tema peovy nhande-Senhor Nhandereraa jepea Jesus Cristo penemboaxya rupi, ha'e peikuaa porãvea py. Ha'e ae toguerovy'aa aỹ ha'e araka'e rã peve.

* 3:9 Lucas 13.6-8

* 3:10 Mateus 24.29-31; Apocalipse 21.1-8

* 3:13 Isafas 65.17

* 3:14 1 João 3.2,3

Jypy'i kuaxia João ombopara va'ekue Jypy'i kuaxia João ombopara va'ekue

Apóstolo João aipoe'i: "Pova'e ayvu peê kuery pe ambopara peikuaa aguã pendere tekove marã e'ÿ oia, Nhanderuete Ra'y rery rupi pejerovia va'e re ae" (5.14).

Marã rami vy 'rã nda'u jaikuaa nhandere tekove marã e'ÿ oia? Jaikuaa 'rã jajejavya nhamombe'u ha'e jaejapa vy (1.8-9), Jesus ojapo uka va'ekue rupi nhandekuai vy (2.3), Jesus oikoague rami nhande voi nhandekuai vy (2.6), irmão kuery jayvu vy (2.9-11), Jesus revegua jaikoa rami nhandemombe'u porã vy (2.23), ha'e teko porã rupi jaiko vy (2.29). Jesus Cristo re jajerovia vy 'rãe jaupity tekove marã e'ÿ: "Nhandevy Nhanderuete ome'ê tekove marã e'ÿ, ha'e tekove ma Ta'y re oî. Ha'e nunga rupi amongue Nhanderuete Ra'y reve ikuai ramo ha'e kuery re oî tekove. Ha'e rã Ta'y reve e'ÿ ikuai ramo ma ha'e kuery re tekove noi" (5.11-12).

Ayvu Tekove me'êa ha'e Nhanderuete reve petei rami nhandekuaia re ijayvua

¹ Jypy'i guive roendu va'ekue, orerexa py ae roexa ha'e hexe ropoko guive va'ekue ma Ayvu Tekove me'êa.*

² Mba'eta Tekove me'êa ojekuaa rã ore roexa rire imombe'uarã roiko. Ha'e rami vy pendevy pe ju romombe'u. Ha'e va'e ma Tekove marã e'ÿ me'êa, Nguu reve oiko va'ekue ri orevy ju ojekuaa karamboae.

³ Roexa ha'e roendu va'ekue ma pendevy pe ju romombe'u, peê kuery voi orereve petei rami nhandekuai aguã. Mba'eta ore ma Tuu ha'e Ta'y Jesus Cristo reve ae orekuai.

⁴ Ha'e va'e rombopara pêvy opa mba'e py javy'a aguã.

Nhanderuete rexakã rupi nhandekuai aguã jajejavya nhamombe'upa aguã re ijayvua

⁵ Ha'e gui ayvu ixugui roendu va'ekue, ha'e pêvy ju romombe'u va'e ma pova'e: Nhanderuete ma hexakã va'e, hexe ma nei petei henda py noi pytã.

⁶ Xapy'a rei "Xee ma Nhanderuete reve aiko" ja'e tei pytã rupi jaiko vy ma nhandeapu, anhetê va'e rupi e'ÿ jaiko.

⁷ Ha'e rami tei guexakã rupi ha'e oikoa rami avi nhande voi hexakã rupi jaiko ri vy petei rami 'rã nhandekuai jomeme, ha'e Ta'y Jesus ruguy nhandeky'a'o 'rã jajejavya ha'e javi gui.

⁸ Ha'e rã "Xere ma nei petei henda py jejavya noi" ja'e ri vy nhande ae jajekore, ha'e nhandere anhetê va'e noi.

⁹ Ha'e gui jajejavya nhamombe'upa ramo ma Nhanderuete heko porã ha'e ojeroviapy va'e vy ombogue 'rã jajejavvyague, ha'e nhandeky'a'o 'rã teko vai ha'e javi gui.

¹⁰ Xapy'a rei "Xee ma ajevavy va'e'ÿ" ja'e vy ixupe "Ijapu va'e" ja'e, ha'e nhandere ijayvu noi.

2

¹ Xera'y kue'iry, ha'e rami ambopara pejevavy e'ÿ aguã. Ha'e rami avi xapy'a rei amongue ojevavy ramo ma Nhanderuetea py petei oiko nhandepytyvõarã. Ha'e va'e ma Jesus Cristo, heko porã va'e.

² Ha'e ma jajejavvyague re opaga va'ekue. Nhande jajejavvyague re anho e'ÿ opaga raka'e, ha'e rã vyvave jave regua ojevavyague re.

³ Ha'e ojapo uka va'e rupi jaiko vy jaikuaa 'rã jaikuaa va'e jaikoa.

⁴ Ha'e nunga rupi amongue "Xee aikuaa" he'i tei ha'e ojapo uka va'e rupi ndoikoi va'e ma ijapu, ha'e hexe noi anhetê va'e.

⁵ Ha'e rã ijayvua rupi jaiko vy 'rãe anhetê Nhanderuete jayvu aguã va'e rami ete jayvu. Ha'e rami vy ae 'rã jaikuaa hexe nhaia.

⁶ "Xee ma hexe ai" he'i va'e ma ha'e oikoague rami ae toiko.

Ayvu yma guare ha'e ipyau va'e re ijayvua

⁷ Xerembiayvu kuery, ayvu ipyau va'e'ÿ ambopara pêvy, ha'e rã yma ojapo uka pyre jypy'i guive pendu va'ekue, mba'eta yma guive ojapo uka pyre ma ayvu pendu va'ekue ae.*

⁸ Ha'e rami avi ojapo uka pyre ambopara va'e ma ipyau guive, mba'eta Jesus Cristo ranhe anhetê va'e rupi oiko rire peê kuery ju ha'e va'e rupi peiko. Mba'eta pytã oaxa ma ovy, ha'e hendy va'e anhetê va'e ju hexakã ouvy.

⁹ Amongue "Xee hexakã rupi aiko" he'i tei o-irmão ndoayvui va'e ma pytã rupi teri oiko.

¹⁰ Ha'e rã o-irmão kuery oayvu va'e ma hexakã rupi oiko, ha'e hexe noi joityarã.

¹¹ Ha'e rã o-irmão ndoayvui va'e ma pytã reia rupi oiko, marã katy pa ooa voi ndoikuai, pytã oexa mbogue rã.

Kyrigue'i, tujakue ha'e ipyaukue pe ijayvua

¹² Xera'y kue'iry, pêvy ambopara mba'eta pejevavyague omboguepaa ma hery rupi.

¹³ Ha'vy peê tujakue, pêvy ambopara mba'eta peikuaa ma jypy'i guive oiko va'e. Ha'e ipyaukue, pêvy ambopara mba'eta pendepo'aka ma poromboeko vaia re.

* 1:1 João 1.1-3, 14

* 2:7 João 13.34

¹⁴ Xera'y kue'iry, pëvy ambopara mba'eta peikuaa ma Nhanderuete. Ha'e tujakue, pëvy ambopara mba'eta peikuaa jypy'i guive oiko va'e. Ipyaukue, pëvy ambopara mba'eta penembaraete ha'e pendere Nhanderuete ayvu oĩ ramo pendepo'aka ma poromboeko vaia re.

Kova'e yvy regua reko re ijayvua

¹⁵ Peayvu eme ko yvy regua reko, neĩ mba'emo yvy re ikuai va'e. Mba'eta yvy regua reko rayvua kuery re ma Nhanderuete rayvua noĩ.

¹⁶ Mba'eta mba'emo yvy re ikuai va'e ma yvy regua meme: to'o oipota va'e, mba'emo jaexa vy jaipotapa reia, ha'e nhandejea ae rive jajeroviaa. Ha'e nunga ma yvy guigua meme, Nhanderuete guigua e'ỹ.

¹⁷ Ko yvy ma opa 'rã, to'o oipota va'e ha'e javi reve. Ha'e rã Nhanderuete oipota va'e ojapo va'e ma oikove riaa 'rã.

Cristo ramigua rive ikuai va'e re ijayvua

¹⁸ Xera'y kue'iry, ovaẽ ma opa aguã ára, Cristo ramigua rive ojekuaa aguã. Pendu ma omombe'ua rã ha'e va'e ou 'rãa. Aỹ voi heta ma ikuai Cristo ramigua rive. Ha'e nunga rupi ae jaikuaa opa aguã ára ovaẽ maa.

¹⁹ Ha'e kuery ma nhande kuery mbyte gui ojepe'a va'ekue, nhande regua e'ỹ vy. Mba'eta nhande regua ikuai va'e rire opyta 'rãgue nhande kuery reve. Ha'e gui ha'e kuery ojepe'a ramo jaikuaa nhande regua e'ỹ ikuai.

²⁰ Ha'e rã pendere ma oĩ penemo'aranduarã lky'a e'ỹ va'e omoĩ va'ekue. Ha'e rami rire peẽ kuery peikuaapa.

²¹ Kova'e kuaxia pëvy ambopara "Anhetẽ va'e ndapeikuaai" ha'e vy e'ỹ. Mba'eta peikuaa ae, ha'e peikuaa avi apu ikuai va'e anhetẽ va'e guigua e'ỹa.

²² Ha'e gui ijapu va'e ma "Jesus ae Cristo oiko" nde'i va'e. Ha'e nunga ma Cristo ramigua rive, mba'eta Tuu neĩ Ta'y re ndojeroviaa va'e.

²³ Ha'e nunga rupi Nhanderuete Ra'y pe "Xee ma hexevegua e'ỹ" he'i va'e re ma Tuu noĩ. Ha'e rã "Nhanderuete Ra'y revegua ae xee" he'i va'e re ma Tuu avi oĩ.

²⁴ Pendere toĩ riaa jypy'i guive pendu va'ekue. Mba'eta jypy'i guive pendu va'ekue pendere oĩ ramo ma peẽ voi 'rã peĩ Nhanderuete ha'e Ta'y re.

²⁵ Mba'eta ijayvu tekove marã e'ỹ ome'ẽ aguã re nhandevy.

²⁶ Ha'e nunga ambopara penembotavyxea kuery gui penheangu aguã.

Nhe'ẽ Ky'a E'ỹ nhandembo'ea re ijayvua

²⁷ Ha'e gui pendere ojeguigua omoĩ va'ekue oĩ riaa ramo penembo'earã mboae oĩ e'ỹ teĩ ha'eve, mba'eta pendere omoĩ mbyre ae 'rã penembo'ea opa mba'e re. Ha'e va'e ma anhetẽ rupigua ae, anhetẽ rupigua merami rive'ỹ. Peĩ riaa ke hexe, penembo'eague rami vy ae.

²⁸ Ha'e gui aỹ xera'y kue'iry, peĩ atã tema hexe. Ha'e rami vy ha'e ojekuaa jevy ramo nhandep'y'a guaxu, ha'e ixugui nhaximba reve nhandehemi e'ỹ aguã ou jevya py.

²⁹ Cristo heko porã va'ea jaikuaa vy jaikuaa avi teko porã rupi ikuai va'e ixugui oiko va'ekue memea.

3

Cristo iky'a e'ỹa rami nhande voi nhandekuai aguã re ijayvua

¹ Peikuaa pota Nhanderuete nhanderayvu etea re, nhandevy "Xera'y kuery" he'ia py. Anhetẽ ae Nhanderuete ra'y kuery nhandekuai.* Ha'e nunga rupi ae yvy regua kuery nanhandekuaai, mba'eta Cristo voi ndoikuaai okuapy rire.

² Xerembiayvu kuery, aỹ voi Nhanderuete ra'y kuery nhandekuai. Ha'e rami teĩ ndajaiquaai teri raka'eve rã marã ramigua ete pa jaiko 'rãa. Ha'e rã peteĩ mba'e ma jaikuaa porã: Cristo ojekuaa ramo nhande voi 'rã heko rami jaiko, mba'eta jaexa 'rã marã rami ete pa ha'e oikoa.

³ Ha'e rami aguã oarõ okuapy va'e ha'e javi ojeky'a'o uka 'rã ha'e iky'a e'ỹa rami avi ikuai aguã.

⁴ Ha'e rã jejavya rupi ikuai va'e ma lei rovai rupi avi ikuai, mba'eta jejavya ma lei rovai ae.

⁵ Peikuaa avi Cristo ou raka'e jajejavya oipe'apa aguã. Hexe ma jejavy noĩ.*

⁶ Hexe ikuai va'e ma ndojejavy riaevei ma 'rã. Ha'e rã jejavya rupi ikuai va'e ma ndoexai, neĩ ndoikuaai okuapy.

Nhanderuete guigua ha'e anha guigua re ijayvua

⁷ Xera'y kue'iry, penhembotavy uka eme avave rei pe. Teko porã rupi ikuai va'e ma heko porã va'e ae, Cristo heko porã va'ea rami avi.

⁸ Ha'e rã jejavya rupi ikuai va'e ma anha guigua, mba'eta anha jypy'i guive ojeyavy raka'e. Ha'e rami aguã ae Nhanderuete Ra'y ou, anha rembiapo ombovaipa aguã.

⁹ Ha'e javi Nhanderuete gui oiko va'ekue ma ndojejavy riaevei ma 'rã, mba'eta ha'e kuery re oĩ Nhanderuete guigua. Ha'e kuery ndojejavy riaevei 'rãe, Nhanderuete gui oiko rive.

¹⁰ Po rami 'rã jaikuaa mava'e pa Nhanderuete ra'y kuery ha'e anha ra'y kuery ikuai. Teko porã rupi nda'ikuaai va'e ma Nhanderuete guigua e'ỹ, ha'e o-irmão kuery ndoayvui va'e guive.

Irmão kuery jayvu ete aguã re ijayvua

¹¹ Ha'e gui ayvu jypy'i guive pendu va'ekue ma pova'e: Peteĩ-teĩ jajoayvu aguã.

¹² Caim oikoague rami e'ÿ 'rã nhandekuai, mba'eta ha'e va'e ma poromboeko vaia guigua oiko rire ojuka raka'e guyyv. Mba'e re nda'u ojuka? Mba'eta heko vai va'e oiko, ha'e rã tyvy ma heko porã va'e.*

¹³ Irmão kuery, penhemondyi eme vvy regua kuery pendere nda'ija'ei rã.

¹⁴ Irmão kuery jayvu vy ae 'rã jaikuaa manoa gui tekove jaupity aguã re jaaxa maa.* Ha'e rã ndoayvuy va'e ma manoa py teri ikuai.

¹⁵ Irmão kuery re nda'ija'ei va'e ma jojuka va'ety meme ikuai. Ha'e peikuaa jojuka va'ety re tekove marã e'ÿ noã.

¹⁶ Po rami ae jaikuaa mborayvu, Cristo nhanderayvu vy nhandere guekove ome'ê rire. Ha'e ramo nhande kuery avi 'rã nhanderekove nhame'ê irmão kuery re.

¹⁷ Ha'e gui xapy'a rei amongue mba'emo kova'e vvy rupigua oguerekopa rei va'e o-irmão ojexavai rei rã oexa teĩ ipy'a mbaraete 'rã oipytyvô e'ÿ aguã. Ha'e nunga re mba'eta tu oĩ Nhanderue te guigua porayvua?

¹⁸ Xera'y kue'iry, nda'eveni jajoayvu merami aguã, nhandeayvu py rive. Jaexa uka ete ke jajoayvua, nhandopytyvôa py ae.

¹⁹ Po rami 'rã jaikuaa anhetê va'e guigua jaiko va'ea, henonde nhandepy'a guaxu aguã ndajaukuaa reia gui.

²⁰ Ha'e rami avi nhandepy'a py nhandembopagaarã nhaendu teĩ nhandepy'a gui Nhanderue te hi'aranduve va'e vy opa mba'e oikuaa.

²¹ Xerembiayvu kuery, nhandepy'a py nhandembopagaarã nanhaendui ri vy nhandepy'a guaxu 'rã Nhanderue te renonde.

²² Ha'e rami vy mba'emo re jajeruea voi jajopy 'rã ixugui, mba'eta henonde ojapo uka va'e rupi jaiko vy nhambovy'a.

²³ Po rami ae ha'e ojapo uka va'ekue: Ta'y Jesus Cristo rery rupi jajerovia aguã, ha'e peteĩ-teĩ jajoayvu aguã ijayvuague rami vy.

²⁴ Nhanderue te ojapo uka va'e rupi ikuai va'e ma hexe anho tema ikuai, ha'e gui ha'e kuery re ma Nhanderue te voi oĩ. Po rami 'rã jaikuaa nhandere oĩa, Inhe'ê nhandere omoĩ va'ekue gui ae.

4

1 João 2.18-26; 2 João 7-11

¹ Xerembiayvu kuery, nda'eveni perovia aguã nhe'ê guigua ayvu va'e ma guive rã. Peikuaa pota ranhe nhe'ê kuery anhetê Nhanderue te guigua tyrã pa anya re, mba'eta heta ma ikuai profeta ramigua rive vvy re.

² Po rami jaikuaa 'rã Nhanderue te Nhe'ê, mba'eta "Jesus Cristo ngo'o reve ou va'ekue re ajerovia" he'i va'e ma Nhanderue te guigua meme.

³ Ha'e rã "Jesus revegua aiko" nde'i va'e ma Nhanderue te guigua e'ÿ, ha'e rã Cristo ramigua nhe'ê rive. Pendu ma ha'e nunga oiko 'rãa, ha'e gui aÿ voi oiko ae ma vvy re.

⁴ Xera'y kue'iry, peê kuery ma Nhanderue te guigua pendekuai vy pendepo'aka ma profeta ramigua kuery re, mba'eta pendere oĩ va'e ma vvy regua kuery re oĩ va'e gui ipo'akave.

⁵ Ha'e kuery ma vvy regua ikuai va'e vy vvy gui rive 'rã ijayvu, ha'e ramo vvy regua kuery ojapyxaka 'rã ijayvua re.

⁶ Ha'e rã nhande kuery ma Nhanderue te guigua nhandekuai ramo Nhanderue te oikuaa va'e kuery ojapyxaka 'rã nhandeayvua re. Ha'e rã Nhanderue te guigua e'ÿ ma ndojapyxakai 'rã okuapy. Ha'e rami rã jaikuaa 'rã nhe'ê anhetê rupi, tyrã pa nhombotavya rupi ijayvu va'ea.

Jajoayvu aguã re ijayvua

⁷ Xerembiayvu kuery, jajoayvu peteĩ-teĩ, mba'eta mborayvu ma Nhanderue te guigua ae. Porayvu va'e ma Nhanderue te guigua meme ikuai, ha'e oikuaa guive Nhanderue te.

⁸ Ha'e rã joayvu e'ÿ va'e ma ndoikuai Nhanderue te, mba'eta Nhanderue te ma mborayvu rupigua ae.

⁹ Po rami Nhanderue te oexa uka raka'e nhanderayvua, Gua'y peteĩ'i va'e ombou vy, hexe vy jaikove riaa aguã.

¹⁰ Pova'e py ma mborayvu ojekuaa: Nhanderue te jayvua py e'ÿ, ha'e rã ha'e ranhe nhanderayvua py, mba'eta Gua'y ombou jajejavyague re opaga aguã.

¹¹ Xerembiayvu kuery, ha'e rami Nhanderue te nhanderayvu rire nhande kuery avi 'rã jajoayvu peteĩ-teĩ. ¹² Nhandere, ha'e iporayvua ojekuaa 'rã va'ekue ojekuaapa 'rã.*

¹³ Po rami jaikuaa 'rã hexe nhaĩa, ha'e ha'e voi nhandere oĩa, mba'eta nhandereve guarã ombou Onhe'ê. ¹⁴ Ha'e ore kuery roexa ha'e romombe'u guive Nhanderue te Gua'y ombouague vvy re ikuai va'e reraa jepearã.

¹⁵ "Jesus ma Nhanderue te Ra'y" he'i va'e re ma Nhanderue te oĩ. Ha'e kuery voi ikuai Nhanderue te re.

¹⁶ Nhande kuery jaikuaa ha'e jarovia guive Nhanderue te nhanderayvua. Nhanderue te porayvua rupi oiko va'e ramo porayvu rupigua ikuai va'e ma hexe meme ikuai, ha'e ha'e kuery re Nhanderue te avi oĩ.

¹⁷ Ha'e ramo nhanderayvua jaikuaa porã vy nhandepy'a guaxu 'rã pavê re oikuaa potaa ára py voi, mba'eta kova'e vvy re jaiko reve ma voi nhandekuai ha'e oikoa rami.

¹⁸ Hembiaiyvu jaiko vy ndajakyje rei 'rã, mba'eta opa mba'e py nhandarayvua oipe'a 'rã jakyjea. Mba'eta jakyjea ma japaga aguã rami jaikoa py anho 'rã nhaendu. Ha'e nunga rupi okyje va'e ma ndoikuaa porã teri nhandarayvua.

¹⁹ Nhande kuery jajoayvu mba'eta ha'e ranhe nhandarayvu rire.

²⁰ Amongue "Xee ayvu Nhanderuete", he'i va'eri irmão kuery ndoayvui va'e ijapu. Mba'eta o-irmão oexa va'e ndoayvui vy Nhanderuete oexa e'y va'e katuve ma ndoayvui 'rã.

²¹ Pova'e ayvu nhaendu ixugui: Nhanderuete oayvu va'e ma toayvu avi o-irmão kuery.

5

Yvy rupigua re nhandepo'aka aguã re ijayvua

¹ Jesus ae Cristo oikoa oguerovia va'e ma Nhanderuete gui oiko va'ekue meme. Ha'e Nhanderuete oayvu va'e kuery oayvu avi 'rã ixugui oiko va'ekue mboae.

² Po rami jaikuaa Nhanderuete ra'y kuery jayvua, mba'eta Nhanderuete jayvu vy ojapo uka va'e rupi nhandekuai.

³ Mba'eta Nhanderuete ojapo uka va'e rupi nhandekuai py ae 'rã jaexa uka jayvua.* Ha'e ojapo uka va'e ma nda'ipoyi guive,

⁴ mba'eta ha'e javi Nhanderuete gui jaiko va'ekue ma nhandepo'aka 'rã vyvy rupigua re. Po rami 'rã nhandepo'aka vyvy rupigua re, jajeroviaa rupi ae.

⁵ Mava'e kuery nda'u ipo'aka 'rã vyvy rupigua re? Jesus Nhanderuete Ra'y oikoa oguerovia va'e kuery anho.

Jesus reko regua kuaa ukua re ijayvua

⁶ Jesus Cristo ou vy vy ha'e nguguy py ojekuaa uka raka'e. Yy py anho e'y ojekuaa uka, ha'e rã yy ha'e nguguy py. Ha'e gui Nhe'ë avi oiko ikuaa ukaarã, mba'eta Nhe'ë ma anhetë va'e kuaa ukua ae.

⁷ Mba'eta ikuaa ukua mboapy ikuai [yva re: Nhanderuete, Jesus ha'e Nhe'ë Ky'a E'y. Ha'e mboapyve ma pete'i.

⁸ Ha'e gui ikuaa ukua mboapy avi ikuai vyvy re:] Nhe'ë, yy ha'e huguy. Mboapyve ma pete'i rami meme oikuaa uka.

⁹ Ha'e gui avakue ayvu jarovia vy Nhanderuete ayvu katuve ma jarovia. Po rami Nhanderuete oikuaa uka Gua'y reko regua.

¹⁰ Nhanderuete Ra'y re ojerovia va'e kuery re ae 'rã ikuaa ukua oĩ. Ha'e rã Nhanderuete ayvu ndogueroviai va'e ma ixupe "Ijapu va'e" he'i, mba'eta Gua'y reko regua Nhanderuete oikuaa uka rã ndogueroviai.

¹¹ Mba'eta oikuaa uka va'ekue ma pova'e ae: Nhandevy Nhanderuete ome'ë tekove marã e'y, ha'e tekove ma Ta'y re oĩ.

¹² Ha'e nunga rupi amongue Nhanderuete Ra'y reve ikuai ramo ha'e kuery re oĩ tekove. Ha'e rã Ta'y reve e'y ikuai ramo ma ha'e kuery re tekove noi.*

Mba'emo re jajerure aguã re ijayvua

¹³ Pova'e ayvu peë kuery pe ambona peikuaa aguã pendere tekove marã e'y oĩa, Nhanderuete Ra'y rery rupi pejerovia va'e re ae.

¹⁴ Nhanderuete re jajerovia vy jaikuaa avi ixupe mba'emo re jajerure ramo oendu 'rãa, ha'e oipotaa rami ri jajerure ramo.

¹⁵ Jajerurea oendua jaikuaa vy jaikuaa avi jajerureague ome'ë ma 'rãa.

¹⁶ Ha'e gui xapy'a rei amongue oexa 'rã o-irmão omano aguã rami e'y ojevavy rã. Ha'e rami vy ha'e va'e re ojerure 'rã, ha'e ramo Nhanderuete omoingove ju 'rã, omano aguã rami e'y ojevavy ramo. Mba'eta oiko avi teko vai nhamano aguã rami nhanemoingo va'erã. "Ha'e nunga re pejerure" nda'ei.

¹⁷ Teko vai ma guive rã jjevavya meme. Teĩ oiko avi teko vai nhamano aguã rami nhanemoingo va'erã e'y.

¹⁸ Jaikuaa ha'e javi Nhanderuete gui oiko va'ekue ndojevavy riaevei ma 'rãa. Mba'eta ha'e kuery re Nhanderuete gui jypy'i oiko va'ekue opena 'rã poromboeko vaia oity e'y aguã.

¹⁹ Jaikuaa nhande kuery Nhanderuete guigua nhandekuiaa, ha'e rã vyvy regua kuery ma poromboeko vaia re ikuai.

Omongeta reve opaa py ijayvuague

²⁰ Jaikuaa avi Nhanderuete Ra'y ou vy nhanemo'arandu anhetë va'e jaikuaa aguã rami. Ha'e rami rire ma anhetë va'e re nha'i, Ta'y Jesus Cristo re ae. Ha'e va'e ma Nhanderuete anhetë va'e ha'e tekove marã e'y me'ëa.

²¹ Xera'y kue'iry, penheangu ke Nhanderuete ramigua rive pembojerovia e'y aguã.

Mokoïguea kuaxia João ombopara va'ekue Mokoïguea kuaxia João ombopara va'ekue

Kova'e kuaxia apóstolo João ombopara va'ekue peteĩ kunha pe, imemby kuery pe guive. Ijayvu anhetê va'e rupi ikuai aguã, mborayvu re guive. Anhetê va'e ma Jesus Cristo regua ae, mba'eta "Cristo regua rami e'ỹ nhombo'ea, ha'e ayvu porã gui ojepe'a va'ekue re ma Nhanderuete noĩ. Ha'e rã ha'e va'e ayvu nhanembo'eague rupi riae ikuai va'e re ma Nhanderuete ha'e Ta'y oĩ" (versículo 9).

Oxarura reve ijayvu vy omboypyague

¹ Xee igreja re apena va'e ma axarura ndevy, xereindy Nhanderuete ojeupe guarã ndeporavo va'ekue pe, ha'e nememby kuery xerembiayvu ikuai avi va'e pe. Xee anho e'ỹ roayvu, anhetê va'e oikuaa va'e kuery ha'e javi guive,

² mba'eta nhande kuery pavê re anhetê va'e oĩ, ha'e nhandereve riae 'rã oiko.

³ Nhandereve oĩ 'rã nhanemboaxya ha'e mby'a porã Nhanderuete ha'e Ta'y Jesus Cristo guigua, anhetê va'e ha'e mborayvu guive.

Jajoayvu aguã re ijayvua

⁴ Xee avy'a ete nememby kuery regua anhetê va'e rupi ikuai rã aikuaa vy, Nhanderu ojapo ukaague rami vy ae.

⁵ Aỹ ma xereindy, xee ajerure peteĩ-teĩ jajoayvu aguã. Ha'e ramia py ma ayvu ipyau va'e'ỹ ambopara, ha'e rã jypy'i guive oeja va'ekue.*

⁶ Po rami 'rã jajoayvu: ha'e ojapo uka va'e rupi nhandekuaia py. Kova'e ma jypy'i guive ojapo uka va'e regua pendu va'ekue, mborayvu re nhandekuai aguã.

Nhombotavya rupi nhombo'ea kuery reko re ijayvua

⁷ Mba'eta heta avi ikuai nhombotavy va'e vyvave rupi. Ha'e va'e kuery ma "Jesus Cristo ngo'o reve ou va'ekue re ajerovia" nde'i. Ha'e rami ikuai nhombotavya rei va'e kuery, Cristo rovaigua ae.*

⁸ Ha'e nunga rupi peiko kuaa pota, pemokanhy e'ỹ aguã penhea'ague repyrã oĩ va'e, ha'e rã pejopya aguã.

⁹ Ha'e gui Cristo regua rami e'ỹ nhombo'ea, ha'e ayvu porã gui ojepe'a va'ekue re ma Nhanderuete noĩ. Ha'e rã ha'e va'e ayvu nhanembo'eague rupi riae ikuai va'e re ma Nhanderuete ha'e Ta'y oĩ.

¹⁰ Amongue pendea py ou vy ha'e va'e ayvu rupi e'ỹ penembo'e ramo pemovaê eme pendero py, pexarura eme guive.

¹¹ Mba'eta ha'e kuery pe amongue oxarura vy ma teko vai apoa kuery reve onhemoirũ va'e.

Oxarura reve opaa py ijayvuague

¹² Heta teri areko ambopara va'erã pëvy. Ha'e rami teĩ aỹ namombe'uxeĩ tinta py kuaxia re, mba'eta peẽ kuerya py aju voixe. Ha'e ramo ma nhandeayvu porã 'rã, javy'a ete aguã.

¹³ Ndekypy'y oiporavo pyre memby kuery ha'e javive oxarura uka ndevy.

* 1:5 João 13.34,35; 1 João 2.7,8 * 1:7 Romanos 16.17,18; 1 João 2.18-26

Mboapykuea kuaxia João ombopara va'ekue Mboapykuea kuaxia João ombopara va'ekue

Kova'e kuaxia ma apóstolo João ombopara va'ekue peteĩ igreja re opena va'e Gaio hery va'e pe. Oguerovy'aa rupi ijayvu, “mba'eta xera'y kuery anhetê va'e rupi ikuai aendu rã xembovy'ave pavê gui”, he'i vy (versículo 4).

Guvy Gaio pe oxarura reve ijayvu vy omboypyague

¹ Xee igreja re apena va'e axarura ndee Gaio roayvu ete va'e pe.

² Xerembiayvu, opa mba'e py ajerure reiko porã ha'e nerexaĩ aguã re, nenhe'ẽ oiko porãa rami avi.

³ Xee avy'a ete irmão kuery ovaẽ vy omombe'u rã anhetê rupigua reikoa, mba'eta anhetê va'e rupi ae reiko va'e.

⁴ Mba'eta xera'y kuery anhetê va'e rupi ikuai aendu rã xembovy'ave pavê gui.

Ayvu porã momba'ua kuery nhaipytyvõ aguã re ijayvua

⁵ Xerembiayvu, irmão kuery reipytyvõ reikovya py ma ha'evea rami rejapo. Yvy mboae guigua kuery ou ramo voi reipytyvõ jepi.

⁶ Mba'eta igreja kuery pe ha'e kuery omombe'u porã ndeporayvua. Ha'evea rami reipytyvõ oguatave aguã, ha'e ramia py Nhanderuete rami ete rejapo.

⁷ Mba'eta ha'e kuery ma Hery rupi oje'oi vy peteĩve henda py nonhepytyvõ ukai nhande kuery regua e'y pe.

⁸ Ha'e nunga rupi ha'evea rami nhaipytyvõ ha'e va'e irmão kuery, anhetê va'e oenduave aguã rami jajapo.

Heko vai ha'e heko porã va'e reko re ijayvua

⁹ Xee ma igreja kuery pe mba'emo re ambopara teĩ Diótfrefes onhemboyvatevexe rei vy ndojapyxaka potai oreayvu re.*

¹⁰ Ha'e nunga rupi araka'e'i rã apy pendekoa py aju vy ixupe xeayvu 'rã ha'eve'yã rami ojapogue re, mba'eta opa marã rei ijayvu orere. Ha'e ramia gui ojapo vaivexe vy irmão kuery ha'e py ovaẽ ramo nomovaẽi, ha'e amongue omovaẽ ta ramo nomovaẽ ukai, ha'e rã igreja gui omoxê ete raka'e.

¹¹ Xerembiayvu, ndee ma eiko eme teko vai rupi, ha'e rã teko porã rupi anho, mba'eta teko porã rupi ikuai va'e ma Nhanderuete guigua meme. Ha'e rã teko vai rupi ikuai va'e ma neĩ peteĩgue voi ndoexai Nhanderuete.

¹² Ha'e rã Demétrio re ma ima'endu'a porã pavê, anhetê va'e eteve voi. Ore kuery voi roikuaa heko porãa, ha'e ndee reikuaa avi oreayvu anhetê ete memea.

Oxarura reve opaa py ijayvuague

¹³ Heta mba'e teri areko ndevy ambopara aguã. Ha'e rami teĩ namombe'uxei tinta ha'e caneta py rive.

¹⁴ Mba'eta xee aa voixe roexa vy. Ha'e ramo ma nhandeayvu porã 'rã.

¹⁵ Tove terendu mby'a porã. Nhaneirũ kuery ha'e javi oxarura uka ndevy. Ha'e nhaneirũ kuery ndea py ikuai va'e peteĩ-teĩ pe omombe'u orema'endu'aa.

* 1:9 Mateus 20.25-28; 23.1-12

Judas ombopara va'ekue Judas ombopara va'ekue

Kova'e kuaxia mboparaare ma Judas Iscariotes e'ÿ, Judas mboae, Tiago ha'e Jesus ryvy (versículo 1). Jypy onhembopy'a jaa jepea omombe'u porãve aguã, ha'e gui amboae rami onhembopy'a, jajeroviaa regua jaepya rupi nhanhea'ã aguã re ijayvu aguã. "Mba'eta amongue avakue Nhanderuete pegua e'ÿ nhanembotavyxe vy nhemi rupi oike ra'e nhanembyte py. Ha'e va'e kuery ma opa marã rei ikuai vy ha'eve'ÿa rami nhombo'e" (versículo 4a).

"Ha'e rã peẽ xerembiayvu kuery, tapenembaraeteve peovy pejeroviaa icky'a e'ÿ va'e rupi, ha'e Nhe'ẽ Ky'a E'ÿ gui peikuaa vy pejerurea py guive. Nhanderuete penderayvu rupi anho tapendekuai. Pearõ tema nhande-Senhor Jesus Cristo penemboaxya rupi tekove marã e'ÿ ogueru rã guarã" (versículos 20-21).

Oxarura reve ijayvu vy omboypyague

¹ Xee Judas ma Jesus Cristo rembiguai ha'e Tiago ryvy aiko.* Axarura peẽ kuery Nhanderuete remienio, hembiaayvu, ha'e Jesus Cristo rery rupi openamby pendekuai va'e pe.

² Tove peẽ kuery tapenduve tema penemboaxya, mby'a porã ha'e mborayvu.

Cristo re jajeroviaa regua re nhanhea'ã aguã re ijayvua

³ Xerembiayvu kuery, jypy anhembopy'a teĩ nhande kuery jaa jepea re pëvy ambopara aguã. Ha'e gui ma aendu ete amboae re xayvu aguã pëvy ambopara vy, jajeroviaa regua anhetê va'e rupi penhea'ã aguã, icky'a e'ÿ va'e kuery pe peteĩgue'i omboaxaa rire.

⁴ Mba'eta amongue avakue Nhanderuete pegua e'ÿ nhanembotavyxe vy nhemi rupi oike ra'e nhanembyte py. Ha'e va'e kuery ma opa marã rei ikuai vy ha'eve'ÿa rami nhombo'e Nhanderuete nhandemboaxya re, ha'e Senhor Jesus Cristo Huvixave pete'i va'e re ndojeroviaa rami ijayvu guive. Ha'e kuery opaga aguã yma ma voi omoĩa.*

Ymagua kuery heko vai va'e ombopagaagae re ijayvua

⁵ Ha'e nunga ha'e javi peikuaa ae ma teĩ romoma'endu'axe ju Egitu yvy gui Senhor heta va'e kuery oguenoẽ vy ogueraa jepepa rire teĩ ojerovia e'ÿ va'e kuery omokanhyague re.*

⁶ Anjo kuery voi guekorã va'ekue gui ojepe'a vy guekoa ae oejapa rire Senhor ombotypa pytũa py, corrente opa e'ÿ va'e py ojokua, ombopaga aguã ára tuvixa va'e pyguarã.

⁷ Ha'e gui Sodoma, Gomorra ha'e ha'e katy'i rupi tetã ikuai va'e re ha'ekue rami ae ju oiko raka'e. Ha'e pygua kuery ma anjo oejavy va'ekue rami ae itavy reia rupi ikuai, ha'e amboae rami rei to'o oipotaa rupi guive. Ha'e kuery ombopagaague ma tata ogue'ÿ va'e gui nhande voi jakyje aguã opyta.*

⁸ Ha'e gui aÿ voi nhombotavy reia kuery ma ha'ekue rami ae ju ikuai. Oexa ra'ua rupi rive vy ngo'o ae omongy'a, nonhe'ẽ rendui huvixa kuery, ha'e ijayvu rei 'rã ipo'akakueve re.

⁹ Ha'e rã anjo yvateve va'e Miguel ma anha reve Moisés retেকে re joaka ete ijayvua py voi nonhemboyvatei raka'e anha pe ijayvu vai aguã. Ha'e rami 'rãgue py "Senhor ae ta'ijayvu ndevy", he'i.*

¹⁰ Ha'e rã nhombo'e vaia kuery ma ijayvu vai 'rã oikuaa e'ÿ va'e ha'e javi re. Mymba kuery hi'arandu e'ÿ va'e rami avi onhemongy'apa rei 'rã mba'emo oakã gui ae oikuaa va'e rupi rive.

¹¹ Ha'e kuery pe nda'evei ete 'rã! Mba'eta Caim oikoague rupi ae ju ha'e kuery ikuai, ha'e mba'emo ojoupaxea rupi rive oje'oi pojava Balaão ojekoreague ramigua rupi, ha'e rire Coré kuery rami avi okanhymba 'rã nnonhe'ẽ raxaveague re.†

¹² Ha'e kuery ma yy guy py ita itui va'e rami onhenhomi va'e, mba'eta ha'e javi joa-joapy, pekarua py ha'e kuery voi 'rã ikuai, peteĩve henda py oxã oendu e'ÿ re.‡ Mymba kuery re opena va'ety ha'e ae rive onhemongaru va'e rami avi ikuai. Oky aguã e'ÿ arai yvytu ogueraapa rive va'e rami, ha'e yvyra hi'a ára py teĩ hi'a e'ÿ va'e rami avi ikuai. Ha'e va'e nunga ma mokoĩgue omano va'e, mba'eta ipirupa va'ekue ha'e oapo'opa pyre rami.

¹³ Ha'e kuery ma yai opu'ã-pu'ã vy hyjui ombovu va'e rami avi ikuai, ha'e jaxy-tata ova va'e rami, pytũ reia py araka'e rã peve guarã omoĩgu pyre.

¹⁴ Ha'e va'e kuery rekorã ma Enoque omombe'u raka'e. Ha'e va'e ma Adão ramymino kuery jevy regua sete-a va'ekue. Aipoe'i: "Senhor ou 'rã ojeupegua kuery icky'a e'ÿ va'e mbovy rei e'ÿ reve.

¹⁵ Joe oikuaa pota vy ou, mba'eta heko vai va'ekue ha'e javi 'rã ombopaga, ixupe ndoikoxei vy teko vai ojapo, ha'e hexe ijayvu vaiague re", he'i va'ekue.

¹⁶ Ha'e kuery ma joe ijayvu rei riae va'e, ndovy'aia rupi rei ijayvu va'ety, ha'e kuery ae oipotaa rami ikuai va'e. Onhemboyvate reia rupi anho ijayvu. Joguerorya rupi 'rã ijayvu mba'emo ojoupaxe vy rive.

* 1:1 Mateus 13.55 * 1:4 2 Timóteo 3.1-9 * 1:5 2 Pedro 2.1-22 * 1:7 Egitu yvy gui oo jepe va'ekue ri ojerovia e'ÿ va'e omokanhyague omombe'u Números 14.26-30 py, ha'e gui tetã Sodoma ha'e Gomorra ombovaipaague ma Gênesis 19 py omombe'u. * 1:9 Zacarias 3.2 † 1:11 Caim rekokie ma Gênesis 4.1-8 py omombe'u, Balaão rekokie ma Números 22 py, ha'e rã Coré kuery rekokie ma Números 16.1-9 py omombe'u. ‡ 1:12 Yy guy py ita itui va'e ma jivaete 'rã, mba'eta ha'e nunga kanoã mboguatã kuery ndoexai vy onhembota rive 'rã.

Apóstolo kuery ijayvu ma voiague rupi nhanemongetaague

¹⁷ Ha'e rã peẽ xerembiayvu kuery, penema'endu'a riae ke yma guive nhande-Senhor Jesus Cristo pegua apóstolo kuery ijayvuague re.

¹⁸ Mba'eta aipoe'i pëvy: "Opaa ára ikuai 'rã porojoi reia kuery, teko vai ojapoxea rupi rive ikuai va'e", he'i va'ekue.*

¹⁹ Ha'e va'e kuery ojapo 'rã joo rami e'ỹ-e'ỹ ikuai aguã rami. Yvy regua reko rami rive ikuai, Nhe'ẽ revegua e'ỹ.

²⁰ Ha'e rã peẽ xerembiayvu kuery, tapenembaraeteve peovy pejeroviaa iky'a e'ỹ va'e rupi, ha'e Nhe'ẽ Ky'a E'ỹ gui peikuaa vy pejerurea py guive.

²¹ Nhanderuete penderayvua rupi anho tapendekuai. Pearõ tema nhande-Senhor Jesus Cristo penemboaxya rupi tekove marã e'ỹ ogueru rã guarã.

²² Pemboaxy ke ndojerovia porãi teri va'e.

²³ Ha'e rami vy peraa jepe, tata gui perojepe'a vy. Ha'e rã amboae kuery ma pemboaxy avi teĩ pejererokyjea rupi guive, mba'eta to'o oipotaa rupi vy oao voi omongy'apa rei vy ojegarupy opyta.*

Opaa py ogueroayvu porãague

²⁴ Ha'e gui Nhanderuete ma ipo'aka opena aguã ja'a e'ỹ aguã, ha'e guexakãa py nhandererovy'a reve iky'a e'ỹ va'e nhanderexa uka aguã.

²⁵ Tove Nhandereraa jepea Nhanderuete petei'i va'e toguerovy'aa nhande-Senhor Jesus Cristo rery rupi. Ha'e anho ha'eve yvate ete aguã, pavẽ re opena ha'e ipo'aka aguã, yma guive, aỹ ha'e araka'eve rã peve. Amém.

* 1:18 2 Pedro 3.3 * 1:23 Gálatas 6.1,2; Tiago 5.19,20

João pe oexa uka pyre Apocalipse 'epy va'e oĩa

João pe oexa uka pyre apocalipse 'epy va'e oĩa

"Kova'e ma Jesus Cristo araka'eve guarã oikuaa uka va'ekue. Ixupe Nhanderuete omboaxa va'ekue, guembiguai kuery pe ju oikuaa uka aguã mba'emo are'ÿ'i re oiko va'erã, tenonderã omoĩ ma voiaque rami vy. Ha'e rami vy ojeupegua anjo ombou, guembiguai João pe oikuaa uka aguã" (1.1).

Apóstolo João pe Jesus ojexa uka vy aipoe'i: "Ekyje eme. Xee ma jypy'igua ha'e opa vygua, oikove va'e guive aiko. Mba'eta amano va'ekue, teĩ aỹ ma aikove ju araka'e rã peve guarã. Areko avi omanogue retã rokẽ pe'aa. Ha'e nunga rupi embopara ke mba'emo rexa va'ekue, mba'emo aỹ oiko, ha'e araka'eve rã oiko va'erã guive", he'i (1.17b-19). Ha'e gui ma omombe'u igreja kuery sete henda rupi ikuai va'e pegua João ombopara va'erã (capítulos 2-3). Ha'e gui ma ixupe oikuaa uka raka'eve rã oiko va'erã. Mba'eta oiko 'rã Jesus remimbo'e kuery re opu'ã rei va'e ha'e ko yvy re mba'emo tuvixa va'e Nhanderuete omoingo rã. Ha'e gui opaa py Jesus Cristo ou jevy 'rã yva gui, yva pyau ha'e yvy pyau reve. Hexe huvixa kuery opu'ã rei teĩ ojekuaa xapy'a 'rã pavẽ pe, mba'eta ha'e ma "Huvixave ikuai va'e Ruvixave, ha'e senhor ikuai va'e Senhor" (19.16).

Ha'e nunga rupi nhandepy'a guaxu ha'e nhaĩ atã 'rã Jesus re jajeroviaa py. Mba'emo oiko rã jaropo'aka 'rã, mba'eta Jesus ipo'aka ae ma mba'emo vai re, ha'e opaa ára py opo'akaa oexa uka 'rã pavẽ pe.

Jesus Cristo raka'eve guarã oikuaa uka va'ekue re ijayvua

¹ Kova'e ma Jesus Cristo araka'eve guarã oikuaa uka va'ekue. Ixupe Nhanderuete omboaxa va'ekue, guembiguai kuery pe ju oikuaa uka aguã mba'emo are'ÿ'i re oiko va'erã, tenonderã omoĩ ma voiaque rami vy. Ha'e rami vy ojeupegua anjo ombou, guembiguai João pe oikuaa uka aguã.

² Ha'e va'e ju omombe'u Nhanderuete ayvu Jesus Cristo oikuaa uka va'ekue. Oexa va'ekue ha'e javi omombe'u.

³ Ovy'a ete 'rã okuapy kova'e ayvu ogueroyvuu, e'ÿ vy oendu rire ipara oĩa rupi ikuai va'e, mba'eta ára namombyrvei ma.*

Ásia yvy re sete igreja ikuai va'e pe João oxaruraague

⁴ Xee João axarura Ásia yvy re sete igreja ikuai va'e pygua kuery pe: Tove peẽ kuery tapendu penemboaxya ha'e mby'a porã, aỹ oiko va'e, yma guive oiko va'ekue, ha'e araka'eve rã ou va'erã va'e guigua, henda openaaty renonde sete Nhe'ẽ ikuai va'e guigua,

⁵ ha'e Cristo guigua guive. Ha'e va'e ma anhetẽ va'e mombe'ua ojeroviapy va'e oiko, omanogue mbyte gui ha'e ranhe ju onhemboete va'ekue, ha'e yvy re huvixave kuery ikuai va'e áryve Ipo'akapa va'e. Nhanderayvu vy nguguy py ae nhandejogua raka'e jajejavyague gui,

⁶ ha'e gui nhanemoingo opo'akaa pyguarã ha'e Nguuete pegua sacerdote-rã. Ha'e ma taexakãmba ha'e ta'ipo'akapa araka'e rã peve. Amém.

⁷ Ma'ẽ, arai rupi 'rã ou. Ha'e ramo oexa pavẽ 'rã, ipyxoare kuery voi. Yvy re ikuai va'e ha'e javi regua oexa vy ojae'opa 'rã okuapy. Anhetẽ ete va'e. Amém.*

⁸ Senhor Nhanderuete aipoe'i: "Xee ma jypy'igua ha'e opa vygua. Aỹ aiko, yma guive aiko va'ekue, ha'e raka'eve rã aju va'erã va'e, Ipo'akapa va'e aiko", he'i.

Jesus guexakã reve ojexa ukaague

⁹ Xee João ma pende-irmão aiko, ha'e gui jaiko axya py, Nhanderuete po'akaa py ha'e Jesus re nhaĩ atãa py peẽ kuery irũ aiko. Peteĩ ypa'ũ Patmos 'epy va'e re aĩ va'ekue, Nhanderuete ayvu Jesus regua amombe'uague re.

¹⁰ Ha'e gui ma Senhor ára py Nhe'ẽ re aiko vy xerakykue katy gui peteĩ aendu ijayvu atã va'e, mimby guaxu rami onhendu va'e.

¹¹ Ha'e va'e ma aipoe'i xevy:

— Rexa va'e ke embopara kuaxia re, ha'e emondouka sete igreja ikuai va'e pe: Éfeso, Esmirna, Pérgamo, Tiatira, Sardes, Filadélfia ha'e Laodicéia pygua pe — he'i.

¹² Ha'e ramo ajere aexa aguã xereve ijayvu va'e. Ajere vy sete tataendy renda aexa ouro guigua meme.

¹³ Tataendy renda ikuai va'e mbyte peteĩ aexa avi ava ra'y rami ojekuaa va'e. Ha'e va'e ma ao puku py onhemonde, ha'e ipexo rupi oĩ ajukue ra'ykue ouro guigua.

¹⁴ Inhakã re hi'a oĩ va'e ma vexa'i rague rami xiĩ, yro'y apĩ rami avi. Hexa ma tata rami hendy.

¹⁵ Ipy ma overa va'e rami hendy, tata py omoexakã mbyre rami ojekuaa. Ijayvua ma yy tuvixa va'e revovo rami onhendu.*

¹⁶ Opo oiporu kuaa regua py ma sete jaxy-tata oguereko. Ijuru gui ma peteĩ kyxe guaxu oẽ haĩmbe jovai va'e. Hova ma kuaray ojope ratãa rami hexakã.

¹⁷ Ha'e gui aexa vy ipy yvry ha'a ajupy omanogue rami. Ha'e ramo opo oiporu kuaa regua xere omoĩ vy aipoe'i:

— Ekyje eme. Xee ma jypy'igua ha'e opa vygua,

18 oikove va'e guive aiko. Mba'eta amano va'ekue, teĩ aỹ ma aikove ju araka'e rã peve guarã. Areko avi omanogue retã rokẽ pe'aa.

19 Ha'e nunga rupi embopara ke mba'emo rexa va'ekue, mba'emo aỹ oiko, ha'e araka'eve rã oiko va'erã guive.

20 Ha'e gui sete jaxy-tata xepo aiporu kuaa regua py areko va'e, ha'e sete tataendy renda ouro guigua rexa va'e ma ndoikuaa ukaai teri. Sete jaxy-tata ma anjo kuery sete igreja ikuai va'e pegua, ha'e rã sete tataendy renda ma sete igreja ae — he'i.

2

Éfeso pygua igreja kuery pe ombopara ukaague

1 — Embopara Éfeso tetã py igreja kuery ikuai va'e pegua anjo pe: “Po rami ijavyvu opo oiporu kuaa regua re sete jaxy-tata oguereko va'e, ha'e sete tataendy renda ouro guigua mbyte rupi avi oiko va'e:

2 “Xee aikuaa peẽ kuery reko. Xevy pe pempa'epoa ha'e peĩ atãa voi aikuaapa, ha'e heko vai va'e kuery avyu re ndapejapxakaia guive. Pea'anga apóstolo onhemoingo rive va'e, ha'e vy ijapu va'e memea peikuaa.*

3 Peĩ atã, ha'e xerery rupi pendekuai ramo pendereko a'ãa rã pendekuerai e'ỹ re peropo'akapa guive.

4 Ha'e rami avi pendereko regua peteĩ ma naxembovy'ai, mba'eta pejepe'a ma jypy'i mborayvu rupi pendekuaiague gui.*

5 Penema'endu'a ke magui pa pe'aague re. Pejeko rerova ke, pendekuai ju jypy peikoague rami. Ha'e rami e'ỹ rã pãa py aju vy aipe'a 'rã pendevyguata tataendy renda oĩaty gui, pejeko rerova e'ỹ ramo.

6 Ha'e rami avi pendereko regua peteĩ oĩ xembovy'a va'e: Nicolaita kuery reko ndapejou porãia. Ha'e va'e kuery reko ma xee voi ndajou porã.

7 Ijapya oĩ va'e ke toendu igreja kuery pe Nhe'ẽ ijavyvu rã. Mba'eta ogueropo'akapa va'ekue pe ame'ẽ 'rã Nhanderuete 'amba re vvyra tekove me'ẽa hi'aĩ va'e'a ho'u agua.”

Esmirna pygua igreja kuery pe ombopara ukaague

8 — Ha'e gui Esmirna tetã py igreja kuery ikuai va'e pegua anjo pe ju embopara: “Po rami ijavyvu jypy'igua ha'e opa vygua, omano va'ekue ri oikove ju va'e:

9 “Xee aikuaa pendekuai axy ha'e pendeporiaukue'i va'ea. Ha'e rami avi perekopa va'e guive. Aikuaa avi judeu rami rive onhemoingo va'e kuery pendere ijavyvu rei okuapya. Ha'e va'e kuery ma Satanás peguarã rive onhemoaty va'e.

10 Pekiye eme pendekuai axy agua gui. Ma'ẽ, amongue peẽ kuery regua ma anha omboty uka 'rã nhuã py pendereko a'ã agua. Dez ára peve 'rã pendekuai axy. Pejerovia tema pmano peve. Ha'e ramo coroa-rã pëvy ame'ẽ 'rã tekove.*

11 Ijapya oĩ va'e ke toendu igreja kuery pe Nhe'ẽ ijavyvu rã. Mba'eta ogueropo'akapa va'ekue ma mokoĩguea manoa py nda'ikuaai axyi 'rã, peteive henda py.”

Pérgamo pygua igreja kuery pe ombopara ukaague

12 — Embopara ke Pérgamo tetã py igreja kuery ikuai va'e pegua anjo pe: “Po rami ijavyvu kyxe guaxu haĩmbe jovai va'e oguereko va'e:

13 “Xee aikuaa tetã pendekuaia py Satanás renda ae.* Ha'e rami teĩ xerery rupi pendekuaia re peĩ atã, ndapejepe'ai guive xere pejeroviaa gui, Antipas ojukaa ára voi. Ha'e va'e ma xevyguata omombe'u porã ramo ojukaa va'ekue pendereko Satanás renda oĩa py.

14 Ha'e rami teĩ oiko avi pendereko regua naxembovy'ai va'e, mba'eta peẽ kuery mbyte pereko Balaão nhombo'eague rupi ikuai va'e. Ha'e va'e ma Balaque ombo'e raka'e Israel kuery renondẽ nhuã omoĩ agua, mba'emo ra'angaa pe ome'ẽ mbyre gui ha'e kuery ho'u ha'e itavy rei okuapy agua rami.

15 Penembyte pereko avi Nicolaita kuery nhombo'ea rupi ikuai va'e.

16 Ha'e nunga rupi pejeko rerova. Ha'e rami e'ỹ ramo aju voi 'rã pãa py, ha'e xejuru gui kyxe guaxu oẽ va'e py apu'ã 'rã ha'e kuery rovai.

17 Ijapya oĩ va'e ke toendu igreja kuery pe Nhe'ẽ ijavyvu rã. Mba'eta ogueropo'akapa va'ekue pe ame'ẽ 'rã manã onhomi mbyre ha'e ita'i xii va'e guive. Ha'e va'e ita re ma tery pyau oĩ 'rã avave rei ndoikuaai va'e, ojopy va'e e'ỹ vy.”

Tiatira pygua igreja kuery pe ombopara ukaague

18 — Embopara ke Tiatira tetã py igreja kuery ikuai va'e pegua anjo pe: “Po rami ijavyvu Nhanderuete Ra'y tata rami hexa ha'e overa va'e rami ipy va'e:

19 “Xee aikuaa pendereko, pendeporavyua, pejeroviaa, xevy pe pempa'epoa ha'e peĩ atãa. Aikuaa avi jypy'i pempa'epoague gui aỹ pempa'epovea.

20 Ha'e rami teĩ peteĩ oĩ pendereko regua naxembovy'ai va'e, mba'eta kunha Jezabel avyu re pejapxaka. Ha'e va'e ma profeta ramigua rive onhemoingo vy xerembiguai kuery ombo'ea rupi ombotavy, itavy rei ha'e mba'emo ra'angaa pe ome'ẽ mbyre gui ha'e kuery ho'u okuapy agua.

21 Ha'e va'e ma xee arõ are ma ojeko rerova agua, teĩ itavy reia gui ndojeko rerovaxei.

* 2:2 2 Coríntios 11.13-15 * 2:4 Mateus 24.12,13 * 2:10 Mateus 10.28; 1 Pedro 1.6,7 * 2:13 Filipenses 2.15

²² Ma'ê, ajapo 'rã tupa py ojaxavai ete oupy aguã rami, ha'e hexeve itavy rei va'ekue guive, kunha va'e ombo'ea rupi ikuaiia gui ndojeko rerovai ramo.

²³ Ajuka ete 'rã imemby ha'e ipi'a kuery. Ha'e ramo igreja kuery ha'e javi 'rã oikuaa xee jopy'a ha'e nhokuraxô re aikuaa pota va'ea. Ha'e rami vy peteî-teî pe ame'ê 'rã peikoague rekovia.

²⁴ "Ha'e rã peê Tiatira pygua kuery mboae, ha'e kuery rami e'ÿ penhembo'e va'e, 'Satanás py'apy regua' he'ia re pepena e'ÿ va'e, peê kuery pe ma aipoa'e: Pendeivy pe ndajapo ukai 'rã ipoyi va'e,

²⁵ pova'e anho: Xee aju peve peî atã tema mba'emo peupity ma va'e re.

²⁶ Mba'eta ogueropo'akapa, ha'e opa peve ajapo uka va'e rupi ikuai va'ekue pe ma ame'ê 'rã vvy regua kuery re ipo'aka aguã.

²⁷ Ha'e ramo omo'arandu 'rã po pygua ferro guigua py, omboa'ypa 'rã mba'emo ryru nhae'ũ guigua rami rive.*

²⁸ Ha'e kuery pe voi ame'ê 'rã jaxy-tata ko'ê mbija, xevy pe xeru ome'êague rami avi.

²⁹ Ijapyxa oî va'e ke toendu igreja kuery pe Nhe'ê ijavyu rã."

3

Sardes pygua igreja kuery pe ombopara ukaague

¹ — Sardes tetã py igreja kuery ikuai va'e pegua anjo pe embopara: "Po rami ijavyu sete nhe'ê Nhanderuete guigua ha'e sete jaxy-tata ogueroko va'e:

"Xee aikuaa pendereko. Pendeivy pe 'Oikove va'e' 'ea teî omanogue peiko.

² Peiko kuaa pota ke, ha'e pemombaraete okuave'i teri teî omano aguã rami ikuai va'e, mba'eta xee aikuaa Xeruete renonde opa mba'e py e'ÿ pendereko porãa.

³ Ha'e nunga rupi penema'endu'a ke avvu pendu vy pendejee pemoî va'ekue re. Pemoî porã ju, ha'e pejeko rerova. Mba'eta ndapeiko kuaa potai ri ramo aju xapy'a 'rã imonda va'e rami, ndapeikuai 'rã guive penderovai aju aguã hora.*

⁴ Ha'e rami avi Sardes tetã py peê kuery regua mbovy'i avi ikuai oao nomongy'ai va'e. Ha'e va'e kuery heko porã va'e vy xerupive 'rã ikuai xiî va'e py onhemonde reve.

⁵ Ogueropo'akapa va'ekue ma ha'e kuery rami avi 'rã onhemonde xiî va'e py. Peteîve henda py hery nambogei 'rã kuaxia tekove ogueroko va'e kuery rery oîa gui. Ha'e rami 'rãgue py hery amombe'u porã 'rã Xeru ha'e ixupegua anjo kuery renonde.

⁶ Ijapyxa oî va'e ke toendu igreja kuery pe Nhe'ê ijavyu rã."

Filadélfia pygua igreja kuery pe ombopara ukaague

⁷ — Embopara ke Filadélfia tetã py igreja kuery ikuai va'e pegua anjo pe: "Po rami ijavyu icky'a e'ÿ ha'e anhetê va'e. Ha'e va'e ma ogueroko okê pe'aa Huvixave Davi rami ipo'aka aguã. Ha'e ramo oipe'aague avave rei nombotyai 'rã, ha'e ombotyague avave rei ndoipe'aai 'rã guive. Ha'e vy aipoe'i:

⁸ "Xee aikuaa pendereko. Ma'ê, penerenonde amoî 'rã peteî okê ojepe'a va'e, avave rei nomboty kuaai va'erã, mba'eta amongue py ete'i penembaraete va'eri xeyvvy pemoî porã, napemombe'u e'ÿi guive xerery rupi peikoa.

⁹ Ha'e gui Satanás peguarã onhemboaty va'e kuery, judeu rami rive onhemoingo teî ha'e'ÿ ikuai va'e ma ajapo 'rã oupa vy pendepy vvyry guenapy'ã re ikuai aguã rami. Ha'e ramo ha'e kuery oikuaa 'rã xerembiavyu peikoa.

¹⁰ Xeyvvyague rami vy peî atã rire xee voi pendere apena porã 'rã jexavaia ára vvy jave re joeko a'äärã ou va'e gui.

¹¹ Aju 'rã are'ÿ'i re. Pendejee pemoî atã ke mba'emo peupity ma va'e, pendeivygua coroa avave rei oipe'aa e'ÿ aguã.

¹² Mba'eta ogueropo'akapa va'ekue ajapo 'rã Xeruete ro icky'a e'ÿ va'e yta rami oî aguã. Ha'e va'e rire ndoipe'aavei 'rã ha'e gui. Ha'e kuery re amoî 'rã Xeruete rery, ha'e Xeruete pegua tetã rery guive. Ha'e va'e ma Jerusalém pyau, yva Xeruetea gui ogueÿy va'erã. Ha'e kuery re amoî avi 'rã xerery pyau.

¹³ Ijapyxa oî va'e ke toendu igreja kuery pe Nhe'ê ijavyu rã."

Laodicéia pygua igreja kuery pe ombopara ukaague

¹⁴ — Embopara ke Laodicéia tetã py igreja kuery ikuai va'e pegua anjo pe: "Po rami ijavyu Anhetê ete va'e hery va'e, mba'eta ha'e va'e ma anhetê va'e mombe'ua ojeroviapy va'e, ha'e Nhanderuete omoingo va'ekue ha'e javi ypy. Ha'e vy aipoe'i:

¹⁵ "Xee aikuaa pendereko. Ha'e gui peê ma yro'yxã va'e'ÿ, neî haku va'e'ÿ. Penero'yxã e'ÿ vy penderaku va'e rire ha'evene 'rãgue.

¹⁶ Ha'e rami 'rãgue py haku vevui va'e rive peiko, neî napenderakui, neî napenero'yxã. Ha'e rami rã xejuru gui rombojevvy aguã rami aiko.*

¹⁷ Mba'eta peê kuery 'Arekopa, aiko porã, xevy pe mba'eve ndoatã' peje.* Ha'e rami teî ndapeikuai ovy'a e'ÿ ete va'e peikoa. Omboetepy e'ÿ, iporiaukue, ára revegua e'ÿ ha'e ipire rei va'e peiko.

* 2:27 Salmo 2.9 * 3:3 Lucas 12.35-40 * 3:16 "Haku va'e" he'ia ma Nhanderuete pe ete ikuai va'e, ha'e rã "Yro'yxã va'e" he'ia ma ixupe oikoxea neî oendu va'e'ÿ. Ha'e rã "Haku vevui va'e" he'ia ma ixupegua merami rive va'e. * 3:17 Lucas 12.15-21

¹⁸ Ha'e ramo xee romongeta xegui pejogua aguã ouro tata py oiky'a'o pyre oguerokopa va'e ete peiko aguã, ha'e ao xií va'e py penhemonde aguã, pendepire reia pexa ukaa py peximba e'ÿ aguã. Xegui pejogua avi texa raxy poã penderexa py pemoi vy pexa porã ju aguã.

¹⁹ Xerembiayvu kuery ha'e javive pe xeyavu amo'arandua rupi. Ha'e nunga rupi penekyre'ÿ ha'e pejeko roerva.

²⁰ Ma'ê, okê py xe'ai anhenduka vy. Amongue xeyavu oendu vy okê oipe'a ramo aike 'rã hoo py. Hexeve akaru 'rã, ha'e voi okaru 'rã xereve.

²¹ Mba'eta ogueropo'akapa va'ekue pe amboguapy 'rã xereve xerenda apenaaty vy'ry, xee voi aropo'akapa rire Xeru reve henda vy'ry aguapya rami avi.

²² Ijapya oí va'e ke toendu igreja kuery pe Nhe'ê ijayvu rã."

4

Nhanderuete renda oexaague

¹ Ha'e va'e rire ama'ê vy petei okê aexa yva re ojepe'a va'e, ha'e teígue ju aendu jypy'i ayvu aendu va'ekue. Mimby guaxu pu rami onhendu vy aipoe'i:

— Enhemboja ke ejuvy. Ha'e ramo aikuaa uka 'rã kova'e nunga rire mae ma mba'emo oiko va'erã, tenonderã omoi ma voiague rami vy — he'i.

² Ha'e ramove nhe'ê re aiko vy petei tenda aexa yva re huvixa openaaty oí va'e, ha'e tenda py petei uguapy oiny va'e guive.

³ Oguapy oiny va'e rova ma ita jaspe ha'e sardônio rami hexakã. Henda vy'ry rupi ojekuaa petei karugua esmeralda rami hexakã va'e.

⁴ Tenda vy'ry rupi ikuai avi vinte e quatro tenda mboae. Ha'e va'e áry ma vinte e quatro tujakueve joe opena va'ety uguapy okuapy onhemondea xií va'e. Ha'e va'e kuery akã re oí coroa ouro guigua.

⁵ Mbytegua tenda oí va'e gui oê overa va'e, ayvu ha'e yapu. Tenda renonde ma sete tataendy oí. Ha'e va'e ma sete nhe'ê Nhanderuete guigua.

⁶ Tenda renonde oí avi petei henda yupa vidro guigua rami ojekuaa va'e, itaendy rami hexakã va'e. Ha'e gui mbyte py, tenda ijyvy'ry rupi ikuai irundy temimoingo kuery. Ha'e va'e kuery jovaive re ma hexa oimba va'e, henonde katy ha'e hakykue katy guive.

⁷ Temimoingo jypygua ma guary rami ojekuaa, mokoia ma vaka ra'y rami, mboapya ma ava rami hova va'e, ha'e rã irundya ma taguato tuvixa va'e oveve oikovy va'e rami.

⁸ Irundy temimoingo ikuai va'e petei-tei ma mboapy meme ipepo va'e. Opa rupi hexa oí va'e, hi'áry ha'e hyepy rupi. Ara py ha'e pyávy opyту'u e'ÿ re aipoe'i:

— Iky'a e'ÿ, iky'a e'ÿ, iky'a e'ÿ va'e ma Senhor Nhanderuete Ipo'akapa va'e. Yma guive oiko va'ekue ae, aÿ oiko, ha'e raka'eve rã ou va'erã va'e — he'i okuapy.*

⁹ Ha'e gui tenda py uguapy oiny va'e araka'e rã peve guarã oiko va'e pe temimoingo kuery oporaei okuapy. Omboete ha'e oguerovy'a ramo

¹⁰ vinte e quatro tujakueve joe opena va'ety voi guenapy'ã re ikuai, tenda py uguapy oiny va'e araka'e rã peve guarã oiko va'e renonde. Omboete vy tenda renonde omombo ojeuepegua coroa. Ha'e vy aipoe'i:

¹¹ — Senhor Oreruete, ndee ma ha'eve rombojerovia, romboete ha'e ndepo'akaa roguerovy'a aguã, mba'eta opa mba'e moingoare reiko. Ndee ae reipotaa rami vy ha'e nunga ha'e javi remoingo ramo oiko raka'e — he'i okuapy.

5

Vexa'i ra'y kuaxia para oipe'a rã oexaague

¹ Ha'e gui aexa rã tenda py uguapy oiny va'e opo oiporu kuaa regua py oguereko petei kuaxia para onhemama va'e. Ha'e va'e vy rupi ha'e hi'áry rupi ipara va'e oí. Sete henda py ombojaague ikuai.

² Ha'e gui petei aexa avi anjo imbaraete va'e. Ha'e va'e ijayvu atã vy aipoe'i:

— Mava'e tu ha'eve kuaxia para mbojaague ikuai va'e omboi vy oipe'a aguã? — he'i.

³ Ha'e rami tei yva re, yvy re ha'e yvy gu'ry avave rei jipoi kuaxia para oipe'a aguã ha'eve va'e, neí kuaxia re oma'ê aguã voi nda'evei.

⁴ Ha'e ramo xee ajae'o vaipa, mba'eta avave rei ndojouai kuaxia para oipe'a aguã ha'eve va'e, neí oma'ê aguã.

⁵ Ha'e rami tei tujakueve joe opena va'ety regua petei aipoe'i xevy:

— Ejae'o eme. Ma'ê, Judá regua guary ipo'aka ma, Davi rapokue renhoi 'epy va'e. Ha'e rami rire ha'e va'e ae ha'eve kuaxia mbojaa sete ikuai va'e omboi vy oipe'a aguã — he'i.

⁶ Ha'e ramo petei aexa tenda ha'e irundy temimoingo kuery ha'e tujakueve ikuai va'e mbyte hi'ai va'e, Vexa'i ra'y ojuka pyre rami ojekuaa. Ha'e va'e re ma sete hakua oí, ha'e sete hexa avi. Hexa ma sete nhe'ê Nhanderuete guigua yvy jave rupi omondouka va'e.*

⁷ Ha'e gui Vexa'i ra'y ou vy ojopy kuaxia para tenda py uguapy oiny va'e oiporu kuaa regua gui.

* 4:8 Ezequiel 1.4-10, Isaías 6.3 * 5:6 Vexa'i ra'y ojuka pyre rami ojekuaa va'e ma Jesus Cristo ae (Isaías 53.6-12; João 1.29; Filipenses 2.5-11). Ha'e rã hexa ma Zacarias 4.10 py omombe'u porãve.

⁸ Kuaxia para Vexa'i ra'y ojopy ramo henonde irundy temimoingo kuery guenapy'ã re ikuai, ha'e vinte e quatro tujakueve voi. Peteĩ-teĩ opo py oguereko mba'epu ixã reta va'e ha'e hy'a'i ouro guigua, hekuã porã va'e oapy va'erã tynyẽ va'e. Ha'e va'e ma iky'a e'ỹ va'e kuery onhembo'ea.

⁹ Ha'e kuery ma mboraei pyau omonhendu vy aipoe'i:

— Ndee ma ha'eve kuaxia para rejopy vy imbojaa reipe'a aguã. Mba'eta ndejukaa va'ekue, ha'e nderuguy py Nhanderuete peguarã rejogua joegua e'ỹ-e'ỹ, amboae rami ijayvu va'e, amboae vvy regua, ha'e amboae regua kuery ha'e javi gui.

¹⁰ Nhanderuete po'akaa pyguarã remoingo, ixupegua sacerdote-rã guive. Ha'e ramo ha'e kuery huvixa rami 'rã jogueroko vvy re — he'i okuapy.

¹¹ Ha'e gui teigue ju ama'ẽ vy peteĩ ayvu aendu tenda vvyry anjo kuery mbovy e'ỹ ikuai va'e oporaei rã. Ha'e va'e kuery ma temimoingo kuery ha'e tujakueve vvyry mbovy rei e'ỹ ikuai, jaipapapa kuaa aguã rami rei e'ỹ.

¹² Oporaei atã vy aipoe'i okuapy:

— Vexa'i ra'y ojuka pyre pe ma ha'eve "Ipo'akapa va'e, oguerekopa, hi'arandu ha'e imbaraeete va'e" 'ea aguã. Ha'eve omboetea aguã, oguerovy'a ha'e ombojerovia pavẽ aguã guive — he'i okuapy.

¹³ Ha'e gui aendu rã yva re, vvy, vvy guýry ha'e ye'ẽ áry temimoingo ikuai va'e ha'e javi aipoe'i:

— Tove tenda py oguapy va'e ha'e Vexa'i ra'y tombojerovíaa, tomboetea, toguerovy'aa, ha'e ta'ipo'akapa araka'e rã peve — he'i okuapy.

¹⁴ Ha'e ramo irundy temimoingo kuery ombovai vy

— Anhetẽ ete — he'i. Tujakueve voi guenapy'ã re ikuai vy omboete okuapy.

6

Jypygua kuaxia para mbojaague Vexa'i ra'y omboi rã oexaague

¹ Ha'e gui aexa rã Vexa'i ra'y omboi kuaxia para mbojaague sete oĩ va'e regua jypygua. Ha'e gui aendu irundy temimoingo kuery va'e regua yapu ratã va'e rami ijayvu rã. Ha'e vy

— Enhemboja ke ejuyv — he'i.

² Ha'e ramo aexa rã ou peteĩ kavaju xii va'e. Ha'e va'e árygua ma guyrapa oguereko, ha'e ixupe ome'ëa coroa. Ha'e ramo joe ipo'aka ovy, ipo'akave aguã.*

Kuaxia para mbojaague mokoia va'e omboi rã oexaague

³ Ha'e gui kuaxia para mbojaague mokoia va'e omboi jave mokoia temimoingo aendu

— Enhemboja ke ejuyv — he'i rã.

⁴ Ha'e gui aexa rã oẽ kavaju mboae, pytã va'e. Ha'e va'e árygua pe ma ome'ëa vvy regua kuery ojapo aguã peteĩ rami ve'ỹ ikuai aguã rami, peteĩ-teĩ jojuka aguã. Ixupe ome'ëa avi peteĩ kyxe guaxu.

Kuaxia para mbojaague mboapya va'e omboi rã oexaague

⁵ Kuaxia para mbojaague mboapya va'e omboi jave aendu mboapya temimoingo

— Enhemboja ke ejuyv — he'i rã.

Ha'e gui aexa rã ou peteĩ kavaju huũ va'e. Ha'e va'e árygua ma opo py oguereko mba'emo opejaa.

⁶ Peteĩ ayvu aendu avi irundy temimoingo kuery mbyte gui rami onhendu va'e. Ha'e vy aipoe'i:

— Peteĩ ryrur'i trigo ma peteĩ ára repy re 'rã ovendea. Mboapy ryrur' cevada voi 'rã peteĩ ára repy re ovendea. Ha'e rami teĩ embovaipa eme azeite ha'e vinho — he'i.

Kuaxia mbojaague irundya va'e omboi rã oexaague

⁷ Ha'e gui Vexa'i ra'y kuaxia para mbojaague irundya va'e omboi jave aendu irundya temimoingo

— Enhemboja ke ejuyv — he'i rã.

⁸ Ha'e ramo ama'ẽ vy aexa peteĩ kavaju iju va'e. Ha'e va'e árygua rery ma Manoa Ja. Hakykue ou avi omanogue retã. Ha'e kuery pe ma ome'ëa vvy regua kuery ojuka aguã, irundy-rundy ikuai va'e gui peteĩ-teĩ ojuka aguã kyxe guaxu py, karuai, nhomoingo axya ha'e vvy rupigua vixo inharõ va'e py.*

Kuaxia para mbojaague teĩ nhiruía va'e omboi rã oexaague

⁹ Kuaxia para mbojaague teĩ nhiruía va'e omboi jave ma aexa rã altar oĩ va'e vvyry ikuai Nhanderuete ayvu omombe'uague ha'e onhemombe'u porãague re ojuka pyre kuery nhe'ẽ.

¹⁰ Ha'e va'e kuery ojapukai atã vy

— Senhor ndepo'akapa va'e, iky'a e'ỹ ha'e anhetẽ va'e, raka'e peve 'rã ndereikuaa potai, neĩ nerembopagai vvy regua kuery oreruguy ome'ëague re? — he'i okuapy.

¹¹ Ha'e ramo ha'e kuery peteĩ-teĩ pe ome'ëa ao xii va'e, ha'e aipo'ea opytu'uve ranhe aguã xapy'a'i, ha'e kuery ojukaa ague rami avi irmão kuery Nhanderuete rembiguai ojuka pyrã ikuai va'e ojukupaa peve.

Kuaxia para mbojaague mboapy memea va'e omboi rã oexaague

¹² Ha'e gui aexa rã Vexa'i ra'y kuaxia para mbojaague mboapy memea va'e omboi jave vvy oryryi atã. Kuaray pytũmba ajukue huũ rei va'e rami, jaxy voi tuguy rami pytãmba.

¹³ Yva re jaxy-tata ikuai va'e ho'apa vvy py, vvytu oipeju atã rã figo'a ky'i okuipaa rami avi.

¹⁴ Ha'e gui ma yva okanhya xapy'a mba'emo pire onhemama ovy va'e rami. Vvyty ha'e ypa'ũ ikuai va'e ha'e javi ovapa oĩague gui.

* 6:2 Mateus 24.4-14 * 6:8 Zacarias 6.1-6, Ezequiel 14.21

¹⁵ Ha'e ramo vvy regua huvixave kuery, yvatekueve, xondaro ruvixa, oguerekopa va'e kuery, ipo'akakueve, escravo ha'e escravo e'ÿ va'e ha'e javi ma vvykua rupi onhemimba okuapy, ha'e vvy'ã re ita pa'ũ ikuai va'e rupi guive.

¹⁶ Ha'e va'e kuery ma vvyty ha'e ita ikuai va'e pe aipoe'i:

— Pe'a ke ore'áry, orenhomi tenda py oguapy oiny va'e orerexa e'ÿ aguã, ha'e Vexa'i ra'y orembopaga e'ÿ aguã.

¹⁷ Mba'eta ovaẽ ma ipoxya ára. Mava'e tu ogueropo'aka ta?

7

Cento e quarenta e quatro mil Israel kuery regua oexaague

¹ Ha'e va'e rire irundy anjo aexa vvy apy irundy oĩ va'e py hi'aĩ rã. Ha'e va'e kuery ma vvyty jokoarã ikuai, vvyty oipeju e'ÿ aguã vvy re, ye'ẽ re, neĩ peteĩve vvyra hi'aĩ va'e re guive.

² Ha'e gui peteĩ anjo mboae ju aexa kuaray oua katy gui oẽ ouvy va'e, Nhanderuete oikove va'e guigua kuaa ukaarã oguerú. Ha'e va'e ma ojarukai atã irundy anjo vvy ha'e ye'ẽ mbovaipaará omoĩ mbyre pe.

³ Ha'e vvy aipoe'i:

— Pembovaipa eme ranhe vvy, ye'ẽ, neĩ vvyra ikuai va'e, Nhanderuete rembiguai kuery rova re ikuaa ukaarã romoĩ e'ÿa ja — he'ĩ.*

⁴ Ha'e gui ikuaa ukaarã omoĩmbaa va'ekue oipapaa rã aendu mbovy paa. Ha'e va'e kuery ha'e javi vvy ma cento e quarenta e quatro mil ikuai, Israel kuery ha'e javi regua gui.*

⁵ Judá regua kuery gui doze mil, Rúben regua gui doze mil ju, Gade regua gui doze mil,

⁶ Aser regua gui doze mil, Naftali regua gui doze mil, Manassés regua gui doze mil,

⁷ Simeão regua gui doze mil, Levi regua gui doze mil, Issacar regua gui doze mil,

⁸ Zebulom regua gui doze mil, José regua gui doze mil, ha'e Benjamim regua gui doze mil re avi ikuaa ukaarã omoĩa.

Ombopyau pyre opu'ã okuapy va'e oexaague

⁹ Ha'e va'e rire aexa rã heta ete ikuai avave rei oipapa kuaa aguã rami e'ÿ, ha'e javi regua kuery, joegua e'ÿ-e'ÿ, amboae vvy regua ha'e amboae rami ijayvu va'e gui. Ha'e va'e kuery opu'ãmba okuapy tenda ha'e Vexa'i ra'y renonde. Xiĩ va'e py peteĩ-teĩ onhemonde va'e, opo py pindo rogue oguereko guive.

¹⁰ Ha'e rami vvy ijayvu atã vvy aipoe'i:

— Tenda py Nhanderuete oguapy oiny va'e ha'e Vexa'i ra'y gui ae ou jaa jepe aguã — he'ĩ okuapy.

¹¹ Anjo kuery ma tujakueve ha'e irundy temimoingo kuery yvyry rupi ikuai, tenda jovaive re opu'ã okuapy. Ha'e javive guenapy'ã re ikuai tenda renonde, vvy re ngova omovaẽ okuapy Nhanderuete omboete vvy.

¹² Ha'e vvy aipoe'i:

— Anhetẽ ete. Tove Nhanderuete pe toporaeia, tombojeroviaa, tai'arandu, toguerovy'aa, tomboetea, tai'ipo'aka ha'e ta'imbaraete araka'e rã peve. Amém — he'ĩ okuapy.

¹³ Ha'e gui tujakueve regua peteĩ ijayvu vvy oporandu xeivy:

— Peva'e kuery xii va'e py onhemonde va'e, marã ramigua tu? Magui ou va'ekue tu?

¹⁴ Xee ambovai vvy

— Xeruvixa, ndee ma reikuaa 'rã — ha'e.

Ha'e ramo aipoe'i xeivy:

— Ha'e kuery ma ikuai axy eteague gui ou va'ekue. Vexa'i ra'y ruguy py oao ojai uka vvy oiky'a'o uka va'ekue.

¹⁵ Ha'e nunga rupi Nhanderuete renda renonde rupi riae ikuai. Ara py ha'e pyávy ombojerovia okuapy ixupegua oo iky'a e'ÿ va'e py. Ha'e ramo ha'e kuery áry rupi tenda py oguapy oiny va'e ojao'i 'rã ho'ã py.

¹⁶ Ha'e ramo ha'e kuery noenduvei ma 'rã karuai neĩ yuvei. Ha'e kuery áry kuaray ndojope raxyvei 'rã, neĩ haku noenduvei 'rã guive,

¹⁷ mba'eta ha'e kuery re Vexa'i ra'y tenda py oĩ va'e opena 'rã, ha'e ogueraa 'rã guive ygua tekove me'ëa oĩa katy. Ha'e kuery rexay Nhanderuete omombirupa 'rã.*

8

Kuaxia para mbojaague sete-a va'e omboi rã sete anjo mimby guaxu oguereko va'e oexaague

¹ Ha'e gui kuaxia para mbojaague sete-a va'e Vexa'i ra'y omboi jave yva re okyriřimba katui'i meia-hora rãnda'u.

² Ha'e gui aexa sete anjo Nhanderuete renonde opu'ã okuapy rã. Ha'e va'e kuery pe ma sete mimby guaxu ome'ëa.

³ Ha'e gui ou avi anjo mboae. Ha'e va'e ma altar vvy'iry hi'aĩ. Opo py oguereko hy'a'i heakuã porã va'e oapyaty ouro guigua. Ixupe ma ome'ëa vaipa heakuã porã va'e, iky'a e'ÿ va'e kuery ojerurea iriřã oapy aguã altar ouro guigua tenda renonde oĩ va'e áry.

⁴ Ha'e gui anjo po py hy'a'i heakuã porã va'e rapyaty oĩ va'e gui hataxi ojeupi ovy Nhanderuete oĩa peve, iky'a e'ÿ va'e kuery ojerurea iriřã.

* 7:3 Ezequiel 9.4 * 7:4 Apocalipse 9.3,4; 14.1-5 * 7:17 Isafas 49.10; 25.8

⁵ Ha'e gui hy'a'i heakuā porā va'e oapyaty ma peteīgue ju anjo omonyē tata altar áry gui ojopy va'ekue. Ha'e vy omombo vvy re. Ha'e rā oiko yapu, ayvu, overa ha'e vvy ryryi.

⁶ Ha'e gui mae ma anjo kuery sete mimby guaxu revegua oguereko katu omonhe'ē aguā.

Jypygua mimby guaxu omonhe'ē jave oexaague

⁷ Ha'e gui jypygua anjo omonhe'ē mimby guaxu. Ha'e ramo ho'a amandau ha'e tata tuguy re irū va'e. Ha'e nunga ma ko vvy re omombo. Ha'e ramo oapy vvy, vvyra ikuai va'e ha'e jai rogue pyau ha'e javi. Mboapy-apy henda ikuai va'e gui peteī-teī okai.

Mokoīa mimby guaxu omonhe'ē jave oexaague

⁸ Ha'e gui anjo mokoīa ju omonhe'ē mimby guaxu. Ha'e ramo peteī omombo ye'ē py, vvyty tuvixa va'e ramigua, hendy va'e. Ha'e ramo ye'ē mboapy-apy oī va'e gui peteī-teī henda py opyta tuguy.

⁹ Temimoingo kuery ye'ē rupi mboapy-apy ikuai va'e peteī-teī omano. Kanoā voi mboapy-apy ikuai va'e gui peteī-teī ombovaipa.

Mboapy mimby guaxu omonhe'ē jave oexaague

¹⁰ Ha'e gui anjo mboapy ju omonhe'ē mimby guaxu. Ha'e ramo yva gui ho'a peteī jaxy-tata tuvixa va'e, takua ryxa rami hendy va'e. Yakā mboapy-apy oī va'e gui peteī-teī áry ho'a, ha'e yvu ikuai va'e áry guive.

¹¹ Jaxy-tata rery ma Iro ete va'e. Ha'e rami vvy mboapy-apy oī va'e gui peteī-teī iro. Ha'e ramo avakue heta omano yy gui, iro vaipa ramo.

Irundya mimby guaxu omonhe'ē jave oexaague

¹² Ha'e gui anjo irundya ju omonhe'ē mimby guaxu. Ha'e ramo kuaray, jaxy ha'e jaxy-tata mboapy-apy ikuai va'e gui peteī-teī pytū. Ara py ha'e pyávy teī naexakāvei.

¹³ Ha'e ramo ama'ē vy aendu peteī taguato tuvixa va'e yva mbyte rupi oveve vy ijayvu rā. Ijayvu atā reve aipoe'i:

— Nda'evei ete, nda'evei ete, nda'evei ete 'rā vvy regua kuery pe, mboapy anjo mimby guaxu omonhe'ē va'erā oime teri ramo.

9

Teī nhiruīa mimby guaxu omonhe'ē jave oexaague

¹ Ha'e gui teī nhiruīa anjo omonhe'ē mimby guaxu. Ha'e rā aexa peteī jaxy-tata yva gui ho'a rā vvy re. Ha'e va'e pe ma ome'ēa vvykua pytūa rokē pe'aa.

² Ha'e gui vvykua pytūa rokē oipe'a rami vvykua gui ojeupi hataxī, tatakua tuvixa va'e gui hataxī opu'āa rami. Vvykua gui hataxī oē va'e omo'āmba kuaray ha'e yvate rupi.

³ Hataxī mbyte gui oē tuku, ha'e vvy re oje'oi. Ha'e va'e kuery pe ome'ēa japeuxa vvy rupigua rami jopi aguā.

⁴ Ha'e kuery pe aipo'ea ojavyky e'ŷ aguā vvy re nhuū ha'e hogue va'e, neī vvyra ikuai va'e, ha'e rā avakue rova re Nhanderuet guigua kuaa ukaarā nomoīaia va'ekue anho.

⁵ Tuku kuery jojuka aguā 'rāgue py ha'e kuery pe ome'ēa teī nhiruī jaxy re nhomoingo axy aguā rive. Ha'e ramo japeuxa jopi vvy nhomoingo axya rami 'rā nhomoingo axy.

⁶ Ha'e va'e jave py avakue onhea'a 'rā omano aguā teī nda'evei 'rā. Omanoxea oendu teī nda'evei 'rā omano aguā.

⁷ Tuku ma kavaju joe opu'ā aguā katy guarā oguereko katu pyre rami ojekuaa. Inhakā re oī coroa ouro guigua rami ojekuaa va'e. Hova ma ava rami ojekuaa.

⁸ Hi'a ma kunhague'a rami, haī ma guary raī rami.

⁹ Opexo re ma oguereko pexo regua ferro gui ojapo pyre ramigua. Ipepo revovo ma joe opu'ā aguā katy karóxa heta kavaju omoatā heravy va'e revovo rami.

¹⁰ Huguai ma japeuxa rami ipopia. Huguai re ae oī teī nhiruī jaxy re nhomoingo axy va'erā.

¹¹ Ha'e kuery rerekoa huvixave rami oguereko va'e ma anjo vvykua pytūa pygua. Ha'e va'e rery ma hebraico py Abadom, ha'e rā grego py ma Apoliom.

¹² Ha'e rami py ojeupity ma jypygua "Nda'evei ete" he'iague. Ha'e va'e rire mokoī ju 'rā oiko.

Mboapy memea mimby guaxu omonhe'ē jave oexaague

¹³ Ha'e gui anjo mboapy memea ju omonhe'ē mimby guaxu. Ha'e gui aendu peteī ayvu. Ha'e va'e ma ouro guigua altar Nhanderuet renonde oī va'e apy irundy oī va'e gui onhendu.

¹⁴ Ha'e vy aipoe'i anjo mboapy memea va'e mimby guaxu oguereko va'e pe:

— Ejora ke irundy anjo Eufrates yakā guaxu vvyry ojokua pyre — he'i.

¹⁵ Ha'e ramo ojora irundy anjo. Ha'e va'e kuery ma ha'e va'e ma'et'y, ha'e va'e jaxy, ha'e va'e ára, ha'e va'e hora jave ae avakue mboapy-apy ikuai va'e gui peteī-teī jukaarā oguereko katu pyre.

¹⁶ Kavaju árygua xondaro kuery mbovy paa aendu rā duzentos millhoēs ikuai.

¹⁷ Ha'e rami vvy aexa rā kavaju ha'e hi'árygua kuery opexo regua oguereko tata rami pytā va'e, jacinto rami hovy va'e ha'e enxofre rami iju va'e. Kavaju akā ma guary akā rami. Ijuru gui ma oē oiny tata, hataxī ha'e enxofre.

¹⁸ Ha'e va'e mboapy nhomoingo axyarā ijuru gui oē va'e py ae jojuka 'rā, tata, hataxī ha'e enxofre py. Avakue mboapy-apy ikuai va'e gui peteī-teī ojuka 'rā.

¹⁹ Mba'eta kavaju kuery mbaraetea ma ijuru ha'e huguai re oĩ. Huguai ma mboi rami inhakã va'e. Ha'e va'e py ae 'rã nhomoingo axy.

²⁰ Ha'e rã amboae kuery, imoingo axyarã oiko va'e gui nomanoi va'ekue ma ndojeko rerovai opo py mba'emo vai ojapoaty gui. Ndojepe'ai ae anha ha'e mba'emo ra'angaa ouro guigua omboetea gui, neĩ prata guigua, overa va'e, ita ha'e yvyra guigua gui, ha'e nunga oexa va'erã e'ỹ, oendu va'erã e'ỹ, neĩ oguata va'erã e'ỹ teĩ.

²¹ Ha'e kuery ndojeko rerovai ae jojukaaty gui, imba'evykya, itavy reia, neĩ imonday gui.*

10

João pe kuaxia para'i ho'u ukaa ague

¹ Ha'e gui amboae anjo imbaraeete va'e aexa yva gui ogejy ouvy rã. Ha'e va'e ma arai py onhemonde ouvy. Inhakã áry rupi ma karugua ojekuaa. Hova ma kuaray rami hexakã, ha'e hetyma ma tata rami.

² Opo py ma peteĩ kuaxia para'i ojepe'a va'e oguereko. Opy oiporu kuaa regua re opyrõ ye'ẽ áry, ha'e rã opy oiporu kuaa e'ỹa re ma yvy re opyrõ.

³ Ha'e gui ojapukai atã guary okororõa rami. Ojapukai ramo sete yapu oĩ va'e ombovai.

⁴ Sete yapu ijayvu rã aendu vy ambopara ta ramove peteĩ ayvu aendu yva gui,

— Emombe'u eme sete yapu ijayvuague, embopara eme — he'i va'e.*

⁵ Ha'e gui ye'ẽ ha'e yvy re anjo opyrõ rã aexa va'e ma opo oiporu kuaa regua oupi yvate katy.

⁶ Ha'e rami vy oura araka'e rã peve oiko va'erã rery rupi, yva, yvy, ye'ẽ ha'e opa mba'e ikuai va'e apoare re. Ha'e vy aipoe'i:

— Ndarevei ma 'rã.

⁷ Mba'eta sete-a anjo ijayvua ára py mimby guaxu omonhe'ẽ ta jave ojeupityma ma 'rã Nhanderueete oikuaa uka e'ỹ teri va'ekue, guembiguai profeta kuery pe omombe'uage rami vy — he'i.

⁸ Yva gui ijayvu va'ekue ma teĩgue ju ijayvu vy aipoe'i xeivy:

— Tereo, ejopy kuaxia para ojepe'a va'e ye'ẽ ha'e yvy re anjo opyrõ va'e po py oĩ va'e — he'i.

⁹ Ha'e ramo anjo hi'ãa py aa vy ajerure kuaxia para'i xeivy ome'ẽ aguã re. Ha'e ramo aipoe'i:

— Ejopy ha'vy, ha'e he'upa. Anhet'ẽ iro 'rã nderyepy py, ha'e rã ndejuru py oĩ teria ja ei rami he'ẽ 'rã — he'i.

¹⁰ Anjo po gui kuaxia para'i ajopy vy ha'u ramo xejuru py he'ẽ ei rami. Ha'e rami teĩ amokõ rire xerye py ma iro.*

¹¹ Ha'e gui aipoe'ive xeivy:

— Teĩgue ju 'rã remombe'u heta regua kuery rekorã, amboae regua, amboae rami ijayvu va'e ha'e huvixave ikuai va'e rekorã.

11

Nhanderueete pegua oo iky'a e'ỹ va'e oa'ã aguã re ijayvuague

¹ Ha'e gui xeivy pe ome'ẽa peteĩ takua popoka rami ipuku va'e. Ha'e aipo'ea xeivy:

— Epu'ã ke, tereo, ha'e ea'ã Nhanderueete pegua oo iky'a e'ỹ va'e. Ea'ã avi altar oĩ va'e, ha'e pygua ombojerovia va'e kuery voi.*

² Ha'e rã oo iky'a e'ỹ va'e roka ma tove, ea'ã eme, mba'eta amboae regua kuery pe ranhe omboaxaa va'ekue. Ha'e va'e kuery ma quarenta e dois jaxy re 'rã opyrõ tetã iky'a e'ỹ va'e re.

Mokoĩ profeta ojukaa rã oexaague

³ — Ha'e gui mokoĩ profeta xeayvu mombe'uarã ambou vy mil duzentos e sessenta ára re 'rã amoiingo, ajukue vaikue py onhemonde reve — he'i.

⁴ Ha'e va'e kuery ma mokoĩ oliveira, ha'e mokoĩ tataendy renda Senhor yvy re ipo'aka va'e renonde hi'ã va'e.*

⁵ Ha'e kuery pe amongue ojapo vai ta ramo ijuru gui oẽ 'rã tata hovaigua kuery mombaara. Ha'e rami 'rae imoingo axyxa kuery omano.

⁶ Ha'e kuery ipo'aka 'rã yva ojoko aguã, ayvu omombe'u oikovya ja oky e'ỹ aguã. Yy re voi ipo'aka 'rã tuguy rami ojeapo aguã. Ipo'aka avi 'rã opa marãgua nhomoingo axya py yvy ombovaipa aguã, mbovykue rei e'ỹ ojapoxea rami.

⁷ Ha'e va'e rire ha'e kuery omombe'u 'rã va'ekue omombe'upa ma ramo ha'e kuery re peteĩ opu'ã 'rã, vixo vaikue yvykua gui oẽ va'e. Ha'e va'e ma ha'e kuery re ipo'aka vy ojuka ete ranhe 'rã.

⁸ Ha'e kuery retেকে omombo inony 'rã tetã guaxu mbyte rupi tape oaxa va'e py. Ha'e va'e tetã pe ma “Sodoma” ha'e “Egito” 'ea Nhe'ẽ gui, mba'eta ha'e py ae ha'e kuery Senhor ojukaa aviague, kuruxu re.

⁹ Ha'e ramo mokoĩ profeta retেকে re heta 'rã oma'ẽ: amboae yvy regua kuery, joegua e'ỹ-e'ỹ, amboae rami ijayvu va'e ha'e amboae regua kuery. Irundy araa kuaray mbyte peve 'rã hetেকে re oma'ẽ okuapy, ojaty uka vy e'ỹ.

* 9:21 Jeremias 5.3 * 10:4 Daniel 12.4 * 10:10 Ezequiel 3.1-3 * 11:1 Ezequiel 40.3 * 11:4 Zacarias 4.1-2

¹⁰ Mba'eta yvy regua kuery oguero vy'a rei 'rã mokoïve omanoague. Ha'e rami vy ojapo 'rã ngaru, ha'e joupe-upe ome'ê 'rã mba'emo, "Ha'e va'e mokoï profeta ma yvy regua kuery omoingo axy rei va'ekue" he'i vy.

¹¹ Ha'e gui irundy araa kuaray mbyete rire ma Nhanderuetea gui nhe'ê imoingove jevyará ou vy ha'e kuery re 'rã oï. Ha'e ramo opu'ã 'rã nhogueno'amy, ha'e hexaa kuery ndaekorãvei 'rã okuapy.

¹² Ha'e gui mokoï profeta yva gui oendu 'rã peteï ayvu atã "Penhemboja ke pejuyvy" he'i nhendu va'e. Ha'e ramo yva re ojeupi 'rã arai rupi, hovaigua kuery oexaa py.

¹³ Ha'e ramove oiko 'rã yvy oryryi atã va'e, tetã mbovaipaarã. Dez henda oï va'e-va'e gui peteï-teï henda py 'rã ombovaipa. Yvy ryryi gui omano 'rã sete mil. Ha'e rã amboae kuery ma ndaekorãvei reve ombojerovia 'rã okuapy Nhanderuete yva pygua.

¹⁴ Ha'e rami py ojeupity mokoïguea "Nda'evei ete" he'iague. Ma'ê, are'ÿ'i re mboapy ju 'rã ou.

Sete-a mimby guaxu ju omonhe'ê jave oexaague

¹⁵ Ha'e gui sete-a anjo ju omonhe'ê mimby guaxu. Ha'e ramo yva re onhendu peteï ayvu atã:

— Yvy regua po'akaa ma nhande-Senhor ha'e hemimbou Cristo pegua omboaxaa. Ha'e ramo ha'e va'e ju 'rã joguereko araka'e rã peve — he'i va'e.*

¹⁶ Ha'e gui vinte e quatro tujakueve joe opena va'ety kuery Nhanderuete renonde, guenda py oguapy okuapy va'e ma guenapy'ã re ikuai, ha'e yvy re ngova omovaê Nhanderuete omboetea rupi.

¹⁷ Ha'e vy aipoe'i okuapy:

— Senhor Oruete Ndepo'akapa va'e, aÿ reiko ha'e yma guive reiko va'ekue va'e, ore kuery roguero vy'a, mba'eta ndepo'aka etea rexa uka vy huvixave ma rei.

¹⁸ Anhetê, yvy regua kuery ipoxyva va'ekue ri ovaê ma ndee ae ndepoxy aguã, omano va'ekue remboayvu aguã ára rea'angaague. Ha'e rami vy nerembiguai kuery pe reme'ê 'rã hekovia, profeta kuery, iky'a e'ÿ va'e ha'e nderery oendu vy ojererokya rupi ikuai va'e ha'e javi, yvyÿigieve ha'e yvatekueve. Ovaê avi yvy mombaare kuery remomba aguã — he'i.

¹⁹ Ha'e gui yva re ojepe'a jekuaa Nhanderuete pegua oo iky'a e'ÿ va'e rokê, ha'e ramo iky'a e'ÿ va'e ropy aexa guexeve guarã ojapo va'ekue ryru oï va'e. Ha'e gui oiko overa, ayvu, yapu ha'e yvy ryryi. Amandau avi ho'a vaipa.

12

Kunha ha'e teju-jagua oexaague

¹ Yva re peteï ojekuaa avi hexa pyrã tuvixa va'e. Oiko peteï kunha kuaray py onhemonde va'e, jaxy áry ipy oï va'e. Ha'e va'e akã re ma oï peteï coroa doze jaxy-tata oïa.

² Hye guaxu'i va'e vy haxy rã haxê, ojexavai oiny kyrí'i va'e oikuavã aguã haxy ramo.

³ Amboae ojekuaa avi hexa pyrã yva re, peteï teju-jagua pytã hi'aï tuvixa va'e. Ha'e va'e ma sete inhakã ha'e dez hakua va'e. Sete inhakã re ma sete coroa oï.

⁴ Nguguai py oity yva gui jaxy-tata ikuai va'ekue. Mboapy-apy oï va'e gui peteï-teï oity vy omombo yvy katy. Kunha kyrí va'e oikuavã ta va'e renonde teju-jagua hi'aï, itui'i ramove ho'u aguã.

⁵ Ha'e gui itui'i ma peteï ava'i. Ha'e va'e ma ha'e javi regua mo'aranduarã oiko po pygua ferro guigua py. Ha'e gui kunha va'e pi'a ma Nhanderuetea py heraa, henda peve.

⁶ Ha'e gui kunha va'e ma tekoa e'ÿa katy ojava ovy. Ha'e py hekoarã oï Nhanderuete oguereko katu va'ekue. Ha'e py omongaru uka 'rã mil duzentos e sessenta araa peve.

Yva gui teju-jagua oitya rã oexaague

⁷ Ha'e gui yva re oiko joe opu'ã va'e. Ha'e rami vy anjo Miguel ma guexevagua kuery reve opu'ã okuapy teju-jagua re. Ha'e ramo teju-jagua ojeupegua anjo kuery reve opu'ã avi,

⁸ teï ha'e va'e kuery nda'ipo'akai. Ha'e ramo ha'e kuery pe noïvei yva re ikuai aguã.

⁹ Ha'e ramo yva gui oitya teju-jagua tuvixa va'e, mboi yma guive oiko va'ekue, anha Satanás hery va'e, yvy regua kuery ha'e javi mbotavya. Yvy katy omombo, ixupegua anjo kuery reve.

¹⁰ Ha'e gui yva gui aendu peteï ijayvu atã va'e:

— Aÿ ma ojekuaa ma jaa jepe aguã, Nhanderuete ombaraetea ha'e opo'akaa oexa uka aguã guive. Ojekuaa avi hemimbou Cristo po'akaa, mba'eta oity ma nhande-irmão kuery rekoke ramigua mombe'ua. Ha'e va'e ma ara py ha'e pyávy Nhanderuete renonde hi'aï ha'e kuery rekoke omombe'ua py.

¹¹ Ha'e rami teï hexe ma Vexa'i ra'y ruguy rupi ha'e kuery ipo'aka, ha'e hexegua ayvu omombe'ua py guive. Ha'e kuery omano aguã rami ikuai teï noendui okuapy ojeayvu.

¹² Ha'e nunga rupi yva re pendekuai va'e ha'e javi, pevy'a ke. Ha'e rã yvy ha'e ye'ê pe ma nda'evei ete 'rã, mba'eta pendea py ogeujy ma anha. Ipoxy vaipa reve ogeujy, mba'eta oikuaa hi'ára opa rai'i maa.

Teju-jagua kunha va'e oakykue monha rã oexaague

¹³ Ha'e gui yvy py teju-jagua omombo ma ramo oakykue monha kunha opi'a'i oikuavã va'ekue.

¹⁴ Ha'e ramo kunha va'e pe ome'êa taguato tuvixa va'e pepo jovaive revegua, tekoa e'ÿa katy oveve aguã, hekoarã oguereko katu pyre py. Ha'e py ma omongaru 'rã mboapy ma'etÿ rire irundya mbyete peve, mboi oexa e'ÿa py.*

* 11:15 Daniel 7.27 * 12:14 Daniel 7.25, 12.7

¹⁵ Ha'e ramo kunha va'e rakykue mboi ou vy ojuru gui yy omoë yakā rami, kunha va'e ogueroxyry heravy aguã.

¹⁶ Ha'e rami teĩ vyv ae oipytyvõ kunha va'e. Ha'e rami vy ojepe'a vy omokõmba teju-jagua ojuru gui yy omoë va'ekue.

¹⁷ Ha'e ramo kunha va'e pe teju-jagua ipoxyve ete vy oo imemby mboae kuery ikuai va'e re opu'ã aguã. Ha'e va'e kuery ma Nhanderuete ojapo uka va'e omoĩ porã, ha'e Jesus regua omombe'ua rupi ikuai va'e.

¹⁸ Ha'e gui teju-jagua ma ye'ẽ rembe re ju hi'ãi ita ku'i reia py.

13

Ye'ẽ gui vixo vaikue oẽ rã oexaague

¹ Ha'e gui peteĩ vixo vaikue aexa ye'ẽ gui oẽ ouvy rã. Ha'e va'e ma dez hakua ha'e sete inhakã va'e. Hakua re ma dez coroa oĩ. Inhakã re ma hery oĩ avvu vai regua.

² Vixo aexa va'e ma reõ rami hete. Ipy ma urso rami, ha'e rã ijuru ma guary rami. Ixupe teju-jagua omboaxa opo'akaa, henda openaaty py oĩ aguã, ha'e mba'emo tuvixa va'e ojapo aguã guive.*

³ Ha'e va'e aexa rã inhakã sete ikuai va'e regua peteĩ re ijukaarã omboguaiague oĩ, teĩ ijai ijukaarã oĩ va'ekue gui okuera. Ha'e ramo vyv regua kuery ha'e javi onhemondyipa vy vixo re anho oje'oi.

⁴ Teju-jagua voi ombojerovia okuapy, vixo ombopo'aka rire. Vixo vaikue avi ombojerovia. Ha'e vy aipoe'i okuapy:

— Mava'e nda'u vixo rami ipo'aka va'e? Mava'e nda'u opu'ã kuaa 'rã hexe? — he'i.

⁵ Ixupe ome'ẽa avi ojuru py ijayvupa rei ha'e ijayvu vai aguã. Quarenta e dois jaxy peve ombopo'akaa.

⁶ Ha'e ramo ojuru oi'pe'a Nhanderuete re ijayvu vai aguã. Ha'e rami vy hery ha'e ombojeroviatty re ijayvu rei, ha'e yva pygua kuery re guive.*

⁷ Ixupe ome'ẽa avi iky'a e'ỹ va'e kuery re opu'ã ha'e ipo'aka ete aguã. Ombopo'akaa avi vyv re ikuai va'e re: peteĩ-teĩ regua re, joegua e'ỹ-e'ỹ, amboae rami ijayvu va'e ha'e amboae regua kuery re.*

⁸ Ha'e ramo vyv regua kuery ha'e javi 'rã ombojerovia. Ha'e va'e kuery rery ma kuaxia tekove oguereko va'e kuery rery oĩa re noĩ. Ha'e va'e kuaxia ma Vexa'i ra'y pegua, mba'eta vyv itui ypy'i guive ojejúka uka va'ekue.

⁹ Ijapyxa oĩ va'e ke toendu.

¹⁰ Nhuã py heraa pyrã ma nhuã py ae 'rã oo. Kyxe guaxu py ojuka pyrã ma kyxe py ae 'rã ojukaa. Ha'e rami oiko rã iky'a e'ỹ va'e kuery toexa uka ogueropo'aka ha'e ojerovia etea.

Vyv gyy gui vixo mboae oẽ ouvy rã oexaague

¹¹ Ha'e gui vixo vaikue mboae ju aexa vyv gyy gui oẽ ouvy rã. Ha'e va'e ma Vexa'i ra'y rami hakua mokoĩ va'eri teju-jagua rami ijayvu va'e.

¹² Jyipygua vixo po'akaa rupi oiko henonde. Ha'e rami vy ojapo 'rã vyv regua kuery vixo jyipygua omboete aguã rami, ijai ijukaarã oĩ va'ekue gui okuera rire.

¹³ Ojapo avi 'rã hexa pyrã tuvixa va'e. Ha'e rami vy yva gui omboguejy 'rã tata vyv katy, avakue oexaa py.

¹⁴ Vixo renonde hexa pyrã ojapo aguã ombopo'akaague rupi ombotavy 'rã vyv regua kuery. Ha'e rami vy ha'e kuery pe ojapo uka 'rã vixo ra'angaarã, kyxe guaxu py omboguaiague gui oikove ju va'ekue pegua ae.

¹⁵ Ombopo'aka avi vixo ra'angaa omopytuẽ aguã. Ha'e ramo ha'angaa ijayvu, ha'e ojuka uka guive ha'angaa ombojerovia e'ỹ va'e kuery.

¹⁶ Pavẽ re omoĩ uka ikuaa ukarã, ipo oiporu kuaa regua re, e'ỹ vy hova re. Yvyĩgueve ha'e yvatekueve, oguerekopa va'e ha'e iporiaukue'i, escravo ha'e escravo e'ỹ ha'e javi re omoĩ,

¹⁷ mba'eve rei ovende e'ỹ neĩ ojogua e'ỹ aguã, ikuaa ukaa oguereko va'e e'ỹ vy. Ha'e va'e kuery re oĩ jyipygua vixo rery, e'ỹ vy hery regua número.

¹⁸ Ha'e nunga ma 'arandua oexa ukaa aguã oiko. Hi'arandu va'e kuery toikuaa pota vixo número mbovy paa re, mba'eta ava regua número ae, seiscentos e sessenta e seis.

14

Vexa'i ra'y ha'e ixupegua kuery Sião vyvty áry ikuai rã oexaague

¹ Ha'e gui ama'ẽ vy aexa Vexa'i ra'y Sião vyvty áry hi'ãi rã. Hexeve ikuai avi cento e quarenta e quatro mil. Ha'e va'e kuery rova re ma hery ha'e Tuu rery omboparaa va'ekue.*

² Ha'e gui peteĩ avvu aendu yva gui onhendu va'e, yy heta ha'e yapu atã va'e revovo rami, ha'e mba'epu ixã reta va'e ombopua rã onhendua rami guive.

³ Tenda oĩ va'e renonde rupi oporaeia okuapy mboraei pyau, irundy temimoingo kuery ha'e tujakueve joe opena va'ety renonde. Ha'e va'e mboraei ma avave rei ndoporaei kuaai, cento e quarenta e quatro mil vyv regua kuery gui ogueraa jepe pyre'ỹ vy.

⁴ Ha'e va'e kuery ma kunhague reve onhemongy'a e'ỹ va'e, joguereko e'ỹ va'e vy. Vexa'i ra'y ooa rupi rei hupive oje'oi va'e. Avakue mbyte gui ojoguaa Nhanderuete ha'e Vexa'i ra'y peguarã jypy'igua ikuai aguã.

⁵ Ha'e kuery juru py apu oĩ e'ỹ va'e, mba'eta iky'a e'ỹ va'e meme.

Jyipygua avvu oenduaque

* 13:2 Daniel 7.3-7 * 13:6 Daniel 11.36 * 13:7 Daniel 7.21 * 14:1 Apocalipse 7.1-4

⁶ Ha'e e gui anjo mboae ju aexa yva mbyte rupi oveve-veve rã. Ha'e va'e ma ayvu porã araka'e rã peve guarã oguereko yvy regua kuery pe omombe'u va'erã, peteĩ-teĩ regua pe, joegua e'ỹ-e'ỹ, amboae rami ijayvu va'e, ha'e amboae yvy regua kuery ha'e javi pe.

⁷ Ha'e vy ijayvu atã reve aipoe'i:

— Pejererokyje ke Nhanderuetete renonde, pemboete guive, mba'eta ovaẽ ma nhombopaga aguaõ hora. Pembojerovia yva, yvy, ye'ẽ ha'e yvu ikuai va'e apoare — he'i.

Mokoia ayvu oenduague

⁸ Ha'e va'e rire ou anjo mboae, mokoia va'e. Ha'e va'e ju aipoe'i:

— Ho'a, ho'apa ma Babilônia tetã guaxu. Mba'eta ha'e va'e tetã ma vinho ome'ẽ va'ekue yvy regua kuery ha'e javi oy'u aguaõ. Ha'e va'e ma poxya, Babilônia pygua kuery itavy reiaque re ou va'e.

Mboapya ayvu oenduague

⁹ Ha'e va'e rire ou anjo mboae ju, mboapya va'e. Ha'e va'e ma ijayvu atã reve aipoe'i:

— Vixo vaikue ha'e ha'angaa mbojeroviaa kuery rova re, e'ỹ vy ipo re ikuaa ukaarã omoĩmbaa va'ekue ma

¹⁰ oy'u 'rã vinho Nhanderuetete poxya regua. Ha'e nunga ma omoirũ e'ỹ re oguereko katu va'ekue. Karo ipoxya oĩa gui ae 'rã ha'e kuery oy'u. Ha'e rami vy tata enxofre revegua py ikuai axy 'rã anjo iky'a e'ỹ va'e kuery ha'e Vexa'i ra'y renonde.

¹¹ Ha'e kuery ikuai axya gui hataxi ojeupi 'rã araka'e rã peve guarã. Vixo vaikue ha'e ha'angaa mbojeroviaa kuery re hery omoĩa va'ekue ma ara py ha'e pyávy opytu'u e'ỹ re ikuai axy riae 'rã — he'i.

¹² Ha'e rami oiko rã iky'a e'ỹ va'e kuery toexa uka oĩ atãa. Ha'e kuery ma Nhanderuetete ayvu ha'e Jesus re ojeroviaa rupi ikuai va'e.

Irundya ayvu oenduague

¹³ Ha'e ramo yva gui aendu peteĩ ayvu:

— Embopara ke: Ovy'a ete 'rã okuapy aỹ guive Senhor re omano va'e kuery — he'i va'e.

Ha'e ramo Nhe'ẽ ombovai:

— Anhetẽ, mba'eta ha'e kuery opytu'u 'rã omba'epoague gui. Heko porãague repy ojekuaa avi 'rã ha'e kuery reve — he'i.

Mba'emo aju omono'õa rã oexaague

¹⁴ Ha'e gui ama'ẽ vy aexa peteĩ arai xii va'e. Ha'e va'e áry ma peteĩ oguapy oiny, ava ra'y ojeapo va'ekue rami ojekuaa va'e. Ha'e va'e akã re ma coroa ouro guigua oĩ, ha'e opo py ma foice'i haimbe va'e oguereko.*

¹⁵ Ha'e gui ma Nhanderuetete ro iky'a e'ỹ va'e gui oẽ ouvy anjo mboae. Ha'e va'e ma ojaxukai reve aipoe'i arai áry oguapy oiny va'e pe:

— Mba'ety yvy regua ijajupa ma. Eraa ke nde-foice'i ha'e emono'õ, mba'eta remono'õ aguaõ hora ovaẽ ma. — he'i.

¹⁶ Ha'e ramo arai áry oguapy oiny va'e yvy áry rupi foice'i py ijaju va'e ojaya vy omono'õmba yvy gui.*

Uva omono'õa rã oexaague

¹⁷ Ha'e gui yva re Nhanderuetete ro iky'a e'ỹ va'e oĩ va'e gui oẽ ouvy anjo mboae. Ha'e va'e voi foice'i haimbe va'e oguereko opo py.

¹⁸ Ha'e gui altar yvýry gui peteĩ oẽ anjo mboae ju, tata re opena va'ety. Ha'e va'e ma foice'i haimbe va'e revegua pe ijayvu atã vy aipoe'i:

— Eraa ke nde-foice'i haimbe va'e, ha'e emono'õ uva yvy regua hembypy gui, mba'eta uva ijajupa ma — he'i.

¹⁹ Ha'e ramo yvy áry rupi anjo foice'i omboaxa vy yvy re uva rembypy ikuai va'e gui ojaya hi'a. Ha'e rami vy uva'a ma peteĩ onhami atyrã tuvixa va'e oĩ va'e py omombopa, Nhanderuetete opoxya rupi nhombopaga aguaõ.*

²⁰ Ha'e ramo uva onhamia tetã gui mombyry'i. Ha'e ramo onhamiaty gui onheẽ tuguy. Kavaju juruxã peve tyguaxu, ha'e trezentos quilometro-a rupi peve oxyry.

15

Sete nhomoingo axyarã omboua ta ramo oexaague

¹ Ha'e gui aexa rã yva re ojekuaa hexa pyrã tuvixa va'e mboae, nhomondyipaarã. Mba'eta sete anjo ikuai, sete nhomoingo axyarã rerua. Ha'e va'e e'ỹ va'e nhomoingo axya ma opa vygua, mba'eta ha'e nunga py opa 'rã Nhanderuetete opoxya rupi joeruekoa.

Moisés ha'e Vexa'i ra'y poraei okuapy rã oenduague

² Ha'e gui peteĩ yupa aexa vidro guigua rami ojekuaa va'e, tata re irũ va'e. Ha'e va'e áry ma mba'emo vai re ipo'aka va'ekue ikuai: vixo vaikue re, ha'angaa, ha'e hery regua número omoĩa 'rã va'ekue re. Ha'e va'e kuery ma Nhanderuetete pegua mba'epu ixã reta va'e oupi reve

³ oporaei okuapy Nhanderuetete rembiguai Moisés ha'e Vexa'i ra'y poraei. Ha'e rami vy aipoe'i:

* 14:14 Daniel 7.13 * 14:16 Mateus 13.37-43 * 14:19 Apocalipse 19.15

— Senhor Oeruetete Ndepo'akapa va'e, mba'emo rejapo va'e ma tuvixa ha'e iporã va'e meme. Reikoa ha'e javi rupi ndereko porã anhetê rupigua meme rexa uka. Yvy regua kuery Ruvixave reiko!

⁴ Senhor, mava'e tu nderery oendu vy nanemboetei 'rã ojererokyjea rupi? Mba'eta ndee anho iky'a e'y va'e reiko. Ha'e nunga rupi vyvy regua kuery ha'e javi 'rã nerenonde ou nemboete agua, ndereko porã ojekuaa ma rire — he'i okuapy.

Nhanderuetete nhomoingo axyarã ombou rã oexaague

⁵ Ha'e va'e rire ama'ẽ jevy rã yva re ombojeroviaaty iky'a e'y va'e ojepe'a, ha'e Nhanderuetete ayvu ryru opy oĩa gui ojekuaa.

⁶ Ha'e gui iky'a e'y va'e ropy gui sete anjo kuery oẽ ovvy sete nhomoingo axyarã rerua. Ha'e va'e kuery ma ajukue porãve xii rei hexakã va'e py onhemonde, ajukue ra'ykue ouro guigua opepo rupi ojokua reve.

⁷ Ha'e ramo sete anjo ikuai va'e po py irundy temimoingo kuery va'e regua peteĩ omboaxa sete hy'a'i ouro guigua. Ha'e va'e ma tynyẽ Nhanderuetete raka'e rã peve oiko va'erã poxya.

⁸ Ha'e gui iky'a e'y va'e ropy rupi tynyẽ Nhanderuetete rexakã ha'e ipo'akaa guigua hataxi. Ha'e ramo avave rei nda'evei ranhe oike agua, sete nhomoingo axyarã sete anjo ogueroko va'e oiko e'ya ja.

16

Jypygua nhomoingo axyarã ombou rã oexaague

¹ Ha'e gui peteĩ ayvu aendu oo iky'a e'y va'e gui onhendu atã va'e. Ha'e rami vy sete anjo ikuai va'e pe aipoe'i:

— Tapeo, sete hy'a'i pereko va'e gui penhoẽ vyvy re Nhanderuetete poxya rexa ukaarã — he'i.

² Ha'e ramo anjo jypygua oẽ ovvy vy hy'a'i py oĩ va'e onhoẽ vyvy re. Ha'e va'e gui ma oiko ai vaikue. Ha'e ramo vixo vaikue guigua kuaa ukaarã avakue omoĩa ha'e ha'angaa ombojerovia va'ekue re oiko imoingo axyarã.

Mokoĩa nhomoingo axyarã ombou rã oexaague

³ Ha'e gui anjo mokoĩa va'e ma ye'ẽ áry ju onhoẽ hy'a'i gui. Ha'e va'e gui ma omano va'ekue ruguy rami vy oiko. Ha'e ramo ye'ẽ rupi temimoingo ikuai va'e omanomba.

Mboapya nhomoingo axyarã ombou rã oexaague

⁴ Ha'e gui anjo mboapya va'e ma yakã ha'e yvu ikuai va'e áry ju onhoẽ hy'a'i gui. Ha'e va'e gui ma tuguy ojeapo.

⁵ Ha'e ramo aendu vyvy re anjo opena va'e aipoe'i rã:

— Ndee ma heko porã va'e, a'y reiko ha'e yma guive reiko va'ekue, Ndeky'a e'y ete va'e, mba'eta ha'e nunga py ma ha'avea rami renhombopaga.

⁶ Ha'e kuery ma iky'a e'y va'e ha'e profeta kuery ruguy omoẽ uka rire ha'e kuery pe ju reme'ẽ tuguy oy'u agua. Ha'e nunga py ha'avea rami rembopaga — he'i.

⁷ Ha'e gui aendu avi altar gui ombovai va'e:

— Anhetê, Senhor Oeruetete Ndepo'akapa va'e. Anhetê va'e ha'e ha'avea rami meme renhombopaga — he'i.

Irundya nhomoingo axyarã ombou rã oexaague

⁸ Ha'e gui irundya anjo ma kuaray re ju onhoẽ hy'a'i gui. Ha'e va'e gui ma kuaray oapy avakue tata py.

⁹ Ha'e ramo kuaray aku gui okaipa vy ijayvu vaikue okuapy Nhanderuetete rery re, imoingo axyarã ombou agua re ipo'aka va'e ramo. Ha'e rami teĩ ndojeko rerovai guive omboete agua.

Peteĩ nhiruĩa nhomoingo axyarã ombou rã oexaague

¹⁰ Ha'e gui anjo peteĩ nhiruĩa va'e ma vixo vaikue renda openaaty re ju onhoẽ hy'a'i gui. Ha'e va'e gui ma vixo openaa ha'e javi rupi pytũmba. Ha'e rã avakue haxy va'e oendu vy oixu'upa oapekũ,

¹¹ ai vaikue gui ojexavai vy ijayvu vai okuapy Nhanderuetete yva pygua re. Ha'e rami teĩ opa marã rei ikuiaa gui ma ndojeko rerovai guive.

Mboapy memea nhomoingo axyarã ombou rã oexaague

¹² Ha'e gui anjo mboapy memea va'e ma Eufrates yakã guaxu áry ju onhoẽ hy'a'i gui. Ha'e va'e gui ma vy ipirupa peteĩ tape oĩ agua, kuaray oua katy gui huvixave kuery ou agua.

¹³ Ha'e ramo ama'ẽ rã teju-jagua, vixo vaikue ha'e profeta ramigua juru gui ma mboapy nhe'ẽ vai oẽ ju'i rami ojekuaa va'e.

¹⁴ Ha'e va'e nhe'ẽ ma anha kuery meme, hexa pyrã apoarã ikuai. Ha'e kuery oje'oi 'rã vyvy jave re huvixa kuery ikuai va'ea rupi omono'õmba heruvy agua, Nhanderuetete Ipo'akapa va'e re opu'ã rei okuapy agua, mba'eta hi'ára tuvixave va'e ova'ẽ rã.

¹⁵ (— Ma'ẽ, xee ma imonda va'e rami 'rã aju xapy'a. Ovy'a ete 'rã xerarõ vy oao py onhemonde riaa va'e, ipire reia rupi oiko e'y agua, oexa pavẽ rã oximba e'y agua — he'i.)

¹⁶ Ha'e gui anha kuery nhe'ẽ ma peteĩ henda py omono'õmba huvixa kuery, hebraico ayvu py Armagedom 'epy va'ea py.

Sete-a nhomoingo axyarã ju ombou rã oexaague

¹⁷ Ha'e gui anjo sete-a va'e ma yvate rupi onhoẽ hy'a'i gui. Ha'e va'e jave py ayvu atã onhendu oo iky'a e'y va'e py, tenda openaaty oĩ va'e vyvy'iry gui. Ha'e vy

— Ojeupitypa ma — he'i.

¹⁸ Ha'e gui oiko overa, ayvu ha'e yapu. Oiko avi vvy ryryi atã tuvixa va'e. Ha'e va'e ramigua vvy ryryi ma vvy re ikuaia ypy'i guive ndoikoi teri va'ekue.

¹⁹ Ha'e va'e gui ma tetã guaxu mboapy henda rupi oja'o. Ho'apa avi kova'e vvy re tetã ikuai va'e. Mba'eta Babilônia tetã guaxu re Nhanderuete oikuaa pota vy omboy'u vinho ipoxya oia karo gui.

²⁰ Ha'e ramo ypa'ũ ha'e javi okanhymba, vvyty ikuai va'e voi ndojouavei.

²¹ Ha'e gui avakue áry ho'a yva gui amandau tuvixa va'e, trinta quilo raxa va'e meme. Ha'e ramo amandau gui ojexavai vy ijayvu vai okuapy Nhanderuete re, imoingo axyarã ombou va'ekue tuvixa ramo.

17

Kunha itavy rei ete va'e oexaague

¹ Ha'e gui anjo kuery sete hy'a'i oguereko va'e regua peteĩ ou. Ha'e va'e ma ijayvu vvy aipoe'i xevy:

— Enhemboja ke ejuvy, aexa uka ta kunha itavy rei ete va'e ombopagaa rã. Ha'e va'e ma yy heta va'e áry oguapy oiny va'e.

² Hexeve huvixave vvy re ikuai va'e itavy rei va'ekue. Kunha va'e itavy reia vinho ma vvy regua kuery oy'u vy oka'upa va'ekue — he'i.

³ Ha'e gui nhe'ẽ re aiko reve anjo xereraa peteĩ henda tekoa e'ỹa py. Ha'e py ma kunha va'e aexa peteĩ vixo pytã va'e kupe áry oguapy oiny rã. Ha'e va'e vixo re ma tery nda'evei ete va'e oimba. Sete inhakã ha'e dez hakua va'e hi'aĩ.

⁴ Kunha va'e ma púrpura ha'e pytã va'e py onhemonde va'e. Ouro guigua py ojegua, ita hepyve va'e ha'e pérola guigua py. Opo py oguereko peteĩ karo ouro guigua. Ha'e va'e ma ojegarupy anho tynyẽ, itavy reia rupi onhemongy'apaague.

⁵ Kunha va'e rova re ma peteĩ tery oĩ oikuaa pyrã e'ỹ: “*Babilônia tetã guaxu, itavy rei va'e kuery xy, ha'e vvy re ojegarupy omoingo va'ety*” he'ia.

⁶ Aexa rã kunha va'e ma Jesus regua mombe'ua kuery iky'a e'ỹ va'e ruguy oy'u vy oka'u va'ekue. Ha'e nunga aexa vy anhemondyi vaipa.

⁷ Ha'e ramo anjo aipoe'i xevy:

— Mba'e re tu renhemondyi ri? Amombe'u porãve ta kunha va'e reko reikuaa e'ỹ va'ekue, ha'e vixo sete inhakã ha'e dez hakua va'e kunha reraa reko guive.

⁸ Vixo rexa va'e ma yma oiko va'ekue ri aỹ noivei, ha'e gui vvykua gui oẽ aguã rami ju oiko, ha'e okanhy aguã rami guive. Ha'e rã vvy regua kuery vvy itui ypy'i guive kuaxia tekove oguereko va'e kuery rery oia re hery nomboparaaia va'e, ha'e kuery oexa 'rã vixo oiko va'ekue ri noivei va'e ojekuaa ju rã. Ha'e gui vixo oiko va'ekue ri noivei va'e ojekuaa ju rã rã vvy regua kuery oexa 'rã okuapy, vvy itui ypy'i guive kuaxia tekove oguereko va'e kuery rery oia re hery nomboparaaia va'e kuery ae. Ha'e kuery oexa vy onhemondyiipa 'rã okuapy.

⁹ — Ha'e nunga ma hi'arandu va'e kuery oikuaa aguã: Vixo akã sete ikuai va'e ma sete vvyty. Ha'e va'e vvyty áry ae kunha va'e oguapy oiny. Sete huvixave guive ikuai.

¹⁰ Ha'e kuery va'e regua peteĩ nhiruí ma noivei ma. Peteĩ ju aỹ oikove, ha'e rã amboae ma ndoikoi teri. Ha'e va'e ma ojekuaa vy are'ỹ'i re 'rã oiko, henonderã omoĩ ma voiaque rami vy.

¹¹ Ha'e gui vixo yma oiko va'ekue ri aỹ noivei va'e ae 'rã oiko huvixave oito-a va'erã. Sete ikuai va'e gui 'rã oiko. Ha'e rami avi okanhy aguã rami oiko.

¹² Ha'e gui dez hakua rexa va'e ma dez huvixave ikuai. Ha'e va'e kuery ma nombopo'akaai teri. Vixo reve vy mae ma 'rã ipo'aka huvixa ikuai aguã. Peteĩ hora ete'i 'rã oĩ.*

¹³ Ha'e va'e kuery ma peteĩ rami meme 'rã onhembopy'a. Ha'e rami vy vixo pe omboaxa 'rã opo'akaa joguereko aguã.

¹⁴ Ha'e kuery opu'ã 'rã okuapy Vexa'i ra'y re. Ha'e rami teĩ ha'e kuery re Vexa'i ra'y ipo'aka 'rã, mba'eta senhor ikuai va'e Senhor, ha'e huvixave ikuai va'e Ruvixave. Hexevegua kuery ipo'aka avi 'rã, hexe anho ojerovia va'e, oiporavo ha'e oenoĩ va'ekue ikuai vy — he'i.

¹⁵ Ha'e gui aipoe'ive ju xevy:

— Kunha itavy rei va'e oguapy oinya yy ma joegua e'ỹ-e'ỹ va'e, heta va'e kuery, amboae vvy regua, ha'e amboae rami ijayvu va'e kuery.

¹⁶ Ha'e gui vixo ha'e dez hakua rexa va'ekue ma nda'ija'ei 'rã okuapy kunha itavy rei va'e re. Ha'e rami vy oipe'apa 'rã heravy mba'emo oguereko va'ekue. Ho'upa 'rã ho'okue, ha'e gui oapypa 'rã guive tata py.

¹⁷ Mba'eta ha'e kuery py'a re Nhanderuete ae 'rã omoĩ ha'e oipota va'e ojapo aguã. Ha'e ramo peteĩ rami meme 'rã vixo pe omboaxa ipo'aka aguã, Nhanderuete ijayvuague ojeupitypa peve.

¹⁸ Kunha rexa va'ekue ma tetã guaxu vvy regua huvixave kuery re ipo'aka va'e.

18

“Babilônia tetã oitya ma” 'ea rã oenduague

¹ Ha'e va'e rire ma ama'ẽ rã yva gui ogeuejy amboae anjo ipo'aka ete va'e. Ha'e va'e rexakãa ma vvy jave re oexape.

² Ha'e gui ojapukai vy aipoe'i:

* 17:12 Daniel 7.24

— Oitya, oitypaa ma Babilônia tetã guaxu. Anha kuery ikuai atyrã rive opyta, opa marãgua nhe'ê vai kuarã, ha'e guyra ojeguarupy ha'eve'y va'e onhemi atyrã.

³ Mba'eta Babilônia pygua kuery itavy reia re imbopagaarã vinho ma yvy regua kuery ha'e javi oy'u. Hexeve yvy regua huvixave kuery itavy rei avi va'ekue. Yvy regua mba'emo vendea kuery voi ojoupa va'ekue Babilônia pygua kuery itavy reia gui.

⁴ Ha'e gui amboae ayvu ju aendu yva gui aipoe'i va'e:

— Xevyguia kuery, pejepe'a ke ha'e kuery mbyte gui, ha'e kuery ojevavya rupi pendekuai e'y aguã, ha'e kuery moingo axyarã pendere voi oiko e'y aguã — he'i.

⁵ Mba'eta ha'e kuery ojevavya ma yva re peve ojekuaa. Ha'e ramo Nhanderuetete oikuaa pota ae ma teko vai rupi ikuai re.

⁶ Tomoingo axya ete ha'e kuery nhomoingo axyague rekovia, tombopaga raxaave guive ojopague re. Karo py ha'e kuery nhomonga'u aguã omoirüague py ae ju tomoirüave ete ha'e kuery oy'u aguã.

⁷ Ha'e kuery ojejou porã ha'e itavy reiaque re tomoekoviaa ojexavai ha'e ojae'o aguã rami, mba'eta ojeupe ae “Xee ma huvixa kunha rami aguapy ainy. Imeve'y va'e xee ndaikoi. Neĩ peteĩ henda py naendui 'rã xembojae'oarã” he'i rire.

⁸ Ha'e nunga rupi peteĩ ára pyve 'rã ou imoingo axyarã. Oiko 'rã ijukaarã, imbojae'oarã ha'e karuai. Ha'e gui okaipa 'rã tata py, mba'eta Senhor Nhanderuetete imbopagaarã oiko va'e ma ipo'aka.

Babilônia tetã oguerovya va'ekue ipy'a vai rã oexaague

⁹ Ha'e gui yvy regua huvixave kuery oexa 'rã okuapy Babilônia tetã okai rã hataxí ojeupi va'e. Ha'e rami vy ojae'o ha'e ipy'a vai 'rã, ha'e kuery reve itavy rei ha'e opa marã ovy'a rire.

¹⁰ Ha'e va'e kuery ma imbojexavaia gui okyje vy tetã gui mombyry ikuai gui 'rã oma'ê okuapy. Ha'e vy aipoe'i 'rã:

— Nda'evei, nda'evei ete teĩ. Ndee tetã guaxu Babilônia, tetã ipo'akapa reiko va'ekue ri peteĩ hora pyve oiko nembopagaarã — he'i 'rã okuapy.

¹¹ Yvy regua mba'emo vendea kuery voi ha'e nunga oexa vy ojae'o ha'e ipy'a vai 'rã okuapy, mba'eta avave rei ndojoguaavei ma 'rã ovende va'erã ogueroko va'ekue.

¹² Ovende va'erã ogueroko va'ekue ma pova'e: ouro guigua, prata, ita hepyve va'e, pérola, ha'e ajukue iporãve va'e guigua, púrpura, seda ha'e pytã va'e guigua, opa mba'e marfim gui ojapo pyre, opa marãgua tenda, mesa, ha'e nunga ha'e javi yvyra hepyve va'e gui ojapo pyre, overa va'e, ferro ha'e mármore guigua,

¹³ canela heakuã porã va'e, mba'emo irürã, heakuã porã va'e oapy pyrã, moã jaikyty va'e nunga, bálsamo, vinho, azeite, trigo, trigo ra'yigue, vaka, vexa'i, kavaju, karóxa ha'e escravo kuery, avakue oikove va'e ae.

¹⁴ Yvyra'a ijaju nhavõ ho'uxe vai va'ekue ma jipovei ma 'rã ndea py. Ndevy pe jipovei ma 'rã mba'emo hepyve va'e, ojou porãmy ikuai va'e, ha'e nunga ndojouavei ma 'rã ndea py.

¹⁵ Ha'e nunga vendea kuery omboekoviaa rupi ojoupa va'ekue ma mombyry gui 'rã oma'ê okuapy, nembojexavaia gui okyje vy. Ojae'o reve ipy'a vai vy

¹⁶ aipoe'i 'rã okuapy:

— Nda'evei, nda'evei ete teĩ tetã guaxu pe. Mba'eta ajukue iporãve va'e py anho ha'e kuery onhemonde va'ekue, púrpura ha'e pytã va'e py. Ijegua va'ekue ouro, ita hepyve va'e ha'e pérola guigua py.

¹⁷ Ha'e rami teĩ peteĩ hora pyve oguerokopa va'ekue okanhymba — he'i 'rã okuapy.

Ha'e gui kanoã ja kuery yy rupi uguata va'e, kanoã mboguataa kuery, ha'e ye'ê rupi omba'eapo va'e kuery ha'e javi ma mombyry gui avi 'rã oma'ê okuapy.

¹⁸ Ha'e rami vy tetã okai rã hataxí ojeupi va'e oexa vy ojapukai 'rã:

— Mba'e nunga tetã tu peva'e tetã guaxu iporãague rami iporã va'e? — he'i 'rã okuapy.

¹⁹ Ha'e kuery oakã re yvy ku'i omombo-mombo reve ojae'o ha'e ipy'a vai 'rã. Ha'e vy ojapukai 'rã:

— Nda'evei, nda'evei ete teĩ tetã guaxu pe. Ha'e py ma ye'ê rupigua kanoã ja kuery ha'e javi ojoupa va'ekue oguerokopaa gui. Ha'e rami teĩ peteĩ hora pyve ivaipa — he'i 'rã okuapy.*

²⁰ Ha'e nunga rupi yva pygua kuery, pevy'a ke. Ha'e peẽ kuery iky'a e'y va'e, apóstolo ha'e profeta kuery voi ke pevy'a, mba'eta Nhanderuetete ombopaga ma penemoingo axyare.

“Babilônia ivaipa ae ma” 'ea rã oenduague

²¹ Ha'e gui peteĩ anjo imbaraeteve va'e oupi peteĩ ita mba'emo mongu'ia rami tuvixa va'e. Ha'e rami vy ye'ê mbyte py omombo. Ha'e vy aipoe'i:

— Guĩ rami 'rã oitya Babilônia tetã guaxu. Avave rei ndojouavei 'rã.

²² Ndea py noenduavei 'rã mba'epu ixã reta va'e mbopua, imba'epu va'e, neĩ mimby ha'e mimby guaxu monhe'êa. Ndojekuaavei 'rã mba'emo py omba'eapo va'e rembiapo. Ndea py noenduavei 'rã mba'emo ra'yigue mongu'ia revovo.

²³ Ndea py naexakãvei ma 'rã tataendy, omenda ta va'e kuery ayvu voi noenduavei 'rã. Ndevy mba'emo ovende va'e ma yvateve ikuai va'ekue yvy re, mba'eta yvy regua kuery ha'e javi rembotavypa va'ekue nembra'evykya py.

²⁴ Ha'e va'e tetã py ae omõea profeta kuery ruguy, iky'a e'y va'e kuery ha'e yvy re ojukaa va'ekue ha'e javi ruguy.

* 18:19 Ezequiel 27.27-32

19

Yva re ovya'okuapy va'e oexaague

¹ Ha'e nunga oiko rire ma yva re peteĩ ayvu atã aendu heta va'e kuery ijayvua rami. Ha'e vy aipoe'i:

— Aleluia! Jaa jepe aguã, hexakãa ha'e po'akaa ma Nhanderuete guigua meme.

² Anhetê rupi, ha'evea rami meme nhombopaga, mba'eta ombopaga ma kunha itavy rei ete va'ekue. Ha'e va'e ma itavy reia py omongy'apa va'ekue yvy regua kuery, ha'e opo py ae Nhanderuete rembiguai kuery ruguy omoê va'ekue teĩ ombopaga ma ha'e nungakue re — he'i.

³ Aipoe'ive ju:

— Aleluia! Kunha okaia gui hataxi opu'ã 'rã araka'e rã peve — he'i.

⁴ Ha'e ramo vinte e quatro tujakueve joe opena va'ety ha'e irundy temimoingo kuery ma guenapy'ã re ikuai vy omboete avi okuapy Nhanderuete tenda py oguapy oiny va'e. Ha'e vy

— Anhetê ete. Aleluia! — he'i okuapy.

⁵ Ha'e gui peteĩ ayvu onhendu tenda oia gui:

— Nhanderuete rembiguai pendekuai va'e, pembojerovia ke, henonde pejererokyjea rupi pendekuai va'e ha'e javi, yvygieve ha'e yvatekueve — he'i.

⁶ Peteĩ ayvu aendu avi heta va'e kuery ijayvua rami, yy tuvixa va'e ha'e yapu atã va'e revovo rami. Ha'e vy aipoe'i:

— Aleluia! Mba'eta Senhor Nhanderuete Ipo'akapa va'e ae oĩ Joguerekoarã.

⁷ Javy'a ke, japoraẽ ha'e ixupe “Hexakãmba va'e” ja'e, mba'eta ovaẽ ma Vexa'i ra'y omenda aguã ára. Ta'yxyrã onhemoatyromba ma guive,

⁸ mba'eta ha'e va'e onhemonde aguã ma ajukue iporãve, hexakã ha'e iky'a e'ỹ va'e ome'ëa — he'i okuapy. Mba'eta ajukue iporãve va'e ma iky'a e'ỹ va'e kuery teko porã rupi ikuaiã.

⁹ Ha'e ramo anjo aipoe'i xeivy:

— Embopara ke po rami: “Ovy'a ete 'rã okuapy Vexa'i ra'y omenda aguã ngaru py oenoĩ mbyre kuery.”*
Aipoe'ive ju:

— Pova'e nunga ma Nhanderuete ayvu anhetê va'e — he'i.

¹⁰ Ha'e ramo ipy yvy'iry xerenapy'ã re aĩ amboete aguã. Ha'e rami teĩ aipoe'i xeivy:

— Ma'ẽ, ejapo eme evoko rami. Xee voi ndee rami tembiguai aiko, nde-irmão kuery Jesus regua omombe'ua rupi ikuai va'e rami. Nhanderuete anho tema emboete. Mba'eta profeta kuery pe Nhe'ẽ oikuaa uka va'e ma Jesus regua ae.

Vixo vaikue ha'e profeta ramigua re Cristo ipo'aka rã oexaague

¹¹ Ha'e gui ama'ẽ rã yva ojepe'a, ha'e oẽ ouvy peteĩ kavaju xii. Hi'árygua pe ma “Ojeroviapy ha'e Anhetê va'e”'ea. Ha'e va'e ma ha'evea rami joguereko, ha'e teko porã rupi opu'ã 'rã joe.

¹² Hexa ma tata rami hendy. Inhakã re ma coroa heta oĩ. Hexe ipara oiny peteĩ tery avave rei ndoikuaa va'e, ha'e anho e'ỹ vy.

¹³ Ijao ma tuguy py omopytã mbyre. Hery oenoĩa ma Nhanderuete ayvu.

¹⁴ Hakykue jogueru yva pygua xondaro kuery. Ha'e va'e kuery voi kavaju xii va'e áry ikuai, ha'e ajukue xii rei iky'a e'ỹ va'e py onhemonde va'e.

¹⁵ Herekoa juru gui ma peteĩ kyxe guaxu haimbe va'e oẽ, ha'e va'e py yvy regua kuery omoingo axy aguã. Ha'e rami vy omo'arandu 'rã po pygua ferro guigua py, ha'e onhami 'rã uva Nhanderuete Ipo'akapa va'e poxya rupi.*

¹⁶ Ijao puku re, ha'e hetyma re ma peteĩ tery ipara oiny: “Huvixave ikuai va'e Ruvixave, ha'e senhor ikuai va'e Senhor” he'ia va'e.*

¹⁷ Ha'e gui peteĩ anjo aexa kuaray áry opu'ã ho'amy va'e. Ha'e va'e ma ojapukai atã reve ijayvu yva mbyte rupi guyra oveve va'e ha'e javi pe. Ha'e vy aipoe'i:

— Peju ke, pendeaty Nhanderuete ngaru tuvixa va'e ojapoa py,

¹⁸ pe'u aguã huvixave ro'okue, xondaro ruvixa, ipo'akakueve, kavaju ha'e hi'árygua kuery ro'okue, opa marãgua ro'okue, escravo ha'e escravo e'ỹ, yvygieve ha'e yvatekueve ro'okue guive — he'i.

¹⁹ Ha'e gui ma aexa rã vixo vaikue ha'e yvy regua huvixave kuery ono'õ okuapy, ha'e kuery pegua xondaro kuery reve. Ha'e va'e kuery ma kavaju áry oĩ va'e rovai opu'ã aguã ono'õ okuapy, ixupegua kuery rovai guive.

²⁰ Ha'e rami teĩ vixo ombotyã nhuã py, profeta ramigua guive. Ha'e va'e ma vixo renonde hexa pyrã ojapo vy ombotavy va'ekue vixo ra'angaa mbojerovia kuery ixuguigua kuaa ukaarã omoĩa va'ekue. Ha'e kuery mokoive ma oikove reve omomboã yupa tata guigua, enxofre okaia py.

²¹ Ha'e rã amboae kuery ma kavaju árygua ojukapa ijuru gui kyxe guaxu oẽ va'e py. Ha'e ramo ho'okue re ma guyra kuery oveve va'e hev yatãmba.*

20

Mil ma'etỹ re anha ombotyã, ha'e onhemboete ju va'e kuery oexaague

¹ Ha'e gui peteĩ anjo aexa yva gui ogejy ouvy va'e. Opo py ogueru yvykuaa rokẽ pe'aa, ha'e peteĩ corrente tuvixa va'e guive.

* 19:9 Mateus 22.1-14

* 19:15 Salmo 2.9

* 19:16 Mateus 24.30; 2 Tessalonicenses 1.6-10

* 19:21 Ezequiel 39.17-20

² Ha'e gui ojopy teju-jagua, mboi yma guive oiko va'ekue. Ha'e va'e ma anha Satanás. Ha'e rami vy mil ma'etý peve ojokua.

³ Yvykua py omombo vy omboty imoiny. Okê re omoí imbojaarã, mil ma'etý ojeupity e'ýa ja ombotavy ve'ý agua vvy regua kuery. Ha'e va'e rire ma henonderã omoí ma voiague rami vy opoia 'rã xapy'a'i.

⁴ Aexa avi huvixa kuery pegua tenda ikuai va'e. Ha'e va'e py ma ombopo'aka pyre kuery oguapy okuapy jogueroko agua. Aexa avi Nhanderuete ayvu Jesus regua omombe'uague re ojyryvi kyxí mbyre kuery nhe'ê. Ha'e va'e kuery ma víxo vaikue ha'e ha'angaa nombojerovia va'ekue, neí ixuguigua kuaa ukaarã nomoí ukai va'ekue ngova re, neí opo re. Ha'e kuery oikove ju, ha'e Cristo reve ipo'aka okuapy mil ma'etý re.

⁵ Ha'e va'e ma nhemboete jevya jypygua. Ha'e rã omano va'ekue mboae ma ndoikove jevyi 'rã mil ma'etý ojeupity e'ýa ja.

⁶ Ovy'a ete, ha'e iky'a e'ý va'e 'rã ikuai jypygua nhemboete jevya py onhemboete ju va'e kuery. Ha'e va'e kuery re ma omano jevy agua nda'ipo'akai 'rã. Ha'e rami 'rãgue py Nhanderuete ha'e Cristo pegua sacerdote 'rã ikuai. Hexeve huvixa rami 'rã opena okuapy mil ma'etý re.*

Anha opoia ma rire ombopagaa rã oexaague

⁷ Ha'e gui mil ma'etý ojeupity ma ramo Satanás opoia 'rã nhuã py ombotyague gui.

⁸ Ha'e ramo oê vy ombotavypa 'rã vvy regua kuery vvy apy irundyve ikuaia rupi, Gogue ha'e Magogue 'epy va'e. Ha'e kuery ha'e javi 'rã omboatypa joe opu'ã agua. Ye'ê rembe re ita ku'i ikuai va'e rami 'rã heta.

⁹ Ha'e ramo ha'e kuery ma vvy jave rupi gui uguata jogueruvy vy ojokopa 'rã iky'a e'ý va'e kuery rekoa, tetã Nhanderuete oayvu ete va'e. Ha'e rami teí yva gui tata oguejy vy omokanhymba 'rã.*

¹⁰ Ha'e gui anha imbotavzare omombo 'rã yupa tata guigua enxofre okaia py. Ha'e py ma oí avi víxo vaikue ha'e profeta ramigua rive. Ha'e kuery ma ara py ha'e pyávy ojexavai 'rã araka'e rã peve.

Senhor oikuaa pota rã oexaague

¹¹ Ha'e gui ma aexa peteí tenda guaxu openaaty xií rei va'e, ha'e hi'áry oguapy oiny va'e guive. Ha'e va'e renonde gui ma vvy ha'e yva regua okanhymba, ndojouavei oí agua.

¹² Aexa avi omano va'ekue, yvatekueve ha'e vvyýgueve guive. Ha'e kuery ma tenda renonde ojexa uka vy opu'ãmba okuapy. Ha'e ramo oipe'aa kuaxia para ikuai va'e, ha'e amboae kuaxia avi oipe'aa, tekove ogueroko va'e kuery rery oía. Ha'e rami vy omano va'ekue re oikuaa potaa 'rã mba'emo ojapoague re, kuaxia ikuai va'e re ipara oía rami vy.*

¹³ Ye'ê gui ou 'rã omano va'ekue ha'e py ikuai va'ekue. Omanogue retã gui avi 'rã ou. Ha'e ramo peteí-teí re oikuaa potaa 'rã mba'emo ojapoague re.

¹⁴ Ha'e ramo omanogue retã py ikuai va'ekue omombopaa 'rã yupa tata guigua py. Ha'e va'e yupa tata guigua ma omano jevy agua ae oí.

¹⁵ Kuaxia para tekove ogueroko va'e kuery rery oía re amongue rery ndojouai ramo omombo 'rã yupa tata guigua py.

21

Yva pyau ha'e vvy pyau oexaague

¹ Ha'e gui aexa yva pyau ha'e vvy pyau, mba'eta yva ha'e vvy jypy guare ma okanhy ma, ye'ê voi jipovei ma.*

² Aexa avi tetã iky'a e'ý va'e, Jerusalém pyau yva gui oguejy rã, Nhanderuetea guigua. Ha'e va'e ma iporã ete, kunhataí omenda ta vy omerã pe onhemotyrõ va'e rami avi.

³ Ha'e gui peteí ayvu atã aendu tenda oía gui onhendu va'e:

— Ma'ê, aý gui ma Nhanderuete opyta 'rã avakue mbyte. Ha'e kuery reve ae 'rã oí. Ha'e kuery ikuai 'rã ixupegua, ha'e rã Nhanderuete ma oiko 'rã ha'e kuery reve.*

⁴ Ha'e rami vy omombirupa 'rã ha'e kuery rexay. Omano va'e jipovei ma 'rã, neí ipy'a vai va'e voi, haxê va'e, neí haxy va'e voi jipovei 'rã, mba'eta jypy guare oaxapa ma — he'i.*

⁵ Ha'e gui tenda py oguapy oiny va'e aipoe'i:

— Ma'ê, opa mba'e ambopyaupa ma — he'i.

Aipoe'ive ju:

— Embopara ke pova'e ayvu, mba'eta anhetê meme vy ogueroviaa agua ha'ave va'e.

⁶ Aipoe'ive ju xeivy:

— Opa mba'e ojeupitypa ma. Xee ma jypy'igua ha'e opa vygua, mba'emo mboypyare ha'e ijapoparaã. Ijy'uvei va'e pe ma xee ame'ê rive 'rã yvu tekove me'êa gui oy'u agua.

⁷ Ha'e nunga ma mba'emo ogueropo'aka va'e kuery peguarã. Xee aiko 'rã ha'e kuery Ruete. Ha'e rã ha'e kuery ma xera'y ha'e xerajy kuery 'rã ikuai.*

⁸ Ha'e rã okyje rei va'e kuery, ojerovia e'ý va'e, ojou vai pyrã, jojuka va'ety, onhemongy'apa rei va'e, imba'veyky va'e, mba'emo ra'angaa ombojerovia va'e, ha'e ijapu va'e kuery ha'e javi, ha'e kuery rekoarã ma yupa tata guigua enxofre okaia va'e. Ha'e kuery omano jevy agua oí.

* 20:6 1 Coríntios 15.20-25; 2 Timóteo 2.12; Apocalipse 5.9,10

* 20:9 Ezequiel 18.1-39; 16

* 20:12 Daniel 7.10, João 5.25-29

* 21:1

2 Pedro 3.13 * 21:3 Ezequiel 37.27

* 21:4 Isafas 25.8

* 21:7 1 Crônicas 17.13

Jerusalém pyau regua omombe'u porãveague

⁹ Ha'e gui sete anjo kuery hy'a'i sete nhomoingo axyarã tynyê va'e oguereko va'ekue regua petei ou. Ha'e va'e ma aipoe'i xeivy:

— Enhemboja ke ejuvy, taexa uka kunhatai omenda va'erã, Vexa'i ra'y ra'yxyrã — he'i.

¹⁰ Ha'e rami vy nhe'ê re aiko reve xereraa petei vyty tuvixa ha'e yvateve va'e áry. Ha'e vy xeivy pe oexa uka Jerusalém tetã iky'a e'y va'e, yva Nhanderuetea gui oguejy ovvy rã.*

¹¹ Ha'e va'e re ma o'i Nhanderuetea rexakã. Ita hepyve va'e rami hexakã, ita jaspe hendy va'e rami.

¹² Ikora ma tuvixa ha'e yvate ete va'e. Doze okê o'i. Okê rarõarã ma doze anjo ikuai. Okê re ma ipara oiny Israel kuery doze regua ikuai va'e rery.

¹³ Kuaray oua katy mboapy okê o'i, kuaray ijapu'a'ia katy ma mboapy ju, kuaray puku-a katy ma mboapy ju, ha'e gui kuaray oikea katy ma mboapy ju o'i.*

¹⁴ Tetã kora re ma doze ita o'i ijytarã. Ha'e va'e re ma ipara oiny Vexa'i ra'y pegua apóstolo kuery doze ikuai va'e rery.

¹⁵ Xereve ijayvu va'e ma petei vyvra po'i'i ouro guigua oguereko mba'emo oa'aarã, tetã, kora ha'e okê o'i va'e oa'ã aguã.

¹⁶ Tetã ma ipuku-a o'i va'e'y, ipuku-a ha'e ipya joo rami. Yvyra po'i'i py anjo tetã oa'ã rã dois mil e duzentos quilômetros ipuku-a. Ipuku-a, ipya ha'e yvatea ma joo rami meme.

¹⁷ Ha'e gui ikora ju oa'ã rã sessenta e cinco metros. Avakue oa'ã jepiaty rami ae avi anjo oa'ã.

¹⁸ Kora ma ita jaspe gui ojapo pyre. Ha'e rã tetã ma ouro iky'a e'y va'e guigua, vidro iky'a e'y va'e rami hexakã.

¹⁹ Tetã kora ytarã ita ikuai va'e ma ita hepyve va'e opa marãgua py ijegua. Ijyta jypygua ma jaspe guigua. Mokoia ma safira guigua. Mboapy ma calcedônia guigua. Irundya ma esmeralda guigua.

²⁰ Tei nhirua ma sardônio guigua. Mboapy memea ma sárdio guigua. Sete-a ma crisólito guigua. Oito-a ma berilo guigua. Nove-a ma topázio guigua. Dez-a ma crisópraso guigua. Onze-a ma jacinto guigua. Ha'e gui doze-a ma ametista guigua.

²¹ Doze okê o'i va'e ma doze pérola. Petei-tei okêrã ma petei pérola o'i. Tetã mbyte rupi tape guaxu oaxa va'e ma ouro iky'a e'y va'e guigua, vidro rami hexakã.

²² Tetã py xee ndaexai templo, mba'eta templo 'rãgue py Senhor Nhanderuetea Ipo'akapa va'e ha'e Vexa'i ra'y o'i.

²³ Tetã rupi kuaray ne'i jaxy nomoexakã te'i ha'eve, mba'eta Nhanderuetea rexakã ae oexape, ha'e Vexa'i ra'y ma tataendy rami omoexakã.

²⁴ Tetã rexakã rupi ma amboae regua kuery 'rã ikuai. Ha'e py 'rã vyvra regua huvixave kuery ogueru mba'emo porãgueve oguereko va'e.

²⁵ Okê ikuai va'e ma nonhemboty'i 'rã ara py, ha'e rã pytũ ma ndoikoi ha'e py.

²⁶ Ha'e py amboae regua kuery mba'emo porãgueve anho 'rã ogueru imboetearã.

²⁷ Ha'eve'y va'e ma ndoikei 'rã ha'e py, ne'i ojeguarupy, e'y vy apua rupi ikuai va'e. Ha'e pygua kuery ma tekove oguereko va'e vy Vexa'i ra'y pegua kuaxia re hery oia va'e kuery anho.

22

¹ Xeivy pe anjo oexa uka avi yakã tekove me'êa. Ha'e va'e ma itaendy rami hexakã, Nhanderuetea ha'e Vexa'i ra'y renda openaaty oia gui oxyry ovvy va'e.

² Tape guaxu o'i va'e mbyte rupi hi'ai vyvra tekove me'êa, yakã rembe rovaive re guive. Ha'e va'e ma doze hi'a va'e, jaxy nhavõ hi'a mboae va'e. Yvyra rogue ma heta va'e kuery joegua e'y-e'y mongueraarã o'i.*

³ Jipovei ma 'rã ayvu vaipy. Tetã re 'rã o'i Nhanderuetea ha'e Vexa'i ra'y renda openaaty. Ixupegua kuery omboete 'rã okuapy,

⁴ ha'e hova oexa 'rã guive. Ha'e rã ha'e kuery rova re ma o'i 'rã hery.

⁵ Ha'e py pytũ jipovei ma ramo ha'e pygua kuery ikuai rupi tataendy nomoexakã, ne'i kuaray ndojopei te'i ha'eve, mba'eta Senhor Nhanderuetea ae 'rã omoexakã. Ha'e ramo ha'e kuery huvixa rami 'rã opena araka'e rã peve.

Kova'e kuaxia re ayvu o'i va'e anhetê ete memea re ijayvu

⁶ Ha'e gui aipoe'ive ju xeivy:

— Pova'e ayvu ma oguerovia pyrã ha'e anhetê va'e meme. Senhor profeta kuery nhe'ê Ruete va'e ma guembigua kuery ikuai py ombou ojepegua anjo are'y'i re mba'emo oiko va'erã oikuaa uka aguã, tenonderã omo'i ma voiague rami vy.

⁷ Ma'ê, are'y re 'rãaju. Ovy'a ete 'rã okuapy kova'e kuaxia para re ayvu o'i va'e rupi ikuai va'e.

Nhanemongeta ha'e nhandereroayvu porãague

⁸ Ha'e nunga xee João ae aendu ha'e aexa. Ha'e nunga aendu ha'e aexa vy ikuaa uka anjo py yvy'iry ai xerenapy'a re amboete aguã.

⁹ Ha'e ramo aipoe'i xeivy:

— Ma'ê, ejapo eme evoko rami. Xee ma ndee rami avi tembiguai aiko, nde-irmão kuery profeta ha'e kova'e kuaxia re ayvu o'i va'e rupi ikuai va'e ha'e javi ramigua. Nhanderuetea ae 'rã remboete — he'i.

* 21:10 Ezequiel 40.1-2, Hebreus 12.22-24

* 21:13 Ezequiel 48.30-35

* 22:2 Ezequiel 47.1,12

¹⁰ Aipoe'ive ju:

— Eikuaa uka e'y eme kuaxia re ayvu oĩ va'e, mba'eta hi'ára namombyryvei ma.

¹¹ Tove heko vai va'e kuery taeko vaive tema. Tove heko ky'a va'e kuery taeko ky'ave tema. Ha'e rã heko porã va'e ma teko porã rupi anho ta'ikuai, ha'e heko ky'a e'y va'e ta'ikuaive tema teko ky'a e'ya rupi.

¹² Ma'ê, xee aju 'rã are'y re, aru 'rã guive peteĩ-teĩ oikoague repy ame'ê va'erã.

¹³ Xee ma jypy'igua ha'e opa vygua, mba'emo mboypyare ha'e ijapopaarã.

¹⁴ Ovy'a ete 'rã okuapy [Vexa'i ra'y ruguy py] oao ojoi va'e, ha'e rami vy yvyra 'a tekove me'êa va'e ho'u, ha'e tetã rokê rupi oike agua.

¹⁵ Ha'e rã tetã rovai rupi ma jagua rami ikuai va'e 'rã opyta, imba'evyky va'e, onhemongy'apa va'e, jojuka va'ety, mba'emo ra'angaa ombojerovia va'e, ha'e ijapuxe vai va'e apu rupi rive ikuai va'e ha'e javi.

¹⁶ Xee Jesus ma xejeupegua anjo ambou peẽ igreja pygua kuery pe ha'e nunga aikuaa uka agua. Xee ma "Davi rapokue renhoĩ" 'epy va'e, hamymino aiko, ha'e jaxy-tata ko'ê mbija hexakãmba va'e guive — he'i.

¹⁷ Nhe'ê ha'e ta'yxyrã ma

— Eju — he'i ixupe.

Tove oendu va'e voi

— Eju — te'i.

Tove ijy'uvei va'e voi tonhemboja touvy, yy tekove me'êa oy'uxe va'e rei tojopy rive.*

Kuaxia para opaa py ijayvuague

¹⁸ — Po rami kova'e kuaxia para re ayvu oĩ va'e rendua kuery ha'e javive pe xeyvu. Ayvu oĩ va'e áryve amongue omoĩve ri ramo hexe ju 'rã Nhanderuete omoĩ nhomoingo axyarã kova'e kuaxia re ipara oiny va'e.

¹⁹ Ha'e kova'e kuaxia re ayvu oĩ va'e gui amongue mba'emo'i teĩ oipe'a ramo ixugui Nhanderuete oipe'a 'rã yvyra'a ho'u agua, tetã iky'a e'y va'e py oike agua, ha'e kova'e kuaxia re mba'emo porã oĩ va'e ojopy agua.

²⁰ Ha'e nunga kuaa ukaa aipoe'i:

— Anhetê are'y re 'rã aju — he'i.

Amém. Eju, Senhor Jesus.

Ogueroayvu porãague

²¹ Tove peẽ kuery ha'e javive tapendu Senhor Jesus penemboaxya.

* 22:17 Isaias 55.1,2; João 4.13,14; 7.37-39